


Nhanderuete ayvu iky'a e'ŷ va'e



New Testament in Guaraní, Mbyá

Nhanderuete ayvu iky'a e'ŷ va'e
New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-08-06

PDF generated using Haiola and XeLaTeX on 4 Mar 2019 from source files dated 1 Oct 2018

3309fa3b-7590-5ae9-b829-5df4ddfbf957

Contents

Gênesis	1
Êxodo	72
Levítico	130
Números	171
Deuteronômio	232
Josué	283
Juízes	316
Rute	352
1 Samuel	358
2 Samuel	405
1 Reis	445
2 Reis	490
1 Crônicas	535
2 Crônicas	575
Esdras	623
Neemias	637
Ester	657
Jó	668
Salmos	716
Provérbios	843
Eclesiastes	883
Cântico	895
Isaías	904
Jeremias	976
Lamentações	1051
Ezequiel	1062
Daniel	1129
Oséias	1151
Joel	1163
Amós	1168
Obadias	1177
Jonas	1179
Miquéias	1183
Naum	1190
Habacuque	1193
Sofonias	1197
Ageu	1201
Zacarias	1204
Malaquias	1218
Mateus	1223
Marcos	1273
Lucas	1304
João	1357
Atos	1399
Romanos	1448
1 Coríntios	1470
2 Coríntios	1491
Gálatas	1505
Efésios	1513
Filipenses	1521

Colossenses	1527
1 Tessalonicenses	1533
2 Tessalonicenses	1538
1 Timóteo	1541
2 Timóteo	1547
Tito	1552
Filemom	1555
Hebreus	1557
Tiago	1573
1 Pedro	1579
2 Pedro	1585
1 João	1589
2 João	1595
3 João	1596
Judas	1597
Apocalipse	1599

Gênesis jypy'i kuaxia Moisés ombopara va'ekue

Gênesis jypy'i kuaxia Moisés ombopara va'ekue

Tery Génesis ma “Mba'emo ypy” he'ia, “Jypy'i ma Nhanderuete ojapo raka'e yva ha'e yvy”, he'ia rami (1.1). Kova'e kuaxia para re ma omombe'u marã rami pa opa mba'e ijypy'iague: kuaray, jaxy, jaxy-tata, yvy, ye'ẽ, avakue, kunhague, mymba, mba'emo rogue, tekoarã guive.

Ha'e nunga ha'e javi Nhanderuete ojapo jave ha'eve va'e meme raka'e. Ava ov'y'a oikovy yvotyty rupi oikoa py, gua'xyx reve. Ha'e gui ma ha'e kuery nonhe'ẽ rendui ramo Nhanderuete omoxẽ, ha'e omano aguã re ijayvu. Ha'e ramia py oiko ypy raka'e teko vai ha'e mano. Ha'e rami rire nhande kuery jajejavu ha'e nhamano aguã rami meme nhandekuai.

Avakue hetave tema ha'e heko vaive oje'oivy. Ha'e ramo Nhanderuete yy ombou vy ojukapa raka'e. Noé anho Nhanderuete pe ete oiko ramo ogueraa jepe kanoã guaxu py, hoo pygua kuery reve.

Ha'e va'e rire Nhanderuete peteĩ regua oiporavo ha'e kuery pe ojekuaa uka aguã. Ha'e kuery ru ma Abraão raka'e, ha'e gui ta'y Isaque, ha'e gui Isaque ra'y Jacó ju oiporavo. Ha'e va'e kuery peteĩ-teĩ pe Nhanderuete ogueroayvu porã vy ijayvu yvy hekoague hamymino kuery pe ju ome'ẽ aguã re.

Jacó pe ma amboae heryrã ju ome'ẽ: ha'e va'e ma Israel. Jacó ma doze gua'y kuery oguereko. Ha'e kuery gui doze regua ikuai raka'e Israel kuery. Jacó ra'y kuery va'e regua peteĩ ma José. Ha'e va'e re tyke'y kuery nda'ija'eí vy ovende raka'e Egito yvy katy oguata va'e kuery pe. Ha'e gui ma karuai oiko ramo Jacó ra'y kuery ha'e javi oo Egito yvy re, tembi'u ojogua aguã. Ha'e py ma opyta raka'e.

Kova'e kuaxia para ha'e javi rupi Nhanderuete oexa uka nhanemboaxya. Adão ha'e Eva ojejavu rire teĩ Nhanderuete omboaxy vy omonhemonde. “Noé ma Senhor renonde ouipity omboaxy”, he'i (6.8). Ha'e José voi guyke'y kuery pe aipoe'i: “Peẽ kuery ma anhetẽ xevy pejapo vaixe pekuapy karamboae. Ha'e rã Nhanderuete ma ha'e nunga oguerova nhomoingo porã aguã rami. Mba'eta heta ete rekove reraa jepearã xemoingo, aÿ pexa pekuapya rami”, he'i (50.20). Nhanderuete ma nhanemboaxyha'e nhandereraa jepea oiko.

Yva, yvy ha'e opa mba'e ikuai va'e omoingoague

¹ Jypy'i ma Nhanderuete ojapo raka'e yva ha'e yvy.

² Yvy ma nda'itui porãi teri, neĩ mba'eve jipoi. Ijaxuru vaikue va'e áry ma pytû anho rei oiny. Ha'e gui Nhanderuete Nhe'ẽ oiko avi yy áry.

³ Ha'e gui Nhanderuete aipoe'i:

— Toiko hexakãa — he'i. Ha'e ramo hexakãa oiko.*

⁴ Hexakãa Nhanderuete oexa rã ha'eve va'e. Ha'e vy omboja'o hexakãa ha'e pytûa.

⁵ Hexakãa ma Nhanderuete oenoĩ “Ára”. Ha'e rã pytû reia pe ma “Pytû” he'i. Oiko ka'aru ha'e aje'ive. Ha'e va'e ára ma ijypy'a.*

⁶ Ha'e gui Nhanderuete aipoe'i ju:

— Yy oĩ va'e mbyte rupi toĩ yva, yy omboja'o aguã mokoĩ henda rupi — he'i.

⁷ Ha'e rami vy Nhanderuete yva ojapo vy yy yvate oĩ va'e omboja'o iguy rupi oĩ va'e gui. Ha'e rã ha'e rami ojeapo.

⁸ Ha'e va'e ma Nhanderuete oenoĩ “Yva”. Oiko ka'aru ha'e aje'ive. Ha'e va'e ma mokoĩ araa.

⁹ Ha'e gui Nhanderuete aipoe'i avi:

* 1:3 2 Coríntios 4.6 * 1:5 Ha'e kuery pe rã ára nhavõ ka'aru ranhe oiko, ha'e gui aje'ive.

— Yy yva guýry oĩ va'e tono'õ peteĩ henda py, ha'e tojekuaa ipiru reia — he'i. Ha'e rã ha'e rami ojeapo.

¹⁰ Ipiru reia ma Nhanderuete oenoĩ “Yvy”, ha'e rã yy ono'õ va'e pe ma “Ye'ẽ” he'i. Nhanderuete ha'e nunga oexa rã ha'eve va'e.

¹¹ Ha'e gui aipoe'i:

— Toiko nhuũ yvy gui. Toiko jai rogue ha'yĩ va'e ha'e yvyra hi'a va'e. Tai'a ha'yĩ va'e joo ramigua e'ŷ-e'ŷ yvy áry — he'i. Ha'e ramo ha'e rami oiko.

¹² Yvy gui oiko nhuũ, jai rogue ha'yĩ va'e joo ramigua e'ŷ-e'ŷ ha'e yvyra hi'a va'e. Ha'e va'e re oĩ joo rami e'ŷ-e'ŷ ha'yĩ va'e. Ha'e nunga Nhanderuete oexa rã ha'eve va'e.

¹³ Oiko ka'aru ha'e aje'ive. Ha'e va'e ma mboapy araa.

¹⁴ Ha'e gui Nhanderuete aipoe'i avi:

— Toĩ hendy va'e yva re, oikuua uka aguã ára ha'e pytû, ha'e va'e re oikuua aguã mba'emo oa'angaa, ára ha'e ma'etÿa.

¹⁵ Yva re hendy va'e toĩ yvy moexakãarã — he'i. Ha'e ramo ha'e rami oiko.

¹⁶ Nhanderuete ojapo mokoĩ hendy guaxu va'e: tuvixave va'e ma ara py ojekuaa va'erã, ha'e rã kyrïve va'e ma pyávy ojekuaa va'erã. Jaxy-tata avi ojapo.

¹⁷ Ha'e vy yva re omoĩ yvy moexakãarã,

¹⁸ ara py ha'e pyávy ojekuaa ha'e omboja'o aguã hexakã aguã ha'e pytû. Ha'e nunga Nhanderuete oexa rã ha'eve va'e.

¹⁹ Oiko ka'aru ha'e aje'ive. Ha'e va'e ma irundy araa.

²⁰ Ha'e gui Nhanderuete aipoe'i avi:

— Toiko ke opa marãgua temimoingo yy rupi omyĩ va'e, ha'e rã yvy áry rupi ma toveve guyra yva rupi — he'i.

²¹ Ha'e rami vy Nhanderuete omoingo yy rupigua tuvixakueve ha'e opa marãgua otyryry va'e. Ha'e nunga heta ikuai yy rupi, peteĩ-teĩ regua. Omoingo avi guyra peteĩ-teĩ regua. Ha'e nunga Nhanderuete oexa rã ha'eve va'e.

²² Ha'e rami vy ogueroayvu porã vy aipoe'i:

— Pendera'y reta ke, pendereta ke. Ha'e rami vy pemonyẽ ye'ẽ, ha'e rã yvy re ma taeta guyra — he'i.

²³ Oiko ka'aru ha'e aje'ive. Ha'e va'e ma peteĩ nhiruĩ araa.

²⁴ Ha'e gui Nhanderuete aipoe'i avi:

— Toiko ke yvy re opa marãgua temimoingo joo ramigua e'ŷ-e'ŷ. Toiko mymba oka re ikuai va'erã, otyryry va'e ha'e ka'aguy regua joo ramigua e'ŷ-e'ŷ — he'i. Ha'e ramo ha'e rami oiko.

²⁵ Nhanderuete omoingo vixo ka'aguy regua joo ramigua e'ŷ-e'ŷ, mymba oka regua joo ramigua e'ŷ-e'ŷ, ha'e yvy rupi otyryry va'e ha'e javi joo ramigua e'ŷ-e'ŷ. Ha'e nunga Nhanderuete oexa rã ha'eve va'e.

²⁶ Ha'e gui Nhanderuete aipoe'i avi:

— Nhamoingo ava va'e nhande ete ramigua, nhande rami ete oiko va'erã. Topena pira ye'ẽ rupigua re, guyra oveve va'e re, mymba oka regua re, yvy ha'e javi re ha'e yvy rupi otyryry va'e ha'e javi re — he'i.

²⁷ Ha'e rami vy Nhanderuete omoingo ava ojee ramigua. Nhanderuete rami oiko va'erã ae omoingo. Ava ha'e kunha va'e omoingo.*

²⁸ Ha'e vy Nhanderuete ogueroayvu porã. Ha'e vy aipoe'i:

— Pendera'y reta ke, pendereta ke, pemonyẽ yvy, ha'e pendepo'aka yvy re. Pepena ke pira ye'ẽ rupi ikuai va'e re, guyra oveve va'e ha'e yvy áry otyryry va'e ha'e javi re — he'i.

²⁹ Aipoe'ive ju:

— Ma'ẽ, pêvy ame'ẽ jai rogue ha'yĩ va'e yvy re ikuai va'e ha'e yvyra'a ha'yĩ va'e ha'e javi. Ha'e nunga ma pe'u va'erã oiko.

* 1:27 Mateus 19.4, Marcos 10.6

³⁰ Ha'e rã yvy re vixo ikuai va'e pe, guyra oveve va'e, yvy rupi otyryry va'e ha'e ipytue
va'e ha'e javi pe ma jai rogue pyau 'rã ikuai ho'u va'erã — he'i. Ha'e ramo ha'e rami ae
oiko.

³¹ Nhanderuete opa mba'e omoingo va'ekue oexa rã ha'eve ete va'e. Oiko ka'aru ha'e
aje'ive. Ha'e va'e ma mboapy meme araa.

2

¹ Ha'e rami py ojapopa yva ha'e yvy ha'e opa mba'e ikuai va'e.

² Ha'e gui ma Nhanderuete ojapopa ma vy sete-a ára py optytu'u opa mba'e ojapoa gui.*

³ Sete-a ára Nhanderuete ogueroayvu porã iky'a e'ý va'e optyta aguã rami, ha'e va'e ára
opa mba'e ojapoa gui optytu'u vy.

Ava ojapo ypy'iague

⁴ Po rami ma yva ha'e yvy oiko ypy'i jave guare, SENHOR Nhanderuete omoingo rã.

⁵ Ha'e va'e jave ma mba'eve onhotý mbyre jipoi teri yvy re, ha'e peteíve hogue va'e yvy
re ikuai va'e naenhoï teri, mba'eta yvy áry SENHOR Nhanderuete nombo'okyi teri, ha'e
ndoikoi teri avakue yvy re oma'etý va'erã.

⁶ Yvy gui yvyxí rive opu'ã ovvy vy omoaký yvy jave re.

⁷ Ha'e ramo SENHOR Nhanderuete ojapo ava yvy ku'i gui, ha'e inhapyígua py oipeju
ipytuë reve oiko aguã. Ha'e ramo ava hekove va'e oiko.*

⁸ Ha'e gui Éden yvy re SENHOR Nhanderuete onhotý peteí yvyra ty, kuaray oua katy.
Ha'e py ae omoõ ava omoingo va'ekue.

⁹ Yvy gui SENHOR Nhanderuete omoenhoï opa marãgua yvyra jaexa rã iporã va'e ha'e
hi'a ja'u aguã ha'eve va'e. Yvyra ty mbyte py omoõ avi yvyra tekove me'ëa, ha'e yvyra
mba'emo porã ha'e mba'emo vai kuaa ukaarã avi omoõ.

¹⁰ Éden yvy gui ma peteí yakã oẽ yvyra ty moakyarã. Ha'e va'e gui oja'o vy irundy
henda rupi oxyry.

¹¹ Yakã jypyguia ma Pisom hery va'e. Ha'e va'e ma Havilá yvy ouro oña rupi ojere-jere ovv
va'e.

¹² Ha'e va'e yvy re ouro oĩ va'e ma iporã. Ita bdélio ha'e ônix voi oiko ha'e py.*

¹³ Yakã mokoña ma Giom hery va'e. Ha'e va'e ma Cuxé yvy ha'e javi rupi ojere-jere ovv
va'e.

¹⁴ Yakã mboapya ma Tigre hery va'e. Ha'e va'e ma Assíria yvy rovai rupi oxyry ovv kuaray
oua katy rupi. Ha'e gui irundaya ma Eufrates hery va'e.

¹⁵ Ha'e gui SENHOR Nhanderuete ava va'e ogueraa vy Éden regua yvyra ty omoõ
omoatyrô ha'e opena aguã.

¹⁶ Ha'e rami vy ixupe SENHOR Nhanderuete aipoe'i:

— Yvyra ty py yvyra hi'aí va'e ha'e javi'a ha'eve 'rã re'u aguã.

¹⁷ Ha'e rã yvyra mba'emo porã ha'e mba'emo vai kuaa ukaa 'a ma re'u va'erã e'ý, mba'eta
ha'e va'e re'ua ára anhetë remano 'rã.

Kunha omoingoague

¹⁸ Ha'e gui SENHOR Nhanderuete aipoe'ive ju:

— Nda'evei ava va'e ha'e ae'i oiko aguã. Amoingo 'rã ipytyvõarã, hexeve guarã ae —
he'i.

¹⁹ Ha'e rami vy SENHOR Nhanderuete ma mymba yvy regua ha'e guyra yvate rupi oveve
va'e omoingo va'ekue ha'e javi oguerupa ava va'e oña py, marã rami pa omboerya oikuaa
aguã. Temimoingo ikuai va'e peteí-teí ava va'e omboeryague rami ae hery.

²⁰ Ha'e rami py ava omboery mymba kuery ha'e javi, guyra oveve va'e ha'e vixo ka'aguy
regua voi. Ha'e rami teí ava pe jipoi hexeveguia ae ipytyvõarã.

* 2:2 Hebreus 4.4 * 2:7 1 Coríntios 15.45 * 2:12 Bdélio ma mba'emo iju porã va'e, ha'e rã ônix ma ita pytã'i
va'e. Ovare va'e meme.

²¹ Ha'e ramo SENHOR Nhanderuete ojapo ava va'e hopeyi vaipa aguã rami. Ha'e ramo oke ete. Ha'e ramo ixugui peteĩ inharukã SENHOR omboi vy ho'o py ju omboity omboiague.

²² Ava arukã SENHOR Nhanderuete omboi va'ekue guiomboete peteĩ kunha. Ha'e vy ogueru ava pe.

²³ Ha'e ramo ava va'e oexa vy aipoe'i:

— Kova'e ma xekãgue gui ae ikãgue va'e, ha'e xero'o gui ho'o va'e. Kova'e pe "Kunha" 'ea 'rã, ava va'e gui omboia rire — he'i.[†]

²⁴ Ha'e rami rire avakue oeja 'rã nguu ha'e oxy, gua'yxy reve joguereko aguã, mokoõi peteĩ'i to'o oiko aguã.*

²⁵ Ha'e rami jave ma ava va'e ha'e ta'yxy ipire rei va'eri noxí raka'e.

3

Ava ha'e kunha ojejavyague

¹ Ha'e gui mboi avi oiko raka'e. Ha'e va'e ma vixo ka'aguy rupigua SENHOR Nhanderuete omoingo va'ekue ha'e javi gui nhombotavy kuaave va'e. Ha'e rami vy aipoe'i kunha va'e pe:

— Po rami teve Nhanderuete aipoe'i ra'e: "Pe'u eme ha'e javive yvyra ty py ikuai va'e'a" he'i va'ekue?

² Kunha va'e ombovai:

— Yvyra ty py ikuai va'e'a ma ha'eve ro'u aguã.

³ Ha'e rã yvyra ty mbyte py peteĩ yvyra hi'aí va'e'a pe ma Nhanderuete "Pe'u eme, neí pepoko eme, pemano e'ý aguã", he'i va'ekue orevy.

⁴ Ha'e gui mboi aipoe'i kunha va'e pe:

— Anhetẽ napemanoi 'rã,

⁵ mba'eta Nhanderuete oikuua ha'e va'e'a pe'ua ára penderexa ojepe'a 'rãa, ha'e Nhanderuete rami ete 'rã peikuaa mba'emo porã ha'e mba'emo vai — he'i.

⁶ Kunha va'e oikuua rã yvyra'a ho'u aguã ha'eve. Yvyra'a oexa rã iporã, ha'e oikuua avi imo'aranduarã oikoa. Ha'e rami vy hi'a omondo vy ho'u. Ome pe avi ome'ẽ rã ha'e voi ho'u.

⁷ Ha'e ramo mokoïve rexo ojepe'a rã oikuua ipire reia. Ha'e rami vy figo'y rogue ojou vy ombovyvy guambeorã.

⁸ Ha'e gui ka'aru jave yvyra ty rupi SENHOR Nhanderuete oiko rã ava va'e ha'e ta'yxy oendu. Ha'e rami vy SENHOR renonde gui onhemi yvyra ty mbyte.

⁹ Ha'e gui SENHOR oenoĩ ava va'e. Ha'e vy oporandu:

— Mamo tu rei?

¹⁰ Ombovai:

— Aendu ndeayvu yvyra ty py reiko rã. Ha'e rami vy ndevy akyje vy anhemi, mba'eta xepire rei — he'i.

¹¹ Nhanderuete oporandu:

— Mava'e tu oikuua uka ndepire reia? Re'u teve yvyra'a "He'u eme ke" ha'eague?

¹² Ava va'e ombovai:

— Kunha xera'yxyrã reme'ẽ va'ekue rima yvyra'a ome'ẽ xevy. Ha'e ramo mae ma xee ha'u — he'i.

¹³ Ha'e gui kunha va'e pe ju SENHOR aipoe'i:

— Mba'e re tu ha'e rami rejapo?

Kunha va'e ombovai:

— Mboi xembotavy ramo rima xee ha'u — he'i.

¹⁴ Ha'e gui SENHOR Nhanderuete aipoe'i mboi pe:

† 2:23 Ha'e kuery ayvu py tery "Kunha" ma "Ava guigua" nhaendu rã joo ramigua rai'i. * 2:24 Mateus 19.5, Marcos 10.7, 1 Coríntios 6.16, Efésios 5.31

— Guĩ rami rejapo rire mymba oka regua ikuai va'e ha'e vixo ka'aguy regua ha'e javive gui ayvu vai pyve 'rã reiko. Ha'e rami vy retyryry 'rã reikovy nderye re, ha'e reikovea pukukue re yvy ku'i rive 'rã rere.

¹⁵ Ajapo 'rã ndee ha'e kunha va'e reve joe napendea'ei aguã rami, ha'e gui neramymimo kuery ha'e hemiarirõ kuery reve ju. Ha'e va'e omou'ũ 'rã neakã, ha'e rã ndee ma reixu'u 'rã ipyta py — he'i.

¹⁶ Kunha va'e pe ju aipoe'i:

— Xee ajapo 'rã nememby ryru'i vy rejexavai ete aguã rami. Ha'e ramo haxy 'rã rendu nememby reikuavã'i vy. Renhomoirûxe 'rã neme reve. Ha'e rã ha'e ma ipo'aka 'rã ndere — he'i.

¹⁷ Ha'e gui Adão pe aipoe'i:

— Ndee ma ndera'yxy renhe'ẽ rendu vy yvyra'a “He'u eme” ha'eague va'e re'u rire ndekáuxa ae 'rã yvy ayvu vaipy itui. Remba'eapo poyi vy 'rãe rejou yvy gui re'u va'erã, reikovea pukukue re.

¹⁸ Yvy gui henhoi 'rã juu'y ha'e juu vaikue. Nerembi'urã oiko 'rã yvy gui ae.

¹⁹ Ndery'aiague re 'rã re'u reikovy mbojape, yvy ju rejeapo peve, yvy gui ae rojapo rire. Mba'eta yvy ku'i regua reiko vy yvy ku'i ju 'rã rejeapo — he'i.

²⁰ Ava va'e gua'yxy omboery Eva, oikove va'e ha'e javive xy oiko ramo.*

²¹ Adão ha'e ta'yxy aorã ma SENHOR ojapo mymba pire gui. Ha'e rami vy omonhemonde.

²² Ha'e gui SENHOR Nhanderuete aipoe'i:

— Aÿ gui ma nhande rami avakue ikuai, mba'eta oikuua mba'emo porã ha'e mba'emo vai. Ha'e gui nda'evei yvyra tekove me'ëa 'a voi ha'e kuery omondo aguã, mba'eta ho'u vy oiko riae 'rã — he'i.

²³ Ha'e rami vy SENHOR omoxẽ Éden regua yvyra ty gui, yvy gui omoingo rire yvy re ae ju oma'etÿ oikovy aguã.

²⁴ Ava omoxẽ ma vy anjo kuery ipopo va'e omoï imbokuapy yvyra ty regua kuaray oua katy. Oeja avi peteï kyxe guaxu hendy va'e ojere-jere va'erã, yvyra tekove me'ëa hi'aia katy tape oo va'e jokoarã.

4

Abel ha'e Caim rekokue oña

¹ Ha'e gui ava va'e jogueroke gua'yxy Eva reve. Ha'e ramo oguerekoy kyrí va'e, oikuavã Caim. Ha'e vy aipoe'i:

— SENHOR xepytyvõ ramo ava'i aikuavã — he'i.

² Ha'e rire teïgue ju oikuavã tyvy Abel. Abel ma vexa'i re openaa rupi oiko. Ha'e rã Caim ma oma'etÿ va'e.

³ Peteï ára Caim ogueru mba'emo onhotÿ va'ekue'a SENHOR pe ome'ẽ va'erã.

⁴ Ha'e rã Abel ma guymba kuery regua jypy'i oiko va'ekue ogueru, ikyrave va'e anho. Ha'e ramo SENHOR ojou porã Abel ha'e mba'emo ome'ẽ va'e.

⁵ Ha'e rã Caim ome'ẽ va'e ma SENHOR ndojou porãi. Ha'e ramo Caim ivai vaipa vy hova mboaepa.

⁶ Ha'e ramo ixupe SENHOR aipoe'i:

— Mba'e re tu ndevai? Mba'e re tu nderova mboae rei ri?

⁷ Ha'evea rami reiko ramo anhetë e'ÿ 'rã ri ty'y roguerovy'a? Ha'e rami teï ha'eve'ÿa rami reiko ramo rejejav y aguã nerarõ okë py. Opa marã ndererekoxe ramo hexe ndepo'aka 'rãgue.

Jojuka ypy'iague

⁸ Ha'e gui Caim aipoe'i guyvy Abel pe:

— Jaa na mba'ety py — he'i. Ha'e gui mba'ety rupi ikuai jave guyvy Abel re Caim opu'ã vy oyuka.

* 3:20 Tery Eva ma “Hekove va'e” 'ea. Ha'e rã tery Adão ma “Ava” 'ea.

- ⁹ Ha'e ramo SENHOR aipoe'i Caim pe:
 — Mamo tu nderyvy Abel oĩ?
 Caim ombovai:
 — Xee ndaikuuai. Xee ri ty'y xeryvy re opena va'e aiko? — he'i.
- ¹⁰ Ha'e ramo Nhanderuete aipoe'i:
 — Mba'e tu rejapo? Nderyvy ruguy xevy ojapukai yvy gui.
- ¹¹ Ha'e rami rire aŷ ayvu vaipy 'rã reiko yvy re, mba'eta nderyvy ruguy ndepo py remoẽ va'ekue yvy ojuru oipe'a vy omokõ rire.
- ¹² Ha'e nunga rupi yvy re rema'etý teĩ ixugui iporã va'e ndoikoi 'rã ndevy. Rejava-java ha'e reguata rei 'rã yvy re — he'i.
- ¹³ Ha'e ramo Caim aipoe'i SENHOR pe:
 — Ha'e rami ete xembopaga ramo ndaropo'aka reguai.
- ¹⁴ Mba'eta aŷ xemoxẽ ta xeyvy gui. Ha'e ramo ajepe'a 'rã nerentonde gui anhemi aguã. Ajava, aguata rei tema 'rã aikovy yvy re. Ha'e xererovaexi va'e rei tema 'rã xejuka.
- ¹⁵ SENHOR ombovai:
 — Ha'e rami avi Caim, ndejukaare ma sete-kue 'rã opaga — he'i. Ha'e rami vy Caim re SENHOR omoĩ ikuua ukaarã, ojou va'e kuery ojuka e'ŷ aguã.
- ¹⁶ Ha'e ramo SENHOR renonde gui Caim ojepe'a vy Node yvy re ju oiko, Éden regua kuaray oua katy.

Caim ramymino kuery rery oĩa

- ¹⁷ Ha'e gui Caim gua'yxy reve jogueroke ramo oguereko kyrĩ va'e, ha'e vy oikuavã'i Enoque. Ha'e gui Caim peteĩ tetã ojapo vy gua'y Enoque rery rupi omboery.
- ¹⁸ Enoque ra'y ma Irade oiko. Irade ra'y ma Meujael, Meujael ra'y ma Metusael, Metusael ra'y ma Lameque.
- ¹⁹ Lameque ma mokoĩ kunha ojou gua'yxyrã: peteĩ ma Ada hery va'e, ha'e rã amboae ma Zilá.
- ²⁰ Ada oikuavã'i Jabal. Ha'e va'e ramymino kuery ma oo'i rupi ikuai ha'e mymba re opena va'e kuery ae.
- ²¹ Tyvy rery ma Jubal. Ha'e va'e ramymino kuery ma mba'epu ixã reta va'e mbopua ha'e mimby monhe'ea kuery ae.
- ²² Ha'e gui Zilá ju oikuavã'i Tubalcaim. Ha'e va'e ma opa marãgua tembiporu haímbe va'e apoa oiko, overa va'e ha'e ferro guigua. Tubalcaim reindy ma Naamá.
- ²³ Ha'e gui Lameque aipoe'i gua'yxy kuery pe:
 — Ada ha'e Zilá, pendu ke xeayvu rã. Peẽ Lameque ra'yxy kuery, pejapyxaka ke xeayvua re. Xee ma ajuka peteĩ ava xere ojeai rire, ha'e peteĩ kunumi va'e ajuka avi xere opyrõ ramo rive.
- ²⁴ Caim ojukaa vy sete-kue 'rã opaga. Ha'e rã xee Lameque ma amongue xejukaa vy setenta vezes sete-kue 'rã opaga — he'i.
- ²⁵ Ha'e gui peteigüe ju Adão gua'yxy reve jogueroke ramo peteĩ ava'i ju oikuavã. Ha'e va'e ma omboery Sete, mba'eta aipoe'i:
 — Nhanderuete amboae ava'i ju ome'ẽ xevy, xepi'a Abel tyke'y Caim ojuka va'ekue rekovia — he'i.*
- ²⁶ Ha'e gui peteĩ oiko avi Sete ra'y. Ha'e va'e ma omboery Enos. Ha'e va'e guive ma SENHOR rery rupi ha'e kuery ojapukai ypy raka'e.

1 Crônicas 1.1-4

- ¹ Kova'e kuaxia ma Adão ramymino kuery rekokue oĩa. Nhanderuete avakue omoingo vy ojee rami ae ojapo.
- ² Ha'e rami vy omoingo ava va'e, ha'e gui kunha ju. Ogueroayvu porã, ha'e mokoïve pe "Avakue" he'i, omoingoa ára guive.*

* 4:25 Tery Sete ma "Ome'ẽ mbyre" 'ea reve nhaendu rã joo ramigua. * 5:2 Mateus 19.4, Marcos 10.6

- ³ Adão ma cento e trinta ma'etŷ re oiko. Ha'e gui ta'y oiko nguu ramigua ete, nguu rami ete ojekuaa. Ha'e va'e ma omboery Sete.
- ⁴ Sete oiko rire tuu Adão ma oitocentos ma'etŷ re ju oiko. Ha'e gui oikove ju ta'y ha'e tajy kuery.
- ⁵ Adão ha'e javi vy novecentos e trinta ma'etŷ re oiko. Ha'e rire omano.
- ⁶ Ha'e gui ta'y Sete ma cento e cinco ma'etŷ re oikoa py oiko ta'y Enos.
- ⁷ Enos oiko rire tuu Sete ma oitocentos e sete ma'etŷ re ju oiko. Oikove ju ta'y ha'e tajy kuery.
- ⁸ Sete ha'e javi vy novecentos e doze ma'etŷ oiko. Ha'e rire omano.
- ⁹ Enos ma noventa ma'etŷ re oikoa py oiko ta'y Cainã.
- ¹⁰ Cainã oiko rire tuu Enos ma oitocentos e quinze ma'etŷ re ju oiko. Oikove ju ta'y ha'e tajy kuery.
- ¹¹ Enos ha'e javi vy novecentos e cinco ma'etŷ re oiko. Ha'e rire omano.
- ¹² Cainã ma setenta ma'etŷ re oikoa py oiko ta'y Maalalel.
- ¹³ Maalalel oiko rire ma tuu Cainã ma oitocentos e quarenta ma'etŷ re ju oiko. Oikove ju ta'y ha'e tajy kuery.
- ¹⁴ Cainã ha'e javi vy novecentos ma'etŷ re oiko. Ha'e rire omano.
- ¹⁵ Maalalel ma sessenta e cinco ma'etŷ re oikoa py oiko ta'y Jerede.
- ¹⁶ Jerede oiko rire tuu Maalalel ma oitocentos e trinta ma'etŷ re ju oiko. Oikove ta'y ha'e tajy kuery.
- ¹⁷ Maalalel ha'e javi vy oitocentos e noventa e cinco ma'etŷ re oiko. Ha'e rire omano.
- ¹⁸ Jerede ma cento e sessenta e dois ma'etŷ re oikoa py oiko ta'y Enoque.
- ¹⁹ Enoque oiko rire tuu Jerede ma oitocentos ma'etŷ re ju oiko. Oikove ta'y ha'e tajy kuery.
- ²⁰ Jerede ha'e javi vy novecentos e sessenta e dois ma'etŷ re oiko. Ha'e rire omano.
- ²¹ Enoque ma sessenta e cinco ma'etŷ re oikoa py oiko ta'y Metusalém.
- ²² Enoque ma Nhanderuete reve oiko. Ta'y Metusalém oiko rire tuu trezentos ma'etŷ re oiko. Oikove ju ta'y ha'e tajy kuery.
- ²³ Enoque ha'e javi vy trezentos e sessenta e cinco ma'etŷ oiko.
- ²⁴ Enoque ma Nhanderuete reve oiko ramo ndoexaavei, Nhanderuete ojeupe ae ogueraa ramo.
- ²⁵ Metusalém ma cento e oitenta e sete ma'etŷ re oikoa py oiko ta'y Lameque.
- ²⁶ Lameque oiko rire tuu Metusalém ma setecentos e oitenta e dois ma'etŷ re ju oiko. Oikove ju ta'y ha'e tajy kuery.
- ²⁷ Metusalém ha'e javi vy novecentos e sessenta e nove ma'etŷ re oiko. Ha'e rire omano.
- ²⁸ Lameque ma cento e oitenta e dois ma'etŷ re oikoa py oiko peteĩ ta'y.
- ²⁹ Ha'e va'e ma Noé omboery vy aipoe'i:
- Kova'e ma nhanemombytu'u 'rã ko vyv Nyanderuete ijayvu vaiague re nhandekuai vy nhandepo py nhamba'eapo poyia gui — he'i.
- ³⁰ Noé oiko rire tuu Lameque ma quinhentos e noventa e cinco ma'etŷ re ju oiko. Oikove ju ta'y ha'e tajy kuery.
- ³¹ Lameque ha'e javi vy setecentos e setenta e sete ma'etŷ re oiko. Ha'e rire omano.
- ³² Noé ma quinhentos ma'etŷ re oiko rire mboapy oiko ta'y kuery: Sem, Cam ha'e Jafé.

Avakue opa marã rei ikuaiague

- ¹ Hetave ovy avakue vyv re, ha'e tajy kuery ikuai.
- ² Nhanderuete ra'y kuery ava rajy kuery oexa rã iporâgue. Ha'e ramo gua'yxyrã ojopy oipota va'e rei.
- ³ Ha'e ramo SENHOR aipoe'i:
- Xenhe'ẽ noñ riaeí 'rã avakue re, to'o rive ikuai rã. Ha'e rami vy ha'e kuery ma cento e vinte ma'etŷ peve'i 'rã ikuai — he'i.

⁴ Ha'e jave ma ikuai gigante yvy re. Ha'e Nhanderuete ra'y kuery avakue rajy kuery re omenda rire ta'y kuery ojerovia rei va'e ikuai. Ha'e va'e avakue ma ipy'a guaxukue ha'e omboetepy meme raka'e.

⁵ SENHOR oexa rā avakue yvy re ikuai va'e heko vaive tema oje'oivy. Ha'e kuery py'a re oī opa marā ikuai aguā anho.

⁶ Ha'e ramo SENHOR ndoguerovy'avei avakue yvy re omoingoague. Opy'a re oendu nda'eveia.

⁷ Ha'e rami vy aipoe'i:

— Avakue amoingo va'ekue amokanhymba 'rā yvy gui. Avakue, vixo, yvy rupi otyryry va'e ha'e guyra oveve va'e ha'e javi 'rā amomba. Ndarovy'avei amoingoague — he'i.

⁸ Ha'e rā Noé ma SENHOR renonde oupity omboaxya.

⁹ Po rami ma Noé rekokue: Noé ma ava heko porā va'e, ha'e javegua kuery mbyte anhetē rupi anho oiko Nhanderuete reve.

¹⁰ Ta'y kuery ma mboapy oiko raka'e: Sem, Cam ha'e Jafé.

Yy ovu aguā Nhanderuete omombe'u ma voiague

¹¹ Nhanderuete renonde yvy regua kuery opa marā rei ikuai joupe ojapo vaia rupi anho.

¹² Yvy Nhanderuete oexa rā yvy regua kuery opa marā rei ikuai. Peteī-teī reko ivaipa ma yvy re.

¹³ Ha'e ramo Nhanderuete aipoe'i Noé pe:

— Xee anhembopy'a yvy regua kuery ha'e javi amomba aguā, avakue heko vai va'e anho ikuai ramo yvy re. Amokanhymba 'rā, yvy reve.

¹⁴ Ha'e ramo ejapo peteī kanoā guaxu yvyrapse cipreste guigua va'e gui. Ha'e va'e py rejapo 'rā opy ja'o-ja'o'i. Ipa'ū-pa'ū rembotypa 'rā opy katy ha'e oka katy, oja va'e reikyty vy.

¹⁵ Po rami 'rā rejapo: cento e cinqüenta metros remoī 'rā ipuku-a, ha'e rā ipya ma vinte e cinco metros, ha'e yvatea ma quinze.

¹⁶ Jovaive rupi rembokua 'rā meio metro yvatea rami. Kanoā rokērā ma ijyke re 'rā rejapo. Pyrōarā ma renhono 'rā mboapy: peteī iguy rupi, peteī hi'áry, ha'e rā amboae ma yvateve rupi.

¹⁷ Mba'eta ambou 'rā yy yvy ha'e javi ao'iarā, amomba aguā opa mba'e ipytuē va'e yva guýry ikuai va'e. Yvy re ikuai va'e ha'e javi 'rā okanhymba.

¹⁸ Ha'e rā ndereve ma ajapo 'rā xereve guarā. Ha'e rami rā peikepa 'rā kanoā py, ndee, ndera'y kuery, ndera'yxy ha'e ndera'y ra'yxy kuery reve.

¹⁹ Kanoā py remoinge avi 'rā mymba temimoingo kuery ikuai va'e. Peteī-teī regua gui mokoī 'rā remoinge, ava ha'e kunha okuave reve rerekō aguā ndereve.

²⁰ Guyra kuery, vaka, yvy rupi otyryry va'e, ha'e nunga ha'e javi peteī-teī regua gui mokoī 'rā reru ndea py, okuave reve rerekō aguā.

²¹ Ndea py emoī porā avi ke opa marāgua tembi'u. Emboaty ndea py ndee re'u va'erā, ha'e kuery pe voi — he'i.

²² Ha'e rami Noé ojapo. Nhanderuete ojapo uka va'ekue ojapopa.

Ngoo pygua kuery reve Noé kanoā py oikeague

¹ Ha'e gui SENHOR aipoe'i Noé pe:

— Eike ke kanoā py, ndee ha'e ndero pygua kuery ha'e javive, mba'eta aikuaa xerenonde heko porā va'e reikoa aýgua kuery mbyte.

² Ha'e javi regua mymba pe'u aguā ha'eve va'e ma sete irū va'e 'rā reraa ava ha'e kunha. Ha'e rā mymba ha'eve'ŷ va'e ma peteī'i irū va'e eraa ava ha'e kunha.*

* 7:2 Ha'e kuery ma amongue mymba pe “Ha'eve'ŷ va'e” he'i 'rā, ha'e rā amboae pe ma “Iky'a e'ŷ va'e” he'i 'rā. Ha'e nunga Levítico 11 py omombe'u porāve.

³ Guyra oveve va'e voi sete irũ va'e 'rã reraa ava ha'e kunha, peteĩ-teĩ regua okuave aguã yvy re.

⁴ Mba'eta sete araa py ambo'oky 'rã yvy re, quarenta ára ha'e quarenta pytû peve. Yvy gui amokanhymba 'rã amoingo va'ekue ha'e javi — he'i.

⁵ Ha'e ramo Noé ojapo SENHOR ojapo uka va'ekue ha'e javi.

⁶ Noé ma seiscentos ma'etõ oguerek, yy ovu vy yvy ojao'i jave.

⁷ Oky ramo yy ovu va'e gui Noé oike raka'e kanoã py. Hexeve oike avi ta'y kuery, ta'yxy ha'e ta'y ra'yxy kuery.

⁸ Oike avi mymba ha'eve va'e ha'e ha'eve'ý va'e, guyra ha'e yvy rupi otyryry va'e ha'e javi.

⁹ Ha'e kuery ma Noé-a py oikepa kanoã py. Mokõ-mokoõ oike ava ha'e kunha, Noé pe Nhanderuete ojapo ukaague rami.

¹⁰ Ha'e gui sete ára rire yy ovu ouvy yvy áry.

¹¹ Seiscentos ma'etõ Noé oguerek jave, mokoõ jaxya ha'e dezessete araa py ma yy yvy guy gui ovu vy omondoropa ygua ha'e javi, ombokua ja'ea, ha'e yva voi ojepe'apa.

¹² Ha'e rami vy oky vaipa yvy re quarenta ára ha'e quarenta pytû re.

¹³ Ha'e va'e árave Noé oike raka'e kanoã py. Oike avi ta'y kuery Sem, Cam ha'e Jafé, ta'yxy ha'e ta'y ra'yxy kuery reve.

¹⁴ Ha'e kuery ha'e mymba peteĩ-teĩ regua, vaka, yvy rupi otyryry va'e, guyra, guyra'i ha'e ipepo va'e ha'e javi,

¹⁵ ho'o va'e ipytuë va'e ha'e javi gui mokõ-mokoõ oike Noé reve kanoã py.

¹⁶ Temimoingo ha'e javi regua gui oike ava ha'e kunha, Nhanderuete Noé pe ojapo ukaague rami. Ha'e rã ha'e oike rire ma SENHOR omboty okẽ.

Yy ovu jave guare

¹⁷ Yvy áry ma quarenta ára re yy ou. Ovuve ovv vy oguerovu heravy kanoã yvy áry gui.

¹⁸ Yy ouve vy typyve ovv yvy áry. Ha'e rã kanoã ma ovu oupy yy áry.

¹⁹ Yvy áry yy ou vy ojao'ipa. Yvyty yvatekueve va'e yva guýry ikuai va'e ha'e javi ojao'i.

²⁰ Yvyty ikuai va'e yy ojao'i vy sete metros raxa peve typy hi'áry.

²¹ Temimoingo yvy re ikuai va'e omanomba: guyra, mymba oka regua ha'e ka'aguy regua, yvy re omyí va'e ha'e avakue ha'e javi.

²² Opa marâguia ipytuë va'e, yyy pirua rupi ikuai va'ekue omanomba.

²³ Ha'e rami py temimoingo kuery yvy re ikuai va'ekue opa, avakue, mymba, otyryry va'e, guyra oveve va'e, ha'e javive okanhymba yvy gui. Noé anho oikove, ha'e hexeve kanoã py ikuai va'e guive.

²⁴ Cento e cinqüenta ára re yy itui yvy áry.

Yy ovu va'ekue typave ovvyague

¹ Ha'e gui ma Nhanderuete ima'endu'a Noé re, ha'e kanoã py mymba ka'aguy regua ha'e oka regua hexeve ikuai va'e ha'e javi re. Ha'e rami vy Nhanderuete ojapo yvy áry rupi yvytu oipeju aguã rami. Ha'e ramo yy typa ovv.

² Onhembotypa ju ygua yvy guy gui yy omondoro va'ekue, ha'e yva voi ndojepe'avei ramo oky vaipa va'ekue opytu'u.

³ Yy ma oxyry ovv yvy áry gui. Typave ovv cento e cinqüenta araa peve.

⁴ Ha'e gui sete jaxya ha'e dezessete araa py ma kanoã optyta Ararate yvyty áry.

⁵ Ha'e va'e rire dez jaxya peve ju yy typave ovv. Ha'e va'e jaxy jypy'ia ára ojekuaa ypy yvyty apyte.

Noé xapirë ha'e apykaxu opoiague

⁶ Ha'e gui quarenta araa py ma Noé oipe'a okẽ'i kanoã re ojapo va'ekue.

⁷ Ha'e rami vy opoi peteĩ xapirë. Ha'e va'e oẽ vy oo ha'e ojevy jepi, yvy áry gui yy ipiru peve.

- ⁸ Ha'e rire peteī apykaxu ju opoi, yvy áry gui pa yy typa maa oikuaaxe vy.
⁹ Va'eri apykaxu oguapy aguā ndojoui vy ojevy ju ha'e oĩa py kanoā py, yvy yy ojao'i teri ramo. Ha'e ramo Noé okuave'ẽ rã oguapy ramo omoinge ju kanoā py.
¹⁰ Sete ára ju oarõ rire opoi ju apykaxu kanoā gui.
¹¹ Ha'e rire ka'aru jave ojevy ju ha'e oĩa py. Ojuru py ogueru oliveira rogue ipyau va'e. Ha'e ramo Noé oikuua yvy áry gui yy typa maa.
¹² Ha'e gui sete ára ju oarõ rire teīgue ju opoi apykaxu. Ha'e ramo ndojevyvei ha'e py.

Kanoā gui Noé kuery oẽmba jevyague

- ¹³ Ha'e gui seiscentos e um ma'etŷa, ijypya jaxy ha'e ijypya ára ma yy typa yvy áry gui. Ha'e ramo Noé oipe'a kanoā ao'ia. Oma'ẽ vy oexa yvy ipiru maa.
¹⁴ Ha'e gui mokoī jaxy, vinte e sete araa py ma yvy ipiru ete ma.
¹⁵ Ha'e ramo Nhanderuete aipoe'i Noé pe:
¹⁶ — Peẽmba ju ke kanoā gui, ndera'yxy, ndera'y kuery ha'e ndera'y ra'yxy kuery reve.
¹⁷ Emoẽmba avi mymba kuery ndereve ikuai va'e, temimoingo ha'e javi, guyra, vaka ha'e opa marāgua yvy rupi otyryry va'e, ha'e kuery yvy re ikuai jevy vy ta'y ha'e heta aguā — he'i.
¹⁸ Ha'e ramo Noé oẽ gua'y kuery, gua'yxy ha'e gua'y ra'yxy kuery reve.
¹⁹ Omoẽmba avi mymba kuery kanoā gui, yvy rupi otyryry va'e ha'e javi, guyra ha'e yvy ary omyí va'e peteī-teī regua.

Noé altar ojapoague

- ²⁰ Ha'e gui Noé ojapo peteī altar SENHOR pegua.* Ha'e rami vy mymba ha'e guyra'i ha'eve va'e regua ojopy vy ojuka. Oapy vy ome'ẽ altar áry.
²¹ Ha'e rã ipixe porã SENHOR oetũ vy aipoe'i ojeupe:
— Aŷ gui ma avakue káuxa xee ndaxeayvu vaivei 'rã yvy re, kyrĩ guive heko vai aguã anho ipy'a va'eri. Neĩ namombavei ma 'rã temimoingo kuery amombaague rami.
²² Yvy ituia ja ndoiko e'ŷi 'rã mba'emo onhotŷa aguā neĩ omono'õa aguā, yro'ya neĩ haku-a, ára neĩ pytũ ndoiko e'ŷi 'rã guive.

9

Noé kuery reve Nhanderuete guexeve guarã ojapoague

- ¹ Ha'e gui Nhanderuete ogueroayvu porã Noé ha'e ta'y kuery. Ha'e vy aipoe'i:
— Pendera'y ke, pendereta ha'e pemonyẽ yvy.
² Mymba yvy re ikuai va'e ha'e guyra oveve va'e ha'e javi 'rã okyje pendegui. Pendepo py amboaxa 'rã yvy áry omyí va'e ha'e pira ye'ẽ rupigua ha'e javi.
³ Opa marāgua oikove va'e yvy re oo va'e ha'e javi 'rã ha'eve pe'u va'erã. Pëvy jai rogue pyau ame'ẽague rami avi aŷ ma ame'ẽmba.
⁴ Ha'e rã xo'o huguy oĩ teri va'e ma nda'evei pe'u aguā, tuguy re tekove oĩ ramo.
⁵ Anhetẽ pende kuery ruguy omoẽague re voi anhombopaga 'rã. Mymba ikuai va'e gui voi amboekovia 'rã, avakue po gui amboekoviaa rami avi. Mba'eta amongue oirũ rekove oipe'a rire ipo gui amboekovia kuerei 'rã.
⁶ Amongue oirũ ruguy omoẽ rire avakue ju omoẽ 'rã huguy, Nhanderuete ojee rami ae avakue omoingo rire.
⁷ Ha'e rã peẽ ma penda'y reta, pendereta ha'e pemonyẽ yvy, pendereta yvy re — he'i.
⁸ Noé ha'e ta'y kuery pe Nhanderuete aipoe'i avi:
— Aŷ ma peẽ kuery reve ajapo ta xereve guarã, peneramymino kuery
¹⁰ ha'e temimoingo kuery pendereve ikuai va'e ha'e javi reve: guyra'i, mymba oka regua ha'e ka'aguy regua kanoā gui oẽ va'ekue, opa marāgua mymba yvy re ikuai va'e reve guive.
¹¹ Po rami pendereve ajapo xereve guarã: Temimoingo kuery namombavei ma 'rã yy gui, yy ndouwei 'rã yvy mombaarã.

* 8:20 Altar ma SENHOR pe ome'ẽmba oapya aguā.

¹² Nhanderuete aipoe'ive ju:

— Pova'e ma aeja xereve guarã ajapo va'e kuaa ukaarã, peẽ kuery ha'e temimoingo kuery pendereve ikuai va'e ha'e javi reve, ha'e araka'e rã peve ikuai va'erã va'e peguarã voi:

¹³ Arai re aexa uka 'rã xerapa, yvy re ikuai va'e reve xereve guarã ajapo va'ekue kuaa ukaarã.*

¹⁴ Yvy áry arai aru nhavõ, ha'e arai re karugua ojekuaa ramo

¹⁵ xema'endu'a 'rã xereve guarã ajapo va'ekue re, peẽ ha'e temimoingo ikuai va'e ha'e javi reve. Ha'e rami vy yy nambouei 'rã okuave va'e mombaarã.

¹⁶ Karugua ojekuaa 'rã arai re. Ha'e ramo xee aexa vy xema'endu'a 'rã xereve guarã xee Penderuete raka'e rã peve guarã ajapo va'ekue re, temimoingo yvy re ikuai va'e ha'e javi reve.

¹⁷ Nhanderuete aipoe'i Noé pe:

— Ha'e va'e ma xereve guarã ajapo va'ekue kuaa ukaarã temimoingo kuery yvy re ikuai va'e reve — he'i.

¹⁸ Noé ra'y kuery kanoã gui oẽ va'ekue ma Sem, Cam ha'e Jafé. Cam ra'y ma Canaã.

¹⁹ Ha'e va'e kuery ma Noé ra'y mboapy ikuai raka'e. Ha'e kuery gui ae yvy jave re omonyẽ.

Noé jogueroayvu porã ha'e ijayvu vaiague

²⁰ Noé ma oma'etÿa rupi oiko. Ha'e rami vy onhotÿ uva.

²¹ Ha'e gui vinho oy'u vy oka'u, ha'e ipire rei oiny oo'i py.

²² Canaã ru Cam ma nguu ipire reia oexa vy omombe'u mokoï guyke'y kuery oka py ikuai va'e pe.

²³ Ha'e ramo guyke'y Sem ha'e Jafé ma peteĩ capa ojopy vy omoï oaxi'y re. Ha'e rami vy okupe re oguata ovy vy ojao'i nguu pire reia oexa e'ÿ re, amboae katy rive oma'ẽ reve.

²⁴ Ha'e gui Noé oka'uague gui ovy vy oikuaa gua'y kyríve va'e hexe ojapoague.

²⁵ Ha'e vy aipoe'i:

— Tove Canaã toiko ayvu vaipy. Guyke'y kuery rembiguai yvyíve va'e rami toiko — he'i.

²⁶ Aipoe'ive ju:

— SENHOR Sem Ruete va'e ma ayvu porãmby toiko. Ha'e rã Canaã ma Sem rembiguai toiko.

²⁷ Ha'e Jafé ma tove Nhanderuete tomboyvate. Guyke'y Sem irû toiko hoo py. Ha'e rã Canaã ma hembiguai toiko — he'i.

²⁸ Yy ovuague oaxa rire Noé ma trezentos e cinqüenta ma'etÿ re ju oiko.

²⁹ Noé ha'e javi vy novecentos e cinqüenta ma'etÿ oiko. Ha'e rire omano.

10

1 Crônicas 1.5-23

¹ Po rami ma Noé ra'y kuery ramymino kuery rery. Ta'y kuery ma Sem, Cam ha'e Jafé. Ha'e kuery ma yy ovu rire ta'y okuapy.

² Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

³ Gômer ra'y kuery ma Asquenaz, Rificate ha'e Togarma.

⁴ Javã ra'y kuery ma Elisá, Társis, Quitim ha'e Dodanim.

⁵ Ha'e va'e kuery oja'o vy oo ye'ẽ rembe re ikuai amboae reguarã. Peteĩ-teĩ regua oayvu ae py ijayvu, joegua-egua joa py ikuai.

⁶ Ha'e gui Cam ra'y kuery ma Cuxé, Mizraim, Pute ha'e Canaã.

⁷ Cuxé ra'y kuery ma Sebá, Havilá, Sabtá, Raamá ha'e Sabtecá. Ha'e Raamá ra'y kuery ma Sabá ha'e Dedã.

⁸ Cuxé ra'y ma Ninrode. Ha'e va'e ma ipo'akapa ypy raka'e yvy re.

⁹ Imba'ejukaa ipy'a guaxu va'e oiko SENHOR renonde. Ha'e ixupe "Ninrode SENHOR renonde imba'ejukaa rami avi oiko va'e", 'ea.

* 9:13 "Xerapa" he'ia ma arai re Nhanderuete karugua oexa uka va'e.

- ¹⁰ Jypy'i ipo'aka raka'e ma Babel tetā re, ha'e gui Ereque, Acade ha'e Calné re ju, Sinar yvy re ae.
- ¹¹ Ha'e va'e yvy gui ha'e ojepe'a Assíria re ju oiko aguā. Ha'e vy ojapo Nínive, Reobote-Ir ha'e Calá tetā.
- ¹² Nínive ha'e Calá mbyte ma ojapo avi Resém tetā guaxu.
- ¹³ Mizraim ra'y ma Ludim, Anamim, Leabim, Naftuim,
- ¹⁴ Patrusim ha'e Casluim (ha'e va'e gui ma filisteu kuery ikuai), ha'e gui Caftorim.
- ¹⁵ Canaã ra'y ma Sidom jypyguia. Ha'e va'e gui ma Hete ju.
- ¹⁶ Hamymino kuery ma jebuseu kuery, amorreu, gurgaseu,
- ¹⁷ heveu, arqueu, sineu,
- ¹⁸ arvadeu, zemareu ha'e hamateu kuery ikuai. Canaã ramymino kuery ma opa rupi oaïmba raka'e.
- ¹⁹ Canaã ramymino kuery yvy omboja'oague ma Sidom guive oo Gerar katy, Gaza peve, ha'e gui oo Sodoma, Gomorra, Admá ha'e Zeboim katy, Lasa peve.
- ²⁰ Ha'e va'e kuery ma Cam ramymino kuery. Peteĩ-teĩ regua oayvu ae py ijayvu, joegua-egua joa py ikuai.
- ²¹ Ha'e gui Jafé ryke'y Sem ma ta'y avi. Hamymino kuery ma Héber ra'y kuery ha'e javi ikuai.
- ²² Sem ra'y kuery ma Elão, Assur, Arfaxade, Lude ha'e Arã.
- ²³ Arã ra'y kuery ma Uz, Hul, Geter ha'e Más.
- ²⁴ Arfaxade ra'y ma Salá, Salá ra'y ma Héber.
- ²⁵ Héber ra'y ma mokoï oiko. Peteĩ ma Pelegue hery va'e, mba'eta ha'e va'e oiko jave yvy omboja'oa.* Ha'e rã tyvy ma Joctã.
- ²⁶ Joctã ra'y kuery ma Almodá, Salefe, Hazar-Mavé, Jerá,
- ²⁷ Hadorão, Uzal, Dicla,
- ²⁸ Obal, Abimael, Sabá,
- ²⁹ Ofir, Havilá ha'e Jobabe ikuai. Ha'e va'e kuery ha'e javi ma Joctã ra'y kuery.
- ³⁰ Ha'e kuery yvy omboja'oague ma Messa guive oo, kuaray oua katy Sefar yvyty oï va'e peve.
- ³¹ Ha'e va'e kuery ma Sem ra'y kuery. Peteĩ-teĩ regua oayvu ae py ijayvu, joegua-egua joa py ikuai.
- ³² Ha'e va'e kuery ae Noé ramymino kuery. Peteĩ-teĩ regua oayvu ae py ijayvu, joegua-egua joa py ikuai. Ha'e kuery ma yy ovu rire oja'opa yvy jave re.

11

Babel py torre ojapoa okuapyague

- ¹ Ha'e jave py ma yvy jave re peteĩ'i ayvu oiko ramo peteĩ'i rami anho ijayvu okuapy.
- ² Ha'e kuery kuaray oua katy gui oje'oi vy ojou peteĩ yvy joja porã reia Sinar yvy re. Ha'e py ju ikuai.
- ³ Ha'e vy aipoe'i joupe-upe:
— Peju ke, jajapo yvy jykuerã, japy porã — he'i. Ha'e jave py yvy jykue oiporu ita 'râgue py. Oja va'e voi oiporu omboja aguã.
- ⁴ Aipoe'i okuapy:
— Peju ke, jajapo peteĩ tetā nhandevy, ha'e torre yva re peve yvate va'erã. Ha'e rami vy nhandere ima'endu'a porã 'rã, ha'e yvy jave re nhaneaõ e'ŷ aguã — he'i okuapy.
- ⁵ Ha'e rami rã SENHOR oguejy oexa aguã tetā ha'e torre avakue ra'y kuery ojapo va'e.
- ⁶ Ha'e vy SENHOR aipoe'i:
— Aŷ peve peteĩ regua anho ikuai, ha'e peteĩ rami meme ijayvu va'e. Ha'e nunga ma jypy'i rei teri. Aŷ gui ma ha'e kuery ndojapo kuaa e'ŷ 'rã ojapoxe va'e rei.
- ⁷ Peju ke, jaguejy, jajapo joo rami e'ŷ-e'ŷ ijayvu aguã rami, peteĩ-teĩ joayvu oendu kuaa ve'ŷ aguã — he'i.

* 10:25 Tery Pelegue ma "Oja'oa" 'ea reve joo ramigua.

⁸ Ha'e rami vy SENHOR omoaïmba yvy jave re. Ha'e ramo optyu'u tetã ojapo okuapya gui.

⁹ Ha'e nunga rupi ha'e va'e henda omboerya Babel, ha'e py joayvu oendu kuaa e'ŷ aguã rami SENHOR ojapo rire, yvy jave re omoaïmba vy.*

1 Crônicas 1.24-27

¹⁰ Po rami ma Sem ramymino kuery rery. Ha'e ma cem ma'etŷ oguerekao py ta'y ypy'i Arfaxade oiko, yy ovu rire mokoĩ ma'etŷa py.

¹¹ Ha'e Arfaxade oiko rire tuu Sem ma quinhentos ma'etŷ re ju oiko. Ta'y ha'e tajy ju.

¹² Arfaxade ma trinta e cinco ma'etŷ oikoa py oiko ta'y Salá.

¹³ Ha'e Salá oiko rire tuu Arfaxade ma quatrocetros e três ma'etŷ re ju oiko. Ta'y ha'e tajy ju.

¹⁴ Salá ma trinta ma'etŷ oikoa py oiko ta'y Héber.

¹⁵ Ha'e Héber oiko rire tuu Salá ma quatrocetros e três ma'etŷ re ju oiko. Ta'y ha'e tajy ju.

¹⁶ Héber ma trinta e quatro ma'etŷ oikoa py oiko ta'y Pelegue.

¹⁷ Ha'e Pelegue oiko rire tuu Héber ma quatrocetros e trinta ma'etŷ re ju oiko. Ta'y ha'e tajy ju.

¹⁸ Pelegue ma trinta ma'etŷ oikoa py ta'y Reú oiko.

¹⁹ Ha'e Reú oiko rire tuu Pelegue ma duzentos e nove ma'etŷ re ju oiko. Ta'y ha'e tajy ju.

²⁰ Reú ma trinta e dois ma'etŷ oikoa py oiko ta'y Serugue.

²¹ Ha'e Serugue oiko rire tuu Reú ma duzentos e sete ma'etŷ re ju oiko. Ta'y ha'e tajy ju.

²² Serugue ma trinta ma'etŷ oikoa py oiko ta'y Naor.

²³ Ha'e Naor oiko rire tuu Serugue ma duzentos ma'etŷ re ju oiko. Ta'y ha'e tajy ju.

²⁴ Naor ma vinte e nove ma'etŷ oikoa py oiko ta'y Terá.

²⁵ Ha'e Terá oiko rire tuu Naor ma cento e dezenove ma'etŷ re ju oiko. Ta'y ha'e tajy ju.

²⁶ Terá ma setenta ma'etŷ oiko rire oiko ta'y kuery Abrão, Naor ha'e Harã.

²⁷ Po rami ma Terá ramymino kuery rery. Terá ra'y kuery ma Abrão, Naor ha'e Harã. Harã ra'y ma Ló.

²⁸ Harã ma yvy oikoague py ae omano, Ur caldeu kuery rekoao py. Ha'e va'e jave py tuu Terá oikove teri.

²⁹ Abrão ha'e Naor ojou gua'yxyrã. Abrão ra'yxy ma Sarai hery va'e, ha'e rã Naor ra'yxy ma Milca, Harã rajy ae. Harã ra'y kuery ma Milca ha'e Iscá.

³⁰ Ha'e rã Sarai ma imembry va'erã e'ŷ ae oiko.

³¹ Ha'e gui Terá ogueraa gua'y Abrão, gua'y Harã ra'y Ló, ha'e gua'y Abrão ra'yxy Sarai. Ha'e vy caldeu kuery rekoao Ur gui jogueraa, Canaã yvy re ovaẽ aguã. Ha'e rami tei Harã tekao peve'i oje'oi. Ha'e vy optya okuapya ha'e py.

³² Ha'e gui Terá ma duzentos e cinco ma'etŷ oikoa py omano Harã tekao py.

12

Nhanderuete Abrão oenoĩ vy ogueroayvu porãague

¹ Ha'e gui SENHOR aipoe'i Abrão pe:

— Exẽ ke ndeyvy gui, nderu ro ha'e neretarã kuery ikuiai gui, ha'e tereo yvy aexa uka va'erã katy.*

² Mba'eta ndegui amoingo 'rã peteĩ regua heta va'e. Romoingo porã 'rã, ha'e amboete uka 'rã nderery. Ndere vy amboae regua kuery amoingo porã avi 'rã.

³ Amoingo porã avi 'rã nemoingo porã va'e kuery, ha'e rã ndere ijayvu vai va'e kuery re ma xeayvu vai 'rã. Ndere vy yvy regua ha'e javi ikuai porã 'rã — he'i.*

⁴ Ha'e rami SENHOR ijayvuague rami vy Abrão oo. Ló voi oo hupive. Setenta e cinco ma'etŷ Abrão oguerekao reve ojepe'a Harã tekao gui.

* 11:9 Tery Babel ma “Joo rami e'ŷ-e'ŷ oikuua okuapya” 'ea. * 12:1 Atos 7.3 * 12:3 Gálatas 3.8

⁵ Abrão ngupive ogueraa va'e ma gua'yxy Sarai, guyvy ra'y Ló ha'e mba'emo oguerekova'e ha'e javi. Ogueraa avi guembiguai kuery Harã teko a py oiko jave ojou va'ekue. Ha'e rami vy Canaã yvy katy ju jogueraa. Ha'e vy ovaẽmba ha'e py.

⁶ Ha'e va'e yvy Abrão oaxa ov yvyra carvalho hi'aĩ va'e peve. Ha'e jave ma cananeu kuery ikuai yvy re.

⁷ Ha'e ramo Abrão pe SENHOR ojexa uka. Ha'e vy aipoe'i:

— Kova'e yvy ame'ẽ 'rã neramymimo kuery pe — he'i. Ha'e ramo Abrão ojapo peteĩ altar SENHOR pe, ixupe ojexa uka rire.

⁸ Ha'e va'e gui oaxa ov yvyty Betel regua kuaray oua katy oĩ va'e peve. Ha'e py ma oupi oo'i, Betel tetã regua kuaray oikea katy opyta, ha'e Ai regua kuaray oua katy. Ha'e py voi ojapo peteĩ altar SENHOR pe, ha'e ojapukai SENHOR rery rupi.

⁹ Abrão oo ju ha'e gui, Neguebe katy tema oo oiny.*

Egito yvy re Abrão oiko jave guare

¹⁰ Ha'e gui ha'e va'e yvy re oiko karuai. Ha'e ramo Abrão oo vy Egito yvy re ju oiko, ijyvy re ae karuai ete ramo.

¹¹ Ha'e gui Egito yvy re ovaẽ rai'i maa py Abrão aipoe'i gua'yxy Sarai pe:
— Xee aikuua porã ndee kunha porã ereikoa.

¹² Ha'e ramo Egito pygua kuery nderexa vy aipoe'i 'rã: “Peva'e kunha ma ta'yxy oiko”, he'i vy xejuka 'rã. Ndee anho'i nemoingove 'rã.

¹³ Ha'e nunga rupi aipo're xereindy reikoa rami, ndere vy ha'e kuery xemboete vy xee voi xemoingove aguã — he'i.

¹⁴ Egito yvy re Abrão ovaẽ ramo ha'e pygua kuery ta'yxy oexa rã iporã ete.

¹⁵ Faraó rembiguai kuery yvatekueve va'e oexa vy omombe'u Faraó pe. Ha'e ramo Faraó ogueru ruka kunha va'e ngoo py.

¹⁶ Faraó ma kunha va'e re vy opena porã Abrão re. Ha'e ramo ojou-jouve guymbarã: vexa'i, vaka, mburika'i, ha'e gui guembiguai avakue ha'e kunhague, kavaju ha'e camelô.

¹⁷ Ha'e rami teĩ SENHOR omoingo axy Faraó ha'e hoo pygua kuery ha'e javi. Mba'emo vai ete omoingo Abrão ra'yxy Sarai káuxa.

¹⁸ Ha'e ramo Faraó oenoĩ uka Abrão. Ha'e vy aipoe'i:

— Mba'e tu rejapo xere? Mba'e re tu nder'a'yxy oikoa neremombe'u porãi ri,

¹⁹ ha'e “Xereindy” 're rive? Ha'e rami rã ajopy karamboae xera'yxyrã. Aÿ ma nder'a'yxy ae ri rã eraa ju, ha'e tapeo — he'i.

²⁰ Ha'e rami vy Faraó guembiguai kuery pe opena uka Abrão re. Ha'e ramo oarõ heravy, ta'yxy ha'e opa mba'e oguerekova'e oague.

13

Abrão ha'e Ló joegui oja'oague

¹ Ha'e gui Egito gui Abrão oẽ vy Neguebe katy ju oo. Gua'yxy ogueraa opa mba'e oguerekova'e reve. Ló avi oo hupive.

² Abrão ma oguerekopa va'e. Oguerekopa vaka, prata ha'e ouro.

³ Ha'e gui Neguebe gui Betel katy ju oo, oo'i oupi ypy'iague py, Betel ha'e Ai mbyte py ae,

⁴ altar SENHOR peguarã ojapoague peve. Ha'e py ae ju Abrão ojapukai SENHOR rery rupi.

⁵ Abrão rupive Ló oo vy ogueraa reta vexa'i, vaka ha'e oo'i.

⁶ Ha'e nunga rupi ha'e va'e yvy re nda'evelei joa py mokoïve ikuai aguã, oguerekopa va'e meme ramo. Nda'evelei ae joa py ikuai aguã.

⁷ Ha'e gui Abrão rymba re opena va'e kuery joguero'a rei Ló rymba re opena va'e kuery reve. Ha'e va'e jave py cananeu ha'e ferezeu kuery avi ikuai ha'e va'e yvy re.

⁸ Ha'e ramo Abrão aipoe'i Ló pe:

— Nda'evelei nhande jajoguero'a rei aguã, neĩ xerembiguai kuery nerembiguai kuery reve joguero'a aguã nda'evelei, joegua meme nhandekuai vy.

* 12:9 Neguebe ma Judéia regua yvy piru reia kuaray puku-a katy oĩ va'e.

⁹ Ma'ẽ, nerondenonde itui yvy ha'e javi. Ajerure xea gui rejep'e a aguã. Xapy'a rei jaiporu kuaa e'ŷa katy ri reo ramo xee ma jaiporu kuaa katy 'rã aa. Ha'e rã jaiporu kuaa katy ri reo ramo xee ma jaiporu kuaa e'ŷa katy 'rã aa — he'i.

¹⁰ Ha'e ramo Ló oma'ẽ vy oexa yvy joja porã reia Jordão yakã yvýry itui va'e, Zoar tekaoa katy'i. Ha'e va'e yvy ma Sodoma ha'e Gomorra SENHOR omomba e'ŷ mbove yy porã oĩa, yvotyty SENHOR omoingo va'ekue rami ae iporã, Egito yvy rami avi.

¹¹ Ha'e ramo Ló ma ojeupe guarã oiporavo Jordão yvýry yvy joja porã reia itui va'e ha'e javi. Ha'e rami vy ha'e katy oo, kuaray oua katy. Ha'e rami py mokoïve oja'o joe gui.

¹² Abrão ma Canaã yvy re ae opyta. Ha'e rã Ló ma oo vy yvy joja porã reia re tetã ikuai va'e rupi oiko. Ha'e rami vy oo'i oguerova heravy Sodoma tetã peve.

¹³ Ha'e rã Sodoma pygua avakue ma heko vai va'e, SENHOR renonde ojejavypa ete va'e ikuai.

Abrão pe Canaã yvy ome'ẽ aguã re SENHOR ijayvuague

¹⁴ Ha'e gui Ló ojepe'a ma rire SENHOR aipoe'i Abrão pe:

— Ema'ẽ reia guive kuaray ijapu'a'ia katy, kuaray ipuku-a katy, oua katy ha'e oikea katy.

¹⁵ Mba'eta yvy rexâva'e ha'e javi 'rã ame'ẽmba ndevy, ha'e neramymino kuery pe voi, araka'e rã peve guarã.*

¹⁶ Amboeta 'rã neramymino kuery yvy ku'i hetaa rami. Amongue yvy ku'i oipapa kuaa va'e rire mae oipapa kuaa avi 'rãgue neramymino kuery.

¹⁷ Epu'ã ke, tereo ha'e eikuua pota kova'e yvy ipuku-a ha'e ipya rami, mba'eta ame'ẽmba 'rã ndevy — he'i.

¹⁸ Ha'e ramo Abrão ngoo'i oguerova heravy vy oiko carvalho yvyra ty Manre py oĩ va'e rexei'i ju oiko, Hebrôm tetã katy'i. Ha'e py ma teigüe ju ojapo altar SENHOR pe.

14

Irundy huvixa kuery peteñ nhiruñ re opu'ã okuapyague

¹ Ha'e jave py ma Sinar tetã pygua huvixa Anrafel, Elasar pygua huvixa Arioque, Elão pygua huvixa Quedorlaomer ha'e Goim pygua huvixa Tidal reve,

² ha'e kuery ma opu'ã okuapy Sodoma pygua huvixa Bera rovai, Gomorra pygua huvixa Birsa, Admá pygua huvixa Sinabe, Zeboim pygua huvixa Semeber ha'e Belá Zoar hery avi va'e pygua huvixa rovai.

³ Ha'e ramo ha'e va'e kuery ma Sidim regua yvyugua py ono'õmba okuapy, yupá he'ẽ ro va'e katy'i.

⁴ Ha'e kuery ma doze ma'etŷ re ma huvixa Quedorlaomer escravo ikuai rire treze ma'etŷ maa py nonhe'ẽ renduxevei.

⁵ Ha'e gui catorze ma'etŷa py Quedorlaomer ou, guexeveguia huvixa kuery reve. Ha'e rami vy oitypa refaim kuery Asterote-Carnaim tetã py, ha'e gui zuzim kuery Hã py, emim kuery Savé-Quiriataim py,

⁶ ha'e horeu kuery ju oity Seir yvyty re, El-Parã regua tekaoa e'ŷa katy'i oĩ va'e peve.

⁷ Ha'e gui ma En-Mispate py ju ovaẽ (ha'e va'e ma Cades), ha'e rami vy oitypa amalequita ha'e amorreu kuery Hazazom-Tamar py ikuai va'ekue.

⁸ Ha'e ramo hovai opu'ã jogueravy Sodoma pygua huvixa, Gomorra pygua huvixa, Admá pygua huvixa, Zeboim pygua huvixa ha'e Belá Zoar va'e pygua huvixa. Ha'e kuery jogueraa Sidim regua yvyugua py huvixa kuery mboae rovai opu'ã aguã,

⁹ Elão pygua huvixa Quedorlaomer, Goim pygua huvixa Tidal, Sinar pygua huvixa Anrafel ha'e Elasar pygua huvixa Arioque rovai. Ha'e rami py irundy huvixa kuery opu'ã okuapy peteñ nhiruñ huvixa kuery rovai.

* 13:15 Gálatas 3.16

¹⁰ Ha'e gui Sidim regua yvyugua py ma heta oĩ yvykua oja va'e oĩa. Ha'e va'e rupi Sodoma ha'e Gomorra pygua huvixa kuery ojava vy amongue ho'a yvykua py, ha'e rã amboae kuery ma yvyty katy ojava.

¹¹ Ha'e rã hovaigua kuery ma oipe'apa Sodoma ha'e Gomorra pygua kuery mba'e rei-rei. Tembi'u voi ogueraapa vy oje'oipa ju.

Ló kuery ojopypaa heravyague

¹² Ha'e kuery ogueraa avi Abrão ryvy ra'y Ló, Sodoma tetã py oikoague gui. Hymba kuery voi ogueraapa.

¹³ Ha'e ramo peteĩ oo jepe va'ekue ou vy omombe'u Abrão hebreu va'e pe, Manre regua carvalho ty katy'i oikoa py. Manre ma amorreu oiko raka'e, Escol ha'e Aner ruvy. Ha'e va'e kuery ma Abrão reve nhomoirũ va'e ikuai.

¹⁴ Ha'e ramo Abrão ma tyvy ra'y ogueraa ague oendu vy omono'õmba guembiguai kuery hoo py itui'i va'ekue, opu'ã kuaa va'e trezentos e dezoito ikuai va'e. Ha'e rami vy amboae kuery rakykue oje'oi Dã peve.

¹⁵ Ha'e rami vy hembiguai kuery oja'o vy pyávy opu'ã okuapy amboae kuery rovai. Oitypa vy omonha Damasco yke ijaxua katy Hobá tetã oĩ va'e peve.

¹⁶ Ha'e rami vy oguerupa ju imba'e rei-rei. Ogueru avi guetarã Ló, imba'e rei-rei, kunhague ha'e hetarã kuery ha'e javive.

¹⁷ Ha'e gui Abrão ma huvixa Quedorlaomer ha'e hexeveguia huvixa kuery oitypaague gui ojevy ramo oĩa py Sodoma pygua huvixa ou ovaexí aguã Savé regua yvyugua, “Huvixa yvyugua” 'epy va'e py.

Melquisedeque Abrão ogueroayvu porãague

¹⁸ Ha'e gui oĩa py Salém pygua huvixa Melquisedeque ogueru mbojape ha'e vinho. Ha'e va'e ma sacerdote oiko Nhanderuete yvate ete va'e pegua.

¹⁹ Ha'e gui ogueroayvu porã Abrão. Ha'e vy aipoe'i:

— Abrão, tove Nhanderuete yvate ete va'e, yva ha'e yvy rerekaoa tanemoingo porã.

²⁰ Ha'e ta'ima'endu'a porãa Nhanderuete yvate ete va'e re, ndepo py nderovaigua kuery omboaxapa rire — he'i. Ha'e rami rã ixupe Abrão ome'ẽ dízimo ogueru va'ekue ha'e javi gui.*

²¹ Ha'e gui Sodoma pygua huvixa ju aipoe'i Abrão pe:

— Xevy pe eraa uka ju xeretã pygua kuery, ha'e rã nhomba'e rei-rei reru va'ekue ma ndevy guarã toĩ — he'i.

²² Ha'e rã Abrão ombovai:

— Aupi xepo SENHOR Nhanderuete yvate ete va'e, yva ha'e yvy rerekaoa pe.

²³ Ha'e rami vy aura mba'eve ajopy e'ŷ aguã nemba'e rei-rei gui, neĩ peteĩ nhimbo, neĩ xapatu xã, “Xee ame'ẽ ramo Abrão oguerekopa”, 're e'ŷ aguã.

²⁴ Mba'eve xee ndaipotai xejeupe guarã, mba'emo kunumigue ho'u va'ekue e'ŷ vy, ha'e xerupive oje'oi va'ekue Aner, Escol ha'e Manre pe reme'ẽ va'erã va'e anho. Tove ha'e kuery tojopy ojeupe guarã — he'i.

15

Nhanderuete Abrão ta'y aguã re ijayvuague

¹ Ha'e va'e rire SENHOR Abrão pe ojexa uka vy aipoe'i ixupe:

— Abrão, ekyje eme. Xee ma mba'emo vai jokoa aiko ndevy, ha'e ndevy guarã va'ekue heta 'rã ame'ẽ.

² Abrão ombovai:

— SENHOR Xeruete, mba'e tu ha'vy reme'ẽ 'rã, xera'y e'ŷ re ae aiko rã? Ha'e xero py mba'emo areko va'e aeja rã ojopy va'erã ma Damasco guigua Eliézer anho.

³ Aipoe'ive ju: — Xera'yrã nereme'ẽi rire mba'emo areko va'e xero py tembiguai itui'i va'ekue pe guarã rive opytapa.

* 14:20 Hebreus 7.17,21

- ⁴ Ha'e ramo SENHOR ombovai vy aipoe'i:
 — Ha'e va'e ma nemba'e jopyarā e'ŷ oiko. Ha'e rā ndegui oiko va'erā va'e ae ma 'rā ojopy — he'i.
- ⁵ Ha'e vy ogueraa oka py. Ha'e vy aipoe'i:
 — Ema'ẽ yva re, ha'e eipapa jaxy-tata ikuai va'e, reipapa aguã ha'eve ramo.*
 Aipoe'i avi: — Guĩ rami 'rā heta neramymimo kuery — he'i.
- ⁶ Ha'e ramo Abrão SENHOR re ojerovia ramo ixupe “Heko porā va'e” he'i.*
- ⁷ Ha'e gui SENHOR aipoe'ive ju:
 — Xee ma SENHOR Ur caldeu kuery retā gui roipe'a va'ekue, kova'e yvy nderekorā ame'ẽ aguã — he'i.
- ⁸ Abrão oporandu ixupe:
 — SENHOR Xeruete, mba'exa tu aikuaa 'rā anhetē kova'e yvy ajopy 'rāa?
- ⁹ Ombovai:
 — Eru xevy ha'vy peteĩ vaka kunha'i, peteĩ kavara ha'e peteĩ vexa'i ra'y, mboapy ma'etŷ oguereko va'e meme. Eru avi peteĩ pyku'i'i ha'e peteĩ apykaxu'i — he'i.
- ¹⁰ Ha'e ramo Abrão mymba ha'e javi ogueru vy oipe'ãmba mbyte rupi. Onhono porā'i ipêgue, peteĩ-teĩ joexe-exei'i. Ha'e rā guyra'i ma noipe'âi.
- ¹¹ Xapirê kuery mba'emo re'õgue áry oguejy ramo Abrão omondyi.

Abrão reve Nhanderuete ngupive guarã ojapoague

- ¹² Ka'aru rai'i ma jave Abrão hopeyi vaipa, ha'e oendu avi okyje vaipaa, pytū vai ete ramo.
- ¹³ Ha'e ramo SENHOR aipoe'i ixupe:
 — Reikuua pota pova'e re, mba'eta neramymimo kuery joyvy rupi oguata rei 'rā. Escravo ikuai aguã rami ojopya 'rā. Ha'e gui ombojexavaia 'rā quatrocentos ma'etŷ re.
- ¹⁴ Ha'e rami teĩ hereko kuery ma xee ju amoingo axy 'rā. Ha'e va'e rire ojepe'apa 'rā ha'e gui, imba'e rei-reipa reve.*
- ¹⁵ Ha'e rā ndee ma reo porā 'rā neramoĩ kuerya py. Ha'e ramo nenhono porā'a 'rā ndetuja'i ete jave.
- ¹⁶ Ha'e gui neramymimo kuery irundykuea mae ma ikuai va'e ojevy 'rā apy, mba'eta ndopai teri apyqua amorreu kuery heko vai aguã — he'i.
- ¹⁷ Kuaray oike ma ramo pytū vaipa ete. Ha'e gui ojekuaa peteĩ tapyĩ ryru hataxĩ opu'ã oinya va'e, ha'e peteĩ takua ryxa rendy mymba pêgue ikuai va'e mbyte rupi oaxa oiny va'e.
- ¹⁸ Ha'e va'e árave Abrão reve SENHOR ojapo ngupive guarã. Ha'e vy aipoe'i:
 — Ha'e gui neramymimo kuery pe ae 'rā ame'ẽ kova'e yvy, Egito yakâ guive Eufrates yakâ guaxu peve,
- ¹⁹ queneu kuery ikuaria, quenezeu, cadmoneu,
- ²⁰ heteu, ferezeu, refaim,
- ²¹ amorreu, cananeu, gurgaseu ha'e jebuseu kuery ikuaria guive.

16

Sarai ha'e Agar rekokue oĩa

- ¹ Abrão ra'yxy Sarai ma imemby va'e'ŷ. Ha'e rami avi oguereko peteĩ guembiguai Egito guigua Agar hery va'e.
- ² Ha'e gui Sarai aipoe'i Abrão pe:
 — Xee ma Nhanderuete xeapo kyrî va'e areko e'ŷ aguã rami. Emenda ke xerembiguai re, ha'e va'e rupi xepi'arâ rami ndera'y aguã — he'i. Ha'e ramo Abrão onhe'ẽ rendu Sarai.
- ³ Ha'e rami vy ome Abrão-a py Sarai ogueraa guembiguai Egito guigua Agar, ome'ẽ ta'yxy jevyrâ. Ha'e va'e jave ma dez ma'etŷ re ma ikuai Canaã yvy re.

* 15:5 Romanos 4.18 * 15:6 Romanos 4.3,9,22, Gálatas 3.6, Tiago 2.23 * 15:14 Atos 7.6-7

⁴ Ha'e gui Agar reve Abrão jogueroke ramo oguereko kyrī va'e. Kyrī va'e oguereko maa oexa vy nda'ija'evei ma opatō ra'yxy re.

⁵ Ha'e ramo Sarai aipoe'i Abrão pe:

— Ndere ae toopa xemoximba reiague. Xee ma xerembiguai rerekoko aguā ame'ẽ rire kyrī va'e oguereko maa oexa vy nda'ija'evei xere. Tove SENHOR toikuaa pota xere rejapo va'ekue re.

⁶ Gua'yxy pe Abrão ombovai:

— Nerembiguai ma ndepo py oiko. Ereko ndee ae rerekoxea rami — he'i. Ha'e ramo Sarai guembiguai oguereko axy ramo ojava ixugui.

⁷ Ha'e gui SENHOR-a guigua anjo ojou tekao e'ŷa py peteŷ yvu rexei, Sur yvy katy tape oo va'e py.

⁸ Ha'e vy aipoe'i ixupe:

— Ndee Sarai rembiguai Agar, magui tu reju? Marā katy tu reo?

Ombovai:

— Xererekoa Sarai gui rima ajava — he'i.

⁹ Ha'e ramo anjo SENHOR-a guigua aipoe'i ixupe:

— Ejevy ju ndererekooa py, ha'e enhemo'yvyi'li ipo py.

¹⁰ Anjo aipoe'ive ju:

— Xee amboeta ete 'rā neremiarirō kuery, avave rei oipapa kuaa aguā rami e'ŷ.

¹¹ Anjo aipoe'ive ju:

— Rerekoo 'rā kyrī va'e, ava'i 'rā reikuavā. Remboery 'rā Ismael, rejexavaia gui SENHOR ndereraa jepe rire.*

¹² Ha'e va'e ma avakue oikuaa rā mburika ka'aguy regua rami 'rā oiko, mba'eta opu'ā 'rā pavē re, ha'e rā hexe ma pavē 'rā opu'ā avi. Oiko 'rā guyvy kuery rovaigua — he'i.

¹³ Ha'e ramo Agar ma SENHOR hexeve ijayvu rire ojapukai hery rupi. Ha'e vy aipoe'i:

— Ndee ma Xeruete rexa va'e — he'i. Mba'eta aipoe'i: “Xee ri ty'y apy ha'eve xerexaa aexa aguā?” he'i vy.

¹⁴ Ha'e nunga rupi ha'e va'e ygua hery Beer-Laai-Roi. Cades ha'e Berede mbyte re opyta.†

Ismael itui'iague

¹⁵ Ha'e gui Agar oguereko'i Abrão ra'y. Ha'e rā Abrão Agar re ta'yague omboery Ismael.

¹⁶ Oitenta e seis ma'etŷ re ma Abrão oiko jave Agar ta'y Ismael re.

17

Nhanderuete Abrão rery oguerovaague

¹ Abrão noventa e nove ma'etŷ oguereko py SENHOR ojexa uka ixupe. Ha'e vy aipoe'i:

— Xee ma Nderuete xepo'akapa va'e. Eiko ke xerenonde opa mba'e py nderekoo porāa rupi.

² Ha'e ramo ndereve ajapo 'rā xerupive guarā, ha'e rami vy amboeta 'rā neramymino kuery — he'i.

³ Ha'e ramo Abrão guenapy'ā re oī, ngova yvy re omovaē. Nhanderuete aipoe'i ixupe:

⁴ — Xerupive guarā ndereve ajapo rire ndee reiko 'rā mbovy e'ŷ regua ikuai va'e ru.

⁵ Ha'e nunga rupi Abrão ve'ŷ ma 'rā nderery, ha'e rā Abraão, mbovy e'ŷ regua rurā romoingo rire.*

⁶ Xee romboeta ete 'rā neramymino kuery. Ndegui 'rā amoingo joegua e'ŷ-e'ŷ, huvixa kuery guive.

⁷ Xerupive guarā ndereve jypy'i ajapo va'ekue ma aikuua uka 'rā neramymino kuery pe ha'e kuery ikuai jevy-jevy rā guarā, raka'eve rā. Ha'e rami vy Nderuete aiko aguā, ha'e gui neramymino kuery Ruete guive.

* 16:11 Tery Ismael ma “Nhanderuete oendu va'e” 'ea. † 16:14 Tery Beer-Laai-Roi ma “Hekove va'e xerexaaty ygua” 'ea. * 17:5 Tery Abraão ma “Heta regua ru” 'ea (Romanos 4.17).

⁸ Ndevy ha'e neramymino kuery pe ame'ẽ 'rã yvy reguata reikovyague. Ha'e kuery pegua itui Canaã yvy ha'e javi, raka'e rã guarã. Ha'e xee aiko 'rã ha'e kuery Ruete.

Opire omboi uka aguã oejaas ague

⁹ Nhanderuete aipoe'ive ju Abraão pe:

— Ndee ha'e neramymino kuery pendekuai 'rã xereve guarã ajapo va'e rupi, ha'e kuery ikuai nhavõ ha'e rami ae ta'ikuai.

¹⁰ Po rami ma xereve guarã ajapo, ha'e va'e rupi peẽ ha'e neramymino kuery pendekuai aguã: Pemboi 'rã avakue'i penembyte oiko va'e ha'e javi pire.

¹¹ Pendero'o pire ae 'rã pemboi. Ha'e nunga ma xereve guarã ajapo va'e rupi pendekuaia kuaa ukaarã oĩ.

¹² Penembyte oiko va'e oito ára oguerekao py pemboi 'rã ipire: avakue pende kuery regua ha'e penerembiguai ra'y kuery pendo py oiko va'ekue, yvy mboae guigua pejogua va'ekue guive, penderegua ae e'ŷ tei.

¹³ Pemboi 'rã pendero py itui'i va'ekue ha'e pendeperáta re pejogua va'ekue pire. Ha'e rami py xereve guarã ajapo va'ekue kuaa ukaarã oĩ 'rã pendero'o re, raka'e rã peve guarã.

¹⁴ Ha'e rã ngo'o pire omboi uka e'ŷ va'e ma oipe'aa 'rã pende kuery mbyte gui, xereve guarã ajapo va'ekue rupi e'ŷ oiko ramo.

Sarai rery ju Nhanderuete oguerovaague

¹⁵ Nhanderuete aipoe'i Abraão pe:

— Ndera'yxy Sarai pe ma “Sarai” 'ereve eme, ha'e rã “Sara” ju 'rã renoi.†

¹⁶ Mba'eta amoingo porã vy ajapo 'rã nderayrã oguerekoo aguã rami. Anhetẽ amoingo porã ramo ixugui joegua e'ŷ-e'ŷ 'rã ikuai, huvixa kuery guive — he'i.

¹⁷ Ha'e ramo Abraão guenapy'ã re oĩ vy yvy re ngova omovaẽ. Ha'e vy hory vy aipoe'i ojeupe:

— Ava cem ma'etŷ ma oguerekoo va'e nda'u ta'y 'rã ri? Ha'vy Sara nda'u imemby nho 'rã, noventa ma'etŷ ma oguerekoo va'eri? — he'i ojeupe.

¹⁸ Ha'e gui Nhanderuete pe ju Abraão aipoe'i:

— Ismael ae oiko 'rãgue nerendirne rupi — he'i.

¹⁹ Nhanderuete ombovai:

— Ndera'yxy Sara ae 'rã oguerekoo nderay. Ha'e va'e remboery 'rã Isaue. Ixupe ae 'rã amoï atã xereve guarã ajapo va'ekue, hamymino kuery raka'eve rã ikuai va'erã va'e peguarã.

²⁰ Ha'e rami avi aendu avi Ismael re ndeayvu rã. Amoingo porã avi 'rã, ha'e ajapo 'rã ta'y reta aguã rami. Ta'y kuery ma doze huvixa 'rã ikuai. Ixugui amoingo 'rã peteĩ regua hetate ikuai va'e.

²¹ Ha'e rã xereve guarã ajapo va'ekue ma Isaue pe ae ju 'rã amoï atã. Ha'e va'e ma peteĩ ma'etŷa py kova'e ára ojeupity ju jave Sara oguerekoo 'rã nderayrã — he'i.

²² Ha'e gui Abraão reve Nhanderuete ijayvupa ma vy ojeupi ovy ha'e gui.

Opire omboi ukapaa okuapyague

²³ Ha'e va'e árave Abraão ogueru ruka gua'y Ismael, guembiguai kuery ha'e pygua ae ha'e peráta re ojogua va'ekue ha'e javi. Avakue hoo py ikuai va'e ha'e javive omboatypa vy omboi peteĩ-tei pire, Nhanderuete aipoe'iague rami vy.

²⁴ Abraão noventa e nove ma'etŷ oguerekoo reve opire omboi uka raka'e.

²⁵ Ta'y Ismael ma treze ma'etŷ oguerekoo jave omboi ipire.

²⁶ Peteĩ ára pyve Abraão ta'y Ismael reve omboi uka okuapy opire.

²⁷ Avakue hoo py ikuai va'e ma guive rã opire omboi ukapa, tembiguai kuery ha'e pygua ae, ha'e yvy mboae gui peráta re ojogua pyre guive.

† 17:15 Tery Sara ma “Huvixave rajy” 'ea.

¹ Ha'e gui Manre py Abraão pe SENHOR ojexá uka ju yvyra carvalho ty oĩ va'e rexei'i, hakuve ma jave ngoo'i rokẽ py oguapy oiny jave.

² Abraão oma'ẽ vy oexá mboapy avakue henonde hi'aĩ ra'e ramo. Oexá vy ngoo'i rokẽ gui onha ový ovaexí aguã.* Guenapy'ã re oĩ, ngova yvy re omovaẽ rei reve.

³ Ha'e vy aipoe'i:

— Xe-Senhor, rejou porã ri ramo ajerure reaxa rive e'ŷ aguã xee nerembiguaia gui.

⁴ Taru ruka yy pendepy pejoi aguã.† Pepytu'u ranhe kova'e yvyra guy py.

⁵ Aru ruka 'rã mbojape'i. Pe'u ke, penembaraeteve, ore kuery penembiguaia py pevaẽ ma vy. Ha'e gui mae ma ha'eve peove aguã — he'i.

Ha'e kuery ombovai vy

— Ejapo ha'vy ndeayvuague — he'i okuapy.

⁶ Ha'e ramo Abraão ojapyra ový oo'i Sara oĩa py. Ha'e vy aipoe'i:

— Emoakŷ pojava na mboapy ryru trigo iporâve va'e mbojaperã, ha'e exy ju tanhimbu py — he'i.

⁷ Ha'e gui Abraão ma mymba kora katy ju onha ový. Peteĩ vaka ra'y ikyra porã va'e ojopy vy ome'ẽ omongakua va'ekue pe oguereko katu pojava aguã.

⁸ Ogueru avi kamby kekue ha'e oke e'ŷ va'e, ha'e gui vaka ro'o oexy uka va'ekue. Ha'e rami vy ipoua kuery renonde omoimba. Oarõ ho'amy ha'e kuerya py yvyra guy py okaru okuapy ramo.

⁹ Ha'e ramo ha'e kuery oporandu ixupe:

— Nderayxy Sara mamo tu oĩ?

Ombovai:

— Opy ri hiny — he'i.

¹⁰ Ha'e kuery regua peteĩ va'e aipoe'i:

— Aŷ ma peteĩ ma'etŷa py ma aju ete ju 'rã ndea py. Ha'e ramo nderayxy Sara oguereko 'rã ava'i — he'i. Ha'e rami jave Sara oendu oo'i rokẽ py ha'e kuery rakykue katy.

¹¹ Abraão ha'e Sara ma tujakue'i ete ma ikuai. Sara voi ndoikovei ma gueko re.

¹² Ha'e gui Sara ha'e nunga oendu vy hory oiny opy'a py. Ha'e vy aipoe'i ojeupe ae:

— Xeguaigu'i ete ma, ha'e xeme voi tuja'i ma va'eri, ha'e rami teĩ nhi'ã avy'a nho 'rã ri? — he'i.

¹³ SENHOR aipoe'i Abraão pe:

— Mba'e re tu Sara hory rei reve ri aipoe'i: "Anhetẽ ete ri nda'u areko'i teri 'rã kyrĩ va'e, xeguaigu'i ma rire?" he'i?

¹⁴ Nhanderuete pe nda'u oiko 'rã ri mba'emo haxy ete va'e ojapo aguã? Peteĩ ma'etŷa py kova'e ára ojeupity jevy jave 'rãe aju ndea py, ha'e Sara oguereko 'rã kyrĩ va'e — he'i.*

¹⁵ Ha'e rami rã Sara okyje vy onhenhomí. Ha'e vy aipoe'i:

— Ndaxeroryi rima ainy.

Ha'e rã ha'e va'e ma ombovai:

— Any, anhetẽ nderory kuri — he'i.

Sodoma ha'e Gomorra omomba aguã re Nhanderuete ijayvuague

¹⁶ Ha'e gui avakue opu'ãmba vy oo ha'e gui, Sodoma tetã katy oma'ẽ aguã. Abraão voi oo ranhe ha'e kuery rupive tape oexá uka aguã.

¹⁷ SENHOR aipoe'i ojeupe ae:

— Ndaikuaa ukai 'rã ri nda'u Abraão pe mba'e pa ajapo taa?

¹⁸ Mba'eta Abraão gui ma oiko 'rã peteĩ regua hetá ha'e imbaraete va'e. Ha'e hexe vy yvy jave regua ha'e javi 'rã amoingo porã.*

* ^{18:2} Mboapy avakue ovaẽ va'e regua mokoĩ ma anjo ikuai (19.1), ha'e rã amboae ma SENHOR ae, ha'e'ŷ vy anjo ikuaa ukaa (versículos 1, 17, 20, 22). † ^{18:4} Ha'e kuery reko rami vy oo py ipoua kuery ovaẽ ramo hoo va'e omovaẽ vy ogueru ruka 'rã yy opy ojoi aguã, tape rupi yvy ku'i rupi ou rire (19.2, 24.32, 43.24, Juízes 19.21, Lucas 7.44, João 13.1-14). * ^{18:14} Romanos 9.9

* ^{18:18} Gálatas 3.8

¹⁹ Mba'eta xee aiporavo ha'e ombo'e aguã gua'y kuery ha'e guamymino kuery araka'eve rã guarã xee aipotaa rami ikuai aguã re, teko porã ha'e ha'eve ramigua anho ojapo aguã. Ha'e nunga rupi Abraão pe xee SENHOR ajapo 'rã hekorã re xeayvuague — he'i.

²⁰ SENHOR aipoe'ive ju:

— Sodoma ha'e Gomorra pygua kuery reko re opa marã ayvua rã aendu. Ha'e kuery ojejavypave tema oje'oivy.

²¹ Ha'e nunga rupi avaẽ 'rã aexa aguã anhetẽ pa aendua rami ha'e kuery ikuiaia. Ha'e rami e'ŷ rã aikuua avi 'rã.

Nhanderuete pe Abraão ojerureague

²² Ha'e gui ha'e va'e avakue oje'oi Sodoma tetã katy. Ha'e rã Abraão ma SENHOR renonde teri oĩ.

²³ Ha'e rami vy hexe onhemboja vy aipoe'i:

— Heko vai va'e remombaa py remomba avi 'rã teve heko porã va'e?

²⁴ Xapy'a rei tetã py cinqüenta heko porã va'e ikuai teĩ nda'u remomba nho 'rã tetã? Cinqüenta heko porã va'e remboaxya nda'u nerendui 'rã tetã remomba e'ŷ aguã?

²⁵ Ejapo eme ha'e rami, heko vai va'e rejukaa py ejukapa avi eme heko porã va'e, heko vai va'e opaa rami ae avi heko porã va'e opa e'ŷ aguã. Tove ha'e ramigua toiko eme. Ndee yvy jave re ikuai va'e rerekaoa reiko va'e ha'eve e'ŷa rami teve 'rã rejogueroko? — he'i.

²⁶ Ha'e ramo SENHOR ombovai:

— Ha'e gui Sodoma py cinqüenta heko porã va'e ajou ri vy ha'e kuery re vy amboaxy 'rã tetã ha'e javi — he'i.

²⁷ Ha'e gui Abraão aipoe'ive ju:

— Taxepy'a guaxu xeayvuve aguã Xeruete reve, yvy ku'i, tanhimbu guigua aiko va'eri.

²⁸ Xapy'a rei heko porã va'e cinqüenta aguã peteĩ nhirũi'i ri oata ramo remomba nho 'rã teve tetã?

Ombovai:

— Quarenta e cinco ri ha'e py ajou vy namombai 'rã tetã — he'i.

²⁹ Abraão aipoe'ive ju:

— Ha'e gui xapy'a rei quarenta ri ikuai ramo ha'vy?

Ombovai:

— Quarenta ikuai va'e re vy namombai 'rã — he'i.

³⁰ Oporanduve ju:

— Ejou vai eme ke SENHOR, xeayvuve ju taa. Ha'vy trinta ikuai ramo ha'e py?

SENHOR ombovai:

— Trinta heko porã va'e ha'e py ajou vy namombai 'rã — he'i.

³¹ Abraão ijayvuve tema:

— SENHOR reve xeayvuve ta. Ha'vy vinte ete'i ri ikuai ramo ha'e py?

SENHOR ombovai:

— Namombai 'rã vinte ikuai va'e re vy — he'i.

³² Abraão aipoe'ive ju:

— Ejou vai eme ke SENHOR, teĩgue ju xeayvu taa. Ha'vy dez heko porã va'e ikuai ramo?

SENHOR ombovai:

— Dez-'i ikuai va'e re vy namombai 'rã — he'i.

³³ Abraão ijayvupa ma ramo SENHOR ojepe'a ov. Ha'e rã Abraão ma ngoo katy ju ojevy.

19

Ló mokoĩ anjo omovaẽague

¹ Pytũ'i ov yave mokoĩ anjo ovaẽ Sodoma py. Ha'e jave py Ló oguapy oiny tetã py oikea py. Anjo kuery ou rã oexa vy opu'ã ov yave ovaexi aguã. Ovaexi vy guenapy'ã re oĩ, yvy re ngova omovaẽ oiny.

² Ha'e vy aipoe'i:

— Aŷ ma xeruvixa kuery, pevaẽ ke xee penerembiguai ro py pendepy pejoi ha'e peke aguã. Ko'ẽ rã aje'ive'i mae ma peguatave ju 'rã.

Ha'e kuery ombovai:

— Ha'e rami avi tetā mbyte py rive roke teĩ ha'eve — he'i.

³ Ló onhea'ã ete ramo mae ma jogueraa hoo py oke aguã. Ha'e ramo omongaru, mbojape ombovu e'ŷ re oexy uka vy. Ha'e ramo ha'e kuery okaru.

⁴ Onhenomba e'ŷ re Sodoma tetā pygua avakue jogueru vy ombojere okuapy oo. Kunumigue ha'e tujakue ou okuapy opa rupi gui.

⁵ Ha'e rami vy Ló pe ojapukai vy aipoe'i okuapy:

— Mamo tu ikuai avakue pytū'i jave ndero py ovaẽ va'ekue? Eru oka katy rojavyky rei aguã — he'i okuapy.

⁶ Ha'e ramo Ló anho oẽ ha'e kuerya py, ha'e omboty okẽ.

⁷ Ha'e vy aipoe'i:

— Xeretarã kuery, ajerure pejapo vai e'ŷ aguã.

⁸ Ma'ẽ, mokoĩ xerajy kunhataĩgue areko xero py. Ha'e va'e kuery ma aru ta perekoxea rami perek aguã. Ha'e rã ha'e va'e avakue pe ma pejapo vai eme, xero py amovaẽ rire.

⁹ Ha'e rã ha'e kuery aipoe'i:

— Ejep'e ke upe gui!

Ha'e gui joupe-upe ju ijayvu:

— Amboae yvy guigua nhanderekoa py ou va'ekue ri oikuua potaxe nhandere. Ha'e nunga rupi hexe tema ngoo py omovaẽ va'ekue gui jajapo vaive 'rã — he'i okuapy. Ha'e vy Ló omboty rei jogueruvy, ha'e omboixe okẽ.

¹⁰ Ha'e ramo ngopy avakue ikuiai gui okuave'ẽ vy ojopy Ló, omoinge ju opy. Ha'e rami vy omboty ju okẽ.

¹¹ Ha'e gui oexa mboguepa oka py ikuai va'e, kyrigueve ha'e tujakueve. Ha'e ramo okẽ rekaa rupi rive ikuai ikane'õmba peve.

¹² Ha'e gui mokoĩ ava aipoe'i Ló pe:

— Apy rerekove pa ndero pygua kuery? Nderajy me kuery, ndera'y kuery, nderajy kuery pa ikuai? Mba'eta rerekova'e ma guive rã eraapa ke tetā gui.

¹³ Mba'eta ore romomba ta kova'e tetā. Apygua kuery reko vaia omombe'ua rã SENHOR renonde peve onhendu. Ha'e ramo SENHOR oremboi romomba aguã — he'i.

¹⁴ Ha'e ramo Ló oo vy guajy me kuery pe omombe'u. Ha'e vy aipoe'i:

— Pepu'ã ke, pejepe'a apy gui. SENHOR omomba ta kova'e tetā — he'i teĩ tajy me kuery "Horyai vy po" he'i okuapy.

¹⁵ Ko'ẽmba ramove anjo kuery peteĩgue ju ijayvu Ló pe. Ha'e vy aipoe'i:

— Epu'ã ke, erojava heravy nderajy mokoïve rerekova'e, tetā okanhya rã pekanhy e'ŷ aguã — he'i.

¹⁶ Ha'e rami teĩ heko mbegue ramo avakue ojopy ipo re ogueraa, ta'yxy ha'e tajy kuery mokoïve reve. SENHOR omboaxy ramo ogueraa tetā roka peve.

¹⁷ Mombyry'i ma ogueraa maa py anjo kuery va'e regua aipoe'i ixupe:

— Penhave tema, tapeo jepe. Pema'ẽ eme penderakykue re, ha'e yvy joja porã reia rupi peaxapa e'ŷ teria ja pepyta eme. Yvy'ã re tapeo pekanhy e'ŷ aguã — he'i.

¹⁸ Ha'e rã Ló ombovai vy aipoe'i:

— Ha'e rami ma nda'evei xeruvixa.

¹⁹ Ndee ma xemboaxy vy xepytyvõ ete kuri xereraa jepe vy. Ha'e rami avi nda'evei yvy'ã re aa aguã. Akyje aa reve mba'emo vai xerupity ramo aiko vai gui.

²⁰ Pe'i py oĩ tekao mboae. Ha'e va'e katy taa, mba'eta ndatuvixai. Tove ha'e katy taa, kyr'i ete ramo. Ha'e py ma xerekove reve 'rã aiko — he'i.

²¹ Ha'e rami rã ha'e kuery ombovai:

— Ha'eve ri. Ore norombai 'rã tekao ndeayvuague.

²² Tereo pojava ha'e py reiko aguã. Mba'eve rei ndajapoi 'rã ha'e py revaẽ e'ŷa ja — he'i. Ha'e rami rire ha'e va'e tetā omboerya Zoar.*

* 19:22 Tery Zoar ma "Kyr'i va'e" 'ea.

Sodoma ha'e Gomorra omombaa ague

- ²³ Kuaray yvate'i ma ovv jave Ló ovaẽ Zoar tekoā py.
- ²⁴ Ha'e rã Sodoma ha'e Gomorra áry ma SENHOR ombou enxofre ha'e tata, ixuguigua ae ho'a yva gui.
- ²⁵ Ha'e rami vy omomba ete tetã, ha'e ha'e katy'i yvy joja porã reia ha'e javi. Tetã py ikuai va'ekue omomba, mba'emo yvy re henhoĩ va'e ha'e javi reve.
- ²⁶ Ha'e gui Ló ra'yxy ma guakykue re oma'ẽ vy juky guigua opyta ho'amy.
- ²⁷ Ha'e gui Abraão ma ko'ẽ e'ŷ re opu'ã vy oo SENHOR renonde oĩague py.
- ²⁸ Sodoma ha'e Gomorra tetã katy oma'ẽ ho'amy. Ha'e vy oexa rã yvy joja porã reia ha'e javi gui hataxí opu'ã ovv, tata rupa gui hataxí opu'ãa rami.
- ²⁹ Yvy joja porã reia re tetã ikuai va'ekue Nhanderuete omomba teĩ Abraão re ima'endu'a vy ogueraa jefe ta'y kyrĩ Ló hetã omomba ta va'e mbyte gui.

Moabita ha'e amonita kuery ypy rekokue oĩa

- ³⁰ Ha'e gui Zoar tekoā py Ló oikoxe teĩ okyje vy ojepe'a ju ha'e gui, guajy mokoĩve reve. Yvy'ã re ju oo, ha'e peteĩ itakua oĩ va'e py ikuai guajy kuery reve.
- ³¹ Ha'e gui tajy guaiguĩve va'e aipoe'i kyrĩve va'e pe:
- Nhanderu ma tuja'i ma, ha'e jipoī avakue kova'e yvy re nhanemerã ikuai va'e, nhanderekorã va'ekue rami vy nhamenda aguã.
- ³² Jaa, nhamboy'u vinho py. Ha'e gui nhanheno hexeve, nhanderu gui ae nhanememby aguã ta'yrã — he'i.
- ³³ Ha'e rami vy ha'e va'e pyávy nguu pe ome'ẽ vinho oy'u aguã. Ha'e gui guaiguĩve va'e ovaẽ vy nguu reve onhenen oikuua e'ŷ re. Tajy onhenen rã noendui, neĩ opu'ã jevy ramo voi noendui.
- ³⁴ Ha'e gui ko'ẽgue guaiguĩve va'e aipoe'i kyrĩve va'e pe:
- Kuee pyávy xee anhenen va'ekue xeru reve. Ha'e gui kova'e pyávy ha'ekue rami ju jajapo vinho oy'u aguã. Ha'e gui ndee ju evaẽ enheno hexeve, ixugui nhanememby aguã ta'yrã — he'i.
- ³⁵ Ha'e va'e pyávy ha'ekue rami ae ju nguu pe vinho ome'ẽ oy'u aguã. Ha'e gui tajy kyrĩve va'e ju ovaẽ vy onhenen nguu reve oikuua e'ŷ re. Onhenen rã tuu noendui, neĩ opu'ã ramo voi ndoikuuai.
- ³⁶ Ha'e rami py Ló rajy kuery mokoĩve nguu gui ae imemby.
- ³⁷ Guaguĩve va'e ma peteĩ ava'i oikuavã vy omboery Moabe. Ha'e va'e ramymino kuery ma Moabe pygua kuery aŷ peve ikuai va'e.
- ³⁸ Ha'e gui kyrĩve va'e voi peteĩ ava'i oikuavã avi vy omboery Ben-Ami. Ha'e va'e ramymino kuery ma Amom pygua kuery aŷ peve ikuai va'e.

20

Gerar py Abraão ha'e Sara ikuai jave guare

- ¹ Abraão guekoa gui oẽ vy Neguebe yvy katy ju oo. Ha'e py ju oiko Cades ha'e Sur mbyte re, Gerar py ae.
- ² Gua'yxy Sara pe "Xereindy" he'i ramo Gerar pygua huvixa Abimeleque ogueru ruka.
- ³ Pyávy Abimeleque oexa ra'u rã Nhanderuete ojexa uka. Ha'e vy aipoe'i ixupe:
- Kunha va'e reipe'a ramo rombopaga 'rã remano peve, omenda va'e ramo — he'i.
- ⁴ Ha'e jave kunha va'e reve Abimeleque ndajoguerekoi teri. Ha'e rami vy aipoe'i:
- SENHOR, rejuka ta va'e ty'y heko porã va'e?
- ⁵ Mba'eta ime ae "Xereindy" he'i, ha'e kunha va'e voi ixupe "Xekyvy" he'i. Ha'e nunga rupi rima xee potae vy e'ŷ ajapo, ajapo vaixe vy e'ŷ — he'i.
- ⁶ Nhanderuete ombovai oexa ra'u rã:
- Aikuua porã potae vy e'ŷ rejapoague. Ha'e nunga rupi ae xee rojoko xerovai rejajavy e'ŷ aguã, ha'e kunha va'e reve rejoguerekoi e'ŷ aguã.

⁷ Aŷ ma eraa ju imea py, mba'eta profeta oiko. Ha'e ma ndere ojerure ramo reikove 'rã. Ha'e rami avi ime pe kunha va'e ndereraai ju ri vy reikuua anhetē ete remano 'rãa, nerembiguai kuery ha'e javi reve – he'i.

⁸ Ko'ẽ rai'i jave Abimeleque opu'ã vy oenoimba guembiguai kuery, ha'e vy omombe'upa. Ha'e ramo avakue oendu vy onhemondyipa okuapy.

⁹ Ha'e gui Abimeleque oenoĩ uka Abraão. Ha'e vy aipoe'i ixupe:

— Mba'e tu rejapo orere? Mba'e nunga py tu ajejavvy ndevy? Mba'eta ha'e rami ete ndee xererojejavy ha'e xerembiguai kuery guive. Nda'evei va'e rejapo va'ekue xere.

¹⁰ Mba'exa tu renhembopy'a ha'e nunga rejapo aguã? — he'i Abraão pe.

¹¹ Abraão ombovai:

— Mba'eta xee ma xejeupe ae aipoa'e: “Kova'e tekoia pygua kuery ma Nhanderuete renonde ojererokyjea rupi e'ŷ ikuai vy xejuka 'rã xera'yxy káuxa”, ha'e va'ekue.

¹² Ha'e rami avi anhetē ae xereindy oiko, xeru rajy oiko vy, va'eri ha'i memby e'ŷ ta'vy oiko. Ha'e rami vy rima hexe amenda karamboae.

¹³ Ha'e nunga rupi aguata-guata aguã xeru ro gui Nhanderuete xemondouka jave aipoa'e va'ekue xera'yxy pe: “Po rami 'rã ndee xepytyvõ nhavaõa nhavõ rupi, Xevy ‘Xekyvy’ re 'rã”, ha'e va'ekue ixupe.

¹⁴ Ha'e rami rã ixupe Abimeleque ogueru ruka vexa'i, vaka, ha'e tembiguai kuery avakue ha'e kunhague, omboaxapa Abraão pe. Ta'yxy Sara avi omboaxa ju ime pe.

¹⁵ Ha'e vy Abimeleque aipoe'i:

— Xeyvy ha'e javi ma nerondenon itui. Eĩ tema reĩxeia py rei — he'i.

¹⁶ Ha'e gui Sara pe ju aipoe'i:

— Ma'lẽ, ndekyvy pe ame'ẽ ta mil hatã'i va'e prata guigua, ndere oiko va'ekue ha'e javi rekovia. Ha'e ramo pavõ oikuua 'rã nderekoo porã va'ea — he'i.

¹⁷ Ha'e gui Abraão ojerure ramo Nhanderuete omonguera Abimeleque, ta'yxy ha'e hembiguai kuery, ta'y jevy aguã rami.

¹⁸ Mba'eta Abraão ra'yxy Sara káuxa SENHOR ojapo rire kunhague Abimeleque ro py ikuai va'e ha'e javi imemby ve'ŷ aguã rami.

21

Isaque itui'iague

¹ SENHOR ijayvuague ramo vy Sara pe ojekuaa uka vy ojapo ijayvuague.

² Ha'e ramo Sara oguerekoo'i, ha'e vy oikuavã peteĩ ava'i. Nhanderuete oa'angaague ára py ae Abraão tuja'i ma va'eri ta'y, SENHOR ijayvuague ramo vy.

³ Sara pi'a'i itui'i va'ekue Abraão omboery Isaque.

⁴ Ta'y Isaque oito ára oguerekoo py Abraão omboi ipire, Nhanderuete ojapo ukaague ramo vy ae.

⁵ Abraão cem ma'etŷ ma oguerekoo ta'y Isaque oiko jave.

⁶ Ha'e gui Sara aipoe'i:

— Aŷ ma Nhanderuete xeapo xerory ju aguã rami. Ha'e ramo pavõ ha'e nunga oendu vy hory avi 'rã xererovy'a vy.

⁷ Avave rei noexa'ái va'ekue xee Sara amokambu'i aguã re xepi'a'i Abraão ra'y, tuja'i vaipa ma va'eri ta'vy — he'i.

Tekoa e'ŷa rupi Agar oguata jave guare

⁸ Ava'i Isaque tuvixa ovv vy nokambuvei. Ha'e ramo nokambuveia ára Abraão ojapo peteĩ ngaru tuvixa va'e.

⁹ Ha'e va'e javeguia py oĩ avi Egito guigua Agar pi'a, Abraão ra'y mboae va'e. Ha'e va'e ma ojojai rei Isaque. Ha'e nunga Sara oexa vy

¹⁰ aipoe'i Abraão pe:

— Emondouka na peva'e tembiguai ipi'a reve. Nda'evei ipi'a mba'emo reja va'e ojopy avi aguã xepi'a Isaque reve — he'i.*

* 21:10 Gálatas 4.30

- ¹¹ Ha'e nunga Abraão oendu vy nda'evei gua'y jypygu re.
- ¹² Ha'e rami teĩ Nhanderuete aipoe'i Abraão pe:
— Ndeporiau eme nder'a'y ha'e ixy nerembiguai re oiko va'e re. Endu ke nder'a'xy Sara ijayvua ha'e javi, mba'eta Isaque ramymino kuery pe ae 'rã "Abraão ramymino kuery" 'ea.*
- ¹³ Ha'e gui nerembiguai pi'a ramymino kuery voi amboeta 'rã, nder'a'y oiko avi ramo — he'i.
- ¹⁴ Ha'e ramo ko'ẽ e'ŷ mbove Abraão opu'ã vy Agar pe ome'ẽ mbojape ha'e peteĩ hyru yy. Ikupe re omoĩ. Ixupe omboaxa avi ipi'a'i. Ha'e rami vy omondouka. Ha'e ramo kunha va'e oo vy oguata rei oikovy Berseba katy tekao e'ŷa oĩ va'e rupi.
- ¹⁵ Ha'e gui yy hyru py opa ma ramo opi'a omonheno yvyra'i hi'aĩ va'e guy py.
- ¹⁶ Ha'e vy ojepe'a vy oo ava'i ituia gui mombyry'i, hu'y nhamombo ramo oguerovya rami peve, "Ava'i omano rã aexa aguã nda'evei" he'i vy. Ha'e rami vy ha'e py oguapy vy haxẽ reve ojae'o.
- ¹⁷ Ha'e gui Nhanderuete ma ava'i va'e haxẽ rã oendu. Ha'e rami vy yva gui Nhanderuetea guigua anjo oenoĩ Agar. Ha'e vy aipoe'i:
— Agar, mba'e tu rerek? Ekyje eme, mba'eta Nhanderuete oendu ava'i ituia py haxẽa.
- ¹⁸ Epu'ã ke, emopu'ã imo'amy ava'i ndepo py rejopy reve, mba'eta amboeta ete 'rã hamymino kuery — he'i.
- ¹⁹ Ha'e gui Nhanderuete kunha va'e rexo oipe'a ramo oexa peteĩ ygua. Ha'e py oo vy omonyẽ ju yryru, ha'e opi'a'i pe ome'ẽ oy'u aguã.
- ²⁰ Ava'i va'e tuja ov yv rã Nhanderuete oiko hexeve. Tekoa e'ŷa rupi oiko guyrapa ha'e hu'y revegua.
- ²¹ Parã yvy regua tekao e'ŷa rupi oiko. Ha'e gui ta'yxyrã ixy ojou peteĩ kunha Egito pygua.

Abimeleque reve Abraão peteĩ rami ikuai aguã ojapoague

- ²² Ha'e jave ma Abimeleque ha'e ojeupega xondaro ruvixa Ficol reve aipoe'i Abraão pe:
— Opa mba'e rejapoa py Nhanderuete oiko ndereve.
- ²³ Ha'e nunga rupi aŷve eura xevy Nhanderuete rery rupi, xevy ndeapu e'ŷ aguã, xera'y pe, neĩ xeramymino pe. Ndevy ajapo porãague rami xevy ju rejapo porã aguã, ha'e xeyvy re reikoague re voi — he'i.
- ²⁴ Abraão ombovai vy
— Aura 'rã — he'i.
- ²⁵ Ha'e rami teĩ Abimeleque pe Abraão ijayvu ete, hembiguai kuery peteĩ ygua oipe'a nhea'ã okuapyague re.
- ²⁶ Ha'e ramo Abimeleque ombovai:
— Xee ndaikuai mava'e pa ha'e ramigua ojapo. Avave rei ndoikuua ukaai teri xevy, neĩ ruxã'i ma voi naendui kova'e ára e'ŷ vy — he'i.
- ²⁷ Ha'e ramo Abimeleque reve Abraão ojapo peteĩ rami ikuai aguã. Ha'e rami vy vexa'i ha'e vaka ogueru vy ome'ẽ Abimeleque pe.
- ²⁸ Sete vexa'i kunha Abraão oiporavo vy mymba kuerya gui ha'e kuery ae'i ikuai aguã py omoĩ.
- ²⁹ Ha'e ramo Abimeleque oporandu Abraão pe:
— Mba'erã tu sete vexa'i ri reipe'a?
- ³⁰ Abraão ombovai:
— Xepo gui rejopy 'rã pee py sete vexa'i ikuai va'e, xee ae kova'e ygua ajo'o ukaague kuaa ukaarã — he'i.
- ³¹ Ha'e rami rire ha'e va'e henda hery Berseba, ha'e py oura okuapy rire.*
- ³² Ha'e rami vy peteĩ rami ikuai aguã re jogueroayvu Berseba py. Ha'e rire Abimeleque ha'e xondaro ruvixa Ficol opu'ã vy ojevypa ju filisteu kuery yvy katy.

* 21:12 Romanos 9.7, Hebreus 11.18 * 21:31 Tery Berseba ma "Ygua ouraague" 'ea.

³³ Berseba py Abraão onhotŷ tamargueira. Ha'e py ojapukai guive SENHOR Nhanderuete imarã e'ŷ va'e rery rupi.

³⁴ Filisteu kuery vyv re Abraão oiko are.

22

Nhanderuete Abraão oeko a'âague

¹ Ha'e va'e rire Nhanderuete oeko a'â Abraão. Ha'e vy
— Abraão — he'i ixupe.

Ombovai:

— Apy ma aî.

² Nhanderuete aipoe'i:

— Ejopy nderai'y peteï'i Isaque reayvu ete va'e, ha'e eraa Moriá vyv re. Ha'e py reme'ẽ 'rã xevy reapy vy, peteï vyty xee aexa uka va'erã áry — he'i.

³ Ha'e gui ko'ë e'ŷ mbove Abraão opu'â. Guymba mburika oguereko katupa ma vy ogueraa mokoï guembiguai, gua'y Isaque guive. Yxakã omboa'y uka omoendy aguã. Ha'e gui oo Nhanderuete aipoe'iague katy.

⁴ Mboapy ára ma ooa py Abraão oma'ẽ vy oexa ooxea mombyry gui.

⁵ Ha'e vy aipoe'i guembiguai kuery pe:

— Peẽ kuery orerarõ 'rã apy mburika'i reve. Ha'e rã xee ma kunumi va'e reve 'rã roo kii rami. Nhanderuete romboetepa ma vy rojevy ju 'rã peëa py — he'i.

⁶ Ha'e vy yxakã omoendy va'erã Abraão ojopy vy ombovoyi gua'y Isaque. Ha'e rã ta'y ma opo py ogueraa tata ha'e kyxe. Ha'e rami vy jogueraa.

⁷ Ooa rupi Isaque aipoe'i nguu Abraão pe:

— Xeru.

Ombovai:

— Apy ma aî xera'y.

Isaque oporandu:

— Apy ma tata, yxakã guive oï. Mamo tu oï vexa'i jajuka ha'e japy va'erã?

⁸ Ombovai:

— Xera'y, Nhanderuete ae 'rã ojou uka vexa'i japy va'erã — he'i. Ha'e gui oove tema joupive.

⁹ Ha'e gui ovaë ma Nhanderuete ijayvuague py. Ha'e py ma Abraão ojapo peteï altar SENHOR pe. Ha'e va'e áry omoï yxakã. Ha'e gui ojokua gua'y Isaque, ha'e altar áry omonheno yxakã oï va'e áry.

¹⁰ Opo omondouka vy ojopy kyxe gua'y ojuka aguã.

¹¹ Ha'e ramo anjo SENHOR-a guigua ijayvu nhendu yva gui. Ha'e vy aipoe'i:

— Abraão! Abraão!

ombovai vy

— Apy ma aî — he'i.

¹² Ha'e ramo aipoe'i:

— Eupi eme ndepo kunumi va'e rejuka aguã, mba'eve ejapo eme hexe. Mba'eta aŷ ma aikuaa Nhanderuete renonde rejererokyjea rupi reiko va'ea, nderai'y peteï'i va'e xevy nereme'ëxe e'ŷi rire — he'i.

¹³ Abraão guakykue katy oma'ẽ vy oexa peteï vexa'i guakua re ojejura oiny va'e jai rogue hi'aï va'e re. Ha'e rami vy vexa'i ojopy vy oapy gua'y rekovia.

¹⁴ Ha'e va'e henda Abraão omboery “SENHOR ojou uka 'rã”. Ha'e rami rire aŷ peve “SENHOR pegua vyty re ojou uka 'rã", 'ea.

¹⁵ Ha'e gui mokoïguea ma anjo SENHOR-a guigua ijayvu Abraão pe yva gui.

¹⁶ Ha'e vy SENHOR aipoe'i:

— Xerery rupi ae aura: Nami rejapo, nderai'y peteï va'e xevy nereme'ëxe e'ŷi rire ma

¹⁷ xee romoingo porã 'rã. Anhetẽ amboeta 'rã neramymino kuery jaxy-tata yva re ikuai va'e rami, ha'e ita ku'i ye'ë yvýry ikuai va'e hetaa rami. Neramymino kuery ipo'aka 'rã ngovaigua kuery retã re.*

¹⁸ Ha'e kuery re vy yvy regua kuery ha'e javi 'rã amoingo porã, xeayvua rejapo rire — he'i.*

¹⁹ Ha'e ramo Abraão ojevy ju guembiguai kuerya py. Oo joupive guekoa Berseba katy. Ha'e py ju hekoia.

Naor ramymino kuery rery oĩa

²⁰ Ha'e va'e rire Abraão oendu "Milca voi oikuavã ma kyrigue, nderyvy Naor ra'y" 'ea rã

²¹ Po rami hery oĩ: tujave va'e ma Uz, tyvy Buz, Arã rurã Quemuel,

²² ha'e gui Quésede, Hazo, Pildas, Jidlafe ha'e Betuel.

²³ Betuel rajy ma Rebeca. Ha'e va'e kuery irundy meme ma Milca memby kuery ikuai, Abraão ryvy Naor ramymino kuery.

²⁴ Naor ra'yxy jevy ma Reumá hery va'e. Ha'e voi oguereko kyrigue: Teba, Gaã, Taás ha'e Maaca.

23

Sara omanoague

¹ Ha'e gui Sara ma cento e vinte e sete ma'etõ re oikoa py

² omano Quiriate-Arba tetã Hebron 'epy va'e py, Canaã yvy re ae. Ha'e ramo Abraão ou vy ojae'o ipy'a vai vy.

³ Ha'e va'e rire Abraão opu'ã ju omano va'ekue ituia gui. Ha'e vy ijayvu Hete ra'y kuery ikuai va'e pe:

⁴ — Xee ma yvy mboae guigua aiko pendeyvy re. Peme'ẽ xevy ha'vy omano va'ekue ruparã pendeyvy re, xera'yxy retekue anhono porã aguã — he'i.

⁵ Hete ra'y kuery ombovai vy Abraão pe aipoe'i:

⁶ — Xeruvixa, endu ke oreayvu. Ndee ma orembyte reiko Nhanderuete huvixarã omoõ va'ekue rami. Yvyra rupa iporãve va'e py tema enhono porã ndera'yxy retekue. Ore kuery regua mava'eve norome'ẽ e'yi 'rã yvyra ruparã va'e, omano va'ekue renhono porã aguã — he'i.

⁷ Ha'e ramo Abraão opu'ã vy guenapy'ã re oĩ ha'e va'e tekao pygua kuery ha'e Hete ra'y kuery renonde.

⁸ Ha'e vy aipoe'i ha'e kuery pe:

— Xapy'a rei omano va'ekue anhono porã aguã pejou porã ri vy pejapyxaka. Xerekovia pejerure Zoar ra'y Efrom pe,

⁹ xevy ome'ẽ aguã Macpela re itakua oĩ va'e, mba'eta ijyvy apy re oĩ. Hepya rami porã tovende xevy, pendeyvy mbyte re anhono porã aguã — he'i.

¹⁰ Ha'e gui heteu regua Efrom ou vy oguapy oiny Hete ra'y kuery mbyte. Tetã kora rokẽ rupi oike va'e ha'e javi oendua py ijayvu, ha'e vy aipoe'i Abraão pe:

¹¹ — Any teve xeruvixa, endu ke. Xeyvy ame'ẽmba rive 'rã ndevy, itakua oĩ va'e guive. Xeretarã ra'y kuery pavẽ renonde ame'ẽ ndevy. Enhono porã tema omano va'ekue — he'i.

¹² Ha'e ramo Abraão guenapy'ã re oĩ tekao pygua kuery renonde.

¹³ Tekao pygua kuery oendua py ijayvu ju Efrom pe:

— Ha'e rami tei rejou porã ri ramo ajerure rejapyxaka aguã re. Ndeyyv repy 'rã xee ame'ẽ. Ejopy ke xepo gui. Ha'e ramo 'rãe xera'yxy retekue anhono porã ha'e py — he'i.

¹⁴ Ha'e ramo Efrom ombovai:

¹⁵ — Xeruvixa, endu ha'vy. Petei yvy quatrocentos hatã'i va'e prata guigua ovare va'e, mba'e tu ha'e nunga xevy ha'e ndevy? Enhono porã katu ha'e py ndera'yxy retekue — he'i.

* 22:17 Hebreus 6.14 * 22:18 Atos 3.25

¹⁶ Ha'e rami Efrom ijayvu rã Abraão oendu vy oa'ã prata ha'e ome'ẽ ixupe. Hete ra'y kuery oexaa py ome'ẽ, ijayvuague rami vy quatrocenos hatã'i va'e prata guigua, mba'emo vendea oiporuve va'e regua.

¹⁷ Ha'e rami Efrom yvy Macpela re oĩ va'e Manre katy'i, yvy, itakua ha'e yvyra ikuai va'e ha'e javi

¹⁸ ovendepa Abraão pe, Hete ra'y kuery ha'e tetã kora rokẽ py ikuai va'e ha'e javive oendua py.

¹⁹ Ha'e rire Abraão onhono porã gua'yxy Sara retekue itakua py, Macpela yvy re Manre katy'i. Ha'e va'e teko ma Hebrom, Canaã yvy re oĩ.

²⁰ Ha'e rami py Hete ra'y kuery Abraão pe ovende raka'e yvy ha'e itakua oĩ va'e, ta'yxy omano va'ekue ruparã.

24

Guembiguai pe Abraão Isaque ra'yxyrã ojou ukaague

¹ Ha'e rire Abraão tuja'i ete ma, heta ma'etõ ma oguereko, ha'e opa mba'e py SENHOR omoingo porã.

² Ha'e ramo Abraão ijayvu guembiguai hoo py ikuai va'e gui inhymave va'e, opa mba'e oguereko va'e re opena va'ety pe. Ha'e vy ixupe aipoe'i:

— Emoĩ ndepo xe'u guy rupi,

³ ha'e eura SENHOR Nhanderuete yva ha'e yvy ha'e javi re ipo'aka va'e rery rupi, xera'y ra'yxyrã rejou aguã teĩ Canaã yvy apy aikoa py ikuai va'e rajy kuery regua e'ŷ guive.*

⁴ Ha'e rã xeretarã kuerya py ae 'rã reo, ha'e va'e regua rejou aguã xera'y Isaque ra'yxyrã — he'i.

⁵ Ha'e ramo hembiguai aipoe'i:

— Xapy'a rei ma kunha va'e ndouxei 'rã xerupive kova'e yvy re. Ha'e rami rã nderay teve 'rã araa yvy rejuague katy?

⁶ Abraão ombovai:

— Nda'eve! Ejapo eme xera'y ha'e katy ojevy aguã rami.

⁷ Mba'eta SENHOR Nhanderuete yva pygua xepe'a karamboae xeru ro ha'e yvy xetuiague gui, ha'e xevy oura reve “Kova'e yvy ame'ẽ 'rã neramymino kuery peguarã”, he'i va'ekue. Ha'e rami vy nerendirondé omondouka 'rã guembiguai anjo. Ha'e ramo ha'e va'e yvy gui 'rã reru xera'y ra'yxyrã.*

⁸ Ha'e gui xapy'a rei kunha va'e nderupive ndouxei ramo toaxa rive reuraague. Ha'e rami teĩ eraa eme xera'y ha'e katy — he'i.

⁹ Ha'e ramo opatõ Abraão 'u guy rupi hembiguai opo omoĩ reve oura ijayvuague rami ojapo aguã re.

¹⁰ Ha'e rami vy dez camelو hembiguai ogueraa opatõ rymba, ha'e mba'emo porã ipatõ ogueraa uka va'ekue ha'e javi. Mesopotâmia katy ojepe'a ovy, Naor kuery retã katy ae.

¹¹ Hetã py ovaẽ rai'ia py peteĩ ygua oĩ va'e yvýry ovaẽ. Ha'e py omombytu'u ranhe mymba camelò henapý'ã re. Ka'aru jave kunhataigue yy re ouaty hora omombytu'u imbokuapy.

¹² Ha'e vy aipoe'i opy'a py:

— SENHOR, xepatõ Abraão Ruete reiko va'e, ajerure ndevy xepytyvõ aguã, ha'e xepatõ Abraão voi remboaxy aguã.

¹³ Mba'eta xee ma apy aĩ ygua rexei'i, kunhague kova'e tetã pygua rajy kuery yy re ouaty py.

¹⁴ Ha'e nunga rupi tove kunhataĩ xevy aipoa'ea va'e: “Emboguejy yryru ay'u aguã”, ha'e ramo “Ey'u, ha'e nerymba camelò kuery avi 'rã amboy'u”, he'i va'e ae toiko nerembiguai Isaque ra'yxyrã reiporavo va'ekue. Ha'e ramo 'rãe aikuaa xepatõ remboaxy maa — he'i.

Rebeca reve Isaque nhovaexiague

* 24:3 Ha'e va'e jave ma ha'e kuery ouraa ovareve aguã opo omoĩ 'rã jo'u guy rupi oura vy. * 24:7 Gálatas 3.16

¹⁵ Ha'e rami teri ijayvu ho'amy jave tetã gui oẽ ouvy Rebeca, Betuel rajy va'e. Tuu ma Abraão ryke'y Naor ra'y, ha'e Milca pi'a. Peteĩ yryru ogueru oiny oaxi'y áry.

¹⁶ Ha'e va'e kunhataĩ ma iporã vaipa, ava reve joguerekó va'e'ý teri. Ha'e gui ygua py oo vy o'ryryru omonyẽ ma vy ou ju.

¹⁷ Ha'e va'e jave py tembiguai oo vy ovaexi. Ha'e vy aipoe'i:

— Eme'ẽ yy nde'ryryru gui ay'u aguã.

¹⁸ Kunha va'e ombovai:

— Ey'u katu xeruvixa — he'i. Ha'e rami vy yryru omboguejy pojava vy ojopy reve ombojero'a omboy'u aguã.

¹⁹ Omboy'upa ma vy aipoe'i:

— Anoẽve ta nerymba camelو kuery pe ju ha'e javive oy'u peve — he'i.

²⁰ Ha'e rami vy ojapura reve onhoẽ mymba oy'uaty py, ha'e onha ju ovy ygua katy ojarave aguã. Ogueruve ju vy camelо kuery ha'e javive omboy'u.

²¹ Ava va'e ijayvu e'ý re oma'ẽ oiny oikuua porãxe vy SENHOR anhetẽ pa ha'e oguataa py oipytyvõa, tyrã anya.

²² Camelо kuery ha'e javive oy'u ma ramo ava va'e oguenoẽ peteĩ ojere'i va'e ouro guigua hatã'i va'e rami rai ipoyi va'e, ha'e mokoĩ poapy regua ouro guigua dez hatã'i va'e rami ipoyi va'e.

²³ Ha'e vy oporandu kunha va'e pe:

— Xee ajerure remombe'u aguã: Mava'e rajy tu ndee? Ha'eve 'rã nda'u nderu ropy ake aguã, ha'e xerupive ou va'ekue guive?

²⁴ Ombovai:

— Xee ma Betuel rajy. Xeru ma Naor ra'yxy Milca pi'a.

²⁵ Ha'e gui roguerekó reta mba'emo pire ha'e nhuũ. Peke aguã voi ha'eve — he'i.

²⁶ Ha'e rami rã ava va'e guenapy'ã re oĩ vy ombojerovia SENHOR.

²⁷ Ha'e vy aipoe'i:

— Ta'ima'endu'a porãmby toiko SENHOR, xepatõ Abraão “Xeruete” he'ia, mba'eta nomboaxy e'ýi xepatõ, neĩ anhetẽ rupi ndoguerenko e'ýi. Xeraperã re SENHOR xembo'e ra'e xepatõ retarã kuery ro py ae avaẽ aguã — he'i.

²⁸ Ha'e rami rã kunhataĩ va'e onha ovy, ha'e oxy kuery ro py omombe'upa.

²⁹ Rebeca oguerekó peteĩ okyvy Labão hery va'e. Ha'e va'e onha ovy tembiguai ygua rexei hi'aĩ va'e ovaexi aguã.

³⁰ Ojere'i va'e ha'e poapy regua gueindy poapy re oexa vy, ha'e heindy “Po rami ava va'e ijayvu xevy” he'i. Ha'e ramo Labão oendu vy oo ovaexi camelо reve, ygua yvy'iry hi'aĩa py.

³¹ Ha'e vy aipoe'i ixupe:

— SENHOR nemoingo porã va'e, evaẽ ke. Mba'e re tu re'ã apy oka py? Xeropy rupi areko katupa ma, nerymba camelо ikuai aguã guive — he'i.

³² Ha'e rami vy omovaẽ. Camelо kuery áry gui mba'emo omboguejypa vy ome'ẽ mba'emo pire ha'e nhuũ. Yy guive ogueru ruka ava va'e py ojoi aguã, avakue hupive ou va'ekue pe voi.

³³ Tembi'u guive ogueru.

Ha'e ramo ava va'e aipoe'i:

— Xee ndakaru reguai amombe'upa e'ý re mba'erã pa ajua.

Labão ombovai:

— Emombe'u ma'vy — he'i.

³⁴ Ha'e ramo aipoe'i:

— Xee ma Abraão rembiguai aiko.

³⁵ SENHOR omoingo porã ete xepatõ. Ha'e ramo oguerekopa: vexa'i, vaka, prata, ouro, guembiguai avakue ha'e kunhague, guymba camelо ha'e mburika'i.

³⁶ Sara xepatõ ra'yxy kakuaa vaipa oikoa py oikuavã opi'a. Ha'e va'e pe ma tuu ome'ẽmba oguerekó va'e ha'e javi.

³⁷ Ha'e gui xepatō xeapo karamboae aura aguã rami. Ha'e vy aipoe'i: "Xera'y ra'yxyrã rejou vy nda'evei kunhague Canaã yvy xee aikoa va'e regua rejou aguã.

³⁸ Ha'e rami 'rãgue py xeru ro py 'rã reo, xeretarã kuerya py ae. Ha'e gui 'rã reru xera'y ra'yxyrã", he'i va'ekue xevy.

³⁹ Ha'e ramo xepatō pe "Xapy'a rei ma kunha va'e ndouxei 'rã xerupive", ha'e.

⁴⁰ ramo ombovai: " SENHOR hexeve aikoa va'e ombou 'rã guembiguai anjo nepytyvõarã, xeretarã kuery ha'e xeru ro py ae rejou aguã xera'y ra'yxyrã.

⁴¹ Ha'e rami avi xeretarã kuerya py reo ramo kunha va'e ha'e kuery nombou ukaxei ramo ma toaxa rive reuraague", he'i va'ekue xevy.

⁴² Ha'e gui ange ygua py avaẽ vy aipoa'e xejeupe: "Xepatō Abraão SENHOR 'Xeruete' he'ia va'e, xapy'a rei aguataa rupi xepytyvõ ramo ma,

⁴³ apy ma aĩ aÿ ygua yvy'iry. Tove kunhataí yy re ou va'e pe aipoa'e ramo 'Eme'ẽ na yy ruxá'i tay'u nde'ryru gui', ha'e rã

⁴⁴ xevy 'Ey'u, ha'e nerymba camelو kuery pe voi ajara 'rã', he'i va'e, ha'e va'e ae toiko xepatō ra'y ra'yxyrã SENHOR oiporavo va'ekue", ha'e va'ekue.

⁴⁵ Ha'e nunga re teri xepy'a ainy jave oẽ ouvy Rebeca. Yryru oaxi'y áry ogueru va'e reve ygua py oo vy ojara yy. Ha'e gui xee aipoa'e: "Ajerure ndevy eme'ẽ na ay'u aguã", ha'e

⁴⁶ ramo ome'ẽ pojava. Ha'e vy oaxi'y áry gui yryru omboguejy vy aipoe'i: "Ey'u, ha'e nerymba camelو kuery pe voi ame'ẽ 'rã oy'u aguã", he'i. Ha'e ramo ay'u, xerymba camelو kuery voi omboy'u.

⁴⁷ Ha'e gui ixupe aporandu: "Mava'e rajy tu ndee?" Ha'e ombovai: "Betuel rajy aiko. Xeru ma Naor ra'y, Milca pi'a va'e", he'i. Ha'e ramo ixí re amoõ ojere'i va'e, ha'e rã ipoapy re ma poapy regua amoõ.[†]

⁴⁸ Ha'e vy xerenapy'ã re aĩ vy ambojerovia SENHOR. Xema'endu'a porã SENHOR xepatō Abraão "Xeruete" he'ia va'e re, mba'eta tape ha'evea rupi xererekoo rire, xepatō retarã rajy ae ajou aguã rami ta'y ra'yxyrã.

⁴⁹ Ha'e gui aÿ ma xapy'a rei xepatō pe iporã va'e ha'e anhetẽ rupigua ri pejapoxe vy pemombe'u xevy. Ha'e rami e'ÿ ramo pemombe'u porã avi xevy, xee aikuaa aguã jaiporu kuaa regua katy aa aguã, e'ÿ vy jaiporu kuaa e'ÿa katy – he'i.

⁵⁰ Ha'e ramo Labão ha'e Betuel ombovai:

— Ha'e nunga ma SENHOR gui ae oiko ra'e. Ore ma mba'eve rei oreayvurã ndoroikuuai, anhetẽ ya'e remombe'u ramo.

⁵¹ Upe hiny Rebeca nerende. Eraa, tapeo. Toiko nepatō ra'y ra'yxyrã, SENHOR ijayvuague rami vy – he'i.

Rebeca re Isaque omendaague

⁵² Ha'e rami ombovai rã Abraão rembiguai oendu vy guenapy'ã re oĩ SENHOR renonde.

⁵³ Ha'e oguenoẽ mba'emo porã: ouro, prata guigua ha'e tupyja. Rebeca pe ome'ẽmba. Ikyvy pe, ixy pe avi ome'ẽ mba'emo porã.

⁵⁴ Ha'e rire mae okaru ha'e oy'u okuapy, avakue hupive ou va'ekue reve. Pytû oaxa okuapy.

Ko'ẽ rai ramove tembiguai opu'ã vy aipoe'i:

— Xemondouka ju xepatõa katy.

⁵⁵ Ha'e rã ikyvy ha'e ixy aipoe'i:

— Tove, kunha va'e topytave'i ranhe dez ára ri jepe. Ha'e gui mae ma 'rã oo – he'i.

⁵⁶ Ha'e ramo aipoe'i:

— Nda'evei ha'e rami aguã, aguataa rupi SENHOR xepytyvõ rire. Xemondouka ju xepatõa katy.

⁵⁷ Aipoe'i okuapy:

— Nhaenoĩ ha'vy kunhataí va'e, ixugui ae nhaendu aguã – he'i.

⁵⁸ Ha'e rami vy gueindy Rebeca oenoĩ okuapy vy oporandu ixupe:

[†] ^{24:47} Ha'e va'e jave py kunhague omombu uka 'rã oxí, aÿgua onambi omombu ukaa rami avi, ijegua va'e omoĩ aguã.

- Reoxe pa kova'e ava reve?
 Ha'e ramo
 — Aa 'rā — he'i.
⁵⁹ Ha'e ramo omondouka gueindy Rebeca hembiguai reve, Abraão rembiguai ha'e avakue hupive ou va'ekue reve oo aguā.
⁶⁰ Ogueroayvu porā imondovy Rebeca. Ha'e vy aipoe'i:
 — Ndee ma ororeindy. Tanememby reta ete. Tove neremiarirō kuery ta'ipo'aka ngovaigua kuery retā re — he'i.
⁶¹ Ha'e ramo Rebeca opu'ā guembiguai kunhataīgue reve. Camelo áry oīmba vy oje'oi ava va'e rakykue. Ha'e rami py Abraão rembiguai ogueraa Rebeca.
⁶² Ha'e va'e jave Isaque ou oiny Beer-Laai-Roi katy gui, Neguebe yvy re ju oiko aguā.
⁶³ Ka'aru'i jave oo oyvy rupi oikuaa pota aguā. Ha'e gui oma'ē vy oexa camelo árygua kuery ou oiny rā.
⁶⁴ Rebeca voi oma'ē vy oexa Isaque. Ha'e rami vy camelo áry gui oguejy vy
⁶⁵ oporandu Abraão rembiguai pe:
 — Mava'e ava tu ou oiny yvy rupi nhanda katy?
 — Xepatō rima ou — he'i ombovai vy. Ha'e ramo tova mo'āa oguenoē vy omo'ā ngova.‡
⁶⁶ Isaque pe tembiguai omombe'u mba'emo ojapo va'ekue ha'e javi.
⁶⁷ Ha'e ramo Isaque ma oxy Sara rogue py ogueraa Rebeca. Hexe omenda ramo ta'yxy oiko. Isaque oayvu ete. Ha'e rami vy mae ipy'a porā ju ixy omanoague gui.

25

1 Crônicas 1.32,33

- ¹ Abraão omenda ju kunha mboae Quetura hery va'e re.
² Ha'e va'e ma oikuavā Zinrā, Jocsā, Medā, Midiā, Isbaque ha'e Suá.
³ Jocsā ra'y kuery ma Sabá ha'e Dedā. Dedā ra'y kuery ma Assurim, Letusim ha'e Leumim.
⁴ Midiā ra'y kuery ma Efá, Efer, Enoque, Abida ha'e Elda. Ha'e va'e kuery ha'e javi Quetura pi'a kuery.
⁵ Ha'e rā Isaque pe ae ma Abraão ome'ē oguereko va'e ha'e javi.
⁶ Gua'yxy jevy pi'a kuery pe ma mba'emo ome'ē avi va'eri oikove teri reve omondoukapa gua'y Isaque-a gui mombyry. Amboae yvy katy omondouka kuaray oua katy.

Abraão omanoague

- ⁷ Abraão ma cento e setenta e cinco ma'etý re oiko.
⁸ Ha'e gui Abraão ipytuē atā vy omano kakuaa ete reve. Ha'e ramo heraa tamoī kuerya py.
⁹ Ha'e ramo ta'y Isaque ha'e Ismael onhono porā Macpela py itakua oī va'e py. Ha'e va'e yvy ma Manre katy'i oī, heteu regua Zoar ra'y Efrom mba'e va'ekue.
¹⁰ Ha'e va'e yvy ma Hete ra'y kuery gui Abraão ojogua va'ekue. Ha'e py ae onhono porā Abraão, ta'yxy Sara yvýry.
¹¹ Abraão omano rire ta'y Isaque ju Nhanderuete omoingo porā. Isaque ma Beer-Laai-Roi katy'i oiko.

1 Crônicas 1.28-31

- ¹² Po rami Ismael ramymino kuery rery. Ha'e ma Abraão ra'y, Sara rembiguai Agar Egito guigua pi'a.
¹³ Po rami ma Ismael ra'y kuery rery, jypy'i itui'i va'ekue guive. Ismael ra'y ypy ma Nebaiote, ha'e gui Qedar, Adbeel, Mibsāo,
¹⁴ Misma, Dumá, Massá,
¹⁵ Hadade, Tema, Jetur, Nafis ha'e Quedemá.
¹⁶ Ha'e va'e kuery ma Ismael ra'y kuery. Ha'e kuery rery ma hetā ha'e hekoa rery joo ramigua. Doze huvixa ikuai guetarā kuery re opena va'e.

‡ 24:65 Rebeca ma ngova ojao'i omerā Isaque omboete vy, ha'e kuery reko rami vy.

¹⁷ Ismael ma cento e trinta e sete ma'etŷ re oiko. Ha'e vy omano. Ha'e rã heraa tamoï kuerya py.

¹⁸ Ta'y kuery ma Havilá yvy guive Sur peve ikuai, Egito katy'i, Assíria katy jaa vy jaaxa va'e. Guetarã kuery gui mombyry ikuai.

Isaque ra'y kuery itui'ague

¹⁹ Po rami ma Abraão ra'y Isaque ra'y kuery. Abraão ra'y ma Isaque.

²⁰ Isaque quarenta ma'etŷ oguerekoa py omenda Rebeca re. Ha'e va'e ma arameu regua Betuel Padã-Arã pygua rajy, arameu regua Labão reindy.

²¹ Ha'e gui Isaque ra'yxy imemby va'erã e'ŷ oiko ramo ojerure SENHOR pe. Ha'e rã ojerurea SENHOR oendu ramo ta'yxy Rebeca oguerekoi kyrī va'e.

²² Hyru'i py kyrīgue joe opu'ã okuapy. Ha'e ramo Rebeca aipoe'i:

— Ha'e rami ri ramo mba'erã tu xee aiko? — he'i. Ha'e rami vy oporandu SENHOR pe.

²³ SENHOR ombovai:

— Mokoï regua rima nderye py oĩ, itui'i guive mokoï regua 'rã oiko joo rami e'ŷ ikuai va'e. Peteï regua ma amboae gui ipo'akave 'rã, ha'e tujave va'e oiko 'rã kyrīve va'e rembiguai — he'i.*

²⁴ Ha'e gui kyrī va'e oikuavã aguã ára ovaẽ ramo mokoï oĩ ra'e hyru'i py.

²⁵ Jypygua ma pytã rei, haguepa rei va'e oiko. Ha'e nunga rupi omboery Esaú.*

²⁶ Ha'e rire'i ma tyvy ju oiko guyke'y Esaú pyta re ojopy reve. Ha'e nunga rupi omboery Jacó.† Isaque sessenta ma'etŷ oguerekoa py ta'yxy Rebeca oikuavã'i.

Esaú jypygua peguarã va'e ovendeague

²⁷ Ha'e gui avakue'i tujapave ma oje'oivy. Esaú ma imba'ejuka rupi oiko ka'aguy re. Ha'e rã Jacó ma oiko rive, oo'i py oĩ va'e.

²⁸ Isaque oayvu vaipa Esaú, xo'o ojuka va'ekue ho'uxe vai vy. Ha'e rã Rebeca ma Jacó oayvuve.

²⁹ Ha'e gui Jacó mba'emo'i ombojy oiny jave Esaú ou oiny ka'aguy gui inhembayai vaipa reve.

³⁰ Ha'e vy aipoe'i:

— Eme'ẽ xevy upe pytã rei va'e rembojy va'ekue kyrī'i ha'u aguã, xenhembyayi vaipa ma — he'i. Ha'e nunga rupi omboerya Edom.‡

³¹ Ha'e ramo Jacó aipoe'i:

— Evende ranhe xevy jypygua peguarã rejopy va'erã va'e.§

³² Tyke'y ombovai:

— Xee ma amano ta ma. Mba'erã tu ovare xevy jypygua peguarã va'e? — he'i.

³³ Ha'e ramo Jacó

— Eura ranhe xevy — he'i ramo oura.

³⁴ Ha'e gui Esaú pe Jacó ome'ẽ mbojape ha'e lentilha mimoï. Ha'e rã ho'upa ma vy opu'ã ovy. Ha'e rami py Esaú nombovarei jypygua pegua ojopy aguã va'ekue.

26

Filisteu kuery yvy re Isaque oiko jave guare

¹ Ha'e gui oiko ju karuai yvy re, jypy'i Abraão oiko teri jave karuai oiko va'ekue ramigua. Ha'e nunga rupi Isaque oo Gerar katy, filisteu kuery ruvixa Abimeleque-a py.

² Ha'e gui ixupe SENHOR ojexa uka vy aipoe'i:

— Eguejy eme Egito katy. Epyta yvy xee aexa uka va'e py.

³ Ha'e py ae eiko. Ha'e rã xee aiko 'rã ndereve, romoingo porã 'rã guive. Mba'eta ndevy ha'e ndera'y kuery pe ju 'rã ame'ẽ kova'e yvy ha'e javi. Ajapopa 'rã nderu Abraão pe auraague.

* 25:23 Romanos 9.12 * 25:25 Tery Esaú ma "Haguepa va'e" 'ea. † 25:26 Tery Jacó ma "Jopyta jopya" 'ea, nhombotavya jaikuaa aguã. ‡ 25:30 Tery Edom ma "Pytã va'e" 'ea. § 25:31 Ha'e kuery reko rami vy tuu omano vy gua'y tujave va'e pe oeja retave 'rã iporâve va'e anho, ha'e rã kyrīve va'e pe ma mboapy'ive 'rã oeja.

⁴ Ha'e rami vy neramymino kuery amboeta 'rā jaxy-tata yva re ikuai va'e hetaa rami. Ha'e kuery pe ju teī ame'ẽ kova'e yvy ha'e javi. Neramymino kuery re vy amoingo porã 'rā ha'e javi regua yvy re ikuai va'e,

⁵ Abraão xenhe'ẽ rendu rire. Ha'e ma ojapopa ajapo uka va'e, aipota va'e, lei hekorã aeja va'ekue ha'e javi — he'i.*

⁶ Ha'e ramo Isaque ma Gerar py ae opyta.

⁷ Ha'e va'e tekaoa pygua kuery ta'yxy re oporandu rā “Xereindy” he'i 'rā, “Xera'yxy” he'i aguã okyje vy. Ojeupe ae “Avakue tekaoa pygua xejuka e'ŷ aguã Rebeca oayvu vy” he'i, ta'yxy iporã vaipa ramo.

⁸ Are ma ha'e py Isaque oikoa py filisteu kuery ruvixa Abimeleque oma'ẽ peteī okē'i rupi. Ha'e vy oexa Isaque gua'yxy Rebeca reve joayvu ramo.

⁹ Ha'e gui Abimeleque oenoĩ uka Isaque. Ha'e vy aipoe'i:

— Anhetẽ ae kunha va'e ndera'yxy ra'e! Mba'e re tu ixupe “Xereindy” 're?

Isaque ombovai:

— Mba'eta “Ikáuxa xejukaa e'ŷ aguã”, ha'e vy — he'i.

¹⁰ Abimeleque aipoe'i:

— Mba'e re tu ha'e rami rejapo orere? Ndaxyi 'rāgue amongue apygua ndera'yxy reve ojejavy aguã. Ha'e rami va'e rire ndee orembojejavy vaipa ete 'rāgue — he'i.

¹¹ Ha'e gui guetarã kuery ha'e javive pe ju Abimeleque ijayvu:

— Amongue kova'e ava re ojapo vai va'e, ha'e e'ŷ vy ta'yxy re opena va'e ma anhetẽ omano 'rā — he'i.

¹² Ha'e rire ha'e va'e yvy re Isaque oma'etŷ. Ha'e va'e ma'etŷ re ae peteī-teī gui omono'õ cem, SENHOR omoingo porã ramo.

¹³ Ha'e rami vy oguerekopave tema ovv, oiko porã, oguerekopa ete peve.

¹⁴ Oguereko vixa'i, vaka, oguereko reta guembiguai. Ha'e ramo filisteu kuery nda'evei rei ikuai hexe.

¹⁵ Ha'e rami vy ombotypa ygua tuu Abraão oikove teri rā hembiguai kuery ojo'o va'ekue, yvy omonyëmba rive.

¹⁶ Abimeleque voi aipoe'i Isaque pe:

— Ejep'e orerekaoa gui, ore kuery gui ndepo'akapave ma guive ramo — he'i.

¹⁷ Ha'e rami rā Isaque oo ha'e gui, Gerar yvy'ã guy py ju oiko aguã. Ha'e py ae hekoa.

¹⁸ Ha'e py peteīgue ju Isaque ojo'o uka yguarã Abraão oikove teri rā ojo'o pyre, Abraão omano rire filisteu kuery ombotypa va'ekue. Ygua peteī-teī omboery tuu omboeryague rupi ae.

¹⁹ Isaque rembiguai kuery avi yvy'ã guy py ojo'o vy ojou yvu porã oĩa.

²⁰ Ha'e rā Gerar pygua vixa'i re opena va'e kuery joguero'a okuapy Isaque rymba kuery re opena va'e reve, “Kova'e yy ma oremba'e” he'i vy. Ha'e ramo ha'e va'e ygua Isaque omboery Eseque, hexeve joguero'a ramo.*

²¹ Ha'e gui amboae ygua ju ojo'o. Ha'e va'ekue re voi joguero'a okuapy. Ha'e nunga rupi ha'e va'e omboery Sitna.†

²² Ha'e gui oove vy amboae ju ojo'o yguarã. Ha'e va'e re ma ndajoguero'avei vy omboery Reobote,‡ “Aŷ SENHOR nhanderekorã ome'ẽ ma ramo nhandekuai porã 'rā kova'e yvy re” he'i vy.

²³ Ha'e gui Berseba katy ju oo.

²⁴ Ha'e va'e pyávy SENHOR ojexa uka ixupe. Ha'e vy aipoe'i:

— Xee ma nderu Abraão Ruete. Ekyje eme, mba'eta ndereve voi xee aiko. Romoingo porã 'rā, ha'e neramymino kuery amboeta 'rā xerembiguai Abraão re vy — he'i.

²⁵ Ha'e ramo ha'e py ojapo peteī altar SENHOR pe, ha'e ojapukai hery rupi. Ha'e gui oupi oĩ aguã ha'e py ae hekoa vy. Hembiguai kuery ojo'o ju yguarã ha'e py.

* 26:5 Atos 3.25 * 26:20 Tery Eseque ma “Joguero'aa” 'ea. † 26:21 Tery Sitna ma “Ija'e e'ŷa” 'ea. ‡ 26:22 Tery Reobote ma “Heta ikuai aguã” 'ea.

Abimeleque reve Isaque peteī rami ikuai aguā ojapoague

- ²⁶ Ha'e rire Gerar gui ou Abimeleque, irū Ausate ha'e xondaro ruvixa Ficol reve.
- ²⁷ Ovaēmba ramo Isaque aipoe'i ha'e kuery pe:
— Mba'erā tu peju xea py? Xere napendea'ei rei vy penembyte gui xepe'a va'ekue ri.
- ²⁸ Ha'e kuery ombovai:
— Roexa porā SENHOR anhetē ndereve oikoa. Ha'e rami vy aiporo'e: “Aŷ ke jaura ore kuery ndereve, jajapo peteī rami nhandekuai aguā.”
- ²⁹ Eura ke orevy rejapo vai e'ŷ aguā, ore peteīve henda py ndere ndorojapo vaia rami avi. Ha'evea rami anho rojapo ndere, romondouka porā guive karamboae. Ndee ma SENHOR omoingo porā va'e reiko — he'i.
- ³⁰ Ha'e ramo Isaque ojapo ngaru ha'e kuery pe. Okaru ha'e oy'u okuapy.
- ³¹ Ko'ẽ rai opu'ã vy oura okuapy joupe-up. Ha'e gui Isaque omondoukapa rā ha'e kuery oje'oi porā.
- ³² Ha'e va'e árave Isaque rembiguai kuery ou vy ixupe omombe'u ygua ojo'o va'ekue. Ha'e vy aipoe'i:
— Rojou ma yy — he'i okuapy.
- ³³ Ha'e va'e ygua maomboery Seba. Ha'e rami rire ha'e va'e tetā rery aŷ reve Berseba.
- ³⁴ Ha'e gui Esaú quarenta ma'etŷ oguerekaoa py gua'yxyrā ojou mokoī: heteu regua Beeri rajy Judite ha'e heteu regua Elom rajy Basemate.
- ³⁵ Ha'e kuery mokoīve re Isaque ha'e Rebeca nda'evei ete ikuai.

27

Isaque gua'y kuery Jacó ha'e Esaú ogueroayvu porāague

- ¹ Isaque tuja'i vy ndoexa kuaavei, noma'ẽ atāvei ma vy. Gua'y tujave va'e Esaú oenoĩ vy aipoe'i:
— Xera'y.
- Ombovai:
— Apy ma aĩ — he'i.
- ² Tuu aipoe'i ixupe:
— Xetuja'i ma, amano aguā ára ovaẽ ouvy teī ndaikuai araka'e paa.
- ³ Aŷ eraa nerembiporu hu'y ryru ha'e nderapa, tereo ka'aguy re, ha'e ejuka xo'o xevy.
- ⁴ Ejapo tembi'u hee va'e xee ha'uxea ramigua, eru ha'u aguā. Mba'eta amano e'ŷ mbove xee rogueroayvu porā 'rā — he'i.
- ⁵ Ha'e ramo Rebeca oendu gua'y Esaú reve Isaque ijayvu rā. Ha'e ramo Esaú ka'aguy re xo'o ojuka aguā oo ma ramo
- ⁶ Rebeca aipoe'i opi'a Jacó pe:
— Aendu kuri nderyke'y Esaú reve nderu ijayvu vy
- ⁷ “Eru xo'o, ha'e ejapo tembi'u hee va'e ha'u aguā, amano e'ŷ mbove SENHOR renonde rogueroayvu porā aguā”, he'i rā.
- ⁸ Aŷ ma xepi'a, endu xeayvu, ejapo ajapo uka va'e.
- ⁹ Tereo mymba kora py, eru mokoī kavara'i iporā va'e. Ha'e va'e gui ma xee ajapo 'rā tembi'u hee va'e nderu pe, ha'e ho'uxea ramigua ae.
- ¹⁰ Ha'e gui reraa 'rā nderu pe ho'u aguā, omano e'ŷ mbove ndee ae ndereroayvu porā aguā — he'i.
- ¹¹ Jacó aipoe'i oxy Rebeca pe:
— Ha'e rami avi ke'y Esaú ma haguepa rei va'e, ha'e rā xee ma ha'e ramigua e'ŷ.
- ¹² Xapy'a rei xeru opokopa 'rā xere, oikuua pota vy. Ha'e rami vy oikuua 'rā ambotavyxea, ha'e ijayvu vai 'rā xere, xereroayvu porā 'rāgue py — he'i.
- ¹³ Ha'e rā ixy ombovai:
— Xepi'a, tove xere ae toī ijayvu vaia. Ndee ma ejapo xeayvua. Tereo, ha'e eru — he'i.
- ¹⁴ Ha'e ramo oo. Mymba ojuka vy ogueru oxy pe. Ha'e rā ojapo tembi'u hee va'e, tuu ho'uxea ramigua.

¹⁵ Ha'e gui Rebeca ogueru opi'a tujave va'e Esaú mba'e ao iporâve va'e, ngoo py oguereko va'e. Ha'e va'e py ma opi'a kyrîve va'e Jacó ju omonhemonde.

¹⁶ Kavara rague py onhovã ipo ha'e ijaju'y ndagueia rupi.

¹⁷ Ha'e vy opi'a Jacó pe ome'ẽ tembi'u hee va'e ha'e mbojape ojapo va'ekue.

¹⁸ Ha'e gui nguua py Jacó oo. Ha'e vy aipoe'i:

— Xeru.

Ombovai:

— Apy ma aĩ. Mava'e tu ndee, xera'y?

¹⁹ Jacó ombovai:

— Xee ma Esaú, ndera'y tujave va'e. Ajapo ma rejapo uka va'ekue. Evy ke, eguapy, he'u ajuka va'ekue, xereroayvu porã aguã — he'i.

²⁰ Ha'e ramo Isaque aipoe'i gua'y pe:

— Xera'y, mba'ixa vy tu rejou voi'i ete ri rejuka va'erã?

Ombovai:

— Mba'eta SENHOR nderuete ombou xerenonderã — he'i.

²¹ Ha'e ramo Isaque aipoe'i Jacó pe:

— Enhemboja ha'vy xea py. Tapoko ndere xera'y, Esaú ete pa reikoa tyrã anya aikuaa aguã — he'i.

²² Ha'e ramo nguu Isaque-a katy'i Jacó onhembojave. Ha'e ramo hexe opokopa vy aipoe'i:

— Ndeayvua ma Jacó rami ndeayvu, ha'e rã ndepo ma Esaú rami ae ndepo — he'i.

²³ Ndoikuuai, ipo haguepa rei ramo tyke'y Esaú po rami. Ha'e rami vy ogueroayvu porã.

²⁴ Ha'e vy aipoe'i ixupe:

— Ndee ma xera'y Esaú ae pa?

Ombovai:

— Tá, ha'e ae xee — he'i.

²⁵ Ha'e ramo aipoe'i:

— Xera'y, eru ha'vy xea py rejuka va'ekue ha'u aguã, rogueroayvu porã aguã — he'i.

Ha'e gui xo'o ogueru ramo ho'u. Vinho avi ogueru ramo oy'u.

²⁶ Tuu Isaque aipoe'i:

— Xera'y, evaëve'i ju ke, xerayvu — he'i.

²⁷ Ha'e rã onhemboja vy oayvu. Ha'e ramo tuu oetã ija o reakuã. Ha'e vy ogueroayvu porã vy aipoe'i:

— Xera'y, reakuã ma mba'ety SENHOR omoingo porã va'e reakuã.

²⁸ Nhanderuete tome'ẽ ndevy yxapy yva gui, tomoingo porã ndeyvy re henhoi va'e. Tome'ẽ vaipa trigo ha'e uva pyau.

²⁹ Tove amboae regua nerembigui ai ta'ikuai, tanemboete. Tove nderyvy kuery re tandepo'aka, ndexy pi'a kuery guenapy'ã re toõ neretonde. Tove ndere ijayvu vai va'e toiko ayvu vaipy, ha'e rã ndereroayvu porã va'e ma ayvu porãmby toiko — he'i.

³⁰ Gua'y Jacó Isaque ogueroayvu porãmba ma ramo nguuia gui oõ ov y ramove tyke'y Esaú ovaõ okaxa vy ooague gui.

³¹ Ha'e avi tembi'u hee va'e ojapo va'ekue ogueru nguuia py. Ha'e vy aipoe'i ixupe:

— Evy ke xeru, he'u ndera'y ojuka va'ekue, xereroayvu porã aguã — he'i.

³² Tuu Isaque oporandu:

— Mava'e tu ndee?

Ombovai:

— Xee ma ndera'y tujave va'e Esaú — he'i.

³³ Ha'e ramo Isaque oryryipa reve aipoe'i:

— Mava'e tu ha'vy xo'o ojuka va'ekue ogueru ra'e? Ndee rejua e'ŷ mbove xee ha'upa ma, ha'e aroayvu porã guive. Ha'e rami rire ayvu porãmby ae 'rã oiko — he'i.

³⁴ Ha'e rami tuu ijayvu rã Esaú oendu vy nda'evei vaipa. Ha'e vy aipoe'i nguu pe:

— Xeru, xee voi ta'vy xereroayvu porã 'rãgue.

³⁵ Tuu ombovai:

— Nderyvy xembotavy reve ou vy ojereroayvu porã uka kuri nderekovia — he'i.

³⁶ Ha'e ramo Esaú aipoe'i:

— Ha'evea rami e'ŷ ri ty'y ha'e hery Jacó?* Mba'eta mokoīgue ma xembotavy. Xegui jypygua peguarā ajopy 'rā va'ekue oipe'a rire aŷ ma xerekovia ju ojereroayvu porā uka. Ndererekovei teve neī peteī henda py ri jepe xereroayvu porā aguā?

³⁷ Ha'e ramo tuu Isaque ombovai Esaú pe:

— Xee amoī ae ma ndere ipo'aka va'erā. Tyvy kuery hembiguai ikuai aguā rami ajapo. Trigo ha'e uva pyau ojoupa aguā rami xeayvu. Ha'e gui ndee xera'y, mba'e tu aŷ ajapo ta ndevy? — he'i.

³⁸ Esaú aipoe'i nguu pe:

— Xeru, neī peteī henda py xereroayvu porā aguā voi teve ndererekoi? Xereroayvu porā avi nho ke — he'i. Ha'e gui Esaú ijayvu atā vy ojae'o.

³⁹ Tuu Isaque ombovai:

— Ndee ma yvy porā gui mombyrya py 'rā reiko, yxapy yvate gui ho'a e'ŷa rupi.

⁴⁰ Kyxe re rejeroviaa rupi 'rā reiko nderyvy rembiguai. Ha'e rami teī repu'ā vy reo jepe 'rā ndere ipo'akaa gui — he'i.

⁴¹ Ha'e rire gua'y Jacó tuu ogueroayvu porā rire Esaú ivai guyvy pe. Ha'e vy aipoe'i ojeupe: "Xeru omano aguā ovaē rai'i ma. Ha'e va'e rire ma ajuka 'rā xeryvy Jacó", he'i.

⁴² Rebeca oendu ha'e rami ipi'a tujave va'e Esaú ijayvuague omombe'ua rā. Ha'e rami vy oenoī uka opi'a kyrīve va'e Jacó. Aipoe'i ixupe:

— Ma'lē, nderyke'y Esaú ndejukaxe ipy'a porā aguā.

⁴³ Ha'e gui aŷ ma xepi'a, endu xeayvua. Tereo xekyvy Labão ro katy Harā py.

⁴⁴ Hexeve eiko are nderyke'y ivaiague oaxa peve,

⁴⁵ nderyke'y re rejapoague re hexarai vy nda'ivaivei peve. Ha'e gui ma amondouka 'rā ndereruarā. Mba'e re tu peteī árave amokanhy ta xepi'a kuery mokoīve? — he'i.

⁴⁶ Ha'e gui ome Isaque pe ju Rebeca aipoe'i:

— Xee ma ndavy'ai Hete rajy kuery kova'e yvy re ikuai va'e re. Xapy'a rei Jacó ju ha'e kuery va'e regua gua'yxyrā ojou ramo mba'erā tu aikove ta? — he'i.

28

Jacó ojavaague

¹ Ha'e ramo Isaque oenoī Jacó. Ogueroayvu porā reve omondouka. Ha'e vy aipoe'i:

— Nda'evei ndera'yxyrā rejou aguā apy Canaã yvy re ikuai va'e rajy kuery regua.

² Ha'e rami 'rāgue py epu'ā, tereo Padā-Arā katy, ndexy ru Betuel ro katy. Ha'e py ae 'rā ndera'yxyrā rejou ndexy kyvy Labão rajy kuery regua.

³ Tove Nhanderuete ipo'akapa va'e tanemoingo porā, tomboeta neramymino kuery, heta regua pendekuai aguā.

⁴ Tove ndere ju toiko Abraão ogueroayvu porāague, ha'e gui neramymino kuery re ju, yvy reikoa Nhanderuete Abraão pe ome'ē va'ekue re ndee ju nderekoa aguā — he'i.

⁵ Ha'e rami vy Isaque omondouka Jacó Padā-Arā katy Betuel ra'y Labão ro katy. Ha'e va'e ma Arā pygua oiko, Jacó ha'e Esaú xy Rebeca kyvy.

⁶ Ha'e gui Esaú oexa gua'y Jacó Isaque ogueroayvu porā reve Padā-Arā katy omondouka rā gua'yxyrā ha'e gui ojou aguā. Mba'eta ixupe "Nda'evei Canaã yvy re ikuai va'e rajy kuery regua rejou aguā ndera'yxyrā" he'i imondovy va'ekue.

⁷ Ha'e vy Esaú oexa avi Jacó nguu ha'e oxy ayvu oendu vy Padā-Arā katy oo rā.

⁸ Oikuua avi tuu Isaque kunhague Canaã yvy pygua ndojou porāia.

⁹ Ha'e rami vy Abraão ra'y Ismael rekoia py Esaú oo vy gua'yxyrā kuery ojou va'ekue gui ojouve ju Ismael rajy Maalate, Nebaiote reindy.

Jacó pe tape pyrō-pyrōa'i oexa ukaa ague

¹⁰ Ha'e gui Jacó ma Berseba gui ojepe'a vy oo oiny Harā katy.

* 27:36 Tery Jacó ma "Nhombotavy" 'ea (25.26).

¹¹ Peteĩ henda py ovaẽa py oaxa pytū, kuaray oike ma ramo. Peteĩ ita ha'e py itui va'e ojou vy omoĩ oakã ngytarã. Ha'e vy onheno oupy vy oke.

¹² Oexa ra'u vy oexa peteĩ tape pyrõ-pyrõa'i yvy gui yva peve oo va'e. Ha'e va'e rupi anjo kuery Nhanderuetea guigua ojeupi ha'e oguejy okuapy.

¹³ Ha'e va'e gui mombyry e'ŷ hi'aĩ SENHOR. Ha'e vy aipoe'i ixupe:

— Xee ma SENHOR neramoĩ Abraão ha'e Isaque Ruete. Yvy aŷ renheno rejupya ma ame'ẽ 'rã ndevy ha'e neramymino kuery pe.

¹⁴ Neramymino kuery ma yvy ku'i rami 'rã heta. Kuaray oikea katy guive 'rã hekoia kuaray oua katy peve, ha'e ijapu'a'ia katy guive ipuku-a katy peve. Ndere ha'e neramymino kuery re vy amoingo porã 'rã ha'e javi regua yvy re ikuai va'e.

¹⁵ Xee ma aiko ndereve, ndere apena 'rã mamo rã reikoa rupi. Rojapo 'rã kova'e yvy re rejevy ju aguã rami. Noroipytyvõ e'ŷi 'rã, xeayvuague ajapopa peve — he'i.

¹⁶ Ha'e gui Jacó okeague gui omyi vy aipoe'i:

— Anhetẽ SENHOR oĩ ra'e apy. Xee ma ndaikuai.

¹⁷ Nda'evei rima ra'e apy! Apy ma Nhanderuete ro, yva rokẽ ae! — he'i ojererokyje reve.

Betel py Jacó ita omopu'ãague

¹⁸ Ko'ẽ rai ramove Jacó opu'ã vy ojopy ita oakã ngytarã omoĩ va'ekue, ha'e omopu'ã ijytarã rami. Hi'áry onhoẽ azeite.

¹⁹ Ha'e va'e katy'i tetã oĩ va'e yma Luz hery va'ekue ma Betel ju omboery.*

²⁰ Ha'e gui Jacó onhemboayvu vy aipoe'i:

— Xapy'a rei xereve Nhanderuete oiko vy xere opena ramo, xapy'a rei mbojape ha'e ao anhemonde aguã xevy ome'ẽ ramo

²¹ xeru ro katy ju ajevy porã aguã rami, ha'e ramo SENHOR ae 'rã Xeruete.

²² Ha'e gui kova'e ita ijytarã rami amopu'ã va'ekue ma oĩ 'rã Nhanderuete rorã. Ha'e gui mba'emo rejou uka va'e nhavõ gui xee ame'ẽ kuerei 'rã dízimo ndevy — he'i.

29

Raquel reve Jacó nhovaexiague

¹ Jacó oguatave vy ovaẽ kuaray oua katy ikuai va'e kuery yvy re.

² Oma'ẽ vy oexa peteĩ ygua ojo'o pyre oĩ va'e. Oexa avi ijyvýry mboapy henda py vexa'i ijaty va'e. Onhenomba rei okuapy, mba'eta ha'e va'e ygua gui ae 'rã opena va'e kuery ome'ẽ guymba kuery oy'u aguã. Ygua juru áry oĩ ita tuvixa va'e imbotyara.

³ Ha'e py mymba kuery ijatypa jave opena va'e kuery oipe'a 'rã ita ygua juru gui. Ha'e vy vexa'i kuery omboy'upa ma vy omoĩ ju 'rã oĩaty py.

⁴ Jacó oporandu ha'e kuery pe:

— Xeryvy kuery, mamogua tu peẽ kuery?

Ombovai:

— Ore ma Harã pygua — he'i okuapy.

⁵ Jacó oporandu ha'e kuery pe:

— Peikuua pa Naor ra'y Labão?

Ombovai vy

— Roikuua ri — he'i.

⁶ Jacó oporanduve ju:

— Ha'e oiko porã pa?

— Tá, oiko porã. Pee hymba kuery vexa'i reve ou oiny va'e ma tajy Raquel ae — he'i okuapy.

⁷ Ha'e ramo aipoe'i ha'e kuery pe:

— Ndaka'arui teri, novaẽi teri mymba kuery vexa'i pemboty aguã. Pemboy'u vexa'i kuery, ha'e peraa pemongaruve — he'i.

* 28:19 Tery Luz ma português pygua ayvu “Luz” e'ŷ raka'e, ha'e kuery ayvu py “Amêndoa'y” 'ea. Ha'e rã tery Betel ma “Nhanderuete ro” 'ea.

8 Ha'e kuery ombovai:

— Ore kuery pe nda'evei, mymba kuery ijatypa e'ŷa ja. Ha'e ramo 'rãe roipe'a ita ygua juru gui romboy'u aguã — he'i okuapy.

9 Ha'e kuery reve ijayvu teri reve ovaẽ ouvy Raquel nguu rymba kuery reve, mba'eta veva'i re openaa rupi oiko.

10 Ha'e gui oxy kyvv Labão rajy Raquel hymba veva'i kuery reve ou oiny rã Jacó oexa vy oo oipe'a ita ygua juru gui. Ha'e rami vy omboy'u oxy kyvv Labão rymba veva'i kuery.

11 Ha'e nunga Jacó ojapopa vy Raquel oayvu vy ojae'o.

12 Ha'e vy Raquel pe Jacó omombe'u tuu retarã ra'y ha'e Rebeca pi'a oikoa. Ha'e ramo kunha va'e onha ovy nguu pe omombe'u aguã.

13 Heindy pi'a Jacó ovaẽague Labão oendu vy onha reve oo ovaexi. Oikuavã, oayvu, ha'e ngoo py ogueraa. Ha'e ramo Labão pe Jacó omombe'upa oguataa rupi oiko va'ekue.

14 Labão aipoe'i ixupe:

— Anhetẽ ndee xekägue ha'e xero'o regua reiko — he'i. Ha'e ramo Jacó peteĩ jaxy re oiko hexeve.

15 Ha'e rire Labão aipoe'i Jacó pe:

— Ndee xeretarã reiko va'eri ha'evea rami teve remba'eapo rive xevy? Emombe'u ke mba'e re 'rã tu remba'eapo — he'i.

16 Labão oguerek mokoĩ guajy: guaiguïve va'e ma Lia, ha'e rã kyrïve va'e ma Raquel.

17 Lia ma oexa porã va'e'ŷ, ha'e rã Raquel ma opa mba'e py iporã, hova rupi voi.

18 Jacó oayvu Raquel. Ha'e vy aipoe'i Labão pe:

— Sete ma'etŷ re amba'eapo 'rã ndevy, nderajy kyrïve va'e Raquel re.

19 Labão ombovai:

— Amboae ra'yxyrã ame'ẽ 'rãgue py ha'eveve ndevy ae ame'ẽ aguã. Eiko ha'vy xea py — he'i.

20 Ha'e rami vy sete ma'etŷ re Jacó ombo'eapo Raquel re. Ixupe rã sete ma'etŷ oaxapa voi, mboapy ára ete'i merami, oayvu ete ramo.

Lia ha'e Raquel re omendaague

21 Ha'e gui Jacó aipoe'i Labão pe:

— Eme'ẽ ma'vy xera'yxyrã. Ovaẽ ma nha'angaague, hexe amenda aguã — he'i.

22 Ha'e ramo Labão omboatypa avakue ha'e py ikuai va'e ngaru ojapoa py.

23 Pyávy ma ogueru guajy Lia, Jacó pe ome'ẽ. Ha'e ramo jogueroke.

24 (Guajy Lia rembiguairã Labão ome'ẽ guembiguai kunha Zilpa.)

25 Ko'ëgue Lia ri ty ra'e oikuua vy Jacó aipoe'i Labão pe:

— Mba'e re tu ha'e rami xeapo ra'e? Nderajy Raquel re e'ŷ ri ty'y amba'eapo raka'e? Mba'e re tu xembotavy ri?

26 Labão ombovai:

— Nda'evei ha'e rami rojapo aguã orerekaoa py. Nda'evei guaiguïve va'e gui kyrïve va'e ranhe omenda aguã.

27 Kova'e semana opa rire ma ame'ẽ 'rã Raquel avi, sete ma'etŷ re ju xevy remba'eapo aguã re — he'i.

28 Jacó ojou porã vy peteĩ semana oiko Lia reve. Ha'e ramo mae ma guajy Raquel avi Labão ome'ẽ ta'yxyrã.

29 (Guajy Raquel rembiguairã Labão ome'ẽ avi guembiguai kunha Bila.)

30 Ha'e gui Jacó joguerek Raquel reve. Lia gui oayuve Raquel. Ha'e gui sete ma'etŷ re ju ombo'eapo Labão pe.

Jacó ra'y kuery itui'ique

31 Lia ndoayvuivea SENHOR oexa vy ojapo imemby aguã rami. Ha'e rã Raquel ma imemby va'erã e'ŷ oiko.

32 Ha'e ramo Lia kyrï va'e oguerek vy oikuavã ava'i. Ha'e va'e omboery Rúben. Ha'e vy aipoe'i:

- Xeporiau rā SENHOR oexa vy xepytyvō. Ha'e ramo aŷ xeme xerayvu 'rā — he'i.*
 33 Teīgue ju kyrī va'e oguereko vy oikuavā ava'i. Ha'e vy aipoe'i:
 — Ajexavai aikovya SENHOR oikuua vy kova'e ju ome'ẽ xevy — he'i vy omboery Simeão.†
 34 Peteīgue ju Lia kyrī va'e oguereko vy oikuavā ava'i. Ha'e vy aipoe'i:
 — Aŷ kova'e gui ma xeme xereve onhemoirūve 'rā, mboapy ta'y areko ramo — he'i.
 Ha'e vy omboery Levi.‡
 35 Peteīgue ju oguereko kyrī va'e, ava'i. Ha'e vy aipoe'i:
 — Aŷ ma arov'y'a SENHOR — he'i. Ha'e vy omboery Judá.§ Ha'e gui ndoguerekovei ranhe kyrī va'e.

30

- 1 Ha'e gui Raquel Jacó ra'y ndoguerekoiia oikuua vy hakate'ỹ guyke re. Ha'e vy aipoe'i Jacó pe:
 — Xemomemby ma ta'vy. Ha'e rami e'ỹ ramo amano 'rā — he'i.
 2 Ha'e ramo Jacó ivai Raquel pe. Ha'e vy aipoe'i:
 — Xee ri ty'y Nhanderuete? Ha'e ae nememby e'ỹ aguã rami ojapo — he'i.
 3 Kunha va'e ombovai:
 — Apy ma oĩ xerembiguai Bila. Xerekovia hexeve ju pejogueroke kyrī va'e oguereko aguã, imemby ramo xememby rami oiko aguã — he'i.
 4 Ha'e vy ixupe ome'ẽ guembiguai Bila ta'yxy jevyrā. Ha'e ramo Jacó jogueroke.
 5 Ha'e rami vy Bila oguereko Jacó ra'y.
 6 Ha'e ramo Raquel aipoe'i:
 — Nhanderuete xere oikuua pota vy oendu xeayvua. Ha'e rami vy ome'ẽ xepi'arā — he'i. Ha'e nunga rupi omboery Dā.*
 7 Ha'e gui Raquel rembiguai Bila teīgue ju oguereko kyrī va'e Jacó ra'y.
 8 Ha'e rā Raquel aipoe'i:
 — Xeryke reve ropu'ã vaipaa gui xepo'aka ma hexe — he'i vy omboery Naftali.†
 9 Ha'e gui Lia ma kyrī va'e ndoguerekoveia oikuua vy ogueru guembiguai Zilpa, ha'e Jacó pe ome'ẽ ta'yxy jevy mboerā.
 10 Ha'e gui Lia rembiguai Zilpa oguereko'i ma Jacó ra'y.
 11 Ha'e ramo Lia aipoe'i:
 — Iporā ete va'e oiko xevy — he'i vy omboery Gade.‡
 12 Ha'e va'e rire Lia rembiguai Zilpa teīgue ju oguereko Jacó ra'y.
 13 Ha'e ramo Lia aipoe'i:
 — Aŷ ma avy'a, xepi'a kuery voi xererovy'a ete 'rā — he'i vy omboery Aser.§
 14 Ha'e gui Rúben ma trigo omono'õa py ojou mandrágora rembypy mba'ety py.* Oxy Lia pe ogueru. Ha'e ramo Raquel aipoe'i Lia pe:
 — Eme'ẽ xevy mandrágora rembypy ndepi'a ojou va'ekue gui.
 15 Lia oporandu:
 — Reraa ma xeme xegui. Aŷ mandrágora rembypy xepi'a ojou va'ekue ju ta reraa?
 Ha'e ramo Raquel ombovai:
 — Ha'e rami rā ma aŷ pyávy tove Jacó ndereve toke mandrágora rembypy ndepi'a ojou va'ekue rekovia — he'i.
 16 Ka'aru'i Jacó mba'ety gui ou ramo Lia oo ovaexī. Ha'e vy aipoe'i:
 — Aŷ xereve ju 'rā reke, romboekovia kuri mandrágora rembypy xepi'a ojou va'ekue re — he'i ramo ha'e va'e pytū oke hexeve.

* 29:32 Tery Rúben ma "Ma'ẽ, ipi'a oiko" 'ea. † 29:33 Tery Simeão ma "Oikuua porāmby" 'ea. ‡ 29:34 Tery Levi ma "Irū" 'ea. § 29:35 Tery Judá ma "Herovy'aa" 'ea. * 30:6 Tery Dā ma "Joguerekoa" 'ea. † 30:8 Tery Naftali ma "Joe apu'ãa" 'ea. ‡ 30:11 Tery Gade ma "Iporā va'e oikoa" 'ea. § 30:13 Tery Aser ma "Ovy'a va'e" 'ea. * 30:14 Mandrágora ma jai rogue. Ha'e kuery pe rā moã imemby aguã regua.

- ¹⁷ Lia ojerurea Nhanderuete oendu ramo peteī nhiruīa ma oguereko Jacó ra'y.
- ¹⁸ Ha'e ramo Lia aipoe'i:
— Nhanderuete ome'ē xevy mba'emo porā, xeme pe xerembiguai ame'ē rire — he'i vy omboery Issacar.[†]
- ¹⁹ Lia peteīgue ju oguereko kyrī va'e. Mboapy memea ma oguereko Jacó ra'y.
- ²⁰ Ha'e rami vy Lia aipoe'i:
— Nhanderuete mba'emo iporā ete va'e ome'ē xevy. Aŷ xereve anho 'rā xeme opyta, mboapy meme ta'y areko ramo — he'i vy omboery Zebulom.[‡]
- ²¹ Ha'e rire kunha'i ju oguereko. Ha'e va'e ma omboery Diná.
- ²² Ha'e gui Raquel re ju Nhanderuete oikuua pota vy ojerurea oendu avi. Ha'e vy ojapo imemby aguā rami.
- ²³ Oguereko kyrī'i va'e, ava'i. Ha'e vy aipoe'i:
— Aŷ ma Nhanderuete axīmba rei aguā rami ve'ŷ xeapo — he'i.
- ²⁴ Ha'e vy omboery José. Aipoe'i:
— Tove Nhanderuete amboae ju tome'ē xepi'arā — he'i vy.[§]
- ²⁵ Ha'e gui Raquel José oguereko'i rire Jacó aipoe'i Labão pe:
— Aŷ ma xemondouka ju xeyvy re ae xerekoa oī va'e katy.
- ²⁶ Eme'ē ta'vy xera'yxy kuery ha'e xera'y kuery, ha'e kuery re amba'epo vaipa ete rire. Ha'e ramo aa 'rā. Ndee voi reikuua mbovy ma'etŷ re ha'e marā rami pa ndevy amba'epoague.

Jacó om̄ba'epo ju aguā re Labão ijayvuague

- ²⁷ Ha'e ramo Labão aipoe'i:
— Aŷ xemboaxya rendu vy ke epytave xereve. Aikuua ma ndere vy Nhanderuete xemoingo porā.
- ²⁸ Emombe'u ke mba'e nunga re pa remba'epo aguā xevy. Ha'e ramo xee apaga 'rā — he'i.
- ²⁹ Jacó aipoe'i:
— Ndee reikuua marā rami pa ndevy amba'epoague, nerymba kuery re apena porāague voi.
- ³⁰ Xee aju e'ŷ mbove mboapy'i rerekva'ekue. Aŷ ma heta ete ma rerekva. Ndevy amba'epo ramo Nhanderuete nemoingo porā. Ha'e gui aŷ araka'e tu ha'vy amba'epo ta xee ae mba'erā re? — he'i.
- ³¹ Ha'e ramo Labão oporandu:
— Mba'e tu ha'vy reipota ame'ē?
- Jacó aipoe'i:
— Mba'eve eme'ē eme. Nerymba kuery re apena, arōve jevy 'rā aikovy, po rami ri xere rejapo ramo.
- ³² Kova'e árave aaxa 'rā nerymba kuery ha'e javi ikuiaia rupi. Vexa'i kuery mbyte gui aipe'apa 'rā ipara'i va'e, ipara va'e ha'e huū va'e ha'e javi. Ha'e gui kavara kuery mbyte gui aipe'a 'rā ipara va'e ha'e ipara'i va'e. Ha'e va'e nunga rive topyta amba'epoague repy.
- ³³ Po rami 'rā reikuua ha'evea ramo pa aiko tyrā pa anya. Reju xapy'a vy rexaxe ramo angana va'ekue ha'e javi 'rā ojekuaa nerenton. Xapy'a rei kavara kuery ipara'i va'e'ŷ, ipara e'ŷ va'e, e'ŷ vy vexa'i kuery huū e'ŷ va'e xereve rejou ri vy reikuua 'rā xemondaague — he'i.
- ³⁴ Ha'e ramo Labão aipoe'i:
— Tá, ha'eve. Ndeayvuague ramo ae tema eiko — he'i.
- ³⁵ Ha'e va'e árave guymba kavara ava Labão oguereko va'e gui omboja'opa ipara puku va'e ha'e ipara va'e ha'e javi. Kavara kunha ikuai va'e mbyte gui oipe'a ipara'i va'e ha'e ipara

[†] 30:18 Tery Issacar ma “Mba'epoa repy” 'ea. [‡] 30:20 Tery Zebulom ma “Tekoa” 'ea. [§] 30:24 Tery José ma “Tome'ēve ju” 'ea.

va'e, ha'e javive ipara xiñ va'e. Vexa'i ikuai va'e mbyte gui oipe'a huñ va'e. Omboaxapa gua'y kuery pe.

³⁶ Mboapy araa py nhavañ aguã va'e py ogueraa Jacó-a gui. Ha'e rã Jacó ma Labão rymba mboae re opena oikovy.

Jacó oguerekopave ovyaque

³⁷ Ha'e gui Jacó ojou yvyra rakã ipyau va'e álamo, aveleira ha'e plátano guigua. Ha'e vy oapiro vy ombopara puku-puku, yvyra xiñ va'e ojekuaa aguã rami.

³⁸ Ha'e vy yvyra rakã oapiro va'ekue omoõ mymba renonde yy rape py, mymba oy'uaty py ae. Ha'e rami vy yy oy'u aguã ou vy ipuru'apa.

³⁹ Mymba kuery guenonde re yvyra oĩ jave ipuru'apa. Ha'e rami vy vexa'i kuery oguerekoo ipara puku va'e, ipara'i va'e ha'e ipara va'e.

⁴⁰ Ha'e gui Jacó omboja'o vexa'i. Labão rymba kuery ipara puku ha'e huñ va'e ikuiaia katy ombojere mymba mboae. Guymba kuery ae omombyta mombyry'i, nomboje'ai Labão rymba kuery re.

⁴¹ Ha'e gui vexa'i tuvixakueve ta'yxe nhavõ mymba kuery renonde Jacó omoõ kuerei yvyra, yy rape yvýry mymba kuery oexa aguã py, yvyra oexa reve ta'y aguã.

⁴² Ha'e rã vexa'i kuery ikangykue ta'yxe ramo ma nomoõ yvyra. Ha'e rami vy ikangykue Labão pe opytapa, ha'e rã imbaraetekue ma Jacó pe opytapa.

⁴³ Ha'e rami vy Jacó oguerekopave tema: mymba vexa'i, guembiguai kuery avakue ha'e kunhague, camelô, mburika guive.

31

Nguu kuery yvy katy Jacó ojevyaque

¹ Ha'e gui Jacó oendu Labão ra'y kuery ijayvu vy "Jacó tu oipe'apa rima nhanderu mba'e. Nhanderu mba'e gui omba'erã ha'e javi ojou" he'i okuapy rã.

² Jacó oexa Labão voi ndoguerovy'avei rã ha'ekue rami e'ŷ.

³ SENHOR aipoe'i Jacó pe:

— Tereo ju nderu kuery yvy katy, neretarã kuerya katy ae. Xee aiko 'rã ndereve — he'i.

⁴ Ha'e ramo Jacó oenoõ uka Raquel ha'e Lia nhuñdy rupi guymba kuery reve oikoa py.

⁵ Ha'e vy aipoe'i ha'e kuery pe:

— Xee aikuuaa penderu ha'ekue rami e'ŷ ndaxererovy'aveia. Ha'e rami teĩ xeru Ruete xereve oiko.

⁶ Peẽ kuery ae voi peikuuaa anhea'ãa rupi penderu pe amba'eapoague.

⁷ Ha'e rami teĩ penderu xembotavypa herekovy. Dez-kue ma opaga 'rã va'ekue oguerova. Ha'e rã Nhanderuete ma mba'eve py ndojapo vai ukai xere.

⁸ Xapy'a rei xevy "Vexa'i ipara'i va'e remba'eapoague repy toptya" he'i ramo hymba kuery ipara'i va'e anho 'rã ta'y'i. Ha'e rã xapy'a rei "Ipara puku va'e remba'eapoague repy toptya" he'i ramo hymba kuery ipara puku va'e anho ta'y'i.

⁹ Ha'e rami vy Nhanderuete nderu rymba kuery oipe'a vy xevy ju omboaxa.

¹⁰ Ha'e gui mymba kuery ipuru'a'ipa jave ama'ẽ vy aexa ra'u kavara ava ojeupi va'e ipara puku, ipara'i ha'e ipara va'e meme ikuaria.

¹¹ Ha'e anjo Nhanderuetea guigua aexa ra'u rã "Jacó" he'i ramo ambovai: "Apy ma aĩ."

¹² Aipoe'i xevy: "Ema'ẽ, ha'e exa kavara ava ojeupi va'e ipara puku, ipara'i ha'e ipara va'e meme ikuaria, mba'eta aexapa Labão ndere ojapo vaia.

¹³ Xee ma Nderuete Betel py ajexa uka va'ekue. Ha'e py ma ita remopu'ã va'ekue áry azeite renhoẽ reve renhemboayvu xevy. Epu'ã ke aŷ, kova'e yvy gui tereo ju neretarã kuerya katy" he'i va'ekue xevy — he'i.

¹⁴ Ha'e ramo Raquel ha'e Lia ombovai vy aipoe'i ixupe:

— Anhetẽ ete ri oreru ro py noïvei orevy ome'ẽ va'erã.

¹⁵ Ndorererekoi ri ty'y amboae yvy guigua oguerekoa rami? Mba'eta orevende, omomba orevy guarã va'ekue.

¹⁶ Mba'eta oreru gui Nhanderuete opa mba'e oipe'apa va'ekue ma nhanemba'e meme, ha'e nhandera'y kuery mba'e. Aŷ ejapo tema Nhanderuete ndevy aipoe'iague — he'i.

¹⁷ Ha'e ramo Jacó opu'ã. Gua'y kuery ha'e gua'yxy kuery camelô áry omoĩ vy
¹⁸ ogueraapa guymba kuery ha'e oguereko va'e ha'e javi. Hymba kuery Padã-Arã py oiko
jave ojou va'ekue omboatypa, nguu Isaque-a py Canaã yvy re oo aguã.

¹⁹ Labão guymba rague ojaya aguã oo jave Raquel imonda mba'emo ra'angaa nguu ro py
oĩ va'ekue re.

²⁰ Ha'e rami vy Jacó ju ombotavy Arã pygua Labão. Nomombe'ui ojava aguã.

²¹ Ojava ovv opa mba'e oguereko va'e reve. Opu'ã vy oaxa ovv yakã Eufrates, Gileade
yvyty katy oo vy.

Jacó rakykue Labão ooague

²² Mboapy araa py mae ma Labão pe omombe'ua Jacó ojavaague.

²³ Ha'e ramo guyvy kuery ngupive ogueraa vy oje'oi hakykue. Sete ára re oguata. Ha'e
vy Gileade yvyty re ovaãa py oupity.

²⁴ Pyávy oexa ra'u rã Nhanderuete ou Arã pygua Labão-a py. Ha'e vy aipoe'i:

— Eiko kuaa ke, Jacó pe ndeayvu eme iporã va'e rupi, neĩ iporã e'ŷ va'e rupi voi — he'i.

²⁵ Ha'e gui Labão oupity ma Jacó ha'e va'e yvyty re Jacó oo'i oupiague py. Labão voi
oupi oo'i Gileade yvyty re guyvy kuery reve.

²⁶ Ha'e vy Labão aipoe'i Jacó pe:

— Mba'e tu xere rejapo xembotavy vy? Xerajy kuery reraa ra'e, escravo-rã kyxe py
ogueraa va'e rami rive.

²⁷ Mba'e re tu rejava nhemi ri xembotavy aguã? Mba'eve neremombe'ui xevy romon-
douka porã'i aguã, mboraei rupi, pandeiro ha'e mba'epu ixã reta va'e rupi.

²⁸ Mba'e re tu nderejapoi xeramymino kuery ha'e xerajy kuery ayvupa'i aguã rami?
Ha'eve e'ŷa rami reiko.

²⁹ Ha'e rami avi xee xepo'aka ndere ajapo vai aguã, va'eri kuee pyávy nderu Ruete ijayvu
xevy. Ha'e vy aipoe'i: “Eiko kuaa ke Jacó pe ndeayvu vai e'ŷ aguã, neĩ ndeayvu porã e'ŷ
aguã”, he'i va'ekue xevy.

³⁰ Aŷ ma nderu ro re nderevy'avei vy reo xea gui. Ha'e rami vy mba'e re tu ha'vy nemonda
ri xeruete ra'angaa areko va'ekue re? — he'i.

³¹ Ha'e ramo Jacó ombovai:

— Akyje vy ndaikuua ukai ndevy. Aipoa'e xejeupe: “Xapy'a rei rã guajy kuery oipe'a
nhea'ã 'rã xegui”, ha'e va'ekue.

³² Ha'e gui nderuete ra'angaa reruare rejou ramo toikove eme. Nhaneretarã kuery oexaa
py eikuua porã pota xemba'e oĩ va'e rupi nemba'e rejouxé vy. Eraapa ju nemba'e — he'i.
Mba'eta Jacó ma ndoikuuai ra'e Raquel imondaague.

³³ Ha'e gui Labão oike Jacó ro Lia ha'e hembiguai kuery kunhague ikuiaia py. Opovvvypa
teĩ ndojoui. Lia oĩa gui oẽ vy Raquel oĩa py ju oike.

³⁴ Tuuete ra'angaa ma Raquel onhomí ra'e camelô kupe áryguá guýry. Ha'e va'e áry ju
oguapy oiny. Labão opy ha'e javi rupi opovvvypa teĩ ndojoui.

³⁵ Ha'e ramo Raquel aipoe'i nguu pe:

— Xeruvixa, ndevai eme ke. Nda'evei apu'ã aguã nerendirre, kunhague reko gui
xemba'eaxy vy — he'i. Ha'e ramo oeka teĩ ndojoui nguuete ra'angaa ngoo py oguereko
va'ekue.

³⁶ Ha'e rami rã Jacó ivai vy ijayvu Labão pe. Ha'e vy aipoe'i:

— Mba'e nunga py tu ha'vy noronhe'ẽ rendui raka'e? Mba'e py ha'vy ajejavý vaipa
raka'e ndevy, xerakykue reju aguã?

³⁷ Xemba'e rei-rei rupi repovvvypa reia rupi mba'e tu ha'vy rejou ndero gui guare? Eru
apy xeretarã kuery nderyyy kuery renonde, ha'e kuery oikuua pota aguã nhanderekokue
re.

³⁸ Vinte ma'etŷ re ndea py aiko jave ma nerymba vexa'i, kavara na'imemby porã e'ŷi, neĩ
ndakarui guive nerymba vexa'i re.

³⁹ Neĩ peteīgue ndarui ndevy vixo omondoro va'ekue. Ha'e nunga oiko rã xee ae amboekovia. Ha'e rã ara py e'ŷ vy pyávy mba'emo nerymba kuery ogueraa ramo ndee remboekovia kuerei xepo gui.

⁴⁰ Ara py aiko axy kuaray aku gui, ha'e pyávy yro'y gui ju ajexavai aikovy va'ekue, ndake kuaavei guive.

⁴¹ Vinte ma'etŷ re aiko va'ekue ndero py. Catorze ma'etŷ re ndevy amba'eapo nderajy kuery mokoïve re, ha'e gui seis ma'etŷ re ju nerymba kuery re apena aikovy va'ekue. Ha'e jave dez-kue ha'ekue-'ekue e'ŷ rami rerova xevy repaga 'rã va'ekue.

⁴² Anhetẽ Xeru Ruete, Abraão Ruete, Isaque Ojererokyjea va'e ae xereve ndoikoi va'e rire ma ndee xemondouka rive 'rāgue. Ha'e rami tei Nhanderuete xere opena amba'eapoa py ajexavai rã. Ha'e nunga rupi ae kuee pyávy ijayvu raka'e ndevy — he'i.

Jacó reve Labão peteī rami ikuai aguã ojapoague

⁴³ Ha'e ramo Labão aipoe'i Jacó pe:

— Kova'e kunhague ma xerajy kuery ikuai, kova'e avakue'i ma xeramymino kuery, kova'e mymba kuery ma xerymba meme ikuai. Opa mba'e jaexa va'e xemba'e meme. Mba'e tu ha'vy ajapo ta aŷ xerajy kuery pe ha'e ipi'a kuery oikuavã va'ekue pe?

⁴⁴ Aŷ ma eju, xereve jajapo peteī rami ju nhandekuai aguã, nhande mokoïve nhanema'endu'a riae aguã rami — he'i.

⁴⁵ Ha'e ramo Jacó peteī ita ojopy vy omopu'ã ijytarã rami.

⁴⁶ Ha'e vy aipoe'i guyvy kuery pe:

— Pemono'õ ke ita — he'i. Ha'e ramo ita ogueru vy omboaty. Ita omboaty va'ekue yyýry okaru okuapy.

⁴⁷ Ha'e va'e ma Labão omboery Jegar-Saaduta. Ha'e rã Jacó ma omboery Galeede.

⁴⁸ Ha'e ramo Labão aipoe'i:

— Kova'e itaaty ma aŷ guive topyta nhande mokoïve moma'endu'aarã — he'i. Ha'e nunga rupi ae omboerya Galeede.*

⁴⁹ Omboery avi Mispa, mba'eta aipoe'i:

— Tove Nhanderuete topena xere ha'e ndere joe gui mombyry jaikoa ja. Toikuaa pota nhandeayvuague jajapo aguã re.[†]

⁵⁰ Ha'e gui xapy'a rei xerajy kuery reayvu ve'ŷ vy amboae kunha re ju remenda ramo avave rei oikuua e'ŷ tei tove Nhanderuete toikuaa pota ha'e nunga re, mokoïve nhanderexa vy.

⁵¹ Labão aipoe'ive ju Jacó pe:

— Apy nhande mokoï mbyte oĩ itaaty ha'e ita amopu'ã va'ekue.

⁵² Tove kova'e itaaty ha'e ita topyta nhanemoma'endu'aarã, kyvõ katy gui itaaty rovai katy aaxa e'ŷ aguã, neĩ ndee ma voi nda'evei itaaty neĩ ita reaxa aguã kyvõ katy.

⁵³ Tove nhaneramoĩ kuery Abraão ha'e Naor Ruete toikuaa pota nhandere — he'i. Ha'e ramo Jacó oura nguu Isaque Ojererokyjea va'e rery rupi.

⁵⁴ Ha'e va'e yyty re Jacó ojuka peteī mymba Nhanderuete pe, ha'e guetarã kuery oenoimba mbojape ho'u aguã. Ho'upa vy ha'e va'e pyávy ju yyty re oke.

⁵⁵ Ko'ẽ e'ŷ mbove'i Labão opu'ã vy oayvupa guamymino kuery ha'e guajy kuery. Peteī-teī ogueroayvu porã. Ha'e vy mae ma ojepe'a vy oo ju ngoo katy.

32

¹ Jacó voi oguatave ju. Ha'e ramo Nhanderuetea guigua anjo kuery jogueru ovaexī aguã.

² Ha'e kuery ou rã Jacó oexa vy aipoe'i:

— Apy rima Nhanderuetea guigua ikuiaia — he'i vy omboery Maanaim.*

Esaú reve Jacó peteī rami ju ikuai aguã ojapoague

* 31:48 Tery Galeede ma “Itaaty nhanema'endu'a aguã” 'ea. † 31:49 Tery Mispa ma “Torre oikuua pota va'ety oña” 'ea. * 32:2 Tery Maanaim ma “Mokoĩ regua ikuiaia” 'ea.

³ Ha'e gui Jacó guenonde re omondouka guyke'y Esaú pe oayvu mombe'uarā kuery, Edom regua Seir yvy katy oī ramo.

⁴ Ha'e vy aipoe'i imondovy ha'e kuery pe:

— Po rami pendeayvu 'rā xeruvixa Esaú pe: “Nerembiguai Jacó aipoe'i uka: ‘Aguataa rupi Labão ro py ranhe aiko va'ekue aŷ peve.

⁵ Areko vaka, mburika, vexa'i, ha'e gui xerembiguai avakue ha'e kunhague. Xeruvixa, ndea py amondouka xeayvu mombe'uarā nerondenonde xemboaxy uka aguā' he'i uka”, peje 'rā ixupe.

⁶ Ha'e gui tenonde re omondouka va'ekue ou jevy vy aipoe'i Jacó pe:

— Roo nderyke'y Esaú-a py peve. Ha'e voi ou nerovaexī aguā quattrocentos avakue reve — he'i okuapy.

⁷ Ha'e rami ijayvu rā Jacó oendu vy okyje vaipa, onhemondyi guive. Ha'e vy omboja'o ngupive ikuai va'e ha'e javi: vexa'i, vaka ha'e camelو kuery. Mokoī henda-enda py omboaty.

⁸ Mba'eta ijayvu vy “Xapy'a rei Esaú ou vy peteī pygua ojukapa teī amboae pygua oo jepe 'rā”, he'i.

⁹ Ha'e gui Nhanderuete pe Jacó ojerure vy aipoe'i:

— SENHOR xeramoī Abraão ha'e xeru Isaque Ruete, xevy aipo're va'ekue: “Tereo ju ndeyvy re neretarā kuerya katy. Ha'e py ma ndere apena porā 'rā”, 're va'ekue.

¹⁰ Xee nerembiguai ma xe'yvy'i ete ndee xemboaxy vy ndeayvuague rami xererekō porā aguā. Mba'eta xepopoka reve anho aaxa karamboae kova'e Jordão yakā. Aŷ ma mokoī henda py ju oreaty.

¹¹ Xereraa jepe ke ke'y Esaú po py aiko vai e'ŷ aguā. Mba'eta akyje apy ou vy xejuka gui, ha'e xera'yxy ha'e xera'y kuery ojukapa gui.

¹² Xevy aipo're va'ekue: “Xee apena 'rā ndere. Amboeta 'rā neramymino kuery ita ku'i heta aguā, heta ete ramo avave rei ndoipapa kuaai aguā rami”, 're va'ekue — he'i.

¹³ Ha'e va'e pyávý Jacó opyta ha'e py. Mba'emo ogueraaa va'e gui oguereko katu guyke'y Esaú pe ome'ē va'erā:

¹⁴ duzentos kavara, vinte kavara ava, duzentos vexa'i, vinte vexa'i ava,

¹⁵ trinta camelò ikamby va'e ta'y'i reve, quarenta vaka, dez vaka ava, vinte mburika ha'e dez ta'y'i.

¹⁶ Ha'e va'e nunga ogueraaa ukapa guembiguai kuery pe, peteī-teī henda py omoī. Guembiguai kuery pe aipoe'i imondovy:

— Tapeo xerenonderā, pemondyi pokā mymba kuery peteī-teī regua amboae regua gui mombyry'i oo aguā — he'i.

¹⁷ Jypy oo va'e pe aipoe'i:

— Ke'y Esaú rerovaexī rā oporandu 'rā ndevy: “Mava'e tu nembou? Marā katy tu reo? Mava'e rymba tu nerondenonde ikuai?” he'i ramo

¹⁸ rembovai 'rā: “Nerembiguai Jacó rymba rima aru. Nguvixa Esaú peguarā ombou uka. Ha'e gui ha'e voi ou oiny orerakykue”, peje 'rā — he'i.

¹⁹ Mokoīa oo va'e pe ha'ekue rami ju aipoe'i uka, mboapya oo va'e pe voi. Mymba kuery mondyiarā ha'e javi pe aipoe'i:

— Po rami meme 'rā pendeayvu Esaú peovaexī vy.

²⁰ Aipopeje 'rā: “Nerembiguai Jacó ou oiny orerakykue”, peje — he'i uka imondovy. Mba'eta ojeupe aipoe'i: “Mba'emo ame'ē uka vy ambopy'a porā 'rā avaexī e'ŷ mbove. Ha'e gui ma xee aexa 'rā. Ha'e rami rā xapy'a rei xejou porā 'rā”, he'i.

²¹ Ha'e rami vy guenonde ranhe omondouka ome'ē uka va'erā. Ha'e rā ha'e ma ha'e va'e pytū re opyta ranhe okeague py.

Nhanderuetea guigua ava reve Jacó joguero'aague

²² Ha'e va'e pyavyve Jacó opu'ā vy omboaty mokoīve gua'yxy, mokoīve guembiguai kunha ha'e gua'y kuery onze-ve ikuai va'e. Ha'e vy ogueraapa Jaboque yakā oaxaaty peve.

- ²³ Ha'e kuery ranhe omboaxa yakā rovai re. Oguereko va'e ha'e javi omboaxapa.
- ²⁴ Jacó ha'e ae'i opyta ha'e py. Ha'e ramo peteī ava ojekuaa vy hexeve joguero'a ko'ē peve.
- ²⁵ Ava va'e ma Jacó re nda'ipo'akaia oexa vy opoko hi'u guýry. Ha'e rami vy omboi Jacó 'u ojepotaa, joguero'a vy.
- ²⁶ Ha'e vy aipoe'i:
- Xepoi katu, taa, mba'eta ko'ē ta ma.
- Jacó ombovai:
- Noromondoukai 'rā xereroayvu porā e'ŷa ja — he'i.
- ²⁷ Ha'e ramo oporandu:
- Mba'exa tu ha'vy nderery?
 - Jacó — he'i.
- ²⁸ Ha'e rā aipoe'i:
- Aŷ ma Jacó ve'ŷ 'rā nderery, ha'e rā Israel. Mba'eta huvixa rami Nhanderuete ha'e avakue reve renhea'ā ndepo'aka peve — he'i.[†]
- ²⁹ Ha'e gui Jacó aipoe'i:
- Ajerure nderery remombe'u aguā.
- Ombovai:
- Mba'e re tu xerery re reporandu? — he'i. Ha'e vy ogueroayvu porā ha'e py.
- ³⁰ Ha'e va'e henda Jacó omboery Peniel, “Apy ma xerexa py ae Nhanderuete aexa teī xerekove ndoipe'ai”, he'i vy.[‡]
- ³¹ Kuaray oẽ jave oaxa Peniel rupi, okara-karau ovu hi'u oi rire.
- ³² Ha'e rami rire aŷ reve Israel kuery ndo'ui 'rā xo'o rajykue hi'u áry rupi ijapu'a oiny va'e, ava va'e Jacó retyma rajy omboapu'apa rire.

33

Esaú reve Jacó nhovaexiague

- ¹ Jacó oma'ẽ vy oexa Esaú ou oiny rā quatrocentos avakue reve. Ha'e rami vy gua'y kuery omboja'o vy opena uka Lia, Raquel ha'e mokoīve guembiguai kunha pe.
- ² Tenonde omondouka mokoīve guembiguai kunha, ipi'a kuery reve. Ha'e kuery rakykue omondouka Lia imemby kuery reve. Takykue ete omondouka Raquel ipi'a José reve.
- ³ Ha'e va'e kuery gui ha'e ranhe oo vy sete-kue guenapy'ā re oĩ ovu guyke'ya py ovaẽ peve.
- ⁴ Ha'e ramo Esaú onha ouvy ovaexī aguā. Oikuavā, oayvupa. Ojae'o vaipa mokoīve.
- ⁵ Ha'e gui Esaú oma'ẽ vy oexa kunhague ha'e kyrīgue ou oiny rā. Ha'e vy aipoe'i:
- Mava'e kuery tu ndereve ikuai?
- Jacó ombovai:
- Peva'e kuery ma kyrīgue xee nerembiguai pe Nhanderuete ome'ẽ va'ekue — he'i.
 - ⁶ Ha'e gui mokoī hembiguai kunha ovaẽ ouvy opa' kuery reve, ha'e guenapy'ā re oĩmba.
 - ⁷ Ha'e gui Lia omemby kuery reve ju ovaẽ vy ha'e kuery voi guenapy'ā re oĩ. Ha'e gui ma Raquel opa' José reve ovaẽ ouvy vy oĩ guenapy'ā re.
- ⁸ Ha'e ramo Esaú oporandu:
- Mba'erā tu guĩ rami ete nerymba kuery xererovaexī ra'e?
- Jacó ombovai:
- Xeruvixa, anhemboaxy uka vy rima aru ruka kuri ndevy — he'i.
 - ⁹ Ha'e ramo Esaú aipoe'i:
 - Xee ma areko vaipa ma mba'emo. Ndepo py ae ri topyta rerekro va'e. - ¹⁰ Ha'e rā Jacó ombovai:
 - Ejopy katu. Xapy'a rei xejou porā ri rā ajerure ame'ẽ rive'i va'e rejopy aguā re. Mba'eta xevy rā nderova Nhanderuete rova rami ete, xererovy'aa rupi xemovaẽ ramo.

† 32:28 Tery Israel ma “Nhanderuete reve joguero'a va'e” 'ea. ‡ 32:30 Tery Sucote ma “Mymba ro” 'ea.

¹¹ Ha'e nunga rupi ajerure mba'emo'i aru ruka va'ekue rejopy aguã re, xevy Nhanderuete ome'ẽ porãmba rire. Arekopa opa mba'e — he'i. Ha'e rami vy onhea'ã ojopy aguã.

¹² Esaú aipoe'i:

— Jaje'oi ha'vy. Xee ma aa ta tenonde.

¹³ Ha'e ramo Jacó aipoe'i:

— Xeruvixa, ndee reikuua xera'y kuery kyrígue teri ikuiaia. Xereve areko avi vexa'i ha'e vaka ikamby va'e. Xapy'a rei peteĩ ára re xerymba kuery romondyi atã heravy ramo omanomba 'rã ha'e javi.

¹⁴ Ha'e nunga rupi xeruvixa, tereo tema ndee ranhe xee nerembiguai renonde. Ha'e rã xee ma mbeguei'i 'rã aa nderakykue, vaka romondyi va'e ha'e kyrígue ooa'i rami, Seir py ndee xeruvixaa py avaẽ peve — he'i.

¹⁵ Esaú ombovai:

— Ha'e rami rã ndereve taeja xereve ikuai va'e regua.

Ha'e rã Jacó aipoe'i:

— Mba'erã tu ha'e kuery optyta ta? Xeruvixa, ha'eve ae ma aexa xemboaxya — he'i.

¹⁶ Ha'e rami rã ha'e va'e árave Esaú oo ju Seir py ouague katy.

¹⁷ Ha'e rã Jacó ma Sucote katy oo. Ha'e py ma ngoorã ojapo, vaka korarã ojao'i guive. Ha'e nunga rupi ae ha'e va'e henda omboery Sucote.

Siquém py Jacó ova ague

¹⁸ Padã-Arã gui Jacó ojevy vy hexa i reve ova  Siquém tetã py, Cana  yvy re o i va'e py. Tetã yv ry oupi oo'i.

¹⁹ Yvy oo'i oupia va'e ma cem hat i va'e re ojogua Siquém ru Hamor ra'y kuery gui.

²⁰ Ha'e py ma ojapo pete i altar. Ha'e va'e ma omboery Nhanderuete Israel Ruete pegua.

34

Siquém pygua kuerya py Din  oo jave guare

¹ Ha'e gui Lia memby Din , Jac  rajy va'e ojepe'a ovy yvy re ikuai va'e rajy kuery rexavy.

² Ha'e jave ha'e va'e pygua huvixa ma Hamor ra'y Siqu m. Ha'e va'e ma Jac  rajy Din  oexa vy ojopy vy ojavyky, oguereko rive.

³ Ovy'a ete kunhata i re, oayvu vy. Ijayvu por i guive ixupe.

⁴ Ha'e gui Siqu m aipoe'i nguu Hamor pe:

— Eru ruka ke ha'e va'e kunhata i xera'yxyr  — he'i.

⁵ Ha'e ramo Jac  oendu tajy Din  oguereko riveague. Ha'e rami te  okyrir  ranhe, ta'y kuery vaka re openaa rupi ikuiaia gui ojevypa e' ja ja.

⁶ Ha'e va'e jave ou Siqu m ru Hamor Jac  reve ijayvu agu .

⁷ Ha'e gui Jac  ra'y kuery oupa nhu ndy gui. Oendu okuapy gueindy re oikoague. Ha'e rami vy nda'eveipa, ipoxypa okuapy, Israel kuery re Siqu m ha'eve e' ja ramigua ojapo rire. Jac  rajy oguereko rive, ha'eve'  va'e ete ojapo.

⁸ Ha'e gui ma ha'e kuery reve Hamor ijayvu. Ha'e vy aipoe'i:

— Xera'y Siqu m ndovy'ai ete oikovy nderajy re. Ajerure peme'  agu  ta'yxyr .

⁹ Ha'e rami vy peiko 'r  oreretar  kueryr . Orevy pe peme'  'r  pendajy kuery, ha'e orerajy kuery ju peraa 'r  pendera'y kuery ra'yxyr .

¹⁰ Ha'e rami vy pendekuai ore kuery reve. Oreyvy ma pendeyvyr  itui. Apy ae pendekuai, mba'emo pejogua peikovy penemb a'r  pejou vy — he'i.

¹¹ Siqu m voi aipoe'i Din  ru ha'e ikyvy kuery pe:

— Ejapo ke ajerurea. Ha'e r  xee ame'  'r  peipota va'e rei.

¹² Mba'emo re pejerure reta te  ame' mba 'r . Ha'e rami avi peme'  kunhata i va'e xera'yxyr  — he'i.

¹³ Ha'e ramo Siqu m ha'e tuu Hamor pe Jac  ra'y kuery ombovai vy ombotavya rupi ijayvu, heindy Din  Siqu m oguereko rive rire. Ha'e vy aipoe'i okuapy:

¹⁴ — Ha'e rami aguã nda'evei, orereindy rome'ẽ aguã ava opire omboi uka e'ŷ va'e ra'yxyrã. Orerekro rami vy ha'e nunga nda'evei.

¹⁵ Peteĩ mba'e pejapo ramo ha'eve 'rã orevy, peẽ kuery avakue ha'e javive ore rami avi pendepire pemboi uka ramo.

¹⁶ Ha'e ramo 'rãe romomenda orereindy kuery, ha'e pendajy kuery re ore romenda, peẽ kuery reve orekuai, ha'e peẽ kuery reve peteĩ regua nhandekuai.

¹⁷ Ha'e rã norenhe'ẽ rendui, pendepire napemboi ukai ramo rogueraa ju 'rã orereindy — he'i.

¹⁸ Ha'e rami ha'e kuery ijayvu rã Hamor ha'e ta'y Siquém ojou porã.

¹⁹ Ha'e rami vy kunumi va'e ndarei ha'e rami ojapo aguã, Jacó rajy oayvu vy. Ha'e va'e ma nguu ro pygua kuery ha'e javi gui omboeteave va'e oiko.

²⁰ Ha'e gui gua'y Siquém reve Hamor tetã korarokë py oo vy ijayvu avakue ha'e py ikuai va'e pe. Ha'e vy aipoe'i:

²¹ — Ha'e va'e avakue ma ndojapo vai 'rã nhandere. Ha'e ramo tove ta'ikuai, tojogua mba'emo. Nhandeyvy ma tuvixa, ha'eve nhande ha'e javi nhandekuai aguã. Ha'e kuery rajy kuery jajopy 'rã nhandera'yxyrã, ha'e nhanderajy kuery nhamomenda 'rã ha'e kuery re.

²² Ha'e rami avi peteĩ mba'e jajapo ramo ha'e va'e avakue pe ha'eve 'rã nhandereve peteĩ'i regua ikuai aguã, avakue apy nhandekuai va'e ha'e javive nhandepire nhamboi uka ramo, ha'e kuery ojapoa rami avi.

²³ Ha'e rire ha'e kuery rymba vaka, mba'emo oguerekro va'e-va'e ha'e javi ha'e hymba kuery ha'e javi 'rã teve nhanemba'erã opyta. Ha'e kuery peteĩ'i re ojerurea jajapo, nhande kuery reve ikuai aguã — he'i.

²⁴ Ha'e ramo tetã korarokë py ikuai va'e ha'e javi onhe'ẽ rendu okuapy Hamor ha'e ta'y Siquém. Ha'e rami vy avakue opire omboi ukapa hokë py ikuai va'ekue ha'e javive.

Simeão ha'e Levi Siquém ro pygua avakue ojukapaague

²⁵ Mboapy araa py avakue haxyo oendu vaipa jave Jacó ra'y mokoĩ Simeão ha'e Levi Diná kyvy kuery ikuai va'e ogueraa okyxe. Tetã py oike ha'e pygua kuery oexa'ã e'ŷa py. Ipoxy reve ojukapa avakue ha'e py ikuai va'ekue ha'e javi.

²⁶ Kyxe py ojuka avi Hamor ha'e ta'y Siquém. Siquém ro gui gueindy Diná oipe'a vy oje'oipa ju.

²⁷ Ha'e gui Jacó ra'y kuery mboae ou vy ojukapaague oexa vy ogueraapa mba'emo tetã py ojou va'e ha'e javi, heindy ha'e pygua oguerekro rive rire.

²⁸ Hymba vexa'i, vaka, mburika oipe'apa tetã gui, ha'e hovai re mba'emo ikuai va'ekue ha'e javi,

²⁹ imba'e rei-rei ha'e javi oipe'apa. Ta'y kuery ha'e ta'yxy kuery oipokuapa heravy ngoo katy.

³⁰ Ha'e ramo Jacó aipoe'i Simeão ha'e Levi pe:

— Ha'e rami peiko vy xemoĩ vai. Pejapo ko'i rupi ikuai va'e xejou vai aguã rami, cananeu ha'e ferezeu kuery. Nhandereta e'ŷ'i ramo xere opu'ã vy xejuka 'rã, xero pygua kuery ha'e javi reve.

³¹ Ha'e kuery ombovai:

— Ha'e rami avi ha'eve 'rã ri nda'u ha'e kuery orereindy itavy rei va'e rami oguerekro rã? — he'i okuapy.

Betel py Jacó altar ojapoague

¹ Ha'e gui Nhanderuete aipoe'i Jacó pe:

— Epu'ã ke, tereo ju Betel katy. Ha'e py eiko, ejapo peteĩ altar Nderuete nderyke'y Esaú gui rejava jave ojexa uka va'ekue pe — he'i.

² Ha'e ramo Jacó ijayvu ngoo pygua kuery ha'e hexeveguia kuery ha'e javi pe. Ha'e vy aipoe'i:

— Pemombo ke mba'emo ra'angaa amboae kuery guigua penembyte perekva'e. Pejeky'a'o ukapa. Pendeao voi pemboekoviapa.

³ Nhapu'á ke, jaje'oi Betel katy. Ha'e py ma ajapo 'rã peteñ altar Nhanderuete ajexavai rei rã xerepy va'ekue pe, aguata aikovya rupi xereve oiko rire — he'i.

⁴ Ha'e ramo Jacó po py omboaxapa mba'emo ra'angaa amboae kuery guigua oguereko va'ekue ha'e javi. Namixã oguereko va'ekue voi omboaxapa. Ha'e ramo Jacó ojatypa vvyra carvalho Siquém katy'i hi'aí va'e guy py.

⁵ Ha'e gui ma oje'oi. Nhanderuete ojapo ha'e katy rai-rai'i tetã oí va'e pygua kuery okyjea oendu aguã rami. Ha'e ramo avave rei ndoje'oiai Jacó ra'y kuery rakykue.

⁶ Ha'e rami vy Jacó hexeve ikuai va'e ha'e javive reve ovaëmba Luz tetã Betel 'epy va'e py, Canaã vvy re oí va'e py.

⁷ Ha'e py ma Jacó ojapo altar. Ha'e va'e henda omboery El-Betel, ha'e py guyke'y gui ojava ovvave Nhanderuete ojexa uka rire.*

⁸ Ha'e py omano Rebeca mongakuaare Débora. Ha'e ramo onhono porã Betel guy katy carvalho hi'aí va'e guy py. Ha'e va'e vvyra omboery Alom-Bacute.†

⁹ Ha'e gui Padã-Arã gui Jacó ou ma ramo Nhanderuete teïgue ju ojexa uka ixupe. Ha'e rami vy ogueroayvu porã.

¹⁰ Ha'e vy aipoe'i:

— Nderery ma Jacó. Aÿ guive ma Jacó ve'ý ma, ha'e rã Israel 'rã nderery — he'i. Ha'e rami vy omboery Israel.

¹¹ Aipoe'ive ju:

— Xee ma Penderuete ipo'akapa va'e aiko. Ndera'y reta ke. Ndegui oiko 'rã peteñ regua, ha'e gui heta regua ju 'rã, huvixa kuery voi.

¹² Ndevy ju ame'ê 'rã vvy Abraão ha'e Isaque pe ame'ê va'ekue. Ha'e gui ndee ndereikovei ma rire neramymino kuery pe ju 'rã ame'ê — he'i.

¹³ Ixugui Nhanderuete ojepé'a vy ijayvu oinyague gui ojeupi ju.

¹⁴ Ha'e ramo Jacó reve Nhanderuete ijayvu oinyague py ixupe omopu'ã peteñ ita ijytarã rami. Hi'áry onhoë guive mba'emo, azeite avi.

¹⁵ Henda hexeve Nhanderuete ijayvuague ma Jacó omboery Betel.

Benjamim itui'i ramo Raquel omanoague

¹⁶ Betel gui oje'oive ju. Efrata py ovaë rai'ia py Raquel oikuavã opi'a. Haxy vaipa ete reve oikuavã.

¹⁷ Imemby raxy ramo hexe opena va'e aipoe'i:

— Enhemondyi eme. Kova'e voi ma reikuavã nho 'rã — he'i.

¹⁸ Ha'e gui omano rã inhe'ê ojepé'a ovvave omboery Benoni. Ha'e rã tuu ma omboery Benjamim.‡

¹⁹ Ha'e gui Raquel omano ramo onhono porã Efrata katy tape oo va'e yvýry. Ha'e va'e ma Belém.

²⁰ Raquel rupa áry Jacó omopu'ã peteñ ita ijytarã. Ha'e va'e ma aÿ reve hi'aí.

²¹ Ha'e gui Israel ojepé'a ju vy oorã ojapo Éder py torre oí va'e rovai re.

²² Ha'e va'e vvy re Israel oiko jave py ta'y Rúben oo vy onheno nguu ra'yxy jevy Bila reve. Ha'e ramo Israel oikuua. Ha'e javi vy doze ikuai raka'e Jacó ra'y kuery.

1 Crônicas 2,1,2

²³ Lia pi'a kuery ma Jacó ra'y jypy guare Rúben, ha'e gui Simeão, Levi, Judá, Issacar ha'e Zebulom.

²⁴ Raquel pi'a ma José ha'e Benjamim.

²⁵ Raquel rembiguai Bila pi'a ma Dã ha'e Naftali.

²⁶ Lia rembiguai Zilpa pi'a ma Gade ha'e Aser. Ha'e va'e kuery Jacó ra'y Padã-Arã py itui'i va'ekue.

* 35:7 Tery El-Betel ma “Betel py Nhanderuete ojekuaa ague” 'ea. † 35:8 Tery Alom-Bacute ma “Carvalho ojae'opaague” 'ea. ‡ 35:18 Tery Benoni ma “Xepi'a xeraxyguigua” 'ea. Ha'e rã Benjamim ma “Xera'y xepo aiporu kuaa regua oí va'e” 'ea.

²⁷ Ha'e gui nguu Isaque-a py ju Jacó ou Manre Quiriate-Arba re oĩ jave py. Ha'e va'e ma Hebrom, Abraão ha'e Isaque ikuaiague.

²⁸ Isaque cento e oitenta ma'etý re oiko.

²⁹ Ha'e gui Isaque ipytuẽ atã vy omano tuja'i vaipa ma vy. Ha'e ramo heraa guamoĩ kuerya py. Ha'e ramo ta'y kuery Esaú ha'e Jacó ae onhono porã.

36

1 Crônicas 1.35-37

¹ Po rami ma Esaú ramymino kuery rery. Hery mboae ma Edom.

² Esaú gua'yxyrã ojou Canaã py ikuai va'e rajy kuery regua: heteu regua Elom rajy Ada, heveu regua Zibeão ra'y Aná rajy Oolibama,

³ ha'e Ismael rajy Nebaiote reindy Basemate.

⁴ Esaú gui Ada oguereko Elifaz, ha'e Basemate oguereko Reuel.

⁵ Oolibama oguereko Jeús, Jalão ha'e Coré. Ha'e va'e kuery ma Esaú ra'y kuery Canaã yvy re itui'i va'ekue.

⁶ Esaú ogueraapa gua'yxy kuery, gua'y kuery, guajy kuery, ngoo py oguereko va'e kuery ha'e javi, guymba kuery, vaka ha'e mba'emo Canaã yvy re oĩ jave ojou va'ekue ha'e javi. Amboae yvy re ju ogueraapa guyvy Jacó gui oja'o vy,

⁷ mba'eta ha'e kuery oguerekopa vy nda'evei joa py ikuaise aguã. Yvy ikuiaia re ma noĩvei hymba kuery omongaru aguã, heta ete ramo.

⁸ Ha'e rami vy Esaú Edom avi hery va'e oo vy Seir yvyty re oiko.

⁹ Pova'e ma Esaú ramymino kuery, edomita kuery Seir yvyty re ikuai.

¹⁰ Po rami ma Esaú ra'y kuery rery: Esaú ra'yxy Ada pi'a Elifaz, ha'e Esaú ra'yxy Basemate pi'a Reuel.

¹¹ Elifaz ra'y kuery ma Temã, Omar, Zefô, Gaetã ha'e Quenaz.

¹² Esaú ra'y Elifaz ma gua'yxy jevy oguereko, Timna hery va'e. Ha'e va'e ma Elifaz gui oguereko Amaleque. Ha'e va'e kuery ma Esaú ra'yxy Ada remiarirõ.

¹³ Ha'e gui Reuel ra'y kuery ma Naate, Zerá, Samá ha'e Mizá. Ha'e va'e kuery ma Esaú ra'yxy Basemate remiarirõ.

¹⁴ Ha'e rã Esaú ra'yxy jevy Oolibama ma Aná rajy, Zibeão ramymino oiko. Esaú gui oguereko Jeús, Jalão ha'e Coré.

¹⁵ Pova'e kuery ma Esaú ra'y kuery huvixa ikuai va'e: Esaú ra'y jypy'igua Elifaz ra'y kuery ma huvixa Temã, Omar, Zefô, Quenaz,

¹⁶ Coré, Gaetã ha'e huvixa Amaleque. Ha'e va'e Elifaz ra'y kuery huvixa meme ikuai, Edom yvy re oiko va'ekue. Ada remiarirõ ikuai.

¹⁷ Ha'e rã Esaú ra'y Reuel ra'y kuery ma huvixa Naate, Zerá, Samá ha'e Mizá. Ha'e va'e Reuel ra'y kuery ma huvixa meme ikuai Edom yvy re. Esaú ra'yxy Basemate remiarirõ ikuai.

¹⁸ Ha'e rã Esaú ra'yxy Oolibama pi'a kuery ma huvixa Jeús, Jalão ha'e Coré. Ha'e va'e huvixa kuery ma Esaú ra'yxy Oolibama Aná rajy memby ikuai.

¹⁹ Ha'e kuery, huvixa kuery guive Esaú ramymino meme ikuai. Ha'e ma Edom.

1 Crônicas 1.38-42

²⁰ Pova'e kuery ma horeu regua Seir ra'y kuery ha'e va'e yvy re ikuai va'e: Lotã, Sobal, Zibeão, Aná,

²¹ Disom, Eser ha'e Disã. Ha'e va'e kuery ma horeu kuery ruvixa, horeu regua Seir ra'y meme ikuai yvy re.

²² Lotã ra'y kuery ma Hori ha'e Homã. Lotã reindy ma Timna.

²³ Sobal ra'y kuery ma Alvã, Manaate, Ebal, Sefô ha'e Onã.

²⁴ Zibeão ra'y kuery ma Aiá ha'e Aná. Aná ma tekoa e'ýa py yvu haku va'e ojou raka'e, nguu Zibeão rymba kuery mburika re opena oikovya py.

²⁵ Aná ra'y kuery ma Disom ha'e tajy Oolibama.

²⁶ Disã ra'y kuery ma Hendã, Esbã, Itrã ha'e Querã.

²⁷ Eser ra'y kuery ma Bilã, Zaavã ha'e Acã.

²⁸ Disā ra'y kuery ma Uz ha'e Arã.

²⁹ Horeu kuery ruvixa ikuai va'e ma huvixa Lotã, Sobal, Zibeão, Aná,

³⁰ Disom, Eser ha'e Disā. Ha'e va'e kuery ma horeu kuery ruvixa ikuai, Seir yvy re heko va'e meme.

1 Crônicas 1.43-54

³¹ Pova'e kuery ma Edom yvy re huvixa kuery ikuai, Israel kuery ruvixave oĩ e'ŷ mbove.

³² Beor ra'y Belá oĩ Edom pygua ruvixa. Tetã opena oikovya ma Dinabá.

³³ Belá omano ramo hekivia oĩ Bozra pygua Zerá ra'y Jobabe.

³⁴ Jobabe omano ramo hekivia oĩ temanita yvy guigua Husão.

³⁵ Husão ju omano ramo hekivia oĩ Bedade ra'y Hadade. Ha'e va'e ma Moabe yvy re Midia pygua kuery ojuka va'ekue. Tetã opena oikovya ma Avite.

³⁶ Hadade omano ramo hekivia oĩ Masreca pygua Samlá.

³⁷ Samlá omano ramo hekivia oĩ Saul, Reobote tetã Eufrates yakã yvy'iry oĩ va'e guigua.

³⁸ Saul omano ramo hekivia oĩ Acbor ra'y Baal-Hanã.

³⁹ Acbor ra'y Baal-Hanã omano ramo hekivia oĩ Hadar. Tetã opena oikovya ma Pau. Ta'xyx ma Meetabel oiko, Matrede rajy, Me-Zaabe ramymino.

⁴⁰ Po rami ma Esaú ramymino huvixa ikuai va'e. Ha'e kuery rery, hetarã kuery rery ha'e heko rery ma joo ramigua: huvixa Timna, Alva, Jetete,

⁴¹ Oolibama, Elá, Pinom,

⁴² Quenaz, Temã, Mibzar,

⁴³ Magdiel ha'e Irã. Ha'e va'e kuery ma Edom pygua ruvixa ikuai. Ha'e kuery rery ma ijyvy heko rery joo ramigua ae. Ha'e va'e kuery ma Edom kuery ru Esaú ramymino ikuai.

37

Tyke'y kuery guyvy José ovendeague

¹ Jacó ma yvy tuu oguata oikovyague rupi ae ju oiko, Canaã yvy re.

² Po rami ma Jacó kuery rekoke. Ta'y José dezessete ma'etý oguereko jave vixa'i re opena oikovy guyke'y kuery reve. Kunumi teri jave tuu rembiguai pi'a kuery reve oiko, Bila ha'e Zilpa pi'a kuery reve. Ha'e kuery reko omombe'u riae nguu pe.

³ Tuu Israel ma gua'y kuery ha'e javi gui oayvuve José, tuja'i ma vy ta'y rire. Ha'e rami vy ikamixa pukurã ojapo, ijyva puku va'e.

⁴ Ha'e gui tyke'y kuery ma ha'e kuery gui tuu José oayvuvea oexa vy nda'ija'evei hexe. Hexeve ijayvu porã aguã voi nda'evevi.

⁵ Ha'e gui José oexa ra'u peteĩ mba'e, ha'e guyke'y kuery pe omombe'u. Ha'e ramo ipoxypave ju,

⁶ mba'eta ha'e kuery pe aipoe'i rire:

— Ajerure pêvy, pendu ke amombe'u rã aexa ra'u va'ekue.

⁷ Mba'ety py merami nhandekuai mba'emo aju jokuaa rupi. Ha'e va'e mbyte py xee ajokua va'ekue opu'ã ho'amy. Ha'e rã peẽ pejokua va'ekue ma ombojere vy xemba'e renonde re ojero'a okuapy — he'i.

⁸ Ha'e ramo tyke'y kuery aipoe'i:

— Ha'e rami vy ndee ri ty'y oreruvixarã reiko? Ndee ri ty'y orere ndepo'aka ta? — he'i okuapy. Ha'e rami ipoxypave okuapy oexa ra'u va'ekue omombe'u ramo, ijayvua ojou vai vy.

⁹ Ha'e gui amboae ju José oexa ra'u. Guyke'y kuery pe omombe'u vy aipoe'i:

— Aexa ra'u avi peteĩ mba'e. Ha'e vy aexa kuaray, jaxy ha'e jaxy-tata onze ikuai va'e. Ha'e kuery xerenonde re merami ikuai vy ngova yvy re omovaëmba okuapy — he'i.

¹⁰ Nguu ha'e guyke'y kuery pe omombe'u ramo tuu ixupe ijayvu ete. Ha'e vy aipoe'i:

— Mba'erã tu ha'e nunga rexâ ra'u? Ha'e rami vy ore kuery — xee, ndexy, nderyke'y kuery — yvy re orerova romovaëmba 'rã ri ty'y nerendone re roõ vy? — he'i.

¹¹ Tyke'y kuery ma ndoayvuvei okuapy. Ha'e rã tuu ma ha'e nungakue omoi porã opy'a re.

¹² Ha'e gui tyke'y kuery oo nguu rymba kuery vixa'i re opena aguã Siquém katy.

¹³ Ha'e ramo Israel aipoe'i José pe:

— Xerymba kuery re nderyke'y kuery opena okuapy Siquém py. Romondouka 'rã ha'e kuerya py.

José ombovai:

— Apy ma aí.

¹⁴ Israel aipoe'i:

— Tereo aý. Exa marã rami pa nderyke'y kuery ikuiaia, ha'e xerymba kuery mba'exa pa ikuiaia guive exa pota. Ha'e gui eju xevy remombe'u aguã — he'i. Ha'e rami vy Hebrom yvy'ã guy gui omondouka Siquém katy.

¹⁵ Opa rupi rei José oiko rã peteĩ ava ovaexi. Ha'e vy oporandu:

— Mba'e tu reka reikovy?

¹⁶ Ombovai:

— Ke'y kuery rima aeka aikovy. Emombe'u ke mamo pa mymba kuery oguereko okuapya — he'i.

¹⁷ Ha'e rã ava va'e aipoe'i:

— Apy gui oje'oipa ju ma. Mba'eta aendu aipoe'i rã: "Jaje'oi apy gui Dotã katy ju" he'i okuapy ramo. — Ha'e ramo José oo guyke'y kuery rakykue. Ha'e vy Dotã py ojou.

¹⁸ Mombyry rupi ou reve ha'e kuery oexa vy ovaẽ e'ý mbove jogueroayvu okuapy ojuka aguã re.

¹⁹ Joupe-upe aipoe'i:

— Pee ma ou oiny oexa ra'u kuaa va'e!

²⁰ Peju ke aý, jajuka. Nhamombo yvykua py, ha'e nhamombe'u 'rã vixo ka'aguy regua ho'uague rami. Ha'e rami vy jaexa 'rã mba'e pa oexa ra'uague gui oiko ra'ea — he'i okuapy.

²¹ Ha'e rami ijayvu rã tyke'y Rúben oendu vy ogueraa jepe ha'e kuery po gui. Ha'e vy aipoe'i:

— Nda'evei jajuka aguã.

²² Nda'evei nhamoë aguã huguy. Yvykua tekoa e'ýa py oï va'e py pemombo teĩ hexe pemoï eme pendepo — he'i. Ha'e rami ijayvu ha'e kuery po gui ogueraa jepexe vy tuua py ju omondouka aguã.

²³ Ha'e gui José guyke'y kuerya py ovaẽ ramove ojopy, omboi ikamixa puku ijyva puku va'e onhemonde oikovya.

²⁴ Ojopy vy omombo yvykua yy oï e'ý va'e py.

²⁵ Ha'e gui oguapy okuapy okaru aguã. Oma'ë vy oexa Ismael regua kuery Gileade gui ou okuapy va'e. Guymba camelô áry ogueru heakuã porã va'e, bálsamo ha'e mirra. Egito yvy katy ogueraa henoiny.

²⁶ Ha'e gui Judá aipoe'i guyvy kuery pe:

— Mba'e tu jajou 'rã nhanderyvy jajukaague re, ha'e huguy nhamoëague nhanhomia re?

²⁷ Peju, nhavende Ismael regua kuery pe, hexe nhandepo nhamoï e'ý aguã, mba'eta nhanderyvy nhandro'o ae oiko — he'i. Ha'e ramo tyvy kuery ojou porã.

²⁸ Mba'emo vendea Midiä pygua kuery oaxa oje'iv yamo José ryke'y kuery ojopy vy oguenoë yvykua gui. Ismael regua kuery pe ovende vinte hatã'i va'e prata guigua re. Ha'e rã ha'e kuery ma Egito yvy katy ogueraa José.

²⁹ Ha'e gui Rúben yvykua py oma'ë aguã ou ju ramo José noïvei ma ha'e py. Ha'e ramo oao omondoro.*

³⁰ Oo ju guyke'y kuerya py. Aipoe'i:

— Kunumi va'e noïvei pe py. Ha'e rami rire xee marã katy 'rã tu aa? — he'i.

³¹ Ha'e ramo José kamixa puku ojopy vy kavara ojuka vy ombovypa huguy.

* 37:29 Ha'e kuery omondoro 'rã oao ndovy'aia oexa uka vy.

³² Ha'e vy kamixa puku ijyva puku va'e omondouka, nguua py ogueraa uka. Ha'e vy aipoe'i uka okuapy:

— Kova'e rojou. Exa pota nderay mba'e pa tyrā pa ha'e'ŷa — he'i uka.

³³ Ha'e gui tuu kamixa puku oexa kuaa vy aipoe'i:

— Xera'y mba'e rima. Vixo ka'aguy regua rima ho'u ra'e. Anhetē José omondoropa 'rā ra'e — he'i.

³⁴ Ha'e rami vy Jacó oao omondoropa vy ajukue voxā guigua py ju onhemonde. Mbovy ára re rei e'ŷ ipy'a vai oikovy gua'y re.

³⁵ Ha'e ramo ta'y ha'e tajy kuery ha'e javive joguerupa ombopy'a porā aguā. Ha'e rā ha'e ma nonhembopy'a porā ukai. Ha'e vy aipoe'i:

— Ajae'o reve 'rā xenhe'ē oo xera'y oĩa py — he'i. Ha'e rami vy tuu ojae'o vaipa.

³⁶ Ha'e va'e jave Midiā regua kuery ma Egito yvy py ju ovende José, Faraó rembiguai xondaro ruvixa Potifar hery va'e pe.

38

Judá ha'e ta'y ra'yxykue Tamar rekokue oĩa

¹ Ha'e va'e jave py Judá guyvy kuerya gui ojepe'a vy oiko peteī Adulão pygua, Hira hery va'e ro py.

² Ha'e py Judá oexa peteī kunha Canaã pygua Sua rajy. Gua'yxyrā ogueru vy oguereko.

³ Ha'e gui oguereko'i kyrī va'e, ava'i. Tuu omboery Er.

⁴ Oguerekove ju amboae kyrī va'e. Ha'e va'e ma ixy omboery Onā.

⁵ Peteīgue ju oguereko ramo amboae ava'i itui'i. Ha'e va'e rery ma Selá. Quezibe tekoa py oikoa py oikuavā'i.

⁶ Ha'e gui Judá ojou gua'y jypy guare Er ra'yxyrā, Tamar hery va'e.

⁷ Ha'e rā Judá ra'y tujave va'e ma teko vai rupi anho oiko Nhanderuete renonde. Ha'e ramo SENHOR oipe'a hekove.

⁸ Ha'e ramo gua'y Onā pe ju Judá aipoe'i:

— Ereko nderyke'y ra'yxykue. Nhanderekorā va'ekue rami vy ereko, nderyke'y ra'yra rami perekō aguā — he'i.*

⁹ Ha'e rami teī Onā oikuua ta'y oiko va'erā va'e ta'y ae e'ŷ oiko 'rāa. Ha'e rami vy guyke'y ra'yxykue reve onheno nhavō ojapo yvy py ho'apa aguā rami, tyke'y ra'yra rami oiko e'ŷ aguā.

¹⁰ Ha'e rami ojapo ramo SENHOR ndojou porāi. Ha'e rami vy ha'e va'e rekove voi oipe'a avi.

¹¹ Ha'e ramo Judá aipoe'i gua'y ra'yxykue Tamar pe:

— Eiko imeve'ŷ va'e ranhe nderu ro py, xera'y Selá tuja peve — he'i. Mba'eta ojeupe aipoe'i: “Kova'e xera'y voi guyke'y kuery rami omano e'ŷ aguā”, he'i vy. Ha'e ramo Tamar oo vy nguu ro py ju oiko.

¹² Yma ma rire Judá ra'yxy Sua rajy va'e omano. Ha'e va'e gui Judá ipy'a porā ju vy oo guymba kuery vexa'i rague ojaya aguā Timna py, oirū Hira Adulão pygua reve.

¹³ Ha'e Tamar pe aipo'ea:

— Neme rukue rako ou oiny Timna katy, guymba vexa'i rague ojaya aguā — he'i.

¹⁴ Ha'e ramo oao imeve'ŷ va'e regua onhemondea omboekovia, ngova guive omo'ā ojexa kuaa uka e'ŷ aguā. Oguapy oiny Enaim rokē rexei Timna katy tape oo va'e py, mba'eta oikuua Selá tuja ma va'eri ta'yxyrā nome'ēi teria.

¹⁵ Ha'e gui Judá oexa vy “Itavy rei va'e po” he'i, ngova omo'ā ramo.

¹⁶ Ha'e rami vy hexe onhemboja ovv vy aipoe'i:

— Eju, jaa nhanheno — he'i, gua'y ra'yxykue oexa kuaa e'ŷ vy.

* ^{38:8} Ha'e kuery reko rami vy amongue ta'y e'ŷ re omano ramo tyvy ju oiko 'rā imeve'ŷ va'e re omenda aguā rami, tyvy ra'y oiko aguā omano va'ekue ra'y rami (Deuteronomio 25.5-6). Ha'e nunga re saduceu kuery oporandu okuapy Jesus pe (Mateus 22.23-33; Marcos 12.18-27; Lucas 20.27-40).

- Kunha va'e oporandu:
- Mba'e tu ha'vy reme'ẽ ta nhanheno aguã re?
- ¹⁷ Ha'e ombovai:
- Ndea py aru ruka 'rã peteĩ kavara xerymba kuery ikuiaia gui — he'i.
- Ha'e rã kunha va'e aipoe'i:
- Kavara reru ruka e'ŷa ja eja ranhe xevy mba'emo areko va'erã — he'i.
- ¹⁸ Judá oporandu:
- Mba'e nunga ha'vy reipota aeja?
- Kunha va'e ombovai:
- Nemba'e carimbo ixã reve, ha'e ndepopoka ndepo py rerekva'e — he'i. Ome'ẽmba vy onheno kunha va'e reve. Ha'e gui kunha va'e oguereko'i ta'y.
- ¹⁹ Ha'e vy opu'ã ovvy vy omboi ngova mo'ãa. Omoñju ao imevel'ý va'e regua omboi va'ekue.
- ²⁰ Ha'e va'e rire oïague py Judá ogueraa uka kavara oirũ Adulão pygua pe, kunha va'e gui ogueru ju aguã ipo py oeja va'ekue. Oo teĩ ndojou kunha va'e.
- ²¹ Ha'e vy oporandu ha'e pygua avakue pe. Ha'e vy aipoe'i:
- Mamo tu oĩ kunha itavy rei va'e Enaim rexei'i tape oo va'e py oĩ va'ekue?
- Ha'e kuery ombovai:
- Apy tu ndoikoi ri jepi itavy rei va'e — he'i.
- ²² Ha'e gui Judá oĩa py ju irũ ojevy vy aipoe'i:
- Xee ndajoui kunha va'e. Ha'e rami avi avakue ha'e pygua “Apy tu ndoikoi ri jepi itavy rei va'e”, he'i okuapy xevy.
- ²³ Judá ombovai:
- Tove ipo py ae toptyta aeja va'ekue, nhandejojaia rei e'ŷ aguã. Ixupe guarã kavara araa uka teĩ nderejoui — he'i.
- ²⁴ Ha'e gui mboapy jaxy rai'i jave Judá pe aipo'ea:
- Nderay'ra'yxkyue Tamar tu itavy rei ra'e, oguereko ma kyrĩ va'e — 'ea.
- Ha'e ramo Judá aipoe'i:
- Penoẽ na oka py peapypa aguã.
- ²⁵ Ogueloõ heruvy ramo aipoe'i uka ome rukue pe:
- Kova'e ja gui ae areko kyrĩ va'e. Peikuua pota ke mava'e mba'e pa kova'e carimbo ixã revegua ha'e kova'e popoka — he'i.
- ²⁶ Ha'e ramo Judá oexa kuaa vy aipoe'i:
- Ha'e ma xegui heko porãve va'e oiko, imerã xera'y Selá name'ẽi rire — he'i. Ha'e va'e rire nonhenovei hexeve.
- ²⁷ Kyrĩ va'e oikuavã aguã ára ovaẽ ramo moko'i oguereko hyru py.
- ²⁸ Itui'i jave peteĩ omoñ opo oka katy. Ixy re opena va'e ojopy vy ipo rupi ojokua nhimbo pytã va'e py. Ha'e vy aipoe'i:
- Kova'e ma ha'e ranhe omoẽ opo.
- ²⁹ Ha'e rami teĩ ha'e va'e opo omoingue ju ramo amboae ju itui. Ha'e rã aipoe'i:
- Mba'exa tu remopa'ũ rejuveny? — he'i vy omboery Perez.[†]
- ³⁰ Ha'e gui ma tyvy ju itui ipo rupi nhimbo pytã ojokuaa va'ekue reve. Ha'e vy omboery Zera.

39

Potifar ro py José oikoague

¹ Ha'e gui Ismael regua kuery Egito katy José ogueraa okuapy rire ha'e kuery gui Faraó rembiguai xondaro ruvixa Potifar hery va'e ju ojogua.

² José reve SENHOR oiko ramo oiko porã Egito pygua ro py.

³ Potifar voi oexa hexeve SENHOR oikoa, ha'e mba'emo ojapoa ha'e javi py SENHOR omoingo porãa.

[†] 38:29 Tery Perez ma “Omopa'ũ va'e” 'ea.

⁴ Ha'e rami vy ojou porã José. Omoĩ ngoo py ikuai va'e ha'e javi re opena aguã. Opa mba'e oguereko va'e omboaxapa ipo py.

⁵ Ngoo ha'e opa mba'e oguereko va'e re opena ukaa ára guive José re vy SENHOR omoingo porã Egito pygua ro. Opa mba'e oguereko va'e, hoo pygua, mba'ety rupi voi SENHOR omoingo porã.

⁶ Ha'e ramo Potifar opa mba'e José po py omboaxapa, mba'emo re opena va'erã omoĩ vy mba'eve re ndoikuaa potavei mbojape ho'u va'erã e'ŷ vy. José ma imbaraete, iporã guive.

⁷ Ha'e va'e rire ipatõ ra'yxy openaxe oikovy José re. Ha'e vy aipoe'i:

— Enheno xereve.

⁸ Ha'e ramo ndoipotai vy aipoe'i opatõ ra'yxy pe:

— Xepatõ ma ndoikuaa potai mba'emo hoo py oĩ va'e re, xepo py omboaxapa oguereko va'e ha'e javi.

⁹ Ha'e voi xegui ndayvatevei kova'e oo py. Mba'eve nomboaxa e'ŷi apena aguã, ndere e'ŷ vy, ta'yxy ae reiko ramo. Mba'e re tu ha'e rami ete teko vai ajapo ta, Nhanderuete pe ajejavvy vy? — he'i.

¹⁰ Ko'ẽ nhavõ kunha va'e ijayvu oikovy José pe. Ha'e rã ndojapyxakai hexeve onheno aguã, neĩ hexeve oĩ aguã ndojou porãi guive.

¹¹ Ha'e gui peteĩ ára oo py José ou mba'emo re oikuaa pota aguã. Tembiguai oo pygua kuery neĩ peteĩve noĩ.

¹² Ha'e ramo kunha va'e ija ojopy vy aipoe'i:

— Enheno xereve — he'i ju. Ha'e ramo kunha va'e po py oao oeja ovvy, onha ovvy oka katy.

¹³ Oka katy onha vy oao ipo py oeja ovya kunha va'e oexa vy

¹⁴ oenoĩ tembiguai avakue oo pygua kuery. Ha'e vy aipoe'i ha'e kuery pe:

— Pexa ma, kova'e hebreu xeme ogueru va'ekue nhanembojaru rei aguã ou. Xea py ou kuri xereve onhenoxe vy. Ha'e rã xee ajapukai ratã.

¹⁵ Ajapukai ratã ramo oendu vy onha ovvy oka katy, oao oeja ovvy — he'i.

¹⁶ Kunha va'e ija omoĩ porã oyvýry, ime ngoo py ou ju peve.

¹⁷ Ha'e gui ome pe ju omombe'u jypy omombe'uague rami ae. Ha'e vy aipoe'i:

— Xea py ou kuri hebreu nerembiguairã reru va'ekue, xembojaruxe vy.

¹⁸ Ha'e gui ajapukai atã ramo oka katy onha vy xeyvýry oeja ovvy oao — he'i.

¹⁹ Ipatõ ra'yxy ixupe “Ha'e rami nerembiguai ojapo kuri xere” he'i rã oendu vy ipoxy vaipa.

²⁰ Ha'e vy ojopy José. Ombo'a uka nhuã huvixa ombo'a uka va'ekue ikuiaia py. Ha'e rami rã José nhuã py oĩ.

²¹ Ha'e rami tei José reve SENHOR oiko vy opena porã hexe. Ojapo nhuã re opena va'e ojou porã aguã rami.

²² Ha'e ramo José pe ju opena uka nhuã py ikuai va'e ha'e javive re. Mba'emo ojapo va'e ha'e javi re opena ha'e py.

²³ Nhuã re opena va'e mba'eve ndojapoi, José pe anho mba'emo ojapo uka vy. Hexeve SENHOR oiko, ha'e mba'emo ojapo ha'e javi py SENHOR omoingo porã.

40

José nhuã py oĩ jave mokoĩ oexa ra'u va'ekue omombe'uague

¹ Ha'e va'e rire Egito pygua huvixa rembiguai kuery, ixupagua karo re opena va'ety ha'e mbojape apoaa, mokoĩve ojejavvy opatõ pe.

² Ha'e ramo guembiguai mokoĩve pe Faraó ivai, karo re opena va'e ruvixa pe, mbojape apoaa ruvixa pe guive.

³ Ha'e rami vy ombo'a uka xondaro ruvixa ro py, José nhuã py oĩa py ae.

⁴ Mokoĩve re xondaro ruvixa opena uka José pe. Ha'e rami py optya are okuapy nhuã py.

⁵ Peteĩ pyavyve ha'e kuery mokoïve oexa ra'u, karo re opena va'ekue ha'e mbojape apoare Egito pygua huvixa rembiguai nhuã py ikuai va'e. Ha'e rami vy peteĩ-teĩ oikuaaxe oexa ra'uague mba'erã paa.

⁶ Ko'ẽ aje'ive reve ha'e kuerya py José ou vy oexa rã iporiau rei okuapy.

⁷ Ha'e ramo oporandu Faraó rembiguai hexeve nhuã py ikuai va'e pe. Ha'e vy aipoe'i:

— Mba'e re tu aÿ pendeporiau rei pekuapy?

⁸ Ha'e kuery ombovai:

— Roexa ra'u kuri peteĩ mba'e, ha'e avave rei jipoi mba'erã paa kuaa ukaarã — he'i.

Ha'e ramo José aipoe'i:

— Nhanderuete e'ÿ ri ty'y ha'e nunga kuaa ukaarã oiko? Pemombe'u ha'vy xevy pexa ra'u va'ekue.

Karo re opena va'e oexa ra'u va'ekue omombe'uague

⁹ Ha'e ramo karo re opena va'ekue José pe omombe'u oexa ra'u va'ekue. Ha'e vy aipoe'i:

— Xee aexa ra'u rã peteĩ uva rembypy hi'aí xerenonde.

¹⁰ Uva rembypy re oĩ mboapy hakã. Hoky, ipotypa, hi'a ijajupa guive.

¹¹ Faraó pegua karo xepo py merami areko. Uva'a ajopy vy aumbiri merami karo py. Ha'e vy Faraó po py merami amoí — he'i.

¹² Ha'e ramo José aipoe'i ixupe:

— Po rami guarã rima ra'e: Mboapy uva rakã ma mboapy ára.

¹³ Ha'e gui mboapy araa py ma Faraó nemoí ju 'rã reikoaty rami reiko aguã, nerembiaporã va'ekue rejapo ju 'rã ipo py karo remoí aguã, yma ixupega karo re repenaaty rami ae ju.

¹⁴ Ha'e rami avi reiko porã ma vy nema'endu'a ke xere. Ajerure xepytyvõ aguã, Faraó oendua py ke nema'endu'a xere, kova'e oo gui aë aguã,

¹⁵ mba'eta xee ma anhetã xererua rive va'ekue hebreu kuery yvy gui. Ha'e gui apy voi mba'eve ndajapoi nhuã py xembotya aguã — he'i.

Mbojape apoa oexa ra'u va'ekue omombe'uague

¹⁶ Ha'e gui mbojape apoa ruvixa ju José mba'emo omombe'u porãa oexa vy aipoe'i ixupe:

— Xee voi aexa ra'u kuri. Ha'e gui mboapy ajaka'i mbojape oĩa xeakã áry merami araa henoiny.

¹⁷ Ajaka'i hi'áryve oĩ va'e py ma opa marãgua Faraó ho'uxe vai va'e oĩ mbojape apoa rembiapo. Ha'e rã guyra ma ho'u okuapy xeakã áry ajaka'i araa va'e gui — he'i.

¹⁸ Ha'e ramo José aipoe'i ixupe:

— Po rami guarã rima ra'e: Mboapy ajaka'i ma mboapy ára.

¹⁹ Ha'e gui mboapy araa py ma Faraó oipe'a uka 'rã neakã, ha'e ndereupi 'rã yvyra re. Ha'e rã guyra ho'u 'rã ndero'okue — he'i.

²⁰ Ha'e gui mboapy araa py ma ovaõ Faraó ituiague ára. Ha'e va'e ára py ngaru ojapo guembiguai kuery ha'e javi pe. Ha'e kuery oexaa py omoí ju karo re opena va'e ruvixa, ha'e rã mbojape apoa ruvixa re ma ijayvu omano aguã re.

²¹ Karo re opena va'e ruvixa ma omoí oikoaty rami ju oiko aguã rami, Faraó po py karo omoí aguã.

²² Ha'e rã mbojape apoa ruvixa ma ojyryvipy uka, José omombe'u voiague rami.

²³ Ha'e rami teĩ karo re opena va'e ruvixa na'ima'endu'avei José re, hexarai rive.

Faraó oexa ra'u va'ekue ju José omombe'uague

¹ Mokoï ma'etýa py Faraó ju oexa ra'u. Nilo yakã yvýry merami opu'ã ho'amy.

² Oexa ra'u sete vaka ikyra va'e, iporãgue va'e yy gui oẽ vy nhuû rogue ho'u okuapy ramo.

³ Ha'e va'e rire sete vaka ivaikue, inhangaikue va'e ju yy gui oẽ ouvy ikyrakue rakykue. Oẽ ypy va'ekue reve opyta okuapy yy rembe re.

⁴ Ha'e gui vaka ivaikue rei, inhangaikue va'e omokõmba merami vaka ikyrave va'e. Ha'e ramove Faraó omyī.

⁵ Ha'e gui oke vyve oexa ra'u ju. Ha'e vy oexa peteī rembypy re sete hary iporā va'e oī rā.

⁶ Ha'e va'e rire sete hary ju oī ivaikue'i, yvytu haku va'e omombirupa rei'i va'ekue ramigua.

⁷ Ha'e gui sete hary ivaikue'i va'e omokõmba hary porāgue oī va'ekue. Ha'e gui Faraó omyī. Ha'e nunga oexa ra'u.

⁸ Ko'ẽ aje'ive ha'e nunga re anho Faraó ipy'a oiny vy oenoī ukapa imba'ekuaa va'e ha'e guembiguai hi'arandu va'e Egito py ikuai va'e ha'e javi. Ha'e kuery pe omombe'upa oexa ra'u va'ekue. Ha'e rami teī peteīve jipoi ixupe mba'erā paa omombe'u kuaa va'erā.

⁹ Ha'e rami rā karo re opena va'e ruvixa aipoe'i Faraó pe:

— Aŷ ma xema'endu'a peteī ajejavyague re.

¹⁰ Nerembiguai kuery pe ndevai vaipa vy xemboty uka karamboae nhuā py xondaro ruvixa ro py, mbojape apoa ruvixa reve.

¹¹ Peteī pyávy peteī-teī roexa ra'u joo rami e'ŷ-e'ŷ.

¹² Ore roïa py oiko avi peteī kunumi hebreu va'e xondaro ruvixa rembiguai oiko va'ekue. Ore roexa ra'u va'ekue romombe'u ramo oikuua uka mba'erā pa roexa ra'uague. Peteī-teī pe roexa ra'u va'ekue ha'evea rami omombe'u orevy.

¹³ Ha'e gui roexa ra'u va'ekue omombe'uague rami meme oiko. Xee ma aikoaty rami ju xemoī. Ha'e rā amboae ma rejyryvipy uka — he'i.

¹⁴ Ha'e ramo Faraó ma José oenoī uka ramo nhuā gui oguenoēa pojava. Ha'e ramo guendyva ojapo, ha'e oao omboekovia ma vy oo Faraó pe ojexa uka aguā.

¹⁵ Ixupe Faraó aipoe'i:

— Xee aexa ra'u va'ekue avave rei ndoikuuaai mba'erā pa aexa ra'ua. Ha'e rā ndevy ma aipo'ea reikuua va'ea oexa ra'u pyre mba'erā paa.

¹⁶ José ombovai vy aipoe'i:

— Xee e'ŷ rima aikuua, Nhanderuete ae 'rā oikuua uka ndee Faraó pe opena porā vy — he'i.

¹⁷ Ha'e ramo Faraó omombe'u José pe:

— Aexa ra'u vy yakā Nilo rembe re merami xe'aī.

¹⁸ Ha'e aexa sete vaka ikyra va'e, iporā va'e yy gui oē rā. Okaru okuapy ranhe nhuū rogue re.

¹⁹ Ha'e rire vaka kuery mboae ju oē ouvy ikangykue, ivaikue ha'e inhangaikue. Ha'e ramigua xee aexa va'e'ŷ teri Egito yvy ha'e javi re.

²⁰ Ha'e gui vaka inhangaikue, ivaikue va'e ho'upa ikyra va'e oē ypy va'ekue.

²¹ Omokõmba rire teī aexa rā nhomokō va'ekue rami e'ŷ, ivaikue rei ae okuapy jypy guare rami ae. Ha'e gui amyī.

²² Ha'e gui ma aexa ra'u ju peteī rembypy re sete hary iporāgue oī va'e.

²³ Ha'e va'e rire oē ju sete hary vaikue'i, yvytu haku va'e gui ipirupa rei va'e.

²⁴ Ha'e gui sete hary vaikue'i va'e omokõmba sete hary porāgue ikuai va'ekue. Ha'e nunga imba'ekuaa va'e kuery pe amombe'u rā neī peteīve nomombe'u kuaai mba'erā paa — he'i.

²⁵ Ha'e ramo José ombovai:

— Ndee Faraó, peteī rami guarā ae rexâa ra'u ra'e. Nhanderuete mba'emo omoingo va'erā rima oikuua uka ndevy.

²⁶ Sete vaka iporā va'e rexâa va'e ma sete ma'etŷ. Ha'e sete hary iporā va'e voi sete ma'etŷ. Rexâa ra'u va'ekue ma peteī'i rami guarā.

²⁷ Sete vaka ivaikue rei, inhangaikue va'e takykue oē va'e ma sete ma'etŷ avi, ha'e sete hary ivaikue rei va'e yvytu haku va'e omombirupa va'ekue ma sete ma'etŷ re karuai oiko va'erā.

²⁸ Pova'e ayvu Faraó pe aipoa'e va'e py ma Nhanderuete ndevy oikuua uka mba'emo ombou va'erā.

²⁹ Mba'eta sete ma'etŷ re opa mba'e oiko porã 'rã Egito yvy ha'e javi re.

³⁰ Ha'e va'e rire ma sete ma'etŷ re ju 'rã oiko karuai. Ha'e va'e gui opa mba'e oiko porâague re na'ima'endu'aavei 'rã Egito yvy re, mba'eta karuai omomba 'rã yvy ha'e javi.

³¹ Yvy re oiko porâague re ma na'ima'endu'aavei 'rã karuai ha'e va'e rire oiko ramo. Ha'e nunga nda'evei ete 'rã.

³² Mokoïgue ma Faraó pe Nhanderuete oexa ra'u uka, mba'eta ombou 'rãe, ombou voi 'rã guive.

³³ Aŷ ma Faraó, rejou 'râgue peteĩ ava oiko kuaa va'e, hi'arandu va'e Egito yvy re opena aguã remoĩ va'erã.

³⁴ Faraó, ejapo ke po ramí. Emoĩ yvy re opena va'erã kuery, Egito yvy rupi sete ma'etŷ re peteĩ nhiruĩ henda py ijaju va'e oiko nhavõ gui peteĩ-teĩ ojopy va'erã.

³⁵ Opena va'e kuery tomono'õ mba'emo'a, ma'etŷa oiko porã va'e ára. Tomboaty reta mba'emo ra'yã Faraó po py tetã pygua kuery peguarã. Tomoĩ porãmba.

³⁶ Ha'e ramí vy 'rãe perekó tembi'u karuai sete ma'etŷ re Egito yvy re oiko jave guarã, karuai gui yvy re ikuai va'e opa e'ŷ aguã — he'i.

Egito yvy re José opena oikovyague

³⁷ Ha'e va'e ayvu Faraó ojou porã. Hembiguai kuery voi ojou porã.

³⁸ Ha'e ramí vy Faraó aipoe'i guembiguai kuery pe:

— Jajou 'rã ri nda'u ava kova'e ramí hexe Nhanderuete Nhe'ẽ oĩ va'e? — he'i.

³⁹ Ha'e rire José pe ju Faraó aipoe'i:

— Ha'e gui ha'e nunga ha'e javi Nhanderuete oikuua ukapa ndevy. Avave rei ndoikoi ndee ramigua oiko kuaa ha'e hi'arandu va'e.

⁴⁰ Ha'e ramí rã ndee ae 'rã reĩ xero re opena va'e. Ndee meme 'rã ndepo'aka xevygua kuery re. Xee anho 'rã ndegui yvateve va'e aiko — he'i.

⁴¹ Faraó aipoe'ive ju José pe:

— Ma'ẽ, Egito yvy ha'e javi re repena aguã romoĩ — he'i.

⁴² Ha'e ramí vy Faraó okuã regua hery oĩa va'e omboi vy José kuã re ju omoĩ. Ao ajukue iporâve va'e guigua py omonhemonde vy mbo'y ouro guigua omoĩ ijaju'y re.

⁴³ Karóxa mokoïa va'e py oĩ aguã ramí ojapo, ha'e henonde “Penenapy'ã re ke peĩ” he'i uka heravy. Ha'e ramí py ombopo'aka Egito yvy re ikuai va'e ha'e javi re.

⁴⁴ Faraó aipoe'ive ju José pe:

— Xee ma Faraó. Ha'e ramí avi ndeayvu e'ŷ re avave rei ndoupi 'rã opo neĩ opy Egito yvy ha'e javi re — he'i.

⁴⁵ Faraó omboery José Zafenate-Panéia. Ta'yxyrã ome'ẽ Asenate, Om pegua sacerdote Potífera hery va'e rajy. Ha'e va'e rire José oguata oikovy Egito yvy ha'e javi rupi.

⁴⁶ José trinta ma'etŷ oguereko Egito pygua huvixa Faraó renonde ojexa uka jave. Ha'e va'e gui Egito yvy jave re oguataa rupi oiko.

⁴⁷ Sete ma'etŷ re yvy py onhotŷ mbyre ha'e javi oiko porã.

⁴⁸ Ha'e va'e sete ma'etŷ re José omono'õ ukapa tembi'urã Egito yvy re oiko va'e. Omoĩ porã tetã ikuai va'e py. Peteĩ-teĩ tetã pyve omoĩ porã ha'e va'e katy'i rupi tembi'urã oiko va'ekue.

⁴⁹ Ha'e ramí vy José omono'õ reta mba'emo ra'yã, ita ku'i ye'ẽ rembe rupi ikuai va'e hetaa ramí. Ndoipapa kuaavei ma, heta vaipa ete rã.

⁵⁰ Ha'e gui karuai oiko e'ŷ mbove oiko mokoĩ kyrĩ va'e José ra'y, Om pegua sacerdote Potífera rajy Asenate pi'a.

⁵¹ Tujave va'e ma José omboery Manassés, mba'eta “Nhanderuete xemboexarai amba'eapo atãague, ha'e xeru ro py aiko jave guare ha'e javi re”, he'i vy.*

⁵² Ha'e rã gua'y mboae ma omboery Efraim, “Yvy ajexavai aikovyague py teĩ Nhanderuete xeapo xera'y reta aguã ramí”, he'i vy.†

* 41:51 Tery Manassés ma “Nhombœxaraia” 'ea. † 41:52 Tery Efraim ma “Ta'y reta va'e” 'ea.

- ⁵³ Sete ma'etŷ Egito yvy re opa mba'e oiko porāa opa.
- ⁵⁴ Ha'e va'e rire oiko sete ma'etŷ re karuai, José aipoe'iague rami vy. Yvy jave re ete oiko karuai. Ha'e rã Egito yvy ha'e javi re ma oĩ tembi'u.
- ⁵⁵ Egito yvy jave re karuai oiko ramo Egito pygua kuery Faraó pe ojapukai tembi'u re. Ha'e ramo ojeupegua kuery pe Faraó
- Tapeo José-a py. Ha'e ojapo uka va'e tema pejapo — he'i.
- ⁵⁶ Yvy jave re karuai oiko ramo José oipe'a uka tembi'u omoĩ porāaty ha'e javi Egito pygua kuery pe ovende aguã, Egito re voi karuai oiko ramo.
- ⁵⁷ Yvy jave re karuai ramo Egito katy oua, José gui tembi'u ojogua aguã.

42

Egito py José ryke'y kuery ju ou okuapyague

- ¹ Egito yvy re tembi'u oĩa Jacó oikuua vy aipoe'i gua'y kuery pe:
- Mba'e re tu joe-joe rive ri pema'ẽ pekuapy?
- ² Xee aendu “Egito yvy re mba'emo ra'yī oĩ” 'ea rã. Tapeo ha'vy ha'e gui pejogua jaikove aguã, nhamanomba e'ŷ aguã — he'i.
- ³ Ha'e ramo José ryke'y kuery dez-ve ikuai va'e oje'oi Egito gui mba'emo ra'yī ojogua aguã.
- ⁴ Ha'e rã José ryvy Benjamim ma Jacó nomondoukai tyke'y kuery reve, ojeupe “Xapy'a rei mba'emo oiko gui”, he'i vy.
- ⁵ Ha'e rami vy amboae regua kuery reve Israel ra'y kuery oje'oi mba'emo ojogua vy, Canaã yvy re voi karuai oiko ramo.
- ⁶ José ma Egito yvy re opena va'e oĩ. Ha'e ae yvy jave gui ou va'e pe mba'emo ovende oiny. Ha'e rami rã tyke'y kuery ou vy guenapy'ã re oĩ henonde, yvy re ngova omovaẽmba reve.
- ⁷ José ma guyke'y kuery oexa kuaa. Ha'e rami teĩ ha'e kuery pe ndojekuaa ukai. Ha'e kuery pe ijayvu atã guive. Ha'e vy aipoe'i:
- Magui tu peju?
- Ha'e kuery ombovai:
- Canaã yvy gui roju tembi'u rojogua aguã — he'i okuapy.
- ⁸ José oexa kuaa guyke'y kuery, ha'e rã ha'e kuery ma ndoexa kuaai.
- ⁹ José ima'endu'a ha'e kuery rekora'o exa ra'u va'ekue re. Ha'e vy aipoe'i:
- Peẽ kuery ma nhemi rupi oikuua pota va'e pendekuai. Oreyvy re peju mamo pa roarõ e'ŷa peikuaaxe vy rive.
- ¹⁰ Ha'e kuery ombovai:
- Any, oreruvixa. Ore nerembiguai kuery tembi'u rojogua aguã rima roju.
- ¹¹ Ore kuery ha'e javive peteĩ'i ava ra'y orekuai. Heko porã va'e guive orekuai, mba'emo re oikuua pota va'e e'ŷ — he'i okuapy.
- ¹² Ha'e rã ha'e aipoe'i:
- Any teve. Yvy roarõ e'ŷa re peikuaaxe vy rima peju.
- ¹³ Ha'e kuery ombovai:
- Ore kuery nerembiguai orekuai va'e ma doze joegua orekuai, peteĩ ava Canaã yvy re oiko va'e ra'y kuery. Kyrïve va'e ma oreru ro py opyta. Ha'e rã amboae ma ndoikovei ma — he'i okuapy.
- ¹⁴ Ha'e gui José aipoe'i ha'e kuery pe:
- Xee pêvy aipoa'eague rami ae oreyyv re peikuaa pota va'e ete pendekuai.
- ¹⁵ Ha'e rami vy 'râe aikuua. Anhetẽ ete Faraó rekove rupi aura vy aipoa'e: Apy gui ndapeoi 'rã penderyvy kyrïve va'e ou e'ŷa ja.
- ¹⁶ Peẽ kuery regua peteĩ xee amondouka 'rã penderyvy reruarã. Ha'e rã peẽ kuery ma romboty 'rã aikuua aguã anhetẽ pa pendeayvua. Ha'e rami e'ŷ rã Faraó rekove rupi aura vy aipoa'e: Oreyvy re peikuaa pota vy ae peju — he'i.
- ¹⁷ Ha'e vy mboapy ára re ombo'a imbokuapy nhuã py.

¹⁸ Mboapy araa py José aipoe'i:

— Po rami pejapo vy 'rāe peikove, mba'eta xee voi Nhanderuete renonde ajererokyjea rupi aiko va'e.

¹⁹ Peē kuery heko porā'i va'e ri pendekuai vy peē kuery va'e regua peteī'i pepyta 'rā apy nhuā py. Ha'e rā amboae kuery ma tapeo mba'emo ra'yī peraa pendo pygua kuery ho'u va'erā.

²⁰ Ha'e gui penderyvy kyrīve va'e ta'vy peru xea py. Ha'e ramo 'rāe aikuua porā pendeayvu anhetēa. Ha'e rami e'ŷ vy pemanomba 'rā — he'i.

Ha'e rami rā ha'e kuery oiko katu ha'e rami ojapo aguā.

²¹ Joupe-upé aipoe'i:

— Aŷ ma japaga 'rā nhanderyvy re jajapo vaiague re. Anhetē ojexavai reve nhandevy ojapukai ramo nanhamboaxyi karamboae. Ha'e nungakue re ae jaiko axy aŷ — he'i okuapy.

²² Ha'e ramo Rúben ombovai:

— Xee aipo nda'eí ri ty'y raka'e: “Nda'evei kunumi va'e re jajapo vai aguā” nda'eí? Teī peē kuery naxenhe'ẽ rendui. Aŷ ha'e nungakue re japagapa jakuapy huguy nhamoẽ uka rire — he'i.

²³ Ha'e kuery ha'e rami ijayvu vy ndoikuuai José oendu kuaa, mba'eta ha'e kuery reve ijayvu mba'e he'ia paa omombe'u va'e rupi.

²⁴ Ha'e kuerya gui José ojepe'a ranhe. Ha'e vy ojae'o. Ha'e gui ou ju vy ha'e kuery reve ijayvu. Guyke'y Simeão ha'e kuery mbyte gui oipe'a vy ojokua uka ha'e kuery oexaa py.

Egito gui José ryke'y kuery ojevyague

²⁵ Ha'e kuery voxā mba'emo ra'yī José omonyē uka vy peteī-teī voxā py omoī uka ju iperáta, tembi'u tape rupi ho'u va'erā guive. Ha'e ramo ijayvuague rami ojapo.

²⁶ Ha'e ramo guymba mburika'i áry mba'emo ra'yī ojogua va'ekue oupi vy oje'oipa ha'e gui.

²⁷ Oke aguā py optyaa py peteī ovoxa oipe'a mburika'i ho'u va'erā oguenoē aguā. Ha'e vy operáta ojou ju voxā py oī ramo.

²⁸ Ha'e vy guyvy kuery pe aipoe'i:

— Kore ome'ēa ju rima xeperáta. Ha'ekue ete'i nda oī xechoxa py — he'i.

Ha'e rami vy onhemondyi okuapy okyje vy. Joe-joe oma'ẽ reve joupe-upé aipoe'i:

— Mba'e re nda'u ha'e rami ete ri Nhanderuete ojapo nhandere? — he'i okuapy.

²⁹ Ha'e gui Canaã yvy re nguu Jacó-a py ovaē vy ixupe omombe'upa oiko va'ekue-'ekue. Ha'e vy aipoe'i:

³⁰ — Ava ha'e va'e yvy pygua ruvixa oī va'e orevy ijayvu atā, ijyvy re oikuua pota va'e rami orererekoo.

³¹ Ha'e rā ore kuery aiporo'e: “Ore ma heko porā va'e orekuai, roikuua pota va'e'ŷ.

³² Doze joegua orekuai, peteī'i oiko oreru. Peteī oreryvy ma jipovei, ha'e rā kyrīve va'e ma oreru ro py oī Canaã yvy re”, ore.

³³ Ha'e gui ava yvy regua ruvixa aipoe'i orevy: “Po rami 'rā aikuua peē kuery heko porā va'e pa peikoa. Apy peja 'rā peteī penderegua va'e. Ha'e rā amboae kuery ma pendo pygua kuery rembi'urā peraa vy tapeo.

³⁴ Ha'e gui xea py ju Peru penderyvy kyrīve va'e. Ha'e ramo 'rā aikuua avakue heko porā va'ea, oikuua pota va'e'ŷ peikoa. Ha'e gui ma pendepo py ju amboaxa 'rā penderyvy, ha'e kova'e yvy re pejogua aguā mba'emo”, he'i va'ekue orevy.

³⁵ Ha'e kuery ogueru va'ekue voxā gui onhoē vy peteī-teī oexa operáta voxā py ogueru jevyague. Voko'i peráta ryru oexa peteī-teī. Ha'e rami vy onhemondyipa okuapy, tuu voi.

³⁶ Ha'e gui tuu Jacó aipoe'i:

— Aŷ nda'evei teve xevy. José ma ndoikovei ma, Simeão voi noī apy. Aŷ ma Benjamim ju peraaxe. Ha'e nunga ha'e javi oiko xevy.

³⁷ Ha'e gui Rúben aipoe'i nguu pe:

— Xapy'a rei xeryvy ndaru jevyi ri ramo ejuka xera'y mokoīve'i hekoria. Xevy repena uka ramo ma xee aru ju 'rā.

³⁸ Ha'e rā tuu ombovai:

— Nda'evei xera'y penderupive oo aguā. Tyke'y omano ma. Ha'e anho'i oikove. Xapy'a rei ooa rupi mba'emo ixupe oiko ramo ma xeporiaua gui rive amano aguā rami 'rā pejapo — he'i.

43

Egitoyvy katy ju José ryke'y kuery oo aguā re onhembopy'a okuapyague

¹ Ha'e ramia jave re karuai nda'evei ete yvy re.

² Ha'e gui ha'e kuery tembi'u Egito gui ojogua va'ekue opa ramo tuu aipoe'i:

— Tapeo, pejoguave ju tembi'u nhandevy.

³ Ha'e ramo Judá ombovai:

— Ha'e rami avi ava va'e orevy ijayvu atā reve aipoe'i va'ekue: “Xerova ndapexa jevyi 'rā penderyvy penderupive ou e'ŷ rā”, he'i va'ekue.

⁴ Ha'e nunga rupi oreryvy orerupive remondouka ramo ma roo ju 'rā tembi'u rojogua aguā.

⁵ Ha'e rā neremondoukai ramo ndorooi 'rā, ava va'e “Xerova ndapexai 'rā penderyvy penderupive ou e'ŷ rā”, he'i rire.

⁶ Ha'e ramo tuu Israel aipoe'i:

— Mba'e re tu xemoĩ vai rei pekuapy penderyvy mboae arekovea peikuua uka vy?

⁷ Ha'e kuery ombovai:

— Ha'e va'e ava oporandu karamboae orere, ha'e oreretarā kuery re guive. Ha'e vy aipoe'i: “Oikove teri pa penderu? Perekove pa penderyvy?” he'i orevy. Ha'e rā oporandua ha'e javi'i rombovai. Ndoroikuuai mba'erā pa oikuaaxeia vy “Peru ke penderyvy”, he'i orevy.

⁸ Ha'e gui Judá aipoe'i nguu Israel pe:

— Xerupive ha'vy emondouka kunumi va'e. Ha'e ramo ropu'ā vy roo 'rā jaikovepa aguā. Ha'e rami e'ŷ ramo ndajaikovei 'rā, ore kuery, ndee, neĩ orera'y kuery.

⁹ Xee ae 'rā apena hexe, ha'e rire xepo gui ae ju rejou aguā. Ha'e gui xee ndea py ndaru jevyi ri ramo xee ae ajejavvy va'e aiko 'rā ndevy, aikovea pukukue re.

¹⁰ Ha'e rā nanhamboarei va'e rire ma mokoīguea ma rojevy 'rāgue — he'i.

¹¹ Tuu Israel ombovai:

— Ha'e rami rā ma po rami pejapo: Pejopy mba'emo iporāve va'e kova'e yvy gui, pendevoxa py peraa ava va'e pe peme'ē va'erā: bálsamo, ei kyr'i'i, heakuā porā va'e, mirra, terebinto ha'e amêndoas.

¹² Peráta guive peraave pendepo py. Pendevoxa py peráta peru va'ekue voi peraa ju pendepo py, mokoīguea repy. Xapy'a rei ojavy ri nhi'ā ra'e.

¹³ Ha'e gui penderyvy avi peraa. Pepu'ā, ha'e tapeo ju ava va'ea katy.

¹⁴ Tove Nhanderuete ipo'akapa va'e tapenemboaxy uka huvixa renonde peĩ ramo, penderyke'y mboae pendupive ou ju aguā, Benjamim guive. Ha'e gui xee, xera'y kuery okanhy ramo ma ta'y e'ŷ va'e 'rā apyta — he'i.

José guyke'y kuery omovaẽmbaague

¹⁵ Ha'e gui avakue ogueraa mba'emo ome'ē va'erā, peráta guive ogueraa mokoīguea repy. Guyvy Benjamim voi ogueraa. Opu'ā vy oje'oi Egito katy. Ha'e rami vy ojexa uka ju José pe.

¹⁶ Benjamim ha'e kuery reve oĩ rā José oexa vy aipoe'i hoo re opena va'e pe:

— Eraa kova'e avakue ha'e javi xero py. Ejuka vaka ra'y, ereko katupa. Kova'e kuery ma kuaray mbyte jave okaru 'rā xereve — he'i.

¹⁷ Ha'e ramo ojapopa José ijayvuague. Ha'e rami vy ogueraa avakue José ro py.

¹⁸ José ro py ogueraa rā okyjepa okuapy. Ha'e vy aipoe'i:

— Peráta káuxa rima aŷ nhandereru, kueve nhandevoxa py peráta oĩ rire. Aŷ ma nhanemondaague rami 'rã omombe'u, nhandere opu'ã vy escravo nhanemoingo aguã, nhanerymba kuery mburika'i ojopy aguã guive — he'i.

¹⁹ Ha'e vy José ro re opena va'e re ha'e kuery onhemboja vy hexeve ijayvu okuapy okẽ py.

²⁰ Ha'e vy aipoe'i:

— Kore xeruvixa, tembi'u rojogua aguã jypy roju karamboae.

²¹ Rojevya rupi roke aguã py rovaẽ vy orevoxa roipe'a ramo ha'e py oreperáta oĩ ra'e. Ha'e va'ekue aŷ rogueru ju.

²² Ha'e gui rogueruve ju peráta tembi'u rojogua aguã. Ndoroikuai guive mava'e pa oreperáta orevoxa py omoĩ jevyague — he'i okuapy.

²³ Ha'e ramo ava va'e ombovai:

— Pendep'y a guaxu ke, pekyje eme. Penderuete, peẽ kuery ru Ruete ae omoĩ uka ju peráta pendevoxa py. Pendeperáta xee ae ajopypa karamboae — he'i. Ha'e gui ha'e kuerya py ogueru ju Simeão.

²⁴ Ha'e gui José ro py ogueroike vy yy ogueru opy ojoi aguã. Hymba kuery mburika'i guive omongaru.

²⁵ Ha'e rã ha'e kuery ma José pe ome'ẽ va'erã oguerekatku kuaray mbyte jave ou rã guarã, mba'eta oendu ha'e py okaru vy ou 'rãa.

²⁶ José ou ramo ha'e kuery ogueroike heruvy ixupe ome'ẽ va'erã. Henonde re guenapy'ã re oĩ okuapy, yvy re ngova omovaẽ reve.

²⁷ Ha'e ramo ha'e kuery pe oporandu mba'exa pa ikuaia re. Ha'e vy aipoe'i:

— Ha'vy penderu tuja'i pemombe'u va'ekue oiko porã pa? Oikove teri pa?

²⁸ Ha'e kuery ombovai:

— Oiko porã ri oreru nerembiguai, oikove teri — he'i okuapy. Oakã omboguejypa reve guenapy'ã re oĩ.

²⁹ Ha'e ramo José oma'ẽ vy oexa guyvy Benjamim ixy pi'a. Ha'e vy aipoe'i:

— Upe va'e ma nñi'ã penderyvy kyrïve va'e pemombe'u va'ekue? Nhanderuete topena porã ndere, xera'y — he'i ixupe.

³⁰ José oeka pojava ojae'o aguã, opy'a re guyvy oayvua anho oendu vy. Ha'e vy opy mboae oike vy ojae'o.

³¹ Ojeovaei rire oẽ ju ouvy. Ojejoko vy aipoe'i guembiguai pe:

— Pejara ke tembi'u — he'i.

³² Ha'e ramo ixupe omoĩ ae'i, ha'e kuery pe omoĩ ae'i avi, ha'e Egito pygua kuery ha'e kuery reve okaru va'e pe omoĩ ae'i avi, mba'eta Egito pygua kuery pe nda'evei hebreu kuery reve okaru aguã, Egito kuery rekora va'ekue rami vy.

³³ Ha'e rami vy guenonde omboguapy uka guyke'y kuery ha'e javi. Tujave va'e omboguapy tujave va'e oĩ aguã py porã, peteĩ-teĩ ha'e rami aguã rami omboguapy, kyrïve va'e voi kyrïve va'e oĩ aguã py. Ha'e rami rã joe-joe oma'ẽ reve onhemondyipa okuapy.

³⁴ Ha'e gui peteĩ-teĩ ho'u va'erã ojara uka tembi'u guenonde re oĩ va'e gui. Ha'e rã Benjamim pe ma hetave ojara uka, amboae kuery pe ojara uka va'e gui peteĩ nhiruikue hetave. Ha'e ramo ha'e kuery okaru ha'e oy'u porã okuapy hexeve.

44

José guyke'y kuery ou jevy aguã rami ojapoague

¹ Ha'e gui José aipoe'i ngoo re opena va'e pe:

— Emonyëmba ke avakue voxipa'akaa rami peve, ha'e emoĩ ju peteĩ-teĩ peráta ivoxa py.

² Ha'e gui kyrïve va'e voxipa'akaa rami peve, ha'e emoĩ ju peteĩ-teĩ peráta ivoxa py.

³ Ko'ẽmba ramove avakue oje'oipa ju guymba kuery reve.

⁴ Tetã gui mombyry e'ŷ'i teri oo jave José aipoe'i ngoo re opena va'e pe:

— Epu'ã, tereo avakue oo va'ekue rakykue. Reupity vy ke aipo're: “Mba'e re tu penderayvu ete va'e pe pejapo vai?

⁵ Upe va'e karo e'ý ri ty'y xeruvixa oy'uaty ha'e imba'ekuaa rupi oiporu va'ety? Ha'e ramia py pejapo vai rima”, 're.

⁶ Ha'e ramo hembiguai ha'e kuery oupity vy ha'ekue rami ae ijayvu.

⁷ Ha'e ramo ha'e kuery ombovai:

— Oreruvixa, mba'e re tu ha'e rami ete ri ndeayvu? Ha'e ramigua ete ore nerembiguai kuery ndorojapoi.

⁸ Peráta orevoxa py rojou va'ekue ma Canaã yvy gui rogueru ju ndevy. Mba'erã tu ha'vy nderuvixa ro gui prata, ouro re oremonda ta?

⁹ Karo rejou ri ramo heruare tomano, ha'e rã ore kuery ma torekuaai ndevygua escravo, oreruvixa — he'i okuapy.

¹⁰ Ha'e ramo ombovai:

— Pendeayvuague rami ae tei karo reruare anho 'rã oiko xevygua escravo. Ha'e rã peẽ kuery re ma penderekó vaia noĩ — he'i.

¹¹ Ha'e gui ha'e kuery ojapura voxá omboguejypa aguã yvy py. Petei-tei oipe'a ovoxa.

¹² Ha'e ramo huvixa rembiguai oikuua pota petei-tei voxá py oĩ va'e re. Tujave va'ea gui ranhe omboypy vy kyrive va'ea py omomba. Ha'e vy karo ojou Benjamim voxá py.

¹³ Ha'e ramo ha'e kuery oao omondoropa. Petei-tei guymba áry ju ovoxa oupipa vy ojevypa tetã katy.

Judá onhemombe'u porãague

¹⁴ Ha'e gui Judá guyvy kuery reve ovaëmba ju José ro py, ha'e py teri oĩ ramo. Guenapy'ã re ju oïmba henonde.

¹⁵ Ha'e ramo José aipoe'i:

— Mba'e re tu ha'e ramigua pejapo xere? Ndapeikuaii va'e ty'y ava xee rami ipo'aka va'e imba'ekuaa va'e memea?

¹⁶ Ha'e ramo Judá ombovai:

— Xeruvixa, mba'exá tu ha'vy rombovai ta ndevy? Mba'exá tu ha'vy oreayvu ta? Mba'exá tu ronhemombe'u ta? Nhanderuete oikuua ore nerembiguai kuery rojeavyague. Aý ma xeruvixa, ore kuery ha'e javive 'rã ndevygua escravo orekuai, karo reraare anho e'ý — he'i.

¹⁷ Ha'e ramo José aipoe'i:

— Nda'evei ha'e rami ajapo aguã. Ava xekaro reraare anho 'rã oiko escravo. Ha'e rã peẽ kuery ma tapeo porã penderua katy — he'i.

¹⁸ Ha'e ramo Judá onhembojave hexe. Ha'e vy aipoe'i:

— Xeruvixa, ejapyxaka ranhe xeayvua re. Ejapyxaka petei'i re xee nerembiguai xeayvu aguã. Xeruvixa, ndevai eme xee nerembiguai pe, mba'eta ndee ma Faraó rami avi ndepo'akapa va'e.

¹⁹ Xeruvixa, ore nerembiguai kuery pe reporandu karamboae vy aipo're: “Perekó pa penderu, e'ý vy penderyvy?” 're va'ekue.

²⁰ Ha'e gui ndee oreruvixa pe rombovai: “Roguerekó oreru tuja'i, ha'e ta'y avi oiko oreru tuja'i ma vy ta'yague. Ha'e va'e ma kyrive va'e oiko. Tyke'y ae'i va'ekue omano rire ha'e anho'i ma oiko ixy pi'a. Tuu oayvuve va'e oiko”, ro'e va'ekue.

²¹ Ha'e gui ndee aipo're avi va'ekue ore nerembiguai kuery pe: “Peru ha'vy apy aexa aguã.”

²² Ha'e ramo ndee oreruvixa pe rombovai: “Kunumi va'e nda'evei nguu tuja'i oeja aguã. Oeja ramo omano 'rã”, ro'e va'ekue.

²³ Ha'e gui ndee aipo're ju orevy: “Penderyvy kyrive va'e penderupive ndoui ramo ndapexavei 'rã xerova”, 're va'ekue.

²⁴ Ha'e gui roo ju nerembiguai orerua py. Romombe'upa ndee xeruvixa ndeayvuague.

²⁵ Oreru aipoe'i: “Tapeo, pejoguave'i ju tembi'u ja'u va'erã”, he'i va'ekue.

- ²⁶ Ha'e rã ore rombovai: “Nda'evei roo aguã. Oreryvy kyrïve va'e orerupive oo ramo 'rãe ha'eve. Nda'evei 'rã ava va'e rova roexa ju aguã oreryvy reve'ŷ”, ro'e ixupe.
- ²⁷ Ha'e gui nerembiguai oreru aipoe'i: “Peẽ kuery peikuaa xera'yxy oikuavã karamboae mokoñ'i xera'y.
- ²⁸ Peteñ ma xea gui okanhy ramo aipoa'e: ‘Xee aikuua rã ta'vy omboa'ypaa rã nda'u’, ha'e va'ekue. Aŷ peve xee ndaexavei.
- ²⁹ Aŷ kova'e ju xea gui peipe'axe, ha'e ixupe mba'emo oiko ramo pejapo 'rã xeporiau gui amano aguã rami”, he'i va'ekue oreru.
- ³⁰ Ha'e rami rire aŷ ma xapy'a rei xee nerembiguai xerua py ajevy teĩ kunumi va'e orerupive ndooi ramo ma oreru omano rive 'rã, mba'eta kunumi va'e reve vy ae oikove'i teri.
- ³¹ Orereve kunumi va'e noñ rã oreru oexa vy omano 'rã. Ha'e rami vy rojapo 'rã nerembiguai oreru iporiau gui rive omano aguã rami.
- ³² Mba'eta xee nerembiguai aiko kunumi va'e re apena aguã rami. Ha'e rami vy xeru pe aipoa'e: “Xeru, xapy'a rei xee ndaru jevyi ramo ndevy pe aiko 'rã ajejavy va'e aikovea pukukue re”, ha'e va'ekue.
- ³³ Ha'e nunga rupi aŷ xeruvixa, xee ae tapyta nerembiguairã kunumi va'e rekovia, ha'e rã kunumi va'e ma too ju ke'y kuery reve.
- ³⁴ Mba'exa tu xerua py aa ju ta kunumi va'e reve'ŷ? Mba'eta xee ma ndaexaxei xeru tuja'i pe mba'emo vai oiko rã — he'i.

45

Guyke'y kuery pe José ojekuaa ukaague

- ¹ Ha'e gui José ma ha'e javi oexaa py nonhemombe'u e'ŷ reguavei. Ha'e vy ojapukai:
— Toẽmba xea gui — he'i. Ha'e ramo avave rei hexeve ndopytai, guyke'y kuery pe José ojekuaa uka aguã.
- ² Ha'e gui José ojae'o atã, Egito pygua kuery oendu aguã rami, Faraó ro pygua kuery guive.
- ³ Ha'e rami vy José aipoe'i guyke'y kuery pe:
— Xee ma José aiko. Ha'vy oikove teri pa xeru? — he'i. Ha'e ramo tyke'y kuery nombovai kuaavei, henonde py okyjepa vy.
- ⁴ José peteñgue ju aipoe'i guyke'y kuery pe:
— Aŷ ma penhembojapa xere — he'i ramo hexe ovaẽmba ouvy. Ha'e vy aipoe'ive ju: — Xee ma José Egito yvy katy xevende imbouvy va'ekue.
- ⁵ Aŷ ma nda'evei pendeporiaupa rei aguã kyvõ katy xevendeague re, neñ pendejeupe pendevai aguã voi nda'evei. Mba'eta ajogueraajepé aguã ae Nhanderuete xembou raka'e penerenonde.
- ⁶ Mba'eta mokoñ ma'etŷ re ma karuai oiko kova'e yvy re. Aŷ oata peteñ nhiruñ ma'etŷ teri mba'eve rei nonhotŷai neñ nomono'õai aguã.
- ⁷ Nhanderuete xembou penerenonde nhande kuery opa e'ŷ aguã ko yvy gui, heta araa jepé vy.
- ⁸ Mba'eta peẽ kuery e'ŷ xembou karamboae apy. Nhanderuete ae xembou vy Faraó ru ramo xemoñ, hoo py ikuai va'e ha'e javive ruvixarã, Egito yvy ha'e javi re apena aguã.
- ⁹ Tapeo povaja ha'vy xerua py, aipopeje: “Nderay José aipoe'i uka: ‘Nhanderuete xemoñ Egito yvy ha'e javi regua ruvixarã. Eju voi xea py are e'ŷ re.
- ¹⁰ Gósen yvy re ha'eve 'rã xea katy'i reiko aguã, nderay kuery, neramymino kuery, nerymba vexa'i, vaka kuery, ha'e mba'emo rerekó va'e ha'e javi reve.
- ¹¹ Ha'e py ma apena 'rã ndere, mba'eta peteñ nhiruñ ma'etŷ teri oata karuai opa aguã. Ha'e rami iporiaukue va'e reiko e'ŷ aguã, ndero py ikuai va'e, neñ rerekó va'e ha'e javi opa e'ŷ aguã', he'i uka José”, peje.
- ¹² Aŷ ma peẽ kuery xeryvy Benjamim reve pexa pekuapy xee ae pendereve xeayvu aikovya.

¹³ Xeru pe pemombe'u Egito yvy re mba'emo porã arekopa va'e ha'e pexa va'e ha'e javi. Tapeo pojava, apy ju Peru xeru — he'i.

¹⁴ Ha'e gui guyvy Benjamim oĩa py José oo vy ijaju'y rupi oikuavã reve ojae'o. Benjamim voi ojae'o guyke'y aju'y rupi oikuavã vy.

¹⁵ Ha'e gui guyke'y kuery ha'e javive ju oayvupa ojae'o reve. Ha'e ramo tyke'y kuery ijayvu hexeve.

José ryke'y kuery ou okuapy rã Faraó oenduague

¹⁶ Ha'e gui Faraó ro py voi onhendu aipo'ea rã:

— José ryke'y kuery ri ty ou ra'e — 'ea rã. Faraó oendu vy ojou porã, hembiguai kuery guive.

¹⁷ Ha'e rami vy Faraó aipoe'i José pe:

— Aipo're nderyke'y kuery pe: “Pova'e nunga pejapo: Penerymba kuery pembovoyi ju heravy Canaã yvy katy.

¹⁸ Ha'e gui Peru penderu ha'e pendera'y kuery xea py. Xee ame'ẽ 'rã yvy iporâvea Egito re oĩ va'e pendekuai aguã. Ha'e py pekaru 'rã pekuapy iporâve va'e re anho", 're.

¹⁹ Emombe'u avi ha'e kuery pe: “Pova'e nunga pejapo: Egito yvy gui peraa karóxa pendera'y kuery ha'e pendera'yxy kuery Peru aguã. Peru avi penderu, pejupa.

²⁰ Ha'e pepexã rei eme mba'emo perekóva'e perupa aguã re, mba'eta Egito yvy ha'e javi re iporâguevea ikuai va'e opytapa rã pendevy", 're — he'i.

²¹ Ha'e gui Israel ra'y kuery ha'e rami ojapo. Faraó aipoe'iague rami vy ha'e kuery pe José ome'ẽ karóxa, tembi'u guive tape rupi ho'u va'erã.

²² Petei-tei pe ome'ẽ ao iporâve va'e. Ha'e rã Benjamim pe ma ome'ẽve, trezentos hatã'i va'e prata guigua ha'e peteí nhiruã ao iporâve va'e.

²³ Nguu pe ma ha'e rami avi ogueraa uka dez mburika'i opa mba'e porã Egito guigua re ovoyi va'e, ha'e dez mburika'i mba'emo ra'yã ha'e mbojape re ovoyi va'e. Tembi'u tuu oua rupi ho'u va'erã voi ome'ẽ.

²⁴ Ha'e rami vy omondoukapa guyke'y kuery. Aipoe'i:

— Joe-joe pepu'a eme tape peoa rupi — he'i imondovy.

²⁵ Ha'e rami rã Egito yvy gui oje'oi vy ovaẽmba ju Canaã yvy re nguu Jacó-a py.

²⁶ Nguu pe aipoe'i okuapy:

— José oikove teri. Ha'e ma Egito yvy jave re opena va'e oiko — he'i okuapy. Ha'e ramigua oendu vy nda'ipy'a tytyveia ramigua oendu, ndogueroviai vy.

²⁷ José ijayvuague omombe'upa rã tuu Jacó oendu vy, ha'e karóxa heruarã José omon-douka va'ekue oexa vy mae ma oendu ju ipy'a guaxua.

²⁸ Ha'e rami vy Israel aipoe'i:

— Ha'eve ma. Xera'y José anhetã oikove teri ra'e. Xee aa ta amano e'ŷ mbove aexa ju aguã — he'i.

46

Egito yvy katy Jacó ro pygua kuery oje'oiague

¹ Ha'e gui Israel opa mba'e oguereko va'e reve oo vy Berseba py ranhe ovaẽ. Ha'e py ma mba'emo ome'ẽ nguu Isaque Ruete pe ombojerovia vy.

² Pyávy Israel pe Nhanderuete ojexa uka vy aipoe'i:

— Jacó! Jacó!

Ombovai:

— Apy ma aĩ — he'i.

³ Ha'e ramo aipoe'i:

— Xee ma Nderuete, nderu Ruete aiko. Ekyje eme Egito yvy re reo aguã, mba'eta ha'e py ndegui amoingo 'rã peteí regua hetã va'e.

⁴ Xee aa 'rã ndereve Egito katy. Araka'eve rã ajapo 'rã ha'e gui pejevy ju aguã ramo. Remano ramo José ae 'rã omboty nderexa — he'i.

- ⁵ Ha'e gui Berseba gui Jacó oguatave ovy. Israel ra'y kuery ogueraa nguu Jacó, gua'y kuery ha'e gua'xyx kuery Faraó karóxa heraarā ombou va'ekue py.
- ⁶ Ogueraapa guymba kuery vaka ha'e Canaã yvy re oiko jave ojou va'ekue ha'e javi. Oopa Egito katy, Jacó, hamymino kuery guive.
- ⁷ Gua'y kuery, gua'y ra'y kuery, guajy kuery, gua'y rajy kuery, ha'e kuery ha'e javi ogueraapa Egito katy.
- ⁸ Po rami ma Israel ra'y kuery nguu Jacó reve Egito katy oo va'ekue rery: Rúben ma Jacó ra'y tujave va'e.
- ⁹ Rúben ra'y kuery ma Enoque, Palu, Hezrom ha'e Carmi.
- ¹⁰ Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul.
- ¹¹ Levi ra'y kuery ma Gérson, Coate ha'e Merari.
- ¹² Judá ra'y kuery ma Er, Onã, Selá, Perez ha'e Zera. Ha'e rā Er ha'e Onã ma Canaã yvy re ae omano. Perez ra'y kuery ma Hezrom ha'e Hamul.
- ¹³ Issacar ra'y kuery ma Tola, Puva, Jó ha'e Sinrom.
- ¹⁴ Zebulom ra'y kuery ma Serede, Elom ha'e Jaleel.
- ¹⁵ Ha'e va'e kuery ma Jacó ramymino ikuai, Lia pi'a meme, Padã-Arã py oiko va'ekue. Tajy Diná voi ha'e pygua. Ha'e va'e ta'y kuery, tajy kuery ha'e javi vy ma trinta e três ikuai.
- ¹⁶ Ha'e gui Gade ra'y kuery ma Zifiom, Hagi, Suni, Esbom, Eri, Arodi ha'e Areli.
- ¹⁷ Aser ra'y kuery ma Imna, Isvá, Isvi, Berias ha'e heindy Sera. Berias ra'y kuery ma Héber ha'e Malquiel.
- ¹⁸ Ha'e va'e kuery ma Zilpa pi'a meme, Jacó ra'y ha'e rajy kuery. Zilpa ma Labão guajy Lia rembiguairā ome'ẽ va'ekue. Ha'e kuery ha'e javi vy ma dezesseis ikuai.
- ¹⁹ Ha'e gui Jacó ra'xy Raquel pi'a ma José ha'e Benjamim.
- ²⁰ José ra'y kuery Egito py oiko va'ekue ma Manassés ha'e Efraim. Ha'e kuery ma Asenate pi'a ikuai. Ixy ma Om pegua sacerdote Potífera rajy.
- ²¹ Benjamim ra'y kuery ma Bela, Bequer, Asbel, Gera, Naamã, Ei, Rôs, Mupim, Hupim ha'e Arde.
- ²² Ha'e va'e kuery ma Jacó ra'y kuery, Raquel pi'a meme. Ha'e javi vy catorze ikuai.
- ²³ Ha'e gui Dã ra'y ma Husim.
- ²⁴ Naftali ra'y kuery ma Jazeel, Guni, Jezer ha'e Silém.
- ²⁵ Ha'e va'e kuery ma Jacó ra'y kuery, Bila pi'a meme. Ha'e va'e ma Labão guajy Raquel rembiguairā ome'ẽ va'ekue. Ha'e javi vy sete ikuai.
- ²⁶ Ha'e rami py Jacó reve Egito katy oo va'ekue ma sessenta e seis ikuai, ta'y ra'xyx kuery jaipapa e'ŷ re.
- ²⁷ José ra'y kuery Egito py oiko va'ekue ma mokoĩ ikuai. Jacó ro pygua kuery Egito py oo va'ekue ha'e javi vy setenta ikuai raka'e.

Nguu reve José nhovaexiague

- ²⁸ Jacó guenonde re omondouka Judá José-a py, Gósen katy tape oo va'e oikuua aguã. Ha'e rami vy Gósen yvy re ovaẽmba.
- ²⁹ Ha'e gui José ma karóxa oguereko katu vy oo ovaexi nguu Israel Gósen re. Ixupe ojexa uka vy ijaju'y rupi oikuavã are'i ojae'o reve.
- ³⁰ Ha'e ramo Israel aipoe'i gua'y José pe:
— Aŷ ma amano teĩ ha'eve ma, reikove reve roexa rire — he'i.
- ³¹ Ha'e gui José aipoe'i guyke'y kuery ha'e nguu ro pygua kuery ha'e javi pe:
— Xee aa ju ta ranhe. Faraó pe aipoa'e 'rā: “Ke'y kuery ha'e xeru ro pygua kuery ha'e javi Canaã yvy re ikuiaia gui oupa ma xea py.
- ³² Ha'e va'e avakue ma vexa'i ha'e vaka re openaa rupi ikuai. Oguerupa guymba kuery vexa'i ha'e vaka, mba'emo oguereko va'e ha'e javi reve”, ha'e 'rā.
- ³³ Ha'e gui Faraó penerenoĩ uka vy oporandu 'rā: “Mba'exa tu peẽ kuery pumba'epo va'e?” he'i ramo ma

³⁴ aipopeje 'rā: "Ore nerembiguai kuery ma mymba kuery re ropenaa rupi orekuai, orekunumi guive aŷ peve, oreramoĩ kuery ikuaiague rami ae", peje. Ha'e rami rā ijayvu 'rā Gôsen yvy re pendekuai aguã. Mba'eta Egito pygua kuery pe rā guymba re opena va'e omboetepy e'ŷ meme ikuai — he'i.

47

Faraó-a py José nguu Israel ogueruague

¹ Ha'e gui José ou vy aipoe'i Faraó pe:

— Xeru ha'e ke'y kuery oupa ma Canaã yvy gui. Guymba kuery vexa'i ha'e vaka, ha'e mba'emo oguerekva'e ha'e javi reve ovaẽ okuapy Gôsen yvy re — he'i.

² Ha'e vy teĩ nhiruĩ guyke'y kuery ogueru avi, oexa uka Faraó pe.

³ Ha'e ramo José ryke'y kuery pe Faraó oporandu:

— Mba'exa tu peẽ kuery pemb'a'epo va'e?

Ha'e kuery ombovai:

— Nerembiguai kuery vexa'i re ropenaa rupi orekuai, oreramoĩ kuery ikuaiague rami ae.

⁴ Kova'e yvy re orekuai aguã ri roju, mba'eta Canaã yvy re ma nihuũ porã jipoi ore nerembiguai kuery rymba kuery pe, karuai nda'evei ete ramo. Ha'e nunga rupi aŷ rojerure Gôsen yvy re orekuai aguã re — he'i okuapy Faraó pe.

⁵ Ha'e ramo Faraó aipoe'i José pe:

— Nderu ha'e nderyke'y kuery ndea py oupa ma ramo

⁶ Egito yvy ndevy guarã ae itui. Iporâvea py ejapo nderu ha'e nderyke'y kuery ta'ikuai. Gôsen yvy re ae ri ta'ikuai. Ha'e gui xapy'a rei rā nderyke'y kuery regua opena kuaa ete va'e ikuai ramo emoĩ xerymba kuery re ae opena va'erã — he'i.

⁷ Ha'e gui nguu Jacó ju José ogueru vy oexa uka Faraó pe. Ha'e ramo Jacó ogueroayvu porã Faraó.

⁸ Faraó oporandu Jacó pe:

— Mbovy ma'etŷ ma tu rerekó?

⁹ Jacó ombovai:

— Xee aikoa ha'e javi vy ma cento e trinta ma'etŷ. Mboapy'i ete aiko axya. Xee ma ndaupityi teri xeramoĩ kuery oikoague ma'etŷ peve — he'i.

¹⁰ Ha'e rami vy Jacó Faraó ogueroayvu porã rire oo ju oĩa gui.

¹¹ Ha'e gui José omboekoa nguu ha'e guyke'y kuery. Ramessés yvy re Egito yvy iporâvea py ome'ẽ ikuai aguã, Faraó aipoe'iague rami vy.

¹² Nguu, guyke'y kuery ha'e nguu ro pygua kuery ha'e javi pe José ombou jepi tembi'u, peteĩ-teĩ gua'y kuery mbovy pa oguerekoa rami.

José Egito yvy ha'e javi ojoguaague

¹³ Karuai nda'evei ete ramo yvy jave re jipoi tembi'u. Ha'e nunga rupi Egito ha'e Canaã yvy re ikuai va'e iporiauve oje'oivy karuai gui.

¹⁴ Ha'e vy Egito ha'e Canaã pygua kuery José gui mba'emo ra'yī ojogua vy ipo py anho omboaxa peráta. Ha'e ramo Faraó ro py ju oguerupa.

¹⁵ Ha'e gui Egito ha'e Canaã yvy re peráta jipovei ramo Egito pygua kuery ha'e javi jogueru vy ojexa uka José renonde. Ha'e vy aipoe'i okuapy:

— Eme'ẽ orerembi'urã. Mba'erã tu romanomba ta rexaa py? Oreperáta opa ma — he'i okuapy.

¹⁶ José ombovai:

— Pendeperáta opa ma ramo penerymba kuery ju Peru. Penerymba kuery rekovia 'rā ame'ẽ tembi'u — he'i.

¹⁷ Ha'e ramo José-a py ogueru guymba kuery. Ha'e rā hembi'urã José ome'ẽ kavaju, vexa'i, vaka ha'e mburika'i rekovia. Ha'e rami vy ha'e va'e ma'etŷ re ma mymba kuery rekovia re omongaru.

¹⁸ Ha'e va'e ma'etŷ opa rire ma'etŷa mboae ovaẽ ramo José-a py oupa ju. Ha'e vy aipoe'i:

— Oreruvixa, nda'evei rombotavya rupi oreayvu aguã ndevy. Oreperáta opa ma, orerymba kuery voi rerekopa ma. Mba'eve'i ndoroguerekovei ma ndevy peguarã, orerete ae ha'e oreyvy e'ŷ vy.

¹⁹ Mba'erã tu ore kuery romano ta rexaa py, oreyvy optya rive aguã? Orejogua ke, oreyvy avi ejogua tembi'u rekoria. Ha'e rami rã ore kuery roiko 'rã escravo Faraó pegua, oreyvy voi imba'erã topyta. Eme'ẽ orevy mba'emo ra'yigue roikove aguã, romano e'ŷ aguã, vy voi optya rive e'ŷ aguã — he'i okuapy.

²⁰ Ha'e rami rã Egito vy ha'e javi José ojogua Faraó pe. Egito pygua kuery peteĩ-teĩ oyvy ovende, ha'e py karuai nda'evei ete ramo. Ha'e rami vy vy ha'e javi Faraó mba'eo ptya.

²¹ Ha'e pygua kuery voi ojeupeguia escravo omoingo, Egito vy ha'e javi rupi ikuai va'e.

²² Sacerdote kuery hyvy anho ndojoguai, mba'eta ha'e va'e kuery pe Faraó mba'emo ome'ẽ jepi ramo. Faraó po gui ojopy va'ekue re ae okaru okuapy. Ha'e rami vy ha'e kuery novendei oyvy.

²³ Ha'e gui José aipoe'i heta va'e kuery pe:

— Aŷ ma peẽ kuery rojogua ma, pendeyvy voi ajogua Faraó mba'erã. Apy ma mba'emo ra'yigue oĩ. Peraa, penhotŷ vy vy re.

²⁴ Mba'emo'a pemono'õ vy ma peteĩ nhiruĩ ikuai va'e nhavõ gui peteĩ-teĩ peme'ẽ 'rã Faraó pe. Ha'e rã hembyrekue ma pendevy peguarã topyta. Pendevygua ma vy re penhotŷ ju aguã, pekaru aguã pendera'y kuery ha'e pendero py ikuai va'e ha'e javi reve — he'i.

²⁵ Ha'e ramo ha'e kuery ombovai:

— Ndee ma roikove aguã rami oreapo. Oreruvixa, ndee oremboaxya rupi orerereko. Ha'e ramo Faraó pegua escravo orekuai teĩ ha'eve — he'i okuapy.

²⁶ Ha'e rami aguã Egito vy re José ojapoague ma lei aŷ peve guarã oĩ: Mba'emo aju peteĩ nhiruĩ ikuai nhavõ gui ma peteĩ-teĩ ome'ea 'rã Faraó pe. Sacerdote kuery vy anho Faraó mba'e'ŷ itui.

²⁷ Ha'e rami vy Israel Egito vy re oiko, Gósen re ae. Ha'e py ha'e kuery ikuai aguã ojou vy heta-etave oje'oivy, heta ete ikuai.

²⁸ Jacó ma dezessete ma'etŷ re oiko Egito vy re. Jacó oikoa ma'etŷ ha'e javi vy cento e quarenta e sete ma'etŷ.

²⁹ Ha'e gui Israel omano rai'i ma vy oenoĩ gua'y José. Ha'e vy aipoe'i:

— Aŷ ma ndee xemboaxy ramo ajerure xe'u guýry ndepo remoĩ reve reura aguã, xevy rejapo porã aguã anhetê rupi. Ajerure Egito vy re e'ŷ xenhono porã aguã,

³⁰ ha'e rã xeru kuery ikuaiague py anho. Ha'e rami vy Egito vygui xeretekue reraa 'rã xeru kuery onhono porãague py, ha'e py ae xenhono porã aguã — he'i.

José ombovai:

— Xee ajapo 'rã ndeayvuague rami — he'i.

³¹ Ha'e gui Jacó

— Eura ha'vy xevy — he'i. Ha'e ramo oura. Ha'e rami rã Israel ojero'a, ngupa akã re ojeko.*

48

Jacó imba'eaxy oupya py José gua'y kuery ogueruague

¹ Ha'e va'e rire José pe aipo'ea:

— Nderu tu imba'eaxy vaipa rima oupy — 'ea. Ha'e ramo ogueraa ha'e py mokoïve gua'y Manassés ha'e Efraim.

² Jacó pe omombe'ua:

— Ndera'y José rako ou oiny ndea py — 'ea. Ha'e ramo Israel onhemomburu ngupa py oguapy ranhe aguã.

* 47:31 Ha'e ramo Jacó ojapo ombojerovia vy (Hebreus 11.21).

³ Ha'e gui Jacó aipoe'i José pe:

— Nhanderuete Ipo'akapa va'e xevy ojexa uka karamboae Canaã yvy re Luz tetã py aiko jave, ha'e rami vy xereroayvu porã.

⁴ Ha'e vy aipoe'i: “Xee rojapo 'rã ndera'y reta aguã rami. Neramymino kuery ajapo 'rã heta regua ikuai aguã rami. Ha'e kuery pe ame'ẽ 'rã kova'e yvy araka'e rã peve guarã”, he'i va'ekue xevy.

⁵ Ha'e rã ndera'y mokoõ Egito yvy re aju e'õ mbove oiko va'ekue ma, ha'e kuery ma aÿ guive xera'y ae'i rami ikuai. Efraim ha'e Manassés ma xera'y ae'i rami ma ikuai, Rúben ha'e Simeão rami avi.*

⁶ Ha'e rã ha'e kuery rire ju ndera'y ikuai va'erã va'e ma ndera'y ae 'rã ikuai, ha'e guyke'y kuery yvy re 'rã ha'e kuery hekoia.

⁷ Mba'eta xee Padã gui aju jave Raquel omano karamboae Canaã yvy re, tape Efrata katy oo va'e katy'i. Xeporiau reve anhono porã karamboae tape Efrata Belém 'epy va'e katy oo va'e yvýry — he'i.

⁸ Ha'e gui Israel ma José ra'y kuery oexa vy aipoe'i:

— Mava'e kuery tu upe va'e?

⁹ José aipoe'i nguu pe:

— Xera'y kuery rima ikuai, apy ae Nhanderuete xevy ome'ẽ va'ekue — he'i.

Ha'e ramo aipoe'i:

— Eronhembojave'i ha'vy xea py, aroayvu porã aguã — he'i.

¹⁰ Israel tuja'i ete vy hexa voi pytûmba ma, ndoexa porãvei ma. Ha'e nunga rupi José ogueronhemboja heruvy ha'e oña py. Ha'e ramo oayvupa, oikuavãmba.

Gua'y José ha'e ta'y kuery Jacó ogueroayvu porãague

¹¹ Ha'e ramo Israel aipoe'i José pe:

— Xee ma naexa'ãi peteigüe ju roexa aguã. Ha'e rami teñ Nhanderuete ojapo ndera'y kuery avi aexa aguã rami — he'i.

¹² Ha'e gui José gua'y kuery oipe'a nguu renapy'ã re ikuiai gui. Nguu renonde oĩ guenapy'ã re, ngova omovaõ yvy re.

¹³ Ha'e va'e rire José ogueru ju gua'y kuery. Efraim ma oiporu kuaa re omopu'ã imo'amy, tuu Israel oiporu kuaa e'õa re oĩ aguã, ha'e rã Manassés ma oiporu kuaa e'õa re omopu'ã, Israel oiporu kuaa re. Ha'e rami vy mokoõve ogueronhemboja heruvy hexe.

¹⁴ Ha'e rami teñ Israel opo ombojoaxa imondovy vy oiporu kuaa regua omoõ Efraim kyrïve va'e apyte re, ha'e rã oiporu kuaa e'õa ma Manassés apyte re omoõ, tujave va'eri.

¹⁵ Ha'e rami vy José ra'y kuery ogueroayvu porã vy aipoe'i:

— Xeramoõ Abraão oiko va'ekue Nhanderuete renonde, xeru Isaque guive. Ha'e gui xere ju opena oikovy xekyrí guive aÿ peve.

¹⁶ Ixugigua anjo opa mba'e vai gui xereraa jepe va'e tomoingo porã kova'e avakue'i. Tove xerery rupi meme ta'ikuai, xeru kuery Abraão ha'e Isaque rery rupi guive. Ta'y kuery taetave oje'oivy yvy re — he'i.

¹⁷ Ha'e gui tuu opo oiporu kuaa regua Efraim apyte re omoõ rã José oexa vy ndojou porãi. Ha'e rami vy nguu po re ojopy, Efraim apyte gui oguerova aguã Manassés apyte re.

¹⁸ Ha'e vy José aipoe'i nguu pe:

— Evoko rami e'õ xeru, mba'eta kova'e ae ma tujave va'e oiko. Inhakã re ae 'rãgue remoõ reiporu kuaa regua — he'i.

¹⁹ Ha'e rami teñ tuu opo ndoguerova ukai. Ha'e vy aipoe'i:

— Xera'y, xee aikuua ae ma, aikuua. Ha'e rami avi ixugui avi 'rã oiko peteñ regua, yvate va'e 'rã oiko. Ha'e rã tyvy ma ixugui yvateve 'rã. Hamymino kuery ma heta regua 'rã ikuai — he'i.

²⁰ Ha'e rami py ha'e va'e ára ogueroayvu porã. Ha'e vy aipoe'i:

* 48:5 José ra'y kuery mokoõ ikuai va'e ma Jacó omano ta vy ogueroayvu porã, gua'y kuery ae'i pe rami avi.

— Peẽ kuery rery rupi Israel kuery jogueroayvu porã 'rã. Ha'e vy “Tove Nhanderuete tanemoingo porã Efraim ha'e Manassés rami”, he'i 'rã okuapy. — Ha'e rami ijayvu vy Manassés rery gui Efraim rery re ranhe ijayvu.

²¹ Ha'e rire Israel aipoe'i José pe:

— Aŷ xee amano 'rã. Ha'e rami teĩ Nhanderuete oiko 'rã ndereve, ojapo 'rã yvy neramoĩ kuery ikuaiague py peo ju aguã rami.

²² Ndevy pe aeja peteĩ mba'e, ha'e ramigua nderyke'y kuery pe aeja va'erã e'ŷ. Ndevy aeja yvy'ã amorreu kuery gui xekyxe ha'e xerapa py aipe'a va'ekue.

49

Jacó gua'y kuery rekorã omombe'u ma voiague

¹ Ha'e rire Jacó oenoĩ gua'y kuery ha'e javi. Ha'e vy aipoe'i:

— Peno'õmba ke. Xee amombe'u 'rã penderekorã, raka'e rã guarã.

² Jacó ra'y kuery, peno'õmba pendu aguã. Pejapyxaka penderu Israel ijayvu rã.

³ — Rúben, ndee ma xera'y tujave va'e, xembaraetea kuaa ukaa. Jypy'i xegui reiko va'ekue, pavẽ gui yvateve ha'e ipo'akave va'e reiko.

⁴ Ha'e rami avi yai opu'ã-pu'ã rami avi rejokoa kuaa e'ŷ vy pavẽ gui e'ŷ 'rã ndeyvateve. Mba'eta nderu rupa py rejeupi vy retekoavy rire. Xerupa py rejeupi va'ekue.*

⁵ — Ha'e gui Simeão, Levi reve ma joegua pendekuai. Pendekyxe perojerovia peikovy joe.

⁶ Ha'e rami avi peẽ kuery penhembopy'aa py xee ma nanhembopy'ai, peẽ penhemboatya re xenhe'ẽ nonhembojai. Mba'eta pendepoxy vy pejojuka raka'e, pejerovia vy vaka oguata vaikue aguã rami pejapo.

⁷ Pendevaia ma ayvu vaipy topyta, pendevai vaipa rã. Pendepoxy vy pejapo vai ete. Ha'e ramo xee romboja'o 'rã Jacó kuery ra'y ikuia rupi, Israel ra'y ikuia rupi romoaõmba 'rã.

⁸ — Judá, nderyvy kuery tandererovy'a. Ndepo py rejopy 'rã nderovaigua kuery aju'y re. Nderu ra'y kuery voi guenapy'ã re oĩ 'rã nerenonde.

⁹ Judá, ndee ma xivi ra'y rami ndepy'a guaxu va'e. Xera'y, guembia omondoroa gui opu'ã ju va'e rami reiko. Xivi ha'e xivi kunha minha onheno oupya gui mava'e nda'u omomyíta?

¹⁰ Judá regua po gui ndoipe'aai 'rã huvixa po pygua opy mbyte ojopy heno'amy va'e, ija Siló 'epy va'e ou e'ŷa ja. Ha'e va'e ma pavẽ regua 'rã onhe'ẽ rendu okuapy.

¹¹ Guymba mburika omoxã 'rã uva rembypy re, hymba ra'y uva rembypy iporãve va'e re 'rã omoxã. Oao ojoi 'rã uva rykue py, o-capá ma tuguy rami uva'a guigua py ojoi 'rã.

¹² Hexa ma pytã 'rã vinho gui, haĩ ma xiĩ va'e opyta 'rã kamby oy'u gui.

¹³ — Ha'e gui Zebulom ma ye'ẽ yvýry 'rã oiko, kanoã ojaaty katy. Sidom peve 'rã oo hekoa.

¹⁴ — Issacar ma mburika'i ikâgue mbaraete va'e, vexa'iaty ikuai va'e mbyte rupi onheno oupy va'e rami.

¹⁵ Ha'e oikuua rã opytu'u aguã ha'eve, ijyvy iporã rã. Ha'e rami vy ojero'a 'rã onhembovoyi uka vy. Ogueropo'akaa rã oiko 'rã rhoembiguai.

¹⁶ — Ha'e gui Dã ma oikuua pota 'rã guetarã kuery re, Israel regua mboae ojapoa rami.

¹⁷ Dã ma mboi tape yvýry itui va'e rami avi 'rã oiko. Mboi minha itui 'rã tape yvýry kavaju pyta py oixu'u aguã, kavaju árygua hakykue katy ho'a aguã rami ojapo.

¹⁸ — SENHOR, xee ma roarõ aikovy xereraa jepe aguã!

¹⁹ — Ha'e gui Gade re ma jojukaa kuery heta opu'ã okuapy teĩ omonhamba 'rã imondovy.

²⁰ — Aser ma ojou reta 'rã tembi'u porã, huvixave pegua voi.

²¹ — Naftali ma guaxu opoi pyre rami oiko, ijayvu porã kuaa 'rã guive.

²² — José ma yvyra rakã hi'a porã riae va'e rami 'rã oiko, yakã yvýry oĩ va'e rami, kora áry rupi hakã ojeupi ov yvýry va'e rami.

* 49:4 Gênesis 35.22

²³ Hapa va'e kuery omoī vai 'rā. Hexe hu'y omombo vy omoingo axy 'rā.

²⁴ Ha'e rami teī nderapa rejopy atā riae 'rā, ndejyva voi imbaraete 'rā, Jacó repyare Ipo'akapa va'e nepytyvō ramo. Ha'e va'e ma Israel kuery re opena va'e, Israel kuery pegua ita imbaraete va'e.

²⁵ Nderu Ruete nepytyvō 'rā. Ipo'akapa va'e nemoingo porā 'rā. Yva guigua ha'e yvy guyrygua py nemoingo porā 'rā. Omoingo porā avi 'rā xy kuery kā ha'e kyr'i'i va'e ryru ndera'y reta aguā rami.

²⁶ Xeru kuery xereroayvu porāague gui xee nderu rogueroayvu porāve, yvyty araka'e rā guarā apyte áryve. Ha'e nunga ha'e javi toī José akā re, guyke'y kuery gui yvateve va'e rā.

²⁷ — Ha'e gui Benjamim ma guary nhomondoropa va'e rami ipo'aka riae va'e. Ha'e nunga ma aje'ive reve ho'u 'rā oiny guembia, ha'e ka'arukue voi omboja'o 'rā ojopy va'ekue — he'i.

²⁸ Ha'e va'e kuery ma Israel regua doze ikuai va'e ru. Ha'e rami ae tuu ogueroayvu porā. Peteī-teī ogueroayvu porā peteī-teī renonderā oīa rami vy.

²⁹ Ha'e rire ha'e kuery pe aipoe'i:

— Xenhe'ē heraa 'rā xeramoī kuerya py. Ha'e ramo xenhono porā xeru kuery yvýry itakua heteu regua Efrom yvy re oī va'e py.

³⁰ Macpela regua yvy Manre katy'i oī Canaā yvy re, Efrom gui Abraão ojogua va'ekue jouparā.

³¹ Ha'e py ma Abraão onhono porā raka'e gua'yxy Sara. Ha'e py ju Isaque onhono porā Rebeca. Ha'e py avi xee anhono porā karamboae Lia.

³² Ha'e va'e yvy ha'e itakua oī va'e ma Hete ra'y kuery gui ojogua pyre — he'i.

³³ Opa ma Jacó gua'y kuery omonogetapa vy opy omboapu'a heravy ngupa py, ha'e omano. Ha'e rami vy inhe'ē heraa tamoī kuerya py.

50

Jacó re ipy'a vai reve onhono porāague

¹ Ha'e ramo José nguu rova oikuavā vy ojae'o reve oayvupa.

² Guembiguai poropoanoa ikuai va'e pe José ijayvu tuu retekue omoeakuāmba aguā re. Ha'e ramo poropoanoa kuery omoeakuāmba Israel retekue.*

³ Gueko rami vy quarenta ára re ombo'eapo omoeakuāmba peve. Ha'e Egito pygua kuery ma setenta ára re ojae'o okuapy.

⁴ Ojae'oa opa ma rire José aipoe'i Faraó ro pygua kuery pe:

— Peē kuery xemboaxy ramo ajerure Faraó apyxa py pendeayvu aguā re. Aipoa'e uka:

⁵ “Xeru rāgue'i xeapo karamboae aura aguā rami. Ha'e vy aipoe'i: ‘Xee amano ta ma. Ha'e gui xenhono porā Canaā yvy re xeruparā xee ae areko katu va'ekue py’, he'i va'ekue. Aŷ ma aaxe xeru retekue anhono porā aguā. Ha'e gui aju ju 'rā”, peje Faraó pe — he'i.

⁶ Ha'e ramo Faraó ombovai:

— Tereo katu, enhono porā nderu, ndevy oura ukaague rami ae — he'i.

⁷ Ha'e ramo José ojepe'a ov ynguu onhono porā aguā. Hupive oje'oi avi Faraó rembiguai kuery, hoo pygua yvatekueve va'e ha'e Egito yvy re yvatekueve ha'e javi.

⁸ Oje'oi avi José ro pygua kuery, tyke'y kuery ha'e nguu ro pygua kuery ha'e javi. Gósen yvy re opyta va'e ma kyrigue'i anho, hymba kuery vexa'i, vaka guive.

⁹ Hupive oje'oi avi karóxa ha'e kavaju árygua. Heta ete oje'oi.

¹⁰ Ha'e gui mba'emo moa'yīaty Atade py oī va'e py ovaēmba vy opyta ranhe Jordão rovai re. Ha'e py ma peteīgue ju ojae'o vaipa okuapy. Sete ára re José ojae'o nguu re.

¹¹ Canaā yvy regua ha'e py ikuai va'e oexa okuapy ha'e rami ete ojae'o okuapy rā, Atade py mba'emo moa'yīaty oī va'e py. Ha'e vy aipoe'i:

* 50:2 Egito pygua kuery gueko rami vy omoeakuā 'rā te'ōgue, are teī hu'ūmba e'ŷ aguā.

— Egito pygua kuery ojae'o vaipa ete — he'i okuapy. Ha'e rami vy omboery Abel-Mizraim. Jordão rovai re oĩ.[†]

¹² Ha'e gui ta'y kuery ojapo tuu ijayvuague rami.
¹³ Ha'e rami vy Canaã yvy katy ogueraa vy onhono porã Macpela yvy re itakua oĩ va'e py. Ha'e va'e yvy ma heteu regua Efrom gui Abraão jouparã ojogua va'ekue, Manre katy'i.

¹⁴ Ha'e rire José ojevy ju Egito katy guyke'y kuery reve, ha'e tuu onhono porã aguã hupive oje'oi va'ekue ha'e javi.

Guyke'y kuery reve José ijayvu porã'iague

¹⁵ José ryke'y kuery ma tuu omano ma rire aipoe'i okuapy:
 — Aŷ ma xapy'a rei José ojepyxe vy nhanembopaga ma 'rã ixupe jajapo vaiague re — he'i okuapy.

¹⁶ Ha'e rami vy José pe aipoe'i uka okuapy:
 — Nhanderu rãgue'i omano e'ŷ mbove aipoe'i:
¹⁷ “Aipopeje 'rã José pe: ‘Eperdoa ke nderyke'y kuery ojejavyague ndevy otekoavy vaipa rire teĩ’, he'i. Ha'e rami rire ma aŷ rojerure reperdoa aguã re ore kuery nderu Ruete rembiguai va'e rojejavyague”, peje. — Ha'e rami ha'e kuery ijayvua José oendu vy ojae'o.

¹⁸ Ha'e gui tyke'y kuery ou vy henonde re guenapy'ã re oĩmba reve aipoe'i okuapy:
 — Apy ma roĩ nerembiguai kueryrã.

¹⁹ José ombovai:
 — Pekyje eme. Xee ma nhi'ã Nhanderuete rami aĩ?

²⁰ Peẽ kuery ma anhetẽ xevy pejapo vaise pekuapy karamboae. Ha'e rã Nhanderuete ma ha'e nunga oguerova nhomoingo porã aguã rami. Mba'eta heta ete rekove reraa jepearã xemoingo, aŷ pexa pekuapya rami.

²¹ Ha'e nunga rupi pekyje eme. Xee apena 'rã pendere ha'e pendera'y kuery re — he'i. Ha'e rami vy ombopy'a guaxua rupi ijayvu porã'i ha'e kuery reve.

José omanoague

²² Egito yvy re José oiko, nguu ro pygua kuery guive. Cento e dez ma'etŷ re oiko.
²³ José oexa Efraim ra'y kuery, ta'y ra'y kuery guive. Oexa avi Manassés ra'y Maquir ra'y kuery, guenapy'ã áry omboguapy imbokuapy.

²⁴ Ha'e gui José aipoe'i guyke'y kuery pe:
 — Xee ma amano ta ma. Ha'e rire Nhanderuete pendevy ojekuaa uka vy penemon-douka ju 'rã kova'e yvy gui, yvy mboae Abraão ha'e Jacó pe ome'ẽ aguã re ouraague katy — he'i.

²⁵ José ojapo Israel ra'y kuery oura aguã rami. Ha'e vy aipoe'i:
 — Anhetẽ Nhanderuete ojekuaa uka 'rã pendevy, ha'e ramo xekâgue peraa 'rã apy gui — he'i.

²⁶ Ha'e gui José omano cento e dez ma'etŷ oguerekoa py. Ha'e ramo hetekue omoeakuãmbaa vy Egito yvy re ae onhono porãa peteĩ hyru py.

[†] 50:11 Tery Abel-Mizraim ma “Egito pygua kuery ojae'oa” 'ea.

Êxodo mokoña kuaxia Moisés ombopara va'ekue

Êxodo mokoña kuaxia Moisés ombopara va'ekue

Tery Êxodo ma “Oëmbaa” he'ia. Ha'e rami vy kova'e kuaxia para re omombe'ua Egito vyv re Israel kuery escravo ikuaias gui oëmbaague.

Jypy Nhanderuete oenoï Moisés Egito vyv re oo vy ixupegua kuery oguenoẽ aguã. Ha'e rã Moisés ma ndooxei ranhe. Ha'e rami vy oporandu: “Mava'e tu xee aiko Faraó-a py aa aguã, ha'e Egito vyv gui Israel kuery anoẽ aguã?” Nhanderuete ombovai: “Xee aiko 'rã ndereve”, he'i (3.11-12a). Ha'e gui ma Moisés oporanduve ju Nhanderuete rery marã rami paa re. “Nhanderuete ombovai Moisés pe: ‘Xee ma xee ae. Po rami ndeayvu 'rã Israel kuery pe: “Xee ae” he'i va'e xembou peẽ kuerya py’”, he'i (3.14). Mba'eta Nhanderuete ma peteñ'i anho, amboae ndoikoi.

Ha'e gui ma Egito vyv re Moisés oo vy huvixa Faraó renonde py dez regua ojapo nhomondyipaaraã. Ha'e va'e rire mae ma Faraó omondouka Israel kuery oyvy gui. Ha'e rami teñ nda'evei nho vy oakykue monha oxondaro kuery reve. Ha'e ramo ye'ẽ mbyte py Nhanderuete ojukapa. Ha'e rã ojeupergua kuery pe ma ye'ẽ omboja'o vy yy opu'ã va'e mbyte rupi omondouka vyv piru reia rupi.

Ha'e gui ma tekoa e'õa rupi ogueraa Sinai vyvty peve. Ha'e py ma Moisés po py omboaxa ojeguigua lei ha'e kuery rekorã. Omombe'u avi ombojerovia atyrã ojapo aguã. Nhanderuete opa mba'e py ha'e kuery re opena porã, yva gui hembi'urã maná 'epy va'e ombou guive teñ ha'e kuery ndojeroviai ha'e nonhe'ẽ rendui jepi raka'e.

Jacó ramymino kuery Egito re ikuai va'ekue rery oĩa

¹ Po rami ma Israel ra'y kuery rery, Jacó reve Egito re oo va'ekue. Peteñ-teñ ogueraa ngoo pygua kuery.

² Rúben, Simeão, Levi ha'e Judá,

³ Issacar, Zebulom ha'e Benjamim,

⁴ Dã ha'e Naftali, Gade ha'e Aser.

⁵ Jacó guigua kuery ha'e javi ma setenta ikuai. Ha'e rã José ma Egito re oiko ae ma.

⁶ Ha'e gui José omano ha'e tyke'y kuery ha'e javi, ha'e javegua kuery ha'e javive.

⁷ Israel kuery ikuai porã vy heta-etave ha'e imbaraeteve tema ov. Ha'e rami vy ha'e kuery vyv omonyẽ.

⁸ Ha'e gui Egito pygua huvixa mboae ju oĩ José oikuua e'õa va'e.*

⁹ Ha'e va'e ma aipoe'i guembiguai kuery pe:

— Aõ ma Israel kuery heta vaipa ma, nhandegui ipo'akave guive.

¹⁰ Ma'ẽ, jaikuua rami jajapo ha'e kuery re heta-etave e'õa aguã, xapy'a rei nhandere opu'ãa ramo nhanderovaigua kuery re ha'e kuery onhemoirũ e'õa aguã, ha'e nhandere opu'ã vy nhandeyvy gui oje'oipa rive e'õa aguã.

¹¹ Ha'e rami vy omoï Israel kuery momba'eapoarã oguerekko axy rei aguã ombovoyia rupi. Ha'e ramo Faraó pe Israel kuery ojapo tetã mba'emo ra'yigue omoï porã atyrã, Pitom ha'e Ramessés hery va'e.

¹² Ha'e rami teñ oguerekko axy reia ramive ma heta-etave tema ov. Ha'e ramo nda'evei rei ikuai Israel kuery gui.

¹³ Ha'e rami vy Egito pygua kuery oguerekko axy reive okuapy Israel kuery omomba'eapoa py.

¹⁴ Ojavyky rei okuapy omomba'eapo poyi vy, yapo omou'ua py, tijolo ojapoa py ha'e mba'ety rupi omiba'eapoa py. Omiba'eapoa ha'e javi rupi omoingo axy.

Faraó ijayvuague rami e'õa kyrñ'i va'e rexaa kuery ikuaiague

* 1:8 Atos 7.18

¹⁵ Ha'e gui Egito pygua huvixa ijayvu hebreu regua kyr'i va'e rexaa kuery pe. Ha'e va'e kuery regua peteī ma Sifrá, ha'e rā amboae ma Puá hery va'e.

¹⁶ Ha'e vy aipoe'i ha'e kuery pe:

— Hebreu regua memby pexa vy ke peikuua pota. Xapy'a rei ava'i ri ramo ma pejuka 'rā. Ha'e rā kunhague'i ri ramo ma tove ta'ikuai.

¹⁷ Ha'e rā kyr'i va'e rexaa kuery ma Nhanderuete renonde ojererokyjea rupi ikuai vy Egito pygua huvixa ijayvuague rami e'ŷ ojapo. Ha'e rami vy ndojukai avakue'i itui'i rā.

¹⁸ Ha'e ramo Egito pygua huvixa oenoī uka kyr'i va'e rexaa kuery. Ha'e vy aipoe'i ha'e kuery pe:

— Mba'e re tu ha'e rami pejapo? Ndapejukai ri avakue'i.

¹⁹ Ha'e ramo kyr'i va'e rexaa kuery aipoe'i Faraó pe:

— Mba'eta hebreu regua kunhague ma Egito regua rami e'ŷ ikyre'ŷ va'e vy kyr'i va'e rexaa kuery ovaē e'ŷ mbove ma voi 'rā oikuavā — he'i okuapy.

²⁰ Ha'e rami rā Nhanderuete opena porā kyr'i va'e rexaa kuery re, ha'e Israel kuery heta-etave ete tema ovy, imbaraete guive.

²¹ Ha'e kyr'i va'e rexaa kuery Nhanderuete renonde ojererokyjea rupi vy ojapo ha'e kuery voi imemby aguā rami.

²² Ha'e ramo Faraó ijayvu guembiguai kuery pe. Ha'e vy aipoe'i:

— Hebreu regua avakue'i itui nhavō pemombo 'rā Nilo yakā py. Ha'e rā kunhague'i ma ndapejukai 'rā.

2

Moisés itui'i ha'e okakuaague

¹ Ha'e gui peteī ava Levi regua oo vy omenda peteī Levi regua rajy re.

² Ha'e ramo kunha va'e ma kyr'i va'e oguereko vy oikuavā peteī ava'i. Ha'e vy oexa rā iporā'i ramo onhomni mboapy jaxy re.

³ Onhomni aguā nda'evevei ramo ma ojou peteī ajaka jai rogue guigua, ha'e ombotypa betume ha'e oja va'e py. Ha'e gui op'i'a'i omboyro vy yakā py omoī hembe katy'i jai rogue ikuiaia rupi.

⁴ Ha'e rā heindy ma mombyry gui oma'ē oikovy mba'e pa oikoa oexaxe vy.

⁵ Ha'e gui Faraó rajy ou yakā py ojau aguā. Hembiguai kunhataīgue yakā yvýry ikuai. Ha'e gui ajaka jai rogue mbyte ovu rā oexa vy omondouka guembiguai ojopy aguā.

⁶ Oipe'a vy oexa kyr'i va'e itui rā. Ha'e va'e ojae'o ramo omboaxy. Ha'e vy aipoe'i:

— Kova'e ma hebreu regua ra'y ra'e.

⁷ Ha'e ramo heindy ou vy aipoe'i Faraó rajy pe:

— Reipota pa aa peteī hebreu regua aenoī omokambu ha'e omongakuaa aguā ndevy?

⁸ Faraó rajy ombovai:

— Tereo ha'vy — he'i. Ha'e ramo kunhataī oo vy oenoī kyr'i va'e xy.

⁹ Ixupe Faraó rajy aipoe'i:

— Tereo, eraa kova'e ava'i, emongakuaa xevy. Ha'e rā xee apaga 'rā repenaa re — he'i. Ha'e ramo ixy ogueraa vy omongakuaa.

¹⁰ Ha'e gui ava'i tujave ma ramo ogueraa Faraó rajya py. Ha'e va'e ju oguereko op'i'a ete'i rami. Ha'e rami vy omboery Moisés, “Yy gui anoē va'ekue” he'i vy.*

Egito pygua Moisés ojuka vy Midiā katy onhaague

¹¹ Ha'e gui Moisés tuja ma vy oo guetarā kuery ikuiaia py. Ha'e vy oexa rā omomba'eapoa poyi vai ete. Oexa avi peteī Egito pygua oinupā rā hebreu regua.

¹² Ha'e gui jobaive-ive re oma'ē vy avave rei ndoexai vy ojuka Egito pygua, ha'e vy hetekue ojaty ita ku'i reia py.

¹³ Ko'ēgue ju oo vy oexa mokoī hebreu regua joguero'a rā. Ha'e rami vy joapo vai va'e pe aipoe'i:

* 2:10 Tery Moisés ma “Oguenoē mbyre” 'ea reve nhaendu rā joo ramigua.

— Mba'e re tu reinupā neretarā?

¹⁴ Ha'e va'e ombovai:

— Mava'e tu nemoī oreruvixarā orere reikuua pota aguā? Egito pygua rejukaague rami jevy teve xejukaxe ri?

Ha'e nunga Moisés oendu vy okyje, "Anhetē teve ha'e va'e oikuua" he'i vy.*

¹⁵ Ha'e nunga Faraó voi omombe'ua rā oendu vy ojukaxe Moisés. Ha'e rami teī Faraó gui Moisés ojava vy oo Midiā yvy re oiko.

Ha'e py ma oguapy oiny peteī ygua yvýry.

¹⁶ Sacerdote Midiā pygua ma sete guajy oguereko. Ha'e va'e kuery ma ygua py ou yyojara aguā. Ha'e rami vy mba'emo oy'uaty oī va'e py omonyē imoiny nguu rymba kuery vexa'i omboy'u aguā.

¹⁷ Ha'e jave jogueru avi vexa'i re opena va'e kuery mboae, ha'e omonhamba kunhague ha'e gui. Ha'e rā Moisés ma opu'ā vy oepy kunhague, ha'e omboy'upa hymba kuery guive.

¹⁸ Ha'e gui kunhague ma nguu Reuel-a py ojevypa. Ha'e ramo tuu oporandu:

— Mba'e re tu kova'e ára peju voive ri?[†]

¹⁹ Kunhague ombovai:

— Peteī Egito pygua orereraa jepe vexa'i re opena va'e kuery po gui. Ha'e gui yy juojara orevy, ha'e mymba kuery pe voi ome'ē oy'u aguā — he'i.

²⁰ Ha'e ramo aipoe'i ha'e kuery pe:

— Mamo ha'vy hiny ava va'e? Mba'e re tu peja ra'e ha'e py? Penoī na, tou to'u mbojape — he'i.

²¹ Ha'e ramo Moisés ov'y'a ha'e va'e ava reve opyta vy. Ha'e ramo Moisés ra'yxyrā ome'ē guajy Zípora.

²² Ha'e gui ta'yxy oikuavā peteī ava'i. Ha'e ramo omboery Gérson, "Yvy mboae re aiko va'e" he'i vy.[‡]

Egito pygua huvixa omano rā guare

²³ Yma ete ma rire omano Egito pygua huvixa. Ha'e jave Israel kuery ipoaē riaeokuapy escravo ikuai vy. Ha'e vy ojapukai okuapy. Ha'e ramo ha'e kuery ojapukaia ma Nhanderuetea peve onhendu.

²⁴ Ipoaēa Nhanderuete oendu vy ima'endu'a Abraão, Isaque ha'e Jacó reve ngupive guarāojapo va'ekue re.

²⁵ Ha'e rami vy Israel kuery Nhanderuete oexa vy oikuua pota ikuai axya re.

3

Moisés reve Nhanderuete yvyra rogue hendy va'e mbyte gui ijayvuague

¹ Ha'e gui Moisés opena oikovy guatyu Jetro Midiā pygua sacerdote va'e rymba kuery vexa'i re. Ha'e rami vy vexa'i kuery ogueraa kuaray oikea katy tekoā e'ŷa va'e py, ha'e Nhanderuete pegua yvyty re ovaē, Horebe 'epy va'e py.*

² Ha'e gui ixupe ojexa uka peteī anjo SENHOR-a guigua peteī yvyra rogue hendy va'e mbyte. Moisés oma'ē rā yvyra rogue re tata hendy oiny va'eri ndokai.

³ Ha'e ramo aipoe'i ojeupe ae:

— Aa ta peva'e katy, aexa aguā ha'e rami ete iporā va'e. Mba'e re tu yvyra rogue ndokai?

⁴ Ha'e katy oexa aguā oo rā SENHOR oexa vy oenoī tata yvyra rogue hendy va'e mbyte gui. Ha'e vy aipoe'i:

— Moisés, Moisés!

Ombovai:

— Apy ma aī.

* 2:14 Atos 7.27-28,35 † 2:18 Reuel ma Midiā pygua sacerdote (versículo 16). Hery mboae ma Jetro (Êxodo 3.1).

‡ 2:22 Tery Gérson ma "Yvy mboae regua" 'ea reve nhaendu rā joo ramigua. * 3:1 Horebe yvyty rery mboae ma Sinai.

⁵ Ha'e ramo aipoe'i ju:

— Ejuve eme kyvõ katy. Emboi ndepy regua, mba'eta yvy repyrõ re'amya ma iky'a e'ŷ va'e.*

⁶ Xee ma nderu Ruete, Abraão, Isaque ha'e Jacó Ruete — he'i.

Ha'e ramo Moisés ma Nhanderuete re oma'ẽ aguã okyje vy omo'ã ngova.*

⁷ Ha'e gui SENHOR aipoe'ive ju:

— Xee aixa ete xevyguia kuery Egito re ikuai vy ojexavaia. Aendu ma ha'e kuery ojapukaia imomba'eapoa kuery gui. Xee aikuua ojexavaia.

⁸ Ha'e nunga rupi aguejy araa jepe aguã Egito pygua kuery po gui, ha'e ajapo aguã ha'e va'e yvy gui yvy iporã mba'emo oata e'ŷa py oje'oi aguã rami. Ha'e va'e yvy ma kamby ha'e ei oata e'ŷa, ha'e cananeu kuery rekoia, heteu, amorreu, ferezeu, heveu ha'e jebuseu kuery rekoia.*

⁹ Mba'eta Israel kuery ojapukaia ma xea peve onhendu, aixa avi Egito pygua kuery opa marã rei ombojexavaia.

¹⁰ Eju ha'yv, aŷ xee romondouka 'rã Faraó-a py, Egito yvy gui xevyguia Israel kuery reipe'a aguã — he'i.

¹¹ Ha'e rami rã Moisés aipoe'i Nhanderuete pe:

— Mava'e tu xee aiko Faraó-a py aa aguã, ha'e Egito yvy gui Israel kuery anoẽ aguã?

¹² Nhanderuete ombovai:

— Xee aiko 'rã ndereve. Po rami 'rã reikuua xee romondoukaague: Egito gui xevyguia kuery renoẽmba ma rire kova'e yvyty re ae ju xee Penderuete xemboete 'rã pekuapy.

¹³ Moisés aipoe'i Nhanderuete pe:

— Ha'e gui Israel kuery ikuuaia py avaẽ vy ha'e kuery pe “Penderu kuery Ruete xembou peẽ kuerya py” ha'e ramo ma ha'e kuery oporandu 'rã xevy: “Mba'exa tu hery?” he'i 'rã okuapy. Ha'e rami rã marã rami tu aipoa'e 'rã ha'e kuery pe?

¹⁴ Nhanderuete ombovai Moisés pe:

— Xee ma xee ae. Po rami ndeayvu 'rã Israel kuery pe: “Xee ae” he'i va'e xembou peẽ kuerya py.

¹⁵ Po rami 'rã ndeayvu Israel kuery pe: “SENHOR peneramoĩ kuery Abraão, Isaque ha'e Jacó Ruete va'e rima xembou karamboae penda py.† Po rami ae ma xerery opa va'erã e'ŷ. Ha'e va'e rupi ae 'rã xere penema'endu'a aŷ ha'e araka'e rã peve”, 're.

¹⁶ Tereo ha'yv, emono'õmba Israel mongetaaty kuery. Aipo're ha'e kuery pe: “SENHOR peneramoĩ kuery Abraão, Isaque ha'e Jacó Ruete ojexaa uka karamboae xevy. Ha'e va'e aipoe'i: ‘Anhetê xee aikuua pota ma pendere, aixa guive Egito yvy re penemoingo axya.

¹⁷ Ha'e nunga rupi xee aipoa'e: “Ajapo 'rã Egito yvy re pendekuai axy reia gui peo jepe aguã cananeu kuery yvy re, heteu, amorreu, ferezeu, heveu ha'e jebuseu kuery yvy re, yvy kamby ha'e ei oata e'ŷa py”, he'i”, 're 'rã ha'e kuery pe.

¹⁸ — Ha'e ramo ha'e kuery oendu 'rã ndeayvua, ha'e gui Israel mongetaaty kuery reve peo 'rã Egito pygua huvixaa py. Ha'e vy aipopeje 'rã ixupe: “SENHOR hebreu kuery Ruete ojekuaa uka orevy. Aŷ ma tove mboapy ára re toroo tekoa e'ŷa oĩ va'e katy, SENHOR Oreruete pe mba'emo rome'ẽ aguã”, peje 'rã.

¹⁹ Ha'e rami tei xee aikuua Egito pygua huvixa napenemondoukai 'rãa, xepo'akaa aixa uka e'ŷ rã.

²⁰ Ha'e nunga rupi xepo aipi vy ajapo vai 'rã Egito yvy re. Ha'e kuery mbyte ambou 'rã opa marãguia nhomondyipaarã. Ha'e va'e rire mae ma penemondouka 'rã.

²¹ Mba'eta xee ajapo 'rã Egito pygua kuery penepytyvõxe aguã rami. Ha'e ramo penembouka rã ndapeo rivei 'rã, pendepo py mba'eve peraa e'ŷ re.

²² Ha'e rami 'rãgue py peẽ kuery regua petei-tei kunha ojerure 'rã ha'e katy'i ikuai va'e, ha'e hoo py ovaẽ va'e-va'e pe prata ha'e ouro guigua iporã va'e re, ao re guive. Ha'e

* 3:5 Atos 7.33 * 3:6 Mateus 22.32, Marcos 12.26, Lucas 20.37, Atos 7.32 * 3:8 Atos 7.34 † 3:15 Tery SENHOR ma “Aikove va'e” 'ea.

nunga pejopy vy pendera'y ha'e penderajy kuery re voi pemoï 'rã. Ha'e rami vy peraapa 'rã Egito pygua kuery mba'emo oguerekva'ekue.

4

Moisés mba'emo ojapo aguã re Nhanderuete ombo'eague

¹ Ha'e gui Moisés ombovai:

— Ha'e rami avi xeretarã kuery ndogueroviai 'rã xeayvua, neñ noendui 'rã guive. Ha'e rami vy "SENHOR ma ndojexa ukai ndevy", he'i 'rã xevy.

² SENHOR oporandu ixupe:

— Mba'e tu ndepo py rerekova'ekue?

Ombovai vy

— Xepopoka rima areko — he'i.

³ Ha'e rã aipoe'i ixupe:

— Emombo ha'vy yvy py.

Ha'e ramo yvy py omombo rã ojeapo mboi. Ha'e va'e gui Moisés onha.

⁴ Ha'e gui SENHOR aipoe'i ju Moisés pe:

— Eju, ekuave'ẽ ha'e ejopy huguai re.

Ha'e ramo okuave'ẽ vy huguai re ojopy rã popoka rive ju ojeapo.

⁵ SENHOR aipoe'i:

— Ha'e nunga ma ha'e kuery oexa vy oguerovia aguã ndevy SENHOR ojexa ukaague, peneramoï kuery Abraão, Isaque ha'e Jacó Ruete.

⁶ Ha'e gui emoï ndepo ndepexo re — he'i. Ha'e rami opexo re opo omoï vy oipe'a jevy rã ipo re oĩ lepra, yro'y rami xiñ va'e.

⁷ SENHOR aipoe'ive ju:

— Emoï ju ndepo ndepexo re — he'i ramo teigue ju opexo re opo omoï vy oipe'a jevy rã ho'o iporãa rami ae ju ojekuaa.

⁸ SENHOR aipoe'i:

— Jypyguha hexa pyrã rejapo rã ha'e kuery nandereroviaai neñ ndoikuaa potai tei xapy'a rei mokoña rejapo ramo ojerovia 'rã.

⁹ Ha'e rami avi ha'e va'e mokoña hexa pyrã rejapo rã ha'e kuery ndogueroviai, neñ ndeayvua noendu potai ramo ma yy rejara 'rã yakã gui, ha'e renhoë 'rã yvy piru reia py. Ha'e rã yy yakã gui rejara va'ekue ojeapo 'rã tuguy yvy áry.

¹⁰ Moisés ombovai SENHOR pe:

— Ai SENHOR! Xee ma xeayvu kuaa va'e'ý, nerembiguai reve ndeayvu rire neñ ndeayvu e'ý mbove. Mba'eta xejuru ha'e xeapekũ ipoyi vaipa xeayvu porã aguã.

¹¹ SENHOR aipoe'i ixupe:

— Mava'e tu ojapo avakue juru? Mava'e tu ojapo ijayvu e'ý va'e ha'e oendu e'ý va'e, ha'e oexa va'e ha'e oexa e'ý va'e? Xee SENHOR e'ý teve ajapo?

¹² Ha'e gui aý tereo. Xee ma ndejuru reve aiko vy rombo'e 'rã ndeayvu aguã.

¹³ Ha'e ramo aipoe'i:

— Ai SENHOR! Emondouka remondouka va'e rei, xee e'ý.

¹⁴ Ha'e ramo SENHOR ivai Moisés pe. Ha'e vy aipoe'i:

— Levita regua Arão nderyke'y e'ý ri ty'y? Xee aikuua ha'e va'e ijayvu kuaa ete va'ea. Ha'e gui ha'e ou ma oiny nerovaexí vy. Nderexa vy ovya'a 'rã opy'a py.

¹⁵ Ha'e gui ndee hexeve ndeayvu vy remombe'u 'rã ijayvu aguã. Ha'e gui xee aiko 'rã ndejuru ha'e ijuru reve, ha'e rombo'e 'rã mba'emo pejapo aguã re.

¹⁶ Nderekovia nderyke'y 'rã ijayvu penetarã kuery pe. Ha'e ma ndejuru rekovia 'rã ijayvu, ha'e rã ndee ma ixupe aipo'ere uka 'rã xee Penderuete rami.

¹⁷ Ha'e rami ejopy kova'e popoka ndepo py, ha'e va'e py hexa pyrã rejapo aguã — he'i.

Egito yvy katy Moisés ojevyague

¹⁸ Ha'e gui Moisés ojevy vy guatyu Jetro-a py ranhe ovaẽ. Aipoe'i guatyu pe:

— Tove taa xeretarã kuery Egito yvy re ikuaria py ju ajevy aguã, okuave teri paa aexa aguã.

Ha'e rã Jetro ma

— Tereo porã ke — he'i Moisés pe.

¹⁹ Ha'e gui Midiã yvy re teri Moisés oiko reve SENHOR aipoe'i ixupe:

— Tereo, ejevy ju Egito katy, mba'eta ndejukaxe va'ekue omanomba ma — he'i.

²⁰ Ha'e ramo Moisés ma gua'yxy ha'e gua'y kuery ogueraa vy omoõ mburika áry. Ha'e rami vy Egito yvy katy ojevy. Opo py ma Moisés ogueraa Nhanderuete pegua popoka.

²¹ SENHOR aipoe'i ju Moisés pe:

— Egito yvy re revaẽ vy ke Faraó renonde ejapopa hexa pyrã ndepo py amboaxa va'ekue ha'e javi. Ha'e rami avi xee ajapo 'rã inhakã ratã aguã rami, neretarã kuery omondouka e'ý aguã.

²² Faraó pe aipo're 'rã: ‘Po rami SENHOR ijayvu: ‘Israel kuery ma xera'y jypygua rami.

²³ Ha'e nunga rupi aipoa'e ndevy xera'y remondouka aguã xevy oiko aguã. Ha'e rã neremondoukaxe ramo xee ajuka 'rã nderá'y jypyguare rerekva'e', he'i uka ndevy', 're 'rã ixupe.

²⁴ Ha'e gui tape rupi Moisés oguataa rupi optyu'ua py SENHOR ovaexí. Ha'e vy ojukaxe.*

²⁵ Ha'e ramo ta'yxy Zípora ma peteñ ita haimbe va'e oguenoẽ vy omboi opi'a pire, ha'e Moisés py yvy'iry omombo. Ha'e vy aipoe'i ixupe:

— Ndee xeme ma xevy rã jouguy moëa — he'i.

²⁶ Ha'e rami rã SENHOR oeja Moisés oikove aguã rami. Opi'a pire omboia káuxa ae ixupe ta'yxy “Xeme jouguy moëa”, he'i.

²⁷ Ha'e gui tyke'y Arão pe voi SENHOR aipoe'i:

— Tereo tekao e'ýa py eovaexí nderyvy Moisés — he'i. Ha'e ramo ha'e va'e ojepe'a ovv. Nhanderuete pegua yvyty oï va'e py guyvy ovaexí vy oayvupa.

²⁸ Ha'e ramo guyke'y Arão pe Moisés omombe'u SENHOR hexeve ijayvu vy omon-doukaague, ha'e hexa pyrã ojapo ukaague ha'e javi.

²⁹ Ha'e gui Moisés jogueraa Arão reve. Ha'e vy omboatypa Israel kuery mongetaaty kuery.

³⁰ Heta va'e kuery pe Arão omombe'u Moisés pe SENHOR aipoe'i ukaague ha'e javi, ha'e kuery oexaa py ojapo avi hexa pyrã.

³¹ Ha'e rami rã ha'e kuery oguerovia. Mba'eta SENHOR oikuua pota vy Israel kuery ikuai axya oexaa ma. Ha'e nunga ha'e kuery pe omombe'u rã oendu vy oimba guenapy'ã re, ha'e ombojerovia.

5

Faraó pe Moisés ha'e Arão ijayvuague

¹ Ha'e gui Faraó-a py Moisés Arão reve jogueraa vy aipoe'i ixupe:

— Po rami SENHOR Israel kuery ruete ijayvu: “Emondouka na xevygua kuery, xemboete vy ngaru ojapo aguã tekao e'ýa py”, he'i.

² Ha'e rã Faraó aipoe'i:

— Mava'e tu SENHOR oiko, ijayvua xee aendu vy Israel kuery amondouka aguã? Xee ndaikuai teve “SENHOR” pejea, neñ namondoukai 'rã Israel kuery — he'i.

³ Ha'e ramo ha'e kuery aipoe'ive ju:

— Hebreu kuery ruete ma ou orepon. Ha'e nunga rupi oremondouka na mboapy ára re tekao e'ýa py roo aguã, SENHOR oreruete pe mba'emo rome'ë aguã, orere ha'e ombou e'ý aguã mba'eaxy, e'ý vy kyxe rewegua.

⁴ Ha'e ramo ha'e kuery pe Egito pygua huvixa aipoe'i:

* ^{4:24} Nhanderuete ojukaxe mba'eta Moisés nomboi teri gua'y pire, ijayvuague rami e'ý (Gênesis 17.9-14).

— Moisés ha'e Arão, mba'e nunga rupi? Mba'e re tu pemombytu'ux e ri penetarã kuery omba'eapoa gui? Tapeo na peẽ kuery pemba'eapo aguã katy.

⁵ Faraó aipoe'i avi:

— Penetarã kuery heta ma ikuai orevy vy re. Ha'e rã peẽ ma pemombytu'ux e omba'eapoa gui.

Faraó Israel kuery ombojexavai reiague

⁶ Ha'e va'e árave Faraó ijayvu guembiguai huvixa kuery ha'e omba'eapoa re opena va'e kuery pe. Ha'e vy aipoe'i:

⁷ — Aÿ gui ma Israel kuery pe napeme'ëvei ma 'rã mba'emo 'ygue jypy guare rami, yvy jykuerã ojapo aguã. Ha'e kuery ae too ha'e kuery ae tojou mba'emo 'ygue.

⁸ Ha'e rami avi ha'e kuery pe pejapo uka 'rã yvy jykuerã jypy'i guive ojapoaty rami ae. Mbovyve'i tojapo eme. Mba'eta ha'e kuery ma inhate'ÿ okuapy. Ha'e rami vy ae "Jaje'oi, mba'emo nhame'ë Nhanderuete pe", he'i.

⁹ Ha'e nunga rupi pembopoyive tema ha'e va'e avakue rembiaporã, ha'e va'e rupi anho ikuai aguã, ijapu va'e ayvu ojapyxaka e'ÿ aguã — he'i.

¹⁰ Ha'e ramo hembiguai huvixa kuery ha'e omba'eapoa re opena va'e kuery oje'oi vy ijayvu Israel kuery pe:

— Faraó aipoe'i: "Pendevy name'ëvei ma 'rã mba'emo 'ygue.

¹¹ Tapeo, peẽ ae pejou mba'emo 'ygue pejoua py rei. Mba'eta mba'eve py ndapejapoi 'rã penerembiapo mbovyve'i", he'i uka pëvy — he'i.

¹² Ha'e ramo Egito yvy ha'e javi rupi Israel kuery oaïmba oje'oivy mba'emo 'ygue 'rãgue py hembyrekue ri jepe omono'õ aguã.

¹³ Huvixa kuery ombojexavai rei herekovy. Ha'e vy aipoe'i:

— Pejapopa ke penembiapo peteĩ-teĩ ára pygurarã pejopy va'ekue mba'emo 'ygue ikuai jave guare rami — he'i.

¹⁴ Ha'e rami vy oinupã Israel kuery omba'eapoa re opena va'e kuery Faraó rembiguai huvixa kuery omoõ va'ekue. Ha'e vy ha'e kuery pe aipoe'i okuapy:

— Mba'e re tu napemombai kuee, neĩ ange penembiaporã pejopy va'ekue, kueve guare rami yvy jykuerã pejapopa aguã?

Moisés ha'e Arão pe Israel kuery ivai okuapyague

¹⁵ Ha'e ramo Israel kuery omba'eapoa re opena va'e kuery oje'oi Faraó-a py. Ixupe ijayvu vy aipoe'i:

— Mba'e re tu ha'e rami orerereko nerembiuai orekuai va'eri?

¹⁶ Mba'emo 'ygue ma nome'ëavei ore kuery nerembiuai orekuai va'e pe, ha'e rami teĩ "Pejapo ke yvy jykuerã", 're uka orevy. Ore ma orenupãmbaa rami teĩ pende kuery ae pejeyavy.

¹⁷ Ha'e rami teĩ Faraó ombovai:

— Peneate'ÿ, peneate'ÿ. Ha'e rami vy ae "Jaje'oi, mba'emo nhame'ë SENHOR pe", peje jepi.

¹⁸ Ha'e gui aÿ tapeo pemba'eapo. Ha'e rã mba'emo 'ygue ma nome'ëai 'rã pendevy. Ha'e rami teĩ pejapo retaaty rami ae 'rã pejapo yvy jykuerã.

¹⁹ Ha'e ramo Israel kuery omba'eapoa re opena va'e kuery ojexavai rei okuapy, ha'e kuery pe aipo'ea rã: "Mba'eve py mbovyve'i pejapo eme yvy jykuerã, peteĩ-teĩ ára py pejapo aguã va'ekue."

²⁰ Ha'e gui Faraó renonde gui ha'e kuery oje'oi vy oexa Moisés ha'e Arão ha'e kuery rarõa py ikuai rã.

²¹ Ha'e vy ha'e kuery pe aipoe'i:

— Tove pendere SENHOR toexa pota, toikuaa pota pendere, mba'eta peẽ pejapo Faraó orere nda'ija'ei aguã rami, ha'e hembiguai kuery renonde. Ha'e kuery po py reme'ë kyxe orejuka aguã — he'i okuapy.

²² Ha'e ramo Moisés SENHOR pe ojapukai. Ha'e vy aipoe'i:

— SENHOR, mba'e re tu rembojexavai uka kova'e kuery? Mba'e re tu xee xembou?

²³ Mba'eta Faraó-a py nderery rupi xeayvu aguã ajexá ukaá ára guive ma ojavyky rei kova'e kuery. Ha'e rã ndee ma peteïve py ndereraa jepei teri ndevyguia kuery.

6

¹ Ha'e ramo SENHOR aipoe'i Moisés pe:

— Aÿ ma rexá 'rã mba'emo Faraó re ajapo va'e, mba'eta xepo'akaa aexa uka ramo 'rãe penemondouka, xepo'akaa aexa uka ramo 'rãe penerenoë ukapa oyvy gui.

Israel kuery ogueraa jepe aguã re Nhanderuete ijayvuague

² Ha'e gui Nhanderuete ijayvuve ju Moisés pe. Ha'e vy aipoe'i ixupe:

— Xee ma SENHOR.

³ Abraão, Isaque ha'e Jacó pe ajexá uka vy Penderuete ipo'akapa va'ea rami ajekuaa uka raka'e. Ha'e rã xerery SENHOR rupi ma ha'e kuery pe ndajekuaa ukai.

⁴ Ha'e kuery reve ajapo avi xereve guarã, ha'e va'e rupi Canaã yvy ame'ë aguã hekoarã, ha'e va'e yvy re oguata rei va'e rami ikuaiague ae.

⁵ Aendu avi Egito pygua kuery Israel kuery escravo omoingo rã ipoaë okuapya. Ha'e rami vy xema'endu'a xereve guarã ajapo va'ekue re.

⁶ Ha'e nunga rupi aipo're Israel kuery pe: "Xee ma SENHOR. Ha'e rami vy roguenoë 'rã Egito pygua penembovoyia guy gui. Roipe'a 'rã pemba'epo vaipaa gui, ha'e rogueraa jepe 'rã xepo aupi vy nhombopagaarã tuvixa va'e ambou reve.

⁷ Xee rogueraa 'rã xevy guarã, ha'e aiko 'rã Penderuete. Ha'e ramo peikuaa 'rã xee SENHOR ae Penderuete aikoa, Egito pygua penembovoyia guy gui roguenoë va'e.

⁸ Ha'e rami vy rogueraa 'rã yvy Abraão pe ame'ë aguã auraague, Isaque ha'e Jacó pe guive. Pendevy ju ame'ë 'rã penderekoarã. Xee ma SENHOR", 're 'rã xerery rupi.

⁹ Ha'ekue rami ae Moisés ijayvu Israel kuery pe. Ha'e rami teï ha'e kuery ndoikuaa potai Moisés re, escravo poyi ikuiaia gui onhe'ë py ikuerai vy.

¹⁰ Ha'e gui teïgue ju SENHOR ijayvu Moisés pe. Ha'e vy aipoe'i:

¹¹ — Tereo Egito pygua huvixa Faraó-a py. Aipo're ixupe: "Tove na too Israel kuery ndeyvygui", 're.

¹² Ha'e rã Moisés ombovai vy aipoe'i SENHOR pe:

— Neï endu ke, Israel kuery ma noendui. Mba'exá'vy tu Faraó oendu ta xeayvu? Ndaxeayvu porã kuaai — he'i.

¹³ Ha'e rami teï Moisés ha'e Arão pe SENHOR ojapo uka ae Israel kuery peguarã, ha'e Egito pygua huvixa Faraó peguarã guive, Egito yvy gui Israel kuery oguenoë aguã.

Moisés ha'e Arão ramymino kuery rery oña

¹⁴ Po rami ma heta va'e kuery re opena va'e kuery rery. Israel ra'y jypygua Rúben ra'y kuery ma Enoque, Palu, Hezrom ha'e Carmi. Ha'e va'e kuery ma Rúben ra'y kuery.

¹⁵ Ha'e Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul. Ha'e va'e kuery ma Simeão ra'y kuery.

¹⁶ Po rami ma Levi ra'y kuery rery hamymino kuery reve: Gérson, Coate ha'e Merari. Levi ma cento e trinta e sete ma'etý re oiko.

¹⁷ Gérson ra'y kuery ma Libni ha'e Simei, ta'y kuery rery oña rami.

¹⁸ Coate ra'y kuery ma Anrão, Isar, Hebrom ha'e Uziel. Ha'e gui Coate ma cento e trinta e três ma'etý re oiko.

¹⁹ Merari ra'y kuery ma Mali ha'e Musi. Ha'e rami ma Levi ra'y kuery rery hamymino kuery reve.

²⁰ Ha'e gui Anrão ma gua'yxyrã ojou ojaixe Joquebede. Ha'e ramo oikuavã Arão ha'e Moisés. Anrão ma cento e trinta e sete ma'etý re oiko.

²¹ Isar ra'y kuery ma Corá, Nefegue ha'e Zicri.

²² Uziel ra'y kuery ma Misael, Elzafã ha'e Sitri.

²³ Arão ma gua'yxyrã ojou Aminadabe rajy Eliseba, Naassom reindy va'e. Ha'e ramo oikuavã'i Nadabe, Abiú, Eleazar ha'e Itamar.

²⁴ Corá ra'y kuery ma Assir, Elcana ha'e Abiasafe. Ha'e va'e ma Corá ra'y kuery.

²⁵ Ha'e gui Arão ra'y Eleazar ma gua'yxyrā ojou Putiel rajy kuery va'e regua. Ha'e ramo oikuavā'i Finéias. Ha'e va'e kuery ma hoo va'e yvatekueve va'e ikuai gua'y kuery reve.

²⁶ Ha'e gui Arão ha'e Moisés pe ae SENHOR aipoe'i: “Penoē ke Israel kuery Egito yvy gui xondaro ikuai va'e rami” he'i va'ekue.

²⁷ Ha'e va'e kuery ma Egito pygua huvixa Faraó pe ijayvu va'ekue Egito gui Israel kuery oguenoē aguā. Moisés ha'e Arão hery va'e.

Faraó pe Moisés ijayvu jevyague

²⁸ Ha'e va'e jave ae SENHOR ijayvu Moisés pe Egito yvy re oiko rā.

²⁹ Ha'e vy aipoe'i ixupe:

— Xee ma SENHOR. Aipo're Egito pygua huvixa Faraó pe ndevy xeayvuague ha'e javi rupi — he'i.

³⁰ Ha'e ramo Moisés ombovai SENHOR renonde:

— Xee ma ndaxeayvu porā kuaai. Mba'exa tu Faraó xenhe'ẽ rendu ta?

7

¹ Ha'e ramo SENHOR aipoe'i Moisés pe:

— Ma'ě, ndee romoī tuuete rami Faraó áry. Ha'e rā nderyke'y Arão oiko 'rā ndeayvu mombe'uarā.

² Mba'eta nderyke'y Arão pe remboaxa 'rā ndevy aipoa'e uka va'e ha'e javi. Ha'e gui ha'e va'e ju 'rā ijayvu Faraó pe, oyvy gui Israel kuery omondouka aguā.

³ Ha'e rami avi xee ma ajapo 'rā Faraó inhakā ratā aguā rami. Ha'e Egito yvy re ajapo 'rā heta hexa pyrā ha'e xeguigua iporā va'e.

⁴ Ha'e rami teī Faraó ndojapyxakai 'rā pendeayvu re. Ha'e nunga rupi xee amoī 'rā xepo Egito áry. Ha'e rami vy ajapo 'rā Egito yvy gui oẽmba aguā rami xexondaro kuery xevygua kuery ikuai va'e, Israel kuery, nhombopagaarā tuvixa va'e aikuaa uka reve.

⁵ Ha'e ramo Egito pygua kuery oikuaa 'rā xee SENHOR aikoa, Egito áry xepo amoī jave ha'e kuery mbyte gui Israel kuery anoẽmba vy.

⁶ Ha'e gui Moisés ha'e Arão ojapo ha'e rami. Ha'e kuery pe SENHOR ijayvuague rami ae ojapo okuapy.

⁷ Moisés ma oitenta ma'etŷ oguereko, ha'e rā Arão ma oitenta e três ma'etŷ oguereko Faraó pe ijayvu jave py.

⁸ Ha'e gui SENHOR aipoe'i Moisés ha'e Arão pe:

⁹ — Ha'e gui pêvy Faraó “Pejapo ha'vy hexa pyrā, ha'e ramo ajerovia 'rā pendere”, he'i rā ke aipo're Arão pe: “Ejopy ndepopoka, ha'e emombo Faraó renonde.” Ha'e ramo ojeapo 'rā mboi.

¹⁰ Ha'e ramo Moisés ovaē Faraó-a py Arão reve. Ha'e vy ojapo SENHOR ha'e kuery pe ojapo uka va'ekue. Arão omombo opopoka Faraó ha'e hembiguai kuery renonde. Ha'e ojeapo mboi.

¹¹ Ha'e ramo Faraó ogueruruka hi'arandu va'e ha'e imba'evyky va'e kuery. Ha'e ramo Egito pygua hi'arandu va'e kuery ma ha'ekue rami ae ojapo nhemi rupi hi'arandua py.

¹² Ha'e ramo ha'e kuery voi opopoka peteī-teī omombo ramo ojeapo mboi. Teī Arão popoka ho'upa ha'e kuery popoka.

¹³ Ha'e rami teī Faraó inhakā ratā vy noendu potai SENHOR ijayvuague re.

Jypygua nhombopagaarā yy tuguy omoingoague

¹⁴ SENHOR aipoe'i Moisés pe:

— Faraó ma inhakā ratā vy nomondoukaxeí neretarā kuery.

¹⁵ Tereo ju Faraó-a py ko'ẽmba'i ramove. Ha'e ma oo 'rā yy katy. Rearō 'rā yakā yvýry. Ndepo py rerekoy 'rā ndepopoka mboi ojeapo va'ekue.

¹⁶ Ha'e aipo're ixupe: “ SENHOR hebreu kuery ruete xembou ndea py aipoa'e aguā: ‘Emondouka xevygua kuery tekao e'ŷa py ikuai aguā xevy. Ha'e rami teī aŷ peve nerendu potai’, ha'e aguā.

¹⁷ Ha'e gui SENHOR aipoe'i ukave ju: 'Pova'e nunga rupi 'rā reikuua xee SENHOR aikoa. Kova'e popoka xepo py areko va'e py ainupā 'rā yy yakā rupi oī va'e. Ha'e ramo oiko 'rā tuguy.

¹⁸ Pira yakā rupi ikuai va'e omanomba 'rā. Yakā heakuā vaikue 'rā, ha'e Egito pygua kuery ojeguaru 'rā yakā gui oy'u aguā', he'i uka."

¹⁹ SENHOR aipoe'ive ju Moisés pe:

— Aipo're Arão pe: "Ejopy ndepopoka, ha'e eupi ndepo yy Egito rupi ikuai va'e áry, yakā, yy rape, yupa ikuai va'e ha'e yy omboty pyre ha'e javi áry, tuguy oiko aguā. Toiko tuguy Egito yvy jave re, yryru yvyra guigua ha'e ita guigua py", 're 'rā ixupe — he'i.

²⁰ Ha'e ramo Moisés ha'e Arão ojapo SENHOR ijayvuague. Ha'e rami vy Arão opopoka oupi vy oinupā yy yakā rupi oī va'e, Faraó ha'e hembiguai kuery oexaa py. Ha'e ramo yy yakā rupi oī va'e ha'e javi tuguy oiko.

²¹ Pira yakā rupi ikuai va'e omanomba. Yakā heakuā vaikue. Ha'e Egito yvy re ikuai va'e nda'evei yakā gui oy'u aguā. Egito yvy jave re tuguy oiko.

²² Ha'e gui Egito pygua imba'ekuaa va'e kuery voi ha'ekue ramigua ju ojapo okuapy nhemi rupi hi'arandua py. Ha'e nunga rupi Faraó inhakā ratā vy noendu potai, SENHOR ijayvuague rami vy.

²³ Faraó ojere vy ngoo katy ju oo. Neī ha'e nunga re voi ndoikuua potai opy'a py.

²⁴ Ha'e gui Egito pygua kuery ha'e javi ojo'o okuapy yakā yvýry, ojou aguā yy oy'u aguā. Mba'eta yy yakā guigua nda'evei oy'u aguā.

²⁵ Ha'e gui SENHOR yakā oinupā uka rire sete ára oaxa.

8

Mokoïa nhombopagaarā ju'i omboouague

¹ Ha'e va'e rire SENHOR aipoe'i Moisés pe:

— Tereo ju Faraó-a py, ha'e aipo're ixupe: "Po rami SENHOR ijayvu: 'Tove too xevygua kuery, xevy ikuai aguā'.

² Xapy'a rei neremondoukai ramo ma rombopaga 'rā ju'i ndeyvy ha'e javi rupi ambou vy.

³ Yakā gui oiko 'rā ju'i. Mbovy e'ŷ 'rā oē, oiko 'rā ndero py, opy ja'o'i rekeaty py, nderupa áry, nerembiguai kuery ro rupi, ndevygua kuery re, ha'e mbojape pembojyaty rupi, mbojaperā pemoapomoaty rupi.

⁴ Ju'i ojeupi 'rā ndere, nerembiguai kuery ha'e ndevygua kuery ha'e javive re', 're 'rā ixupe."

⁵ SENHOR aipoe'ive ju Moisés pe:

— Aipo're ke Arão pe: "Eupi ndepo ndepopoka reve yakā áry, yy rape ha'e yupa ikuai va'e áry, ju'i rejapo Egito yvy re oē aguā rami", 're.

⁶ Ha'e ramo Arão opo oupi yy Egito yvy re ikuai va'e áry. Ha'e rā ju'i oē vy Egito yvy ha'e javi rupi ojao'i.

⁷ Ha'e ramo imba'ekuaa va'e kuery ha'ekue ramigua ju ojapo nhemi rupi hi'arandua py. Ha'e vy ojapo Egito yvy re ju'i oē aguā rami.

⁸ Ha'e gui Faraó oenoī Moisés ha'e Arão. Ha'e vy aipoe'i ha'e kuery pe:

— Pejerure SENHOR pe oipe'a aguā ju'i xea gui ha'e xevygua kuerya gui. Ha'e ramo ma pende kuery romondouka 'rā SENHOR pe mba'emo peme'ē aguā.

⁹ Ha'e ramo Moisés aipoe'i Faraó pe:

— Aipo're ke xevy araka'e pa reipota ajerure ndere, nerembiguai kuery ha'e ndevygua kuery re, ju'i oipe'aa aguā ndea gui ha'e ndero pygua kuerya gui, yakā py anho ju optya aguā.

¹⁰ — Ko'ē rā — he'i.

Moisés aipoe'i:

— Toiko ndeavvua rami, reikuua aguā peteīve jipoia SENHOR Oreruete ramigua.

¹¹ Ndea gui ojepe'apa 'rā ju'i, ndero pygua kuery, nerembiguai kuery ha'e ndevygua kuerya gui. Yakā py anho ju 'rā ikuai — he'i.

¹² Ha'e ramo Moisés ha'e Arão jogueraa Faraó-a gui. SENHOR pe Moisés ojapukai ju'i káuxa, Faraó reve jogueroayvuague rami vy.

¹³ Ha'e ramo SENHOR aipapo Moisés ijayvuague rami. Ju'i omanomba oo rupi, oka rupi ha'e mba'ety rupi ikuaiague py.

¹⁴ Ijaty reta-eta. Ha'e ramo yvy jave re heakuã vaikue.

¹⁵ Ha'e gui Faraó ma oo jepea oexa vy inhakã ratãve ju. Ha'e vy noenduxevei, SENHOR ijayvuague rami vy.

Mboapya nhombopagaarã ky ombouague

¹⁶ Ha'e gui SENHOR aipoe'i Moisés pe:

— Aipo're Arão pe: “Eupi ndepopoka, ha'e einupã yvy ku'i re, ky oiko aguã Egito yvy jave re”, 're.

¹⁷ Ha'e rami ojapo. Arão opo opopoka reve oupi vy oinupã yvy ku'i. Ha'e ramo oiko reta ky avakue re ha'e mymba kuery re. Yvy ku'i ha'e javi gui ky oiko Egito yvy jave re.

¹⁸ Ha'e ramo imba'ekuaa va'e kuery ma ha'ekue ramigua ae avi o'arandua rupi ojapo nhemixe ky omoingo aguã, va'eri ndojapo kuaai. Ky anho ikuai avakue re ha'e mymba kuery re.

¹⁹ Ha'e ramo imba'ekuaa va'e kuery aipoe'i Faraó pe:

— Kova'e ma Nhanderuete kuã ojapo va'e — he'i teĩ Faraó inhakã ratã. SENHOR ijayvuague rami vy noendui ae.

Irundaya nhombopagaarã mberu ombouague

²⁰ Ha'e gui SENHOR aipoe'i Moisés pe:

— Epu'ã ke ko'ẽ rã aje'ive'i reve, ha'e ejexa uka ju Faraó pe. Ha'e va'e oo 'rã oiny yy katy. Ha'e rã ixupe aipo're: “Po rami ijayvu SENHOR: ‘Tove too xevyguia kuery, xevy ikuai aguã.

²¹ Ha'e gui xevyguia kuery neremondoukai ri ramo ma'ẽ, xee ambou 'rã mberu nde'áry, nerembiguai kuery, ndevyguia kuery ha'e ndero pygua kuery áry. Ha'e Egito pygua kuery ro rupi omonyẽmba 'rã mberu, yvy ha'e kuery ikuia voi.

²² Ha'e rã Gósen yvy re xevyguia kuery ikuia rupi ma amboae rami 'rã ajapo. Xevyguia kuery ikuia re mberu ndoikoi 'rã, reikuia aguã pendeyvy mbyte re voi xee SENHOR aikoa.

²³ Ha'e rã ndevyguia kuery ma xevyguia kuery areko rami e'ŷ 'rã areko. Ko'ẽ rã oiko 'rã ha'e nunga hexa pyrã', he'i uka ndevy”, 're.

²⁴ Ha'e rami ae SENHOR ojapo. Ha'e ramo Faraó ro re ou mbovy e'ŷ mberu, hembiguai kuery ro re ha'e Egito yvy ha'e javi áry. Ha'e ramo yvy na'iporãvei mberu gui.

²⁵ Ha'e ramo Faraó oenoĩ Moisés ha'e Arão. Ha'e vy aipoe'i:

— Tapeo, Penderuete pe mba'emo peme'ẽ teĩ kova'e yvy re anho ta'vy.

²⁶ Moisés ombovai:

— Ha'e rami rojapo aguã nda'evei, mba'eta SENHOR Oreruete pe rome'ẽ 'rã mba'emo Egito pygua kuery ojou porã va'e'ŷ. Ma'ẽ, xapy'a rei ha'e kuery oexaa rupi ha'e nunga rome'ẽ ramo ha'e kuery oreapipa 'rã ita py.

²⁷ Ha'e rami 'rãgue py mboapy ára re 'rã roo tekao e'ŷa py, ha'e py mae SENHOR Oreruete pe mba'emo rome'ẽ aguã, orevy aipoe'ia rami vy — he'i.

²⁸ Ha'e ramo Faraó aipoe'i:

— Ha'eve 'rã tekao e'ŷa py teĩ peo aguã mba'emo peme'ẽ aguã. Ha'e ramo avi mombyry ete e'ŷ 'rã peo. Ha'e xere voi ke penhembo'e.

²⁹ Moisés ombovai:

— Ma'ẽ, aŷ ma xee nerendirneidegui aa vy anhembo'e 'rã SENHOR pe. Ha'e gui ko'ẽ rã kova'e mberu ojepe'apa 'rã ndee Faraó-a gui, nerembiguai kuery ha'e ndevyguia kuery ha'e javia gui. Ha'e ramo avi Faraó, xembotavyve eme, xeretarã kuery SENHOR pe mba'emo ome'ẽ aguã neremondoukaia py — he'i.

³⁰ Ha'e ramo Faraó renondegui Moisés oo vy onhembo'e SENHOR pe.

³¹ Ha'e ramo SENHOR ojapo Moisés ijayvuague rami. Ha'e ramo mberu ojepe'apa Faraó-a gui, hembiguai kuery ha'e ixupegua kuery ha'e javia gui. Petei'i voi ndopytai mberu.

³² Ha'e rami tei Faraó inhakā ratā ju. Ha'e vy nomondoukai ha'e kuery.

9

Petei nhiruña nhombopagaarā mymba re mba'eaxy ombouague

¹ Ha'e gui SENHOR aipoe'i Moisés pe:

— Ejexa uka ju Faraó pe, ha'e aipo're ixupe: "Po rami SENHOR hebreu kuery ruete va'e ijayvu: 'Tove too xevyguia kuery, xevy ikuai aguā.'

² Mba'eta xapy'a rei neremondoukai ha'e remombyta nhea'ā ramo

³ SENHOR opo omoi 'rā nerymba kuery nhuūndy rupi ikuai va'e áry, kavaju kuery, mburika, camelo kuery, vaka ha'e vexa'i kuery áry, mba'eaxy vaikue ombou vy.

⁴ Ha'e rā Israel kuery rymba kuery re ma SENHOR amboae rami 'rā ojapo Egito pygua kuery rymba re ojapo 'rāgue py, Israel kuery rymba nei peteive omano e'ŷ aguā', he'i uka ndevy.

⁵ Mba'eta SENHOR oa'anga ma ha'e nunga oiko aguā ára. Ko'ē rā ha'e nunga SENHOR omoingo 'rā yvy re", 're 'rā ixupe — he'i.

⁶ Ha'e gui ko'ē jevy SENHOR ha'e nunga ombou ramo Egito pygua kuery rymba ha'e javi omano. Ha'e rā Israel kuery rymba ma nomanoi nei peteī.

⁷ Ha'e gui Faraó omondouka oma'ē aguā, ha'e rā Israel kuery rymba nomanoi nei peteī. Ha'e rami tei Faraó inhakā ratā vy nomondoukai ha'e kuery.

Seis-a nhombopagaarā ai vaikue ombouague

⁸ Ha'e ramo SENHOR aipoe'i Moisés ha'e Arão pe:

— Tata rupa gui pejopy pendepo renyē tanhimbu. Ha'e ramo Faraó renonde Moisés omombo 'rā yvate katy.

⁹ Ha'e va'e gui oiko 'rā iku'i va'e Egito yvy ha'e javi áry. Ha'e ramo Egito yvy jave rupi oiko 'rā irurupa, opu 'rā ai vaikue avakue re ha'e mymba kuery re — he'i.

¹⁰ Ha'e ramo ha'e kuery oo vy tata rupa gui ojopy tanhimbu, ha'e vy oo Faraó-a py. Moisés omombo yvate katy. Ha'e ramo ha'e va'e gui oiko irurupa va'e ha'e ai vaikue avakue re ha'e mymba kuery re.

¹¹ Ha'e nunga rupi Moisés renonde gui imba'ekuaa va'e kuery ojepe'apa ai vaikue gui. Mba'eta imba'ekuaa va'e kuery re voi ai vaikue oiko, ha'e Egito pygua kuery ha'e javi re.

¹² Ha'e rami tei SENHOR ojapo Faraó inhakā ratā aguā rami. Ha'e ramo noendui, Moisés pe SENHOR ijayvuague rami vy.

Sete-a nhombopagaarā amandau ombouague

¹³ Ha'e gui SENHOR aipoe'i Moisés pe:

— Epu'ā ke ko'ē rā aje'ive. Ejexa uka Faraó pe, ha'e aipo're ixupe: "Po rami SENHOR hebreu kuery ruete ijayvu: 'Tove too xevyguia kuery, xevy ikuai aguā.'

¹⁴ Mba'eta aŷ ma ndere ete amoī 'rā nhombopagaarā ha'e javi, nerembiguai kuery ha'e ndevyguia kuery áry, peikuua aguā avave rei xee ramigua jipoia yvy jave re.

¹⁵ Mba'eta ha'e rami ajapoxe va'e rire rojuka aguā xepo amoī ma 'rāgue, ndee ha'e ndevyguia kuery áry mba'eaxy ambou vy. Roipe'apa ma 'rāgue yvy gui.

¹⁶ Ha'e rami tei ha'e rami ndajapoi, ndevy aexa uka aguā xepo'akaa, ha'e xerery rupi xerekoo omombe'ua aguā yvy jave re.*

¹⁷ Ha'e rā ndee repu'ā rei teri va'e ty'y xevyguia kuery rovai, remondouka e'ŷ aguā?

¹⁸ Ma'ē, ko'ē rā kova'e hora ojeupity ju jave ajapo 'rā amandau ho'a vaipa aguā rami, Egito yvy re oiko e'ŷ teri va'e ramigua ijypyā ára gui aŷ peve.

¹⁹ Ha'e gui aŷ ma emoinge ukapa nerymba vaka, avakue ha'e mymba nhuūndy rupi ikuai va'e. Mba'eta opy ndoikei vy ha'e kuery re amandau ho'a rā omanomba 'rā', he'i uka ndevy", 're.

* 9:16 Romanos 9.17

²⁰ Ha'e ramo Faraó rembiguai kuery va'e regua amongue ma SENHOR ayvu oendu vy ojeayvu. Ha'e rami vy ojapo guembiguai kuery ha'e guymba vaka kuery oupa aguã rami ngoo rupi.

²¹ Ha'e rã SENHOR ayvu re ndoikuua potai va'e ma oeja guembiguai kuery ha'e vaka kuery nhuündy re ae.

²² Ha'e gui SENHOR aipoe'i Moisés pe:

— Eupi ndepo yvate katy. Ha'e rã ho'a 'rã amandau Egito yvy jave re, avakue áry, mymba ha'e Egito yvy jave re mba'ety rupi onhotõ mbyre ikuai va'e áry.

²³ Ha'e ramo Moisés yvate katy opopoka oupi ramo SENHOR ombou yapu hatã va'e ha'e amandau, tata voi ho'a yvy re. Ha'e rami vy SENHOR ojapo amandau Egito yvy re ho'a aguã.

²⁴ Ha'e rami ete amandau ha'e tata amandau re irû va'e ho'a nda'evei ete va'e. Ha'e ramigua oiko va'e'lõ teri Egito yvy re, Egito pygua ikuai ypya ára guive.

²⁵ Ha'e gui Egito yvy jave re amandau ojuka opa mba'e oka rupi ikuai va'e, avakue ha'e mymba kuery. Amandau ojavyky avi mba'ety rupi onhotõ mbyre ha'e javi, omopẽmba avi yvyra nhuündy rupi ikuai va'e.

²⁶ Ha'e rã Gósen yvy re Israel kuery ikuia py anho ndo'ai amandau.

²⁷ Ha'e ramo Faraó oenoĩ uka Moisés ha'e Arão. Ha'e vy aipoe'i ha'e kuery pe:

— Aý ma ajejav. SENHOR ma heko porã va'e, ha'e rã xee ha'e xevyguia kuery ma rojejav vy va'e.

²⁸ Ejapukai ke ha'vy SENHOR pe, mba'eta ha'eve ma kova'e yapu atã va'e ha'e amandau. Xee romondouka 'rã, ndapepytavei ma 'rã apy.

²⁹ Ha'e ramo Moisés ombovai:

— Xee ma tetã gui aẽ vy xepo audi 'rã SENHOR pe. Ha'e ramo yapu va'e oaxa 'rã, ndo'avei 'rã amandau, peikuua aguã ko yvy SENHOR mba'ea.

³⁰ Ha'e rami avi xee aikuua ndee ha'e nerembiguai kuery SENHOR Oreruete renonde pejererokyje aguã noĩ teria.

³¹ (Ha'e jave py linho ha'e cevada ikuai va'e ojavykypa, mba'eta cevada ma hary ma, ha'e rã linho ma ipoty.

³² Ha'e rã trigo ha'e centeio ma ndojavykyi, naenhoĩ teri ramo.)

³³ Ha'e gui Faraó renonde gui Moisés oo ju vy oẽ tetã gui. SENHOR pe opo oupi ramo yapu atã va'e ha'e amandau oaxapa, neĩ nda'okyvei yvy re.

³⁴ Ha'e rami teĩ amandau ha'e yapu atã va'e oaxapa rã Faraó oexa vy ojejavvyre ju, mba'eta guembiguai kuery reve inhakã ratã va'e meme.

³⁵ Ha'e rami vy Faraó inhakã ratã vy nomondoukai Israel kuery, Moisés pe SENHOR ijayvuague rami vy.

10

Oito-a nhombopagaarã tuku ombouague

¹ Ha'e gui SENHOR aipoe'i Moisés pe:

— Tereo Faraó-a py, mba'eta amoakã ratã, hembiguai kuery guive, ha'e kuery mbyte ajapo aguã kova'e nunga hexa pyrã,

² ha'e ndera'y kuery pe, ndera'y ra'y kuery pe remombe'u aguã Egito pygua kuery ajavyky reiague, ha'e ha'e kuery mbyte mbokyue rei e'ý nhomondyipaarã ambouague, ha'e kuery oikuua aguã xee ae SENHOR aikoa — he'i.

³ Ha'e ramo Moisés ha'e Arão oo vy ojexa uka Faraó renonde. Ha'e vy aipoe'i ixupe:

— Po rami SENHOR hebreu kuery ruete ijayvu: “Raka'e peve tu nerenhemo'yvyi'i 'rã xerenonde? Tove too xevyguia kuery, xevy ikuai aguã.

⁴ Ha'e rami teĩ xevyguia kuery neremondoukaxei aguã ramo ma'ë, ko'ë rã ambou 'rã tuku ndeyvy re.

⁵ Ha'e ramo ojao'ipa 'rā yvy. Ha'e va'e gui neī peteī henda py ma ndojekuaavei 'rā. Ha'e kuery ho'upa 'rā amandau ndojavykypai va'ekue, ho'upa avi 'rā yvyra pendeyvy re henhoī va'ekue.

⁶ Ndero rupi voi omoneyēmba 'rā, nerembiguai kuery ha'e Egito pygua kuery ha'e javi ro. Nderu kuery oexa e'ŷ teri va'e nunga, neī neramoī kuery voi, yvy re ikuiai ára guive kova'e ára peve", he'i uka ndevy — he'i. Ha'e gui Moisés ojere vy ojepe'a ju ovy Faraó renonde gui.

⁷ Ha'e ramo Faraó rembiguai kuery aipoe'i ixupe:

— Raka'e peve tu kova'e ava nhandejopy 'rā herekovy? Emondouka na ha'e kuery, SENHOR nguuete pe ikuai aguā. Nderekuaai teri ri ty'y Egito ivaipa maa? — he'i okuapy.

⁸ Ha'e gui Faraó renonde ogueru ju Moisés ha'e Arão. Ha'e ramo ha'e aipoe'i ha'e kuery pe:

— Tapeo, peiko SENHOR penderuete pe. Ha'e gui mava'e kuery tu oo va'erā pendereve?

⁹ Moisés ombovai:

— Ore revegua oo 'rā kunumigue, tujakue'i, orera'y kuery, orerajy kuery, orerymba kuery ha'e vaka kuery ha'e javi. Mba'eta rojapo 'rāe ngaru SENHOR pegua — he'i.

¹⁰ Ha'e ramo Faraó aipoe'i ha'e kuery pe:

— Toiko SENHOR pendereve, peē ha'e kyrīgue reve, xapy'a rei romondouka ri ramo. Ha'e rami avi peikuua pota, mba'eta ha'eve'ŷa rami pejapoxe.

¹¹ Ha'e rami nda'evei 'rā. Tapeo peē avakue anho SENHOR pe pendekuai aguā rejurerua rami — he'i. Ha'e rami vy Faraó guenonde gui oipe'a uka.

¹² Ha'e gui SENHOR aipoe'i Moisés pe:

— Eupi ndepo Egito yvy áry, tuku ou vy ho'upa aguā jai rogue yvy re ikuai va'e, amandau ndojavykypai va'ekue ha'e javi — he'i.

¹³ Ha'e gui Egito yvy áry Moisés opopoka oupi ramo SENHOR kuaray oua katy gui ombou yvytu. Ha'e va'e ára pukukue re ha'e pytū mbukukue re oipeju. Ha'e gui ko'ẽ jave ma yvytu rupi ou tuku.

¹⁴ Ha'e rami vy tuku ou Egito yvy jave áry, yvy jave re oguejy. Heta ete vy ha'e va'e e'ŷ mbove ndokoi teri ha'e va'e nunga tuku, neī ha'e va'e rire ndouwei ma 'rā ha'e va'e ramigua.

¹⁵ Mba'eta ojao'ipa yvy ha'e javi, yvy huū rei aguā rami optya. Ho'upa jai rogue yvy re ikuai va'e ha'e yvyra'a ha'e javi, amandau ndojavykypai va'ekue. Egito yvy ha'e javi rupi mba'eve jipovei ipyau va'e yvyra re, neī jai rogue mba'ety rupi ikuai va'e.

¹⁶ Ha'e rami rā Faraó oenoī pojava Moisés ha'e Arão. Ha'e vy aipoe'i ha'e kuery pe:

— Ajeavy SENHOR penderuete rovai ha'e peē kuery rovai.

¹⁷ Ha'e gui aŷ ma ajerure pěv yeperdoa ju aguā ajejavya aŷguia voi. Ha'e pejerure SENHOR penderuete pe xegui oipe'a aguā kova'e manoia — he'i.

¹⁸ Ha'e ramo Faraó renonde gui Moisés oo ju vy ojapukai SENHOR pe.

¹⁹ Ha'e ramo SENHOR ojapo yvytu kuaray oikea katy gui ju oipeju atā aguā rami. Ha'e va'e ma tuku oguerovevepa vy oitypa Ye'ẽ Pytā va'e py. Neī peteī tuku ndopytai Egito yvy jave re.

²⁰ Ha'e rami teī SENHOR Faraó omoakā ratā ramo nomondoukai Israel kuery.

Nove-a nhombopagaarā pytū ombouague

²¹ Ha'e gui SENHOR aipoe'i Moisés pe:

— Eupi ndepo yvate katy, Egito yvy re pytū ou aguā, pytū vaikue japokoa va'e regua — he'i.

²² Ha'e ramo Moisés yvate katy opo oupi ramo oiko pytū ana Egito yvy jave re mboapy ára re.

²³ Ha'e nunga rupi peteīve ndajoexai, peteīve oĩa gui nopu'āi mboapy ára re. Ha'e rā Israel kuery ro rupi ma hexakā.

²⁴ Ha'e ramo Faraó oenoī Moisés. Ha'e vy aipoe'i ixupe:

— Tapeo, peiko SENHOR pe. Topyta penerymba vexa'i ha'e penerymba vaka anho. Pendera'y kuery kyrīgue ma too avi pendupive.

²⁵ Moisés ombovai:

— Ha'e rami ri ramo ndee ae 'rā reme'ē orepo py mba'emo rojuka ha'e roapy vy SENHOR Oreruete pe rome'ē va'erā.

²⁶ Any, orerymba vexa'i kuery avi 'rā oo orerupive. Neī peteīve pyapē ndopytai 'rā, mba'eta ha'e va'e regua gui roiporavo 'rā SENHOR Oreruete pe rome'ē aguā. Ndoroikuuai mba'e nunga pa SENHOR pe rome'ē va'erāa, ha'e py rovaē e'ŷa ja — he'i.

²⁷ Ha'e gui Faraó inhakā ratā aguā rami SENHOR ojapo ramo nomondoukaxeit.

²⁸ Ha'e rami vy Faraó aipoe'i Moisés pe:

— Ejep'e ke xea gui, ha'e eiko kuaa xerova rexā ve'ŷ aguā. Mba'eta xerova rexā jevya ára ma remano 'rā.

²⁹ Moisés ombovai:

— Ha'evea rami ndeayvu. Xee ndaexa jevyvei ma 'rā nderova — he'i.

11

Dez-a nhombopagaarā Nhanderuete ombou aguā re ijayvuague

¹ Ha'e gui SENHOR aipoe'i Moisés pe:

— Peteīgue ju 'rā ambou nhomoingo axyarā Faraó ha'e Egito yvy ha'e javi áry. Ha'e ramo mae penemondouka 'rā apy gui. Penemondoukaa ára ma anhetē penemoxēmba ete 'rā.

² Aŷ ma ndeayvu neretarā kuery oendua py, avakue ha'e javi ngoo katy'i rupi ikuai va'e pe mba'emo re ojerure aguā re, kunhague voi tojerure kunhague ngoo katy'i rupi ikuai va'e pe. Prata ha'e ouro guigua re tojerure — he'i.

³ Ha'e ramo SENHOR ojapo Egito pygua kuery ixupeguia kuery omboaxy aguā rami. Moisés voi oikuaapy oiko Egito yvy re, Faraó rembiguai kuery ha'e ixupeguia kuery omboetepa.

⁴ Ha'e gui Moisés aipoe'i Faraó pe:

— Po rami SENHOR ijayvu: “Pytū mbyte jave xee aaxa 'rā Egito yvy mbyte rupi.

⁵ Ha'e ramo omano 'rā jypyguia Egito yvy re ikuai va'e ha'e javive, Faraó guenda openaaty py oguapy va'e ra'y jypyguia, hembiguai kunha mba'emo mongu'ia pygua pi'a jypyguia voi, ha'e mymba ikuai va'e ra'y'i ypya ha'e javi.

⁶ Ha'e ramo Egito yvy jave re onhendu 'rā haxē va'e. Ha'e nunga oiko va'e'ŷ teri, ha'e ndoikovei ma 'rā guive.

⁷ Ha'e rā Israel kuery re ma ndoikoi 'rā, avakue, neī mymba kuery re. Ha'e kuery re ma neī peteī jagua voi nonhe'ēi 'rā, peikuua aguā SENHOR amboae ramo oguerekoa Israel kuery, Egito pygua kuery rami e'ŷ”, he'i uka ndevy.

⁸ Ha'e ramo nerembiguai kuery apy ikuai va'e xea py jogueruvy vy xerenonde ojero'a reve aipoe'i 'rā: “Tereo ndee ha'e neretarā kuery ndereve ikuai va'e ha'e javive”, he'i 'rā xevy. Ha'e va'e rire mae ma 'rā aa — he'i Faraó pe. Ha'e rami vy Moisés ipoxy vaipa reve ojepe'a Faraó renonde gui.

⁹ Ha'e gui SENHOR aipoe'i Moisés pe:

— Faraó ma noendui 'rā pendeayvua, xeguigua nhomondyipaarā ojekuaave aguā Egito yvy re — he'i.

¹⁰ Ha'e nunga nhomondyipaarā ha'e javi Moisés ha'e Arão ojapo Faraó renonde teī SENHOR omoakā ratā ramo Israel kuery nomondoukai oyvy gui.

12

Páscoa judeu kuery rekorā oejaā ague

¹ SENHOR aipoe'i Moisés ha'e Arão pe Egito yvy re teri ikuai jave:

² — Kova'e jaxy ma pendevy jaxy jypyguia 'rā, ma'etŷa ijypyga regua.

³ Pendeayvu Israel kuery ijaty va'e pe. Ha'e vy aipopeje: “Kova'e jaxy dez araa py ma peteī-teī Peru 'rā peteī vexa'i ra'y, peteī-teī hoo va'e ogueru 'rā peteī vexa'i ra'y ngoo peguarā.

- ⁴ Ha'e gui xapy'a rei hoo pygua kuery mbovy'i vy vexa'i ra'y ndo'upai 'rā ri ramo ma toenoī ojea katy'ive rupi ikuai va'e, mbovy pa ikuia rami. Oikuaa pota 'rā mbovy pe pa ha'eve vexa'i ra'y ho'upa aguã.
- ⁵ Vexa'i ava ma ivaikue rei e'ŷ va'e peteĩ ma'etŷ oguereko va'e ha'eve. Vexa'i ra'y e'ŷ vy kavara'i ha'eve avi peru aguã.
- ⁶ Ha'e va'e jaxy pemboty 'rā catorze ára peve. Ha'e vy Israel kuery ha'e javive 'rā ojuka ka'arukue.
- ⁷ Huguykue ma peraa vy peikyty 'rā okẽ yta jovaive ha'e hi'árygua rupi, pendero pe'ua va'e rokẽ re ae.
- ⁸ Ha'e va'e pytûve 'rā pe'u ho'okue tata py oexy pyre. Mbojape imbovua reveguia e'ŷ ha'e jai rogue iro va'e reve 'rā pe'u.
- ⁹ Ho'okue ipyrygua ma ndape'ui 'rā, neñ yy py ombojy pyre, ha'e rā tata py oexy pyre anho: inhakâgue, hetymague ha'e ha'ykue-'ykue.
- ¹⁰ Ha'e va'e gui mba'eve rei ndapejai 'rā ko'ẽ peve guarã. Ko'ẽ peve opyta va'e ma peapypa 'rā tata py.
- ¹¹ Po rami 'rā pe'u. Pendeku'a kuua reve 'rā pe'u, pendepy regua reve, ha'e pendepo py pendepopoka perekó reve. Pe'u pojava ke. Ha'e va'e ma SENHOR pegua Páscoa.*
- ¹² Mba'eta ha'e va'e pytû xee Egito yvy rupi aaxa vy ajuka 'rā ta'y jypyguia ikuai va'e ha'e javi, avakue ha'e mymba guigua voi. Ambopaga 'rā Egito pygua ruete ikuai va'e ha'e javi. Xee ma SENHOR.
- ¹³ Huguykue ma oikuaa uka 'rā oo pendekuaia. Mba'eta huguy aexa vy ma aaxa rive 'rā peña rupi. Ha'e rami rā peẽ kuery mbyte ma ndoikoi 'rā mba'eaxy nhomombaarã. Ha'e va'e py ma Egito yvy re anho 'rā ajojuka.
- ¹⁴ "Ha'e va'e ára ma penema'endu'a aguã. Ngaru iky'a e'ŷ va'e pejapo 'rā SENHOR pe. Peneramymimo kuery avi 'rā ojapo araka'e rā peve guarã, pendekorã aeja rire.
- ¹⁵ Sete ára re pe'u 'rā mbojape imbovua reveguia e'ŷ. Ijypyá ára guive peipe'apa 'rā mbojape imbovua penderopy oí va'ekue, mba'eta ijypyá ára guive sete-a ára peve imbovua reveguia ho'u va'e rei oipe'aa 'rā Israel kuerya gui.
- ¹⁶ Ijypyá ára py ma pêvy oiko 'rā nhemboaty iky'a e'ŷ va'e. Sete araa py teigue ju pejapo 'rā nhemboaty iky'a e'ŷ va'e. Ha'e jave py ma neñ peteïve tembiapo ndojapoai 'rā, pe'u va'erã pejapoia e'ŷ vy. Ha'e va'e anho ha'eve pejapo aguã.
- ¹⁷ Ha'e rami vy pejapo 'rā ngaru mbojape imbovua reveguia e'ŷ pe'u va'erã, mba'eta ha'e va'e ára ae xee roguenoë Egito yvy gui. Ha'e nunga rupi peneramymimo kuery ikuia peve 'rā penema'endu'a ha'e va'e ára re, araka'e rā peve guarã aeja rire.
- ¹⁸ Jypyguia jaxy catorze araa ka'aru guive 'rā pe'u mbojape imbovua reveguia e'ŷ, ha'e va'e jaxy vinte e um araa ka'aru peve.
- ¹⁹ Ha'e va'e sete ára ma toĩ eme mbojape imbovua pendero rupi. Mba'eta mbojape imbovua reveguia ho'u va'e oipe'aa 'rā Israel kuery mbyte gui, mombyry guigua e'ŷ vy pendeyvy pygua ae tei.
- ²⁰ Mba'eve imbovua reveguia pe'u eme. Pendero ha'e javi rupi 'rā pe'u mbojape imbovua reveguia e'ŷ anho", peje ha'e kuery pe — he'i.
- ²¹ Ha'e rami rā Moisés oenoimba Israel kuery mongetaaty kuery. Ha'e vy aipoe'i ha'e kuery pe:
- Peẽ kuery peteĩ-tei peiporavo 'rā vexa'i ra'y pendero peguarã, ha'e pejuka 'rā Páscoa ára pyguarã.
- ²² Hissopo rakâgue Peru vy pemoakŷ huguykue hy'a jere py oí va'e py, ha'e hy'a jere py huguykue oí va'e peikyty 'rā penerokẽ yta re, ha'e hi'árygua rupi. Ko'ẽmba peve peteïve napeei 'rā penerokẽ gui.
- ²³ Mba'eta SENHOR oaxa 'rā ov y Egito pygua kuery ojuka aguã. Ha'e rā okẽ árygua ha'e ijyta jovaive re huguy oña SENHOR oexa vy ma oaxa rive 'rā ha'e va'e oo rupi, pendero py nomoingei 'rā nhomombaarã pendejuka aguã.

* 12:11 Tery Páscoa ma "Oaxa ov y rivea" 'ea (versículo 23).

²⁴ Ha'e nunga rupi peẽ ha'e pendera'y kuery penderexarai eme pendekorã araka'e rã peve aeja va'ekue re.

²⁵ Ha'e gui yvy SENHOR ijayvuague py penderekao ma vy voi pendekuai 'rã pendekorã aeja va'ekue rami.

²⁶ Ha'e pendera'y kuery pêvy oporandu ramo: "Mba'ixa tu nhandereko ha'e rami?" he'i ramo

²⁷ aipopeje 'rã: " SENHOR pegua Páscoa pygurarã jajuka va'e, mba'eta Egito yvy re Israel kuery ro áry rupi oaxa vy Egito pygua kuery ojuka, ha'e rã nhandro py ikuai va'e ma ogueraa jepe", peje 'rã pendera'y kuery pe — he'i.

Ha'e ramo heta va'e kuery ojero'apa vy ombojerovia okuapy.

²⁸ Ha'e gui Israel kuery oje'oi vy ojapo ha'e rami. Moisés ha'e Arão pe SENHOR aipoe'iague rami ae ikuai.

Dez-a nhombopagaarã ta'y kuery jypygua ojukapaa ague

²⁹ Ha'e gui pytû mbyte jave SENHOR ojuka Egito yvy re ta'y jypygua ikuai va'e ha'e javi. Ojuka Faraó guenda openaaty py oguapy va'ety ra'y jypygua, nhuã py ombo'a pyre ra'y kuery ha'e mymba ra'y jypygua ikuai va'e ha'e javi.

³⁰ Ha'e ramo Faraó opu'ã pyavyve, hembiguai kuery ha'e Egito pygua kuery ha'e javive guive. Mba'eta haxẽ va'e onhendu Egito yvy re, mba'eta oo omanoa e'ŷa jipoi.

³¹ Ha'e ramo ha'e va'e pytûve Faraó oenoĩ Moisés ha'e Arão. Ha'e vy aipoe'i ha'e kuery pe:

— Pepu'ã ke, tapeo xevygua kuery mbyte gui, peẽ ha'e Israel kuery ha'e javive guive. Tapeo, SENHOR pe pendekuai, aipo pejeague rami vy.

³² Penderupive peraa avi peneryomba kuery vexa'i ha'e vaka, aipo pejeague rami. Tapeopa, ha'e xee voi ke xereroayvu porã — he'i.

³³ Mba'eta Egito pygua kuery omondouka pojava, oyvy gui omoẽmba aguã ojapura vy, "Ha'e javive nhamanomba 'rã" he'i vy.

³⁴ Ha'e ramo ha'e kuery ojopy mbojaperã omoakŷ va'ekue, imbovua reveguia e'ŷ. Omoapomoaty ma oao py onhovã vy ojaxei heravy.

³⁵ Ha'e rami vy Israel kuery ojapo okuapy Moisés ijayvuague rami. Ha'e vy Egito pygua kuery pe ojerure okuapy prata ha'e ouro guigua ha'e ao re.

³⁶ SENHOR ojapo Egito pygua kuery omboaxy aguã rami ixupeguia kuery. Ha'e va'e kuery pe ojerurea ome'ẽmba. Ha'e ramo oipe'apa Egito pygua kuery oguereko va'ekue.

Egito yvy gui Israel kuery oẽmbaague

³⁷ Ha'e rami vy Israel kuery ma Ramessés tetã gui oje'oi Sucote katy. Seiscentos mil yvy rupigua avakue ikuai, kunhague ha'e kyrigue oipapa e'ŷ rã.

³⁸ Ha'e kuery reve oje'oi avi amboae kuery joegua e'ŷ-e'ŷ, ha'e gui mbovy e'ŷ mymba kuery vexa'i ha'e vaka.

³⁹ Ombojy okuapy mbojape imbovua reveguia e'ŷ Egito gui omoapomo heravy va'ekue. Imbovua reveguia e'ŷ teri ombojy, mba'eta Egito gui omoẽmbaa ramo ojapura vy nda'evei ho'u va'erã ojapopa aguã.

⁴⁰ Israel kuery ma quatrocentos e trinta ma'etŷ re ikuai Egito yvy re.

⁴¹ Ha'e gui quattrocentos e trinta ma'etŷa opa jave, ha'e va'e ára ae SENHOR pegua xondaro rami ikuai va'e ha'e javi oje'oi Egito gui.

⁴² Ha'e va'e pytû ma SENHOR re ima'endu'aa aguã, mba'eta ha'e va'e jave oguenoẽmba Egito yvy gui. Ha'e va'e pytû ma SENHOR pegua ramo Israel kuery ha'e javive 'rã ima'endu'a, araka'e rã ikuai va'e voi.

⁴³ Ha'e gui SENHOR aipoe'ive ju Moisés ha'e Arão pe:

— Po ramo ma Páscoa ára py pejapo va'erã. Amboae regua neĩ peteive ndo'ui 'rã ha'e va'e regua.

⁴⁴ Ha'e rã tembiguai kuery peráta re ojogua pyre ha'e javi 'rã ho'u, opire omboi uka rire.

⁴⁵ Ha'e rã amboae regua ha'e peráta re om̄ba'eapo va'erã pejou va'ekue ma ndo'ui 'rã ha'e va'e regua.

⁴⁶ Peteĩ-teĩ vexa'i ra'y ma peteĩ'i oo py 'rã pe'u. Ho'okue peraa eme oka katy, neĩ pemopẽ eme ikãgue.*

⁴⁷ Israel kuery ha'e javive tojapo ha'e rami.

⁴⁸ Ha'e rã xapy'a rei pendero py amboae yvy regua ovaẽ vy SENHOR pegua Páscoa ho'uxe avi ramo ma avakue ha'e javi pire tomboi ranhe. Ha'e gui mae ma 'rã ha'eve onhemboja ha'e ho'u aguã. Ha'e rami rire ha'e pyguae rami 'rã oiko. Ha'e rã opire omboi uka e'ỹ va'e ma neĩ peteĩve ndo'ui 'rã.

⁴⁹ Ha'e rami ae toiko pendeyvy pygua ae, ha'e amboae yvy regua penembyte rupi ikuai va'e pe.

⁵⁰ Ha'e rami ikuai Israel kuery ha'e javive. Moisés ha'e Arão pe SENHOR ojapo ukaague rami ae ikuai.

⁵¹ Ha'e va'e árave SENHOR oguenoẽ Israel kuery Egito yvy gui, peteĩ-teĩ regua ooa rami.

13

Jypyguia itui'i va'ekue SENHOR pegua ikuai aguã re ijayvuague

¹ Ha'e gui SENHOR aipoe'i Moisés pe:

² — Xevy guarã remboaxa 'rã Israel kuery oxy gui jypyguia itui'i va'e ha'e javi. Avakue e'ỹ vy mymba guigua teĩ xemba'e meme — he'i.*

³ Ha'e ramo Moisés aipoe'i guetarã kuery pe:

— Penema'endu'a ke kova'e ára Egito yvy gui peopaague re, escravo rami pumba'eapo poyiague gui. Mba'eta SENHOR opo'akaa rupi penerenoẽ ha'e gui. Ha'e nunga rupi pe'u eme mbojape imbovua revegua.

⁴ Kova'e ára jaxy abibe 'epy va'e py ae peje'oi.

⁵ Ha'e gui SENHOR pendereraa 'rã yvy mboae re, cananeu kuery, heteu, amorreu, heveu ha'e jebuseu kuery yvy penderekorã ome'ẽ aguã re peneramoĩ kuery pe oura reve ijayvuague, yvy kamby ha'e ei oata e'ña. Ha'e va'e yvy re SENHOR pendereraa ma ramo kova'e jaxy ojeupity nhavõ penema'endu'a ha'e rami penderekorã oeja va'ekue rami pendekuai aguã.

⁶ Ha'e rami vy sete ára re pe'u 'rã mbojape imbovua revegua e'ỹ. Ha'e gui sete araa py ma oiko 'rã nhemboaty iky'a e'ỹ va'e SENHOR pegua.

⁷ Sete ára re pe'u 'rã mbojape imbovua revegua e'ỹ. Mbojape mbovua toĩ eme pendereve, neĩ pendeyvy ha'e javi rupi.

⁸ Ha'e va'e árave ndera'y kuery pe remombe'u vy "Ha'e rami nhandekuai mba'eta SENHOR mba'emo porã ojapo xevy Egito gui orenoẽ vy", peje 'rã.

⁹ Ha'e rami nhandekuaia opyta 'rã ikuua ukaarã ndepo re ha'e nderova re oĩ va'e rami, nema'endu'a aguã SENHOR guigua lei rupi ndeayvu aguã, mba'eta Egito yvy gui SENHOR opo'akaa rupi nerenoẽ rire.

¹⁰ Ha'e nunga rupi ma'etõa nhavõ, hi'ára py porã pendekuai 'rã ha'e va'e ayvu rami.

¹¹ — Ha'e gui SENHOR ndevy ha'e neramoĩ kuery pe ouraague rami vy penemoinge 'rã cananeu kuery yvy re. Pendekoarã ome'ẽ ma ramo

¹² SENHOR peguarã remboaxa 'rã oxy gui jypyguia itui'i va'ekue ha'e javi, mymba kuery guive. Jypyguia ava oiko va'e ma guive rã SENHOR peguarã meme.

¹³ Ha'e rã mburika'i ra'y jypyguia rekovia reme'ẽ 'rã vexa'i ra'y py. Remboekovia e'ỹ ri ramo remopẽ 'rã ijatua rupi. Ha'e rã avakue regua ndera'y kuery jypyguia ikuai va'e ma remboekovia va'erã meme.

¹⁴ Ha'e gui ko'ẽ rã ndera'y kuery oporandu rã "Mba'e re tu ha'e rami nhandekuai?" he'i ramo ixupe aipo're 'rã: "SENHOR opo'akaa rupi orerenoẽ raka'e escravo orekuiai gui.

¹⁵ Mba'eta Faraó inhakã ratã vy noremundoukavei ramo SENHOR ojuka Egito yvy re jypy'i guare ha'e javi, avakue ha'e mymba guigua voi. Ha'e rami rire SENHOR pe xee amboaxa oxy gui jypyguia itui'i va'e ava ma guive rã, ha'e rã xera'y kuery jypyguia ha'e javi ma amboekovia 'rã.

¹⁶ Ha'e rami nhandekuaia opyta 'rā ndepo re ha'e nderova re ikuua ukaarā oī va'e rami, mba'eta SENHOR opo'akaa rupi orerenoē raka'e Egito yvy gui", 're 'rā ndera'y kuery pe.

Tape rupi Nhanderuete ojeupegua kuery oguerekaoague

¹⁷ Israel kuery Faraó omondouka ma jave filisteu kuery yvy rupi tape oo va'e rupi e'ŷ Nhanderuete ogueraa namombyryive tei, mba'eta aipoe'i vy: "Xevyguá kuery joe opu'ā va'e oexa vy oendu 'rā okyjea, ha'e Egito yvy katy ju ojevyxe 'rā", he'i vy.

¹⁸ Ha'e rami 'rāgue py ojeupegua kuery Nhanderuete ojapo ejere jogueravy aguā rami ye'ẽ pytā katy'i rupi tape tekao e'ŷa rupi oo va'e rupi. Ha'e ramo Israel kuery xondaro rami guembiporupa reve oje'oi Egito gui.

¹⁹ Moisés ogueraa avi José kāgue, mba'eta ha'e rami Israel ra'y kuery ojapo aguā re oura rire. Ha'e vy aipoe'i: "Anhetē Nhanderuete ojekuaa 'rā pendevy. Ha'e ramo apy gui ke peraa xekāgue", he'ague rami ae ogueraa.

²⁰ Ha'e gui ha'e kuery Sucote gui oje'oi vy Etā py ju ikuai, tekao e'ŷa re ovaēa'i py.

²¹ SENHOR oo oiny ha'e kuery renonde. Ára pukukue re peteī arai opu'ā va'e rupi oo, tape rupi ogueraa aguā. Ha'e rā pyávy ma tata opu'ā va'e rupi oo oexape aguā, ara py ha'e pyávy ha'e kuery oguata aguā.

²² Ara py arai opu'ā va'e ndojep'e'ai ha'e kuery áry gui, ha'e pyávy ma tata opu'ā va'e voi ndojep'e'ai.

14

Israel kuery rakykue Egito pygua kuery ouague

¹ Ha'e gui SENHOR aipoe'i Moisés pe:

² — Ndeayvu na Israel kuery pe guakykue katy ju oo vy Pi-Hairote rexei opyta aguā, Migdol ha'e ye'ẽ mbyte, Baal-Zefom renonde katy. Ha'e va'e renonde py pepytā 'rā ye'ẽ yvýry.

³ Ha'e ramo Faraó ojeupe ae "Israel kuery nda'ikuai kuaavei vy po okanhymba ma nhi'ā tekao e'ŷa re" he'i 'rā.

⁴ Ha'e rami vy amoakā ratā 'rā Faraó penderakykue oo aguā. Ha'e ramo pexa 'rā Faraó ha'e ixondaro kuery ha'e javi re xepo'aka rā. Egito pygua kuery voi oikuua 'rā xee SENHOR aikoa — he'i. Ha'e ramo ha'e kuery ojapo ha'e rami.

⁵ Ha'e gui Egito pygua huvixa pe omombe'ua Israel kuery ojavapa maa. Ha'e ramo Faraó ha'e hembiguai kuery amboae rami ju onhembopy'a ha'e kuery rovai. Ha'e vy aipoe'i okuapy:

— Mba'exa tu jajapo ra'e Israel kuery nhanerembiguai kuery ikuai ve'ŷ aguā rami? — he'i okuapy.

⁶ Ha'e gui Faraó okaróxa oguerekao katu ma vy ogueraa oxondaro kuery.

⁷ Ha'e rami vy ogueraa seiscentos mba'eyru oiporavo va'ekue ha'e karóxa Egito re ikuai va'e ha'e javi, huvixa oī reve meme.

⁸ Mba'eta SENHOR omoakā ratā Egito pygua huvixa Faraó Israel kuery rakykue oo aguā. Ha'e rā Israel kuery ma ipy'a guaxu reve oje'oi.

⁹ Ha'e kuery rakykue Egito pygua kuery oje'oi. Kavaju ha'e javi, Faraó mba'e karóxa, kavaju árygua kuery ha'e ixondaro kuery reve oo vy oupity ye'ẽ yvýry hekoá okuapy py, Pi-Hairote katy'i, Baal-Zefom renonde katy.

¹⁰ Ha'e gui Faraó kuery ovaē rai'i rā Israel kuery oma'ẽ. Ha'e vy oexa Egito pygua kuery ha'e kuery rakykue ou oiny rā. Ha'e rami vy Israel kuery okyje ete okuapy, ha'e vy ojapukai okuapy SENHOR pe.

¹¹ Aipoe'i okuapy Moisés pe:

— Egito yvy re orenhono porā aguā jipoí ramo teve ha'e gui orenoē kova'e tekao e'ŷa py romanomba aguā? Mba'e re tu nami oreapo, Egito gui roẽmba aguā rami orererekō?

¹² Po rami e'ŷ ri ty'y ndevy oreayyu raka'e Egito yvy re teri nhandekuai reve: "Orereja ke Egito pygua kuery pe orekuai aguã" ro'e va'ekue. Mba'eta orevy pe ha'eveva'e rire Egito pygua kuery pe orekuai aguã teko a e'ŷa py romanomba 'râgue py — he'i okuapy.

¹³ Ha'e ramo Moisés ombovai heta va'e kuery pe:

— Pekyje eme, pekyrirĩ ha'e pexa 'râ pendereraa jepearã SENHOR kova'e ára omoingo ta va'e, mba'eta Egito pygua kuery aŷ pexa va'e ma ndapexa jeyvyei ma 'râ.

¹⁴ SENHOR ae 'râ opu'ã penderepy aguã, ha'e râ peẽ ma pekyrirĩ 'râ — he'i.

Ye'ẽ mbyte rupi oopaague

¹⁵ Ha'e gui SENHOR aipoe'i Moisés pe:

— Mba'e re tu rejapukai xevy? Aipo're Israel kuery toguata oje'oivy.

¹⁶ Ha'e râ ndee ma eupi ndepopoka, ekuave'ẽ ye'ẽ áry, ha'e emboja'o, ye'ẽ mbyte rupi Israel kuery oaxa aguã ipiru reia rupi.

¹⁷ Ma'ẽ, Egito pygua kuery xee amoakã ratã vy ajapo 'râ penderakykue oo vy ha'e va'e rupi oike avi aguã rami. Xemboete pavẽ 'râ Faraó re xepo'aka ramo, ha'e ixondaro kuery ha'e javi re, ikaróxa ha'e kavaju árygua kuery re guive.

¹⁸ Ha'e ramo Egito pygua kuery oikuua pavẽ 'râ xee SENHOR aikoa. Faraó re vy xemboetea 'râ, karóxa ha'e kavaju árygua kuery re vy guive — he'i.

¹⁹ Ha'e gui Nhanderuetea guigua anjo ma Israel kuery xondaro kuery renonde oo oiny va'ekue ojepe'a vy ha'e kuery rakykue katy ju oaxa. Arai opu'ã va'e voi ojepe'a ha'e kuery renonde katy gui, ha'e vy hakykue katy ju opyta.

²⁰ Ha'e rami vy opyta Egito pygua kuery ikuiaia ha'e Israel kuery ikuiaia mbyte. Arai ma Egito pygua kuery pe pytû, ha'e râ Israel kuery pe ma hexakã. Ha'e rami py pytû mbukukue re nda'evei Egito pygua kuery onhemboja aguã Israel kuery re.

²¹ Ha'e gui Moisés okuave'ẽ ye'ẽ áry. Ha'e ramo ha'e va'e pytû mbukukue re SENHOR ojapo yvytu kuaray oua katy gui oipeju aguã rami, ye'ẽ ojepe'a aguã. Yy oja'oague rupi yvy piru rei opyta.

²² Ha'e ramo Israel kuery oike ye'ẽ mbyte yvy ipiru reia rupi. Yy ma kora rami oĩ ha'e kuery yvýry, oiporu kuaa re ha'e oiporu kuaa e'ŷa re.

²³ Ha'e gui Egito pygua kuery ma ha'e kuery rakykue oje'oi vy oike avi jogueravy, Faraó rymba kuery kavaju ha'e javive, karóxa ha'e kavaju árygua kuery guive. Ha'e rami vy ye'ẽ mbyte peve oo.

²⁴ Ha'e gui ko'ẽ rai jave SENHOR tata ha'e arai opu'ã va'e mbyte oĩa gui oexa Egito pygua kuery oje'oi râ. Ha'e rami vy omondyipa.

²⁵ Ha'e vy ha'e kuery karóxa ruéra ombopija vy ojapo ndoo porâvei aguã rami. Ha'e ramo Egito pygua kuery aipoe'i:

— Jajavapa ke Israel kuery renonde gui, mba'eta SENHOR opu'ã ore kuery rovai ha'e kuery repy vy.

Egito pygua kuery yy py omanombaague

²⁶ SENHOR aipoe'i Moisés pe:

— Ekuava'ẽ ju ye'ẽ áry, Egito pygua kuery áry yy ojevy aguã, ikaróxa ha'e kavaju árygua kuery áry — he'i.

²⁷ Ha'e ramo ye'ẽ áry Moisés okuave'ẽ. Ko'ẽmba ma jave ye'ẽ oxyry atã ju ouvy. Egito pygua kuery ojavapa ta ovy ramo yy ovaexi. Ha'e rami ye'ẽ mbyte py SENHOR oitypa Egito pygua kuery.

²⁸ Yy ojevypa vy ojao'ipa karóxa, kavaju kuery ha'e Faraó xondaro kuery ha'e javi ye'ẽ mbyte rupi hakykue oje'oi ta va'ekue. Ha'e kuery regua neĩ peteïve ndopytai.

²⁹ Ha'e râ Israel kuery ma ye'ẽ mbyte ipiru reia rupi oguata. Ha'e kuery pe ma yy kora rami oĩ, oiporu kuaa re ha'e oiporu kuaa e'ŷa re.

³⁰ Ha'e va'e ára SENHOR ogueraa jepe Israel kuery Egito pygua kuery gui. Ha'e gui Israel kuery oexa okuapy Egito pygua kuery ye'ẽ rembe re omanomba va'ekue.

³¹ Ha'e rami vy Israel kuery oexa SENHOR ipo'aka etea Egito pygua kuery re opu'ã rã. Ha'e ramo ha'e kuery oendu SENHOR renonde ojererokyjea. Hexe ojerovia ete okuapy, hembigui Moisés re guive.

15

Moisés oporaeiague

- ¹ Ha'e ramo Moisés ha'e Israel kuery omonhendu okuapy pova'e mboraei SENHOR pe. Ha'e vy aipoe'i:
— Aporaei 'rã SENHOR pe, mba'eta yvate ete vy ipo'aka.
 Ye'ẽ mbyte py oitypa kavaju ha'e hi'árygua kuery.
- ² SENHOR ma xembaraetea ha'e aporaeia.
 Ha'e ma xereraa jepea oiko.
 Ha'e va'e ma xeruete, ha'e nunga rupi amboete 'rã.
 Xeru Ruete voi oiko ramo amboyvate 'rã.
- ³ SENHOR ma joe opu'ã va'e.
 SENHOR ma hery.
- ⁴ Ye'ẽ mbyte py oitypa Faraó mba'e karóxa ha'e xondaro kuery.
 Huvixa kuery voi oy'upa Ye'ẽ Pytã va'e py.
- ⁵ Yai ou oiny va'e ojao'ipa.
 Ha'e ramo ita rami oikepa yy guy ete peve.
- ⁶ SENHOR, ndepo reiporu kuaa regua ipo'aka vy iporã ete.
 SENHOR, ndepo reiporu kuaa regua omboa'ypa nderovaigua kuery.
- ⁷ Ndeyvate ete va'e vy reitypa nderovai opu'ã va'e kuery.
 Ndepoxya rembou rã omokanhymba mba'emo ra'ykue rami.
- ⁸ Neapyíguia gui nepytuẽ va'e py rive remboatyy yy.
 Oxyrya gui opytapa, ijaty oupy.
 Yai ikuai va'e hatãmba ye'ẽ guýry.
- ⁹ Orerovaigua aipoe'i: "Aa 'rã ha'e kuery rakykue auptity peve.
 Amboja'o 'rã ha'e kuery mba'e rei-rei va'ekue,
 xenhe'ẽ py arovya'rã ha'e nunga ajopypa vy.
 Aekyi 'rã xekyxé, xepo py amokanhymba 'rã", he'i va'ekue.
- ¹⁰ Ha'e rã ndeguigua yvytu py reipeju ramo ye'ẽ ojao'ipa.
 Ha'e kuery oikepa yy omyí atãa py chumbo oikea rami.
- ¹¹ — SENHOR, tuuete ikuai va'e regua mav'a'e 'rã tu ndee ramigua oiko?
 Mava'e tu oiko ndee ramigua? Ndeky'a e'ŷ va'e rã ndererovy'aa.
 Nhomondyipaarã iporã va'e rejapo vy okyjepy reiko.
- ¹² Reiporu kuaa regua reupi ramo
 yvy omokõmba.
- ¹³ Rejoayvua rupi rerekoo ndevygua kuery reraa jepe va'ekue.
 Ndepo'akaa rupi reraa nderekoo iky'a e'ŷ va'e py.
- ¹⁴ Yvy regua kuery oendu vy oryryipa okuapy,
 tekoaxy poyi ipo'aka Filístia pygua kuery re.
- ¹⁵ Ma'ẽ, Edom py yvatekueve ikuai va'e ma oximba.
 Moabe pygua ipo'aka va'e kuery voi oendu okuapy okyjea.
 Canaã pygua kuery ikangypa.
- ¹⁶ Ha'e kuery áry ho'a imondiyiarã ha'e imongygearã.
 Ndejyva ipo'aka ete va'e gui vy okyririmbä 'rã ita rami,
 ndevygua kuery oaxa peve, SENHOR,
 rejogua va'ekue oaxapa peve.
- ¹⁷ Ha'e va'e kuery ma ndevygua yvyty re reraa vy renhotŷ 'rã ha'e py nemba'etyrã,
 SENHOR, tekota reñ atyrã rerekoo katu va'ekue py,
 henda iky'a e'ŷ va'e py, ndepo py renhono va'ekue py.

¹⁸ SENHOR ipo'aka 'rā araka'e rā peve — he'i.

¹⁹ Mba'eta Faraó rymba kuery kavaju, ikaróxa ha'e kavaju árygua kuery ye'ẽ mbyte py oikepa ramo ha'e kuery áry SENHOR ombou ju yy. Ha'e rā Israel kuery ma yvy rupi oaxa oje'oivy ye'ẽ mbyte ipiru reia rupi.

Miriā kunhague mboae reve oporaei okuapyague

²⁰ Arão reindy Miriā ma profeta kunha oiko. Ha'e rami vy pandeiro ojopy rā hakykue kunhague ha'e javive oje'oi pandeiro reve ha'e ojerokya rupi.

²¹ Ha'e ramo ha'e kuery pe Miriā ombovai:

— Peporaei SENHOR pe, mba'eta iporā ete ipo'akaa py.
Mba'eta ye'ẽ py oitypa kavaju ha'e hi'árygua kuery.

Yy iro va'e iro e'ŷ va'e ju optyaague

²² Ye'ẽ Pytā va'e gui ma Moisés ogueraa Israel kuery tekao e'ŷa Sur katy. Tekao e'ŷa rupi mboapy ára re oguata oje'oivy yy ojou e'ŷ re.

²³ Ha'e gui mae ma Mara py ovaẽ. Ha'e rami teĩ Mara py yy oĩ va'e ma nda'evei oy'u aguã, iro ramo. Ha'e ramo ae omboero Mara.*

²⁴ Ha'e rami rā Moisés re heta va'e kuery ijayvu rei vy aipoe'i:
— Mba'e tu jay'u 'rā? — he'i okuapy.

²⁵ Ha'e ramo Moisés ojapukai SENHOR pe. Ha'e rā ixupe SENHOR oexa uka peteĩ yvyra. Ha'e va'e ma Moisés yy py omombo ramo yy nda'irovei. Ha'e py SENHOR oeja peteĩ ayvu ha'e kuery rekorã. Ha'e rami vy ha'e kuery oeko a'ã ha'e py.

²⁶ Ha'e vy aipoe'i:
— Xapy'a rei SENHOR Penderuete ayvu pendu riae, henonde ha'evea ramigua anho pejapo, ojapo uka va'e pendu, ha'e ijayvuague ha'e javi rupi pendekuai ramo ma neĩ peteĩve mba'eaxy ndoui 'rā pendere, Egito pygua kuery re ambou va'ekue regua. Mba'eta xee ma SENHOR romonguera va'e — he'i.

²⁷ Ha'e gui ha'e kuery ma Elim py ju ovaẽ, doze yvu ha'e setenta pindo ikuaiia py. Ha'e py optya okuapy yy ikuai va'e yvýry.

16

Nhanderuete maná ombouague

¹ Elim tekao gui Israel kuery ha'e javi oje'oi Sim tekao e'ŷa katy, Elim ha'e Sinai mbyte oĩ va'e. Egito yvy gui oẽmba rire mokoĩ jaxyia quinze araa py ovaẽ.

² Ha'e gui tekao e'ŷa py Israel kuery ha'e javive ijayvu mbegue rei okuapy Moisés ha'e Arão re.

³ Ha'e vy aipoe'i okuapy:

— SENHOR po py romanomba va'e rire Egito yvy re, oja xo'o mimoĩ oĩa yvýry roguapy rokuapy jave, ha'e orerevyatãmba peve mbojape ro'u rokuapy jave. Mba'eta ndee ma kova'e tekao e'ŷa py orereru orejuka aguã karuai py, ore kuery ha'e javive — he'i.

⁴ Ha'e ramo SENHOR aipoe'i Moisés pe:

— Ma'ẽ, ajapo 'rā yva gui penembi'urā ho'a aguã ramo. Ha'e ramo ko'ẽ nhavõ heta va'e kuery oẽ vy omono'õ 'rā peteĩ-teĩ ára guarã ete'i, xee aexa aguã xeguigua lei rupi pa ikuai tyrã pa anya.*

⁵ Ha'e gui mboapy meme araa py ma mokoĩ ára peguarã 'rā pemono'õ. Ha'e va'e pemono'õ vy pemoĩ 'rā penerembi'urā — he'i.

⁶ Ha'e ramo Moisés ha'e Arão aipoe'i Israel kuery ha'e javi pe:

— Kuri ka'arukue peikuua 'rā SENHOR ae Egito yvy gui penerenoẽmbaague.

⁷ Ha'e rā ko'ẽ aje'ive'i ma pexa 'rā SENHOR rexakã oexa uka rā, mba'eta oendu pendeayvu rei rā. Ha'e gui marã ramigua tu ore roiko orere peẽ kuery pendeayvu rei aguã?

⁸ Mba'eta ka'arukue SENHOR ombou 'rā xo'o pe'u va'erã, ha'e aje'ivekue ma mbojape ju ombou penerevyatã aguã. Ha'e rami avi SENHOR oendu pejou reia, mba'eta hexe ae

* 15:23 Tery Mara ma "Iro" 'ea. * 16:4 João 6.31

pendeayvu rei. Ha'e rã ore ma mava'e tu roiko? Ore rovai e'ŷ pendeayvu, ha'e rã SENHOR rovai — he'i Moisés.

⁹ Ha'e gui Moisés aipoe'i Arão pe:

— Aipo're Israel kuery ha'e javi pe: “Peno'õmba ke SENHOR renonde, mba'eta ha'e oendu pendeayvu rei rã”, 're 'rã ha'e kuery pe — he'i.

¹⁰ Ha'e ramo Israel kuery ha'e javi pe Arão ijayvu jave tekao e'ŷa katy oma'ẽ vy oexa okuapy SENHOR rexakã arai re.

Nhanderuete guyra codornizes ha'e maná ombouague

¹¹ Ha'e gui SENHOR aipoe'i Moisés pe:

¹² — Aendu Israel kuery ijayvu reia. Ha'e ramo aipo're ha'e kuery pe: “Kuri ka'aru pytũ e'ŷ mbove pe'u 'rã xo'o. Ha'e rã aje'ive'i ju ma pe'u 'rã mbojape. Ha'e rami vy peikuaa 'rã xee SENHOR Penderuete aikoa”, 're 'rã ha'e kuery pe — he'i.

¹³ Ha'e gui ka'arukue oveve ouvy guyra codornizes, ha'e vy ojao'ipa tekao ha'e javi rupi. Ha'e gui aje'ive'i ma yxapy oĩ tekao yvýry.

¹⁴ Yxapy ho'a va'ekue ipirupa jave yvy re opyta mba'emo xiñ rei va'e pira pekue ramigua, yro'y rami ipererí va'e.

¹⁵ Ha'e nunga Israel kuery oexa vy joupe-upe aipoe'i okuapy:

— Mba'e nunga tu peva'e? Mba'eta ndoikuuai mba'e paa.

Ha'e ramo Moisés ombovai:

— Peva'e ma mbojape pe'u va'erã SENHOR ombou va'ekue.

¹⁶ Mba'eta SENHOR aipoe'i uka pêvy: “Peva'e nunga peteĩ-teĩ pemono'õ 'rã pe'u va'erã, peteĩ-teĩ peguarã peteĩ ryru tynyẽ oĩ, mbovy pa pendekuaia rami. Peteĩ-teĩ omono'õ 'rã ngoo py ikuai va'e peguarã”, he'i uka va'ekue.

¹⁷ Ha'e rami ae Israel kuery ojapo. Ha'e vy amongue omono'õve, ha'e rã amboae kuery ma nomono'õive'i.

¹⁸ Ha'e rami teĩ hyru py oa'ã rã naembyrei omono'õ reta va'ekue pe, neĩ ndoatai mbovy'i omono'õ va'ekue pe. Mba'eta peteĩ-teĩ ho'u aguã ha'evea rami omono'õ.*

¹⁹ Ha'e gui Moisés aipoe'i ha'e kuery pe:

— Avave rei tomoõ porã eme ko'ẽ rã guarã — he'i.

²⁰ Ha'e rami teĩ ha'e kuery noendu potai Moisés ayvu re. Ha'e vy amongue maná omono'õ vy omoõ porã ko'ẽ rã guarã. Ha'e rã haxopa, heakuã vaikue guive. Ha'e ramo Moisés ivai ha'e kuery pe.

²¹ Ha'e nunga rupi aje'ive'i nhavõ omono'õ peteĩ-teĩ ho'u va'erã ete'i, mba'eta kuaray aku rã hykupa.

Israel kuery maná omono'õ okuapyague

²² Ha'e gui seis araa py ma tembi'u omono'õ okuapy mokoõ ára guarã, peteĩ-teĩ pe mokoõ ryru omono'õ. Ha'e rã yvatekueve ou vy omombe'u okuapy Moisés pe.

²³ Ha'e ramo Moisés ombovai:

— Ha'e rami aguã ae ma SENHOR aipoe'i: “Ko'ẽ ramo ma pepytu'u 'rã, SENHOR pegua ára sábado iky'a e'ŷ va'e ramo. Ha'e gui aŷ ma mba'emo oexyaty py pexyxe va'e ma pexy 'rã, ha'e yy py pembojyxé va'e ma pembojy 'rã. Ha'e rami avi ndape'upai va'ekue ha'e javi 'rã peipe'a ko'ẽ rã guarã”, he'i va'ekue.

²⁴ Ha'e ramo Moisés aipoe'iague ramo ha'e kuery omoõ porã ko'ẽ jevy peve. Ha'e va'e ma naeakuã vaikuei, ndaxoi guive.

²⁵ Ha'e ramo Moisés aipoe'i:

— Pe'u ke kova'e ára, mba'eta kova'e ára ma sábado SENHOR pegua. Kova'e ára ma ndapejoui 'rã nhuñdy rupi.

²⁶ Seis ára re 'rã pemono'õ. Ha'e rã sete araa ma sábado. Ha'e va'e ára py ma jipoí 'rã — he'i.

²⁷ Ha'e gui sete araa py heta va'e kuery regua amongue oje'oi omono'õ aguã, teĩ ndojoui.

* 16:18 2 Coríntios 8.15

²⁸ Ha'e ramo SENHOR aipoe'i Moisés pe:

— Raka'e peve tu ndapejapo'i 'rā ajapo uka va'e ha'e xeguigua lei?

²⁹ Peikuua pota SENHOR pepytu'u aguã sâbado ára oejaague re. Ha'e nunga rupi seis araa py ome'ẽ penembi'u mokoõ ára peguarã. Sete araa py ma peteõ-teõ topyta oĩa py ae, avave rei too eme oĩa gui — he'i.

³⁰ Ha'e rami rã sete araa py heta va'e kuery opytu'u okuapy.

³¹ Ha'e nunga pe Israel kuery "Maná" he'i. Kuratõ ra'yí rami xií, ha'e ei guigua rami hee va'e.

³² Ha'e gui Moisés aipoe'i:

— Po rami SENHOR ojapo uka va'e: "Ha'e va'e regua pemonyẽ 'rã peteõ hyru, ha'e pemoõ porã 'rã peneramymino kuery peguarã, ha'e kuery avi oexa aguã tembi'u tekaoa e'õa rupi penemongaruague, Egito gui roguenoẽ javé", he'i.

³³ Ha'e gui Arão pe ju Moisés aipoe'i:

— Ejopy peteõ hyru, ha'e emonyẽ maná. Ha'e va'e ma emoõ porã SENHOR renonde, peneramymino kuery peguarã — he'i.

³⁴ Ha'e ramo Moisés pe SENHOR ijayvuague rami vy Arão ma Nhanderuete ayvu oĩaty renonde omoõ porã hyru.

³⁵ Ha'e rã Israel kuery ma quarenta ma'etõ re okaru okuapy maná re, yvy hekoa aguã py oike peve. Canaã yvy re ovaõ peve okaru okuapy maná re.

³⁶ Ha'e gui dez ryru renyẽ ma peteõ ajaka.

17

Refidim py ita gui yy oẽague

¹ Ha'e gui Sim teko a'õa gui Israel kuery oje'oipa vy opytu-pyta oje'oivy SENHOR aipoe'iague rami vy. Ha'e rami vy Refidim py ju opytu okuapy. Ha'e py ma yy jipoi ha'e kuery oy'u aguã.

² Ha'e ramo heta va'e kuery ijayvu ete okuapy Moisés re. Ha'e vy aipoe'i:

— Eme'ẽ yy roy'u aguã.

Moisés ombovai:

— Mba'e re tu pendeayvu ete xere? Mba'e re tu peko a'ã SENHOR? — he'i.

³ Heta va'e kuery ha'e py ijey'uveipa vy Moisés re ijayvu rei vy aipoe'i:

— Mba'e re tu oreapo Egito yvy gui roju aguã rami, yuvei py orejukapa aguã, orera'y kuery ha'e orerymba kuery reve? — he'i okuapy.

⁴ Ha'e ramo Moisés ojapukai SENHOR pe:

— Mba'e tu ajapo 'rã kova'e kuery re? Ita py xeapipa ta ma okuapy.

⁵ SENHOR ombovai:

— Eaxa heta va'e kuery renonde, ha'e nderupive eraa Israel kuery mongetaaty kuery regua. Ndepo py eraa ndepopoka yakã reinupãague va'e. Tereo.

⁶ Ha'e gui neronde xee aí 'rã peteõ itaova Horebe py oí va'e áry. Einupã ha'e va'e itaova, ha'e rã ixugui oẽ 'rã yy. Ha'e ramo heta va'e kuery oy'u 'rã — he'i. Ha'e rami Moisés ojapo Israel kuery mongetaa kuery renonde.

⁷ Ha'e va'e teko ma omboery Massá ha'e Meribá,* SENHOR oeko a'ãa rupi Israel kuery ijayvu ete rire, "Nhanembyte SENHOR oí teve tyrã pa any?" he'i okuapy vy.

Israel kuery re Amaleque kuery opu'ãague

⁸ Ha'e gui Refidim py Israel kuery ikuai jave Amaleque kuery ou vy opu'ã okuapy ha'e kuery rovai.

⁹ Ha'e ramo Moisés ijayvu Josué pe:

— Eiporavo avakue ha'e tereo, pepu'ã Amaleque kuery rovai. Ha'e rã xee ma ko'ẽ rã aẽ 'rã yvyty apyte áry, Nhanderuete pegua popoka xepo py areko reve — he'i.

* 17:7 Tery Massá ma "Moangekoa" 'ea, ha'e gui Meribá ma "Ayvua ete-ete" 'ea.

¹⁰ Ha'e ramo Josué ojapo Moisés ijayvuague rami. Ha'e rami vy opu'ã okuapy Amaleque kuery re. Ha'e rã Moisés, Arão ha'e Hur ma yvyty apyte áry oẽ.

¹¹ Moisés opo oupi jave Israel kuery ipo'aka 'rã. Ha'e rã opo omboguejy jave ma Amaleque kuery ju 'rã ipo'aka.

¹² Ha'e gui Moisés po ma ipoyi. Ha'e ramo peteĩ ita ha'e kuery ogueru vy omoĩ okuapy ha'e py. Ha'e ramo Moisés oguapy hi'áry. Arão ha'e Hur ma ipo omoĩ atã herekovy joavaive-ive re. Ha'e rami py ipo oĩ atã kuaray oike peve.

¹³ Ha'e rami rã Josué kuery kyxe guaxu py oitypa Amaleque kuery.

¹⁴ Ha'e ramo SENHOR aipoe'i Moisés pe:

— Embopara peteĩ kuaxia re ha'e nungakue re penema'endu'a aguã, ha'e eroayvu ju Josué pe. Mba'eta xee amomba ete 'rã Amaleque kuery, yva guýry rupi ha'e kuery re ima'endu'aa ve'ŷ aguã — he'i.

¹⁵ Ha'e gui Moisés ojapo peteĩ altar. Ha'e va'e ma omboery “ SENHOR ma xebandeira”.†

¹⁶ Ha'e vy aipoe'i:

— Mba'eta SENHOR ouraague rami vy Amaleque kuery re opu'ã 'rã araka'e rã peve.

18

Moisés ratyu ta'yxy ha'e ta'y kuery ogueruague

¹ Ha'e gui Moisés ratyu Jetro sacerdote Midiã pygua va'e oendu Moisés pe ha'e Israel kuery pe SENHOR ojapo va'ekue ha'e javi, ha'e marã rami vy pa Egito yvy gui ha'e kuery ogueru raka'eague.

² Ha'e rami vy Moisés ratyu Jetro ogueru ju ta'yxy Zípora omondoukaague gui.

³ Mokoĩ ta'y kuery reve ogueru. Ha'e va'e kuery regua peteĩ ma omboery Gérson, Moisés “Amboae yvy rupi aguata rei aikovy va'ekue” he'i vy.

⁴ Ha'e rã amboae ma omboery Eliézer, “Xeru ruete xepytyvõ vy xereraa jepe Faraó kyxe guaxu gui” he'i vy.*

⁵ Ha'e rami py Moisés tekao e'ŷa py hekoia oikovya py hatyu Jetro ogueru ta'y kuery ha'e ta'yxy, Nhanderuete pegua yvyty katy'i.

⁶ Ha'e vy hatyu aipoe'i uka Moisés pe:

— Xee nderatyu Jetro aju ndea py, ndera'yxy ha'e ndera'y kuery mokoĩ reve — he'i uka

⁷ ramo Moisés oo ovaexi vy. Ojero'a vy oayvupa. Ha'e gui peteĩ-teĩ amboae oiko porãa re oropandu vy jogueroike opy.

⁸ Guatyu pe Moisés omombe'u SENHOR Israel kuery oayvu vy ojapo va'ekue ha'e javi Faraó ha'e Egito pygua kuery ha'e javi re, ha'e Egito yvy re opa marãguia tembiapo ojapo va'ekue, ha'e marã rami vy pa SENHOR ogueraa jepepaague.

⁹ Ha'e ramo Jetro oguerovy'a opa mba'e py Israel kuery pe SENHOR ojapo porãague, Egito pygua kuery po gui ogueraa jepe vy.

¹⁰ Ha'e vy aipoe'i:

— Ta'ima'endu'a porã SENHOR Faraó ha'e Egito pygua kuery ha'e javi po gui pendereraa jepe va'ekue re.

¹¹ Aŷ ma aikuua ma tuuete ramigua ikuai va'e ha'e javi gui SENHOR ipo'akapave va'ea, mba'eta Egito pygua kuery po gui neretarã kuery ogueraa jepe, ha'e kuery oguereko axy ramo — he'i.

¹² Ha'e ramo Moisés ratyu Jetro ogueru Nhanderuete pe oapy vy ome'ẽ va'erã. Ha'e ramo ou Arão ha'e Israel mongetaaty kuery ha'e javi, Moisés ratyu reve okaru aguã Nhanderuete renonde.

Deuteronômio 1.9-18

¹³ Ko'ê jevy Moisés oguapy oiny heta va'e kuery re oikuua pota aguã. Ko'ëmba ramove kuaray oikea peve heta va'e kuery opu'ã okuapy henonde.

† ^{17:15} Bandeira ma joe opu'ãa py huvixa omopu'ã 'rã hupivegua kuery ha'e py oupa aguã. * ^{18:4} Tery Eliézer ma “Nhanderuete xepytyvõa” 'ea nhaendu rã joo ramigua.

¹⁴ Ha'e gui Moisés heta va'e kuery oguereko rā hatyu oexa vy aipoe'i:

— Mba'exa tu guī rami rerekro heta va'e kuery? Mba'e re tu ndee anho repenaa py reguapy reiny ko'ẽmba'i ramove kuaray oikea peve, ha'e rā heta va'e kuery ma opu'ã okuapy nerentonde?

¹⁵ Moisés ombovai guatyu pe:

— Ha'e rami mba'eta xea py heta va'e kuery ou 'rā oporandu uka vy Nhanderuete pe.

¹⁶ Ha'e gui amongue va'e ijayvu aguã oguereko vy ma ou 'rā xea py, xee aikuaa pota aguã peteĩ-teĩ reko re, ha'e heta va'e kuery ambo'e porã aguã Nhanderuete ojapo uka va'ekue ha'e lei re — he'i.

¹⁷ Ha'e ramo Moisés ratyu aipoe'i ixupe:

— Nda'evei ha'e rami rejapo aguã.

¹⁸ Mba'eta nekangy 'rā, heta va'e kuery ndereve ikuai va'e voi. Guī ramigua ma ipoyi vaipa ndevy. Ndee ae'i ndereropo'aka kuaai 'rā.

¹⁹ Ha'e gui endu ke xeayvu. Xee romongeta 'rā, ha'e Nhanderuete toiko ndereve. Eĩ tema heta va'e kuery rekoria Nhanderuete renonde. Nhanderuete pe emombe'u ha'e kuery mba'emo oguereko va'e.

²⁰ Embo'e hekorā va'ekue ha'e lei re. Ha'e embo'e ha'e kuery mava'e tape rupi pa oo aguã, ha'e mba'emo ojapo aguã re.

²¹ Ha'e gui ejou avi heta va'e kuery regua avakue hi'aranduve va'e, avakue Nhanderuete renonde ojererokyjea rupi ikuai va'e, oipotapa reia re nda'eve e'ŷi va'e. Ha'e va'e nunga emoĩ mil ikuai nhavõ va'e ruvixarā, cem, cinqüenta ha'e dez ikuai nhavõ va'e ruvixarā.

²² Ha'e kuery toikuua pota jepi heta va'e kuery re. Ha'e rā haxy ete va'e ha'e javi ma ndevy pe ae 'rā ogueru. Mba'emo ndaxyi va'e re ma ha'e kuery ae toikuua pota. Ha'e rami rā ha'eveve 'rā ndevy. Ndereve amboae kuery togueraa avi voyi.

²³ Xapy'a rei ha'e rami rejapo, ha'e Nhanderuete ha'e rami aguã ojapo uka ramo ma reropo'aka 'rā, ha'e heta va'e kuery ha'e javi 'rā ngoo katy ojevy avi ov'y'a reve — he'i hatyu.

²⁴ Ha'e rami rā Moisés onhe'ẽ rendu guatyu. Ojapopa ijayvuague ha'e javi.

²⁵ Ha'e rami vy Moisés oiporavo avakue hi'arandu va'e Israel kuery regua ha'e javi gui. Ha'e va'e kuery ma omoĩ imbokuapy heta va'e kuery re opena va'erā: mil ikuai nhavõ va'e ruvixarā, cem, cinqüenta ha'e dez ruvixarā.

²⁶ Ha'e ramo ha'e kuery ju oikuua pota okuapy heta va'e kuery re. Haxy ete va'e ma Moisés-a py 'rā ogueru. Ha'e rā ndaxyi va'e re ma ha'e kuery ae 'rā oikuua pota.

²⁷ Ha'e ramo Moisés oxarura imondovy guatyu. Ha'e ramo ojevy ju oyvy katy.

19

Sinai yvyty áry Moisés reve SENHOR ijayvuague

¹ Egito yvy gui Israel kuery oẽmba rire mboapy jaxya ha'e ijypy'ia ára py ovaẽ okuapy Sinai yvyty yvýry tekoia e'ŷa oĩ va'e py.*

² Refidim gui oje'oi vy Sinai regua tekoia e'ŷa py ju ou. Ha'e va'e py ae Israel kuery optya okuapy yvyty rexei.

³ Ha'e gui Moisés oẽ yvyty re Nhanderuete reve ijayvu aguã katy. Ha'e ramo yvyty áry gui SENHOR oenoĩ vy aipoe'i ixupe:

— Po rami 'rā ndeayvu Jacó ramymino kuery pe, remombe'u 'rā Israel kuery ha'e javi pe:

⁴ “Pexa ma karamboae Egito pygua kuery re ajapo va'e, taguato pepo áry rami rogueraa ague ha'e gui, ha'e apy xea py ju rogueruague.

⁵ Ha'e gui aŷ ma pendu kuaa pota 'rā xeayvu, pendekuai 'rā xereve guarā ajapo va'ekue rami. Ha'e rami vy xevygua ae 'rā pendekuai, ha'e javi regua mbyte teĩ, mba'eta yvy ha'e javi ma xemba'e.

* ^{19:1} Sinai yvyty ma yvateve va'e. Ha'e rā ijyvyrygua ma ijoja rei tekoia e'ŷa.

6 Peẽ kuery pendekuai 'rã apenaa ha'e xevyguia sacerdote kuery, peteĩ regua iky'a e'ŷ va'e", 're 'rã Israel kuery pe — he'i.

7 Ha'e ramo Moisés ou vy oenoĩ nhomongoeta va'ety kuery. Ha'e kuery oendua py omombe'upa ayvu SENHOR omombe'u uka va'ekue ha'e javi.

8 Ha'e ramo heta va'e kuery peteĩ rami ombovai:

— SENHOR ijayvua ha'e javi 'rã rojapo — he'i okuapy. Ha'e rami heta va'e kuery ijayvuague Moisés omombe'u ju SENHOR pe.

9 Ha'e gui SENHOR aipoe'i Moisés pe:

— Ma'ě, ndea py aju 'rã peteĩ arai pytū va'e rupi, ndereve xeayvu rã heta va'e kuery oendu avi aguã, ndere ojerovia riae okuapy aguã — he'i. Mba'eta SENHOR pe Moisés omombe'u ma va'ekue heta va'e kuery ijayvuague.

10 SENHOR aipoe'i avi Moisés pe:

— Tereo ju heta va'e kuerya py. Eiky'a'o ukapa kova'e ára ha'e ko'ě rã. Ha'e kuery tojoi oao,

11 ha'e toiko katupa mboapy araa pygurarã. Mba'eta mboapy araa py heta va'e kuery ha'e javi oexaa py xee SENHOR aguejy 'rã Sinai yvyty áry peve.

12 Ha'e gui yvyty yvýry rupi rea'anga 'rã imoiny heta va'e kuery rejoko vy. Ha'e vy aipo're 'rã: "Peiko kuaa pota yvyty re peẽ e'ŷ aguã, neĩ pepoko eme ijyvýry rupi aa'angaague re. Mba'eta yvyty re opoko va'e rei omano 'rã.

13 Ha'e nunga re avave ndopokoa'i 'rã. Ha'e rami 'rãgue py ojapipaa 'rã ita py, e'ŷ vy onhyvõa 'rã. Avakue, e'ŷ vy mymba teĩ ae ma ndoikovevei 'rã. Mimby guaxu onhe'ě mbuku nhendu jave mae ma ha'eve yvyty re peẽ aguã", 're 'rã ha'e kuery pe.*

14 Ha'e gui Moisés yvyty áry gui heta va'e kuerya py ju oguejy ma vy oiky'a'o ukapa. Ha'e ramo ojoi okuapy oao.

15 Moisés aipoe'i heta va'e kuery pe:

— Peiko katu ke mboapy araa pygurarã, ha'e rami vy penhemboja eme kunhague re — he'i.

16 Ha'e gui mboapy araa ko'ëmba ramove ma oiko onhemboxi ha'e overa va'e, ha'e peteĩ arai pytū ete va'e yvyty áry ojekuaa. Peteĩ mimby guaxu onhe'ě ratã ete, tekoia py ikuai va'e oryryipa aguã rami.

17 Ha'e ramo Moisés ogueraa heta va'e kuery ikuiai gui mombyry'i Nhanderuete ovaexí aguã. Ha'e ramo yvyty yvýry ju ikuai.

18 Sinai yvyty ha'e javi rupi hataxí oiny, hi'áry peve SENHOR oguejy ramo tata rupi. Hataxí opu'â ový tatakua gui hataxí opu'â va'e rami, ha'e yvyty ha'e javi oryryi atã.

19 Ha'e gui mimby guaxu onhe'ě atã-atãve tema. Moisés ijayvua rã Nhanderuete ombovai yapu atãa py.

20 Ha'e gui Sinai yvyty apyte áry SENHOR oguejy vy oenoĩ Moisés yvyty apyte áry ou aguã. Ha'e ramo Moisés oẽ ový.

21 SENHOR aipoe'i Moisés pe:

— Eguejy ju, heta va'e kuery pe ndeayvu touve eme yvyty yvýry rupi rea'angaague kyvõ rami xee SENHOR-a katy xerexa aguã, ha'e kuery regua heta omano e'ŷ aguã.

22 Sacerdote kuery xee SENHOR re onhemboja va'e voi tojeky'a'o, xee SENHOR ajuka e'ŷ aguã — he'i.

23 Ha'e ramo Moisés ombovai:

— Heta va'e kuery nda'evei ae Sinai yvyty re oẽ aguã, mba'eta orevy ndeayvu vy aipo're: "Ea'anga yvyty yvýry rupi, xevy guarã ae remboaxa vy", 're va'ekue orevy.

24 SENHOR aipoe'i ixupe:

— Tereo, eguejy ju. Ha'e rire ma peẽ ju pejogueruvy Arão reve. Ha'e rã sacerdote kuery ha'e heta va'e kuery ma touve eme rea'angaague kyvõ rami xee SENHOR aĩa py oẽ aguã, ajuka e'ŷ aguã.

25 Ha'e ramo heta va'e kuerya py ju Moisés oguejy vy omombe'u ha'e kuery pe ha'e nunga ha'e javi.

* 19:13 Hebreus 12.20

20

Deuteronômio 5.1-21

- ¹ Ha'e gui po rami Nhanderuete ijayvu. Ha'e vy aipoe'i:
² — Xee ma SENHOR Nderuete Egito yvy re escravo pendekuai vy pemb'a'apo poyiague
 gui pendepe'a va'ekue.
³ — Ndererekoi 'rā nderuete mboae xerenonde.
⁴ — Nderejapoi 'rā mba'emo ra'angaa nderueterā, yva re ikuai va'e ra'angaa, yva guýry
 yvy re ikuai va'e ramigua, neñ yvy guy rupi yy oĩ va'e rupi ikuai va'e ra'angaa voi.
⁵ Ha'e nunga neremboetei 'rā, neñ nerembojeroviai 'rā, mba'eta xee ae ma SENHOR
 Nderuete aiko, aipota xere anho pejerovia, mba'eta aju vy ambopaga 'rā xere nda'ija'ei
 va'e reko vaiague re, tuu kuery, ta'y kuery, hamymino ha'e hamymino jevy kuery ikuia
 peve.
⁶ Ha'e rā amongue xerayvu vy ajapo ukaague rami ikuai va'e ma amboaxy 'rā mil-kue
 hamymino kuery ikuai peve.
⁷ — Ndeayvu rive eme SENHOR Nderuete rery rupi, mba'eta SENHOR nomboeko porāi
 'rā hery rupi ijayvu rive va'ekue.

- ⁸ — Nema'endu'a ke sábado ára py iky'a e'ŷ va'erā remboete aguā.*
⁹ Mboapy meme ára re 'rā remba'apo, ha'e rejapopha 'rā rejapo va'erā va'ekue ha'e javi.
¹⁰ Ha'e rā sete-a ára ma sábado SENHOR Nderuete pegua ára. Neremba'apoi 'rā
 mba'eve py, nderajy, nerembiguai avakue ha'e kunhague, nerymba kuery, neñ
 mombyrygua kuery ndero py removaẽ va'ekue voi.
¹¹ Mba'eta mboapy meme ára re SENHOR ojapo raka'e yva ha'e yvy, ye'ẽ ha'e opa mba'e
 hexe ikuai va'e. Ha'e gui sete araa py ma opytu'u. Ha'e nunga rupi sábado ára SENHOR
 ogueroayvu porā vy oeja iky'a e'ŷ va'erā.*
¹² — Remboete 'rā nderu ha'e ndexy, reikove puku aguā yvy ndeyvyrā SENHOR
 Nderuete ome'ẽ va'ekue re.*
¹³ — Ejojuka eme.*
¹⁴ — Ndetavy eme.*
¹⁵ — Nemonda eme.*
¹⁶ — Ndeayvu rive eme neirū re.
¹⁷ — Emoaruã eme neirū ro. Emoaruã eme neirū ra'yxy, hembiguai ava neñ kunha,
 hymba vaka neñ mburika'i, neñ neirū mba'e rei-rei oguereko va'e.*

Deuteronômio 5.22-33

- ¹⁸ Israel kuery ha'e javi oendu okuapy yapu ha'e mimby guaxu pu, ha'e oexa overa
 va'e ha'e yvyty gui hataxí va'e. Ha'e nunga ha'e kuery oexa vy oryryipa ha'e mombyry'i
 opyta.
¹⁹ Ha'e vy aipoe'i okuapy Moisés pe:
 — Ndee ae ke ndeayvu orevy, ha'e ramo ore kuery roendu 'rā. Ha'e rā Nhanderuete
 ma ta'ijayyu eme orevy, romanomba e'ŷ aguā.
²⁰ Moisés ombovai heta va'e kuery pe:
 — Pekyje eme ke. Nhanderuete ma pendeko a'ã aguā ou kuri, henonde pendu riae
 aguā pejererokyje aguā, pejejavy e'ŷ aguā — he'i.
²¹ Ha'e ramo ha'e kuery opu'ãmba okuapy mombyry'i. Ha'e rā Moisés ma Nhanderuete
 oña katy onhemboja ov yarai pytū reia py.

Altar re ijayvuague

- ²² Ha'e ramo Nhanderuete aipoe'i Moisés pe:
 — Po rami 'rā ndeayvu Israel kuery pe: “Peẽ kuery pexa ma yva gui pendereve xeayvu
 rā.
²³ Pejapo eme tuuete ramigua prata e'ŷ vy ouro gui xereve pemboete avi va'erā.

* 20:8 Sábado ma “Pytu'ua ára” 'ea. * 20:11 Atos 4.24, 14.15 * 20:12 Mateus 15.4, Marcos 7.10, Efésios 6.2-3
 * 20:13 Mateus 5.21, Romanos 13.9, Tiago 2.11 * 20:14 Mateus 5.27, Romanos 13.9, Tiago 2.11 * 20:15 Romanos
 13.9 * 20:17 Romanos 7.7, 13.9

²⁴ Ha'e rami 'rāgue py peteī altar yvy guigua rive 'rā pejapo xemboete aguā. Ha'e va'e áry ma mba'emo peapy vy peme'ē 'rā, ha'e peteī rami nhandekuaia regua, penerymba vexa'i ha'e vaka ava. Mamo rā xerery re penema'endu'a aguā ajapoague rupi aju 'rā ha'e py pendea py romoingo porā aguā.

²⁵ Ita gui ri xevy guarā altar pejapo vy ita omoatyrōmba pyre gui e'ŷ 'rā pejapo, mba'eta tembiporu py pemoatyrō vy pemongy'a 'rā.

²⁶ Xevyguua altar re pejeupi eme tape pyrō-pyrō'a'i rupi, pendepire reia ojekuaa e'ŷ aguā", 're 'rā ha'e kuery pe.

21

Deuteronômio 15.12-18

¹ — Po rami 'rā remombe'u heta va'e kuery rekora.

² Xapy'a rei peteī hebreu regua escravo-rā pejogua ramo mboapy meme ma'etý peve ete'i 'rā ombo'ea py. Ha'e rā sete ma'etýa py ma pepoi rive 'rā, hepy re'ŷ.

³ Omenda e'ŷ re ri Peru rire ha'e ae'i 'rā oo. Ava omenda va'e ri vy ogueraa 'rā ta'yxy.

⁴ Xapy'a rei ipatō ta'yxyrā ome'ē ramo imemby e'ŷ vy ipi'a, ha'e ramo ma kunha ha'e imemby kuery ipatō pe meme 'rā opyta, ha'e ime ma ha'e ae'i 'rā oo.

⁵ Ha'e rami avi escravo onhemombe'u porā vy "Xee ma ayvu rima xepatō, xera'yxy ha'e xera'y kuery. Ha'e rami vy ndajepē'axei apy gui", he'i ramo

⁶ ipatō ogueraa 'rā huvixa kuerya py, ojapo 'rā okē py ovaē aguā rami, e'ŷ vy okē yta peve, ha'e ramo inambi ipatō omombu 'rā mba'emo mombua py. Ha'e rami rire ixupeguia escravo riae 'rā oiko.

⁷ — Xapy'a rei peteī ava escravo-rā guajy ovende ramo kunha va'e ndojepē'ai 'rā escravo kuery ojepē'aa rami.

⁸ Xapy'a rei ipatō gua'yxyrā ojogua teī kunha va'e nombovy'ai ramo ovende ju 'rā. Ha'e rami avi nda'evei amboae yvy pygua pe ovende aguā, mba'eta ha'e rami aguā ixupe anhetē rupi e'ŷ 'rā oikoa.

⁹ Ha'e rā gua'y re ri omomenda vy guajy rami ae 'rā oguerek.

¹⁰ Ha'e gui xapy'a rei gua'y ra'yxyrā kunha mboae ju ojou vy ta'yxy jypygua pe ome'ē tema 'rā tembi'u, ijaorā ha'e ta'yxy rami joguerek aguā.

¹¹ Ha'e nunga mboapyve mba'e ixupe nome'ēi ri vy opoi rive 'rā hepy re'ŷ.

Joguero'a va'e re ijayvuague

¹² — Amongue jojuka ramo ha'e voi pejuka 'rā.

¹³ Ha'e rā potae vy e'ŷ ojuka, ha'e rā ipo py Nhanderuete ombou rire ma pemondouka 'rā onhemu aguā henda pêvya aikuua uka va'erā va'e py.

¹⁴ Ha'e rami avi guetarā ojukaxe vy ete hexe oma'ē mbegue reve opu'ā, hi'ā gui ojuka ramo ma xevyguua altar yvýry oĩa gui teī penoē 'rā pejuka aguā.

¹⁵ Nguu e'ŷ vy oxy ojuka va'ekue ma pejuka 'rā.

¹⁶ Ha'e amongue ojopy nhea'ā rei vy ovende, ha'e rami e'ŷ vy ipo py ojoua ramo ma pejuka avi 'rā.

¹⁷ Nguu e'ŷ vy oxy re ijayvu vai va'ekue avi 'rā pejuka.*

¹⁸ — Xapy'a rei mokoī joguero'aa py guetarā ombouguya 'rā ita py, ha'e e'ŷ opo py. Ha'e gui hetarā omano e'ŷ vy jepe ngupa py itui 'rā.

¹⁹ Ha'e gui opu'ā vy oka rupi ju oiko 'rā opopoka reve teī. Ha'e rami rā napembopagai 'rā nhoungaare. Ha'e rami avi nhoungaare omboekovia 'rā ára omboaxa riveague re, ha'e omopena uka 'rā okuera porā peve.

²⁰ — Xapy'a rei amongue guembiguai ava e'ŷ vy kunha yvyra py oinupā ramo omano 'rā ipo py. Ha'e rami rā pembopaga 'rā.

²¹ Ha'e rami avi xapy'a rei peteī ára, mokoī ára ri hembiguai nomanoi ramo napembopagai 'rā ipatō, mba'eta ipatō peráta rami ombovare va'e.

* 21:17 Mateus 15.4, Marcos 7.10

²² — Ha'e gui xapy'a rei avakue joguero'aa py peteī ounga 'rā kunha ipuru'a va'e. Ha'e gui omemby'i oity teī ixy re mba'eve rei ndoikoi ramo ma ounagaare omboekovia 'rā kunha va'e me oipotaa rami, huvixa kuery ijayvua rami ete.

²³ Ha'e rami avi kunha va'e nda'evei ramo pejuka avi 'rā ijukaare,

²⁴ joexa omombuague re pemombu avi 'rā hexa, nhoaī omopēague re pemopē avi 'rā haī, jopo ojayaague re pejaya avi 'rā ipo, jopy ojayaague re pejaya avi 'rā ipy,*

²⁵ joapyague re peapy avi 'rā, nhoungaague re peunga avi 'rā, ha'e nhokyxīague re peikyxī avi 'rā.

²⁶ — Xapy'a rei amongue guembiguai ava e'ŷ vy kunha oexa mbogue ramo ndoexavei 'rā. Ha'e rami rā opoi rive 'rā hexa ombogueague rekovia.

²⁷ Ha'e guembiguai ava e'ŷ vy kunha raī ojavykya rupi omboi ramo opoi rive 'rā haī omboiague rekovia.

²⁸ — Ha'e gui xapy'a rei amongue rymba vaka ma ava e'ŷ vy kunha oikutu rire omano 'rā. Ha'e rami rā vaka pejapipa 'rā ita py, ha'e neī ho'okue ma voi ndape'ui 'rā. Ha'e rā vaka ja ma napembopagai 'rā.

²⁹ Ha'e rami avi xapy'a rei vaka yma ma voi jokutu va'ety, ha'e ija oikuua va'eri nombotyi ramo peteī ava e'ŷ vy kunha mba'e ojuka 'rā. Ha'e rami rā vaka pejapipa 'rā ita py, ha'e ija voi pejuka avi 'rā.

³⁰ Ha'e rami teī ija pe omboekovia re ojerurea ramo ojerurea rami ome'ē 'rā guekove rekovia.

³¹ Xapy'a rei peteī ava'i e'ŷ vy kunha'i vaka oikutu vy ojuka ramo ha'ekue rami ae 'rā pembopaga ija.

³² Ha'e rā escravo ava e'ŷ vy kunha mba'e vaka oikutu ramo ija opaga 'rā ipatō pe trinta hatā'i va'e prata guigua, ha'e rā vaka ma pejapipa 'rā ita py.

³³ — Amongue yvykua omboty e'ŷ re oeja, xapy'a rei yvy ojo'o va'ekue ri ikua nombotyi ramo ha'e py ho'a 'rā vaka, e'ŷ vy mburika.

³⁴ Ha'e rami rā yvy jo'oare omboekovia 'rā ija pe peráta ome'ē vy. Ha'e gui mymba omano va'ekue ma imba'e ae 'rā opyta.

³⁵ — Xapy'a rei amongue rymba vaka ma amboae rymba vaka oikutu ramo omano 'rā. Ha'e rami rā ija kuery ovende 'rā vaka oikove va'e, ha'e hepykue omboja'o 'rā joo'i rami. Ha'e mymba omano va'ekue avi 'rā omboja'o.

³⁶ Ha'e rami avi ha'e va'e vaka jokutu va'etya oikuua pavē va'eri ija nombotyi ramo guymba vaka ome'ē 'rā amboae vaka rekovia, ha'e rā omano va'ekue ma imba'e ae 'rā opyta.

22

Nhomba'e rei-rei re ijayvuague

¹ — Xapy'a rei amongue vaka e'ŷ vy vexa'i re imonda vy ovende 'rā ojuka e'ŷ vy. Ha'e ramo peteī-teī vaka imondaague rekovia ome'ē 'rā peteī nhiruī vaka, ha'e peteī-teī vexa'i imondaague rekovia ome'ē 'rā irundy vexa'i.

² Ha'e xapy'a rei imonda va'e peteī oo py oipe'a rā ojoua vy oikutu rā omano 'rā. Ha'e ramo huguy moēare ojejavvy va'e'ŷ 'rā opyta.

³ Ha'e rā xapy'a rei kuaray ouve teri reve ri ha'e nunga oiko ramo huguy moēare ojejavvy va'e 'rā opyta.

— Imonda va'e oiko va'e rei omboekovia 'rā imondaague. Xapy'a rei ome'ē aguā ndojoui ramo pevende 'rā escravo-rā imondaague rekovia.

⁴ Xapy'a rei mymba vaka, mburika e'ŷ vy vexa'i mba'e re imonda rire ipo py imondaague oikove reve teri ojoua 'rā. Ha'e rami rā imondaague rekovia mokoī kuerei 'rā ome'ē.

⁵ — Xapy'a rei amongue guymba nhomba'ety py, e'ŷ vy jo'uvaty py omongaru 'rā, ha'e rami e'ŷ vy opoi rive 'rā nhomba'ety rupi okaru oikovy. Ha'e rami rā ija ombo'ety gui ae 'rā omboekovia iporāgueve va'e ome'ē vy, ha'e e'ŷ vy o'uvaty gui.

* 21:24 Mateus 5.38

⁶ Xapy'a rei tata ojopy xapy'a vy juuty okai vy oapy avi 'rā mba'emo aju oī va'e, e'ŷ vy oipo'o pyre, ha'e rami e'ŷ vy mba'ety ha'e javi okai 'rā. Ha'e rami rā tata moendyare omboekovia 'rā okaiague re.

⁷ — Xapy'a rei amongue guetarā pe peráta e'ŷ vy mba'emo ome'ẽ 'rā omoĩ porā aguā, ha'e gui ha'e nunga re imondaa 'rā ijopyare gui, ha'e imonda va'ekue ojoua 'rā. Ha'e rami rā imondaague re ma mokoīguea repy 'rā omboekovia.

⁸ Ha'e xapy'a rei imonda va'ekue ndojouai ramo hoo va'e ae 'rā peraa huvixa kuerya py, ha'e kuery oikuua pota aguā guetarā mba'e rei-rei re na'imondai pa ra'ea re.

⁹ Xapy'a rei amongue jokore 'rā mymba vaka re, mburika, vexal'i mba'e, ao, e'ŷ vy mba'emo omokanhy mbyre re. Ha'e rami vy amboae "Xemba'e rima" he'i ramo mokoīve 'rā peraa huvixa kuerya py. Ha'e ramo huvixa peteī ombopaga ramo guetarā pe mokoīguea repy 'rā omboekovia.

¹⁰ Xapy'a rei amongue guetarā pe opena uka 'rā guymba mburika, vaka, e'ŷ vy vexa'i re, ha'e e'ŷ vy amboae nunga mymba re, ha'e gui hymba omano 'rā, ha'e e'ŷ vy ojejuka 'rā, e'ŷ vy oē ramo avave rei ndoexaavei 'rā.

¹¹ Ha'e rami rā guetarā pe oura 'rā Nhanderuete rery rupi. Ha'e vy "Xee tu ndajopyi nerymba", he'i 'rā. Ha'e ramo ija ojou porā 'rā, ha'e amboae ma nomboekoviai 'rā.

¹² Ha'e rami avi anhetē imondaague oikuua ramo ma omboekovia 'rā ija pe.

¹³ Xapy'a rei ojayapaa ramo ogueru 'rā oexa pavē aguā. Ha'e rami rā nomboekoviai 'rā ojayapaague re.

¹⁴ Ha'e amongue guetarā pe hymba re ojerure vy ogueraa, ha'e ija noīa py mymba okarau, e'ŷ vy omano 'rā. Ha'e rami rā heraare omboekovia 'rā.

¹⁵ Ha'e rā ija ha'e py ri oī rire heraare nomboekoviai 'rā. Xapy'a rei hepy re oiporu rire oiporukaague repy ae 'rā ome'ẽ hekivia.

Jomeme ha'e Nhanderuete pe marā rami pa ikuai aguā oejaague

¹⁶ — Kunhataī'i omenda aguā nda'evei teri va'e amongue ombotavy vy onheno 'rā hexeve. Ha'e rami vy hexe omboekovia 'rā, ha'e omenda 'rā.

¹⁷ Ha'e rami avi tuu nomomendaxei ramo ixupe peráta py omboekovia 'rā kunhataīgue re opagaa rami.*

¹⁸ Imba'evky va'e rei napemoingovei 'rā.

¹⁹ Mymba reve itavy va'ekue pejuka 'rā.

²⁰ Amongue tuuete mboae pe, Nhanderuete pe'ŷ mba'emo ome'ẽ ramo pejuka avi 'rā.

²¹ Pemoingo axy eme amboae regua, pereko axy eme, mba'eta peē voi Egito yvy re amboae regua peiko rire.

²² Pejavyky eme neī peteīve imeve'ŷ va'e, e'ŷ vy tyre'ŷ.

²³ Mba'eta mba'emo py rei pemoingo axy ramo ha'e kuery xevy ojapukai ramo aendu 'rā ojapukaia.

²⁴ Ha'e rami vy xepoxy vy rojuka uka 'rā kyxe guaxu py. Ha'e ramo pendera'yxykue ju 'rā oiko imeve'ŷ va'e, ha'e pendera'y kuery voi tyre'ŷ 'rā ikuai.

²⁵ Xapy'a rei xevygua iporiaukue'i ndea katy'i oiko va'e pe peráta reiporuka ma vy emboekovia retave eme, peráta oiporuka va'ety kuery rami e'ŷ.

²⁶ Xapy'a rei neretarā gui ao puku reipe'a vy nemba'emo ogueraa va'e rekovia, ha'e rami vy ixupe reme'ẽ ju 'rā kuaray oike e'ŷ mbove.

²⁷ Mba'eta ha'e va'e py ae 'rā onhemonde, onheovā'i 'rā ipire ao'ia. Ajukue py onheovā e'ŷ re mba'exa tu oke 'rā? Ha'e va'e xevy ojapukai ramo aendu 'rā, mba'eta xee anhomboaxy kuaa va'e.

²⁸ Ndeayvu vai eme Nhanderuete rovai, neī penderuvixa kuery re voi.*

²⁹ Xevy reme'ẽ va'erā eru voi nemba'ety gui ha'e nde'uvaty gui iporāgueve. Nderal'i kuery jypygua voi remboaxa 'rā xevy.

* 22:17 Ha'e jave py ava omendaxe vy kunhataī ru kuery pe ome'ẽ 'rā mba'emo iporā va'e (Gênesis 24.53). * 22:28 Atos 23.5

³⁰ Ha'e rami ae avi 'rā rejapo 'rā nerymba vaka ha'e vexa'i re. Sete ára re ranhe oxy rupi toiko. Ha'e gui oito araa py ma reme'ē 'rā xevy.

³¹ Xevyguia iky'a e'ŷ va'e 'rā pendekuai. Ha'e rami vy pe'u eme jai rupi ivaipa rei va'e ro'okue. Jagua kuery pe rive 'rā pemombo.

23

Ijapu ha'e joe ijayvu rei va'e re ijayvuague

¹ — Nda'evei nemba'emombe'u rive aguã, nda'evei joekokue ramigua remombe'u vy heko vai va'e reve renhomoirũ aguã.

² Nda'evei heta va'e kuery rupive peo aguã mba'emo vai pejapo aguã katy. Ha'e pavẽ ijayvu rei okuapya py voi nda'evei renhomoirũ aguã anhetẽ rupi e'ŷ ndeayvu vy.

³ Iporiaukue re reikuua potaa py ma nda'evei reayvuve rive aguã.

⁴ Xapy'a rei nderovaigua rymba vaka e'ŷ vy mburika ixã e'ŷ re rejou vy reraa ju 'rā ixupe.

⁵ Ndere ija'e e'ŷ va'e rymba mburika ovoyi reve onheno oupy rã rexâ vy ema'ē rive eme, eipytyvõ ivoyi oupi aguã.

Deuteronômio 16.18-20

⁶ — Neretarã iporiaukue'i huvixa kuery pe ojexa uka rã nda'evei ha'eve'ŷa rami rerekó aguã.

⁷ Nda'evei reiporu aguã ayvu rive rei. Nda'evei rejuka uka aguã ojejavý e'ŷ va'e ha'e heko porã va'e, mba'eta xee namboeko porã 'rã joapo vai rei va'e.

⁸ Nda'evei ome'ẽmby rejopy aguã ha'eve'ŷa rami rejogueroko aguã, mba'eta ome'ẽ mbyre oexa mbogue 'rã hi'arandu va'e, ojapo 'rã heko porã va'ekue voi anhetẽ rupi e'ŷ ijayvu aguã rami.

⁹ Ha'e nda'evei amboae regua rejavyky aguã, mba'eta peikuua ae ma amboae regua py'a re oí va'e, Egito yvy re amboae regua peiko rire.

Levítico 25.1-7

¹⁰ — Mboapy meme ma'etŷ peve 'rã rema'etŷ ndeyvy re, ha'e ndejeupe guarã remono'õ 'rã mba'emo aju.

¹¹ Ha'e rã sete ma'etŷa re ma yvy reja 'rã opytu'u aguã, topyta rema'etŷ e'ŷ re. Ha'e ramo heta va'e kuery regua iporiaukue'i ojou aguã ho'u va'erã, ha'e ka'aguy rupigua voi ho'u aguã hembyrekue. Ha'e rami ae 'rã rejapo nde'uvaty ha'e nde-oliveira-ty re.

Levítico 23.3

¹² — Mboapy meme ára peve 'rã remba'eapo. Ha'e rã sete araa py ma repytu'u 'rã, nerymba vaka ha'e mburika voi opytu'u aguã, ha'e gui nerembigui pi'a kuery ha'e amboae regua voi opytu'u avi aguã.

¹³ Penekyre'ŷ xeayvua ha'e javi rupi pendekuai aguã. Ha'e rami vy penema'endu'a eme tuuete ramigua rive rery re, ha'e nunga rery rupi pendeayvu eme.

Êxodo 34.18-26; Levítico 23.4-21,33-44; Deuteronômio 16.1-17

¹⁴ — Ma'etŷa nhavõ mboapykue 'rã pejapo ngaru xevy.

¹⁵ Ha'e rami vy pejapo 'rã ngaru mbojape imbovua revegua e'ŷ. Sete ára re pe'u 'rã mbojape imbovua revegua e'ŷ aipoa'eague rami vy, jaxy abibe re oa'angaague py ae, mba'eta ha'e javé py Egito yvy gui peẽmba raka'e. Xerenonde avave rei tou rive eme mba'emo ogueru e'ŷ re.

¹⁶ Ha'e gui pejapo avi 'rã ngaru mba'emo ra'yigue pemono'õa regua, penemba'ety rupi mba'emo ra'yigue pemoaïague gui jypy'igua pemono'õ javé. Ha'e gui ma'etŷa opaa py pejapo avi 'rã ngaru mba'emo'a peipo'oa regua, penemba'ety rupi renhotŷ va'ekue gui pemono'õmba ma rire.

¹⁷ Ma'etŷa nhavõ mboapykue 'rã avakue ha'e javi ojexa uka okuapý SENHOR Penderuete renonde.

¹⁸ Nda'evei mbojape imbovua regua xevy peme'ē avi aguã mymba pejuka va'ekue ruguykue reve. Xevyguia ngarua py nda'evei avi inhandykue perekó aguã pytû mbukukue re ko'ẽmba peve.

¹⁹ Penemba'ety rupi jypy'i oiko va'ekue regua iporâgueve peru 'rã SENHOR Penderuete pegua oo py. Ha'e nda'evei kavara'i pembojoy aguã ixy ae kamby reve.

Ijyvrã Nhanderuete ome' ã aguã re ijayvuague

²⁰ — Penerenonde re amondouka 'rã peteĩ anjo pendere opena aguã tape rupi, ha'e pendereraa aguã pendeyvyrã areko va'e py.

²¹ Ha'e va'e renonde re ma peiko kuaa, ha'e pendu ijayvua. Pepu'ã eme hexe, mba'eta ha'e nomboguei 'rã pendeko vaiague, hexe xerery oĩ ramo.

²² Ha'e rami 'rãgue py opa mba'e py penhe'ẽ rendu, ha'e xeayvuague ha'e javi rejapopa ramo xee aiko 'rã penderovaigua kuery rovaigua, ha'e penemoingo axy reixe va'e moingo axya.

²³ Mba'eta xeguigua anjo penerenonde oo vy pendereraa 'rã amorreu, heteu, ferezeu, cananeu, heveu ha'e jebuseu kuery yvy peve. Ha'e gui ha'e va'e kuery xee amomba 'rã.

²⁴ Ha'e gui nda'evei ha'e kuery ruete pembojerovia neĩ pemboete aguã, nda'evei ha'e kuery ikuaia rami peẽ kuery pendekuai aguã. Ha'e rami 'rãgue py pemomba ete 'rã, ha'e pemboa'ypa 'rã ita omopu'ã va'ekue ha'e javi.

²⁵ SENHOR Penderuete pe ete 'rã pendekuai. Ha'e ramo ha'e omoingo porã 'rã mbojape pe'u va'e ha'e yy pey'u va'e. Penembyte gui oipe'apa 'rã mba'eaxy.

²⁶ Ha'e ramo pendeyvvy re ndoikoi 'rã kunha omemby'i oity va'e, neĩ imemby va'erã e'ŷ. Xee romoingo pukuve 'rã.

²⁷ Ha'e penerenonde rupi amondouka 'rã xegui okyjepa aguã, mamo rã peoa ha'e javi rupi onhemondyipa aguã. Ajapo 'rã penderovaigua kuery ha'e javi guakykue katy onha aguã rami.

²⁸ Penerenonde amondouka avi 'rã kavy nerende gui oipe'a heravy va'erã: heveu kuery, cananeu ha'e heteu kuery.

²⁹ Ha'e rami avi peteĩ'i ma'etŷ re'ŷ 'rã aipe'a, ijyvy va'ekue opyta rei e'ŷ aguã, ha'e penderovai ka'aguy rupigua heta-etave e'ŷ aguã.

³⁰ Ha'e rami 'rãgue py mbeguei'i py aipe'a 'rã heravy penerenonde gui, pendereta ha'e pendeyvyrã va'ekue ha'e javi rupi pendekoa peve.

³¹ Ha'e gui pendeyvyrã aa'anga 'rã Ye'ẽ Pytã guive filisteu kuery ikuaia rupi ye'ẽ oĩ va'e peve, ha'e teko a e'ŷa guive Eufrates yakã peve. Mba'eta pendepo py amboaxa 'rã ha'e va'e yvy re ikuai va'e ha'e javi, penerenonde gui peipe'apa aguã.

³² Ha'e kuery reve pejapo eme peteĩ rami pendekuai aguã, neĩ ha'e kuery ruete ramigua kuery pe pendekuai eme guive.

³³ Ha'e va'e kuery ma nda'evei ikuai aguã pendeyvvy re, xerovai rupi penderojejavy e'ŷ aguã. Tuuete kuery pe pendekuai ramo nhuã py rami 'rã penembo'a.

24

Israel kuery reve Nhanderuete guexeve guarã ojapoague

¹ Ha'e gui Nhanderuete aipoe'i Moisés pe:

— Eẽ eovy xee SENHOR aĩa py, Arão reve, ha'e gui Nadabe, Abiú ha'e setenta Israel regua nhomongeta va'ety kuery reve. Mombyry gui teri pejua py pembojerovia 'rã.

² Ndee Moisés anho 'rã renhemboja xee SENHOR re. Ha'e rã amboae kuery ma nonhembojai 'rã, heta va'e kuery ma voi nda'evei oẽ aguã ha'e kuery reve — he'i.

³ Ha'e gui Moisés oo ju vy heta va'e kuery pe omombe'u Nhanderuete ijayvuague, ha'e ayvu oeja va'ekue ha'e javi.

Ha'e ramo heta va'e kuery peteĩ rami meme ombovai okuapy. Ha'e vy aipoe'i:

— SENHOR ijayvuague va'e ma guive rã rojapopa 'rã — he'i.

⁴ Moisés omboparapa SENHOR ayvu ha'e javi'i. Ha'e gui ko'ẽ aje'ive'i reve opu'ã vy peteĩ altar ojapo yvy'iry. Doze ita omopu'ã avi, Israel kuery regua doze ikuaia rami.

⁵ Ha'e omondouka amongue Israel kuery regua kunumigue. Ha'e va'e kuery ma mba'emo oapy vy ome'ẽ SENHOR pe, ha'e vaka ra'y ojuka hexeve peteĩ rami ikuaia regua.

⁶ Huguy mbyte rupigua Moisés ojopy vy omoī peteī hy'a py, ha'e rā hembyrekue ma omboayvipa altar áry rupi.

⁷ Ha'e gui kuaxia guexeve guarā ojapo pyre oĩ ogueru vy ogueroayvu heta va'e kuery oendua py. Ha'e ramo ha'e kuery aipoe'i:

— SENHOR ijayvuague ha'e javi 'rā rojapo, ronhe'ẽ rendu vy — he'i.

⁸ Ha'e gui huguy omboyrū va'ekue Moisés ogueraa vy heta va'e kuery áry rupi ju omboayvi. Ha'e vy aipoe'i:

— Kova'e tuguy ma SENHOR guexeve guarā pendereve ojapo aguã, ijayvuague ha'e javi rami vy — he'i.*

⁹ Ha'e gui oẽ jogueravy Moisés ha'e Arão, Nadabe, Abiú ha'e setenta-ve Israel regua nhomongeta va'ety kuery.

¹⁰ Ha'e kuery oexa Israel kuery Ruete. Ipy guýry ma peteī pyrõa oĩ ita safira ramigua, yva rami hexakā va'e.

¹¹ Israel regua Nhanderuete oiporavo va'ekue oexa teī ha'e kuery re opo nomoī. Ha'e rami 'rāgue py okaru ha'e oy'u okuapy henonde.

Peteīgue ju nhomongeta va'ety kuery reve Moisés vvyty re oẽague

¹² Ha'e gui SENHOR aipoe'i Moisés pe:

— Eẽ ke vvyty re xea py, ha'e epyta ranhe ha'e py. Ndevy ame'ẽ 'rā itape ambopara va'ekue pendekorā ha'e ajapo uka va'e oĩa, ha'e kuery ju rembo'e aguã — he'i.

¹³ Ha'e ramo guembiguai Josué reve Moisés opu'ã vy oẽ ov yvyty re.

¹⁴ Nhomongeta va'ety kuery pe aipoe'i:

— Orerarõ ke apy pendea py rojevy peve. Arão ha'e Hur ma opyta 'rā pendereve. Xapy'a rei amongue mba'emo oguerekō ri vy ha'e kuerya py too — he'i.

¹⁵ Ha'e gui Moisés oẽ ramo arai ojao'ipa vvyty.

¹⁶ Sinai vvyty áry ojekuaa oiny Nhanderuete rexakā. Seis ára re arai ojao'i. Ha'e gui sete araa py ma SENHOR oenoī Moisés arai mbyte gui.

¹⁷ SENHOR rexakā ma tata rami nhomomba va'e ojekuaa vvyty apyte áry Israel kuery oexa rā.

¹⁸ Arai mbyte rupi Moisés oike vy oẽ ov yvyty re. Ha'e py ma opyta quarenta ára ha'e quarenta pytū re.

25

Êxodo 35.4-9

¹ Ha'e gui SENHOR aipoe'i Moisés pe:

² — Ndeayvu ke Israel kuery pe ogueru aguã xevy ome'ẽ va'erā. Avakue ipy'a re ha'e rami aguã oĩa va'e, ha'e kuery po gui pejopy 'rā xevy ome'ẽ va'e.

³ Pova'e ma xevygua ha'e kuery po gui pejopy va'erā: ouro, prata ha'e overa va'e,

⁴ ajukue hovy va'e, púrpura, pytā va'e, ajukue iporâve va'e ha'e kavara rague,

⁵ vexal'i pirekue omopytā mbyre, ipirekue iporâve va'e, vvyra acácia,

⁶ azeite tataendy rykuerā, azeite SENHOR pe nhomboaxaa aguã regua irûrā ha'e heakuã porâ va'e oapy pyrâ,

⁷ ita ônix ha'e ita sacerdote pegua manto ha'e ipexo regua jeguarâ.

⁸ Xevy pe pejapo 'rā peteī henda iky'a e'ŷ va'erā, heta va'e kuery mbyte xee aiko aguã.

⁹ Ombojerovia atyrâ rejapo 'rā ha'angaa ndevy aexa uka va'e ha'e javi rami, ha'e opy oĩ 'rā ha'e va'e rami rejapo va'erā ha'e javi.

Êxodo 37.1-5

¹⁰ — Yvyra acácia gui rejapo 'rā xeayvu ryrurâ. Ipuku-a ma peteī metro raxa'i, ipya ma meio metro raxa'i, yvatea ma meio metro raxa'i avi.

¹¹ Renhovâ 'rā ouro ete'i py. Hyepy rupi ha'e hi'áry rupi voi renhovâ 'rā. Ha'e ijyvýry rupi ma rembojegua 'rā ouro guigua py.

* 24:8 Mateus 26.28, Marcos 14.24, Lucas 22.20, Hebreus 9.20

¹² Rejapo avi 'rã irundy inhapyí va'e ouro gui. Ha'e va'e ma remoï 'rã hyru apy irundyve re. Mokoï inhapyí va'e remoï 'rã kyvõ katygua re, ha'e mokoï avi 'rã remoï hovai re.

¹³ Rejapo avi 'rã vyvra po'i'i acácia gui, ha'e renhovã 'rã ouro py.

¹⁴ Vyvra po'i'i ma remboaxa 'rã hyru jovaive re inhapyí va'e oĩ va'e rupi, ha'e va'e re hyru peraa aguã.

¹⁵ Vyvra po'i'i opyta 'rã hyru jovaive re inhapyí va'e oĩ va'e rupi. Ndapeipe'ai 'rã ha'e gui.

¹⁶ Hyru py remoï 'rã xeayvu ndevy aikuaa uka va'erã va'e.

Êxodo 37.6-9

¹⁷ — Imbotya teko vai ombogue atyrã rejapo avi 'rã ouro ete'i gui. Ipuku-a ma peteï metro raxa'i 'rã, ha'e ipya ma meio metro raxa'i.

¹⁸ Ouro gui avi 'rã rejapo mokoï anjo ipepo va'e ra'angaa. Ouro omoatyrõ mbyre gui 'rã rejapo, hyru mbotya apy jovaive re hi'aï va'erã.

¹⁹ Peteï anjo ra'angaa remopu'ã 'rã peteï apy re, ha'e amboae ma hovai re. Peteï regua gui meme 'rã rejapo imbotya ha'e anjo ra'angaa ijapy jovaive re hi'aï va'erã.

²⁰ Anjo ra'angaa opepo oupi 'rã yvate katy, ipepo omo'ã 'rã hyru mbotya. Joa katy 'rã oma'ẽ, imbotya teko vai ombogueaty katy ae.

²¹ Hyru áry remoï 'rã imbotya. Ha'e rã hyepy py ma remoï 'rã xeayvu ndevy amboaxa va'erã va'e.

²² Ha'e py aju 'rã ndea py, imbotya teko vai ombogueaty áry, mokoïve anjo ipepo va'e ra'angaa xeayvu ryru mbotya áry hi'aï va'e mbyte. Ndereve xeayvu 'rã ajapo uka va'e, ha'e Israel kuery rekorã amombe'u va'e ha'e javi re.

Êxodo 37.10-16

²³ — Rejapo avi 'rã peteï mesa vyvra acácia gui. Ipuku-a ma peteï metro va'erã, ipua ma meio metro, ha'e yvatea ma meio metro raxa'i.

²⁴ Mesa ma renhovã 'rã ouro ete'i py. Ijyvýry rupi ma rembojegua 'rã ouro guigua py.

²⁵ Ijyvýry rupi ma rejapo 'rã hembe 'yrã. Ipo guaxua ma irundy kuã va'erã, ha'e hembe 'y rupi rembojegua 'rã ouro guigua py.

²⁶ Irundy inhapyí va'e rejapo 'rã ouro gui. Ha'e va'e ma remoï 'rã ijapy irundyve re, hetyma irundyve oĩa py.

²⁷ Rembojeguaague katy'i 'rã oĩ inhapyí va'e vyvra po'i'i oĩ aguã, ha'e va'e re peraa aguã mesa.

²⁸ Ha'e va'e vyvra po'i'i ma rejapo 'rã vyvra acácia gui, ha'e ouro py renhovã 'rã, ha'e va'e re peraa aguã mesa.

²⁹ Hi'áry guarã rejapo avi 'rã hy'arã, heakuã porã va'e oapy atyrã, hy'a kuarã ha'e hy'a rugua'i mba'emo ome'ẽmby peraa aguã. Ha'e va'e ma ouro ete'i gui meme 'rã rejapo.

³⁰ Mesa áry remoï 'rã mbojape iky'a e'ý va'e xerenonde oĩ riae va'erã.

Êxodo 37.17-24

³¹ — Rejapo avi 'rã peteï tataendy 'yrã ouro guigua. Ouro omoatyrõ mbyre gui 'rã rejapo. Hapytarã, hakãrã, tykue ryrurã, ijapu'a va'erã, ha'e ipotyrã voi peteï'i gui meme 'rã rejapo.

³² Ijyke gui ma oẽ 'rã mboapy meme hakã. Mboapy rakã oẽ oiny 'rã peteï yke gui, ha'e hovai gui ju mboapy rakã avi 'rã oẽ.

³³ Peteï-teï hakã re oĩ 'rã mboapy amêndoaa ra'angaa tykue ryrurã, peteï ijapu'a va'e ha'e peteï ipoty. Ha'e gui hakã mboae re ha'ekue rami ae avi 'rã oĩ mboapy amêndoaa ra'angaa tykue ryrurã, peteï ijapu'a va'e ha'e peteï ipoty. Ha'e rami 'rã mboapy meme hakã tataendy 'y gui oẽ oiny va'e.

³⁴ Hi'y re ete ma oĩ 'rã irundy amêndoaa ra'angaa ijapu'a va'e tykue ryrurã, ipoty reve.

³⁵ Peteï ijapu'a va'e oĩ 'rã mokoï rakã ixugui oẽ oiny va'e renderã, ha'e amboae ijapu'a va'e ha'ekue rami ae oĩ 'rã mokoï rakã ixugui oẽ oiny va'e renderã. Oïve ju 'rã peteï ijapu'a va'e mokoï rakã ixugui oẽ oiny va'e renderã. Ha'e rami rejapo 'rã mboapy meme hakã mokõ-mokoï tataendy 'y gui oẽ oiny va'e.

³⁶ Ijapu'a va'e ha'e hakã ma peteï'i guigua meme. Ha'e javive peteï'i guigua meme 'rã rejapo ouro ete'i omoatyrõ mbyre gui.

³⁷ Rejapo avi 'rã sete tataendy. Ha'e va'e ma hendy 'rã omoexakã aguã henonde.

³⁸ Tata moendya ha'e imboguea ma ouro ete'i guigua meme.

³⁹ Peteĩ poyikue ouro ete gui 'rã rejapo tataendy 'yrã ha'e hyru ha'e javi.

⁴⁰ Eikuua pota ke vytyt apyte re reĩ jave ha'angaa aexa uka va'ekue rami ete rejapopa aguã re.*

26

Êxodo 36.8-18

¹ — Ha'e gui rejapo 'rã ombojerovia atyrã. Imbotyarã ma oĩ 'rã dez cortina ajukue iporãve va'e oipoka pyre gui, ha'e hovy va'e, púrpura ha'e pytã va'e gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.

² Peteĩ-teĩ cortina puku-a ma catorze metros va'erã, ha'e ipya ma mokoĩ. Cortina ikuai va'e joo rami meme 'rã.

³ Peteĩ nhiruĩ cortina oje'a 'rã joe, ha'e hovai re voi peteĩ nhiruĩ oĩ va'e oje'a-je'a 'rã joe.

⁴ Hovy va'e gui rejapo 'rã jokuaa cortina jypygua apy re oĩ va'e rembe re. Ha'e rami ae avi rejapo 'rã mokoĩa aty apy re cortina oĩ va'e rembe re.

⁵ Peteĩ-teĩ cortina re cinqüenta jokuaa 'rã rejapo, ha'e amboae cinqüenta jokuaa rejapo 'rã mokoĩ aty apy re cortina oĩ va'e re. Peteĩ-teĩ ojokuaa ma oĩ 'rã hovaigua renonde katy.

⁶ Ha'e rejapo avi 'rã cinqüenta ijopyarã ouro guigua. Ha'e va'e py peteĩ-teĩ cortina rejopy 'rã amboae re. Ha'e rami py ombojeroviaaty peteĩ'i ae 'rã opyta.

⁷ — Ha'e kavara rague gui rejapo avi 'rã cortina mboae ombojeroviaaty ao'i jevya mbotyarã. Onze cortina rejapo 'rã ha'e ramigua.

⁸ Ha'e va'e cortina peteĩ-teĩ puku-a ma quinze metros 'rã, ha'e ipya ma mokoĩ. Onze-ve cortina ikuai va'e joo rami meme 'rã ipuku-a ha'e ipya.

⁹ Ha'e va'e cortina ma peteĩ nhiruĩ rejokua 'rã joe, ha'e gui mboapy meme mboae voi rejokua 'rã ha'e rami. Cortina mboapy memea va'e ogueroja 'rã ijao'ia oĩ va'e renonde.

¹⁰ Ha'e jypygua aty apy re cortina oĩ va'e rembe re ma cinqüenta jokuaa rejapo 'rã, ha'e mokoĩa aty apy re cortina oĩ va'e rembe re ma cinqüenta jokuaa ju 'rã rejapo.

¹¹ Rejapo avi 'rã cinqüenta ijopyarã overa va'e guigua. Ha'e gui ijopya ikuai va'e remoĩ 'rã cortina jokuaa re. Ha'e va'e py rejokua 'rã reovy ijao'í arã, peteĩ'i ae opyta aguã.

¹² Ha'e gui ijao'ia re cortina hembyrekue ma remoĩ 'rã ombojeroviaaty kupe katy, cortina mbyte rupi hembyre va'e ae.

¹³ Ha'e rami py ombojeroviaaty re cortina oĩ va'e pukukue rami hembyre vy ma kyvõ rupi meio metro, hovai rupi meio metro avi. Ha'e va'e ma jovaive re remoĩ 'rã ijao'í arã.

Mymba pirekue ha'e vyvyrage ogueru rukaague

¹⁴ — Ha'e gui vexa'i pirekue omopytã mbyre gui rejapo 'rã ijao'ia áry guarã. Ha'e va'e áry guarã ju remoĩ 'rã ipirekue iporãve va'e.

¹⁵ — Ombojeroviaaty ytarã ma rejapo avi 'rã vyvyrage acácia gui. Ha'e nunga ma rejapo 'rã imo'am.

¹⁶ Peteĩ-teĩ vyvyrage puku-a ma irundy metros raxa'i 'rã, ha'e ipya ma meio metro raxa'i.

¹⁷ Peteĩ-teĩ vyvyrage re oĩ 'rã mokoĩ omoĩ aguã joa katy oo va'e, joo'i rami nhovaexĩ aguã rami. Ha'e rami rejapo 'rã vyvyrage ombojeroviaaty ytarã ha'e javi.

¹⁸ Ha'e ombojeroviaaty ytarã ma vinte vyvyrage rejapo 'rã kuaray puku-a katy guarã.

¹⁹ Ha'e gui vinte-ve vyvyrage guýry guarã ma rejapo 'rã quarenta omopyrõ aguã prata guigua. Mokoĩ omopyrõ aguã ma peteĩ vyvyrage guýry guarã rejapo mokoïve renderã, ha'e mokoĩ omopyrõ aguã amboae vyvyrage guýry guarã, mokoïve renderã.

²⁰ Ha'e gui ombojeroviaaty rovai re ma rejapo avi 'rã vinte vyvyrage, kuaray ijapu'a'ia katyguia reguarã.

²¹ Rejapo avi 'rã quarenta omopyrõ aguã prata guigua. Peteĩ vyvyrage guýry mokoĩ omopyrõ aguã, ha'e amboae vyvyrage guýry mokoĩ avi.

* 25:40 Hebreus 8.5

²² Ha'e gui kuaray oikea katy ombojeroviaaty kupe reguarã ma rejapo 'rã mboapy meme yvyrape.

²³ Ha'e ombojeroviaaty kupe katy guarã ma rejapo avi 'rã mokoõ yvyrape ijapy katy guarã.

²⁴ Ha'e va'e ma iguýry rupi oja'o, ha'e rã yvate rupi ma peteõ inhapyõ va'e rupi joyvy 'rã oõ. Ha'e rami rejapo 'rã mokoõ yvyrape re. Mokoõve apy peteõ-teõ re 'rã mokoõ oõ.

²⁵ Ha'e rami oõ 'rã oito yvyrape omopyrõ aguã prata guigua reve, dezesseis omopyrõ aguã. Peteõ yvyrape guýry oõ va'e mokoõ omopyrõ aguã, ha'e amboae yvyrape guýry mokoõ ju.

²⁶ — Yvyra mbyte rupi oaxa ovv va'erã ma rejapo avi 'rã acácia gui, ombojeroviaaty yke re oõ 'rã peteõ nhiruõ yvyrape.

²⁷ Ha'e gui ombojeroviaaty rovai re yvyrape oõ va'e rupi guarã ma peteõ nhiruõ, ha'e oo kupe kuaray oikea katy yvyrape oõ va'e rupi guarã peteõ nhiruõ avi 'rã oõ.

²⁸ Yvyra oaxa ovv va'e oaxa 'rã yvyrape mbyte rupi, peteõ apy gui amboae apy peve.

²⁹ Yvyrape renhovã 'rã ouro py, ha'e ouro gui ae ju 'rã rejapo inhapyõ va'e, ha'e va'e rupi mbyte yvyra oaxa ovv va'e oaxa aguã. Yvyra oaxa oiny va'e voi ouro py ae avi 'rã renhovã.

³⁰ Ha'e gui rejapo 'rã ombojerovia atyrã yvyty re ndevy aexa uka va'ekue rami ae.

Êxodo 36.35-38

³¹ — Ha'e gui rejapo 'rã peteõ ajukue okẽ regua hovy va'e gui, púrpura, pytã va'e, ha'e iporãve va'e oipoka pyre gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.

³² Ha'e va'e reipyo 'rã irundy yta yvyra acácia guigua ouro py onhovã mbyre. Ha'e va'e jopyarã rejapo 'rã ouro gui, ha'e irundy prata guigua omopyrõ aguã.

³³ Ajukue okẽrã reupi 'rã ijopya guýry. Ha'e gui xeayvu ryru ju reraa 'rã ha'e katy, ajukue okẽ regua rovai opyta aguã. Ha'e rami py ajukue oõ 'rã omboja'o aguã henda iky'a e'ý va'e ha'e henda iky'a e'ý ete va'e.

³⁴ — Henda iky'a e'ý ete va'e py xeayvu ryru oõ va'e mbotyarã ma remoõ 'rã teko vai ombogueatý.*

³⁵ Ha'e rã mesa ma cortina okẽ regua kyvõ rami 'rã remoõ. Tataendy 'y ma remoõ 'rã mesa renonde ombojeroviaaty yke kuaray puku-a katy. Ha'e rã mesa ma remoõ 'rã kuaray ijapu'a'ia katy.

³⁶ — Oo rokẽrã ma rejapo 'rã peteõ ajukue hovy va'e gui, púrpura, pytã va'e, ha'e ajukue iporãve va'e oipoka pyre gui, ombojegua kuaa va'e rembiapo.

³⁷ Ha'e va'e ajukue ytarã ma rejapo 'rã peteõ nhiruõ yvyra acácia guigua. Renhovãmba 'rã ouro py. Ijopyarã voi ouro guigua 'rã oõ. Ha'e va'e renderã ma overa va'e remboyku 'rã peteõ nhiruõ.

27

Êxodo 38.1-7

¹ — Ha'e gui altar-rã ma yvyra acácia gui 'rã rejapo. Ipuku-a ma mokoõ metros raxa'i, ipya ma ha'e rami ae ju, altar ijapy irundy va'e opyta aguã. Ha'e rã yvatea ma peteõ metro raxa'i 'rã.

² Ijapy irundyve re ma rejapo 'rã irundy rakua. Ha'e va'e ma altar reve peteõ'i gui ae 'rã rejapo. Ha'e renhovãmba 'rã overa va'e py.

³ Ha'e rejapo avi 'rã tanhimbu ryrurã, ha'e pá iky'a'o arã, hy'arã, ikuxa rakua ha'e tapyõ ryrurã. Hyrurã ha'e javive overa va'e gui meme 'rã rejapo.

⁴ — Hi'árygua ipokã rei va'erã ma rejapo 'rã overa va'e gui, kya xã ramigua. Irundyve apy reguarã ma rejapo 'rã irundy inhapyõ va'e overa'i va'e gui.

⁵ Ha'e va'e remoõ 'rã altar ryepy py yvy katy, altar mbyte peve ixã ovaõ aguã rami.

⁶ Altar peguarã rejapo avi 'rã yvyra po'il'i. Ha'e va'e yvyra po'il'i ma acácia gui 'rã rejapo, ha'e overa va'e py ju 'rã renhovã.

⁷ Yvyra po'il'i ma oõ 'rã inhapyõ va'e joavaive altar re oõ va'e re, peraa aguã.

* 26:34 Êxodo 25.21

⁸ Inhyvyí va'e rejapo 'rã yvyrape gui. Yvyty áry ndevy aexaague rami ae 'rã rejapo.

Êxodo 38.9-20

⁹ — Rejapo avi 'rã ombojeroviaaty rokarã. Kuaray puku-a katy oka rupi oĩ 'rã cortina ajukue iporãve va'e oipoka pyre gui. Jova-jovai re ipuku-a ma quarenta e cinco metros 'rã.

¹⁰ Ha'e va'e rupi oĩ 'rã vinte ijyta ha'e vinte omopyrõ aguã overa va'e guigua meme. Ha'e va'e ijyta re ity'aĩ, ha'e hi'áry ikarẽ va'e oĩ va'e ma prata guigua meme 'rã.

¹¹ Ha'e rami avi kuaray ijapu'a'ia katyguia voi cortina puku-a quarenta e cinco metros avi 'rã. Ha'e vinte ijyta, ha'e vinte omopyrõ aguã oĩ va'e voi overa va'e guigua meme 'rã. Ha'e rã ijyta re ity'aĩ, ha'e hi'áry ikarẽ va'e oĩ va'e ma prata guigua meme 'rã.

¹² Ha'e kuaray oikea katy ma oka pukukue rupi oĩ 'rã cortina vinte e dois metros oĩ va'e. Ijyta oĩ 'rã dez, ha'e omopyrõ aguã dez avi.

¹³ Ha'e rami ae avi oka kuaray oëa katyguia voi ipya vinte e dois metros 'rã.

¹⁴ Ha'e okẽ yke re cortina oĩ va'e ma sete metros 'rã. Ijyta ma mboapy 'rã oĩ, ha'e omopyrõ aguã voi mboapy 'rã.

¹⁵ Okẽ rovaigua re voi oĩ 'rã cortina sete metros va'e. Ijyta ma mboapy 'rã oĩ, ha'e omopyrõ aguã voi mboapy avi 'rã.

¹⁶ Ha'e oka rokẽrã ajukue oĩ va'e ma nove metros ipya 'rã. Ha'e va'e ma hovy va'e guigua, púrpura, pytã va'e ha'e ajukue iporãve va'e oipoka pyre guigua, ajukue ombojegua kuaa va'e rembiapo. Ijyta irundy 'rã, ha'e omopyrõ aguã voi irundy.

¹⁷ Ha'e javive ijyta oka rupi hi'aĩ va'e ma guive rã oguereko 'rã hi'áry rupi prata guigua. Ity'aĩ voi prata guigua, ha'e rã omopyrõ aguã ma overa va'e guigua 'rã.

¹⁸ Oka puku-a ma quarenta e cinco metros, ha'e ipya ma jova-jovai re cinqüenta metros. Yvatea ma dois metros raxa'i 'rã. Cortina oĩ va'e ma ajukue iporãve va'e oipoka pyre gui, ha'e omopyrõ aguã ma overa va'e guigua meme 'rã.

¹⁹ Ha'e javi tembiporu ombojeroviaaty py oiporu pyrã, ombota pyrã, ha'e oka rupi ombota pyrã voi overa va'e guigua meme 'rã.

Levítico 24.1-4

²⁰ — Aipo're 'rã Israel kuery pe togueru tataendyrã azeite oliveira gui anho ombota pyre, tata hendy riae oiny aguã.

²¹ Ha'e gui oguy nhemboaty oïaty py, xeayvu ryru renonde ajukue okẽ regua oĩ va'e kylvõ rami, ha'e py ma Arão ha'e ta'y kuery opena riae 'rã, ka'aru'i guive ko'ë aje'ive peve, SENHOR renonde. Ha'e rami ma Israel kuery rekorã opa e'ý va'erã, araka'e rã peve guarã.

28

Êxodo 39.1-31

¹ — Tou ndea py nderyke'y Arão ha'e ta'y kuery, Israel kuery gui aiporavo ha'e kuery ae sacerdote ikuai aguã, Arão, ha'e gui ta'y kuery Nadabe, Abiú, Eleazar ha'e Itamar.

² Nderyke'y Arão pe rejapo 'rã ao iky'a e'ý va'erã, omboetea aguã ha'e iporã aguã rami.

Sacerdote kuery aorã ojapo ukaague

³ — Ndeayvu avi 'rã avakue mba'emo ojapo kuaa va'e ha'e hexe nhe'ë imo'aranduarã amoña va'e ha'e javive pe, ha'e kuery ojapo aguã Arão aorã. Ha'e rami rã xevy guarã remboaxa 'rã, xevyguia sacerdote oiko aguã.

⁴ Po rami 'rã rejapo ijaorã: pexo regua, manto sacerdote pegua, kamixa puku árygua, kamixa puku ombojegua pyre, ngora oimama mbyre ha'e ku'akuua. Ao iky'a e'ý va'erã rejapo 'rã nderyke'y Arão ha'e ta'y kuery pe, xevyguia sacerdote ikuai aguã.

⁵ — Peru 'rã ouro, hovy va'e, púrpura, pytã va'e ha'e ajukue iporãve va'e,

⁶ pejapo aguã manto sacerdote peguarã ouro gui, hovy va'e, púrpura, pytã va'e ha'e ajukue iporãve va'e oipoka pyre gui, ojapo porã mbyre meme.

⁷ Ha'e va'e re oĩ 'rã mokoñ axi'y árygua. Mokoñve apy re 'rã oĩ, peteñ'i optya aguã.

⁸ — Iku'akuaa voi iporã aguã rami 'rã rejapo, sacerdote pegua manto áry oĩ va'erã, joo rami guarã. Mba'eta joo rami ae 'rã rejapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui.

⁹ Rejou 'rã mokoõ ita ônix regua. Ha'e va'e re rembopara 'rã Israel kuery rery.

¹⁰ Peteõ ita re rembopara 'rã mboapy meme tery, ha'e amboae ita re amboae mboapy meme ju 'rã rembopara ha'e kuery itui'ague rami.

¹¹ Ita re omba'eapo va'e ombopara 'rã, kuã reguarã omboparaa rami avi. Ha'e va'e mokoõ ita re rembopara 'rã Israel ra'y kuery rery ha'e javi. Ijyvýry rupi remboja 'rã ouro py.

¹² Mokoõve ita remoõ 'rã manto sacerdote pegua axi'y áry, ita Israel kuery re imoma'endu'a arã. Ha'e kuery rery ma Arão oaxi'y áry ogueraa 'rã SENHOR renonde ima'endu'a aguã.

¹³ Ouro gui rejapo 'rã ita renderã,

¹⁴ ha'e remoxã 'rã mokoõ corrente'i ouro ete'i gui. Ixã oipokaa rami 'rã reipoka. Ha'e va'e corrente'i oipoka pyre ma remboja 'rã ita renda re.

¹⁵ — Rejapo avi 'rã pexo regua oikuaa pota aguã va'erã iporã aguã rami, manto sacerdote peguarã rejapoague rami. Ouro gui, ha'e hovy va'e, púrpura, pytã va'e ha'e ajukue iporãve va'e oipoka pyre gui 'rã rejapo.

¹⁶ Irundy jovaive re, ha'e mokoõ rejapo 'rã. Ipuku-a ma peteõ po pukukue, ha'e ipya voi peteõ po pukukue avi 'rã.

¹⁷ Ha'e va'e re ma remoõ 'rã ita hendarã reve, ita irundy ryxy oĩ reve: jypy'igua ma sárdio, topázio ha'e carbúnculo. Ha'e va'e ma jypy'igua ryxy.

¹⁸ Mokoõ ryxya ma esmeralda, safira ha'e diamante.

¹⁹ Mboapy ryxya ma jacinto, ágata ha'e ametista.

²⁰ Ha'e gui irundy ryxya ma berilo, ônix ha'e jaspe. Henda ouro guigua oĩ 'rã imbojeguaarã.

²¹ Ha'e va'e ita oĩ 'rã Israel ra'y kuery rery oĩ aguã, hery doze va'e rami avi. Kuã reguarã rami 'rã rembopara, peteõ-teõ ita re hery oĩ aguã, doze regua ikuia rami.

²² Pexo regua peguarã rejapo 'rã peteõ corrente ixã rami, ouro guigua oipopẽ mbyre.

²³ Ha'e pexo regua peguarã rejapo 'rã mokoõ inhapyí va'e ouro guigua. Ha'e mokoõ inhapyí va'e remboja 'rã pexo regua apy re.

²⁴ Ha'e gui mokoõve corrente'i ouro guigua remboaxa 'rã mokoõ inhapyí va'e pexo regua apy re remoõ va'ekue rupi.

²⁵ Mokoõve corrente'i apy remboja 'rã mokoõve ita renda re, ha'e remoõ 'rã manto sacerdote pegua axi'y árygua renonde katy.

²⁶ Rejapo avi 'rã mokoõ inhapyí va'e ouro gui, ha'e remboja 'rã pexo regua apy mokoõve re, iguýry oĩ va'e rembe re, manto sacerdote pegua reve.

²⁷ Ha'e mokoõ ju 'rã rejapo inhapyí va'e ouro gui. Ha'e va'e ma remoõ 'rã mokoõve manto sacerdote pegua axi'y árygua re, henonde yvyíve'i, ijoapya oĩ va'e katy'i, iku'akuaa manto sacerdote pegua reve joo rami ojapo porã mbyre áry.

²⁸ Ha'e gui pexo regua re inhapyí va'e oĩ va'e ma rejokua 'rã inhapyí va'e manto sacerdote pegua re oĩ va'e hi'áry, peteõ xã hovy va'e py oĩ aguã manto sacerdote pegua ku'akuaa reve joo rami oĩ aguã. Pexo regua ndoja'oi 'rã manto sacerdote pegua gui.

²⁹ Ha'e rami vy Israel kuery rery Arão ogueraa 'rã pexo regua oikuaa pota aguã va'e, okuraxõ áry, henda iky'a e'ý va'e py oike ma vy, SENHOR renonde ima'endu'a riae aguã.

³⁰ — Ha'e gui pexo regua oikuaa pota aguã va'e re remoõ avi 'rã Urim ha'e Tumim,* Arão kuraxõ áry oĩ aguã SENHOR renonde oike ramo. Ha'e rami vy Arão okuraxõ áry ogueraa 'rã Israel kuery re oikuaa pota aguã, SENHOR renonde oike nhavõ.

³¹ — Ha'e sacerdote pegua manto reve guarã ma rejapo avi 'rã kamixa puku áry guarã hovy va'e gui anho.

* 28:30 Urim ha'e Tumim ma sacerdote kuery mba'ekuaa-a oguereko va'ekue (Números 27.21).

³² Mbyte py ma oĩ 'rã ijaju'y kuarã. Ha'e va'e hembe 'y rupi remoana 'rã tupyja ipererí'i va'e rami, oxoro e'ŷ aguã.

³³ Ha'e gui kamixa puku árygua rembe ha'e javi rupi rembojegua 'rã yvyra'a ra'angaa hovy va'e, púrpura ha'e pytã va'e gui ojapo pyre py. Mbyte rupi remoõ avi 'rã oparã'i va'erã ouro guigua.

³⁴ Kamixa puku árygua rembe ha'e javi rupi oĩ 'rã peteõ oparã'i va'e ouro guigua, ha'e peteõ yvyra'a ra'angaa, ha'e gui amboae oparã'i va'e ouro guigua, ha'e amboae ju yvyra'a.

³⁵ Ha'e va'e kamixa puku árygua py Arão onhemonde 'rã ombo'epo jave guarã, oparã'i va'e onhendu aguã henda iky'a e'ŷ va'e py oike nhavõ SENHOR renonde, ha'e oẽ ouvy rã guive, omano e'ŷ aguã.

³⁶ — Rejapo avi 'rã ipe va'e ouro ete'i guigua. Ha'e va'e ma rembopara 'rã "Iky'a e'ŷ va'e SENHOR peguarã" he'ia py, kuã reguarã omboparaa rami avi.

³⁷ Ha'e va'e re rejokua 'rã peteõ ixã hovy va'e reve akã regua oĩa rami avi, akã regua renonde ete py oĩ aguã.

³⁸ Ha'e va'e oĩ 'rã Arão rova áry, Israel kuery mba'emo iky'a e'ŷ va'e ome'ẽ va'ekue ogueraa vy ojeky'a'o uka aguã, hexe oĩ e'ŷ aguã jejavya. Ha'e nunga rupi oĩ riae 'rã Arão rova áry, ome'ẽ mbyre ombovy'a aguã SENHOR.

³⁹ — Rejapo 'rã kamixa puku ajukue iporãve va'e gui. Akã regua voi rejapo 'rã ajukue iporãve va'e gui, ha'e rã ku'akuua ma ajukue ombopara va'e ojapoa rami 'rã rejapo.

⁴⁰ — Arão ra'y kuery pe rejapo 'rã kamixa puku, ku'akuua ha'e akã regua, omboetea ha'e iporã aguã.

⁴¹ Ha'e va'e py ae 'rã remonhemonde nderyke'y Arão ha'e ta'y kuery. Hexe azeite remoõ reve remboaxa 'rã xevygua sacerdote iky'a e'ŷ va'erã.

⁴² Rejapo avi 'rã ha'e kuery kaxõrã ijapu'a'i va'e ajukue iporãve va'e guigua ojao'i aguã ipire reia. Iku'a guive hi'u peve 'rã oĩ.

⁴³ Ha'e va'e ma Arão ha'e ta'y kuery omoõ 'rã oguy nhemboaty oĩaty py oike nhavõ guarã, altar oĩa py ovaẽ vy henda iky'a e'ŷ va'e py ombo'epo aguã, ha'e kuery re jejavya oĩ e'ŷ aguã omano e'ŷ aguã. Ha'e rami aguã aeja hekorã opa e'ŷ va'e, ha'e hamymino kuery ikuaive jevy va'e rekorã.

29

Levítico 8.1-36

¹ — Po rami 'rã rejapo xevygua sacerdote-rã remboaxa aguã. Reru 'rã peteõ vaka ra'y ha'e mokoõ vexa'i ivaikue rei e'ŷ va'e,

² ha'e gui mbojape ha'e mbojape'i imbovua reveguia e'ŷ azeite reve omoapomo mbyre, ha'e gui mbojape'i imbovua reveguia e'ŷ azeite reve omoaký mbyre. Trigo ku'ikue iporãve va'e gui 'rã rejapo.

³ Ha'e va'e ma peteõ ajaka py 'rã remboyreru reru aguã. Reru avi 'rã vaka ra'y ha'e mokoõ vexa'i.

⁴ Ha'e gui rejapo 'rã Arão ha'e ta'y kuery oguy nhemboaty oĩaty rokẽ py ovaẽ aguã rami. Jypy rejoii 'rã yy py.

⁵ Ha'e rire ijaorã reru vy remonhemonde 'rã Arão kamixa puku py, hi'árygua, sacerdote pegua manto ha'e pexo regua py. Ha'e gui reku'a jokua 'rã ku'axã manto reguarã ojapo porã mbyre py.

⁶ Inhakã áry ma remoõ 'rã akã regua, ha'e akã regua áry ju 'rã remoõ coroa iky'a e'ŷ va'e.

⁷ Ha'e gui azeite SENHOR pe nhomboaxaa aguã regua reru vy renhoõ 'rã inhakã áry. Ha'e rami vy 'rã remoõ.

⁸ Ha'e va'e rire Arão ra'y kuery ju 'rã remonhemboja. Ha'e kuery re ma remoõ 'rã kamixa puku.

⁹ Arão ha'e ta'y kuery re ku'akuua ha'e akã reguarã reimama 'rã imoiny, sacerdote ikuai aguã guekorã opa e'ŷ va'e rupi. Ha'e rami py remboaxa 'rã Arão ha'e ta'y kuery xevy pegua sacerdote-rã.

¹⁰ — Ha'e oguy nhemboaty oīaty renonde peru 'rā vaka ra'y. Mymba akā re Arão ha'e ta'y kuery omoī 'rā opo.

¹¹ Rejyryvi kyxī 'rā SENHOR renonde, oguy nhemboaty oīaty rokē py ae.

¹² Ha'e gui vaka ra'y ruguy rejopy vy nekuā py reikyty 'rā altar rakua ikuai va'e re. Ha'e rā huguy rembyrekue ma renhoē 'rā altar yvypy rupi.

¹³ Ha'e gui reipe'apa 'rā ikyra hyepy rupi ojao'i imoiny va'ekue, ipy'akue, mokoīve ipyky raxī ha'e ikyra hexe oī va'ekue. Ha'e nunga reapypa 'rā altar áry.

¹⁴ Ha'e rā vaka ra'y ro'okue, ipire ha'e hye po'ikue ma pendekoa gui mombyry'i 'rā reapy. Ha'e va'e ma jejavya regua ome'ẽmbry.

¹⁵ — Ha'e rire ma Peru 'rā peteī vexa'i. Ha'e ramo inhakā re Arão ha'e ta'y kuery omoī 'rā opo.

¹⁶ Vexa'i rejyryvi kyxī 'rā, ha'e huguy remboyu vy renhoē 'rā altar yvýry jovaive rupi.

¹⁷ Vexa'i reipe'ã vy remboa'y-a'y 'rā. Hyepy ha'e hetymague rejoipa vy remoī 'rā ipēgue ha'e inhakāgue áry.

¹⁸ Ha'e rami meme 'rā vexa'i reapy altar áry. SENHOR pe reapy reve reme'ẽ 'rā, heakuā porā rā ojou porā aguā, SENHOR pe oapy vy ome'ẽ mbyrā.

¹⁹ — Ha'e gui amboae vexa'i rejopy ramo inhakā áry Arão ha'e ta'y kuery omoī 'rā opo.

²⁰ Rejyryvi kyxī 'rā vexa'i. Ha'e gui huguykue rejopy vy reikyty 'rā Arão ha'e ta'y kuery nambi oiporu kuaa regua apy re, ha'ekue rami ae avi ikuā guaxu ha'e ipyxā guaxu oiporu kuaa regua re. Huguy rembyrekue ma renhoẽmba 'rā altar yvýry jovaive rupi.

²¹ Rejopy 'rā huguy altar áry oī va'e ha'e azeite SENHOR pe nhomboaxaa aguā regua, ha'e remboayvipa 'rā Arão ha'e ijao re, ta'y kuery re ha'e ta'y kuery hexeve ikuai va'e ao re. Ha'e reiky'a'o uka aguā ijao reve, ha'e ta'y kuery hexeve ikuai va'e voi ha'e kuery ao reve.

²² — Ha'e gui reipe'a 'rā vexa'i kyrakue ha'e huguai kyrakue, ikyra hyepy rupi ojao'i imoiny va'ekue avi, ipy'akue, mokoīve ipyky raxīgue, ikyra hexe oī va'e ha'e hi'ugue oiporu kuaa regua, mba'eta vexa'i py reiky'a'o uka aguā,

²³ peteī mbojape imbovua rewegua e'ŷ, ha'e mbojape'i azeite rewegua ha'e mbojape'i kyrīve'i va'e SENHOR renonde oī va'e gui.

²⁴ Ha'e nunga ha'e javi reme'ẽ 'rā Arão ha'e ta'y kuery po py. Oupi reve ombovava 'rā SENHOR renonde ome'ẽ mbyrā.

²⁵ Ha'e gui ipo gui rejopy ju vy reapy 'rā altar áry. SENHOR pe 'rā reme'ẽ. Heakuā porā rā ojou porā aguā, SENHOR pe oapy vy ome'ẽ mbyrā.

²⁶ — Ha'e gui rejopy 'rā vexa'i reiky'a'o uka va'erā poxi'akue. Ha'e va'e ma Arão ojeky'a'o uka aguā. Oupi reve ombovava 'rā SENHOR renonde ome'ẽ mbyrā. Ha'e nunga ma ndevy guarā.

²⁷ Reiky'a'o va'ekue reupi vy rembovava reve reme'ẽ 'rā, ipoxi'akue ha'e hetyma rovaikue'i rembovava reve reme'ẽ va'ekue 'u ro'okue. Ha'e va'e ma vexa'i reiky'a'o uka rā guarā gui reipe'a 'rā Arão ha'e ta'y kuery peguarā.

²⁸ Ha'e va'e ma Israel kuery ome'ẽ riae 'rā Arão ha'e ta'y kuery pe, sacerdote peguarā ramo. Ha'e nunga Israel kuery ome'ẽ 'rā SENHOR pe peteī rami ikuiaia reguarā.

²⁹ — Ha'e ao iky'a e'ŷ va'e Arão oiporu va'ekue ma ta'y kuery pe ju 'rā peme'ẽ 'rā ndoikovei rire, ha'e kuery ju oiporu aguā ha'e kuery re azeite omoīa reve SENHOR pegua sacerdote-rā omboaxaa rā.

³⁰ Ta'y hekovia sacerdote-rā oiko aguā ma sete ára re 'rā onhemonde ha'e va'e py, oguy nhemboaty oīaty py oike vy henda iky'a e'ŷ va'e py omba'eapo aguā.

³¹ — Rejopy 'rā vexa'i SENHOR pe nhomboaxaa aguā regua, ha'e vy ho'okue rembojy 'rā henda iky'a e'ŷ va'e py.

³² Ha'e va'e ro'okue ma Arão ha'e ta'y kuery ho'u 'rā okuapy, ha'e oguy nhemboaty oīaty rokē py ajaka py mbojape remboyu va'ekue oī va'e gui.

³³ Ha'e kuery ho'u 'rā tembi'u teko vai ojao'i ukaa aguā regua, sacerdote-rā oiky'a'o uka ha'e omboaxaa aguā. Ha'e va'e tembi'u ma iky'a e'ŷ va'e ramo amboae regua ndo'ui 'rā.

³⁴ Xapy'a rei ko'ëgue peve ri hembyre xo'o e'ŷ vy mbojape nhomboaxaa aguã regua, reapypa 'rã tata py. Nda'evei pe'u aguã, iky'a e'ŷ va'e ramo.

³⁵ — Ha'e rami rejapo 'rã Arão ha'e ta'y kuery pe. Ajapo ukaague rami meme 'rã rejapo. Sete ára re 'rã remboaxa sacerdote-rã.

³⁶ Ko'ë nhavõ rerekó katu 'rã peteí vaka ra'y jejavya regua ome'ë mbyrã, imbogue arã. Ha'e va'e py reiky'a'o uka 'rã altar, ha'e va'e rire jejavya regua ome'ëmby py teko vai reja'o'i uka aguã. Hexe azeite remoï 'rã SENHOR peguarã remboaxa aguã.

³⁷ Sete ára re 'rã reiky'a'o uka altar, remboaxa vy. Ha'e rami rire altar iky'a e'ŷ ete va'erã, ha'e hexe ový va'e ma guive rã iky'a e'ŷ va'e avi 'rã optya.

Números 28.1-8

³⁸ — Pova'e ma reme'ë riae 'rã altar áry: ko'ë nhavõ mokoï vexa'i ra'y peteí ma'etÿ oguereko va'e.

³⁹ Peteí vexa'i ra'y reme'ë 'rã aje'ivekue, ha'e rã amboae ma kuaray oike jave.

⁴⁰ Peteí vexa'i ra'y reve reme'ë avi 'rã peteí ryru trigo ku'ikue iporâve va'e peteí litro azeite ombota pyre reve omoapomo mbyre, ha'e renhoë 'rã peteí litro vinho.*

⁴¹ Ha'e gui amboae vexa'i ra'y ma kuaray oike jave rejuka 'rã aje'ive guare rami tembi'u reme'ë aguã mba'emo renhoë reve. Ha'e nunga ma heakuã iporã rã SENHOR ojou porã aguã, ixupe oapy vy ome'ëmby.

⁴² Ha'e rami ae araka'e rã peve peneramymino kuery mba'emo oapy vy ome'ë 'rã, oguy nhemboaty oïaty rokë py xee SENHOR renonde. Ha'e py ae xee arovaexí 'rã, ndereve xeayvu aguã ha'e py.

⁴³ Ha'e py ae aju 'rã Israel kuerya py, xerexakãa py aiky'a'o aguã.

⁴⁴ Ha'e rami vy aiky'a'o 'rã oguy nhemboaty oïaty ha'e altar, ha'e gui Arão ha'e ta'y kuery guive, xevygua sacerdote ikuai aguã.

⁴⁵ Xee aiko 'rã Israel kuery mbyte rupi, Tuuete aiko 'rã.

⁴⁶ Ha'e rami rire ha'e kuery oikuaapa 'rã xee ae SENHOR Tuuete aikoa, Egito yvy gui araa jepe va'ekue, ha'e kuery mbyte rupi aiko aguã. Xee ma SENHOR ha'e kuery Ruete.

30

Êxodo 37.25-28

¹ — Ha'e gui rejapo avi 'rã peteí altar heakuã porã va'e peapy atyrã. Yvyra acácia gui 'rã rejapo.

² Ipuku-a ma meio metro va'erã, ha'e ipya ma ha'e rami ae avi 'rã, ijapy irundy va'e. Ha'e rã yvatea ma mokoï metro 'rã. Hexe hakua ikuai va'e ma hexeve peteí'i rami 'rã rejapo.

³ Ouro ete'i py renhovã 'rã yvatevea rupi, imbotyarã jobaive re ha'e hakua ikuai va'e. Ijyvýry rupi rembojegua 'rã ouro guigua py.

⁴ Ha'e gui rembojeguaague yvyíve'i rejapo avi 'rã mokoï inhapyí va'e ouro guigua. Jovaive re 'rã remoï. Ha'e va'e rupi remboaxa 'rã yvyla po'i'i altar peraa aguã.

⁵ Yvyra po'i'i ma rejapo 'rã acácia gui, ha'e renhovã 'rã ouro py.

⁶ Altar ma remoï 'rã xeayvu ryru renonde ajukue okë regua oï va'e kyvõ rami, teko vai ombogueat yxeayvu ryru oï va'e rexei. Ha'e py ndereve aïjepi 'rã.

⁷ Ha'e va'e altar áry ma Arão oapy 'rã heakuã porã va'e, ko'ë tataendy omoatyrõ nhavõ.

⁸ Ha'e gui pytú'i jave tataendy omoendy vy ha'ekue rami ae ju 'rã oapy. Ha'e rami py heakuã porã va'e oï riae 'rã SENHOR renonde, peneramymino jevy-jevy jave guarã.

⁹ Ha'e va'e áry ma nda'evei reapy aguã amboae ramigua heakuã porã va'e, neñ amboae regua ome'ëmby nda'evei hi'áry reapy reve reme'ë aguã, neñ mba'emo ra'yigue voi. Nda'evei avi mba'emo hi'áry renhoë reve reme'ë aguã.

¹⁰ Ma'etÿa nhavõ peteigüe'i altar áry hakua ikuai va'e re Arão ojao'i uka 'rã pejejavyague mymba ojuka va'ekue ruguy py. Ma'etÿa nhavõ peteigüe'i ojao'i uka 'rã hi'áry. Ha'e va'e ma SENHOR pegua iky'a e'ŷ ete va'e, peneramymino jevy-jevy peguarã.

Guekovia peráta ome'ë aguã re ijayvuague

* 29:40 Apy "peteí ryru" 'ea py ma mokoï litro va'e jaikuua aguã, trigo ri rã peteí quilo va'e.

¹¹ Ha'e gui SENHOR aipoe'ive ju Moisés pe:

¹² — Ha'e gui Israel kuery reipapa ramo ma peteī-teī SENHOR pe ome'ẽ 'rā guekovea repyrā oipapaa jave. Ha'e kuery mbyte imoingo axyarā oiko e'ŷ aguã, reipapa ma rire.

¹³ Reipapa va'e ma guive rā ome'ẽ 'rā po rami: hatā'i va'e seis grama va'e, henda iky'a e'ŷ va'e py oiporupy ipoyi va'e rami (ha'e va'e regua ma doze gramas ipoyia). Seis grama va'e ae 'rā ome'ẽ SENHOR pe.

¹⁴ Vinte ma'etŷ va'e guive tujakue peve ojepapa uka vy SENHOR pe ome'ẽ 'rā ha'e va'e regua ae.

¹⁵ Oguerekopa va'e ma ome'ẽ aguã va'ekue gui nome'ẽvei 'rā, neī iporiaukue'i voi mbovyve'i nome'ẽi 'rā SENHOR pe, pendereko vaiague pejao'i uka aguã.

¹⁶ Pejopy 'rā peráta pejao'i uka aguã repy Israel kuery gui, ha'e peme'ẽ 'rā oguy nhemboaty oĩaty rupi omba'epo va'e pe. Ha'e va'e ma pejapo 'rā SENHOR renonde Israel kuery re ima'endu'aa aguã, pendereko vaiague pejao'i uka vy.

Êxodo 38.8

¹⁷ Ha'e gui SENHOR aipoe'ive ju Moisés pe:

¹⁸ — Overa va'e gui rejapo 'rā peteī yy mbotyarā, mba'emo pejoi aguã. Hendarā voi ejapo overa va'e gui avi. Ha'e va'e ma remoī 'rā oguy nhemboaty oĩaty ha'e altar oĩ va'e mbyte py. Ha'e va'e py remoī 'rā yy.

¹⁹ Ha'e va'e py ma Arão ha'e ta'y kuery ojoi 'rā opo ha'e opy.

²⁰ Oguy nhemboaty oĩaty py ha'e kuery oike vy yy py ojepoei, ha'e opy ojoi 'rā omano e'ŷ aguã, ha'e altar oĩa py ovaẽ vy mba'emo omoī aguã, ha'e SENHOR pe omoendy aguã mba'emo oapy vy omboaxa va'erā.

²¹ Opo ha'e opy ha'e kuery ojoi 'rā omano e'ŷ aguã. Ha'e rami aguã oĩ 'rā hekorā opa e'ŷ va'e, ha'e kuery ha'e hamymino kuery ikuai jevy va'e peguarā.

Êxodo 37.29

²² Ha'e gui SENHOR aipoe'ive ju Moisés pe:

²³ — Ha'e gui heakuã porâve va'e regua reru 'rā mirra rykue mboapy meme quilos poyikue, cinamomo heakuã porâva'e ma mbyte rupi 'rā mboapy quilos va'e, ha'e gui cálamo heakuã porâva'e ma mboapy quilos va'e avi 'rā,

²⁴ ha'e cássia ma mboapy meme quilos va'e henda iky'a e'ŷ va'e py poyi oiporu va'ety rami ipoyi va'e, ha'e gui azeite oliveira guigua ma peteī galão va'e.

²⁵ Ha'e nunga gui ma rejapo 'rā azeite iky'a e'ŷ va'e SENHOR pe nhomboaxaa aguã regua, heakuã porâva'e apoa rembiapo. Ha'e va'e nunga ma azeite iky'a e'ŷ va'e SENHOR pe nhomboaxaa aguã regua.

²⁶ Ha'e va'e ma oguy nhemboaty oĩaty re 'rā remoī remboaxy vy, ha'e gui xeayvu aeja va'ekue ryru re,

²⁷ mesa hembiporu ha'e javi reve, tataendy 'y hembiporu ha'e javi reve, altar heakuã porâva'e oapyaty,

²⁸ altar mba'emo oapyaty hembiporu ha'e javi reve, ha'e hy'a re remoī avi 'rā, henda re guive.

²⁹ Ha'e nunga ha'e javi ma SENHOR peguarā remboaxa 'rā ha'e rami, iky'a e'ŷ ete va'e optya aguã. Opa mba'e hexe ovv va'e avi 'rā iky'a e'ŷ va'e optya.

³⁰ Azeite ma Arão ha'e ta'y kuery re avi 'rā remoī, xevygua sacerdote-rā remboaxa vy.

³¹ Ha'e aipo're 'rā Israel kuery pe: "Kova'e ma azeite iky'a e'ŷ va'e xee SENHOR pe nhomboaxaa aguã regua, pende kuery ha'e araka'e rā peve ikuai va'e peguarā.

³² Nda'evei ava sacerdote e'ŷ va'e re pemoī aguã, neī ha'e ramigua nda'evei pejapo aguã ha'e va'e guigua gui ju. Iky'a e'ŷ va'e vy iky'a e'ŷ ae 'rā pendevy kuery pavē pe.

³³ Ha'e va'e azeite ramigua rive amongue ojapo, ha'e e'ŷ vy amboae regua re omoī va'ekue ma oipe'aa 'rā heta va'e kuerya gui", 're 'rā ha'e kuery pe.

Heakuã porâva'e iky'a e'ŷ va'erā ojapo ukaague

³⁴ SENHOR aipoe'ive ju Moisés pe:

— Ejopy joo ramigua e'ŷ-e'ŷ heakuã porã va'e irûrã estoraque, ônica ha'e gálbano. Ha'e va'e ma remboje'a 'rã heakuã porã va'e re, peteĩ-teĩ guigua peteĩ rami meme 'rã ipoyi va'e.

³⁵ Ha'e va'e gui rejapo 'rã heakuã porã va'e, ha'e nunga apoa rembiapo rami. Remoirû 'rã juky reve, ha'e gui irû e'ŷ va'e ha'e iky'a e'ŷ optya aguã.

³⁶ Ha'e va'e regua amongue ma remongu'i vy remoĩ 'rã oguy nhemboaty oïaty py xeayvu ryru oï va'e rexei. Ha'e va'e ma peẽ kuery pavẽ pe iky'a e'ŷ va'erã ete.

³⁷ Ha'e va'e heakuã porã va'e pejapo va'e rami ju nda'evei pendejeupe guarã pejapo aguã. Iky'a e'ŷ va'e ma SENHOR pegua ae 'rã.

³⁸ Amongue ha'e ramigua gueakuãrã rive ojapo va'e ma oipe'aa 'rã heta va'e kuery mbyte gui.

31

Êxodo 35.30-36.1

¹ Ha'e gui SENHOR aipoe'ive Moisés pe:

² — Aenoĩ hery rupi Judá regua Uri ra'y Bezalel, Hur ramymino.

³ Ha'e va'e re ma xenhe'ẽ amoĩ amo'arandu ha'e mba'emo aikuua uka vy, tembiapo ha'e javi ojapo kuaa aguã rami,

⁴ o'arandu rupi mba'emo ra'angaa ojapo aguã ouro, prata ha'e overa va'e gui,

⁵ ha'e ita jeguarã ombole porã aguã, vyryra gui guive mba'emo ojapo aguã, ha'e tembiapo porã ha'e javi rupi ombo'epo aguã.

⁶ Ha'e va'e irûrã ma amoĩ Dã regua Aisamaque ra'y Aoliabe. Ha'e avakue mba'emo ojapo kuaa va'e ha'e javi pe amo'arandu ajapo uka va'e ha'e javi ojapo kuaa aguã:

⁷ oguy nhemboaty atyrã, ha'e xeayvu ryrurã, ha'e imbotya tekó vai ombogue atyrã, ha'e oguy rupi tembiporu oï va'erã ha'e javi:

⁸ mesa hembiporu ha'e javi reve, tataendy 'y ouro ete'i guigua hembiporu ha'e javi reve, altar heakuã porã va'e oapy atyrã,

⁹ altar mba'emo oapy atyrã hembiporu ha'e javi reve, hy'a guaxu henda reve,

¹⁰ ao ipererí'i va'e oipoka pyre, ao iky'a e'ŷ va'e sacerdote Arão ha'e ta'y kuery peguarã sacerdote ikuai aguã,

¹¹ azeite SENHOR pe nhomboaxaa aguã regua, ha'e heakuã porã va'e henda iky'a e'ŷ va'e pygumarã. Ha'e kuery ma xee ajapo ukaague rami meme 'rã ojapo.

Sâbado ára ha'e itape ayvu oïa re ijayvuague

¹² Ha'e gui SENHOR aipoe'ive ju Moisés pe:

¹³ — Israel kuery pe ndeayvu vy aipo'ere 'rã: “Pendekuai 'rã xevygua sâbado ára pygumarã aeja va'ekue rupi. Mba'eta xee ha'e peẽ kuery reve guarã aeja peikuaa aguã, peneramymino kuery araka'e rã ikuai va'erã pe guive, xee ae SENHOR pendeky'a'oa aikoa peikuaa aguã.

¹⁴ Ha'e nunga rupi ae pendekuai 'rã sâbado ára pygumarã aeja va'ekue rupi, mba'eta iky'a e'ŷ va'e pêvy. Ha'e rã ha'e va'e ára py onhemongy'a va'e ma omano 'rã. Ha'e va'e ára mba'emo ojapo nho va'e oipe'aa 'rã heta va'e kuery mbyte gui.

¹⁵ Seis ára re 'rã pemba'epo. Ha'e rã sete araa ma sâbado SENHOR pegua iky'a e'ŷ va'e pepytu'u aguã. Sâbado ára py mba'emo ojapo va'e omano 'rã.

¹⁶ Ha'e nunga rupi Israel kuery sâbado ára py ikuai 'rã ha'e rami, xereve guarã ajapo va'ekue opa e'ŷ va'e re ima'endu'a reve araka'e rã peve.

¹⁷ Ha'e nunga xee ha'e Israel kuery reve guarã aeja araka'e rã peve guarã ha'e kuery oikuua aguã. Mba'eta seis ára re xee SENHOR ajapo raka'e yva ha'e yvy. Ha'e gui sete araa py ma apytu'u mba'eve ndajapovei vy", 're 'rã ha'e kuery pe — he'i.

¹⁸ Ha'e gui Moisés reve SENHOR Sinai vyty áry ijayvupa ma rire ixupe ome'ẽ mokoĩ itape ijayvu oïa. Ha'e va'e itape ma Nhanderuete ha'e ae okuã py ombopara va'ekue.

32

¹ Ha'e gui yvyty gui Moisés ndoui ete maa heta va'e kuery oexa vy oupa okuapy Arão-a py. Ha'e vy aipoe'i ixupe:

— Epu'ã ke, ejapo tuuete ramigua nhanerenonde oo va'erã. Ha'e gui Moisés Egito yvy gui nhanerenoë va'ekue ri ndajaikuai mba'e pa hexe oiko raka'eague. *

² Arão ombovai:

— Pemboipa ha'vy namixã ouro guigua pendera'yxy nambi gui, pendera'y kuery ha'e penderajy kuery gui. Ha'e vy peru ju — he'i.

³ Ha'e ramo heta va'e kuery ha'e javi onambi gui namixã omboipa vy ogueru Arão-a py.

⁴ Ha'e kuery po gui ouro ojopy vy omoatyrõ tembiporu py. Tata py omboy rire ojapo peteï vaka ra'y. Ha'e ramo ha'e kuery aipoe'i okuapy:

— Israel kuery, kova'e ae ma penderuete Egito yvy gui penerenoë va'ekue — he'i okuapy.

⁵ Ha'e nunga Arão oexa vy ta'angaa renonde ojapo peteï altar. Ha'e vy ijayvu atã reve aipoe'i:

— Ko'ẽ ramo ma oiko 'rã ngaru SENHOR pegua — he'i.

⁶ Ko'ẽ jevy iko'ẽmba okuapy vy ha'e nunga pe mba'emo oapy vy ome'ẽ okuapy, peteï rami ikuia regua avi. Ha'e vy oguapy okuapy okaru ha'e oy'u aguã, ha'e gui opu'ã ma okuapy ovy'a aguã.*

⁷ Ha'e ramo SENHOR aipoe'i Moisés pe:

— Tereo, eguejy ju, mba'eta neretarã kuery Egito gui renoë va'ekue ojejavypa ju ma.

⁸ Ha'e kuery ojepe'a pojava tape xee aeja va'ekue gui. Ojeupe guarã ojapo uka okuapy vaka ra'y tata py. Ha'e va'e anho omboete vy ixupe mba'emo ome'ẽ okuapy. Ha'e vy aipoe'i: “Israel kuery, kova'e ae ma penderuete Egito yvy gui penerenoë va'ekue”, he'i va'ekue.

⁹ SENHOR aipoe'ive ju Moisés pe:

— Ha'e kuery aexa rã inhakã ratã okuapy.

¹⁰ Aÿ ma xereja, xepoxya rupi tareko amokanhymba peve, ha'e gui ndegui ju ajapo 'rã peteï regua heta ikuai aguã rami.

Êxodo 32:30-35; Deuterônômio 9:25-29

¹¹ Ha'e ramo Moisés ojerure SENHOR nguuete pe. Ha'e vy aipoe'i:

— Mba'e re tu ndepoxy ri ndevygua kuery opa mba'e re ndepo'akaa rupi Egito yvy gui rerupa va'ekue rovai?

¹² Mba'exa tu ha'eve 'rã Egito pygua kuery ijayvu vy “Apy gui ma tuuete ogueraapa yvyty re ojukapa aguã, ha'e yvy áry gui omokanhymba aguã”, he'i okuapy aguã? Ndepoxya rupi e'ý ke eiko, ejapo vai eme ndevygua kuery rovai.

¹³ Nema'endu'a ke Abraão, Isaque ha'e Israel re. Ha'e kuery nerembiguai ikuai va'e pe ndee ae rery rupi reura vy “Amboeta 'rã neramymino kuery jaxy-tata hetaa rami. Ha'e gui kova'e yvy ha'e javi xeayvuague ame'ẽ 'rã neramymino kuery rekoarã araka'e rã peve”, 're va'ekue — he'i.

¹⁴ Ha'e rami rã ojeupegua kuery pe SENHOR ndojapoi ojapo vai aguã re ijayvuague.

¹⁵ Ha'e gui Moisés yvyty gui ojevy vy opo py ogueroguejy mokoĩ itape Nhanderuete ayvu oña. Ha'e va'e itape ma jovaive re ipara oiny va'e.

¹⁶ Itape ma Nhanderuete rembiapo, iparaa oĩ va'e ma Nhanderuete ae ombopara va'ekue itape re.

¹⁷ Ha'e gui Josué ma heta va'e kuery ojapukaia oendu vy aipoe'i Moisés pe:

— Joe opu'ãmbaa py hevovo rei nhendu okuapy ha'e kuery ikuaiia py.

¹⁸ Moisés ombovai:

— Joe ipo'aka va'ekue onhendua e'ý, neĩ oity pyre onhendu e'ý guive. Oporaei va'e rima aendu — he'i.

¹⁹ Heta va'e kuery ikuaiia py ovaẽ rai'i vy oexa vaka ra'y ra'angaa hi'aĩ rã, ha'e ojeroky va'e. Ha'e rami vy ipoxya oendu vy itape omombo vy omboa'ypa yvyty yvy'iry.

* 32:1 Atos 7:40 * 32:6 1 Coríntios 10:7

²⁰ Ha'e gui vaka ra'y ojapo pyre ojopy vy oapypa tata py. Omongu'i porã'i vy omoaĩ yy áry rupi. Ha'e rami vy Israel kuery pe ome'ẽ oy'u aguã.

²¹ Moisés oporandu Arão pe:

— Mba'e tu ha'e kuery ojapo ndere ha'e rami ete ojejavypa aguã rami rejapo aguã?

²² Arão ombovai:

— Xeruvixa, ndevai eme xevy. Reikuua ma ha'e kuery py'a re teko vai anho oĩa.

²³ Mba'eta xevy aipoe'i okuapy: “Ejapo tuuete orevy orerenonde oo va'erã. Ha'e rami avi ava Moisés Egito yvy gui nhanerenoẽ va'ekue ri nhande ndajaikuai mba'e pa hexe oiko raka'ea”, he'i okuapy va'ekue.

²⁴ Ha'e ramo aipoa'e ha'e kuery pe: “Ouro perekó va'e ke peipe'a ha'e peme'ẽ xevy”, 're. Ha'e gui ma tata py xee amombo ramo rive kova'e vaka ra'y ra'angaa oiko — he'i.

Tuuete ramigua mboetea kuery Moisés ojuka ukapaague

²⁵ Ha'e ramo Moisés oexa rã heta va'e kuery ndojejokoi okuapy, ha'e kuery ae oakã guíkuai aguã rami Arão oeja rire oximba aguã rami, ngovaigua kuery mbyte ae tei.

²⁶ Ha'e rami vy Moisés opu'ã ho'amy ha'e kuery ikuiaia py oikea py. Ha'e vy aipoe'i:

— SENHOR-a katygua peiko va'e ke peju xea py — he'i. Ha'e gui oĩa py ono'õmba jogueruvy Levi ramymino kuery ha'e javi.

²⁷ Ha'e va'e kuery pe aipoe'i:

— Po rami ma SENHOR Israel kuery ruete aipoe'i: “Petei-tei pemoi ke pendekyxe pendeku'a re. Peaxa-axa 'rã heta va'e kuery ikuiaia ha'e hoké ha'e javi rupi. Petei-tei pejuka 'rã penderyvy, peneiru ha'e pendea katy'igua”, he'i.

²⁸ Ha'e ramo Moisés ojapo ukaague rami Levi ramymino kuery ikuai. Ha'e va'e ára rãnda'u três mil avakue ho'a heta va'e kuery regua,

²⁹ Moisés aipoe'i rire: “Kova'e ára ma SENHOR pe anho 'rã pendekuai, petei-tei pendera'y kuery e'ý vy penderegua kuery rovai peiko tei, kova'e ára guive penemoingo porã ju aguã”, he'i rire.

Êxodo 32.11-14; Deuterônômio 9.25-29

³⁰ Ko'ẽ jevy Moisés aipoe'i heta va'e kuery pe:

— Peẽ kuery ma pejejavvy vaipa. Ha'e rami tei aý ma aa ju ta SENHOR-a py, pejejavvyague ambogue ukapa aguã — he'i.

³¹ Ha'e gui Moisés SENHOR-a py ju oo. Ha'e vy aipoe'i:

— Ma'ẽ, kova'e kuery ojejavvy vaipa okuapy nguueterã ouro guigua ojapoa py.

³² Aý ma ajerure ojejavvyague rembogue aguã re. Ha'e rami e'ý vy embogue xerery kuaxia rembopara va'ekue gui — he'i.

³³ Ha'e ramo SENHOR aipoe'i Moisés pe:

— Xerovai ojejavvy va'ekue anho 'rã ambogue xekuaxia gui.

³⁴ Ha'e rã tereo aý, eraapa ha'e kuery xeayvuague katy. Xevygua anjo oo 'rã neronden. Ha'e rami avi xee ajekuaa ára ambopagapa 'rãxe vy ojejavvy va'ekue — he'i.

³⁵ Ha'e rami vy SENHOR omoingo axy, Arão pe ha'e kuery vaka ra'y ra'angaa ojapo uka rire.

33

Ha'e kuery renonde Nhandeuete guigua anjo omondouka aguã re ijayvuague

¹ Ha'e gui SENHOR aipoe'i ju Moisés pe:

— Tapeo apy gui ndee ha'e Egito yvy gui reipe'apa va'ekue ha'e javi reve. Peguata 'rã yvy Abraão pe, Isaque ha'e Jacó pe ame'ẽ aguã re aura reveague katy, “Neramymino kuery pe 'rã ame'ẽ”, ha'eague rami vy.

² Ha'e rami vy petei anjo neronden amondouka vy aipe'apa 'rã cananeu kuery, amorreu, heteu, ferezeu, heveu ha'e jebuseu kuery.

³ Tapeo yvy kamby ha'e ei oata e'ýa katy. Ha'e rami avi peneakã ratã ete ramo xee ma ndaai 'rã peẽ kuery reve, tape rupi apomomba e'ý aguã — he'i.

⁴ Ha'e rami ijayvu rā heta va'e kuery oendu vy ojae'opa okuapy, ojee jegua omoī va'ekue omboipa guive,

⁵ mba'eta Moisés pe SENHOR aipoe'i rire:

— Aipo'ere ke Israel kuery pe: “Peē kuery peneakā ratā ete va'e. Xapy'a'i penembyte aa teī ma apomokanhymba 'rā. Ha'e nunga rupi pendejegui pemboipa jegua pemoī va'ekue. Ha'e ramo 'rāe aikuua mba'e pa ajapo aguā”, 're 'rā ha'e kuery pe — he'i va'ekue.

⁶ Ha'e rami rā Israel kuery omboipa jegua oiporu va'ekue ha'e javi, Horebe yvyty re ovaēa ára guive nomoīvei.

⁷ Moisés ma ha'e ae'i oī aguā oo'i ogueraa 'rā heta va'e kuery ikuiaia gui mombyry'i. Ha'e py ju 'rā omopu'ā. Ha'e va'e pe “Oguy nhemboaty oīaty” 'ea 'rā. SENHOR re ojerovia va'e ha'e javi 'rā oje'oi oguy nhemboaty oīaty katy. Heta va'e kuery ikuiaia gui mombyry'i oī.

⁸ Oo'i oīa katy Moisés oē ov y ramo heta va'e kuery peteī-teī opu'āmba 'rā okuapy ngoo rokē py, hakykue katy gui oma'ē 'rā okuapy oo py oike peve.

⁹ Moisés opy oī ramove arai opu'ā va'e oguejy 'rā hi'áry, oo rokē py ju 'rā optyta oiny. Ha'e rami vy SENHOR ijayvu 'rā Moisés reve.

¹⁰ Pavē rei oexa okuapy arai opu'ā va'e okē py optyta rā. Ha'e rami vy ae peteī-teī ngoo rokē py opu'āmba 'rā okuapy SENHOR omboete vy.

¹¹ Moisés reve SENHOR ijayvu 'rā oiny jova re oma'ē reve oirū reve ijayvu va'e rami. Ha'e gui ma Moisés ojevy ju 'rā heta va'e kuery ikuiaia py. Ha'e rā hembiguai kunumi Num ra'y Josué va'e ma oo'i gui ndojepé'ai oikovy.

Ha'e kuery reve Nhanderuete oiko aguā re Moisés ojerureague

¹² Ha'e gui Moisés aipoe'i SENHOR pe:

— Ndee ma “Eraa kova'e kuery”, 're teī xevy neremombe'ui guive mava'e ete'i pa xerupive remondouka 'rāa. Xevy aipo're: “Nderery rupi xee roikuua, ha'e xerembiexa rupi avi romboaxy”, 're va'ekue xevy.

¹³ Ha'e nunga rupi aŷ xemboaxya rendu ramo ajerure nderekō reikuua uka aguā xevy, ha'e rami xee voi roikuua porā aguā, ha'e ndee xemboaxya rupi ete aiko aguā. Ha'e nema'endu'a avi kova'e kuery ndevyguia ae ikuiaia re — he'i.

¹⁴ Ombovai:

— Xee ae ma aa 'rā ndereve, ha'e ame'ē 'rā nekane'ōguia aguā — he'i.

¹⁵ Ha'e ramo Moisés aipoe'i:

— Xerupive ndereo reguai vy oremondouka eme apy gui.

¹⁶ Ha'e rami e'ŷ ramo mba'eda vy tu oikuua ta nerembiexa rupi xee ha'e ndevyguia kuery oremboaxy? Mba'eta orereve reiko ramo 'rāe yvy regua kuery reko rami e'ŷ orekuai.

Nhanderuete guexakāa oexa uka aguā re Moisés ojerureague

¹⁷ SENHOR aipoe'i Moisés pe:

— Xee ajapo avi 'rā ndeayvuague ramo, mba'eta xee romboaxy, nderery rupi roikuua guive.

¹⁸ Moisés ojerure:

— Ajerure nerexakāa rexu uka aguā xevy.

¹⁹ Ombovai ju:

— Ajapo 'rā nerendone xeporayvua ha'e javi oaxa aguā ramo, ha'e ndevy amombe'u porāve 'rā xerery SENHOR. Mba'eta amboaxy 'rā xee amboaxyxe va'e, xemboaxya ramo areko 'rā ha'e rami arekoxe va'e.*

²⁰ Ha'e rā xerova ma nda'evei rexu uka aguā, mba'eta xerova oexa va'e ndoikovei 'rā.

²¹ SENHOR aipoe'ive ju:

— Apy xeyvy'iry oī peteī itaova, ha'e va'e áry ndee reī aguā.

²² Ha'e gui xepo'akaa oaxa ramo ma xee romoī 'rā ita pa'ū oī va'e py, ha'e xepo py rojao'i 'rā xee aaxa peve.

* 33:19 Romanos 9.15

²³ Ha'e gui xepo aipe'a ramo xerexa 'rā, teī xekupe katy gui rive. Ha'e rā xerova ma nderexai 'rā.

34

Deuteronômio 10.1-5

¹ Ha'e gui SENHOR aipoe'i Moisés pe:

— Mokoī ju ke embope itaperā jypy'i guare rami. Ha'e va'e re ma xee ambopara uka 'rā ayvu ha'ekue ae itape rembovopa va'e re oī va'ekue.

² Eiko katu ha'vy ko'ē rā guarā, aje'ivekue Sinai yvyty re reē ju aguā. Ha'e py ma rejexa uka jevy 'rā xevy, yvyty apyte áry ae.

³ Ha'e rami avi avave rei toē eme ndereve, neī toiko eme yvyty ha'e javi re. Ijyvýry rupi vexa'i, neī vaka ma voi nda'evei omongaru aguā — he'i.

⁴ Ha'e rami rā Moisés ombope mokoī ita, jypy'i guare rami. Ha'e gui ko'ē rai ma jave opu'ā vy oē ju ov yvyty re, SENHOR ijayvuague rami vy. Opo py ogueraa mokoī itaperā omoatyrō va'ekue.

⁵ Ha'e gui SENHOR arai rupi oguejy vy hexeve hi'aī ha'e py. Ha'e rami vy guery SENHOR omombe'u porāve reve

⁶ oaxa ov yvy henonde re. Ha'e vy ijayvu:

— SENHOR, SENHOR Penderuete aiko va'e ma nhomboaxy va'e, poroayvu va'e, ipoxy voi e'ŷ va'e, opa mba'e py iporayvupa va'e ha'e ojeroviapy aiko.

⁷ Mil-kue peneramymino ikuiaia peve areko 'rā xeporayvua rupi. Ambogue 'rā guive ha'e kuery reko vaia, ha'eve'ŷa rami ikuiaia ha'e ojejavya ha'e javi. Ha'e rami avi heko vai va'e ma nambopaga e'ŷi 'rā. Ha'e rami vy tuu kuery reko vaiague regua ma ta'y kuery ha'e hamymino kuery re ju 'rā ambou, mboapya ha'e irundaya ikuiaia peve — he'i.

⁸ Ha'e rami SENHOR ijayvu ramove Moisés yvy py guenapy'ā re oī vy omboete.

⁹ Ha'e vy aipoe'i:

— SENHOR, xapy'a rei aŷ nerembiexa rupi xemboaxy ri vy eiko ha'vy ore kuery mbyte rupi. Ore kuery oreakā ratā ete va'eri emboguepa ke orerekovaiaty ha'e rojejavyague. Ha'e orereraa ndejeupe guarā.

Deuteronômio 7.1-5

¹⁰ Ha'e ramo aipoe'i:

— Xee ma heta va'e kuery reve xereve guarā ajapo vy ha'e kuery ha'e javi renonde 'rā ajapo mba'emo iporā ete va'e. Ha'e nunga iporā ete va'e ma neī peteī henda py, neī peteī regua renonde ma voi ndojapoai teri. Peva'e kuery mbyte reikoa va'e, ha'e kuery ha'e javi toexa xee SENHOR ajapo va'e, mba'eta mba'emo vaipa ete 'rā ajapo rombovai vy.

¹¹ Penderexarai eme ange xeayvuague re. Mba'eta penerenonde gui amoxēmba 'rā amorreu, cananeu, heteu, ferezeu, heveu ha'e jebuseu kuery.

¹² Ha'e peoa yvy re hekoa va'e kuery reve nda'evei pejapo aguā peteī rami pendekuai aguā, ha'e nungakue pendere oiko e'ŷ aguā nhuā rami.

¹³ Ha'e rami 'rāgue py peitypa 'rā ha'e kuery altar ojapo va'ekue, pemopēmba 'rā ita omopu'ā va'ekue, peake'o 'rā mba'emo ra'angaa ha'e kuery omopu'ā va'ekue.

¹⁴ Napemboetei 'rā amboae tuuete ramigua, mba'eta xee SENHOR pe “Oikuaa pota porā kuaa va'e” 'ea. Xee aipota xere anho pejerovia.

¹⁵ Ha'e nunga rupi ha'e va'e yvy regua kuery reve pejapo eme peteī rami pendekuai aguā. Mba'eta ha'e kuery nguuite kuery mboetea rupi mba'emo ome'ē, ha'e guymba ojukaa py penerenoī 'rā ha'e kuery reve pe'u aguā ojuka va'ekue ro'okue gui.

¹⁶ Ha'e py peo ri vy ha'e kuery rajy kuery pejopy 'rā pendera'y kuery ra'yxyrā. Ha'e gui tajy kuery nguuite pe ju omboete vy ojapo 'rā pendera'y kuery voi ha'e kuery ruete omboete aguā rami.

¹⁷ Pejapo eme penderueterā mba'emo ryku gui rive.

¹⁸ — Ha'e gui pejapo 'rã ngaru mbojape imbovua revegua e'ŷ regua. Sete ára re 'rã pe'u mbojape imbovua revegua e'ŷ xeayvuague rami vy, jaxy abibe 'epy va'e reguarã aa'angaague rami, mba'eta abibe jaxy py ae Egito yvy gui peẽmba rire.

¹⁹ Jypygua itui'i va'ekue ma xemba'e meme. Penerymba kuery vaka ava, jypygua oiko va'ekue ma guive rã, ha'e vexa'i guigua voi.

²⁰ Ha'e gui mburika jypygua oiko va'ekue ma pendejeupe guarã pemboekovia 'rã vexa'i ra'y'i pejuka vy. Ha'e rã pendejeupe guarã napemboekoviae ri vy pemopẽ 'rã ijaju'y. Ha'e rami ae pendejeupe pemboekovia avi 'rã pendera'y kuery jypy'i itui va'ekue.

— Avave rei xerenonde ndoui 'rã mba'emo ome'ẽ va'erã reve'ŷ.

²¹ Seis ára re pemba'eapo 'rã. Ha'e rã sete araa py ma pepytu'u 'rã penemba'eaty rupi pemba'eapoa gui, ha'e mba'emo pemono'õa gui.

²² — Trigo pemono'õ ypy'ia ára py pejapo 'rã ngaru sete semana-a pygua, ha'e gui ma'etýa opa nhavõ ju mba'emo pemono'õa ngaru pejapo.

²³ Ha'e rami py ma'etýa nhavõ mboapykue kuerei 'rã peẽ kuery va'e regua avakue ha'e javi pejexa uka SENHOR Israel kuery ruete renonde.

²⁴ Mba'eta penerenonde gui aipe'a 'rã amboae regua kuery, pendekuai aguã ambopyve vy. Ha'e rami rire ma'etýa nhavõ mboapykue SENHOR renonde pejexa uka aguã peo teĩ jipoi 'rã pendeyvy pe'aarã.

²⁵ — Ha'e gui xevy mymba ruguy peme'ẽ reve nda'evei mbojape imbovua revegua avi peme'ẽ aguã. Ha'e Páscoa ára ngaru py xevy mymba peme'ẽ rire nda'evei pyávy ndape'upai va'ekue optya aguã ko'ẽ rã peve guarã.

²⁶ Nemba'ety gui jypy'i pemono'õ va'ekue regua iporãgueve ma peru 'rã SENHOR Penderuete pegua oo py.

— Nda'evei kavara'i remomimoï aguã ixy kamby py ae — he'i.

²⁷ SENHOR aipoe'ive ju Moisés pe:

— Embopara ha'e va'e ayvu, mba'eta ha'e rami ae ndereve ha'e Israel kuery ha'e javi reve ajapo xereve guarã — he'i.

²⁸ Ha'e py ma SENHOR reve Moisés oĩ quarenta ára ha'e quarenta pytû re. Ha'e jave ma ndo'ui mbojape, neĩ yy ma voi ndoy'ui Ha'e py itape re ombopara ayvu guexeve guarã ojapo va'ekue regua, dez ayvu ombopara.

Moisés rova hexakãmbaa oexapa okuapyague

²⁹ Ha'e gui Sinai yvyty gui Moisés oguejy vy opo py ogueraa mokoï itape Nhanderuete ayvu oĩa. Hexeve Nhanderuete ijayvu rire hova hexakãmbaa teĩ ndoikuai ranhe yvyty gui oguejy ouvya ja.

³⁰ Ha'e gui Moisés re Arão ha'e Israel kuery ha'e javive oma'ẽ rã hova hexakãmba. Ha'e ramo ha'e kuery okyje hexe onhemboja aguã.

³¹ Ha'e rami rã Moisés oenoõmba. Ha'e ramo mae Arão ha'e yvatekueve onhemboja hexe, ha'e ha'e kuery reve Moisés ijayvu.

³² Ha'e gui ma oupa avi okuapy Israel kuery ha'e javi. Ha'e ramo ha'e va'e kuery pe Moisés omboaxapa Sinai yvyty re SENHOR ojapo ukaague.

³³ Ha'e kuery pe Moisés ijayvupa ma vy ngova re omoï imo'ãarã.*

³⁴ Ha'e gui SENHOR renonde ju Moisés ijayvu aguã oo vy ngova mo'ãa oipe'a kuerei 'rã, oẽ ouvy e'ŷa ja. Ha'e gui oẽ vy Israel kuery pe ju 'rã omombe'u ojapo uka pyre ha'e javi.

³⁵ Ha'e ramo ma Israel kuery Moisés rova oexa rã hexakã. Ha'e va'e rire Moisés omo'ã ju 'rã ngova, peteigüe ju SENHOR reve ijayvu aguã py oike e'ŷa ja.

Sábado ára re ijayvuague

¹ Ha'e gui Moisés Israel kuery ha'e javive omboaty vy aipoe'i:

— Pova'e ayvu ma SENHOR ojapo uka jajapopa ete aguã.

* 34:33 2 Coríntios 3.7-16

² Nhamba'epo 'rã seis ára re, ha'e rã sete araa py ma ára iky'a e'ŷ va'e, SENHOR pegua sâbado ixupe anho japytu'u aguã. Ha'e va'e ára omba'epo va'e ma omano 'rã.

³ Sâbado ára nda'evei neñ peteíve ma pejatapy aguã pendero rupi ae'i voi.

Êxodo 25.1-9

⁴ Moisés aipoe'ive ju Israel kuery ha'e javive pe:

— Po rami SENHOR ijayvu vy aipoe'i:

⁵ “Mba'emo perekva'e-va'e gui peipe'a 'rã SENHOR pe peme'ẽ va'erã. Peteí-teí pendepy'a re oña rami, peme'ëxea rami Peru 'rã SENHOR pe peme'ẽ va'erã: ouro, e'ŷ vy prata, overa va'e,

⁶ hovy va'e, púrpura, pytã va'e, ajukue iporãve va'e, kavara rague,

⁷ vexa'i pirekue, mba'emo mopytãarã, yy rupigua pirekue, yvyra acácia,

⁸ azeite omboverapa aguã, azeite SENHOR pe nhomboaxaa aguã regua irûrã, heakuã porã va'e oapy pyrã,

⁹ ita ônix, manto sacerdote pegua re ha'e ipexo regua re ita oĩ va'erã”, he'i.

Êxodo 39.32-43

¹⁰ “Peñ kuery va'e regua toupa avakue mba'emo ojapo kuaa va'e ha'e javi, tojapopa SENHOR ojapo uka va'ekue.

¹¹ Tojapo ombojerovia atyrã, ija'o'iarã ha'e hi'áry guarã reve, ty'aĩ ikuai va'erã, yvyrapé avi, yvyra hi'áry rupi guarã, ijytarã hendarã reve,

¹² ha'e ayvu ryrurã ijyke rupi yvyra po'i'i oĩ va'e reve, teko vai ombogue atyrã ha'e cortina okẽ pyguardã avi,

¹³ mesa ijyke rupi yvyra po'i'i ha'e hembiporurã ha'e javi oĩ va'e reve, ha'e mbojape SENHOR renonde omoõ mbypyra,

¹⁴ tataendy 'yrã hembiporu reve, tataendyra, azeite tataendy rykuerã,

¹⁵ altar heakuã porã va'e oapy atyrã, ijyke regua yvyra po'i'i reve, azeite SENHOR pe nhomboaxaa aguã regua, heakuã porã va'e oapy pyrã, ha'e ajukue ombojeroviaaty rokẽ reguarã,

¹⁶ altar mba'emo oapy atyrã, hi'áry guarã ipokã rei va'e overa va'e guigua, ijyke regua yvyra po'i'i, hembiporu ha'e javi'i, mba'emo ojoi atyrã hendarã reve,

¹⁷ ajukue okẽ regua oka rupi guarã, ijytarã henda reve, cortina oka rokẽ pyguardã,

¹⁸ ombota pyrã ombojeroviaaty omoõ atã aguã, ombota pyrã oka kora omoõ atã aguã, ixãrã,

¹⁹ henda iky'a e'ŷ va'e rupi omba'epo va'e kuery aorã, ha'e sacerdote Arão ha'e ta'y kuery ao iky'a e'ŷ va'erã, ha'e kuery sacerdote ikuia rupi omba'epo vy oiporu aguã”, he'i.

Ogueruxea rupi mba'emo ogueru okuapyague

²⁰ Ha'e gui Israel kuery ha'e javive Moisés renonde gui oo ju ramo

²¹ oña py ou avakue opy'a ha'e onhe'ẽ py mba'emo ome'ëxea oendu va'e ha'e javi. Ha'e va'e kuery ma SENHOR pe ome'ẽ va'erã ogueru oguy nhemboaty atyrã ojapo aguã, opy rupi mba'emo ojapo va'e kuery oiporu va'erã, ha'e ao iky'a e'ŷ va'erã avi.

²² Avakue ha'e kunhague avi ou, ikyre'ŷ va'e meme. Ogueru jegua, mba'emo ojee omoõ va'ekue, kuã regua, poapy regua, ha'e opa mba'e porã ouro guigua. Avakue ha'e javive ogueru SENHOR pe ouro guigua ome'ẽ va'erã.

²³ Hovy va'e oguereko va'e ha'e javi ogueru, ha'e gui púrpura, pytã va'e, ajukue iporãve va'e, kavara rague, vexa'i pirekue omopytã mbyre, ha'e yy rupi ikuai va'e pirekue guive ogueru.

²⁴ Amongue ma ojapo mba'emo SENHOR pe ome'ẽ va'erã, prata guigua e'ŷ vy overa va'e guigua. Ha'e va'e ma oguerupa. Ha'e yvyra acácia ojou va'ekue ogueru okuapy opa marãgua ojapo pyrã.

²⁵ Ha'e kunhague mba'emo ojapo kuaa va'e voi mba'emo ogueru okuapy ha'e kuery ae opo py ojapo va'ekue, hovy va'e, púrpura, pytã va'e ha'e ajukue iporãve va'e.

²⁶ Kunhague opy'a re mba'emo ojapoxea oĩ va'e ha'e javi ma kavara rague gui oipoka.

²⁷ Huvixa kuery ma ita ônix ha'e ita sacerdote pegua manto ha'e ipexo regua ombojegua pyrã ogueru,

²⁸ ha'e mba'emo heakuã porã va'e, azeite tataendy rykuerã, azeite SENHOR pe nhom-boaxaa aguã regua, ha'e heakuã porã va'e oapy pyrã.

²⁹ Ha'e rami py Israel kuery ogueruxea rupi ogueru SENHOR pe ome'ẽ va'erã. Avakue ha'e kunhague opy'a re ome'ẽxea oendu va'e ogueru okuapy ome'ẽ va'erã, Moisés pe SENHOR ojapo uka va'ekue ha'e javi.

Êxodo 31.1-11

³⁰ Ha'e gui Moisés aipoe'i Israel kuery pe:

— Pendu ke, SENHOR oenoĩ hery rupi Judá regua Uri ra'y Bezalel, Hur ramymino.

³¹ Ha'e rami vy Nhanderuete Onhe'ẽ omonyẽ imbaraeterã, hi'arandurã ha'e oikuaapa aguã, opa mba'e ojapo kuaa aguã rami,

³² ha'e mba'emo ra'angaa ojapo va'ekue rami ojapo aguã ouro, prata ha'e overa va'e gui,

³³ ha'e ita omoĩ 'rã omoatyrõ aguã, yvyra gui mba'emo ojapo aguã, ha'e opa mba'e porã ojapo kuaa aguã.

³⁴ Ipy'a re omoĩ 'rã amboae kuery avi ombo'e aguã, Dã regua Aisamaque ra'y Aoliabe guive.

³⁵ Ha'e kuery re omoĩ hi'arandurã mba'emo ojapo kuaa ete aguã rami, haxyve va'e guive, ha'e hovy va'e py ajukue ombopara kuaa aguã, púrpura py, pytã va'e py ha'e ajukue iporãve va'e py, ha'e oipokaa rupi ombo'eapo aguã. Ha'e rami py opa marã ojapo kuaa, mba'emo ra'angaa ojapo va'ekue rami ae.

36

¹ Ha'e rami py Bezalel ha'e Aoliabe ombo'eapo, avakue mba'emo ojapo kuaa va'e ha'e javi reve. Ha'e kuery pe SENHOR oikuaaa uka ha'e omo'arandu henda iky'a e'ŷ va'e pygularã ha'e javi ojapo kuaa aguã, SENHOR ojapo ukaague rami meme.

Mba'emo apoarã kuery po py heta va'e kuery ome'ẽ va'ekue Moisés omboaxapaague

² Ha'e gui Moisés oenoĩ Bezalel ha'e Aoliabe, ha'e avakue mba'emo ojapo kuaa va'e ha'e javi. Ha'e va'e kuery SENHOR omo'arandu vy ipy'a re omoĩ ovaẽ ha'e mba'emo ojapoxea.

³ Ha'e va'e kuery pe ae Moisés omboaxa Israel kuery ogueru ha'e ome'ẽ va'ekue, henda iky'a e'ŷ va'e pygularã ojapo aguã. Ko'ẽ nhavõ Moisés-a py ha'e kuery ogueruve 'rã ome'ẽxea rupi ome'ẽ va'e.

⁴ Ha'e ramo avakue hi'arandu va'e ma henda iky'a e'ŷ va'e pygularã mba'emo ojapo 'rã va'ekue oeja ranhe vy oupa.

⁵ Ha'e vy aipoe'i okuapy Moisés pe:

— Heta va'e kuery tu ogueruve rima SENHOR ojapo ukaague rami rojapo 'rã va'ekue áryve — he'i.

⁶ Ha'e ramo Moisés ijayvu heta va'e kuery ikuiaia ha'e javi rupi omombe'ua aguã. Ha'e vy aipoe'i uka:

— Avakue ha'e kunhague ma voi henda iky'a e'ŷ va'e pygularã ome'ẽ va'erã ojapo ve'ŷ teī ha'eve — he'i uka. Ha'e rami vy heta va'e kuery pe ijayvu mba'emo ndogueruvei aguã,

⁷ mba'eta mba'emo ha'everã ma oĩ mba'emo ojapopaa aguã, hetave guive oĩ.

Êxodo 26.1-13

⁸ Ha'e rami rã ombo'eapo va'e regua avakue mba'emo ojapo kuaa ete va'e ojapo okuapy ombojerovia atyrã. Ha'e rami vy dez cortina ojapo ajukue iporãve va'e oipoka pyre guigua, ha'e hovy va'e, púrpura ha'e pytã va'e gui. Anjo ipepo va'e ra'angaa py ombojegua. Opa mba'e ojapo porã ete.

⁹ Peteī-teī cortina ma doze metros raxa'i 'rã ipuku-a, ha'e rã ipya ma mokoĩ. Cortina ikuai va'e ma joo rami meme ipuku-a ha'e ipya.

¹⁰ Peteī nhiruĩ cortina ma amboae ae re oje'a, ha'e hovai re peteī nhiruĩ ikuai va'e voi ha'e rami avi amboae ae re oje'a.

¹¹ Cortina ojokua ypy va'ekue apy re ma jokuaarã ojapo hovy va'e gui. Ha'ekue rami ae ju ojapo cortina ojokua va'ekue mboae apy re.

¹² Cinqüenta jokuaa ojapo peteĩ-teĩ cortina re, ha'e cinqüenta ju cortina mboae ikuai va'e japy re. Jokuaa ikuai va'e ma peteĩ-teĩ joexe-exei'i aguã oĩ.

¹³ Ojapo avi cinqüenta ojopy aguã ouro guigua. Ha'e va'e py ma cortina ikuai va'e amboae ae re ombojepo'oi aguã, ombojeroviaaty peteĩ'i optya aguã.

¹⁴ Kavara pire gui ojapo avi cortina ombojeroviaaty áry rupi guarã, onze cortina.

¹⁵ Ha'e va'e regua peteĩ-teĩ cortina puku-a ma treze metros raxa'i, ha'e rã ipya ma mokoõ. Onze-ve cortina ma joo rami meme ipuku-a ha'e ipya.

¹⁶ Peteĩ nhiruã cortina ma joe ojokua, ha'ekue rami ae ju mboapy meme hembyre va'ekue re.

¹⁷ Ha'e gui cinqüenta jokuaa ojapo cortina ojokua ypy va'ekue apy rembe re.

¹⁸ Overa va'e guigua ojapo avi cinqüenta ojopy aguã oo ao'ia ojokua aguã, ha'e javive peteĩ'i optya aguã.

¹⁹ Oo áry guarã ma ojapo vexa'i pirekue omopytã mbyre gui, ha'e rã amboae pirekue ma inhana e'ý va'e.

Êxodo 26.14-30

²⁰ Ombojeroviaaty mbotyarã ojapo avi yvyrape acácia gui, omopu'ã imo'amy aguã.

²¹ Peteĩ-teĩ yvyrape ma quatro metros raxa'i ipuku-a, ha'e rã ipya ma meio metro raxa'i.

²² Peteĩ-teĩ yvyrape re oĩ mokoõ omoõ aguã joa katy oo va'e. Ha'e rami ojapo yvyrape ombojeroviaaty mbotyarã ha'e javi.

²³ Yvyrape ombojeroviaaty mbotyarã ma vinte ojapo kuaray puku-a katy guarã.

²⁴ Ha'e gui vinte-ve yvyrape renderã prata guigua ojapo avi quarenta iguýry rupi omoõa aguã. Peteĩ ipe va'e guýry hendarã mokoõ oĩ, ha'e amboae ipe va'e guýry voi oĩ 'rã mokoõ hendarã.

²⁵ Ha'e gui ombojeroviaaty rovai katy guarã ma vinte yvyrape ju ojapo kuaray apu'a'ia katy guarã.

²⁶ Hendarã ma quarenta oĩ prata guigua meme: peteĩ-teĩ yvyrape guýry ma mokoõ oĩ hendarã, amboae guýry mokoõ avi oĩ, ha'e ramive tema.

²⁷ Ombojeroviaaty yke kuaray oikea katy guarã ma mboapy meme yvyrape ju omopu'ã.

²⁸ Ha'e gui ombojeroviaaty apy katy guarã ma mokoõ yvyrape ju omopu'ã jobaive reguarã.

²⁹ Ha'e va'e ma iguy rupi ndoje'ai. Ha'e rã hi'áry ma joe oje'a'rã inhapyí va'e oĩ ypy va'e re. Ha'e rami omoõ mokoõ yvyrape ijapy katy guarã oĩ va'e.

³⁰ Ha'e rami oĩ oito-ve yvyrape henda prata guigua reve. Ha'e javi ma dezesseis oĩ hendarã: peteĩ-teĩ yvyrape guýry ma mokoõ 'rã oĩ hendarã, ha'e amboae guýry ma mokoõ ju 'rã oĩ.

³¹ Imbotya mbyte rupi guarã ma yvyra po'i'i ojapo acácia gui: peteĩ nhiruã ma yvyrape ombojeroviaaty yke rupi guarã ojapo,

³² ha'e gui peteĩ nhiruã ju ma yvyrape hovai re oĩ va'e peguarã, ha'e gui peteĩ nhiruã ju ombojeroviaaty kupe katy rupi yvyrape oĩ va'e peguarã, kuaray oua katy.

³³ Yvyra po'i'i ma yvyrape omopu'ã va'ekue mbyte rupi omboaxa amboae apy peve.

³⁴ Yvyrape ikuai va'e ma ouro py onhovã, ha'e omoõ avi inhapyí va'e ouro guigua. Ha'e va'e rupi ae omboaxa imoiny yvyra po'i'i. Yvyra po'i'i voi ouro py avi onhovã.

Êxodo 26.31-37

³⁵ Okérã ma ojapo avi ajukue hovy va'e gui, púrpura, pytã va'e ha'e ajukue iporãve va'e oipoka pyre gui. Ombojegua avi anjo ipepo va'e ra'angaa py, hembiapo kuaa va'e ojapo va'ekue.

³⁶ Yvyra acácia gui ojapo avi irundy ijytarã, ha'e ouro py ju onhovã. ijopyarã ma ouro guigua avi, ha'e hendarã irundy ikuai, prata guigua meme.

³⁷ Ojapo avi oo'i rokẽ mbotyarã hovy va'e gui, púrpura, pytã va'e, ha'e ajukue iporãve va'e oipoka pyre gui, ombopara kuaa va'e ojapo.

³⁸ Cortina ytarã ma peteĩ nhiruĩ ojapo, ojopy aguã reve. Ijapy yvate katygua, ha'e hembe 'y ma ouro py meme onhovã. Ha'e rã hendarã peteĩ nhiruĩ ikuai va'e ma overa va'e guigua.

37

Êxodo 25.10-15

¹ Ayvu ryrurã ma Bezalel ojapo yvyra acácia gui. Ipuku-a ma peteĩ metro raxa'i, ha'e rã ipya ha'e yvatea ma meio metro raxa'i meme.

² Ouro ete'i py onhovã ipypy rupi ha'e hi'áry rupi. Ijyvýry rupi ma ouro guigua py ju ombojegua.

³ Irundy inhapyí va'e ma ouro gui ojapo. Ha'e va'e ma hyru apy omoĩ irundyve re: mokoĩ inhapyí va'e omoĩ kyvõ katy, ha'e mokoĩ ju ma hovai re.

⁴ Yvyra acácia gui ojapo avi yvyra po'i'i, ha'e ouro py ju onhovã.

⁵ Yvyra po'i'i ma hyru jovaive re omboaxa inhapyí va'e oĩ va'e rupi, hyru ogueraa aguã.

Êxodo 25.17-22

⁶ Imbotyarã ma ouro ete'i gui ojapo avi teko vai ombogue atyrã. Ipuku-a ma peteĩ metro raxa'i, ha'e rã ipya ma meio metro raxa'i.

⁷ Ouro gui ojapo avi mokoĩ anjo ipepo va'e ra'angaa. Ouro ombope pyre gui ojapo, ha'e teko vai ombogueaty apy jovaive re omoĩ.

⁸ Peteĩ anjo ra'angaa ma peteĩ apy re omoĩ, ha'e rã amboae ma hovai re. Ha'e peteĩ'i regua gui ae ojapo teko vai ombogue atyrã ha'e anjo ipepo va'e jovaive re oĩ va'erã.

⁹ Anjo ra'angaa ma opepo py ojao'i teko vai ombogueaty. Peteĩ-tei joa katy hova, ha'e teko vai ombogueaty re oma'ẽ.

Êxodo 25.23-30

¹⁰ Mesa ma yvyra acácia gui avi ojapo. Ipuku-a ma peteĩ metro, ipya ma meio metro, ha'e rã yvatea ma meio metro raxa'i.

¹¹ Ouro ete'i py onhovã, ha'e ijyvýry rupi ombojegua.

¹² Ijyvýry rupi ojapo avi hembe 'yrã irundy kuã ipya va'e, ha'e hembe 'y rupi ju ombojegua.

¹³ Ijapy irundyve re omoĩ irundy inhapyí va'e. Ouro omboyku vy ojapo, ha'e omoĩ irundyve hetyma oĩa re.

¹⁴ Inhapyí va'e ma hembe 'y katy'i omoĩ yvyra po'i'i oaxa aguã, mesa ogueraa aguã.

¹⁵ Yvyra po'i'i ma acácia guigua, ha'e ouro py ju onhovã, mesa ogueraa aguã.

¹⁶ Mesa áry tembiporu oĩ va'erã ma ouro ete'i gui ojapo: hy'a, heakuã porã va'e ryrurã, hy'a kua, ha'e tigela mba'emo rykue ome'ẽmby ryrurã.

Êxodo 25.31-39

¹⁷ Tataendy 'yrã ma ouro ete'i omoatyrõ mbyre gui ojapo. Hapytarã, hakãrã, tykue ryrurã, ijapu'a va'e ha'e ipoty ikuai va'erã ha'e javi ma peteĩ'i gui meme ojapo.

¹⁸ Ijyke gui ma mboapy meme hakã oẽ oiny. Peteĩ yke gui oẽ 'rã mboapy, ha'e hovai gui ma mboapy avi oẽ.

¹⁹ Peteĩ-tei rakã re ma mboapy tykue ryru oĩ amêndoа ramigua, ha'e gui peteĩ ijapu'a va'e ha'e peteĩ yvoty. Amboae hakã gui ma ha'ekue rami ae ju mboapy tykue ryru amêndoа ramigua oẽ, peteĩ ijapu'a va'e ha'e peteĩ yvoty. Ha'e rami ae ikuai mboapy meme hakã tataendy 'y gui oẽ oiny va'e.

²⁰ Tataendy 'y ete re ma irundy tykue ryru oĩ amêndoа ramigua, ijapu'a va'e ha'e ipoty reve.

²¹ Mokoĩ rakã ixugui oẽ oiny va'e nhavõ re oĩ 'rã peteĩ ijapu'a va'e hendarã. Amboae mokoĩ rakã ixugui oẽ oiny va'e re ma ijapu'a va'e mboae ju oĩ hendarã. Ha'e rami ae tema ojapo mboapy meme hakã tataendy 'y gui oẽ oiny va'e.

²² Ijapu'a va'e ha'e hakã hexe oĩ va'e ma peteĩ'i gui ae ojapo. Ha'e javi ma peteĩ'i guigua meme, ouro ete'i omoatyrõ mbyre gui ojapo.

²³ Ojapo avi sete tataendy. Tata moendya ha'e imboguea ma ouro guigua meme.

²⁴ Peteĩ poyikue ouro ete gui oiporu tataendy 'yrã ha'e hembiporu ha'e javi reve ojapo aguã.

Êxodo 30.1-10

²⁵ Altar heakuã porã va'e oapy atyrã ma yvyra acácia gui ojapo. Ipuku-a ha'e ha'e ipya ma meio metro meme, ipuku-a oĩ va'e'ý ramo. Ha'e rã yvatea ma peteĩ metro rai'i. Hexeve hakua ikuai va'e voi peteĩ'i gui ae avi.

²⁶ Ouro ete'i gui onhovã hi'áry ha'e ijvvýry rupi, hakua ikuai va'e guive. Ijvvýry rupi ma ouro guigua py ombojegua.

²⁷ Ombojeguaague guýry rupi ojapo avi mokoĩ inhapyí va'e ouro guigua. Jovaive re ojapo. Ha'e va'e rupi ma omboaxa yvyra po'i'i altar ogueraa aguã.

²⁸ Acácia gui yvyra po'i'i ojapo ma vy ouro py onhovãmba.

Êxodo 30.22-38

²⁹ Ojapo avi azeite iky'a e'ý va'e SENHOR pe nhomboaxaa aguã regua. Heakuã porã va'e oapy atyrã avi ojapo, heakuã porã va'e apoa ojapo va'ekue.

38

Êxodo 27.1-8

¹ Altar mba'emo oapy atyrã ojapo avi yvyra acácia gui. Ipuku-a ma mokoĩ metros raxa'i, ha'e ipya ha'e rami ae ju, ipuku-a oĩ va'e'ý ramo. Ha'e rã yvatea ma peteĩ metro raxa'i.

² Ijapy irundyve va'e re ma omoĩ irundy hakuarã. Ha'e va'e ma altar reve peteĩ'i gui meme ojapo. Overa va'e py ju onhovãmba.

³ Tembiporu altar rupi oiporua va'erã ma ojapo avi opa marâguia: tanhimbu ryrurã, pá iky'a'oarã, hy'arã, ikuxa rakua ha'e tapyí ryrurã. Ha'e va'e ha'e javi ma overa va'e gui meme ojapo.

⁴ Altar reguarã ma ojapo peteĩ ipokã rei va'e overa va'e gui kya xã ramigua. Ha'e va'e ma altar rye py rupi oĩ altar mbyte rupi peve ovaẽ.

⁵ Ipokã rei va'e overa va'e guigua apy irundyve reguarã ma ojapo irundy inhapyí va'e. Ha'e va'e rupi ma omboaxa 'rã yvyra po'i.

⁶ Yvyra po'i ma acácia gui ojapo, ha'e overa va'e py ju onhovã.

⁷ Ha'e va'e ma inhapyí va'e rupi omboaxa altar jovaive re, ogueraa aguã. Inhyvyí va'erã ma yvyrape gui ojapo.

Êxodo 30.17-21

⁸ Overa va'e gui ojapo yy mbotyarã, mba'emo ojoia aguã. Hendarã voi ojapo overa va'e gui avi. Oguy nhemboaty oïaty rokẽ py kunhague omba'eapo okuapy va'e epéko ome'ẽ va'ekue gui ojapo.

Êxodo 27.9-19

⁹ Okarã ma ojapo avi oo regua kuaray ipuku-a katy. Cortina oka korarã oĩ va'e ma ajukue iporãve va'e oipoka pyre gui ojapo. Ipuku-a ma quarenta e cinco metros.

¹⁰ Ijytarã ma vinte ojapo, ha'e hendarã ma overa va'e guigua meme. Ha'e rã ijyta re ty'aĩ oĩ va'e, ha'e hi'áry rupigua ma prata guigua.

¹¹ Ha'e rami ae avi kuaray ijapu'a'ia katy voi oĩ cortina quarenta e cinco metros ipuku-a va'e. Ijytarã ma vinte ojapo, ha'e vinte avi ojapo hendarã, overa va'e guigua meme. Ijyta re ty'aĩ ha'e hi'áry rupigua oĩ va'e voi prata guigua.

¹² Ha'e rã kuaray oikea katy cortina oĩ va'e ma vinte e dois metros ipuku-a va'e. Ijytarã ma dez ojapo, ha'e ijyta renderã ma dez avi. Ijyta re ty'aĩ ha'e hi'áry rupigua oĩ va'e ma prata guigua meme.

¹³ Kuaray oua katy cortina oĩ va'e ma vinte e dois metros ipuku-a va'e.

¹⁴ Ha'e rã oikea rexei cortina oĩ va'e ma sete metros ipuku-a. Ijyta ma mboapy, ha'e henda voi mboapy.

¹⁵ Oka py oikea rovai katy ma cortina puku-a sete metros, oikea rovaise katy joo rami ipuku-a. Ijyta ma mboapy, ha'e henda voi mboapy avi.

¹⁶ Oka yvýry rupi cortina oĩ va'e ha'e javi ma ajukue iporãve va'e oipoka pyre gui ojapo.

¹⁷ Ijyta renderarã oĩ va'e ma overa va'e guigua meme. Ha'e rã ijyta re ty'aĩ ha'e hi'áry rupigua oĩ va'e ma prata guigua.

¹⁸ Ajukue oka rokẽ regua ma ajukue ombopara va'e rembiapo. Hovy va'e gui, púrpura, pytã va'e ha'e ajukue iporãve va'e oipoka pyre gui ojapo. Ipuku-a ma nove metros. Yvatea ha'e ipya ma dois metros raxa'i meme, oka rupi cortina ikuai va'e re oa'ãague rami vy.

¹⁹ Ijyta irundy va'e ha'e ijyta renda irundy va'e ma overa va'e gui meme ojapo. Ha'e rã hexegua ty'aĩ ma prata guigua. Ijapy yvategua, ha'e hi'áry ha'e javi prata guigua.

²⁰ Ha'e rã ombota pyrã ombojeroviaaty omoĩ atã aguã, ha'e oka yvýry rupi oĩ va'e regua ma guive rã overa va'e guigua meme.

Mba'emo ombojeroviaaty regua oipapa ha'e oa'ãague

²¹ Pova'e nunga oĩ ombojeroviaaty Nhanderuete ayvu oĩa ropy. Moisés aipoe'iague rami vy sacerdote Arão ra'y Itamar oipapa, levita kuery ha'e py omba'eapo aguã.

²² Judá regua Uri ra'y Bezalel, Hur ramymino va'e ojapopa Moisés pe SENHOR ojapo uka va'ekue ha'e javi.

²³ Hexeve ma Dã regua Aisamaque ra'y Aoliabe omba'eapo. Ha'e va'e ma mba'emo re opena va'e, mba'emo ra'angaa ombopara kuaa, ha'e ajukue ombopara va'e hovy va'e py, púrpura, pytã va'e ha'e ajukue iporãve va'e py.

²⁴ Henda iky'a e'ŷ va'e pyguarã ouro mba'emo ojapoa rupi oiporu va'ekue, ouro ome'ẽ mbyre oa'ãa rã mil quilos rânda'u, henda iky'a e'ŷ va'e py oiporua va'e rami ae.

²⁵ Ha'e rã prata guery ombopara uka va'e kuery ome'ẽ va'ekue ha'e javi ma três mil quilos, henda iky'a e'ŷ va'e py oiporua va'e rami.

²⁶ Guery ombopara uka va'e vinte ma'etŷ va'e guive tujakue peve peteĩ-teĩ ome'ẽ peteĩ hatã'i va'e seis grama va'e, henda iky'a e'ŷ va'e py oiporua va'e rami. Ome'ẽ va'ekue ha'e javi ma seiscentos e três mil, quinhentos e cinqüenta.

²⁷ Prata ma três mil e quinhentos quilos oiporu mba'emo iky'a e'ŷ va'e py oĩ va'e renderarã ojapo aguã, ha'e imbotya renderarã guive. Cem ojapo hendarã, peteĩ-teĩ re ma trinta e cinco quilos prata oiporu.

²⁸ Ijyta re mba'emo ojopy aguã ojapo vy oiporu vinte quilos raxa'i, ha'e gui ijapy yvategua onhovã, ha'e hi'áry rupigua ojapo aguã.

²⁹ Ha'e gui overa va'e ha'e kuery ome'ẽ va'ekue oa'ãa rã dois mil e quinhentos quilos.

³⁰ Ha'e va'e gui ma ojapo oguy nhemboaty oĩaty rokẽ yta renderarã, altar overa va'e guigua, ipokã rei va'e overa va'e guigua, ha'e altar py oiporu va'erã ha'e javi.

³¹ Overa va'e gui ojapo avi oka yvýry rupi kora oĩ va'e renderarã, oka rokẽ yta renderarã, ombota pyrã ombojeroviaaty moĩ atãarã ha'e javi, ha'e oka yvýry rupi guarã ombota pyrã va'e ha'e javi.

39

Êxodo 28.1-43

¹ Hovy va'e, púrpura ha'e pytã va'e gui ojapo avi ao iporãve va'e. Ha'e va'e ma henda iky'a e'ŷ va'e rupi omba'eapo va'e onhemonde va'erã. Ojapo ao iky'a e'ŷ va'e Arão peguarã, Moisés pe SENHOR ojapo ukaague rami vy.

² Manto sacerdote peguarã ma ojapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui.

³ Ouro ombole porã'i vy ojapo ipererí'i va'e, ha'e ojaya po'i'i, oikutu aguã hovy va'e reve, púrpura, pytã va'e ha'e ajukue iporãve va'e reve, ajukue ombopara va'e rembiapo.

⁴ Ojapo avi mokoõ axi'y áry guarã, manto apy mokoõive ojopy aguã, ha'e rami joe oje'a oiny.

⁵ Iku'akuaarã voi ojapo porã, ha'e omoĩ manto sacerdote pegua áry rupi. Ha'e va'e ma manto reve joo rami ae ojapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui, Moisés pe SENHOR aipoe'iague rami vy.

⁶ Ita ôníx omoatyrô vy omoï hendarã ouro guigua re. Ha'e va'e re ma ombopara Israel kuery rery, kuã reguarã omboparaa rami avi.

⁷ Ha'e va'e ita mokoïve ma manto sacerdote pegua axi'y árygua re omoï, Israel kuery re ima'endu'aa aguã, Moisés pe SENHOR aipoe'iague rami vy.

⁸ Pexo regua ma manto sacerdote pegua rami avi ojapo porã ete. Ouro gui ojapo, ha'e hovy va'e, púrpura, pytã va'e ha'e ajukue iporâve va'e oipoka pyre gui.

⁹ Pexo regua ma ijapy irundy va'e, mokoï va'e ojapo. Ipuku-a ha'e ipya ma joo rami peteï po pukukue.

¹⁰ Ha'e va'e re ma omoï ita peteï-teï renderã ojapo pyre reve. Ita ma irundy ryxy omoï. Jypy'igua ma sárdio, topázio ha'e carbúnculo.

¹¹ Mokoï ryxya ma esmeralda, safira ha'e diamante.

¹² Mboapy ryxya ma jacinto, ágata ha'e ametista.

¹³ Irundy ryxya ma berilo, ôníx ha'e jaspe. Peteï-teï renderã ojapo pyre ma ouro guigua meme.

¹⁴ Ha'e javi vy doze ita oï, Israel ra'y kuery rery doze ikuai va'e rami avi. Kuã regua rami ombopara pyre. Peteï-teï re oï peteï rery, doze regua rery ikuai va'e rami vy.

¹⁵ Pexo regua omoxã corrente'i oipopê mbyre py, ouro ete'i guigua.

¹⁶ Ixã renderã ma mokoï ojapo pexo regua re, mokoï inhapyï va'e voi, ouro guigua meme. Mokoïve inhapyï va'e ma pexo regua apy re omoï.

¹⁷ Pexo regua apy re mokoïve inhapyï va'e oï va'e rupi omoï mokoïve corrente oipopê mbyre ouro guigua.

¹⁸ Mokoïve corrente oipopê mbyre apy mboae ma omovaë mokoïve hendarã ojapo pyre re. Ha'e va'e ju omoï manto sacerdote pegua axi'y árygua re, henonde katy.

¹⁹ Ojapove ju mokoï inhapyï va'e ouro guigua. Ha'e va'e ma omoï mokoïve pexo regua apy re, hembe oï ypyve va'e re omoï manto sacerdote pegua rexei.

²⁰ Ojapove ju mokoï inhapyï va'e ouro guigua, ha'e omoï mokoïve manto sacerdote pegua axi'y árygua re, iguýry, manto sacerdote pegua renonde re, ombojaague oï va'e yvy'iry, ku'akuaa ojapo porã mbyre áry rupi.

²¹ Ha'e gui pexo regua re inhapyï va'e oï va'e ma ojokua inhapyï va'e manto sacerdote pegua re oï va'e re, hi'áry rupi. Peteï xã hovy va'e py ojokua, manto sacerdote pegua ku'akuaa ojapo porã mbyre áry rupi optya aguã. Ha'e rami vy pexo regua oja'o e'ý aguã manto gui, Moisés pe SENHOR aipoe'iague rami vy.

²² Manto sacerdote pegua reve guarã ojapo avi kamixa puku árygua oipopê mbyre gui, hovy va'e guigua.

²³ Ha'e va'e mbyte py oï ijaju'y kuarã. Ijyvýry rupi omoana, oxoro e'ý aguã.

²⁴ Kamixa puku árygua rembe ha'e javi ombojegua vvyra'a ra'angaa py. Hovy va'e, pytã va'e ha'e ajukue iporâve va'e oipoka pyre gui ojapo.

²⁵ Oparã'i va'e voi ojapo ouro ete'i gui. Ha'e va'e ma omoï vvyra'a ra'angaa ikuai va'e mbyte rupi, hembe ha'e javi rupi.

²⁶ Peteï oparã'i va'e, ha'e gui peteï vvyra'a ra'angaa, ha'e gui amboae oparã'i va'e, ha'e amboae vvyra'a, ha'e rami ae tema kamixa puku árygua rembe ha'e javi rupi oï aguã. Ha'e va'e py onhemonde 'rã mba'emo ojapo oikovya rupi, Moisés pe SENHOR aipoe'iague rami vy.

²⁷ Kamixa pukurã ma ajukue iporâve va'e gui ojapo, Arão ha'e ta'y kuery peguarã.

²⁸ Akã reguarã ma ajukue iporâve va'e gui avi ojapo, ha'e akã jokuaa ajukue iporâve va'e gui, ha'e gui kaxõ ajukue iporâve va'e oipoka pyre gui ojapo.

²⁹ Ha'e rã ku'akuaa ma ajukue iporâve va'e oipoka pyre gui ojapo, hovy va'e, púrpura ha'e pytã va'e gui. Ajukue ombopara va'e rembiapo, Moisés pe SENHOR aipoe'iague rami vy.

³⁰ Akã jokua iky'a e'ý va'e reguarã ma ojapo avi ipererí'i va'e. Ouro ete'i gui ojapo. Ha'e va'e re ma ombopara "SENHOR pegua iky'a e'ý va'e" he'ia va'e, kuã reguarã omboparaa rami avi.

³¹ Ha'e gui akã regua áry ipererí'i va'e ojokua aguã ma peteĩ ixã hovy va'e py oiporu, Moisés pe SENHOR aipoe'iaque rami vy.

Êxodo 35.10-19

³² Ha'e rami vy ojapopa ombojeroviaaty py mba'emo oĩ va'erã, oguy nhemboaty oĩaty reguarã. Israel kuery ojapopa, Moisés pe SENHOR ojapo ukaague rami vy.

³³ Ha'e gui Moisés-a py ogueru avi ombojeroviaaty, ijaõ'iarã, opy guarã ha'e javive, ojopy aguã, yvyrape, hi'áry rupi guarã, ijytarã, hendarã,

³⁴ ijaõ'iarã vexa'i rague omopytã mbyre guigua, hi'áry guarã pirekue inhana e'ý va'e guigua, ajukue okẽ reguarã,

³⁵ Nhanderuete ayvu ryru yvyra po'i'i reve, imbotya teko vai ombogue atyrã,

³⁶ mesa opa marãguia hembiporu reve, mbojape SENHOR renonde omoõ mbyrã,

³⁷ tataendy 'yrã ouro ete'i gui ojapo va'ekue hataendy reve, ha'e tataendy hendarã py porã oĩ hembiporu ha'e javi reve, azeite tataendy rykuerã,

³⁸ altar ouro guigua avi, azeite SENHOR pe nhomboaxaa aguã regua, heakuã porã va'e oapy pyrã, ajukue oo rokérã,

³⁹ altar overa va'e guigua, ipokã rei va'e overa va'e guigua hembiporu ha'e javi reve, ha'e hy'a guaxu henda reve,

⁴⁰ cortina oka korarã, ijyta hendarã ojapo pyre reve, ajukue oka rokérã, ixãrã, ombota pyrã va'e, ombojeroviaaty re oiporu va'erã va'e ha'e javi, oguy nhemboaty oĩaty rupi guarã,

⁴¹ ao iporãve va'e henda iky'a e'ý va'e py omba'eapo va'e kuery oiporu va'erã, ao iky'a e'ý va'e sacerdote Arão peguarã, ha'e ta'y kuery aorã sacerdote ikuai aguã.

⁴² Moisés pe SENHOR aipoe'iaque rami vy Israel kuery ojapopa ma.

⁴³ Ha'e ramo Moisés mba'emo ojapo pyre oexa rã SENHOR ojapo ukaague rami meme ojapopa ra'e. Ha'e rami ojapopa ma ramo Moisés ogueroayvu porã.

40

Moisés pe SENHOR omopu'ã ukaague ombojerovia atyrã ojapo pyre

¹ Ha'e gui SENHOR aipoe'i Moisés pe:

² — Jaxy jypy'ia re ijypy'ia ára ma remopu'ã 'rã imo'amy oguy pembojerovia vy penhemboaty aguã.

³ Ha'e va'e py ma remoõ 'rã xeayvu ryru, ha'e remboty 'rã ajukue okẽ reguarã reipyo vy.

⁴ Remoinge 'rã mesa, ha'e hi'áry mba'emo remoõ 'rã oĩ aguã py porã. Opy remopu'ã avi 'rã imo'amy tataendy 'y, ha'e remoendy 'rã hataendy.

⁵ Ha'e gui altar ouro guigua heakuã porã va'e oapy atyrã ma xeayvu ryru renonde 'rã remoõ. Ha'e gui mae ma remoõ 'rã ajukue ombojeroviaaty rokérã.

⁶ Ha'e gui altar mba'emo oapy atyrã remoõ 'rã oguy ombojeroviaaty ha'e nhemboaty oĩaty rokẽ rexei'i.

⁷ Ha'e gui hy'a guaxu ju 'rã remoõ oguy nhemboaty oĩaty ha'e altar mbyte py. Ha'e rami vy remonyé 'rã imoiny yy.

⁸ Ijyvýry ma remopu'ã 'rã imo'amy oka korarã, ha'e remoõ 'rã ajukue oka rokérã.

⁹ — Ha'e gui azeite xee SENHOR pe nhomboaxaa aguã regua reru vy remoõ 'rã ombojeroviaaty ha'e hexegua ikuai va'e ha'e javi re. Ha'e rami py remboaxapa 'rã xevy guarã, hexegua ha'e javi reve. Ha'e ramo opyta 'rã iky'a e'ý va'e.

¹⁰ Altar mba'emo oapyaty re avi 'rã azeite remoõ, hembiporu ha'e javi reve, altar xee SENHOR peguarã remboaxa vy. Ha'e ramo altar opyta 'rã iky'a e'ý ete va'e.

¹¹ Azeite remoõ 'rã hy'a guaxu re, henda reve, xevy guarã remboaxa vy.

¹² Ha'e gui rejapo 'rã Arão ha'e ta'y kuery oguy nhemboaty oĩaty rokẽ re onhembojapa aguã rami. Ha'e py ma rejoi 'rã yy py.

¹³ Arão remonhemonde 'rã ao iky'a e'ý va'e py, ha'e hexe remoõ 'rã azeite, xevygua sacerdote-rã remboaxa vy.

¹⁴ Ha'e gui ta'y kuery ju 'rã remonhemboja, ha'e kuery re avi remoõ aguã kamixa puku.

¹⁵ Ha'e kuery re ju remoī 'rā azeite tuu re remoīague rami, ha'e kuery voi xevyguar sacerdote ikuai aguā. Ha'e kuery re azeite remoī rire hamymino kuery voi araka'e rā peve ha'eve 'rā sacerdote ikuai aguā — he'i.

Ombojerovia atyrā omopu'ā imo'amyague

¹⁶ Ha'e ramo Moisés ojapopa SENHOR ojapo ukaague rami meme. Ha'ekue rami ae ojapo.

¹⁷ Mokoī ma'etŷa py, jaxy ijypy'i ouvya py, jypy'ia ára py ma omopu'āa imo'amy ombojerovia atyrā.

¹⁸ Ombojerovia atyrā Moisés omo'ā aguā omoī hendarā, omopu'ā imo'amy yvyrape, peteī-teī re omoī hi'áry rupigua, ha'e gui omopu'ā imo'amy ijytarā.

¹⁹ Ha'e gui ombojeroviaaty áry rupi oipyo ijaō'iarā, ha'e hi'áry rupi guarā avi omoī, Moisés pe SENHOR ojapo ukaague rami.

²⁰ Ha'e vy itape Nhanderuete ayvu oīa ogueru vy omoī hyrurā ojapo pyre py. Hyru yke re omoī avi yvyra po'i'i. Hyru áry ma teko vai mbogue atyrā omoī.

²¹ Ha'e gui ayvu ryru ma ombojeroviaaty py ogueroike vy okērā oipyo ajukue. Ha'e rami vy omboty ayvu ryru, Moisés pe SENHOR ojapo ukaague rami vy.

²² Ha'e gui mesa ju omoī oguy nhemboaty oīaty py, ombojeroviaaty regua kuaray puku-a katy, ajukue okē regua kyvō rupi, oka katy.

²³ Ha'e va'e áry hendarā py porā omoī mbojape iky'a e'ý va'e SENHOR renonde oī aguā, Moisés pe SENHOR ojapo ukaague rami.

²⁴ Tataendy 'y avi omoī oguy nhemboaty oīaty py, mesa renonde, ombojeroviaaty regua kuaray oua katy.

²⁵ Ha'e rami vy SENHOR renonde omoatyrō tataendy, Moisés pe SENHOR ojapo ukaague rami vy.

²⁶ Altar ouro guigua ma oguy nhemboaty oīaty py avi omoī, ajukue okē regua rexei.

²⁷ Hi'áry ma heakuā porā va'e omoendy, Moisés pe SENHOR ojapo ukaague rami vy.

²⁸ Ha'e gui ombojeroviaaty rokērā ju ajukue oipyo imoiny.

²⁹ Ha'e gui altar mba'emo oapty ma oguy ombojeroviaaty py omoī, ha'e nhemboaty oīaty rokē py ae. Ha'e rami vy hi'áry mba'emo oapy vy ome'ē, mba'emo ra'yīgue guive, Moisés pe SENHOR ojapo ukaague rami vy.

³⁰ Ha'e gui hy'a guaxu ju omoī oguy nhemboaty oīaty ha'e altar mbyte. Ha'e va'e omonyē yy ojejoia aguā.

³¹ Ha'e va'e py ma Moisés, Arão ha'e ta'y kuery ojepoei ha'e ojepyei 'rā

³² oguy nhemboaty oīaty py oike ta vy, ha'e altar re onhemboja vy, Moisés pe SENHOR ojapo ukaague rami vy.

³³ Ombojeroviaaty ha'e altar yvýry rupi omopu'ā avi imo'amy oka korarā. Kora rokērā ma ajukue oipyo. Ha'e rami py Moisés ojapo 'rā va'e ojapopa.

Números 9.15-23

³⁴ Ha'e gui oguy nhemboaty oīaty rupi arai ojao'ipa. Ha'e ramo ombojeroviaaty ropy rupi tynyēmba SENHOR rexakāa.

³⁵ Moisés eteve voi ndoike reguai ranhe oguy nhemboaty oīaty py, hi'áry rupi arai opyta, ha'e ombojeroviaaty SENHOR rexakāa tynyē teria ja.

³⁶ Ombojeroviaaty áry gui arai opu'ā ma rire mae ma Israel kuery oguatave ju ikuaiague gui. Ha'e rami oiko kuerei 'rā ha'e kuery oguataa ha'e javi rupi.

³⁷ Ha'e rā arai opu'ā e'ŷa ja ma ha'e kuery ndoguatai 'rā, opu'āa ára anho.

³⁸ Ara py ma SENHOR guigua arai ojekuaa 'rā ombojeroviaaty áry. Ha'e rā pyávy ma hi'áry ojekuaa 'rā tata, Israel kuery ha'e javi oexaa py, ha'e kuery oguataa ha'e javi rupi.

Levítico mboapya kuaxia Moisés ombopara va'ekue

Levítico mboapya kuaxia Moisés ombopara va'ekue

Tery Levítico ma “Levita kuery pegua” he'ia. Mba'eta Nhanderuete oenoī Levi ramymino kuery ombojeroviaaty rupi omba'eapo aguā. Amongue ma sacerdote-rā omoī Nhanderuete pe mymba ojuka vy oapy reve omboaxa aguā, ha'e e'ŷ vy amboae nunga: nhandy, mba'emo aju. Moisés ryke'y Arão ma jypygua sacerdote oiko raka'e. Ha'e rā levita kuery mboae ma sacerdote ptytvōarā ikuai ombojeroviaaty rupi.

Sacerdote kuery ha'e levita kuery ha'e javi ma Nhanderuete renonde iky'a e'ŷ va'erā omoīa raka'e. Aipoe'i: “Xee Senhor ae Egito yvy gui penenoēmba va'ekue, Penderuete aiko aguā. Ha'e nunga rupi iky'a e'ŷ va'e 'rā peiko, mba'eta xee ma iky'a e'ŷ va'e” (11.45). Ha'e rami avi Israel kuery pavē peju aipoe'i: “Iky'a e'ŷ va'e 'rā peiko xevy guarā, mba'eta xee Senhor iky'a e'ŷ va'e aiko ramo, ha'e yvy regua kuery mbyte gui roipe'a xevy guarā ae pendekuai aguā”, he'i (20.26). Ha'e va'e ayvu ma Nhanderuete pe jaiko va'e ha'e javi peguarā.

Mbovykue rei e'ŷ Nhanderuete ojapo uka vy aipoe'i: “Xee ma Senhor”: “Pendekuai 'rā xeayvua aeja va'ekue ha'e javi rupi, pejapopa 'rā ajapo uka va'ekue. Xee ma Senhor”, he'i (19.37). Ha'e va'e ayvu ma jajererokyje aguā oī, mba'eta Iky'a e'ŷ ha'e Ipo'akapa va'e pegua jaiko.

Oapy vy ome'ẽmby regua

¹ SENHOR oguy nhemboaty oīaty gui oenoī Moisés. Ha'e vy aipoe'i ixupe:

² — Aipo're Israel kuery pe: SENHOR pe mba'emo peme'ẽ va'erā peruxe vy penerymba vaka e'ŷ vy vexa'i 'rā peru.

³ — Xapy'a rei peapy vy peme'ẽxe vy mymba ava ivaikue rei e'ŷ va'e 'rā peru.* Oguy nhemboaty oīaty rokē peve 'rā peru, SENHOR renonde pendejou porā aguā.

⁴ Ime'ẽa ma mymba ome'ẽ va'erā akā áry opo omoī 'rā, hekovia SENHOR ojopy vy ojejavya ojao'i aguā.

⁵ Ha'e rire ma vaka ra'y ojuka 'rā SENHOR renonde. Ha'e gui huguykue ma Arão ra'y kuery sacerdote ikuai va'e oexa uka vy omboayvipa 'rā altar oguy nhemboaty oīaty rokē rexei'i oī va'e yvýry rupi.

⁶ Ha'e gui oapy vy ogueru pyre oipiropa vy omboa'ypa 'rā.

⁷ Sacerdote Arão ra'y kuery omoendy 'rā tata altar áry, ha'e tata py omoīve ju 'rā xakā.

⁸ Ha'e gui xakā altar áry tata reve oī va'e py ma Arão ra'y kuery sacerdote ikuai va'e omoī avi 'rā mymba omboa'y va'ekue, inhakāgue, ikyrakue voi.

⁹ Ha'e rā hyekue ha'e hetymague ma sacerdote kuery ojoi 'rā yy py. Ha'e gui mae 'rā oapy altar áry. Ha'e nunga ma oapy vy ome'ẽmby, heakuā porā rā SENHOR ojou porā aguā.

¹⁰ — Xapy'a rei mymba reapy vy reme'ẽ va'erā ma kyrīve va'e, vexa'i e'ŷ vy kavara ri reru vy ma ava meme 'rā reru ivaikue rei e'ŷ va'e.

¹¹ Ha'e va'e ma SENHOR renonde ojukaa 'rā altar yvýry kuaray ijapu'a'ia katy. Huguykue ma Arão ra'y kuery sacerdote ikuai va'e omboayvipa 'rā altar yvýry ha'e javi rupi.

¹² Ha'e gui omboa'ypa 'rā, inhakāgue, ikyrakue voi. Ha'e vy sacerdote omoī porā'i 'rā xakā altar áry tata oī va'e py.

¹³ Ha'e rā hyekue ha'e hetymague ma ojoi 'rā yy py. Ha'e nungakue ha'e javi sacerdote ogueru vy oapypa 'rā altar áry. Ha'e nunga voi ma oapy vy ome'ẽmby, heakuā porā rā SENHOR ojou porā aguā.

¹⁴ — Ha'e gui xapy'a rei SENHOR pe reapy vy reme'ẽ va'erā guyra ri vy ma reru 'rā pyku'i'i e'ŷ vy apykaxu xiī.

* ^{1:3} Judeu kuery mba'emo oapy reve ome'ẽ 'rā Nhanderuete omboete aguā, ha'e'ŷ vy ojejavyague ombogue uka aguā, e'ŷ vy Nhanderuete pe ete oikoa oikuua uka aguā.

¹⁵ Ha'e gui altar oĩa py sacerdote ogueru vy opoapẽ py omopẽ 'rã ijaju'y kãgue, ipire omondo e'ŷ re. Ha'e vy oapy 'rã altar áry. Ha'e rã huguykue ma omboxyry 'rã altar yvýry rupi.

¹⁶ Ha'e rã hi'ai hague reve omboi vy omombo 'rã altar kuaray oua katy tanhimbu oĩa py.

¹⁷ Ha'e vy ipepo guive omondoro 'rã omboa'y e'ŷ re. Ha'e vy sacerdote oapypa 'rã altar áry, xakã tata py itui va'e áry. Ha'e nunga voi oapy vy ome'ẽmby, heakuã porã rã SENHOR ojou porã aguã.

2

Mba'emo aju guigua ome'ẽmby regua

¹ — Ha'e gui xapy'a rei amongue va'e rei SENHOR pe mba'emo aju guigua ome'ẽ vy ma ogueru 'rã trigo ku'ikue iporãve va'e.* Hi'áry ma omo'i'rã azeite, ha'e gui hexeve heakuã porã va'e ju 'rã ogueru.

² Ha'e nunga ogueraa 'rã Arão ra'y kuery sacerdote ikuai va'e pe. Ha'e kuery ojopy 'rã teĩ po trigo ku'ikue, azeite ha'e heakuã porã va'e ha'e javi reve. Ha'e va'e ma oapy 'rã altar áry ome'ẽmby ha'e javi rekovia. Ha'e va'e ma oapy vy ome'ẽmby, heakuã porã rã SENHOR ojou porã aguã.

³ Ha'e rã mba'emo aju guigua ome'ẽ mbyre ndoapyi va'ekue ma Arão ha'e ta'y kuery peguarã optyta. Ha'e nunga ma SENHOR pe oapy pyre regua iky'a e'ŷ ete va'e.

⁴ — Ha'e gui xapy'a rei reru 'rã mba'emo aju guigua tatakua py ombojy pyre reme'ẽ va'erã. Ha'eve mbojape imbovua revegua e'ŷ, trigo ku'ikue iporãve va'e azeite reve omoapomo mbyre, ha'e mbojape ipererí'i va'e imbovua revegua e'ŷ azeite py oikytypa pyre.

⁵ Xapy'a rei mba'emo aju oexyaty py oexy pyre ri reru vy ma trigo ku'ikue gui imbovua revegua e'ŷ azeite reve omoapomo mbyre 'rã ha'eve.

⁶ Remboa'y-a'ypa 'rã. Ha'e gui hi'áry renhoë 'rã azeite. Ha'e nunga ma mba'emo aju guigua ome'ẽmby.

⁷ — Ha'e gui xapy'a rei mba'emo aju guigua reme'ẽ va'erã pairá py ri rembojy vy ma trigo ku'ikue iporãve va'e gui 'rã rejapo azeite reve.

⁸ Ha'e nunga mba'emo aju guigua reme'ẽ va'erã rejapo ri vy reru 'rã SENHOR pe. Sacerdote-a py 'rã reraa, ha'e va'e ju altar py ogueraa aguã.

⁹ Ha'e gui mba'emo aju guigua reme'ẽ va'e gui ma sacerdote oipe'a 'rã altar áry oapy va'erã ha'e javi rekovia. Ha'e nunga ma oapy vy ome'ẽmby, heakuã porã rã SENHOR ojou porã aguã.

¹⁰ Ha'e gui mba'emo aju guigua ome'ẽ mbyre ndoapyi va'ekue ma Arão ha'e ta'y kuery pegua. Ha'e nunga ma SENHOR pe oapy pyre regua iky'a e'ŷ ete va'e.

¹¹ — Ha'e rami avi mba'emo aju guigua SENHOR pe peme'ẽ va'erã ma ndapejapoi 'rã imbovua revegua. Mba'eta teïve regua imbovua revegua nda'evei SENHOR pe peapy vy peme'ẽ va'erã, neï ei revegua voi nda'evei.

¹² Ha'e va'e regua gui ma Peru 'rã SENHOR pe jypy'igua peme'ẽ va'erã, teĩ altar áry ma nomoïai 'rã heakuã porã aguã rami.

¹³ Mba'emo aju guigua reme'ẽ va'e ha'e javi 'rã remoe'ẽ juky py. Ha'e nunga reme'ẽ nhavõ neremoe'ẽ e'ŷi 'rã juky, mba'eta Nderuete guexeve guarã ojapo va'ekue kuaa ukaarã. Reme'ẽ va'e ha'e javi re 'rã remoïjuky.

¹⁴ — SENHOR pe reru avi 'rã mba'emo aju jypy'i oiko va'ekue regua iporãgueve reme'ẽ va'erã. Ha'eve 'rã mba'emo rary pyau guigua reme'ẽ aguã, tata py rexy va'ekue, ha'yïngy hary pyau va'e gui reumbiri va'ekue.

¹⁵ Ha'e va'e áry renhoë 'rã azeite, ha'e hexeve reru 'rã heakuã porã va'e. Ha'e nunga ma mba'emo aju guigua ome'ẽmby.

* 2:1 Mba'emo aju guigua ma ha'e kuery ome'ẽ 'rã Nhanderuete omboete ha'e oguerovy'a aguã.

¹⁶ Mba'emo ra'yīngy oumbiri pyre gui sacerdote oipe'a 'rā ome'ēmby ha'e javi rekovia oapy va'erā, azeite ha'e heakuā porā va'e ha'e javi reve. Ha'e nunga ma SENHOR pe oapy vy ome'ēmby.

3

Peteī rami ikuiaia regua ome'ēmby regua

¹ — Ha'e gui amongue SENHOR renonde ogueru 'rā peteī rami ikuiaia regua ome'ē va'erā.* Ha'e rami vy ha'eve 'rā guymba ava e'ŷ vy kunha ivaikue rei e'ŷ va'e.

² Mymba ome'ē va'e akā áry opo omoī vy ojuka 'rā oguy nhemboaty oīaty rokē katy'i. Huguykue ma Arão ra'y kuery sacerdote ikuai va'e omboayvi 'rā altar yvýry ha'e javi rupi.

³ Peteī rami ikuiaia regua ome'ē va'e gui ma oipe'a 'rā mba'emo SENHOR pe oapy vy ome'ē va'erā: ikyra hyekue áry ha'e hyekue re oī va'ekue ha'e javi,

⁴ ha'e gui ipykyraxī mokoīve, hi'áry ikyra ojao'i va'ekue, ikupe áry guare, ha'e ipy'akue re ikyra oī va'ekue voi ipykyraxī reve omboipa 'rā.

⁵ Ha'e nunga ha'e javi Arão ra'y kuery oapy 'rā altar áry, mba'emo oapy vy ome'ēmby, xakā áry ae 'rā oapy. Ha'e va'e ma oapy vy ome'ēmby, heakuā porā rā SENHOR ojou porā aguā.

⁶ — Ha'e gui peteī rami ikuiaia reguarā SENHOR pe mba'emo ome'ē aguā ma ha'eve mymba kyrīive va'e ava e'ŷ vy kunha, ivaikue rei e'ŷ va'e anho.

⁷ Vexa'i ri ome'ē va'erā ogueru vy ma SENHOR renonde py ae 'rā ome'ē.

⁸ Ha'e vy ome'ē va'e akā áry opo omoī vy ojuka 'rā oguy nhemboaty oīaty roka py. Huguykue ma Arão ra'y kuery omboayvi 'rā altar yvýry rupi.

⁹ Peteī rami ikuiaia regua ome'ē va'e gui ma oipe'a 'rā ikyrakue SENHOR pe oapy aguā: huguaikue ipyxo kāgue katy'i omboi pyre ha'e javi, ha'e ikyra hyekue áry ha'e hyekue re oī va'ekue ha'e javi.

¹⁰ Ipykyraxī mokoīve omboi avi 'rā, mokoīve áry ikyra oī va'e, ikupe regua, ha'e gui ipy'akue re ha'e ipykyraxī re oī va'ekue ha'e javi 'rā omboi.

¹¹ Ha'e va'e ha'e javi sacerdote oapypa 'rā altar áry, SENHOR pe tembi'u oapy vy ome'ēmby.

¹² — Kavara ri ome'ē va'erā vy ma SENHOR renonde py 'rā ogueru.

¹³ Ha'e vy inhakā áry opo omoī vy ojuka 'rā oguy nhemboaty oīaty roka py. Huguykue ma Arão ra'y kuery omboayvi 'rā altar yvýry ha'e javi rupi.

¹⁴ Ha'e va'e regua ome'ē va'e gui oipe'a 'rā SENHOR pe oapy vy ome'ē va'erā: ikyra hyekue áry ha'e hyekue re oī va'ekue ha'e javi,

¹⁵ ipykyraxī mokoīve, mokoīve áry ikyra oī va'ekue, ikupe regua, ha'e ipy'akue regua oī va'ekue ipykyraxī reve omboipa 'rā.

¹⁶ Ha'e nunga ha'e javi sacerdote oapypa 'rā altar áry, tembi'u oapy vy ome'ēmby, heakuā porā rā SENHOR ojou porā aguā. Ikyrakue ha'e javi ma SENHOR pegua ae.

¹⁷ Po rami ma pendekorā oeja pyre raka'e rā peve guarā, pendekuaia jave re, ha'e mamo rā pendekuaia py: ndape'ui 'rā ikyrakue neī huguykue — he'i.

4

Sacerdote kuery potae vy e'ŷ ojejavy vy mba'emo ome'ē aguā regua

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're 'rā: Xapy'a rei amongue potae vy e'ŷ ojejavy 'rā SENHOR ojapo uka va'ekue rovai, xapy'a rei ha'e nunga rovai py ojapo 'rā ojapo e'ŷ va'erā va'ekue.

* ^{3:1} Peteī rami ikuiaia regua ha'e kuery ome'ē 'rā Nhanderuete omboete ha'e hexeve peteī rami ikuiaia oikuua uka aguā.

³ Xapy'a rei sacerdote-rā omoī mbyre eteve voi ojejavy 'rā heta va'e kuery opaga aguā rami avi omoingo vy. Ha'e rami vy ojejavyague re SENHOR pe ome'ē 'rā peteī vaka ra'y ivaikue rei e'ŷ va'e.*

⁴ SENHOR renonde py vaka ra'y ogueru 'rā oguy nhemboaty oīaty rokē py. Vaka ra'y akā áry opo omoī vy ojuka 'rā SENHOR renonde.

⁵ Huguykue regua ma sacerdote-rā omoī mbyre ogueraa 'rā oguy nhemboaty oīaty py.

⁶ Huguykue py okuā omoakŷ vy sete-kue 'rā omboayvi SENHOR renonde py, henda iky'a e'ŷ va'e py ajukue okē regua oī va'e rexei.

⁷ Sacerdote huguy omoī avi 'rā altar heakuā porā va'e oapyaty va'e rakua ikuai va'e apy re, SENHOR renonde py. Ha'e va'e altar ma oguy nhemboaty oīaty py oī. Ha'e gui huguy rembyrekue ma altar mba'emo oapyaty va'e guýry onhoē 'rā, nhemboaty oīaty rokē py oī va'e py.

⁸ Jejavya ojao'i ucaa aguā regua vaka ra'y ome'ēmby gui omboipa 'rā ikyrakue oī va'e ha'e javi: ikyra hyekue áry, hyekue re oī va'ekue ha'e javi,

⁹ ipykyraxī mokoīve, mokoīve re ikyra oī va'ekue, ikupe regua, ha'e ipy'akue regua oī va'ekue ipykyraxī reve omboipa avi 'rā,

¹⁰ peteī rami ikuia regua vaka ra'y ome'ēmby gui omboia rami avi. Ha'e vy sacerdote oapypa 'rā altar mba'emo oapyaty va'e áry.

¹¹ Ha'e rā vaka ra'y pirekue, ho'okue ha'e javi, inhakāgue, ipykue, hyekue, ha'e hepoxikue,

¹² vaka ra'y retekue ha'e javi ma ogueraa 'rā teta ikuia gui mombyry'i peteī henda iky'a e'ŷa py. Tanhimbukue omomboaty py 'rā oapypa tata py, xakā áry.

Números 15.22-26

¹³ — Xapy'a rei Israel kuery ha'e javi potae vy e'ŷ ojejavy teī ha'e nungakue avave rei ndoikuuai ranhe, xapy'a rei ojapo e'ŷ va'erā va'ekue py ojejavy okuapy 'rā SENHOR ojapo uka va'ekue rovai.

¹⁴ Ha'e gui ha'e kuery ojejavyague oikuua ri ramo pavē ogueru 'rā vaka ra'y ojejavyague re ome'ē va'erā. Ha'e vy oexa uka 'rā okuapy oguy nhemboaty oīaty roka py.

¹⁵ Vaka ra'y akā áry ha'e kuery monogetaaty kuery omoī 'rā opo SENHOR renonde. Ha'e rire vaka ra'y ojukaa 'rā SENHOR renonde.

¹⁶ Vaka ra'y ruguykue regua sacerdote-rā omoī mbyre ojopy vy ogueraa 'rā oguy nhemboaty oīaty py.

¹⁷ Ha'e vy huguykue py okuā omoakŷ vy sete-kue 'rā omboayvi SENHOR renonde py, cortina okē regua rexei.

¹⁸ Huguykue omoī avi 'rā altar oī va'e rakua apy re, SENHOR renonde oguy nhemboaty oīaty py. Ha'e rā huguy rembyrekue ha'e javi ma onhoē 'rā altar mba'emo oapyaty va'e nhemboaty oīaty rokē py oī va'e guýry.

¹⁹ Vaka ra'y gui ikyrakue omboipa vy oapypa 'rā altar áry.

²⁰ Ha'e va'e vaka ra'y re ojapo 'rā jejavya regua vaka ra'y ome'ēmby re ojapoa rami avi. Ha'e rami ae 'rā ojapo, ha'e kuery ojejavyague sacerdote ojao'i uka vy. Ha'e rami rā ha'e kuery operdoaa 'rā.

²¹ Ha'e va'e rire vaka ra'y retekue oipe'aa 'rā heravy teta ikuia gui mombyry'i. Ha'e vy oapypa 'rā jypy vaka ra'y oapyague rami avi. Ha'e va'e ma heta va'e kuery ojejavyague regua ome'ēmby.

Yvatekueve potae vy e'ŷ ojejavy vy mba'emo ome'ē aguā regua

²² — Ha'e gui huvixa kuery va'e regua potae vy e'ŷ ojejavy 'rā SENHOR ojapo uka va'ekue regua e'ŷ ojapoa py. Ha'e vy ha'e nunga py opaga aguā rami 'rā oiko,

²³ ha'e gui ojejavyague ixupe oikuua ucaa ramo ogueru 'rā kavara ivaikue rei e'ŷ va'e ome'ē va'erā.

* ^{4:3} Jejavya regua ome'ēmby ma ha'e kuery ome'ē ojejavyague ombogue uka aguā. Ha'e nunga ome'ē reve ojejavyague omombe'upa Nhanderuete oiky'a'o ju aguā.

²⁴ Kavara akā áry opo omoī vy SENHOR renonde ojuka 'rā oapy pyrā ojukaaty py. Ha'e nunga ma jejavya regua ome'ẽmbry.

²⁵ Ha'e gui jejavya regua ome'ẽ mbyre ruguy py sacerdote okuā re omoakŷ vy ombovy 'rā altar mba'emo oapyaty va'e rakua ikuai va'e apy re. Ha'e rā huguy rembyrekue ma onhoẽmba 'rā altar mba'emo oapyaty va'e yvýry rupi.

²⁶ Ome'ẽ mbyre kyrakue ma oapypa 'rā altar áry, peteĩ rami ikuiaia regua ome'ẽmbry kyrakue oapya rami avi. Ha'e rami py sacerdote ojao'i uka 'rā huvixa ojejavyague. Ha'e ramo operdoaa 'rā.

Mava'e rā rei potae vy e'ŷ ojejavy vy mba'emo ome'ẽ aguā regua

²⁷ — Ha'e gui xapy'a rei mava'e rā rei pendeyvy re oiko va'e regua ojejavy 'rā potae vy e'ŷ, SENHOR ojapo uka e'ŷ va'ekue ojapoa py. Ha'e rami vy opaga aguā rami va'e 'rā oiko.

²⁸ Ha'e gui ojejavyague ixupe oikuua ucaa ramo ogueru 'rā kavara ivaikue rei e'ŷ va'e ome'ẽ va'erā, ojejavyague regua.

²⁹ Ojejavyague regua ome'ẽ va'e akā áry opo omoī vy ojuka 'rā oapy pyrā ojukaaty py ae.

³⁰ Ome'ẽmbry ruguy py sacerdote okuā omoakŷ vy ombovy 'rā altar mba'emo oapyaty va'e rakua apy re. Ha'e rā huguy rembyrekue ma onhoẽmba 'rā altar yvýry rupi.

³¹ Ikyrakue ma omboipa 'rā peteĩ rami ikuiaia regua re ome'ẽmbry rami avi. Sacerdote oapypa 'rā altar áry, heakuā porā rā SENHOR ojou porā aguā.[†] Ha'e rami sacerdote ojao'i uka 'rā ojejavyague, ha'e ramo operdoaa 'rā.

³² — Ha'e rami teĩ xapy'a rei vexa'i ri ojejavyague regua ome'ẽ vy ma kunha ivaikue rei e'ŷ va'e 'rā ogueru.

³³ Ha'e rami vy ojejavyague regua ome'ẽmbry akā áry opo omoī vy ojuka 'rā ojejavyague re, mba'emo ome'ẽmbry oapyaty py ae.

³⁴ Ojejavyague regua ome'ẽmbry ruguykue py sacerdote okuā omoakŷ vy ombovy 'rā altar mba'emo oapyaty va'e rakua apy re. Ha'e rā huguy rembyrekue ma onhoẽmba 'rā altar yvýry rupi.

³⁵ Ha'e rā ikyrakue ma omboipa 'rā, peteĩ rami ikuiaia regua ome'ẽmbry re ojapoa rami avi. Ha'e vy sacerdote oapypa 'rā altar áry, SENHOR pe mba'emo oapy va'e áry. Ha'e rami sacerdote ojao'i uka 'rā ojejavyague. Ha'e ramo operdoaa 'rā.

5

Amongue va'e rei oikuua e'ŷ re ojejavy vy mba'emo ome'ẽ aguā regua

¹ — Xapy'a rei amongue ojejavy 'rā po rami: Mba'emo oiko rā oexa e'ŷ vy oendu teĩ huvixa omboayvua py voi nomombe'uxei 'rā. Mba'emo oikuua va'eri nomombe'ui vy hexe ae 'rā oī ojejavyague re opaga aguā.

² Xapy'a rei amongue ojopy 'rā mba'emo ha'eve'ŷ va'e re, vixo ha'eve'ŷ va'e re'õgue re mba'e, mymba ha'eve'ŷ va'e re'õgue, e'ŷ vy yvvy rupi onhembotyryry va'e ha'eve'ŷ va'e re'õgue re. Ha'e nunga avave rei ndoexaai teĩ ha'e ae ju ha'eve'ŷ va'e ojeapo vy ha'e ae oiko 'rā opaga aguā rami.

³ Ha'e rami e'ŷ vy xapy'a rei ojopy 'rā ava guigua ha'eve'ŷ va'e re, ha'e nunga oī va'e re rei onhemongy'a 'rā. Potae vy e'ŷ opoko teĩ oikuua nho vy opaga aguā rami 'rā oiko.

[†] ^{4:31} Mboapy regua ome'ẽmbry pe anho “Heakuā porā rā SENHOR ojou porā aguā” 'ea va'e. Ha'e va'e ma oapy vy ome'ẽmbry (capítulo 1), mba'emo aju guigua ome'ẽmbry (capítulo 2), ha'e peteĩ rami ikuiaia regua ome'ẽmbry (capítulo 3). Ha'e va'e mboapy regua ome'ẽmbry ma ome'ẽxeia'i py 'rā ome'ẽ, Nhanderuete omboetea rupi. Ha'e rā amboae regua ome'ẽmbry pe ma “Heakuā porā rā SENHOR ojou porā aguā” nde'i, mba'eta ojejavyague re ome'ẽ, Nhanderuete ombogue aguā. Ha'e va'e ma jejavya regua ome'ẽmbry (4.1–5.7). Ha'e rami avi jejavya regua ome'ẽmbry gui voi ikyrakue oapypa 'rā ha'e nunga pe “Heakuā porā rā SENHOR ojou porā aguā” he'i avi 'rā, mba'eta peteĩ rami ikuiaia regua ome'ẽmbry rami oapypa (4.31).

- ⁴ Ha'e rami e'ŷ vy amongue ijayvu vy oura rive 'rã ojapo vai aguã re, e'ŷ vy ojapo porã aguã re teĩ, ha'e rami rei oura rivea rupi ijayvu 'rã oikuaa pota vy e'ŷ, teĩ oikuaa nho vy ha'e nunga káuxa oiko 'rã opaga aguã rami.
- ⁵ Ha'e ramigua py ri opaga aguã rami oiko rire omombe'upa 'rã mba'e py ete'i pa ojejavya, ⁶ ha'e ome'ẽ 'rã ojejavvyague regua. Ha'e rami vy SENHOR pe ogueru 'rã mymba kyrïve va'e, vexa'i kunha, e'ŷ vy kavara kunha, ojejavvyague regua ome'ẽ va'erã. Ha'e ramo sacerdote ojao'i uka 'rã ojejavvyague.
- ⁷ Ha'e gui vexa'i kunha ndojoui ri vy SENHOR pe ogueru 'rã mokoõ apykaxu e'ŷ vy mokoõ jeruxi, opaga aguã rami oikoague re ome'ẽ va'erã. Peteĩ ma ojejavvyague regua 'rã ome'ẽ, ha'e rã amboae ma oapy vy ome'ẽmby.
- ⁸ Sacerdote pe mokoõve ome'ẽ rã jejavya regua ranhe 'rã ojuka. Ha'e rami vy opoapẽ py omopẽ 'rã ijaju'y kãgue, ipire omondo e'ŷ re.
- ⁹ Ha'e gui jejavya regua ome'ẽmby ruguykue gui ma ogueraa vy omboayvipa 'rã altar yke rupi. Ha'e rã huguy rembyrekue ma altar guýry rupi onhoëmba 'rã. Ha'e va'e ma jejavya regua ome'ẽmby.
- ¹⁰ Ha'e gui amboae guyra ma oapy 'rã ipara oĩa rami vy. Ha'e rami sacerdote ojao'i uka 'rã ojejavvyague. Ha'e rã operdoaa 'rã.
- ¹¹ Xapy'a rei mokoõ apykaxu e'ŷ vy mokoõ jeruxi ogueru aguã ndojoui ri vy, ojejavya regua ome'ẽ va'erã togueru peteĩ ryru trigo ku'ikue iporâve va'e.* Ha'e va'e áry tomoõ eme guive azeite, neĩ heakuã porã va'e, jejavya regua ome'ẽmby ramo.
- ¹² Sacerdote pe ha'e va'e ome'ẽ ramo ojara 'rã peteĩ po renyẽ ha'e javi rekovia. Ha'e va'ekue ma SENHOR pe oapy 'rã altar áry, oapy vy ome'ẽmby oĩ va'e áry ju. Ha'e va'e ma jejavya regua.
- ¹³ Ha'e rami sacerdote ojao'i uka 'rã mba'emo py rei tema ojejavvyague. Ha'e ramo operdoaa 'rã. Ha'e rã ndoapyi va'ekue ma sacerdote kuery pegua, mba'emo aju guigua ome'ẽ mbyre re ojapoa rami.

SENHOR pegua nomboeteiague re ome'ẽ aguã regua

¹⁴ SENHOR aipoe'ive ju Moisés pe:

- ¹⁵ — Ha'e gui xapy'a rei amongue ojapo 'rã ojapo e'ŷ va'erã va'ekue, ha'e potae vy e'ŷ ojejavvy 'rã mba'emo SENHOR pegua iky'a e'ŷ va'e oĩ va'e py. Ha'e rami vy guymba kuery ikuai va'e gui ogueraa 'rã SENHOR pe peteĩ vexa'i ivaikue rei e'ŷ va'e ome'ẽ va'erã. Ha'e va'e repy re reikuua 'rã hatã'i va'e prata guigua mbovy paa, henda iky'a e'ŷ va'e py oiporua va'e rami, mba'emo omboekovia aguã regua ome'ẽmby.
- ¹⁶ Ha'e rami py oguerupa ju 'rã SENHOR pe ndoguerupai va'ekue. Hi'áry omoõ retave ju 'rã, peteĩ nhiruĩ ikuai nhavõ áry peteĩ-teĩ ju 'rã ome'ẽve. Sacerdote pe ae 'rã ome'ẽ. Ha'e ramo sacerdote ojao'i uka 'rã ojejavvyague, mba'emo omboekovia aguã regua vixa'i ome'ẽ va'ekue py ae. Ha'e ramo operdoaa 'rã.

Potae vy e'ŷ ojejavvyague re mba'emo ome'ẽ aguã regua

¹⁷ — Xapy'a rei amongue ojejavvy 'rã SENHOR ojapo uka va'ekue rupi e'ŷ. Potae vy e'ŷ ojapo teĩ oiko 'rã opaga aguã rami, ha'e vy hexe ae 'rã oĩ ojejavvyague re opaga aguã.

¹⁸ Ha'e rami vy guymba kuery gui ogueraa 'rã sacerdote pe peteĩ vexa'i ivaikue rei e'ŷ va'e. Hepy reikuua rami ome'ẽ 'rã ojejavvyague omboekovia aguã. Ha'e ramo ha'e va'e py sacerdote ojao'i uka 'rã potae vy e'ŷ ojejavvyague. Ha'e ramo operdoaa 'rã.

¹⁹ Ha'e va'e ma mba'emo omboekovia aguã regua ome'ẽmby, SENHOR pe opaga aguã rami oiko rire.

Amongue oikuaa teĩ ojejavvy nho vy mba'emo ome'ẽ aguã regua

¹ SENHOR ijayvuve Moisés pe. Ha'e vy aipoe'i:

* 5:11 Apy “peteĩ ryru” he'ia ma mokoõ litro va'e re ijayvu vy, ha'e rã trigo ri rã peteĩ quilo va'e (Lucas 2.24).

² — Xapy'a rei amongue ojejavy 'rā, ojapo vai 'rā SENHOR rovai. Xapy'a rei oirū pe nome'ẽ jevyxei 'rā mba'emo oĩa py omoĩ porā uka va'ekue, e'ŷ vy mba'emo repyrā ome'ẽ va'ekue, mba'emo re imondaague mba'e, oirū okoreague,

³ omokanhy mbyre ojou teĩ ha'e nunga pe "Ndajoui" he'i 'rā oura rive vy, e'ŷ vy amboae ramigua py avakue ojejavy jepiaty rami.

⁴ Ha'e rami ojejavyague oikuaa pavē ramo ome'ẽ jevy nho 'rā imondaague rekovia, e'ŷ vy okoreague rekovia, hexeve omoĩ porā va'ekue, mba'emo omokanhy mbyre ojou va'ekue,

⁵ e'ŷ vy ha'e nunga ha'e javi re oura riveague. Omboekoviapa ju 'rā ha'ekue'i rami. Ha'e va'e áry omoïve'i ju 'rā, peteĩ nhiruĩ ikuai nhavõ áry peteĩ-teĩ ju 'rā ome'ẽve. Ija kuery pe ae 'rā ome'ẽ, ojejavyague re omboekovia aguã regua ome'ẽa árave.

⁶ Omboekovia aguã regua ome'ẽ va'erā ma SENHOR pe ogueru 'rā guymba kuery gui vexa'i ivaikue rei e'ŷ va'e, mbovy repy reikuaa rami omboekovia aguã regua ome'ẽ va'erā. Sacerdote pe ae 'rā ogueru.

⁷ Ha'e ramo ojejavyague sacerdote ojao'i uka 'rā SENHOR renonde. Ha'e ramo operdoaa 'rā ojejavya py opaga aguã rami oikoague.

Mba'emo oapya vy ome'ẽmby regua lei oĩa

⁸ SENHOR aipoe'ive Moisés pe:

⁹ — Ejapo uka na Arão ha'e ta'y kuery pe. Ha'e vy aipo're: Po rami 'rā mba'emo peme'ẽ peapy vy. Oapya vy ome'ẽ mbyre ma altar áry 'rā opyta pytū mbukukue ko'ẽ peve, tata altar áry hendy riae reve.

¹⁰ Ha'e gui ma sacerdote onhemonde 'rā ao puku ajukue iporâve va'e guigua py, ha'e kaxõ ajukue iporâve va'e guigua py opire reia áry. Ha'e rami vy altar tata ome'ẽ mbyre oapypa ma rire tanhimbu oguerova 'rā ha'e gui, altar yvýry ju ranhe 'rā omoĩ.

¹¹ Ha'e gui oao omboekoviapa vy amboae ju 'rā omoĩ. Ha'e vy tanhimbu ogueraa 'rā teta ikuiaia gui mombyry'i, peteĩ henda iky'a e'ŷa py.

¹² Altar áry tata hendy riae 'rā oiny. Pembogue eme. Ko'ẽ nhavõ hi'áry sacerdote omoïve 'rā xakã, ha'e gui ha'e va'e áry ju 'rā omoĩ oapya vy ome'ẽmby, ha'e gui ha'e va'e áry ju 'rā oapya mba'emo kyrakue peteĩ rami ikuiaia regua, ome'ẽ mbyre guigua.

¹³ Altar áry tata hendy riae 'rā oiny. Pembogue eme.

Mba'emo aju guigua ome'ẽmby regua lei oĩa

¹⁴ — Po rami 'rā peme'ẽ mba'emo aju guigua. SENHOR renonde altar oĩ va'e py 'rā Arão ra'y kuery ome'ẽ.

¹⁵ Ha'e kuery regua peteĩ ma mba'emo aju guigua ome'ẽmby gui ojopy 'rā peteĩ po renyẽ trigo ku'ikue iporâve va'e azeite reve. Ojopy avi 'rā heakuã porā va'e ome'ẽmby revegua ha'e javi. Ha'e va'e ma altar áry omoendy 'rā ome'ẽmby ha'e javi rekovia, heakuã porā rā SENHOR ojou porā aguã.

¹⁶ Ha'e rā hembyrekue ma Arão ha'e ta'y kuery ho'u 'rā. Imbovua reve'ŷ 'rā ho'u henda iky'a e'ŷa py. Oguy nhemboaty oĩaty roka rupi 'rā ho'u okuapy.

¹⁷ Ha'e rami avi ndoexyi 'rā imbovua reve. Ha'e kuery peguarã ae xee aeja xevygua oapya vy ome'ẽmby regua. Ha'e nunga ma iky'a e'ŷ ete va'e, jejavya regua ha'e mba'emo omboekovia aguã regua ome'ẽmby rami avi.

¹⁸ Arão ra'y kuery va'e regua ha'e javi 'rā ho'u ha'e va'e gui. Ha'e rami aguã pendekorã aeja va'ekue raka'e rā peve, pendekuaia pukukue reguarã, SENHOR pe oapya vy ome'ẽmby regua. Ha'e va'e re ovy va'e rei tema iky'a e'ŷ va'e avi 'rā opyta.

Sacerdote kueryrā omoĩa jave mba'emo ome'ẽ aguã regua

¹⁹ Ha'e gui SENHOR aipoe'ive Moisés pe:

²⁰ — Pova'e nunga ma Arão ha'e ta'y kuery ome'ẽ 'rā SENHOR pe sacerdote-rā omoĩa ára py. Peteĩ ryru trigo ku'ikue iporâve va'e ome'ẽ riae jepi 'rā mba'emo aju guigua ome'ẽ mbyrã. Mbyte peve ma aje'ivekue 'rā ome'ẽ, ha'e rā hembyrekue ma ka'arukue 'rā.

²¹ Ha'e va'e ma ombojoy 'rā o oxyaty py azeite reve, omona porā 'rā guive ogueru aguā. Pēgue-pēgue'i mbixy ma ogueru 'rā mba'emo aju guigua ome'ẽ aguā, heakuā porā rā SENHOR ojou porā aguā.

²² Ha'e gui Arão ra'y kuery va'e regua hekobia sacerdote-rā omoī mbyre ma ha'ekue rami ae 'rā ojapo. Raka'e rā peve guarā ojapo uka pyre rami vy oapy 'rā SENHOR peguarā ae.

²³ Ha'e rami 'rā mba'emo aju guigua ome'ẽmby peapypa, ndape'ui 'rā.

Jejavya regua ome'ẽmby regua lei oĩa

²⁴ SENHOR aipoe'ive Moisés pe:

²⁵ — Aipo're Arão ha'e ta'y kuery pe: Po rami 'rā peme'ẽ jejavya regua. Mba'emo oapy vy ome'ẽmby ojukaaty py ae 'rā pejuka jejavya regua, SENHOR renonde. Ha'e va'e ma iky'a e'ŷ ete va'e.

²⁶ Jejavya regua mboaxaare sacerdote ae 'rā ho'u. Henda iky'a e'ŷa py 'rā ho'u, oguy nhemboaty oĩaty roka py.

²⁷ Ome'ẽ mbyre ro'okue re ovy va'e ha'e javi tema iky'a e'ŷ va'e avi 'rā optyta. Ha'e gui oao re ri huguy omboayvi xapy'a vy ma omboayviague ojoi 'rā henda iky'a e'ŷa py.

²⁸ Yapo guigua py ri ombojoy rire ma ombovo 'rā hyrukue. Ha'e rā overa va'e guigua py ri ombojoy rire ma oipyeipa porā, ha'e ojoi 'rā yy py.

²⁹ Ha'e va'e ma sacerdote regua ha'e javi 'rā ho'u. Iky'a e'ŷ ete va'e.

³⁰ Ha'e rā jejavya regua ome'ẽ mbyre ro'okue ma ndape'ui 'rā teīve, oguy nhemboaty oĩaty py huguykue Peru rire, henda iky'a e'ŷ va'e py jejavya ojao'i ukaa aguā. Ha'e nunga ma tata py 'rā peapypa.

7

Mba'emo omboekovia aguā regua ome'ẽmby regua lei oĩa

¹ — Po rami 'rā peme'ẽ mba'emo omboekovia aguā regua. Ha'e va'e ma iky'a e'ŷ ete va'e.

² Mba'emo omboekovia aguā regua ome'ẽmby ma oapy vy ome'ẽmby ojukaaty py ae avi 'rā pejuka. Ha'e gui huguykue ma omboayvia 'rā altar áry ha'e javi rupi.

³ Ikyrakue ma omboaxapa 'rā, huguaikue ha'e hye áry ikyra oĩ va'ekue voi,

⁴ ha'e gui ipykyraxígue mokoïve, hexe ikyra oĩ va'ekue ikupe reguare, ha'e ipy'akue regua ipykyraxígue reve omboipa 'rā.

⁵ Altar áry 'rā sacerdote oapy, SENHOR pe oapy vy ome'ẽ mbyrā. Ha'e va'e ma mba'emo omboekovia aguā regua ome'ẽmby.

⁶ Sacerdote regua ha'e javi 'rā ho'u henda iky'a e'ŷ va'e py. Iky'a e'ŷ ete va'e.

⁷ Jejavya regua peme'ea rami ae avi 'rā peme'ẽ mba'emo omboekovia aguā regua. Mokoïve regua lei ma petei'i. Ha'e va'e py sacerdote ojao'i uka 'rā jejavya, rire ixupeguia ae 'rā optyta ndoapyi va'ekue.

⁸ Amongue rekovia sacerdote oapy vy ome'ẽ rire ipirekue optyta 'rā ixupeguia ae.

⁹ Omboxyryryaty py, e'ŷ vy oxyaty áry ombojoy pyre ma sacerdote peguarā meme 'rā optyta, tatakua py mba'emo aju guigua oxy pyre rami avi.

¹⁰ Mba'eta mba'emo aju guigua ome'ẽ mbyre, azeite reve omoapomo mybre e'ŷ vy ipiru va'e teī ma Arão ra'y kuery pegua meme.

Peteī rami ikuia regua ome'ẽmby regua lei oĩa

¹¹ — Po rami 'rā peme'ẽ peteī rami ikuia regua. Amongue va'e rei ha'eve SENHOR pe ome'ẽ aguā.

¹² SENHOR oguerovy'aa rupi ri ome'ẽ vy oguerovy'aa rupi ome'ẽ va'e reve ogueru avi 'rā mbojape imbovua revegua e'ŷ azeite py omoapomo mbyre, ha'e mbojape ipereri'i va'e imbovua revegua e'ŷ azeite py oikyty pyre, ha'e mbojape trigo ku'ikue iporâve va'e guigua azeite reve omoapomo porā mbyre.

¹³ Ha'e va'e mbojape reve ogueru avi 'rā mbojape imbovua revegua ome'ẽ va'erā, peteī rami ikuia regua reve oguerovy'aa rupi ome'ẽ mbyrā.

¹⁴ Mba'emo ome'ẽmbay ha'e javi regua gui ogueru avi 'rã peteĩ mbojape SENHOR pe ome'ẽ va'erã. Ha'e va'e ma peteĩ rami ikuia regua ome'ẽmbay ruguykue sacerdote omboayvi rire ixupe guarã ae 'rã opyta.

¹⁵ Peteĩ rami ikuia reguare ome'ẽa árave 'rã ho'upa oguerovy'aa rupi ome'ẽmbay ro'okue. Mba'eve ndoejai 'rã ko'ẽ rã guarã.

¹⁶ — Ha'e gui xapy'a rei amongue onhemboayvua rupi ri mba'emo ome'ẽ, e'ŷ vy ha'e ae'i onhenhandua rami ome'ẽ teĩ ome'ẽa árave ae 'rã ho'ua. Xapy'a rei mba'emo hembyre ramo ko'ẽgue ha'eve teri ho'ua aguã.

¹⁷ Ha'e rã mboapy ára peve ri ome'ẽ mbyre ro'okue hembyre ramo ma oapypaa 'rã tata py.

¹⁸ Mba'eta xo'o peteĩ rami ikuia regua ome'ẽ mbyre ma mboapy ára peve ri ho'ua ramo heruare ndojou porãai 'rã, ome'ẽ va'ekue voi ndovarei 'rã. Ha'e nunga ma ha'eve'ŷ va'e. Hi'uare re ae 'rã oimba ojejavyague re opaga aguã.

¹⁹ — Ha'e gui mba'emo ha'eve'ŷ va'e re xo'o ovvy ramo ma ndo'uai 'rã. Tata py 'rã oapypaa. Ha'e rã xo'o ome'ẽ mbyre regua ma amongue ojeky'a'o ukapa va'ekue rei 'rã ha'eve ho'ua aguã.

²⁰ Ha'e rami avi amongue ojeky'a'o uka va'ekue'ŷ ri, peteĩ rami ikuia regua SENHOR pe ome'ẽ mbyre xo'o ho'u ramo, oipe'aa 'rã heta va'e kuery mbyte gui.

²¹ Ha'e rami avi xapy'a rei amongue opoko 'rã mba'emo ha'eve'ŷ va'e re, avakue guigua ha'eve'ŷ va'e, e'ŷ vy mymba ha'eve'ŷ va'e, e'ŷ vy onhembotyryry va'e ha'eve'ŷ va'e guigua re. Ha'e gui ha'e va'e peteĩ rami ikuia regua SENHOR pe ome'ẽ mbyre xo'o gui ho'u ramo oipe'aa 'rã heta va'e kuery mbyte gui.

Ikyrakue ha'e huguykue Nhanderuete ndo'u ukaiague

²² SENHOR aipoe'ive ju Moisés pe:

²³ — Ndeayvu 'rã Israel kuery pe. Ha'e vy aipo're: Pe'u eme vaka kyra, neĩ vexa'i ha'e kavara kyra voi.

²⁴ Ha'e gui mymba omano rive va'ekue, ha'e inharõ va'e rembia kyrakue ha'eve 'rã amboae rami peiporu aguã, ha'e rã pe'u aguã ma nda'evei.

²⁵ Mba'eta SENHOR pe oapy vy ogueru pyre kyrakue ho'u va'e rei ma oipe'aa 'rã heta va'e kuery mbyte gui.

²⁶ Ndape'ui 'rã huguy mamo rã peĩa py, neĩ guyra neĩ vaka guigua.

²⁷ Huguy ho'u va'e rei tema oipe'aa 'rã heta va'e kuery mbyte gui.

Sacerdote kuery pegua re ijayvua

²⁸ SENHOR aipoe'ive ju Moisés pe:

²⁹ — Ndeayvu ke Israel kuery pe. Ha'e vy aipo're: Peteĩ rami ikuia regua amongue ome'ẽ vy ogueru 'rã SENHOR pe. Ha'e gui peteĩ rami ikuia regua ome'ẽmbay gui

³⁰ opo py ae 'rã oipe'a heruvy SENHOR pe oapy vy ome'ẽ va'erã. Ipexo kyrakue ma ogueru 'rã ipexokue reve. Ha'e va'e SENHOR renonde oupi vy ombovava reve 'rã ome'ẽ.

³¹ Ikyrakue ma sacerdote oapy 'rã altar áry, ha'e rã ipexokue ma Arão ha'e ta'y kuery peguarã opyta.

³² Hi'ugue oiporu kuaa regua voi ome'ẽ 'rã sacerdote pe, peteĩ rami ikuia regua ome'ẽ va'e gui oipe'a va'ekue.

³³ Mba'eta Arão ra'y kuery va'e regua peteĩ rami ikuia regua ome'ẽmbay ruguykue mboayviare ha'e ikyrakue rapyare, ha'e va'e ae 'rã ogueraa hi'ugue oiporu kuaa regua ojeupe guarã.

³⁴ Mba'eta xejeupe guarã ae aipe'a uka peteĩ rami ikuia regua mymba pexokue ha'e hi'ugue Israel kuery ome'ẽ va'ekue gui, ha'e sacerdote Arão ha'e ta'y kuery pe ju amboaxa. Raka'e rã peve guarã ha'eve 'rã Israel kuery gui ojopy aguã.

³⁵ Ha'e nunga ae ma opyta Arão ha'e ta'y kuery peguarã, mba'emo SENHOR pe oapy vy ome'ẽ mbyre regua, SENHOR pegua sacerdote-rã omoña ára guive ha'e kuery peguarã aeja.

³⁶ Ha'e kuery omoña ára py ha'e nunga ae xee SENHOR xeayvu Israel kuery ome'ẽ aguã ha'e kuery pe, hamymino kuery rekorã avi aeja raka'e rã peve guarã — he'i.

³⁷ Ha'e rami ae 'rã peme'ẽ mba'emo oapy vy ome'ẽmby, mba'emo aju guigua, jejavya regua, mba'emo omboekovia aguã regua, ojeky'a'o aguã regua ha'e peteĩ rami ikuaria regua.

³⁸ Moisés pe SENHOR ae ojapo uka va'ekue Sinai yvyty re. Ojapo ukaa ára guive Israel kuery mba'emo ogueru aguã SENHOR pe Sinai regua tekoá e'ýa py.

8

Êxodo 29.1-37

¹ SENHOR aipoe'ive ju Moisés pe:

² — Eraa Arão ha'e ta'y kuery ijaó puku reve, ha'e azeite SENHOR pe nhomboaxaa aguã regua avi, ha'e gui peteĩ vaka ra'y jejavya re reme'ẽ va'erã, ha'e mokoï vexa'i, ha'e gui ajaka mbojape imbovua revegua e'ý va'e oña.

³ Oguy nhemboaty oíaty rokẽ py emboaty uka heta va'e kuery ha'e javi — he'i.

⁴ Ha'e ramo Moisés ojapo SENHOR ojapo ukaague rami. Ha'e ramo heta va'e kuery ma oguy nhemboaty oíaty rokẽ py onhemboatypa okuapy.

⁵ Moisés aipoe'i ijaty va'e kuery pe:

— Namigua ma SENHOR ojapo uka va'ekue nhandevy — he'i vyve

⁶ Arão ha'e ta'y kuery ogueru vy ombojau yy py.

⁷ Ommonhemonde Arão kamixa puku py, ha'e ku'akuaa ju omoï. Omoï ao puku sacerdote pegua. Hexe omoï avi hi'árygua, ha'e manto sacerdote pegua ae omoï vy oku'akua avi manto regua py ae, ita oimbaa va'e py. Ha'e vy omoatyrõmba porã'i hexe.

⁸ Ha'e gui ma omoï avi pexo regua, ha'e pexo regua re ma Urim ha'e Tumim ju omoï.*

⁹ Inhakã re oimama imoiny ingorarã, ha'e ingora re henonde katy omoï avi ouro guigua ipereri'i va'e hakã regua iky'a e'ý va'erã, Moisés pe SENHOR ojapo ukaague rami vy.

¹⁰ Ha'e rami rã azeite SENHOR pe nhomboaxaa aguã regua Moisés ogueru vy omoï ombojeroviaaty re, ha'e mba'emo ikuai va'e ha'e javi re, iky'a e'ý va'erã omboaxa vy.

¹¹ Altar áry rupi ma sete-kue azeite omboayvi. Omboayvi altar re hembiporu ikuai va'e rupi, hy'a guaxu ha'e henda rupi guive, iky'a e'ý va'erã omboaxa vy.

¹² Ha'e va'e rire Arão akã áry ju azeite SENHOR pe nhomboaxaa aguã regua onhoë, iky'a e'ý va'erã omboaxa vy.

¹³ Ha'e gui Moisés omonhemboja avi Arão ra'y kuery. Ha'e vy kamixa puku py omonhemonde vy ha'e kuery oiku'akua avi ku'akuaa py. Akã reguarã oimama avi imoiny, SENHOR ijayvuague rami vy.

¹⁴ Vaka ra'y ogueru ruka avi jejavya regua ome'ẽ va'erã. Vaka ra'y akã áry Arão ha'e ta'y kuery opo omoï jejavya regua ome'ẽ va'erã.

¹⁵ Ha'e rã Moisés ojuka vy ojopy huguykue, ha'e vy okuã py oikyty altar rakua ikuai va'e re. Ha'e rami vy oiky'a'o altar. Huguy rembyrekue ma altar yvýry onhoëmba. Ha'e rami vy omboaxa iky'a e'ý va'erã, hi'áry ojejavague ojao'i uka aguã.

¹⁶ Ha'e gui ma hyekue áry ha'e ipy'akue re ikyra oí va'ekue ogueru ipykyraxigüe mokoïve ikyrakue reve. Ha'e vy Moisés oapypa altar áry.

¹⁷ Ha'e rã vaka ra'y regua altar áry ndoapyi va'ekue ma ha'e kuery rekoá gui mombyry'i oapy, ipirekue, xo'o ha'e hepoxi ha'e javi reve, Moisés pe SENHOR ojapo ukaague rami vy.

¹⁸ Ha'e va'e rire vexa'i oapy vy ome'ẽ va'erã ju ogueru ruka. Vexa'i akã áry ma Arão ha'e ta'y kuery opo omoï.

¹⁹ Moisés ojuka vy huguykue omboayvipa altar áry ha'e javi rupi.

²⁰ Omboa'ypa vexa'i. Inhakágue ma Moisés oapy, ipêgue ha'e ikyrakue reve.

²¹ Hyekue, hetymague ma ojoipa ranhe yy py. Ha'e gui vexa'i ha'e javi Moisés oapy altar áry, heakuã porã rã SENHOR ojou porã aguã. Ixupeguá oapy vy ome'ẽmby opyta, Moisés pe SENHOR ojapo ukaague rami vy.

* 8:8 Urim ha'e Tumim ma sacerdote kuery mba'ekuaa-a oguereko va'ekue (Números 27.21).

²² Ha'e gui amboae vexa'i ju ogueru ruka sacerdote-rã mboaxaarã. Vexa'i akã áry Arão ha'e ta'y kuery omoõ opo.

²³ Moisés ojuka vy huguykue guiojara vy ombovy Arão nambi, ikuã guaxu ha'e ipyxã guaxu oiporu kuaa regua re meme.

²⁴ Ha'e gui Arão ra'y kuery avi omovaẽ. Huguy gui ae ombovy ha'e kuery nambi, ikuã guaxu ha'e ipyxã guaxu oiporu kuaa regua re. Ha'e rã huguy rembyrekue ma altar áry ha'e javi rupi Moisés omboayvi.

²⁵ Ogueru ikyrakue, huguaikue, ikyra hyekue áry ha'e ipy'akue re oĩ va'ekue, ipykyraxígue mokoõve ikyrakue reve, ha'e gui hi'ugue oiporu kuaa regua.

²⁶ Ha'e gui ajaka mbojape imbovua revegua e'ŷ va'e oĩ SENHOR renonde oĩ va'e gui ma ojopy peteĩ mbojape imbovua revegua e'ŷ, peteĩ mbojape azeite revegua, ha'e gui peteĩ mbojape ipererí'i va'e. Ha'e va'e ma omoõ ikyrakue ha'e hi'ugue oiporu kuaa regua áry.

²⁷ Ha'e nunga ha'e javi omoõ Arão ha'e ta'y kuery po py. Ha'e vy oupi reve ombovava SENHOR renonde, ome'ẽ mbyrã.

²⁸ Ha'e va'e rire ha'e kuery po gui Moisés oipe'a ju vy oapy altar áry, mba'emo oapy inony va'e áry. Ha'e nunga ma ha'e kuery iky'a e'ŷ va'erã omboaxa vy ome'ẽ, heakuã porã rã SENHOR ojou porã aguã, SENHOR pe ae oapy vy ome'ẽ.

²⁹ Ipexokue ma Moisés ojopy vy oupi reve ombovava SENHOR renonde, ome'ẽ mbyrã. Ha'e va'e vexa'i nhomboaxaa aguã regua ome'ẽmbypexokue ma Moisés pegua ae, SENHOR ijayvuague rami vy.

³⁰ Ha'e gui Moisés ojopy avi azeite SENHOR pe nhomboaxaa aguã regua, ha'e altar áry huguykue oĩ va'ekue. Ha'e va'e omboayvi Arão ha'e ijao re, ha'e gui ta'y kuery ha'e ijao re guive. Ha'e rami vy iky'a e'ŷ va'erã omboaxa Arão ha'e ta'y kuery, ijao reve.

³¹ Ha'e gui ma Arão ha'e ta'y kuery pe Moisés aipoe'i:

— Pembojy ke xo'o oguy nhemboaty oïaty rokẽ rexei. Ha'e pyve 'rã pe'u ajaka nhomboaxaa aguã regua py mbojape oĩ va'e reve, xee ajapo ukaague rami vy, "Arão ha'e ta'y kuery ho'u'rã", ha'e rire.

³² Ha'e gui xo'o ha'e mbojape ndape'upai va'ekue ma peapypa 'rã.

³³ Sete ára peve pejepe'a eme oguy nhemboaty oïaty rokẽ gui, iky'a e'ŷ va'erã penemboaxa aguã ára ojeupitypa e'ŷa ja. Mba'eta sete ára peve 'rã SENHOR ojeupe guarã penemboaxa.

³⁴ Kova'e ára py jajapo va'ekue ma SENHOR ojapo uka va'ekue meme, pejejavyague ojao'ipa aguã.

³⁵ Ha'e nunga rupi sete ára peve 'rã pepyta oguy nhemboaty oïaty rokẽ py ara py ha'e pyávy. Pejapopa 'rã SENHOR ojapo uka va'ekue, pemanu e'ŷ aguã, ha'e rami xevy ojapo uka rire — he'i.

³⁶ Ha'e ramo Arão ha'e ta'y kuery ojapopa Moisés rupi SENHOR ojapo uka va'ekue ha'e javi.

9

Arão ojeupeguha'e heta va'e kuery regua ome'ẽague

¹ Oito araa py ma Moisés oenoõ Arão ta'y kuery reve, ha'e Israel monetaaty kuery guive.

² Ha'e vy aipoe'i Arão pe:

— Eraa peteĩ vaka ra'y rejavya regua reme'ẽ va'erã, ha'e peteĩ vexa'i reapy vy reme'ẽ va'erã. Mokoõve ma ivaikue rei e'ŷ va'e 'rã. Ha'e vy eru SENHOR renonde.

³ Ha'e gui aipo're 'rã Israel kuery pe: "Peru peteĩ kavara pejejavyague re peme'ẽ va'erã, ha'e gui peteĩ vaka ra'y ha'e peteĩ vexa'i ra'y, mokoõve peteĩ ma'etŷ va'e ha'e ivaikue rei e'ŷ va'e meme, peapy vy peme'ẽ va'erã.

⁴ Peru avi peteĩ vaka ha'e peteĩ vexa'i peteĩ rami ikuiaia regua peme'ẽ va'erã, SENHOR renonde pejuka aguã, ha'e gui mba'emo aju guigua azeite reve omona mbyre peme'ẽ va'erã, mba'eta kova'e ára SENHOR ojexa uka 'rã pêvy", 're 'rã ha'e kuery pe — he'i.

⁵ Ha'e ramo Moisés ijayvuague rami vy ha'e kuery oguerupa okuapy oguy nhemboaty oīaty rexei. Ha'e vy heta va'e kuery ha'e javi oupa vy ojexa uka okuapy SENHOR renonde.

⁶ Moisés aipoe'i:

— Kova'e SENHOR ojapo uka va'ekue ma pejapo 'rā. Ha'e ramo SENHOR rexakāa ojexa uka 'rā pēvy.

⁷ Arão pe ju Moisés aipoe'i:

— Enhemboja ke altar oīa py, ha'e eme'ẽ rejavyague re reapy vy reme'ẽ aguā va'e. Ha'e vy ejao'i uka ndee ae rejavyague, ha'e gui heta va'e kuery pe avi. Ha'e va'e rire eme'ẽ heta va'e ome'ẽ uka va'ekue ha'e kuery ojejavyague rejao'i uka aguā, SENHOR ijayvuague rami vy — he'i.

⁸ Ha'e ramo altar oīa py Arão onhemboja vy ha'e ae ojejavyague regua ranhe ojuka vaka ra'y.

⁹ Arão pe ta'y kuery huguykue ogueru ramo huguykue re okuā ombovy vy oikyty altar rakua ikuai va'e re. Huguy rembyrekue ma onhoēmba altar yvýry.

¹⁰ Ha'e gui ojejavyague regua ome'ẽmby kyrakue, ipykyraxīgue ha'e ipy'akue regua oī va'ekue ha'e javi ma oapypa altar áry, SENHOR Moisés pe ojapo ukaague rami vy.

¹¹ Ha'e rā ho'o ha'e ipirekue ma tekoa gui mombyry'ia py oapy.

¹² Ha'e va'e rire mymba oapy vy ome'ẽ va'erā ju ojuka. Arão pe ta'y kuery huguykue ogueru rā ha'e omboayvi altar yvýry ha'e javi rupi.

¹³ Ixupe ogueru avi mymba oapy vy ome'ẽ va'erā omboa'ypa va'ekue, inhakāgue reve. Ha'e rā oapypa altar áry.

¹⁴ Ha'e gui hyekue ha'e hetymague ojoipa vy oapy altar py oapy inony va'e áry.

¹⁵ Ha'e va'e rire ogueru ruka heta va'e kuery ome'ẽ uka va'ekue. Kavara heta va'e ojejavyague regua ome'ẽmby ranhe ojopy vy ojuka, ha'e oguereko katu ojejavyague regua ome'ẽ aguā, jypy ojapoague rami vy.

¹⁶ Ogueru ruka avi oapy vy ome'ẽ va'erā. Ha'e vy ome'ẽ ojapoaty rami vy.

¹⁷ Ha'e gui ogueru ruka avi mba'emo aju guigua ome'ẽ va'erā. Ha'e va'e regua peteĩ po renyē ojopy vy oapy altar áry, aje'ive reve mba'emo oapy va'ekue áryve.

¹⁸ Ha'e va'e rire ojuka vaka ha'e vexa'i peteĩ rami ikuaria reguarā heta va'e kuery rekovia. Huguykue Arão ra'y kuery ixupe omboaxa rā omboayvipa altar yvýry ha'e javi rupi.

¹⁹ Ojopy avi vaka ha'e vexa'i kyrakue, huguaikue, hyekue regua oī va'ekue, ipykyraxīgue ha'e ipy'akue regua oī va'ekue.

²⁰ Ipexokue áry ikyrakue omoīmba vy oapypa altar áry.

²¹ Ha'e rā ipexo ha'e hi'ugue oiporu kuaa regua ma Arão omboaxa SENHOR renonde oupi vy ombovava reve, Moisés ojapo ukaague rami vy.

²² Ha'e va'e rire heta va'e kuery ikuaria katy Arão opo oupi vy ogueroayvu porāmba. Ha'e gui mae oguejy, ojejavyague regua ome'ẽmba ma rire, oapy vy ome'ẽmba ha'e peteĩ rami ikuai aguā regua guive.

²³ Moisés ha'e Arão oike jogueravy oguy nhemboaty oīaty py. Ha'e gui oē ju vy teīgue ju ogueroayvu porāmba heta va'e kuery. Ha'e ramo SENHOR rexakāmbaa ojekuaa ha'e kuery pavē pe.

²⁴ Oma'ẽ rā SENHOR-a guigua tata oguejy vy oapypa mymba ome'ẽmba altar áry oī va'e ha'e javi, ikyrakue guive. Ha'e nunga ha'e kuery oexa vy oguerovy'a reve omboete okuapy. Guenapy'ā re oīmba, ngova yvy re omovaē reve.

² Ha'e ramo SENHOR-a gui tata ho'a xapy'a vy oapypa. Ha'e rā oiko vai SENHOR renonde.

³ Ha'e gui Moisés aipoe'i Arão pe:

— Po rami SENHOR ijayvuague ae: “Xere onhemboja va'e pe aexa uka 'rā xeky'a e'ŷ va'ea, ha'e heta va'e kuery renonde ojekuaa 'rā xepo'akaa”, he'i. Ha'e ramo Arão okyrirī.

⁴ Ha'e gui Moisés oenoī Arão tuty Uziel ra'y kuery Misael ha'e Elzafā. Ha'e kuery pe aipoe'i:

— Peju, peipe'a penderyvy retekue henda iky'a e'ŷ va'e renonde gui, peraa tekaoa gui mombyry'ia py — he'i.

⁵ Ha'e ramo ha'e kuery ou vy ikamixa puku py ae onhovā heravy tekaoa gui mombyry'ia py, Moisés aipoe'iague rami vy.

⁶ Moisés aipoe'i Arão pe, ha'e ta'y kuery Eleazar ha'e Itamar pe voi:

— Pejeai eme pende'a re, neĩ pemondoro eme pendeao, pemanoo e'ŷ aguā, ha'e nhande kuery pavē áry ou e'ŷ aguā imbopagaarā nda'evei ete va'e. Ha'e rā nderegua kuery Israel ro pygua kuery ikuai va'e ma tojae'o pavē SENHOR-a gui tata ho'aague re.

⁷ Peẽ eme guive oguy nhemboaty oĩaty rokē gui, pemanoo e'ŷ aguā, pendere omoña rire azetei SENHOR pe nhomboaxaa aguā regua — he'i.

Ha'e ramo ha'e kuery ojapo okuapy Moisés aipoe'iague rami.

Sacerdote kuery mba'emo ojapo aguā, ha'e kuery pegua re ijayvua

⁸ SENHOR voi ijayvu Arão pe. Ha'e vy aipoe'i:

⁹ — Ndee ha'e ndera'y kuery oguy nhemboaty oĩaty py peike ta jave ndapey'ui 'rā vinho neĩ iro va'e, peiko vai e'ŷ aguā. Ha'e rami aguā ma peẽ kuery rekorā aeja va'e raka'e peve guarā, ha'e peneramymino kuery ikuai va'erā'-erā pe guive guarā,

¹⁰ peẽ kuery peikuua aguā mba'emo iky'a e'ŷ va'erā omboaxa pyre ha'e omboaxa pyre'ŷ reve joo rami e'ŷa, ha'eve va'e ma ha'eve'ŷ va'e reve joo rami e'ŷ guive,

¹¹ Israel kuery pembo'e kuaa aguā Moisés pe SENHOR omombe'u uka va'ekue rupi ikuai aguā rami.

¹² Ha'e gui Moisés aipoe'i Arão ha'e ta'y okuave'i va'ekue Eleazar ha'e Itamar pe:

— Pejopy mba'emo aju guigua SENHOR pe ome'ěa teĩ ndoapyi va'ekue, ha'e pe'u imbovua e'ŷ re altar yv'y'iry ae, iky'a e'ŷ va'e ramo.

¹³ Pe'u 'rā henda iky'a e'ŷ va'e py, mba'eta p̄evyguia ha'e pendera'y kuery pegua ae, mba'emo SENHOR pe oapy vy ome'ě mbyre guigua. Ha'e rami ae xevy ojapo uka va'ekue.

¹⁴ Ha'e gui ipexokue ha'e hi'ugue peupi vy pembovava reve pemboaxa va'ekue voi pe'u 'rā peteĩ henda iky'a e'ŷa py, ndera'y kuery ha'e nderajy kuery reve. Mba'eta ha'e nunga ma ndevy guarā ae ome'ě mbyre, ha'e ndera'y kuery peguarā, Israel kuery peteĩ rami ikuua regua ome'ě va'ekue guigua.

¹⁵ Hi'ugue ha'e ipexokue peupi vy pembovava reve pemboaxa va'ekue ma Peru 'rā mymba peapy va'ekue kyrakue reve. Ha'e nunga ha'e javi peupi vy pembovava 'rā SENHOR renonde. Ha'e rami aguā ma penderekorā aeja va'e raka'e peve guarā, ha'e peneramymino kuery peguarā, SENHOR he'iague rami vy — he'i.

¹⁶ Moisés oikuaa pota ete kavara jejavya regua ome'ě mbyre guigua teĩ oapypaa ma ra'e. Ha'e vy ijayvu atã Arão ra'y kuery okuave'i va'e Eleazar ha'e Itamar pe. Ha'e vy aipoe'i:

¹⁷ — Mba'e re tu ndape'ui ri jejavya regua ome'ě mbyre guigua henda iky'a e'ŷa py? Mba'eta ha'e nunga ma iky'a e'ŷ ete va'e. Pendevy SENHOR ome'ě heta va'e kuery ojejavyague peraa aguā SENHOR renonde pejao'i uka vy.

¹⁸ Ne'exa, ha'e va'e mymba ome'ě mbyre ruguykue henda iky'a e'ŷ va'e py ndogueruai ramo ma xo'o pe'upa 'rāgue ra'e henda iky'a e'ŷ va'e py, xee ajapo ukaague rami vy — he'i.

¹⁹ Arão ombovai Moisés pe:

— Ma'ě, ange jejavya regua xee ha'u va'e rire SENHOR ojou porā 'rāgue ri nda'u? Mba'eta ange xera'y kuery omboaxa heta va'e kuery ojejavyague regua SENHOR renonde, oapy vy ome'ě mbyre voi, va'eri ha'e rami ete xere oiko — he'i.

20 Ha'e nunga Moisés oendu vy nda'ivaivei.

11

Deuteronômio 14.3-20

- 1** SENHOR ijayvu Moisés ha'e Arão pe. Ha'e vy aipoe'i:
- 2** — Aipopeje Israel kuery pe: Yvy re mymba ipy irundy va'e ikuai va'e gui ma pova'e anho 'rã pe'u:
- 3** Ipyapẽ mbyte rupi ja'o va'e ha'e oixu'u jevy va'e ha'e javi ma ha'eve 'rã mymba ikuai va'e gui pe'u aguã.
- 4** Ha'e rã pova'e nunga ma ndape'ui 'rã: oixu'u jevy va'e rive, ha'e e'ŷ vy ipyapẽ ja'o va'e'ŷ rive. Camelô ma oixu'u jevy va'eri ipyapẽ ja'o va'e'ŷ. Ha'e nunga ma ha'eve'ŷ va'e pendevy.
- 5** Arganaz ma oixu'u jevy avi va'eri ipyapẽ ja'o va'e'ŷ. Ha'e nunga ma pendevy ha'eve'ŷ va'e.
- 6** Tapixi ma oixu'u jevy va'eri ipyapẽ ja'o va'e'ŷ. Ha'e nunga pendevy ha'eve'ŷ va'e.
- 7** Poryko ma ipyapẽ ja'o va'eri oixu'u jevy va'e'ŷ. Ha'e va'e ma pendevy ha'eve'ŷ va'e.
- 8** Ha'e nunga ro'okue ma ndape'ui 'rã, neĩ he'ögue re ma voi ndapepokoi 'rã, pendevy ha'eve'ŷ va'e ramo.
- 9** — Ha'e gui yy rupi ikuai va'e regua ma pova'e pe'u 'rã: ye'ẽ ha'e yakã rupi ipepo ha'e ipekue va'e ma pe'u 'rã.
- 10** Ha'e rã ipepo e'ŷ va'e, e'ŷ vy ipekue e'ŷ va'e ma nda'evei: ye'ẽ rupi, yakã, yy rupi onhemboaty okuapy, yy rupi temimoingo ikuai va'e tema nda'evei, ha'eve'ŷ va'e pendevy.
- 11** Pendevy ha'eve'ŷ va'e ramo ma ho'okue ndape'ui 'rã, he'ögue voi ha'eve'ŷ va'e.
- 12** Yy rupigua ipepo e'ŷ va'e, e'ŷ vy ipekue e'ŷ va'e ma pendevy ha'eve'ŷ va'e meme.
- 13** — Guyra oveve va'e regua ha'eve'ŷ va'e ma pova'e regua ro'o ndape'ui 'rã, oyeguarupy ramo: taguato xiñ, xapirẽ ha'e taguato ye'ẽ rupigua gui;
- 14** milhano, falção ha'e hexegua va'e ma guive rã;
- 15** xapirẽ regua ha'e javi, ha'e hexegua va'e ma guive rã;
- 16** avestruz, urukure'a, gaivota, taguato, ha'e hexegua va'e ma guive rã;
- 17** mocho, xapirẽ ye'ẽ rupigua, íbis,
- 18** aka'ẽ, pelicano, abutre,
- 19** cegonha, garça ha'e hexegua va'e ma guive rã, poupa ha'e mbopi.
- 20** — Ha'e gui omyi'i va'e oveve'i ha'e ipy irundy re oguata va'e regua yvy áry rupi opo aguã hetyma mbukuve va'e ma pe'u 'rã.
- 21** Ha'e rã omyi'i ha'e oveve'i va'e, opy irundy re oguata va'e regua yvy áry rupi opo aguã hetyma mbukuve va'e ma pe'u 'rã.
- 22** Ha'e va'e regua pe'u va'erã ma pova'e: locusta ha'e hexegua va'e ma guive rã, tukukaru ha'e hexegua va'e ma guive rã, kyju ha'e hexegua va'e ma guive rã, ha'e tuku hexegua va'e ma guive rã.
- 23** Ha'e gui amboae oveve'i va'e ha'e omyi'i va'e opy irundy re oguata va'e ma ha'eve'ŷ va'erã meme pendevy.
- 24** — Pova'e nunga re'ögue ma penemongy'aarã ramo amongue va'e rei hexe opoko va'ekue ma ha'eve'ŷ va'e 'rã oiko ka'aru peve.
- 25** He'ögue reraare ma ojoi 'rã oao, ha'e rami teĩ ha'eve'ŷ va'e 'rã oiko ka'aru peve.
- 26** Myumba ipyapẽ ja'o va'eri mbyte rupi e'ŷ oja'o va'e, ha'e oixu'u jevy va'e'ŷ ma pendevy ha'eve'ŷ va'e meme. Ha'e nunga re opoko va'e rei ma ha'eve'ŷ va'e avi 'rã oiko.
- 27** Myumba ipy irundy va'eri opy mbyte re oguata va'e ma pendevy ha'eve'ŷ va'e meme. He'ögue re opoko va'e ma guive rã ha'eve'ŷ va'e 'rã oiko ka'aru peve.
- 28** He'ögue reraare voi ojoi 'rã oao, ha'e ha'eve'ŷ va'e oiko 'rã ka'aru peve. Ha'e nunga ha'e javi ma ha'eve'ŷ va'e pendevy.
- 29** — Ha'e gui yvy jave re temimoingo ikuai va'e-vá'e regua ma pova'e nunga ha'eve'ŷ va'e 'rã: doninha, anguja, teju ha'e hexegua va'e ma guive rã,

³⁰ ha'e geco, jakare yvy re ikuai va'e, tejuro, teju ye'ẽ yvýrygua ha'e camaleão.

³¹ Ha'e gui temimoingo ikuai va'e ha'e javi gui ma ha'e nunga pendevy ha'eve'ŷ va'e meme 'rã. He'õgue re opoko va'ekue ma oiko 'rã ha'eve'ŷ va'e ka'aru peve.

³² Ha'e mba'emo áry ha'e nunga re'õgue ho'a ramo voi ha'eve'ŷ va'e 'rã, mba'emo ryru yvýra guigua mba'e, ao, ipire, voxá, e'ŷ vy tembiporu mba'emo jajapoa va'e rei, ha'e nunga nhamoï 'rã yy py, ka'aru peve 'rã optyta ha'eve'ŷ va'e. Ha'e ramo ma ha'eve va'e ju 'rã optyta.

³³ Ha'e gui mba'emo ryru nhae'ū guigua py ri ha'e nunga ho'a ramo ma ha'e py omboyrú pyre ha'e javi ha'eve'ŷ va'e 'rã optyta. Hyru voi pembovo 'rã.

³⁴ Ha'e va'e py tembi'u yy reve ojy va'ekue ma ha'eve'ŷ va'e meme 'rã optyta. Hykue va'e jay'u va'erã omboyrú pyre ma ha'eve'ŷ va'e meme avi 'rã.

³⁵ Ha'e mba'emo áry rei he'õgue ho'a ramo optyta 'rã ha'eve'ŷ va'e: tatakua, e'ŷ vy tata rupa yapo guigua áry ho'a ramo pembovopa 'rã, ha'eve'ŷ va'e ma optyta ramo, ha'e nunga rupi ha'eve'ŷ va'ea peikuua aguã.

³⁶ Ha'e rã yvu, e'ŷ vy yy omboty pyre py ri ho'a ramo ma ha'eve va'e 'rã optyta. Ha'e rã yy py omano va'ekue re opoko va'ekue ma ha'eve'ŷ va'e 'rã optyta.

³⁷ Xapy'a rei mba'emo ra'yígue onhotŷ mbyrã va'e áry ri he'õgue ho'a ramo ma optyta 'rã ha'eve va'e.

³⁸ Ha'e rã xapy'a rei amongue ha'yígue yy py omoakŷ va'ekue áry mba'emo re'õgue ho'a ramo ma ha'eve'ŷ va'e 'rã optyta pendevy.

³⁹ — Xapy'a rei mymba pe'u aguã ha'eve va'e omano ramo he'õgue re amongue opoko ri vy optyta 'rã ha'eve'ŷ va'e ka'aru peve.

⁴⁰ He'õgue regua ho'u va'ekue ma ojoi 'rã oao, ha'e ka'aru peve 'rã oiko ha'eve'ŷ va'e. He'õgue reraare voi ojoi 'rã oao, ha'e oiko 'rã ha'eve'ŷ va'e ka'aru peve.

⁴¹ — Opa marãguá temimoingo yvy rupi omyí okuapy va'e ma pe'u aguã ha'eve'ŷ va'e meme. Ha'e nunga ma pe'u va'erã e'ŷ.

⁴² Opa marãguá temimoingo yvy rupi omyí okuapy va'e guye re oguata va'e, opy irundy re oguata va'e, e'ŷ vy ipy reta va'e ma nda'evei 'rã pe'u aguã, ha'eve'ŷ va'e ramo.

⁴³ Ha'eve'ŷ va'e penhemongo eme ha'e va'e regua temimoingo yvy rupi omyí okuapy va'e pe'ua py, penhemongy'a eme ha'e va'e regua gui, ha'eve'ŷ va'e peiko e'ŷ aguã.

⁴⁴ Xee ma SENHOR Penderuete. Ha'e nunga rupi peẽ voi pejeky'a'o iky'a e'ŷ va'e peiko aguã, mba'eta xee ma iky'a e'ŷ va'e. Penhemongy'a eme temimoingo kuery yvy rupi onhembotyryry va'e gui.

⁴⁵ Xee SENHOR ae Egito yvy gui penenoëmba va'ekue, Penderuete aiko aguã. Ha'e nunga rupi iky'a e'ŷ va'e 'rã peiko, mba'eta xee ma iky'a e'ŷ va'e.*

⁴⁶ — Ha'e va'e lei ma mymba kuery, guyra oveve va'e, yy rupi omyí va'e, ha'e temimoingo yvy re ikuai va'e ha'e javi regua,

⁴⁷ peikuua aguã ha'eve va'e ha'e ha'eve'ŷ va'e reve joo rami e'ŷa, ha'e mymba pe'u aguã ha'eve va'e ha'e ha'eve'ŷ va'e voi.

12

Kunhague oikuavã'i rire ojeky'a'o jevy aguã regua

¹ SENHOR aipoe'ive ju Moisés pe:

² — Ndeayvu 'rã Israel kuery pe: Xapy'a rei peteñ kunha kyrí va'e oguereko vy ava'i ri oikuavã'i ma vy sete ára re 'rã oĩ ha'eve'ŷ va'e, gueko re oiko va'e rami ae avi.

³ Oito araa py ma ava'i pire omboi uka 'rã.

⁴ Ha'e gui kunha va'e ma trinta e três ára peve 'rã oĩve nguguy gui ojeky'a'o aguã. Ojeky'a'opaa ára ojeupity e'ŷa ja teíve ma voi ndopokoi 'rã iky'a e'ŷ va'e re, neñ ndoikei 'rã henda iky'a e'ŷ va'e py.

⁵ Ha'e rã kunha'i ri oikuavã'i vy ma mokoï semana 'rã ha'eve'ŷ va'e oĩ, gueko re oiko va'e rami avi. Ha'e va'e rire sessenta e seis ára re oĩ 'rã nguguy gui ojeky'a'opaa peve.

* 11:45 1 Pedro 1.16

6 — Ha'e gui imemby'i e'ŷ vy ipi'a'i oikoague gui ojeky'a'opa aguã ára ojeupity ma ramo sacerdote pe ogueraa 'rã peteĩ vixa'i ra'y peteĩ ma'etŷ'i va'e oapy vy ome'ẽ va'erã, ha'e gui peteĩ apykaxu e'ŷ vy peteĩ jeruxi'i jejavya regua ome'ẽ va'erã, oguy nhemboaty oïaty rokẽ py.

7 Ha'e ramo sacerdote ojuka 'rã SENHOR renonde kunha va'e ha'eve e'ŷague ojao'i uka vy. Ha'e ramo ojeky'a'opa ju 'rã nguguy gui. Ha'e rami aguã ma omemby'i e'ŷ vy opi'a'i oikuavã'i va'e rekora oeja pyre.

8 Ha'e rami teĩ xapy'a rei vixa'i ra'y ome'ẽ va'erã ndojoui ri vy ogueraa 'rã mokoĩ jeruxi e'ŷ vy mokoĩ apykaxu'i. Ha'e va'e regua peteĩ ma oapy vy ome'ẽ 'rã, ha'e rã amboae ma jejavya regua. Ha'e va'e py sacerdote ojao'i uka 'rã kunha va'e ha'eve e'ŷague, ha'e ramo ha'eve va'e ju 'rã oiko.*

13

Lepra regua lei oĩa

1 SENHOR aipoe'i Moisés ha'e Arão pe:

2 — Xapy'a rei amongue pire re oĩ 'rã irurupaa e'ŷ vy ipeupa rei, e'ŷ vy iovea overa rei va'e. Ha'e nunga lepra rivyvyi ramo peraa 'rã sacerdote Arão-a py, e'ŷ vy ta'y sacerdote oiko va'ea py.

3 Ha'e ramo sacerdote oexa pota 'rã ijai ipire re oĩ va'e. Xapy'a rei ijai rupi ipire rague xiĩ rei, ha'e ijai ho'o peve oike ma ramo ma oikuaa 'rã lepra guigua ete ai vaikue. Sacerdote oexa potapa ma vy ixupe “Ha'eve'ŷ va'e” he'i 'rã.

4 Xapy'a rei iovea overa rei va'e xiĩ rei va'eri ho'o peve ijai ndoikei, ha'e ipire rague voi naxiĩ ramo sacerdote omboty 'rã ijai va'e ha'e ae'i sete ára peve.

5 Sete araa py ma sacerdote oexa pota ju 'rã. Oexa rã ijai vaikue opyta, ha'e ipire áry rupi nda'ipy-ipyve ovyi ri ramo sete ára peve ae ju 'rã sacerdote omboty.

6 Ha'e gui sete araa py sacerdote oexa pota jevy 'rã. Xapy'a rei lepra ndovera reivei, ha'e nda'ipyve ovyi ramo ma ixupe sacerdote “Ha'eve va'e” he'i 'rã. Ha'e va'e regua ai ma tykue rei va'ekue ae. Ava oao ojoi vy ha'eve va'e ju 'rã oiko.

7 Ha'e rami teĩ ojeky'a'o uka aguã sacerdote pe ojexa uka ma rire ipire rupi ijai tykue reia ipyve ju ovyi ri ramo teigüe ju 'rã ojexa uka sacerdote pe.

8 Ha'e va'e oikuaa pota rã ipire rupi ijai tykue reia ipyve ra'e ri ramo ixupe “Ha'eve'ŷ va'e” he'i 'rã, lepra ete oĩ ramo.

9 — Xapy'a rei amongue re lepra ojekuaa ri ramo peraa 'rã sacerdote-a py.

10 Sacerdote oikuaa pota rã ipire rurua rupi xiĩ rei va'e ojekuaa, ipire rague xiimba ha'e ho'okue ojekuaa rei ri ramo

11 ipire re lepra ae oĩ. Ha'e nunga rupi sacerdote ixupe “Ha'eve'ŷ va'e” he'i 'rã. Nomboty 'rã, ha'eve'ŷ va'e ae oiko ramo.

12 Xapy'a rei lepra ipy-ipyve ri hete pire ha'e javi rupi, ha'e sacerdote oexa rã inhakã guive ipy peve ojao'ipa ri ijai ramo

13 oikuaa pota porã 'rã. Xapy'a rei lepra ho'o ha'e javi rupi ojao'ipa ramo iove va'e pe “Ha'eve va'e” he'i 'rã. Lepra oñague xiimba ramo ha'eve va'e ju oiko.

14 Ha'e rami teĩ ho'okue ojekuaa jevyá ára py ma ha'eve'ŷ va'e ju 'rã oiko.

15 Ho'okue ojekuaa reia py sacerdote oexa vy “Ha'eve'ŷ va'e” he'i 'rã. Ho'okue ojekuaa va'e ma ha'eve'ŷ va'e. Ha'e nunga ma lepra ae.

16 Xapy'a rei ho'okue ojekuaa rei va'ekue xiimba jevy ramo ou 'rã sacerdote-a py.

17 Ha'e ramo oexa pota 'rã. Xapy'a rei lepra ojekuaa va'ekue xiimba jevy ramo ijai vaikueague pe sacerdote “Ha'eve va'e” he'i 'rã. Ha'e ramo ha'eve va'e 'rã oiko.

18 — Ha'e gui xapy'a rei ho'okue ha'e ipire py ipeupa reiague onhembotypa,

19 ha'e ipeupa reia 'rãgue py irurupa rei vy iovea xiimba rei, e'ŷ vy overa reia rupi pytãmba rei avi ramo ojexa uka 'rã sacerdote pe.

* 12:8 Lucas 2.24

²⁰ Ha'e ramo sacerdote oikuua pota 'rā. Xapy'a rei ipire guýry ete oike, ha'e ipire rague'i xiīmba ri ramo sacerdote "Ha'eve'ŷ va'e" he'i 'rā. Ha'e va'e ma lepra ae, ipeupa reiague gui ju ojekuaa.

²¹ Ha'e rami teĩ sacerdote oexa pota rā ipire rague'i naxiīvei, ipire guýry e'ŷ, ha'e ndoveravei ramo sacerdote sete ára peve 'rā omboty ha'e ae'i.

²² Xapy'a rei ipire rupi ipy-ipyve ri ramo ma ixupe sacerdote "Ha'eve'ŷ va'e" he'i 'rā, lepra ae ramo.

²³ Ha'e rami avi iovea overa reia nda'ipyve ovyi ri ramo ma ipeupa reia rendakue ae 'rā ipere. Ha'e ramo ixupe sacerdote "Ha'eve va'e" he'i 'rā.

²⁴ — Xapy'a rei ipire re tata okaia py ho'okue perea overa rei ri, xapy'a rei xiīmba ha'e pytā rei reve, e'ŷ vy xiīmba rive ramo

²⁵ sacerdote oexa pota 'rā. Xapy'a rei ipere overa reia rague xiīmba, ha'e ipire guýryve ri oī ramo lepra ae okaiague mbyte gui ojekuaa. Ixupe sacerdote "Ha'eve'ŷ va'e" he'i 'rā, lepra ae ramo.

²⁶ Ha'e rami teĩ sacerdote oexa pota rā ipere overa reia rague naxiī ri, neĩ ipire guýry voi ndoikei, ha'e ndoveravei ri ramo sacerdote omboty 'rā sete ára peve ha'e ae'i.

²⁷ Ha'e gui sete araa py ma sacerdote oexa pota jevy 'rā. Xapy'a rei ijai ipire rupi ipyve ri ov yamo sacerdote "Ha'eve'ŷ va'e" he'i 'rā, lepra ae ramo.

²⁸ Ha'e rami avi xapy'a rei ipere overa reia oīague py optya, nda'ipyve ovyi, ha'e ndovera reivei ramo okaiague pere ae 'rā ojekuaa. Ha'e ramo sacerdote "Ha'eve va'e" he'i 'rā, okaiague pere rive ramo.

²⁹ — Xapy'a rei ava e'ŷ vy kunha inhakā re e'ŷ vy hembeta re ijai ramo

³⁰ sacerdote oexa pota 'rā ai. Xapy'a rei ipire guýry ri ijai oike, ha'e hague'i ijupa rei va'e ojekuaa ramo ma sacerdote "Ha'eve'ŷ va'e" he'i 'rā. Ha'e nunga lepra ma tinhā 'epy va'e, inhakā re e'ŷ vy hembeta re ojekuaa.

³¹ Ha'e rami teĩ ai tinhā sacerdote oikuua pota vy oexa rā ijai ipire guýry vaipa e'ŷ, ha'e hague huū va'e noī ri ramo sacerdote sete ára peve 'rā omboty tinhā reveguha'e ae'i.

³² Sete araa py ma sacerdote oexa pota ju 'rā ai. Xapy'a rei tinhā nda'ipyve ovyi, hague'i iju va'e noī, ha'e tinhā ai oexa rā ipire guýry e'ŷ ri ijai ramo ma

³³ ava onhopīa 'rā. Ha'e rā ai tinhā oīa rupi ma nonhopīai. Ha'e gui sacerdote omboty ju 'rā sete ára peve ai tinhā reveguha'e.

³⁴ Sete araa py ma sacerdote oexa pota jevy 'rā ai tinhā reveguha'e. Xapy'a rei ipire rupi nda'ipyve ovyi, ha'e ipire guýry e'ŷ ri ijai ramo ixupe sacerdote "Ha'eve va'e" he'i 'rā. Oao ojoi ma vy ha'eve va'e ju 'rā oiko.

³⁵ Ha'e rami avi xapy'a rei ojeky'a'o uka rire ipire rupi ai tinhā ipyve pyve ri ramo

³⁶ sacerdote oexa pota ju 'rā. Ipire rupi tinhā ipyve pyve ri ramo sacerdote hague'i ijupa va'e oeka e'ŷ teĩ ha'eve'ŷ va'e ae oiko.

³⁷ Ha'e rami avi ha'e oexa rā ai tinhā va'e optya, ha'e hague'i huū va'e ipukuve ri ramo ai tinhā okuera ma. Ha'eve va'e ramo ixupe sacerdote "Ha'eve va'e" he'i 'rā.

³⁸ — Ha'e gui ava e'ŷ vy kunha ipire rupi ipere overa rei va'e oī ramo

³⁹ sacerdote oexa pota 'rā. Xapy'a rei ipire rupi ipereague xiīmba rei va'eri ndovera reivei va'e ramo ma iove xiī ojekuaa ipire rupi. Ha'e va'e ma ha'eve va'e.

⁴⁰ — Xapy'a rei ava akā gui hi'a okuipa vy ipire rei teĩ ha'eve va'e oiko.

⁴¹ Xapy'a rei hova katy gui ri hi'a kui vy hova katy ipire rei teĩ ha'eve va'e oiko.

⁴² Ha'e rami avi xapy'a rei ijapyte rupi e'ŷ vy hova katy hi'a kuipaague py ojekuaa ri ai xiī rei va'e pytā reve vy ma lepra ojekuaa, ijapyte rupi e'ŷ vy hova katy hi'a kuipaague py.

⁴³ Ha'e gui sacerdote oikuua pota vy oexa rā irurua ijapyte re e'ŷ vy hova katy hi'a kuipaague py xiī rei pytā reve ri ramo lepra ipire re ojekuaa rami,

⁴⁴ ha'e ramo ma lepra reveguha'e, ha'eve'ŷ va'e oiko. Ixupe sacerdote "Ha'eve'ŷ va'e" he'i 'rā, inhakā re ijai oī ramo.

45 — Ha'e gui lepra revegua ma oao xorokue py onhemonde 'rā, o'a voi nomoatyrōi 'rā. Ojejuru mo'ā reve ojapukai vy “Ha'eve'ŷ va'e, ha'eve'ŷ va'e aiko!” he'i 'rā.

46 Hexe ai oĩa ja ha'eve'ŷ va'e oiko 'rā. Ha'eve'ŷ va'e vy ha'e ae'i 'rā oiko. Heta va'e kuery gui mombyry 'rā onhemboekoa.

47 — Xapy'a rei amongue ao re ojekuaa 'rā hove rei va'e, ao vexa'i rague guigua, e'ŷ vy ajukue iporāve va'e guigua re.

48 Ipuku-a rupigua mba'e, e'ŷ vy ipya rupigua re ojekuaa 'rā ajukue iporāve va'e guigua e'ŷ vy vexa'i rague guigua re, mba'emo pire re, e'ŷ vy pire guigua ojapo pyre re mba'e.

49 Ha'e nunga re hove va'e hovy, e'ŷ vy pytā va'e ri oī ramo, ao re mba'e, e'ŷ vy mba'emo pire re, ipuku-a rupi e'ŷ vy ipya rupigua re, ha'e pire gui mba'emo ojapo pyre re teī hove rei va'e ojekuaa rā oexa uka 'rā sacerdote pe.

50 Sacerdote oexa pota vy hove rei va'e oĩa omoĩ porā 'rā sete ára peve.

51 Ha'e gui sete araa py ma oexa pota jevy 'rā. Xapy'a rei ija re ipyve ovvy ri ramo, ipuku-a rupi e'ŷ vy ipya rupi teī, ipire re e'ŷ vy mba'emo hembiapo re mba'e, ha'e ramo lepra ovvy va'e ae 'rā oĩ. Ha'e va'e ma ha'eve'ŷ va'e ae.

52 Ha'e ramo oapypaa 'rā ajukue, ipuku-a rupi e'ŷ vy ipya rupigua re lepra ojekuaa teī, vexa'i rague guigua e'ŷ vy ajukue iporāve va'e guigua teī, mba'emo pire gui ojapo pyre re teī lepra ojoua rā lepra ae ovvy va'e ae. Ha'e nunga ha'e javi oapypaa 'rā.

53 — Ha'e rami avi xapy'a rei sacerdote oexa pota rā hove rei va'e nda'ipyve ovyyi ri ija re, neī ipuku-a rupi neī ipya rupi, neī mba'emo pire gui ojapo pyre re voi ramo

54 sacerdote ojoi uka 'rā hove va'e oīague, ha'e sete ára peve ju omoĩ porā 'rā ha'e ae'i.

55 Ha'e gui ajukue hove rei va'e ojekuaa ague ojoia rire sacerdote oexa pota rā ha'ekue'i ae opyta ramo, nda'ipyve ovyyi teī ha'eve'ŷ va'e ae 'rā oiko. Oapypaa 'rā tata py. Ha'e nunga ma lepra okaru va'e, hi'áry rupi e'ŷ vy iguy rupi ojekuaa teī.

56 — Ha'e rami avi sacerdote oikuaa pota vy xapy'a rei oexa 'rā ojoia rire oje'o ramo omondoro 'rā ajukue gui, e'ŷ vy ipirekue guigua gui, ipuku-a rupi e'ŷ vy ipya rupi ojekuaa teī.

57 Ajukue re hove rei ovvy va'e ojekuaa teri ramo, ipuku-a rupi e'ŷ vy ipya rupi teī, mba'emo pire gui ojapo pyre re teī lepra ipy-ipyve va'erā ae. Oapypaa 'rā tata py lepra ovyyague.

58 Ha'e rami teī xapy'a rei ao re hove rei va'e oĩa va'e, ipuku-a rupi e'ŷ vy ipya rupi teī, e'ŷ vy mba'emo pire guigua teī ojoia rā hove rei va'e ndojekuaavei ri ramo teīgue ju 'rā ojoia. Ha'e vy ma ha'eve va'e ju 'rā oiko.

59 Ha'e va'e lei ma vexa'i rague guigua re hove rei va'e ojekuaa va'e regua, e'ŷ vy ajukue iporāve va'e guigua re, ipuku-a rupi e'ŷ vy ipya rupi ojekuaa, e'ŷ vy ipire gui ojapo pyre re ojekuaa rire, ha'e nunga pe “Ha'eve va'e” e'ŷ vy “Ha'eve'ŷ va'e” he'i kuaa aguā.

14

Lepra gui okuera va'ekue regua lei oĩa

1 SENHOR aipoe'i Moisés pe:

2 — Pova'e ojapo ukapy ma lepra gui okuera va'ekue ojeky'a'oa ára guarā. Ha'e rami rā peraa 'rā sacerdote-a py.

3 Ha'e ramo tekuaa ojeky'a'oa ojeky'a'oa ára guarā. Ha'e rami rā peraa 'rā sacerdote-a py.

4 sacerdote ojeky'a'oa ojeky'a'oa ára guarā. Ha'e rami rā peraa 'rā sacerdote ojeky'a'oa ojeky'a'oa ára guarā.

5 Peteī guyra ma sacerdote ojeky'a'oa ojeky'a'oa ára guarā. Ha'e rami rā peraa 'rā sacerdote ojeky'a'oa ojeky'a'oa ára guarā.

6 — Ha'e gui mokoia guyra ju ogueru ruka 'rā mokoia guyra oikove reve ha'e ha'eve va'e, ha'e gui peteī guyra yary, havijukue pytā va'e, ha'e hissopo rogue. Ha'e vy omoakymba 'rā guyra yy xyry áry ojeka va'ekue ruguykue py.

⁷ Lepra gui ojeky'a'o uka va'e áry rupi ma omboayvi 'rã sete-kue. Ha'e vy ixupe "Ha'eve va'e" he'i 'rã, ha'e gui guyra oikove va'e opoi ju 'rã teko a e'ýa áry rupi oveve ov y aguã.

⁸ Ha'e gui ojeky'a'o uka va'e ojoi 'rã oao, onhopímba 'rã opire rague ha'e javi, ha'e ojau 'rã yy py. Ha'e vy ma ha'eve va'e ju 'rã oiko. Ha'e va'e rire oo ju 'rã teko a py, tei ngoo py tema ndoikei ranhe 'rã sete ára peve.

⁹ Sete araa py ma o'a onhopímba 'rã oakã gui, guendyva, ha'e guexa pykã rague guive. Opire rague ha'e javi 'rã onhopímba. Ha'e vy oao ojoi 'rã, ojau 'rã guive. Ha'e vy ma ha'eve va'e ju 'rã oiko.

¹⁰ — Oito araa py ma ogueru 'rã mokoí vexa'i ivaikue rei e'ý va'e, peteí vexa'i kunha ivaikue rei e'ý va'e peteí ma'etý'i va'e, ha'e mboapy ryru trigó ku'ikue iporáve va'e mba'emo aju guigua ome'ẽ mbyrã, azeite reve omonamba pyre, ha'e gui peteí ryru azeite ju.

¹¹ Ha'e gui sacerdote joky'a'o ukaa rupi oiko va'e ma SENHOR renonde oexa uka 'rã ava ojeky'a'o uka aguã ou va'e mba'emo ogueru va'ekue ha'e javi reve, oguy nhemboaty oíaty rokẽ py.

¹² Peteí vexa'i va'e regua ogueru vy ojuka 'rã mba'emo omboekovia aguã regua ome'ẽ va'erã, azeite ryru reve. Ha'e nunga oupi reve ombovava 'rã SENHOR renonde ome'ẽ vy.

¹³ Ha'e gui vexa'i mboae ju 'rã ojuka. Jejavya regua ha'e oapy vy ome'ẽmby ojukaaty py ae ojuka, henda iky'a e'ý va'e py. Mba'eta mba'emo omboekovia aguã regua ome'ẽmby ha'e jejavya regua ma sacerdote pe meme opyta, iky'a e'ý ete va'e.

¹⁴ Omboekovia aguã ome'ẽmby ruguykue regua sacerdote ojopy vy ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme.

¹⁵ Azeite ju ojopy vy hyru gui onhoẽ 'rã opo ijaxua regua mbyte py.

¹⁶ Opo ijaxua re azeite oĩ va'e py omoaký 'rã okuã oiporu kuaa regua. Ha'e vy okuã py ju omboayvipa 'rã sete-kue SENHOR renonde.

¹⁷ Azeite rembyrekue opo py oĩ teri va'e regua ma sacerdote ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ome'ẽ mbyrã ojuka uka va'ekue ruguy áry.

¹⁸ Ha'e rã azeite rembyrekue opo py oĩ va'e ma sacerdote onhoẽ 'rã ojeky'a'o uka va'e apyte re. Ha'e rami vy SENHOR renonde sacerdote ojao'i uka 'rã ha'eve e'ýague.

¹⁹ — Ha'e gui ma jejavya regua sacerdote ome'ẽ vy ojao'i uka 'rã ojeky'a'o uka va'e ha'eve e'ýague. Ha'e va'e rire ma ojuka 'rã oapy vy ome'ẽmby.

²⁰ Ha'e nunga ome'ẽ 'rã altar áry mba'emo aju guigua reve. Ha'e rami py sacerdote ojao'i uka 'rã ava ha'eve e'ýague. Ha'e ramo ha'eve va'e ju 'rã oiko.

²¹ Xapy'a rei iporiaukue'i vy ha'e nunga ha'e javi ndojoui ri vy ogueru 'rã peteí vexa'i mba'emo omboekovia vy ome'ẽ aguã oupi vy ombovava reve, ha'eve e'ýague ojao'i uka aguã. Ogueru avi 'rã peteí ryru trigó iporáve va'e azeite reve omona mbyre mba'emo aju guigua ome'ẽ aguã, ha'e peteí ryru azeite,

²² ha'e gui mokoí jeruxi e'ý vy mokoí apykaxu ojoua'i rami. Ha'e va'e regua peteí ma jejavya regua ome'ẽ va'erã, ha'e rã amboae ma oapy vy ome'ẽ va'erã.

²³ Ha'e gui irundy meme ára ma ojeky'a'o ukaa py sacerdote pe ogueru 'rã ha'e nunga ha'e javi, oguy nhemboaty oíaty va'e rokẽ py, SENHOR renonde.

²⁴ Sacerdote ma vexa'i mba'emo omboekovia aguã regua ome'ẽmby ha'e azeite ryru ojopy vy oupi 'rã SENHOR renonde ombovava reve ome'ẽ mbyrã.

²⁵ Ha'e gui ma sacerdote ojuka 'rã vexa'i mba'emo omboekovia aguã regua ome'ẽmby. Ha'e vy mba'emo omboekovia aguã vexa'i ojuka va'ekue ruguy ojopy vy ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme.

²⁶ Azeite onhoẽ 'rã opo ijaxua regua mbyte re.

²⁷ Ha'e vy opo ijaxua regua re azeite oĩ va'e py okuã oiporu kuaa regua omoaký vy omboayvi 'rã sete-kue SENHOR renonde.

²⁸ Ha'e vyazeite opo py oĩ va'e regua ombovy 'rã ojeky'a'o uka va'e nambi apy, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ojuka pyre ruguy oikyty va'ekue áry.

²⁹ Ha'e gui sacerdote po pyazeite rembyre oĩ va'e ma onhoẽ 'rã ojeky'a'o uka va'e apyte re, SENHOR renonde ha'eve e'ÿague ojao'i uka aguã.

³⁰ Ome'ẽ 'rã peteĩ jeruxi e'ÿ vy peteĩ apykaxu ha'e ojoua'i rami.

³¹ Ha'e va'e regua peteĩ ma jejavya regua ome'ẽ 'rã, ha'e rã amboae ma mba'emo aju guigua oapy vy ome'ëmby reve guarã. Ha'e rami py SENHOR renonde sacerdote ojao'i uka 'rã ojeky'a'o uka va'e ha'eve e'ÿague.

³² Ha'e va'e lei ma lepra oguerekva'e gui ojeky'a'o uka va'e rekora, iporiaukue'i vy ome'ẽ aguã ndojoui ramo.

Lepra oo re ojekuaa va'e regua lei oĩa

³³ SENHOR aipoe'ive ju Moisés ha'e Arão pe:

³⁴ — Canaã yvy pendekoarã pendevy ame'ẽ va'ekue py pevaẽ ma rire amongue oo re xee amoï 'rã hu'üm̄ba rei va'e.

³⁵ Ha'e ramo hoo va'e sacerdote pe omombe'u vy "Mba'emo vaikue ko xero re oĩ", he'i 'rã.

³⁶ Ha'e ramo sacerdote oguenoẽ ukapa 'rã opy gui, hu'ũ rei va'e oexa pota e'ÿ mbove, oo py ikuai va'e ha'e javi omongy'apa e'ÿ aguã. Ha'e rire mae ma sacerdote oo 'rã oo re oikuaa pota aguã.

³⁷ Oexa pota 'rã hu'ũ rei va'e. Xapy'a rei oo mbotya re iovea hovy rei va'e e'ÿ vy pytã reia ri ojekuaa oo mbotya guýryve oike ramo ma

³⁸ opy gui sacerdote oẽ vy omboty uka 'rã sete ára peve.

³⁹ Sete araa py sacerdote ou ju 'rã oexa pota vy. Xapy'a rei oo mbotya re ipyve ri hu'ũ rei va'e ojekuaa ramo ma

⁴⁰ oo mbotya gui omboi uka 'rã ita hu'ũ rei va'e oĩa, ha'e vy omombo uka 'rã tetã gui mombyry'i peteĩ henda mba'emo ha'eve'ÿ va'e omomboaty py.

⁴¹ Ha'e gui onhopí ukapa 'rã opy rupi mbotya ikuai va'e ha'e javi rupi. Onhopí va'ekue ku'ikue ma omombo 'rã tetã gui mombyry'i peteĩ henda mba'emo ha'eve'ÿ va'e omomboaty py.

⁴² Ha'e va'e rire ma ita mboae ojopy vy omoia 'rã omboi ypyague py. Omoapomo pyau va'ekue ojopy vy omboja 'rã oo re.

⁴³ — Xapy'a rei ita omboia vy oo mbotya onhopimba rire omboja jevy teĩ oo re hu'ũ rei va'e ojekuaa jevy ri ramo

⁴⁴ sacerdote oike ju 'rã oexa pota. Xapy'a rei oo re hu'ũ rei va'e tuvixa-vixave ri vy ma hu'ũ rei ovy va'e ae 'rã oĩ. Ha'eve'ÿ va'e ae 'rã opyta.

⁴⁵ Ha'e rami rã oitypa 'rã oo, ita ha'e yvyra omboipa 'rã, oo mbotya omboja va'ekue voi. Ha'e nunga ogueraapaa 'rã tetã gui mombyry, peteĩ henda mba'emo ha'eve'ÿ va'e omomboaty py.

⁴⁶ Oo omboty aguã jave py amongue oike vy ha'eve'ÿ va'e avi 'rã oiko ka'aru peve.

⁴⁷ Opy oke e'ÿ vy okaru va'ekue ma ojoi 'rã oao.

⁴⁸ — Ha'e rami avi oo omboja pyaupa rire ha'e py sacerdote oike jevy vy oexa pota rã oo re hu'ũ rei va'e ndatuvixave ovyi ri ramo ixupe sacerdote "Ha'eve va'e" he'i 'rã, hu'ũ rei va'e okanhy ma rire.

⁴⁹ Ha'e gui oo oiky'a'o aguã ma ojopy 'rã mokoõ guyra, yvyra yary, havijukue pytã va'e ha'e hissopo rogue.

⁵⁰ Peteĩ guyra ojuka 'rã hyru nhae'ũ guigua py yy xyry omboyr va'ekue áry.

⁵¹ Ojopy 'rã yvyra yary, hissopo rogue, havijukue pytã va'e ha'e guyra oikove va'e. Ha'e vy guyra ojuka va'ekue ruguy py omoakÿ 'rã yy oxyry va'e reve. Sete-kue 'rã omboayvi oo re.

⁵² Ha'e rami py oo oiky'a'o 'rã guyra ruguykue, yy oxyry va'e, guyra oikove va'e, yvyra yary, hissopo rogue ha'e havijukue pytã va'e py guive.

⁵³ Guyra oikove va'e ma tetā gui opoi 'rā mombyry teko a e'ŷa áry rupi oveve ovy aguã. Ha'e rami vy oo ha'eve e'ŷague oiky'a'o uka ma ramo ha'eve va'e ju 'rā opyta.

⁵⁴ — Ha'e va'e lei ma opa marâguia lepra ha'e mba'eaxy tinhha oguereko va'e regua,

⁵⁵ ao re hu'ũ rei va'e oĩ va'e, ha'e oo re,

⁵⁶ irurupa va'e re, ipeu ha'e iperea overa rei va'e re,

⁵⁷ penhombo'e aguã ha'eve va'e ha'e ha'eve'ŷ va'e oikoa re. Ha'e va'e ma lei lepra regua.

15

Ava ha'e kunha re ha'eve'ŷa oĩ va'e re ijayvua

¹ SENHOR aipoe'ive Moisés ha'e Arão pe:

² — Pendeayvu Israel kuery pe, ha'e vy aipopeje: Ava ma guive rā hete guigua ndopytai ramo ha'eve'ŷ va'e 'rā oiko ndopytaia káuxa.

³ Po rami 'rā ha'eve'ŷ va'e oikoa oikuaa aguã regua, hete guigua ndopytaia káuxa. Xapy'a rei hete gui ndopytai, e'ŷ vy opytu'u-tu'u teĩ ha'eve'ŷ va'e ae 'rā oiko.

⁴ Tupa ha'e onhenoa py rei tema ha'eve'ŷ va'e 'rā opyta, ndopytaia káuxa. Ha'e mba'emo áry ha'e oĩague py rei ha'eve'ŷ va'e avi 'rā opyta.

⁵ Hupa re ovy va'e rei tema ojoi 'rā oao, ha'e ojau 'rā yy py. Ha'e vy ka'aru peve ha'eve'ŷ va'e 'rā oiko.

⁶ Ha'e gui hete guigua opyta e'ŷ va'e oguapyague py ri oguapy va'e tema ojoi 'rā oao, ha'e ojau 'rā yy py. Ha'e vy ha'eve'ŷ va'e 'rā oiko ka'aru peve.

⁷ hete guigua opyta e'ŷ va'e re ovy va'e tema ojoi 'rā oao, ojau 'rā guive yy py, ha'e oiko 'rā ha'eve'ŷ va'e ka'aru peve.

⁸ Xapy'a rei amongue ha'eve va'e re ava hete guigua opyta e'ŷ va'e onyvõ ramo ha'e va'e voi ojoi 'rā oao, ha'e ojau 'rā yy py, ha'e vy ka'aru peve oiko 'rā ha'eve'ŷ va'e.

⁹ Kavaju kupe árygua hete guigua opyta e'ŷ va'e oĩague voi opyta 'rā ha'eve'ŷ va'e.

¹⁰ Mba'emo iguýry oĩ va'e re opoko va'e rei tema oiko 'rā ha'eve'ŷ va'e ka'aru peve. Ha'e rā ha'e nunga reraare voi ojoi 'rā oao, ha'e ojau 'rā yy py, ha'e vy oiko 'rā ha'eve'ŷ va'e ka'aru peve.

¹¹ Amongue re hete guigua opyta e'ŷ va'e ojepoei e'ŷ re opokoa va'ekue ma ojoi 'rā oao, ha'e ojau 'rā yy py, ha'e vy oiko 'rā ha'eve'ŷ va'e ka'aru peve.

¹² Hyru yapo guigua re hete guigua opyta e'ŷ va'e opokoague ma ombovoa 'rā. Ha'e rā hyru yvyla guigua ri ramo ma ojoipa 'rā yy py.

¹³ — Ha'e gui hete guigua opyta e'ŷ va'e okuera ju ma vy oipapa 'rā sete ára peve ojeky'a'o uka aguã. Ha'e gui ojoi 'rā oao ha'e ojaupa 'rā guete ha'e javi rupi yy xyry py. Ha'e vy ma ha'eve va'e ju 'rā oiko.

¹⁴ Irundy meme araa py ma ogueraa 'rā mokoĩ jeruxi e'ŷ vy mokoĩ apykaxu. Ha'e vy ojexa uka 'rā SENHOR renonde py, oguy nhemboaty oĩaty rokẽ py. Ha'e vy sacerdote pe ome'ẽ 'rā mokoĩ guyra,

¹⁵ ha'e va'e ombooxa aguã. Jypygua ma ome'ẽ 'rā jejavya regua, ha'e rā amboae ma oapy vy ome'ẽmby. Ha'e rami SENHOR renonde sacerdote ojao'i uka 'rā hete guigua opyta e'ŷ va'e ha'eve e'ŷague.

¹⁶ — Ha'e gui ava xapy'a rei ijay ndopytai rei rive vy ma ojau 'rā yy py guete ha'e javi rupi, ha'e vy oiko 'rā ha'eve'ŷ va'e ka'aru peve.

¹⁷ Ijao e'ŷ vy ipire re ijay ovyague oĩ ramo ojoipa 'rā yy py, ha'e vy opyta 'rā ha'eve'ŷ va'e ka'aru peve.

¹⁸ Xapy'a rei peteĩ ava kunha reve joguerekoa py ojapo ri vy mokoĩve 'rā ojau yy py, ha'e vy ha'eve'ŷ va'e 'rā ikuai ka'aru peve.

¹⁹ — Kunha va'e gueko re oiko ramo heko ae ri oiko ramo sete ára peve 'rā oiko gueko re. Hexe ovy va'e rei ha'eve'ŷ va'e 'rā oiko ka'aru peve.

²⁰ Gueko re oikoa pukukue re oke oupyague ha'e oguapyague rei tema ha'eve'ŷ va'e 'rā opyta.

²¹ Hupa re ovy va'e rei tema ojoi 'rā oao, ha'e ojau 'rā yy py. Ha'e vy oiko 'rā ha'eve'ŷ va'e ka'aru peve.

²² Mba'emo áry oīague re opoko va'ekue voi ojoi 'rā oao, ha'e ojau 'rā. Ha'e vy oiko 'rā ha'eve'ŷ va'e ka'aru peve.

²³ Hupa e'ŷ vy oguapyague áry mba'emo itui va'e re opoko va'ekue ma oiko 'rā ha'eve'ŷ va'e ka'aru peve.

²⁴ Xapy'a rei gueko re oiko va'e reve ava joguereko vy ma ha'eve'ŷ va'e 'rā oiko sete ára peve. Tupa onhenoague voi optyta 'rā ha'eve'ŷ va'e.

²⁵ — Ha'e gui kunha ma heko ojekuaa vaipa ete mbovy ára rei e'ŷ, ha'e ramiaty py e'ŷ va'eri, ha'e'ŷ vy gueko re oikoaty gui oaxave ri vy ko'ē nhavō gueko re oikoa ja oiko 'rā ha'eve'ŷ va'e, gueko re ae oikoa rami.

²⁶ Gueko re oiko va'e tupu okeva va'e ma ha'eve'ŷ va'e 'rā optyta gueko re ae oikoaty rami ae. Mba'emo áry oīague va'e tema optyta avi 'rā ha'eve'ŷ va'e, gueko re oikoaty rami ae.

²⁷ Ha'e va'e re ovy va'ekue ma oiko 'rā ha'eve'ŷ va'e. Ha'e rami vy ojoi 'rā oao, ha'e ojau 'rā yy py. Ha'e vy oiko 'rā ha'eve'ŷ va'e ka'aru peve.

²⁸ Ha'e rami avi heko optyta ri ramo oipapa 'rā sete ára peve ju, ha'e gui ma ha'eve va'e ju 'rā oiko.

²⁹ Oito araa py ma ojopy 'rā mokoī jeruxi e'ŷ vy mokoī apykaxu, ha'e vy ogueru 'rā sacerdote pe oguy nhemboaty oīaty rokē py.

³⁰ Peteī ma sacerdote omboaxa 'rā jejavya re, ha'e rā amboae ma oapy vy ome'ēmby. Ha'e va'e rupi SENHOR renonde sacerdote ojao'i uka 'rā gueko re oiko va'e ha'eve e'ŷague.

³¹ — Ha'e rami Israel kuery gui peipe'a ukapa 'rā ha'eve e'ŷague, ha'e va'e gui oiko vai e'ŷ aguā xembojeroviaaty ha'e kuery mbyte oī va'e omongy'aague re.

³² — Ha'e va'e lei ma hete guigua ndopytaia, ha'e ijay ndopytai rei rivea re ha'eve'ŷ va'e oiko va'e regua,

³³ ha'e kunha gueko re oikoa py oiko axy va'e regua, ava e'ŷ vy kunha teī hete guigua optyta e'ŷ va'e, ha'e gui ava reve gueko re oiko va'e joguereko va'e regua guive.

16

Jejavya ojao'i ukaa ára regua

¹ SENHOR ijayvu Moisés pe, mokoī Arão ra'y kuery SENHOR renonde py onhemboja vy oiko vai rire.

² Ha'e vy SENHOR aipoe'i Moisés pe:

— Aipo're nderyke'y Arão pe, toike riae eme henda iky'a e'ŷ va'e py ajukue okē regua rovai, xeayvu ryru áry imbotya teko vai ambogueaty oī va'e renonde, omano xapy'a e'ŷ aguā, mba'eta xee ae imbotya áry ajexa uka 'rā arai rupi.

³ Pova'e nunga reve anho 'rā Arão oike henda iky'a e'ŷ va'e py: peteī vaka ra'y jejavya re ome'ē va'erā, ha'e vexa'i oapy vy ome'ēmby.

⁴ Onhemonde 'rā kamixa puku ajukue iporāve va'e guigua iky'a e'ŷ va'e py, ha'e kaxō voi ajukue iporāve va'e guigua 'rā oiporu opire ao'iarā, oku'a rupi ojokua 'rā ajukue iporāve va'e guigua avi, ha'e vy ngorarā ajukue iporāve va'e guigua oimama mbyre py. Ha'e va'e ao ma iky'a e'ŷ va'e meme. Yy py ojaupa ma vy onhemonde 'rā.

⁵ Israel kuery po gui ojopy 'rā mokoī kavara ojejavvyague re ome'ē va'erā, ha'e gui peteī vexa'i oapy vy ome'ē va'erā.

⁶ — Vaka ra'y jejavya regua ome'ē va'erā Arão ogueru vy ha'e ae ojejavvyague ranhe 'rā ojao'i uka, ha'e gui ngoo pygua kuery ojejavvyague ju.

⁷ Mokoīve kavara ojopy vy ogueru 'rā imo'amý SENHOR renonde oguy nhemboaty oīaty rokē py.

⁸ Mokoīve kavara re oexa 'rā xortea. Peteī ma SENHOR peguarā optyta, ha'e rā amboae kavara ma omondouka pyrā.

⁹ Kavara SENHOR peguarā optyta va'ekue ma Arão omovaē vy ojuka 'rā jejavya regua ome'ē va'erā.

¹⁰ Ha'e rã kavara omondouka pyrã ma oikove reve 'rã oexa uka SENHOR renonde, ha'e va'e rupi jejavya ojao'i uka aguã, ha'e gui tekao e'ŷa katy omondoukaa aguã.

Sacerdote yvateve va'e ha'e ae ojejavyague re ome'ẽa regua

¹¹ — Ha'e gui Arão ogueru 'rã vaka ra'y ha'e ae ojejavyague ranhe ojao'i uka aguã, ha'e gui ngoo pygua kuery ojejavyague ju. Ha'e vy ojuka 'rã ojejavyague reguarã.

¹² SENHOR renonde altar oĩ va'e áry gui oguenoẽ 'rã tapyī heakuã porã va'e oapyaty renyẽ, ha'e gui mokoĩ po renyẽ heakuã porã va'e omongu'i porã mbyre. Ha'e va'e ogueroike 'rã ajukue okẽ regua rovai.

¹³ Xee SENHOR renonde omoĩ 'rã heakuã porã va'e tata py, hataxigue ojao'i aguã xeayvu ryru mbotya teko vai ambogueaty áry rupi, omano xapy'a e'ŷ aguã.

¹⁴ Ha'e gui vaka ra'y ruguykue ojopy vy okuã py omboayvipa 'rã ayvu ryru mbotya áry rupi. Ha'e gui hyru mbotya renonde rupi ju sete-kue 'rã omboayvi huguykue okuã py.

Heta va'e kuery ojejavyague re ome'ẽa regua

¹⁵ — Ha'e va'e rire ma ojuka 'rã kavara heta va'e kuery ojejavyague re ome'ẽ aguã. Huguykue ma ogueroike 'rã ajukue okẽ regua rovai. Huguykue py ojapo 'rã vaka ra'y ruguykue py ojapoague rami ae. Omboayvi 'rã ayvu ryru mbotya teko vai ambogueaty áry rupi, ha'e henonde rupi.

¹⁶ Ha'e rami py ojao'i uka 'rã Israel kuery henda iky'a e'ŷ va'e omongy'aague, ha'e kuery ojejavya ha'e heko vaia ha'e javi káuxa. Ha'e rami ae avi oiky'a'o uka 'rã oguy nhemboaty oĩaty ha'e kuery mbyte oĩ va'e omongy'apaague gui.

¹⁷ Peteīve ava ndopytai 'rã oguy nhemboaty oĩaty py henda iky'a e'ŷ va'e py sacerdote oike jave jejavya ojao'i uka aguã, ha'e ae ojejavyague ranhe ojao'i uka ma vy oẽ e'ŷa ja, ha'e gui ngoo pygua kuery ha'e Israel kuery ha'e javi ojejavyague ju.

¹⁸ Ha'e gui oẽ vy SENHOR renonde altar oĩa py oo vy oiky'a'o uka avi 'rã omongy'aague oĩ va'e gui. Ha'e rami vy vaka ra'y ha'e kavara ruguykue ojopy vy ombovy 'rã altar rakua ikuai va'e yvýry rupi.

¹⁹ Okuã py sete-kue 'rã huguykue omboayvi 'rã altar áry. Ha'e rami py oiky'a'o uka 'rã Israel kuery omongy'aague gui.

²⁰ — Ha'e gui ma henda iky'a e'ŷ va'e, oguy nhemboaty oĩaty ha'e altar oiky'a'o ukapa ma rire ogueru ruka 'rã kavara oikove va'e.

²¹ Arão opo joavaive omoĩ 'rã kavara oikove va'e akã áry. Hi'áry omombe'u 'rã Israel kuery reko vaia, nonhe'ẽ rendui ha'e ojejavyague ha'e javi. Kavara akã áry ha'e nunga omoimba ma vy ogueraa uka 'rã peteĩ ava po rupi, ha'e rami aguã omoĩ mbyre pe.

²² Ha'e rami ha'e kuery reko vaia kavara ojee ae ogueraapa 'rã peteĩ yvy avave rei noĩa py. Tekoa e'ŷa py 'rã ava opoi kavara.

²³ — Ha'e va'e rire Arão oike jevy 'rã oguy nhemboaty oĩaty py. Ha'e vy omboipa 'rã ao ajukue iporãve va'e guigua henda iky'a e'ŷ va'e py oike aguã omoĩ va'ekue. Ha'e py ae 'rã oejapa.

²⁴ Ojau 'rã yy py peteĩ henda iky'a e'ŷa py, ha'e vy onhemonde 'rã oao ae'i py. Ha'e vy oẽ ju vy oapy vy ome'ẽ 'rã ha'e ae ojejavyague, ha'e heta va'e kuery ojejavyague guive. Ha'e rami vy ojao'i uka 'rã.

²⁵ Ome'ẽ mbyrã ojuka va'ekue kyrakue ma ojejavyague re oapypa avi 'rã altar áry.

²⁶ Ha'e gui kavara reraa-are ma ojoi 'rã oao ha'e ojaupa 'rã yy py. Ha'e gui ma ovaẽ ju 'rã tekao py.

²⁷ Ha'e rã vaka ra'y ha'e kavara ojejavyague regua ome'ẽ va'ekue ma huguykue henda iky'a e'ŷ va'e py jejavya ojao'i uka aguã ogueroike rire hetekue peraa ju 'rã tekao gui mombyry'i. Ipirekue, ho'okue ha'e hepoxikue ha'e javi 'rã oapypa.

²⁸ Ha'e va'e rapyare ma ojoi 'rã oao, ha'e ojau 'rã yy py. Ha'e gui ma ovaẽ ju 'rã tekao py.

²⁹ — Pova'e nunga ma penderekorā oeja pyre raka'e rā peve guarā. Ha'e gui sete jaxyva'e dez araa py ma pejexavai 'rā penenhe'ẽ py, ndapejapoi 'rā mba'eve, neĩ ha'e py aegua, neĩ amboae regua penembyte rupi ikuai va'e.*

³⁰ Mba'eta ha'e va'e ára ma ojao'ia 'rā pejejavyague, pendeky'a'o aguā. Ha'e ramo xee SENHOR renonde pejeky'a'opa 'rā pejejavyague ha'e javi gui.

³¹ Ha'e va'e sábado ára ma xevy pe ete 'rā pepytu'u ha'e pejexavai aguā penenhe'ẽ py. Ha'e va'e ma penderekorā oeja pyre raka'e rā peve guarā.

³² Ha'e gui nguu rekoria sacerdote-rā omboaxaa vy hexe azeite omoĩ mbyre ae 'rā ojao'i uka pejejavyague, ao ajukue iporāve va'e guigua iky'a e'ŷ va'e py onhemonde reve.

³³ Ha'e rami vy ojao'i uka 'rā henda iky'a e'ŷ va'e, oguy nhemboaty oīaty ha'e altar re ha'eve'ŷa oī va'ekue. Ojao'i uka avi 'rā sacerdote kuery ha'e heta va'e kuery ha'e javi re oī va'ekue.

³⁴ Ha'e va'e ma penderekorā raka'e rā peve guarā oeja pyre, ma'etŷa nhavō Israel kuery ojejavyague ojao'ia aguā — he'i.

Ha'e ramo Arão ojapopa Moisés pe SENHOR omombe'u ukaague rami.

17

Mymba ojuka aguā regua lei oīa

¹ SENHOR aipoe'i Moisés pe:

² — Ndeayvu ke Arão, ta'y kuery ha'e Israel kuery ha'e javi pe. Ha'e vy aipo're: Po rami SENHOR ojapo uka vy aipoe'i va'ekue:

³ Israel kuery regua ma guive rā xevy peguarā teĩ vaka ra'y e'ŷ vy vexa'i, ha'e'ŷ vy kavara mba'e ojuka amboae tekaoa py, e'ŷ vy tekaoa gui mombyry'i,

⁴ oguy nhemboaty oīaty rokē py ogueru 'rāgue py xee SENHOR pe ome'ẽ aguā, ha'e va'e ava pe "Jojukaa" 'ea 'rā. Huguy omoõe rire ha'e va'e ava oipe'aa 'rā heta va'e kuery mbyte gui.

⁵ Mba'eta Israel kuery ma mymba tekaoa rovai rupi ojuka 'rāgue py ogueru 'rā SENHOR pe oexa uka aguā, oguy nhemboaty oīaty rokē py ae. Ha'e rami rā sacerdote ome'ẽ 'rā SENHOR pe peteĩ rami ikuiaia reguarā.

⁶ Huguykue sacerdote omboayvipa 'rā oguy nhemboaty oīaty rokē rexei SENHOR pegua altar oī va'e áry. Ha'e rā ikyrakue ma oapypa 'rā, heakuā porā rā SENHOR ojou porā aguā.

⁷ Anha kuery pe rive nda'evevi ome'ẽ aguā mymba, mba'eta ha'e nunga pe rive onhembotavy uka okuapy. Ha'e va'e ma penderekorā oeja pyre raka'eve rā ikuai va'e peguarā.

⁸ — Ha'e nunga rupi aipo're ha'e kuery pe: Ava ma guive rā Israel kuery va'e regua e'ŷ vy amboae regua penembyte ikuai va'e teĩ mba'emo oapy, e'ŷ vy mymba ome'ẽ aguā ojuka aguā

⁹ oguy nhemboaty oīaty rokē py e'ŷ ogueru ramo SENHOR pe ome'ẽ aguā, ha'e va'e ma oipe'aa 'rā heta va'e kuery mbyte gui.

Mymba ruguykue ho'u e'ŷ aguā re ijayvua

¹⁰ — Ava ma guive rā Israel kuery regua e'ŷ vy amboae guigua penembyte rupi ikuai va'e teĩ huguykue ho'u ramo ma hovai apu'ã vy aipe'a 'rā heta va'e kuery mbyte gui.

¹¹ Mba'eta temimoingo rekovea ma huguy re ae oī. Huguy ma ame'ẽ uka va'e altar áry penderekorā vaiaty pejao'i uka aguā. Mba'eta huguy re vy ae 'rā ajao'i, tekove rekoria.

¹² Ha'e nunga rupi aipoa'e ae ma Israel kuery pe: "Peẽ kuery va'e regua neĩ peteĩve to'u eme huguykue, neĩ amboae regua penembyte ikuai va'e voi to'u eme", ha'e va'ekue.

¹³ Ava ma guive rā Israel kuery va'e regua, e'ŷ vy amboae regua penembyte rupi ikuai va'e teĩ, mymba e'ŷ vy guyra ojuka vy huguy omoõmba rive 'rā, ha'e yvy ku'i py ju 'rā ojao'i.

* 16:29 Onhe'ẽ py ojexavai ojejavyague re, ha'e okaru e'ŷ re ikuai.

¹⁴ — Mba'eta temimoingo ha'e javi rekovea ma huguy re ae oī. Ha'e nunga rupi ae aipoa'e va'ekue Israel kuery pe: “Xo'o ma guive rā pe'u eme huguykue, mba'eta temimoingo ha'e javi rekovea ma huguy re ae oī. Ho'u va'e rei tema oipe'aa 'rā”, ha'e va'ekue.

¹⁵ Ha'e py aegua, e'ŷ vy amboae regua teī, mymba omano rive va'ekue e'ŷ vy omboa'ypa pyre ri ho'u rire ojoi 'rā oao, ha'e ojau 'rā yy py. Ha'e vy ha'eve'ŷ va'e 'rā oiko ka'aru peve. Ha'e va'e rire ma ha'eve va'e ju 'rā oiko.

¹⁶ Ha'e rami teī oao ndojoi neī yy py ndojaui ri ramo hexe ae 'rā oī ojejavyague re opaga aguā.

18

Amboae reve itavy rei va'e re ijayvua

¹ SENHOR aipoe'ive Moisés pe:

² — Ndeayvu Israel kuery pe. Ha'e vy aipo're: Xee ma SENHOR Penderuete.

³ Pendekuai eme Egito yvy pendekuaiague pygua kuery reko rami, neī Canaā yvy katy xee rogueraa henoinya pygua kuery reko rami ma voi. Ha'e kuery reko rami pendekuai eme.

⁴ Xee aipotaa rami ae 'rā pendekuai, xeayvu aeja va'ekue pejapo, ha'e va'e rupi anho peiko aguā. Xee ma SENHOR Penderuete.

⁵ Ha'e nunga rupi xeayvua ha'e ajapo uka va'ekue rupi ae 'rā pendekuai. Mba'eta ha'e va'e ayvu amongue ojapopa ri vy oikove 'rā hexe vy. Xee ma SENHOR.*

⁶ — Ava ma guive rā nda'evei guetarā kunha reve ae ojejavy aguā. Xee ma SENHOR.

⁷ Ejejavy eme nderu pe, ndexy reve pejejavya rupi. Ha'e ma ndexy ae. Ejejavy eme hexeve.

⁸ Ejejavy eme ndexy anga reve, nderu pe voi rejejavvy e'ŷ aguā.

⁹ Ejejavy eme nereindy reve. Xap'a rei nderu rajy e'ŷ vy ndexy memby, pendero py aegua e'ŷ vy pendero gui mombyry guigua teī ejejavvy eme hexeve.

¹⁰ Ejejavy eme ndera'y rajy e'ŷ vy nderajy memby reve, ndero'o pe ae rejejavvy e'ŷ aguā.

¹¹ Ejejavy eme nderu ra'yxy memby, nderu gui oiko va'ekue reve, nereindy ae oiko ramo.

¹² Ejejavy eme nderu reindy reve, nderu retarā ae oiko ramo.

¹³ Ejejavy eme ndexy kypy'y reve, ndexy retarā ae oiko ramo.

¹⁴ Ejejavy eme nderu ryvy pe ta'yxy reve rejejavvy rupi, ndexy'y ae oiko ramo.

¹⁵ Ejejavy eme ndera'y ra'yxy reve, ndera'y ra'yxy ae oiko ramo. Ejejavy eme hexeve.

¹⁶ Ejejavy eme nderyke'y e'ŷ vy nderyvy ra'yxy reve, nderyke'y e'ŷ vy nderyvy pe rejejavvy e'ŷ aguā.

¹⁷ Ejejavy eme peteī kunha ha'e imemby reve avi. Ha'e ejopy eme ndera'y rajy neī nderajy memby hexeve rejejavvy aguā. Ha'e kuery ma neretarā kuery ae ramo ma ha'eve'ŷ ete 'rā.

¹⁸ Nderā'yxy ae rerekoye reve eraa eme amboae kunha ndera'yxy jevyrā, joe nda'ija'ei e'ŷ aguā. Nderā'yxy ae oikovea ja nda'evei amboae re rejejavvy aguā.

Ojeguarupy rupi anho joguereko va'e re ijayvua

¹⁹ — Enhemoja eme kunha gueko re oikoa ja, hexeve renheno aguā.

²⁰ Enheno eme neirū ra'yxy reve, hexeve vy renhemongy'a e'ŷ aguā.

²¹ Ndeguigua kuery peteīve ma emboaxa eme Moloque pe rive, remongy'a rei e'ŷ aguā Nderuete rery. Xee ma SENHOR.*

²² Enheno eme ava reve kunha reve rami. Ha'e nunga ma ojeguarupy ete.

²³ Neī mymba reve voi nerenheno 'rā, hexeve vy renhemongy'a e'ŷ aguā. Kunhague ma voi nda'evei mymba re onhemboja vy hexeve ojejavy aguā. Ha'e nunga ma ha'eve'ŷ ete.

²⁴ — Neī peteīve ha'e va'e regua py enhemongy'a eme, mba'eta ha'e nunga ha'e javi py amboae regua kuery onhemongy'a okuapya re aipe'apa 'rā penerononde gui.

* 18:5 Romanos 10.5, Gálatas 3.12 * 18:21 Tuuete ra'angaa Moloque ma amboae regua kuery ombojerovia vy ixupe gua'y kuery ae 'rā omboaxa tata rupi ojuka aguā (20.1-5; 2 Reis 23.10; Jeremias 7.31, 32.35).

- ²⁵ Ha'e rami vy ha'e kuery oyvy ae omongy'apa. Ha'e ramo aju vy ha'e va'e yvy re aikuaa pota vy yvy gui amondyipa 'rā ha'e py ikuai va'e.
- ²⁶ Ha'e rā peē kuery ma pejapo 'rā ajapo uka va'e ha'e xeayvu aeja va'ekue ha'e javi. Neī peteīve ojeguarupy amboae kuery ikuia regua pejapo eme, peē ha'e py aegua kuery, neī amboae regua penembyte rupi ikuai va'e voi.
- ²⁷ Mba'eta ha'e va'e regua ojeguarupy ha'e javi ma peē kuery peju e'ŷ mbove ha'e va'e yvy re ikuai va'e ojapo raka'e. Ha'e rami vy oyvy omongy'apa.
- ²⁸ Peē ma pendekuai eme pendeyvy pemongy'aa rupi, peē kuery voi pendepe'apaa e'ŷ aguā ha'e gui, peju e'ŷ mbove ha'e py ikuai va'e oipe'apaague rami ae avi.
- ²⁹ Ha'e va'e regua ojeguarupy rupi ikuai va'e, ha'e nunga apoare rei tema oipe'apaa 'rā heta va'e kuery mbyte gui.
- ³⁰ Ha'e nunga rupi xereve guarā aeja va'ekue rupi anho 'rā pendekuai. Pejapo eme neī peteīve ojeguarupy peju e'ŷ mbove ikuai va'e ojapo va'ekue, penhemongy'a e'ŷ aguā. Xee ma SENHOR Penderuete.

19

Lei regua omombe'u porāve jevyague

- ¹ Ha'e gui SENHOR aipoe'i Moisés pe:
- ² — Ndeayvu Israel kuery pavē pe. Ha'e vy aipo're: Peiko iky'a e'ŷ va'e, mba'eta xee SENHOR Penderuete ma iky'a e'ŷ va'e aiko.
- ³ Peteī-teī pemboete 'rā pendexy ha'e penderu, ha'e pemboete avi 'rā xevyguá sábado ára. Xee ma SENHOR Penderuete.
- ⁴ Peiko eme mba'emo ra'angaa pe, neī pejapo eme penderuete ra'angaarā mba'emo ryku gui. Xee ae ma SENHOR Penderuete.
- ⁵ — Ha'e gui xee SENHOR reve peteī rami nhandekuaia regua peme'ē vy ma pendejou porā aguā rami 'rā peme'ē.
- ⁶ Peme'ēa árave 'rā pe'u, ha'e ko'ēgue jevy. Ha'e rā mboapy araa py ma peapypa 'rā ndape'upai va'ekue.
- ⁷ Mboapy araa py ri ho'u va'e ma ojeguarupy ae 'rā optyta, ha'e ome'ē mbyte voi ndajou porāi 'rā.
- ⁸ Ha'e nunga ho'u va'e rei tema hexe ae 'rā oī ojejavyague re opaga aguā, xee SENHOR pegua iky'a e'ŷ va'e nombovarei rire. Ha'e nunga rupi oipe'aa 'rā heta va'e kuery mbyte gui.
- ⁹ — Ha'e gui ndeyvy re renhoty va'ekue remono'ō vy nemba'ety rembe rupi nere-mono'ō katuī'i 'rā, neī hary reity rive va'ekue voi neremono'ōi 'rā nemba'ety gui.
- ¹⁰ Neremono'ō jevyi 'rā nde'uvaty rupi, neī nderejopyi 'rā uva'a reity rive va'ekue. Ha'e nunga ha'e javi reja 'rā iporiaukue'i ha'e amboae regua kuery pe. Xee ma SENHOR Penderuete.
- ¹¹ — Nemonda eme, ndeapu eme, neī embotavy eme neirū kuery.
- ¹² Eura rive eme xerery rupi, Penderuete rery nerembovare e'ŷi aguā. Xee ma SENHOR.
- ¹³ — Emoingo axy eme neirū kuery, ha'e kuery gui nemonda eme guive. Omba'eapo va'e kuery peguarā ndepo py toptya eme ko'ē peve.
- ¹⁴ — Ndeayvu vai eme ijapyxa e'ŷ va'e re, neī hexa pyxo e'ŷ va'e renonde emoi eme onhepyxanga aguā. Ha'e rami 'rāgue py Penderuete renonde rejererokyjea rupi eiko. Xee ma SENHOR.
- ¹⁵ — Mba'emo re reikuua potaa py ejoguerekemba'etu eme ha'eve e'ŷa rami. Ema'ēve eme iporiaukue'i re, eayvuve rei eme guive oguerekopa rei va'e kuery. Ha'evea rami meme 'rā reikuua pota neirū kuery reko re.
- ¹⁶ — Enhomoangeko rei eme heta va'e kuery mbyte rupi. Eiko eme neirū kuery rekove reipe'a ukaa rupi. Xee ma SENHOR.
- ¹⁷ — Ndea'e e'ŷ eme nderyke'y e'ŷ vy nderyvy kuery re ndepy'a py. Ha'e rami avi ndeayvu ete 'rā neirū pe, ha'e ramia py rive ndee voi rejavy e'ŷ aguā.

¹⁸ — Ejepy eme joe, neĩ ndejee emoĩ eme neirũ kuery va'e regua pe ndevaia. Ha'e rami 'rãgue py reayvu 'rã neirũ ndee ae rejeayvua rami. Xee ma SENHOR.*

¹⁹ — Reiko 'rã xeayvua aeja va'ekue rupi anho. Eja eme nerymba kuery joegua e'ŷ-e'ŷ re ta'y aguã. Nemba'ety py enhoty eme mba'emo ra'yĩ mokoĩ regua. Enhemonde eme guive ao joegua e'ŷ-e'ŷ guigua py.

²⁰ — Amongue onheno 'rã escrava kunha amboae ava re omenda aguã rami oiko va'e reve, teĩ imerã mba'eve ndopagai teri escrava oikoa gui opoi aguã. Ha'e ramo mokoĩve ombopia 'rã. Ha'e rami avi ndojukaai 'rã, mba'eta escrava oikoa gui ndopoiai teri ramo.

²¹ Ha'e ramia py ava va'e ojejavyague omboekovia aguã ogueru peteĩ vexa'i xee SENHOR pe oguy nhemboaty oĩaty rokẽ py.

²² Ha'e ramo mba'emo omboekovia aguã regua vexa'i ome'ẽ va'e py ma sacerdote ojao'i uka 'rã ojejavyague SENHOR renonde. Ha'e ramo ojejavyague operdoa 'rã.

²³ — Ha'e gui pendeyvyrã va'ekue re pendekoa ma vy opa marãguia yvyra hi'a va'e penhoty ramo nda'evei ranhe 'rã hi'a pe'u aguã. Mboapy ma'etõy peve nda'evei 'rã, ndape'ui 'rãe.

²⁴ Ha'e gui irundy ma'etõy re ma hi'a ha'e javi peikuua 'rã iky'a e'ŷ va'ea, ha'e SENHOR pe peme'ẽmba 'rã perovy'aa rupi anho.

²⁵ Peteĩ nhiruĩ ma'etõy py mae ma 'rã pe'u hi'a, ha'e rami py hi'ave aguã. Xee ma SENHOR Penderuete.

²⁶ — Ndape'ui 'rã xo'o huguykue reve. Penemba'ekuua eme, penemba'evyky rei eme guive.

²⁷ — Pejaya eme pende'a ijapu'a'i aguã rami, neĩ pejaya eme penerendyva apy rupi.*

²⁸ Omaniao rã penhekiximba rei eme pendero'o rupi, penhembojeguapa rei eme guive. Xee ae ma SENHOR.

²⁹ — Pembojejavys eme penderajy kuery itavy rei va'e ikuai aguã, pendeyvy ha'e javi rupi penhembotavy vy teko vai rupi anho pendekuai e'ŷ aguã.

³⁰ Pemboete 'rã xevygua sâbado ára, ha'e xevygua henda iky'a e'ŷ va'e. Xee ma SENHOR.

³¹ — Peo eme omanogue mboayvua kuery re, neĩ imba'ekuua va'e kuery re. Peka eme, ha'e kuery reve vy penhemongy'a e'ŷ aguã. Xee ma SENHOR Penderuete.

³² — Pepu'ã pe'amys hi'a xiimba'i va'e renonde py, pemboete 'rã tujakueve ikuai va'e. Penderuete renonde avi peiko pejerokyjea rupi. Xee ma SENHOR.

³³ — Amboae regua pendeyvy re ikuai va'e pemoingo axy rei eme.

³⁴ Amboae regua penembyte ikuai va'e perek 'rã pẽa py aegua perekova rami. Pemboaxy 'rã peẽ ae penhemboaxya rami, mba'eta Egito yvy re amboae regua peẽ voi peiko rire. Xee ma SENHOR Penderuete.

Deuteronômio 25.13-16

³⁵ — Pejokore eme joeko re peikuua potaa py, neĩ yvyra'i py mba'emo pea'ã vy, mba'emo pepejaa py, neĩ hyru py mba'emo pea'ãa py.

³⁶ Mba'emo opejaa, ipoyia, ajaka ha'e galão ma ha'evea'i ramigua meme 'rã peiporu. Xee ma SENHOR Penderuete Egito yvy gui penerenoẽmbaare.

³⁷ Pendekuai 'rã xeayvua aeja va'ekue ha'e javi rupi, pejapopa 'rã ajapo uka va'ekue. Xee ma SENHOR.

Nhomoingo axyague repy re ijayvua

¹ SENHOR aipoe'ive ju Moisés pe:

² — Aipo're avi 'rã Israel kuery pe: Ava ma guive rã Israel kuery e'ŷ vy amboae regua peẽ kuery mbyte rupi ikuai va'e Moloque pe gua'y kuery omboaxa ramo pejuka 'rã. Pendeyvy re pendekuai va'e ae 'rã pejapipa ita py.*

* 19:18 Mateus 5.43, 19.19, 22.39; Marcos 12.31; Lucas 10.27; Romanos 13.9; Gálatas 5.14; Tiago 2.8 * 19:27 Ha'e jave py amboae regua kuery ma omaniao rã ipy'a vai vy ojaya 'rã o'a ijapu'a'i aguã rami, ha'e opa marã 'rã onhekiximba rei (21.5; Deuteronômio 14.1-2). * 20:2 Levítico 18.21

³ Ha'e va'e rovai xee voi apu'ã vy aipe'a 'rã heta va'e kuery mbyte gui, mba'eta Moloque pe gua'y kuery ae omboaxa vy omongy'a xevyguia henda iky'a e'ŷ va'e, ha'e nombovarei xerery iky'a e'ŷ va'e.

⁴ Xapy'a rei pendekuai va'e penderexa pemboty 'rã pexa e'ŷ aguã amongue gua'y kuery Moloque pe omboaxa rã, ha'e rami vy ndapejukai 'rã.

⁵ Ha'e ramo ma xee ae 'rã apu'ã ha'e va'e ava ha'e hoo pygua kuery ha'e javi rovai. Aipe'apa 'rã heta va'e kuery mbyte gui, hexeve Moloque pe onhembotavy uka va'ekue ha'e javi guive.

⁶ — Ha'e gui amongue oo 'rã omanogue mboayvua kuery pe oporandu aguã, ha'e rami e'ŷ vy imba'evyky va'e kuerya py oo 'rã ha'e kuery reve vy onhembotavy uka aguã. Ha'e ramo ha'e va'e rovai xee ae apu'ã vy aipe'a 'rã heta va'e kuery mbyte gui.

⁷ Ha'e nunga rupi pejeky'a'o uka ke iky'a e'ŷ va'e peiko aguã, mba'eta xee ma SENHOR Penderuete.

⁸ Peiko ete 'rã xeayvua aeja va'ekue rupi, pejapopa ete. Xee ma SENHOR xevyguia iky'a e'ŷ va'erã penemoingo va'e.

⁹ Mava'e rã rei ava nguu e'ŷ vy oxy re ijayvu vai ramo pejuka 'rã. Nguu e'ŷ vy oxy re ijayvu vai rire hexe ae 'rã oĩ huguy pemoëague re opaga aguã.*

¹⁰ — Oirũ ra'yxy reve ava itavy ramo pejuka 'rã, kunha itavy va'ekue voi.

¹¹ Nguu ra'yxy reve ava onheno vy ojejavu nguu pe ae. Ha'e rã mokoïve 'rã pejuka. Ha'e kuery re ae 'rã oĩ huguy pemoëague re opaga aguã.

¹² Gua'y ra'yxy reve ava onheno ramo pejuka 'rã mokoïve, nda'eveipa va'e ojapo rire. Ha'e kuery re ae 'rã oĩ huguy pemoëague re opaga aguã.

¹³ Ha'e gui ava meme ri kunha rami joguerekoo va'e ma mokoïve ojapo okuapy ojeguarupy. Pejuka 'rã. Ha'e kuery re ae 'rã oĩ huguy pemoëague re opaga aguã.

¹⁴ Xapy'a rei peteĩ ava joguerekoo 'rã peteĩ kunha ha'e ixo reve. Ha'e ramo ha'eve'ŷ va'e ae. Peapypa 'rã ava ha'e kunhague, penembyte ha'e rami ete teko vai ojapo ve'ŷ aguã.

¹⁵ Mymba reve ri ava itavy ramo pejuka 'rã, pejuka avi 'rã mymba.

¹⁶ Kunha ri mymba re onhemboja vy hexeve ojejavu ramo pejuka 'rã kunha va'e ha'e mymba avi. Ha'e kuery re ae 'rã oĩ huguy pemoëague re opaga aguã.

¹⁷ — Xapy'a rei peteĩ ava ogueraa 'rã gueindy nguu rajy va'e, ha'e e'ŷ vy oxy memby, hexeve ojejavu aguã. Ha'e ramo ma ha'eve'ŷ va'e ae. Ha'e kuery oipe'apaa 'rã heta va'e kuery mbyte gui. Gueindy reve ae ojejavu rire hexe ae 'rã oĩ ojejavuague re opaga aguã.

¹⁸ Xapy'a rei peteĩ kunha gueko re oiko va'eri ava oguerekoo vy ojejavu 'rã. Heko regua oexa, ha'e kunha va'e voi gueko regua oexa uka rire mokoïve oipe'aa 'rã heta va'e kuery mbyte gui.

¹⁹ Ha'e rami ae avi ejejavy eme ndexy kypy'y e'ŷ vy nderyke reve, neĩ nederu reindy reve voi. Neretarã ae'i reve rejekavy rire ndere ae 'rã oĩ rejekavyague re opaga aguã.

²⁰ Oxy'y reve ava onheno vy otuty pe voi ojejavu. Hexe ae 'rã oĩ ojejavuague re opaga aguã. Ha'e rami vy omano 'rã ta'y ve'ŷ re.

²¹ Guyvy e'ŷ vy guyke'y ra'yxy reve ri ava joguerekoo vy ha'eve'ŷ va'e ae oiko, guyke'y e'ŷ vy guyvy pe ojejavu rire ta'y ve'ŷ re 'rã oiko.

²² — Ha'e nunga rupi peiko 'rã xeayvua aeja va'ekue ha'e javi rupi, pejapopa ajapo uka va'ekue, vyv pendekuai aguã py rogueraa ague gui pendepe'apaa e'ŷ aguã.

²³ Pendekuai eme penerenonde gui aipe'a va'ekue regua ikuaria rami, mba'eta ha'e nunga ha'e javi ha'e kuery ojapo va'e. Ha'e nunga rupi ae xee ajou vai.

²⁴ Ha'e rã peẽ kuery pe ma aipoa'e ae ma: Ha'e va'e vyv re ae 'rã pendekoa, pendekoarã ae ame'ẽ, vyv kamby ha'e ei oata e'ŷa. Xee ma SENHOR Penderuete vyv regua kuery mbyte gui pendepe'aare.

²⁵ Ha'e nunga rupi aŷ peikuaa 'rã mymba ha'e guyra ha'eve va'e ha'e ha'eve'ŷ va'e reve joo ramigua e'ŷa. Penhemoingo eme ojeguarupy mymba re rive, guyra, e'ŷ vy vyv áry

* 20:9 Mateus 15.4, Marcos 7.10

rupi onhembotyryry ovy va'e re rive, mba'eta ha'e rami ikuai va'e pendegui aipe'a rire ha'eve'ŷ va'e memea peikuaa aguã.

²⁶ Iky'a e'ŷ va'e 'rã peiko xevy guarã, mba'eta xee SENHOR iky'a e'ŷ va'e aiko ramo, ha'e vyv regua kuery mbyte gui roipe'a xevy guarã ae pendekuai aguã.

²⁷ — Ha'e gui ava e'ŷ vy kunha teĩ omanogue mboayvua, ha'e'ŷ vy imba'evykyra rupi oiko va'e pejuka 'rã. Pejapipa 'rã ita py. Ha'e kuery re ae 'rã oĩ huguy pemoēague re opaga aguã.

21

Sacerdote kuery regua lei oĩa

¹ SENHOR aipoe'i Moisés pe:

— Ndeayvu Arão ra'y kuery sacerdote ikuai va'e pe. Ha'e vy aipo're: Sacerdote kuery ma nda'evei onhemongy'a aguã heta va'e kuery ikuiaia py omano va'ekue re opokoa py,

² hetarã ae'i re e'ŷ ramo, ixy, tuu, ta'y, tajy, tyvy e'ŷ vy tyke'y ae'i,

³ ha'e heindy ae'i voi kunhata'i omenda e'ŷ teri va'e retekue re opoko vy onhemongy'a teĩ ha'eve avi.

⁴ Heta va'e kuery renondegua sacerdote kuery ikuai va'e vy nda'evei onhemongy'a rive aguã, ha'eve'ŷ va'e oiko e'ŷ aguã.

⁵ Sacerdote kuery ma oakã nombopire rei 'rã, guendyva voi ndojayai 'rã, nonhekyximbä rei 'rã guive guete rupi.

⁶ Ha'e kuery ma Nguuete pegua iky'a e'ŷ va'e 'rã ikuai, Nguuete rery nombovareai aguã rami e'ŷ, mba'eta SENHOR pe ae mba'emo oapy vy omboaxa, tembi'u SENHOR pegua guive. Ha'e vy iky'a e'ŷ va'e 'rã ikuai.

⁷ Ha'e kuery ma gua'yxyrã ndojou'i 'rã kunha itavy rei va'e, e'ŷ vy omboetepy e'ŷ. Ndojoui 'rã ime omoxẽ va'ekue, mba'eta sacerdote ma iky'a e'ŷ va'e, Nguuete pe ete oiko va'e.

⁸ Ha'e nunga rupi remboaxa 'rã xevy guarã, Nguuete pegua tembi'u me'ëa ikuai ramo. Ha'e kuery ikuai 'rã iky'a e'ŷ va'e, mba'eta xee SENHOR pendeky'a'oa aiko va'e ma iky'a e'ŷ va'e aiko.

⁹ Peteĩ sacerdote rajy onhembotavy reia py omboetepy e'ŷ onhemoingoa ma nguu voi nomboete ukai vy. Ha'e ramo oapypaa 'rã.

¹⁰ — Ha'e gui sacerdote yvateve va'e ma tyvy kuery mbyte gui oiporavo vy inhakã re onhoëa azeite SENHOR pe omboaxaa aguã regua, ha'e ao iky'a e'ŷ va'e py onhemonde aguã oiky'a'oa ramo ma nomoatyryõ e'ŷi 'rã o'a, neĩ nomondoroi 'rã oao.

¹¹ Neĩ nonhembojai 'rã teĩ tetekue re, neĩ tuu e'ŷ vy ixy ae omano teĩ ha'e nonhemongy'ai 'rã hetekue re.

¹² Ha'e ma noëi 'rã henda iky'a e'ŷ va'e gui, nombovare e'ŷi 'rã Nguuete pegua henda iky'a e'ŷ va'e, hexe azeite Tuuete pe nhomboaxaa aguã regua omoña rire. Xee ma SENHOR.

¹³ Gua'yxyrã ma kunhata'i omenda e'ŷ teri va'e anho 'rã ojou.

¹⁴ Gua'yxyrã ndojou'i 'rã imeve'ŷ va'e, neĩ opoi pyre, omboetepy e'ŷ neĩ itavy rei va'e, ha'e rami 'rãgue py kunhata'i omenda e'ŷ teri va'e ha'e kuery va'e regua ae 'rã ojou gua'yxyrã,

¹⁵ ha'e rami vy amboae kuery mbyte gua'y kuery nombovare e'ŷi aguã, mba'eta xee SENHOR ae aiko xevyguia iky'a e'ŷ va'erã amoingo va'e — he'i.

¹⁶ SENHOR aipoe'ive ju Moisés pe:

¹⁷ — Ndeayvu 'rã Arão pe. Ha'e vy aipo're: Neramymino kuery, aŷ guive ikuai va'erã voi, ha'e kuery va'e regua re ivaikue reia oĩa va'e nonhembojai 'rã SENHOR Nguuete peguarã tembi'u omboaxa aguã.

¹⁸ Peteĩve ava hexe ivaikue reia oĩa va'e nonhembojai 'rã: ava hexa pyxo e'ŷ va'e, e'ŷ vy ipy xogue va'e, hova pëgue'i va'e, e'ŷ vy hete vaikue'i va'e,

¹⁹ ipy e'ŷ vy ipo opẽ va'ekue,

²⁰ ojero'a rei'i va'e, kyr'i rei va'e, e'ŷ vy hexa ra'yí huña xiñ'i va'e, hemomba va'e, ipire ijapipa rei va'e, ha'e'ŷ vy ha'yí opu va'ekue.

²¹ Peteīve ava sacerdote Arão ramymino va'e regua teī hexe ivaikue reia oī ramo nonhembojai 'rā SENHOR pe mba'emo oapy vy omboaxa aguā. Hexe ivaikue reia oī ramo nonhembojai 'rā Nguuete pegua tembi'u omboaxa aguā.

²² Ha'e rami avi ha'e va'e regua ma Nguuete pegua tembi'u ho'u teī ha'eve, tembi'u iky'a e'ŷ va'e, iky'a e'ŷ ete va'e teī.

²³ Ha'e rami teī hexe ivaikue reia oī ramo ndoikei 'rā ajukue okē regua katy'i peve, neī novaēi 'rā altar oīa peve, xevygua henda iky'a e'ŷ va'e nombovare e'ŷi aguā, mba'eta xee ma SENHOR xevygua iky'a e'ŷ va'erā amoingo va'e — he'i.

²⁴ Ha'e rami Moisés ijayvu Arão, ta'y kuery ha'e Israel kuery ha'e javi pe.

22

Tembi'u ha'eve va'e regua lei oīa

¹ SENHOR aipoe'i Moisés pe:

² — Aipo're Arão ha'e ta'y kuery pe mba'emo iky'a e'ŷ va'e Israel kuery xevy ome'ẽ va'ekue re topena rive eme, xerery iky'a e'ŷ va'e nombovare e'ŷi aguā. Xee ma SENHOR.

³ — Aipo're avi ha'e kuery pe: Peē kuery ha'e peneramymino kuery ikuai va'e regua teī hexe ha'eve'ŷa oī teri reve mba'emo iky'a e'ŷ va'e xee SENHOR pe Israel kuery ome'ẽ va'ekue re onhemboja ramo oipe'aa 'rā xerenonde gui. Xee ma SENHOR.

⁴ Arão ramymino kuery regua teī lepra oguerek, e'ŷ vy hete guigua opyta e'ŷ va'e ndo'ui 'rā tembi'u iky'a e'ŷ va'e, ojeky'a'opa e'ŷa ja. Ha'e rami ae avi mba'emo ha'eve'ŷ va'e re opoko va'e avi, tetekue re ov y va'ekue, e'ŷ vy ijay opyta e'ŷ xapy'a va'e,

⁵ ha'e'ŷ vy onhembotyryry va'e re opoko vy ha'eve'ŷ va'e oiko va'ekue, e'ŷ vy ava ndojeky'a'o ukai teri va'e re, mba'emo re rei tema ov y ha'eve'ŷ va'e 'rā oiko.

⁶ Ha'e nunga re opoko va'ekue rei tema oiko avi 'rā ha'eve'ŷ va'e ka'aru peve. Ha'e rami vy tembi'u iky'a e'ŷ va'e ho'u aguā nda'evei, yy py ojaupa ranhe e'ŷa ja.

⁷ Ha'e gui kuaray oike ma jave ha'eve va'e ju 'rā oiko. Ha'e vy 'rāe ho'u temibi'u iky'a e'ŷ va'e, ixupe guarā va'ekue ae ramo.

⁸ Sacerdote kuery ndo'ui avi 'rā mymba omano rive va'ekue e'ŷ vy omboa'ypa pyre, ha'e nunga py onhemongy'a e'ŷ aguā. Xee ma SENHOR.

⁹ Ha'e kuery ma xereve guarā aeja va'ekue rupi 'rā ikuai, ha'e kuery omano e'ŷ aguā ojejavya re opaga aguā oī va'e káuxa, ha'e kuery ae onhemongy'a rire. Xee ma SENHOR iky'a e'ŷ va'erā amoingo va'e.

¹⁰ — Ha'e rā amboae regua peteīve ndo'ui 'rā tembi'u iky'a e'ŷ va'e. Sacerdote kuerya py oke vy ou va'e, neī ixupe ombo'epo va'e kuery ma voi ndo'ui 'rā.

¹¹ Ha'e rami avi xapy'a rei sacerdote operáta re ae 'rā ojogua escravo-rā. Ha'e va'e regua ma ha'eve 'rā ha'e nunga gui ho'u aguā. Hopy ae oiko'i va'ekue voi hexeve okaru avi 'rā hembi'u re.

¹² Ha'e rami teī sacerdote rajy amboae regua re ri omenda vy ndokaruvei 'rā iky'a e'ŷ va'e ome'ẽ mbyre re.

¹³ Ha'e rami avi xapy'a rei sacerdote rajy imeve'ŷ va'e oiko, ha'e e'ŷ vy opoi pyre, ha'e imemby e'ŷ teri vy nguu ro py ju ojevy 'rā kunhatai jave oikoague py. Ha'e vy ma ha'eve 'rā nguu rembi'u re ju okaru aguā. Ha'e rā amboae regua ma peteīve nda'evei ha'e nunga re okaru aguā.

¹⁴ Xapy'a rei amongue oikuaa pota e'ŷ re mba'emo iky'a e'ŷ va'e ho'u 'rā. Ha'e rami ri vy ma ha'ekue regua áryve ome'eve ju 'rā sacerdote pe, peteī nhiruī ikuai nhavō áry peteī-teī ju 'rā ome'eve iky'a e'ŷ va'ekue repy.

¹⁵ Sacerdote kuery nda'evei nombovarei aguā mba'emo iky'a e'ŷ va'e SENHOR pe Israel kuery ome'ẽ va'e,

¹⁶ mba'eta ha'e rami ri vy ojapo 'rā hexe ae ojejavague re opaga aguā oī aguā rami, mba'emo iky'a e'ŷ va'e ho'uague káuxa, mba'eta xee ma SENHOR iky'a e'ŷ va'erā amoingo va'e.

Mymba ivaikue rei e'ŷ va'e anho ome'ẽ aguā re ijayvua

¹⁷ SENHOR aipoe'ive ju Moisés pe:

¹⁸ — Ndeayvu Arão ha'e ta'y kuery pe, ha'e Israel kuery ha'e javi pe. Ha'e vy aipo're: Xapy'a rei Israel kuery va'e regua, ha'e'ŷ vy amboae regua Israel kuery mbyte rupi ikuai va'e ogueru 'rã mba'emo ome'ẽ va'erã, onhemboayvuague ojapopaa regua mba'e, e'ŷ vy onhenhandua'i rami ome'ẽ va'e. Ha'e nunga SENHOR pe oapy vy ome'ẽ va'erã ogueru ramo

¹⁹ xee ajopy 'rã mymba ava ivaikue rei e'ŷ va'e anho, vaka ra'y, vexa'i e'ŷ vy kavara.

²⁰ Ha'e rã mymba ivaikue rei va'e ma napeme'ẽi 'rã, mba'eta ha'e nunga ma xee ndajopyi 'rã pendepo gui.

²¹ Ha'e gui xapy'a rei xee SENHOR pe amongue ome'ẽ 'rã peteĩ rami ikuiaia regua, onhemboayvuague ojapopaa regua, e'ŷ vy onhenhandua'i rami ome'ẽ teĩ, vaka ra'y, e'ŷ vy guymba kuery mboae guigua. Ha'e ramo mymba ajopy aguã ma ivaikue rei e'ŷ va'e. Ha'e va'e re neĩ peteĩ henda py ivaikue reia oĩ aguã nda'evei.

²² Ha'e rã oexa e'ŷ va'e, ikarêgue'i, e'ŷ vy hova pégue'i va'e, ijai vaikue va'e, hemomba va'e, e'ŷ vy ipire rupi iove rei va'e, ha'e nunga ma nda'evei xee SENHOR pe peme'ẽ aguã, neĩ altar áry ma voi napemoi 'rã xee SENHOR pe peapy aguã.

²³ Ha'e rami avi vaka ra'y e'ŷ vy vexa'i hete vaikue'i va'e ha'eve 'rã penhenhandua'i rami peme'ẽ aguã, ha'e rã penhemboayvuague pejapopaa reguarã ma ndajopyi 'rã.

²⁴ SENHOR pe napeme'ẽi 'rã mymba ha'yí raxy va'e, omou'ũ mbyre, oa'yíjo pyre, ha'e'ŷ vy ojaya pyre. Ha'e nunga pejapo eme yvy pendekuaia re.

²⁵ Neĩ amboae regua kuery po gui pejopy eme avi ha'e nunga mymba Penderuete pegua tembi'u peme'ẽ aguã, mba'eta ivaikuea oĩa káuxa nda'evei ae ma. Ha'e nunga ma ndajopyi 'rã pendepo gui.

²⁶ SENHOR aipoe'ive ju Moisés pe:

²⁷ — Vaka ra'y, e'ŷ vy vexa'i oiko'i rire ma sete ára peve 'rã oiko ixya py. Oito ára guive mae ha'eve xee SENHOR pe peapy vy peme'ẽ aguã. Ha'e ramo ma xee ajopy 'rã.

²⁸ Vaka, e'ŷ vy vexa'i teĩ peteĩ'i ára pyve pejuka eme mokoïve imemby reve.

²⁹ SENHOR perovy'aa rupi mba'emo peme'ẽ vy ma pendejou porã aguã rami peme'ẽ.

³⁰ Ha'e va'e árave pe'upa 'rã. Mba'eve pemoembyre eme ko'ẽ jevy guarã. Xee ma SENHOR.

³¹ Ha'e nunga rupi peiko 'rã ajapo uka va'ekue rupi, pejapopa 'rã. Xee ma SENHOR.

³² Pembovare e'ŷ eme xerery iky'a e'ŷ va'e, mba'eta Israel kuery mbyte aikuua uka 'rã iky'a e'ŷ va'e aikoa. Xee ma SENHOR iky'a e'ŷ va'erã penemoingo va'e.

³³ Egito yvy gui roguerupa va'ekue Penderuete aiko aguã. Xee ma SENHOR.

23

SENHOR pegua ngaru ikuai va'e re ijayvua

¹ SENHOR aipoe'i Moisés pe:

² — Ndeayvu 'rã Israel kuery pe. Ha'e vy aipo're: Ngaru SENHOR peguarã oa'angaa pyre ma peikuua uka 'rã iky'a e'ŷ va'e memea penhemboaty aguã. Pova'e ma xevygua ngaru ikuai va'e.

Êxodo 23.12

³ — Seis ára re pemba'eapo 'rã. Ha'e rã sete araa ma sábado, xevygua pepytu'u ha'e penhemboaty aguã ára iky'a e'ŷ va'e. Mba'eve py napemba'eapoi 'rã, mba'eta sábado SENHOR pegua ára, mamo rã peikoa rupi rei.

Êxodo 23.14,15; 34.18; Deuteronomio 16.1-8

⁴ — Pova'e ma ngaru SENHOR oa'anga va'ekue meme, ára iky'a e'ŷ va'e penhemboaty aguã. Peikuua uka 'rã oa'angague ára ojeupity nhavõ.

⁵ Jypy'igua jaxy re, catorze araa py, ka'aru'i ma jave ojeupity 'rã SENHOR pegua Páscoa ára.

⁶ Ha'e va'e jaxy re ae quinze araa py oiko 'rã SENHOR pegua ngaru mbojape imbovua revegua e'ŷ va'e regua. Sete ára peve 'rã pe'u mbojape imbovua revegua e'ŷ.

⁷ Jypy'ia ára ma pejapo 'rã nhemboaty iky'a e'ŷ va'e. Ha'e vy pemba'eapo eme mba'eve py.

⁸ Sete ára re peme'ẽ 'rã mba'emo SENHOR pe peapy vy. Ha'e gui sete araa py ma oiko 'rã nhemboaty iky'a e'ŷ va'e. Pemba'epo eme mba'eve py.

Êxodo 23.16; 34.22,26

⁹ SENHOR aipoe'ive Moisés pe:

¹⁰ — Ndeayvu Israel kuery pe. Ha'e vy aipo're: Yvy ame'ẽ va'ekue re pevaẽ ma vy pemono'õ 'rã mba'emo penhoty va'ekue. Mba'emo aju pemono'õ va'e gui ma sacerdote pe Peru 'rã jypy'i pejokua va'ekue regua iporãgueve peme'ẽ va'erã.

¹¹ Ha'e va'e jokuaa sacerdote oupi reve ombovava 'rã SENHOR renonde, pendejou porã aguã.

¹² Sábado ára rire'i 'rã sacerdote oupi reve ombovava. Mba'emo aju ojokua pyre oupia ára ae 'rã peme'ẽ avi peteĩ vexa'i ivaikue rei e'ŷ va'e, peteĩ ma'etŷ oguerekó va'e, SENHOR pe peapy vy peme'ẽ aguã.

¹³ Ha'e gui mba'emo aju guigua peme'ẽ va'erã mokoĩ ryru trigo iporãve va'e azeite reve omona mbyre. Ha'e va'e ma peapy vy peme'ẽ 'rã, heakuã porã rã SENHOR ojou porã aguã. Peru avi 'rã peteĩ ryru vinho ixupe penhoẽ va'erã.

¹⁴ Ndape'ui 'rã mbojape, trigo maimbe, neĩ mba'emo ra'yíngy, Penderuete pe peme'ẽ va'erã Peru e'ŷa ja. Ha'e rami aguã ma raka'e rã peve aeja va'ekue penderekorã, pendekuaia rupi ha'e javi guarã ae.

Deuteronômio 16.9-12

¹⁵ — Ha'e gui peipapa 'rã ára, sábado ára rire'i jokuaa oupi reve ombovava pyrã perua ára guive peipapa 'rã sete semana ha'e javi re.

¹⁶ Ha'e gui sete-a sábado rire'i ára guive ma cinqüenta ára jevy 'rã peipapa. Ha'e gui ma Peru ju 'rã SENHOR pe mba'emo aju guigua peme'ẽ va'erã.

¹⁷ Pendekoa gui Peru 'rã mokoĩ mbojape oupi reve ombovava pyrã. Mokoĩ ryru trigo gui 'rã pejapo. Imbovua reve 'rã pembojy. Ha'e va'e ma jypy'igua SENHOR pe peme'ẽ va'erã.

¹⁸ Ha'e gui mbojape reve peme'ẽ avi 'rã sete vexa'i ra'y ivaikue rei e'ŷ va'e, peteĩ ma'etŷ'i va'e meme, ha'e peteĩ vaka ra'y, ha'e gui mokoĩ vexa'i. Ha'e nunga peapy uka vy peme'ẽ 'rã SENHOR pe, peteĩ rami pendekuaia regua ha'e vinho penhoẽ va'e reve. Peapy uka vy 'rã peme'ẽ, heakuã porã rã SENHOR ojou porã aguã.

¹⁹ Ha'e gui peteĩ kavara peme'ẽ avi 'rã pejejavyague re, ha'e mokoĩ vexa'i peteĩ ma'etŷ va'e ju 'rã peme'ẽ peteĩ rami pendekuaia reguarã.

²⁰ — Ha'e nunga ma sacerdote oupi reve ombovava 'rã, trigo jypygua gui mbojape pejapo va'ekue reve. Ha'e nunga SENHOR renonde oupi reve ombovava pyrã peme'ẽ, mokoĩ vexa'i ra'y reve. Ha'e nunga ma SENHOR pegua iky'a e'ŷ va'e, sacerdote kuery ho'u va'erã.

²¹ Ha'e va'e árave oikuua uka 'rã nhemboaty aguã ára iky'a e'ŷ va'erã. Pemba'epo eme mba'eve py. Ha'e va'e ma ojapo uka pyre raka'e rã peve guarã, pendekuaia ha'e javi rupi, ha'e peneramymino kuery ikuai va'e peguarã avi.

²² — Ha'e gui pendeyvy re penembetty rupi pemono'õ vy ndapeo jevyi 'rã penembetty rembe rupi gui Peruve aguã, neĩ hary peity rive va'ekue pemono'õ eme. Tove iporiaukue'i ha'e amboae regua kuery peguarã. Xee ma SENHOR Penderuete — he'i.

²³ SENHOR aipoe'ive ju Moisés pe:

²⁴ — Ndeayvu Israel kuery pe. Ha'e vy aipo're: Sete jaxyá re ijypy'ia ára py ma oiko 'rã xevy pepytu'u ha'e penema'endu'a aguã ára. Mimby guaxu pemonhe'ẽ 'rã penhemboaty aguã, ára iky'a e'ŷ va'e ramo.

²⁵ Mba'eve py pemba'epo eme. Ha'e rami 'rãgue py SENHOR pe 'rã Peru peapy vy peme'ẽ va'erã.

Jejavya ojao'ia aguã ára re ijayvua

²⁶ SENHOR aipoe'ive Moisés pe:

²⁷ — Ha'e gui ha'e va'e sete jaxyá va'e re, dez araa py ma ojeupity 'rã jejavya ojao'ia aguã ára. Oiko 'rã nhemboaty iky'a e'ŷ va'e, penenhe'ẽ py pejexavaia rupi pendekuaia aguã. Ha'e rami vy SENHOR pe Peru 'rã peapy vy peme'ẽ va'erã.

²⁸ Ha'e va'e ára ma mba'eve py napemba'eapoi 'rā, pejejavyague ojao'ia aguã ára, SENHOR Penderuete renonde pejejavyague pejao'i uka aguã ae.

²⁹ Ha'e va'e ára onhe'ẽ py ojexavaia rupi e'ŷ ikuai va'e oipe'aa 'rā heta va'e kuery mbyte gui.

³⁰ Ha'e va'e ára mba'emo py omba'eapo va'e ma xee ae amokanhy 'rā heta va'e kuery mbyte gui.

³¹ Mba'eve py napemba'eapoi 'rā. Ha'e va'e ma ojapo uka pyre raka'e rā peve guarã peneramymino ikuai va'e peguarã, pendekuaia ha'e javi rupi.

³² Sábado ára rami oiko 'rā xevy pe pepytu'u aguã ára, penenhe'ẽ py pejexavaia rupi peiko aguã. Ha'e va'e jaxy re nove araa py ka'arukue guive, ha'e ko'ê jevy ka'aru peve ma pepytu'u 'rā sábado ára pemboetea rami.

Ngaru oikoa ára oguy'i py ikuai aguã re ijayvua

³³ SENHOR aipoe'ive ju Moisés pe:

³⁴ — Ndeayvu Israel kuery pe, ha'e vy aipo're: Sete jaxya va'e re quinze araa py ma oiko 'rā SENHOR pegua ngaru oguy'i py peñ aguã regua. Sete ára re 'rā oiko.

³⁵ Jypy'ia ára ma oiko 'rā nhemboaty iky'a e'ŷ va'e. Ha'e rami vy mba'eve py napemba'eapoi 'rā.

³⁶ Sete ára re 'rā SENHOR pe peme'ẽ mba'emo peapy vy. Oito araa py ju 'rā oiko nhemboaty iky'a e'ŷ va'e, SENHOR pe peme'ẽ aguã mba'emo peapy vy. Ixupe penhemboaty aguã ára ramo mba'eve py napemba'eapoi 'rā.

³⁷ — Ha'e va'e ha'e javi ma SENHOR pegua ngaru oiko aguã ára oa'anga pyre. Ojeupity nhavõ peikuaa uka 'rā nhemboaty iky'a e'ŷ va'erã, SENHOR pe peme'ẽ aguã mba'emo peapy vy, tata py oapya va'erã, mba'emo aju guigua, mymba ojukaa va'erã, ha'e mba'emo rykue onhoëa va'erã, peteñ-teñ regua ma hi'ára py porã 'rā peme'ẽ.

³⁸ Oiko avi 'rā SENHOR pegua sábado ára, ha'e mba'emo peme'ẽ aguã ára, ha'e penhemboayvague pejapopaa regua, ha'e SENHOR pe mba'emo penhenhandua'i rami peme'ẽ aguã ha'e javi.

³⁹ — Ha'e gui sete jaxya re quinze ára py ma pendeyvy re penhoty va'ekue'a pemono'õmba ma vy sete ára re pejapo 'rā ngaru SENHOR pe. Jypy'ia ára, ha'e gui oito araa py ju 'rā oiko xevy pepytu'u aguã.

⁴⁰ Jypy'ia ára py ma Peru 'rā yvyra'a iporägueve va'e, pindo rogue, yvyra rogue porägue, ha'e salgueiro yy rembe rupi hi'aí va'e rogue guive. Ha'e rami vy sete ára re pevy'a 'rā SENHOR Penderuete renonde.

⁴¹ Ha'e rami vy pejapo 'rā ngaru SENHOR pegua, sete ára re ma'etýa nhavõ. Ha'e va'e ma ojapo uka pyre raka'e rā peve guarã, peneramymino kuery ikuai va'e peguarã. Sete jaxya ha'e pe 'rā pejapo.

⁴² Sete ára peve 'rā peñ oguy'i yvyra rogue gui pejapo va'ekue guýry. Israel kuery regua ha'e javi toñ oguy'i py,

⁴³ peneramymino kuery oikuaa aguã, mba'eta Egito yvy gui Israel kuery xee anoëmba jave ajapo karamboae oguy'i guýry ikuai aguã rami. Xee ma SENHOR Penderuete — he'i.

⁴⁴ Ha'e rami Israel kuery pe Moisés omombe'u porâve ngaru SENHOR pegua oa'angaague ára.

24

Êxodo 27.20,21

¹ Ha'e gui SENHOR aipoe'i Moisés pe:

² — Ndeayvu Israel kuery pe ogueru aguã azeite ete'i oliveira onhami mbyre guigua tataendy reguarã, ha'e rami vy hexakã riae oiny aguã ogue e'ŷ re.

³ Ha'e va'e re ma Arão opena porã 'rā oikovy oguy nhemboaty oñaty py SENHOR ayvu oñaty renonde, ajukue okẽ regua kyvõ rupi, ka'aru guive ko'ëgue peve. Ha'e va'e ma raka'e rā peve guarã ojapo uka pyre peneramymino kuery ikuai va'e peguarã.

4 SENHOR renonde tataendy 'y ouro ete'i gui ojapo pyre áry ikuai 'rã hendy va'e. Ha'e va'e re ha'e opena riae 'rã oikovy.

SENHOR pegua mesa áry mbojape oĩ va'e re ijayvua

5 — Ha'e gui trigo iporâve va'e rejou vy rejapo 'rã doze mbojape. Petei-tei ma mokoï ryru gui 'rã rejapo.*

6 Ha'e gui mesa ouro guigua va'e áry remoï 'rã mokoï ryxy rupi. Petei-tei ryxy rupi ma mboapy meme 'rã remoï SENHOR renonde.

7 Petei-tei ryxy áry rupi ma remoï 'rã heakuã porã va'e. Ha'e va'e ma mbojape ha'e javi rekovia oapy vy ome'ëa 'rã SENHOR pe.

8 Sábado nhavõ Arão omoatyrõ porã'i 'rã SENHOR renonde. Ojapo riae 'rã Israel kuery re vy, raka'e rã peve xereve guarã aeja va'ekue rami vy.

9 Ha'e va'e mbojape ma Arão ha'e ta'y kuery peguarã, henda iky'a e'ë va'e py ae ho'u okuapy aguã, mba'eta iky'a e'ë ete va'e ha'e kuery pe, SENHOR pe mba'emo oapy vy ome'ë mbyre reveguia, raka'e rã peve guarã ajapo ukaague rami vy.

SENHOR re ijayvu vai va'e opaga aguã re ijayvua

10 Ha'e gui Israel kuery mbyte petei oiko Israel regua pi'a, Egito pygua ra'y. Ha'e va'e ava Israel regua pi'a va'e ma Israel regua ae reve joe opu'ã ha'e kuery rekoia py.

11 Israel regua pi'a va'e ma ojejavu vy ijayvu vai SENHOR rery re. Ha'e ramo Moisés oia py oguerua. Ixy ma Dã regua Dibri rajy Selomite.

12 Ha'e rã ava va'e nhuã py ombotya hekorã SENHOR oikuua uka e'ë ja.

13 Ha'e rami rã SENHOR aipoe'i Moisés pe:

14 — Peipe'a ijayvu vai va'ekue pendekoa gui mombyry'i. Ha'e ramo inhakã áry henuare kuery ha'e javi tomoï opo. Ha'e gui heta va'e kuery ha'e javi 'rã ojapipa ita py.

15 — Aipo're Israel kuery pe: Mava'e rã rei Nguuete re ijayvu vai va'e ma hexe ae 'rã oĩ ojejavayague re opaga aguã.

16 SENHOR rery re ijayvu vai va'ekue ma pejuka 'rã. Peẽ kuery ha'e javi 'rã pejapi ita py. Amboae regua kuery, e'ë vy Israel regua ae tei SENHOR rery re ijayvu vai ramo ojukaa 'rã.

17 Jojuka va'e rei tema ojukaa avi 'rã.

18 Ha'e rã mymba jukaare ma amboae ju 'rã ome'ë hekivia, ha'ekue ramigua ete'i.

19 Amongue va'e rei joupe ojapo vai ri ramo joe ojapoague re pejapo avi 'rã hexe:

20 nhomopéague re pemopé avi 'rã, joexa omombuague re pemombu avi 'rã hexa, nhoaï omopéague re pemopé avi 'rã haï. Nhomingo axyague re pejapo avi 'rã hexe.*

21 Myumba jukaare ma amboae ju 'rã ome'ë hekivia. Ha'e rã ava ri ojuka ramo ma ojukaa avi 'rã.

22 Lei petei'i rami ae 'rã peiporu, amboae regua kuery ha'e Israel kuery va'e regua pe tei. Mba'eta xee ma SENHOR Penderuete — he'i.

23 Ha'e ramo Israel kuery pe Moisés aipoe'i ijayvu vai va'ekue tekaoa gui mombyry'i oipe'a vy ita py ojapipa aguã. Ha'e ramo Israel kuery ojapo okuapy Moisés pe SENHOR ojapo ukaague rami.

25

Êxodo 23.10,11

1 SENHOR aipoe'i Moisés pe Sinai yvyty re oĩ teri jave:

2 — Ndeayvu Israel kuery pe, ha'e vy aipo're: Pendeyvyrã ame'ë va'ekue py pevaë ma ramo yvy ae opytia rive jepi 'rã oupy SENHOR pe sábado ára py rami.

3 Mboapy meme ma'etý re penhotý 'rã penemba'ety rupi, mboapy meme ma'etý re avi 'rã pende'uva ty rupi pemoatyrõ hakã, ha'e vy pemono'õ 'rã hi'a.

* 24:5 Mbojape petei-tei ma dois quilos trigo gui 'rã ojapo. * 24:20 Mateus 5.38

⁴ Ha'e rã sete ma'etý re ma oiko 'rã sábado ára py rami yvy opytu'u aguã, SENHOR pe ae 'rã opyta rive sábado ára py rami. Ha'e vy napema'etýi 'rã penemba'ety rupi, neñ pende'uva ty rupi hakã napemoatyrõi 'rã guive.

⁵ Penemba'ety rupi henhoi rive va'ekue'a voi napemono'oi 'rã, neñ uva rakã pemoatyrõ e'ÿague rupi voi ndapeipo'oi 'rã. Ha'e va'e ma'etý re ma yvy opyta rive 'rã xevy.

⁶ Ha'e rami avi yvy opyta rivea ja hi'a rive va'ekue ma ha'eve 'rã pe'u aguã, peẽ, penembiguai kuery avakue ha'e kunhague, pêvy ombo'eapo va'e ha'e amboae regua pendereve ikuai va'e guive.

⁷ Penerymba kuery ha'e mymba kuery pendeyvy re ikuai va'e voi okaru avi 'rã mba'etygue ha'e javi rupi.

Ma'etý jubileu 'epy va'e re ijayvua

⁸ — Ha'e gui peipapa 'rã ma'etýa oaxa va'e, sete ma'etýa sete-kue peve 'rã peipapa. Ha'e rami vy sete ma'etýa sete-kue peipapa va'e ha'e javi vy quarenta e nove ma'etýa 'rã peipapa.

⁹ Ha'e gui sete jaxyva va'e re, dez araa py ma pemonhe'ẽ atã 'rã mimby guaxu. Jejavya ojao'ia ára py ae 'rã pemonhe'ẽ pendeyvy ha'e javi rupi onhendu aguã rami.

¹⁰ Ha'e vy cinqüenta ma'etý ma peikuua uka 'rã ma'etý iky'a e'ÿ va'ea, yvy jave rupi ikuai va'e pe peikuua uka avi 'rã opa mba'e pepoi rivepa aguã. Ha'e va'e ma'etý ma jubileu pendevy peguarã aeja va'e. Ha'e rami vy peteñ-teñ pejevypa 'rã peovy pendeyvy ae katy, ha'e peneratarã kuerya katy ae.

¹¹ Cinqüenta ma'etý ojeupity nhavõ oiko 'rã jubileu ma'etý pendevy pegua. Ha'e vy napema'etýi 'rã, neñ napemono'oi 'rã henhoi rive va'ekue gui, neñ uva rakã pemoatyrõ e'ÿague rupi voi ndapeipo'oi 'rã.

¹² Mba'eta jubileu ma'etý oiko, iky'a e'ÿ va'e pendevy. Ha'e vy penemba'ety rupi hi'a rive va'ekue 'rã pe'u.

¹³ — Jubileu ma'etý re ma peteñ-teñ pejevypa 'rã penderekaoa katy ae.

¹⁴ Xapy'a rei neirũ pe mba'emo revende, ha'e e'ÿ vy neirũ gui mba'emo rejogua ri vy ekore eme nderyke'y, e'ÿ vy nderyvy.

¹⁵ Mba'eta jubileu ma'etý oiko guive mbovy ma'etý oaxa va'ekue reipapaa rami vy 'rã neirũ gui yvy rejogua va'e repyrã peikuua. Mba'eta oyvy ndevy ha'e ovende jave jubileu ma'etý ojeupity jevy aguã remono'õ aguã mbovy ma'etý oata teria rami vy peikuua 'rã hepyrã.

¹⁶ Heta ma'etý re guarã ri vy hepyve 'rã, ha'e rã mbovy'i ma'etý re guarã ri vy ma ndaepyive 'rã, mba'eta ndevy ha'e omboepy 'rã mbovykue pa remono'õ aguã rami.

¹⁷ Ha'e nunga rupi pekore eme peneirũ kuery. Ha'e rami 'rãgue py peteñ-teñ Penderuete renonde pejererokyjea rupi pendekuai, mba'eta xee ma SENHOR Penderuete.

¹⁸ — Pendekuai xee ajapo uka va'ekue rupi, xee aipotaa rami pejapopa aguã. Ha'e rami vy 'rã pendekuai porã pendeyvy re.

¹⁹ Ha'e rami vy yvy re mba'emo hi'a porã 'rã, pe'uxea rami 'rã pe'u, pendekuai porã 'rã guive.

²⁰ Xapy'a rei aipopeje 'rã: "Mba'e tu ja'u 'rã sete ma'etýa re, nanhama'etýi neñ nhanemba'ety gui nhamono'õ e'ÿ re?" peje 'rã xevy.

²¹ Ha'e ramo ma mboapy meme ma'etýa re ajou uka retave 'rã pendevy, mboapy ma'etý peve mba'emo hi'a aguã rami.

²² Ha'e gui oito ma'etýa re mae ma pema'etý jevy vy pe'u 'rã pemono'õ ypy va'ekue rive, nove ma'etýa peve. Penhotý jevy va'ekue hi'a e'ÿa ja pe'u 'rã inhymague gui.

²³ Ha'e gui pendeyvy napevendei 'rã raka'e rã peve guarã, mba'eta yvy ma xemba'e ae, ha'e rã peẽ kuery ma xevy rã kova'e yvy regua e'ÿ, amboae guigua yvy rupi oguata va'e rami rive.

²⁴ Ha'e nunga rupi yvy pendekuaia ha'e javi rupi yvy ja pe ae ju 'rã pejogua uka.

²⁵ — Xapy'a rei penderyvy e'ÿ vy penderyke'y iporiaukue'i vy oyvy ovende ramo peteñ hetarã ou 'rã hepyarã, ha'e vy ojogua jevy 'rã yvy tyvy e'ÿ vy tyke'y ovende va'ekue.

²⁶ Xapy'a rei amongue ndoguererekoi guetarā oyvy jogua jevyarā teī ha'e ae 'rā ojou hepyrā ojogua jevuā.

²⁷ Ha'e rami vy ha'e oipapa 'rā mbovy ma'etŷ re pa ojapo ma ovendeague, ha'e gui jubileu ma'etŷ ojeupity aguā oata teria rami vy ome'ē 'rā oyvy joguaare pe, ha'e gui oyvy katy ae 'rā ojevy ju.

²⁸ Ha'e rami avi yyv repyrā ndojoui ramo yyv ovende va'ekue optya 'rā ijoguaare po py ae, jubileu ma'etŷ ojeupity jevy e'ŷa ja. Ha'e gui jubileu ojeupity jevy ramo ipo gui ojopy ju 'rā oyvyrā.

²⁹ — Ha'e gui xapy'a rei tetā ikorapa va'e py amongue ngoo oguereko va'e ovende teī ovendeague ára guive peteī ma'etŷ ndoaxai teria ja ha'eve ojogua jevy aguā. Peteī ma'etŷ oaxa e'ŷa ja ha'eve ju 'rā ojogua aguā.

³⁰ Ha'e rami avi ojogua jevy e'ŷ re peteī ma'etŷ oaxa ma rire oo tetā ikorapa va'e py oī va'e optya ae 'rā ijoguaare po py, ha'e oiko rire hamymino kuery po py ju, raka'e rā guarā. Jubileu ma'etŷ ojeupity teī ijoguaare nome'ēvei 'rā ivendeare pe.

³¹ Ha'e rā oo tekota'i ikora e'ŷ va'e py oī va'e ma yyv hovai rupi oī va'e rami 'rā omboepya. Ha'e nunga ma ha'eve riae 'rā ojogua jevy aguā, ha'e vy jubileu ma'etŷ ojeupity jave py ijoguaare ome'ē ju 'rā ivendeare pe.

³² Ha'e rā levita kuery retā rupi ma ngoo ovende rire teī raka'e rā peve guarā ha'eve ojogua ju aguā.

³³ Xapy'a rei levita ngoo guetā py ovende va'ekue ndojogua jevyi teī ijoguaare ome'ē nho 'rā jubileu ma'etŷ ojeupity jevy ramo. Mba'eta levita kuery retā py hoo ikuai va'e ma imba'e ae 'rā oī Israel kuery mbyte rupi.

³⁴ Ha'e rā ha'e kuery retā yvýry yyv itui va'e ma novendei 'rā, mba'eta imba'e ae 'rā itui raka'e rā peve guarā.

Deuteronômio 15.7-11

³⁵ — Xapy'a rei nderyvy e'ŷ vy nderyke'y iporiau vy ikangypa ramo pemongaru 'rā. Amboae regua pendeyvy rupi ikuai va'e reipytyvōa rami rereko avi 'rā ndereve.

³⁶ Ixupe peráta reiporukaa áryve emboekovia uka retave eme. Ha'e rami 'rāgue py Nderuete renonde rejelerokyjea rupi eiko, ndereve nderyvy kuery, nderyke'y kuery ikuai porā aguā rami.

³⁷ Ha'e kuery pe peráta ndereiporukai 'rā remboekovia uka retave aguā rive, neī tembi'u voi nerevendei 'rā ha'e kuery pe hepyve re.

³⁸ Xee ma SENHOR Penderuete. Egito yyv gui roquerupa Canaā yyv ame'ē, ha'e Penderuete aiko aguā.

Escravo kuery regua lei oīa

³⁹ — Ha'e gui nderyvy e'ŷ vy nderyke'y ndereve oikoa py iporiau vy nerembiguairā onhevende teī ereko eme escravo rami.

⁴⁰ Ndea py oiko 'rā om̄ba'epo va'e e'ŷ vy amboae regua rami. Jubileu ma'etŷ ojeupity jevy peve'i 'rā om̄ba'epo ndevy.

⁴¹ Ha'e gui ma ndero gui ojepe'a vy gua'y kuery reve oje'oipa jevy 'rā nguu kuery rekoague katy.

⁴² Mba'eta peē kuery ma Egito yyv gui xevygua escravo rami ae arupa va'ekue. Ha'e nunga rupi napenevendeai ju 'rā amboae pegua escravo-rā.

⁴³ Ha'e nunga rupi ejoguereko poyi eme. Ha'e rami 'rāgue py Nderuete renonde eiko rejelerokyjea rupi.

⁴⁴ Xapy'a rei ndevygua escravo-rā ava e'ŷ vy kunha ma pendeyvy yvýry rupigua anho 'rā pejogua. Ha'e gui ae 'rā pejou escravo-rā.

⁴⁵ Ha'eve avi mombyry guigua penembyte ikuai va'e ra'y kuery pejogua aguā, pendeyvy re ta'y kuery oguereko va'e guive. Ha'e kuery anho ha'eve escravo pereko aguā.

⁴⁶ Ha'e va'e kuery ma peja 'rā pendera'y kuery peguarā, pendera'y kuery ju oguereko aguā. Pendera'y kuery pe om̄ba'epo 'rā raka'e rā peve. Ha'e rā penderyvy kuery,

penderyke'y kuery Israel kuery ae ikuai ramo perekoy rei eme, peteñ-teñ penhem-bouvixave eme joe gui.

⁴⁷ — Ha'e gui xapy'a rei amboae regua pendea rupi ikuai va'e oguerekopa 'rã mba'emo, ha'e penderyke'y e'ý vy penderyvy iporiau vy onhevende 'rã amboae regua penembyte oiko va'e pegua escravo-rã, ha'e rami e'ý vy ta'y kuery pe.

⁴⁸ Ha'e va'e regua onhevende ma teñ ha'eve nho 'rã ojoguaa ju aguã. Tyvy kuery, tyke'y kuery va'e regua ha'eve 'rã ojogua ju aguã.

⁴⁹ Ituty kuery, tyvy kuery voi ha'eve 'rã ojogua aguã, e'ý vy hetarã va'e rei ojogua 'rã. Ha'e e'ý ramo ma ha'e ae mba'emo ojoupa ri vy ojejogua 'rã.

⁵⁰ Ha'e gui ma ijoguaare reve oikuaa pota 'rã mbovy repy re pa onhevendeague ma'etÿ guive jubileu ma'etÿ ojeupity jevy peve. Ha'e va'e ma'etÿa mbovy paa rami vy oikuaa 'rã hepyrã, omba'epo va'e pe pemboekoviaa rami vy.

⁵¹ Xapy'a rei jubileu ojeupity peve ma'etÿa oata reta teri ramo ma ojejogua ju aguã ome'ẽ reta 'rã.

⁵² Ha'e rami avi jubileu ojeupity peve ma'etÿa ndoata retai ri ramo ma hexeve oikuaa pota vy ojejogua ju aguã nome'ẽ retaive 'rã.

⁵³ Ha'e rami vy ma'etÿ nhavõ ixupe omba'epo 'rã omba'epo va'e rami ae. Ha'e rami avi reikuua pota 'rã ija oguerekoy rei ojogua ju aguã.

⁵⁴ Xapy'a rei avave rei ndojoguaa jevyi ri ramo jubileu ma'etÿ py ae 'rã oo jepe, ta'y kuery voi oje'o'i 'rã hexeve.

⁵⁵ Mba'eta Israel kuery ma xevygua escravo rami ae ikuai. Xevygua kuery areko va'e ma ha'e kuery ae, Egito yvy gui aipe'apa va'ekue. Xee ma SENHOR Penderuete.

26

Nguuete ra'angaa omboete e'ý aguã re ijayvua

¹ — Ndapejapo'i 'rã penderuete ra'angaarã rive, neñ napemopu'ãi 'rã mba'emo ra'angaa neñ ita. Nda'evei avi pendeyvy re ita oĩ va'e gui ta'angaarã pejapo aguã, ha'e nunga pe pejero'a e'ý aguã. Mba'eta xee ae ma SENHOR Penderuete.

² Pemboete 'rã xevygua sábado ára, pemboete avi 'rã xevygua henda iky'a e'ý va'e. Xee ma SENHOR.

Deuteronômio 7.12-24; 28.1-14

³ — Xapy'a rei xeayvua rupi pendekuai, ha'e ajapo uka va'e ha'e javi pejapo ramo

⁴ pendevy xee ambou 'rã oky hi'ára py porã. Ha'e rã yvy gui oiko 'rã mba'emo'a, ha'e yvyra pendeyvy rupi ikuai va'e voi hi'a 'rã.

⁵ Ha'e rami rã mba'emo ra'yigue pejyky 'rã uva peipo'oa ára peve, ha'e uva peipo'o 'rã mba'emo ra'yí pemono'õ jevya ára peve. Pejou 'rã tembi'u oata aguã rami e'ý, ha'e pendekuai porã 'rã pendeyvy re.

⁶ Ajapo 'rã pendeyvy re pendekuai porã aguã rami. Penheno rã nda'ipoi 'rã penemondiyarã. Pendeyvy gui amomba 'rã mymba penemoangeko reiarã ikuai va'ekue, ha'e pendeyvy rupi ndoaxavei ma 'rã kyxe rewegua.

⁷ Peakykue monhamba 'rã penderovaigua kuery. Penerenonde ha'e kuery ho'apa 'rã pendekyxe gui.

⁸ Peñ kuery va'e regua peteñ nhiru'i teñ pemomba 'rã cem, ha'e peñ kuery va'e regua cem pemomba 'rã dez mil. Ha'e rã penerenonde penderovaigua kuery ho'apa 'rã pendekyxe gui.

⁹ Pendere ama'ẽ vy ajapo 'rã pendera'y reta aguã rami, romboetave 'rã. Ha'e vy xereve guarã aeja va'ekue amoñ atâve 'rã.

¹⁰ Pe'u tema 'rã pemono'õ va'ekue ymague gui, ha'e inhymague penoëmba vy 'rãe pejou mba'emo ra'yigue pyau pemoñ porã aguã.

¹¹ Penembyte amoñ 'rã xembojerovia atyrã, ha'e gui xenhe'ẽ py ndoroipota e'ývei ma 'rã.

¹² Penembyte rupi aiko vy Penderuete ae 'rã aiko, ha'e rã peñ kuery ma xevygua kuery pendekuai 'rã.*

* 26:12 2 Coríntios 6.16

¹³ Xee ma SENHOR Penderuete. Egito yvy gui roquerupa va'ekue ha'e kuery pegua escravo pendekuai ve'ŷ aguã. Hi'y pendeaju'y rupi omoĩ va'ekue amopẽ vy ajapo pende'yvi porã reve peiko aguã rami.

Deuteronômio 28,15-68

¹⁴ — Ha'e rami teĩ xapy'a rei naxenhe'ẽ rendui, ha'e ajapo uka va'e ha'e javi ndapejapoi ramo,

¹⁵ xeayvuague pemboykepa rive ri ramo, ha'e pendepy'a re aipotaa ha'e javi napendu potai ajapo uka va'e ndapejapoxei vy, ha'e xereve guarã aeja va'ekue rupi e'ŷ pendekuai ramo,

¹⁶ ha'e ramo xee ambou 'rã pova'e nunga: Pende'áry ambou 'rã penemongyjearã, mba'eaxy ha'e pire raku vaikue. Ha'e nunga ojapo 'rã penderexa hendy reia oguepa aguã rami, ha'e pendekovea opa ovy aguã rami. Mba'emo ra'yí penhotõ rive 'rã, mba'eta penderovaigua kuery ou vy ho'upa 'rã.

¹⁷ Penderovaigua xee voi aiko ramo penderovaigua kuery pendejuka 'rã. Pendere ija'e e'ŷ va'e kuery onhembouvixa rei 'rã pende'áry, ha'e mava'eve penemonhaa e'ŷ teĩ penhamba rive 'rã.

¹⁸ Xeayvuague napendu potai teri ri ramo pejejavyague re rombojexavaive ju 'rã sete-kue peve.

¹⁹ Ha'e rami vy amomba 'rã penembaraetea penhemboyvate rei ve'ŷ aguã. Ha'e vy yva pende'áry rupi oĩ va'e amboty 'rã ferro guigua rami, pendeyvy overa va'e rami hatãmba aguã.

²⁰ Rive ete 'rã penhea'ã pemba'eapoa rupi. Mba'eta pendeyvy gui ndoikovei ma 'rã pemono'õ va'erã, yvyra yvy re ikuai va'e voi ndai'avei 'rã.

²¹ — Xapy'a rei xerovai tema pendekuai, ha'e xeayvua napendu potai ae ramo pende'áry ambouve 'rã penemoingo axyara sete-kue peve ju, pejejavyve temaa re.

²² Ha'e rami vy penembyte ambou 'rã ka'aguy rupigua inharõ va'e. Ha'e va'e kuery omomba 'rã pendera'y kuery ha'e penerymba kuery, ojapo 'rã mbovy'i ete pekuave aguã rami, tape peguataaty rupi avave rei ndoaxaavei peve.

²³ — Ha'e ramigua oiko teĩ ndapeikuua potai vy xeayvu napendu potai xevy pe ju pendekuai aguã, ha'e xerovai tema peiko ramo ma

²⁴ xee voi aiko 'rã penderovai. Ha'e rami vy pejejavyvea re xee ae rojukapa 'rã sete-kue teri pendekuai axy aguã.

²⁵ Pende'áry ambou 'rã kyxe rewegua penemombaarã, xereve guarã aeja va'ekue rovai pendekuai ramo. Ha'e ramo peneretã rupi pendeatypa teĩ penembyte ambou 'rã mba'eaxy vaikue, ha'e romboaxa 'rã penderovaigua kuery po py.

²⁶ Pe'u 'rã va'ekue aipe'a ramo dez kunhague pete'i tatakua pyve 'rã ombojy mbojape, ha'e gui opejapa va'ekue anho 'rã omboja'o-ja'o pendevy. Pe'u teĩ napenhandui 'rã.

²⁷ — Ha'e rami ete oiko teĩ napendu potai vy xerovai ae tema peiko ramo

²⁸ xee voi xepoxya aendu vy aiko 'rã penderovai. Ha'e rami vy pejejavyvea re rombojexavaive 'rã sete-kue peve ju.

²⁹ Ha'e ramo pe'u 'rã pendera'y ha'e penderajy kuery ro'okue ae.

³⁰ Aity ukapa 'rã pembojerovia atyrã yvy'ã rupi pejapo va'ekue, ambovaipa 'rã kuaray ra'angaa pejapo va'ekue, ha'e penere'õgue amombo 'rã penderuete ramigua ivaipa va'ekue áry. Ha'e vy xepy'a py aendu 'rã noromboaxyveia anho.

³¹ Ambovaipa 'rã peneretã ikuai va'e teko a'e ũya opyta aguã rami, amomba 'rã pembojeroviaaty, naetûvei ma 'rã heakuã porã va'e ajou porã aguã peapy teĩ.

³² Ambotyguepa avi 'rã pendeyvy. Ha'e nunga gui penderovaigua kuery onhemondyipa 'rã onhemboekoa okuapy vy.

³³ Romoaïmba 'rã yvy regua kuery mbyte rupi, ha'e aekyi uka 'rã kyxe penderakykue rupi. Pendeyvy va'ekue itygue 'rã, ha'e peneretã va'ekue ma tekoague meme 'rã opyta.

³⁴ — Ha'e ramo 'rãe pendeyvy opytu'upa sâbado ára py ramo, jipoaveia ja. Ha'e rã peẽ kuery ma penderovaigua kuery yvy re rive 'rã pendekuai. Ha'e va'e jave ma pendeyvy ikane'õgua 'rã, sâbado ára py opytu'upaa ramo.

³⁵ Jipoaveia ja pendeyvy ikane'õguua 'rã, mba'eta yvy re pendekuai jave pendeyvy ndopytu'ui rire sábado ára py rami.

³⁶ Ha'e gui pekuave va'e kuraxõ re amoõ 'rã mby'a guaxu ve'ý penderovaigua kuery yvy re pendekuaia py. Ha'e rami vy penhamba 'rã mba'emo rogue pirukue ovava nhendu'i va'e gui rive. Kyxe rewegua ou va'e gui rami 'rã penhamba, pe'apa rive 'rã guive mava'eve penemonha ramo e'ý.

³⁷ Pe'apa 'rã jo'a-jo'a kyxe gui ho'a va'e rami, mava'eve penemonha ramo e'ý. Napepu'ã kuaavei 'rã penderovaigua kuery renonde.

³⁸ Pemanomba 'rã yvy regua kuery mbyte, ha'e penderovaigua kuery yvy re peneru'ũmba 'rã.

³⁹ Pende kuery va'e regua okuave'i va'ekue okanhymba 'rã oje'oivy penderovaigua kuery yvy re, peẽ ha'e peneramoĩ kuery reko vaiague káuxa pekanhymba 'rã ha'e kuery rami avi.

⁴⁰ — Ha'e rami avi xapy'a rei ha'e kuery ojejavyague omombe'upa 'rã, ha'e tamoĩ kuery xerovai ikuiaia rupi ojejavyague. Mba'eta tamoĩ kuery voi xerovai ikuiaia onhemombe'upa raka'e,

⁴¹ ha'e kuery rovai xee aiko vy hovaigua kuery yvy re amboaxapa rire. Ha'e gui xapy'a rei pende kuery regua voi inhakã ratã va'e teĩ onhemo'yvy'i vy ojejavyague repy pe "Ha'evea ramigua" he'i ramo,

⁴² ha'e ramo xee xema'endu'a ju 'rã xereve guarã Jacó reve ajapo va'ekue, Isaque ha'e Abraão reve ma voi ajapo va'ekue re. Ha'e kuery yvy re avi xema'endu'a 'rã.

⁴³ Ha'e rami avi ijyvy jipoaveia ha'e kuery oeja va'ekue optyu'u 'rã sábado ára py rami. Ha'e rami jave ha'e kuery ojejavyague re ambopagaa pe "Ha'evea ramigua" he'i 'rã, xee aipota va'e ha'e kuery nombovarei, ha'e ajapo uka va'ekue ojou vai rire.

⁴⁴ Ha'e rami rã hovaigua kuery yvy re ha'e kuery ikuai jave ndaxerexarai 'rã ha'e kuery gui, naenduvei 'rã guive ha'e kuery ndaipotavei vy amomba aguã, neĩ xereve guarã ha'e kuery reve ajapo va'ekue amboavaipa aguã, mba'eta xee ma SENHOR ha'e kuery Ruete.

⁴⁵ Ha'e rami 'rãgue py ha'e kuery amboaxy vy xema'endu'a ma voi 'rã tamoĩ kuery pe xereve guarã ajapo va'ekue re, mba'eta Egito yvy gui aipe'a va'ekue yvy regua kuery oexaa py, ha'e kuery Ruete aiko aguã. Xee ma SENHOR — he'i.

⁴⁶ Ha'e va'e ae SENHOR ojapo uka, oipota va'e ha'e lei Israel kuery pe oeja va'ekue hexeve ikuai aguã. Sinai yvyty áry ome'ẽ va'ekue Moisés po rupi.

27

Mba'emo ome'ẽa aguã re, ha'e hepyrã oikuaa aguã re ijayvua

¹ SENHOR aipoe'ive Moisés pe:

² — Ndeayvu Israel kuery pe, ha'e vy aipo're: Amongue onhemboayvu 'rã xevy guarã nhomboaxa aguã re. Ha'e rami rire omboaxa pyre SENHOR pegua ae 'rã oiko, teĩ ha'eve avi nhomboaxa ete 'rãgue py omboekovia aguã hepyrã reikuua va'e re.*

³ Peteĩ ava vinte ma'etõ'va'e guive sessenta ma'etõ'va'e peve ri ramo ma hepyrã reikuua 'rã cinqüenta hatã'i va'e prata guigua, henda iky'a e'ý va'e py oiporua va'e rami.

⁴ Ha'e rã kunha ri ramo ma trinta hatã'i va'e reikuua 'rã hepyrã.

⁵ Ha'e rã amongue cinco ma'etõ'va'e guive vinte ma'etõ'va'e peve, ava ri ramo hepyrã reikuua 'rã vinte hatã'i va'e, ha'e rã kunha repyrã ramo dez 'rã reikuua.

⁶ Ha'e rã peteĩ jaxy'i va'e guive cinco ma'etõ'va'e peve, ava ri ramo hepyrã reikuua 'rã cinco hatã'i va'e prata guigua, ha'e rã kunha repyrã ma três ete'i 'rã.

⁷ Ha'e rã avakue sessenta ma'etõ'va'e guive tujakueve peve ramo ma quinze hatã'i va'e reikuua 'rã hepyrã. Ha'e rã kunha ma dez 'rã hepyrã.

* 27:2 Samuel xy Ana onhemboayvu ipi'a oiko'i rire SENHOR peguarã omboaxa aguã re (1 Samuel 1.9-11). Ha'e guipy aipoe'i ha'eve avi amongue nhomboaxa ete 'rãgue py peráta re omboekovia aguã.

⁸ Ha'e rami teĩ xapy'a rei nhomboaxa aguã re onhemboayvu va'e iporiaukue'i vy ndojou i'rã joepyrã reikuaa va'ekue. Ha'e rami vy ojexa uka 'rã sacerdote pe, ha'e va'e ju joepyrã oikuaa aguã. Ha'e ramo hepyrã sacerdote oikuaa 'rã ojoua'i rami vy.

⁹ — Xapy'a rei penhemboayvu 'rã mymba SENHOR pe pemboaxa aguã re. Peme'ẽ va'ekue ma SENHOR pe iky'a e'ŷ va'e meme.

¹⁰ Ha'e nungakue ndaperovai 'rã, neĩ iporã va'e napemboekoviai 'rã ivaikue va'e re, neĩ ivaikue va'e iporã va'e re. Xapy'a rei peteĩ mymba amboae re pemboekovia ramo mokoïve 'rã opyta iky'a e'ŷ va'e.

¹¹ Xapy'a rei mymba ha'eve'ŷ va'e SENHOR pe ome'ẽ mbyrã va'ekue'ŷ regua ri Peru vy pexa uka 'rã sacerdote pe.

¹² Sacerdote ae oikuaa 'rã iporã pa, tyrã ivaikue rei va'ea. Sacerdote oikuaa rami ae 'rã hepy.

¹³ Ha'e gui xapy'a rei pendejeupe guarã ju pejoguaxe vy hepyrã oikuaa pyre áryve 'rã peme'ẽve, peteĩ nhiruĩ repy oikuaa nhavõ áry peteĩ-teĩ ju 'rã peme'ẽve.

¹⁴ — Ha'e gui amongue ngoo SENHOR pe omboaxa aguã re onhemboayvu 'rã iky'a e'ŷ va'erã. Ha'e ramo sacerdote oexa pota 'rã iporã paa, tyrã ivaikue rei va'ea. Sacerdote oikuaa rami ae 'rã hepy.

¹⁵ Ha'e rã SENHOR pe ngoo omboaxa va'ekue omboekovia jevyxe ri vy hepyrã oikuaa pyre áryve 'rã ome'ẽve, peteĩ nhiruĩ repy oikuaa nhavõ áry peteĩ-teĩ ju 'rã ome'ẽve. Ha'e ramo mae ma imba'e ju 'rã opyta.

Oyvy ome'ẽ aguã re oura rire ojogua jevy va'e regua

¹⁶ — Xapy'a rei amongue pe peteĩ mba'ety oeja 'rã imba'erã, ha'e ramo onhemboayvu 'rã SENHOR peguarã ju omboaxa aguã re. Ha'e gui hepyrã reikuaa 'rã mba'emo ra'yigue ha'e va'e rupi onhotõ aguã ha'eve va'e. Cevada ra'yigue mba'e peteĩ ryru renyẽ repyra ma cinquenta hatã'i va'e prata guigua 'rã reikuaa.

¹⁷ Xapy'a rei jubileu ma'etõ py ri ombo'ety omboaxa aguã re onhemboayvu ramo hepyrã ha'e javi porã'i 'rã reikuaa.

¹⁸ Ha'e rami avi jubileu ma'etõ oiko rire ri ombo'ety omboaxa ramo sacerdote hepyrã oikuaa 'rã jubileu ojeupity jevy peve mbovy ma'etõ pa oataa rami vy. Ha'e va'e rami vy hepyrã reikuaa vy neremboetaive 'rã.

¹⁹ Xapy'a rei ombo'ety ome'ẽ rire ojogua jevyxe ri vy peráta ome'ẽve 'rã hepyrã reikuaa va'ekue áryve, peteĩ nhiruĩ repy oikuaa nhavõ áry peteĩ-teĩ ju 'rã ome'ẽve. Ha'e vy mae imba'e ju 'rã itui.

²⁰ Xapy'a rei ombo'etykue ndojogua jevyxei, neĩ amboae ava pe novendexei rire ma nda'evei 'rã omboekovia ju aguã.

²¹ Ha'e rami avi jubileu ma'etõ py ri ha'e va'e mba'ety omboekovia ramo SENHOR pegua iky'a e'ŷ va'e 'rã itui, mba'ety ixupe omboaxa pyre rami ae. Sacerdote peguarã 'rã itui.

²² — Xapy'a rei amongue ombo'etyrã ojogua va'ekue omboaxa 'rã SENHOR peguarã, imba'erã oeja pyre regua e'ŷ.

²³ Ha'e ramo hepyrã sacerdote oikuaa 'rã jubileu ma'etõ ojeupity peve oataa rami vy. Ha'e va'e árave hepyrã oikuaa va'ekue ome'ẽ 'rã SENHOR pe iky'a e'ŷ va'e opyta aguã.

²⁴ Ha'e gui jubileu ojeupity jevy jave ha'e va'e mba'ety ivendeare mba'erã ju 'rã itui, imba'erã ae oeja rire.

²⁵ Peteĩ-teĩ mba'e repyra reikuaa 'rã hatã'i va'e henda iky'a e'ŷ va'e py oiporua va'e rami. Peteĩ-teĩ hatã'i va'e ma doze gramas va'e.

²⁶ — Ha'e rã jypy'igua mymba ra'y oiko va'e SENHOR peguarã ae ma oiko ramo nda'evei avave rei omboaxa jevy aguã. Jypy'igua vaka ra'y, e'ŷ vy mymba kyrĩ-kyrĩ'i va'e oiko teĩ SENHOR pegua ae meme.

²⁷ Ha'e rami avi mymba ha'eve'ŷ va'e regua ramo ma ha'eve 'rã omboekovia ju aguã, hepyrã reikuaa va'ekue rami vy, ha'e hi'áryve ome'ẽve avi 'rã, peteĩ nhiruĩ repy reikuaa nhavõ áry peteĩ-teĩ ju 'rã ome'ẽve. Xapy'a rei nomboekovia jevyi ri ramo ovendea 'rã hepyrã reikuaa va'ekue re.

Mba'emo iky'a e'ŷ va'e ae omboekovia jevy e'ŷ aguã re ijayvua

²⁸ — Ha'e rami avi SENHOR pe amongue omboaxa 'rã mba'emo oguereko va'e raka'e rã peve guarã, ava mba'e, e'ŷ vy mymba, ha'e'ŷ vy imba'etyrã oeja pyre teĩ. Ha'e nunga ma nda'evei pevende, neĩ pemboekovia ju aguã. Ha'e nunga ha'e javi SENHOR pe pemboaxa ae ma rire iky'a e'ŷ ete va'e optya.

²⁹ Avakue va'e regua teĩ SENHOR peguarã omboaxaa ae ma rire nda'evei omboekovia ju aguã. Ojukaa 'rãe.

Dízimo re ijayvua

³⁰ — Ha'e gui dízimo voi yvy gui mba'emo'a oiko va'ekue regua, mba'ety gui mba'emo ra'yí va'e regua, e'ŷ vy yvyra'a teĩ SENHOR mba'e meme, SENHOR pegua iky'a e'ŷ va'e.

³¹ Xapy'a rei amongue dízimo ome'ẽ va'ekue regua ri omboekoviaxe vy ome'ẽve 'rã hepyrã va'ekue áryve, peteĩ nhiruĩ repy ovare nhavõ áry peteĩ-teĩ ju 'rã ome'ẽve.

³² Ha'e rã dízimo vaka ra'y regua, mymba kyrigueve'i, ha'e mymba re opena va'e kuery oipapa vy yvyra guy rupi omboaxa va'e ha'e javi regua dízimo ome'ẽ ma rire ma SENHOR pegua iky'a e'ŷ va'e ae optya.

³³ Ija ndoikuaa potai 'rã iporã va'e pa, e'ŷ vy iporã e'ŷ va'ea re, neĩ nda'evei omboekovia aguã. Omboekovia ri ramo mokoïve 'rã optya iky'a e'ŷ va'e. Nda'evei avi 'rã ojeupe guarã ju ojogua aguã — he'i.

³⁴ Kova'e ayvu ha'e javi Moisés pe SENHOR oeja va'ekue Israel kuery peguarã, Sinai yvyty áry.

Números irundaya kuaxia Moisés ombopara va'ekue

Números irundaya kuaxia Moisés ombopara va'ekue

Kova'e kuaxia ma Números 'epy va'e, mba'eta omombe'u mokoīgue Moisés heta va'e kuery oipapaague. Jypy ma Egito yvy gui Israel kuery oēmba rire Sinai yvyty py ikuai jave py oipapa (capítulo 1). Ha'e gui amboae ma quarenta ma'etŷ rire Canaã yvy re oopa ta jave py ju oipapa (capítulo 26). Ha'e gui kova'e kuaxia para re oī quarenta ma'etŷ re Israel kuery teko e'ŷa rupi ikuai jave guare.

Ha'e va'e jave ma Israel kuery nonhe'ẽ rendui jepi okuapy Nhanderuete, neĩ hemimbo'e Moisés voi. Amongue py na'ikyre'ŷvei, okyje rei ha'e ijayvu rei okuapy Moisés ha'e Nhanderuete rovai. Ha'e rami teĩ Nhanderuete omboaxya rupi opena porā, ojejavyague operdoa kuerei guive. Moisés ma imbaraete oikovy va'eri ha'e voi peteīgue nonhe'ẽ rendu porāi, mba'eta Meribá teko py ivai vy nomboetei Nhanderuete heta va'e kuery oendua py. "Ha'e ramo Senhor aipoe'i Moisés ha'e Arão pe: 'Peẽ kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ŷ va'ea. Ha'e nunga rupi peẽ ma naperovaẽvei ma 'rã kova'e kuery ijyvyrã ame'ēague py', he'i" (20.12).

Ha'e gui ma Israel kuery rovaigua kuery ogueru peteī ava Balão ha'e kuery re ijayvu vai aguã. Ha'e rami teĩ Nhanderuete ojoko vy ojeupeguia kuery rovai nomombe'u ukai ayvu vai. Ha'e rami 'rāgue py Balão aipoe'i: "Jacó kuery rovai rupi mba'evykyia nda'eve ranhei 'rã, Israel kuery rovai mba'ekuaa ndovarei 'rã", he'i (23.23a). Ha'e ramia py Nhanderuete oepy kuerei 'rã ojeupeguia kuery.

Moisés pe Israel kuery rery rupi Nhanderuete oipapa ukapaague

¹ Egito yvy gui Israel kuery oje'oipa rire mokoī ma'etŷa re, mokoī jaxyia, jypy araa py ma SENHOR ijayvu Moisés pe, Sinai yvyty katy'i teko e'ŷa oī va'e py. Oguy nhemboaty oīty oī va'e py aipoe'i:

² — Pemboparapa ke Israel kuery rery ha'e javi, peteī-teĩ ta'y va'e, ha'e tamoi kuery ro pygua ikuia rami vy. Avakue ha'e javi 'rã peipapa peteī-teĩ rery rupi.

³ Vinte ma'etŷ oguereco va'e guive 'rã peipapa tujakue peve, Israel regua joe opu'ã aguã ikuai kuaa va'e meme, ha'e va'e kuery ae ndee ha'e Arão reve peipapa 'rã xondaro kueryrã peteī-teĩ regua gui.

⁴ Peteī-teĩ regua ikuai va'e gui oiko avi 'rã peteī ava penepytyvōarã, nguu ro pygua kuery ruvixa ae.

⁵ Po rami ma avakue penepytyvōa rery: Rúben ramymino kuery ruvixa ma Sedeur ra'y Elizur;

⁶ Simeão ramymino kuery ruvixa ma Zurisadai ra'y Selumiel;

⁷ Judá ramymino kuery ruvixa ma Aminadabe ra'y Naassom;

⁸ Issacar ramymino kuery ruvixa ma Zuar ra'y Natanael;

⁹ Zebulom ramymino kuery ruvixa ma Helom ra'y Eliabe;

¹⁰ Ha'e gui José ra'y kuery ramymino kuery, Efraim ramymino kuery ruvixa ma Amiúde ra'y Elisama, ha'e rã Manassés ramymino kuery ruvixa ma Pedazur ra'y Gamaliel;

¹¹ Benjamim ramymino kuery ruvixa ma Gideoni ra'y Abidã;

¹² Dã ramymino kuery ruvixa ma Amisadai ra'y Aiezer;

¹³ Aser ramymino kuery ruvixa ma Ocrã ra'y Pagiel;

¹⁴ Gade ramymino kuery ruvixa ma Deuel ra'y Eliasafe;

¹⁵ Naftali ramymino kuery ruvixa ma Enã ra'y Aira.

¹⁶ Ha'e va'e kuery ma heta va'e kuery mbyte gui oiporavo pyre, tamoi kuery ramymino kuery yvateve va'e, Israel kuery mbovy rei e'ŷ ikuai va'e ruvixarã.

¹⁷ Ha'e ramo ha'e va'e avakue hery rupi oiporavoa ramo Moisés ha'e Arão ogueraa.

¹⁸ Ha'e vy mokoī jaxyā jypy'ia ára py heta va'e kuery omboatypa ramo ha'e kuery omombe'u porāve okuapy peteī-teī regua ramoī kuery rery, tuu ha'e ta'y kuery. Hery rupi oipapa vinte ma'etŷ oguereko va'e guive tujakue peve.

¹⁹ Moisés pe SENHOR ojapo ukaague rami vy oipapapa Sinai yvyty katy'i tekao e'ŷa oĩ va'e py.*

²⁰ Israel ra'y jypykue Rúben ramymino kuery, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

²¹ Ha'e vy Rúben ramymino kuery oipapa rã quarenta e seis mil e quinhentos ha'e javi vy.

²² Ha'e gui Simeão ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

²³ Ha'e vy Simeão ramymino kuery oipapa rã cinqüenta e nove mil e trezentos ha'e javi vy.

²⁴ Ha'e gui ma Gade ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

²⁵ Ha'e vy Gade ramymino kuery oipapa rã quarenta e cinco mil seiscentos e cinqüenta ha'e javi vy.

²⁶ Ha'e gui Judá ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

²⁷ Ha'e vy Judá ramymino kuery oipapa rã setenta e quatro mil e seiscentos ha'e javi vy.

²⁸ Ha'e gui Issacar ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

²⁹ Ha'e vy Issacar ramymino kuery oipapa rã cinqüenta e quatro mil e quatrocentos ha'e javi vy.

³⁰ Ha'e gui Zebulom ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

³¹ Ha'e vy Zebulom ramymino kuery oipapa rã cinqüenta e sete mil e quatrocentos ha'e javi vy.

³² Ha'e gui José ra'y kuery ju, Efraim ramymino kuery ranhe, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

³³ Ha'e vy Efraim ramymino kuery oipapa rã quarenta mil e quinhentos ha'e javi vy.

³⁴ Manassés ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

³⁵ Ha'e vy Manassés ramymino kuery oipapa rã trinta e dois mil e duzentos ha'e javi vy.

³⁶ Ha'e gui Benjamim ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

³⁷ Ha'e vy Benjamim ramymino kuery oipapa rã trinta e cinco mil e quattrocentos ha'e javi vy.

³⁸ Ha'e gui Dã ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

³⁹ Ha'e vy Dã ramymino kuery oipapa rã sessenta e dois mil e setecentos ha'e javi vy.

* ^{1:19} Sinai yvyty áry SENHOR lei oeja raka'e (Êxodo 19.1-6).

⁴⁰ Ha'e gui Aser ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

⁴¹ Ha'e vy Aser ramymino kuery oipapa rā quarenta e um mil e quinhentos ha'e javi vy.

⁴² Ha'e gui Naftali ramymino kuery ju, peteī-teī hoo pygua kuery ikuiaia rami, tuu ha'e ta'y kuery, hery rupi meme oipapa. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

⁴³ Ha'e vy Naftali ramymino kuery oipapa rā cinqüenta e três mil e quatrocentos ha'e javi vy.

⁴⁴ Ha'e va'e kuery ma Moisés ha'e Arão oipapa va'ekue. Israel kuery yvatekueve ikuai va'e ma doze avakue, peteī-teī tamoī kuery ro pygua kuery ruvixa oiko.

⁴⁵ Ha'e rami vy Israel kuery ha'e javi oipapaa peteī-teī hoo pygua kuery ikuiaia rami. Peteī-teī ava vinte ma'etŷ oguereko va'e guive tujakue peve oipapa joe opu'ã kuaa va'e meme.

⁴⁶ Oipapa pyre ha'e javi vy ma seiscentos e três mil quinhentos e cinqüenta.

Levita kuery regua ndoipapaa iague

⁴⁷ Ha'e rā levita kuery regua ma ndoipapaaai tuu kuery regua ikuiaia rami, amboae kuery oipapaa rami e'ŷ,

⁴⁸ mba'eta Moisés pe SENHOR ijayvu ma voi vy aipoe'i va'ekue:

⁴⁹ “Levita kuery regua anho 'rā nderepapai, ha'e kuery rery ma voi neremboparai 'rā Israel kuery rery mboae ikuiaia py.

⁵⁰ Ha'e rami 'rāgue py levita kuery ma remoī 'rā ombojeroviaaty xeayvu oĩa va'e re opena va'erā, tembiporu ikuai va'e ha'e hexegua ha'e javi re. Ha'e kuery ikuai 'rā ombojeroviaaty oguerova heravy aguã rami, hexegua tembiporu ha'e javi reve. Ombojeroviaaty ropy rupi ae 'rā ha'e kuery opena okuapy, ha'e ijyvýry rupi 'rā ikuai.

⁵¹ Ha'e gui ombojeroviaaty oguerova ta jave ma levita kuery ombovaipa 'rā. Ha'e gui tekaoa mbyte py ju omopu'ã aguã ma levita kuery ae ju 'rā omoatyrō. Ha'e rā amboae regua hexe onhemboja vy omano 'rā.

⁵² Ha'e gui Israel kuery ma peteī-teī ngoorā ojapo 'rā guekoa py ae, peteī-teī regua joa py ae 'rā ikuai, ojeupeguia bandeira yvýry rupi.

⁵³ Ha'e rā levita kuery ma ngoorā ojapo 'rā okuapy ombojeroviaaty xeayvu oĩa va'e yvýry rupi ae, Israel kuery áry ou e'ŷ aguã imbopagaarā. Ha'e rami vy levita kuery ae 'rā opena okuapy ombojeroviaaty xeayvu oĩa va'e re”, he'i va'ekue.

⁵⁴ Ha'e ramo Israel kuery ojapo ha'e rami. Moisés pe SENHOR ojapo ukaague ha'e javi rupi ikuai.

2

Tekoa rupi peteī-teī regua ikuai aguã re ijayvuague

¹ SENHOR aipoe'i Moisés ha'e Arão pe:

² — Israel kuery ikuai 'rā peteī-teī regua bandeira 'y yvýry rupi ae. Peteī-teī regua bandeira re ma tamoī kuery kuaa ukaarā oĩ. Ogyu nhemboaty oĩaty oĩ va'e yvýry rupi 'rā hekoa, ha'e va'e katy peteī-teī regua oma'ẽ okuapy aguã rami.

³ Kuaray oua katy ikuai 'rā Judá regua kuery ojeupeguia bandeira 'y yvýry, peteī-teī regua joa py ae. Judá ra'y kuery ruvixarā oĩ 'rā Aminadabe ra'y Naassom.

⁴ Ha'e kuery va'e regua xondaro kuery oipapaa rā setenta e quatro mil seiscentos ha'e javi vy.

⁵ Ha'e kuery yvýry ikuai 'rā Issacar regua kuery. Ha'e va'e kuery ruvixarā oĩ 'rā Zuar ra'y Natanael.

⁶ Ha'e kuery va'e regua xondaro kuery oipapaa rā cinqüenta e quatro mil e quattrocentos ha'e javi vy.

⁷ Ha'e gui Zebulom regua kuery jevy 'rā ikuai. Ha'e va'e kuery ruvixarā oĩ 'rā Helom ra'y Eliabe.

⁸ Ha'e kuery va'e regua xondaro kuery oipapaa rā cinqüenta e sete mil e quatrocentos ha'e javi vy.

⁹ Judá regua kuery rekoa py oipapaa rā cento e oitenta e seis mil e quatrocentos ha'e javi vy, amboae regua irū kuery reve. Ha'e kuery ma tenondegua 'rā oje'oi.

¹⁰ Ha'e gui kuaray puku-a katy 'rā ikuai Rúben regua kuery ojeupegua bandeira 'y yvýry, peteī-teī regua joa py ae. Rúben ra'y kuery ruvixarā oī 'rā Sedeur ra'y Elizur.

¹¹ Ha'e kuery va'e regua xondaro kuery oipapaa rā quarenta e seis mil e quinhentos ha'e javi vy.

¹² Ha'e kuery yvýry ma ikuai 'rā Simeão regua kuery. Ha'e va'e kuery ruvixarā oī 'rā Zurisadai ra'y Selumiel.

¹³ Ha'e kuery va'e regua xondaro kuery oipapaa rā cinqüenta e nove mil e trezentos ha'e javi vy.

¹⁴ Ha'e gui ma Gade regua kuery jevy 'rā ikuai. Ha'e va'e kuery ruvixarā oī 'rā Deuel ra'y Eliasafe.

¹⁵ Ha'e kuery va'e regua xondaro kuery oipapaa rā quarenta e cinco mil seiscentos e cinqüenta ha'e javi vy.

¹⁶ Rúben regua kuery rekoa py oipapaa rā cento e cinqüenta e um mil quattrocentos e cinqüenta ha'e javi vy, amboae regua irū kuery reve. Ha'e kuery ma tenondegua rakykue 'rā oje'oi.

¹⁷ Ha'e gui mae ma oguerovaa 'rā heravy oguy nhemboaty oīaty. Levita kuery ikuai va'e amboae kuery mbyte py 'rā oje'oi. Ha'e kuery ikuia ramí ae 'rā oje'oi oguataa rupi. Peteī-teī regua oje'oi 'rā ikuai aguā py ae, ojeupegua bandeira rakykue.

¹⁸ Ha'e gui kuaray oikea katy ikuai 'rā Efraim regua kuery ojeupegua bandeira 'y yvýry, peteī-teī regua joa py ae. Efraim ra'y kuery ruvixarā oī 'rā Amiúde ra'y Elisama.

¹⁹ Ha'e kuery va'e regua xondaro kuery oipapaa rā quarenta mil e quinhentos ha'e javi vy.

²⁰ Ha'e va'e kuery yvýry ikuai 'rā Manassés regua kuery. Ha'e va'e kuery ruvixarā oī 'rā Pedazur ra'y Gamaliel.

²¹ Ha'e kuery va'e regua xondaro kuery oipapaa rā trinta e dois mil e duzentos ha'e javi vy.

²² Ha'e gui ma Benjamim regua kuery jevy 'rā ikuai. Ha'e va'e kuery ruvixarā oī 'rā Gideoni ra'y Abidā.

²³ Ha'e kuery va'e regua xondaro kuery oipapaa rā trinta e cinco mil e quattrocentos ha'e javi vy.

²⁴ Efraim regua kuery rekoa py oipapaa rā cento e oito mil e cem ha'e javi vy, amboae regua irū kuery reve. Ha'e kuery ma mboapya py 'rā oje'oi.

²⁵ Ha'e gui kuaray apu'aa katy ikuai 'rā Dā regua kuery ojeupegua bandeira 'y yvýry, peteī-teī regua joa py ae. Dā ra'y kuery ruvixarā oī 'rā Amisadai ra'y Aiezer.

²⁶ Ha'e kuery va'e regua xondaro kuery oipapaa rā sessenta e dois mil e setecentos ha'e javi vy.

²⁷ Ha'e va'e kuery yvýry ikuai 'rā Aser regua kuery. Ha'e va'e kuery ruvixarā oī 'rā Ocrā ra'y Pagiel.

²⁸ Ha'e kuery va'e regua xondaro kuery oipapaa rā quarenta e um mil e quinhentos ha'e javi vy.

²⁹ Ha'e gui ma Naftali regua kuery jevy 'rā ikuai. Ha'e va'e kuery ruvixarā oī 'rā Enā ra'y Aira.

³⁰ Ha'e kuery va'e regua xondaro kuery oipapaa rā cinqüenta e três mil e quattrocentos ha'e javi vy.

³¹ Dā regua kuery rekoa py oipapaa rā cento e cinqüenta e sete mil e seiscentos ha'e javi vy, amboae regua irū kuery reve. Ha'e kuery ma opa vyguá 'rā oje'oi, peteī-teī regua ojeupegua bandeira rakykue.

³² Ha'e va'e kuery ma Israel kuery regua oipapa pyre, tamoī kuery ikuai va'e-va'e rupi. Oipapa pyre ha'e javi vy ma seiscentos e três mil quinhentos e cinqüenta, peteī-teī regua joa py ikuiaia rami.

³³ Ha'e rā levita kuery ma ndoipapaaai Israel kuery oipapaa py, Moisés pe SENHOR ijayvuague rami vy.

³⁴ Ha'e rami ae Israel kuery ikuai. Moisés pe SENHOR ijayvuague rami ae ikuai ojeupequa bandeira 'y yvýry rupi. Ha'e rami ae avi oguata oje'oivy, peteī-teī regua nguu ro pygua kuery reve.

3

Levita kuery mbovy pa ikuai, ha'e hembiaporā re ijayvuague

¹ Ha'e gui pova'e kuery ma Arão ha'e Moisés ra'y kuery ikuai, Sinai yvyty áry Moisés pe SENHOR ijayvuave guare.

² Po rami ae Arão ra'y kuery rery: ta'y jypykue ma Nadabe, ha'e gui ma Abiú, Eleazar ha'e Itamar.

³ Po rami Arão ra'y kuery rery, sacerdote-rā omoī mbyre meme ikuai, sacerdote-rā omboaxaa rire.

⁴ Ha'e rami teī Nadabe ha'e Abiú omano raka'e SENHOR renonde py, Sinai regua tekao e'ŷa py SENHOR renonde tata ha'eve'ŷa ramigua ogueroike ramo. Ta'y e'ŷ re omano raka'e. Ha'e rā tyvy kuery Eleazar ha'e Itamar ju sacerdote ikuai nguu Arão renonde.

⁵ SENHOR aipoe'i Moisés pe:

⁶ — Emonhemboja ke Levi regua kuery sacerdote Arão renonde py ipytyvōarā.

⁷ Ha'e kuery tojapo mba'emo ixupe, ha'e heta va'e kuery oguy nhemboaty oīaty renonde rupi ikuai va'e ha'e javi re vy, ombojeroviaaty ropy rupi omba'eapoa py.

⁸ Ha'e kuery opena 'rā tembiporu oguy nhemboaty oīaty pygua ha'e javi re. Ha'e vy 'rāe ojapopa ojapo 'rā va'ekue Israel kuery re vy, ombojeroviaaty rupi omba'eapoa py.

⁹ Ha'e nunga rupi levita kuery remboaxa 'rā Arão ha'e ta'y kuery peguarā. Israel kuery regua ixupe remboaxa va'erā ha'e kuery anho.

¹⁰ Ha'e rā Arão ha'e ta'y kuery pe ndeayvu 'rā sacerdote rami anho omba'eapo aguā re. Ha'e rā amboae regua ri onhemboja vy ma omano 'rā — he'i.

¹¹ SENHOR aipoe'i Moisés pe:

¹² — Ma'ě, levita kuery ma xee aipe'a va'ekue Israel kuery mbyte gui. Israel kuery jypy'i oiko'i va'e nhavō rekoria ma levita kuery aiporavo xejeupe guarā. Ha'e rami rire levita kuery xevygua meme 'rā ikuai.

¹³ Mba'eta jypy'i oiko va'e nhavō ma xevygua ae. Egito yvy py jypy'i oiko va'ekue ajukapa ára guive ma Israel kuery va'e regua jypykue'i amboaxapa xejeupe guarā, avakue ha'e mymba kuery voi. Xevy guarā meme ikuai. Xee ma SENHOR — he'i.

¹⁴ Ha'e gui Sinai regua tekao e'ŷa py SENHOR ijayvu Moisés pe. Ha'e vy aipoe'i:

¹⁵ — Reipapa 'rā Levi ramymino kuery peteī-teī tamymino kuery rery rupi, tuu ha'e ta'y kuery reve. Avakue ha'e javi 'rā reipapa, peteī jaxy oguereko va'e guive tujapave peve — he'i.

¹⁶ Ha'e ramo SENHOR ijayvuague rami vy Moisés oipapa levita kuery, ixupe oipapa ukaague rami ae.

¹⁷ Po rami ma Levi ra'y kuery rery: Gérson, Coate ha'e Merari.

¹⁸ Ha'e gui pova'e ma Gérson ra'y kuery rery, peteī-teī ta'y kuery reve: Libni ha'e Simei.

¹⁹ Ha'e gui Coate ra'y kuery, ta'y kuery reve ma Anrão, Izar, Hebrón ha'e Uziel.

²⁰ Ha'e gui Merari ra'y kuery, ta'y kuery reve ma Mali ha'e Musi. Ha'e va'e kuery ae Levi ramymino kuery, guamoī kuery rery rupi.

²¹ Gérson ramymino kuery ma Libni ha'e Simei ra'y kuery, Gérson re tamoī va'e meme.

²² Ha'e kuery regua avakue peteī jaxy oguereko va'e guive tujapave peve ma hery rupi oipapaa rā sete mil e quinhentos ha'e javi vy.

²³ Ha'e gui Gérson ramymino kuery ma ombojeroviaaty kupe rupi 'rā ngoorā ojapo, kuaray oikea katy.

- ²⁴ Gérson ramymino kuery ruvixarā ma Lael ra'y Eliasafe ikuai 'rā.
- ²⁵ Gérson ramymino kuery opena 'rā okuapy oguy nhemboaty oīaty re, ombojeroviaaty, oo ha'e ijao'ia re, ha'e oguy nhemboaty oīaty rokērā ajukue oī va'e re,
- ²⁶ ajukue oka ombojeroviaaty ha'e altar yvýry rupi ikuai va'e re, oka rokērā ajukue oī va'e re, ha'e gui ixā ikuai va'e re. Ha'e nunga ha'e javi rupi ombo'eapo aguā rami ikuai.
- ²⁷ Ha'e gui Coate ramymino kuery ma Anrāo, Izar, Hebrōm ha'e Uziel ra'y kuery. Ha'e va'e kuery ma Coate re tamoī va'e meme.
- ²⁸ Ha'e kuery regua avakue peteī jaxy oguereko va'e guive tujapave peve ma oipapaa rā oito mil e seiscentos ha'e javi vy. Ha'e kuery ma henda iky'a e'ŷ va'e re opena aguā rami ikuai.
- ²⁹ Ha'e gui Coate ramymino kuery ma ombojeroviaaty yke katy rupi 'rā ngoorā ojapo, kuaray puku-a katy.
- ³⁰ Coate ramymino kuery ruvixarā oī 'rā Uziel ra'y Elisafā.
- ³¹ Ha'e kuery ma xeayvu ryru re opena aguā rami ikuai, mesa oī va'e, tataendy 'y, altar ha'e javi re, tembiporu henda iky'a e'ŷ va'e rupi oiporu va'ety ha'e ajukue okērā oī va'e re. Ha'e nunga ha'e javi re opena aguā rami ikuai.
- ³² Levi ramymino kuery ruvixa yvateve va'e ma sacerdote Arāo ra'y Eleazar. Ha'e va'e ma opena 'rā henda iky'a e'ŷ va'e ropy rupi ombo'eapo va'e kuery re.
- ³³ Ha'e gui Merari ramymino kuery ma Mali ha'e Musi ra'y kuery. Ha'e va'e kuery ae Merari re tamoī va'e meme.
- ³⁴ Ha'e kuery regua avakue peteī jaxy oguereko va'e guive tujapave peve ma oipapaa rā seis mil e duzentos ha'e javi vy.
- ³⁵ Ha'e gui Merari ramymino kuery ruvixarā oī 'rā Abail ra'y Zuriel. Ha'e kuery ma ombojeroviaaty yke katy rupi 'rā ngoorā ojapo, kuaray apu'a'ia katy.
- ³⁶ Merari ra'y kuery omoīague rami vy opena 'rā okuapy yvyra pe ombojeroviaaty regua ikuai va'e re, ha'e gui ijyta'i, ijyta, ijyta yvypy ha'e tembiporu ikuai va'e re. Ha'e va'e ha'e javi re opena aguā rami ikuai,
- ³⁷ ha'e gui ijyvýry oka rupi ijyta ikuai va'e re, ijyta yvypy, yvyra rakua, ha'e ixā ikuai va'e ha'e javi re.
- ³⁸ Ha'e gui ombojeroviaaty renonde kuaray oua katy Moisés ha'e Arāo ojapo 'rā ngoorā gua'y kuery reve, oguy nhemboaty oīaty renonde kuaray oua katy ae. Ha'e va'e kuery ma henda iky'a e'ŷ va'e ropy rupi 'rā ombo'eapo, omoīague rami vy. Ombo'eapo 'rā Israel kuery re oma'ě vy. Ha'e rā amboae regua ri onhemboja vy omano 'rā.
- ³⁹ Ha'e gui levita kuery regua avakue peteī jaxy oguereko va'e guive tujapave peve ma oipapaa rā vinte e dois mil ha'e javi vy. SENHOR ojapo ukaague rami vy Moisés ha'e Arāo oipapa, ta'y kuery ha'e javi reve.

Jypy oiko'i va'ekue rekovia ome'ě mbyrā re ijayvuague

- ⁴⁰ SENHOR aipoe'i Moisés pe:
- Eipapa ta'y jypykue'i avakue Israel kuery regua. Peteī-teī hery rupi 'rā reipapa peteī jaxy oguereko va'e guive tujapave peve.
- ⁴¹ Ha'e rami avi Israel kuery jypykue'i va'e rekovia xejeupe guarā amboaxa ma levita kuery. Xee ma SENHOR. Ha'e rami ae avi levita kuery rymba kuery xejeupe guarā amboaxa 'rā Israel kuery rymba kuery jypykue'i va'ekue rekovia — he'i.
- ⁴² Ha'e ramo SENHOR ojapo ukaague rami vy Moisés oipapa jypykue'i Israel kuery regua ha'e javi.
- ⁴³ Ha'e kuery regua avakue jypykue'i va'e peteī jaxy oguereko va'e guive tujapave peve ma hery rupi oipapaa rā vinte e dois mil duzentos e setenta e três ha'e javi vy.
- ⁴⁴ Ha'e gui SENHOR aipoe'i Moisés pe:
- ⁴⁵ — Israel kuery regua ta'y jypykue'i rekovia emboaxa ke levita kuery xevy guarā, ha'e Israel kuery rymba kuery rekovia emboaxa avi levita kuery rymba ikuai va'e. Mba'eta levita kuery ma xevy guarā meme ikuai. Xee ma SENHOR.

⁴⁶ Ha'e gui ikuai avi duzentos e setenta e três jypykue Israel kuery regua, levita kuery gui hetave va'e. Ha'e va'e kuery remboekovia aguã ma

⁴⁷ peteĩ-teĩ repyrã rejopy 'rã cinco hatã'i va'e. Henda iky'a e'ŷ va'e py hatã'i va'e oiporua va'e regua ae 'rã reiporu, doze gramas va'e meme.

⁴⁸ Ha'e va'e peráta reme'ẽ 'rã Arão ha'e ta'y kuery pe, hetave va'e kuery repyrã — he'i.

⁴⁹ Ha'e va'e peráta ma Moisés ojopy levita kuery gui Israel kuery jypykue'i hetave ikuai va'e repyrã.

⁵⁰ Israel kuery jypykue'i gui ae ojopy, mil trezentos e sessenta e cinco hatã'i va'e ha'e javi vy, henda iky'a e'ŷ va'e py oiporua va'e rami.

⁵¹ Ha'e va'e peráta SENHOR ome'ẽ ukaague rami vy Moisés ome'ẽ ha'e kuery repyrã. Arão ha'e ta'y kuery pe ome'ẽmba, Moisés pe SENHOR ojapo ukaague rami vy.

4

Coate ramymino kuery rembiaporã re ijayvuague

¹ Ha'e gui SENHOR aipoe'i Moisés ha'e Arão pe:

² — Pemboparapa ke Levi ra'y Coate ramymino kuery rery, ta'y kuery ha'e tuu ro rupigua kuery ikuai va'e reve.

³ Trinta ma'etý va'e guive cinqüenta ma'etý oguereko va'e peve ha'e va'e kuery ombo'eapo aguã rami ikuai 'rã, onhemboaty aty ropy rupi mba'emo ojapo aguã.

⁴ Po rami ae 'rã Coate ra'y kuery ombo'eapo oguy nhemboaty oïaty rupi, mba'emo iky'a e'ŷ ete va'e re opena vy.

⁵ Ha'e gui heta va'e kuery ikuai va'e ova ta ma ramo Arão gua'y kuery reve ou vy omboi 'rã ajukue okẽ regua xeayvu ryru oïa mbotyarã omoi mbyre, ha'e vy ha'e va'e py onhovã 'rã hyru.

⁶ Ha'e va'e áry rupi ma omoi 'rã mba'emo pirekue iporãve va'e, ha'e gui hi'áry jevy rupi omoi 'rã peteĩ ajukue hovypa rei va'e. Ha'e gui mae ma jovaive rupi 'rã omoi yvyra po'i oupi heravy aguã.

⁷ Ha'e rami ae avi mesa mbojape xerenonde omoi mbyre ikuaiaty áry voi omoi 'rã peteĩ ajukue hovypa va'e. Ha'e va'e áry ju omoi 'rã hy'a, heakuã porã va'e ryrurã, karo, ha'e gui mba'emo ryru kyrí'i va'e. Hi'áry ikuai tema avi 'rã mbojape xerenonde ikuai riae va'erã.

⁸ Ha'e nunga ha'e javi áry rupi omoi 'rã ajukue pytã porãve va'e, ha'e ojao'i 'rã mba'emo pirekue iporãve va'e py. Ha'e gui ma jovaive rupi omoi avi 'rã yvyra po'i.

⁹ Ha'e gui ma ajukue hovy va'e oupi vy ojao'i 'rã imoiny tataendy 'y hi'aí va'e, tataendy ikuai va'e, tapyí pejua, imboguea, ha'e gui tykuerã azeite ryru ikuai va'e ha'e javi.

¹⁰ Tataendy 'y, ha'e hexegua tembiporu ikuai va'e ha'e javi ojao'ipa 'rã mba'emo pirekue iporãve va'e py. Ha'e gui ma omoimba 'rã yvyra po'i áry rupi.

¹¹ Ha'e gui ma altar ouro guigua áry rupi omoi 'rã peteĩ ajukue hovy va'e, ha'e ojao'i 'rã mba'emo pirekue iporãve va'e py. Ha'e gui ma yvyra po'i jevy 'rã omoi jovaive rupi.

¹² Ha'e gui ma oguerupa 'rã tembiporu henda iky'a e'ŷ va'e rupi oiporua va'e ha'e javi. Ha'e nunga voi onhovã 'rã ajukue hovy va'e py, ha'e ojao'i avi 'rã mba'emo pirekue iporãve va'e py. Ha'e gui omoimba 'rã yvyra po'i áry rupi.

¹³ Ha'e gui altar ryepy gui oipe'a 'rã tanhimbu oï va'e, ha'e hi'áry ma omoi 'rã peteĩ ajukue pytã va'e.

¹⁴ Ha'e va'e áry jevy omoimba 'rã altar rupi tembiporu oiporupy ha'e javi: tapyí ryru, kuxa rakua va'e, kuxa guaxu ha'e hy'a guaxu ikuai va'e, ha'e altar rupi tembiporu oiporupy ha'e javi. Ha'e gui hi'áry rupi ma omoi 'rã mba'emo pirekue iporãve va'e. Ha'e gui ma jovaive rupi omoi 'rã yvyra po'i.

¹⁵ — Ha'e gui tekoa gui oje'oipa ta ramo Arão ha'e ta'y kuery henda iky'a e'ŷ va'e ha'e hexegua mba'emo ikuai va'e ojao'ipa ma rire Coate ra'y kuery ju 'rã ou ogueraapa aguã. Ha'e rã mba'emo iky'a e'ŷ va'e re ma ha'e kuery ndopokoi 'rã, omano e'ŷ aguã. Mba'emo oguy nhemboaty oïaty regua anho 'rã ha'eve Coate ra'y kuery ogueraaa aguã.

¹⁶ Ha'e gui sacerdote Arão ra'y Eleazar ma tataendy rykuerā azeite oĩ va'e re opena 'rã, ha'e gui heakuã porã va'e re, mba'emo aju guigua ome'ẽ jepi aguã, azeite SENHOR pe nhomboaxaa aguã regua re. Ha'e rami ae 'rã opena ombojeroviaaty re, ha'e gui ha'e py ikuai va'e ha'e javi re, henda iky'a e'ŷ va'e ropy rupi mba'emo ikuai va'e re guive — he'i.

¹⁷ Ha'e ramo SENHOR aipoe'i Moisés ha'e Arão pe:

¹⁸ — Peja eme Coate ramymino kuery ojapo aguã, levita kuery mbyte gui okanhymba aguã rami.

¹⁹ Pova'e ae 'rã pejapo ha'e kuery okuave aguã, mba'eta mba'emo iky'a e'ŷ ete va'e ikuiaia katy onhemboja vy ha'e kuery omanomba 'rã. Arão ha'e ta'y kuery anho 'rã ha'e py oike, peteĩ-teĩ rembiaporã ome'ẽ aguã.

²⁰ Ha'e rã Coate kuery ma neĩ xapy'a'i voi nda'evei oike aguã ha'e py mba'emo iky'a e'ŷ va'e oexa aguã, ha'e kuery omano e'ŷ aguã.

Gérson ramymino kuery rembiaporã re ijayvuague

²¹ Ha'e gui SENHOR aipoe'ive ju Moisés pe:

²² — Aŷ ma pemboparapa ke Gérson ramymino kuery rery, ta'y kuery ha'e tuu ro rupigua kuery ikuai va'e reve.

²³ Trinta ma'etŷ va'e guive cinqüenta ma'etŷ oguereko va'e peve ha'e va'e kuery ombo'eapo aguã rami ikuai 'rã, oguy nhemboaty oĩaty roka rupi opena aguã.

²⁴ Gérson ramymino kuery rembiaporã ma mba'emo re opena ha'e ogueraa aguã.

²⁵ Oguerovapa 'rã ajukue ombojeroviaaty ha'e oguy nhemboaty oĩaty mbotyarã oipyo pyre, ha'e gui ija'o'ia, hi'áry rupi mba'emo pirekue iporâve va'e py onhovã mbyre, okẽ reguarã ajukue omoõ mbyre,

²⁶ ombojeroviaaty, altar yvýry rupi ajukue oka mbotyarã oupi pyre, oka rokêrã ajukue omoõ mbyre, ixã-ixã ha'e tembiporu ikuai va'e. Ha'e nunga ha'e javi re openaa rupi 'rã ha'e kuery ombo'eapo.

²⁷ Gérson ramymino kuery mba'emo ogueraa e'ŷ vy ojapo aguã ha'e javi ma Arão ha'e ta'y kuery ojapo ucaa rami 'rã ojapo. Arão kuery ae 'rã oguerova uka mba'emo.

²⁸ Ha'e rami ae Gérson ra'y kuery ombo'eapo 'rã oguy nhemboaty oĩaty rupi. Sacerdote Arão ra'y Itamar ijayvua rami anho 'rã ombo'eapo okuapy.

Merari ramymino kuery rembiaporã re ijayvuague

²⁹ — Ha'e gui Merari ramymino kuery reipapa avi 'rã ta'y kuery ha'e tuu ro rupigua kuery ikuai va'e reve.

³⁰ Trinta ma'etŷ va'e guive cinqüenta ma'etŷ oguereko va'e peve ha'e va'e kuery ombo'eapo aguã rami 'rã ikuai, oguy nhemboaty oĩaty rupi ombo'eapo aguã.

³¹ Pova'e nunga ha'e kuery oguerova 'rã oguy nhemboaty oĩaty rupi ombo'eapo vy: yvyra pe ombojeroviaaty mbotyarã omoõ mbyre, yvate rupi ikuai va'e, ijytarã omopu'ã mbyre, ijyta yvypy ikuai va'e,

³² oka yvýry rupi ijytarã omopu'ã mbyre, ijyta yvypy, yvyra rakua, ixã-ixã, tembiporu ha'e opa mba'e ha'e rupi oiporupy ha'e javi. Mba'emo ha'e kuery oguerova va'erã rery remombe'upa 'rã.

³³ Ha'e rami ae 'rã Merari ramymino kuery ombo'eapo oguy nhemboaty oĩaty rupi, sacerdote Arão ra'y Itamar ijayvua rami anho.

Coate ra'y kuery oipapaa ague

³⁴ Ha'e gui Moisés ha'e Arão hetá va'e kuery yvatekueve reve oipapapa Coate ra'y kuery, ta'y kuery ha'e tuu ro rupigua kuery ikuai va'e reve.

³⁵ Trinta ma'etŷ va'e guive cinqüenta ma'etŷ oguereko va'e peve oipapa hembiaporã ome'ẽ aguã, oguy nhemboaty oĩaty rupi mba'emo ojapo aguã.

³⁶ Ha'e va'e kuery oipapa rã dois mil setecentos e cinqüenta ha'e javi vy, tuu ro rupigua kuery ikuiaia rami.

³⁷ Ha'e kuery ae Coate ramymino kuery oipapa pyre, oguy nhemboaty oīaty rupi ombo'epo va'erā meme. Moisés ha'e Arão ae oipapa, Moisés pe SENHOR ojapo ukaague rami vy.

Gérson ramymino kuery oipapaa ague

³⁸ Ha'e gui Gérson ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

³⁹ trinta ma'etŷ va'e guive cinqüenta ma'etŷ oguereko va'e peve hembiaporā ome'ē aguā, oguy nhemboaty oīaty rupi mba'emo ojapo aguā.

⁴⁰ Ha'e va'e kuery oipapa rā dois mil seiscentos e trinta ha'e javi vy, tuu ro rupigua kuery ikuiaia rami.

⁴¹ Ha'e kuery ae Gérson ramymino kuery oipapa pyre, oguy nhemboaty oīaty rupi ombo'epo va'erā meme. Moisés ha'e Arão ae oipapa, Moisés pe SENHOR ojapo ukaague rami vy.

Merari ramymino kuery oipapaa ague

⁴² Ha'e gui Merari ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

⁴³ trinta ma'etŷ va'e guive cinqüenta ma'etŷ oguereko va'e peve hembiaporā ome'ē aguā, oguy nhemboaty oīaty rupi mba'emo ojapo aguā.

⁴⁴ Ha'e va'e kuery oipapa rā três mil e duzentos ha'e javi vy, tuu ro rupigua kuery ikuiaia rami.

⁴⁵ Ha'e kuery ae Merari ramymino kuery oipapa pyre. Moisés ha'e Arão ae oipapa, Moisés pe SENHOR ojapo ukaague rami vy.

Levita regua kuery anho'i mbovy pa ikuiaia re ijayvuague

⁴⁶ Ha'e rami py Moisés ha'e Arão Israel kuery yvatekueve reve oipapa levita regua kuery, ta'y kuery ha'e tuu ro rupigua kuery ikuai va'e reve,

⁴⁷ trinta ma'etŷ va'e guive cinqüenta ma'etŷ oguereko va'e peve, hembiaporā ome'ē aguā, oguy nhemboaty oīaty rupi mba'emo ojapo aguā.

⁴⁸ Ha'e va'e kuery oipapa rā oito mil quinhentos e oitenta ha'e javi vy.

⁴⁹ Moisés pe SENHOR ojapo ukaague rami vy peteī-teī omoī guembaporā rupi ombo'epo aguā. Ha'e rami aguā ae ha'e kuery oipapa, Moisés pe SENHOR ojapo ukaague rami vy.

5

Tekoa gui mombyry'i lepra revegua ha'e ha'eve'ŷ va'e oipe'apaa aguā re ijayvuague

¹ Ha'e gui SENHOR aipoe'i Moisés pe:

² — Aipo're Israel kuery pe tekao mbyte gui mombyry'i oipe'apa aguā lepra revegua, ipeupa rei va'e, ha'e omanogue re opokoa py ha'eve'ŷ va'e ikuai va'ekue ha'e javi.

³ Avakue ha'e kunhague voi peipe'a 'rā tekao gui mombyry'i, penderekao omongy'apa e'ŷ aguā, mba'eta mbyte rupi xee aiko — he'i.

⁴ Ha'e ramo Israel kuery ha'e rami ae ojapo okuapy. Ha'e vy guekoa mbyte gui oipe'apa ha'e ramigua kuery. Moisés pe SENHOR ojapo ukaague rami vy Israel kuery ojapo okuapy.

Lei mba'emo rekovia ome'ēa regua oĩa

⁵ Ha'e gui SENHOR aipoe'ive ju Moisés pe:

⁶ — Aipo're Israel kuery pe: Xapy'a rei ava e'ŷ vy kunha mba'e ojejavý 'rā pavē ojejavýa py, ha'e vy otekoavy 'rā SENHOR pe. Ha'e rami vy ha'e va'e ojejavý va'e oiko.

⁷ Ha'e gui ma omombe'u 'rā ojejavýague, ha'e ojejavýague re mba'emo ome'ē 'rā otekoavyague rekovia. Ome'ēve 'rā guive, peteī nhiruī repy ovare nhavō áry peteī-teī ju 'rā ome'ēve. Ha'e nunga ha'e javi ome'ē 'rā ojapo vaia va'ekue pe ae.

⁸ Ha'e gui xapy'a rei ha'e va'e omano, ha'e hetarā ete'i nda'ipoi ramo otekoavyague rekovia ome'ēa rā ojopy va'erā, ha'e ramo SENHOR pe ae 'rā ome'ē opaga aguā va'ekue. Sacerdote pe togueru peteī vexa'i reve, ha'e va'e py ojejavýague ojao'i uka aguā.

⁹ Mba'emo sacerdote pe Israel kuery ogueru va'ekue ha'e javi ma sacerdote pegua ae opyta iky'a e'ŷ va'e.

¹⁰ Peteĩ-teĩ gui mba'emo iky'a e'ŷ va'e ojopy va'ekue ma imba'e ae. Sacerdote pe ogueru pyre ma ixupe ae 'rã opyta.

Kunha otavypaague re oikuua pota aguã re ijayvuague

¹¹ SENHOR aipoe'ive ju Moisés pe:

¹² — Ndeayvu ke Israel kuery pe, ha'e vy aipo're: Xapy'a rei amongue ra'yxy ome gui ojepe'a vy oiko 'rã ome okorea rupi.

¹³ Ava mboae reve itavy rei teĩ onhenhomí ramo ime ndoexai 'rã, ha'eve'ŷa rami oiko teĩ avave rei ndoexaai, neĩ itavy jave voi.

¹⁴ Ha'e gui xapy'a rei ime opy'a re oendu hakâte'ŷ reia, gua'yxy re hakâte'ŷ 'rã kunha va'e itavy rire, ha'e'ŷ vy nda'itavyi teĩ hexe hakâte'ŷ vy ma

¹⁵ ava va'e ogueru 'rã gua'yxy sacerdote-a py. Ogueru avi 'rã mba'emo gua'yxy ojejavya regua ome'ẽ va'erã. Peteĩ ryru cevada ku'ikue ome'ẽ 'rã ha'e va'e re azeite omoõ e'ŷ re, neĩ heakuã porã va'e ma voi nomoõ 'rã hi'áry, mba'eta hakâte'ŷ reia regua mba'emo aju guigua ome'ẽmbý. Ha'e va'e ma mba'emokue re nhomoma'endu'a aguã regua ome'ẽ, teko vai kuaa ukaarã.

¹⁶ — Ha'e ramo sacerdote kunha va'e omonhemboja vy ogueru 'rã imo'amy SENHOR renonde py.

¹⁷ Ha'e vy sacerdote karo nhae'ũ guigua yy ky'a e'ŷ oĩa va'e oupi vy ojopy avi 'rã yvy ku'ikueombojeroviaaty ropy rupi ikuai va'e regua. Ha'e va'e ma omoõ 'rã yy py.

¹⁸ Ha'e vy SENHOR renonde py kunha va'e oexa uka vy omboguejypa 'rã hi'a. Ha'e vy ipo py omoõ 'rã mba'emo aju guigua imoma'endu'aarã ome'ẽ mbyre, takâte'ŷ regua. Ha'e rã yy iro va'e nhomoingo axyarã ma sacerdote po py ranhe 'rã opyta.

¹⁹ Ha'e gui kunha va'e pe sacerdote oura uka vy aipoe'i 'rã ixupe: "Xapy'a rei ndereve avave rei nonhenoai, ha'e neme oipotaa rami e'ŷ vy ixugui nderejepe'ai ri vy ha'eve'ŷ va'e rejapo aguã, ha'e rami vy kova'e yy iro va'e ayvu vaipy nhomoingoarã gui rey'u teĩ mba'eve ndoikoi 'rã, reo jepe 'rã.

²⁰ Ha'e rami teĩ xapy'a rei neme openaa gui rejope'a vy ha'eve'ŷa rami reiko, ha'e ava neme e'ŷ ri ndereve onheno ramo ma —"

²¹ (ha'e rami vy sacerdote oura uka 'rã kunha va'e pe oiko axy aguã rupi, ha'e vy ixupe aipoe'ive 'rã:) "— Ha'e rami ri ramo tove SENHOR tanemoingo ayvu vaipy ha'e ojou vaipy heta va'e kuery mbyte. Tove SENHOR tandeapo nde'u ivaipa ha'e nderyepy rupi irurupa ovu aguã rami.

²² Ha'e rami vy kova'e yy ayvu vaipy nhomoingoarã nderyepy rupi oike ramo ta'irurupa, ha'e ta'ivaipa nde'u", he'i 'rã. Ha'e ramo kunha va'e "Ha'eve va'e, ha'eve va'e!" he'i 'rã.

²³ — Ha'e gui ha'e va'e ayvu vai sacerdote omboparapa 'rã peteĩ kuaxia re, ha'e gui ipara omboje'opa ju 'rã yy iro va'e irûrã.

²⁴ Ha'e vy kunha va'e pe oy'u uka 'rã yy iro va'e ayvu vaipy nhomoingoarã. Ha'e va'e oy'u ramove ma hexe oĩ 'rã imoingo axyarã.

²⁵ Ha'e gui kunha va'e po gui sacerdote ju ojopy 'rã mba'emo aju guigua takâte'ŷ regua ome'ẽ mbyre, ha'e SENHOR renonde oupi vy ombovava 'rã. Ha'e gui ma altar hi'aĩa py ju 'rã ogueraa.

²⁶ Ha'e gui mba'emo aju guigua nhomoma'endu'aarã ome'ẽ mbyre peteĩ po ojopy vy oapy 'rã altar áry. Ha'e va'e rire yy ome'ẽ 'rã kunha va'e pe oy'u aguã.

²⁷ Ha'e gui ma ixupe yy oy'u uka ramo, xapy'a rei kunha va'e ojejavvy ri vy ha'eve'ŷa rami ome okorea rupi oiko rire ma yy ayvu vaipy nhomoingoarã hexe oike vy omoingo axy 'rã. Ha'e ramo hyepy rupi irurupa 'rã, ha'e hi'u ivaipa 'rã. Ha'e ramo kunha va'e heta va'e kuery mbyte rupi oiko 'rã ayvu vaipy.

²⁸ Ha'e ramo teĩ xapy'a rei kunha va'e mba'eve py ndojejavyi, ha'e hexe ha'eve'ŷ va'e noĩ ramo oo jepe 'rã, ha'eve ju 'rã kyrí va'e oguerekol'i aguã.

²⁹ — Ha'e va'e lei ma takāte'ŷa regua, kunhague ome kuery openaa gui ojepe'a vy ha'eve'ŷa rami oiko ramo guarã,

³⁰ ha'e rami e'ŷ vy ava opy'a re hakāte'ŷa oendu ramo guarã. Ha'e rami vy gua'yxy ogueraa vy SENHOR renonde py oexa uka 'rã, ha'e hexe sacerdote ojapopa 'rã lei oĩ va'e ha'e javi rami vy.

³¹ Ha'e gui ava va'e re ma teko vai noĩ, ha'e rã kunha va'e ojejavy rire hexe oĩ 'rã ojejavyague re opaga aguã.

6

Lei nazireu rami oiko aguã regua oĩa

¹ SENHOR aipoe'i Moisés pe:

² — Ndeayvu ke Israel kuery pe, ha'e vy aipo're: Peteĩ ava e'ŷ vy kunha teĩ ae ma onhemboayvu 'rã anhetẽ rupi nazireu rami oiko aguã re, SENHOR pe anho oiko aguã.*

³ Ha'e rami vy ha'e va'e ndoy'uvei ma 'rã vinho ha'e iro va'e regua. Neĩ ndoy'uvei 'rã vinagre vinho guigua, iro va'e guigua, uva rykue, ndo'ui 'rã uva oipo'o ramo'i pyre, neĩ ipirukue ma voi.

⁴ Nazireu rami oiko teri reve ndo'uvei 'rã mba'emo uva'a gui ojapo pyre, ha'yigue neĩ ipirekue gui ma voi.

⁵ Nazireu rami oiko aguã re onhemboayvuague rami oiko teri reve ma oakã rague ndojaya ukai 'rã mba'emo haimbe va'e py ma voi. SENHOR pe anho oiko aguã ára ojeupitypa e'ŷa ja ma oiko 'rã iky'a e'ŷ va'e. Ha'e vy onhembo'a vuku 'rã.

⁶ — SENHOR pe onhemboaxa aguã pukukue re ma nonhembojavei 'rã te'õgue ituia katy ma voi.

⁷ Xapy'a rei tuu ae omano teĩ, e'ŷ vy ixy teĩ ae ma, e'ŷ vy tyvy, tyke'y, e'ŷ vy heindy omano teĩ ikáuxa rive nda'evei ha'eve'ŷ va'e oiko aguã. Mba'eta inhakã re oĩ 'rã Nguuete pe anho oiko aguã kuaa ukaarã.

⁸ Nazireu rami oikoa pukukue re ma SENHOR pe iky'a e'ŷ va'e 'rã oexa uka.

⁹ — Ha'e gui ha'e oĩa py amongue omano xapy'a ramo nazireu rami onhemboaxaague gui ha'eve'ŷ va'e ju 'rã oiko, hi'a guive. Ha'e ramo ma sete araa py ojaya ukapa ju 'rã o'a, ojeky'a'o ukaa ára py ae.

¹⁰ Ha'e gui oito araa py ma sacerdote pe ogueraa 'rã mokoï pyku'i'i e'ŷ vy mokoï apykaxu'i, oguy nhemboaty oĩaty rokẽ peve.

¹¹ Ha'e va'e regua peteĩ ma sacerdote omboaxa 'rã jejavya regua, ha'e rã amboae ma oapypa vy omboaxa 'rã. Ha'e rami vy ojao'i uka 'rã omanogue káuxa ojejavyague. Ha'e va'e árave omboaxa jevy 'rã o'a.

¹² Ha'e gui onhemboaxa ju 'rã SENHOR pe nazireu rami oiko aguã, ha'e vy mba'emo omboekovia aguã regua ome'ẽ va'erã ogueraa 'rã peteĩ vexa'i peteĩ ma'etŷ oguereko va'e. Ha'e gui nazireu rami oikoa oaxa va'ekue ma ndovarevei 'rã, ivaipa rive ramo.

¹³ — Po rami ma nazireu pegua lei. Nazireu rami oiko aguã ára ojeupitypa ma ramo oguerua 'rã oguy nhemboaty oĩaty rokẽ peve.

¹⁴ Ha'e ramo SENHOR pe ha'e ogueru 'rã vexa'i peteĩ ma'etŷ va'e ivaikue rei e'ŷ va'e, oapy vy ome'ẽ mbyrã. Ha'e gui jejavya regua ome'ẽ avi 'rã vexa'i kunha peteĩ ma'etŷ oguereko va'e, ivaikue rei e'ŷ va'e. Ha'e gui peteĩ rami ikuia regua ome'ẽ 'rã peteĩ vexa ava ivaikue rei e'ŷ va'e.

¹⁵ Ome'ẽ avi 'rã peteĩ varai mbojape imbovua rewegua e'ŷ, mbojape trigo iporãve va'e guigua azeite reve omoapomo mbyre, ha'e gui mbojape iperirí'i va'e azeite rewegua. Mba'emo aju guigua voi ome'ẽ 'rã, mba'emo rykue guive.

¹⁶ Ha'e nunga SENHOR renonde py sacerdote ogueru vy oexa uka 'rã jejavya regua ome'ẽmbi ha'e oapypa rewegua.

* ^{6:2} Nazireu ma Nhanderuete pe anho'i oiko aguã rami onhemboayvu va'ekue. Peteĩ semana e'ŷ vy peteĩ jaxy, e'ŷ vy cinco ma'etŷ peve guarã oiko 'rã ijayvuague ramo ae. Ha'e va'e rire ma nazireu ve'ŷ 'rã oiko, Nhanderuete pe oiko riae teĩ amboae nunga re opena reve.

¹⁷ Vexa'i ma SENHOR pe ome'ẽ 'rã peteĩ rami ikuiaia regua, varai py mbojape imbovua revegua e'ŷ reve. Sacerdote ome'ẽ avi 'rã mba'emo aju guigua ogueru pyre, mba'emo rykue guive.

¹⁸ Ha'e gui nazireu rami oiko va'e ma oguy nhemboaty oĩaty rokẽ py hi'aĩa py onhopĩ ukapa 'rã oakã rague nazireu rami oikoague kuaa ucaa. Ha'e va'e ma ogueraa vy omoõ 'rã tata áry, peteĩ rami ikuiaia regua ome'ẽmb y vývýry.

¹⁹ Ha'e va'e rire ma sacerdote ogueru 'rã vexa'i axi'y ro'okue mimoõ, peteĩ mbojape imbovua revegua e'ŷ hyru gui, ha'e gui peteĩ mbojape perir'i imbovua revegua e'ŷ. Ha'e nunga ma omoõmba 'rã nazireu va'e po py, nazireu rami oiko aguã oakã onhopõmba ma rire.

²⁰ Ha'e nunga sacerdote oupi 'rã SENHOR renonde py, oupi vy ombovava reve ome'ẽ mbyrã. Ha'e nunga ma iky'a e'ŷ va'e optya sacerdote peguarã, mymba oupi vy ombovava reve ome'ẽmb pexokue ha'e hi'ugue ha'e rami ae avi. Ha'e va'e rire ma ha'eve ju 'rã nazireu va'ekue vinho oy'u aguã.

²¹ — Ha'e va'e lei ma nazireu rami oiko aguã re onhemboayvu va'ekue pegua. SENHOR pe mba'emo ome'ẽ 'rã nazireu ome'ẽ aguã va'e ae, mba'emo oguereko va'e rami ome'ẽ va'e áryve. Onhemboayvuague rami ae 'rã oiko, lei nazireu rami oiko aguã regua oĩa rami ae.

Sacerdote jogueroayvu porã aguã regua

²² SENHOR aipoe'i Moisés pe:

²³ — Ndeayvu ke Arão ha'e ta'y kuery pe, ha'e vy aipo're: Po rami 'rã peroayvu porã Israel kuery. Ha'e vy aipopeje 'rã:

²⁴ “ SENHOR tanemoingo porã
ha'e topena porã ndere.

²⁵ SENHOR rova taexakã nde'áry rupi,
tanemboaxy guive.

²⁶ SENHOR toma'ẽ riae ndere,
ha'e tome'ẽ revy'a aguã.”

²⁷ Po rami 'rã peroayvu xerery Israel kuery áry rupi. Ha'e ramo xee amoingo porã 'rã — he'i.

7

Altar SENHOR pegua iky'a e'ŷ va'erã omboaxaa py yvatekueve mba'emo ome'ẽ okuapyague

¹ Ha'e gui Moisés ombojerovia atyrã ojapopaa ára py azeite omoõ reve omboaxa SENHOR pegua iky'a e'ŷ va'erã, tembiporu ikuai va'e guive, altar ha'e hexegua tembiporu ikuai va'e ha'e javi reve.

² Ha'e ramo Israel kuery yvatekueve guetarã kuery rerekaoa ikuai va'e, peteĩ-teĩ regua ruvíxa kuery guetarã kuery papaa ma mba'emo ome'ẽmba okuapy.

³ Ha'e vy SENHOR renonde py ogueru okuapy ome'ẽ va'erã mboapy meme karóxa hoopa va'e ha'e doze toro. Yvatekueve mokõ-mokoõ ome'ẽ peteĩ karóxa, ha'e rã peteĩ-teĩ ma ome'ẽ toro. Oguerupa okuapy ombojeroviaaty rexei.

⁴ Ha'e gui SENHOR aipoe'i Moisés pe:

⁵ — Ejopypa ke ha'e nunga ha'e kuery po gui, mba'eta oguy nhemboaty oĩaty rupi ombo'eapo va'e kuery oiporu va'erã. Levita kuery pe ju 'rã remboaxapa, peteĩ-teĩ guembiaporã oguerekaoa rami — he'i.

⁶ Ha'e ramo Moisés karóxa ha'e toro ojopypa vy omboaxapa levita kuery pe.

⁷ Ha'e rami vy Gérson ramymino kuery pe ranhe omboaxa mokoõ karóxa ha'e irundy toro, ha'e kuery guembiaporã oguerekaoa rami.

⁸ Ha'e gui Merari ramymino kuery pe ma irundy karóxa ha'e oito toro omboaxa, ha'e kuery guembiaporã oguerekaoa rami. Ha'e kuery ma sacerdote Arão ra'y Itamar po py meme ombo'eapo.

⁹ Ha'e rã Coate ramymino kuery pe ma nome'ẽ mba'eve, mba'eta ha'e va'e kuery henda iky'a e'ŷ va'e rupi ombo'eapo va'e vy ojaxei 'rã mba'emo.

¹⁰ Ha'e gui altar re azeite omoĩ reve SENHOR peguarã omboaxa aguã yvatekueve ogueru okuapy mba'emo altar áry ome'ẽ va'erã. Altar rexei peteĩ-teĩ ogueru okuapy ome'ẽ va'e.

¹¹ Mba'eta SENHOR aipoe'i Moisés pe:

— Altar xevygua iky'a e'ŷ va'erã pemboaxa aguã ma huvixa kuery peteĩ-teĩ ogueru 'rã ome'ẽ va'erã, ára rexei ae 'rã oguerupa — he'ague rami vy.

¹² Ha'e ramo jypy'ia ára py mba'emo ome'ẽ va'erã ogueru va'ekue ma Aminadabe ra'y Naassom, Judá ramymino kuery ruvixa.

¹³ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omomyẽ reve ogueru, azeite reve omoapomo mbyre, mba'emo aju guigua ome'ẽ va'erã;

¹⁴ ha'e gui peteĩ hyru ouro guigua cento e vinte gramas ipoyi va'e, heakuã porã va'e tynyẽ reve;

¹⁵ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etã va'e, oapy vy ome'ẽ va'erã meme;

¹⁶ ha'e gui peteĩ kavara jejavya regua ome'ẽ va'erã;

¹⁷ ha'e gui peteĩ rami ikuai aguã regua ome'ẽ va'erã ma mokoõ toro, peteĩ nhiruã vexa ava, peteĩ nhiruã kavara ava ha'e peteĩ nhiruã vexa'i ra'y peteĩ ma'etã va'e meme. Ha'e va'e ha'e javi ma Aminadabe ra'y Naassom ome'ẽ va'ekue.

¹⁸ Ha'e gui mokoõ araa py mba'emo ome'ẽ va'erã ogueru va'ekue ma Zuar ra'y Natanael, Issacar ramymino kuery ruvixa.

¹⁹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omomyẽ reve ogueru, azeite reve omoapomo mbyre, mba'emo aju guigua ome'ẽ va'erã;

²⁰ ha'e gui peteĩ hyru ouro guigua cento e vinte gramas ipoyi va'e, heakuã porã va'e tynyẽ reve;

²¹ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etã va'e, oapy vy ome'ẽ va'erã meme;

²² ha'e gui peteĩ kavara jejavya regua ome'ẽ va'erã;

²³ ha'e gui peteĩ rami ikuai aguã regua ome'ẽ va'erã ma mokoõ toro, peteĩ nhiruã vexa ava, peteĩ nhiruã kavara ava ha'e peteĩ nhiruã vexa'i ra'y peteĩ ma'etã va'e meme. Ha'e va'e ha'e javi ma Zuar ra'y Natanael ome'ẽ va'ekue.

²⁴ Ha'e gui mboapy araa py ma ou Helom ra'y Eliabe, Zebulom ramymino kuery ruvixa.

²⁵ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omomyẽ reve ogueru, azeite reve omoapomo mbyre, mba'emo aju guigua ome'ẽ va'erã;

²⁶ ha'e gui peteĩ hyru ouro guigua cento e vinte gramas ipoyi va'e, heakuã porã va'e tynyẽ reve;

²⁷ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etã va'e, oapy vy ome'ẽ va'erã meme;

²⁸ ha'e gui peteĩ kavara jejavya regua ome'ẽ va'erã;

²⁹ ha'e gui peteĩ rami ikuai aguã regua ome'ẽ va'erã ma mokoõ toro, peteĩ nhiruã vexa ava, peteĩ nhiruã kavara ava ha'e peteĩ nhiruã vexa'i ra'y peteĩ ma'etã va'e meme. Ha'e va'e ha'e javi ma Helom ra'y Eliabe ome'ẽ va'ekue.

³⁰ Ha'e gui irundy araa py ma ou Sedeur ra'y Elizur, Rúben ramymino kuery ruvixa.

³¹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omomyẽ reve ogueru, azeite reve omoapomo mbyre, mba'emo aju guigua ome'ẽ va'erã;

³² ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

³³ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etỹ va'e, oapy vy ome'ẽ va'erã meme;

³⁴ ha'e gui peteĩ kavara jejavya regua ome'ẽ va'erã;

³⁵ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etỹ va'e meme. Ha'e va'e ha'e javi ma Sedeur ra'y Elizur ome'ẽ va'ekue.

³⁶ Peteĩ nhiruĩ araa py ma ou Zurisadai ra'y Selumiel, Simeão ramymino kuery ruvixa.

³⁷ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omoneye reve ogueru, azeite reve omoapomo mbyre, mba'emo aju guigua ome'ẽ va'erã;

³⁸ ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

³⁹ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etỹ va'e, oapy vy ome'ẽ va'erã meme;

⁴⁰ ha'e gui peteĩ kavara jejavya regua ome'ẽ va'erã;

⁴¹ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etỹ va'e meme. Ha'e va'e ha'e javi ma Zurisadai ra'y Selumiel ome'ẽ va'ekue.

⁴² Ha'e gui mboapy meme araa py ma ou Deuel ra'y Eliasafe, Gade ramymino kuery ruvixa.

⁴³ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omoneye reve ogueru, azeite reve omoapomo mbyre, mba'emo aju guigua ome'ẽ va'erã;

⁴⁴ ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

⁴⁵ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etỹ va'e, oapy vy ome'ẽ va'erã meme;

⁴⁶ ha'e gui peteĩ kavara jejavya regua ome'ẽ va'erã;

⁴⁷ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etỹ va'e meme. Ha'e va'e ha'e javi ma Deuel ra'y Eliasafe ome'ẽ va'ekue.

⁴⁸ Ha'e gui sete araa py ma ou Amiúde ra'y Elisama, Efraim ramymino kuery ruvixa.

⁴⁹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omoneye reve ogueru, azeite reve omoapomo mbyre, mba'emo aju guigua ome'ẽ va'erã;

⁵⁰ ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

⁵¹ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etỹ va'e, oapy vy ome'ẽ va'erã meme;

⁵² ha'e gui peteĩ kavara jejavya regua ome'ẽ va'erã;

⁵³ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etỹ va'e meme. Ha'e va'e ha'e javi ma Amiúde ra'y Elisama ome'ẽ va'ekue.

⁵⁴ Oito araa py ma ou Pedazur ra'y Gamaliel, Manassés ramymino kuery ruvixa.

⁵⁵ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoõive ma trigo iporãve va'e py omoneye reve ogueru, azeite reve omoapomo mbyre, mba'emo aju guigua ome'ẽ va'erã;

⁵⁶ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁵⁷ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

⁵⁸ ha'e gui peteī kavara jejavya regua ome'ẽ va'erā;

⁵⁹ ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Pedazur ra'y Gamaliel ome'ẽ va'ekue.

⁶⁰ Ha'e gui nove araa py ma ou Gideoni ra'y Abidā, Benjamim ramymino kuery ruvixa.

⁶¹ Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erā;

⁶² ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁶³ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

⁶⁴ ha'e gui peteī kavara jejavya regua ome'ẽ va'erā;

⁶⁵ ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Gideoni ra'y Abidā ome'ẽ va'ekue.

⁶⁶ Ha'e gui dez araa py ma ou Amisadai ra'y Aiezer, Dā ramymino kuery ruvixa.

⁶⁷ Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erā;

⁶⁸ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁶⁹ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

⁷⁰ ha'e gui peteī kavara jejavya regua ome'ẽ va'erā;

⁷¹ ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Amisadai ra'y Aiezer ome'ẽ va'ekue.

⁷² Ha'e gui onze araa py ma ou Ocrā ra'y Pagiel, Aser ramymino kuery ruvixa.

⁷³ Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erā;

⁷⁴ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁷⁵ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

⁷⁶ ha'e gui peteī kavara jejavya regua ome'ẽ va'erā;

⁷⁷ ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Ocrā ra'y Pagiel ome'ẽ va'ekue.

⁷⁸ Ha'e gui doze araa py ma ou Enā ra'y Aira, Naftali ramymino kuery ruvixa.

⁷⁹ Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erā;

⁸⁰ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁸¹ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

⁸² ha'e gui peteī kavara jejavya regua ome'ẽ va'erā;

⁸³ ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Enā ra'y Aira ome'ẽ va'ekue.

⁸⁴ Po rami ma Israel kuery yvatekueve ome'ẽ va'ekue altar áry azeite omoī reve SENHOR peguarā omboaxa aguã: doze hy'a prata guigua, doze hy'a guaxu prata guigua ha'e doze avi hyru ouro guigua.

⁸⁵ Peteī-teī hy'a prata guigua va'e ma mil e quinhentos gramas ipoyi va'e meme, ha'e gui peteī-teī hy'a guaxu ma setenta ipoyi va'e. Ha'e va'e tembiporu re prata oī va'e ha'e javi vy ma vinte e oito quilos e oitocentos gramas, henda iky'a e'ŷ va'e py oiporupy rami ae.

⁸⁶ Ha'e gui doze hyru ouro guigua heakuã porā va'e tynyẽ reve ma cento e vinte gramas ipoyi va'e meme, henda iky'a e'ŷ va'e py oiporupy ramigua ae. Ha'e nunga ha'e javi re ouro oī va'e ma um quilo e quatrocentos e quarenta gramas.

⁸⁷ Ha'e gui mymba kuery oapy vy ome'ẽ mbyre ma doze toro ra'y, doze vexa ava, doze avi vexa'i ra'y peteī ma'etŷ va'e, mba'emo aju guigua ome'ẽ mbyre reve, ha'e doze kavara ava avi ome'ẽ jejavya regua.

⁸⁸ Ha'e gui peteī rami ikuai aguã regua mymba ome'ẽ mbyre ha'e javi vy ma vinte e quatro toro ra'y, sessenta vexa ava, sessenta kavara ha'e sessenta avi vexa'i ra'y peteī ma'etŷ va'e meme. Ha'e va'e ma ome'ẽ okuapy altar áry azeite omoī vy SENHOR peguarā omboaxa aguã.

⁸⁹ Ha'e gui SENHOR reve Moisés ijayvu aguã oguy nhemboaty oīaty py oike nhavõ oendu kuerei 'rā ixupe ijayvu va'e ayvu ryru mbotya teko vai ombogueaty áry gui. SENHOR ayvu ryru áry mokoī anjo ipepo va'e ra'angaa hi'ai va'e mbyte gui onhendu.* Ha'e rami ae 'rā ijayvu ixupe.

8

Henda iky'a e'ŷ va'e py sete tataendy renda ikuai va'e re ijayvuague

¹ SENHOR aipoe'i Moisés pe:

² — Ndeayvu ke Arão pe, ha'e vy aipo're: Sete tataendy hendarā py remoī vy reja 'rā imoiny hi'y kyvõ katy hexakā aguã rami — he'i.

³ Ha'e ramo ha'ekue rami ae Arão ojapo. Ha'e rami vy tataendy omoī hi'y kyvõ katy meme hexakā aguã rami, Moisés pe SENHOR aipoe'iague rami vy.

⁴ Tataendy 'y ma ouro ombota pyre gui ojapoa va'ekue, hi'yvypy guive yvate katy ipoty ikuiaia peve. Moisés pe SENHOR ta'angaa oexa ukaague rami ae ju ojapo tataendy 'yrā.

SENHOR pegua iky'a e'ŷ va'erā levita kuery omboaxaa ague

⁵ Ha'e gui SENHOR aipoe'ive ju Moisés pe:

⁶ — Aŷ ma emono'õmba levita kuery Israel kuery mbyte gui, ha'e eiky'a'opa xevy guarā.

⁷ Po rami 'rā rejapo iky'a e'ŷ va'e ikuai aguã: Ha'e kuery áry emboayvi yy jejavya ojao'ia aguã regua. Ha'e gui hete ha'e javi rupi renhopi uka 'rā kyxe py, ha'e rejoí ukapa 'rā ijao. Ha'e rami vy 'rā ha'e kuery iky'a e'ŷ va'e ikuai.

⁸ Ha'e gui ha'e kuery ogueru 'rā peteī toro ra'y mba'emo aju guigua reve ome'ẽ va'erā, trigo iporâve va'e ha'e azeite reve omoapomo mbyre. Ha'e rā ndee ma amboae toro ra'y ju 'rā reru jejavya regua reme'ẽ va'erā.

⁹ Ha'e gui rejapo 'rā oguy nhemboaty oīaty rexei levita kuery onhembojapa aguã rami. Remboaty avi 'rā Israel kuery ha'e javi.

¹⁰ Ha'e gui ma SENHOR renonde py levita kuery removaẽmba ramo ha'e kuery áry katy Israel kuery omoimba 'rā opo.

* 7:89 Anjo ipepo va'e ra'angaa ma ayvu ryru mbotya áry guarā omoī mbyre (Êxodo 25.18-20).

¹¹ Ha'e gui SENHOR pe Arão oexa uka 'rã levita kuery mba'emo oupi reve Israel kuery ome'ẽ va'e rami. Ha'e rami rã 'rã SENHOR pe ombo'epo aguã rami ikuai.

¹² Ha'e gui levita kuery ju opo omoi'rã okuapy toro ra'y ikuai va'e akã áry. Ha'e va'e regua peteĩ ma rejuka 'rã jejavya regua ome'ẽ mbyrã, ha'e rã amboae ma SENHOR pe oapy vy ome'ẽ mbyrã, levita kuery ojejavyague reja'o'i uka aguã.

¹³ Ha'e vy Arão ha'e ta'y kuery renonde py levita kuery removaẽ imo'amy vy rexâ uka 'rã SENHOR pe oupi reve ome'ẽmby rami.

¹⁴ — Reipe'a 'rã levita kuery Israel kuery mbyte gui. Levita kuery ma xevy pegua ae 'rã ikuai.

¹⁵ Ha'e va'e rire mae ma levita kuery oike 'rã oguy nhemboaty oïaty rupi ombo'epo aguã. Ndee remboaxa 'rã iky'a e'ŷ va'erã, ha'e xevy rexâ uka 'rã oupi reve ome'ẽmby rami.

¹⁶ Mba'eta ha'e kuery ae Israel kuery va'e regua ikuai va'erã xevy pegua. Israel kuery regua jypykue ta'y ikuai va'ekue ha'e javi rekoria ma xejeupe guarã meme aipe'a.

¹⁷ Mba'eta xevygua meme ikuai Israel kuery regua jypykue ikuai va'ekue, avakue ha'e'ŷ vy mymba kuery regua tei. Egito yvy re ta'y ypy'iague ajukapa ára guive ha'e kuery aipe'a xejeupeguia iky'a e'ŷ va'erã.

¹⁸ Ha'e nunga rupi xejeupe guarã levita kuery aipe'a Israel kuery jypykue ikuai va'e rekoria.

¹⁹ Ha'e gui ma Arão ha'e ta'y kuery po py ju amboaxa levita kuery, Israel kuery mbyte gui. Amboaxapa oguy nhemboaty oïaty rupi ombo'epo okuapy aguã Israel kuery re ama'ẽ vy, ha'e kuery ojejavyague ojao'i uka aguã, ha'e rami vy Israel kuery mbyte rupi oiko e'ŷ aguã imoingo axyarã, mba'eta henda iky'a e'ŷ va'e py Israel kuery oike va'e rire oiko 'rãgue ae — he'i.

²⁰ Ha'e ramo Moisés, Arão ha'e Israel kuery ha'e javi ma ha'e rami ae ojapo okuapy levita kuery re. Moisés pe SENHOR ijayvuague ha'e javi rami Israel kuery ojapo okuapy levita kuery omboaxa vy.

²¹ Ha'e rami vy levita kuery iky'a e'ŷ va'e ikuai aguã ojoi okuapy oao. Ha'e gui Arão oexa ukapa SENHOR renonde py oupi reve ome'ẽmby rami. Ojao'i uka guive ha'e kuery ojejavyague, iky'a e'ŷ va'e ikuai aguã.

²² Ha'e va'e rire levita kuery ovaẽmba okuapy oguy nhemboaty oïaty rupi ombo'epo aguã, Arão ha'e ta'y kuery renonde rupi. Levita kuery rekorã re Moisés pe SENHOR ijayvuague rami vy ae ojapo ha'e kuery re.

²³ Ha'e gui SENHOR aipoe'ive ju Moisés pe:

²⁴ — Pova'e lei ma levita kuery regua: Vinte e cinco ma'etý va'e guive tujakue peve 'rã ikuai oguy nhemboaty oïaty rupi ombo'epo aguã.

²⁵ Ha'e rã cinqüenta ma'etý va'e ma ha'e va'e rupi nda'ikuaivei 'rã, ha'ekue rami nomba'apovei 'rã.

²⁶ Ha'e rami 'rãgue py joegua kuery pytyvõa rupi 'rã ikuai oguy nhemboaty oïaty rupi ombo'epoa py, tei ha'e kuery ae nomba'apovei 'rã. Ha'e rami ae 'rã remoĩ levita kuery guembiapõa oĩ va'e ojapo aguã.

9

Páscoa ára pygua ngaru ojapo aguã re ijayvuague

¹ SENHOR ijayvu Moisés pe Sinai regua tekoa e'ŷa rupi oiko teri reve. Egito yvy gui oje'oipa rire mokoĩ ma'etýa ha'e jypy'ia jaxy re ijayvu vy aipoe'i:

² — Israel kuery tojapo okuapy ngaru Páscoa regua hi'ára py porã.

³ Kova'e jaxy re catorze araa py, ka'aru ma ovya py ma pejapo 'rã ngaru hi'ára py. Lei ha'e ojapo uka pyre ha'e javi rami vy 'rã pejapo ngaru — he'i.

⁴ Ha'e ramo Moisés aipoe'i Israel kuery pe ngaru ojapo aguã Páscoa ára py.

⁵ Ha'e rami vy ngaru ojapo okuapy, peteĩ jaxy re, catorze araa py ae. Ka'aru ma ovya jave ojapo Sinai regua tekoa e'ŷa py. Moisés pe SENHOR ojapo ukaague rami vy Israel kuery ojapopa okuapy.

⁶ Ha'e va'e ára ma amongue ikuai avi ha'eve'ŷ va'e peteĩ omanogue re opokoague káuxa. Ha'e nunga rupi nda'evei ngaru oĩa py ikuai aguã. Ha'e rami vy Moisés ha'e Arão renonde py ha'e kuery ovaẽ vy

⁷ aipoe'i okuapy:

— Ore ma ha'eve'ŷ va'e roiko peteĩ ava omano va'ekue re ropoko rire. Nda'evei 'rã ri nda'u SENHOR pe ore voi mba'emo rome'ẽ aguã Israel kuery reve Páscoa ára py?

⁸ Moisés ombovai:

— Pearõ ranhe, ha'e xee ajapyxaka 'rã ainy mba'exa pa peẽ kuery re SENHOR ojapo uka rã aendu aguã — he'i.

⁹ Ha'e gui ma SENHOR aipoe'i Moisés pe:

¹⁰ — Ndeayvu ke Israel kuery pe, ha'e vy aipo're: Xapy'a rei amongue pende kuery va'e regua, e'ŷ vy raka'eve rã peneramymino kuery ikuai va'erã regua ikuai 'rã ha'eve'ŷ va'e omano va'ekue káuxa. Ha'e rami e'ŷ vy penderekoa gui mombyry oguata teĩ ha'eve nho 'rã Páscoa regua ngaru ojapo aguã SENHOR pe.

¹¹ Ha'e rami vy ha'e kuery mokoĩ jaxyia py 'rã ngaru ojapo, catorze araa va'e ka'aru ma javé. Ho'u 'rã okuapy mbojape imbovua reveguia e'ŷ, jai rogue iro va'e reve.*

¹² Pemoembyre eme neĩ kyrĩ'i ma voi ko'ẽ rã guarã, pemopẽ eme guive ikāgue'i. Páscoa pygua ngaru regua re ipara oĩa rami 'rã pejapo.

¹³ Ha'e rami avi xapy'a rei peteĩ ava ngarua pyguarã ha'eve va'e oiko, ha'e tape rupi ndoguatai va'eri Páscoa ára ngaru py ndooi ri ramo ha'e va'e oipe'aa 'rã heta va'e kuery mbyte gui, mba'eta ha'e va'e ára py mba'eve ndoguerui SENHOR pe ome'ẽ va'erã. Ha'e va'e ava re oĩ ae 'rã ojejayague re opaga aguã.

¹⁴ Ha'e gui penembyte amboae regua ikuai va'e Páscoa ára SENHOR pegua ngarua py ikuai avi ri vy lei ipara oĩa rami vy ae 'rã ikuai. Peteĩ'i lei oĩ pendevy ha'e amboae kuery pe joo rami.

Êxodo 40.34-38

¹⁵ Ha'e guiombojerovia atyrã ojapoaa ára py arai ou va'e ojao'ipa. Ha'e va'e oo ma SENHOR ayvu oĩaty ae. Ha'e rã ka'aru guive ko'ẽmba peve ma tata rami ju 'rã ojekuaa ombojeroviaaty áry rupi.

¹⁶ Ha'e rami ae tema oiko. Arai ojao'i kuerei 'rã, ha'e rã pyávy ma tata rami ju 'rã ojekuaa.

¹⁷ Oo áry gui arai ojeupi ovy nhavõ Israel kuery oguata 'rã oje'oivy. Ha'e gui arai optya oinya py ae ju 'rã Israel kuery optya avi okuapy.

¹⁸ SENHOR oikuaa ucaa rami vy Israel kuery oje'oi 'rã, ha'e gui SENHOR oikuaa ucaa rami vy ae ju 'rã optya okuapy. Ombojeroviaaty áry rupi arai optya oinya ja ma ikuai tema 'rã ha'e py.

¹⁹ Heta ára re ri ombojeroviaaty áry rupi arai optya teĩ Israel kuery SENHOR ojapo ucaa rami ikuai vy ndooi 'rã okuapy.

²⁰ Amongue py are'ŷ'i re arai optya 'rã oinya ombojeroviaaty áry rupi. Ha'e ramo SENHOR oikuaa ucaa rami vy ikuaive tema 'rã ha'e py, ha'e gui SENHOR oikuaa ucaa rami vy jevy 'rã oguata oje'oivy.

²¹ Amongue py ma ka'aru'i ramove ko'ẽmba peve'i 'rã arai optya oinya. Ha'e gui ko'ẽ rã arai ojeupi ovy ramo ma ha'e kuery oguata 'rã oje'oivy. Ara py e'ŷ vy pyávy teĩ arai ojeupi ramo oguata 'rã oje'oivy.

²² Xapy'a rei ombojeroviaaty áry rupi arai oĩ tema 'rã mokoĩ ára re, e'ŷ vy peteĩ jaxy re mba'e, e'ŷ vy areve mba'e teĩ hi'áry rupi arai oĩ teria ja Israel kuery ikuai tema 'rã ha'e py, ndoguatai. Ojeupi ovy ramo mae ma oguata ju 'rã oje'oivy.

²³ Ha'e rami py SENHOR oikuaa ucaa rami vy optya 'rã, ha'e gui SENHOR oikuaa ucaa rami vy ae ju 'rã oguata oje'oivy. SENHOR pe ojapo okuapy ojapo 'rã va'ekue, Moisés rupi SENHOR ojapo ucaa rami vy.

* 9:11 Ha'e kuery pe ma Nhanderuete ngaru ojapo uka amboae jaxy py, hi'ára pyguarã ndoiko katui rire.

10

Mokoī mimby guaxu prata guigua re ijayvuague

¹ Ha'e gui SENHOR aipoe'ive ju Moisés pe:

² — Ejapo uka mokoī mimby guaxu prata guigua. Pembota-mbota vy 'rā pejapo. Ha'e va'e pemonhe'ẽ 'rā heta va'e kuery pemboaty aguã, ha'e ikuiai gui oguata oje'oivy aguã guive.

³ Pemonhe'ẽ ramo heta va'e kuery onhemboatypa 'rā okuapy ndea py, oguy nhemboaty oĩaty rokẽ rexei'i rupi ae.

⁴ Petei'i mimby guaxu pemonhe'ẽ ramo ndea py onhemboja 'rā yvatekueve anho, Israel kuery mbovy rei e'ŷ regua ruvixa ikuai va'e ae.

⁵ Ha'e gui mokoīve ri pemonhe'ẽ ramo ma oje'oi 'rā kuaray oua katy ikuai va'ekue ranhe.

⁶ Pemonhe'ẽ jevy ramo oje'oi 'rā kuaray puku-a katy ikuai va'ekue. Pemonhe'ẽ va'e ha'e kuery oendu vy oikuua 'rā oje'oi aguã.

⁷ Ha'e rā ha'e kuery pemboaty jevy aguã ma pemonhe'ẽ avi 'rā teī hatã e'ŷ ta'vy.

⁸ Arão ramymino kuery sacerdote ikuai va'e ae 'rā omonhe'ẽ mimby guaxu. Pende kuery rekorã aeja raka'e rā peve guarã.

⁹ Ha'e gui pendeyvy re ae pendekuai jave penderovaigua kuery reve pepu'ã aguã katy peje'oi ramo penemoi vai okuapy ramo pemonhe'ẽ avi 'rā mimby guaxu. Ha'e ramo xee SENHOR Penderuete aña py peẽ kuery re ama'ẽ ramo peo jepe 'rā penderovaigua kuery gui.

¹⁰ Ha'e rami ae avi pevy'a aguã ára py, xevy ngaru pejapoa py mba'e, ha'e jaxy jypy'ia py guive pemonhe'ẽ avi 'rā mimby guaxu. Ha'e va'e jave py mba'emo peapypa vy peme'ẽ, ha'e peteī rami pendekuaia regua peme'ẽ va'e áry rupi pemonhe'ẽ ramo xee Penderuete aña py ama'ẽ 'rā pendere. Xee ma SENHOR Penderuete aiko.

Sinai gui Israel oje'oipaague

¹¹ Ha'e gui ma mokoī ma'etŷa py, mokoī jaxya re vinte ára ma jave arai ojeupi ovy oguy nhemboaty oĩaty áry rupi oĩague gui.

¹² Ha'e ramo Israel kuery Sinai regua tekao e'ŷa py ikuiai gui oguata oje'oivy. Oguata-guata oje'oivy Parã regua tekao e'ŷa py ju arai opyta peve.

¹³ Ha'e rami vy oguata ypy'i oje'oivy, SENHOR Moisés pe ojapo ukaa rami vy.

¹⁴ Jypyra ete ma Judá ramymino kuery pegua bandeira reraa ranhe oje'oi ngupivegua kuery reve. Ha'e va'e regua xondaro kuery ruvixa ma Aminadabe ra'y Naassom.

¹⁵ Ha'e gui Issacar ramymino kuery regua xondaro kuery ruvixa ma Zuar ra'y Natanael.

¹⁶ Zebulom ramymino kuery xondaro kuery regua ruvixa ma Helom ra'y Eliabe.

¹⁷ Ha'e gui ma ombovaipa okuapy ombojeroviaaty, ha'e Gérson ha'e Merari ramymino kuery oje'oi vy ogueraapa henoiny.

¹⁸ Ha'e va'e rire ma Rúben kuery pegua bandeira reraa ju oje'oi ngupivegua kuery reve. Ha'e kuery va'e regua xondaro kuery ruvixa ma Sedeur ra'y Elizur.

¹⁹ Ha'e gui Simeão ramymino kuery regua xondaro kuery ruvixa ma Zurisadai ra'y Selumiel.

²⁰ Gade ramymino kuery regua xondaro kuery ruvixa ma Deuel ra'y Eliasafe.

²¹ Ha'e gui ma oje'oipa ju Coate regua kuery mba'emo iky'a e'ŷ va'e ogueraa reve. Ha'e gui ha'e kuery ovaẽ e'ŷ mbove ma voi omopu'ãmbaa ju 'rā imoiny ombojeroviaaty.

²² Ha'e va'e rire ma Efraim ramymino kuery pegua bandeira reraa ju oje'oi ngupivegua kuery reve. Ha'e kuery regua xondaro kuery ruvixa ma Amiûde ra'y Elisama.

²³ Ha'e gui Manassés ramymino kuery regua xondaro kuery ruvixa ma Pedazur ra'y Gamaliel.

²⁴ Benjamim ramymino kuery regua xondaro kuery ruvixa ma Gideoni ra'y Abidã.

²⁵ Ha'e gui ma Dã ramymino kuery pegua bandeira reraa ju oje'oi ngupivegua kuery reve. Ha'e va'e kuery ma heta va'e kuery ha'e javi rakykue oje'oi oarõa rupi. Ha'e kuery va'e regua xondaro kuery ruvixa ma Amisadai ra'y Aiezer.

²⁶ Ha'e gui Aser ramymino kuery regua xondaro kuery ruvixa ma Ocrã ra'y Pagiel.

- ²⁷ Naftali ramymino kuery regua xondaro kuery ruvixa ma Enā ra'y Aira.
²⁸ Ha'e rami ae oguata oje'oivy Israel kuery meme, oxondaro kuery reve.

Hobabe pe ha'e kuery reve oo aguā re Moisés ojerureague

²⁹ Ha'e gui Moisés ijayvu Hobabe pe. Ha'e va'e ma hatyu Midiā pygua Reuel ra'y. Ha'e vy aipoe'i:

— Roguata roje'oivy peteī henda orevy SENHOR “Ame'ē 'rā pēvy” he'iague katy. Eju orerupive, ha'e ramo rojapo porā 'rā ndevy. Mba'eta Israel kuery pe mba'emo porā ome'ē aguā re SENHOR ijayvu.

³⁰ Ha'e ombovai:

— Xee ma ndaa reguai. Xeyvy xeretarā kuery rekoa py ae 'rā aa — he'i.

³¹ Ha'e gui ixupe Moisés aipoe'ive ju:

— Ne'exa, orereja eme ke, mba'eta ndee ma reikuua tekao e'ŷa rupi orekuai ranhe 'rāa. Ha'e gui ndee ma orererekooarā 'rā reiko.

³² Xapy'a rei ore kuery reve reo ri ramo ndevy pe rojapo porā 'rā SENHOR ore kuery peojapoa rami ae — he'i.*

³³ Ha'e gui ma oje'oipa ma SENHOR pegua yvty katy'i ikuaiague gui. Mboapy araa re oguata oje'oivy. Ha'e kuery renonde rupi SENHOR guexeve guarā ojapo va'ekue ryru reraa kuery oguata oje'oivy mboapy ára re, ha'e kuery optytu'u aguā ojou aguā.

³⁴ Ha'e gui ára py arai SENHOR ombou va'ekue oo tema ha'e kuery áry rupi, ikuiaigui oje'oi jave voi.

³⁵ Ha'e gui Nhanderuete ayvu ryru oupia heravy nhavō Moisés aipoe'i 'rā:

— SENHOR, epu'ā ke nderovaigua kuery remoaimbā aguā. Tove nerondenidegui tonhamba ndere nda'ija'ei va'e.

³⁶ Ha'e gui optya ju nhavō aipoe'i 'rā:

— SENHOR, ejevy ju ke mbovy rei e'ŷ Israel kuery ikuiai py.

11

Israel kuery ijayvu ete okuapyague

¹ Ha'e gui ma SENHOR oendua py teī ha'e kuery ijayvu ete okuapy mba'emo oiko va'e re. SENHOR oendu ramo ipoxya hendy. Ha'e rami vy ha'e kuery mbyte tata SENHOR guigua ou vy omomba hekoaply rupi ikuai va'e.

² Ha'e ramo Moisés pe ha'e kuery ojerure okuapy ramo SENHOR pe ha'e ju onhembo'e. Ha'e ramo tata oguepa.

³ Ha'e nunga rupi ha'e va'e tekao ma oenoī Taberá, ha'e kuery mbyte tata SENHOR guigua hendy ma rire.*

⁴ Ha'e gui ha'e kuery mbyte opa marā ikuai va'e oendu okuapy Egito pygua kuery rembi'u regua ho'uxe reia. Ha'e ramo Israel kuery voi ojae'opa reve aipoe'i okuapy:

— Mava'e 'rā tu ome'ē xo'o ja'u va'erā?

⁵ Aŷ ma nhanema'endu'a jakuapy Egito yvy re pira ja'u rive jakuapyague re, ha'e pepino, melão, alho ka'aguy regua, cebola ha'e alho re guive.

⁶ Ha'e rami teī aŷ ma nhanenhe'ē voi ipirupa ma 'rā, mba'eta amboae ramigua ma voi ndajajouvei, kova'e maná e'ŷ vy — he'i okuapy.

⁷ Maná ma coentre ra'yīgue ramigua, jaexa rā yvyra ayxy ramigua rei.

⁸ Heta va'e kuery opa rupi oeka oje'oivy vy omono'ō vy omongu'i 'rā mba'emo mongu'ia py, ha'e'ŷ vy angu'a py ojoxo 'rā. Ha'e rami vy omomimoī 'rā oja py, e'ŷ vy iku'ikuegui ojapo 'rā mbojape. Ja'u rā mbojape azeite reve ojapo pyre rami hee va'e.

⁹ Pyávy ha'e kuery rekaoa rupi yxapy ho'a reve maná ho'a avi 'rā oiny ha'e rupi.

Moisés ojapo 'rā va'ekue ipoyi etea rupi ijayvuague

* 10:32 Moisés ngupive ogueraaxe ngovaja Hobabe. Ha'e va'e ma ndooxei ranhe teī oo nho (Juízes 1.16). * 11:3 Tery Taberá ma “Okaia” 'ea reve nhaendu rā joo ramigua.

¹⁰ Heta va'e kuery ojae'o rā Moisés oendu, mba'eta peteī-teī gua'y kuery reve ngoo rokē py ojae'o okuapy. Ha'e ramo SENHOR poxya hendy. Moisés voi oexa vy ndojou porāi.

¹¹ Ha'e ramo Moisés aipoe'i SENHOR pe:

— Mba'e re tu mba'emo vai rejapo xee nerembiguai re? Mba'e re tu ndaxejou porāvei nerенонде py? Mba'eta xemoī kova'e kuery ha'e javi re apena aguā rami.

¹² Xee ae ri ty'y kova'e kuery moingoare aiko? Xee ae ri ty'y areko'i va'ekue xevy aipo're aguā: “Eraapa ndejyva áry okambu'i va'e rami, yvy aura reve neramoī kuery pe ame'ē aguā re xeayvuague peve”, 're aguā?

¹³ Magui 'rā tu xee ajou xo'o ha'e kuery ha'e javi peguarā? Mba'eta xerenonde py ojae'o reve aipoe'i okuapy: “Eme'ē na xo'o ro'u va'erā.”

¹⁴ Ha'e gui xee ae'i ma voi ndaropo'akai 'rā kova'e kuery ha'e javi, xevy ipoyi vaipa ramo.

¹⁵ Nami ae ta ri xererekoy vy ma xejuka vyvoi, ajerure. Xemboaxy ri vy xemoingo eme ajexavai aguā rive.

Moisés pytyvōarā setenta avakue Nhanderuete oiporavo ukaague

¹⁶ SENHOR aipoe'i Moisés pe:

— Emboaty ha'vy setenta avakue Israel kuery monetaaty va'e regua rexā va'ety, nhomongetaa rupi ha'e heta va'e kuery re openaa rupi ae ikuai va'ety. Ha'e va'e kuery remonhembojapa 'rā oguy nhemboaty oītā rexei, ha'e py ikuai aguā nerенонде.

¹⁷ Ha'e py ma xee aguejy vy xeayvu 'rā ndereve. Ha'e Xenhe'ē ndere oī va'e ambouve vy ha'e kuery re voi amoī 'rā. Ha'e vy ndereve ha'e kuery ikuai avi 'rā heta va'e kuery re openaa rupi, ndee anho'i e'ŷ repena aguā.

¹⁸ Ha'e vy aipo're 'rā heta va'e kuery pe: “Pejeky'a'o uka ju ko'ē rā guarā, pe'u aguā xo'o. Mba'eta peē kuery pejae'o reve ‘Mava'e tu ome'ē ta xo'o ja'u va'erā? Egito yvy re ma jaiko porā va'ekue’, peje ramo SENHOR oendu. Ha'e rami vy pendevy SENHOR ome'ē 'rā xo'o, ha'e pe'upa 'rā.

¹⁹ Peteī ára'i re rive'ŷ 'rā pe'u, neī mokoī ára'i 'rā e'ŷ, neī peteī nhiruī neī dez, neī vinte ára re'i e'ŷ guive.

²⁰ Ha'e rami 'rāgue py peteī jaxy pukukue re 'rā pe'u, peneapyīguā gui oēmba rā pejeguarupa peve. Mba'eta SENHOR penembyte oiko va'e ndapeipotavei, ha'e henonde py pejae'o reve ‘Mba'e re tu Egito gui jajupa raka'e?’ peje va'ekue”, 're 'rā ha'e kuery pe — he'i.

²¹ Ha'e ramo Moisés ombovai:

— Xee ma seiscentos mil avakue opu'ā okuapy va'e mbyte py aiko. Ha'e ramo mba'exa tu aipo're xevy: “Eme'ē ha'e kuery pe xo'o, peteī jaxy pukukue re ho'u okuapy aguā” 're?

²² Mymba kuery vexa'i ha'e vaka ty'y ojukapaa 'rā ha'e kuery ha'e javi ho'u va'erā? Tyrā pa ye'ē rupi pira ikuai va'e ha'e javi 'rā omono'ōmbaa ha'e kuery ho'u va'erā? — he'i.

²³ Ha'e ramo Moisés pe SENHOR ombovai:

— Xee SENHOR jyva nda'u ijapu'a'i ri? Aŷ'i ma voi rexā 'rā xeayvuague oiko rā tyrā pa anya! — he'i.

²⁴ Ha'e gui Moisés oē vy heta va'e kuery pe SENHOR omombe'upa SENHOR ijayvuague. Ha'e vy ha'e kuery monetaaty setenta avakue ikuai va'e omboaty imbokuapy oo yvýry rupi.

²⁵ Ha'e ramo SENHOR oguejy arai rupi. Ha'e vy ijayvu ixupe. Ha'e vy Nhe'ē hexe oī va'e ombouve vy omoī avi setenta nhomongetaaty ikuai va'e re. Ha'e va'e kuery re Nhe'ē oī avi ramo omombe'u okuapy ixuguigua, teī ha'e va'e rire ma nda'ijayvuwei ha'e rami.

²⁶ Ha'e gui ma mokoī avakue opyta tekota py. Peteī ma Eldade hery va'e, ha'e rā amboae ma Medade. Ha'e kuery re voi Nhe'ē oī, mba'eta ha'e kuery voi nhomongetaaty kuery regua teī oo katy ndooi va'ekue. Ha'e rami vy ha'e kuery voi ayvu omombe'u okuapy tekota mbyte ikuia py.

²⁷ Ha'e ramo peteī kunumi onha ovv vy omombe'upa Moisés pe. Ha'e vy aipoe'i:

— Eldade ha'e Medade voi ri tu ayvu omombe'u okuapy — he'i.

²⁸ Ha'e ramo Num ra'y Josué, Moisés pytyvōarā oiporavo va'ekue va'e ombovai vy aipoe'i:

— Xeruvixa Moisés, emokyriři na.

²⁹ Ha'e rā Moisés aipoe'i ixupe:

— Ndee ta'vy nerakātē'ý teve xere? SENHOR pegua kuery profeta meme ikuai 'rāgue, ha'e kuery ha'e javi re SENHOR Onhe'ẽ omoī aguā! — he'i.

³⁰ Ha'e va'e rire Moisés ma tekao katy ju oje'oi Israel kuery mongetaaty kuery reve.

Guyra codornizes Nhanderuete ombouague

³¹ Ha'e gui SENHOR-a gui peteři yvytu oipeju ovvyy vy ye'ẽ áry gua'ogueru guyra codornizes. Ha'e vy tekao áry ha'e javi rupi omoāimba heravy peteři ára jaguataa rami rai'i peve. Ijyvýry rupi opyta peteři metro peve yvy py.

³² Ha'e ramo ha'e va'e árave heta va'e kuery oje'ipa, pyávy ha'e ko'égue voi, ha'e vy ojopy oje'ovy guyra ikuai va'e. Amongue mboapy'ive ojopy va'ekue ri cem voxā renyē ogueru. Ha'e vy tekao ha'e javi rupi omboaty imoiny ojeupe guarā ae.

³³ Ha'e rami teři ijuru py xo'o oime rei reve, oixu'u jepe e'ý re voi ha'e kuery rovai SENHOR poxya hendy vy ojukapa mba'emo vai py.

³⁴ Ha'e nunga rupi ha'e va'e tekao ma oenoña Quibrote-Hataavá, ha'e py Egito regua tembi'u re nda'eveive va'ekue ojatypaa rire.[†]

³⁵ Ha'e gui Quibrote-Hataavá gui ma ha'e kuery oje'oive Hazerote katy, ha'e vy opyta ju ha'e py.

12

Moisés rovai rupi Miriā ha'e Arão ijayvuague

¹ Ha'e gui Moisés ogueraa peteři kunha Cuxé pygua gua'yxyrā. Ha'e ramo Miriā ha'e Arão ijayvu okuapy Moisés rovai, Cuxé pygua gua'yxyrā ogueraa va'ekue káuxa.

² Ha'e vy aipoe'i okuapy:

— Xap'a rei nda'u Moisés rupi anho ri SENHOR ijayvu? Nhande rupi voi nda'u nda'ijayvui avi 'rā? — he'i ramo SENHOR oendu.

³ Moisés ma ava onhemo'yvy'i va'e, ko yvy re avakue ikuai va'e gui voi yvy'iive va'e oiko.

⁴ Are'ý'i re SENHOR aipoe'i Moisés pe, Arão ha'e Miriā pe voi:

— Peě kuery mboapy ma peě 'rā oguy nhemboaty oī va'e gui — he'i. Ha'e ramo oēmba mboapyve.

⁵ Arai rupi SENHOR oguejy ouvy vy oo rokē py opyta ho'amy. Ha'e vy oenoñ Arão ha'e Miriā. Ha'e ramo ha'e kuery ojexa uka.

⁶ Ha'e ramo aipoe'i ha'e kuery pe:

— Pendu ke aŷ xee xeayvu ramo. Penembyte profeta oiko ramo ma ixupe xee SENHOR ajekuaa uka 'rā mba'emo aexa ukaa py, ha'e'ý vy oexa ra'ua py 'rā xeayvu hexeve.

⁷ Ha'e rā xerembiguai Moisés reve ma nami e'ý ju aiko, mba'eta ha'e ma ojeroviapy ete oiko xero pygua kuery ha'e javi re openaa rupi.*

⁸ Hexeve ma xeayvu 'rā xejuru rupi ae, oikuaa porā aguā rami, ayvu haxy rei va'e rupi e'ý. Ixupe xee SENHOR ajekuaa rā xerexa guive. Mba'exa ha'vy tu ndapekyjei ri xerembiguai Moisés rovai rupi pendeayvu aguā? — he'i.

⁹ Ha'e rami vy ha'e kuery rovai SENHOR poxya hendy. Ha'e rire ojepe'a.

¹⁰ Arai voi ojepe'a ovvyy oo áry gui. Ha'e ramove Miriā oikuuaa rā hexe oī ma lepra, yro'ý apí rami xiři rei va'e. Miriā re Arão oma'ẽ ramo lepra reveguia ma hi'aí.

¹¹ Arão aipoe'i Moisés pe:

— Ake'e xeruvixa! Ndevy ajerure: Orere emoī eme orerekvaia, mba'eta ore'arandua rupi e'ý rojapo ha'e nunga, rojejavu ete ange.

¹² Nhanereindy topyta eme kyri'i va'e oity pyre rami, mbyte rupi ho'okue ho'apa va'e rami — he'i.

† 11:34 Tery Quibrote-Hataavá ma "Tembí'u re nda'eveive va'ekue ojatyaague" 'ea. * 12:7 Hebreus 3,2,5

¹³ Ha'e ramo SENHOR pe Moisés ojapukai vy aipoe'i:

— Xeruete, ajerure remonguera ju aguã.

¹⁴ SENHOR ombovai Moisés pe:

— Xapy'a rei hova re tuu onyvõ va'e rire nda'u sete araa peve ndopytai 'rāgue oximbaba py? Ha'e voi topyta ranhe sete ára tekoá gui mombyry'i. Ha'e va'e rire ma ha'eve peru ju aguã — he'i.

¹⁵ Ha'e rami rā Miriā sete ára peve omondouka ranhe tekoá gui mombyry'i. Oguerua e'ýa ja heta va'e kuery ndoguatai tekoá gui.

¹⁶ Ha'e va'e rire mae ha'e kuery oje'oi ju Hazerote gui, ha'e Parā regua tekoá e'ýa py ju ikuai.

13

Deuteronômio 1.19-25

¹ SENHOR aipoe'i Moisés pe:

² — Emondouka ke avakue Canaã yvy re oexa pota va'erā, mba'eta ame'ẽ 'rā Israel kuery yvyrā. Peneramoí kuery peteñ-teñ regua gui remondouka 'rā peteñ ava, huvixa oiko va'e ae — he'i.

³ Ha'e ramo Moisés omondouka Parā regua tekoá e'ýa py ikuiai gui ae, SENHOR aipoe'iague rami vy. Ha'e va'e avakue ma Israel kuery ruvixa ikuai va'e meme.

⁴ Po rami ma ha'e va'e kuery rery: Rúben kuery regua ma Zacur ra'y Samua;

⁵ Simeão kuery regua ma Hori ra'y Safate;

⁶ Judá kuery regua ma Jefoné ra'y Calebe;

⁷ Issacar kuery regua ma José ra'y Jigeal;

⁸ Efraim kuery regua ma Num ra'y Oséias;

⁹ Benjamim kuery regua ma Rafu ra'y Palti;

¹⁰ Zebulom kuery regua ma Sodi ra'y Gadiel;

¹¹ José kuery regua, ha'e Manassés kuery regua ae ma Susi ra'y Gadi;

¹² Dã kuery regua ma Gemali ra'y Amiel;

¹³ Aser kuery regua ma Micael ra'y Setur;

¹⁴ Naftali kuery regua ma Vofsi ra'y Nabi;

¹⁵ Gade kuery regua ma Maqui ra'y Geuel.

¹⁶ Ha'e va'e avakue ma Moisés omoí yvy re oexa pota va'erā omondouka aguã. Ha'e gui Num ra'y Oséias rery Moisés oguerova vy Josué ju omboery.

¹⁷ Ha'e gui Canaã yvy katy Moisés omondouka oexa pota aguã. Ha'e vy aipoe'i ha'e kuery pe:

— Peñ Neguebe katy, ha'e yvyty ikuai va'e rupi ju 'rā peo.

¹⁸ Pexa 'rā yvy peikuaa aguã mba'exa pa ra'e, ha'e hexegua kuery re guive peikuaa pota, imbaraetekue tyrā pa ikangykue, ndaetai tyrā pa heta.

¹⁹ Ha'e peikuaa pota 'rā mba'exa pa yvy ha'e kuery ikuai re, iporā tyrā pa na'iporāi, ha'e mba'exa pa tetã ikuai voi ra'e, tekoá rive tyrā pa tetã ikorapa va'e.

²⁰ Pexa avi mba'exa pa ra'e yvy itui, iporā tyrā pa na'iporāi, ha'e gui ka'aguy tyrā pa any. Penekyre'ý tema, ha'e Peru mba'emo aju ha'e va'e yvy guigua — he'i. Ha'e va'e jave ma uva ijaju ypya ára ae.

²¹ Ha'e rami rā ha'e kuery oje'oi vy ha'e yvy rupi oexa pota oje'oivy, Zim regua tekoá e'ýa guive Reobe peve Hamate py ovaëa'i py.

²² Neguebe rupi oje'oi vy ou okuapy Hebrón peve. Ha'e py ma ikuai Enaque ra'y kuery Aimã, Sesai ha'e Talmai. (Hebrón tetã ojapoa ma sete ma'etý teri Egito yvy re Zoã tetã ojapoa e'ý mbove ma voi.)

²³ Ha'e rire ma Escol yvyugua peve ju ou. Ha'e py ma ojaya okuapy peteñ xã uva hi'y reve. Ha'e va'ekue ma mokoí avakue ogueru peteñ yvyra po'i re ombo'y vy. Romã'a ha'e figo'a avi ogueru.

²⁴ Ha'e va'e yvyugua pe ma “Escol” oenoī, ha'e py Israel kuery uva'a ojaya rire.*

Deuteronomio 1,26-33

²⁵ Ha'e gui yvy oexa vy oje'oiague gui quarenta ára opaa py ojevypa ju.

²⁶ Oguata jogueruvy vy ovaẽmba ju Moisés ha'e Arão-a py, ha'e Israel kuery ha'e javi onhemboaty okuapy py Parã regua tekao e'ŷa re, Cades py ae. Ha'e kuery pe omombe'upa okuapy oexa va'ekue, heta va'e kuery ha'e javi pe voi. Oexa uka avi mba'emo aju ha'e va'e yvy gui ogueru va'ekue.

²⁷ Ha'e vy Moisés pe omombe'u vy aipoe'i okuapy:

— Roje'oi yvy oremondoukaague va'e peve. Ha'e gui anhetē ete ha'e py kamby ha'e ei ndoatai. Kova'e ma mba'emo'a ha'e pyguare.

²⁸ Ha'e rami avi avakue ha'e va'e yvy re ikuai va'e ma imbaraetekue ae. Hetā voi tuvixa ete va'e ikuai, ikorapa va'e meme guive. Ha'e py roexa avi Enaque ramymino kuery.†

²⁹ Amalequita kuery ma Neguebe re ikuai. Ha'e rã yvyty rupi ma heteu, jebuseu ha'e amorreuu kuery ikuai. Ye'ẽ katy'i rupi ma cananeu kuery ikuai, Jordão yakã yvýry rupi guive — he'i okuapy.

³⁰ Ha'e gui Calebe ju nhomokyririmbá heta va'e kuery Moisés renonde py ikuai va'e. Ha'e rami vy aipoe'i:

— Ma'ẽ, jaje'oi jajopy aguã ha'e va'e yvy, mba'eta nhandepo'aka 'rã ha'e kuery re — he'i.

³¹ Ha'e rami teĩ avakue mboae hexeve oje'oi va'ekue aipoe'i okuapy:

— Nda'evei teve ha'e va'e kuery rovai jaje'oi aguã, nhande kuery gui ipo'akapave va'e ramo — he'i okuapy.

³² Ha'e rami vy Israel kuery oendupaa py ha'e kuery ijayvu rei okuapy yvy oexa va'ekue re. Ha'e vy aipoe'i:

— Yvy mbyte rupi roexa pota aguã roaxaague va'e ma hekoia va'e kuery mombaarã itui. Ha'e py roexa va'ekue ma ava ja'eakue meme,

³³ gigante kuery avi roexa karamboae. Ha'e vy rojoexa ramo tuku'i rami rive orekuai, ha'e kuery pe voi ha'e rami ae avi orerexa rã — he'i okuapy. Enaque ramymino kuery ma gigante guigua meme ikuai raka'e.

14

Heta va'e kuery oyvyrã katy ndooxeiague

¹ Ha'e gui heta va'e kuery opu'ãmba vy ojapukai atã rei okuapy. Ha'e va'e pyávy ha'e kuery ojae'opa okuapy.

² Ha'e vy Israel kuery ha'e javi ijayvu rei okuapy Moisés ha'e Arão re. Ha'e vy aipoe'i:

— Ha'eveve 'rãgue Egito yvy re, e'ŷ vy kova'e tekao e'ŷa py ma voi nhamanomba va'e rire!

³ Mba'erã tu SENHOR nhandererupa kova'e yvy re? Kyxe py nhamanomba aguã pa, ha'e nhandera'yxy kuery ha'e nhandera'y kue'iry escravo-rã ogueraapaa aguã teve? Nda'evei nda'u Egito yvy katy ae ju jajevypa aguã — he'i.

⁴ Joupe-upa aipoe'i okuapy:

— Jajou peteĩ nhanderuvixarã, Egito yvy katy jajevypa aguã — he'i okuapy.

⁵ Ha'e rami rã Israel kuery oexaa py Moisés ha'e Arão guenapy'ã re oĩ ngova yvy re omovaẽ reve.

⁶ Ha'e rami ae avi yvy rexaare kuery va'e regua Num ra'y Josué ha'e Jefoné ra'y Calebe omondoro okuapy oao.

⁷ Ha'e vy Israel kuery ha'e javive pe ijayvu vy aipoe'i:

— Yvy mbyte rupi roaxaague va'e rima iporã ete.

⁸ SENHOR nhandejou porã ri vy ojapo 'rã ha'e va'e yvy re nhavaẽ aguã rami, nhandevy ju omboaxa aguã. Ha'e va'e yvy ma kamby ha'e ei oata e'ŷa.

* 13:24 Tery Escol ma “Uva'a” 'ea. † 13:28 Enaque ra'y kuery ma gigante ikuai raka'e (versículo 33).

⁹ Ha'e nunga rupi pepu'ã rei eme SENHOR re, pekyje eme guive ha'e pygua avakue gui, mba'eta mbojape ja'ua rami nhamomba avi 'rã ha'e kuery. Ha'e kuery reve noïvei ma hepyarã va'ekue. Ha'e rã nhande kuery reve ma SENHOR ae 'rã oiko. Pekyje eme ha'e kuery gui — he'i.

¹⁰ Ha'e rami teī heta va'e kuery ha'e javi jogueroayvu okuapy ita py ojapipa aguã re. Ha'e rami teī ha'e kuery pe SENHOR rexakã ojekuaa xapy'a oguy nhemboaty oïaty rupi.

¹¹ Ha'e rami vy SENHOR aipoe'i Moisés pe:

— Raka'e peve nda'u kova'e kuery xerek a'ã 'rã okuapy? Raka'e peve nda'u ndojeroviai 'rã xere, ha'e kuery mbyte rupi opa marãgu hexa pyrã amoingo va'eri?

¹² Ha'e nunga rupi ambou 'rã mba'eaxy vaikue ijukapaarã, name'ëvei ma 'rã ijyvyrã va'ekue. Ha'e gui ndegui ju amoingo 'rã petē regua kova'e kuery gui hetave ha'e imbaraetekueve va'e — he'i.

Heta va'e kuery re Moisés ojerureague

¹³ Ha'e ramo Moisés ombovai SENHOR pe:

— Egito pygua kuery mbyte gui ndepo'akapaa rupi kova'e kuery reipe'apa rire teī remomba ramo Egito pygua kuery oendupa 'rã.

¹⁴ Ha'e rami vy ha'e kuery omombe'u uka 'rã kova'e yvy re ikuai va'e pe. Ha'e gui SENHOR, kova'e yvy pygua kuery oendu ae ma ndevyguia kuery mbyte rupi reikoa, ha'e ha'e kuery rexa py ae rejexa ucaa. Ha'e kuery áry rupi ndeguigua arai oĩ, ha'e ha'e kuery renonde rupi arai opu'ã va'e py 'rã reo ara py, ha'e rã pyávy ma tata opu'ã va'e py 'rã reo.

¹⁵ Ha'e gui xapy'a rei ndevyguia kuery rejukapa vyvoi ramo amboae regua kuery nemombe'ua rã oendu va'ekue aipoe'i 'rã okuapy:

¹⁶ “Yvy re SENHOR ndogueraa kuaai ri nda'u ojeupega kuery, oura reve ha'e kuery pe ome'ë aguã re ijayvu va'ekue ri, ha'e nunga rupi ae ojukapa tekao e'ÿa py”, he'i 'rã okuapy.

¹⁷ Ha'e nunga rupi aÿ SENHOR, ajerure ndepo'akapa va'ea rexa uka aguã, ndeayvuague rami vy. Mba'eta aipo're va'ekue:

¹⁸ “Xee SENHOR ma xeporayvu va'e ha'e opa mba'e py anhomboaxy va'e, ambogue 'rã teko vai ha'e jejavya. Ha'e rami avi ojejavy va'ekue nambopaga e'ÿi 'rã. Ha'e rami 'rãgue py tuu kuery reko vaiague re ambou 'rã ta'y kuery voi ojexavai aguã, mboapya ha'e irundaya ikuiaia peve”, 're va'ekue.

¹⁹ Ha'e nunga rupi opa mba'e py renhomboaxy va'e vy embogue ke kova'e kuery reko vaia, heko vaia Egito yvy gui oje'oipa guive apy ovaëmba peve rembogue jepiaty rami.

Deuteronômio 1.34-40

²⁰ Ha'e ramo SENHOR aipoe'i:

— Ndeayvua ramo xee ambogue ma ha'e kuery reko vaia.

²¹ Ha'e rami avi anhetë ete xee SENHOR xee ae rekove rupi, ha'e xerexakãa yvy jave rupi ojekuaa va'erã va'e rupi aura vy aipoe'e:

²² avakue xerexakãa ha'e hexa pyrã Egito yvy re ha'e tekao e'ÿa rupi ajapo rã oexa va'ekue, ha'e gui dez-kue ma xerek a'ãa rupi naxenhe'ë rendui va'ekue,

²³ ha'e va'e regua neï peteïve ma ndoexai 'rã yvy peneramoï kuery pe ame'ë aguã re aura reve xeayvuague va'e. Tá, ndaxepotavei va'e kuery neï peteï'i ma voi ndoexai 'rã.

²⁴ Ha'e rã xerembiguai Calebe re ma amboae regua nhe'ë oĩ. Ha'e va'e ma xereve ete oiko riae ramo xee ajapo 'rã yvy oexa potaague re ae hekao aguã rami. Hamymino kuery avi 'rã ikuai ha'e py.

²⁵ Ne'ixa, amalequita ha'e cananeu kuery ma yvy'ã guy katy ikuai. Pejepekuavo ha'vy amboae katy. Ko'ë rã tapeo tekao e'ÿa katy ju, ye'ë pytã yvýry tape oo va'e rupi ae — he'i.

²⁶ Ha'e rire Moisés ha'e Arão pe ju SENHOR aipoe'i:

²⁷ — Raka'e peve 'rã tu aropo'aka kova'e kuery xerovai rupi ijayvu okuapy va'e? Xee aendupa ainy Israel kuery xere ijayvu rei okuapy ramo.

²⁸ Aipo're ha'e kuery pe: SENHOR aipoe'i: Xee ae rekove rupi aura vy aipoe'e: Xeapyxa py pendeayvuague ae ju 'rã ambou pendere.

²⁹ Mba'eta kova'e tekao e'ŷa py ae 'rã pemanomba, peẽ kuery va'e regua penderery omoĩa jave vinte ma'etŷ va'e ha'e pendetujakueve va'e guive, joupe-upe xerovai pendeayvu va'ekue ha'e javi.

³⁰ Ndapeupityi 'rã yvy pendekoarã ame'ẽ aguã re aura reve xeayvuague va'e py, Jefoné ra'y Calebe ha'e Num ra'y Josué va'e e'ŷ vy.

³¹ Ha'e rã pendera'y kuery pe "Escravo-rã ogueraapaa 'rã" peje va'ekue ri ha'e kuery ma ajapo 'rã ha'e py ovaẽmba aguã rami. Ha'e kuery ma oexa 'rã yvy peẽ ndapeipotai va'ekue.

³² Ha'e rã peẽ kuery ma kova'e tekao e'ŷa py 'rã pemanomba.

³³ Kova'e tekao e'ŷa rupi ma quarenta ma'etŷ re pendera'y kuery ikuai 'rã guymba kuery re openaa rupi. Pejejavya káuxa ae 'rã ha'e kuery ojexavai, kova'e tekao e'ŷa py xapirẽ penderetekue ho'upa peve.

³⁴ Mba'eta quarenta ára re yvy re pexa pota peje'oivy rire quarenta ma'etŷ re ju 'rã pejexavai pejejavyague re, peteĩ-teĩ ára rekovia peteĩ ma'etŷ 'rã oaxa. Ha'e rami vy pendupa 'rã xee rojou vaia regua.

³⁵ Xee SENHOR ha'e rami xeayvu rire ha'e rami ae ju 'rã ajapo kova'e kuery heko vai va'e xere opu'ã va'ekue re. Kova'e tekao e'ŷa py ae 'rã okanhy ovv, opa peve — he'i.

³⁶ Ha'e gui avakue yvy rexhaarã Moisés omondouka va'ekue ojevy vy ha'e va'e yvy re ijayvu rei vy ojapo heta va'e kuery ha'e javi yvy re ijayvu rei avi okuapy aguã rami.

³⁷ Ha'e va'e avakue yvy re ijayvu rei va'ekue ma SENHOR renonde py omanomba raka'e mba'eaxy vaikue gui.

³⁸ Ha'e rã Num ra'y Josué ha'e Jefoné ra'y Calebe ma avakue yvy rexhaarã oje'oi va'ekue va'e regua avi teĩ okuave.

Deuterônômio 1.41-46

³⁹ Ha'e nunga Moisés omombe'u Israel kuery ha'e javive pe. Ha'e ramo ha'e kuery iporiau vaipa ete okuapy.

⁴⁰ Ko'ẽ rai ramove ovypa vy oẽmba jogueruvy yvyty apyte katy. Ha'e vy aipoe'i okuapy:
— Apy ma orekuai, anhetẽ ae rojejavypa rire teĩ roo nho 'rã yvy nhandevy SENHOR ome'ẽ 'rã va'ekue re — he'i okuapy.

⁴¹ Moisés ombovai:

— Mba'e re ha'vy SENHOR ojapo ukaa rami e'ŷ pendekuai? Pendeayvua rami pendekuai aguã ma nda'eve porãi.

⁴² Tapeo eme ta'vy penderovaigua kuery renonde py pemanomba e'ŷ aguã, mba'eta SENHOR noïvei ma 'rã peẽ kuery mbyte.

⁴³ Ma'ẽ, penerononde rupi amalequita ha'e cananeu kuery ikuai. Pe'apa 'rã pekuapy ikyxe gui. Mba'eta SENHOR gui pejepe'a ma rire noïvei 'rã peẽ kuery reve — he'i.

⁴⁴ Ha'e ramive ma ha'e kuery onhea'ã tema okuapy yvyty rupi oje'oi aguã. Ha'e ramo teĩ SENHOR guexeve guarã ojapo va'ekue ryru ndogueraai ha'e kuery rekoia mbyte oĩa gui, neĩ Moisés voi ndooi.

⁴⁵ Ha'e ramo amalequita ha'e cananeu kuery yvyty rupi ikuai va'e oguejy vy ojukapa, Horma peve oitypa.

15

Lei mba'emo ome'ẽmby regua oĩa

¹ SENHOR aipoe'i Moisés pe:

² — Ndeayvu ke Israel kuery pe, ha'e vy aipo're: Yvy pendekoarã xee ame'ẽ va'erã re pevaẽ jave ma

³ mba'emo peapy vy peme'ẽ 'rã SENHOR pe, mymba mba'e pejuka vy penhemboayvuague pejapopa regua, e'ŷ vy mba'emo penhenhandua'i rami peme'ẽ va'e, e'ŷ vy ngaru hi'ára py pejapoa py SENHOR pe peapy 'rã heakuã porã va'e, vaka, vexa'i pejuka vy peme'ẽ va'e reve.

⁴ Ha'e gui SENHOR pe mba'emo ome'ẽ va'erã ogueru va'e ma ogueru avi 'rã peteĩ ryru trigo iporãve va'e, peteĩ ryru raxa'i azeite reve omoirũ va'ekue.

- ⁵ Ha'e Petei-tei vexa'i peme'ẽ va'e reve guarã Peru avi 'rã Petei ryru vinho penhoẽ reve peme'ẽ va'erã, mba'emo peapy vy peme'ẽ va'e ha'e mymba pejuka uka va'e áry.
- ⁶ Petei-tei vexa'i peme'ẽ va'e reve guarã Peru avi 'rã mba'emo aju guigua peme'ẽ va'erã. Mokoĩ ryru trigo iporãve va'e Peru, Petei ryru raxa'i azeite reve omoirũ mbyre.
- ⁷ Vinho Petei ryru raxa'i 'rã peme'ẽ SENHOR pe penhoẽ reve, peapy vy peme'ẽ ramo heakuã porã aguã.
- ⁸ Ha'e Gui toro ra'y peapy e'ŷ vy pejuka aguã perekat 'rã penhemboayvuague pejapopaa reguarã, ha'e'ŷ vy perovy'a aguã regua SENHOR pe peme'ẽ va'erã.
- ⁹ Toro ra'y reve Peru avi 'rã mba'emo aju guigua peme'ẽ va'erã. Mboapy ryru trigo iporãve va'e 'rã Peru, mokoĩ ryru rai'i azeite reve omoirũ mbyre.
- ¹⁰ Vinho penhoẽ reve peme'ẽ 'rã mokoĩ ryru rai'i, SENHOR pe mba'emo peapy vy peme'ẽ ramo heakuã porã aguã.
- ¹¹ Ha'e rami ae pejapo 'rã toro ra'y peme'ẽ va'e reve guarã, vexa ava, vexa'i ra'y ha'e kavara ava reve guarã guive.
- ¹² Petei-tei peme'ẽ va'e reve guarã 'rã Peru, mbovy pa peme'ẽa rami vy.
- ¹³ Ha'e py aegua kuery ojapo 'rã ha'e rami, mba'emo oapy vy SENHOR pe ome'ẽ ramo heakuã porã aguã.
- ¹⁴ Ha'e penembyte rupi ikuai avi 'rã amboae regua, peneramymino kuery ikuative-ive jave. Ha'e va'e regua ogueru avi 'rã mba'emo oapy vy SENHOR pe ome'ẽ va'erã, heakuã porã aguã. Peẽ kuery pejapoa rami ae avi 'rã ha'e kuery voi ojapo.
- ¹⁵ Peẽ kuery ha'e javi rekorã ma Petei'i aeja, pêvy ha'e amboae regua penembyte rupi ikuai va'e pe voi. Ha'e va'e ma raka'e rã peve guarã oĩ peneramymino kuery rekorã avi ikuai jave guarã. Peẽ kuery pendekuaia rami ae avi 'rã amboae regua kuery ikuai xee SENHOR renonde.
- ¹⁶ Petei'i lei oĩ 'rã pendekorã, peẽ kuery pe ha'e amboae regua penembyte rupi ikuai va'e pe voi — he'i.

¹⁷ SENHOR aipoe'ive ju Moisés pe:

- ¹⁸ — Ndeayvu ke Israel kuery pe, ha'e vy aipo're: Yvy xee rogueraa ague py pevaẽ jave yvy re mba'emo aju oiko va'ekue pe'u ta nhavõ SENHOR pe ranhe 'rã peme'ẽ mba'emo.
- ¹⁹ Jypyguia mba'emo pemongu'i va'ekue iporãve va'e Gui pejapo 'rã mbojape. Ha'e va'e ma Peru peme'ẽ va'erã. Mba'emo pemoa'yí va'ekue rami 'rã peme'ẽ.
- ²⁰ Jypyguia mba'emo pemongu'i va'ekue iporãve va'e guigua SENHOR peguarã ranhe 'rã peme'ẽ, peneramymino kuery ikuative-ive jave voi.

Levítico 4.13-21

- ²² — Ha'e Gui amongue py pejavy 'rã Moisés rupi SENHOR ojapo uka va'ekue ndape-japoia py.
- ²³ Mba'eta Moisés rupi meme SENHOR ojapo uka raka'e pêvy, ojapo uka ypya ára guive aŷ peve, ha'e peneramymino kuery ikuative-ive jave guarã guive.
- ²⁴ Ha'e Gui xapy'a rei potae vy e'ŷ pejapo 'rã ha'eve'ŷa rami, ha'e neĩ heta va'e kuery voi ndoikuuai okuapy. Ha'e rami vy ha'e kuery ha'e javi ome'ẽ 'rã Petei toro ra'y, oapya ramo SENHOR pe heakuã porã aguã. Mba'emo aju guigua reve 'rã ogueru, ha'e mba'emo rykue onhoẽ aguã ome'ẽ va'erã reve, pendekorã oeja pyre rami vy ae. Petei kavara ogueru avi 'rã jejavya regua ome'ẽ va'erã.
- ²⁵ Ha'e Gui sacerdote ojao'i uka 'rã Israel kuery ojejavvy okuapyague. Ha'e ramo ha'e kuery operdoaa 'rã, potae vy e'ŷ ojejavvy rire. Ha'e kuery ojejavvyague re ogueru 'rã mba'emo oapy vy SENHOR pe ome'ẽ va'erã. SENHOR renonde py ogueru avi 'rã ojejavvyague regua ome'ẽ va'erã.
- ²⁶ Ha'e ramo operdoaa 'rã Israel kuery ha'e javi, ha'e kuery mbyte rupi amboae regua ikuai va'e voi, ha'e javive otekoavy rire.
- ²⁷ — Amongue potae vy e'ŷ ojejavvy rire ogueru 'rã Petei kavara kunha Petei ma'etŷ va'e, ojejavvyague regua ome'ẽ va'erã.
- ²⁸ Ha'e ramo sacerdote ojao'i uka 'rã ojejavvyague, SENHOR renonde potae vy e'ŷ ojejavvy rire. Ha'e nungakue ojao'i uka ramo operdoaa 'rã.

²⁹ Israel kuery ae, ha'e'ŷ vy ha'e kuery mbyte amboae regua ikuai va'e teĩ peteĩ'i anho 'rã oĩ lei potae vy e'ŷ ojejavy va'ekue pe.

³⁰ Ha'e rã otekoavy potae va'e, ha'e pygua kuery ae, e'ŷ vy amboae regua teĩ SENHOR mboetea rupi e'ŷ rei oiko ramo oipe'aa 'rã heta va'e kuery mbyte gui,

³¹ SENHOR ayvu noendu potai rire, ha'e ndojapoxei ete ha'e ojapo uka va'ekue. Ha'e va'e oipe'aa 'rãe, ha'e hexe ae 'rã oĩ ojejavyague opaga aguã.

Sábado regua lei rupi e'ŷ oiko va'ekue ombopagaague

³² Tekoa e'ŷa py Israel kuery ikuai teri reve oikuua okuapy peteĩ ava sábado py va'eri xakã omono'õ oikovy rã.

³³ Ha'e rami vy xakã mono'õare ojou va'ekue ogueru okuapy Moisés ha'e Arão-a py, heta va'e kuery ha'e javi renonde py.

³⁴ Ojea ranhe openaa imoiny aguã, mba'eta ndoikuuai rei teri mba'exa pa hexe ojapo aguã.

³⁵ Ha'e ramo SENHOR aipoe'i Moisés pe:

— Ha'e va'e ava ma omano aguã rami oiko. Pavẽ 'rã ojapi ita py, tekaoa gui mombyry'ia py — he'i.

³⁶ Ha'e ramo ha'e kuery ha'e javi ma tekaoa gui mombyry'ia py ogueraa vy ojapipa okuapy ita py. Ha'e ramo omano, Moisés pe SENHOR ojapo ukaague rami vy.

Deuteronômio 22,12

³⁷ SENHOR aipoe'i Moisés pe:

³⁸ — Ndeayvu ke Israel kuery pe. Ha'e vy aipo're: Pembopotypa 'rã pendeao apy rupi, peneramymino kuery ikuative-ive jave guarã. Ao apy re peteĩ-teĩ poty 'rã pejokua ixã hovy va'e py.

³⁹ Ha'e nunga pexa nhavõ penema'endu'a 'rã SENHOR ojapo uka va'ekue ha'e javi re, pejapo ete aguã. Nda'evei pendep'y a re peipotaa oĩ va'e rami rive pendekuai aguã, neĩ mba'emo pexa vy peipota rei aguã guive, mba'eta ha'e nunga rupi pendekuai vy pendetavy rei ae ma.

⁴⁰ Ha'e rami 'rãgue py penema'endu'a ajapo uka va'ekue ha'e javi re, pejapo ete aguã. Ha'e vy 'rãe Penderuete renonde peiko iky'a e'ŷ va'e.

⁴¹ Xee ae ma SENHOR Penderuete, Egito yvy gui pendererupaare, Penderuete aiko aguã. Xee ae SENHOR Penderuete.

16

Coré, Datã ha'e Abirão SENHOR rovai opu'âxe okuapyague

¹ Peteĩ levita regua oiko Coate ramymino Isar ra'y Coré hery va'e.* Ha'e va'e ma ngupive ogueraa Rúben kuery regua, Eliabe ra'y kuery Datã ha'e Abirão, ha'e gui Pelete ra'y Om.

² Ha'e ramo ha'e va'e kuery ma Moisés renonde py opu'âxe okuapy duzentos e cinqüenta Israel kuery regua avakue reve, huvixarã heta va'e kuery oiporavo va'ekue, avakue omboetepy ikuai va'e meme.

³ Ha'e kuery onhemboaty okuapy Moisés ha'e Arão rovai opu'âxe vy. Ha'e vy aipoe'i okuapy ha'e kuery pe:

— Aŷ ha'eve ma! Mba'eta heta va'e kuery ha'e javive iky'a e'ŷ va'e ikuai, nhande kuery va'e regua peteĩ-teĩ ma iky'a e'ŷ va'e jaiko, nhande kuery mbyte SENHOR oiko ramo. Mba'e re tu ha'vy penhemboyvateve ri SENHOR pegua orekuai va'e gui? — he'i okuapy.

⁴ Ha'e nunga Moisés oendu vy guenapy'â re oĩ, ngova yvy re omovaẽ peve.

⁵ Ha'e rami vy ijayvu Coré ha'e hexeveguia kuery ha'e javi pe. Ha'e vy aipoe'i:

— Ko'ê rã aje'ive ma SENHOR oikuua uka 'rã mava'e ete pa ixupeguia ra'ea, ha'e mava'e pa iky'a e'ŷ va'e ojee omonhemboja va'erã. Mba'eta ha'e oiporavo va'ekue anho 'rã omonhemboja.*

* 16:1 Amongue Bíblia py hery Coré 'rãgue py Corá oĩ. Mokoïve tery ojeporu. * 16:5 2 Timóteo 2.19

⁶ Coré ha'e ndereveguá kuery ha'e javi, po rami 'rā pejapo. Peru ke hy'a'i heakuā porā va'e oapyaty,[†]

⁷ ha'e gui ko'ē rā pemboja 'rā tata. Hi'áry pemoī avi 'rā heakuā porā va'e SENHOR renonde py. Ha'e gui SENHOR oiporavo va'e ae ma 'rā iky'a e'ŷ va'e. Peẽ levita kuery pendekuai va'e, ha'eve ma aŷ pendeayvu — he'i.

⁸ Aipoe'ive ju Coré kuery pe:

— Aŷ ma Levi ramymino kuery, penduve tema.

⁹ Peẽ kuery pe rā nda'u mba'e'ŷ'i ri Israel kuery Ruete ha'e kuery mbyte gui pendeporavo hexe penhemboja aguā, ha'e SENHOR ombojeroviaaty rupi ixupe pemba'eapo aguā heta va'e kuery re vy?

¹⁰ Mba'eta Coré, ha'e ma nemonhemboja ojee, ha'e ndereveguá Levi ramymino kuery voi. Mba'e re tu sacerdote ete avi peikoxe ri?

¹¹ Ha'e nunga rupi ndee ha'e ndereveguá ikuai va'e ma SENHOR rovaigua meme pendekuai. Ha'e gui Arão ma mba'exagua tu oiko, hovai re pendeayvu rei pekuapy aguā? — he'i.

¹² Ha'e gui Moisés oenoī uka Eliabe ra'y kuery Datā ha'e Abirão. Ha'e rami teĩ ha'e kuery ma aipoe'i uka:

— Ore kuery ma ndorooi 'rāe.

¹³ Ndee ma orepe'a va'ekue yvy kamby ha'e ei oata e'ŷa gui, kova'e tekaoa e'ŷa py ju romanomba aguā, ha'e gui aŷ renhemoī ukaxe oreruvixarā orere ndepo'aka aguā.

¹⁴ Mba'eta ndee ndorereraai teri yvy kamby ha'e ei oata e'ŷa py, neĩ orevy nereme'ēi guive mba'ety ha'e vinho ty. Remombo ta ri ty'y yvy ku'ikue kova'e avakue rexā py? Ha'e nunga rupi ore kuery ma ndorooi 'rā — he'i uka.

¹⁵ Ha'e ramo Moisés ivai vaipa reve aipoe'i SENHOR pe:

— Ha'e kuery ndevy mba'emo ome'ē teĩ ema'ē rive ome'ē va'e re. Mba'eta xee ma ha'e kuery gui neĩ peteĩ mburika ma voi ndaraai, neĩ peteĩ henda py ma voi ndajapo vai ha'e kuery pe — he'i.

¹⁶ Moisés aipoe'ive ju Coré pe:

— Ndee ha'e ndereveguá kuery ma ko'ē rā peimba 'rā SENHOR renonde py. Arão voi oĩ 'rā.

¹⁷ Peteĩ-teĩ peru 'rā penemba'e hy'a'i heakuā porā va'e oapyaty, pemoī avi 'rā heakuā porā va'e. Peteĩ-teĩ peru 'rā SENHOR renonde py, duzentos e cinqüenta hy'a'i ha'e javi py 'rā Peru. Ndee ha'e Arão Peru 'rā penemba'e ae — he'i.

¹⁸ Ha'e ramo ha'e kuery peteĩ-teĩ ogueru okuapy heakuā porā va'e oapyaty. Tata omboja, ha'e hi'áry omoī heakuā porā va'e. Moisés ha'e Arão reve ikuai oguy nhemboaty oĩaty rokē rexei.

¹⁹ Moisés ha'e Arão rovai Coré omboatypa heta va'e kuery oguy nhemboaty oĩaty rokē py. Ha'e ramo SENHOR rexakāa ojekuaa xapy'a ijaty va'e ha'e javi pe.

Opu'ã rei va'ekue ombopagaague

²⁰ Ha'e gui SENHOR aipoe'i Moisés ha'e Arão pe:

²¹ — Pejep'e a ke upe va'e kuery mbyte gui, mba'eta are'ŷ'i re amomba vyvoi 'rā — he'i.

²² Ha'e rami teĩ ha'e kuery mokoïve ma ngova yvy re omovaẽ reve aipoe'i:

— Oreruete temimoingo ha'e javi moingoare ha'e herekoā reiko va'e, xapy'a rei rā peteĩ'i ava ri ojejavy ramo kova'e kuery ha'e javi rovai 'rā teve ndepoxy?

²³ SENHOR ombovai Moisés pe:

²⁴ — Aipo're ha'vy upe py ikuai va'e ha'e javi pe: “Pejep'e a ke Coré, Datā ha'e Abirão ikuiaigui”, 're.

²⁵ Ha'e ramo Moisés opu'ã ju vy oo Datā ha'e Abirão ikuiai py. Hakykue oje'oipa avi Israel kuery mongetaaty kuery.

[†] [16:6](#) Ha'e kuery ma sacerdote e'ŷ ikuai ramo nda'evei heakuā porā va'e oapy aguā, sacerdote kuery pe anho ha'eve (Êxodo 30.34-38).

²⁶ Ha'e vy aipoe'i ha'e py ijaty va'e pe:

— Ajerure, pejepe'apa na upe va'e avakue heko vai va'e rekoa gui mombyry'i. Pepoko eme guive ha'e kuery mba'e rei-rei re, ha'e kuery ojejavya py peē voi penemombaa e'ŷ aguā — he'i.

²⁷ Ha'e ramo ojepe'apa oje'oivy Coré, Datā ha'e Abirão ikuiai gui. Datā ha'e Abirão ma oẽ vy ngoo rokē py oguapy, gua'yxy kuery reve, gua'y kuery, guajy kuery ha'e kyrīgue'i ha'e javi reve.

²⁸ Ha'e gui Moisés aipoe'i:

— Mba'emo oiko ta va'e rupi peikuaa 'rā SENHOR ae xembouague ixupeguia ha'e javi ajapo aguā, ha'e xejegui e'ŷ ae meme ajapoa peikuaa aguā.

²⁹ Aŷ ma peva'e avakue amboae avakue omanoa rami ri omano ramo, xapy'a rei avakue mboae ojexavaia rami rive ha'e kuery ojexavai ramo ma SENHOR remimbou e'ŷ xee aiko.

³⁰ Ha'e rami avi xapy'a rei SENHOR mba'emo ndajaexai teri va'e ojapo ramo yvy ojepe'a rā kova'e avakue ho'apa aguā omba'e rei-rei reve, ha'e yvykua vaikue py ha'e kuery oikove reve oguejy ramo peikuaa 'rā SENHOR mboetea rupi ve'ŷ ikuai va'e memea — he'i.

³¹ Ijayvupa'i ramove yvy ha'e kuery ikuiai guy rupi ojepe'a ovy.

³² Ojepe'a ramo ha'e kuery ho'apa hoo ha'e javi reve, Coré reveguia avakue ikuai va'ekue voi, imba'e rei-rei ha'e javi reve.

³³ Yvykua vaikue py ho'apa oguereko va'ekue ha'e javi reve. Ha'e gui yvy ojao'ipa jevy ramo heta va'e kuery mbyte gui okanhymba.

³⁴ Ha'e ramo Israel kuery ha'e kuerya katy'i rupi ikuai va'ekue onhamba oje'oivy haxēmba rā oendu vy, “Tove yvy tanhanemomba heravy eme avi” he'i vy.

³⁵ SENHOR-a gui tata oẽ ouvy vy ojukapa duzentos e cinqüenta avakue heakuā porā va'e ryru reveguia.

³⁶ Ha'e gui SENHOR aipoe'i Moisés pe:

³⁷ — Aipo're sacerdote Arão ra'y Eleazar pe heakuā porā va'e oapyaty ikuai va'e oipe'apa aguā tata hendy va'e mbyte gui, tomoaïmba tata oĩ va'e mombyrya rupi, mba'eta hyru ma iky'a e'ŷ va'e meme.

³⁸ Ha'e gui ojejavy okuapy va'e mba'ekue heakuā porā va'e oapyaty peipe'a va'ekue ma pemopererí'i 'rā altar penhovā aguā, SENHOR renonde py oguerupa okuapy rire. Ha'e nunga iky'a e'ŷ va'e ikuai ramo opyta 'rā Israel kuery oikuaa aguā — he'i.

³⁹ Ha'e ramo sacerdote Eleazar oipe'a heakuā porā va'e oapyaty overa va'e guigua okaipa va'ekue po gui, ha'e vy omopererí'i altar onhovā aguā,

⁴⁰ Israel kuery ha'e nungakue re ima'endu'a okuapy aguā. Mba'eta amboae regua rei Arão guigua e'ŷ va'e nda'evei SENHOR renonde py onhemboja aguā heakuā porā va'e oapy aguā, Coré ha'e hexeveguia kuery re oiko va'ekue ramigua oiko ju e'ŷ aguā, Moisés rupi SENHOR ijayvuague rami vy.

Opa marā ju ikuai va'ekue ombopagaague

⁴¹ Ko'ẽ jevy ma Israel kuery ha'e javi ijayvu rei okuapy Moisés ha'e Arão rovai. Ha'e vy aipoe'i:

— Peē kuery tu pejuka ma SENHOR pegua kuery — he'i.

⁴² Moisés ha'e Arão rovai re ha'e kuery onhemboatypa vy oguy nhemboaty oĩaty oĩa katy oje'oi ramove arai ou vy ojao'ipa, ha'e SENHOR rexakāa ojekuaa xapy'a.

⁴³ Moisés ha'e Arão jogueru avi onhemboaty aty renonde py.

⁴⁴ Ha'e gui Moisés pe SENHOR ijayvu vy aipoe'i:

⁴⁵ — Pejepe'a ke upe va'e kuery ikuiai gui, amomba vyvoi aguā — he'i ramo mokoīve guenapy'ā re ikuai ngova yvy re omovaē peve.

⁴⁶ Ha'e ramo Moisés aipoe'i Arão pe:

— Eraa ke nemba'e heakuā porā va'e oapyaty, ha'e emboja tata altar áry gui rejopy va'e. Hi'áry rupi emoĩ avi heakuā porā va'e. Ha'e gui tereo pojava heta va'e kuery ikuiai rupi ha'e kuery ojejavya rejao'i uka aguā, mba'eta imbopagaarā tuvixa ete va'e ou SENHOR renonde gui. Omboypy ma mba'eaxy vaikue — he'i.

⁴⁷ Arão ma Moisés ijayvuague rami vy heakuā porā va'e ryru ogueraa vy onha ovy tekao mbyte rupi, ha'e kuery mbyte rupi mba'eaxy vaikue ou ma ramo. Tata áry rupi heakuā porā va'e omoī vy ojao'i uka ovy ha'e kuery ojejavya.

⁴⁸ Ha'e rami py omanogue ha'e okuave va'e mbyte oiko. Ha'e rami rā mba'eaxy vaikue opa vyvoi.

⁴⁹ Mba'eaxy gui omano va'ekue ma catorze mil e seiscentos ha'e javi vy, Coré káuxa omano va'ekue reve'ý vy.

⁵⁰ Ha'e gui mba'eaxy vaikue opytu'u rire oguy nhemboaty oīaty rokē py ju Arão ou Moisés oīa py.

17

Arão popoka ipotypaague

¹ SENHOR aipoe'i Moisés pe:

² — Ndeayvu ke Israel kuery pe. Ha'e kuery gui rejopy 'rā popoka. Doze popoka rejopy 'rā, peteī-teī tamoī ro pygua kuery va'e regua yvatekueve gui. Peteī-teī rery rembopara 'rā imba'e popoka re ae.

³ Ha'e rā Levi kuery va'e regua popoka re ma rembopara 'rā Arão rery, mba'eta peteī-teī oo pygua kuery ruvixa oguereko 'rā popoka.

⁴ Ha'e va'e ma remoīmba 'rā oguy nhemboaty oīaty py, xeayvu ryru oī va'e renonde. Ha'e py xee ae 'rā rovaexī.

⁵ Ha'e gui ava xee aiporavo va'e popoka ma ipotypa 'rā. Ha'e rami vy xerenonde gui amombytu'upa 'rā Israel kuery penderovai rupi ijayvu rei okuapya — he'i.

⁶ Ha'e rami Israel kuery pe Moisés ijayvu ramo doze yvatekueve ikuai va'e ome'ē okuapy opopoka. Peteī-teī ixupe ome'ē guamoī ro pygua kuery pegua ae, doze popoka ha'e javi vy. Ha'e kuery popoka mbyte py oī avi Arão popoka.

⁷ Ha'e kuery popoka ma Moisés ogueroikepa SENHOR renonde py, opy ijayvua oīaty py ae.

⁸ Ko'ē jevy oguy Nhanderuete ayvu oīaty ropy Moisés oike ramo Arão popoka Levi ro pygua kuery pegua henhoīmba ra'e. Hi'y tuvixaa rupi ipotypa ma, ha'e vy hi'apa guive.

⁹ Ha'e ramo popoka ha'e javi ma SENHOR renonde gui Moisés ogueraapa ju Israel kuery ikuapia py. Ha'e ramo ha'e kuery oexa vy peteī-teī ojopy okuapy opopoka ae.

¹⁰ SENHOR aipoe'i Moisés pe:

— Eraa ju ke imoiny Arão popoka xeayvu oīaty renonde py, ha'e py ae oī porā aguā Israel kuery opu'ā rei va'e oikuaa okuapy aguā. Ha'e rami vy 'rāe remokyrirī xerovai rupi ijayvu rei okuapy va'e, omanomba e'ý aguā — he'i.

¹¹ Ha'e ramo Moisés ojapo ha'e rami. SENHOR ojapo ukaa rami vy ae ojapo.

¹² Ha'e gui Moisés pe Israel kuery ijayvu jevy vy aipoe'i okuapy:

— Aŷ ma romanomba ta ma! Rokanhymba 'rā, rokanhymba 'rāe ha'e javive!

¹³ Mba'eta SENHOR ombojeroviaaty katy onhemboja va'e rei ma omano 'rā. Xapy'a rei nda'u ore kuery ha'e javive 'rā ri romanomba? — he'i okuapy.

18

Sacerdote kuery mba'emo ojapo ha'e ojopy va'erā re ijayvuague

¹ Ha'e gui SENHOR aipoe'i Arão pe:

— Ndee, nderā'y kuery ha'e neramoī Levi ramymino kuery ha'e javi re oī 'rā henda iky'a e'ý va'e rupi pemba'eapoa py pejejavvy ri vy pepaga aguā. Ha'e rā ndee ha'e nderā'y kuery re anho 'rā oī sacerdote rami pemba'eapoa py pejejavvy vy pepaga aguā.

² Ha'e gui oo xeayvu oīaty renonde rupi ndee ha'e nderā'y kuery pemba'eapo pekuapy jave ma Peru avi 'rā peneretarā kuery peneramoī Levi ramymino ikuai va'e, pendea py meme ha'e kuery ou vy penepytyvō okuapy aguā.

³ Ha'e kuery ma ndereve oo rupi ombo'epo vy ojapo 'rā okuapy ojapo 'rā va'ekue. Ha'e rami teñ ha'e kuery nonhembojai 'rāe henda iky'a e'ŷ va'e py mba'emo ikuai va'e re, neñ altar re, omanomba e'ŷ aguã, peñ kuery voi.

⁴ Ndea py ha'e kuery onhemboaty 'rā okuapy ojapopa aguã oguy nhemboaty oñaty rupi ojapo 'rā va'e ha'e javi. Ha'e rā amboae regua ma nda'evei pêa py onhemboja aguã.

⁵ Peñ kuery anho 'rā pemba'epo henda iky'a e'ŷ va'e py, altar rupi voi, Israel kuery mbopagaarã oiko jevy e'ŷ aguã.

⁶ Peneretarã kuery levita ikuai va'e ma xee aiporavo Israel kuery mbyte gui, ha'e penepytyvõarã ju amboaxa oguy nhemboaty oñaty rupi SENHOR pe ombo'epo okuapy aguã.

⁷ Ha'e rā altar rupi, ha'e ajukue okẽ regua oñ va'e ropy rupi ma ndee ha'e nderay kuery reve ae 'rā pepena sacerdote rembiaporã oñ va'e ha'e javi re. Ha'e va'e ma penembiaporã ae. Peñ kuery pe amelẽ sacerdote rami pemba'epo aguã. Ha'e rā amboae regua onhemboja ri vy ma omano 'rā — he'i.

⁸ SENHOR aipoe'ive ju Arão pe:

— Ndevy peguarã xee amboaxa xevy ome'ẽ mbyre-mbyre gui mba'emo oipe'aa va'e, Israel kuery mba'emo iky'a e'ŷ va'erã ogueru va'e guigua. Ndevy ha'e nderay kuery pe raka'e rā peve guarã amboaxa peñ kuery peguarã ae.

⁹ Pova'e ae 'rā pejopy mba'emo iky'a e'ŷ ete va'e gui, tata py omoña e'ŷ va'ekue regua. Xevy ome'ẽ va'erã ha'e kuery ogueru va'e ha'e javi gui mba'emo opyta 'rā ndevy ha'e nderay kuery pe iky'a e'ŷ ete va'erã, mba'emo aju guigua mba'e, jejavya regua, ha'e mba'emo omboekovia aguã regua xevy ogueru va'e ha'e javi gui.

¹⁰ Ha'e nunga pe'u 'rā pekuapy henda iky'a e'ŷ etea py ae. Peñ kuery va'e regua avakue ma guive rā pe'u 'rā. Pendevy ma iky'a e'ŷ va'e opyta.

¹¹ Pova'e nunga voi opyta 'rā ndevy guarã: mba'emo Israel kuery oupi vy ombovava reve ome'ẽ va'ekue ha'e javi gui oipe'a pyre, ha'e nunga voi amboaxa ndevy, nderay kuery ha'e nderajy kuery pe guive, raka'e rā peve guarã. Ndero pygua kuery ngarua pyguarã ha'eve va'e ri ikuai vy ha'e javi 'rā ha'eve ho'u aguã.

¹² Azeite, vinho ha'e mba'emo ra'yigue oiko ypy'i va'ekue regua iporãgueve SENHOR pe ha'e kuery ome'ẽ va'ekue ma ndevy peguarã meme amboaxapa.

¹³ Yvy re onhoty mbyre ha'e javi regua jypy'i hi'a va'e xee SENHOR pe ha'e kuery ogueru va'e ma nemba'e meme 'rā. Ndero pygua kuery ngarua pyguarã ha'eve va'e ri ikuai vy ha'e javi 'rā ho'u.

¹⁴ SENHOR peguarã Israel kuery omboaxa va'ekue ha'e javi ma ndevyguia meme opyta.

¹⁵ Ha'e javi regua temimoingo jypy'igua oiko va'ekue xee SENHOR pe ha'e kuery ogueru va'e, avakue e'ŷ vy mymba kuery teñ ndevy guarã meme 'rā opyta. Ha'e rami avi avakue jypykue oiko va'ekue ma remboekovia uka 'rā, mymba kuery ha'eve'ŷ va'e regua jypy guare remboekovia uka avi 'rā.

¹⁶ Peteñ jaxy'i va'e meme 'rā remboekovia uka. Hekovia repyrã reikuaa rami vy ae 'rā ome'ẽ, cinco hatã'i va'e re, henda iky'a e'ŷ va'e py oiporupy regua doze grama va'e rami ae.

¹⁷ Ha'e rā vaka, vexa'i, kavara ra'y kuery jypy'igua va'e ma nomboekoviai 'rā, iky'a e'ŷ va'e ramo. Huguykue ma pemboayvipa 'rā altar áry rupi, ha'e rā ikyrakue ma oapy vy ome'ea 'rā SENHOR pe heakuã porã aguã.

¹⁸ Ha'e rā ho'okue ma pendevyguia 'rāe, ipexo oupi vy ombovava reve ome'ẽ mbyre ro'okue, ha'e hi'u oiporu kuaa regua ro'okue ma ha'e rami ae avi.

¹⁹ Xee SENHOR peguarã iky'a e'ŷ va'e Israel kuery ome'ẽ va'ekue ha'e javi amboaxa ndevy, nderay ha'e nderajy kuery ikuai va'e pe guive, raka'e rā peve guarã. Xee SENHOR renonde py oñ riae 'rā xereve guarã ajapo va'ekue juky regua, ndee ha'e neramymimo kuery peguarã.*

²⁰ Ha'e gui SENHOR aipoe'i avi Arão pe:

* 18:19 Mba'emo ome'ẽ 'rā juky py omoe'ẽ reve (Levítico 2.13).

— Ndee ma ndeyvyrā nderejopyi 'rā neī ruxā'i voi, heta va'e kuery yvy mbyte neī peteī henda py voi noī 'rā ndeyvyrā. Mba'eta xee ae ma aiko ndevyguia rerekō va'erā Israel kuery mbyte — he'i.

Dízimo ha'e levita kuery re ijayvuague

²¹ — Levi ramymino kuery pe ma xee amboaxa dízimo ome'ẽmby ha'e javi. Ha'e kuery peguarā ae opyta oguy nhemboaty oīaty rupi om̄ba'epoague repyrā.

²² Ha'e rā Israel kuery ma novaēi 'rā oguy nhemboaty oīaty py, ha'e kuery ojejavyague re opaga aguā oī ramo omanomba e'ŷ aguā.

²³ Levita kuery ae 'rā om̄ba'epo oguy nhemboaty oīaty rupi, ha'e kuery re ae 'rā oī ojejavy vy opaga aguā. Ha'e va'e lei ma raka'e rā peve oī hekorā, hamymino jevy kuery peguarā. Ha'e rā oyvyrā ma neī ruxā'i ma voi ndojopyi 'rā Israel kuery mbyte py.

²⁴ Mba'eta Israel kuery dízimo SENHOR pe ome'ẽ okuapy va'e ma amboaxapa levita kuery peguarā. Ha'e kuery pe ma “Israel kuery mbyte rupi pendeyvyrā neī ruxā'i ma voi ndapejopyi 'rā”, ha'e rire.

²⁵ Ha'e gui Moisés pe ju SENHOR aipoe'i:

²⁶ — Ndeayvu 'rā levita kuery pe, ha'e vy aipo're: Israel kuery dízimo ome'ẽ va'ekue pendevy guarā amboaxa va'e pejopy vy pemboja'o ju 'rā SENHOR pe. Dízimo ome'ẽ mbyre regua gui dízimo ju 'rā peme'ẽ xevy.

²⁷ Ha'e nunga peme'ẽ va'e ma mba'emo pemoa'yī va'ekue gui, e'ŷ vy vinho onhamiaty gui jypy'igua peme'ẽ 'rāgue py.

²⁸ Ha'e rami vy SENHOR pe ju 'rā peme'ẽ dízimo Israel kuery po gui pejopy va'ekue ha'e javi guigua. Ha'e nunga gui SENHOR pe peme'ẽ va'e ma sacerdote Arão ae oiporu va'erā.

²⁹ Ome'ẽ mbyre pejopy va'e ha'e javi gui peme'ẽ 'rā SENHOR pegua meme. Ha'e nunga iporāgueve ae 'rā peme'ẽ iky'a e'ŷ va'erā.

³⁰ — Aipo'reve ju 'rā levita kuery pe: Dízimo ome'ẽ mbyre regua iporāgueve peme'ẽ ma rire hembyrekue ma pendevy guarā ae opyta, mba'emo pemoa'yī va'ekue gui, e'ŷ vy vinho onhamiaty gui dízimo me'ẽare pe hembyrekue opytaa rami avi.

³¹ Ha'e nunga pe'uua py rei pe'u teī ha'eve, peē kuery ha'e pendero pygua kuery guive, oguy nhemboaty oīaty rupi pembā'epoague repy ae ramo.

³² Ha'e va'e mbyte gui iporāve va'e peme'ẽ aguā peiporavo ramo pendere noī 'rā pejejavya. Ha'e rami vy 'rāe mba'emo Israel kuery iky'a e'ŷ va'erā ome'ẽ va'ekue ndopyta jevyi ha'eve'ŷ va'e, pemanomba e'ŷ aguā.

19

Yy joky'a'oa re ijayvuague

¹ Ha'e gui SENHOR aipoe'ive ju Moisés ha'e Arão pe:

² — Pova'e lei rupi SENHOR ojapo uka vy aipoe'i: Aipopeje Israel kuery pe peēa py togueru peteī vaka kunha'i pytā va'e, iporā rei va'e, ivaikue rei e'ŷ va'e, neī peteīgue ma voi canga py omombā'epo e'ŷ teri va'e.

³ Ha'e va'e ma pemboaxa ju 'rā sacerdote Eleazar pe. Ha'e va'e ju ogueraa 'rā tekoa gui mombyry'ia py, ha'e vy ojukaa 'rā henonde py.

⁴ Ha'e vy huguykue re sacerdote Eleazar okuā ombovy vy omboayvipa 'rā oguy nhemboaty oīaty renonde katy. Sete-kue 'rā omboayvi.

⁵ Ha'e oexaa py oapypaa 'rā vaka kunha'i ha'e javi: ipire, ho'okue, huguy ha'e hepoxikue voi. Ha'e javi 'rā oapypa.

⁶ Sacerdote ogueru 'rā peteī yvyra yary va'e, hissopo rogue ha'e havijukue pytā va'e, ha'e vy omoimba 'rā tata mbyte vaka kunha'i okaia py.

⁷ Ha'e gui ma sacerdote ojoi 'rā oao, ojau 'rā guive yy py. Ha'e rire mae 'rā ojevy ju tekoa py, teī ha'eve'ŷ va'e oiko 'rā ka'aru peve.

⁸ Hapyare voi ojoi 'rā oao ha'e ojau yy py. Ha'e voi oiko 'rā ha'eve'ŷ va'e ka'aru peve.

⁹ Ha'e gui peteī ava ha'eve va'e ma tanhimbu vaka kunha'i rugue omboaty ju vy omoī porā 'rā tekaoa gui mombyry'ia py, peteī henda iky'a e'ŷ va'e ojapo pyre py. Israel kuery ha'e javi peguarā omoī porā 'rā, yy joky'a'oa irūrā, jejavya gui joky'a'o aguā.

¹⁰ Ha'e gui vaka kunha'i rugue mono'ōare voi ojoi 'rā oao, ha'e ha'eve'ŷ va'e oiko 'rā ka'aru peve. Ha'e va'e ojapo uka pyre ma raka'e rā peve guarā Israel kuery pe, ha'e amboae regua ha'e kuery mbyte rupi ikuai va'e pe guive.

¹¹ — Amongue omanogue re, ava retekue re ri opoko ramo ma ha'eve'ŷ va'e oiko 'rā sete ára peve.

¹² Ha'e gui mboapy araa py, ha'e sete araa py ju ojeky'a'o uka 'rā ha'e va'e yy py, ha'eve va'e ju oiko aguā. Va'eri mboapy araa py, e'ŷ vy sete araa py ndojeky'a'o ukai ri vy ma ha'eve'ŷ va'e ae 'rā oiko.

¹³ Xapy'a rei omanogue re, ava retekue re opoko va'ekue ndojeky'a'o ukai vy ma omongy'apa avi 'rā SENHOR mbojeroviaaty. Ha'e va'e ma oipe'aa 'rā Israel kuery mbyte gui, mba'eta hi'áry rupi yy joky'a'oa nomboayviai rire ha'eve'ŷ va'e ae 'rā oiko. Hexe oī teri ha'eve'ŷa.

¹⁴ — Pova'e lei ma amongue ava peteī oo py ri omano rā guarā. Ha'e va'e opy oike va'e, ha'e opy ikuai va'ekue ha'e javi 'rā ha'eve'ŷ va'e ikuai sete ára peve.

¹⁵ Mba'emo ryru ojepe'a va'e, imbotya ojokua e'ŷ va'e ma ha'eve'ŷ va'e oiko avi 'rā.

¹⁶ Ha'e javive rei mba'ety rupi ooa rupi amongue kyxe py ojuka pyre re opoko va'ekue ma oiko 'rā ha'eve'ŷ va'e sete ára peve, ha'e'ŷ vy amboae rami omano va'ekue re, amongue ava kāgue re, e'ŷ vy te'ōgue rupa re mba'e.

¹⁷ Ha'eve'ŷ va'e oiky'a'oa aguā ma pejopy 'rā vaka kunha'i oapy va'ekue rugue jejavya gui joky'a'oa va'e regua, ha'e gui hugue áry penhoē 'rā yy oxyry va'e, peteī hyru py.

¹⁸ Peteī ava ha'eve va'e ma peteī hissopo rogue ogueraa vy omoaky' 'rā ha'e va'e yy py. Ha'e va'e py omboayvipa 'rā ha'e va'e oo áry rupi ha'e tembiporu ikuai va'e, ha'e py ikuai va'ekue áry rupi, ha'e gui ojuka pyre, e'ŷ vy omano va'ekue kāgue re opoko va'ekue, hupa áry rupi guive.

¹⁹ Ha'eve'ŷ va'e áry rupi amongue ha'eve va'e omboayvi 'rā mboapy araa py, ha'e sete araa py ju. Sete araa py ma oiky'a'o 'rā. Ha'eve'ŷ va'ekue ojoi 'rā oao, ha'e ojau 'rā yy py. Ka'aru jave ha'eve va'e ju 'rā oiko.

²⁰ — Ha'e rami teī xapy'a rei amongue ha'eve'ŷ va'e ndojeky'a'o ukai ramo oipe'aa 'rā heta va'e kuery mbyte gui, SENHOR pegua henda iky'a e'ŷ va'e omongy'apa rire. Hi'áry rupi yy joky'a'oa nomboayviai rire ha'eve'ŷ va'e ae 'rā oiko.

²¹ Ha'e rami aguā ma raka'e rā peve guarā oī ha'e kuery ojapo aguā. Yy joky'a'oa mboayviare voi ojoi 'rā oao. Yy joky'a'oa re opoko va'e rei ma oiko 'rā ha'eve'ŷ va'e ka'aru peve.

²² Opa marāgua re ha'eve'ŷ va'e opokoa va'e rei oiko 'rā ha'eve'ŷ va'e. Hexe opoko va'e voi oiko 'rā ha'eve'ŷ va'e ka'aru peve.

20

Miriā omanogue

¹ Ha'e gui Israel kuery ha'e javi ovaē okuapy Zim regua tekaoa e'ŷa py. Jypy'igua jaxy py ma Cades py optytapa okuapy. Ha'e py ma Miriā omano, ha'e pyve ju onhono porāa.

Meribá py itaova oī va'e Moisés ombovoague

² Ha'e gui yy nda'ipoi ha'e kuery oy'u aguā. Ha'e ramo onhemboaty okuapy Moisés ha'e Arão rovai.

³ Moisés pe ijayvu atā vy aipoe'i okuapy:

— Ne'exa, oreryvy kuery SENHOR renonde py omanomba jave ore voi romano va'e rire ha'eveve 'rāgue!

⁴ Mba'e re tu SENHOR pegua orekuai va'e orererupa raka'e tekaoa e'ŷa py, romanomba aguā rive, ore kuery ha'e orerymba kuery guive?

⁵ Mba'e re tu Egito yvy gui orererupa ri kova'e tekoá vaikue py oremovaẽ aguã, neĩ mba'emo ra'yigue noña py, neĩ figo'a ma voi, vinho, romã'a, neĩ yy jay'u va'erã voi nda'ipoia py? — he'i okuapy.

⁶ Ha'e ramo heta va'e kuery onhemboaty okuapy va'e renonde gui Moisés ha'e Arão oje'oi vy ovaẽ nhemboaty oĩaty rokẽ py. Ha'e vy guenapy'ã re oĩ ngova yvy re omovaẽ peve. Ha'e ramove SENHOR rexakãa ojekuaa xapy'a ha'e kuery pe.

⁷ SENHOR aipoe'i Moisés pe:

⁸ — Aŷ eru popoka, ha'e emboatypa ju heta va'e kuery, ndee ha'e nderyke'y Arão voi. Ha'e vy ha'e kuery oexapaa py ndeayvu 'rã itaova oĩ va'e pe, ha'e ramo ixugui onheẽ 'rã yy. Ita gui yy onheẽ aguã rami pejapo vy peme'ẽ 'rã heta va'e kuery pe oy'u okuapy aguã, hymba kuery pe guive — he'i.

⁹ Ha'e ramo popoka SENHOR renonde py oĩ va'ekue Moisés oguenoẽ, SENHOR aipoe'iague rami vy.

¹⁰ Ha'e gui Moisés ha'e Arão omboatypa heta va'e kuery itaova oĩ va'e rexei. Ha'e vy aipoe'i ha'e kuery pe:

— Pendu ke aŷ, pepu'ã rei va'e kuery. Xapy'a rei nda'u rojapo 'rã kova'e itaova oĩ va'e gui yy onheẽ aguã rami, peẽ kuery pey'u aguã? — he'i vy

¹¹ Moisés opo py popoka oguereko va'e oupi vy itaova re oinupã mokoõgue. Ha'e ramo onheẽ vaipa ete yy. Heta va'e kuery oy'u okuapy, hymba kuery guive.

¹² Ha'e ramo SENHOR aipoe'i Moisés ha'e Arão pe:

— Peẽ kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ŷ va'ea. Ha'e nunga rupi peẽ ma naperovaẽvi ma 'rã kova'e kuery ijyvyrã ame'ẽague py — he'i.

¹³ Ha'e va'e yy ma Meribá pygua. Ha'e py ma Israel kuery SENHOR rovai rupi ijayvu atã okuapy ramo ha'e kuery mbyte py SENHOR oexa uka iky'a e'ŷ va'ea.*

Edom yvy rupi ha'e kuery oaxa oje'oivy aguã re Moisés ojerure uka teĩague

¹⁴ Cades gui Moisés omondouka guembiguai kuery Edom pygua huvixaa py, ixupe aipoe'i aguã: “Po rami ijayvu nderyvy Israel kuery: Reikuua porã ma ore kuery opa mba'e py orekuai axyague.

¹⁵ Mba'eta oreramoĩ kuery Egito yvy katy oguejypa raka'e. Ha'e gui ore kuery ju Egito py are vaipa orekuai. Ha'e rã Egito pygua kuery oremoingo axy, ore kuery ha'e oreru kuery voi.

¹⁶ SENHOR pe rojapukai ramo oreayvua oendu vy ojeguigua anjo omondouka Egito gui orepe'apaarã. Ha'e gui aŷ ma Cades py orekuai, tetã ndeyvy rexei'i oĩ va'e py.

¹⁷ Eja ndeyvy rupi roaxa aguã. Ndoroaxai 'rã penemba'ety rupi, neĩ uvaty rupi. Ndoroy'ui avi 'rã ygua ikuai va'e gui. Tape iporãve va'e rupi anho 'rã roguata, ndoropiai 'rã jaiporu kuua katy, neĩ jaiporu kuua e'ŷa katy ma voi, ndeyvy rupi roaxapa peve”, he'i uka.

¹⁸ Ha'e ramo Edom pygua aipoe'i uka ixupe:

— Peaxa eme ta'vy xeyvy rupi, rovaexí vy aa e'ŷ aguã kyxe reve — he'i.

¹⁹ Ha'e gui Israel kuery aipoe'i ju okuapy ixupe:

— Tape jeporuve va'e rupi anho 'rã roje'oi. Xapy'a rei xee ha'e'ŷ vy xerymba kuery nemba'e yy roy'u ri vy apagapa 'rã hepya rami tema. Amboae nunga ma ndaipotai, yvy rupi roaxa aguã e'ŷ vy.

²⁰ Ombovai:

— Peaxa eme ta'vy — he'i vy Edom kuery oupa nhoguenoiny heta avakue reve ovaexí aguã, opo'akaa oexa uka reve.

²¹ Ha'e rami vy Edom kuery ndoejai Israel kuery ijyvy rupi oaxa aguã. Ha'e ramo Israel kuery ojepekuavo oje'oivy ha'e va'e gui.

Números 33.38,39

²² Cades gui Israel kuery ha'e javi ikuai va'ekue oje'oi vy oguata oje'oivy Hor yvyty katy.

* 20:13 Tery Meribá ma “Ayvua ete-ete” 'ea (Êxodo 17.7).

²³ Hor yvyty re Edom yvy opa'ia py ma SENHOR aipoe'i Moisés ha'e Arão pe:

— Arão nhe'ẽ ma heraa 'rã tamoĩ kuerya py, novaẽi 'rã Israel kuery yvyrã ame'ẽ va'e py, Meribá py yy onheẽ jave naxenhe'ẽ rendu potai rire.

²⁵ Eraa ha'vy Arão ha'e ta'y Eleazar, ha'e enoẽ Hor yvyty apyte peve.

²⁶ Ha'e rire ma emboi Arão ao, ha'e gui ijaokue py ta'y Eleazar ju emonhemonde, mba'eta Arão ma oipe'aa 'rã tuu kuery ooague katy, ha'e py ae 'rã omano — he'i.

²⁷ Moisés ojapo SENHOR ojapo ukaa rami vy. Jogueraa nhoguenoiny Hor yvyty katy heta va'e kuery ha'e javi oexaa gui.

²⁸ Arão ao Moisés omboi vy ta'y Eleazar ju omonhemonde ijaokue py. Ha'e py Arão omano yvyty apyte py ae. Ha'e rã Moisés ha'e Eleazar ma oguejy ju jogueruvy ha'e gui.

²⁹ Ha'e ramo heta va'e kuery Arão omanoague oikuaa ma vy ha'e kuery ha'e javi ojae'o hexe. Trinta ára re ojae'o okuapy.

21

Arade pygua huvixa oity okuapyague

¹ Ha'e gui ma cananeu regua Arade pygua huvixa Neguebe py oikoa py oendu omombe'ua rã Israel kuery tape rupi ou okuapy Atarim katy. Ha'e rami vy Israel kuery re opu'ã vy amongue ogueraa escravo-rã.

² Ha'e ramo Israel kuery SENHOR renonde onhemboayvu vy aipoe'i okuapy:

— Orepo py ri ha'e va'e kuery remboaxapa ramo romomba ete 'rã ha'e kuery retã ikuai va'e — he'i.

³ Israel kuery ijayvua SENHOR oendu vy ipo py omboaxapa cananeu kuery. Ha'e ramo Israel kuery omomba ete, hetã ikuai va'e guive. Ha'e va'e tekoia ma oenoĩ okuapy Horma.*

Mboi ra'angaa overa va'e guigua re ijayvuague

⁴ Ha'e gui Hor yvyty gui oje'oipa okuapy. Ye'ẽ Pytã va'e yvýry tape oo va'e rupi oje'oi, Edom yvy rovai rupi oaxa aguã. Ha'e rami tei Israel kuery oguataa rupi nda'evei ete ju okuapy.

⁵ Ha'e vy ijayvu okuapy Nhanderuete ha'e Moisés rovai rupi. Ha'e vy aipoe'i:

— Mba'erã tu Egito yvy gui orererupa ri, kova'e tekoia e'ŷa py romanomba aguã ty'y, mbojape neī yy ma voi nda'ipoia py? Mba'eta orenhe'ẽ py voi orekane'õmba ma kova'e nunga mbojape ovare e'ŷ va'e anho ro'u vy — he'i.

⁶ Ha'e ramo ha'e kuery mbyte rupi SENHOR ombou mboi inharõve va'e, ixu'uphaarã. Ha'e ramo heta omano Israel kuery va'e regua.

⁷ Moisés-a py ha'e kuery oupa vy aipoe'i okuapy:

— Rojejavypa ra'e, mba'eta SENHOR rovai ha'e nderovai rupi oreayvu. Ejerure ha'vy SENHOR pe ore kuerya gui oipe'apa aguã mboi — he'i ramo Moisés ojerure ha'e kuery re.

⁸ Ha'e gui SENHOR aipoe'i Moisés pe:

— Ejapo ke peteĩ mboi inharõve va'e ra'angaa, ha'e eupi imoiny yvyrã po'i apy re. Ha'e gui ha'e javive oixu'u va'ekue ha'e nunga re oma'ẽ vy oikove 'rã — he'i.

⁹ Ha'e ramo Moisés ojapo peteĩ mboi ra'angaa overa va'e gui, ha'e vy oupi imoiny peteĩ yvyrã po'i apy re. Ha'e gui amongue mboi oixu'u ramo overa va'e guigua re oma'ẽ va'e okuera kuerei.*

Israel kuery oguata oje'oivyague

¹⁰ Ha'e gui Israel kuery oje'oipa vy Obote py ju ikuai.

¹¹ Ha'e gui Obote gui oje'oi vy Ijé-Abarim py ju optya okuapy, tekoia e'ŷa Moabe rexei oĩ va'e py, kuaray oua katy.

¹² Ha'e gui oje'oi vy Zerede yvy'ã guy py ju optya.

* 21:3 Tery Horma ma “Ombovaipaague” 'ea. * 21:9 João 3.14-15

¹³ Oje'oi jevy vy Arnom yakā rovai ju opyta okuapy, teko a e'ŷa amorreu kuery reko peve oo va'e py. Mba'eta Arnom yakā ma Moabe yvy apy'i rupi oĩ, Moabe ha'e amorreu kuery reko mbyte py.

¹⁴ Ha'e nunga rupi ae SENHOR joe opu'ãa regua oĩa kuaxia re ipara oiny:

“Vaebe teko a Sufa re oĩ va'e,
ha'e Arnom yakā yvýry yvy'ã guy ikuai va'e rupi,

¹⁵ ha'e gui yvyugua gui jaguejya rupi

jaguejyve 'rā Ar teko a katy,
Moabe teko a apy'ia py nhavaea peve.”

¹⁶ Ha'e gui ma Beer katy ju oguata oje'oivy. Ha'e va'e ygua ma Moisés pe SENHOR aipoe'iague: “Emboatypa heta va'e kuery, ha'e ramo ame'ẽ 'rā yy”, he'iague va'e.

¹⁷ Ha'e ramo pova'e mboraei rupi Israel kuery oporai okuapy:

— Tovu yy! Perovy'a ke mboraei rupi!

¹⁸ Yguarã huvinha kuery ojo'o va'ekue,

heta va'e kuery regua yvatekueve ojo'o va'ekue
yvyra py rive, popoka oguerekva'e py ae — he'i okuapy.

Ha'e gui ma teko a e'ŷa gui Matana katy ju oguata oje'oivy.

¹⁹ Matana gui ma Naaliel katy ju oje'oi, ha'e Naaliel gui ma Bamote katy,

²⁰ ha'e Bamote gui ma yvy'ã guy Moabe yvy oĩ va'e katy ju oje'oi, Pisga yvyty áry peve.
Ha'e va'e apyte gui nhama'ẽ 'rā teko a e'ŷa katy.

Deuteronômio 2,26-37

²¹ Ha'e gui ma Seom amorreu kuery ruvixaa py Israel kuery omondouka ayvu reraarã.
Ha'e vy aipoe'i:

²² — Oremboaxa uka ke ndeyvy rupi. Ndoropai 'rā mba'ety ikuai va'e rupi, neĩ uvaty rupi. Ygua gui voi ndoroy'ui 'rā. Roguata 'rā roje'oivy tape iporâve rupi anho, ndeyvy rupi roaxapa peve — he'i uka.

²³ Ha'e rami tei Seom nomboaxa ukai Israel kuery oyvy rupi. Ha'e rami 'rāgue py ojeupagua kuery omboatypa vy oje'oi Israel kuery ovaexi aguã teko a e'ŷa py. Jasa py ovaea py opu'ã okuapy Israel kuery rovai.

²⁴ Tei Israel kuery ma kyxé py ojuka reta vy ipo'aka ijyvy re, Arnom yakā guive Jaboque peve, Amom ramymino kuery reko peve. Ha'e va'e teko a apy'i rupi ikorapa va'e.

²⁵ Ha'e rami vy Israel kuery ojopypa amorreu kuery retã ikuai va'ekue, ha'e va'e py ju ikuai, Hesbom py ha'e ijyvyteko a'i ikuai va'e ha'e javi rupi.

²⁶ Mba'eta Hesbom tetã ma amorreu kuery ruvixa Seom openaaty ae. Ha'e va'e ma Moabe pygua ruvixa yma guare re opu'ã vy ijyvy ojopypa va'ekue Arnom yakā peve,

²⁷ ijayvu kuaa va'e kuery aipoe'ia rami:

“Peju ke Hesbom tetã py! Pejapo ju,
pemoatyrõmba ju Seom opena atyrã.

²⁸ Mba'eta Hesbom gui tata oẽ,

tataendy nhomombaarã oẽ Seom pegua tetã gui,
ha'e vy omomba Moabe kuery reko a Ar,
ha'e Arnom yvýry yvy'ã re yvatekueve ikuai va'ekue ha'e javive.

²⁹ Moabe kuery, nda'evei ete 'rā pêvy!

Quemos pe pendekuai va'e, okanhgue ma peiko.
Mba'eta ojapo pendera'y kuery onhamba aguã rami,
ha'e penderajy kuery escravo-rã ogueraapa aguã rami,
amorrekuery ruvixa Seom peguarã ae.

³⁰ Ore kuery ma roitypa ma.

Okanhymba ete Hesbom guive Dibom peve.
Rombovaipa ma Nofa peve,
tata py roapypa Medeba peve.”

Deuteronômio 3,1-11

- ³¹ Ha'e rami vy amorreu kuery yvy re ju Israel kuery hekoia.
³² Ha'e va'e rire Jazer tetā re ju Moisés oexa pota uka ma ramo Israel kuery ipo'aka hekoia ijyvýry ikuai va'e ha'e javi reve, amorreu kuery ha'e py ikuai va'ekue oipe'apa vy.
³³ Ha'e gui ojevypa ju vy oje'oi Basā tetā katy tape oo va'e rupi. Ha'e ramo Basā pygua huvixa Ogue va'e ou ha'e kuery rovai, ojeupegua kuery ha'e javi reve. Ha'e vy joe opu'ā okuapy Edrei py.
- ³⁴ Ha'e gui SENHOR aipoe'i Moisés pe:
— Ekyje eme ha'e kuery gui, mba'eta xee amboaxa ma ndepo py, huvixa ha'e ixupegua kuery ha'e javi, ijyvy voi. Ha'e kuery re pejapo 'rā amorreu kuery ruvixa Seom Hesbom pygua re pejapoague ramo ae — he'i.
- ³⁵ Ha'e ramo ojuka reta okuapy, huvixa, ta'y kuery ha'e ixupegua kuery ha'e javi. Ha'e kuery va'e regua neñ peteñ'i ma voi ndoo jepoi. Ijyvy re ipo'aka avi ombo'erā.

22

Balaão-a py ayvu reraa kuery Balaque omondoukaague

- ¹ Israel kuery ha'e gui oje'oi pa vy opyta ju okuapy Moabe yvy rupi Jordão rovaigua re, Jericó tetā rexei.
- ² Ha'e gui ma Zipor ra'y Balaque oexapa va'ekue Israel kuery amorreu kuery re ojapoague.*
- ³ Ha'e rami vy ha'e kuery gui Moabe kuery okyje vaipa okuapy, heta raxa ramo. Nda'evei ete ikuai Israel kuery ou rā oexa vy.
- ⁴ Ha'e va'e jave ma Moabe pygua huvixa ma Zipor ra'y Balaque ae.
Ha'e rami vy Moabe pygua huvixa aipoe'i Midiā pygua kuery yvatekueve pe:
— Aÿ ma ha'e kuery heta ete vy omomba 'rā orevvýry ikuai va'e, vaka nhuū mba'ety rupi oĩ va'e ho'upaa ramo avi — he'i.
- ⁵ Ha'e rami vy guembigui kuery omondouka Beor ra'y Balaão oenoī aguā. Ha'e va'e ma Eufrates yakā yvýry oiko Petor py, hetarā kuery ikuia py ae. Ha'e va'e pe aipoe'i uka:
— Aÿ ma peteñ regua Egito yvy gui ou vy ojao'ipa ma okuapy yvy ha'e javi. Ha'e kuery ma xerekua renonde katy ae ju ikuai.
- ⁶ Ha'e gui aÿ ajerure ndevy: Eju na ha'e kuery re ndeayvu vai aguā, xegui ipo'akapave ramo. Xapy'a rei rā ha'e kuery va'e regua ajuka vy aipe'apa 'rā xeyvy gui, mba'eta xee aikuua reroayvu porā va'ekue rei ayvu porāmbi ae 'rā ikuai, ha'e amongue re ndeayvu vai rire ma ayvu vaipy 'rā oiko — he'i uka.
- ⁷ Ha'e ramo Moabe ha'e Midiā pygua yvatekueve oje'oi. Ngupive ogueraa avi ijayvu vaiaomboekovia aguā. Balaão-a py ovaẽmba ma vy ixupe omombe'u okuapy Balaque ijayvuague ha'e javi.
- ⁸ Ha'e ramo Balaão aipoe'i ha'e kuery pe:
— Pepyta ke apy kova'e pyávy, ha'e gui aikuua uka 'rā ambovaia, SENHOR ijayvua ramo vy ae — he'i ramo Balaão ro py Moabe pygua yvatekueve opyta okuapy.
- ⁹ Ha'e gui Balaão-a py Nhanderuete ojekuaa vy aipoe'i:
— Marā ramigua tu kova'e avakue ndero py ikuai va'e?
- ¹⁰ Balaão ombovai Nhanderuete pe:
— Ha'e kuery ma Zipor ra'y Balaque Moabe pygua huvixa va'e ombou va'ekue xereve ijayvu aguā. Ha'e vy aipoe'i xevy:
- ¹¹ “Egitoyvyguiouva'ekuerreguaojao'ipa maokuapyyvyha'ejav. Aÿmaejunaha'e
kueryrendeayvuvaiaguā. Xapy'reihae'kueryrexep'aka nho'rāxeyvygui aipe'apa
aguārami”, he'i va'ekue xevy.
- ¹² Ha'e ramo Nhanderuete aipoe'i Balaão pe:
— Tereo eme ha'e kuery reve, ndeayvu vai eme guive heta va'e kuery re. Mba'eta ha'e kuery ma ijayvu porāmbi ae ikuai — he'i.
- ¹³ Ha'e gui ko'égue Balaão opu'ā vy aipoe'i Balaque pegua yvatekueve pe:

* 22:2 Balaque ma Moabe pygua huvixave.

— Tapeo ju pendeyvy katy, mba'eta SENHOR naxemondoukai penderupive — he'i.

¹⁴ Ha'e ramo Moabe pygua yvatekueve opu'ã vy oje'oi ju Balaque-a py. Ha'e vy aipoe'i okuapy:

— Balaão rima ndouxei orereve — he'i okuapy.

¹⁵ Ha'e gui yvatekueve mboae ju Balaque omondouka, jypygua kuery gui hetave ha'e omboetevepy va'e.

¹⁶ Ha'e va'e kuery ma Balaão-a py ovaẽ vy aipoe'i okuapy:

— Po rami ma Zipor ra'y Balaque ijayvu: “Ajerure ndevy: Emboare eme xea py reju aguã,

¹⁷ mba'eta anhetẽ ete rojapo 'rã omboetepy. Ndeayvua ha'e javi tema 'rã ajapo. Ha'e gui ajerure ndevy: Eju ke, ndeayvu vai kova'e kuery re”, he'i uka va'ekue ndevy.

¹⁸ Ha'e ramo Balaque pegua yvatekueve pe Balaão ombovai:

— Xevy pe Balaque ngoo prata ha'e ouro tynyẽ reve ome'ẽmba teĩ xee mba'eve ndajapoi 'rã SENHOR Xeruete ojapo uka va'e e'ŷ vy, mba'emo kyr̄i'i va'e e'ŷ vy tuvixa va'e teĩ.

¹⁹ Ha'e rami avi aŷ ajerure kova'e pyávy peẽ kuery pepyta aguã apy, aikuaa aguã xapy'a rei xevy SENHOR omombe'uve rã — he'i.

²⁰ Pyávy Balaão-a py SENHOR ojekuaa vy aipoe'i ixupe:

— Ha'e va'e avakue ndereraaxe vy ou ramo epu'ã, tereo ha'e kuery reve. Ha'e rami teĩ rejapo 'rã xeayvua anho.[†]

SENHOR-a guigua anjo ha'e Balaão rymba mburika'i ojoko-jokoague

²¹ Ko'ẽmba jave Balaão opu'ã vy ombokupe áryguapa guymba mburika'i, ha'e vy oo Moabe pygua yvatekueve reve.

²² Ha'e oo ramo Nhanderuete poxya hendy. Ha'e rami vy SENHOR-a guigua anjo optyta tape henonde oo aguã py ojoko aguã. Ha'e rami jave Balaão oguata ov y mburika'i áry. Hexeve oo avi mokoñ hembiguai.

²³ Ha'e gui henda mburika'i oexa SENHOR-a guigua anjo tape py optyta ho'amy rã, opo py okyxe hyru gui oekue oguerekó reve. Ha'e ramo mburika'i ma tape gui ojepekuavo ov y mba'ety rupi ju oo oiny. Ha'e ramo Balaão oinupã mburika'i tape rupi ae ju ojevy aguã.

²⁴ Ha'e gui ma SENHOR-a guigua anjo ma peteĩ henda uvaty mbyte rupi hi'aĩ, kora joavaive rupi oĩ va'e py.

²⁵ Mburika'i ma SENHOR-a guigua anjo hi'aĩ rã oexa vy kora re ojekyty vy oubirí heravy Balaão retyma. Ha'e ramo Balaão ojeaive ju.

²⁶ Ha'e gui henonde katy SENHOR-a guigua anjo oove vy peteĩ henda ipo'i'ivea py ju hi'aĩ, ojepekuavo aguã ha'eve'ŷa py oiporu kuaa katy, neĩ oiporu kuaa e'ŷa katy ma voi.

²⁷ Ha'e gui mburika'i ma SENHOR-a guigua anjo hi'aĩ rã oexa vy ho'a oupy Balaão guy rupi. Ha'e ramo Balaão ivai ete vy oinupãmba mburika'i yvyra py.

²⁸ Ha'e ramo SENHOR ojapo mburika'i ijayvu aguã ramí. Ha'e vy aipoe'i Balaão pe:

— Mba'e tu xee ajapo ndevy, mboapykue ma xenupãmba aguã?

²⁹ Balaão ombovai mburika'i pe:

— Mba'eta xeavyky rei. Xepo py kyxe areko va'e rire aŷ'i ma voi rojuka 'rãgue — he'i.

³⁰ Ha'e ramo mburika'i ijayvu Balaão pe:

— Xapy'a rei nda'u xee nerymba mburika'i e'ŷ ri aiko, xe'áry e'ŷ nda'u reĩ, reikoa pukukue re aŷ peve? Xapy'a rei nda'u nami ae pa ndevy ajapo jepi?

Ombovai vy

— Any ri — he'i.

[†] 22:20 Nhanderuete nomondoukaxeit teĩ omondouka nho, mba'eta oikuaa vy Balaão ooxe etea (versículo 12). Ha'e gui Balaão ma oikuaa ma voi Nhanderuete nomondoukaxeia, teĩ oo nho Nhanderuete oipotaa rami e'ŷ.

³¹ Ha'e gui Balaão rexā SENHOR oipe'a ramo oexā SENHOR-a guigua anjo tape py hi'aī rā, kyxe hyru gui oekyi va'ekue opo py oguereko reve. Ha'e ramo oakā omboguejy vy ngova omovaē yvy re.

³² SENHOR-a guigua anjo aipoe'i ixupe:

— Mba'e re tu mboapykue ma reinupāmba mburika'i? Ne'exa, xee ma nderovai guarā aju, mba'eta xerenonde rupi ha'eve'ŷa rami reiko.

³³ Mburika'i ma xerexa vy ae mboapykue ma ojepekuavo xegui. Anhetē ete ha'e rami e'ŷ va'e rire xee rojuka ma 'rāgue, ha'e rā nerymba ma aeja 'rāgue oikove reve — he'i.

³⁴ SENHOR-a guigua anjo pe Balaão ombovai:

— Ajejavy, mba'eta ndaikuaai kova'e tape py xejokoarā ne'aīa. Ha'e rā xapy'a rei rā ha'eve'ŷ va'e ri reikuua ramo ma ajevy ju 'rā.

³⁵ SENHOR-a guigua anjo ombovai:

— Tereo tema peva'e avakue reve. Ha'e rami teī xeayvua rami anho 'rā ndeayvu — he'i ramo Balaão oo ju oiny Balaque pegua yvatekueve reve.

³⁶ Ha'e gui Balaão ovaē ta maa Balaque oendu vy oē ovaexī aguā peteī tetā Moabe regua Arnom yakā ovaēa peve, oyvy apy peve ete.

³⁷ Ha'e rami vy Balaque oporandu Balaão pe:

— Xee namondoukai ri ty'y xerembiguai kuery nerenoī aguā? Mba'e re tu ndereju voi ri xea py? Xee nda'u nanemboete kuaai ri?

³⁸ Balaão ombovai Balaque pe:

— Apy ma xee aī nerentonde py. Xapy'a rei nda'u xee ju aŷ ha'eve 'rā xeayvu aguā mba'emo re rei? Ha'e rami 'rāgue py ayvu Nhanderuete xevy omombe'u uka va'e rupi anho 'rā xeayvu — he'i.

³⁹ Ha'e gui Balaque reve Balaão oo vy ovaē okuapy Quiriate-Huzote py.

⁴⁰ Ha'e ramo Balaque ma vaka ha'e vexa'i ojuka uka vy ho'okue omondouka Balaão pe ha'e hexeve yvatekueve ikuai va'e pe.

⁴¹ Ko'ēgue Balaque Balaão ogueraa vy oguenoē heravy Bamote-Baal apyte peve. Ha'e va'e gui ma Balaão oexā Israel kuery regua ha'e'i pyve ikuiaia.

23

Balaão jypy'i Israel kuery ogueroayvu porāague

¹ Ha'e ramo Balaão aipoe'i Balaque pe:

— Ejapo na sete altar xevy, ha'e vy ejuka sete toro ra'y ha'e sete vexa'i — he'i ramo

² Balaque ojapo Balaão ijayvuague. Peteī-teī altar áry Balaque ha'e Balaão oapy peteī toro ra'y ha'e peteī vexa'i.

³ Ha'e gui Balaão aipoe'ive ju Balaque pe:

— Ndee ma epyta apy altar áry reapy va'ekue yvýry, ha'e rā xee ma aa 'rā mombyry'i. Xapy'a rei SENHOR xererovaexī vy ou ramo ma aju vy ndevy amombe'upa 'rā oexā uka va'e rei — he'i vy oē ov yvty áry.

⁴ Ha'e gui Balaão reve Nhanderuete nhovaexī ouvy ramo aipoe'i ixupe:

— Xee ma sete altar ma ajapo ndevy, ha'e gui peteī-teī áry apy ma peteī toro ra'y ha'e peteī vexa'i — he'i.

⁵ Ha'e ramo SENHOR ome'ē ayvu Balaão omombe'u va'erā. Ha'e vy aipoe'i:

— Tereo ju Balaque-a py. Ha'e vy xeayvua rami ae 'rā ndeayvu — he'i.

⁶ Ha'e katy ju Balaão oo vy altar ikuiaia py ovaē rā altar yvýry teri Balaque hi'aī, Moabe pygua yvatekueve ha'e javi reve.

⁷ Ha'e ramo ayvu omombe'u vy aipoe'i:

— Balaque ma xereru ruka Arā gui,

Moabe pygua huvixa xerenoī kuaray ou katy yvty oī va'e gui.

“Eju na, Jacó ramymino kuery re ndeayvu vai aguā,

ejу ndeayvu rei Israel kuery re”, he'i uka.

⁸ Ha'e rami avi mba'exa tu xeayvu vai ta Nhanderuete nda'ijayvu vaia kuery re?

- Mba'exá tu xeayvu rei ta SENHOR nda'ijayvu reia kuery re?
- ⁹ Mba'eta xee ma yvyty áry gui aexa Israel kuery,
 yvy'ã xe'aíá gui ama'ẽ ha'amý ha'e kuery re.
 Ha'e vy xee aexa rã ha'e kuery ae'i ikuai va'e regua,
 ha'e kuery pe "Yvy regua" nda'eai 'rã.
- ¹⁰ Mava'e ha'vy oipapa kuaa ta Jacó ramymino kuery yvy ku'i rami heta va'e,
 mava'e oipapa kuaa ta Israel kuery heta va'e apy re'i voi?
 Xee ma tamano heko porã va'e kuery rami,
 ha'e kuery opaa rami avi tapa — he'i.
- ¹¹ Ha'e ramo Balaque aipoe'i Balaão pe:
 — Mba'e tu rejapo xere? Xee ma roenoĩ xerovaigua kuery re ndeayvu vai aguã, va'eri
 ndee ma reroayvu porã.
- ¹² Ha'e rã ombovai:
 — Xap'yá rei nda'u ayvu SENHOR omombe'u uka va'ekue rupi e'ŷ 'rã ri xeayvu? — he'i.
- Balaão mokoïguea Israel kuery ogueroayvu porãague*
- ¹³ Ha'e ramo Balaque aipoe'i ixupe:
 — Xee ajerure ndevy: Eju, amboae katy ju jaa xerupive, ha'e kuery rexá aguã py. Ha'e'i
 rupive ikuai va'e anho 'rã rexá, ha'e javi e'ŷ. Ha'e vy ndeayvu vai 'rã ha'e gui — he'i vy
- ¹⁴ Zofim regua nhuündy rupi ju ogueraa, Pisga yvyty apyte áry. Ha'e py ma sete altar ju
 ojapo, ha'e peteñ-teñ áry oapy peteñ toro ra'y ha'e peteñ vexa'i.
- ¹⁵ Ha'e ramo Balaão aipoe'i Balaque pe:
 — Epyta ke apy altar áry reapy va'ekue yvýry, ha'e rã xee ma aa ta pe'i py SENHOR reve
 aikuua pota aguã — he'i.
- ¹⁶ Balaão-a py SENHOR ojekuaa ju vy ixupe ome'ẽ ayvu omombe'u va'erã. Ha'e vy
 aipoe'i:
 — Tereo ju Balaque-a py. Xeayvua rami 'rã ndeayvu.
- ¹⁷ Ha'e gui Balaque oĩa py ojevy rã ho'ame teri altar yvýry. Hexeve ikuai avi Moabe
 pygua yvatekueve. Ha'e vy oporandu:
 — Mba'e he'i SENHOR?
- ¹⁸ Ha'e ramo Balaão ayvu omombe'u vy aipoe'i:
 — Epu'ã ke Balaque, rendu aguã.
 Ndee Zipor ra'y, ejapyxaka xeayvu re.
- ¹⁹ Nhanderuete ma ava e'ŷ oiko ijapu aguã,
 ava ra'y e'ŷ guive oiko nda'evei nho ju aguã.
 Xap'yá rei nda'u ha'e nome'ẽ 'rã ri ome'ẽ 'rã va'ekue?
 Ha'e ijayvu rire ndojapoi 'rã ri nda'u ha'e rami he'iague?
- ²⁰ Ma'ẽ, ha'e ijayvu ha'e kuery aroayvu porã aguã re.
 Ha'e gui ha'e ogueroayvu porãague ma xee nda'evei amboaxa rive aguã.
- ²¹ Mba'eta Jacó kuery re ha'e ndoexai mba'emo vai,
 nonhembopy'ai guive Israel kuery omoingo axy aguã.
 Ha'e kuery reve SENHOR tuuete oiko,
 ha'e kuery mbyte gui onhendu nguvixave oguerovy'a okuapya regua.
- ²² Egito yvy gui Nhanderuete ogueraapa raka'e,
 ha'e kuery ma toro ka'aguy regua rami 'rã imbaraete.
- ²³ Mba'eta Jacó kuery rovai rupi mba'evykyá nda'eve ranhei 'rã,
 Israel kuery rovai mba'ekuaa ndovarei 'rã.
 Aŷ ma Jacó ha'e Israel kuery re aipo'ea 'rã:
 "Mba'emo iporã ete va'e ha'e kuery pe Nhanderuete ojapo!"
- ²⁴ Ma'ẽ, ha'e kuery opu'ã 'rã guary kunha rami,
 guary rami ete 'rã opu'ã.
 Mba'eta nonhenoi 'rã guembia ho'upa e'ŷa ja,
 ojuka va'ekue ruguy voi oy'u va'e — he'i.

- ²⁵ Ha'e ramo Balaque aipoe'i Balaão pe:
 — Ndeayvu vai eme ha'e kuery re, neĩ eroayvu porã eme guive.
- ²⁶ Ha'e rã Balaão ombovai vy aipoe'i Balaque pe:
 — Aipo nda'ei ri ty'y: “ SENHOR ijayvua ha'e javi ma xee ajapo 'rãe”, nda'ei ae ty'y ndevy?
- ²⁷ Ha'e rami rã Balaque aipoe'ive ju Balaão pe:
 — Neĩ ke eju, amboae katy jevy ta rogueraa. Xapy'a rei ma ha'e py Nhanderuete ojou porã 'rã ndeayvu vai aguã — he'i.
- ²⁸ Ha'e rami vy Peor yvyty apyte peve ju Balaque ogueraa Balaão. Ha'e va'e gui ma tekoa e'ŷa ha'e javi ojekuaa 'rã.
- ²⁹ Ha'e gui Balaão aipoe'i Balaque pe:
 — Apy voi ke ejapo xevy sete altar, ha'e eapy ju sete toro ra'y ha'e sete vexa'i — he'i.
- ³⁰ Balaão ijayvuague rami vy Balaque ojapo vy peteĩ-teĩ altar áry oapy peteĩ toro ra'y ha'e peteĩ vexa'i.

24

Balaão mboapykuea Israel kuery ogueroayvu porãague

- ¹ Ha'e gui Balaão oikuua ae ma SENHOR Israel kuery ogueroayvu porãxeia. Ha'e rami vy ha'ekue rami e'ŷ ndooi ranhe imba'ekuua aguã. Ha'e rami 'rãgue py tekaoa e'ŷa katy oma'ẽ ho'amy.
- ² Balaão oma'ẽ vy oexa Israel kuery peteĩ-teĩ regua ikuai va'e. Ha'e gui hexe ou Nhanderuete-a guigua Nhe'ẽ.
- ³ Ijayvu vy aipoe'i:
 — Po rami ma Beor ra'y Balaão ijayvu,
 ava mba'emo oexa porã va'e ayvu,
- ⁴ Nhanderuete hayvu oendu va'e ayvu ae.
 Mba'eta Ipo'akapa va'e oexa uka va'e aexa vy
 xerenapy'ã re aĩ reve ama'ẽ porã va'e.
- ⁵ Jacó kuery, oo pendekuaia va'e ma iporã va'e meme!
 Israel kuery, penderekaoa ma iporã ete!
- ⁶ Yvy'ämbe reia rupi ojekuaa,
 yvoty ty yakã yvýry onhotý mbyre rami,
 yvýra sândalo rembypy SENHOR onhotý va'ekue rami,
 yary yy yvýry rupi hi'aĩ va'e rami.
- ⁷ Ha'e kuery yryru py ndoatai 'rã yy,
 mba'emo ra'yí onhotýa rupi voi inhaký porã riae 'rã.
 Ha'e kuery ruvixave ma Agague gui 'rã yvateve,
 ipo'akaa voi omboetevepy.
- ⁸ Israel kuery Egito yvy gui Nhanderuete ogueru va'ekue ma
 toro ka'aguy regua rami imbaraete va'e.
 Ha'e vy omomba 'rã ngovaigua kuery yvy regua.
 Omopẽmba 'rã ikãgue.
 Ngu'y py onhyvõmba 'rã.
- ⁹ Ha'e kuery oguapy vy onheno 'rã guary rami,
 ha'e guary kunha rami. Mava'e 'rã tu omomyí?
 Ovy'a ete 'rã ha'e kuery reroayvu porãare,
 ha'e rã ha'e kuery re ijayvu vai va'ekue ma ayvu vaipy ikuai — he'i.
- ¹⁰ Ha'e ramo Balaão pe Balaque ipoxy raxa. Ha'e vy aipoe'i Balaão pe:
 — Xee ma xerovaigua kuery pe ndeayvu vai aguã roenoĩ teĩ mboapykue ma reroayvu porã.
- ¹¹ Ha'e nunga rupi aŷ ma tereo ju ndero katy. Xee ma “Ndevy ame'ẽ 'rã mba'emo porã”
 ha'e va'ekue ri aŷ SENHOR ojapo ma mba'eve rejopy e'ŷ aguã rami — he'i.

- ¹² Ha'e ramo Balaão ju aipoe'i Balaque pe:
 — Ha'e rami avi nerembiguai kuery xea py remondouka va'ekue pe xee aipo nda'eit'y:y:
¹³ “Xapy'a rei Balaque ngoo ouro ha'e prata tynyẽ reve xevy ome'ẽ teĩ xee ma mba'eve ndajapoi 'rã SENHOR ojapo uka va'e e'ŷ vy, aroayvu porã aguã, e'ŷ vy xeayvu vai aguã teĩ. SENHOR ijayvuague rupi ae 'rã xee xeayvu”, nda'eit ae ri ty'y:
¹⁴ Ha'e gui aŷ xee aa ju ta xeretarã kuery rekoakat. Ha'e rami teĩ enhemboja ranhe, ndevy amombe'u ta raka'eve rã ndevyguakuery re kova'e kuery ojapo 'rãa — he'i.

Jaxy-tata Jacó guigua re Balaão ijayvu ma voiague

- ¹⁵ Ha'e vy Balaão ayvu omombe'u vy aipoe'i:
 — Po rami ma Beor ra'y Balaão ijayvu,
 ava mba'emo oexa porã va'e ayvu,
¹⁶ Nhanderuete hayvu oendu va'e ayvu ae.
 Mba'eta Yvateve ete va'e oikuua uka va'e aikuua va'e,
 Ipo'akapa va'e oexa uka va'e aexa va'e,
 ha'e xerenapy'ã re aĩ reve ama'ẽ porã va'e.
¹⁷ Ha'e gui peteĩ aexa teĩ aŷ'i oiko va'erã e'ŷ guive,
 aexa teĩ ovaẽ rai'i va'erã e'ŷ.
 Mba'eta peteĩ jaxy-tata oiko 'rã Jacó ramymino,
 Israel kuery mbyte gui peteĩ ou 'rã po pygua revegua,
 Moabe kuery akã rupi omopẽmba va'erã,
 ha'e Sete ramymino kuery mombaarã.
¹⁸ Mba'eta Edom yvy re ipo'aka 'rã,
 ngovaigua kuery Seir yvy re voi ipo'aka 'rã.
 Ha'e rã Israel kuery ma imbaraetea rupi 'rã ikuai.
¹⁹ Mba'eta Jacó kuery mbyte gui oiko 'rã joe ipo'aka va'erã.
 Ha'e va'e omomba 'rã peneretã rupi pekuave va'ekue-'ekue — he'i.
²⁰ Ha'e gui Balaão amalequita kuery ju oexa vy ayvu omombe'uve. Ha'e vy aipoe'i:
 — Amalequita kuery ma yvy regua kuery gui penderetave va'eri
 opaa py ma penemokanhymbaa 'rã — he'i.
²¹ Oexa avi Queneu kuery. Ha'e vy ayvu omombe'u vy aipoe'i:
 — Penderekao ma oĩ porã ranhe,
 nderaityrã itaova re rejapo va'ekue ri,
²² teĩ peẽ Queneu kuery penemombaa 'rã.
 Raka'e peve 'rã tu? Assur pygua kuery pendereraapa 'rã escravo-rã — he'i.
²³ Ayvu omombe'u teri vy aipoe'i:
 — Haxy ete 'rã! Mava'e tu oikove 'rã
 Nhanderuete ha'e nunga omoingo jave?
²⁴ Mba'eta Quitim yvy gui kanoã guaxu py avakue ou vy
 Assur ha'e Héber rupi voi nhombojexavai 'rã.
 Ha'e rami teĩ ha'e kuery ae jevy 'rã omanomba — he'i.
²⁵ Ha'e rire Balaão opu'ã vy ojepe'a ovv, oyvy katy ju ojevy. Balaque voi oo ju ouague rupi.

Peor pygua kuery ruete ramigua Baal ombojerovia okuapya py Finéias omombaague

- ¹ Israel kuery Sitim py ikuai jave ha'e kuery omboypy Moabe pygua kunhague reve itavy rei okuapya aguã.
² Ha'e va'e kunhague oenoimba nguuetre ra'angaa kuery pe rive mba'emo ome'ẽa py. Ha'e ramo Israel kuery amboae kuery reve okaru okuapya aguã oo vy kunhague ruete ra'angaa kuery renonde py rive 'rã guenapy'ã re ikuai.

³ Peor pygua kuery ruete ramigua Baal re Israel kuery voi oje'oi ramo SENHOR poxya hendy ha'e kuery rovai.

⁴ Ha'e rami vy SENHOR aipoe'i Moisés pe:

— Ejopypa ke heta va'e kuery ruvixa ikuai va'e, ha'e vy SENHOR renonde ejyryvipypa imo'amy oka py, Israel kuerya gui xepoxya ojepe'a aguã — he'i.

⁵ Ha'e ramo Moisés aipoe'i Israel kuery mongetaa kuery pe:

— Peteĩ-teĩ pejuka 'rã pendereguá avakue Peor pygua ruete Baal re oje'oi va'ekue — he'i.

⁶ Ha'e rami teĩ peteĩ ava Israel kuery va'e regua oo vy heta va'e kuery ikuiaia py ogueru peteĩ kunha Midiã pygua. Moisés oexaa py eteve ogueru, ha'e Israel kuery ha'e javi oexa pav a py, ha'e kuery oguy nhemboaty o aty renonde py ojae'opa teri okuapy jave.

⁷ Kunha va'e ogueru rã sacerdote Fin ias oexa. Ha'e va'e ma Eleazar ra'y, Ar o ramymimo ae. Ha'e rami vy heta va'e kuery mbyte gui ha'e opu ã vy peteĩ hu'y ojopy reve

⁸ oo oiny ava Israel regua rakykue, ngopy oike ovagogue peve. Ha'e py ae onhyv o moko ve hyepy rupi, ava Israel regua ha'e kunha va'e voi. Ha'e ramo optytu'u mba'emo vai Israel kuery mbyte rupi oiko va'ekue.

⁹ Mba'emo vai gui omano va'ekue ma vinte e quatro mil ha'e javi vy.

¹⁰ Ha'e gui SENHOR aipoe'i Moisés pe:

— Eleazar ra'y Fin ias, sacerdote Ar o ramymimo va'e rima ojapo Israel kuery ary guixepoxya optytu'u aguã rami. Mba'eta xere vy ae oendu nda'evei etea ha'e kuery mbyte rupi. Ha'e rami vy ojapo Israel kuery amomba e' y aguã rami, nda'evei etea aendu teї.

¹² Ha'e nunga rupi aipo're 'rã: "A y ma ndereve ajapo 'rã xereve peteĩ rami romoingo agu  " 're,

¹³ mba'eta hexeve, ha'e gui ha'e ndoikovei rire hamymimo kuery jevy ikuai va'e reve ajapo 'rã sacerdote ikuai agu  . Xee nguete re ima'endu'a vy ae oendu openaxea, ha'e rami vy ojao'i uka Israel kuery ojejavyague — he'i.

¹⁴ Midi  pygua kunha reve Israel regua ojuka pyre ma Salu ra'y Zimri. Tuu ma Sime o regua kuery ruvixa.

¹⁵ Ha'e rã Midi  pygua kunha ojuka pyre ma Zur rajy Cosbi. Tuu ma Midi  pygua huvixa oiko.

¹⁶ Ha'e gui SENHOR aipoe'ive ju Mois s pe:

¹⁷ — Pemoingo axy 'rã Midi  pygua kuery pejukapa peve,

¹⁸ mba'eta ha'e kuery voi penemoingo axy va'ekue Peor py nguete ramigua pembojerovia agu   rami penembotavypaa py, ha'e gui gueindy Midi  pygua huvixa rajy Cosbi k  uxa voi. Ha'e va'e ma ojukaa Peor py mba'emo vai oiko jave.

26

Israel kuery oipapaa jevyague

¹ Mba'emo vai oaxapa ma rire SENHOR ijayvu Mois s pe, ha'e sacerdote Ar o ra'y Eleazar pe. Ha'e vy aipoe'i:

² — Pemboparapa ke Israel kuery ha'e javi rery, vinte ma'et y va'e guive tujakue peve, peteĩ-teĩ tamoi kuery ro pygua ikuiaia rami vy. Israel kuery va'e regua pemboparapa 'r a joe opu   kuaa va'e ha'e javi — he'i.

³ Ha'e ramo Mois s ha'e sacerdote Eleazar ijayvu Israel kuery yvatekueve pe. Moabe yvy ka'aguy e' y py, Jord o yak  yv  y Jeric  tet  rexei ikuiaia py ijayvu vy aipoe'i:

⁴ — Peipapa 'r a avakue vinte ma'et y va'e guive tujakue peve, Mois s pe SENHOR ojapo ukaague rami vy, ha'e Israel kuery Egito gui oje'oi va'ekue ha'e javi pe — he'i.

⁵ Ha'e gui R  ben ma Israel ra'y jypykue va'e. R  ben ramymimo kuery Enoque guigua ma enoquita, Palu ramymimo kuery ma palu  ta,

⁶ Hezrom ramymimo kuery ma hezronita, Carmi ramymimo kuery ma carmita.

⁷ Ha'e va'e kuery ma R  ben ramymimo meme. Ha'e kuery va'e regua oipapaa r a quarenta e tr  s mil e setecentos e trinta ha'e javi vy.

⁸ Palu ra'y ma Eliabe.

⁹ Eliabe ra'y kuery ma Nemuel, Datā ha'e Abirão. Ha'e gui Datā ha'e Abirão ma heta va'e kuery oiporavo va'ekue ri opu'ã okuapy Moisés ha'e Arão rovai Coré pegua kuery reve, SENHOR rovai ae opu'ãa py.

¹⁰ Ha'e va'e jave py yvy ojepe'a ramo Coré pegua kuery ho'apa raka'e. Ha'e vy omanomba. Tata py ju duzentos e cinqüenta avakue omano raka'e. Ha'e nungakue ma nhanheangu aguã oiko raka'e.

¹¹ Ha'e rami teĩ Coré ra'y kuery ma nomanombai.

¹² Ha'e gui Simeão ramymino kuery peteĩ-teĩ regua ikuai va'e ma po rami hery: Nemuel ramymino kuery ma nemuelita, Jamim ramymino kuery ma jaminita, Jaquim ramymino kuery ma jaquinita,

¹³ Zerá ramymino kuery ma zeraíta, Saul ramymino kuery ma saulita.

¹⁴ Ha'e va'e kuery ma Simeão ramymino meme, vinte e dois mil e duzentos ha'e javi vy ikuai.

¹⁵ Ha'e gui Gade ramymino kuery ju. Zefom ramymino kuery ma zefonita, Hagi ramymino kuery ma hagita, Suni ramymino kuery ma sunita,

¹⁶ Ozni ramymino kuery ma oznita, Eri ramymino kuery ma erita,

¹⁷ Arodi ramymino kuery ma arodita, Areli ramymino kuery ma arelita.

¹⁸ Ha'e va'e kuery ma Gade ramymino kuery meme. Ha'e kuery va'e regua oipapaa rã quarenta mil e quinhentos ha'e javi vy.

¹⁹ Ha'e gui Judá ramymino kuery ma Er ha'e Onã. Ha'e va'e kuery ma Canaã yvy re omano va'ekue.

²⁰ Ha'e rami vy Judá ramymino kuery peteĩ-teĩ regua ikuai va'e ma po rami hery: Selá ramymino kuery ma selaita, Perez ramymino kuery ma perezita, Zera ramymino kuery ma zeraíta,

²¹ Perez ra'y Hezrom ramymino kuery ma hezronita, ha'e rã Hamul ramymino kuery ma hamulita.

²² Ha'e va'e kuery ma Judá ramymino kuery meme. Ha'e kuery va'e regua oipapaa rã setenta e seis mil e quinhentos ha'e javi vy.

²³ Ha'e gui Issacar ra'y kuery ju peteĩ-teĩ regua ikuai va'e ma po rami hery: Tola ramymino kuery ma tolaíta, Puva ramymino kuery ma puvita,

²⁴ Jasube ramymino kuery ma jasubita, Sinrom ramymino kuery ma sinronita.

²⁵ Ha'e va'e kuery ma Issacar ramymino kuery meme. Ha'e va'e kuery oipapaa rã sessenta e quatro mil e trezentos ha'e javi vy.

²⁶ Ha'e gui Zebulom ra'y kuery ju peteĩ-teĩ regua ikuai va'e ma po rami hery: Serede ramymino kuery ma seredita, Elom ramymino kuery ma elonita, Jaleel ramymino kuery ma jaleelita.

²⁷ Ha'e va'e kuery ma Zebulom ramymino kuery meme. Ha'e kuery va'e regua oipapaa rã sessenta mil e quinhentos ha'e javi vy.

²⁸ Ha'e gui José ra'y kuery ju peteĩ-teĩ regua ma Manassés ha'e Efraim.

²⁹ Manassés ramymino kuery Maquir guigua ma maquirita, Maquir ra'y ma Gileade, ha'e Gileade ramymino kuery ma gileadita.

³⁰ Ha'e gui Gileade ramymino kuery Jezer ramymino kuery ma jezerita, Heleque ramymino kuery ma helequita,

³¹ Asriel ramymino kuery ma asrielita, Siquém ramymino kuery ma siquemita,

³² Semida ramymino kuery ma semidaíta, Hefer ramymino kuery ma heferita.

³³ Hefer ra'y Zelofeade ma ta'y e'ŷ va'e, tajy kuery anho ikuai. Zelofeade rajy kuery ma Macla, Noa, Hogla, Milca e Tirza.

³⁴ Ha'e va'e kuery ma Manassés ramymino kuery. Ha'e kuery va'e regua oipapaa rã cinqüenta e dois mil e setecentos ha'e javi vy.

³⁵ Ha'e gui Efraim ra'y kuery peteĩ-teĩ ikuai va'e ma po rami hery: Sutela ramymino kuery ma sutelaíta, Bequer ramymino kuery ma bequerita, Taã ramymino kuery ma taanita.

³⁶ Ha'e gui Sutela ra'y Erā va'e ramymino kuery ma eranita ae.

³⁷ Ha'e va'e kuery ma Efraim ramymino kuery meme. Ha'e kuery va'e regua oipapaa rā trinta e dois mil e quinhentos ha'e javi vy. Ha'e va'e kuery ma José ramymino kuery meme, peteī-teī regua ikuia rami.

³⁸ Ha'e gui Benjamim ramymino kuery peteī-teī regua ikuai va'e ma po rami hery: Bela ramymino kuery ma belaita, Asbel ramymino kuery ma asbelita, Airão ramymino kuery ma airamita,

³⁹ Sufā ramymino kuery ma sufamita, Hufā ramymino kuery ma hufamita.

⁴⁰ Bela ra'y kuery ma Arde ha'e Naamā. Arde ramymino kuery ma ardita, Naamā ramymino kuery ma naamanita.

⁴¹ Ha'e va'e kuery ma Benjamim ramymino kuery meme. Ha'e kuery va'e regua oipapaa rā quarenta e cinco mil e seiscentos ha'e javi vy.

⁴² Ha'e gui Dā ramymino kuery peteī-teī regua ikuai va'e ma po rami hery: Suão ramymino kuery ma suamita. Ha'e va'e kuery ma Dā ramymino kuery kuery, peteī-teī regua ikuia rami.

⁴³ Ha'e gui suamita kuery va'e regua ma oipapaa rā sessenta e quatro mil e quatrocentos ha'e javi vy.

⁴⁴ Ha'e gui Aser ra'y kuery ju peteī-teī regua ikuai va'e ma po rami hery. Imna ramymino kuery ma imnaíta, Isvi ramymino kuery ma isvita, Berias ramymino kuery ma beriaíta.

⁴⁵ Berias ra'y Héber ramymino kuery ma heberita, ha'e rā Malquiel ramymino kuery ma malquielita.

⁴⁶ Ha'e gui Aser rajy rery ma Sera.

⁴⁷ Ha'e va'e kuery ma Aser ramymino kuery meme. Ha'e kuery va'e regua oipapaa rā cinqüenta e três mil e quatrocentos ha'e javi vy.

⁴⁸ Ha'e gui Naftali ra'y kuery peteī-teī regua ikuai va'e ma po rami: Jazeel ramymino kuery ma jazeelita, Guni ramymino kuery ma gunita,

⁴⁹ Jezer ramymino kuery ma jezerita, Silém ramymino kuery ma silemita.

⁵⁰ Ha'e va'e kuery ma Naftali ramymino kuery meme. Ha'e kuery va'e regua oipapaa rā quarenta e cinco mil e quatrocentos ha'e javi vy.

⁵¹ Ha'e va'e kuery ma Israel kuery va'e regua oipapaa rā seiscentos e um mil setecentos e trinta ha'e javi vy.

Ha'e kuery yvyrā omboja'o-ja'o aguā re ijayvua

⁵² SENHOR aipoe'i Moisés pe:

⁵³ — Ha'e kuery pe ma remboja'o 'rā yvy imba'erā, peipapa rā peteī-teī regua mbovy pa ikuia rami vy.

⁵⁴ Ha'e gui hetave va'e regua pe ma yvy tuvixave 'rā pemboaxa. Ha'e rā mboapy'ive va'e regua pe ma ruxāve'i 'rā remboaxa. Peteī-teī regua mbovy pa ikuia rami vy 'rā remboaxa ijyvyrā.

⁵⁵ Yvy pemboja'o 'rā xorte pexa vy. Tamoī kuery regua rery pexaa rami vy ha'e kuery ojopy 'rā oyvyrā.

⁵⁶ Xorte pexa vy 'rāe pemboja'opa peteī-teī regua pe, hetave va'e pe, ha'e mboapy'ive va'e pe voi.

Levita kuery ju oipapaa ague

⁵⁷ Pova'e kuery ma levita kuery va'e regua oipapa pyre, peteī-teī regua ikuia rami: Gérson ramymino kuery ma gersonita, Coate ramymino kuery ma coatita, Merari ramymino kuery ma merarita.

⁵⁸ Pova'e kuery voi ma Levi ramymino kuery ikuai: libnita, hebronita, malita, musita ha'e coreíta kuery regua. Coate ra'y ma Anrão.

⁵⁹ Anrão ra'yxy ma Levi ramymino Joquebede, Egito yvy re ae oiko va'ekue. Ha'e va'e ma oguereko'i Anrão ra'y kuery Arão ha'e Moisés, ha'e gui ha'e kuery reindy Miriã.

⁶⁰ Arão ra'y kuery ma Nadabe, Abiú, Eleazar ha'e Itamar.

⁶¹ Nadabe ha'e Abiú ma omano va'ekue, tata ha'eve'ŷa ramigua SENHOR renonde py ogueruague re.

⁶² Ha'e va'e kuery regua oipapaa rã vinte e três mil, avakue peteĩ jaxy va'e guive tujakue peve. Ha'e va'e kuery ma Israel kuery mboae reve ndoipapaa, mba'eta ha'e kuery pe ma nome'ẽai ijyvyrã amboae kuery reve.

⁶³ Ha'e va'e kuery ha'e javi ma Moisés ha'e sacerdote Eleazar oipapa va'ekue. Moabe yvy ka'aguy e'ŷa py oipapa Israel kuery, Jordão yakã yvýry, Jericó tetã rexei ikuai jave.

⁶⁴ Ha'e va'e kuery regua peteĩve ma voi jipovei Moisés ha'e sacerdote Arão oipapa ypy va'ekue, Sinai regua tekoá e'ŷa py Israel kuery ikuai jave,

⁶⁵ SENHOR “Ha'e kuery omanomba 'rã tekoá e'ŷa py” he'i rire. Ha'e rami rire peteĩve ma voi ndoikovei, Jefoné ra'y Calebe e'ŷ vy, ha'e gui Num ra'y Josué guive.

27

Zelofeade rajy kuery oyvyrã ojopy aguã re ijayvua

¹ Ha'e gui ou okuapy Zelofeade rajy kuery. Zelofeade ma Hefer ra'y, Hefer ma Gileade ra'y, Gileade ma Maquir ra'y, Maquir ma Manassés ra'y, Manassés ma José ra'y. Po rami ma tajy kuery rery: Macla, Noa, Hogla, Milca ha'e Tirza.

² Ha'e gui ha'e va'e kuery ma Moisés renonde py ojexa uka okuapy, sacerdote Eleazar, huvixa kuery ha'e heta va'e kuery renonde py, oguy nhemboaty oĩaty rokẽ py onhem-boatya py. Ha'e vy aipoe'i okuapy:

³ — Ore kuery ru ma omano karamboae tekoá e'ŷa py teĩ SENHOR rovai Coré pegua kuery opu'ã okuapy va'e reveguia e'ŷ. Ha'e ae ojejavague re omano raka'e. Ta'y e'ŷ re guive omano.

⁴ Mba'e re tu ha'vy oreru rery pembogue ta ri hetarã kuery mbyte gui, ta'y kuery nda'ipoia káuxa rive? Eme'ẽ avi na oreyvyrã, oreru ryvy kuery oguerekia rami avi — he'i okuapy.

⁵ Ha'e va'e kunhague ojerurea Moisés omboaxa SENHOR renonde py.

⁶ Ha'e ramo SENHOR aipoe'i Moisés pe:

⁷ — Zelofeade rajy kuery ma ha'evea rupi meme ojerure. Ha'e nunga rupi ha'e kuery pe voi peme'ẽ 'rã ijyvyrã, tuu ryvy kuery pe rami avi. Tajy kuery pe 'rã peme'ẽ tuu yvykue.

⁸ Ndeayvu 'rã Israel kuery pe. Ha'e vy aipo're: “Amongue ta'y e'ŷ re omano ri ramo imba'ekue peme'ẽ 'rã tajy pe ae.

⁹ Ha'e rã tajy ndoikoi ramo imba'ekue peme'ẽ 'rã tyvykue pe.

¹⁰ Ha'e rã tyvy kuery ndoikoi ri ramo imba'ekue peme'ẽ 'rã tuu ryvy kuery pe.

¹¹ Ha'e rã guyvy kuery ndoguerekoi ri ramo imba'ekue peme'ẽ 'rã penetarã kuery ae'ive pe imba'erã”, 're 'rã — he'i.

Ha'e va'e ma Israel kuery rekorã SENHOR oeja va'ekue, Moisés pe ojapo ukaague rami vy.

Deuteronômio 3.23-29

¹² Ha'e va'e rire SENHOR aipoe'i Moisés pe:

— Eẽ ke kova'e yvyty Abarim apyte peve, yvy Israel kuery pe ame'ẽ va'e rexia aguã.

¹³ Ha'e va'e rexia ma rire nenhe'ẽ ju 'rã heraa neramoí kuerya py, nderyke'y Arão nhe'ẽ heraa ague rami avi.

¹⁴ Mba'eta Zim regua tekoá e'ŷa py heta va'e kuery opu'ãmba rei jave peẽ voi naxenhe'ẽ rendui va'ekue, ha'e vy ha'e kuery oexaa py ndapexa ukai xeky'a e'ŷ va'ea, yy peme'ẽa py — he'i. Ha'e va'e yy ma Meribá pygua, Cades katy'i, Zim regua tekoá e'ŷa py.

¹⁵ Ha'e ramo Moisés aipoe'i SENHOR pe:

¹⁶ — Ndee SENHOR pavẽ rekoverã me'ẽa, ha'e pavẽ rekove re repena va'e, emoí peteĩ ava kova'e kuery re opena va'erã,

¹⁷ ha'e kuery renonde rupi ojepe'a ha'e ojevy va'erã, ha'e ha'e kuery oje'oi ha'e ojevyra rupi oguerekia va'erã, SENHOR pegua kuery vexa'i ija e'ŷ va'e rami rive ikuai e'ŷ aguã — he'i.

Moisés rekovia Josué ju omoïague

¹⁸ SENHOR aipoe'i Moisés pe:

— Eraa ha'vy Num ra'y Josué, ha'e emoī ndepo hexe, mba'eta ha'e va'e re ma Nhe'ẽ oī.

¹⁹ Rexa uka 'rã sacerdote Eleazar ha'e heta va'e kuery ha'e javi renonde py. Ha'e kuery oexaa py eme'ẽ ojapo va'erã.

²⁰ Ixupe ju 'rã remboaxa ndepo'akaa regua, Israel kuery ha'e javi onhe'ẽ rendu aguã.

²¹ Ha'e jevy 'rã ojexa uka sacerdote Eleazar pe, SENHOR renonde py oikuua pota aguã Urim oexaa rupi. Mba'eta sacerdote ijayvua rami meme 'rã ha'e kuery oje'oi ha'e ojevy okuapy, Josué ha'e Israel kuery ha'e javi — he'i.

²² Ha'e ramo Moisés ojapo SENHOR ojapo ukaa rami. Ha'e vy Josué ogueraa vy oexa uka sacerdote Eleazar pe heta va'e kuery pavẽ oexaa py.

²³ Hexe opo omoī vy ome'ẽ ojapo va'erã, Moisés pe SENHOR ijayvuague rami vy.

28

Êxodo 29.38-42

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Pepena 'rã mba'emo xevy peme'ẽ aguã, peme'ẽ aguã ára py porã, mba'emo aju guigua mba'e, mba'emo peapy va'erã, heakuã porã va'e guive.

³ Pova'e ae 'rã ko'ẽ nhavõ SENHOR pe peapy vy peme'ẽ va'erã: mokoī vexa'i ra'y peteī ma'etý va'e, ivaikue rei e'ŷ va'e. Ha'e va'e ma peapy vy peme'ẽ jepi 'rã.

⁴ Peteī vexa'i ra'y ma peme'ẽ 'rã aje'ive'i reve, ha'e rã amboae ma ka'a'ru'i jave guarã.

⁵ Peteī ryru trigo iporãve va'e avi 'rã peru mba'emo aju guigua ome'ẽ mbyrã, peteī ryru azeite onhami mbyre reve pemoirũ vy pemoapomo va'ekue reve.

⁶ Ha'e va'e ma peapy vy peme'ẽ jepi 'rã Sinai yvyty py oejaague rami vy, heakuã porã rã SENHOR ojou porã aguã.

⁷ Peteī-teī vexa'i ra'y reve penhoē avi 'rã peteī ryru iro va'e. Henda iky'a e'ŷ va'e py 'rã peme'ẽ SENHOR pe.

⁸ Ha'e rã amboae vexa'i ra'y ma ka'aru'i jave 'rã peme'ẽ. Aje'ive'i reve guarã peme'ẽa rami ae avi 'rã peme'ẽ ju mba'emo aju guigua, iro va'e penhoē reve. Peapy vy 'rã peme'ẽ, heakuã porã rã SENHOR ojou porã aguã.

⁹ — Ha'e rã sábado ára py ma peme'ẽ 'rã mokoī vexa'i ra'y peteī ma'etý va'e, ivaikue rei e'ŷ va'e, ha'e gui mokoī ryru trigo iporãve va'e azeite reve omoapomo mbyre. Mba'emo aju guigua peme'ẽ 'rã iro va'e penhoē reve.

¹⁰ Ha'e va'e ma sábado nhavõ peapy vy peme'ẽ va'erã, ko'ẽ nhavõ mba'emo peme'ẽ ha'e penhoē va'e áryve.

¹¹ — Ha'e gui jaxy nhavõ ijypy'ia ára py ma SENHOR pe peapy vy peme'ẽ 'rã mokoī toro ra'y, peteī vexa'i ha'e sete vexa'i ra'y peteī ma'etý va'e, ivaikue rei e'ŷ va'e.

¹² Toro ra'y reve peme'ẽ avi 'rã mba'emo aju guigua mboapy ryru trigo iporãve va'e azeite reve omoapomo mbyre. Ha'e rã vexa'i reve ma mba'emo aju guigua peme'ẽ 'rã mokoī ryru trigo iporãve va'e azeite reve omoapomo mbyre.

¹³ Vexa'i ra'y reve ma mba'emo aju guigua peme'ẽ 'rã peteī ryru trigo iporãve va'e azeite reve omoapomo mbyre. Ha'e va'e ma peapy vy peme'ẽ 'rã, heakuã porã rã SENHOR ojou porã aguã.

¹⁴ Toro ra'y reve penhoē 'rã mokoī ryru vinho, ha'e rã vexa'i reve ma peteī ryru raxa'i 'rã penhoē, ha'e gui vexa'i ra'y reve ma peteī ryru ete'i 'rã penhoē. Ha'e va'e ma jaxy pyaua ára ojeupity nhavõ peme'ẽ 'rã peapy vy, ma'etý mbukukue re.

¹⁵ Ko'ẽ nhavõ Peru avi 'rã peteī kavara ava jejavya regua SENHOR pe peapy vy peme'ẽ va'erã, mba'emo penhoē va'e reve.

¹⁶ — Ha'e gui jaxy jypy'igua re catorze araa py ma oiko 'rã SENHOR pegua ngaru Páscoa regua.

¹⁷ Ha'e va'e jaxy re quinze araa py ma pejapo 'rã ngaru. Sete ára re 'rã mbojape pe'u pekuapy imbovua revegua e'ŷ.

¹⁸ Ijypyua ára oiko 'rã nhemboaty iky'a e'ŷ va'e. Nei peteīve ma napemba'eapoi 'rã.

¹⁹ SENHOR pe peapy vy peme'ẽ 'rã mokoĩ toro ra'y, peteĩ vexa'i ha'e sete vexa'i ra'y peteĩ ma'etõ va'e, ivaikue rei e'ŷ va'e meme.

²⁰ Mba'emo aju guigua peme'ẽ 'rã azeite reve omoapomo mbyre. Toro ra'y reve peme'ẽ 'rã mboapy ryru trigo iporãve va'e gui pejapo va'ekue, ha'e rã vexa'i ava reve ma mokoĩ ryru gui,

²¹ ha'e gui sete vexa'i ra'y ikuai va'e regua peteĩ-teĩ reve 'rã peme'ẽ peteĩ ryru gui pejapo va'ekue.

²² Peme'ẽ avi 'rã peteĩ kavara ava jejavya regua, pejejavyague pejao'i uka aguã.

²³ Ha'e nunga ha'e javi 'rã peme'ẽ, aje'ive'i reve mba'emo peapy vy peme'ẽ va'ety reve.

²⁴ Ha'e rami vy sete ára re, ko'ẽ nhavõ peme'ẽ 'rã mba'emo aju guigua peapy vy, heakuã porã rã SENHOR ojou porã aguã. Ko'ẽ nhavõ mba'emo peapy vy peme'ẽ va'e reve ha'e va'e peme'ẽ avi 'rã, mba'emo penhoẽ reve.

²⁵ Ha'e gui sete araa py ju 'rã pejapo nhemboaty iky'a e'ŷ va'e. Neĩ peteĩve ma napemba'eapoi 'rã.

²⁶ — Ha'e gui mba'emo aju jypy'igua ára py ju 'rã pejapo nhemboaty iky'a e'ŷa va'e, mba'emo aju pyau guigua SENHOR pe peru aguã, ngaru semana regua ojeupity jave. Neĩ peteĩve ma napemba'eapoi 'rã.

²⁷ Ha'e va'e jave py pova'e 'rã peapy vy peme'ẽ heakuã porã rã SENHOR ojou porã aguã: mokoĩ toro ra'y, peteĩ vexa'i ava ha'e sete vexa'i ra'y peteĩ ma'etõ va'e meme.

²⁸ Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã pejapo 'rã mboapy ryru trigo iporãve va'e gui, ha'e rã vexa'i ava reve guarã ma mokoĩ ryru gui.

²⁹ Sete vexa'i ra'y va'e regua peteĩ-teĩ reve guarã ma pejapo avi 'rã peteĩ ryru gui.

³⁰ Peteĩ kavara ava peme'ẽ avi 'rã pejejavyague pejao'i uka aguã.

³¹ Ha'e nunga ha'e javi 'rã peme'ẽ, ko'ẽ nhavõ mba'emo peapy vy peme'ẽ va'e reve, mba'emo aju guigua ha'e mba'emo penhoẽ va'e reve. Ivaikue rei e'ŷ va'e meme 'rã Peru.

29

SENHOR pegua ngaru mboae oiko jave py mba'emo ome'ẽ va'erã re ijayvuague

¹ — Ha'e gui sete jaxy re, jypy'igua ára py ma pejapo 'rã nhemboaty iky'a e'ŷ va'e. Neĩ peteĩve ma napemba'eapoi 'rã. Pêvy oiko 'rã mimby guaxu pemonhe'ẽ aguã ára.

² Ha'e va'e jave py pova'e nunga peme'ẽ 'rã peapy vy, heakuã porã rã SENHOR ojou porã aguã: peteĩ toro ra'y, peteĩ vexa ava ha'e sete vexa'i ra'y peteĩ ma'etõ va'e, ivaikue rei e'ŷ va'e meme.

³ Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã ma mboapy ryru trigo iporãve va'e gui 'rã pejapo, ha'e rã vexa ava reve guarã ma mokoĩ ryru gui 'rã.

⁴ Ha'e gui sete vexa'i ra'y peteĩ-teĩ reve guarã ma peteĩ ryru gui 'rã pejapo.

⁵ Peteĩ kavara peme'ẽ avi 'rã jejavya regua, pejejavyague pejao'i uka aguã.

⁶ Ha'e va'e jaxy re mba'emo peapy vy peme'ẽ va'e reve 'rã peme'ẽ, mba'emo aju guigua reve, ko'ẽ nhavõ mba'emo peapy vy mba'emo aju guigua ha'e penhoẽ va'e regua reve. Ombopara pyre oĩa rami vy peme'ẽ 'rã heakuã porã rã SENHOR ojou porã aguã.

⁷ — Ha'e gui sete jaxy re dez araa py ma pejapo ju 'rã nhemboaty iky'a e'ŷ va'e. Penenhe'ẽ py pejexavaia rupi 'rã pendekuai. Neĩ peteĩve ma napemba'eapoi 'rã.

⁸ Pova'e ma peapy vy peme'ẽ 'rã heakuã porã rã SENHOR ojou porã aguã: peteĩ toro ra'y, peteĩ vexa ava, ha'e gui sete vexa'i ra'y peteĩ ma'etõ va'e, ivaikue rei e'ŷ va'e meme.

⁹ Mba'emo aju guigua peme'ẽ 'rã azeite reve omoapomo mbyre: toro ra'y reve guarã ma mboapy ryru trigo iporãve va'e gui pejapo 'rã, ha'e gui vexa'i ava reve guarã ma mokoĩ ryru gui 'rã.

¹⁰ Ha'e rã sete vexa'i ra'y ikuai va'e regua peteĩ-teĩ reve guarã ma peteĩ'i ryru gui 'rã pejapo.

¹¹ Peme'ẽ avi 'rã peteĩ kavara ava jejavya regua. Ha'e va'e peme'ẽ avi 'rã jejavya regua ko'ẽ nhavõ peme'ẽ va'e reve, ha'e mba'emo peapy va'e, mba'emo aju guigua ha'e mba'emo penhoẽ jepi va'e reve.

¹² — Sete jaxyá re quinze araa py ma teigue ju 'rã oiko nhemboaty iky'a e'ŷ va'e. Neĩ peteĩve ma napemba'eapoi 'rã. Sete ára re 'rã pejapo ngaru SENHOR pe.

¹³ Pova'e ma peapy vy peme'ẽ 'rã heakuã porã rã SENHOR ojou porã aguã: mboapy toro ra'y, mokoĩ vexa ava, ha'e gui catorze vexa'i ra'y peteĩ ma'etŷ va'e, ivaikue rei e'ŷ va'e meme.

¹⁴ Mba'emo aju guigua peme'ẽ 'rã azeite reve omoapomo mbyre: mboapy toro ra'y peteĩ-teĩ reve guarã ma mboapy ryru trigo iporãve va'e gui pejapo 'rã, ha'e gui mokoĩ vexa'i ra'y peteĩ-teĩ reve guarã ma mokoĩ ryru gui 'rã pejapo.

¹⁵ Ha'e rã catorze vexa'i ra'y peteĩ-teĩ reve guarã ma peteĩ'i ryru gui 'rã pejapo.

¹⁶ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

¹⁷ — Ha'e gui mokoĩ araa py ma peme'ẽ 'rã doze toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

¹⁸ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

¹⁹ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

²⁰ — Ha'e gui mboapy araa py ma peme'ẽ 'rã onze toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

²¹ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

²² Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

²³ — Ha'e gui irundy araa py ma peme'ẽ 'rã dez toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

²⁴ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

²⁵ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

²⁶ — Ha'e gui peteĩ nhiruĩ araa py ma peme'ẽ 'rã nove toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

²⁷ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

²⁸ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

²⁹ — Ha'e gui mboapy meme araa py ma peme'ẽ 'rã oito toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

³⁰ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

³¹ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

³² — Ha'e gui sete araa py ma peme'ẽ 'rã sete toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

³³ Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

³⁴ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

³⁵ — Ha'e gui oito araa py ma pejapo 'rã nhemboaty iky'a e'ŷ va'e. Neĩ peteĩve ma napemba'eapoi 'rã.

³⁶ Ha'e rami vy peapy vy peme'ẽ 'rã peteĩ toro ra'y, peteĩ vexa ava ha'e sete vexa'i ra'y peteĩ ma'etŷ va'e, ivaikue rei e'ŷ va'e meme, heakuã porã rã SENHOR ojou porã aguã.

³⁷ Toro ra'y reve guarã, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuia rami vy peme'ẽ 'rã hexeve guarã, ayvu oeja pyre rami vy.

³⁸ Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

³⁹ — Ha'e va'e ha'e javi ma SENHOR pe peme'ẽ 'rã peteĩ-teĩ ngaru ojeupity nhavõ oappy vy ome'ẽ mbyrã, mba'emo aju guiguarã, mba'emo onhoẽ mbyrã, ha'e peteĩ rami ikuai aguã reguarã. Ha'e va'e peme'ẽ avi 'rã SENHOR renonde penhemboayvua rami, e'ŷ vy penhenhandua'i rami mba'emo peme'ẽ va'e reve — he'i.

⁴⁰ Ha'e rami Moisés ijayvu Israel kuery pe, ixupe SENHOR ojapo ukaague ha'e javi rami vy.

30

Deuteronômio 23.21-23

¹ Ha'e gui Moisés ijayvu Israel kuery peteĩ-teĩ regua yvatekueve ikuai va'e pe. Ha'e vy aipoe'i:

— Pova'e ayvu ma SENHOR ojapo uka va'ekue:

² Xapy'a rei peteĩ ava onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re. Ha'e rami ri vy ndojapo e'ŷi 'rã ijayvuague. Onhemboayvuague ha'e javi 'rã ojapo.

³ Ha'e rami avi xapy'a rei peteĩ kunha onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re, kunhatai vy ngu ro py teri oiko va'e.

⁴ Ha'e gui xapy'a rei tuu ma guajy onhemboayvuague oikuua va'eri mba'eve nde'i 'rã ixupe. Ha'e ramo ma onhemboayvuague ha'e javi 'rã ovare. Tajy ojapopa 'rãe mba'emo ojapo e'ŷ re oiko aguã re onhemboayvuague.

⁵ Ha'e rã xapy'a rei tuu ha'e va'e nunga oikuua vyve ojoko ramo ma tajy onhemboayvuague neĩ peteĩ henda py voi ndovarei 'rã, mba'emo ojapo e'ŷ re oiko aguã re ijayvuague rupi oiko e'ŷ teĩ ha'eve 'rã. SENHOR operdoa 'rã, onhemboayvuague tuu ojoko rire.

⁶ — Ha'e rami avi xapy'a rei kunha va'e onhemboayvuague, ha'e'ŷ vy opêxa porã e'ŷ re mba'emo ojapo aguã re ijayvuague ovare teri reve omenda 'rã,

⁷ ha'e xapy'a rei ime ha'e nunga oendu teĩ mba'eve nde'i ramo kunha va'e onhemboayvuague ovare tema 'rã. Ojapo 'rãe mba'emo ojapo e'ŷ re oiko aguã re ijayvuague.

⁸ Ha'e rami teĩ xapy'a rei ime oendu vyve ojoko 'rã kunha va'e onhemboayvuague, e'ŷ vy opêxa porã e'ŷ re ijayvuague ojapo aguã gui. Ijayvuague ime ombovaipa rire SENHOR operdoa 'rã.

⁹ Ha'e gui imeve'ŷ va'e, e'ŷ vy kunha oeja pyre onhemboayvuague ma ovare va'erã meme.

¹⁰ — Xapy'a rei kunha va'e ome ro py oiko reve onhemboayvu 'rã, ha'e'ŷ vy oura reve ijayvu 'rã mba'emo ojapo e'ŷ re oiko aguã re.

¹¹ Ha'e nunga ime oikuua vy "Ha'eve" nde'i, neĩ "Nda'evei" nde'i ri ramo kunha va'e onhemboayvuague ovare 'rã. Ojapopa 'rãe mba'emo ojapo aguã re ijayvuague.

¹² Ha'e rã xapy'a rei ime ha'e nunga oikuua vyve ombovaipa 'rã. Ha'e rami rã kunha va'e mba'emo ojapo aguã re, ha'e'ŷ vy mba'emo ojapo e'ŷ re oiko aguã onhemboayvu rire teĩ ndovarei 'rã. Ime ombovaipa rire SENHOR operdoa 'rã.

¹³ Kunha va'e onhe'ẽ py ojexavaia rupi oiko aguã re ijayvu, e'ŷ vy oura ramo ime oendu vy xapy'a rei "Ha'eve" he'i 'rã, e'ŷ vy "Nda'evei" he'i 'rã ombovaipa vy.

¹⁴ Ha'e rami avi xapy'a rei ime ma ko'ẽ nhavõ mba'eve nde'i ramo kunha va'e mba'emo ojapo aguã re onhemboayvuague ovarepa 'rã, ime oikuaa vyve mba'eve nde'i rire.

¹⁵ Ha'e gui xapy'a rei ime ha'e nunga oendua ára rire ri ombovaipa ramo hexe ae 'rã oĩ kunha va'e káuxa opaga aguã — he'i.

¹⁶ Ha'e va'e ma Moisés pe SENHOR omboaxa va'ekue ojapoagre aguã, ime ha'e gua'yxy reve joguereko kuua aguã regua, ha'e gui tuu ha'e tajy kunhatai vy nguu ro py teri oiko va'e pegua.

31

Midiã pygua kuery re ipo'akaague

¹ SENHOR aipoe'i Moisés pe:

² — Embopaga Midiã pygua kuery Israel kuery re ojapoague re. Ha'e rire ma nenhe'ẽ heraa 'rã neramoĩ kuerya py — he'i.*

³ Ha'e ramo Moisés ijayvu heta va'e kuery pe. Ha'e vy aipoe'i:

— Peẽ kuery va'e regua perekó katu ke tembiporu joe pepu'ã aguã. Ha'e gui tapeo Midiã pygua kuery rovai pepu'ã aguã, SENHOR ombopaga ukaa rami pejapo aguã.

⁴ Israel kuery peteĩ-teĩ regua joe opu'ã aguã py pemondouka 'rã mil avakue — he'i.

⁵ Ha'e ramo Israel kuery mbovy e'ŷ ikuai va'e peteĩ-teĩ regua gui omondouka mil. Joe opu'ã aguã katy doze mil ha'e javi vy omondouka tembiporu reveguá memo.

⁶ Moisés ae omondouka joe opu'ã aguã katy, peteĩ-teĩ regua mil oje'oi aguã. Oo avi sacerdote Eleazar ra'y Finéias. Ha'e va'e ma ogueraa mimby guaxu iky'a e'ŷ va'e omonhe'ẽ aguã.

⁷ Ha'e gui Midiã pygua kuery reve opu'ã okuapy, Moisés pe SENHOR ojapo ukaague rami vy.

⁸ Ha'e vy ojukapa okuapy avakue ikuai va'ekue ha'e javi. Jypyve omano va'ekue regua anho e'ŷ, ojuka avi Midiã pygua huvixa kuery: Evi, Requém, Zur, Hur ha'e Reba, peteĩ nhiruĩ Midiã pygua kuery ruvixa ikuai va'ekue. Kyxe py ojuka avi okuapy Beor ra'y Balaão.

⁹ Ha'e rã Midiã pygua kunhague ha'e kyrigue ma Israel kuery ogueraapa okuapy guembiguairã. Ogueraapa avi vaka kuery ha'e hymba kuery ikuai va'ekue, ha'e oguereko va'ekue-ekue ha'e javi.

¹⁰ Oapypa avi tetã ha'e kuery ikuaiague, ha'e gui hekoa mboae ikuai va'ekue voi.

¹¹ Ha'e rami py ogueraapa ojopy va'ekue-ekue, ombo'erã ojou va'ekue ha'e javi, ha'e kuery va'e regua ha'e hymba kuery guive.

¹² Ha'e nunga oguerupa okuapy Moisés pe, sacerdote Eleazar ha'e Israel kuery ha'e javi ikuai va'e pe. Guembiguairã ogueraaa va'ekue, mba'emo ojou va'ekue ha'e imba'e rei-rei va'ekue ha'e javi ogueraaa guekoaa py, Moabe yvy ka'aguy e'ŷa py, Jordão yakã yvýry, Jericó tetã rexei.

Guembiguairã oguerupa pyre re ijayvuague

¹³ Ha'e gui Moisés, sacerdote Eleazar ha'e heta va'e kuery regua yvatekueve ha'e javi ma tekoágui oẽmba okuapy mombyry'i omovaẽ jevy aguã.

¹⁴ Ha'e rami teĩ Moisés ivai xondaro ruvixa kuery pe, mil ha'e cem xondaro capitão kuery joe opu'ãague gui ou va'ekue pe.

¹⁵ Ha'e vy Moisés aipoe'i ha'e kuery pe:

— Peja ri ty'y kunhague ha'e javi okuave aguã?

¹⁶ Mba'eta ha'e kuery ae Balaão omongoetaa rami vy ojapo va'ekue Israel kuery SENHOR rovai rupi ikuai aguã rami, Peor py ae. Ha'e nunga rupi mba'emo vai oiko raka'e SENHOR pegua kuery mbyte rupi.

* 31:2 Midiã pygua kuery ojapo va'ekue ma ombotavypa rei Israel kuery, tuuete ramigua rive ombojerovia aguã rami (25.16-18).

¹⁷ Ha'e nunga rupi aŷ kyrīgue'i regua pejukapa 'rā avakue'i ikuai va'e. Pejukapa avi 'rā kunhague avakue reve nhogueronheno va'ekue.

¹⁸ Ha'e rā kunhague'i ha'e kunhataīgue'i avakue reve nhogueronheno e'ŷ teri va'e ma peja 'rā okuave aguã pendejeupe guarã.

Xondaro kuery ha'e mba'emo ogueru va'ekue oiky'a'opaa jevyague

¹⁹ — Sete ára re ranhe 'rā pendekuai tekoa gui mombyry'ia py. Mava'e rā rei peẽ kuery pejojuka, ha'e'ŷ vy omanogue re pepoko va'ekue ma pejeky'a'o uka 'rā mboapy araa py, ha'e gui sete araa py ju, penembiguarã peru va'ekue voi.

²⁰ Peiky'a'o uka avi 'rā ao perekva'e, mba'emo mymba rague gui ojapo pyre, kavara rague gui ha'e yvyra gui ojapo pyre ha'e javi — he'i.

²¹ Ha'e gui sacerdote Eleazar aipoe'i avi xondaro kuery joe opu'ã aguã katy oje'oi va'ekue pe:

— Po rami ma lei Moisés rupi SENHOR ojapo uka va'ekue.

²² Mba'emo ouro guigua, prata, overa va'e, ferro, estanho ha'e chumbo guigua,

²³ opa mba'e tata py oĩ aguã ha'eve va'e ma pemboaxa 'rā tata rupi ha'eve va'e optya aguã. Peiky'a'o avi 'rā yy joky'a'oa py. Ha'e rā mba'emo tata py oĩ aguã nda'evei va'e ma yy py rive 'rā peiky'a'o.

²⁴ Ha'e gui sete araa py pejoipa 'rā pendeao, ha'eve va'e ju peiko aguã. Ha'e gui mae ma peike ju 'rā tekoa py.

Mba'emo ogueru pyre omboja'opa aguã re ijayvuague

²⁵ Ha'e gui SENHOR aipoe'ive ju Moisés pe:

²⁶ — Reipapa 'rā nhomba'ekue ogueru pyre, ha'e kuery va'e regua ha'e mymba kuery voi. Ndee ha'e sacerdote Eleazar peipapa 'rā, ha'e heta va'e kuery regua tamoi kuery ro pygua yvatekueve ikuai va'e guive.

²⁷ Pemboja'o 'rā mokoï henda katy joo rami meme. Peteï henda py ma xondaro kuery joe opu'ã aguã oje'oi va'ekue peguarã, ha'e rā amboae henda py ma heta va'e kuery ha'e javi peguarã.

²⁸ Ha'e gui SENHOR peguarã peipe'a avi 'rā xondaro kuery joe opu'ã aguã oje'oi va'ekue guigua. Quinhentos ikuai va'e nhavõ gui peteï 'rā peipe'a, ha'e kuery va'e regua, toro, mburika'i ha'e vexa'i kuery ikuai va'e gui.

²⁹ Xondaro kuery peguarã omboja'o pyre mbyte gui reipe'a va'ekue ma sacerdote Eleazar po py 'rā reme'ē, SENHOR pe ju omboaxa va'erã.

³⁰ Ha'e rā Israel kuery peguarã omboja'o pyre mbyte gui ma reipe'a 'rā cinqüenta ikuai va'e nhavõ gui peteï, ha'e kuery va'e regua gui, toro, mburika'i, vexa'i ha'e mymba kuery ha'e javi gui. Ha'e nunga remboaxapa 'rā levita kuery po py, SENHOR pembojerovia aty rupi omba'epo va'e peguarã — he'i.

³¹ Ha'e gui Moisés ha'e sacerdote Eleazar ojapopa SENHOR Moisés pe ojapo ukaague.

³² Xondaro kuery mba'emo ogueru va'ekue ha'e javi vy ma seiscentos e setenta e cinco mil vexa'i,

³³ setenta e dois mil toro,

³⁴ sessenta e um mil mburika'i,

³⁵ ha'e gui trinta e dois mil kunhague neï peteïgue ma avakue reve nhogueronheno e'ŷ teri va'e.

³⁶ Ha'e gui joe opu'ã aguã katy oje'oi va'ekue peguarã omboja'o pyre ma trezentos e trinta e sete mil e quinhentos vexa'i ikuai.

³⁷ Vexa'i kuery SENHOR peguarã omboaxa va'ekue ma seiscentos e setenta e cinco ha'e javi vy.

³⁸ Toro ma trinta e seis mil. Ha'e va'e regua SENHOR peguarã omboaxa va'ekue ma setenta e dois.

³⁹ Mburika'i kuery ma trinta mil e quinhentos. Ha'e va'e regua SENHOR peguarã ome'ē va'ekue ma sessenta e um.

⁴⁰ Ha'e rā ha'e kuery va'e regua ma dezesseis mil. Ha'e va'e regua SENHOR peguarã omboaxa va'ekue ma trinta e dois.

⁴¹ Ha'e ramo sacerdote Eleazar po py ju Moisés omboaxa SENHOR peguarã ome'ẽ mbyre, Moisés pe ojapo ukaague rami vy.

⁴² Heta va'e kuery peguarã ju Moisés omboja'o joe opu'ã aguã katy oje'oi va'ekue ogueru va'ekue gui.

⁴³ Heta va'e kuery peguarã omboja'o va'ekue ma trezentos e trinta e sete mil e quinhentos vexa'i,

⁴⁴ trinta e seis mil toro,

⁴⁵ trinta mil e quinhentos mburika'i,

⁴⁶ ha'e gui ha'e kuery va'e regua ma dezesseis mil.

⁴⁷ Ha'e gui Israel kuery peguarã omboja'o pyre mbyte gui ma cinqüenta ikuai va'e nhavõ gui Moisés oipe'a peteĩ, ha'e kuery va'e regua ha'e mymba kuery guive. Ha'e vy omboaxapa levita kuery SENHOR ombojeroviaaty rupi ombo'eapo va'e po py, Moisés pe SENHOR ojapo ukaague rami vy.

Xondaro ruvixa kuery mba'emo onhenhandua'i rami ome'ẽ okuapyague

⁴⁸ Ha'e gui Moisés-a py ovaëmba okuapy xondaro kuery mbovy e'ŷ ikuai va'e ruvixa kuery, mil ha'e cem ikuai va'e capitão kuery voi.

⁴⁹ Ha'e vy ha'e kuery aipoe'i okuapy ixupe:

— Ore nerembiguai kuery ma roipapapa avakue joe opu'ãa pygua ore kuery ropenaa va'e. Ha'e rā ha'e kuery va'e regua neĩ peteĩve ma ndoatai, ore kuery va'e regua ha'e rami ae avi.

⁵⁰ Ha'e nunga rupi rogueru ma SENHOR pe rome'ẽ va'erã, peteĩ-teĩ rogueru rojou va'ekue regua gui, mba'emo ouro guigua, jyva regua, poapy regua, kuu regua, namixã ha'e mbo'y. SENHOR renonde py rogueru rojejavyague rojao'i uka aguã — he'i okuapy.

⁵¹ Ha'e ramo ha'e kuery gui Moisés ha'e sacerdote Eleazar ojopypa ouro guigua, mba'eta jegua ojapo porã mbyre meme ramo.

⁵² SENHOR pe ouro guigua mil ha'e cem rerekaoa capitão kuery ogueru va'ekue poyikue ma cento e oitenta quilos raxa ha'e javi vy.

⁵³ Mba'eta joe opu'ãa pygua kuery ombo'erã mba'emo ojopy va'ekue meme.

⁵⁴ ouro guigua mil ha'e cem rerekaoa capitão kuery gui Moisés ha'e sacerdote Eleazar ojopy vy onhemboaty aty ropy ju ogueru imoiny, SENHOR renonde py Israel kuery ima'endu'a riae aguã.

32

Ha'e kuery va'e regua amongue Jordão rovai re optyaxe okuapyague

¹ Rúben ha'e Gade ramymino kuery ma heta ete oguereko guymba kuery. Ha'e kuery ma Jazer ha'e Gileade yvy oexa rā mymba kuery ikuai aguã ha'eve.

² Ha'e rami vy Gade ha'e Rúben ramymino kuery ou okuapy Moisés pe ojerure aguã, sacerdote Eleazar ha'e heta va'e kuery yvatekueve reve. Ha'e vy aipoe'i okuapy:

³ — Ha'e gui yvy Atarote, Dibom, Jazer, Ninra, Hesbom, Eleale, Sebã, Nebo ha'e Beom,

⁴ ha'e va'e yvy pygua kuery Israel kuery renonde gui SENHOR oipe'apa ma va'ekue meme. Ha'e va'e yvy ma ha'eve mymba kuery ikuai aguã. Ha'e gui ore nerembiguai kuery ma orerymba va'e meme.

⁵ Xapy'a rei rā ndee rejou porã ri vy eme'ẽ ha'e va'e yvy ore nerembiguai kuery pe oreyyvyrã. Oremboaxa eme Jordão yakã rovai katy — he'i okuapy.

⁶ Ha'e rami teĩ Gade ha'e Rúben ramymino kuery pe Moisés aipoe'i:

— Amboae regua kuery anho 'rã ty'y joe opu'ã aguã katy oje'oi, ha'e rā peẽ kuery ma apy ae 'rã pepytapa?

⁷ Mba'e re tu pejapo Israel kuery nda'ipy'a guaxuvei aguã rami, yvy SENHOR ha'e kuery pe ome'ẽ va'e py oove e'ŷ aguã?

⁸ Mba'eta ha'e rami ae avi penderu kuery ojapo raka'e, Cades-Barnéia gui amondouka jave py kova'e yvy oexa pota aguã.

⁹ Ha'e va'e kuery ma Escol yvy'ã guy katy peve ovaẽa py yvy oexapa ma vy ojapo okuapy Israel kuery nda'ipy'a guaxuvei aguã rami, yvy SENHOR ome'ẽ va'e oupity e'ŷ aguã.

¹⁰ Ha'e va'e árave SENHOR poxya hendy vy oura reve aipoe'i va'ekue orevy:

¹¹ “Anhetẽ ete avakue vinte ma'etŷ va'e guive tujakue peve Egito gui oje'oi va'ekue ri peteïve ma ndoexai 'rã yvy Abraão pe, Isaque ha'e Jacó pe aura reve ame'ẽ aguã re xeayvuague, xenhe'ẽ rendua gui ojepe'apa rire.

¹² Oexa va'erã ma quenezeu Jefoné ra'y Calebe anho, ha'e Num ra'y Josué avi, mba'eta ha'e kuery ma SENHOR nhe'ẽ rendua gui ndojepe'ai rire”, he'i va'ekue.

¹³ Ha'e rami vy SENHOR poxya Israel rovai rupi hendy vy quarenta ma'etŷ re ojapo ha'e kuery tekao e'ŷa rupi oguata rei aguã rami, SENHOR rovai opu'ã okuapy va'ekue omanomba peve.

¹⁴ Ha'e gui apy ju pendekuai avakue ojejavypa va'e regua. Peẽ kuery ju penderu kuery ojapoague rami ae avi pepu'ã pekuapy, pejapo aguã Israel rovai SENHOR ipoxyve aguã rami.

¹⁵ Mba'eta peẽ kuery napenhe'ẽ reduxei ramo teigue ju ha'e oejapa 'rã kova'e kuery tekao e'ŷa py. Ha'e ramo peẽ kuery káuxa ae 'rã ha'e kuery okanhymba — he'i.

¹⁶ Ha'e ramo Moisés oña py ha'e kuery onhembojave jogueruvy vy aipoe'i okuapy:

— Ore kuery ma apy rojapo 'rã mymba kuery korarã, ha'e tetã orera'y kuery rekoarã.

¹⁷ Ha'e rã ore kuery ma orerembiporu rojopy vy rojapura reve 'rã roje'oi Israel kuery renonde rupi, ha'e kuery ikuai aguã py rogueraa peve. Orera'y kuery anho 'rã optyta tetã ikorapa va'e py, yvy regua kuery ojuka e'ŷ aguã py.

¹⁸ Israel kuery peteï-teï oyvyrã va'ekue py ikuipa e'ŷa ja ore kuery ndorojevyvei 'rã orero katy.

¹⁹ Mba'eta ore kuery ma ndorojopyi 'rã ha'e kuery reve yvy Jordão rovai re itui va'e regua, neñ henondeve katy ma voi, mba'eta ore ma Jordão kyvõ katy roguereko ae ma orevyrã, kuaray oua katy — he'i okuapy.

²⁰ Ha'e ramo Moisés ombovai:

— Xapy'a rei ha'e nunga pejapo ri vy, ha'e SENHOR renonde rupi penerembiporu reve joe pepu'ã aguã katy peje'oi,

²¹ SENHOR renonde rupi peteï-teï penerembiporu reve Jordão rovai re peaxa, guenonde gui ngovaigna kuery oipe'apa peve,

²² ha'e SENHOR renonde rupi ha'e va'e yvy re pendepo'akapa, ha'e rami ramo ma ha'eve 'rã pejevy ju aguã. Ha'e gui SENHOR ha'e Israel kuery renonde rupi pejapo ve'ŷ teï ha'eve 'rã. Ha'e gui kova'e yvy ma pendekuai aguã 'rã itui SENHOR renonde.

²³ Ha'e rã xapy'a rei ha'e rami e'ŷ ri pendekuai ramo ma ma'ẽ, SENHOR rovai ojejavy va'e 'rã peiko. Ha'e rami vy peikuaa pejejavvyague re pepaga 'rãe.

²⁴ Ha'e nunga rupi pejapo tema tetã pendera'y kuery ikuai aguã, penerymba kuery korarã guive. Pejapopa e'ŷ eme guive pendeayvuague — he'i.

²⁵ Ha'e ramo Gade ha'e Rúben ramymino kuery ijayvu ju okuapy Moisés reve. Ha'e vy aipoe'i okuapy:

— Ndee oreruvixa, rejapo uka va'ekue meme 'rã ore nerembiguai kuery rojapo.

²⁶ Orera'y kuery, orerajy kuery, orera'yxy kuery ha'e orerymba kuery ha'e javi optytapa 'rã apy tetã Gileade yvy re ikuai va'e py ae.

²⁷ Ha'e rã ore nerembiguai kuery ma SENHOR renonde rupi 'rã roaxa orerembiporu reve meme, ndee oreruvixa aipo'reague rami vy — he'i okuapy.

²⁸ Ha'e ramo ha'e kuery ojapo va'erã re Moisés ijayvu sacerdote Eleazar pe, Num ra'y Josué ha'e Israel kuery regua tamoi kuery ro pygua yvatekueve ikuai va'e ha'e javi pe.

²⁹ Ha'e vy aipoe'i ha'e kuery pe:

— Gade ha'e Rúben ramymino kuery pende kuery renonde rupi ri Jordão rovai katy oaxa ramo, SENHOR renonde rupi peteï-teï guembiporu reve joe opu'ã aguã katy oo aguã,

ha'e xapy'a rei ha'e va'e yvy re pendepo'akapa ri vy ma ha'e kuery pe peme'ẽ 'rã Gileade yvy ikuai aguã.

³⁰ Ha'e rami teĩ xapy'a rei ha'e kuery guembiporu reve ndoaxai ri vy pende kuery reve, ha'e rami vy pende kuery pendekuaia mbyte rupi ae 'rã ha'e kuery ikuai, Canaã yvy re ae — he'i.

³¹ Ha'e ramo Gade ha'e Rúben ramymino kuery ombovai vy aipoe'i okuapy:

— Ore nerembiguai kuery pe SENHOR ijayvua rami tema rojapo 'rã.

³² Ha'e rami vy SENHOR renonde rupi roaxa 'rã Canaã yvy re orerembiporu reve. Ha'e rã oreyyvrã rojopy va'erã ma Jordão yakã kylvõ rami ae itui.

Deuteronômio 3.12-17

³³ Ha'e rami rã Gade ha'e Rúben ramymino kuery, ha'e José ra'y Manassés ramymino kuery va'e regua mbytekue yvyrã ma Moisés ome'ẽ amorreuu kuery ruvixa Seom ha'e Basã pygua huvixa Ogue openague. Ha'e va'e yvy ome'ẽ tetã ikuai va'e reve, mba'eta yvy ha'e javi rupi tetã ikuai.

³⁴ Ha'e gui Gade ramymino kuery ma ojapo Dibom tetã, Atarote ha'e Aroer,

³⁵ Atarote-Sofã, Jazer ha'e Jogbeá,

³⁶ Bete-Ninra ha'e Bete-Harã, tetã ikorapa va'e meme. Vexa'i kuery korarã voi ojapo.

³⁷ Ha'e gui Rúben ramymino kuery ma ojapo Hesbom, Eleale ha'e Quiriataim,

³⁸ Nebo, ha'e Baal-Meom hery oguerova va'e. Sibma voi ojapo. Tetã ha'e kuery ojapo va'e ma amboae rami meme omboery.

³⁹ Ha'e gui Manassés ra'y Maquir ramymino kuery ma Gileade yvy katy oje'oi vy ipo'aka. Amorreuu kuery ha'e py ikuai va'ekue ma ha'e kuery oipe'apa.

⁴⁰ Ha'e rami vy Manassés ra'y Maquir kuery pe Moisés ome'ẽ Gileade yvy ha'e kuery ikuai aguã.

⁴¹ Ha'e va'e yvýry rupi tekao ikuai va'e ma Manassés ra'y Jair ae oo vy ojopypa. Ha'e va'e ma oenoí Havote-Jair.

⁴² Ha'e gui Noba oo vy ojopy Quenate, ijyvýry rupi tekao ikuai va'e guive. Ha'e va'e oenoí ju Noba, guery rupi ae.

33

Egito gui ha'e kuery oẽmba guive ikuaiague rery meme oĩa

¹ Pova'e rupi ma Israel kuery Egito yvy gui oje'oi vy peteĩ-teĩ regua oxondaro kuery reve oguata jogueravyague, Moisés ha'e Arão ijayvua rami meme.

² Moisés ombopara oguata oje'oivyaa nhavõ, SENHOR ijayvua rami vy. Pova'e rupi ha'e kuery oguata, oje'oria nhavõ rupi.

³ Ramessés tetã gui oje'oi jaxy jypyre re quinze araa py. Páscoa ára rire ko'ẽ jevy ma Israel kuery oguata oje'oivy ipy'a guaxu reve, Egito pygua kuery ha'e javi oexaa gui,

⁴ Egito pygua gua'y jypykue onhono porã teri okuapya ja, ha'e kuery mbyte rupi SENHOR ojukapa rire. Ha'e kuery ruete ra'angaa re voi SENHOR ombou imbopagaarã.

⁵ Ha'e gui Ramessés tetã gui Israel kuery oje'oi vy ikuai ranhe Sucote py.

⁶ Sucote gui oje'oi vy ma ikuai ranhe Etã py, tekao e'ŷa apy'i py.

⁷ Etã gui oje'oi vy ojeapa oje'oivy vy Pi-Hairote py ju ikuai, Baal-Zefom katy'i peve. Ha'e vy ikuai ju ranhe Migdol rexei'i.

⁸ Ha'e gui Pi-Hairote gui oje'oi ju vy ye'ẽ oĩ va'e mbyte rupi oaxa oje'oivy tekao e'ŷa katy oje'oi vy. Ha'e gui mboapy ára re tekao e'ŷa Etã rupi oguata rire ma opyta ju ranhe Mara py.

⁹ Mara gui oje'oi jevy vy ova okuapy Elim py. Ha'e gui Elim py ma doze ygua oĩ, setenta pindo avi ikuai. Ha'e py ju opyta ranhe.

¹⁰ Elim gui oje'oi vy Ye'ẽ Pytã rembe'i rupi ju opyta.

¹¹ Ye'ẽ Pytã gui oje'oi vy Sim tekao e'ŷa py ju opyta.

¹² Sim gui oje'oi vy Dofca py ju opyta.

¹³ Dofca gui oje'oi vy ma Alus py ju opyta.

- ¹⁴ Alus gui oje'oi vy ma Refidim py ju opyta, teĩ ha'e py ma nda'ipoi yy ha'e kuery oy'u aguã.
- ¹⁵ Refidim gui oje'oi vy Sinai regua tekao e'ŷa py ju opyta.
- ¹⁶ Sinai regua tekao e'ŷa gui oje'oi vy ma Quibrote-Hataavá py ju opyta.
- ¹⁷ Quibrote-Hataavá gui oje'oi vy Hazerote py ju opyta.
- ¹⁸ Hazerote gui oje'oi vy Ritma py ju opyta.
- ¹⁹ Ritma gui oje'oi vy Rimom-Perez py ju opyta.
- ²⁰ Rimom-Perez gui oje'oi vy Libna py ju opyta.
- ²¹ Libna gui oje'oi vy Rissa py ju opyta.
- ²² Rissa gui oje'oi vy Queelata py ju opyta.
- ²³ Queelata gui oje'oi vy Sefer yvyty py ju opyta.
- ²⁴ Yvyty Sefer gui oje'oi vy Harada py ju opyta.
- ²⁵ Harada gui oje'oi vy Maquelote py ju opyta.
- ²⁶ Maquelote gui oje'oi vy Taate py ju opyta.
- ²⁷ Taate gui oje'oi vy Tera py ju opyta.
- ²⁸ Tera gui oje'oi vy Mitca py ju opyta.
- ²⁹ Mitca gui oje'oi vy Hasmona py ju opyta.
- ³⁰ Hasmona gui oje'oi vy Moserote py ju opyta.
- ³¹ Moserote gui oje'oi vy Bene-Jaacã py ju opyta.
- ³² Bene-Jaacã gui oje'oi vy Hor-Hagidgade py ju opyta.
- ³³ Hor-Hagidgade gui oje'oi vy Jotbatá py ju opyta.
- ³⁴ Jotbatá gui oje'oi vy Abrona py ju opyta.
- ³⁵ Abrona gui oje'oi vy Eziom-Geber py ju opyta.
- ³⁶ Eziom-Geber gui oje'oi vy Zim regua tekao e'ŷa regua py ju opyta. Ha'e va'e ma Cades ae.
- ³⁷ Cades gui oje'oi vy ma Hor yvyty py ju opyta, Edom yvy apy'i py.

Números 20.22-29

- ³⁸ Ha'e gui sacerdote Arão ma SENHOR ijayvuague rami vy oẽ ovy Hor yvyty re. Ha'e py ae omano, quarenta ma'etý re ma Israel kuery Egito yvy gui oje'oipa rire, peteĩ nhiruĩ jaxya, ijypy'ia ára py.
- ³⁹ Arão ma cento e vinte e três ma'etý oguerekao py omano Hor yvyty re.
- ⁴⁰ Ha'e gui cananeu Arade pygua huvixa oendu Israel kuery oupa ta maa. Ha'e va'e ma Canaã yvy regua kuaray puku-a katy oiko va'e.
- ⁴¹ Ha'e gui Hor yvyty gui ha'e kuery oje'oi vy Zalmona py ju opyta.
- ⁴² Zalmona gui oje'oi vy Punom py ju opyta.
- ⁴³ Punom gui oje'oi vy Obote py ju opyta.
- ⁴⁴ Obote gui oje'oi vy Ijé-Abarim py ju opyta, Moabe yvy apy'i py.
- ⁴⁵ Ijé-Abarim gui oje'oi vy Dibom-Gade py ju opyta.
- ⁴⁶ Dibom-Gade gui oje'oi vy Almom-Diblataim py ju opyta.
- ⁴⁷ Almom-Diblataim gui oje'oi vy yvyty Abarim py ju opyta, Nebo katy'i.
- ⁴⁸ Yvyty Abarim gui oje'oi vy opyta ju Moabe yvy ka'aguy e'ŷa rupi, Jordão yvýry, Jericó tetã rexei.
- ⁴⁹ Ha'e gui Jordão yakã yvýry opyta ranhe okuapy, Bete-Jesimote guive Abel-Sitim oĩa peve, Moabe yvy ka'aguy e'ŷa rupi.

Canaã yvy regua kuery Nhanderuete oipe'a ukapaague

- ⁵⁰ Ha'e gui SENHOR aipoe'i Moisés pe, Moabe yvy ka'aguy e'ŷa rupi ha'e kuery ikuai jave, Jordão yakã yvýry, Jericó tetã rexei:
- ⁵¹ — Ndeayvu ke Israel kuery pe. Ha'e vy aipo're: Jordão yakã peaxapa ma vy Canaã yvy katy peje'oi ma jave
- ⁵² penerenonde katy gui peipe'apa 'rã ha'e va'e yvy regua kuery. Pembovaipa 'rã ita ta'angaa oĩa va'e ha'e javi, ta'angaarã mba'emo ryku gui ha'e kuery ojapo va'ekue voi. Peitypa 'rã yvy'ã rupi ombojerovia atyrã ojapo va'ekue.

⁵³ Ha'e va'e yvy pejopypa 'rā penemba'erā, ha'e py ae pendekuai aguā, mba'eta ha'e va'e yvy ae ame'ẽ pendeyvyrā.

⁵⁴ Xortea pexaa rami 'rā pemboja'o yvy, pendera'y kuery peteĩ-teĩ mbovy pa ikuia rami vy. Hetave va'e regua pe ma tuvixave va'e 'rā peme'ẽ ijyvyrā, ha'e rā mboapy'ive va'e pe kyrīve'i va'e 'rā peme'ẽ ijyvyrā. Xorte pexaa rami ae 'rā optya peteĩ-teĩ peguarā. Penderu kuery guigua peteĩ-teĩ regua mbovy pa ikuia rami 'rā pejopy pendeyvyrā.

⁵⁵ Ha'e rami avi penerenonde gui yvy regua kuery ndapeipe'apai ri ramo peẽ kuery mbyte py optya va'ekue ma penderexa py juu haxy va'e rami 'rā ikuai, penderyepy rupi hakua va'e oña rami 'rā pendu. Ha'e rami vy penemoangekoarā rive 'rā optya yvy pendekuia re.

⁵⁶ Ha'e gui pendere ju ajapo 'rā ha'e kuery re ajapo aguā re anhembopy'aague.

34

Ijyvy apy ikuai va'e re ijayvuague

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Canaã yvy re pevaẽmba ma rire itui 'rā penderekoarā, Canaã yvy ae, ijapya'i nhavõ peve.

³ — Yvy kuaray puku-a katy itui va'e re pendekuai 'rā Zim regua tekao e'ŷa regua guive Edom yvy apy'i peve. Kuaray puku-a katy pendeyvy oo 'rā ye'ẽ apy guive kuaray oua katy.

⁴ Ha'e va'e apy ma ojeapa 'rā ov ykuaray puku-a katy rupi, Acrabim yvy'ã katy, ha'e gui ma oaxaju 'rā Zim peve. Ha'e gui ma oo 'rā Cades-Barnéia kuaray puku-a katy rupi. Ha'e vy Hazar-Adar katy oẽ vy Azmom peve 'rā oaxa.

⁵ Ha'e va'e apy ma Azmom gui ojeapave 'rā ov y Egito katy'i yakā'i oĩ va'e rembe peve. Ha'e gui oove 'rā ye'ẽ rembe'i peve ae.

⁶ — Ha'e gui kuaray oikea katy rupi pendeyvy apyrā ma ye'ẽ tuvixave va'e rembe 'rā optya. Ha'e va'e ae 'rā optya pendeyvy apy kuaray oikea katy rupi.

⁷ — Pova'e ma ijapy kuaray ijapu'a'ia katy rupi: ye'ẽ tuvixave va'e guive oaxa 'rā Hor yvyty peve.

⁸ Ha'e gui Hor yvyty guive ma oo 'rā Hamate py nhavaẽ'i peve. Ha'e va'e apy ma Zedade peve 'rā oo.

⁹ Ha'e va'e gui ma oo 'rā Zifrom peve, ha'e gui opaa ma Hazar-Enã py 'rā optya. Ha'e va'e ae ma ijapy kuaray ijapu'a'ia katy rupi oo va'e.

¹⁰ — Ha'e gui kuaray oua katy rupi ijapy oo 'rā Hazar-Enã guive Sefã peve.

¹¹ Ha'e gui Sefã guive oguejy 'rā Ribla peve, Aim kuaray oua katy rupi ae. Ha'e gui ma oguejyve vy oo 'rā Quinerete ye'ẽ rembe rupi kuaray oua katy rupi.

¹² Ha'e gui oguejyve 'rā ov y Jordão yakā rembe ha'e javi rupi, ha'e gui ye'ẽ rembe py ju 'rā opa. Ha'e va'e ae 'rā pendeyvyrā itui, ijapya'i ha'e javi peve — he'i.

¹³ Ha'e gui Moisés ijayvu Israel kuery pe. Ha'e vy aipoe'i:

— Kova'e yvy ma pendeyvyrā xortea pexaa rami pejopy va'erā, nove regua pe ha'e peteĩ regua mbytekue ikuai va'e pe ju SENHOR ome'ẽ uka va'ekue.

¹⁴ Mba'eta Rúben ha'e Gade ramymino kuery ma oyvyrā ojopy ae ma okuapy guamoĩ ro pygua kuery mbovy pa ikuia rami vy. Ha'e gui Manassés kuery regua mbytekue voi ojopy ma avi oyvyrā.

¹⁵ Ha'e va'e mokoĩ regua ha'e peteĩ regua mbytekue ikuai va'e ju ojopy ae ma okuapy oyvyrā Jordão yakā kyvõ rami, Jericó tetā rexei, kuaray oua katy ae.*

Yvy mboja'oarā kuery rery oña

¹⁶ Ha'e gui SENHOR aipoe'ive ju Moisés pe:

¹⁷ — Pova'e avakue ae ma yvy mboja'oarā ikuai. Hery ma sacerdote Eleazar ha'e Num ra'y Josué.

* 34:15 Kova'e kuaxia py ma "Jordão kyvõ rami" he'ia ma Jordão yakā regua kuaray oua katy yvy itui va'e re ijayvu vy, mba'eta ha'e py teri ha'e kuery ikuai.

- ¹⁸ Peteĩ-teĩ regua gui peiporavo avi 'rã peteĩ huvixa, yvy mboja'oarã.
¹⁹ Ha'e va'e avakue rery ma po rami: Judá kuery va'e regua ma Jefoné ra'y Caleb, Simeão ramymino kuery va'e regua ma Amiúde ra'y Samuel,
²¹ Benjamim kuery va'e regua ma Quislom ra'y Elidade,
²² Dã ramymino kuery va'e regua ma Jogli ra'y huvixa Buqui,
²³ José ra'y Manassés ramymíno kuery va'e regua ma Éfode ra'y huvixa Haniel,
²⁴ Efraim ramymino kuery va'e regua ma Siftã ra'y huvixa Quemuel,
²⁵ Zebulom ramymino kuery va'e regua ma Parnaque ra'y huvixa Elizafã,
²⁶ Issacar ramymino kuery va'e regua ma Azã ra'y huvixa Paltiel,
²⁷ Aser ramymino kuery va'e regua ma Selomi ra'y huvixa Aiúde,
²⁸ Naftali ramymino kuery va'e regua ma Amiúde ra'y huvixa Pedael — he'i.
²⁹ Ha'e va'e kuery pe ae SENHOR omboja'o uka Canaã yvy Israel kuery rekoarã.

35

Levita kuery pegua tetã re ijayvuague

¹ SENHOR aipoe'ive ju Moisés pe, Moabe yvy ka'aguy e'ýa py ha'e kuery ikuai jave, Jordão yakã yvýry, Jericó tetã rexei:

² — Ndeayvu ke Israel kuery pe, amongue tetã ha'e kuery yvy re ikuai va'e ome'ẽ aguã levita kuery rekoarã. Peteĩ-teĩ tetã yvýry rupigua ome'ẽ avi 'rã levita kuery yvyrã, guymba kuery oguereko aguã.

³ Ha'e va'e tetã py ae 'rã ha'e kuery ikuai. Ha'e rã ijyvýry rupi ma vaka, vexa'i ha'e guymba kuery ha'e javi 'rã oguereko.

⁴ Tetã ikuai va'e yvýrykue levita kuery pe ome'ẽ va'erã va'e ma tetã kora guive oo 'rã mombyry'i, quatrocentos e cinqüenta metros peve tetã yvýry ha'e javi rupi.

⁵ Tetã gui mombyrya py kuaray oua katy rupi ma pea'ã 'rã novecentos metros, ha'e gui kuaray puku-a katy rupi, oikea katy, ha'e kuaray ijapu'a'ia katy rupi ma novecentos metros ju 'rã pea'ã. Ha'e va'e mbyte py oï 'rã tetã. Ha'e rami ae 'rã peteĩ-teĩ tetã yvýrykue oï.

⁶ — Levita kuery pe tetã peme'ẽ va'e regua ma mboapy meme tetã opyta 'rã onhemí atyrã. Ha'e va'e ma peiporavo 'rã jojuka rive va'ekue onhemí aguã. Ha'e va'e áryve levita kuery pe peme'ẽve 'rã quarenta e dois tetã.

⁷ Levita kuery pe tetã peme'ẽ va'erã ma quarenta e oito tetã ha'e javi vy, ijyvýrykue reve.

⁸ Ha'e gui tetã Israel kuery mba'e regua levita kuery pe peme'ẽ va'erã va'e ma xapy'a rei peteĩ regua heta raxa ri ikuai ramo ma levita kuery pe heta 'rã pemboaxa tetã. Ha'e rã xapy'a rei peteĩ regua ndaetai ramo mboapy'i 'rã pemboaxa levita kuery pe. Peteĩ-teĩ regua guetã mbovy pa ojopyague rami amongue ome'ẽ 'rã levita kuery pe ikuai aguã.

Deuteronômio 4.41-43; 19.1-3

⁹ Ha'e gui SENHOR aipoe'ive ju Moisés pe:

¹⁰ — Ndeayvu ke Israel kuery pe, ha'e vy aipo're: Canaã yvy re pevaẽ aguã Jordão yakã peaxa ma vy

¹¹ amboae tetã ju 'rã peiporavo onhemia atyrã, ha'e va'e py jojuka rive va'ekue oike 'rã onhemí aguã.

¹² Ha'e va'e tetã perek 'rã jouguy moẽare onhemí aguã imbopagaarã va'e gui, heta va'e kuery mbyte py jojuka rive va'ekue ojukaa e'ý aguã ojexa uka e'ý mbove onhemboayvu uka aguã.

¹³ Mboapy meme tetã peiporavo 'rã onhemia atyrã.

¹⁴ Ha'e va'e tetã va'e regua ma mboapy peme'ẽ 'rã Jordão kyvõ rami oï va'e, ha'e rã amboae mboapy va'e ma Canaã yvy re 'rã oï, tetã onhemia atyrã ae oï aguã.

¹⁵ Ha'e va'e mboapy meme tetã ma Israel kuery pe opyta 'rã onhemí atyrã, ha'e amboae regua kuery pe guive, ha'e kuery mbyte rupi ovaẽ va'ekue pe, ha'e va'e tetã py jojuka rive va'ekue onhemí aguã.

Deuteronomio 19.11-13

¹⁶ — Ha'e gui amongue tembiporu ferro guigua py mba'e nhonupā rā omano ramo hembiporu reveguia pe "Jojukaare" peje 'rā. Ha'e ramo jojukaare ma guive rā pejuka 'rā.

¹⁷ Ha'e'ŷ vy amongue opo py ita oguereko va'e py amboae ojapi 'rā omano aguā rami. Ha'e va'e pe voi "Jojukaare" peje 'rā. Ijukaare ramo pejuka 'rā.

¹⁸ Ha'e'ŷ vy amongue opo py yvyra oguereko va'e py amboae oinupā 'rā omano aguā rami. Ha'e va'e pe voi "Jojukaare" peje 'rā. Ijukaare ramo pejuka 'rā.

¹⁹ Jouguy moēare reve joepyarā ou va'ekue nhovaexī vy ojuka 'rāe.

²⁰ Ha'e gui xapy'a rei amongue nhomoanha 'rā nda'iporayvui vy, ha'e'ŷ vy amongue ojukaxe vy mba'emo hexe omombo 'rā omano aguā rami,

²¹ ha'e rami e'ŷ vy ija'ea rupi e'ŷ opo py ae ounga 'rā omano aguā rami. Ha'e ramo pejuka 'rā ijukaare, jojukaare ramo. Jojukaare reve joepyarā ou va'ekue nhovaexī vy ojuka 'rā.

Deuteronomio 19.4-10

²² — Ha'e gui xapy'a rei amongue potae vy e'ŷ nhomoanha xapy'a 'rā, ha'e'ŷ vy mba'emo omombo rive 'rā hexe ojukaxe vy e'ŷ.

²³ Ha'e'ŷ vy oexa e'ŷ re hi'áry ita oity rive ramo omano 'rā, hovaigua e'ŷ oiko, neī ixupe ojapo vaixe rei e'ŷ teī.

²⁴ Ha'e ramo ma heta va'e kuery ha'e javi oikuua pota 'rā okuapy jojukaare ha'e joepyarā ou va'e re, kova'e lei oĩ rami vy ae.

²⁵ Ha'e rami vy joepyarā ou va'ekue po gui ogueraa jepe 'rā okuapy jojukaare, hekoa katy'i tetā onhemia aty oĩ va'e katy omondouka vy, ha'e py onhemi aguā. Ha'e py ae 'rā jojukaare opyta, sacerdote yvateve va'erā azeite iky'a e'ŷ va'e py omoĩ mbyre omano e'ŷa ja.

²⁶ Ha'e rā xapy'a rei jojukaare tetā onhemi aguā ooague gui oẽ ri ramo

²⁷ ha'e va'e tetā gui mombyrya py joepyarā ojou vy jojukaare ojuka teī napembopagai 'rā huguy omoēague re.

²⁸ Tetā onhemiaty py ae jojukaare opyta 'rāgue sacerdote yvateve va'e omano e'ŷa ja. Ha'e gui sacerdote omano ma rire jojukaare ojevy ju 'rā oyvy py.

²⁹ Ha'e va'e ma penderekorā ombopara pyre, peneramymino kuery ikuai va'erā pe guive, penderekoa ha'e javi rupi.

³⁰ — Jojukaague hexaare kuery omombe'u ramo mae ma jojukaare pejuka 'rā. Peteī'i ri hexaare oiko ramo ma nda'evei 'rā pejuka aguā.

³¹ Jojukaare omano aguā rami oiko rire ma nda'evei 'rā pemboekovia uka aguā. Pejuka 'rāe.

³² Ha'e rami ae avi xapy'a rei tetā py onhemi oikovya gui ojevy ju 'rā oyvy re ae, sacerdote yvateve va'e omano e'ŷ mbove ma voi. Ha'e va'e voi napemboekovia ukai 'rā,

³³ pejapo e'ŷ aguā vyv pendekuaia ha'eve'ŷ va'e itui aguā rami, mba'eta jouguy omoēague ma ojapo 'rā vyv ha'eve'ŷ va'e itui aguā rami. Peteī've henda py pendeyvy ndapeiky'a'oi jouguy omoēague gui, jouguy moēare ruguy pemoē e'ŷ vy.

³⁴ Ha'e nunga rupi pejapo eme vyv pendekuaia ha'eve'ŷ va'e opyta aguā rami, ha'e va'e mbyte rupi xee aiko avi ramo. Mba'eta xee SENHOR aiko Israel kuery mbyte.

36

Kunhague vyv jopyare omenda aguā re ijayvuague

¹ Ha'e gui Moisés oĩa py ovaẽmba okuapy Gileade ramymino kuery huvixa ikuai va'e. Gileade ma Maquir ra'y, Maquir ma Manassés ra'y, Manassés ma José ra'y. Ha'e gui ha'e kuery ijayvu okuapy Moisés ha'e Israel kuery ruvixa ikuai va'e renonde py.

² Ha'e vy aipoe'i okuapy:

— Oreruvixa, ndevy SENHOR ojapo ukaague rami vy kova'e vyv xortea oexaa rupi reme'ẽ uka va'ekue Israel kuery yvyrā. Ha'e gui oreruvixa, SENHOR ijayvuague rami ae avi rejapo va'ekue oreryke'y Zelofeade yvykue tajy kuery pe ju omboaxaa aguā rami.*

* 36:2 Números 27.1-11

³ Ha'e rami teĩ xapy'a rei ha'e va'e kuery omenda 'rã Israel kuery regua mboae re. Ha'e ramo ma ha'e kuery yvyrã ojopy va'ekue oipe'aa 'rã oreramoĩ kuery yvykue gui, ha'e omboaxaa 'rã amboae regua mba'erã, ime kuery regua mba'e ae. Ha'e rami 'rã oipe'aa oreiyvrã xortea oexaa rupi rojopy va'ekue gui.

⁴ Mba'eta jubileu ma'etý Israel kuery pegua ojeupity nhavõ ma kunhague yvyrã ojopy va'ekue oaxa 'rã ime kuery regua pe ae.* Ha'e rami vy oyvyrã ojopy va'ekue oipe'aa 'rã oreramoĩ kuery yvykue gui — he'i okuapy.

⁵ Ha'e ramo Moisés ijayvu Israel kuery pe, SENHOR ojapo ucaa rami vy. Ha'e vy aipoe'i:
— José ramymino kuery va'e regua ma anhetẽ rupi meme ijayvu.

⁶ Mba'eta po rami ae SENHOR oeja va'ekue Zelofeade rajy kuery pe. Aipoe'i va'ekue: “Ha'e kuery pe ma ha'eve amongue va'e re rei omenda aguã teĩ guamoĩ ramymino kuery regua re anho.

⁷ Ha'e rami vy Israel kuery peteĩ-teĩ regua mba'e yvy ndoaxai 'rã amboae regua mba'erã. Mba'eta Israel kuery ikuai 'rã guamoĩ kuery mba'ekue yvy py ae.

⁸ Xapy'a rei Israel kuery peteĩ regua tajy omба'erã ojopy 'rã guamoĩ kuery yvykue. Ha'e rami vy omenda 'rã guamoĩ ramymino kuery regua re ae, Israel kuery peteĩ-teĩ ikuai aguã guamoĩ kuery yvykue py.

⁹ Ha'e rami vy peteĩ-teĩ regua oyvyrã ojopy va'ekue gui ndoaxai 'rã amboae regua pe. Mba'eta Israel kuery peteĩ-teĩ ikuai 'rã guamoĩ kuery yvykue py ae”, he'i va'ekue.

¹⁰ Moisés pe SENHOR ojapo ukaague rami ae Zelofeade rajy kuery ikuai.

¹¹ Ha'e rami vy Zelofeade rajy kuery Macla, Tirza, Hogla, Milca ha'e Noa ma otuty ra'y kuery re meme omenda,

¹² José ra'y Manassés ramymino kuery va'e regua re ae omendapa. Ha'e rami vy oyvyrã ojopy va'ekue opytapa tamoĩ ramymino kuery regua mba'e ae.

¹³ Ha'e va'e ayvu ha'e javi SENHOR oeja va'ekue Moisés pe Israel kuery rekorã, Moabe yvy ka'aguy e'ŷa py ikuai jave, Jordão yakã yvýry, Jericó tetã rexei.

* 36:4 Levítico 25.8-34

**Deuteronômio peteĩ nhiruña kuaxia Moisés ombopara
 va'ekue**
Jordão yakã yvýry Moisés ijayvu ypy'iague
**Deuteronômio peteĩ nhiruña kuaxia Moisés ombopara
 va'ekue**

Tery Deuteronômio ma “lei omombe'u porâveague” he'ia, mba'eta kova'e kuaxia para re Israel kuery pe Moisés omombe'u porâve Nhanderuete guigua lei. Omombe'u avi ha'e kuery tekao e'ŷa rupi oguata jave Nhanderuete opena porâague, ha'e omongeta guive Canaã yvy re oo vy onhe'ẽ rendu aguã. Moabe yvy re teri ikuai jave omombe'u, Jordão yakã regua kuaray oua katy, Canaã yvy re oo ta jave.

Kova'e kuaxia para re Moisés omombe'u porâve avi Nhanderuete reko: “Pendu ke, Israel kuery. Peteĩ'i oiko Senhor, Senhor Nhanderuete ae. Ha'e nunga rupi peayvu 'rã Senhor Penderuete pendep'y'a, penenhe'ẽ ha'e penembaraetea ha'e javi py”, he'i (6.4-5). Moisés ijayvu avi Nhanderuete renonde jajererokyjea rupi nhanhe'ẽ rendu aguã: “Ha'e nunga rupi Israel kuery, mba'e nunga tu Senhor oipota pejapo? Senhor Penderuete renonde pejererokyjea rupi pendekuai aguã anho, heko rupi pendekuai, Senhor Penderuete peayvu ha'e ixupe peiko aguã pendep'y'a ha'e penenhe'ẽ ha'e javi py, ha'e pejapopa aguã Senhor ojapo uka va'e ha'e oayvu oeja va'ekue, aŷ pêvy amboaxa va'e, ha'e rami vy pendekuai porã aguã”, he'i (10.12-13).

Kuaxia para opaa py ijayvu Moisés omanoague re, mba'eta Meribá py Nhanderuete nonhe'ẽ rendui rire ixupe noguerovaẽ ukai heta va'e kuery ijyvyrã ome'ẽ va'ekue py. Moisés rekoria Nhanderuete oiporavo uka ipytyvõare Josué heta va'e kuery ogueraa aguã. Ha'e rã Moisés ma Pisga yvyty oẽ, ha'e va'e gui Canaã yvy katy oma'ẽ ranhe aguã. Ha'e rire yvyty áry ae Moisés omano raka'e, Israel kuery pegua profeta yvateve va'e.

Israel kuery ikuaiague Moisés omombe'uague

¹ Kova'e ayvu rupi ma Israel kuery pe Moisés ijayvu raka'e Jordão yakã rovai teri ikuai jave, tekao e'ŷa yvy joja reia py, Sufe ye'ẽ yvýry, Parã, Tofel, Labã, Hazerote ha'e Di-Zaabe mbyte ikuia py.

² Onze ára ogueraa 'rã va'ekue Horebe yvyty guive Cades-Barnéia peve oguata oje'oivy aguã, Seir yvy'ã rupi tape oo va'e rupi.*

³ Quarenta ma'etŷa va'e onze jaxy ijypy'ia ára py Moisés ijayvu raka'e Israel kuery pe, SENHOR ha'e kuery re ijayvuague rami ae,

⁴ amorreu kuery ruvixa Seom Hesbom pygua, ha'e Basã pygua kuery ruvixa Ogue Astarote py oiko va'ekue ha'e kuery ojuka rire Edrei py.

⁵ Jordão yakã rovai, Moabe yvy re teri ikuia py Moisés omboypy kova'e lei omombe'u porâve aguã. Ha'e vy aipoe'i:

⁶ — SENHOR Nhanderuete ma ijayvu Horebe yvyty re nhande kuery nhandekuai jave. Ha'e vy aipoe'i va'ekue: “Kova'e yvyty re pepyta ranheague ha'eve ma.

⁷ Pejere ha'vy, pejepe'apa. Tapeo yvyty rupi amorreu kuery ikuia katy, ha'e yvy joja reia re yvyty ikuia katy, Neguebe katy voi, ha'e ye'ẽ yvýry cananeu kuery ikuia katy, Líbano katy Eufrates yakã guaxu peve.

⁸ Ne'exa, ha'e va'e yvy ha'e javi amoĩ penerononde. Pevaẽ ha'vy, ha'e va'e yvy re penhemboekoa aguã, SENHOR oura reve peneramoĩ kuery pe ome'ẽ rire, Abraão, Isaque

* ^{1:2} Horebe ma Sinai yvyty ae (Êxodo 3.1, Malaquias 4.4). Onze ára ete'i oguata 'rãgue py quarenta ma'etŷ re ha'e kuery ikuai raka'e tekao e'ŷa rupi, Nhanderuete ombopaga rã nonhe'ẽ renduiague re (Números 14.26-34).

ha'e Jacó, ha'e gui ha'e kuery ikuai rire hamymino jevy-jevy kuery peguarā voi", he'i va'ekue.

Êxodo 18.13-27

⁹ — Ha'e va'e jave py ae aipoa'e pendevy: "Xee ae'i ndaxepo'aka reguai peẽ kuery rogueraa aguã,

¹⁰ SENHOR Penderuete penemboetave rire. Ha'e ramo aŷ pendereta ma jaxy-tata yva re ojekuaa va'e rami.

¹¹ Tove SENHOR peneramoī kuery Ruete tapenemboetave mil-kue peve ju, ha'e ijayvuague rami vy.

¹² Ha'e rami avi mba'exa tu xee ae'i aropo'aka ta pendepoyikue ha'e javi, pendevoyi, ha'e pepu'ã reia?

¹³ Peiporavo ha'vy avakue hi'arandu, oiko kuaa ha'e opena kuaa va'e, peẽ kuery peteĩ-teĩ regua gui ae, amoī aguã pendere opena va'erã", ha'e va'ekue.

¹⁴ — Ha'e rã xembovai vy "Ha'evea rami ndeayvu", peje va'ekue.

¹⁵ Ha'e rã peẽ kuery peteĩ-teĩ regua akã aenoī vy amoī peẽ kuery ruvixarã, avakue hi'arandu ha'e opena va'e meme. Ha'e vy amoī mil ikuai va'e-va'e re opena va'erã, ha'e gui cem, cinqüenta ha'e dez ikuai va'e re opena va'erã, peẽ kuery peteĩ-teĩ regua re ae.

¹⁶ Ha'e va'e jave py xeayvu pendere opena va'ety kueryrã pe. Ha'e vy aipoa'e va'ekue: "Pendu 'rã penderegua kuery joe nda'evei reia, ha'evea'i rami 'rã peikuaa pota avakue joegua meme nda'evei rei va'e re, ha'e'ý vy amboae regua ha'e kuery reve ikuai va'e re teĩ.

¹⁷ Ha'e rami vy peikuaa potaa py peteĩ regua peavyuve eme joegui, pendu 'rã yvyigüeve'i ha'e yvatekueve ijayvua teĩ. Pekyje eme guive avave gui, mba'eta peikuaa pota kuaa aguã ma Nhanderuete gui ae ou. Ha'e rami avi mba'emo peikuaa pota aguã haxy ete ri ramo pemboaxa 'rã xea py, ha'e rã xee voi aendu 'rã", ha'e va'ekue.

¹⁸ Ha'e rami ae ha'e va'e jave py xeayvu va'ekue mba'emo pejapo aguã ha'e javi re.

Números 13.1-24

¹⁹ — Ha'e gui ma Horebe yvyty gui jaje'oi vy jaguata tekao e'ýa ijava etea pexaague ha'e javi rupi. Tape amorreuu kuery regua yvyty ikuai va'e rupi jaje'oi SENHOR Nhanderuete ojapo ukaague rami vy. Ha'e vy Cades-Barnéia peve nhavaẽ karamboae.

²⁰ Ha'e ramo xee aipoa'e va'ekue peẽ kuery pe: "Amorreuu kuery regua yvyty ikuai va'e re nhavaẽ ma, nhandevyvrã SENHOR Nhanderuete ome'ẽ va'e re ae.

²¹ Ne'exa, kova'e yvy ma SENHOR Nhanderuete omoī ma penerenonde. Tapeo ha'vy penhemboekoa aguã, SENHOR peneramoī kuery Ruete aipoe'iague rami vy. Pekyje eme, penhemondyi eme guive", ha'e va'ekue.

²² Ha'e ramo peẽ kuery xea py pevaẽmba vy aipopeje va'ekue: "Nhamondouka 'rã avakue nhanerenonde guarã, yvy re oexa pota aguã nhandevy, ha'e gui nhandevy omombe'u ju aguã tape jaa aguã, ha'e tetã oĩa py tema nhavaẽ aguã", peje va'ekue.

²³ Ha'e rami pendeayvua xee ajou porã vy doze avakue aiporavo karamboae penembyte gui, peteĩ-teĩ regua peteĩ'i ava.

²⁴ Ha'e ramo ha'e kuery jogueraa vy yvyty ikuai va'e rupi oguata vy yvy re oexa pota oje'oivy raka'e. Ha'e vy Escol yvyugua peve ovaẽ vy

²⁵ yvy re mba'emo aju ikuai va'ekue opo py ojopy vy ha'e nunga ogueru okuapy nhandea py. Ha'e vy nhandevy omombe'u vy "Yvy porã ete SENHOR Nhanderuete nhandevy ome'ẽ va'e", he'i va'ekue.

Números 13.25-33

²⁶ — Ha'e rami teĩ peẽ kuery ma ndapeoxei. Ha'e rami 'rãgue py SENHOR Penderuete ojapo ukaague rupi e'ý pendekuai.

²⁷ Ha'e rami vy pendero rupi voi penhemboxy rivea ramo pendeayvu tema pekuapy. Ha'e vy aipopeje va'ekue: " SENHOR ma nanhanderayvui vy ae ma nhi'ã nhandepe'apa Egito yvy gui, amorreuu kuery po py nhanemboaxapa rã ha'e kuery nhanemomba aguã rive.

²⁸ Ha'e gui marã katy 'rã tu jaje'oi aguã ha'eve? Mba'eta nhanderyvy kuery ojapo nhandepy'a ikangy rei aguã rami. Mba'eta ha'e kuery aipoe'i va'ekue: 'Ha'e pygua kuery ma nhandegui tuvixakueve ha'e yvatekueve ikuai. Ha'e kuery retã voi tuvixave, ha'e yva peve ikorapa va'e. Ha'e gui roexa avi ha'e py Enaque ra'y kuery regua', he'i", peje va'ekue.[†]

²⁹ Ha'e ramo xee aipoa'e va'ekue pendevy: "Penhemondyi rei eme, pekyje eme guive.

³⁰ Mba'eta SENHOR Penderuete penerenonde rupi oo vy ha'e ae joe opu'ã 'rã peẽ kuery repy vy, Egito yvy re pexa pav a py nhandevy mba'emo ojapoague rami ae,

³¹ ha'e tekao e' a re nhandekuaia rupi ojapoague rami voi. Ha'e py ma pexapa karamboae ava gua'y ogueraa rami avi SENHOR Penderuete pendereraa henoiny tape peguataa ha'e javi rupi, apy peva  peve.

³² Ha'e rami te  a  ma ndapejeroviai pekuapy SENHOR Penderuete re,

³³ penerenonde tape ha'e javi rupi oo te , ojou uka vy pe  kuery pepyta agu . Py y ma tata py oexa uka tape peo agu , ha'e r a  ra py ma arai rupi", ha'e va'ekue pendevy.

N umeros 14.20-38

³⁴ — Ha'e rami pendeayvua SENHOR oendu vy ivai reve oura reve aipoe'i va'ekue:

³⁵ "Anhet  ete aipoa'e, kova'e avakue heko vai va'e regua pete ve ndoexai 'r a yvy por , tamoi kuery pe ame'  agu  xeayvuague,

³⁶ Jefon  ra'y Calebe anho e'  vy. Ha'e va'e ma oexa 'r a. Ha'e rami vy yvy ha'e opyr  ma oikovyague ame'  'r a ixupe ha'e ta'y kuery pe ju, SENHOR rupive oiko agu  onhea'  rire", he'i va'ekue SENHOR.

³⁷ Ha'e rami avi pendek uxa xevy voi SENHOR ivai vy aipoe'i va'ekue: "Ha'e rami ae avi ndee voi ndereupityi 'r a ha'e va'e yvy.

³⁸ Ha'e r a Num Josu  ra'y nerentonde rupi oiko va'e, ha'e va'e ae 'r a oupity. Embopy'a guaxu ke ha'vy, mba'eta ha'e va'e ojapo 'r a Israel kuery heko agu  rami yvy ame'  va'e re.

³⁹ Ha'e gui pendera'y kue'iry, ha'e kuery pe 'Ombo'a pyr ' pejeague va'e, pendera'y kuery mba'emo vai ne  mba'emo por  ma voi ndoikuaii va'e kuery ae oike 'r a ha'e py. Ha'e kuery pe ae 'r a ame' , ha'e ramo heko 'r a okuapy ha'e py.

⁴⁰ Ha'e r a pe  kuery ma pejere, tapeopa ju tekao e' a katy, tape Ye'  pt  katy oo va'e rupi", he'i va'ekue SENHOR.

N umeros 14.39-45

⁴¹ — Ha'e ramo pe  kuery aipopeje va'ekue xevy: "Rojeavy rima SENHOR rovai. Roje'oi nho 'r a joe ropu'  vy, SENHOR Nhanderuete ijayvuague rami vy", peje vy pete -te  penerembiporu joe opu' a pygua pejopypa vy pendepy'a py pemo  ae pekuapy yvyty ikuaii katy peje'oi agu .

⁴² Ha'e ramo SENHOR aipoe'i karamboae xevy: "Aipo're ha'e kuery pe: 'Tapeo eme, pepu'  eme joe, mba'eta xee ndaikoi 'r a pe  kuery mbyte, penderovaigua kuery pendereitypa e'  agu ', 're", he'i va'ekue.

⁴³ Ha'e rami pendevy xeayvu va'ekue ri napenduxei pekuapy. Ha'e rami 'r ague py SENHOR nhe'  rendua rupi e' , ha'e pendejee anho rei pejeroviaa rupi peje'oi karamboae yvyty ikuaii katy.

⁴⁴ Ha'e ramo ha'e va'e yvy re amorreu kuery ikuaii va'e penerovaexi agu  joguerupa vy eiru rami penemonha. Ha'e rami vy pendereitypa Seir guive Horma peve.

⁴⁵ Ha'e ramo pejeyvypa ma vy pejae'o va'ekue SENHOR renonde. Ha'e rami te  SENHOR noendui, ndojapyxakai ae pejapukaia re.

⁴⁶ Ha'e va'e rire mbovy  ra rei e'  pendekuai va'ekue Cades py ae.

† 1:28 Enaque ra'y kuery ma gigante ikuai raka'e (N umeros 13.28).

¹ — Ha'e va'e rire ma jajeapa vy tekoa e'ŷa katy ju jaje'oi, tape ye'ẽ pytã katy oo va'e rupi, SENHOR xevy aipoe'iague rami vy. Ha'e rami vy mbovy ára re rei e'ŷ jajere-jere jakuapy Seir regua yvyty yvýry rupi.

² Ha'e rã SENHOR ijayvu vy aipoe'i xevy:

³ “Pejere-jere vaipa ma kova'e yvyty yvýry rupi. Pejeapa ju ke kuaray ijapu'a'ia katy.

⁴ Ha'e vy heta va'e kuery pe ndeayvu vy aipo're 'rã: ‘Peaxa 'rã penderyke'y kuery Esaú ramymino kuery Seir re ikuia rupi. Ha'e va'e kuery ma okyje 'rã peẽ kuery gui. Va'eri peiko kuaa pota ta'vy opa mba'e py.

⁵ Pejoguero'a rei eme ha'e kuery reve, mba'eta ha'e kuery yvy ma name'ẽi 'rã pendevy, neĩ ruxã'i pepyrô aguã rive voi. Mba'eta Esaú kuery pe ae ame'ẽ raka'e Seir yvyty regua ha'e javi.

⁶ Ha'e kuery gui tembi'u pe'u va'erã pejogua 'rã peráta re ae. Yy pey'u va'erã voi pejogua peráta re', 're 'rã" he'i va'ekue SENHOR.

⁷ Mba'eta SENHOR Penderuete penemoingo porã va'ekue pendepo py penembiapoa ha'e javi re. Ha'e ma oikuaapa kova'e tekao e'ŷa rupi peguataa. Quarenta ma'etõ re SENHOR Penderuete oiko pendereve. Ha'e ramo mba'eve rei indoatai pendevy.

⁸ Ha'e gui jaaxa nhanderyvy Esaú ramymino kuery Seir re ikuia yke rupi. Ha'e rami vy tape Elate ha'e Eziom-Geber gui yvy joja reia katy oo va'e gui jajeapa vy tape Moabe regua tekao e'ŷa rupi oo va'e rupi ju jaa.

⁹ — Ha'e gui SENHOR aipoe'i xevy: “Pejavyky rei eme Moabe pygua kuery, neĩ pepu'ã rei eme guive ha'e kuery re, mba'eta ha'e kuery yvy ma name'ẽi 'rã pendevy, mba'eta Ar tetã ame'ẽ ma voi Ló ramymino kuery pe”, he'i.

¹⁰ (Ha'e py ymave rupi ikuai va'ekue ma emim kuery. Ha'e va'e kuery ma tuvixakue, heta ete, ha'e anaquim kuery rami ipuku va'ekue raka'e.

¹¹ Ha'e kuery pe ma “Refaim ikuai” 'ea va'ekue, anaquim kuery pe rami avi. Ha'e rã ha'e kuery pe Moabe pygua kuery ma “Emim kuery” he'i.

¹² Ha'e horeu kuery voi ikuai va'ekue Seir py. Va'eri Esaú ra'y kuery omomba vy omondyipa guenonde gui, ha'e rami vy hekoague py ha'e kuery ju ikuai, Israel kuery ojapoague rami avi oyvyrã SENHOR ome'ẽ va'ekue py.)

¹³ Ha'e gui “Pepu'ã ke aŷ, ha'e peaxa Zerede yakã rovaigua re”, SENHOR he'iague rami vy jaaxa va'ekue Zerede yakã rovaigua re.

¹⁴ Cades-Barnéia guive Zerede yakã rovaigua peve jaguataague ha'e javi ma trinta e oito ma'etõ, nhande kuery regua avakue joe opu'ã va'ety ha'e javi omanomba peve nhandeaty mbyte py ae, SENHOR oura reve ijayvu ma voiague rami vy.*

¹⁵ Ha'e rami vy SENHOR ae opo oupi ha'e kuery rovai, nhandeaty mbyte gui omomba ha'e omokanhymba peve.

Ar tetã rupi Arnom yakã oaxapa oje'oivyague re ima'endu'aague

¹⁶ — Ha'e gui heta va'e kuery mbyte gui avakue joe opu'ã va'ety omanomba ma rire

¹⁷ SENHOR ijayvu vy aipoe'i xevy:

¹⁸ “Aŷ ma peaxa 'rã Ar rupi, Moabe pygua kuery yvy rupi,

¹⁹ ha'e pevaẽ 'rã Amom ra'y kuery renonde katy peve. Ha'e rã pejavyky rei eme, neĩ pepu'ã rei eme ha'e kuery re, mba'eta Amom ra'y kuery yvy ma name'ẽi 'rã pendeyvyrã, Ló ra'y kuery yvyrã ame'ẽ ma voi rire.”

²⁰ (Ha'e rami avi ha'e va'e yvy pe “Refaim kuery yvy” 'ea avi, ha'e kuery voi ikuai ranhe rire, ha'e kuery pe amonita kuery “Zanzumim kuery” 'ea va'e ae.

²¹ Ha'e kuery ma tuvixakue, heta ete, ha'e anaquim kuery rami ipuku va'ekue raka'e. Ha'e gui SENHOR omomba va'ekue amonita kuery renonde gui. Ha'e ramo ha'e kuery ju omondyipa ma vy ikuai hekoague py.

²² Ha'e rami ae avi Esaú ra'y kuery re ojapo raka'e Seir py, mba'eta ha'e kuery renonde horeu kuery omomba rire Esaú ra'y kuery ju ikuai hekoague py, kova'e ára peve.

* 2:14 Números 14.28-35

²³ Ha'e gui Caftor pygua kuery voi guekoa gui ae ou vy omomba avi raka'e aveu kuery Gaza tekoia peve ikuai va'ekue, ha'e vy ikuai hekoague py.)

²⁴ Ha'e gui "Pepu'ã ke ha'vy. Tapeo, ha'e peaxa Arnom yakã. Ne'exa, ndepo py ma amboaxa Hesbom pygua huvixa Seom amorreu regua, ha'e ijyvy ha'e javi. Tapeo ha'vy, pendekuai ha'e py, pepu'ã ha'e kuery re.

²⁵ Aÿ gui amboypy 'rã yva guy rupi ikuai va'e ha'e javi re amoï aguã peẽ kuery gui okyjepa rei aguã. Ha'e kuery pendepo'akaa omombe'ua rã oendu vy oryryipa 'rã okuapy pendegui, ndaekorävei rei vy", SENHOR he'i va'ekue.

Números 21.21-30

²⁶ — Ha'e ramo Quedemote tekoia e'ÿa gui xee amondouka ayvu mombe'uarã kuery Hesbom pygua huvixa Seom-a py. Ayvu ha'evepa rei aguã regua amombe'u uka vy aipoa'e:

²⁷ "Tove toroaxa ndeyvy rupi. Tape rupi anho 'rã roo. Ndorojepe'ai 'rã roiporu kuaa katy, neï roiporu kuaa e'ÿa katy voi.

²⁸ Tembi'u ro'u va'erã reme'ë peráta re ae, yy roy'u va'erã voi peráta re reme'ë. Ha'e vy tove toroaxa ndeyvy rupi,

²⁹ Esaú ra'y kuery Seir py ikuai va'e oremboaxaague rami avi, ha'e Moabe pygua kuery Ar py ikuai va'e voi. Ha'e rami vy roaxa aguã Jordão yakã rovaigua re, orevyrã SENHOR Oreruete ome'ë va'ekue py rovaë peve", ha'e uka va'ekue.

³⁰ Ha'e rami tei Hesbom pygua huvixa Seom ndoipotai jaaxa ijyvy rupi, mba'eta SENHOR ae ojapo inhakã ratãa rupi onhe'ë py ndoipotaia oendu aguã rami, pendepo py omboaxa aguã aÿ pexaa rami ae.

³¹ Ha'e vy SENHOR aipoe'i: "Ne'exa, apy amboypy ma pendepo py omboaxa aguã Seom ha'e ijyvy ha'e javi. Tapeo ha'vy peipe'apa, peẽ ju ijyvykue py penhemboekoa aguã", he'i va'ekue.

³² — Ha'e gui Seom ojeupagua kuery ha'e javi reve ou okuapy nhanderovai opu'ã aguã Jaza py.

³³ Ha'e rami tei nhandepo py SENHOR Nhanderuete omboaxa ramo jaitypa, ta'y kuery ha'e ixupeagua kuery ha'e javi.

³⁴ Ha'e va'e jave ha'e kuery retã ikuai va'e jajopypa vy nhamomba katuï'i, avakue, kunhague ha'e kyrïgue'i guive. Neï peteïve ma voi ndajaejai va'ekue ikuaive aguã.

³⁵ Hymba kuery anho tema jajopy nhanerymbarã, ha'e hetã jaipe'a va'ekue py mba'emo oeja va'ekue voi.

³⁶ Arnom yvjugua yvýry Aroer oï va'e, ha'e ha'e py tetã oï va'e guive Gileade peve, tetã ikora yvateve va'e meme tei jaipe'apa, nhandepo py SENHOR Nhanderuete omboaxapa ramo.

³⁷ Ha'e rã Amom ra'y kuerya py anho nanhavaëi va'ekue, neï Jaboque yakã yvýry rupi, yvyty yvýry tetã ikuai va'e rupi, neï teïve henda py SENHOR Nhanderuete nanhanemondoukaia rupi.

3

Números 21.31-35

¹ — Ha'e gui jajeapa vy Basã katy tape oo va'e rupi ju jaa. Ha'e ramo Basã pygua huvixa Ogue nhanerovaexi vy ou ojeupagua kuery ha'e javi reve, nhandere opu'ã aguã Edrei py.

² Ha'e rã SENHOR Nhanderuete aipoe'i xevy: "Ekyje eme ha'e kuery gui, mba'eta amboaxa ndepo py, ixupeagua kuery ha'e ijyvy ha'e javi reve. Ha'e va'e re pejapo 'rã amorreu kuery ruvixa Seom re pejapoague rami, Hesbom pygua ae va'ekue", he'i va'ekue.

³ Ha'e rami vy nhandepo py SENHOR Nhanderuete omboaxa avi Basã pygua huvixa Ogue, ixupeagua kuery ha'e javi reve. Jajukapa, neï peteï'i voi oikove aguã rami e'ÿ.

⁴ Ha'e va'e jave py nhandepo'aka hetã ha'e javi re. Teïve tetã noï nhandepo'akaa e'ÿ va'ekue. Sessenta tetã re nhandepo'aka Argobe regua yvy ha'e javi, Basã pygua huvixa Ogue openaague.

- ⁵ Ha'e va'e tetã ha'e javi ma ikora yvate va'e meme, ikora rokẽ jokoa va'e voi. Tetã mbovy e'ŷ rei avi jajopy ikora e'ŷ va'e.
- ⁶ Nhamomba katu'i'i, Hesbom pygua huvixa Seom mba'ekue re jajapoague rami. Peteĩ-teĩ tetã nhamomba, avakue, kunhague ha'e kyrigue ha'e javi.
- ⁷ Mymba kuery anho tema jaraa nhandevy guarã, tetã pygua kuery oguereko va'ekue voi.
- ⁸ Ha'e rami py amorreu kuery huvixa mokoïve po gui jaipe'a va'ekue ijyvy Jordão yakã kyvõ rupi itui va'ekue, Arnom yakã guive yvyty Hermom yvyty peve.
- ⁹ (Hermom yvyty pe ma Sidom pygua kuery "Siriom" he'i, ha'e rã amorreu kuery ma "Senir" he'i okuapy va'e.)
- ¹⁰ Ha'e rami vy nhandepo'aka yvy joja reia rupi tetã ikuai va'e re, Gileade regua ha'e javi re, Basã regua re voi, Salca ha'e Edrei peve. Ha'e va'e ma Basã pygua huvixa Ogue openaague meme.
- ¹¹ (Mba'eta Basã pygua huvixa Ogue anho'i ma oikove va'ekue refaim kuery regua. Ha'e va'e rupa ma ferro guigua, Amom ra'y kuery retã Rabá re oĩ teri va'e. Ipuku-a ma irundy metros, ha'e rã ipya ma mokoï metros, aŷ nha'ãa rami.)

Números 32.33-42

- ¹² — Ha'e va'e jave py ae jajopypa nhandeyvyrã. Ha'e gui Arnom yvyugua yvýry Aroer tekoa oĩ va'ekue guive Gileade regua yvyty mbytekue peve, tetã ikuai va'e ha'e javi reve amboaxa Rúben ha'e Gade ramymino kuery pe.
- ¹³ Ha'e rã Manassés ramymino kuery mbytekue ikuai va'e pe ma amboaxa Gileade yvy rembyre ha'e Ogue openaague Basã yvy ha'e javi. Argobe regua Basã ha'e javi pe ma "Refaim kuery yvy" 'ea va'ekue.
- ¹⁴ Ha'e gui Manassés ra'y Jair ojopy Argobe, ha'e va'e ma Basã ae, gesurita ha'e maacatita kuery yvy oje'aa peve. Ha'e vy tekoia ikuai va'e ma guery py ae oenoĩ rire "Havote-Jair" 'ea aŷ peve.
- ¹⁵ Maquir pe ma amboaxa Gileade.
- ¹⁶ Ha'e rã Rúben ha'e Gade regua kuery pe ma amboaxa Gileade guive Arnom yvyugua peve, ha'e va'e mbyte rupi ija'orã opyta oiny ramo, ha'e gui Jaboque yakã yvýry Amom ra'y kuery yvy oje'aa peve.
- ¹⁷ Ha'e rami ae avi Arabá rupi ma Jordão yakã opyta ija'orã, Quinerete yupa guive Arabá regua ye'ero peve, ha'e gui kuaray oëa katy ma Pisga yvy'ã guy katy rupi oo.

- ¹⁸ — Ha'e va'e jave py pendevy xeayvu vy aipoa'e va'ekue: "SENHOR Penderuete ae ome'ẽ kova'e yvy penderekoarã. Ha'e nunga rupi penderegua avakue ipy'a guaxukue guembiporu reve toaxapa guyvy kuery Israel regua mboae renonde.
- ¹⁹ Penda'yxy kuery, pendera'y ha'e penderajy kuery anho 'rã opyta penderekoarã amboaxa va'ekue py, penerymba kuery guive, mba'eta aikuaa penerymba reta va'ea,
- ²⁰ ha'e rami penderyvy kuery voi SENHOR opytu'u aguã ome'ea ára peve peẽ kuery pe ranhe pepytu'u aguã ome'ëague rami avi, ha'e kuery voi hekoa aguã ijyvyrã Jordão yakã rovai re SENHOR Penderuete ome'ẽ va'e py. Ha'e gui mae ma peteĩ-teĩ pejevy 'rã pendeyvyrã amboaxa va'ekue py", ha'e va'ekue.

- ²¹ — Ha'e va'e jave py Josué pe voi xeayvu vy aipoa'e va'ekue: "Nderexa py ae rexapa ma kova'e mokoï huvixa re SENHOR Nderuete ojapoague. Ha'ekue rami ae ju 'rã SENHOR ojapo huvixa ikuai va'e openaa rupi ndee reaxa aguã rupi.
- ²² Pekyje eme ha'e kuery gui, mba'eta SENHOR Penderuete ae 'rã opu'ã peẽ kuery repy vy", ha'e va'ekue.

Números 27.12-23

- ²³ — Ha'e va'e jave xee voi ajapukai SENHOR pe. Ha'e vy aipoa'e:
- ²⁴ "Ah SENHOR Oreruete, remboypy ma xee nerembiguai pe rexâ uka aguã mba'emo ndepo'akaa rupi ndepo imbaraete va'e py rejapo va'e. Mba'eta mba'e nunga tuuete yva re, e'ŷ vy yvy re teĩ ikuai va'e, ha'e kuery ojapo avi 'rã ndepo'akaa rupi rejapo va'e ramigua?"

²⁵ Ha'e nunga rupi ajerure ndevy, tove taaxa avi, xee voi aexa aguã yvy porã Jordão yakã rovai re itui va'e, ha'e va'e yvytya ha'e javi, Líbano peve", ha'e va'ekue SENHOR pe.

²⁶ — Ha'e rami teĩ peẽ kuery káuxa SENHOR xevy ivai vy noendu potai. Ha'e rami vy aipoe'i: "Ha'eve ma! Ndeayvuve eme xereve ha'e nunga re.

²⁷ Eẽ eovy Pisga yvyty apyte áry, ha'e ema'ẽ kuaray ijapu'a'ia katy, ipuku-a katy ha'e oikea katy. Nderexa py rive 'rã rexa, mba'eta nda'evei kova'e Jordão yakã rovai re reaxa aguã.

²⁸ Ha'e rami avi Josué pe ndeayvu 'rã rembopy'a guaxu ha'e remombaraetea rupi, mba'eta ha'e ma oaxa 'rã kova'e kuery renonde, ojapo 'rã yvy ndee rexa rive va'ekue py hekoag Aguã rami", he'i va'ekue.

²⁹ — Ha'e ramo japytave'i ranhe Bete-Peor katy'i yvyugua oĩ va'e py.

4

SENHOR nhe'ẽ rendua rupi heta va'e kuery ikuai aguã re Moisés ijayvuague

¹ — Aÿ ma Israel kuery, pendu ke ayvu oeja pyre ha'e 'arandua rupigua re rombo'e ta va'e. Pejapo ete peikove ha'e peupity aguã pendeyvyrã SENHOR Penderuete ome'ẽ va'e.

² Napemoïvei 'rã ayvu xee amboaxa va'e áryve, neĩ napemboivei 'rã guive, SENHOR Penderuete ojapo uka va'ekue pejapopa aguã, xee amboaxaa rami ae.

³ Penderexa py ae pexa va'ekue tuuete Baal re oje'oi va'ekue re SENHOR Penderuete ojapoague, mba'eta avakue Peor pygua kuery nguete Baal re oje'oi va'ekue ma omokanhymba raka'e penembyte gui.

⁴ Ha'e rã peẽ kuery SENHOR Penderuete re pejerovia ete va'e ma pekuavepa aÿ peve.

⁵ Ne'ixa, SENHOR Xeruete omombe'u ukaague rami vy xee rombo'e ma oayvu oeja va'ekue ha'e hi'arandua rupigua re, pendeyvyrã pejopy va'ekue py pendekuai ma vy ha'e rami ae pendekuai aguã.

⁶ Pendejee pemoï ha'vy pejapo ete aguã, mba'eta ha'e rami vy pexa uka 'rã pene'arandua ha'e peiko porã kuaa amboae regua kuery rembiexa py. Ha'e nunga ayvu oeja pyre ha'e kuery oendu vy "Anhetẽ ete kova'e kuery ma hi'arandu ete ha'e ikuai porã kuaa va'e", he'i 'rã okuapy.

⁷ Mba'eta mba'e nunga kuery regua tu heta teĩ nguu ete oguerek SENHOR Nhanderuete jajapukai nhavõ nhanepytyvõ va'e ramigua?

⁸ Mba'e nunga kuery regua tu heta teĩ oguerek ayvu oeja pyre ha'e 'arandu rupigua aÿ penderekorã amboaxa va'e ha'e javi ramigua?

⁹ — Ha'e rami avi perekoo kuaa pota peẽ ae pendekuai ha'e penenhe'ẽ, penderexarai e'ÿ aguã penderexa py pexa va'ekue'-ekue re, ha'e pendep'y'a gui pemokanhy eme peikoa pukukue re. Peikuua uka avi 'rã pendera'y ha'e peneramymino kuery pe.

¹⁰ Pendexarai eme Horebe yvyty re Penderuete renonde pendekuai jave guare re, xevy SENHOR aipoe'i jave: "Emboatypa ke kova'e kuery, tojapyxaka xeayvu re, yvy re ikuuai pukukue re xerenonde ikuai aguã ojererokyjea rupi, ha'e gua'y kuery voi ombo'e aguã ha'e rami" he'i va'ekue.

¹¹ Ha'e va'e yvyty yvýry pevaẽ vy pearõmba pekuapy. Yvyty ma tata raku jekuaa yva mbyte peve, ha'e gui pytû vaikue, arai pytû guive.

¹² Ha'e gui tata mbyte gui SENHOR ijayvu. Ijayvu nhendu rã pendu va'ekue. Ha'e rami ete ijayvua pendu va'eri neĩ peteïve py ndapexai va'ekue.

¹³ Pendevy peguarã omombe'u guexeve guarã, ojapo uka avi dez ayvu ojapo pyrã. Ha'e va'e ma ombopara mokoï itape re.

¹⁴ Ha'e va'e jave ae SENHOR xevy penembo'e uka avi oayvu oeja va'ekue ha'e o'arandu rupigua re, pendeyvyrã pejopy va'ekue py pendekuai ma vy pejapopa aguã.

¹⁵ Pereko kuaa pota ha'vy penenhe'ẽ, mba'eta Horebe yvyty re tata mbyte gui SENHOR Penderuete pendevy ijayvu jave neĩ teigueve ma ndapexai va'ekue,

¹⁶ penhemboeko ky'a rei e'ÿ aguã mba'emo ra'angaa pembojerovia va'erã rive pejapoa py, ava e'ÿ vy kunha ra'angaa teĩ ae ma,

¹⁷ ha'e'ÿ vy mba'emo mymba yvy rupi ikuai va'e, e'ÿ vy yva guy rupi oveve va'e ramigua,

¹⁸ mymba yvy rupi otyryry va'e, e'ŷ vy pira yy guýry ikuai va'e voi.

¹⁹ Peiko kuaa pota ke, yva re pema'ẽ vy kuaray, jaxy, jaxy-tata ha'e mba'emo yva re ojekuaa va'e ha'e javi pexa vy pejekore vy henonde penenapy'ã re peĩ reve pemboete e'ŷ aguã, mba'eta ha'e nunga ma SENHOR Penderuete ae oeja va'ekue yva guýry ha'e javi regua ikuai va'e peguarã rive.

²⁰ Ha'e rã peẽ kuery ma SENHOR pendejogua vy penerenoẽmba tata rupa ferro ky'a'oaty, Egito yvy re pendekuaia gui, ojeupe guarã ae pendereru, aŷ minha pexaa rami.

²¹ — Ha'e gui pendekáuxa xevy SENHOR ivai vy oura xee aaxa e'ŷ aguã yvy porã Jordão yakã rovai re pendekoarã SENHOR Penderuete ome'ẽ va'e py.

²² Ha'e rami rã xee ma kova'e tekaoa py ae 'rã amano, ndaaxai 'rã Jordão yakã rovai re. Ha'e rã peẽ kuery ma peaxa 'rã ha'e va'e yvy porã py penderekoa aguã.

²³ Peiko kuaa pota ke penderexarai e'ŷ aguã SENHOR Penderuete guexeve guarã ojapo va'ekue gui, pejapo e'ŷ aguã mba'emo ra'angaa pembojerovia va'erã, ha'e nunga SENHOR Penderuete ndojapo ukai rire.

²⁴ Mba'eta SENHOR Penderuete ma tata nhomokanhyarã. Ha'e ma oipota hexe anho pejerovia.*

²⁵ — Ha'e gui pendera'y ha'e peneramymino jevy vy yvy re pendetuja'ipa ma jave, xapy'a rei penhemboeko ky'aa rupi pejapo 'rã mba'emo ra'angaa pembojerovia va'erã, ha'e vy SENHOR Penderuete renonde ha'eve'ŷ va'e pejapo 'rã pendevy ivai aguã rami,

²⁶ aŷ gui ma yva ha'e yvy opyta peẽ kuery rekokue moma'endu'aarã, mba'eta pe-manomba voi 'rã pendeyvyrã Jordão yakã rovai re peaxa vy pejopyague py. Ha'e py ma ndapeiko pukui 'rã. Ha'e rami 'rãgue py penemombaa 'rã.

²⁷ Ha'e rami vy SENHOR penemoaõmba 'rã amboae regua ikuia rupi. Mboapy'i ete'i 'rã pekuave, yvy regua kuery ikuia rupi SENHOR penemondoukaague rupi.

²⁸ Ha'e py ma penderueterã pembojerovia 'rã avakue rembiapo rive, yvyra ha'e ita guigua, oexa e'ŷ va'e, oendu e'ŷ va'e, okaru e'ŷ va'e, neĩ oetû e'ŷ va'e.

²⁹ Ha'e gui mae ma peka 'rã SENHOR Penderuete, ha'e vy pejou 'rã, penenhe'ẽ ha'e pendepy'a ha'e javi py ri peka vy.

³⁰ Mba'eta pejexavaia py opaa ára ha'e nunga ha'e javi pendere ou ramo SENHOR Penderuete pe pejevy vy penhe'ẽ rendu nho ramo

³¹ SENHOR Penderuete napeneptyvõ e'ŷi 'rã, nhomboaxy kuaa va'e vy. Napenemomba etei 'rã, ndaexarai 'rã guive oura reve guexeve guarã peneramoíkuery reve ojapo va'ekue gui.

³² — Aŷ ma peikuaa pota yma peiko e'ŷ mbove mba'emo oikoague re, mba'eta yvy re Nhanderuete avakue omoingo guive, yva guy ha'e javi rupi ndoikoi neĩ noenduai teri guĩ ramigua.

³³ Tyrã pa amongue va'e regua nda'u oendu ma tata mbyte gui tuuete ijayvu va'e teĩ okuave teri, peẽ kuery re oikoague rami?

³⁴ Tyrã amongue tuuete nda'u onhembopy'a ma amboae regua kuery mbyte gui ojeupe guarã oipe'a aguã, joeko a'ãa py, mba'emo porã oexa ucaa py, iporã va'e ojapoa py, joe opu'ãa py, opo oupi vy opo'akaa oexa ucaa py, opa marã nhomondyipaa py, Egito yvy re SENHOR Penderuete penembiexarã ojapoague rami ete?

³⁵ Pendevy ae ha'e nunga oexa uka raka'e, peikuaa aguã SENHOR ae Penderuete oikoa. Jipoi amboae, ha'e anho e'ŷ vy.*

³⁶ Yva gui oayvua omonghendu penembo'e aguã, ha'e yvy re ju oexa uka guata tuvixa va'e. Ha'e ramo hata mbyte gui pendu va'ekue ijayvua.

³⁷ Peneramoíkuery ha'e oayvua rupi, hamymino kuery ju oiporavo vy penerenoẽmba raka'e Egito yvy gui, ha'e ae ojekuaa uka opo'akaa ha'e javi py,

³⁸ penerononde gui oipe'apa aguã amboae regua pendegui ipo'akapave va'e voi, ha'e gui pendeyvyrã va'ekue py Peru aguã, aŷ jaexaa rami ae.

* 4:24 Hebreus 12.29 * 4:35 Marcos 12.32

³⁹ Ha'e nunga rupi aŷ gui ma peikuua 'rã, pendepy'a py peikuua pota porã 'rã SENHOR anho Nhanderuete oikoa re, yva re ha'e yvy re ndoikoi amboae.

⁴⁰ Pejapopa ha'vy oayvu oeja va'ekue ha'e ojapo ukaague aŷ xee ju amboaxa va'e, pendekuai porã'i aguã, ha'e pendera'y kuery ju peẽ ndapeikovei jave, pendeyvyrã SENHOR Penderuete raka'e rã peve guarã ome'ẽ va'ekue py pendekuai puku aguã — he'i Moisés.

Números 35.9-15; Deuteronômio 19.1-3

⁴¹ Moisés oiporavo mboapy tetã onhemi atyrã Jordão yakã regua kuaray oua katy ikuai va'e,

⁴² ha'e py potae vy e'ŷ oirũ ojuka va'ekue onhemi aguã, neĩ omotare'ŷ-e'ŷkue py ri vy, ha'e va'e tetã va'e regua py rei ovaẽ vy oiko aguã.

⁴³ Ha'e vy Rúben kuery peguarã ma Bezer tetã oiporavo tekao e'ŷa py yvypea re oĩ va'e. Gade kuery pe ma Gileade regua Ramote tetã oiporavo, ha'e rã Manassés kuery pe ma Basã regua Golã tetã ju.

Mokoïgue ma Moisés ijayvu jevyague

Lei oeja pyre Moisés omombe'u porâveague

⁴⁴ Pova'e lei ma Israel kuery rekorã Moisés omboaxa va'ekue.

⁴⁵ Po rami ma mba'emo oikuua uka pyre, ayvu oeja pyre ha'e 'arandu rupigua Israel kuery pe Moisés omombe'u va'ekue Egito yvy gui oupa jave py,

⁴⁶ Jordão yakã rovai teri ikuiaia re, Bete-Peor katy'i yvyugua rupi ikuai jave, amorreu kuery Hesbom pygua ruvixa Seom oiko va'ekue yvy re. Ha'e va'e ma Moisés ha'e Israel kuery ojuka va'ekue Egito yvy gui oupa ma jave,

⁴⁷ ha'e ijvykue guive ojopypa ikuai aguã, Basã pygua huvixa Ogue yvykue guive. Ha'e va'e mokoïve ma amorreu kuery huvixa ikuai va'ekue meme. Ijvykue ma Jordão yakã regua kuaray oua katy itui,

⁴⁸ Arnom yvyugua katy'i Aroer tekao oĩ va'e guive, ha'e Siom yvyty peve (ha'e va'e ma Hermom),

⁴⁹ Yvy joja reia ha'e javi Jordão yakã regua kuaray oua katy oĩ va'e, yvy joja reia regua ye'ẽ rembe peve Pisga yvyty katy'i yvy'ã guy rupi.

5

Êxodo 20.1-17

¹ Ha'e gui Israel kuery Moisés oenoimba vy aipoe'i:

— Israel kuery, pendu ke ayvu oeja pyre ha'e 'arandu rupigua re pendeapyxa py xeayvu ramo, peikuua porã vy pejapopa ete aguã.

² Horebe yvyty re nhandekuai jave nhande kuery reve SENHOR Nhanderuete ojapo guexeve guarã.

³ Nhaneramoï kuery reve'ŷ SENHOR ojapo, ha'e rã nhande kuery apy aŷ'i jakuave'i teri va'e reve ae.

⁴ Nhande kuery nhaendua py ete SENHOR ijayvu, yvyty áry tata mbyte gui.

⁵ (Ha'e rami jave ma xee ha'ã va'ekue Nhanderuete ha'e peẽ kuery mbyte SENHOR ijayvua mboaxaarã, mba'eta tata gui pekyje vy napeẽi yvyty re.) Ha'e gui SENHOR aipoe'i va'ekue:

⁶ “Xee ma SENHOR Nderuete Egito yvy re escravo pendekuai vy pemba'epo poyiague gui pendepe'a va'ekue.

⁷ Ndererekoi 'rã nderuete mboae xerenonde.

⁸ Nderejapoi 'rã mba'emo ra'angaa nderueterã, yva re ikuai va'e ra'angaa, yva guýry yvy re ikuai va'e ramigua, neĩ yvy guy rupi yy oĩ va'e rupi ikuai va'e ra'angaa voi.

⁹ Ha'e nunga neremboetei 'rã, neĩ nerembojeroviai 'rã, mba'eta xee SENHOR Nderuete ma aipota xere anho pejerovia, mba'eta aju vy ambopaga 'rã xere nda'ija'eí va'e reko vaiague re, tuu kuery, ta'y kuery, hamymino ha'e hamymino jevy kuery ikuiaia peve.

¹⁰ Ha'e rã amongue xerayvu vy ajapo ukaague rami ikuai va'e ma amboaxy 'rã mil-kue hamymino kuery ikuai peve.

¹¹ “Ndeayvu rive eme SENHOR Nderuete rery rupi, mba'eta SENHOR nomboeko porã 'rã hery rupi ijayvu rive va'ekue.

¹² “Nema'endu'a ke sábado ára py iky'a e'ŷ va'erã remboete aguã, SENHOR Nderuete ojapo ukaague rami vy.

¹³ Mboapy meme ára re 'rã remba'eapo, ha'e rejapopa 'rã rejapo va'erã va'ekue ha'e javi.

¹⁴ Ha'e rã sete-a ára ma sábado SENHOR Nderuete pegua ára. Neremba'eapoi 'rã mba'eve py, ndera'y, nderajy, nerembiguai avakue ha'e kunhague, nerymba vaka, mburika'i, neĩ peteĩve nerymba, neĩ mombyrygua kuery ndero py removaẽ va'ekue voi, nerembiguai kuery voi ndee rami avi topytu'u.

¹⁵ Mba'eta nema'endu'a Egito yvy re escravo reiko jave ha'e gui SENHOR Nderuete ndepe'aague re, opo oupi vy opo'akaa oexa ukaa py. Ha'e rami rire SENHOR Nderuete omboete uka sábado ára.

¹⁶ “Remboete 'rã nderu ha'e ndexy, SENHOR Nderuete ojapo ukaague rami, reikove puku ha'e reiko porã aguã ndeyvyrã SENHOR Nderuete ome'ẽ va'ekue py.*

¹⁷ “Ejojuka eme.*

¹⁸ “Ndetavy eme.*

¹⁹ “Nemonda eme.*

²⁰ “Ndeayvu rive eme neirũ re.

²¹ “Emoaruã eme neirũ ra'yxy. Emoaruã eme neirũ ro, neĩ imba'ety, hembiguai ava neĩ kunha, hymba vaka neĩ mburika'i, neĩ mba'eve neirũ mba'e rei-rei oguereko va'e.”*

Êxodo 20.18-21, 31.18

²² — Ha'e va'e ayvu rupi ma pendeaty va'e kuery pe SENHOR ijayvu raka'e yvyty oĩa gui. Tata ha'e arai pytã mbyte gui onhendu atã. Ha'e va'e rire nda'ijayvuve jevyi. Mokoĩ itape re omboparapa ma rire ome'ẽ xevy.

²³ Yvyty tata ojopeayi teri reve arai pytãa gui ijayvu rã pendu vy penhemboja xere, peteĩ-teĩ regua akã ha'e nhomongeta va'ety kuery.

²⁴ Ha'e vy aipopeje va'ekue xevy: “Apy ma SENHOR Nhanderuete orevy oexa uka opo'akaa ha'e imarã e'ŷ va'ea. Roendu guive tata mbyte gui ijayvu rã. Aŷ roexa rã Nhanderuete ndee ava reiko va'e reve ijayvu teĩ reikove teri.

²⁵ Ha'vy aŷ, mba'e re tu romanomba ta? Mba'eta peva'e tata tuvixa va'e oremokanhymba 'rã. SENHOR Nhanderuete ayvu roenduve tema ri vy romanomba 'rã.

²⁶ Mba'eta mava'e ava nda'u SENHOR Nhanderuete oikove va'e tata mbyte gui ijayvu rã oexa teĩ oikove 'rã, nhande kuery jaexaa rami?

²⁷ Enhemboja ndee, ha'e endu SENHOR Nhanderuete mba'e he'ia. Ha'e gui orevy ju remombe'upa 'rã SENHOR ijayvuague. Ha'e ramo roendu vy rojapopa 'rã”, peje va'ekue.

²⁸ Ha'e rami xevy pendeayvu rã SENHOR oendu vy aipoe'i xevy: “Xee aendu heta va'e kuery ndevy pe ijayvu rã. Ha'e kuery ha'evea rami meme ijayvu.

²⁹ Ha'e kuery py'a re oĩ ete 'rãgue xerenonde ojererokyjea rupi ikuai aguã, ha'e ajapo uka va'e ha'e javi rupi, ha'e kuery ikuai porã aguã, ta'y kuery voi, raka'e rã peve guarã!

³⁰ Tereo ha'vy, ha'e kuery pe ‘Tapeopa ju pendero katy’, 're.

³¹ Ha'e rã ndee ma repytave ju 'rã apy xereve. Ha'e rã xee amombe'uve 'rã ajapo uka va'e, xeayvu ha'e aipota va'e ha'e javi. Ha'e va'e re ma ndee rembo'e 'rã ha'e kuery oyvyrã ame'ẽ va'e py ikuai jave ojapopa aguã rami”, he'i va'ekue SENHOR.

³² Ha'e nunga rupi pejapopa pota 'rã SENHOR Penderuete ojapo uka va'ekue. Ha'e ramia gui pejep'e eme peiporu kuaa katy, neĩ peiporu kuaa e'ŷa katy.

³³ SENHOR Penderuete ojapo uka va'e ha'e javi rupi pendekuai, pendekuai porã ha'e peiko pukuve aguã pendeyvyrã pejopy aguã va'e re.

* 5:16 Mateus 15.4, Marcos 7.10, Efésios 6.2-3 * 5:17 Mateus 5.21, Romanos 13.9, Tiago 2.11 * 5:18 Mateus 5.27, Romanos 13.9, Tiago 2.11 * 5:19 Romanos 13.9 * 5:21 Romanos 7.7, 13.9

6

"Nhanhe'ẽ rendu aguã ae lei oeja", he'iague

¹ — Kova'e ayvu ma SENHOR Penderuete ojapo uka va'ekue, 'arandua rupigua ha'e oipotaa reve, ha'e va'e re penhembo'e vy pejapo ete aguã yvy re pendekuai ma vy,

² SENHOR Penderuete renonde pejererokyjea rupi pendekuai aguã, 'arandua rupigua ha'e oayvua ojapo uka va'e xee amboaxa rã peẽ ha'e pendera'y kuery, ha'e peneramymimo kuery voi ikuiaia pukukue reguarã, peiko pukuve aguã.

³ Ha'e nunga rupi pendu ke Israel kuery, peikuaa pota ha'e pejapo ete aguã, pendekuai porã ha'e penderetave ete aguã pendeyvy kamby ha'e ei oata e'ŷa py, SENHOR peneramoĩ kuery ruete aipoe'iague rami vy.

⁴ Pendu ke, Israel kuery. Peteĩ'i oiko SENHOR, SENHOR Nhanderuete ae.*

⁵ Ha'e nunga rupi peayvu 'rã SENHOR Penderuete pendep'y'a, penerhe'ẽ ha'e penembaraetea ha'e javi py.*

⁶ Kova'e ayvu aŷ amombe'u va'e ma pemoĩ 'rã pendep'y'a re.

⁷ Ha'e va'e rupi pembo'e 'rã pendera'y kuery. Ha'e va'e rupi avi 'rã pendeayvu pekuapy pendero py, tape rupi peikoa py, penheno ha'e pevy ju ma vy guive.

⁸ Ha'e va'e re penemoma'endu'aarã pejokua 'rã imoiny pendepo re, ha'e penderova re penderexa mbyte py.

⁹ Pembopara avi 'rã pendero rokẽ áry, ha'e okẽ re.

¹⁰ — Ha'e gui SENHOR Penderuete peneramoĩ Abraão, Isaque ha'e Jacó pe ouraague rami vy pendeyvyrã va'e py pendereraa ma rire pendepo py omboaxa 'rã tetã tuvixa ha'e iporã va'e peẽ kuery pejapo va'ekue'ŷ,

¹¹ ha'e gui oo opa mba'e porã oĩa pemonyẽ va'ekue'ŷ, ha'e yguarã pejo'o va'ekue'ŷ, uvaty ha'e oliveira ty penhotŷ va'ekue'ŷ. Ha'e va'e gui pe'u vy penevyatãmba ma vy

¹² penheangu penderexarai e'ŷ aguã SENHOR, Egito yvy re escravo peiko vy pumba'eapo poyiague gui pendepe'a va'ekue gui.

¹³ SENHOR Penderuete renonde pejererokyjea rupi 'rã peiko, ixupe ae 'rã pendekuai, hery rupi anho 'rã peura.

¹⁴ Peiko eme amboae tuuete ramigua pe, neĩ teĩve yvy regua kuery pendeyvýry ikuai va'e ruete pe,

¹⁵ mba'eta SENHOR Penderuete penembyte oiko va'e oipota hexe anho pejerovia. Ha'e rami e'ŷ rã SENHOR Penderuete poxya penderovai hendy vy penemomba 'rã yvy áry gui.

¹⁶ Peko a'ã eme SENHOR Penderuete, Massá py peko a'âague rami.*

¹⁷ Pejapo ete 'rã SENHOR Penderuete ojapo uka va'ekue, ayvu ha'e 'arandua rupigua ha'e ojapo uka va'ekue ha'e javi.

¹⁸ SENHOR renonde rupi pejapo 'rã ha'eve va'e ha'e iporã va'e anho, pendekuai porã aguã, ha'e yvy porã re pendekoa aguã, SENHOR peneramoĩ kuery pe oura reve ome'ẽ aguã re ijayvuague py ae,

¹⁹ ha'e penerenonde gui pendovaigua kuery SENHOR oipe'apa aguã aipoe'iague rami.

²⁰ — Raka'eve rã ndera'y kuery oporandum 'rã ndevy. Ha'e vy aipoe'i 'rã: "Mba'erã tu ayvu 'arandua rupigua ha'e oipotaa SENHOR Nhanderuete oeja raka'e nhandevy?" he'i ramo

²¹ rembovai 'rã ndera'y kuery pe: "Egito yvy re Faraó pegua escravo orekuai va'ekue ri teĩ SENHOR opo'akaa rupi orepe'apa ha'e gui.

²² Roexaa py SENHOR ojapo karamboae mba'emo kuaa ukaarã ha'e nhomondyipaarã tuvixa ete va'e nhomongyjea rupi, Faraó rovai, hoo pygua kuery ha'e Egito pygua kuery ha'e javi rovai.

²³ Ha'e rami vy ha'e gui orepe'a orereru aguã kova'e yvy nhaneramoĩ kuery pe oura reve nhanderekoarã ome'ẽ aguã re ijayvuague py.

* 6:4 Marcos 12.29,32 * 6:5 Mateus 22.37, Marcos 12.30,33, Lucas 10.27 * 6:16 Kova'e ayvu rupi Jesus ombovai anha omoangeko rã (Mateus 4.7,10, Lucas 4.8,12).

²⁴ SENHOR ijayvu avi kova'e ayvu oeja va'ekue ha'e javi jajapopa ete aguã, ha'e henonde jajererokyjea rupi nhandekuai aguã, raka'e rã peve nhanemoingo porã ha'e nhanemoin-gove aguã, aÿ peve ojapoа rami ae.

²⁵ Ha'e gui SENHOR Nhanderuete renonde kova'e ayvu ojapo uka va'ekue ha'e javi ri jajapo ramo aipoe'iague rami ae, ha'e nunga oĩ 'rã nhanderekо porãrã", 're 'rã.

7

Êxodo 34.10-17

¹ — SENHOR Penderuete pendereru 'rã pendeyvyrã py penderekoa aguã, ha'e penerenonde gui oipe'a reta 'rã yvy regua: heteu kuery, girkaseu, amorreu, cananeu, ferezeu, heveu ha'e jebuseu kuery, sete regua 'rã oipe'a pendegui hetave ha'e im-baraketkueve va'e tei.

² Ha'e va'e kuery ma SENHOR Penderuete omboaxapa 'rã pendepo py. Ha'e ramo pemomba katu'i i 'rã. Ha'e kuery reve ndapejapo'i 'rã peteї rami pendekuai aguã, napemboaxyi 'rã guive.

³ Nei napemundai 'rã ha'e va'e regua kuery reve. Ta'y kuery re napemundai 'rã penderajy kuery, tajy kuery ma voi ndaperui 'rã pendera'y kuery re omenda va'erã.

⁴ Mba'eta ha'e kuery ojapo 'rã pendera'y kuery xegui ojepe'a aguã rami, amboae tuuete ramigua kuery pe ju ikuai aguã. Ha'e ramo penderovai SENHOR poxya hendy vy penemomba vyvoi 'rã.

⁵ Ha'e rami 'rãgue py po rami 'rã pejapo ha'e kuery re: Peitypa 'rã altar ha'e kuery ojapo va'ekue, pemopêmba 'rã ita omopu'ã va'ekue, peake'o 'rã yvyra ta'angaarã omopu'ã va'ekue, ha'e gui peapypa 'rã mba'emo ra'angaarã ojapo va'ekue.

⁶ — Mba'eta peẽ kuery ma SENHOR Penderuete pegua iky'a e'ÿ va'e pendekuai. Yvy regua ha'e javi gui SENHOR Penderuete pendeporavo ojeupe guarã.

⁷ Amboae regua gui penderetave va'e ramo e'ÿ guive SENHOR penderayvu vy pendeporavo, mba'eta yvy regua ha'e javi gui mboapy'ive va'e peiko.

⁸ Ha'e rami 'rãgue py SENHOR penderayvu ete vy rive pendepe'a opo'akaa rupi, ha'e peneramo'i kuery pe oura reve ijayvuague ojapo vy. Ha'e vy ae penderepy escravo peiko vy pemba'epo poyia gui, ha'e Egito pygua huvixa Faraó po'akaa gui.

⁹ Ha'e nunga rupi peikuaa pota SENHOR Penderuete anho Nhanderuete oikoa re. Nhan-deruete ojeroviapy va'e vy guexeve guarã ojapo va'ekue rupi ae 'rã oiko nhanemboaxyu rupi, jayvua rupi ojapo uka va'e jajapo va'e kuery pe, mil-kue nhaneramymino ikuai jevy-jevy va'e pe guive.

¹⁰ Ha'e rã hexe nda'ija'ei va'e kuery ma ha'e ombopaga 'rã omokanhymba peve. Ndarei 'rã hexe nda'ija'ei va'e re oikuaa pota vy ombopaga vyvoi aguã.

¹¹ Ha'e nunga rupi pejapopa 'rã ojapo uka va'ekue, ayvu ha'e 'arandua rupigua kova'e ára gui pendevy amboaxa va'e.

Levítico 26.3-13; Deuteronômio 28.1-14

¹² — Pova'e 'arandua rupigua pendu vy pemo'i porã ha'e pejapo ete ri ramo SENHOR Penderuete oiko 'rã guexeve guarã peneramo'i kuery pe oura reve ojapo va'ekue rami.

¹³ Ha'e rami vy penderayvua rupi penemoingo porã ha'e penemboetave 'rã heravy. Omoingo porã avi 'rã pendera'y kuery, ha'e pendeyvy re mba'emo aju oiko va'e, mba'emo ra'yí, vinho, azeite, ha'e penerymba vaka ha'e vexal'i ra'y kuery, yvy peneramo'i kuery pe oura reve ome'ë aguã re ijayvuague py ae.

¹⁴ Yvy regua ikuai va'e ha'e javi gui penemoingo porâve 'rã. Ha'e ramo pendekuaia py ndoikoi 'rã avakue ta'y e'ÿ va'erã, kunhague imembý e'ÿ va'erã, nei penerymba kuery regua ma voi.

¹⁵ Pendegui SENHOR oipe'apa 'rã opa marâguia mba'eaxy. Peẽ kuery re nomo'i 'rã mba'eaxy vaikue Egito yvy re pexa va'ekue ramigua. Ha'e nunga ma pendere ija'e'ÿ va'e kuery ha'e javi re 'rã omo'i.

¹⁶ Pemomba 'rā ha'e javi regua pendepo py SENHOR Penderuete omboaxa va'ekue. Ha'e kuery re pema'ẽ teĩ pemboaxy eme, peiko eme guive ha'e kuery pegua tuuete pe, mba'eta ha'e rami rā pendereity 'rā.

¹⁷ — Xapy'a rei aipopeje 'rā pendepy'a py: "Kova'e yvy regua kuery ma nhande kuery gui hetave ramo mba'exa tu jaipe'a 'rā?" peje teĩ

¹⁸ pekyje eme ha'e kuery gui. Penema'endu'a tema Faraó re SENHOR Penderuete ojapo va'ekue re, ha'e Egito yvy ha'e javi rupi

¹⁹ mba'emo tuvixa ete va'e pexaa py ojapo va'ekue re, hexa pyrā ha'e mba'emo porã ete ojapo va'ekue re, mba'eta SENHOR Penderuete opo oupi vy opo'akaa oexa uka reve penerenoẽ ha'e gui. Ha'ekue rami ae ju 'rā ojapo yvy regua pekyjea va'e kuery ha'e javi re.

²⁰ Ha'e kuery mbyte rupi SENHOR Penderuete ombou avi 'rā kavy guaxu, pendegui nonhai vy onhemni va'e ndaekorâvei pavê peve.

²¹ Ha'e nunga rupi penhemondyipa rei eme ha'e kuery pexa vy, mba'eta penembyte SENHOR Penderuete oĩ, Nhanderuete ipo'akapa ha'e okyjevepy va'e ae.

²² Ha'e rami avi mbeguel'i rupi anho 'rā SENHOR Penderuete oipe'a 'rā kova'e kuery regua penerenonde gui. Napemomba vyvoi 'rā, penderovai guarã mymba inharõ va'e hetave oje'ovy e'ŷ aguã.

²³ Ha'e rami avi pendepo py SENHOR Penderuete omboaxapa 'rāe, nda'evei reive va'e ojapo vy omomba peve.

²⁴ Pendepo py omboaxa avi 'rā huvixa kuery, ha'e ramo pejapo aguã yva guy rupi ha'e kuery rery na'ima'endu'aavei aguã rami. Avave rei nda'ipo'akaai 'rā pendere, pemomba peve.

²⁵ Ha'e kuery ruete ra'angaa ma peapypa 'rā tata py. Prata ha'e ouro ha'e nunga onhovâague re voi pepena rei eme, peraa eme penemba'erã, ha'e va'e py pe'a e'ŷ aguã. Mba'eta ha'e nunga ma SENHOR Penderuete pe rā ojeguarupy.

²⁶ Ha'e nunga rupi Peru eme ojeguarupy penderopy guarã, ayvu vaipy peẽ voi peiko e'ŷ aguã ha'e nunga rami ae. Ha'e nunga ha'e javi pejou vai ha'e pembojeguaru ete 'rā, ayvu vaipy meme ramo.

8

SENHOR opena porãague re ima'endu'a aguã regua

¹ — Peikuaa pota ke ojapo uka pyre aŷ amboaxa va'e pejapopa ete aguã, peikove ha'e penderetave aguã. Ha'e gui yvy SENHOR penamoĩ kuery pe oura reve ome'ẽ aguã re ijayvuague py pevaẽ vy pendekuai aguã.

² Penema'endu'a ke tape rupi SENHOR Penderuete pendereraa ague ha'e javi re. Quarenta ma'etŷ re pendereraa tekao e'ŷa rupi penemo'yvyi'i aguã penderekoo a'ã vy, pendepy'a re oĩ va'e oikuua aguã, xapy'a rei ojapo uka va'e rupi pa pendekuai tyrâ pa any.

³ Ha'e rami vy penemo'yvyi'i a rupi ojapo pendekaruai aguã rami. Ha'e gui maná re ju penemongaru, ha'e nunga pexa va'ekue'ŷ teri, neĩ penderu kuery ma voi oikuua va'ekue'ŷ. Ha'e ramigua ome'ẽ pendevy oikuua uka aguã mbojape re anho e'ŷ avakue oikoa. Ha'e rā SENHOR ayvu ha'e javi re 'rā avakue oiko.*

⁴ Pendeao penhemondea va'e voi nda'ivaipai raka'e, pendepy ma voi nda'irurupai, quarenta ma'etŷ pukukue re teĩ.

⁵ Ha'e nunga rupi peikuaa pota penekuraxõ py, mba'eta avakue gua'y kuery omo'arandua rami avi SENHOR Penderuete penemo'arandu herekovy.

⁶ Pendekuai SENHOR Penderuete ojapo uka va'ekue rupi ete, gueko oeja va'ekue rupi ae peiko aguã henonde pejererokyjea rupi.

⁷ Mba'eta SENHOR Penderuete pendereraa 'rā yvy porãa py, yakã ikuiaia, yvu, yvu typy va'e guive yvyuga ha'e yvyty áry gui oxyry oiny va'e,

* 8:3 Kova'e ayvu rupi Jesus ombovai anha omoangeko rā (Mateus 4.4, Lucas 4.4).

⁸ yvy trigo ha'e cevada oiko porãa, uva, figo ha'e romã'a oiko porãa guive, ha'e gui oliveira, azeite ha'e ei ikuai.

⁹ Ha'e va'e yvy re ma tembi'u oata aguã rami e'ŷ 'rã pe'u, mba'eve rei ndoatavei ma 'rã ha'e py. Yvy re ita ikuai va'e py ferro oĩ, ha'e yvyty ikuai va'e gui ma penoẽ 'rã overa va'e.

¹⁰ Pekaru vy penevyatãmba 'rã, ha'e vy perovy'a 'rã SENHOR Penderuete yvy porã pendevy ome'ẽague re.

¹¹ — Ha'e rami avi penheangu, penderexarai eme SENHOR Penderuete re, ha'e ojapo uka va'ekue ndapejapo e'ŷi aguã, 'arandua rupigua ha'e ayvu oeja va'ekue, pendevy aŷ amboaxa va'e ae.

¹² Ha'e rami pekarupa vy penevyatãmba ma rire teĩ, oo porã pejapo vy ha'e va'e py peĩ ma rire,

¹³ penerymba vaka ha'e vexa'i kuery hetave ma rire, ha'e penemba'e prata ha'e ouro voi ndoatavei aguã rami rire teĩ

¹⁴ xapy'a rei pendep'y'a py pendeyvate rei vy penderexarai 'rã SENHOR Penderuete re, Egito yvy re escravo peiko vy pemba'eapo poyiague gui penerenoẽ va'ekue ri,

¹⁵ ha'e gui tekao e'ŷa tuvixa ha'e ijavaete va'e rupi pendereraa herekovy va'ekue ri mboi inharõ ete va'e ikuia rupi, japeuxa popia va'e ha'e yvy pirua yy ikuai e'ŷa rupi. Ha'e gui pendevy itaova gui yy omoẽ va'ekue,

¹⁶ ha'e tekao e'ŷa rupi penemongaru va'ekue maná penderu kuery oikuua va'ekue'ŷ re, penemo'yvy'i vy pendereko a'ã aguã, ha'e gui opaa py penemoingo porã aguã.

¹⁷ Ha'e nunga rupi pendep'y'a py "Xepo'akaa ha'e xeiyva mbaraetea py ae arekopa", peje eme.

¹⁸ Ha'e rami 'rãgue py penema'endu'a SENHOR Penderuete re, mba'eta ha'e ae penemombarate mba'emo pejoupa aguã rami, ha'e rami pendevy pe ojapo guexeve guarã peneramoĩ kuery pe oura reve ojapo va'ekue ojeupity aguã, aŷ pexaa rami.

¹⁹ Mba'eta SENHOR Penderuete re penderexarai ri vy amboae tuuete kuery re peo vy ha'e kuery pemboetea rupi ju pendekuai ramo aŷ ma'ẽ, penderovai xeayvu pekanhymba aguã re.

²⁰ Ha'e javi regua penerenonde gui SENHOR omombaague rami pekanhymba avi 'rã, SENHOR Penderuete napenhe'ẽ rendu potai rire.

9

SENHOR Israel kuery oipytyvõague re Moisés omoma'endu'aague

¹ — Pendu ke, Israel kuery. Aŷ peaxa 'rã Jordão yakã, amboae regua kuery pendegui hetave ha'e imbaraeteve va'e re pendep'o'aka aguã katy. Hetã ikuai va'e ma tuvixa ha'e yva peve ikorapa va'e.

² Ha'e kuery ma heta ha'e yvateve va'e, Enaque ra'y kuery ae. Ha'e va'e kuery reko ma pendua ae ma, "Mava'e 'rã tu ipo'aka Enaque ra'y kuery re?" 'ea ramo.

³ Ha'e nunga rupi aŷ peikuua pota, mba'eta SENHOR Penderuete ae oaxa 'rã penerenonde rupi. Tata nhomokanhýarã rami 'rã omomba ha'e oitypa penerenonde rupi. Ha'e rami 'rã peipe'a ha'e pemokanhymba vyvoi 'rã, SENHOR ijayvuague rami vy.

⁴ — Ha'e nunga rupi penerenonde gui SENHOR Penderuete oipe'apa ma ramo aipopeje eme pendep'y'a py: "Xerekó porã ramo ae SENHOR xereru kova'e yvy re xerekoa aguã", peje eme. Mba'eta kova'e yvy regua kuery heko vai ramo SENHOR oipe'apa 'rã penerenonde gui.

⁵ Pendereko porãa re e'ŷ ta'vy, neĩ pendep'y'a py iporã va'e oĩa re e'ŷ guive yvy re pendekoa aguã pevaẽ 'rã. Kova'e yvy regua kuery reko vaia re rima SENHOR Penderuete oipe'apa 'rã penerenonde gui, ojapo aguã peneramoĩ kuery pe oura reve ijayvuague ojeupity aguã, Abraão, Isaque ha'e Jacó pe.

6 — Ha'e nunga rupi peikuua pota ke, mba'eta pendereko porãa re e'ŷ SENHOR Penderuete ome'ẽ kova'e yvy porã pendekuai aguã, mba'eta peẽ kuery ma peneakã ratãgue ae.

7 Penema'endu'a tema, pendexarai eme tekoa e'ŷa rupi SENHOR Penderuete pembopoxyague re. Egito yvy gui peopaa ára guive apy pevaembá peve pepu'ãmba reia rupi pendekuai SENHOR rovai.

8 Horebe yvyty re pendekuai jave SENHOR pembopoxy rei ramo penderovai ipoxya hendy va'ekue penemomba aguã.

9 Mba'eta xee ma yvyty áry aa va'ekue itape ajopy aguã, guexeve guarã SENHOR pendereve ojapo va'ekue oĩa. Yvyty áry ma quarenta ára ha'e pytû re aiko mbojape ha'u e'ŷ re, neĩ yy ay'u e'ŷ re.

10 Ha'e ramo xevy pe SENHOR ome'ẽ mokoĩ itape Nhanderuete okuã py ae ombopara va'ekue. Ha'e va'e re oĩ ayvu pendevy guarã SENHOR yvyty áry omombe'u va'ekue ha'e javi, tata mbyte oĩa gui, peẽ kuery ha'e javi pendeatypa pekuapy jave.

11 Ha'e gui quarenta ára ha'e quarenta pytûa py ma SENHOR ome'ẽ xevy mokoĩ itape ipara va'e, guexeve guarã ojapo va'ekue oĩa.

12 Ha'e vy SENHOR aipoe'i xevy: “Epu'ã ju ke, eguejy pojava apy gui, mba'eta ndevyguia kuery Egito yvy gui reru va'ekue onhemongy'apa ma oje'oivy. Are e'ŷ'i re ojepe'apa ma ha'e kuery rekorã aeja va'ekue gui, mba'emo ryku gui rive nguuete ra'angaarã ojapo vy”, he'i va'ekue.

13 — Xevy pe SENHOR ijayvuve ju vy aipoe'i: “Kova'e kuery xee aixa rã inhakã ratã ete okuapy.

14 Tamomba ete, yva guy ha'e javi rupi gui hery amboguepa aguã. Ha'e gui ma ndegui ju amoingo 'rã peteĩ regua ha'e kuery gui imbaraetekueve ha'e hetave va'erã”, he'i va'ekue xevy

15 Ha'e ramo ajere vy aguejy yvyty gui. Ha'e ramo yvyty ojopeayi oiny tata gui. Xepo py araa mokoĩ itape guexeve guarã ojapo va'ekue oĩa.

16 Ha'e gui ama'ẽ rã pejejavypa rei ra'e SENHOR Penderuete rovai. Ha'e rami vy penderueterã mba'emo ryku gui pejapo ra'e peteĩ vaka ra'y ra'angaa rive. Are e'ŷ'i re pejepo'apa penderekorã SENHOR oeja va'ekue gui.

17 Ha'e ramo mokoĩ itape areko va'e amombo xepo gui, ha'e vy pexaa py amboa'ypa.

18 — Ha'e gui teigüe ju quarenta ára ha'e quarenta pytû re aiko SENHOR renonde py jypy guare rami. Xerenapy'ã re aĩ, mbojape nda'ui neĩ yy ma voi nday'ui pejejavya ha'e javi re vy, mba'eta SENHOR oexaa py mba'emo vai ete pejapo ipoxy aguã rami.

19 Xee voi akyje va'ekue SENHOR penemomba aguã ipoxy etea gui. Ha'e rami teĩ peteigüe ju SENHOR oendu xeayvua.*

20 Arão pe voi SENHOR ipoxy raxa va'ekue omomba aguã rami. Ha'e rami teĩ ha'e va'e jave py Arão re voi ajerure.

21 Ha'e rami vy pejejavya rupi vaka ra'y ra'angaa pejapo va'ekue ajopy vy apypa, ha'e gui amou'ũmba porã iku'ipa peve. Iku'ikue ma yakã yvyty gui oxyry oiny va'e py amombo.

22 — Ha'e gui Taberá py, Massá ha'e Quibrote-Hataavá py ju pejapo SENHOR ipoxy ete aguã rami.

23 Cades-Barnéia gui SENHOR penemondouka vy aipoe'i: “Tapeo, ha'e penderekaoa yvy pendevy ame'ẽ va'e py”, he'i ramo ndapejapoxei raka'e SENHOR Penderuete ijayvuague. Ndaperoviai vy napenhe'ẽ rendui.

24 Ha'e rami vy SENHOR rovai pepu'ã rei va'e ae tema roexa ypya ára guive ma voi.

Êxodo 32.11-14,30-35

25 — SENHOR renonde py ajero'a ainy, ha'e quarenta ára ha'e quarenta pytû re xetui, pendevy SENHOR “Amomba 'rã” he'i rire.

* 9:19 Hebreus 12.21

²⁶ Ha'e vy SENHOR pe ajerure vy aipoa'e: "Ah SENHOR Oreruete! Emomba eme ndevyguá kuery, ndejeupe guarã ae nembaraetea rupi repy vy Egito yvy gui ndepo'akaa rupi renoẽmba va'ekue.

²⁷ Nderexarai eme nerembiguai kuery Abraão, Isaque ha'e Jacó re. Eikuua pota eme kova'e kuery inhakã atãa re, neĩ heko vaia re, neĩ ojejavy okuapya re.

²⁸ Ha'e rami Egito yvy orerenoẽague pygua kuery aipoe'i e'ŷ aguã: 'Ha'e kuery rima SENHOR ndogueraa reguai yvy ijayvuague py. Ha'e kuery re ha'e nda'ija'evei vy ae rima oguenoẽmba raka'e tekoá e'ŷa py ojukapa aguã', he'i okuapy e'ŷ aguã.

²⁹ Ha'e rami avi ha'e kuery ma ndevyguá ae, ndevy guarã ae renoẽmba raka'e ndepo'aka etea rupi, ha'e ndepo reupi reve", ha'e va'ekue SENHOR pe.

10

Mokoõguea itape re lei omboparaague

¹ — Ha'e va'e jave py SENHOR aipoe'i xevy: "Mokoõ itape ju ke emoatyrõ jypy guare rami guarã. Ha'e vy eju ju xea katy yvity áry. Ejapo avi peteĩ hyru yvyla gui.

² Ha'e gui mokoõ itape re xee ambopara 'rã jypyguá remopẽmba va'ekue re oĩague rami. Ha'e ramo rembooru 'rã hyrurã rejapo va'ekue py", he'i xevy.

³ Ha'e rami rã peteĩ hyru yvyla acácia guigua ajapo, ha'e mokoõ itape amoatyrõ jypy guare rami guarã. Ha'e gui aẽ avy yvity re mokoõve itape xepo py araa reve.

⁴ Ha'e gui itape re SENHOR jypy iparaague rami ju ombopara dez ayvu ojapo uka va'e, pendeatya ára py yvity áry tata oĩ va'e mbyte gui omombe'u ypy va'ekue rami ae. Ha'e rami vy SENHOR omboaxa xevy.

⁵ Ha'e ramo ajere vy yvity gui aguejy ju. Itape ma ambooru hyrurã ajapo va'ekue py. Ha'e va'e py ae opyta, xevy SENHOR ojapo ukaague rami vy.

Levi kuery regua oiporavoague

⁶ — Ha'e gui ma Israel kuery oje'oipa Beerote-Bene-Jaacã gui Mosera katy ju oo aguã. Ha'e py ma Arão omano, ha'e ramo onhono porãa ha'e pyve. Hekovia ta'y Eleazar ju oĩ sacerdote.

⁷ Ha'e va'e gui ma oje'oi ju Gudgoda katy, ha'e Gudgoda gui ma Jotbatá katy ju oje'oi. Ha'e va'e yvy re ma yakã'i ikuai rei.

⁸ Ha'e va'e jave py SENHOR oiporavo Levi ramymino kuery ogueraa aguã hyru SENHOR guexeve guarã ojapo va'ekue oĩa, SENHOR renonde ikuai aguã, ixupe omba'eapo, ha'e hery rupi jogueroayvu porã aguã, aŷ peve guarã ae.

⁹ Ha'e rami rire Levi kuery ndoguerekoi ae tema oyvyrã guyke'y kuery reve. SENHOR ae oiko ha'e kuery mba'erã, SENHOR Penderuete ijayvuague rami vy.

¹⁰ — Ha'e gui jypy'i guare rami aiko tema yvity re, quarenta ára ha'e pytû re. Ha'e ramo xeayvua peteigue ju SENHOR oendu, napenemombaxeí.

¹¹ Ha'e gui SENHOR aipoe'i xevy: "Epu'ã ke, tereo ju heta va'e kuery renonde rupi, yvy peneramoõ kuery pe aura reve ame'ê aguã re xeayvuague py ha'e kuery ovaõ vy ikuai aguã."

Onhe'ẽ rendu aguã regua

¹² — Ha'e nunga rupi Israel kuery, mba'e nunga tu SENHOR oipota pejapo? SENHOR Penderuete renonde pejererokyjea rupi pendekuai aguã anho, heko rupi pendekuai, SENHOR Penderuete peayvu ha'e ixupe peiko aguã SENHOR pendep'y'a ha'e penenhe'ẽ ha'e javi py,

¹³ ha'e pejapopa aguã SENHOR ojapo uka va'e ha'e oayvu oeja va'ekue, aŷ pêvy amboaxa va'e, ha'e rami vy pendekuai porã aguã.

¹⁴ Ma'ẽ, yva ha'e yvate rupi yva oĩ va'e ma SENHOR Penderuete mba'e meme, yvy ha'e hexe ikuai va'e ha'e javi guive.

¹⁵ Ha'e rami avi peneramoï kuery SENHOR oayvu etea rupi omboaxy rire peẽ kuery ha'e kuery ramymino pendekuai va'e ju ojeupe guarã pendeporavo ha'e javi regua gui, aÿ pexaa rami.

¹⁶ Ha'e nunga rupi penekuraxõ gui pemboi mba'emo vai oĩ va'e, ha'e pendekuaive eme peneakã ratãa rupi.

¹⁷ Mba'eta SENHOR Penderuete ma tuuete ikuai va'e ruete, ha'e senhor ikuai va'e SENHOR, Nhanderuete yvateve va'e, ipo'akapa ha'e okyjevepy va'e. Ha'e ma peteĩ rive joegui oayvuve va'e'ÿ, neĩ ome'ëmby ndojopyi 'rã guive ha'eve'ÿa rami joguerek agoa.

¹⁸ Ha'evea rami 'rã oguerekoy tyre'ÿ ha'e imeve'ÿ va'e, oayvu avi amboae regua kuery, ha'e kuery pe tembi'u ha'e ijaorã ojou uka vy.

¹⁹ Ha'e nunga rupi peẽ avi peayvu 'rã amboae regua, mba'eta peẽ kuery voi amboae regua pendekuai va'ekue Egito yvy re peiko jave.

²⁰ Ha'e gui SENHOR Penderuete renonde pendekuai 'rã pejererokyjea rupi. Ixupe ae 'rã peiko, hexe ae penhemboja, ha'e hery rupi anho 'rã peura.

²¹ Mba'eta ha'e ma perovy'a va'erã ha'e Penderuete oiko, pendevy ojapo va'e mba'emo tuvixa ete va'e nhomondyipaarã, penderexa py ae pexa va'ekue.

²² Mba'eta peneramoï kuery ma setenta ikuai va'e reve oje'oi raka'e Egito yvy katy. Ha'e gui aÿ ma SENHOR Penderuete pendeapo yva re jaxy-tata ikuai va'e rami pendereta agoa rami.

11

¹ — Ha'e nunga rupi peayvu 'rã SENHOR Penderuete, ha'e ára nhavõ peiko 'rã penembo'ea rupi, ayvu oeja va'ekue, 'arandua rupigua ha'e ojapo uka va'ekue ha'e javi rupi.

² Aÿ gui peikuaa pota ha'vy. (Pendera'y kuery pe'ÿ xeayvu, mba'eta ha'e kuery ma ndoikuuai neĩ ndoexai SENHOR Penderuete penemo'arandua rupi pendererekoague.) Peikuaa pota ke SENHOR yvate etea, ipo'aka etea ha'e opo oupia reve mba'emo ojapoague re.

³ Penema'endu'a avi hexa pyrã Egito mbyte rupi ojapo va'ekue re, Egito pygua huvixa Faraó re, ijyvy jave rupigua ha'e javi re,

⁴ Egito pygua xondaro kuery re, ha'e gui kavaju árygua ha'e karóxa ikuai va'e re SENHOR ojapoague re, mba'eta ha'e kuery áry rupi ombou Ye'ë Pytã, penderakykue ha'e kuery ou jave py. Aÿ peve guarã SENHOR omomba.

⁵ Penema'endu'a avi tekoa e'ÿa py ojapoague re, apy pevaõ peve,

⁶ ha'e gui Rúben ramymino Eliabe ra'y kuery Datã ha'e Abirão re ojapoague re. Mba'eta yvy ojepa' ramo ho'apa raka'e, hoo pygua kuery, hoo ha'e hupive oo va'ekue ha'e javi, Israel kuery pavê oexaa py.

⁷ Penderexa py ae pexa va'ekue tuvixa ete va'e SENHOR ojapo rã.

Onhe'ë rendu rã omoingo porã agoa re ijayvua

⁸ — Ha'e nunga rupi pendekuai SENHOR ojapo uka va'ekue aÿ amboaxa va'e ha'e javi rupi, penembaraete agoa, ha'e yvy katy peoa py pevaõ vy penderekaoa agoa,

⁹ ha'e rami vy peiko pukuve agoa yvy SENHOR oura reve peneramoï kuery pe ome'ë agoa re ijayvague py, hamymino kuery pe avi. Ha'e va'e yvy ma kamby ha'e ei oata e'ÿa.

¹⁰ Mba'eta yvy penderekaoa ma Egito yvy pejepa'ague va'e rami e'ÿ. Mba'eta ha'e va'ekue py ma mba'emo ra'yí penhotÿague katy pendepy py pemboxyry vy pemoakÿ va'ekue horta rami ae.

¹¹ Ha'e rã yvy penderekaoa SENHOR ome'ë va'e ma yvyty ha'e yvyugua reia, oky yva gui ho'a va'e gui ae 'rã inhaký va'e.

¹² Ha'e va'e yvy re SENHOR Penderuete ae 'rã opena. Ha'e va'e re SENHOR Penderuete oma'ë riae 'rã, ma'etýa ypy'i guive opa peve.

¹³ Xapy'a rei aÿ ayvu amboaxa va'e rupi peiko ramo, SENHOR Penderuete peayvua rupi, ha'e pendepy'a ha'e penenhe'ë ha'e javi py ixupe anho pendekuai ramo

¹⁴ yvy áry rupi ambou 'rā oky hi'ára py porā, mba'emo henhoī jave ha'e ipoty jave ju, mba'emo ra'yī penhotŷ va'ekue gui pemono'ō aguā, uva rykue ha'e azeite perekō aguā.

¹⁵ Pendevy rupi amoingo 'rā jai rogue penerymba kuery rembi'urā. Ha'e ramo pekaru vy penevyatāmba 'rā pekuapy.

¹⁶ Penheangu ke pendep'y a py pejekore e'ŷ aguā, ha'e pejepe'a vy tuuete mboae pe pendekuai vy ha'e kuery renonde penerenap'y re pei e'ŷ aguā.

¹⁷ Mba'eta peē kuery rovai SENHOR poxya hendy ramo ojoko 'rā yva nda'okyvei aguā rami, ha'e ramo yvy re mba'emo naenhoīvei 'rā, ha'e are e'ŷ re pekanhymba 'rā yvy porā SENHOR pendevy ome'ē va'ekue gui.

¹⁸ — Ha'e nunga rupi pemoī porā xeayvuague pendep'y a ha'e penenhe'ē py. Pejokua 'rā imoiny pendepo re penemoma'endu'aarā, ha'e penderova re penderexa mbyte py.

¹⁹ Ha'e va'e re pembo'e 'rā pendera'y ha'e penderajy kuery, penderopy rupi peguapy peiny vy pendeayvu 'rā, tape rupi peoa py, penhenoa py ha'e pevy ju ma vy.

²⁰ Ha'e va'e ayvu pembopara avi 'rā penerokē áry rupi, ha'e penerokē re ae,

²¹ pende'ára hetave aguā pendera'y ha'e penderajy kuery pe voi, yvy SENHOR oura reve peneramoī kuery pe ome'ē aguā re ijayvuague py penderekaoa ma vy, yvy áry yva oī temaa rami avi.

²² Mba'eta xapy'a rei kova'e ayvu pendevy amboaxa va'e ha'e javi pejapo ramo, SENHOR Penderuete peayvua rupi, heko rupi pendekuai, ha'e hexeve peiko ramo

²³ SENHOR oipe'apa 'rā amboae regua kuery ha'e javi. Ha'e ramo pejopy 'rā ha'e kuery ikuaiague, peē kuery gui hetave ha'e imbaraetekueve tei.

²⁴ Ha'e gui mamo rā rei pepyrōa ma penemba'e meme 'rā, tekao e'ŷa guive, Líbano ha'e yakā Eufrates yakā guive, ye'ē kuaray oikea katyguá peve.

²⁵ Avave rei nda'ipo'akai 'rā pendere. Mba'eta yvy pepyrōa ha'e javi rupi SENHOR Penderuete omoingo 'rā pendegui okyjea aguā rami, ijayvuague rami vy.

Imoingo porārā e'ŷ vy imoingo vaiarā re ijayvuague

²⁶ — Ma'lē, aŷ penerenonde py amoī penemoingo porārā, e'ŷ vy penemoingo vaiarā.

²⁷ Penemoingo porāa oiko 'rā SENHOR Penderuete ojapo uka va'ekue pejapopa ramo, aŷ amboaxa va'e rupi ae.

²⁸ Ha'e rā penemoingo vaia ma oiko 'rā SENHOR Penderuete ojapo uka va'ekue pejapo 'rāgue py pejepe'a ramo tape pendevy aŷ aikuua uka va'e gui, amboae tuuete kuery rupi ndapeikuuaai va'eri peo vy.

²⁹ Ha'e gui yvy penderekorā peo aguā py SENHOR Penderuete pendereraa ma jave pemombe'u 'rā penemoingo porāa regua Gerizim yvyty áry gui, ha'e rā penemoingo vaia regua ma Ebal yvyty áry gui 'rā pemombe'u.

³⁰ Ha'e va'e mokoīve yvyty ma Jordão yakā rovai re oī, kuaray oikea katy, cananeu kuery yvy re, yvy joja reia re Gilgal rexei, Moré py yvyra carvalho ikuai va'e katy'i.

³¹ Mba'eta peaxa ta ma Jordão yakā, pendevyvrā SENHOR Penderuete ome'ēague py pendekuai aguā. Ha'e py 'rā penhemboekoa.

³² Ha'e rami avi penhea'ā ayvu ha'e 'arandua rupigua aŷ aikuua uka va'e ha'e javi rupi pendekuai aguā.

12

Anhetē va'e rupi ombojerovia atyrā oiporavoague

¹ — Pova'e ayvu oeja pyre ha'e 'arandu rupigua pejapo 'rā pendevyvrā SENHOR peneramoī kuery Ruete ome'ē va'ekue py, ára nhavō ha'e va'e yvy re peikoa pukukue re.

² Amboae regua kuery peipe'a vy pemomba 'rā nguuete ramigua mboeteaty, yvyty ha'e yvy'ā'i áry ha'e javi rupi, ha'e yvyra rovana guy rupi ikuai va'e ha'e javi.

³ Peitypa 'rā ha'e kuery mba'e altar ha'e javi, ita omopu'ā va'ekue pemboa'ypa 'rā, ta'angaa yvyra gui omo'ā va'ekue peapypa 'rā tata py, mba'emo ryku gui nguuete ra'angaarā ojapo va'ekue pemboa'ypa avi 'rā, hery pemboguepa aguā ha'e va'e yvy gui.

- ⁴ — Mba'eta SENHOR Penderuete ma ha'e rami e'ŷ 'rã pemboete.
- ⁵ Ha'e rami 'rãgue py ha'e javi regua ikuaiague mbyte py SENHOR Penderuete peteĩ henda oiporavo 'rã guery omoĩ, ha'e ojeupagua oo oĩ aguã. Ha'e py ae 'rã peo peka vy.
- ⁶ Ha'e katy 'rã peru mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo perekva'e, mba'emo pendepo py Peru va'e, mba'emo penhenhandua'i rami peme'ẽ va'erã, ha'e gui jypy'i guare penerymba vaka ha'e vexa'i ra'y'i oiko va'ekue.
- ⁷ Ha'e py SENHOR Penderuete renonde py ae 'rã pekaru ha'e perovy'a pekuapy opa mba'e pejapoap py, peẽ ha'e pendero pygua kuery reve, SENHOR Penderuete penemoingo porã rire.
- ⁸ Apy jajapoap rami ve'ŷ 'rã pendekuai, mba'eta aŷ peve peteĩ-teĩ ha'e ae ojou porã rami rive 'rã ikuai,
- ⁹ mba'eta ndapeupityi teri pepytu'u aguã pendeyvyrã SENHOR Penderuete ome'ẽ va'e.
- ¹⁰ Ha'e rami avi peaxa 'rãe Jordão yakã, pendekuai aguã pendeyvyrã SENHOR Penderuete ome'ẽ va'erã py. Ha'e ramo pendevy pe ome'ẽ 'rã pepytu'u aguã penderovaigua kuery pendeyvýry rupi ikuai va'e ha'e javi gui. Ha'e ramo pendekuai porã 'rã opa mba'e vai gui.
- ¹¹ Ha'e ramo SENHOR Penderuete oiporavo 'rã peteĩ henda hery oĩ aguã. Ha'e py ae 'rã Peru pendevy aruruka va'ekue ha'e javi: mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo perekva'e, mba'emo pendepo py pejapo va'ekue, ha'e gui iporâgueve SENHOR peguarã peme'ẽ aguã penhemboayvuague ha'e javi.
- ¹² Ha'e rami vy pevy'a 'rã SENHOR Penderuete renonde py, peẽ kuery, penderajy ha'e ha'e penderajy kuery, pendevygua escravo avakue ha'e kunhague, ha'e gui levita kuery peneretã py ikuai va'e, penembyte rupi ijyvy e'ŷ va'e teĩ.
- ¹³ Penheangu ke, mba'emo peapy vy peme'ẽ e'ŷ aguã mamo rã pexa rã ha'eve reia py rive.
- ¹⁴ Ha'e rami 'rãgue py peẽ kuery va'e regua pendekuaia gui peteĩ'i henda SENHOR oiporavoague py 'rã peo mba'emo peapy vy peme'ẽ aguã, ha'e ayvu amboaxa va'e ha'e javi pejapo aguã.

Xo'o ho'u ha'e mba'emo ome'ẽ aguã re ijayvua

- ¹⁵ — Ha'e rami avi nderekaoa py ae ha'eve xo'o rejuka vy re'u tema aguã, nenhe'ẽ py re'uxea rami, SENHOR Nderuete ojou uka va'e rei. Ha'eve va'e e'ŷ vy ha'eve'ŷ va'e reiko teĩ ha'eve re'u aguã, guaxu puku ha'e guaxu ete'i ro'o re'ua rami.*
- ¹⁶ Ha'e rã huguykue ma ndere'ui 'rã. Yy rami renhoë 'rã yvy py.
- ¹⁷ Ha'e rami teĩ nderekaoa py ma nda'evei re'u aguã dízimo-rã remboja'o va'ekue, mba'emo aju gui, e'ŷ vy uva rykue gui, azeite, nerymba kuery vaka ha'e vexa'i ra'y jypyguare regua gui voi. Neĩ nda'evei re'u aguã mba'emo reme'ẽ aguã re renhemboayvuague regua gui, mba'emo renhenhandua'i rami reme'ẽ va'erã, neĩ reme'ẽ aguã ndepo py rejapo va'ekue gui voi.
- ¹⁸ Ha'e nunga ma SENHOR Nderuete renonde anho 'rã re'u, henda ha'e oiporavoague py ae, ndee, ndera'y kuery, nderajy kuery, ndevygua escravo avakue ha'e kunhague, ha'e levita kuery nderekaoa py ikuai va'e. Ha'e rami vy SENHOR Nderuete renonde py ae 'rã revy'a rejapoap ha'e javi py.
- ¹⁹ Enheangu ke, eipytyvõ e'ŷ eme levita kuery yvy re reikoa ja.
- ²⁰ — Ha'e gui SENHOR Nderuete oayvuague rami vy ndeyvyrã ombotuvixave ma ramo, xapy'a rei xo'o re'uxea vy "Ha'u 'rã xo'o" 're 'rã. Ha'e rami vy nderekaoa py ae 'rã re'u, re'uxea rami.
- ²¹ Ha'e rami avi henda SENHOR Nderuete guery omoĩ aguã oiporavoague gui mombyry ri reiko vy ma rejuka 'rã nerymba vaka ha'e vexa'i kuery SENHOR ojou uka va'ekue, ha'e nderekaoa py ae teĩ ha'eve re'u aguã, re'uxea rami, ndevy amboaxaague rami vy.
- ²² Guaxu puku ha'e guaxu ete'i ro'o re'ua rami 'rã re'u xo'o. Ha'e nunga gui ma avakue ha'eve va'e ha'e ha'eve'ŷ va'e teĩ ha'eve ho'u aguã.

* ^{12:15} Mba'eta guaxu puku ma ka'aguy rupigua rã SENHOR pe ome'ẽ mbyrã e'ŷ. Ha'eve amongue va'e rei ho'u tema aguã.

²³ Ha'e rami avi eikuaa pota huguy reve re'u e'ŷ aguã, mba'eta tuguy re ma oĩ tekove. Nda'evei tekove xo'o reve re'u aguã.

²⁴ He'u eme tuguy. Yvy py 'rã renhoẽ yy rami.

²⁵ Ndere'ui 'rãe. Nderá'y kuery ndereikovevei rire ndo'ui avi 'rã, SENHOR penemoingo porã aguã, henonde ha'evea ramigua anho pejapo ramo.

²⁶ Ha'e rã mba'emo rerekva'e gui reiky'a'o uka va'ekue, ha'e reme'ẽ aguã re renhem-boayvuague va'e ma henda SENHOR oiporavoague py ae 'rã reraa.

²⁷ SENHOR Penderuete pegua altar áry ae 'rã reapy vy reme'ẽ, ho'okue ha'e huguykue guive. Mymba reme'ẽ va'e ruguykue ma onhoëa 'rã SENHOR Penderuete pegua altar áry rupi. Ha'e rã ho'okue gui ma re'u 'rã.

²⁸ Eikuua pota rejapopa aguã ayvu amboaxa va'ekue ha'e javi, ndee ha'e ndera'y kuery peiko porã aguã raka'e rã peve, SENHOR Penderuete renonde ha'evea ramigua pejapo ramo.

²⁹ — Ha'e gui penerenonde gui SENHOR Nderuete amboae regua kuery oipe'apa ma jave, ha'e ijyvykue py reo ma vy nderekao aguã,

³⁰ enheangu ha'e kuery ikuaiague rami avi reiko e'ŷ aguã, neronde gui omombaa rire tei. Eikuua pota rei eme guive ha'e kuery ruete ra'angaa kuery re, nei "Ha'e kuery nguu ete ra'angaa omboeteague rami xee voi ajapo 'rã", 're eme.

³¹ Emboete eme SENHOR Nderuete ha'e rami, mba'eta ha'e kuery nguuete kuery pe ojapo va'e ma SENHOR pe rã ojeguarua ha'e ojou vaipy meme, mba'eta nguuete kuery pe ha'e kuery oapy 'rã gua'y ha'e guajy kuery eteve voi.

³² — Rejapopa 'rã ayvu amboaxa va'e ha'e javi. Hi'áryve neremoïvei 'rã, nei neremboivei 'rã guive.

13

Profeta ramigua rive ha'e mba'emo ra'angaa mboetea rupi nhomoingoxe va'e re ijayvua

¹ — Ha'e gui xapy'a rei pete'i profeta, ha'e'ŷ vy mba'emo rexra ra'ua penembyte py oiko vy omombe'u ma voi 'rã hexa pyrã e'ŷ vy nhomondyipaarã,

² ha'e rire hexa pyrã e'ŷ vy nhomondyipaarã omombe'u va'ekue oiko 'rã, tei ha'e va'e aipoe'i avi 'rã: "Jaa ke amboae tuuete kuery ndajaikuai teri va'ekue pe ju jaiko", he'i ramo ma

³ pendu pota eme profeta e'ŷ vy mba'emo rexra ra'ua ayvu. Mba'eta SENHOR Penderuete penderekko a'ã, oikuaxe vy anhetõ pa pendepy'a ha'e penenhe'ẽ ha'e javi py peayvu ra'ea.

⁴ SENHOR Penderuete rupive anho 'rã peiko, henonde pejererokyjea rupi 'rã pendekuai. Pejapo 'rã ha'e ojapo uka va'e, pendu 'rã ijayvua, ixupe ae 'rã peiko, hexe anho 'rã penhemboja.

⁵ Ha'e gui ha'e va'e profeta e'ŷ vy mba'emo rexra ra'ua ma pejuka 'rã, SENHOR Penderuete rovai nhomopu'ãa rupi ijayvu rire, Egito yvy re escravo pendekuaiague gui penerenoëare rovai ijayvu, pendepe'axe vy SENHOR Penderuete tape oeja va'ekue gui. Ha'e rami vy penembyte gui peipe'a 'rã mba'emo vai.

⁶ Xapy'a rei nderyvy e'ŷ vy nderyke'y ndexy pi'a ae ha'e rami 'rã ijayvu, ndera'y e'ŷ vy nderajy, ndera'yxy reayvu va'e mba'e, e'ŷ vy neiru ndee ae rejeayvua rami reayvu va'e tei nhemi rupi ndereroayvu vy aipoe'i 'rã: "Jaa jaiko amboae tuuete kuery pe ju, ha'e nunga ndee nei neramoï kuery ma voi ndikuauai va'e tei,

⁷ amboae regua ndeyvýry ikuai va'e ruete ra'angaa pe ae, ndea gui mombyry e'ŷ vy ha'e'i rupigua, pendeyvy re mamo rã rei", he'i ramo ma

⁸ enhembotavy uka eme ixupe, endu pota eme, hexe ema'ẽ eme guive remboaxya rupi. Ndereraa jepe ukai 'rã, nerenhomi 'rã guive.

⁹ Ha'e rami 'rãgue py rejuka 'rãe. Ndee ranhe'i 'rã ndepo reupi rejuka aguã, ha'e gui heta va'e kuery ha'e javi ju 'rã.

¹⁰ Pejapipa 'rã ita py omano peve, mba'eta SENHOR Penderuete Egito yvy re escravo peikoague gui penerenoëare gui pendepe'axe rire.

¹¹ Ha'e rami rã Israel kuery ha'e javi omombe'ua rã oendu vy ojererokyje 'rã okuapy, ha'e ha'ekue ramigua mba'emo vai ndojapovei 'rã penembyte rupi.

¹² — Ha'e gui xapy'a rei amongue tetã pendekoarã SENHOR Penderuete ome'ẽ va'ekue rupi pendu 'rã omombe'ua vy aipo'ea rã:

¹³ “Penderekoa py avakue heko vai va'e oje'oi vy nhombotavypa tetã pygua kuery, ‘Jaa amboae ruete ndajaikuaai va'ekue pe jaiko’ he'i va'e”,

¹⁴ 'ea ramo pendu vy ma peikuaa pota porã 'rã, pexa pota ha'e peporandu porã 'rã. Xapy'a rei ha'e rami ete mba'emo vai penembyte rupi anhetẽ ri oiko ra'e ramo

¹⁵ ha'e va'e tetã pygua kuery pejukapa 'rãe kyxe py. Pemomba 'rã ha'e py ikuai va'ekue ha'e javi, mymba kuery guive.

¹⁶ Imba'e rei-reikue ma pemboatypa 'rã tetã mbyte py, ha'e vy tetã ha'e mba'e rei-rei reve peapypa 'rã SENHOR Penderuete pe mba'emo oapy vy ome'ẽmby rami. Ha'e rami rire ha'e va'e tetã mba'emo vaikueaty rive 'rã oĩ raka'e rã peve, ndojapoavei 'rã guive.

¹⁷ Omomba pyrã regua neĩ peteĩve topyta eme pendepo py, SENHOR penemboaxy nhombopaga ve'ŷ aguã poxya rupi, ha'e penderayvua rupi penemboetave aguã, peneramoĩ kuery pe ourague rami vy,

¹⁸ xapy'a rei SENHOR Penderuete ijayvua pendu vy ha'e ojapo uka va'ekue ha'e javi pejapo ri ramo, aŷ amboaxa va'e ae, SENHOR Penderuete renonde rupi ha'evea ramigua anho pejapo aguã.

14

Onhekixi rei e'ŷ aguã re ijayvua

¹ — SENHOR Penderuete ra'y kuery ae peiko. Ha'e nunga rupi penhekixi rei eme, neĩ penderova katy ma voi penhopi eme omano va'ekue káuxa pendepy'a vai vy.

² Mba'eta peẽ kuery ma SENHOR Penderuete pegua iky'a e'ŷ va'e pendekuai. Ha'e javi regua yvy jave rupi ikuai va'e gui SENHOR pendoporavo va'ekue ojeupe guarã.

Levítico 11.1-47

³ — Neĩ peteĩve ndape'ui 'rã ojeguarupy regua.

⁴ Pova'e mymba ro'o anho 'rã pe'u: vaka, vexa'i, kavara,

⁵ guaxu ete'i, guaxu puku, guaxu miri, kavara ka'aguy regua, antiflope, vexa yvyty rupigua ha'e gamo.

⁶ Mymba ikuai va'e regua ipyapẽ mbyte rupi ja'o va'e, ha'e oixu'u jevy va'e ma ha'eve meme 'rã pe'u aguã.

⁷ Ha'e rã pova'e ma ndape'ui 'rã: mymba oixu'u jevy va'e anho, ha'e'ŷ vy ipyapẽ ja'o va'e anho: camelo, tapixi ha'e arganaz, oixu'u jevy va'eri ipyapẽ ja'o va'e'ŷ vy. Ha'e nunga ma ha'eve'ŷ va'e 'rã pendevy.

⁸ Poryko voi nda'evei, mba'eta ipoapẽ ja'o va'eri oixu'u jevy va'e'ŷ guive vy ha'eve'ŷ va'e 'rã pendevy. Ha'e va'e ro'o ndape'ui 'rã, he'õgue re voi pepoko eme.

⁹ — Yy rupi ikuai va'e gui ma pova'e regua 'rã pe'u: ipopo ha'e ipekue va'e ha'e javi.

¹⁰ Ha'e rã opa mba'e ipopo e'ŷ va'e, ha'e'ŷ vy ipekue e'ŷ va'e ma ndape'ui 'rã. Ha'eve'ŷ va'e meme 'rã pendevy.

¹¹ — Ha'e gui guyra ja'u aguã ha'eve va'e ha'e javi regua ma pe'u 'rã.

¹² Ha'e rã pova'e ma pe'u va'erã e'ŷ: taguato guaxu, quebrantosso, taguato guaxu ye'ẽ rupigua,

¹³ açor, taguato ha'e milhano, ha'e ha'e va'e regua ma guive rã;

¹⁴ ha'e javi uruvu, ha'e ha'e va'e regua ma guive rã;

¹⁵ ha'e gui avestruz, urukure'a, mbyju ye'ẽ rupigua, taguato, ha'e ha'e va'e regua ma guive rã;

¹⁶ ha'e gui mocho, íbis, aka'ẽ,

¹⁷ oko, abutre, uruvu ye'ẽ rupigua,

¹⁸ kuruka ha'e guyraxi, ha'e ha'e va'e regua ma guive rã; ha'e gui poupa ha'e mbopi.

¹⁹ — Ha'e javi regua omyñ'i ha'e oveve'i va'e ma guive rã ha'eve'ÿ va'e pendevy, pe'u va'erã e'ÿ.

²⁰ Ha'e rã guyra ha'eve va'e ha'e javi regua ma pe'u 'rã.

²¹ — Mymba omano rive va'ekue ma ndape'ui 'rã. Ha'eve peme'ẽ aguã amboae regua kuery peneretã py ikuai va'e pe ho'u aguã, ha'e'ÿ vy amboae regua kuery pe pemboekovia aguã, mba'eta peẽ kuery ma SENHOR Penderuete pegua iky'a e'ÿ va'e.

— Napembojyi 'rã kavara ra'y ixy kamby py ae.

SENHOR peguarã dízimo ome'ẽ aguã regua

²² — Ha'evea rami kuerei 'rã dízimo reme'ẽ mba'emo ra'yã renhotÿ va'ekue aju guigua, ma'etÿa nhavõ mba'ety rupi remono'õ va'e gui.*

²³ Dízimo regua gui ma SENHOR Nderuete renonde 'rã re'u, guery omoõ aguã oiporavoague py, mba'emo aju guigua, vinho, azeite, ha'e gui nerymba vaka ha'e vexa'i kuery ra'y ypy'i regua gui. Ha'e rami vy 'rã reikuua SENHOR Nderuete renonde rejererokyjea rupi reiko aguã, reikovea pukukue re.

²⁴ Ha'e gui xapy'a rei henda SENHOR Nderuete guery omoõ aguã oiporavoague mombyry ete ramo nda'evei 'rã ha'e py reraa aguã, nderekoa gui mombyry ramo ha'e SENHOR Nderuete ojou uka reta va'ekue reme'ẽ aguã,

²⁵ ha'e ramo remboekovia 'rã dízimo, ha'e hepykue peráta ndepo py reraa reve tereo henda SENHOR Nderuete oiporavoague py.

²⁶ Ha'e va'e peráta re ma rejogua 'rã nenhe'ẽ py reme'ëxe va'e rei, vaka, vexa'i, e'ÿ vy vinho, oy'u pyrã irove va'e, ha'e'ÿ vy nenhe'ẽ py reme'ëxea rendua rami tema. Ha'e rami vy ha'e py, SENHOR Nderuete renonde py ae re'u vy revy'a 'rã ndero pygua kuery ha'e javi reve.

²⁷ — Ha'e rami teñ eipytyvõ e'ÿ eme levita kuery neretã mbyte ikuai va'e, pendeyvy rupi oyvyrã ndojopyi rire.

²⁸ Mboapy ma'etÿa opa nhavõ ma dízimo ha'e va'e ma'etÿa mba'emo aju regua remono'õ vy neretã py ae 'rã remoõ porã.

²⁹ Ha'e ramo levita kuery ou 'rã ho'u aguã (pendeyvy rupi oyvyrã ndojopyi rire). Ou avi 'rã amboae regua kuery, tyre'ÿ ha'e imeve'ÿ va'e neretã py ikuai va'e. Okaru 'rã okuapy hevyatãmba peve, SENHOR Nderuete nemoingo porã aguã ndepo py rejapo va'e ha'e javi py.

15

Oreveague omboguepaa aguã ára pyguarã re ijayvua

¹ — Ha'e gui sete ma'etÿa opa nhavõ remboguepa kuerei 'rã ndevy oreveaague.

² Po rami 'rã rembogue: Neirũ kuery pe mba'emo reiporuka va'ekue ha'e javi rembogue 'rã omboekovia aguã va'ekue. Ha'e rami vy neremboekovia ukai 'rã neirũ e'ÿ vy nderyvy kuery pe, rembogue aguã SENHOR oikuua uka ramo.

³ Ha'e rã amboae regua kuery pe ma ha'eve remboekovia uka aguã, ha'e rã nderyvy oiporu vy ogueraa va'ekue ma neremboekovia ukavei 'rã.

⁴ Ha'e rami vy pendekuaia py iporiaukue'i ikuai e'ÿ aguã, mba'eta opa mba'e py SENHOR Penderuete penemoingo porã 'rã vyv penderekoarã ome'ẽ va'ekue py,

⁵ xapy'a rei SENHOR Penderuete ayvu pendu ri ramo, aÿ amboaxa va'e ha'e javi pejapo ete aguã.

⁶ Mba'eta SENHOR Penderuete penemoingo porã 'rãe, aipoe'iague rami vy. Ha'e ramo heta regua kuery pe peiporuka 'rã mba'emo, teñ ha'e kuery gui ma peẽ kuery ndapeiporui 'rã mba'eve. Heta regua re pendepo'aka 'rã, teñ ha'e kuery ma pendere nda'ipo'akai 'rã.

Levitico 25.35-38

⁷ — Ndeyvyrã SENHOR Nderuete ome'ẽague rupi xapy'a rei nderekoa rupi oiko 'rã nderyvy iporiaukue'i va'e, neretã oĩ va'e pygua. Ha'e ramo ma ndepy'a ratã eme, neñ nerakâte'ÿ eme guive nderyvy iporiaukue'i pe.

* 14:22 Levítico 27.30-33, Números 18.21

⁸ Ha'e rami 'rāgue py reipe'a 'rā ndepo opa marāgua reiporuka aguā ixupe oata va'e rei.
⁹ Enheangu ke amboae rami rei ndeyp'a e'ŷ aguā, aipo're eme guive: "Sete ma'etŷa ovaẽ ta ma, orevea nhamboguepa aguā", 're eme, nderyvy iporiau'i va'e re rema'ē vai vy ixupe mba'eve nereme'ēi aguā. Mba'eta ha'e rami rā SENHOR pe ojapukai 'rā nderovai, ha'e ndere oĩ 'rā rejavya.

¹⁰ Reme'ēxe'a'i py eme'ē ixupe, ndeyp'a re mba'emo vai toĩ eme reme'ēa py. Ha'e rami rā SENHOR Nderuete nemoingo porā 'rā ndepo py rejapo va'e ha'e rejapoxea ha'e javi py.

¹¹ Mba'eta ikuai 'rāe iporiaukue'i yvy re. Ha'e nunga rupi aipoa'e ndevy: Eipe'a ndepo, reme'ēxe'a'i py reme'ē aguā nderyvy ojexavai rei'i va'e ha'e iporiaukue'i ndeyvy re ikuai va'e pe.

Êxodo 21.1-11

¹² — Xapy'a rei peteĩ nderyvy e'ŷ vy nereindy hebreu regua ndevy ovendea ramo ma mboapy meme ma'etŷ peve'i 'rā remomba'epo. Ha'e gui sete ma'etŷa py ma repoi ju 'rā.

¹³ Ndea gui oo ma jave emondouka rive eme mba'emo reraa uka e'ŷ re.

¹⁴ Ixupe reme'ēxe'a'i py eme'ē nerymba kuery regua, mba'emo moa'yiaty gui, ha'e uva renhamiaty gui guare. SENHOR Nderuete nemoingo porāague regua gui reme'ē 'rā ixupe.

¹⁵ Nema'endu'a ke Egito yvy re ndee voi escravo reikoague gui SENHOR Nderuete nerenoēague re. Aŷ gui ma ha'e nunga amboaxa ndevy.

¹⁶ Ha'e rā xapy'a rei nerembiguai "Xee ndaai 'rā ndea gui" he'i 'rā ndevy, mba'eta nderayvu ha'e ndero pygua kuery voi, ha'e ndea py oiko porā.

¹⁷ Ha'e ramo mba'emo mombua py remombu 'rā inambi okē py. Ha'e rami rire nerembiguai ae 'rā oiko raka'e rā peve. Ha'e rami ae avi 'rā rejapo nerembiguai kunha va'e re.

¹⁸ Ndejeupe "Haxy xee apoi aguā" 'ere eme, mba'eta mboapy meme ma'etŷ re ma ndevy ombo'epo rire mbyte rupi ete'i ombo'epo va'e repy re, SENHOR Nderuete nemoingo porā aguā rejapo va'e ha'e javi py.

Lei mymba ra'y kuery oiko ypy'i va'ekue re ijayvua

¹⁹ — Nerymba vaka e'ŷ vy vexa'i ra'y oiko ypy'i va'ekue ha'e javi ma, ava ri ramo remboaxa 'rā SENHOR Nderuete peguarā. Vaka ra'y jypy guare ma neremomba'epoi 'rā, ha'e vexa'i ra'y jypy guare rague ma nderejayai 'rā.

²⁰ Ha'e va'e ro'o re'u 'rā SENHOR renonde py ndero pygua kuery reve. Ma'etŷa nhavō 'rā re'u, henda SENHOR oiporavoague py ae.

²¹ Ha'e rami teĩ ha'e va'e mymba re ivaikuea oĩ ri ramo, hetyma vaikue'i e'ŷ vy oexa e'ŷ va'e mba'e, ha'e'ŷ vy amboae rami ivaikuea oĩ ramo ma nereme'ēi 'rā SENHOR Nderuete pe.

²² Ha'e va'e ma neretā py ae 'rā re'u. Peẽ kuery va'e regua ha'eve va'e ha'e ha'eve'ŷ va'e teĩ pe'u 'rā joa py, guaxu puku e'ŷ vy guaxu ete'i ro'o pe'ua rami.

²³ Ha'e rā huguykue ma ndape'ui 'rāe. Penhoē 'rā yvy py yy rami.

16

Judeu kuery pegua ngaru mboapy regua ojapo aguā re ijayvua

Páscoa ára regua

Êxodo 23.14,15; 34.18; Levítico 23.4-8

¹ — Abibe jaxy re Páscoa ára ojeupity nhavō pejapo 'rā ngaru SENHOR Penderuete pegua. Mba'eta abibe jaxy py ae, pyávy SENHOR Penderuete penerenoēmba raka'e Egito yvy gui.

² Ha'e rami rire Páscoa ára ojeupity jave SENHOR Penderuete pe peme'ē 'rā penerymba vaka ha'e vexa'i regua, SENHOR guery omoĩ aguā oiporavoague py ae.

³ Ha'e va'e jave py ma mbojape ombovu pyre ndape'ui 'rā. Sete ára re 'rā pe'u mbojape imbovua revegua e'ŷ, jexavai regua, (mba'eta Egito yvy gui pejepo a pojava raka'e), peikoa pukukue re penema'endu'a aguā Egito yvy gui pejepo aague ára re.

⁴ Sete ára re pendea py noī 'rā mbojape mbovua, pendeyvy ha'e javi rupi. Ha'e rami avi jypyá ára ka'arukue xo'o pejuka va'ekue ma topyta eme ko'ëguerã.

⁵ Páscoa ára pygúarã neī peteïve pejuka eme penderekoarã SENHOR Penderuete ome'ẽ va'ekue py,

⁶ ha'e rā SENHOR Penderuete guery omoï aguã oiporavoague py ae 'rā pejuka Páscoa ára pygúarã. Ka'arukue, kuaray oike ma jave 'rā pejuka, Egito yvy gui peëmbaague hora ojeupity jave ae.

⁷ Pembojy vy pe'u 'rā SENHOR Penderuete oiporavoague py ae. Ha'e gui ko'ëgue jevy peo 'rā pendero katy pejevy aguã.

⁸ Mboapy meme ára re 'rā pe'u mbojape imbovua revegua e'ŷ. Ha'e gui sete araa py ma SENHOR Penderuete pe pejapo 'rā nhemboaty iky'a e'ŷ va'e. Neī peteïve ma napemba'eapoi 'rā.

Pentecostes ára regua

Êxodo 23.16; 34.22; Levítico 23.15-21

⁹ — Ha'e gui peipapa 'rā sete semana peve. Mba'ety rupi kyxe py mba'emo aju pemono'õ ypyá ára guive sete semana peve 'rā peipapa.

¹⁰ Ha'e vy SENHOR Penderuete pe pejapo 'rā ngaru semanas regua. Pendepo py ae 'rā peme'ẽ mba'emo peme'ëxealí py, SENHOR Penderuete penemoingo porãague rami.

¹¹ Pevy'a 'rā pekuapy SENHOR Penderuete renonde py, pendera'y, penderajy kuery, penerembiguai avakue ha'e kunhague reve, levita kuery penderekaoa py ikuai va'e reve, ha'e gui amboae regua, tyre'ŷ ha'e imeve'ŷ va'e kuery pendea rupi ikuai va'e reve, SENHOR Penderuete guery omoï aguã oiporavoague py ae.

¹² Penema'endu'a ke Egito yvy re escravo pendekuaiague re. Ha'e rami vy kova'e ayvu oeja pyre re peikuua pota 'rā pejapo ete aguã.

Oguy'i py ikuai aguã regua

Levítico 23.33-43

¹³ — Ha'e gui sete ára re pejapo 'rā ngaru oguy'i py pendekuai aguã regua, mba'emo pemoa'yimba ma jave, ha'e uva rykue penhamimba ma rire.

¹⁴ Ngarua py pevy'a 'rā, pendera'y, penderajy kuery, penerembiguai avakue ha'e kunhague, ha'e gui levita, amboae regua, tyre'ŷ ha'e imeve'ŷ va'e kuery penderekaoa py ikuai va'e reve.

¹⁵ Sete ára re 'rā ngaru pejapo SENHOR Penderuete pegua, SENHOR oiporavoague py ae, mba'eta SENHOR Penderuete penemoingo porã 'rā mba'emo pemono'õa ha'e pendepo py pejapo va'e ha'e javi py, opa mba'e py perovy'a aguã rami.

¹⁶ — Ha'e rami py ma'etýa nhavõ mboapykue-pykue peë kuery va'e regua avakue ikuai va'e ojexa uka 'rā SENHOR Penderuete renonde, oiporavoague py ae: ngaru mbojape imbovua revegua e'ŷ va'e regua oikoa py, ngaru semanas regua, ha'e gui ngaru oguy'i py ikuai aguã regua oikoa py. Opo py mba'emo ogueru reve anho 'rā ojexa uka SENHOR renonde py.

¹⁷ Peteï-teï ome'ẽ 'rā ojoua'i rami, SENHOR Tuuete omoingo porãague rami.

Êxodo 23.6-9

¹⁸ — Penderekoarã SENHOR Penderuete ome'ẽ va'ekue py peë kuery regua ikuia ha'e javi rupi pemoï 'rā nhomboayvu va'ety ha'e huvixa kueryrã, heta va'e kuery re oikuua pota aguã ha'evea rami.

¹⁹ Joe peikuua pota eme ha'eve e'ŷa rami rei. Peteï peayvuve eme joegui. Pejopy eme ome'ẽmby, mba'eta ome'ẽmby ombogue 'rā hi'arandu va'e rexha ha'e omboeko vai rive 'rā heko porã va'e.

²⁰ Ha'evea rami meme 'rā peikuua pota, ha'e rami anho'i, peikove ha'e penderekaoa aguã pendeyvyrã SENHOR Penderuete ome'ẽ va'ekue py.

²¹ Pemo'ã eme yvyra ta'angaarã SENHOR Penderuete pegua altar yvýry.

²² Neī pemo'ã eme ita SENHOR Penderuete ojou vai va'e regua rive.

17

Tuuete ra'angaa mboeteare ombopagaa aguã re ijayvua

¹ — Ha'e gui vaka ra'y e'ŷ vy vexa'i iporã e'ŷ, ivaikue rei va'e ma peme'ẽ eme SENHOR Penderuete pe, mba'eta ixupe ramo ojeguaru pyrã.

² Xapy'a rei pendea py penderekoarã SENHOR Penderuete ome'ẽ va'ekue rupi pejou 'rã ava e'ŷ vy kunha teĩ SENHOR Penderuete renonde tekó vai rupi oiko va'e, guexeve guarã ojapo va'ekue rupi e'ŷ.

³ Ha'e va'e nunga oo vy tuuete mboae pe rive 'rã ikuai omboetea rupi, ha'e'ŷ vy kuaray, jaxy, ha'e'ŷ vy yva re ojekuaa va'e pe rei, xee ajapo ukaague rami e'ŷ.

⁴ Ha'e va'e reko omombe'ua rã pendu vy ma peikuuaa pota porã 'rã. Ha'e gui xapy'a rei anhetẽ ete ri Israel kuery mbyte ha'eve'ŷ va'e ojapo ramo

⁵ ava e'ŷ vy kunha va'e ha'eve'ŷ va'e apoare peraa 'rã peneretã rokẽ peve, ha'e vy pejapipa 'rã ita py omano peve.

⁶ Mokoĩ e'ŷ vy mboapy hexaare omombe'u ramo mae ma pejuka omano aguã rami ojejavý va'ekue. Peteĩ'i hexaare omombe'u ramo nomanoi 'rã.*

⁷ Hexaare ranhe 'rã ita omombo ojuka aguã. Ha'e gui ma heta va'e kuery ha'e javi 'rã ojapi. Ha'e rami vy pendea gui peipe'a aguã heko vai va'e.*

Haxy ete va'e re huvixa oikuuaa pota kuua aguã re ijayvua

⁸ — Ha'e gui mba'emo re reikuuaa pota aguã haxy ete ri ramo, jojukaague re mba'e, e'ŷ vy mba'emo re ojerurea, joapo vaiague, e'ŷ vy amboae ramigua oikuuaa pota ukaa py, ha'e ramo repu'ã vy reo 'rã SENHOR Nderuete oiporavoague py.

⁹ Ha'e vy rejexa uka 'rã levita regua sacerdote kuery ha'e nhomboayvu va'ety ha'e jave py ikuai va'e pe. Ha'e kuery pe reporandu rã omombe'u 'rã rejapo va'erã.

¹⁰ SENHOR oiporavoague py ndevy ombovaiague rami 'rã rejapo. Enhea'ã ndevy ojapo uka va'ekue rejapopa aguã.

¹¹ Lei re ha'e kuery nembo'eague rami 'rã rejapo. Ayvu ndevy omombe'uague gui nderejepe'ai 'rãe, reiporu kuaa regua katy, neĩ reiporu kuaa e'ŷa katy ma voi.

¹² Ha'e gui ava onhemboyvate rei vy SENHOR Nderuete pegua sacerdote ayvu noendu potai, neĩ nhomboayvu va'ety ayvu ri ramo ma ojukaa 'rã, Israel kuery mbyte gui peipe'a aguã mba'emo vai,

¹³ ha'e nunga heta va'e kuery ha'e javi oendu vy okyje aguã, onhemboyvate ve'ŷ aguã rami.

Huvixaverã omoĩ mbyre rekorã re ijayvua

¹⁴ — Xapy'a rei yvy penderekoarã SENHOR Penderuete ome'ẽ va'ekue py pevaẽ ma vy aipopeje 'rã: “Nhamoĩ huvixave nhandere opena va'erã, ha'e javi regua nhandeyvýry rupi ikuia rami” peje 'rã.

¹⁵ Ha'e rami vy penderuvixaverã pemoĩ 'rã SENHOR Penderuete oiporavo va'e ae. Ha'e rã amboae regua ava penderyvy kuery regua e'ŷ ma nda'evei pemoĩ aguã, ha'e rã Israel kuery va'e regua anho.

¹⁶ Ha'e rami avi penderuvixave ma nda'evei ojeupe guarã kavaju omboetave aguã, neĩ Egito yvy katy heta va'e kuery ogueraa jevy aguã, kavaju ojouvexe vy. Mba'eta pendevy “Ndapejevyvei 'rã kova'e tape rupi” he'i va'ekue SENHOR.

¹⁷ Nda'evei avi ojou reta aguã gua'yxy jevyrã, opy'a py tape porã gui opia e'ŷ aguã. Nda'evei guive ojeupe guarã prata e'ŷ vy ouro ojou reta aguã.

¹⁸ — Ha'e gui guenda opena atyrã py oguapy ma vy ojeupe ae oguerova 'rã kova'e lei kuaxia re ombopara vy. Ha'e va'e ma levita regua sacerdote kuerya py oĩ va'e.

¹⁹ Ngupive oguerekoo riae 'rã, oikovea ára nhavõ ogueroayvu aguã. Ha'e rami vy oikuua 'rã SENHOR Nguete renonde ojererokyjea rupi oiko aguã, ha'e kova'e lei re ayvu oĩ va'e ha'e javi rupi omoĩ porã ha'e ojapopa ete aguã.

* 17:6 Hebreus 10.28 * 17:7 1 Coríntios 5.13

²⁰ Mba'eta ha'e va'e ayvu ojapo 'rā opy'a py guyvy kuery gui onhembovateve e'ŷ aguã, ha'e ojapo uka pyre gui ojepe'a e'ŷ aguã, oiporu kuaa regua katy neĩ oiporu kuaa e'ŷa katy ma voi. Ha'e rami vy Israel kuery mbyte huvixa oĩ are aguã, ha'e gui ta'y kuery ju.

18

Sacerdote ha'e levita kuery peguarã ha'e hekorã re ijayvua

¹ — Ha'e gui levita regua sacerdote kuery, ha'e levita kuery ha'e javi ndoguerekoi 'rā oyvyrã Israel kuerya py. Ha'e kuery okaru 'rā SENHOR pe oapy vy ome'ẽ mbyre re, ha'e kuery peguarã opyta va'e gui.

² Oyvyrã ma ndoguerekoi 'rā guyvy kuery ikuiaia rupi. SENHOR ae 'rā ha'e kuery mba'erã va'ekue, ha'e kuery pe ijayvuague rami vy.

³ Ha'e nunga rupi pova'e ma sacerdote kuery peguarã heta va'e kuery ome'ẽ va'ekue regua, vaka e'ŷ vy vexa'i kuery mba'e. Sacerdote pegua ma ijaxi'y kãgue, ha'e gui haŷ'y kãgue ha'e hyekue.

⁴ Ha'e kuery pe peme'ẽ avi 'rā jypygua mba'emo aju, uva rykue ha'e azeite iporãgueve gui, ha'e gui vexa'i rague jypy guare voi.

⁵ Mba'eta ha'e kuery ma Israel kuery ha'e javi regua gui SENHOR Penderuete oiporavo va'ekue, SENHOR rery rupi om̄ba'epo aguã, ha'e gui ta'y kuery ju, ára nhavõ reguarã.

⁶ — Ha'e gui xapy'a rei peteĩ levita ou 'rā guekoa peteĩ tetã Israel regua va'e rei gui. Opy'a py om̄ba'epoxea'i ha'e javi rupi 'rā ou henda SENHOR oiporavoague py.

⁷ Ha'e rami vy om̄ba'epo 'rā SENHOR Nguete rery rupi, guyvy kuery levita regua ha'e javi SENHOR renonde opena okuapya rami.

⁸ Ha'e va'e ho'u va'erã ma ha'e kuery pegua reve joo rami ae 'rā, mba'emo guekoa py ovendeague repy áryve ome'ẽa 'rā.

Imba'ekuaa ha'e imba'evyky va'e kuery rovai ijayvua

⁹ — Ha'e gui yvy SENHOR Penderuete ome'ẽague py pevaẽ ma vy napenhembo'ei 'rā ha'e pygua kuery ha'eve'ŷ va'e ojapo rami pendekuai avi aguã.

¹⁰ Penembyte py toiko eme guive gua'y e'ŷ vy guajy tata py oapy va'e, imba'ekuaa va'e, tenondegua mombe'ua, oexa'ã kuaa va'e, neĩ imba'evyky va'e ma voi,

¹¹ onhembo'e vaikue va'e, neĩ omanogue mboayvua, nhe'ẽ vai rewegua, neĩ omanogue pe oporandu va'e ma voi.

¹² Mba'eta ha'e nunga apoa ma SENHOR pe rã ojeguarupy meme. Ha'e nunga ha'e kuery ojapo okuapya re ae SENHOR Penderuete oipe'a raka'e penerononde gui.

¹³ Opa mba'e py heko porã va'e 'rā peiko SENHOR Penderuete renonde.

¹⁴ Mba'eta yvy pejopy va'erã va'e regua kuery ojapyxaka 'rā okuapy tenondegua mombe'ua ha'e imba'ekuaa va'e kuery re. Ha'e rã pendevy pe ma SENHOR Penderuete ndojapo ukai ha'e nunga.

Profeta yvate ete va'e oiko aguã re ijayvua

¹⁵ — Penembyte gui SENHOR Penderuete omoingo 'rā peteĩ profeta-rã, penderyvy regua xee rami guarã ae. Ha'e va'e re ma pejapyxaka 'rã,*

¹⁶ mba'eta Horebe vyty re penhemboaty pekuapya py SENHOR Penderuete pe pejerure vy "Nda'evei SENHOR Oreruete ayvu roenduve aguã, neĩ kova'e tata tuvixa ete va'e roexave aguã, romano e'ŷ aguã", peje va'ekue.

¹⁷ Ha'e ramo SENHOR aipoe'i xevy: "Ha'evea rami ha'e kuery ijayvu.

¹⁸ Ha'e rami rã ha'e kuery pe xee amoingo 'rã peteĩ profeta-rã penderyvy kuery mbyte gui, ndee ramigua ae. Ha'e va'e juru py amoĩ 'rã xeayvu, ha'e kuery pe ju omombe'u aguã ixupe ajapo ukaague ha'e javi.

¹⁹ Xerery rupi xeayvu ha'e omombe'u ramo ambopaga 'rã ndojapyxaka potai va'e ha'e javi.

* 18:15 Profeta Moisés ramigua SENHOR omoingo va'erã ma Jesus ae (Atos 3.22-23, 7.37).

²⁰ Ikuai avi 'rã profeta kuery xerery rupi merami ijayvu va'eri xeayvu namombe'u ukaia va'e, ha'e'ý vy tuuete mboae rery rupi ijayvu va'e. Ha'e va'e regua profeta kuery ma pejuka 'rã.

²¹ Xapy'a rei aipopeje 'rã pendepy'a py: 'Mba'exa vy tu jaikuaa 'rã SENHOR gui e'ý aipoe'i rã?'

²² Peikuaa pota ke: Peteĩ profeta SENHOR rery rupi ijayvu teĩ ijayvuague ndojeupityi, ndoikoi ri ramo ma SENHOR guigua e'ý ae ijayvu. Ha'e va'e profeta ma onhemboyvatea rupi rive ijayvu ra'e. Pekyje eme ixugui."

19

Números 35.9-15; Deuteronômio 4.41-43

¹ — SENHOR Penderuete yvy regua oipe'apa vy ijyvykue pendevy ju ome'ẽ ramo ha'e kuery rekoague ha'e hoogue ikuai va'e pejopy vy ha'e py pendekuai ma rire,

² ha'e jave py mboapy tetã ju pemboja'o 'rã pendeyvyrã SENHOR Penderuete ome'ẽ va'ekue mbyte rupi.*

³ Pejapo 'rã tape ha'e va'e katy oo va'erã, ha'e pendeyvyrã SENHOR Penderuete ome'ẽ va'ekue pemboja'o 'rã mboapy henda rupi, ha'e va'e tetã py jojukaare ma guive rã onhemi aguã.

Números 35.22-28

⁴ — Pova'e nunga jojukaare ha'eve 'rã ha'e va'e tetã py onhemi vy oikove aguã: oirũ ojukaxe reia py e'ý, potae vy e'ý ojuka va'ekue anho.

⁵ Xapy'a rei amongue oo 'rã oirũ reve ka'aguy re xakã ojaya aguã. Ha'e vy haxa py yvyra ojaya aguã oity ratã ramo hi'y gui ferro oẽ xapy'a ramo oirũ omongarau rire omano 'rã. Ha'e gui ijukaare oo vy onhemi 'rã ha'e va'e tetã py oo jepe aguã.

⁶ Ha'e rami e'ý rã huguy repyarã opy'a py ipoxy reve jojukaare omonha vy oupity 'rã tape ipuku-a rupi. Ha'e vy ojuka 'rã, omano aguã rami e'ý oiko teĩ, jojukaxe reia py e'ý rire.

⁷ Ha'e nunga rupi aipoa'e mboapy tetã peiporavo aguã.

⁸ Xapy'a rei SENHOR Penderuete peneramoĩ kuery pe ouraague rami vy ombotuvixave 'rã pendeyvy, ha'e pendevy ome'ẽmba 'rã yvy ome'ẽ 'rã va'ekue,

⁹ xapy'a rei ha'e ojapo uka va'ekue aý amboaxa va'e ha'e javi pejapo ramo SENHOR Penderuete peayvu, ha'e ára nhavõ ixuguigua tape rupi peiko aguã, ha'e rami vy ma mboapy tetã ju 'rã pejouve, mboapy ae ma va'ekue áryve,

¹⁰ ha'e rami pendeyvyrã SENHOR Penderuete ome'ẽ va'ekue py heko porã va'e ruguy omoëa e'ý aguã, pendere oĩ e'ý aguã tuguy omoëague re opaga aguã.

Números 35.16-21

¹¹ — Ha'e gui xapy'a rei oiko 'rã oirũ ndoayvui vy oity aguã re onhembopy'a va'e. Ha'e vy hexe opu'ã vy oinupã vy ojuka 'rã, ha'e gui onhemi 'rã peteĩ tetã peiporavo va'ekue py.

¹² Ha'e ramo hekoa ae pygua nhomoneta va'ety kuery omondouka 'rã heruarã, ha'e oguerua ma ramo omboaxa 'rã huguy repyarã po py ojuka aguã.

¹³ Ha'e va'e re pema'ẽ eme pemboaxya rupi, Israel kuery mbyte gui peipe'a aguã heko porã va'e ruguy moëare ojeavyague, pendekuai porã aguã.

Yvy ja'oa ha'e mba'emo mombe'ua kuery re ijayvua

¹⁴ — Erova eme neirũ kuery yvy markaa, ymagua kuery pendeyvy re omo'ã va'ekue, yvy SENHOR Penderuete penderekorã ome'ẽ va'ekue py.

¹⁵ — Amongue teko vai, e'ý vy jejavya ma guive rã ojapo rire teĩ peteĩ'i hexaare nda'evei hovai opu'ã vy hekokue omombe'u aguã. Mokoĩ, mboapy hexaare omombe'u rire mae 'rã peikuua anhetëguá.*

* 19:2 Jordão yakã yvýry ha'e kuery ovaẽ ypyague py mboapy tetã omboja'o ma voi raka'e (4.41-43). Apy ma mboapy ju omboja'o aguã re ijayvu, ha'e javi vy mboapy meme tetã oĩ aguã jojukaare onhemi atyrã. * 19:15 Mateus 18.16, 2 Coríntios 13.1

¹⁶ Xapy'a rei joe amongue opu'ã vy hekokue ramigua omombe'u 'rã teko vai ojapoague rami.

¹⁷ Ha'e rami rã mokoïve avakue joupe ijayvu va'ekue ojexa uka 'rã SENHOR renonde py, sacerdote ha'e nhomboayvu va'ety kuery ha'e va'e ára ikuai va'e renonde.

¹⁸ Nhomboayvu va'ety kuery oikuua pota porã 'rã. Ijayvu riveague, guyvy rovai ijapuague ri oikuua vy

¹⁹ hexe ojapo 'rã guyvy re ojapoxeague rami. Ha'e rami vy 'rã peipe'a teko vai penembyte gui,

²⁰ amboae kuery oendu vy okyje aguã, ha'ekue ramigua ndojapoavei aguã penembyte rupi.

²¹ Joapo vaiare re pema'ëeme pemboaxya rupi: joekove oipe'aague re peipe'a avi 'rã hekove, joexa omombuague re pemombu avi 'rã hexa, nhoaï omopéague re pemopé avi 'rã haï, jopo ojayaague re pejaya avi 'rã ipo, e'ŷ vy jopy ojayaague re pejaya avi 'rã ipy.

20

Joe opu'ãa rã guarã re ijayvua

¹ — Ha'e gui penderovaigua kuery reve pepu'ã aguã peo vy pexa 'rã kavaju áry e'ŷ vy karóxa py ou va'e pendegui hetave va'e. Ha'e rami teñ pekyje eme, mba'eta pendereve oiko SENHOR Penderuete Egito vygui penerenoëare ae.

² Joe pepu'ã aguã py pevaë ta ramo penerononde sacerdote oo vy ijayvu 'rã peë kuery pe.

³ Ha'e vy aipoe'i 'rã: "Pendu ke, Israel kuery. Aŷ pevaë ta ma penderovaigua kuery reve joe pepu'ã aguã py. Penhemondyi eme penekuraxõ py. Pekyje eme, peryryipa eme, napenderekorâvei eme guive penderovai ha'e kuery ou rã pexa vy,

⁴ mba'eta SENHOR Penderuete oo 'rã peë kuery reve. Pendere vy ha'e opu'ã 'rã penderovaigua kuery re, pendereraa jepe aguã", he'i 'rã.

⁵ — Ha'e gui yvatekueve ju peë kuery pe ijayvu 'rã. Ha'e vy aipoe'i 'rã: "Peë kuery va'e regua mava'e tu ngoorã ojapo teñ nomboaxai teri SENHOR peguarã? Ha'e va'e tojevy ju ngoo katy, joe opu'ãa py omano ramo amboae ju omboaxa e'ŷ aguã.

⁶ Ha'e peë kuery va'e regua mava'e tu uva tyrâ onhotŷ va'erí hi'a nomono'õi teri? Ha'e va'e tojevy ju ngoo katy, joe opu'ãa py omano ramo amboae ju omono'õ e'ŷ aguã.

⁷ Peë kuery va'e regua mava'e tu kunha re omendaxe va'erí nomundai teri? Ha'e va'e tojevy ju ngoo katy, joe opu'ãa py omano ramo amboae ju kunha re omenda e'ŷ aguã.

⁸ Peë kuery va'e regua mava'e tu okyje raxa ha'e ipy'a vava rei va'e? Ha'e va'e tojevy ju ngoo katy, tyvy kuery voi opy'a py okyjea oendu avi e'ŷ aguã, ha'e va'e opy'a py okyjea rami", he'i 'rã yvatekueve heta va'e kuery pe ijayvu vy.

⁹ Heta va'e kuery pe yvatekueve ijayvupa ma vy mae ma omo'í'rã xondaro kuery ruvixarã ha'e kuery renonde katy guarã.

¹⁰ — Ha'e gui amongue tetã re pepu'ã aguã py pevaë ta ma vy peporandu ranhe ha'e kuery reve peteñ rami pendekuai aguã re.

¹¹ Xapy'a rei peteñ rami ikuaxea rami penembovai, ha'e pendevy guetã rokẽ oipe'a ramo ma ha'e pygua kuery ha'e javi pemomba'epo atã 'rã penerembiguairã.

¹² Ha'e rami teñ pendereve peteñ rami nda'ikuaxei vy pendere opu'ã ri ramo ma pejokopa 'rã tetã.

¹³ Ha'e ramo SENHOR Penderuete omboaxa 'rã pendepo py. Ha'e pygua avakue ikuai va'e ma guive rã pejuka 'rã kyxe py.

¹⁴ Ha'e rã kunhague, kyrîgue, mymba kuery, ha'e mba'emo tetã py ikuai va'e ha'e javi ma peraapa 'rã penemba'erã. Peë ae peiporu 'rã penderovaigua kuery mba'e rei-reikue pendepo py SENHOR Penderuete omboaxa va'ekue.

¹⁵ Ha'e rami ae 'rã pejapo tetã pendegui mombyry ikuai va'e ha'e javi re, ha'e katy'igua kuery pegua e'ŷ ramo.

¹⁶ Ha'e rã amboae regua kuery pendepo py SENHOR Penderuete omboaxa va'e retã py ma neñ peteñve ndapejai 'rã oikove vy ipytue va'e.

¹⁷ Ha'e rami 'rāgue py SENHOR Penderuete ijayvuague rami vy pemomba ete 'rā: heteu kuery, amorreu, cananeu, ferezeu, heveu ha'e jebuseu kuery,

¹⁸ ha'e kuery penembo'e e'ŷ aguā ha'eve'ŷ va'e pejapo aguā, nguuete ra'angaa kuery peojapoa rami, mba'eta ha'e rami pejejavý 'rā SENHOR Penderuete rovai.

¹⁹ — Xapy'a rei peteī tetā pejoko 'rā mbovy ára re rei e'ŷ, ha'e kuery re pepu'ā 'rā pendepo'aka aguā. Ha'e rami teī pembovaipa rive eme yvyra ha'e va'e rupi ikuai va'e haxa py peake'o vy, mba'eta hi'a ha'eve 'rā pe'u aguā. Pemboguai eme, mba'eta yvyra mba'ety rupi ikuai va'e nda'u avakue teve, ha'e va'e re pepu'ā aguā?

²⁰ Ha'e rā yvyra hi'a pe'u e'ŷ va'erā ma ha'eve peake'o vy peity aguā. Ha'e va'e py tetā re pepu'ā pekuapya va'e rovai pemo'ā 'rā ijokoarā, peitypa peve.

21

Oikuaa e'ŷpy jojukaague ojao'i ucaa aguā re ijayvua

¹ — Ha'e gui pendeyvyrā SENHOR Penderuete ome'ēague py peteī te'ōgue pejou xapy'a 'rā mba'ety py itui va'e, ha'e ndapeikuuai 'rā guive mava'e pa ojukaague.

² Ha'e ramo nhomongetaa ha'e oikuaa pota va'ety kuery oē 'rā jogueruvy, ha'e vy omano va'ekue ituia gui oa'ā 'rā peteī-teī tetā ijyvýry rupi oī va'e peve.

³ Ha'e gui omano va'ekue ituia katy'ive tetā oī va'e pygua nhomongeta va'ety kuery ogueraa 'rā peteī vaka kunha nomba'epoi teri va'e, neī canga re voi nomoatāi teri va'ekue.

⁴ Ha'e va'e ogueraa 'rā peteī yvyugua yy xyry oīa yvy noikaraīai, neī nonhotýai teria py. Ha'e va'e yvyugua py ae 'rā ojyryvi poka vaka kunha.

⁵ Ha'e gui Levi ramymino va'e regua sacerdote kuery ovaē avi 'rā, mba'eta ha'e va'e kuery SENHOR Penderuete oiporavo va'ekue ojeupe ombo'epo aguā, SENHOR rery rupi jogueroayvu porā, ha'e ijayvua rupi oikuaa pota aguā peteī-teī ojerurea ha'e joguero'apaague re.

⁶ Ha'e gui nhomongeta va'ety kuery tetā omano va'ekue ituia katy'ivegua ha'e javi ma ojepoei 'rā vaka kunha yvyugua py ojuka va'ekue áry.

⁷ Ha'e vy aipoei 'rā okuapy: "Orepo e'ŷ ae kova'e ava ruguy omoē va'ekue, orerexa ndoexai guive huguy omoēa rā.

⁸ Ha'e gui SENHOR, emboaxy ndevygua Israel kuery, ndee ae reraa jepe rire. Eja eme heko porā va'e ruguy omoēague py jejavy opyta aguā ndevygua Israel kuery mbyte", he'i okuapy ramo ojao'ia 'rā huguy omoēague py jejavy oī va'e.

⁹ Ha'e rami py penembyte gui peipe'a uka 'rā heko porā va'e ruguy omoēague py jejavy oī va'e, SENHOR renonde ha'evea ramigua pejapo vy.

Kunha escravo-rā ogueraa pyre re ijayvua

¹⁰ — Penderovaigua kuery reve joe pepu'ā aguā peo ramo xapy'a rei SENHOR Penderuete omboaxa 'rā pendepo py, ha'e peraapa 'rā escravo-rā.

¹¹ Ha'e vy ha'e kuery mbyte xapy'a rei peteī kunha iporā ete va'e rexva vy ndea'e rei 'rā hexe, ha'e reraaxe 'rā ndera'yxyrā.

¹² Ha'e rami vy reraa 'rā ndero katy, ha'e o'a ojayapa 'rā oakā re oī va'ekue, ojaya 'rā oopoapé,

¹³ ha'e gui omboekovia 'rā oao escravo-rā peraa jave onhemondeague. Ndero py ae 'rā oiko, ha'e peteī jaxy re ojae'o 'rā nguu ha'e oxy re. Ha'e va'e rire mae ma rejoguerek 'rā hexeve. Ndee ma ime 'rā reiko, ha'e rā kunha va'e ma ndera'yxy 'rā.

¹⁴ Ha'e gui xapy'a rei ndevy pe rā kunha va'e nda'evei rei ramo tove too ha'e ae oocea katy rei. Nda'evei 'rā peráta re revende aguā, ereko axy eme guive, ndee ae ma remo'yvy'i rire.

Ta'y jypy guare peguarā re ijayvua

¹⁵ — Xapy'a rei peteī ava omenda 'rā mokoī kunha re. Peteī ma oayvuve 'rā, ha'e rā amboae ma ndoayvuite 'rā. Ha'e vy gua'yxy mokoīve re ta'y 'rā, ha'e ndoayvuite va'e re ranhe 'rā ta'y.

¹⁶ Ha'e gui gua'y kuery pe mba'emo oguereko va'e omboja'opaa ára py ma nda'evei 'rã jypy guare peguarã oguereko va'e oayvuve va'e pi'a pe ome'ẽ aguã, ndoayvuive va'e pi'a pe 'rãgue py, mba'eta ha'e va'e ae ta'y jypy guare.

¹⁷ Ndoayvuive va'e pi'a pe ae tuu "Jypy guare" he'i vy ixupe ome'ẽ retave 'rã oguereko va'e gui mokoïguea va'ekue. Kumumive jave py ta'ya pe ae ojopy 'rã jypy guare peguarã tuu oguereko va'ekue.

Ta'y nhonhe'ẽ rendu e'ŷ va'e re ijayvua

¹⁸ — Xapy'a rei amongue oguereko 'rã peteĩ gua'y inhe'ẽ rendu e'ŷ ha'e opu'ã rei va'e, nguu neĩ oxy ayvu ma voi noendu potai va'e, tuu oinupã teĩ ndoikuua potai rive ae va'e.

¹⁹ Ha'e ramo tuu ha'e ixy ojopy vy ogueraa 'rã tetã pygua nhomongeta va'ety kuery ikuiaia py, guetã rokẽ py ae.

²⁰ Ha'e rami vy aipoe'i 'rã ha'e kuery pe: "Kova'e orera'y ma orere opu'ã rei ha'e norenhe'ẽ rendui va'e, neĩ ndojapyxakai oreayvua re. Opa marã rei oiko, oka'uxe guive oikovy", he'i 'rã.

²¹ Ha'e ramo tetã pygua avakue ha'e javi ojapipa 'rã ita py, omano peve. Ha'e rami vy penembyte gui peipe'a 'rã teko vai. Ha'e ramo Israel kuery ha'e javi oendu vy ojererokyje 'rã okuapy.

Yvyra re omano va'ekue oupi pyre oipe'aa jevy aguã re ijayvua

²² — Xapy'a rei amongue ojejavvy vy omano aguã rami oiko 'rã. Ha'e ramo pejuka ma vy hetekue yvyra re peupi imoiny rire,

²³ hetekue ndopytai 'rã yvyra re pytû mbuku re. Ha'e va'e árave 'rãe pemboguejy ha'e pejaty. Mba'eta yvyra re oupi pyre ma Nhanderuete ijayvu vaia va'e oiko. Ha'e ramo vy 'rãe napemongy'a rei pendeyvyrã SENHOR Penderuete ome'ẽ va'ekue.*

22

Okanhygue re ijayvua

¹ — Xapy'a rei nderyvy rymba vaka e'ŷ vy vexa okanhygue rexâa vy enhomi eme ixugui. Reme'ẽ jevy 'rã nderyvy pe.

² Ha'e rami avi ija ndea katygua e'ŷ ramo, e'ŷ vy rexâa va'ety e'ŷ ramo ma ndero py ranhe eraa rerekoy aguã, nderyvy ogueraa aguã ou rã ixupe remboaxa jevy peve.

³ Ha'e rami ae 'rã rejapo hymba mburika'i re, ha'e ijao re voi. Ha'e rami ae avi 'rã rejapo nderyvy omokanhya va'ekue re rei, rejou ri vy. Nda'evei renhomie aguã.

⁴ Ha'e gui nderyvy rymba mburika'i e'ŷ vy vaka tape rupi ho'a va'ekue rexâa vy enhomi eme ixugui. Reipytyvõ 'rãe remopu'ã vy.

Lei opa mba'e rei regua

⁵ — Kunhague nonhemondei 'rã avakue pegua ao py, avakue ma voi nonhemondei 'rã kunha pegua ao py. Mba'eta ha'e ramigua ojapo va'e rei tema SENHOR Nderuete ojeguarua meme.

⁶ — Tape rupi reoa rupi xapy'a rei rexâa 'rã guyra'i raity yvyra re, e'ŷ vy yvy py, ha'e va'e re guyra ra'y kue'iry ikuai, e'ŷ vy hupi'a, ha'e gui ta'y kue'iry áry, e'ŷ vy hupi'a áry ixy oĩ. Ha'e rami rã ejopy eme ixy ta'y kue'iry reve.

⁷ Tove ixy too ooxea katy, eraa ta'y kue'iry anho ndejeupe guarã, reiko porã ha'e reiko pukuve aguã.

⁸ — Ha'e gui oorã rejapo vy ijao'ia rembe rupi rejapo 'rã kora jojokoarã, xapy'a rei ijao'ia gui amongue ho'a ramo oo káuxa ndere oĩ e'ŷ aguã huguy omoëague re repaga aguã.

⁹ — Nde'uvaty rupi enhoty eme mokoï regua ha'yí'i, ha'yí renhoty va'ekue gui hi'a oiko vy ha'eve'ŷ va'e opyta e'ŷ aguã, ha'e remono'õ va'ekue ha'e javi.

¹⁰ — Yvy reikaraí aguã eraa eme vaka mburika reve irú va'e.

¹¹ — Enhemonde eme ao vexa rague guigua ipererí va'e reve ombojo'a pyre py.

* 21:23 Gálatas 3.13

Lei ombojeguua aguã regua

¹² — Ao puku renheovãa rembojegua 'rã ijapy irundy va'e py.

Lei itavy reia ha'e omenda va'e pegua

¹³ — Xapy'a rei peteĩ ava omenda 'rã kunha re, ha'e kunha va'e reve jogueroke ma rire nda'ija'evei 'rã hexe.

¹⁴ Ha'e rami vy omombe'u 'rã itavy rei va'ea rami, kunha va'e re ijayvu rei vy. Ha'e vy aipoe'i 'rã: "Kova'e kunha re amenda teĩ hexeve ajoguerekoy vndaexai kunhatai'i teria" he'i ramo

¹⁵ kunha va'e ru ha'e ixy ma kunhatai'i teria kuaa ukaarã ojou vy ogueraa 'rã tetã py nhomongeta va'ety kuery okẽ py ikuia py.

¹⁶ Nhomongeta va'ety kuery pe kunha va'e ru aipoe'i 'rã: "Kova'e ava re xerajy amomenda teĩ kunha va'e re ha'e nda'ija'e py

¹⁷ hexe ijayvu oximba aguã rami. Ha'e vy xevy 'Nderajy ma kunhatai'i e'ŷ ra'e' he'i. Ko, apy ma oĩ xerajy kunhatai'i teri oikoa kuaa ukaarã", he'i vy ajukue oipyopa 'rã tetã pygua nhomongeta va'ety kuery renonde.

¹⁸ Ha'e nunga ha'e kuery oexa vy ime ojopy vy oinupãmba 'rã.

¹⁹ Ha'e rami vy ome'ẽ uka 'rã cem hatã'i va'e prata guigua kunha va'e ru peguarã, Israel regua kunhatai'i va'e rovai ijayvu rei rire. Ha'e gui kunha va'e oiko 'rã ta'yxy ae, ha'e ime nomoxêvei 'rã oikoa pukukue re.

²⁰ Ha'e rami avi anhetã ae ri kunhatai'i oikoa ndoexai ramo

²¹ ha'e pygua kuery kunha va'e ogueraa 'rã tuu kuery rokẽ peve, ha'e tetã pygua avakue ojapipa 'rã ita py omano peve, Israel kuery mbyte oiko vaikue rei rire, itavy rei ra'e nguu ro rupi teri oiko reve. Ha'e rami vy penembyte gui peipe'a 'rã teko vai.

²² — Ha'e gui xapy'a rei peteĩ ava ojoua 'rã kunha ome oguerekoy va'e reve onheno ramo. Ha'e vy mokoõve omano 'rã, ava kunha reve onheno va'ekue, ha'e kunha va'e teĩ ae ma. Ha'e rami py peipe'a 'rã teko vai Israel kuery mbyte gui.

²³ — Xapy'a rei peteĩ kunhatai'i ete teri omenda aguã rami oiko, ha'e gui peteĩ ava tetã py ojou vy ogueronheno 'rã.

²⁴ Ha'e ramo mokoõve peraa 'rã tetã rokẽ peve ita py pejapipa aguã, omano peve. Kunha va'e ma tetã py ndojapukaiague re 'rã pejuka, ha'e rã ava ma oirũ ra'yxy omo'yvyiague re. Ha'e rami py peipe'a 'rã teko vai penembyte gui.

²⁵ — Ha'e rã mba'ety rupi ava ojou 'rã kunha omenda aguã rami oiko va'e, ha'e vy onhea'ã vy ogueronheno 'rã. Ha'e rami vy ava va'e anho'i omano 'rã kunha ogueronhenoague re.

²⁶ Ha'e rã kunha va'e re ma mba'eve ndapejapoi 'rã. Hexe ma noĩ omano aguã regua, mba'eta ava va'e ojapo oirũ rovai opu'ã vy ojukaa rami,

²⁷ mba'ety py ojou rire. Kunha omenda aguã rami oiko va'e ojapukai teĩ nda'ipoai heraa jepearã.

²⁸ — Ha'e gui xapy'a rei peteĩ ava ojou 'rã kunhatai'i ete va'eri omenda aguã rami e'ŷ teri oiko va'e, ha'e. ojopy vy ogueronheno 'rã. Ha'e nunga ojoua ramo

²⁹ kunha va'e ru pe ava va'e kunha reronhenoare ome'ẽ 'rã cinquenta hatã'i va'e prata guigua. Ava omo'yvyi'i rire kunha va'e oiko 'rã ta'yxyra. Neĩ nda'evei 'rã omoxê aguã oikoa pukukue re.

³⁰ — Ha'e gui peteĩve ava ma voi nogueronheno 'rã oxy ranga, nguu rupa omongy'a e'ŷ aguã.

23

Nhemboaty iky'a e'ŷ va'e py oĩ aguã nda'evei va'e re ijayvua

¹ — Avakue oa'yijo pyre e'ŷ vy oembo aya pyre ma ndoikei 'rã SENHOR pegua nhemboaty oĩaty py.

² Omenda e'ŷ va'ekue pi'a ma voi ndoikei 'rã SENHOR pegua nhemboaty oĩaty py. Neĩ hamymimo kuery dez-kue peve ikuai va'e voi ndoikei 'rã.

³ Amom ha'e Moabe pygua kuery va'e regua mava'eve voi ndoikei 'rã SENHOR pegua nhemboaty oñaty py. Neñ hamymimo kuery dez-kue peve ikuai va'e voi ndoikei 'rã, raka'e rã peve teñ,

⁴ mba'eta ha'e va'e kuery ndogueraai rire mbojape ha'e yy penerovaexi aguã, Egito yvy gui peopa jave tape rupi peguataa rupi. Ha'e rami 'rãgue py peráta re penderovai guarã ogueru Beor ra'y Balaão, Mesopotâmia re Petor guigua, peñ kuery rovai ijayvu vai aguã.

⁵ Ha'e rami teñ SENHOR Penderuete Balaão ayvu noendu potai vy ojapo pendereroayvu porã aguã rami ijayvu vai 'rãgue py, penderayvu ete vy.

⁶ Ha'e va'e regua kuery reve peteñ rami pendekuai aguã nda'evei pejapo aguã, neñ ha'e kuery ikuai porã aguã rami ma voi, pendekuiaia pukukue re, raka'e rã peve.

⁷ — Ha'e rã Edom pygua kuery ma peayvu e'ý eme, penderyvy kuery ae ramo. Peayvu e'ý eme avi Egito pygua kuery, ha'e kuery yvy re amboae regua rami pendekuai rire.

⁸ Ha'e va'e ramymimo kuery regua peteñ-teñ oike 'rã SENHOR pegua nhemboaty oñaty py.

Tekoa iky'a e'ý va'e optya aguã re ijayvua

⁹ — Penderovaigua kuery re xondaro kuery opu'ã aguã oje'oi jave ma penheangu 'rã ha'eve'ý va'e ha'e javi gui.

¹⁰ Xapy'a rei peñ kuery va'e regua oiko 'rã ha'eve'ý va'e pyávy otty omondykyta py. Ha'e rami vy ha'e va'e ojepe'a 'rã pendekuiaia gui. Ndopytai 'rãe ha'e py.

¹¹ Ha'e gui ko'ë jevy ka'aru ma jave ojau 'rã yy py. Kuaray oike ma jave oike ju 'rã pendekuiaia py.

¹² Pendekuiaia gui mombyry'ia py oñ 'rã peteñ henda peo aguã.

¹³ Tembiporu rereko va'e reve reraa avi 'rã peteñ yvyra, reguapy ma vy ha'e va'e py rejo'o aguã yvy. Ha'e gui rejevy ta ma vy rejaty 'rã nderepoxi.

¹⁴ Mba'eta SENHOR Penderuete oiko avi 'rã pendekuiaia mbyte rupi, penderovaigua kuery gui pendereraa jepe ha'e penderepy aguã. Ha'e nunga rupi pendekuiaia ma iky'a e'ý va'e 'rã optya, pendere SENHOR ha'eve'ý va'e oexa vy pendegui ojepe'a e'ý aguã.

Escravo oo jepe va'ekue, itavy rei va'e ha'e oiporuka pyre rekoria re ijayvua

¹⁵ — Peteñ escravo opatõ gui ojava vy ndea py ri onhemi ramo neremboaxa jevyi 'rã ipatõ pe.

¹⁶ Ndea py ae toiko ha'e ae oiporavoague py, peñ kuery rekua rupi ojou porãa py ae. Pereko axy eme.

¹⁷ — Israel regua rajy kuery ta'ikuai eme ta'angaa pegua itavy rei va'e, neñ Israel regua ra'y kuery ma voi ta'ikuai eme ha'e rami.*

¹⁸ SENHOR Penderuete pegua opy ndaperui 'rã itavy rei va'e repykue, neñ ava itavy rei va'e repykue voi, penhemboayvuague pejapopaa regua peme'ë aguã teñ ae ma. Mba'eta ha'e va'e mokoïve repy ma SENHOR Penderuete ojeguarua meme.

¹⁹ — Nderyvy pe mba'emo reiporuka rire emboekovia uka retave eme, peráta, tembi'u, e'ý vy mba'emo rei, ha'e nunga oiporukaa vy hekovia ojopyave aty teñ.

²⁰ Amboae regua kuery pe mba'emo reiporuka vy ha'eve 'rã remboekovia uka retave aguã. Ha'e rã nderyvy pe ma mba'emo reiporuka vy emboekovia uka retave eme, SENHOR Nderuete nemoingo porã aguã ndeyvy reña rupi mba'emo rejapo va'e ha'e javi py.

Mba'emo ojapo aguã re onhemboayvu okuapyague

²¹ — SENHOR Nderuete pe mba'emo rejapo aguã re renhemboayvu ri vy emboare eme rejapo aguã. Mba'eta SENHOR Nderuete nembopaga 'rã, ha'e ndere ae oñ 'rã rejejavya.

²² Ha'e rami avi mba'emo rejapo aguã re nerenhemboayvui rire ma ndere noñ 'rã rejejavya.

²³ Enhea'ë ndeayvuague rejapo ete aguã, mba'eta ndejuru py ae SENHOR Nderuete pe rejapoxea'i py ndeayvu rire.

* 23:17 Ha'e jave py itavy reia 'rã amboae regua kuery ruete ra'angaa pegua templo py (1 Reis 14.24).

²⁴ — Neirũ mba'e uvaty rupi reaxa vy ha'eve 'rã uva re'uxea rami re'u aguã nerevyatã peve, teĩ eraa eme ajaka py.

²⁵ Ha'e rami ae avi neirũ mba'ety rupi reaxa vy ha'eve mba'emo aju reipo'o aguã, teĩ kyxe py nderejayai 'rã imba'ety rupi.

24

Omenda va'e oja'o rã guarã re ijayvua

¹ — Xapy'a rei peteĩ ava kunha va'e ojou vy omenda 'rã hexe, teĩ kunha va'e re ha'eve'ÿ va'e ojou rire ndojou porãvei 'rã. Ha'e rami vy oja'o aguã regua ombopara vy kunha va'e po py ome'ẽ ma vy mae ma omondouka 'rã ngoo gui.*

² Ha'e gui xapy'a rei hoo gui kunha va'e oo rire amboae ava re ju 'rã omenda.

³ Ha'e gui ha'e va'e ju ndoayvuvei vy oja'o aguã regua ombopara vy ipo py ome'ẽ ma vy omondouka ju 'rã ngoo gui, ha'e rami e'ÿ vy mokoña ava gua'yxyrã ogueraa ma rire omano 'rã.

⁴ Ha'e gui ime jypygua imondoukaare ma nda'evei 'rã ogueru ju aguã gua'yxyrã omongy'a ma rire, mba'eta SENHOR pe ojeguarua ae 'rã. Pejapo eme pendeyvyrã SENHOR Nderuete ome'ẽ va'ekue re jejavya oĩ aguã rami.

Lei nhomboaxy a rupi ikuai aguã re ijayvuague

⁵ — Ava omenda ramo'i va'e majoee opu'ã aguã katy oo e'ÿ teĩ ha'eve, neĩ napemopenai 'rã mba'eve rei re. Peteĩ ma'etÿa peve toiko ngoo py ae, gua'yxyrã ogueraa va'ekue ombovy'a aguã.

⁶ — Ndevy amongue oreve ramo eraa eme mokoõ ita mba'emo ra'yigue mongu'ia oguereko va'e, neĩ ita hi'árygua eraa eme, mba'eta ha'e rami reipe'a 'rãgue oikove aguã.

⁷ — Xapy'a rei amongue imonda 'rã guyvy Israel regua va'e re escravo-'rã, e'ÿ vy ovende va'erã. Imondaague peikuua ramo tomano. Ha'e rami vy 'rã penembyte gui peipe'a teko vai.

⁸ — Penheangu ke mba'eaxy lepra gui, ha'e penhea'ã levita regua sacerdote kuery penembo'ea pejapopa aguã. Penhea'ã ha'e kuery pe ajapo ukaague rami pejapo aguã.

⁹ Penema'endu'a ke Miriã re SENHOR Penderuete ojapoague re, tape rupi Egito yvy gui peopaa jave.*

¹⁰ — Neirũ pe mba'emo reiporuka ri vy eike eme hoo py hekivia renoẽ aguã.

¹¹ Repyta 'rã oka py, ha'e rã mba'emo poruare ae 'rã ogueru hekivia reraa aguã.†

¹² Ha'e rami teĩ ha'e va'e ava iporiaukue'i ri ramo nda'evei hekivia rerekoo aguã pytû mbukukue re.

¹³ Kuaray oike'i jave ixupe reme'ẽ ju 'rã ao puku reraa va'ekue ha'e va'e py onheovã aguã, ha'e ramo ndereroayvu porã 'rã. Ha'e ramigua ma SENHOR Nderuete renonde "Nderekoo porãa" he'i 'rã.

¹⁴ — Erekoo axy eme nerembiguai iporiaukue'i ojexavai va'e, nderyvy ae'i e'ÿ vy amboae regua ndeyvy re nderekoo py oiko va'e.

¹⁵ Hi'ára py porã ixupe reme'ẽ 'rã ombo'eapoague repy, kuaray oike e'ÿ teri reve, mba'eta iporiaukue'i vy oipota oikove aguã. Ha'e rami e'ÿ rã SENHOR pe ha'e ojapukai 'rã nderovai, ha'e ndere oĩ 'rã jejavya.

¹⁶ — Tuu kuery ndapejukai 'rã ta'y kuery ojejavyague re, neĩ ta'y kuery ma voi ndapejukai 'rã tuu kuery ojejavyague re. Peteĩ-teĩ omano 'rã ha'e ae ojejavyague re.

¹⁷ — Eikuua pota porã e'ÿ eme amboae guigua ha'e tyre'ÿ kuery. Eraa eme imeve'ÿ va'e ao ixupe reiporuka va'ekue rekivia.

¹⁸ Nema'endu'a tema Egito yvy re escravo pendekuaiague re, ha'e SENHOR ha'e gui pendereraa ague re. Ha'e nunga rupi ae ajapo uka ndevy ha'e rami aguã.

* 24:1 Mateus 5.31, 19.7-9 * 24:9 Moisés reindy Miriã ma hovai ijayvu rire Nhanderuete omomba'eaxy lepra py (Números 12.9-10). † 24:11 Ha'e kuery reko rami vy amongue oirũ pe mba'emo oiporu rama iporukaare pe irũ ogueraa uka 'rã mba'emo, oiporu va'e hekivia ome'ẽ ju peve guarã.

¹⁹ — Nemba'ety py mba'emo aju remono'õ jave peteĩ jokuaa re nderexarai ri vy ejevy eme rejopy nho aguã. Topyta amboae regua, tyre'ŷ ha'e imeve'ŷ va'e peguarã. Ha'e ramo SENHOR Nderuete nemoingo porã 'rã ndepo py rejapo va'e ha'e javi py.

²⁰ Azeite remondopa ma rire ejevy ju eme remondove aguã hakã gui. Topyta amboae regua, tyre'ŷ ha'e imeve'ŷ va'e peguarã.

²¹ Ha'e gui uva'a reipo'opa ma rire ejevy ju eme reipo'ove aguã. Hembyrekue toppta amboae regua, tyre'ŷ ha'e imeve'ŷ va'e peguarã.

²² Nema'endu'a Egito yvy re escravo pendekuaiague re. Ha'e nunga rupi ajapo uka ndevy ha'e rami aguã.

25

Nhombopagaa py nhonupã aguã re ijayvua

¹ — Xapy'a rei mokoĩ joguero'a vy jogueraa rã oikuua pota va'ety kuerya py. Ha'e ramo oikuua pota vy omboeko porã 'rã ha'evea rami oiko va'ekue, ha'e ombopaga 'rã ha'eve'ŷa rami oiko va'ekue.

² Xapy'a rei ha'eve'ŷa rami oiko va'ekue pembopi aguã rami ri oiko ramo nhomboayvu va'ety omonheno uka, ha'e gui oinupã uka 'rã guenonde py, mbovykue pa ojapo vaiague re oinupãa oikuua rami.

³ Quarenta-kue peve'i 'rã peinupã, ha'e va'e áryve nda'evei peinupã aguã, mba'eta penderyvy peinupãve ri vy pemo'yvy'i 'rã penerenonde.

⁴ — Vaka mba'emo aju moa'yia rupi ombo'eapo va'e ma pejokua eme ijuru rupi.*

Guyke'y ra'yxykue re omenda aguã re ijayvua

⁵ — Xapy'a rei joegua meme joa py oiko, ha'e peteĩ omano 'rã ta'y e'ŷ re. Ha'e ramo omano va'ekue ra'yxy nomendai 'rã amboae re, ngoo pygua re ae e'ŷ vy. Hovaja ae gua'yxyrã ogueraa vy omenda 'rã hexe, hexe ta'y aguã hovaja rekorã oeja pyre rami vy.*

⁶ Ha'e gui kunha va'e re jypy'i ta'ya omboery 'rã guyke'y omano va'ekue rery rupi, hery okanhy e'ŷ aguã Israel kuery mbyte gui.

⁷ — Ha'e rã xapy'a rei ngovaja re tyvy nomendaxei ri ramo kunha va'e oo 'rã tetã rokẽ py nhomongeta va'ety kuery ikuia py. Ha'e vy aipoe'i 'rã: “Xerovaja xere ndata'yxei guyke'y rery oĩ ae aguã Israel kuerya rupi. Xereve ndojapoxei hovaja ojapo aguã va'e”, he'i 'rã.

⁸ Ha'e ramo hetã pygua monogeta va'ety kuery oenoĩ uka 'rã ava va'e, ixupe ijayvu aguã. Ha'e gui ndoiptai vy “Ndaraaxeae” he'i ramo

⁹ hovaja kunha ou ju 'rã nhomongeta va'ety kuerya py. Ha'e vy ipy gui omboi 'rã ngovaja py regua, ha'e onyvõ 'rã hova re. Ha'e rami vy “Ha'e rami 'rã ojapoa ava guyke'y rekovia ndata'yxei va'e re” he'i 'rã.

¹⁰ Ha'e rami rire ava va'e ro pygua kuery pe “Ipy rei va'e regua” 'ea 'rã Israel kuerya rupi.

¹¹ — Xapy'a rei mokoĩ ava joe opu'âa py peteĩ va'e ra'yxy ovaẽ 'rã ome oepy aguã hovaigua po gui. Ha'e rami vy okuave'ẽ vy ojopy 'rã hako rupi.

¹² Ha'e ramo ma pejaya 'rã ipo. Hexe pema'ẽ eme pemboaxyra rupi.

Levítico 19.35,36

¹³ — Ndevoxa py eraa eme ipoyia joo rami e'ŷ va'e: peteĩ tuvixave va'e, ha'e rã amboae kyrive va'e.

¹⁴ Ha'e ndero py ereko eme hyru joo rami e'ŷ va'e: peteĩ tuvixave va'e, ha'e rã amboae kyrive va'e.

¹⁵ Teĩ'i regua rerekoo 'rã opejaa aguã, ha'evea'i ramigua anho, ha'e hyru ha'evea'i ramigua anho avi. Ha'e rami vy reiko pukuve aguã ndeyvyrã SENHOR Nderuete ome'ẽ va'ekue py.

¹⁶ Mba'eta ha'e ramigua teko vai ojapo va'e ha'e javi ma SENHOR Nderuete ojeguarua meme.

Amaleque kuery omokanhymba aguã re ijayvuague

* 25:4 1 Coríntios 9.9, 1 Timóteo 5.18 * 25:5 Mateus 22.24, Marcos 12.19, Lucas 20.28

¹⁷ — Penema'endu'a ke Egito yvy gui peopa jave Amaleque kuery pendere ojapo vaiague re tape rupi.

¹⁸ Mba'eta tape rupi pendeporiau ha'e penekangy reve peguata jave ha'e kuery ovaẽ xapy'a vy opu'ã okuapy takykue penekangykueve peju va'ekue re, Nhanderuete renonde ojererokyjea rupi e'ŷ.

¹⁹ Ha'e nunga rupi pendeyvyrã SENHOR Penderuete ome'ẽ va'ekue py pendekuai ma ramo ha'e ome'ẽ 'rã pepytu'u aguã penderovaigua kuery pendeyvýry rupi ikuai va'e ha'e javi gui. Ha'e ramo pemokanhymba 'rã Amaleque kuery, ha'e kuery re ima'endu'aave aguã rami e'ŷ, yva guy rupi rei. Penderexarai eme ke.

26

Mba'emo aju oiko ypy'i va'ekue re ijayvua

¹ — Ha'e gui pendeyvyrã SENHOR Penderuete ome'ẽ va'ekue py revaẽ vy ha'e py nderekoa ma vy

² rejopy 'rã mba'emo aju remono'õ ypy'i va'ekue, ndeyvy gui oiko va'ekue regua iporãgueve. Ha'e va'e ma peteĩ ajaka py remoĩ vy reraa 'rã henda SENHOR Penderuete guery omoĩ aguã oiporavogue py.

³ Ha'e gui reo 'rã sacerdote ha'e va'e jave oĩ va'ea py. Ha'e vy aipo're 'rã ixupe: "Aŷ SENHOR Nhanderuete pe amombe'u porã, yvy nhaneramoĩ kuery pe ome'ẽ aguã oura reve ijayvuague py xerekao maa", peje 'rã.

⁴ Ha'e ramo ndepo gui sacerdote ajaka ojopy vy omoĩ 'rã SENHOR Nderuete pegua altar oĩ va'e rexei.

⁵ Ha'e gui ma SENHOR Nderuete renonde py renhemombe'u porã vy aipo're 'rã: "Xeramoĩ ma arameu regua oiko raka'e. Ha'e va'e ma omano rai'i ma vy oo Egito yvy re. Ha'e py ju amboae regua rami oiko raka'e ngoo pygua kuery mboapy'i va'e reve. Ha'e gui ixugui oiko peteĩ regua hetave ha'e imbaraetkueve, ha'e py ae.

⁶ Ha'e rami teĩ Egito pygua kuery orembojaru ha'e orembojexavai rei vy oremoĩ romba'eapo raxa aguã rami.

⁷ SENHOR oreramoĩ kuery Ruete pe rojapukai ramo oreayvua oendu vy oikuua pota rojexavaia, romba'eapoa ha'e oremoingo axya re.

⁸ Ha'e rami vy Egito yvy gui SENHOR orerenoẽ opo oupi py opo'akaa oexa uka reve, ha'e nhomondyipaarrã ojapo reve, mba'emo kuaa ukaarã ha'e hexa pyrã reve.

⁹ Apy ju orereru vy kova'e yvy ome'ẽ orevy, kamby ha'e ei oata e'ŷa.

¹⁰ Ha'e gui ma'ẽ, aŷ ma aru mba'emo aju jypy guare iporãgueve va'e yvy ndee SENHOR xevy reme'ẽ va'ekue guigua", 're 'rã. Ha'e rami vy SENHOR Nderuete renonde ajaka remoĩ vy rejero'a 'rã henonde.

¹¹ Ha'e gui rerovy'a 'rã mba'emo porã SENHOR Nderuete ndevy ome'ẽ va'ekue ha'e javi, ndero pygua kuery pe, ha'e nderekoa py levita ha'e amboae regua ikuai va'e pe guive.

Dízimo ome'ẽ kuaa aguã re ijayvua

¹² — Ha'e gui mboapy ma'etŷa py dízimo reme'ẽ ojeupity nhavõ dízimo-rã remboja'opa ma rire reme'ẽ 'rã levita kuery pe, amboae yvy guigua, tyre'ŷ ha'e imeve'ŷ va'e kuery pe, nderekoa rupi ha'e kuery okaru vy hevyatã okuapy aguã.

¹³ Ha'e vy SENHOR Nderuete renonde py aipo're 'rã ixupe: "Ndevy peguarã amboaxa va'ekue xero gui anoẽ vy levita kuery pe ame'ẽ, amboae guigua, tyre'ŷ ha'e imeve'ŷ va'e kuery pe, xevy rejapo uka va'ekue ha'e javi rami vy. Rejapo uka va'ekue neĩ peteĩve ndajapo e'ŷi, peteĩve re ndaxerexarai.

¹⁴ Dízimo gui ma xee nda'ui xepy'a vai jave, neĩ ruxã'i ma voi nanoẽ xevy ha'eve'ŷ va'e aiko reve, namboaxai guive oo omanogue ituia py oĩ aguã. Xee anhe'ẽ rendu SENHOR Xeruete. Xevy ojapo uka va'ekue ajapopa ma.

¹⁵ Ema'ẽ yva re ne'amba iky'a e'ŷ va'e oĩa gui, ha'e vy emoingo porã ndevygua Israel kuery, ha'e yvy oreramoĩ kuery pe reuraague rami orevy reme'ẽ va'ekue, yvy kamby ha'e ei oata e'ŷa", 're 'rã.

Onhe'ẽ rendu aguã re ijayvua

¹⁶ — Aŷ gui ma pendevy SENHOR Penderuete ojapo uka kova'e ayvu oeja va'ekue ha'e oipotaa. Pemoĩ porã pendejee, ha'e pejapo pendepy'a ha'e penenhe'ẽ ha'e javi py.

¹⁷ Ange SENHOR oikuua uka Penderuete oikoa regua, ha'e ixuguigua tape rupi, ha'e oayvu oeja va'ekue rupi pendekuai aguã, ha'e gui ojapo uka va'ekue ha'e nhomongetaa rupi, ha'e ijayvua re pejapyxaka aguã.

¹⁸ Ange SENHOR pendevy oikuua uka avi ixupegua pendekuai aguã, pendevy aipoe'iague rami vy, ha'e ojapo uka va'ekue ha'e javi rupi pendekuai aguã.

¹⁹ Ha'e rami rã ha'e javi regua SENHOR omoingo va'ekue gui penemboyvateve 'rã, ha'e kuery gui pendererovy'aave, penemboeteave ha'e pendejou porãave aguã, ha'e SENHOR Penderuete pegua iky'a e'ý va'e peiko aguã, aipoe'iague rami vy — he'i Moisés.

Mboapykuea ma Moisés ijayvuague

27

Omboetea rupi lei ita re ombopara ukaague

¹ Israel regua nhomongeta va'ety kuery reve Moisés ijayvu heta va'e kuery pe. Ha'e vy aipoe'i:

— Pejapopa ke kova'e ojapo uka pyre aŷ pendevy amombe'u va'e.

² Peaxa 'rã Jordão yakã rovai re pendeyvyrã SENHOR Penderuete ome'ẽ va'e katy peo vy. Yakã peaxaa árave pemo'ã 'rã ita tuvixakue, ha'e cal py pemoxiimba 'rã.

³ Peaxapa ma rire ha'e va'e ita re pembopara 'rã kova'e lei re ayvu oĩ va'e ha'e javi, ha'e rami vy pevaẽ aguã pendeyvyrã SENHOR Penderuete ome'ẽ va'ekue py. Ha'e va'e yvy ma kamby ha'e ei oata e'ýa, SENHOR peneramoĩ kuery Ruete ijayvuague rami vy.

⁴ Kova'e ára aipoa'e Jordão yakã rovai re peaxa ma vy Ebal yvyty re ita pemo'ã aguã, ha'e pemoxiimba 'rã cal py.

⁵ Ha'e py SENHOR Penderuete pe pejapo 'rã peteĩ altar ita gui. Ha'e va'e re ndapeiporui 'rã tembiporu ferro guigua.

⁶ Ita pejou va'ekue py rive 'rã pejapo altar SENHOR Penderuete peguarã. Hi'áry peapy 'rã mba'emo peme'ẽ va'e.

⁷ Peme'ẽ avi 'rã peteĩ rami pendekuaia regua ha'e py. Ha'e rami vy pekaru ha'e pevy'a 'rã SENHOR Penderuete renonde.

⁸ Ha'e va'e ita re pembopara 'rã ayvu kova'e lei re oĩ va'e ha'e javi, ojekuaa porã aguã rami — he'i.

⁹ Ha'e gui levita regua sacerdote kuery reve Moisés ijayvu vy aipoe'i Israel kuery ha'e javi pe:

— Israel kuery, pekyririmba ke pendu aguã! Aŷ gui ma SENHOR Penderuete pegua ete 'rã peiko.

¹⁰ Ha'e nunga rupi penhe'ẽ rendu SENHOR Penderuete, ha'e pejapopa ojapo uka ha'e ayvu oeja va'ekue aŷ pêvy amombe'u va'e.

Ebal yvyty áry gui ayvu vai omombe'ua aguã re ijayvuague

¹¹ Ha'e va'e ára Moisés ojapo uka heta va'e kuery pe. Ha'e vy aipoe'i:

¹² — Jordão yakã rovai re peaxa ma rire pova'e kuery ikuai 'rã Gerizim yvyty áry jogueroayvu porã aguã: Simeão, Levi, Judá, Issacar, José ha'e Benjamim regua.

¹³ Ha'e rã pova'e kuery ma ayvu vai mombe'uarã 'rã ikuai Ebal yvyty áry: Rúben, Gade, Aser, Zebulom, Dã ha'e Naftali regua.

¹⁴ — Ha'e gui levita kuery ijayvu atã 'rã Israel kuery ha'e javi pe. Ha'e vy aipoe'i 'rã:

¹⁵ “Ayvu vaipy 'rã oiko ava ta'angaarã onhopi e'ý vy, mba'emo ryku gui ojapo vy hi'ã py omopu'ã va'e. Ha'e nunga ojapo kuaa va'e rembiapo tei SENHOR pe rã ojeguarupy meme.”

Ha'e ramo heta va'e kuery ha'e javi ombovai vy “Ha'eve va'e” he'i 'rã okuapy.

¹⁶ Aipoe'i avi 'rã: “Ayvu vaipy 'rã oiko oxy e'ý vy nguu nomboetei va'e.”

Heta va'e kuery ombovai vy “Ha'eve va'e” he'i 'rã.

- ¹⁷ Aipoe'i 'rā: "Ayvu vaipy 'rā oiko oirū yvy markaa oguerova va'e."
 Heta va'e kuery ombovai vy "Ha'eve va'e" he'i 'rā.
- ¹⁸ Aipoe'i 'rā: "Ayvu vaipy 'rā oiko hexa pyxo ve'ŷ va'e tape ojavy aguā rami ojapo va'e."
 Heta va'e kuery ombovai vy "Ha'eve va'e" he'i 'rā.
- ¹⁹ Aipoe'i 'rā: "Ayvu vaipy 'rā oiko mombyry guigua, e'ŷ vy tyre'ŷ ha'e imeve'ŷ va'e mba'e oipe'a va'e."
 Heta va'e kuery ombovai vy "Ha'eve va'e" he'i 'rā.
- ²⁰ Aipoe'i 'rā: "Ayvu vaipy 'rā oiko oxy ranga reve onheno va'e, nguu rupa omongy'a rire."
 Heta va'e kuery ombovai vy "Ha'eve va'e" he'i 'rā.
- ²¹ Aipoe'i 'rā: "Ayvu vaipy 'rā oiko mymba reve itavy va'e."
 Heta va'e kuery ombovai vy "Ha'eve va'e" he'i 'rā.
- ²² Aipoe'i 'rā: "Ayvu vaipy 'rā oiko gueindy reve, nguu rajy e'ŷ vy oxy memby reve onheno va'e."
 Heta va'e kuery ombovai vy "Ha'eve va'e" he'i 'rā.
- ²³ Aipoe'i 'rā: "Ayvu vaipy 'rā oiko guaixo reve onheno va'e."
 Heta va'e kuery ombovai vy "Ha'eve va'e" he'i 'rā.
- ²⁴ Aipoe'i 'rā: "Ayvu vaipy 'rā oiko oirū nhemi rupi ojuka va'e."
 Heta va'e kuery ombovai vy "Ha'eve va'e" he'i 'rā.
- ²⁵ Aipoe'i 'rā: "Ayvu vaipy 'rā oiko amongue ome'ẽmby ojopy va'e heko porā va'e ojuka aguā."
 Heta va'e kuery ombovai vy "Ha'eve va'e" he'i 'rā.
- ²⁶ Aipoe'i 'rā: "Ayvu vaipy 'rā oiko kova'e lei re ayvu oĩ va'e nomboetei vy ndojapoi va'e."
 Heta va'e kuery ombovai vy "Ha'eve va'e" he'i 'rā.*

28

Levítico 26:3-13; Deuteronômio 7:12-22

- ¹ — Ha'e gui SENHOR Penderuete ayvu re pejapyxaka porā vy ha'e ojapo uka va'ekue aŷ amombe'u va'e pejapopa ri ramo SENHOR Penderuete penemboyvate 'rā yvy jave re ikuai va'e áryve.
- ² SENHOR Penderuete penhe'ẽ rendu ramo pendere ombou 'rā kova'e ayvu porā ha'e javi, peẽ kuery re ojeupitypa 'rā.
- ³ Ayvu porãmby 'rā peiko tetã py ha'e penemba'ety rupi.
- ⁴ Ayvu porãmby 'rā ikuai kyrigue perekva'e, mba'emo'a pendeyvy gui oiko va'e, ha'e penerymba kuery vaka ha'e vexa'i ta'y'ia.
- ⁵ Ayvu porãmby 'rā peiko hyru py mba'emo aju pemono'õa, ha'e mbojaperã pemoapo-moa py.
- ⁶ Ayvu porãmby 'rā peiko peike ha'e peẽ ju maa ha'e javi py.
- ⁷ SENHOR ojapo 'rā penerenonde py penderovaigua kuery pendere opu'ã va'ekue oitypaa aguā rami. Peteĩ tape rupi penderovai ou va'ekue ri sete tape rupi ju 'rā ojava jogueravy pendegui.
- ⁸ SENHOR ombou 'rā mba'emo aju pemoõ porãaty oĩ porā aguā, ha'e opa mba'e pendepo py pejapo va'e voi. Ha'e rami vy penemoingo porā 'rā pendeyvyrã SENHOR Penderuete ome'ẽ va'ekue py.
- ⁹ SENHOR ojeupe guarã penemoingo 'rā iky'a e'ŷ va'e regua, pendevy ouraague rami vy, SENHOR Penderuete ojapo uka va'ekue pejapo, ha'e ixuguigua tape rupi pendekuai ramo.
- ¹⁰ Ha'e ramo yvy regua kuery ha'e javi SENHOR guery rupi penerenoõa oexa vy okyjepa 'rā pendegui.

* 27:26 Gálatas 3:10

¹¹ SENHOR opa mba'e 'rā ome'ẽ pêvy: kyrīgue perekoa py, penerymba kuery ta'y'ia py, ha'e pendeyvy gui mba'emo oikoa py, SENHOR pendeyvyrā ome'ẽ aguã re peneramoĩ kuery pe ouraague py ae.

¹² SENHOR oipe'a 'rā yva mba'emo porã ombou aguã, hi'ára py porã yvy re ombo'oky aguã, pendepo py mba'emo pejapo va'e javi py penemoingo porã aguã. Ha'e ramo heta regua pe mba'emo peiporuka 'rā teĩ peẽ ma ndapeiporui 'rā ha'e kuery mba'e.

¹³ SENHOR penemoĩ 'rā ha'e kuery akãrã, tuguairã ve'ŷ. Ha'e ramo hi'árykue'i 'rā pendekuai, iguy rupi rive'ŷ, xapy'a rei SENHOR Penderuete ojapo uka va'ekue aŷ amombe'u va'e pejapopa aguã pemoĩ ramo.

¹⁴ Pejepe'a eme peteĩve ayvu aŷ ajapo uka va'e gui, pendeaxua re neĩ pendeaxua e'ŷa re ma voi, tuuete mboae kuery re rive peaxa vy ha'e kuery pe pendekuai e'ŷ aguã.

Levítico 26.14-45

¹⁵ — Ha'e rami teĩ xapy'a rei SENHOR Penderuete napenhe'ẽ rendui vy, ojapo uka va'ekue ha'e ayvu aŷ amombe'u va'e ha'e javi ndapejapoi ramo, pendere ou 'rā kova'e ayvu vai ha'e javi, pendere ojeupitypa 'rā.

¹⁶ Ha'e ramo ayvu vaipy 'rā peiko tetã py ha'e penemb'ety rupi.

¹⁷ Ayvu vaipy 'rā peiko hyru py mba'emo aju pemono'õa, ha'e mbojaperã pemoapomoa py.

¹⁸ Ayvu vaipy 'rā ikuai kyrīgue perekva'e, mba'emo'a pendeyvy gui oiko va'e, ha'e penerymba vaka ha'e vexa'i kuery ta'y'ia.

¹⁹ Ayvu vaipy 'rā peiko peike ha'e peẽ ju maa ha'e javi py.

²⁰ — Pendere SENHOR ombou 'rā ayvu vai penemoĩ vaiarã ha'e pendere opu'ã va'e mba'emo pejapoa ha'e javi py, penemomba rã pekanhymba xapy'a peve, teko vai pejapoa rupi xegui pejepe'aague re.

²¹ SENHOR ombou 'rā mba'eaxy vaikue pendere oja va'erã, pendeyvyrã pejopy aguã katy peoa va'e omomba peve.

²² SENHOR pendejuka 'rā mba'eaxy vaikue py, pire raku, ai ipeupa va'e, kuaray aku raxa va'e, pirupa va'e, hu'umbaa ha'e hatãmba reia py. Ha'e nunga penemoingo axy 'rã pekanhymba peve.

²³ Yva peneakã áry rupi oĩ va'e ma overa va'e rami 'rã onhemboty, ha'e yvy pepyrõa ma ferro rami 'rã hatãmba.

²⁴ Pendeyvy rupi oky 'rãgue py SENHOR ombou 'rã yvy ku'i ha'e tanhimbu rive. Yva gui ha'e nunga anho ho'a 'rã pende'áry penemomba peve.

²⁵ SENHOR pendereity 'rã penderovaigua kuery renonde rupi. Peteĩ tape rupi ha'e kuery rovai peju rire teĩ sete tape rupi ju 'rã pejavapa ha'e kuery gui. Ha'e vy yvy jave regua ikuia rupi pendekuaa 'rã ojeguaru reia rami.

²⁶ Penderetekue optya 'rã guyra yvate rupi oveve va'e ha'e mymba yvy re ikuai va'e rembi'urã rive. Ha'e nunga mondyiarã ndoikoi 'rã.

²⁷ SENHOR penembojexavai 'rã ai vaikue Egito pyguare regua py, tyepy peu, temo ha'e ai vaikue py, ndapekueravei aguã rami.

²⁸ SENHOR penembojexavai 'rã peneakã vai reia py, napema'ẽveia ha'e pendepy'a eta reia py.

²⁹ Ha'e ramo kuaray mbyte teĩ pekuave'ẽ rei 'rã peovy, pytũ rupi oexa e'ŷ vy okuave'ẽ rei ov yva'e rami. Ha'e rami vy ndapeiko porãvei 'rã. Ha'e rami 'rãgue py peikoa pukukue re pejexavai 'rã, penemb'a'e rei-rei re imondapaa riae 'rã. Ha'e avave rei napendereraa jepeai 'rã.

³⁰ Peteĩ kunha re pemenda teĩ hexeve amboae ava onheno 'rã. Penderorã pejapo teĩ ha'e py ndapeikoi 'rã. Uva penhotŷ teĩ napemono'õi 'rã.

³¹ Penerymba toro ojukaa 'rã pexaa py, teĩ ho'okue ndape'ui 'rã. Pendegui penerymba mburika'i re imondaa 'rã, ha'e ndojevyvei 'rã pendea py. Penerymba kuery vexa'i ogueraa ukapaa 'rã penderovaigua kuery pe. Ha'e avave rei napendereraa jepeai 'rã.

³² Pendera'y ha'e penderajy kueryomboaxapaa 'rā amboae regua kuery pe. Ha'e nunga penderexa py ae pexa rire penema'endu'aa rupi pejexavai rei 'rā ára nhavō. Ha'e rami teĩ pendepo py mba'eve ndapejapo kuaai 'rā.

³³ Pendeyvy rupi pemba'epoague gui mba'emo aju oiko va'ekue ma peteĩ va'e regua kuery peikuaa e'ŷ va'e ho'upa 'rā. Ha'e vy penembojexavai ha'e penembojero'a rei 'rā ára nhavō.

³⁴ Ha'e ramo peneakā vaipa 'rā mba'emo vai ete pexa rire.

³⁵ SENHOR penembojexavai 'rā ai vaikue karu penerenapy'ã ha'e peneretyma re oĩ va'e py. Ha'e va'e gui ma ndapekueravei 'rā, pendepy guive pendeapte peve.

³⁶ — Ha'e gui SENHOR pendereraa uka 'rā penderuvixaverā pemoĩ va'ekue reve, pexa va'ety e'ŷ regua kuery pe, neĩ peẽ neĩ penderu kuery ma voi ndapeikuaii va'e regua pe. Ha'e py pendekuai 'rā amboae tuuete kuery yvyla ha'e ita gui rive ojapo pyre pe.

³⁷ Ha'e javi regua ikuia rupi SENHOR pendereraa ukaague rupi ha'e kuery onhemondyi 'rā pendegui, pendere ijayvu ha'e pendejojai rei 'rā okuapy.

³⁸ Mba'ety rupi mba'emo ra'yī penhotŷ reta teĩ mbovy'i 'rā pemono'õ, tuku ho'upa ramo.

³⁹ Uva voi penhotŷ reta vy pepena porã'i teĩ ndapey'ui 'rā hykue, neĩ napemono'õi 'rā hi'a, haxo'i ho'upa ramo.

⁴⁰ Pendeyvy ha'e javi rupi azeitona'y ikuai teĩ azeite ndaperekoi 'rā pendejee peikyty aguã, hi'a okuipa rā.

⁴¹ Pendera'y ha'e penderajy kuery perekotei teĩ pendereve ndopytai 'rā, escravo-rā ogueraapaa rā.

⁴² Pendeyvy re yvyla ikuai ha'e ijaju okuapy va'e tuku-karu ho'upa 'rā.

⁴³ Penembyte py amboae regua ikuai va'e yvateve 'rā oje'oivy, ha'e rā peẽ ma pene'yvŷive 'rā peje'oivy.

⁴⁴ Ha'e kuery mba'emo oiporuka 'rā pendevy, teĩ peẽ ma ndaperekoi 'rā ha'e kuery pe peiporuka aguã. Ha'e kuery ikuai 'rā peneakā, ha'e rā peẽ ma peiko 'rā huguai.

⁴⁵ Kova'e ayvu vai ha'e javi ou 'rā pende'áry. Penembojexavai rei 'rā, pendere ojeupitypa vy penemokanhymba peve, SENHOR Penderuete napenhe'ẽ rendui rire, pendevy ojapo uka ha'e ayvu oeja va'ekue ndapejapo guive.

⁴⁶ Penembyte py mba'emo oiko va'e opyta 'rā mba'emo kuaa ukaarā ha'e hexa pyrā, ha'e peneramymino kuery pe voi, raka'e rā peve guarā.

⁴⁷ — Mba'eta SENHOR Penderuete perovy'a ha'e peayvua rupi ve'ŷ ixupe peiko, opa mba'e perekotei,

⁴⁸ ha'e rire karuai, yuvei, pire reia ha'e opa mba'e oataa py 'rā peiko, penderovaigua kuery SENHOR ombou va'e pe ae. Pendeaжу'y re ha'e omoõ 'rā kanga ferro guigua penemomba peve.

⁴⁹ Pendere SENHOR ombou 'rā peteĩ regua kuery mombyry gui. Ha'e ramo yvy apy gui 'rā ou pojava taguato oveve ouvy va'e rami. Neĩ ha'e va'e kuery ayvu ma voi napendu kuaai 'rā.

⁵⁰ Ha'e kuery ngova py oexa uka 'rā opoxya, neĩ peẽ kuery va'e regua tujakue'i omboete va'e'ŷ, neĩ kunumigue'i ma voi nomboaxyi 'rā.

⁵¹ Ha'e kuery ho'u 'rā penerymba ra'y kuery ha'e pendeyvy gui mba'emo aju oiko va'ekue, omokanhymba peve. Ndoejai 'rā ha'yigue'i, uva rykue, azeite, neĩ penerymba vaka ha'e vexa'i ta'y'i aguã, omomba ete peve.

⁵² Peneretā ikuai va'e ojokopa 'rā, pendeyvy ha'e javi rupi kora yvateve ha'e hatāve va'e pejeroviaague oitypa peve. Peneretā ikuai va'e ojokopa 'rā, pendeyvyrā SENHOR Penderuete ome'ẽ va'ekue ha'e javi rupi.

⁵³ Penderovaigua kuery pendejokopaa py penemoĩ vai ete ramo pe'u 'rā kyrigue perekotei va'ekue, pendera'y ha'e penderajy kuery SENHOR Penderuete pendevy ome'ẽ va'ekue ro'okue ae.

⁵⁴ Avakue penembyte py porayvuve ha'e ojou porãvepy ikuai va'e teĩ hakate'ŷ 'rā guyvy, gua'yxy oayvu va'e, ha'e gui gua'y kuery okuave va'e pe,

⁵⁵ mba'eta ha'e kuery pe nomboja'oxei 'rã gua'y ha'e guajy kuery ro'okue ha'e ae ho'upa aguã, mba'eta tetã ha'e javi hovaigua kuery ojokopa ramo ixupe neĩ mba'eve'i ndopytai, oĩ vaia py ombojexavai rire.

⁵⁶ Ha'e kunhague penembyte py porayvuve ha'e ojou porâvepy ikuai va'e teĩ, porayvu ha'e ojou porâvepy vy neĩ yvy re nopyrõi va'ekue teĩ hakate'ŷ 'rã ome oayvu va'e, opi'a ha'e omemby pe,

⁵⁷ mba'eta hakate'ŷ 'rã omemby ryrukue ha'e ho'okue re, ha'e ae nhemi rupi ho'upaxe opa mba'e oata ramo, mba'eta tetã ha'e javi hovaigua kuery ojokopa vy ombojexavai ete 'rã.

⁵⁸ Xapy'a rei kova'e lei kuaxia para re oĩ va'e pejapo aguã napemoĩ, ha'e SENHOR Penderuete rery hexakãmba va'e renonde ndapejererokyjevi ramo

⁵⁹ pendere SENHOR ombou 'rã mba'eaxy vaikue, peneramymino kuery re guive. Ha'e va'e mba'eaxy vaikue ma tuvixa ha'e opa voi va'erã e'ŷ.

⁶⁰ Ha'e vy penemoingo axy 'rã mba'eaxy vaikue Egito pyguare regua pekyjea py. Ha'e ramo pendere ju 'rã oja oiny.

⁶¹ Pende'áry SENHOR ombou avi 'rã mba'eaxy ha'e mba'emo vaikue kova'e kuaxia lei oĩa re ipara noĩ va'e voi, penemokanhymba peve.

⁶² Ha'e ramo mboapy'i ete 'rã pendekuai, yva re jaxy-tata rami pendereta va'ekue teĩ, SENHOR Penderuete napenhe'ẽ rendui rire.

⁶³ SENHOR pendererovy'a vy penemoingo porã ha'e penemboetave heravyague rami ae ju ovya'rã penemokanhymbaa rupi, penemomba peve. Yvy penderekorã peoa va'e gui pendepe'apa 'rã.

⁶⁴ SENHOR penemoaĩmba 'rã ha'e javi regua mbyte rupi, yvy apy guive hovai re peve. Ha'e py ma peiko 'rã amboae tuuete peikuaa e'ŷ va'ekue pe, neĩ penderu kuery ma voi ndoikuuai va'ekue pe. Ha'e vy pembojerovia 'rã yvyra ha'e ita guigua rive.

⁶⁵ Ha'e gui neĩ ha'e va'e regua ikuairupi pendekuaia py ndapepytu'ui 'rã, neĩ pendepy optytu'u aguã ma voi ndapejoui 'rã, mba'eta ha'e py SENHOR ombou 'rã pendepy'a oryryipa, penderexa kangypa ha'e penenhe'ẽ py pe'a rive aguã.

⁶⁶ Penderekove okanhy rai'i 'rã, penerenonde nhimbo py omoxã mbyre rami. Ara py ha'e pyávy pekyjepa 'rã, ndapeikovei aguã re pepêxaa py.

⁶⁷ Ko'ëgue aipopeje 'rã: "Pytû ma va'e rire ha'eve 'rãgue!" Ha'e gui pytû'i jave ma "Aikore! Ko'ëmba ma va'e rire ha'eve 'rãgue!" peje 'rã pekuapy, mba'eta pendepy'a re pendu 'rã pekyje reia, ha'e penderexa py nhomondyipa rei va'e pexa vy.

⁶⁸ SENHOR ojapo 'rã Egito katy kanoã guaxu py pendereraa jevy aguã, ha'e tape pendevy "Ndapeovei ma 'rã" he'iague rupi teĩ. Ha'e py ma penhevendexe 'rã penderovaigua kuery escravo-rã avakue ha'e kunhague, teĩ ndoikoi 'rã pendejoguaarã — he'i Moisés.

Irundykuea ma Moisés ijayvuague

29

Heta va'e kuery reve Nhanderuete guexeve guarã ojapo pyauague

¹ Kova'e ayvu ma Moisés rupi SENHOR guexeve guarã Israel kuery reve ojapo va'ekue Moabe yvy re, ha'e kuery pe Horebe yvyty re oeja va'ekue áryve.

² Ha'e rami vy Moisés Israel kuery ha'e javi oenoĩmba vy aipoe'i:

— Peẽ kuery pexapa va'ekue Egito yvy re SENHOR ojapoague ha'e javi. Pexaa py ojapo Faraó re, hembiguai kuery ha'e ijyvy ha'e javi re.

³ Hexa pyrã tuvixa va'e penderexa py ae pexa va'ekue, mba'emo kuaa ukaarã ha'e iporã ete va'e.

⁴ Ha'e rami teĩ aŷ peve nome'ëi pêvy penekuraxõ py pejapyxaka ete aguã, neĩ penderexa py pexa aguã, neĩ pendeapyxha py mba'emo pendu aguã.*

⁵ Aipoe'i: "Quarenta ma'etŷ re tekoa e'ŷa rupi xee roguerekovo jave pendeao na'inhymai, neĩ pendepy regua ma voi nda'ivaipai.

* 29:4 Romanos 11:8

⁶ Mbojape ndaperekoi va'ekue pe'u va'erã, ha'e vinho neĩ iro va'e voi ndapey'ui, peikuaa aguã xee ae SENHOR Penderuete aikoa", he'i va'ekue.

⁷ Apy ju peju jave Hesbom pygua huvixa Seom ha'e Basã pygua huvixa Ogue voi ou nhandere opu'ã aguã, teĩ nhande kuery jaity karamboae.

⁸ Ha'e kuery yvykue re nhandepo'aka vy nhamboaxa Rúben kuery peguarã, Gade ha'e Manassés kuery pe.

⁹ Ha'e nunga rupi pendu porã ke kova'e ayvu guexeve guarã ojapo pyre regua. Pejapopa ete, peiko porã aguã opa mba'e pejapoa py.

¹⁰ — Ha'e gui aÿ peẽ kuery ha'e javive pene'aĩ SENHOR Penderuete renonde py: peẽ kuery va'e regua huvixa kuery, tujakueve ha'e yvatekueve, avakue Israel kuery regua ha'e javive,

¹¹ ha'e gui pendera'y ha'e penderajy kuery, pendera'yxy ha'e amboae regua pendekuaia rupigua kuery, pendevy yxakã ayaaty ha'e yy reruaty kuery voi,

¹² pendejee pemoĩ aguã SENHOR Penderuete guexeve guarã ojapo va'ekue rupi pendekuai aguã, ha'e aÿ pendevy oura reve ijayvua rupi.

¹³ Ha'e rami ojapo aÿ gui ojeupe guarã penemoingo aguã, ha'e Penderuete oiko aguã, pendevy ijayvuague rami vy, ha'e peneramoĩ kuery Abraão, Isaque ha'e Jacó pe ouraague rami.

¹⁴ Ha'e gui peẽ kuery peguarã anho e'ÿ guĩ rami Nhanderuete reve guarã ajapo aura reve.

¹⁵ Aÿ apy SENHOR Nhanderuete renonde py pene'aĩ va'e reve, ha'e gui aÿ apy nhandereve ikuai e'ÿ va'e kuery reve voi.

¹⁶ — Mba'eta peikuaa ae ma Egito yvy re nhandekuai jave, ha'e gui yvy regua kuery yvy mbyte rupi jaaxa jave guare ha'e javi.

¹⁷ Pexa ha'e kuery pegua ojeguarua, mba'emo ra'angaarã yvyra ha'e ita gui ojapo va'ekue. Pexa avi ha'e kuery mbyte rupi prata ha'e ouro guigua oguereko va'e,

¹⁸ ha'e rami vy peẽ kuery mbyte rupi oiko e'ÿ aguã neĩ peteïve ava, kunha neĩ hoo pygua kuery, neĩ peẽ kuery va'e regua ma voi opy'a re omoĩ va'e SENHOR Nhanderuete gui ojepe'a vy yvy regua kuery ruete pe rive oiko aguã, peẽ kuery mbyte rupi oiko e'ÿ aguã mba'emo vai rapo, ha'e va'e gui henhoĩ aguã moã vaikue iro va'e.*

¹⁹ Avave rei kova'e ayvu vai oendu vy aipote'i eme ha'e ae opy'a py ojereroayvu porãa rupi rive: "Xee aiko porã 'rã, xepy'a py mba'emo vai oĩ va'e rupi aiko teĩ", te'i eme, mba'eta oka'u ma teĩ oy'uvexea oendu va'e rami ijayvu.

²⁰ Ha'e va'e ma SENHOR ndoperdoai 'rãe. Ha'e rami 'rãgue py ha'e va'e ava pe SENHOR oexa uka 'rã ipoxya ha'e nda'evei etea. Hi'áry ombou 'rã ayvu vai kova'e kuaxia re ipara oiny va'e ha'e javi, ha'e SENHOR ombogue 'rã hery yva guy rupi gui.

²¹ Ha'e va'e ma SENHOR omboja'o 'rã Israel kuery regua ikuaiia gui ojexavai aguã, ayvu vai kova'e kuaxia re ombopara pyre ha'e javi rami vy.

²² — Ha'e ramo raka'eve rã ikuai va'e kuery omombe'u 'rã okuapy, peẽ kuery rire pendera'y ju ikuai va'e, ha'e amboae regua yvy mboae mombyry gui ou va'e voi. Mba'eta oexa 'rã kova'e yvy re mba'emo vai ha'e mba'eaxy vaikue oikoague, nhomoingo axyarã SENHOR ombou va'ekue.

²³ Mba'eta pendevy ha'e javi rupi okaipa 'rã enxofre ha'e juky ho'aague rami. Mba'eve rei nonhotýai 'rã, neĩ ndai'avei 'rã, neĩ ka'aguy ma voi ndoikovei 'rã, tetã Sodoma ha'e Gomorra, Admá ha'e Zeboim SENHOR ojou vai vy opoxya rupi omombaague rami.

²⁴ Ha'e ramo ha'e javi regua aipoe'i 'rã okuapy: "Mba'e re nda'u SENHOR guĩ ramigua ojapo peva'e yvy re? Mba'e nunga káuxa py tu nami ete oexa uka opoxya?"

²⁵ he'i okuapy ramo ombovaia 'rã: "Mba'eta SENHOR tamoĩ kuery Ruete gui ha'e kuery herexaraipa rire, ha'e Egito yvy gui oguenoë vy guexeve guarã ojapo va'ekue gui ojepe'a ramo.

²⁶ Ha'e rami ojepe'a vy amboae tuuete kuery pe ikuai, ombojeroviapa rei okuapy, ha'e va'e tuuete ha'e kuery ndoikuaii va'ekue ri, ha'e SENHOR nombojerovia ukai teĩ.

* 29:18 "Mba'emo vai rapo" he'ia ma nhombojejavy va'e re ijayvu vy (Hebreus 12.15).

²⁷ Ha'e nunga rupi ae kova'e yvy rovai SENHOR poxya hendy vy ombou ayvu vaipy kova'e kuaxia re ipara oiny va'e ha'e javi.

²⁸ Ha'e rami vy SENHOR opoxya reve oipe'apa ijyvy gui. Ojou vai ete ha'e ombopagaxea oendu vy omombopa yvy mboae katy, aÿ jaexaa rami ae", he'i 'rã ombovai vy.

²⁹ — Mba'eta mba'emo jaikuua e'ÿ va'e ma SENHOR Nhanderuete pegua ae. Ha'e rã mba'emo oikuua uka va'ekue ma nhandevy ha'e nhandera'y kuery pegua raka'e rã peve guarã, kova'e lei re ayvu oï va'e jajapopa aguã.

30

Omboaxy jevy aguã re ijayvuague

¹ — Raka'eve rã ha'e nunga ha'e javi ou 'rã pendere, ayvu porã ha'e ayvu vai, penerenonde amombe'u va'ekue voi. Ha'e ramo yvy regua kuery ikuia mbyte SENHOR Penderuete penemomboague py penema'endu'a ju 'rã ha'e nungakue re.

² Ha'e gui peë ha'e pendera'y kuery reve pejevypa ju 'rã SENHOR Penderuete pe, penekuraxõ ha'e penenhe'ë ha'e javi py. Pejapyxaka ju 'rã ijayvua re, aÿ ajapo uka va'e rami vy.

³ Ha'e ramo SENHOR Penderuete penemboaxy nho vy penemoingo porã ju 'rã. Ha'e vy teïgue ju 'rã penemboatypa heruvy yvy regua kuery mbyte penemoaïague gui.

⁴ Yva mamo rã ijapy rupi penemoxë va'ekue teï ha'e gui voi SENHOR Penderuete penemboatypa 'rã heruvy, ha'e gui ae 'rã pendereru.

⁵ Ha'e vy SENHOR Penderuete pendereraa 'rã yvy peneramoï kuery ikuaiague py ae, peë kuery ju pendekuai aguã. Ha'e vy penemoingo porã vy peneramoï kuery gui voi penemboetave 'rã.

⁶ Ha'e vy penekuraxõ gui SENHOR Penderueteomboi 'rã mba'emo vai oï va'e, peneramymino kuery kuraxõ gui voi, penekuraxõ ha'e penenhe'ë ha'e javi py peayvu aguã SENHOR Penderuete, peikove aguã.

⁷ Ha'e gui penderovaigua kuery áry ae 'rã SENHOR Penderuete ombou kova'e ayvu vai ha'e javi, pendere ija'e e'ÿ va'e penembojexavaiare kuery re ju oiko aguã.

⁸ Ha'e rami rire SENHOR ijayvua re pejapyxaka ju vy pejapo 'rã ojapo uka va'ekue aÿ xeayvua ha'e javi.

⁹ Ha'e ramo SENHOR Penderuete ojapo 'rã pendepo py mba'emo pejapo va'e oiko porã aguã rami, pendera'y ha'e penderajy kuery itui'ia py, penerymba kuery ta'y'ia py, mba'ety rupigua hi'a porã aguã pendekuai porã aguã rami. Mba'eta teïgue ju SENHOR pendererovy'a 'rã penemoingo porã aguã, peneramoï kuery oguerovy'aague rami,

¹⁰ xapy'a rei SENHOR Penderuete ayvu re pejapyxaka vy ojapo uka va'ekue ha'e ayvu kova'e kuaxia re ipara oiny va'e ha'e javi pemoï porã ramo, ha'e penekuraxõ ha'e penenhe'ë ha'e javi py SENHOR Penderuete peguarã ju pejeko rerova ri ramo.

¹¹ — Mba'eta kova'e ayvu aÿ pendevy amboaxa va'e ma haxy vaipa va'e'ÿ, neï pendegui mombyry e'ÿ oï.

¹² Mba'eta yva re e'ÿ oï, aipopeje aguã: "Mava'e nda'u oo 'rã yva re, nhandevy ogueru vy omombe'u aguã, jajapo kuaa aguã rami?" peje e'ÿ aguã.

¹³ Neï ye'ë rovai re e'ÿ guive ayvu oï, aipopeje aguã: "Mava'e nda'u nhanderekovia oaxa 'rã yy rovai re ogueru vy nhandevy omombe'u aguã, jajapo kuaa aguã?" peje e'ÿ aguã.

¹⁴ Mba'eta kova'e ayvu ma penda'i py oï, pendejuru py pemombe'u kuaa, ha'e pendepy'a py peikuua va'e ae, pejapo kuaa aguã.*

Tekove e'ÿ vy manoia oiporavo ukaague

¹⁵ — Ma'ë, aÿ penerenonde xee amoï tekove mba'emo porã reve, ha'e gui manoia mba'emo vai reve.

¹⁶ Xapy'a rei aÿ kova'e ayvu ajapo uka va'e pemoï porã vy, ha'e SENHOR Penderuete peayvu vy ixuguigua tape rupi peiko, ha'e gui ojapo uka va'ekue, ayvu ha'e 'arandua

* 30:14 Romanos 10.5-10

rupigua pemoï porã ri vy peikove ha'e penderetave 'rã, mba'eta SENHOR Penderuete penemoingo porã 'rã yvy pendekuai aguã peoague py.

¹⁷ Ha'e rami tei xapy'a rei pendep'y'a py pejepe'a vy ndapejapyxakaxevei 'rã, ha'e pendererovaa rã tuuete mboae pemboete, ha'e kuery pe ju peiko aguã ramo,

¹⁸ ha'e ramo aÿ amombe'u porã ma voi anhetê pemano 'rã. Napendekuai arei 'rã yvy Jordão yakã rovai re peaxaague py.

¹⁹ Aÿ qui ma aenoï yva ha'e yvy penderovai xeayvua moma'endu'aarã. Mba'eta penerenonde amoï tekove ha'e manoia, ayvu porã ha'e ayvu vai. Peiporavo ha'vy tekove peikove aguã, peë ha'e pendera'y kuery.

²⁰ Peayvu tema SENHOR Penderuete. Pejapyxaka ijayvua re, hexeve peiko aguã. Mba'eta ha'e rami vy 'rãe peikove ha'e peiko puku yvy peneramoï kuery pe SENHOR oura reve ome'ë aguã re ijayvuague py, Abraão, Isaque ha'e Jacó pe ae — he'i Moisés.

Opa vygua omombe'uague

31

Moisés rire Josué ju joguerekoarã oiko aguã re ijayvuague

¹ Pova'e ayvu Moisés omombe'u Israel kuery ha'e javi pe.

² Ha'e vy aipoe'i:

— Kova'e ára ma cento e vinte ma'etÿ ma areko. Aÿ nda'eveei aë ha'e aike ju aguã, SENHOR ae xevy ijayvuague rami: "Ndee ndereaxai 'rã Jordão yakã", he'i.

³ SENHOR Penderuete ae oaxa 'rã penerenonde rupi. Ha'e ae omomba 'rã amboae regua kuery penerenonde gui, peë kuery ju pendekuai aguã. Josué ma oaxa 'rã penerenonde rupi, SENHOR ijayvu ma voiague rami vy.

⁴ Ha'e kuery re SENHOR ojapo 'rã amorreu pygua huvixa Seom ha'e Ogue re ojapoague rami. Ha'e va'e kuery ma omomba va'ekue, ijyvy voi.

⁵ Ha'e gui penerenonde ikuai va'e kuery ma pendepo py SENHOR omboaxa ma ramo ha'e kuery re pejapo 'rã pëvy ajapo uka ma voiague ha'e javi rami vy.

⁶ — Penembaraete ha'e pendep'y'a guaxu. Pekyje eme, ha'e kuery pexa vy penhemondyi eme guive, mba'eta SENHOR Penderuete ae oo 'rã pendereve. Napenderejai 'rã, napenepytyvõ e'ÿi 'rã guive — he'i.*

⁷ Ha'e gui Moisés oenoï Josué, ha'e vy Israel kuery ha'e javi renonde py aipoe'i ixupe:

— Nembaraete ha'e ndepy'a guaxu ke. Mba'eta kova'e kuery reve reo 'rã yvy SENHOR oura reve nhaneramoï kuery pe ome'ë aguã re ijayvuague py. Ha'e rami vy ndee reraa 'rã ha'e py ikuai aguã.

⁸ SENHOR ae 'rã oo nerondenre rupi. Ha'e ma oiko 'rã ndereve. Nanderejai 'rã, naneipytyvõ e'ÿi 'rã. Ekyje eme, enhemondyi eme guive — he'i.

Sete ma'etÿ ojeupity nhavõ heta va'e kuery pe lei ogueroayvua aguã re ijayvuague

⁹ Kova'e lei ae Moisés ombopara va'ekue. Ha'e gui Levi ramymino kuery sacerdote ikuai va'e pe ju omboaxa, SENHOR guexeve guarã ojapo va'ekue ryru reraaty kuery pe, ha'e Israel kuery mongetaaty kuery ha'e javi pe.

¹⁰ Ha'e kuery pe Moisés ojapo uka vy aipoe'i:

— Sete ma'etÿ opa'ia py kuerei, ma'etÿ oreveague pemboguepa aguã ojeupity nhavõ, ngaru oguy'i py pendekuai aguã regua oiko jave,

¹¹ Israel kuery ha'e javi ojexa uka 'rã okuapy SENHOR nguete renonde. Ha'e va'e jave py peroayvu 'rã kova'e kuaxia para lei oña va'e, henda SENHOR oiporavoague py ae.

¹² Ha'e rami vy pemboatypa 'rã heta va'e kuery: avakue, kunhague, kyrigüe ha'e amboae regua penderekao rupi ikuai va'e, ha'e kuery oendu vy oikuua aguã, ha'e SENHOR Penderuete renonde ojererokyjea rupi ikuai aguã, ha'e ayvu kova'e lei regua ojapopa aguã,

* 31:6 Hebreus 13.5

¹³ pendera'y kuery lei oikuua e'ŷ teri va'eri oendu vy oikuua avi aguã SENHOR Penderuete renonde ojererokyjea rupi ikuai aguã, Jordão yakã rovai re yvy peoague py peikoa pukukue re.

Raka'eve rã Israel kuery nonhe' ñ renduvei 'rãa re ijayvuague

¹⁴ Ha'e gui SENHOR aipoe'i Moisés pe:

— Ma'ë, ovaë rai'i ma remano aguã ára. Enoí ha'vy Josué, ha'e vy pejexa uka 'rã oguy nhemboaty oïaty py, ixupe aeja aguã ojapo va'erã — he'i ramo Moisés ha'e Josué jogueraa vy ojexa uka oguy nhemboaty oïaty py.

¹⁵ Ha'e py SENHOR ojekuaa arai rupi, hokë áry rupi optya oiny.

¹⁶ SENHOR aipoe'i Moisés pe:

— Ma'ë, ovaë rai'i ma neramoí kuery reve repytu'u aguã. Ha'e va'e rire kova'e kuery opu'ã vy itavy rei 'rã okuapy, amboae regua tuuete kuery pe 'rã ikuai, yvy oje'oiague mbyte py. Ha'e rami vy xegui ojepe'apa 'rã oje'oivy, xereve guarã ha'e kuery reve ajapo va'ekue ombovaipa vy.

¹⁷ Ha'e va'e jave py xepoxya hendy 'rã ha'e kuery rovai. Ha'e vy naipytyvõvei 'rã, ha'e kuery pe ndajexa ukai 'rã omombaa aguã. Ha'e kuery áry mba'emo vai ha'e ikuai axy aguã ou reta ramo ijayvu 'rã: “Nhanderuete orembyte py noïvei ramo e'ŷ teve ha'e rami ete oiko orere?” he'i 'rã okuapy.

¹⁸ Ha'e va'e jave anhetë ete ha'e kuery pe ndajexa ukai 'rã, opa marã rei ikuaiague re, amboae regua tuuete kuery re rive ovapa rire.

¹⁹ Ha'e ramo pembopara kova'e mboraei pendejeupe ae, ha'e pembo'e Israel kuery ha'e javi oporaei aguã rami, Israel kuery rovai xeayvua moma'endu'aarã optya aguã.

²⁰ Mba'eta xee araa 'rã xevygua kuery yvy kamby ha'e ei oata e'ŷa py, tamoí kuery pe aura reve ame'ë aguã re xeayvuague rami vy. Ha'e ramo ha'e kuery okaru porã vy hevyatã ha'e ikyrapa 'rã. Ha'e gui ma ovapa 'rã amboae regua tuuete kuery re xembopoxy aguã rami, xereve guarã ajapo va'ekue ombovaipa vy.

²¹ Ha'e gui opa marã ikuai axy ha'e ojexavai ramo, ha'e jave py kova'e mboraei rupi ima'endu'a 'rã mba'e re pa ha'e kuery rovai aikoa re, mba'eta hamymino kuery oporai riae 'rã. Mba'eta aikuaa ha'e kuery py'a re aŷ voi oï va'e ha'e javi, yvy aura reve ame'ë aguã re xeayvuague py araa e'ŷ re ma voi — he'i.*

²² Ha'e va'e árave Moisés ombopara kova'e mboraerã ha'e javi, ha'e vy ombo'e Israel kuery oporaei aguã.

²³ Ha'e gui Num ra'y Josué ojapo va'erã re SENHOR ijayvu vy aipoe'i:

— Nembaraete ha'e ndepy'a guaxu ke, mba'eta ndee reraa 'rã Israel kuery yvy ame'ë aguã re aura reve xeayvuague py. Ha'e ramo xee aiko 'rã ndereve.

Hyru yvýry kuaxia lei oïa omoïa aguã re ijayvuague

²⁴ Kuaxia re Moisés ombopara ayvu kova'e lei regua ha'e javi.

²⁵ Ijayvu guive levita kuery SENHOR guexeve guarã ojapo va'ekue ryru reraa kuery pe. Ha'e vy aipoe'i:

²⁶ — Pejopy ke kova'e kuaxia lei oïa, ha'e pemoí porã SENHOR Penderuete guexeve guarã ojapo va'ekue ryru oïaty yvýry, ha'e py itui riae aguã mba'e re pa penderovai oikoa kuaa ukaarã.

²⁷ Mba'eta xee aikuaa ae ma pendevai reia ha'e peneakã ratãa. Mba'eta aŷ peẽ kuery reve xee aiko teri jave SENHOR rovai rupi pendekuai rire, amano rire katuve ma ha'e ramive 'rã pendekuai.

²⁸ Pemboatypa ke xerenonde rupi peẽ kuery regua nhomongoeta va'ety ha'e penderuvixa kuery, ha'e kuery apyxa py xeayvu aguã pova'e ayvu rupi. Ha'e vy xee aenoí yva ha'e yvy ha'e kuery rovai xeayvua moma'endu'aarã.

²⁹ Mba'eta xee aikuaa porã amano rire opa marã rei pendekuai 'rãa. Pejepe'apa 'rã tape xee rombo'eague gui. Ha'e rami vy opaa ára py kova'e ayvu vai penderupity 'rã, mba'eta

* 31:21 “Kova'e mboraei” he'ia ma 32 py oï.

SENHOR renonde pejapo vai, pendepo py pejapo va'ekue py peko a'ã rei rire, ipoxy aguã rami.

Moisés mboraerā re nhombo'eague

³⁰ Ha'e ramo Israel kuery ha'e javi pe Moisés ombo'e pov'a'e ayvu mboraerā:

32

- ¹ — Yva, xeayvu rã ejapyxaka ke ndeapyxa py.
Yvy, endu ke xejuru gui ayvu oẽ va'e.
- ² Xe'arandua ma opa rupi too oky otykya rami,
xeayvua tanhomoingo porã yxapy yvy omoakŷa rami,
nhuū áry oky rayvi'i, ha'e mba'ety áry rupi otykya rami.
- ³ Mba'eta amombe'u porâve 'rã SENHOR rery.
Amboyvate ete 'rã Nhanderuete.
- ⁴ Ha'e ma itaova! Ha'e ojapo va'e ma ha'evea ramigua meme,
oikoa ha'e javi rupi oexa uka gueko porãa.
Nhanderuete ma ojeroviapy, hexe noĩ 'rã mba'emo vai.
Heko porã va'e vy ha'evea rami joguereco.
- ⁵ Ha'e rã peẽ kuery ma hovai rupi pendekuai, ojeroviaa rupi e'ŷ.
Ha'e rami vy ta'y kuery regua e'ŷ ma peiko,
ha'e rã iove ramigua rive.
Peẽ kuery ma ha'eve e'ŷa rami pendekuai teko vai rupi.
- ⁶ Ha'e rami ete teve pemboekovia SENHOR pendererekao re,
inhakã porã e'ŷ ha'e oikuua e'ŷ rei va'e peiko va'e?
Ha'e'ŷ nda'u Penderu ojeupe guarã pendejoguaare,
penemoingoare ha'e penemombaraetea?
- ⁷ Penema'endu'a ke ára ymave rupi oiko va'ekue re,
peikuua pota na ma'etŷa oaxapa rei ma va'ekue rupi ikuai va'ekue re.
Peoporandu ke penderu kuery pe, ha'e ramo omombe'u porâve 'rã.
Penemongeta va'ety kuery pe peoporandu rã omombe'u avi 'rã.
- ⁸ Mba'eta Yvate ete va'e yvy regua ikuai aguã ome'ë-me'ë raka'e,
avakue ra'y kuery joegui omboja'o vy.
Ha'e va'e jave py oa'anga raka'e ha'e kuery rekoarã,
Israel ra'y kuery regua mbovy pa ikuia rami vy.
- ⁹ Mba'eta SENHOR pegua oĩ va'e ma ixupegua kuery,
Jacó kuery ae ikuai ixupegua regua.
- ¹⁰ Yvy ipirupa reia py ojou va'ekue ojeupe guarã,
peteñ henda tekao e'ŷa hi'âgue-'âgue nhendua py.
Ha'e vy ojoko herekovy vy opena ha'e kuery re,
opena porã imoiny guexa ra'yí re rami ae.
- ¹¹ Taguato minha gua'y kuery ombo'e vy
ha'e kuery áry rupi oveve oikovy va'e rami,
opepo oipyo vy ojopy imoiny vy opepo áry ogueraa va'e rami,
- ¹² ha'e rami ae SENHOR nhandererekao, ha'e anho'i.
Hexeve ndoikoi amboae regua tuuete.
- ¹³ Ha'e vy vyty áry rupi ojapo kavaju árygua rami oje'oi aguã rami.
Ojapo mba'ety rupi ikuai va'e gui okaru okuapy aguã rami,
ei itaova re ikuai va'e oipyte aguã, ha'e azeite itaty reia rupi ikuai va'e,
- ¹⁴ vaka kamby kekue, vexa'i kamby gui,
ha'e gui vexa ra'y kyrakue,
kavara ha'e kavara ava Basã py ikuai va'e gui,
trigo porâgueve va'e gui ae.
Ojapo uva rykue oy'u aguã rami, pytã porã va'e.

- ¹⁵ Ha'e rami teĩ hymba hembiayvu va'e ikyrapa ma vy opyvoi hexe.
 Ikyrapa, tuvixapa, oguerekopa ma vy
 hexaraipa Nhanderuete imoingoare gui,
 ndoiptavei itaova gueraa jepeare.
- ¹⁶ Mba'eta amboae regua tuuete re rive ha'e kuery oo vy ojapo SENHOR nda'evei etea
 oendu aguã rami,
 ojeguarupy omboetea py ombopoxy.
- ¹⁷ Anha kuery pe rive ome'ẽ okuapy mba'emo, Nhanderuete pe e'ŷ.
 Amboae regua tuuete ndoikuuai rei va'ety pe,
 tuuete ojapoa pyau va'ekue pe,
 tuu kuery omboete va'ety pe e'ŷ.
- ¹⁸ Hexaraipa okuapy itaova ha'e kuery re ta'y va'e gui,
 nguuite imoingoare gui ae hexarai.
- ¹⁹ Ha'e nunga SENHOR oexa vy nopenavei,
 ta'y kuery ha'e tajy kuery ombopoxy rire.
- ²⁰ Ha'e vy aipoe'i: "Ha'e kuery pe ndajexa ukavei 'rã.
 Aexa 'rã opaa py ha'e kuery re oiko va'e.
 Mba'eta ha'e kuery ma teko vai rupi ikuai va'erã ae,
 ta'y kuery ojeroviapy e'ŷ.
- ²¹ Ha'e rami vy nguuite pe rai'i ra'aga e'ŷ ikuai vy xeapo nda'evei etea aendu aguã rami,
 mba'emo ra'angaa pe rive ikuai vy xembopoxy.
 Ha'e nunga rupi xee ju ajapo 'rã ha'e kuery nda'evei etea oendu aguã rami peteĩ
 regua e'ŷ ikuai va'e arua py,
 inhakã porã e'ŷ va'e regua arekoaa py xee ajapo 'rã ha'e kuery ivai aguã rami.*
- ²² Mba'eta xepoxyaa rupi amoendy 'rã tata
 manoa guyve katy peve hendy va'erã.
 Ha'e va'e omomba 'rã yvy ha'e mba'ety ikuai va'e,
 yvyty guy rupi peve 'rã amoendy.
- ²³ Ha'e kuery rovai heta 'rã ambou mba'emo vai.
 Xeru'y amombo 'rã ha'e kuery re.
- ²⁴ Ha'e ramo okanhymba 'rã karuai gui,
 omano 'rã pire raku ha'e mba'eaxy vaikue gui.
 Ha'e kuery rovai ambou 'rã mymba haĩmba rei va'e,
 ha'e mboi vaikue yvy ku'i rupi onhembotyryry va'e.
- ²⁵ Oka rupi omanomba 'rã kyxé gui,
 ha'e rã ngopy rupi ma ho'apa 'rã nhemondyi gui,
 kunumigue ha'e kunhataigüe,
 kyrigüe'i okambu'i ha'e tujakue hi'a xiimba'i va'e voi.
- ²⁶ Xee aipoa'e 'rãgue opa rupi romoaĩmba aguã rami,
 ajapo 'rãgue pendere avave ima'endu'aa ve'ŷ aguã rami,
- ²⁷ va'eri xee ndaiptai penderovaigua kuery ov'y'a rei,
 penderovaigua kuery ojekore vy
 aipoe'i e'ŷ aguã: 'Nhandepo py ae jaity,
 SENHOR e'ŷ rima ha'e nunga ha'e javi ombou va'ekue', he'i okuapy e'ŷ aguã.
- ²⁸ Mba'eta xevygua kuery ma imongetaarã va'e'ŷ merami ikuai,
 ha'e kuery re noĩ 'arandu.
- ²⁹ Ha'e kuery ma hi'arandu va'e tamo ra'e ikuai!
 Ha'e rami va'e rire ma oikuaa 'rãgue ha'e nunga,
 oikuaa pota 'rãgue opa taa re.
- ³⁰ Mba'exa vy tu pete'i'i va'eri ha'e kuery va'e regua mil omondyi,

* 32:21 1 Coríntios 10.22, Romanos 10.19

- e'ŷ vy moko'i va'e dez mil omondyi.
 Ha'e kuery repyarã itaova oĩ va'ekue oeja ramo ae oiko ha'e rami,
 ha'e jopo py SENHOR omboaxa ramo.
- ³¹ Mba'eta hovaigua kuery pegua itaova ma nhande'itaova rami e'ŷ,
 nhanderovaigua eteve voi oikuaa.
- ³² Mba'eta ha'e kuery uvaty ma Sodoma py ikuai va'e ramigua,
 ha'e imba'ety ma Gomorra regua.
 Ha'e kuery uva ma veneno rami jojukaarã,
 ha'e ijaju va'e voi iro va'e meme.*
- ³³ Ha'e kuery uva rykue ma onhembotyryry va'e veneno rami iro va'e,
 mboi guigua rami ete nda'evei va'e.
- ³⁴ Ha'e rami aguã ma xejee e'ŷ ri ty'y amoĩ imoiny,
 mba'emo moĩ porãatý py rami?
- ³⁵ Mba'eta anhombopaga aguã rami aiko mba'emokue amboekovia vy,
 ha'evea ára py ha'e kuery onhepyxanga jave.
 Mba'eta ovaẽ rai'i ma ha'e kuery ojexavai aguã ára,
 ha'e kuery renonderã ou pojava."
- ³⁶ Mba'eta SENHOR oikuaa pota 'rã ojeupequa kuery re,
 ha'e vy omboaxy 'rã guembiguai kuery,
 ha'e kuery mbaraeteague opa ma ovya ha'e oexa vy,
 mba'eta ha'e kuery va'e regua nonhenduvei 'rã, escravo ha'e escravo e'ŷ va'e ma
 voi.*
- ³⁷ Ha'e ramo aipoe'i 'rã: "Mamo tu ikuai tuuete ramigua pemboete va'ekue,
 ha'e itaova re pejeroviaa va'ekue?
- ³⁸ Ha'e va'e tuuete kuery nda'u ho'u 'rã mba'emo kyra peme'ẽ va'e,
 ha'e oy'u 'rã vinho peme'ẽ va'e?
 Ha'e kuery ae ha'vy topu'ãmba penepytyvõ aguã,
 peẽ kuery penhemi atyrã ojeapo vy!
- ³⁹ Pexa ke aŷ, xee ae, xee anho'i aiko.
 Amboae regua tuuete ndoikoi, xee e'ŷ vy.
 Xee ma ajojuka ha'e anhomingo 'rã.
 Xee anhomingo axy ha'e anhomonguera ju 'rã.
 Ndoikoi guive xepo py ho'a va'ekue reraa jepearã.
- ⁴⁰ Yvate katy xepo audi reve
 xee ae rekove opa va'erã e'ŷ rupi aura vy aipoa'e:
- ⁴¹ Xekyxe hendy rei va'e aĩmbe'e,
 ha'e xepo'akaa rupi aikuaa pota vy
 ambopaga 'rã xerovaigua kuery,
 amboekovia 'rã xere nda'ija'ei va'e kuery ojapoague.
- ⁴² Ajapo 'rã xeru'y tuguy omoẽ aguã rami,
 (xekyxe voi omomba 'rã ho'o,)
 omanogue ha'e ombo'a pyre kuery ruguy,
 penderovaigua kuery akã hi'a vuku va'e regua voi", he'i.
- ⁴³ Amboae regua kuery, perovy'a ke ixupequa kuery,
 mba'eta SENHOR nhombopaga 'rã guembiguai kuery ruguy omoẽa ague re,
 ombopaga 'rã hovaigua kuery,
 ha'e vy oiky'a'o ju 'rã ojeupequa kuery yvy.*
- ⁴⁴ Ha'e va'e ayvu mboraei regua ha'e javi Moisés omombe'u heta va'e kuery remien-durã, Num ra'y Josué reve.

* 32:32 Uvaty re ijayvua py Israel kuery re ae ijayvu, ha'e rã uva'a ma ha'e kuery reko porãrã va'ekue.
 Romanos 12.19, Hebreus 10.30

* 32:43 Romanos 15.10, Hebreus 1.6

* 32:36

⁴⁵ Ha'e va'e ayvu rupi Israel kuery pe Moisés ijayvupa ma rire

⁴⁶ aipoe'ive ju:

— Penekuraxõ re pemoï porã 'rã ayvu aÿ penembyte amombe'u va'e ha'e javi, pendera'y kuery pe pejapo uka aguã kova'e lei re ayvu oï va'e ha'e javi.

⁴⁷ Mba'eta pova'e ma pendevy ayvu rive e'ÿ, ha'e rã penemoingovearã ae. Pova'e ayvu rupi vy ae 'rã peiko pukuve pendevyvrã Jordão yakã rovai re peaxa ma vy pendekuaia py.

Moisés rekove opa ma aguã ára pyguare

Nebo yvyty apyte gui Moisés Canaã yvy oexa aguã re ijayvuague

⁴⁸ Ha'e va'e árave SENHOR ijayvu Moisés pe. Ha'e vy aipoe'i:

⁴⁹ — Eẽ ke Abarim yvyty rupi Nebo yvyty peve. Ha'e va'e ma Moabe yvy re oï Jericó rexei'i katy. Ha'e vy rexa 'rã Canaã yvy, Israel kuery rekoarã ame'ẽ va'ekue.

⁵⁰ Ha'e gui yvyty reëague áry ae 'rã remano, ha'e rã nenhe'ẽ heraa 'rã neramoï kuerya py, nderyke'y Arão Hor yvyty py omano rã inhe'ẽ tamoï kuerya py heraa ague rami avi.

⁵¹ Mba'eta peẽ naxenhe'ẽ rendui va'ekue Israel kuery mbyte, Meribá yakã katy'i Cades re, Zim tekoa e'ÿa py. Mba'eta Israel kuery mbyte py ndapeikuua ukai iky'a e'ÿ va'e aikoa.

⁵² Ha'e rami vy yvy nerondenre oï va'e rexa rive 'rã, nerevaẽi 'rã Israel kuery yvyrã ame'ẽ va'ekue py.

33

Moisés jogueroayvu porãague

¹ Po rami ma Nhanderuete remimbo'e Moisés omano ta jave ogueroayvu porã Israel kuery.

² Ha'e vy aipoe'i:

— SENHOR ma Sinai yvyty katy gui ou vy

ha'e kuery pe ojekuaa Seir katy gui ko'ëmba'i ouvya rami,
Parã yvyty guive hexakãmba ouvy.

Mbovy rei e'ÿ ojeupegua iky'a e'ÿ va'e kuery reve ou.

Oiporu kuaa regua re tata rami ojekuaa ha'e kuery pegua lei.

³ Anhetẽ ete ae ra'e reayvu heta va'e kuery.

Ndevyguia kuery iky'a e'ÿ va'e ndepo py meme ikuai.

Ndep yvy'iry ha'e kuery onhemboja okuapy vy
onhembo'e uka 'rã ndeayvua re.

⁴ Moisés ombopara va'ekue

Jacó guigua kuery peguarã lei.

⁵ Ha'e gui SENHOR ae oï guembiyvvu kuery ruvixarã,
ha'e kuery regua yvatekueve onhemboatya py,
Israel kuery regua ha'e javi reve.

⁶ — Rúben kuery ma tokuave, tomanomba eme.

Ha'e va'e regua avakue mbovy'i e'ÿ ta'ikuai.

⁷ Judá kuery renonderã ma po rami omombe'u:

— SENHOR, endu ke Judá kuery ojerurea,

epena heta va'e kuery ikuiaia py ju ojevy aguã rami.*
Ndepo py ke ejoguero'a ha'e kuery repya rupi,
eipytyvõ hovaigua kuery rovai rupi.

⁸ Ha'e gui Levi kuery va'e regua pe aipoe'i:

— Xeruete, Tumim ha'e Urim rupi ejekuaa uka ke
ndevyguia ava ojeroviapy va'e pe.

Ha'e va'e reko ma Massá py reikuua porã raka'e,

* 33:7 Judá kuery va'e regua ma heta va'e kuery renonde 'rã oje'oi joe opu'ã aguã katy (Números 2.9).

- ha'e Meribá yakã py ixupe ndeayvu ete.[†]
- ⁹ Ha'e va'e ma oxy ha'e nguu pe aipoe'i va'ekue
peteigueve oexa e'ýa rami,
neí guyvy kuery oexa e'ý va'ekue,
gua'y kuery re voi openaa rupi ndoikoi.
Ha'e rami 'râgue py ojee omoí porã ndeayvuague,
ha'e ndereve guarã rejapo va'ekue rupi anho oiko.[‡]
- ¹⁰ Ha'e vy ne'arandua re ombo'e oikovy Jacó kuery,
Israel kuery ombo'e ndeguigua lei re.
Oapy avi heakuã porã va'e rejou porã aguã,
mymba kuery voi oapy ndevygua altar áry.
- ¹¹ SENHOR, emoingo porã ke ha'e kuery imbaraete aguã,
erovy'a avi opo py ojapo va'e.
Ha'e rã emoingo axypa ha'e kuery re ija'e e'ý vy opu'ã rei va'e,
raka'eve rã opu'ã ve'ý aguã.
- ¹² Ha'e gui Benjamim kuery va'e regua pe ma aipoe'i:
— SENHOR rembiayvu oĩ porã ete 'rã hexeve.
Ára nhavõ SENHOR opena porã 'rã.
Ha'e ramo opytu'u 'rã ijyva áry rupi.
- ¹³ Ha'e gui José kuery va'e regua pe ma aipoe'i:
— SENHOR tomoingo porã pendeyvy,
yva gui ho'a va'e iporãgueve py,
yxapy ha'e yy yvy guy rupi oĩ va'e py guive,
- ¹⁴ kuaray omboaju va'e iporãgueve,
ha'e jaxy nhavõ hi'a va'e py,
- ¹⁵ ha'e gui yvyty ymave guare,
ha'e yvy'ã raka'eve rã peve oĩ va'e rupi henhoí porãgueve va'e py,
- ¹⁶ yvy gui oiko va'e iporãgueve va'e ha'e javi py,
yvyra'a iporãgueve va'e py voi.
Ha'e nunga ha'e javi tou José kuery re,
tyvy kuery yvateve va'e rã.[§]
- ¹⁷ Ha'e kuery ipo'aka 'rã vaka jypy guare va'e rami,
hakua ma vaka ka'aguy regua rakua rami.
Ha'e va'e py ma ipo'aka 'rã yvy regua ha'e javi re,
yvy apy peve voi.
Ha'e rami ae mbovy e'ý ta'ikuai Efraim
ha'e Manassés regua kuery.
- ¹⁸ Ha'e gui Zebulom kuery va'e regua pe ma aipoe'i:
— Pevy'a ke Zebulom kuery, ye'ẽ rembe rupi peoa py,
ha'e peẽ Issacar kuery voi pendekoa py peña rupi.
- ¹⁹ Ha'e kuery mokoí regua ma oenoí 'rã amboae regua kuery yvyty áry oupa aguã.
Ha'e py ma Nhanderuete pe ome'ẽ 'rã ha'evea ramigua.
Mba'eta ha'e kuery okaru porã 'rã ye'ẽ rupigua re,
ha'e mba'emo iporãve va'e ita ku'ia guýry oĩ va'ekue gui.*
- ²⁰ Ha'e gui Gade kuery va'e regua pe ma aipoe'i:
— Tovy'a porã Gade kuery yvyrã omboetavea rupi.
Ha'e kuery ma guary kunha rami 'rã ikuai,

[†] 33:8 Apy ma ijayvu sacerdote yvateve Levi regua oiko va'e re. Sacerdote jypyguia ma Arão ae oiko raka'e. Ha'e gui Tumim ha'e Urim ma sacerdote kuery mba'ekuaa-arã oĩ (Êxodo 28.30). [‡] 33:9 Levi kuery ma pavẽ gui oayvuve Nhanderuete ayvu (Êxodo 32.25-29). [§] 33:16 José ramymino kuery ma mba'emo ojopy retave aguã rami ikuai (1 Crônicas 5.1). ^{*} 33:19 Zebulom kuery ma ye'ẽ rembe rupi ikuai raka'e.

- jojyva ha'e nhoakã omboa'ypaa rupi.
- ²¹ Ha'e vy ombo'erã ojopy 'rã iporãve va'e,
 huvíxa kuery peguarã ha'e py omoõ porã mbyre.
 Ha'e vy heta va'e kuery renonde rupi oguata vy
 ojapo 'rã SENHOR oipotaa ha'evea ramigua,
 Israel kuery re ijayvuague rami vy.
- ²² Ha'e gui Dã kuery va'e regua pe ma aipoe'i:
— Dã kuery ma guary'i
 Basã gui opo va'e rami 'rã ikuai.
- ²³ Ha'e gui Naftali kuery va'e regua pe ma aipoe'i:
— Naftali kuery ma SENHOR omoingo porãa rupi 'rã ov'y'a okuapy.
 Opa mba'e py SENHOR ogueroayvu porãa rami vy
 hekao 'rã yupa rupi, kuaray puku-a katy.
- ²⁴ Ha'e gui Aser kuery va'e regua pe ma aipoe'i:
— Aser kuery ma ta'ikuai porãve Jacó ra'y kuery ikuiaia mbyte.
 Tyvy kuery rembiayyuve toiko,
 ha'e ipy rupi tomoaky azeite py.
- ²⁵ Ha'e kuery retã rokẽ jokoa ma ferro ha'e overa va'e guigua toĩ.
 Ta'ikuai porã okuave teria ja.
- ²⁶ — Hembiajyu peiko va'e, Penderuete ramigua mboae ndoikoi.
 Yva áry rupi ha'e ou 'rã penepytyvõ aguã,
 yvatevea rupi ou arai áry.
- ²⁷ Nhanderuete imarã e'ý va'e re ae 'rã pendekoa,
 ha'e ramo ojyva áry rupi penekuavã 'rã raka'e rã peve guarã.
 Penerenonde katy gui oipe'a 'rã penderovaigua kuery
 “Pemomba katu”, he'i vy.
- ²⁸ Ha'e ramo Israel kuery ikuai porã 'rã,
 Jacó ramymino kuery, ygua oĩ ae'i va'e rami 'rã ikuai,
 yvy mba'emo aju ha'e vinho oĩa va'e re.
 Yva gui ma ho'a 'rã yxapy imoakyarã.
- ²⁹ Israel kuery, pevy'a ete 'rã!
 Marã ramigua tu ikuai peẽ kuery ramigua?
 SENHOR ogueraa jepe va'e peiko.
 Ha'e ma mba'emo vai jokoa oĩ penepytyvõarã,
 ha'e kyxe penembopo'akaarã.
 Ha'e rami rire penderovaigua kuery ma peipotaa rami meme 'rã ikuai,
 ha'e rã peẽ ma pepyrõ 'rã ha'e kuery ombojeroviaaty yvy'ã re ojapo va'ekue áry.

34

Moisés omanoaque

¹ Ha'e gui Moabe yvy gui Moisés oẽ vy Nebo yvyty katy oo, Pisga yvy'ã yvatevea py, Jericó rexei'i ae. Ha'e ramo ixupe SENHOR oexa uka yvy ha'e javi Gileade guive Dã peve,

² Naftali, Efraim ha'e Manassés kuery peguarã, ha'e gui Judá kuery peguarã yvy ha'e javi, ye'ẽ kuaray oikea katy oĩ va'e peve,

³ ha'e gui Neguebe ha'e Jericó tetã pindo ty va'e katy'i yvyugua oĩ va'e ha'e javi rupi, Zoar peve.

⁴ Ha'e rami vy SENHOR aipoe'i ixupe:

— Kova'e yvy ae ma Abraão, Isaque ha'e Jacó pe aura reve ame'ẽ aguã re xeayvuague va'e, “Peneramymino kuery pe ame'ẽ 'rã”, ha'eague ae. Ha'e va'e ma nderexa py rexa aguã rami ajapo va'eri ndereoi 'rã ha'e katy — he'i.

⁵ Ha'e pyve SENHOR rembiguai Moisés omano, Moabe yvy re, SENHOR ijayvuague rami vy.

⁶ Ha'e ramo onhono porã peteĩ yvy'ã guy py Moabe re, Bete-Peor rexei'i. Aÿ peve avave rei ndokuuaai teri onhono porãague.

⁷ Moisés omano jave py cento e vinte ma'etÿ oguerekó va'ekue. Ha'e rami teĩ hexa ndoguepai teri va'ekue, imbaraete rei guive.

⁸ Peteĩ jaxy re Israel kuery ojae'opa okuapy Moisés re, Moabe yvy re ae, ojae'o aguã va'ekue opa peve.

⁹ Ha'e gui Num ra'y Josué re Moisés opo omoĩ rire hexe Nhe'ẽ imo'arandua anho oĩ. Ha'e ramo ijayvua re Israel kuery ojapyxaka vy ojapo okuapy Moisés rupi SENHOR ojapo ukaague rami.

¹⁰ Israel kuery mbyte ndoikovei teri profeta Moisés ramigua ju, mba'eta joval re oma'ẽ reve SENHOR ijayvu hexeve.

¹¹ Ndoikovei teri mba'emo kuaa ukaarã ha'e hexa pyrã SENHOR ojapo ukaa rami vy Egito yvy re ha'e ojapo va'ekue ramigua, Faraó re, ixupegu yvatekueve re, ha'e ijyvy ha'e javi rupi.

¹² Mba'eta Moisés ma opo'akaa rupi ojapo va'ekue mba'emo nda'evei ete ha'e tuvixave va'e, Israel kuery pavã oexaa py.

Josué rekukue oĩa Josué rekukue oĩa

Jypy'i kova'e kuaxia para py aipoe'i: "Senhor rembiguai Moisés omano rire ipytyvõare Num ra'y Josué va'e ju Senhor oenoñ. Ha'e vy aipoe'i: 'Xerembiguai Moisés omano ma. Epu'ã ke aÿ, eaxa Jordão yakā kova'e kuery ha'e javi reve, Israel kuery yvyrā ame'ẽ va'ekue py. Opa rupi pepyrōa yvy ame'ẽ ma voi pendevy, Moisés pe xeayvuague rami vy. ... Moisés reve aikoague rami ae ju 'rā aiko ndereve. Ndoroejai 'rā, noroipytyvõ e'ŷi 'rā guive. Nembaraete ha'e ndepy'a guaxu ke' ", he'i (1.1-2, 5b-6a). Ha'e rami rā kova'e kuaxia re oĩ Josué Israel kuery ogueraa vy Canaã yvy re ipo'akaague.

Jypy ma Jericó tetã oipe'a okuapy, Nhanderuete opo'akaa rupi ikora oitypa ramo. Ha'e gui amboae tetã ikuai va'e re ju ha'e kuery ipo'aka. Amongue henda py nda'ipo'akai guive. Josué opena vy peteñ-teñ regua pe ome'ẽ ijyvyrā.

Opaa py Josué aipoe'i Israel kuery ha'e javi pe: "Xetuja'i ma, are ma aiko. Ha'e gui peẽ kuery pexapa ma Senhor Penderuete peẽ kuery re oma'ẽ vy amboae regua kuery re ojapoague. Mba'eta ha'e kuery re Senhor Penderuete ae opu'ã oikovy penderepy vy", he'i (23.2b-3).

Josué ipy'a guaxu aguã re Nhanderuete ijayvuague

¹ SENHOR rembiguai Moisés omano rire ipytyvõare Num ra'y Josué va'e ju SENHOR oenoñ. Ha'e vy aipoe'i:

² — Xerembiguai Moisés omano ma. Epu'ã ke aÿ, eaxa Jordão yakā kova'e kuery ha'e javi reve, Israel kuery yvyrā ame'ẽ va'ekue py.

³ Opa rupi pepyrōa yvy ame'ẽ ma voi pendevy, Moisés pe xeayvuague rami vy.

⁴ Tekoa e'ŷa ha'e Líbano yvy guive Eufrates yakā tuvixa va'e peve, heteu kuery yvy ha'e javi ame'ẽ, ha'e gui kuaray oikea katy ye'ẽ tuvixa va'e oĩ va'e peve, pendevy guarā meme itui.

⁵ Reikovea pukukue re avave rei nda'ipo'akaa 'rā pendere. Moisés reve aikoague rami ae ju 'rā aiko ndereve. Ndoroejai 'rā, noroipytyvõ e'ŷi 'rā guive.

⁶ Nembaraete ha'e ndepy'a guaxu ke, mba'eta ndee rejapo 'rā kova'e kuery yvy re hekoa aguã rami, tuu kuery pe aura reve ame'ẽ aguã re xeayvu rire.

⁷ Nembaraete ha'e ndepy'a guaxu ete ke, rejapopa aguã lei xerembiguai Moisés ojapo ukaague. Ejepe'a eme ndeaxu e'ŷa katy, neñ ndeaxua katy, mamo rā reikoa py reiko porã aguã.

⁸ Ejepe'a eme kuaxia re lei oĩa re ndeayvua gui. Ha'e va'e re reikuua pota 'rā reikovy ara py ha'e pyávy. Enhea'ã tema ipara re oĩa rami rejapopa aguã. Ha'e rami vy reiko porã 'rā, ha'e rejapopa 'rā rejapo va'erã va'e.

⁹ Xee ae aipo nda'ei ri ty'y ra'e? Nembaraete ha'e ndepy'a guaxu ke. Ekyje eme, enhemondyi eme guive, mba'eta SENHOR Nderuete oiko ndereve mamo rā reikoa py rei.

Canaã yvy re oaxa e'ŷ mbove ijayvuague

¹⁰ Ha'e ramo Josué ijayvu heta va'e kuery regua yvatekueve pe. Ha'e vy aipoe'i:

¹¹ — Peaxa ke heta va'e kuery ikuiaia mbyte rupi. Ha'e kuery pe pendeayvu vy aipopeje 'rā: "Perekó katu ke tembi'u, mba'eta mboapy araa py peaxa 'rā kova'e Jordão yakā, pevaõ aguã pendeyvyrā SENHOR Penderuete ome'ẽ va'ekue re, penderekoa aguã", peje.

¹² Ha'e gui Rúben regua, Gade ha'e Manassés regua mbyte rupi oja'o va'ekue pe ju Josué ijayvu vy aipoe'i:^{*}

* 1:12 Rúben, Gade ha'e Manassés regua mbyte rupi oja'o va'ekue opyta raka'e Jordão yakā regua kuaray oẽa katy oĩ va'e re, amboae kuery reve yakā oaxa 'rāgue py. Ha'e kuery va'e regua xondaro kuery anho oaxa Jordão yakā guyvy kuery oipytyvõ aguã (Números 32).

¹³ — Penema'endu'a ke SENHOR rembiguai Moisés ijayvu vy pendevy aipoe'iague re: “SENHOR Penderuete ome'ẽ 'rã pepytu'u aguã kova'e yvy ome'ẽ va'e re.

¹⁴ Pendera'yxy kuery, pendera'y ha'e penderajy kuery ha'e penerymba vaka kuery topyta Jordão yakã kylvõguia re pendevy Moisés omboaxa va'ekue re. Ha'e rã peẽ ma tembiporu reve 'rã peaxa penderyvy kuery renonde, xondaro peiko va'e ha'e javi. Peipytyvõ 'rã,

¹⁵ penderyvy kuery voi opytu'u aguã SENHOR ome'ẽ, peve peẽ kuery pe rami avi. Ha'e kuery voi 'rã hekoa oyvyrã SENHOR Penderuete ome'ẽ va'e re. Ha'e rami vy 'rãe pejevy pendeyvyrã SENHOR rembiguai Moisés omboaxa va'ekue re, kuaray oua katy pendekoa aguã, Jordão yakã kylvõguia re”, he'i va'ekue.

¹⁶ Ha'e ramo Josué pe ha'e kuery ombovai okuapy vy aipoe'i:

— Orevy pe ndeayvua ha'e javi 'rã rojapo, ha'e mamo rã oremondoukaa py tema roo 'rã.

¹⁷ Opa mba'e py Moisés ronhe'ẽ renduague rami avi ndee ju 'rã ronhe'ẽ rendu.

¹⁸ Ha'e rã ha'e javi ava ndeayvua rami ndoikoxei, ha'e rejapo uka va'e ha'e javi ndojapoxei va'e ma omano 'rã. Ha'e nunga rupi nembaraete ke, ha'e ndepy'a guaxu.

2

Jericó tetã re oikuua pota vy oo va'e kuery Raabe ro py ikuai jave guare

¹ Sitim gui Num ra'y Josué omondouka mokoĩ ava yvy re oma'ẽ nhemi aguã. Ha'e vy aipoe'i:

— Peguataa rupi peikuaa pota peovy yvy re, Jericó tetã peve — he'i ramo oje'oi. Ha'e rami vy ovaẽ peteĩ kunha itavy rei va'e ro py. Hery ma Raabe. Ha'e py ae ha'e kuery oke.

² Ha'e ramo Jericó pygua huvixa pe omombe'ua vy aipo'ea:

— Ma'lẽ, ange pyávy apy ovaẽ ra'e avakue Israel kuery regua nhandeyvy re oikuua pota va'e — 'ea.

³ Ha'e ramo Jericó pygua huvixa aipoe'i uka Raabe pe:

— Emoẽ ju avakue ou vy ndero py ovaẽ va'ekue, mba'eta nhandeyvy ha'e javi re oikuua pota aguã ou — he'i uka.

⁴ Ha'e rami teĩ kunha va'e ma mokoĩ avakue omovaẽ vy onhomni ma voi va'ekue. Ha'e rami vy aipoe'i:

— Anhetẽ xea py ovaẽ kuri mokoĩ avakue. Va'eri xee ndaikuuai maguigua paa.

⁵ Ha'e gui pytũ ma jave tetã kora rokẽ pemboty ta ramo ha'e kuery oexa vy jogueraa ju kuri. Ndaikuuai marã katy pa oje'oria. Tapeo pojava ha'e kuery rakykue, peupity nho 'rã — he'i.

⁶ Mba'eta ha'e va'e e'ŷ mbove ngoo áry ojeupi vy onhomni va'ekue linho 'ygue omoĩ porã va'ekue guy py.

⁷ Ha'e gui huvixa rembiguai kuery oje'oi ju yvy re oikuua pota va'e kuery rakykue, Jordão yakã oaxaaty katy tape oo va'e rupi. Ha'e kuery rekaa oẽ ramove tetã kora rokẽ ombotya.

⁸ Ha'e gui oikuua pota va'e kuery onheno e'ŷ mbove kunha va'e oo ha'e kuerya py oo áry.

⁹ Ha'e vy aipoe'i ha'e kuery pe:

— Xee aikuua porã pende kuery pe SENHOR kova'e yvy ome'ëague. Pende kuery gui ore kuery rokyjea anho roendu, ha'e yvy re ikuai va'e ha'e javi ikangypa guive.

¹⁰ Mba'eta roendu Egito gui peo jave Ye'ẽ Pytã penerenonde oĩ va'e SENHOR omboy-paague, ha'e gui mokoĩ amorreu kuery ruvixa re pejapo va'ekue voi, Jordão rovai re Seom ha'e Ogue pemomba va'ekue.

¹¹ Ha'e nungakue roendu vy orepy'a kangy, neĩ peteïve re noïvei imbaraetea, pende kuery peju ramo. Mba'eta SENHOR Penderuete ae Nhanderuete yva ha'e yvy re ipo'aka va'e ae.

¹² Ha'e gui aŷ ma peura xevy SENHOR rery rupi, xee romboaxyague rami peẽ kuery ju xeru ro pygua kuery pemboaxy aguã. Ha'e aikuua porã aguã aipota avi mba'emo xevy pemboaxa,

¹³ xeru ha'e ha'i hekove reve peja aguã, xekyvy ha'e xekypy'y kuery voi, ha'e roguereko va'e ha'e javi, orejukaarã gui orereraa jepe vy — he'i.

¹⁴ Ha'e ramo avakue aipoe'i kunha va'e pe:

— Ndee oremombe'u e'ŷ ramo orerekovea voi rome'ẽ 'rã nderekove rekovia. Ha'e vy kova'e yvy SENHOR orevy ome'ẽ ma jave anhetẽ ete romboaxy 'rã — he'i okuapy.

¹⁵ Ha'e ramo kunha va'e ojapo janela oĩ va'e py ixã va'e rupi ha'e kuery oguejy aguã rami, tetã kora áry ae hoo oĩ ramo.

¹⁶ Ha'e gui aipoe'i ha'e kuery pe:

— Tapeo yvyty reia re, penderekva vy oo va'e kuery pendejou e'ŷ aguã. Mboapy ára peve 'rã penhemi ha'e py, ha'e kuery ojevy ju peve. Ha'e gui mae ma tapeo tape rupi — he'i.

¹⁷ Ha'e ramo avakue aipoe'i ixupe:

— Ndevy rouraague ndorojapoi 'rã,

¹⁸ teĩ po rami 'rã rejapo: pendeyvy re ore kuery rovaẽ jave kova'e ixã pytã va'e janela roguejyague py rejokua 'rã, ha'e gui nderu, ndexy, ndekyvy ha'e nderu ro pygua kuery ha'e javi remboatypa 'rã ndero py. Ha'e rami e'ŷ rã ndorojapoi 'rã rouraague.

¹⁹ Ha'e rami avi peteĩ va'e rei ndero rokẽ gui oka py oẽ ri ramo ma hexe ae 'rã oĩ huguy omoëague opaga aguã, orere e'ŷ. Ha'e rã ndereve opy ikuai va'e ruguy omoëa ramo ma orere ae toĩ ropaga aguã, ha'e kuery re amongue opo omoĩ rã.

²⁰ Ha'e rami avi ndee oremombe'u ramo ore ndorojapoi 'rã ndevy rouraague — he'i.

²¹ Ha'e ramo kunha va'e

— Pendeayvuague rami toiko — he'i vyve omondouka. Ha'e rã ha'e kuery oo. Ha'e gui janela re kunha va'e ojokua ixã pytã va'e.

²² Avakue jogueraa vy yvyty reia re ovaẽ. Ha'e py ma mboapy ára optya, heka vy oo va'e kuery guetã katy ju ojevypa peve, ha'e kuery tape ha'e javi rupi oeka okuapy teĩ ndojoui vy.

²³ Ha'e rami vy mokoïve ava ma yvy'ã gui oguejy vy jogueraa ju. Yakã oaxa ma vy ovaẽ Num ra'y Josué oĩa py. Ixupe omombe'u ha'e kuery re oiko va'ekue ha'e javi.

²⁴ Ha'e vy aipoe'i Josué pe:

— Anhetẽ ete nhandepo py SENHOR omboaxa ha'e va'e yvy ha'e javi. Ha'e py ikuai va'e ha'e javi ipy'a kangypa nhandegui — he'i.

3

Jordão yakã oaxa oje'oivyague

¹ Ko'ẽ ju ramove Israel kuery ha'e javi reve Josué nhomopu'ãmba vy Sitim gui oje'oi, Jordão yakã rembe peve ovaẽmba. Ha'e py ma oke ju ranhe okuapy oaxa e'ŷ mbove.

² Ha'e gui mboapy araa py huvixa kuery oaxa ju oje'oivy heta va'e kuery mbyte rupi.

³ Ha'e vy heta va'e kuery pe omombe'u-mbe'u vy aipoe'i:

— SENHOR Penderuete guexeve guarã ojapo va'ekue ryru ma levita regua sacerdote kuery oupi heravy rã pexa vy peẽ kuery voi peo 'rã ha'e kuery rakykue.*

⁴ Ha'e rami avi hyru gui mombyry'i 'rã peiko, mil metros-a py. Ha'e va'e re penhemboja eme, marupi pa peo aguã peikuaa aguã, mba'eta ha'e va'e tape rupi peo va'e'ŷ teri — he'i.

⁵ Josué avi aipoe'i avi heta va'e kuery pe:

— Pejeky'a'o ke ko'ẽ rã guarã, mba'eta peẽ kuery mbyte SENHOR ojapo 'rã iporã va'e — he'i.

⁶ Sacerdote kuery pe voi ijayvu vy aipoe'i:

— Peupi heravy Nhanderuete guexeve guarã ojapo va'ekue ryru, ha'e peroaxa heta va'e kuery renonde — he'i ramo hyru oupi vy heta va'e kuery renonde ogueroguata heravy.

⁷ Ha'e gui SENHOR aipoe'i Josué pe:

* 3:3 Êxodo 25.10-16, Hebreus 9.1-5

— Kova'e ára amboypy 'rā romboyvate aguã Israel kuery pavẽ oexaa py, ha'e kuery oikuua aguã Moisés reve aikoague rami ndereve ju aikoa.

⁸ Ha'e gui ndee ma sacerdote kuery hyru reraa va'e pe ndeayvu vy aipo're: "Jordão yakã py peguejy ma vy pepyta ranhe 'rā ha'e py", 're.

⁹ Ha'e ramo Josué aipoe'i Israel kuery pe:

— Penhemboja ke kylvõ rami, SENHOR Penderuete ayvu pendu aguã.

¹⁰ Ha'e va'e rire Josué aipoe'ive ju:

— Po rami 'rā peikuua Nhanderuete oikove va'e penembyte oikoa, ha'e anhetẽ penerenonde gui oipe'apa 'rāa cananeu, heteu, heveu, ferezeu, gurgaseu, amorreu ha'e jebuseu kuery ha'e javi.

¹¹ Ma'ě, SENHOR yvy jave re ipo'aka va'e guexeve guarã ojapo va'ekue ryru ma penerenonde ogueroaxa 'rā heravy Jordão yakã.

¹² Ha'e gui aŷ ma peiporavo doze avakue Israel regua, peteĩ-teĩ regua gui peteĩ ava peiporavo,

¹³ mba'eta Jordão yakã py sacerdote kuery SENHOR yvy jave re ipo'aka va'e ayvu ryru reraa kuery oguejy ramove yy ojeaya 'rā, yvate katy gui yy ou 'rā va'ekue ijaty ramo — he'i.

¹⁴ Ha'e gui ma ha'e kuery guekoia gui oguata oje'oivy Jordão yakã oaxa aguã. Ha'e kuery renonde sacerdote kuery ogueraa okuapy SENHOR ayvu ryru.

¹⁵ Hyru reraa kuery Jordão yakã py oguejy ramo yy py ipy inhakŷ. (Mba'eta Jordão ma ára pyau nhavõ tyguaxu raxa va'e, hembe ikuai va'e áry rupi guive.)

¹⁶ Ha'e gui yy yvate katy gui ou va'e optya. Adā tetã gui mombyry'i ono'õ, Zaretã rexei oĩ va'e katy. Ha'e rā yvy joja reia regua ye'ẽ ro katy oxyryague ma typa. Ha'e ramo ha'e kuery oaxa oje'oivy, Jericó tetã rexei'i ae.

¹⁷ Ha'e rā sacerdote kuery SENHOR ayvu ryru reraa va'e ma Jordão yakã mbyte py optya okuapy. Ha'e ramia ja Israel kuery ha'e javi ipiru reia rupi oaxa.

4

Jordão yakã mbyte gui doze ita oguenoëague

¹ Ha'e kuery ha'e javi Jordão yakã oaxapa ma ramo SENHOR ijayvu Josué pe. Ha'e vy aipoe'i:

² — Eiporavo doze avakue, peteĩ-teĩ regua gui eiporavo peteĩ.

³ Ha'e va'e kuery pe ndeayvu vy aipo're: "Apy Jordão yakã mbyte gui penoẽ doze ita sacerdote kuery optya vy opyrõ okuapya gui. Ha'e va'e ma peraa vy pemboaty kova'e pytû pepyta aguã py", 're.

⁴ Ha'e ramo rā Josué oenoĩ doze avakue Israel kuery regua oiporavo va'ekue,

⁵ peteĩ-teĩ regua gui peteĩ oiporavo. Ha'e vy aipoe'i ha'e kuery pe:

— Tapeo Jordão yakã mbyte py peẽ ranhe SENHOR Penderuete ayvu ryru reraa kuery renonde, ha'e peteĩ-teĩ pendeaxi'y áry peupi 'rā heravy peteĩ ita, Israel kuery regua mbovy pa ikuiaia rami vy.

⁶ Ha'e va'e ma pende kuery mbyte oĩ 'rā penema'endu'a aguã. Ha'e gui pendera'y kuery raka'e rā ikuai va'e oporandu vy "Mba'erā tu kova'e ita?" he'i ramo

⁷ aipopeje 'rā ha'e kuery pe: " SENHOR ayvu ryru renonde ma Jordão yakã ojeaya raka'e. Hyru ogueroaxaa ramove yy ojeaya. Ha'e ramia rire kova'e ita ma raka'e rā peve guarã ikuai Israel kuery ima'endu'a aguã", peje 'rā — he'i.

⁸ Ha'e ramo rā Israel kuery ojapo Josué ijayvua. Ha'e vy Jordão yakã mbyte gui ojopy heravy doze ita, Josué pe SENHOR aipoe'ique rami vy, Israel kuery regua mbovy pa ikuiaia rami vy. Ha'e va'e ma ha'e kuery optya aguã py ogueraa vy omboaty ha'e py.

⁹ Ha'e gui Jordão yakã mbyte py ma Josué ju doze ita omopu'ã, sacerdote kuery ayvu ryru reraa va'e optya vy opyrõague py ae. Ha'e va'e ita ma aŷ peve ikuai ha'e py.*

* ^{4:9} "Aŷ peve" he'i mba'eta kova'e kuaxia omboparaa jave ita optya teri.

¹⁰ Mba'eta sacerdote hyru reraa kuery ma Jordão mbyte opyta okuapy, Moisés pe SENHOR aipoe'i ukaague ojeupitypa peve, heta va'e kuery pe Josué ijayvuague rami vy. Ha'e ramo heta va'e kuery oaxapa pojava.

¹¹ Heta va'e kuery ha'e javi yakā oaxapa ma ramo sacerdote kuery opytaague gui oguenoē ju SENHOR ayvu ryru, pavē oexaa py.

¹² Israel kuery renonde oaxa avi jogueravy Rúben regua, Gade ha'e Manassés regua mbyte rupi oja'o va'ekue. Tembiporu reve meme oaxa, Moisés ijayvuague rami vy.

¹³ SENHOR renonde quarenta mil xondaro rānda'u oaxa joe opu'ā aguā katy, Jericó tetā vvýry nhuündy reia py.

¹⁴ Ha'e va'e ára ma SENHOR ombovate Josué Israel kuery pavē oexaa py. Ha'e ramo omboete okuapy oikovea pukukue re, Moisés omboeteague rami avi.

¹⁵ Ha'e gui SENHOR aipoe'i Josué pe:

¹⁶ — Aipo're sacerdote kuery xeayvu ryru reraa va'e pe Jordão yakā gui oguenoē aguā — he'i.

¹⁷ Ha'e ramo sacerdote kuery pe Josué ijayvu vy

— Peē ju ke Jordão yakā gui — he'i ramo

¹⁸ sacerdote kuery ayvu ryru reraa va'e ma Jordão mbyte gui oēmba. Ha'e gui vvy pirua re ha'e kuery opyrō ramove Jordão yakā oīague rupi ju oxyry. Yy rembe ha'e javi rupi oxyry, oīague rami ae ju.

¹⁹ Dez-a jaxy jypy'ia ára ha'e kuery oje'oi Jordão yakā gui. Gilgal py ju opyta okuapy, Jericó rexei kuaray oua katy.

²⁰ Doze ita Jordão yakā gui oguenoē va'ekue ma Josué omboaty Gilgal py.

²¹ Ha'e vy aipoe'i Israel kuery pe:

— Raka'e rā pendera'y kuery pendevy pe oporandu vy aipoe'i 'rā: "Mba'erā tu kova'e ita?" he'i ramo

²² pendera'y kuery pe pemombe'u vy aipopeje 'rā: "Peva'e Jordão yakā ma Israel kuery oaxa raka'e ipirua rupi.

²³ Mba'eta peē kuery renonde SENHOR Nhanderuete ojapo Jordão yakā ipiru aguā rami, peaxapa peve. Mba'eta ore kuery renonde SENHOR Nhanderuete Ye'ē Pytā omombiru karamboae roaxapa peve, ha'e gui ha'ekue rami ae ju ojapo orevy,

²⁴ vvy regua kuery ha'e javi oikuua aguā SENHOR ipo'akapa va'ea, ha'e peē voi SENHOR Penderuete renonde pejererokyjea rupi pendekuai aguā, raka'e rā peve."

5

Israel kuery pire omboia ague

¹ Ha'e va'e vvy regua huvixa kuery oendupa ha'e nunga. Amorrekuery Jordão yakā kyvō katy ikuai va'e kuaray oikea katy, ha'e cananeu kuery ye'ē vvýry ikuai va'e ruvixa kuery ha'e javi oendu Israel kuery renonde Jordão yakā SENHOR omombirupaague, ha'e kuery oaxapa peve. Ha'e va'e oendu vy ipy'a kangypa Israel kuery káuxa, noīvei ma imbaraeerā.

² Ha'e va'e jave py SENHOR aipoe'i Josué pe:

— Pejapo kyxe ita gui, ha'e emboi uka Israel kuery pire — he'i.*

³ Ha'e ramo Josué ojapo uka kyxe ita gui, ha'e vy omboi uka Israel kuery pire, Gibeate-Haralote py.

⁴ Pova'e nunga rupi ae Josué omboi uka ipire, mba'eta Egito vvy gui oē va'ekue tekao e'ŷa re oguataa rupi omanomba ma rire, avakue xondaro ikuai va'ekue ha'e javi.

⁵ Mba'eta Egito vvy gui oē va'e kuery ma opire omboi uka va'ekue meme, ha'e rā oē va'ekue gui tekao e'ŷa rupi oiko'i va'ekue ma nomboi ukai.

⁶ Quarenta ma'etŷ re Israel kuery ikuai tekao e'ŷa rupi, avakue xondaro ikuai va'e Egito gui oē va'ekue omanomba peve, SENHOR nonhe'ē rendui rire. Ha'e va'e kuery pe ma

* 5:2 Gênesis 17.10-14 ha'e Êxodo 12.43-48

SENHOR oura reve ijayvu yvy neĩ ndoexa ukai aguã re, tamoĩ kuery pe SENHOR ome'ẽ aguã re oura reve ijayvuague, yvy kamby ha'e ei oata e'ŷa.

⁷ Ha'e rami vy ha'e kuery rekovia ma ta'y kuery ju omoingo. Ha'e va'e kuery pire ae Josué omboi uka, nomboi ukai teri va'ekue ikuai ramo, oguataa rupi nomboiai rire.

⁸ Ha'e kuery pire omboipa ma rire optya ranhe ikuia py ae, okuerapa peve.

⁹ SENHOR aipoe'ive ju Josué pe:

— Kova'e ára peẽ kuery gui aipe'a Egito yvy re escravo pendekuai vy peximba reiague — he'i.

Ha'e nunga rupi ha'e va'e teko Gilgal hery aŷ peve.*

Páscoa ára py ngaru ojapo okuapyague

¹⁰ Gilgal py Israel kuery ikuai jave ojapo okuapy ngaru Páscoa ára. Ha'e va'e jaxy catorze ára va'e ka'arukue py ojapo, Jericó yvýry nhuündy reia oĩ va'e py.

¹¹ Páscoa ára rire ko'ẽ jevy ho'u okuapy mba'emo aju ha'e yvy re ojou va'ekue: mbojape imbovua e'ŷ va'e ha'e mba'emo ra'yí oaimbe va'ekue ho'u okuapy ha'e va'e ára.

¹² Ha'e va'e yvy regua mba'emo aju ho'ua ára rire'ive ma opa maná.[†] Ha'e rã Israel kuery ndojouvei. Ha'e rami 'rãgue py ha'e va'e ma'etŷ guive okaru okuapy Canaã yvy re mba'emo aju ikuai va'e re.

Josué pe SENHOR pegua xondaro ruvixa ojekuaa ukaague

¹³ Jericó yvýry Josué oikoa py oma'ẽ vy guenonde oexa peteĩ ava opu'ã ho'amy va'e, opo py kyxe hyru gui oekyi va'ekue reve. Ha'e va'e re Josué onhemboja vy oporandu ixupe:

— Ndee pa orea katyguia tyrã pa orerovaigua reiko?

¹⁴ Ha'e rã ombovai:

— Any. Xee ma SENHOR pegua xondaro kuery ruvixa aŷ aju va'e — he'i.

Ha'e ramo Josué ojero'a vy ngova omovaõ yvy re omboete vy. Ha'e vy oporanduve ju ixupe:

— Xeruvixa, mba'e 're 'rã tu xee nerembiguai pe?

¹⁵ SENHOR pegua xondaro kuery ruvixa ombovai Josué pe:

— Emboi ndepy regua, mba'eta yvy reĩa ma iky'a e'ŷ va'e — he'i.

Ha'e ramo Josué ojapo ha'e rami.

6

Jericó tetã oitypaague

¹ Ha'e gui Jericó rokẽ ma Israel kuery gui onhemboty porã. Avave rei noëai, neĩ ndoikeai 'rã.

² Ha'e ramo SENHOR aipoe'i Josué pe:

— Ma'ẽ, ndepo py amboaxa ma Jericó tetã, huvixa ha'e ixupegua ipy'a guaxukueve guive.

³ Ha'e rã peẽ avakue joe opu'ãa pygua kuery ha'e javive ma pembojere 'rã tetã peteïgue. Ha'e rami ma mboapy meme ára re 'rã pejapo.

⁴ Xeayvu ryru renonde ma sete sacerdote ogueraa 'rã sete mimby guaxu vexa'i ava rakuakue guigua. Ha'e gui sete araa py ma sete-kue 'rã pembojere tetã, ha'e sacerdote kuery omonhe'ẽ 'rã mimby guaxu.

⁵ Ha'e gui mimby guaxu vexa'i ava rakuakue guigua omonhe'ẽ puku rã pendu vy peẽ kuery ha'e javive pejapukai ratã 'rã. Ha'e gui tetã kora ho'apa 'rã yvy katy, ha'e peẽ kuery pejeupi 'rã hi'áry rupi, peteĩ-teĩ penerononde katy — he'i.

⁶ Ha'e ramo Num ra'y Josué oenoĩ sacerdote kuery. Ha'e vy aipoe'i ha'e kuery pe:

— Pejopy heravy SENHOR ayvu ryru. Ha'e gui SENHOR ayvu ryru renonde ma sete sacerdote togueraa sete mimby guaxu vexa'i ava rakuakue guigua — he'i.

⁷ Heta va'e kuery pe ju aipoe'i:

* 5:9 Tery Gilgal nhaendu rã "Oipe'a" 'ea rami. † 5:12 Maná ma Israel kuery rembi'urã Nhanderuete yva gui ombou va'ekue (Êxodo 16).

— Tapeo, pembojere tetā. Ha'e rā tembiporu rewegua kuery ma SENHOR ayvu ryru renonde toje'oi — he'i.

⁸ Josué ijayvuague rami heta va'e kuery oje'oi. SENHOR renonde sete sacerdote ranhe oaxa jogueravy sete mimby guaxu vexa'i ava rakuakue guigua reve, mimby guaxu omonhe'ẽ jogueravy. Ha'e rā hakykue ma SENHOR ayvu ryru ogueraa.

⁹ Ha'e gui sacerdote kuery mimby guaxu omonhe'ẽ va'e renonde ma avakue tembiporu rewegua oje'oi. Takykue ete oo va'e ma hyru rakykue oje'oi. Ha'e rā mimby guaxu omonhe'ẽ ae tema jogueravy.

¹⁰ Heta va'e kuery pe Josué ijayvu vy aipoe'i:

— Pejapukai eme, penhendu eme, neĩ peteĩ ayvu toẽ eme pendejuru gui. Xee xeayvu vy “Pejapukai ke” ha'e ramo mae ma pejapukai — he'i.

¹¹ Ha'e rami py SENHOR ayvu ryru rewegua kuery ma peteigüe ombojere jogueravy tetā, ha'e ojevy ju. Tekoa py ju ovaẽ. Ha'e vy oke okuapy ha'e py.

¹² Ko'ẽ rai Josué opu'ã rā sacerdote kuery ogueraa ju okuapy SENHOR ayvu ryru.

¹³ SENHOR ayvu ryru renonde sete sacerdote kuery sete mimby guaxu vexa'i ava rakuakue guigua omonhe'ẽ tema jogueravy. Ha'e kuery renonde ma avakue tembiporu rewegua oje'oi. Ha'e rā takykueguia kuery ma SENHOR ayvu ryru rakykue oje'oi. Ha'e ramia ja mimby omonhe'ẽ tema jogueravy.

¹⁴ Mokoĩ araa py teigüe ju ha'e kuery ombojere tetā, ha'e ojevypa ju tekaoa py. Ha'e rami ma mboapy meme ára re ojapo okuapy.

¹⁵ Sete araa py ma ko'ẽ ju hexakā ramove oje'oi ju. Ha'ekue rami ae ombojere tetā, sete-kue. Ha'e va'e ára anho sete-kue ombojere tetā.

¹⁶ Ha'e gui sete-kuea py sacerdote kuery mimby guaxu omonhe'ẽ jave Josué aipoe'i heta va'e kuery pe:

— Pejapukai ke, mba'eta SENHOR omboaxa ma tetā pendepo py.

¹⁷ Pemomba ete aguã rami oĩ, ha'e py ikuai va'e ha'e javi voi. Oikove va'erã ma Raabe itavy rei va'ekue anho, hoo pygua kuery guive, mba'eta avakue yvy re oikuua pota aguã romondouka va'ekue onhomí rire.

¹⁸ Ha'e rami avi pejepoyvu ke pejopy e'ŷ aguã mba'emo pemomba aguã rami omboaxa pyre, Israel kuery rekoia ayvu vaipy pejapo e'ŷ aguã, nda'evei rei va'e perua py.

¹⁹ Ha'e rā prata ha'e ouro guigua, ha'e mba'emo ryru overa va'e ha'e ferro guigua ha'e javi ma SENHOR peguarã ae 'rā opyta. Ha'e nunga ma jaraa 'rā ixupe guarã nhamoĩ porã aguã — he'i.

²⁰ Ha'e ramo heta va'e kuery ojapukai, ha'e sacerdote kuery omonhe'ẽ mimby guaxu. Omonhe'ẽ rā ha'e kuery oendu vy ojapukai ratā okuapy. Ha'e ramo tetā kora ho'apa. Hi'áry ha'e kuery ojeupi jogueravy vy oikepa tetā py, peteĩ-teĩ ooa katy ae. Ha'e rami py oipe'a tetā.

²¹ Tetā py ikuai va'e ma guive rā ojukapa kyxe py: avakue, kunhague, kyrigue, tujakue, mymba kuery vaka, vexa'i ha'e mburika kuery guive.

Raabe ogueraa jepeague

²² Ha'e gui Josué ijayvu mokoĩ ava yvy re oikuua pota aguã oo va'ekue pe. Ha'e vy aipoe'i:

— Peike kunha itavy rei va'ekue ro py, penoẽ ha'e gui, ha'e javi ikuai va'e reve, ixupe peuraague rami vy — he'i.

²³ Ha'e ramo kunumigue oikuua pota va'ekue ma oo py oike vy oguenoẽ Raabe, ha'e tuu, ixy, ikyvy kuery, ha'e oguerekoo va'e ha'e javi. Hetarã kuery ha'e javi ogueraa Israel kuery rekoia katy'i ikuai aguã.

²⁴ Ha'e rā tetā ha'e opa mba'e ha'e py ikuai va'e ma oapypa tata py. Ha'e rā prata, ouro, ha'e overa va'e guigua, ferro guigua anho oguenoẽ SENHOR ropy guarã.

²⁵ Josué omoingove itavy rei va'ekue Raabe, tuu ro pygua kuery, ha'e opa mba'e oguerekoo va'e voi. Ha'e ramo rire Israel kuery mybyte ha'e kuery ikuai aý peve, Jericó tetā re oikuua pota aguã Josué omondouka va'ekue onhomí rire.

²⁶ Ha'e va'e jave py Josué ojapo heta va'e kuery oura vy aipoe'i okuapy aguã: "Ayyu vaipy toiko SENHOR renonde ava opu'ã vy kova'e tetã Jericó ojapo jevy va'e. Ijytarã omo'ã va'e omokanhy 'rã gua'y jypyguia, ha'e rã tetã rokẽ omoĩ jevy va'e ma omokanhy 'rã kyríve va'e" he'i okuapy aguã.

²⁷ Ha'e rami SENHOR oiko Josué reve. Ha'e ramo heko oendupaa yvy jave re.

7

Acã ojejavyague káuxa Israel kuery Ai teko re nda'ipo'akaiague

¹ Ha'e rami teĩ Israel kuery ikuai aguã va'ekue rupi nda'ikuai, mba'emo omomba pyrã re nda'evei vy. Mba'eta Judá regua Carmi ra'y Acã, Zabdi ramymino ha'e Zera ramymino jevy va'e ma ojeupe guarã ojopy mba'emo omomba aguã ramí omboaxa pyre. Ha'e nunga rupi SENHOR poxya hendy Israel kuery rovai.

² Ha'e rami jave py Josué omondouka avakue Jericó gui Ai teko katy. Ha'e va'e teko ma Bete-Áven katy'i oĩ, Betel regua kuaray oua katy. Ha'e kuery pe ijayvu vy aipoe'i imondovy:

— Tapeo, peiko kuaa yvy re — he'i ramo ha'e kuery oje'oi vy Ai teko re oikuaa pota.

³ Josué oĩa py ha'e kuery ojevy vy aipoe'i ixupe:

— Heta va'e kuery ha'e javi e'ŷ toje'oi. Dois mil e'ŷ vy três mil avakue ete'i ri toje'oi Ai teko mombaarã. Emokane'õmba eme heta va'e kuery, nhanderovaigua kuery ha'e pygua mbovy'i ri ikuai rã — he'i okuapy.

⁴ Ha'e rami vy ha'e kuery regua avakue ma três mil oje'oi. Ha'e rami ra'aga vy ha'e kuery onhamba Ai pygua avakue gui.

⁵ Ha'e kuery regua avakue ma Ai pygua ojuka trinta e seis, ha'e omonha amboae kuery tetã kora rokẽ gui ita oguenoëaty oĩ va'e peve. Yvy'ã guy rupi oo vy ojukave. Ha'e nunga rupi heta va'e kuery ipy'a kangypa, yy rami rive optyta.

⁶ Ha'e rami rã Josué omondoro oao, ha'e ho'a oupy ngova yvy re omovaẽ reve. Ka'aru peve onheno SENHOR ayvu ryru renonde. Israel mongetaaty kuery voi ha'e rami nda'evei vy oakã re omoĩ okuapy yvy ku'i.

⁷ Josué ojapukai vy aipoe'i:

— Ah SENHOR Xeruete! Mba'e re tu rejapo kova'e kuery Jordão yakã oaxa aguã ramí? Amorreu kuery po py oremboaxa aguã pa rejapo, ha'e kuery oremomba aguã rive? Jordão yakã rovai re ae ropyta aguã rovy'a va'e rire!

⁸ Ah SENHOR, mba'e pa aipoa'e ta? Mba'eta Israel kuery onhamba rire ngovaigua kuery gui!

⁹ Ha'e nunga ma cananeu kuery ha'e yvy re ikuai va'e ha'e javi oendu vy orejoko 'rã jogueruvy, ojapo 'rã orerery re na'ima'endu'aavei aguã ramí yvy re. Ha'e gui ha'e rami vy mba'e 'rã tu rejapo nderery ipo'akapa va'e re ima'endu'aa aguã?

¹⁰ Ha'e ramo SENHOR aipoe'i Josué pe:

— Epu'ã ke. Mba'e re tu evoko ramí re'a rejupy nderova yvy re?

¹¹ Israel kuery ojejavy, nda'ikuaxei xereve guarã ajapo va'ekue ramí. Ha'e rami vy ojopy omomba pyrã regua. Imonda, ijapu, ha'e ombo'e rei-rei guýry onhomí imoiny.

¹² Ha'e nunga rupi ae Israel kuery nopu'ã kuaavei kuri ngovaigua kuery renonde. Onhamba oje'oviy amboae regua renonde gui, Israel kuery ae ju omomba pyrã ojeapo. Peẽ kuery mbyte gui mba'emo onhomí mbyre peipe'a e'ŷa ja xee ndaikovei ma 'rã peẽ kuery reve.

¹³ Eiko katu ke, eiky'a'o uka heta va'e kuery. Aipo're ha'e kuery pe: "Pejeky'a'o ke ko'ẽ rã guarã. Mba'eta po ramí Israel kuery Ruete ijayvu: Peẽ Israel kuery, peẽ kuery mbyte oĩ omomba pyrã va'ekue. Penembyte gui mba'emo omomba pyrã peipe'a e'ŷa ja nda'evei penderovaigua kuery renonde pepu'ã aguã.

¹⁴ Aŷ ma ko'ẽ rã aje'ive'i reve pejexa ukapa 'rã peteĩ-teĩ regua. Ha'e ramo xorte rupi SENHOR oikuaa uka 'rã peteĩ regua. Ha'e va'e kuery ma ojexa uka 'rã, peteĩ-teĩ tekoia pygua. Ha'e ramo SENHOR oikuaa uka 'rã peteĩ tekoia. Ha'e va'e kuery ju peteĩ-teĩ oo

rupi 'rã ojexa uka. Ha'e ramo SENHOR oikuaa uka 'rã peteĩ oo. Ha'e va'e gui ma peteĩ-teĩ ava 'rã ojexa uka.

¹⁵ Ha'e gui mba'emo omomba pyrã jopyare pejou va'e rei peapypa 'rã tata py, opa mba'e oguereko va'e guive, mba'eta SENHOR guexeve guarã ojapo va'ekue rami ndoikoxei vy ha'eve'ŷ va'e ojapo Israel kuery mbyte", 're 'rã.

¹⁶ Ha'e rami rã Josué opu'ã ko'ẽ rai. Ha'e vy ojapo Israel kuery ojexa ukapa aguã rami, peteĩ-teĩ regua. Ha'e gui xortea oexa rã Judá regua ae ra'e.

¹⁷ Ha'e gui Judá regua kuery ojexa uka rã Zera ramymino kuery re ojekuaa. Ha'e gui Zera ramymino kuery peteĩ-teĩ ojexa uka rã Zabdi ro pygua kuery re ojekuaa.

¹⁸ Ha'e gui ha'e va'e ro pygua kuery ojexa uka rã ojekuaa Judá regua Carmi ra'y Acã, Zabdi ramymino, Zera ramymino jevy va'e re.

¹⁹ Ha'e gui Acã pe Josué aipoe'i:

— Xera'y, embojerovia na SENHOR Israel kuery Ruete, eporaei ixupe.* Aŷ emombe'u porã xevy mba'e pa rejapoague. Enhenhomni eme — he'i.

²⁰ Ha'e ramo Josué pe Acã ombovai vy aipoe'i:

— Anhetẽ ae ajejavry ra'e SENHOR Israel kuery Ruete pe, po rami ajapo.

²¹ Mba'emo rei-reikue re ama'ẽ vy aexa peteĩ ao puku Babilônia guigua iporâve va'e, ha'e duzentos hatã'i va'e prata guigua, ha'e gui peteĩ ouro guigua meio quilo poyikue oĩ va'e. Ha'e nunga aipota vy ajopy karamboae. Ha'e vy anhomni yvy guýry, ajaty xeroguy mbyte py, ha'e iguýry ma prata oĩ — he'i.

²² Ha'e ramo hoo katy Josué omondouka oikuaa pota va'erã kuery. Onha reve oje'oi hoguy katy. Ha'e py ma onhomni va'ekue oïmba ra'e, ha'e rã iguýry ma prata oĩ.

²³ Ha'e rami vy hoguy mbyte gui ojopypa heruvy vy ogueru Josué ha'e Israel kuery pavẽ ikuaria py. SENHOR renonde omoïmba.

²⁴ Ha'e ramo Israel kuery ha'e javi reve Josué ogueraa Zera ra'y Acã. Ogueraa avi prata, ao puku, ouro guigua, ha'e ta'y kuery, tajy kuery, hymba kuery vaka, mburika, vexa'i kuery, ha'e gui hoguy, ha'e oguereko va'ekue ha'e javi. Acor yvyugua py ogueraapa.

²⁵ Ha'e py ma Josué aipoe'i:

— Mba'e re tu orembojexavai rei ri? Kova'e ára ma ndee ju 'rã SENHOR nembojexavai — he'i ramo Israel kuery ha'e javi ojapipa ita py. Ojapipa ma rire oapypa tata py.

²⁶ Ha'e gui hetekue áry heta omboaty ita. Ha'e nunga ma aŷ peve oĩ ha'e py. Ha'e rami rire SENHOR nda'ipoxyvei. Ha'e va'e yvyugua ma Acor hery aŷ peve.†

8

Ai tekao omomba okuapyague

¹ Ha'e gui SENHOR aipoe'i Josué pe:

— Ekyje eme, enhemondyi eme guive. Emboaty uka ju xondaro kuery ha'e javi, ha'e pepu'ã. Tapeo ju Ai tekao katy. Mba'eta ndepo py amboaxa ma Ai pygua huvixa ha'e ixupegua kuery, hetã ha'e ijyvy guive.

² Ha'e rã Ai tekao ha'e huvixa re rejapo 'rã Jericó ha'e huvixa re rejapoague rami. Ha'e rã imba'e rei-reikue ha'e hymba kuery ma ha'eve 'rã pendejeupe guarã peraa aguã. Peiko katu tetã kupe rupi penhemi aguã, tetã re pepu'ã aguã ha'e gui — he'i.

³ Ha'e ramo Josué ha'e joe opu'ãa pygua kuery ha'e javi reve opu'ã vy oje'oi Ai pygua kuery re opu'ã aguã. Trinta mil avakue imbaraeteve va'e Josué oiporavo vy omondouka pyávy.

⁴ Ha'e kuery pe ijayvu vy aipoe'i:

— Ma'ẽ, romoõ 'rã penhemi aguã tetã re pepu'ã aguã ikupe katy gui. Mombryr vaipa e'ŷ ke pendekuai tetã gui. Ha'e javive peke eme.

* 7:19 “Embojerovia Nhanderuete” he'i hery rupi omboura vy (João 9.24). † 7:26 Tery Acor ma “Moangekoa” 'ea ha'e kuery ayvu py.

⁵ Ha'e rā xee ha'e xerupive ikuai va'e ha'e javi ma tetā renonde py rovaẽ rai'i 'rā rokuapy. Ha'e gui kueve guare rami orea katy ha'e kuery oẽ ramo ma ronha 'rā ranhe ha'e kuery renonde gui.

⁶ Tove ha'e kuery orerakykue tou tetā gui oẽmba peve. Mba'eta ha'e kuery "Onhamba po nhanerenonde gui" he'i 'rā kueve guare rami. Ha'e rami ae ronhamba ranhe 'rā tei.

⁷ Ha'e gui ma peẽ kuery penhemiague gui peju vy pendepo'aka 'rā tetā re. Mba'eta SENHOR Penderuete omboaxa 'rā pendepo py.

⁸ Tetā re pendepo'aka ma vy pemboja 'rā tata, SENHOR ijayvuague rami vy. Ma'ẽ, ha'e rami aguã ae pendevy xeayvu — he'i.

⁹ Ha'e gui Josué omondouka ramo ha'e kuery oo onhemi aguã py. Betel ha'e Ai mbyte opyta okuapy, Ai regua kuaray oikea katy. Ha'e rā Josué ma ha'e va'e pytū oaxa heta va'e kuery mbyte.

¹⁰ Ko'ẽ rai ma jave Josué opu'ã vy oikuaa pota ju heta va'e kuery re. Ha'e rire heta va'e kuery renonde oje'oi Israel mongetaaty kuery reve Ai tekaoa katy opu'ã aguã.

¹¹ Hupive oje'oi avakue joe opu'ãa pygua kuery ha'e javi. Ovaẽmba ma okuapy tetā renonde katy, Ai regua kuaray ijapu'a'ia katy opyta. Ha'e kuery ikuiaia ha'e Ai tekaoa pa'ũ re ma peteĩ yvyugua oĩ.

¹² Cinco mil avakue ogueraa avi vy Betel ha'e Ai mbyte py omoĩ onhemi aguã, tetā regua kuaray oikea katy.

¹³ Ha'e rami vy ha'e javi omoĩ imbokuapy ikuai aguã py ae. Hetave ikuai tetā gui kuaray ijapu'a'ia katy, ha'e rā onhemi va'e kuery ma ka'arua katy opyta. Ha'e va'e pytū ma Josué oguejy yvyugua peve.

¹⁴ Ai tekaoa pygua huvixa oexa vy tetā pygua kuery reve ikuai atã. Ko'ẽ rai jave opu'ã okuapy vy oo Israel kuery rovai yvy joja reia py opu'ã aguã katy. Ndoikuuai okuapy hovaigua kuery tetā kupe rupi onhemi okuapy.

¹⁵ Ha'e kuery renonde Josué ha'e Israel kuery ha'e javi ojeapo ipo'akaa pyre rami. Ha'e vy onhamba tenonde gui, tekaoa e'ŷa katy tape oo va'e rupi oje'oi vy.

¹⁶ Ha'e nunga rupi tetā pygua kuery ha'e javive oenoĩa omonha aguã. Ha'e ramo Josué kuery rakykue oje'oi, tetā gui mombyry'ia peve.

¹⁷ Neĩ peteĩ'i ava ndopytaai Ai py, neĩ Betel py, Israel kuery rakykue oje'oipa vy. Israel kuery rakykue oje'oi vy oeja tetā rokẽ ojepe'a reve.

¹⁸ Ha'e ramo SENHOR aipoe'i Josué pe:

— Ai tekaoa katy eupi hu'y guaxu ndepo py rerekoo va'e, mba'eta amboaxa 'rā ndepo py — he'i.

Ha'e rā Josué hu'y guaxu opo py oguereko va'e oupi tetā katy.

¹⁹ Opo oupi rā onhemi va'ekue oexa vy opu'ã pojava onhemiague gui. Tetā py ovaẽ vy oikepa. Omboja pojava tata ha'e py.

²⁰ Ha'e gui Ai tekaoa pygua avakue guakykue katy ojere vy oexa tetā mbyte gui hataxĩ opu'ã jekuaa rā yvate katy. Nda'evei onheguã aguã guakykue katy neĩ guenonde katy, mba'eta tekaoa e'ŷa katy onha va'ekue voi ojere okuapy, hakykue rupi ou va'e kuery rovai opu'ã aguã.

²¹ Ha'e gui Josué ha'e Israel kuery ha'e javive oexa okuapy onhemi va'ekue tetā re ipo'aka rā. Hataxĩ tetā gui opu'ã va'e avi oexa vy ojevy vy ojukapa Ai pygua avakue.

²² Tetā gui amboae kuery voi oẽ ngovaigna kuery rovai opu'ã aguã. Ha'e ramo opyta okuapy Israel kuery mbyte py. Amongue peteĩ henda katy gui ou, amboae ma amboae katy gui ou. Ha'e rami vy ojukapa. Peteĩve ndoikovei, neĩ ndoo jepei.

²³ Ha'e rā Ai pygua huvixa ma oikove reve ojopy vy ogueru okuapy Josué-a py.

²⁴ Ha'e rami py Israel kuery Ai pygua kuery ojukapa yvy'ämbe reia py, tekaoa e'ŷa py hakykue oje'oiaque rupi ae. Ojukapa kyxe py, omomba. Ha'e vy Israel kuery Ai tekaoa py ojevy vy ha'e py ju ojukapa kyxe py.

²⁵ Ha'e va'e ára ojuka va'ekue avakue kunhague reve vy ma doze mil, Ai pygua kuery ha'e javi.

²⁶ Mba'eta Ai pygua kuery omomba ete e'ŷa ja Josué nomboguejyi opo hu'y guaxu reve oupiague gui.

²⁷ Mymbakue ha'e mba'e rei-reikue ma Israel kuery ojeupe guarã ogueraa tetã gui, Josué pe SENHOR ijayvuague rami vy.

²⁸ Ai tekao re Josué tata omboja uka vy mba'emo vaikueaty ojapo raka'e rã peve guarã. Aŷ peve optya ha'e rami.

²⁹ Ha'e rã Ai pygua huvixa ma ojyryvipy, ha'e yvyra re oeja ka'aru peve. Kuaray oike jave mae ma Josué omboi uka he'õgue yvyra gui. Tetã kora rokẽ py omombo inony. Hi'áry omboaty reta ita aŷ peve oĩ va'erã.

Lei ogueroayvu jevyague

³⁰ Ha'e ramo Ebal yvyty re Josué ojapo peteĩ altar SENHOR Israel kuery Ruete pe,

³¹ Israel kuery pe SENHOR rembiguai Moisés ijayvuague rami vy. Mba'eta kuaxia lei oĩa re Moisés ombopara va'ekue po rami: "Xevyguia altar pejapo 'rã ita omoatyrõ mbyre gui e'ŷ, tembiporu ferro guigua ndapeiporui 'rã' he'iague rami. Ha'e va'e áry ma mba'emo mymba oapy okuapy Senhor pe. Ome'ẽ avi hexeve peteĩ rami ikuai aguã regua.

³² Ha'e py ita re ju Josué ombopara lei Israel kuery renonde Moisés ombopara va'ekue ogueroova vy.

³³ Israel kuery ha'e javive ikuai ha'e py, imongetaaty kuery, yvatekueve ha'e nhomboayvu va'ety kuery reve. SENHOR guexeve guarã ojapo va'ekue ryru jovaive-ive rupi ikuai, levita regua sacerdote kuery hyru reraa va'e renonde. Yvy mboae regua ikuai avi, ha'e kuery mbyte py ae ikuai va'ekue reve. Ha'e kuery regua omboja'o mbyte rupi, amongue ikuai aguã Gerizim yvyty rexei, ha'e rã amboae kuery ma Ebal yvyty rexei ikuai aguã, SENHOR rembiguai Moisés ijayvuague rami meme, Israel regua ogueroayvu porã uka vy.

³⁴ Ha'e rire ogueroayvu lei re ayvu oĩ va'e ha'e javi, ayvu porã ha'e ayvu vai oĩ va'e, kuaxia re lei ipara oĩa rami vy.

³⁵ Israel kuery pavẽ nhomboatya py Josué neĩ peteĩ henda py ma voi ndogueroayvu e'ŷi Moisés ojapo ukaague regua. Kunhague, avakue'i ha'e kunhague'i pe voi ogueroayvu, ha'e yvy mboae regua kuery ha'e kuery mbyte ikuai va'e pe guive.

9

Gibeão pygua kuery nhombotavypaague

¹ Ha'e nunga huvixa kuery oendu okuapy Jordão yakã kyvõgua ha'e javi: yvy'ãa rupi, yvy'ãmbe reia rupi, ye'ẽ tuvixa va'e rembe ha'e javi rupi, Líbano katy'i ikuai va'e, heteu kuery, amorreu, cananeu, ferezeu, heveu ha'e jebuseu kuery.

² Ha'e vy peteĩ rami ha'e kuery ono'õ okuapy Josué ha'e Israel kuery rovai opu'ã aguã.

³ Ha'e gui Gibeão pygua kuery ma Jericó ha'e Ai tekao re Josué ojapo va'ekue oendu vy

⁴ jogueroayvu okuapy ombotavy aguã re. Ha'e vy Josué-a katy oje'oi huvixa rembiguai rami rive ojeapo vy. Voxa ymague anho ogueraa mburika áry, ha'e vinho ryru ymague, oxorokue ha'e ombojapa pyre.

⁵ Opy re xapatu ymague, ombojapa pyre omoõ, ha'e ojee ao yma py onhemonde. Mbojape tape rupi guarã ogueru va'e ma ipiru ha'e ivaipa va'e meme.

⁶ Oje'oi Josué-a py Gilgal py hekoa oĩa py. Ha'e rami vy ixupe aipoe'i okuapy, ha'e Israel regua avakue ha'e javi pe:

— Rovaẽ apy oreyyv mombyry oĩ va'e gui. Aŷ ma jajapo peẽ kuery reve peteĩ rami nhandekuai aguã — he'i okuapy.

⁷ Ha'e ramo Israel regua avakue aipoe'i ha'e kuery heveu ikuai va'e pe:

— Xapy'a rei ore kuerya katy'i rupi ae pendekuai va'e. Ha'e rami rã mba'exa tu rojapo ta peẽ kuery reve peteĩ rami nhandekuai aguã?

⁸ Ha'e kuery ombovai Josué pe:

— Ore ma nerembiguai roiko — he'i okuapy.

Josué peteĩgue ju oporandu ha'e kuery pe:

— Marã ramigua ete tu peẽ? Magui tu peju?

⁹ Ombovai okuapy:

— Ore nerembiguai kuery ma oreyyvy mombyry ete oĩ va'e gui roju, SENHOR Nderuete omombe'ua rã roendu rire. Roendu heko, ha'e Egito yvy re ojapo va'ekue ha'e javi, ¹⁰ ha'e amorreu kuery ruvixa mokoïve Jordão yakã rovai ikuai va'e re ojapo va'ekue: Hesbom pygua huvixa Seom, ha'e Basã Astarote py oĩ va'e pygua huvixa Ogue re.

¹¹ Ha'e nunga rupi oremongeta va'ety kuery ha'e oreyyvy re ikuai va'e ha'e javi aipoe'i orevy: “Peraa tembi'u tape rupi peguata rã guarã, ha'e tapeo ha'e kuery peovaexi aguã. Aipopeje ha'e kuery pe: ‘Ore kuery ma penerembiguai roiko. Ha'e gui aý ma pejapo ke peẽ kuery reve peteĩ rami nhandekuai aguã’, he'i va'ekue orevy.”

¹² Kova'e mbojape rogueru va'e ma haku teri reve rojopy va'ekue orero gui, peẽ kuerya py rovaë aguã rojua ára. Ha'e gui ma'ẽ, apy oĩ ipirupa ha'e ivaipa ma.

¹³ Ha'e gui kova'e vinho ryru ma ipyau va'ekue vinho rombooru jave, aý ma oxoropa ma. Ha'e kova'e oreao, ha'e xapatu voi inhymamba ma, mombyry ete gui roguata ramo — he'i okuapy.

¹⁴ Ha'e ramo Israel kuery ha'e kuery rembi'u oa'anga teĩ SENHOR pe ma noporandui.

¹⁵ Ha'e rami vy ha'e kuery reve Josué ojapo peteĩ rami ikuai aguã, ojapo ha'e kuery okuave aguã rami. Ha'e Israel regua yvatekueve voi oura okuapy ha'e rami.

¹⁶ Ha'e kuery reve peteĩ rami ikuai aguã ojapo ma rire mboapy araa py oikuua ha'e'i rupi ae ikuai ra'ea, ha'e kuery mbyte ikuai va'e ae.

¹⁷ Mba'eta Israel kuery oo vy ovaë ha'e kuery retã py mboapy araa py ete'i. Ha'e kuery retã ma Gibeão, Cefira, Beerote ha'e Quiriate-Jearim.

¹⁸ Ha'e rami teĩ Israel kuery ndojukai, SENHOR Israel kuery Ruete rery rupi yvatekueve oura rire. Ha'e ramo heta va'e kuery ijayvu vai okuapy yvatekueve rovai.

¹⁹ Ha'e ramo yvatekueve aipoe'i okuapy heta va'e kuery ha'e javi pe:

— Ore ma SENHOR Israel kuery Ruete rery rupi roura ae ma ha'e kuery pe. Ha'e nunga rupi nda'evei ha'e kuery re nhandepo nhamoï aguã.

²⁰ Ha'e rami avi po rami 'rã jajapo ha'e kuery re: Nhamoingove 'rã, roura rire nhande'áry Nhanderuete poxya ou e'ý aguã.

²¹ Ta'ikuai tema — he'i yvatekueve ha'e kuery pe. Ha'e rami rire Gibeão pygua kuery ma yxakã mbovoarã ha'e yy renoëarã ikuai heta va'e kuery pavẽ pe, yvatekueve ijayvuague rami vy.

²² Ha'e gui Josué oenoïmba vy aipoe'i ha'e kuery pe:

— Mba'e re tu orembotavy vy “Peẽ kuerya gui mombyry orerekao va'e” peje va'ekue, ore kuerya katy'i ae pendekoa va'eri?

²³ Ha'e nunga rupi aý ma ayvu vaipy pendekuai. Ore kuery pegua escravo pendekuai riae 'rã yxakã pembovo ha'e yy penoë aguã Xeruete ro pyguarã — he'i.

²⁴ Ha'e kuery ombovai Josué pe:

— Rombotavya rupi oreayvu va'ekue, mba'eta ore nerembiguai kuery roendu omombe'ua rã anhetê SENHOR Nderuete guembiguai Moisés pe ijayvu pendevy ome'ẽ aguã kova'e yvy ha'e javi, ha'e peẽ kuery renonde omomba aguã yvy re ikuai va'e ha'e javi. Peẽ kuery orejukapa gui rokyje vy ae orekuai va'ekue ha'e rami.

²⁵ Ma'ẽ, ndepo py orekuai. Ha'evea rami ha'e anhetê rupi orererekoo — he'i okuapy.

²⁶ Ha'e rami rã Josué oguereko ha'e rami. Ogueraa jepepa Israel kuery po gui, ndojukai ukai.

²⁷ Ha'e va'e ára guive Josué omoingo yxakã mbovoarã ha'e yy renoëarã heta va'e kuery pe, ha'e SENHOR pegua altar pyguarã. Aý peve ha'e rami ikuai, henda Nhanderuete oiporavoague py ae.

¹ Ha'e gui Jerusalém pygua huvixa Adoni-Zedeque oendu Ai tekao re Josué kuery ipo'aka vy omomba eteague. Oendu avi Ai ha'e huvixa re ojapoague, Jericó ha'e ha'e pygua huvixa re ojapoague rami avi. Oendu avi Gibeão pygua kuery Israel kuery reve peteī rami ikuai aguā ojapoague, ha'e ha'e kuery mbyte ikuia. Ha'e nunga oendu vy

² okyje vaipa okuapy, mba'eta Gibeão ma tetā guaxu oĩ huvixave oĩ ramigua, Ai tekao gui tuvixave va'e. Oikuaa avi ha'e pygua ipy'a guaxukue memea.

³ Ha'e ramo Jerusalém pygua huvixa Adoni-Zedeque omondouka guembiguai Hoão Hebron pygua huvixaa py, ha'e Jarmute pygua huvixa Pirā hery va'ea py, Laquis pygua huvixa Jafia-a py, ha'e Eglom pygua huvixa Debir-a py. Ha'e vy ha'e kuery pe aipoe'i uka:

⁴ — Peju ke xea py, xepytyvõ Gibeão pygua kuery jajukapa aguā. Mba'eta ha'e kuery ma Josué ha'e Israel kuery reve ojapo raka'e peteī rami ikuai aguā — he'i.

⁵ Ha'e rami rā amorreu regua huvixa kuery nhomboaty vy oje'oi peteī nhiruīve: Jerusalém pygua huvixa, Hebron, Jarmute, Laquis ha'e Eglom pygua huvixa. Xondaro kuery ha'e javi reve oje'oi vy Gibeão katy'i ikuai. Ha'e gui opu'ã okuapy ha'e pygua kuery rovai.

Gibeão pygua kuery Josué pe ojepy ukaague

⁶ Ha'e ramo Gibeão pygua avakue omondouka oayvu reraa Josué kuery rekao Gilgal py. Ha'e vy aipoe'i ixupe:

— Orereja eme ore ae'i, nerembiguai orekuai rā. Eju pojava orea katy, orereraa jepe, orepytyvõ ke. Mba'eta amorreu kuery yvytya rupi ikuai va'e regua huvixa kuery reve ono'õ ma okuapy orere opu'ã aguā — he'i.

⁷ Ha'e ramo Josué ma Gilgal gui oje'oi oxondaro kuery ha'e ipy'a guaxukue ha'e javi reve.

⁸ Ha'e gui SENHOR aipoe'i Josué pe:

— Ekyje eme ha'e kuery gui, mba'eta ndepo py amboaxapa. Neī peteīve nda'ipo'akai 'rā ndere — he'i.

⁹ Pytū mbukukue re Gilgal gui Josué oguata ovy vy ovaẽ xapy'a ha'e kuerya py.

¹⁰ SENHOR omoĩ vai Israel kuery renonde, ojapo ojuka reta aguā rami Gibeão py. Ha'e rami vy omonha Bete-Horom katy tape oo va'e rupi, Azeca ha'e Maqedá peve oitypa oje'oviy.

¹¹ Ha'e gui Israel kuery gui Bete-Horom yvy'ã guy katy onha oje'oviy jave ma ha'e kuery áry SENHOR yva guiombo'oky amandau guaxu Azeca ovaẽa peve. Ha'e ramo omanomba. Israel kuery kyxe py ojuka va'ekue gui hetave amandau guí omano va'ekue.

Kuaray ha'e jaxy optya ranheague

¹² Israel kuery po py SENHOR amorreu kuery omboaxaa ára ma Josué ojapukai SENHOR pe. Ha'e vy Israel kuery oendua py aipoe'i:

— Kuaray, epyta ke Gibeão áry, ha'e ndee jaxy, epyta Aijalom yvyugua áry — he'ia rami

¹³ kuaray optya, jaxy guive, ngovaigua kuery ojukapa peve. Yva mbyte py ae kuaray optya, are oike aguā peteī ára ha'e javi re rai'i. Kuaxia héko porā va'e rekokue oĩa re ha'e nunga ipara oiny.

¹⁴ Ha'e va'e'ý mbove ha'e va'e ramigua ára ndoikoi, neī ha'e va'e rire, SENHOR peteī ava ojapukai rā onhe'ẽ rendu vy ojapo va'ekue ramigua. Mba'eta SENHOR ae Israel kuery re oma'ẽ vy opu'ã hovaigua kuery re.

¹⁵ Ha'e gui ma Israel kuery ha'e javi reve Josué ojevy guekoa Gilgal py oĩ va'e py.

Peteī nhiruī huvixa Josué omboty ukapa rire ojukaague

¹⁶ Ha'e rā peteī nhiruīve huvixa kuery ma onha vy onhemimba Maqedá py itakua oĩ va'e py.

¹⁷ Ha'e ramo Josué pe omombe'ua vy

— Peteī nhiruīve huvixa kuery ojoua ra'e Maqedá py itakua oĩ va'e py onhemi va'ekue — 'ea.

¹⁸ Ha'e gui Josué aipoe'i:

— Itakua juru mbotyarā ha'vy pembojere peteī ita guaxu, ha'e pemoī avakue harōarā. Ha'e rā peē ae ma pepyta eme ha'e py.

¹⁹ Ha'e rami 'rāgue py tapeo pendovaigua kuery rakykue, pejukapa takykue oo va'e-va'e. Pemoinge eme ha'e kuery retā py, mba'eta SENHOR Penderuete omboaxa ma pendepo py — he'i.

²⁰ Ha'e rami py Israel kuery reve Josué ojuka reta, omomba. Ha'e rami avi ha'e kuery regua amongue ete'i oo jepe tetā ikorapa va'e py oike vy.

²¹ Ha'e gui Josué oña katy ixupegua kuery ha'e javi ojevy okuapy ov'y'a reve, Maquedá py ikuaiague py ae. Ha'e rami rire avave rei nda'ijayvu kuaavei Israel kuery rovai.

²² Ha'e va'e rire mae Josué aipoe'i:

— Peipe'a ke itakua juru gui ita guaxu oī va'e, ha'e xea py ju Peru peteī nhiruīve huvixa kuery ha'e gui.

²³ Ha'e ramo ma ha'e rami ikuai vy itakua gui ogueru peteī nhiruīve huvixa: Jerusalém pygua, Hebron, Jarmute, Laquis ha'e Eglom pygua.

²⁴ Josué-a py huvixa kuery ogueru ma ramo oenoīmba avakue Israel regua ha'e javi. Ha'e vy aipoe'i xondaro ruvixa kuery hexeve oje'oí va'ekue pe:

— Peju ke. Pepyrō kova'e huvixa kuery aju'y re — he'i ramo ha'e kuery ou vy opyro ha'e kuery aju'y re.

²⁵ Ha'e ramo Josué aipoe'i ha'e kuery pe:

— Pekyje eme, penhemondyi eme guive. Penembaraete ha'e pendepy'a guaxu, mba'eta guī rami ae SENHOR ojapo 'rā pendovaigua kuery ha'e javi re, ha'e kuery rovai pepu'āa va'e re rei — he'i.

²⁶ Ha'e gui Josué oikutu vy ojukapa. Ha'e vy yvyra re oupi imoiny peteī nhiruīve. Hetekue yvyra re ovava okuapy ka'aru peve.

²⁷ Kuaray oike ma jave Josué omboguejy uka yvyra gui. Ha'e rā omombo itakua onhemiague py ae. Ha'e gui itakua juru py omboaty reta ita guaxu. Ha'ekue py teri oī aŷ peve.

Sete huvixa re vyvoi ju Josué kuery ipo'akaague

²⁸ Ha'e va'e árave Josué ipo'aka Maquedá tetā re. Ha'e pygua kuery ojukapa kyxe py, huvixa voi. Omomba katuī'i ha'e py ikuai va'ekue. Ndoejai neī peteīve. Maquedá pygua huvixa re ojapo Jericó pygua huvixa re ojapoague rami ae.

²⁹ Maquedá gui ma Israel kuery ha'e javi reve Josué oje'oí Libna katy, ha'e vy ha'e pygua re ju opu'ā.

³⁰ Ha'e ramo SENHOR omboaxa Israel kuery po py, huvixa guive. Kyxe py ojukapa ha'e py ikuai va'e ha'e javi. Ndoejai neī peteī'i. Ha'e pygua huvixa re ojapo Jericó pygua huvixa re ojapoague rami.

³¹ Libna gui Israel kuery ha'e javi reve Josué oo vy Laquis tetā ju ojoko, ha'e vy opu'ā ha'e pygua re.

³² Laquis voi SENHOR omboaxa Israel kuery po py. Ha'e ramo ko'ē jevy oike vy ojukapa kyxe py ha'e py ikuai va'e ha'e javi, Libna re ojapoague rami ae.

³³ Ha'e ramo Geber pygua huvixa Hoão va'e oo Laquis pygua kuery oipytyvō vy, teī Josué ojuka, hupivegua kuery voi. Neī peteī'i ndoejai.

³⁴ Laquis gui Israel kuery ha'e javi reve Josué oo Eglom katy. Ha'e py ju ojoko vy opu'ā ha'e pygua re.

³⁵ Ha'e va'e árave oike vy ojukapa kyxe py. Ha'e py ikuai va'e ha'e javi omomba. Laquis re ojapoague rami ae ju ojapo.

³⁶ Ha'e rire ma Eglom gui Israel kuery ha'e javi reve Josué oo Hebron katy. Ha'e pygua kuery re ju opu'ā.

³⁷ Ha'e py oike vy ojukapa kyxe py: huvixa ha'e ha'e katy'i hekoa va'ekue ha'e javi. Neī peteī'i voi ndoejai, Eglom re ojapoague rami ae. Omomba ukaague rami ae Josué omomba, ha'e pygua kuery ha'e javi.

³⁸ Ha'e gui Debir py ju Israel kuery ha'e javi reve Josué ojevy vy opu'ā ha'e pygua re.

³⁹ Oipe'a tetā, ha'e huvixa voi ojuka kyxe py. Ha'e py ikuai va'e ha'e javi omomba katuī'i. Peteī'i voi ndoejai. Hebrom, Libna ha'e huvixa re ojapoague rami ojapo Debir ha'e huvixa re voi.

⁴⁰ Ha'e rami py Josué kuery ojukapa ha'e va'e yvy regua kuery yvy'ã reia rupi ikuai va'e, Neguebe rupi, nhuūndy reia ha'e yvy'ã guy rupi ikuai va'e, huvixa kuery ha'e javi reve. Omomba ipytuē va'e ha'e javi. Neī peteī'i voi ndoejai, SENHOR Israel kuery Ruete ijayvuague rami vy.

⁴¹ Cades-Barnéia guive Gaza peve Josué kuery jojukapa, yvy ha'e javi Gósen guive Gibeão rupi peve.

⁴² Josué kuery oitypa vyvoi ha'e va'e huvixa kuery, ha'e ijyvy ha'e javi, mba'eta SENHOR Israel kuery Ruete ae Israel kuery re oma'ẽ vy opu'ã joe.

⁴³ Ha'e rire ma Israel kuery ha'e javi reve Josué ojevy ju guekoa Gilgal katy.

11

Amboae kuery re Josué kuery ipo'akaague

¹ Ha'e nunga ma omombe'ua rā Hazor pygua huvixa Jabim oendu vy guembiguai omondouka Madom pygua huvixa Jobabe-a py, Sinrom ha'e Acsafe pygua huvixaa py,

² ha'e yvyty reia kuaray ijapu'a'ia katy huvixa kuery ikuai va'ea py, Quinerete regua kuaray puku-a katy yvy joja reia py, Dor regua yvy'āmbe ha'e yvy'āmbe tuvixa va'e ikuai va'e rupi, ye'ẽ rexei oĩ va'e py,

³ omondouka avi cananeu kuery kuaray oua katy, ha'e kuaray oikea katy ikuai va'e pe: amorreu kuery, heteu, ferezeu, jebuseu kuery yvytya rupi ikuai va'e pe, ha'e heveu kuery Hermom yvy'ã guy py Mispa yvy re ikuai va'e pe.

⁴ Ha'e rami rā ha'e va'e kuery oupa, oxondaro kuery ha'e javi reve. Mbovy e'ŷ ete ikuai, ita ku'i ye'ẽ rembe rupi ikuai va'e rami heta. Guymba kavaju ha'e karóxa heta ete ogueru.

⁵ Ha'e va'e huvixa kuery jogueruvy vy Merom yakā yvýry ono'õ okuapy, Israel kuery re opu'ã aguā.

⁶ Ha'e gui SENHOR aipoe'i Josué pe:

— Ekyje eme ha'e kuery gui. Ko'ẽ rā kova'e hora-ve amboaxapa 'rā Israel kuery po py ojuka pyre. Kavaju kuery pemongaraupa 'rā, ha'e karóxa peapypa 'rā tata py — he'i.

⁷ Ha'e rami rā Merom yakā katy Josué oxondaro kuery ha'e javi reve ou pojava vy opu'ã okuapy ha'e kuery rovai.

⁸ Israel kuery po py SENHOR omboaxapa ramo ojukapa. Omonha Sidom tuvixa va'e peve, ha'e Misrefote-Maim ha'e Mispa regua yvyugua kuaray oua katy oĩ va'e peve. Ojukapa, neī peteī'i voi ndoejai.

⁹ Ha'e kuery re Josué kuery ojapo SENHOR aipoe'iague rami. Kavaju omongaraupa, ha'e karóxa oapypa.

¹⁰ Ha'e va'e jave py Josué kuery ojevy vy Hazor tetā re ju ipo'aka. Kyxe py ojuka ha'e pygua huvixa. Hazor ma tetā mboae ae ha'e javi re ipo'aka va'ekue.

¹¹ Kyxe py ojuka ha'e py ikuai va'e ha'e javi, omomba katuī'i. Peteīve ndoikovevei. Ha'e Hazor tetā ma oapypa.

¹² Ha'e va'e huvixa kuery tetā openaa ha'e javi ma Josué kuery ojopypa, huvixa kuery voi. Ojukapa kyxe py, omomba katuī'i, SENHOR rembiguai Moisés ijayvuague rami vy.

¹³ Ha'e rā tetā yvy'ã reia rupi ikuai va'e ma Israel kuery ndoapyi, Hazor e'ŷ vy. Ha'e va'e ma Josué oapypa uka.

¹⁴ Ha'e va'e tetā pygua mba'e rei-reikue ma Israel kuery ogueraapa, hymbakue guive. Ha'e rā ha'e pygua kuery ma ojukapa kyxe py omomba peve. Peteīve ndoikovevei.

¹⁵ SENHOR guembiguai Moisés pe ijayvuague rami ae Moisés ju ijayvu Josué pe. Ha'e rā ha'ekue rami Josué ojapo. Neī peteī ayvu'i voi ndojapo e'ŷi Moisés pe SENHOR ijayvuague ha'e javi.

¹⁶ Ha'e rami py Josué kuery ipo'aka ha'e va'e yvy ha'e javi re: yvyty reia rupi, Neguebe ha'e Gósen yvy ha'e javi, yvy joja reia rupi, Arabá, ha'e gui Israel peguarā yvyty reia, ha'e ijyvýry yvy'ã reia oĩ va'e reve,

¹⁷ Halaque yvyty Seir katy oo va'e guive Baal-Gade Líbano regua yvyugua re oĩ va'e peve, Hermom yvyty yvy'iry. Ha'e va'e rupi huvixa kuery ikuai va'e voi ojopypa. Oitypa, ha'e ojukapa.

¹⁸ Are vaipa Josué kuery opu'ã okuapy ha'e va'e huvixa kuery rovai.

¹⁹ Jipoi tetã Israel kuery reve peteĩ rami ikuai va'e, heveu kuery Gibeão pygua e'ŷ vy. Joe opu'ãa rupi anho ojopypa.

²⁰ Mba'eta SENHOR gui ae ou ha'e kuery inhakã ratã aguã, Israel kuery rovai opu'ã aguã rami, ha'e rami rã omboaxy e'ŷ re omomba ete aguã omokanhymba peve, Moisés pe SENHOR ijayvuague rami vy.

²¹ Ha'e va'e jave py Josué kuery oje'oi vy omomba anaquim kuery yvyty reia rupi ikuai va'e, ha'e gui Hebron, Debir ha'e Anabe pygua, ha'e Judá ha'e Israel regua yvyty re ikuai va'ekue ha'e javi. Josué kuery omomba ete, hetã guive.

²² Anaquim regua neĩ peteĩve ndoikovei Israel kuery yvy re. Gaza py anho, Gate ha'e Asdode py ma amongue'i okuave.

²³ Ha'e rami py Moisés pe SENHOR ijayvuague rami vy Josué ipo'aka ha'e va'e yvy ha'e javi re. ha'e omboja'o Israel kuery yvyrã. Joegua-egua ikuai va'e peguarã omboja'o. Ha'e va'e rire yvy re optyu'upa joe opu'ãa gui.

12

Mokoï huvixa Moisés oity va'ekue rery oĩa

¹ Pova'e kuery ma ha'e va'e yvy regua huvixa Israel kuery ojukapa va'ekue Jordão yakã rovai re kuaray oua katy, ha'e ijyvy re voi ipo'aka, Arnom yakã'i guive Hermom yvyty peve, ha'e yvy joja reia kuaray oua katyguha ha'e javi.

² Amorreu kuery ruvixa Seom ma Hesbom py oĩ va'ekue. Ha'e va'e openaague ma Arnom yvyugua yvýry Aroer oĩ va'e guive, ha'e Arnom yvyugua mbyte gui Gileade mbyte peve, Jaboque yakã'i peve, Amom ramymino kuery yvy peve.

³ Yvy joja reia guive ye'ẽ Quinerete kuaray oua katy peve, ha'e gui Ye'ẽ ro regua kuaray oua katy tape Bete-Jesimote katy oo va'e rupi, ha'e gui kuaray puku-a katy guive Asdote-Pisga yvy'ã guy katy.

⁴ Amboae yvy ma Basã pygua huvixa Ogue mba'ekue. Ha'e va'e ma refaim kuery ramymino, Astarote ha'e Edrei py oĩ va'ekue.

⁵ Ha'e va'e openaague ma Hermom yvyty, Salca ha'e Basã ha'e javi, gesurita ha'e maacatita kuery yvy peve, ha'e gui Gileade mbyte rupi Hesbom pygua huvixa Seom yvy peve.

⁶ Ha'e va'e kuery SENHOR rembiguai Moisés Israel kuery reve ojukapa. Ijyvykue ma SENHOR rembiguai Moisés omboaxa Rúben regua, Gade ha'e Manassés regua mbyte rupi oja'o va'ekue pe.

Huvixa kuery Josué oitypa va'ekue retã rery oĩa

⁷ Ha'e gui po rami ma Jordão yakã kyvõ rupi kuaray oikea katy huvixa kuery ikuai va'e rery, Israel kuery reve Josué ojukapa va'ekue, Baal-Gade Líbano regua yvyugua guive, Halaque yvyty Seir katy oo va'e peve. Ha'e va'e yvy ma Josué omboaxa Israel regua kuery pe omboja'o vy.

⁸ Ha'e va'e yvy ma yvyty reia rupi oĩ, yvy'ãmbe reia rupi, yvy joja reia rupi, yvy'ã guy rupi, teko a e'ŷa rupi, ha'e Neguebe rupi. Ha'e py ikuai va'ekue ma heteu, amorreu, cananeu, ferezeu, heveu ha'e jebuseu kuery.

⁹ Huvixa ojuka ypy'i va'ekue ma Jericó pygua, ha'e gui Betel rexei Ai oĩ va'e pygua,

¹⁰ ha'e gui Jerusalém pygua huvixa, Hebron pygua,

¹¹ Jarmute pygua, Laquis pygua,

¹² Eglom pygua, Gezer pygua,

¹³ Debir pygua, Geder pygua,

¹⁴ Horma pygua, Arade pygua,

¹⁵ Libna pygua, Adulão pygua,

- ¹⁶ Maquedá pygua, Betel pygua,
¹⁷ Tapua pygua, Hefer pygua,
¹⁸ Afeca pygua, Lasarom pygua,
¹⁹ Madom pygua, Hazor pygua,
²⁰ Sinrom-Merom pygua, Acsafe pygua,
²¹ Taanaque pygua, Megido pygua,
²² Quedes pygua, Carmelo py Jocneão oĩ va'e pygua,
²³ Nafate-Dor pygua, Goim pygua Gilgal py oĩ va'e,
²⁴ ha'e gui ma Tirza pygua huvixa. Ha'e javi vy ma trinta e um huvixa kuery ikuai va'ekue.

13

Yvy ndojopypai teri va'ekue re ijayvuague

- ¹ Ha'e gui Josué tuja'i ma, heta ma'etŷ ma oguereko jave ixupe SENHOR aipoe'i:
— Ndetuja'i ma, heta ma rerekma'etŷ. Ha'e rami teĩ heta ete teri oĩ yvy ndapejopypai
va'e.
² Yvy ndapejopyi teri va'e ma filisteu kuery yvy ha'e javi, Gesur ha'e javi,
³ Egito katy'i Sior oĩ va'e guive Ecrom yvy kuaray ijapu'a'ia katy oĩ va'e peve, "Cananeu
kuery yvy" 'epy va'e, ha'e gui filisteu kuery ruvixa peteĩ nhiruĩ ikuai va'e openaa: Gaza,
Asdode, Asquelom, Gate ha'e Ecrom tetã.
⁴ Kuaray puku-a katy oĩ va'e ma aveu kuery yvy ndapejopyi teri avi, ha'e gui cananeu
kuery yvy ha'e javi, ha'e Sidom regua kuery Meara yvy, amorrekuery yvy katy'i Afeca
oĩ va'e.
⁵ Oime teri avi gibleu kuery yvy, ha'e Líbano yvy ha'e javi kuaray oẽa katy oĩ va'e,
Hermom yvy'ã guy py Baal-Gade oĩ va'e guive Hamate katy oaxaa peve,
⁶ ha'e gui yvyty reia rupi ikuai va'e ha'e javi, Líbano gui Misrefote-Maim peve, Sidom
regua kuery ha'e javi. Ha'e va'e yvy xee aipe'a 'rã Israel kuery renonde gui. Ha'e nunga
rupi emboja'o ma voi yvy Israel kuery peguarã, ndevy xeayvuague rami vy.
⁷ Ha'e nunga rupi aÿ ma emboja'o yvy nove regua ikuai va'e peguarã, ha'e Manassés
regua mbyte rupi oja'o va'ekue pe — he'i.
⁸ Ha'e rã Manassés regua mboae mbyte rupi oja'o va'ekue reve ma Rúben ha'e Gade
regua kuery hekao ae ma Jordão yakã rovai re kuaray oua katy, SENHOR rembiguai Moisés
omboaxaque rami vy.
⁹ Ha'e kuery yvy ma Arnom yvyugua py Aroer oĩ va'e gui ijypy, ha'e gui tetã yvyugua
mbyte py oĩ va'e, ha'e Medeba py yvy'ãmbe tuvixa va'e ha'e javi Dibom peve oo va'e,
¹⁰ ha'e amorrekuery ruvixa Seom Hesbom py oĩ va'e openaque tetã, Amom ramymino
kuery yvy peve.
¹¹ Ha'e gui Gileade, ha'e gesurita ha'e maacatita kuery yvy, Hermom yvyty ha'e javi, ha'e
gui Basã ha'e javi Salca peve,
¹² Basã pygua huvixa Ogue openaque ha'e javi, Astarote ha'e Edrei py voi opena va'ekue.
Ha'e va'e ma gigante kuery regua rembyrekue. Ha'e va'e kuery ma Moisés ojukapa rai
vy oipe'apa va'ekue.
¹³ Ha'e rã gesurita ha'e maacatita kuery ma Israel kuery ndoipe'ai rire aÿ peve ha'e kuery
ikuai Israel kuery mbyte.

Moisés yvy omboja'o-ja'oague

- ¹⁴ Ha'e rã Levi regua pe anho nomboja'oi ijyvyrã, mba'eta SENHOR Israel kuery Ruete
pe mba'emo oapy reve ome'ẽ mbyre ma ha'e kuery pegua oĩ, aipoe'i ma voiague rami vy.
¹⁵ Ha'e gui Rúben ramymino kuery regua pe ma Moisés omboja'o peteĩ-teĩ hoo pygua
kuery ikuiaia rami vy.
¹⁶ Ha'e kuery rekoarã ijypy Arnom yvyugua apy re Aroer oĩ va'e gui, ha'e gui tetã yvyugua
mbyte py oĩ va'e, ha'e yvy'ãmbea tuvixa va'e ha'e javi Medeba peve.
¹⁷ Oĩ avi Hesbom ijyvýry tetã ikuai va'e ha'e javi reve, yvy'ãmbea tuvixa va'e py oĩ va'e:
Dibom, Bamote-Baal ha'e Bete-Baal-Meom,

- ¹⁸ ha'e gui Jaza, Quedemote, Mefaate,
¹⁹ Quiriataim, Sibma, ha'e Zerete-Saar yvy'ã rugua oĩ va'e re,
²⁰ Bete-Peor, Pisga re yvy'ã reia oĩ va'e, Bete-Jesimote,
²¹ tetã yvy'ãmbe tuvixa va'e ha'e javi, ha'e amorreuu kuery ruvixa Seom Hesbom py oĩ va'e openaague ha'e javi. Ha'e va'e ma Moisés ojuka Midiã pygua ruvixa kuery Evi, Requém, Zur, Hur ha'e Reba ojukaague rami avi. Ha'e va'e kuery ma Seom pegua yvatekueve yvy re opena va'ekue.
²² Israel kuery kyxe py ojuka avi Balaão Beor ra'y imba'ekuaa va'e, amboae kuery ojukaa py.
²³ Rúben regua kuery yvy ma Jordão yakã peve oo, ha'e ha'e katy rai'i ikuai va'e peve. Ha'e va'e yvy ma Rúben ramymino kuery pegua, peteĩ-teĩ hoo pygua kuery ikuiaia rami vy, tetã ha'e tekoia ijyvýry ikuai va'e reve.
²⁴ Ha'e gui Gade regua kuery pe ma Moisés omboja'o ta'y kuery peguarã peteĩ-teĩ hoo pygua kuery ikuiaia rami vy.
²⁵ Ha'e kuery yvy ma Jazer ha'e Gileade re tetã oĩ va'e ha'e javi, ha'e Amom ramymino kuery yvy mbyte rupi, Rabá apy re Aroer oĩ va'e peve;
²⁶ ha'e gui Hesbom guive Ramate-Mispa ha'e Betonim peve, ha'e Maanaim guive Debir yvy peve;
²⁷ ha'e gui yvyugua py oĩ va'e ma Bete-Arã, Bete-Ninra, Sucote ha'e Zafom ma Hesbom pygua huvixa Seom openaague rembyrekue, ha'e gui Jordão yakã, ha'e ijyvýry rupi ikuai va'e ye'ê Quinerete apy peve, Jordão rovai re kuaray oua katy oĩ va'e.
²⁸ Ha'e va'e yvy ma Gade ramymino kuery pegua peteĩ-teĩ hoo pygua kuery ikuiaia rami vy, tetã ha'e tekoia ijyvýry ikuai va'e reve.
²⁹ Ha'e gui Manassés regua mbyte rupi oja'o va'ekue peguarã ma Moisés omboja'o peteĩ-teĩ hoo pygua kuery ikuiaia rami vy.
³⁰ Ha'e kuery rekoia ma Maanaim gui ijypy, ha'e gui Basã ha'e javi, Basã pygua huvixa Ogue openaague ha'e javi, ha'e tekoia Jair openaague ha'e javi, sessenta tetã Basã re ikuai va'e;
³¹ ha'e gui Gileade yvy mbyte rupi, ha'e Astarote ha'e Edrei tetã Basã pygua huvixa Ogue openaague. Ha'e va'e tetã ma Manassés ra'y Maquir pe omboaxa va'ekue, Maquir ramymino kuery mbyte rupi ikuai va'e pe omboaxa, peteĩ-teĩ hoo pygua kuery ikuiaia rami vy.
³² Ha'e va'e yvy ma Moisés omboja'o va'ekue Moabe regua nhuündy rupi oiko teri jave. Jordão yakã rovai re opyta, Jericó regua kuaray oua katy.
³³ Ha'e rã Levi regua pe ma Moisés nomboja'oi yvy, mba'eta ha'e kuery pegua ma SENHOR Israel kuery Ruete ae oiko, ha'e kuery pe ijayvu ma voiague rami vy.

14

Canaã yvy xorte rupi omboja'oague

- ¹ Po rami ma Canaã yvy re Israel kuery oyvyrã ojopy raka'e. Sacerdote Eleazar, Num ra'y Josué ha'e Israel kuery regua huvixa ikuai va'e omboja'o okuapy ha'e kuery pe.
² Ha'e kuery yvyrã xorte oexaa rupi omboja'o okuapy Moisés pe SENHOR ijayvuague rami vy, nove regua pe, ha'e peteĩ mbyte rupi oja'o va'ekue peguarã ae.
³ Ha'e rã mokoõ regua ha'e amboae mbyte rupi oja'o va'ekue yvyrã ma Moisés omboaxa ma voi Jordão yakã rovai re. Ha'e rã levita kuery pe ma nomboaxai ijyvyrã tyke'y kuery yvy mbyte rupi.
⁴ Mba'eta José ramymino kuery Manassés ha'e Efraim gui ma mokoõ regua ikuai. Ha'e gui levita kuery pe ma nomboaxai ijyvyrã.* Ha'e rami avi tetã omboaxa ha'e kuery ikuai aguã, ha'e gui tetã yvýry rupi omboaxa avi guymba vaka ha'e mymba mboae oguereko aguã.

* 14:4 José ramymino kuery reve doze ma ikuai araka'e Israel regua. Ha'e va'e doze regua pe anho ome'ê ijyvyrã, Levi regua pe e'ŷ.

5 Moisés pe SENHOR ijayvuague rami ae Israel kuery ikuai vy omboja'opa yvy.

Calebe pe Josué Hebrón yvy omboaxaague

6 Ha'e gui Josué-a py Judá ramymino kuery ovaẽ avi Gilgal py. Ha'e rami vy quenezeu regua Jefoné ra'y Calebe aipoe'i ixupe:

— Ndee reikuaa Nhanderuete remimbo'e Moisés pe SENHOR ijayvuague Cades-Barnéia py, xereko re ha'e nderekro re avi.[†]

7 Xee ma quarenta ma'etŷ areko va'ekue Cades-Barnéia gui SENHOR rembiguai Moisés xemondouka jave yvy re aikuaa pota aguã. Ha'e rã xee amombe'u porã ixupe xepy'a re aendu va'e.

8 Ha'e rã xeryvy kuery xerupive oje'oi va'ekue ma omongyjepa rei heta va'e kuery. Ha'e rã xee ma aĩ atâve tema SENHOR Xeruete oipota va'e ajapo aguã.

9 Ha'e ramo ha'e va'e ára Moisés oura vy aipoe'i va'ekue xevy: “Anhetê yvy repyrðague ma ndee ha'e neramymino kuery pegua oĩ raka'e rã peve guarã, SENHOR Xeruete oipota va'e rejapo aguã reĩ atã ramo”, he'i va'ekue xevy.

10 Ma'ẽ, SENHOR xere opena aŷ peve aikove aguã rami, ijayvuague rami vy. Quarenta e cinco ma'etŷ ma ojapo Moisés pe ha'e rami SENHOR ijayvuague, Israel kuery tekoa e'ŷa rupi teri oguata jave py. Ha'e gui aŷ ma xee oitenta e cinco ma'etŷ ma areko.

11 Xembaraete teri, Moisés xemondouka jave guare rami. Aŷ voi xembaraete aikovy ha'ekue rami ae, joe apu'ã aguã katy aa ha'e ajevy aguã.

12 Ha'e nunga rupi aŷ ma emboaxa xevy yvyty reia SENHOR aipoe'iague. Ha'e jave py rendu karamboae anaquim kuery ha'e py ikuiaia, ha'e tetã guaxu ikorapa va'ea. Ha'e rami teĩ xereve SENHOR oiko rã aipe'apa 'rã ijayvuague rami vy — he'i.

13 Ha'e rami rã Josué ogueroayvu porã Jefoné ra'y Calebe. Ha'e vy ixupe omboaxa Hebrón regua ijyvyrã.

14 Ha'e rami rã Hebrón optya quenezeu regua Jefoné ra'y Calebe mba'e, ixupe guarã ome'ẽ aŷ peve, SENHOR Israel kuery Ruete oipota va'e ojapo aguã oĩ atã ramo.

15 Ha'e va'e e'ŷ mbove Hebrón tetã rery ma Quiriate-Arba. Arba ma anaquim kuery regua gui yvateve va'ekue. Ha'e va'e rire yvy re optyu'upa ju joe opu'ãa gui.[‡]

Nove regua ha'e amboae regua mbyte rupi oja'o va'ekue yvyrã omboja'oague

15

Judá kuery pe ijyvyrã omboja'oague

1 Ha'e gui Judá ramymino kuery yvyrã xorte rupi omboja'oa peteĩ-teĩ hoo pygua kuery ikuiaia rami vy. Ha'e kuery yvy itui kuaray puku-a katy Edom yvy peve, Zim tekoa e'ŷa kuaray puku-a katy itui va'e apy peve.

2 Kuaray puku-a katy rupi ijyvy itui Ye'ẽ ro apy guive, ijapy kuaray puku-a katyguia guive.

3 Ha'e gui oo kuaray puku-a katy Acrabim katy oẽ ovya peve, Zim rupi oaxa, ha'e gui kuaray puku-a katy gui oẽ ovya Cades-Barnéia katy.

4 Oaxa Hezrom rupi, oẽ Adar peve, ha'e gui Carca rupi ju ojere ovvy. Oaxa Azmom, ha'e ovaẽ Egito katy'i yakã'i oĩ va'e py. Ha'e gui ijyvy oo ye'ẽ peve. Ha'e va'e rupi oo 'rã pendeyvyrã omboja'oa kuaray puku-a katy oĩ va'e.

5 Ha'e rã ijapy kuaray oua katyguia ma Ye'ẽ ro rembe rupi itui, Jordão yakã 'aa peve. Ijapy ka'arua katyguia ma ye'ẽ rembe ojere va'e gui oo, Jordão 'aa guive.

6 Ha'e gui oo Bete-Hogla peve, ha'e oaxa Bete-Arabá kuaray ijapu'a'ia katy rupi, oẽ ovvy Rúben ra'y Boã pegua ita oĩa peve.

[†] **14:6** Calebe ha'e Josué ma Canaã yvy re oikuaa pota aguã omondouka pyre regua, ha'e kuery anho nhomongeta va'ekue yvy py heta va'e kuery oike oje'oivy aguã re. Ha'e rã amboae kuery oje'oi va'ekue ma okyjepa. Ha'e nunga rupi Calebe ha'e Josué pe anho SENHOR ijayvu yvy re oike aguã re (Números 14.24). [‡] **14:15** Tery Quiriate-Arba ma “Arba pegua tetã” 'ea.

⁷ Oeve tema ovy Acor yvyugua guive Debir katy, ha'e gui kuaray ijapu'a'ia katy rupi ju oo Gilgal katy. Ha'e va'e ma oĩ Adumim katy oẽ ovya katy'i, kuaray puku-a katy yakã'i oĩ rami. Ha'e gui ma oaxa ovy En-Semes py yy oĩ va'e peve. Ha'e gui oove En-Rogel peve.

⁸ Ha'e va'e gui ma oẽ ovy Hinom ra'y rekoia yvyugua rupi, ha'e gui jebuseu kuery ikuai regua kuaray puku-a katy rupi. Ha'e va'e ma Jerusalém. Ha'e gui oẽ ovy Hinom yvyugua rexei kuaray oua katy yvyty oĩ va'e apyte peve, yvyugua refaim kuery ikuaiague kuaray ijapu'a'ia katy itui va'e apy peve.

⁹ Ha'e gui yvyty apyte guive oo yvu Neftoa py oĩ va'e peve. Ha'e gui oo oiny Efraim tetã yvyty reia rupi ikuai va'e peve. Oove tema Baalá peve. Ha'e va'e ma Quiriate-Jearim.

¹⁰ Ha'e gui ojere ovy Baalá guive kuaray oikea katy Seir yvyty peve oo vy. Oaxa ovy Jearim yvyty kuaray ijapu'a'ia katy oĩ va'e yvýry rupi. Ha'e va'e ma Quesalom. Ha'e gui oguejy ovy Bete-Semes katy. Timna rupi oaxa.

¹¹ Oove ju Ecrom yke kuaray puku-a katy oĩ va'e katy rupi. Siquerom katy oo vy oaxa yvyty Baalá, Jabneel py oẽ, ye'ẽ py mae ijapy.

¹² Ha'e rã yvy omboja'oa kuaray oikea katy itui va'e ma ye'ẽ tuvixa va'e rembe ae. Ha'e rami ma itui Judá ramymino kuery yvyrã omboja'oa, peteĩ-teĩ hoo pygua kuery ikuai rami vy.

Juízes 1.11-15

¹³ Ha'e gui Jefoné ra'y Calebe pe ma Josué omboaxa Judá ramymino kuery yvy mbyte py oiko aguã, SENHOR aipoe'iague rami vy. Ha'e va'e ma Quiriate-Arba, Hebrom 'epy va'e. Arba ma Enaque ru oiko va'ekue.

¹⁴ Ha'e va'e tetã gui Calebe oipe'a mboapy Enaque ra'y kuery regua: Sesai, Aimã ha'e Talmai, Enaque ramymino kuery meme.

¹⁵ Ha'e va'e gui oo Debir pygua kuerya katy. Ymave heryague ma Quiriate-Sefer.

¹⁶ Calebe aipoe'i:

— Quiriate-Sefer re ipo'aka vy oipe'apa va'ekue pe ma ame'ẽ 'rã xerajy Acsa ta'yxyrã — he'i.

¹⁷ Ha'e gui Calebe ryke'y Quenaz ra'y Otniel ae oipe'a. Ha'e ramo ta'yxyrã ome'ẽ guajy Acsa.

¹⁸ Ha'e va'e kunha Otniel-a py oo vy ixupe ijayvu guatyu pe peteĩ yvy re ojerure aguã re. Ha'e gui mburika áry gui oguejy ramo ixupe Calebe oporandu:

— Mba'e tu reipota?

¹⁹ Ombovai:

— Eme'ẽ mba'emo xevy. Yvy pirua rive xevy reme'ẽ rire eme'ẽve ju ygua ikuai va'e — he'i ramo ixupe ome'ẽ yvu yvy'ã re ha'e yvy'ã guy rupi ikuai va'e.

Judá kuery retã rery oĩa

²⁰ Pova'e ma Judá ramymino kuery rekoarã omboaxa pyre, peteĩ-teĩ hoo pygua kuery ikuai rami vy.

²¹ Judá ramymino kuery retã kuaray puku-a katy, Edom yvy katy'i ikuai va'e rery ma Cabzeel, Éder, Jagur,

²² Quiná, Dimona, Adada,

²³ Quedes, Hazor, Itnã,

²⁴ Zife, Telém, Bealote,

²⁵ Hazor-Hadata, Querioite-Hezrom (ha'e va'e ma Hazor),

²⁶ Amã, Sema, Moladá,

²⁷ Hazar-Gada, Hesmom, Bete-Plete,

²⁸ Hazar-Sual, Berseba, Biziotiá,

²⁹ Baalá, Iim, Ezém,

³⁰ Eltolade, Quesil, Horma,

³¹ Ziclague, Madmana, Sansana,

³² Lebaote, Silim, Aim ha'e Rimom. Ha'e javi vy ma vinte e nove tetã ikuai, ijyvýry tekao ikuai va'e reve.

³³ Ha'e gui yvy'ãmbe reia rupi ma Estaol, Zorá, Asná,

³⁴ Zanoa, En-Ganim, Tapua, Enã,

- ³⁵ Jarmute, Adulão, Socó, Azeca,
³⁶ Saaraim, Aditaim, Gedera ha'e Gederotaim. Ha'e javi vy ma catorze tetā ikuai, ijyvýry tekoai ikuai va'e reve.
³⁷ Ha'e gui Zenã, Hadasa, Migdal-Gade,
³⁸ Dileã, Mispa, Jocteel,
³⁹ Laquis, Bozcate, Eglom,
⁴⁰ Cabom, Laamás, Quitlis,
⁴¹ Gederote, Bete-Dagom, Naamá ha'e Maquedá. Ha'e javi vy ma dezesseis tetā ikuai ijyvýry tekoai ikuai va'e reve.
⁴² Ha'e gui Libna, Eter, Asã,
⁴³ Ifta, Asná, Nezibe,
⁴⁴ Queila, Aczibe ha'e Maressa. Ha'e javi vy ma nove tetā ikuai ijyvýry tekoai ikuai va'e reve.
⁴⁵ Ha'e gui Ecrom avi, ha'e ijyvýry tetā'i ha'e tekoai ikuai va'e reve,
⁴⁶ ha'e gui Ecrom tetā guive ye'ẽ peve, Asdode katy tekoai ikuai va'e ha'e javi reve.
⁴⁷ Ha'e gui Asdode ha'e ijyvýry tetā'i ha'e tekoai ikuai va'e reve, Gaza ha'e ijyvýry tetā'i ha'e tekoai ikuai va'e reve, Egito regua yakã ha'e ye'ẽ tuvixa va'e rembe peve.
⁴⁸ Yvy'ã reia rupi ikuai va'e ma Samir, Jatir, Socó,
⁴⁹ Daná, Quiriate-Sana (ha'e va'e ma Debir),
⁵⁰ Anabe, Estemoa, Anim,
⁵¹ Gósen, Holom ha'e Gilo. Ha'e javi vy ma onze tetā ikuai ijyvýry tekoai ikuai va'e reve.
⁵² Ha'e gui Arabe, Dumá, Esã,
⁵³ Janim, Bete-Tapua, Afeca,
⁵⁴ Hunta, Quiriate-Arba (ha'e va'e ma Hebron) ha'e Zior. Ha'e javi vy ma nove tetā ikuai ijyvýry tekoai ikuai va'e reve.
⁵⁵ Ha'e gui Maom, Carmelo, Zife, Jutá,
⁵⁶ Jezreel, Jocdeão, Zanoa,
⁵⁷ Caim, Gibeá ha'e Timna. Ha'e javi vy ma dez tetā ikuai ijyvýry tekoai ikuai va'e reve.
⁵⁸ Ha'e gui Halul, Bete-Zur, Gedor,
⁵⁹ Maarate, Bete-Anote ha'e Eltecom. Ha'e javi vy ma mboapy meme tetā ikuai ijyvýry tekoai ikuai va'e reve.
⁶⁰ Ha'e gui Quiriate-Baal (ha'e va'e ma Quiriate-Jearim) ha'e Rabá. Ha'e javi vy ma mokoõ tetā oĩ ijyvýry tekoai ikuai va'e reve.
⁶¹ Tekoa e'ŷa py oĩ va'e ma Bete-Arabá, Midim, Secaca,
⁶² Nibsã, Tetā-juky ha'e En-Gedi. Ha'e javi vy ma mboapy meme tetā ikuai ijyvýry tekoai ikuai va'e reve.
⁶³ Ha'e rã jebuseu kuery Jerusalém py ikuai va'e ma Judá ramymino kuery ndoipe'a kuaai. Ha'e ramo aŷ peve Jerusalém py jebuseu kuery ikuai Judá ramymino kuery mbyte.

16

Efraim kuery pe ijyvyrã omboja'oague

- ¹ Ha'e gui José ramymino kuery yvyrã xorte rupi omboaxaa va'ekue ma ijypy Jordão yakã ha'e Jericó katy'i gui. Ha'e gui oo Jericó regua kuaray oua katy yy oĩ va'e rupi, ha'e gui tekoai e'ŷa ha'e yvy'ã reia rupi oo Betel peve.
² Betel gui ma oo Luz katy, ha'e arquita kuery yvy oaxa Atarote peve.
³ Ha'e gui oguejy ov ykuery oikea katy Jafleti yvy peve, Bete-Horom yvy'ã guy oĩ va'e ha'e Gezer peve. Ye'ẽ rembe py ma ijapy.
⁴ Ha'e va'e ma José ra'y kuery Manassés ha'e Efraim regua yvyrã ojopy va'ekue.
⁵ Ha'e gui Efraim ramymino kuery yvyrã peteĩ-teĩ hoo pygua kuery ikuia rami vy ojopy va'ekue apy ma kuaray oua katy rupi oo Atarote-Adar guive Bete-Horom yvy'ã oĩ va'e peve.

⁶ Ha'e gui ye'ẽ katy oo. Kuaray ijapu'a'ia katy rupi oo Micmetate katy'i. Ha'e va'e gui ma kuaray oua katy ojevy ovy Taanate-Siló peve. Ha'e va'e rupi oo ju kuaray oua katy Janoa peve.

⁷ Janoa guive oguejy ovy Atarote ha'e Naarate katy. Jericó py ovaẽ vy Jordão yakã rembe py ijapy.

⁸ Ha'e gui Tapua guive kuaray oikea katy oo oiny Caná yakã'i peve. Ye'ẽ rembe py ma ijapy. Ha'e va'e ma Efraim ramymino kuery regua yvyrã omboaxa pyre, peteĩ-teĩ hoo pygua kuery ikuaria rami vy.

⁹ Efraim ramymino kuery pe omboja'oa avi amongue tetã Manassés ramymino kuery yvy mbyte ikuai va'e, ijyvýry tetã'i ha'e teko'a'i ikuai va'e ha'e javi reve.

¹⁰ Ha'e rã cananeu kuery Gezer py ikuai va'e ma ndoipe'ai okuapy. Ha'e rire ha'e va'e kuery ma Efraim kuery mbyte ikuai aÿ peve. Ha'e ramo omomba'eapo nhea'ã imbokuapy.

17

Manassés kuery mbyte rupi oja'o va'ekue pe ijyvyrã omboja'oague

¹ Ha'e gui Manassés regua kuery yvyrã ma xorte rupi avi omboaxaa. Manassés ma José ra'y oiko ypy'i va'ekue. Ha'e gui Manassés ra'y jypy'igua ma Maquir Gileade ru va'e, joe opu'ãa rupi oiko va'ekue. Ixupe ma Gileade ha'e Basã tekoia omboaxaa.

² Manassés ramymino kuery mboae ojopy avi oyvyrã, peteĩ-teĩ hoo pygua kuery ikuaria rami vy. Ha'e va'e kuery ma Abiezer ra'y kuery, Heleque, Asriel, Siquém, Hefer ha'e Semida ra'y kuery. Ha'e va'e kuery ma José ra'y Manassés ramymino kuery meme, peteĩ-teĩ hoo pygua kuery ikuaria rami vy.

³ Ha'e rã Manassés ra'y Maquir ramymino, Gileade ra'y Zelofeade hery va'e ma ndata'yi, tajy anho rei. Tajy kuery rery ma Macla, Noa, Hogla, Milca ha'e Tirza.

⁴ Ha'e va'e kuery ma ovaẽmba sacerdote Eleazar, Num ra'y Josué ha'e huvixa kuery renonde. Ha'e vy aipoe'i okuapy:

— Moisés pe SENHOR aipoe'i raka'e oreyvyrã omboaxa aguã orekyvy kuery ikuaria mbyte — he'i ramo ha'e kuery yvyrã Josué omboaxa tuu ryvy kuery ikuaria mbyte, SENHOR aipoe'iague rami vy.

⁵ Ha'e vy Manassés regua rekoarã omboaxave ju dez henda py, Gileade ha'e Basã yvy Jordão yakã rovai re oĩ va'e ojopy ae ma va'ekue áryve.

⁶ Mba'eta Manassés ramymino kuery kunhague ma ta'y kuery mbyte oguereko 'rãe yvy. Ha'e rã Manassés ramymino kuery mboae ma Gileade yvy ojopy ae ma va'ekue.

⁷ Ha'e gui Manassés kuery yvy apy ma Aser gui oo Micmetate, Siquém regua kuaray oua katy oĩ va'e peve. Ha'e gui kuaray puku-a katy oo En-Tapua pygua kuery ikuaria peve.

⁸ Manassés kuery ma Tapua yvy re hekoa. Ha'e rã Tapua tetã ma Efraim ramymino kuery pegua optya, Manassés regua yvy apy py oĩ va'eri.

⁹ Ha'e ramo ijyvy apy oguejy ovy Caná yakã peve. Ha'e rã Manassés yvy re, yakã gui kuaray puku-a katy tetã ikuai va'e ma Efraim pegua optya. Ha'e gui Manassés yvy apy ma yakã gui kuaray ijapu'a'ia katy rupi oo oiny. Ijapy ma ye'ẽ rembe py.

¹⁰ Efraim regua yvy ma kuaray puku-a katy oĩ, ha'e rã Manassés regua yvy ma kuaray ijapu'a'ia katy oĩ. Ha'e gui ijapy ma ye'ẽ rembe. Kuaray ijapu'a'ia katy rupi oĩ va'e ma Aser regua yvy. Ha'e rã kuaray oua katy rupi ma Issacar regua yvy oĩ.

¹¹ Mba'eta Issacar ha'e Aser regua yvy re amongue tetã ikuai va'e ma Manassés kuery peguarã optya. Ha'e va'e ma Bete-Seã ha'e tetã'i ijyvýry ikuai va'e, Ibleão, Dor, Taanaque ha'e Megido, yvy mboapy yvyty'i oĩ va'e re.

¹² Ha'e rami avi ha'e va'e tetã pygua kuery ma Manassés ramymino kuery ndoipe'a kuaai. Ha'e nunga rupi cananeu kuery ikuai ae tema ha'e va'e yvy re.

¹³ Ha'e gui Israel kuery hetá-etave ovy vy omomba'eapo nhea'ã cananeu kuery, ndoipe'apai.

¹⁴ Ha'e gui José ramymino kuery regua aipoe'i Josué pe:

— Mba'e re tu peteī henda py ete'i ri remboaxa oreyvyrā? Mba'eta ore kuery ma heta orekuai, aÿ peve SENHOR oremoingo porā ramo.

¹⁵ Josué ombovai:

— Pendereta va'e vy tapeo ka'aguy re, ha'e py pembokatu ferezeu ha'e refaim kuery yvy re, pendeyvy Efraim re yvy'ã reia oĩ va'e ipo'i'i vaipa ri ramo — he'i.

¹⁶ Ha'e ramo José ramymino kuery aipoe'ive ju:

— Yvy'ã reia re orerekaoa oĩ va'e ma nda'evei. Ha'e gui cananeu kuery yvyugua py ikuai va'e ma karóxa ferro guigua oguereko va'e meme. Bete-Seã py ha'e ijvvýry tetā'i rupi ikuai va'e ha'e javi oguereko avi, Jezreel yvy'ã guy py ikuai va'e kuery voi.

¹⁷ Ha'e ramo José ra'y Efraim ha'e Manassés regua kuery pe Josué ombovai vy aipoe'i:

— Peē kuery ma pendereta ha'e penembaraete va'e. Peteī henda py ete'i e'ŷ 'rā penderekaoa.

¹⁸ Aÿ ma yvy'ã reia ma pendevy guarā itui. Ka'aguy anho rei teī pembokatupa 'rā. Ijapya peve 'rā penderekaoa, mba'eta peipe'apa 'rā cananeu kuery, imbaraketekue ha'e karóxa ferro guigua guive oguereko va'eri — he'i.

18

Yvy nomboja'opai teriaque sete henda rupi omboja'oague

¹ Ha'e gui Israel kuery ijatypa okuapy Siló py. Ha'e py oupi okuapy oo onhemboaty atyrā, yvy ha'e javi re ha'e kuery ipo'aka rire.

² Ha'e rami avi Israel kuery mbyte sete regua ikuai oyvyrā ndojopyi teri va'e.

³ Ha'e ramo Josué aipoe'i Israel kuery pe:

— Raka'e peve tu pearō 'rā pendevyvrā SENHOR peneramoī kuery Ruete ome'ẽ va'ekue pejopy aguā?

⁴ Peteī-teī regua gui peiporavo 'rā mboapy avakue xee amondouka va'erā. Ha'e kuery toiko katu oo aguā. Yvy jave rupi toguata, tombopara kuaxia re peteī-teī regua oyvyrā ndojopyi va'ekue. Ha'e gui toupa ju xea py.

⁵ Ha'e rami vy omboja'o 'rā yvy sete henda rupi. Ha'e rā Judá kuery ma oyvy re ae ma ikuai kuaray puku-a katy. José ramymino kuery voi oyvy re ae ma ikuai kuaray ijapu'a'ia katy.

⁶ Pembopara 'rā yvy sete henda rupi omboja'oa aguā regua. Ha'e gui Peru 'rā xevy, xee xortea aexa aguā SENHOR Nhanderuete renonde peikuaa aguā.

⁷ Ha'e rā levita kuery ma ndojopyi 'rā oyvyrā peē kuery mbyte, mba'eta ha'e kuery pegua ma sacerdote SENHOR pegua ikuai aguā. Ha'e rami avi Gade, Rúben ha'e Manassés regua mbyte rupi oja'o va'ekue ma ojopy ae ma oyvyrā Jordão yakā rovai re kuaray oua katy, ha'e kuery pe SENHOR rembiguai Moisés omboaxa va'ekue — he'i.

⁸ Ha'e rami rā ha'e va'e avakue opu'ã vy oje'oi. Yvy regua ombopara aguā oje'oi va'e kuery pe Josué ijayvu vy aipoe'i imondovy:

— Tapeo, peguata yvy ha'e javi rupi. Pemboparapa kuaxia re. Ha'e vy pejevy ju xea py apy Siló py ae, xortea aexa aguā pêvy SENHOR renonde — he'i.

⁹ Ha'e ramo avakue oje'oi. Yvy ha'e javi rupi oaxa jogueravy. Kuaxia re ombopara tetā ikuai va'e ha'e javi, sete henda rupi ombopara oje'oviy. Ha'e vy ojevypa ju Josué-a py tekao Siló py.

¹⁰ Ha'e ramo SENHOR renonde Josué ha'e kuery pe oexa xortea Siló py. Ha'e rami vy Israel kuery yvyrā Josué omboja'o ha'e py, peteī-teī regua jave ikuiaia rami vy.

Benjamim regua kuery pe ijvyrā omboja'oaague

¹¹ Ha'e gui Benjamim ramymino kuery pe ma xorte oexa peteī-teī hoo pygua kuery ikuiaia rami vy. Ha'e gui ijvyrā xorte rupi optya Judá ha'e José ramymino kuery yvy mbyte py.

¹² Ha'e kuery yvy apy ma kuaray ijapu'a'ia katy oo oiny Jordão yakā guive. Jericó rexei gui oẽ ov ykuery ijapu'a'ia katy, ha'e gui oẽ ov yvy'ã reia rupi kuaray oikea katy. Bete-Áven teko a e'ŷa py ma ijapy.

¹³ Ha'e va'e gui oaxa ov ykuery ijapu'a'ia katy, Luz regua ka'arua katy. Ha'e va'e ma Betel. Oguejy ov ykuery Atarote-Adar peve, Bete-Horom yvy'ã guy rupi oĩ va'e regua yvyty kuaray ijapu'a'ia katy oĩ va'e yvy'iry peve.

¹⁴ Oove tema yvyty yke kuaray puku-a katy oĩ va'e rupi kuaray oikea katy oo vy. Ijapy ma Judá ramymimo kuery retã Quiriate-Baal py. Ha'e va'e ma Quiriate-Jearim. Ha'e va'e ma ijapy kuaray oikea katy oĩ va'e.

¹⁵ Ha'e gui ijapy kuaray puku-a katyguia ma ijypy Quiriate-Jearim apy kuaray oẽa katy oĩ va'e gui. Ha'e gui oove ju Neftoa py yvu ikuai va'e peve.

¹⁶ Oguejy ov yvyty Hinom ra'y rekoia yvyugua rexei oĩ va'e peve, refaim kuery rekoia yvyugua regua kuaray ijapu'a'ia katy rupi. Ha'e gui oguejy ov y Hinom yvyugua rupi, jebuseu kuery rekoia yvy'ã guy reia rupi kuaray puku-a katy oo vy. Ha'e gui En-Rogel katy ju oguejy.

¹⁷ Ojeapa ov ykuery ijapu'a'ia katy vy ovaẽ En-Semes py. Ha'e gui ma oaxa oiny Adumim yvy'ã re Gelilote oĩ va'e katy'i. Ha'e vy oguejy ov y Rúben ra'y Boã pegua ita oĩa peve.

¹⁸ Oo ju kuaray puku-a katy yvy joja reia rupi, yvu ikuai va'e katy'i rupi oo vy. Ha'e gui oguejy ov yvy'ãmbe reia katy.

¹⁹ Ha'e va'e gui ma ijapy oaxa ov ykuery ijapu'a'ia katy rupi. Opa 'rã Ye'ẽ ro rembe py, Jordão yakā 'aa py. Ha'e va'e ma yvy apy kuaray puku-a katy oĩ va'e.

²⁰ Ha'e gui ijapy kuaray oua katy rupi oĩ va'e ma Jordão rembe rupi oĩ. Ha'e va'e ma Benjamim ramymimo kuery pegua yvy apy ojere ov yva'e regua, peteĩ-teĩ hoo pygua kuery ikuaria rami vy.

Benjamim kuery retã rery oĩa

²¹ Benjamim regua peteĩ-teĩ hoo pygua kuery ikuaria rami vy ha'e kuery pegua tetã ma Jericó, Bete-Hogla, Emeque-Qesis,

²² Bete-Arabá, Zemaraim, Betel,

²³ Avim, Pará, Ofra,

²⁴ Quefar-Amonai, Ofni ha'e Geba. Ha'e javi vy ma doze tetã ikuai, ijyvýry tekoia ikuai va'e reve.

²⁵ Ha'e gui Gibeão, Ramá, Beerote,

²⁶ Mispa, Cefira, Mosa,

²⁷ Requém, Irpeel, Tarala,

²⁸ Zela, Elefe, Jebus (ha'e va'e ma Jerusalém), Gibeá ha'e Quiriate. Ha'e javi vy ma catorze tetã ikuai, ijyvýry rupi tekoia ikuai va'e reve. Ha'e va'e ma Benjamim ramymimo kuery yvy, peteĩ-teĩ hoo pygua kuery ikuaria rami vy.

19

Simeão kuery pe ijyvyrã omboja'oague

¹ Ha'e gui Simeão pe, Simeão ramymimo kuery pe ma mokoia xorte oexa, peteĩ-teĩ hoo pygua kuery ikuaria rami vy. Ha'e va'e kuery yvy ma Judá ramymimo kuery yvy mbyte py itui.

² Ha'e kuery yvyrã ojopy va'ekue re oĩ Berseba, Seba, Moladá,

³ Hazor-Sual, Balá, Ázen,

⁴ Eltolade, Betul, Horma,

⁵ Ziclague, Bete-Marcabote, Hazar-Susa,

⁶ Bete-Lebaote ha'e Saruém. Ha'e javi vy ma treze tetã ikuai, ijyvýry tekoia ikuai va'e reve.

⁷ Ha'e gui Aim, Rimom, Eter ha'e Asã, irundy tetã, ijyvýry tekoia ikuai va'e reve.

⁸ Ha'e gui oĩ avi ha'e va'e tetã yvýry tekoia ikuai va'e ha'e javive, Baalate-Beer peve. Ha'e va'e ma Ramá Neguebe regua. Ha'e va'e ma Simeão ramymimo kuery yvyrã ojopy va'ekue, peteĩ-teĩ hoo pygua kuery ikuaria rami vy.

⁹ Simeão ramymino kuery yvyrā ma Judá ramymino kuery yvy gui omboja'oa, mba'eta ha'e kuery yvy ma tuvixa ete ha'e kuery pe. Ha'e nunga rupi Simeão ramymino kuery pe ha'e kuery yvy gui omboja'oa ikuai aguā.

Zebulom kuery pe ijyvyrā omboja'oague

¹⁰ Ha'e gui Zebulom ramymino kuery pe mboapya xorte oexa peteī-teī hoo pygua kuery ikuiaia rami vy. Ha'e kuery yvy apy ma Saride peve oo.

¹¹ Oē ovy kuaray oikea katy rupi Marala peve. Dabesete gui oo va'e ovaē yakā'i Jocneão katy'i oī va'e peve.

¹² Saride gui ojeapa ovy kuaray oua katy, Quislote-Tabor kyvō peve. Daberate katy oo vy Jafia peve oē ovy.

¹³ Ha'e va'e gui oaxa ovy kuaray oēa katy Gate-Hefer ha'e Ete-Cazim katy. Rimom katy oo oiny Neá peve.

¹⁴ Ha'e va'e rupi ojere ovy vy oaxa kuaray ijapu'a'ia katy Hanatom peve. Ijapy Ifta-El yvy'ā guy py.

¹⁵ Oīve ju Catate, Naalal, Sinrom, Idala ha'e Belém. Ha'e javi vy doze tetā ikuai, ijyvýry tekao ikuai va'e reve.

¹⁶ Ha'e va'e ma Zebulom ramymino kuery yvyrā ojopy va'ekue, peteī-teī hoo pygua kuery ikuiaia rami vy, ha'e va'e tetā ha'e ijyvýry tekao ikuai va'e reve.

Issacar kuery pe ijyvyrā omboja'oague

¹⁷ Ha'e gui Issacar ju. Issacar ramymino kuery pe ma irundaya xorte oexa, peteī-teī hoo pygua kuery ikuiaia rami vy.

¹⁸ Ha'e va'e kuery yvy re oī Jezreel, Quesulote, Suném,

¹⁹ Hafaraím, Siom, Anacarate,

²⁰ Rabite, Quisião, Ebés,

²¹ Remete, En-Ganim, En-Hada ha'e Bete-Pazes.

²² Ijyvy apy ma Tabor, Saazima ha'e Bete-Semes rupi oaxa ovy vy Jordão yakā rembe py ijapy. Ha'e javi vy dezesseis tetā ikuai, ijyvýry tekao ikuai va'e reve.

²³ Ha'e va'e ma Issacar ramymino kuery yvyrā ojopy va'ekue, peteī-teī hoo pygua kuery ikuiaia rami vy, ha'e va'e tetā ha'e ijyvýry tekao ikuai va'e reve.

Aser kuery pe ijyvyrā omboja'oague

²⁴ Aser ramymino kuery pe ma peteī nhiruña xorte oexa, peteī-teī hoo pygua kuery ikuiaia rami vy.

²⁵ Ha'e kuery yvy re ma oī Helcate, Hali, Béten, Acsafe,

²⁶ Alameleque, Amade ha'e Misal. Ha'e gui oaxa ovy kuaray oikea katy Carmelo peve, ha'e gui Sior-Libnate katy.

²⁷ Ojeapa ovy kuaray oua katy Bete-Dagom peve. Oaxa ovy Zebulom ha'e Ifta-El yvyugua rupi, kuaray ijapu'a'ia katy oo Bete-Emeque ha'e Neiel peve. Ha'e gui oo oiny nhandeaxua regua rupi Cabul peve.

²⁸ Oaxa avi Ebrom, Reobe, Hamom ha'e Caná rupi, Sidom tuvixa va'e peve oo.

²⁹ Ojere ovy Ramá katy, Tiro tetā ikorapa va'e peve. Ha'e gui ma ojeapa ovy Hosa katy. Aczibe yvýry ye'ē rembe py ijapy.

³⁰ Oī avi Umá, Afeca ha'e Reobe. Ha'e javi vy ma vinte e duas tetā ikuai ijyvýry tekao ikuai va'e reve.

³¹ Ha'e va'e ma Aser ramymino kuery yvyrā ojopy va'ekue, peteī-teī hoo pygua kuery ikuiaia rami vy.

Naftali kuery pe ijyvyrā omboja'oague

³² Ha'e gui Naftali ramymino kuery pe ma mboapya memea xorte oexa, peteī-teī hoo pygua kuery ikuiaia rami vy.

³³ Ha'e kuery yvy apy ma Helefe guive oo carvalho yvyraty Zaananim py oī va'e peve. Ha'e gui Admim-Neguebe katy oo, ha'e Jabneel katy Lacum peve. Ha'e gui Jordão yakā rembe py ijapy.

³⁴ Ojere ovy kuaray oikea katy rupi Aznote-Tabor katy. Ha'e gui ma oaxa ovy Hucoque katy. Kuaray puku-a katy oī Zebulom yvy, ha'e rā kuaray oikea katy oī Aser yvy. Ha'e gui kuaray oikea katy oī Judá regua yvy Jordão rembe rupi.

³⁵ Tetā ikorapa va'e ma Zidim, Zer, Hamate, Racate, Quinerete,

³⁶ Adamá, Ramá, Hazor,

³⁷ Quedes, Edrei, En-Hazor,

³⁸ Irom, Migdal-El, Horém, Bete-Anate ha'e Bete-Semes. Ha'e javi vy dezenove tetā ikuai, ijyvýry tekoia ikuai va'e reve.

³⁹ Ha'e va'e ma Naftali ramymino kuery yvyrā ojopy va'ekue peteī-teī hoo pygua kuery ikuai rami vy, ha'e va'e tetā ha'e ijyvýry tekoia ikuai va'e reve.

Dā kuery pe ijyvyrā omboja'oague

⁴⁰ Ha'e gui Dā ramymino kuery pe ma sete-a xorte oexa, peteī-teī hoo pygua kuery ikuai rami vy.

⁴¹ Ha'e kuery yvy re ma oī Zorá, Estaol, Ir-Semes,

⁴² Saalabim, Aijalom, Itla,

⁴³ Elom, Timna, Ecrom,

⁴⁴ Elteque, Gibetom, Baalate,

⁴⁵ Jeúde, Bene-Beraque, Gate-Rimom,

⁴⁶ Me-Jarcom, Racom ha'e yvy Jope katy'i oī va'e.

⁴⁷ Dā ramymino kuery pe ijyvvy kyrīve'i ramo ha'e kuery oje'oi vy joguero'a okuapy Lesém pygua kuery reve. Ipo'aka vy ojukapa kyxe py. Tetā re ipo'aka ma vy ikuai ha'e py. Ha'e vy omboery Dā, guamoī rery rupi ae.

⁴⁸ Ha'e va'e ma Dā ramymino kuery yvyrā ojopy va'ekue, peteī-teī hoo pygua kuery ikuai rami vy, ha'e va'e tetā ha'e ijyvýry tekoia ikuai va'e reve.

Josué peguarā tetā omboaxaague

⁴⁹ Ha'e gui Israel kuery yvy omboja'opa ma rire Num ra'y Josué pe ome'ē hekoarā ha'e kuery yvy mbyte py.

⁵⁰ SENHOR ijayvuague rami vy ixupe ome'ē Timnate-Sera tetā ojerureague, Efraim kuery ikuai mbyte py yvy'ā reia oī va'e py. Ha'e ramo ha'e va'e tetā ha'e ojapo jevy vy oiko ha'e py.

⁵¹ Ha'e va'e yvy ma sacerdote Eleazar, Num ra'y Josué ha'e heta va'e kuery ruvixa kuery omboja'o okuapy xorte oexa vy. Israel kuery yvyrā omboja'o Siló py SENHOR renonde, onhemboaty atyrā ojapo va'ekue rokē py. Ha'e rami vy opa ma yvy omboja'o.

20

Tetā jojukaare onhemi aguā oiporavoague

¹ Ha'e gui SENHOR aipoe'i Josué pe:

² — Aipo're Israel kuery pe: “Peiporavo ke amongue tetā onhemi atyrā, Moisés rupi pendevy ajapo ukaague rami vy.”*

³ Ha'e va'e tetā jojukaare onhemiati 'rā oī, jojuka rive va'e, potae vy e'ŷ, ojekore vy rive jojuka va'ekue oo jepe aguā jouguy omoēague re imbopagaarā gui.

⁴ Ha'e va'e tetā katy oo 'rā onhemi aguā. Tetā kora rokē py ovaē vy ha'e pygua nhomongeta va'ety kuery pe omombe'upa 'rā guekokue. Ha'e ramo mae omoinge 'rā tetā py. Ha'e vy ixupe ome'ē 'rā ha'e kuery reve oiko aguā.

⁵ Xapy'a rei jouguy omoēague re imbopagaarā ha'e py ovaē ramo ipo py ha'e pygua kuery nomboaxai 'rā jojukaare, potae vy e'ŷ jojuka rire, nda'ija'e e'ŷi guive.

⁶ Ha'e ramo ha'e va'e tetā py ae 'rā jojukaare oī, heta va'e kuery renonde ojexa uka rā omboayvu rā guarā, ha'e gui sacerdote yvateve va'e ha'e va'e jave py oī va'e omano e'ŷa ja. Ha'e ramo mae ma jojuka rive va'ekue oē vy ngoo katy ju 'rā ojevy tetā onhaague py ae", 're.

* 20:2 Números 35.9-28; Deuterônômio 4.41-43; 19.1-13

⁷ Ha'e gui ma tetā ha'e kuery oiporavo va'e ma Galiléia regua Quedes, Naftali regua yvy'ã reia re oĩ va'e; Efraim regua Siquém yvy'ã reia re oĩ va'e; ha'e Quiriate-Arba Hebron hery mboae va'e, Judá regua yvy'ã reia re oĩ va'e.

⁸ Ha'e gui Jordão yakā rovai re Jericó rexei kuaray oua katy ma oiporavoa ae ma Rúben kuery ikuaria Bezer teko a e'ŷa yvy'âmbea tuvixa va'e re oĩ va'e; ha'e Gileade regua Ramote Gade kuery ikuaria py, ha'e gui Basã regua Golã, Manassés kuery ikuaria py.

⁹ Ha'e va'e tetā oiporavo Israel kuery ha'e javi pe, amboae yvy regua ha'e kuery mbyte ikuai va'e pe guive. Ha'e py potae vy e'ŷ jojuka va'ekue ha'e javi onhemi atyrã, joguy omoëague re imbopagaarã po py omano e'ŷ aguã, ha'e rami 'râgue py heta va'e kuery renonde ojexa uka aguã.

21

1 Crônicas 6.54-81

¹ Ha'e gui sacerdote Eleazar ha'e Num ra'y Josué oĩa py ovaẽ okuapy levita regua tujakueve ruvixa ikuai va'e, ha'e Israel kuery regua ruvixa ikuaria py.

² Canaã yvy re Siló oĩ va'e py ha'e kuery ijayvu vy aipoe'i:

— Moisés rupi SENHOR ijayvu raka'e orevy pemboaxa aguã tetā orekuai aguã, ha'e ijyvýry rupi yvy itui va'e orerymba kuery roguereko aguã — he'i.

³ Ha'e rami rã SENHOR aipoe'iague rami vy levita kuery pe Israel kuery omboaxa tetā oyvy re oĩ va'e, ha'e ijyvýry yvy itui va'e.

⁴ Coatita kuery pe ranhe xorte oexa. Ha'e kuery regua sacerdote Arão ramymino kuery levita ikuai va'e ma xorte rupi ojopy treze tetā Judá, Simeão ha'e Benjamim kuery yvy regua.

⁵ Ha'e rã Coate ramymino kuery mboae ma xorte rupi ojopy dez tetā Efraim, Dã ha'e Manassés regua mbyte rupi oja'o va'ekue yvy regua.

⁶ Ha'e gui Gérson ramymino kuery ma xorte rupi ojopy treze tetā Issacar, Aser, Naftali ha'e Manassés regua oyvyrã ojopy ypy va'ekue yvy regua Basã py.

⁷ Ha'e gui Merari ramymino kuery ma peteñ-teñ hoo pygua kuery ikuaria rami vy ojopy doze tetā Rúben, Gade ha'e Zebulom kuery yvy regua.

⁸ Ha'e rami py levita kuery pe Israel kuery omboaxa ha'e va'e tetā ha'e javi, ijyvýrykue reve. Xorte rupi omboaxa, Moisés rupi SENHOR ojapo ukaague rami vy.

⁹ Ha'e gui Judá ha'e Simeão ramymino kuery yvy regua pova'e tetā omboaxa.

¹⁰ Levi ra'y Coate ramymino Arão ra'y kuery ikuai aguã, ha'e kuery pe ranhe xorte oexa.

¹¹ Ha'e kuery pe omboaxa Quiriate-Arba Judá regua yvy'ã reia re oĩ va'e (ha'e va'e ma Hebron), ijyvýrykue reve. Arba ma Enaque ru oiko va'ekue.

¹² Ha'e rã tetā yvýrykue ha'e teko a ikuai va'e ma Jefoné ra'y Calebe peguarã omboaxaa ae ma.

¹³ Ha'e gui sacerdote Arão ramymino kuery pe omboaxa Hebron tetā jojukaare oo jepe aguã, ijyvýrykue reve. Omboaxa avi Libna,

¹⁴ Jatir, Estemoa,

¹⁵ Holom, Debir,

¹⁶ Aim, Jutá ha'e Bete-Semes ijyvýrykue reve meme. Ha'e javi vy ma nove tetā omboaxa mokoñ regua yvy re.

¹⁷ Ha'e gui Benjamim kuery yvy regua ma irundy tetā omboaxa: Gibeão, Geba,

¹⁸ Anatote ha'e Almom, ijyvýrykue reve meme.

¹⁹ Ha'e javi vy sacerdote Arão ramymino kuery pegua ma treze tetā omboaxaa ijyvýrykue reve.

²⁰ Ha'e gui Levi ra'y Coate ramymino kuery ma tetā ojopy xorte rupi Efraim kuery yvy regua.

²¹ Ha'e kuery pe omboaxa Siquém tetā jojukaare oo jepe aguã Efraim regua yvy'ã reia re, ijyvýrykue reve. Omboaxa avi Gezer,

²² Quibzaim ha'e Bete-Horom ijyvýrykue reve meme, irundy tetā.

²³ Ha'e gui Dã kuery yvy regua ma irundy tetā omboaxa: Elteque, Gibetom,

²⁴ Aijalom ha'e Gate-Rimom, ijyvýrykue reve meme.

- ²⁵ Ha'e gui Manassés regua mbyte rupi oja'o va'ekue yvy regua ma mokoī tetā omboaxa: Taanaque ha'e Gate-Rimom, ijyvýrykue reve meme.
- ²⁶ Ha'e javi vy ma dez tetā ijyvýrykue reve omboaxaa Coate ramymino kuery mboae pe.
- ²⁷ Ha'e gui Levi ra'y Gérson ramymino kuery pe ma Basā py Manassés regua kuery yvy regua omboaxa mokoī tetā: Golā jojukaare oo jepe aguā, ha'e Beesterá guive, ijyvýrykue reve meme.
- ²⁸ Issacar kuery yvy regua ma irundy tetā omboaxa: Quisião, Daberate,
- ²⁹ Jarmute ha'e En-Ganim, ijyvýrykue reve meme.
- ³⁰ Aser kuery yvy regua ma irundy tetā omboaxa: Misal, Abdom,
- ³¹ Helcate ha'e Reobe, ijyvýrykue reve meme.
- ³² Naftali kuery yvy regua ma Galiléia py omboaxa Quedes jojukaare oo jepe aguā, ijyvýrykue reve. Omboaxa avi Hamote-Dor ha'e Cartā ijyvýrykue reve meme, mboapy tetā.
- ³³ Ha'e javi vy Gérson regua kuery peteī-teī hoo pygua kuery ikuiaia rami vy ma treze tetā ojopy ijyvýrykue reve meme.
- ³⁴ Ha'e gui Levita kuery mboae Merari ramymino kuery pe ma Zebulom kuery yvy regua ma irundy tetā omboaxa: Jocneão, Cartá,
- ³⁵ Dírnha ha'e Naalal, ijyvýrykue reve meme.
- ³⁶ Rúben kuery yvy regua ma irundy tetā omboaxa: Bezer, Jaza,
- ³⁷ Qudemote ha'e Mefaate, ijyvýrykue reve meme.
- ³⁸ Gade kuery yvy gui ma Gileade py omboaxa Ramote jojukaare oo jepe aguā, ijyvýrykue reve. Omboaxa avi Maanaim,
- ³⁹ Hesbom ha'e Jazer ijyvýrykue reve meme, irundy tetā ha'e javi vy.
- ⁴⁰ Ha'e va'e tetā ha'e javi ma xorte rupi omboaxaa Merari ramymino kuery pe, peteī-teī hoo pygua kuery ikuiaia rami vy, Levi regua voi ikuai ramo. Doze tetā ojopy.
- ⁴¹ Ha'e rami vy Israel kuery yvy regua ma quarenta e oito tetā omboaxa levita kuery pe, ijyvýrykue reve meme.
- ⁴² Peteī-teī tetā omboaxa ijyvýry rupi yvy itui va'e reve. Ha'e va'e tetā ha'e javi ma ha'e rami meme omboaxa.
- ⁴³ Ha'e rami py Israel kuery pe SENHOR ome'ē yvy ha'e javi, tamoī kuery pe ome'ē aguā re ourague rami vy. Ha'e ramo ojopy ma vy ikuai ha'e py.
- ⁴⁴ Ha'e kuery pe SENHOR ome'ē opty'u aguā oyvy ha'e javi rupi, tamoī kuery pe ourague ha'e javi rami vy. Hovaigua kuery neī peteīve nda'ipo'akai ha'e kuery re, ha'e kuery po py SENHOR omboaxapa ramo.
- ⁴⁵ Israel kuery pe mba'emo porā ojapo aguā re SENHOR ijayvuague peteī henda py voi ndoaxa rivei. Ha'e javi ojeupity.

22

Mokoī regua ha'e amboae regua mbyte rupi oja'o va'ekue Josué ogueroayvu porāmba ma vy hoo katy omondoukaague

¹ Ha'e ramo Josué oña py oenoī Rúben, Gade ha'e Manassés regua mbyte rupi oja'o va'ekue.

² Ha'e vy aipoe'i ha'e kuery pe:

— Peē kuery pe SENHOR rembiguai Moisés ijayvuague pejapopa ma. Ha'e gui xee voi xenhe'ē rendu pekuapy ajapo uka va'e ha'e javi py.

³ Are ma, aŷ peve napeipytyvō e'ŷi penderyvy kuery. Ha'e rami 'rāgue py pendejee pemoī SENHOR Penderuete ojapo uka va'ekue pejapopa aguā.

⁴ Penderyvy kuery pe SENHOR Penderuete ome'ē ma opty'u aguā, ijayvuague rami vy. Ha'e nunga rupi pejevy aŷ, tapeo penderekao katy, yvy pendevyguia itui va'e katy, SENHOR rembiguai Moisés Jordão yakā rovai re pendevy omboaxa va'ekue py.

⁵ Ha'e rami teī pemoī porā pota ke lei SENHOR rembiguai Moisés pendevy ojapo uka va'ekue, po rami: Peayvu 'rā SENHOR Penderuete, peiko 'rā ixuguigua tape rupi anho,

pemoi 'rā ojapo uka va'ekue pejapopa aguā, pejepe'a eme ixugui, ha'e peiko ixupe pendepy'a ha'e penenhe'ē ha'e javi py — he'i.

⁶ Ha'e rami vy Josué ogueroayvu porāmba ma vy omondoukapa. Ha'e ramo guekoa katy ae oje'oi.

⁷ Ha'e rami mba'eta Manassés regua kuery yvyrā ma Basā yvy re Moisés omboaxa ae ma va'ekue. Ha'e rā ha'e kuery regua mboae kuery yvyrā ma Josué omboaxa va'ekue tyvy kuery ikuiaia mbyte, kuaray oikea katy Jordão yakā kyvōgu re. Ha'e gui Josué hekoia katy omondoukapa ta ma vy ogueroayvu porāmba.

⁸ Ha'e vy aipoe'i ha'e kuery pe:

— Perekopa reve tapejevy porā'i penderekaoa katy, penerymba kuery reta reve, prata, ouro, overa va'e, ferro ha'e ao heta ete reve. Penderyvy kuery pe tapemboja'o penderovaigua kuery mba'e rei-reikue — he'i.

⁹ Ha'e ramo Rúben, Gade ha'e Manassés regua mbyte rupi oja'o va'ekue ojevypa. Canaā yvy re Israel kuery reko Siló gui oje'oi ju Gileade yvy re ha'e kuery yvy itui va'e katy, ha'e py ae hekoarā Moisés omboaxa rire, SENHOR ijayvuague ramy vy.

Jordão yakā rembe re altar ojapo jave guare

¹⁰ Ha'e gui Rúben, Gade ha'e Manassés regua mbyte rupi oja'o va'ekue oje'oi vy Jordão yakā rembe peve ovaē. Ha'e py ma peteī altar ojapo okuapy Jordão rembe re. Ha'e va'e altar ma tuvixa ete oexaa pavē va'erā.

¹¹ Ha'e ramo Israel kuery oendu aipo'ea rā: “Rúben ha'e Gade kuery Manassés regua mbyte rupi oja'o va'ekue reve ojapo okuapy peteī altar Jordão yakā rembe re, Canaā yvy Israel kuery ikuiaia katy”, 'ea rā.

¹² Ha'e ramigua Israel kuery oendu vy ono'õmba okuapy Siló py, ha'e gui oje'oi vy guyvy kuery rovai opu'ā aguā.

¹³ Ha'e gui Gileade yvy katy Israel kuery omondouka sacerdote Eleazar ra'y Finéias hery va'e, Rúben ha'e Gade kuery Manassés regua mbyte rupi oja'o va'ekue ikuiaia katy.

¹⁴ Hupive omondouka avi dez huvixa kuery, Israel kuery peteī-teī regua gui. Ha'e va'e kuery ma ngoo pygua kuery tujakueve ikuai, Israel regua heta va'e kuery ikuiaia gui omondouka.

¹⁵ Ha'e ramo ha'e kuery oje'oi vy Rúben ha'e Gade kuery Manassés regua mbyte rupi oja'o va'ekue reve ikuiaia py ovaē. Ha'e vy ha'e kuery pe ijayvu vy aipoe'i okuapy:

¹⁶ — SENHOR pegua kuery nhomboaty va'e ha'e javi aipoe'i uka okuapy: Mba'exa tu pendeayvuague ramy e'ŷ peiko Israel kuery Ruete rovai? Kova'e ára SENHOR pe pendekuaia gui pejepa'apa ri pekuapy. Mba'eta altar pejapo SENHOR rovai pendekuaia aguā.

¹⁷ Yma Peor py nhande kuery ojapo vaiague ri ty'y kyrī'i ete pēvy?* Ha'e nungakue gui ndajajeky'a'o ukapai teri aŷ peve, nhaneramoī kuery re SENHOR mba'emo vai ombou va'ekue ri.

¹⁸ Mba'erā tu ha'vy aŷ voi pepoipa ri SENHOR gui? Mba'eta SENHOR rovai aŷ pendekuaia ramo araka'eve rā ipoxy 'rā Israel kuery ha'e javi rovai.

¹⁹ Xapy'a rei pendeyvyrā pejopy va'ekue re ha'eve'ŷa ramo peva ju SENHOR pegua yvy re, ha'e SENHOR pegua oo oña py. Mba'eta ha'eve 'rā ore kuery mbyte penderekaoa aguā. Ha'e rami e'ŷ vy teī pejapo vai eme guive SENHOR rovai, neī ore kuery rovai, SENHOR pegua altar 'rāgue py altar mboae pejapo py.

²⁰ Tyrā pa Zera ra'y Acā mba'emo omomba pyrā ojopy vy ha'eve'ŷa ramo ojapo jave Israel kuery ha'e javi áry e'ŷ teve ou raka'e mboxy? Mba'eta ha'e anho'i e'ŷ omano va'ekue ojapo vaiague re — he'i okuapy.*

²¹ Ha'e ramo Rúben, Gade ha'e Manassés regua mbyte rupi oja'o va'ekue ombovai okuapy Israel kuery ruvixa ikuai va'e pe. Ha'e vy aipoe'i:

* 22:17 Números 25.1-9 * 22:20 Josué 7

²² — SENHOR, Nhanderuete ipo'akapa va'e! SENHOR, Nhanderuete ipo'akapa va'e! Ha'e ma oikuaa porã. Ha'e Israel kuery voi toikuaapa. Xapy'a rei ronhe'ẽ rendu e'ŷa rupi, e'ŷ vy SENHOR rovai rojapo vaia rupi roiko ramo toremomba aŷ'ive.

²³ Xapy'a rei SENHOR gui rojepe'a aguã ri altar-rã rojapo, ha'e rami e'ŷ vy hi'áry ojuka pyre, mba'emo aju, e'ŷ vy pentei rami orekuai aguã regua rome'ẽ aguã rojapo ramo SENHOR ae torembopaga.

²⁴ Ha'e rami 'rãgue py kova'e altar rojapo roexa'ãmba rei reve orekuai vy, mba'eta xapy'a rei raka'eve rã orera'y kuery pe pendera'y kuery aipoe'i 'rã: "Mba'e nunga tu peẽ kuery perekó SENHOR Israel kuery Ruete reve?

²⁵ Mba'eta Jordão yakã SENHOR onhono vy yvy apyrã omoi raka'e ore ha'e peẽ kuery mbyte, peẽ Rúben ha'e Gade ramymino kuery. Mba'eve ndaperekoi SENHOR reve", he'i 'rã okuapy. Ha'e rami vy pendera'y kuery ojapo 'rã orera'y kuery ojepe'a aguã rami SENHOR renonde ojererokyjea rupi ikuiai gui.

²⁶ Ha'e nunga rupi aiporo'e va'ekue orejeupe ae: "Po rami 'rã jajapo, pentei altar-rã, mba'emo roapy aguã e'ŷ, neĩ mymba rome'ẽ aguã e'ŷ.

²⁷ Ha'e rami 'rãgue py ha'e va'e toĩ ore ha'e peẽ kuery mbyte ikuaa ukaarã, nhaneramymimo kuery raka'e rã nhande rire ikuai va'erã pe, ha'e kuery oikuaa aguã SENHOR pe ete ore kuery orekuiaia, ha'e henonde anho mba'emo roapy, mymba rome'ẽ, ha'e pentei rami orekuai aguã regua rogueraa 'rã rome'ẽ aguã. Ha'e rami rã raka'eve rã orera'y kuery pe pendera'y kuery 'Mba'eve ndaperekoi SENHOR reve', he'i e'ŷ aguã."

²⁸ Ha'e nunga rupi ae orejeupe aiporo'e va'ekue: "Xapy'a rei raka'eve rã ha'e rami ha'e kuery ijayvu 'rã nhandevy, ha'e nhaneramymimo kuery pe. Ha'e rami rã aipoja'e 'rã: 'Peikuua pota SENHOR pegua altar-rã oreru kuery ojapo va'ekue re, mba'emo oapy aguã e'ŷ, neĩ mymba ome'ẽ aguã e'ŷ, ha'e rã ikuua ukaarã optya aguã ore ha'e peẽ kuery mbyte', ja'e 'rã", ro'e.

²⁹ Ha'e nunga rupi nda'evei ete ore kuery SENHOR rovai roiko aguã, neĩ kova'e ára ixugui rojope'a aguã. Altar-rã rojapo va'ekue áry ma norome'ẽi 'rãe mba'emo roapy reve, mba'emo aju, e'ŷ vy mymba rojuka va'ekue, SENHOR Nhanderuete pegua opy renonde altar hi'aĩ va'e áry e'ŷ vy — he'i okuapy.

³⁰ Ha'e rami Rúben, Gade ha'e Manassés ramymino kuery ijayvu rã sacerdote Finéias ha'e Israel regua heta va'e kuery tujakueve ikuai va'e oendu vy oguerovy'a okuapy.

³¹ Ha'e rami vy sacerdote Eleazar ra'y Finéias aipoe'i Rúben, Gade ha'e Manassés ramymino kuery pe:

— Aŷ roikuua ma SENHOR nhanembyte oikoa. Mba'eta mba'eve ndapejapoí ra'e SENHOR rovai. Aŷ ma pejapo Israel kuery SENHOR po py jaiko vai e'ŷ aguã rami — he'i.

³² Ha'e gui mae sacerdote Eleazar ra'y Finéias huvixa kuery mboae reve oeja oje'oivy Rúben ha'e Gade ramymino kuery ha'e py. Gileade yvy gui ha'e kuery ojevypa ju Canaã yvy re Israel kuery ikuiaia katy. Ha'e py ovaẽ vy heta va'e kuery pe omombe'upa.

³³ Ha'e rami ijayvu rã Israel kuery oendu vy oguerovy'a vy ima'endu'a porã okuapy Nhanderuete re. Ha'e vy nda'ijayvuvei Rúben ha'e Gade ramymino kuery rovai opu'ã aguã re, neĩ ha'e kuery yvy ombovaipa aguã.

³⁴ Ha'e gui Rúben ha'e Gade ramymino kuery ma altar-rã ojapo va'ekue pe "Ikuua ukaa" he'i okuapy, mba'eta aipoe'i: "Nhanembyte oikuaa uka 'rã SENHOR ae Nhanderuete oikoa."

23

SENHOR guigua lei rami ikuai aguã re Josué ijayvuague

¹ Yma ete rire, Israel kuery hovaigua kuery ijvvýry rupi ikuai va'e ha'e javi gui SENHOR omombytu'upa rire Josué tuja'i ma, oiko are'i ma.

² Ha'e vy Josué oĩa py oenoi Israel kuery ha'e javi, nhomongeta va'ety, huvixa kuery, nhomboayvu va'ety ha'e mba'emo re opena va'e kuery. Ha'e vy aipoe'i ha'e kuery pe:

— Xetuja'i ma, are ma aiko.

³ Ha'e gui peẽ kuery pexapa ma SENHOR Penderuete peẽ kuery re oma'ẽ vy amboae regua kuery re ojapoague. Mba'eta ha'e kuery re SENHOR Penderuete ae opu'ã oikovy penderepy vy.

⁴ Ma'ẽ, apy peẽ kuery pegua xorte aexa karamboae, amboae regua kuery amomba va'e yvykue pejopy aguã, Jordão yakã guive ye'ẽ tuvixa va'e peve kuaray oikea katy. Ha'e rami avi ha'e kuery va'e regua amongue okuave teri.

⁵ SENHOR Penderuete oipe'apa 'rã penembyte gui, omoxẽ 'rã penerenonde gui. Ha'e ramo pejopy 'rã ha'e kuery yvykue, SENHOR Penderuete ijayvuague rami vy.

⁶ Ha'e nunga rupi penhea'ã ete ke kuaxia re lei Moisés ombopara va'ekue pejapopa aguã, ha'e va'e gui pejepe'a e'ŷ aguã pendeaxu e'ŷa katy, neĩ pendeaxua katy,

⁷ penhemoirũ e'ŷ aguã amboae regua kuery peẽ kuery mbyte okuave va'e re. Penema'endu'a eme ha'e kuery ruete rery re, peura eme ha'e kuery re, peiko eme ha'e kuery pe, pembojerovia eme guive.

⁸ Ha'e rami 'rãgue py SENHOR Penderuete re tema peĩ atã, kova'e ára peve pendekuaia rami ae.

⁹ Mba'eta penerenonde gui SENHOR oipe'a ma amboae regua imbaraeteve ha'e heta ikuai va'e teĩ. Ha'e rã peẽ kuery re ma avave rei nda'ipo'akaai aŷ peve.

¹⁰ Peẽ kuery regua peteĩ'i ava teĩ omonha 'rã mil ikuai va'e, SENHOR Penderuete ae penderepy vy joe opu'ã ramo, ijayvuague rami vy.

¹¹ Ha'e nunga rupi penhea'ã penenhe'ẽ re pepenaa py, SENHOR Penderuete anho peayvu aguã.

¹² Mba'eta xapy'a rei ixugui pejepe'a vy kova'e regua kuery penembyte okuave va'e re penhemoirũ ha'e penhemotetarã, ha'e gui ha'e kuery reve peẽ kuery penhomoirũ vy,

¹³ peikuua pota ke pova'e re: SENHOR Penderuete anhetẽ ndoipe'avei ma 'rã peẽ kuery renonde gui. Ha'e rami 'rãgue py nhuã ha'e mba'emo mbo'aa rami 'rã oĩ pãvy. Oiko 'rã pendekupe rupi penenupãa rami, ha'e juu penderexa py oĩ va'e rami, kova'e yvy porã SENHOR Penderuete ome'ẽ va'ekue áry gui pekanhymba peve.

¹⁴ — Ma'ẽ, aŷ xee aa ta ma tape yvy regua ha'e javi oje'oia rupi.* Ha'e gui peẽ kuery ma pendep'y a ha'e penerhe'ẽ ha'e javi re peikuua porã neĩ peteĩve ayvu ndoaxa riveia SENHOR Penderuete pãvy mba'emo porã re ijayvuague ha'e javi. Ha'e nunga ha'e javi ojeupitypa, neĩ peteĩve ndoaxa rivei.

¹⁵ Ha'e rami avi mba'emo porã oiko aguã re SENHOR Penderuete ijayvuague ha'e javi ojeupityague rami ae ju pendere ha'e ombou 'rã mba'emo vai ijayvuague rami vy, yvy porã pãvy ome'ẽ va'ekue áry gui pekanhymba peve.

¹⁶ Xapy'a rei SENHOR Penderuete guexeve guarã ojapo va'ekue rupi e'ŷ pendekuaia gui pejepe'a vy amboae regua ruete pe ju pendekuaia ha'e pemboete ramo SENHOR poxya hendy 'rã pendere. Ha'e are'ŷ re pekanhy 'rã yvy porã pãvy ome'ẽ va'ekue áry gui.

24

Josué omano ta vy heta va'e kuery omongoetaague

¹ Ha'e va'e rire Siquém py Josué oenoĩ Israel regua kuery ha'e javi. Israel mongetaaty kuery, huvixa, nhomboayvu va'ety ha'e mba'emo re opena va'e kuery oenoimba ramo ojexa uka okuapy Nhanderuete renonde.

² Ha'e ramo Josué aipoe'i heta va'e kuery ha'e javi pe:

— Po rami SENHOR Israel kuery Ruete ijayvu: “Ymave rupi peneramoĩ kuery ikuai va'ekue Eufrates yakã rovai re. Tuuete mboae pe ikuai, Abraão ha'e Naor ru Terá voi.

³ Ha'e gui peneramoĩ Abraão yakã rovai gui xee aru vy ajapo raka'e Canaã yvy ha'e javi rupi oguata aguã rami. Amboeta avi hamymino kuery. Ta'yrã ame'ẽ Isaque,

⁴ ha'e gui Isaque pe ma Jacó ha'e Esaú ame'ẽ. Esaú yvyrã ame'ẽ Seir regua yvy'ã reia. Ha'e rã Jacó ha'e ta'y kuery ma Egito katy oje'oi.

* 23:14 Ha'e ramo ijayvu omano ta maa oikuua vy.

- ⁵ Ha'e ramo ambou Moisés ha'e Arão, ha'e Egito pygua kuery amoingo axy mba'emo vai ambou vy. Ha'e va'e rire peẽ kuery roguenoẽ ha'e gui.
- ⁶ Egito yvy gui peneramoĩ kuery anoẽmba ramo pevaẽ va'ekue ye'ẽ rembe re. Ha'e kuery rakykue Egito pygua kuery voi karóxa ha'e kavaju árygua reve ou va'ekue Ye'ẽ Pytã peve.
- ⁷ Ha'e gui peneramoĩ kuery ojapukai ramo SENHOR omoĩ pytũ reia peẽ ha'e Egito pygua kuery mbyte. Ha'e gui Egito pygua kuery áry yy ombou ramo ojao'ipa. Peẽ kuery pexa xee Egito yvy re mba'emo ajapo rã. Ha'e ramo pendekuai are va'ekue tekoa e'ŷa rupi.
- ⁸ Ha'e va'e gui amorreuu kuery Jordão yakã rovai re ikuai va'e yvy re ju xee rogueru. Ha'e va'e kuery ma peẽ kuery rovai opu'ã va'ekue ri pendepo py amboaxapa. Ha'e ramo pejopy ha'e kuery yvy, penerenonde gui amomba rire.
- ⁹ Israel kuery re opu'ã avi raka'e Moabe pygua huvixa, Zipor ra'y Balaque. Ha'e rami vy oenoĩ uka Beor ra'y Balaão peẽ kuery re ijayvu vai aguã.
- ¹⁰ Ha'e rami teĩ xee naendu potai Balaão ayvu. Ha'e rami 'rágue py pendereroayvu porã aguã rami ajapo. Ha'e rami vy rogueraa jepe ha'e kuery po gui.*
- ¹¹ Ha'e gui Jordão yakã peaxa vy Jericó tetã peve pevaẽ rã peẽ kuery re Jericó pygua kuery opu'ã raka'e, ha'e amorreuu kuery, ferezeu, cananeu, heteu, girkaseu, heveu ha'e jebuseu kuery guive. Ha'e rami teĩ ha'e kuery amboaxapa raka'e peẽ kuery po py.
- ¹² Penerenonderã amondouka kanharõ guaxu. Ha'e va'e ma penerenonde gui oipe'apa, mokoïve amorreuu kuery ruvixa va'e voi. Pendekyxé py e'ŷ, penderapa py e'ŷ guive oipe'aa.
- ¹³ Pêvy ame'ẽ yvy pumba'apoague e'ŷ, ha'e tetã pejapo va'ekue e'ŷ. Ha'e ramo aŷ penderekao ha'e py. Pe'u pekuapy uva ha'e oliveira'a penhotŷague gui e'ŷ", he'i SENHOR.

SENHOR pe ikuai aguã regua omboxyau jevyague

¹⁴ — Ha'e nunga rupi aŷ gui ma SENHOR renonnde pendekuai pejererokyjea rupi. Ixupe pendekuai opa mba'e py, pejope'a e'ŷ re. Ha'e gui pemombopa tuuete ramigua Eufrates rovai ha'e Egito yvy re peneramoĩ kuery ombojerovia va'ekue, SENHOR pe anho pendekuai.

¹⁵ Ha'e rami avi xapy'a rei pêvy SENHOR pe pendekuai aguã nda'evei ramo aŷve peiporavo marã ramigua pe ete pa peiko aguã: tuuete ramigua Eufrates rovai re peneramoĩ kuery ombojerovia va'ekue pe, e'ŷ vy amorreuu kuery ruete kuery pe rive, ha'e kuery yvy re pendekuai vy. Ha'e rã xee ha'e xero pygua kuery ma SENHOR pe ae 'rã roiko — he'i.

¹⁶ Ha'e ramo heta va'e kuery ombovai vy aipoe'i:

— Nda'evei ete SENHOR gui rojope'a aguã tuuete mboae kuery pe rive orekuai aguã.

¹⁷ Mba'eta SENHOR ae ma Nhanderuete. Ha'e ma Egito yvy gui nhande ha'e nhanceramoĩ kuery nhancerenoẽ va'ekue, escravo nhandekuaiague gui. Ojapo guive hexa pyrã tuvixa va'e jaexa va'e, ha'e gui opa rupi tape jaguataa rupi opena porã nhandere, amboae regua kuery ikuia rupi roaxaa rupi guive.

¹⁸ Nhancerenonde gui SENHOR oipe'a va'ekue ha'e va'e kuery ha'e javi, amorreuu kuery kova'e yvy re ikuai va'ekue voi. Ha'e nunga rupi ore kuery voi orekuai 'rã SENHOR pe, ha'e ae ma Nhanderuete oiko ramo — he'i okuapy.

¹⁹ Josué aipoe'ive ju heta va'e kuery pe:

— Nda'evei 'rã ko SENHOR pe pendekuai aguã, mba'eta Nhanderuete ma iky'a e'ŷ va'e. Ha'e ma oipota hexe anho pejerovia. Ha'e rami vy ixupe penderekao vai ramo nomboguei 'rã pejejavyague.

²⁰ Mba'eta SENHOR pe peikoa gui pejope'a vy tuuete amboae ramigua pe ju pendekuai ramo ha'e onhemoingo 'rã peẽ kuery rovai, penemoingo axy 'rã penemokanhymba peve, peẽ kuery pe ojapo porã ranhe rire teĩ — he'i.

²¹ Ha'e rami rã heta va'e kuery ombovai:

— Any ri, SENHOR pe 'rã orekuai — he'i okuapy.

²² Ha'e gui Josué aipoe'i heta va'e kuery pe:

* 24:10 Números 22.1-24

— Ha'e rami vy peẽ kuery ma penderovai ae peikuaa uka SENHOR peiporavoa rami, ixupe pendekuai aguã.

Ombovai vy

— Tá, ha'e rami ae roikuaa uka — he'i okuapy.

²³ Josué aipoe'i:

— Ha'e rami vy aŷ pemombopa tuuete amboae ramigua penembyte ikuai va'e, ha'e pendepy'a re pemoĩ SENHOR Israel kuery Ruete pe anho peiko aguã.

²⁴ Heta va'e kuery ombovai Josué pe:

— SENHOR Nhanderuete pe orekuai 'rã, ha'e ijayvu rã ronhe'ẽ rendu 'rã guive — he'i okuapy.

²⁵ Ha'e rami py ha'e va'e ára Siquém py Josué heta va'e kuery reve ojapo SENHOR pe ikuai aguã regua. Ha'e kuery pe oeja ha'e rami ae ikuai aguã.

Ita nhomoma'endu'aarã omopu'âague

²⁶ Ha'e ramigua ayvu Josué ombopara kuaxia para Nhanderuete guigua lei oĩa va'e re. Ha'e gui peteĩ ita tuvixa va'e ojopy vy omopu'ã imo'amy ha'e py, yvrya carvalho SENHOR pegua henda iky'a e'ŷ va'e py hi'ãi va'e guy py.

²⁷ Ha'e vy heta va'e kuery pavẽ pe Josué aipoe'i:

— Ma'ë, kova'e ita ma penema'endu'a aguã oĩ, mba'eta hexei ha'e va'e ayvu ha'e javi SENHOR omombe'u. Ha'e va'e ma penemoma'endu'a 'rã Penderuete pe pendeapu e'ŷ aguã — he'i.

²⁸ Ha'e gui Josué omondoukapa ju heta va'e kuery, peteĩ-teĩ hekoa katy.

Juízes 2.6-9

²⁹ Ha'e va'e nunga oiko rire SENHOR rembiguai Num ra'y Josué omano, cento e dez ma'etý re ma oikoa py.

³⁰ Ha'e ramo ijyy re ae onhono porãa, Timnate-Sera, Efraim regua yvyty reia re oĩ va'e py, Gaás yvyty regua kuaray ijapu'a'ia katy.

³¹ Josué oikovea pukukue re Israel kuery ikuai SENHOR pe, ha'e gui Josué ndoikovevei ma rire nhomongeta va'ety kuery ikuia pukukue re ju, Israel kuery pe SENHOR ojapo va'ekue oikuaapa va'e ramo.

³² Ha'e gui José kãgue Israel kuery Egito yvy gui ogueru va'ekue ma Siquém yvy re ojaty inony. Yvy Siquém ru Hamor ra'y kuery gui cem hatã'i va'e prata guigua re Jacó ojogua va'ekue py ae onhono porã. Ha'e rami rire ha'e va'e yvy ma José ramymino kuery mba'erã itui.

³³ Arão ra'y Eleazar omano avi ramo onhono porãa Gibeá py. Ha'e va'e yvy Efraim regua yvyty reia re oĩ va'e ma ta'y Finéias peguarã ome'ë mbyre.

Joguerekoa juiz kuery opena jave guare oĩa Joguerekoa juiz kuery opena jave guare oĩa

Josué omano ma ramo Israel kuery “Oeja rivepa guamoĩ kuery Ruete Senhor Egito yvy gui oguenoẽmba va'ekue ri. Ha'e vy ovapa nguuete kuery mboae re, ha'e kuery katy rai'i rupi ikuai va'e kuery ruete re. ... Ha'e nunga rupi Israel kuery rovai Senhor poxya henty vy omboaxa mba'emo pe'apaarã kuery po py. Ha'e rã oipe'apa ha'e kuery oguerekoo va'ekue. Hovaigua kuery ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe. ... Ha'e gui Senhor omoĩ joguerekorã kuery, mba'emo pe'apaa kuery po gui oepy aguã. ... Joguerekorã omoĩ va'ekue reve Senhor oiko vy oepypa hovaigua kuery po gui, joguerekoa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoaẽ okuapy. Ha'e nunga Senhor oendu vy omboaxy. Ha'e rami teĩ joguerekoa omano ma rire ha'ekue rami ae ju'rã ikuai” (2.12a, 14, 16, 18-19a).

Ha'e javi vy treze joguerekorã Nhanderuete omoĩ raka'e. Ha'e kuery va'e regua ma Gideão ha'e Sansão. Ha'e rami teĩ heta va'e kuery ha'eve'ŷa rami anho ikuai. Opaa py aipoe'i: “Ha'e va'e jave ma ndoikoi huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive” (21.25).

Kova'e kuaxia py ijayvua rami vy Nhanderuete pegua kuery ixupe ete ri ikuai vy ikuai porã 'rã. Ha'e rã ndojeroviai rei ramo ha'e kuery pe nda'evei 'rã. Jajejavý rei teĩ Nhanderuete pe jajapukai ramo nhandeperdoa 'rãe tema.

Cananeu kuery re Judá kuery ipo'akaague

¹ Josué omano rire Israel kuery oporandu okuapy SENHOR pe. Ha'e vy aipoe'i:

— Ore kuery va'e regua mava'e nda'u ha'e ranhe oo 'rã cananeu kuery ikuia py, ha'e kuery rovai opu'ã aguã?

² SENHOR ombovai:

— Judá kuery ma oo 'rã. Mba'eta ha'e kuery po py ma amboaxa ma yvy — he'i.

³ Ha'e ramo Judá kuery aipoe'i guyvy kuery Simeão regua pe:

— Jaa ke orerupive jajopy aguã oreyvyrã xorte rupi ome'ẽ mbyre. Nhapu'ã 'rã cananeu kuery rovai. Ha'e va'e rire ore kuery ju 'rã penderupive roo, pendeyvyrã xorte rupi ome'ẽ mbyre py — he'i ramo ha'e kuery rupive Simeão kuery oo avi.

⁴ Judá kuery oje'oi rã ipo py SENHOR omboaxa cananeu ha'e ferezeu kuery. Ha'e ramo Bezeque py ojukapa ha'e kuery va'e regua dez mil avakue.

⁵ Bezeque py ma ha'e kuery Adoni-Bezeque ojou vy hexe opu'ã okuapy. Ha'e vy ojuka cananeu ha'e ferezeu kuery.

⁶ Ha'e rã Adoni-Bezeque ma ojava ovy teĩ hakykue oje'oi vy oupity vy ojaya ikuã guaxu joavaive ha'e ipyxã guaxu voi.

⁷ Ha'e ramo Adoni-Bezeque aipoe'i:

— Setenta huvixave ikuai ha'e va'e kuery kuã guaxu ha'e ipyxã guaxu ojayapaa reve omono'õ okuapy va'ekue tembi'u kure'i xe-mesa guy py. Ha'e gui joe xee ajapoague rami ae Nhanderuete xembopaga avi — he'i.

Ha'e rire Jerusalém py ogueraa ramo omano ha'e py.

⁸ Judá kuery ma Jerusalém rovai ju opu'ã vy ipo'akapa. Ha'e vy ojukapa kyxe py, ha'e tetã re omboja tata.

⁹ Ha'e va'e rire Judá kuery oje'oi ju opu'ã aguã cananeu kuery yvyty áry rupi ikuai va'e re, Neguebe rupi ha'e yvy'ã guy rupi ikuai va'e re.

¹⁰ Ha'e gui cananeu kuery Hebron py ikuai va'e rovai ju Judá kuery oje'oi. Ha'e va'e rery ypy ma Quiriate-Arba. Ha'e vy Judá kuery ojuka Sesai, Aimã ha'e Talmai.

¹¹ Ha'e va'e gui ma Debir tetā py ikuai va'e rovai opu'ã aguã ju oje'oi. Ymave ma Debir rery ma Quiriate-Sefer.

¹² Calebe aipoe'i:

— Amongue va'e rei Quiriate-Sefer oitypa vy ipo'aka va'ekue pe ma ame'ẽ 'rã xerajy Acsa ta'yxyrã — he'i.

¹³ Ha'e gui Calebe ryvy Quenaz ra'y Otniel va'e ae ipo'aka tetā re. Ha'e ramo ixupe Calebe ome'ẽ guajy Acsa ta'yxyrã.

¹⁴ Ha'e va'e ma omea py oo vy aipoe'i:

— Tereo xeru pe ejerure peteĩ henda yyy re — he'i. Ha'e gui kunha va'e ae mburika'i áry gui oguejy ramo Calebe oporandu ixupe:

— Mba'e tu reipota?

¹⁵ Ombovai:

— Eme'ẽ rive xevy peteĩ mba'e. Yvy pirua rive ma xevy reme'ẽ va'ekue ri yvu avi eme'ẽ xevy — he'i ramo ixupe Calebe ome'ẽ yvy'ã re ha'e yvy'ã guy rupi yvu ikuai va'e.

Amboae rupi ipo'akaague

¹⁶ Judá kuery reve Moisés ratyu queneu va'e ra'y kuery oguata avi oje'oivy. Tetā pindoty va'e gui oje'oi Judá regua tekoá e'ña peve, Arade rexei kuaray puku-a katy.* Ha'e py oje'oi vy ikuai ha'e pygua kuery reve.

¹⁷ Ha'e gui Judá kuery guyvy kuery Simeão regua reve oje'oi vy ojukapa cananeu kuery Zefate py ikuai va'ekue, omomba ete. Ha'e nunga rupi ha'e va'e omboerya ju Horma.†

¹⁸ Judá kuery ojopypa avi Gaza, Asquelom ha'e Ecrom, ha'e katy'i rupi yvy ikuai va'e ha'e javi reve.

¹⁹ Judá kuery reve SENHOR oiko ramo oipe'apa yvyty rupi ikuai va'ekue. Ha'e rã yvyugua re ikuai va'e ma ndoipe'a kuaai, karóxa ferro guigua ha'e kuery oguereko ramo.

²⁰ Ha'e gui Moisés ijayvuague rami vy Calebe pe omboaxaa Hebron tetā. Ha'e ramo ha'e gui Calebe oipe'apa Enaque ra'y kuery mboapy ikuai va'ekue.

²¹ Ha'e rã Benjamim kuery ma ndoipe'a reguai jebuseu kuery Jerusalém py ikuai va'e. Ha'e rami 'rãgue py Benjamim kuery reve jebuseu kuery ikuai Jerusalém py ae, aÿ peve.

²² José ramymino kuery voi oje'oi Betel tetā rovai opu'ã aguã. Ha'e ramo ha'e kuery reve SENHOR oiko.

²³ Ha'e rami vy Betel re ha'e kuery omondouka avakue oikuua pota nhemi aguã. Ha'e va'e tetā omboery ypyague ma Luz.

²⁴ Oikuua pota va'e kuery oexa okuapy peteĩ ava tetā gui oẽ ouvy rã. Ha'e vy aipoe'i ixupe:

— Exa uka na orevy tetā katy oikeaty. Ha'e rami rã romboaxy 'rã — he'i.

²⁵ Ha'e gui tetā katy oikeaty ha'e oexa uka ramo ha'e kuery ojukapa tetā pygua kuery kyxe py. Ha'e rã ha'e va'e ava hoo pygua kuery reve ma ndojukai.

²⁶ Ha'e ramo heteu kuery yvy re ju ava va'e oo vy peteĩ tetā ojapo ha'e py, ha'e omboery Luz. Ha'e va'e ma hery oime aÿ peve.‡

Yvy Israel kuery ndojopypai teri va'ekue re ijayvuague

²⁷ Ha'e gui Manassés kuery ma ndoipe'ai Bete-Seã pygua kuery, neĩ Taanaque, Dor, Ibleão, neĩ Megido pygua kuery, neĩ ha'e katy'i rupi tekoá ikuai va'e pygua kuery, mba'eta cananeu kuery oĩ atãve okuapy oyvy re ae ikuai aguã.

²⁸ Israel kuery imbaraeteve ma vy omomba'eapo nhea'ã cananeu kuery. Ha'e rami teĩ ndoipe'apai.

²⁹ Efraim kuery ma ndoipe'ai cananeu kuery Gezer py ikuai va'e. Ha'e ramo ha'e kuery reve ikuaise tema Gezer py ae.

³⁰ Zebulom kuery ma ndoipe'ai avi Quitrom neĩ Naalol py ikuai va'e. Ha'e ramo cananeu kuery ikuaise tema ha'e kuery reve, omba'eapo nhea'ã aguã ramí ikuai.

* ^{1:16} Tetā pindoty ma Jericó ae (Deuteronômio 34.3, 2 Crônicas 28.15). † ^{1:17} Tery Horma ma “Ombovaipaague” 'ea. ‡ ^{1:26} Tery Luz ma “Amêndoа'y” 'ea ha'e kuery ayvu py.

³¹ Aser kuery ma ndoipe'ai Aco py ikuai va'e, neĩ Sidom, Alabe, Aczibe, Helba, Afeca, neĩ Reobe pygua kuery voi.

³² Ha'e rami rire Aser kuery ma cananeu kuery mbyte rupi ae ikuai ha'e va'e yvy re, ndoipe'apai rire.

³³ Naftali kuery ma ndoipe'ai Bete-Semes pygua kuery, neĩ Bete-Anate pygua kuery voi. Ha'e rami vy cananeu kuery mbyte rupi ikuave tema ha'e va'e yvy re. Ha'e rã Bete-Semes ha'e Bete-Anate pygua kuery ma omomba'eapo nhea'ã.

³⁴ Ha'e gui amorreuu kuery ojapo Dã kuery yvy'ã rupi anho ikuai aguã rami, yvy'ã guy katy oguejy e'ý aguã.

³⁵ Ha'e rami ae avi amorreuu kuery onhea'ã okuapy Heres yvyty re ikuai aguã, Ajalom ha'e Saalabim re. Ha'e rami teĩ José ramymino kuery ipo'aka nho vy omomba'eapo nhea'ã.

³⁶ Amorreuu kuery ikuiaia apy ma Acrabim ha'e Sela guive oo oiny yvy'ã katy.

2

Israel kuery pe Nhanderuete ijayvu atãague

¹ Ha'e gui SENHOR-a guigua anjo ma Gilgal gui oẽ vy oo Boquim tetã py. Ha'e vy aipoel'i:

— Ajapo raka'e Egito gui peẽmba aguã rami, ha'e rogueru yvy aura reve peneramoĩ kuery pe ame'ẽ aguã re ju. Xee aipoa'e va'ekue: “Nambovaipai 'rã xereve guarã peẽ kuery reve ajapo va'ekue.

² Ha'e rã peẽ ma nda'evei kova'e yvy regua kuery reve pejapo aguã peteĩ rami pendekuai aguã. Ha'e rami 'rãgue py peitypa 'rã ha'e kuery altar ikuai va'e", ha'e va'ekue ri peẽ naxenhe'ẽ rendui. Mba'e re tu ha'e rami pejapo?

³ Ha'e nunga rupi xee aipoa'e avi: “Xee ma ndaipe'ai 'rã ha'e kuery penerenonde gui. Ha'e rami 'rãgue py penderovaigua riae 'rã ikuai, ha'e tuuete ramigua ikuai va'e voi nhuã penembo'aarã 'rã ikuai", ha'e va'ekue — he'i.

⁴ SENHOR-a guigua anjo ha'e rami Israel kuery ha'e javi pe ijayvu ramo ha'e kuery onhendu atã vy ojae'o okuapy.

⁵ Ha'e nunga rupi ha'e va'e henda omboery Boquim.* Ha'e gui ha'e py mba'emo ome'ẽ okuapy SENHOR pe.

Josué 24.29-31

⁶ Josué heta va'e kuery omondoukapa rã Israel kuery peteĩ-teĩ regua oje'oi oyvyrã ogopy aguã katy.

⁷ Josué oikoa pukukue re ma SENHOR pe anho heta va'e kuery ikuai, ha'e gui Josué ndoikovei ma rire nhomongeta va'ety kuery ikuiaia pukukue re ju. Ha'e va'e kuery ma Israel kuery pe SENHOR mba'emo porã tuvixa va'e ojapo rã oexapa va'ekue.

⁸ Ha'e gui ma Num ra'y Josué SENHOR rembiguai va'e omano, cento e dez ma'etõ ma oguerekao py.

⁹ Ha'e ramo onhono porãa ijyvy apy re ae, Timnate-Heres py, Efraim kuery yvy re yvyty oĩ va'e re, Gaás yvyty regua kuaray ijapu'a'ia katy.

¹⁰ Ha'e va'e javegua kuery ha'e javi avi omano rã ogueraa tuu kuerya py. Ha'e va'e kuery rire ma ta'y ha'e tajy kuery ju ikuai SENHOR oikuua e'ý va'e, neĩ Israel kuery pe mba'emo porã ojapo va'ekue voi ndoikuaai okuapy.

¹¹ Ha'e rami vy SENHOR renonde Israel kuery ojapo okuapy ha'eve'ý va'e, Baal ra'angaa ikuai va'e re rive ikuai vy.

¹² Oeja rivepa guamoĩ kuery Ruete SENHOR Egito yvy gui oguenoẽmba va'ekue ri. Ha'e vy ovapa nguuete kuery mboae re, ha'e kuerya katy rai'i rupi ikuai va'e kuery ruete re. Ha'e nunga rive ha'e kuery omboete vy ombopoxy SENHOR,

¹³ SENHOR gui ojepé'apa vy Baal ha'e Astarote pe rive ikuiaia py.

¹⁴ Ha'e nunga rupi Israel kuery rovai SENHOR poxya hendy vy omboaxa mba'emo pe'apaarã kuery po py. Ha'e rã oipe'apa ha'e kuery oguerekoo va'ekue. Hovaigua kuery

* 2:5 Tery Boquim ma “Ojae'oa” 'ea.

ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe.

¹⁵ Ha'e kuery rovai tema SENHOR po oĩ oje'oria rupi rei. Ha'e kuery re ma mba'emo vai anho SENHOR ombou, oura reve ijayvuague rami vy. Ha'e rami rã ojexavai ete okuapy.

¹⁶ Ha'e gui SENHOR omoĩ joguerekorã kuery, mba'emo pe'apaa kuery po gui oepy aguã.

¹⁷ Ha'e rami teĩ nonhe'ẽ rendui avi okuapy joguerekoa kuery. Ha'e vy ovapa okuapy amboae ramigua tuuete kuery re, ha'e vy omboete okuapy. Ojepe'a pojava guamoĩ kuery SENHOR onhe'ẽ rendua rupi oje'oiague gui. Ha'e vy nda'ikuaiivei guamoĩ kuery ikuaiague rami.

¹⁸ Juguerekorã omoĩ va'ekue reve SENHOR oiko vy oepypa hovaigua kuery po gui, joguerekoa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoaẽ okuapy. Ha'e nunga SENHOR oendu vy omboaxy.

¹⁹ Ha'e rami teĩ joguerekoa omano ma rire ha'ekue rami ae ju 'rã ikuai. Ha'e vy guamoĩ kuery ikuaiague gui nda'eveive ete ju okuapy, amboae regua tuuete re ovapa, ha'e nunga pe rive ikuai ha'e omboete okuapy. Peteĩ henda py voi ndojepe'ai teko vai ojapo okuapy gui, neĩ ha'eve'ŷa rami rei ikuaiia gui.

²⁰ Ha'e nunga rupi Israel kuery rovai SENHOR poxya hendy. Ha'e vy aipoe'i:

— Kova'e kuery nda'ikuai ae tamoĩ kuery pe xereve guarã ajapo va'ekue rupi, naxenhe'ẽ rendui guive.

²¹ Ha'e ramo ha'e kuery renonde gui xee voi ndaipe'avei 'rã amboae regua kuery, Josué omano vy oeja rive va'ekue rembyre.

²² Ha'e rami 'rãgue py ha'e va'e regua aeja 'rã Israel kuery aeko a'ã aguã, aikuua aguã SENHOR guigua tape rupi tamoĩ kuery ikuaiague rami ikuai 'rãa, tyrã pa anya — he'i.

²³ Ha'e rami vy ha'e kuery mbyte py SENHOR oeja amboae regua kuery, ndoipe'a voi, neĩ nomboaxapai guive Josué po py.

3

Israel kuery mbyte amboae rami rei onhembo'ea rupi ikuai va'e re ijayvuague

¹ Pova'e regua kuery ma SENHOR oeja va'ekue Israel kuery oa'anga aguã, mba'eta Israel kuery pavẽ e'ŷ oikuua Canaã vyv re joe opu'ãa katy oo aguã.

² Ha'e rami ojapo Israel kuery joe opu'ã aguã oikuua e'ŷ teri va'ekue-'ekue ombo'e vy.

³ Ijyvy re oeja va'ekue ma peteĩ nhiruĩ filisteu regua yvatekueve va'e, ha'e cananeu kuery ha'e javi, Sidom tetã pygua ha'e heveu kuery Líbano vyv'ã re ikuai va'e, Baal-Hermom vyv'ã guive Hamate katy oikea peve.

⁴ Ha'e va'e kuery opyta SENHOR oeko a'ã aguã Israel kuery, oikuua aguã ha'e kuery ojapyxaka 'rã paa tamoĩ kuery pe Moisés rupi ojapo uka va'ekue re.

⁵ Ha'e ramo Israel kuery ma heteu kuery mbyte rupi, amorreu, ferezeu, heveu ha'e jebuseu kuery mbyte rupi ikuai vy

⁶ gua'yxyrã ogueraa ha'e va'e regua rajy kuery, ha'e guajy kuery omomenda ha'e va'e regua ra'y kuery re. Ha'e kuery ruete kuery omboete avi okuapy.

Cusã-Risataim po gui Otniel Israel kuery oepyague

⁷ SENHOR renonde rupi Israel kuery ha'eve'ŷa rami ikuai, hexaraipa SENHOR nguuete gui. Ha'e vy omboete okuapy Baal ra'angaa ikuai va'e ha'e vyvra aygue gui ta'angaarã omopu'ã mbyte.

⁸ Ha'e ramo ha'e kuery rovai SENHOR poxya hendy vy omboaxapa Mesopotâmia pygua huvixa Cusã-Risataim po py. Ha'e ramo oito ma'etŷ re Cusã-Risataim rembiguai ikuai.

⁹ Ha'e gui SENHOR pe Israel kuery ojapukai okuapy ramo hepyarã ombou Calebe ryvy Quenaz ra'y Otniel. Ha'e ramo oepy.

¹⁰ Ha'e va'e re SENHOR guigua Nhe'ẽ ou ramo oikuua pota Israel kuery re. Joe opu'ã aguã katy ha'e oo ramo ipo py SENHOR omboaxa Mesopotâmia pygua huvixa Cusã-Risataim. Ha'e ramo Otniel ipo'aka hexe.

¹¹ Ha'e rami rire quarenta ma'etý re optyu'upaa yvy re. Ha'e gui ma Quenaz ra'y Otniel omano.

Eglom rembiguai ranhe ha'e kuery ikuaiague

¹² Peteīgue ju Israel kuery ha'eve'ýa ramigua ikuai SENHOR renonde. Ha'e ramo Israel kuery re SENHOR ombopo'aka Moabe pygua huvixa Eglom, henonde ha'eve'ýa rami ikuai ríre.

¹³ Ha'e va'e ma ojea py omboaty Amom ha'e Amaleque kuery. Ha'e kuery reve oje'oi vy ojuka Israel kuery regua. Tetā pindoty va'e re avi ipo'aka.

¹⁴ Dezoito ma'etý re Israel kuery ikuai Moabe pygua huvixa Eglom va'e rembiguai.

Eúde joepy jevyague

¹⁵ Ha'e gui SENHOR pe Israel kuery ojapukai okuapy ramo hepyarã ombou peteī ava ijaxu va'e, Benjamim regua Gera ra'y Eúde. Ha'e va'e po rupi Israel kuery omondouka peráta Moabe pygua kuery ruvixa Eglom pe omboaxa va'erã.

¹⁶ Ha'e rã Eúde ma peteī kyxe haimbe jovai va'e ojapo, ijyva ku'a peve ipuku-a va'e. Ha'e va'e ma oku'a oiporu kuaa re omoí, oao guy rupi.

¹⁷ Ogueraa avi peráta Moabe pygua kuery ruvixa Eglom pe ome'ẽ va'erã. Eglom ma ava guaxu rei.

¹⁸ Peráta ogueru va'ekue ome'ẽ rire ma omondoukapa ju avakue ngupiveguia, ha'e kuery reve oẽ avi ranhe.

¹⁹ Ha'e gui Gilgal py ta'angaa ikuiaia peve ooague gui ojevy ju. Ha'e vy aipoe'i huvixa pe:
— Xeruvixa, xee areko peteī ayvu xee ae'i aikuia va'e ndevy guarã.

Huvixa ombovai vy

— Ekyrirí ranhe — he'i vy guenonde gui omondoukapa ijyvýry ikuai va'ekue.

²⁰ Yro'yxâvea'i jave ramo huvixa oguapy oiny peteī opy ja'o'i py. Oĩa py Eúde oike vy aipoe'i:

— Areko peteī ayvu Nhanderuete guigua ndevy amombe'u va'erã — he'i ramo Eglom opu'a tenda oĩa gui.

²¹ Ha'e ramo Eúde oaxua regua okuave'ẽ vy oekyi kyxe oyke oiporu kuaa regua gui, ha'e oipyxo hye py.

²² Haimbea reve hi'y voi oike, ha'e hye gui kyxe ndoekyi ramo ikyra onhembotypa hi'áry. Ha'e gui Eúde ma oké'i oĩ va'e rupi oẽ vy

²³ oaxa ovy oikeaty rupi, oké ombotypa vy ojoko rire.

²⁴ Ha'e oo ma rire ou huvixa rembiguai kuery. Ha'e kuery oma'ẽ rã opy yro'yxâvea'i rokẽ ojokoa ra'e imoiny. Ha'e ramo “Opy yro'yxâvea'i py po optyu'u oiny” he'i ranhe.

²⁵ Ha'e gui noarõxevei ma okuapy vy opy katyguia oké ndoipe'a reguai vy ipe'aa ogueru vy oipe'a. Ha'e gui oexa rã huvixa re'õgue ipukupa oupy yvy rupi.

²⁶ Ha'e kuery ikuai area ja Eúde oo jepe. Ta'angaa ojapo pyre ikuiaia rupi oaxa vy Seirá katy oo.

²⁷ Ha'e py ovaẽ vy omonhe'ẽ mimby guaxu Efraim regua yvyty reia rupi. Ha'e rã Israel kuery oguejy oje'oviy hupive, tenonde ha'e oo ramo.

²⁸ Ha'e kuery pe aipoe'i:

— Jaa ke xerupive, mba'eta pendepo py SENHOR omboaxa ma penderovaigua kuery Moabe pygua — he'i.

Ha'e ramo hakykue oje'oi vy ojoko Jordão yakã oaxaaty, Moabe pygua kuery oaxa e'ý aguã. Ha'e kuery va'e regua neĩ peteīve nomboaxai.

²⁹ Ha'e va'e jave py ojuka dez mil avakue Moabe pygua kuery regua, imbaraetekue ha'e ipy'a guaxukue meme. Peteīve ndoo jepei.

³⁰ Ha'e rami py ha'e va'e ára Israel kuery ipo'aka okuapy Moabe re. Ha'e ramo yvy re optyu'upa oitenta ma'etý re.

³¹ Ha'e va'e rire ma oiko avi Anate ra'y Sangar. Ha'e va'e ma peteī toro mondyia py ojuka seiscentos avakue filisteu regua. Ha'e rami vy ha'e voi oepy Israel kuery.

4

Canaã pygua huvixa Jabim rembiguai ha'e kuery ikuaiague

- ¹ Eúde omano rire ma peteigue ju Israel kuery ha'eve'ýa rami ikuai SENHOR renonde.
² Ha'e ramo SENHOR omboaxapa Canaã pygua huvixa Jabim po py. Ha'e va'e openaa ma Azor tetã. Ixupeguia xondaro kuery ruvixa ma Harosete-Hagoim pygua Sísera hery va'e.
³ Ha'e gui Israel kuery ojapukai okuapy SENHOR pe, mba'eta Jabim ma novecentos karóxa ferro guigua oguereko va'e reve vinte ma'etý re ma oguereko axy.

Débora ha'e Baraque joepyague

- ⁴ Ha'e va'e jave Israel kuery oguereko oikovy va'e ma peteí profeta kunha Lapidote ra'yxy Débora hery va'e.
⁵ Débora ma peteí pindo hi'aí va'e "Débora oíaty" 'epy va'e guy py opena oiny, Ramá ha'e Betel mbyte py Efraim regua yvy'á reia py. Ha'e oíia py Israel kuery jogueru 'rã mba'emo re oikuua pota aguã.
⁶ Ha'e gui ha'e va'e kunha va'e oenoí uka Abinoão ra'y Baraque, Naftali regua Quedes tetã py oikoa gui. Ha'e vy aipoe'i ixupe:
— SENHOR Israel kuery ruete nda'u ndevy ijayvu vy aipo nde'i raka'e: "Tereo, eraa avakue Tabor yvyty peve. Dez mil avakue eraa Naftali ha'e Zebulom kuery regua.
⁷ Ha'e gui xee ajapo 'rã ndea py Quisom yaká'i py Jabim pegua xondaro kuery ruvixa Sísera va'e ou aguã rami, karóxa ha'e xondaro kuery reve, ha'e amboaxapa 'rã ndepo py", nde'i pa?

⁸ Ha'e rã Baraque aipoe'i:
— Xerupive ndee reo ramo ma aa 'rã. Ha'e rã xerupive ndereoi ramo ma xee ndaai 'rã — he'i.
⁹ Kunha va'e ombovai:
— Anhetê aa 'rã nderupive, teí ndee e'ý 'rã nemboetea joe nhapu'á aguã katy jaa rire. Mba'eta SENHOR omboaxa 'rã Sísera peteí kunha va'e po py — he'i. Ha'e vy Débora ojepe'a vy Baraque reve jogueraa Quedes katy.

¹⁰ Quedes py ma Baraque oenoí Zebulom ha'e Naftali kuery va'e regua. Ha'e rã hupive oje'oi dez mil avakue. Débora voi oo avi hupive.
¹¹ Quedes katy'i oiko avi peteí ava queneu regua Héber hery va'e. Ha'e va'e ma queneu kuery Moisés ratyu Hobabe ramymino kuerya ikuiaia gui ojepe'a ma vy Zaananim katy'i ojapo va'ekue ngoorã, yvyra carvalho hi'aí va'e guy py.

¹² Ha'e gui Sísera pe omombe'ua rã oikuua Tabor yvyty katy Abinoão ra'y Baraque oo maa.
¹³ Ha'e rami vy Sísera ogueru rukapa karóxa ha'e javi, novecentos karóxa ferro guigua meme, ha'e hexeve ikuai va'e ha'e javi, Harosete-Hagoim gui ogueraapa Quisom yaká'i peve.

¹⁴ Ha'e ramo Débora aipoe'i Baraque pe:
— Epu'á ke, mba'eta kova'e árave SENHOR omboaxa 'rã Sísera ndepo py. Xapy'a rei nda'u SENHOR ndooi ri neronde rupi? — he'i. Ha'e ramo Baraque ma Tabor yvyty gui oguejy ovv, ngupiveguia dez mil avakue reve.
¹⁵ Ha'e gui Baraque rupiveguia kuery kyxe reve ovaë ramo SENHOR oitypa Sísera, karóxa ha'e xondaro kuery ha'e javi. Ha'e rã Sísera ma karóxa gui opo vy onha ovv yvy rupi.
¹⁶ Baraque ma karóxa ha'e xondaro kuery rakykue monha Harosete-Hagoim peve. Ha'e rami py Sísera pegua xondaro kuery oitypa kyxe py, neí peteíve ndoo jepei.

Jael ojukaague Sísera

- ¹⁷ Ha'e gui Sísera ma yvy rupi onha ovv vy ovaë queneu regua Héber ro py, mba'eta peteí rami ikuai Hazor pygua huvixa Jabim ha'e queneu regua Héber ro pygua kuery reve. Ha'e gui Héber ra'yxy Jael oíia py ovaë ramo
¹⁸ Jael oë ovv Sísera ovaexí vy. Ha'e vy aipoe'i ixupe:
— Eike ke, xeruvixa. Eike na xero py, ekyje eme — he'i. Ha'e ramo opy ovaë ramo kunha va'e onhovã peteí nheovãa py.

¹⁹ Ava va'e aipoe'i ixupe:

— Ajerure ndevy, eme'ẽ na xevy ruxã'i yy ay'u aguã, xey'uvei ramo.

Ha'e rã kunha va'e ma kamby ryru oipe'a vy kamby ome'ẽ oy'u aguã. Ha'e va'e rire onhovã ju.

²⁰ Ha'e gui ava va'e aipoe'ive ju ixupe:

— He'ã ke okẽ py. Xapy'a rei amongue ou rã oporandu vy “Oĩa pa?” 'ea ramo “Any” 're 'rã — he'i.

²¹ Ha'e ramo Héber ra'yxy Jael ma peteĩ yvyra rakua oguy pygua ha'e peteĩ karavo mbotaa ogueru vy oo mbeguei'i ava va'e onhenoa py. Ha'e rami vy hexapy kã rexei'i ombota a yvyra rakua, oaxa vy yvy re oike aguã peve, mba'eta oke rana oupy, ikane'õ vaipa vy. Ha'e rami vy omano.

²² Ha'e gui Sísera rakykue Baraque oo rã Jael oexa vy oẽ ju ovaexi vy. Ha'e vy aipoe'i ixupe:

— Eju, aexa uka 'rã ava reka va'ekue — he'i ramo oo hakykue'i. Ha'e vy oexa rã Sísera omano ra'e oupy, yvyra rakua hexapy kã rexei'i oĩ reve.

²³ Ha'e rami py ha'e va'e ára Israel kuery renonde Nhanderuete omo'yvyi'i Canaã pygua huvixa Jabim.

²⁴ Ha'e gui Canaã pygua huvixa Jabim kuery re Israel kuery ipo'akave tema oje'oivy, omomba peve.

5

Débora oporaeiague

¹ Ha'e va'e ára Débora ha'e Abinoão ra'y Baraque reve oporaei vy aipoe'i:

² — Israel kuery renonde huvixa kuery onhemoimba,
ha'e heta va'e kuery onhenhandua rupi ojeko me'ẽmba ramo
penema'endu'a porã SENHOR re.

³ Pendu ke, huvixa kuery. Pejapyxaka, yvatekueve:
Xee, xee ae ma aporaei ta SENHOR pe.
Aporaei ta SENHOR Israel kuery Ruete pe.

⁴ Ndee SENHOR, Seir gui reẽ vy,
Edom regua nhuñdy guive rejerojy reovy ramo
yvy oryryi, yva gui hayvi avi.
Tá, arai voi ombo'oky rayvi.

⁵ SENHOR renonde rupi yvyty ikuai va'e omy-omyi,
yvyty Sinai voi, SENHOR Israel kuery Ruete renonde.

⁶ Anate ra'y Sangar oiko jave,
Jael avi oiko jave ma ndoaxavei mba'emo vendea kuery.
Oguata va'e kuery voi opia oje'oivy tape vaikue rupi.*

⁷ Israel yvy re tekao ikuai va'ekue tekao e'ŷa opyta, okyririmbä rei,
xee Débora apu'ã peve,
Israel kuery va'e regua xy aiko va'e apu'ã.

⁸ Nguuete pyaurã Israel kuery ojou ramo
hetã kora rokẽ py oiko joe opu'ã va'e.
Israel kuery quarenta mil ikuai va'eri
ha'e kuery mbyte py ndojoui hu'y jokoa neñ hu'y guaxu.

⁹ Xekuraxõ oo Israel regua xondaro kuery ruvixa re,
heta va'e kuery rerekooarã onhenhandua rupi onhemoi ramo.
Penema'endu'a porã SENHOR re!

¹⁰ Peẽ kuery mburika xiñ va'e áry peẽ va'e,
peikuaa potaa py peguapy va'e,

* 5:6 Ha'e kuery okyjepa rei Canaã pygua huvixa Jabim ha'e ixupegua xondaro ruvixa Sísera gui. Ha'e nunga rupi ndoguatavei tape rupi, ha'e guekoia voi oeja reipa.

- ha'e tape rupi peguata va'e voi pendeayvu avi ha'e nunga re.
- ¹¹ Yy rerua kuery oporaei va'e,
 mymba kuery oy'uaty yakã ikuai va'e mbyte rupi
 pendeayvu SENHOR gueko porãa rupi ojapo va'e re,
 mba'eta gueko porãa rupi oipptyvõ Israel re hekoa va'e.
 Ha'e rami rire SENHOR pegua kuery
 ha'eve ju ngoo katy ojevy aguã.
- ¹² Emyĩ ke Débora, emyĩ ke.
 Evy ke, ekeveeme, emonhendu mboraei.
 Epu'ã ke Baraque, ndee Abinoão ra'y,
 eraapa ke ndejopyare kuery rejokua reve.
- ¹³ Ha'e ramo oguejy avi yvatekueve rembyre,
 SENHOR pegua kuery xereve guarã oje'oi ipo'akakueve rovai.
- ¹⁴ Efraim kuery va'e regua Amaleque yvy yma guare re ikuai va'e
 ma joe opu'ãa katy oguejy jogueravy.
 Ha'e gui ndee Débora nderakykue
 oje'oi avi Benjamim regua guetarã kuery reve.
 Maquir gui oguejy xondaro ruvixa kuery,
 Zebulom gui voi ou po pygua ojopy reve jogueraa va'e kuery.
- ¹⁵ Issacar regua yvatekueve voi Débora rupive oje'oi.
 Issacar kuery ma Baraque rupive oje'oi,
 hakykue oguejy jogueravy yvy'ã guy katy.
 Ha'e rã Rúben kuery va'e regua mbyte ma
 joo rami e'ŷ-e'ŷ ijayvu okuapy.
- ¹⁶ Mba'e re tu vaka kora rupi ri pepyta pekuapy
 mimby pu pendua py rive?
 Rúben regua joo rami e'ŷ-e'ŷ ijayvu okuapy.
- ¹⁷ Gileade pygua kuery voi Jordão yakã rovai re optya.
 Ha'e Dã kuery, mba'e re tu kanoã guaxu yvýry optya okuapy?
 Aser kuery voi oguapypa okuapy ye'ẽ rembe re,
 optyu'u porã okuapy ye'ẽ rakã pa'ũ py.
- ¹⁸ Ha'e rã Zebulom kuery va'e regua ma ndojeayvuveikue py oo,
 Naftali kuery voi nhuündy yvy'ã re oje'oi.
- ¹⁹ Ha'e gui huvinxave kuery ono'õ vy joe opu'ã okuapy.
 Canaã pygua huvinxave kuery opu'ã okuapy Taanaque py,
 Megido yy yvýry.
 Ha'e rami teĩ prata guigua mba'eve ndogueraai ombo'erã.
- ²⁰ Mba'eta yva guive ma voi jaxy-tata opu'ã okuapy Sísera rovai,
 oaxa ovya rupi ae opu'ã.
- ²¹ Quisom yakã voi ogueroxyrypa,
 Quisom yakã opu'ã jepiaty ae.
 Xenhe'ẽ, ejerojyve tema, nembaraete ke.
- ²² Ha'e ramo kavaju kuery ipyambu onhaa rupi,
 hi'árygua kuery joe opu'ã aguã katy ogueronha ramo.
- ²³ SENHOR-a guigua anjo aipoe'i: "Pendeayvu vai ke Meroz tetã re.
 Pendeayvu vai ha'e py ikuai va'e re,
 mba'eta ha'e kuery ma SENHOR jogueraa jepe aguã katy ndooi rire,
 SENHOR jogueraa jepe aguã katy ndooi ixupeguia ipy'a guaxukueve reve", he'i.
- ²⁴ Ha'e rã Jael ma kunhague mboae gui ayvu porãvepy toiko,
 queneu regua Héber ra'yxy va'e.
 Ayvu porãvepy toiko kunhague oguy py ikuai va'e ha'e javi gui.
- ²⁵ Mba'eta ava va'e ovaẽ vy re ojerure ramo ixupe ome'ẽ kamby.

- Karo yvatekueve pegua va'e py ae ome'ẽ kamby nhandykue.
- ²⁶ Ha'e gui okuave'ẽ yvyra rakua ituia katy,
oiporu kuaa regua re okuave'ẽ omba'epo va'e kuery karavo ombotaaty re.
Ha'e vy Sísera re ombota vy
ombovo inhakã,
ombokua vy omboaxa inhakã rupi.
- ²⁷ Ha'e rã kunha va'e py yvy'iry ojero'a,
ho'a vy ipukupa oupy.
Ipy yvýry ojero'a vy ho'a.
Ojero'aay ve ho'a vy omano.
- ²⁸ Ha'e gui ma Sísera xykue'i ma janela jokoa pa'ũ rupi oma'ẽ ho'amy.
Ha'e vy janela gui haxẽ reve aipoe'i:
“Mba'e re tu ikaróxa ndou voi ri?
Mba'e re tu hymba kavaju kuery ndoguata pojawai ri?” he'i.
- ²⁹ Ha'e rã kunhague hi'arandukueve ombovai okuapy,
ha'e rã ha'e voi ombovai ojeupe ae:
- ³⁰ “Ndojoui 'rã ri nda'u, nomboja'oi 'rã ri nda'u mba'emo oipe'apa va'ekue?
Petei-tei ava pe petei e'ŷ vy mokoñ kunhatai nome'ẽi 'rã ri ty'y?
Ha'e gui Sísera peguarã ae ma optya 'rã ajukue joegua e'ŷ-e'ŷ pytã va'e,
ha'e ramo petei e'ŷ vy mokoñ ajukue ombojeguapa pyre e'ŷ nda'u
gua'yxy aju'y re omoi 'rã?” he'i.
- ³¹ Ha'e rami ae SENHOR, tomanomba nderovaigua kuery ha'e javi.
Ha'e rã nderayvua kuery ma
kuaray hexakã ouvya rami taexakã — he'i.
Ha'e rami rire yvy re optyu'upa quarenta ma'etŷ re.

6

Midiã pygua kuery Israel kuery ojavyky reiague

- ¹ Israel kuery ha'eve'ŷ va'e ojapo SENHOR renonde. Ha'e nunga rupi SENHOR sete ma'etŷ re omboaxa Midiã pygua kuery po py.
- ² Israel kuery re Midiã pygua kuery ipo'akapave tema oje'oivy ramo ha'e kuery gui onhemis atyrã ojapo okuapy yvy'ã re itaovape guy ha'e itakua oĩ va'e rupi, ha'e tetã ikorapa va'e py.
- ³ Mba'eta Israel kuery oma'etŷ nhavõ Midiã pygua kuery, amalequita ha'e kuaray oua katygua kuery regua opu'ã 'rã jogueruvy ha'e kuery rovai.
- ⁴ Ha'e vy ha'e kuery rovai ono'õ vy omomba 'rã mba'emo aju yvy re ikuai va'e Gaza katy'i peve. Israel kuery pe mba'eve ndoejai ho'u va'erã. Oipe'a avi 'rã hymba kuery vexa'i, vaka ha'e mburika'i.
- ⁵ Mba'eta ovaẽ 'rã okuapy guymba kuery ha'e oguy omopu'ã va'erã reve. Tuku-karu rami mbovy e'ŷ reve ou ramo nei oipapaa aguã nda'evei, nei hymba camelos kuery voi. Ou okuapy yvy regua ombotyguepa aguã.
- ⁶ Ha'e rami rã Israel kuery ikangy ete okuapy Midiã pygua kuery ikuai rã. Ha'e rami vy ha'e kuery ojapukai okuapy SENHOR pe.
- ⁷ Midiã pygua kuery káuxa SENHOR pe Israel kuery ojapukai ramo
- ⁸ SENHOR ombou petei profeta ha'e kuery pe aipoe'i va'erã:
— Po rami SENHOR Israel kuery Ruete ijayvu: “Xee ae ma Egito yvy gui roguerupa va'ekue, escravo pendekuaiague gui roguenoẽ.
- ⁹ Ha'e rami vy rogueraa jepe Egito pygua ha'e penemoingo axya kuery ha'e javi po gui. Penerenonde gui ha'e kuery aipe'a vy pendevy ju ame'ẽ ijyvykue.
- ¹⁰ Ha'e gui aipoa'e: ‘Xee ma SENHOR Penderuete. Pekyje eme amorreu kuery ruete ramigua kuery gui, ha'e kuery yvy re pendekuai tei', ha'e va'ekue ri xeayvu re peẽ kuery ndapejapyakai.’

Nhanderuete oenoīague Gideão

¹¹ Ha'e gui SENHOR-a guigua anjo ou vy oguapy Ofra py yvyra carvalho hi'aĩ va'e guy py, Abiezer ra'y Joás yvy re. Ha'e va'e jave ma ta'y Gideão ma uva'a ombiriaty py omoa'yĩ oiny trigo, Midiã pygua kuery gui onhomí aguã.

¹² Ha'e va'e pe SENHOR-a guigua anjo ojexa uka vy aipoe'i:

— SENHOR oiko ndereve, ava ipy'a guaxu va'e — he'i.

¹³ Gideão ombovai:

— Ai xeruvixa! SENHOR orereve oiko va'eri mba'e re tu ha'vy orere ou kova'e nunga ha'e javi? Mamo 'rã tu oĩ mba'emo porã ha'e ojapo va'ekue oreru kuery omombe'u va'e ramigua? Mba'eta aipoe'i orevy: “Egito yvy gui e'ŷ ri nda'u SENHOR nhanenoẽmba raka'e?” he'i okuapy va'eri aŷ ma SENHOR orerejapa, oremboaxapa ri Midiã pygua kuery po py — he'i.

¹⁴ Ha'e ramo Gideão oĩ katy SENHOR ojere vy aipoe'i:

— Tereo ndere mbaraetea oĩ va'e rupi, ha'e eraa jepe Israel kuery Midiã pygua kuery po gui. Xee e'ŷ ri nda'u romondouka? — he'i.

¹⁵ Ha'e ramo aipoe'i ixupe:

— Aikore xeruvixa! Mba'e nunga py 'rã tu araa jepe Israel kuery? Ma'ẽ, Manassés kuery ikuai va'e gui xero pygua kuery iporiauve va'e, ha'e gui xee ma xeru ro pygua kuery gui kyrïve va'e aiko.

¹⁶ SENHOR ombovai:

— Ndereve xee aiko ramo ma rejukapa vyvoi 'rã Midiã pygua kuery peteĩ'i ava rami rive — he'i.

¹⁷ Gideão aipoe'i ju:

— Xapy'a rei aŷ xejou porã ha'e xemboaxy ri vy ejapo ha'vy mba'emo, ndee ae ri SENHOR ndeavua reikuua uka aguã.

¹⁸ Ambe'i ranhe, apy gui ejepa'eme ajevy e'ŷa ja, mba'emo neretonde amoĩ va'erã aru aguã.

Ombovai vy

— Roarõ 'rã ha'vy rejevy peve — he'i.

¹⁹ Opy Gideão oike vy oguerekó katu peteĩ kavara'i ha'e peteĩ ryru trigo gui ojapo mbojape imbovua rewegua e'ŷ. Xo'o omoĩ peteĩ ajaka py, ha'e rã tykue ma peteĩ oja py omoĩ. Ha'e rami vy yvyra carvalho guy py oĩ py oguerupa vy omoĩ henonde.

²⁰ Ha'e ramo SENHOR-a guigua anjo aipoe'i ixupe:

— Ejopy xo'o ha'e mbojape imbovua rewegua e'ŷ, emoimba peva'e ita áry, ha'e hi'áry enhoẽmba tykue — he'i rã ha'e rami ojapo.

²¹ Ha'e ramo SENHOR-a guigua anjo ma popoka opo py ogueru va'ekue omokuave'ẽ vy omovaẽ xo'o ha'e mbojape imbovua rewegua e'ŷ oĩ va'e re. Ha'e ramo ita gui tata opu'ã vy oapypa vyvoi xo'o ha'e mbojape. Ha'e gui SENHOR-a guigua anjo ojepa'vyvoi henonde gui.

²² Ha'e gui Gideão ma anjo SENHOR-a guigua etea oikuua vy aipoe'i:

— SENHOR Xeruete, nda'evei ete xevy! Mba'eta xerexa py ae aexa kuri SENHOR-a guigua anjo.

²³ Ha'e rã SENHOR ombovai:

— Toĩ ndere mby'a porã! Ekyje eme! Neremanoi 'rã ri — he'i.

²⁴ Ha'e ramo SENHOR pe Gideão ojapo peteĩ altar ha'e py. Ha'e va'e omboery “SENHOR gui ou mby'a porã.” Aŷ peve ha'e va'e altar oĩ Ofra py Abiezer ramymino kuery yvy re.

Baal pegua altar Gideão oitypaague

²⁵ Ha'e va'e pyavyve SENHOR aipoe'i ixupe:

— Eraa peteĩ vaka nderu rymba, ha'e va'e ma toro sete ma'etŷ va'e regua mokoĩa perekó va'e. Ha'e va'e reve eity Baal pegua altar nderu ojapo va'ekue, ha'e ejaya yvyra gui ta'angaarã omo'ã mbyre, altar yvýry hi'aĩ va'e.

²⁶ Ha'e gui SENHOR Nderuete pe ju ejapo peteī altar. Ha'e va'e yvy'ā apyte áry pyve ejapo, ita py remboupa vy. Ha'e vy toro mokoīa rejopy vy rejuka ha'e reapy 'rā ome'ē mbyrā, ta'angaa'y yxakārā rejaya va'ekue remoendy vy — he'i.

²⁷ Ha'e ramo Gideão dez avakue guembiguai ikuai va'e ogueraa vy ojapo SENHOR ijayvuague. Ha'e rami teī okyje avi nguu ro pygua kuery ha'e guetā pygua avakue gui. Ha'e rami vy ara py ndojapoi, pyávy anho.

²⁸ Ha'e gui ko'ē rai jave ha'e va'e tetā pygua avakue opu'ā vy oexa rā Baal pegua altar oitya ma ra'e, ha'e ijyvýry ta'angaa'y guigua hi'aī va'ekue ojaya ra'e. Ha'e toro mokoīa va'e voi oapypaa inony altar ojapo va'ekue áry.

²⁹ Ha'e rami vy joupe-upe aipoe'i okuapy:

— Mava'e tu ojapo peva'e nunga?

Ha'e vy oporanduve ha'e oikuaa pota porā ma vy

— Joás ra'y Gideão rima ojapo — he'i okuapy.

³⁰ Ha'e ramo ha'e va'e tetā pygua avakue aipoe'i okuapy Joás pe:

— Eraa na ndera'y apy gui mombyry'i, jajuka aguā. Mba'eta oity altar Baal pegua ha'e ojaya ijyvýry ta'angaa'y hi'aī va'ekue.

³¹ Ha'e ramo Joás aipoe'i hexe opu'ā va'e kuery ha'e javi pe:

— Baal repya rupi ri ty'y pejoguero'a ta? Peē ae ri ty'y pepy 'rā? Hepya rupi joguero'a va'e rei omano 'rā kova'e ko'ē re ma voi. Mba'eta tuuete ae ri vy ha'e ae tojepy ixupeguo altar oityague re — he'i.

³² Ha'e va'e ára guive Gideão omboerya Jerubaal, mba'eta aipoe'i:

— Baal ae tojepy, ixupeguo altar oityague re — 'ea.*

³³ Ha'e gui Midiā pygua kuery, amalequita ha'e kuaray oua katy ikuai va'e kuery ono'ōmba okuapy. Ha'e vy oupa vy Jezreel yvyugua py ikuai.

³⁴ Ha'e ramo Gideão re SENHOR Nhe'ē onhemonde ramo omonhe'ē atā mimby guaxu. Ha'e ramo Abiezer ramymino kuery oupa oĩa py.

³⁵ Ha'e rami vy guembiguai kuery omondouka Manassés regua ikuia ha'e javi rupi, ha'e kuery avi oenoĩ oĩa py oupa aguā. Aser regua ikuia rupi avi omondouka guembiguai, Zebulom ha'e Naftali regua ikuia rupi guive. Ha'e ramo oupa oĩa py.

³⁶ Ha'e gui Gideão aipoe'i Nhanderuete pe:

— Xapy'a rei ndeayvuague rami vy xee rupi ae ri Israel kuery reraa jepe 'rā ramo

³⁷ ma'ē, peteī pirekue vexa'i rague amoī 'rā mba'emo moa'yīaty py. Xapy'a rei ha'e va'e re anho ri yxapy oĩ ramo, ha'e ijyvýry rupi ipiru rei ramo aikuua 'rā xee rupi ae Israel kuery reraa jepe 'rā, ndeayvuague rami vy — he'i.

³⁸ Ha'e ramo ha'ekue rami oiko, mba'eta ko'ēgue, ko'ē rai ramove Gideão ovv vy vexa'i rague onhami vy yxapykue peteī hy'a omonyē.

³⁹ Ha'e gui Gideão aipoe'ive ju:

— Ndevai eme xevy, xeayvuve ju ta povae're re anho. Aŷ ma ajerure ndevy teīgue ju rejapo aguā vexa'i rague re xee aikuua aguā. Tove vexa'i rague anho ta'ipiru, ha'e rā ijyvýry ma ta'ixapypa — he'i.

⁴⁰ Ha'e ramo ha'ekue rami ae Nhanderuete ojapo ha'e va'e pytū re. Vexa'i rague anho ipiru oiny, ha'e rā ijyvýry rupi ma yvy inhakāmba yxapy gui.

Trezentos avakue reve Gideão oityaque Midiā pygua kuery

¹ Ko'ē rai ramove Jerubaal Gideão va'e opu'ā, hexeve ikuai va'e ha'e javi reve. Ha'e vy oje'oi vy Harode yvu oĩ va'e yvýry ju ikuai. Kuaray ijapu'a'ia katy ikuai Midiā pygua kuery, Moré yvyty rexei.

² Gideão pe SENHOR aipoe'i:

* 6:32 Tery Jerubaal ma "Baal tojepy" 'ea.

— Heta ete rima ndereve ikuai va'e, ha'e kuery po py Midiā pygua kuery amboaxa aguã. Ha'e rami va'e rire xerovai Israel kuery onhemboyvate vy “Orepo'akaa rupi ae roo jepé” he'i 'rágue okuapy.

³ Ha'e nunga rupi ndeayvu ke heta va'e kuery oendua py. Ha'e vy aipo're: “Amongue ndooxeia ha'e okyjea oendu va'e ma tojevy ju, tojepe'a ov y Gileade vvyty reia gui”, 're 'rã — he'i. Ha'e rami rã ha'e kuery va'e regua ojevy vinte e dois mil, ha'e rã dez mil ma opyta.

⁴ SENHOR aipoe'ive ju Gideão pe:

— Oĩ reta ete teri ha'e kuery va'e regua. Ejapo yy py oguejypa aguã rami, ha'e rã ha'e py ndevy aikuaa pota uka 'rã. Amongue xee ndevy aipoa'ea va'e: “Kova'e ma oo 'rã nderupive” ha'ea va'e ma oo 'rã nderupive. Ha'e rã ndevy “Kova'e ma nderupive ndooi 'rã”, ha'ea va'e ma ndooi 'rãe — he'i.

⁵ Ha'e ramo Gideão ojapo yy py oguejypa aguã rami. Ha'e ramo ixupe SENHOR aipoe'i:

— Reipe'a 'rã opu'ã reve jagua rami oapekũ py oy'u va'e ha'e javi, ha'e rã oy'u aguã guenapy'ã re oĩ va'e kuery ma amboae katy 'rã reipe'a — he'i.

⁶ Opu'ã reve opo py oy'u va'e ma trezentos avakue ikuai. Ha'e rã hembyrekue ha'e javi ma guenapy'ã re oĩ yy oy'u aguã.

⁷ Ha'e gui SENHOR aipoe'i Gideão pe:

— Peva'e trezentos avakue oapekũ py oy'u va'ekue reve ma xee rogueraa jepé 'rã, ndepo py Midiā pygua kuery amboaxapa vy. Ha'e rã amboae kuery ma tojepe'a pavẽ, peteĩ-teĩ too guekoia katy ae — he'i.

⁸ Ha'e rami rã avakue Israel regua peteĩ-teĩ Gideão omondoukapa hoo katy, ha'e rã trezentos ete'i ma ojea py omombyta. Ha'e va'e kuery ma opo py ojopy heravy guembi'urã ha'e mimby guaxu mymba rakuakue guigua. Ha'e rã Midiā pygua kuery ma vvy'ã guy py ono'õ okuapy.

⁹ Ha'e va'e pyavyve SENHOR aipoe'i ixupe:

— Epu'ã ke ha'e eguejy ono'õ okuapya katy, mba'eta amboaxapa ma ndepo py.

¹⁰ Xapy'a rei repu'ã aguã rekyje teri ri vy ono'õ okuapya katy eguejy nerembiguai kunumi va'e Pura reve.

¹¹ Ha'e vy pendu 'rã ha'e kuery joupe-upa ijayvu va'e. Ha'e va'e rire ndepy'a guaxua rendu ma ramo peguejy 'rã ono'õ okuapy va'e rovai pepu'ã aguã — he'i. Ha'e ramo guembiguai Pura reve oo ono'õ okuapya apy'i peve.

¹² Midiā pygua kuery, amalequita ha'e kuaray oua katyguia kuery ha'e javi ma mbovy e'ŷ vy omonyē rei yvyugua tuku rami. Ha'e kuery rymba camelio kuery voi mbovy rei e'ŷ ikuai, ita ku'i ye'ẽ rembe re ikuai va'e rami.

¹³ Ha'e gui Gideão ovaẽ vy oendu peteĩ ava oirũ pe omombe'u rã oexa ra'u va'ekue. Ha'e vy aipoe'i:

— Xee aexa ra'u kuri rã peteĩ mbojape cevada guigua ojere ov y Midiā pygua kuery nhano'õ jakuapya katy. Ha'e vy onhembota xondaro kuery ruvixa roguy re. Ha'e va'e ho'a vy ojere yvate katy guare vvy katy. Ha'e vy ha'ekue rami ae itui — he'i.

¹⁴ Irũ ma ombovai:

— Ha'e va'e ma Israel regua Joás ra'y Gideão kyxe ae. Ipo py tuuete omboaxa ra'e Midiā pygua kuery, ha'e nhano'õ jakuapy va'e ha'e javi — he'i.

¹⁵ Ha'e rami rã oexa ra'u pyre ha'e mba'erã paa Gideão oendu ma vy omboete Nguuete. Ha'e gui ojevy ju Israel kuery onhemboatya py. Ha'e vy aipoe'i ha'e kuery pe:

— Pepu'ã ke, mba'eta pendepo py SENHOR omboaxa ma Midiā pygua kuery.

¹⁶ Ha'e gui omboja'o trezentos avakue mboapy aty ikuai aguã. Peteti-teĩ po py ome'ẽ mimby guaxu ha'e yryru, ipy py takua ryxa rendy oĩ va'e reve.

¹⁷ Ha'e vy ha'e kuery pe aipoe'i:

— Pema'ẽ ke xere, ha'e pejapo xee ajapoa rami. Ono'õ okuapya apy'i peve xee avaẽ vy ajapoa rami pejapo avi 'rã.

¹⁸ Ha'e gui xee ha'e xereve ikuai va'e mimby guaxu romonhe'ẽ ramove peẽ voi pemonhe'ẽ 'rã pekuapy ono'õ va'e kuery yvýry rupi. Ha'e vy pejapukai reve “ SENHOR ha'e Gideão rery rupil!” peje 'rã — he'i

¹⁹ Ha'e gui ma Gideão ha'e cem avakue hexeve ikuai va'e ma ono'õa apy'i peve ovaẽ, pytû mbyte rai'i nhoarõa kuery omboekovia aguã rami ikuai jave. Ha'e vy mimby guaxu omonhe'ẽ vy ombovo yryru opo py ogueru va'ekue.

²⁰ Ha'e rami vy mboapy aty ikuai va'e omonhe'ẽ pavẽ mimby guaxu ha'e ombovo yryru. Oaxua regua re ojopy tataendy'y, ha'e rã oiporu kuaa regua re ma mimby guaxu omonhe'ẽ va'e oguereco. Ha'e vy ojapukai okuapy:

— Kyxe SENHOR ha'e Gideão rery rupigua!

²¹ Ha'e vy peteĩ-teĩ ma hi'aïague py ae optya ono'õ okuapy va'e yvýry. Ha'e ramo ha'e javi omboypy onha, ojapukai ha'e ojava oje'oivy aguã.

²² Trezentos mimby guaxu onhendu rã SENHOR ojapo peteĩ-teĩ kyxe jomeme oiporu aguã rami. Ono'õ okuapyha'e javi rupi oiko ha'e rami. Ha'e rami vy Zererá katy onhamba, ha'e gui Bete-Sita ha'e Abel-Meolá apy peve, Tabate rovai.

²³ Ha'e ramo Israel regua avakue, Naftali, Aser ha'e Manassés regua oenoïmbaa avi Midiã pygua kuery rakykue oje'oi aguã.

²⁴ Efraim regua yvy'ã reia ha'e javi rupi Gideão omondouka guembiguai kuery. Ha'e vy aipoe'i imondovy:

— Peguejy ke Midiã pygua kuery pejoko aguã. Pemboaxa eme Jordão yakã, Bete-Bara peve — he'i ramo Efraim regua avakue oenoï mbyre ojokopa Jordão yakã Bete-Bara peve.

²⁵ Ha'e rami vy ojopy okuapy Midiã pygua huvixave mokoõ oiko va'ekue, Orebe ha'e Zeebe. Ojuka Orebe itaova Orebe regua py ae, ha'e rã Zeebe ma ojuka Zeebe regua uva onhamiaty py. Oje'oive Midiã pygua kuery rakykue. Ha'e gui Jordão rovai re Gideão oĩa py ogueru Orebe ha'e Zeebe akágue.

8

Efraim kuery reve Gideão ijayvu porã'i, ha'e rã Midiã pygua huvixave kuery ojukapaague

¹ Ha'e gui Efraim regua avakue aipoe'i okuapy Gideão pe:

— Mba'e re tu ha'e rami ete rejapo orere? Mba'eta Midiã pygua kuery rovai repu'ã aguã reo jave norerenoĩ — he'i okuapy ixupe ijayvu atã vy.

² Ha'e ramo ombovai ha'e kuery pe:

— Aÿ ma mba'ixa tu peẽ kuery pejapoia gui xee ajapove? Peẽ Efraim kuery mba'e uva'a rembyrekue na'iporãive ri ty'y ore Abiezer ramymino kuery mba'e uva'a gui?

³ Pendepo py ae Nhanderuete omboaxa Midiã pygua huvixave kuery Orebe ha'e Zeebe. Mba'ixa tu xee ajapo ta peẽ pejapo va'ekue ramigua? — he'i vy ojapo ha'e kuery nda'ivaivei aguã rami.

⁴ Ha'e gui Jordão yakã yvýry peve Gideão ovaẽ vy oaxapa oje'oivy trezentos avakue hexeve ikuai va'e reve. Ha'e kuery ikane'õmba ma teĩ joakykue teri oje'oi.

⁵ Ha'e gui aipoe'i Sucote pygua avakue pe:

— Ajerure pêvy, peme'ẽ xerupiveguia kuery ho'u va'erã, mba'eta ikane'õmba ma, ha'e xerupive oje'oi Midiã pygua huvixa kuery Zeba ha'e Zalmuna rakykue.

⁶ Ha'e rã Sucote pygua yvatekueve ombovai:

— Ndee rerekma pa Zeba ha'e Zalmuna pokue, nexondaro kuery ho'u va'erã rome'ẽ aguã? — he'i.*

⁷ Ha'e ramo Gideão ju aipoe'i:

— Ha'e rami rã Zeba ha'e Zalmuna xepo py SENHOR omboaxa ma ramo pendero'o rupi roikutupa 'rã juu tekao e'ŷ regua ha'e juu rakuaendy py — he'i.

⁸ Ha'e gui Penuel py oo vy ha'ekue rami ae ju ijayvu ha'e pygua avakue pe. Ha'e rã Penuel pygua kuery voi ombovai Sucote pygua avakue ombovaiague rami.

* ^{8:6} Ha'e jave ma ngovaigua ruvixa kuery ojuka vy inhakã e'ŷ vy ipokue ojaya 'rã oexa uka aguã (Juízes 7.25).

⁹ Ha'e ramo Penuel pygua avakue pe ijayvu vy aipoe'i avi:
— Xee ma ajevy porã ju vy aitypa 'rã kova'e torre — he'i.

¹⁰ Ha'e gui Zeba ha'e Zalmuna ma Carcor py ikuai oxondaro kuery reve, quinze mil avakue ha'e javi vy, kuaray oua katyguia kuery va'e regua xondaro kuery hembyre va'ekue. Ha'e rã ojuka pyre ma cento e vinte mil avakue kyxe reve guare.

¹¹ Gideão ma ijyvy e'ŷ va'e rape rupi oo oiny, Noba ha'e Jogbeá katy rupi kuaray oua katy. Ha'e vy ojukapa ha'e va'e xondaro kuery nonheangui rei jave.

¹² Zeba ha'e Zalmuna ma ojava jogueravy va'eri ha'e kuery rakykue Gideão oo. Ha'e vy ojopy mokoïve Midiä pygua huvixa Zeba ha'e Zalmuna, oitypa avi ixondaro kuery.

¹³ Ha'e gui Joás ra'y Gideão opu'âague gui Heres yvy'â rupi ojevy vy
¹⁴ ojoko peteĩ kunumi va'e Sucote pygua, ha'e ixupe oporandu mba'emo re. Ha'e ramo kunumi va'e ixupe ombopara Sucote pygua yvatekueve ha'e nhomongeta va'ety kuery rery ha'e javi, setenta e sete avakue rery.

¹⁵ Ha'e ramo Gideão ou ju Sucote pygua avakue ikuiaia py. Ha'e vy aipoe'i:
— Ema'ẽ apy ma Zeba ha'e Zalmuna re, ha'e kuery reko re xejajai vy aipo pejeague: “Rerek ma pa Zeba ha'e Zalmuna pokue, ndevyguia avakue ikane'õmba va'e ho'u va'erã rome'ẽ aguã?” pejeague — he'i.

¹⁶ Ha'e rami vy ojopy ha'e va'e tetã pygua nhomongeta va'ety kuery, ha'e ombopi ukapa Sucote pygua avakue juu tekao e'ŷ regua ha'e juu rakuaendy py.

¹⁷ Oity avi torre Penuel py oĩ va'ekue, ha'e ojuka tetã pygua avakue.

¹⁸ Ha'e rire aipoe'i Zeba ha'e Zalmuna pe:
— Marã ramigua avakue tu pejuka raka'e Tabor py?
Ha'e kuery ombovai:

— Ndee ramigua meme ri ha'e kuery ikuai karamboae. Peteĩ-teĩ ma huvixave ra'y ramigua — he'i.

¹⁹ Ha'e ramo aipoe'i:
— Ha'e va'e kuery rima xeryvy kuery, ha'i pi'a kuery ae'i. Anhetẽ ete SENHOR oikove va'e rery rupi aura vy aipoa'e: Ha'e kuery ndapejukai va'e rire xee voi ndorojukai 'rãgue — he'i.

²⁰ Ha'e gui aipoe'i gua'y jypyguia Jéter va'e pe:
— Epu'â ha'e ejuka mokoïve — he'i teĩ kunumi teri vy okyxe ndoekyi, okyje vy.

²¹ Ha'e ramo Zeba ha'e Zalmuna aipoe'i:
— Epu'â ke ndee ae, ha'e eju orere, mba'eta tuja va'e anho 'rã ipy'a guaxu — he'i ramo Gideão opu'â vy ojuka mokoïve. Ha'e vy ha'e kuery rymba camelò aju'y gui oipe'a ijeguarã jaxy pëgue ramigua oĩ va'ekue.

Gideão huvixarã noíxei va'eri manto sacerdote peguarã ojapo ma rire omanoague

²² Ha'e ramo Israel regua avakue aipoe'i okuapy Gideão pe:
— Ei ke oreruvixarã, ndee ha'e gui ndera'y ju, ha'e va'e rire neramymino voi ju, Midiä pygua kuery po'akaa gui orereraa jepe rire.

²³ Gideão ombovai:
— Xee ma naĩ reguai penderuvixarã, xera'y voi nopenai 'rã pendere. SENHOR ae ma 'rã penderuvixa oĩ — he'i.

²⁴ Gideão aipoe'ive ju ha'e kuery pe:
— Ha'e rami avi peteĩ mba'e re ma ajerure ta pëvy: Peme'ẽ xevy namixã penemba'erã peipe'a va'ekue-'ekue — he'i, mba'eta hovaigua kuery ma Ismael regua vy namixã ouro guigua oguereko va'ekue.

²⁵ Ha'e kuery aipoe'i:
— Rovy'a ete reve 'rã rome'ẽ ndevy — he'i okuapy vy peteĩ ao puku ha'e kuery oipyo vy hi'áry peteĩ-teĩ omoĩ peteĩ namixã oipe'a va'ekue.

²⁶ Namixã ouro guigua ojerurea va'ekue poyikue oikuua rã dezenove quilos ouro ete anho oĩ, amboae ramigua jegua reve'ŷ vy: jaxy pëgue, mbo'y, ao púrpura guigua Midiä pygua huvixa kuery omoĩ va'ekue ha'e camelò kuery aju'y re jegua oĩ va'ekue reve'ŷ vy.

²⁷ Ha'e va'ekue gui ma Gideão ojapo peteĩ manto sacerdote peguarã, ha'e guekoa Ofra py omoĩ. Ha'e ramo ha'e va'e re Israel kuery ovapa vy opa marã rei ikuai. Ha'e va'e manto ma nhuã rami optya Gideão pe, hoo pygua kuery pe voi.

²⁸ Ha'e rami py Midiã pygua kuery ma Israel kuery oitypa ma rire neĩ oakã nomopu'avei ha'e kuery rovai ou aguã. Ha'e rami rã yvy re optyu'upa quarenta ma'etõ re, Gideão oikovea pukukue re.

²⁹ Ha'e gui Joás ra'y Jerubaal va'e ojepe'a vy oiko ngoo py ae.†

³⁰ Gideão ma setenta gua'y kuery oguereko, ta'y ae meme, mba'eta ta'yxy reta vy.

³¹ Siquém py ta'yxy jevy oiko va'e voi oikuavã'i peteĩ ava'i. Ha'e rã omboery Abimeleque.

³² Ha'e gui Joás ra'y Gideão tuja'i ete ma vy omano. Ha'e rã onhono porãa tuu Joás onhono porãague py ae ju, Abiezer ramymino kuery rekoia Ofra py.

³³ Ha'e gui Gideão omano rire Israel kuery opa marã rei ju ikuai, Baal ra'angaa ikuai va'e re rive ovapa vy. Ha'e rami vy nguuetarã omoĩ okuapy Baal-Berite ra'angaa.

³⁴ Israel kuery na'ima'endu'avei SENHOR nguete re, hovaigua kuery ijyvýry ikuai va'e ha'e javi gui ogueraa jepe va'ekue ri.

³⁵ Neĩ Jerubaal Gideão va'e ro pygua kuery re voi ha'e kuery nda'ija'evei, Israel kuery pe ha'e ojapo porã va'ekue ri.

9

Abimeleque guyvy kuery ojukapa vy ha'e ju onhembouvixave oinyague

¹ Ha'e gui Jerubaal ra'y Abimeleque ma Siquém tetã py oo, oxy kyvy kuery ikuiaia py. Ha'e pygua kuery pe ijayvu, ha'e guamoĩ ro pygua kuery ha'e javi pe. Ha'e vy aipoe'i:

² — Ajerure pendeayvu ke Siquém pygua kuery ha'e javi oendua py. Ha'e vy aipopeje: “Mava'e tu peẽ kuery pejou porãve penderuvixarã: Setenta avakue Jerubaal ra'y kuery ha'e javi, tyrã pa peteĩ'i penderuvixarã oĩ aguã? Penema'endu'a ke xee voi peẽ kuery va'e regua, pendero'o ae aikoa re”, peje — he'i.

³ Ha'e va'e ayvu ha'e javi ma Siquém pygua kuery pe ju ixy kyvy kuery omombe'u. Ha'e ramo ha'e kuery py'a re oĩ Abimeleque-a katy anho oje'oi aguã, “Nhanderegua” he'i okuapy vy.

⁴ Ha'e rami vy ixupe ome'ẽ okuapy setenta hatã'i va'e prata guigua Baal-Berite ra'angaa oĩa gui oipe'a va'ekue. Ha'e va'e peráta Abimeleque ome'ẽ avakue hi'arandu e'ŷ ha'e ojerovia rei rive va'e pe ngupive guarã.

⁵ Ha'e rami vy Ofra tetã py nguu ro py oje'oi vy ojuka guyvy kuery Jerubaal ra'y ikuai va'ekue. Peteĩ ita áry pyve ojuka setenta avakue. Ha'e rã Jerubaal ra'y kyrive Jotão va'e ma onhemi vy oikove.

⁶ Ha'e gui Siquém ha'e Bete-Milo pygua kuery ha'e javi ono'õmba jogueru vy nguvixaverã omoĩ okuapy Abimeleque, Siquém katy'i yvyra carvalho ima'endu'aapy hi'aĩ va'e yvy'iry.

Jotão ijayvuague

⁷ Ha'e gui Jotão pe ha'e nunga omombe'ua rã oo vy oẽ Gerizim yvyty re. Ha'e py oĩa gui ojapukai reve ijayvu ho'amy. Ha'e vy aipoe'i ha'e kuery pe:

— Siquém pygua kuery, pejapyxaka ke xeayvua re, Nhanderuete ju pendeayvu oendu aguã.

⁸ Peteigüe ma yvyra ikuai va'e oje'oi nguvixaverã omoĩ aguãazeite oikyty reve. Ha'e rami vy peteĩ azeitona'y hi'aĩ va'e pe aipoe'i okuapy: “Eĩ ke oreruvixarã.”

⁹ Ha'e rami teĩ azeitona'y ombovai: “Ha'e rami avi xee ajepe'a'rã ri ty'y azeite ame'ëa gui, Nhanderuete ha'e avakue oguerovy'a va'eri, yvyra pendekuai va'e áry rupi rive xerakã ovava aguã?” he'i.

¹⁰ Ha'e gui figo'y pe ju yvyra ikuai va'e aipoe'i: “Eju ndee oreruvixarã.”

¹¹ Ha'e rã figo'y ombovai: “Xee ajepe'a'rã ri ty'y xe'a he'ë ha'e iporã va'e ame'ëa gui, yvyra pendekuai va'e áry rupi rive xerakã ovava aguã?” he'i.

† 8:29 Jerubaal ma Gideão rery mboae (Juízes 6.32).

¹² Ha'e gui uva rembypy pe ju yvyra ikuai va'e aipoe'i: "Eju ndee oreruvixarā."

¹³ Ha'e rā uva rembypy ombovai: "Xee ajepe'a 'rā ri ty'y vinho ame'ēa gui, Nhanderuete ha'e avakue oguerovy'a va'eri, yvyra pendekuai va'e áry rupi rive xerakā ovava aguā?" he'i.

¹⁴ Ha'e gui juu'y pe rive ju yvyra ikuai va'e aipoe'i okuapy: "Eju ndee oreruvixarā."

¹⁵ Ha'e ramo juu'y ombovai yvyra ikuai va'e pe: "Anhetē ri penderuvixarā xemoīxe vy peju ha'vy, penhemī xekuaray'ā guy py. Ha'e rā any ri ramo juu'y gui toē tata, toapypa yary Líbano py ikuai va'e voi" he'i.

¹⁶ — Ha'e gui aŷ ma anhetē rupi ri nda'u pendekuai Abimeleque penderuvixarā pemoīa py? Ha'evea rami ri nda'u Jerubaal ha'e hoo pygua kuery re pejapo? Ha'e va'e mba'emo porā ojapoague rami ri nda'u pejapo hexe?

¹⁷ (Mba'eta xeru ma pendere vy joe opu'ā vy ndojeayvuveikue py pendereraa jepe raka'e Midiā pygua kuery po gui.

¹⁸ Ha'e rā peē kuery ma aŷ xeru ro pygua kuery re pepu'ā vy peteī ita áryve pejukapa kuri ta'y kuery setenta ikuai va'e. Ha'e gui peē Siquém pygua kuery, hembiguai pi'a Abimeleque va'e ju pemoī penderuvixarā, penderegua ramo rive.)

¹⁹ Ha'e gui xapy'a rei anhetē rupi ha'e ha'evea rami ri Jerubaal ha'e hoo pygua kuery re pejapo vy ma tapererovy'a Abimeleque, ha'e voi toguerovy'a peē kuery.

²⁰ Ha'e rā any ri ramo Abimeleque gui toē tata, tomomba Siquém ha'e Bete-Milo pygua kuery. Ha'e Siquém ha'e Bete-Milo pygua kuery gui voi toē tata, Abimeleque ju tomomba — he'i.

²¹ Ha'e va'e rire'ive Jotāo ojava vy oo Beer katy guyke'y Abimeleque gui okyje vy. Ha'e py ju oiko.

Abimeleque rovai Gaal ijayvuague

²² Ha'e gui Abimeleque mboapy ma'etŷ re ma Israel kuery ruvixa oī javé

²³ Nhanderuete ombou peteī nhe'ē Abimeleque ha'e Siquém pygua kuery reve joe ija'e e'ŷ aguā rami nhomoingoarā. Ha'e ramo ha'e kuery nhemi rupi ikuai Abimeleque rovai.

²⁴ Ha'e rami oiko Jerubaal ra'y kuery setenta ikuai va'e ojukapaague repyrā ou aguā, ha'e tyke'y Abimeleque ojukapa va'ekue áry ae huguy omoēague re imbopagaarā ou aguā, ha'e Siquém pygua kuery áry voi, mba'eta ha'e kuery onhemoirū rire guyvy kuery ojukapa aguā py.

²⁵ Ha'e rami vy Abimeleque rovai Siquém pygua kuery omoī avakue yvyty ikuai va'e áry oma'ē mbegue aguā, ha'e va'e rupi oaxa va'e ha'e javi ha'e kuery oguero'a aguā. Ha'e rā ha'e nunga Abimeleque pe omombe'ua.

²⁶ Ha'e gui Ebede ra'y Gaal va'e guyvy kuery reve ou avi vy Siquém py ikuai. Ha'e ramo hexe Siquém pygua kuery ojerovia okuapy.

²⁷ Ha'e gui ha'e kuery mba'ety py oje'oi vy omono'ō uva'a. Ha'e vy hi'a onhamimba ma rire ojapo okuapy ngaru. Ha'e rami vy nguu ete ra'angaa pegua oo py ju oje'oi vy okaru ha'e oy'u okuapy, Abimeleque re ijayvu vai guive.

²⁸ Ha'e rami vy Ebede ra'y Gaal aipoe'i:

— Marā ramigua tu Abimeleque, ha'e marā ramigua tu nhande Siquém pygua jaiko, ixupe jaiko aguā? Ha'e va'e ma Jerubaal ra'y e'ŷ ri ty'y? Zebul e'ŷ ri ty'y hembiguai oiko? Mba'erā tu ixupe rive jaiko? Ha'e rami 'rāgue py ha'eveve Siquém ru Hamor ramymimo kuery pe jaiko.

²⁹ Peē kuery ma xepo py penemoīa va'e rire xee aipe'a 'rāgue Abimeleque, ha'e ixupe "Emboatypa ndevygua xondaro kuery, ha'e erupa" ha'e 'rāgue — he'i.

³⁰ Ha'e rami Ebede ra'y Gaal ijayvu rā tetā pygua huvixa Zebul oendu vy ivai vaipa.

³¹ Ha'e rami vy Abimeleque-a py omondouka nhemi guembiguai omombe'u va'erā: "Ebede ra'y Gaal ma guyvy kuery reve Siquém py ou vy tetā pygua kuery omopu'āmba nderovai.

³² Epu'ā ke ha'vy pyávy, ndee ha'e ndereve ikuai va'e kuery ha'e javi. Penhemī ranhe mba'ety rupi.

³³ Ha'e gui ko'ẽ aje'ive reve pevypa kuaray oẽ'i ramove, ha'e pepu'ã pekuapy tetã re. Ha'e rã Gaal ngupive ikuai va'ekue reve penderovai oẽmba jogueruvy ramo pejapo tema hexe pejapoxea rami", he'i uka.

Gaal ha'e Siquém pygua kuery re Abimeleque opu'ã vy omombaague

³⁴ Ha'e va'e pyavyve Abimeleque ha'e hexeve ikuai va'e ovypa vy onhemi okuapy Siquém tetã re opu'ã aguã. Irundy henda py ikuai.

³⁵ Ha'e gui Ebede ra'y Gaal oẽ vy opu'ã ho'amy tetã rokẽ py. Ha'e ramo Abimeleque ha'e hexeve ikuai va'e ha'e javi opu'ãmba ju onhemiague gui.

³⁶ Ha'e rã ha'e kuery ou rã Gaal oexa vy aipoe'i Zebul pe:

— Ma'ẽ, oguejya jekuaa yvyty áry gui.

Zebul ombovai:

— Any, yvyty'ã rima ava rami rexa — he'i.

³⁷ Ha'e gui Gaal ijayvuve ju. Ha'e vy aipoe'i:

— Ma'ẽ, pee ma oguejya jogueruvy nhanerenonde katy gui, ha'e ou reta avi yvyra carvalho imba'ekuaa aty rupi tape ou va'e gui.

³⁸ Zebul ombovai:

— Ha'e gui mamo tu aŷ'i oĩ ndejuru, ha'e va'e py aipo'reague: "Marã ramigua tu Abimeleque ixupe jaiko aguã?" 'reague? Peva'e e'ŷ ri ty'y nerembovarei va'ekue? Ha'e rami vy eẽ ha'vy, epu'ã hovai — he'i.

³⁹ Ha'e ramo Siquém pygua kuery renonde Gaal oẽ ovypa vy opu'ã Abimeleque kuery rovai.

⁴⁰ Ha'e rã Abimeleque omonha vy ou ramo Gaal ojava henonde gui. Ha'e gui heta ojuka pyre ho'a tetã rokẽ rupi oike ta maa peve.

⁴¹ Ha'e gui Abimeleque ma Arumá py ranhe oo opyta ramo Zebul ae omoxẽ Gaal ha'e tyvy kuery Siquém py ikuai ve'ŷ aguã.

⁴² Ko'ẽ jevy tetã pygua kuery oẽmba ju oje'oivy mba'ety katy. Ha'e nunga Abimeleque pe omombe'ua rã

⁴³ ojeupega avakue ojopy vy omboja'o mboapy henda py. Ha'e rami vy omondouka mba'ety rupi onhemi aguã. Amboae kuery tetã gui oẽ rã oexa vy opu'ã hovai, oitypa.

⁴⁴ Abimeleque hexeveguia kuery reve onha pojava vy tetã rokẽ py ae ikuai. Ha'e rã amboae mokoõ aty va'e mba'ety katy oẽ oje'oivy va'ekue re opu'ã vy oitypa avi.

⁴⁵ Ha'e va'e ára pukukue re Abimeleque kuery opu'ã okuapy ha'e va'e tetã re. Ha'e vy ipo'aka. Ha'e pygua kuery ojukapa vy ombovaipa tetã, ha'e juky avi omoaï.*

⁴⁶ Ha'e ramo Siquém pygua kuery torre py ikuai va'e ha'e nunga oendu vy oikepa El-Berite pegua templo guy py onhemi atyrã ojo'o pyre py.

⁴⁷ Abimeleque pe omombe'ua Siquém py torre pygua kuery ono'õ okuapya.

⁴⁸ Ha'e ramo Zalmom yvyty re Abimeleque oẽ ojeupega kuery ha'e javi reve. Haxa Abimeleque ojopy vy ojaya peteĩ yvyra rakã. Ha'e va'e oupi vy oaxi'ý áry omoõ reve aipoe'i ngupive ikuai va'e pe:

— Xee ajapo rã pexa vy peẽ voi ha'ekue rami pejapo pojava — he'i ramo

⁴⁹ ha'e kuery peteĩ-teĩ yvyra rakã ojaya vy oo Abimeleque rakykue. Ha'e vy onhonomba imoiny onhemi atyrã ojo'o pyre áry. Ha'e vy omoendy Siquém pygua kuery torre py ikuai va'ekue ha'e javi áry, oapypa. Ha'e rami vy omanomba, mil avakue ha'e kunhague.

Abimeleque omanoaque

⁵⁰ Ha'e gui Abimeleque ma Tebes tetã py oo vy ojokopa vy ipo'aka.

⁵¹ Ha'e va'e tetã mbyte py oĩ peteĩ torre imbaraete va'e. Ha'e va'e katy tetã pygua kuery avakue ha'e kunhague onha vy oikepa. Ha'e vy guakykue torre rokẽ omboty vy ojeupipa okuapy ijapyte áry.

⁵² Torre oĩa peve Abimeleque ou vy opu'ã hovai. Ha'e vy okẽ peve ovaẽ oapy aguã.

* 9:45 Juky omoaï mba'eve henhoi e'ŷ aguã (Deuteronomio 29.23, Salmo 107.33-34).

⁵³ Ha'e ramo peteĩ kunha ma peteĩ ita guaxu mba'emo mongu'ia regua oupi vy omombo Abimeleque hakã re, ombovo ikägue.

⁵⁴ Ha'e ramo ha'e oenoĩ vyvoi ojeupegua kunumi hu'y jokoa reraa. Ha'e vy aipoe'i ixupe:
— Ekyi ndekyxe ha'e xejuka, “Kunha rive ojuka”, 'ea e'ŷ aguã — he'i ramo kunumi va'e oipyxo ramo omano.

⁵⁵ Abimeleque omano maa Israel regua avakue oexa vy oje'oipa peteĩ-teĩ ngoo katy.

⁵⁶ Ha'e rami py Abimeleque re Nhanderuete ombou nguu pe ojapo vaiague rekovia, guyvy kuery setenta va'e ojukapaague re.

⁵⁷ Ha'e rami ae avi Siquém pygua avakue áry Nhanderuete ombou ojapo vaiague ha'e javi rekovia. Ha'e rami vy ha'e kuery re ojeupity Jerubaal ra'y Jotão ijayvu vaiague.

10

Israel rerekhoa kuery Tola ha'e Jair rekokue oĩa

¹ Abimeleque oiko rire ma Israel kuery repyarã oiko Issacar regua Puá ra'y Tola, Dodô ramymino. Ha'e va'e ma Samir py oiko Efraim regua yvy'ã reia re.

² Ha'e va'e ma vinte e três ma'etý re opena Israel kuery re. Ha'e gui omano, ha'e rã onhono porãa Samir py ae.

³ Tola oiko rire ma oiko Jair. Ha'e va'e ju opena Israel kuery re, vinte e dois ma'etý re.

⁴ Ha'e va'e ma trinta gua'y kuery oguereko, trinta mburika'i áry ikuai va'e. Oguereko avi trinta tetã. Ha'e va'e ma Havote-Jair omboery kova'e ára peve, Gileade yvy re ikuai va'e.

⁵ Ha'e gui Jair omano, ha'e rã Camom py onhono porãa.

Filisteu ha'e Amom kuery rembiguai ikuai jave guare

⁶ Ha'e gui Israel kuery ha'eve'ya ramo ju ikuai SENHOR renonde. Ha'e vy Baal ra'angaa kuery pe rive ikuai, Astarote, ha'e Síria pygua kuery ruete ramigua ikuai va'e pe, Sidom, Moabe, Amom ha'e filisteu kuery pegua va'e pe. Ojepe'apa okuapy SENHOR pe ikuiai gui, ixupe nda'ikuiaeui.

⁷ Ha'e ramo Israel kuery rovai SENHOR poxya hendy vy omboaxapa filisteu ha'e Amom kuery po py.

⁸ Ha'e ramo ha'e va'e kuery ombojexavai Israel kuery ha'e va'e ma'etý guive, oguereko axy rei. Dezoito ma'etý re oguereko axy Israel kuery Jordão yakã rovai re ikuai va'e ha'e javi, amorreu kuery yvy re Gileade py ikuai va'e.

⁹ Ha'e gui Amom kuery ma Jordão yakã kylvõ rupi oaxa Judá kuery rovai ju opu'ã avi aguã, Benjamim ha'e Efraim kuery rovai guive. Ha'e ramo Israel kuery ikuai axy ete.

¹⁰ Ha'e gui Israel kuery ojapukai okuapy SENHOR pe. Ha'e vy aipoe'i:

— Rojejavy nderovai, mba'eta oreruete roeja vy Baal ra'angaa kuery pe rive orekuai.

¹¹ Ha'e rã SENHOR ombovai Israel kuery pe:

— Egito pygua kuery penemoingo axy jave, ha'e gui amorreu kuery ju, Amom kuery, filisteu,

¹² Sidom pygua, amalequita ha'e maonita kuery pendererekko axy rã xevy pe pejapukai jave xee ndorogueraa jepei ri ty'y ha'e kuery po gui?

¹³ Ha'e ramo tei peẽ xereja ma tuuete ramigua pe rive pendekuai aguã. Ha'e nunga rupi xee ndorogueraa jepevei ma 'rã.

¹⁴ Tapeo, pejapukai penderueterã peiporavo va'ekue pe ae. Ha'e kuery ae tapendereraa jepe pejexavaia gui — he'i.

¹⁵ Ha'e ramo tei Israel kuery ojapukaive ju SENHOR pe:

— Rojejavy ae ma. Ejapo orere rejapoxea ha'e javi ramo, va'eri orereraa jepe ju aŷ ete'i ri jepe, rojerure ndevy — he'i okuapy.

¹⁶ Ha'e ramo vy ha'e kuery mbyte gui oipe'apa okuapy amboae kuery ruete ra'angaa, ha'e vy SENHOR pe ju ikuai. Ha'e ramo ndoexa uka e'ŷvei Israel kuery omboaxy, ikuai axy rã.

¹⁷ Amom kuery ma ono'õ vy Gileade py ikuai. Ha'e rã Israel kuery ma oupa vy Mispa py ikuai.

¹⁸ Ha'e ramo heta va'e kuery regua Gileade pygua huvixa kuery joupe-upa aipoe'i okuapy:
— Mava'e ava nda'u ha'e ranhe 'rā oo Amom kuery rovai opu'ā aguā? Ha'e va'e oī 'rā Gileade pygua ha'e javi ruvixarā.

11

Israel kuery repyarā Jefté onhemoiague

¹ Ha'e gui Gileade tetā pygua Jefté ju oiko. Ha'e va'e ava ma ipy'a guaxu va'e, kunha itavy rei va'e pi'a, Gileade ra'y.

² Gileade ra'xyx ae oguereko avi ta'y kuery. Ha'e va'e kuery tujapa ma vy omoxē Jefté. Ha'e vy aipoe'i okuapy ixupe:

— Ndee ma mba'eve ndererekoi 'rā orevy guarā nhanderu oguereko va'e regua, kunha mboae pi'a reiko vy — he'i okuapy.

³ Ha'e ramo guyke'y kuery renonde gui Jefté ojava vy Tobe yvy re ju oiko. Ha'e pygua avakue hi'arandu e'ŷ rei va'e hexe onhemoirū vy oje'oi 'rā hupive.

⁴ Ha'e va'e rire Amom kuery opu'ā okuapy Israel kuery rovai.

⁵ Ha'e kuery opu'ā rā Gileade pygua nhomongeta va'ety kuery oje'oi Jefté oīa py, Tobe yvy gui ogueru aguā.

⁶ Ha'e vy aipoe'i okuapy Jefté pe:

— Eju oreruvixarā, Amom kuery rovai nhapu'ā aguā.

⁷ Jefté ombovai Gileade pygua nhomongeta va'ety kuery pe:

— Ha'e rami avi peē kuery ndaxerayvui vy naxemoxēi ri ty'y raka'e xeru ro gui? Ha'e vy mba'e re tu aŷ peju xea py, pendekuai axy vy rive? — he'i

⁸ Ha'e ramo Gileade pygua nhomongeta va'ety kuery aipoe'i ju Jefté pe:

— Ha'e rami rā ae roju ndea py. Eju orereve, Amom kuery rovai nhapu'ā aguā. Ha'e rā ndee ma reī 'rā Gileade pygua kuery ha'e javi ruvixa — he'i okuapy.

⁹ Ha'e ramo Jefté ju oporandu Gileade pygua nhomongeta va'ety kuery pe:

— Ha'e gui xapy'a rei xereraa ju ri Amom kuery rovai apu'ā aguā, ha'e SENHOR xepo py omboaxa ramo anhetē ri pa xee aiko 'rā penderuvixa?

¹⁰ Gileade pygua nhomongeta va'ety kuery ombovai:

— SENHOR ae 'rā nhanembyte oī oreayvu renduarā, ha'e rami vy orembopaga 'rā ndeayvuague ndorojapoi ramo — he'i.

¹¹ Ha'e rami rā Jefté oo Gileade pygua nhomongeta va'ety kuery reve. Ha'e rā ha'e pygua kuery omoī nguvixarā. Ha'e gui SENHOR renonde Mispa py ju Jefté omombe'upa SENHOR ijayvuague.

¹² Ha'e gui Amom kuery ruvixaa katy Jefté omondouka guembiguai kuery oayvu mombe'uarā. Ha'e vy aipoe'i uka:

— Mba'e tu rereko xereve, xea py reju vy xeyvy rovai repu'ā aguā?

¹³ Jefté rembiguai kuery pe Amom pygua huvixa ombovai:

— Mba'eta Egito yvy gui Israel kuery ou vy ojopy raka'e oreayvy Arnom guive Jaboque peve, ha'e gui Jordão yakā peve ju. Aŷ eme'ē porā'i ju xeyvy — he'i.

¹⁴ Ha'e rami teī guembiguai kuery mboae ju Jefté omondouka Amom kuery ruvixa pe oayvu mombe'uarā.

¹⁵ Ha'e vy aipoe'i ixupe:

— Jefté aipoe'i uka: Israel kuery ma ndojopyi raka'e Moabe pygua kuery yvy, neī Amom kuery yvy.

¹⁶ Mba'eta Egito gui Israel kuery ou vy tekoa e'ŷa rupi oguata Ye'ē Pytā peve, ha'e rupi ae Cades py ovaē aguā.

¹⁷ Ha'e ramo Israel kuery oayvu mombe'uarā omondouka raka'e Edom pygua kuery ruvixaa py. Ha'e vy aipoe'i uka: “Rojerure ndevy roaxa ta ndeyvy rupi”, he'i uka. Ha'e rami teī Edom pygua kuery ruvixa noendu potai. Ha'ekue rami ae ju Israel kuery ojerure Moabe pygua kuery ruvixa pe, ha'e va'e voi noendu potai. Ha'e rami rā Cades py ranhe Israel kuery ikuai.

¹⁸ Ha'e va'e rire tekoa e'ŷa rupi oguata vy ojeapa raka'e Edom ha'e Moabe pygua kuery yvy yke rupi. Ha'e vy ha'e va'e kuery yvy gui mombyry'i ovaẽ kuaray oua katy, Arnom yakã rovai re ae ikuai. Ha'e rami vy novaẽ raka'e Moabe kuery yvy re, mba'eta Arnom yakã ma ijyvy apy oĩ.

¹⁹ Ha'e ramo amorreu kuery ruvixa Hesbom pygua Seom pe ju Israel kuery omondouka oayvu mombe'uarã. Ha'e vy aipoe'i uka ixupe: “Rojerure ndevy, toroaxa ndeyvy rupi orekuai aguã py rovaẽ aguã”, he'i

²⁰ teĩ Israel kuery re Seom ndojeroviai vy nomboaxai oyvy rupi. Ha'e rami 'rāgue py ojeupeguia kuery ha'e javi oenoĩ vy Jaza py ikuai, ha'e vy opu'ã okuapy Israel kuery rovai.

²¹ Ha'e gui Israel kuery po py SENHOR Israel kuery ruete omboaxa Seom ha'e ixupeguia kuery ha'e javi, ha'e ramo ojukapa. Ha'e ramo Israel kuery oipe'apa amorreu kuery ijyvy rupi ikuaiague gui.

²² Ipo'aka amorreu kuery yvy ha'e javi re, Arnom guive Jaboque peve, ha'e gui tekoa e'ŷa guive Jordão yakã peve.

²³ Ha'e rami py SENHOR Israel kuery ruete ae oipe'a uka raka'e amorreu kuery ojeupeguia kuery renonde gui. Ha'e gui ndee ma nhi'ã kova'e yvy ja renhemingo ta?

²⁴ Anhetẽ e'ŷ ri ty'y penderuete Camos mba'emo pendevy omboaxa va'e ramo “Oremba'e” peje? Ha'e rami ae avi ore kuery voi rojopy 'rã oreruete SENHOR orerenonde gui oipe'a va'ekue yvy.

²⁵ Ndee ma nhi'ã Zipor ra'y Balaque Moabe pygua ruvixa oĩ va'ekue gui nembaraeteve? Mba'eta ha'e va'e ma peteigüeve nda'ijayvu rei raka'e Israel kuery rovai, ha'e kuery re nopus'ãi guive.*

²⁶ Ha'e gui Israel kuery trezentos ma'etŷ re Hesbom ha'e Aroer re hekoadave, ha'e ijyvýry tekoa'i ikuai va'e rupi, ha'e gui Arnom yakã rembe ha'e javi rupi tetã ikuai va'e re ha'e kuery hekoadave ma, ha'e va'e javi mba'e re tu ndapejopy jevyi raka'e ha'e va'e tetã?

²⁷ Ha'e nunga rupi xee e'ŷ ajejavý nderovai! Ha'e rã ndee ae ma rejapo vai orerovai repu'ãa py. Tove SENHOR pavõ re oikuaa pota va'e toikuaa pota aŷ Israel ha'e Amom kuery re, he'i uka.

²⁸ Ha'e rami teĩ Amom kuery ruvixa ndojapyxaka potai Jefté oayvu omombe'u uka va'ekue re.

Jefté onhemboayvuague

²⁹ Ha'e ramo Jefté re SENHOR Nhe'ẽ ou ramo oaxa ovy Gileade ha'e Manassés rupi, ha'e vy Gileade regua Mispa oĩ va'e peve oo, ha'e Mispa gui oo ju Amom kuery rovai opu'ã aguã.

³⁰ Jefté onhemboayvu vy oura SENHOR pe. Ha'e vy aipoe'i:

— Xapy'a rei Amom kuery xepo py remboaxa ramo

³¹ Amom kuery re xepo'akaague gui ajejavý ju ma ramo xerokẽ gui xerovaexi aguã ha'e ranhe oẽ ouvy va'e rei amboaxa 'rã SENHOR peguarã, ixupe xee ame'ẽ 'rã apy reve — he'i.

³² Ha'e rami vy Jefté oo Amom kuery reve nhovaexi, ha'e kuery rovai opu'ã aguã. Ha'e gui Jefté po py SENHOR omboaxapa.

³³ Ha'e ramo oitypa Aroer guive Minite katy'i peve (vinte tetã ha'e javi vy), ha'e Abel-Queramim peve ju. Heta tekoa oity. Ha'e rami vy Israel kuery renonde Amom kuery nda'ipo'akavei aguã rami ikuai.

³⁴ Ha'e gui Mispa py Jefté ou jevy vy ngoo py ovaẽ ramo tajy ae ha'e ranhe oẽ ouvy ovaexi aguã. Pandeiro reve ojerokya rupi ou. Ha'e va'e ma tajy pete'i'i va'e ae, tajy mboae nda'ipoi, ta'y e'ŷ va'e guive.

³⁵ Guajy oexa vy Jefté oao omondoropa reve aipoe'i:

— Aikore xerajy, ndee xemomboriau ete! Ndee ma reiko ajexavai aguã rami, mba'eta nda'evei SENHOR pe anhemboayvuague amboaxa rive ju aguã.

* 11:25 Números 22 guive 24 peve.

³⁶ Ha'e rā kunhataī ombovai nguu pe:

— Xeru, ndee renhemboayvu ae ma SENHOR pe. Ha'e rami xere ejapo SENHOR pe renhemboayvuague rami ae. Mba'eta nderovaigua Amom kuery gui SENHOR nderepy rire — he'i.

³⁷ Aipoe'ive ju nguu pe:

— Peteī mba'e ejapo xevy: Taa ranhe, mokoī jaxy re taiko yvy'ā rupi, amenda e'ŷ va'e aikoa re ajae'o aguã, xeirū kuery reve.

³⁸ Tuu ombovai vy — Tereo — he'i vy mokoī jaxy re omondouka. Ha'e ramo oirū kuery reve tajy oo vy yvy'ā rupi ojae'o omenda e'ŷ va'e oikoa re.

³⁹ Mokoī jaxy opa ma ramo ojevy ju nguua py. Ha'e ramo hexe ojapo onhemboague. Kunhataī va'e ma ava reve nonhemoirūi ae. Ha'e va'e gui oiko Israel kuery rekorā,

⁴⁰ mba'eta ma'etŷ nhavō Israel rajy kuery oje'oi 'rā irundy ára re, Gileade pygua Jefté rajy re ipy'a vaia rupi oporaei aguã.

12

Efraim kuery re Jefté kuery opu'āague

¹ Ha'e ramo Efraim regua avakue oenoīmbaa rā oje'oipa Zafom katy. Ha'e vy aipoe'i okuapy Jefté pe:

— Mba'e re tu Amom kuery rovai repu'ā aguã reo jave norerenoī ore avi nderupive roo aguã? Roapy 'rā ndero, ha'e py reĩ teri reve.

² Ha'e kuery pe Jefté ombovai:

— Ha'e rami avi Amom kuery reve xevyguia kuery joguero'a ete jave xee roenoī teĩ peẽ kuery ndapeoi va'ekue ha'e kuery po gui xereraa jepe aguã.

³ Peẽ ndaxereraa jepeii taa aikuua vy mae ajeayvukue'i py e'ŷ aa Amom kuery rovai apu'ā aguã. Ha'e ramo xepo py SENHOR omboaxa ha'e kuery ha'e javi. Ha'e gui mba'e re tu aŷ peju xea py xerovai pepu'āxe vy? — he'i

⁴ Ha'e rami vy Gileade pygua avakue Jefté omboatypa vy opu'ā okuapy Efraim kuery rovai. Gileade pygua avakue oitypa Efraim regua, mba'eta Efraim pygua kuery ijayvu vy “Peẽ Gileade pygua kuery Efraim gui pejep'e'a va'ekue, Efraim ha'e Manassés kuery mbyte pendekuai va'ekue”, he'i rire.

⁵ Ha'e ramo Gileade pygua kuery ojokopa Jordão yakā oaxaaty Efraim katy oo va'e py. Ha'e rami vy Efraim regua ojava ovu vy “Aaxaxe” he'i ramo ha'e kuery pe Gileade pygua avakue ju oporandu 'rā: “Ndee pa Efraim pygua ae?” Ha'e rā ombovai vy “Any” he'i

⁶ ramo aipoe'ive ju 'rā: “Ha'e vy aipo're: ‘Chibolete’ 're”, he'i 'rā. Ha'e ramo ombovai vy xap'y'a rei “Sibolete” he'i 'rā ayvu ndoupity porāi vy. Ha'e ramo oguero'a vy ojuka 'rā Jordão yakā oaxaaty pyve. Ha'e rami vy ha'e jave py Efraim kuery va'e regua omano quarenta e dois mil.

⁷ Gileade pygua Jefté ma mboapy meme ma'etŷ re opena raka'e Israel kuery re. Ha'e gui omano rā onhono porāa peteī tetā Gileade re oĩ va'e py.

Joguerekoia kuery Ibsā, Elom ha'e Abdom ikuai jave guare

⁸ Ha'e va'e rire ma Belém pygua Ibsā ju opena Israel kuery re.

⁹ Ha'e va'e ma trinta gua'y kuery oguerek, trinta guajy kuery guive mombyrygua kuery re omenda va'e meme. Ha'e rami ae avi mombyry gui trinta kunhague ogueru gua'y kuery ra'xyrā. Sete ma'etŷ re opena Israel kuery re.

¹⁰ Ha'e gui Ibsā omano rā onhono porāa Belém tetā py ae.

¹¹ Ha'e va'e rire ma Zebulom pygua Elom oiko. Ha'e va'e ma dez ma'etŷ re opena Israel kuery re.

¹² Zebulom pygua Elom omano rā onhono porāa Zebulom yvy re Aijalom py.

¹³ Ha'e va'e rire ma piratonita Hilel ra'y Abdom ju opena Israel kuery re.

¹⁴ Ha'e va'e ma quarenta gua'y kuery oguerek, ha'e gui trinta guamymino kuery. Ha'e va'e kuery ma setenta mburika'i áry ikuai. Oito ma'etŷ re opena Israel kuery re.

¹⁵ Ha'e gui piratonita Hilel ra'y Abdom omano rā onhono porāa Efraim yvy re Piratom py, yvyty reia rupi amalequita kuery ikuia py.

13

Sansão itui'iague

¹ SENHOR renonde Israel kuery ha'eve'ŷa rami ju ikuai ramo quarenta ma'etŷ re omboaxa filisteu kuery po py.

² Zorá tetā py oiko peteĩ ava Dã ramymino, Manoá hery va'e. Ta'yxy ma imemby va'erā e'ŷ ae oiko vy na'imembyi.

³ Ha'e gui kunha va'e pe SENHOR-a guigua anjo ojexa uka vy aipoe'i ixupe:

— Ma'ē, ndee ma nememby va'erā e'ŷ ae reiko va'ekue, nememby va'e'ŷ teri va'eri rerekoi'rā, ha'e vy reikuavā nho 'rā peteĩ ava'i.

⁴ Ha'e rā aŷ ma eiko kuaa ke, ey'ueme vinho, neĩ iro va'e. He'ueme ha'eve'ŷ va'e.

⁵ Mba'eta ndee rerekoi'vy reikuavā 'rā peteĩ ava'i. Ha'e va'e akā re napemovaẽi 'rā kyxe hi'a pejaya aguā. Mba'eta ava'i guive oiko 'rā nazireu, guyru'i py teri oĩ reve ae 'rā oiko Nhanderuete pe omboaxa pyre.* Ha'e gui omboypy 'rā Israel kuery ogueraa jepe aguā filisteu kuery po'akaa gui — he'i.

⁶ Ha'e rami rā omea py kunha va'e oo vy aipoe'i ixupe:

— Peteĩ ava Nhanderuete remimbo'e ou kuri xea py, Nhanderuetea guigua anjo ramigua ojekuaa, nhanemongye rei va'e. Ha'e rā xee ma naporandui maguigua paa re, neĩ ha'e voi guery nomombe'ui xevy,

⁷ va'eri aipoe'i xevy: “Ma'ē, ndee rerekoi'vy reikuavā 'rā peteĩ ava'i. Ha'e nunga rupi aŷ ma ey'uve eme vinho, neĩ iro va'e, he'ueme guive ha'eve'ŷ va'e, mba'eta ava'i ma oiko 'rā nazireu Nhanderuete pe omboaxa pyre, guyru'i py oĩ reve omanoa ára peve”, he'i va'ekue xevy.

⁸ Ha'e ramo Manoá onhembo'e SENHOR pe. Ha'e vy aipoe'i:

— Xe-SENHOR, ajerure ndevy, embou ju ava neremimbo'e, torembo'e ava'i itui'i va'erā roguereko aguā re.

⁹ Ha'e rami Manoá ijayvu rā Nhanderuete oendu ramo SENHOR-a guigua anjo teigue ju ou kunha va'e oĩa py, mba'ety py oguapy oiny jave. Ha'e rā ime Manoá ma noĩ hexeve.

¹⁰ Ojekuaa ramo kunha va'e opu'â pojava ho'amy vy onha ovoy ome pe omombe'u. Ha'e vy aipoe'i ixupe:

— Ma'ē, xevy ojexa uka ju ava kueve'i ojexa uka va'ekue — he'i.

¹¹ Ha'e ramo Manoá opu'â avi vy gua'yxy rakykue oo. Ha'e gui ava va'e hi'aia py ovaẽ vy aipoe'i ixupe:

— Ndee pa kova'e kunha pe ndeayvu ra'e?

Ombovai:

— Xee ae ri — he'i.

¹² Ha'e ramo Manoá aipoe'i:

— Ha'e gui ndeayvuague ojeupity ma jave marā rami 'rā tu roguereko ava'i, ha'e mba'e nunga 'rā tu ojapo?

¹³ Ixupe SENHOR-a guigua anjo ombovai ju:

— Tove kunha va'e toiko xeayvuague rami ae.

¹⁴ Ha'e rami vy peteïne henda py ndo'ui 'rā uva'a guigua, vinho neĩ iro va'e ndoy'ui 'rā, ndo'ui 'rā guive ha'eve'ŷ va'e. Ixupe xeayvuague ha'e javi 'rā ojapo — he'i.

¹⁵ Ha'e ramo Manoá teigue ju aipoe'i SENHOR-a guigua anjo pe:

— Epytave'i ranhe ke, ha'e rā ndevy roguereko katu 'rā peteĩ kavara'i — he'i,

¹⁶ mba'eta Manoá ndoikuuai SENHOR-a guigua anjo oikoa. Ha'e gui SENHOR-a guigua anjo aipoe'i Manoá pe:

* 13:5 Nazireu kuery mboae ma Nhanderuete pe mba'emo ojapo aguā re onhemboayvu va'e (Números 6.1-21). Ha'e rā Sansão ma itui'i e'ŷ re voi anjo oiporavo uka va'ekue nazireu oiko aguā.

— Apytave teĩ nda'ui 'rã tembi'u reme'ẽ va'e. Xapy'a rei mba'emo reapy reve reme'ẽ va'erã ri rerekó katu vy SENHOR pe ae eme'ẽ — he'i.

¹⁷ Manoá oporandu ju SENHOR-a guigua anjo pe:

— Marã rami tu nderery, ndeayvuague ojeupity ramo romboete aguã?

¹⁸ SENHOR-a guigua anjo ombovai vy

— Mba'e re tu reporandu xerery re? Mba'eta iporã ete va'e oikuaa pyrã e'ŷ — he'i.

¹⁹ Ha'e gui Manoá ojopy peteĩ kavara'i ha'e mba'emo aju guigua ome'ẽ va'erã. Ha'e va'e ma SENHOR pe ome'ẽ peteĩ ita áry. Ha'e ramo SENHOR-a guigua anjo ma peteĩ mba'e ojapo iporã ete va'e, Manoá ha'e ta'yxy oexaa py.

²⁰ Ha'e rami vy altar áry gui tata yva katy ojeupi ov yva rupi SENHOR-a guigua anjo voi ojeupi ov y. Ha'e rã Manoá ha'e ta'yxy oexa vy guenapy'ã re ikuai ngova yvy re omovaẽ reve.

²¹ Manoá pe, neĩ ta'yxy pe anjo SENHOR-a guigua ndojexa ukavei ramo Manoá oikuaa SENHOR-a guigua anjo oikoa.

²² Ha'e rami vy aipoe'i gua'yxy pe:

— Anhetẽ ete nhamano 'rã, Nhanderuete jaexa rire.

²³ Ha'e rã ta'yxy ombovai:

— SENHOR nhandejukaxe va'e rire nhandepo gui ndojopyi 'rãgue mba'emo jaapy reve nhame'ẽ va'ekue, neĩ mba'emo aju guigua. Neĩ ndoexa ukai 'rãgue ha'e nunga ha'e javi, neĩ ndoikuua ukai 'rãgue guive — he'i.

²⁴ Ha'e va'e rire ma kunha va'e oikuavã'i peteĩ ava'i. Ha'e vy omboery Sansão. Ha'e gui ava'i tuvixa ov y, ha'e SENHOR omoingo porã.

²⁵ Ha'e gui Zorá ha'e Estaol mbyte Maané-Dã py oiko jave SENHOR Nhe'ẽ omboypy oguereko aguã.

14

Sansão omendaxeague

¹ Ha'e gui Sansão ma Timna tetã py oo. Ha'e py ma peteĩ filisteu rajy oexa vy

² ojevy vy omombe'u nguu ha'e oxy pe. Ha'e vy aipoe'i:

— Timna py aexa kuri peteĩ kunha, filisteu kuery rajy regua. Peru ta'vy xera'yxyrã.

³ Ha'e rami teĩ tuu ha'e ixy ombovai:

— Jipoi ri ty'y kunha nhanceretã kuery rajy regua, ha'e'ŷ vy nhande kuery ha'e javi regua, filisteu kuery ikuiai gui ndera'yxyrã rejopy 'rãgue py? Mba'eta ha'e kuery ma opire omboi uka e'ŷ va'e.

Sansão aipoe'i nguu pe:

— Eru xevy ha'e va'e ae, mba'eta ha'e va'e anho ajou porã — he'i.

⁴ Ha'e gui tuu ha'e ixy ndoikuuai SENHOR gui ha'e rami aguã oikoa. Ha'e va'e jave py Israel kuery re filisteu kuery ipo'aka ramo SENHOR oarõ filisteu kuery ombopaga aguã.

⁵ Ha'e gui nguu ha'e oxy reve jogueraa Timna py. Timna katy'i uvaty ikuai va'e py ovaẽ jave oma'ẽ vy oexa peteĩ guary ra'y okororõ reve oẽ ouvy rã oĩa katy.

⁶ Ha'e ramo hexe SENHOR Nhe'ẽ onhemonde rã omondoropa vyvoi kavara'i omondoroaa rami avi, opo py mba'eve oguereko e'ŷ re. Ha'e rami teĩ nguu neĩ oxy pe nomombe'ui ojukaague.

⁷ Oove vy kunha va'e reve ijayvu vy ojou porã.

⁸ Kueve ma rire Sansão ojevy ju gua'yxyrã ogueraa aguã. Ha'e gui tape rupi oo vy opia ov y oexa aguã guary re'õgue. Ha'e va'e oexa rã eiru oĩ ei reve.

⁹ Opo py hetãgue ojopy vy ho'u heravy oguata reve. Ha'e gui nguu ha'e oxya py ovaẽ vy ha'e kuery pe ome'ẽ ei, ha'e rã ho'u avi. Ha'e rami teĩ ha'e kuery pe nomombe'ui guary re'õgue gui oguenoëague.

Ayvu py mba'emo re Sansão oporanduague

¹⁰ Ha'e gui kunha va'e ro py Sansão ojapo peteĩ ngaru, mba'eta ha'e rami ae kunumigue ojapo va'erã ha'e kuery reko rami vy. Tuu avi oo.

¹¹ Ha'e gui filisteu kuery Sansão oexa vy trinta avakue oenoī hexeve ikuai aguā.

¹² Ha'e gui ha'e va'e kuery pe Sansão aipoe'i:

— Pēvy amombe'u ta peteī ayvu pembovai va'erā. Xapy'a rei sete ára re ngaru ndopai peve pembovai kuaai ri ramo pēvy ame'ẽ 'rā trinta kamixa ha'e trinta ao ngaru oĩa py oiporupy.

¹³ Ha'e rā napembovai kuaai ri vy peẽ ae 'rā peme'ẽ xevy trinta kamixa ha'e trinta ao ngaru oĩa py oiporupy — he'i.

Ha'e kuery aipoe'i:

— Emombe'u ha'vy orevy, toroendu ayvu rombovai aguā.

¹⁴ Ha'e ramo ha'e kuery pe omombe'u vy

— Okaru va'ekue gui oẽ tembi'u,
imbaraete va'ekue gui oẽ he'ẽ va'e — he'i.

Ha'e rā mboapy ára re ha'e kuery nombovai kuaai okuapy.

¹⁵ Sete araa py ma ha'e kuery aipoe'i Sansão ra'yxy pe:

— Ndeayvu na neme pe orevy oporanduague omombe'u porāve aguā re, ndee ha'e nderu ro roapypa e'ŷ aguā. Tyrā pa oremba'e rei-rei reipe'a aguā rive orerenoī uka? Ha'e rami e'ŷ teve? — he'i okuapy.

¹⁶ Ha'e ramo Sansão renonde ta'yxy ojae'o. Ha'e vy aipoe'i:

— Xemomboriau ete, ndaxerayvui vy. Mba'eta xeretā pygua kuery pe remombe'u ayvu ha'e kuery ombovai va'erā, teī xevy voi neremombe'u porāvei teri.

Ha'e ramo ombovai:

— Neī xeru neī ha'i pe voi namombe'ui. Ha'e gui ndevy ma nhi'ã amombe'u 'rā? — he'i.

¹⁷ Ha'e rā henonde ojae'o oikovy sete ára re ngaru oikoa pukukue re. Ha'e ramo sete araa py mae omombe'u porāve ixupe oporandu riae ramo. Ha'e ramo kunha va'e ju omombe'u guetā pygua kuery pe.

¹⁸ Ha'e gui sete araa py kuaray oike e'ŷ mbove ma ha'e va'e tetā pygua avakue aipoe'i Sansão pe:

— Mba'e nunga tu oiko ei gui he'ẽve va'e, ha'e guary gui imbaraeteve va'e? — he'i.

Ha'e rā ha'e kuery pe Sansão aipoe'i:

— Xerymba vaka kunha py yvy napeikaraĩ va'e rire napembovai kuaai 'rāgue aporan-
duague.*

¹⁹ Ha'e ramo hexe SENHOR Nhe'ẽ onhemonde ramo Asquelom pygua kuery ikuiaia py oo vy ha'e va'e regua ojuka trinta avakue. Ha'e rami vy ha'e kuery ao ngaru oĩa py oiporu va'e oipe'apa vy ome'ẽ oporanduague ombovai va'ekue pe. Va'eri ivai raxa reve oo ju nguu ro katy.

²⁰ Ha'e gui Sansão irū ae pe ju ome'ẽa kunha va'e ta'yxyrā.

15

Filisteu kuery mba'ety rupi Sansão oapypaague

¹ Kueve ma rire trigo omono'ða ára py Sansão peteī kavara'i ogueraa reve vy oo guembireko py, “Avaẽ 'rā xerembireko oĩa py” he'i vy. Ha'e rami teī hatyu nomovaẽi.

² Ha'e vy aipoe'i ixupe:

— Xee aexa'ã ndereayuveia ramu. Ha'e rami vy neirū pe ju ame'ẽ. Ha'e rami avi ikypy'y kyrīve va'e ixugui iporāve va'e'ŷ ri ty'y? Ha'e rami rā eraa hekobia.

³ Sansão ombovai:

— Aŷ ma xee ha'evea ramu 'rā ambopaga filisteu kuery — he'i.

⁴ Ha'e rami vy oo vy ojopy trezentos aguara'i, ha'e mokõ-mokoĩ ruguai re ojokua hendy va'erā.

* ^{14:18} “Xerymba vaka kunha” he'ia ma gua'yxy re ae ijayvu vy, “Xera'yxy pe napeporandui va'e rire napembovai kuaai 'rāgue” he'i aguā.

⁵ Hendy va'erã omoendypa vy opoipa filisteu kuery mba'ety rupi. Ha'e rami vy omoendy mba'emo aju jokuaa ikuai va'e, nomono'õi teri va'ekue guive, ha'e gui uvaty ha'e oliveiratý ha'e javi rupi.

⁶ Filisteu kuery oporandu okuapy:

— Mava'e tu ha'e nunga ojapo?

Ombovaia:

— Timna pygua rajy me Sansão ojapo, mba'eta ixugui ta'yxy oipe'a vy irũ pe ju ome'ẽ rire — 'ea. Ha'e ramo filisteu kuery oje'oi vy oapy kunha va'e tuu reve.

⁷ Sansão aipoe'i ha'e kuery pe:

— Evoko rami pejapo rire ndapytu'ui 'rã aipotaa rami ajepy e'ŷa ja — he'i.

⁸ Ha'e rami vy oguero'a vy ojuka reta. Ha'e vy oo ju, Etã py itaovape guy oĩ va'e py optya.

Judá regua avakue Sansão ojokua reve ogueraa ague

⁹ Ha'e ramo filisteu kuery oje'oi vy Judá rovai opu'ã okuapy. Ha'e rami vy Leí tetã katy'i rupi ikuai.

¹⁰ Ha'e kuery pe Judá regua avakue oporandu:

— Mba'e re tu peju ore kuery rovai?

Ha'e kuery ombovai:

— Sansão re roju rojokua heravy aguã, hexe rojapo aguã ore kuery re ojapoague rami avi — he'i okuapy.

¹¹ Ha'e ramo três mil avakue Judá regua oje'oi Etã py itaovape guy oĩ va'e py. Ha'e vy aipoe'i okuapy Sansão pe:

— Ndereikuaai teve filisteu kuery nhandere ipo'akaa? Mba'e re tu ha'vy ha'e rami ete rejapo nhande kuery re?

Ombovai:

— Xere ha'e kuery ojapoague rami ae avi xee ajapo karamboae ha'e kuery re — he'i.

¹² Ha'e kuery aipoe'i:

— Ore roju rojokua heravy aguã, filisteu kuery po py romboaxa aguã.

Sansão aipoe'i ha'e kuery pe:

— Peura ha'vy peẽ ae xejuka e'ŷ aguã.

¹³ Ha'e kuery ombovai:

— Any ri, rojokua heravy aguã rive roju ha'e kuery po py romboaxa aguã. Mba'eve py rei ndorojukai 'rã — he'i. Ha'e rami vy mokoĩ ixã pyau py ojokua vy oguenoẽ heravy itaovape guy py oĩa gui.

Mburika raĩ'y kãgue py Sansão mil avakue ojukaague

¹⁴ Leí tetã py ha'e kuery oguerovaẽ ramo filisteu kuery ov'y a reve oẽmba jogueruvy ovaexĩ aguã. Ha'e rami teĩ Sansão re SENHOR Nhe'ẽ onhemonde ramo ixã ijyva rupi ojokuaague omondo nhimbo kaigue'i rami rive. Ha'e rami vy ojokuaague ojerapa ipo gui.

¹⁵ Peteĩ mburika'i raĩ'y kãgue pyau teri va'e ha'e katy'i itui va'e ojou vy ha'e va'e py ojuka mil avakue.

¹⁶ Ha'e vy aipoe'i:

— Peteĩ mburika'i raĩ'y kãgue py ajapo opa rupi ono'õa aguã rami,
peteĩ mburika'i raĩ'y kãgue py rive ajuka mil avakue — he'i.

¹⁷ Ha'e rami ijayvupa ma vy omombo haĩ'y kãgue opo gui. Ha'e va'e henda ma omboery Ramate-Leí.*

¹⁸ Ijy'uvei vaipa vy ojapukai SENHOR pe. Ha'e vy aipoe'i:

— Xee nerembiguai pe heta reraa jepe uka kuri. Ha'e gui xee amano 'rã teve xey'uvei gui? Aĩ vai 'rã teve ha'e va'e kuery opire omboi uka e'ŷ va'e po py? — he'i.

* 15:17 Tery Ramate-Leí ma “Yvy'ã haĩ'y kãgue oĩa” 'ea.

¹⁹ Ha'e ramo itakua Leí py oĩ va'e SENHOR oipe'a vy ojapo yy oxyry ouvy aguã rami. Sansão oy'u ma vy imbaraete ha'e oiko porã ju. Ha'e va'e rire ha'e va'e henda omboerya En-Hacoré aŷ peve.[†]

²⁰ Sansão ma vinte ma'etý re opena Israel kuery re, filisteu kuery ipo'aka jave ae.

16

Gaza py Sansão ooague

¹ Ha'e gui Gaza tetã py ju Sansão oo. Ha'e py ma peteĩ kunha itavy rei va'e oexa vy hexeve jogueroke rive.

² Gaza pygua kuery joupe-upe

— Sansão ovaẽ ra'e apy — he'i okuapy.

Ha'e ramo ojoko mbeguepa, pytû mbukukue re oarõ okuapy tetã kora rokẽ py onhemia py. Pytû mbukukue re okyrirí okuapy, mba'eta aipoe'i:

— Nharõ tema ko'ẽ peve. Ha'e rami vy jajuka 'rã — he'i vy.

³ Ha'e rã Sansão ma pytû mbyte peve'i nhogueronheno joguerupy. Ha'e gui ovv vy oyopy tetã kora rokẽ joavaive regua. Ijokoa reve oipe'a vy omoõ oaxi'y áry, ha'e vy yv'y'ã katy ogueraa, vyty apyte áry Hebron renonde katy peve.

Dalila Sansão ojopy uka nhemiague

⁴ Ha'e va'e rire Sansão inhakã vai peteĩ kunha Soreque yvjugua py oiko va'e Dalila hery va'e re.

⁵ Ha'e ramo kunha va'e oña py filisteu regua yvatekueve oje'oi vy aipoe'i ixupe:

— Ndeayvu na ixupe ndevy omombe'u porãve aguã mba'e nunga rupi pa imbaraete oikovya, ha'e mba'e nunga py pa rojokua vy rojopy ete aguã. Ha'e ramo ore kuery peteĩ-tei ndevy rome'ẽ 'rã mil e cem hatã'i va'e prata guigua — he'i okuapy.

⁶ Ha'e rami rã Dalila aipoe'i Sansão pe:

— Ajerure ndevy remombe'u aguã xevy mba'e nunga rupi tu nembaraetea, ha'e mba'e nunga py ndejokua vy 'rã tu ndere ipo'akaa.

⁷ Sansão ombovai:

— Sete vaka pi pyau, ipiru e'ŷ teri va'e py ri xekangy 'rã. Ha'e rami vy avakue mboae rami rive 'rã aiko — he'i.

⁸ Ha'e ramo Dalila pe filisteu regua yvatekueve ogueru sete vaka pi pyau, ipiru e'ŷ teri va'e. Ha'e rã ha'e va'e py kunha va'e ojokua,

⁹ ha'e rã avakue ma opy ja'o mboae py onhomni okuapy. Ha'e rami vy kunha va'e aipoe'i Sansão pe:

— Sansão, filisteu kuery ou ma ra'e ndere! — he'i ramove omondopa vaka pi, mandyju okai va'ekue omondoaa rami. Ha'e rami py ndoikuuai okuapy mba'e nunga rupi pa imbaraetea.

¹⁰ Ha'e gui Dalila aipoe'i Sansão pe:

— Ma'ẽ, ndee ma xejajai rei ha'e ndeapu xevy. Ma'ẽ, aŷ ma emombe'u porã xevy: Mba'e nunga py pa ndejokuaa ramo 'rã tu ha'eve?

¹¹ Ombovai:

— Ixã pyau mba'eve py oiporu pyre e'ŷ teri va'e py ri xekangy vy amboae avakue rami rive 'rã aiko — he'i.

¹² Ha'e ramo Dalila ma opy ja'o mboae py avakue onhomni ma vy ixã pyau ogueru, ha'e ojokua. Ha'e vy

— Sansão, filisteu kuery ou ma ra'e ndere! — he'i tei ojyva kuaa omondopa vyvoi peteĩ nhimbo omondoaa rami.

¹³ Ha'e gui Dalila aipoe'i Sansão pe:

— Aŷ peve xejajai anho rei ha'e ndeapu xevy. Ha'e rã aŷ ma emombe'u porã xevy: Mba'e nunga py pa ndejokuaa ramo 'rã tu ha'eve?

Ombovai:

† 15:19 Tery En-Hacoré ma “Ojapukai va'e pegua yvu” 'ea.

— Ajukue popēa py xe'a sete henda py ri reipopē, ha'e yvyra rakua py rembopija atā ramo xekangy vy aiko 'rā avakue mboae rami rive — he'i.

Ha'e ramo oke oupy jave kunha va'e hi'a sete popēa oī va'e oipopēmba ajukue popēa py,

¹⁴ ha'e peteī yvyra rakua py ju ombopija atā. Ha'e vy aipoe'i ixupe:

— Sansão, filisteu kuery ou ma ra'e ndere! — he'i ramo okeague gui omyī vy yvyra rakua omboi vy oguenoē o'a ajukue popēa gui.

¹⁵ Ha'e gui kunha va'e aipoe'i ixupe:

— Mba'exa tu xevy “Roayvu” 're va'eri nekuraxō py xere nerenhemoirūxei? Mba'eta mboapykue ma xejojai rei, neremombe'ui teri guive mba'e nunga rupi pa nembaraetea — he'i.

¹⁶ Ko'ě nhavō kunha va'e oporandu tema, omombe'u ete aguā omoangeko rei riae ramo Sansão onhe'ě py nonhenhandu porāvei, omanoxe rive peve.

¹⁷ Ha'e rami vy kunha va'e pe onhemombe'upa opy'a re oī va'e ha'e javi. Ha'e vy aipoe'i ixupe:

— Xee ma xekā rague re kyxe omovaēa va'erā e'ŷ, mba'eta ha'i rye py teri aī reve nazireu aiko Nhanderuete omboaxa pyre. Xekā rague onhopīa ri ramo xembaraetea ojepe'apa 'rā xegui. Ha'e ramo xekangy vy aiko 'rā avakue mboae rami rive — he'i.

¹⁸ Opy'a re oī va'e ha'e javi onhemombe'ua Dalila oikuaa ma vy oenoī uka filisteu regua yvatekueve. Ha'e vy aipoe'i:

— Peju ke teīgue ju, mba'eta aŷ ma xevy onhemombe'u ma opy'a re oī va'e ha'e javi — he'i. Ha'e ramo oīa py filisteu regua yvatekueve oupa okuapy, peráta guive ogueru.

¹⁹ Ha'e ramo Dalila ojapo o'u áry Sansão oke aguā rami. Ha'e vy peteī ava oenoī vy onhopī uka hi'a sete popēa oī va'ekue ha'e javi. Ha'e rami py ipo'aka nhuā hexe, imbaraetea okanhy ete ramo.

²⁰ Ha'e gui kunha va'e aipoe'i:

— Sansão, filisteu kuery ou ra'e ndere!

Ha'e rā okeague gui omyī vy ojeupe ae “Jepiaty rami aē ju 'rā aŷ, ha'e vy aa jepe 'rā” he'i, mba'eta ndoikuuai teri ixugui SENHOR opo'akaa oipe'a maa.

²¹ Ha'e ramo filisteu kuery ojopy vy omombupa hexa, ha'e Gaza tetā py ogueraa. Mokoī corrente overa va'e guigua py ojokua. Ha'e rā mba'emo mongu'ia ombojere herekovy nhuā py ombotya py.

²² Ha'e rami teī inhakā rague onhopīa rire ipukuve ju ma ov.

Sansão omanoague

²³ Ha'e gui filisteu regua yvatekueve ono'ō okuapy nguu ete Dagom ra'angaa pe mba'emo ome'ě ha'e ov'y'a okuapy aguā. Mba'eta

— Nhandevyguia nhanderuete ma nhandepo py Sansão nhanderovaigua omboaxa rire — he'i vy.

²⁴ Ha'e rami heta va'e kuery oexa vy oporaei okuapy nguu ete ramigua pe, mba'eta aipoe'i:

— Nhandevyguia nhanderuete nhandepo py omboaxa nhanderovaigua nhandeyvy ojapo vai ha'e nhanderegua ojuka va'ety — he'i okuapy.

²⁵ Ha'e gui opy'a py ov'y'a okuapy vy aipoe'i:

— Pembou na Sansão jarovy'a rei aguā — he'i. Ha'e ramo Sansão nhuā gui herua rā oguerovy'a rei okuapy. Oo ytarā mokoī omo'ā mbyre pa'ū py omopu'āa imo'amy.

²⁶ Ha'e gui Sansão aipoe'i kunumi ipo re ogueno'ā va'e pe:

— Xererekoo oo yta hil'āi va'e re apoko aguā peve, hexe ajeko aguā — he'i.

²⁷ Ha'e va'e oo ma tynyē rei avakue ha'e kunhague. Ikuai avi filisteu regua yvatekueve ha'e javi. Oo ao'ia áry ma três mil ju ikuai avakue ha'e kunhague, Sansão re oma'ě okuapy ojokua rei reve.

²⁸ Sansão ojapukai SENHOR pe. Ha'e vy aipoe'i:

— SENHOR Xeruete, ajerure ndevy xere nema'endu'a aguã, ha'e eme'ẽ aŷ ete'i ri jepe xembaraeju aguã. Xeruete, filisteu kuery re ajepy 'rāgue xerexa omombuague rekovia — he'i.

²⁹ Ha'e rami vy Sansão oikuavã mokoïve oo yta oo mbyte py hi'aĩ va'e, ha'e va'e re onhemomburu ete ho'amy, peteĩ re ma oiporu kuaa regua re, ha'e rã amboae re ma oaxua re.

³⁰ Ha'e vy aipoe'i:

— Tamano filisteu kuery reve — he'i vy onhemomburu ete reve ojero'a ramo oo ho'apa yvatekueve ha'e heta va'e kuery ha'e py ikuai va'e ha'e javi áry. Ha'e rami py oiko vaia ára ma oikove teri reve jojukaague gui ojuka retave.

³¹ Ha'e gui ou tyvy kuery ha'e tuu ro pygua kuery ha'e javi. Hetekue oupi heravy vy onhono porã Zorá ha'e Estaol mbyte, tuu Manoá onhono porãague py ae. Vinte ma'etý re Sansão opena va'ekue Israel kuery re.

17

Mica ngoo py ta'angaa oguerekoague

¹ Oiko peteĩ ava Efraim regua Mica hery va'e, yvy'ã reia re oiko.

² Ha'e va'e ma aipoe'i oxy pe:

— Ha'e gui mil e cem hatã'i va'e prata guigua ndegui imondaague va'e, ha'e va'e re ndeayvu vaiague ha'e xevy remombe'u avi va'ekue, ma'ẽ, ha'e va'e peráta ma xee ae areko. Xee ae xemonda karamboae ndegui.

Ha'e ramo ixys ombovai:

— Tove SENHOR tanemoingo porã, xepi'a! — he'i.

³ Oxy pe mil e cem hatã'i va'e prata guigua ome'ẽ jevy ramo ixys aipoe'ive ju:

— Kova'e peráta ma xepo gui ae amboaxa SENHOR pe. Ndee xepi'a, ndee ae 'rã reiporu peteĩ ta'angaarã rejapo uka aguã yvyra gui, ha'e gui amboae ju ma prata ryku gui. Aŷ gui ma ame'ẽmba ju 'rã ndevy — he'i.

⁴ Ha'e rami rã oxy pe peráta ome'ẽ ramo duzentos hatã'i va'e prata guigua ogueraa vy opaga prata re ombo'eapo va'e pe. Ha'e va'e ju peteĩ ta'angaarã ojapo yvyra gui, ha'e amboae ju ma hyku va'e gui ojapo. Ha'e va'e ta'angaa ma Mica ro py ae optya.

⁵ Ha'e rami py ava Mica hery va'e oguereko oo tuuete ra'angaa ikuaiaty. Ojapo avi peteĩ manto sacerdote pegua ha'e ta'angaa opy guarã. Peteĩ gua'y omboaxa avi sacerdote-rã.

⁶ Ha'e jave py ma ndoikoi huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive.

Mica ro py levita ovaẽ jave guare

⁷ Ha'e gui Judá regua Belém tetã py oiko peteĩ kunumi va'e. Ha'e va'e ma levita oiko va'eri ha'e py oiko.

⁸ Ha'e gui Judá regua Belém gui ha'e va'e ojepe'a ovu, mamo rã ojou porã reia py oiko aguã. Ha'e rami vy tape rupi oo vy ovaẽ Efraim regua yvy'ã reia re, Mica ro oña py ae.

⁹ Ha'e gui Mica oporandu ixupe:

— Magui tu reju?

Ombovai:

— Xee ma levita Judá regua Belém guigua. Ha'e vy mamo rã ajou porãa py 'rã aiko — he'i.

¹⁰ Ha'e ramo Mica aipoe'i ixupe:

— Eiko xea py ae. Xerurã rami eiko, xevygua sacerdote-rã. Ha'e rã ma'etýa nhavõ ndevy ame'ẽ 'rã dez hatã'i va'e prata guigua, ndeaorã ha'e tembi'u — he'i rã levita va'e oendu vy ovaẽ ha'e py.

¹¹ Ovy'a reve kunumi va'e oiko ava ro py. Ta'y rami oiko.

¹² Ha'e ramo Mica ma levita regua kunumi va'e omoi ojeupeguia sacerdote-rã. Ha'e ramo Mica ro py oiko.

¹³ Ojeupe ae Mica aipoe'i:

— Aŷ xee aikuaa SENHOR xemoingo porã 'rãa, xevyguia sacerdote-rã levita areko ramo.

18

Dã regua kuery oyvy tuvixave va'erã ojouxe jave guare

¹ Ha'e va'e jave ma ndoikoi huvixave Israel kuery re opena va'erã. Ha'e rami rã Dã regua kuery oeka okuapy oyvyrã ikuai aguã, mba'eta ha'e va'e ára peve ha'e kuery ndojopyi teri oyvyrã xorte rupi ome'ẽ mbyre Israel regua ikuiaia mbyte.*

² Ha'e rami vy Dã kuery omondouka peteĩ nhiruĩ avakue ha'e kuery va'e regua ae, Zorá ha'e Estaol pygua kuery ipy'a guaxuvekue, yvy re oma'ẽ mbegue ha'e oikuua pota aguã. Ha'e vy ha'e kuery pe

— Tapeo, peikuua pota yvy re — he'i. Ha'e ramo oje'oi vy Efraim regua yvy'ã reia re ovaẽ Mica ro py. Ha'e vy oke okuapy ha'e py.

³ Mica ro py ha'e kuery ikuai jave oendu kuaa kunumi va'e levita regua ayvu. Ha'e vy oĩa py onhemboja vy aipoe'i ixupe:

— Mava'e tu ndereru apy? Mba'e tu rejapo reikovy apy? Ha'e mba'e tu apy rerek?

⁴ Ombovai:

— Po rami Mica ojapo xevy. Peráta re ixupe amba'eapo vy aiko ixupegua sacerdote — he'i.

⁵ Ha'e ramo aipoe'i okuapy ixupe:

— Eporandu ha'vy Nhanderuete pe, roikuua aguã tape rupi rooa rupi iporã va'e rojou 'rã paa.

⁶ Sacerdote ombovai:

— Tapeo porã ke. Tape rupi peguataa rupi SENHOR oma'ẽ 'rã — he'i.

⁷ Ha'e ramo peteĩ nhiruĩ avakue oje'oi vy Laís tetã py ju ovaẽ. Ha'e py ma oexa rã ha'e pygua kuery ikuai porã. Sidom pygua kuery reko rami ikuai mby'a porã ha'e joe ojeroviaa rupi. Peteĩve jipoí huvixa mba'emo py omoingo axy va'erã. Sidom tetã gui mombyry ikuai, amboae kuery re nonhemoirüi guive.

⁸ Ha'e ramo ojevypa ju guyvy kuery Zorá ha'e Estaol py ikuiaia py. Ha'e rã ha'e kuery pe oporandu vy

— Mba'e pa pemombe'u orevy? — he'i ramo

⁹ ombovai:

— Pepu'ã ke, jaje'oi ha'e kuery rovai. Mba'eta yvy re roikuua potaa rupi roexa rã iporã.

¹⁰ Peĩ rive ta tema ri ty'y upe py? Pemboare eme ta'vy peje'oi vy ha'e va'e yvy pejopy aguã. Mba'eta ha'e py pevaẽ vy pejou 'rã joe ojeroviaa rupi rive ikuai va'e, ijyvy ma tuvixa guive. Nhanderuete omboaxa ma pendepo py. Ha'e va'e yvy ma mba'eve oata e'õa ha'e py ikuai va'e kuery pe — he'i.

¹¹ Ha'e rami rã Dã regua kuery ma Zorá ha'e Estaol gui oje'oi, seiscentos avakue tembiporu joe opu'ãa pygua reveguia meme.

¹² Ha'e kuery oje'oi vy Judá regua Quiriate-Jearim py ranhe ikuai. Ha'e nunga rupi ha'e va'e henda pe "Maané-Dã" he'i okuapy aŷ peve. Quiriate-Jearim rovai katy oĩ.

¹³ Ha'e va'e gui oje'oi ju Efraim regua yvy'ã reia katy. Ha'e vy Mica ro py ju ovaẽ okuapy.

Mica pegua ta'angaa oipe'a vy Laís tetã re ipo'aka okuapyague

¹⁴ Peteĩ nhiruĩ avakue Laís yvy re oikuua pota aguã oje'oi va'ekue aipoe'i guyvy kuery pe:

— Peikuaa pa ha'e va'e oo py oĩa peteĩ manto sacerdote pegua, ha'e ta'angaa oo pygua, ta'angaa yvyra guigua ha'e amboae ma mba'emo ryku guigua oĩa? Penhembopy'a ke ha'vy mba'emo pejapo aguã re — he'i.

¹⁵ Ha'e ramo ha'e py ovaẽ okuapy kunumi levita regua ro py, Mica ro py ae. Ha'e vy oxarura okuapy ixupe.

¹⁶ Seiscentos avakue Dã regua tembiporu joe opu'ãa pygua oguereko va'e ma okẽ rupi opyta okuapy oikeaty py.

* 18:1 Josué 19.41-48

¹⁷ Ha'e rā peteī nhiruī avakue yvy re oikuua pota aguā oje'oi va'ekue oike vy ojopy ta'angaa yvyra guigua, manto sacerdote pegua, ta'angaa oo py ikuai va'ekue ha'e ta'angaa mba'emo ryku gui ojapo pyre guive. Ha'e rā sacerdote ma opyta ho'amy okē py, seiscientos avakue tembiporu joe opu'āa pygua reveguia kuery ikuia py.

¹⁸ Mica ro py ha'e kuery oike vy ta'angaa yvyra guigua oipe'a heravy, manto sacerdote pegua, ta'angaa oo py ikuai va'e ha'e ta'angaa mba'emo ryku guigua. Ha'e ramo sacerdote aipoe'i ha'e kuery pe:

— Mba'e tu pejapo?

¹⁹ Ha'e kuery ombovai:

— Ekyrirī ke, emōñ ndepo ndejuru py, ha'e eju orerupive. Orevy ju 'rā reiko oreru rami ha'e sacerdote-rā. Mba'eta ndevy pe ha'eveve pa peteī'i ava ro py sacerdote reikoa, tyra pa Israel re peteī regua ha'e javi pe sacerdote reiko aguā? — he'i rā

²⁰ sacerdote oendu vy ov'y'a op'y'a py. Ha'e rami vy ha'e ae ju manto sacerdote pegua oipe'a, ta'angaa oo py ikuai va'e ha'e ta'angaa yvyra guigua oipe'a avi vy oguenoē heravy ha'e kuery mbyte rupi.

²¹ Ha'e kuery ojevy aguā katy ju oo ta vy guenonde omoñ gua'y kue'iry, guymba kuery ha'e omba'e rei-rei ha'e javi. Ha'e rami vy oje'oi.

²² Mica ro gui mombyry'i ma Dā kuery oje'oi jave avakue Mica ro katy'igua kuery nhomboaty vy oupity okuapy.

²³ Ha'e vy hakykue katy gui ojapukai oje'oivy. Ha'e rā ha'e kuery ojere vy aipoe'i Mica pe:

— Mba'e tu oiko upe va'e kuery remboaty aguā?

²⁴ Ombovai:

— Tuuete ra'angaarā ajapo va'ekue peipe'apa ra'e, xevygua sacerdote guive. Ha'e gui peo ju kuri. Mba'e tu oiko xevy guarā peja va'ekue? Ha'e gui mba'e re tu xevy peporandu vy "Mba'e tu oiko?" peje? — he'i.

²⁵ Ha'e ramo Dā kuery aipoe'i ixupe:

— Ndeayvuve eme orevy, xapy'a rei avakue ipy'a guaxukueve ndere opu'ā rā pekan-hymba e'ŷ aguā, ndero pygua kuery reve — he'i okuapy.

²⁶ Ha'e rami vy Dā kuery oje'oive tema. Ha'e rā Mica ma ixugui ha'e kuery ipo'akavea oikuua vy ojevy ju ngoo katy.

²⁷ Ha'e kuery ogueraa ta'angaarā Mica ojapo va'ekue ha'e sacerdote oguereko va'ekue. Ha'e gui Laís tetā py ju ovaē, peteī regua ikuai porā ha'e joe ojeroviaa rupi rive ikuia py. Ha'e vy ojukapa kyxe py, ha'e oapypa tetā.

²⁸ Nomoingovei avave rei, mba'eta Sidom tetā gui mombyry, avave rei re na'irūi guive. Ha'e va'e tetā ma Bete-Reobe katy'i oĩ yvyugua oĩ va'e py. Ha'e gui ha'e kuery ae ju tetā omoatyrō ju vy ha'e py ikuai.

²⁹ Tetā omboery guamoñ Dā Israel ra'y oiko va'ekue rery py. Ha'e rā tetā rery ypyague ma Laís.

³⁰ Dā kuery ojeupe ae ogueraa ta'angaa yvyra guigua. Ha'e gui Dā regua kuery pe ju Gérson ra'y Jônatas, Manassés ramymino va'e oĩ sacerdote, ha'e va'e rire ta'y kuery pe ju, ha'e kuery escravo-rā ogueraapaa ára peve.

³¹ Ha'e rami py Mica ta'angaa ojapo va'ekue ma ojeupe ae ju ha'e kuery oguereko, Siló py Nhanderuete pegua oo oĩ teria ja.

Levita ha'e ta'yxy jevy rekokue oĩa

¹ Ha'e va'e jave py huvinxave ndoikoi Israel kuery re opena va'erā. Ha'e gui oiko peteī levita regua. Ha'e va'e ma Efraim yvy'ā rupi oguata oikovy vy peteī gua'yxy jevyrā ogueraa Judá regua Belém tetā pygua.

² Ha'e rā kunha va'e ma hexe nda'ijs'evei vy opoi. Ha'e rami vy nguu ro katy ju ojevy Judá regua Belém py. Ha'e py ju oiko irundy jaxy re.

³ Ha'e gui ime opu'ã vy guembiguai ha'e mokoĩ mburika ogueraa hakykue oo vy. Hexeve ijayvu porã'ixe ogueru ju aguã. Ha'e py ovaẽ ramo kunha va'e omovaẽ nguu ro py. Tuu oexa vyve ov'y'a reve oẽ, omovaẽ porã'i.

⁴ Hatyu kunha va'e ru va'e ma mboapy ára re omombyta ojea py. Okaru ha'e oy'u okuapy, ha'e gui omenda va'e kuery oke ha'e py.

⁵ Irundy araa py ov'y voi, opu'ã oje'oí aguã. Ha'e ramo kunha va'e ru aipoe'i guajy me pe:

— Penhemombaraete ranhe ke peteĩ mbojape'i re. Ha'e va'e rire ma peo 'rã — he'i ramo

⁶ oguapy mokoïve, okaru ha'e oy'u nhoguenoiny.

Ha'e gui kunha va'e ru aipoe'i ava pe:

— Ajerure ndevy, kova'e pytũ ju peke apy, pendepy'a py pevy'a aguã.

⁷ Ha'e rami teĩ ava va'e opu'ã ju oo aguã. Ha'e rã hatyu ma hexeve ijayvu tema vy ha'e va'e pytũ re ju omombyta.

⁸ Peteĩ nhiruĩ araa py ov'y voi oo aguã. Ha'e rã kunha va'e ru aipoe'i:

— Penhemombaraete ke, pepytave'i ju ka'aru peve — he'i ramo mokoïve okaru nhoguenoiny.

⁹ Ha'e ramo ava va'e opu'ã ju oo aguã, ta'yxy jevy ha'e hembiguai kunumi va'e reve. Ha'e rã ixupe aipoe'i hatyu kunha va'e ru:

— Ma'ẽ, ka'aru ma, pytũ ovaẽ ju ta ma. Ajerure ndevy pytũ peaxa ju aguã apy. Ára oaxa ta ramo peaxa pytũ apy, pendepy'a py pevy'a aguã. Ha'e gui ko'ẽ rã mae ma pepu'ã pendero katy peo aguã — he'i.

¹⁰ Ha'e rami teĩ ava va'e ndoaxaxevei pytũ ha'e py. Ha'e rami vy opu'ã vy oo. Ngupive ogueraa va'e ma mokoĩ mburika ikupe árygua va'e ha'e ta'yxy jevy. Ha'e gui Jebus tetã katy'i peve ovaẽ (ha'e va'e ma Jerusalém tetã).

¹¹ Jebus katy'i oje'oí jave ka'aru ete ma ramo kunumi va'e aipoe'i opatõ pe:

— Aÿ ma jaa, nhavaẽ jebuseu kuery retã py, pytũ jaaxa aguã ha'e py.

¹² Ipatõ ombovai:

— Any, nda'evei tetã jaikuua e'ÿ va'e py nhavaẽ aguã, Israel kuery e'ÿ ikuia py. Jaave 'rã Gibeá peve.

¹³ Jaave 'rã, nhavaẽ 'rã amboae tekoá py, Gibeá py e'ÿ vy Ramá py jake aguã — he'i guembiguai pe.

¹⁴ Ha'e gui oje'oive. Gibeá tetã katy'i ovaẽ jave kuaray oike, Benjamim regua yvy py.

¹⁵ Ha'e rami vy opia oje'oivy Gibeá katy, pytũ oaxa aguã ha'e py. Ha'e py ovaẽ vy oguapy okuapy tetã mbyte py, mba'eta avave rei nomovaẽai ngoo py pytũ oaxa aguã.

¹⁶ Ha'e gui pytũ ma jave ou peteĩ tuja'i mba'ety rupi ombo'epoague gui. Ha'e va'e ma Efraim yvy'ã reia pygua va'eri Gibeá py hekoa va'e. Ha'e rã ha'e pygua kuery ae ma Benjamim regua meme.

¹⁷ Tuja'i va'e oma'ẽ vy tetã mbyte py oexa oguata va'e. Ha'e vy oporandu ha'e kuery pe:
— Marã katy peo, ha'e magui tu peju?

¹⁸ Ombovai:

— Judá regua Belém gui roguata roje'oivy, mombyry Efraim yvy'ã reia katy roo. Xee ma ha'e pygua ae. Aa karamboae Judá regua Belém py. Ha'e gui aÿ ma aguata avy SENHOR pegua oo oĩa katy. Teĩ avave rei naxemovaẽai ngoo py,

¹⁹ roguereko teĩ ae ma mba'emo pirukue ha'e mba'emo rogue orerymba mburika peguarã. Mbojape ha'e vinho voi roguereko xevy, kunha ha'e kunumi va'e nerembiguai reve ou va'ekue pe. Mba'eve rei ndoatai orevy — he'i.

²⁰ Ha'e ramo tuja'i va'e aipoe'i:

— Tove mby'a porã toĩ ndere. Xapy'a rei ndevy mba'emo oata ramo xee ae tajou. Ha'e rami avi nda'evei tetã mbyte py peaxa aguã pytũ — he'i.

²¹ Ha'e rami vy ngoo py ae omovaẽ vy mba'emo rogue ome'ẽ mburika kuery pe. Ha'e kuery py ojoipa ma rire okaru ha'e oy'u okuapy.

²² Ha'e kuery ovy'a okuapy jave ha'e va'e tetā pygua avakue nhe'ē vai ra'y kuery oupa vy ombojere okuapy oo. Ombota-mbota okuapy okē re. Ha'e vy hoo va'e tuja'i va'e pe ijayvu vy

— Emoē apy oka py ava ndero py removaē va'ekue rojavyky rei aguā — he'i.

²³ Ha'e rā hoo va'e ma ha'e kuerya py oē vy aipoe'i ha'e kuery pe:

— Any xeryvy kuery, pejapo eme ha'e rami ete ha'eve'ŷ va'e. Xee ae ma xero py ava amovaē rire pejapo vai eme.

²⁴ Xee aru 'rā oka py xerajy omenda e'ŷ teri va'e, ha'e ava va'e ra'yxy jevy. Ha'e va'e kuery ma pemo'yvyi'i 'rā, ha'e kuery re 'rā pejapo pejapoxea rami. Ha'e rā ava va'e re ma pejapo vai eme ha'e rami ete — he'i.

²⁵ Ha'e pygua avakue noendu potaxezi ramo levita ra'yxy jevy ojopy vy ogueraa oka py, omboaxa ha'e kuery pe. Ha'e ramo ha'e kuery ju ojopy vy ojavyky reia rupi oguenonheno okuapy pytū mbukukue re, ko'ē peve. Ha'e gui ko'ēmba ma ramo oejapa rive oje'oivy.

²⁶ Ko'ē rai'i ma ramo kunha va'e ou vy ho'a oo ome oĩa rokē py. Ha'e py ma iko'ēmba ete'i oupy.

²⁷ Ko'ēgue ime opu'ā vy oipe'a okē. Ha'e rami vy oove aguā oē vy oexa rā kunha gua'yxy jevy okē rupi itui ra'e, opyrō ovyaty áry opo omoĩ reve.

²⁸ Ha'e vy aipoe'i ixupe:

— Epu'ā ke, ha'e gui jaa — he'i teñ nombovai. Ha'e ramo ava va'e oupi inony mburika'i áry, ojepe'a, oo ju ngoo katy.

²⁹ Ngoo py ovaē ma vy gua'yxy omboguejy jevy retekue. Ha'e vy kyxe ogueru vy omboa'ypa, ikāgue reve, doze henda py. Ha'e va'e ma ogueraa uka Israel kuery ikuuaia ha'e javi rupi.

³⁰ Peteñ-teñ oexa va'e aipoe'i okuapy joupe-upe:

— Kova'e nunga ojapoa va'e'ŷ teri, neñ oexaa va'e'ŷ teri, Egito yvy gui Israel kuery oua ára guive aŷ peve. Peikuaa pota ha'e nunga re, penhembopy'a ha'e pejogueroayvu — he'i okuapy.

20

Levita ra'yxy jevy ojavyky reia ague re Israel kuery nhombopagaague

¹ Ha'e gui Israel kuery ha'e javi ma Mispa py oje'oi vy nhomboatypa okuapy SENHOR renonde. Peteñ'i rami ou Dā guive Berseba peve ikuai va'e, Gileade yvy gui guive.

² Ha'e kuery va'e regua yvatekueve ha'e javi ha'e Israel kuery peteñ-teñ regua oupa okuapy Nhanderuete pegua onhemboaty okuapy py. Quatrocentos mil avakue ikuai opu'ā okuapy va'e, kyxe reveguia meme.

³ Benjamim kuery voi oendu okuapy Israel kuery Mispa katy oje'oiia omombe'ua rā.

Ha'e gui ava pe Israel kuery oporandu okuapy:

— Emombe'upa orevy marā rami vy pa ha'e nunga oikoague.

⁴ Ha'e ramo ava levita kunha omano va'ekue megue ombovai vy aipoe'i:

— Xera'yxy jevy reve rovaē Benjamim regua kuery retā Gibeá py, pytū roaxa aguā.

⁵ Ha'e ramo Gibeá pygua kuery xere opu'ā vy pyávy ombojere oo xee aña va'e. Xejukaxe, ha'e gui xera'yxy jevy voi ojavyky rei okuapy. Ha'e ramo omano.

⁶ Ha'e ramo xera'yxy jevy retekue araa. Amboa'ypa vy araa uka Israel kuery yvy ha'e javi rupi, nhande Israel kuery moxīmbaarā ojapo rire.

⁷ Ma'ē, peẽ kuery ma Israel kuery regua meme pendekuai. Peikuaa pota porā ke! Pejogueroayvu ha'e penhomoneta ha'e nunga re — he'i.

⁸ Ha'e rami rā heta va'e kuery ha'e javi ma peteñ'i rami opu'āmba okuapy vy aipoe'i:

— Nhande kuery va'e regua peteñive ndojevyi 'rā ngoo katy, peteñive ndajaai 'rā nhandero katy.

⁹ Ha'e rami vy po rami 'rā jajapo Gibeá pygua kuery re: Jaje'oi 'rā ha'e kuery rovai nhapu'ā aguā xorte jaexaa rami.

¹⁰ Ha'e rami vy Israel kuery regua cem avakue ikuai va'e-va'e gui ma dez kuerei 'rā nhamondouka, mil ikuai va'e-va'e gui cem kuerei 'rā, ha'e dez mil ikuai va'e-va'e gui ma mil kuerei 'rā nhamondouka tembi'u ojou aguā nhande kuery pe. Ha'e rā nhande kuery ma Benjamim regua Gibeá py jaa vy ha'e kuery re jajapo 'rā Israel kuery mbyte ojapo vaiague rami — he'i.

¹¹ Ha'e rami vy Israel regua avakue ha'e javi nhomboaty okuapy ha'e va'e tetā rovai opu'ā vy oo aguā. Peteī'i rami onhemoirūmba okuapy.

¹² Ha'e gui Israel kuery omondouka avakue Benjamim regua yvy ha'e javi rupi, aipoe'i aguā:

— Mba'e nunga ha'eve'ŷ va'e tu penembyte ojapoa?

¹³ Aŷ orepo py pemboaxa na Gibeá pygua avakue nhe'ẽ vai ra'y kuery rojukapa aguā, ha'e rami vy Israel kuerya gui roipe'a aguā ha'e rami ete nda'evei va'e — he'i. Ha'e rā Benjamim kuery ma noendu potai guyvy Israel kuery ayvu.

¹⁴ Ha'e rami 'rāgue py Benjamim kuery ma Gibeá katy'i tetā ikuai va'e gui oupa vy ono'ombā okuapy, oje'oi aguā Israel kuery re opu'ā aguā.

¹⁵ Ha'e va'e ára ma oipapaa Benjamim kuery tetā ikuai va'e gui ou va'ekue. Oikuua rā vinte e seis mil avakue ikuai kyxe reveguia, Gibeá pygua kuery reve'ŷ vy. Ha'e va'e kuery ma oipapaa rā seiscentos avakue ikuai oiporavo pyre meme.

¹⁶ Ha'e va'e kuery ha'e javi regua ma setecentos avakue ikuai oiporavo pyre ijaxu va'e meme. Ha'e va'e kuery ma ita momboa py peteī 'ague'i re omombo vy voi ndojavyi 'rā.

¹⁷ Ha'e rā Israel regua avakue ma oipapaa rā quatrocentos mil avakue ikuai kyxe reveguia, joe opu'āa rupi ikuai va'ety meme, Benjamim regua e'ŷ.

¹⁸ Ha'e gui Israel regua kuery opu'ā vy Betel py oo. Ha'e py ma Nhanderuete pe oporandu vy aipoe'i:

— Ore kuery va'e regua mava'e ranhe 'rā tu oo Benjamim kuery rovai opu'ā aguā?

SENHOR ombovai:

— Judá kuery ranhe 'rā oo — he'i.

¹⁹ Ha'e gui ko'ẽ aje'ive reve Israel kuery opu'ā vy oje'oi. Ono'õ okuapy Gibeá rovai opu'ā aguā.

²⁰ Israel regua avakue ae oje'oi Benjamim kuery rovai opu'ā aguā. Gibeá katy'i ikuai joe opu'ā aguā rami.

²¹ Ha'e ramo Gibeá gui Benjamim kuery oẽ oje'ivvy vy ha'e va'e ára oitypa Israel regua yvy rupi, vinte e dois mil avakue.

²² Ha'e gui avakue Israel kuery regua peteīgue ju ipy'a guaxu vy oiko katu okuapy joe opu'ā aguā, jypyia ára opu'āague py ae ju.

²³ Ha'e va'e'ŷ mbove ma Israel kuery oje'oi ranhe vy ojae'o okuapy SENHOR renonde. Ka'aru peve oporandu okuapy SENHOR pe,

— Roje'oi ju 'rā pa oreryvy kuery Benjamim regua rovai ropu'ā aguā? — he'i vy.

SENHOR ombovai:

— Tapeo ha'e kuery re pepu'ā aguā — he'i.

²⁴ Ha'e gui ma ko'ẽ jevy Israel kuery ovaẽ ma okuapy Benjamim kuery rovai opu'ā aguā.

²⁵ Ha'e va'e ára voi Benjamim kuery Gibeá tetā gui oẽ oje'ivvy ha'e kuery ovaexi aguā. Ha'e vy dezoito mil avakue ju oity yvy rupi, kyxe reveguia meme.

²⁶ Ha'e rami rā Israel kuery ha'e javi oje'oi vy Betel py ovaẽ. Ha'e vy ojae'o ete okuapy, ha'e py SENHOR renonde ikuaria py. Ha'e va'e ára okaru e'ŷ re ikuai ka'aru peve. SENHOR renonde ome'ẽ avi okuapy mba'emo oapy reve ha'e peteī rami ikuaria regua.

²⁷ Ha'e rami vy Israel kuery oporandu ju okuapy SENHOR pe. (Mba'eta ha'e va'e jave ma ha'e py ae oĩ Nhanderuete guexeve guarā ojapo va'ekue ryru.

²⁸ Ha'e va'e oĩ rupi Eleazar ra'y Finéias, Arão ramymino va'e ombo'eapo oikovy ha'e jave py.) Ha'e gui aipoe'i okuapy:

— Roo jevy 'rā pa oreryvy kuery Benjamim regua rovai ropu'ā aguā, tyrā pa ndoroovei ma 'rā?

SENHOR ombovai:

— Tapeo, mba'eta ko'ẽ ramo xee amboaxa 'rã pendepo py — he'i.

²⁹ Ha'e ramo Israel kuery ma Gibeá yvýry rupi omoĩ xondaro kuery onhemi aguã.

³⁰ Ha'e gui mboapy araa py ma Benjamim kuery rovai Israel kuery opu'ã aguã oje'oi vy jypy guare rami ae oiko katu okuapy Gibeá rovai opu'ã aguã.

³¹ Ha'e ramo ha'e kuery ovaexí aguã Benjamim kuery oẽ jogueruvy vy tetã gui mombyry ojereru uka vy omboypy ju ojuka aguã ha'e kuery regua. Jypy guare rami ojuka trinta avakue Israel regua tape rupi. Ha'e va'e regua peteĩ ma Betel katy oo, ha'e rã amboae ma Gibeá nhuündy katy oo va'e.

³² Ha'e rami vy Benjamim kuery aipoe'i:

— Kue'i guare rami ae ju ho'apa ta ma nhanerenonde — he'i okuapy.

Ha'e rã Israel kuery ma aipoe'i:

— Nhanhamba, ha'e kuery nhanderakykue tape rupi oopa aguã tetã gui mombyry peve — he'i.

³³ Ha'e rami vy Israel regua avakue ikuaiague gui opu'ãmba jogueruvy, joe opu'ã aguã rami ikuai Baal-Tamar py. Israel regua onhemia py ikuai va'ekue voi oẽmba jogueruvy Geba katy'i ikuaiague gui.

³⁴ Ha'e rami vy dez mil avakue Israel kuery regua oiporavo pyre ou okuapy Gibeá re opu'ã aguã. Opu'ãma nda'evei ete va'e, ha'e rã amboae kuery ma noexa'ái okuapy okanhymba taa.

³⁵ Ha'e ramo Israel kuery renonde SENHOR omoĩ vai Benjamim kuery. Ha'e ramo ha'e va'e ára Israel kuery ojuka Benjamim regua vinte e cinco mil e cem avakue, kyxe revegua meme.

³⁶ Ha'e ramo mae Benjamim kuery oexa ombojexavai maa. Mba'eta avakue Israel regua ojepe'apa ranhe Benjamim regua kuery renonde gui, Gibeá rovai opu'ã va'erã kuery onhomí va'ekue re ojerovia vy.

³⁷ Ha'e gui onhemi okuapy va'ekue oẽmba pojava vy oikepa Gibeá tetã py. Ha'e vy oitypa ha'e javi kyxe py ojuka vy.

³⁸ Avakue Israel regua ma jogueroayvu ae ma onhemi va'e kuery reve, tetã gui peteĩ arai tuvixa va'e rami hataxí omopu'ã aguã re.

³⁹ Ha'e nunga Israel regua kuery oexa vy ojevy ju opu'ã aguã katy. Ha'e kuery re ae Benjamim regua kuery omboypy ojapo vai aguã, trinta avakue Israel regua ojuka vy

— Kuee nhapu'ãague rami ae ri ha'e kuery ho'apa ma 'rã nhanerenonde — he'i okuapy tei.

⁴⁰ Ha'e rami tei tetã gui hataxí opu'ã ma ovy arai rami, oo yta hi'aĩ va'e rami ae. Ha'e ramo Benjamim regua kuery guakykue katy oma'ẽ vy oexa rã tetã ha'e javi rupi tata rendy vuku ojeupi ma ovy ra'e yvate.

⁴¹ Israel regua avakue ojerepa rã Benjamim regua kuery oexa vy onhemondyipa okuapy, imombhaarã ou ta maa oexa vy.

⁴² Ha'e rami vy Israel regua avakue renonde gui ojevypa, tekaoa e'ŷa katy tape oo va'e rupi onhambaxe va'eri opu'ã va'e kuery omoĩ vai. Ha'e rã tetã gui ou va'e kuery ju ojukapa ha'e kuery mbyte.

⁴³ Ha'e rami vy ojokopa rei Benjamim regua kuery. Hakykue monha vy mamo rã optyu'ua py oupity, Gibeá katy'i, kuaray oua katy.

⁴⁴ Ha'e rami py Benjamim regua ho'a dezoito mil avakue, ipy'a guaxuve va'e meme.

⁴⁵ Ha'e gui ojevypa vy tekaoa e'ŷa katy ju onhamba, Rimom py itaova oĩ va'e katy. Tape rupi hembyrekue onha va'e regua ma cinco mil avakue ju ojukave. Ha'e gui hupive rei omonhave Gidom peve. Ha'e py ju ojukave dois mil avakue ha'e kuery regua.

⁴⁶ Ha'e va'e ára Benjamim regua omano va'e ha'e javi vy ma vinte e cinco mil avakue kyxe revegua, ipy'a guaxuve va'e meme.

⁴⁷ Ha'e rami tei seiscentos avakue ojere vy ojava tekaoa e'ŷa katy, Rimom py itaova oĩ va'e py. Ha'e py ma irundy jaxy re ikuai.

⁴⁸ Ha'e gui ma Israel regua avakue ojevy ju Benjamim kuery rekoa katy. Ha'e vy ojukapa kyxe py tetā py hembyre va'ekue ha'e javi, avakue ha'e mymba kuery, ojou va'e rei. Tetā ojou va'e rei oapypa tata py.

21

Benjamim regua avakue ra'yxyrā ojouague

¹ Ha'e gui Israel regua avakue Mispa py teri ikuaria py oura okuapy reve

— Nhande kuery regua peteīve nomomendai 'rā guajy Benjamim regua ra'yxyrā — he'i ma voi va'ekue.

² Ha'e rami teī Betel py ha'e kuery oo vy ka'aru peve ikuai Nhanderuete renonde ha'e py. Ojapukai ha'e ojae'o okuapy hexay ete reve.

³ Ha'e vy aipoe'i:

— Ah! SENHOR Israel kuery ruete, mba'e re tu ha'e rami ete oiko Israel re, mba'eta aŷ oata ma peteī regua — he'i okuapy.*

⁴ Ha'e gui ko'ē jevy, ko'ēmba ramove ha'e kuery opu'ā vy peteī altar ojapo ha'e py. Hi'ary ome'ē okuapy mba'emo oapy reve, peteī rami ikuaria regua guive ome'ē.

⁵ Ha'e gui Israel kuery joupe-upo oporandu vy

— Mava'e tu Israel regua ndooi va'ekue SENHOR pegua nhemboaty oikoa py? — he'i. Mba'eta Mispa py SENHOR renonde oura ae ma voi onhemboaty aguā ndoui va'e ojukaa aguā re.

⁶ Israel kuery omboaxy okuapy guyvy Benjamim regua kuery,

— Kova'e ára opa rai'i ete peteī regua Israel gui.

⁷ Ha'e gui marā rami vy nda'u jajou 'rā hembyrekue ra'yxyrā? Mba'eta SENHOR pe jaura ae ma nhanderajy kuery nhamomenda e'ŷ aguā ha'e kuery ra'yxyrā — he'i okuapy.

⁸ Ha'e rami vy aipoe'i:

— Oiko pa Israel regua SENHOR pegua nhemboaty Mispa py oiko va'e py ndooi va'ekue? — he'i.

Ha'e rami vy oikuua pota rā Jabel-Gileade pygua kuery peteīve ndooi ra'e ono'ō okuapy vy nhemboaty ojapoa py.

⁹ Heta va'e kuery oipapaa rā oikuua Jabel-Gileade pygua kuery peteīve noī ha'e py.

¹⁰ Ha'e nunga rupi ha'e katy ijaty okuapy va'e omondouka doze mil avakue ipy'a guaxukueve. Ijayvu imondovy vy aipoe'i ha'e kuery pe:

— Tapeo pejukapa Jabel-Gileade pygua kuery kyxe py, kunhague ha'e kyrīgue guive.

¹¹ Po rami 'rā pejapo: Avakue ha'e kunhague avakue reve onheno ma va'ekue ha'e javi 'rā pejuka — he'i.

¹² Ha'e rami rā Jabel-Gileade py oo vy quatrocentos kunhataīgue ojou avakue reve onheno e'ŷ teri va'e. Ha'e va'e kuery Siló py oguerupa heta va'e kuery ikuaria py, Canaā vyv re.

¹³ Ha'e gui ono'ō okuapy va'e ha'e javi omondouka Benjamim kuery pe imombe'uarā, Rimom itaovape guy py onhemi va'ekue pe. Ha'e rami vy ijayvu jomeme ikuai porā ju aguā re.

¹⁴ Ha'e ramo Benjamim regua kuery ojevypa. Ha'e rā ha'e kuery ra'yxyrā ome'ēa Jabel-Gileade py kunhataīgue ndojukai va'ekue. Ha'e rami teī oata teri ha'e kuery ra'yxyrā.

¹⁵ Ha'e rami py ha'e kuery omboaxy Benjamim kuery, Israel regua oata aguā rami SENHOR ojapo rire.

¹⁶ Ha'e gui nhomogeta va'ety kuery aipoe'i ijaty okuapy va'e pe:

— Marā rami vy nda'u jajouve ju 'rā hembyrekue ra'yxyrā, Benjamim regua kunhague opa rire?

¹⁷ Mba'eta nda'evei Benjamim regua rembyrekue ndata'yi aguā, mba'eta nda'evei peteī regua ha'e javi oata aguā.

* 21:3 “Peteī regua oata” he'i okuapy, mba'eta Benjamim regua avakue ojukapa rai'i ma rire (versículo 6).

¹⁸ Ha'e rami avi nhande ma nda'evei ha'e kuery ra'yxyrā nhamomenda aguā nhanderajy kuery, mba'eta nhande Israel kuery jaura vy “Ayvu vaipy toiko Benjamim regua ra'yxyrā guajy omomenda va'e”, ja'e rire — he'i.

¹⁹ Ha'e ramo ombovai:

— Ma'etŷa nhavō ma oiko 'rā SENHOR pegua nhemboaty Siló py. Ha'e nunga oiko 'rā Betel tetā katy'i kuaray ijapu'a'ia katy, tape Betel gui Siquém katy yvy'ã rupi oo va'e rupi kuaray oua katy, ha'e Lebona regua kuaray ipuku-a katy — he'i.

²⁰ Ha'e rami vy Benjamim kuery pe ju ijayvu vy aipoe'i:

— Tapeo, penhemi uvaty ikuai va'e rupi.

²¹ Ha'e py ma pema'ẽ mbegue peiny, mba'eta Siló pygua rajy kuery oẽ 'rā jogueruvy oguyryĩ reve ojeroky vy. Ha'e ramo ma peẽ 'rā uvaty py penhemia gui, ha'e ha'e kuery regua peteĩ-teĩ pejopy 'rā pendera'yxyrā. Ha'e vy tapeo ju Benjamim yvy re.

²² Ha'e gui tuu ha'e ikyvy kuery ou 'rā nhanda py ndojou porāia rupi ijayvu aguā. Ha'e ramo ha'e kuery pe aipo ja'e 'rā: “Orerayvua rupi ke pemboaxy avi Benjamim regua avakue, mba'eta Jabes-Gileade tetā re ropu'ã jave ta'yxyrā ndorojoupai rire. Ha'e rami avi penderajy kuery napeme'ẽi va'ekue ha'e kuery pe. Ha'e rami e'ŷ va'e rire pepaga aguā rami peiko 'rāgue”, ja'e 'rā — he'i.[†]

²³ Ha'e rami ae Benjamim kuery ikuai. Ha'e rami vy gua'yxyrā peteĩ-teĩ ogueraa oguyryĩ reve ojeroky okuapy va'e kuery gui, mbovy pa ikuiai rami vy ogueraa. Ha'e gui oje'oi vy oyvy py ju ojevypa. Ojapo ju guetā, ha'e vy ikuai ha'e py.

²⁴ Ha'e gui mae ma Israel kuery voi ojevy ju ha'e gui. Peteĩ-teĩ guetarā kuerya py ae oo, gua'y kuerya py ha'e oyvy py ae.

²⁵ Ha'e va'e jave ma ndoikoi huvixave Israel kuery re opena va'erā. Ha'e ramo peteĩ-teĩ ikuai 'rā ha'e kuery ae oipotaa rami rive.

[†] ^{21:22} Ha'e kuery ha'e javi oura va'ekue Benjamim regua avakue ra'yxyrā guajy kuery ome'ẽ e'ŷ aguā (versículo 1). Ha'e gui apy ojerure guajy kuery pe Benjamim regua avakue ra'yxyrā ojereraa uka aguā, ourague ombovaipa e'ŷ aguā.

Rute rekukue oĩa Rute rekukue oĩa

“Joguerekao kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve” (1.1). Ha'e rami ijypy kova'e kuaxia para. Moabe yvy re ava va'e omano, ta'y kuery avi. Ha'e ramo ta'yxykue Noemi hery va'e ojevy ju Belém tetã py. Hexeve ou avi peteĩ ipi'a ra'yxykue Rute hery va'e, Moabe pygua. Ha'e va'e ma oayvu ete ome xykue'i, Nhanderuete anhetẽ va'e re ojerovia guive oikovy.

Belém tetã py oiko jave peteĩ ava heko porã va'e ogueraa gua'yxyrã, Boaz hery va'e. Ha'e rami vy Rute ma huvixa Davi jaryi, ha'e Jesus Cristo jaryi guive oiko raka'e.

Ha'e jave py heko vai va'e heta ikuai teĩ Rute rami ikuai avi yvyigueve'i ojerovia ete va'e. Ha'e va'e kuery ma Nhanderuete omoingo porã.

Moabe yvy gui Noemi ha'e Rute ojevyague

¹ Joguerekao kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve.

² Ha'e va'e ava ma Elimeleque hery va'e, ha'e rã ta'yxy ma Noemi. Ta'y kuery ma Malom ha'e Quiliom. Efrateu kuery ikuai Judá regua Belém py heko va'e. Moabe yvy re ha'e kuery ovaẽmba vy heko ha'e py.

³ Ha'e gui ma Noemi me Elimeleque omano. Ha'e rã kunha va'e ha'e anho opyta mokoĩ op'i'reve.

⁴ Ha'e gui mokoïve omenda Moabe pygua kunhague re. Ta'yxy kuery regua peteĩ rery ma Orfa, ha'e rã amboae ma Rute. Ha'e rami vy ha'e py ikuai dez ma'etý rai'i.

⁵ Ha'e gui mokoïve ipi'a Malom ha'e Quiliom omano avi. Ha'e rami vy kunha va'e ha'e anho'i opyta, ipi'a kuery mokoïve ha'e ime ndoikovevei ma rire.

⁶ Ha'e gui kunha va'e oendu SENHOR ojeupagua kuery re ima'endu'a vy ho'u va'erã ojou uka jevya. Ha'e rami vy op'i'a ra'yxykue reve opu'ã jogueravy Moabe yvy gui ojevy aguã.

⁷ Ha'e ramo opi'a ra'yxykue mokoïve reve oje'oi ikuaiague gui. Mboapyve oguata jogueravy, Judá yvy katy ovaẽ aguã.

⁸ Ha'e gui ma Noemi aipoe'i ha'e kuery pe:

— Tapeo, pejevy ju peteĩ-teĩ pendexya py. Tove SENHOR tapenemboaxy, omano va'ekue peẽ pemboaxyague rami, ha'e xevy voi.

⁹ Tove SENHOR tapenembovy'a, peteĩ-teĩ penemerã ro py — he'i. Ha'e vy oayvupa.

Ha'e rami rã ha'e kuery ojae'o atã.

¹⁰ Ha'e rami vy ime xykue pe aipoe'i:

— Any, ore voi roo avi 'rã nderupive neretarã kuerya katy.

¹¹ Ha'e rã Noemi aipoe'i:

— Pejevy ke, xememby kuery. Mba'erã tu peo ta xerupive? Xee nda'u areko teri ri xerye py xepi'a penemerã?

¹² Pejevy ke, xememby kuery. Tapeo ke, mba'eta xeguaim'i ete ma amenda jevy aguã. Xee ma “Aendu teri arõ aguã” ha'e va'e rire, ha'e rami e'ý vy kova'e pytû re xemerã ajou vy xememby voi va'e rire ma

¹³ pearõ 'rãgue ri ty'y ha'e kuery tujapa peve? Imeve'ý va'e teri 'rãgue ri ty'y peiko? Any teve, xememby kuery. Mba'eta pendere vy xee xeporiau vaipa teĩ, xerovai SENHOR opo upui rire — he'i.

¹⁴ Ha'e ramo ha'e kuery teĩgue ju ojae'o atã okuapy. Orfa ma peteĩgue oayvu reve oxarura ovy ome xykue pe. Ha'e rã Rute ma oikuavã ratã tema oiny.

¹⁵ Ha'e ramo Noemi aipoe'i ixupe:

— Ne'exa, neirū ojevy ma ovy guetarā kuery ha'e nguuete kuerya katy. Ejevy ke ndee voi neirū rakykue.

¹⁶ Ha'e rā Rute ombovai:

— Ejeja uka eme xevy, xejoko eme guive nderupive aa aguā. Mba'eta mamo rā reoa py rei xee aa avi 'rā, ha'e mamo rā rekea py xee voi ake 'rā. Neretarā kuery ma xeretarā kuery ae avi 'rā ikuai, ha'e Nderuete pe ma "Xeruete" ha'e avi 'rā.

¹⁷ Mamo rā remanoa py xee amano avi 'rā, ha'e py ae 'rā xenhono porāa. Ha'e gui tove SENHOR taxemoingo axy ha'e oikuua rami, xapy'a rei ndegui mba'emo pe ajep'e a uka ramo, manoa e'ŷ vy — he'i.

¹⁸ Ha'e ramo Noemi ngupive ooxe etea oexa vy nonhea'āvei ojevy aguā.

¹⁹ Ha'e rami vy jogueraa mokoīve Belém peve.

Ha'e py ovaē ramo tetā pygua kuery onhemondyipa rei okuapy ha'e kuery oexa vy. Ha'e vy kunhague ma aipoe'i okuapy:

— Peva'e e'ŷ teve Noemi?

²⁰ Ha'e ramo ombovai:

— Xevy pe "Noemi" pejeve eme, ha'e rā "Mara" peje xevy, mba'eta Ipo'akapa va'e ha'e rami ete xemoingo axy rire.*

²¹ Arekopa reve apy gui aa va'ekue ri SENHOR ojapo xeporiaukue'i reve ajevy aguā rami. Mba'e re tu "Noemi" peje xevy, xerovai SENHOR onhemoī ramo, Ipo'akapa va'e xembojexavai rei rire? — he'i.

²² Ha'e rami py Noemi ojevy Moabe yvy gui, op'i a ra'yxykue Moabe pygua Rute reve. Cevada omono'ōa ypy'i jave ovaē Belém py.†

2

Cevada ra'yīgue 'are Rute ojeupe guarā omono'ōague

¹ Ha'e gui peteī ava oiko Noemi me rāgue'i retarā oguerekopa va'e. Ha'e va'e ma Elimeleque retarā, Boaz hery va'e.

² Ha'e gui Moabe pygua Rute aipoe'i Noemi pe:

— Taa nhomba'ety rupi taiko, xemboaxy'i va'e rakykue rupi rei aa vy cevada ra'yīgue 'are amono'ō aguā.

Ombovai:

— Tereo ha'vy, xememby — he'i.

³ Ha'e gui Rute nhomba'ety py oo vy omono'ō oikovy omono'ō va'e kuery rakykue rupi. Elimeleque retarā Boaz mba'ety py guive oo.

⁴ Ha'e jave py ae Boaz ou Belém gui. Ha'e rami vy guembiguai kuery omono'ō va'e pe oxarura:

— SENHOR toiko peē kuery reve.

Ha'e kuery ombovai:

— Ndee voi SENHOR tanemoingo porā — he'i okuapy.

⁵ Ha'e gui Boaz oporandu guembiguai kuery re opena va'e pe:

— Mava'e rajy tu pe kunha va'e?

⁶ Hembiguai ombovai:

— Pe kunha va'e ma Moabe pygua, Noemi reve Moabe yvy gui ou va'ekue.

⁷ Ha'e va'e ma ange xevy aipoe'i: "Tajopy ha'yīgue, tamono'ō avy omboaty pyre pa'ū rupi omono'ō va'e kuery rakykue rupi", he'i vy ou kuri. Ko'ēmba'i ramove koropi ae oiko aŷ'i peve, xapy'a'i optytu'u oguy py guive — he'i.

* ^{1:20} Tery Noemi ma "Iporā va'e" 'ea. Ha'e rā tery Mara ma "Haxy va'e, iro va'e" 'ea (Êxodo 15.23). † ^{1:22} Israel kuery yvy py ma mba'emo ra'yīgue omono'ō 'rā abril ha'e maio py. Cevada ranhe 'rā omono'ō, ha'e gui trigo ju. Po rami 'rā omono'ō. Hi'y ma avakue ojaya rire kunhague hakykue oo vy ojokua 'rā. Ha'e gui oo ju 'rā ndojokuapai va'ekue ojopy vy. Ha'e gui mae ma ogueraa 'rā ojyky aguā py. Vaka omopyrō vy 'rā ojyky, ha'e'ŷ vy hi'áry rupi mba'emo ipoyi va'e omoatā 'rā heruvy, e'ŷ vy karóxa omboguata reve. Ha'e gui omboveve 'rā, ha'e oiky'a'o ju 'rā omboyrū aguā.

Rute reve Boaz ijayvu porã'iague

⁸ Ha'e gui Boaz aipoe'i Rute pe:

— Endu ke, xerajy. Tereo eme mba'ety mboae py remono'õ vy, apy gui tereove eme. Apy ae 'rã reiko xerembiguai kunhague reve.

⁹ Rexa pota 'rã cevada mono'õa kuery ombo'eapoa re, hakykue rupi reo aguã. Xerembiguai kuery pe xeayvu ae ma ndere opena rei e'ŷ aguã. Ndey'uvei vy tereo yryru oña py, ha'e ey'u xerembiguai kuery ojara va'ekue — he'i.

¹⁰ Ha'e ramo kunha va'e ngova omovaõ yvy re. Ha'e vy aipoe'i:

— Mba'exávy tu xepytyvõ 'rã, amboae tekaoa guigua aiko va'eri?

¹¹ Boaz ombovai vy aipoe'i:

— Xevy omombe'ua porã neme omano rire ixykue pe rejapo porãague. Mba'eta nderu, ndexy ha'e yvy ndetui'iague reja vy peteïve reikuaa e'ŷ va'e kuerya py reju va'ekue.

¹² SENHOR tomboekovia joupe rejapo porãague. Tove SENHOR Israel kuery ruete gui toupa ndevy guarã ha'e javi, ipepo guýry renhemi aguã reju rire — he'i.

¹³ Ha'e ramo kunha va'e aipoe'i:

— Xeruvixa, ndee xepytyvõ vaipa ma. Xembopy'a porã xee nerembiguai py'a re peve guarã ndeayvu vy, xee nerembiguai regua ndaikoi va'eri — he'i.

¹⁴ Ha'e gui okarua jave ju Boaz aipoe'i ixupe:

— Enhemboja ke kyvõ katy, ekaru einy mbojape re, vinho reve — he'i. Ha'e ramo omono'õ va'e kuery reve oguapy oiny. Ha'e rã ixupe ome'ẽ ha'yigue mbixy. Ixupe ome'ẽ retave ramo okaru porã, hevyatã peve.

¹⁵ Ha'e gui kunha va'e ha'yigue oekave ju aguã opu'ã ramo Boaz peteïgue ju ijayvu guembiguai kuery pe. Ha'e vy aipoe'i:

— Tove tomono'õ pemboaty va'ekue ikuaia rupi voi, pendeayvu eme ixupe.

¹⁶ Peity-ityve tema upe py pemboaty va'ekue gui, tove ta'ikuai ojopy aguã. Pendevai eme ixupe — he'i.

¹⁷ Ha'e gui mba'ety rupi kunha va'e omono'õ oikovy ka'aru peve. Omono'õ va'ekue ojyky vy oexa rã peteï ajaka renyẽ rai'i cevada oĩ.

¹⁸ Ha'e va'e oupi heravy tetã katy. Ha'e ramo ime xykue oexa omono'õ va'ekue. Ha'e ramo okaru okuapy jave guare rembyre voi oguenoẽ vy ome'ẽ avi ome xykue pe.

¹⁹ Ha'e rami rã ime xykue aipoe'i ixupe:

— Mamo tu remono'õ ange? Mamo tu remba'eapo ra'e? Ta'ima'endu'a porãa nepytyvõ vy nemovaõ porãare re!

Ha'e ramo ome xykue pe Rute omombe'u mamo pa ombo'eapoague. Ha'e vy aipoe'i:

— Mba'ety amba'eapoa va'e ja rery ma Boaz — he'i.

²⁰ Ha'e ramo Noemi aipoe'i opi'a ra'yxykue pe:

— SENHOR tomoingo porã, mba'eta ndojepe'ai jaikove va'e ha'e omano va'ekue omboaxy oikovyia gui. Ha'e va'e ava ma peteï nhanderepya regua oiko — he'i.*

²¹ Ha'e ramo Moabe pygua Rute aipoe'i:

— Ha'e va'e ma xevy “Xerembiguai kuery reve ae 'rã reiko ha'yigue omono'õmba peve”, he'i avi.

²² Opi'a ra'yxykue Rute pe Noemi ombovai:

— Xememby, ha'eve ete 'rã hembiguai kunhague reve reiko aguã, amboae kuery mba'ety rupi reiko axy 'rãgue py — he'i.

²³ Ha'e rami vy Boaz rembiguai kunhague reve kunha va'e omono'õ oikovy cevada ha'e trigo omono'õmba peve, ha'e ome xykue'ia py oke jepi oikovy.

* 2:20 Ha'e kuery reko rami vy hetarã ae'ive va'e pe “Nhenderepya” he'i 'rã. Ha'e va'e ma ojogua ju 'rã guetarã yvy operde va'ekue (Levítico 25.25), opena 'rã guetarã iporiaukue'i re (Levítico 25.35), ojogua ju 'rã guetarã escravo-rã ogueraa pyre (Levítico 25.47-49), oepy 'rã guetarã ojukaague re (Números 35.19), ha'e omenda 'rã guyvy rembirekokue re imemby va'e'ŷ teri ramo (Deuteronomio 25.5-10). Ha'e gui nhande kuery repya ma Jesus ae (Gálatas 4.5, Tito 2.14).

Mba'emo moa'yīaty py Boaz oīa py Noemi omondoukaague

¹ Ha'e gui ime xykue Noemi aipoe'i ixupe:

— Xememby, nda'evei ri ty'y nemerā xee ajou aguā revy'a aguā?

² Ne'exa, Boaz ma nhaneretarā oiko, guembiguai kunhague reve nemoingo va'ety guive. Ma'ē, kova'e pyávy ojkyk 'rā mba'emo moa'yīaty py.

³ Ejau ke, enhemoeakuā ha'e emoī ndeao iporāve va'e. Ha'e vy tereo mba'emo moa'yīaty py. Va'eri ava va'e okaru ha'e oy'u e'ŷ teria ja ejekuaa uka eme ta'vy ixupe.

⁴ Ha'e gui oke ta ma ramo reikuua pota 'rā mamo pa onhenoa re. Ha'e gui reo avi 'rā ha'e py. Eipe'a inhovā ipy gui, ha'e enheno avi ha'e py. Ha'e gui ma ava va'e omombe'u 'rā rejapo va'erā.

⁵ Rute ombovai:

— Xee ajapopa 'rā ndeayvuague — he'i.

Rute re Boaz omenda aguā re ijayvuague

⁶ Ha'e rami rā mba'emo moa'yīaty py oo vy ojapo ime xykue ijayvuague ha'e javi.

⁷ Ha'e rami vy Boaz okaru ha'e oy'upa ma vy, ha'e opy'a py ovy'a ete oiny reve oo onheno ha'yīgue omboaty pyre yvy'iry, ha'e ramo kunha va'e onhemboja mbegue'i vy oipe'a inhovā ipy gui. Ha'e vy onheno avi oupy ha'e py.

⁸ Pytū mbyte jave ava va'e onhemondyi. Ovy vy oexa rā peteī kunha va'e ipy rupi onheno oupy ra'e.

⁹ Ha'e vy aipoe'i:

— Mava'e tu ndee?

Ombovai:

— Xee ma nerembiguai Rute. Eipyko ke nde-capa xee nerembiguai áry, mba'eta ndee ma oreptyvōarā reiko — he'i.*

¹⁰ Ha'e ramo aipoe'i:

— Xerajy, SENHOR tanemoingo porā. Jypy joupe rejapo porāague gui aŷ xevy rejapo va'e iporāve ete, mba'eta kunumigue rakykue rupi ma ndereoi, iporiaukue'i e'ŷ vy oguerekopa va'e rakykue rupi voi.

¹¹ Ha'e gui aŷ ma xerajy, ekyje eme. Ndeayvua ha'e javi 'rā ajapo, mba'eta tetā py xeretarā kuery ikuuai va'e ha'e javi oikuaa ndee kunha heko porā va'ea.

¹² Ne'exa, anhetē ete xee penepytyvōarā aiko va'eri penepytyvōarā mboae oiko avi xegui peneretarā ae'ive va'e.

¹³ Epyta apy kova'e pytū re. Ha'e gui ko'ẽmba'i jave xapy'a rei ha'e va'e nepytyvōxe vy ha'eve nepytyvō aguā. Ha'e rā nanepytyvōxei ri ramo anhetē ete SENHOR oikove va'e rery rupi aura vy aipoa'e: Xee ae 'rā roipytyvō. Enheneove ranhe ejupy ko'ẽmba peve — he'i.

¹⁴ Ha'e rami rā ipy rupi onheno oupy ko'ẽmba peve. Aje'ive'i reve opu'ã ovy joexa kuaa e'ŷ re teri, ava va'e

— Toikuaa eme kunha va'e mba'emo moa'yīaty py ouague — he'i ramo.

¹⁵ Ava va'e aipoe'i avi:

— Eupi xevy ajukue renheovāa va'e, ejopy imoiny — he'i. Kunha va'e oupi ma ramo omonyē mboapy meme ryru cevada ra'yīgue. Ikupe áry oupi ma ramo oo ju tetā katy.

¹⁶ Ome xykue ro py ovaē ramo ixupe oporandu:

— Xememby, mba'e pa oiko ra'e?

Ha'e ramo omombe'u ava va'e ixupe ojapo porāague ha'e javi.

¹⁷ Aipoe'ive ju:

— Kova'e cevada ra'yīgue mboapy meme ryru ome'ẽ xevy, mba'eta aipoe'i: "Mba'eve reraa e'ŷ re ejevy eme teri neme xykuea katy", he'i va'ekue.

¹⁸ Ha'e ramo Noemi aipoe'i ixupe:

* 3:9 Hexe omendaxea rami ijayvu ojejavy e'ŷ re, ha'e kuery reko rami vy.

— Xememby, earõ ke, mba'e pa oiko 'rã jaikuaa peve. Mba'eta ha'e ava ma ndopytu'ui 'rã kova'e árave ha'e nunga re oikuaa pota e'ŷ re.

4

Rute re Boaz omenda aguã re jogueroayvuague

¹ Ha'e gui tetã kora rokẽ py Boaz oo vy oguapy oiny ha'e py.* Ha'e rami vy oexa oiny hetarã pytyvõa mboae ijayvuague va'e oaxa rã. Ha'e va'e pe Boaz aipoe'i:

— Xeretarã, eju apy, eguapy ke — he'i ramo ha'e va'e ojere vy oguapy oiny avi ha'e py.

² Ha'e ramo Boaz oenoī dez avakue tetã pygua nhomongeta va'ety ikuai va'e. Ha'e kuery pe aipoe'i:

— Peẽ voi peguapy ke apy — he'i ramo oguapy avi okuapy.

³ Ha'e gui guetarã oipytyvõ aguã rami oiko va'e pe ju aipoe'i:

— Ha'e gui nhanderyke'y Elimeleque yvykue ma ta'yxykue ovendea va'erã itui, Noemi Moabe yvy gui ojevy va'ekue ae 'rã ovendexe.

⁴ Ha'e nunga rupi xee anhembopy'a ndevy amombe'u aguã. Ha'e rami vy nhaneretarã kuery apy oguapy okuapy va'e renonde aipoa'e ndevy: Ejogua na ha'e va'e yvy. Rejoguaxe ri vy ejogua. Ha'e rã any ri vy emombe'u porã xevy aikuua aguã, mba'eta amboae ipytyvõara ndoikoi ndee e'ŷ vy, ha'e ndee rire ma xee ju aiko — he'i.

Ombovai:

— Xee ma ajogua 'rã — he'i.

⁵ Ha'e gui Boaz aipoe'ive ju:

— Ha'e rami avi Noemi po gui yvy rejoguaa ára ma Moabe pygua imeve'ŷ va'e Rute gui avi 'rã rejogua, hexe remenda ramo nderã y oiko va'erã pe ime yvykue opyta aguã hery py — he'i.*

⁶ Ha'e ramo ojogua ta va'ekue aipoe'i:

— Ha'e rami ri ramo xee ma nda'evei ajogua aguã, amokanhy e'ŷ aguã xera'y kuery peguarã ae mba'emo areko va'e ha'e javi. Ejogua ndee ae ajogua 'rã va'ekue, xee ajogua aguã nda'eve reguai ramo — he'i.

⁷ Po rami ae yma rupi Israel kuery reko, amongue mba'emo ovende, e'ŷ vy omboekoviaa py. Ha'e va'e oikuua uka porã aguã ma omboi 'rã opy ryru, ha'e ijoguua pe ome'ẽ 'rã. Ha'e rami py oikuua pavẽ 'rã omboekoviaague, Israel kuery reko rami vy.

⁸ Ha'e rami rã hetarã oipytyvõ aguã rami oiko va'e Boaz pe “Ndee ae ejogua” he'i vy omboi opy ryru.

⁹ Ha'e ramo Boaz aipoe'i nhomongeta va'ety ha'e guetarã kuery ha'e javi pe:

— Kova'e ára pexa pavẽa py Noemi po gui ajogua mba'emo Elimeleque, Quiliom ha'e Malom oguerekva ha'e javi.

¹⁰ Ha'e xera'yxyrã araa avi Malom ra'yxykue Moabe pygua Rute, herykue py xera'y oiko ma ramo ixupe guarã yvy opyta aguã, Malom rerykue re hexegua kuery ha'e tetã rokẽ py onhemboaty va'e hexarai e'ŷ aguã. Ha'e nunga rexaare ma peẽ kuery ae pendekuai aŷ — he'i.

¹¹ Ha'e ramo nhomongeta va'ety kuery ha'e okẽ py ikuai va'e ha'e javi aipoe'i:

— Ore kuery ma roexa ri. Ha'e ramo ha'e va'e kunha ndero py reraa va'erã ma SENHOR tomoingo porã Raquel ha'e Lia omoingoague rami, mba'eta ha'e va'e mokoïve omboetave raka'e Israel kuery. Ha'e gui ndee Boaz voi tanemboetea Efrata py, nderery re ta'ima'endu'aa pavẽ Belém tetã py.

¹² Ndero pygua kueryrã ta'ikuai Judá ra'y Perez, Tamar pi'a va'e ro py ikuiaia rami, nderã'yxy rupi nderã y kueryrã SENHOR ome'ẽ va'erã ha'e javi.

* ^{4:1} Ha'e jave py ma huvixa kuery mba'emo re oikuua pota vy oo 'rã tetã rokẽ py, tetã rokẽ yvýry oguapy 'rã okuapy jogueroayvu aguã. Ha'e rami vy amongue mba'emo oguerekva ha'e oo 'rã tetã rokẽ py huvixa kuery oikuua pota aguã (Deuteronomio 21.18-19; 2 Samuel 15.1-4, 19.8; Jó 29.7-12; Proverbios 31.23; Jeremias 38.7-8, 39.3). * ^{4:5} Deuteronomio 25.5-10

Rute opi'a Obede oikuavā'iague

¹³ Ha'e gui Boaz ogueraa Rute gua'yxyrā. Hexeve joguereko ramo ixupe SENHOR ome'ẽ oguereko'i aguā. Ha'e rā oikuavā'i ava'i.

¹⁴ Ha'e ramo Noemi pe kunhague ikuai va'e aipoe'i:

— SENHOR toiko ima'endu'a porāmby, mba'eta kova'e ára nome'ẽ e'ŷi neremiarirō neptyvðarā. Tove ha'e va'e rery re ta'ima'endu'aa pavē Israel kuery ikuiaia rupi.

¹⁵ Ha'e va'e ma nembopy'a porā ju 'rā nderekove pukukue re, ha'e nembopy'a porā 'rā neguaimi'i ma jave teī, mba'eta ndepi'a ra'yxykue nderayvu va'e oikuavā'i ma. Ha'e va'e kunha ma sete ndepi'a kuery oiko 'rā va'ekue gui ovareve va'e ndevy — he'i.

¹⁶ Ha'e ramo guamiarirō ava'i Noemi ojopy vy omoĩ o'u áry, hexe opena oikovy guive.

¹⁷ Hoo katy'i rupi ikuai va'e omboery okuapy.

— Oiko ma peteī ava'i Noemi remiarirō — he'i vy omboery Obede. Ha'e va'e ma Jessé ru, ha'e Jessé ma Davi ru raka'e.

¹⁸ Po rami ma Perez ramymino kuery rery: Perez ra'y ma Hezrom,

¹⁹ Hezrom ra'y ma Rāo, Rāo ra'y ma Aminadabe,

²⁰ Aminadabe ra'y ma Naassom, Naassom ra'y ma Salmom,

²¹ Salmom ra'y ma Boaz, Boaz ra'y ma Obede,

²² Obede ra'y ma Jessé, ha'e rā Jessé ra'y ma Davi.

Jypygua kuaxia Samuel 'epyre oĩa Jypygua kuaxia Samuel 'epyre oĩa

Kova'e kuaxia para re oĩ Samuel ha'e huvixa Saul rekoke. Samuel ma Nhanderuete renonde profeta oiko, ha'e joguerekaoa opa vygua. Saul ma Israel pygua huvixave jypy'i oĩ va'ekue. Saul oĩ jave Davi oiko avi, Saul rekoria Israel kuery ruvixa oĩ va'era.

Heta va'e kuery ae ojerure okuapy raka'e nguvixaverã omoña aguã re. Ha'e rami teĩ Samuel nomoõxei ranhe. Ha'e vy ixupe Nhanderuete aipoe'i: "Ha'e kuery oipota ramo emoõ" he'i ramo mae omoõ Saul. Huvixa Saul ma jypy onhe'ẽ rendu Nhanderuete, ha'e rã araka'eve rã ojepe'a onhe'ẽ rendua gui, ha'e ae oikuaa rami rive oiko vy. Nhanderuete pe mymba ome'ẽ teĩ ixupe Samuel aipoe'i: "Mba'emo nhame'ëa gui ma ha'eveve nhanhe'ẽ rendu. Vexa'i kyrakue nhame'ëa gui ha'eveve ojapo uka va'e jajapo. ... Ha'e gui Senhor ayvu reja rire ha'e voi ndereja, huvixa nereïvei aguã", he'i (15.22b, 23b). Ha'e ramo Saul oiko vai, Senhor ndoguerovy'avei rã. Nhanderuete nanhanhe'ẽ rendui ramo ou 'rã jajexavai aguã.

Saul oĩ teri reve hekoria Nhanderuete oiporavo Davi. Ha'e va'e ma kunumi va'e, guymba vexa'i kuery openaa rupi oiko. Ha'e rami teĩ Nhanderuete po'akaa rupi ojuka raka'e gigante Golias ita momboa py rive. Aipoe'i: "Ndee ma kyxe reve reju xerovai, hu'y guaxu ha'e hu'y jokoa reve. Ha'e rã xee ma nderovai aju Senhor ixondaro reta va'e rery rupi. ... Apy heta va'e kuery ikuai va'e ha'e javi oexa 'rã Senhor jogueraa jepea kyxe py e'ŷ, hu'y guaxu py e'ŷ guive. Mba'eta pendere opu'ã va'e ma Senhor ae. Ha'e ae 'rã penemboaxapa orepo py", (17.45a, 47) he'i vy ojuka.

Elcana ha'e mokoõ ta'yxy rekoke oĩa

¹ Oiko peteĩ ava Ramataim-Zofim guigua, Efraim yvy'ã reia katyguia, Elcana hery va'e. Ha'e va'e ma Jeroão ra'y, Jeroão ma Eliú ra'y, Eliú ma Toú ra'y, Toú ma Zufe ra'y. Efraim regua meme ikuai.

² Ha'e va'e ma ta'yxy mokoõ va'e. Peteĩ ma Ana, amboae ma Penina. Penina ma imemby va'e, ha'e rã Ana ma imemby va'e'ŷ.

³ Ha'e va'e ava ma'metõa nhavõ guekoia gui oo 'rã Siló tetã katy, omboetea rupi mba'emo ome'ẽ aguã SENHOR ixondaro reta va'e pe. Ha'e py oiko avi sacerdote Eli ta'y mokoõve Hofni ha'e Finéias reve. SENHOR pegua sacerdote meme ikuai.

⁴ Elcana ma SENHOR pe mba'emo omboaxa va'e nhavõ gui mba'emo ome'ẽ avi 'rã gua'yxy Penina pe, ha'e gua'y ha'e guajy kuery ha'e javi pe.*

⁵ Ha'e rã gua'yxy Ana pe ma hetave 'rã ome'ẽ oayvuve vy, SENHOR nomomemby ukai teĩ.

⁶ Ta'yxy mboae omoangeko reia rupi tema oguerekao, SENHOR nomomemby ukai ramo.

⁷ Ha'e rami ae tema oiko ma'metõa nhavõ. SENHOR pegua oo katy Ana oo nhavõ ta'yxy mboae omomboriaua rupi tema ijayvu. Ha'e ramo ojae'o oiny vy ndokarui.

⁸ Ha'e rami rã ime Elcana aipoe'i ixupe:

— Ana, mba'e re tu rejae'o? Mba'e re tu nderekarui ri? Mba'e re tu ndepy'a py ndeporiau reiny? Peteĩ nhiruĩ meme ndepi'a'râgue py xee ndereve aikoa ha'eveve e'ŷ ri ty'y? — he'i.

Ana ojerure vy onhemboayvuague

⁹ Ha'e gui Siló py ha'e kuery okaru ha'e oy'u jave oĩ avi sacerdote Eli. Ha'e ma peteĩ tenda py oguapy oiny SENHOR pegua oo yta yvýry.

¹⁰ Ha'e va'e rire Ana opu'ã vy onhe'ẽ py nda'evei etea oendu reve ojerure ho'amy SENHOR pe, ojae'o vaipa guive.

* ^{1:4} Ha'e kuery reko rami vy SENHOR pe tembi'u omboaxa va'e amongue regua gui ha'eve 'rã ha'e kuery ae ho'u aguã, ngoo pygua kuery ha'e javi reve (Deuterônômio 12.17-18, 16.13-17).

¹¹ Ha'e vy onhemboayvu reve aipoe'i:

— SENHOR nexondaro reta va'e, xapy'a rei xee nerembiguai ajexavaia re rema'ẽ vy xere nema'endu'a ri ramo, xapy'a rei xee nerembiguai re nema'endu'a vy peteĩ xepi'arã reme'ẽ ri ramo ma ndevy ju SENHOR amboaxa 'rã oikoa pukukue re ndevy guarã anho oiko aguã, ha'e peteigueve hi'a ndojayaai 'rã guive kyxe py — he'i.[†]

¹² SENHOR renonde onhembo'ea py oĩ are ramo Eli oma'ẽ oiny ijuru omyĩa re.

¹³ Mba'eta Ana ma opy'a py rive'i ijayvu. Hembe omyĩ va'eri nda'ijayvuẽi. Ha'e ramo Eli "Oka'u rai po" he'i vy

¹⁴ aipoe'i ixupe:

— Raka'e peve 'rã tu reka'u rei reiny? Ey'uve eme vinho! — he'i.

¹⁵ Ha'e rami teĩ Ana ombovai:

— Any, xeruvixa! Xee ma kunha xenhe'ẽ py ajexavai rei va'e. Xee nday'ui ri vinho, neĩ iro va'e. Ha'e rami 'rãgue py SENHOR renonde aju xenhe'ẽ py ajexavaia rami anhemombe'u aguã.

¹⁶ Ha'e nunga rupi xee nerembiguai pe "Nhe'ẽ vai rajy" 're eme. Mba'eta xeporiaua ha'e ajexavaia rima aroayvu ainy aÿ — he'i.

¹⁷ Ha'e rami rã Eli ombovai:

— Tereo porã'i ha'vy. Tove Israel kuery ruete tojapo rejerureague — he'i.

¹⁸ Ha'e rã kunha va'e ju

— Xee nerembiguai taxejou vai eme — he'i. Ha'e rami ijayvu ma vy kunha va'e oo ju tape rupi. Okaru jevy rire iporiaua noïvei hova re.

Samuel itui'i rire Nhanderuete peguarã omboaxaque

¹⁹ Ha'e gui ko'ẽ rai ramove ha'e kuery ovy vy SENHOR renonde omboete okuapy. Ha'e rami vy ojevypa vy ngoo py ae ovaẽ Ramá tetã py. Ha'e gui gua'yxy Ana reve Elcana joguerekju. Ha'e ramo hexe SENHOR ima'endu'a ramo

²⁰ oguerekoi'i peteĩ kyrĩ va'e. Hi'ára ovaẽ ramo oikuavã'i opi'a'i. Ha'e va'e ma omboery Samuel,

— SENHOR pe ajerureague ae oiko — he'i vy.

²¹ Ha'e gui ime Elcana ma ngoo pygua kuery ha'e javi reve oje'oi SENHOR pe mba'emo ma'etýa nhavõ ome'ea rami ome'ẽ ha'e onhemboayvuague ojapopa aguã.

²² Ha'e rã Ana ma ndooi. Ha'e vy ome pe aipoe'i:

— Ava'i nokambuvei jave ma xee araa 'rã aexa uka SENHOR pe, ha'e rã ha'e py ae oiko aguã.

²³ Ime Elcana ombovai:

— Eiko ha'vy ndevy ha'evea rami. Eropyta okambu teria ja. Ha'e rami vy eiko SENHOR ijayvuague ojapopa aguã rami — he'i. Ha'e ramo ta'yxy opyta vy ombotuvixa kyrĩ va'e okã re, okambu teria ja.

²⁴ Nokambuvei ma jave mae ma ogueraa. Peteĩ vaka ra'y mboapy ma'etý va'e reve ogueraa avi, peteĩ ajaka trigo ku'ikue ha'e peteĩ vinho ryru. Ha'e rami vy SENHOR pegua opy oexa uka Siló py, ava'i va'e kyrĩ'i ete teri reve.

²⁵ Ha'e rami vy vaka ra'y ojuka ukapa ma vy opi'a'i ogueraa sacerdote Eli oĩa py.

²⁶ Ha'e vy ixupe ixy aipoe'i:

— Aÿ ma xeruvixa, anhetẽ ete nderekove rupi aura vy aipoa'e: Xee ma kunha apy ndereve aĩ va'ekue, SENHOR renonde anhembo'e ha'amyã py.

²⁷ SENHOR pe kova'e ava'i re ae ajerure ramo ojapo ma ajerureague.

²⁸ Ha'e nunga rupi aru oikoa pukukue re SENHOR peguarã amboaxa aguã, SENHOR pe ajerure rire — he'i. Ha'e ramo omboete SENHOR ha'e py.

† 1:11 SENHOR pe opi'a omboaxa aguã re Ana ijayvu Números 6.1-21 py oĩa rami. Ha'e rami ae avi oiko Sansão (Juízes 13.2-5) ha'e Paulo (Atos 18.18).

- ¹ Ha'e rami vy Ana onhembo'e vy aipoe'i:
 — Xepy'a py arov'y'a SENHOR,
 xembaraeetevea aendu avi SENHOR re vy.
 Xejuru py ma xerory xerovaigua kuery gui,
 ndee xereraa jepea re avy'a vy.
- ² SENHOR rami iky'a e'ŷ va'e ndoikoi,
 ndee ramigua amboae ndoikoi vy.
 Neî peteîve'i py ndoikoi itaova ndee Oreruete rami guarâ.
- ³ Pemboeteve eme ayvu pejejou porâ reia rupigua,
 pendejuru gui toë eme nhemboyvate reia rupigua.
 Mba'eta SENHOR Nhanderuete anho hi'arandua rupi oiko va'e.
 Jaikoa ha'e javi re ha'e oikuua pota 'râ mba'emo opejaa py rami.
- ⁴ Ha'e rami vy omopẽmba 'râ imbaraete va'e kuery rapa,
 ha'e râ ikangykue'i va'ekue ma omombaraete 'râ.
- ⁵ Karuai oendu e'ŷ va'ekue ma aŷ escravo-râ onhemingo uka 'râ mbojape re rive,
 ha'e râ okaruxe reia rupi ikuai va'ekue ma ndojexavai reivei ma 'râ karuai gui.
 Na'imembyi ae va'ekue voi sete kyrî va'e oguereko,
 ha'e râ imemby reta va'ekue ma na'imbaraetevei ma 'râ.
- ⁶ SENHOR ae ma tekove pe'aa ha'e tekove me'ëa oiko.
 Yvykua katy nhomboguejy, ha'e jogueru jevy kuaa va'e.
- ⁷ SENHOR ma nhomomboriau kuaa, ha'e nhomboyv'a jevy kuaa va'e,
 nhomo'yvî'i kuaa, ha'e nhomboyvate jevy kuaa va'e.
- ⁸ Ha'e omopu'â 'râ iporiaukue'i yvy ku'i ituiague gui,
 ytyaty ikuaiia gui omboyvate 'râ iporiaukue'i va'e,
 yvatekueve va'e mbyte ju 'râ omboguapy,
 ojapo 'râ ipo'akapa va'e renda áry oguapy aguã rami.
 Mba'eta SENHOR gui vy ae yvy yta itui va'e oï atâ,
 ha'e va'e áry omoï atâ yvy ha'e javi.
- ⁹ Ha'e opena 'râ ojeupe guarâ oiky'a'o va'ekue re opyrõa rupi,
 ha'e râ heko vai va'e kuery ma omokyririmbâ 'râ pytû manoa oïa py.
 Mba'eta avakue ma ombaraetea rupi rive nda'ipo'akai 'râ.
- ¹⁰ SENHOR re opu'âa rupi ikuai va'e ma omomba 'râ,
 ha'e kuery rovai hyapu 'râ yva gui.
 SENHOR nhombopaga 'râ yvy apy rupi voi,
 ha'e râ ojeupegua huvixa ma omombaraete 'râ,
 ombopo'aka 'râ guembiporavo — he'i.
- ¹¹ Ha'e gui Elcana ojevy ju Ramá py ngoo oïa py. Ha'e râ ava'i ma sacerdote Eli renonde
 rupi mba'emo ojapo oikovy SENHOR pe.

Eli ra'y kuery mba'emo vai ojapo jeipiague

- ¹² Eli ra'y kuery ma nhe'ë vai ra'y ete ikuai, nomboetei guive SENHOR.
- ¹³ Mba'eta ha'e jave ma po rami 'râ sacerdote kuery ojapo heta va'e kuery re. Amongue
 mba'emo ome'ë nhavõ ou 'râ peteî sacerdote rembiguai kunumi va'e xo'o ombojy teria
 py, opo py kuxa rakua oguereko reve,
- ¹⁴ ha'e vy omopo'ë 'râ oja ferro guigua py, e'ŷ vy oja py, oja guaxu py, e'ŷ vy hy'a py mba'e,
 ha'e gui kuxa rakua py oguenoë va'e rei sacerdote kuery ogueraa 'râ ojeupe guarâ. Ha'e
 rami ae tema 'râ ojapo Israel kuery ha'e py Siló py oo va'e nhavõ re.
- ¹⁵ Ikyrakue oapy e'ŷ mbove ma voi sacerdote rembiguai kunumi va'e ou vy aipoe'i 'râ ava
 oapy ta va'e pe: "Upe va'e xo'o eme'ë sacerdote kuery pe oexy aguã, mba'eta ndepo gui
 ndojopyi 'râ xo'o jykue, ipyrygua anho", he'i 'râ.

¹⁶ Ha'e gui xapy'a rei xo'o me'ëa ombovai vy "Tove ikyrakue ranhe taapy, ha'e rire ma rejopyxeia rami ejopy", he'i ramo ma aipoe'i 'rā: "Any, eme'ë xevy aÿ ma voi. Ha'e rami e'ÿ rā aipe'apa nhea'ã 'rā", he'i 'rā.

¹⁷ Ha'e rami py ha'e va'e kunumigue opa mba'e py ojejavvy SENHOR renonde, ixupe mba'emo ome'ëmby nombovarei vy.

Samuel kyrī jave guare

¹⁸ Ha'e gui Samuel ma kyrī reve ma voi mba'emo ojapo oikovy SENHOR renonde, manto sacerdote pegua ipereri'i va'e py onhemonde guive.

¹⁹ Ixy ma ma'etÿa nhavō ao puku ruxă'i va'e ojapo vy ixupe ogueru 'rā ome reve, ma'etÿa nhavō mba'emo ome'ëaty rami ome'ë javé.

²⁰ Ha'e ramo Eli ogueroayvu porā 'rā Elcana ha'e ta'yxy. Ha'e vy aipoe'i 'rā:
— Tove SENHOR tome'ëve ju kova'e kunha pi'arā, SENHOR pe opi'a omboaxa va'ekue rekovia — he'i. Ha'e ramo ha'e kuery ojevy ju 'rā guekoा katy.

²¹ Ha'e rā Ana re SENHOR opena porā ramo oguerekō raka'e mboapy avakue ha'e mokoī kunha. Ha'e gui kunumi va'e Samuel ma tujave ovvy SENHOR renonde.

Gua'y kuery pe Eli ijayvuague

²² Ha'e gui Eli tuja'i ete reve oendu omombe'ua rā Israel kuery ha'e javi re ta'y kuery ojapo vaia, mba'eta nhogueronheno 'rā kunhague oguy nhemboaty oïaty rokē rupi ombo'epo va'e kuery reve.

²³ Ha'e rami vy gua'y kuery pe aipoe'i:

— Mba'e re tu ha'e nunga pejapo? Mba'eta aendu riae tema heta va'e kuery omombe'u rā pendeko vaia.

²⁴ Ha'e rami e'ÿ ta'vy xera'y kuery, peiko porā e'ÿa ae tema aendu. SENHOR pegua kuery ojejavypa aguā rami pejapo.

²⁵ Xapy'a rei peteñ ava oírū rovai ri ojejavvy ramo Nhanderuete oikuaa pota 'rā mokoïve re. Ha'e rā SENHOR rovai ri ojejavvy ramo ma mava'e 'rā tu oiko hepyarā? — he'i. Ha'e rami tuu ijayvu teñ ha'e kuery noendu potai, SENHOR ojukaxe ae ramo.

²⁶ Ha'e rā kunumi va'e Samuel ma tujave ha'e ijyvateve ovvy, SENHOR ha'e avakue ojou poräve tema aguā rami oiko.

Eli ro pygua kuery rovai profeta ijayvuague

²⁷ Ha'e gui Eli oïa py ou peteñ ava Nhanderuete remimbo'e. Ha'e vy aipoe'i ixupe:
— Po rami SENHOR ijayvu: "Neramoñ ro pygua kuery pe xee ajekuaa uka va'ekue Egito vyv re teri Israel kuery ikuai jave, Faraó rekoaa py. Anhetē e'ÿ ri ty'y?"

²⁸ Ha'e rami vy Israel kuery pavë regua mbyte gui xee aiporavo ae ma sacerdote xejeupe guarā, xevygua altar oïa py oo vy heakuā porā va'e oapy aguā, ha'e xerenonde manto sacerdote pegua py onhemonde reve ikuai aguā. Neramoñ kuery peguarā ame'ëmba va'ekue mba'emo Israel kuery oapy va'ekue ha'e javi.

²⁹ Mba'e re tu ha'vy pepyrõmba rei ri xevy pe mymba ha'e mba'emo ra'yigue ome'ëmby re, xeayvuague rami vy xevygua oo py ome'ëa teñ? Ha'e ndee, mba'et'a re tu xegui remboeteve ndera'y kuery rive? Mba'eta ha'e kuery reve penhemongyra rivepa ma pekuapy xevygua Israel kuery ome'ë va'e iporägueve re."

³⁰ Ha'e nunga rupi SENHOR Israel kuery ruete aipoe'i: "Anhetē xee aipoa'e va'ekue ndero pygua ha'e neramoñ ro pygua kuery raka'e rā peve guarā amoingo aguā", he'i va'ekue. Ha'e rami teñ aÿ SENHOR aipoe'i: "Ha'e nunga toïve eme, mba'eta amboete uka 'rā xemboetea kuery, ha'e rā xerayvua rupi e'ÿ ikuai va'e ma ojou vaia 'rā.

³¹ Ne'exa, ovaë ouvy ndejyva ajaya aguā ára, ha'e neramoñ jyva voi, ndero py tujakueve ndoikovei aguā rami.*

³² Ndee ae rex'a 'rā jexavaia Nhanderuete pegua opy rupi oiko rā. Israel kuery re mba'emo porā oikoa ramive ndero pygua kuery va'e regua ma ndoikoi 'rā tuja va'e.

* 2:31 "Ndejyva ajaya 'rā" he'ia ma ta'y kuery ojukapa aguā re ijayvu vy. Ha'e rami ae ojapo (1 Samuel 4.11-18).

³³ Xapy'a rei neramymino kuery va'e regua amongue ava xevygua altar oikoa gui ndaipe'ai 'rā va'eri nderexay py ambogueupa 'rā nderexa, nenhe'ē py ndeporiaua rendu va'e gui. Ha'e rami vy neramymino kuery, ndero pygua kuery ha'e javi ma kunumi rei teri reve teī omanomba 'rā.

³⁴ Ha'e gui ndera'y kuery mokoī Hofni ha'e Finéias re mba'emo oiko 'rā reikuua aguā, mba'eta peteī ára pyve omano 'rā mokoīve.

³⁵ Ha'e gui ma xejeupe guarā amoingo 'rā peteī sacerdote ojerovia pyrā. Ha'e va'e ma oiko 'rā xepy'a re oī va'e ha'e javi rami, anhembopy'aa rami meme. Hoorā ajapo 'rā oī atā aguā rami, ha'e oiko riae 'rā xerembiporavo renonde.

³⁶ Ha'e va'e renonde ou 'rā okuapy ndero gui hembyre va'ekue ha'e javi, guenapy'ā re oī 'rā peteī'i hatā'i va'e prata guigua ojopy aguā rive, ha'e peteī jururā'i mbojape. Ha'e vy aipoe'i 'rā: 'Ajerure ndevy, sacerdote kuery ombo'eapoa rupi xee voi xemoī aguā re, mbojape ra'ykue'i ha'u va'erā ajou aguā', he'i 'rā okuapy."

3

Ikery py SENHOR Samuel oenoīague

¹ Kunumi va'e Samuel mba'emo ojapo oikovy SENHOR pe, Eli oexaa rupi. Ha'e va'e jave ma SENHOR oayvu nombou retai, mba'emo ndoexa uka riae guive.

² Ha'e gui peteī pytū ma sacerdote Eli onheno oupy onhenoaty rupi. Hexa pytūmba rei ma guive vy ndoexavei rai'i ma.

³ Samuel voi onheno ma avi oupy SENHOR ayvu ryru oīa oo py, Nhanderuete pegua tataendy oī va'e nombogueai teri jave.

⁴ Ha'e gui ma SENHOR oenoī kunumi va'e:

— Samuel, Samuel!

Ha'e ramo ombovai:

— Apy ma aī! — he'i.

⁵ Ha'e rami vy onha ov y Eli ituia py. Ha'e vy aipoe'i:

— Apy ma ha'ā, ndee xerenoī ramo.

Ha'e rā aipoe'i:

— Any, xee e'ŷ ri roenoī xera'y. Tereo ju enheno — he'i ramo oo ju onheno.

⁶ SENHOR teīgue ju oenoī:

— Samuel! — he'i.

Ha'e ramo ov y jevy vy Eli ituia py oo vy aipoe'i:

— Apy ma ha'ā, ndee xerenoī ramo.

Ha'e rā aipoe'i:

— Any, xee e'ŷ ri roenoī xera'y. Tereo enheno ju — he'i.

⁷ Mba'eta Samuel ndoikuuai teri SENHOR ae ria, ixupe SENHOR oayvu nomboui teri ramo.

⁸ Ha'e gui mboapykue ma SENHOR oenoī Samuel. Ha'e rā ov y oo ju Eli-a py. Ha'e vy aipoe'i:

— Apy ma ha'ā, ndee xerenoī ramo.

Ha'e ramo mae ma Eli oikuaa SENHOR ae ri kunumi va'e oenoīa.

⁹ Ha'e rami vy aipoe'i Samuel pe:

— Tereo enheno ju. Ha'e gui xapy'a rei nerenoīa ju rā aipo're: "Ndeayvu ke SENHOR, xee nerembiguai aendu ainy ndeayvu", 're 'rā — he'i. Ha'e ramo Samuel oo ju ngupa py onheno.

¹⁰ Ha'e gui SENHOR ou vy hi'aī ha'e py. Ha'e rami vy oenoī ypyague rami ae ju oenoī:

— Samuel, Samuel! — he'i ramove ombovai:

— Ndeayvu ke, mba'eta xee nerembiguai aendu ma ainy — he'i.

¹¹ Ha'e gui SENHOR aipoe'i Samuel pe:

— Ne'ixa, peteī mba'e ajapo ta Israel kuery re, ha'e va'e oendu va'e rei ijapyxa nhe'ēmba 'rā nhemondyi gui.

¹² Mba'eta ha'e va'e ára Eli rovai amoingo 'rā hoo pygua kuery rekora xeayvuague ha'e javi. Amboypy vy ma ajapopa 'rā.

¹³ Mba'eta ixupe aipoa'e ae ma va'ekue hoo pygua kuery ambopaga aguā raka'e rā peve, ha'e kuery ojejavya ha'e voi oikuua porā rire. Ta'y kuery opa marā rei ikuai va'eri tuu ndojokoi.

¹⁴ Ha'e nunga rupi aura Eli ro pygua kuery ojeavyague ndoja'o'i ai ae aguā re, mymba e'ŷ vy mba'emo ra'yīgue ha'e kuery ome'ẽ tei.

Eli pe Samuel oexa va'ekue omombe'uague

¹⁵ Ko'ēmba peve Samuel onheno oupy. Ha'e vy ma oipe'a SENHOR pegua oo rokē. Ha'e rami tei okyje teri Eli pe oexa va'ekue omombe'u aguā.

¹⁶ Ha'e gui Eli oenoī Samuel. Ha'e vy aipoe'i:

— Xera'y Samuel!

Ombovai:

— Apy ma ha'ā! — he'i.

¹⁷ Ha'e ramo aipoe'i:

— Mba'e he'i tu SENHOR ijayvu vy? Ajerure renhom i e'ŷ aguā. Tove Nhanderuete ha'e oipotaa rami ete tojapo ndevy, xapy'a rei ijayvuague ha'e javi remombe'u porāmba e'ŷ rā.

¹⁸ Ha'e ramo Samuel omombe'upa, mba'eve py ndoikuua uka e'ŷi. Ha'e rami rā Eli aipoe'i:

— SENHOR ae rima ra'e. Ha'e oipota va'e ae tojapo — he'i.

¹⁹ Ha'e gui Samuel okakuaave tema ov. Hexeve SENHOR oiko vy peteīve henda py ndoejai ijayvuague oaxa rive aguā rami.

²⁰ Ha'e rami rā Israel kuery ha'e javi, Dā guive Berseba peve ikuai va'e oikuaapa okuapy SENHOR pegua profeta Samuel oikoa.

²¹ Siló py SENHOR ojekua uka ae tema Samuel pe, oayvu ombou guive.

4

Israel kuery re filisteu kuery ipo'akaague

¹ Ha'e rami rā Samuel ayvu oendupaa Israel kuery ikuiaia rupi.

Ha'e gui ma Israel kuery oje'oipa filisteu kuery rovai opu'ā aguā. Ha'e rami vy Ebenézer tekaoa katy'i ijaty okuapy. Ha'e rā filisteu kuery ma Afeca katy'i ijaty okuapy.

² Filisteu kuery ma hyxy porāmba okuapy, Israel kuery reve joguero'a aguā oje'oi. Ha'e gui joguero'a okuapya py filisteu kuery omoingo axypa Israel kuery. Ha'e vy nhuūndy reia rupi ojuka okuapy quattro mil avakue Israel regua.

³ Ha'e gui Israel kuery ijaty okuapyague py ojevypa ramo nhomongeta va'ety kuery aipoe'i:

— Mba'e re nda'u SENHOR nhanemoingo axy uka ange filisteu kuery renonde? Siló tetā gui jaru 'rāgue SENHOR guexeve guarā ojapo va'ekue ryru, nhanembyte ou vy nhanderovaigua kuery po gui nhanderepy aguā — he'i.

⁴ Ha'e ramo heta va'e kuery ogueru ruka SENHOR ixondaro reta va'e anjo ipepo va'e ra'angaa ikuai va'e mbyte oī va'e ayvu ryru. Nhanderuete guexeve guarā ojapo va'ekue ryru oguerua py ma Eli ra'y kuery mokoīve ikuai, Hofni ha'e Finéias.

Hyru oipe'aa heravy, ha'e Hofni ha'e Finéias ojukaa okuapyague

⁵ Ha'e gui Israel kuery ijaty okuapya py SENHOR ayvu ryru oguerua jave ma ha'e kuery ha'e javi onhendu atā xapy'a okuapy. Ha'e ramo vyv jave rupi rai oendua.

⁶ Ha'e kuery ov'y'a reve ojapukai atāa filisteu kuery oendu vy aipoe'i okuapy:

— Mba'exa tu ov'y'a ete nhendu va'e hebreu kuery ijatya py? — he'i. Ha'e vy mae oikuua SENHOR ayvu ryru ijatya py oguerua maa.

⁷ Ha'e rami vy filisteu kuery okyjepa aipoe'i okuapy.

— Nhanderuete ramigua kuery ou ra'e ha'e kuery ijaty okuapyague py — he'i. — Nda'evei ete nhandevy! Ha'e nunga oiko va'e'ŷ teri aŷ peve.

⁸ Nda'evei ete nhandevy! Mava'e tu nhandereraa jepe 'rā Nhanderuete ramigua kuery ipo'akapa va'e gui? Mba'eta ha'e va'e Nhanderuete ramigua kuery ae ma Egito pygua kuery opa marāgua mba'eaxy py omoingo axy va'ekue teko a e'ŷa re ikuaria py.

⁹ Filisteu kuery, penembaraete ke ha'vy! Avakue ipy'a guaxukueve peiko, hebreu kuery pegua escravo nhandekuai e'ŷ aguā, ha'e kuery nhande-escravo ikuaiague rami e'ŷ! Avakue ipy'a guaxukueve nhandekuai reve jaje'oi joe nhapu'ā aguā! — he'i okuapy.

¹⁰ Ha'e rami vy filisteu kuery joe opu'ā okuapy. Ha'e vy ombojexavai Israel kuery ramo peteī-teī onhamba ngoo katy. Israel kuery regua ikuai axypa, trinta mil avakue yvy rupigua ojukaa ramo.

¹¹ Oipe'aa avi heravy Nhanderuete ayvu ryru. Ojukaa avi Eli ra'y mokoīve, Hofni ha'e Finéias.

Eli omanoague

¹² Ha'e va'e árave peteī ava Benjamim regua hyxy okuapya mbyte gui onha ov y ovaē Siló tetā py. Oao xorokue reve ovaē, yvy oakā re omombo reve.

¹³ Ha'e va'e ovaē jave Eli oguapy oiny guenda py, tape yvýry. Oma'ē oiny, Nhanderuete ayvu ryru re nda'evei vy ipy'a ryryipa rei guive. Ava va'e tetā py ovaē vy omombe'upa ma rire tetā ha'e javi rupi hevovo rei xapy'a okuapy haxē vy.

¹⁴ Haxē rei va'e Eli oendu vy oporandu:

— Mba'e nunga tevovo tu pova'e? — he'i ramo ava va'e ojapurave ouvy reve omombe'u Eli pe.

¹⁵ Eli ma noventa e oito ma'etŷa oguereko ha'e va'e jave py. Ndoexavei ae ma, oexa aguā nda'evei ae va'e vy.

¹⁶ Ha'e gui ava va'e aipoe'i Eli pe:

— Xee ma hyxy va'e gui aē vy ange'i anha ajuvy kuri va'ekue — he'i.

Eli oporandu:

— Xera'y, mba'e nunga tu oiko ra'e?

¹⁷ Imombe'ua ombovai:

— Filisteu renonde gui Israel kuery onhamba kuri. Nhande kuery mbyte rupi oiko nhandejukapaa. Nderā'y mokoīve, Hofni ha'e Finéias ojukaa avi. Nhanderuete ayvu ryru voi oipe'aa heravy — he'i.

¹⁸ Nhanderuete ayvu ryru omombe'u ramove Eli guakykue katy ho'a guenda okē katy'i oī va'e gui. Oaju'y omopē vy omano vyvoi, tuja'i ete ha'e ipoyi guive vy. Quarenta ma'etŷ re ma Israel kuery re opena va'ekue.

¹⁹ Ha'e gui ma ta'y Finéias ra'yxy omemby oikuavā rai'i va'e oendu avi omombe'u rā Nhanderuete ayvu ryru oipe'a heravyague ha'e ime ru ha'e ime omanoague. Ha'e nunga oendu vy onhea'ā xapy'a vy kyrī'i va'e oikuavā'i oiny, omemby raxyra oendu vy.

²⁰ Kunha va'e omano ta ramo kunhague ipytyvōa kuery aipoe'i okuapy:

— Ekyje eme, reikuavā'i ae ma ava'i — he'i.

Ha'e rami teī kunha va'e nombovai, ha'e rami ijayvua re ndojapyxaka potai.

²¹ Va'eri opa'i omboery Icabô,

— Israel kuery pegua hexakāmba va'ekue okanhy ra'e — he'i vy.

Ha'e rami ijayvu Nhanderuete ayvu ryru oipe'aa heravyague re, ime ru ha'e ime omanoague re guive.*

²² Aipoe'ive ju:

— Israel kuery pegua hexakāmba va'ekue okanhy ra'e, Nhanderuete ayvu ryru oipe'aa rā.

Dagom pegua opy hyru oījave guare

¹ Ha'e gui Nhanderuete ayvu ryru ma filisteu kuery ogueraa Ebenézer teko a, ha'e Asdode tetā py oguerovaē.

* 4:21 Tery Icabô ma "Okanhy ma hexakā va'e" 'ea.

² Ha'e py ma Nhanderuete ayvu ryru ogueraa vy Dagom ra'angaa oĩ oo py omoĩ, ta'angaa yvy'iry ae.

³ Ha'e gui ko'ẽ ramo aje'ive'i reve Asdode pygua kuery ovypa vy oma'ẽ rã Dagom ra'angaa ho'a ma oupy ra'e, ngova yvy rami itui SENHOR ayvu ryru renonde. Ha'e ramo ojopy vy hi'aigue py ju omopu'ã imo'amy.

⁴ Ko'ẽ jevy aje'ive'i reve ovypa ju vy oma'ẽ rã Dagom ra'angaa ho'a ju oupy ra'e, ngova yvy rami ae ju itui SENHOR ayvu ryru renonde. Dagom akã ha'e ipo jobaive ojaya ma ra'e inony okẽ renda áry. Hete mbytekue rive ma ouve.

⁵ Ha'e rami rire Dagom pegua sacerdote kuery ha'e ixupegua opy oike va'e rei ma ha'e va'e okẽ renda re nopyrõvei 'rã Asdode tetã py, aÿ peve.

⁶ Ha'e gui Asdode pygua kuery rovai SENHOR opo omoĩ vy omoingo axy vaipa. Ombojexavai vy omomba'eaxyapa tuguy rape mbopeupaa py, ha'e katy'i rupi ikuai va'e kuery guive.

⁷ Ha'e rami rã avakue Asdode pygua ha'e nunga oexa vy aipoe'i okuapy:

— Nda'eveei nhanderekoa py Israel kuery ruete ayvu ryru optya aguã. Mba'eta nhande'ary ma ipo ipoyi ete, nhande kuery ruete Dagom áry voi — he'i.

⁸ Ha'e rami vy ayvu reraarã omondouka guekoa py omboatypa aguã filisteu kuery ruvixa ikuai va'e ha'e javi. Ha'e vy ha'e kuery pe aipoe'i okuapy:

— Mba'e nda'u jajapo 'rã Israel kuery ruete ayvu ryru re?

Ombovai:

— Peraa ju Israel kuery ruete ayvu ryru Gate tetã py, ha'e gui tetã nhavõ rupi toguerenkoa — he'i ramo Gate tetã py ju ogueraa.

⁹ Ayvu ryru ogueraa ma rire ha'e va'e tetã rovai ju SENHOR po oĩ. Ha'e ramo nda'eveipa rei okuapy, mba'eta ha'e va'e tetã py voi omomba'eaxyapa yvyigueve ha'e yvatekueve voi. Ha'e kuery ha'e javi re oĩ tuguy rape mbopeupaarã.

¹⁰ Ha'e ramo Ecrom tetã py ju ogueraa Nhanderuete ayvu ryru. Tei ha'e py oguerovaẽ rã Ecrom pygua kuery ijayvu atã reve aipoe'i:

— Nhandea py ju oguerua ra'e Israel kuery ruete ayvu ryru. Nhande kuery ha'e javi ojukapaxe vy rima ogueru — he'i.

¹¹ Ha'e rami vy ayvu reraarã omondouka vy filisteu kuery ruvixa ikuai va'e omboaty ju aguã. Ha'e vy aipoe'i:

— Peraa uka ju apy gui Israel kuery ruete ayvu ryru, tojevy ju oĩague py ae, ore kuery ha'e javi orejukapa e'ý aguã — he'i. Mba'eta hetã ha'e javi rupi oiko manoa gui okyjepa rei va'e, ha'e py Nhanderuete po ombojexavai ete ramo.

¹² Mba'eta omano e'ý va'ekue re voi oĩ tuguy rape mbopeupaa. Ha'e ramo ha'e va'e tetã pygua kuery ojapukaia onhendu ov yva peve.

6

Filisteu kuery oyvy rovai katy hyru ogueraa ukaague

¹ Sete jaxy re SENHOR ayvu ryru oĩ filisteu kuery yvy re.

² Ha'e ramo ha'e kuery oenoimba sacerdote ha'e imba'ekuaa va'e kuery. Ha'e vy aipoe'i okuapy:

— Mba'e tu jajapo 'rã SENHOR ayvu ryru re? Pemombe'u marã rami vy pa oĩague katy ae rogueraa uka jevy aguã.

³ Ha'e kuery ombovai:

— Ha'e gui Israel kuery ruete ayvu ryru peraa ukaxe vy peraa uka eme hyru rive. Ha'e kuery ruete oĩ katy peraa uka avi 'rã nhanderekoo vaia rekovia peme'ẽ va'e. Ha'e vy 'rãe pekuera, ha'e peikuua mba'e re pa opo pende'ary gui ndoipe'ai teria — he'i.

⁴ Ha'e ramo oporanduve ju okuapy:

— Mba'e nunga 'rã tu orerekoo vaia rekovia rome'ẽ?

Ha'e kuery ombovai:

— Filisteu kuery yvatekueve mbovy pa ikuiaia rami vy peme'ẽ 'rã peteĩ nhiruĩ tuguy rape mbopeupaa ra'angaa ha'e peteĩ nhiruĩ anguja ra'angaa ouro guigua meme, mba'eta tekoaxy pende'áry ha'e yvatekueve ikuai va'e áry ou va'ekue ma peteĩ'i regua.

⁵ Pejapo ke pendekoaxy ra'angaa ha'e anguja ra'angaa guive Israel kuery ruete pemboete aguã, mba'eta anguja heta ikuai nhandeyvy jave rupi ombovaipa va'e. Xapy'a rei rã pende'áry gui oipe'a nho 'rã opo, penderuete ramigua ha'e pendeyvy ha'e javi áry gui guive.

⁶ Mba'eta mba'e re rã'vy peneakã ratã Faraó ha'e Egito pygua kuery ha'e javi inhakã ratãague rami? Mba'eta ha'e va'e minha oguereko axy rire omondoukapa raka'e, oeja ha'e kuery oje'oipa aguã.

⁷ Ha'e gui aÿ ma pejapo peteĩ karóxa ipyau va'e heraarã. Pejopy avi mokoĩ vaka ta'y'i va'e, canga hexe omoimby e'ÿ teri va'e, ha'e pemoĩ karóxa re. Ha'e rã ta'y'i ma peraa uka vy pemboty uka 'rã hoo py.

⁸ Ha'e vy mae ma SENHOR ayvu ryru peupi vy pemoĩ karóxa py. Ijyke re hyru mboae oĩ va'e py ma pemoĩ ouro gui mba'emo ra'angaa pejapo va'ekue, pendeko vaia rekovia peme'ẽ va'e. Ha'e gui ma tove too.

⁹ Pexa pota porã ke. Xapy'a rei Bete-Semes katy tape oo va'e rupi ri oo ramo jaikuua 'rã ha'e ae nhanemoingo axyare oikoa. Ha'e rã ha'e katy e'ÿ ri oo ramo jaikuua 'rã ipo e'ÿ ae nhanemoingo axyare oikoa, ha'e xapy'a-py'a py rive nhandere oiko va'e ae — he'i.

Bete-Semes py hyru ovaãague

¹⁰ Ha'e rami ae ha'e va'e avakue ojapo. Ha'e vy mokoĩ vaka ta'y'i va'e ogueraa vy omoĩ karóxa re. Ha'e rã ta'y'i ma omboty hoo py.

¹¹ Karóxa py omoĩ SENHOR ayvu ryru. Omoĩ avi hyru py anguja ra'angaa ouro guigua ha'e tuguy rape mbopeupaa ra'angaa guive.

¹² Ha'e gui ma vaka oguata oje'oviy Bete-Semes katy ma voi. Oguataa rupi haxẽ jogueravy va'eri ha'e va'e tape rupi ae tema oo, opia e'ÿ re oiporu kuaa katy neĩ oiporu kuaa e'ÿa katy. Hakykue rupi oje'oi filisteu yvatekueve, Bete-Semes tetã katy'i peve oo.

¹³ Ha'e va'e jave py ma Bete-Semes pygua kuery trigo omono'õ okuapy yvyugua rupi. Ha'e gui oma'ẽ-ma'ẽ vy oexa ayvu ryru oguerua oiny rã. Oexa vy ov'y'a pavẽ.

¹⁴ Karóxa ma Bete-Semes pygua Josué yvy peve oguerua. Ha'e py ae optyta peteĩ ita tuvixa va'e ituia py. Ha'e ramo karóxa regua yvyrape ikuai va'e omboipa vy omoendy. Tata ojapo va'e áry oapy okuapy vaka, SENHOR pe ome'ẽ vy.

¹⁵ Levita kuery ma SENHOR ayvu ryru omboguejy, ijyvýry hyru ouro gui ojapo pyre oĩ va'e voi. Ha'e rami vy ita tuvixa va'e áry ju omoĩ. Ha'e va'e árave Bete-Semes pygua avakue mba'emo ome'ẽ avi SENHOR pe, mymba oapy reve.

¹⁶ Ha'e nunga ha'e javi peteĩ nhiruĩ filisteu yvatekueve va'e oexa ma vy ojevypa ju Ecrom tetã katy ha'e va'e árave.

¹⁷ Ha'e gui tuguy rape mbopeupaa ra'angaa ouro guigua filisteu kuery gueko vaia rekovia SENHOR pe ogueru ruka va'ekue ma povae: Asdode tetã regua peteĩ, ha'e Gaza, Gate, Asquelom ha'e Ecrom tetã regua avi.

¹⁸ Anguja ra'angaa ouro guigua ha'e rami ae avi filisteu kuery guetã mbovy pa ikuiaia rami vy ogueru ruka, mba'eta tetã peteĩ nhiruĩ ikuai va'e ma yvatekueve peteĩ-teĩ openaa, ikorapa va'e ha'e ha'e katy'i tekoia ikuai va'e guive. Ha'e gui ita tuvixa va'e hi'áry SENHOR ayvu ryru omoãague va'e ma aÿ peve oime Bete-Semes pygua Josué mba'etygue py.

Quiriate-Jearim peve ayvu ryru ogueraa ague

¹⁹ Bete-Semes pygua avakue ayvu ryrupy katy oma'ẽ ramo SENHOR omomba'eaxypa. Ha'e kuery regua cinqüenta mil e setenta ojuka. Ha'e ramo heta va'e kuery ojae'opa okuapy ha'e kuery va'e regua SENHOR ojuka reta ramo.

²⁰ Ha'e rami vy Bete-Semes pygua kuery avakue aipoe'i okuapy:

— Mava'e nda'u ha'eve SENHOR renonde oĩ aguã? Mba'eta Nhanderuete ma iky'a e'ÿ va'e oiko. Mava'e kuery rekoia katy ju 'rã jaraa uka nhanderekaoa gui? — he'i.

²¹ Ha'e nunga rupi Quiriate-Jearim pygua kuery pe omondouka ayvu reraarā. Ha'e vy aipoe'i:

— Filisteu kuery ogueru ruka ju ma SENHOR ayvu ryru. Peju ha'vy, peraa peē kuerya py.

7

¹ Ha'e ramo Quiriate-Jearim pygua avakue ou vy SENHOR ayvu ryru ogueraa Abinadabe ro py, yvy'ā áry. Ha'e rami vy ta'y Eleazar omoī SENHOR ayvu ryru re opena aguā.

Ojeko rerova jevy okuapy aguā re Samuel ijayvuague

² Ha'e va'e ára guive SENHOR ayvu ryru optya Quiriate-Jearim py. Mbovy ára re rei e'ŷ oaxa oiny ha'e py, vinte ma'etŷ oaxapa peve. Ha'e nunga re Israel kuery ha'e javi ojae'o okuapy SENHOR renonde.

³ Ha'e rami rā Samuel ijayvu Israel ro pygua kuery ha'e javi pe. Ha'e vy aipoe'i:

— Pendepy'a ha'e javi py ri SENHOR pe pejevy vy peipe'a ha'vy penembyte gui Nhanderuete ramigua rive perekō va'e, Astarote ra'angaa ikuai va'e voi. Perekō katu pendepy'a SENHOR peguarā, ha'e ixupe anho peiko. Ha'e rami ri ramo pendereraa jepe 'rā filisteu kuery po gui — he'i.

⁴ Ha'e ramo Israel kuery ombyte gui oipe'a Baal ha'e Astarote ra'angaa oguereko va'ekue ha'e javi, ha'e SENHOR pe anho ju ikuai.

Filisteu kuery nda'ipo'akaveiague

⁵ Samuel aipoe'ive ju:

— Israel kuery ha'e javi tonhemboaty Mispa py. Ha'e rā xee ma SENHOR pe arhembo'e 'rā pendere — he'i.

⁶ Ha'e ramo Mispa py onhemboaty okuapy vy yy oguenoē vy SENHOR renonde onhoē, okaru e'ŷ re ikuai vy ha'e va'e ára. Ha'e py aipoe'i:

— Jajejavý SENHOR rovai — he'i okuapy. Israel kuery Mispa py ikuai va'e re ma Samuel ae opena.

⁷ Mispa py Israel kuery onhemboaty okuapya omombe'ua rā filisteu kuery oendu vy yvatekueve ikuai va'e reve ou Israel kuery rovai. Ha'e nunga Israel kuery oendu vy okyjepa rei okuapy filisteu kuery gui.

⁸ Ha'e rami vy Israel kuery aipoe'i okuapy Samuel pe:

— Epytu'u eme ta'vy SENHOR Nhanderuete pe orere rejapukaia gui, filisteu kuery po gui orerepy aguā — he'i.

⁹ Ha'e gui Samuel peteī vexa'i okambu teri va'e ogueraa vy ojuka, ha'e SENHOR pe ome'ē oapy reve. SENHOR pe Samuel ojapukai Israel kuery re. Ha'e ramo ombovai.

¹⁰ Samuel mymba ome'ē jave py filisteu kuery ovaē Israel kuery reve joguero'a aguā. Ha'e rami teī ha'e va'e ára SENHOR hyapu opororo ratā reve filisteu kuery áry rupi. Ha'e rami vy omongyjea py rive oitypa, Israel kuery renonde.

¹¹ Israel regua avakue Mispa gui oje'oi filisteu kuery rakykue. Ha'e rami vy oity Bete-Car katy'i yvy'ā guy oī va'e peve.

¹² Ha'e gui Samuel peteī ita ojopy vy omopu'ā Mispa ha'e Sem mbyte py. Ha'e va'e omboery Ebenézer. Po va'e ma "Apy peve SENHOR nhaneptyvō" he'ia.

¹³ Ha'e rami vy filisteu kuery oitypaa rire ndouvei Israel kuery yvy re, Samuel oikovea ja ha'e kuery rovai SENHOR po oī rā.

¹⁴ Ha'e gui tetā ikuai va'e re filisteu kuery ipo'akaague va'e ma Israel kuery po py ju omboaxapa, Ecrom guive Gate peve. Ha'e katy'i yvy itui va'e voi Israel kuery oipe'a filisteu kuery po gui. Amorreuu kuery voi ndajoguero'avei ranhe Israel kuery reve.

¹⁵ Samuel oikovea pukukue re opena Israel kuery re.

¹⁶ Ma'etŷa nhavō ojeapa 'rā ovy Betel, Gilgal ha'e Mispa tetā rupi. Ha'e va'e tekoa ha'e javi rupi oikuua pota Israel kuery re.

¹⁷ Ramá tetā py ojevy kuerei 'rā, ha'e py ae hoo oī ramo. Ha'e py voi Israel kuery re opena, ha'e peteī altar SENHOR peguarā ojapo avi ha'e py.

Nguvixaverā re Israel kuery ojerure okuapyague

- ¹ Samuel tuja'i ma vy gua'y kuery ju omoī Israel kuery re opena aguā.
- ² Ta'y ypy rery ma Joel, ha'e rire jevygua ma Abias. Ha'e kuery ma Berseba py opena.
- ³ Ha'e rami teī Samuel ra'y kuery ma nguu oikoague rami e'ŷ ikuai. Peráta re rive nda'eveive va'e vy mba'emo ome'ēa rā ojopy 'rā ha'eve e'ŷa rami joguereko aguā.
- ⁴ Ha'e ramo Israel regua nhomongeta va'ety kuery onhemboaty vy oupa okuapy Ramá py Samuel oĩa py.
- ⁵ Ha'e vy aipoe'i okuapy ixupe:
 - Ne'exa, ndee ndetuja'i, ha'e ndera'y kuery ma reikoague rami e'ŷ ikuai. Ha'e nunga rupi aŷ ejou peteī oreruvixaverā orere opena va'erā, yvy regua ha'e javi oguerekao rami — he'i.
 - ⁶ Ha'e rami ijayvu rā Samuel oendu vy ndojou porāi, “Ejou oreruvixaverā orere opena va'erā”, he'i ramo. Ha'e rami vy Samuel oporandu oiny SENHOR pe.
 - ⁷ Ha'e gui SENHOR aipoe'i Samuel pe:
 - Endu pota heta va'e kuery ijayvua ha'e ndevy ojerurea ha'e javi re, mba'eta ndee e'ŷ ndereja, ha'e rā xee anho ndaxepotai ha'e kuery re apena aguā.
 - ⁸ Ha'e kuery Egito yvy gui anoembajave ma voi rire aŷ peve ikuai tema ha'e rami. Mba'eta nguuete mboae pe ikuai vy xereja jepi okuapy. Ha'e rami ae ju ojapo ndere voi.
 - ⁹ Ha'e rami teī aŷ ma endu pota ha'e kuery ijayvua re. Ha'e rami avi ndeayvu atā 'rā ha'e kuery pe, emombe'u porāve marā rami pa huvixave oĩ va'e oguerekoo 'rāa — he'i.
 - ¹⁰ Ha'e ramo heta va'e kuery nguvixaverā re ojerure rire ha'e kuery pe Samuel omombe'upa SENHOR ijayvuague.
 - ¹¹ Ha'e vy aipoe'i:
 - Po rami ma huvixave oĩ va'e pendererekoo 'rā. Ha'e va'e ma pendera'y kuery oipe'a vy omomba'eapo 'rā karóxa py ha'e kavaju áry guarā, ha'e karóxa renonde onha va'erā.
 - ¹² Ha'e kuery va'e regua omoī 'rā mil re opena va'erā, ha'e'ŷ vy cinqüenta va'e re mba'e. Amboae kuery ma ombo'ety rupi 'rā omomba'eapo, mba'emo ra'yīgue omono'ōa py. Ha'e rā amboae kuery ju ma ojapo uka 'rā tembiporu joe opu'āa pyguarā, ha'e'ŷ vy karóxa reguarā.
 - ¹³ Penderajy kuery voi ogueraa 'rā heakuā porā va'e apoarā, tembi'u mbojyarā ha'e mbojape apoarā.
 - ¹⁴ Ojeupe ae oipe'a 'rā penemba'ety iporāvea, uvaty ha'e oliveira ty gui. Guembiguai kuery pe ju 'rā omboaxa.
 - ¹⁵ Mba'emo ra'yīgue ha'e uva pemono'ō va'ekue gui ojopy 'rā dízimo ojeupe ae, ojeupegua opena va'e ha'e guembiguai kuery pe omboaxapa aguā.
 - ¹⁶ Ogueraa avi 'rā penerembiguai avakue ha'e kunhague, ha'e kunumigue iporāve va'e, penerymba mburika'i kuery voi. Ha'e vy omomba'eapo 'rā mba'emo ojapo ukaa py.
 - ¹⁷ Penerymba vexal'i kuery gui voi ojopy 'rā dízimo, ha'e penemoingo 'rā guembiguairā.
 - ¹⁸ Ha'e rami rā ha'e va'e ára pejapukai 'rā SENHOR pe penderuvixarā peiporavo uka va'ekue káuxa. Ha'e rami teī ha'e va'e ára SENHOR noendui 'rā pejapukaia — he'i.
 - ¹⁹ Ha'e rami Samuel ijayvu rā heta va'e kuery noendu potai. Ha'e vy aipoe'i okuapy:
 - Any rima! Roguerekoo nho 'rā huvixave orere opena va'erā,
 - ²⁰ yvy regua kuery ha'e javi ikuiaia rami ore kuery voi orekuai aguā. Oreruvixave ae 'rā opena orere, ha'e ore kuery renonde 'rā oo joe ropu'ā aguā katy — he'i okuapy.
 - ²¹ Ha'e rami heta va'e kuery ijayvua Samuel oendu vy SENHOR pe ju omombe'u.
 - ²² Ha'e ramo Samuel pe SENHOR ombovai vy
 - Endu ke ha'e kuery ijayvua, ha'e emoī huvixaverā teī — he'i.
 - Ha'e rami rā Israel kuery pe ju Samuel aipoe'i:
 - Pejevy ju peteī-teī penderekao katy.

Mburika'i kanhygue reka vy Saul oo vy Samuel reve joexaque

¹ Peteī ava oiko oguerekopa va'e Benjamim regua Quis hery va'e. Ha'e va'e ma Abiel ra'y, Abiel ma Zeror ra'y, Zeror ma Becorate ra'y, Becorate ma Afia ra'y.

² Ha'e va'e ma peteī gua'y oguereko Saul hery va'e. Ha'e va'e kunumi ma iporāve va'e. Israel kuery regua nda'ipoi ixugui iporāve va'e. Heta va'e kuery ha'e javi gui ipukuve va'e, joaxi'y gui oaxa reive va'e.

³ Ha'e gui Saul ru Quis rymba kuery mburika okanhymba. Ha'e ramo gua'y Saul pe Quis aipoe'i:

— Eraa peteī kunumi va'e nderupive guarā. Peiko katu, ha'e tapeo mburika'i peka vy — he'i.

⁴ Ha'e ramo oo vy oaxa jogueravy Efraim yvy'ā reia ha'e Salisa yvy rupi teī ndojoui. Ha'e va'e rire Saalim yvy katy ju oo va'eri ha'e py voi nda'ipoi avi. Benjamim yvy rupi ju oaxa teī ndojoui ae tema.

⁵ Ha'e gui ma Zufe yvy re ha'e kuery ovaē ramo Saul aipoe'i kunumi hupive oo va'e pe:

— Eju, jajevy ju. Nda'evei xeru guymba kuery mburika'i re iporiaua gui nhandere ju iporiauve aguā.

⁶ Kunumi va'e ombovai:

— Ha'e rami avi kova'e tetā py oiko peteī ava Nhanderuete remimbo'e omboetevepy. Ha'e va'e ijayvua ma oiko 'rāe. Jaa mba'e ha'e py. Xapy'a rei ha'e oexa uka 'rā tape jaa aguā — he'i.

⁷ Ha'e ramo Saul aipoe'ive ju kunumi va'e pe:

— Ha'e rami avi ha'e va'e oña py jaa vy mba'e nunga ta'vy jaraa 'rā ixupe? Mba'eta nhandevoko py mbojape jareko va'ekue opa ma. Nda'ipoi teve ava Nhanderuete remimbo'e pe nhame'ē va'erā. Mba'e tu jareko?

⁸ Kunumi va'e ombovai Saul pe:

— Apy ko arekove teri peteī hatā'i kyrī'i va'e prata guigua. Ha'e va'e ae 'rā ame'ē ava Nhanderuete remimbo'e pe, nhandevy tape oexa uka aguā — he'i.

⁹ (Ymave rupi Israel yvy re ma Nhanderuete pe oporandum uka vy oo va'e “Peju, jaje'oi imba'ekuua va'e oña py”, he'i 'rā. Aŷ “Profeta” ja'ea va'e pe ma yma rupi “Imba'ekuua va'e” 'ea raka'e.)

¹⁰ Ha'e gui Saul aipoe'i kunumi va'e pe:

— Aipo'rea ma ha'eve va'e. Eju ha'vy, jaa. Ha'e rami vy oo tema tetā Nhanderuete remimbo'e oña katy.

¹¹ Tetā py ovaē rai'i ma vy ovaexī kunhataīgue yy re oē okuapy va'e. Ha'e vy oporandum ha'e kuery pe:

— Apy nda'u oī 'rā ri imba'ekuua va'e?

¹² Ha'e kuery ombovai:

— Oī rima. Ma'ē, peove ma penerononde. Pejapurave'i ke, mba'eta ange ou kuri tetā py. Mba'eta apyguia kuery oo 'rā kuri yvy'ā re Nhanderuete pe mba'emo ome'ē aguā.

¹³ Tetā py pevaē vyve pejou 'rā, yvy'ā katy okaru aguā oo e'ŷ mbove'i. Mba'eta apyguia kuery ndokarui 'rā ha'e ovaē e'ŷa ja, mba'emo ome'ē va'erā oguereko va'e ogueroayvu porā ranhe e'ŷa ja. Ha'e va'e rire mae ma oenoī uka pyre kuery okaru 'rā okuapy. Tapeo ha'vy aŷ'i ma voi pejou aguā — he'i.

¹⁴ Ha'e ramo tetā katy oo. Ovaē ramove Samuel ae oē ouvy yvy'ā katy oo aguā. Ha'e rami vy nhovaexī okuapy.

¹⁵ Peteī ára teri Saul ovaē aguā oata jave SENHOR oikuua uka ma voi Samuel pe. Ha'e vy aipoe'i:

¹⁶ “Ko'ē rā kova'e hora ndea py ambou 'rā peteī ava Benjamim yvy guigua. Ha'e va'e ma azeite reikyty reve remoī 'rā xevygua Israel kuery ruvixarā. Ha'e ma ogueraa jepe 'rā xevygua kuery filisteu kuery po gui. Mba'eta xee aendu xevygua kuery ojerure rā, ha'e kuery ojapukaia xea peve onhendu ramo”, he'i va'ekue.

¹⁷ Ha'e gui ma Samuel oexa Saul ramove SENHOR aipoe'i ixupe:

— Pee ma ava aipoa'eague. Evoko va'e ae ma opena 'rā xevyguia kuery re — he'i.

¹⁸ Okē py Saul Samuel re onhemboja vy aipoe'i:

— Ajerure ndevy, rexia uka aguā mamo pa imba'ekuaa va'e ro oīa.

¹⁹ Samuel ombovai vy aipoe'i Saul pe:

— Xee ae ma imba'ekuaa va'e. Tereo xerenonde yvy'ā katy. Kova'e ára ma jakaru 'rā xereve. Ko'ē rā aje'ivekue ma romondouka ju 'rā, ha'e amombe'upa 'rā ndeypy'a re oī va'e ha'e javi.

²⁰ Ndeypy'a vai eme guive mboapy ára re mburika'i okanhy va'ekue re, mba'eta ojoua ma. Mava'e peguarā tu oī ovareve va'e Israel ha'e javi re, ndevy e'ŷ vy, ha'e nderu ro pygua kuery ha'e javi pe e'ŷ teve? — he'i.

²¹ Ha'e ramo Saul ombovai:

— Ha'e rami avi xee ma Benjamim regua Israel kuery ikuai va'e gui yvyīve va'e, xero pygua kuery voi Benjamim regua gui ore'yvyīve va'e orekuai. Mba'e re tu ha'vy ha'e rami ndeayvu? — he'i.

²² Ha'e gui Samuel ogueraa Saul ha'e hexeveguia kunumi va'e, ha'e vy ogueroike opy mboae'i okaruaty py. Ha'e kuery pe ome'ē henda iporāve va'e oenoī uka va'ekue mbyte py, trinta rivyvyi ikuiai py.

²³ Tembi'u mbojya pe Samuel aipoe'i:

— Eru ke ndevy tembi'u ame'ē va'ekue, “Emoī porā ndea py”, ha'eague.

²⁴ Ha'e ramo tembi'u mbojya ma xo'o 'ugue hexegua ha'e javi reve ogueru vy Saul renonde omoī. Samuel aipoe'i:

— Ne'ixa, upe va'e ma amoī porā va'ekue. Ejopy ke, he'u, mba'eta ndevy pe ae amoī porā kova'e hora guarā, “Penoī ukapa apyguia kuery”, ha'e va'ekue guive — he'i. Ha'e ramo Samuel reve Saul okaru ha'e va'e ára.

²⁵ Ha'e gui yvy'ā gui oguejy jogueruvy vy tetā re ju ovaē rire Samuel ijayvu oiny Saul reve ngoo áry.

²⁶ Ko'ēmba rai jave ko'ē mbija oē jekuaa ouvy ramove Samuel ovy vy onhenduka Saul hoo áry okea py.* Ha'e vy aipoe'i:

— Ewy ke. Xee aa 'rā ndereve romondouka aguā — he'i ramo Saul ovy vy jogueraa mokoīve, Samuel reve.

²⁷ Tetā apy katy ha'e kuery oguejy jogueravy jave Samuel aipoe'i Saul pe:

— Aipo're kunumi va'e pe nhanerenonde oo aguā re. Ha'e rā ndee ma ha'e oo rire earōve'i ke, ndevy amombe'u aguā Nhanderuete ijayvuague.

10

Israel kuery ruvixarā Saul re Samuel azeite onhoēague

¹ Ha'e gui petei ryru azeite Samuel oguenoē vy onhoē Saul akā re. Oayvu vy aipoe'i:

— SENHOR ae ndere onhoē uka azeite ojeupagua Israel kuery ruvixa reiko aguā.

² Ha'e gui xea gui kurive reo vy rexia 'rā mokoī avakue Raquel ojatyaague katy'i, Benjamim yvy re Zelza py. Ha'e va'e kuery aipoe'i 'rā ndevy: “Ojoua ju ma mburika'i peka peikovy va'e. Ha'e gui aŷ ma nderu mburika'i re nda'ipy'a vaivei ma, pendere ju iporiau oikovy. Ha'e rami vy ojeupe ae ‘Mba'e 'rā tu ajapo xera'y ajou aguā?’ he'i.”

³ Ha'e gui peove'i vy pevaē 'rā Tabor katy'i yvyra carvalho hi'aī va'e py. Ha'e py penerovaexi 'rā jogueruvy mboapy avakue Betel py Nhanderuete omboete vy oje'oi va'e. Petei ma omondyi 'rā heravy mboapy kavara. Amboae ma mboapy mbojape he'ē va'e 'rā ogueraa. Ha'e rā amboae ju ma petei ryru ipire guigua py 'rā ogueraa vinho.

⁴ Ha'e kuery ma ndevy oxarura ma vy ndevy ome'ē 'rā mokoī mbojape. Ha'e va'e ma rejopy 'rā ipo gui.

* 9:26 Ha'e kuery ro ao'ia ma pyrōa rami ae ijoja rei va'e hiny, hi'áry ha'e kuery oke, e'ŷ vy mba'emo ojapo aguā ha'eve va'e.

⁵ Ha'e gui peove 'rā Gibeá-Eloim katy. Ha'e py ma oĩ filisteu regua xondaro kuery ijaty okuapya. Tetā py pevaẽ ma vy peovaexī 'rā profeta kuery yvy'ã katy gui ou va'e. Ha'e kuery renonde ou 'rā okuapy mbaraka revegua, angu'a pu, mimby ha'e mba'epu ixā reta va'e revegua. Ayvu omombe'u reve 'rā ou.

⁶ Ha'e gui ndere voi SENHOR Nhe'ẽ oĩ 'rā. Ha'e ramo ayvu remombe'u avi 'rā ha'e kuery reve, amboae ava rami nemoingo ramo.

⁷ Ha'e nunga ndere oiko ramo ejapo reipota va'e ha'e py, mba'eta ndereve Nhanderuete oiko ramo.

⁸ Ha'e gui ndee ranhe xegui reo 'rā Gilgal py. Ne'exa, xee voi aa avi 'rā reĩa py, mymba aapy reve ame'ẽ aguã, peteĩ rami ikuai aguã regua voi. Sete ára re xerarõ 'rā ndea py aju peve. Ha'e ramo ma ndevy amombe'u porã 'rā rejapo va'erã — he'i.

Profeta kuery mbyte Saul oikoague

⁹ Saul oo ta vy Samuel-a katy ojere oxarura aguã. Ha'e ramove Nhanderuete oguerova ipy'a. Ha'e gui ha'e va'e árave ha'e nunga ha'e javi oiko ikuua ukaarã.

¹⁰ Ha'e gui Gibeá py ha'e kuery ovaẽ jogueravy ramo profeta kuery oẽ ouvy ovaexī aguã. Saul re Nhanderuete Nhe'ẽ onhemonde ramo ha'e voi ayvu omombe'u avi ha'e kuery mbyte.

¹¹ Yma guive oexa va'ety kuery ha'e javi ma profeta kuery mbyte ayvu omombe'u avi rã oexa vy peteĩ-teĩ aipoe'i okuapy joupe-upe:

— Mba'e nunga tu oiko Quis ra'y re? Saul voi nda'u profeta kuery regua avi oiko?

¹² Ha'e rã peteĩ ava ombovai:

— Ha'e rami avi mava'e ha'vy amboae kuery ru? — he'i. Ha'e nunga rupi aipo'ea va'ety: “Saul voi nda'u profeta kuery regua avi oiko?”

¹³ Saul ayvu omombe'upa ma rire yvy'ã katy ju oo.

¹⁴ Ha'e gui Saul tuty oporandu ixupe, hexevegua kunumi va'e pe guive:

— Marã katy tu peo ra'e?

Ombovai:

— Mburika'i reka vy roo teĩ ndorojou reguai vy roove ju Samuel oĩa py — he'i.

¹⁵ Ha'e ramo Saul tuty aipoe'i:

— Ajerure ndevy, emombe'u ke xevy mba'e he'i tu Samuel pendevy?

¹⁶ Saul ombovai otuty pe:

— Orevy omombe'u mburika'i ojoua jevyague rive — he'i. Nomombe'u porã potai huvixa oĩ aguã re Samuel ijayvuague.

Saul huvixarã oĩague

¹⁷ Ha'e gui Mispa py Samuel oĩ teria py omboatypa SENHOR pegua kuery.

¹⁸ Ha'e vy aipoe'i Israel kuery pe:

— Po rami SENHOR Israel kuery ruete ijayvu: “Xee ma Israel kuery anoẽmba va'ekue Egito yvy gui. Egito pygua kuery po gui araa jepe, huvixa ikuai va'e imbojexavaia gui guive.”

¹⁹ Ha'e rami teĩ aÿ ma pejapa Penderuete mba'emo vai py pejexavaia gui pendereraa jepe va'ekue. Ha'e vy aipopeje: “Any! Emoĩ peteĩ huvixave orere opena va'erã”, peje. Ha'e gui aÿ SENHOR renonde pendekuai, penderegua ikuai va'e ha'e javi, ha'e mil jevy-jevy pendekuai va'e reve — he'i.

²⁰ Ha'e javi regua Samuel omboatypa rire xortea py Benjamin regua oiporavoa oikuua ukaa.

²¹ Ha'e gui Benjamin regua kuery peteĩ-teĩ ro pygua ikuai va'e oguerupa rã oikuua ukaa va'e ma Matri ro pygua kuery. Ha'e va'e kuery gui ju Quis ra'y Saul oikuua ukaa. Ha'e rami teĩ oeka vy ndojouai.

²² Ha'e ramo SENHOR pe ju oporandu Saul pa ou ra'ea re. Ha'e ramo SENHOR ombovai vy

— Upe py ae ma oĩ, mba'e rei-rei mbyte py onhemi oiny — he'i.

²³ Ha'e ramo onha oje'ovvy vy ogueru ha'e gui. Ha'e ramo heta va'e kuery mbyte hi'aïa py pavë gui ipukuve ho'amy joaxi'y gui oaxa reive va'e.

²⁴ Ha'e gui Samuel aipoe'i heta va'e kuery pe:

— Pexa ma pa SENHOR oiporavo va'ekue? Nhande kuery va'e regua amboae ndoikoi ae ha'e ramigua ete'i — he'i ramo heta va'e kuery ha'e javi ojapukai atã reve

— Toikove riae nhanderuvixa! — he'i okuapy.

²⁵ Heta va'e kuery pe Samuel omombe'u porâve huvixa ikuai va'e joguerekaguã. Ha'e nunga peteñ kuaxia re ombopara vy omoñ porã SENHOR renonde. Ha'e rami vy Samuel omondoukapa heta va'e kuery peteñ-teñ hoo katy.

²⁶ Saul voi oo avi ngoo katy Gibeá py. Hupive heta oje'oi avi avakue ipy'a Nhanderuete oguerovaague va'e kuery.

²⁷ Ha'e rã nhe'ẽ vai ra'y kuery ma aipoe'i okuapy:

— Mba'exa 'rã ha'e va'e ava nhandereraa jepe? — he'i. Ha'e rami vy ombojaru rei okuapy, mba'eve ndoguerui guive ixupe ome'ẽ va'erã. Ha'e rami teñ Saul ma oendu rive.

11

Amom pygua kuery re Saul ipo'akaague

¹ Ha'e gui Amom pygua Naás opu'ã ovvy vy ojoko Jabel-Gileade tetã. Ha'e ramo Naás pe Jabel pygua avakue aipoe'i okuapy:

— Ejapo ke orererekoporã aguã regua, ha'e ramo ndevy pe orekuai 'rã — he'i.

² Ha'e rami teñ Amom pygua Naás ombovai:

— Ajapo 'rã ri teñ penderexa peiporu kuaa regua re amombupa avi 'rã — he'i Israel kuery ha'e javi omoximbaxe vy.

³ Ha'e ramo Jabel pygua nhomongeta va'ety kuery aipoe'i:

— Ha'e rami rã ma earõ ranhe sete ára ayvu mombe'uarã romondouka aguã Israel ha'e javi rupi. Ha'e gui xapy'a rei orerepyarã nda'ipoai ramo ma rojejopy ukapa 'rã ndevy — he'i okuapy.

⁴ Ha'e gui Saul rekoa Gibeá py ayvu mombe'ua kuery ovaẽ vy ha'e pygua kuery pe omombe'u oiko va'ekue. Ha'e ramo ha'e kuery ojae'o atã okuapy.

⁵ Ha'e jave py ma Saul nhuñdy rupi vaka kuery re openaa gui ojevy vy oporandu:

— Mba'e tu ha'e kuery oguerekoha'e rami ete ojae'o okuapy aguã? — he'i ramo ixupe omombe'u Jabel pygua avakue ijayvuague.

⁶ Ha'e rami ijayvu rã Saul oendu ramo hexe oĩ Nhanderuete Nhe'ẽ. Ha'e ramo oendu ipoxy raxaa.

⁷ Ha'e rami vy mokoñ toro ojuka ha'e ombo'ipa vy ogueraa uka Israel yvy regua ha'e javi pe. Ayvu mombe'ua kuery heraa va'e pe aipoe'i uka:

— Saul ha'e Samuel oipotaa rami amongue nda'ikuai ramo nami ae 'rã ojapoa hymba toro re — he'i uka.

Ha'e ramo heta va'e kuery SENHOR gui okyjea oendu vy peteñ ava rami oupa.

⁸ Bezeque py ovaẽa py oipapaa rã Israel kuery va'e regua ma trezentos mil, ha'e gui Judá guigua ma trinta mil avakue ju ikuai.

⁹ Ayvu mombe'ua kuery ou va'ekue pe ha'e kuery aipoe'i:

— Po rami 'rã aipopeje Jabel-Gileade pygua kuery pe: "Ko'ẽ rã kuaray ojope'i ramove penderepya 'rã", peje.

Ha'e ramo ayvu mombe'ua kuery oo vy omombe'u okuapy Jabel pygua kuery pe.

Ha'e rami rã ha'e kuery ovvy'apa vy

¹⁰ Amom pygua kuery pe ju aipoe'i:

— Ko'ẽ rã rojejopy ukapa 'rã pendevy. Ha'e ramo ma peipotaa rami oreapo teñ ha'eve — he'i okuapy.

¹¹ Ha'e gui ko'ẽ jevy Saul omboja'o ngupiveguia kuery mboapy henda py. Ha'e ramo aje'ive'i reve ha'e kuery Amom pygua kuery ikuiaia mbyte oo vy ojukapa rai'i, kuaray akuve peve. Okuave va'e joa rupi e'ŷ-e'ŷ onha vy ndopytai peteñive ma joa py.

Huvixarā Saul oī ete aguā re ijayvu okuapyague

¹² Ha'e gui heta va'e kuery aipoe'i Samuel pe:

— Mava'e kuery tu nhandere Saul opena aguā ndoipotai va'ekue? Peru apy, rojukapa aguā.

¹³ Ha'e rā Saul ombovai:

— Kova'e ára ma mava'eve nomanoi 'rā, mba'eta ange SENHOR ogueraa jepeda Israel kuery — he'i.

¹⁴ Heta va'e kuery pe Samuel ju aipoe'i:

— Peju, jaje'oi Gilgal py nhamoī atāve aguā huvixarā oī aguā regua — he'i.

¹⁵ Ha'e ramo ha'e kuery ha'e javi Gilgal py oo vy SENHOR renonde ijayvu okuapy nguvixarā Saul oī ete aguā re. Henonde ogueru avi okuapy peteī rami ikuai aguā regua SENHOR pe ome'ē va'erā. Saul voi ov'y'a vaipa ha'e py Israel regua kuery ha'e javi reve.

12

Samuel opa vy ijayvu heravyague

¹ Ha'e gui Samuel aipoe'i Israel kuery ha'e javi pe:

— Ne'exa, pendeayvua aendu vy ajapopa va'ekue pejerurea. Ha'e vy amoī penderuvixaverā.

² Aŷ ma perekō ma huvixa penerononde oiko va'erā. Ha'e gui xee ma xetuja'i ma, xe'a xiîmba ma guive. Xera'y kuery ikuai avi apy pendekuaia py. Xee ae penerononde aiko va'ekue, xekunumi guive aŷ peve.

³ Ha'e gui apy ma ha'ā SENHOR renonde, ha'e penderuvixarā omoī va'ekue renonde. Pemombe'u ha'vy xapy'a rei xerovai mba'emo perekō ri vy. Mava'e ryumba toro tu aipe'a raka'e? Mava'e gui tu mburika'i aipe'a raka'e? Mava'e tu akore raka'e? Mava'e tu areko axy raka'e? Mava'e po gui tu peráta ajopy raka'e ha'evea rami e'ŷ aikuua pota aguā? Ha'e nungakue ajopy va'e rire ame'embā ju 'rāgue — he'i.

⁴ Ha'e ramo heta va'e kuery ombovai:

— Any rima, mba'eve py ndee ndorekorei, norembojexavai, neī mba'eve nderejopyi orepo gui — he'i.

⁵ Ha'e rā ha'e aipoe'i:

— Kova'e ára SENHOR ae oī pendeayvuague renduarā, ha'e penderuvixarā omoī va'ekue voi oī omombe'u aguā xepo py mba'eve ndapejouia.

Ha'e rā heta va'e kuery ombovai vy

— Nhanderuete oī ri oreayvuague renduarā — he'i okuapy.

⁶ Ha'e ramo Samuel aipoe'i heta va'e kuery pe:

— SENHOR ae pendeayvu renduarā oī. Ha'e ae Moisés ha'e Arão oiporavo va'ekue Egito yvy gui penderu kuery oguenoē aguā.

⁷ Ha'e gui aŷ ma apy pendekuai va'e xee romoma'endu'apa 'rā SENHOR renonde, mba'emo porā pendevy ha'e penderu kuery pe ojapoague re.

⁸ Mba'eta Jacó kuery Egito yvy py ovaembā raka'e. Ha'e va'e rire penderu kuery SENHOR pe ojapukai okuapy ramo ombou Moisés ha'e Arão. Ha'e rami vy Egito yvy gui oguenoēmbā vy ojapo apy ju hekoa aguā rami.

⁹ Ha'e rami teī ha'e kuery hexaraipa SENHOR Nguuete gui. Ha'e ramo omboaxapa Hazor pygua xondaro kuery ruvixa Sísera va'e po py, filisteu kuery po py, ha'e gui Moabe pygua huvixa po py ju. Ha'e ramo ha'e kuery reve joguero'a.

¹⁰ — Ha'e gui ma SENHOR pe ju ojapukai vy aipoe'i okuapy: “Rojejav, mba'eta SENHOR roeja vy Baal ha'e Astarote ra'angaa pe rive orekuai va'ekue. Ha'e rami teī aŷ orereraa jepe jeyv ke orerovaigua kuery po gui. Ha'e ramo ndevy ae ju 'rā orekuai”, he'i va'ekue.

¹¹ Ha'e rami rā SENHOR ombou Jerubaal, Baraque, Jefté ha'e gui xee Samuel ju, penderovaigua kuery penembojere rei va'e po gui pendereraa jepe uka vy. Ha'e va'e rire pendekuai porāmba va'ekue.

¹² — Ha'e rami teĩ penderovai Amom kuery ruvixa Naás ou rã pexa vy aipopeje xevy: “Nda'evei! Tove toĩ oreruvixaverã”, peje, SENHOR Penderuete ae penderuvixave oĩ ae va'eri.

¹³ Ha'e gui aÿ, pee ma hi'aĩ penderuvixaverã pejou uka va'ekue, pejerureague. Ma'ẽ, SENHOR penderuvixaverã omoĩ va'ekue hi'aĩ.

¹⁴ Ha'e gui xapy'a rei SENHOR renonde pejererokyjea rupi vy ixupe pendekuai, ha'e penhe'ẽ rendu, ha'e ojapo uka va'e rovai napepu'ãi, ha'e rami 'rãgue py peẽ ha'e penderuvixave pendere opena va'e reve SENHOR penderuete pe ete ri peiko ramo ma ha'eve 'rã pendevy.

¹⁵ Ha'e rami avi xapy'a rei SENHOR ayvu re ndapejapyxakai vy ojapo uka va'e ndapejapoi ri ramo ma SENHOR oupi 'rã opo penderovai, peneramoĩ kuery rovai oupiague rami avi.

¹⁶ Ha'e gui aÿ voi apy pene'aĩ va'e pexa 'rã mba'emo porã SENHOR penerenonde ojapo va'e.

¹⁷ Aÿ e'ÿ teve trigo mono'õa ára? Ha'e rami teĩ aÿ ajerure 'rã SENHOR pe. Ha'e rã ombou 'rã yapu oky reve. Ha'e nunga pexa vy peikuua 'rã SENHOR renonde pejejavy vaipa eteague, mba'eta pejerure penderuvixaverã omoĩ aguã re — he'i.

¹⁸ Ha'e rami vy SENHOR pe Samuel ojerure ramo ha'e va'e árave SENHOR ombou yapu oky reve. Ha'e ramo ojererokyje okuapy SENHOR renonde, Samuel guive omboete pavẽ.

¹⁹ Ha'e gui ha'e kuery ha'e javi aipoe'i Samuel pe:

— Ejerure ke SENHOR nderuete pe ore nerembiguai kuery romanomba e'ÿ aguã re. Mba'eta rojejavyague ha'e javi romboetave ma heravy oreruvixaverã re rojerurea py.

²⁰ Samuel ombovai:

— Pekyje eme. Ha'e rami pejapoa py pejejavy ete ri. Ha'e rami teĩ pejepe'a eme SENHOR pe pendekuaia gui. Ha'e rami 'rãgue py pendepy'a ha'e javi py pendekuai SENHOR pe.

²¹ Pejep'e eme mba'emo ra'angaa pe rive pendekuai aguã, ha'e nunga mba'everã ndovarei, neĩ pendereraa jepearã e'ÿ, mba'emo ra'angaa rive ae vy.

²² Ha'e rami teĩ SENHOR guery tuvixa va'e omboete ukaa rupi vy noipytyvõ e'ÿi 'rã ojeupagua kuery, ojeupe guarã SENHOR pendereru rire.

²³ — Ha'e gui xee ma ndajejavyi 'rãe SENHOR pe, peẽ kuery re ajerure e'ÿa py rive. Ha'e rami 'rãgue py xee rombo'e tema 'rã tape porã hi'yvi va'e re.

²⁴ Ha'e nunga rupi SENHOR renonde pejererokyjea rupi pendekuai, ixupe anho peiko pendepy'a ha'e javi py. Mba'eta pexa ae mba'emo porã pendevy ojapo va'ekue tuvixa ete va'e.

²⁵ Ha'e rami teĩ xapy'a rei pejejavya rupi tema pendekuai vy pekanhy 'rãe, peẽ kuery, ha'e penderuvixave voi.

13

Israel ha'e filisteu kuery reve joe opu'ã aguã rami ikuaiague

¹ Peteĩ ma'etÿ ma Israel kuery re Saul opena rire mokoĩ ma'etÿa py

² ojeupe oiporavo três mil avakue Israel regua. Ha'e kuery va'e regua ma dois mil ikuai Saul reve Micmás py, Betel yvy'ã reia re, ha'e rã amboae mil avakue ma ta'y Jônatas reve ikuai Benjamim regua Gibeá py. Heta va'e kuery rembyrekue ma omondoukapa ju peteĩ-teĩ hoo katy.

³ Ha'e gui Jônatas kuery ojukapa rai'i filisteu kuery Gibeá py ikuai va'e. Ha'e nunga filisteu kuery oendupa vy ivai ramo Saul omonhe'ẽ uka mimby guaxu oyvy ha'e javi rupi, “Hebreu kuery toendupa” he'i vy.

⁴ Ha'e rami py Israel kuery ha'e javi oendu okuapy Saul kuery filisteu ikuai va'e ojukapa rai'i ramo filisteu kuery Israel kuery pe ivai okuapya. Ha'e ramo Saul oenoĩ ukapa heta va'e kuery Gilgal py oña py.

⁵ Filisteu kuery voi ono'õmba okuapy Israel kuery reve joguero'a aguã. Ha'e kuery va'e regua ma trinta mil karóxa, seis mil kavaju árygua kuery ha'e gui amboae kuery ju ita

ku'i ye'ẽ rembe re ikuai va'e rami heta va'e. Ha'e vy oje'oi vy ijaty okuapy Micmás py, Bete-Áven regua kuaray oua katy.

⁶ Ha'e gui avakue Israel regua omoi vaia rā oexa okuapy heta va'e kuery ndaekorävei rei. Ha'e rami vy onhemi okuapy itakua ikuai va'e rupi, yvykua, itaova yvateve va'e pa'ū, yvyra rupa ha'e yy oī atyrā ojo'o pyre rupi.

⁷ Hebreu kuery va'e regua amongue ma Jordão yakā oaxa oje'oviv Gade ha'e Gileade yvy katy oo aguā. Ha'e rā heta va'e kuery Gilgal py Saul reve ae optya va'ekue ma okyjea anho oendu okuapy.

Saul mymba kuery ome'ẽ ramo ixupe Samuel ijayvu eteague

⁸ Ha'e gui Saul ma sete ára re oarõ Samuel ijayvuague rami vy.* Va'eri Gilgal py Samuel ndoui ramo heta va'e kuery omboypy ha'e gui joa katy e'ŷ-e'ŷ oje'oi aguā.

⁹ Ha'e ramo Saul aipoe'i:

— Peru ha'vy xevy mymba aapy reve ame'ẽ va'erā, ha'e peteĩ rami nhandekuai aguā regua guive — he'i.

Ha'e rami vy mymba ome'ẽ oapy reve.

¹⁰ Oapy reve ome'emb'a'i ramove Samuel ovaẽ ouvy. Ha'e rā Saul oẽ ovvy ovaexi vy oipopyy aguā.

¹¹ Samuel oporandu:

— Mba'e tu rejapo?

Saul ombovai:

— Heta va'e kuery apy gui joa katy e'ŷ-e'ŷ oje'oi ta, ha'e ndee reju 'rāgue ára py nderejui, ha'e gui filisteu kuery Micmás py ono'õmba ma avi. Ha'e nunga aexa vy

¹² aipoa'e xejeupe ae: "Aŷ ma xerovai filisteu kuery ou ma 'rā Gilgal py, SENHOR pe ajerure e'ŷ re." Ha'e rami vy aĩ vai ma vy mymba kuery ame'ẽ kuri aapy reve — he'i.

¹³ Ha'e rami rā Samuel aipoe'i Saul pe:

— Ne'arandua rupi e'ŷ reiko ra'e SENHOR nderuete ojapo uka va'ekue e'ŷ rejapo vy. Ha'e rami e'ŷ va'e rire SENHOR ojapo ma 'rāgue raka'e rā peve Israel kuery re repena aguā rami.

¹⁴ Ha'e rami tei aŷ gui ma repenaa noī riae 'rā. SENHOR ojeupe guarā ojou ae ma peteĩ ava oguerovy'a va'e. Ha'e va'e ma omoi 'rā ojeupequa kuery ruvixarā, SENHOR ojapo uka va'ekue nderejapoi rire — he'i.

¹⁵ Ha'e vy Samuel opu'ã vy Gilgal gui oo Benjamim regua Gibeá katy. Ha'e rire'ive Saul oipapa heta va'e kuery hexeve optya va'e, seiscentos avakue ikuai.

¹⁶ Ha'e gui Saul, ta'y Jônatas ha'e heta va'e kuery hexeve optya va'ekue ma Benjamim regua Geba py ikuai. Ha'e rā filisteu kuery ma Micmás py ijaty okuapy.

¹⁷ Filisteu kuery rekaoa gui ma mboapy henda katy oje'oi mba'emo re imonda aguā. Ha'e kuery regua peteĩ aty ma tape Ofra via rupi oje'oi Sual yvy katy.

¹⁸ Amboae kuery ma oje'oi tape Bete-Horom via rupi. Ha'e rā mboapya ma tape kavaju árygua ooaty rupi oje'oi Zeboim yvyugua rupi, tekaoa e'ŷa katy.

¹⁹ Ha'e gui Israel yvy ha'e javi re peteïve ndoikoi ferro moatyrõa, filisteu kuery "Hebreu kuery ojapo e'ŷ aguā kyxe, nei hu'y rakua" he'i rire.

²⁰ Ha'e nunga rupi Israel ha'e javi oje'oi 'rā filisteu kuery rekaoa py oaímbe'e uka aguā yvy karaña, enhada, haxa ha'e foice.

²¹ Filisteu kuery ma Israel kuery gui mokoí hatā'i va'e repy re 'rā oaímbe'e yvy karaña ha'e enhada, ha'e gui haxa ha'e foice oaímbe'e aguā ma peteĩ repy 'rā ojopy.

²² Ha'e nunga rupi joguero'aa ára ma Saul ha'e Jônatas reve ikuai va'e po py nei kyxe, nei hu'y rakua ma voi ndoguerekoi. Ha'e nunga oguerekoi va'e ma Saul ha'e ta'y Jônatas anho'i.

²³ Ha'e jave py filisteu regua xondaro kuery oẽ oje'oviv Micmás tape rugua katy.

* 13:8 Samuel ijayvu ma voi va'ekue Gilgal py sete ára re Saul oarõ aguā (1 Samuel 10.8).

14

Filisteu kuery re Jônatas ipo'akaague

- 1 Ha'e gui petei ára Saul ra'y Jônatas aipoe'i hu'y jokoa reraa kunumi va'e pe:
— Eju, jaa filisteu kuery yvy'ã ugua rovai re ijaty va'e katy — he'i. Nguu pe oikuua uka e'ŷ re oo.
- 2 Ha'e jave py Saul ma Gibeá apy katy oiko Migrom py romã'y hi'aĩ va'e yvypy py. Hexeve ikuai va'e ma seiscentos avakue.
- 3 Ha'e py oiko avi sacerdote Aías, manto sacerdote pegua py onhemonde va'e. Ha'e va'e ma Icabô ryvy Aitube ra'y, Icabô ma Finéias ra'y, Finéias ma Eli ra'y. Eli ma sacerdote SENHOR pegua Siló py oiko va'ekue. Saul reve ikuai va'e ndoikuaai okuapy Jônatas ooague.
- 4 Ha'e gui Jônatas ma onhembopy'a tape rugua oaxa aguã filisteu kuery ijaty katy. Kyvõ rupi hi'aĩ petei itaova, ha'e rã hovai re ma amboae hi'aĩ. Petei rery ma Bozez, amboae ma Sené.
- 5 Petei ma kuaray apu'a'ia katy hi'aĩ Micmás katy, ha'e rã amboae ma kuaray puku-a katy hi'aĩ Geba katy.
- 6 Ha'e gui hu'y jokoa reraa pe Jônatas aipoe'i:
— Eju, jaa opire omboi uka e'ŷ va'ekue ijaty katy. Xapy'a rei SENHOR nhanepytyvõ 'rã, mba'eta ixupe ma ndaxyi jogueraa jepe aguã heta va'e rupi e'ŷ vy mboapy'i va'e rupi tei — he'i.
- 7 Ha'e ramo hu'y jokoa reraa ombovai:
— Ejapo tema ndepy'a re oĩ va'e ha'e javi. Apy ma xee aiko avi ndereve, ajapo 'rã ndee reipota va'e.
- 8 Ha'e ramo Jônatas aipoe'i:
— Jaa ha'vy ha'e va'e avakue ikuiaia katy. Ha'e kuery pe jajexa uka 'rã.
- 9 Xapy'a rei nhandevy "Pepyta peĩa py rovaẽ peve" he'i ramo ma japyta 'rã nhane'aĩa py ae, ndajaai 'rã ha'e kuerya katy.
- 10 Ha'e rã xapy'a rei "Peju orea katy" he'i ramo ma nhavaẽ 'rã javy ha'e katy, mba'eta SENHOR omboaxapa 'rã nhandepo py. Ha'e rami ma jaikuua 'rã — he'i.
- 11 Ha'e gui filisteu kuery ijaty va'e pe mokoïve ojexa uka ramo joupe-upe aipoe'i:
— Pee ma hebreu kuery oẽ jogueruvy itakua py onhemiague gui — he'i okuapy.
- 12 Ha'e rami vy Jônatas ha'e hu'y jokoa reraa ojexa uka rã filisteu kuery ijaty va'e ombovai vy aipoe'i:
— Peju orea katy, ha'e ore rombopaga 'rã — he'i.
Ha'e ramo hu'y jokoa reraa pe Jônatas aipoe'i:
— Eju einy xerakykue'i rupi, mba'eta SENHOR omboaxapa ma Israel kuery po py — he'i.
- 13 Ha'e rami vy Jônatas oponhy reve ojeupi ov. Hakykue'i rupi ma hu'y jokoa reraa ou avi oiny. Jônatas guenonde rupi oitypa filisteu kuery. Hakykue rupi ma hu'y jokoa reraa voi jojuka ov.
- 14 Ha'e rami jypy Jônatas ha'e hu'y jokoa reraa reve jojuka vinte avakue meio litro yvy py rive'i.
- 15 Ha'e ramo filisteu kuery ijaty py oiko nhemondyi tuvixa va'e, nhuñdy rupi ha'e kuery ikuiaia ha'e javi rupi guive. Ijaty va'e ha'e imonda aguã oje'oi va'ekue voi oryryipa okuapy. Yvy voi oryryi, ngyje Nhanderuete guigua oiko rã.
- 16 Ha'e gui Benjamim regua Gibeá py Saul pegua harõa kuery oma'ẽ vy oexa rã filisteu kuery heta va'ekue oaĩmba ra'e, joa katy e'ŷ-e'ŷ onha oje'oivy.
- 17 Ha'e ramo Saul aipoe'i hexeve ikuai va'e pe:
— Ne'exa, peipapa xerevegua kuery, mavva'e pa nhandea gui oo ra'ea peikuua aguã — he'i ramo oipapa vy oikuua Jônatas ha'e py noña, neĩ hu'y jokoa reraa va'e voi.
- 18 Saul aipoe'i Aías pe:
— Eru apy Nhanderuete ayvu ryru — he'i, mba'eta ha'e va'e ára ma Israel kuery ikuiaia py ae hyru oĩ.

¹⁹ Ha'e gui sacerdote pe Saul ijayvu jave filisteu kuery ijatya py hevovo nhendu va'e onhenduve tema ramo Saul aipoe'i sacerdote pe:

— Aŷ gui ma ayvu ryru reru e'ŷ teĩ ha'eve — he'i.*

²⁰ Ha'e ramo Saul ha'e hexeve ikuai va'e ono'ombra jevy vy joguero'a aguã katy oje'oi. Ha'e ramo filisteu kuery jomeme ae opu'â okuapy ra'e kyxe oguerojerovia reve, opa marã jojuka rive okuapy.

²¹ Ha'e gui hebreu kuery filisteu kuery ijatya py ikuai va'ekue ma Israel kuerya katy ju oje'oi, ha'e vy Saul ha'e Jônatas reve ikuai va'e re ju onhemoirû okuapy.

²² Ha'e gui Efraim yvy'â reia rupi Israel regua avakue onhemi va'ekue oendupa okuapy filisteu kuery onhambaa. Ha'e rami vy ha'e kuery voi oje'oi hakykue joguero'a vy.

²³ Ha'e rami py ha'e va'e ára SENHOR ogueraa jepe Israel kuery. Bete-Áven rovai rupi voi joguero'a oje'oivy.

Saul onhemboayvu jave guare

²⁴ Ha'e va'e ára Israel regua avakue ojexavai okuapy, mba'eta ojeupegua kuery oendua py Saul oura vy: "Ayvu vaipy toiko ava pytû e'ŷ mbove tembi'u ho'u va'e rei, xerovaigua kuery re ajepypa e'ŷa ja", he'i rire. Ha'e rami rã heta va'e kuery neñ mba'eve ndo'ui.

— Ha'e gui ha'e kuery ha'e javive ovaë okuapy ka'aguy re, ei yvy re oña py.

²⁶ Ka'aguy re ha'e kuery ovaë rã ei oï vaipa teĩ mava'eve rei ndoerei, ouraague káuxa okyje vy.

²⁷ Ha'e rã Jônatas ma noendui nguu heta va'e kuery oendua py ouraague. Ha'e rami vy yvyra'i opo py oguerekva'e apy omovaë vy omoakÿ ei rykue'i py. Oere vyve hexa hendypa.

²⁸ Ha'e ramo heta va'e regua peteĩ aipoe'i:

— Ange nderu oura kuri ore roendua py. Ha'e vy aipoe'i: "Ayvu vaipy toiko ava kova'e ára tembi'u ho'u va'e rei", he'i va'ekue. Ha'e ramo ore kuery orekangypa ma rokuapy — he'i.

²⁹ Ha'e ramo Jônatas aipoe'i:

— Xeru ma ojapo ra'e nhandeyvy re ojexavaia aguã rami. Ne'exa, xerexa hendypa kuri kova'e ei ruxã'i aere va'ekue gui teĩ.

³⁰ Ha'e gui nhande kuery katuve ma imbaraete 'râgue kova'e ára ngovaigua kuery tembi'u ogueru va'ekue gui okaruxea rami okaru va'e rire. Ha'e rami teĩ kova'e py filisteu kuery ndajajuka reta vaipai kuri — he'i.

³¹ Ha'e va'e ára ma filisteu kuery Micmás guive Aijalom peve ojukapaa py ha'e kuery ikangypa.

³² Ha'e vy hovaigua kuery mba'emo ogueru va'ekue re oje'oi pojava vy ojopypa vixa'i, vaka ha'e ta'y'i guive. Yvy rupi rive ojuka vy ho'u okuapy huguy reve.

³³ Ha'e nunga Saul pe omombe'ua vy

— Nhande reveguia kuery ojejavy okuapy SENHOR rovai, xo'o huguy reve ho'u vy — 'ea.

Ha'e ramo Saul aipoe'i:

— Ha'eve'ŷa rami raxa pejapo. Pembojere aŷve ita guaxu kyvõ katy.

³⁴ Aipoe'ive ju:

— Tapeo, nhande kuery mbyte rupi aipopeje: "Peteĩ-teĩ Peru mymba vaka e'ŷ vy vixa'i pejou va'ekue, ha'e pejuka apy ae. Ha'e gui mae pe'u. Pejejavvye jevy eme SENHOR rovai, huguy reve pe'ua py", peje — he'i.

Ha'e ramo pyavyve ha'e kuery peteĩ-teĩ ogueru vaka ojopy va'ekue. Ha'e vy ojuka ha'e py.

³⁵ Saul ojapo avi peteĩ altar SENHOR peguarã. Ha'e va'e altar ma jypyguia ha'e ojapo.

Jônatas oo jepe aguã rami heta va'e kuery ojapo okuapyague

³⁶ Saul aipoe'ive ju:

* 14:19 Nhanderuete ayvu ryru Saul oipota, ha'e va'e rupi Nhanderuete pe oporandu aguã mba'e pa oikoa re, ha'e filisteu kuery rakykue oo aguã re. Ha'e gui filisteu kuery onhamba ma rire Saul ndoipotavei hyru.

— Kova'e pyavyve jaje'oi 'rā filisteu kuery rakykue. Jaitypa 'rā ko'ẽmba peve. Nhamoembyre eme peteĩve ava ha'e kuery va'e regua — he'i.

Hexeveguia kuery ombovai okuapy:

— Ejapo rejou porãa rami.

³⁷ Ha'e rā sacerdote oĩ va'e aipoe'i:

— Ha'e rami avi Nhanderuete pe ranhe nhaporandu — he'i.

Ha'e ramo Nhanderuete pe Saul oporandu uka vy aipoe'i:

— Toroo pa filisteu kuery rakykue? Remboaxa 'rā pa ore Israel kuery po py? — he'i uka teĩ ha'e va'e ára ma Nhanderuete nombovai.

³⁸ Ha'e rami rā Saul aipoe'i:

— Peẽ heta va'e kuery re pepena va'e ha'e javi, pejupa apy. Peikuua pota pexa aguã mba'e nunga jejavy pa ange ojapoa ra'e.

³⁹ Mba'eta anhetẽ ete SENHOR oikove va'e Israel kuery reraa jepea rery rupi aura vy aipoe'e: Ojejavy va'ekue omano 'rā, xera'y Jônatas ae teĩ — he'i va'eri heta va'e kuery peteĩve nombovai.

⁴⁰ Ha'e gui aipoe'ive ju Israel kuery pe:

— Peẽ kuery ma peteĩ henda py 'rā peĩ, ha'e rā xee ha'e xera'y Jônatas reve ma amboae py 'rā ore'aí.

Heta va'e kuery ombovai:

— Ejapo ha'vy rejou porãa rami — he'i okuapy.

⁴¹ Ha'e gui Saul aipoe'i SENHOR Israel kuery ruete pe:

— Eikuua uka ke anhetẽ va'e.

Ha'e ramo xortea py oikuua uka Jônatas ha'e Saul, ha'e rā heta va'e kuery e'ŷ ae ra'e.

⁴² Saul aipoe'i ju:

— Pexa ha'vy xortea xere ha'e xera'y Jônatas re — he'i ramo Jônatas ae oikuua ukaa.

⁴³ Ha'e ramo Saul oporandu Jônatas pe:

— Emombe'u porã ke mba'e pa rejapo ra'ea.

Jônatas ombovai:

— Aere kuri ei yvyra'i xepo py areko va'e py. Ha'e gui apy ma aĩ amano aguã.

⁴⁴ Ha'e ramo Saul aipoe'i:

— Nhanderuete taxembopaga ha'e oipotaa rami, Jônatas omano e'ŷ rā.

⁴⁵ Ha'e rami teĩ heta va'e kuery aipoe'i Saul pe:

— Jônatas ri ty'y omano 'rā, nhande Israel kuery nhandereraa jepe va'ekue ri? Tomano eme. Anhetẽ ete SENHOR oikove va'e rery rupi roura vy aiporo'e: Ha'e va'e akã gui neĩ peteĩ hi'a ma voi ndo'ai 'rā. Nhanderuete reve vy ae ha'e nunga ojapo ange — he'i okuapy. Ha'e rami py heta va'e kuery ojapo Jônatas omano aguã gui oo jepe aguã rami.

⁴⁶ Ha'e gui filisteu kuery rakykue Saul kuery ndooovei ramo ha'e kuery ojevypa ju oyvy katy.

⁴⁷ Israel kuery ruvixarā Saul oĩ ma vy joguero'a oikovy ngovaigua kuery jovaive rupi ikuai va'e ha'e javi reve: Moabe, Amom ra'y kuery ha'e Edom ha'e Zobá pygua huvixa kuery reve, ha'e gui filisteu regua huvixa kuery reve. Ooa katy rei ipo'akapa va'e raka'e.

⁴⁸ Imbaraetea rupi joguero'a vy ojuka Amaleque pygua kuery voi. Ha'e rami vy ogueraa jepe Israel kuery mba'emo re imonda aguã oje'oi va'ekue po gui.

⁴⁹ Saul ra'y kuery ma Jônatas, Isvi ha'e Malquisua raka'e. Tagy guaimive va'e rery ma Merabe, ha'e rā kyrïve va'e ma Mical.

⁵⁰ Saul ra'yxy ma Aimaás rajy Ainoã. Ixupe xondaro kuery re opena va'e rery ma Abner, Saul tuty Ner ra'y ae.

⁵¹ Saul ru ma Quis raka'e. Ha'e gui Abner ru Ner ma Abiel ra'y raka'e.

⁵² Saul oĩa pukukue re joguero'a tema filisteu kuery reve. Ha'e rami vy avakue imbaraetekue ha'e ipy'a guaxukueve Saul oexa vy ogueraapa 'rā ojeupe guarā.

15

Saul SENHOR nonhe'ẽ rendui rire huvixa noīvei aguā re ijayvuague

1 Ha'e gui Samuel aipoe'i Saul pe:

— SENHOR xembou karamboae ndere azeite aikyty vy ixupegua Israel kuery ruvixarā amoī aguā. Ha'e rire aŷ ejapyxaka SENHOR ijayvua re.

2 Po rami SENHOR ixondaro reta va'e ijayvu: Xee ambopaga 'rā Amaleque pygua kuery Israel kuery re ojapo vaiague re, mba'eta Egito gui Israel kuery ou ramo ha'e kuery rovai opu'ã okuapy tape rupi.

3 Ha'e nunga rupi tereo aŷ. Ejukapa Amaleque pygua kuery, ha'e emomba katuī'i guive oguerekva e' ũ emomba e' ũ eme mba'eve'i. Rejuka 'rā avakue ha'e kunhague, avakue'i ha'e kyrīgue'i okambu va'e ha'e javi, vaka ha'e vexta'i, camelha'e mburika'i kuery — he'i.

4 Ha'e rami rā Saul heta va'e kuery oenoī ukapa vy oipapa Telaim py: duzentos mil avakue yvy rupi guarā ha'e dez mil avakue Judá regua ikuai.

5 Amaleque tetā py Saul ogueraa ma vy yvyugua py omoī oarō nhemiarā.

6 Ha'e rami vy queneu kuery pe ranhe aipoe'i:

— Tapeo, pejep'e'a. Peēmba Amaleque pygua kuery mbyte gui, ha'e kuery amombaa py peē kuery romomba avi e' ũ aguā. Mba'eta Israel kuery Egito gui ou jave pemboaxypa raka'e — he'i. Ha'e rami rā queneu kuery ojepe'apa Amaleque pygua kuery mbyte gui.

7 Ha'e ramo mae ma Saul ojuka Amaleque pygua kuery, Havilá guive Egito katy'i Sur peve.

8 Ojopy avi Amaleque pygua huvixa Agague oikove reve. Ha'e rā ha'e pygua kuery ma ojukapa kyxe py.

9 Ha'e rā Agague ma Saul ha'e hexeveguia kuery ndojukai, neī mymba kuery vexta'i ha'e vaka ra'y porāgueve, mymba ikyrakueve va'e, vexta'i ra'y kuery ha'e mba'emo porāgueve ha'e javi guive. Nomomba etei. Ivaikue-ikue'i, oipota e' ũ va'e rive omomba.

10 Ha'e ramo SENHOR oayvu ombou Samuel pe. Ha'e vy aipoe'i:

11 — Xee ndavy'avei huvixarā Saul amoīague re, mba'eta xevy oikoa gui ojepe'a vy ndojapoi xeavyvuague — he'i ramo Samuel iporiau vaipa vy pytū mbukukue re ojerure oiny SENHOR pe.

12 Ko'ẽ rai ramove Samuel oo aje'ive'i reve Saul ovaexī aguā. Teī ixupe omombe'ua:

— Saul oo ma Carmelo katy. Ha'e py ma mba'emo omopu'ã ha'e ae onhemoma'endu'a uka aguā. Ha'e gui ojevy vy Gilgal katy oguejy ovv — 'ea.

13 Ha'e ramo Samuel oo Saul oĩa py. Ha'e py ovaẽ ramo Saul aipoe'i ixupe:

— Tove SENHOR topena porā ndere. Xee ajapopa ma SENHOR ijayvuague.

14 Ha'e ramo Samuel oporandu:

— Mba'eda tu ha'vy vexta'i ha'e vaka nhendua xeapyxa py aendu va'e?

15 Saul ombovai:

— Ha'e nunga tu Amaleque tekua gui ogueru pyre rima. Mba'eta vexta'i ha'e vaka kuery iporāgueve ma xereveguia kuery nomombai, SENHOR Nderuete pe ojuka aguā ogueru. Ha'e rā hembyrekue ma rojukapa katuī'i — he'i.

16 Ha'e ramo Samuel aipoe'i Saul pe:

— Earō ranhe, ndevy amombe'u aguā kuee pyávy xevy SENHOR aipoe'iague.

Saul ombovai vy

— Ndeayvu ke — he'i.

17 Samuel ijayvuve:

— Ndejeupe ae “Xe'yvyi've” 're va'ekue ri Israel kuery akārā e' ũ ri ty'y nemoīa? Ha'e vy ndere azeite SENHOR oikyty uka reve nemoī raka'e ha'e kuery ruvixarā.

18 Ha'e gui kylvō rupi ju SENHOR nemondouka vy aipoe'i va'ekue: “Tereo, emomba katuī'i ojejavvy va'e kuery Amaleque regua. Ha'e kuery rovai pejoguero'a 'rā pemomba peve”, he'i va'ekue.

¹⁹ Mba'e re ha'vy nderejapyxakai SENHOR ijayvua re? Ha'e rami 'rāgue py renha reve imba'e rei-reikue rejopy. Ha'eve'ŷa rami rejapo SENHOR renonde — he'i.

²⁰ Ha'e rami teĩ Saul ombovai Samuel pe:

— Ha'e rami e'ŷ ko, aendu ri SENHOR ayvu. Ha'e vy tape SENHOR xemondoukaague rupi ae aa vy Amaleque pygua huvixa Agague aru, ha'e rā Amaleque pygua kuery ma ajukapa katuĩ'i.

²¹ Ha'e rami avi heta va'e kuery ogueru avi imba'e rei-reikue mba'emo mymba vexa'i ha'e vaka ra'y kuery. Romomba aguã va'ekue gui iporāgueve ha'e kuery oiporavo heruvy SENHOR nderuete pe ome'ẽ aguã Gilgal py — he'i.

²² Va'eri Samuel aipoe'i:

— SENHOR nda'u ijayvua nhaendua gui oguerovy'ave 'rā teve mba'emo japy vy nhame'ẽ va'e rive? Ne'exa, mba'emo nhame'ẽa gui ma ha'eveve nhanhe'ẽ rendu. Vexa'i kyrakue nhame'ẽa gui ha'eveve ojapo uka va'e jajapo.

²³ Mba'eta onhemboyvate va'e kuery ma imba'evyky va'e rami ae ojejavvy, nonhe'ẽ rendui va'e kuery ma ngopy ta'angaa ombojerovia aguã oguerekoo va'e rami ojejavvy. Ha'e gui SENHOR ayvu reja rire ha'e voi ndereja, huvixa nereĩvei aguã — he'i.

²⁴ Ha'e ramo Saul ombovai Samuel pe:

— Xee ma ajejavvy ri, SENHOR ojapo uka va'e ndajapoi vy, ndeayvua guive. Mba'eta heta va'e kuery gui akyje vy ha'e kuery ijayvua aenduve.

²⁵ Ha'e rami teĩ aŷ ma ndevy ajerure xeperdoa aguã ajejavvyague. Ha'e rami vy ejevy ju xereve SENHOR romboete aguã — he'i.

²⁶ Ha'e rami teĩ Samuel aipoe'i Saul pe:

— Xee ndajevyi 'rā ndereve. SENHOR ayvu reja rire ha'e voi ndereja, Israel kuery ruvixa nereĩvei aguã — he'i.

²⁷ Ha'e gui Samuel oo ju aguã ojere rā Saul ojopy iiao puku apy re. Ha'e ramo oxoro.

²⁸ Ha'e ramo Samuel aipoe'i ixupe:

— Ange ndepo gui SENHOR omondoro avi Israel kuery re repenaague. Ha'e vy ndea katy'igua ndegui heko porâve va'e pe ju ome'ẽ.

²⁹ Ha'e gui Israel kuery ruete Hexakãmba va'e ma nda'ijapui, nda'evei nho va'e'ŷ guive, mba'eta ava e'ŷ oiko ojeko rerova rive aguã.

³⁰ Ha'e ramo Saul aipoe'i:

— Xee ajejavvy teĩ xemboete uka ri jepe heta va'e kuery yvatekueve ha'e Israel kuery ha'e javi renonde. Ejevy ju ha'vy xereve, SENHOR nderuete nhamboete aguã — he'i.

³¹ Ha'e ramo Saul reve Samuel jogueraa nho ju, ha'e vy omboete SENHOR.

Samuel Agague ojukaague

³² Ha'e gui Samuel aipoe'i:

— Peru apy Amaleque pygua huvixa Agague — he'i.

Ha'e ramo oĩa py Agague oikuua rei reve ou, ojeupe “Anhetẽ, amano aguã gui akyjea ko oaxa ma” he'i vy.

³³ Ha'e rami teĩ Samuel aipoe'i:

— Ndekyxe kunhague pi'a kuery rekove oipe'aague rami ae avi ndexy voi oiko 'rā ipi'a ve'ŷ va'e kunhague mbyte rupi — he'i vyve SENHOR renonde Gilgal py Samuel omboa'y-a'ypa Agague.

³⁴ Ha'e gui Samuel oo Ramá katy. Ha'e rā Saul ma guekoa Gibeá py oo ngoo oĩ va'e katy.

³⁵ Saul omanoa ára peve Samuel ndoexavei teĩ oendu guive Saul re ipy'a vaia. SENHOR voi ndovy'avei Israel kuery ruvixarã Saul omoñague re.

— Raka'e peve 'rã tu ndepy'a vai Saul re? Mba'eta xee SENHOR amboyke ma Israel kuery re openaa gui. Emonyẽ peteĩ hakuakue azeite, ha'e tereo. Romondouka 'rã Jessé rekoaa Belém py. Mba'eta ta'y kuery va'e regua peteĩ ajou ma huixara.

² Samuel oporandu:

— Mba'exa 'rã tu aa? Saul oikuua ri vy xejuka 'rã.

SENHOR ombovai:

— Eraa peteĩ vaka ra'y. Ha'e vy aipo're: “Aju SENHOR pe mymba ajuka vy ame'ẽ aguã”, 're.

³ Ha'e rami vy renoõ 'rã Jessé mymba reme'ẽ aguã py ou aguã. Ha'e rã xee aikuua uka 'rã mba'e pa rejapo 'rãa. Ha'e ramo xee aikuua uka va'e ae 'rã remoõ, azeite reikyty vy — he'i.

⁴ Ha'e gui SENHOR aipoe'iague rami Samuel oiko vy oo Belém tekao py. Ha'e ramo tetã pygua nhomongeta va'ety kuery oexa vy oryryipa reve oẽ jogueruvy ovaexi aguã. Ha'e vy oporandu:

— Ha'evepa reia rupi pa reju?

⁵ Ombovai:

— Ha'evepa reia rupi ri aju SENHOR pe mymba ajuka vy ame'ẽ aguã. Pejeky'a'o ke ha'e peju xereve mymba ame'ea py — he'i. Ha'e rami vy oiky'a'o Jessé ha'e ta'y kuery. Ha'e vy oenoimba avi mymba ome'ẽ aguã katy.

⁶ Ha'e kuery oike ouvy rã Samuel oexa Eliabe. Ha'e vy ojeupe ae “Kova'e nhi'ã SENHOR renonde oiporavo va'ekue hi'ai” he'i.

⁷ Ha'e rami tei SENHOR aipoe'i Samuel pe:

— Eikuua pota eme hova re, nei ipuku-a re, mba'eta ha'e va'e ma xee ndaiporavoi. Mba'eta SENHOR ma avakue joexaa rami e'õ oexa va'e. Avakue ma hi'arykue rive 'rã oexa, ha'e rã SENHOR ma ipy'apy re oexa va'e — he'i.

⁸ Ha'e gui gua'y Abinadabe ju Jessé oenoõ vy ojapo Samuel renonde rupi oaxa aguã rami. Ha'e rami tei

— Kova'e voi SENHOR oiporavo va'ekue'õ — he'i.

⁹ Ha'e gui gua'y Samá ju Jessé ojapo oaxa aguã, tei Samuel

— Kova'e e'õ SENHOR oiporavo — he'i.

¹⁰ Ha'e rami vy Jessé sete-ve ojapo gua'y kuery Samuel renonde rupi oaxa aguã rami, tei Jessé pe Samuel ombovai vy

— Kova'e kuery voi SENHOR ndoiporavoi avi — he'i.

¹¹ Ha'e gui ma Samuel oporandu Jessé pe:

— Opa ma teve nderay kuery?

Ombovai:

— Oata teri kunumive ete va'e tei vexa'i re opena oikovy — he'i.

Samuel aipoe'i ju Jessé pe:

— Enoõ uka ha'vy, mba'eta ha'e ou e'õ re nda'evei mesa py jaguapy aguã.

¹² Ha'e ramo oenoõ uka vy ogueroike uka. Ha'e va'e ma ipytã rei porã, hexa porãmba, ha'e hete porã rei va'e. SENHOR aipoe'i Samuel pe:

— Epu'ã ha'e eikyty azeite hexe, mba'eta upe va'e ae ma — he'i.

¹³ Ha'e ramo Samuel hakuakue py azeite oĩ va'e oupi vy oikyty inhakã re omoõ tyke'y kuery oexaa py. Ha'e va'e ára guive SENHOR Nhe'ẽ onhemonde Davi re. Ha'e gui ma Samuel opu'ã vy Ramá katy ju oo.

Saul renonde Davi mba'epu ixã reta va'e ombopu oinyague

¹⁴ Saul gui SENHOR Nhe'ẽ ojepe'a ramo nhe'ẽ vai ju ombou rã oguerekaxy.

¹⁵ Ha'e ramo Saul rembiguai kuery aipoe'i okuapy:

— Ne'exa, aõ ma nhe'ẽ vai Nhanderuete ombou va'ekue nembojexavai.

¹⁶ Ha'e nunga rupi oreruvixa, emondouka na nerembiguai kuery nerondenide ikuai va'e peteĩ ava rogueru aguã ixã reta va'e mbopuarã. Ha'e ramo rãnda'u nhe'ẽ vai SENHOR

ombou va'ekue ndere ou jave peteī-teī okuā py ombopu rā rendu vy rekuerave 'rā — he'i okuapy.

¹⁷ Saul ombovai guembiguai kuery pe:

— Pejou ha'vy peteī ava imba'epu porā kuaa va'e, ha'e Peru Xea py — he'i.

¹⁸ Ha'e gui peteī kunumi va'e ombovai vy aipoe'i:

— Xee ma aikuaa peteī ava Belém pygua Jessé ra'y kuery va'e regua. Ha'e va'e ma imba'epu porā kuaa va'e, imbaraete ha'e ipy'a guaxu va'e guive, ava joguero'aa pygua rami rei oiko va'e, ijayvu kuaa ha'e hete porā rei va'e, ha'e hexeve SENHOR oikoa va'e — he'i.

¹⁹ Ha'e rami rā Jessé oña py Saul ayvu mombe'uarā ombou vy aipoe'i uka:

— Embou xevy nderā'y Davi, vexa'i kuery re opena oikovy va'e — he'i uka.

²⁰ Ha'e ramo Jessé guymba mburika'i ojopy vy ombovoyi mbojape ha'e peteī vinho ryru re. Peteī kavara ra'y'i voi ogueru vy Saul peguarā ogueraa uka avi gua'y Davi pe.

²¹ Ha'e rami vy Saul oña py Davi oo vy henonde oiko. Ha'e ramo ha'e oayvu vaipa vy hu'y jokoa reraarā omoingo.

²² Saul aipoe'i uka Jessé pe:

— Tove Davi xerenonde rupi riae toiko, xembovy'a rei ramo — he'i.

²³ Ha'e gui Saul re nhe'ẽ vai Nhanderuete ombou va'e ou nhavō Davi mba'epu ixā reta va'e oupi vy peteī-teī okuā py ombopu 'rā oiny. Ha'e ramo Saul onhenhandu 'rā ha'eve raive, okuerave 'rā, ixugui nhe'ẽ vai ojepe'a kuerei rā.

17

Golias opu'āxe reia rupi ijayvuague

¹ Ha'e gui filisteu kuery omboaty xondaro kuery joguero'a aguā. Ono'ōmba okuapy Judá re Socó oĩ va'e py. Socó ha'e Azeca mbyte ijaty okuapy Efes-Damim py.

² Ha'e rā Saul ha'e Israel kuery ma ono'ōmba vy Elá yvyugua py ijatypa okuapy. Ha'e py ma oiko katu okuapy filisteu kuery re opu'ā okuapy aguā.

³ Filisteu kuery ma hovai re ikuai yvy'ā oĩ va'e re, ha'e rā Israel kuery ma yvy'ā kyvō rupigua re ikuai. Ha'e kuery ikuiaia mbyte ma yvyugua oĩ.

⁴ Ha'e gui filisteu kuery ijaty okuapya gui peteī ava oẽ ouvy joguero'a kuaa rei va'e. Golias hery va'e, Gate pygua, mboapy metros ipuku va'e.

⁵ Oakā re oguerekō akā regua overa va'e guigua, ha'e onhemonde ao ratā ipore-pore va'e py. Ha'e va'e poyia ma cinqüenta e cinco quilos.

⁶ Hetyma re ma oĩ tetyma regua hatā va'e overa va'e guigua. Ijaxi'y re ma peteī hu'y guaxu overa va'e guigua oĩ.

⁷ Hu'y guaxu'y ma ipoguaxu ajukue popēa'y rami. Hu'y guaxu apy ma seis quilos va'e. Henonde ma oo oiny hu'y jokoa tuvixa va'e reraa.

⁸ Ha'e va'e ojapukai ho'amy Israel regua xondaro kuery ikuiaia katy. Ha'e vy aipoe'i:

— Mba'e re tu pejoguero'a aguā peju va'eri pendeyxy rei pekuapy? Xee ma filisteu e'ŷ teve aiko, ha'e peẽ nda'u Saul rembiguai kuery e'ŷ teve pendekuai? Peiporavo ha'vy peteī ava penderegua xerovaiguarā.

⁹ Ha'e gui xereve rojoguero'aa py ha'e va'e xejuka ri ramo ore kuery orekuai 'rā penerembiguairā. Ha'e rā xee ri xepo'aka vy ajuka ramo peẽ 'rā orerembiguairā pendekuai ore roipotaa rami anho.

¹⁰ Aipoe'ive tema:

— Aŷ ma xeayvu ha'amy xondaro kuery Israel regua rovai. Embou na xevy peteī ava, mokoïve rojoguero'a aguā — he'i.

¹¹ Ha'e rami filisteu va'e ijayvu rā Saul ha'e Israel kuery ha'e javi oendu vy onhemondyipa rei okuapy, okyje vaipa guive.

Tyke'y kuery ikuiaia katy Davi omondoukaa ague

¹² Davi ru ma efrateu Judá regua Belém pygua, Jessé hery va'e, ta'y irundy meme va'e. Saul opena oikovy jave ma tujave va'e ae ma oiko.

¹³ Jessé ra'y kuery tujakueve mboapy ikuai va'e ma Saul pe ojexa uka vy hupive oo joguero'a aguã katy. Ha'e va'e kuery regua tujave va'e ma Eliabe, mokoña ma Abinadabe, ha'e rã mboapya ma Samá.

¹⁴ Davi ma kunumive ete va'e. Tyke'y tujakueve anho oo mboapyve Saul rupive.

¹⁵ Ha'e rã Davi ma Saul oĩa py oo rire ojevy kuerei 'rã guekoa Belém py nguu rymba veva'i kuery re opena aguã.

¹⁶ Ha'e ramia ja filisteu va'e ma aje'ive'i nhavõ 'rã ou, ka'aru'i avi. Quarenta ára re ha'e rami oiko.

¹⁷ Ha'e gui ma Jessé aipoe'i gua'y Davi pe:

— Eraa ke nderyke'y kuery pe peteĩ ryru trigo oaimbe pyre ha'e kova'e dez mbojape. Tereo pojava kova'e nunga reraa vy ijaty okuapya py, nderyke'y kuery pe.

¹⁸ Ha'e gui kova'e dez queijo ma mil xondaro re opena va'e pe eraa. Nderyke'y kuery reipou 'rã reikuaa aguã ikuai porã pa ra'ea. Ha'e gui rejuvena vy ha'e kuerya gui reru 'rã mba'emo aikuaa aguã.

¹⁹ Ha'e kuery ma Saul ha'e Israel kuery ha'e javi reve 'rã ikuai Elá yvjugua py, filisteu kuery reve joguero'a aguã py — he'i tuu.

²⁰ Ha'e ramo ko'ẽmba rai'i ramove Davi ovy vy veva'i kuery re opena va'erã po py oejapa vy mba'emo ojopy heravy nguu Jessé aipoe'iague rami vy. Xondaro kuery ijaty okuapya py ovaẽ jave ha'e kuery joguero'a aguã katy oje'oi. Ojapukai okuapy reve nhoenoĩ joguero'a aguã py oje'oi aguã.

²¹ Israel kuery ha'e filisteu kuery nhoarõ okuapy, jovaive re hyxy okuapy.

²² Ha'e ramo Davi mba'emo ogueraa va'ekue oejapa ranhe mba'emo re opena va'ety po py. Ha'e vy onha ovy joguero'a va'erã ikuiaia katy. Ha'e py ovaẽ vy oporandu guyke'y kuery pe ikuai porã paa re.

²³ Ha'e kuery reve Davi ijayvu teri ho'amy reve filisteu regua xondaro kuery ikuiaia gui ou oiny ha'e ae'i opu'ã va'erã Golias hery va'e, filisteu Gate pygua. Ha'e va'e ma ijayvuat y rami ae ijayvu ramo Davi oendu.

Israel kuery rovai gigante Golias ijayvuague

²⁴ Ha'e va'e ava Israel kuery ha'e javi oexa vy onhamba ixugui okyje vaipa vy.

²⁵ Ha'e vy joupe-upa aipoe'i:

— Pexa pa ha'e va'e ava ou rã? Israel kuery rovai ijayvu aguã ou. Ha'e va'e jukaare pe ma huviixa ome'ẽ 'rã opa mba'e nunga, guajy ae ome'ẽ avi 'rã ta'yxyrã, ha'e tuu ro pygua kuery imposto re ndopagavei ma 'rã Israel regua — he'i okuapy.

²⁶ Ha'e rami rã Davi oporandu oĩa katy'i ikuai va'e pe. Ha'e vy aipoe'i:

— Mba'e nunga ete tu ome'ẽa 'rã ava ha'e va'e filisteu ojuka vy Israel kuery moximbaare oipe'a va'e pe? Marã ramigua tu ha'e va'e opire omboi uka e'ŷ va'ekue oiko, Nhanderuete oikove va'e pegua xondaro kuery rovai ha'e rami ete ijayvu aguã? — he'i.

²⁷ Ha'e kuery ijayvuague rami ae ju ijayvu vy

— Ha'e nunga ome'ẽmbaa 'rã ava ijukaare pe — he'i.

²⁸ Ha'e gui ha'e kuery reve ijayvu rã tyke'y tujave va'e Eliabe oendu vy ivai vaipa Davi pe. Ha'e vy aipoe'i:

— Mba'e re tu rejuvena ra'e apy? Mava'e po py tu reja ra'e veva'i kuery mboapy'i repenaa va'e tekaoa e'ŷa rupi? Xee aikuaa porã renhemboyvateve reia ha'e nderekoo vaia. Juguero'a va'e rexa aguã rive rejuvena.

²⁹ Davi ombovai:

— Mba'e nunga py tu xee ajapo vai aŷ? Aporandu rive'i merami va'eri — he'i.

³⁰ Ha'e rami vy ixugui ojepe'a vy amboae pe ju oporandu ha'ekue rami ae. Ha'e rã jypyguare rami ae ju ombovai.

Gigante rovai Davi joguero'a aguã oiko katuague

³¹ Ha'e rami Davi ijayvua oendupaa vy Saul pe omombe'u uka. Ha'e ramo oenoĩ uka Davi.

³² Davi ou vy aipoe'i Saul pe:

— Avave py'a re toĩ eme ixugui okyjea. Xee nerembiguai ae 'rã aa filisteu rovai ajoguero'a aguã — he'i.

³³ Ha'e rami teĩ Saul aipoe'i Davi pe:

— Nda'evei ndee reo aguã filisteu reve rejoguero'a vy, mba'eta ndee ma nekunumi ete teri. Ha'e rã ha'e ma kunumi guive joguero'a va'ety ae rei.

³⁴ Davi ombovai Saul pe:

— Ha'e gui xee nerembiguai ma xeru rymba kuery vexa'i re apena va'e. Guary e'ŷ vy urso mba'e ou vy mymba kuery ikuiaia gui vexa ra'y'i ojopy ramo

³⁵ hakykue xee aa vy ajuka 'rã. Ha'e vy ijuru gui araa jepe kuerei 'rã vexa ra'y'i. Xere opu'ã teĩ hendyva re ajopy vy ajuka 'rã.

³⁶ Xee nerembiguai ajuka karamboae guary ha'e urso. Ha'e gui filisteu va'e voi omano 'rã ha'e kuery rami, Nhanderuete oikove va'e pegua xondaro kuery rovai ijayvu rire — he'i.

³⁷ Davi aipoe'ive tema:

— Guary ha'e ursø xejopya gui SENHOR xereraa jepe rire filisteu va'e po gui voi xereraa jepe 'rã — he'i.

Ha'e rami rã Saul aipoe'i Davi pe:

— Tereo ha'vy, SENHOR toiko ndereve — he'i.

³⁸ Saul omonhemonde Davi oao ratã py ae, inhakã re ngora overa va'e guigua omoĩ, ha'e ipexo re omba'e pexo regua ae omoĩ.

³⁹ Ao ratã re Davi kyxe omoĩ vy onhea'anga oguata aguã, oiporu va'ety e'ŷ vy. Ha'e rami vy Davi aipoe'i Saul pe:

— Kova'e nunga reve tu nda'evei rima aguata aguã, aiporu va'ety e'ŷ vy — he'i. Ha'e vy Davi omboipa ju ojegui.

⁴⁰ Opo py yvyra'i oiporu va'ety ogueraa reve oo yakã'i rembe py. Ha'e py oiporavo peteĩ nhiruĩ ita yxyi rei'i va'e. Ha'e va'e ita omboyrø ovoko vexa'i re openaa rupi oguerekø va'ety py. Ha'e vy ita momboa ogueraa avi vy onhembojave ovy filisteu va'e re.

Gigante reve Davi nhovaexi vy ojukaague

⁴¹ Davi onhemboja ovy rã filisteu va'e oexa vy ha'e voi ovaexi ouvy. Henonde ma hu'y jokoa tuvixa va'e reraa ou avi oiny.

⁴² Filisteu va'e oma'ẽ porã vy oexa Davi. Ha'e rami vy oojai rei, kunumi pytã rei ha'e hete porã rei va'e ou rã.

⁴³ Ha'e rami vy filisteu va'e aipoe'i Davi pe:

— Ha'e gui jagua ri ty'y xee aiko, yvyra'i reve rive reju aguã? — he'i. Ha'e vy nguuete ramigua rery rupi filisteu ijayvu vai Davi re.

⁴⁴ Filisteu va'e aipoe'ive tema Davi pe:

— Eju ke xere, ndero'okue ame'ẽ aguã guyra oveve va'e ha'e vixo vaikue ikuai va'e pe — he'i.

⁴⁵ Ha'e ramo Davi aipoe'i filisteu pe:

— Ndee ma kyxe reve reju xerovai, hu'y guaxu ha'e hu'y jokoa reve. Ha'e rã xee ma nderovai aju SENHOR ixondaro reta va'e rery rupi. Ha'e va'e ma Israel regua xondaro kuery rovai ndeayvu vaiaty va'e ruete ae oiko.

⁴⁶ Aŷ'ive SENHOR nemboaxa 'rã xepo py. Rojuka 'rã, ha'e amboi 'rã neakâgue. Ha'e rami vy filisteu ijaty okuapy va'e retekue voi aýve ame'ẽmba 'rã guyra yvate rupi oveve va'e ha'e vixo vaikue pe. Ha'e rami rire yvy jave re oikuaapaa 'rã Israel kuery mbyte Nhanderuete oikoa.

⁴⁷ Apy heta va'e kuery ikuai va'e ha'e javi oexa 'rã SENHOR jogueraa jepea kyxe py e'ŷ, hu'y guaxu py e'ŷ guive. Mba'eta pendere opu'ã va'e ma SENHOR ae. Ha'e ae 'rã penemboaxapa orepo py — he'i.

⁴⁸ Ha'e gui filisteu va'e Davi ovaexi aguã ouve ramo hyxy okuapy va'e oeja ovy vy onha ovy filisteu va'e ovaexi vy.

⁴⁹ Ovoko'i py Davi opo'ẽ ovy vy oguenoẽ peteĩ ita. Ha'e va'e ma ita momboa py omombo vy ojapi filisteu rova py. Hova mbyte py ita oike oiny ramo ho'a ngova yvy re.

⁵⁰ Ha'e rami py filisteu re Davi ipo'aka raka'e ita py ha'e ita momboa py rive'i. Ojapi vy ojuka, opo py kyxe oguerekoy e'ŷ.

⁵¹ Ha'e gui Davi onha ovy vy filisteu áry onhemombo vy ikyxe ojopy vy oguenoẽ hyru gui. Ojuka ma vy ha'e va'e py ojaya inhakā. Ha'e ramo filisteu kuery ma guepyarā va'ekue omano maa oexa vy onhamba.

⁵² Ha'e ramo Israel ha'e Judá pygua avakue opu'ãmba. Ovy'apa reve oje'oi filisteu kuery rakykue Gate ha'e Ecrom tetārokē peve. Filisteu kuery ojuka pyre ho'a-o'apa tape rupi, Saaraim guive Gate ha'e Ecrom peve.

⁵³ Ha'e gui ma filisteu kuery rakykue ooague gui Israel kuery ojevypa ju. Filisteu kuery ijaty okuapyague gui ojopypa heravy mba'emo oeja pyre.

⁵⁴ Davi ma filisteu akāgue ojopy vy ogueraa Jerusalém tetā py. Ha'e rā hembiporukue ma ngoo py ae omoõ porā.

⁵⁵ Filisteu va'e re nhovaexī aguã Davi oo rā Saul oexa vy aipoe'i xondaro kuery ruvixa Abner pe:

— Abner, mava'e ra'y tu peva'e kunumi va'e?

Abner ombovai:

— Xeruvixa, anhetē ete nderekove rupi aura vy aipoa'e: Xee ndaikuuai — he'i.

⁵⁶ Huvixave aipoe'i ju:

— Eporandu ha'vy mava'e ra'y pa ha'e va'e kunumi va'e — he'i.

⁵⁷ Ha'e gui ma filisteu ojukaague gui Davi ojevy ju ma ramo Abner ogueraa Saul oña py, filisteu akāgue opo py ogueru reve.

⁵⁸ Ha'e ramo Saul oporandu:

— Kunumi, mava'e ra'y tu ndee?

Davi ombovai:

— Xee nerembiguai ma Belém pygua Jessé ra'y aiko — he'i.

18

Davi reve Jônatas joayvuague

¹ Ha'e gui Saul reve Davi ijayvupa ma ramo ta'y Jônatas onhe'ẽ py joayvu Davi reve. Jônatas ha'e ae ojeayvua rami oayvu.

² Ha'e va'e ára guive Saul oña py ae omombyta Davi, tuu ro katy nomondoukavei.

³ Davi reve Jônatas ojapo peteĩ rami ikuai aguã, ha'e ae ojeayvua rami oayvu vy.

⁴ Ha'e rami vy Jônatas oao puku oiporu va'ety omboi vy ome'ẽ Davi pe, tembiporu joe opu'ãa pygua guive: kyxe, guyrapa ha'e ku'akuua.

⁵ Davi oo tema 'rā Saul omondoukaa py rei, ha'evea rami meme ojapo oikovy. Ha'e ramo ipo py Saul omboaxa oxondaro kuery opena aguã. Heta va'e kuery ojou porãmba okuapy, Saul rembiguai kuery ikuai va'e voi.

Kunhague oporaeia Saul oendu vy ivai oinyague

⁶ Ha'e gui Saul oxondaro kuery reve oupa jave Davi avi ojevy filisteu kuery ojukaague gui. Ha'e ramo kunhague Israel tetā py ikuai va'e ha'e javi oẽmba huvinha Saul ovaexī vy. Oporaei oje'oivy, pandeiro reve ojeroky guive. Ovy'a oje'oivy mba'epu reve.

⁷ Kunhague ovy'a reve jorire-rire'i oporaei vy

— Saul ma mil ojuka va'ekue,

 ha'e rā Davi ma dez mil peve ojuka va'ekue — he'i oje'oivy.

⁸ Ha'e rami ijayvu rā Saul oendu vy ivai vaipa oiny, ha'e va'e ayvu nombovy'ai ete rā. Ha'e aipoe'i:

 — Davi pe ma “Dez mil peve ojuka va'ekue” he'i kunhague, ha'e rā xevy pe ma “Mil ete'i ojuka va'ekue” he'i. Anhetē ixupe oata va'e ma huvinharā oĩ aguã anho — he'i.

⁹ Ha'e va'e ára guive Saul ndoexaxe porãvei Davi.

¹⁰ Ko'ẽ jevy Saul re nhe'ẽ vai Nhanderuete ombou va'ekue oĩ ramo ivaia re anho oĩ ngoo py. Ha'e rã Davi ma jypyguare rami ae ixã reta va'e ombopu oiny. Saul ma hu'y guaxu oguerek owo py.

¹¹ Ojeupe "Anhyvõ 'rã Davi oo mbotya reve" he'i vy omombo teĩ Davi ojeavy uka. Hu'y guaxu mokoigüe omombo teĩ Davi ojeavy uka kuerei.

¹² Davi reve SENHOR oiko rã Saul okyje ixugui, Saul-a gui ma SENHOR ojepe'a rire.

¹³ Ha'e rami vy Saul oĩa gui omondouka ju Davi, ha'e vy mil xondaro kuery re ju omopena. Ha'e ramo oxondaro kuery reve oẽ ha'e ojevy 'rã heta va'e kuery oexaa py.

¹⁴ Davi reve SENHOR oiko rã ha'evea rami meme ojapo.

¹⁵ Ha'e ramo Saul ma Davi ha'evea rami ojapo oikovya oexa vy okyjeve tema ixugui.

¹⁶ Ha'e rã Israel ha'e Judá kuery ha'e javi ma oayvu okuapy Davi, mba'eta ha'e kuery oexaa py oxondaro kuery reve oẽ ha'e ojevy 'rã.

Saul Davi ojuka ukaxeague

¹⁷ Ha'e gui Saul aipoe'i Davi pe:

— Ne'exa, apy ma oĩ xerajy guaimive va'e Merabe. Ame'ẽ 'rã nderá'yxyrã. Ha'e gui ndee ma xevy anho 'rã reiko xera'y ipy'a guaxu va'erã, SENHOR pe vy rejoguero'a aguã — he'i, ojeupe ae "Xepo py e'ŷ 'rã oiko vai, ha'e rã filisteu kuery po py" he'i vy.

¹⁸ Ha'e ramo Davi ombovai vy aipoe'i Saul pe:

— Ha'e rami avi marã ramigua tu xee, ha'e mba'exa tu xerek, ha'e xeru kuery marã ramigua tu ikuai Israel yvy re, xeruvixa rajy me xee aiko aguã? — he'i.

¹⁹ Ha'e rami teĩ Davi pe Saul guajy Merabe ome'ẽ 'rãgue py amboae pe ome'ẽ ta'yxyrã, Meolá pygua Adriel pe.

Mical Davi oayvu vy hexe omendaague

²⁰ Ha'e rã Saul rajy mboae Mical ma oayvu Davi. Ha'e nunga Saul pe omombe'ua rã oendu vy ový'a vaipa.

²¹ Mba'eta ojeupe aipoe'i: "Xerajy Mical ae 'rã ame'ẽ ixupe, oiko aguã nhuã imbo'aarã, filisteu kuery ojuka aguã", he'i vy.

Ha'e rami vy Davi pe Saul aipoe'i:

— Kova'e xerajy mokoña va'e re ma aŷ xerajy me 'rã reiko — he'i.

²² Saul aipoe'i uka guembiguai kuery pe:

— Pendeayvu ke Davi pe ha'e ae'ia py. Ha'e vy aipopeje 'rã: "Ne'exa, huvixa ma nderayvu vaipa, hembiguai kuery ha'e javi nderayvu avi. Eiko ha'vy huvixa rajy merã", peje 'rã.

²³ Ha'e rami Davi pe Saul rembiguai kuery ijayvu rã ombovai:

— Pavê gui xeporiaukueve va'eri huvixa rajy me ta ri ty'y aiko? — he'i.

²⁴ Ha'e rami ijayvuague Saul rembiguai kuery ixupe omombe'u vy aipoe'i:

— Po rami ma Davi ijayvu.

²⁵ Saul aipoe'ive ju:

— Po rami aipopeje ju 'rã Davi pe: "Oreruvixa ma mba'eve ndoipotai reme'ẽ tajy re remenda aguã, cem filisteu kuery pirekue e'ŷ vy, ngovaigua kuery re ojepy uka aguã" peje 'rã — he'i Saul, mba'eta oipota filisteu kuery po py Davi omano.

²⁶ Ha'e va'e ayvu Davi pe Saul rembiguai kuery omombe'u rã ový'a vaipa huvixa rajy merã oiko aguã. Ha'e rami vy oa'angaague ára ovaẽ e'ŷ mbove

²⁷ Davi opu'ã vy ojeupagua kuery ogueraa vy ojuka duzentos filisteu regua. Ipirekue omboipa heruvy vy ome'ẽ huvixa pe, tajy me oiko aguã. Ha'e ramo ta'yxyrã Saul ome'ẽ guajy Mical.

²⁸ Ha'e nunga Saul oexa vy oikuua Davi reve SENHOR anhetẽ oikoa, ha'e tajy Mical Davi oayvua guive oexa.

²⁹ Ha'e rami vy Davi gui Saul okyjeve oikovya vy nda'ija'ei ae tema hexe.

³⁰ Filisteu yvatekueve pegua xondaro kuery joguero'a vy oje'oi nhavõ Saul rembiguai kuery ikuai va'e gui Davi ojukave 'rã. Ha'e ramo hery opa rupi oendupaa.

19

Davi re Jônatas ojerureague

¹ Ha'e gui ma gua'y Jônatas pe Saul ijayvu Davi ojuka aguã re, guembiguai kuery ha'e javi pe guive. Ha'e rami teĩ Saul ra'y Jônatas Davi oayvu ete vy

² omombe'u ixupe. Ha'e vy aipoe'i:

— Xeru Saul ndejuka ukaxe. Enheangu ke ko'ẽ rã aje'ivekue guarã. Tereo renhemí aguã katy, epyta ha'e py ae.

³ Ha'e rã xee ma aa 'rã xeru reve nhuñdy rupi reĩa katy'i peve. Xeru reve xeayvu 'rã ndere, ha'e aexa 'rã oiko va'e. Ha'e gui ma aikuaa uka 'rã ndevy — he'i.

⁴ Ha'e gui ma nguu Saul reve Jônatas ijayvu porã Davi re. Ha'e vy aipoe'i:

— Xeruvixa, ejejavy eme nerembiguai Davi rovai, mba'eta ndevy pe ndojapo vai. Ha'e rami 'rãgue py ndevy ojapo oikovy va'e ma iporã va'e meme.

⁵ Mba'eta ndojeayvuvei reve filisteu kuery ojuka reta ramo SENHOR ogueraa jepe Israel kuery. Ndee ae voi rexá vy rerovy'a va'ekue. Mba'e re 'rã'vy rejajavy heko porã'i va'e ruguy remoẽ vy, Davi rejuka rive vy? — he'i.

⁶ Ha'e rami Jônatas ijayvu 'rã Saul oendu vy oura:

— Anhetẽ ete SENHOR oikove va'e rupi aura vy aipoa'e: Davi ma nomanoi 'rã — he'i.

⁷ Ha'e rã Jônatas Davi oenoĩ uka vy ixupe omombe'upa tuu ijayvuague ha'e javi. Ha'e rami vy Saul oĩa py ju ogueru. Ha'e ramo henonde rupi ju oiko jypyguare rami ae.

Peteĩgue ju Saul Davi ojuka ukaxeague

⁸ Ha'e gui teĩgue ju oiko joe opu'ãa. Ha'e ramo filisteu kuery reve Davi joguero'a vy oitypa ramo onhamba okuapy ixugui.

⁹ Ha'e rã Saul re ma nhe'ẽ vai ju oĩ SENHOR ombou va'ekue. Ngoo py oguapy oiny, opo py hu'y guaxu oguerekó reve. Henonde Davi ombopu oiny mba'epu ixã reta va'e.

¹⁰ Ha'e rami vy Davi re Saul hu'y omombo xapy'a oo mbotya reve onhyvõxe vy, teĩ ojeavy uka rã hu'y guaxu ipija oiny oo mbotya re. Ha'e ramo Davi onha vy oo jepe.

¹¹ Ha'e va'e pyavyve Saul omondouka guembiguai kuery Davi ro py, oarõ vy aje'ive reve ojuka aguã. Ha'e nunga Davi pe ta'yxy Mical omombe'u vy

— Kova'e pyávy ndereo jepe ri vy ko'ẽ rã ndejukaa 'rã — he'i.

Mical nguu ombotavy ramo Davi oo jepeague

¹² Ha'e gui Mical ma janela yvate oĩ va'e gui omboguejy Davi. Ha'e ramo onha ový vy oo jepe.

¹³ Mical ojopy peteĩ ta'angaa ngopy oguerekó va'e. Ha'e va'e ma tupa py omonheno vy inhekã re omoĩ peteĩ ajukue kavara rague guigua, ha'e ao puku py ju onhovãmba inony.

¹⁴ Saul rembiguai kuery Davi reraarã ombou va'ekue pe ma ta'yxy ijayvu vy

— Imba'eaxy oupy — he'i.

¹⁵ Ha'e rire Saul guembiguai kuery omondouka ju Davi oexa ete aguã. Ha'e vy aipoe'i ha'e kuery pe:

— Peru tema hupa reve teĩ, ajuka aguã — he'i.

¹⁶ Ha'e ramo hembiguai kuery oo ju vy tupa py oexa rã ta'angaa oo pygua ae itui ra'e, ha'e inhekã re ajukue kavara rague guigua oĩ.

¹⁷ Ha'e ramo guajy Mical pe Saul aipoe'i:

— Mba'e re tu nami xembotavy vy remondouka xerovaigua?

Mical ombovai:

— Mba'eta ha'e aipoe'i xevy: “Eja taa. Ha'e rami e'ŷ ramo xee rojuka 'rã”, he'i va'ekue.

Guembiguai kuery reve Saul ayvu omombe'u okuapyague

¹⁸ Ha'e rami py Davi onha vy oo jepe. Ha'e vy Ramá tetã py Samuel oĩa py ovaẽ vy ixupe omombe'u Saul ojapoague ha'e javi. Ha'e rami vy Samuel reve ojepe'a vy profeta kuery ro oĩ va'e py ju oiko.

¹⁹ Ha'e gui Saul pe aipo'ea:

— Davi je Ramá tetã py oiko profeta kuery ro py — 'ea.

²⁰ Ha'e rami rā Saul omondouka guembiguai kuery Davi ogueru aguā. Ha'e kuery oo vy oexa profeta kuery ikuai va'e ayvu omombe'u okuapy rā. Samuel voi oī ha'e kuery reroayvua py. Saul rembiguai kuery re voi ou Nhanderuete Nhe'ē, ha'e ramo ha'e kuery omombe'u avi okuapy ayvu.

²¹ Ha'e nunga Saul pe omombe'ua rā oendu vy guembiguai kuery mboae ju omondouka. Ha'e rā ha'e kuery voi omombe'u avi ayvu. Ha'e ramo Saul ma mboapykuea ju omondouka. Ha'e kuery voi omombe'u avi ayvu.

²² Ha'e ramo ha'e ae ma voi oo Ramá tetā py. Ygua tuvixa va'e Seco tekua katy'i oī va'e py ovaē vy oporandu:

— Mamo tu ikuai Davi ha'e Samuel?

Ombovai vy

— Ha'e kuery ma Ramá tetā py ikuai profeta kuery ro py — 'ea.

²³ Ha'e ramo Ramá tetā py profeta kuery ro oī va'e katy oo. Ha'e rā hexe voi Nhanderuete Nhe'ē ou. Ha'e ramo oguata ovya ramive ayvu omombe'u ovvy Ramá py profeta kuery ro oī va'e py ovaē peve.

²⁴ Ha'e py ma oao puku omboi vy omombe'u oiny ayvu Samuel renonde. Ha'e rami onheno oupy ha'e va'e ára re, pytū mbukukue re guive. Ha'e ramo rā aipo'ea:

— Saul voi teve oiko profeta kuery va'e regua?

20

Davi ha'e Jônatas joayvu eteague

¹ Ha'e gui Ramá tetā py profeta kuery ro oī va'e gui Davi onhave ju ovvy. Ha'e vy aipoe'i Jônatas pe:

— Mba'e tu xee ajapo? Mba'e nungakue py tu ajejav? Mba'e py tu xee ajapo vai nderu pe, xejuka ukaxe aguā?

² Ombovai:

— Ha'e nunga ndoikoi 'rā. Nanderejukai 'rāe. Xeru ma ndojapoi 'rā mba'eve, tuvixa va'e neñ kyrñ'i va'e xevy ranhe omombe'u e'ŷ re. Mba'erā tu xeru ha'e ramigua ndoikuua kai 'rā xevy? Ha'e nunga ndoikoi 'rāe — he'i.

³ Ha'e rā Davi oura reve ombovai:

— Nderu ma oikuua ae ndee xemboaxya. Ha'e nunga rupi ojeupe ae aipoe'i: “Jônatas toikuua eme ha'e nunga, iporiau e'ŷ aguā”, he'i va'ekue. Anhetē ete SENHOR oikove va'e rupi, ha'e ndee Jônatas nderekove rupi avi aura vy aipo'a'e: Xee amano aguā ovaē rai'i ma — he'i.

⁴ Ha'e rami rā Jônatas aipoe'i Davi pe:

— Ndee reipota va'e tema xee ajapo 'rā.

⁵ Davi ombovai:

— Ko'ē ramo oiko 'rā ngaru jaxy pyau pygua, huvixa reve xee akaru ainy aguā 'rāgue. Va'eri tove taa nhuñdy rupi anhemi aguā, mboapy araa ka'arukue peve.

⁶ Ha'e gui xee naña nderu oikuua rā ndee aipo're 'rā: “Davi ojerure kuri Belém guetā katy oo aguā re, mba'eta ha'e py hetarā kuery ha'e javi 'rā ojapo mymba ome'ē okuapy aguā ma'etýa nhavō”, 're 'rā.

⁷ Ha'e ramo xapy'a rei nderu “Ha'eve” he'i ramo xee nerembiguai aiko porā 'rā. Teñ ivai ri ramo reikuua ma 'rā xejukacea.

⁸ Xee nerembiguai pe exa uka xemboaxya, xereve SENHOR renonde peteñ ramo jaiko aguā ramo rejapo rire. Ha'e ramo e'ŷ rā xapy'a rei xere ha'eve'ŷ va'e oĩa reikuua vy ndee ae xejuka. Mba'e re 'rā tu nderu pe xemboaxa? — he'i.

⁹ Jônatas ombovai:

— Ha'e nunga ma ndoikoi 'rāe ndere. Xeru ndejukacea aikuua ri vy aju voi 'rā ndea py, xee ae amombe'u aguā — he'i.

¹⁰ Davi oporandu Jônatas pe:

— Ha'e ramo rā nderu ivai reve ri ombovai rā mava'e tu ou 'rā xevy pe omombe'u aguā?

¹¹ Jônatas ombovai:

— Eju ha'vy, jaa nhuündy rupi — he'i. Ha'e vy jogueraa.

Davi reve peteī rami ikuai aguā Jônatas ojapoague

¹² Ha'e gui Jônatas aipoe'i Davi pe:

— SENHOR Israel kuery ruete oendua py aipoa'e: Ko'ē rā e'ŷ vy ko'ē mboae ramo aikuua pota 'rā xerua py. Xapy'a rei ndee Davi pe ha'e ojapo porāxe ri ramo xee amombe'u uka 'rā.

¹³ Ha'e rami avi xapy'a rei xeru ndejukaxe teī ndevy xee ndaikuua ukai ri ramo reo jepe aguā rami, ha'e ramo tove SENHOR xee Jônatas taxembopaga ha'e ae oipotaa rami. SENHOR toiko ndereve, xeru reve oikoague rami.

¹⁴ Ha'e gui xapy'a rei xee aikove teri ramo xemboaxy ke SENHOR rami, amano e'ŷ aguā.

¹⁵ Ha'e yvy gui SENHOR omomba teī ndee Davi rovaigua kuery ha'e javi, ha'e rami teī emboaxy e'ŷ eme xero pygua kuery — he'i.

¹⁶ Ha'e rami Davi ro pygua kuery re Jônatas oma'ē vy ojapo peteī rami ikuai aguā. Ha'e vy aipoe'i:

— Tove SENHOR tombopaga Davi rovaigua kuery ha'e javi — he'i.

¹⁷ Teīgue ju Jônatas ojapo Davi oayvua rupi oura aguā rami, mba'eta Jônatas oayvu onhe'ē ha'e javi py.

¹⁸ Ha'e gui Jônatas aipoe'ive:

— Ko'ē ramo oiko 'rā ngaru jaxy pyau pygua. Ha'e va'e py oporandua 'rā ndere, nerenda oī rive ramo.

¹⁹ Mboapy araa py ma reo pojava 'rā jypy renhemiague katy, Ezel py itaova rovai hi'āa py 'rā repyta.

²⁰ Ha'e gui xee ma ha'e katy amombo 'rā mboapy hu'y, itaova re rive omombo va'e rami.

²¹ Ha'e rami vy amondouka 'rā kunumi va'e, “Tereo, eka hu'y”, ha'e vy. Ha'e va'e gui xapy'a rei kunumi va'e pe “Ne'exa, hu'y tu kyvõ'i rami ikuai, eru”, ha'e ramo ke eju ju Davi, mba'eta anhetē ete SENHOR oikove va'e rupi aura vy aipoa'e: Reiko porā 'rā, mba'eve gui rekyje e'ŷ re.

²² Ha'e rami teī xapy'a rei kunumi va'e pe “Neī ke, hu'y nderovaive'i ma ikuai”, ha'e ramo tereo, SENHOR nemondouka ramo.

²³ Ha'e gui jajogueroayvuague rami vy nhanembyte SENHOR oī 'rā raka'e rā peve — he'i.

²⁴ Ha'e rami rā Davi oo vy nhuündy rupi onhemi.

Ha'e gui ngaru jaxy pyau pygua oiko jave py ma huvixa ma mesa py oī okaru aguā.

²⁵ Gueko rami vy guenda py ae oī oo mbotya yvy'iry. Jônatas ma henonde'i oī, ha'e gui Saul yvy'iry ma Abner oī avi. Ha'e rā Davi renda ma oī rive.

²⁶ Ha'e rami teī ha'e va'e ára ma Saul mba'eve nde'i, ojeupe ae “Davi re ko mba'emo rei oī rā ha'eve'ŷ va'e teri oiko, onhemongy'a uka va'ekue ae 'rā”, he'i vy.

²⁷ Ko'ē jevy ha'ekue rami ae ju oiko mokoī araa ma ngaru jaxy pyau pygua. Davi renda oī rive ae tema.

Ha'e ramo Saul aipoe'i gua'y Jônatas pe:

— Mba'e re tu Jessé ra'y ndoui okaru vy, kuee neī aŷ ma voi?

²⁸ Jônatas ombovai:

— Davi ijayvu porā'ia rupi ojerure xevy Belém tekao katy oo aguā re.

²⁹ Ha'e vy aipoe'i xevy: “Ajerure aa aguā, mba'eta xeretarā kuery mba'emo ome'ē aguā rami ikuai tekao py. Ha'e vy xeretarā kuery va'e regua onhea'ā rei xereraa aguā re. Aŷ ha'eve ri ramo ajerure aa aguā re, xeregua kuery aexapa aguā”, he'i rire. Ha'e nunga rupi ae ndoui xeruvixa ngaru rejapoa py.

Jônatas pe Saul ivai reve ijayvuague

³⁰ Ha'e ramo Saul ma Jônatas pe ae ivai. Ha'e vy aipoe'i:

— Kunha heko vai ha'e inhakā ratā va'e pi'a! Xee ndaikuuaai teve Jessé ra'y reiporoaque nemoximbaarā, ha'e ndexy nekuavāare voi oximba aguā?

³¹ Ha'e nunga rupi Jessé ra'y yvy re oikovea ja neī ndee ma voi riae ndereikoi 'rā, neī repenaa voi noī atāi 'rā. Eru ruka ha'vy aŷ ma voi, ajuka 'rāe — he'i.

³² Ha'e ramo Jônatas ombovai vy aipoe'i nguu Saul pe:
— Mba'e re 'rã ha'vy rejuka? Mba'e tu ojapo vai?

³³ Ha'e rami teñ hexe Saul omombo hu'y guaxu onhyvõ aguã. Ha'e rami rã Jônatas oikuua anhetê ae tuu onhembopy'aa Davi ojuka aguã.

³⁴ Ha'e rire Jônatas ivai vy mesa gui opu'ã ovy. Mokoï araa ma ngaru jaxy pyau pygua va'e ára ma ndokarui, tuu ha'e rami ete Davi re ijayvu rã iporiau vy.

Jônatas Davi mondoukaa rupi ijayvuague

³⁵ Ko'ẽ jevy Davi reve Jônatas oa'angaague ára py oo nhuñdy katy. Ogueraa avi peteñ guembiguai kunumi va'e.

³⁶ Kunumi va'e pe

— Enha ke hu'y amombo rã reru aguã — he'i. Ha'e ramo ha'e va'e onha jave omombo peteñ hu'y henonderã katy.

³⁷ Jônatas hu'y omombo va'ekue ho'aague py kunumi va'e ovaẽ ramo Jônatas ojapukai ixupe. Ha'e vy aipoe'i:

— Nderovaive'i e'ŷ teve hu'y ho'a?

³⁸ Teigue ju Jônatas ojapukai:

— Neñ ejapura ke, neakuã ta'vy — he'i. Ha'e ramo kunumi Jônatas rembiguai hu'y ojopy ma vy ojevy ju hereko aõa py.

³⁹ Kunumi va'e mba'eve ma voi ndokuuaai. Jônatas ha'e Davi anho'i oikuua ha'e nunga.

⁴⁰ Ha'e gui ma kunumi ogueru va'ekue po py Jônatas omoï guapa. Ha'e vy aipoe'i:

— Tereo, eraa tetã katy.

⁴¹ Kunumi va'e oo'i ramove Davi opu'ã ouvy kuaray puku-a katy oïague gui. Mboapykue oï guenapy'ã re, ngova yvy re omovaẽ reve. Ha'e vy Jônatas reve mokoïve joayvu vyve ojae'o. Davi ma ojae'ove oiny.

⁴² Jônatas aipoe'i Davi pe:

— Tereo porã'i ke, nhande mokoïve SENHOR rery rupi jaura vy “ SENHOR toñ nhanembyte, ha'e gui xero pygua ha'e ndero pygua kuery mbyte avi”, ja'e rire — he'i. Ha'e ramo Davi opu'ã ovy. Ha'e rã Jônatas ma tetã katy ju ojevy.

21

Sacerdote Aimeleque oña py Davi ooague

¹ Ha'e gui ma Nobe tetã py Davi ovaẽ sacerdote Aimeleque oña py. Ha'e ramo Aimeleque ma Davi ou rã oexa vy oryryipa reve oẽ ovaexi vy. Ha'e vy aipoe'i:

— Mba'e re tu ndee ae'i reju? Mava'eve pa ndou i ndereve?

² Davi ombovai sacerdote Aimeleque pe:

— Huvixave xembou vy aipoe'i: “Mava'eve toikuua eme mba'e re pa romondoukaa, ha'e mba'e nunga rupi paa voi”, he'i va'ekue. Ha'e rã xevygua xondaro kuery pe ma aipoa'e peteñ henda py rojoexa ju aguã rami.

³ Aŷ ma mba'e tu rerekö apy ndepo py? Eme'ẽ xevy peteñ nhiruñ mbojape, e'ŷ vy rerekö va'e rei tema — he'i.

⁴ Sacerdote ombovai vy Davi pe aipoe'i:

— Mbojape rive'i ma ndarekoi xepo py. Mbojape iky'a e'ŷ va'e anho oĩ. Ha'e rami avi nderevega avakue kunha reve nhogueronheno ve'ŷ teri va'e pe ma guive rã — he'i.

⁵ Davi ombovai vy aipoe'i sacerdote pe:

— Tá, ha'e rami ae jepi, rojoguero'a aguã katy roo nhavõ nda'evei ae kunhague reve roñ aguã. Ha'e rami vy xerevega avakue nonhemboete ky'ai 'rã roo rivea rupi, ha'e gui aŷ katuve ma nda'iky'aive ma 'rã — he'i.

⁶ Ha'e rami rã sacerdote ome'ẽ mbojape iky'a e'ŷ va'e, amboae regua ha'e py nda'ipoi rã. Mbojape iky'a e'ŷ va'e anho oĩ, SENHOR renonde gui oguenoë mbyre, hi'ára py porã omboekovia rire mbojape haku rei teri va'e re.

⁷ Ha'e va'e ára py oĩ ra'e peteñ Saul rembiguai regua, SENHOR renonde oĩ aguã rami oiko va'e ae. Doegue hery va'e, Edom pygua, Saul rymba kuery re opena va'e.

⁸ Ha'e gui Davi aipoe'i Aimeleque pe:

— Ndererekoi pa hu'y guaxu, e'ŷ vy kyxe? Mba'eta xee ndarekoi kyxe neĩ xerembiporu ma voi, huvixa xembou pojava rā.

⁹ Sacerdote ombovai:

— Apy oĩ va'e ma kyxe filisteu Golias Elá yvyugua py rejuka va'ekue mba'ekue. Manto sacerdote pegua'ã katy oĩ ajukue py onhovā mbyre. Reraaxe vy ke eraa, mba'eta amboae nda'ipoi kova'e anho e'ŷ vy — he'i.

Davi aipoe'i:

— Amboae nda'ipoi ri ha'e va'e ramigua. Eme'ẽ xevy.

Gate pygua huvixa Aquis oĩa katy ojavaague

¹⁰ Ha'e va'e ára Davi opu'ã vy ojava ovy Saul gui. Ha'e vy Gate pygua huvixa Aquis oĩa py ju ovaẽ.

¹¹ Ha'e rami teĩ Aquis pe hembiguai kuery aipoe'i okuapy:

— Peva'e pa Davi oyvy re huvixa opena va'e e'ŷ teve? Ixupe e'ŷ teve ojeroky reve oporaei reve “Saul ma mil ete'i ojuka, ha'e rā Davi ma dez mil peve ojuka va'e”, he'i okuapyague va'e? — he'i okuapy.

¹² Ha'e rami ijayvu rā Davi oendu vy ima'endu'a riae oikovy ha'e ae'i. Ha'e rami vy Gate pygua huvixa Aquis gui okyje.

¹³ Ha'e rami vy ha'e kuery oexaa py onhembotavy rei vy inhakā porā e'ŷ va'e rami oiko. Ha'e vy okẽ yta rupi oikaraĩmba, ha'e hendyry xyrypa rei oikovy guendyva rupi.

¹⁴ Ha'e ramo Aquis aipoe'i guembiguai kuery pe:

— Pexa ma kova'e ava na'inhakā porāia va'eri. Mba'e re tu xea py peru?

¹⁵ Xevy pe oata ri ty'y inhakā porā e'ŷ va'e, ha'e va'e Peru avi aguã, xerenonde inhakā vai rei oikovy aguã? Ha'e va'e voi ri ty'y oike 'rā xero py? — he'i.

22

Adulão ha'e Moabe py Davi onhemiague

¹ Ha'e rami rā Davi ha'e gui oo vy Adulão katy'i itakua oĩ va'e py ju onhemi. Ha'e py ha'e oikoa tyke'y kuery ha'e tuu ro pygua kuery ha'e javi oendu vy oupa ha'e py hexeve ikuai aguã.

² Hexe onhemoirū avi avakue mba'emo py ojapurapa rei va'e ha'e javi, oreve va'e e'ŷ vy ndovy'ai rei va'e. Ha'e rā ha'e ma oiko ha'e kuery re opena va'e. Ha'e javi vy hexeve ikuai quatrocentos avakue rivyyvi.

³ Ha'e va'e gui Davi oo ju Moabe regua Mispa katy. Ha'e rami vy ha'e pygua huvixa pe aipoe'i:

— Toiko xeru ha'e ha'i pendereve, mba'e pa Nhanderuete xere ojapo 'rāa aikuua peve — he'i.

⁴ Ha'e rami vy Moabe pygua huvixa oĩa py ha'e kuery ogueru ramo hexeve ikuai, Davi itakua py oikoa ja.

⁵ Ha'e gui profeta Gade aipoe'i Davi pe:

— Eptyave eme apy. Tereo, Judá yvy re ju eike — he'i ramo Davi oẽ vy Herete ka'aguy'i re ju oo.

Nobe py sacerdote ikuai va'ekue Saul ojuka ukapaague

⁶ Davi ha'e hexeveguia avakue ikuiaia oikuua okuapya. Ha'e nunga Saul pe omombe'ua rā oendu. Ha'e jave py Saul ma Gibeá py oĩ, yvyra-vyra'i guy py, yvy'ã'ia re. Opo py oguereko hu'y guaxu, ha'e hexeve hembiguai kuery voi ikuai.

⁷ Ha'e va'e kuery pe aipoe'i:

— Benjamim ramymino kuery, pendu ke xeayvua! Pêvy voi ty'y Jessé ra'y ome'ẽ 'rā yvy ha'e uvaty? Peẽ kuery ha'e javi pendeapo 'rā ri ty'y mil ha'e cem re pepena aguã rami?

⁸ Ha'e rami aguã ae ri ty'y pejogueroayvu pekuapy xerovai? Mava'eve rei nomombe'ui xevy Jessé ra'y reve xera'y peteĩ rami ikuai aguã re jogueroayvuague. Peẽ kuery va'e

regua peteīve naxemboaxyi vy xevy napemombe'ui xera'y eteve voi xerembiguai reve xemoingo axy aguā rami jogueroayvuague, aŷ minha jaexaa rami — he'i.

⁹ Ha'e ramo Edom pygua Doegue ma ombovai, Saul rembiguai kuery mboae reve hi'aī avia py. Ha'e vy aipoe'i:

— Ha'e gui xee ma aexa Jessé ra'y Nobe tetā py ovaē rā, Aitube ra'y Aimeleque oĩa py.

¹⁰ Ha'e gui ha'e ojerure rā Aimeleque oporandu SENHOR pe. Ha'e vy ixupe ome'ẽ tembi'u.

Ixupe ome'ẽ avi kyxe filisteu Golias mba'ekue — he'i.

¹¹ Ha'e rami rā huvixa oenoĩ uka sacerdote Aitube ra'y Aimeleque, ha'e tuu ro pygua kuery ha'e javi. Ha'e va'e kuery ma Nobe py sacerdote ikuai va'e. Ha'e ramo ha'e kuery ha'e javi ou okuapy huvixaa py.

¹² Saul aipoe'i:

— Aitube ra'y, endu ke xeayvua!

Ombovai:

— Apy ma aī, xeruvixa — he'i.

¹³ Ha'e ramo Saul aipoe'i:

— Mba'e re tu Jessé ra'y reve penhomongeta xerovai? Mba'eta ixupe reme'ẽ mbojape ha'e kyxe. Hexe reporandu avi Nhanderuete pe, xerovai opu'ã vy xejuka nhemi aguā, aŷ jaexaa rami — he'i.

¹⁴ Ha'e ramo Aimeleque ombovai vy huvixa pe aipoe'i:

— Ha'e rami avi mava'e ha'vy nerembiguai kuery ikuai va'e regua Davi rami heko porā va'e? Ha'e ma nderajy me, nerarõa kuery re opena va'e, ha'e ndero pygua kuery omboeteve okuapy va'e.

¹⁵ Tyrā aŷ ramo teve jypy'i Nhanderuete pe ajerure hexe? Any! Ndeayvu rive eme xee nerembiguai re, neĩ xeru ro pygua kuery re. Mba'eta xee nerembiguai va'e ma mba'eve aikuua va'e'ŷ, tuvixa va'e neĩ kyrī'i va'e — he'i.

¹⁶ Ha'e rami teĩ huvixave ombovai:

— Aimeleque, ndee remano 'rā, nderu ro pygua kuery ha'e javi reve.

¹⁷ Huvixa aipoe'ive ju harõa kuery hexeve ikuai va'e pe:

— Peju, pejukapa SENHOR pegua sacerdote kuery, mba'eta ha'e kuery voi Davi re onhemoirū vy ojava rā oikuua va'eri xevy ndoikuua ukai rire — he'i teĩ hembiguai kuery ndojukaxei SENHOR pegua sacerdote kuery.

¹⁸ Ha'e ramo Doegue pe ju huvixa aipoe'i:

— Eju, ejukapa sacerdote kuery — he'i ramo Edom pygua Doegue ou vy ojukapa sacerdote kuery. Ha'e va'e ára ojuka oitenta e cinco avakue manto sacerdote pegua py onhemonde va'ekue.

¹⁹ Nobe tetā sacerdote kuery rekoa py voi ojukapa kyxe py: avakue ha'e kunhague, kyrīgue ha'e okambu'i va'e, vaka, mburika'i ha'e vexa'i kuery.

Davi reve Abiatar voi onhemiague

²⁰ Aitube ra'y Aimeleque ra'y kuery regua ojukaa rā peteī'i anho oo jepe, Abiatar hery va'e. Ha'e va'e ma Davi oĩa katy onha ovy.

²¹ Ha'e vy ixupe omombe'u vy aipoe'i:

— Saul ma ojuka ukapa ma SENHOR pegua sacerdote kuery.

²² Ha'e ramo Davi aipoe'i Abiatar pe:

— Xee aikuua porā ae ma Edom pygua Doegue ha'e py oĩ rire nomombe'u e'ŷi 'rāe Saul pe. Xekáuxa ae nderu ro pygua kuery omanomba.

²³ Eiko ri xereve, ekyje eme, mba'eta xejukaxea ma ndee voi ndejukaxe avi. Xereve vy ma reo jepe 'rā — he'i.

— Queila pygua kuery reve filisteu kuery joguero'a vy imondapa mba'emo ra'yīgue re
— 'ea.

² Ha'e rami rā SENHOR pe Davi oporandu vy aipoe'i:

— Ha'e gui xee aa vy pa aity 'rā filisteu kuery?

SENHOR ombovai vy aipoe'i Davi pe:

— Tereo, filisteu kuery peitypa 'rā, ha'e vy peraa jepe 'rā Queila pygua kuery — he'i.

³ Ha'e rami teī avakue Davi reve ikuai va'e aipoe'i:

— Apy Judá yvy re rive voi rokyje, ha'e gui Queila katy filisteu regua xondaro kuery
rovai roje'oi vy katuve ma — he'i okuapy.

⁴ Ha'e rami rā Davi teīgue ju oporandu SENHOR pe. Ha'e rā SENHOR ombovai vy aipoe'i:

— Peiko katu tema Queila katy peo aguā, mba'eta pendepo py amboaxapa 'rā filisteu
kuery — he'i.

⁵ Ha'e ramo Queila katy Davi oje'oi hexeveguia kuery va'e reve. Filisteu kuery rovai
opu'ā vy ogueraapa ju mymba kuery imondaague. Heta avi ojuka ha'e kuery regua. Ha'e
rami py Davi ogueraa jepe Queila pygua kuery.

⁶ Davi oña katy Aimelleque ra'y Abiatar ojava va'ekue Queila katy oo avi vy opo py ogueraa
manto sacerdote pegua.

⁷ Ha'e gui Saul pe omombe'ua Queila katy Davi ooague. Saul aipoe'i:

— Nhanderuete omboaxa ma xepo py. Ojejoko uka ma, peteī tetā hokē jokoa va'e py
oike rire — he'i.

⁸ Ha'e rami vy Saul oenoī ukapa ojeupeguia kuery, joe opu'ā vy Queila katy oje'oi aguā,
Davi ha'e hexeveguia kuery ojokopa aguā.

⁹ Ha'e rami teī Davi oikuua ae Saul ojukaxe oikovya. Ha'e vy aipoe'i sacerdote Abiatar
pe:

— Eru apy manto sacerdote pegua — he'i ramo ogueru.

¹⁰ Ha'e gui Davi onhembo'e SENHOR pe:

— Xe-SENHOR Israel kuery ruete va'e, xee nerembiguai aendu Saul xekáuxa Queila tetā
py ou vy ombovaipaxea.

¹¹ Ha'e gui Queila pygua avakue xemboaxa 'rā teve ipo py? Ha'e Saul ou ae 'rā teve, xee
nerembiguai aendua rami? Ah SENHOR Israel kuery ruete, eikuua uka ke xee nerembiguai
pe.

SENHOR ombovai:

— Ou 'rā — he'i.

¹² Ha'e gui teīgue ju Davi oporandu ixupe:

— Ha'e gui avakue Queila pygua xemboaxa 'rā teve Saul po py, xerembiguai kuery reve?

SENHOR ombovai ju:

— Penemboaxa 'rā ipo py — he'i.

¹³ Ha'e rami rā Davi ma hexeve avakue seiscentos ikuai va'e reve oiko katupa vy Queila
gui oẽmba vy ooa katy rei oje'oi. Ha'e gui Queila gui Davi ojava maa omombe'ua rā Saul
oendu vy ndoo potavei.

¹⁴ Ha'e rā Davi ma tekao e'ŷa rupi ae tema oiko onhemia py. Yvy'ā reia Zife tekao e'ŷa re
oiko. Saul ko'ē nhavō oeka oikovy teī Nhanderuete nomboaxai ipo py.

Teīgue ju Davi ha'e Jônatas peteī rami ikuai aguā re jogueroayvuague

¹⁵ Ha'e gui Saul ojukaxe vy oo jevyague Davi oikuua vy opyta ranhe Horesa py Zife
tekao e'ŷa py.

¹⁶ Ha'e ramo Saul ra'y Jônatas opu'ā vy oo Davi oña katy Horesa py. Ha'e vy ombopy'a
guaxuve Nhanderuete re ojeroviaa py.

¹⁷ Ha'e vy aipoe'i:

— Ekyje eme, mba'eta xeru Saul nandejoui 'rā. Ha'e rami 'rāgue py ndee ae 'rā repena
Israel kuery re. Ndereve xee voi aī 'rā nepytyvōarā. Ha'e nunga xeru ae voi oikuua porā
— he'i.

¹⁸ Ha'e rami vy SENHOR renonde mokoïve ojapo peteī rami ikuai aguā. Ha'e gui Davi
opyta Horesa py, ha'e rā Jônatas ma ngoo katy ju ojevy.

Zife pygua kuery Davi omboaxa nhemi aguā re ijayvu okuapyague

¹⁹ Ha'e gui Zife pygua kuery oje'oi Gibeá katy Saul oña py. Ha'e vy aipoe'i:

— Ore kuery orerekoa Horesa py e'ŷ teve Davi onhemi oikovy? Haquila yvy'ā reia rupi oiko Jesimom regua kuaray puku-a katy.

²⁰ Aŷ ma oreruvixa, tereo ndepy'a py rejou porāa rami vy. Ha'e gui ore kuery ma ndepo py romboaxa aguā rami 'rā roiko — he'i okuapy.

²¹ Saul aipoe'i:

— SENHOR tapenemoingo porā, xemboaxya rupi peiko rā.

²² Tapeo ha'vy peporandu porāve. Peikuua pota porā mamo pa oikoa re, ha'e mava'e pa oexa jepi va'ea re. Mba'eta xevy omombe'ua ha'e oiko kuaa raxa va'ea rami.

²³ Ha'e nunga rupi pejapyxaka, peikuua pota porā onhemiaty ha'e javi re. Ha'e gui ma pejevy ju xea py pemombe'u porāve aguā, Judá regua mbovy e'ŷ ikuai rupi teĩ ajou aguā — he'i.

²⁴ Ha'e rami rā ha'e kuery opu'ā vy Zife katy ju ojevy Saul renonderā. Davi ha'e hexeveguia avakue ikuai Maom regua tekao e'ŷa py Jesimom katy, yvy joja reia oī va'e re.

²⁵ Hakykue Saul ha'e hexeveguia avakue oje'oi rā Davi pe omombe'ua. Ha'e rami rā oo itaova pa'ū tekao e'ŷa Maom oī va'e katy. Ha'e nunga Saul oendu vy oo avi Davi rakykue tekao e'ŷa Maom katy.

²⁶ Ha'e gui ma Saul ha'e hexeveguia avakue oje'oi peteĩ yvy'ā katy, ha'e rā Davi ha'e hexeveguia avakue ma amboae katy oje'oi. Davi ojapura Saul gui oo jepe aguā onha vy. Ha'e rami teĩ ha'e kuery ojoko Davi kuery ojopypa aguā.

²⁷ Ha'e gui Saul oña py ou peteĩ ayvu mombe'ua. Ha'e vy aipoe'i:

— Ejapura ke ha'e tereo ju, mba'eta filisteu kuery oupa ma nhandeyvy re — he'i.

²⁸ Ha'e rami rā Saul ojope'a Davi rakykue ooa gui, filisteu kuery re opu'ā ovvy aguā. Ha'e nunga rupi ha'e va'e tekao omboerya Ita oo jepea.

²⁹ Ha'e va'e gui Davi oo vy En-Gedi py ju onhemi oī porā aguā py.

24

Davi Saul ndojukaiague

¹ Filisteu kuery rakykue Saul ooague gui ojevy jave omombe'ua ixupe:

— Davi ma En-Gedi tekao e'ŷa re oiko — 'ea.

² Ha'e ramo Saul ogueraa três mil avakue Israel kuery ha'e javi gui oiporavo va'ekue. Ha'e rami vy itaova pa'ū ijavaete reia rupi oje'oi Davi ha'e hexeveguia avakue rakykue.

³ Tape rupi ooa rupi ovaẽ vexa'i kuery kora oī va'e py. Ha'e py oī avi peteĩ itakua. Ha'e va'e py ma Saul oike, jai py optytaxea oendu vy. Ha'e va'e itakua py ae Davi oirū kuery reve ikuai, iguyve katy onhemi okuapy.

⁴ Ha'e ramo Davi revegua avakue aipoe'i okuapy:

— Ange ma SENHOR aipoe'iague ára: “Ndepo py amboaxa 'rā nderovaigua, reipotaa rami rereko aguā” he'iague — he'i okuapy ramo Davi opu'ā mbeguei'i ovvy vy ojaya Saul ao puku apy.

⁵ Ha'e rami teĩ Saul ao apy ojaya rire Davi oendu ipy'a tytyvea.

⁶ Ha'e rami vy hexeveguia avakue pe aipoe'i:

— SENHOR taxejoko mba'emo rei xeruvixa re ajapo e'ŷ aguā, hovai xepo amoī e'ŷ aguā, SENHOR oiporavo va'ekue oiko rā — he'i.

⁷ Ha'e rami Davi ijayvu vy ojoko hexeveguia avakue Saul rovai opu'ā okuapya gui. Ha'e gui Saul ma itakua gui oẽ ju vy oove tema.

⁸ Ha'e rire Davi voi opu'ā vy oẽ avi itakua gui. Ha'e rami vy ojapukai ho'amy Saul pe. Ha'e vy aipoe'i:

— Huvixave, xeruvixa!

Saul guakykue re oma'ē ramo Davi guenapy'ā re oī omboetea rupi, ngova yvy re omovaẽ reve.

⁹ Ha'e vy Davi aipoe'i Saul pe:

— Mba'e re tu rejapyxaka 'rā avakue “Davi ndejukaxe”, he'i va'e kuery re?

¹⁰ Mba'eta nderexa py ae rexā ange kova'e itakua py SENHOR xepo py SENHOR nemboaxa rā. Ha'e gui amongue aipoe'i rojuka aguā teī xee ma ndorojukai, mba'eta aipoa'e: “Xee namoī 'rā xepo xeruvixa re, Nhanderuete oiporavo rire”, ha'e kuri.

¹¹ Ema'ē ha'vy xeru, exa apy xepo py ndeo apykue areko va'e. Ndeo apy'i rive xee ajaya kuri rojuka 'rāgue py. Eikuua pota ha'vy rexā aguā xere noīa romoingo axy aguā. Xee ma mba'eve ndajapoxei ndere, ndajapo vai ndevy, ndee xejukaxe vy xereka reikovy teī.

¹² SENHOR toikuua pota xere ha'e ndere, SENHOR ae tanembopaga xere rejapo vaiague re, ha'e rā xee ma namoī 'rā xepo ndere.

¹³ Ymagua kuery ayvu omombe'u vy “Heko vai va'e gui ae oiko teko vai”, he'iaty rami ae. Ha'e rā xee ma namoī 'rā xepo nderovai.

¹⁴ Ha'e gui mava'e rakykue tu ndee Israel pygua huvixa va'e reo? Marā ramigua tu rejopyxe? Peteī jagua re'ōgue ri ty'y? Tyrā pa peteī jagua ky teve?

¹⁵ SENHOR toikuua pota xere, toikuua pota xere ha'e ndere, toexa pota porā, taxemboeko porā, xevy pe tojapo ha'evea ramigua, ha'e taxereraa jepe ndepo gui — he'i.

¹⁶ Ha'e rami Davi ijayvupa ma ramo Saul ombovai:

— Pova'e ae pa ndeayvua, xera'y Davi? — he'i vyve ojae'o atā.

¹⁷ Aipoe'ive Davi pe:

— Ndee ma xegui nderekō porāve va'e, mba'eta mba'emo porā anho rejapo xere, ha'e rā xee ma mba'emo vai ajapoxe ndere.

¹⁸ Ange rexā uka xere rejapo porāa. Ndepo py SENHOR xemboaxa teī ndee ndaxejukai.

¹⁹ Mba'eta mava'e nda'u ngovaigua ojou teī omondouka porā rive 'rā tape rupi? SENHOR tome'ē ndevy mba'emo porā ange xere nderejapo vaiague re.

²⁰ Aŷ aikuua porā ma ndee ae 'rā huvixave reiko, ha'e Israel kuery re repenaa oī atā 'rā ndepo py.

²¹ Ha'e nunga rupi eura ke xevy SENHOR re, xeguigua kuery remomba e'ŷ aguā, xerery rembogue e'ŷ aguā xeru ro gui — he'i.

²² Ha'e rami rā Saul pe Davi oura ramo oo ju ngoo katy. Ha'e rā Davi ma hexeve avakue reve oje'oi peteī henda py onhemi jeyv aguā.

25

Samuel omanoague

¹ Ha'e gui Samuel omano. Ha'e ramo Israel kuery ha'e javi ono'ōmba vy ojae'o okuapy. Hekoague py ae onhono porā, Ramā tetā py. Ha'e va'e rire Davi opu'ā vy oove ju Parā tekaoa e'ŷa katy.

Nabal rekoa py Davi kuery ovaē javé guare

² Oiko peteī ava Maom pygua, Carmelo katy'i ijyvy va'e. Ha'e va'e ma oguerekopa va'e, trois mil vexā'i ha'e mil kavara oguerekopa va'e. Ha'e vy vexā'i rague ojaya oikovy Carmelo py ae.

³ Ha'e va'e rery ma Nabal.* Ha'e rā ta'yxy rery ma Abigail. Kunha va'e ma hi'arandu ha'e iporā guive. Ha'e rā ime ma ivai ja rei ha'e nda'iporayvui guive opa mba'e py. Ha'e va'e ma Calebe ramymino oiko raka'e.

⁴ Ha'e gui Davi ma tekaoa e'ŷa re oikoa py oendu Nabal vexā'i rague ojaya oikovy.

⁵ Ha'e rami vy dez guembigui kunumigue ha'e katy omondouka vy aipoe'i:

— Tapeo Carmelo py Nabal ombo'eapoa py. Ixupe peporandu 'rā xerery rupi, mba'exa pa oikoa re.

⁶ Ha'e vy oguerekopa va'e pe aipopeje 'rā: “Toī ndere mby'a porā, ndero pygua re voi, ha'e rerekō va'e ha'e javi re.

* 25:3 Tery Nabal ma “Hi'arandu e'ŷ va'e” 'ea (versículo 25).

⁷ Aendu vexa'i rague pejaya pekuapya. Nerymba vexa'i re opena va'e kuery romovaẽ orea py. Ha'e kuery pe ndorojapo vai, ha'e ha'e kuery pe mba'eve rei ndoatai Carmelo py orea py ikuai jave.

⁸ Ndevygua kunumigue ikuai va'e pe reporandu rā ha'e kuery oremombe'u porā 'rā. Ha'e nunga rupi xevygua kunumigue voi ndea py ou ramo emovaẽ porā, mba'eta pevy'aa ára py rovaẽ ramo. Eme'ẽ ha'vy xerembiguai kuery pe ndepo py rerekva'e tema, xee ndera'y Davi pe voi", he'i uka imondovy.

⁹ Ha'e gui kunumigue Davi omondouka va'ekue Nabal oña py ovaẽmba vy ixupe omombe'upa Davi ayvu ha'e javi, hery rupi. Ha'e vy ojapyxaka okuapy.

¹⁰ Ha'e ramo Davi rembiguai kuery pe Nabal ombovai vy aipoe'i:

— Mava'e tu Davi? Mava'e tu Jessé ra'y? Mba'eta aŷ gui ma heta ikuai tembiguai opatõ gui ojavapa va'ekue.

¹¹ Xee nda'u aipe'a 'rā ri xemba'e mbojape ha'e yy, ha'e xevy omba'eapo va'e kuery peguarã xo'o ajuka va'ekue, ha'e nunga amboaxa aguã avakue aikuaa e'ŷ va'e pe, magui pa oua aikuaa e'ŷ re? — he'i.

¹² Ha'e rami rā Davi rembiguai kuery ojevy ju oje'oivy tape ouague rupi. Ovaẽmba vy Davi pe omombe'upa ju ijayvuague ha'e javi.

¹³ Ha'e ramo Davi aipoe'i guembiguai kuery pe:

— Peteĩ-teĩ pemoĩ kyxe pendejee — he'i ramo peteĩ-teĩ ojee omoĩ okyxe, Davi voi omoĩ avi okyxe. Davi rupive avakue oje'oi va'e ma quattrocentos rivyvyi, ha'e gui duzentos ju mba'e rei-rei rarõa py optyta.

¹⁴ Ha'e rami jave Nabal rembiguai kuery va'e regua omombe'u ta'yxy Abigail pe. Ha'e vy aipoe'i:

— Davi tekaoa e'ŷa py oña gui ombou guembiguai kuery orererekaoa va'e pe ijayvu porā'i uka aguã teĩ ha'e ombovai atã.

¹⁵ Ha'e va'e avakue ma ha'eve vai'i va'e orevy. Mba'eve py ha'e kuery noremoingo axyi. Ha'e rami ae avi ha'e kuery reve orekuia ja mba'eve rei ndoatai oremba'e, nhuñdy rupi orekuai jave teĩ.

¹⁶ Ore kuery pe ma ha'e kuery ara py ha'e pyávy ikuai kora mba'emo jokoarã, ha'e kuery reve vexa'i ropenaa rupi orekuia ja.

¹⁷ Aŷ ma eikuua pota. Exa mba'e pa rejapo va'erã, mba'eta anhetẽ mba'emo vai oiko 'rā tema orererekaoa re, ha'e hoo pygua kuery ha'e javi re. Ha'e ma nhe'ẽ vai ra'y ramo ndoikoi hexeve ijayvu porā'ia aguã — he'i.

Davi jojukaxeа gui Abigail omombytu'u eteague

¹⁸ Ha'e ramo ta'yxy Abigail ojapura reve ogueraa duzentos mbojape, mokoĩ ryru vinho, teĩ nhiruĩ vexa'i ro'okue, teĩ nhiruĩ ryru trigo ra'yigue mbixy, cem uva'a pirukue ha'e duzentos figo pirukue apomo. Ha'e vy guymba kuery mburika'i áry omoĩmba vy

¹⁹ aipoe'i guembiguai kunumigue pe:

— Tapeo xerenonderã. Xee ma penderakykue'i 'rā aa — he'i va'eri ome Nabal pe ma mba'eve nomombe'ui.

²⁰ Mburika'i áry oo oiny vy yvy'ã guy oguejy vy ojeapa'i ma ovy jave Davi ha'e hupivegua avakue ou avi okuapy. Ha'e vy nhovaexi ha'e kuery reve.

²¹ Davi aipoe'i ma voi va'ekue: "Anhetẽ tekaoa e'ŷa rupi arõ uka rive va'ekue mba'emo Nabal oguereko va'e. Xee ma imba'e rei-rei regua mba'eve namboatatai heta teĩ. Ixupe xee ajapo porāague rekovia ha'e ojapo vai xevy.

²² Tove Nhanderuete oipotaa rami tombopaga Davi rovaigua kuery, xapy'a rei ko'ẽmba peve peteĩ ava ha'e kuery va'e regua oikove reve aeja ri ramo", he'i va'ekue.

²³ Ha'e gui Abigail oexa Davi vy oguejy pojava guymba mburika'i áry gui. Davi renonde py guenapy'ã re oĩ ngova yvy re omovaẽ reve, yvy re peve ojero'a oiny.

²⁴ Ipy yvy'iry oña py aipoe'i:

— Ake'e xeruvixa, xere ae toĩ xeme ojapo vaiague repy. Ha'eve rā xee nerembiguai xeayvu ta ndereve. Endu ke xee nerembiguai xeayvu rā.

²⁵ Xeruvixa, epena eme nhe'ẽ vai ra'y Nabal hery va'e re. Mba'eta hery he'ia rami avi heko. Hery ma Nabal, a rami avi hexe oĩ va'e ma 'arandu e'ŷ reia anho. Ha'e rã xee nerembiguai ma ndaexai kuri nerembiguai kuery remondouka va'ekue.

²⁶ Ha'e gui aŷ ma xeruvixa, anhetẽ ete SENHOR oikove va'e rupi, ha'e ndee avi nderekove rupi aura vy aipoa'e: SENHOR ndejoko kuri joguy remoẽ e'ŷ aguã, ha'e ndepo py ae rejepy e'ŷ aguã. Nabal rami ae avi topagapa nderovaigua kuery ndee xeruvixa pe ojapo vaixe va'e ha'e javi.

²⁷ Ha'e gui kova'e ma xee nerembiguai aru va'ekue ndee xeruvixa pe ame'ẽ rive va'erã. Eme'ẽ nderupivegua kunumigue pe.

²⁸ Xeperdoa ke xee nerembiguai ajejavya. Mba'eta SENHOR ojapo 'rã ndero pygua kuery imbaraete aguã rami meme, SENHOR pe vy rejoguero'a ramo. Teko vai toĩ eme ndere reikoa pukukue re.

²⁹ Xapy'a rei amongue ava nderakykue opu'ã 'rã nderekovea oipe'a aguã tei nderekovea SENHOR Nderuete ojokua 'rã ojeupega ikuai va'e mbyte. Ha'e rã nderovaigua kuery rekovea ma omombo 'rã ita momboa py rami.

³⁰ Ha'e gui ma SENHOR ndere ijayvuague rami vy oexa uka 'rã nderayvua, Israel kuery ruvixaverã nemoi vy.

³¹ Ha'e va'e jave py xeruvixa, noĩ 'rã nemomboriauarã, nei ndepy'a re ipoyi va'e joguy mba'eve re'ŷ remoëague re, nei ndepo py ae rejepyague re. Ha'e gui SENHOR nemoingo porã jave ma nema'endu'a ke xee nerembiguai re — he'i.

³² Ha'e rami rã Abigail pe Davi ombovai:

— Tove SENHOR Israel kuery ruete ta'ima'endu'a porãa, ange xerovaexi aguã nembou rire.

³³ Ta'ima'endu'a porãa ne'arandu reikovya re, ha'e ima'endu'a porãmby tereiko ndee ae, mba'eta ange xejoko joguy amoẽ taa gui, ha'e xepo py ae ajepy taa gui.

³⁴ Mba'eta anhetẽ ete SENHOR Israel kuery ruete oikove va'e rupi aura vy aipoa'e: Xejoko kuri ajapo vai taa gui. Mba'eta xerovaexi aguã ndereju pojawai va'e rire Nabal ndoikovei 'rãgue ko'ẽmba peve, nei peteive ava ixupegua ma voi — he'i.

³⁵ Ha'e gui Abigail po gui Davi ojopy mba'emo ogueru va'ekue. Ha'e vy aipoe'i:

— Tereo porã'i ke ndero katy. Ne'exa, rejerurea aendu vy ajapo 'rãe.

Nabal omanoague

³⁶ Ha'e rire Abigail ojevy ju Nabal oĩa py. Ha'e rã ha'e ma ngoo py ojapo oikovy ngaru, huvixave ngaru ojapo va'e ramigua. Opy'a re ov'yaa anho rei oendu, oka'u vaipa ma vy. Ha'e rami rã ixupe ta'yxy nomombe'ui ranhe mba'eve, nei mboapy'i nei heta ma voi, nako'ei teria ja.

³⁷ Ko'ẽ jevy Nabal okuera ju ma oiny vinho py oka'uague gui. Ha'e gui ma ta'yxy omombe'u ha'e nunga. Ha'e rã ipy'a he'õmba rire ita rami ju optya.

³⁸ Dez araa py ma SENHOR ojuka Nabal. Ha'e rã omano.

Abigail re Davi omendaague

³⁹ Nabal omanoague Davi pe omombe'ua rã oendu vy aipoe'i:

— SENHOR toiko ima'endu'a porãmby, mba'eta xerepy ma Nabal xevy ijayvu atãague re, xejoko guive mba'emo vai ajapo taa gui. Nabal ojapo vaiague repy ma hexe ae ju SENHOR ombou — he'i.

Ha'e gui Abigail pe Davi oporandu uka gua'yxyrã ogueraa aguã re.

⁴⁰ Ha'e ramo Davi rembiguai kuery oje'oi Carmelo py Abigail oĩa py. Ha'e vy aipoe'i okuapy ixupe:

— Davi orembou gua'yxyrã rogueraa aguã — he'i.

⁴¹ Ha'e ramo kunha va'e opu'ã vy guenap'yã re oĩ ngova yvy re omovaẽ reve. Ha'e vy aipoe'i:

— Apy ma aĩ hembiguairã. Xeruvixa rembiguai kuery py ajoí aguã rami aiko — he'i.

⁴² Ha'e rami vy kunha va'e ojapura vy oo mburika'i áry tei nhiruĩ guembiguai kunhataigüe reve. Ha'e vy oo Davi rembiguai kuery rupive. Ha'e ramo ogueraa gua'yxyrã.

- ⁴³ Davi ogueraa avi Ainoã Jezreel guigua. Ha'e vy ta'yxy mokoĩ.
⁴⁴ Mba'eta Saul ma guajy Mical Davi ra'yxy va'e ome'ẽ ju va'ekue Galim pygua Laís ra'y Palti ra'yxyrã.

26

Teīgue ju Davi Saul ndojukaiague

- ¹ Ha'e gui Zife pygua kuery ou Gibeá py Saul oĩa py. Ha'e vy aipoe'i okuapy:
— Davi ma Haquila yvy'ã reia rupi nonhemi teve, Jesimom katy'i? — he'i okuapy.
- ² Ha'e rami rã Saul opu'ã vy Zife tekao e'ýa katy oo Davi reka vy. Hexeve oje'oi avi três mil avakue Israel gui oiporavo va'ekue.
- ³ Saul kuery ijaty okuapy Haquila yvy'ã re, Jesimom katy, tape yvýry. Ha'e rã Davi ma tekao e'ýa re oiko. Ha'e rami vy Saul oeka ouvya Davi oikuaa vy
- ⁴ omondouka oexa pota va'erã kuery. Ha'e vy oikuaa Saul ou ete ae ra'ea.
- ⁵ Davi opu'ã vy oo Saul kuery ijaty okuapya py. Ha'e vy oexa Saul onheno oupy rã, Ner ra'y Abner xondaro kuery re opena va'e guive. Saul ma ijaty okuapy va'e mbyte py onheno oupy. Ijyvýry rupi ma heta va'e kuery ikuai.
- ⁶ Ha'e gui Davi aipoe'i Heteu pygua Aimeleque ha'e Joabe ryke'y Abisai Zeruia pi'a va'e pe:
— Mava'e tu peo ta xerupive ha'e kuery ijaty okuapya py Saul ituia py?
Abisai ma ombovai:
— Xee aa 'rã nderupive — he'i.
- ⁷ Ha'e rami vy Abisai reve Davi ou pyávy heta va'ea py. Ha'e rã ha'e py Saul onheno vy oke oupy ijaty okuapy va'e mbyte. Oakã katy'i hu'y guaxu oipyxo imo'amy yvy re. Abner ha'e heta va'e kuery mboae ma ijyvýry rupi meme onheno okuapy.
- ⁸ Ha'e gui Abisai aipoe'i Davi pe:
— Aý ma ndepo py Nhanderuete omboaxa ma nderovaigua. Taa xee aý taipyxo yvy re hu'y guaxu py ae, peteīgue'i pyve. Mokoīgue aipyxo e'ý teí ha'eve 'rã — he'i.
- ⁹ Teí Davi ombovai vy aipoe'i Abisai pe:
— Ejuka eme. Mava'e tu SENHOR oiporavo va'ekue rovai opo oupi 'rã ojejavy e'ý re?
- ¹⁰ Davi aipoe'ive ju:
— Anhetẽ ete SENHOR oikove va'e rupi aura vy aipoa'e: SENHOR ae 'rã ojuka, e'ý vy omano aguã ára ovaẽ 'rã, e'ý vy joguero'aa py oo rã ojukaa 'rã, xee e'ý.
- ¹¹ SENHOR taxejoko oiporavo va'ekue re xepo aupti e'ý aguã. Ha'e rami avi aý ma ejopy hu'y guaxu inhakã katy'i oĩ va'e, yryru guive. Ha'e gui jaa ju — he'i.
- ¹² Ha'e rami vy Davi ojopy uka hu'y guaxu Saul akã katy'i oĩ va'e ha'e yryru. Ha'e gui oo ju. Mava'eve ndoexaai, neĩ ndoikuuai, nomyiái guive. Ha'e javive okepa tema okuapy, ha'e kuery hopeyi vaipa aguã rami SENHOR ojapo rã.
- ¹³ Ha'e gui Davi ma yvyugua rovai re oo ma vy yvy'ã apyte py hi'aĩ mombyry'ia py. Saul kuery ikuiaia gui mombyry'i ete hi'aĩ.
- ¹⁴ Ha'e rami vy ha'e kuery pe ojapukai nhendu ho'amy, Ner ra'y Abner pe guive. Ha'e vy aipoe'i:
— Abner, nerembovai va'e ty'y?
Ha'e ramo Abner omyi vy oporandu:
— Mava'e tu ndee, huvixave pe rejapukai aguã?
- ¹⁵ Ha'e ramo Davi ombovai Abner pe:
— Ndee ta'vy ava e'ý teve reiko? Israel kuery va'e regua mava'e tu oiko ndee rami ipo'aka va'e? Mba'e re ha'vy nerepenai ri nderuvixa re? Mba'eta ou kuri peteĩ regua nderuvixa omomba aguã.
- ¹⁶ Ha'eve'ýa rami rejapo. Anhetẽ ete SENHOR oikove va'e rupi aura vy aipoa'e: Ha'eveve pemano, penderuvixarã SENHOR oiporavo va'ekue re napepenai rire. Aý ma exa pota: Mamo tu oĩ huvixa mba'e hu'y guaxu ha'e yryru inhakã katy'i oĩ va'ekue? — he'i.

Teīgue ju Davi reve Saul peteĩ rami ikuai aguã re ijayvuague

¹⁷ Ha'e gui Davi ri ty ra'ea Saul oendu kuaa vy aipoe'i:

— Ndeayvu e'ŷ teve, xera'y Davi?

Davi ombovai:

— Tá xeruvixa, xeayvu ae ri — he'i.

¹⁸ Aipoe'ive tema:

— Xeruvixa, mba'e re tu ha'e rami ete ri reka riae nerembiguai? Mba'e tu xee ajapo ndere? Mba'e nunga tekó vai tu rejou xere?

¹⁹ Aŷ ma xeruvixa, ajerure ndevy: Endu ke xee nerembiguai xeayvu rã. SENHOR ae xerovai reo aguã rami ndeapo va'e riire ojopy 'râgue mba'emo ixupe ame'ẽ va'e. Ha'e rami avi avakue ri ha'e rami aguã rami ndeapo vy ayvu vaipy ta'ikuai SENHOR renonde. Mba'eta aŷ ha'e kuery xemoxẽ ma SENHOR pegua yvy re aikoague gui, "Tereo, embojerovia tuuete mboae ramigua pe", he'ia rami.

²⁰ Ha'e rami teĩ aŷ xeruguy tomoëa eme SENHOR pegua yvy gui mombyrya py. Mba'eta ndee Israel pygua huvixave ma jagua ky ramigua rakykue rive reo, inambu pytã rakykue yvy'ã reia rupi oo va'e rami — he'i.

²¹ Ha'e rami rã Saul aipoe'i:

— Ajejavy rima. Xera'y Davi, ejevy ju ha'vy, mba'eta ndajapo vai jevyi 'rã ndevy. Ange rexu uka xerekovea rembovare va'ea. Xee ae ma inhakã porã e'ŷ va'e rami aiko ajejavy riaeia py.

²² Davi ombovai:

— Ne'exa, apy ma nemba'e hu'y guaxu areko. Tou xea py peteĩ kunumi ogueru aguã.

²³ Ha'e gui peteĩ-teĩ pe SENHOR tomboekovia heko porã rupi ojeroviapy oikoa. Mba'eta xepo py SENHOR nemboaxa va'eri xee ma xepo ndaupixeí SENHOR oiporavo va'ekue rovai.

²⁴ Ange nderekovea ambovareague rami ae avi SENHOR tombovare xerekovea voi, taxereraa jepe opa mba'e vai gui — he'i.

²⁵ Ha'e ramo Saul aipoe'i Davi pe:

— Xera'y Davi, ima'endu'a porãmby tereiko. Mba'eta rejapo 'rã mba'emo tuvixa va'e, ndepo'aka 'rãe — he'i.

Ha'e ramo Davi oove ju, ha'e rã Saul ma guekoa katy ju ojevy.

27

Teǐgue ju Davi Gate pygua huvixa Aquis oĩa py ooague

¹ Ha'e rami teĩ Davi ojeupe ae aipoe'i: "Xapy'a rei ramo amongue ára xee akanhy 'rã Saul po py. Ha'eveve filisteu kuery yvy katy ajava, Israel ha'e javi rupi Saul xerekova oikovya gui ikane'õ vy opytu'u aguã. Ha'e ramo 'rãe xee aa jepe ipo gui" he'i.

² Ha'e rami vy Davi oiko katu vy seiscentos avakue hupive ikuai va'e reve oje'oi Gate pygua huvixa Maoque ra'y Aquis oĩa katy.

³ Gate tetã py ae Davi oiko Aquis reve. Ha'e rã hupiveguia avakue ma peteĩ-teĩ gua'yxy kuery reve ikuai. Davi voi mokoïve gua'yxy reve oiko: Jezreel guigua Ainoã, ha'e Carmelo pygua Nabal ra'yxykue Abigail.

⁴ Gate katy Davi ojavaague Saul pe omombe'ua rã oendu vy ndoeka potavei.

⁵ Ha'e gui Davi aipoe'i Aquis pe:

— Xapy'a rei ndee xemboaxya rendu vy ke eme'ẽ peteĩ tetã ndeyvy regua py aĩ aguã. Xee nerembiguai nda'evei ndeyvy'iry aĩ aguã tetã huvixave oĩaty mbyte py — he'i ramo

⁶ ha'e va'e árave ixupe Aquis omboaxa Ziclague tetã. Ha'e rami rire aŷ peve Ziclague opyta huvixa Judá pygua mba'e ae.

⁷ Filisteu kuery yvy re Davi oiko peteĩ ma'etŷ rire irundy jaxyia peve.

⁸ Ha'e gui Davi ngupiveguia avakue reve oje'oi jepi 'rã gesurita kuery, gersita ha'e amalequita kuery rovai. Ha'e va'e kuery ma ha'e va'e yvy re ikuai Sur katy Telã guive Egito yvy peve.

⁹ Ha'e va'e yvy Davi kuery ombovaipa 'rā heravy, ojuka 'rā avakue ha'e kunhague. Ojeupe guarā ogueraapa kuerei vexa'i, vaka, mburika'i ha'e camelo kuery, ajukue guive. Ojevy vy ovaẽ kuerei Aquis oĩa py.

¹⁰ Ha'e ramo Aquis oporandu 'rā: "Marā ramigua kuery reve tu ange pejoguero'a ra'e?" he'i nhavõ Davi ombovai 'rā: "Judá regua kuaray puku-a katy ikuai va'e reve ri, jerameel ha'e queneu kuery kuaray puku-a katy ikuai va'e reve" he'i 'rā.*

¹¹ Davi ndojuka e'ŷi peteīve ava neĩ kunha ma voi Gate tetā py oguerojevy va'erā. Mba'eta ojeupe ae aipoe'i: "Oremombe'ua e'ŷi aguã, 'Ha'e rami Davi ojapo', he'i vy." Ha'e rami vy filisteu kuery yvy re oĩ teria ja ojapo oikovy ha'e rami ae.

¹² Aquis ma ojerovia Davi re. Ha'e vy aipoe'i:

— Ha'e anhetē ete ri ojapo guetarã Israel pygua kuery ae voi nda'ija'ei aguã rami. Ha'e nunga rupi xevy anho'i riae 'rā oiko.

28

En-Dor py omanogue mboayvua oiko va'ea py Saul ooague

¹ Ha'e va'e jave py filisteu regua xondaro kuery ono'õmba okuapy Israel kuery rovai joguero'a aguã. Ha'e rami vy huvixa Aquis aipoe'i Davi pe:

— Aikuua uka ma voi ndevy: Xereve ndee voi reo 'rā joguero'aa py, ndereveguia avakue reve.

² Davi ombovai:

— Ha'e rami rā reikuua 'rā xee nerembiguai mba'e pa ajapo 'rāa — he'i.

Aquis aipoe'ive ju Davi pe:

— Ha'e rami rire romoĩ 'rā xerarõarã reikoa pukukue re — he'i.

³ Samuel omano ma va'ekue, ha'e ramo Israel kuery ha'e javi ojae'o vy onhono porã raka'e Ramá tetā py hekoague py ae. Ha'e gui Saul oyvy gui oipe'apa raka'e omanogue mboayvua ha'e imba'ekuaa va'e kuery ha'e javi.

⁴ Ha'e gui filisteu kuery ono'õ vy ou Suném py ju ijaty okuapy aguã. Ha'e ramo Saul omono'õmba avi Israel kuery ramo Gibeá py ijaty okuapy.

⁵ Filisteu kuery ijaty okuapya Saul oexa vy oendu okyjea. Ha'e vy ipy'a tyty vaipa oiny onhemondyi vy.

⁶ Ha'e rami vy SENHOR pe oporandu teĩ nombovai, ra'u rupi, Urim rupi, neĩ profeta kuery ayvu rupi ma voi.*

⁷ Ha'e ramo Saul aipoe'i guembiguai kuery pe:

— Pejou na peteĩ kunha omanogue mboayvua, ha'e va'e oĩa py aa vy aporandu uka aguã.

Hembiguai kuery ombovai:

— Oiko peteĩ kunha En-Dor py omanogue mboayvua — he'i.

⁸ Ha'e gui Saul ndojekuaa ukai aguã amboae ao omoĩ reve oo. Hupive ma oo avi mokoĩ avakue. Ha'e vy pyávy ovaẽmba kunha va'ea py. Ha'e vy aipoe'i:

— Ndevy ajerure omanogue remboayvu aguã. Ha'e vy rembovy 'rā aipota va'e ae.

⁹ Kunha va'e ombovai:

— Ha'e rami avi reikuua porã huvixa Saul ojapoague, mba'eta oipe'apa raka'e omanogue mboayvua ha'e imba'ekuaa va'e kuery. Mba'e re tu amano aguã rami rive reju, xejuka ukaxe vy? — he'i

¹⁰ Ha'e ramo ixupe Saul oura SENHOR rery rupi:

— Anhetē ete SENHOR oikove va'e rupi aura vy aipoa'e: Ndoikoi 'rāe ha'e nungakue re nembopagaarã — he'i.

¹¹ Ha'e rami rā kunha va'e aipoe'i:

— Mava'e ha'vy ambovy 'rā?

* 27:10 Ha'e rami Davi ombovai ombotavy vy. Guetarã Israel kuery reve ae joguero'aa rami ijayvu, Israel kuery rovaigua kuery reve joguero'a va'eri. * 28:6 Urim ma sacerdote kuery mba'ekuaa-a oguerek raka'e (Êxodo 28.30, Números 27.21).

Ombovai:

— Embovy xevy Samuel — he'i.

¹² Ha'e gui kunha va'e Samuel oexa vy ojapukai atā reve aipoe'i Saul pe:

— Mba'e re tu xembotavy? Mba'eta ndee ae ri tu huvixa Saul.

¹³ Huvixa ombovai:

— Ekyje eme. Mba'e tu rex? — he'i.

Kunha va'e ombovai Saul pe:

— Peteī aexa nhanderuete ramigua yvy gui oē rā — he'i.

¹⁴ Ha'e ramo oporandu ju:

— Mba'exa tu ojekua?

Kunha va'e ombovai:

— Oē ouvy va'e ma tuja'i, ao puku py onheovā va'e — he'i. Ha'e ramo Samuel ae ria Saul oikuua vy guenapy'ā re oī ngova yvy re omovaē reve.

¹⁵ Ha'e gui Samuel aipoe'i Saul pe:

— Mba'e re tu xemoangeko, aē jevy aguā rami rejapo vy?

Saul ombovai:

— Xeporiau vaipa aikovy, xerovai filisteu kuery joguero'a rā. Nhanderuete voi xegui ojepe'a vy naxemboavaivei, profeta kuery rupi, neī ra'u rupi ma voi. Ha'e nunga rupi roenoī uka, xevy remombe'u aguā ajapo va'erā — he'i.

¹⁶ Ha'e ramo Samuel aipoe'i:

— Mba'e re ha'vy xevy reporandu ri, SENHOR ndereja vy nderovaigua oiko rire?

¹⁷ Mba'eta SENHOR ndere ojapo xevy aipoe'i ukaague rami. Ndepo gui ndepo'akaa oipe'a vy neirū Davi pe ju omboaxa.

¹⁸ SENHOR ayvu re nderejapyxakai vy neremombai karamboae Amaleque kuery opoxya rupi omomba ukaague rami vy. Ha'e nunga rupi ae SENHOR nemoī vai aŷ.

¹⁹ SENHOR nemboaxa 'rā filisteu kuery po py, Israel kuery ha'e javi reve. Ha'e gui ko'ē ramo ndee ha'e ndera'y kuery xereve ma'rā peiko. Filisteu kuery po py SENHOR omboaxa avi 'rā Israel kuery ijaty okuapy va'e — he'i.

²⁰ Ha'e ramove Saul ho'a vy ipukupa oupy yvy rupi. Okyje vaipa oupy Samuel ayvu gui. Ha'e vy na'imbaraetevei, ha'e va'e ára, pyávy voi mba'eve ndo'ui rire.

²¹ Saul ituia katy kunha va'e ovaēve'i ov vy oexa ndojepokuaavei etea. Ha'e vy aipoe'i:

— Ma'ē, xee nerembiguai ma rejerurea aendu vy ndajeayvuveikue py ajapopa kuri ndeayvuaque.

²² Teī aŷ ma ndee ju endu xee nerembiguai xeayvua. Tamoī mbojape re'u va'erā. He'u, nembaraete ma vy tape rupi reo aguā.

²³ Ha'e rami teī ndoipotai vy aipoe'i:

— Xee nda'ui 'rā — he'i. Ha'e rami teī hembiguai kunha va'e reve ome'ē nhea'ā rei ramo ojapyxaka. Ha'e vy yvy gui opu'ā vy oguapy oiny tupa py.

²⁴ Kunha va'e oguerekó peteī vaka ra'y omongyra va'ekue. Ojuka pojava. Trigo ku'i avi ogueru vy omoapomo, ha'e ombojy mbojape imbovua e'ŷ va'e.

²⁵ Ha'e rami vy Saul ha'e hembiguai kuery pe ogueru ramo okaru okuapy. Ha'e gui opu'āmba vy oje'oipa ju pyavyve.

29

Davi re filisteu kuery ndojeroviaveiague

¹ Ha'e gui filisteu kuery omono'ōmba xondaro kuery Afeca py. Ha'e rā Israel kuery ma Jezreel py yvu oī va'e katy'i ijaty okuapy.

² Ha'e katy filisteu kuery yvatekueve va'e oje'oi cem ha'e mil reve-reve. Ha'e rā Davi ha'e avakue hexeve ikuai va'e ma oo Aquis reve hakykue guarā.

³ Filisteu kuery yvatekueve va'e aipoe'i okuapy:

— Kova'e hebreu kuery, mba'e tu ojapo okuapy apy?

Aquis ombovai filisteu kuery yvatekueve va'e pe:

— Ha'e va'e pa Davi e'ŷ, Israel pygua huvixa Saul rembiguai e'ŷ teve? Kueve ma guive xereve ae oiko. Ha'e gui hexe ndajou vai, xea py ou guive aŷ peve — he'i.

⁴ Ha'e rami teĩ filisteu kuery yvatekueve va'e ivai vaipa ixupe. Ha'e vy aipoe'i okuapy:

— Embojevy ju ha'e va'e ava hekoarã reme'ēague katy. Nda'evei nhandereve oo aguã jajoguero'aa py, nhanderovaigua oiko e'ŷ aguã. Mba'eta ha'e rami e'ŷ vy mba'exa vy 'rã tu ha'eve nguvixa reve peteĩ rami ju ikuai aguã, nhande kuery akāgue ogueraa e'ŷ vy?

⁵ Ha'e va'e pa Davi e'ŷ? Ojerokya py joupe-upé ombovai vy aipoe'i: “Saul ma ojuka mil, ha'e rã Davi ma dez mil ojuka va'ekue” he'iague va'e e'ŷ teve?

⁶ Ha'e rami rã Aquis oenoĩ Davi. Ha'e vy aipoe'i ixupe:

— Anhetẽ ete SENHOR oikove va'e rupi aura vy aipoa'e: Ndee ma anhetẽ rupi reiko va'e. Ha'e gui xevy rã ha'evea rami vy rei orereve kova'e rojoguero'aa py reo. Mba'eta xea py rejuvenue guive kova'e ára peve mba'eve py ndojou vaiai ndere. Ha'e rami teĩ yvatekueve va'e ma ndojou porãi.

⁷ Ejevy ju aŷ, ejevy porã ke, filisteu kuery yvatekueve va'e ndejou vai rei e'ŷ aguã — he'i.

⁸ Ha'e ramo Davi aipoe'i Aquis pe:

— Ha'e rami avi mba'e tu xee ajapo? Ha'e e'ŷ vy mba'e tu xee nerembiguai re rejou vai, ndevy amba'eapo ypya ára guive aŷ peve, xeruvixa rovaigua kuery rovai xee voi ajoguero'a e'ŷ aguã?

⁹ Aquis ombovai:

— Xee ma aikuua porã. Xevy rã anhetẽ Nhanderuete guigua anjo rami reiko porã va'e teĩ. Ha'e rã filisteu kuery yvatekueve va'e ma “Too eme orereve joguero'aa py” he'i okuapy.

¹⁰ Evy voi ha'vy ko'ẽ rai ramove nerembiguai kuery ndereve ou va'ekue reve. Kuaray hexakã'i ramove pevypa, ha'e tapeo — he'i.

¹¹ Ha'e ramo ko'ẽ rai ramove Davi ový avakue hexeve ikuai va'e reve, filisteu kuery yvy katy ju ojevy oje'oivy aguã. Ha'e rã filisteu kuery ma Jezreel katy oje'oi.

30

Ziclague tetã gui Amaleque kuery opa mba'e ogueraapaague

¹ Ha'e gui mboapy araa py Davi hexeveguia avakue reve ovaẽmba Ziclague tetã py. Ha'e vy oikuua Amaleque pygua kuery ou vy kuaray puku-a katyguia kuery re opu'āague, ha'e Ziclague tetã ombovaipa vy oapypa ma raka'eague.

² Ha'e vy kunhague ojou va'e tema ogueraapa raka'e ojeupe guarã. Ha'e rami avi mava'eve ndojukai: kyrīgue neĩ tujakue. Ngupive ogueraapa rive oje'oivy ouague rupi.

³ Ha'e gui tetã py Davi ha'e hexeveguia avakue ou vy oexa rã okaipa raka'e. Ha'e rã ta'yxy kuery, ta'y ha'e tajy kuery ogueraapaa raka'e.

⁴ Ha'e rami rã Davi ha'e hexeve ikuai va'e ojapukai atã reve ojae'o. Ojae'o raxa okuapy ikangypa peve.

⁵ Davi ra'yxy mokoïve avi ogueraaa raka'e: Jezreel guigua Ainoã, ha'e Carmelo pygua Nabal ra'yxykue'i Abigail.

⁶ Davi iporiau vaipa, mba'eta hexeveguia avakue ita py ojapipa aguã re ijayvu okuapy rã. Peteĩ-teĩ ivai okuapy gua'y ha'e guajy kuery re. Ha'e rami teĩ Davi ma SENHOR nguuete re vy ipy'a guaxuve ju.

Ojokua reve reve ogueraaa pyre Davi oguerupa jevyague

⁷ Ha'e gui Davi aipoe'i sacerdote Aimeleque ra'y Abiatar pe:

— Eru manto sacerdote pegua — he'i ramo Abiatar ogueru Davi pe.

⁸ Ha'e gui SENHOR pe Davi oporandu vy aipoe'i:

— Aa 'rã teve ha'e kuery rakykue? Aupity 'rã teve?

SENHOR ombovai:

— Tereo, peupity 'rãe. Ha'e vy peraa jepepa ju 'rã ogueraaa va'ekue ha'e javi — he'i.

⁹ Ha'e gui Davi oo seiscentos avakue hexeve ikuai va'e reve. Besor yakã'i py ovaẽ ramo amongue opyta ikane'õve va'e-va'e.

¹⁰ Ha'e rā Davi quattrocentos avakue reve oove tema. Duzentos ma takykue optyta va'ekue, ikane'ō vy Besor yakā'i ndoaxai va'ekue.

¹¹ Ha'e gui nhuūndy rupi ojou okuapy peteī ava Egito pygua, Davi oīa py ogueru. Ixupe mbojape ome'ē rā ho'u. Ome'ē avi yy oy'u aguā.

¹² Ome'ē avi peteī figo pirukue apomo ra'ykue'i, mokoī uva'a pirukue guive. Ha'e ramo ho'upa. Ha'e gui ikangy gui imbaraeteve ju, mboapy ára ha'e mboapy ptytū re ma mba'eve ndo'uvei, neī yy ndoy'uvei va'ekue.

¹³ Ha'e ramo ma Davi oporandu:

— Mava'e regua tu ndee? Magui tu rej?

Egito pygua kunumi va'e ombovai:

— Xee tu Amaleque regua rembiguai rima. Mboapy ára re xemba'eaxy ramo xepatō xereja apy.

¹⁴ Ore kuery romomba rojuvy kuaray puku-a katy queretita kuery, Judá yvy regua kuery, ha'e gui Calebe regua kuaray puku-a katyguia. Ha'e vy Ziclague tetā voi roapypa rojuvy — he'i.

¹⁵ Davi aipoe'i:

— Ha'eve pa reo vy ha'e kuerya py xereraa aguā?

Ombovai:

— Nhanderuete rery rupi ha'vy eura xevy xejuka e'ŷ aguā, ha'e xepatō po py ju xemboaxa e'ŷ aguā. Ha'e rami rā aa 'rā roguereko aguā ha'e kuery ikuiaia peve — he'i.

¹⁶ Ha'e gui oo, ogueraa henoiny. Ha'e ramia ja Amaleque pygua kuery ma joa rupi e'ŷ-e'ŷ ikuai ha'e va'e yvy re. Okaru ha'e oy'u okuapy, ov'y'a vaipa okuapy omondakue ha'e javi filisteu kuery yvy ha'e Judá gui ogueru va'ekue re.

¹⁷ Ko'ē rai'i ramove Davi kuery ojuka okuapy ka'aru'i peve. Ha'e ramo ha'e kuery va'e regua peteīve ma ndoo jepei, quattrocentos kunumigue camelō áry oī va'e anho onhamba.

¹⁸ Ha'e rami py Davi ogueraa jepepa nho ju Amaleque pygua kuery ogueraa va'ekue-ekue. Ogueraa jepe avi gua'yxy mokoīve.

¹⁹ Mba'eve'i ndoatai, kyrīgue neī tujakue, ta'y neī tajy kuery, neī omondakue ogueraa va'ekue ma voi, neī mba'eve ha'e kuery ogueraapa va'ekue. Davi oguerupa nho ju.

²⁰ Ha'e gui Davi ojopypa avi heruvy vexa'i ha'e vaka. Ha'e nunga Davi renonde omondyi heravy va'e aipoe'i:

— Kova'e ma Davi ogueru va'e.

Davi mba'emo omboja'o ukaague

²¹ Ha'e gui Davi ovaē ouvy duzentos avakue ikane'ō vy ndooovei va'ekuea py, Besor yakā yvýry optytapa okuapyague py ae. Ha'e ramo ha'e va'e kuery oupa Davi ovaexī vy, hupive ou okuapy va'e voi. Ha'e kuery oua py Davi ovaēve'i ouvy vy oxarura porā'i.

²² Ha'e rami teī Davi rupive oje'oi va'ekue regua iporayvu e'ŷ va'e, nhe'ē vai ra'y kuery ombovai vaikue reve aipoe'i okuapy:

— Nhande kuery reve ha'e kuery ndooi rire nanhame'ēi 'rā mba'eve rei ogueraapa pyre jaru ju va'ekue. Peteī-teī peraa pendera'yxy ha'e pendera'y kuery rive. Ha'e vy tapeopa ju — he'i okuapy.

²³ Ha'e rami teī Davi aipoe'i:

— Xeryvy kuery, evoko rami e'ŷ pejapo SENHOR nhandevy ome'ē va'ekue re, nhandere opena vy nhande po py nhanderovai ou va'ekue omboaxapa rire.

²⁴ Mava'e 'rā tu ojapyxaka ha'e rami pendeayyua re? Mba'eta pejoguero'a vy peo va'ekue pejopya rami ae avi 'rā mba'e rei-rei rarōa py optyta va'ekue voi ojopy. Joo rami meme 'rā jajopy — he'i.

²⁵ Ha'e rami rire ha'e rami aguā ma Israel kuery rekora oī, ha'e va'e ára guive aŷ peve.

²⁶ Ziclague tetā py Davi ovaē vy mba'emo re imonda vy ogueraapa pyre ogueraa ukapa ju Judá regua tujakueve oirū kuery ikuai va'e pe. Ha'e vy ha'e va'e kuery pe aipoe'i uka:

— Kova'e ma pendevy rome'ē rive SENHOR rovaigua kuery ogueraapa va'ekue regua — he'i.

- ²⁷ Ha'e rami vy Betel pygua kuery pe ogueraa uka, Ramote Neguebe pygua kuery pe, Jatir,
²⁸ Aroer, Sifmote, Estemoa,
²⁹ Racal, jerameel ha'e queneu kuery ikuiaia tetā pygua kuery pe,
³⁰ Horma, Borasā, Atace,
³¹ Hebron, ha'e gui Davi avakue hexeve ikuai va'e reve oje'oiague ha'e javi rupi ikuai va'e pe.

31

1 Crônicas 10.1-7

- ¹ Ha'e gui Israel kuery reve filisteu kuery joguero'a ramo avakue Israel regua onhamba filisteu kuery gui. Ha'e ramo Gilboa yvy'ã re ojukapa.
² Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.
³ Joguero'aa py Saul oĩ vaive ovy. Hu'y momboa kuery ojou ramo ha'e kuery gui okyje vaipa.
⁴ Ha'e gui Saul aipoe'i hu'y jokoa reraa pe:
— Ekyi ndekyxé ha'e xepyxo, ha'e kuery opire omboi uka e'ŷ va'ekue ou vy xepyxo vy xejojai rei e'ŷ aguã — he'i teĩ hu'y jokoa reraa ndoipyxoxei, okyje vaipa vy. Ha'e ramo Saul ae kyxe ojopy vy hakua re ho'a.
⁵ Hu'y jokoa reraa Saul omano ma ri ty ra'ea oexa vy ha'e voi kyxe re ho'a vy omano avi hexeve.
⁶ Ha'e rami py Saul omano, ta'y kuery voi, hu'y jokoa reraa reve. Avakue hexeve ikuai va'e voi ha'e va'e ára ojukapaa.
⁷ Ha'e gui avakue Israel regua yvyugua rupi ha'e Jordão yakã rovai hekoa va'e oexapa okuapy oirũ kuery onhambaa, ha'e Saul gua'y kuery reve omanomba maa. Ha'e rami vy ha'e kuery voi gueko aejapa vy onhamba avi. Ha'e gui filisteu kuery ou vy ha'e py ju hekoa.

1 Crônicas 10.8-12

- ⁸ Ko'ẽ jevy filisteu kuery ou omanogue mba'ekue ogueraapa aguã. Ha'e rami vy ojou Saul ha'e ta'y kuery mboapyve Gilboa yvy'ã re omanoague py.
⁹ Ha'e rami vy Saul akágue ojaya vy hembiporukue ogueraapa. Filisteu kuery yvy ha'e javi rupi omondouka ayvu mombe'uarã, ha'e nungakue omombe'u aguã ta'angaa pegua oo ikuai va'e rupi, ha'e guetarã kuery ha'e javi pe.
¹⁰ Saul rembiporukue ma Astarote ra'angaa oĩ py ogueraa. Ha'e rã hetekue ma Bete-Seã tetā kora re omboja imoiny.
¹¹ Ha'e gui ma Jabel-Gileade pygua kuery oendu okuapy filisteu kuery Saul re ojapoague.
¹² Ha'e rami vy avakue ipy'a guaxukueve va'e opu'âmba vy pytû mbukukue re oguata oje'oviv. Ha'e vy Bete-Seã tetā kora gui omboi heruvy Saul ha'e ta'y kuery retekue. Jabel tetā py oupa ju vy oapypa.
¹³ Ikágue ojopy vy ojatypa Jabel py ae, yvyra ikuai va'e guy py. Ha'e vy sete ára re okaru e'ŷ re ikuai.

Mokoĩa kuaxia Samuel 'epyre oĩ Mokoĩa kuaxia Samuel 'epyre oĩ

Kova'e kuaxia ma Davi rekukue oĩ, huvixa oĩ jave guare. Jypy ma Judá regua kuery ruvixa oĩ. Ha'e rire ma Israel kuery ha'e javi ju oipota huvixa oĩ aguã.

Davi ma Nhanderuete re ojerovia ete va'e. Ha'e ramo ojapo ngovaigua kuery ha'e javi re ipo'aka aguã rami. Ijyvate ete, ha'e heta va'e kuery ha'e javi ombojepokuaapa ojee. Ha'e rami teĩ itavy reia py ojapo vai guive. Ha'e ramo ixupe profeta Natã ijayvu ramo Davi onhemombe'u: “Ajejavy raka'e Senhor pe.” Natã ombovai Davi pe: “Senhor ndeperdoa rejavyague gui. Ndee ma neremanoï 'rã. Ha'e rami avi rejapo vaiague káuxa ma Senhor rovaigua kuery ijayvu rei okuapy. Ha'e gui nderal'y oiko rire omano 'rã”, he'i (12.13-14). Nhanderuete ombopaga rã Davi ojou porã ha'e ogueropo'aka. Ha'e rami teĩ Davi ro pygua kuery ojapo jepi iporiau aguã rami.

Davi ma Israel pygua huvixa ikuai va'e gui yvateve va'e oiko raka'e. Ha'e nunga rupi nhandereraa jepearã Nhanderuete ombou va'ekue pe ma “Davi ra'y” e'ŷ vy “Davi ramymino” 'ea. Davi ma heta salmo ojapo raka'e Nhanderuete pe oporai vy.

Israel kuery oitypa ha'e Saul omano aviague Davi pe omombe'uague

¹ Saul omano ma rire Davi ojevy ju Amaleque kuery oitypaague gui. Ha'e vy mokoĩ ára re oiko Ziclague tetã py.

² Mboapy araa py, Saul pegua kuery ijaty okuapya gui ou peteĩ ava ijaõ xoropa rei va'e, oakã áry yvy omoimba rei reve.* Davi oĩa py ha'e va'e ovaẽ vy ojero'a, yvy re oĩ guenapy'ã re.

³ Ixupe Davi oporandu:

— Magui tu rejo?

Ombovai:

— Anha ajuvy Israel kuery ijaty okuapya gui — he'i.

⁴ Davi oporanduve ju:

— Mba'e tu oiko ha'e py? Emombe'u ke xevy.

Ombovai:

— Joguero'aa gui ore kuery ronhamba, heta ho'a vy omano rã, Saul ha'e ta'y Jônatas guive — he'i.

⁵ Ha'e rami rã Davi aipoe'i kunumi imombe'ua va'e pe:

— Mba'eda tu ha'vy reikuaa Saul ha'e ta'y Jônatas omanoa?

⁶ Ha'e rã kunumi imombe'ua va'e aipoe'i:

— Avaẽ xapy'a rei Gilboa yvyty re. Ha'e rã Saul ojeko oiny guembiporu hu'y re. Ha'e gui karóxa ha'e kavaju áryguia kuery ojokove tema okuapy.

⁷ Guakykue katy oma'ẽ vy xerexa vy xerenoĩ. Ha'e ramo xee “Apy ma aĩ” ha'e ixupe.

⁸ Xevy pe oporandu “Mava'e tu ndee?” he'i ramo xee ambovai: “Xee ma Amaleque regua”, ha'e.

⁹ Ha'e ramo aipoe'i xevy: “Eju ha'vy, xe'áry epu'ã he'amy ha'e xejuka, mba'eta xerajyjeapa rei va'eri xerekovea oime teri”, he'i.

¹⁰ Ha'e ramo hi'áry apu'ã ha'amy vy ajuka, mba'eta xee aikuua porã ndoikovei 'rãa ho'a ma rire. Ha'e vy coroa oĩ va'ekue ajopy ha'e ipoapy regua, ha'e gui aru apy ndevy xeruvixa — he'i.

Davi ojuka ukaague Amaleque regua

¹¹ Ha'e rami rã Davi oao ae ojopy vy omondoro, avakue hexeve ikuai va'e ha'e javive Davi ojapoa rami avi ojapo okuapy.

* 1:2 Oao omondoropa rei ha'e oakã re yvy omoĩ Saul omanoague re ipy'a vai vy (Gênesis 37.29,34, 1 Samuel 4.12, 2 Samuel 1.11).

¹² Iporiaupa, ojae'opa okuapy, ha'e va'e ára okaru e'ŷ re ikuai ka'aru peve, Saul ha'e ta'y Jônatas omano ramo, ha'e SENHOR pegua Israel kuery re guive, kyxe py ho'apa rire.

¹³ Davi aipoe'ive ju kunumi imombe'ua va'e pe:

— Maguigua tu ndee?

Ombovai:

— Xee tu amboae guigua ra'y, Amaleque regua — he'i.

¹⁴ Davi aipoe'i ixupe:

— Mba'exa tu nderekkyjei ri ra'e SENHOR oiporavo va'ekue rovai ndepo reupi aguã?

¹⁵ Ha'e gui ma Davi oenoĩ peteĩ kunumi va'e. Ha'e vy aipoe'i:

— Eju, epu'ã peva'e ava re — he'i. Ha'e ramo oipyxo rã omano.

¹⁶ Davi aipoe'i va'ekue:

— Ndere ae toĩ nderuguy moëague repaga aguã, mba'eta ndejuru py ae nderovai remombe'u vy "Ajuka SENHOR oiporavo va'ekue", 're va'ekue.

Saul ha'e Jônatas re Davi ipy'a vaia rupi oporaiague

¹⁷ Ha'e gui Davi ojae'o Saul ha'e ta'y Jônatas re. Po rami oporaei iporiaua rupi.

¹⁸ Judá ra'y kuery ha'e javi ombo'e uka avi kova'e mboraei guyrapa regua, kuaxia para heko porã va'e kuery rekokue oĩa va'e re.

¹⁹ — Israel kuery, perovy'a rei va'ekue ho'a ma pendeyvy re yvy'ã oĩ va'e re!

Mba'exa tu ipy'a guaxukueve ho'apa!

²⁰ Ha'e rã Gate tetã py ma pemombe'ueme,

peikuaa uka eme guive Asquelom tetã py tape ikuai va'e rupi,

filisteu kuery rajy kuery oguerovy'a rei e'ŷ aguã,

opire omboi uka e'ŷ va'e rajy kuery ov'y'a rei reve opo-opo e'ŷ aguã.†

²¹ Ha'e gui Gilboa yvy'ã peiko va'e,

pende'ary to'ave eme yxapy neĩ oky,

pendere toikove eme mba'emo aju,

mba'eta ha'e py ma ipy'a guaxukueve mba'e hu'y jokoa ojeatypa yvy re,

Saul mba'e hu'y jokoa voi ho'a rire nomboveraavei ma 'rã azeite py.

²² Jônatas peteĩgueve ma voi ndogueropytu'ui va'ekue guapa,

neĩ Saul ndogueru jevy rivei va'ekue okyxe,

ojuka va'ekue ruguy ha'e ipy'a guaxukueve kyrakue oĩ e'ŷ re.

²³ Saul ha'e Jônatas ma ijaea ha'e oayvuve pyre,

oikovea ja ha'e omano ma teĩ nomboja'oai!

Taguato gui ipojavave,

ha'e guary gui imbaraeteve va'ekue.

²⁴ Peẽ Israel rajy kuery, pejae'o Saul re,

ajukue pytã va'e py pemonhemonde,

ha'e ouro guigua py pendeano ombojegua va'ekue re.

²⁵ Mba'exa tu ipy'a guaxukueve ho'apa raka'e joguero'aa py!

Jônatas voi ojukaa yvy'ã re!

²⁶ Xeryvy Jônatas, xeporiau aikovy ndere!

Ndee xerayvu vaipa va'ekue!

Xerayvu ete vy

kunhague gui voi ndee xerayvuve va'ekue.

²⁷ Mba'exa tu ipy'a guaxukueve ho'apa,

ha'e hembiporu joguero'aa pygua okanhymbal! — he'i.

Judá pygua ruvixarã Davi omoĩ okuapyague

¹ Ha'e va'e rire Davi oporandu SENHOR pe. Ha'e vy aipoe'i:

† ^{1:20} Gate ha'e Asquelom ma Israel rovaigua kuery filisteu va'e retã.

— Aa 'rā teve Judá tetā regua py?

SENHOR ombovai:

— Tereo — he'i.

Davi oporanduve ju:

— Mamo katy ete 'rā aa?

SENHOR ombovai:

— Hebrom katy — he'i.

² Ha'e ramo Davi oo ha'e katy. Ta'yxy mokoīve oje'oi avi: Jezreel pygua Ainoā ha'e Carmelo pygua Nabal ra'yxykue'i Abigail.

³ Davi oguerupa avi hexevegua avakue, peteī-teī ta'y kuery reve. Ha'e rami vy Hebrom tekao py ju ikuai.

⁴ Ha'e gui Davi oĩa py Judá pygua avakue ou vy omoĩ nguvixarā. Davi pe omombe'u avi:

— Avakue Saul retekue nhono porāare ma Jabel-Gileade pygua meme — he'i.

⁵ Ha'e ramo Jabel-Gileade pygua avakue pe Davi omondouka ayvu mombe'uarā kuery aipoe'i aguā: “Tove SENHOR tapenemoingo porā, penderuvixakue pe pejapo porāague re, Saul retekue penhono porā rire!*

⁶ Ha'e gui aŷ ma tove SENHOR tapenderereko penemboaxya ha'e ojeroviapy oikoa rupi. Xee voi ajapo porā 'rā ha'e rami pejapo porāague re.

⁷ Aŷ ma pendepo ta'imbaraete, tapendepy'a guaxu guive, mba'eta penderuvixa Saul omano ma teī xee ju Judá regua kuery xemoĩ nguvixarā” he'i uka.

Israel pygua ruvixarā Abner omoĩague Isbosete

⁸ Ha'e gui Saul pegua xondaro kuery ruvixa Ner ra'y Abner ma Maanaim tetā py ogueraa Saul ra'ykue Isbosete.

⁹ Ha'e py ma omoĩ huvixarā Gileade yvy re, Aser, Jezreel, Efraim, Benjamim ha'e Israel ha'e javi re opena aguā.

¹⁰ Saul ra'ykue Isbosete ma quarenta ma'etŷ rivyvyi oguerek Israel re opena ypy'i jave. Ha'e vy mokoī ma'etŷ peve'i oĩ. Judá regua kuery anho ikuai Davi pegua.

¹¹ Davi ma sete ma'etŷ ha'e seis jaxy re opena Judá pygua kuery re, Hebrom tetā py ae.

Isbosete pegua kuery re Davi pegua kuery ipo'akaague

¹² Ha'e gui Ner ra'y Abner ma Maanaim gui ogueraa Saul ra'ykue Isbosete pegua avakue Gibeão peve.

¹³ Ha'e rā Davi pegua avakue ma Zeruia pi'a Joabe ogueraa avi ha'e py. Ha'e rami vy nhovaexīmba Gibeão yy omboty pyre katy'i. Jovaive-ive re ikuai, hovai katy ha'e kyvō katy.

¹⁴ Abner aipoe'i Joabe pe:

— Topu'ã kunumigue, tajoguero'a nhanerenonde.

Joabe ombovai vy

— Topu'ã ha'yv — he'i.

¹⁵ Ha'e rami rā opu'ã joguerovy jojo'i rami: doze Benjamim regua Saul ra'y Isbosete pegua, ha'e gui doze avakue Davi pegua ju.

¹⁶ Peteī-teī ojopy ngovaigua akā re, jopyxo kyxe py joyke py. Ha'e vy jojavi ho'apa. Ha'e rami rire ha'e va'e henda pe ma “Yvy kyxe” 'ea, Gibeão katy'i oĩ.

¹⁷ Ha'e va'e árave joguero'ave tema okuapy. Ha'e rā Davi pegua avakue oitypa Abner ha'e Israel regua kuery re.

Abner ojukaague Asael

¹⁸ Ha'e py ma ikuai Zeruia pi'a mboapyve: Joabe, Abisai ha'e Asael. Asael ma guaxu ka'aguy regua rami inhakuā va'e.

* ^{2:5} Jabel-Gileade tekao ma Davi retarā kuery Judá regua e'ŷ, Israel regua ramo ma ha'e pygua kuery reve ijayvu porā'i, ixupe guarā ju ikuai aguā.

¹⁹ Ha'e gui Asael ma Abner rakykue oo. Oeka ovya rupi ndoikei oiporu kuaa katy, neī oiporu kuaa e'ŷa katy ma voi.

²⁰ Ha'e ramo Abner guakykue katy oma'ẽ vy oporandu ovy:

— Ndee ae ri ty'y Asael?

Ombovai vy:

— Xee ae ri — he'i.

²¹ Ha'e ramo Abner aipoe'i ixupe:

— Eike ha'vy reiporu kuaa katy, e'ŷ vy reiporu kuaa e'ŷa katy. Ejoguero'a peteī kunumi va'e reve, ixugui ae eipe'a hembiporu joguero'aa pygua — he'i teī Asael ma ndojepe'axei hakykue ooa gui.

²² Teīgue ju Abner aipoe'i ixupe:

— Ejep'e na xerakykue gui. Mba'e re tu xee rojuka ta, ha'e yvy py roity rive? Ha'e rami vy mba'exa tu xee ajoexa ta nderyvy Joabe reve?

²³ Ha'e rami teī Asael ndojepe'axei ae ramo hye py Abner oipyxo hu'y guaxu rapyta py rive, ikupe gui omboaxa. Ha'e ramo Asael ho'a vy ha'e pyve omano. Omanoague py ovaē va'e tema opyta kuerei 'rā.

Abner pegua avakue rakykue Joabe ooague

²⁴ Ha'e gui Joabe ha'e Abisai ju Abner rakykue oje'oi. Kuaray oike'i ma jave ovaē jogueravy Amá yvy'ã re. Ha'e va'e ma Giá katy'i oĩ, Gibeão teko a e'ŷa katy tape oo va'e yvy'iry.

²⁵ Ha'e gui Benjamim ra'y kuery ono'õmba vy Abner rupive oje'oi vy peteī yvy'ã apyte áry ijaty okuapy peteī rami.

²⁶ Ha'e ramo Abner ojapukai Joabe pe. Ha'e vy aipoe'i:

— Kyxe py nhanhomomba riae 'rā teve? Nderekuaai teve opaa py joe nanhandea'evei 'rā? Raka'e peve 'rā tu neremombytu'ui penderegua kuery reve orerakykue peoa gui?

²⁷ Joabe ombovai:

— Anhetē ete Nhanderuete oikove va'e rery rupi aura vy aipoa'e: Nami nandeayvui va'e rire ko'ẽ rā aje'ive'i mae ma 'rāgue ore kuery ropytu'u oreryvy kuery rakykue rupi rooa gui — he'i.

²⁸ Ha'e rami vy Joabe mimby guaxu omonhe'ẽ rā ha'e kuery ha'e javi optyapa, ha'e vy ndooovei Israel kuery rakykue rupi, ndajoguero'a nhoi guive.

²⁹ Ha'e ramo ha'e va'e pytū mbukukue re Abner ha'e ixupegua avakue oguata yvy joja reia rupi. Jordão yakā oaxapa vy aje'ive'i reve oguatave vy ovaẽmba Maanaim py.

³⁰ Ha'e rami py Joabe ndooovei Abner rakykue. Ha'e vy ojeupeguia kuery omboatypa rā oata ra'e dezenove Davi pegua avakue, Asael oipapa e'ŷ re.

³¹ Va'eri Davi rembiguai kuery ma trezentos e sessenta avakue ojuka va'ekue Benjamim regua Abner reve oje'oi va'ekue, ha'e ramo omanomba.

³² Asael retekue ma ha'e kuery ogueraa vy onhono porā okuapy tuu rupa py ae, Belém katy'i. Ha'e va'e pytū mbukukue re Joabe ha'e avakue hexeve ikuai va'e oguatave vy Hebrōm tetā py iko'ẽmba jogueravy.

3

¹ Davi ro pygua kuery reve Saul ro pygua kuery joguero'a are raka'e. Ha'e rami teī Davi kuery imbaraeteve, ha'e rā Saul ro pygua kuery ma ikangyve oje'oivy.

1 Crônicas 3.1-4

² Hebrōm tetā py Davi ra'y kuery ikuai. Ta'y ypy'i ma Jezreel pygua Ainoã pi'a Amnom.

³ Mokoña ma Carmelo pygua Nabal ra'yxykue'i Abigail pi'a Quileabe. Mboapya ma Gesur pygua huvixa Talmai rajy Maaca pi'a Absalão.

⁴ Irundaya ma Hagite pi'a Adonias. Peteī nhiruña ma Abital pi'a Sefatias.

⁵ Mboapy memea ma Davi ra'yxy Eglá pi'a Itreão. Ha'e kuery ma Davi ra'y kuery Hebrōm py ae ikuai va'ekue.

Davi reve peteī rami ikuai aguã Abner ojapoague

⁶ Davi ha'e Saul ro pygua kuery joguero'a jave Saul ro pygua ikuai va'e gui Abner ipo'akave ovy.

⁷ Oiko avi raka'e Saul ra'yxy jevykue Rispa hery va'e, Aiá rajy. Ha'e gui Isbosete oporandu Abner pe:

— Mba'e re tu ndee renheno xeru ra'yxy jevykue reve?

⁸ Ha'e rami Isbosete ijayvu rā Abner oendu vy ivai vaipa ixupe. Ha'e vy aipoe'i:

— Xee ri ty'y jagua akā aiko, Judá kuerya katy aa aguā? Ange teri ajapo porā nderu Saul ro pygua kuery pe, tyvy ha'e irū kuery pe guive. Xee ma noromboaxai Davi po py. Ha'e rami tē aŷ remombe'u ha'e va'e kunha reve atekoavya rami.

⁹ Xee Abner Nhanderuete taxembopaga oipotaa rami, Davi pe SENHOR ouraague rami xee ndajapoi ri ramo.

¹⁰ Mba'eta Saul ro pygua po'akaague amboaxa 'rā joupe. Ha'e rami vy ajapo 'rā Davi ju Israel ha'e Judá kuery re ipo'aka aguā rami, Dā guive Berseba peve — he'i.

¹¹ Ha'e rami Abner ijayvua Isbosete nda'evei ombovai aguā nēi petēi ayvu'i py ma voi, okyje vy.

¹² Ha'e ramo Abner ojegui ae omondouka ayvu mombe'uarā Davi pe. Ha'e vy aipoe'i uka:

— Mava'e po py tu kova'e yvy itui? Xereve ha'vy ejapo petēi rami jaiko aguā, ha'e ramo xee roipytyvō 'rā ndepo py Israel kuery ha'e javi amboaxa vy — he'i uka.

¹³ Davi ombovai:

— Ha'eve, ndereve ajapo 'rā petēi rami jaiko aguā, va'eri petēi mba'e ma aipota: Xea py rejú vy reru 'rā Saul rajy Mical. Ha'e rami e'ŷ vy nderexai 'rā xerova — he'i.*

¹⁴ Saul ra'ykue Isbosete pe voi Davi ombou ayvu mombe'uarā. Ha'e vy aipoe'i uka:

— Embou ju xera'yxy Mical, cem filisteu kuery pire amboiague re xera'yxyrā ajogua va'ekue — he'i.

¹⁵ Ha'e rami rā Isbosete kunha va'e oipe'a uka ju ime Paltiel Laís ra'y va'e ro gui.

¹⁶ Ime oo ranhe oiny hakykue'i, ooa rupi ojae'o ovy Baurim peve. Ha'e rā ixupe Abner

— Tereo, ejevy ju eovy — he'i ramo mae ojevy.

¹⁷ Ha'e gui Abner jogueroayvu Israel regua nhomongetaa ikuai va'e reve. Ha'e vy aipoe'i:

— Kueve ma pemoīxe Davi penderuvixarā.

¹⁸ Aŷ ma pejapo ete, mba'eta Davi pe SENHOR ijayvu va'ekue: "Xerembiguai Davi rupi vy xevygua kuery araa jepepa 'rā filisteu kuery ha'e hovaigua kuery ha'e javi po gui", he'i va'ekue.

¹⁹ Benjamim kuery pe ju Abner omombe'u uka ha'e rami ae. Ha'e vy Davi oĩa katy oo Hebrrom tetā py, ixupe omombe'u aguā Israel ha'e Benjamim regua kuery ha'e javi oipota okuapy.

²⁰ Ha'e gui Hebrrom tetā py Davi ro oĩ va'e py Abner ovaẽ, hexeve vinte avakue ou va'ekue reve.

²¹ Ha'e rami vy Abner aipoe'i Davi pe:

— Xeruvixa, xee apu'ã vy aa 'rā Israel kuery ha'e javi amono'õmba aguā ndeea py, ndereve ojapo okuapy aguā ndevy ikuai aguā — he'i. Ha'e rami rā Davi Abner omondouka ramo oo porā'i.

Nhemí rupi Joabe Abner ojukaague

²² Ha'e jave ma Davi ha'e Joabe rembiguai kuery joguero'a vy oje'oiague gui oupa ju. Ngupive ogueru reta joegui oipe'a va'ekue. Ha'e rā Abner ma Hebrrom tetā py noīvei ma Davi-a py, omondouka rā oo porā ma rire.

²³ Ha'e gui Joabe guexeveguia kuery reve ou rā ixupe aipo'ea:

— Huvixa Davi-a py Ner ra'y Abner ou ra'e, ha'e gui omondouka rire oo porā ju ma oiny — 'ea.

* ^{3:13} Saul rajy Mical ma Davi ra'yxyrā ome' ē va'ekue ri ixugui oipe'a vy amboae ava pe ju omboaxa raka'e (1 Samuel 18.27, 25.44).

- ²⁴ Ha'e rami rā huvixaa py Joabe oo vy aipoe'i ixupe:
 — Mba'e tu rejapo ra'e? Abner ou ra'e ndea py. Mba'exa tu remondouka rive ju?
- ²⁵ Reikuua porā Ner ra'y Abner reko. Ha'e ma nembotavy aguā ou, ha'e mba'emo rejapo va'e re oikuua pota vy oikuua aguā renhembopy'aa ha'e javi — he'i.
- ²⁶ Ha'e gui Davi-a gui Joabe ojepe'a ma vy Davi pe oikuua uka e'ŷ re omondouka ayvu mombe'uarā Abner rakykue, ha'e rami vy ojapo Sirá ygua gui ojevy aguā.
- ²⁷ Hebrom tetā py Abner ojevy ju ma ramo Joabe ogueroike okē rupi ha'e kuery ae'ia py jogueroayvu aguā merami. Ha'e vy hye py Joabe oipyxo ramo omano, guyke'y Asael ojukaague re oepy vy.
- ²⁸ Ha'e rire ma Davi oikuua vy aipoe'i:
 — Xee ha'e xevyguia kuery ma SENHOR pe mba'eve py ndorojejavyi Ner ra'y Abner ruguy omoēague py, raka'e rā peve.
- ²⁹ Huguy moēague re opaga aguā toī Joabe ha'e tuu ro pygua kuery ha'e javi re! Joabe ro py toī riae ijai peupa va'e, lepra reveguia, yvyra re oguata va'e, kyxe py ho'a va'e ha'e tembi'u oipota rei va'e voi — he'i.
- ³⁰ Ha'e rami py Joabe guyvy Abisai reve ojuka raka'e Abner, Gibeāo py joguero'aa py tyke'y Asael ojukaague re.

Abner omanoague re Davi ojae'oague

- ³¹ Ha'e gui Davi aipoe'i Joabe ha'e hexeveguia kuery ha'e javi pe:
 — Pemondoro pendeao, penhemonde voxia py, ha'e vy tapeo pejae'o peovy Abner retekue renonde ogueraa rā — he'i. Ha'e rā huvixa Davi ma mba'e guaxu ryru rakykue'i oo oiny.
- ³² Ha'e rami vy Hebrom tetā py onhono porā okuapy Abner retekue. Abner onhono porāague yvy'iry huvixa onhendu ratā reve ojae'o oiny. Heta va'e kuery ha'e javi ojae'o avi okuapy.
- ³³ Abner re huvixa ojae'o vy aipoe'i:
 — Mba'e re tu Abner omano heko vai va'ekue rami?
- ³⁴ Mba'eta ipo ndojokuaai,
 neī ipy re voi noī corrente.
 Ha'e rami 'rāgue py heko vai va'e ra'y kuery po py ho'a rive va'e rami ho'a! — he'i.
 Ha'e ramo heta va'e kuery ha'e javi ojae'ove hexe.
- ³⁵ Ha'e gui ma heta va'e kuery ha'e javi ou vy ojapo okuapy Davi okaru aguā rami, ára rei teri reve. Ha'e rami teī Davi oura vy aipoe'i:
 — Kuaray oike e'ŷ mbove mbojape e'ŷ vy tembi'u mboae xee ha'u ramo tove Nhanderuete taxembopaga ha'e oipotaa rami — he'i.
- ³⁶ Ha'e rami Davi ijayvu rā heta va'e kuery oendu vy ojou porā okuapy, huvixa ojapo va'e rei ojou porā memea rami avi.
- ³⁷ Ha'e rami vy ha'e va'e ára guive ha'e kuery ha'e Israel kuery ha'e javi oikuaapa okuapy Ner ra'y Abner ojukaague py huvixa Davi mba'eve ndoguerekoague.

- ³⁸ Ha'e gui huvixa aipoe'i guembiguai kuery pe:
 — Ndapeikuai teve ange Israel yvy re peteī ava yvateve ha'e imbaraete va'e ho'aague?
³⁹ Ha'e rā xee ma xekangy aŷ, huvixarā xemoīa teī. Xegui ma kova'e avakue Zeruia pi'a kuery imbaraetekueve va'e. SENHOR ae tombopaga mba'emo vai apoare kuery ojapoague re — he'i.

Isbosete ojukaa ague

- ¹ Hebrom tetā py Abner ojukaa ague Saul ra'ykue Isbosete oendu vy ikangypa, ha'e Israel kuery ha'e javi okyjepa.
- ² Saul ra'ykue pegua mokoī ava oiko, xondaro kuery ruvixa meme. Peteī ma Baaná, ha'e rā amboae ma Recabe hery va'e. Beerote pygua Rimom ra'y va'e meme, Benjamim kuery regua, mba'eta Beerote ma Benjamim yvy regua ae,

³ mba'eta Beerote pygua kuery yma guare onha vy Gitaim tetā py ova va'ekue. Ha'e py ae ikuai aŷ peve.

⁴ Ha'e gui Saul ra'y Jônatas ma peteĩ gua'y oguereko va'ekue oguata e'ŷ va'e. Peteĩ nñhiruĩ ma'etŷ rivyvyi oguereko va'ekue Saul ha'e Jônatas omanoague mombe'ua ou jave Jezreal gui. Ha'e ramo hexe opena va'ety oupi heravy oguerojava vy. Oguerojava aguã ojapura ramo ava'i ho'a vy oguata karê'i va'e oiko. Hery ma Mefibosete raka'e.

⁵ Ha'e gui Beerote pygua Rimom ra'y kuery Recabe ha'e Baaná jogueraa vy Isbosete ro py ovaē. Kuaray mbyte jave hakuve ma ramo oke oupy.

⁶ Ha'e py Recabe ha'e tyvy Baaná jogueroike jogueravy oguy katy, trigo re ou va'e rami. Ha'e rami vy oipyxo hye py, ha'e gui onha jepe.

⁷ Ha'e kuery ma oguy py oike rā Isbosete ngupa okeaty py itui jave oipyxo vy ojuka. Ha'e rire inhakâgue ojaya vy ogueraa. Pytū mbukukue re oguata jogueravy yvy joja reia rupi.

⁸ Isbosete akâgue ma ha'e kuery ogueru huvixa Davi pe Hebron py. Ha'e vy aipoe'i ixupe:

— Apy ma nderovaigua Saul ndejukaxeare ra'ykue Isbosete akâgue. Xeruvixa, ha'e rami ange SENHOR ojapo rejepy aguã rami Saul ha'e ta'y kuery ojapoague ha'e javi re — he'i.

⁹ Ha'e rami teĩ Davi ombovai Beerote pygua Rimom ra'y kuery Recabe ha'e tyvy Baaná pe. Ha'e vy aipoe'i:

— Anhetẽ ete SENHOR oikove va'e xenhe'ẽ ojexavaia ha'e javi gui ogueraa jepe va'ekue rery rupi aura vy aipoa'e:

¹⁰ Yma xea py amongue ayvu ogueru vy “Saul ma omano ma” he'i ramove araa vy Ziclague tetā py ajuka karamboae, ojeupe rā iporā va'e merami omombe'u rā.

¹¹ Ha'e gui heko vai va'e kuery katuve ma ambopaga 'rā, peteĩ ava heko porā va'e ngoo py ngupa py ae itui va'e jukaare kuery. Ha'e rami vy aŷ xee rombopaga 'rā huguy pendepo py pemoëague re, romomba 'rā yvy gui — he'i.

¹² Ha'e rami vy Davi guembiguai kunumigue pe ijayvu rā ha'e kuery ojuka. Ha'e vy ipokue ha'e ipykue ojaya ma vy oupi imoiny Hebron tetā py, yy omboty pyre oĩ va'e yvy'iry. Ha'e rā Isbosete akâgue ma ogueraa vy Abner rupa katy'i ojaty, Hebron py ae.*

5

1 Crônicas 11.1-3

¹ Ha'e gui ma Israel regua kuery ha'e javi ou okuapy Hebron py Davi oĩa py. Ha'e vy ijayvu vy aipoe'i okuapy:

— Ore kuery voi ma nderegua kuery ae avi.

² Yma Saul oiko teri vy orere opena jave py ndee ae reo ha'e rejevy 'rā va'ekue Israel regua xondaro kuery reve. Ha'e gui SENHOR aipoe'i: “Ndee repena 'rā xevygua Israel kuery re, reiko 'rā ha'e kuery ruvixa”, he'i va'ekue ndevy — he'i okuapy.

³ Hebron py huvixa Davi-a py Israel regua nhomongetaa kuery ha'e javi ou ramo ha'e kuery reve Davi ojapo oguereko porā aguã regua, SENHOR renonde. Ha'e ramo omoĩ okuapy Davi nguvixarā Israel kuery re opena aguã.

⁴ Davi opena ypy'i jave ma trinta ma'etŷa oguereko. Ha'e gui ma quarenta ma'etŷ re opena.

⁵ Hebron py ma Judá kuery re anho ranhe opena sete ma'etŷ ha'e mboapy meme jaxy re. Ha'e gui Jerusalém py ju trinta e três ma'etŷ re opena Israel ha'e Judá kuery ha'e javi re.

1 Crônicas 11.4-9

⁶ Ha'e gui Jerusalém tetā katy huvixa Davi ogueraa ojeupegua avakue, jebuseu kuery ha'e va'e yvy re ikuai va'e rovai opu'ã aguã. Ha'e ramo Davi pe ha'e pygua kuery aipoe'i okuapy:

— Ndereikei 'rā apy, ára revegua e'ŷ ha'e oguata e'ŷ va'e kuery rive teĩ ndejoko rā — he'i okuapy, ojeupe “Davi ndoikei 'rā apy”, he'ia rami.

* ^{4:12} Ha'e kuery ma Isbosete akâgue ojaya rire Davi ojaya uka ipo ha'e ipy.

⁷ Ha'e rami teñ Davi oipe'a nho Sião py oo ikorapa va'e. Ha'e va'e pe ma "Tetã Davi rekoá" 'ea.

⁸ Mba'eta ha'e va'e ára Davi aipoe'i:

— Jebuseu kuery pejukaxe va'e tapeo yy raperã ita ombokuaague rupi, ha'e vy pejukapa "Ára revegua e'ý ha'e oguata e'ý va'e" 'ea va'e kuery — he'i, mba'eta Davi onhe'ë py nda'ija'ei ae ha'e kuery re. (Ha'e nunga rupi aipo'ea: "Ára revegua e'ý ha'e oguata e'ý va'e ndoikei 'rã ha'e va'e oo py", 'ea.)

⁹ Ha'e rami vy oo ikorapa va'e py Davi ae oĩ, ha'e vy omboery tetã Davi rekoá. Ha'e va'e yvýry rupi tetã omoatyrõ heravy, Milo guive oikea peve.

¹⁰ Davi ipo'akave tema ovy, hexeve SENHOR Nhanderuete ixondaro reta va'e oiko ramo.

1 Crônicas 14,1,2

¹¹ Davi-a py Tiro pygua huvixa Hirão ombou ayvu mombe'uarã. Ogueru ruka avi yvyra yary, oo apoa kuery ha'e ita re omba'epo va'e kuery, Davi rorã ojapo va'erã.

¹² Ha'e ramo Davi oikuaa SENHOR omoõ atãvea Israel re opena aguã, ojeupeguá kuery oayvua rupi ombopo'akave.

1 Crônicas 3,5-9; 14,3-7

¹³ Hebróm tetã gui Davi ou rire Jerusalém py ju ojouve gua'yxy jevyrã. Ha'e rã ikuaiive ju ta'y ha'e tajy kuery.

¹⁴ Po rami ma Jerusalém py itui'i va'ekue rery: Samua, Sobabe, Natã, Salomão,

¹⁵ Ibar, Elisua, Nefegue, Jafia,

¹⁶ Elisama, Eliada ha'e Elifelete.

1 Crônicas 14,8-17

¹⁷ Filisteu kuery oendu okuapy Davi omoõa Israel kuery ha'e javi ruvixarã. Ha'e vy oupa ojopy aguã Davi. Ha'e nunga Davi oendu vy ova ju oo ikorapa va'e py.

¹⁸ Ha'e rã filisteu kuery ou vy Refaim yvjugua ha'e javi rupi ijaty.

¹⁹ Ha'e ramo Davi oporandu SENHOR pe. Ha'e vy aipoe'i:

— Taa pa filisteu kuery rovai? Remboaxa 'rã teve xepo py?

SENHOR ombovai:

— Tereo, mba'eta anhetã amboaxa 'rã filisteu kuery ndepo py — he'i.

²⁰ Ha'e rami rã Baal-Perazim py Davi ou vy oitypa ha'e py. Ha'e vy aipoe'i:

— SENHOR omoãmba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami — he'i. Ha'e nunga rupi ha'e va'e tekao oenoña Baal-Perazim.*

²¹ Ha'e py ma filisteu kuery oejapa oje'oivy ta'angaa oguerekva'ekue. Ha'e rã Davi ha'e avakue hexeve ikuai va'e ogueraapa.

²² Ha'e gui filisteu kuery ou nho jevy vy ijaty ju okuapy Refaim yvjugua ha'e javi rupi.

²³ SENHOR pe Davi oporandu jevy ramo ombovai:

— Tereo eme. Pembojere 'rã hakykue katy gui, ha'e gui ma ha'e kuery re pepu'ã 'rã amora ikuai va'e guy rupi.

²⁴ Ha'e gui xapy'a rei rendu 'rã amora rovapy rupi opyrõ-pyrõ nhendu va'e. Ha'e va'e rendu vy ke ejapura. Ha'e va'e ma nerondenode SENHOR ae oo nhendua, filisteu kuery ijaty okuapy va'e jukapaarã — he'i.

²⁵ SENHOR ojapo ukaa rami Davi ojapo vy ojukapa filisteu kuery Geba guive Gezer py ovaẽa peve.

6

1 Crônicas 13,5-14

¹ Davi ma Israel kuery gui omboatypa ju oiporavo va'ekue ha'e javi, trinta mil avakue.

² Oiko katupa ma vy ogueraa ha'e kuery Judá re Baalá oĩ va'e katy, ha'e va'e gui Nhanderuete ayvu ryru ogueru aguã yv'yã katy. Ha'e va'e re oĩ SENHOR ixondaro reta va'e anjo ipepo va'e kuery ikuai va'e mbyte oĩ va'e rery.

* 5:20 Tery Baal-Perazim ma "Senhor omoãmba" 'ea.

³ Nhanderuete ayvu ryru ma peteī karóxa ipyau va'e áry omoī vy ogueru Abinadabe ro yvy'ā re oīague gui. Ha'e rā Abinadabe ra'y kuery Uzá ha'e Aiô oje'oi karóxa pyau reraarā.

⁴ Ha'e rami py Abinadabe ro yvy'ā re oīague gui ogueru inony Nhanderuete ayvu ryru. Ha'e rā Aiô oo oiny hyru renonde.

⁵ Davi ha'e Israel ro pygua kuery ha'e javi ovy'a oje'oviy SENHOR renonde rupi, opa marāgua ipu va'e yvyra faia gui ojapo pyre py, ixā reta va'e, mbaraka, angu'a pu'i, pandeiro ha'e hy'a pu py.

⁶ Ha'e gui Nacom mba'emo moa'yīaty re ovaēa py ma Nhanderuete ayvu ryru re Uzá opoko vy omombyta, vaka onhepyxanga rā.

⁷ Ha'e ramo Uzá rovai SENHOR poxya hendy vy ha'e pyve ojuka, nomboetei reia re. Ha'e rā omano Nhanderuete ayvu ryru yvy'iry ae.

⁸ SENHOR Uzá ojuka rā Davi ndojou porāi. Ha'e vy ha'e va'e tekoā omboery Perez-Uzá, aŷ peve guarā.

⁹ Ha'e va'e ára SENHOR gui Davi okyje vy aipoe'i:

— Mba'exa nda'u SENHOR ayvu ryru aru 'rā? — he'i.

¹⁰ Ha'e rami vy Davi ndogueruxevei SENHOR ayvu ryru guekoa katy. Ha'e rami 'rāgue py Gate guigua Obede-Edom va'e ro katy rive ogueraa uka.

¹¹ Mboapy jaxy re SENHOR ayvu ryru optya Gate guigua Obede-Edom ro py. Ha'e rā SENHOR omoingo porā, hoo pygua ha'e javi reve.

1 Crônicas 15.25-16.3

¹² Ha'e gui ma Davi pe omombe'ua vy aipo'ea:

— SENHOR oayvu ryru re vy omoingo porā Obede-Edom ro pygua kuery ha'e mba'emo oguereko va'e ha'e javi — 'ea. Ha'e ramo Davi ovy'a reve oo vy Obede-Edom ro gui ogueru ruka guekoa katy Nhanderuete ayvu ryru.

¹³ SENHOR ayvu ryru rerua kuery mboapy memekue opyrōa py kuerei 'rā SENHOR pe ojuka vaka ha'e vexa'i omongyra pyre.

¹⁴ Davi ojeroky ratā ouvy SENHOR renonde ovy'a reve. Onhemonde sacerdote pegua manto ajukue pererī'i gui ojapo pyre py.

¹⁵ Ha'e rami vy Israel kuery ha'e javi reve Davi ogueru SENHOR ayvu ryru, ovy'a reve ha'e mimby guaxu omonhe'ea rupi.

¹⁶ Tetā Davi rekoā py SENHOR ayvu ryru oguerovaēa ma heruvy jave Saul rajykue Mical janela rupi oma'ē vy oexa oiny SENHOR renonde huvixa Davi ojeroky ha'e opo-opo reve ou rā. Ha'e rami vy opy'a py ojou vai.

¹⁷ Ha'e gui SENHOR ayvu ryru ogueroike vy omoī oo'i hendarā ae ma voi Davi ojapo va'ekue py. Davi ae SENHOR renonde ogueru mba'emo oapy reve ha'e peteī rami ikuuai regua ome'ē va'erā.

¹⁸ Mba'emo oapy reve ha'e peteī rami ikuuai regua Davi ome'ēmba ma rire ogueroayvu porā heta va'e kuery SENHOR ixondaro reta va'e rery rupi.

¹⁹ Ha'e gui ha'e kuery ha'e Israel kuery ha'e javi pe ome'ē tembi'u, avakue ha'e kunhague pe. Peteī-teī ikuuai va'e pe ome'ē peteī ra'ykue mbojape, peteī ra'ykue ja'ea'i xo'o ha'e uva pirukue. Ha'e rire ma ha'e kuery ojepe'apa oje'oviy ngoo katy.

Mical pe Davi ijayvu eteague

²⁰ Davi ngoo pygua kuery ae ogueroayvu porā aguā ojevy jave Saul rajykue Mical oē ovaexī aguā. Ha'e vy aipoe'i:

— Ojexa uka porā ete pa Israel pygua huvixa! Ange ojekuaa uka guembiguai kuery rembiguai kunhague pe, oxī e'ŷ va'e rami ojekuaa uka, ovare'ŷ va'e rive rami ete.

²¹ Ha'e rā Davi ombovai Mical pe:

— SENHOR renonde ae xee ajapo. Ha'e va'e ma xeporavo karamboae nderu ha'e hoo pygua kuery ha'e javi 'rāgue py, ha'e vy xemoī uka ojeupeguia Israel kuery ruvixarā. SENHOR renonde ae xee avy'a kuri.

²² Ha'e gui xee ange aikoague gui ndajeayvu ukaive tema 'rā, ha'e anhemo'yvy'iive 'rā aikoa py. Ha'e rā tembiguai kunhague ndeayvua va'e ma xemboeteve 'rā okuapy — he'i.

²³ Saul rajykue Mical ma na'imembyi, omanoa ára peve.

7

1 Crônicas 17.1-15

¹ Ha'e gui huvixa Davi ngoo py ae oī jave, hovaigua kuery jovalovai re ikuai va'e opu'āague gui SENHOR omombytu'u ma rire

² huvixa aipoe'i profeta Natā pe:

— Ma'ē, xee ma xero ainy yary guigua py, ha'e rā hyru Nhanderuete pegua ma peteī oo'i py rive oī.

³ Natā orbovai huvixa pe:

— Tereo, ejapo ndepy'a re rendu va'e ha'e javi, ndereve SENHOR oiko ramo — he'i.

⁴ Ha'e gui ha'e va'e pyavyve, Natā pe SENHOR ombou oayvu. Ha'e vy aipoe'i:

⁵ — Tereo ha'e aipo're xerembiguai Davi pe: “Po rami SENHOR ijayvu: Ndee ae 'rā teve rejapo peteī oo xee aī aguā?

⁶ Mba'eta neī peteīve oo py ma voi xee naī teri Egito yvy gui Israel kuery arupa guive aīy peve. Ha'e rami 'rāgue py oo'i py rive aiko va'e, xembojerovia aty py ae.

⁷ Opa rupi Israel kuery aru herekovya rupi nda'u xeayvu ri raka'e amongue nderegua pe, xevygua Israel kuery re apena uka va'ekue pe nda'u aipoa'e: ‘Mba'e re tu nderejapoi peteī xerorā yary guigua?’ ha'e teve?

⁸ Ha'e gui aīy ma po rami 'rā ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexa'i kuery re repenaa gui, ha'e kuery rakykue reikoa gui, huvixarā xevygua Israel kuery re ju repena aguā.

⁹ Ndereve xee aa avi karamboae, mamo rā reoa rupi tema. Nderovaigua kuery amomba nerondenonide gui, amboyvate guive ndererery, yvy regua ipo'akakueve anho ikuiai rami.

¹⁰ Areko katu avi xevygua Israel kuery rekoarā, ha'e vy amboekoapa ha'e py, mava'eve omoangeckoave e'ŷ aguā, ha'e heko vai va'e ombojexavaive e'ŷ aguā jypy guare rami e'ŷ,

¹¹ xevygua Israel kuery rerekoarā amoīa ára guive. Ha'e rami avi ndevy ame'ē 'rā nderovaigua kuery opu'āague gui repytu'u aguā”, he'i va'ekue. SENHOR ma oikuaa uka pova'e: Ha'e ae 'rā ojapo oo ndevy.* Aipoe'i:

¹² “Nderekovea opa rā nderu kuery reve repytu'u ma jave nderekovia xee amoingo 'rā ndeguigua, ndegui ete oiko va'erā. Ha'e vy ajapo 'rā ipo'akaa oī atā aguā rami.

¹³ Ha'e va'e ae ma ojapo 'rā peteī oo xerery oī aguā, ha'e rā xee ajapo 'rā raka'e rā peve ipo'aka oiny aguā rami.

¹⁴ Xee ma tuu 'rā, ha'e rā ha'e ma xera'y 'rā oiko. Xapy'a rei ha'e ojejavu ramo ma ambopaga 'rā avakue hyvyra po'i'i py, avakue gua'y kuery ombopia rami.*

¹⁵ Ha'e rami teī ixugui ndaipai 'rā amboaxya, Saul nerondenonide gui aipe'a vy namboaxyveague rami e'ŷ.

¹⁶ Ha'e rā ndero ha'e ndepo'akaa ma amoī atāve 'rā nerenderā. Ha'e rami vy oī riae 'rā ndepo'aka reinya”, he'i.

¹⁷ Ha'e va'e ayvu ha'e javi ma Natā pe oexa ukaague rami ae omombe'u Davi pe.

1 Crônicas 17.16-27

¹⁸ Ha'e gui ma SENHOR pegua opy Davi oike vy hi'aī henonde. Ha'e vy aipoe'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguā?

¹⁹ SENHOR Xeruete, ha'e nunga tu ndevy pe mba'e'ŷ rima, ndeayvu ma voi guive xee nerembiguai ro pygua raka'e rā guarā re. SENHOR Xeruete, ha'e nunga ma avakue ha'e javi mo'aranduarā rejapo.

²⁰ Ha'e gui xee nerembiguai Davi, mba'e ta'eve ju ndevy pe? Mba'eta ndee ma xekuaa porā, SENHOR Xeruete.

* 7:11 Oo ojapo aguā re SENHOR ijayvu, raka'eve rā Davi ramymino kuery regua huvixarā omoingo aguā re (versículos 12, 16). Ha'e va'e regua ma Jesus Cristo ae oiko (Lucas 1.32-33,69; Atos 13.23). * 7:14 2 Coríntios 6.18, Hebreus 1.5, Apocalipse 21.7

- ²¹ Ndeayvua ha'e ndepy'a re rendua rami vy rejapo kova'e nunga tuvixa va'e ha'e javi, xee nerembiguai pe reikuua uka guive.
- ²² Ha'e nunga rupi SENHOR Xeruete, ndetuvixa ete va'e, mba'eta ndoikoi ndee ramigua ete'i, ndoikoi guive Oreruete mboae ndee e'ŷ vy, oreapyxa py ae roenduague rami.
- ²³ Mava'e regua tu ndevyguia Israel kuery ikuia ramigua? Xeruete, ha'e kuery anho'i ae yvy re ikuai va'e mbyte gui ndejeupe guarā reipe'a va'ekue. Ha'e rami ndejeupe ae rejapo nderery re ima'endu'aa aguā rami, ha'e ndevyguia kuery pe rejapo mba'emo porā ete, ndeyvy re guive, mba'eta ha'e gui yvy regua kuery remoxēmba raka'e tuuete ramigua kuery reve, ndevyguia kuery Egito yvy gui renoēmba va'ekue renonde gui.
- ²⁴ SENHOR, Israel kuery ndejeupe guarā ae remoingo raka'e rā peve, ha'e gui ndee ju renhemingo Tuuete.
- ²⁵ Ha'e gui aŷ ma SENHOR Xeruete, ha'e va'e ayvu xee nerembiguai rekorā re, ha'e xero pygua re guive aipo'reague toĩ atāve, ejapo ndeayvuague rami ae.
- ²⁶ Nderery tomboetea riae, ha'e vy "SENHOR ixondaro reta va'e ma Israel kuery Ruete", ta'ea. Ha'e ramo xee Davi nerembiguai ro ma oĩ atā riae 'rā nerondenon.
- ²⁷ Mba'eta SENHOR ixondaro reta va'e, Israel kuery Ruete va'e, xee nerembiguai pe ha'e nunga reikuua uka vy "Ajapo 'rā oo ndevy", 're va'ekue. Ha'e nunga rupi ae xee nerembiguai xepy'a guaxu nami anhembo'e aguā ndevy.
- ²⁸ Ha'e gui aŷ, SENHOR Xeruete, ndee ae ma Oreruete, ha'e ndeayvua ma anhetē va'e meme. Ha'e vy xee nerembiguai pe rejapo porā aguā re ndeayvu.
- ²⁹ Ha'e nunga rupi aŷ SENHOR Xeruete, emingo porā xee nerembiguai ro pygua kuery, nerondenon rupi orekuai riae aguā rami, mba'eta ha'e rami aguā re ndeayvu rire. Ha'e rami vy xee nerembiguai ro pygua reroayvu porā rire raka'e rā peve 'rā roiko porā — he'i.

8

1 Crônicas 18.1-13

- ¹ Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi hetā tuvixakueve re ipo'aka aguā.
- ² Oitypa avi Moabe pygua kuery. Ha'e rami vy yvy rupi omonhenomba vy oa'ã: mokoĩ ixā'i oa'āgue ma ojuka aguā rami ikuai, ha'e rā peteĩ ixā'i oa'āgue ma ndojukai. Ha'e rami vy Moabe pygua kuery ikuai Davi rembiguairā, ha'e ixupe mba'emo opaga jepi 'rā okuapy.
- ³ Ha'e gui Zobá pygua huvixa Reobe ra'y Hadadezer ma yakā Eufrates re ipo'aka ju aguā oo jave hexe voi Davi ipo'aka.
- ⁴ Ixupegua kavaju árygua kuery ma Davi ojopy mil e setecentos, ha'e gui vinte mil avakue yvy rupigua. Ojayapa guive kavaju karóxa regua pytaxā, cem ete'i oeja ojaya e'ŷ re.
- ⁵ Ha'e ramo Síria pygua kuery ma Damasco tetā gui ou Zobá pygua huvixa Hadadezer repyarā. Ha'e rami teĩ ha'e va'e avakue Síria guigua ma Davi ojuka vinte e dois mil.
- ⁶ Ha'e gui Damasco regua Síria py Davi omoĩ harōarā kuery. Ha'e ramo Síria pygua kuery Davi rembiguairā ikuai vy mba'emo opaga 'rā okuapy ixupe. Davi ooa nhavō rupi SENHOR ombopo'akave tema.
- ⁷ Hadadezer rembiguai yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.
- ⁸ Hadadezer pegua tetā Betá ha'e Berotai gui voi huvixa Davi oipe'ave tema overa va'e guigua.
- ⁹ Ha'e gui Hamate pygua huvixa Toí oendu Hadadezer pegua xondaro kuery Davi oitypaague.
- ¹⁰ Ha'e rami vy huvixa Davi-a py ombou gua'y Jorão. Ha'e va'e ma oxarura vy oguerovy'a Hadadezer reve joguero'aa py ojukapaague re (mba'eta Toí reve Hadadezer joguero'a tema rire). Jorão ou vy ogueru mba'emo prata, ouro ha'e overa va'e guigua ome'ẽ va'erā.
- ¹¹ Ha'e nunga huvixa Davi ojopy vy omboaxapa SENHOR peguarā, ha'e javi regua re ipo'akaague va'e kuery gui prata ha'e ouro ojopy va'ekue reve:

¹² Síria guigua, Moabe regua, Amom ra'y kuery, filisteu kuery, Amaleque ha'e Zobá pygua huvixa Recabe ra'y Hadadezer mba'e rei-rei guigua guive.

¹³ Síria pygua kuery Davi oitypaague gui ou vy "Juky yvvyugua" 'ea va'e py dezoito mil avakue ju ojuka. Ha'e rami rā Davi rery re ima'endu'aa opa rupi.

¹⁴ Edom re voi omoī harōarā kuery. Edom ha'e javi rupi omoī harōarā. Ha'e ramo Edom pygua kuery ha'e javi ikuai Davi rembiguairā. Davi ooa nhavō rupi SENHOR ombopo'akave tema.

2 Samuel 20.23-26; 1 Crônicas 18.14-17

¹⁵ Ha'e rami vy Davi opena Israel kuery ha'e javi re. Joe oikuua potaa py ha'evea rami oguereko ojeupeguia kuery.

¹⁶ Ixupeguia xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

¹⁷ Sacerdote ma Aitube ra'y Zadoque, ha'e gui Abiatar ra'y Aimeleque. Ha'e rā kuaxia re opena va'ety ma Seraías.

¹⁸ Huvixa ro rarōa kuery ruvixa ma Joiada ra'y Benaia. Ha'e rā Davi pytyvōa kuery ma ta'y kuery ae.

9

Jônatas ra'ykue re Davi opena porāague

¹ Davi aipoe'i:

— Oikove teri teve Saul ro pygua kuery va'e regua, Jônatas ayvua rupi xee apena porā aguā? — he'i.

² Saul ro py oiko raka'e peteī hembiguai Ziba hery va'e. Ha'e va'e oenoī ucaa Davi-a py oo aguā. Davi oporandu ixupe:

— Ndee pa Ziba?

Ombovai:

— Xee ae ri, nerembiguai aiko — he'i.

³ Huvixa aipoe'i:

— Ndoikovei ma teve Saul ro pygua Nhanderuete porayvua rami apena porā aguā?

Ziba ombovai huvixa pe:

— Oiko teri peteī Jônatas ra'ykue, opy jovaive oiporu ve'ŷ va'e — he'i.

⁴ Huvixa oporandu:

— Mamo ha'vy oī?

Ziba ombovai:

— Amiel ra'y Maquir ro py ko oī, Lo-Debar py — he'i.

⁵ Ha'e ramo Lo-Debar gui huvixa ogueru ruka Amiel ra'y Maquir ro gui.

⁶ Davi-a py Saul ra'y Jônatas ra'ykue Mefibosete ou vy guenapy'ā re oī, ngova yvy re omovaē reve. Ixupe Davi aipoe'i:

— Mefibosete!

Ombovai:

— Apy ma nerembiguai aiko! — he'i.

⁷ Ha'e gui Davi aipoe'i:

— Ekyje eme, mba'eta nderu Jônatas ayvua rupi apena porā 'rā ndere. Ha'e vy ndevy ame'ẽmba 'rā neramoī Saul yvykue ha'e javi. Ha'e rā ndee ma rekaru riae 'rā xe-mesa py.

⁸ Ha'e ramo ojero'a ju reve aipoe'i:

— Mba'e tu xee nerembiguai aiko, jagua re'õgue rami xee aiko va'e re rema'ẽ aguā? — he'i.

⁹ Ha'e gui Davi oenoī uka ju Saul rembiguai Ziba. Ha'e vy aipoe'i ixupe:

— Saul mba'e va'ekue ha'e imba'e rei-reikue ha'e javi ma amboaxa ange nepatō ra'ykue pe.

¹⁰ Pemba'epo 'rā ijyvy re, nderal' y kuery ha'e nerembiguai kuery reve. Ha'e vy mba'emo aju pemono'õ kuerei 'rā, nepatō rogue py oī aguā pe'u va'erā. Ha'e rā nderuvixa ra'ykue

Mefibosete ma xe-mesa py riae 'rā okaru — he'i. Ziba ra'y kuery ikuai raka'e quinze, ha'e gui hembiguai kuery ma vinte.

¹¹ Ziba aipoe'i huvixa pe:

— Xeruvixa, xee nerembiguai pe rejapo uka va'e ha'e javi 'rā ajapo — he'i. Ha'e rami vy Mefibosete okaru oikovy Davi mesa py, huvixa ra'y kuery rami ae avi.

¹² Mefibosete ra'y kyrī'i va'e rerry ma Mica. Ziba ro py ikuai va'e ma Mefibosete rembiguai meme raka'e.

¹³ Mefibosete ma Jerusalém tetā py hekoa raka'e, huvixa mesa py ae tema okaru vy. Ha'e ma opy joavaive oiporu ve'ŷ va'e.

10

1 Crônicas 19.1-19

¹ Ha'e rire ma Amom ra'y kuery ruvixa omano, ha'e rā ta'y Hanum ju oĩ nguu rekovia.

² Ha'e ramo Davi aipoe'i:

— Naás ra'ykue Hanum pe aexa uka 'rā ayvua, tuu xerayvuague rami — he'i. Ha'e rami vy Davi omondouka guembiguai kuery ombopy'a porā ju aguã tuu omanoague gui. Ha'e rā Davi rembiguai kuery ovaẽ Amom ra'y kuery yvy re.

³ Ha'e rami teĩ Amom regua yvatekueve aipoe'i okuapy nguvixa Hanum pe:

— Rexa'ã teve Davi nderu rāgue'i omboetea rupi guembiguai ombou nembopy'a porārā? Xapy'a rei ma ndea py merami guembiguai kuery ombou vy neretā re oikuaa pota ha'e yvy re oexa pota rire ombovaipa aguã e'ŷ teve? — he'i okuapy.

⁴ Ha'e rami rā Hanum ojopy Davi rembiguai kuery, ha'e vy onhopimba hendyva ijykekue'i rupi, ija ojaya guive hevi ro'o ojekuaa peve. Ha'e rire mae ma omondouka ju.

⁵ Ha'e nunga Davi oikuaa vy ombou ayvu mombe'uarā ha'e kuery ovaexi aguã, omoximbaa rire. Huvixa aipoe'i uka:

— Pepyta ranhe Jericó tetā py, penerendyva ipukupa ju peve. Ha'e rire ma peju ju — he'i uka.

⁶ Amom ra'y kuery oikuaa okuapy Davi nda'ija'evei aguã rami ojapoague. Ha'e vy omondouka ayvu mombe'uarā vinte mil Síria pygua avakue ogueru aguã Bete-Reobe ha'e Zobá gui, ha'e gui mil avakue Maaca pygua huvixa pegua, ha'e doze mil ju Tobe gui ogueru aguã.

⁷ Ha'e nunga Davi oendu vy ha'e kuery rovai ombou Joabe oxondaro kuery ha'e javi reve, ipy'a guaxukueve meme.

⁸ Amom ra'y kuery oje'oi vy tetā kora rokē py oarō okuapy joe opu'ã aguã. Ha'e rā Síria pygua kuery Zobá ha'e Reobe guigua ma amboae rupi ranhe ikuai nhuñdy rupi, avakue Tobe ha'e Maaca guigua kuery reve.

⁹ Ha'e gui Joabe oexa hovaigua kuery henonde ha'e hakykue katy gui oarō okuapya, ha'e rami vy Israel kuery ikuai va'e gui opu'ã kuaave va'e oiporavo vy omboyxy imbokuapy Síria pygua kuery rovai.

¹⁰ Ha'e rā hembyrekue ma guyvy Abisai po py omboaxa. Ha'e ramo ha'e va'e ma Amom ra'y kuery rovai ju omboyxy imbokuapy.

¹¹ Ixupe Joabe aipoe'i:

— Xapy'a rei Síria pygua kuery xegui imbaraeteve ramo ndee reo 'rā xepytyvõ aguã. Ha'e rā Amom ra'y kuery ri ndegui imbaraeteve ramo xee aju 'rā roipytyvõ vy.

¹² Nhanembarate ke ha'vy. Jajoguero'a nhandepy'a guaxua rupi nhaneretarā kuery ha'e Nhanderuete pegua tetā ikuai va'e jaepya rupi. Ha'e SENHOR tojapo ojou porāa rami — he'i.

¹³ Ha'e vy Joabe guexeveguia kuery ogueraa vy joguero'a okuapy Síria pygua kuery reve. Ha'e rā ha'e va'e kuery onhamba henonde gui.

¹⁴ Ha'e rā Síria pygua kuery onhamba maa Amom ra'y kuery oexa vy ha'e kuery voi onhamba avi Abisai renonde gui, ha'e vy guetā py ju oikepa. Ha'e ramo Joabe ma Amom ra'y kuery reve joe opu'ãague gui ojevy vy oopa ju Jerusalém katy.

- ¹⁵ Ha'e gui Síria pygua kuery ma Israel kuery renonde oitypaa oexa vy ono'õmba ju.
- ¹⁶ Hadadezer ogueru rukave ju Síria pygua kuery yakã rovai re ikuai va'ekue, ha'e rã ha'e va'e kuery ma Helã tetã py ou. Ha'e kuery renonde ou oiny Sobaque, Hadadezer pegua xondaro kuery rerekorã.
- ¹⁷ Ha'e nunga Davi pe omombe'ua rã oendu vy omboatypa Israel kuery ha'e javi, ha'e vy Jordão yakã oaxa vy Helã katy oje'oi. Síria pygua kuery oarõ okuapy Davi kuery rovai joguero'a aguã, ha'e vy joguero'a ha'e kuery reve.
- ¹⁸ Ha'e rami tei Israel kuery renonde gui Síria pygua kuery onhamba ju. Ha'e ramo Davi ojuka Síria pygua kuery va'e regua setecentos karóxa pygua ha'e quarenta mil kavaju árygua. Oipyxo avi xondaro kuery rerekoa Sobaque, ha'e rami rã ha'e pyve omano.
- ¹⁹ Hadadezer rembiguai kuery huvixa ikuai va'e oitypa maa oexa okuapy vy ojapo Israel kuery reve ikuai porã ju aguã, ha'e kuery rembiguai ikuai aguã. Ha'e rami rire Síria pygua kuery okyje vy noipytyvõxevei Amom ra'y kuery.

11

Bate-Seba reve Davi itavyague

- ¹ Petei ma'etãa ma rire huvixa kuery joguero'a vy oopa jepi jave Davi omondouka Joabe guembiguai kuery ha'e Israel kuery ha'e javi. Ha'e ramo ha'e kuery oitypa Amom ra'y kuery, ojokopa okuapy guive hetã Rabá. Ha'e rã Davi ma Jerusalém py ae opyta.
- ² Peteigue ka'aru rai jave Davi ngupa py ituia gui opu'ã vy oiko-iko rei ngoo áry rupi. Ha'e vy oexa peteĩ kunha ojau rã, iporã raxa va'e.
- ³ Davi oporandu uka mava'e paa re. Ha'e rã ombovaia:
- Bate-Seba ri, Eliã rajy ha'e heteu regua Urias ra'yxy va'e — 'ea.
- ⁴ Ha'e ramo Davi omondouka guembiguai kuery ogueru aguã. Ha'e ou ramo onheno hexeve. Ha'e ramo kunha va'e ma ha'eve'ÿague gui ojeky'a'o ma vy ngoo katy ju ojevy.
- ⁵ Kunha va'e oguereko'i vy Davi pe
- Areko'i ma — he'i uka.

Davi Urias ogueru ruka jave guare

- ⁶ Ha'e ramo Davi omondouka ayvu mombe'ua Joabe pe. Ha'e vy aipoe'i uka:
- Embou ke xea py heteu regua Urias — he'i ramo Davi-a py Joabe ombou Urias.
- ⁷ Davi-a py Urias ou rã ixupe oporandu mba'exa pa Joabe oikoa re, ha'e kuery ikuaria re ha'e joguero'a okuapya re.
- ⁸ Ha'e gui ma Davi aipoe'i Urias pe:
- Tereo ndero py epytu'u — he'i.
- Davi ro gui Urias oo ramove'i ixupe huvixa ogueraa uka mba'emo ome'ẽ rive va'e.
- ⁹ Ha'e rami tei Urias ma huvixa ro rokẽ py rive onheno, nguvixa rembiguai kuery ha'e javi reve. Ha'e vy ngoo katy ndooi.
- ¹⁰ Davi pe omombe'ua vy
- Urias tu ndooi ma ngoo katy — 'ea.
- Ha'e ramo Davi aipoe'i Urias pe:
- Mombyry gui e'ÿ teve rej? Mba'e re tu ndereoi ndero katy?
- ¹¹ Urias ombovai:
- Lei ryru ha'e Israel ha'e Judá kuery ma oguy'i py rive optytapa teri okuapy. Xepatõ Joabe ha'e nerembiguai kuery ha'e javi ma ijaty okuapy oka py rive. Ha'e rã xee teve aike ta xero py akaru ha'e ay'u aguã, ha'e xera'yxy reve anheno aguã? Anhetõ ete nderekove rupi aura vy aipoa'e: Xee ndajapoi 'rã ha'e nunga — he'i.
- ¹² Ha'e ramo Davi aipoe'i Urias pe:
- Epytave'i ranhe aÿ ete'i ri jepe, ha'e vy ko'ẽ ramo romondouka ju aguã — he'i ramo ha'e va'e ára pukukue re Urias oiko Jerusalém tetã py, ko'ëgue peve.
- ¹³ Davi oenoï vy hexeve okaru ha'e oy'u, omonga'u guive. Ka'aru'i majave Urias oo ngupa py onheno aguã nguvixa rembiguai kuery reve, ha'e rã ngoo katy ma ndooi ae.

Urias omanoague

- ¹⁴ Aje'ivekue, kuaxia para Joabe pe Davi ojapo vy Urias po py ogueraa uka.
- ¹⁵ Kuaxia para re aipoe'i imoiny:
 — Emondouka Urias pavē renonde joguero'avea py. Ha'e vy peja ha'e ae'i, ojukaa aguā — he'i.
- ¹⁶ Ha'e ramo tetā Joabe kuery ojoko imoinya py omondouka Urias avakue imbaraekekueve reve joe opu'ā aguā py.
- ¹⁷ Avakue tetā py ikuai va'e oē vy Joabe kuery reve joguero'a okuapy ramo Davi rembiguai kuery va'e regua amongue ho'a. Heteu regua Urias omano avi.
- ¹⁸ Ha'e ramo imombe'uarā Joabe ombou vy Davi pe omombe'u joguero'aa py oiko va'ekue ha'e javi.
- ¹⁹ Ayvu mombe'ua pe ijayvu imondovy vy aipoe'i:
 — Xapy'a rei joguero'aa oiko va'ekue remombe'upa rā
- ²⁰ ha'e ivai vy aipoe'i rā ndeby: "Mba'e re tu tetā yvy'iry ete ri pejoguero'a? Ndapeikuai ri ty'y tetā kora gui omombo 'rāa?
- ²¹ Mba'ixa tu ojukaa raka'e Jerubesete ra'y Abimeleque? Peteī kunha va'e e'ŷ teve kora áry gui hexe omombo ita, ha'e va'e gui ae omano raka'e Tebes py?" he'i ramo ndee ju "Omano avi nerembiguai heteu regua Urias" 're 'rā — he'i.
- ²² Ha'e ramo ayvu mombe'ua oo vy ovaă, ha'e Davi pe omombe'upa Joabe aipoe'i ukaague.
- ²³ Ha'e vy ayvu mombe'ua aipoe'i Davi pe:
 — Anhetē, ha'e va'e avakue ma oregui ipo'akave vy nhuūndya rupi ou orerovai. Teī ore kuery roo avi ha'e kuery rovai, tetā kora rokē py oikea peve.
- ²⁴ Ha'e ramo hu'y reveguia kuery ikora yvatea gui nerembiguai kuery rovai omombo ramo amongue'i omano ndee xeruvixa rembiguai kuery. Ha'e gui omano avi nerembiguai heteu regua Urias.
- ²⁵ Davi aipoe'i ayvu mombe'ua pe:
 — Po rami 'rā aipo're Joabe pe: "Ndepy'a vai eme ha'e nungakue re, mba'eta kyxe py jojuka 'rāe joguero'aa py. Pejoguero'ave tema tetā rovai ha'e peitypa", 're 'rā. Po rami 'rā rembopy'a guaxu Joabe — he'i.

Bate-Seba re Davi omendaague

- ²⁶ Ha'e gui Urias ra'yxy ma ome omanoa oendu vy ojae'o.
- ²⁷ Ojae'o vaipa ma rire Davi ogueru ruka rā herua hoo py. Ha'e rā ta'yxy ju ma oiko vy oguerekopeteī kyrī va'e. Ha'e rami teī Davi ojapo va'ekue ma SENHOR pe nda'evei va'e.

12

Davi pe Natā ijayvuague

- ¹ Davi-a py SENHOR ombou profeta Natā. Ha'e py Natā ovaă vy aipoe'i ixupe:
 — Peteī tetā py ma je oiko mokoī avakue. Peteī je oguerekopa va'e, ha'e rā amboae ma je iporiaukue'i.
- ² Oguerekopa va'e ma vexa'i ha'e vaka kuery heta oguerekopeteī.
- ³ Ha'e rā iporiaukue'i va'e ma je mba'eve ndoguerekoi, peteī vexa ra'y'i ojogua va'ekue ombotuvixa va'e e'ŷ vy. Ha'e va'e ma hoo py tuvixa'i ta'y kuery reve. Ha'e kuery reve okaru, ha'e kuery karo gui oy'u guive. Ijyva áry oke ramo guajy rami oguerekopeteī.
- ⁴ Ha'e gui oguerekopa va'ea py peteī ovaă mombyry gui ou va'ekue. Ha'e ramo ha'e va'e ndojukaxeī guymba kuery vexa'i ha'e vaka ae, mombyry gui ou va'ekue omongaru aguā. Ha'e rami l'rāgue py ojopy iporiaukue'i va'e rymba vexa'i, ha'e vy ae omongaru ava ovaă va'ekue — he'i.
- ⁵ Ha'e ramo Davi ivai raxa ava ha'e rami ete joapo va'ekue pe. Ha'e vy aipoe'i Natā pe:
 — Anhetē ete SENHOR oikove va'e rery rupi aura vy aipoa'e: Ava ha'e rami joapo va'ekue ma ojukaa ramo 'rā ha'eve.

⁶ Ha'e vexa ra'y'i ojuka va'ekue rekovia ma irundy ju 'rā ome'ē, nhomboaxya rupi e'ŷ ojapo rire — he'i.

⁷ Ha'e ramo Natā ombovai Davi pe:

— Ha'e va'e ava ma ndee ae. Po rami SENHOR Israel kuery ruete ijayvu: Xee roiporavo va'ekue Israel kuery ruvixarā, Saul po gui rogueraa jepe guive.

⁸ Ndevy ame'ē nderuvixa rokue, ha'e ndejyva py amboaxa ta'yxykue ha'e javi. Ndevy amboaxa avi Israel ha'e Judá kuery. Ha'e rā ha'e nunga mboapy'i raka'e va'e rire mba'emo ame'ē retave heravy 'rāgue ndevy.

⁹ Mba'e re tu nderexarai ri SENHOR ijayvua gui, mba'emo vai rei rejapo vy? Mba'eta heteu regua Urias ma rejuka uka kyxe py. Ha'e gui ta'yxykue ma nder'a'yxyrā rejopy, Amom ra'y kuery kyxe py ime rejuka uka rire.

¹⁰ Ha'e rami rire aŷ guive ndero py ndoiko e'ŷi 'rā kyxe jojukaarā, mba'eta xereja vy heteu regua Urias ra'yxy reraa rire.

¹¹ — Po rami SENHOR ijayvu: Ma'ē, ndero gui ae amoingo 'rā mba'emo vai nde'āry, ha'e vy ndee ae rexaa py ajopy ukapa 'rā nder'a'yxy kuery, neirū pe ju 'rā amboaxa. Ha'e va'e ae ju 'rā onheno ha'e kuery reve, ára porā rei jave.

¹² Mba'eta ndee ma nhemi rupi rejapo, ha'e rā xee ma ha'e nunga ajapo 'rā Israel kuery ha'e javi oexaa py, kuaray rexakāa py ae — he'i.

¹³ Ha'e rami rā Davi aipoe'i Natā pe:

— Ajejavy raka'e SENHOR pe.

Natā ombovai Davi pe:

— SENHOR ndeperdoa rejavyague gui. Ndee ma neremanoi 'rā.

¹⁴ Ha'e rami avi rejapo vaiague káuxa ma SENHOR rovaigua kuery ijayvu rei okuapy. Ha'e gui nder'a'y oiko rire omano 'rā — he'i.

¹⁵ Ha'e gui ma Natā oo ju ngoo katy.

Bate-Seba pi'a omanoague

Ha'e gui SENHOR omoingo axy Davi ra'y'i Urias ra'yxykue oguereko va'ekue. Ha'e rā kyrī va'e imba'eaxy vaipa.

¹⁶ Kyrī va'e re Davi ojapukai Nhanderuete pe. Okaru e'ŷ re guive oiko, ha'e pytū mbukukue oaxa oupy yvy rupi ipukupa reve.

¹⁷ Ha'e ramo nhomongeta va'ety kuery hoo py ikuai va'e onhemboja okuapy hexe, yvy gui omopu'āxe vy. Ha'e rā ha'e ma nopus'āxei, ha'e kuery reve ndokaruxei guive.

¹⁸ Sete araa py ma kyrī va'e omano. Ha'e rā hembiguai kuery okyje okuapy kyrī va'e omano maa Davi pe omombe'u aguā, mba'eta ha'e kuery aipoe'i okuapy:

— Ma'ē, kyrī va'e oikove'i teri reve nhandeayvu ramo noendu potai. Mba'exa 'rā tu kyrī va'e omano maa nhamombe'u ramo? Mba'eta iporiauve ju 'rā — he'i okuapy.

¹⁹ Davi ma hembiguai kuery joupe-upe ijayvu mbegue rā oexa vy oikuaa kyrī va'e omano maa. Ha'e vy oporandu guembiguai kuery pe:

— Kyrī va'e pa omano ma ra'e?

Ha'e kuery ombovai:

— Omano ma — he'i.

²⁰ Ha'e ramo Davi opu'ā ju yvy gui. Ojau, onhemoatyro ha'e oao omboekovia ma vy SENHOR pegua opy oike vy omboete. Ha'e gui ma ngoo katy ju ou vy ojerure tembi'u oguerua aguā re. Henonde omoña rā ho'u.

²¹ Hembiguai kuery aipoe'i okuapy:

— Mba'e tu rejapo? Kyrī va'e oikove'i teria ja ma rekaru e'ŷ re reiko, rejae'o guive. Va'eri omano ma rire revy vy mbojape guive re'u reiny.

²² Ombovai:

— Kyrī va'e oikove'i teria ja rima akaru e'ŷ re aiko, ajae'o guive, mba'eta aipoa'e vy: “SENHOR xemboaxy nho rivyvyi gui, ha'e rā pa kyrī va'e oikove tema 'rā?” ha'e va'ekue.

²³ Ha'e gui aŷ ma omano ma rire mba'e re 'rā'vy akaru e'ŷ re aiko? Xee nda'u amoingove ju 'rā teve? Xee aa 'rā ha'e oñā py, teñ ha'e ma ndou jevyvei 'rā xevy — he'i.

²⁴ Ha'e gui ma Bate-Seba oĩa py Davi oo vy ijayvu porã'i, hexeve onheno guive. Ha'e ramo oguereko'i peteĩ ava'i. Ha'e va'e ma Davi omboery Salomão. Ha'e rã SENHOR voi oayvu.

²⁵ Profeta Natã po py Davi omoĩ ramo oenoĩ Jedidias, SENHOR oayvu ramo.*

1 Crônicas 20.1-3

²⁶ Ha'e ramia ja Joabe kuery joguero'a teri Amom ra'y kuery retã Rabá rovai, ha'e vy ipo'aka okuapy huvixa rekoa oĩ va'e re.

²⁷ Ha'e ramo Davi-a py Joabe ombou ayvu mombe'ua aipoe'i va'erã: “Rabá rovai ajoguero'a vy xepo'aka ma yy tetã pygua kuery oy'u aguã va'ekue re.

²⁸ Ha'e gui aÿ ma emono'õve ju ndejeupeguia kuery mboae, ha'e pejoko tetã pendepo'aka peve, xee ae xepo'aka ramo xerery rupi oenoĩa e'ÿ aguã”, he'i uka.

²⁹ Ha'e ramo Davi amboae kuery ha'e javi omono'õmba vy Rabá tetã katy oje'oi. Ha'e va'e tetã rovai joguero'a vy ipo'aka.

³⁰ Ha'e pygua huvixa akã gui omboi coroa. Ha'e va'e re ouro oĩ va'e poyia ma trinta e três quilo rivyvyi, ha'e va'e re oĩ avi ita hepykueve va'e. Ha'e gui Davi akã re ju omoĩa. Ha'e va'e tetã gui ogueraa reta mba'emo.

³¹ Ha'e py ikuai va'ekue ogueraa avi vy omomba'epo yvyra ayaa py, picareta ha'e haxa ferro guigua py, ha'e gui yvy jykue apoa py. Ha'e rami Davi ojapo Amom ra'y kuery retã ha'e javi re. Ha'e gui heta va'e kuery ha'e javi reve Davi ojevy ju Jerusalém katy.

13

Amnom gueindy reve itavyague

¹ Davi ra'y Absalão oguereko raka'e gueindy iporã vaipa va'e, Tamar hery va'e. Ha'e va'e re ma Davi ra'y mboae Amnom va'e opena rei.

² Amnom nda'evei oiko gueindy Tamar re, imba'eaxy peve, teĩ kunha va'e ma avakue oikuua va'e'ÿ teri ramo haxy ete ha'e nunga ojapo aguã.

³ Amnom oguereko peteĩ oirũ, Davi ryvy Siméia ra'y, Jonadabe hery va'e. Jonadabe ma oiko kuua rei va'e.

⁴ Ha'e va'e aipoe'i Amnom pe:

— Mba'e re tu ko'ẽ nhavõ ne'angaise reovy? Neremombe'uxei teve xevy?

Ha'e ramo Amnom onhemombe'u:

— Ayvu xeryvy Absalão reindy Tamar — he'i.

⁵ Jonadabe aipoe'i ixupe:

— Enheno nderupa py, enhemomba'eaxy merami ejupy. Nderu ndepou vy ou ramo aipo're: “Ajerure xereindy Tamar ou vy mbojape ome'ẽ aguã, mba'eta tembi'u ojapo rã aexa vy ha'u 'rã ipo gui”, 'rã 'rã — he'i.

⁶ Ha'e ramo Amnom onheno vy onhemomba'eaxy oupy. Huvixa oipou vy ou rã Amnom aipoe'i ixupe:

— Ajerure xereindy Tamar ou vy tojapo mokoĩ mbojape aexaa py, ipo gui ha'u aguã — he'i.

⁷ Ha'e ramo Davi aipoe'i uka Tamar pe ngoo py oĩa py:

— Tereo ndekyvy Amnom ro py, ejapo tembi'u ixupe — he'i.

⁸ Okyvy Amnom ro py Tamar ovaẽ rã onheno oupy. Kunha va'e trigo apomo ogueru vy mbojape ojapo, ha'e vy ombojy oexaa py.

⁹ Oexya renda oguerova ixupe teĩ Amnom ndo'uxei. Ha'e rami 'rãgue py aipoe'i:

— Tojep'e'apaa xea gui — he'i. Ha'e ramo ha'e javive ojepe'apa.

¹⁰ Ha'e gui ma Amnom aipoe'i gueindy Tamar pe:

— Eru tembi'u xerupa py, ha'e ramo ha'u 'rã ndepo gui — he'i ramo Tamar mbojape ojapo va'ekue ogueru okyvy Amnom rupa okeaty peve.

¹¹ Ome'ẽ ramove ojopy kunha va'e jyva re, ha'e vy aipoe'i:

— Xereindy, eju, enheno xereve — he'i.

* 12:25 Salomão ma hery mokoĩ va'e. Tery Jedidias ma “SENHOR rembiayvu” 'ea. Ha'e rã tery Salomão ma “Joguereko porã'i va'e” 'ea.

¹² Ha'e rami teĩ kunha va'e ombovai:

— Any xekyvy, enhea'ã rei eme, mba'eta Israel re ma namigua ojapo va'e'ŷ. Ejapo eme mba'emo vai.

¹³ Mamo 'rã tu aa aximba reve? Ha'e rã ndee ma Israel kuery ndekuaa 'rã inhakã porã e'ŷ va'e rami. Aŷ ma ajerure huvixa reve ndeayvu aguã re. Ha'e ma naxeme'ẽ e'ŷi 'rã ndera'yxyrã — he'i.

¹⁴ Ha'e rami teĩ ikyvy noendu potai kunha va'e ijayvua re. Ha'e imbaraeteve vy onhea'ã rei vy nhogueronheno kunha va'e reve.

¹⁵ Ha'e rire Amnom oendu nda'ija'evei etea, jypy oayvuague rami e'ŷ. Ha'e vy Amnom aipoe'i ixupe:

— Epu'ã, tereo ju.

¹⁶ Ha'e ramo kunha va'e ombovai:

— Any, xekyvy. Xemondouka rive jevy va'e rire jypy xere rejapo va'ekue gui nda'eveive 'râgue — he'i.

Ha'e rami teĩ ikyvy noendu potai vy

¹⁷ guembiguai kunumi va'e oenoĩ vy aipoe'i:

— Emoẽ kunha va'e oka py, ha'e gui emboty okẽ — he'i.

¹⁸ Ha'e ramo hembiguai kunumi va'e oka py omoẽ vy omboty okẽ.

Tamar ma ao ijyva puku va'e py onhemonde, huvixa rajy kuery kunhatai'i va'e onhemondea rami.

¹⁹ Ha'e gui tanhimbu ojopy vy omoĩ oakã re, omondoropa oao ijyva puku va'e onhemondea, ha'e vy oakã re opo omoĩ reve ojepe'a. Ojae'o atã ov.

²⁰ Ha'e gui ikyvy Absalão ju oexa vy aipoe'i ixupe:

— Ndekyvy Amnom teve oĩ ra'e ndereve? Ma'ẽ xereindy, ekyrirĩ ma'vy. Ndekyvy ranga oiko. Ndepy'a vai eme ha'e nungakue re — he'i. Ha'e rami rire Tamar iporiau vaipa reve okyvy Absalão ro py ju oiko.

²¹ Huvixa Davi ha'e nunga ha'e javi oendu vy ivai.

²² Ha'e rã Absalão ma guyke'y Amnom reve nda'ijayvu porãi neĩ nda'ijayvu vai guive, gueindy Tamar re onhea'ã reiague re.

Guyke'y Amnom Absalão ojuka ukaague

²³ Mokoĩ ma'etŷa ma oaxa rire Absalão ojaya oikovy guymba kuery vexa'i rague Baal-Hazor py, Efraim katy'i oĩ va'e py. Ha'e vy Absalão oenoĩ uka huvixa ra'y kuery ha'e javi ha'e py ou aguã.

²⁴ Ha'e vy huvixaa py Absalão oo vy aipoe'i ixupe:

— Ma'ẽ, xee nerembiguai ajaya aikovy vexa'i rague. Xeruvixa, ajerure reo aguã nerembiguai kuery reve.

²⁵ Ha'e rami teĩ huvixa ombovai:

— Any xera'y, ndorooi 'rã jojavi, ndevy pe mba'emo oata e'ŷ aguã — he'i. Ta'y Absalão ogueraaxeia rami ijayvu tema va'eri ndooxei. Ha'e rami teĩ ogueroayvu porã.

²⁶ Ha'e rami rã Absalão aipoe'i:

— Ndee ndereoxei teĩ xeryke'y Amnom ri jepe emondouka orereve.

Huvixa oporandu:

— Mba'erã tu ha'e oo 'rã ndereve? — he'i ramo

²⁷ Absalão onhea'ã rei tema. Ha'e ramo huvixa omondouka nho Amnom, gua'y kuery ha'e javive reve.

²⁸ Ha'e gui Absalão ma guembiguai kunumigue pe ijayvu vy aipoe'i:

— Peikuaa pota rei ke. Amnom vinho gui oka'u vaipa ma vy ov'y'a rei jave pendevy "Pejuka ke Amnom" ha'e ramo pejuka. Pekyje eme. Xee e'ŷ ri ty'y ha'e rami ajapo uka? — he'i.

²⁹ Ha'e rami rã Absalão rembiguai kunumigue Amnom re ojapo okuapy Absalão ojapo ukaague. Ha'e ramo huvixa ra'y kuery ikuai va'e oexa vy opu'āmba vy peteĩ-teĩ guymba áry oĩ vy onhamba.

³⁰ Ha'e kuery tape rupi teri oo reve ayvu mombe'ua ovaẽ Davi-a py aipoe'i va'e:

— Xeruvixa, Absalão tu ndera'y kuery ha'e javive ma ojukapa, neĩ peteĩve ndopytai — he'i.

³¹ Ha'e rami rā huvixa opu'ã vy omondoro oao, ha'e ho'a yvy rupi. Hembiguai kuery hexeve ikuai va'e ha'e javi avi omondoro oao.

³² Davi ryvy Siméia ra'y Jonadabe oĩ avi. Ha'e va'e ombovai vy aipoe'i:

— Xeruvixa, exa'ã eme ndera'y kuery ha'e javi ojukapaa rami, Amnom anho'i omano. Mba'eta Absalão ma gueindy Tamar re Amnom onhea'ã reia ára guive ha'e rami aguã ae onhembopy'a va'ekue.

³³ Ha'e nunga rupi aŷ xeruvixa, erovia eme ha'e rami ete, ndera'y kuery omanombaa rami e'ŷ. Mba'eta Amnom anho'i ko omano — he'i.

³⁴ Ha'e gui Absalão ma ojava ma ra'e.

Ha'e gui tembiguai oikuua pota ho'amy va'e ma guakykue katy tape oĩ va'e re oma'ẽ vy oexa yvy'ã katy gui heta oguejy jekuaa joguerovy va'e.

³⁵ Ha'e ramo Jonadabe aipoe'i huvixa pe:

— Xeruvixa, pee ma ou jekuaa ndera'y kuery. Xee nerembiguai xeayvuague rami ae oiko ra'e — he'i.

³⁶ Ha'e va'e ijayvupa ramove'i huvixa ra'y kuery ovaẽmba okuapy. Ha'e vy onhendu ratã reve ojae'o okuapy. Ha'e rā huvixa ha'e hembiguai kuery ha'e javive avi ojae'o raxa okuapy.

Talmai rekoa katy Absalão ojavaague

³⁷ Ha'e rā Absalão ma ojava vy oo Gesur pygua huvixa Amiúde ra'y Talmai rekoa katy. Ha'e rā Davi ma ojae'o tema gua'y re ko'ẽ nhavõ.

³⁸ Ha'e rami vy Absalão ojava vy oo Gesur katy. Ha'e py ma mboapy ma'etŷa peve oiko.

³⁹ Ha'e ramo ma Davi opytu'u Absalão oekaa gui, mba'eta ipy'a porã ju ma Amnom omanoague gui.

14

Jerusalém tetã katy Absalão ojevy juague

¹ Ha'e gui huvixa opy'a py oexa nga'u tema gua'y Absalão. Ha'e nunga Zeruia pi'a Joabe oikuua vy

² ogueru ruka peteĩ kunha hi'arandu va'e Tecoa tetã gui. Ha'e vy aipoe'i ixupe:

— Ejexa uka iporiau vaipa va'e rami, emoĩ ao ndeporiaua pygua, enhemoatyrõ eme azeite py, ha'e enhemoingo omano va'ekue re are ma iporiau oikovy va'e rami.

³ Ejexa uka ha'e rami huvixa pe, ha'e ndeayvu hexeve aipoa'eague rupi anho — he'i. Ha'e vy Joabe omombe'u ijayvu aguã.

⁴ Ha'e gui huvixa pe Tecoa pygua kunha ojexa uka vy ojero'a reve oĩ guenapy'ã re, ngova yvy re omovaẽ reve. Ha'e vy aipoe'i:

— Xeruvixa, xepytyvõ ke!

⁵ Huvixa oporandu:

— Mba'e ha'vy rerekó?

Ombovai:

— Aikore! Xee nerembiguai ma kunha imeve'ŷ va'e aiko xeme omano rire.

⁶ Xee areko va'ekue mokoĩ xepi'a. Ha'e kuery ma jomeme joguero'a mba'ety py. Imboja'oarã nda'ipoai rā peteĩ ma guyke'y oipyxo vy ojuka.

⁷ Ha'e ramo xeretarã kuery ha'e javi opu'ãmba okuapy xee nerembiguai rovai, ha'e vy aipoe'i okuapy xevy: “Emboaxa na orepo py guyke'y jukaare, rojuka aguã omano va'ekue rekovia, ha'e rami vy romomba aguã ndee rire nemba'ekue jopyarã”, he'i okuapy. Ha'e rami vy 'rā ha'e kuery ombogue tapyí opa vygua areko va'ekue, ha'e xeme rery voi, ta'ykue yvy re ndoikovevei aguã rami — he'i.

⁸ Kunha va'e pe huvixa ombovai:

— Tereo ndero katy. Ha'e rā xee ajapo 'rā ndeayvuague — he'i.

⁹ Tecoa pygua kunha aipoe'ive ju huvixa pe:

— Ha'e gui xeruvixa, tove xere ha'e xeru ro pygua kuery re toĩ ha'e nungakue re ropaga aguã. Ha'e rã ndee xeruvixa, tenda repenaaty py reĩ va'e re toĩ eme.

¹⁰ Huvixa ombovai:

— Nderovai ijayvuave ri ramo eru xea py. Ha'e ramo nanemoangekovei 'rã — he'i.

¹¹ Kunha va'e aipoe'i:

— Ha'e rami rã xeruvixa, eura ke SENHOR Nderuete rery rupi, ojepyxe vy ou va'e kueryojuka e'ý aguã xepi'a jouguy omoëague re.

Ombovai:

— Anhetẽ ete SENHOR oikove va'e rupi aura vy aipoa'e: Neĩ peteĩ'i ma voi ndepi'a'a ndo'a rivei 'rã yvy py — he'i.

¹² Ha'e gui ma kunha va'e aipoe'i:

— Xeruvixa, tove xee nerembiguai tamombe'uve'i ju peteĩ ayvu ndevy.

Ombovai:

— Emombe'u tema — he'i.

¹³ Kunha va'e ijayvuve tema:

— Mba'e re tu ndee ha'e rami e'ý renhembopy'a Nhanderuete pegua kuery rovai reiko aguã? Mba'eta xeruvixa, ha'e rami ndeayvua rami vy ndee ae renhembopaga uka, mba'eta ndee voi ndereru ruka jevyxei ndera'y amboae yvy katy remondouka va'ekue.

¹⁴ Mba'eta nhande kuery ma nhamano 'rãe, yvy py yy onhoë mbyre nanhamboyrū kuaaveia rami. Ha'e rã Nhanderuete ma nanhandejuka rivei 'rã, ha'e rami 'rãgue py onhembopy'a 'rã henonde gui omondouka pyre mombyry riae ikuai e'ý aguã re.

¹⁵ Aÿ ma xeruvixa, pova'e ayvu rupi ndereve xeayvu vy ae aju, heta va'e kuery xemongyje ramo. Ha'e ramo xee nerembiguai aipoa'e: "Xeayvu 'rã huvixa reve. Xapy'a rei rã ha'e ojapo 'rã xeayvua", ha'e vy aju.

¹⁶ Mba'eta ndee xeruvixa, xee nerembiguai re reikuua pota 'rã avakue po gui xerepy aguã, xee ha'e xepi'a rekove ha'e kuery oipe'a e'ý aguã, Nhanderuete mba'emo ome'ë rã rojopy e'ý aguã rami.

¹⁷ Xee nerembiguai teïgue ju aipoa'e ta: Aÿ xeruvixa, ndeayvu ke aiko porã ju aguã rami. Mba'eta ndee ma Nhanderuete guigua anjo rami reikuua va'e mba'emo porã ha'e mba'emo vai. Ha'e SENHOR Nderuete oiko 'rã ndereve — he'i.

¹⁸ Ha'e ramo huvixa ombovai vy aipoe'i kunha va'e pe:

— Ajerure renhenhomí e'ý aguã ndevy aporandu taa re.

Kunha va'e ombovai:

— Ndeayvu ha'vy, xeruvixa — he'i.

¹⁹ Huvixa aipoe'i:

— Joabe e'ý teve ndereve ijayvu va'ekue pova'e ha'e javi rupi ndeayvu aguã?

Kunha va'e ombovai:

— Anhetẽ ete xeruvixa, nderekove rupi aura vy aipoa'e: Ndeayvua gui mava'eve ojope'a aguã nda'evei, oiporu kuaa regua katy neĩ oiporu kuaa e'ýa katy. Mba'eta anhetẽ nerembiguai Joabe ae ri xembou ra'e pova'e ayvu ha'e javi rupi xeayvu aguã.

²⁰ Ha'ekue rami ve'ý reiko aguã ae ri nerembiguai Joabe ojapo uka ha'e rami. Ha'e rami teĩ xeruvixa, Nhanderuete guigua anjo rami ne'arandu va'e vy yvy jave re oiko va'e teĩ reikuuaapa 'rã — he'i.

²¹ Ha'e gui ma Joabe pe ju huvixa aipoe'i:

— Aendu ma rejureru ukaa. Tereo ha'vy, eru kunumi Absalão — he'i.

²² Ha'e ramo Joabe ojero'a vy guenapy'ã re oĩ ngova yvy re omovaõ peve. Ha'e vy huvixa ogueroayvu porã vy aipoe'i:

— Aÿ ma xeruvixa, aikuua ma ndee xejou porãa, xee nerembiguai ajerure ukaague rejapo rire — he'i.

²³ Ha'e rami vy Joabe opu'ã vy oo Gesur katy. Ha'e vy Jerusalém py ju ogueru Absalão.

²⁴ Ha'e rami rã huvixa aipoe'i:

— Tojevy ju ngoo py xerova oexa e'ý re — he'i ramo Absalão ngoo py ae ojevy huvixa rova oexa e'ý re.

Absalão iporãa re ijayvuague

²⁵ Israel ha'e javi rupi amboae nda'ipoi Absalão rami ojou porãmby. Ipy guive ijaptye peve noī iwaikuea.

²⁶ Hi'a ma ma'etŷa opaa nhavõ ojaya vy ipoyia oexaa rã dois quilos raxa'i 'rã, mba'emo opejaa huvixa oiporu uka va'e rami.

²⁷ Oiko avi ta'y mboapy ha'e pete'i tajy, Tamar hery va'e. Ha'e va'e kunha ma jaexa rã iporã ete va'e.

Davi oĩa py Absalão ooague

²⁸ Mokoĩ ma'etŷ re ma huvixa rova oexa e'ŷ re Jerusalém py Absalão oiko vy oenoĩ uka Joabe, huvixaa py omondouka aguã tei ha'e ndouxei. Peteigue ju oenoĩ uka tei ha'e ndouxei.

³⁰ Ha'e ramo aipoe'i guembiguai kuery pe:

— Ma'ẽ, pee py ma Joabe mba'ety itui xemba'ety re oje'a va'e, cevada onhotŷague. Tapeo peapy — he'i ramo Absalão rembiguai kuery oapy imba'ety.

³¹ Ha'e rami rã Joabe opu'ã vy oo Absalão ro py. Ha'e vy aipoe'i:

— Mba'e re tu nerembiguai kuery oapy ri xemba'ety?

³² Absalão ombovai:

— Roenoĩ uka vy aipoa'e va'ekue: “Eju apy, huvixaa py romondouka aguã, po rami xeayvu remombe'u aguã: ‘Mba'erã tu aju raka'e Gesur tetã aikoague gui? Ha'eve 'rãgue ha'e py ae aiko va'e rire', 're aguã.'” Aÿ ma xee aexaxe huvixa rova. Xapy'a rei xee ri ajejavy ramo ma taxejuka — he'i Joabe pe.

³³ Ha'e ramo huvixaa py Joabe oo vy omombe'upa. Ha'e ramo mae huvixa oenoĩ uka Absalão. Ha'e ramo ou vy ojexa uka huvixa renonde, ngova yvy re omovaẽ reve. Ha'e ramo huvixa oayvupa.

15

Absalão opu'ã rei ramo Davi kuery onhambaague

¹ Ha'e va'e rire ma Absalão ojeupe ae ojou pete'i karóxa, kavaju kuery ha'e cinqüenta avakue henonde oo va'erã.*

² Ha'e rami vy aje'ive'i reve Absalão ovy vy opyta 'rã ho'amy tetã kora rokẽ py. Ha'e ramo avakue huvixaa katy mba'emo re oikuaa pota uka vy oo va'e ha'e javi pe Absalão aipoe'i 'rã: “Mava'e tetã guigua tu ndee?” he'i rã ombovai vy “Israel regua ae ri xee nerembiguai aiko” he'i

³ ramo ma Absalão aipoe'ive ju 'rã ixupe: “Ma'ẽ, reikuua pota ukaa va'e ma ha'evea ramigua, ha'evea rami meme. Ha'e rami tei huvixa ma avave rei nomoĩ oendu va'erã”, he'i 'rã.

⁴ Absalão aipoe'ive ju 'rã: “Aikore! Yvy re opena va'etyrã xemoĩa va'e rire, avakue mba'emo re oikuaa pota uka vy, e'ŷ vy ojerure aguã xea py ou ramo ha'e kuery re ajapo 'rãgue ha'evea ramigua meme!” he'i 'rã.

⁵ Ha'e rami ae avi henonde amongue ou vy henonde yvy py ojero'a ta ramo ha'e okuave'ẽ vy omopu'ã ju 'rã oayvupa reve.

⁶ Ha'e rami py Absalão ojapo Israel kuery huvixaa katy mba'emo re oikuaa pota uka vy oo va'e ha'e javi re. Ha'e rami vy ojeee meme oguerovapa avakue Israel kuery kuraxõ.

⁷ Irundy ma'etŷ opaa py ma Absalão aipoe'i huvixa pe:

— Tove Hebrom tetã katy taa SENHOR pe anhemboayvuague ajapo aguã.

⁸ Mba'eta Síria re Gesur tekao py teri aiko jave xee nerembiguai anhemboayvu vy aipoa'e va'ekue: “Xapy'a rei Jerusalém katy ajevy aguã rami SENHOR xeapo ri ramo ambojerovia 'rã”, ha'e rire.

⁹ Huvixa ombovai:

— Tereo porã ke — he'i. Ha'e ramo opu'ã vy Hebrom katy oo.

* 15:1 Israel pygua huvixa kuery gui Absalão ranhe guendarã karóxa ojou raka'e. Opa mba'e ojapo huvixarã onhemoingo aguã.

¹⁰ Ha'e rami avi Absalão nhemi rupi omondouka ayvu mombe'uarã Israel kuery va'e regua ha'e javi rupi. Ha'e vy aipoe'i:

— Mimby guaxu pu pendu vy aipopeje 'rã: “Absalão ma Hebrón tetã py oĩ nhanderuvixa”, peje.

¹¹ Jerusalém gui Absalão rupive oje'oi duzentos avakue oenoĩ va'ekue. Ha'e va'e kuery ma oo tema rive, mba'erã paa oikuua vy e'ŷ.

¹² Absalão mba'emo Nhanderuete pe ome'ẽ oikovy jave oenoĩ uka avi Davi mongetaaty Aitofel Gilo tetã py hekoá va'e. Ha'e rami py huvixa rovaigua kuery imbaraeteve oje'oivy, heta-etave tema ou Absalão-a katy guarã.

¹³ Ha'e gui peteĩ ou ayvu mombe'ua Davi pe. Ha'e vy aipoe'i:

— Israel kuery ha'e javive ko Absalão re anho ovapa — he'i.

¹⁴ Ha'e rami rã Davi aipoe'i Jerusalém py hexeveguá avakue ikuai va'e pe:

— Pepu'ã ke, nhanha, mba'eta Absalão gui ndajaa jepe reguai teve. Pejapura ke jaje'oi pojava, nhanderupity xapy'a e'ŷ aguã, ha'e nhande'áry mba'emo vai ogueru reve tetã py ikuai va'e ha'e javi ojukapa e'ŷ aguã kyxe py.

¹⁵ Ha'e ramo huvixa Davi reveguá avakue ombovai:

— Ma'ẽ, apy ma nerembiguai orekuai, oreruvixa ojapo uka va'e tema rojapo aguã ae — he'i okuapy.

¹⁶ Ha'e gui huvixa ojepe'a ramo hoo pygua kuery ha'e javi oje'oi hexeve. Va'eri oeja avi dez gua'yxy jevy kuery ngoo re opena va'erã.

¹⁷ Ha'e rami vy heta va'e kuery hupive oje'oi va'e reve huvixa oo rã oo ijapy'i py oĩ va'e py opytapa ranhe.

¹⁸ Ha'e gui hexeveguá avakue ha'e javi oaxa henonde katy. Ha'e vy harõa ha'e Gate pygua kuery ha'e javi ju, seiscentos avakue Gate pygua hupive oje'oi va'ekue oaxa jogueravy huvixa renonde.

Itai ojeroviapy oikoa oexa ukaague

¹⁹ Ha'e gui ma huvixa aipoe'i Gate pygua Itai va'e pe:

— Mba'e re tu ndee reoxe avi ore kuery reve? Ejevy ju, epyta penderuvixarã ou va'e reve, mba'eta amboae yvy guigua reiko, ndeyvy gui ae mombyry reiko va'e.

²⁰ Kuee rei revaẽ va'ekue ma nhi'ã xee rogueraa ta ma avi xerupive aŷ, neĩ xee ma voi ndaikuuai marã katy pa aa aguã va'eri? Ejevy ju, erojevypa avi nderyvy kuery. Tove ndere toĩ Nhanderuete nemboaxyha ha'e ojeroviapy oikoa.

²¹ Ha'e ramo Itai ombovai huvixa pe:

— Anhetẽ ete SENHOR oikove va'e rupi, ha'e ndee xeruvixa nderekove rupi avi aura vy aipoa'e: Mamo rã rei ndee xeruvixa reĩa py ae xee nerembiguai aiko avi 'rã, amano e'ŷ vy aikove aguã teĩ — he'i.

²² Ha'e ramo Davi aipoe'i Itai pe:

— Tereo ha'vy, eixa xerenonde katy — he'i. Ha'e ramo Gate pygua Itai ma hexeveguá avakue ha'e javi reve oo, kyrigue guive.

²³ Ha'e kuery oo rã ha'e va'e yvy re ikuai va'e oexa vy ojae'o ratã pavẽ.† Ha'e rã ha'e kuery oaxa oje'oivy. Cedrom yakã huvixa voi oaxa, tekao e'ŷa katy tape oĩ va'e rupi oo vy.

Jerusalém tetã katy ju Zadoque, Abiatar ha'e Husai ombojevyague

²⁴ Oaxa avi sacerdote Abiatar ha'e Zadoque. Ha'e kuery reve oje'oi avi levita kuery SENHOR guexeve guarã ojapo va'ekue ryru reraa kuery. Ha'e py omboguejy ranhe, tetã gui ha'e kuery ha'e javi oẽ vy oaxapa peve.

²⁵ Ha'e ramo huvixa Davi aipoe'i Zadoque pe:

— Perojevy ju SENHOR ayvu ryru tetã katy. SENHOR rembiexa rupi xemboaxy ri vy xeapo 'rã ha'e katy ju ajevy aguã rami hyru aexa ju aguã, oĩaty voi.

† 15:23 Ha'e kuery ojae'o mba'eta huvixa guetã gui onha ramo (versículo 20).

²⁶ Ha'e rami teĩ xapy'a rei SENHOR xevy "Xee ndoguerovy'avei", he'i ramo, ma'ẽ, xee ma apy ha'ã. Tojapo xere ha'e oipotaa rami — he'i.

²⁷ Sacerdote Zadoque pe huvixa aipoe'ive ju:

— Ndee ha'e Abiatar imba'ekuaa va'e vy pejevy porã'i ke tetã katy. Pendereve too porã'i avi pendera'y mokoõ: nderã'y Aimaás, Abiatar ra'y Jônatas guive.

²⁸ Ma'ẽ, peẽ pemombe'u uka jevy e'ŷa ja xee apyta ranhe 'rã yy oaxaaty tekao e'ŷa katy oĩ va'e py — he'i.

²⁹ Ha'e ramo Zadoque ha'e Abiatar ma Jerusalém katy ju ogueraa Nhanderuete ayvu ryru. Ha'e py ae opyta.

³⁰ Ha'e gui Davi oguatave ovv vy Oliveiras yv'yã rupi oẽ ovv ojae'o reve. Oakã ojao'i ha'e ipy rei reve oguata ovv. Hupive oje'oi va'e ha'e javi oakã ojao'i reve meme ojae'o avi jogueravy.

³¹ Ha'e rire Davi pe omombe'ua vy aipo'ea:

— Aitofel voi Absalão reve opyta ndere opu'ã rei va'e kuery mbyte.

Ha'e ramo Davi aipoe'i:

— SENHOR, xee ajerure: ejapo Aitofel o'arandua rupi e'ŷ nhomoneta aguã rami — he'i.[‡]

³² Ha'e gui yvyty apyte áry Davi ovaõ SENHOR ombojeroviaaty py. Ha'e jave ha'e oma'ẽ rã peteĩ ovaõ ouvy arquita regua Husai. Ha'e va'e ma oao puku oxoropa va'e py onhemonde reve ou, ha'e oakã re yvy omoõ reve.

³³ Ixupe Davi aipoe'i:

— Xerupive reo aguã ri reju ramo nda'evei xevy.

³⁴ Ha'eveve 'rã tetã katy rejevy vy Absalão pe aipo're: "Aŷ ma xeruvixa, xee ma nerembiguai ju 'rã aiko, nderu rembiguai aikoague rami avi. Ha'ekue rami ae 'rã aiko nerembiguai", 're vy rejapo 'rã Aitofel ijayvu rã Absalão oendu ve'ŷ aguã rami.

³⁵ Ha'e py ndereve ikuai avi 'rã sacerdote kuery Zadoque ha'e Abiatar. Huvixa ro py mba'emo rendu va'ekue ha'e javi 'rã remombe'u uka ha'e kuery pe.

³⁶ Ta'y kuery avi 'rã ikuai ha'e py: Zadoque ra'y Aimaás ha'e Abiatar ra'y Jônatas. Ha'e kuery pe ma xeremiendurã pemombe'u uka 'rã mba'emo pyau pendu va'ekue ha'e javi — he'i.

³⁷ Ha'e ramo Davi irũ Husai ojevy ju tetã katy. Absalão voi ovaõ ma avi Jerusalém py.

16

Davi reve Ziba ijayvuague

¹ Ha'e gui Davi ma yv'yã guy katy ojapyro ovv jave ou jekuaa oiny Mefibosete rembiguai Ziba.* Ha'e va'e ma mokoõ mymba mburika'i ogueru ombokupe áryguapa va'ekue, ha'e hi'áry duzentos mbojape, ha'e cem xã uva pirukue, cem avi hi'a pyau, ha'e gui peteĩ ryru vinho.

² Ziba ou rã Davi oexa vy oporandu ixupe:

— Mba'erã tu kova'e nunga reru?

Ziba ombovai:

— Mymba mburika'i ma hi'áry huvixa ro pygua kuery oĩ aguã. Ha'e rã mbojape ha'e mba'emo'a ma kunumigue ho'u va'erã aru. Vinho ma tekao e'ŷa rupi penekane'õ vy pey'u va'erã — he'i.

³ Ha'e rã Davi oporanduve ju:

— Ha'vy nderuvixa ra'y, mamo tu opyta?

Ziba ombovai:

— Ha'e ma Jerusalém py ae opyta, mba'eta ojeupe ae "Kova'e ára po xevy ju 'rã Israel ro pygua kuery omboaxa xeru rekovia xepo'aka aguã", he'i vy.

⁴ Ha'e rami rã Davi aipoe'i Ziba pe:

‡ 15:31 Aitofel ma huvixa mongetaaty oiko. Davi mongetaa rupi ranhe oiko, ha'e gui Absalão mongetaa rupi ju (versículo 12). * 16:1 Ziba ma Saul rembiguai ranhe oiko, ha'e gui Jônatas ra'ykue Mefibosete rembiguai ju (2 Samuel 9.9-10).

— Mefibosete oguereko va'ekue-'ekue ma ame'ẽmba ndevy.[†]

Ziba ombovai:

— Xeruvixa, xee ajero'a romboete vy. Taxemboaxy nerentonende — he'i Davi pe.

Davi re Simei ijayvu vaiague

⁵ Ha'e gui Baurim tekoa py huvixa Davi ovaẽ vy oma'ẽ rã peteĩ ovaexi jogueruvy Saul ro pygua kuery regua Simei hery va'e, Gera ra'y. Ha'e va'e ovaexi vy ijayvu vai ouvy hexe.

⁶ Davi re ita omombo ouvy, hembiguai kuery re guive, Davi reveguia ha'e hembiguai xondaro kuery ooa yke jovaive rupi oje'oi oiny va'eri.

⁷ Simei ijayvu vai vy aipoe'i:

— Tereo apy gui, tereo ke, ndee ava tuguy moẽaty, nhe'ẽ vai ra'y.

⁸ Aŷ Nhanderuete nembopaga ma Saul ro pygua kuery ruguy omoẽague re, hekvia ndee nhemi rupi reĩ rire. Ha'e rami teĩ ndera'y Absalão po py ju SENHOR omboaxa. Ma'ẽ, aŷ ma reximba reia rupi reiko, ava tuguy moẽaty reiko vy — he'i.

⁹ Ha'e rami rã Zeruia pi'a Abisai aipoe'i Davi pe:

— Xeruvixa, mba'e re tu peva'e jagua re'õgue ijayvu vai ri ndere? Tove taaxa apy gui akā'o aguã.

¹⁰ Huvixa ombovai:

— Mba'e tu xee areko peẽ Zeruia pi'a kuery reve? Tove ri ta'ijayvu vai. Mba'eta xapy'a rei SENHOR ae ixupe ijayvu vy "Ndeayvu vai Davi pe", he'i raka'e. Ha'e rami ri ramo mava'e tu "Mba'e re tu ha'e rami ete rejapo?" he'i aguã ha'eve ta? — he'i.

¹¹ Davi aipoe'ive ju Abisai ha'e guembiguai kuery ha'e javive pe:

— Ne'exa, xera'y ae teĩ xejukaxe aŷ, ha'e rami peva'e Benjamim regua katuve ma. Tove ta'ijayvu vai, mba'eta SENHOR ae ojapo uka ha'e rami.

¹² Xapy'a rei SENHOR oma'ẽ 'rã xee ajexavaia re. Ha'e rami ri vy mba'emo porã anho 'rã SENHOR ome'ẽ xevy kova'e ára ayvu vaiague rekovia — he'i.

¹³ Ha'e gui ma oguatave oje'oivy, Davi ha'e ixupeguia avakue reve. Ijyke rupi Simei voi oo avi oiny yvy'ã pukukuea rupi. Ijayvu vai tema ovy, ita ha'e yvy guive omombo ovy hexe.

¹⁴ Ha'e gui huvixa ha'e hupive oguata va'e kuery reve ma ikangypakue ovaẽ oje'oivy Jordão yakã rembe re. Ha'e py ma ikane'õgua ranhe okuapy.

Absalão pegua oikoa rami Husai omobotavya rupi onhemombe'uague

¹⁵ Ha'e gui Jerusalém tetã py Absalão kuery ovaẽmba okuapy ixupeguia avakue Israel regua ha'e javi reve. Ha'e kuery reve ou avi Aitofel.

¹⁶ Ha'e gui Davi irũ Husai arquita va'e voi ojexa uka avi Absalão pe. Ha'e vy aipoe'i ixupe:

— Toikove huvixa, toikove huvixa!

¹⁷ Ha'e rã Absalão aipoe'i Husai pe:

— Ha'e rami ae teve rexa uka neirũ Davi pe reikoa? Mba'e re tu ndereoi neirũ rupive?

¹⁸ Husai ombovai:

— Any ri. Xee apyta 'rã hekvia SENHOR omoĩ va'ekue reve. Kova'e kuery Israel pygua avakue ha'e javi oiporavo va'ekue reve xee voi aiko 'rã, hexeve ae 'rã.

¹⁹ Mba'eta mava'e pe 'rã tu aiko aguã ha'eve? Ndee ta'y pe e'ŷ ri ty'y? Nderu rembiguai aikoague rami ae ndevy ju 'rã aiko xee — he'i.

Davi ra'yxy jevy kuery reve Absalão onhenoague

²⁰ Ha'e gui ma Absalão aipoe'i Aitofel pe:

— Oremongeta na mba'e nunga pa rojapo aguã.

²¹ Aitofel ombovai Absalão pe:

— Nderu ra'yxy jevy kuery oeja ovy ngoo re opena va'erã. Enheno ha'vy ha'e kuery reve. Ha'e ramo nderu reve joe napendea'eveia Israel kuery ha'e javi oikuua ramo ndereveguia kuery ipy'a guaxuve 'rã okuapy — he'i.

[†] 16:4 Ziba pe Davi omboaxa mba'emo Mefibosete oguereko va'ekue, mba'eta ixupe Ziba ijapu vy Absalão re Mefibosete ooague rami omombe'u ramo. Ha'e rã Mefibosete ma ndooi (2 Samuel 19.24-30).

²² Ha'e gui ma oo áry ojapo okuapy peteī oo'i Absalāo oī aguā. Ha'e ramo ha'e py, Israel kuery pavē oexaa py onheno nguu ra'yxy jevy kuery reve.

²³ Ha'e va'e jave Aitofel nhomongeta 'rā Nhanderuete pe oporandua rā ombovaia rami avi. Ha'e rami ae tema Aitofel ijayvu nhomongeta vy, Davi omongetaague rami ae avi omongeta Absalāo.

17

Aitofel ha'e gui Husai ju omonetaague

¹ Aitofel aipoe'ive ju Absalāo pe:

— Tove taiporavo doze mil avakue. Ha'e vy Davi rakykue aa 'rā kova'e pyavyve.

² Hexe apu'ā 'rā ikane'ō ha'e ikangypa rei jave. Amondyipa 'rā. Ha'e rā hexeve ikuai va'ekue onhamba 'rā. Huvixa anho'i 'rā ajuka.

³ Ha'e kuery ajapo 'rā ndere oupa ju aguā rami meme. Mba'eta ha'e kuery ha'e javi ojevypa 'rā, peteī'i ava rejukaxeia rami rejuka uka rire. Ha'e rami vy ikuai porāmba 'rā — he'i.

⁴ Ha'e rami ijayvu rā Absalāo ha'e Israel regua nhomongeta va'ety kuery ha'e javi oendu vy ojou porā rei okuapy.

⁵ Ha'e rami teī Absalāo aipoe'ive ju:

— Penōi ta'vy arquita regua Husai ju, nhaendu aguā ha'e pa mba'e he'i ra'e — he'i.

⁶ Absalāo-a py Husai ovaē ramo aipoe'i ixupe:

— Ha'e rami Aitofel ijayvu ange. Ha'eve 'rā pa ijayvua rami jajapo aguā? Ha'e rami e'ŷ vy ndee ju ke ndeayvu.

⁷ Husai ombovai Absalāo pe:

— Aitofel ange ijayvuague ma ha'eve va'e'ŷ — he'i.

⁸ Husai aipoe'ive ju:

— Reikuaa porā nderu ha'e avakue hexeve ikuai va'e reko, reikuaa avi ha'e kuery ipy'a guaxukueve ikuaria, ha'e urso kunha ka'aguy rupi gua'y kuery omokanhy va'e rami ipoxy va'e memea. Nderu voi joe opu'ā va'ety vy pyávy teī ndopytai 'rā ojeupeguia kuery reve.

⁹ Ne'exa, aŷ ma ha'e oma'ē mbegue 'rā peteī itakua gui, e'ŷ vy amboae henda py. Ha'e gui jypy'i hexe pepu'āa py ndevygua kuery amongue oitya ri ramo ha'e nunga oendu va'e rei ijayvu vy "Absalāo rupi ou va'ekue oitypaa ra'e" he'i 'rā.

¹⁰ Ha'e rami rā ma avakue ipy'a guaxukueve voi okyjepa rei 'rā, xivi rami ipy'a guaxu va'e teī. Mba'eta Israel kuery pavē oikuua nderu ma joe opu'āa py ipo'akave va'ety ae, ha'e hexeveguia avakue voi ipy'a guaxukueve memea.

¹¹ Xee ma po rami romongeta: Emboatypa pojava ndejeupe Israel kuery ha'e javi, Dā guive Berseba peve ikuai va'e, ye'ē rembe re ita ku'i ikuaria rami mbovy rei e'ŷ ikuai va'e. Ha'e vy ndee ae 'rā reraa henoiny ha'e kuery mbyte rupi.

¹² Ha'e vy ma Davi re jaje'oi 'rā mamo rā rei oīa py, ha'e vy jajopy xapy'a 'rā, yxapy minha vyv re ho'aa rami. Ha'e ramo ndoikovevei 'rā, hexeveguia avakue voi ndokuavei 'rā teīve.

¹³ Xapy'a rei amongue tetā py ha'e onhemi ramo ma ha'e katy Israel kuery ha'e javi 'rā ogueraa ixā. Ha'e vy jaitypa 'rā heravy yakā katy, oīague py neī peteī'i ita ra'y'i voi nda'ipovei peve — he'i.

¹⁴ Ha'e rami rā Absalāo ha'e Israel pygua avakue aipoe'i okuapy:

— Aitofel ijayvuague gui ma arquita regua Husai ijayvua ha'eve — he'i okuapy, mba'eta SENHOR ae ojapo Aitofel ijayvua oendu rivepa aguā rami, Absalāo kuery áry mba'emo vai ombouxve vy.

¹⁵ Ha'e gui ma Husai aipoe'i sacerdote kuery Zadoque ha'e Abiatar pe:

— Aitofel ma ha'e rami omongeta kuri Absalāo ha'e Israel regua nhomongeta va'ety kuery. Ha'e rā xee ma amboae rami amongeta.

¹⁶ Aŷ pemondouka pojava ha'vy Davi pe ayvu mombe'uarā aipoe'i aguā: "Epyta eme kova'e pytū yy oaxaaty tekua e'ŷa katy oī va'e py. Ha'e rami 'rāgue py eaxa pojava hovaigua re, huvixa ojukaa e'ŷ aguā, hexeve ikuai va'e kuery reve", peje uka — he'i.

¹⁷ Ha'e jave ma Jônatas ha'e Aimaás ma En-Rogel katy'i oĩ, tetã py ha'e kuery ovaẽ rã oexaa e'ŷ aguã. Ha'e gui ha'e kuery pe peteĩ tembiguai kunha'i omombe'u ha'e nunga, Davi pe ju ha'e kuery omombe'u aguã.

¹⁸ Ha'e rami teĩ peteĩ kunumi va'e oexa nho vy ou Absalão pe omombe'u. Ha'e rã mokoïve ma ojapura reve jogueraa vyvoi vy peteĩ ava ro py ovaẽ, Baurim tekao py. Ha'e va'e roka py oĩ peteĩ ykua ojo'o pyre. Ha'e va'e py ha'e kuery oguejy jogueravy.

¹⁹ Ykua mbotya hoo va'e ra'xyx ogueru vy omoõ hi'áry. Imbotya áry ju mba'emo ra'yigue onhoë. Ha'e rami rã mava'eve ndoikuuai.

²⁰ Ha'e va'e oo py Absalão rembiguai kuery ovaẽ vy aipoe'i okuapy kunha va'e pe:

— Mamo tu ikuai Aimaás ha'e Jônatas?

Kunha va'e ombovai:

— Ha'e kuery oaxapa ae ma yy oaxaaty — he'i. Ha'e ramo ha'e kuery oeka teĩ ndojoui vy ojevypa ju Jerusalém katy.

²¹ Ha'e kuery oje'oi ramove ykua gui oẽ mokoïve. Ha'e rami vy oo vy omombe'u Davi pe. Ha'e vy aipoe'i:

— Pepu'ã ke, peaxapa pojava yy rovai re, mba'eta ha'e rami Aitofel ijayvu penderovai — he'i.

²² Ha'e rami rã Davi ha'e hexeveguia kuery ha'e javi oaxapa Jordão yakã. Ko'ẽmba ma jave takykue re neĩ teĩ voi nda'ipoi Jordão oaxa e'ŷ va'e.

²³ Ha'e gui Aitofel ma nhomongetaague rami e'ŷ ikuiaia rã oexa vy ombokupe árygua guymba mburika'i, ha'e oĩ vy oo tetã py ngoo oĩ va'e py. Mba'emo omoõmba porã ma vy ha'e ae oo ojejyryvipy. Omano ramo onhono porãa tuu rupa yvýry.

²⁴ Ha'e gui Davi kuery ma Maanaim py ovaẽ. Absalão kuery voi Jordão yakã oaxapa, avakue Israel kuery hexeve ikuai va'e reve.

²⁵ Ha'e vy xondaro kuery ruvixa Joabe rekovia ma Absalão omoõ Amasa. Ha'e va'e ma Ismael guigua Itra ra'y, Naás rajy Abigail pi'a. Abigail ma Joabe xy Zeruia kypy'y.

²⁶ Ha'e rami vy Israel kuery Absalão reve ijatypa okuapy Gileade yvy re.

Absalão reveguia xondaro kuery re Davi reveguia kuery ipo'aka okuapyague

²⁷ Maanaim py Davi kuery ovaẽ ma ramo ovaexí jogueruvy pova'e kuery: Amom kuery va'e regua Rabá pygua Naás ra'y Sobi, ha'e gui Lo-Debar pygua Amiel ra'y Maquir, ha'e gui Rogelim pygua gileadita regua Barzilai avi.

²⁸ Ha'e va'e kuery ma Davi oĩa py ogueru tupu, hy'a, hyru nhae'ũ guigua, trigo, cevada, mba'emo ku'ikue, ha'yigue maimbe, ei retã, kumanda pe'i,

²⁹ ei, kamby kekue, vexa'i kuery ha'e gui queijo vaka guigua. Ha'e nunga oguerupa Davi ha'e hexeve ikuai va'e pe ho'u va'erã, mba'eta aipoe'i okuapy: “Kova'e kuery ma tekao e'ŷa rupi ikuiaia py inhembyayi, ikane'õ ha'e ije'yuvei guive” he'i vy.

18

¹ Davi guexeveguia kuery oipapa vy ha'e kuery ruvixarã omoõ mil e'ŷ vy cem re opena va'erã.

² Ha'e gui mboapy henda py omboja'o vy omondoukapa ju: peteĩ aty ma Joabe ogueraa, amboae aty ma Zeruia pi'a Abisai ogueraa, ha'e rã amboae aty ma Gate pygua Itai ogueraa. Huvixa aipoe'i ha'e kuery pe:

— Xee voi aa 'rã peẽ kuery reve.

³ Ha'e rã ha'e kuery ombovai:

— Ndee ma ndereoi 'rã. Xapy'a rei nhanderovaigua kuery oremonha vy orere ha'e kuery nopenai 'rã, neĩ mbyte rupi peve ore romano teĩ ae ma, mba'eta ore kuery va'e regua dez mil ikuai va'e gui ndee anho'i teĩ revareve va'e. Ha'eveve ndee orerepy aguã rami reiko aguã, tetã py reĩa gui ae — he'i okuapy.

⁴ Davi ju aipoe'i ha'e kuery pe:

— Peẽ kuery peipotaa rami ha'vy xee aiko 'rã — he'i. Ha'e rami rã tetã kora rokẽ yvýry huvixa hi'aĩ jave ixupeguia kuery ha'e javi oẽ jogueravy cem ha'e mil ma voi-voi.

⁵ Ha'e gui ma Joabe, Abisai ha'e Itai pe ju Davi ijayvu. Ha'e vy aipoe'i:

— Xere pema'ẽ vy perekō porā'i xera'y Absalão — he'i. Amboae kuery ha'e javi oendu okuapy xondaro ruvixa kuery pe huvixa gua'y Absalão re opena porā uka rā.

⁶ Ha'e gui ma ha'e javi oje'oi tetā rovai rupi, Israel kuery reve joguero'a aguã. Efraim regua ka'aguy rupi joe opu'ã okuapy.

⁷ Ha'e py ma Davi rembiguai kuery oitypa Israel kuery. Ha'e va'e ára ho'a reta, vinte mil avakue ojukaa py.

⁸ Mba'eta joe opu'ã va'e kuery oaīmba oje'oivy ha'e va'e yvy ha'e javi rupi. Ha'e va'e ára kyxe py ojukaa gui okanhy retave ka'aguy re ikuiaia py rive.

Absalão omanoague

⁹ Absalão ma mburika áry oo oiny vy nhovaexí Davi rembiguai avakue reve. Hymba mburika ma peteĩ yvyra carvalho hi'aĩ va'e rakā guy rupi oaxa ovy jave Absalão akā ipija oiny yvyra rakāmby py, ha'e vy ovava oiny yvate katy gui yvy katy. Hymba mburika ma oaxa tema ovy.

¹⁰ Peteĩ ava ha'e nunga oexa vy oo omombe'u Joabe pe. Ha'e vy

— Absalão ma yvyra carvalho rakā re ovava oiny — he'i.

¹¹ Ha'e rā Joabe aipoe'i ava imombe'uare pe:

— Rexa va'eri mba'e re tu nderejukai ha'e pyve, ha'e reity 'rāgue inony yvy rupi? Ha'e rami reiko va'e rire ma ndevy ame'ẽ 'rāgue dez hatā'i va'e prata guigua ha'e peteĩ ku'akuua — he'i.

¹² Ha'e ramo ava va'e aipoe'i Joabe pe:

— Xepo py mil hatā'i va'e prata guigua reme'ẽ teĩ xee ma nakuave'ẽi 'rā huvixa ra'y rovai, mba'eta roendu porā ange huvixa ndevy, Abisai ha'e Itai pe ijayvu ramo, “Perekō porā'i xera'y Absalão”, he'i rā.

¹³ Xapy'a rei xee ma nanhe'ẽ renduia rupi hexe ajapo vai va'e rire huvixa ndoikuaa e'ŷi 'rāgue. Ha'e rami avi ndee eteve voi xejou vai 'rāgue — he'i.

¹⁴ Joabe ombovai:

— Nda'evei ndereve ha'ã rive aguã — he'i vyve mboapy hu'y ogueraa vy oipyxo Absalão kuraxõ py, oikove teri reve yvyra carvalho rakāmby re ipija oinya py.

¹⁵ Ha'e gui dez kunumigue Joabe rembiporu reraa va'e kuery ju ombojere okuapy vy ojuka ete'i Absalão.

¹⁶ Ha'e gui ma Joabe mimby guaxu omonhe'ẽ rā ixondaro kuery optyu'upa Israel kuery monhaa gui. Ha'e vy ojevypa, Joabe omombiytu'u ramo.

¹⁷ Absalão retekue ogueraa vy omombo ka'aguy re yvykua tuvixa va'e oĩ va'e py, ha'e vy hi'áry omboaty reta ita. Ha'e rā Israel kuery ma peteĩ-teĩ ngoo katy onhamba oje'oivy.

¹⁸ Absalão oikove teri reve omopu'ã va'ekue peteĩ ita ojeupe ae, huvixa rekoia yvyugua py. Mba'eta aipoe'i: “Xee ndarekoi xera'y peteĩ'i ma voi xerery re ima'endu'aa aguã”, he'i. Ha'e rami vy ita re ae omoĩ guery. Ha'e rami rire ha'e va'e pe aŷ peve “Absalão pegua ita” 'ea.

Absalão omano rā Davi ojae'o vaipaague

¹⁹ Ha'e gui Zadoque ra'y Aimaás aipoe'i:

— Tove taa tamombe'u huvixa pe hovaigua kuery po'akaa gui SENHOR ogueraa jepe maague.

²⁰ Ha'e rami teĩ Joabe ombovai:

— Ndee ma neremombe'ui 'rā teve ange mba'emo oiko va'ekue, amboae ára py ha'eve 'rā teĩ, huvixa ra'y ae omano rire — he'i.

²¹ Ha'e gui peteĩ Etiópia pygua hi'aĩ va'e pe ju Joabe aipoe'i:

— Ndee katu tereo emombe'u mba'emo rexā va'ekue — he'i ramo Joabe renonde ojero'a ma vy onha ovy.

²² Ha'e gui Zadoque ra'y Aimaás aipoe'ive ju Joabe pe:

— Ha'e rami teĩ ma tove xee voi taa Etiópia pygua rakykue.

Joabe aipoe'i:

— Mba'erā tu ndee voi renha ta, xera'y? Mba'eta ha'e nunga remombe'ua gui nderejoui 'rā hekoria — he'i.

²³ — Ha'e rami teī ae ma xee aanha ta avi — he'i ju Aimaás.

Ixupe Joabe

— Enha ha'vy eovy — he'i ramove Aimaás onha avi ovy tape yvy'āmbe rupi, ha'e vy onhokuā ovy Etiópia pygua.

²⁴ Tetā jaikea py Davi oguapy oiny mokoī okē oī va'e mbyte py. Peteī jopya ojeupi ovy okē yke rupi kora oī va'e áry. Ha'e vy oma'ē vy oexa peteī ava ha'e ae'i onha ouvy va'e.

²⁵ Ha'e vy jopya ojapukai vy omombe'u huvixa pe. Ha'e rā huvixa ombovai:

— Ha'e ae'i ri ou va'e ma mba'emo porā mombe'uarā 'rā ou — he'i. Ha'e vy ou oiny va'e ovaē ouvy.

²⁶ Ha'e gui jopya oma'ē jevy vy oexa amboae ava onha ouvy va'e. Ha'e vy teīgue ju ojapukai okē py oī va'e pe. Ha'e vy aipoe'i:

— Amboae ava ju ha'e ae'i onha jekuaa ouvy.

Huvixa ombovai:

— Ha'e rami rā ha'e va'e voi mba'emo porā mombe'uarā 'rā ou — he'i.

²⁷ Aipoe'ive ju jopya:

— Tenonde onha ouvy va'e ma ko Zadoque ra'y Aimaás.

Huvixa ombovai:

— Ha'e va'e ma heko porā va'e vy mba'emo porā omombe'u 'rā ouvy — he'i.

²⁸ Ha'e gui ma Aimaás ovaē vy ojapukai huvixa pe:

— Ha'evepa rei! — he'i vy huvixa renonde ojero'a ngova yvy re omovaē peve. Ha'e vy aipoe'ive ju:

— Ta'ima'endu'a porāa SENHOR Nderuete re, mba'eta nhandepo py omboaxapa xeruvixa rovai opu'ā va'ekue — he'i.

²⁹ Huvixa oporandu:

— Oiko porā pa xera'y Absalão?

Aimaás ombovai:

— Ha'e rami avi xeruvixa, xee ma nerembiguai Joabe xembou ma javé aexa nhomoanha-anha ha'e hevovo rei va'eri xee ndaikuuai guive mba'e paa — he'i.

³⁰ Huvixa aipoe'i:

— Apy he'ā, earō ranhe — he'i ramo oarō ho'amy ha'e py.

³¹ Ha'e gui Etiópia pygua ju ovaē vy aipoe'i:

— Xeruvixa, mba'emo porā aru neremiendurā. Ange ma SENHOR nderepy nderovai opu'ā va'ekue po'akaa gui — he'i.

³² Ha'e ramo huvixa oporandu Etiópia pygua pe:

— Oiko porā pa xera'y Absalão?

Etiópia pygua ombovai:

— Xeruvixa, tove ha'e va'e oiko vaiague ramigua toiko nderovaigua kuery ha'e javi re, ndevy ojapo vai aguā opu'ā va'ekue ma guive rā — he'i.

³³ Ha'e rami rā huvixa opy'a py onhenhandu vai ete vy ojepē'a ovy tetā kora rokē áry opy ja'o oī va'e py oī aguā. Ha'e vy ojae'o. Oguata vy ojevy-jevy oikovya rupi aipoe'i:

— Xera'y Absalão, xera'y, xera'y Absalão! Nderekovia xee amano 'rāgue teī, Absalão xera'y, xera'y!

Davi pe Joabe ijayvuague

¹ Ha'e gui ma Joabe pe aipo'ea:

— Ma'ē, huvixa tu ojae'o rima oikovy gua'y Absalão re ipy'a vaia rupi — 'ea.

² Ha'e rami py ha'e va'e ára ha'e kuery ipo'aka teī iporiaupa okuapy, “Huvixa ma gua'y Absalão re ipy'a vai” 'ea ramo.

³ Ha'e va'e árave ha'e kuery nda'evei reve oike ju okuapy tetā py, joe opu'āa gui oxīmba rei vy onha va'e rami.

⁴ Huvixa Davi ma oakā ojao'ipa reve ojapukai ratā:

— Xera'y Absalão, Absalão xera'y, xera'y! — he'i oikovy.

⁵ Ha'e ramo Joabe ma huvixa oña py oike vy aipoe'i ixupe:

— Aŷ ma rejapo nerembiguai kuery ha'e javi oxīmba aguā rami, ha'e kuery ange nderekove ogueraa jepe rire teĩ, ha'e nderā'y ha'e nderajy kuery rekove, ha'e nderā'yxy ha'e nderā'yxy jevy kuery rekove guive.

⁶ Ndee ma nhi'ā reayvu ndere ija'e e'ŷ va'e kuery, ha'e rā nderayvua kuery ma remomboriau rive. Aŷ ma xee aikuua rā ange Absalão nomanoi, ha'e rā ore kuery ma romanomba va'e rire revy'a 'rāgue.

⁷ Epu'ā ke aŷ, eẽ, ha'e ndeayvu nerembiguai kuery ipy'a porā ju aguā rami. Xee ma Nhanderuete rery rupi aura vy aipo'e: Aŷ ndeayvu aguā nereēi ri ramo ndereve neī peteĩ'i ava ma voi ndopytavei 'rā kova'e pyávy. Nekunumi guive aŷ peve rejexavaiaty qui ma ha'e nunga nda'eveive 'rā ndevy — he'i.

⁸ Ha'e rami rā huvixa opu'ā vy oguejy tetā kora rokē py oguapy oiny. Ha'e rā heta va'e kuery ha'e javi pe omombe'ua vy

— Ne'ixa, huvixa ma okē py hiny — 'ea rā ha'e kuery ha'e javi ou vy ojexa uka okuapy huvixa renonde.

Ha'e rā Israel kuery ma onhamba ma voi, peteĩ-teĩ ngoo katy.

⁹ Ha'e rami vy Israel kuery ha'e javi regua joupe-upa ijayvu okuapy, ha'e vy aipoe'i:

— Huvixa ma nhanderovaigua ha'e filisteu kuery po gui nhandereraa jepe va'ekue ri oyvy qui ae onha va'ekue Absalão káuxa.

¹⁰ Ha'e rami teĩ Absalão nhanderuvixarā nhamoī va'ekue ma joe opu'āa py omano. Aŷ ka, mba'e re tu pekyrirī ri? Pejapo 'rāgue huvixa ojevy ju aguā rami.

Jerusalém tetā katy Davi ojevyague

¹¹ Israel kuery ha'e rami joupe-upa ijayvua omombe'upaa ma huvixa Davi pe. Ha'e ramo huvixa aipoe'i uka sacerdote kuery Zadoque ha'e Abiatar pe:

— Aipopeje ke Judá regua nhomogetaa kuery ikuai va'e pe: “Mba'e re tu peẽ kuery gui amboae kuery ha'e javi ranhe ogueru ju 'rā huvixa hekoá py?

¹² Peẽ kuery ma xeryvy kuery ae'i, xekāgue ha'e xero'o regua'i ae peiko. Mba'e re tu ha'vy peẽ kuery gui amboae regua kuery ranhe xereru jevy ta?” peje.

¹³ Ha'e gui Amasa pe ma aipopeje: “Ndee nda'u xero'o ha'e xekāgue regua ae'i e'ŷ avi? Xevyguia xondaro kuery ruvixa Joabe rekovia ndee romoī e'ŷ ramo Nhanderuete taxembopaga ha'e oipotaa rami” peje.

¹⁴ Ha'e rami huvixa ijayvua Judá regua avakue oendu vy peteĩ'i rami ovy'a okuapy opy'a py. Ha'e vy aipoe'i uka okuapy ixupe:

— Oreruvixa, ejevy ju nerembiguai kuery ha'e javi reve — he'i uka.

¹⁵ Ha'e ramo huvixa ojevy vy Jordão yakā peve ranhe ovaẽ. Ha'e rā Judá kuery avi Gilgal py oje'oi huvixa reve nhovaexī aguā, Jordão yakā ogueroaxa heruvy aguā.

Davi reve Simei nhovaexiague

¹⁶ Ha'e gui Gera ra'y Simei, Benjamim regua Baurim pygua va'e ojapura ovy vy Judá regua avakue rupive oguejy, huvixa Davi reve nhovaexī avi aguā.*

¹⁷ Ha'e va'e reve oo avi mil xondaro kuery Benjamim regua. Saul ro pygua kuery rembiguai Ziba oo avi, gua'y kuery quinze ha'e guembiguai vinte va'e reve. Ha'e kuery jogueraa pojava Jordão yakā py huvixa pe ojexa uka vy.

¹⁸ Ha'e rami vy ha'e kuery yy oaxapa huvixa ro pygua kuery ogueroaxa ju heruvy aguā, ha'e ixupe ojapo aguā oipotaa rami rei.

Gera ra'y Simei ma huvixa renonde oĩ guenapy'ā re, huvixa Jordão yakā oaxa ta ramo.

* 19:16 Simei ma Jerusalém gui Davi onha jave ixupe ijayvu vai, ha'e hexe ita omombo va'ekue (2 Samuel 16.5-14).

¹⁹ Ha'e vy aipoe'i ixupe:

— Xeruvixa, xembopaga eme ajejavyague re, nema'endu'a eme xee nerembiguai xe'arandu e'ŷa rupi ajapo vaiague re, Jerusalém gui reoa ára. Xeruvixa, nema'endu'ave eme ha'e nungakue re ndepy'a py.

²⁰ Mba'eta xee nerembiguai va'e aŷ anhemombe'upa ajejavyague. Ha'e rami vy ae xeruvixa, José ramymimo kuery gui xee ranhe aju rovaexī aguā — he'i.

²¹ Ha'e ramo Zeruia pi'a Abisai aipoe'i:

— Simei nomanoi 'rā ri nda'u huvixarā SENHOR omoĩ va'ekue pe ijayvu vaiague re?

²² Ha'e rā Davi ombovai:

— Mba'e tu xee areko peē Zeruia pi'a kuery reve? Mba'e re tu aŷ penhemoingo xerovaiguarā? Aŷ nda'u Israel regua omano ta? Tyrā pa xee ndaikuai teve Israel kuery ruvixa ju aĩa? — he'i

²³ Ha'e gui Simei pe ju huvixa oura vy

— Ndee neremanoi 'rā — he'i.

Davi reve Mefibosete nhovaexīague

²⁴ Saul ramymimo Mefibosete voi oo huvixa reve nhovaexī aguā. Ha'e va'e ma huvixa ooa ára guive ojevy porāa ára peve ndojepyeivei, nonhendyva apoi, neĩ oao voi ndojoivei va'ekue.

²⁵ Ha'e gui Jerusalém py huvixa ovaẽ ramo hexeve Mefibosete nhovaexī aguā ou ramo huvixa aipoe'i:

— Mefibosete, mba'e re tu ndereoi raka'e xerupive?

²⁶ Ombovai:

— Xeruvixa, xerembiguai xembotavy ramo ndaai. Mba'eta xee nerembiguai aguata porā e'ŷ va'e vy aipoa'e tei: "Ambokupe árygua uka 'rā xerymba huvixa rupive aa aguā", ha'e va'ekue.

²⁷ Ha'e rami teī xeruvixa, xerembiguai ma nerentonde ijayvu rei xere.† Ha'e rami avi xeruvixa, ndee ma Nhanderuetea guigua anjo rami reikuaapa va'e. Xererekoo ke ndee reipotaa rami.

²⁸ Ha'e gui xeruvixa, ha'evea rami 'rāgue xeru ro py ikuai va'ekue rejuka ukapa va'e rire. Ha'e rami teī ndee xereru imoiny nde-mesa py okaru va'e kuery mbyte. Ha'e nunga rupi xeruvixa, nda'evei mba'emo re rive xee ajerure aguā ndevy — he'i.

²⁹ Ha'e rā huvixa ombovai:

— Ha'eve ma. Mba'e re tu ha'e nunga re teri ndeayvu? Xeayvu Ziba reve pemboja'o pendeyvy.

³⁰ Mefibosete aipoe'i huvixa pe:

— Ixupe ae topytapa, xeruvixa, ndero py rejevy porā ma rire.

Davi reve Barzilai nhovaexīague

³¹ Ha'e gui Gileade pygua Barzilai voi Rogelim gui ou vy huvixa reve oaxa Jordão yakā, yy rovai re peve.

³² Barzilai ma tuja'i ete, oitenta ma'etŷ ma oguerekoo va'e. Ha'e ae huvixa kuery pe ome'ẽ va'ekue ho'u va'erā Maanaim py ikuai jave, ava oguerekopa va'e vy.*

³³ Ha'e gui huvixa aipoe'i Barzilai pe:

— Jaa ke xerupive, Jerusalém tetā py xee ame'ẽ 'rā nerembi'urā.

³⁴ Barzilai ombovai huvixa pe:

— Mbovy ára peve teri nda'u aiko 'rā? Nda'evei teve ndee xeruvixa reve aa aguā Jerusalém peve.

³⁵ Oitenta ma'etŷ ma xee areko. Ndaikuaavei ma mba'e nunga pa iporā va'e, ha'e'ŷ vy iporā e'ŷ va'ea voi. Tembi'u ha'u va'e voi naendu kuaavei ma heea, ha'u va'e ha'e ay'u

† 19:27 Mefibosete ma Saul ra'y Jônatas ra'ykue, hexe Davi opena porāa va'ekue Jônatas re ima'endu'a vy. Hembiguai ma Ziba (9.1-13). Ha'e gui Ziba ma Mefibosete rekokue ramigua rive omombe'u va'ekue Davi pe, ijyvy ojeupe guarā ae ojopyxe vy (16.1-4). * 19:32 2 Samuel 17.27-29

va'e voi. Xee nda'u aendu kuua teri 'rā avakue ha'e kunhague oporaei rā? Xeruvixa, mba'erā tu xee nerembiguai romoingo eta rei rive ta?

³⁶ Ha'e rami avi xeruvixa, ndereve xee aa 'rā Jordão yakā rovai peve'i. Mba'e re tu ndee remboekovia ta mba'emo porā ndevy ajapoague?

³⁷ Tove xee nerembiguai taa ju, ha'e vy xerekoa py ae amano'i 'rā xeru ha'e ha'i kuery rupa katy'i xenhono porāa aguā. Ha'e rami avi ne'exa, Quimā toī nerembiguairā. Xeruvixa, toaxa ha'e ae nderupive, ha'e rā rereko 'rā reipotaa rami – he'i.

³⁸ Huvixa ombovai:

— Toaxa ha'vy Quimā xereve, ha'e ixupe ajapo 'rā reipotaa rami tema. Ndevy voi ajapo 'rā reipota va'e ha'e javi – he'i.

³⁹ Pavē rei Jordão yakā oaxapa ramo huvixa voi oaxa ma vy oayvupa Barzilai rova py, ha'e vy ogueroayvu porā imondovy. Ha'e rā Barzilai ojevy ju ngoo katy.

⁴⁰ Gilgal peve huvixa oaxa ovv ramo Quimā oo avi oiny hupive. Huvixa rupive oje'oi avi Judá regua kuery ha'e javi, ha'e Israel regua mbyte rupi peve.

⁴¹ Ha'e gui Israel regua avakue ha'e javi oupa okuapy huvixaa py. Ha'e vy aipoe'i okuapy ixupe:

— Oreruvixa, mba'e re tu oreryvy kuery gui Judá regua ranhe rive ndereru nhemi okuapy? Mba'eta Jordão yakā kyvōguia re ha'e kuery ndereru ndero pygua kuery reve, nerembiguai kuery ha'e javi avi – he'i.‡

⁴² Ha'e ramo Judá regua avakue ha'e javi ombovai Israel kuery pe:

— Ha'e rami rojapo mba'eta huvixa ma oreretarā ae. Mba'e re tu ha'e rami rā rive pendevai ta? Ore kuery nda'u huvixa rembi'u re rokaru, tyrā pa orevy mba'emo ome'ē rive va'ekue?

⁴³ Ha'e gui avakue Israel kuery ombovai ju Judá kuery pe:

— Ore kuery ma pendegui dez-kue oreretave va'e vy peē kuery gui roguerekove Davi reve. Mba'e re tu ha'vy peē kuery norembovareive? Ore kuery ranhe oreayvu raka'e nhanderuvixa rogueru jevy aguā re – he'i teī Israel kuery ijayvua gui Judá kuery ijayvua poyive tema.

20

Seba huvixa rovai opu'ā rā ojukaa ague

¹ Ha'e py oī avi peteī ava nhe'ē vai ra'y Seba hery va'e, Bicri ra'y, Benjamim regua va'e. Ha'e va'e ma mimby guaxu omonhe'ē vy aipoe'i:

— Nhande kuery ma mba'eve ndajarekoi Jessé ra'y Davi reve. Israel kuery, peteī-teī jaje'oi nhandro katy! – he'i.

² Ha'e ramo Israel regua avakue ha'e javi oja'o jogueravy Davi-a gui, Bicri ra'y Seba rupive anho oje'oi. Ha'e rā Judá regua kuery ma huvixa reve tema ikuai, ha'e vy Jordão yakā guive ogueru okuapy Jerusalém peve.

³ Jerusalém tetā py ngoo oī va'e py Davi ovaē vy ogueraapa dez gua'yxy jevy oguerekova'ekue ngoo re opena va'erā oeja va'ekue. Ha'e va'e kuery ma ombotypa vy omongaru uka porā va'eri neī teīve reve nonhenovei. Ha'e kuery omano e'ŷa ja oo omboty pyre py ikuai imeve'ŷ va'e rami ae.

⁴ Ha'e gui Davi aipoe'i Amasa pe:

— Mboapy araa py emboatypa ke xea py Judá regua avakue, ha'e ndee voi eju ju apy rejexa uka aguā – he'i.

⁵ Ha'e ramo Amasa oo Judá regua avakue oguerupa aguā, teī ou ju e'ŷ re ára oa'angaague oaxa rive.

⁶ Ha'e ramo Abisai pe ju Davi aipoe'i:

‡ ^{19:41} Apy “Israel kuery” he'ia ma Judá regua e'ŷ re ijayvu vy. Ha'e rā amboae py ma jaikuaa 'rā judeu kuery ha'e javi re ijayvua.

— Aŷ Absalão ojapoague gui Seba ojapo vaive 'rā nhandevy. Ha'e rami vy eraapa na xerembiguai kuery, ha'e pemonha, tetā ikorapa va'e py onhemi vy nhandegui oo jepe e'ŷ aguã — he'i.

⁷ Ha'e ramo Joabe revegua kuery ma Jerusalém gui kuery oje'oipa Bicri ra'y Seba omonha vy, huvixa rarõa ha'e xondaro kuery ipy'a guaxukue ha'e javi reve.

⁸ Ha'e gui Gibeão katy'i ita tuvixa va'e hil'aña py ha'e kuery ovaẽmba jave ma Amasa ovaexĩ ouvy. Joabe ma xondaro kuery ao py onhemonde ho'amy ha'e py. Hi'áry ku'akuua oĩ va'e reve kyxe avi oĩ hyru py. Ovaexĩ ovvy vy oity kyxe.

⁹ Ha'e vy Amasa pe Joabe

— Xeryvy, reiko porã'i pa? — he'i reve hendyva re ojopy oiporu kuaa regua py, oayvu aguã merami.

¹⁰ Ha'e rā Amasa neĩ ndoikuuaa potai Joabe opo rovai py kyxe oguerekoa re. Ha'e rā ha'e va'e py ae oye'o, hyekue onhoẽmba. Teīgue ju oikyxí e'ŷ re omano ha'e pyve. Ha'e ramo guyvy Reve Joabe omonhave ju jogueravy Bicri ra'y Seba.

¹¹ Joabe reve ikuai va'e regua peteĩ ma Amasa retekue yvýry hi'aĩ vy aipoe'i:

— Joabe revegua Davi-a katyguia peiko va'e ma jaa ke Joabe rupive — he'i.

¹² Tape mbyte rupi Amasa nguguy re omyĩ teri oupy ramo oexa va'e nhavõ opyta kuerei 'rā. Ha'e nunga rupi xondaro va'e oexa vy tape mbyte gui oguerovave heravy Amasa retekue nhuündy katy. Ha'e vy hi'áry omombo peteĩ ao puku, ituia py ovaẽ va'e nhavõ opyta ramo.

¹³ Tape gui oguerova ma rire avakue ha'e javi oo Joabe rupive, Bicri ra'y Seba rakykue monha vy.

¹⁴ Seba kuery ma Israel ha'e javi regua ikuiaia rupi oaxapa jogueravy, Abel-Bete-Maaca peve. Ha'e rami teĩ berita kuery anho onhemboatypa vy oje'oi hupive.

¹⁵ Ha'e gui Joabe oxondaro kuery reve ovaẽmba vy ojoko imoiny Abel-Bete-Maaca tetā. Ha'e va'e tetā katy'i omboaty reta yvy, tetā kora yvatekuea peve. Ha'e javi Joabe reve ikuai va'e ojo'o-jo'o okuapy tetā kora oity aguã.

¹⁶ Ha'e gui ma tetā gui peteĩ kunha hi'arandu va'e ojapukai:

— Pendu ke, pendu ke. Aipopeje Joabe pe tou kylvõ katy, hexeve xeayvu aguã.

¹⁷ Ha'e va'e ovaẽ ramove kunha va'e oporandu:

— Ndee ae pa Joabe?

Ombovai:

— Xee ae — he'i.

Ha'e rā kunha va'e aipoe'i:

— Endu ke xee nerembiguai xeayvua.

— Aendu 'rā — he'i Joabe.

¹⁸ Ha'e rā kunha va'e aipoe'ive ju:

— Yma guive aipo'ea: "Penhemongeta uka 'rā Abel py, mba'emo perekva'e re oikuuaa pota porãa aguã" 'ea.

¹⁹ Ha'e rami ae xee ma Israel kuery joe opu'ã va'e regua e'ŷ, ore kuery ma ojeroviapymeme. Ha'e rā ndee ma rembovaipaxe peteĩ tetā, xee Israel regua xy aiko va'eri. Mba'e re tu oremokanhy ta SENHOR pegua orekuai va'e?

²⁰ Joabe ombovai vy aipoe'i:

— Xee ma namokanhyi 'rāe, nambovaipavei 'rā guive.

²¹ Ndee rexâ'aa rami e'ŷ aikoa. Ha'e rami avi peteĩ ava Efraim yvyty re oiko va'e, Bicri ra'y Seba hery va'e, opu'ã karamboae huvixa Davi rovai. Ha'e va'e anho'i pemboaxa xevy, ha'e ramo ajepa ju 'rā peneretā gui — he'i.

Ha'e rā kunha va'e aipoe'i Joabe pe:

— Ma'ě, inhakâgue amombo uka 'rā ndevy tetā kora áry rupi.

²² Ha'e gui kunha va'e o'arandua rupi oo guetarā kuery ha'e javi reve jogueroayvu aguã. Ha'e rire Bicri ra'y Seba akâ ojaya okuapy vy omombo Joabe oexa aguã. Ha'e rā omonhe'ẽ

mimby guaxu, ha'e ramo ojepe'apa ju tetā gui. Peteī-teī ngoo katy ju oje'oi. Ha'e rā Joabe ma Jerusalém katy ojevy huvixa reve jogueroayvu aguā.

2 Samuel 8.15-18; 1 Crônicas 18.14-17

²³ Joabe ma Israel regua xondaro kuery ha'e javi re opena va'e. Ha'e rā Joiada ra'y Benaia ma huvixa rarōa kuery re opena.

²⁴ Adorão ma omomba'eapo nhea'āmby kuery re opena. Ha'e rā Ailude ra'y Josafá ma mba'emo oiko va'ekue mboparaa ae.

²⁵ Seva ma kuaxia re opena va'ety. Zadoque ha'e Abiatar ma sacerdote ikuai.

²⁶ Ha'e gui Jair ramymino Ira ma Davi mongetaaty oiko.

21

Gibeão pygua kuery ojepy okuapague

¹ Davi oĩ jave oiko karuai mboapy ma'etý re. Ha'e rā SENHOR pe Davi oporandu rā aipoe'i ixupe:

— Ha'e rami oiko mba'eta Saul ha'e hoo pygua kuery jouguy omoēague re ndopagai teri, Gibeão pygua kuery regua ojukaague re guive — he'i.

² Ha'e rami rā Gibeão pygua kuery huvixa oenoĩ uka vy ijayvu ha'e kuery reve. Gibeão pygua ma Israel regua e'ŷ, amorreu regua rembyrekue ae. Ha'e gui Israel kuery oura ma voi va'ekue omomba e'ŷ aguā re, va'eri Saul ma omombaxe Israel ha'e Judá kuery re nda'evei ete vy.*

³ Ha'e gui Davi oporandu Gibeão pygua kuery pe:

— Mba'e tu peipota ajapo pendevy kuery pe? Mba'e nunga tu ame'ẽ 'rā pendevy teko vai ojapoague rekoria, SENHOR pegua kuery peroayvu porā aguā?

⁴ Gibeão regua kuery ombovai okuapy:

— Saul ha'e hoo pygua kuery mba'e prata ha'e ouro ma ndoroipotai. Israel regua ndorojukaxeí guive peteīve — he'i.

Davi oporanduve ju:

— Mba'e nunga tu ha'vy tajapo pendevy kuery pe?

⁵ Ha'e kuery ombovai huvixa pe:

— Ha'e gui ororeguia kuery jukaare, Israel mbyte rupi roikove e'ŷ aguā oremokanhym-baxe va'ekue,

⁶ ha'e va'e ra'y kuery regua gui emboaxa orevy sete avakue SENHOR renonde rojyryvipy aguā, Gibeá SENHOR rembiporavo Saul rekoague py ae — he'i.

Ha'e ramo huvixa aipoe'i:

— Xee amboaxa 'rā pendevy — he'i.

⁷ Ha'e rā Jônatas ra'y Mefibosete Saul ramymino va'e ma huvixa nomboaxai, SENHOR rery rupi Saul ra'y Jônatas reve SENHOR Davi ouraague rami vy.

⁸ Ha'e rami vy huvixa ojopy Saul ra'y kuery Aiá rajy Rispa pi'a mokoīve, Armoni ha'e Mefibosete hery va'e, ha'e gui Saul rajy Merabe pi'a kuery peteī nhiruīve, meolatita Barzilai ra'y Adriel ra'y kuery ikuai va'e.

⁹ Ha'e va'e kuery ma Gibeão pygua kuery po py omboaxa yvy'ā áry ojyryvipy aguā, SENHOR renonde. Ha'e rā sete-ve ho'apa vyvoi. Ha'e vy omano, mba'emo mono'õa ypy'ia ára, jypy cevada omono'õa ára py ae.

¹⁰ Ha'e ramo Aiá rajy Rispa ma peteī ajukue voxá guigua ogueraa vy peteī ita tuvixa va'e áry oipyo imoiny oĩ aguā. Ha'e py ma jypy omono'õa ára guive optya yva gui oky ho'aju peve. Ha'e va'e ma ara py neī pyávy ndoejai oikovy tetekue ikuiai py guyra oveve va'e onhemboja aguā, mymba ka'aguy rupigua guive.

¹¹ Davi pe omombe'ua Saul ra'yxy jevy Rispa oikoa ha'e javi, Aiá rajy va'e.

* ^{21:2} Gibeão regua kuery reve Josué jogueroayvuague rami vy Israel kuery pe omiba'eapo 'rā avave rei ojukaa e'ŷ re (Josué 9).

¹² Ha'e rami rã Davi oo vy Jabel-Gileade gui ogueru Saul ha'e ta'y Jônatas kâgue, ha'e pygua kuery Bete-Seã tetã mbyte gui ogueraa rire. Ha'e py ma Gilboa yvyty re filisteu kuery Saul ojukaa ára py oeja imoiny va'ekue.

¹³ Ha'e kuery po gui Saul ha'e ta'y Jônatas kâgue ogueru vy ha'e va'e reve onhono porã avi ojyryvipy pyre kâgue.

¹⁴ Ha'e rami vy Benjamim regua yvy re ojaty okuapy Saul ha'e ta'y Jônatas kâgue, Zela py, tuu Quis onhono porãague py ae. Huvixa ojapo ukaa rami ojapopa. Ha'e va'e rire ma ha'e va'e yvy re Nhanderuete ojapo porã ju.

1 Crônicas 20.4-8

¹⁵ Ha'e gui filisteu kuery opu'ã ju okuapy Israel kuery rovai. Ha'e rã Davi oxondaro kuery reve oje'oi vy joguero'a filisteu kuery reve. Ha'e gui ma Davi ikane'õ vaipa.

¹⁶ Isbi-Benobe ma gigante ramymino regua. Hu'y guaxu oguereko va'e ma cinco quilos ipoyi va'e, ha'e onhemonde oikovy hu'y jokoa regua ipyaukue py. Ha'e va'e ma ojukaxe Davi.

¹⁷ Ha'e rami teñ Zeruia pi'a Abisai oepy vy filisteu oipyxo vy ojuka. Ha'e ramo Davi pegua kuery ixupe oura vy aipoe'i okuapy:

— Aÿ gui ma orereve ndee ndereovei 'rã joe ropu'ã aguã katy, Israel kuery moexakãa ogue e'ÿ aguã — he'i okuapy.

¹⁸ Ha'e va'e rire ma joguero'ave ju Gobe py, filisteu kuery reve. Ha'e py ma husatita Sibecai va'e ojuka gigante ramymino Safe.

¹⁹ Ha'e va'e rire teñgue ju joguero'a filisteu kuery rovai Gobe py. Ha'e gui Belém pygua Jaaré-Oregim ra'y Elanã ojuka Gate pygua Golias. Ha'e va'e guembiporu hu'y guaxu oguereko va'ekue ma ajukue popëa'y rami tuvixa va'e.*

²⁰ Teñgue ju opu'ã okuapy joe, Gate py ae. Ha'e py oiko peteñ ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguereko. Ha'e va'e voi gigante ramymino regua.

²¹ Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

²² Ha'e va'e avakue irundy ikuai gigante ramymino Gate tetã py. Ha'e rami teñ Davi ha'e ixondaro kuery oitypa raka'e.

22

Salmo 18.1-50

¹ Ha'e gui SENHOR pe Davi ijayvu kova'e mboraei rupi, Saul ha'e hovaigua kuery ha'e javi po gui SENHOR ogueraa jepe jave.

² Ha'e vy aipoe'i:

— SENHOR, ndee ma xe'itaova.

Ndee ma oo imbaraete va'e ha'e xerepya.

³ Xeruete ma xe'itaova anhemiaty,

mba'emo vai jokoa, xereraa jepea imbaraete va'e,
oo yvate va'e, ha'e anhemiaty.

Ndee Xeruete, xereraa jepe 'rã xejukaxea kuery gui.

⁴ Ajapukai SENHOR ogueroporaepy va'e pe.

Ha'e rami vy aa jepe 'rã xerovaigua kuery gui.

⁵ Manoa pygua xejoko va'ekue yai rami,

heko vai va'e yai rami xere opu'ã vy xemongyje.

⁶ Manoa pygua xejokua va'ekue,

nhu'ã xã xejura xapy'a.

⁷ Ha'e ramo ajexavaia py ajapukai karamboae SENHOR pe.

Xeruete pe ajapukai ainy.

Ha'e rã ojeupagua templo gui oendu xeayvua,
ijapyxa peve ajapukaia ovaẽ ramo.

* 21:19 1 Crônicas 20.5

- ⁸ Ha'e ramo yvy omyī ha'e oryryi.
 Yva yta ikuai va'e voi ovavapa, oryryipa,
 ogueropoxy ramo.
- ⁹ Inhapyīgua gui opu'ā hataxī,
 ijuru gui ma tata nhomombaaraā oē,
 tapyī hexakā va'e.
- ¹⁰ Yva omo'yvyī vy oguejy,
 ipy guýry pytū vaikue oī reve.
- ¹¹ Peteī anjo ipepo va'e áry oī vy oveve ouvy,
 yvytu opepo áry ogueru pojava ramo.
- ¹² Oyvýry rupi rami omoī pytū reia oo'irā,
 pytū, yy ijatya ha'e yva re arai ikuai va'e voi.
- ¹³ Hexakāa henonde oo va'e gui
 hendy ovy tapyī rexakā ramigua.
- ¹⁴ Ha'e gui SENHOR yapu yva re,
 Yvate ete va'e ijayvu atā.
- ¹⁵ Ngu'y omombo vy omoaīmba xerovaigua kuery.
 Overa vy omondyipa.
- ¹⁶ Ha'e ramo ojekuaa yy rupa,
 ha'e yvy yta avi ojekuaapa,
 ndeayvu atāa py SENHOR,
 ndepoxya rupi neapyīgua gui nepytue ramo.
- ¹⁷ Yvate gui ha'e okuave'ē vy xejopy,
 xerenoē yy tuvixa va'e gui.
- ¹⁸ Xereraa jepe xerovaigua kuery imbaraete va'e gui,
 xemomboriau rei va'e kuery gui ae,
 xegui ipo'akave ete va'ekue ri.
- ¹⁹ Xere ha'e kuery opu'āmba rei ajexavai jave,
 teī SENHOR onhemoī xepytyvōaraā.
- ²⁰ Ha'e rami vy xerero peteī henda ipa'ū ja'eavea py.
 Xereraa jepe xererovy'a vy.
- ²¹ Xerekō porāa re SENHOR xererekō porā,
 xevy pe ome'ē ndaxepo ky'aiague repy.
- ²² Mba'eta xee ma SENHOR guigua tape rupi aiko va'e,
 ndajepe'ai Xeruete gui ha'eve'ŷa rami aiko aguā.
- ²³ Xejee amoī ijayvuague ha'e javi,
 xejegui ndaipe'ai ayvu omoī va'ekue.
- ²⁴ Henonde aiko anhetēa rupi,
 ajejoko teko vai rupi aiko e'ŷ aguā.
- ²⁵ Ha'e ramo SENHOR ome'ē xerekō porāague repy,
 henonde rupi ndaxerekō ky'ai rire.
- ²⁶ Heko porā va'e kuery pe rejekuaa uka 'rā heko porā va'e,
 anhetē rupi ikuai va'e pe rejekuaa uka anhetē rupigua avi,
- ²⁷ iky'a e'ŷ va'e pe rejekuaa uka iky'a e'ŷ va'e,
 ha'e rā heko vai va'e pe ma rejekuaa uka 'rā nhombopaga kuaa va'e.
- ²⁸ Ndee reraa jepe 'rā onhemo'yvyī'i va'e,
 ha'e rā oma'ē vaikue reia rupi onhembovate va'e ma remomba 'rā.
- ²⁹ Ndee SENHOR ma xerexapea,
 SENHOR omoexakā pytū rupi aiko rā.
- ³⁰ Ndereve vy amomba 'rā xondaro kuery,
 Xeruete reve vy apo 'rā hetā kora áry rupi.
- ³¹ Nhanderuete guigua tape ma iky'a e'ŷ va'e,

- SENHOR ayvu ma oa'anga pyre.
 Hexe onhemi va'e ha'e javi pe ma mba'emo vai jokoa oiko.
- ³² Mava'e tu Nhanderuete oiko SENHOR e'ŷ vy?
 Mava'e tu nhande'itaova oiko Nhanderuete e'ŷ vy?
- ³³ Nhanderuete ma xemombaraetea xekangy e'ŷ aguã,
 omoatyrō 'rā aguata aguã rupi.
- ³⁴ Ha'e ojapo xepy guaxu rami inhakuã aguã.
 Ha'e vy yvatea rupi xemoingo.
- ³⁵ Xepo pe voi ome'ẽ joe apu'ã kuaa aguã.
 Ha'e ramo guyrapa overa va'e guigua voi aipira 'rā.
- ³⁶ Mba'emo vai jokoarã reme'ẽ xereraa jepea,
 xemboaxya rupi xemboyvate.
- ³⁷ Apyrō aguã tape rembopyve ramo
 ndaxepyxryi 'rā.
- ³⁸ Xerovaigua kuery amonha 'rā aupity peve.
 Amomba rire ma ajevy ju.
- ³⁹ Amomba ae, amou'ũmba opu'ã aguã nda'evevei peve.
 Xepy yvýry ho'apa.
- ⁴⁰ Mba'eta ndee xemombaraete ajoguero'a kuaa aguã,
 rejapo xere opu'ã va'ekue re xepo'aka aguã rami.
- ⁴¹ Xerovaigua kuery rejapo ojavapa aguã rami.
 Xerayvu e'ŷ va'e amomba.
- ⁴² Ha'e kuery oma'ẽ rā avave rei ndoepyai.
 Tá, SENHOR pe ha'e kuery ojapukai teĩ nombovai.
- ⁴³ Ha'e ramo amongu'ipa yvy ku'i rami.
 Amou'ũmba, yapo tape guiguare rami amomba.
- ⁴⁴ Xeretā pygua kuery xere opu'ãa gui xereraa jepe,
 xemoĩ yvy regua kuery ruvixarã.
 Amboae regua kuery ndaexai va'ety voi xevygua ikuai.
- ⁴⁵ Amboae regua kuery xenhe'ẽ rendu.
 Xeayvu oendu vy ojapopa okuapy.
- ⁴⁶ Ha'e gui amboae regua kuery okanhymba,
 onhemiague gui oẽmba onhemondyipa vy.
- ⁴⁷ SENHOR ma oikove va'e, togueroayvu porãa xe'itaova!
 Tomboetea Xeruete, ita xereraa jepea.
- ⁴⁸ Nhanderuete xerepy vy jojukapa,
 heta va'e kuery re xembopo'aka.
- ⁴⁹ Nhanderuete ae xereraa jepe xerovaigua kuery gui.
 Ndee ma xemboyvate xerovaigua kuery áry,
 ha'e xerepy avakue jojuka va'ety po gui.
- ⁵⁰ Ha'e ramo SENHOR, roguerovy'a 'rā yvy regua kuery oendua py,
 aporaei 'rā nderery rupi.*
- ⁵¹ Ha'e ae ombopo'aka 'rā huvixave omoĩ va'ekue,
 oexa uka 'rā guembiporavo oayvua,
 Davi ha'e hamymino kuery pe, raka'e rā peve.

Davi opa vygua ijayvuague

- ¹ Pova'e ayvu ma opa vygua Davi ijayvuague.
 Jessé ra'y Davi ijayvua,
 ava omboyvate pyre, Jacó kuery ruete omoĩ va'ekue,

* 22:50 Romanos 15.9

- Israel regua ha'eve rei'ia rupi oporai va'e.
- ² — SENHOR Nhe'ẽ ijayvu xejuru rupi,
ha'e ijayvua rupi ae xejuru omombe'u.
- ³ Israel kuery ruete ijayvu,
Itaova Israel kuery onhemiaty aipoe'i xevy:
“Teko porã rupi avakue re opena va'e,
SENHOR renonde ojererokyjea rupi joe opena va'e ma
- ⁴ ko'ẽ aje'ive omoexakã ouvy va'e rami oiko,
ko'ẽ aje'ive nda'araivei jave kuaray ojope ouvy va'e rami,
oky rire ojope ju vy mba'emo renhoĩ ombo'okypa va'e rami”, he'i.
- ⁵ Ha'e rami e'ŷ ri pa Nhanderuete renonde xero pygua kuery ikuai?
Mba'eta xereve ojapo ngupive guarã opa e'ŷ va'erã,
ha'evea rami meme ae ojapo, ivaipa aguã rami e'ŷ.
Ha'e rami vy ndojapoi avi 'rã teve aa jepe aguã,
aupity aguã arõ aikovy va'e ha'e javi?
- ⁶ Ha'e rã nhe'ẽ vai ra'y kuery ma oipe'apaa 'rã
juu nhandepo py e'ŷ nhamondo va'e rami.
- ⁷ Mba'eta amongue omodoxe vy
oiporu 'rã ferro guigua, e'ŷ vy hu'y guaxu.
Ha'e rire hi'añague pyve okai katuĩ'i 'rã tata py.

1 Crônicas 11.10-47

- ⁸ Po rami ma Davi pegua ipy'a guaxukueve rery oĩ: Taquemoni ra'y Josebe-Bassebete ma mboapyve va'e kuery ruvixa. Ha'e va'e ma guembiporu hu'y guaxu reve onhea'ã oikovy oitocentos avakue rovai, ha'e vy ojukapa vyvoi peteĩgue'i pyve.
- ⁹ Ha'e va'e rire ma Dodô ra'y Eleazar, Aoí ramymino va'e. Ha'e va'e ma mboapyve ipy'a guaxukueve va'e regua oiko. Peteĩ ára Davi reve ha'e kuery ikuai vy filisteu kuery ijaty okuapy va'e ombovai okuapy joe opu'ã aguã. Israel kuery mboae ma ojepe'apa ma teĩ
- ¹⁰ ha'e opu'ã vy onhea'ã filisteu kuery rovai, ipo kyxe ojopya haxypa peve. Ha'e va'e ára SENHOR ogueraa jepepa rã heta va'e kuery Eleazar opu'ã ho'amya py ojeyvypa ju mba'emo oeja pyre ojopy heravy aguã.
- ¹¹ Ha'e va'e rire ma Agé ra'y Samá, hararita va'e. Leí tekoa py peteĩ mba'ety kumanda pe'i anho ikuiaia py filisteu kuery ijaty okuapy ramo ha'e kuery gui heta va'e kuery onhamba teĩ
- ¹² mba'ety mbyte py Samá hi'aĩ vy ojokopa. Ha'e rami vy ojukapa filisteu kuery. Ha'e rami py teĩgue ju SENHOR ogueraa jepepa.
- ¹³ Ha'e gui trinta yvatekueve ikuai va'e regua mboapy ma mba'emo mono'õa ára oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains yvyugua py.
- ¹⁴ Ha'e rami vy Davi onhemia py oĩ, ha'e rã filisteu regua xondaro kuery ma Belém py ikuai.
- ¹⁵ Ha'e gui Davi ijy'uvei etea rupi aipoe'i:
— Mava'e tu xemboy'u ta ygua Belém tetã kora rokẽ py oĩ va'e gui? — he'i ramo

¹⁶ ha'e va'e mboapyve ipy'a guaxukueve ikuai va'e ma filisteu kuery ijaty okuapy mbyte rupi oaxa vy ygua Belém tetã rokẽ py oĩ va'e gui oguenoẽ yy, ha'e Davi oĩa py ogueru. Ha'e rã ha'e ndoy'uxei vy onhoẽ SENHOR renonde ome'ẽ mbyrã.

¹⁷ Ha'e vy aipoe'i:

— SENHOR, nda'evei ete xee ha'e nunga ay'u aguã! Xee ay'u 'rã ri nda'u avakue ndojeayvuveikue py oje'oi va'ekue ruguy rami? — he'i vy ndoy'ui. Ha'e ramigua ae mboapy ipy'a guaxukueve ojapo va'ekue.

¹⁸ Ha'e gui Joabe ryke'y Abisai, Zeruia pi'a va'e ma trinta ikuai va'e ruvixa. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy tenondegua mboapyve ikuai va'e rami ete ima'endu'a porãmbyo oiko.

¹⁹ Ha'e ma trinta ikuai va'e guiomboetevepy vy ha'e kuery ruvixa oiko va'eri tenondegua mboapyve ikuai va'e regua e'ý guive.

²⁰ Ha'e gui Joiada ra'y Benaia ma ipy'a guaxuve va'e avi. Cabzeel pygua oiko, mba'emo tuvixa va'e ojapo avi va'e. Ha'e rami vy ojuka mokoï Moabe pygua joe opu'ã kuaave va'ekue. Yro'y apí ho'a jave ma itakua py oguejy vy ojuka peteñ guary okua py oí va'ekue.

²¹ Ojuka avi peteñ ava Egito guigua ipukuve va'ekue. Egito pygua ma hu'y guaxu reve ou rã Benaia popoka py rive opu'ã ovvy vy ipo gui hu'y guaxu oguerekva'ekue oipe'a vy ha'e va'e py ae ju ojuka.

²² Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

²³ Ha'e va'e ma trinta ikuai va'e guiomboetevea va'eri mboapyve tenondegua regua ndoikoi guive. Ha'e gui Davi omoï guarõa kuery re opena va'erã.

²⁴ Trinta ikuai va'e ma po rami hery: Joabe ryvy Asael, Belém pygua Dodô ra'y Elanã,

²⁵ ha'e gui Samá ha'e Elica harodita va'e meme,

²⁶ paltita va'e Heles, Tecoa pygua Iques ra'y Ira,

²⁷ Anatote pygua Abiezer, Mebunai husatita va'e,

²⁸ Zalmom aoíta va'e, Maarai netofatita va'e,

²⁹ Baaná netofatita va'e ra'y Helebe, Gibeá pygua Ribai ra'y Itai Benjamim regua va'e,

³⁰ Benaia piratonita va'e, Gaás yakã katygua Hidai,

³¹ Abi-Albom arbatita va'e, Azmavete barumita va'e,

³² Eliaba saalbonita va'e, Jasém ra'y kuery, Jônatas,

³³ Sama hararita va'e, Sarar ararita va'e ra'y Aião,

³⁴ Aasbai maacatita va'e ra'y Elifelete, Aitofel gilonita va'e ra'y Eliã,

³⁵ Hezrai carmelita va'e, Paarai arbita va'e,

³⁶ Zobá pygua Natã ra'y Jigeal, Bani gadita va'e,

³⁷ Zeleque amonita va'e, Naarai beerotita va'e, Zeruia pi'a Joabe rembiporu reraaty,

³⁸ Ira ha'e Garebe itrita va'e meme,

³⁹ ha'e gui Urias heteu va'e. Ha'e javi vy trinta e sete ikuai.

24

1 Crônicas 21.1-6

¹ Ha'e gui teígue ju SENHOR poxya hendy jevy Israel kuery rovai. Ha'e vy Davi py'a re omoï ha'e kuery rovai oiko aguã. Ha'e vy aipoe'i ixupe:

— Tereo eipapa Israel ha'e Judá kuery ha'e javi — he'i.

² Ha'e ramo huvixa Davi aipoe'i xondaro ruvixa Joabe pe:

— Eiko ke Israel regua ha'e javi ikuiaia rupi, Dã guive Berseba peve. Ha'e vy eipapapa, aikuua aguã mbovy pa ikuiaia.

³ Joabe ombovai huvixa pe:

— Ha'e rami avi tove SENHOR Nderuete cem-kue ju tomboetave, ndee xeruvixa rexaa py. Ha'e rami teí xeruvixa, mba'e re tu ndee ha'e rami ete rejapoxe? — he'i.

⁴ Ha'e rami teí huvixa ayvu Joabe ha'e xondaro ruvixa kuery ijayvua gui ipoyive ramo huvixa renonde gui Joabe ha'e xondaro ruvixa kuery oje'oi vy oipapa jogueravy Israel kuery ha'e javi.

⁵ Ha'e rami vy ha'e kuery Jordão yakã oaxa vy opyta Aroer py Gade yvyugua mbyte py tetã oí va'e yke jaiporu kuua regua katy. Ha'e vy oo Jazer katy.

⁶ Ha'e gui ma Gileade katy oo vy ovaë Cades peve, heteu kuery yvy re. Ha'e gui Dã-Jaã katy oo vy ojeapa jogueravy Sidom katy.

⁷ Ha'e vy ovaë Tiro tetã ikorapa va'e py, ha'e gui heteu ha'e cananeu kuery rekoia ha'e javi rupi. Ha'e gui oje'oi ju Judá regua Neguebe yvy katy Berseba peve.

⁸ Ha'e rami py oguata jogueravy Israel yvy ha'e javi rupi.

Ha'e gui nove jaxyva vinte araa py ma ovaë ju okuapy Jerusalém py.

⁹ Huvixa pe Joabe omombe'u heta va'e kuery mbovy pa ikuai. Israel re ikuai ra'e oitocentos mil avakue joe opu'ãa py kyxe oiporu kuaa va'e. Ha'e rã Judá re ma quinhentos mil ikuai.

¹ *Crônicas 21.7-17*

¹⁰ Ha'e gui Davi heta va'e kuery oipapa ukapa ma rire opy'a py oendu ramo nda'eveia. Ha'e vy aipoe'i SENHOR pe:

— Ajejavy vaipa ra'e ha'e rami ajapoa py. Ha'e rami teĩ aÿ SENHOR, ajerure rembogue aguã xee nerembiguai ajejavyague, inhakã porã ve'ÿ va'e rami ajapo rire — he'i.

¹¹ Ko'ẽ aje'ive'i reve Davi ov y ramove Davi pegua imba'ekuaa va'e profeta Gade rupi SENHOR ombou oayvu. Ha'e vy aipoe'i ixupe:

¹² — Tereo aipo're Davi pe: “Po rami SENHOR ijayvu: ‘Mboapy regua va'e aikuaa uka'rã peteĩ eiporavo ajapo aguã’, he'i.”

¹³ Ha'e ramo Davi-a py profeta Gade ovaẽ vy omombe'u. Ha'e vy aipoe'i:

— Reipota pa sete ma'etÿ re karuai ou ndeyvy re? Tyrã pa mboapy jaxy re renha ta reikovy nderovaigua kuery gui, ha'e kuery nemonha rã? Tyrã pa reipota mboapy ára re mba'eaxy vaikue oiko ndeyvy re? Eiporavo ke aÿ, ha'e emombe'u xembouare pe ambovai va'erã — he'i.

¹⁴ Gade pe Davi ombovai:

— Xee ma ajexavaia aendu. Ha'eveve SENHOR po py anhemboaxa uka rã, mba'eta ha'e ma opa e'ÿ va'e nhanemboaxy va'e. Ha'e rã avakue po py ma xee nanhemboaxa ukaxe — he'i.

¹⁵ Ha'e rami rã SENHOR ombou mba'eaxy vaikue Israel yvy ha'e javi rupi, ko'ẽ aje'ive'i guive oa'angaague ára peve. Ha'e ramo Dã guive Berseba peve omano setenta mil avakue ha'e kuery regua.

¹⁶ Ha'e gui Jerusalém áry SENHOR-a guigua anjo tetã omomba aguã opo oupi ho'amy jave SENHOR opty'u ma mba'emo vai omoingoa gui. Ha'e vy aipoe'i anjo heta va'e kuery mombaarã ou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aí jebuseu regua Araúna mba'emo moa'yíaty yvy'iry.

¹⁷ Ha'e gui anjo heta va'e kuery omomba rã Davi oexa vy ojapukai SENHOR pe. Ha'e vy aipoe'i:

— Xee rima ajejavy, xee rima hi'arandu e'ÿ va'e rami ajapo. Ha'e rã kova'e vexa'i kuery, mba'e tu ha'e kuery ojapo? Xerovai ae eupi ndepo, ha'e xeru ro pygua kuery rovai.

¹ *Crônicas 21.18-27*

¹⁸ Ha'e va'e árave profeta Gade ou Davi oĩa py. Ha'e vy aipoe'i:

— Tereo na, ejapo SENHOR pe peteĩ altar-rã jebuseu regua Araúna mba'emo moa'yíaty py.

¹⁹ Gade ayvu rupi SENHOR ojapo ukaague rami vy Davi oo.

²⁰ Ha'e gui Araúna ma yvy'ã re oĩa gui oexa huvixa guembiguai kuery reve jogueru nhoguenoiny ramo. Ha'e rami vy guenapy'ã re oĩ ngova yvy peve.

²¹ Ha'e vy oporandum:

— Xeruvixa, mba'e re tu ndee reju apy xee nerembiguai aĩa py?

Davi ombovai:

— Mba'emo moa'yíaty ajogua aguã rima aju, SENHOR pe altar-rã ajapo aguã, mba'eaxy vaikue heta va'e kuery áry ombou va'ekue opty'u aguã — he'i.

²² Ha'e rã Araúna aipoe'i Davi pe:

— Ejopy ha'e eme'ẽ SENHOR pe reme'exe va'e, reipota va'e rei teĩ. Apy ma vaka ikuai reapy vy reme'ẽ va'erã. Oĩ avi yvyrapo mba'emo moa'yíaty regua yxakãrã, canga guive oĩ.

²³ Xeruvixa, ha'e nunga ha'e javi ndepo py xee Araúna ame'ẽmba — he'i.

Ha'e vy aipoe'ive ju:

— SENHOR Nderuete tojapo rejerurea.

²⁴ Ha'e rami teĩ huvixa ombovai Araúna pe:

— Any, ndegui xee ajogua 'rã hepyrã porã re, mba'eta SENHOR Xeruete pe name'ẽi 'rã xevy ome'ẽ rive pyre — he'i. Ha'e rami vy Davi ojogua mba'emo moa'yiaty, ha'e vaka re ma ome'ẽ cinqüenta hatã'i va'e prata guigua.

²⁵ Ha'e py ma Davi ojapo peteĩ altar SENHOR pe, ha'e vy ome'ẽ mba'emo oapy reve, peteĩ rami ikuia regua guive. Ha'e rami rã ha'e va'e yvy re SENHOR ojapo porã jevy ramo Israel kuery ikuia áry gui mba'eaxy vaikue opytu'u.

Jypy'igua kuaxia huvixave rei kuery rekukue oĩa Jypy'igua kuaxia huvixave rei kuery rekukue oĩa

Huvixa Davi omano rire ta'y Salomão ju oĩ hekoria. “Salomão pe Nhanderuete ome'ẽ avi hi'arandurã, opa mba'e py oikuua pota ha'e mba'emo oikuapa rei aguã rami, ye'ẽ rembe rupi ita ku'i ikuiaia rami. ... Omombe'u avi três mil ayvu arandua regua, ha'e gui mil e cinco mboraeirã. ... Ha'e ramo ha'e javi regua ou Salomão arandua oenduxe vy” (4.29, 32, 34a). Nhanderuete ombojerovia atyrã Salomão ojapo peteĩ templo iporã vaipa va'e, ouro ha'e overa va'e py onhovãmbaa. Mbovy rei e'ŷ oguereko kavaju ha'e karóxa joe opu'ãa pygurarã. “Ha'e rami vy setecentos kunhague oguereko huvixa rajy meme, ha'e gui trezentos ta'yxy jevy kuery. Ha'e va'e kunhague ma ojapo amboae rami rei ipy'a aguã. Ha'e vy tuja'ive ma jave ta'yxy kuery ombopy'a rerova ete tuuete mboae ramigua kuery re ju ombojerovia aguã. Ha'e ramo opy'a re anhetẽ rupi ve'ŷ oiko Senhor nguuete pe, nguu Davi oikoague rami e'ŷ” (11.3-4).

Salomão omano rire openaague omboja'oa mokoõ henda py. Kuaray puku-a katy optya Judá regua, ta'ykue opena aguã. Ha'e rã kuaray ijapu'a'ia katy ma Israel regua optya, amboae kuery openaa. Ha'e va'e mokoõve regua joe opu'ã jepi raka'e.

Israel regua re opena raka'e peteĩ huvixa Acabe hery va'e. Ha'e va'e ma Nhanderuete re ndojeroviai ramo ixupe profeta Elias ijayvu, tuuete ramigua Baal pegua sacerdote kuery reve oeko a'ã guive. Aipoe'i heta va'e kuery pe: “Raka'e peve 'rã tu pendepy'a py ndapeikuai rei pekuapy mokoõ rupi rei vy? Senhor ae ri Nhanderuete oiko ramo ixupe ete pendekuai. Ha'e'ŷ vy xapy'a rei Baal ri Nhanderuete oiko ramo ixupe pendekuai” he'i (18.21). Ha'e ramo Nhanderuete ombovai vy tata ombou yva gui, opo'akaa oexa uka vy.

Davi tuja'i ete jave guare

¹ Huvixa Davi tuja'i ete, ha'e heta ma'etýa oguereko ma ramo ajukue py onhovãmbaa teĩ ijeyro'y ae tema.

² Ha'e ramo ixupe hembiguai kuery aipoe'i:

— Oreruvixa, tove tojoua peteĩ kunhatai'i nerondenre oiko va'erã. Tove ndere topena toikovy, toke avi ndejyva py, ndeyro'y riae e'ŷ aguã — he'i.

³ Ha'e rami vy Israel ha'e javi rupi oeka oje'oivy kunhatai'i iporãve va'e. Ha'e vy Suném pygua Abisague hery va'e ojou vy ogueru huvixaa py.

⁴ Kunhatai va'e ma iporã ete va'e. Huvixa re opena oikovy, oipytyvõa rupi oiko teĩ huvixa ma hexe nopena rei.

Adonias huvixarã onhemoi uka rivexeague

⁵ Ha'e gui Davi ra'y Adonias Hagite pi'a va'e ma onhembovate rei. Ha'e vy aipoe'i:

— Xee ae 'rã aĩ huvixarã — he'i. Ha'e rami vy ojou karóxa, kavaju áry guarã kuery ha'e cinqüenta avakue henondenre rupi onha okuapy aguã.

⁶ Ha'e rami teĩ tuu ma neĩ peteigüe ma voi nda'ijayvui ixupe. Neĩ aipo nde'i: “Mba'e re tu guí rami reiko?” nde'i. Ha'e ma jaexa rã iporãve va'e avi, Absalão oiko rire oiko va'ekue.*

⁷ Ha'e rami vy Zeruia pi'a Joabe ha'e sacerdote Abiatar reve jogueroayvu, ha'ea katy ha'e kuery oo vy oipytyvõ aguã re.

⁸ Ha'e rã sacerdote Zadoque ma Adonias-a katy ndooi, neĩ Joiada ra'y Benaia, profeta Natã, Simei, Reí ha'e Davi rembiguai kuery ipy'a guaxukueve va'e ma voi.

⁹ Ha'e rire Adonias ma ita Zoelete py oĩa py oo vy ome'ẽ mymba kuery vexa'i, vaka ha'e ikyra ete va'e oapy reve, Rogel katy'i yvu oĩ va'e py. Ha'e katy oenoimba avi guyvy

* 1:6 Adonias ma Absalão ryvy (2 Samuel 3.2-5), teĩ ha'e kuery ikuiaia re tuu Davi ndoikuua potai (2 Samuel 14).

kuery huvixa ra'y ikuai va'e, ha'e gui avakue Judá pygua huvixa rembiguai kuery ha'e javive.[†]

¹⁰ Ha'e rā profeta Natā ma noenoī ukai ae, neī Benaia, avakue ipy'a guaxukueve neī guyvy Salomão ma voi.

Bate-Seba reve Salomão huvixarā oī aguā re Natā ijayvuague

¹¹ Ha'e rami rā Natā aipoe'i Salomão xy Bate-Seba va'e pe:

— Nerendui ri ty'y Hagite pi'a Adonias huvixarā onhemoīague? Ha'e rami teī nhanderuvixa Davi ndoikuai.

¹² Ha'e nunga rupi eju, toromongeta, reikove reve reo jepe aguā, ndepi'a Salomão voi.

¹³ Tereo, ejexa uka huvixa Davi pe. Ha'e vy aipo're ixupe: "Xeruvixa, reura ma e'ŷ teve xee nerembiguai pe? Mba'eta aipo're va'ekue: 'Ndepi'a Salomão ae ma oī 'rā huvixave xerekovia, xerenda áry ae 'rā oī', 're va'ekue. Mba'e re tu ha'yy Adonias ri huvixarā onhemoī?' 're 'rā ixupe.

¹⁴ Ha'e gui huvixa reve ndee ndeayvu teri reve ma xee voi avaē 'rā nderakykue. Ha'e vy xee ju xeayvu 'rā ndeayvuague rupi — he'i.

¹⁵ Ha'e gui Bate-Seba ma opy huvixa oīa py oo vy ojexa uka ixupe. Huvixa ma tuja'i raxa ma ramo Suném pygua Abisague oī avi oipytyvōa rupi.

¹⁶ Ha'e gui huvixa renonde py Bate-Seba ojero'a vy oī guenapy'ā re. Ha'e ramo oporandu vy

— Mba'e tu reipota? — he'i huvixa.

¹⁷ Kunha va'e ombovai:

— Xeruvixa, SENHOR Nderuete renonde reura va'ekue xee nerembiguai va'e pe. Ha'e vy aipo're va'ekue: "Ndepi'a Salomão ae ma oī 'rā huvixarā xerekovia. Ha'e ae 'rā oguapy xerenda áry", 're va'ekue.

¹⁸ Ha'e rami teī aŷ ma Adonias ae onhemoī ra'e huvixaverā. Ha'e gui ndee xeruvixa, ndereikuai teri.

¹⁹ Ha'e va'e ma mymba kuery ojuka uka vy ome'ẽ ma vaka ra'y ikyrave va'e ha'e vexa'i oata aguā rami rei e'ŷ. Oenoimba avi huvixa kuery ha'e javi, sacerdote Abiatar ha'e xondaro kuery ruvixa Joabe. Ha'e rā ndera'y Salomão ma ha'e noenoī ukai.

²⁰ Ha'e rami teī xeruvixa, Israel kuery ha'e javi ma ndere meme oma'ẽ okuapy, ndee ae reikuua uka porāve aguā mava'e ete pa nerenda áry oguapy va'erāa nderekovia huvixarā oī aguā.

²¹ Ha'e rami e'ŷ rā xeruvixa, neramoī kueryague rami nenhono porāa rā xee ha'e xepi'a Salomão voi orerereko axya rei 'rā joapo vai va'ety rami rive — he'i.

²² Huvixa reve kunha va'e ijayvu teri reve ovaē avi profeta Natā ha'e py.

²³ Ha'e ramo huvixa pe omombe'ua vy ixupe aipo'ea:

— Apy ma ko ovaē profeta Natā — 'ea ramove ha'e va'e ju ojero'a vy henonde ngova omboja yvy peve.

²⁴ Ha'e vy aipoe'i:

— Xeruvixa, ndee ae ri nhi'ā aipo're va'ekue: "Adonias 'rā huvixa oī xee ndaikovevei ma rire, ha'e vy ha'e ae ma 'rā oguapy xerenda áry", 're ri ty'y?

²⁵ Mba'eta ange ma ha'e ou vy ojuka uka vaka ha'e mymba kuery ikyrakueve va'e, vexa'i kuery oata aguā rami e'ŷ guive. Ha'e vy oenoī ukapa huvixa ra'y kuery ha'e javi, xondaro kuery ruvixa ha'e sacerdote Abiatar. Ha'e ramo ha'e kuery oguerovy'a vy okaru ha'e oy'u okuapy henonde py. Ha'e vy ixupe aipoe'i okuapy: "Ha'eve ete ma nhanderuvixave Adonias!" he'i okuapy.

²⁶ Ha'e rā xee nerembiguai aiko va'e ma naxerenoī, neī sacerdote Zadoque, Joiada ra'y Benaia ha'e ndera'y Salomão ma voi.

²⁷ Xeruvixa, ndee ae ri nhi'ā rejapo uka va'ekue ha'e nunga? Mba'eta nerembiguai kuery pe ndereikuua ukai teve nderekovia nerenda áry oguapy va'erāa — he'i.

[†] 1:9 Adonias ma ngaru ojapo Nhanderuete peguarā merami teī huvixa oī aguā rive, tyke'y Absalão ojapoague rami avi (2 Samuel 15.7-12).

²⁸ Ha'e ramo huvixa Davi ijayvu vy

— Penoī ju ha'vy Bate-Seba xea py — he'i. Ha'e rā kunha va'e ma huvixa renonde py ou ju vy ojexa uka ho'amy ixupe.

²⁹ Ha'e ramo huvixa oura reve aipoe'i:

— Anhetē ete ajexavaia ha'e javi gui SENHOR oikove va'e xerepy va'ekue rery rupi aura vy aipoa'e:

³⁰ Kova'e ára pyve ajapo 'rā ndevy auraague. Mba'eta SENHOR Israel kuery Ruete rery rupi aipoa'e va'ekue: “Ndepi'a Salomão ae 'rā oī xee naīvei jave. Ha'e ae ju 'rā oguapy xerenda áry xerekovia”, ha'e va'ekue.

³¹ Ha'e ramo Bate-Seba ma huvixa renonde py ojero'a vy yvy peve omboja ngova. Ha'e vy aipoe'i:

— Ha'eve ete ma xeruvixa Davi, raka'e rā peve guarā!

Huvixarā Salomão omoī okuapyague

³² Ha'e gui ma Davi aipoe'i:

— Penoī xea py sacerdote Zadoque, profeta Natā ha'e Joiada ra'y Benaia — he'i ramo ha'e va'e kuery oguerua rā ojexa uka okuapy huvixa pe.

³³ Ha'e kuery pe huvixa aipoe'i:

— Peraa ke xee penderuvixa rembiguai kuery, ha'e pejapo xera'y Salomão mburika áry oī aguā rami. Ha'e vy peraapa Giom katy.

³⁴ Ha'e py ma profeta Natā reve sacerdote Zadoque omoī 'rā huvixarā Israel kuery re opena aguā. Ha'e gui pembopu 'rā mimby guaxu, ha'e vy “Ha'eve ete ma huvixave Salomão!” peje 'rā.

³⁵ Ha'e gui ma peju jevy 'rā hupive. Ha'e rā ha'e ma ou vy oguapy 'rā xerenda áry, xerekovia ha'e ju oī aguā, mba'eta xeayvuague rami vy ha'e ae 'rā opena Israel ha'e Judá kuery re — he'i.

³⁶ Ha'e rami rā Joiada ra'y Benaia huvixa ombovai vy aipoe'i:

— Ha'eve va'e. Po rami ae ta'ijayvu avi SENHOR xeruvixa Ruete va'e.

³⁷ Xeruvixa, ndere SENHOR openaague rami ae topena Salomão re voi. Ha'e rami vy tombopo'aka xeruvixa Davi po'akaa gui eteve voi — he'i.

³⁸ Ha'e gui huvixa pegua xondaro kuery reve oje'oi sacerdote Zadoque, profeta Natā ha'e Joiada ra'y Benaia. Huvixa Davi rymba mburika'i áry ae Salomão omoī vy ogueraa okuapy Giom py.

³⁹ Ha'e gui sacerdote Zadoque ma azeite ryru ombojerovia aty gui ogueru va'ekue oupi vy omoī Salomão re. Ha'e vy mimby guaxu ombopu rā heta va'e kuery ha'e javi oendu vy ojapukai:

— Ha'eve ete ma huvixa Salomão! — he'i okuapy.

⁴⁰ Ha'e gui hakykue oje'oipa vy gaita ombopu reve oguerovy'a ete heravy. Onhendu atā oje'oivy vy voi omomyī rei aguā rami.

Adonias ojeupagua kuery reve onhemondyipa okuapyague

⁴¹ Ha'e ramo Adonias ha'e oenoī va'ekue okarupa ma rire oendu okuapy. Joabe voi mimby pu oendu vy aipoe'i:

— Mba'e nungarā tu pova'e tetā katy gui hevovo rei va'e onhendu?

⁴² Ha'e ijayvu teri reve ovaē sacerdote Abiatar ra'y Jônatas. Ha'e ramo ixupe Adonias aipoe'i:

— Eike na, mba'eta ndee ma ava ndepy'a guaxu va'e vy mba'emo pyau porā va'e anho 'rā nhiā reru orevy — he'i.

⁴³ Ha'e rā Jônatas ombovai vy aipoe'i Adonias pe:

— Ha'e ramo 'rāgue py nhanderuvixa Davi ma omoī uka ra'e Salomão huvixaverā.

⁴⁴ Ha'e rami vy hexeve Davi omondouka sacerdote Zadoque, profeta Natā, Joiada ra'y Benaia ha'e ojeupagua xondaro kuery. Ha'e va'e kuery ma omoī huvixa rymba mburika'i áry ae.

⁴⁵ Ha'e vy Giom py sacerdote Zadoque ha'e profeta Natã omoĩ huvixaverã. Ha'e gui oguerovy'a ete reve ojevypa jogueruvy ramo tetã ha'e javi rupi hevovo rei okuapy. Ha'e va'e kuery ae rima ojapukai rã pendu va'e.

⁴⁶ Ha'e gui Salomão ma huvixa renda áry oguapy ae.

⁴⁷ Ha'e rami ae avi Davi rembiguai kuery yvatekueve ou okuapy ixupe oxarura. Ha'e vy aipoe'i okuapy: "Nderuete tojapo nderery gui Salomão rery omboetevea aguã rami. Tombopo'akave ndepo'akaa gui eteve", he'i okuapy ramo huvixa ngupa áry ituia pyve ojero'a.

⁴⁸ Ha'e rami vy aipoe'i: "Ta'ima'endu'a porãa SENHOR Israel kuery Ruete re, mba'eta ange nhandevy ombou xerenda áry oguapy va'erã, xee ae rexâa py ma voi aexa va'e", he'i.

⁴⁹ Ha'e rami rã Adonias hexeve guarã oenoĩ va'ekue oryryipa reve opu'ãmba vy oje'oipa joa katy e'ÿ-e'ÿ.

Adonias onhemboaxy ukaague

⁵⁰ Ha'e rã Adonias ma Salomão gui okyje vaipa avi vy opu'ã vy templo py oo, ha'e ojopy oiny altar apy'i ikuai va'e re.[‡]

⁵¹ Salomão pe aipo'ea:

— Ma'ë, Adonias ma ndegui okyje vy oo altar apy'i re ojopy oiny. Ha'e vy aipoe'i: "Aÿ gui huvixa Salomão toura xejuka uka e'ÿ aguã kyxe py, hembiguai aiko rã", he'i.

⁵² Ha'e ramo Salomão ombovai:

— Ha'e va'e ma ha'evea rami ri oiko va'e ramo neĩ peteĩ'i hi'a ma voi ndo'ai 'rã yvy py. Ha'e rã hexe nda'evei va'e oïa jaikuua ramo omâno 'rã — he'i.

⁵³ Ha'e ramo guembiguai kuery Salomão omondouka rã omboguejy okuapy altar gui. Ha'e ramo ha'e ou vy huvixa Salomão renonde py ojero'a. Ha'e rã aipoe'i ixupe:

— Tereo ju ndero katy.

2

Salomão pe Davi mba'emo ojapo va'erã omboaxapa ma vy omanoague

¹ Ovaë ma ouvy Davi omâno aguã ára. Ha'e vy gua'y Salomão pe mba'emo ojapo uka vy aipoe'i:

² — Xee aa ta ma tape omâno va'e pavẽ oje'oia rupi. Ha'e gui ndepy'a guaxu ke ava rami!

³ Eiko SENHOR Nderuete nhanembo'eague rami, ha'e oikoa rami ae reiko vy ijayvua oeja va'ekue rejapopa aguã, ha'e ojapo uka va'ekue, oipotaa, ha'e oikuua uka va'ekue lei Moisés ombopara va'ekue re oïa rami, ha'e rami vy opa mba'e rejapoa py reiko porã aguã, mamo rã reoa rupi rei.

⁴ Ha'e ramo 'rãe SENHOR ndevy voi omoĩ atã xevy ijayvuague. Mba'eta aipoe'i va'ekue: "Ndera'y kuery ma ikuaia re ae oikuua pota ri vy anhetê ete rupi xerenonde ikuai aguã opy'a ha'e onhe'ë ha'e javi py, ha'e ramo ndoatai 'rã nderekovia tenda Israel kuery re openaaty áry oï va'e", he'i va'ekue.

⁵ — Ha'e rami avi ndee ma reikuua porã Zeruia pi'a Joabe xeapo vaiague, ha'e gui Israel pygua xondaro kuery ruvixa mokoĩ va'e re voi: Ner ra'y Abner ha'e Jéter ra'y Amasa re. Ha'e va'e kuery ma ha'e ojuka joe nopo'ãavei ma jave tei. Ha'e rami vy ojepy joe opu'ãa jave py jouguy omoëague re. Ha'e nungakue py onhemongy'a, oku'ãkuua ha'e oxapatu voi.*

⁶ Ha'e nunga rupi ejapo hexe ne'arandua rami. Ha'e rami vy eja eme hi'a xiimba rire ma omâno aguã.

⁷ — Ha'e rã Gileade pygua Barzilai ra'y kuery re ma repena porã 'rã. Ha'e kuery va'e regua ta'ikuai riae nde-mesaa py okaru va'e, mba'eta ha'e rami ae xere opena karamboae nderyke'y Absalão gui anha jave py.

[‡] ^{1:50} Templo py Adonias oike vy altar apy'i ikuai va'e re ojopy onhemboaxy ukaa rupi (Êxodo 21.12-14). * ^{2:5} Joabe ma Abner ha'e Amasa ojukaague omombe'u 2 Samuel 3.25-32 ha'e 20.9-10 py. Ha'e rã Barzilai ra'y kuery Davi re opena porãague omombe'u 2 Samuel 17.27-29 py.

⁸ — Ha'e gui apy ndereve avi oiko teri Benjamim regua Gera ra'y Simei, Baurim pygua. Ha'e va'e ma xevy ijayvu vaikue rei ete karamboae, Maanaim katy aa jave py. Ha'e rami rire tei Jordão yakã rembe re xerovaexi vy ou ramo xee ma SENHOR rery rupi aura vy aipoa'e karamboae kyxe py ajuka e'ŷ aguã re.

⁹ Ha'e rami tei aŷ ma exa'a eme ojejavy e'ŷ va'e oikoa rami, mba'eta ne'arandu va'e vy reikuua porã 'rã hexe rejapo va'erã, huguy omoëa ramo omano aguã — he'i.

¹⁰ Ha'e va'e rire Davi ndoikovevi'i ma guamoï kueryague rami. Ha'e ramo onhono porãa tetã Davi rekoague py ae.

¹¹ Davi ma quarenta ma'etý re oï huvixa Israel kuery re opena va'e. Hebróm py ranhe opena sete ma'etý re, ha'e gui trinta e três ma'etý re ju Jerusalém py opena.

¹² Ha'e rami py Salomão ju oï nguu Davi rekoria. Ha'e vy opa mba'e py ipo'akave tema ovu.

Adonias omanoague

¹³ Ha'e gui Hagite pi'a Adonias ou Salomão xy Bate-Seba oña py. Ha'e ramo ixupe kunha va'e oporandu:

— Ha'evepa reia rupi pa reju?

Ombovai:

— Ha'evepa reia rupi rima — he'i.

¹⁴ Ha'e vy aipoe'ive ju:

— Petei ayvu xeayvu ta ndevy.

Kunha va'e ombovai vy

— Ndeayvu tema — he'i.

¹⁵ Ha'e ramo aipoe'i:

— Reikuua porã xee ae huvixa aĩ aguã rami aiko va'ekue, ha'e Israel kuery ha'e javi oarõ okuapy va'ekue xee apena aguã, tei opena aguã ma xeryvy pe ju omboaxaa. SENHOR gui ae ojopy ha'e rami aguã.

¹⁶ Ha'e gui aŷ ma petei mba'e re anho ajerure ndevy. Ejapo e'ŷ eme xevy.

Kunha va'e ombovai:

— Ndeayvu ha'vy — he'i.

¹⁷ Ha'e ramo aipoe'i:

— Ajerure ndeayvu aguã huvixa Salomão pe, mba'eta ndevy pe ma nome'ẽ e'ŷi 'rã. Tome'ẽ xevy Suném pygua Abisague xera'yxýrã.

¹⁸ Bate-Seba ombovai:

— Ha'eve, ndeayvuague rami vy xee xeayvu 'rã huvixa pe — he'i.

¹⁹ Ha'e gui ma Bate-Seba oo huvixa Salomão-a py, Adonias ojerureague omombe'u aguã. Huvixa opu'a oxy reve nhovaexi aguã, ha'e vy ojero'a henonde py. Ha'e gui guenda áry ju oguapy vy ogueru ruka petei tenda oxy pe. Ha'e ramo oguapy oiny oiporu kuaa regua re.

²⁰ Ha'e vy aipoe'i:

— Petei mba'e kyr'i ete va'e re tema ajerure ta ndevy. Eme'ẽ e'ŷ eme.

Huvixa ombovai:

— Ha'i, ejerure tema. Xee name'ẽ e'ŷi 'rã ndevy — he'i.

²¹ Kunha va'e aipoe'i:

— Reme'ẽ 'rãgue Suném pygua Abisague nderyke'y Adonias ra'yxýrã.

²² Ha'e ramo huvixa Salomão ombovai vy aipoe'i oxy pe:

— Mba'e re tu rejerure Suném pygua Abisague re Adonias ra'yxýrã? Mba'e re tu nderejerurei avi ha'e ipo'aka aguã re (mba'eta xeryke'y oiko rã), ha'e sacerdote Abiatar ha'e Zeruia pi'a Joabe peguarã re voi? — he'i.

²³ Ha'e vy huvixa Salomão oura SENHOR rery rupi. Ha'e vy aipoe'i:

— Adonias guekove rovai ae e'ŷ ri ijayvu ramo Xeruete oipotaa rami taxembopaga.[†]
²⁴ Ha'e gui aŷ anhetē ete SENHOR xeru Davi rekovia xemoĩ, ha'e ijayvuague rami vy xero pygua kueryrā omoingo va'ekue oikove va'e rery rupi aura vy aipoa'e: Aŷ ma Adonias omano 'rā — he'i.
²⁵ Ha'e rami vy huvixa Salomão ma Joiada ra'y Benaia omondouka rā oo vy oguero'a Adonias, ha'e vy ojuka.

Salomão sacerdote Abiatar omoxēague

²⁶ Ha'e gui sacerdote Abiatar pe ju huvixa aipoe'i:
 — Tereo Anatote katy nemba'ety ituia py, mba'eta ndee ma ava ojuka pyrā. Ha'e rami teĩ aŷ ma ndorojukai 'rā, mba'eta xeru Davi renonde rupi SENHOR ayvu ryru reraa va'ekue, ha'e xeru ojexavaiaque ha'e javi py ndee voi rejexavai rire — he'i.
²⁷ Ha'e rami vy Salomão omoxē Abiatar, SENHOR pegua sacerdote-ve'ŷ oiko aguã. Ha'e rami py ojeupity Siló py Eli ramymino kuery rekorā re SENHOR ijayvuague.[‡]

Joabe ojukaa ague

²⁸ Ha'e nunga Joabe pe omombe'ua rā oendu vy ojava ovvy vy oike SENHOR ombojerovia aty ropy, ha'e vy ojopy oiny altar apy'i oĩ va'e re, mba'eta Joabe voi Adonias reve onhemoirū va'ekue, Absalão reve nonhemoirū va'ekue ri.
²⁹ Ha'e ramo Salomão pe omombe'ua SENHOR ombojerovia aty katy Joabe ojava vy altar yvy'iry oĩa. Ha'e ramo Salomão Joiada ra'y Benaia omondouka vy aipoe'i:

— Tereo ke, ero'a.
³⁰ Ha'e ramo SENHOR ombojerovia aty py Benaia oo vy aipoe'i Joabe pe:
 — Po rami huvixa ijayvu: Eẽ ke upe gui.
 Ombovai:
 — Any, apy ae 'rā amano — he'i.
 Ha'e gui Benaia oo jevy vy ha'e nunga huvixa pe omombe'u vy aipoe'i:
 — Po rami Joabe xembovai kuri.
³¹ Ha'e ramo ixupe huvixa aipoe'i:
 — Ejapo ha'vy aipoe'iague rami vy. Ero'a vy ejuka, ha'e gui enhono porā. Ha'e rami vy 'rāe xegui ha'e xeru ro pygua kuery gui reipe'a heko porā va'e ruguy Joabe omoẽ riveague re rombopaga aguã oĩ va'ekue.

³² Ha'e rami rā Joabe re ae ju 'rā SENHOR omoĩ tuguy omoẽague re opaga aguã. Mba'eta mokoĩ avakue ixugui heko porâve ha'e ha'eve va'e re opu'ã vy ojuka ete rire kyxe py, xeru Davi oikuua e'ŷ re. Ha'e va'e ma Ner ra'y Abner Israel kuery xondaro ruvixa va'e, ha'e gui Jéter ra'y Amasa Judá pygua xondaro ruvixa.

³³ Ha'e rami rā Joabe re ae 'rā oĩ ha'e kuery ruguy omoẽague re opaga aguã, hamymimo kuery re guive, raka'e rā peve guarā. Ha'e rā Davi re ma, hamymimo kuery, hoo pygua kuery, ha'e henda áry oĩ va'e re ma oĩ 'rā SENHOR omoingo porā aguã, raka'e rā peve guarā — he'i.

³⁴ Ha'e ramo Joiada ra'y Benaia Joabe re oguero'a vy ojuka. Ha'e vy onhono porā hoogue py ae, tekao e'ŷa py.

³⁵ Ha'e gui Joabe rekovia ma huvixa omoĩ Joiada ra'y Benaia xondaro ruvixarā, ha'e rā Abiatar rekovia ma omoĩ Zadoque sacerdote-rā.

Simei ojukaa ague

³⁶ Ha'e rire ma huvixa oenoĩ uka Simei. Ha'e vy aipoe'i ixupe:
 — Ejapo ke nderorā Jerusalém py, ha'e py ae eiko. Apy gui eẽ-eẽve eme ke peteïve henda katy.
³⁷ Mba'eta eikuua pota porā ke: Apy gui reo vy Cedrom yakā reaxa vyve remano 'rā. Ha'e gui ndere ae ju 'rā oĩ nderuguy omoẽague re repaga aguã.

[†] 2:23 Adonias ojerureague omombe'ua rā Salomão oendu vy ndojou porāi, mba'eta Suném pygua Abisague Davi ra'xyx jevy rami ae irū oiko va'ekue (1.1-4), ha'e pavē oikuua rā huvixa ra'yxykue re omenda va'e huvixa jevyrā oikoa rami (2 Samuel 16.20-23). [‡] 2:27 Eli pe SENHOR ijayvuague ma 1 Samuel 2.27-33 py oĩ.

³⁸ Ha'e ramo Simei ombovai huvixa:

— Xeruvixa, ha'evea rami ndeayvu. Ndeayvuague rami 'rāe xee nerembiguai aiko — he'i. Ha'e rami vy Simei are'i ma oiko Jerusalém py.

³⁹ Ha'e gui mboapy ma'etŷa py ma mokoï Simei rembiguai ojava jogueravy Gate pygua huvixa Maaca ra'y Aquis ro katy. Ha'e ramo Simei pe omombe'ua vy

— Nerembiguai kuery je Gate py ikuai — 'ea.

⁴⁰ Ha'e rami rā Simei opu'ã vy guymba mburika'i oguerekokatu vy oo Gate katy, Aquis ro gui guembiguai kuery ogueru aguã. Ha'e rami vy Gate gui ogueru ju guembiguai kuery.

⁴¹ Salomão pe omombe'ua Simei Jerusalém gui Gate katy oo rire ojevy ju maague.

⁴² Ha'e ramo huvixa oenoï uka Simei. Ha'e vy aipoe'i ixupe:

— Xee ndajapoi ri ty'y raka'e SENHOR rery rupi reura aguã rami? Ha'e romoneta vy aipo nda'e i teve raka'e: "Marã katy rā rei reoa árave remano 'rā", nda'e i ri ty'y? Ha'e ramo xevy aipo're va'ekue: "Ha'evea rami ndeayvu aendu", 're va'ekue ri.

⁴³ Mba'e re ha'vy nderejapoi ri SENHOR pe reuraague, neñ xee romonetaague ma voi?

⁴⁴ Huvixa aipoe'ive ju Simei pe:

— Ndep'y a re reikuaa porã xeru Davi re rejapo vaiague ha'e javi. Ha'e nunga rupi ndere ae ju SENHOR ombou ta rejapo vaiague repy.

⁴⁵ Ha'e rā huvixa Salomão ma ogueroayvu porã 'rā, ha'e SENHOR renonde py Davi po'akaa va'ekue omoï porã 'rā raka'e rā peve — he'i.

⁴⁶ Ha'e gui Joiada ra'y Benaia pe huvixa ijayvu ramo oo vy hexe opu'ã vy ojuka. Ha'e ramo py Salomão po'akaa oĩ atâve.

3

Faraó rajy re Salomão omendaague

¹ Salomão hatyu oikovy Egito pygua huvixa Faraó re. Ha'e vy gua'yxyrā Faraó rajy ogueraa vy tetã Davi rekoague py ranhe ogueru, ngoorã ojapopa e'ŷa ja, ha'e gui SENHOR pegua oo ha'e Jerusalém tetã ha'e javi rupi kora ojapopa e'ŷa ja.

² Ha'e rami tei heta va'e kuery ma yvy'ã rupi ombojeroviaaty ikuai va'e rupi oo vy mba'emo ome'ẽ teri okuapy ha'e py, mba'eta ha'e va'e jave ma oo SENHOR rery oĩ atyrã ndojapoai teri.

2 Crônicas 1.2-13

³ Salomão oayvu ete SENHOR. Ha'e rami vy nguu Davi ombo'eague rami oiko. Ha'e rami tei yvy'ã rupi ombojeroviaaty ikuai va'e rupi teri ome'ẽ jepi mba'emo, heakuã va'e oapy guive.

⁴ Ha'e rami vy Gibeão katy oo mba'emo ome'ẽ aguã, ombojeroviaaty yvy'ã re oĩ va'e tuvixave va'e ramo. Ha'e py altar oĩ va'e áry Salomão oapy uka mil mymba.

⁵ Ha'e gui ma Gibeão py ae Salomão pe SENHOR ojexa uka pyávy, ra'u rupi. Ha'e vy aipoe'i:

— Ejerure ke xevy reipota va'e re, ha'e rā xee ame'ẽ 'rā.

⁶ Ha'e rā Salomão ombovai:

— Nerembiguai xeru rāgue'i Davi pe reayvua rexu uka raka'e opa mba'e py, mba'eta ha'e ma ojerovia etea rupi ndereve oiko va'ekue, gueko porã rupi ha'e nerondenode rupi opy'a re anhetê ete va'e omoï reve. Reayvua rexu ukaa rupi ixupe reme'ẽ pete'i ta'y hekoria oĩ va'erã, aŷ ojekuaa ramo.

⁷ Ha'e rami vy SENHOR Xeruete, xeru Davi rekovia xee nerembiguai ju xembopo'aka. Ha'e rami tei xee xekyrí ete teri, mba'eve py ndaiko kuaai.

⁸ Xee nerembiguai ma ndevygua kueryrā reiporavo va'ekue mbyte rupi aiko. Ha'e va'e kuery ma heta raxa va'e, neñ aipapapa rei va'erã e'ŷ va'e.

⁹ Ha'e nunga rupi xee nerembiguai pe eme'ẽ xepy'a py xe'arandu aguã, ndevygua kuery areko kuaa, ha'e xe'arandua rupi aikuua pota aguã heko porã ha'e heko vai va'e re. Mba'eta mava'e 'rā tu oguerekouua kova'e kuery heta va'e? — he'i.

¹⁰ Ha'e rami ijayvu rā SENHOR oendu vy ojou porã, ha'e rami oiko aguã re Salomão ojerure ramo.

¹¹ Ha'e vy Nhanderuete ombovai:

— Ha'e rami aguā re ae rejerure rire, reiko pukuve aguā re'ŷ, rerekopa aguā re, neĩ nderovaigua kuery omanomba aguā re'ŷ ma voi rejerure, ha'e rā ne'arandurā re anho ha'evea ramigua reikuua aguā,

¹² ha'e ramo ma xee ajapo 'rāe ndeayvuague. Ha'e vy ndeyp'a re amoī rā ne'arandu ha'e reikuaapa aguā. Ndoikoi teri ndee reiko 'rāa rami oiko va'ekue, neĩ reĩ rire voi ndoikoi 'rā amboae.

¹³ Ndevy pe ame'ẽve avi 'rā rejerureague'ŷ teĩ, rerekopa ha'e ndeporiau e'ŷ aguā. Huvixa kuery ikuai va'e regua ndoikoi 'rā ndee ramigua, repena reikovya pukukue re.

¹⁴ Xapy'a rei aikoa rami ri reiko ramo, ha'e nderu Davi oikoague rami avi xeayvuague ha'e ajapo uka va'ekue rejapopa ramo xee amboetave 'rā nde'ára — he'i.

¹⁵ Ha'e gui ma Salomão omyĩ vy oikuua oexa ra'u ra'ea. Ha'e vy Jerusalém py ojevy vy SENHOR guexeve guarã ojapo va'ekue ryru renonde py hi'aĩ. Ha'e vy ome'ẽ mymba kuery oapy uka reve, ome'ẽ avi hexeve peteĩ rami ju ikuia regua. Ha'e vy peteĩ ngaru ojapo guembiguai yvatekueve ikuai va'e ha'e javi pe.

Mokoī kunhague re Salomão oikuua potaague

¹⁶ Ha'e gui huvixaa py mokoī kunhague itavy rei va'e ovaẽ vy opu'ã okuapy henonde py.

¹⁷ Ha'e kuery va'e regua peteĩ aipoe'i ixupe:

— Xeruvixa, kova'e kunha va'e reve ma peteĩ oo py ae roiko va'e. Ha'e py ae aikuavā'i xepi'a.

¹⁸ Kyrĩ va'e aikuavā rire mboapy araa py ma kova'e kunha va'e voi oikuavā'i avi ava'i. Joa py roĩ va'ekue, neĩ peteĩve ma voi jipoi oo py roĩ jave, ore anho'i ae roĩ ha'e py.

¹⁹ Ha'e gui pyávy ma kova'e kunha va'e pi'a'i omano, hi'áry onheno oupy rive ramo.

²⁰ Ha'e gui pytū mbyte xee nerembiguai ake teri ajupy jave ha'e va'e ovu vy xejyva áry gui xepi'a'i oguerova vy ojyva áry ju omonheno. Ha'e rā opi'a'i omano va'ekue ma omonheno xejyva áry.

²¹ Ko'ẽ rai jave avy amokambu aguā teĩ xepi'a'i omano ma ra'e merami. Ha'e gui ko'ẽgue aikuua pota rā ha'e va'e ava'i aikuavā'i va'ekue'ŷ — he'i.

²² Ha'e ramo amboae kunha va'e aipoe'i:

— Any, oikove'i va'e ma xepi'a'i ae, ndepi'a'i ae ma omano va'ekue.

Ha'e rā amboae ju ombovai:

— Any, omano va'ekue ma ndepi'a, xepi'a'i ma oikove va'e — he'i. Ha'e rami ijayvu tema okuapy huvixa renonde py.

²³ Ha'e ramo huvixa aipoe'i:

— Kova'e kunha aipoe'i: "Kova'e oikove va'e ma xepi'a, ha'e rā ndepi'a ma omanogue."

Ha'e rā amboae ombovai vy "Any, omanogue ma ndepi'a, xepi'a ma oikove va'e", he'i.

²⁴ Huvixa aipoe'ive ju:

— Peru peteĩ kyxe xevy — he'i ramo huvixaa py oguerua peteĩ kyxe.

²⁵ Huvixa aipoe'i:

— Pemboja'o ava'i oikove va'e, ha'e gui mbytekue peme'ẽ 'rā peteĩ kunha pe, ha'e rā hovaikue ma amboae pe peme'ẽ — he'i.

²⁶ Ha'e rami rā ava'i oikove va'e xy ijayvu huvixa pe, mba'eta ixy ae vy oendu opi'a oayvua anho. Ha'e vy aipoe'i:

— Xeruvixa, eme'ẽ na amboae pe ava'i oikove va'e. Ejuka uka eme teve.

Ha'e rā amboae kunha ma

— Ndoikoi 'rā xepi'a, neĩ ndepi'a voi. Tomboja'oa — he'i.

²⁷ Ha'e ramo huvixa ombovai:

— Peme'ẽ ava'i oikove va'e kunha jypygua pe. Pejuka eme ta'vy, mba'eta peva'e ma ixy ae — he'i.

²⁸ Huvixa ijayyuague Israel kuery ha'e javi oendu vyomboete ete okuapy, mba'eta okuua okuapy hexe Nhanderuete guigua 'arandua oña, ha'evea rami joguerekoo kuaa aguã.

4

Salomão rembiguai kuery yvatekueve rery oña

¹ Ha'e gui Salomão opena oikovy Israel kuery ha'e javi re.

² Pova'e avakue ma hembiguai yvatekueve va'e: yvateve ete va'e ma Zadoque ra'y Azarias.

³ Sisa ra'y kuery Eliorefe ha'e Aías ma kuaxia mboparaaty kuery. Mba'emo oiko va'ekue ombopara va'ety ma Ailude ra'y Josafá.

⁴ Joiada ra'y Benaya ma xondaro kuery ruvixa. Zadoque ha'e Abiatar ma sacerdote ikuai.

⁵ Ha'e gui Natã ra'y Azarias ma opena va'ety kuery ruvixa. Natã ra'y Zabude ma mba'emo re opena ha'e huvixa irü oiko.

⁶ Ha'e gui Aisar ma mba'emo re opena va'ety. Abda ra'y Adonirão ma omomba'epo nhea'ämby kuery rerekao.

⁷ Salomão omoñ doze avakue Israel kuery ha'e javi re opena va'erã, huvixa ha'e hoo pygua kuery ho'u va'erã ojoua rupi. Ha'e kuery regua peteñ-teñ ma ma'etña nhavõ ojou'rã peteñ jaxy reguarã.

⁸ Ha'e kuery rery ma po rami: Ben-Hur ma Efraim yvyty rupi opena va'e.

⁹ Ben-Dequer ma Macaz, Saalabim, Bete-Semes, Elom ha'e Bete-Hanã rupi opena.

¹⁰ Ben-Hesede ma Arubote rupi opena. Ha'e va'e pegua ma Socó ha'e Hefer yvy ha'e javi avi.

¹¹ Ben-Abinadabe ma opena Dor yvy'ã ha'e javi rupi. Ta'yxy ma Salomão rajy Tafate.

¹² Ailude ra'y Baaná ma opena Taanaque, Megido ha'e Bete-Seã ha'e javi rupi. Ha'e va'e ma Zaretã katy'i rupi optya Jezreel yvy'ã guy katy, Bete-Seã guive Abel-Meolá peve, ha'e Jocmeão tetã rovai peve.

¹³ Ben-Geder ma Ramote-Gileade rupi opena. Ha'e va'e ma Manassés ra'y Jair rekoague Gileade re ikuai va'e rupi opena. Opena avi Basã regua Argobe tetã oñi va'e re, ha'e javi vy sessenta tetã ikorapa ha'e hokë jokoa overa va'e guigua va'e meme.

¹⁴ Ido ra'y Ainadabe ma Maanaim rupi opena.

¹⁵ Aimaás ma Naftali rupi opena. Ha'e va'e ma gua'yxyrã ogueraa peteñ Salomão rajy, Basemate hery va'e.

¹⁶ Husai ra'y Baaná ma opena Aser ha'e Bealote rupi.

¹⁷ Parua ra'y Josafá ma Issacar rupi opena.

¹⁸ Elá ra'y Simei ma Benjamim rupi opena.

¹⁹ Uri ra'y Geber ma Gileade rupi opena amorreú kuery ruvixa Seom ha'e Basã pygua huvixa Ogue yvykue re. Ha'e va'e yvy re peteñ'i anho oñi opena va'e.

Salomão openaa rupi oguerekopaague

²⁰ Judá ha'e Israel kuery ma heta ikuai, ye'ẽ yvýry ita ku'i ikuai va'e rami heta. Okaru, oy'u ha'e ový'a okuapy.

²¹ Salomão ma amboae regua ikuai va'e re opena avi, Eufrates yakã guive filisteu kuery yvy ha'e Egito yvy peve. Ha'e pygua kuery ma mba'emo ome'ẽ 'rã okuapy Salomão pe, ixupe ombo'epo 'rã guive okuapy ha'e oikovea pukukue re.

²² Ko'ẽ nhavõ Salomão peguarã ome'ẽ 'rã okuapy trinta ryru trigo iporãve va'e ha'e sessenta ryru trigo mboae,

²³ ha'e gui dez vaka ra'y ikyra va'e, vinte vaka ikora pygua, ha'e cem vexa'i, guaxu ete'i, guaxu puku, guaxu mirí ha'e guyra ikyrakue rei'i va'e.

²⁴ Mba'eta ha'e va'e yvy ha'e javi rupi opena, ha'e Eufrates yakã yvýry rupi Tifsa guive Gaza peve huvixa kuery ikuai va'e re. Ha'e gui ijyvy yvýry ha'e javi rupi ma mba'eve rei ndoikoi.

²⁵ Ha'e rami py Judá ha'e Israel kuery ikuai porã'i. Salomão oikovea pukukue re peteĩ-teĩ oguapy 'rã okuapy ngoka py ae uva ha'e figo'y ikuiaia guy rupi, Dã guive Berseba peve.

²⁶ Salomão oguerekó avi quarenta mil kavaju oguy pygua karóxa reraarã, ha'e gui imboguataa kuery ma doze mil.

²⁷ Ha'e gui tembi'u re opena va'ety kuery ojou 'rã okuapy peteĩ-teĩ jaxy reguarã, huvixa Salomão ha'e i-mesa py ovaẽ va'e pe rei, mba'eve oata e'ŷ aguã rami.

²⁸ Mamo rã huvixa oĩa py ogueraa avi 'rã cevada ha'e hi'ygue kavaju kuery ha'e kavaju porãgueve peguarã, ijayvuague rami vy ae.

Salomão 'arandua re ijayvua

²⁹ Salomão pe Nhanderuete ome'ẽ avi hi'arandurã, opa mba'e py oikuua pota ha'e mba'emo oikuapa rei aguã rami, ye'ẽ rembe rupi ita ku'i ikuiaia rami.

³⁰ Kuaray oua katygua ha'e Egito pygua kuery 'arandua gui voi Salomão hi'aranduve va'e.

³¹ Avakue ikuai va'e ha'e javi gui hi'aranduve, ezraíta Etã gui voi, ha'e gui Maol ra'y kuery Hemã, Calcol ha'e Darda gui voi. Ha'e ramo hi'arandua oendupaa ha'e javi regua ijyvýry ikuai va'e rupi.

³² Omombe'u avi três mil ayvu 'arandu regua, ha'e gui mil e cinco mboraeirã.

³³ Omombe'u kuaa avi hogue va'e ha'e javi, yary Líbano re ikuai va'e, hissopo kora áry henhoi va'e guive. Omombe'u avi mymba kuery ha'e guyra ikuai va'e, yvy rupi otyryry va'e ha'e pira ikuai va'e voi.

³⁴ Ha'e ramo ha'e javi regua ou Salomão 'arandua oenduxe vy. Heta avi ou yvy regua huvixa kuery rembiguai Salomão 'arandua omombe'ua rã oendu va'ekue.

5

2 Crônicas 2.1-16

¹ Salomão-a py Tiro pygua huvixa Hirão voi ombou guembiguai kuery, mba'eta oendu tuu rekovia Salomão ju huvixarã omoñaague. Hirão ma Davi irũ ae oiko va'ekue.

² Ha'e ramo Hirão pe ju Salomão omondouka guembiguai kuery aipoe'i va'erã:

³ “Reikuua porã xeru Davi SENHOR nguete pegua oorã ojapo aguã nda'eveiague, ngovaigua kuery reve joguero'a riae ramo, ipo'akaa guýry SENHOR ha'e kuery omoimba e'ŷa ja.

⁴ Ha'e rã xevy pe ma SENHOR Xeruete ome'ẽ joavaive rupi orekuai porã'i aguã. Ha'e vy ndoikoi orerovaiguarã, neĩ oremoangeko reiarã voi.

⁵ Ha'e nunga rupi anhembopy'a peteĩ oo ajapo aguã SENHOR Xeruete rery oĩ aguã, xeru Davi pe ijayvuague rami vy. Ha'e vy aipoe'i va'ekue: ‘Nderekovia nderá'y amoĩ va'erã va'e ae 'rã ojapo oo xerery oĩ aguã’, he'i va'ekue.

⁶ Ha'e nunga rupi ejaya na xevy yvyra yary Líbano yvy re ikuai va'e. Xerembiguai kuery ma nerembiguai kuery reve avi 'rã ikuai, ha'e gui ha'e va'e kuery ombo'eapoague repy xee ame'ẽ 'rã ndeayvua rami ae. Mba'eta reikuua porã nerembiguai kuery Sidom pygua yvyra ojaya kuaa va'e rami ete xerembiguai avakue regua peteĩve ndoikoi”, he'i.

⁷ Ha'e rami Salomão ayvukue Hirão oendu vy ovy'a vaipa. Ha'e vy aipoe'i:

— Ta'ima'endu'a porãa SENHOR re aŷ, mba'eta Davi pe peteĩ ta'y hi'arandu ete va'e ome'ẽ heta va'e kuery re opena va'erã — he'i.

⁸ Ha'e rami vy Salomão oĩa py ju Hirão ombou guembiguai kuery aipoe'i va'erã: “Aendu ma rejerure ukaague. Ha'e rami vy reipotaa rami ajaya uka 'rã yvyra yary ha'e cipreste.

⁹ Ha'e va'e ma Líbano yvy gui xerembiguai kuery ogueraa 'rã ye'ẽ rembe peve. Ha'e gui ye'ẽ rupi ma xee aru rukapa 'rã ojokuapa va'ekue ndee rejopy aguã peve. Ha'e gui ha'e py ma ojorapa ju 'rã, ha'e ndee ju reraa ukapa 'rã. Ha'e gui ndee voi rejapo 'rã xee aipotaa rami, xero pygua kuery pe tembi'u reme'ẽ vy”, he'i va'erã.

¹⁰ Ha'e rami py Salomão oipotaa rami vy ixupe Hirão ogueru ruka yvyra yary ha'e cipreste.

¹¹ Ha'e gui Hirão pe ma Salomão ome'ẽ vinte mil ryru trigo hoo pygua kuery rembi'urã, ha'e vinte ryru azeite-rã oumbiri pyre. Ha'e rami ojapo ma'etŷa nhavõ.

¹² Salomão pe Nhanderuete ijayvuague rami vy ome'ẽ hi'arandurã. Ha'e gui Hirão ha'e Salomão reve peteĩ rami ikuai, jogueroayvuague rami vy.

2 Crônicas 2.17,18

¹³ Israel kuery va'e regua avakue ma Salomão omomba'eapo trinta mil.
¹⁴ Ha'e va'e kuery ma omondouka kuerei 'rã Líbano katy, jaxyah nhavõ re dez mil 'rã oo. Peteĩ jaxyah re ma ikuai 'rã Líbano re, ha'e gui mokoĩ jaxyah re ma ngoo rupi 'rã ikuai. Ha'e kuery herekoia ma Adonirão.

¹⁵ Salomão oguereco avi oitenta mil mba'emo reraaty kuery, ha'e gui oitenta mil ju yvyty rupi ita mbovoa kuery.

¹⁶ Salomão rembiguai três mil e duzentos avi ikuai joe opena va'ety. Ha'e va'e kuery ma omoba'eapo va'e kuery re opena vy ojapo uka 'rã mba'emo.

¹⁷ Huvixa ogueru ruka ita tuvixakueve ha'e iporāgueve va'e, omoatyrō mbyre guive ogueru ruka oo ytarã.

¹⁸ Salomão ha'e Hirão rembiguai kuery ae imoatyrōarã ikuai, Gibal pygua kuery voi. Yvyra ha'e ita omoatyrō okuapy templo-rã ojapo aguã.

6

2 Crônicas 3.1-9

¹ Egito yvy gui Israel kuery oje'oipa rire ma quatrocentos ma'etŷa py Salomão omboypy templo-rã ojapo aguã, Israel kuery re openaa py irundy ma'etŷa py, mokoĩ jaxyah zive 'epy va'e re.

² Ha'e gui oo SENHOR peguarã huvixa Salomão ojapo va'ekue puku-a ma vinte e sete metros va'e, ipya ma nove, ha'e yvatea ma treze raxa'i va'e.

³ Ha'e rã templo roka ja'oa renonde katy oĩ va'e pya ma nove metros va'e, henda iky'a e'ŷ va'e rami ae. Ha'e rã ipuku-a katy ma quatro metros raxa'i.

⁴ Oo re omoĩ avi janela-rã opy katy oĩ va'e gui oka katy ipo'i live'i va'e.

⁵ Oo mbotya re oka katy rupi ma ojapo opy ja'orã yvatevea py, henda iky'a e'ŷ va'e ha'e iky'a e'ŷ ete va'e yvýry rupi guive.

⁶ Pyrōa jypyguia pya ma mokoĩ metros raxa'i, mokoĩa ma mboapy metros rai'i va'e, ha'e rã mboapy ma mboapy metros raxa'i va'e, mba'eta imbotya oka katyguia ha'e javi rupi ojapo pyrōa yta renderã, imbotya ombokua e'ŷ aguã.

⁷ Oorã ojapo ita imbovoaty py ae oguereco katu pyre py. Ha'e rami vy oo ojapo okuapy py ndoiporuai martelo, haxa neĩ tembiporu ferro guigua ma voi, nombota-mbota nhenduai aguã ha'e py.

⁸ Opy ja'o yvyïve va'e rokẽ ma kuaray puku-a katy oĩ, ha'e tape pyrō-pyrōa'i rupi nhaẽ 'rã mokoĩa ha'e mboapya peve.

⁹ Ha'e rami vy oo ojapove heravy ojapopa peve. Ha'e vy oipyovãmba yvyrape yary guigua py.

¹⁰ Ha'e gui oo re opy ja'o ojapo va'ekue yvatea ma mokoĩ metros raxa'i va'e meme. Templo re ombojoapy yary guigua py ae.

¹¹ Ha'e gui ma SENHOR oayvu ombou Salomão pe. Ha'e vy aipoe'i:

¹² — Upe va'e oo rejapo reikovy va'e ma, xapy'a rei xeayvu aeja va'ekue rupi reiko ramo, ha'e aipotaa rejapopa, ajapo uka va'e rejapo avi vy ha'e va'e rupi anho ri reiko, ha'e ramo ndevy pe ajapo 'rã nderu Davi pe xeayvuague.

¹³ Ha'e rami vy aiko 'rã Israel kuery mbyte rupi, xevyguia kuery naipytyvõ e'ŷi 'rã guive.

Henda iky'a e'ŷ ete va'e re ijayvua

¹⁴ Ha'e rami py Salomão ojapopa oo.

¹⁵ Imbotya ma opy rupi ojao'ipa yvyrape yary guigua py. Opyrōa guive ijao'ia peve ojao'ipa yvyrape py, opy rupi. Ha'e rã pyrōa ma ojao'i yvyrape cipreste guigua py.

¹⁶ Ha'e rami ae yvyrape yary guigua py ojao'ipa avi opy ja'o'i ijapy katy oĩ va'e, nove metros ipya va'e, pyrōa guive ijao'ia peve. Ha'e va'e opy ja'o ma henda iky'a e'ŷ ete va'erã ojapo.

- ¹⁷ Templo ropy iky'a e'ŷ va'e puku-a ma dezoito metros va'e.
¹⁸ Ha'e gui yvyrape opy rupi omo'ã mbyre ma ombojeguapa hy'a ha'e yvoty ra'angaa py. Yary guigua anho ojekuaa, ita ma neñ peteñ henda'i py ma voi ndojekuaai.
¹⁹ Ijapy katy ma oguereko katu henda iky'a e'ŷ ete va'erã, ha'e va'e py omoõ aguã SENHOR guexeve guarã ojapo va'ekue ryru.
²⁰ Henda iky'a e'ŷ ete va'e puku-a ma nove metros, ipya ha'e yvatea ha'e rami ae avi nove metros va'e meme. Ouro ete py onhovãmba, altar yary guigua voi ouro ete py onhovã avi.
²¹ Opy rupi voi Salomão onhovãmba ouro ete py. Henda iky'a e'ŷ ete va'e ropy rupi omoatã avi imoiny corrente ouro guigua, ouro py avi ojao'i rire.
²² Ha'e rami py ouro py meme onhovãmba opy rupi, altar henda iky'a e'ŷ ete va'e renonde py oĩ va'e voi.

2 Crônicas 3.10-14

- ²³ Henda iky'a e'ŷ ete va'e pyguarã ma yvyra oliveira gui ojapo avi mokoõ anjo ipopo va'e ra'angaa. Peteñ-teñ yvatea ma irundy metros raxa'i meme.
²⁴ Peteñ-teñ anjo pepo puku-a ma mokoõ metros raxa'i. Ha'e rami vy irundy metros raxa'i oĩ ipopo apy jovaise re.
²⁵ Amboae anjo ra'angaa ma ha'ekue rami ae ju yvatea irundy metros raxa'i va'e avi. Mokoõve tuvixaa ma joo rami ete'i.
²⁶ Peteñ anjo ra'angaa yvatea ma irundy metros raxa'i, ha'e rami ae amboae voi ramo.
²⁷ Anjo ra'angaa ma opy omo'ã. Ipepo ma oipyo imoiny. Ha'e gui peteñ pepo ma ovaõ oiny oo mbotya re, ha'e rã amboae pepo ma oo mbotya mboae re ovaõ oiny. Ha'e rami vy opy mbyte rupi peve mokoõve jovai gui opepo omovaõ imoiny joe.
²⁸ Ha'e gui mokoõve anjo ra'angaa ombojupa ju ouro py.

Opy rupi ha'e okẽ rupi ombojeguague

- ²⁹ Oo mbotya opy ha'e javi rupi ombojeguapa anjo ipopo va'e ra'angaa, pindo ha'e yvoty ojepe'apa va'e ra'angaa py, opyve rupi ha'e kyvõ rupi voi.
³⁰ Pyrõa ha'e javi rupi voi ombojupa ju ouro py, opyve rupi ha'e kyvõ rupi voi.
³¹ Henda iky'a e'ŷ ete va'e rokẽrã ma ojapo yvyrape oliveira guigua gui. Ha'e rã yvateve rupi guarã ha'e ijytarã ma ojapo vy omboapte rakua, peteñ nhiruñ ijapy va'e oĩ aguã.
³² Okẽrã ma mokoõ yvyrape oliveira guigua gui ojapo. Ha'e vy ombojeguapa anjo ipopo va'e, pindo ha'e yvoty ojepe'apa va'e ra'angaa py. Ha'e nunga ha'e javi ouro py meme onhovã, pindo ha'e anjo ra'angaa guive.
³³ Henda iky'a e'ŷ va'e oikeaty ytarã ma yvyra oliveira gui avi ojapo. Oikeaty ma ijapy irundy va'erã ojapo.
³⁴ Ha'e va'e okẽrã ma mokoõ yvyrape cipreste guigua gui ojapo. Mokoõve yvyrape ma ejerea oĩ va'e meme.
³⁵ Ha'e va'e ombojegua avi anjo, pindo ha'e yvoty ojepe'apa va'e ra'angaa py, ha'e vy onhovãmba ouro py, ombojeguague rupi porã.
³⁶ Ha'e gui opy ja'o mbyte pygua rupi omoõ avi ita ojaya pyre mboapy jo'aa rupi, ha'e gui peteñ jo'aa yvyra yary guigua.
³⁷ Irundy ma'etõa py, mokoõ jaxyia zive 'epy re ma omoõ oo SENHOR pegua ytarã.
³⁸ Ha'e gui onze ma'etõa py, oito jaxyia bul 'epy re, opa ete ma oo ojapoxeague rami, hexegua ha'e javi. Ha'e rami py sete ma'etõ ogueraa Salomão ojapopa aguã.

Salomão oo mboae ju ojapoveague

- ¹ Ha'e gui Salomão ngoorã ojapo avi, treze ma'etõ ogueraa ojapopa aguã.
² Ojapo avi oo Líbano ka'aguy regua guigua. Ipuku-a ma quarenta e cinco metros, ipya ma vinte e dois, ha'e yvatea ma treze raxa'i. Ijytarã ma irundy ryxy rupi omo'ã imo'amy yary guigua. Ha'e gui ijyta hi'aĩ va'e áry omoõ ijao'ia ytarã, yary guigua meme ju.

³ Ijao'ia ma yary guigua. Opy ja'o ijyvýry rupigua ma quarenta e cinco ikuai. Peteĩ-teĩ opy yvate va'e ja'o ma quinze oĩ. Ha'e va'e ma oyta re meme oĩ.

⁴ Janela ma oĩ avi mboapy ryxy rupi, mboapy ryxy-ryxy jovai rupi janela oĩ.

⁵ Okẽ ha'e janela ikuai va'e ma ijapy irundy va'e meme, janela jova-jovai rupi oĩ va'e ha'e javi.

⁶ Ha'e gui ma Salomão ojapo avi opy guaxurã ijyta reta va'e. Ipuku-a ma vinte e dois metros, ha'e rã ipya ma treze raxa'i. Hexei'i rupi oĩ avi oike atyrã ijyta va'e, ijao'ia reve.

⁷ Ojapo avi oo henda openaaty oĩ aguã. Ha'e py ma mba'emo re oikuua pota 'rã. Ha'e nunga rupi oikuua potaaty 'ea. Yary gui meme ojao'ipa, pyrõa guive ijao'ia peve.

⁸ Ha'e rã ngoo oke atyrã ma ojapo oo henda openaaty oĩa rovai oka oĩ va'e mbyte py, ha'e va'e rami guarã ae ojapo. Faraó rajy Salomão ra'yxyrã ogueru va'ekue rorã avi ojapo, henda openaaty oĩa rami guarã ae ju.

⁹ Ha'e va'e oo ha'e javi ma ita iporãve va'e guigua, oa'ãague rami ojaya pyre meme, oka katy ha'e opy katy guarã ojaya pyre anho oiporu, yvy guive ijao'ia rembe peve, ha'e oka katy rupi oka guaxu oĩ va'e peve.

¹⁰ Ha'e gui yvy re ijytarã omoĩ ita ovareve va'e tuvixakueve, mboapy e'ý vy irundy metros meme ipuku-a va'e.

¹¹ Ha'e va'e áry rupi ma ita ovarekueve oa'ãague rupi ojaya pyre, yary voi.

¹² Ha'e gui oka guaxu yvýry rupi ma oĩ mboapy jo'aa ita ojaya pyre, ha'e irundy ma yary gui ombojo'a. Ha'e ramigua ae avi oĩ SENHOR pegua opy ja'o mbyte pygua, ha'e oikeaty rupi voi.

¹³ Ha'e gui ma huvixa Salomão omondouka guembiguai kuery Tiro tetã gui Hirão ogueru aguã.

¹⁴ Ha'e va'e ma kunha Naftali regua imeve'ý va'e pi'a. Tuu ma ava Tiro pygua overa va'e re omba'eapo va'ekue. Hirão ma hi'arandu raxa ha'e oikuapa va'e. Overa va'e gui voi ojapo kuaapa va'e. Ha'e va'e Salomão-a py ou ma vy ojapopa ojapo uka va'e.*

2 Crônicas 3.15-17

¹⁵ Ojapo avi mokoĩ oo ytarã overa va'e guigua. Peteĩ-teĩ yvatea ma oito metros, ha'e gui ixã cinco metros raxa'i va'e ojerea rupi.

¹⁶ Overa va'e gui ojapo avi mokoĩ ijyta áry guarã. Peteĩ-teĩ yvatea ma mokoĩ metros raxa'i.

¹⁷ Ijyta áry guarã ojapo va'ekue ma ombojegua corrente oipoka pyre py. Sete corrente ojapo peteĩ árygua reguarã, ha'e sete avi ojapo amboae reguarã.

¹⁸ Ojapo avi yvyra'a ra'angaa mokoĩ ryxy corrente oĩ va'e áry rupi ombojegua vy ojao'i aguã ijyta árygua rupi. Ha'e rami ae avi ojapo amboae yta áry rupi.

¹⁹ Ijyta áry ojekuaa va'e ma yvoty rami meme, oo henda oĩa va'e py rami avi, mokoĩ metros va'e meme.

²⁰ Ijyta árygua re, yvoty katy'i, oipoka pyre py ombojeguaague rovai'i rupi ma ikuai avi duzentos yvyra'a ra'angaa. Ha'e va'e ma ijyvýry rupi omoĩ ryxy pyre, mokoĩve yta re.

²¹ Ha'e gui ma ijytarã omopu'ã imo'amy templo oikeaty py. Ijaxu e'ýa re omopu'ã va'ekue ma omboery Jaquim, ha'e rã ijaxua re omopu'ã va'ekue ma omboery Boaz.[†]

²² Ijyta árygua ma yvoty rami ojekuaa. Ha'e rami py ojapopa ijytarã.

Overa va'e ryku gui yy mbotyarã ojapoague

²³ Ha'e gui overa va'e ryku gui ojapo avi peteĩ yy mbotyarã. Ha'e va'e ma ojere rei va'e, irundy metros raxa'i ipya va'e, ha'e rã yvatea ma mokoĩ metros raxa'i. Ha'e gui ijyke rupi ixã treze metros raxa'i va'e oa'ãa va'e.*

²⁴ Iguýry rupi ma omoĩ hy'akua ra'angaa, meio metro nhavõ re dez ta'angaa omoĩ. Mokoĩ ryxy omoĩ, hy'a guaxu reve jojaví ojapo avi.

²⁵ Yy mbotya ma doze vaka ra'angaa áry oĩ. Mboapy ma kuaray ijapu'a'ia katy hi'aĩ, mboapy ma kuaray oikea katy, mboapy ma kuaray puku-a katy, ha'e mboapy ma kuaray

* 7:14 Tiro pygua huvixa ma Hirão avi (5.1-12). Ha'e rã apy omombe'u va'e ma Hirão mboae, overa va'e re omba'eapo va'e, huvixa e'ý. † 7:21 Tery Jaquim ma "Imoĩ atãa" 'ea, ha'e rã Boaz ma "Imombaraetea" 'ea, Nhanderuete re ima'endu'aa rupi omboery vy. * 7:23 2 Crônicas 4.1-5

oua katy hi'aī. Ha'e va'e kuery áry ae oī hy'a guaxu. Ha'e rā hevi ma mbyte katy meme ovaē oiny.

²⁶ Ipo guaxu-a ma irundy kuā oīa rami. Ijyvýrykue ma karo rami hembe va'e, yvoty rami ojekuaa. Yy henyēa ma quarenta mil litros rivyvyi va'e.

2 Crônicas 4.6-22

²⁷ Overa va'e gui ojapo avi dez ryru renderā. Peteī-teī ipuku-a ha'e ipya ma mokoī metros rai'i, ha'e rā yvatea ma peteī metro raxa'i.

²⁸ Po rami ma hendarā ojapo: hexe oī imbotya, ijyta reve.

²⁹ Ha'e va'e re ma oī guary, vaka ha'e anjo ipepo va'e ra'angaa. Ijyta re guary ha'e vaka ra'angaa ikuai va'e áry ha'e iguýry ma ombojegua avi.

³⁰ Peteī-teī henda ma iruéra irundy va'e overa va'e guigua meme. Iruéra'y voi overa va'e guigua. Ipy irundy va'e áry ma oī ryryu ytarā mba'emo ryku gui ojapo pyre. Ha'e va'e yvýry ombojegua.

³¹ Hi'áry oī avi ijyta ojere va'e. Ha'e va'e yvatea ma meio metro. Hi'yvypy ho'amy va'e yta ma ojere rei va'e. Ipya ma meio metro raxa. Hexe oī avi ijeguarā. Imbotya ma ijapy irundy va'e, ojere rei e'ŷ va'e.

³² Iruéra irundy va'e ma imbotya guy rupi ikuai. Hi'y ma henda regua ae oī. Peteī-teī ruéra yvatea ma meio metro raxa'i.

³³ Iruéra ma karóxa regua ramigua meme. Hi'y, ijyvýry rupigua, raios, ha'e mbyte regua voi ma overa va'e ryku guigua meme.

³⁴ Peteī-teī hyru renda re, ijapy irundyve re oī hendarā. Ha'e va'e voi hexegua ae oī.

³⁵ Peteī-teī hyru renda áry re oī peteī ojere va'e peteī po yvatea va'e. Henda áry rupi mba'emo yta ha'e imbotya ikuai va'e ma hexegua ae oī.

³⁶ Hexegua ijyta ha'e imbotya ikuai va'e re ma ojapo anjo, guary ha'e pindo ra'angaa. Peteī-teī oī aguā ha'evea py ae. Ijyvýry rupi oī avi ijeguarā.

³⁷ Ha'e rami vy ojapo dez hyru renderā. Peteī-teī ma overa va'e ryku guigua, joo rami meme tuvixa ha'e ojekuaa oiny va'e voi.

³⁸ Ha'e gui ojapo avi dez hy'a overa va'e guigua. Peteī-teī ma oitocentos litros raxa'i va'e. Peteī-teī pya ma mokoī metros rai'i. Dez hyru renda ikuai va'e peteī-teī áry ma oī peteī hy'a.

³⁹ Ha'e gui peteī nhiruī henda omoī opyve katy jaiporu kuaa regua re, ha'e rā peteī nhiruī mboae ma jaiporu kuaa e'ŷa re omoī. Ha'e rā hy'a guaxu ma omoī jaiporu kuaa regua re, kuaray puku-a ha'e oua katy rami.

⁴⁰ Ha'e va'e rire ma Hirão ojapo avi oja guaxu, mba'emo reraa ha'e hy'a. Ha'e rami py ojapopa SENHOR pegua opy guarā huvixa Salomão ojapo uka va'ekue.

⁴¹ Ha'e va'e ma mokoī oo ytarā, mokoī ojere va'e oo yta áry oī va'erā, mokoī oipoka pyre mokoī ijyta árygua reguarā,

⁴² quatrocentos yvyra'a ra'angaa mokoī oipoka pyre reve guarā, ha'e rami vy peteī-teī oipoka pyre re mokoī ryxy omoī yvyra'a ra'angaa, ombojegua aguā mokoī oo yta árygua,

⁴³ dez hyru renderā, ha'e hi'áry dez hy'a oī va'erā,

⁴⁴ hy'a guaxu, ha'e iguýry doze vaka ra'angaa hi'aī va'erā,

⁴⁵ oja guaxu, mba'emo reraa, hy'a mboae, ha'e va'e tembiporu ha'e javi Hirão ojapo huvixa Salomão pe, SENHOR pegua opy guarā. Ha'e javive ma overa va'e guigua omoexakā mbyre meme.

⁴⁶ Ha'e nungarā ma huvixa ojapo ukapa Jordão yakā yvýry mba'emo omboyku vy yapo porā reia áry, Sucote ha'e Zaretā mbyre.

⁴⁷ Ha'e nunga hetá raxa ramo Salomão ndopeja ukai. Ha'e rami vy ndoikuaa porā potai overa va'e guigua poyia re.

⁴⁸ Salomão ojapo uka avi tembiporu SENHOR pegua henda iky'a e'ŷ va'e reguarā: altar ouro guigua, ouro guigua mesa hi'áry mbojape SENHOR renonde omoīa aguā,

⁴⁹ tataendy'y ouro ete'i guigua, peteī nhiruī ijaxu e'ŷa re, ha'e peteī nhiruī ju ijaxua re omoña va'erā henda iky'a e'ŷ ete va'e rexei. Yvoty ra'angaa, tataendyrā ha'e tata mboguea ma ouro guigua meme.

⁵⁰ Ha'e gui hy'a'i, tapyī araa, hy'a, heakuā porā va'e ryrurā, tapyī ryrurā, ouro ete'i guigua meme. Ha'e gui henda iky'a e'ŷ ete va'e ha'e templo ropy henda iky'a e'ŷ va'e rokē ma ouro guigua meme ojapo.

2 Crônicas 5.1

⁵¹ Ha'e rami py huvixa Salomão ojapo ukapa oo SENHOR peguarā. Salomão ogueru avi mba'emo nguu Davi omboaxa ma voi va'ekue: prata, ouro ha'e tembiporu ha'e javi omoimba SENHOR pegua oo re mba'emo hepyve va'e reve.

8

2 Crônicas 5.2-14

¹ Ha'e gui Salomão omboatypa Israel regua nhomongeta va'ety kuery, peteī-teī regua akā ikuai va'e ha'e Israel regua yvatekueve. Guenonde py omboaty Jerusalém py ae, tetā Davi rekoague Sião va'e gui templo katy oguerova aguā SENHOR guexeve guarā ojapo va'ekue ryru.

² Ha'e ramo avakue Israel regua ha'e javi onhemboatypa okuapy huvixa Salomão-a py. Ngaru ojapoa py ijaty sete jaxyta etanim 'epy va'e py.

³ Israel regua nhomongeta va'ety kuery oupa ramo sacerdote kuery oupi heravy SENHOR ayvu ryru.

⁴ Ha'e vy yvy'ā katy oguerova heravy oguy nhemboaty oīaty reve ha'e tembiporu iky'a e'ŷ va'e ha'e py ikuai va'ekue ha'e javi. Sacerdote ha'e levita kuery ae ogueraa.

⁵ Ha'e rā huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oivy. Mymba kuery heta raxa ramo oipapaa aguā voi nda'evei.

⁶ Ha'e gui SENHOR guexeve guarā ojapo va'ekue ryru ma sacerdote kuery omoī okuapy oī aguā py ae, templo ropyve henda iky'a e'ŷ va'e py, henda iky'a e'ŷ ete va'e py ae, anjo ra'angaa ikuai va'e pepo guy rupi.

⁷ Mba'eta anjo pepo ma oipyo imoiny hyru itui aguā áry rupi. Ha'e rami vy yvate rupi ojao'i hyru ha'e yvyra po'i'i hi'yrā ikuai va'e.

⁸ Yvyra po'i'i ipuku ete ramo henda iky'a e'ŷ va'e gui ojekuaa henda iky'a e'ŷ ete va'e rexei'i, va'eri oka katy gui ma ndojekuaai. Ha'e py ma itui aý peve.

⁹ Ha'e gui ayvu ryru py ma mba'eve nda'ipoi Horebe py Moisés itape omoī va'ekue e'ŷ vy. Egito yvy gui Israel kuery oje'oipa jave py ha'e kuery reve guexeve guarā SENHOR ojapo va'ekue.

¹⁰ Ha'e gui henda iky'a e'ŷ va'e gui sacerdote kuery oē ju ramove peteī arai ou vy omonyē SENHOR pegua opy rupi.

¹¹ Ha'e ramo sacerdote kuery nda'evei ha'e py ombo'eapove aguā, mba'eta arai rupi SENHOR guigua rexakā ojekuaa va'e omonyē ixupegua opy rupi.

2 Crônicas 6.1-11

¹² Ha'e gui Salomão aipoe'i:

— SENHOR aipoe'i va'ekue pytūa mbyte oī aguā re.

¹³ Ha'e rami rā anhetē ete xee ajapo peteī oo porā, peteī henda raka'e rā peve reiko aguā — he'i.*

¹⁴ Ha'e gui huvixa ojere vy ogueroayvu porā Israel kuery onhemboaty va'ekue ha'e javi, opu'āmba teri okuapy reve.

¹⁵ Ha'e vy aipoe'i:

* ^{8:13} Nhanderuete Moisés reve ijayvu jave aipoe'i va'ekue arai pytūa py oī aguā, heta va'e kuery ijayvua oendu teī oexa e'ŷ aguā (Êxodo 19.9). Ha'ekue rami ae avi templo ropy henda iky'a e'ŷ ete va'e py SENHOR pegua hyru oīa py ma pytū rei, janela noī, ha'e oikeaty onhemboty ramo, ajukue hokērā omoī mbyre Jesus omano jave omondoroa peve (Mateus 27.51).

— Ta'ima'endu'a porāa SENHOR Israel kuery ruete re, mba'eta xeru rāgue'i Davi pe ijayvuague ojapopa ma opo'akaa rupi. Ha'e vy aipoe'i va'ekue:

¹⁶ “Egitó yvy gui xevyguá kuery Israel regua aipe'apa ára guive, Israel kuery ikuiaia tetā neñ peteíve ndaiporavoi ha'e py peteí oo rejapo aguã xerery oĩ aguã. Ha'e rami teí aiporavo Davi xevyguá Israel kuery ruvixara”, he'i va'ekue.

¹⁷ Ha'e rami avi xeru Davi opy'a re omoí peteí oo SENHOR Israel kuery ruete rery oĩ atyrã ojapo aguã.

¹⁸ Ha'e rami teí xeru Davi pe SENHOR aipoe'i: “Peteí oo xerery oĩ atyrã rejapoxea py ha'evea rami ndepy'a re remoí ha'e rami aguã.

¹⁹ Ha'e rami teí ndee e'ŷ 'rã oo rejapo, ha'e rã nderá'y ndegui oiko va'ekue ae 'rã ojapo xerery oĩ atyrã”, he'i raka'e.

²⁰ Ha'e rami rire SENHOR ojapopa ma ijayvuague, mba'eta xeru Davi rekoria xee aí vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oĩ atyrã.

²¹ Ha'e py ajapo avi ijayvu ryru oĩ aguã. Ha'e va'e py oĩ itape nhaneramoí kuery reve Egito yvy gui SENHOR oipe'a jave guexeve guarã ojapo va'ekue oĩa.

2 Crônicas 6.12-42

²² Ha'e gui Salomão ma Israel kuery ha'e javi oexaa py SENHOR pegua altar renonde py oĩ. Ha'e vy yva katy opo oupi reve

²³ aipoe'i:

— SENHOR Israel kuery ruete, ndoikoi amboae ndee rami guarã ete yva re neñ yva guy yvy re voi, mba'eta nerembiguai kuery opy'a ha'e javi py nerondenre rupi ikuai va'e ndee rerekó 'rã ndereve guarã rejapo va'ekue rami, ha'e remboaxya rupi.

²⁴ Mba'eta rejapo ae ma nerembiguai xeru Davi pe ndeayvuague. Ndee ae ndeayvu rire ndepo'akaa rupi rejapo ma, aŷ roexaa rami ae.

²⁵ Ha'e gui aŷ SENHOR Israel kuery ruete, ejapopa ke nerembiguai xeru Davi pe ndeayvuague. Ha'e vy aipo're va'ekue: “Xerenonde ndoatai 'rã nderekoria tenda Israel kuery re openaaty áry oguapy oiny va'erã, xapy'a rei xerenonde rupi nderá'y kuery voi ndee reikoague rami ikuai aguã omoí porã ramo”, 're va'ekue.

²⁶ Ha'e gui aŷ Israel kuery ruete, tojeupity nerembiguai xeru Davi pe ndeayvuague.

²⁷ — Ha'e rami avi ha'eve 'rã ri nda'u Oreruete yvy re reiko aguã? Ma'ê, mba'eta yva neñ yva yvatevea rupi peve voi nandejai 'rã, ha'e vy kova'e oo xee ajapo va'ekue py katuve ma nda'evei 'rã.

²⁸ Ha'e rami avi SENHOR Xeruete, endu pota ke xee nerembiguai anhembo'e vy ajerurea re, rendu aguã aŷ nerondenre xee nerembiguai ajapukai reve anhembo'ea.

²⁹ Ha'e rami vy ara py ha'e pyávy kova'e oo re rema'ê riae aguã, ha'e kova'e henda “Ha'e py 'rã xerery oĩ”, 'reague re, kova'e henda py nerembiguai onhembo'e oinya rendu aguã.

³⁰ Ha'e gui aŷ, endu nerembiguai ha'e Israel kuery ha'e javi kova'e henda py rojapukai rokuapya. Endu ke yva re ne'amba py reia gui. Endu ha'e oreperdoa guive.

³¹ — Xapy'a rei amongue oirû pe otekoavy ramo ha'ekue re omboayvua ramo ou vy kova'e ndevyguá opy altar oĩ va'e renonde py oura ramo

³² endu ke yva re reia gui, ha'e embovai. Eikuua pota nerembiguai kuery re. Ha'e rami vy embopaga ojejavý va'ekue, hexe ae ojeapa aguã ojapo vaiague. Ha'e rã ha'evea rami oiko va'e ma emboeko porã, ha'evea rami oikoa repy reme'ê vy.

³³ — Ha'e gui xapy'a rei ndevyguá Israel kuery ndevy ojejavý rire ngovaigua kuery renonde rupi ho'apa ma vy ndevy ju ojeko rerova 'rã okuapy. Ha'e vy nderery rupi ojapukai vy kova'e oo py ndevy onhembo'e ha'e ojerure ramo

³⁴ endu ke yva re reia gui, ha'e vy eperdoapa ndevyguá Israel kuery ojejavýague. Ha'e gui ejapo ju yvy tuu kuery pe reme'ê va'ekue katy ojevy aguã rami.

³⁵ — Ha'e gui xapy'a rei nderovai hetá va'e kuery ojejavýpa rire yva rembotypa 'rã nda'okyvei aguã rami, ha'e gui kova'e henda py onhembo'e okuapy vy nderery rupi ojapukai 'rã, ha'e remoingo axy rire ojejavýpa gu ojeko rerova ramo

³⁶ endu ke yva re reĩa gui, ha'e vy eperdoapa nerembiguai kuery, ndevygua Israel kuery ojejavyague. Embo'e ju tape porã rupi ikuai aguã, ha'e gui embou oky yvy ndevygua kuery ikuai aguã reme'ẽ va'ekue áry.

³⁷ — Ha'e gui xapy'a rei kova'e yvy re oiko 'rã karuai e'ŷ vy mba'eaxy vaikue, ha'e'ŷ vy hu'ũmbaa, hatãmba reia, e'ŷ vy tuku karu ha'e ape'i okaru va'e, xapy'a rei hovaigua kuery ojokopa 'rã ha'e kuery retã, ha'e'ŷ vy oiko 'rã ai vaikue e'ŷ vy mba'eaxy va'e rei,

³⁸ ha'e gui xapy'a rei mava'e rã rei onhembo'e vy ojerure 'rã, ha'e'ŷ vy ndevygua Israel kuery ha'e javi 'rã ojerure okuapy, peteĩ-teĩ opy'a raxya oikuaa vy kova'e oo oĩa katy opo omoĩ ramo

³⁹ endu ke yva re ne'amba py reĩa gui, ha'e vy eperdoa. Ejapo, ha'e vy eme'ẽ peteĩ-teĩ pe oikoague repy, ha'e kuery py'a re oĩ va'e reikuaapa va'e vy, mba'eta ndee anho'i pavẽ py'a regua oikuaa va'e reiko.

⁴⁰ Ha'e ramo nerenonde ha'e kuery ojererokyje aguã, oreru kuery yvyrã reme'ẽ va'ekue re ikuia pukukue re.

⁴¹ — Ha'e gui amboae regua voi, ndevygua Israel kuery regua e'ŷ ikuai va'eri oyvy mombyrya gui ou avi 'rã nderery rupi ikuai aguã,

⁴² (mba'eta ha'e kuery voi oendu 'rã nderery yvateve va'e omombe'ua rã, ha'e ndejyva reupi vy ndepo'akaa rexu ukaague), ha'e gui ha'e kuery onhembo'e avi 'rã kova'e oo oĩa katy oma'ẽ reve,

⁴³ ha'e ramo endu ke yva re ne'amba py reĩa gui, ha'e ejapopa amboae regua kuery ndevy ojerurea, ha'e rami vy yvy regua ha'e javi nderery oikuaa aguã, ndevygua Israel kuery rami ha'e kuery voi nerenonde ojererokyjea rupi ikuai aguã, ha'e oikuaapa aguã kova'e oo xee ajapo va'ekue py nderery remoĩague.

⁴⁴ — Ha'e gui xapy'a rei ndevygua kuery oje'oi 'rã ngovaigua kuery reve joe opu'ã aguã katy, ha'e gui tape rupi remondoukaa py onhembo'e 'rã ndevy pe SENHOR, kova'e tetã reiporavo va'ekue ha'e kova'e oo nderery oĩ atyrã rejapo uka va'ekue katy oma'ẽ ramo

⁴⁵ endu ke yva re reĩa gui onhembo'e vy ojerure okuapy, ha'e ejapo ha'evea rami.

⁴⁶ — Xapy'a rei ma ha'e kuery ojejavy 'rã nderovai (mba'eta jipoj ojejavy e'ŷ va'erã), ha'e ramo ha'e kuery rovai ndepoxy vy remboaxapa 'rã hovaigua kuery po py, ha'e kuery guekoia katy ogueraapa aguã escravo-rã, mombyry e'ŷ vy ha'e'i rupi teĩ ae ma.

⁴⁷ Ha'e gui yvy mamo rã rei escravo-rã ogueraa ague re ikuia py xapy'a rei ha'e kuery onhemboaxy vy ojeko rerova 'rã, ha'e yvy escravo ikuia py ae ndevy ojerure vy aipoe'i 'rã okuapy: "Rojejavypa, teko vai rupi anho orekuai va'ekue", he'i 'rã okuapy.

⁴⁸ Ha'e rami vy xapy'a rei ndevy guarã ju ojeko rerova 'rã opy'a ha'e onhe'ẽ ha'e javi py, yvy hovaigua kuery escravo-rã ogueraa ague py ae, ha'e vy ndevy onhembo'e 'rã okuapy oyvyrã tuu kuery pe reme'ẽ va'ekue katy oma'ẽ reve, kova'e tetã ha'e kova'e oo nderery oĩ atyrã ajapo va'ekue katy voi.

⁴⁹ Ha'e ramo endu ke yva re ne'amba py reĩa gui ha'e kuery onhembo'e vy ojerure okuapy, ha'e ejapo ha'evea rami.

⁵⁰ Eperdoa ndevygua kuery ndevy ojejavyague, nderovai rupi opa mba'e py ojapo vai rã. Ejapo escravo-rã heraare kuery omboaxy aguã rami.

⁵¹ Mba'eta ndevygua kuery ma ndevy guarã ae Egito yvy gui reipe'a va'ekue, tata rupa ferro guigua mbyte py ojexavaia gui.

⁵² Ha'e rami vy eikuua pota riae nerembiguai ha'e ndevygua Israel kuery ojerure okuapy re, opa mba'e re ndevy ojapukai rã rendu aguã.

⁵³ Mba'eta SENHOR xeruete, ndee ma kova'e yvy regua ha'e javi mbyte gui reipe'apa raka'e ore ndevygua kuery ae orekuai aguã, Egito yvy gui oreru kuery reipe'apa jave nerembiguai Moisés rupi ndeayvuague rami vy — he'i.

Salomão heta va'e kuery ogueroayvu porãague

⁵⁴ Ha'e gui Salomão opa ma SENHOR pe onhembo'e ha'e ojerure rire, guenapy'ã re oĩ reve yvate katy opo oupi oinya gui opu'ã ju SENHOR pegua altar oĩ va'e renonde gui.

⁵⁵ Opu'ã ho'amy vy ogueroayvu porã Israel kuery ijaty okuapy va'e ha'e javi. Ha'e vy ijayvu atã reve aipoe'i:

⁵⁶ — Ta'ima'endu'a porãa SENHOR re, ojeupequa Israel kuery pe opytu'u aguã ome'ẽ rire ijayvuague ha'e javi rami vy. Nhanemoingo porã aguã re guembiguai Moisés rupi ijayvuague neĩ peteĩ'i ayvu nomboaxa rivei.

⁵⁷ Ha'e gui SENHOR Nhanderuete toiko riae peẽ kuery reve, nhaneramoĩ kuery reve oikoague rami ae. Tanhanepytyvõ e'ŷ eme, tanhandereja eme guive,

⁵⁸ nhanekuraxõ tomombyta ojeupe guarã ae, ixuguigua tape ha'e javi rupi nhandekuai aguã, ha'e jajapopa aguã ojapo uka va'ekue, ijayvuague ha'e oipotaa nhanderu kuery pe omombe'u va'ekue.

⁵⁹ Tove po rami xeayvu vy SENHOR renonde rupi ajerurea toĩ riae SENHOR Nhanderuete renonde py, ara py ha'e pyávy, ha'e rami vy guembiguai ha'e ojeupequa Israel kuery oepy kuerei aguã, ko'ẽ nhavõ nhaikotevãa rami,

⁶⁰ yvy regua ha'e javi oikuua aguã SENHOR ae Nhanderuete oikoa, ha'e amboae ndoikoia.

⁶¹ Tove penekuraxõ py SENHOR Nhanderuete pegua ete tapendekuai, ha'e ijayvuague rupi anho peiko ha'e ojapo uka va'ekue pejapopa aguã, aŷ pejapoa rami ae — he'i.

2 Crônicas 7.4-10

⁶² Ha'e gui huvixa ha'e Israel kuery hexeve ikuai va'e ha'e javi ma mymba kuery ome'ẽ okuapy SENHOR renonde.

⁶³ Salomão ma SENHOR reve peteĩ rami ju ikuiaia reguarã ome'ẽ avi vinte e dois mil vaka ha'e cento e vinte mil vexa'i kuery. Ha'e rami py huvixa ha'e Israel kuery ha'e javi reve SENHOR pegua oo omboaxa okuapy ipo py.

⁶⁴ Ha'e va'e árave huvixa omboaxa avi oka SENHOR pegua oo rexei oĩ va'e. Mba'eta ha'e py ae ome'ẽ mymba oapy reve, ha'e hexeve peteĩ rami ikuai aguã regua kyrakue. Mba'eta altar overa va'e guigua SENHOR renonde oĩ va'e ma kyri'i ete rã noimba reguai mymba oapy reve ome'ẽ va'e, mba'emo aju guigua ha'e hexeve peteĩ rami ikuai aguã regua kyrakue oapy va'e.

⁶⁵ Ha'e va'e jave ae avi Salomão ojapo ngaru oguy'i py ikuai aguã Israel kuery ha'e javi reve.[†] Heta ete ijaty okuapy SENHOR Nhanderuete renonde py, Hamate tekoá py nhavaẽa'i ha'e Egito yakã katy'i gui ou va'ekue. Sete ára rire sete ára re ju, ha'e javi vy catorze ára re ikuai.

⁶⁶ Ngaru oikoa py oito araa py ma omondoukapa heta va'e kuery, ha'e rã ha'e kuery ju ogueroayvu porã okuapy nguvixa. Ha'e gui mae ma oje'oipa ju ngoo katy, ov'y'a ete ha'e opy'a py oguerovy'a reve opa mba'e py SENHOR guembiguai Davi pe ojapoague, ha'e ojeupequa Israel kuery pe guive.

9

2 Crônicas 7.11-22

¹ Ha'e gui huvixa Salomão ojapopa ma oo SENHOR peguarã, ngoorã ha'e opa mba'e onhembopy'aa rami ojapoxe va'ekue voi.

² Ha'e ramo peteigüe ju ixupe SENHOR ojexa uka, Gibeão py ojexa ukaague rami.

³ Ha'e vy SENHOR aipoe'i:

— Xee aendu ae ma xerenonde py renhembo'e vy rejerurea. Ha'e rami vy xee ajapo oo rejapo va'ekue iky'a e'ŷ va'e oĩ aguã rami, ha'e py xerery amoĩ aguã raka'e rã peve guarã. Ha'e va'e re ama'ẽ vy xepy'a py xema'endu'a riae 'rã ára nhavõ.

⁴ Ha'e gui xapy'a rei xerenonde rupi nderu Davi oikoague rami ndee voi reiko ramo, ndepy'a ha'e javi py anhetẽ ete rupi ae ri reiko vy ajapo uka va'ekue, xeayvuague ha'e aipotaa ha'e javi rejapopa ramo,

⁵ ha'e ramo raka'e rã peve guarã amoĩ atã 'rã nderu Davi pe xeayyuague, hamymino kuery va'e regua amoingo riae 'rã xevygua Israel kuery re opena va'erã. Ixupe aipoa'e

[†] 8:65 Ngaru oguy'i py ikuai aguã regua ma ha'e kuery rekorã Moisés rupi oeja pyre (Levítico 23.33-36; Deuteronômio 16.13-15).

va'ekue: "Nderekovia ndoiko e'ŷi 'rã tenda Israel kuery re openaaty áry oguapy oiny va'erã", ha'e va'ekue.

⁶ Ha'e gui xapy'a rei peẽ ha'e pendera'y kuery marã rami vy xegui pejep'e a vy ajapo uka va'ekue ha'e xeayvuague ndapejapovei vy peo 'rã tuuete kuery mboae re, ha'e kuery pembojeroviaa rupi,

⁷ ha'e rami ri ramo xee aipe'apa 'rã Israel kuery ijyvyrã ame'ẽ va'ekue gui, ha'e kova'e oo xerery oĩ atyrã aiky'a'opa va'ekue voi mombyry amombopa 'rã xerenonde gui. Ha'e rami rire Israel kuery ikuai 'rã yvy regua kuery ojojai rei vy ijayvu rei okuapy aguã rami.

⁸ Kova'e oo ma aŷ omboeteave teĩ ha'e va'e jave py oĩague rupi oaxa va'e kuery oexa vy onhemondyipa 'rã. Ha'e vy otuvy nhe'ẽ ha'e aipoe'i 'rã: "Mba'e re tu SENHOR guĩ rami ete ri ombovaipa uka kova'e yvy ha'e kova'e oo?" he'i 'rã okuapy.

⁹ Ha'e rã ombovaia 'rã: "Ha'e rami ete ombovaipa uka mba'eta ha'e kuery oejapa rire SENHOR nguuete Egito yvy gui tuu kuery oipe'a va'ekue, ha'e tuuete mboae pe ju ova vy omboete ha'e ombojerovia okuapy ramo. Ha'e nunga rupi ae rima ha'e kuery áry SENHOR ombou raka'e guĩ rami ete ojexavai aguã", 'ea 'rã.

2 Crônicas 8.1-18

¹⁰ Vinte ma'etýa py mae ma Salomão ojapopa mokoĩ oo, SENHOR peguarã ha'e ojeupe guarã guive.

¹¹ Ha'e Salomão oipotaa rami ixupe Tiro pygua huvixa Hirão ma ombou yvyra yary ha'e cipreste guigua, ouro guive. Ha'e gui Hirão pe ju Salomão omboaxa vinte tetã Galiléia yvy regua.

¹² Ha'e ramo guetã Tiro gui Hirão oo oexa aguã tetã Salomão omboaxa va'ekue, teĩ ndojou porãi.

¹³ Ha'e rami vy aipoe'i ixupe:

— Xeryvy, kova'e tetã ae ma nhi'ã xevy remboaxa va'ekue? — he'i. Ha'e rami vy omboery Cabul yvy, aŷ peve guarã.*

¹⁴ Hirão ma huvixa pe ouro guigua quatro mil quilos rivyvvi omondouka va'ekue.

¹⁵ Ha'e gui Salomão ma nhomomba'eapo nhea'ã SENHOR pegua oo ojapo aguã, ngoorã, ha'e gui Milo, Jerusalém korarã, Hazor tetã, Megido ha'e Gezer tetã avi,

¹⁶ mba'eta Egito pygua huvixa Faraó ou vy Gezer tetã re ipo'aka va'ekue. Ha'e vy oapypa vy ojukapa ha'e py cananeu kuery ikuai va'ekue. Ha'e vy Salomão pe ju omboaxa ta'yxyrã guajy ome'ẽ jave.

¹⁷ Ha'e nunga rupi ae Salomão ojapo ju Gezer, Bete-Horom yvy'ã guy rupigua,

¹⁸ Baalate ha'e Tadmor, ha'e va'e yvy re tekao e'ŷa oĩ va'e py ae.

¹⁹ Ojapo avi tetã mba'emo oguereko va'e ha'e javi omoĩ porã atyrã, ha'e tetã ikaróxa ikuai aguã, kavaju árygua kuery rekoarã, ha'e Jerusalém py ojapoxe va'ekue ha'e javi, Líbano ha'e amboae yvy re openaa ha'e javi rupi peve.

²⁰ Ha'e gui okuave teri amorreu kuery regua, heteu, ferezeu, heveu ha'e jebuseu kuery Israel kuery regua e'ŷ ikuai va'e.

²¹ Ha'e va'e kuery ra'y kuery okuave va'e ma Israel kuery ndojukapai va'ekue teĩ Salomão omomba'eapo nhea'ã, aŷ peve guarã.

²² Ha'e rã Israel kuery va'e regua ma neĩ peteĩ Salomão nomomba'eapo escravo rami. Ha'e va'e kuery ma ixupe ikuai joe opu'ãa rupi, huvixa kuery, yvatekueve, capitão kuery, karóxa re opena va'e ha'e imboguataaty kuery.

²³ Ha'e gui Salomão rembiguai kuery mba'emo ojapo uka va'e re opena va'ety yvatekueve ma quinhentos e cinqüenta ikuai. Ha'e va'e kuery ma ombo'eapo va'e kuery re opena.

²⁴ Ha'e gui Faraó rajy ma tetã Davi rekoague py oĩague gui ova ju hoorã Salomão ojapo uka va'ekue py. Ha'e gui mae ojapo Milo.[†]

* 9:13 Tery Cabul ma "Mba'verã ndovarei va'e" 'ea. Ha'e rami omboery ndojou porãi vy. † 9:24 Milo ma peteĩ henda Jerusalém tetã regua Salomão omombaraete va'ekue.

25 Ma'etŷa nhavõ mboapykue kuerei 'rã Salomão ome'ẽ mymba kuery oapy reve ha'e peteĩ rami ikuai aguã regua, altar SENHOR peguarã ojapo va'ekue áry. SENHOR renonde altar oĩ va'e áry oapy uka avi heakuã porã va'e. Ha'e rami py ojapopa oo ixupe guarã.

26 Eziom-Geber py huvixa Salomão ojapo avi kanoã guaxu, Elate katy'i, ye'ẽ pytã va'e yvýry, Edom yvy re ae.

27 Ha'e va'e kanoã guaxu mboguataarã Hirão ombou guembiguai kuery yy rupi oguata va'ety, ye'ẽ rupi ikuai kuaa va'e meme, Salomão rembiguai kuery reve omboguata va'erã.

28 Ha'e kuery ma Ofir py ovaẽ vy ha'e gui ojogua catorze mil quilos ouro guigua, ha'e gui huvixa Salomão pe ju ogueru.

10

2 Crônicas 9.1-12

1 Ha'e gui Sabá pygua huvixa kunha oendu avi Salomão reko omombe'ua rã, SENHOR rery omboetea voi. Ha'e rami vy ou haxy-axy va'e re oporandu aguã.

2 Ha'e vy Jerusalém tetã py ovaẽ guembiguai kuery heta va'e reve. Guymba camelo kuery ombovoyi heruvy tembi'u irûrã, mbovy rei e'ŷ ouro ha'e ita iporâve va'e re. Ha'e gui Salomão renonde py ovaẽ vy ixupe oporandu onhembopy'ague ha'e javi rami.

3 Ha'e ramo opa mba'e re oporandu rã Salomão ombovai, mba'eta ixupe neĩ peteĩ henda py ma voi ndaxyi omombe'u porâve aguã.

4 Ha'e ramo Sabá pygua huvixa kunha oikuua Salomão 'arandua ha'e javi, oexa avi oo ojapo uka va'ekue,

5 mesa áry tembi'u oguerua va'e, yvatekueve ikuaiaty, hembiguai kuery ombo'eapoa, ijao guive, karo rerua kuery ha'e mymba kuery altar áry SENHOR pe oapyaty. Ha'e va'e ha'e javi oexa vy onhemondyi rei oiny.

6 Ha'e vy aipoe'i huvixa pe:

— Anhetẽ ete ae ra'e xerekaoa py ayvua ndereko regua aendu va'ekue ha'e ne'arandua regua voi.

7 Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexo py aexa e'ŷa ja. Anhetẽ neĩ mbyte rupi peve ma voi xevy nomombe'uai va'ekue, mba'eta ndereko omombe'ua rã aenduague gui ne'arandupave ra'e, rerekopave ha'e ndere ima'endu'a porã mbyve ete va'e.

8 Ovy'a ete okuapy nerembiguai avakue nerondenre rupi ikuai va'ety, mba'eta ha'e kuery oendu 'rã ne'arandua rupi ndeayvua.

9 Ta'ima'endu'a porãa avi SENHOR Nderuete re, mba'eta ndererovy'a vy tenda Israel kuery re openaaty áry nemoĩ rire. Israel kuery SENHOR oayvu riae vy ae nemoĩ huvixarã, ha'evea rami rejoguerekoo ha'e reikuua pota aguã — he'i.

10 Ha'e rami vy huvixa pe kunha va'e ome'ẽ quatro mil quilos ouro guigua, heta tembi'u irûrã ha'e ita iporâve va'e guive. Neĩ peteigueve ma ndogueruai teri mba'emo porã Sabá pygua huvixa kunha Salomão pe ome'ẽ va'ekue ramigua ete.

11 Ha'e gui Hirão mba'e kanoã guaxu Ofir gui ouro ogueru va'e ma ha'e katy gui ogueru avi yvyra sândalo aygue ha'e ita iporâve va'e.

12 Ha'e va'e yvyra sândalo gui ma huvixa Salomão ojapo uka jopy-jopy ovyaty SENHOR pegua opy ha'e ngopy guarã, ha'e gui mba'epu ixã reta va'e ha'e mbaraka oporaei va'e kuery peguarã. Ha'e va'e regua yvyra ma neĩ peteigueve ndogueruai teri ha'e py, ha'e aŷ peve voi ndoexaavei ha'e va'e regua yvyra.

13 Ha'e gui Sabá pygua huvixa kunha pe huvixa Salomão ju ome'ẽ mba'emo ojerurea ha'e javi, mba'emo ome'ẽxeia'i py ome'ẽ va'e áryve rupi. Ha'e ramo ojevy vy oyvy katy ju oo, guembiguai kuery ha'e javi reve.

2 Crônicas 1.14-17; 9.13-28

14 Ha'e gui ma'etŷa nhavõ Salomão pe ouro oguerua va'e poyikue ma vinte e dois mil quilos,

15 mba'emo vendea kuery, mba'emo mboekoviaaty, Arábia pygua huvixa ha'e ijyvy re opena va'ety kuery ixupe ome'ẽ kuerei va'e áryve.

¹⁶ Ha'e ramo ouro ombope pyre gui Salomão ojapo duzentos hu'y jokoa tuvixave va'e. Peteĩ-teĩ hu'y jokoarã ma seis quilos ouro opejaa.

¹⁷ Ouro ombope pyre gui ojapo avi trezentos hu'y jokoa kyríve va'e. Ha'e va'e regua hu'y jokoarã peteĩ-teĩ ma dois quilos rai'i ouro opejaa. Ha'e va'e ma oo Líbano ka'aguy regua guigua py huvixa omoĩ porã ukapa.

¹⁸ Huvixa ojapo avi peteĩ tenda tuvixave va'e marfim guigua, ha'e vy onhovãmba ouro ete py anho.

¹⁹ Ha'e va'e tenda renonde guarã ma ojapo mboapy meme pyrõa. Henda kupe ma ojere rei va'e. Ijyke jovaise re ma omoĩ avi jyva ytarã oguapayaty yvýry, ha'e ijyva yta yvýry ma mokoĩ guary ra'angaa omopu'ã imo'amy.

²⁰ Mboapy meme pyrõa ikuai va'e áry ma doze avi omoĩ guary ra'angaa, peteĩ-teĩ pyrõa apy reguarã. Ha'e va'e nunga ma neĩ peteїve huvixa pe ma voi ojapoa va'e'ŷ teri.

²¹ Karo huvixa Salomão oy'uat yva'e ma guive rã ouro guigua meme, ha'e gui oo Líbano ka'aguy regua guigua py tembiporu ikuai va'e voi ouro guigua meme avi. Ha'e va'e re neĩ ruxã'i ma voi noĩ prata, mba'eta Salomão oĩ jave prata rive nombovarei.

²² Mba'eta huvixa oguerekko reta ye'ẽ rupi Társis guigua kanoã guaxu, Hirão mba'e reve omboguataa va'e. Mboapy ma'etýa py kuerei 'rã Társis gui kanoã guaxu ojevy okuapy vy ogueru ouro, prata, marfim, karaja ha'e jayru guaxu.

²³ Ha'e rami vy yvy jave re huvixa kuery ikuai va'e gui huvixa Salomão ipo'akave, o'arandua py ha'e mba'emo oguerekopaa py.

²⁴ Ha'e ramo oĩ py yvy jave gui ou 'rã okuapy o'arandua rupi ijayvu rã oendu aguã.

²⁵ Ma'etýa nhavõ peteĩ-teĩ ogueru 'rã mba'emo ixupe ome'ẽ va'erã: ouro ha'e prata guigua, ajukue, tembiporu, kavaju ha'e mburika kunha, tembi'u irûrã guive.

²⁶ Ha'e ramo Salomão oguerekopave ov ykaróxa ha'e kavaju áry guarã. Mil e quatrocentos karóxa oguerekko, ha'e doze mil kavaju áry guarã. Ha'e va'e ma joa py e'ŷ-e'ŷ 'rã oguerekko tetã karóxa ikuaiaty rupi, Jerusalém tetã py huvixa oĩ py guive.

²⁷ Prata ma ita rami rive huvixa omboetave Jerusalém py, ha'e gui yary voi oata aguã rami e'ŷ ojapo sicômoro'y teko a e'ŷa rupi ikuai va'e rami rive.

²⁸ Kavaju Salomão rymbarã ma Egito ha'e Cilícia yvy gui ogueru. Cilícia guigua ma huvixa rembiguai mba'emo vendea kuery ae ogueru hepy oĩa rami.

²⁹ Ha'e rã Egito gui peteĩ-teĩ karóxa ogueru 'rã seiscientos hatã'i va'e repy prata guigua re, ha'e rã kavaju ma cento e cinqüenta repy re. Ha'e rami ae avi mba'emo vendea kuery ovende ju 'rã heravy heteu ha'e Síria pygua huvixa kuery peguarã.

11

Tuuete kuery mboae re rive Salomão ojeroviaague

¹ Ha'e gui Faraó rajy anho e'ŷ huvixa Salomão oayvu, heta oguerekko avi kunhague yvy mboae guigua: Moabe, Amom, Edom, Sidom ha'e Hete guigua.

² Ha'e va'e regua kunhague re ma SENHOR aipoe'i ma voi va'ekue Israel kuery pe: "Pejoguerekko eme ha'e kuery reve, neĩ ha'e kuery ma voi tapendererekko eme, pendepy'a py penhembotavy uka e'ŷ aguã tuuete kuery mboae re rive pevapa aguã", he'i raka'e teĩ ha'e va'e regua ae Salomão oayvu.

³ Ha'e rami vy setecentos kunhague oguerekko huvixa rajy meme, ha'e gui trezentos ta'xyx yevy kuery. Ha'e va'e kunhague ma ojapo amboae rami rei ipy'a aguã rami.

⁴ Ha'e vy tuja'ive ma jave ta'xyx kuery ombopy'a rerova ete tuuete mboae ramigua kuery re ju ombojerovia aguã. Ha'e ramo opy'a re anhetê rupi ve'ŷ oiko SENHOR nguuete pe, nguu Davi oikoague rami e'ŷ.

⁵ Ha'e rami vy Sidom pygua kuery xyete ra'angaa Astarote pe Salomão oiko, ha'e gui Amom pygua kuery ruete Milcom ojeguarupy va'e pe guive.

⁶ Ha'e rami vy SENHOR renonde ha'eve'ŷ va'e Salomão ojapo vy SENHOR pe anho ve'ŷ oiko, nguu Davi oikoague rami e'ŷ.

⁷ Ha'e va'e jave ma Salomão ojapo peteĩ oo Moabe kuery ruete Quemos ojeguarupy peguarã, yvyty Jerusalém katy'i ae, ha'e Amom kuery ruete Moloque ojeguarupy peguarã guive.

⁸ Ha'e rami ae avi gua'yxy kuery peteĩ-teĩ regua pe ojapo, ha'e kuery nguuete ramigua kuery pe heakuã porã va'e oapy ha'e mymba ojuka aguã.

Salomão rovai Nhanderuete onhemoïague

⁹ Ha'e nunga rupi SENHOR opu'ã Salomão rovai, SENHOR Israel kuery ruete pe oikoa gui ova ramo opy'a py, mokoïgue ixupe ojexa uka va'ekue ri.

¹⁰ Ha'e rami e'ŷ aguã ijayvu ae ma, tuuete ramigua kuery mboae pe oiko e'ŷ aguã. Ha'e rami teĩ ndoikoi ae SENHOR ijayvuague rami.

¹¹ Ha'e nunga rupi SENHOR aipoe'i ju Salomão pe:

— Nami ete reiko vy xerupive guarã ajapo va'ekue ha'e ajapo uka va'ekue gui rejep'e a ma ramo ndegui ju aipe'a 'rã ndepo'akaa, nerembiguai pe ju amboaxa aguã.

¹² Ha'e rami teĩ reĩ teria ja ndaipe'ai 'rã, nderu Davi re ama'ẽ vy. Ha'e rami 'rãgue py nder'a'y po gui 'rã aipe'a.

¹³ Ha'e rami avi ndaipe'apai 'rã guive ndepo'akaa. Ha'e vy nder'a'y po py aeja 'rã peteĩ regua, xerembiguai Davi re ha'e Jerusalém tetã re xema'endu'a vy, aiporavo rire.

Salomão rovai guarã Nhanderuete omopu'ãague

¹⁴ Ha'e gui SENHOR omopu'ã Salomão rovai guarã. Ha'e va'e ma Edom pygua Hadade, Edom pygua huvixa ramymino ae.

¹⁵ Mba'eta Edom yvy re Davi oiko jave ixondaro kuery ruvixa Joabe voi ou avi omanogue onhono porã aguã. Ha'e va'e jave py ojuka avakue Edom pygua ha'e javi.

¹⁶ (Mba'eta mboapy meme jaxy re Joabe oiko raka'e ha'e py Israel pygua xondaro kuery reve, Edom pygua avakue ojukapa peve.)

¹⁷ Ha'e va'e jave py Hadade kunumi teri reve onha ovy amongue avakue Edom pygua tuu rembiguai kuery reve, Egito katy oje'oi aguã.

¹⁸ Midiã yvy gui oje'oi vy Parã katy oguata jogueravy. Ha'e py ojouve ju ngupive guarã, ha'e vy oguerovaëmba Egito pygua huvixa Faraó-a py. Ha'e va'e ma Hadade pe ome'ẽ peteĩ oo ijyvyrã guive, ha'e vy ijayvu oipytyvõ aguã re.

¹⁹ Faraó omboaxy ete vy Hadade ra'yxyrã ome'ẽ avi ngovaja gua'yxy kypy'y va'e.

²⁰ Ha'e va'e ma ta'yxy Tafnes kypy'y. Ha'e va'e ma oikuavã'i ava'i, Genubate hery va'e. Ha'e va'e ma Faraó ro py ae Tafnes omongakuaa herekovy, Faraó ra'y kuery rupi ae Genubate oiko.

²¹ Ha'e gui Egito yvy re Hadade oikoa py oendu Davi guamoï kueryague rami ndoikovevei'i maa, ha'e ixondaro kuery ruvixa Joabe voi omano ma avia. Ha'e ramo Hadade aipoe'i Faraó pe:

— Tajevy ju xerekaoa katy.

²² Ha'e ramo Faraó oporandu ixupe:

— Mba'e tu xereve reikoa py oata ndevy, ndeyvy re rejevy aguã?

Ombovai:

— Any, mba'eve rei ndoatai, teĩ taa ju — he'i.

²³ Nhanderuete omoingo avi amboae Salomão rovai guarã. Ha'e va'e ma Eliada ra'y Rezom, opatõ Zobá pygua huvixa Hadadezer gui ojava va'ekue.

²⁴ Ha'e va'e ma guembiguai kuery avakue omboaty vy onhemoingo ha'e kuery ruvixa. Ha'e gui Davi pegua xondaro kuery jojukapa rire ha'e kuery ma Damasco katy oje'oi. Ha'e py ma huvixaverã omoï okuapy Rezom.

²⁵ Ha'e va'e ma Salomão oikovea pukukue re Israel kuery rovaigua oiko. Hadade rami ae avi omoingo axy, Israel kuery re nda'ija'ei vy Síria pygua kuery ruvixa onhemoingo rire.

Israel kuery ruvixa Jeroboão oĩ 'rãa re profeta Aías ijayvu ma voiague

²⁶ Ha'e gui Nebate ra'y Jeroboão ma Efraim regua oiko tekao Zereda pygua, Salomão rembiguai ae oiko. Ixy ma imeve'ŷ va'e, Zerua hery va'e. Ha'e va'e ava ae opo oupi huvixa rovai.

²⁷ Po rami ae huvixa rovai oupi opo. Ha'e va'e jave py Salomão ma Milo ojapoa rupi ombojoja yvy nguu Davi rekoague rupi.

²⁸ Ha'e gui Salomão oexa rā Jeroboão ava ipy'a guaxu ha'e oiko kuaa va'e, kunumi ombo'epo kuaa va'e ae. Ha'e ramo omopena José ramymino kuery regua omomba'epo nhea'āmby kuery ha'e javi re.

²⁹ Ha'e gui ma Jerusalém tetā gui Jeroboão oguata vy tape rupi nhovaexī Siló pygua profeta Aías reve. Ha'e va'e ma peteī ao puku ipyau'i va'e py onhemonde ovvy, ha'e rā ha'e kuery moko'i ikuai nhuñdy py.

³⁰ Ha'e ramo Aías ao puku ipyau'i va'e ojee gui omboi vy omondoro. Doze ra'ykue omboja'o.

³¹ Ha'e vy aipoe'i Jeroboão pe:

— Ejopy ke dez ra'ykue ndejeupe guarā, mba'eta po rami ijayvu SENHOR Israel kuery ruete: Ma'ē, Salomão po gui amondoropa 'rā ipo'akaa, ha'e vy ndevy pe ju amboaxa 'rā dez regua.

³² Ha'e rami avi peteī regua aeja teri 'rā ipo py, xerembiguai Davi ha'e Jerusalém tetā re ama'ē vy, Israel kuery ha'e javi regua gui aiporavo rire.

³³ Mba'eta xegui Salomão ojepe'a vy guenapy'ā re oī Sidom kuery xyete Astarote ra'angaa renonde, Moabe pygua kuery ruete Quemos ha'e Amom pygua kuery ruete Milcom ra'angaa renonde. Xeguigua tape rupi ve'ŷ oiko, xerenonde ha'eve va'e ndojapoxevei vy. Xeayvuague rupi ve'ŷ, aipotaa rami ve'ŷ oiko, tuu Davi oikoague rami e'ŷ.

³⁴ Ha'e rami teī ixugui ipo'akaa ndaipe'apa etei 'rā guive. Ha'e rami 'rāgue py oikovea pukukue reguarā amoī huvixarā, xerembiguai Davi aiporavo va'ekue re ama'ē vy, mba'eta Davi ma mba'emo ajapo uka va'ekue ha'e xeayvuague ha'e javi rupi oiko va'ekue.

³⁵ Ha'e rā ta'y po gui ma aipe'a 'rā ipo'akaa, dez regua va'e, ndevy pe ju amboaxa 'rā.

³⁶ Ta'y po py peteī regua'i 'rā ame'ē, xerenonde xerembiguai Davi rekovia peteī hendy va'e oī riae aguā raka'e rā peve guarā, Jerusalém tetā xerery oī atyrā aiporavo va'ekue py ae.*

³⁷ Ha'e gui ndee romoī ramo ndepo'aka 'rā ndepy'a py reipota va'e re rei, Israel pygua huvixa reī vy.

³⁸ Ha'e gui xee ajapo uka va'e ha'e javi ri rejapo ramo, ha'e xeguigua tape rupi reiko vy xerenonde rupi ha'evea ramigua ri rejapo, xeayvuague ha'e ajapo uka va'ekue remoīmba ri xerembiguai Davi ojapoaque rami avi, ha'e ramo xee aiko 'rā ndereve, ha'e ndevy ajapo 'rā peteī oo oī riae va'erā, Davi pe ajapo va'ekue ramigua, mba'eta ndevy pe amboaxa 'rā Israel kuery re repena aguā.

³⁹ Ha'e rā Davi ramymino kuery ma ambojexavai 'rā, teī raka'e rā peve'ŷ guive — he'i.

⁴⁰ Ha'e rami rā Salomão ojukaxe teī Jeroboão. Ha'e va'e oiko katu vy Egito yvy katy ojava, Egito pygua huvixa Sisaque reve jogueroayvu aguā. Ha'e py ae oiko Salomão omano peve.

2 Crônicas 9.29-31

⁴¹ Ha'e gui oīve rei tema Salomão rekoke regua. Ha'e rami avi hi'arandua ha'e mba'emo ajapo va'ekue ha'e javi noī 'rā teve kuaxia Salomão rekoke oīa re?

⁴² Quarenta ma'etŷ re Salomão oī huvixa Jerusalém py, Israel kuery ha'e javi re openaa rupi.

⁴³ Ha'e gui guamoī kueryague rami ndoikovevei'i ma ramo onhono porāa tetā Davi rekoague py ae. Ha'e gui ta'y Roboão ju oī nguu rekovia.

* 11:36 “Hendy va'e” he'ia ma huvixa raka'eve rā oiko aguā re ijayvu vy, ha'e Jesus Cristo rekorā re guive (1 Reis 15.4; 2 Reis 8.19; 2 Crônicas 21.7; Salmo 132.17; Lucas 2.30-32; João 8.12).

¹ Ha'e gui Roboão oo Siquém katy, mba'eta ha'e py Israel kuery onhemboatypa ma nguvixarā omoī aguā.

² Ha'e nunga Nebate ra'y Jeroboão oendu. (Ha'e va'e ma Egito yvy re teri oiko, huvixa Salomão gui onhaague py).

³ Ha'e gui ju oenoña ramo) ha'e voi ou Israel kuery ha'e javi ikuiaia py, Roboão reve ha'e kuery jogueroayvu aguā. Ha'e rami vy aipoe'i okuapy Roboão pe:

⁴ — Nderu ma orererekoxo axy ete va'ekue. Ha'e gui aŷ gui ma ndee orererekoporā'i ju ke nderu orembojexavai ha'e orererekoxo axyague gui. Ha'e ramo ma ndevy ae 'rā orekuai – he'i okuapy.

⁵ Ha'e ramo Roboão ombovai:

— Tapeopa ju. Ha'e gui mboapy araa py ma peju ju xea py – he'i. Ha'e ramo heta va'e kuery oje'oipa.

⁶ Ha'e gui ma huvixa Roboão onhemongeta uka nguu Salomão oikove teri jave tujakueve henonde ikuai va'ekue pe. Ha'e vy oporandu ha'e kuery pe:

— Mba'exa tu peē kuery xemongeta ta heta va'e kuery ambovai aguā?

⁷ Ha'e ramo ha'e kuery ombovai:

— Aŷ gui kova'e kuery ruvixa reiko vy xapy'a rei reipytyvōxe ha'e repena kuaaxe ri vy ndeayvu porā'i, ha'e ramo ha'e kuery raka'e rā peve 'rā ikuai nerembiguai – he'i okuapy.

⁸ Ha'e rami teī tujakueve omongoeta rā Roboão noendu potai. Ha'e vy guembiguai kunumigue ojaveguia kuery pe ju onhemongeta uka.

⁹ Ha'e vy ha'e kuery pe aipoe'i:

— Peē kuery, mba'exa tu xemongeta ta kova'e kuery ambovai aguā? Mba'eta xevy ojerure vy “Orererekoporā'i ju nderu orererekoxo axyague gui”, he'i okuapy ramo.

¹⁰ Ha'e ramo kunumigue ijaveguia kuery ombovai okuapy:

— Po rami 'rā ndeayvu heta va'e kuery “Nderu orererekoxo axy, va'eri ndee orererekoporā'i ju”, he'i va'ekue pe. Po rami 'rā ndeayvu: “Xekuā kyrī'i va'e teī xeru ku'aa gui tuyivxave.

¹¹ Xeru pendererekoxo axy ae ma, ha'e rā xee ma roguerekoxo axyve ete 'rā. Xeru ma vaka pi py penembojexavai penenupā vy, ha'e rā xee ma japeuxa popia py 'rā rombojexavai”, 're 'rā – he'i okuapy.

¹² Ha'e va'e rire mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevy ju xea py”, he'iague rami vy.

¹³ Ha'e ramo huvixa Roboão ombovai vy ayvu poyi py ijayvu, tujakueve omongoetaa noendu potai rire.

¹⁴ Kunumigue omongoetaague rami rive ijayvu vy aipoe'i:

— Xeru pendererekoxo axy, ha'e rā xee ma roguerekoxo axyve 'rā. Xeru ma vaka pi py penembojexavai, ha'e rā xee ma japeuxa popia py 'rā rombojexavai – he'i.

¹⁵ Ha'e rami vy huvixa Roboão noendu potai heta va'e kuery ayvu re, mba'eta ha'e rami aguā ma SENHOR gui ae oiko, Nebate ra'y Jeroboão pe Siló pygua Aías ijayvuague SENHOR omongoinga aguā.

2 Crônicas 10.16-19

¹⁶ Ha'e gui Israel kuery ha'e javi oexa rā ijayvua re huvixa Roboão ndojapyxaka potai ramo ivai vaipa okuapy. Ha'e vy aipoe'i:

— Mba'e tu ha'vy jareko Davi ramymino kuery reve? Jessé ra'y reve guarā noīvei ri nhandevy! Israel kuery, jaje'oipa nhandro katy! Ha'vy Davi ramymino kuery, pepena pendero re ae! – he'i okuapy. Ha'e rami vy Israel kuery peteī-teī oje'oipa ju ngoo katy.

¹⁷ Ha'e rā Judá regua tetā rupi Israel kuery hekoa va'e re ma Roboão ae opena oikovy.

¹⁸ Ha'e gui heta va'e kuerya py huvixa Roboão omondouka omomba'eapo nhea'āmby kuery re opena va'ety Adorão. Ha'e rami teī Israel kuery ojapipa ita py, ha'e ramo omano. Ha'e rā huvixa Roboão ma okaróxa ogueraa nho vy onha ový Jerusalém katy.

¹⁹ Ha'e rami py Israel kuery onhemoingo Davi ramymino kuery rovaigua, aŷ peve guarā.

²⁰ Ha'e rami vy Israel kuery ha'e javi ma Jeroboão ojevy ju maa oendu vy oenoī uka onhemboaty okuapya py, ha'e vy omoī okuapy nguvixarā. Mava'eve nda'ikuai Davi ramymino kuery rupive, Judá regua anho e'ŷ vy.*

2 Crônicas 11.1-4

²¹ Ha'e gui Jerusalém py Roboão ovaẽ ma vy omboatypa Judá ha'e Benjamim kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e kuery re Salomão ra'y Roboão ju ipo'aka aguã rami ojapo aguã.

²² Ha'e rami teĩ Nhanderuete oayvu ombou peteĩ ava guemimbo'e Semaías hery va'e pe. Ha'e va'e pe aipoe'i:

²³ — Ndeayvu Salomão ra'y Roboão Judá pygua huvixa va'e pe, ha'e gui Judá ha'e Benjamim kuery pe, heta va'e kuery rembyrekue pe guive. Ha'e vy aipo're:

²⁴ “Po rami SENHOR ijayvu: ‘Tapeo eme, pepu'ã eme penderyvy Israel kuery rovai. Peteĩ-teĩ pejevy ju pendero katy, mba'eta xee ae ha'e nunga amoingo va'ekue’, he'i”, ‘re 'rã. Ha'e rami SENHOR ijayvua omombe'u rã ha'e kuery oendu vy ojevypa, ijayvuague rami vy.

Jeroboão mba'emo ra'angaa rive ombojeroviaague

²⁵ Ha'e gui Jeroboão omoatyrō Siquém tetã Efraim regua yvy'ã re. Ha'e vy onhemboekoa ha'e py. Omoatyrō avi Penuel.

²⁶ Ha'e vy Jeroboão ojeupe ae aipoe'i:

— Aŷ ma nhi'ã xepo'akaa 'rãgue py Davi ramymino kuery nho 'rã ipo'aka.

²⁷ Mba'eta kova'e kuery ma Jerusalém tetã katy oo jepi 'rã SENHOR pe mba'emo ome'ẽ aguã. Ha'e rami vy opy'a re oendu 'rã okuapy Judá pygua huvixa Roboão re ju oopa aguã. Ha'e vy xejuka 'rã okuapy, Judá pygua huvixa pe ojevypa vy — he'i.

²⁸ Ha'e gui huvixa onhemoneta uka vy mokoĩ vaka ra'y ra'angaa ojapo ouro gui. Ha'e vy aipoe'i heta va'e kuery pe:

— Peẽ Israel kuery, aŷ gui ma Jerusalém katy peove e'ŷ teĩ ha'eve. Apy ae pexa Penderuete ramigua Egito yvy gui pendererupaare — he'i.

²⁹ Ha'e va'e ta'angaa ma peteĩ omoī Betel py, ha'e rã amboae ma Dã py.

³⁰ Ha'e ramia káuxa heta va'e kuery ojejavý okuapy, Dã py voi oje'oi tema vy, vaka ra'y ra'angaa rive peteĩ-teĩ omboete aguã.

³¹ Yvy'ã ikuia rupi Jeroboão ojapo avi ombojerovia atyrã. Ha'e vy heta va'e kuery regua rive omoī sacerdote kueryrã, Levi ramymino kuery regua e'ŷ teĩ.

³² Ha'e gui irundy meme jaxya re quinze araa py ojapo peteĩ ngaru, Judá re ngaru oiko va'e ramigua. Ha'e rami vy mba'emo oapy okuapy altar áry. Ha'ekue ramigua Betel tetã py avi ojapo vy mba'emo ome'ẽ okuapy vaka ra'y ra'angaa ojapo va'ekue pe. Betel py voi omoī sacerdote kueryrã, yvy'ã re ombojerovia atyrã omopu'ã mbyre peguarã.

³³ Ha'e gui oito jaxya re quinze araa py, ha'e ae oipotaa rami rive oa'angaague py ae, oo oiny Betel py altar ojapo uka va'ekuea py. Ha'e py voi ojapo ngaru Israel kuery pegua. Heakuã porã va'e oapy avi ha'e py.

13

Altar oĩ va'e re profeta ijayvuague

¹ Ha'e gui ma peteĩ ava Nhanderuete remimbo'e SENHOR ijayvuague rami vy Judá gui ou vy Betel py ovaẽ. Ha'e jave py altar yvýry Jeroboão hi'aĩ heakuã porã va'e oapya py.

² Ha'e ramo profeta ojapukai reve ijayvu altar re. SENHOR aipoe'i ukaague rami vy aipoe'i:

— Altar, altar! Nhanderuete ijayvu po rami: “Ma'ẽ, oiko 'rã peteĩ Davi ro pygua ramymino, Josias hery va'e. Ha'e va'e ma nde'áry oapy 'rã sacerdote kuery yvy'ã regua, nde'áry ha'e va'e kuery heakuã porã va'e oapy va'ekue ae. Ha'e rami py nde'áry oapy 'rã nhande va'e kãgue”, he'i.

* 12:20 Apy “Israel kuery” he'ia ma dez-ve regua kuery Judá regua e'ŷ ikuai va'e re ijayvu vy. Ha'e rã amboae py ma jaikuua 'rã judeu kuery ha'e javi re ijayvua.

- ³ Ha'e va'e árave ma omombe'u avi mba'emo kuaa ukaarã. Ha'e vy aipoe'i:
 — Po rami SENHOR omombe'u uka mba'emo kuaa ukaarã. Ma'ẽ, altar ovopa rive 'rã, ha'e vy hi'áry tanhimbu oĩ va'ekue voi onheẽmba 'rã — he'i.
- ⁴ Ha'e rami Nhanderuete remimbo'e Betel pygua altar re ijayvu rã huvixa Jeroboão oendu vy altar áry gui opo oipe'a vy okuave'ẽ vy “Pejopy”, he'i ramove ipo ipiru vyvoi, Nhanderuete remimbo'e rovai okuave'ẽ ramo. Ha'e ramo nomomyĩ kuaavei.
- ⁵ Ha'e ramo altar ovo xapy'a rã hi'áry tanhimbu oĩ va'ekue onheẽmba, SENHOR ijayvuague rami mba'emo kuaa ukaarã hemimbo'e omombe'u va'ekue rami vy.
- ⁶ Ha'e rami rã huvixa aipoe'i Nhanderuete remimbo'e pe:
 — Ejapukai te'i ae ri SENHOR nderuete pe, ha'e vy ejerure xere, xepo ratãmbaa gui ha'eve ju aguã — he'i.
 Ha'e ramo Nhanderuete remimbo'e ojerure SENHOR pe. Ha'e ramove huvixa po ha'eve ju, ha'ekue rami ae.
- ⁷ Ha'e gui ma huvixa aipoe'ive ju Nhanderuete remimbo'e pe:
 — Eju xerupive xero py, ha'e he'u mba'emo nembaraete aguã. Ha'e rã xee ma ame'ẽ 'rã mba'emo ndevy.
- ⁸ Ha'e rami teĩ Nhanderuete remimbo'e va'e ombovai huvixa pe:
 — Ndero py rerekro va'e regua ma mbyte rupi peve xevy reme'ẽ teĩ xee ndaai 'rã nderupive, nda'ui 'rã mbojape, nday'ui 'rã guive yy kova'e tekao py.
- ⁹ Mba'eta po rami ae xevy SENHOR ijayvu vy aipoe'i va'ekue: “Ndere'ui 'rã mbojape, neĩ nderey'ui 'rã yy, ha'e neĩ nderejevyi 'rã guive tape rejuague rupi”, he'i va'ekue.
- ¹⁰ Ha'e rami vy ojepe'a vy amboae tape rupi oo, Betel katy ouague rupi e'ŷ.
- Profeta nonhe'ẽ rendui rã ombopagaague*
- ¹¹ Ha'e gui Betel py oiko avi peteĩ profeta tuja'i va'e. Ha'e va'e oĩa py ta'y kuery ou vy omombe'u Nhanderuete remimbo'e ha'e va'e ára Betel py ojapo va'ekue ha'e javi. Nguu pe omombe'u avi huvixa pe ijayvuague.
- ¹² Ha'e ramo tuu oporandu ha'e kuery pe:
 — Mava'e tape rupi ha'vy oo? — he'i ramo ta'y kuery oexa uka tape Nhanderuete remimbo'e Judá guigua ooague.
- ¹³ Ha'e gui ma gua'y kuery pe aipoe'ive ju:
 — Pembokupe árygua ha'vy xerymba mburika xevy pe — he'i. Ixupe ombokupe áryguapa ramo oĩ hi'áry,
- ¹⁴ ha'e oo Nhanderuete remimbo'e rakykue. Ha'e vy ouputy yvyra carvalho guy py oguapy oiny rã. Ha'e rami vy aipoe'i ixupe:
 — Ndee ae pa Nhanderuete remimbo'e Judá gui reju va'ekue?
 Ombovai:
 — Xee ae ri — he'i.
- ¹⁵ Ha'e ramo aipoe'i:
 — Eju ha'vy xerupive xero py, ja'u mbojape.
- ¹⁶ Ha'e rã ombovai:
 — Nda'evei ndereve ajevy aguã, neĩ navaẽi 'rã ndero py, nda'ui 'rã mbojape, neĩ yy ma voi nday'ui 'rã kova'e tekao py.
- ¹⁷ Mba'eta SENHOR ayvu rupi aipo'ea xevy: “Ha'e py ma ndere'ui 'rã mbojape neĩ nderey'ui 'rã yy, tape rejuague rupi guive ndereo jevyi 'rã”, 'ea rire — he'i.
- ¹⁸ Ha'e rami rã aipoe'ive ju ixupe:
 — Xee voi profeta aiko ndee rami ae. Ha'e SENHOR ayvu rupi peteĩ anjo aipoe'i xevy: “Ejapo ke nderupive ndero py ojevy aguã rami, mbojape ho'u ha'e yy oy'u aguã”, he'i va'ekue — he'i ijapua rupi.
- ¹⁹ Ha'e ramo ma ojevy vy hoo py ovaẽ vy mbojape ho'u, yy oy'u guive.
- ²⁰ Mesa py ha'e kuery ikuai jave joguerojevyare pe SENHOR ombou oayvu.
- ²¹ Ha'e ramo Nhanderuete remimbo'e Judá guigua pe ojapukai vy aipoe'i:

— Po rami ijayvu SENHOR: “Nerenhe'ẽ rendui ra'e SENHOR, nderejapoí SENHOR nderuetu ojapo uka va'ekue.

²² Ha'e rami 'rāgue py rejevy vy re'u mbojape ha'e rey'u guive yy ndevy, 'Ndere'ui 'rā mbojape, neñ yy ma voi nderey'ui 'rā, he'iague py ae. Ha'e rami rire nderetekue nonhono porāai 'rā nderu kuery onhono porāague py", he'i.

²³ Ha'e gui profeta joguerojevyare va'e opa ma mbojape ho'u ha'e yy oy'upa ma vy joupe ombokupe árygua ju mburika.

²⁴ Ha'e gui ma amboae ma oo ramo tape rupi ooa py peteñ guary ovaexí vy ojuka. Hetekue ma tape rupi oity inony rive, mburika ha'e guary ma hi'añ hetekue yvýry.

²⁵ Ha'e rupi oguata va'e kuery oaxa vy oexa okuapy hetekue tape rupi itui rā, ha'e guary voi hetekue yvý'iry hi'añ rā. Ha'e vy oje'oi vy profeta tuja'i va'e rekaoa py omombe'u.

²⁶ Ha'e gui profeta joguerojevyare ha'e nunga oendu vy aipoe'i:

— Nhanderuete remimbo'e va'ekue ae ri, SENHOR nonhe'ẽ rendui va'ekue. Ha'e nunga rupi ae SENHOR omboaxa guary pe. Ha'e rā omboa'ypa vy ojuka, SENHOR ixupe aipoe'i ukaague rami vy.

²⁷ Ha'e gui aipoe'i gua'y kuery pe:

— Pembokupe árygua ha'vy xerymba mburika — he'i ramo ombokupe áryguapa.

²⁸ Ha'e ramo oo vy ojou tetekue tape rupi oity pyre, ha'e tetekue yvýry mburika'i ha'e guary hi'añ va'eri ndo'ui, neñ mburika ma voi nomboa'ypai ra'e.

²⁹ Ha'e gui Nhanderuete remimbo'e retekue profeta oupi vy mburika'i áry omoñ vy ogueraa ju. Ha'e rami vy guekoa py ju profeta tuja'i ojae'o reve oguerovaõ onhono porā aguã.

³⁰ Nguparā oguereco katu ma voi va'ekue py ae onhono porā. Ha'e vy ha'e kuery ojae'opa okuapy vy

— Aikore xeryvy! — he'i okuapy.

³¹ Onhono porā ma rire aipoe'i gua'y kuery pe:

— Xee amano ma ramo ke xenhono porā avi Nhanderuete remimbo'e nhanhono porāague py ae. Pemoñ ke xekāgue ikāgue yvýry.

³² Mba'eta ojeupity 'rāe Betel py altar oĩ va'e rovai SENHOR omombe'u ukaague, Samaria yvy re ombojeroviaaty ikuai va'e rovai guive — he'i.

Jeroboão ojejayve tema ovayague

³³ Ha'e nunga oiko rire teñ Jeroboão ndojepe'ai ae tema gueko vaia gui. Ha'e rami 'rāgue py heta va'e kuery regua rive omoñve sacerdote kuery yvý'ã rupi ombojeroviaaty ikuai va'e peguarã. Ha'e va'e oipota va'e rei tema omoñ sacerdote kuery yvý'ã rupi ombojeroviaaty ikuai va'e peguarã.

³⁴ Ha'e rami tema oiko Jeroboão ro pygua kuery ojejavypa rei aguã rami, ko yvy gui ha'e kuery omombaa aguã okanhymba peve.

14

Jeroboão rovai profeta Aías ijayvuague

¹ Ha'e va'e jave py Jeroboão ra'y Abias imba'eaxy.

² Ha'e ramo gua'xy pe aipoe'i:

— Tereo aÿ'i ma voi, ejexa uka amboae rami, “Jeroboão ra'yxy teve” 'ea e'ÿ aguã. Ha'e vy tereo Siló py. Ha'e py ma oiko profeta Aías, kova'e kuery ruvixarã xee aí aguã re ijayvua ma voi va'ekue.

³ Eraa avi dez mbojape, xipa'i ha'e peteñ ryru ei. Evaõ oĩa py hexeve ndeayvu aguã. Ha'e ramo ha'e ma omombe'u 'rā xera'y re oiko 'rāa — he'i.

⁴ Ha'e ramo Jeroboão ra'yxy oiko ha'e rami ae. Ha'e vy opu'ã ovy Siló katy, ha'e Aías ro py ovaõ. Ha'e rā Aías ma tuja'i ete vy ndoexavei ma.

⁵ Ha'e gui SENHOR aipoe'i Aías pe.

— Ma'ẽ, ou ma oiny Jeroboão ra'yxy opi'a imba'eaxy re oporandu aguã. Po rami-rami 'rã ijayvu oike ma ouvy vy, "Jeroboão ra'yxy ae rima ra'e" 're e'ŷ aguã — he'i.

⁶ Ha'e gui Aías ma kunha va'e okẽ rupi oike nhendu rã oendl vyve aipoe'i:

— Eike ke, Jeroboão ra'yxy. Mba'e re tu amboae rami rejexa ukaxe? Mba'eta ndevy pe haxy va'e amombe'u aguã rami aiko.

⁷ Tereo ju, aipo're Jeroboão pe: "Po rami ijayvu SENHOR Israel kuery ruete va'e: Xee ma heta va'e kuery mbyte gui roiporavo vy romoĩ huvixa Israel kuery re repena va'erã.

⁸ Davi ro pygua kuery po'akaa aipe'a vy ndevy ju amboaxa, va'eri ndee ma xerembiguai Davi oikoague rami e'ŷ reiko. Mba'eta ha'e va'e ma ajapo uka va'ekue ojapoa rupi xerupive oiko va'ekue opy'a ha'e javi py, xerenonde rupi ha'evea ramigua anho ojapo.

⁹ Ha'e rã ndee ma mba'emo vai anho rejapo, huvixa reĩ e'ŷ mbove ikuai va'ekue ha'e javi gui nderekova vaive ete vy. Ha'e vy amboae tuuete kuery ra'angaarã rejapo avi mba'emo ryku gui rive, xembopoxo aguã rami. Ha'e rami vy ndekupe rive rerova xea katy.

¹⁰ Ha'e nunga rupi Jeroboão ro pygua kuery áry xee ambou 'rã mba'emo vai anho. Ha'e vy Jeroboão ramymino kuery amomba 'rã ava ma guive rã, escravo e'ŷ vy ikuai rive'i va'e tei. Ha'e vy Jeroboão ro pygua kuery amombopa 'rã mymba repoxi mombyry omombopaa rami, ha'e kuery ha'e javi opa peve.

¹¹ Ha'e ramo Jeroboão guigua tetã py omano va'ekue jagua ho'upa kuerei 'rã, ha'e rã mba'ety rupi omano va'ekue ma guyra yvate rupigua 'rã ho'u", he'i SENHOR.

¹² — Ha'e rami rã ejere ju, tereo ndero katy. Ha'e gui nderekova re ndepy removaõ ramove ndepi'a'i omano 'rã.

¹³ Ha'e ramo Israel kuery ha'e javi ojae'opa reve 'rã onhono porã. Ha'e rami avi Jeroboão ra'y kuery va'e regua ma ha'e va'e anho'i 'rã onhono porãa, mba'eta Jeroboão ro pygua kuery regua ha'e va'e re anho oĩ SENHOR ojou porã va'e.

¹⁴ Ha'e gui SENHOR amboae ju 'rã omoĩ huvixa ojeupagua Israel kuery re opena va'erã. Ha'e va'e ma oĩ vy omomba 'rã Jeroboão ro pygua kuery. Xee aipoa'eague oikopa vyvoi 'rã.

¹⁵ Ha'e gui Israel kuery voi SENHOR oity ukapa 'rã mba'emo'ygue-'ygue yy rupi ivevui vy omyi rei va'e rami ikuai peve. Kova'e yvy porã tuu kuery pe ome'ẽ va'ekue gui oipe'apa 'rã Israel kuery, Eufrates yakã rovai rupi ju omoãmba 'rã, SENHOR ombopoxya rupi ta'angaarã yvyra omopu'ã rire.

¹⁶ Ha'e rami py Jeroboão ojejavague re oeja 'rã Israel kuery, joguerojejavypa rire — he'i.

¹⁷ Ha'e gui ma Jeroboão ra'yxy opu'ã vy oo ju. Tirza tekota py ovaõ. Ngoo py ovaõ ramove ava'i va'e omano ma.

¹⁸ Ha'e ramo Israel kuery ha'e javi onhono porã vy ojae'opa okuapy, SENHOR oayvu guembiguai profeta Aías rupi ombou va'ekue rami vy.

¹⁹ Ha'e gui oïve rei tema Jeroboão rekukue regua. Ha'e rami avi joe opu'âague, joe openaague ha'e mba'emo ojapo va'ekue ha'e javi noï 'rã teve kuaxia Israel pygua huvixa kuery rekukue oïa re?

²⁰ Vinte e dois ma'etý re ma Jeroboão oĩ huvixa. Ha'e gui ndoikovevei'i ma guamoĩ kueryague rami. Ha'e ramo ta'y Nadabe ju oĩ nguu rekovia.

2 Crônicas 12.1-16

²¹ Ha'e gui Salomão ra'y Roboão ma Judá re oĩ huvixa. Ixy ma Amom guigua, Naamá hery va'e. Quarenta e um ma'etý ma oguerekova py Roboão omboypy huvixa oĩ aguã, ha'e gui dezessete ma'etý re peve opena Jerusalém py. Ha'e va'e tetã ma Israel re ikuai va'e gui SENHOR oiporavo va'ekue hery oĩ aguã.

²² Ha'e gui ma Judá pygua kuery ha'eve'ŷ ete va'e ojapo okuapy SENHOR renonde. Ojejavya rupi anho ikuai vy guamoĩ kuery gui voi nda'eveive va'e ojapo okuapy SENHOR nda'evei etea oendl vyve aguã rami.

²³ Mba'eta Judá pygua kuery voi yvy'ã re omopu'ã mba'emo ra'angaa, ita ha'e yvyra ta'angaarã yvy'ã ikuai va'e áry, ha'e yvyra ikuai va'e guy rupi.

²⁴ Ijyvy re ikuai avi avakue ta'angaa pegua itavy rei va'e. Ha'e rami vy ojapo okuapy ha'eve'ŷ va'e yvy regua Israel kuery renonde gui SENHOR oipe'a va'ekue ikuaiague rami rive.

²⁵ Ha'e gui peteñ nhiruñ ma'etŷa re ma Roboão huvixa oĩ jave py Egito pygua huvixa Sisaque ou Jerusalém re opu'ã aguã.

²⁶ Ha'e vy ogueraapa SENHOR pegua opy ha'e huvixa ropy iporâgueve oĩ va'ekue. Ogueraa avi hu'y jokoarã ouro guigua Salomão ojapo va'ekue.

²⁷ Ha'e gui ha'e va'ekue rekoria ma huvixa Roboão ojapove ju hu'y jokoa, teñ overa va'e guigua rive. Ha'e va'e ma omboaxa huvixa rokẽ rarõa kuery rerekao po py.

²⁸ Ha'e gui SENHOR pegua oo py huvixa oike nhavõ harõa kuery ogueraa 'rã hu'y jokoa. Ha'e rire ogueru kuerei 'rã opy ja'o harõa kuery ikuaiaty py.

²⁹ Ha'e gui oïve rei tema Roboão rekukue regua. Ha'e rami avi mba'emo ojapo va'ekue ha'e javi noñ 'rã teve kuaxia Judá pygua huvixa kuery rekukue oña re?

³⁰ Jeroboão kuery reve Roboão kuery joguero'a okuapy oikovea pukukue re.

³¹ Ha'e gui ma Roboão ndoikovevei'i ma guamoñ kueryague rami. Ha'e gui ha'e kuery reve onhono porãa tetã Davi rekoague py. Ixy rery ma Naamá, Amom guigua. Ha'e gui ta'y Abias ju oĩ nguu rekoria.

15

2 Crônicas 13.1-22

¹ Ha'e gui Nebate ra'y Jeroboão dezoito ma'etŷ re ma huvixa oĩ jave py Abias oĩ Judá pygua huvixarã.

² Ha'e vy mboapy ma'etŷ re opena Jerusalém py. Ixy ma Absalão rajy Maaca.

³ Ha'e va'e ma nguu ojejavypaague ha'e javi rupi ae ju oiko. Ha'e vy ipy'a re noñ SENHOR nuguete pe ete oiko aguã, nguu Davi oikoague rami e'ŷ.

⁴ Ha'e rami teñ SENHOR tuiete Davi re oma'ẽ vy hekovia omoñ peteñ hendy va'e Jerusalém py, ha'e va'e oiko rire ta'y ju omoingo vy. Ha'e rami vy omoñ atãve Jerusalém.*

⁵ Mba'eta Davi ma SENHOR renonde ha'evea rami anho ojapo va'ekue, oikovea pukukue re ndojepe'ai guive peteñe ojapo uka va'ekue gui ma voi, Urias heteu va'e re ojapo va'ekue py e'ŷ vy.

⁶ Roboão ha'e Jeroboão ikuia pukukue re oiko riae joe opu'ã va'e.

⁷ Ha'e gui oïve rei tema Abias rekukue regua. Ha'e rami avi hi'arandua ha'e mba'emo ojapo va'ekue ha'e javi noñ 'rã teve kuaxia Judá pygua huvixa kuery rekukue oña re? Oiko avi raka'e Abias ha'e Jeroboão kuery reve joe opu'ãa.

⁸ Ha'e gui ma Abias ndoikovevei'i ma guamoñ kueryague rami. Ha'e ramo onhono porãa tetã Davi rekoague py. Ha'e gui ta'y Asa ju oĩ nguu rekoria.

2 Crônicas 14.1-8; 15.16-16.14

⁹ Ha'e gui Israel pygua huvixa Jeroboão vinte ma'etŷa re ma oĩ jave py Asa oĩ Judá pygua huvixarã.

¹⁰ Ha'e va'e ma quarenta e um ma'etŷ re opena Jerusalém py. Ijaryi ma Absalão rajy Maaca hery va'e.

¹¹ Ha'e gui Asa ma SENHOR renonde rupi ha'evea rami oiko, guamoñ Davi rami ae.

¹² Mba'eta oyvy gui oipe'apa avakue ta'angaa pegua itavy rei va'ekue, oitypa avi ta'angaa nguu kuery ojapo va'ekue.

¹³ Ojaryi Maaca eteve voi oipe'a huvixa xy po'akaa gui, mba'eta ha'e va'e ma yvyra gui ta'angaa ojeguaru pyrã ojapo uka rire. Ha'e rã Asa ma ta'angaa ombovaipa vy oapypa Cedrom yvyugua py.

¹⁴ Ha'e rami teñ yvy'ã rupi ombojerovia atyrã ojapo pyre ma nombovaipai va'eri Asa oikovea pukukue re SENHOR pe ae oiko opy'a py.

¹⁵ Ha'e vy SENHOR pegua opy ogueru ju SENHOR pe mba'emo nguu omboaxa uka va'ekue, ha'e ae omboaxa uka va'ekue guive: prata, ouro ha'e tembiporu.

* 15:4 "Hendy va'e" he'ia ma hekovia huvixa mboae raka'eve rã oiko va'erã re ijayvu vy (1 Reis 11.36).

- ¹⁶ Israel pygua huvixa Baasa reve Asa opu'ã riae, oikovea pukukue re.
- ¹⁷ Mba'eta Israel pygua huvixa Baasa ma Judá kuery rovai ou vy ojokopa Ramá tetã, Judá pygua huvixa Asa openaa gui mava'eve oo e'ý aguã, neñ ova  a e'ý aguã ha'e py.
- ¹⁸ Ha'e ramo Asa oipe'apa ouro ha'e prata SENHOR pegua opy o   teri va'e, ha'e huvixa ropy omo   por   mbyre voi. Ha'e vy guembiguai kuery po py huvixa Asa omboaxapa vy omondoukapa S  ria pygua huvixa Ben-Hadade pe, Damasco tetã py o  a py. Ha'e va'e ma Heziom ramymimo Tabrimom ra'y. Ha'e vy ixupe aipoe'i uka:
- ¹⁹ — Jajapo ke jomeme nhandekuai por  i aguã, nderu xeru reve ikuaiague rami. Ne'exa, aru ruka ndevy ame'   rive va'e, prata ha'e ouro. Ha'e r   tereo, Israel pygua huvixa Baasa-a py embovaipa hexeve guar   rejapo va'ekue, xeret   ojokoa gui ojepe'a aguã — he'i uka.
- ²⁰ Ha'e ramo Asa ijayvua Ben-Hadade oendu vy xondaro ruvixa kuery omondouka Israel kuery ret   re opu'ã aguã. Ha'e rami vy oitypa Ijom, D  , Abel-Bete-Maaca ha'e Quinerete tekao ha'e javi rupi, Naftali yvy rupi voi.
- ²¹ Ha'e nunga Baasa oendu vy optyu'u Ramá tetã ojokoa gui, ha'e vy Tirza tekao py ju optya.
- ²² Ha'e ramo huvixa Asa ma Jud  ia ha'e javi rupi omombe'u uka oupaa vy Ram  a gui oguerupaa ju agu   ita ha'e yvyra huvixa Baasa ojokoa py oiporu va'ekue. Ha'e va'ekue py ma huvixa Asa ju ojapo Geba tet   Benjamin regua ha'e Mispa.
- ²³ Ha'e gui o  ve rei tema Asa rekukue regua. Ha'e rami avi ipo'akaague, tet   ojapoague, ha'e mba'emo ojapo va'ekue ha'e javi no   'r   teve kuaxia Jud   pygua huvixa kuery rekukue o  a re? Ha'e gui tuja'i ma jave imba'eaxy opy rupi.
- ²⁴ Ha'e gui Asa ndoikovevei'i ma guamo   kueryague rami. Ha'e ramo onhono por  a tet   Davi rekoague py, tuu kuery ituia py ae. Ha'e gui ta'y Josaf   ju o   nguu rekovia.

Israel pygua huvixa Nadabe ha'eve'  a rami joguerecoague

- ²⁵ Ha'e gui Jud   pygua huvixa Asa moko   ma'et  a re ma o   javo py Jerobo  o ra'y Nadabe o   Israel pygua huvixar  . Ha'e vy moko   ma'et   re oiko Israel kuery re openaa rupi.
- ²⁶ Ha'e va'e ma SENHOR renonde rupi ha'eve'   va'e ojapo oikovy nguu oikoague rami, ha'e nguu Israel kuery oguerojejavypaague rupi ae.
- ²⁷ Ha'e ramo hexe Issacar regua A  as ra'y Baasa opu'ã vy oity filisteu kuery rekoao Gibetom py, Gibetom tekao Nadabe ha'e Israel kuery ha'e javi ojokopa jave.
- ²⁸ Ha'e vy Baasa ma Jud   pygua huvixa Asa o   javo mboapy ma'et  a py Nadabe ojuka vy ha'e ju huvixar   o   hekovia.
- ²⁹ Ha'e gui o   ypy'ia pyve ojukapa Jerobo  o ramymimo kuery ha'e javi. Ne   pete  ve ma voi ndoejai oikove reve, omomba ete, SENHOR guembiguai Sil   pygua A  as rupi oayvu ombou va'ekue rami vy,
- ³⁰ Jerobo  o ojejavypaague re ae, ha'e Israel kuery oguerojejavypa ague re, mba'emo vai py SENHOR Israel kuery ruete ombopoxya py.
- ³¹ Ha'e gui o  ve rei tema Nadabe rekukue regua. Ha'e rami avi mba'emo ojapo va'ekue ha'e javi no   'r   teve kuaxia Israel pygua huvixa kuery rekukue o  a re?
- ³² Asa ha'e Israel pygua huvixa Baasa ikuaiia pukukue re oiko raka'e jomeme opu'ã va'e.

Israel pygua huvixa Baasa o   javo guare

- ³³ Ha'e gui Jud   pygua huvixa Asa mboapy ma'et  a re ma o   javo A  as ra'y Baasa o   huvixar  . Ha'e va'e ma Israel kuery ha'e javi re opena oikovy Tirza py. Vinte e quattro ma'et   re opena.
- ³⁴ SENHOR renonde ojapo ha'eve'   va'e. Ha'e vy Jerobo  o ojejavypaague rupi ae oiko, ha'e Israel kuery oguerojejavypa ague rupi.

² — Xee ma yvy ku'i gui romopu'ã vy romoõ va'ekue xevyguia Israel kuery ruvixarã, va'eri Jeroboão rekoke rupi reiko vy xevyguia Israel kuery rerojejavypa, xembopoxy aguã rami.

³ Ne'ixa Baasa, xee romomba ma 'rã neramymino kuery reve. Ha'e vy ndero pygua kuery re ajapo 'rã Nebate ra'y Jeroboão ro pygua kuery re ajapoague rami.

⁴ Ha'e rami rã Baasa guigua kuery tetã rupi omano va'ekue jagua kuery ho'upa 'rã, ha'e rã mba'ety rupi omano va'ekue ma guyra yvate rupigua 'rã ho'u — he'i.

⁵ Ha'e gui oïve rei tema Baasa rekoke regua. Ha'e rami avi opo'akaa rupi mba'emo ajapo va'ekue ha'e javi noï 'rã teve kuaxia Israel pygua huvixa kuery rekoke oïa re?

⁶ Ha'e gui Baasa ndoikovevei'i ma guamoõ kueryague rami. Ha'e ramo onhono porãa Tirza py ae. Ha'e gui ta'y Elá ju oï nguu rekovic.

⁷ Ha'e rami aguã ae SENHOR oayvu ombou Hanani ra'y profeta Jeú pe Baasa ha'e hamymino kuery rovai, mba'eta SENHOR renonde opa mba'e py ojapo vai vy ombopoxy, Jeroboão ro pygua kuery ikuaiague rami oikoa py, ha'e Jeroboão ro pygua kuery ojukapaa py.

Israel pygua huvixa Elá re Zinri opu'ãague

⁸ Ha'e gui Judá pygua huvixa Asa vinte e seis ma'etýa re ma oï jave py Baasa ra'y Elá oï Israel kuery ruvixarã, tetã Tirza py ae. Mokoõ ma'etý re opena.

⁹ Ha'e va'e re opu'ã hembiguai Zinri joe opu'ãa pygua karóxa ikuai va'e re mbyte rupi peve opena va'e. Elá ma Tirza py oï guembiguai Arsa ro py, oy'u ha'e oka'u vaipaa rupi.

¹⁰ Ha'e gui Zinri oike vy oguero'a vy ojuka ete, Judá pygua huvixa Asa vinte e sete ma'etýa re ma oï jave. Ha'e vy ha'e ae ju oï hekovic.

¹¹ Ha'e va'e ma tenda openaaty áry oï ypy vyve ojukapa Baasa kuery. Ndoejai neï peteïve avakue, hetarã, neï irã kuery ma voi.

¹² Ha'e rami py Zinri ojukapa Baasa kuery, profeta Jeú rupi Baasa rovai SENHOR oayvu ombouague rami vy.

¹³ Baasa ha'e ta'y Elá opa mba'e py ojejavague re ojuka, ha'e Israel kuery oguerojejavypa ague re, SENHOR Israel kuery ruete ombopoxy aguã rami, mba'emo ra'angaa ojapoague re guive.

¹⁴ Ha'e gui oïve rei tema Elá rekoke regua. Ha'e rami avi mba'emo ojapo va'ekue ha'e javi noï 'rã teve kuaxia Israel pygua huvixa kuery rekoke oïa re?

Israel pygua huvixa Zinri oïjave guare

¹⁵ Ha'e gui Judá pygua huvixa Asa vinte e sete ma'etýa re ma oï jave py Zinri sete ára ete'i oï Tirza py. Ha'e jave py heta va'e kuery ma filisteu kuery rekao Gibetom re opu'ãa rupi ikuai.

¹⁶ Ha'e gui ha'e py ikuai va'e oendu “Zinri ma huvixa rovai opu'ã vy ojuka” 'ea rã. Ha'e rami vy ha'e va'e árave Israel kuery ikuai va'e ha'e javi nguvixarã omoõ xondaro kuery rerekao Onri.

¹⁷ Ha'e ramo Gibetom gui Onri ogueraa Israel kuery ha'e javi. Ha'e vy Tirza tekao ojokopa okuapy.

¹⁸ Ha'e gui Zinri ma tetã re ipo'akaa ta ma ramo oexa vy oo huvixa ropy imbaraetevea py. Ha'e py oike ma vy oïa áry omoendypa vy omano.

¹⁹ Ojejavague re ae omano, SENHOR renonde ha'eve'ý va'e ojapo rire, Jeroboão oikoague rami ae Israel kuery oguerojejavypa ague re.

²⁰ Ha'e gui oïve rei tema Zinri rekoke regua. Ha'e rami avi huvixa rovai opu'ãague ha'e mba'emo ojapo va'ekue ha'e javi noï 'rã teve kuaxia Israel pygua huvixa kuery rekoke oïa re?

Israel pygua huvixa Onri oïjave guare

²¹ Ha'e gui Israel kuery oja'o mokoõ henda katy. Peteï ja'okue ma Ginate ra'y Tibni rupive oje'oi nguvixarã omoõ aguã, ha'e rã amboae ja'okue ma Onri rupive oje'oi.

²² Ha'e gui Onri rupive oje'oi va'ekue ma ipo'aka okuapy Ginate ra'y Tibni rupive oo va'ekue re. Ha'e gui Tibni omano ramo Onri ae ju opena.

²³ Ha'e rami py Judá pygua huvixa Asa trinta e um ma'etýa re ma oĩ jave py Onri oĩ Israel kuery ruvixarã. Ha'e javi vy doze ma'etý re opena. Ha'e rã Tirza py ma seis ma'etý re opena.

²⁴ Ha'e gui Semer gui ojogua Samaria yyty sessenta e seis quilos prata re, ha'e vy omombaraete. Yvyty áry tetã ojapo va'ekue ma omboery Samaria, Semer yvy jakue rery rupi.

²⁵ Onri ma SENHOR renonde ojapo oikovy ha'eve'ý va'e. Ha'e oiko e'ý mbove ikuai va'ekue gui ojapo vaive.

²⁶ Nebate ra'y Jeroboão oikoague ha'e javi rupi oiko, Israel kuery oguerojejavypa ague rupi. Ha'e vy SENHOR Israel kuery ruete ipoxy aguã rami ojapo ta'angaarã ojapoa py.

²⁷ Ha'e gui oĩve rei tema Onri rekokue regua. Ha'e rami avi opo'akaa oexa ukaa rupi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

²⁸ Ha'e gui Onri ndoikovevei'i ma guamoĩ kueryague rami. Ha'e ramo onhono porãa Samaria py. Ha'e gui ta'y Acabe ju oĩ nguu rekovia.

Israel pygua huvixa Acabe oĩ, ha'e Jezabel re omendaague

²⁹ Ha'e gui Judá pygua huvixa Asa trinta e oito ma'etýa re ma oĩ jave py Onri ra'y Acabe oĩ Israel kuery ruvixarã. Ha'e vy vinte e dois ma'etý re opena oikovy Israel kuery re, Samaria py ae.

³⁰ Onri ra'y Acabe ma SENHOR renonde ojapo oikovy ha'eve'ý va'e, ha'e oiko e'ý mbove ikuai va'e gui heko vaive va'e.

³¹ Nebate ra'y Jeroboão ojejavylague rupi anho e'ý oiko, gua'yxyrã ogueraa avi Sidom pygua huvixa Etbaal rajy Jezabel. Ha'e vy ova vy Baal pegua ete oiko, ombojerovia ete.

³² Ha'e vy peteĩ altar Baal peguarã ojapo Samaria py, Baal peguarã oo ojapo va'ekue py ae.

³³ Acabe omopu'ã avi imo'amy yyvra mba'emo ra'angaarã. Ha'e vy ha'e oiko e'ý mbove Israel pygua huvixa kuery ikuai va'ekue gui ha'eve'ýve va'e ojapo, SENHOR Israel kuery ruete ombopoxy aguã rami rive.

³⁴ Ha'e va'e oĩ jave Betel pygua Hiel ojapo ju Jericó. Íkora ytarã omoĩ jave omano ta'y jypykue Abirão. Ha'e gui ikora rokẽ omoĩ jave ma Segube ju omano ijapyre va'ekue, Num ra'y Josué rupi SENHOR ijayvuague rami vy.*

17

Nda'oky pukuvei aguã re Elias ijayvu rire xapirẽ kuery omongaruague

¹ Ha'e gui Gileade gui ou Tisbé pygua Elias. Ha'e va'e ma aipoe'i Acabe pe:

— Anhetẽ ete SENHOR Israel kuery ruete henonde aikoa va'e rekove rupi aura vy aipoa'e: Ndo'ai 'rã yxapy neĩ oky kova'e ma'etý guive, xee aipoa'e jevy e'ýa ja — he'i.

² Ha'e gui SENHOR oayvu teigue ju ombou Elias pe. Ha'e vy aipoe'i:

³ — Ejep'e a ke apy gui, ha'e tereo kuaray oua katy. Enhemi Querite yakã yvýry rupi, Jordão yakã rovai.

⁴ Ha'e va'e yakã gui ae 'rã rey'u reikovy. Ha'e py ambou avi 'rã xapirẽ kuery nemongaru va'erã — he'i.

⁵ Ha'e ramo oo vy SENHOR ijayvuague rami ojapo. Ha'e vy ojepe'a vy oiko Jordão yakã rovai Querite yakã yvýry.

⁶ Ha'e gui ko'ëmba'i nhavõ ixupe xapirẽ ogueru jepi 'rã mbojape ha'e xo'o. Ka'aru'i jave ju 'rã ogueru mbojape ha'e xo'o. Ha'e rã yakã gui ae oy'u oikovy.

⁷ Ha'e gui kueve ma rire yakã gui oy'uaty typa, yvy re nda'okyvei ramo.

Imeve'ý va'e Sarepta pygua ro py Elias oiko jave guare

⁸ Ha'e gui ixupe SENHOR oayvu ombou jevy vy aipoe'i:

* 16:34 Josué 6.26

⁹ — Aŷ ma epu'ã ke, tereo ju Sidom re tekao Sarepta oĩ va'e katy. Eiko are ha'e py, mba'eta ha'e py oiko peteĩ kunha imeve'ŷ va'e, ha'e va'e pe xeayvu ma nemongaru aguã re — he'i.

¹⁰ Ha'e ramo opu'ã ovv Sarepta katy. Tetā rokẽ py ovaẽ ovya py oma'ẽ rã ha'e py oiko peteĩ kunha imeve'ŷ va'e xakã omono'õa rupi. Ha'e rã onhenduka vy aipoe'i kunha va'e pe:

— Ajerure ndevy, eru ke xevy peteĩ ryru yy ay'u aguã.

¹¹ Ha'e rã kunha va'e yy re oo ta ramo onhenduka jevy vy aipoe'i:

— Eru avi ke mbojape ra'ykue'i peteĩ jururã'i ri jepe.

¹² Ha'e ramo kunha va'e ombovai:

— Anhetẽ ete SENHOR nderuete oikove va'e rery rupi aura vy aipoa'e: Mba'eve ndarekoi ojykue ma voi. Oĩ va'e ma peteĩ po'i trigo oja py, ha'e ruxã'i azeite hyru py. Ema'ẽ, ko ma mokoĩ yvyrá rakãgue'i ajopy va'ekue, tembi'u'i ajapo aguã xevy ha'e xepi'a pe. Ha'e va'e ro'upa ma rire romano 'rã — he'i.

¹³ Ha'e ramo Elias aipoe'i:

— Ekyje eme. Tereo ha'e ejapo tema xeayvuague. Jypy ma xevy ranhe ejapo peteĩ mbojape'i, ha'e vy eru apy oka katy. Ha'e gui mae ejapove ju ndejeupe ha'e ndepi'a pe avi.

¹⁴ Mba'eta po rami SENHOR Israel kuery ruete ijayvu: “Trigo oja py oĩ va'e ndopavei 'rã, ha'e azeite ndoatavei 'rã hyru py, yvy áry SENHOR ombo'oky e'ŷa ja”, he'i.

¹⁵ Ha'e ramo kunha va'e oo vy ojapo Elias ijayvuague. Ha'e rami rire kunha va'e ha'e hoo pygua kuery ha'e javi reve okaru okuapy, mbovy ára re e'ŷ.

¹⁶ Oja py trigo oĩ va'e ndopavei, azeite voi ndoatai hyru py, Elias pe SENHOR aipoe'i ukaague rami vy.

¹⁷ Ha'e va'e rire ma kunha hoo va'e pi'a imba'eaxy. Ha'e vy nda'eveive ovv vy omano.

¹⁸ Ha'e ramo kunha va'e aipoe'i Elias pe:

— Nhanderuete remimbo'e, mba'e tu xee ajapo ra'e? Tyrã pa xea py reju raka'e xerekovaiaque re xemoma'endu'a aguã, ha'e va'ekue káuxa rive ava'i omano aguã?

¹⁹ Ha'e ramo Elias ombovai:

— Emboaxa ha'vy ndepi'a xevy — he'i. Ha'e vy ixy jyva áry gui ojopy vy ogueraa opy ja'o yvateve ha'e ae'i okeaty py. Ha'e vy omonheno ngupa rupi.

²⁰ Ha'e gui ma ojapukai oiny SENHOR pe. Ha'e vy aipoe'i:

— SENHOR Xeruete, kova'e imeve'ŷ va'e xemovaëare voi ri ty rembojexavai ra'e, ipi'a rejuka vy — he'i.

²¹ Ha'e vy ava'i va'e áry rupi mboapykue onheno vy ojapukai ju SENHOR pe. Ha'e vy aipoe'i:

— SENHOR Xeruete, ajerure ndevy, ejapo inhe'ẽ ojevy vy hexe ju oĩ aguã rami — he'i.

²² Ha'e ramo Elias ayvu SENHOR oendu. Ha'e ramo ava'i nhe'ẽ ojevy vy hexe oĩ ju. Ha'e rã oikove ju.

²³ Ha'e gui Elias ava'i va'e oupi vy opy ja'o gui ogueroguejy ju. Ha'e vy ixy pe ju ome'ẽ vy aipoe'i:

— Ne'ixa, ndepi'a oikove ju ma — he'i.

²⁴ Ha'e ramo kunha va'e aipoe'i Elias pe:

— Namia py aŷ aikuaa ma ndee anhetẽ ae Nhanderuete remimbo'e reikoa, ha'e ndejuru rupi SENHOR ijayvua anhetẽ va'e meme.

Acabe pe Elias ojexa uka jevyague

¹ Are ma rire mboapy ma'etŷa py ma SENHOR oayvu ombou ju Elias pe. Ha'e vy aipoe'i:

— Tereo, ejexa uka ju huvixa Acabe pe, mba'eta ambo'oky ju 'rã yvy áry — he'i.

² Ha'e ramo Elias oo huvixa Acabe pe ojexa uka aguã. Ha'e va'e jave ma karuai nda'evei ete Samaria tetā py.

³ Ha'e gui Acabe oenoī mba'emo re opena va'ety Obadias. (Obadias ma SENHOR renonde ojererokyjea rupi ete oiko va'e.

⁴ Ha'e rami vy SENHOR pegua profeta kuery Jezabel ojuka ta jave Obadias cem profeta ogueraa vy mokoī itakua py onhom. Cinquenta meme omboja'o vy ha'e kuery pe mbojape ha'e yy py omongaru jepi raka'e.)

⁵ Ha'e gui Acabe aipoe'i Obadias pe:

— Tereo xeyvy re yakā ryapy ha'e yupu ikuai va'e ha'e javi rupi. Xapy'a rei jajou 'rā nhuū pyau xerymba kuery kavaju ha'e mburika'i jaraa jepe nho aguā, omanomba e'ŷ aguā — he'i.

⁶ Ha'e gui mokoīve ma yvy rupi joa katy e'ŷ oje'oi oikuua pota aguā. Acabe oo peteī tape rupi, ha'e rā Obadias ma amboae tape rupi oo avi ha'e ae'i.

⁷ Ha'e gui Obadias tape rupi ooa rupi Elias reve nhovaexī xapy'a. Obadias oexa kuaa vy guenapy'ā re oī ngova yvy re omovaē reve. Ha'e vy aipoe'i:

— Xeruvixa Elias, ndee ae pa?

⁸ Ombovai:

— Xee ae ri. Ha'e gui tereo aipo're nderuvixa pe: "Pe py ma Elias oī", 're — he'i.

⁹ Ha'e rami teī ha'e aipoe'i:

— Mba'e nunga py tu ajapo vai, Acabe po py xee nerembiguai xemboaxa aguā, xejuka aguā?

¹⁰ Anhetē ete SENHOR nderuete oikove va'e rupi aura vy aipo'a'e: Mamo rā yvy regua ikuia ha'e huvixa kuery ipo'akaa rupi ma voi xeruvixa guembiguai kuery omondouka ndereka vy. Ha'e gui ha'e pygua kuery "Apy ma noī", he'i teī ha'e kuery pe huvixa oura uka guive nandejouiague rami.

¹¹ Ha'e gui aŷ ma ndee aipo're kuri: "Tereo, aipo're nderuvixa pe: 'Pe py ma Elias oī'", 're uka xevy.

¹² Teī xapy'a rei ma ndea gui aa ramove SENHOR guigua Nhe'ē ndereraa ju 'rā, marā katy paa xee aikuua e'ŷ re. Ha'e gui reīague py huvixa Acabe aru vy ndorojoui ramo xejuka 'rā. Ha'e rami avi xee nerembiguai SENHOR re ajerovia va'e xekunumi guive.

¹³ Ha'e gui xeruvixa, ndevy pe nomombe'uai teve SENHOR pegua profeta kuery ajapo porāague Jezabel ojuka ta jave? Mba'eta SENHOR pegua profeta kuery va'e regua anhom. cem avakue, cinquenta meme anhom peteī-teī henda itakua py, ha'e vy mbojape ha'e yy py amongaru va'ekue.

¹⁴ Ha'e gui aŷ ma ndee aipo're: "Tereo, aipo're nderuvixa pe: 'Pe py ma oī Elias'", 're uka. Ha'e ramo ma xejuka 'rā — he'i.

¹⁵ Ha'e gui Elias ombovai:

— Anhetē ete SENHOR ixondaro reta va'e henonde rupi aikoa va'e rekove rupi aura vy aipo'a'e: Aŷve ajexa uka 'rā Acabe pe — he'i.

¹⁶ Ha'e ramo mae Obadias oo Acabe-a py, ixupe omombe'u. Ha'e ramo Acabe oo Elias reve ijayvu aguā katy.

¹⁷ Ha'e gui huvixa oexa vy aipoe'i:

— Israel kuery moangeko reiaty, ndee ae pa reiko?

¹⁸ Elias ombovai:

— Xee'ŷ ma Israel kuery moangeko, ha'e rā ndee ae, ha'e nderu ro pygua kuery reve, mba'eta SENHOR ojapo uka va'ekue gui pejep'e a vy Baal kuery mboetea rupi peiko.

¹⁹ Ha'e gui aŷ ma xea py emboaty ukapa Israel kuery ha'e javi, Carmelo yvyty áry. Toupa avi quattrocentos e cinquenta Baal pegua profeta kuery, ha'e quattrocentos profeta kuery yvyra ta'angaarā omopu'ā mbyre pegua, Jezabel omongaru jepi va'e — he'i.

Carmelo yvyty áry Baal pegua profeta kuery reve Elias joeko a'ā okuapayague

²⁰ Ha'e gui Israel kuery ikuia rupi Acabe omondouka guembiguai kuery omombe'u va'erā. Ha'e vy omboatypa profeta kuery Carmelo yvyty áry.

²¹ Ha'e rā heta va'e kuery ikuia py Elias ovaē vy aipoe'i ha'e kuery pe:

— Raka'e peve 'rā tu pendepy'a py ndapeikuuai rei pekuapy mokoī rupi rei vy? SENHOR ae ri Nhanderuete oiko ramo ixupe ete pendekuai. Ha'e'ŷ vy xapy'a rei Baal ri Nhanderuete oiko ramo ixupe pendekuai — he'i. Ha'e ramo heta va'e kuery teīve nombovai.

²² Ha'e gui Elias aipoe'ive ju heta va'e kuery pe:

— Xee anho'i aikove SENHOR pegua profeta kuery va'e regua. Ha'e rā Baal pegua profeta kuery ma quattrocentos e cinqüenta avakue ikuai.

²³ Aŷ ma Peru orevy mokoī vaka ra'y. Tove amboae kuery ranhe toiporavo peteī vaka ra'y, ha'e tomboa'ypa. Ha'e vy tomoī xakā áry, teī tomboja eme guive tata. Ha'e gui xee voi amboae vaka ra'y areko katu vy amoī 'rā xakā áry, tata amboja e'ŷ re avi.

²⁴ Ha'e gui ma peē kuery pejapukai 'rā pekuapy penderuete rery rupi, ha'e rā xee ma SENHOR rery rupi 'rā ajapukai. Ha'e gui tata omboua py nhanembovai va'e jaikuaa 'rā Nhanderuete oikoa — he'i.

Ha'e ramo heta va'e kuery ombovai vy

— Ha'e rami ma ha'eve — he'i okuapy.

²⁵ Ha'e gui ma Elias aipoe'i Baal pegua profeta kuery pe:

— Aŷ peiporavo peteī vaka ra'y pendejeupe guarā. Peē kuery ranhe perekō katu, penderetave vy. Pejapukai penderuete rery rupi. Ha'e rami teī pemboja eme tata — he'i.

²⁶ Ha'e ramo ha'e kuery ranhe oiporavo okuapy peteī vaka ra'y ogueru pyre regua. Oguereko katupa ma vy ojapukai okuapy nguete Baal rery rupi. Ko'ẽmba'i guive kuaray mbyte peve aipoe'i okuapy:

— Baal, orembovai na! — he'i okuapy teī mamove gui nombovai nhendui. Ha'e ramo opa marā opo-opo reve ojeroky oje'oivy altar ojapo va'ekue yvýry rupi.

²⁷ Kuaray mbyte jave ma Elias ojojai rei vy aipoe'i ha'e kuery pe:

— Pejapukai ratāve ke, mba'eta ha'e ma tuuete va'e vy xapy'a rei mba'emo re oikuua pota ra'e, e'ŷ vy oo 'rā ra'e jai katy, ha'e'ŷ vy amboae katy 'rā oguata ra'e, ha'e rami e'ŷ vy oke 'rā. Ha'e rami ri vy omyī 'rā nhi'ā oupy — he'i.

²⁸ Ha'e rami rā ha'e kuery ojapukai ratāve tema, ha'e gueko rami vy onhekxyī okuapy kyxe ha'e hu'y py, huguy onheẽmba peve.

²⁹ Kuaray mbyte rire ma teī ha'e kuery ojapukai teri, mba'emo aju guigua ome'ẽa aguã hora peve. Ha'e rami teī nombovai nhendui, ndojapyxakaai ae tema.

³⁰ Ha'e gui mae ma Elias aipoe'i heta va'e kuery ha'e javi pe:

— Penhembojapa ke xere — he'i. Ha'e ramo heta va'e kuery onhembojapa hexe. Ha'e gui jypy Elias omoatyrōmba ju SENHOR pegua altar ivaipa va'ekue.

³¹ Ha'e vy doze ita ojou heruvy Jacó ra'y kuery mbovy pa ikuaiague rami. Ha'e va'e pe ma SENHOR ijayvu vy "Aŷ gui ma Israel 'rā nderery", he'i raka'e.

³² Ha'e va'e ita py omoatyrō ju altar SENHOR rery rupi guarā. Altar yvýry rupi ojo'o yy raperā tuvixave va'e, mba'emo ra'yī ryrukue vinte quilo va'e rami.

³³ Ha'e gui xakā omoī vy vaka ra'y omboa'ypa ha'e onhono xakā áry.

³⁴ Ha'e gui ma aipoe'i:

— Pemonyē ke irundy yryru. Penhoē xo'o áry, ha'e xakā ikuai va'e ha'e javi rupi.

Aipoe'ive ju:

— Teīgue ju pejapo — he'i ramo ojapo ju okuapy.

Aipoe'ive ju:

— Teīgue ju pejapo mboapykuerā — he'i ramo mboapykuea ma ojapo okuapy.

³⁵ Ha'e ramo altar yvýry rupi peve yy oxyry vy omonyẽmba ojo'oague.

³⁶ Ha'e gui mba'emo aju guigua ome'ẽa aguã jave ma profeta Elias ju onhemboja ouvy vy aipoe'i:

— Xe-SENHOR Abraão ruete, Isaque ha'e Israel ruete va'e, aŷ gui toikuua pavē ndee ae Israel kuery ruete reikoa, ha'e rā xee ma nerembiguai aikoa, ha'e ndeayvua rami ae kova'e nunga ha'e javi ajapoague.

³⁷ Xembovai ke SENHOR, xembovai ke, kova'e kuery oikuaapa aguã ndee ae SENHOR Oreruete reikoa, ha'e ndejeupe guarã ha'e kuery py'a rerupa jevy 'rãa — he'i.

³⁸ Ha'e gui ma SENHOR-a gui tata ho'a vy oapypa xo'o omoõ mbyre, xakã, ita ha'e yvy voi, omombirupa avi yy ojo'oague rupi oĩ va'ekue.

³⁹ Ha'e nunga heta va'e kuery oexa vy guenapy'ã re ikuai ngova yvy re omovaëmba reve. Ha'e vy aipoe'i:

— SENHOR ae ma Nhanderuete! SENHOR ae ma Nhanderuete! — he'i okuapy.

⁴⁰ Ha'e ramo Elias aipoe'i ha'e kuery pe:

— Pejopypa na Baal pegua profeta kuery, neĩ peteïve oo jepe e'ŷ aguã — he'i. Ha'e ramo ojopypa ramo Elias ogueraa ukapa Quisom yakã katy, ojukapa okuapy ha'e py.

Oky aguã re Elias ojerureague

⁴¹ Ha'e gui ma Elias aipoe'i Acabe pe:

— Tereo, ekaru ha'e ey'u, mba'eta onhendu ma ouvy oky ja'ea revovo! — he'i.

⁴² Ha'e ramo Acabe oy'u ha'e okaru aguã katy oo jave Elias oẽ ovy Carmelo yvyty re. Ha'e py ojero'a oiny yvy katy, guenapy'ã re ngova omovaë reve.

⁴³ Ha'e vy aipoe'i guembiguai kunumi va'e pe:

— Tereo, ema'ẽ ye'ẽ katy.

Ha'e rã kunumi va'e oo vy oma'ẽ. Ha'e vy ombovai:

— Ndaexai mba'eve — he'i.

Ha'e rã Elias aipoe'i ixupe:

— Tereo ju ha'vy.

Ha'ekue rami sete-kue peve oiko.

⁴⁴ Ha'e gui sete-kuea py ma aipoe'i:

— Aŷ ma ye'ẽ gui oẽ jekuaa ouvy peteĩ arai, teĩ nhandepo rami kyrĩ'i va'e guive — he'i. Ha'e rã ombovai:

— Tereo ha'vy aipo're Acabe pe: “Ereko katu na ndekaróxa ha'e tereo katu, oky ndejoko e'ŷ aguã”, 're.

⁴⁵ Ha'e gui are e'ŷ'i re yva pytumba araipa vy. Ha'e vy yvytu ha'e oky vaipa. Ha'e rã Acabe okaróxa py oĩ vy ojepe'a ma ovy Jezreel tetã katy.

⁴⁶ Ha'e rã Elias re SENHOR opo omoõ ramo ojeku'akua rire onha ovy Acabe renonde, Jezreel tetã py jaike'a'i peve.

19

Horebe yvyty py Elias oikoague

¹ Ha'e gui Jezabel pe Acabe omombe'upa Elias ojapo va'ekue, Baal pegua profeta kuery kyxe py ojuka ukapaague guive.

² Ha'e ramo Elias oĩa py Jezabel omondouka peteĩ guembiguai ixupe aipoe'i va'erã: “Ko'ẽ rã kova'e hora ojeupity peve xee nderekove ndaipe'ai ramo amboae kuery re rejapoague rami, tuuete kuery ikuai va'e taxerereko axy oipotaa rami”, he'i uka.

³ Ha'e rami rã Elias okyje vy opu'ã ovy. Ojeayvu vy Berseba tetã py ovaẽ, Judá yvy re ae. Ha'e py oeja ovy guembiguai kunumi va'e.

⁴ Ha'e gui ha'e anho oove ju tekao e'ŷa katy, peteĩ ára re oguata. Ha'e py ovaẽ vy oguapy oiny peteĩ yvyra zimbro hi'aĩ va'e yvypy py. Ha'e vy ojerure oiny omano aguã re. Ha'e vy aipoe'i:

— SENHOR, ha'eve ma, aŷ eipe'a xerekove, mba'eta xeru kuery gui xerekó porãve va'e'ŷ ae — he'i.

⁵ Ha'e vy onheno vy oke oupy zimbro hi'aĩ va'e guy py.

Ha'e gui ma peteĩ anjo omomyĩ vy

— Evy ke, ekaru — he'i.

⁶ Ha'e rã oma'ẽ vy oakã yvy'iry oexa peteĩ mbojape ita raku áry ojy va'ekue, ha'e peteĩ yryru. Ha'e vy okaru ha'e oy'u. Ha'e gui oke ju.

⁷ Teĩgue ju ou SENHOR guigua anjo. Omomyĩ vy aipoe'i ixupe:

— Evy ke, ekaru, mba'eta reguata aguã mombyry vaipa teri — he'i.

⁸ Ha'e ramo ovy vy okaru ha'e oy'u ju. Ha'e va'e tembi'u gui imbaraete ma vy oguatave ju quarenta ára ha'e quarenta pytû re, Nhanderuete pegua Horebe vyty py ovaẽ peve.

⁹ Ha'e py ma peteĩ itakua oĩ va'e py oike vy oaxa oiny peteĩ pytû. Ha'e gui ixupe SENHOR oayvu ombou vy aipoe'i:

— Elias, mba'e tu rejapo reiny apy?

¹⁰ Elias ombovai:

— Xee ma SENHOR Xeruete ixondaro reta va'e pe aikoa rupi nda'evei ete, mba'eta Israel kuery hexaraipa ma okuapy ndereve guarã rejapo va'ekue gui. Ha'e rami vy oitypa altar ndevy guarã ojapo mbyre, kyxé py ojukapa guive ndevyguia profeta kuery. Aÿ xee anho'i ma aikove, ha'e xee voi xereka okuapy xejuka aguã — he'i.*

¹¹ Ha'e ramo Nhanderuete aipoe'i ixupe:

— Eẽ ha'e he'ã kova'e vyty re SENHOR renonde — he'i.

Ha'e gui ma SENHOR oaxa ovy. Jypy peteĩ vyty vaikue oitypa vyty ikuai va'e, omboa'ypa avi ovy itaova SENHOR renonde rupi. Ha'e rami teĩ vyty py ma SENHOR noĩ ra'e. Ha'e gui vyty rire ma vy ju oryryipa, teĩ vy oryryia py ma SENHOR noĩ avi.

¹² Ha'e gui vy oryryi rire ojekuaa tata, teĩ SENHOR ma noĩ tata py. Ha'e gui ma tata oaxa rire peteĩ ayvu onhendu mbegue'i ha'e ha'eve rei'i va'e.

¹³ Ha'e va'e ma Elias oendu vy oao puku apy py ngova omo'ã reve oẽ vy ho'ã itakua rokẽ py.

Ha'e gui ma ixupe ou peteĩ ayvu.

— Elias, mba'e tu rejapo re'amy apy? — he'i ju.

¹⁴ Ombovai:

— Xee ma SENHOR Xeruete ixondaro reta va'e pe aikoa rupi nda'evei ete, mba'eta Israel kuery hexaraipa ma okuapy ndereve guarã reja va'ekue gui. Ha'e rami vy oitypa altar ndevy guarã ojapo mbyre, ha'e kyxé py ojukapa ndevyguia profeta kuery. Aÿ xee anho'i ma aikove, ha'e xee voi xereka okuapy xejuka aguã — he'i.

¹⁵ SENHOR aipoe'i ixupe:

— Tereo, ejevy ju rejuague katy ae, Damasco regua tekao e'ÿa katy. Ha'e py revaẽ vy emoi Hazael Síria pygua huvixarã.

¹⁶ Ninsi ra'y Jeú remoĩ avi 'rã Israel pygua huvixarã. Ha'e gui Abel-Meolá pygua Safate ra'y Eliseu ma remoĩ 'rã profeta-rã nderekovia.

¹⁷ Ha'e gui Hazael kyxé gui oo jepe va'ekue ma Jeú 'rã ojuka, ha'e Jeú kyxé gui oo jepe va'ekue ma Eliseu 'rã ojuka.

¹⁸ Ha'e gui xejeupe guarã amoingove ma voi sete mil Israel kuery va'e regua. Ha'e va'e kuery ma Baal renonde guenapy'ã re oĩ va'e'ÿ, ha'e ha'angaa ojuru rayvu va'e'ÿ meme.

Elias ngupive guarã Eliseu oenoiaque

¹⁹ Ha'e gui Elias oo vy ojou Safate ra'y Eliseu, doze canga vaka ombo'epo va'e reve vyty oikaraia jave, ha'e rã ha'e ma doze-a va'e ogueraa. Ha'e rupi Elias oaxa ovy vy Eliseu kupe re omombo oao puku.

²⁰ Ha'e ramo Eliseu vaka oejapa vy onha ouvy Elias rakykue. Ha'e vy aipoe'i ixupe:

— Taa ranhe taxarura xeru ha'e ha'i pe ayyua rupi, ha'e gui ma aa 'rã nderupive.

Elias ombovai:

— Tereo ha'vy, ha'e gui ejevy ju. Mba'eta reikuua porã ma ndevy ajapoague — he'i.

²¹ Elias oĩa gui Eliseu ojepe'a ranhe vy ojevy mokoĩ vaka ombo'epo va'e ikuiaia py. Mokoïve ojopy vy ojuka, ha'e ijaju'y regua canga omoendy vy oexy ho'okue. Ha'e vy heta va'e kuery pe ome'ëmba ramo ho'upa okuapy. Ha'e gui mae ma ojepe'a ouvy vy Elias rupive oo ipityvõarã.

¹ Ha'e gui Síria pygua huvixa Ben-Hadade omboatypa oxondaro kuery ha'e javi. Hexeve ikuai avi trinta e dois huvixa kuery, kavaju kuery ha'e karóxa. Ha'e kuery oje'oi vy Samaria tetã ojokopa ha'e kuery rovai opu'ãa rupi.

² Ha'e gui tetã katy omondouka Israel kuery ruvixa Acabe pe imombe'uarã kuery.

³ Ha'e vy aipoe'i okuapy ixupe:

— Po rami ijayvu Ben-Hadade: “Prata ha'e ouro rerekva'e ma xemba'e ae. Ha'e nderayxy kuery ha'e nderay ipo'akakueve voi xemba'e meme 'rã!” he'i.

⁴ Ha'e rã Israel pygua huvixa ombovai:

— Xeruvixa, ndeayvua rami ae tema toiko. Xee ha'e opa mba'e areko va'e ha'e javi ma ndevy guarã meme — he'i.

⁵ Ha'e gui imombe'uare kuery teigue ju ou vy aipoe'i okuapy:

— Po rami ijayvu Ben-Hadade: “Ndea py anhetã amondouka va'ekue pe aipoa'e uka: ‘Xevy remboaxa mate 'rã prata ha'e ouro, ha'e gui nderayxy ha'e nderay kuery’, ha'e uka va'ekue.

⁶ Ha'ekue rami ae tei ko'ẽ rã, kova'e hora ojeupity jevya py xerembiguai kuery ambou ju 'rã. Ha'e va'e kuery ma nderopy rupi oike vy oexapa 'rã, nerembiguai kuery opena va'ety ro rupi guive. Ha'e vy oipe'a 'rã heravy iporãgueve oexa va'e rei”, he'i.

⁷ Ha'e nunga Israel pygua huvixa oendu vy oenoí ukapa nhomongeta va'ety kuery oyvy re ikuai va'e. Ha'e vy aipoe'i ha'e kuery pe:

— Peikuaa ae ha'e va'e ava ha'eve'ý va'e anho ojapoxe oikovya. Mba'eta xera'yxy ha'e xera'y kuery, ha'e gui prata ha'e ouro guive ome'ẽ ukapa ramo xee name'ëxe e'ýi — he'i.

⁸ Ha'e ramo nhomongeta va'ety kuery ha'e heta va'e kuery ha'e javi aipoe'i okuapy ixupe:

— Ejapyxaka rei eme ta'vy ijayvua re, ejapo eme guive.

⁹ Ha'e ramo huvixa ombovai Ben-Hadade rembiguai kuery pe:

— Aipopeje penderuvixa pe: “Jypy xee nerembiguai pe rejerure ukaague ajapo ta va'ekue. Ha'e rã angegua ma ndajapo reguai”, peje. Ha'e rami ombovai ramo tembiguai kuery ojevy vy omombe'upa.

¹⁰ Ha'e gui Ben-Hadade omondoukave ju imombe'uarã kuery. Ha'e vy aipoe'i:

— Xapy'a rei Samaria guigua yvy ku'i xerupiveguia kuery po tynyëmba aguã rami peve tei optya ramo tuuete kuery ikuai va'e taxerereko axy oipotaa rami — he'i.*

¹¹ Ha'e rã Israel pygua huvixa ombovai:

— Aipopeje ixupe: “Joe opu'ã aguã onhemoatyrõ teri reve oiko va'e ma nda'evei ijayvu aguã joity maague gui ojevy va'ekue ijayvua rami rive”, peje 'rã.

¹² Ha'e rami ombovaique Ben-Hadade oendu oo py huvixa kuery mboae reve oy'u okuapy py. Ha'e vy aipoe'i guembiguai pe:

— Peiko katu pavã ha'vy — he'i ramo oiko katupa ma tetã pygua kuery rovai opu'ã aguã.

¹³ Ha'e gui ma Israel pygua huvixa Acabe-a py ovaõ peteñ profeta. Ha'e vy aipoe'i ixupe:

— Po rami ijayvu SENHOR: “Rexa pa peva'e avakue nhomboaty va'e ha'e javi? Ha'e va'e kuery ma kova'e árave amboaxapa 'rã ndepo py. Ha'e ramo reikuua 'rã xee ae SENHOR aikoa”, he'i.

¹⁴ Ha'e ramo Acabe oporandu:

— Mava'e kuery po rupi 'rã ha'vy aity uka?

Profeta ombovai:

— Po rami SENHOR ijayvu: “Kunumigue xondaro ruvixa kuery rembiguai ikuai va'e po rupi 'rã reity uka”, he'i.

Ha'e ramo Acabe oporanduve ju:

— Mava'e ranhe 'rã tu omboypy joe opu'ã aguã?

— Ndee ae 'rã ri — he'i profeta.

* 20:10 Ha'e ramo Ben-Hadade ouraa rupi ijayvu Samaria tetã omomba ete aguã re.

¹⁵ Ha'e ramo oipapa ukapa kunumigue xondaro ruvixa kuery rembiguai ikuai va'e. Ha'e ramo duzentos e trinta e dois oikuua. Ha'e gui Israel kuery ha'e javi ju oipapa uka vy sete mil oikuua.

¹⁶ Kuaray mbyte jave ha'e kuery oje'oi. Ha'e va'e jave py Ben-Hadade ma opy oy'u tema oiny, oka'upa rei guive okuapy, huvixa kuery mboae trinta e dois oipytyvõa rupi ikuai va'e reve.

¹⁷ Ha'e gui kunumigue ranhe tenonde jogueraa, huvixa kuery rembiguai va'e. Ha'e ramo oexa pota va'erã Ben-Hadade omondouka va'ekue oexa vy

— Samaria tetã gui ou jekuua avakue — he'i uka ixupe.

¹⁸ Ombovai:

— Ha'e kuery ma xapy'a rei peteĩ rami nhandekuai aguã re ojerure vy ou ramo pejopypa rive 'rã oikove reve. Orere opu'ã aguã ri ou teĩ ha'e rami ae avi pejopypa rive 'rã oikove reve — he'i.

¹⁹ Ha'e gui tetã gui kunumigue huvixa kuery rembiguai va'e jogueru, ha'e hupive xondaro kuery ha'e javi ou va'e ma

²⁰ peteĩ-teĩ ojuka avakue ojee opu'ã va'e. Ha'e ramo Síria pygua kuery onhamba ramo Israel kuery oje'oi hakykue. Ha'e rã Síria pygua huvixa Ben-Hadade ma kavaju áry oo jepé, kavaju árygua kuery mboae reve.

²¹ Ha'e gui Israel pygua huvixa ou vy ojukapa kavaju, karóxa guive ombovaipa. Ha'e vy ojuka reta avi Síria pygua kuery.

²² Ha'e gui Israel pygua huvixaa py profeta ou jevy vy aipoe'i ixupe:

— Tereo, ha'e enhemombaraeteve na. Eikuua pota porã mba'e pa rejapo aguã re, mba'eta peteĩ ma'etýa py Síria pygua huvixa ou jevy 'rã nderovai — he'i.

²³ Ha'e gui Síria pygua huvixa rembiguai kuery aipoe'i okuapy ixupe:

— Israel kuery ruete nhi'ã yvyty rupi rive ipo'aka va'e. Ha'e nunga rupi ae ipo'aka karamboae nhande kuery re. Ha'e rã yvy joja reia rupi ri ha'e kuery rovai nhapu'ã vy nhande ju 'rã jaity ha'e kuery.

²⁴ Ha'e nunga rupi ejapo po rami: Reipe'apa 'rã huvixa ndereve ikuai va'ekue ha'e javi, ha'e hekovia remoĩ 'rã xondaro ruvixa ae.

²⁵ Ha'e gui rejouve ju 'rã xondaro kuery, omanomba va'ekue hetaa rami ae. Ha'ekue rami ae ju 'rã rejou kavaju ha'e karóxa voi. Ha'e gui yvy joja reia rupi ha'e kuery rovai nhapu'ã vy nhi'ã jaitypa 'rã — he'i okuapy. Ha'e rami ha'e kuery ijayvua oendu ma vy ha'e rami ae ju ojapo.

²⁶ Ha'e gui peteĩ ma'etýa py Ben-Hadade oo jevy vy Síria pygua xondaro kuery re oexa potapa. Ha'e vy Afeca katy ogueraa Israel kuery re opu'ã aguã.

²⁷ Ha'e gui Israel kuery re voi oexa potaa, ha'e ho'u va'erã ogueraa reve oje'oi amboae kuery rovai. Israel kuery ma amboae kuery renonde ikuiaia py mokoĩ henda py mbov'y'i e'ŷ kavara kuery rami rive'i ojekuua. Ha'e rã Síria pygua kuery ma yvy jojaa opa rupi ikuai.

²⁸ Ha'e gui ovaẽ peteĩ ava Nhanderuete remimbo'e. Ha'e vy Israel pygua huvixa pe ijayvu vy aipoe'i:

— Po rami SENHOR ijayvu: “Síria pygua kuery aipoe'i: ‘SENHOR ma yvyty rupi anho ri ipo'aka va'e, yvyugua rupi ipo'aka va'e'ŷ’, he'i okuapy teĩ xee ma ndepo py amboaxapa rã peva'e kuery ha'e javi. Ha'e ramia py reikuua aguã xee ae SENHOR aikoa”, he'i.

²⁹ Ha'e gui sete ára re ikuai joexei'i. Sete araa py ma omboypy okuapy joe opu'ã aguã. Ha'e vy Israel kuery ma peteĩ ára pyve cem mil avakue vyvoi ojuka Síria pygua xondaro kuery yvy rupigua.

³⁰ Ha'e ramo hembyrekue ma Afeca katy onhamba vy oikepa jogueravy tetã py. Tetã kora ma vinte e sete mil avakue hembyre va'ekue áry ho'a ramo omanomba. Ha'e rã Ben-Hadade ma onha vy tetã katy ou vy onhemi peteĩ opy ja'o py.

³¹ Ha'e gui ixupe hembiguai kuery aipoe'i:

— Ma'ë, roendu ma Israel pygua huvixa kuery nhomboaxya rupi ikuiaia. Ha'e nunga rupi nhandejee nhamoĩ 'rã ajukue voxá guigua rive, ha'e nhaneakã rupi ixã nhaimama

'rã heravy, Israel pygua huvixaa py nhaẽ aguã. Xapy'a rei ma nandekukai nho 'rã — he'i okuapy.

³² Ha'e rami ojee omoĩ okuapy ajukue voxua guigua, ha'e oakã rupi ixã omoĩ va'e reve oẽ okuapy Israel pygua huvixaa py. Ha'e vy ixupe aipoe'i okuapy:

— Nerembiguai Ben-Hadade aipoe'i uka: “Xejuka eme nho ta'vy”, he'i uka.

Ha'e rã Acabe ombovai:

— Oikove teri ri ty'y? Ha'e ma xeryvy — he'i.

³³ Ha'e rami ijayvu rã avakue ipy'a guaxuve vy ombovai ju aipoe'iague rami.

— Ben-Hadade ma nderyvy ae! — he'i okuapy ramo ombovai:

— Peju ha'vy peru xea py — he'i. Ha'e ramo mae Ben-Hadade oẽ ouvy oĩa katy. Ha'e rã oguerojeupi okaróxa py ae.

³⁴ Ben-Hadade aipoe'i Acabe pe:

— Ndevy amboaxapa ju 'rã tetã nderu gui xeru oipe'a va'ekue. Damasco py ae 'rã remondouka ndevygua mba'emo vendea kuery, xeru Samaria py ojapoague rami.

Acabe ombovai:

— Ha'e gui xee ma romondouka porã ju 'rã, ndereve peteĩ rami nhandekuai aguã regua ajapo va'erã rami vy — he'i. Ha'e vy hexeve peteĩ rami ikuai aguã ojapo ma vy omondouka ju.

³⁵ Ha'e ramo peteĩ profeta remimbo'e aipoe'i oirũ pe SENHOR aipoe'iague rami vy:

— Ejeai ha'vy xere — he'i oirũ pe teĩ irũ ndojeaixei.

³⁶ Ha'e ramo aipoe'i ixupe:

— Ndee ma SENHOR nerenhé rendui rire aŷ'i xea gui rejep'e a ramove peteĩ guary ou vy ndejuka 'rã — he'i. Ha'e gui ojep'e a ový ramove peteĩ guary ovaexí vy ojuka.

³⁷ Ha'e gui profeta ma ava mboae ju ojou vy aipoe'i ixupe:

— Ejeai xere — he'i ramove ojeai vy oity.

³⁸ Ha'e gui profeta oo tape huvixa ouaty va'e rupi teĩ ngova omo'ãmba reve hi'aĩ ojexa kuaa uka e'ŷ aguã.[†]

³⁹ Huvixa oaxa rã ojapukai vy aipoe'i:

— Xee nerembiguai ma joe opu'ãa mbyte py aiko jave xea py xeirũ ou vy ogueru peteĩ ava xea py. Ha'e vy aipoe'i xevy: “Epena ke kova'e ava re, mba'eta kova'e okanhý ri ramo ndee ae 'rã remboekovia nderekove py, ha'e rami e'ŷ ri vy hekovia reme'ë 'rã trinta e cinco quilos prata guigua”, he'i va'ekue xevy.

⁴⁰ Ha'e gui xee nerembiguai xereketa rei jave ava va'e oo ma ra'e — he'i.

Ha'e ramo Israel pygua huvixa ombovai:

— Nembopagaa 'rã ndee ae aipo'reague rami vy — he'i.

⁴¹ Ha'e ramove oakã oimamaague omboi vyvoi ngova gui. Ha'e ramo mae ma Israel pygua huvixa oexa kuaa ramo profeta kuery va'e regua ae ra'e.

⁴² Ha'e vy aipoe'i huvixa pe:

— Po rami SENHOR ijayvu: “Ndee ma ava ndepo py opaga aguã amboaxa va'ekue, teĩ repoi rire ma hekovia aipe'a 'rã nderekove, ha'e ixupagua kuery ikuai axy 'rãgue py ndevygua kuery 'rã ikuai axy”, he'i uka ndevy.

⁴³ Ha'e ramo Israel pygua huvixa oo ju ngoo katy, ndojou porãi ha'e nonhenhandu porãvei reve. Ha'e vy Samaria tetã py ju ovaõ.

Acabe pe Nabote ombo'e uvaty novendexeague

¹ Ha'e va'e rire ma pova'e oiko. Jezreel pygua Nabote hery va'e oguerekao peteĩ uvaty. Jezreel py ae onhotŷ va'ekue Samaria pygua huvixa Acabe ro yvy'iry.

² Ha'e gui Acabe aipoe'i Nabote pe:

[†] ^{20:38} Profeta ombojeaixe ojee huvixa oexa vy oikuaa e'ŷ aguã profeta oikoa.

— Eme'ẽ na nemb'a'e uvaty xe-hortarã, mba'eta xero yvy'iry optya. Ha'e rã hekoria ame'ẽ 'rã uvaty mboae iporãve va'e. Ha'e rami e'ŷ vy amboae rami reipota ramo ndevy ame'ẽ 'rã peráta hepya rami ae tema.

³ Nabote ombovai Acabe pe:

— SENHOR taxejoko xeramoĩ kuery yvy oeja va'ekue joupe amboaxa e'ŷ aguã — he'i.

⁴ Ha'e gui Acabe ma ndojou porãi ha'e nda'evei ete reve oo ju ngoo py, ixupe Jezreel pygua Nabote “Ndevy name'ẽi 'rã xeramoĩ kuery yvy oeja va'ekue”, he'i rire. Ha'e vy ngupa rupi onheno oupy vy hovai katy ngova ombojere vy neĩ ndokaru potai.

⁵ Ha'e gui ituia py ta'yxy Jezabel ou vy oporandu:

— Mba'e tu oĩ ha'e rami ete nderejou porãi va'e nenhe'ẽ py, neĩ nderekarui aguã?

⁶ Ime ombovai:

— Mba'eta Jezreel pygua Nabote pe “Emboekovia na nde'uvaty peráta re, e'ŷ vy reipotaa rami amboae uvaty ame'ẽ va'erã re”, ha'e ramo ombovai: “Ndevy name'ẽi 'rã xe'uvaty”, he'i.

⁷ Ha'e ramo ta'yxy Jezabel aipoe'i:

— Israel kuery ruvixa e'ŷ ri ty'y ndee reiko? Evy ke, ekaru, ha'e evy'a guive ndepy'a py. Ha'e rã xee ma ndepo py amboaxa 'rã Jezreel pygua Nabote uvaty — he'i.

Jezabel Nabote ojuka ukaague

⁸ Ha'e gui Acabe rery rupi ta'yxy ombopara kuaxia. Acabe rery oĩa reve guive omboja vy ogueraa uka Nabote rekua py nhomongeta va'ety ha'e yvatekueve ikuai va'e pe.

⁹ Ha'e vy kuaxia re ombopara vy aipoe'i: “Pejapo okaru e'ŷ re ikuai aguã, ha'e gui Peru Nabote heta va'e kuery renonde.

¹⁰ Henonde py Peru avi 'rã mokoĩ avakue heko vai va'e hexe ijayvu rive va'erã, ‘Nabote ijayvu vai Nhanderuete ha'e huvixa rovai’, he'i aguã. Ha'e gui ma tetã gui peraa 'rã mombyrya py, ha'e pejapipa 'rã ita py omano peve”, he'i ombopara vy.

¹¹ Ha'e gui ma ha'e va'e tetã pygua nhomongeta va'ety kuery ha'e yvatekueve ojapo okuapy Jezabel aipoe'iague rami, kuaxia para ogueraa uka va'ekue re oĩa rami ae.

¹² Ha'e rami vy omombe'u peteĩ ára re okaru e'ŷ re ikuai aguã. Ha'e vy heta va'e kuery renonde ogueru Nabote.

¹³ Henonde py ogueru avi mokoĩ avakue heko vai va'e. Heta va'e kuery oendua py ijayvu rive Nabote rovai.

— Ijayvu vai Nhanderuete ha'e huvixa rovai — he'i okuapy. Ha'e ramo tetã gui ogueraa okuapy vy ita py ojapipa, ha'e rã omano.

¹⁴ Ha'e va'e rire Jezabel pe omombe'u uka Nabote ojapipaa rã omano maa.

¹⁵ Ha'e gui Nabote ojapipaa rã omano maa Jezabel oendu vy aipoe'i Acabe pe:

— Epu'ã ke, ha'e ejopy uvaty Jezreel pygua Nabote peráta re nomboekoviaxei va'ekue. Mba'eta Nabote ndoikovevei ma, omano ma — he'i.

¹⁶ Nabote omano maa Acabe oendu vy opu'ã ju, ha'e Nabote mba'ekue uvaty katy oo ejopy aguã.

Acabe ha'e Jezabel pe Elias ijayvu poyiague

¹⁷ Ha'e gui ma Tisbé pygua Elias pe SENHOR oayvu ombou vy aipoe'i:

¹⁸ — Epu'ã ke, tereo revaexi aguã Israel pygua huvixa Acabe Samaria py hekoa va'e. Nabote mba'ekue uvaty py 'rã rexâ, ojeupe guarã ejopy aguã ooague py.

¹⁹ Ixupe ndeayvu vy aipo're: “Po rami SENHOR ijayvu: ‘Rejojuka uka ma, ha'e gui rejapo vaive vy imba'ekue'i ae reipe'apa ta?’ he'i. Po rami SENHOR ijayvuve ju: ‘Nabote ruguy jagua oy'uague py ae ju oy'u avi 'rã nderuguy’, he'i”, 're 'rã.

²⁰ Ha'e gui Acabe Elias oexa vy oporandu ixupe:

— Aŷ pa xejou ma, xerovaigua?

Elias ombovai:

— Tá, rojou ae ma, mba'eta renheme'ẽ ma SENHOR renonde ha'eve'ŷ va'e rejapo aguã.

²¹ Po rami SENHOR ijayvu ndere: “Ne'exa, ndere ambou 'rã mba'emo vai. Ha'e rami vy amokanhymba 'rã neramymino kuery, Israel gui amomba 'rã ndee Acabe ramymimo kuery avakue ikuai va'e ma guive rã, escravo e'ŷ vy ikuai rive'i va'ekue tei.

²² Ndero pygua kuery re ajapo 'rã Nebate ra'y Jeroboão ro pygua kuery re ajapoague ramigua, ha'e Aías ra'y Baasa ro pygua re, xembopoxy rei rire, ha'e Israel kuery oguerojejavypa ague re”, he'i.

²³ Ha'e gui Jezabel re voi SENHOR ijayvu: “Jezreel tetã py ae jagua ho'upa 'rã Jezabel retekue.

²⁴ Acabe kuery va'e regua tetã rupi omano rã jagua ho'upa 'rã, ha'e rã mba'ety rupi omano ramo ma guyra oveve va'e 'rã ho'upa”, he'i.

²⁵ Mava'eve ndoikoi raka'e Acabe rami ete, mba'eta onheme'ẽ rei SENHOR renonde ha'eve'ŷ va'e ojapo aguã, ta'yxy Jezabel ombo'eague rami rive.

²⁶ Mba'eta mba'emo ra'angaa re rive ojeroviaa rupi oiko vy ojapo ha'eve'ŷ ete va'e, amorreu kuery ojapoague ramigua meme. Ha'e va'e kuery ma SENHOR oipe'apa Israel kuery ikuai aguã gui.

²⁷ Ha'e gui ma ha'e va'e ayvu Acabe oendu vy omondoropa oao, ha'e ajukue voxá guigua py rive onheovãmba vy okaru e'ŷ re oiko. Voxá py guive oke, ha'e oakã oity rei reve oiko.

²⁸ Ha'e gui SENHOR oayvu ombou ju Tisbé pygua Elias pe. Ha'e vy aipoe'i:

²⁹ — Rexa pa Acabe xerenonde onhemo'yvy'i oikovya? Xerenonde onhemo'yvy'i ramo ma oikove teria ja namboui 'rã mba'emo vai ambou 'rã va'ekue. Ha'e rã ta'y ju ma oĩ jave ambou 'rã hoo pygua kuery re.

22

2 Crônicas 18.1-3

¹ Mboapy ma'etŷ oaxa Síria ha'e Israel kuery reve joe opu'ã ve'ŷ re.

² Ha'e gui mboapy ma'etŷa py ma Judá pygua huvixa Josafá oo joexa aguã Israel pygua huvixa reve.

³ Ha'e jave py Israel pygua huvixa aipoe'i guembiguai kuery pe:

— Ndapeikuai ri ty'y Ramote-Gileade tetã nhanemba'erã optytaa? Mba'exa tu ha'vy ndajaa potai teri Síria pygua huvixa po gui jaipe'a ju aguã? — he'i.

⁴ Huvixa Josafá pe ju oporandu:

— Ndee pa reo avi 'rã orereve Ramote-Gileade re ropu'ã aguã katy?

Josafá ombovai Israel pygua huvixa:

— Xee ma aiko 'rã ndereve, xevygua kuery voi ndevygua kuery revegua ae avi 'rã, xerymba kuery kavaju voi nerymba kuery kavaju rami avi 'rã ikuai — he'i.

2 Crônicas 18.4-11

⁵ Ha'e gui Josafá aipoe'ive ju Israel pygua huvixa pe:

— Eikuua pota ranhe ke SENHOR ijayvua re — he'i.

⁶ Ha'e ramo Israel pygua huvixa omboatypa profeta kuery, quatrocentos avakue ha'e javi vy. Ha'e vy aipoe'i ha'e kuery pe:

— Taa pa Ramote-Gileade re apu'ã aguã, tyrã pa taa eme?

Ha'e kuery ombovai vy

— Tereo oreruvixa, mba'eta SENHOR omboaxapa 'rã ndepo py — he'i okuapy.

⁷ Ha'e rã Josafá ma aipoe'i:

— Nda'ipoi teri pa apy profeta SENHOR pegua ete jaikuaa pota ranhe aguã?

⁸ Israel pygua huvixa ombovai Josafá pe.

— Petei'i teri oiko ha'e va'e rupi SENHOR ayvu re jaikuaa pota aguã. Ha'e rami avi hexe ma xee ndaxe'a'ei, mba'eta xerenonderã re nomombe'ui iporã va'e, iporã e'ŷ va'e anho. Ha'e va'e ma Inlá ra'y Micaías — he'i.

Ha'e rã Josafá aipoe'i:

— Huvixa, ha'e rami ndeayvu eme.

⁹ Ha'e gui Israel pygua huvixa ma peteí guembiguai oenoí vy ixupe aipoe'i:

— Tou vyvoi ta'vy xea py Inlá ra'y Micaías — he'i.

¹⁰ Ha'e va'e jave py ma Israel pygua huvixa ha'e Judá pygua huvixa reve jogueroguapy nhoguenoiny peteī-teī guenda py ae, ha'e huvixa pegua ao py ae onhemonde reve, Samaria tetā oike ovya rokē yvýry, mba'emo moa'yiaty py. Ha'e kuery renonde ma profeta kuery ha'e javi ijayvu okuapy.

¹¹ Ha'e gui Quenaana ra'y Zedequias ma vaka rakua ra'angaa oguereko ferro gui ojapo va'ekue. Ha'e vy aipoe'i:

— Po rami SENHOR ijayvu: “Kova'e ramigua py reipyxo 'rā Síria pygua kuery reitypa peve”, he'i.

¹² Ha'e gui profeta mboae kuery pov'a e ayvu rupi meme ijayvu okuapy.

— Oreruvixa, tereo ke Ramote-Gileade katy, ha'e py ma ndepo'aka 'rā, mba'eta SENHOR omboaxapa 'rā ndepo py — he'i okuapy.

2 Crônicas 18.12-27

¹³ Ha'e gui tembiguai Micaías reruarā oo va'ekue ixupe ijayvu vy aipoe'i:

— Ma'lē, profeta kuery ikuai va'e ma peteī'i rami ijayvu kuri huvixa pe mba'emo porā re anho. Ndee voi ndeayvu 'rāgue ha'e kuery ijayvuague rami ae, mba'emo porā re anho.

¹⁴ Ha'e rā Micaías ombovai:

— Anhetē ete SENHOR oikove va'e rupi aura vy aipoa'e: Xee ma SENHOR aipoe'i ucaa rami ae 'rā xeayvu — he'i.

¹⁵ Ha'e gui ma huvixaa py ovaẽ ramove ixupe oporandu:

— Micaías, toroo ae pa Ramote-Gileade re ropu'ā vy, tyrā pa toroo eme?

Micaías ombovai:

— Tapeo, ha'e vy pendepo'aka 'rā, mba'eta ndepo py SENHOR omboaxapa 'rā — he'i.*

¹⁶ Ha'e rami rā huvixa aipoe'i ixupe:

— Mbovykue ma tu ndevy xeayvu, SENHOR rery rupi anhetē va'e re anho ndeayvu aguā?

¹⁷ Ha'e rā Micaías aipoe'i:

— Israel kuery aexapa vytyt áry rupi omoimbaa ramo, vexa'i ija e'ŷ va'e rami. Ha'e ramo SENHOR aipoe'i: “Peva'e kuery ma ija e'ŷ va'e vy peteī-teī too porā ngoo katy”, he'i kuri xevy.

¹⁸ Ha'e ramo Israel pygua huvixa aipoe'i Josafá pe:

— Aipoa'e ae ma ndevy: “Ha'e va'e ma xerenonderā re nomombe'ui ae iporā va'e, ha'e rā iporā e'ŷ va'e anho”, ha'e ma voi kuri.

¹⁹ Ha'e gui ma Micaías ijayvuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rā, ha'e oĩa py ikuai avi ixondaro kuery yva pygua ha'e javi, ijaxu e'ŷa re ha'e ijaxua re.

²⁰ SENHOR oporandu: “Mava'e 'rā tu Acabe mbotavyarā oo, Ramote-Gileade tetā py omano aguā?” he'i ramo peteī ma peteī rupi ijayvu, ha'e rā amboae ma amboae rami ijayvu.

²¹ Ha'e gui ma peteī nhe'ē ou vy ojexa uka SENHOR renonde. Ha'e va'e aipoe'i: “Xee ma ambotavy 'rā” he'i. Ha'e rā SENHOR oporandu: “Mba'e py ha'vy?”

²² Ombovai: “Aa 'rā nhe'ē imbotavyarā aĩ ixupergua profeta kuery ha'e javi juru re”, he'i. Ha'e rami rā SENHOR aipoe'i: “Ndee ma rembotavy 'rā, amboae kuery gui ndepo'akave vy. Tereo ha'vy, ejapo ha'e rami”, he'i.

²³ Ha'e rami rā kova'e profeta kuery ndevygua ikuai va'e juru re SENHOR omoī ra'e nhe'ē nembotavyarā. Ha'e rā SENHOR ae nderovai ijayvu mba'emo vai oiko aguā re — he'i.

²⁴ Ha'e ramo Quenaana ra'y Zedequias onhemboja vy oipete Micaías. Ha'e vy aipoe'i:

— Ma rupi tu ha'vy xegui SENHOR nhe'ē oẽ ndereve ijayvu aguā?

²⁵ Micaías ombovai:

— Reikuua 'rā opy ja'o py renhemi aguā reike jave — he'i.

²⁶ Ha'e gui Israel pygua huvixa ju aipoe'i:

* 22:15 Micaías ma profeta ramigua kuery ayvu rupi rive ranhe ijayvu, anhetē va'e'ŷa rami oikuaa uka vy.

— Pejopy ke Micaías, ha'e pemboaxa tetā ruvixa Amom ha'e huvixa ra'y Joás po py.

²⁷ Ha'e vy aipopeje: “Po rami huvixa ijayvu: ‘Pemboty nhuā py kova'e ava, ha'e pembojexavai mbojape ha'e yy ruxā'i kuerei peme'ēa py, ajevy porā ju e'ŷa ja', he'i.”

²⁸ Ha'e ramo Micaías aipoe'i:

— Teĩ xapy'a rei anhetē ri rejevy porā ramo SENHOR ayvu rupi e'ŷ xeayvu ramo ma'rā.

Aipoe'ive ju:

— Peẽ kuery ha'e javi, pendu pota povae're re! — he'i.

2 Crônicas 18.28-34

²⁹ Ha'e gui ma Ramote-Gileade tetā katy Israel pygua huvixa jogueraa Judá pygua huvixa Josafá reve.

³⁰ Israel pygua huvixa aipoe'i Josafá pe:

— Xee ma amboae rami anhemonde reve 'rā aa joe apu'ā aguā katy. Ha'e rā ndee ma ndeao py ae 'rā renhemonde — he'i. Ha'e rami vy Israel pygua huvixa amboae rami onhemonde reve oo joe opu'āa py.

³¹ Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: “Pepu'ā eme ou va'e-va'e rovai, yvatekueve ikuai teĩ, ha'e rā Israel pygua huvixa rovai anho'i”, he'i va'ekue.

³² Ha'e gui huvixa karóxa mboguataa kuery ma Josafá oexa vy

— Peva'e ae ri nhi'ā Israel pygua huvixa — he'i okuapy. Ha'e vy ha'e katy oje'oi ojoko aguā. Ha'e ramo Josafá ojapukai.

³³ Ha'e gui huvixa karóxa mboguataa kuery ma Israel pygua huvixa e'ŷ ae ra'ea oikuua vy oejapa ju oje'oivy.

³⁴ Ha'e gui ma peteĩ ava guyrapa xā omoatā vy opoia katy rei opoi vy onhyvō Israel pygua huvixa pexo regua pa'ūa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'āa mbyte gui xereraa aguā, mba'eta xepyxoa ma — he'i.

³⁵ Ha'e va'e ára ma joe opu'āve tema okuapy. Ha'e rā huvixa ma Síria kuery oexaa py omopu'āa imoiny ikaróxa py, ha'e ijai aui huguy onheē oiny karóxa py rupi. Ha'e rire ka'aru ma jave omano.

³⁶ Kuaray ndojopevei ma jave onhendu peteĩ ayvu xondaro kuery ikuia rupi, “Peteĩ-teĩ tapeo pendekoa katy, peteĩ-teĩ tapeo pendeyvy katy ae”, he'i va'e.

³⁷ Huvixa Acabe omano ma ramo Samaria tetā py ogueraa vy onhono porā okuapy ha'e py.

³⁸ Ha'e rā ikaróxa ma Samaria py yy ojoko pyre yvýry ojoi ramo jagua oere okuapy huvixa ruguykue, SENHOR aipoe'iague ramo vy. Ha'e va'e yy py kunhague itavy rei va'e voi ojau'rā.

³⁹ Ha'e gui oïve rei tema Acabe rekokue regua. Ha'e rami avi oorā marfim gui anho ojapoague, tetā ha'e mba'emo ojapo va'ekue ha'e javi noī 'rā teve kuaxia Israel pygua huvixa kuery rekokue oïa re?

⁴⁰ Ha'e rami py Acabe ndoikovevei'i ma guamoī kueryague ramo. Ha'e ramo ta'y Acazias ju oïnguu rekovia.

2 Crônicas 20.31-37

⁴¹ Ha'e gui Israel pygua huvixa Acabe irundy ma'etŷ re ma oï jave py Asa ra'y Josafá oï Judá kuery ruvixarā.

⁴² Huvixa oï ypy'i jave Josafá ma trinta e cinco ma'etŷ oguereco. Ha'e vy vinte e cinco ma'etŷ re huvixa oï Jerusalém py. Ixy rery ma Azuba, Sili rajy.

⁴³ Ha'e ma nguu Asa oikoague rupi ae oiko. Ha'e va'e rupi oikoa gui ndojope'ai vy ha'evea ramigua meme ojapo SENHOR renonde.

⁴⁴ Ha'e rami teĩ yvy'ā rupi ombojerovia atyrā ojapo pyre ndoipe'ai ramo ha'e va'e py heta va'e kuery mba'emo ome'ē ha'e heakuā porā va'e oapy tema okuapy.

⁴⁵ Josafá ma peteĩ ramo ikuai Israel pygua huvixa reve.

⁴⁶ Ha'e gui oīve rei tema Josafá rekokue regua. Ha'e rami avi opo'akaa oexa ukaague, joe opu'āague, ha'e mba'emo ojapo va'ekue ha'e javi noī 'rā teve kuaxia Judá pygua huvixa kuery rekokue oīa re?

⁴⁷ Ha'e rami avi oyvy gui oipe'apa avakue ta'angaa pegua itavy rei va'ekue, nguu Asa teri oī jave py opyta va'ekue ha'e javi.

⁴⁸ Ha'e va'e jave ma noī huvixave Edom py, ha'e rā peteī oiko joe opena ucaa va'e.

⁴⁹ Josafá ojapo kanoā guaxu Társis guigua Ofir katy ouro re oo aguā, va'eri ndooi, Eziom-Geber py kanoā guaxu opēmba rā.

⁵⁰ Acabe ra'y Acazias aipoe'i Josafá pe:

— Xerembiguai kuery toje'oi avi kanoā guaxu py nerembiguai kuery reve — he'i teī Josafá ndoipotai.

⁵¹ Ha'e gui Josafá ndoikovevei'i ma guamoī kueryague rami. Ha'e ramo onhono porāa tetā guamoī Davi rekoague py. Ha'e gui ta'y Jeorão ju oī nguu rekovia.

Israel pygua huvixa Acazias oī jave guare

⁵² Ha'e gui Judá pygua huvixa Josafá dezessete ma'etý re ma oī jave py Acabe ra'y Acazias oī Israel pygua huvixarā, Samaria py. Ha'e vy mokoī ma'etý peve opena Israel kuery re.

⁵³ Ha'e va'e ma ha'eve'ŷ va'e ojapo oikovy SENHOR renonde rupi, mba'eta nguu ha'e oxy oikoague rami ae oiko, ha'e Nebate ra'y Jeroboão Israel kuery oguerojejavypa ague rupi. Ha'e rami vy Baal pe rive oiko omboetea py. Ha'e rami py ojapo SENHOR Israel kuery ruete ipoxy aguā rami, nguu ojapoague ha'e javi rami ae ju.

Mokoña kuaxia huvixave rei kuery rekokue oĩa Mokoña kuaxia huvixave rei kuery rekokue oĩa

Kova'e kuaxia para re ma oĩ mokoñ henda py judeu kuery ikuai: kuaray ijapu'a'ia katy ha'e ipuku-a katy.

Kuaray ijapu'a'ia katy ikuai va'e ma Israel kuery. Opaa py Assíria pygua kuery ou vy ojuka, ombojexavai ha'e escravo-rã ogueraapa. “Ha'e va'e nunga oiko raka'e mba'eta Senhor nguuete pe Israel kuery ojejavypa ramo, Egito yvy gui oguerupa rire tei, Egito pygua huvixa Faraó po'akaa rupi ikuaiague gui. Ha'e rami rire tei amboae regua tuuete ramigua kuery ju ha'e kuery omboete okuapy. Yvy regua kuery reko rupi rive ikuai. ... Ha'e nunga rupi Senhor ojou vai ete Israel kuery, ha'e vy guenonde gui oipe'apa. Omombytave ranhe va'e ma Judá kuery anho” (17.7-8a, 18).

Ha'e gui ma Judá kuery voi nonhe'ẽ rendui ramo Babilônia pygua kuery po py Senhor omboaxapa. “Mba'eta profeta ha'e imba'ekuaa va'e kuery ha'e javi rupi Senhor ijayvu va'ekue Israel ha'e Judá kuery pe. ... Ha'e rami tei ha'e kuery noendu potai okuapy. ... Ha'e nunga rupi Senhor oeja Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve” (17.13a, 14a, 20).

Huvixa Acazias pe profeta Elias ayvu omombe'ua ague

¹ Huvixa Acabe omano ma rire Moabe kuery opu'ã okuapy Israel kuery rovai.

² Ha'e gui huvixa Acazias ma Samaria tetã py oikoa py peteĩ oo yvateve va'e py janelo oĩ va'e gui ho'a vy imba'eaxy vaipa. Ha'e rami vy guembiguai kuery omondouka oayvu reraarã. Ha'e kuery pe aipoe'i:

— Tapeo, peporandu Ecrom pygua kuery ruete Baal-Zebube pe, aikuua aguã xemba'eaxygui akuera 'rã, tyrã pa anya — he'i.

³ Ha'e gui ma Tisbé pygua Elias pe SENHOR-a guigua anjo aipoe'i:

— Epu'ã ke, tereo penhovaexi aguã Samaria pygua huvixa rembiguai kuery reve. Aipo're ha'e kuery pe: “Xapy'a rei nda'u Israel yvy re nda'ipoi ri Nhanderuete, Ecrom pygua ruete Baal-Zebube pe rive peporandu aguã?

⁴ Ha'e nunga rupi SENHOR aipoe'i uka: ‘Nderupa ndetuia gui nderevyvei 'rã, remano 'rãe', he'i uka’, ‘re 'rã. Ha'e rire Elias oo ju.

⁵ Ha'e gui tembiguai kuery ma huvixaa py ju ojevy. Ha'e rã oporandu ha'e kuery pe:

— Mba'e tu oiko, pejevy aguã?

⁶ Ha'e kuery ombovai:

— Petei ava orerovaexi ouvy kuri. Ha'e vy aipoe'i orevy: “Tapeo ke, pejevy ju huvixa penembouarea py. Ha'e vy aipopeje ixupe: ‘Po rami SENHOR ijayvu: Xapy'a rei nda'u Israel yvy re nda'ipoi ri Nhanderuete, Ecrom kuery ruete Baal-Zebube pe rive reporandu uka aguã? Ha'e nunga rupi nderupa ndetuia gui nderevyvei 'rã, remano 'rãe’”, he'i kuri.

⁷ Ha'e ramo huvixa oporandu ha'e kuery pe:

— Mba'exagua ava tu penerovaexi ouvy vy ha'e rami ijayvu ra'e?

⁸ Ombovai vy

— Mba'emo pirekue py onhemonde ha'e vaka pire py iku'axã va'e — he'i okuapy.

Ha'e ramo aipoe'i:

— Ha'e va'e ko Tisbé pygua Elias ae ra'e.

Elias-a py mboapy xondaro ruvixa oo rã guare

⁹ Ha'e gui Elias oĩa katy huvixa omondouka peteĩ xondaro ruvixa cinqüenta avakue re opena va'e, ixupeguia xondaro kuery ha'e javi reve. Ha'e ramo ha'e kuery ma profeta oĩa katy oẽ jogueravy. Yvyty apyte áry oguapy oinya py ovaẽ vy xondaro ruvixa aipoe'i ixupe:

— Nhanderuete remimbo'e, huvixa ma “Toguejy ke”, he'i uka.

¹⁰ Ha'e rã Elias ombovai xondaro ruvixa cinqüenta re opena va'e pe:

— Xapy'a rei xee Nhanderuete remimbo'e ri aiko ramo toguejy ha'vy tata yva gui, tanemomba, ndevygua cinqüenta avakue reve — he'i ramove yva gui tata ho'a xapy'a vy omomba, cinqüenta va'ekue guive.

¹¹ Ha'e gui ma ha'e oña katy huvixa omondoukave ju xondaro ruvixa cinqüenta avakue reve. Ha'e ramo ha'e va'e ju aipoe'i ixupe:

— Nhanderuete remimbo'e, huvixa ma “Toguejy pojava ke”, he'i uka.

¹² Elias ombovai vy aipoe'i ixupe:

— Xapy'a rei rã xee Nhanderuete remimbo'e ri aiko ramo toguejy tata yva gui, ha'e tanemomba, ndevygua cinqüenta avakue reve — he'i ramove yva gui Nhanderuete guigua tata ho'a vy omomba, cinqüenta va'ekue guive.

¹³ Ha'e gui mboapykuea ma huvixa omondouka xondaro ruvixa cinqüenta avakue reve. Ha'e ramo xondaro ruvixa oo vy oẽ yvy'ã re, ha'e Elias renonde py oĩ guenapy'ã re. Ha'e vy ixupe ojerure vy aipoe'i:

— Nhanderuete remimbo'e, ajerure ndevy: Tovare xerekove xere rema'ea rupi, ha'e kova'e nerembiguai kuery cinqüenta ikuai va'e rekove guive.

¹⁴ Mba'eta yva gui tata ho'a vy omomba raka'e mokoõve xondaro ruvixa, ixondaro cinqüenta ikuai va'ekue reve. Ha'e nunga rupi tovare xerekove xere rema'ea rupi — he'i.

¹⁵ Ha'e gui SENHOR-a guigua anjo aipoe'i Elias pe:

— Eguejy ke peva'e reve, ekyje eme guive — he'i. Ha'e ramo opu'ã vy oguejy ov y hexeve huvixaa katy.

¹⁶ Ha'e gui ma huvixa pe aipoe'i:

— Po rami SENHOR ijayvu: “Mba'e re tu nerembiguai kuery remondouka Ecrom kuery ruete Baal-Zebube pe oporandu va'erã? Israel yvy re nda'u nda'ipoi ri Nhanderuete, ixupe reporandu aguã? Ha'e nunga rupi upe va'e tupu ndetuia gui nderevyvei 'rã, remano 'rãe”, he'i.

Acazias omanoaque

¹⁷ Ha'e gui ma huvixa omano, SENHOR ayvu Elias omombe'uague rami vy. Ha'e gui Acazias ta'y va'e'ý ramo tyvy Jorão ju oĩ hekovia. Josafá ra'y Jeorão Judá pygua huvixa oĩ rire mokoõ ma'etý rai'i maa py omboypy opena aguã.

¹⁸ Ha'e gui oĩve rei tema Acazias rekokue regua. Ha'e rami avi hi'arandua ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

2

Elias rupive Eliseu ooague

¹ Ha'e gui SENHOR ma yvate katy omboaguyje ta heravy Elias peteĩ yvytu jere rupi. Ha'e rami jave Elias oo Gilgal gui, hupive Eliseu oo avi.

² Ha'e ramo Elias aipoe'i Eliseu pe:

— Epyta ke apy, mba'eta SENHOR xemondouka ta Betel katy.

Eliseu ombovai:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rã ndee anho'i — he'i. Ha'e rami vy oguejy jogueravy Betel katy.

³ Ha'e gui Betel py profeta kuery remimbo'e ikuai va'e oẽmba joguerovy Eliseu ovaexi aguã. Ha'e vy aipoe'i okuapy ixupe:

— Reikuaa ma pa kurive'i SENHOR omboaguyje heravy 'rãa nderuvixa neakã áry rupi? Ombovai:

— Xee voi aikuua ae ma. Pekyrirí ke — he'i.

⁴ Ha'e gui ma Elias aipoe'i Eliseu pe:

— Epyta ke apy ae, mba'eta SENHOR ma Jericó katy ju xemondouka ta.

Ombovai:

— Anhetē ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rā ndee anho'i — he'i vy jogueraave ju Jericó katy.

⁵ Ha'e gui Jericó py profeta kuery remimbo'e ikuai va'e oëmba jogueruvy Eliseu ovaexī aguã. Ha'e vy aipoe'i okuapy ixupe:

— Reikuua ma pa kurive SENHOR omboaguyje heravy 'rāa nderuvixa neakā áry rupi? Ombovai:

— Xee voi aikuua ae ma. Pekyrirī ke — he'i.

⁶ Ha'e gui ma ixupe Elias aipoe'i:

— Epyta ke apy, mba'eta SENHOR xemondouka ta Jordão yakā katy. Ombovai:

— Anhetē ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rā ndee anho'i — he'i vy joupive ju jogueraa.

⁷ Oje'oi avi cinqüenta avakue profeta kuery remimbo'e va'e. Ha'e gui Jordão yakā rembe re mokoïve opyta ramo hembiguai kuery voi opytapa okuapy mombyry'i.

⁸ Ha'e gui ma Elias oao puku omboi vy oipokapa, ha'e oinupā yy. Ha'e ramo yy ma mbyte rupi oja'o. Ha'e ramo mokoïve ipiru reia rupi oaxa jogueravy.

Yva re Elias ogueraague

⁹ Ha'e gui mokoïve oaxa ma vy Elias aipoe'i Eliseu pe:

— Ejerure xevy peteī ndevy ajapo aguã, ndegui xepe'aa e'ŷ'i re.

Eliseu aipoe'i:

— Ajerure xevy pe hetave remboaxa aguã nenhe'ẽ — he'i.

¹⁰ Elias ombovai:

— Haxy va'e re ri rejerure, teī xapy'a rei ndegui xepe'aa jave xerexa ri ramo rejereumague rami ae 'rā oiko. Ha'e rā ndaxerexai ri ramo ndoikoi 'rā rerejereumague — he'i.

¹¹ Mokoïve oove ha'e jogueroayvu jogueravy teri reve ha'e kuery mbyte ojekuaa xapy'a peteī karóxa ha'e kavaju tata revegua, joegui omboja'o. Ha'e rā Elias ma yvate katy oipe'aa heravy peteī yvyty jere mbyte py.

¹² Ha'e nunga Eliseu oexa ho'amy vy ojapukai:

— Xeru, xeru! Ha'vy Israel kuery karóxa ha'e kavaju árygua kuery! — he'i vyve ndoexa jevyvei. Ha'e vy oao ojopy vy omondoro mbyte rupi.

¹³ Ha'e vy ojopy Elias mba'e va'ekue ao puku ixupe guarā oity va'ekue. Ojopy heravy vy ojevy ju. Ha'e gui ovaẽ ju ho'amy Jordão yakā rembe re.

¹⁴ Ha'e vy ao puku Elias oity va'ekue py oinupā yy. Ha'e vy aipoe'i:

— Mamo tu oĩ SENHOR Elias ruete va'e? — he'i vy yy oinupā ramove oja'o mbyte rupi. Ha'e ramo Eliseu oaxa ju ouvy.

Profeta remimbo'e kuery Elias oeka teī okuapyague

¹⁵ Ha'e nunga profeta kuery remimbo'e henonde rupi ikuai va'e ha'e nunga oexa okuapy, Jericó py ikuia py ae. Ha'e vy ijayvu:

— Elias re nhe'ẽ oĩ va'ekue ma Eliseu re ju oĩ ra'e — he'i okuapy. Ha'e vy ovaexī aguã katy jogueru, ha'e henonde ojero'a okuapy yvy peve.

¹⁶ Ha'e vy aipoe'i okuapy:

— Apy ore neremimbo'e kuery regua ikuai cinqüenta avakue ipy'a guaxukueve va'e. Emondouka na nderuvixa oeka aguã. Xapy'a rei rā SENHOR guigua nhe'ẽ ogueraa ri teī, oeja nho 'rā peteī yvyty áry, e'ŷ vy yvy'ã guy katy mba'e.

Ombovai vy

— Pemondouka eme — he'i.

¹⁷ Ha'e rami teī ha'e kuery onhea'âve tema hexeve ramo nda'evei vy

— Pemondouka ha'vy — he'i ha'e kuery pe. Ha'e ramo omondouka okuapy cinqüenta avakue. Mboapy ára re ha'e va'e kuery oeka okuapy teī ndojoui.

¹⁸ Ha'e gui ma Jericó py ojevypa ju Eliseu oĩ teria py. Ha'e ramo ha'e kuery pe aipoe'i:

— “Tapeo eme” nda'eí ri ty'y raka'e?

Jericó py yy iporã jevy aguã rami Eliseu ijayvuague

¹⁹ Ha'e gui Eliseu pe tetã pygua avakue aipoe'i okuapy:

— Xeruvixa, apy ma rexaa rami oretetã oĩ porã ete teĩ yy ma na'iporãi, neĩ yvy ma voi na'iporãi nhama'etã aguã — he'i okuapy.

²⁰ Ha'e ramo

— Peru ha'vy xevy pe hy'a ipyau'i va'e, juky reve — he'i ramo ogueru okuapy oĩa py.

²¹ Ha'e gui Eliseu ma yvu oĩ va'e py oo vy onhoẽ juky yy py. Ha'e vy aipoe'i:

— Po rami SENHOR ijayvu: “Ajapo kova'e yy iporã ju aguã rami. Ha'e rami rire ndajojukavei, neĩ mba'emo aju ma voi nomoingo e'ŷvei ma 'rã”, he'i.

²² Ha'e ramove yy ikuai va'e iporãmba ju aŷ peve guarã, Eliseu ijayvuague rami vy.

Kunumigue Eliseu ojojai rei okuapyague

²³ Ha'e gui ma Jericó tetã gui Eliseu oove ju Betel katy. Tape rupi oo oiny ramo amongue kunumigue'i oẽ jogueruvy tetã katy gui. Ha'e va'e kuery ojojai reia rupi aipoe'i okuapy ixupe:

— Neĩ ke akã perõ, eẽ ke eovy. Neĩ ke akã perõ, eẽ ke eovy — he'i okuapy.

²⁴ Ha'e ramo Eliseu guakykue katy ojere vy oexa vy ha'e kuery pe ijayvu vai, SENHOR rery rupi. Ha'e ramove ka'aguy gui mokoĩ urso oẽ ouvy vy omboa'ypa quarenta e dois kunumigue ikuai va'ekue.

²⁵ Ha'e rire Eliseu Carmelo vvyty katy oo, ha'e gui Samaria tetã katy ju ojevy.

3

Israel pygua huvixa Jorão oĩ jave guare

¹ Ha'e gui ma Acabe ra'y Jorão ju oĩ Israel kuery ruvixa. Samaria tetã py oĩ ypy, dezoito ma'etã re ma Judá pygua huvixa Josafá oĩ rire. Ha'e vy doze ma'etã re oĩ.

² Ha'e va'e ma SENHOR renonde rupi ha'eve'ŷa ramigua ojapo. Ha'e rami avi nguu rami ete'ŷ ojapo, neĩ oxy rami e'ŷ guive. Mba'eta oipe'a Baal peguarã ita nguu omo'ã va'ekue.

³ Ha'e rami teĩ Nebate ra'y Jeroboão ojejavyague rupi ae tema oiko, Israel kuery oguerojejavya py. Ha'e rami oikoa gui ndojepé'ai ae.

Huvixa kuery Moabe pygua kuery oitypa 'rãa rami Eliseu omombe'u ma voiague

⁴ Ha'e gui Moabe pygua huvixa Mesa va'e ma mymba kuery re opena va'e ramo ixugui Israel pygua huvixa okobra jepi 'rã cem mil vexa'i ra'y ha'e gui cem mil vexa'i ava rague.

⁵ Ha'e rami teĩ huvixa Acabe omano ma rire Moabe pygua huvixa opu'ã Israel pygua huvixa Jorão rovai.

⁶ Ha'e ramove Samaria tetã gui Jorão oẽ vy omboatypa Israel kuery ha'e javi.

⁷ Judá pygua huvixa Josafá pe voi aipoe'i uka:

— Moabe pygua huvixa opu'ã ma xerovai. Ndee voi pa reo 'rã xereve Moabe kuery rovai re nhapu'ã aguã?

Ombovai:

— Xee aa 'rã. Xee voi aa 'rã ndee rami, xevygua avakue ma ndevygua avakue rami avi 'rã ikuai, ha'e xerymba kavaju kuery ma nerymba kuery rami avi 'rã ikuai ndepo py — he'i.

⁸ Ha'e ramo Jorão oporandu:

— Mava'e tape rupi 'rã tu jaje'oi?

Ombovai:

— Edom tekao e'ŷa rupi tape oĩ va'e rupi rima ha'eve — he'i.

⁹ Ha'e rami vy huvixa Israel pygua, Judá pygua ha'e Edom pygua reve jogueraa.

Ha'e gui sete araa py ma ha'e kuery oguataa rupi nda'ipovei ma yy xondaro kuery ha'e mymba kuery ogueraa va'e pe.

¹⁰ Ha'e ramo Israel pygua huvixa aipoe'i:

— Aikore! Mba'eta mboapy huvixa jaiko va'e SENHOR nhanerenoĩ nhanemboaxapa aguã Moabe kuery po py.

¹¹ Ha'e rã Josafá oporandu:

— Ndoikoi pa apy SENHOR pegua profeta, ixupe ranhe SENHOR pe nhaporandu uka aguã?

Ha'e ramo peteĩ Israel pygua huvixa rembiguai oĩ va'e ombovai:

— Apy ma oĩ Safate ra'y Eliseu, Elias ojepoei aguã yy ogueru va'ekue — he'i.

¹² Josafá aipoe'i:

— Ha'e va'e ma oikuaa 'rã SENHOR guigua ayvu — he'i ramo Eliseu-a katy Josafá reve jogueraa huvixa Israel ha'e Edom pygua.

¹³ Ha'e rami teĩ Eliseu aipoe'i Israel pygua huvixa pe:

— Mba'e tu areko ndereve? Tereo ke eporandu nderu ha'e ndexy pegua profeta kuery pe ae.

Ha'e rã Israel pygua huvixa aipoe'i ixupe:

— Nda'evei, mba'eta SENHOR ae mboapyve huvixa roiko va'e orerenoĩ va'ekue Moabe kuery po py oremboaxa aguã — he'i.

¹⁴ Eliseu aipoe'ive ju:

— Anhetẽ ete SENHOR ipo'akapa ha'e oikove va'e henonde rupi xee aikoa va'e rupi aura vy aipoa'e: Judá pygua huvixa Josafá xee namboetei va'e rire naendu potai 'rãgue ndeavvua, neĩ ndere nama'ẽi 'rãgue guive.

¹⁵ Ha'e gui Peru ha'vy xea py peteĩ imba'epu va'erã — he'i.

Ha'e ramo oĩa py imba'epu va'e ombopu jave Eliseu re ou Nhanderuete po'akaa.

¹⁶ Ha'e ramo aipoe'i:

— Po rami SENHOR ijayvu: “Pejo'o-jo'o ke yvy kova'e yvyugua ha'e javi rupi”, he'i.

¹⁷ Mba'eta SENHOR ijayvuve ju: “Yvytu napendui, ha'e oky ndapexai teĩ kova'e yvyugua ha'e javi rupi 'rã tynyẽ yy. Ha'e ramo peẽ kuery pey'u 'rã, penerymba vaka ha'e penerymba kuery ha'e javi guive”, he'i.

¹⁸ Ha'e va'e ma SENHOR pe rã mba'e'ŷ. Ha'e gui pendepo py omboaxa avi 'rã Moabe kuery.

¹⁹ Pembovaipa 'rã ha'e kuery retã ikorapa ha'e yvatekueve va'e ha'e javi. Pejayapa 'rã yvyra porãgue, ha'e pembotypa 'rã yvu ikuai va'e ha'e javi. Ha'e gui mba'ety porãgueve ha'e javi rupi 'rã pemombo ita — he'i.

²⁰ Ha'e gui ma ko'ëgue mba'emo aju ome'ẽ jave oma'ẽ rã Edom yvy katy gui yy ou xapy'a vy omonyëmba yvy.

Moabe kuery oitypaa ague

²¹ Ha'e gui ma Moabe kuery oendupa okuapy ha'e kuery rovai huvixa kuery opu'ã aguã ouague. Ha'e rami vy omboatypa tembiporu reveguia ma guive rã, kunumigueve ha'e tujakueve va'e voi. Ovy vy rupi omoimba avi imbokuapy harõarã.

²² Ha'e gui ko'ëgue yy áry rupi kuaray oẽ jekuaa jave Moabe kuery ovypa vy guenonde katy rupi oma'ẽ okuapy rã yy tuguy rami ojekuaa.

²³ Ha'e vy aipoe'i okuapy:

— Peva'e tu tuguy rima. Huvixa kuery meme nhi'ã nhomomba ra'e, jojukaa py! Ha'e gui Moabe kuery, aŷ ma jaa jajopy imba'e rei-reikue! — he'i.

²⁴ Ha'e gui ma Israel kuery ikuaria py ha'e kuery ovaẽ rã Israel kuery opu'ãmba vy oitypa Moabe kuery. Ha'e rã ha'e kuery gui onhamba. Ha'e ramo ijyvy re Israel kuery oo vy ha'e py voi ojukapa okuapy Moabe kuery regua.

²⁵ Ha'e vy ombovaipa hetã ikuai va'e, ha'e vy mba'ety porãgueve rupi peteĩ-teĩ omombo ita, omonyëmba peve. Ombotypa yvu ikuai va'e, ha'e ojayapa yvyra iporãgueve ikuai va'ekue. Quir-Haresete py anho hi'aĩ teri tetã kora, va'eri nhemoatã va'e reveguia kuery ojokopa vy ojukapa avi okuapy.

²⁶ Ha'e gui Moabe pygua huvixa ma hovaigua kuery ipo'akave ta ramo oexa vy setecentos avakue kyxe reveguia ogueraa ngupive, Edom pygua huvixa reve joguero'a aguã, teĩ novaẽ reguai.

²⁷ Ha'e rami vy ojopy gua'y jypykue'i, guekovia huvixarã omoĩ va'erã va'e, ha'e vy ikora áry ae ojuka vy oapypa. Ha'e rami rã Israel kuery rovai ju ojerovia reive okuapy. Ha'e ramo ojope'apa ha'e gui, oyvy katy ae ju ojevy aguã.

4

Imeve'ŷ va'e pe azeite oata e'ŷ aguā rami Eliseu ojapoague

¹ Ha'e gui peteī profeta remimbo'e ra'yxykue imeve'ŷ va'e ojerure Eliseu pe. Ha'e vy aipoe'i:

— Xeme neremimbo'e oiko va'ekue ma omano. Ndee voi reikuua SENHOR renonde ojererokyjea rupi oikoague. Ha'e gui aŷ mba'emo porukaare ovaē ta ma ouvy xepi'a kuery mokoīve ogueraa aguā escravo-rā.

² Ha'e ramo Eliseu oporandu ixupe:

— Mba'e tu ajapo 'rā ndevy? Emombe'u ke mba'e pa rerekon dero py.

Kunha va'e ombovai:

— Xee nerembiguai mba'eve ndarekoi xero py, peteī ryru azeite e'ŷ vy — he'i.

³ Ha'e ramo Eliseu aipoe'i:

— Tereo ha'vy, hyrurā re ejerure ndero katy'i rupi ikuai va'e ha'e javi pe. Hyrukue anho eru, mboapy'i e'ŷ ta'vy.

⁴ Ha'e gui ma eike ju ndero py, ha'e emboty ju okē, ndepi'a kuery reve penhembotypa aguā. Ha'e vy azeite rerekoy va'e enhoē hyru rejou va'ekue ha'e javi py. Ha'e vy ke erova tynyē va'e-va'e ijyke katy — he'i.

⁵ Ha'e gui ma oĩa gui kunha va'e ojepe'a vy onhembotypa opi'a kuery reve. Ha'e gui oxy oĩa py ha'e kuery hyru omboaxa rā ixy omonyē tema.

⁶ Hyru omonyēmba ma vy ixy aipoe'i peteī opi'a pe:

— Eru ju peteī hyrurā.

Ha'e va'e ombovai:

— Apy ma nda'ipovei ma hyrurā — he'i. Ha'e ramove azeite opa.

⁷ Ha'e gui kunha va'e oo vy omombe'u Nhanderuete remimbo'e va'e pe. Ha'e ramo ha'e aipoe'i:

— Tereo, evende azeite, ha'e gui epagapa rereveague. Ha'e gui hembyrekue ma topyta ndepi'a kuery reve pe'u va'erā.

Suném pygua kunha Eliseu oipytyvõague

⁸ Peteī ára Eliseu oaxa ov y Suném tetā rupi. Ha'e py ma oiko peteī kunha oguerekopa va'e. Ha'e va'e ma oenoī okaru aguā. Ha'e rupi oaxa nhavō ovaē kuerei 'rā ha'e py okaru aguā.

⁹ Kunha va'e aipoe'i ome pe:

— Xee aexa rā kova'e ava nhanda rupi oaxa jepi va'e ma Nhanderuete remimbo'e iky'a e'ŷ va'e.

¹⁰ Ha'e nunga rupi jajapo na yvate katy peteī opy ja'o'i oke atyrā. Ita gui 'rā jajapo uka huparā nhamoī aguā ha'e py, mesa, tenda ha'e tataendy renderā, nhandro py ovaē vy ha'e py oke aguā — he'i.

¹¹ Ha'e gui peteī ára ha'e py Eliseu ovaē jevy vy okeaty py oo vy onhenouupy.

¹² Ha'e vy aipoe'i guembiguai Geazi pe:

— Enoī ranhe Suném pygua kunha — he'i ramo oenoī rā kunha va'e oī profeta oĩa py.

¹³ Eliseu aipoe'i uka kunumi va'e pe:

— Aipo're kunha va'e pe: “Ma'ē, orere repena porā opa mba'e py. Mba'e 'rā tu ha'vy jajapo ndevy? Oiko pa nderekovia huvixa pe ajerure aguā? Tyrā pa xondaro kuery ruvixa pe?” 're 'rā ixupe.

Kunha va'e ombovai:

— Arekopa rei apy xeretarā kuery mbyte py aikoa py — he'i.

¹⁴ Ha'e ramo profeta oporanduve ju:

— Mba'exagua nda'u ajapo 'rā ixupe?

Geazi ombovai:

— Ne'ixa, ha'e ndoguerekoi omemby, ime tuja'i ma guive — he'i.

¹⁵ Eliseu ju

— Enoī ha'vy — he'i.

- Oenoī ramo kunha va'e ou vy okē py hi'ai.
- ¹⁶ Ha'e ramo profeta aipoe'i:
- Peteī ma'etŷa py kova'e ára ojeupity jevy ma jave reikuavâ'i 'rã peteī kyri va'e — he'i.
- Kunha va'e aipoe'i:
- Any teve xeruvixa, Nhanderuete remimbo'e reiko va'e. Ndeapu eme xee nerembiguai pe — he'i.
- ¹⁷ Ha'e va'e rire kunha va'e ogueroko'i ma. Ha'e vy peteī ma'etŷ opaa py porã oikuavâ peteī ava'i, Eliseu aipoe'iague rami vy.
- ¹⁸ Ha'e gui ma ipi'a tujave ma vy peteī ára oo nguu omba'eapo va'e kuery reve oikoa py.
- ¹⁹ Ha'e vy nguu pe
- Xeakâ raxy! — he'i.
- Ha'e ramo guembiguai kunumi va'e pe tuu
- Eraa na ixya py — he'i.
- ²⁰ Ha'e ramo oupi vy ogueraa ixya py. Ha'e ramo guenapy'â áry oikuavâ ranhe imoiny, ha'e gui kuaray mbyte jave omano.
- ²¹ Ha'e ramo kunha va'e oguerojeipi heravy vy onhono inony Nhanderuete remimbo'e rupa rupi. Ha'e vy okē omboty vy oo ju.
- ²² Ha'e gui ome oenoī uka vy aipoe'i uka ixupe:
- Embou xea py peteī nerembiguai ha'e peteī mburika'i, Nhanderuete remimbo'e oĩa katy aa ranhe, ha'e gui ajevy ju aguã — he'i.
- ²³ Ha'e ramo ime oporandu:
- Mba'e re tu aŷ reo ta ri ha'e py, jaxy pyau e'ŷ teri, neĩ sâbado e'ŷ guive va'eri?
- Kunha va'e ombovai:
- Tove ri, ha'eve 'rã — he'i.
- ²⁴ Ha'e gui kunha va'e ombokupe árygua ukapa mburika'i. Ha'e vy aipoe'i guembiguai pe:
- Eraa, eroguata tema, eropytu'u eme guive, xee amombytu'u uka e'ŷa ja — he'i.
- ²⁵ Ha'e gui ma kunha va'e oo vy Nhanderuete remimbo'e oĩa py ovaẽ, Carmelo yvyty re. Ha'e ramo mombyry teri oexa vyve aipoe'i guembiguai Geazi pe:
- Pee ma ou jekuaa oiny Suném pygua kunha.
- ²⁶ Eê ke eovy reovaexi aguã, ha'e vy aipo're ixupe: "Ha'eve vai pa ndee, neme ha'e ndepi'a voi?" 're.
- Oporandu rã kunha va'e ombovai:
- Ha'evepa rei — he'i.
- ²⁷ Ha'e gui ma yvyty re Nhanderuete remimbo'e oĩa py kunha va'e ovaẽ vyve oikuavâ ipy. Ha'e ramo Geazi oipe'a aguã ovaẽ ta ramo ixupe Nhanderuete remimbo'e aipoe'i:
- Tove katu, mba'eta onhe'ë py nda'evei ete va'e oendu. Ha'e nunga ma SENHOR onhomni xegui, ndoikuua ukaxeí vy.
- ²⁸ Ha'e ramo kunha va'e aipoe'i:
- Xeruvixa, xapy'a rei nda'u ndevy ajerure va'ekue xepi'arã re? "Xembotavy eme ke", ha'e va'ekue e'ŷ ri? — he'i.
- ²⁹ Ha'e gui profeta aipoe'i Geazi pe:
- Eiko katu ke, ejopy xemba'e popoka, ha'e tereo. Xapy'a rei amongue reovaexi vy ma exarura eme. Ndevy pe amongue oxarura ri ramo embovai eme guive. Ha'e gui xepopoka remoï 'rã ava'i va'e rova áry — he'i.
- ³⁰ Ha'e rami teiñ ixys aipoe'i Eliseu pe:
- Anhetë ete SENHOR oikove va'e rupi, ha'e nderekove rupi avi aura vy aipoa'e: Xee ma ndoroejai 'rã — he'i. Ha'e ramo ha'e voi opu'ã vy oo ma oiny kunha va'e reve.
- ³¹ Ha'e rã Geazi ma ha'e kuery renonde rupi oo vy ava'i va'e rova áry rupi omoï popoka. Ha'e rami teiñ nda'ijayvuë nhendui, neĩ ipytuëa ma voi ndojekuaai. Ha'e ramo oo ju Eliseu reve nhovaexi aguã. Ha'e vy ixupe omombe'u vy aipoe'i:

— Ava'i va'e nomyī ae tema — he'i.

³² Ha'e gui oo py profeta ju ovaē ramo ava'i va'e omano oupy tupu rupi.

³³ Ha'e ramo oike vy omboty okē ha'e kuery mokoīve oīa py, ha'e vy onhembo'e SENHOR pe.

³⁴ Ha'e vy tupu oīa katy oo vy onheno ava'i va'e áry rupi. Ha'e vy ojuru omboja ijuru re, guexa ma hexa re, ha'e opo ma ipo re, hi'áry rupi itui vy. Ha'e ramo ava'i va'e rete hakupa ju ma ovy.

³⁵ Ha'e gui ma opu'ā ju vy oguata-guata oikovy opy rupi, ha'e gui ma oo ju ha'e py. Ha'e vy ava'i va'e áry rupi ju onheno oupy. Ha'e ramo mae sete-kue vyvoi inhaxiā reve oipe'a ju guexa.

³⁶ Ha'e ramo oenoī Geazi, ha'e vy aipoe'i ixupe:

— Enoī ke Suném pygua kunha — he'i. Oenoī ramo kunha va'e ojexa uka ho'amy profeta pe.

Ha'e ramo aipoe'i kunha va'e pe:

— Eraa ju ke ndepi'a.

³⁷ Ha'e ramo kunha va'e oike ouvy vy ipy yvy'iry rupi oī, ha'e ojero'a yvy katy guenapy'ā re. Ha'e gui ma opi'a'i oupi heravy vy oē ju.

Oja py jojukaarā oī va'ekue oipe'aague

³⁸ Ha'e gui ma ha'e va'e yvy re karuai oiko, ha'e Eliseu ojevy ju Gilgal katy. Ha'e py ma henonde profeta kuery remimbo'e kuery oguapypa okuapy. Ha'e ramo aipoe'i guembiguai pe:

— Emoī ke oja guaxu tata áry, ha'e vy ejapo tembi'u profeta kuery remimbo'e kuery pe — he'i.

³⁹ Ha'e ramo peteī oo mba'ety rupi mba'emo aju re. Ha'e vy ojou peteī hi'y rupi hi'a va'e ka'aguy reguae. Ha'e vy hi'y gui hi'a oipo'opa vy omonyē oao puku. Ha'e gui ma ou ju vy oipe'āmba'i vy omoīmba oja py, oexa va'e ū teri va'eri.

⁴⁰ Ha'e gui ma ome'ē avakue pe ho'u aguā. Ojykue ho'u teri okuapy reve ojapukai okuapy:

— Nhanderuete remimbo'e! Oja py rima oī jojukaarā! — he'i okuapy. Ho'uve aguā ma voi nda'evei.

⁴¹ Ha'e rami rā aipoe'i:

— Peru ke trigo — he'i. Ha'e vy oja py omoī vy aipoe'i:

— Ejara ju ke, emongaru heta va'e kuery — he'i. Ha'e ramove oja py noīvei ma ra'e jojukaarā.

Vinte mbojape re cem avakue okaru porā okuapyague

⁴² Ha'e gui ou peteī ava Baal-Salisa gui. Ha'e va'e ma Nhanderuete remimbo'e pe ogueru mbojape jypykue'i regua voxā py. Vinte mbojape cevada guigua ha'e hary pyau ogueru. Ha'e rā Eliseu aipoe'i:

— Emboja'o heta va'e kuery pe ho'u aguā — he'i.

⁴³ Ha'e ramo hembiguai aipoe'i ixupe:

— Mba'exa tu amoī ta cem avakue ikuai va'e ho'u va'erā?

Ombovai:

— Eme'ē katu heta va'e kuery pe ho'u aguā, mba'eta po rami SENHOR ijayvu: “Ho'u 'rā okuapy, ha'e gui hembyre ju 'rā”, he'i.

⁴⁴ Ha'e ramo omoī ha'e kuery renonde py. Ha'e ramo ho'u okuapy, ha'e gui hembyre ju, SENHOR ijayvuague rami vy.

Lepra gui Naamā okueraague

¹ Oiko peteī Síria pygua huvixa pegua xondaro kuery ruvixa, Naamā hery va'e. Ha'e va'e ma huvixa renonde rupi ipo'akave va'e ha'e omboetepy oiko, mba'eta hupive ma SENHOR ojapo Síria kuery ipo'aka aguā rami. Joe opu'āa py ipo'akapave. Ha'e rami avi lepra revegua oiko.

² Ha'e gui Síria gui xondaro kuery oje'oi vy Israel kuery yvy gui voi ogueraa peteĩ kunha'i va'e escravo-rã. Ha'e va'e ma Naamã ra'yxy pe oiko ombo'aepoa rupi.

³ Ha'e gui ma kunha'i va'e aipoe'i herekoap:

— Xeruvixa Samaria py profeta oiko va'ea py oo va'e rire omonguera 'rãgue lepra gui — he'i.

⁴ Ha'e ramo Naamã oo vy aipoe'i nguvixa pe:

— Po rami ijayvu kunha'i Israel yvy gui aru va'ekue.

⁵ Ha'e ramo Síria pygua huvixa ombovai:

— Tereo ha'vy, eguata. Ha'e rã xee ma peteĩ kuaxia araa uka 'rã Israel pygua huvixa pe reme'ẽ va'erã — he'i. Ha'e ramo oo ma. Ngupive ogueraa dez poyikue prata guigua, seis mil hatã'i va'e ouro guigua, ha'e gui dez ao ngarua pygua.

⁶ Ogueraa avi kuaxia Israel pygua huvixa pegua ijayvu imoinya va'e: “Kova'e kuaxia ndea py ome'ëa ramove reikuua 'rã xerembiguai Naamã ambouague lepra gui remonguera aguã”, he'ia va'e.

⁷ Ha'e gui ma Israel pygua huvixa kuaxia para ogueroayvu ma vy omondoro oao. Ha'e vy aipoe'i:

— Xapy'a rei nda'u xee Nhanderuete ri aiko, joekove amboi, e'ŷ vy anhomoingove aguã rami xepo'akapa va'e? Mba'eta xea py ombou kova'e ava lepra gui amonguera aguã. Peikuua pota ke, ha'e pexa porã, mba'eta xereve joguero'axe vy teve ombou — he'i.

⁸ Ha'e gui ma Nhanderuete remimbo'e Eliseu oendu Israel pygua huvixa oao omondoroague. Ha'e vy aipoe'i uka huvixa pe:

— Mba'e re tu ndeao remondoropa ri? Tou ava xea py, ha'e vy oikuua 'rã Israel re profeta oikoa — he'i uka.

⁹ Ha'e gui ma Naamã ou guymba kavaju kuery ha'e karóxa reve. Ha'e vy ovaëmba okuapy Eliseu rokë rexel'i.

¹⁰ Ha'e ramo Eliseu omondouka peteĩ guembiguai. Ha'e vy aipoe'i uka:

— Tereo, ejau sete-kue Jordão yakã py. Ha'e ramo ndero'o oï porãmba ju 'rã, nda'eve e'ŷvei ma 'rã — he'i uka.

¹¹ Ha'e rami rã Naamã ndojou porãi ete. Ha'e vy aipoe'i ov:

— Xee aexa'ã va'ekue teĩ xee aïa py profeta oë ho'amy vy ojerure 'rãgue SENHOR Nguuete rery rupi, ha'e lepra oïa áry rupi okuave'ẽ reve xemonguera 'rãgue.

¹² Ha'e rã xapy'a rei nda'u Damasco py Abana ha'e Farfar yakã ikuai va'e ma Israel re yakã ikuai va'e gui na'iporãive 'rã ri? Nda'evei nda'u ha'e va'e py ae xee ajau aguã, akuera ju aguã? — he'i. Ha'e rami vy ojevy ju ivai reve.

¹³ Ha'e ramo oïa py ovaë jogueravy ixupegua kuery yvatekueve va'e. Ha'e vy aipoe'i okuapy ixupe:

— Oreruvixa, xapy'a rei profeta mba'emo haxy va'e ojapo uka va'e rire ndee nda'u nderejapoi 'rãgue? Mba'eta ndevy pe “Ejau ke, ha'e rã ha'eve va'e ju 'rã reiko” he'i va'ekue rive — he'i okuapy.

¹⁴ Ha'e rami rã Naamã oo vy Jordão yakã py oguejy sete-kue, Nhanderuete remimbo'e ijayvuague rami vy. Ha'e ramove ho'o oï porã ju kyrí va'e ro'o rami. Ha'e vy ha'eve va'e ju oiko.

¹⁵ Ha'e gui ma ojevy ju jogueravy Nhanderuete remimbo'ea katy, hexeveguia kuery ha'e javi reve. Ovaë ma vy henonde py hi'äi. Ha'e vy aipoe'i:

— Aŷ aikuua ma yvy jave rupi ndoikoi Nhanderuete, Israel kuery Ruete e'ŷ vy. Ha'e nunga rupi aŷ ma ajerure rejopy aguã mba'emo xee nerembiguai ame'ẽ va'e.

¹⁶ Eliseu ombovai:

— Anhetê ete SENHOR oikove va'e henonde rupi aikoa va'e rupi aura vy aipoa'e: Xee ma mba'eve ndaipotai — he'i. Ha'e ramo hexeve onhea'ã tema ojopy aguã re, va'eri ndoipotai ae.

¹⁷ Ha'e rami rã Naamã aipoe'i:

— Ndereipotai ae ramo ajerure apy gui taraa yvy mokoī mburika'i áry. Mba'eta aŷ gui xee nerembiguai ma tuuete ra'angaa pe rive name'ëvei 'rā mymba apy reve ajuka uka va'e, SENHOR pe e'ŷ vy.*

¹⁸ Ha'e gui aŷ SENHOR pe xee hembiguai ajerure ajejavya ombogue aguā re. Mba'eta xeruvixa ma nguuete Rimom pegua opy oike jepi 'rā omboete aguā, ha'e xepo re ojopy 'rā oiny. Ha'e gui xee voi aĩ 'rā xerenapy'ā re Rimom pegua opy ajero'a ainya py. Ha'e nunga rupi tove SENHOR tomboguepa xee hembiguai ajejavya.

¹⁹ Eliseu ombovai vy

— Tereo porā ke — he'i.

Geazi re ju lepra ovaague

Ha'e gui Naamā ojepe'a ma mombyry'i ov yave

²⁰ Nhanderuete remimbo'e Eliseu rembiguai Geazi va'e ma aipoe'i ojeupe ae:

— Xeruvixa ma ndoiptai Síria pygua Naamā ome'ë mba'emo ogueru va'ekue. Ha'e rami avi anhetē ete SENHOR oikove va'e rupi aura vy aipoa'e: Xee ae 'rā anha avy hakykue rupi, ixugui ajopy aguā mba'emo — he'i.

²¹ Ha'e rami vy Geazi oo Naamā oupity aguā. Ha'e rā Naamā ma hakykue rupi onha ouvy ramo oexa vy opo okaróxa gui ovaexī aguā. Ha'e vy oporandu:

— Ha'eve vai pa?

²² Ombovai:

— Ha'evepa rei. Xeruvixa aipoe'i uka: “Aŷ ma ou mokoī kunumigue profeta remimbo'e kuery Efraim yvyty reia gui. Eme'ë ha'e va'e kuery pe peteī poyikue prata guigua ha'e mokoī ao ngarua pygua”, he'i uka.

²³ Ha'e ramo Naamā aipoe'i:

— Eraa ha'vy mokoī poyikue prata guigua — he'i. Ha'e rami vy ogueraa uka ete vy mokoī voxā py ojokua mokoī poyikue prata guigua ha'e mokoī ao ngarua pygua. Ha'e va'e py ombovoysi mokoī guembiguai Geazi renonde rupi ogueraa va'erā.

²⁴ Ha'e gui yvy'ā áry peve ovaē ma vy ha'e kuery po gui ju ojopy, ha'e omoī porā oo py. Avakue omondoukapa ramo oje'oi ju.

²⁵ Ha'e ramo oike vy nguvixa renonde py hi'aĩ. Ixupe Eliseu oporandu:

— Geazi, magui tu reju?

Ombovai:

— Xee nerembiguai ma mamove rei ndaai — he'i.

²⁶ Ha'e ramo aipoe'i ixupe:

— Ndea py xenhe'ë oĩ avi kuri, ava nerovaexī aguā karóxa gui oguejy ouvy javé. Aŷ voi pa ha'eve prata ha'e ao rejopy aguā, ha'e gui oliveira ha'e uvaty, vexa'i ha'e vaka kuery, tembiguai avakue ha'e kunhague?

²⁷ Ha'e nunga rupi ndere ju 'rā Naamā guigua lepra ova, neramymino kuery re guive, raka'e rā peve guarā — he'i. Ha'e ramove lepra yro'y rami xiĩ va'e reve ae ojepe'a ov y henonde gui.

6

Eliseu peteī haxa ovu aguā rami ojapoague

¹ Ha'e gui profeta kuery remimbo'e kuery ikuai va'e aipoe'i okuapy Eliseu pe:

— Apy ndereve orekuiaia ma nhanemboty rei'i ete.

² Ha'e nunga rupi toroo Jordão yakā re, ha'e gui peteī-teī rogueru aguā yvyra, peteī oo nhandekuai atyrā rojapo aguā.

Ombovai:

— Tapeo ha'vy — he'i.

³ Ha'e ramo ha'e kuery va'e regua peteī aipoe'i:

— Ha'eve 'rā ndee voi reo aguā ore nerembiguai kuery reve.

* 5:17 Ha'e kuery reko ramo vy Israel regua yvy Naamā ogueraa oyvy re, ha'e py ju omboete aguā Nhanderuete.

- Eliseu ombovai:
 — Xee aa avi 'rā — he'i.
- ⁴ Ha'e rami vy oo ha'e kuery reve.
 Jordão yakā rembe re ha'e kuery ovaē vy oake'o okuapy yvyra.
- ⁵ Ha'e gui peteī yvyra hi'aī va'e oake'o vy haxa oity yy py. Ha'e ramo ojapukai vy aipoe'i:
 — Aikore xeruvixa! Haxa ma nhomba'e aiporu va'ekue — he'i.
- ⁶ Ha'e ramo Nhanderuete remimbo'e oporandu:
 — Mamo tu ho'a ra'e?
 Ha'e gui ixupe oexa uka ramo Eliseu peteī yvyraojaya vy omombo yy py. Ha'e vy ojapo ferro guigua ovu aguā rami.
- ⁷ Ha'e vy
 — Emoatā ju ke — he'i ramo okuave'ē vy ojopy.

Síria pygua kuery reve joguero'aa jave Eliseu nhopytyvōague

⁸ Ha'e gui Síria pygua huvixa opu'ā Israel kuery rovai. Ha'e vy yvatekueve reve nhomongeta vy peteī henda re onhembopy'aa rupi aipoe'i:
 — Ha'e py 'rāe ha'eve japyta ranhe aguā — he'i.

⁹ Ha'e rami teī Israel pygua huvixa pe Nhanderuete remimbo'e aipoe'i uka:
 — Penheangu ke ha'e rupi peaxa e'ŷ aguā, mba'eta ha'e py 'rā Síria pygua kuery oo — he'i uka.

¹⁰ Ha'e ramo Nhanderuete remimbo'e omombe'u ma voi rire ijayvuague katy Israel pygua huvixa voi omondouka guembiguai kuery oikuaa pota va'erā. Ha'e rami vy oo jepe nho. Ha'e va'e ramigua ma mbovykue rei e'ŷ oiko.

¹¹ Ha'e nunga rupi Síria pygua huvixa opy'a py nda'evei etea oendu. Ha'e vy guembiguai kuery oenoī vy aipoe'i ha'e kuery pe:
 — Pemombe'u na xevy nhande kuery va'e regua mava'e tu Israel pygua huvixaa katy oo va'e.

¹² Ha'e ramo hembiguai va'e regua ombovai:
 — Xeruvixa, avave rei ndorooi ri. Ha'e rami avi profeta Eliseu Israel re oī va'e ae ri Israel pygua huvixa pe omombe'u kuerei 'rā rekeaty py ndeayvua voi — he'i.

¹³ Ha'e ramo aipoe'i:
 — Tapeo, pexa pota mamo pa oīa re, xee ajopy uka aguā — he'i.
 Ha'e gui ma ixupe
 — Dotā tetā py rima oī — 'ea.

¹⁴ Ha'e ramo ha'e katy omondouka kavaju, karóxa ha'e xondaro kuery ipy'a guaxukueve. Pyávy ha'e kuery ovaē vy ojokopa tetā.

¹⁵ Ha'e gui ma Nhanderuete remimbo'e rembiguai aje'ive'i reve ovy vy oē vy oexa mbovy rei e'ŷ ikuai va'e, kavaju árygua ha'e karóxa rewegua kuery. Jovaive re ojokopa ra'e. Ha'e ramo hembiguai aipoe'i Eliseu pe:

— Aikore xeruvixa! Mba'e tu jajapo ta?
¹⁶ Eliseu ombovai:
 — Ekyje eme. Mba'eta ha'e kuery reve ikuai va'e gui nhandereveguia kuery hetave — he'i.

¹⁷ Ha'e gui ma Eliseu onhembo'e vy aipoe'i:
 — SENHOR, ajerure hexa reipe'a aguā oexa kuaa aguā rami — he'i. Ha'e ramo hembiguai rexa SENHOR oipe'a ramo Eliseu yvýry rupi oexa tata rewegua kuery kavaju árygua ha'e karóxa yv'yā rupi ikuai va'e.

¹⁸ Ha'e gui ma hovaigua kuery ha'e kuery rovai ou ramo Eliseu onhembo'e ju SENHOR pe. Ha'e vy aipoe'i:

— Ajerure ndevy: Embogue ke ha'e kuery rexa oexa e'ŷ aguā — he'i ramo Eliseu ijayvuague rami vy omboguepa hexa, ndoexai aguā rami.

¹⁹ Ha'e gui ma ha'e kuery va'e regua pe Eliseu aipoe'i:

— Kova'e tape ma ha'evea ramigua e'ŷ, neĩ kova'e tetã oĩ va'e voi. Peju xerakykue, ha'e rogueraa 'rã ava peka va'ea katy — he'i. Ha'e rami vy Samaria tetã py ogueraa.*

²⁰ Ha'e gui ma Samaria tetã py ha'e kuery ovaẽ ma ramo Eliseu aipoe'i:

— SENHOR, eipe'a ju kova'e avakue rexa, ha'e kuery oexa ju aguã — he'i. Ha'e ramo ha'e kuery rexa SENHOR oipe'a ramo oexa rã Samaria tetã mbyte py ra'e ma ikuai.

²¹ Ha'e nunga Israel pygua huvixa oexa vy oporandu Eliseu pe:

— Xeru, ajukapa 'rã? Tajukapa pa?

²² Ombovai:

— Any teve, ejuka eme. Rejuka aguã ha'eve va'e ma ndee ae kyxe ha'e nderapa reve rejopy va'ekue anho. Ha'e rã kova'e kuery pe ma eru ruka mbojape ho'u va'erã ha'e yy oy'u aguã. Ha'e gui ma tojevypa ju nguvixaa katy ae — he'i.

²³ Ha'e ramo ha'e kuery pe huvixa ojapo ngaru tuvixa ete va'e. Ha'e ramo okaru ha'e oy'u okuapy. Ha'e ramo mae omondoukapa rã nguvixaa katy ju oje'oi. Ha'e rami rire Síria pygua kuery ndouvei ranhe Israel yvy re mba'emo oipe'a aguã.

Samaria py karuai oikoague

²⁴ Ha'e va'e rire Síria pygua huvixa Ben-Hadade va'e ma teǐgue ju ojeupegua xondaro kuery omboaty ramo oje'oi vy ojokopa okuapy Samaria tetã.

²⁵ Ha'e nunga rupi Samaria py oiko karuai vaikue. Ojokopaa rã tetã mbyte py mburika'i kãgue rive ovende 'rã oitenta hatã'i va'e prata re, ha'e apykaxu'i repoxi mboapy rai teĩ cinco re 'rã ovende.

²⁶ Ha'e gui ma Israel pygua huvixa tetã kora rupi oaxa ovy jave ixupe ojapukai nhendu peteĩ kunha va'e:

— Xepytyvõ ke, xeruvixa — he'i.

²⁷ Huvixa ombovai vy aipoe'i:

— SENHOR nanepytyvõi ri ramo magui tu xee ajou 'rã roipytyvõ aguã? Mba'emo moa'yãty gui, tyrã pa uva onhamiaty gui teve 'rã ajou?

²⁸ Huvixa oporanduve ju ixupe:

— Mba'e tu ha'vy rerekó?

Kunha va'e ombovai:

— Kova'e kunha xereveguia aipoe'i va'ekue xevy: “Eme'ẽ ndepi'a'i ja'u va'erã, ha'e gui ko'ẽ ramo ma xepi'a ju 'rã ja'u”, he'i va'ekue xevy.

²⁹ Ha'e rami vy xepi'a'i ranhe nhamomimoi vy ja'u. Ha'e rami teĩ ko'ẽ jevy ixupe xee “Aŷ ma ndepi'a ju eme'ẽ ja'u aguã”, ha'e ramo onhomni — he'i.

³⁰ Ha'e rami kunha va'e ijayvu rã huvixa oendu vy omondoro oao tetã kora rupi oaxa ovya pyve. Ha'e ramo heta va'e kuery oexa rã oao guýry huvixa onhemonde ra'e ajukue voxá guigua py rive.†

Eliseu “Heta mba'e ju 'rã pejou”, he'iague

³¹ Ha'e ramo huvixa aipoe'i:

— Kurive Safate ra'y Eliseu akã ijaxi'y áry gui aipe'a e'ŷ rã Nhanderuete taxemoingo axy oipotaa rami — he'i.

³² Ha'e rami vy huvixa peteĩ ava omondouka Eliseu-a katy, ngoo py oguapy oiny ramo nhomongeta va'ety kuery reve. Tembiguai ovaẽ e'ŷ mbove ma voi Eliseu aipoe'i nhomongeta va'ety kuery pe:

— Pexa 'rã jojuka rive va'e ra'y xeakã ayaarã ombou va'e. Pexa pota ke, tembiguai ovaẽ jave pemboty okẽ, pejoko guive. Ha'e va'e rakykue rupi ou avi 'rã ri huvixa. Ipy ambua pendu 'rã — he'i.

* ^{6:19} Ha'e kuery ma Eliseu re ae oje'oi va'ekue ri oexa e'ŷ rã Eliseu ogueraa ngovaigua Israel kuery retã mbyte peve, Samaria py ae. † ^{6:30} Ha'e kuery reko rami vy ajukue voxá guigua py onhemonde 'rã ipy'a vai, e'ŷ vy nda'evei etea oendu vy.

³³ Ha'e kuery reve ijayvu teri jave ovaẽ nhendu tembiguai. Ha'e gui huvixa voi ovaẽ, mba'eta aipoe'i: "Kova'e mba'emo vai ma SENHOR-a gui ae ou ramo mba'e re tu xee arõve ta orerepy aguã?" he'i.

7

¹ Ha'e ramo Eliseu aipoe'i:

— Pejapyxaka ke SENHOR ijayvua re. Po rami SENHOR ijayvu: "Ko'ẽ rã, kova'e hora rupi rivyvyi, Samaria tetã rokẽ py peteĩ varai trigo ku'ikue ovendea 'rã peteĩ hatã'i va'e re rive, ha'e mokoĩ ryru cevada guigua ma peteĩ hatã'i va'e re 'rã ovendea", he'i.

² Ha'e ramo xondaro ruvixa huvixa pytyvõa va'e ombovai Nhanderuete remimbo'e:

— SENHOR ha'e nunga ombou aguã yva oipe'a teĩ ha'e nunga oiko 'rã nda'u? — he'i.

Profeta ombovai:

— Ha'e nunga nderexa py ae 'rã rexâa va'eri ndere'ui 'rã ta'vy.

Síria pygua kuery onhambaague irundy lepra reveguia omombe'u okuappyague

³ Tetã rokẽ py irundy avakue lepra reveguia ikuai. Ha'e va'e kuery ma joupe-upê aipoe'i okuapy:

— Mba'erã tu apy jaguapy jakuapy nhamanomba peve teve?

⁴ Xapy'a rei "Tetã py jaike" ja'e teĩ tetã rupi karuai nhaendu vy nhamanomba 'rã ha'e py. Ha'e rã "Apy ae 'rã jaguapyve nhainy" ja'e vy ma nhamanomba avi 'rã. Ha'e nunga rupi aÿve jaje'oi Síria pygua kuery ikuiaia katy. Ha'e kuery nhanemoingove ri ramo jaikove 'rã. Ha'e rã nhandejukapa ramo nhamanomba 'rãe ma vy — he'i okuapy.

⁵ Ha'e rami vy ha'e kuery ma pytûmba ramove opu'ãmba Síria pygua ikuiaia katy oje'oi aguã. Ha'e py ovaẽ vy ndoexai avave rei.

⁶ Mba'eta Síria pygua kuery ikuiaia rupi SENHOR oenduka ma voi va'ekue kavaju árygua, karóxa reveguia ha'e xondaro kuery hyapu rei nhendu va'e. Ha'e nunga Síria pygua kuery oendu vy joupe-upê "Pendu ke, Israel pygua huvixa nhanderovai oiporuka ra'e huvixa heteu regua ha'e Egito pygua, nhanderovai opu'ã aguã", he'i va'ekue.

⁷ Ha'e nunga rupi ha'e kuery oje'opia ra'e. Ha'e vy pytû rupi onhamba vy oejapa oje'oivy oguy ikuai va'e ha'e guymba kavaju ha'e mburika'i kuery. Ikuaiague ha'e javi oeja ha'ekue rami ae. Onhamba oje'oivy oo jepexe vy.

⁸ Ha'e kuery ikuaiague py lepra reveguia kuery ju ovaẽ ma jogueruvy. Peteĩ oguy py oike vy okaru ha'e oy'u okuapy. Ha'e gui ae oipe'a prata, ouro ha'e ao. Oje'opia ju vy onhomimba. Ha'e gui ojevy vy amboae oguy py ju oike vy ha'e va'e gui voi mba'emo oipe'ave vy onhom.

⁹ Ha'e gui mae aipoe'i joupe-upê:

— Ha'eve'ýa ramigua jajapo. Kova'e ára ma mba'emo porã nhamombe'u aguã ára va'eri nhakyririmbä jakuapy. Xapy'a rei ko'ẽ rã peve nhamombe'u aguã nharõ ramo pavẽ rei 'rã oikuua jajejavu va'ea. Ha'e nunga rupi aÿ ma voi jaje'oi, huvixa ro peve nhamombe'u aguã — he'i okuapy.

¹⁰ Ha'e rami vy ha'e kuery oo vy ojapukai okuapy tetã rokẽ rarõa kuery pe. Onhemombe'u porã'i vy aipoe'i:

— Roje'oi kuri Síria pygua ikuiaia py teĩ ha'e py ma avave rei nda'ipoavei ma, nonhenduai guive. Kavaju ha'e mburika'i kuery ojokua pyre anho ikuai, ha'e gui oguy voi ha'ekue rami ae ikuai — he'i.

¹¹ Ha'e ramo okẽ rarõa kuery ju ojapukai reve omombe'u ukapa huvixa ro rupi peve.

¹² Ha'e gui ma pyavyve huvixa opu'ã vy aipoe'i guembiguai kuery pe:

— Aÿ ma xee amombe'u ta pêvy Síria pygua kuery nhandere ojapoague. Ha'e kuery oikuapa mba'eve ndajarekoveia. Ha'e rami vy ikuiaia gui mombyry'i peve ojepe'apa ra'e mba'ety rupi onhemi aguã. Mba'eta aipoe'i: "Tetã pygua kuery oẽmba jogueruvy ramo jajopypa 'rã oikove reve, tetã py jaike aguã", he'i okuapy ra'e.

¹³ Ha'e ramo peteĩ hembiguai va'e regua ombovai vy aipoe'i:

— Ejou ha'vy peteī nhiruī kavaju tetā py hembyre va'ekue regua. Nhamondouka 'rā avakue ha'e py oikuaa pota aguā. Mba'eta Israel kuery apy hembyrekue ikuai va'e okanhymba avi 'rā Israel kuery mboae rami ae — he'i.

¹⁴ Ha'e ramo mokoī karóxa kavaju reveguo ojou rā huvixa omondouka avakue Síria pygua xondaro kuery rakykue. Ha'e vy aipoe'i:

— Tapeo pexa pota — he'i.

¹⁵ Ha'e ramo hakykue rupi oje'oi Jordão yakā peve. Ha'e vy oexa rā tape rupi omboty rei ra'e ao ha'e tembiporu Síria kuery onhamba vy omombopa va'ekue. Ha'e ramo tembiguai kuery ojevypa ju vy omombe'upa okuapy huvixa pe.

Eliseu ayvu ojeupityague

¹⁶ Ha'e gui ma heta va'e kuery oēmba oje'oivy tetā gui. Ha'e vy Síria pygua kuery ikuaiague gui oipe'apa. Ha'e SENHOR ijayvuague rami vy peteī varai trigo ovendea peteī hatā'i va'e re rive, mokoī varai cevada guive ha'e rami ae avi.

¹⁷ Ha'e gui huvixa ma xondaro ruvixa ipytyvōaty pe oarō uka tetā rokē. Ha'e rami teī heta va'e kuery okē py ae opyrōmba okuapy ramo omano, Nhanderuete remimbo'e oia py huvixa oo jave ijayvuague rami vy.

¹⁸ Ha'e rami py ojeupity huvixa pe Nhanderuete remimbo'e ijayvu ma voiague: “Ko'e rā kova'e hora rivyyi mokoī varai cevada ovendea 'rā peteī hatā'i va'e re Samaria py ae, peteī varai trigo guive”, he'iague.

¹⁹ Ha'e jave ma xondaro ruvixa ombovai va'ekue Nhanderuete remimbo'e pe: “SENHOR yva oipe'a teī pova'e ayvu oiko 'rā nda'u?” he'i va'ekue. Ha'e profeta ju “Ha'e nunga nderexa py ae 'rā rexā va'eri ndere'ui 'rā ta'vy”, he'i va'ekue.

²⁰ Ha'ekue rami ae oiko. Tetā rokē py heta va'e kuery opyrōmba ramo omano.

8

Kunha Suném pygua pe mba'emo oguerekō va'ekue ome'ē ukapaa jevyague

¹ Ha'e gui Eliseu ijayvu ju ava'i omboete ju va'ekue xy pe. Ha'e vy aipoe'i:*

— Epu'ā ke, tapeo ndero pygua kuery reve, ha'e gui penderekoa ju 'rā mamo rā ha'evea py rei. Mba'eta pendeyvy re SENHOR ombou ta karuai sete ma'etý re oiko va'erā — he'i.

² Ha'e ramo kunha va'e opu'ā vy Nhanderuete remimbo'e ijayvuague rami oiko. Ha'e rami vy ngoo pygua kuery ha'e javi reve oje'oi vy sete ma'etý re ikuai filisteu kuery yvy re.

³ Sete ma'etý opaa py ma filisteu kuery yvy gui kunha va'e ojevy ju. Ha'e vy huvixaa py oo ngoo ha'e oyvy oguerekō va'ekue re ojerure ju aguā.

⁴ Ha'e va'e jave py huvixa ijayvu oiny Nhanderuete remimbo'e rembiguai Geazi reve. Ha'e vy ixupe aipoe'i:

— Xee ajerure, emombe'u ke xevy mba'emo tuvixa va'e Eliseu ojapo va'ekue ha'e javi — he'i.

⁵ Ha'e ramo huvixa pe Geazi omombe'u oiny Eliseu ava'i omano va'ekue omopu'ā jevyague. Ha'e ramove ava'i omboete ju va'ekue xy ae ovaē, ha'e vy huvixa pe ojerure ngoo ha'e oyvy re.

Ha'e ramo Geazi aipoe'i:

— Xeruvixa, kova'e kunha ae ma Eliseu omboete jevy va'ekue xy.

⁶ Ha'e gui kunha va'e pe huvixa oporandu ramo omombe'upa. Ha'e ramo ipytyvōarā huvixa omoī peteī guembiguai. Ha'e va'e pe aipoe'i:

— Ixupe eme'ē ukapa ju oguerekō va'ekue ha'e javi, ha'e oyvy gui oēa ára guive aŷ peve imba'etý gui omono'ō mbyre repykue voi — he'i.

Eliseu-a py Damasco pygua Hazael ooague

⁷ Ha'e gui ma Síria pygua huvixa Ben-Hadade imba'eaxy oupy jave Eliseu oo Damasco tetā py. Huvixa pe omombe'ua vy

* ^{8:1} Kunha va'e pi'a Eliseu omboete jevyague omombe'u 2 Reis 4.8-31 py.

— Nhanderuete remimbo'e ovaẽ ra'e apy — 'ea.

⁸ Ha'e ramo huvixa aipoe'i Hazael pe:

— Eiporavo mba'emo Nhanderuete remimbo'e pe reme'ẽ va'erã, ha'e tereo eovaex̄. Ixupe eporandu uka xere SENHOR pe, kova'e mba'eaxy areko va'e gui akuera 'rãa aikuaa aguã — he'i.

⁹ Ha'e gui Hazael ma mba'emo ome'ẽ va'erã reve oo ovaex̄ aguã katy. Ha'e vy quarenta cameló áry ogueraa Damasco tetã py iporãgueve oĩ va'ekue regua. Eliseu oĩa py ovaẽ vyojexa uka henonde py. Ha'e vy aipoe'i:

— Síria pygua huvixa nderá'y Ben-Hadade ae xembou aporandu aguã: “Akuera 'rã pa mba'eaxy areko va'e gui?” he'i uka.

¹⁰ Ha'e ramo Eliseu ombovai:

— Tereo, ha'e aipo're ixupe: “Rekuera ju 'rãe”, 're. Ha'e rami teĩ xevy SENHOR oikuaa uka avi omano nho 'rãa — he'i.

¹¹ Ha'e vy Hazael re Eliseu oma'ẽ ngatu oiny. Hexe oma'ẽ ngatu ete ramo nda'evei reia oendu. Ha'e gui Nhanderuete remimbo'e ojae'o.

¹² Ha'e ramo Hazael aipoe'i:

— Xeruvixa, mba'e re tu rejae'o ri?

Ombovai:

— Mba'eta aikuaa ma voi Israel kuery re mba'emo vai rejapo 'rãa. Mba'eta reapypa 'rã ha'e kuery ro ikorapa va'e, kyxe py rejukapa 'rã ha'e kuery va'e regua kunumigue, remou'ũmba 'rã kyrígue'i, ha'e remondoropa 'rã kunhague imemby ryru'i va'e — he'i.

¹³ Ha'e ramo Hazael aipoe'i:

— Ha'e gui mba'exa tu xee nerembiguai jagua ramigua'i va'eri ha'e ramigua ete ajapo aguã?

Eliseu ombovai:

— SENHOR ma xevy oikuaa uka ndee ju Síria pygua ruvixarã reĩ aguã — he'i.

¹⁴ Eliseu oĩa gui Hazael oo ju vy nguvixaa py ovaẽ. Ha'e rã ixupe oporandu:

— Mba'e he'i Eliseu ndevy?

Ombovai:

— Aipoe'i xevy rekuera 'rãa rami — he'i.

¹⁵ Ha'e gui ko'ẽ jevy ma Hazael peteĩ nheovãa ogueraa yy py. Omoakõ ma vy onhovã huvixa rova, omano peve. Ha'e gui hekivia Hazael ju oĩ huvixa.

2 Crônicas 21.1-20

¹⁶ Peteĩ nhiruĩ ma'etõ re ma Acabe ra'y Jorão Israel pygua huvixa oĩ rire, Judá pygua huvixa Josafá oĩ teri reve ta'y Jorão ju omboypy Judá pygua huvixa oĩ aguã.

¹⁷ Ha'e va'e ma huvixa oĩ ypy'i jave py trinta e dois ma'etõ oguereco. Ha'e gui oito ma'etõ re opena Jerusalém py.

¹⁸ Israel pygua huvixa kuery ikuaiague rupi oiko, Acabe ro pygua kuery ikuaiague rami avi, tajy re ae omenda rire. Ha'e rami vy SENHOR renonde rupi mba'emo vai anho ojapo oikovy.

¹⁹ Ha'e rami teĩ SENHOR guembiguai Davi re oma'ẽ vy nomombaxeji Judá pygua kuery, mba'eta ixupe ijayvuague rami vy hekivia nhomoexakãarã omoĩ riae aguã re, ha'e gui hamymino kuery rekovia ju.[†]

²⁰ Ha'e gui Jorão oĩ jave Edom pygua kuery opu'ã okuapy Judá kuery rovai, ipo'akaa guy py nda'ikuaixevei vy. Ha'e rami vy omoĩ okuapy nguvixarã ae.

²¹ Ha'e nunga rupi Jorão ma Zair katy oje'oi karóxa oguereco va'e ha'e javi reve. Ha'e rã Edom pygua kuery ojoko okuapy, ha'e ikaróxa ja ruvixa kuery voi, teĩ pyavyve Jorão kuery opu'ã vy oitypa. Ha'e rami teĩ ixupergua kuery onhamba ju ngoo katy.

²² Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aý peve guarã. Ha'e va'e jave ae avi Libna pygua kuery opu'ã okuapy.

[†] ^{8:19} Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui “Nhomoexakã” he'ia ma huvixave raka'eve rã oiko aguã re ijayvu vy, ha'e Jesus Cristo rekorrã re guive (Lucas 2.30-32; João 8.12).

²³ Ha'e gui oïve rei tema Jeorão rekukue regua. Ha'e rami avi mba'emo ojapo va'ekue ha'e javi noï 'rã teve kuaxia Judá pygua huvixa kuery rekukue oïa re?

²⁴ Ha'e gui Jeorão ndoikovevel'i ma guamoï kueryague rami.‡ Ha'e ramo onhono porâa tetâ Davi rekoague py. Ha'e gui ta'y Acazias ju oï nguu rekovia.

2 Crônicas 22.1-6

²⁵ Ha'e gui Acabe ra'y Jorão doze ma'etÿ re ma Israel pygua huvixa oï rire ma Jeorão ra'y Acazias oï Judá pygua huvixarã.

²⁶ Acazias ma huvixa oï ypy'i jave py vinte e dois ma'etÿ oguereko, ha'e gui peteï ma'etÿ ete'i opena Jerusalém py. Ixy ma Israel pygua huvixa Onri rajy, Atalia hery va'e.

²⁷ Ha'e gui Acazias voi Acabe ro pygua kuery ikuaiague rupi oiko. Ha'e vy mba'emo vai anho ojapo oikovy SENHOR renonde rupi. Acabe ro pygua rami oiko, tajy me ae vy.

²⁸ Ha'e rami vy Acabe ra'y Jorão reve jogueraa Ramote-Gileade katy, Síria pygua huvixa Hazael kuery re opu'ã aguã. Ha'e ramo Síria pygua kuery oipyxo Jorão.

²⁹ Ha'e ramo huvixa Jorão ma Jezreel tetâ katy ju ojevy Síria kuery oipyxoague gui okuera aguã, Ramá py Síria pygua huvixa Hazael re opu'ãa py. Ha'e gui ma Jezreel py Acabe ra'y Jorão imba'eaxy oupya py Judá pygua huvixa Jeorão ra'y Acazias oo avi oexa aguã.

9

Israel pygua huvixarã Jeú omoñaague

¹ Ha'e gui profeta Eliseu ma peteï oenoï profeta kuery remimbo'e regua. Ha'e vy aipoe'i ixupe:

— Eiko katu, eraa kova'e azeite ryru, ha'e tereo Ramote-Gileade katy.

² Ha'e py revaë vy ejou Josafá ra'y Jeú, Ninsi ramymino. Eike ha'e emopu'ã tyvy kuery mbyte gui, ha'e opyvea py ju eraa.

³ Ha'e gui azeite ryru reupi reve enhoë inhakã re. Ha'e vy aipo're: “Po rami SENHOR ijayvu: ‘Israel pygua huvixarã romoï’, he'i.” Ha'e gui okë ripe'a ju vy enha pojava eovy — he'i.

⁴ Ha'e ramo profeta kunumi va'e ma Ramote-Gileade katy oo.

⁵ Ha'e py kunumi va'e ovaë vy oma'ẽ rã xondaro ruvixa kuery oguapypa okuapy ra'e. Ha'e rami vy aipoe'i ixupe:

— Xeruvixa, areko ndevy amombe'u va'erã — he'i.

Jeú oporandu:

— Mava'e tu ore kuery ha'e javive regua pe?

Ombovai:

— Ndevy pe ae, xeruvixa — he'i.

⁶ Ha'e ramo Jeú opu'ã vy oike opy katy. Ha'e rã inhakã re kunumi va'e azeite onhoë vy aipoe'i:

— Po rami SENHOR Israel kuery ruete ijayvu: “Romoï Israel pygua huvixarã, SENHOR pegua kuery re repena aguã.

⁷ Ha'e gui rejukapa 'rã nderuvixa Acabe ro pygua kuery, ambopaga aguã Jezabel po py xerembiguai profeta kuery ruguy omoëague re, ha'e SENHOR rembiguai kuery ojuka ukaague ha'e javi re.

⁸ Ha'e rami py Acabe ro pygua kuery omanomba 'rã. Israel gui amomba 'rã Acabe guigua avakue ikuai va'e ha'e javi, escravo, ha'e'ý vy escravo e'ý tei.

⁹ Mba'eta Acabe ro pygua kuery re ajapo 'rã Nebate ra'y Jeroboão ro pygua re ajapoague rami, ha'e Aías ra'y Baasa ro pygua kuery re rami.

¹⁰ Ha'e gui Jezreel tetâ yvýry rupi jagua kuery ho'upa 'rã Jezabel retekue. Ijatyarã nda'ipoi 'rã guive”, he'i.

Pova'e nunga kunumi va'e omombe'upa vyve okë oipe'a ju vy onha ov.

‡ ^{8:24} Apy “Optyu'u ma guamoï kueryague rami”, he'ia ma omano maa rami ijayvu vy.

¹¹ Ha'e gui Jeú ma nguvixa rembiguai kuery ikuaiia py ou ju ramo oporandu okuapy ixupe:

— Ha'eve vai pa? Mba'erā tu ou peva'e inhakā porā e'ŷ va'e?

Jeú ombovai:

— Peikuaa porā ha'e ava, ha'e ijayvua re — he'i.

¹² Ha'e ramo aipoe'i okuapy:

— Ndeapu rima. Aŷ ma rojerure ndevy, emombe'u porā tema roikuaa aguã.

Ha'e ramo Jeú aipoe'i:

— Peikuaaxe rā po rami ri ijayvu: “ SENHOR aipoe'i: ‘Romoĩ Israel pygua huvixarā’, he'i.”

¹³ Ha'e ramove ha'e kuery ojapura vy peteĩ-teĩ oao puku omboi vy omoĩ okuapy tenda oĩ va'e guy rupi escada oĩ va'e áry rupi. Ha'e vy mimby guaxu omonhe'ẽ vy ijayvu okuapy:

— Jeú ma nhanderuvixa oĩ.

Jorão ha'e Acazias Jeú ojukaague

¹⁴ Ha'e gui ma Josafá ra'y Jeú, Ninsi ramymino va'e jogueroayvu rei Jorão rovai. Ha'e rami teĩ Jorão ma Ramote-Gileade oarõ okuapy Israel kuery ha'e javi reve, Síria pygua huvixa Hazael gui.

¹⁵ Ha'e gui Jorão ojevy ju va'ekue Jezreel katy onhepoano uka aguã, Síria pygua huvixa Hazael pegua kuery re opu'ã rā oipyxpotaague gui. Ha'e gui Jeú aipoe'i:

— Xapy'a rei penderuvixarā xepota ri vy avave rei toẽ eme tetā gui Jezreel py joupe omombe'u aguã — he'i.

¹⁶ Ha'e rami vy Jeú ae peteĩ karóxa py ojeupi vy oo Jezreel katy, mba'eta ha'e py Jorão itui ramo tupa rupi. Ha'e Judá pygua huvixa Acazias voi oo ma avi va'ekue Jorão oexa aguã.

¹⁷ Ha'e gui Jezreel py torre oĩ va'e re oĩ peteĩ oexa pota va'ety. Ha'e va'e ma Jeú reveguia kuery mbovy rei e'ŷ ou jekuaa va'e oexa vy aipoe'i:

— Aexa mbovy rei e'ŷ ou va'e — he'i.

Ha'e ramo Jorão aipoe'i:

— Emondouka ha'vy peteĩ kavaju árygua ovaexĩ vy ha'e kuery pe oporandu aguã: “Peteĩ rami nhandekuai aguã pa peju?” he'i aguã.

¹⁸ Ha'e ramo kavaju árygua ovaexĩ aguã oo vy aipoe'i:

— Po rami huvixa aipoe'i uka: “Peteĩ rami nhandekuai aguã pa peju?” he'i uka.

Ha'e rā Jeú ombovai:

— Mba'e tu rerekó peteĩ rami ikuai va'e reve? Eju ke xerakykue — he'i.

Ha'e nunga ju oexa pota va'ety omombe'u vy aipoe'i:

— Ha'e kuerya py tembiguai ovaẽ teĩ ndojevyvei ju — he'i.

¹⁹ Ha'e gui Jorão ma amboae ju omondouka kavaju árygua. Ha'e rā ha'e kuerya py ha'e va'e ovaẽ vy aipoe'i:

— Po rami huvixa aipoe'i uka: “Peteĩ rami nhandekuai aguã pa peju?” he'i uka.

Jeú ombovai:

— Mba'e tu rerekó peteĩ rami ikuai va'e reve? Eju ke xerakykue — he'i.

²⁰ Ha'e gui oexa pota va'ety ha'e nunga ju omombe'u vy aipoe'i:

— Peva'e voi ha'e kuerya py ovaẽ teĩ ndojevyvei ju. Ha'e gui karóxa ogueroguata heruvy va'e ma ko Ninsi ramymino Jeú, mba'eta ojerovia rei reve ou ta — he'i.

²¹ Israel pygua huvixa Jorão aipoe'i:

— Emoatyrō xekaróxa — he'i. Ha'e rami vy ikaróxa omoatyrōa ma ramo Jorão oo oiny, Judá pygua huvixa Acazias avi, peteĩ-teĩ okaróxa py ae jogueraa Jeú reve nhovaexĩ aguã. Ha'e vy ovaexĩ okuapy Jezreel pygua Nabote mba'ety py.

²² Ha'e gui Jorão ma Jeú rexa vy oporandu ixupe:

— Jeú, peteĩ rami nhandekuai aguã pa reju?

Ombovai:

— Mba'exa vy 'rā tu peteī rami nhandekuai, ndexy Jezabel tavy reia ha'e imba'evykyha'e javi rupi nhomoingo teria ja? — he'i.

²³ Ha'e ramove Jorāo ma kavaju juru xā ombojeapa vy ogueronha heravy. Ha'e vy aipoe'i ovy Acazias pe:

— Nhanderovaigua ae ra'e, Acazias!

²⁴ Ha'e rami teī Jeú ma ombaraetekuea ha'e javi py guyrapa omoatā vy ojapi Jorāo kupe mbyte py. Ikuraxō rupi hu'y oaxa oiny ramo okaróxa py ae ho'a.

²⁵ Ha'e ramo Jeú aipoe'i oxondaro ruvixa Bidcar pe:

— Eraa ke, ha'e emombo Jezreel pygua Nabote yvykue py. Mba'eta nema'endu ke, ndereve tuu Acabe rakykue rupi kavaju áry jaa jave hovai SENHOR aipoe'i ma voiague re:

²⁶ “Kuee ka'aru Nabote ha'e ta'y kuery ruguy omoē rā aexa va'ekue rupi aipoa'e: Anhetē ha'e va'e mba'ety py ae avi 'rā ambopaga”, he'iague re. Ha'e nunga rupi eraa ha'e va'e mba'ety py ae emombo, SENHOR ijayvuague rami vy — he'i.

²⁷ Ha'e nunga Judá pygua huvixa Acazias oexa vy onha ovy Bete-Hagā katy tape oo va'e rupi. Ha'e rami teī Jeú ma hakykue monha avi vy aipoe'i:

— Pejuka avi — he'i ramo oipyxo ikaróxa py ae, Ibleão katy'i Gur katy ooa py. Ha'e ramo Megido katy onhave vy ha'e py mae omano.

²⁸ Ha'e ramo karóxa pyve hembiguai kuery ogueraa Jerusalém py. Ha'e vy onhono porā okuapy tetā Davi rekoague py, tamoi kuery rupa yvýry ae.

²⁹ Acabe ra'y Jorāo onze ma'etý re ma huvixa oī rire Acazias omboypy va'ekue Judá kuery re opena aguā.

Jezabel omanoague

³⁰ Ha'e gui Jezabel oendu omombe'ua rā Jezreel py Jeú ovaē maa. Ha'e rami vy onhemopytāmba guexa yvýry rupi, omoatyrōmba o'a, ha'e vy janela gui oma'ẽ ho'amy.

³¹ Ha'e gui ma huvixa roka rokē rupi Jeú oaxa ramo kunha va'e aipoe'i:

— O nderuvixa jukaare Zinri, jomeme reiko porā'i vy teve reju?*

³² Ha'e ramo Jeú yvate katy oma'ẽ janela oī va'e re. Ha'e vy aipoe'i:

— Mava'e tu xea katygua peiko? Mava'e tu? — he'i. Ha'e ramo mokoī e'ŷ vy mboapy tembiguai ikuai va'e oma'ẽ okuapy hexe.

³³ Ha'e kuery pe aipoe'ive ju:

— Pemombo ke kunha va'e upe gui yvy katy — he'i. Ha'e ramo kunha va'e omombo okuapy yvy katy. Ha'e vy oo mbotya re huguy hayvipa, ha'e kavaju kuery re voi, hi'áry rupi Jeú ogueroguata rā.

³⁴ Ha'e gui ma opy oike ma vy okaru ha'e oy'u ma. Ha'e rire mae ma aipoe'i:

— Pepena ke kii heko vai va'e retekue re. Peraa, penhono porā, huvixa rajykue ae ramo — he'i.

³⁵ Ha'e ramo oje'oi okuapy onhono porā aguā. Ha'e rami teī hetekue ma ndojouwei inhakāgue e'ŷ vy, ha'e gui ipykue ha'e ipokue anho'i.

³⁶ Ha'e kuery ojevy ju vy omombe'u okuapy ixupe. Ha'e ramo aipoe'i:

— Ha'e nunga ma SENHOR ijayvuague rami ae oiko, guembiguai Tisbé pygua Elias rupi aipoe'i ukaague rami. Ha'e vy aipoe'i: “Jezreel yvy py jagua kuery ho'upa 'rā Jezabel retekue.”

³⁷ Ha'e gui Jezabel rete rembyrekue ma tepoxi rami rive 'rā optya Jezreel yvy rupi. Ha'e ramo rire avave rei ‘Apy ma Jezabel itui’, nda'eavei 'rā.’

* ^{9:31} Jeú pe ma “Zinri” he'i omboetea rupi e'ŷ, mba'eta Zinri ma ymave rupi nguvixa ojuka avi, ha'e gui sete ára ete'i rire ojukaa avi va'ekue (1 Reis 16.8-20).

¹ Samaria tetā py setenta ikuai Acabe ra'y kuery. Ha'e gui Jeú ma kuaxia ombopara vy omondouka ha'e katy, tetā pygua huvixa kuery pe, nhomoneta va'ety ha'e Acabe ra'y kuery re opena va'ety kuery pe. Ha'e vy aipoe'i:

² "Peē kuerya py perekō penderuvixakue ra'y kuery, ha'e gui karóxa, kavaju, tetā ikorapa va'e ha'e tembiporu joe opu'āa pygua ha'e javi. Ha'e nunga rupi peē kuerya py kova'e kuaxia para oguerovaēa ramove'i

³ peiporavo penderuvixa ra'ykue'i va'e kuery regua hi'aranduve ha'e omboetevepy. Ha'e va'e ma pemoī 'rā penderuvixarā penderu rāgue'i rekoria, ha'e gui peju xereve pejoguero'a aguā penderuvixa ro pygua kuery pepya rupi", he'i uka.

⁴ Ha'e rami teī ha'e kuery okyje ete vy joupe-upē aipoe'i okuapy:

— Mokoī huvixa voi nda'ipo'akai raka'e hexe. Ha'e nunga rupi mba'exa tu nhande kuery nhandepo'aka ta hexe? — he'i joupe-upē.

⁵ Ha'e rami vy huvixa ro re ha'e tetā rupi opena va'e kuery, nhomoneta va'ety ha'e huvixa ra'y kuery re opena va'e kuery ombovai okuapy Jeú:

— Ore ma nerembiguai kuery ae, ha'e gui rejapo uka va'e ha'e javi tema ore kuery rojapo 'rā. Ore ma oreruvixarā noroiporavo reguai neī teīve. Orereko tema ndee reipotaa rami — he'i uka okuapy.

⁶ Ha'e ramo Jeú ma kuaxia mboae ju ombopara ha'e kuery pe. Ha'e vy aipoe'i:

"Xapy'a rei xea katyguia ae peiko vy, ha'e xenhe'ē rendu ta ri vy ma peipe'a 'rā penderuvixakue ra'y kuery akā. Ha'e gui ma ko'ē rā kova'e hora ojeupity ju jave peru xea py Jezreel py", he'i.

Ha'e va'e jave huvixakue ra'y kuery setenta va'e ma tetā pygua mongakuaa kuery yvatekuevea py ikuai.

⁷ Ha'e gui ha'e kuerya py kuaxia para oguerovaēa ramo nguvixakue ra'y kuery ojopypa vy ojukapa setenta-ve. Ha'e vy inhakāgue ajaka py omboyrupa vy ogueraa uka okuapy Jezreel katy.

⁸ Jeú oīa py peteī tembiguai ou vy aipoe'i ixupe:

— Oguerupaa ma huvixa ra'y kuery akāgue.

Ha'e ramo ombovai:

— Pemoī mokoī aty okē jaike'ia py, ko'ē rā peve.

⁹ Ha'e gui ma ko'ēgue ha'e oo ha'e py. Ha'e vy optyta ho'amy vy aipoe'i heta va'e kuery pe:

— Kova'e nunga ma peē kuery káuxa e'ŷ oiko. Xee ae rima xeruvixa rovai anhembopy'a vy ajuka. Ha'e rami teī mava'e tu kova'e kuery jukapaare?

¹⁰ Ha'e nunga rupi aŷ peikuaa ma SENHOR oayvu Acabe rovai omombe'u ma voi va'ekue ndoaxa rivei 'rāe, mba'eta SENHOR ojapo ma oayvu guembiguai Elias pe omombe'u ukaague — he'i.

¹¹ Ha'e rami vy Jeú ojukapa Jezreel tetā py Acabe ro pygua kuery okuave va'ekue, ixupegua yvatekueve ikuai va'ekue voi, irū ha'e sacerdote kuery guive. Neī peteī'i ma voi ndoejai hembyre aguā.

¹² Ha'e gui ma Jeú oiko katu vy Samaria katy ojepe'a ov. Tape rupi oo oiny vy, Bete-Equede dos Pastores tekao py

¹³ nhovaexī Judá pygua huvixakue Acazias retarā kuery reve. Ha'e vy oporandu ha'e kuery pe:

— Mava'e kuery peē?

Ha'e kuery ombovai:

— Acazias rāgue'i retarā kuery roiko. Oreruvixakue ra'y kuery roexa aguā rima roje'oi, ha'e ixykue pi'a kuery voi — he'i okuapy.

¹⁴ Ha'e ramo Jeú ngupive oje'oi va'e pe

— Pejopypa ke oikove reve — he'i. Ha'e ramo oikove reve ojopypa vy ojukapa Bete-Equede ygua py ae. Quarenta e dois avakue ikuai va'ekue regua neī peteī'i ma voi ndoejai hembyre aguā.

Jonadabe reve Jeú nhovaexīague

¹⁵ Ha'e gui oove vy nhovaexī Recabe ra'y Jonadabe reve, hexeve ovaexī aguā ae ou rā. Jeú oxarura reve oporandu ixupe:

— Anhetē ete pa nekuraxō py xea katy reiko, xee ma ndea katy anhenhandua rami?

Jonadabe ombovai:

— Tá, ha'e rami ae ri aiko — he'i.

Ha'e ramo aipoe'i:

— Ha'e rami ete ri reiko vy xepopyy — he'i ramo Jonadabe oipopyy.

Ha'e gui Jeú ma okaróxa py ombojeupi ngupive oo aguā.

¹⁶ Ha'e vy ixupe aipoe'i:

— Jaa ha'vy xerupive, ha'e vy rexa 'rā SENHOR pe ete aikoa rupi ajapo va'e — he'i. Ha'e rami vy Jeú ogueraa okaróxa py.

¹⁷ Ha'e gui Samaria py Jeú ovaē ma vy ojukapa Acabe pegua kuery ha'e py okuave va'ekue omomba peve, Elias pe SENHOR ijayvuague rami vy.

Baal mbojeroviaa kuery Jeú ojuka ukapaague

¹⁸ Ha'e gui Jeú omboatypa heta va'e kuery, ha'e vy aipoe'i:

— Acabe ma amongue py ete'i ombojerovia va'ekue Baal. Ha'e rā xee Jeú ma opa mba'e py 'rā ambojerovia.

¹⁹ Ha'e nunga rupi penoīmba xea py Baal pegua profeta kuery, imbojeroviaa ha'e ixupegua sacerdote ikuai va'e ha'e javi. Neī peteīve ma voi toata eme, mba'eta heta mba'e areko Baal pe ame'ē va'erā. Ha'e javi oata va'e ma ndokovevi 'rā — he'i. Ha'e rami Jeú ijayvu nhombotavy vy, Baal mbojeroviaa kuery ojukapaxe vy.

²⁰ Jeú aipoe'ive ju:

— Pejapo ke Baal pegua nhemboaty iky'a e'ŷ va'erā — he'i. Ha'e ramo omombe'u okuapy.

²¹ Israel ha'e javi rupi Jeú omondouka ayvu reraarā. Ha'e ramo oupa okuapy Baal mbojeroviaa kuery ha'e javi, neī peteī'i ma voi ndou e'ŷi. Ha'e rami vy oikepa okuapy Baal pegua opy, ha'e javi rupi omonyē.

²² Ha'e gui ma ao re opena va'ety pe Jeú aipoe'i:

— Erupa ke ao Baal mbojeroviaa kuery pegua, ha'e kuery ha'e javi onhemonde aguā — he'i. Ha'e ramo ha'e rami ojapo.

²³ Ha'e gui mae Jeú oike Baal ropy Recabe ra'y Jonadabe reve. Ha'e vy aipoe'i Baal mbojeroviaa kuery pe:

— Peikuua pota, pexa pota porā apy peē kuery mbyte SENHOR rembiguai kuery ndoikoi pa ra'e, Baal mbojeroviaa anho e'ŷ vy mba'e — he'i.

²⁴ Ha'e gui ha'e kuery oike jogueravy mba'emo oapy reve ome'ē aguā. Ha'e rā oka katy ma Jeú omoī ma voi va'ekue oitenta avakue. Ha'e va'e kuery pe "Avakue pendepo py amboaxa va'ekue regua oo jepe ri ramo hekvia aipe'a 'rā imondoukaare rekove", he'i va'ekue.

²⁵ Ha'e gui Jeú mba'emo oapy reve ome'ēmba ma vy aipoe'i uka jopya ha'e xondaro ruvixa kuery pe:

— Peike ke, pejukapa. Pemonduka eme neī peteīve voi — he'i. Ha'e ramo ojukapa okuapy kyxe py, ha'e jopya ha'e xondaro ruvixa kuery omombopa oka py. Ha'e va'e rire oikeve jogueravy Baal ra'angaa oīaty opyve katy.

²⁶ Ha'e rami vy oguenoē mba'emo ra'angaa omopu'ā mbyre Baal ropy oī va'ekue. Ha'e vy oapypa okuapy.

²⁷ Oguenoē avi Baal ra'angaa omopu'ā mbyre ae. Ha'e rami vy oitypa okuapy Baal pegua oo oī va'ekue, ha'e oīague ma ojapo tepoxi rorā rive ju, aŷ peve guarā.

²⁸ Ha'e rami vy Israel gui Jeú omomba Baal peguare kuery.

²⁹ Ha'e rami teī Jeú ae ma ndojepe'ai tema Nebate ra'y Jeroboão ojejavyague ramigua gui, mba'eta ha'e va'e ma Israel kuery oguerojejavy aguā vaka ra'y ouro guigua ojapo va'ekue, Betel ha'e Dā py omoī vy.

³⁰ SENHOR ijayvu Jeú pe:

— Ndee ma xerenonde rupi ha'evea ramigua rejapo vy xee anhembopy'aague ha'e javi rupi remomba Acabe ro pygua kuery, ha'e rami rire neramymino jevy-jevy ikuai va'e voi oguapy 'rā Israel kuery ruvixa renda áry — he'i.

³¹ Ha'e rami tei Jeú ma opy'a ha'e javi py e'ŷ oiko SENHOR Israel kuery ruete guigua lei rupi, neî ndojepe'ai guive Jeroboão Israel kuery oguerojeavyague ramigua gui.

Jeú omanoague

³² Ha'e va'e ára guive SENHOR omboypy Israel kuery yvy omokyrīve aguã, Hazael ojukapa rire ijyvy ha'e javi rupi,

³³ Jordão yakā guive kuaray oua katy peve, ha'e Gileade yvy ha'e javi. Ha'e va'e ma Gad, Rúben ha'e Manassés regua yvy itui va'ekue Arnom yvyugua katy'i Aroer oĩ va'e guive, Gileade ha'e Basã yvy ae.

³⁴ Ha'e gui oïve rei tema Jeú rekukue regua. Ha'e rami avi ipo'akaague ha'e mba'emoojapo va'ekue ha'e javi noï 'rā teve kuaxia Israel pygua huvixa kuery rekukue oïa re?

³⁵ Ha'e gui ma Jeú ndoikoveei'i ma guamoï kueryague rami. Ha'e ramo onhono porãa Samaria py. Ha'e gui ta'y Jeoacaz ju oï huvixarã nguu rekovia.

³⁶ Samaria py Jeú vinte e oito ma'etŷ re huvixa oï va'ekue.

11

2 Crônicas 22.10-12

¹ Ha'e gui Acazias xy Atalia oendu opi'a omano maa. Ha'e vy opu'ã vy ojukapa guemiarirõ kuery voi.*

² Ha'e rā Acazias ra'y Joás ma ha'e kuery ojukaa ta jave Jorão rajy Jeoseba Acazias reindy va'e ogueraa jepe huvixa ra'y kuery mbyte gui. Ha'e rami vy onhomí peteĩ opy mbyteve katy hexe opena va'ety reve. Atalia gui onhomí vy ndojuka ukai nho.

³ SENHOR pegua opy ae Jeoseba onhomí mboapy meme ma'etŷ re. Ha'e va'e jave ma Atalia ae huvixa oï ha'e va'e yvy re.

2 Crônicas 23.1-11

⁴ Ha'e gui sete ma'etŷa py Joiada oenoï uka Cária guigua kuery ha'e harõa ikuai va'e ruvixa kuery.† Ha'e vy oïa py omoinge ukapa SENHOR pegua opy ae. Ha'e kuery reve jogueroayvu. Ojapo avi ha'e kuery oura aguã SENHOR ropy ae. Ha'e vy mae ha'e kuery pe oexa uka huvixa ra'ykue.

⁵ Ha'e rami vy ha'e kuery pe ijayvu vy aipoe'i:

— Peẽ kuery ma mboapy henda py 'rā pendekuai. Peteĩ regua ma sábado py peike vy pearõ 'rā huvixa ro py.

⁶ Ha'e gui amboae regua ma Sur Oké 'epy va'e py 'rā pearõ. Ha'e gui amboae regua ma oké jopya kuery ikuai va'e rovai rupi 'rā pearõ. Ha'e rami 'rā pearõ pekuapy kova'e oo.

⁷ Ha'e gui mokoï regua sábado py oje'oi va'e kuery ha'e javi 'rā oarõ SENHOR pegua oo, huvixa yvýry.

⁸ Ha'e rami vy huvixa yvýry ae 'rā pendekuai, peteĩ-tei pendepo py tembiporu pereko reve. Ha'e gui mava'e rā rei penderyxy va'e mbyte rupi oaxa ta va'e pejuka 'rā. Huvixa reve ae 'rā peiko oë ový jave, ha'e gui oike ouvy jave voi — he'i.

⁹ Ha'e ramo cem ikuai va'e-va'e ruvixa kuery ojapo okuapy sacerdote Joiada ojapo uka va'ekue ha'e javi. Ha'e rami vy peteĩ-tei ogueraa guexeveguá avakue sacerdote Joiada oïa py, sábado ára py oike ha'e oë ta va'e kuery.

¹⁰ Ha'e ramo cem ikuai va'e-va'e ruvixa kuery pe sacerdote omboaxa hu'y guaxu ha'e hu'y jokoa huvixa Davi mba'ekue, SENHOR pegua opy omoï porã mbyre.

¹¹ Ha'e ramo huvixa ro rarõa kuery ikuai, peteĩ-tei guembiporu reve, huvixa ro oiporu kuaa ha'e oiporu kuaa e'ŷa rupi, altar ha'e templo peve.

* 11:1 Guemiarirõ kuery ojukapa ha'e ae onhembovixaxe vy. † 11:4 Joiada ma sacerdote yvateve va'e ha'e Jeoseba me, Nhanderuete pe ete oiko va'e. Gua'yxy reve onhomí huvixa ra'y Joás sete ma'etŷ oguerekó peve, ha'e gui omoï uka huvixarã.

¹² Ha'e gui mae ma Joiada oguenoẽ huvixa ra'ykue. Inhakā re coroa omoĩ vy ixupe ome'ẽ kuaxia para Nhanderuete ayvu oĩa. Ha'e rami vy nguvixarã omoĩ okuapy azeite oikyty reve. Ha'e vy ojepopete-pete reve ojapukai okuapy:

— Toiko riae nhanderuvixa!

2 Crônicas 23.12-15

¹³ Harõa ha'e heta va'e kuery ojapukai okuapy rã Atalia oendu vy ha'e kuerya py ou SENHOR pegua opy.

¹⁴ Ha'e py oma'ẽ rã huvixa hi'aĩ ma oo yta yvýry huvixa va'e nhavõ hi'aĩaty py ae. Huvixa renonde ikuai avi harõa kuery ruvixa ha'e mimby guaxu monhe'ẽa kuery. Heta va'e kuery ha'e javi oguerovy'a okuapy, ha'e omonhe'ẽa avi mimby guaxu. Ha'e nunga Atalia oexa vy oao omondoro reve ojapukai:

— Xerovaigua ra'e! Xerovaigua ra'e! — he'i.

¹⁵ Ha'e ramo sacerdote Joiada ma xondaro ruvixa kuery pe ijayvu vy aipoe'i:

— Kunha va'e penoẽ ke heravy hyxy okuapy va'e kuery mbyte rupi. Amongue hupive oo ta ramo pejuka 'rã kyxe py — he'i. Mba'eta sacerdote ae “Pejuka eme SENHOR pegua opy” he'iague rami.

¹⁶ Ha'e ramo ojopy okuapy kunha va'e. Ha'e rami vy kavaju rape oĩ va'e rupi ogueraa huvixa ro peve. Ha'e py mae ma ojuka.

2 Crônicas 23.16-21

¹⁷ Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery reve.

¹⁸ Ha'e ramo heta va'e kuery oyvy ha'e javi gui ou va'ekue oike okuapy Baal pegua oo py, ha'e vy ombovaipa. Ixupegua altar ikuai va'ekue omopẽmba okuapy, ta'angaa ikuai va'e voi. Baal pegua sacerdote Matã voi ojuka altar yvy'iry.

Ha'e gui sacerdote Joiada omoĩ SENHOR pegua oo rarõarã kuery.

¹⁹ Ha'e rami vy ogueraapa Cária guigua kuery ruvixa, harõa kuery ruvixa kuery ha'e heta va'e kuery oyvy ha'e javi gui ou va'ekue. Ha'e va'e kuery ha'e javi reve ogueraa huvixa SENHOR pegua oo gui. Ha'e rami vy nhoarõa kuery rokẽ rupi tape oo va'e rupi oguenovaẽ huvixa ro py ae. Ha'e ramo Joás oguapy oiny tenda huvixa va'e nhavõ openaaty áry.

²⁰ Ha'e ramo heta va'e kuery oyvy gui ou va'ekue ha'e javi oyv'a okuapy, tetã rupi voi ha'eve rei va'e ikuai, huvixa ro py Atalia kyxe py ojukaa ma rire.

²¹ Joás ma sete ma'etã oguereko huvixarã omoĩa ypy'i javé.

12

2 Crônicas 24.1-14

¹ Israel pygua huvixa Jeú sete ma'etã re ma oĩ rire Joás oĩ huvixarã. Ha'e gui quarenta ma'etã re opena Jerusalém py. Ixy ma Berseba pygua Zíbia.

² Joás ma ha'evea ramigua ojapo oikovy SENHOR renonde, sacerdote Joiada ombo'e herekovya ja.

³ Ha'e rami teĩ ombojeroviaaty yvy'ã rupi ikuai va'e nombovaipai. Ha'e ramo heta va'e kuery mba'emo ome'ẽ okuapy ha'e py, heakuã porã va'e oapy avi teri okuapy.

⁴ Ha'e gui Joás aipoe'i sacerdote kuery pe:

— Pemono'õ 'rã peráta iky'a e'ŷ va'e SENHOR pe ome'ẽ mbyre, imposto re peteĩ-teĩ ome'ẽ va'ekue, amongue rekoria ome'ẽ mbyre, ha'e gui peráta peteĩ-teĩ onhenhandua'i rami ome'ẽ va'ekue SENHOR ropy guarã.

⁵ Ha'e va'e ma sacerdote ikuai va'e ae 'rã ojopy, peteĩ-teĩ oirũ kuery gui. Ha'e va'e py ha'e kuery omoatyrõ 'rã oo ivaipaa oĩa rupi — he'i.

⁶ Ha'e gui vinte e três ma'etã re ma huvixa Joás oĩ teĩ sacerdote kuery nomoatyrõi teri oo ivaipaague.

⁷ Ha'e ramo huvixa Joás oenoĩ sacerdote Joiada ha'e sacerdote kuery mboae. Ha'e vy aipoe'i ha'e kuery pe:

— Mba'e re tu napemoatyrōi ri oo ivaipaa oĩ rupi? Aŷ gui ma ndapejopyvei ma 'rā peráta peneirũ kuery gui. Ha'e rami 'rāgue py pemboaxapa 'rā oo moatyrōarā kuery pe — he'i.

⁸ Ha'e ramo sacerdote kuery ojou porā okuapy heta va'e kuery gui peráta ojopy ve'ŷ aguã, oo ivaipaa oĩ rupi ha'e kuery ae omoatyrō ve'ŷ aguã.

⁹ Ha'e ramo sacerdote Joiada ma peteĩ hyru ojopy uka vy ombokua uka imbotya re. Ha'e vy altar yvýry omoĩ, SENHOR ropy oike va'e kuery oiporu kuaa regua re. Ha'e rami vy ha'e py ae sacerdote kuery okẽ rarõa ikuai va'e omoĩ peráta SENHOR pegua opy ogueru pyre ha'e javi.

¹⁰ Ha'e gui hyru py heta ma peráta oĩ nhavõ oexa rā huvixa pegua kuaxia re opena va'ety oo kuerei 'rā sacerdote yvateve va'e reve, ha'e vy oipapa vy omboyrupa 'rā okuapy SENHOR ropy peráta ogueru pyre.

¹¹ Ha'e rami vy peráta opesapa rire omboaxapa 'rā SENHOR pegua oo moatyrōa kuery re opena va'e kuery po py. Ha'e va'e kuery ju opaga 'rā oo apoa ha'e oo ivaipaague omoatyrō va'e kuery pe,

¹² ita re omba'eapo ha'e imboa'ya kuery pe guive. Ha'e ramo ha'e kuery ojogua 'rā yvyra ha'e ita omoatyrō mbyre SENHOR pegua oo ivaipaa oĩ rupi omoatyrō aguã. Opaga avi SENHOR pegua oo omoatyrōa py oiporua va'erā ha'e javi.

¹³ Ha'e gui peráta SENHOR pegua oo py ogueru pyre gui ma ndojapoai hy'a prata guigua, neĩ tapyĩ araa, hy'a guaxu, mimby guaxu, neĩ hyru SENHOR pegua oo pyguarã ndojapoai ha'e va'e ouro ha'e prata gui.

¹⁴ Ha'e rami 'rāgue py omboaxapa omba'eapo va'e kuery re opena va'e kuery pe. Ha'e ramo ha'e va'e py omoatyrō okuapy SENHOR pegua oo.

¹⁵ Ha'e ramive neĩ ndoikuua potaavei avakue peráta jopyare re, omba'eapo va'e kuery pe ome'ẽ va'erā kuery re. Mba'eta ha'e kuery ma ojeroviapy meme ikuai omba'eapoa py.

¹⁶ Ha'e rā peráta mba'emo omboekovia aguã regua ha'e jejavya regua ome'ẽmby ma ndogueruai SENHOR pegua oo py. Ha'e va'e ma sacerdote kuery peguarã anho.

¹⁷ Ha'e va'e javi ma Síria pygua huvixa Hazael opu'ã vy joguero'a Gate tetã ojopy aguã, ha'e vy ipo'aka. Ha'e va'e rire Hazael kuery Jerusalém katy ooxe avi ojopy aguã.

¹⁸ Ha'e ramo Judá pygua huvixa Joás ma oipe'apa mba'emo iky'a e'ŷ va'erā guamoĩ kuery Judá pygua huvixa va'e SENHOR pe omboaxa va'ekue, Josafá, Jeorão ha'e Acazias. Oipe'a avi ouro SENHOR ropy ha'e huvixa ropy omoĩ porā mbyre. Ha'e va'e ma Síria pygua huvixa Hazael pe omondouka. Ha'e ramo nopenavei Jerusalém tetã re.

¹⁹ Ha'e gui oïve rei tema Joás rekukue regua. Ha'e rami avi mba'emo ojapo va'ekue ha'e javi noĩ 'rā teve kuaxia Judá pygua huvixa kuery rekukue oĩ re?

2 Crônicas 24.25-27

²⁰ Ha'e gui ma Joás rembiguai kuery hovai opu'ã vy oipyxo okuapy Milo ro py, Sila katy jaguej'y i javya py.

²¹ Ha'e vy hembiguai Simeate ra'y Jozacar ha'e Somer ra'y Jozabate ae oipyxopa okuapy ramo omano. Ha'e ramo onhono porāa tuu kuery rupa katy'i Davi rekoague py. Ha'e gui ta'y Amazias ju huvixarã oĩ nguu rekovia.

13

Israel pygua huvixa Jeoacaz oĩ jave guare

¹ Acazias ra'y Joás vinte e três ma'etŷ re ma Judá pygua huvixa oĩ rire Jeú ra'y Jeoacaz oĩ Israel pygua huvixarã. Samaria py opena dezessete ma'etŷ re.

² Ha'e va'e ma ha'eve'ŷ va'e ojapo oikovy SENHOR renonde, mba'eta Nabote ra'y Jeroboão Israel kuery oguerojejavague rupi ae ju oiko, ndojep'e ai guive ha'e rami oikoague gui.

³ Ha'e nunga rupi SENHOR poxya hendy Israel kuery rovai. Ha'e rami vy omboaxapa Síria pygua huvixa Hazael ha'e ta'y Ben-Hadade po py, Jeoacaz oĩ pukukue re.

⁴ Ha'e rami teĩ SENHOR renonde Jeoacaz ojerure ramo oendu guive, mba'eta oexa Síria pygua huvixa Israel kuery ombojexavai rā.

⁵ Ha'e rami vy SENHOR peteī ombou Israel kuery reraa jepearā. Ha'e ramo Israel kuery ma Síria kuery po'akaa gui oo jepe nho vy ha'ekue rami ae ju ikuai ngoogue rupi.

⁶ Ha'e rami teī ndojepe'ai tema okuapy Jeroboão Israel kuery oguerojejavyague ramigua gui, ha'e va'ekue rupi ae tema ikuai, ndoipe'ai guive ta'angaarā yvyra Samaria py omopu'ā mbyre.

⁷ Ha'e ramo Jeoacaz pegua xondaro kuery ma Síria pygua huvixa omomba rire ndokuavei, cinqüenta kavaju árygua ete'i e'ŷ vy, ha'e dez karóxa ha'e dez mil avakue yvy rupigua. Yvy ku'i rami ojapo omou'ūmba vy.

⁸ Ha'e gui oīve rei tema Jeoacaz rekukue regua. Ha'e rami avi mba'emo opo'akaa rupi ojapo va'ekue ha'e javi noī 'rā teve kuaxia Israel pygua huvixa kuery rekukue oīa re?

⁹ Ha'e gui ma Jeoacaz ndoikovevei'i ma guamoī kueryague rami. Ha'e ramo onhono porāa Samaria py. Ha'e ramo ta'y Jeoás ju oī nguu rekovia.

Israel pygua huvixa Jeoás oī jave guare

¹⁰ Judá pygua huvixa Joás trinta e sete ma'etŷ re ma oī rire Jeoacaz ra'y Jeoás oī Israel pygua huvixarā. Ha'e gui Samaria py opena dezesseis ma'etŷ re.

¹¹ Ha'e va'e ma ha'eve'ŷa ramigua ojapo oikovy SENHOR renonde. Ha'e rami vy ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

¹² Ha'e gui oīve rei tema Jeoás rekukue regua. Ha'e rami avi Judá pygua huvixa Amazias rovai opu'āague, ha'e mba'emo opo'akaa rupi ojapo va'ekue ha'e javi noī 'rā teve kuaxia Israel pygua huvixa kuery rekukue oīa re?

¹³ Ha'e gui Jeoás ndoikovevei'i ma guamoī kueryague rami. Ha'e ramo onhono porāa Samaria py ae, Israel pygua huvixa kuery rupa yvýry. Ha'e gui hekovia ma oī Jeroboão.

Eliseu opa vygua ayvu omombe'u rire omanoague

¹⁴ Ha'e gui Eliseu ma ojexavai oupy mba'eaxy gui, omano rai'i ma. Ha'e ramo Israel pygua huvixa Jeoás ou oipou aguā. Ha'e vy hexe ojae'o vy aipoe'i:

— Xeru, xeru! Ha'vy Israel kuery karóxa ha'e kavaju árygua kuery!

¹⁵ Ha'e ramo ixupe Eliseu

— Ejopy ke peteī guyrapa ha'e hu'y — he'i. Ha'e ramo ojopy peteī guyrapa ha'e hu'y.

¹⁶ Aipoe'ive ju Israel pygua huvixa pe:

— Emoatā ke guyrapa — he'i ramo omoatā. Ha'e gui ma huvixa po áry Eliseu omoī opo.

¹⁷ Ha'e vy aipoe'i:

— Peipe'a janela kuaray puku-a katygua. Ha'e kuery oipe'a ramo Eliseu aipoe'ive ju:

— Emombo ke — he'i ramo omombo.

Aipoe'ive ju:

— Ha'e va'e hu'y ma SENHOR ipo'akaa regua kuaa ukaarā, hu'y Síria kuery re ipo'aka aguā regua, mba'eta Afeca py reitypa 'rā Síria kuery remomba peve — he'i.

¹⁸ Ha'e gui ma aipoe'ive teri:

— Hu'y rembyrekue ju ejopy — he'i ramo Israel pygua huvixa hu'y ojopy jevy ramo aipoe'i ixupe:

— Einupā ke yvy re — he'i. Ha'e ramo mboapykue yvy re oinupā ma vy opytu'u.

¹⁹ Ha'e rami rā ixupe Nhanderuete remimbo'e ivai vaipa vy aipoe'i:

— Cinco-kue e'ŷ vy seis-kue reinupā va'e rire Síria pygua kuery reity ete 'rāgue remomba peve. Ha'e rami teī aŷ mboapykue'i 'rā reity Síria pygua kuery — he'i.

²⁰ Ha'e gui ma Eliseu omano. Ha'e ramo onhono porāa.

Ha'e gui Moabe pygua kuery regua ma ára pyau ojeupity nhavō ijyvy re jogueru jepi 'rā mba'emo oipe'apa aguā.

²¹ Ha'e gui ma peteī ava retekue hetarā kuery ojaty jave oexa okuapy Moabe pygua kuery ou rā. Ha'e rami vy hetekue ma Eliseu rupa py rive omombo okuapy. Ha'e gui Eliseu kāgue re hetekue oje'a ramove ava va'e oikove jevy vy opu'ā ho'amy.

²² Jeoacaz oĩ pukukue re Síria pygua huvixa Hazael ombojexavai imbokuapy Israel kuery.

²³ Ha'e ramo SENHOR omboaxy nho oayvu vy. Ha'e kuery re oma'ẽ Abraão, Isaque ha'e Jacó reve guexeve guarã ojapo va'ekue re ima'endu'a vy. Nomombaxe etei, guenonde gui nomomboi teri guive.

²⁴ Ha'e gui Síria pygua huvixa Hazael omano ma ramo ta'y Ben-Hadade ju oĩ nguu rekovic.

²⁵ Jeoacaz oĩ jave hexeve Ben-Hadade joguero'a vy ojopy ixupeguia tetã ikuai va'ekue. Ha'e va'e tetã ma Jeoacaz ra'y Jeoás ju ojopypa Ben-Hadade po'akaa gui. Mboapykuea ma Jeoás oitypa vy ojopy Israel kuery retã ikuai va'ekue.

14

2 Crônicas 25.1-4

¹ Jeoacaz ra'y Jeoás mokoĩ ma'etã re ma Israel pygua huvixa oĩ rire Joás ra'y Amazias oĩ Judá pygua huvixarã.

² Ha'e va'e ma vinte e cinco ma'etã oguereko huvixa oĩ ypy'i jave py, ha'e vinte e nove ma'etã re opena Jerusalém py. Ixy rery ma Jeoadã, Jerusalém pygua ae.

³ Ha'e ma ha'evea ramigua ojapo oikovy SENHOR renonde rupi, teĩ guamoĩ Davi rami ete'ŷ ju ta'vy. Ha'e rami vy nguu Joás ojapoague ramigua meme ojapo oikovy.

⁴ Ha'e rami avi ombojeroviaaty yvy'ã rupi ikuai va'e nombovaipai. Ha'e rami vy ha'e va'e rupi teri heta va'e kuery mba'emo ome'ẽ, ha'e heakuã porã va'e oapy okuapy.

⁵ Ha'e gui opo'akaa re oĩ atã ma rire ojuka ukapa guembiguai kuery tuu jukaare.

⁶ Ha'e rã ijukaare ra'y kuery ma ndojuka ukai, Moisés kuaxia re omboparaague rami vy, mba'eta SENHOR ojapo uka vy aipoe'i: “Tuu kuery ma ndojukaaai 'rã ta'y kuery ojapo vaiague re, ta'y kuery voi ndojukaaai 'rã tuu kuery ojapo vaiague re. Peteĩ-teĩ ojukaa 'rã ha'e ae ojejavyague re”, he'iague rami.

2 Crônicas 25.5-13

⁷ Yvyugua Juky 'epy va'e oĩa py Amazias ojuka Edom pygua kuery dez mil, ha'e vy joguero'aa py ojopy Sela tekoa. Ha'e va'e ma omboery ju Jocteel, aÿ peve guarã.

2 Crônicas 25.17-24

⁸ Israel pygua huvixa ma Jeoacaz ra'y Jeoás, Jeú ramymino va'e. Ha'e va'ea katy Amazias omondouka ayvu mombe'uarã kuery.

— Peju, jajoguero'a — he'i uka.

⁹ Ha'e rami teĩ Israel pygua huvixa Jeoás ombovai Judá pygua huvixa Amazias:

— Ha'e gui Líbano yvy re ma je peteĩ juu rakuaendy hi'aĩ va'e oayvu omondouka yary ha'e py hi'aĩ avi va'e pe: “Eme'ẽ na nderajy xera'y ra'yxyrã”, he'i uka. Ha'e rami teĩ juu rakuaendy re mymba kuery Líbano yvy regua opyrõmba rive.*

¹⁰ Ha'e gui ndee ma anhetã ete Edom pygua kuery re ndepo'aka va'ekue, ha'e rami vy nekuraxõ re oĩ renhemboyvate reixeia. Ha'e nungakue rerovy'a vy ndero py ae repyta 'rãgue. Mba'e re tu rejeity ukaxe ri mba'emo vai py, Judá pygua kuery reve? — he'i uka.

¹¹ Ha'e rami teĩ Judá pygua huvixa Amazias noendu potai. Ha'e rami vy oo nho Judá regua Bete-Semes tekoa py joe opu'ã aguã Israel pygua huvixa Jeoás reve.

¹² Ha'e gui ma Israel kuery renonde rupi Judá pygua kuery oitypaa. Ha'e vy peteĩ-teĩ onhamba ngoo katy.

¹³ Ha'e gui Bete-Semes py ae Israel pygua huvixa Jeoás ojopy Judá pygua huvixa Joás ra'y Amazias, Acacias ramymino va'e. Ha'e rami vy Jerusalém py oo vy oitypa tetã kora rokẽ Efraim 'epy va'e guive ojerea katy'i okẽ hi'aïague peve, cento e oitenta metros va'ekue ha'e javi.

¹⁴ Ha'e rami vy oipe'apa ouro, prata ha'e mba'emo ryru SENHOR ropy ikuai va'ekue, huvixa ro py mba'emo omoĩ porã mbyre ha'e javi guive. Ogueraa avi avakue mba'emo re omboekovia va'erã. Ha'e gui mae ma ojevy ju Samaria katy.

* 14:9 “Juu rakua endy” he'ia ma Amazias ombojaru reia rupi ijayvu vy, ha'e rã “Yary hi'aĩ va'e” he'ia ma ojee ae ijayvu vy.

Israel pygua huvixa Jeoás omanoague

¹⁵ Ha'e gui oïve rei tema Jeoás rekukue regua. Ha'e rami avi Judá pygua huvixa Amazias re opu'āague, ha'e mba'emo opo'akaa rupi ojapo va'ekue ha'e javi noī 'rā teve kuaxia Israel pygua huvixa kuery rekukue oïa re?

¹⁶ Ha'e gui ma Jeoás ndoikovevei'i ma guamoī kueryague rami. Ha'e ramo onhono porãa Samaria py, Israel pygua huvixa kuery rupa yrýry ae. Ha'e ramo ta'y Jeroboão ju oïnguu rekovia.

2 Crônicas 25.25-28

¹⁷ Jeoacaz ra'y Jeoás Israel pygua huvixa omano ma rire Joás ra'y Amazias Judá pygua huvixa oikove ranhe quinze ma'etý re.

¹⁸ Ha'e gui oïve rei tema Amazias rekukue regua. Ha'e rami avi mba'emo opo'akaa rupi ojapo va'ekue ha'e javi noī 'rā teve kuaxia Judá pygua huvixa kuery rekukue oïa re?

¹⁹ Ha'e va'e rovai Jerusalém py jogueroayvua ramo onha Laquis katy. Ha'e rami tei hakykue omondoukaa avakue Laquis peve. Ha'e rami vy ha'e pyve ojuka.

²⁰ Ha'e rami vy kavaju áry ogueru vy Jerusalém tetã py ae onhono porãa, tetã Davi rekoague py tuu kuery rupa yvýry.

²¹ Ha'e gui ta'y Uzias ma dezesseis ma'etý oguerekó reve Judá pygua kuery omoī okuapy tuu Amazias rekovia.

²² Ha'e va'e ma Elate tetã omoatyrõ ma vy ojapo Judá kuery rekoarã, tuu Amazias guamoī kueryague rami ndoikovevei'i ma rire.

Israel pygua huvixa Jeroboão mokoña va'e oïjave guare[†]

²³ Joás ra'y Amazias Judá pygua huvixa quinze ma'etý re ma oïjave Samaria py oïJeoás ra'y Jeroboão Israel pygua huvixarã. Ha'e rami vy quarenta e um ma'etý re oï huvixa.

²⁴ Ha'e va'e ma mba'emo vai anho ojapo oikovy SENHOR renonde rupi. Nei ruxã'i ma voi ndojepe'ai Nabote ra'y Jeroboão Israel kuery oguerojejavague ramigua gui.

²⁵ Ha'e va'e ma Israel kuery omoī atã ju ijyvy apy rupi, Hamate py jaikeaty guive yvy joja reia regua ye'ẽ rembe peve, SENHOR Israel kuery ruete ijayvuague rami vy, guembigui Amitai ra'y profeta Jonas Gate-Hefer pygua ayvu rupi.

²⁶ Mba'eta SENHOR oexa rã Israel kuery opa mba'e py ojexavai okuapy, ndoikoi guive Israel kuery repyarã, nei escravo ha'e escravo e'ŷ voi.

²⁷ Ha'e va'e jave ma SENHOR nda'ijayvui teri Israel rery ombogue aguã re yva guy rupi gui. Ha'e rami vy Jeoás ra'y Jeroboão pe ogueraa jepe uka.

²⁸ Ha'e gui oïve rei tema Jeroboão rekukue regua. Ha'e rami avi joe opu'āa rupi Judá regua tetã Damasco ha'e Hamate re ipo'akaague Israel rekoarã, ha'e mba'emo opo'akaa rupi ojapo va'ekue ha'e javi noī 'rā teve kuaxia Israel pygua huvixa kuery rekukue oïa re?

²⁹ Ha'e gui Jeroboão ndoikovevei'i ma nguu kuery Israel pygua huvixa ikuai va'ekue rami. Ha'e ramo ta'y Zacarias ju oïnguu rekovia.

15

2 Crônicas 26.1-15

¹ Vinte e sete ma'etý re ma Israel pygua huvixa Jeroboão oïjave py Amazias ra'y Azarias oï Judá pygua huvixarã.*

² Ha'e va'e ma dezesseis ma'etý oguerekó jave py oïypy'i huvixa, ha'e vy cinqüenta ma'etý re opena Jerusalém py. Ixy ma Jecolias, Jerusalém pygua ae.

³ Ha'e ma ha'evea ramigua ojapo oikovy SENHOR renonde rupi, nguu Amazias ojapoague rami meme.

⁴ Ha'e rami tei nombovaipai guiveombojeroviaaty yvy'ã rupi ikuai va'e. Ha'e rupi heta va'e kuery mba'emo ome'ẽ teri, ha'e heakuã porã va'e guive oapy okuapy.

2 Crônicas 26.16-23

[†] 14:22 Jeoás ra'y Jeroboão pe ma "Jeroboão mokoña va'e" 'ea, mba'eta jypygua Jeroboão Nabote ra'y va'e oï ae ma va'ekue Israel pygua huvixa. * 15:1 Azarias rery mboae ma Uzias raka'e (14.21, 15.13).

⁵ Ha'e gui SENHOR omomba'eaxy huvixa. Ha'e ramo lepra revegua oiko omano peve, oo ha'e ae'i oĩ aguã py. Ha'e ramo ta'y Jotão ju opena oikovy hoo re, ijyvy pygua kuery re guive.

⁶ Ha'e gui oĩve rei tema Azarias rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokue oĩa re?

⁷ Ha'e gui Azarias ndoikovevei'i ma guamoĩ kueryague rami. Ha'e ramo onhono porãa tuu kuery rupa yvýry ae, Davi rekoague py. Ha'e ramo ta'y Jotão ju oĩ nguu rekovia.

Israel pygua huvixa Zacarias oĩ jave guare

⁸ Trinta e oito ma'etý re ma Azarias Judá pygua huvixa oĩ rire Jeroboão ra'y Zacarias oĩ Israel pygua ruvixarã. Samaria py opena seis jaxy re ete'i.

⁹ Ha'e va'e ma ha'eve'ý va'e ojapo oikovy SENHOR renonde, nguu kuery ojapoague ramigua ae. Ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

¹⁰ Ha'e va'e rovai opu'ã Jabes ra'y Salum. Heta va'e kuery oexaa py oipyxo vy ojuka. Ha'e vy ha'e ju oĩ hekovia.

¹¹ Ha'e gui oĩve rei tema Zacarias rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

¹² Ha'e rami vy ojeupity Jeú pe SENHOR ijayvuague: “Neramymino jevy kuery ikuia peve ha'e kuery oguapy 'rã tenda Israel kuery re openaaty áry”, he'iague rami ae oiko raka'e.

Israel pygua huvixa Salum oĩ jave guare

¹³ Trinta e nove ma'etý re ma Uzias Judá pygua huvixa oĩ rire Jabel ra'y Salum oĩ Israel kuery ruvixarã. Ha'e va'e ma peteĩ jaxy ete'i opena Samaria py.

¹⁴ Ha'e gui ma Tirza tetã gui Gadi ra'y Menaém Samaria py ou vy oipyxo Jabel ra'y Salum, ha'e vy ojuka. Ha'e gui ha'e ju oĩ hekovia.

¹⁵ Ha'e gui oĩve rei tema Salum rekokue regua. Ha'e rami avi nguvixa rovai opu'ãague, ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

¹⁶ Ha'e ramo Menaém ojukapa Tifsa pygua kuery, Tirza guive ikuai va'ekue ha'e javi reve, ixupe guetã rokẽ ndoipe'ai ramo rive. Ha'e rami vy omomba ha'e omondoro ukapa kunhague hye guaxu'i va'ekue rye.

Israel pygua huvixa Menaém oĩ jave guare

¹⁷ Trinta e nove ma'etý re ma Judá pygua huvixa Azarias oĩ rire Gadi ra'y Menaém oĩ Israel pygua ruvixarã. Ha'e vy dez ma'etý re opena Samaria py.

¹⁸ Ha'e va'e ma ha'eve'ý va'e anho ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

¹⁹ Ha'e ramo Síria pygua huvixa Pul ou ijyvy re opu'ã aguã. Ha'e va'e Pul pe Menaém ome'ẽ trinta e três toneladas prata guigua, onhembopo'aka ukavexe vy.

²⁰ Ha'e va'e peráta ma Israel ha'e javi rupi gui Menaém ojopy Assíria pygua huvixa pe ome'ẽ aguã. Ipo'akapa ha'e oguerekopa va'e peteĩ-teĩ gui ojopy cinqüenta hatã'i va'e prata guigua. Ha'e rire ma Assíria pygua huvixa oo ju oyvy katy, Israel yvy re ndopytavei.

²¹ Ha'e gui oĩve rei tema Menaém rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

²² Ha'e gui Menaém ndoikovevei'i ma guamoĩ kueryague rami. Ha'e gui ta'y Pecaías ju oĩ nguu rekovia.

Israel pygua huvixa Pecaás oĩ jave guare

²³ Cinqüenta ma'etý re ma Judá pygua huvixa Azarias oĩ rire Menaém ra'y Pecaás oĩ Israel pygua huvixarã. Samaria py ae opena mokoĩ ma'etýa peve.

²⁴ Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

²⁵ Ixupegua xondaro ruvixa ma Remalias ra'y Peca. Ha'e va'e ma Pecaías re opu'ã vy oipyxo Samaria tetã py, huvixa ro ikorapa va'e py ae. Ojuka avi Argobe ha'e Arié. Peca revegua ma cinqüenta avakue ikuai Gileade pygua meme. Ha'e vy huvixa ojuka rire ha'e ju oĩ hekobia.

²⁶ Ha'e gui oïve rei tema Pecaías rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

Israel pygua huvixa Peca oĩ jave guare

²⁷ Cinqüenta e dois ma'etý re ma Judá pygua huvixa Azarias oĩ rire Remalias ra'y Peca oĩ Israel pygua ruvixarã. Samaria py ae opena vinte ma'etý re.

²⁸ Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojejavyague ramigua gui.

²⁹ Israel pygua huvixa Peca oĩ jave py ou Assíria pygua huvixa Tiglate-Pileser. Ha'e va'e ou vy ipo'aka Ijom re, Abel-Bete-Maaca, Janoa, Quedes, Hazor, Gileade, Galiléia ha'e Naftali vyv ha'e javi re. Ha'e rupi ikuai va'ekue ogueraapa oyvy Assíria katy.

³⁰ Ha'e gui ma Remalias ra'y Peca rovai Elá ra'y Oséias opu'ã vy oipyxo, ha'e vy ojuka. Ha'e rami vy ha'e ae ju oĩ hekobia, vinte ma'etý re ma Uzias ra'y Jotão Judá pygua huvixa oĩ rire.

³¹ Ha'e gui oïve rei tema Peca rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

2 Crônicas 27.1-9

³² Mokoĩ ma'etý re ma Remalias ra'y Peca Israel pygua huvixa oĩ rire Uzias ra'y Jotão oĩ Judá pygua ruvixarã.

³³ Ha'e va'e ma vinte e cinco ma'etý oguereko jave py oĩ ypy'i huvixarã. Ha'e vy dezesseis ma'etý re opena Jerusalém py. Ixy ma Zadoque rajy Jerusa.

³⁴ Ha'e ma ha'evea rami oiko SENHOR renonde rupi, nguu Uzias oikoague ha'e javi rami.

³⁵ Ha'e rami teĩ nombovaipai ae tema ombojeroviaaty yvy'ã rupi ikuai va'e. Ha'e rami rã yvy'ã rupi heta va'e kuery mba'emo ome'ẽ ha'e heakuã porã va'e oapy okuapy. Jotão ma ojapo uka SENHOR pegua oo rokẽ yvate rupi guarã.

³⁶ Ha'e gui oïve rei tema Jotão rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokue oĩa re?

³⁷ Ha'e va'e jave py SENHOR omboypy Judá rovai guarã ombou aguã Síria pygua huvixa Rezim ha'e Remalias ra'y Peca.

³⁸ Ha'e gui Jotão ndoikovevei'i ma guamoĩ kueryague rami. Ha'e ramo tuu kuery rupa yvýry ae onhono porãa, Davi rekoague py. Ha'e gui ta'y Acaz ju oĩ nguu rekovia.

16

2 Crônicas 28.1-4

¹ Dezessete ma'etý re ma Remalias ra'y Peca Israel pygua huvixa oĩ rire Jotão ra'y Acaz oĩ Judá pygua ruvixarã.

² Acaz ma oĩ ypy'i jave vinte ma'etý ramo'i oguereko. Ha'e gui dezesseis ma'etý re opena Jerusalém py. Ha'e va'e ma ha'eve'ýa ramigua ojapo oikovy SENHOR nguuete renonde rupi, guamoĩ Davi rami e'ý.

³ Mba'eta Israel pygua huvixa kuery reko rami oiko. Ha'e vy gua'y ae oapy nguuete ramigua pe, amboae regua kuery Israel kuery renonde guí SENHOR oipe'a va'ekue ojeguarupy ojapo okuapyague rami.

⁴ Ombojeroviaaty yvy'ã rupi ikuai va'e py voi mba'emo ome'ẽ oikovy, heakuã porã va'e oapy avi yvy'ã rupi, yvyra rogue ana ikuai va'e guýry rupi guive.

2 Crônicas 28.16-21

⁵ Ha'e gui ma Jerusalém tetã re jogueru nhoguenoiny Síria pygua huvixa Rezim ha'e Israel pygua huvixa Remalias ra'y Peca reve, ha'e pygua re opu'ã aguã. Ojoko okuapy Acaz oĩa teĩ nda'ipo'akai hexe.

⁶ Ha'e va'e jave py Síria pygua huvixa Rezim ipo'aka ju Elate tetā Síria reguarã. Ha'e va'e gui oipe'apa judeu ikuai va'ekue. Ha'e gui Elate katy Síria pygua kuery ju oo vy ha'e py ikuai aŷ peve.

⁷ Ha'e ramo Acaz ma Assíria pygua huvixa Tiglate-Pileser pe omondouka ayvu mombe'uarã. Ha'e vy aipoe'i uka:

— Xee ma nerembiguai ha'e ndera'y aiko. Eju ha'vy, xereraa jepe Síria ha'e Israel pygua huvixa po'akaa gui, mba'eta ha'e kuery opu'ã okuapy orerovai — he'i uka.

⁸ Ha'e rami vy prata ha'e ouro guigua SENHOR pegua templo ropy ikuai va'ekue Acaz oipe'a vy omondoukapa Assíria pygua huvixa pe, huvixa ro py ikuai va'ekue voi omboaxa ixupe.

⁹ Ha'e ramo Assíria pygua huvixa oendu vy Damasco tetā re ju oo opu'ã aguã. Ha'e va'e tetā re ipo'aka ma vy ha'e pygua kuery escravo-rã ogueraapa Quir katy. Ha'e vy ojuka avi Rezim.*

2 Crônicas 28.22-25

¹⁰ Damasco tetā katy huvixa Acaz voi oo Assíria pygua huvixa Tiglate-Pileser reve joexa aguã. Ha'e py ma peteĩ altar oexa vy sacerdote Urias pe omondouka oa'ãmba ha'e ha'angaa ojapo uka va'ekue, ha'e nunga ha'e javi'i oña rami vy.

¹¹ Ha'e ramo sacerdote Urias ojapo peteĩ altar huvixa Acaz Damasco tetā py oexa va'ekue ramigua, ojapo ukaague ha'e javi rami. Damasco tetā gui huvixa Acaz ou jevy e'ŷ re ma voi sacerdote Urias ojapopa.

¹² Damasco gui huvixa ou ma vy oexa altar. Ha'e rami vy ha'e katy onhemboja vy mba'emo ome'ẽ hi'áry.

¹³ Ha'e rami vy oapy mymba, mba'emo aju guigua guive ome'ẽ. Altar áry onhoẽ mba'emo rykue, ha'e hi'áry rupi omboayvipa avi mymba kuery ruguykue, peteĩ rami ikuai aguã regua ome'ẽ va'ekue guigua.

¹⁴ Ha'e rã altar overa va'e guigua SENHOR renonde oĩ va'ekue ma oipe'a heravy oo rexei oñague gui, SENHOR pegua oo ha'e omba'e altar mbyte gui, ha'e vy omba'e altar yvy'iry ju oguerova, kuaray apu'a'ia katy.

¹⁵ Ha'e gui huvixa Acaz ojapo ukave ju sacerdote Urias pe. Ha'e vy aipoe'i:

— Altar tuvixave va'e áry ma eapy aje'ive nhavõ reme'ẽ va'e, ha'e mba'emo aju guigua ka'aru nhavõ reme'ẽ va'e guive, ha'e xee huvixa mba'emo apy uka va'e, ha'e mba'emo aju guigua ame'ẽ va'e. Hi'áry rupi remboayvi 'rã mba'emo oapya aguã ome'ẽ mbyre ruguykue ha'e javi. Ha'e rã altar overa va'e guigua ma xee ae aiporu 'rã xemba'ekuua aguã — he'i.

¹⁶ Ha'e ramo huvixa Acaz ojapo ukaague rami meme sacerdote Urias ojapo.

¹⁷ Ha'e gui mba'emo renderã omoõ mbyre gui ma huvixa Acaz ojaya imbotya oĩ va'ekue, ha'e gui hi'áry gui omboi hy'a ikuai va'ekue. Ha'e gui mba'emo yy mbotya oĩ va'e voi omboi vaka ra'angaa overa va'e guigua áry oñague gui, ha'e vy ita ombojopeague áry rive ju omboguejy.

¹⁸ Omboi avi oo oikeaty ao'iarã omoõ mbyre sábado py anho'i oiporu va'ekue. SENHOR ro roka katy gui omboi avi huvixa oikeaty. Ha'e va'ekue ma omboipa, Assíria pygua huvixa oipotaa rami rive.

2 Crônicas 28.26,27

¹⁹ Ha'e gui oïve rei tema Acaz rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokue oña re?

²⁰ Ha'e gui Acaz ndoikovevei'i ma guamoõ kueryague rami. Ha'e ramo onhono porãa tuu kuery rupa yvýry, Davi rekoague py. Ha'e ramo ta'y Ezequias ju oĩ hekovia.

* 16:9 Damasco ma Síria hyvy re opena va'e huvixa retã, aŷ peve voi.

¹ Doze ma'etŷ re ma Acaz Judá pygua huvixa oĩ rire Elá ra'y Oséias oĩ Israel pygua ruvixarā. Samaria py ae opena nove ma'etŷ peve.

² Ha'e va'e ma ha'eve'ŷ va'e ojapo oikovy SENHOR renonde rupi, teĩ huvixa ymavegua kuery rami e'ŷ guive.

Samaria tetã re ipo'akaa ha'e Israel kuery escravo-rã ogueraapaa ague

³ Ha'e gui ma Oséias rovai ou Assíria pygua huvixa Salmaneser. Ha'e va'e rembiguai Oséias oiko, ixupe mba'emo ome'ẽ oikovy guive.

⁴ Ha'e ramo Assíria pygua huvixa ojeupe “Xere Oséias opu'ã” he'i, mba'eta Egito pygua huvixa Sô oĩa katy ayvu mombe'uarã omondouka ramo, ha'e jypy guare rami e'ŷ nome'ẽvei kuerei mba'emo huvixa Assíria pygua pe, ma'etŷ nhavõ ome'ẽague rami e'ŷ. Ha'e nunga rupi Assíria pygua huvixa ojokua vy omboty nhuã py.

⁵ Mba'eta huvixa Assíria pygua ma ijyvy jave rupi oiko vy Samaria tetã re ou vy mboapy ma'etŷ re ojoko.

⁶ Oséias nove ma'etŷ re ma oĩ rire Assíria pygua huvixa ipo'aka Samaria re. Ha'e vy ogueraapa Israel kuery oyvy Assíria katy. Ha'e rami vy Hala tetã py ju omboekoa, Habar ha'e Gozã yakã yvýry, ha'e gui Média pygua kuery retã ikuai va'e rupi.

Mba' e ojapo vai rã pa ogueraapaa ague

⁷ Ha'e va'e nunga oiko raka'e mba'eta SENHOR nguuete pe Israel kuery ojejavypa ramo, Egito yvy gui oguerupa rire teĩ, Egito pygua huvixa Faraó po'akaa rupi ikuaiague gui. Ha'e rami rire teĩ amboae regua tuuete ramigua kuery ju ha'e kuery omboete okuapy.

⁸ Yvy regua kuery reko rupi ikuai, Israel kuery renonde gui SENHOR oipe'apa va'ekue rekukue rupi ae, ha'e Israel pygua huvixa kuery amboae rami reiombo'eague rami.

⁹ Ha'e rami vy SENHOR nguuete rovai Israel kuery ojapo ha'eve'ŷ va'e. Ha'e vy yvy'ã rupi ojapo okuapy ha'e kuery oikuua rami rive ombojerovia atyrã, guekoa ikuai va'e rupi, nhoarõa kuery ikuia ha'e tetã ikorapa va'e ha'e javi rupi.

¹⁰ Ha'e vy yvy'ã rupi ha'e yvyra rogueana ikuai va'e ha'e javi guýry rupi omopu'ã avi imo'amy ita ha'e yvyra ta'angaa.

¹¹ Ombojeroviaaty yvy'ã rupi ikuai va'e ha'e javi py oapy okuapy heakuã porã va'e, ha'e kuery renonde gui SENHOR amboae regua oipe'apa va'ekue reko rami ae ju. Ha'e vy opa marã ikuai SENHOR ombopoxy aguã rami rive.

¹² Mba'emo ra'angaa pe rive ikuai. Ha'e va'e nunga re SENHOR ijayvu vy aipoe'i: “Ha'e ramigua peẽ kuery ndapejapoi 'rã”, he'i va'ekue ri.

¹³ Mba'eta profeta ha'e imba'ekuaa va'e kuery ha'e javi rupi SENHOR ijayvu va'ekue Israel ha'e Judá kuery pe. Ha'e vy aipoe'i: “Pejepe'a nho ke tape vai rupi pendekuaia gui, ha'e gui pemoõ porã xee ajapo uka va'e ha'e ayvu aeja va'ekue, lei peneramoõ kuery pe ambopara uka va'ekue xerembiguai profeta kuery pe”, he'i va'ekue.

¹⁴ Ha'e rami teĩ ha'e kuery noendu potai okuapy. Ha'e rami 'rãgue py inhakã ratãve tema oje'oivy nonhe'ẽ renduxei vy, guamoõ kuery SENHOR nguuete re ndojeroviaiague rami ae ju.

¹⁵ Ha'e kuery noendu potai okuapy ayvu SENHOR oeja va'ekue ha'e guamoõ kuery reve guexeve guarã ojapo va'ekue re, neĩ ha'e kuery pe ijayvu ete jepiague re. Ha'e rami 'rãgue py ta'angaa ndovarei va'e pe rive ikuai, ha'e kuery ae ju ndovarei va'e ikuai peve. Mba'eta amboae regua kuery reko rupi ikuai, SENHOR “Napendekuai 'rã ha'e rami”, he'i va'ekue ri.

¹⁶ SENHOR nguuete ojapo uka va'ekue ha'e kuery omboykepa vy ha'e kuery oikuua rami rive ojapo okuapy ta'angaa mba'emo rykukue gui. Mokoõ toro ra'y ra'angaa ojapo, ha'e yvyra omopu'ã avi imo'amy mba'emo ra'angaa rive. Ha'e vy omboete okuapy yva re ikuai va'e, ha'e tuuete ramigua Baal pe rive ikuai.

¹⁷ Gua'y ha'e guajy kuery ae oapy okuapy nguuete ramigua pe ome'ẽ vy. Ha'e vy onhembo'e okuapy imba'ekuaa aguã re rive, oexa'ã kuaa va'e kuery re anho ojerovia vy. SENHOR renonde rupi ojeko me'ẽ okuapy ha'eve'ŷ va'e ojapo aguã, ombopoxy aguã rami rive.

¹⁸ Ha'e nunga rupi SENHOR ojou vai ete Israel kuery, ha'e vy guenonde gui oipe'apa. Omombytave ranhe va'e ma Judá kuery anho.

¹⁹ Ha'e rami tei Judá kuery voi nomoī porāi SENHOR nguuete ojapo uka va'ekue. Ha'e rami 'rāgue py Israel kuery ikuia rami ae ju ikuai.

²⁰ Ha'e nunga rupi SENHOR oeja Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve.

²¹ Mba'eta Davi ramymimo kuery po gui SENHOR Israel kuery oipe'apa ma rire Nabote ra'y Jeroboão nguvixarā ha'e kuery omoī okuapy ramo ha'e va'e ojapo Israel kuery SENHOR re ojeroviaague gui ojepe'a vy ojejavypa aguā rami.

²² Ha'e rami vy Israel kuery ikuai Jeroboão ojejavyaague rupi anho, neī peteīgueve ma voi ndojepe'ai ha'e rami ikuiai gui,

²³ SENHOR guenonde gui Israel kuery oipe'apa peve, guembiguai profeta kuery rupi ijayvuague ha'e javi rami vy. Ha'e rami vy Assíria yvy katy escravo-rā ogueraa ukapa raka'e Israel kuery, aŷ peve ha'e py ae ikuai.

Assíria pygua huvixa Samaria tetā py hekoा va'erā ogueru rukaveague

²⁴ Ha'e gui ma huvixa Assíria pygua ogueru rukave ju Babilônia tetā pygua, Cuta, Ava, Hamate ha'e Sefarvaim gui, Samaria tetā py hekoा va'erā Israel kuery rekoague py. Ha'e ramo Samaria tetā re ha'e kuery ipo'aka ma vy onhemboekoa okuapy ha'e katy tetā ikuai va'e ha'e javi rupi.

²⁵ Ha'e kuery ikuai ypy jave SENHOR renonde ojererokyjea rupi e'ŷ ranhe ikuai. Ha'e ramo ha'e kuery mbyte rupi SENHOR ombou guaru ha'e kuery va'e regua jukaarā.

²⁶ Ha'e ramo Assíria pygua huvixa pe omombe'ua vy aipo'ea:

— Samaria tetā py hekoा aguā remondouka va'ekue ma ndoikuuai rei okuapy ha'e va'e yvy regua tuuete ombojerovia aguā. Ha'e nunga rupi ae ha'e kuery mbyte rupi ombou rima guaru, ha'e ramo ojukapa rai'i, ha'e pygua tuuete nombojerovia kuaai okuapy ramo — 'ea.

²⁷ Ha'e ramo Assíria pygua huvixa aipoe'i uka:

— Peraa ju ha'e katy peteī sacerdote ha'e gui Peru va'ekue, ha'e katy oo vy ha'e kuery ombo'e oikovy aguā ha'e pygua tuuete ombojerovia aguā re — he'i.

²⁸ Ha'e ramo oo ju peteī sacerdote Samaria gui ogueru pyre, ha'e vy Betel py oiko. Ha'e va'e ma nhombo'e oikovy SENHOR renonde ojererokyjea rupi ikuai aguā re.

Samaria pygua kuery joo rami e'ŷ-e'ŷ rei ombojerovia okuapyague

²⁹ Ha'e rami tei peteī-tei regua ojapo teri okuapy ha'e kuery ruete ra'angaa rive tetā py ikuiai rupi, ha'e omopu'ā imo'amy yvy'ā rupi ombojerovia atyrā Samaria pygua kuery ojapo va'ekue ha'e javi py.

³⁰ Ha'e rami vy Babilônia guigua kuery ojapo okuapy Sucote-Benote ra'angaa, Cuta guigua ma Nergal ra'angaa ojapo okuapy, Hamate guigua ma Asima ra'angaa ojapo,

³¹ Aveu kuery ma Nibaz ha'e Tartaque ra'angaa ojapo, ha'e rā Sefarvaim guigua kuery ma gua'y ha'e guajy kuery ae oapy okuapy tata py nguuete ra'angaa Adrameleque ha'e Anameleque peguarā.

³² Ha'e rami rei tei SENHOR ojererokyjea rupi avi ikuai, va'eri ha'e kuery regua omoī avi okuapy sacerdote kuery ombojeroviaaty yvy'ā rupi ikuai va'e py, ha'e pygua kuery re vy mba'emo ome'ē aguā.

³³ Ha'e rami py SENHOR ojererokyjea rupi ikuai va'eri nguuete ra'angaa ombojeroviaa rupi avi ju, ha'e kuery ikuaiague pygua kuery reko rami vy.

³⁴ Aŷ peve ma ha'e kuery gueko ymague rupi ae tema ikuai. SENHOR renonde ojererokyjea rupi e'ŷ ikuai, oayvu ha'e oipotaa oeja va'ekue rupi e'ŷ guive, neī lei Jacó ramymimo kuery pe SENHOR ombopara uka vy ojapo uka va'ekue rupi. Ha'e va'e ma omboery ju Israel raka'e.

³⁵ Mba'eta ha'e kuery reve SENHOR guexeve guarã ojapo vy aipoe'i va'ekue: "Pembojerovia eme tuuete mboae rive, neĩ ha'e nunga renonde rupi peĩ eme penerenapy'ã re, ha'e kuery pe pendekuai eme, peme'ẽ eme mba'emo guive.

³⁶ SENHOR pe anho ha'eve, Egito yvy gui opo'aka etea rupi ha'e opo oupi reve penerenoẽ va'ekue pe ae. Henonde ma pejererokyjea rupi pendekuai, henonde penerenapy'ã re peĩ 'rã guive, ha'e ixupe ae 'rã peme'ẽ mba'emo.

³⁷ Ha'e gui oayvu ha'e oipotaa oeja va'ekue, lei, ha'e nunga pendevy ojapo uka va'ekue ma pemoĩ porã pota 'rã ára nhavõ. Ha'e rã tuuete mboae ramigua ma pembojerovia eme.

³⁸ Penderexarai eme guive guexeve guarã ojapo va'ekue re. Pembojerovia eme tuuete mboae ramigua rive.

³⁹ SENHOR Penderuete renonde pejererokyjea rupi anho 'rã pendekuai. Ha'e ramo pendereraa jepepa 'rã penderovaigua kuery po gui", he'i va'ekue.

⁴⁰ Ha'e rami teĩ ha'e kuery ndojapyxakai ha'e nunga re. Ha'e rami 'rãgue py gueko ymague rupi ae tema ikuai.

⁴¹ Ha'e rami py ha'e va'e regua kuery ma SENHOR ojererokyjea rupi ikuai va'eri ombojerovia avi okuapy ta'angaarã ha'e kuery ae ojapo va'ekue. Guamoĩ kuery ikuaiague rami ae ju ta'y kuery ha'e hamymino kuery voi ikuai, aÿ peve.

18

2 Crônicas 29.1,2

¹ Ha'e gui mboapy ma'etã re ma Elá ra'y Oséias Israel pygua huvixa oĩ jave py Acaz ra'y Ezequias oĩ Judá pygua ruvixarã.

² Ha'e va'e oĩ ypy'i jave vinte e cinco ma'etã oguereko, ha'e vy vinte e nove ma'etã re opena Jerusalém py. Ixy ma Zacarias rajy Abi.

³ Ha'e va'e ma ha'evea ramigua ojapo oikovy SENHOR renonde rupi, guamoĩ Davi ojapoague ha'e javi rami.

⁴ Ombojeroviaaty yvy'ã rupi ikuai va'ekue ombovaipa vy omopẽmba ita omopu'ã mbyre, oitypa guive ta'angaarã yvyra omopu'ã mbyre. Omboa'ypa mboi ra'angaa overa va'e guigua Moisés ojapo va'ekue, mba'eta ha'e va'e jave ha'e va'e pe Israel kuery oapy 'rã okuapy heakuã porã va'e, Neustã omboery vy.

⁵ Ezequias ma ojerovia oikovy SENHOR Israel kuery ruete re. Ha'e oĩ rire nda'ipovei ha'ekue ramigua, Judá pygua huvixa kuery ma voi ndoikoi, neĩ ha'e oiko e'ÿ mbove voi.

⁶ Mba'eta SENHOR pe ae ma voi oiko, ndojepe'ai ixupe oikoa gui, ha'e vy omoĩ porãmba Moisés rupi SENHOR ojapo uka va'ekue.

⁷ Ha'e ramo hexeve SENHOR oiko. Mamo rã rei ooa py tema ha'evea ramigua meme ojapo. Assíria pygua huvixa rovai re opu'ã, oipota va'e ndojapoxevei vy.

⁸ Ojukapa guive filisteu kuery Gaza ha'e ijyvýry teko a ikuai va'e peve, harõa kuery oikuaa potaaty ha'e tetã ikorapa va'e py voi.

⁹ Ha'e gui ma irundy ma'etã re ma huvixa Ezequias oĩ jave, ha'e sete ma'etã re ma Elá ra'y Oséias Israel pygua huvixa oĩ jave py ou Assíria pygua huvixa Salmaneser kuery Samaria tetã re, ha'e vy ojokopa.

¹⁰ Ha'e gui mboapy ma'etã py ipo'aka. Ha'e va'e jave py mboapy meme ma'etã ma ojapo Ezequias oïague, ha'e nove ma'etã ojapo Israel pygua huvixa Oséias oïague.

¹¹ Assíria pygua huvixa ma oyvy katy ae ogueraapa Israel kuery ha'e javi. Hala py ju omboekoa, Habor katy'i Gozã yakã yvýry, tetã Média pygua kuery reko a ikuai va'e rupi guive.

¹² Ha'e nunga oiko mba'eta SENHOR nguuete ha'e kuery nonhe'ẽ rendui okuapy rire. SENHOR guexeve guarã ojapo va'ekue rupi e'ÿ ikuai, hembiguai Moisés ojapo uka va'ekue rupi e'ÿ guive. Noendu potai, ha'e ndojapoi guive okuapy.

2 Crônicas 32.1-8; Isaías 36.1-3

¹³ Ha'e gui catorze ma'etã re ma huvixa Ezequias oĩ jave py ou Assíria pygua huvixa Senaqueribe. Ha'e va'e ma Judá regua tetã ikorapa va'e ha'e javi re opu'ã vy ipo'aka.

¹⁴ Ha'e ramo Judá pygua huvixa Ezequias ma Laquis tetā py omondouka guembiguai huvixa Assíria pygua oña katy. Ha'e vy aipoe'i uka:

— Ha'eve'ya rami aiko va'ekue. Ejepe'a ke xeyvy gui. Ha'e gui opa mba'e reme'ẽ uka va'e tema ame'ẽmba 'rã ndevy — he'i uka.

Ha'e ramo huvixa Assíria pygua ojapo Judá pygua huvixa Ezequias dez mil quilos prata ha'e mil quilos ouro ome'ẽ aguã rami.

¹⁵ Ha'e ramo ixupe Ezequias ome'ẽ prata SENHOR ropy ojou va'ekue ha'e javi, ngoo py ae omoĩ porã va'ekue guive.

¹⁶ Ha'e rami vy SENHOR pegua templo rokẽ ha'e ijyta oĩ va'e gui Ezequias omboipa ouro Judá pygua huvixa ae omonheovãague. Ha'e nunga ha'e javi ome'ẽ avi Assíria pygua huvixa pe.

¹⁷ Ha'e ramive ma Assíria pygua huvixa Laquis tetā py oña gui omondouka reta xondaro kuery Jerusalém py huvixa Ezequias oña katy, Tartã, Rabe-Saris ha'e Rabsaqué rupive. Ha'e va'e kuery ma Jerusalém tetā py oupa. Ovaẽmba ma vy ijatypa okuapy yy omboity pyre yvy'ã re oĩ va'e gui yy oxyry ouvyaty rovai katy, tape ao joiaty kuery yvy via yvýry.

¹⁸ Ha'e rami vy ha'e kuery oenoĩ uka huvixa Ezequias. Ha'e ramo ha'e kuery ijaty okuapya py huvixa ombou uka guembiguai kuery Hilquias ra'y Eliaquim huvixa ro re opena va'ety, kuaxia para re opena va'e Sebna, ha'e gui Asafe ra'y Joá mba'emo oiko va'ekue mboparaaty.

2 Crônicas 32,9-20; Isaías 36,4-22

¹⁹ Ha'e ramo ha'e kuery pe Rabsaqué aipoe'i:

— Aipopeje ke Ezequias pe: Po rami Assíria pygua huvixa yvateve va'e ijayvu: Mba'e nunga re tu rejerovia?

²⁰ Ha'e ramo ndevy pe xeayvu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejerovia reikovy, xerovai repu'ã aguã?

²¹ Egito pygua kuery re rima rejerovia, ha'e rami teĩ ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

²² Ha'e rã xapy'a rei xevy aipopeje 'rã: "Ore ma SENHOR Oreruete re ae rojerovia va'e", peje teĩ ha'e va'e peguare e'ŷ teve ombojeroviaaty yvy'ã rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: "Kova'e altar Jerusalém py oĩ va'e katy anho 'rã pembojerovia pekuapy", he'i va'ekue pendevy.

²³ Ha'e nunga rupi ejerure na xeruvixa Assíria pygua pe, ha'e gui xee ma ame'ẽ 'rã ndevy dois mil kavaju, xapy'a rei avakue hi'áry guarã rejou ri ramo.

²⁴ Mba'e re tu rejerovia reikovy Egito pygua karóxa ha'e kavaju áryguia kuery re? Mba'eta xeruvixa rembiguai yvyigüeve teĩ nderakykue monha 'rã.

²⁵ Ha'e gui xapy'a rei xee nda'u SENHOR reve'ŷ ri aju peneretã amomba aguã? Any, mba'eta SENHOR ae xevy aipoe'i: "Tereo ke, epu'ã ha'e kuery yvy re, ha'e emomba", he'i va'ekue xevy.

²⁶ Ha'e rami rã Rabsaqué pe Hilquias ra'y Eliaquim, Sebna ha'e Joá ombovai vy aipoe'i okuapy:

— Rojerure ndevy: Ore nerembiguai kuery pe ndeayvu ke aramaico ayvu py anho, roendu kuaa rã. Ndeayvuve eme judeu kuery ayvu py, heta va'e kuery tetã kora áry rupi ikuai va'e oendu kuaa e'ŷ aguã — he'i.

²⁷ Ha'e rami teĩ Rabsaqué ombovai:

— Ha'e gui pêvy ha'e penderuvixa remiendorã anho teve xeruvixa xembou xeayvu aguã? Avakue tetã kora áry rupi ikuai va'e pe guive e'ŷ teve xeayvu, mba'eta peẽ kuery rami avi ha'e kuery voi ikuai guepoxi ho'u ha'e otyrai ae oy'u okuapy aguã rami — he'i.*

* ^{18:27} Ha'e rami ijayvu, mba'eta tetã ojokopa ha'e pygua kuery ho'u va'erã ha'e yy oy'u aguã ojou e'ŷ aguã, tetã re ipo'akaxe vy.

²⁸ Ha'e rami vy Rabsaqué opu'ã vy ijayvu atãve ho'amy judeu kuery ayvu py. Ha'e vy aipoe'i:

— Pejapyxaka ke Assíria pygua huvixa yvateve va'e ayvu re.

²⁹ Po rami xeruvixa ijayvu: “Penhembotavy uka eme Ezequias pe, mba'eta ha'e ma napendereraa jepe 'rã xepo gui.

³⁰ Ezequias tapendeapo eme SENHOR re pejerovia aguã rami, mba'eta aipoe'i: ‘SENHOR nhandereraa jepe 'rãe, ha'e vy kova'e tetã nomboaxai 'rã Assíria pygua huvixa po py’, he'i 'rã.’

³¹ Pejapyxaka eme Ezequias ayvu re. Mba'eta po rami Assíria pygua huvixa ijayvu: “Pejapo ke xereve peteĩ rami nhandekuai aguã, ha'e vy peju xea katy. Ha'e rami vy peteĩ-tei pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

³² xee pendeyvy re xee aju peve. Ha'e gui ma xee rogueraa 'rã peteĩ yvy pendeyvy rami ae itui va'e katy. Ha'e va'e yvy ma mba'emo aju ha'e uva rykue oikoa, mbojape ha'e uva, oliveira ty ha'e ei oata e'ýa, peiko puku aguã pemanomba e'ý re. Ha'e nunga rupi pejapyxa eme Ezequias ayvu re. Mba'eta penembotavya rupi rive ‘SENHOR nhandereraa jepe 'rã’, he'i pãvy.

³³ Mba'eta yvy regua kuery ruete ra'angaa ikuai va'e nda'u ogueraa jepe ri yvy Assíria pygua huvixa po gui?

³⁴ Mba'eta mamo tu ikuai Hamate ha'e Arpade pygua kuery ruete ra'angaa? Mamo tu ikuai Sefarvaim, Hena ha'e Iva pygua kuery ruete ra'angaa? Ha'e kuery nda'u ogueraa jepe raka'e Samaria tetã xepo gui?

³⁵ Mba'eta ha'e va'e yvy re ikuai va'e ruete ra'angaa regua mava'e rei ogueraa jepe oyvy xepo gui. Mba'exa 'rã tu ha'vy SENHOR ogueraa jepe Jerusalém xepo gui?” he'i.

³⁶ Ha'e rami heta va'e kuery oendu teĩ okyririmbä okuapy, peteĩve ma voi nombovai, huvixa “Pembovai eme” he'i rire.

³⁷ Ha'e ramo Hilquias ra'y Eliaquim mba'emo re opena va'ety, kuaxia re opena va'ety Sebna ha'e Asafe ra'y Joá mba'emo oiko va'ekue ombopara va'ety jogueru ju Ezequias oia py. Oao omondoropa va'ekue reve ou vy ixupe omombe'u okuapy Rabsaqué ijayvuague ha'e javi.

19

Isaías 37.1-7

¹ Ha'e nunga huvixa Ezequias oendu vy omondoro oao, ha'e ajukue voxá guigua py rive onheovãmba vy oike SENHOR pegua oo py.

² Ha'e rami vy Amoz ra'y profeta Isaías oia katy omondouka ngoo re opena va'ety Eliaquim ajukue voxá guigua py onheovã va'ekue reve, kuaxia re opena va'ety Sebna ha'e sacerdote kuery yvatekueve va'e guive,

³ Isaías pe ha'e kuery aipoe'i aguã:

— Po rami Ezequias aipoe'i: “Kova'e ára ma jajexavai aguã ha'e nhanembopagaa rã nhaximbä aguã ára, kunha oikuavã'i ta teĩ oguerekó ete aguã na'imbaraetevei va'e rami nhandekuai.

⁴ Mba'eta Assíria pygua huvixa remimbou Rabsaqué ijayvu va'ekue Nhanderuete oikove va'e rovai. Ijayvua SENHOR Nderuete oendu vy ijayvu ete 'rãgue. Ha'e nunga rupi ejapukai ke ixupe jakuave'i teri va'e re”, he'i aguã.

⁵ Ha'e ramo Isaías oia py huvixa Ezequias rembiguai kuery ou ramo

⁶ Isaías aipoe'i ha'e kuery pe:

— Aipopeje ke penderuvixa pe: “Po rami SENHOR ijayvu: Ekyje eme ayvu rendu va'ekue káuxa. Ha'e va'e ayvu rupi ma xerovai ae Assíria pygua huvixa rembiguai kuery ijayvu okuapy.

⁷ Ha'e rami teĩ hexe ambou 'rã peteĩ nhe'ẽ imongyjearã. Ha'e ramo ixupe mba'emo omombe'ua rã oendu vy ojepe'a ju 'rã ovvy oyvy katy ae. Ha'e gui ma ha'e py ajapo 'rã kyxe py ojukaa aguã rami", he'i.

Isaías 37.8-13

⁸ Ha'e gui ma Rabsaqué oo ju vy oikuua Assíria pygua huvixa kuery Libna tetã re opu'ã okuapya, mba'eta oendu ma voi huvixa Laquis tetã re opu'ãa gui ojepe'a ma ovvyague.

⁹ Assíria pygua huvixa oendu avi "Etiópia pygua huvixa Tiraca ma je ou oiny nderovai opu'ã vy", 'ea ramo. Ha'e rami vy peteigüe ju Ezequias oña katy omondouka guembiguai kuery. Ha'e vy aipoe'i uka ha'e kuery pe:

¹⁰ — Po rami pendeayvu 'rã Judá pygua huvixa Ezequias pe: "Enhembotavy uka eme nderuete re rejeroviaa py. Mba'eta aipo're: 'Jerusalém tetã ma nomboaxai 'rã Assíria pygua huvixa po py', 're.

¹¹ Ndee nerendui teve Assíria pygua huvixa kuery vvy jave re ojapo va'ekue? Mba'eta omomba ete. Ha'e nunga rupi ndee rexã'ã ri ty'y reo jepe aguã?

¹² Mba'eta vvy regua ruete ra'angaa ikuai va'e nda'u ogueraa jepe ri raka'e xeramoï kuery omomba aguã gui? Ha'e va'e kuery ma Gozã, Harã ha'e Rezefe pygua, ha'e Éden ramymino kuery Telassar py ikuai va'ekue.

¹³ Ha'e mamo tu oiko aÿ Hamate pygua huvixa, ha'e Arpade, Sefarvaim tetã, Hena ha'e Iva pygua huxixa kuery?" — he'i uka.

Isaías 37.14-20

¹⁴ Ha'e gui ma tembiguai kuery po gui kuaxia para Ezequias ojopy vy ogueroayvu. Ha'e rami vy SENHOR pegua oo py oike vy oexa uka imoiny henonde.

¹⁵ Ha'e rami vy SENHOR renonde ojapukai vy aipoe'i:

— SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko vvy jave regua kuery ruete. Ndee ma yva ha'e vvy apoare.

¹⁶ SENHOR, ejapyxaka rendu pota aguã. Eipe'a ke nderexa, rexä pota aguã. Ha'e vy endu pota Senaqueribe ijayvuague ha'e javi re, mba'eta Oreruete reikove va'e, nderovai ae ijayvu.

¹⁷ Ha'e gui SENHOR, anhetê ete ae Assíria pygua huvixa kuery omomba raka'e vvy regua ikuai va'e, ha'e kuery vvy guive.

¹⁸ Ha'e gui oapypa guive ha'e kuery ruete ra'angaa oguereko va'ekue. Ha'e rami avi ha'e nunga ma tuuete e'ÿ ae, avakue rembiapo, vvyra ha'e ita guigua rive. Ha'e nunga rupi ae omomba.

¹⁹ Ha'e ramo SENHOR Oreruete, orereraa jepe ke ipo gui, vvy regua ha'e javi oikuua aguã ndee anho SENHOR reikoa — he'i.

Isaías 37.21-35

²⁰ Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijayvu: Assíria pygua huvixa Senaqueribe káuxa xevy rejerule ramo xee aendu ae ma.

²¹ Ha'e ramo vy po rami xee SENHOR xeayvu hexe. Ndere ma kunhataigue'i Sião pygua rajy kuery opuka rei okuapy. Nderakykue Jerusalém pygua rajy kuery oguerova-rova oakã.

²² Mba'eta mava'e re tu ndeayvu vai? Mava'e tu rejojai? Mava'e rovai rupi tu ndeayvu ha'e nderexa py rema'ẽ vaikue rei? Xee Israel kuery ruete xeky'a e'ÿ va'e rovai ae.

²³ Mba'eta nerembiguai kuery rembo'e SENHOR rovai ijayvu aguã re. Ha'e vy aipo're: "Xekaróxa reta va'e vy ajeupi 'rã vvyty áry peve, Líbano vvy re mombyryvea rupi tei. Xee aitypa 'rã ha'e py yary yvatekueve ha'e cipreste iporägueve ikuai va'e, avaë 'rã mombyryvea py apyta aguã, ka'aguy inhanavea py peve.

²⁴ Ha'e gui vvy ajo'o vy ay'u amboae regua kuery pegua yy gui, ha'e Egito vvy re apyrõ vy rive amombirupa yakã ikuai va'e", 're va'ekue.

²⁵ — Ha'e rami teĩ nerendui teve yma rupi ma voi xee ae amoï ha'e va'e nunga oiko aguã, ymave guive anhembopy'a ae ma ha'e rami aguã re? Ha'e rami vy aÿ ma amoingo

ete ma ha'e nungakue. Xee ae aipotaa rami vy ndee rembovaipa karamboae tetā ikorapa va'ekue.

²⁶ Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vy okanhymba vyvoi nhuū rami rive, e'ŷ vy jai rogue pyau, nhuū oo ao'ia áry henhoī rive va'e rami, e'ŷ vy mba'emo onhotŷ mbyre ijaju e'ŷ re okaipa va'e rami rive.

²⁷ Ha'e rã xee ma aikuua porã reguapy reiny rã, repu'ã reovy ha'e reike ju rejuvy nhavõ, ha'e gui xerovai repu'ã reia guive.

²⁸ Ha'e ramo xerovai repu'ã reia ha'e renhemboyvate reia aendupa ma vy aŷ ma nexĩ re amoī 'rã ty'aĩ ndereruarã, ndejuru re amoī avi 'rã juru xã, ha'e rami vy ajapo 'rã rejuague rupi ae ju rejevy aguã rami.

²⁹ — Ha'e gui ndee Ezequias reikuua aguã ma pova'e 'rã oiko: Aŷ kova'e ma'etŷ ma peẽ kuery pekaru 'rã mba'emo ha'e ae gui henhoī va'ekue re, ha'e gui amboae ma'etŷ ma ha'e va'ekue gui ikuai va'ekue re ju 'rã pekaru. Ha'e rã mboapy ma'etŷa py ma penhotŷ ju 'rã mba'emo, ha'e gui pemono'õ 'rã. Penhotŷ 'rã uva, hi'a pe'u aguã.

³⁰ Ha'e gui Judá regua rembyre oo jepe va'ekue ma hapo ju 'rã yvy katy, ha'e vy hi'árykue ma hi'a ju 'rã.

³¹ Mba'eta Jerusalém tetā py ikuai 'rã okuave va'e, Sião yvyty re ikuai 'rã oo jepe va'ekue. SENHOR ixondaro reta va'e ae 'rã ojapo, nhanderayvu etea rupi.

³² — Mba'eta po rami SENHOR ijayvu Assíria pygua huvixa rekorã re: “Ha'e ma kova'e tetā py ndoikei 'rãe, neĩ peteĩve hu'y nomomboi 'rã tetā katy, hu'y jokoa reve nonhembojai 'rã ouvy, neĩ yvy nombo'yvatei 'rã guive tetā kora áry rupi ojeupi aguã.

³³ Ha'e rami 'rãgue py tape ouague rupi ae ju 'rã ojevy. Kova'e tetā py ndoikei 'rãe”, he'i SENHOR.

³⁴ “Mba'eta xee ae ajoko 'rã tetā araa jepe vy, xejee ha'e xerembiguai Davi re ama'ë vy”, he'i.

2 Crônicas 32.21,22; Isaías 37.36-38

³⁵ Ha'e gui ma ha'e va'e pyavyve anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'ëgue okuave'i va'e ovvy vy oexa rã hetekue rive ikuai.

³⁶ Ha'e ramo Assíria pygua huvixa Senaqueribe ojepe'a ju ovvy. Ojevy vy ngetã ae Nínive py ju opyta.

³⁷ Ha'e gui ma nguuete ra'angaa Nisroque pegua opy omboetea py oĩ jave ta'y kuery ae Adrameleque ha'e Sarezer ojuka kyxe py. Ha'e vy onhamba jogueravy Ararate yvy katy. Ha'e ramo ta'y Esar-Hadom ju oĩ nguu rekovia.

20

2 Crônicas 32.24; Isaías 38.1-8

¹ Ha'e va'e jave py huvixa Ezequias imba'eaxy vy omano ta ma oupy. Ha'e ramo oĩa py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: “Emoatyrõ mba'emo ndero py ikuai va'e, mba'eta remano 'rã, ndereikovevei ta ma”, he'i.

² Ha'e ramo Ezequias ojere vy ngooboty re ngova omboja oupy. Ha'e vy SENHOR pe ojerure vy aipoe'i:

³ — SENHOR, ajerure ndevy. Nema'endu'a ke nerentonde rupi ha'evea rami aikoague re, xepy'a ha'e javi py. Ha'evea ramigua ajapo aikovy va'ekue nerentonde rupi — he'i. Ha'e vy ojae'o vaipa oupy.

⁴ Ha'e gui Isaías ma tetā mbyte gui oo e'ŷ mbove ma voi ixupe SENHOR ombou ju oayvu. Ha'e vy aipoe'i:

⁵ — Ejevy ke, ha'e vy aipo're xevygua kuery ruvixa Ezequias va'e pe: Po rami SENHOR neramoī Davi ruete va'e ijayvu: “Xee aendu ma renhembo'ea, nderexay aexa guive. Ma'ë, xee romonguera 'rã. Ha'e ramo mboapy araa py reo 'rã SENHOR pegua oo py.

⁶ Ha'e vy amoïve 'rã nde'ára quinze ma'etŷ peve ju, ha'e rogueraa jepe 'rã Assíria pygua huvixa po gui, kova'e tetā guive. Aepy 'rã kova'e tetā xejee ha'e xerembiguai Davi re ama'ë vy”, he'i.

⁷ Isaías aipoe'ive ju:

— Peru ke peteī figo ru'ūgue — he'i ramo ha'e kuery ogueru vy omoī huvixa ai re. Ha'e ramo okuera ju.

⁸ Ezequias aipoe'i Isaías pe:

— Mba'exagua hexa pyrā tu aexa 'rā aikuaa aguā SENHOR xemonguera ete 'rāa, mboapy araa py SENHOR pegua oo py aa aguā?

⁹ Isaías ombovai:

— Pova'e nunga SENHOR oexa uka 'rā ndevy, reikuua aguā oayvuague ojapo 'rāa. Mava'e pa reipotave? Escada rupi kuaray'ā tenonde katy oove ma voi 'rā dez pyrōa, tyrā pa hakykue katy?

¹⁰ Ha'e ramo Ezequias aipoe'i:

— Ndaxyi'i ae guive dez pyrōa kuaray'ā tenonde katy oove vyvoi. Ha'e rami aguā ma nda'evei. Ha'e rami 'rāgue py tojevy ju dez pyrōa hakykue katy — he'i.

¹¹ Ha'e ramo SENHOR pe profeta Isaías ojapukai ramo escada Acaz ojapo va'ekue rupi ojapo dez pyrōa hakykue katy ju ojevy aguā rami.

Isaías 39.1-8

¹² Ha'e va'e jave py Babilônia pygua huvixa Baladā ra'y Merodaque-Baladā va'e ma "Huvixa Ezequias haxy oupy" 'ea rā oendu vy oĩa katy ombou kuaxia para, mba'emo ome'ẽ va'erā reve.

¹³ Ha'e ramo herua kuery ovaẽ rā Ezequias oguerovy'a vy ha'e kuery pe oexa uka mba'emo omoī porāaty py oguereko va'e ha'e javi: prata, ouro, tembi'u irūrā, azeite iporāve va'e ha'e tembiporu joe opu'āa pygua. Omoī porāaty py ikuai va'e ha'e javi oexa uka. Neĩ peteī'i voi Ezequias ndoexa ukai ha'e kuery pe, ngoo py ae, neĩ openaa ha'e javi rupi oguereko va'e.

¹⁴ Ha'e ramo huvixa Ezequias oĩa py profeta Isaías ou vy oporandu ixupe:

— Mba'e nunga re tu avakue ou va'ekue ijayvu okuapy ra'e? Magui tu ou okuapy ndea py?

Ezequias ombovai:

— Peteī yvy mombyryvea gui ou, Babilônia gui ae — he'i.

¹⁵ Ha'e ramo oporanduve ju:

— Mba'e tu ha'e kuery oexa okuapy ndero py?

Ezequias ombovai:

— Xero py oexa okuapy mba'emo ikuai va'e ha'e javi. Xemba'e amoī porāaty py oĩ va'e regua neĩ peteīve ndaexa ukai ha'e kuery pe — he'i.

¹⁶ Ha'e gui ma Isaías aipoe'i Ezequias pe:

— Endu ha'yv SENHOR ixondaro reta va'e ayvu.

¹⁷ "Ovaẽ 'rā ára ndero py ikuai va'e ha'e javi Babilônia yvy katy oguerapaa aguā, ymave guive neramoī kuery omoī porā va'ekue kova'e ára peve. Ndoejaii 'rā neĩ peteī regua ma voi", he'i SENHOR.

¹⁸ Ndera'y kuery rerekoye ae voi ogueraapaa avi 'rā okuapy, Babilônia pygua huvixa ro py oa'yijo pyre meme ikuai aguā — he'i.*

¹⁹ Ha'e ramo Ezequias aipoe'i Isaías pe:

— Pova'e ayvu SENHOR guigua remombe'u va'e ma ha'eve va'e — he'i, ojeupe ae "Xee aikuaa rā aikovea ja mby'a porā anho ha'e ha'evepa rei'i ta merami", he'i vy.

2 Crônicas 32.32,33

²⁰ Ha'e gui oĩve rei tema Ezequias rekokue regua. Ha'e rami avi yy omботы vy tetā mbyte peve yy ogueru aguā haperā ojapoague, ha'e mba'emo opo'akaa rupi ojapo va'ekue ha'e javi noĩ 'rā teve kuaxia Judá pygua huvixa kuery rekokue oĩa re?

²¹ Ha'e gui Ezequias ndoikovevei'i ma guamoī kueryague rami. Ha'e ramo ta'y Manassés ju oĩ nguu rekovia.

* 20:18 Ha'e va'e jave ma huvixave kuery oa'yijo uka 'rā guembiguai kuery ngoo rupi guarā.

21

2 Crônicas 33.1-9

- ¹ Manassés ma doze ma'etŷ oguereko jave py oĩ huvixarã. Ha'e vy cinqüenta e cinco ma'etŷ re opena Jerusalém py. Ixy rery ma Hefzibá.
- ² Ha'e va'e ma ha'eve'ŷ va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.
- ³ Ha'e rami vy omoatyrõmba ju ombojeroviaaty yvy'ã rupi ikuai va'e nguu Ezequias ombovaipa va'ekue, altar Baal peguarã ojapo reta guive. Omopu'ã avi imo'amy ta'angaa rã yvyra guigua Israel pygua huvixa Acabe omopu'ã va'ekue ramigua. Ha'e vy guenapy'ã re oĩ yva re jaxy-tata ikuai katy omboetea rupi.
- ⁴ SENHOR pegua opy rupi eteve voi ojapo altar-rã, SENHOR aipoe'iague: “Jerusalém py amoĩ 'rã xerery”, he'iague py.
- ⁵ SENHOR pegua oo roka mokoïve oĩ va'e rupi ojapo avi altar jaxy-tata yva re ikuai va'e ha'e javi peguarã.
- ⁶ Ha'e rami vy gua'y ae oapy reve ome'ẽ, ha'e arai rupi rive imba'ekuaa ha'e oexa'ã oikovy. Oporandu uka oikovy omanogue mboayvua ha'e imba'evyky va'e kuery pe rive. Ha'e rami vy SENHOR renonde rupi ojapo oikovy ha'eve'ŷ va'e meme, ombopoxy aguã rami rive.
- ⁷ Ha'e vy yvyra gui ta'angaa rã ojapo uka va'ekue omoĩ avi opy Davi ha'e ta'y Salomão pe SENHOR aipoe'iague va'e py: “Kova'e oo ha'e Jerusalém tetã aiporavo Israel regua ha'e javi gui, ha'e py xerery amoĩ aguã raka'e rã peve guarã.
- ⁸ Mba'eta xee ajapo uka va'ekue ha'e lei xerembiguai Moisés ijayvuague ha'e javi rupi Israel kuery ikuai ramo xee namoxêvei 'rã tuu kuery yvyrã ame'ẽ va'ekue gui oguata rei aguã rami”, he'iague py ae.
- ⁹ Ha'e rami tei ha'e kuery noendu potai okuapy. Ha'e rami vy Manassés oguerojejavý ramo amboae regua Israel kuery renonde gui SENHOR omomba va'ekue gui heko vaive okuapy.

Judá kuery ombopaga aguã re ijayvuague

- ¹⁰ Ha'e nunga rupi SENHOR ijayvu guembiguai kuery profeta ikuai va'e rupi. Ha'e vy aipoe'i:
- ¹¹ — Ha'e rami ete Judá pygua huvixa Manassés ojeguaru pyrã ojapo oikovy. Ha'e va'e oĩ e'ŷ mbove amorreu kuery ikuaiague gui nda'eveive va'e ojapo ta'angaa oguereko va'e rupi Judá kuery voi ojejavý aguã rami.
- ¹² Ha'e rire SENHOR Israel kuery ruete aipoe'i: “Ma'ẽ, Jerusalém ha'e Judá re ambou 'rã mba'emo vai, ha'e nunga oendu va'e rei ijapyxa jovaive nhe'ẽmba 'rã nhemondyi gui.
- ¹³ Ha'e rami vy Jerusalém áry rupi amoatã 'rã ixã ha'ãarã, Samaria ha'e Acabe ro pygua kuery aa'ãague rami avi. Ha'e rami vy Jerusalém tetã gui aipe'apa 'rã ikuai va'e, hy'a oiky'a'o vy ombovapy va'e rami.
- ¹⁴ Ha'e rami vy aejapa 'rã xevygua kuery rembyrekue, hovaigua kuery po py amboaxapa vy. Ha'e ramo hovaigua kuery ojuka ha'e ogueraa aguã rami rive 'rã ikuai,
- ¹⁵ mba'eta xerenonde rupi ha'e kuery ojapo okuapy ha'eve'ŷ va'e xembopoxy aguã rami rive, jypy tuu kuery yvy gui oupaa ára guive aŷ peve.
- ¹⁶ Ha'e rami ae avi Manassés omoẽ reta ojejavý e'ŷ va'e ruguy, Jerusalém ha'e javi rupi omonyẽmba peve. Oguerojejavypa avi Judá kuery, SENHOR renonde rupi ha'eve'ŷ va'e ojapoa py.”

2 Crônicas 33.18-20

- ¹⁷ Ha'e gui oĩve rei tema Manassés rekokue regua. Ha'e rami avi ojejavýague, ha'e mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokue oĩa re?
- ¹⁸ Ha'e gui Manassés ndoikovevei'i ma guamoĩ kueryague rami. Ha'e ramo onhono porãa hoo py yvotyty ituia py, Uzá py ae. Ha'e gui ta'y Amom ju oĩ nguu rekovia.

2 Crônicas 33.21-25

¹⁹ Amom ma vinte e dois ma'etŷ oguereko huvixa oĩ ypy'i jave py. Ha'e gui mokoĩ ma'etŷ re ete'i opena Jerusalém py. Ixy ma Mesulemete, Jotbá pygua Haruz rajo.

²⁰ SENHOR renonde rupi ha'eve'ŷ va'e anho ojapo oikovy, nguu Manassés ojapoague rami.

²¹ Nguu oikoague ha'e javi'i rupi oiko, mba'emo ra'angaa tuu ojerovaiague re ae ju ojerovia, omboete guive.

²² Ha'e rami vy SENHOR nguu kuery ruete gui ojepe'a vy SENHOR guigua tape rupi ndoikovei.

²³ Ha'e ramo huvixa Amom rovai hembiguai kuery jogueroayvu vy hoo py ae ojuka okuapy.

²⁴ Ha'e rã ijyvy re ae ikuai va'e ju ojukapa huvixa Amom jukaare kuery. Ha'e rami vy ta'y Josias ju omoĩ okuapy hekobia.

²⁵ Ha'e gui oïve rei tema Amom rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re?

²⁶ Ha'e gui onhono porãa yvotyty Uzá py oĩ va'e py. Ha'e ramo ta'y Josias oĩ nguu rekovia.

22

2 Crônicas 34.1,2

¹ Josias ma oito ma'etŷ oguereko huvixa oĩ ypy'i jave py. Ha'e vy trinta e um ma'etŷ re opena Jerusalém py. Ixy ma Jedida, Bozcate pygua Adaías rajo.

² Ha'e va'e ma SENHOR renonde rupi ha'evea ramigua ojapo oikovy, guamoĩ Davi ojapoague ha'e javi rupi. Ha'e vy ndojep'e ai oiporu kuaa katy, neĩ oiporu kuaa e'ŷa katy ma voi.

2 Crônicas 34.8-13

³ Huvixa Josias dezoito ma'etŷ re ma oĩ jave py omondouka kuaxia re opena va'ety Azalias ra'y Safã, Mesulão ramymino va'e SENHOR pegua oo katy.

⁴ Ha'e vy ixupe aipoe'i:

— Tereo ke sacerdote yvateve va'e Hilquias-a katy, reipapa aguã peráta SENHOR pegua opy ogueru pyre. Ha'e va'e peráta ma heta va'e kuery ome'ẽ rã okẽ rarõa kuery omono'õ va'ekue.

⁵ Ha'e kuery tomboaxapa SENHOR pegua opy rupi omba'eapo va'e kuery re opena va'e kuery po py. Ha'e kuery ju omboekovia aguã SENHOR pegua opy rupi omba'eapo va'e kuery pe. Ha'e rami vy 'rãe opy rupi ivaipaague ikuai va'e omoatyrõmba okuapy.

⁶ Yvyra gui mba'emo ojapo va'e, oo apoa ha'e ita re omba'eapo va'e kuery pe 'rã omboekovia. Ha'e gui ojogua 'rã yvyra ha'e ita omoatyrõ mbyre, opy rupi ivaipaague omoatyrõmba aguã — he'i.

⁷ Omba'eapo va'e kuery ma opa mba'e py ojeroviap ikuai ramo ndoikuua potavei ha'e kuery po py peráta omboaxa pyre re.

2 Crônicas 34.14-18

⁸ Ha'e gui sacerdote yvateve va'e Hilquias aipoe'i kuaxia re opena va'ety Safã pe:

— SENHOR pegua opy xee ajou kuaxia para lei oĩa — he'i. Ha'e rami vy Safã pe Hilquias ome'ẽ ramo ogueroayvu.

⁹ Ha'e gui kuaxia re opena va'ety Safã ma huvixaa py ou vy ixupe omombe'u. Ha'e vy aipoe'i:

— Nerembiguai kuery oipapapa ma peráta SENHOR pegua opy omoĩ porã mbyre, ha'e omboaxapa ma SENHOR pegua opy rupi omba'eapo va'e kuery re opena va'e kuery po py.

¹⁰ Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ẽ kova'e kuaxia para — he'i. Ha'e rami vy huvixa renonde py Safã ogueroayvu.

2 Crônicas 34.19-28

¹¹ Kuaxia para lei oĩa ogueroayvu rã huvixa oendu vy omondoropa oao.

¹² Ha'e rami vy huvixa ijayvu sacerdote Hilquias, Safã ra'y Aicão, Micaías ra'y Acbor, nhomongeta va'ety Safã ha'e guembiguai Asaías pe. Ha'e vy aipoe'i ha'e kuery pe:

¹³ — Tapeo ke, peporandu uka SENHOR pe xerekó re, ha'e heta va'e kuery Judá regua ha'e javi re. Mba'eta nhanderovai SENHOR poxya hendy vaipa, mba'eta kova'e kuaxia

para re ayvu oĩ va'e re nhaneramoĩ kuery ndojapyxaka potai, neĩ nhanderekorã re ipara oĩ va'e ha'e javi re ma voi rire — he'i.

¹⁴ Ha'e ramo sacerdote Hilquias, Aicão, Acbor, Safã ha'e Asaías oje'oi Jerusalém tetã vyv'ã guy katy profeta kunha Hulda oikoa py. Ha'e va'e ma Harás ra'y Ticvá ra'y Salum sacerdote kuery ao re opena va'ety ra'yxy. Ha'e gui kunha va'e pe ha'e kuery omombe'u okuapy oiko va'ekue.

¹⁵ Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: “Aipopeje ava xea py penembouare pe:

¹⁶ Po rami SENHOR ijayvu: Ma'ẽ, mba'emo vai ambou 'rã kova'e tekoá ha'e apy ikuai va'e re, kuaxia para Judá pygua huvixa ogueroayvu uka va'ekue ha'e javi rami vy.

¹⁷ Mba'eta ha'e kuery xerejapa vy amboae regua tuuete ramigua kuery pe oapy okuapy heakuã porã va'e, opo py mba'emo ojapo va'ekue py xembopoxy aguã rami rive. Ha'e nunga rupi xepoxya hendy ma kova'e tekoá áry, ndoguei 'rã guive”, he'i.

¹⁸ Ha'e rã Judá pygua huvixa SENHOR pe peporandu uka aguã penembou va'ekue pe pemombe'u 'rã: “Po rami SENHOR Israel kuery ruete ijayvu, ayvu rendu va'ekue omombe'u porãve vy:

¹⁹ 'Ndee ma rendu kova'e tekoá ha'e apy hekoá va'e kuery amomba aguã re xeayvu vai rã, ha'e rami vy xee SENHOR renonde py renhemoo'yvy'i vy ndeo remondoro ha'e rejao'o va'ekue. Ha'e va'e ma xee ju aendu', he'i SENHOR.

²⁰ 'Ha'e nunga rupi xee romombytu'u 'rã neramoĩ kueryague rami, ha'e rã nenhono porãa 'rã, nderexa py rexo e'ý aguã mba'emo vai kova'e tekoá re ambou rã', he'i.”

Ha'e ramo kunha va'e ombovaiague ha'e kuery omombe'u okuapy huvixa pe.

23

2 Crônicas 34.29-33

¹ Ha'e gui ma huvixa oenoĩ uka ijayvu nhomoneta va'ety kuery Judá re ha'e Jerusalém py ikuai va'e oĩa py onhemboatypa okuapy aguã.

² Ha'e gui Judá regua avakue, Jerusalém pygua, sacerdote, profeta ha'e heta va'e kuery ha'e javi reve huvixa oo SENHOR pegua oo katy. Yvyigüeve ha'e yvatekueve guive oje'oi. Ha'e rami vy ha'e kuery oendu pavëa py huvixa ogueroayvu kuaxia para SENHOR pegua opy ojou pyre. Guexeve guarã ojapo va'ekue regua ayvu oĩ va'e ha'e javi ogueroayvu.

³ Ha'e vy oo yta hi'aĩ va'e yvýry huvixa opu'ã ho'amy vy SENHOR renonde ojapo ixupe anho ha'e kuery ikuai aguã, opy'a ha'e onhe'ẽ ha'e javi py ojapopa okuapy aguã SENHOR ojapo uka va'ekue, ijayvua ha'e oipotaa, ha'e rami vy ayvu kuaxia para re oĩ va'e rupi ikuai aguã, SENHOR guexeve guarã ojapo va'ekue rupi anho. Ha'e ramo heta va'e kuery ha'e javi onhemboayvu okuapy ha'e va'e ayvu rupi ikuai aguã re.

2 Crônicas 34.3-7

⁴ Ha'e gui ma huvixa ijayvu sacerdote yvateve va'e Hilquias, sacerdote yvyigüeve ha'e okẽ rarõa kuery pe, SENHOR pegua templo ropy gui ha'e kuery oipe'apa aguã tembiporu Baal peguarã ojapo pyre, ha'e gui ta'angaarã yvyra omopu'ã mbyre ha'e yva re jaxy-tata ikuai va'e peguarã ojapo pyre ha'e javi. Ha'e rami vy Jerusalém gui mombyrya py oapypa, Cedrom nhuündy py, ha'e gui tanhimbukue ma ogueraa Betel katy.

⁵ Oipe'apa guive sacerdote kuery Judá rupi ha'e Jerusalém yvýry ombojeroviaaty yvy'ã rupi ikuai va'e peguarã Judá pygua huvixa kuery omoĩ va'ekue. Ha'e va'e kuery ma tuuete ramigua pe heakuã porã va'e oapy va'ekue, Baal pe, kuaray, jaxy, ko'ẽ mbija ha'e jaxy-tata ha'e javi pe.

⁶ Ha'e rami vy SENHOR pegua opy gui oipe'a avi ta'angaarã yvyra omopu'ã mbyre, ha'e vy Jerusalém gui mombyrya py ogueraa Cedrom yvyugua peve. Ha'e va'e ma oapypa vy omongu'ipa, ha'e vy ha'e pyguare rupa ikuai va'e áry rupi omombopa.

⁷ Oitypa avi SENHOR pegua oka py oo avakue ombojeroviaa rupi itavy rei okuapyague. Ha'e va'e opy rupi kunhague ojapo va'ekue oo'i ajukue guigua ta'angaarã yvyra omopu'ã va'ekue rorã.

⁸ Ha'e gui ma ogueru rukapa sacerdote kuery Judá regua tetā py ikuaiague gui, ha'e vy omongy'apa ombojeroviaaty yvy'ã rupi ikuai va'e ha'e kuery heakuã porā va'e oapyaty va'ekue, Geba guive Berseba peve. Ha'e vy oitypa avi altar tetā rokē py oĩ va'ekue, tetā re opena va'ety Josué pegua okē regua oiporu kuaa e'ŷa re.

⁹ Ha'e rã ombojeroviaaty yvy'ã rupi sacerdote kuery ikuai va'ekue pe ma mba'eve ndoapy ukai SENHOR pegua altar Jerusalém py oĩ va'e áry, mbojape mbovua revegua e'ŷ guyvy kuery reve ho'u okuapy va'eri.

¹⁰ Ha'e gui huvixa omongy'apa avi Hinom ra'y kuery yyyugua re Tofete oĩ va'ekue, ha'e py avave rei gua'y e'ŷ vy guajy kuery ndoapyavei aguã ta'angaa Moloque peguarã.

¹¹ Oipe'apa avi kavaju Judá pygua huvixa kuery kuaray re ojeroviaa rupi omboaxa va'ekue. Ha'e va'e ma SENHOR pegua oka py optyta va'ekue jaikeaty rexei, opy rupi opena va'ety Natã-Meleque renda katy'i rupi. Ha'e rã karóxa kuaray peguarã omboaxa va'ekue ma oapypa.

¹² Huvixa oipe'apa avi Acaz rendakue yrýry rupi altar ikuai va'ekue, oo áry rupi. Ha'e va'e altar ma Judá pygua huvixa kuery ha'e Manassés ojapo va'ekue SENHOR pegua oka mokoĩ oĩ va'e rupi. Ha'e va'e omboa'ypa vy oipe'apa heravy. Ha'e vy iku'ikue ma omombo Cedrom yakã áry rupi.

¹³ Huvixa omongy'apa avi ombojeroviaaty Jerusalém katy'i yvy'ã rupi ikuai va'ekue, yvyty mba'emo omombaaty katy'i ijaxu e'ŷa re. Ha'e va'e ma Sidom pygua kuery ha'eve'ŷ va'e Astarote pe ojapo atyrã Israel pygua huvixa Salomão omopu'ã va'ekue, ha'e Moabe pygua kuery Camo pe, ha'e gui Amom ra'y kuery ruete ramigua ojeguarupy Milcom pe ojapo atyrã va'ekue voi.

¹⁴ Ha'e rami ae avi omboa'ypa ita omopu'ã mbyre, ta'angaarã yvyra omopu'ã mbyre voi ojayapa. Ha'e vy ha'e nunga ikuaiague rupi omonyẽmba imoiny avakue kãgue.

Betel py altar oĩ va'ekue ju omongy'apa ha'e oitypaague

¹⁵ Huvixa oity avi altar Betel py oĩ va'ekue, ha'e yvy'ã rupi ombojerovia atyrã Nebate ra'y Jeroboão ojapo va'ekue Israel kuery oguerojeavy aguã. Ombovaipa ombojeroviaaty yvy'ã re oĩ va'ekue, altar oĩ va'ekue ma omongu'ipa, ha'e oapypa ta'angaarã yvyra omopu'ã mbyre.

¹⁶ Ha'e gui huvixa Josias oma'ẽ-ma'ẽ vy oexa yvyra rupa yvy'ã re ikuai va'e. Ha'e va'e gui ma ikãgue ikuai va'ekue oguenoẽ ukapa vy oapypa altar oĩ va'e áry. Ha'e vy omongy'apa, SENHOR ayvu Nhanderuete remimbo'e omombe'u ma voiague rami vy.*

¹⁷ Ha'e gui huvixa oporandu:

— Mava'e rupa markaague tu pe py xee aexa va'e?

Ha'e rã tetā pygua avakue ombovai okuapy:

— Peva'e ma ava Nhanderuete remimbo'e Judá gui ou va'ekue rupa. Ha'e va'e ma omombe'u ma voi va'ekue Betel py altar oĩ va'e ndee remongy'a'rãa — he'i okuapy.

¹⁸ Ha'e ramo Josias aipoe'i:

— Tove ha'vy ta'itui. Avave rei topena eme ikãgue re — he'i. Ha'e ramo ha'e va'e kãgue ma ha'e kuery oeja okuapy, Samaria gui profeta ou va'ekue kãgue ha'e py oĩ va'e reve.

¹⁹ Ha'e gui Samaria re tetā ikuai va'e rupi ju Josias ombovaipa yvy'ã rupi ombojerovia atyrã Israel pygua huvixa kuery ojapo va'ekue SENHOR ombopoxy aguã rami rive. Ha'e va'e re ju ojapo Betel rupi ojapoague ha'e javi rami.

²⁰ Ha'e vy altar ha'e py ikuai va'e áry ae ojukapa sacerdote kuery ombojeroviaaty yvy'ã rupi ikuai va'e peguare, ha'e vy ikãgue ma oapypa hi'áry. Ha'e gui mae ma ojevy ju Jerusalém katy.

2 Crônicas 35.1-19

²¹ Ha'e gui ma heta va'e kuery ha'e javi pe huvixa omombe'u uka vy aipoe'i:

— Páscoa ára pejapo ngaru SENHOR Penderuete peguarã, kuaxia para re guexeve guarã ojapo va'ekue oña rami vy — he'i.

* 23:16 Ha'e va'e ayvu jaexa 'rã 1 Reis 13.1-32 py.

²² Ha'e ramo Páscoa ára ngaru ojapo okuapy va'e ramigua ma neĩ peteĩgueve ma voi ndojapoai teri Israel rerekua kuery opena jave, neĩ Israel ha'e Judá pygua huvixa kuery opena jave ma voi.

²³ Huvixa Josias dezoito ma'etŷ re ma oĩa py ojapo okuapy Páscoa ára ngaru SENHOR peguarã, Jerusalém py.

Josias Nhanderuete pe ete oikoague

²⁴ Josias omomba avi omanogue mboayvua ha'e imba'evky va'e kuery, opy rupi ta'angaa ikuai va'ekue, ta'angaa mboae, ha'e Judá yvy re ha'e Jerusalém py ojeguarupy ikuai va'ekue-ekue. Ha'e rami oiko ojapopa aguã kuaxia para SENHOR ropy sacerdote Hilquias ojou va'ekue re lei oĩa rami vy.

²⁵ Ha'e oĩ e'ŷ mbove ma ndoikoi teri huvixa ha'e ramigua, mba'eta opy'a, onhe'ẽ ha'e ombaraetea ha'e javi py SENHOR pe ojeko me'ẽ va'e, Moisés lei ombopara va'ekue ha'e javi rami vy. Ha'e va'e rire ma ha'ekue ramigua ete ju ndoikovei guive.

²⁶ Ha'e rami avi SENHOR nda'ipoxy ve'ŷi guive Judá rovai, Manassés opa marã ombopoxy aguã rami ojapo vai rire.

²⁷ Ha'e rami vy SENHOR aipoe'i:

— Judá regua voi aipe'apa 'rã xerenonde gui, Israel regua aipe'aague rami ae ju. Ha'e rami vy aeja 'rã kova'e tetã Jerusalém xejeupe guarã aiporavo va'ekue ri, xevyguia oo "Ha'e py oĩ 'rã xerery", ha'eague voi.

2 Crônicas 35.20-27

²⁸ Ha'e gui oïve rei tema Josias rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re?

²⁹ Josias oĩ teri jave ma Egito pygua huvixa Faraó-Neco oo Eufrates yakã katy Assíria pygua huvixa rovai. Ha'e ramo Neco rovai ju Josias oo vy hexe opu'ã ramo ojuka, Megido py.

³⁰ Hetekue ma hembiguai kuery ogueru okuapy peteĩ karóxa py. Jerusalém py oguerovaẽ ma vy onhono porã okuapy huparã oĩ va'ekue py ae. Ha'e rire ma ha'e va'e yvy re ikuai va'e kuery Josias ra'y Jeoacaz ogueraa vy omoĩ okuapy nguvixarã tuu rekovia.

2 Crônicas 36.1-4

³¹ Jeoacaz oĩ ypy'i jave py ma vinte e três ma'etŷ oguereko, ha'e gui mboapy jaxy re ete'i opena Jerusalém py. Ixy ma Hamutal, Libna pygua Jeremias rajy.

³² Ha'e va'e ma ha'eve'ŷ va'e ojapo oikovy SENHOR renonde rupi, guamoĩ kuery ojapoague ha'e javi rami.

³³ Ha'e ramo Faraó-Neco ombo'a uka imoiny Ribla py Hamate yvy re, Jerusalém py opena ve'ŷ aguã. Ha'e vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

³⁴ Huvixarã ma Faraó-Neco omoĩ Josias ra'y Eliaquim, tuu Josias rekovia opena aguã. Ha'e vy hery oguerova vy Jeoaquim ju omboery. Ha'e rã Jeoacaz ma Egito yvy katy ju ogueraa. Ha'e ramo omano ha'e py.

³⁵ Ha'e gui ma Jeaquim prata ha'e ouro omboaxa Faraó pe. Ha'e rami vy oyvy jave rupi ome'ẽ uka, Faraó ijayvuague rami vy ixupe omboaxapa aguã. Oyvy re ikuai va'e prata ha'e ouro ome'ẽmba aguã rami ojapo, peteĩ-teĩ gui oipe'a ha'e ae ome'ẽ ukaa rami vy, Faraó-Neco pe omboaxa aguã.

2 Crônicas 36.5-8

³⁶ Jeaquim ma vinte e cinco ma'etŷ oguereko jave py huvixa oĩ ypy. Ha'e gui onze ma'etŷ re opena Jerusalém py. Ixy ma Zebida, Ruma pygua Pedaías rajy.

³⁷ Ha'e va'e ma ha'eve'ŷ va'e anho ojapo oikovy SENHOR renonde rupi, guamoĩ kuery ojapoague ha'e javi rami.

² Ha'e ramo Jeoaquim rovai SENHOR ombou caldeu kuery, Síria pygua, Moabe pygua ha'e Amom ra'y kuery. Judá yvy re ombou ombovaipa aguã, guembiguai profeta kuery rupi SENHOR ijayvuague rami vy.

³ Ha'e nunga oiko Judá kuery re SENHOR ijayvuague rami vy ae, guenonde gui oipe'apa aguã, Manassés opa marã ojejavyague káuxa,

⁴ ojejavy e'ý va'e kuery ruguy omoëague káuxa guive, Jerusalém tetã ha'e javi rupi huguy omoë rire. Ha'e rami ete ojejavyague ma SENHOR nomboguexei.

⁵ Ha'e gui oïve rei tema Jeoaquim rekokue regua. Ha'e rami avi mba'emo ojapo va'ekue ha'e javi noï'rã teve kuaxia Judá pygua huvixa kuery rekokue oña re?

⁶ Ha'e gui Jeoaquim ndoikovevei'i ma guamoï kueryague rami. Ha'e ramo ta'y Joaquim ju oïnguu rekoria.

⁷ Ha'e rã Egito pygua huvixa ma neï peteïgue ma voi noëvei oyvy gui. Mba'eta mba'emo oguereko va'ekue ha'e javi Babilônia pygua huvixa oipe'apa ma, Egito katy'i yakã'i oï va'e guive Eufrates yakã peve.

2 Crônicas 36.9

⁸ Joaquim ma dezoito ma'etý oguereko jave py huvixa oï ypy. Ha'e gui mboapy jaxy re ete'i opena Jerusalém py. Ixy ma Neústa, Jerusalém pygua Elnatã rajy.

⁹ Ha'e va'e ma ha'eve'ý va'e anho ojapo oikovy SENHOR renonde rupi, guamoï kuery ojapoague ha'e javi rami.

Jerusalém gui yvatekueve Nabucodonosor escravo-rã ogueraapaague

¹⁰ Ha'e va'e jave py ma Jerusalém katy ou Babilônia pygua huvixa Nabucodonosor rembiguai kuery. Ha'e vy ojokopa tetã.

¹¹ Ha'e gui tetã re Babilônia pygua huvixa Nabucodonosor ae ou, guembiguai kuery ojokopa okuapy jave.

¹² Ha'e ramo Judá pygua huvixa Joaquim oo Babilônia pygua huvixa reve nhovaexi aguã. Ngupive ogueraaa oxy, guembiguai kuery, ojeupagua yvatekueve ha'e joe opena va'etý kuery. Ha'e ramo Babilônia pygua huvixa ogueraaa escravo-rã, oito ma'etý re ma oï jave py.

¹³ Ogueraaa avi SENHOR pegua opy mba'emo omoï porã mbyre ha'e javi, huvixa ro gui guive. SENHOR ijayvuague rami vy omboa'ypa tembiporu Israel pygua huvixa Salomão ojapo va'ekue, ouro guigua SENHOR pegua templo ropy guarã va'ekue meme.

¹⁴ Ha'e rami py oipe'apa Jerusalém py ikuai va'ekue ha'e javi. Yvatekueve, avakue ipy'a guaxukue, mba'emo apoa ha'e ferro re omba'eapo va'e kuery ha'e javi vy ma dez mil ogueraaa. Avave rei ndopytai yvy re, iporiaukue'i e'ý vy.

¹⁵ Babilônia katy ogueraaa Joaquim. Jerusalém gui escravo-rã ogueraaa avi huvixa xy, ta'yxy kuery ha'e hembiguai kuery ha'e javi.

¹⁶ Avakue ipy'a guaxukueve sete mil ikuai va'e, mba'emo apoa ha'e ferro re omba'eapo va'e kuery mil ikuai va'e joe opu'ã kuaa va'ekue meme ma Babilônia pygua huvixa ogueraapa escravo-rã.

¹⁷ Ha'e gui Joaquim rekoria ma Babilônia pygua huvixa omoï tuvy'i Matanias. Ha'e va'e rery oguerova vy Zedequias ju omboery.

2 Crônicas 36.10-16; Jeremias 52.1-3

¹⁸ Zedequias ma vinte e um ma'etý oguereko jave py oï ypy huvixa. Ha'e gui onze ma'etý re opena Jerusalém py. Ixy ma Hamutal, Libna pygua Jeremias rajy.

¹⁹ Ha'e va'e ma ha'eve'ý va'e anho ojapo oikovy SENHOR renonde rupi, Joaquim ojapoague ha'e javi rami.

Jeremias 39.1-7; 52.3-11

²⁰ Ha'e nunga oiko Jerusalém tetã ha'e Judá pygua kuery rovai SENHOR ipoxy ramo, guenonde gui oipe'apa aguã. Ha'e gui ma huvixa Zedequias opu'ã Babilônia pygua huvixa rovai.

25

¹ Zedequias nove ma'etŷ re ma huvixa oĩ javé, dez jaxyá re dez araa py ma Babilônia pygua huvixa Nabucodonosor ou Jerusalém py, oxondaro kuery ha'e javi reve. Tetã re ipo'akaxe vy ojokopa okuapy joavaive re.

² Onze ma'etŷ re ma Zedequias oĩ peve ojokopa tetã.

³ Irundy jaxyá re nove araa py ma tetã ha'e javi rupi karuai oiko rã ha'e pygua kuery ndojouvei ho'u va'erã.

⁴ Ha'e va'e javé py oitya tetã kora. Ha'e ramo ha'e pygua avakue joe opu'ãa pygua onhamba pyávy. Mokoï kora pa'ü okẽ oĩ va'e rupi oje'oi huvixa mba'e yvotyty oĩ va'e yvýry tape oĩ va'e rupi, caldeu kuery tetã joavaive re ikuai tei. Ha'e rã huvixa ma yvy joja reia rupi tape oĩ va'e rupi onha.*

⁵ Ha'e ramo caldeu regua xondaro kuery ma huvixa Zedequias rakykue oje'oi vy oupity Jericó tetã katy'i yvy joja reia oĩ va'e py. Hexeveguá xondaro kuery oaïmba vy oejapa oje'oivy.

⁶ Ha'e ramo ojokua reve ogueraa Ribla py Babilônia pygua huvixa oña py. Ha'e ramo ijayvu opaga aguã re.

⁷ Ha'e rami vy Zedequias oexaa py ae ojukapa ta'y kuery. Ha'e gui ma hexa omombupa. Mokoï corrente overa va'e guigua py ojokua reve ogueraa okuapy Babilônia katy.

2 Crônicas 36.17-21; Jeremias 39.8-10; 52.12-27

⁸ Dezenove ma'etŷ re ma Babilônia pygua huvixa Nabucodonosor oĩ javé py, peteñ nhiruñ jaxyá re sete araa py ma peteñ ou Jerusalém peve, Babilônia pygua huvixa rembiguai, jopya kuery ruvíxa Nebuzaradã.

⁹ Ha'e va'e ma oapypa SENHOR pegua oo, huvixa rogue ha'e Jerusalém tetã rupi oo ikuai va'ekue ha'e javi. Oo iporâgueve ikuai va'e oapypa.

¹⁰ Ha'e rami vy jopya kuery ruvíxa reve caldeu regua xondaro kuery ou va'ekue oitypa okuapy Jerusalém tetã yvýry rupi kora oĩ va'ekue.

¹¹ Ha'e gui jopya kuery ruvíxa Nebuzaradã ma heta ogueraa escravo-rã: tetã rupi ikuai va'ekue, Babilônia pygua huvixa pe ojejopy uka va'ekue, heta va'e kuery regua guive.

¹² Ha'e rã iporiaukueve ma jopya kuery ruvíxa oejapa uva nhotýarã ha'e mba'ety rupi omba'eapo va'erã.

¹³ Caldeu kuery omopêmba okuapy SENHOR pegua oo ytarã overa va'e guigua mokoïve hi'añ va'ekue, mba'emo renda ha'e yy mbotyarã overa va'e gui ojapo pyre, SENHOR pegua opy oĩ va'ekue. Ha'e vy overa va'e oĩ va'ekue ogueraapa Babilônia katy.

¹⁴ Ogueraa avi oja, pá, tapyí araa, heakuã porã va'e ryrukue, tembiporurã overa va'e gui ojapo pyre, ha'e mba'emo omboetea rupi oiporua va'ekue ha'e javi.

¹⁵ Jopya kuery ruvíxa ogueraa avi tapyí ryru, hy'a guaxu, ha'e gui ouro ha'e prata guigua ha'e javi.

¹⁶ Ha'e gui mokoïve oo yta hi'añ va'ekue, mba'emo ojoiaty ha'e mba'emo renderã Salomão ojapo va'ekue SENHOR pegua opy rupi guarã, ha'e va'e tembiporu re overa va'e oĩ va'ekue ha'e javi ma jaipapapa va'erã e'ý.

¹⁷ Peteñ-teñ oo yta yvatekuea ma oito metros, ha'e gui hi'áry ma oĩ ju overa va'e guigua mokoï metro yvatea va'e. Hi'árygua yvýry rupi imbojeguaarã kya corrente guigua ha'e yvyra'a ra'angaa oĩ va'ekue ma overa va'e guigua meme. Ha'e rã hovai re ijyta hi'añ va'e reve ma joegua, kya imbojeguaarã oĩ va'e voi.

¹⁸ Jopya kuery ruvíxa ogueraa avi sacerdote yvateve va'e Seraías, sacerdote yvyïve va'e Sofonias, ha'e gui okẽ rarõa kuery mboapy ikuai va'ekue.

¹⁹ Tetã gui ogueraa avi peteñ xondaro kuery ruvíxa oĩ va'ekue, ha'e gui peteñ nhiruñ avakue huvixa monogetaaty tetã py ojou va'ekue, ha'e xondarorã ha'e py ikuai va'e rery ombopara va'ety, ha'e gui sessenta avakue ha'e py hekoa va'ekue tetã rupi ojou va'ekue.

* 25:4 Caldeu kuery ma Babilônia pygua kuery ae. Ha'e gui caldeu kuery ruvíxa ma Nabucodonosor (versículo 1).

²⁰ Ha'e va'e kuery ma jopya kuery ruvixa Nebuzaradā ojokua reve ogueraapa Ribla py Babilônia pygua huvixa oĩa py.

²¹ Ha'e ramo Ribla py ae Babilônia pygua huvixa oipyxo uka vy ojuka ukapa, Hamate yvy re. Ha'e rami py Judá kuery ijyvy gui ogueraapaa escravo-rã.

²² Babilônia pygua huvixa Nabucodonosor ma Safã ra'y Aicão ra'y Gedalias omoĩ Judá yvy re oeja va'ekue re opena va'erã.

Ismael Gedalias ojukaague

²³ Ha'e gui xondaro ruvixa kuery, hexeveguia avakue reve oendu okuapy Babilônia pygua huvixa Gedalias ju huvixarã omoĩague. Ha'e rami vy Mispa py Gedalias oĩa py ha'e kuery ou okuapy oikuua porãve aguã. Ha'e va'e kuery regua ma Netanias ra'y Ismael, Careá ra'y Joanã, netofatita Tanumete ra'y Seraías ha'e maacatita ra'y Jazanias. Guexeveguia avakue reve ou okuapy.

²⁴ Ha'e ramo Gedalias onhemboayvu ha'e kuery pe ha'e hexeveguia avakue ikuai va'e pe. Ha'e vy aipoe'i:

— Pekyje eme caldeu kuery gui. Pepyta tema nhandeyvy re, ha'e penhe'ẽ rendu Babilônia pygua huvixa. Ha'e ramo peẽ kuery pendekuai porã'rã — he'i.

²⁵ Ha'e rami teĩ sete jaxyia py ou Netanias ra'y Ismael, Elisama ramymino va'e, ipo'akave va'e ra'y. Hexeve ou avi dez avakue. Ha'e va'e kuery Gedalias oipyxo ramo omano, judeu ha'e caldeu kuery Mispa py hexeve ikuai va'ekue voi.

²⁶ Ha'e ramo heta va'e kuery ha'e javi caldeu kuery gui okyje vy opu'ãmba oje'oivy, yvyigüeve ha'e yvatekueve, xondaro ruvixa kuery voi oje'oi Egito yvy katy.

Jeremias 52.31-34

²⁷ Judá pygua huvixa Joaquim dezessete ma'etõ ma escravo-rã ogueraague ojapo rire, doze jaxyia re vinte e sete araa py ma Evil-Merodaque oĩ Babilônia pygua huvixarã. Ha'e va'e ma Judá pygua huvixa Joaquim opoi nhuã py ombo'aague gui.

²⁸ Ha'e vy hexeve ha'eve reia'i rupi ijayvu vy omboyvateve amboae huvixa kuery Babilônia py hexeve ikuai va'e gui.

²⁹ Ha'e ramo Joaquim oao nhuã py oiporu va'ekue omboekovia vy huvixa renonde ae okaru oikovy ko'ẽ nhavõ, oikoa pukukue re.

³⁰ Ha'e vy ko'ẽ nhavõ huvixa po gui ae ojopy mba'emo repyrã, oikovea ja guarã.

Jypy Crônicas huvixa kuery rekokue oĩa Jypy crônicas huvixa kuery rekokue oĩa

Kova'e kuaxia para re ma omombe'ua poräve ju mba'emo omombe'ua ma va'ekue, omo'arandu ha'e ombopy'a guaxu aguã judeu kuery escravo-rã ogueraa ague gui oyvy re ojevy va'ekue. Ha'e rami vy jypy omombe'u oyvy re ojevy va'ekue ramoĩ kuery rery. Ha'e gui ma huvixa Davi openaague ju omombe'u vy ima'endu'a yvatea ha'e ipo'akaa re. Omombe'u avi Senhor pegua templo peguarã Davi oguereko katupaague.

Heta va'e kuery oendua py Davi oguerovy'a Senhor. Ha'e vy aipoe'i: “Senhor Israel kuery ruete, Oreruete reiko va'e, ndere ae ta'ima'endu'a porãa yma ete guive raka'eve rã peve. ... Ndere ae oĩ ndepo'aka aguã, ha'e pavẽ ikuai va'e aryve rupi ndeyvateve va'e repenaa py. ... Ha'e gui aãy ma Oreruete, roguerovy'a vy rogueroporaei rokuapy nderery hexakãmba va'e rupi” (29.10b, 11b, 13).

Adão ramymino kuery rery oĩa

Gênesis 5.1-32

¹ Adão, ha'e gui Sete, Enos,

² Cainã, Maalalel, Jared,

³ Enoque, Metusalém, Lameque,

⁴ Noé, Sem, Cam ha'e Jafé.*

Gênesis 10.1-32

⁵ Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

⁶ Gômer ra'y kuery ma Asquenaz, Rificate ha'e Togarma.

⁷ Javã ra'y kuery ma Elisá, Társis, Quitim ha'e Rodanim.

⁸ Ha'e gui Cam ra'y kuery ma Cuxé, Mizraim, Pute ha'e Canaã.

⁹ Cuxé ra'y kuery ma Sebá, Havilá, Sabtá, Raamá ha'e Sabtecá. Raamá ra'y kuery ma Sabá ha'e Dédã.

¹⁰ Cuxé ra'y ma Ninrode. Ha'e va'e ma jypy'i ipo'akapa va'e oiko yvy re.

¹¹ Mizraim ra'y kuery ma Ludim, Anamim, Leabim, Naftuim,

¹² Patrusim, Casluim (ha'e va'e ma filisteu kuery ypy'i) ha'e Caftorim.

¹³ Canaã ra'y kuery ma jypygua Sidom, ha'e gui Hete,

¹⁴ ha'e jebuseu kuery, amorreu, gurgaseu,

¹⁵ heveu, arqueu, sineu,

¹⁶ arvadeu, zemareu ha'e hamateu kuery.

¹⁷ Ha'e gui Sem ra'y kuery ma Elão, Assur, Arfaxade, Lude, Arã, Uz, Hul, Geter ha'e Meseque.

¹⁸ Arfaxade ra'y ma Selá, ha'e Selá ra'y ma Héber.

¹⁹ Héber ra'y kuery ma mokoĩ oiko: Peteĩ rery ma Pelegue, mba'eta ha'e va'e oiko jave py yvy omboja'oa.† Ha'e rã tyvy rery ma Joctã.

²⁰ Joctã ra'y ma Almodá, Salefe, Hazar-Mavé, Jerá,

²¹ Hadorão, Uzal, Dicla,

²² Ebal, Abimael, Sabá,

²³ Ofir, Havilá ha'e Jobabe. Ha'e va'e kuery ha'e javi ma Joctã ra'y kuery meme.

Gênesis 11.10-32

²⁴ Sem, ha'e gui Arfaxade, Selá,

²⁵ Héber, Pelegue, Reú,

²⁶ Serugue, Naor, Terá,

²⁷ ha'e gui Abrão, hery mboae Abraão va'e.

Gênesis 25.12-18

²⁸ Abraão ra'y kuery ma Isaque ha'e Ismael.

* ^{1:4} Sem, Cam ha'e Jafé ma Noé ra'y kuery ikuai (Gênesis 5.32). † ^{1:19} Tery Pelegue ma “Mboja'o” 'ea.

²⁹ Po rami ma ha'e va'e ra'y kuery: Ismael ra'y jypygua ma Nebaiote, ha'e gui Quedar, Adbeel, Mibsão,

³⁰ Misma, Dumá, Massá, Hadade, Temá,

³¹ Jetur, Nafis ha'e Quedemá. Ha'e va'e kuery ma Ismael ra'y kuery meme.

Gênesis 25.1-6

³² Ha'e gui Abraão ra'yxy jevy Quetura opi'a kuery oikuavā'i va'ekue ma Zinrā, Jocsā, Medā, Midiā, Isbaque ha'e Suá. Jocsā ra'y kuery ma Sabá ha'e Dedā.

³³ Midiā ra'y kuery ma Efá, Efer, Enoque, Abida ha'e Elda. Ha'e va'e kuery ma Quetura pi'a kuery meme.

³⁴ Ha'e gui Abraão ra'y ma Isaque. Isaque ra'y kuery ma Esaú ha'e Israel.

Gênesis 36.1-19

³⁵ Esaú ra'y kuery ma Elifaz, Reuel, Jeús, Jalão ha'e Coré.

³⁶ Elifaz ra'y kuery ma Temá, Omar, Zefi, Gaetá, Quenaz, Timna ha'e Amaleque.

³⁷ Reuel ra'y kuery ma Naate, Zerá, Samá ha'e Mizá.

Gênesis 36.20-30

³⁸ Ha'e gui Seir ra'y kuery ma Lotā, Sobal, Zibeão, Aná, Diso, Eser ha'e Disā.

³⁹ Lotā ra'y kuery ma Hori ha'e Homā. Ha'e gui Lotā reindy ma Timna.

⁴⁰ Sobal ra'y kuery ma Aliã, Manaate, Ebal, Sefô ha'e Onã. Zibeão ra'y kuery ma Aiá ha'e Aná.

⁴¹ Aná ra'y ma Disom. Disom ra'y kuery ma Hanrão, Esbã, Itrã ha'e Querã.

⁴² Eser ra'y kuery ma Bilã, Zaavã ha'e Jaacã. Disā ra'y kuery ma Uz ha'e Arã.

Gênesis 36.31-43

⁴³ Pova'e kuery ma Edom yvy re huvixave oī va'ekue, Israel kuery ruvixave oī e'ŷ teri javé: Beor ra'y Bela. Ha'e va'e retā openaaty ma Dinabá.

⁴⁴ Ha'e gui Bela omano rire hekovia oī Bozra pygua Zera ra'y Jobabe.

⁴⁵ Jobabe omano rire hekovia oī temanita kuery yvy guigua Husão.

⁴⁶ Husão omano rire hekovia oī Bedade ra'y Hadade. Ha'e va'e ma oitypa Midiā pygua kuery Moabe yvy re. Hetâ openaaty ma Avite.

⁴⁷ Ha'e gui Hadade omano rire hekovia oī Masreca pygua Samlá.

⁴⁸ Samlá omano rire hekovia oī Saul. Ha'e va'e ma Eufrates yakã yvýry Reobote oī va'e guigua.

⁴⁹ Ha'e gui Saul omano rire hekovia oī Acbor ra'y Baal-Hanã.

⁵⁰ Baal-Hanã omano rire hekovia oī Hadade. Ha'e va'e retā openaaty ma Paí. Ha'e rã ta'yxy ma Matrede memby Meetabel, Me-Zaabe remiarirõ va'e.

⁵¹ Ha'e gui Hadade ju omano.

Po rami ma Edom pygua yvatekueve rery: yvatekueve Timna, Alva, Jetete,

⁵² Oolibama, Elá, Pinom,

⁵³ Quenaz, Temá, Mibzar,

⁵⁴ Magdiel, ha'e gui Irã. Ha'e va'e kuery ma Edom pygua yvatekueve meme.

2

Gênesis 35.22-26

¹ Ha'e gui pova'e ma Israel ra'y kuery: Rúben, Simeão, Levi, Judá, Issacar, Zebulom,

² Dã, José, Benjamim, Naftali, Gade ha'e Aser.

Judá ramymino kuery rery oĩa

³ Ha'e gui Judá ra'y kuery ma Er, Onã ha'e Selá. Ha'e va'e kuery mboapy ma Canaã pygua Bate-Sua pi'a ikuai raka'e. Ha'e gui Judá ra'y jypygua Er ma SENHOR renonde rupi heko vai ramo ojuka.

⁴ Ha'e rã gua'y ra'yxy Tamar re Judá ta'yague ma Perez ha'e Zera. Judá ra'y kuery ha'e javi vy ma peteñ nhiruñ ikuai.

⁵ Ha'e gui Perez ra'y kuery ma Hezrom ha'e Hamul.

⁶ Zera ra'y kuery ma Zinri, Etã, Hemã, Calcol ha'e Dara. Ha'e javi vy ma peteñ nhiruñ ikuai.

⁷ Carmi ra'y ma Acar. Ha'e va'e ma Israel kuery ikuai axy aguã rami ojapo ha'eve'ŷ va'e py ojejavvy.

- ⁸ Etã ra'y ma Azarias.
- ⁹ Hezrom ra'y kuery ikuai va'ekue ma Jerameel, Rão ha'e Quelubai.
- ¹⁰ Ha'e gui Rão ra'y ma Aminadabe. Aminadabe ra'y ma Naassom, Judá regua kuery ruvixa va'e.
- ¹¹ Naassom ra'y ma Salma, ha'e Salma ra'y ma Boaz.
- ¹² Boaz ra'y ma Obede, ha'e Obede ra'y ma Jessé.
- ¹³ Jessé ra'y jypygua ma Eliabe, mokoña ma Abinadabe, mboapya ma Siméia,
- ¹⁴ irundaya ma Natanael, peteñ nhiruña ma Radai,
- ¹⁵ mboapy memea ma Ozém, ha'e gui sete-a ma Davi.
- ¹⁶ Ha'e va'e reindy kuery ma Zeruia ha'e Abigail. Zeruia pi'a kuery ma mboapy: Abisai, Joabe ha'e Asael.
- ¹⁷ Abigail ma oikuavã'i Amasa. Ha'e rã Amasa ru ma Ismael guigua Jéter.
- ¹⁸ Ha'e gui Hezrom ra'y Calebe ma gua'y kuery oguereko gua'yxy Azuba ha'e gui Jeriote re. Ha'e va'e pi'a kuery ma Jeser, Sobabe ha'e Ardom.
- ¹⁹ Ha'e gui Azuba omano ma rire gua'yxyrã Calebe ogueraa Efrata. Ha'e va'e re ta'ya ma Hur.
- ²⁰ Hur ra'y ma Uri, ha'e Uri ra'y ma Bezalel.
- ²¹ Ha'e gui Hezrom ma Gileade ru Maquir rajy re omenda, sessenta ma'etý ma oguereko py. Ha'e ramo oikuavã'i Segube.
- ²² Segube ra'y ma Jair. Ha'e va'e ma vinte e três tetã re opena Gileade yvy rupi.
- ²³ Ha'e rami teñ Jair pegua tekao ikuai va'ekue ma Gesur ha'e Arã oipe'apa, Quenate yvýry tekao'i ikuai va'e ha'e javi guive, ha'e javi vy ma sessenta tekao ikuai. Ha'e va'e kuery ha'e javi ma Gileade ru Maquir ra'y kuery meme.
- ²⁴ Calebe-Efrata py Hezrom omano ma rire Hezrom ra'yxy Abia oikuavã'i Tecoa rurã Asur.
- ²⁵ Ha'e gui povae ma Hezrom ra'y jypygua Jerameel ra'y kuery: jypygua Rão, ha'e gui Buna, Orém, Ozém ha'e Aías.
- ²⁶ Ha'e gui Jerameel amboae ju ogueraa gua'yxyrã, Atara hery va'e. Ha'e va'e ma Onã xyrrã.
- ²⁷ Jerameel ra'y jypygua Rão ra'y kuery ma Maaz, Jamim ha'e Equer.
- ²⁸ Onã ra'y kuery ma Samai ha'e Jada. Samai ra'y kuery ma Nadabe ha'e Abisur.
- ²⁹ Abisur ra'yxy rery ma Abiaiel. Ha'e va'e oguereko Abã ha'e Molide.
- ³⁰ Nadabe ra'y kuery ma Selede ha'e Apaim. Ha'e rã Selede ma ta'y e'ý re omano.
- ³¹ Apaim ra'y ma Isi. Isi ra'y ma Sesã. Sesã ra'y ma Alai.
- ³² Ha'e gui Samai ryvy Jada ra'y kuery ma Jéter ha'e Jônatas. Ha'e rã Jéter ma omano ta'y e'ý re.
- ³³ Jônatas ra'y kuery ma Pelete ha'e Zaza. Ha'e va'e kuery ma Jerameel ra'y kuery.
- ³⁴ Ha'e gui Sesã ma ndata'yi, tajy kuery anho. Ha'e rami avi Sesã oguereko peteñ guembiguai Egito guigua, Jara hery va'e.
- ³⁵ Ha'e gui Jara ra'yxyrã ma Sesã ome'ë guajy. Ha'e va'e ma oikuavã'i Atai.
- ³⁶ Atai ra'y ma Natã, ha'e Natã ra'y ma Zabade.
- ³⁷ Zabade ra'y ma Eflal, ha'e Eflal ra'y ma Obede.
- ³⁸ Obede ra'y ma Jeú, ha'e Jeú ra'y ma Azarias.
- ³⁹ Azarias ra'y ma Heles, ha'e Heles ra'y ma Eleasa.
- ⁴⁰ Eleasa ra'y ma Sismai, ha'e Sismai ra'y ma Salum.
- ⁴¹ Salum ra'y ma Jecamias, ha'e rã Jecamias ra'y ma Elisama.
- ⁴² Ha'e gui Calebe ra'y jypygua, Jerameel ryke'y va'e ma Maressa. Ha'e va'e ma Zife ru oiko. Maressa ra'y ma Abi-Hebrom.
- ⁴³ Hebrom ra'y kuery ma Coré, Tapua, Requém ha'e Sema.
- ⁴⁴ Sema ra'y ma Jorqueão rurã Raão. Ha'e gui Requém ra'y ma Samai.
- ⁴⁵ Samai ra'y ma Maom, ha'e Maom ra'y ma Bete-Zur.
- ⁴⁶ Ha'e gui Calebe ra'yxy jevy Efá ma oikuavã'i Harã, Mosa ha'e Gazez. Ha'e Harã ra'y ma Gazez.
- ⁴⁷ Jadai ra'y kuery ma Regém, Jotão, Gesã, Pelete, Efá ha'e Saafe.

⁴⁸ Ha'e gui Calebe ra'yxy jevy Maaca oguereko Seber ha'e Tiraná.

⁴⁹ Maaca oikuavā'i avi Madmana rurā Saafe, ha'e gui Macbena ha'e Gibeá rurā Seva. Ha'e gui Acsa ma Calebe rajy ae.

⁵⁰ Ha'e va'e kuery ma Calebe ra'y kuery meme.

Ha'e gui Efrata ra'y jypygua Hur ra'y kuery ma Quiriate-Jearim rurā Sobal,

⁵¹ ha'e gui Belém pygua kuery rurā Salma, ha'e Bete-Gade rurā Harefe.

⁵² Ha'e gui Quiriate-Jearim pygua kuery ru Sobal ra'y kuery ma Haroé ha'e Hazi-Hamenuote.

⁵³ Ha'e gui Quiriate-Jearim pygua kuery regua ikuai va'e ma itrita kuery, puteu, sumateu ha'e misraeu kuery. Ha'e va'e kuery guigua ma zoratita ha'e estaoleu kuery.

⁵⁴ Ha'e gui Salma ra'y kuery ma Belém netofatita kuery reve, Atrote-Bete-Joabe ha'e Hazi-Hamanaati, zoreu va'e.

⁵⁵ Lei re nhombo'e va'ety kuery Jabez py ikuai va'e regua ma tiratita, simeatita ha'e sucatita kuery. Ha'e va'e kuery ae ma queneu kuery Hamate gui ou va'ekue. Ha'e va'e ma Recabe regua kuery ru ae.

3

2 Samuel 3:2-5

¹ Pova'e ma Davi ra'y kuery Hebrón tetā py itui'i va'ekue. Jypygua ma Jezreel pygua Ainoā pi'a Amnom. Mokoña ma Carmelo pygua Abigail pi'a Daniel.

² Mboapya ma Gesur pygua huvixave Talmai rajy Maaca pi'a Absalão. Ha'e gui irundaya ma Hagite pi'a Adonias.

³ Peteñ nhiruña ma Abital pi'a Sefatias. Mboapy memea ma ta'yxy Eglá pi'a Itreão.

⁴ Ha'e va'e mboapy meme ta'y kuery Hebrón tetā py itui'i va'ekue, ha'e py sete ma'etýa ha'e mboapy meme jaxy re huvixave oī javé.

Ha'e va'e rire ma Jerusalém tetā py ju trinta e três ma'etýa re oī.

⁵ Pova'e ma Jerusalém py ta'y kuery itui'i va'ekue: Siméia, Sobabe, Natā ha'e Salomão. Ha'e va'e irundaya ma Amiel rajy Bate-Seba pi'a kuery.

⁶ Ha'e va'e rire ju ta'ya ma Ibar, Elisama, Elifelete,

⁷ Nogá, Nefegue, Jafia,

⁸ Elisama, Eliada ha'e Elifelete, nove ikuai ha'e javi vy.

⁹ Ha'e va'e kuery ma Davi ra'y kuery meme, ta'yxy jevy pi'a kuery rery oī e'ŷ re. Ha'e gui Tamar ma ha'e kuery reindy ae avi.

Salomão ramymino kuery rery oīa

¹⁰ Ha'e gui Salomão ra'y ma Roboão, Roboão ra'y ma Abias, Abias ra'y ma Asa, Asa ra'y ma Josafá,

¹¹ Josafá ra'y ma Jorão, Jorão ra'y ma Acazias, Acazias ra'y ma Joás,

¹² Joás ra'y ma Amazias, Amazias ra'y ma Azarias, Azarias ra'y ma Jotão,

¹³ Jotão ra'y ma Acaz, Acaz ra'y ma Ezequias, Ezequias ra'y ma Manassés,

¹⁴ Manassés ra'y ma Amom, Amom ra'y ma Josias.

¹⁵ Ha'e gui Josias ra'y kuery ma pova'e: ta'y jypygua ma Joanã, mokoña ma Jeoaquim, mboapya ma Zedequias, irundaya ma Salum.

¹⁶ Ha'e gui Jeoaquim ra'y kuery ma Jeconias ha'e Zedequias.

¹⁷ Jeconias escravo-rā ogueraa pyrā ra'y kuery ma Sealtiel,

¹⁸ Malquirão, Pedaías, Senazar, Jecamias, Hosama ha'e Nedabias.

¹⁹ Pedaías ra'y kuery ma Zorobabel ha'e Simei. Zorobabel ra'y kuery ma Mesulão ha'e Hananias. Ha'e va'e kuery reindy ma Selomite.

²⁰ Ikuai avi Hasuba, Oel, Berequias, Hasadias ha'e Jusabe-Hesede, peteñ nhiruñ ikuai ha'e javi vy.

²¹ Ha'e gui Hananias ra'y kuery ma Pelatias ha'e Jesaías. Ikuai avi Refaías ra'y kuery, Arnā ra'y kuery, Obadias ra'y kuery ha'e Secanias ra'y kuery.

²² Secanias ra'y ma Semaías. Ha'e rā Semaías ra'y kuery ma Hatus, Igal, Barias, Nearias ha'e Safate, mboapy meme ikuai ha'e javi vy.

²³ Ha'e gui Nearias ra'y kuery ma Elioenai, Ezequias ha'e Azricão, mboapy ikuai ha'e javi vy.

²⁴ Elioenai ra'y kuery ma Hodavias, Eliasibe, Pelaías, Acube, Joanã, Delaías ha'e Anani, sete ikuai ha'e javi vy.

4

Judá ramymino kuery rery oĩa

¹ Ha'e gui Judá ra'y kuery ma Perez, Hezrom, Carmi, Hur ha'e Sobal.

² Sobal ra'y Reaías ra'y ma Jaate. Jaate ra'y kuery ma Aumai ha'e Laade. Ha'e va'e kuery regua ma zoratita ikuai.

³ Pova'e ma Etã ru ra'y kuery: Jezreel, Isma ha'e Idbas. Ha'e kuery reindy rery ma Hazelelponi.

⁴ Ikuai avi Gedor ru Penuel ha'e Husa ru Ezer. Pova'e kuery ma Hur ra'y kuery meme. Ha'e va'e ma Efrata ra'y jypygua, ha'e Belém pygua kuery ru.

⁵ Ha'e gui Tecoa ru Asur ma mokoĩ ogueraa gua'yxyrã: Hela ha'e Naara.

⁶ Naara ma oikuavã'i Auzão, Héfer, Temeni ha'e Haastari. Ha'e va'e kuery ma Naara pi'a kuery meme.

⁷ Hela pi'a kuery ma Zerete, Izar ha'e Etnã.

⁸ Coz ma Anube ha'e Zobeba ru, ha'e Harum ra'y Aarel guigua kuery ru avi.

⁹ Jabez ma guyvy kuery gui omboeteave va'e. Ixy Jabez omboery vy aipoe'i: "Mba'eta haxy ete py aikuavã'i va'ekue", he'i.*

¹⁰ Ha'e gui Jabez ma ojerure Israel kuery ruete pe. Ha'e vy aipoe'i:

— Xemoingo porã tamo ra'e, ha'e emoïve xeyvyrã. Tove xereve riae toĩ ndepo, ha'e xepe'a mba'emo vai gui, xemoingo axyarã ou e'ý aguã rami — he'i. Ha'e ramo Nhanderuete ojapo ojerureague.

¹¹ Ha'e gui Suá ryke'y Quelube ra'y ma Meir. Ha'e va'e ma Estom ru.

¹² Estom ra'y ma Bete-Rafa, Paséia ha'e Ir-Naás pygua kuery rurã Teína. Ha'e va'e avakue ma Reca pygua meme.

¹³ Quenaz ra'y kuery ma Otniel ha'e Seraías. Ha'e rã Otniel ra'y ma Hatate.

¹⁴ Meonotai ra'y ma Ofra, ha'e Seraías ra'y ma Joabe. Ha'e va'e ma vvyugua py mba'emo ojapo kuaa va'e kuery retã ojapo ypy va'ekue, ha'e py mba'emo ojapoa rupi ikuai va'e meme.

¹⁵ Ha'e gui Jefoné ra'y Calebe ra'y kuery ma Iru, Elá ha'e Naã. Ha'e gui Elá ra'y ma Quenaz.

¹⁶ Jealelel ra'y kuery ma Zife, Zifa, Tiria ha'e Asareel.

¹⁷ Ezra ra'y kuery ma Jéter, Merede, Efer ha'e Jalom. Ha'e gui Merede ma gua'yxyrã ogueraa Faraó rajy Bitia. Ha'e va'e pi'a kuery ma Miriã, Samai ha'e Estemoa rurã Isbá.

¹⁸ Ha'e gui ta'yxy Judá regua va'e oikuavã'i Gedor pygua kuery rurã Jerede, Socó pygua kuery rurã Héber, ha'e gui Zanoa pygua kuery rurã Jecutiel.

¹⁹ Ha'e gui Hodias ra'yxy Naã reindy va'e pi'a kuery ma Garmi pygua Abiqueila, ha'e Maacá pygua Estemoa.

²⁰ Simão ra'y kuery ma Amnom, Rina, Ben-Hanã ha'e Tilom. Ha'e gui Isi ra'y kuery ma Zoete ha'e Bene-Zoete.

²¹ Ha'e gui Judá ra'y Selá ra'y kuery ma Leca pygua kuery rurã Er ha'e Maressa pygua kuery rurã Lada. Selá ma linho re ombo'eapo va'e kuery ru avi, Asbéia py hekoia va'e.

²² Oiko avi Joquim, Cozeba pygua kuery, Joás ha'e Sarafe pygua kuery Moabe re ipo'aka va'e, Jasubi-Leém pygua kuery guive. Ha'e va'e ma ymaveguia kuery rery ombopara pyre.

²³ Ha'e kuery ma nhae'ũ re ombo'eapo va'e, Netaim ha'e Gedera py hekoia va'e. Ha'e py ae ikuai nguvixave pe ombo'eapo aguã.

Simeão ramymino kuery rery oĩa

²⁴ Ha'e gui Simeão ra'y kuery ma Nemuel, Jamim, Jaribe, Zerá ha'e Saul.

²⁵ Ha'e va'e ra'y ma Salum, Salum ra'y ma Mibsão, Mibsão ra'y ma Misma.

* 4:9 Ha'e kuery ayvu py ma tery Jabez "Haxy va'e" 'ea rami onhendu.

- ²⁶ Ha'e gui Misma ra'y ma Hamuel, Hamuel ra'y ma Zacur, Zacur ra'y ma Simei.
- ²⁷ Simei ra'y kuery ma dezesseis ikuai, ha'e rā tajy kuery ma mboapy meme. Ha'e rā tyvy kuery ma ndata'y retaive meme rei, ndaetaive guive Judá ramymino kuery rami e'ŷ.
- ²⁸ Ha'e kuery ma Berseba py hekoia va'e, ha'e Moladá py, Hazar-Sual,
- ²⁹ Bila, Ezém, Tolade,
- ³⁰ Betuel, Horma, Ziclague,
- ³¹ Bete-Marcabote, Hazar-Susim, Bete-Biri ha'e Saaraaim py. Ha'e va'e tetā py ikuai Davi huvixave oĩ peve.
- ³² Ha'e kuery pegua tekao'i ikuai va'e ma Etā, Aim, Rimom, Toquém ha'e Asā, peteĩ nhiruĩ tetā.
- ³³ Ha'e va'e tetā yvýry rupi tekao ikuai va'e ha'e javi, Baal peve. Ha'e py ae ha'e kuery ikuai, ha'e oguereko avi kuaxia guamoĩ kuery rery oĩa.
- ³⁴ Peteĩ-teĩ regua huvixa omboparaa hery rupi: Mesobabe, Janleque, Amazias ra'y Josa,
- ³⁵ ha'e gui Joel ha'e Josibias ra'y Jeú. Josibias ma Asiel ra'y, ha'e Asiel ma Seraías ra'y.
- ³⁶ Ha'e gui Elioenai, Jaacobá, Jesoaías, Asaías, Adiel, Jesimiel, Benaia,
- ³⁷ ha'e gui Sifi ra'y Ziza. Sifi ma Alom ra'y, Alom ma Jedaías ra'y, Jedaías ma Sinri ra'y, Sinri ma Semaías ra'y.
- ³⁸ Ha'e va'e kuery ramymino kuery hetave tema ovy.
- ³⁹ Ha'e rami vy Gedor yvy re ovaẽ ovya peve oje'oi, yvyugua gui kuaray oua katy oje'oi nhuũ oeka vy guymba kuery vexa'i omongaru aguã.
- ⁴⁰ Ha'e py ma ojou nhuũndy oata e'ŷ va'e, ha'eve reia, ha'e yvy voi tuvixaa ojou, mba'eve noĩa, ha'e ov'y a rei aguã va'e. Ha'e py ma Cam ramymino kuery rekoague.
- ⁴¹ Ha'e gui hery ombopara pyre ma oupa okuapy Judá pygua huvixa Ezequias oĩ jave py. Ha'e rami vy ha'e py oo ikuai va'e oitypa vy ojukapa meunita kuery ha'e py ojou va'e rei. Omomba ete aŷ peve guarã. Ha'e rami vy ha'e kuery ikuaiague py ae ikuai, mba'eta ha'e py oĩ nhuũndy hymba kuery vexa'i okaru aguã.
- ⁴² Ha'e gui ha'e kuery va'e regua ae, Simeão ramymino kuery, quinhentos avakue oje'oi Seir yvyty katy. Ha'e va'e kuery rerekaoa kuery ma Pelatias, Nearias, Refaías ha'e Uziel, Isi ra'y kuery va'e meme.
- ⁴³ Ha'e rami vy ojukapa nho amalequita kuery gui oo jepe va'ekue. Ha'e vy ha'e kuery ju ikuai ha'e py, aŷ peve.

5

Rúben ramymino kuery rery oĩa

- ¹ Ha'e gui Rúben ramymino kuery ju. (Ha'e va'e ma Israel ra'y jypyguva va'eri otekoavy nguu rupa py ae. Ha'e nunga rupi ta'y jypyguva oikoa regua ixugui oipe'aa vy Israel ra'y José pe ju omboaxaa. Ha'ekue rami ju jypyguva oikoa omombe'ua py ma hery noĩ.*
- ² Ha'e rami avi Judá anhetẽ guyvy ha'e guyke'y kuery gui ipo'akave va'e, ha'e hamymino oiko huvixarã, va'eri José pe ae omboaxaa jypyguva pegua.)
- ³ Ha'e gui Rúben ra'y kuery ma Enoque, Palu, Hezrom ha'e Carmi.
- ⁴ Joel ra'y ma Semaías, Semaías ra'y ma Gogue, Gogue ra'y ma Simei,
- ⁵ Simei ra'y ma Mica, Mica ra'y ma Reaías, Reaías ra'y ma Baal,
- ⁶ Baal ra'y ma Beera, Assíria pygua huvixa Tiglate-Pileser escravo-rã ogueraa va'ekue. Ha'e va'e ma Rúben ramymino kuery ruvixa oiko.
- ⁷ Ha'e gui tyvy kuery rery omboparaa avi hamymino kuery ikuia rami, peteĩ-teĩ oo pygua rery oĩa. Ha'e va'e kuery akärã omoĩ mbyre ma Jeiel, ha'e gui Zacarias,
- ⁸ Azaz ra'y Bela, Sema ramymino ha'e Joel ramymino kuery regua. Ha'e va'e kuery ma Aroer py hekoia va'ekue, Nebo ha'e Baal-Meom peve oje'oi.
- ⁹ Ikuai avi va'ekue kuaray oua katy, tekao e'ŷa re ovaẽ ovya peve. Ijyvy oo 'rã Eufrates yakã peve, hymba kuery Gileade yvy re heta-etave ramo.

* 5:1 Rúben ma nguu Israel pe otekoavy ta'yxy jevy reve (Gênesis 35.22, 49.3-4).

¹⁰ Ha'e gui Saul huvixave oĩ jave py ma ha'e kuery opu'ã okuapy Agar regua kuery rovai. Ha'e rami vy ha'e kuery rogue ha'e javi rupi ju hekoa okuapy, Gileade katy'i rupi, kuaray oua katy.

Gade ramymino kuery rery oĩa

¹¹ Ha'e gui Gade ramymino kuery ma hekoa avi raka'e ha'e kuery ikuia rexei'i rupi, Basã yvy re, Salca peve.

¹² Joel ma ha'e kuery re opena va'erã omoĩ mbyre yvateve va'e, ha'e gui jevy guare ma Safã omoña. Janai ha'e Safate ikuai va'ekue Basã py.

¹³ Ha'e rã tyvy kuery ma pova'e, tuu ro pygua kuery rery rami: Micael, Mesulão, Seba, Jorai, Jacã, Zia ha'e Héber, ha'e javi vy sete ikuai.

¹⁴ Ha'e va'e kuery ma Abail ramymino kuery ae. Ha'e va'e ma Huri ra'y, Huri ma Jaroa ra'y, Jaroa ma Gileade ra'y, Gileade ma Micael ra'y, Micael ma Jesisai ra'y, Jesisai ma Jado ra'y, ha'e Jado ma Buz ra'y.

¹⁵ Ha'e gui Abdiel ra'y Ái, Guni ramymino va'e ma hetarã kuery akã oĩ.

¹⁶ Ha'e kuery ma Gileade py ae hekoa va'ekue, Basã py, ha'e ijyvýry rupi tekoia ikuai va'e py, ha'e Sarom yvýry tekoia ikuai va'e ha'e javi rupi peve.

¹⁷ Ha'e kuery rery ha'e javi ma omboparaa raka'e, Judá pygua huvixave Jotão ha'e Israel kuery ruvixave Jeroboão oĩ jave py.

Jordão yakã rovaigua rupi ikuai va'e kuery rekokue oĩa

¹⁸ Ha'e gui Rúben, Gade ha'e Manassés regua mbyte rupi oja'o va'ekue ma avakue ipy'a guaxukueve meme ikuai raka'e. Ha'e kuery ma ojee omoĩ 'rã okuapy hu'y jokoa ha'e kyxe. Guyrapa voi oiporu kuaa, ha'e joe opu'ãa py ikuai kuaa va'e. Ha'e kuery va'e regua ma quarenta e quatro mil setecentos e sessenta ikuai, joe opu'ãa py ikuai kuaa va'e meme.

¹⁹ Ha'e gui ha'e kuery joguero'a okuapy Agar kuery, Jetur, Nafis ha'e Nodabe reve.

²⁰ Ha'e va'e kuery reve joguero'aa py oipytyvõa, ha'e ipo py omboaxapaa Agar kuery re ipo'aka aguã, imoirũa kuery ha'e javi re guive, joguero'aa py Nhanderuete pe ojapukai okuapy ramo. Hexe ojerovia ete okuapy ramo oendu.

²¹ Ha'e rami rã ogueraapa hymba kuery: cinqüenta mil camelo, duzentos e cinqüenta mil vexa'i ha'e dois mil mburika. Ogueraa avi cem mil avakue.

²² Heta ete avi ikuai kyxe py ojuka va'ekue, ha'e kuery rovai opu'ã okuapy aguã Nhanderuete gui ae ou ramo. Ha'e rire hekoague py ae ju ikuai, escravo-rã heraapaa peve.

²³ Ha'e gui Manassés regua mbyte rupi oja'o va'ekue ma ha'e py ae hekoa Basã yvy re, Baal-Hermom, Senir ha'e Hermom yvyty peve. Ha'e kuery heta-etave tema ov.

²⁴ Pova'e ma hetarã kuery akã ikuai va'ekue: Efer, Isi, Eliel, Azriel, Jeremias, Hodavias ha'e Jadiel. Ha'e va'e kuery ma joe opu'ãa py ipy'a guaxukueve, avakue omboetevepy ha'e hetarã kuery akã.

²⁵ Ha'e rami teĩ ha'e kuery ojejav ynguu kuery ruete rovai. Ha'e vy itavy rei ha'e va'e yvy regua kuery ruete pegua ikuia rupi, henonde gui ha'e va'e kuery Nhanderuete omomba rire teĩ.

²⁶ Ha'e nunga rupi ae Israel kuery ruete omokyre'õ Assíria pygua huvixa Pul ha'e Tiglate-Pileser. Ha'e ramo ha'e va'e ma escravo-rã ogueraapa Rúben, Gade ha'e Manassés regua mbyte rupi oja'o va'ekue. Hala katy ogueraa, Habor ha'e Hara py, Gozã yakã peve. Ha'e py ae ha'e kuery ikuai aÿ peve.

Levi ramymino kuery rery oĩa

¹ Ha'e gui Levi ra'y kuery ma Gérson, Coate ha'e Merari.

² Coate ra'y kuery ma Anrão, Isar, Hebrom ha'e Uziel.

³ Anrão ra'y kuery ma Arão, Moisés ha'e Miriã. Arão ra'y kuery ma Nadabe, Abiú, Eleazar ha'e Itamar.

4 Eleazar ra'y ma Finéias, Finéias ra'y ma Abisua,
 5 Abisua ra'y ma Buqui, Buqui ra'y ma Uzi,
 6 Uzi ra'y ma Zeraías, Zeraías ra'y ma Meraiote,
 7 Meraiote ra'y ma Amarias, Amarias ra'y ma Aitube,
 8 Aitube ra'y ma Zadoque, Zadoque ra'y ma Aimaás,
 9 Aimaás ra'y ma Azarias, Azarias ra'y ma Joanã,
 10 Joanã ra'y ma Azarias. Ha'e va'e ma sacerdote oĩ va'ekue Jerusalém py Salomão oorã
 ojapo va'ekue py.
 11 Ha'e gui Azarias ra'y ma Amarias, Amarias ra'y ma Aitube,
 12 Aitube ra'y ma Zadoque, Zadoque ra'y ma Salum,
 13 Salum ra'y ma Hilquias, Hilquias ra'y ma Azarias,
 14 Azarias ra'y ma Seraías, Seraías ra'y ma Jeozadaque.
 15 Ha'e gui Jeozadaque ma escravo-rã heraa, Judá regua ha'e Jerusalém pygua kuery
 Nabucodonosor pe SENHOR ogueraa uka ramo.
 16 Ha'e gui Levi ra'y kuery ma Gérson, Coate ha'e Merari.
 17 Gérson ra'y kuery ma Libni ha'e Simei.
 18 Coate ra'y kuery ma Anrão, Isar, Hebron ha'e Uziel.
 19 Merari ra'y kuery ma Mali ha'e Musi. Ha'e va'e kuery ma Levi ra'y kuery va'e regua
 meme, tamoĩ kuery rery rami ae.
 20 Gérson ra'y ma Libni, Libni ra'y ma Jaate, Jaate ra'y ma Zima,
 21 Zima ra'y ma Joá, Joá ra'y ma Ido, Ido ra'y ma Zerá, Zerá ra'y ma Jeaterai.
 22 Ha'e gui Coate ra'y ma Aminadabe, Aminadabe ra'y ma Coré, Coré ra'y ma Assir,
 23 Assir ra'y ma Elcana, Elcana ra'y ma Ebiasafe, Ebiasafe ra'y ma Assir,
 24 Assir ra'y ma Taate, Taate ra'y ma Uriel, Uriel ra'y ma Uzias, Uzias ra'y ma Saul.
 25 Ha'e gui Elcana ra'y kuery ma Amasai ha'e Aimote.
 26 Elcana ra'y ma Zofai, Zofai ra'y ma Naate,
 27 Naate ra'y ma Eliabe, Eliabe ra'y ma Jeroão, Jeroão ra'y ma Elcana.
 28 Ha'e gui Samuel ra'y jypygua ma Joel, ha'e va'e riregua Abias.
 29 Merari ra'y ma Mali, Mali ra'y ma Libni, Libni ra'y ma Simei, Simei ra'y ma Uzá,
 30 Uzá ra'y ma Siméia, Siméia ra'y ma Hagias, ha'e Hagias ra'y ma Asaías.

Levi ramymino kuery oporaei va'erã omoĩ mbyre rery oĩa

31 Pova'e kuery ma Davi omoĩ va'ekue jogueroporai va'erã SENHOR pegua oo py,
 ixupeguia hyru oguera ma imoiny rire.
 32 Ha'e ramo ha'e kuery ma oporaeia rupi ikuai onhemboaty oĩaty renonde, Jerusalém
 py SENHOR peguarã oo Salomão ojapo e'ŷa ja. Ha'e rami vy ipara oĩa rami ojapo okuapy
 SENHOR pe.
 33 Pova'e kuery ma gua'y kuery reve omba'eapo va'ekue. Coate ramymino kuery regua
 ma oporai va'e Hemã. Ha'e va'e ma Joel ra'y, Joel ma Samuel ra'y,
 34 Samuel ma Elcana ra'y, Elcana ma Jeroão ra'y, Jeroão ma Eliel ra'y, Eliel ma Toá ra'y,
 35 Toá ma Zufe ra'y, Zufe ma Elcana ra'y, Elcana ma Maate ra'y, Maate ma Amasai ra'y,
 36 Amasai ma Elcana ra'y, Elcana ma Joel ra'y, Joel ma Azarias ra'y, Azarias ma Sofonias
 ra'y,
 37 Sofonias ma Taate ra'y, Taate ma Assir ra'y, Assir ma Ebiasafe ra'y, Ebiasafe ma Coré
 ra'y,
 38 Coré ma Isar ra'y, Isar ma Coate ra'y, Coate ma Levi ra'y, Levi ma Israel ra'y.
 39 Ha'e gui tyvy Asafe ma irûrã oĩ oiporu kuaa regua re. Asafe ma Berequias ra'y,
 Berequias ma Siméia ra'y,
 40 Siméia ma Micael ra'y, Micael ma Baaséias ra'y, Baaséias ma Malquias ra'y,
 41 Malquias ma Etni ra'y, Etni ma Zera ra'y, Zera ma Adaías ra'y,
 42 Adaías ma Etã ra'y, Etã ma Zima ra'y, Zima ma Simei ra'y,
 43 Simei ma Jaate ra'y, Jaate ma Gérson ra'y, Gérson ma Levi ra'y.

- ⁴⁴ Ha'e gui tyvy kuery Merari ramymino kuery ma ijaxua re ikuai. Ha'e va'e ma Quisi ra'y Etã. Ha'e gui Quisi ma Abdi ra'y, Abdi ma Maluque ra'y,
⁴⁵ Maluque ma Hasabias ra'y, Hasabias ma Amazias ra'y, Amazias ma Hilquias ra'y,
⁴⁶ Hilquias ma Anzi ra'y, Anzi ma Bani ra'y, Bani ma Semer ra'y,
⁴⁷ Semer ma Mali ra'y, Mali ma Musi ra'y, Musi ma Merari ra'y, Merari ma Levi ra'y.
⁴⁸ Ha'e gui tyvy kuery Levi ramymino ikuai va'e ma omoña Nhanderuete pegua opy rupi opa mba'e re omba'epo aguã.

Arão ramymino kuery rery oña

- ⁴⁹ Ha'e gui Arão ma gua'y kuery reve mba'emo ome'ẽ 'rã okuapy altar mba'emo oappyaty oĩ va'e áry, heakuã porã va'e oappyaty áry guive. Ha'e kuery ma henda iky'a e'ŷ ete va'e py avi ikuai guetarã Israel kuery ojejavyague ojao'i uka aguã SENHOR pe, Nhanderuete guembiguai Moisés pe ojapo ukaague ha'e javi rami vy.
⁵⁰ Arão ra'y ma Eleazar, Eleazar ra'y ma Finéias, Finéias ra'y ma Abisua,
⁵¹ Abisua ra'y ma Buqui, Buqui ra'y ma Uzi, Uzi ra'y ma Zeraías,
⁵² Zeraías ra'y ma Meraiote, Meraiote ra'y ma Amarias, Amarias ra'y ma Aitube,
⁵³ Aitube ra'y ma Zadoque, ha'e rã Zadoque ra'y ma Aimaás.

Josué 21.1-42

- ⁵⁴ Pova'e py ma ha'e kuery hekoia okuapy, ha'e kuery rekoarã ome'ẽague rami vy, ijapya peve: Arão ramymino kuery Coate regua pe ranhe xortea oexa ramo
⁵⁵ ha'e kuery pe ome'ẽa Hebron tetã Judá yvy re, ha'e ijyvýry rupi yvy itui va'e ha'e javi.
⁵⁶ Ha'e rã yvy tetã ha'e tekoia'i ikuai va'e yvýry rupigua ma Jefoné ra'y Calebe pe ome'ẽa.
⁵⁷ Arão ramymino kuery pe ome'ẽa tetã jojukaarã gui onhemia aguã: Hebron ha'e Libna ijyvýry rupi yvy itui va'e reve, ha'e gui Jatir ha'e Estemoa ijyvýry rupi yvy itui va'e reve,
⁵⁸ Hilém ha'e Debir ijyvýry rupi yvy itui va'e reve,
⁵⁹ Asã ha'e Bete-Semes ijyvýry rupi yvy itui va'e reve,
⁶⁰ ha'e gui Benjamim regua gui ome'ẽa Geba, Alemete ha'e Anatote ijyvýry rupi yvy itui va'e reve. Ha'e javi vy ma treze tetã ome'ẽa ha'e kuery va'e regua ikuai aguã.
⁶¹ Ha'e gui Coate ramymino kuery mboae pe ma xortea oexaague rami ome'ẽa dez tetã Manassés regua mbyte rupi oja'o va'ekue ikuia re.
⁶² Ha'e gui Gérson ramymino kuery pe ma treze tetã ome'ẽa ha'e kuery ikuai aguã, Issacar, Aser, Naftali ha'e Manassés regua Basã yvy re ikuai va'e.
⁶³ Ha'e gui Merari ramymino kuery pe ma doze tetã ome'ẽa Rúben, Gade ha'e Zebulom regua, xortea oexaague rami vy.
⁶⁴ Ha'e rami py Levi ramymino kuery pe Israel kuery ome'ẽ ha'e va'e tetã ha'e javi ijyvýry rupi yvy itui va'e reve.
⁶⁵ Ha'e va'e tetã peteĩ-teĩ rery rupi ome'ẽa avi Judá, Simeão ha'e Benjamim regua va'ekue, xorte oexaague rami.
⁶⁶ Ha'e gui Coate ramymino kuery amongue regua pe ma ome'ẽa tetã Efraim regua yvy re ikuai va'e.
⁶⁷ Ha'e kuery pe ome'ẽa avi tetã onhemia aguã, pova'e: Siquém yvyty Efraim regua re oĩ va'e ijyvýry rupi yvy itui va'e ha'e javi reve, ha'e gui Gezer,
⁶⁸ Jocmeão, Bete-Horom,
⁶⁹ Aijalom ha'e Gate-Rimom ijyvýry rupi yyy itui va'e ha'e javi reve.
⁷⁰ Ha'e gui Manassés regua mbyte rupi oja'o va'ekue yvy gui Coate ramymino kuery mboae pe ome'ẽa Aner ha'e Bileã ijyvýry rupi yvy itui va'e ha'e javi reve.
⁷¹ Ha'e gui Gérson ramymino kuery pe ma ome'ẽa Manassés regua mbytekue Basã yvy re oĩ va'e Golã ha'e Astarote ijyvýry rupi yvy itui va'e ha'e javi reve,
⁷² ha'e gui Issacar regua gui ome'ẽa Quedes ha'e Daberate ijyvýry rupi yvy itui va'e ha'e javi reve,
⁷³ Ramote ha'e Aném ijyvýry rupi yvy itui va'e ha'e javi reve guive.
⁷⁴ Ha'e gui Aser regua gui ma ome'ẽa Masal ha'e Abdómen ijyvýry rupi yvy itui va'e ha'e javi reve,

- ⁷⁵ ha'e Hucoque ha'e Reobe ijyvýry rupi yvy itui va'e ha'e javi reve guive.
⁷⁶ Ha'e gui Naftali regua Galiléia re ikuaias gui ma ome'ëa Quedes, Hamom ha'e Quiriataim ijyvýry rupi yvy itui va'e ha'e javi reve.
⁷⁷ Ha'e gui Merari ramymino kuery mboae pe ma ome'ëa Zebulom regua gui Rimono ha'e Tabor ijyvýry rupi yvy itui va'e ha'e javi reve.
⁷⁸ Ha'e gui Jordão yakã rovai, Jericó tetã rexei Jordão gui kuaray oua re oï va'e voi ome'ëa avi Rúben regua gui Bezer ha'e Jaza ijyvýry rupi yvy itui va'e ha'e javi reve,
⁷⁹ ha'e Quedemote ha'e Mefaate ijyvýry rupi yvy itui va'e ha'e javi reve guive.
⁸⁰ Ha'e gui Gade regua Gileade re oï va'e gui ome'ëa Ramote ha'e Maanaim ijyvýry rupi yvy itui va'e ha'e javi reve,
⁸¹ ha'e Hesbom ha'e Jazer ijyvýry rupi yvy itui va'e ha'e javi reve guive.

7

Issacar ramymino kuery rery oña

- ¹ Ha'e gui Issacar ra'y kuery ma Tola, Puá, Jasube ha'e Sinrom, ha'e javi vy irundy ikuai.
² Tola ra'y kuery ma Uzi, Refaías, Jeriel, Jamai, Ibsão ha'e Samuel, Tola ramymino kuery re opena va'e, avakue ipy'a guaxukueve meme. Ha'e kuery va'e regua rery huvixa Davi oï jave ombopara pyre ma vinte e dois mil e setecentos ikuai.
³ Ha'e gui Uzi ra'y ma Izraías. Ha'e gui Izraías ra'y kuery ma Micael, Obadias, Joel ha'e Issias, ha'e javi vy peteñ nhiruñ ikuai, huvixa meme.
⁴ Ha'e kuery va'e regua rery ombopara pyre ma trinta e seis mil avakue ikuai joe opu'ää pygua, mba'eta ha'e kuery va'e regua heta ete avi ikuai kunhague ha'e ta'y kuery.
⁵ Tyvy kuery Issacar ramymino kuery va'e regua avakue ipy'a guaxukueve ha'e javi vy ma oitenta e sete mil ikuai, hery ombopara pyre oña rami vy.

Benjamim ramymino kuery rery oña

- ⁶ Ha'e gui Benjamim ra'y kuery ma Bela, Bequer ha'e Jediael, ha'e javi vy mboapy ikuai.
⁷ Ha'e gui Bela ra'y kuery ma Esbom, Uzi, Uziel, Jerimote ha'e Iri, ha'e javi vy peteñ nhiruñ ikuai. Guetarã kuery re opena va'e meme, avakue ipy'a guaxukueve. Vinte e dois mil e trinta e quatro ikuai hery ombopara pyre oña rami vy.
⁸ Ha'e gui Bequer ra'y kuery ma Zemira, Joás, Eliézer, Elioenai, Onri, Jerimote, Abias, Anatote ha'e Alemete, Bequer ra'y kuery meme ikuai.
⁹ Ha'e javi vy vinte mil e duzentos ikuai guamoñ jypygua kuery rery ombopara pyre oña rami. Guetarã kuery re opena va'e, avakue ipy'a guaxukueve ikuai.
¹⁰ Ha'e gui Jediael ra'y ma Bilã. Ha'e rã Bilã ra'y kuery ma Jeús, Benjamim, Eúde, Quenaana, Zetã, Társis ha'e Aisaar.
¹¹ Ha'e va'e Jediael ra'y kuery ha'e javi ma ma guetarã kuery re opena va'e. Avakue ipy'a guaxukueve ma dezessete mil e duzentos ikuai joe opu'ää py ikuai kuaa va'e.
¹² Ha'e gui Supim ha'e Hupim ma Ir ra'y kuery ae. Ha'e rã Husim ma Aer ra'y ju.
¹³ Ha'e gui Naftali ra'y kuery ma Jaziel, Guni, Jezer ha'e Salum, Bila ramymino meme.

Manassés ramymino kuery rery oña

- ¹⁴ Ha'e gui Manassés ra'y ma Asriel, ta'yxy jevy Síria guigua oguereko va'ekue. Ha'e va'e oikuavã'i avi Gileade rurã Maquir.
¹⁵ Ha'e gui Maquir ma gua'yxyrã ojou Hupim ha'e Supim reindy, Maaca hery va'e. Ha'e rã Maquir ryvy rery ma Zelofeade. Ha'e va'e ma guajy anho oguereko raka'e.
¹⁶ Ha'e gui Maquir ra'yxy Maaca ma peteñ opi'a oguereko vy omboery Perez. Tyvy ma Seres hery va'e. Ha'e rã Perez ra'y kuery ma Ulão ha'e Requém.
¹⁷ Ulão ra'y ma Bedã. Ha'e kuery ae Gileade ramymino ikuai. Ha'e va'e ma Maquir ra'y, Manassés ramymino.
¹⁸ Heindy Hamolequete ma oikuavã'i Is-Hode, Abiezer, ha'e Macla.
¹⁹ Ha'e rã Semida ra'y kuery ma Aiã, Siquém, Liqui, ha'e Anião.

Efraim ramymino kuery rery oña

- ²⁰ Ha'e gui Efraim ra'y ma Sutela. Ha'e gui Sutela ra'y ma Berede, Berede ra'y ma Taate, Taate ra'y ma Eleada, ha'e Eleada ra'y ma Taate avi.
- ²¹ Ha'e gui Taate ra'y ma Zabade, ha'e Zabade ra'y ma Sutela. Ha'e rā Ezer ha'e Eleade ma avakue Gate pygua ae ojuka, ha'e va'e kuery rymba re imonda aguā oje'oi ramo.
- ²² Ha'e nunga rupi mbovy ára re rei e'ŷ tuu Efraim ojae'o oiny ha'e kuery re. Ha'e ramo tyke'y kuery ou ombopy'a porā ju aguā.
- ²³ Ha'e va'e rire ma gua'yxy reve joguereko ramo oguereko'i vy oikuavā peteñ opi'a. Ha'e ramo tuu omboery Berias, hoo py mba'emo vai oiko ramo.*
- ²⁴ Ha'e gui tajy ma Seerá, Bete-Horom tetā ojapo va'erā, yvy'ā guy katy ha'e yvy'ā katy voi. Ojapo avi Uzém-Seerá.
- ²⁵ Ha'e gui Berias ra'y ma Refa, Refa ra'y ma Resefe, Resefe ra'y ma Tela, Tela ra'y ma Taã,
- ²⁶ Taã ra'y ma Ladã, Ladã ra'y ma Amiúde, Amiúde ra'y ma Elisama,
- ²⁷ Elisama ra'y ma Num, ha'e Num ra'y ma Josué.
- ²⁸ Ha'e kuery yvy ha'e hekoa ma povae: Betel ijyvýry rupi tekao'i ikuai va'e reve, ha'e gui kuaray oua katy Naarā oĩ, ha'e rā kuaray oikea katy oĩ va'e ma Gezer, Siquém ha'e Aia peve, ijyvýry rupi tekao'i ikuai va'e reve.
- ²⁹ Ha'e gui Manassés ramymino kuery rekoia rexei rupi ma Bete-Seã ijyvýry rupi tekao'i ikuai va'e reve, Taanaque, Megido ha'e Dor ijyvýry rupi tekao'i ikuai va'e reve. Ha'e va'e tetā ha'e javi rupi Israel ra'y José ramymino kuery ikuaria.

Aser ramymino kuery rery oĩa

- ³⁰ Ha'e gui Aser ra'y kuery ma Imna, Isvá, Isvi ha'e Berias. Ha'e rā Sera ma ha'e kuery reindy oiko.
- ³¹ Berias ra'y kuery ma Héber ha'e Malquiel. Malquiel ra'y ma Birzavite.
- ³² Héber ra'y kuery ma Jaflete, Somer, Hotão ha'e Suá ha'e kuery reindy.
- ³³ Jaflete ra'y kuery ma Pasaque, Bimal ha'e Asvate. Ha'e kuery ma Jaflete ra'y kuery ikuai.
- ³⁴ Ha'e gui Semer ra'y kuery ma Aí, Roga, Jeubá ha'e Arã.
- ³⁵ Tyvy Helém ra'y kuery ma Zofa, Imna, Seles ha'e Amal.
- ³⁶ Ha'e gui Zofa ra'y kuery ma Sua, Harnefer, Sual, Beri, Inra,
- ³⁷ Bezer, Hode, Sama, Silsa, Itrã ha'e Beera.
- ³⁸ Ha'e gui Jéter ra'y kuery ma Jefoné, Pispa ha'e Ara.
- ³⁹ Ula ra'y kuery ma Ara, Haniel ha'e Rizia.
- ⁴⁰ Ha'e kuery ha'e javi ma Aser ramymino kuery ikuai, guetarā kuery re opena va'erā oiporavo pyre, avakue ipy'a guaxukueve, huvixa yvatekueve ikuai, hetarā kuery rery oĩa py hery omboparaa joe opu'âa rupi ikuai va'erā. Ha'e javi vy ma vinte e seis mil avakue ikuai raka'e.

8

Benjamim ramymino kuery rery oĩa

- ¹ Ha'e gui Benjamim ra'y ma Bela jypyguva va'e. Mokoĩa ma Asbel, mboapya ma Aará,
- ² irundaya ma Noá, ha'e rā peteñ nhiruña ma Rafa.
- ³ Ha'e gui Bela ra'y kuery ma Adar, Gera, Abiúde,
- ⁴ Abisua, Naamã, Aoá,
- ⁵ Gera, Sefufá ha'e Hurão.
- ⁶ Pova'e kuery ma Eúde ramymino kuery. Ha'e kuery ma Geba pygua kuery re opena va'ekue ri ha'e gui oguerovapaa Manaate py ju ikuai aguā.
- ⁷ Ha'e kuery ma Naamã, Aías ha'e Gera. Ha'e va'e ae oguerovapa, ha'e gui ta'ya ma Uzá ha'e Aiúde.
- ⁸ Ha'e gui Saarim ma gua'yxy kuery Husim ha'e Baara gui opoi ma rire Moabe regua yvy re oiko jave
- ⁹ gua'yxyrã Hode ju ojou va'e reve oguereko Jobabe, Zíbia, Messa, Malcã,

* 7:23 Ha'e kuery ayvu py tery Berias ma "Mba'emo vai" 'ea rami onhendu.

¹⁰ Jeús, Saquias ha'e Mirma. Ha'e va'e kuery ma ta'y kuery ikuai, guetarã kuery re opena va'e meme.

¹¹ Ha'e gui Husim ra'y kuery ma Abitube ha'e Elpaal.

¹² Elpaal ra'y kuery ma Héber, Misã ha'e Semede. Ha'e va'e ma ojapo Ono ha'e Lode, ha'e ijyvýry rupi tekao ikuai va'erã.

¹³ Ha'e gui Berias ha'e Sema ma Aijalom py hetarã kuery akã ikuai. Ha'e kuery ma Gate py hekoia va'ekue omoxẽmba.

¹⁴ Ha'e gui Aiô, Sasaque, Jeremote,

¹⁵ Zebadias, Arade, Éder,

¹⁶ Micael, Ispa ha'e Joá, Berias ramymino kuery meme ikuai.

¹⁷ Ha'e gui Zebadias, Mesulão, Hizqui, Héber,

¹⁸ Ismerai, Izlias, ha'e Jobabe ma Elpaal ramymino kuery ikuai.

¹⁹ Ha'e gui Jaquim, Zicri, Zabdi,

²⁰ Elienai, Ziletaí, Eliel,

²¹ Adaías, Beraías ha'e Sinrate ma Simei ramymino kuery ikuai.

²² Ha'e gui Ispã, Héber, Eliel,

²³ Abdom, Zicri, Hanã,

²⁴ Hananias, Elão, Antotias,

²⁵ Ifdéias ha'e Penuel ma Sasaque ramymino kuery ikuai.

²⁶ Ha'e gui Sanserai, Searias, Atalias,

²⁷ Jaaresias, Elias ha'e Zicri ma Jeroão ramymino kuery ikuai.

²⁸ Ha'e kuery ma Jerusalém tetã py guetarã kuery re opena va'e, ha'e kuery va'e reguery oña rami vy.

²⁹ Ha'e gui Gibeão py oiko Gibeão rurã. Ha'e rã ta'yxy rery ma Maaca.

³⁰ Ha'e py oiko avi ta'y jypyguare Abdom, ha'e gui Zur, Quis, Baal, Nadabe,

³¹ Gedor, Aiô ha'e Zequer.

³² Ha'e gui Miclote ra'y ma Siméia. Ha'e va'e kuery ma Jerusalém py ikuai guyvy kuery reve joa katy'i.

³³ Ha'e gui Ner ra'y ma Quis, Quis ra'y ma Saul, Saul ra'y ma Jônatas, Malquisua, Abinadabe ha'e Esbaal.

³⁴ Jônatas ra'y ma Meribe-Baal, ha'e gui Meribe-Baal ra'y ma Mica.

³⁵ Mica ra'y kuery ma Pitom, Meleque, Taréia ha'e Acaz.

³⁶ Acaz ra'y ma Jeoada, ha'e Jeoada ra'y kuery ma Alemete, Azmavete ha'e Zinri. Ha'e gui Zinri ra'y ma Mosa,

³⁷ Mosa ra'y ma Bineá, Bineá ra'y ma Rafa, Rafa ra'y ma Eleasa, Eleasa ra'y ma Azel.

³⁸ Ha'e gui Azel ra'y kuery ma mboapy meme ikuai raka'e. Ha'e kuery rery ma Azricão, Bocru, Ismael, Searias, Obadias ha'e Hanã. Ha'e va'e kuery ha'e javi ma Azel ra'y ikuai.

³⁹ Ha'e gui tyvy Eseque ra'y kuery ma pova'e: Ulão ma jypykue, Jeú ma mokoña, Elifelete ma mboapya.

⁴⁰ Ulão ra'y kuery ma avakue ipy'a guaxukueve, guyrapa oiporu kuaa va'e. Ha'e gui heta avi ta'y ha'e hamymino kuery, ha'e javi vy cento e cinqüenta ikuai. Ha'e kuery ha'e javi ma Benjamim ramymino kuery meme.

Escravo ikuai rire Jerusalém py ju ikuai va'e kuery rery oña

¹ Ha'e gui Israel kuery ha'e javi rery omboparapaa imoiny kuaxia Israel kuery ruvíxa rekokue oña re. Ha'e gui Judá regua kuery ma ojejavý okuapya re Babilônia katy ogueraapaa escravo ikuai aguã py.

² Ha'e va'e rire amongue ou ju oyvy re, ha'e tetã ikuaiague py ae ju hekoia. Ou ypy va'ekue ma Israel regua sacerdote kuery, levita kuery ha'e templo py ombo'eapo va'ekue.

³ Ha'e gui amongue Judá ramymino kuery, Benjamim, Efraim ha'e Manassés ramymino kuery Jerusalém py ae ikuai va'e ma pova'e:

- ⁴ Utai ma Amiúde ra'y, Amiúde ma Onri ra'y, Onri ma Inri ra'y, Inri ma Bani ra'y, Bani ma Judá ra'y Perez ramymino kuery va'e regua.
- ⁵ Ou avi Siló py hekoia va'ekue: jypyguare Asaías, hamymino kuery guive,
- ⁶ ha'e gui Zerá ramymino kuery regua Jeuel ha'e tyvy kuery reve vy seiscentos e noventa ikuai.
- ⁷ Benjamim ramymino kuery regua ma Salu, ha'e va'e ma Mesulão ra'y, Mesulão ma Hodavias ra'y, ha'e Hodavias ma Hassenuá ra'y.
- ⁸ Ou avi Jeroão ra'y Ibnéias, ha'e gui Uzi ra'y Elá, Micri ramymino, ha'e gui Sefatias ra'y Mesulão, Mesulão ma Reuel ra'y, Ibnijas ramymino.
- ⁹ Ha'e gui tyvy kuery ma ha'e kuery rery oïa rami vy novecentos e cinqüenta e seis ha'e javi vy. Ha'e va'e avakue ha'e javi ma hetarã kuery akã ikuai peteĩ-teĩ oo rupi.
- ¹⁰ Ha'e gui sacerdote kuery va'e regua ma Jedaías, Jeoiaribe, Jaquim
- ¹¹ ha'e Azarias. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y, Meriaote ma Aitube ra'y, ha'e Aitube ma Nhanderuete pegua opy rupi openaa py yvateve va'e.
- ¹² Ou avi Jeroão ra'y Adaías, Jeroão ma Pasur ra'y, Pasur ma Malquias ra'y. Ou avi Adiel ra'y Masai, Adiel ma Jazera ra'y, Jazera ma Mesulão ra'y, Mesulão ma Mesilemite ra'y, ha'e Mesilemite ma Imer ra'y.
- ¹³ Ou avi tyvy kuery hetarã kuery akã ikuai va'e, ha'e javi vy mil setecentos e sessenta ikuai, avakue Nhanderuete pegua ropy rupi omba'eapo kuaa va'e meme.
- ¹⁴ Ha'e gui levita kuery regua ou va'ekue ma Semaías. Ha'e va'e ma Hassube ra'y, Hassube ma Azricão ra'y, Azricão ma Hasabias ra'y, Hasabias ma Merari ramymino kuery regua.
- ¹⁵ Ou avi Baquebacar, Heres, Galal ha'e Matanias. Ha'e va'e ma Mica ra'y, Mica ma Zicri ra'y, ha'e Zicri ma Asafe ra'y.
- ¹⁶ Ou avi Semaías ra'y Obadias, Semaías ma Galal ra'y, Galal ma Jedutum ra'y, Jedutum ma Berequias ra'y, Berequias ma Asa ra'y, Asa ma Elcana netofatita kuery yvy re hekoia va'e ra'y.
- ¹⁷ Ha'e gui okẽ rarõa kuery ma Salum, Acube, Talmom ha'e Aimã, ha'e tyvy kuery guive. Salum ma ha'e kuery ruvixa oiko.
- ¹⁸ Aÿ peve ha'e kuery huvixa rokẽ rarõa rupi ae ikuai, kuaray oua yke katy. Ha'e va'e kuery ae Levi ramymino kuery rekoia kora rokẽ rarõa rupi ikuai va'e.
- ¹⁹ Salum ma Coré ra'y, Coré ma Ebiasafe ra'y, ha'e Ebiasafe ma Corá ra'y. Tyvy kuery nguu ro pygua ikuai va'e reve ma Coré regua kuery omoïa ixupe omba'eapo va'erã ha'e ombojerovia aty rokẽ rarõarã. Tamoï kuery ma SENHOR pegua kuery ikuaria re opena, ha'e tekoa rokẽ rarõa rupi ikuai va'ekue.
- ²⁰ Ha'e jave ma Eleazar ra'y Finéias opena ha'e kuery re, ha'e hexeve SENHOR oiko.
- ²¹ Ha'e gui Meselemias ra'y Zacarias ma onhemboaty aty rokẽ rarõa rupi avi oiko.
- ²² Ha'e va'e okẽ rarõarã oiporavo pyre kuery ha'e javi vy ma duzentos e doze ikuai. Tamoï kuery rery oïa py ha'e kuery rery omboparaa peteĩ-teĩ rekoia py ae. Davi ha'e profeta Samuel ae omoï va'ekue peteĩ-teĩ rembiaporã.
- ²³ Ha'e rami rire ha'e kuery, gua'y kuery reve oarõ 'rã okuapy SENHOR pegua rokẽ, oo py oikea ikuai va'e.
- ²⁴ Okẽ rarõa kuery ma irundy henda yvytu oipejua katy ikuai: kuaray oua katy, oikea katy, apu'a'ia katy ha'e kuaray puku-a katy.
- ²⁵ Ha'e rã tyvy kuery tekoa'i py ikuaria gui ou jepi 'rã ha'e kuery reve sete ára re omba'eapo aguã.
- ²⁶ Ha'e rami teĩ ha'e jave py ikuai riae 'rã irundy okẽ rarõa yvatekueve Levi ramymino kuery va'e regua. Ha'e kuery ae opena 'rã Nhanderuete pegua oo ja'o ikuai va'e re, ha'e peráta omoï porã mbyre re.
- ²⁷ Ha'e kuery ma oke 'rã Nhanderuete pegua oo yvy'iry rupi ae, opena va'erã omoïa rire, ha'e ko'ẽ nhavõ okẽ oipe'a aguã.

²⁸ Ha'e kuery va'e regua amongue ma tembiporu re openaa rupi ikuai. Ha'e kuery ma oipapapa 'rã ogueraa ha'e oguerua jevy rã.

²⁹ Ikuai avi amboae kuery tenda ha'e mesa ikuai va'e re opena va'erã, ha'e henda iky'a e'ŷ va'e pygua tembiporu ikuai va'e re, ha'e gui trigo, vinho, azeite, heakuã porã va'e ha'e irûrã oguereko va'e re.

³⁰ Mba'eta sacerdote ra'y kuery amongue va'e ma ojapo 'rã heakuã porã va'e irûrã.

³¹ Ha'e gui peteĩ levita va'e regua oiko Matitias hery va'e, Salum ra'y jypykue, Coré ramymino kuery va'e regua. Ha'e va'e ma mbojape apoa kuery re opena.

³² Ha'e rã tyvy kuery Coate ramymino kuery va'e regua ma sábado nhavõ ojapo 'rã mbojape SENHOR renonde omoõ mbyrã.

³³ Ha'e gui oporai va'e kuery ma levita regua kuery akã ikuai va'e meme. Ha'e kuery ma templo ropy ja'o ikuai va'e py ae 'rã ikuai. Amboae rupi nomba'epoi 'rãe, mba'eta ara py ha'e pyáv ombo'epo 'rã okuapy hembiaporã ome'ẽ mbyre rupi ae.

³⁴ Ha'e va'e kuery ma levita regua kuery akã ikuai, ojaveguia kuery ruvíxa. Jerusalém py ae hekoia va'e meme.

³⁵ Gibeão py ma oiko raka'e Jeiel, Gibeão ru va'e. Ha'e rã ta'yxy ma Maaca.

³⁶ Ta'y jypykue ma Abdom, ha'e gui Zur, Quis, Baal, Ner, Nadabe,

³⁷ Gedor, Aiô, Zacarias ha'e Miclote.

³⁸ Ha'e gui Miclote ra'y ma Siméia. Ha'e va'e kuery ma Jerusalém py ae hekoia va'ekue, guyvy kuery reve joa katy'i ikuai.

³⁹ Ner ra'y ma Quis, Quis ra'y ma Saul, ha'e Saul ra'y kuery ma Jônatas, Malquisua, Abinadabe ha'e Esbaal.

⁴⁰ Jônatas ra'y ma Meribe-Baal, ha'e Meribe-Baal ra'y ma Mica.

⁴¹ Mica ra'y kuery ma Pitom, Meleque ha'e Taréia.

⁴² Ha'e gui Acaz ra'y ma Jaerá, ha'e rã Jaerá ra'y kuery ma Alemete, Azmavete ha'e Zinri. Ha'e rã Zinri ra'y ma Mosa,

⁴³ Mosa ra'y ma Bineá, Bineá ra'y ma Refaías, Refaías ra'y ma Azel.

⁴⁴ Ha'e rã Azel ra'y kuery ma mboapy meme ikuai. Hery ma Azricão, Bocru, Ismael, Searias, Obadias ha'e Hanã. Ha'e kuery ha'e javi ma Azel ra'y kuery meme.

10

1 Samuel 31.1-7

¹ Ha'e gui Israel kuery reve filisteu kuery joguero'a ramo avakue Israel regua onhamba filisteu kuery gui. Ha'e ramo Gilboa yvy'ã re ojukapa.

² Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.

³ Joguero'aa py Saul oï vaive ový. Hu'y momboa kuery ojou ramo ha'e kuery gui okyje vaipa.

⁴ Ha'e gui Saul aipoe'i hu'y jokoa reraa pe:

— Ekyi ndekyxé ha'e xepyxo, ha'e kuery opire omboi uka e'ŷ va'ekue ou vy xejajai rei e'ŷ aguã — he'i.

Ha'e rami teĩ hu'y jokoa reraa okyje vaipa vy ndoipyxoxei. Ha'e ramo Saul ae kyxe ojopy vy onhemombo hakua re.

⁵ Hu'y jokoa reraa Saul omano ma ri ty ra'ea oexa vy ha'e voi kyxe re onhemombo vy omano avi.

⁶ Ha'e rami py Saul omano gua'y kuery mboapyve reve. Hoo pygua kuery voi omanomba avi hexeve.

⁷ Ha'e gui avakue Israel regua yvyugua rupi hekoia va'e oexa okuapy oirũ kuery onhambaa, ha'e Saul gua'y kuery reve omanomba maa. Ha'e rami vy ha'e kuery voi guekoia oejapa vy onhamba avi oje'ový. Ha'e gui filisteu kuery ou vy ha'e py ju ikuai.

1 Samuel 31.8-13

⁸ Ko'ẽ jevy filisteu kuery ou omanogue mba'ekue ogueraapa aguã. Ha'e rami vy ojou Saul ha'e ta'y kuery mboapyve retekue Gilboa yvy'ã re ho'apaague py.

⁹ Ha'e rami vy Saul akāgue ojaya vy hembiporukue ogueraapa. Filisteu yvy ha'e javi rupi omondouka ayvu mombe'uarā, ha'e nungakue omombe'u aguā ta'angaa pegua oo ikuai va'e rupi, ha'e guetarā kuery ha'e javi pe.

¹⁰ Saul rembiporukue ogueraa nguuete kuery pegua oo py. Ha'e rā inhakāgue ma nguuete Dagom pegua oo re omboja imoiny.

¹¹ Ha'e gui Jabes-Gileade pygua kuery oendu okuapy filisteu kuery Saul re ojapoague.

¹² Ha'e rami vy avakue ipy'a guaxukueve va'e opu'āmba vy omboi heruvy Saul ha'e ta'y kuery retekue. Jabes tetā py ogueru vy ojatypa ha'e py, yvyra ikuai va'e guy py. Ha'e vy sete ára re okaru e'ŷ re ikuai.

¹³ Ha'e rami py Saul omano SENHOR rovai ojejavyague re, SENHOR ijayvua noenduxei rire, omanogue mboayvua pe rive oporandu ramo guive,

¹⁴ SENHOR pe e'ŷ. Ha'e nunga rupi SENHOR ojuka uka vy Jessé ra'y Davi pe ju omboaxa huvixave oī aguā.

11

2 Samuel 5.1-5

¹ Ha'e gui ma Israel regua kuery ha'e javi ou okuapy Hebrom tetā py Davi oīa py. Hexeve jogueroayvu vy aipoe'i okuapy:

— Ore kuery voi ma nderegua kuery ae avi.

² Yma Saul oiko teri vy orere opena jave py ndee ae reo ha'e rejevy 'rā va'ekue Israel regua xondaro kuery reve. Ha'e gui SENHOR aipoe'i ndevy: "Ndee repena 'rā xevygua Israel kuery re, ha'e reiko 'rā ha'e kuery ruvixa", he'i va'ekue.

³ Ha'e rami vy Israel regua nhomonetaa kuery ha'e javi ou okuapy Hebrom py huvixa reve jogueroayvu aguā. Ha'e ramo Hebrom py, SENHOR renonde ha'e kuery reve huvixa Davi ojapo oguerekō porā aguā regua. Ha'e rā omoī okuapy Davi nguvixarā Israel kuery ha'e javi re opena aguā, Samuel ayvu rupi SENHOR aipoe'iague rami vy.*

2 Samuel 5.6-10

⁴ Ha'e gui Davi ha'e Israel kuery ha'e javi reve oje'oi Jerusalém tetā hery mboae Jebus va'e katy, mba'eta ha'e py ae jebuseu kuery ha'e va'e yvy regua reko.

⁵ Ha'e ramo Jebus py hekoa va'e kuery aipoe'i Davi pe:

— Apy ma ndereikei 'rā — he'i okuapy. Ha'e rami teī Davi oipe'a oo ikorapa va'e Sião py oī va'e. Ha'e va'e pe ma "Davi reko" 'ea.

⁶ Mba'eta Davi aipoe'i ma voi va'ekue: "Amongue va'e rei jypy'i jebuseu kuery oity va'e amoī 'rā xondaro kuery ruvixarā", he'i va'ekue. Ha'e ramo Zeruia pi'a Joabe ha'e ranhe opu'ā ov y ha'e kuery re. Ha'e ramo omoī xondaro ruvixarā.

⁷ Ha'e rami vy oo ikorapa va'e py ae Davi oī. Ha'e nunga rupi ha'e va'e pe "Davi reko" 'ea.

⁸ Ha'e va'e yvýry rupi mba'emo ojapo avi. Milo guive tetā omoatyrō heravy omboypyague py ovaē peve. Ha'e rā tetā rembyre ma Joabe ju omoatyrōmba.

⁹ Davi ma ipo'akave tema ov y, hexeve SENHOR ixondaro reta va'e oiko ramo.

2 Samuel 23.8-39

¹⁰ Pova'e kuery ma Davi pegua ipy'a guaxukueve yvateve va'e. Ha'e kuery ma Israel kuery ha'e javi reve oipytyvō okuapy huvixave oī aguā, ha'e va'e kuery reko re SENHOR ijayvuague rami vy.

¹¹ Po rami ma Davi pegua kuery ipy'a guaxukueve rery: hacmonita Jasobeão ma trinta ikuai va'e ruvixa. Ha'e va'e ma guembiporu hu'y reve trezentos ikuai va'e rovai opu'ā vy peteīgue'i pyve ojukapa va'ekue.

¹² Ha'e va'e rire ma Dodô ra'y Eleazar, Aoí ramymino. Ha'e va'e ma mboapyve ipy'a guaxukueve va'e regua oiko.

* 11:3 Davi huvixave oī aguā Samuel oikuaa ukaague omombe'u 1 Samuel 16.1-13 py.

¹³ Ha'e gui ha'e va'e kuery ma Pas-Damim py Davi reve ikuai filisteu kuery ijaty okuapy jave py. Ha'e py peteĩ yvy cevada-ty oña py xondaro kuery onhamba filisteu kuery renonde gui.

¹⁴ Ha'e va'e yvy mbyte py ha'e kuery opu'ã vy ojoko nho, oitypa filisteu kuery. Ha'e rami py SENHOR ogueraa jepepa raka'e.

¹⁵ Ha'e gui trinta yvatekueve ikuai va'e regua mboapy oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains vyvugua py.

¹⁶ Ha'e rami vy Davi onhemia py oĩ, ha'e rã filisteu regua xondaro kuery ma Belém tetã py ikuai.

¹⁷ Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém rokẽ py oĩ va'e gui? — he'i.

¹⁸ Ha'e ramo ha'e va'e mboapyve ma filisteu kuery ijaty okuapya rupi oje'oi vy ygua Belém kora rokẽ py oĩ va'e gui yy oguenoẽ, ha'e Davi oña py ogueru. Ha'e rã ha'e ndoy'uxei vy SENHOR renonde onhoẽ ixupe guarã.

¹⁹ Ha'e vy aipoe'i:

— SENHOR, nda'evei ete xee ha'e va'e ay'u aguã! Xee ay'u 'rã ri nda'u avakue ojeayvu ve'ÿkue py oje'oi va'ekue ruguy rami? Mba'eta ha'e kuery ndojeayvuveikue py ogueru okuapy va'ekue — he'i vy ndoy'uxei.

Ha'e ramigua ae mboapy ipy'a guaxukueve ojapo va'ekue.

²⁰ Ha'e gui Joabe ryke'y Abisai ma trinta ikuai va'e akã. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy mboapyve tenonde re ikuai va'e rami ete ima'endu'a porãmby oiko.

²¹ Ha'e ma trinta ikuai va'e gui yvateve va'e vy ha'e kuery akã oiko, va'eri mboapyve tenonde re ikuai va'e regua e'ÿ guive.

²² Ha'e gui Joiada ra'y Benaia ma ipy'a guaxuve va'e avi Cabzeel pygua, mba'emo tuvixa va'e ojapo avi va'e. Ha'e rami vy ojuka mokoõ Moabe pygua joe opu'ã kuaave va'ekue. Yro'y apí ho'a jave ma itakua py oguejy vy guary okua py oĩ va'ekue ojuka.

²³ Ojuka avi peteĩ ava Egito pygua mokoõ metros raxa'i yvate va'ekue. Egito pygua ma hu'y guaxu ajukue popõa 'y rami ipo guaxu va'e reve ou rã Benaia ma popoka py rive opu'ã ovy vy ipo gui hu'y guaxu oguereko va'ekue oipe'a vy ha'e va'e py ae ju ojuka.

²⁴ Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

²⁵ Ha'e va'e ma trinta ikuai va'e gui omboetevea va'eri mboapyve tenonde re ikuai va'e regua ndoikoi guive. Ha'e gui Davi omoõ guarõa kuery re opena va'erã.

²⁶ Ha'e gui xondaro kuery regua ipy'a guaxukueve ma Joabe ryvy Asael, Belém pygua Dodô ra'y Elanã,

²⁷ Harode guigua Samote, Pelete guigua Heles,

²⁸ Tecoa pygua Iques ra'y Ira, Anatote guigua Abiezer,

²⁹ Husa guigua Sibecai, Aoí guigua Ilai,

³⁰ Netofa guigua Maarai, Netofa pygua Baaná ra'y Helede,

³¹ Gibeá pygua Ribai ra'y Itai Benjamim ramymino va'e, Piratom guigua Benaia,

³² Gaás yakã'i yvýry guigua Hurai, Arba guigua Abiel,

³³ Baarum guigua Azmavete, Saalbom guigua Eliaba,

³⁴ Gizom guigua Benê-Hasém, Aião pygua Sage ra'y Jônatas,

³⁵ Aião pygua Sacar ra'y Aião, ha'e Ur ra'y Elifal,

³⁶ Mequerá guigua Hefer, Pelom guigua Aías,

³⁷ Carmelo guigua Hezro, Ezbai ra'y Naarai,

³⁸ Natã ryvy Joel, Hagri ra'y Mibar,

³⁹ Amom guigua Zeleque, Beerote guigua Naarai, Zeruia pi'a Joabe rembiporu reraaty va'e,

⁴⁰ ha'e gui Jatir guigua kuery Ira ha'e Garebe,

- ⁴¹ heteu Urias, Alai ra'y Zabade,
⁴² Rúben regua Siza ra'y Adina Rúben ramymino kuery ruvixa, hexevegua trinta avi ikuai,
⁴³ ha'e gui Maaca ra'y Hanã, Mitã guigua Josafá,
⁴⁴ Asterá pygua Uzias, Aroer pygua Hotão ra'y kuery Sama ha'e Jeiel,
⁴⁵ Sinri ra'y Jediael, ha'e tyvy Joá Tiz guigua,
⁴⁶ Maavá guigua Eliel, Elnaão ra'y kuery Jeribai ha'e Josavias, Moabe guigua Itma,
⁴⁷ ha'e gui Zobá guigua kuery Eliel, Obede ha'e Jaasiel.

12

Davi pegua xondaro kuery re ijayvua

- ¹ Pova'e kuery ma Davi-a katy ou va'ekue Ziclague py Quis ra'y Saul gui onhaague py. Ha'e va'e kuery ma ipy'a guaxukueve joe opu'ãa rupi ikuai va'e regua.
² Ha'e va'e kuery rembiporu ma guyrapa. Oiporu kuaa regua re ha'e oiporu kuaa e'ýa re oiporu ita momboa, hu'y voi omombo 'rã guyrapa py. Ha'e va'e kuery ma Saul regua ae, Benjamim ramymino kuery.
³ Ha'e kuery ruvixa ma Gibeá pygua Semaá ra'y kuery Aiezer ha'e Joás, ha'e gui Azmavete ra'y kuery Jeziel ha'e Pelete, Beraca, Anatote guigua Jeú,
⁴ Gibeão guigua Ismaías ma trinta ipy'a guaxukueve ikuai va'e regua, ha'e kuery akã avi oiko, ha'e gui Jeremias, Jaaziel, Joanã ha'e Gedera pygua Jozabade,
⁵ ha'e gui Eluzai, Jerimote, Bealias, Semarias ha'e Harife pygua Sefatias,
⁶ Elcana, Issias, Azarel, Joezer ha'e Jasobeão, Corá ramymino meme,
⁷ ha'e gui Gedor pygua Jeroão ra'y kuery Joela ha'e Zebadias.
⁸ Gade regua kuery voi oaxa Davi-a katy, tekoá e'ýa py oo ikorapa va'e py oí javé. Ha'e va'e avakue ma ipy'a guaxukueve joe opu'ãa kuaa va'e meme. Hembiporu ma hu'y jokoa ha'e imo'ãa tuvixa va'e. Hova ma guary rami, ha'e guaxu vyty áry rupi onhaa rami inhakuã va'e.
⁹ Ha'e gui Ezer ma ha'e kuery akã, ha'e va'e gui mokoña ma Obadias, mboapya ma Eliabe,
¹⁰ irundaya ma Mismana, peteñ nhiruña ma Jeremias,
¹¹ mboapy memea ma Atai, sete-a ma Eliel,
¹² oito-a ma Joanã, nove-a ma Elzabade,
¹³ dez-a ma Jeremias ha'e onze-a ma Macbanai.
¹⁴ Ha'e kuery Gade ramymino ma xondaro kuery ruvixa ikuai. Ha'e va'e regua vyvive va'e ma cem avakue rami ovare va'e opu'ãa py, ha'e rã yvateve va'e ma mil avakue rami ovare va'e.
¹⁵ Ha'e va'e kuery ma Jordão yakã rupi oaxa va'ekue jaxy ijypyá re, hembe ha'e javi áry rupi yy ojao'i teñ. Ha'e rami vy omonhamba vyvugua rupi ikuai va'ekue ha'e javi, kuaray oua katy ha'e kuaray oikea katy guive.
¹⁶ Ha'e gui Davi oña py ou avi Benjamim ha'e Judá ramymino kuery regua, oo ikorapa va'e py.
¹⁷ Ha'e ramo Davi ovaexí aguã oo vy ijayvu ha'e kuery reve. Ha'e vy aipoe'i:
— Xapy'a rei rã peñ kuery xepytyvõ aguã ri peju ramo xepy'a py anhemoirû 'rã peñ kuery reve. Ha'e gui pêvy ajapo vai e'ý teñ xerovaigua kuery pe xemboaxa aguã rive ri peju ramo ma tove nhaneramoñ kuery ruete ae toexa pota, ha'e vy ta'ijayvu pêvy — he'i.
¹⁸ Ha'e ramo trinta va'e akã Amasai re Nhe'ë oí ramo aipoe'i:
— Ha'e rami avi ore kuery ma ndevygua ae, Davi! Jessé ra'y, ndereve ete 'rã orekuai! Tereiko porã, nepytyvõa kuery voi ta'ikuai porã! Mba'eta Nderuete ma nepytyvõ 'rã — he'i ramo Davi omovaë imbokuapy vy xondaro kuery ruvixarã omoñ.
¹⁹ Ha'e gui Manassés va'e regua voi Davi-a katy oaxa, filisteu kuery reve ha'e ou jave Saul reve ha'e kuery joguero'a aguã katy. Ha'e rami teñ ha'e noipytyvõi va'ekue filisteu kuery, mba'eta ha'e kuery va'e regua huvixa kuery jogueroayvuague rami vy nomondoukai. Ha'e vy aipoe'i okuapy:
— Nguvixave Saul-a katy ri Davi oaxa ramo ma nhaneakã ojayapaa 'rã — he'i okuapy.

²⁰ Ha'e ramo Ziclague tetā katy Davi ojevy ju ramo ha'ea katy oaxapa okuapy Manassés ramymino kuery. Ha'e va'e kuery ma Adna, Jozabade, Jediael, Micael, Jozabade, Eliú ha'e Ziletaí, Manassés regua mbovy rei e'ŷ ruvixa kuery ikuai va'ekue.

²¹ Ha'e va'e kuery ma oipytyvõ Davi hexe opu'ã va'e mbovy rei e'ŷ ikuai va'e rovai, avakue ipy'a guaxukueve ha'e xondaro ruvixa meme ikuai va'e vy.

²² Ha'e va'e jave py ko'ẽ nhavõ ou retave 'rã Davi ptyvõarã. Ha'e rami py mbovy e'ŷ ikuai ixondaro kuery, Nhanderuete pegua xondaro kuery hetaa rami.

Hebrom tetā py xondaro kuery Davi nguvixaverã omoĩ okuapyague

²³ Pova'e avakue ma joe opu'ã aguã katy guarã hembiporu va'e Davi Hebrom py oĩa py ou va'ekue, Saul rekoria ha'e ju nguvixaverã omoĩ aguã, SENHOR ijayvuague rami vy.

²⁴ Ha'e gui Judá ramymino kuery regua hu'y jokoa ha'e imo'ãa tuvixa va'e oguereko va'e ha'e javi vy ma seis mil e oitocentos ou, joe opu'ã aguã katy guarã hembiporu va'e meme.

²⁵ Ha'e gui Simeão ramymino kuery regua avakue joe opu'ã aguã ipy'a guaxu va'e ma sete mil e cem ou.

²⁶ Levi ramymino kuery regua ma quatro mil e seiscentos ou.

²⁷ Joiada ma Arão ramymino kuery ruvixa oiko va'e vy ngupive três mil e setecentos avi ogueru.

²⁸ Ha'e gui Zadoque ma kunumi teri va'eri ava ipy'a guaxu va'e vy ogueru avi vinte e dois huvixa kuery nguu ro py ikuai va'ekue.

²⁹ Benjamim ramymino kuery regua, Saul regua kuery ma três mil ou. Mba'eta ha'e va'e jave py heta teri ikuai Saul-a katyguia.

³⁰ Efraim ramymino kuery regua ma vinte mil e oitocentos avakue ipy'a guaxukueve ha'e omboetevepy nguu ro py ikuai va'ekue.

³¹ Manassés regua mbyte rupi oja'o va'ekue ma dezoito mil ikuai hery rupi oiporavo pyre Davi nguvixaverã omoĩ aguã ou va'ekue.

³² Issacar ramymino kuery regua ou ha'e va'e ára Israel kuery mba'e pa ojapo aguã re oikuua pota kuaa va'e. Ha'e rami vy ou duzentos huvixa kuery, guyvy kuery hembiguai ikuai va'e meme reve.

³³ Ha'e gui Zebulom regua joe opu'ãa katy oo va'e, opa marãgua tembiporu oguereko va'e ma cinqüenta mil ikuai. Ha'e kuery ma joguero'a aguã py ikyre'ŷ va'e, ndokyje kuaai guive.

³⁴ Naftali rekoa gui ma mil xondaro ruvixa ou. Ha'e va'e kuery reve ou avi trinta e sete mil hu'y jokoa ha'e hu'y guaxu tuvixa va'e reveguia.

³⁵ Dã ramymino kuery regua ma vinte e oito mil e seiscentos ou joe opu'ã aguã katy guarã hembiporu va'e.

³⁶ Aser guigua ma quarenta mil ou joe opu'ã aguã katy guarã hembiporu va'e, joguero'a kuaa rei va'e.

³⁷ Jordão yakã rovai guigua Rúben, Gade ha'e Manassés regua kuery mboae ma cento e vinte mil ou okuapy opa marãgua tembiporu oguereko va'e joe opu'ã aguã.

³⁸ Ha'e va'e avakue joe opu'ã aguã ombo'e pyre ma Hebrom tetā py ou okuapy Davi omoĩ aguã Israel kuery ha'e javi ruvixaverã. Ha'e gui Israel kuery ndoui va'e voi peteĩ rami Davi omoĩxe avi okuapy nguvixaverã.

³⁹ Ha'e py ma ikuai mboapy ára re Davi oĩa py. Ha'e rami vy okaru ha'e oy'u okuapy ha'e py, ho'u va'erã tyvy kuery ome'ẽmba rire.

⁴⁰ Ha'e rami ae ha'e'i rupi ikuai va'e, Issacar, Zebulom ha'e Naftali guigua kuery ogueru avi okuapy tembi'u. Mburika áry, camelo, kavaju ha'e vaka áry ogueru farinha, figo ha'e uva'a pirukue, vinho, azeite, vaka ha'e vexa'i guive, mymba kyrigueve'i voi ogueru oata aguã rami e'ŷ, mba'eta Israel kuery ový'a ete okuapy.

¹ Ha'e gui ma Davi jogueroayvu huvixa kuery mil ha'e cem re opena va'e kuery, ha'e yvatekueve ikuai va'e reve.

² Ha'e vy Israel kuery ha'e javi pe aipoe'i onhemboatya py:

— Xapy'a rei pejou porā ri ramo, ha'e SENHOR Nhanderuete guigua ri ramo ma nhamondouka pojava 'rā ayvu mombe'uarā nhanderyvy kuery Israel yvy ha'e javi rupi ikuai va'e pe, sacerdote kuery pe, ha'e Levi regua kuery tetā ha'e ijyvýry rupi ikuai va'e ha'e javi pe, ha'e kuery ono'ombā avi aguā nhande reve.

³ Aŷ gui ma jaru ju 'rā Nhanderuete ayvu ryru nhanderekoa py. Mba'eta Saul oĩ teri jave py ha'e va'e re nanhapenavei ranhe va'ekue — he'i.

⁴ Ha'e ramo ono'ombā va'e ha'e javi ojou porā okuapy ha'e rami ae ojapo aguā, iporā va'ea oikuua pavē vy.

2 Samuel 6.1-11

⁵ Ha'e gui ma Davi omboaty Israel kuery ha'e javi Egito yvy re Sior oĩ va'e guive Hamate py nhavāea peve, Nhanderuete ayvu ryru ogueru aguā Quiriate-Jearim py oĩa gui.

⁶ Ha'e rami vy Israel kuery ha'e javi reve Davi oje'oi Baalá Quiriate-Jearim hery mboae va'e, Judá re oĩ va'e py, Nhanderuete ayvu ryru ogueru aguā ha'e gui. Ha'e va'e renonde ma SENHOR rery re ima'endu'aa riae, anjo kuery ipopo va'e ikuai va'e áry oguapy oiny va'e re.

⁷ Ha'e rami vy Nhanderuete pegua hyru omoĩ okuapy peteĩ karóxa ipyau va'e áry. Abinadabe ro gui ogueru okuapy. Uzá ha'e Aiô oje'oi karóxa reraarā.

⁸ Israel kuery ha'e javi reve Davi ov'y'a ov'y'a Nhanderuete renonde rupi ombaraetea ha'e javi reve, oporaei okuapya py, ixā reta va'e pu reve, mbaraka, pandeiro ha'e hy'a pu py, mimby guaxu omonhe'ea py guive.

⁹ Ha'e gui Quidom mba'emo moa'yīaty re ovaẽa py vaka onhepyxanga rā Uzá opoko hyru re ho'a e'ŷ aguā.

¹⁰ Uzá hyru re opoko ramo hovai SENHOR poxya hendy vy oity. Ha'e pyve omano Nhanderuete renonde.

¹¹ SENHOR Uzá ojuka rā Davi ndojou porāi. Ha'e vy ha'e va'e tekao omboery Perez-Uzá, aŷ peve guarā.

¹² Ha'e va'e ára Nhanderuete gui Davi okyje vy aipoe'i:

— Mba'exā vy nda'u aru 'rā Nhanderuete ayvu ryru? — he'i.

¹³ Ha'e rami vy Davi ndogueruxevei SENHOR ayvu ryru guekoa katy. Ha'e rami 'rāgue py Gate guigua Obede-Edom va'e ro py ranhe ogueraa uka.

¹⁴ Mboapy jaxy re Nhanderuete ayvu ryru opyta Obede-Edom kuerya py. Ha'e rā SENHOR omoingo porā Obede-Edom ro pygua kuery ha'e mba'emo oguereko va'e ha'e javi.

14

2 Samuel 5.11,12

¹ Davi oĩa py Tiro pygua huvixa Hirão ombou ayvu mombe'uarā. Ogueru ruka avi yvyra yary, oo apoa ha'e ita re ombe'apo va'e kuery, hoorā ojapo va'erā.

² Ha'e ramo Davi oikuua SENHOR omoĩ atāvea Israel re opena aguā, ha'e ombopo'akave ojeupegua kuery re oma'ê vy.

2 Samuel 5.13-16; 1 Crônicas 3.5-8

³ Jerusalém tetā py Davi ojouve kunhague gua'yxy jevyrā. Ha'e vy ikuaise ju ta'y ha'e tajy kuery.

⁴ Po rami ma Jerusalém py itui'i va'ekue rery: Samua, Sobabe, Natā, Salomão,

⁵ Ibar, Elisua, Elpelete,

⁶ Nogá, Nefegue, Jafia,

⁷ Elisama, Beeliada ha'e Elifelete.

2 Samuel 5.17-25

⁸ Filisteu kuery oendu avi okuapy Davi omoĩa Israel kuery ha'e javi ruvixarā. Ha'e vy oje'oipa ojopy aguā Davi. Ha'e nunga Davi oendu vy ha'e voi oo avi ha'e kuery ovaexī aguā.

⁹ Ha'e rā filisteu kuery ou Refaim yvyugua py mba'emo oipe'apa aguā.

¹⁰ Davi ma SENHOR pe oporandu vy aipoe'i:

— Taa pa filisteu kuery rovai? Remboaxa 'rā teve xepo py?

SENHOR ombovai:

— Tereo, mba'eta amboaxa 'rā ndepo py — he'i.

¹¹ Ha'e ramo Davi Baal-Perazim py oo vy oitypa ha'e py. Ha'e vy aipoe'i:

— SENHOR xepo rupi omoaīmba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami — he'i. Ha'e nunga rupi ha'e va'e tekao oenoña Baal-Perazim.*

¹² Ha'e py ma filisteu kuery oejapa oje'oivy nguuete kuery ra'angaa. Ha'e rā Davi oapy ukapa tata py.

¹³ Ha'e gui filisteu kuery ou nho ju yvyugua gui mba'emo oipe'apa aguā.

¹⁴ Peteīgue ju Nhanderuete pe Davi oporandu ramo ombovai:

— Tereo eme hakykue rupi. Ha'e rami 'rāgue py hakykue katy rupi ranhe 'rā pejeapa, ha'e gui ma ha'e kuery re pepu'ã 'rā amora ikuai va'e guy rupi.

¹⁵ Ha'e gui xapy'a rei rendu 'rā amora ty rovapy rupi opyrō-pyrō nhendu va'e. Ha'e va'e rendu ramove peẽ 'rā ha'e kuery re pepu'ã aguā. Ha'e va'e ma nerentonde Nhanderuete oo nhendua, filisteu kuery ijaty okuapy va'e jukapaarā — he'i.

¹⁶ Nhanderuete ojapo ucaa rami Davi ojapo vy ojukapa filisteu kuery Geba guive Gezer py ovaēa peve.

¹⁷ Ha'e rami vy ha'e va'e yvy jave rupi Davi rery re ima'endu'aave ovy, mba'eta SENHOR ojapo Davi gui pavē regua okyje aguā rami.

15

Levita kuery lei ryru reraarā omoīague

¹ Ha'e gui Davi pegua tetā 'epy va'e py ojapo ngoorā. Oguereko katu avi Nhanderuete ayvu ryru oĩ aguā, ha'e hi'áry guarā ma peteī oo'i ojapo.

² Ha'e gui Davi aipoe'i:

— Avave rei nda'evei Nhanderuete ayvu ryru ogueru aguā levita kuery e'ŷ vy, SENHOR ae omoī rire oayvu ryru reraarā, ha'e ixupe anho ombo'epo riae aguā raka'eve rā peve guarā — he'i.

³ Ha'e nunga rupi Jerusalém tetā py Davi omboatypa Israel kuery ha'e javi, SENHOR ayvu ryru ogueru aguā oĩ aguā ojapo va'ekue py.

⁴ Davi omboaty avi Arão ramymino kuery, levita kuery guive, po rami hery va'e:

⁵ Coate ramymino kuery va'e regua ma huvixa Uriel ha'e tyvy kuery reve vy cento e vinte ikuai,

⁶ Merari ramymino kuery va'e regua ma huvixa Asaías ha'e tyvy kuery reve vy duzentos e vinte ikuai,

⁷ Gérson ramymino kuery va'e regua ma huvixa Joel ha'e tyvy kuery reve vy cento e trinta ikuai,

⁸ Elisafā ramymino kuery va'e regua ma huvixa Semaías ha'e tyvy kuery reve vy duzentos ikuai,

⁹ Hebrom ramymino kuery va'e regua ma huvixa Eliel ha'e tyvy kuery reve vy oitenta ikuai,

¹⁰ Uziel ramymino kuery va'e regua ma huvixa Aminadabe ha'e tyvy kuery reve vy cento e doze ikuai.

¹¹ Davi oenoī avi sacerdote kuery va'e regua Zadoque ha'e Abiatar, ha'e gui levita kuery Uriel, Asaías, Joel, Semaías, Eliel ha'e Aminadabe.

¹² Ha'e vy aipoe'i ha'e kuery pe:

— Peẽ kuery ma levita kuery akā peiko. Pejeky'a'o uka ke ha'vy penderyvy kuery reve, SENHOR Israel kuery ruete ayvu ryru Peru aguā hendarā areko katu va'ekue py.

¹³ Mba'eta jypy peẽ kuery ndaperui ramo SENHOR Nhanderuete ipoxy va'ekue nhande kuery rovai, ojapo ukaague rami e'ŷ jaru rire — he'i.

* ^{14:11} Tery Baal-Perazim ma “Senhor omoaīmba” 'ea.

¹⁴ Ha'e rami rā sacerdote kuery ojeky'a'o uka okuapy, levita kuery guive, SENHOR Israel kuery ruete ayvu ryru ogueru aguã.

¹⁵ Ha'e rami vy levita kuery ogueru okuapy Nhanderuete ayvu ryru oaxi'y áry, hi'yrā omoī va'ekue reve, SENHOR ijayvuague rami vy Moisés ojapo ukaague rami vy.

Imba'epua rupi ikuai va'erā omoīague

¹⁶ Ha'e gui Davi aipoe'i levita ruvixa kuery pe guyvy kuery regua omoī aguã oporaei va'erā. Ha'e va'e kuery ma mba'epu reve, mbaraka, mba'epu ixā reta va'e ha'e hy'a pu reve ov'y'aa rupi oporaei aguã pavē oendu aguã rami.

¹⁷ Ha'e ramo levita kuery oiporavo Joel ra'y Hemā tyvy kuery regua Berequias ra'y Asafe reve, Merari ramymino kuery va'e regua Cusaías ra'y Etā guive.

¹⁸ Ha'e kuery reve ma tyvy kuery yvyīgueve avi. Ha'e va'e kuery ma Zacarias, Bene, Jaaziel, Semiramote, Jeiel, Uni, Eliabe, Benaia, Maaséias, Matitias, Elifeleu ha'e Micnéias, ha'e gui Obede-Edom ha'e Jeiel ma okē raroärā ikuai.

¹⁹ Ha'e rami py oporaei va'e Hemā, Asafe ha'e Etā ma onhendu 'rā okuapy hy'a pu overa va'e guigua py.

²⁰ Ha'e rā Zacarias, Aziel, Semiramote, Jeiel, Uni, Eliabe, Maaséias ha'e Benaia ma mbaraka reve 'rā oporaei yvatea py.

²¹ Matatias, Elifeleu, Micnéias, Obede-Edom, Jeiel ha'e Azazias ma oporaeia py ombo-joguy 'rā ixā reta va'e, irundy meme xā oña peve.

²² Ha'e gui Quenanias levita kuery oporaeia re opena va'e ma jogueroporaeiarā omoī mbyre, ha'e rami aguã oikuaave va'e ramo.

²³ Berequias ha'e Elcana ma lei ryru oña rokē rarōarā omoī.

²⁴ Ha'e rā Sebanias, Josafá, Natanael, Amasai, Zacarias, Benaia ha'e Eliézer sacerdote ikuai va'e ma omonhe'ẽ 'rā okuapy mimby guaxu, Nhanderuete ayvu ryru renonde py. Ha'e gui Obede-Edom ha'e Jeás ma hyru oña rokē rarōa avi ikuai.

Jerusalém tetā py lei ryru ogueru okuapyague

²⁵ Ha'e gui ma Davi ha'e Israel regua nhomongetaa kuery reve oje'oi, xondaro kuery ruvixa ikuai va'e reve. Ovy'aa rupi jogueraa Obede-Edom ro gui ogueru aguã SENHOR guexeve guarā ojapo va'ekue ryru.

²⁶ Ha'e gui levita kuery hyru oguerua rupi Nhanderuete oipytyvō ramo ixupe ome'ẽ okuapy sete vaka ra'y ha'e sete vixa'i ojuka vy.

²⁷ Ha'e rā Davi ma onhemonde ov'y peteī ao puku xiī porā rei ha'e ipererī'i va'e py. Ha'e rami ae avi levita kuery hyru reraa voi onhemonde okuapy, ha'e oporaei va'e kuery, hyru reraa kuery ha'e oporaei va'e kuery re opena va'e Quenanias guive. Davi onhemonde avi manto sacerdote pegua, ajukue ipererī'i va'e guigua.

²⁸ Ha'e rami py Israel kuery ha'e javi ov'y'a reve ogueru okuapy SENHOR guexeve guarā ojapo va'ekue ryru, mimby ha'e mimby guaxu omonhe'ẽ reve, ha'e hy'a pu, mbaraka ha'e ixā reta va'e omonhendu ratāa rupi.

2 Samuel 6.16,20-22

²⁹ SENHOR guexeve guarā ojapo va'ekue ryru Davi rekoia py ogueroikea jave ma Saul rajykue Mical janela gui oma'ẽ ho'amy. Ha'e rami vy huvixa Davi ov'y'aa rupi ojeroky oikovy rā oexa vy ndojou porāi opy'a py.

Mba'emo ome'ẽ okuapyague

¹ Ha'e rire ma Nhanderuete pegua hyru ogueroike vy omoī oo'i Davi ojapo va'ekue mbyte py. Nhanderuete renonde py ogueru avi okuapy mba'emo oapy reve ome'ẽ va'erā, hexeve peteī rami ju ikuia regua guive.

² Ha'e gui opa ma oapy va'erā ha'e hexeve peteī rami aguã regua Davi ome'ẽmba ma vy SENHOR rery rupi ogueroayvu porā heta va'e kuery ha'e javi.

³ Ha'e gui ma Israel kuery avakue ha'e kunhague ikuai va'e peteī-teī pe omboja'o peteī mbojape, xo'o ra'ykue ja'ea'-ea ha'e uva'a pirukue.

⁴ Omoī avi levita kuery va'e regua SENHOR ayvu ryru renonde rupi ikuai va'erā, SENHOR Israel kuery ruete oguerovy'a, ogueroporaei ha'e omboete aguā. Ha'e va'e kuery ma pova'e:

⁵ huvixa Asafe, ha'e gui mokoīa ma Zacarias, ha'e va'e rire ma Jeiel, Semiramote, Jeiel mboae, Matitias, Eliabe, Benaia, Obede-Edom ha'e Jeiel mboapya mbaraka ha'e ixā reta va'e reve guarā. Ha'e gui Asafe ma omonhendu ratāve 'rā hy'a pu.

⁶ Ha'e gui sacerdote kuery Benaia ha'e Jaaziel ma mimby guaxu omonhe'ēa rupi riae 'rā ikuai Nhanderuete guexeve guarā ojapo va'ekue ryru oīa renonde rupi.

Salmos 105, 96, 106

⁷ Ha'e va'e ára ma Davi omoī ypy'i Asafe ha'e tyvy kuery SENHOR pe oporaeia rupi oguerovy'a aguā. Aipoe'i:

⁸ — Perovy'a SENHOR, hery rupi pejapukai.

Yvy regua kuery pe peikuaa uka ojapo va'ekue.

⁹ Peporaei ke ixupe, peporaei salmos.

Pemombe'upa ke nhomondyipaarā ojapo va'ekue.

¹⁰ Perovy'a hery iky'a e'ŷ va'e.

SENHOR oeka va'e kuery tovy'a opy'a py.

¹¹ Peka SENHOR, ipo'akaa guive.

Peka ke henonde peī riae aguā.

¹² Penema'endu'a ke mba'emo porā ojapo va'ekue re,
nhomondyipaa ha'e oipota va'e re ijayvuague re,

¹³ peē hembiguai Israel ramymino kuery,
peē Jacó ra'y kuery hembiporavo pendekuai va'e.

¹⁴ Ha'e ma SENHOR Nhanderuete.

Oipotaa ma yvy jave re ojekuaa.

¹⁵ Ima'endu'a riae 'rā guexeve guarā ojapo va'ekue re,
mbovy rei e'ŷ ikuai va'erā peve guarā ayvu ome'ē va'ekue re,

¹⁶ Abraão reve ngupive guarā ojapo va'ekue re,
Isaque pe ouraa rupi ijayvuague re guive.

¹⁷ Ha'e nungakue re ma Jacó reve ju ijayvu,
raka'e rā peve guarā re ijayvu Israel reve.

¹⁸ Ha'e vy aipoe'i:

“Ndevy ame'ē 'rā Canaã yvy penemba'erā”, he'i.

¹⁹ Ha'e jave py ha'e kuery mbovy'i teri ikuai,
yvy mboae guigua mbovy'i ete ikuai raka'e,

²⁰ oguata va'ekue yvy mboae-ae ikuai va'e rupi,
joyvy-yvy re.

²¹ Ha'e rami teī avave rei pe ha'e ndoguerekō axy ukai.

Ha'e kuery re oma'ē vy ijayvu ete huvixave ikuai va'e pe.

²² Ha'e vy aipoe'i: “Emoī eme ndepo xerembiporavo kuery re,
pereko axy eme xevygua profeta kuery”, he'i.

²³ Peporaei ke SENHOR pe yvy jave regua kuery!

Ko'ē nhavō peikuaa uka nhandereraa jepea.

²⁴ Yvy regua kuery pe peikuaa uka hexakāa,
ha'e javi regua pe pemombe'u mba'emo porā ojapoa.

²⁵ Mba'eta SENHOR ma yvate ete va'e.

Ha'evea rami ixupe japoraeia,

tuuete ikuai va'e gui okyjevepy oiko.

²⁶ Mba'eta yvy regua kuery ruete ha'e javi ma mba'emo ra'angaa rive.

Ha'e rā SENHOR ma yva apoare.

²⁷ Henonde ma guexakāa ha'e ijyvatea oexa uka.

Ipo'akaa ha'e iporãa ojekuaa ixupegua henda iky'a e'ŷ va'e py.

²⁸ Yvy regua ha'e javi, peroporaei ke SENHOR!
Peroporaei SENHOR rexakãa ha'e ipo'akaa.

²⁹ Peroporaei SENHOR rery iporã ete ramo.
Peme'ẽ va'erã peru vy peroike ixupegua roka py.
Pembojerovia SENHOR iky'a e'ŷa rexakãa py.

³⁰ Yvy jave regua kuery, peryryipa henonde.
Mba'eta yvy omoõ atã raka'e omyí e'ŷ aguã rami.

³¹ Ha'e nunga rupi tovy'a yva ha'e yvy.
Yvy regua kuery ikuai rupi “SENHOR ma huvixave oĩ”, peje.

³² Taevovo ye'ẽ ha'e hexe ikuai va'e ha'e javi!
Tovy'a nhuündy ha'e hexe ikuai va'e ha'e javi!

³³ Tovy'apa yvyra ka'aguy re ikuai va'e Senhor renonde,
mba'eta ou 'rã yvy regua kuery re oikuua pota aguã.

³⁴ Perovy'a ke SENHOR, porayvu va'e ramo,
mba'eta nhomboaxyo opa va'erã e'ŷ.

³⁵ Ha'e gui aipopeje: “Oreruete orereraa jepea, orereraa jepe ke!
Oremboatypa ju, orereraa jepe ke yvy regua kuery gui,
nderery iky'a e'ŷ va'e rupi roguerovy'a aguã,
ha'e rovy'aa rupi rogueroporaei aguã.”

³⁶ Ima'endu'a porãmby toiko SENHOR Israel kuery Ruete
aŷ, ha'e raka'e rã peve! — he'i.
Ha'e ramo heta va'e kuery “Amém!” he'i vy ogueroporaei okuapy SENHOR.

SENHOR pe mba'emo ojapo va'erã Davi omoïve juague

³⁷ Ha'e ramo SENHOR guexeve guarã ojapo va'ekue ryru oĩa renonde py ae Davi omoõ Asafe tyvy kuery reve, ha'e kuery opena riae aguã henonde py, ko'ẽ nhavõ opena ukaague rami vy.

³⁸ Omoõ avi Obede-Edom tyvy kuery ha'e javi reve, sessenta e oito ha'e javi vy. Jedutum ra'y Obede-Edom ha'e Hosa ma omoõ okẽ re opena va'erã.

³⁹ Ha'e rã sacerdote Zadoque ha'e tyvy sacerdote ikuai va'e ma omoõ oo'i SENHOR pegua Gibeão yvy'ã re oĩ va'e renonde rupi ikuai va'erã,

⁴⁰ altar oĩ va'e áry SENHOR pe mba'emo oapy reve ome'ẽ riae aguã, aje'ivekue ha'e ka'arukue. Ha'e rami ikuai Israel kuery pe SENHOR lei oeja va'ekue re ipara oĩa ha'e javi rami.

⁴¹ Ha'e kuery reve omoõ avi Hemã ha'e Jedutum, ikuaise ju hery rupi oiporavo pyre SENHOR pe oporaei va'erã, mba'eta nhanemboaxyo rupi oiko riae 'rã raka'e rã peve.

⁴² Ha'e kuery reve ikuai avi Hemã ha'e Jedutum mimby guaxu omonhe'ẽ aguã, ha'e hy'a pu ha'e mba'epu Nhanderuete pe ombopu aguã. Ha'e rã Jedutum ra'y kuery ma okẽ rarõa ikuai.

⁴³ Ha'e va'e rire mae ma onhemboaty va'ekue peteĩ-teĩ ngoo katy oje'oi. Davi voi oo ju ngoo pygua kuery ogueroayvu porã aguã.

17

2 Samuel 7.1-17

¹ Ha'e gui huvixa Davi ngoo py ae oiko vy aipoe'i profeta Natã pe:
— Ma'ẽ, xee ma xero ainy yary guigua py, ha'e rã Nhanderuete guexeve guarã ojapo va'ekue ryru ma oo'i py rive oĩ.

² Natã ombovai huvixa pe:
— Tereo, ejapo ndepy'a re rendu va'e ha'e javi, mba'eta ndereve Nhanderuete oiko — he'i.

³ Ha'e va'e pyavyve SENHOR oayvu ombou Natã pe. Ha'e vy aipoe'i:

⁴ — Tereo ha'e aipo're xerembiguai Davi pe: “Po rami SENHOR ijayvu: ‘Ndee ma oo xee aĩ aguã apoarã e'ŷ reiko.

5 Mba'eta neĩ peteĩve oo py ma voi xee naĩ teri Israel kuery Egito gui arupa guive aŷ peve. Ha'e rami 'rāgue py oo'i py rive aiko va'e, xembojerovia aty py ae mamo rā oĩa rupi rei.

6 Opa rupi Israel kuery aru herekovya rupi nda'u xeayvu ri raka'e amongue herekoia pe, e'ŷ vy xevygua kuery re apena uka va'ekue pe nda'u aipoa'e: “Mba'e re tu nderejapoi peteĩ xerorā yary guigua?” ha'e teve?

7 Ha'e gui aŷ ma po rami 'rā ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexa'i kuery re repenaa gui, ha'e hakykue reikoa gui, huvixarā xevygua Israel kuery re ju repena aguã.

8 Xee aa avi karamboae ndereve, reoa rupi tema. Nderovaigua kuery amomba nerentonde gui, amboyvate guive nderery, ipo'akakueve anho ikuia rami.

9 Areko katu avi xevygua Israel kuery ikuai aguã, amboekoapa guive ha'e py, mava'eve omoangekoave e'ŷ aguã, ha'e heko vai va'e ombojexavaive e'ŷ aguã jypy guare rami e'ŷ,

10 xevygua Israel kuery rerekoarā amoña ára guive. Ha'e rami avi nderovaigua kuery aitypa, ha'e aikuua uka pova'e: Xee SENHOR ae 'rā ajapo oo ndevy.*

11 Mba'eta nderekovea opa rā nderu kuery ooague py ndereraa avi ma jave nderekovia amoingo 'rā ndeguigua, ndera'y kuery ramymino va'e regua. Ha'e va'e ma ajapo 'rā ipo'akaa oĩ atã aguã rami.

12 Ha'e va'e ae ma ojapo 'rā peteĩ oo xevy guarã, ha'e rā xee ajapo 'rā raka'e rā peve huvixave oĩ aguã rami.

13 Xee ma tuu 'rā, ha'e rā ha'e ma xera'y 'rā oiko. Ha'e rami vy ixugui ndaipe'ai 'rā amboaxya, ndee reĩ e'ŷ mbove guare gui aipe'a vy namboaxyveiague rami e'ŷ.*

14 Ha'e rami 'rāgue py ha'e va'e amoñ atãve 'rā xero re opena aguã, ha'e huvixave oĩ riae aguã rami. Ha'e ramo huvixave oĩ riae 'rā raka'e rā peve', he'i.”

15 Ha'e va'e ayvu ha'e javi, Natã pe oikuua ukaague rami ae Davi pe ju omombe'u.

2 Samuel 7.18-29

16 Ha'e gui ma SENHOR pegua opy Davi oike vy hi'aĩ henonde. Ha'e vy aipoe'i:
— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguã?

17 Xeruete, ha'e nunga tu ndevy pe mba'e'ŷ rima, ndeayvu ma voi guive xee nerembiguai ro pygua raka'e rā guarã re. SENHOR Xeruete, ha'e rami xereroayvu porã avakue omboetevepy rami.

18 Xee nerembiguai Davi nami xemboete uka rire mba'e ta'eve ju ndevy? Mba'eta ndee ma xee nerembiguai xekuua porã.

19 SENHOR, nerembiguai remboaxya ha'e ndepy'a re rendua rami vy rejapo kova'e nunga tuyixa va'e ha'e javi, oikuua pavẽ aguã.

20 Ha'e nunga rupi SENHOR Xeruete, ndoikoi ndee ramigua ete'i, ndoikoi guive Oreruete mboae ndee e'ŷ vy, oreapyxa py ae roenduague rami.

21 Mava'e regua tu ndevygua Israel kuery ikuia ramigua? Xeruete, ha'e kuery anho'i ae yvy re ikuai va'e mbyte gui ndejeupe guarã reipe'a va'ekue. Mba'emo porã ete rejapo py ndejeupe ae rejapo aguã nderery re ima'endu'aa aguã rami. Mba'eta yvy regua kuery remoxẽmba raka'e, ndevygua kuery Egito gui renoẽmba va'ekue renonde gui.

22 Israel kuery ndejeupe guarã ae remoingo raka'e rā peve, ha'e gui SENHOR, ndee ju renhemongo Tuuete.

23 Ha'e gui aŷ ma SENHOR, ha'e va'e ayvu xee nerembiguai rekorã re aipo'reague, ha'e xero pygua re voi, toĩ atãve. Ejapo ndeayvuague rami ae.

24 Nderery toikuua pavẽ, tomboetea riae, ha'e vy aipo ta'ea: “ SENHOR ixondaro reta va'e ma Israel kuery Ruete, Israel kuery pegua ae”, ta'ea. Ha'e ramo xee Davi nerembiguai ro ma oĩ atã riae 'rā nerentonde.

* 17:10 Oo ojapo aguã re SENHOR ijayvua py ma raka'eve rā Davi ramymino kuery regua huvixarā omoingo aguã re ijayvu (versículos 12,16). Ha'e va'e regua Jesus Cristo ae oiko (Lucas 1.32-33,69; Atos 13.23). Ha'e rami avi “Israel ro” he'ia ma Israel ramymino kuery re ijayvu vy. * 17:13 Hebreus 1.5, Apocalipse 21.7

²⁵ Mba'eta Xeruete, xee nerembiguai pe reikuua uka xevy pegua oorā rejapo 'rāa. Ha'e nunga rupi ae xee nerembiguai xepy'a guaxu nami anhembo'e aguā ndevy.

²⁶ Aŷ ma SENHOR, ndee ae ma Oreruete, ha'e xee nerembiguai pe rejapo porā aguā re ndeayvu.

²⁷ Ha'e nunga rupi aŷ, emingo porā nerembiguai ro pygua kuery, nerondenre rupi orekuai riae aguā rami. Mba'eta SENHOR, ndee orereroayvu porā rire raka'e rā peve 'rā roiko porā — he'i.

18

2 Samuel 8.1-14

¹ Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi Gate tetā ha'e ijyvýry rupi tekoia ikuai va'e.

² Oitypa avi Moabe pygua kuery. Ha'e rire Davi rembiguairā ikuai, ixupe mba'emo ome'ẽ 'rā okuapy guive.

³ Ha'e gui Zobá pygua huvixa Hadadezer ma yakā Eufrates re ipo'aka ju aguā oo jave hexe voi Davi ipo'aka Hamate peve.

⁴ Ixupeguia kavaju árygua kuery regua ma Davi ogueraa mil e setecentos, vinte mil avakue yvy rupigua reve. Davi ojajapa avi kavaju karóxa regua pytaxā, cem ete'i ojaya e'ŷ re oeja.

⁵ Ha'e ramo Síria pygua avakue ou Damasco gui, huvixa Zobá pygua Hadadezer pytyvõarā. Ha'e rami teī Síria guigua ma Davi ojuka vinte e dois mil.

⁶ Ha'e gui Síria Damasco regua py Davi omoõ harõarā kuery. Síria pygua kuery voi Davi rembiguairā ikuai vy mba'emo ome'ẽ 'rā okuapy ixupe. Davi ooa nhavõ rupi SENHOR ombopo'akave tema.

⁷ Hadadezer rembiguai kuery yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.

⁸ Hadadezer pegua tetā Tibate ha'e Cum gui voi huvixa Davi oipe'ave tema overa va'e guigua. Ha'e va'e overa va'e gui ma Salomão ojapo 'rā yy mbotya, oo ytarā ha'e tembiporu.

⁹ Ha'e gui Hamate pygua huvixa Toú oendu Zobá pygua huvixa Hadadezer pegua xondaro kuery Davi oitypaague.

¹⁰ Ha'e vy Davi-a py huvixa ombou gua'y Hadorão oxarura vy oguerovy'a aguā Hadadezer reve joguero'aa py oitypaague re (mba'eta Toú reve Hadadezer joguero'a avi tema rire). Hadorão ou vy ogueru mba'emo ouro, prata ha'e overa va'e guigua ome'ẽ va'erā.

¹¹ Ha'e nunga huvixa Davi ojopy vy omboaxapa SENHOR peguarā, ha'e javi regua gui prata ha'e ouro ojopy va'ekue reve: Edom guigua, Moabe, Amom ramymino kuery, filisteu kuery ha'e Amaleque guigua guive.

¹² Ha'e gui Zeruia pi'a Abisai ojuka avi dezoito mil Edom pygua juky yvyugua 'epy va'e py.

¹³ Edom re voi omoõ harõarā kuery. Ha'e ramo Edom pygua kuery ha'e javi ikuai Davi rembiguairā. Davi ooa nhavõ rupi SENHOR ombopo'akave tema.

2 Samuel 8.15-18; 20.23-26

¹⁴ Ha'e rami vy Davi opena Israel kuery ha'e javi re. Mba'emo re oikuua potaa py ha'evea rami meme oguereko.

¹⁵ Ixupeguia xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

¹⁶ Sacerdote ma Aitube ra'y Zadoque, ha'e gui Abiatar ra'y Abimeleque ju. Kuaxia re opena va'ety ma Sausa.

¹⁷ Huvixa ro rarõa kuery ruvixa ma Joiada ra'y Benaia. Ha'e rā huvixa Davi reveguia yvatekueve ma ta'y kuery ae.

19

2 Samuel 10.1-19

¹ Ha'e rire ma Amom kuery ruvixa Naás omano, ha'e rā ta'y ju oī nguu rekovia.

² Ha'e ramo Davi aipoe'i:

— Naás ra'yke Hanum pe aexa uka 'rā ayvua, tuu xerayvu rire — he'i. Ha'e rami vy Davi omondouka guembiguai kuery ombopy'a porā ju aguā tuu omanoague gui. Ha'e gui Davi rembiguai kuery ovaē Amom kuery yvy re, Hanum ombopy'a porā aguā.

³ Ha'e rami teī Amom regua yvatekueve aipoe'i okuapy Hanum pe:

— Rexa'ā teve Davi nderu rāgue'i omboetea rupi guembiguai ombou nembopy'a porāarā? Xapy'a rei ma ndea py merami guembiguai kuery ombou vy neretā re oikuua pota ha'e nhandeyvy re oexa pota rire ombovaipa aguā e'ŷ teve? — he'i okuapy.

⁴ Ha'e rami rā Hanum omboty Davi rembiguai kuery, ha'e vy onhopī hentyva, ija ojaya guive hevi ro'o ojekuaa peve. Ha'e rire ma omondouka ju.

⁵ Ha'e ramo amongue oje'oi vy Davi pe omombe'upa hembiguai kuery re oiko va'ekue. Ha'e kuery omoxīmbaa rire huvixa ombou ayvu mombe'uarā ha'e kuery ovaexī aguā. Aipoe'i uka:

— Pepyta ranhe Jericó tetā py, penerendyva ipukupa ju peve. Ha'e rire ma peju ju — he'i uka.

⁶ Amom kuery oikuua okuapy Davi nda'ija'evei aguā rami ojapoa. Ha'e rami vy Hanum ha'e Amom kuery omondouka trinta e três mil quilos prata guigua, Mesopotâmia gui ojeupe guarā ogueru ruka aguā karóxa ha'e kavaju árygua kuery, Síria pygua kuery Maaca ha'e Zobá gui guive.

⁷ Ha'e rami vy ojeupe guarā ogueru ruka trinta e dois mil karóxa ha'e Maaca pygua huvixa ixupeguia kuery reve. Ha'e kuery ha'e javi ou vy Medeba tetā rexei'i ikuai. Amom kuery voi guetā ikuai va'e ha'e javi gui ou vy ono'õmba avi. Ha'e rami vy mae ma oje'oi joe opu'ā aguā katy.

⁸ Ha'e nunga Davi oendu vy ha'e kuery rovai ombou Joabe oxondaro kuery ipy'a guaxukueve ha'e javi reve.

⁹ Amom kuery oje'oi vy oarō okuapy tetā kora rokē py joe opu'ā aguā. Ha'e rā huvixa kuery ipytyvōarā ou va'ekue ma amboae rupi ranhe ikuai nhuñdy rupi.

¹⁰ Ha'e gui Joabe oexa hovaigua kuery henonde ha'e hakykue katy gui voi oarō okuapy rā, ha'e rami vy Israel kuery ikuai va'e gui opu'ā kuaave va'e oiporavo vy omboyxy imbokuapy Síria pygua kuery rovai.

¹¹ Ha'e rā hembyrekue ma guyvy Abisai po py omboaxa, ha'e rā ha'e ma Amom kuery rovai ju omboyxy imbokuapy.

¹² Ixupe Joabe aipoe'i:

— Xapy'a rei Síria pygua kuery xegui imbaraeteve ramo ndee reo 'rā xepytyvō aguā. Ha'e rā Amom kuery ri ndegui imbaraeteve ramo xee aju 'rā roipytyvō vy.

¹³ Nhanembaraete ke ha'vy. Jajoguero'a nhandepy'a guaxua rupi nhaneretarā kuery ha'e Nhanderuete pegua tetā ikuai va'e jaepya rupi. Ha'e SENHOR tojapo ojou porāa rami — he'i.

¹⁴ Ha'e gui Joabe guexeveguia kuery reve oje'oi vy joguero'a okuapy Síria pygua kuery reve. Ha'e rā ha'e va'e kuery onhamba henonde gui.

¹⁵ Síria pygua kuery onhamba maa Amom kuery oexa vy ha'e kuery voi onhamba avi Joabe ryvy Abisai renonde gui. Ha'e rami vy onhemimba ju guetā py. Ha'e ramo Joabe ojevy ju Amom kuery reve joe opu'āague gui, ha'e vy oopa ju Jerusalém katy.

¹⁶ Ha'e gui Síria pygua kuery ma Israel kuery renonde oitypaa oexa okuapy vy omondouka ayvu reraarā guetā pygua kuery yakā rovai re hekoia va'e oupa avi aguā. Ha'e kuery renonde ou oiny Sofaque, Hadadezer pegua xondaro kuery rerekooarā.

¹⁷ Ha'e nunga Davi pe omombe'ua rā omboatypa Israel kuery ha'e javi, ha'e vy Jordão yakā oaxa ma vy ha'e kuery ikuaria katy oje'oi joguero'a aguā. Síria pygua kuery rovai joguero'a aguā Davi kuery oje'oi ramo ha'e kuery voi opu'ā jogueruvy hovai.

¹⁸ Ha'e rami teĩ Israel kuery renonde gui Síria pygua kuery onhamba ju. Ha'e ramo Síria pygua kuery va'e regua avakue ma Davi ojuka sete mil karóxa pygua ha'e quarenta mil vvy rupigua. Ojuka avi xondaro kuery ruvixa Sobaque.

¹⁹ Hadadezer rembiguai kuery oitypa ae maa oexa okuapy vy Davi reve ojapo ikuai porã aguã, ha'e vy hembiguai ju ikuai. Ha'e rami rire Síria pygua kuery neĩ raka'e ramo voi noipytyvõxevei Amom kuery.

20

2 Samuel 12.26-31

¹ Ha'e gui petei ma'etõa opaa py, huvixa kuery joe opu'ã aguã katy oo 'rã jave py ma Joabe ogueraa xondaro kuery. Ha'e rami vy Amom kuery vvy ombovaipa vy Rabá tetã peve ou ha'e ojokopa okuapy. Ha'e rã Davi ma Jerusalém tetã py opyta. Ha'e gui Joabe kuery ma Rabá re opu'ã vy omomba ete okuapy.

² Ha'e pygua kuery ruvixa akã gui Davi omboi coroa. Ha'e gui opejaa rã oikuua trinta e três quilos ouro guigua ipoyia. Hexe oĩ avi ita rexakã iporãve va'e. Ha'e rami vy Davi akã re ju omoña. Tetã gui imba'e rei-rei va'ekue ogueraa reta avi.

³ Ha'e pygua kuery ogueraa avi vy omomba'eapo vvyra ayaa py, picareta ha'e haxa ferro guigua py. Ha'e rami ae Davi ojapo Amom kuery retã ha'e javi re. Ha'e gui ojeupegua kuery ha'e javi reve Davi ojevy ju Jerusalém katy.

2 Samuel 21.15-22

⁴ Ha'e va'e rire ma Gezer py joguero'a okuapy filisteu kuery reve. Ha'e vy Husa pygua Sibecai ojuka gigante ramymino Sipai. Ha'e rami vy ipo'aka okuapy filisteu kuery re.

⁵ Ha'e gui filisteu kuery reve ju joguero'a okuapy. Ha'e vy Jair ra'y Elanã ojuka Gate pygua Golias ryvy Lami. Ha'e va'e guembiporu hu'y guaxu oguereko va'ekue ma ajukue popẽa 'y rami tuvixa va'e.

⁶ Ha'e gui teigüe ju opu'ã okuapy joe, Gate py ae. Ha'e py oiko petei ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguereko. Ha'e va'e voi gigante ramymino regua.

⁷ Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

⁸ Ha'e va'e avakue ma gigante ramymino ikuai Gate py. Ha'e rami teĩ Davi ha'e ixondaro kuery oitypa raka'e.

21

2 Samuel 24.1-9

¹ Ha'e gui Israel kuery rovai Satanás opu'ã vy Davi py'a re omoĩ Israel kuery oipapapa aguã.*

² Ha'e rami vy Davi aipoe'i Joabe ha'e heta va'e kuery ruvixa ikuai va'e pe:

— Tapeo, peipapapa Israel kuery ikuai va'e, Berseba guive Dã peve. Ha'e vy peikuaa va'ekue Peru ju xea py, xee voi aikuua aguã mbovy pa ikuaria — he'i.

³ Joabe ombovai:

— Ha'e rami avi tove SENHOR Nderuete tomboetave cem-kue ju. Ha'e rami teĩ Xeruvixa, ha'e kuery ha'e javi e'ý teve nerembiguai ikuai? Mba'e re tu ha'e rami ete rejapoxe? Xeruvixa, mba'e re tu ha'e rami ete rejapo Israel kuery ha'e javi re jejavya ou aguã rami? — he'i.

⁴ Ha'e rami teĩ huvixa ayvu Joabe ijayvua gui ipoyive ramo Joabe oo vy Israel vvy ha'e javi rupi oikuua pota. Ha'e gui mae ma ojevy ju Jerusalém katy,

⁵ ha'e Davi pe omombe'u heta va'e kuery mbovy pa ikuaria. Israel re avakue kyxe oiporu kuaa va'e ma um milhão e cem mil ikuai ra'e. Ha'e rã Judá py ma quattrocentos e setenta mil ikuai avakue kyxe oiporu kuaa va'e.

* 21:1 Davi oipapa uka avakue joe opu'ã kuaa va'e. Ha'e nunga py ojejavy, oxondaro kuery re ojerovia vy, Nhanderuete re 'rãgue py.

6 Ha'e rā ha'e kuery reve Levi ha'e Benjamim regua ma Joabe ndoipapai, huvixa ayvu ndojou porāi ete vy.

2 Samuel 24.10-17

7 Ha'e nunga ha'e javi Nhanderuete ndojou porāi vy omoingo axy Israel kuery.

8 Ha'e ramo Davi aipoe'i Nhanderuete pe:

— Ajejavy vaipa ra'e ha'e rami ajapoa py. Ha'e rami teī aŷ SENHOR, ajerure xee nerembiguai ajejavyague rembogue aguā, inhakā porā ve'ŷ va'e rami aiko rire — he'i.

9 Ha'e gui SENHOR ijayvu Davi pegua profeta Gade pe. Ha'e vy aipoe'i:

10 — Tereo aipo're Davi pe: “Po rami SENHOR ijayvu: ‘Mboapy regua va'e peteī ma ambou 'rā ndere. Ha'e va'e regua peteī eiporavo ajapo aguā’, he'i.”

11 Ha'e ramo Davi oĩa py Gade ou vy aipoe'i ixupe:

— SENHOR ma po rami ijayvu: “Eiporavo reipota va'e rei:

12 Mboapy ma'etŷ re karuai oiko aguā, tyrā pa mboapy ma'etŷ re nderovaigua kuery nhandereity aguā kyxe nderupitya py, tyrā pa mboapy ára re SENHOR okyxe ae oiporu aguā. Ha'e va'e ma mba'eaxy vaikue oiko aguā ndeyvy re, Israel ha'e javi rupi SENHOR-a guigua anjo nhomokanhymba aguā.” Eikuua pota porā ke aŷ, xembouare pe ambovai kuaa aguā — he'i.

13 Ha'e ramo Davi ombovai Gade pe:

— Xee ma ajexavai vaipaa aendu. Ha'eve SENHOR po py anhemboaxa uka rā, mba'eta ha'e ma opa e'ŷ va'e nhanemboaxy va'e. Ha'e rā avakue po py ma xee nanhemboaxa ukaxe — he'i.

14 Ha'e rami rā SENHOR ombou mba'eaxy vaikue Israel ha'e javi rupi. Ha'e ramo Israel kuery va'e regua setenta mil avakue omano.

15 Jerusalém tetā py voi Nhanderuete ombou peteī anjo nhomombaarā. Ha'e rami teī omomba ta ma ramo SENHOR oma'ē vy optyu'u ma mba'emo vai omoingoa gui. Ha'e vy aipoe'i anjo nhomombaarā ombou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aĩ jebuseu regua Ornā mba'emo moa'yīaty yvy'iry.

16 Ha'e gui Davi oma'ē vy oexa anjo SENHOR-a guigua yvy ha'e yva mbyte optya rā, opo py kyxe oekyi va'ekue oupi ho'amy Jerusalém rovai. Ha'e ramo Davi ha'e nhomongeta va'ety kuery hexeve ikuai va'e ajukue vaikue py onhemonde reve ojero'apa vy yvy re ngova omovaẽ okuapy.

17 Ha'e ramo Davi aipoe'i Nhanderuete pe:

— Xee ae e'ŷ ri ty'y heta va'e kuery aipapa aguā re xeayvu va'ekue? Xee rima ajejavy, xee ae ha'eve'ŷ va'e ajapo. Ha'e rā kova'e vexa'i kuery, mba'e tu ha'e kuery ojapo? SENHOR Xeruete, xerovai anho eupi ndepo, ha'e xeru ro pygua kuery rovai. Ha'e rā ndevygua kuery ma embopaga eme.

2 Samuel 24.18-25

18 Ha'e gui ma SENHOR-a guigua anjo aipoe'i Gade pe:

— Davi too peteī altar SENHOR peguarā tojapo, jebuseu regua Ornā mba'emo moa'yīaty py — he'i.

19 Ha'e gui SENHOR rery rupi Gade ha'e rami ijayvu ramo Davi oo ijayvuague rami vy.

20 Ornā ma ha'e va'e jave trigo moa'yīa rupi oiko. Ha'e gui ojere vy oexa anjo hi'aĩ rā. Ha'e ramo hexeve ta'y kuery irundy omaba'leapo okuapy va'e onhemimba jogueravy.

21 Ha'e gui Ornā oĩa py Davi ovaẽ ouvy ramo oma'ē. Oexa kuaa vy mba'emo moa'yīaty gui oẽ vy Davi renonde py oĩ guenapy'ã re, ngova yvy re omovaẽ reve.

22 Davi aipoe'i Ornā pe:

— Xevy pe eme'ē kova'e yvy peteī altar SENHOR peguarā ajapo aguā, mba'eaxy vaikue heta va'e kuery áry ombou va'ekue optyu'u aguā. Emboaxa xevy, ha'e rā hepy xee ame'ē 'rā ha'evea rami.

23 Ha'e rā Ornā aipoe'i Davi pe:

— Xeruvixa, ejopy tema ndejeupe guarã, ha'e ejapo reipota va'e rei. Apy ma vaka ikuai, ame'ẽ reapy reve reme'ẽ va'erã. Ame'ẽ avi yvyrape mba'emo moa'yiaty regua yxakãrã, ha'e trigo ra'yigue guive reme'ẽ va'erã irûrã. Ame'ẽmba rive — he'i.

²⁴ Huvixa Davi ombovai Ornã:

— Any, ha'e rami 'rãgue py ndevy pe xee amboekovia 'rã hepyrã porã re. Mba'eta ndepo gui nda'evei ajopy rive aguã SENHOR pe ame'ẽ va'erã. Ome'ẽ rive pyre ma xee name'ẽ reguai — he'i.

²⁵ Ha'e rami vy ha'e va'e yvy repyrã Davi ome'ẽ Ornã pe seiscentos hatã'i va'e ouro guigua.

²⁶ Ha'e py ma Davi ojapo altar SENHOR peguarã. Hi'ary ma ome'ẽ mymba oapy reve, hexeve peteĩ rami ju ikuia regua guive. Ha'e gui SENHOR pe ojapukai ramo ombovai tata yva gui altar áry ombou vy.

²⁷ Ha'e gui anjo pe SENHOR ijayvu ramo ombovru ju kyxe.

Templo oĩ aguã py mba'emo ome'ẽague

²⁸ Ha'e jave py Davi oexa rã jebuseu Ornã mba'emo omoa'yiaty py SENHOR ombovai. Ha'e rami vy mba'emo ome'ẽ ixupe ha'e py.

²⁹ Mba'eta ha'e va'e jave py ma oo'i SENHOR peguarã teko e'ŷa py Moisés ojapo va'ekue ma Gibeão yvy'ã re teri oĩ, altar mba'emo oapyaty voi.

³⁰ Ha'e katy nda'evei Davi oo aguã Nhanderuete pe oporandu aguã, SENHOR-a guigua anjo kyxe oguereko va'e gui okyje vy.

22

Templo ojapoa rã guarã Davi mba'emo oguereko katuague

¹ Ha'e gui Davi aipoe'i:

— Apy ae ojapoa 'rã oo SENHOR Nhanderuete peguarã, altar Israel kuery mba'emo oapy aguã guive — he'i.

² Ha'e rami vy Davi omboaty uka amboae guigua kuery Israel yvy ha'e javi rupi hekoia va'e. Ha'e kuery va'e regua omoi ita re ombo'eapo va'erã, ita omoatyrõ aguã oo SENHOR peguarã ojapoa rã guarã.

³ Ikaravorã ma Davi ojou uka reta avi ferro, okẽ re omoi aguã ijao'ia ha'e hexe guarã. Overa va'e voi ojou uka oata aguã rami e'ŷ, opejapaa rei aguã rami e'ŷ guive,

⁴ yary aygue guive heta avi. Ha'e nunga ma Sidom ha'e Tiro pygua kuery ogueru okuapy Davi pe oata aguã rami e'ŷ.

⁵ Mba'eta Davi aipoe'i: “Xera'y Salomão ma kunumi'i teri vy mba'emo ojapo kuaa va'e'ŷ teri. Ha'e gui oo SENHOR peguarã ojapo pyrã ma iporãve ete va'e 'rã, ha'e va'e re ima'endu'a porãa aguã rami yvy jave re. Ha'e nunga rupi xee areko katupa ma voi 'rã mba'emo ojapo vy oiporu va'erã”, he'ague rami Davi omano e'ŷ mbove voi oguereko katupa oata aguã rami e'ŷ.

Salomão pe Davi templo-rã ojapo ukaague

⁶ Ha'e ramo Davi oenoi gua'y Salomão. Ha'e vy ixupe ojapo uka oo SENHOR Israel kuery ruete peguarã.

⁷ Ha'e vy aipoe'i Salomão pe:

— Xera'y, xee aendu va'ekue oo SENHOR Xeruete pe ajapoxea hery oĩ aguã.

⁸ Ha'e rami tei xevy SENHOR ombou avi oayvu. Ha'e vy aipoe'i: “Ndee ma tuguy ndopavei aguã rami remoẽ va'ekue, joe repu'aa py rejoguero'aa rupi. Ha'e rami vy ndee nda'evei 'rã rejapo aguã oo xerery oĩ aguã, mbovy e'ŷ tuguy remoẽ rire kova'e yvy re, xerenonde rupi.

⁹ Ne'ixa, oiko 'rã peteĩ ndera'y. Ha'e va'e ma joe opu'aa rupi e'ŷ 'rã oiko, mba'eta amombytu'u 'rã hovaigua kuery ha'e javi gui. Ha'e ma Salomão hery va'erã. Ha'e oĩ jave ma ajapo 'rã Israel kuery ikuai porã aguã rami, mba'eve ndoikoi rã.

¹⁰ Ha'e va'e ae 'rã ojapo oo xerery oĩ aguã. Xera'y rami ae 'rã oiko, ha'e rã xee ma tuu rami 'rã aiko. Ha'e gui raka'e rã peve amoĩ atã 'rã Israel kuery re opena aguã", he'i va'ekue xevy.

¹¹ Ha'e gui aÿ ma xera'y, tove SENHOR toiko ndereve, reiko porã aguã, SENHOR Nderuete peguarã oo rejapo aguã rami, nderekorã re ijayvuague rami vy.

¹² Tove SENHOR tome'ẽ ne'arandurã ha'e reiko kuaa aguã, Israel kuery re repenaa ja SENHOR Nhanderuete guigua lei rami ete reiko aguã rami.

¹³ Ha'e rami vy 'rãe reiko porã, nekyre'ÿa rupi Israel kuery rekorã SENHOR Moisés pe ombopara uka va'ekue rejapopa aguã. Nembaraete ke ha'vy, ndepy'a guaxu, ekyje eme guive nekangy e'ÿ aguã.

¹⁴ Ha'e gui ne'exa, xee ma amba'eapo vaipaa rupi anho areko katu ma oo SENHOR peguarã três milhões e trezentos mil quilos ouro guigua, ha'e trinta e três milhões de quilos prata guigua, ha'e gui overa va'e ha'e ferro oata aguã rami e'ÿ, neĩ ndopejaai guive. Ha'e gui yvyra ha'e ita voi areko katu avi va'ekue. Ha'e rami avi ndee ju rejou retave aguã ha'eve.

¹⁵ Ha'e gui ndevy guarã ikuaise ju ombo'eapo va'e kuery heta ete, ita moatyrôa, ita re ombo'eapo va'e, oo apoa kuery, ha'e opa mba'e ojapo kuaa va'e,

¹⁶ ouro ha'e prata guigua, overa va'e ha'e ferro guigua re ombo'eapo va'e mbovy e'ÿ. Ha'e nunga rupi nekyre'ÿ ke rejapopa aguã. Ha'e tove SENHOR toiko ndereve — he'i.

¹⁷ Ha'e gui Davi ijayvu avi Israel kuery ruvixa ikuai va'e gua'y Salomão oipytyvõ aguã re. Ha'e vy aipoe'i:

¹⁸ — SENHOR Penderuete peẽ kuery reve oiko ojapo jova-jovai rupi pendere nopu'ãavei aguã rami. Mba'eta xepo py omboaxapa ma nhandeyvy re ikuai va'e ha'e javi. Ha'e rami rire ha'e kuery SENHOR rembiguai ikuai, ixupeguia kuery rembiguai guive.

¹⁹ Ha'e nunga rupi aÿ penekyre'ÿ ke pendepy'a ha'e penenhe'ẽ ha'e javi py SENHOR Penderuete peka aguã. Pejapo ete oo SENHOR Nhanderuete pegua iky'a e'ÿ va'erã, ha'e py hery oĩ aguã, ha'e SENHOR guexeve guarã ojapo va'ekue ryru Peru aguã, tembiporu ixupeguia ikuai va'e guive — he'i.

23

Levita kuery peteĩ-teĩ regua ombo'eapo aguã re ijayvuague

¹ Ha'e gui Davi tuja'i ma, ha'e hi'ára opa rai'i ma ramo omoĩ gua'y Salomão Israel kuery ruvixarã.

² Ha'e rami vy omboatypa Israel kuery ruvixa ikuai va'e, sacerdote ha'e levita kuery guive.

³ Levita kuery trinta ma'etÿ va'e guive tujakue peve oipapaa rã ha'e javi vy trinta e oito mil avakue ikuai.

⁴ Ha'e kuery va'e regua ma vinte e quatro mil ikuai SENHOR pegua oo py ombo'eapo va'e kuery re opena va'erã, ha'e gui seis mil ju ikuai huvixarã mba'emo re oikuua pota va'erã.

⁵ Quatro mil ikuai okẽ rarõarã, ha'e gui quattro mil ju ikuai SENHOR pe oporaei va'erã, mba'epu Davi ha'e rami aguã ojapo uka va'ekue ombojoguy reve.

⁶ Ha'e kuery Levi ramymino ikuai va'e ma Davi omboja'o ta'y kuery rery rupi peteĩ-teĩ regua ikuai aguã: Gérson, Coate ha'e Merari.

⁷ Gérson ra'y kuery ma Ladã ha'e Simei.

⁸ Ladã ra'y kuery ma huvixa Jeiel, ha'e gui Zetã ha'e Joel, ha'e javi vy mboapy ikuai.

⁹ Simei ra'y kuery ma Selomite, Haziel ha'e Harã, mboapy ikuai. Ha'e kuery ma Ladã ramymino kuery re opena va'e meme.

¹⁰ Simei ra'y kuery ma Jaate, Ziza, Jeús ha'e Berias. Ha'e kuery Simei ra'y ikuai va'e ma irundy.

¹¹ Jaate ma huvixa oiko, ha'e rã Ziza ma mokoña. Ha'e gui Jeús ha'e Berias ma ndata'y reta vaipai. Ha'e nunga rupi ha'e va'e mokoïve ramymino kuery ma peteĩ'i regua rive ikuai.

¹² Ha'e gui Coate ra'y kuery ma Anrão, Isar, Hebrôm ha'e Uziel, irundy ikuai.

¹³ Anrão ra'y kuery ma Arão ha'e Moisés. Ha'e gui Arão ma omoña henda iky'a e'ŷ va'e rupi ombo'eapo aguã, hamymino kuery voi, raka'e rã peve, ha'e gui SENHOR renonde py oapy aguã heakuã porã va'e, ixupe ombo'eapo aguã, ha'e hery rupi jogueroayvu porã aguã, raka'e rã peve.

¹⁴ Nhanderuete remimbo'e Moisés ra'y kuery voi Levi ramymino ikuai.

¹⁵ Moisés ra'y kuery ma Gérson ha'e Eliézer.

¹⁶ Gérson ra'y ma huvixa Sebuel.

¹⁷ Eliézer ra'y ma huvixa Reabias. Nda'ipoi ae ta'y kuery mboae. Ha'e rami avi Reabias ramymino kuery ma heta-etave oje'oivy.

¹⁸ Isar ra'y ma huvixa Selomite.

¹⁹ Hebrom ra'y kuery ma huvixa Jerias, mokoña ma Amarias, mboapya ma Jaaziel, ha'e gui irundaya ma Jecameão.

²⁰ Uziel ra'y kuery ma huvixa Mica, ha'e mokoña ma Issias.

²¹ Merari ra'y kuery ma Mali ha'e Musi. Mali ra'y kuery ma Eleazar ha'e Quis.

²² Eleazar ma ta'y e'ŷ re omano va'eri tajy kuery ikuai. Ha'e kuery re ikyvy kuery Quis ra'y ikuai va'e omenda okuapy.

²³ Musi ra'y kuery ma Mali, Éder ha'e Jeremote, mboapy ikuai.

²⁴ Ha'e va'e kuery ma Levi ramymino kuery meme, peteĩ-teĩ regua re opena va'e kuery reve. Peteĩ-teĩ oipapaa hery rupi. Ha'e gui vinte ma'etý va'e guive tujakue peve omoña SENHOR pegua oo rupi ombo'eapo va'erã.

²⁵ Mba'eta Davi aipoe'iague rami: "SENHOR Israel kuery ruete ojapo ojeupagua kuery re nopus'avei aguã rami, Jerusalém py hekoia riae aguã.

²⁶ Ha'e nunga rupi Levi ramymino kuery ndogueraavei 'rã oo'i, neĩ tembiporu oiporu va'erã ma voi", he'i va'ekue.

²⁷ Ha'e nunga rupi Davi opa vy ijayvuague rami vy oipapapaa Levi ramymino kuery vinte ma'etý va'e guive tujakue peve.

²⁸ Ha'e kuery omoña Arão ramymino kuery oipytyvõ aguã SENHOR pegua opy rupi ombo'eapo ramo, oka rupi, opy ja'o ikuai va'e rupi, mba'emo oiky'a'oa rupi, ha'e Nhanderuete pegua opy ombo'eapoa ha'e javi rupi.

²⁹ Ha'e kuery opena 'rã mbojape SENHOR renonde omoimby re, trigo ku'i mba'emo irũ ome'ẽ mbyrã oĩ va'e re, mbojape imbovua reveguia e'ŷ ojapoa re, mba'emo oxy ha'e oxyryrya re, ha'e mba'emo opejaa ha'e oa'ã ha'e javi re.

³⁰ Ko'ẽ nhavõ aje'ive'i reve ikuai aguã SENHOR oguerovy'aa rupi oporaei aguã, ka'arukue voi ha'ekue rami ae ju 'rã ikuai,

³¹ ha'e gui SENHOR pe mba'emo oapy reve ome'ẽ aguã, sábado ára ha'e jaxy ipyau'ia ára nhavõ ngaru oikoa py, ngaru aguã ára oa'anga pyre ojeupity nhavõ. SENHOR renonde py ombo'eapo 'rã oipapaague rami vy.

³² Ha'e rami vy opena 'rã onhemboaty aty re, henda iky'a e'ŷ va'e re guive. Oipytyvõ avi 'rã guexegua Arão ramymino kuery SENHOR pegua opy rupi ombo'eapoa py.

24

Sacerdote kuery peteĩ-teĩ regua ombo'eapo aguã re ijayvuague

¹ Ha'e gui Arão ramymino kuery ju omboja'o-ja'opaa peteĩ-teĩ regua rami. Arão ra'y kuery ma Nadabe, Abiú, Eleazar ha'e Itamar.

² Ha'e gui Nadabe ha'e Abiú ma nguu omano e'ŷ mbove omano raka'e ta'y e'ŷ re. Ha'e va'e rire ma Eleazar ha'e Itamar ju sacerdote ikuai.

³ Ha'e gui Davi ma Eleazar ramymino Zadoque ha'e Itamar ramymino Aimeleque reve omboja'o peteĩ-teĩ regua ombo'eapoa py ojapo 'rã va'ekue rami.

⁴ Ha'e rami vy omboja'o vy oikuua Itamar ramymino kuery ikuai va'e gui Eleazar ramymino kuery re opena va'e hetave ra'ea. Mba'eta Eleazar ramymino kuery re opena va'e ma dezesseis, ha'e rã Itamar ramymino kuery regua ma oito ete'i ikuai.

⁵ Ha'e gui xortea oexa vy omboja'opa peteĩ-teĩ regua rami ikuai aguã. Ha'e rami py Eleazar ha'e Itamar ramymino kuery va'e regua ma henda iky'a e'ŷ va'e re ha'e mba'emo Nhanderuete pegua ikuai va'e re opena va'erã ikuai.

⁶ Ha'e rami vy ha'e kuery rery Semaías omboparapa imoiny. Ha'e va'e ma levita Natanael ra'y kuaxia mboparaa rupi oiko va'e. Huvixave oexaa py ombopara, ha'e gui huvixa kuery, sacerdote Zadoque ha'e Abiatar ra'y Aimeleque, ha'e gui sacerdote ha'e levita kuery akã ikuai va'e ha'e javi oexaa py guive. Ha'e rami py xortea oexa vy jorire-rire oiporavo heravy Eleazar ha'e Itamar ramymino va'e regua.

⁷ Jypy xortea oexaa rami vy oiporavo Jeoiaribe, ha'e gui mokoña ma Jedaías,

⁸ mboapya ma Harim, irundaya ma Seorim,

⁹ peteĩ nhiruña ma Malquias, mboapy memea ma Miamim,

¹⁰ sete-a ma Hacoz, oito-a ma Abias,

¹¹ nove-a ma Jesua, dez-a ma Secanias,

¹² onze-a ma Eliasibe, doze-a ma Jaquim,

¹³ treze-a ma Hupá, catorze-a ma Jesebeabe,

¹⁴ quinze-a ma Bilga, dezesseis-a ma Imer,

¹⁵ dezessete-a ma Hezir, dezoito-a ma Hapses,

¹⁶ dezenove-a ma Petaías, vinte-a ma Jeezquel,

¹⁷ vinte e um-a ma Jaquim, vinte e dois-a ma Gamul,

¹⁸ vinte e três-a ma Delaías, vinte e quatro-a ma Maazias.

¹⁹ Ha'e rami hery ikuiaia rami peteĩ-teĩ SENHOR pegua opy oike 'rã omba'epo aguã, guamoĩ Arão ha'e SENHOR Israel kuery ruete ojapo ukaague rami.

²⁰ Ha'e gui Levi ramymino kuery mboae ikuai va'e ruvixa kuery rery ma po rami: Anrão ra'y kuery va'e regua Subael, Subael ra'y kuery va'e regua Jedias,

²¹ Reabias ra'y kuery va'e regua huvixa Issias,

²² Isar ramymino kuery va'e regua Selomite, Selomite ra'y kuery va'e regua Jaate,

²³ Hebrom ra'y kuery va'e regua jypygua ma Jerias, mokoña ma Amarias, mboapya ma Jaaziel, ha'e gui irundaya ma Jecameão,

²⁴ Uziel ra'y kuery va'e regua Mica, Mica ra'y kuery va'e regua Samir,

²⁵ Mica ryvy Issias, Issias ra'y kuery va'e regua Zacarias,

²⁶ Merari ra'y kuery va'e regua Mali ha'e Musi, Jaazias ra'y kuery va'e regua Beno,

²⁷ Merari ramymino Jaazias guigua ikuai va'e regua ma Beno, Soão, Zacur ha'e Ibri,

²⁸ Mali ramymino Eleazar ta'y e'ŷ va'e,

²⁹ Quis ra'y kuery va'e regua Jerameel,

³⁰ Musi ra'y kuery va'e regua Mali, Éder ha'e Jerimote. Ha'e va'e kuery ma Levi ramymino kuery meme, peteĩ-teĩ regua ikuiaia rami.

³¹ Ha'e kuery voi guyvy kuery Arão ramymino ikuai va'e ojapoague rami ae ju oexa okuapy xortea. Guetarã kuery re opena va'e ha'e yvyigueve voi oexa okuapy xortea huvixa Davi oexaa py, Zadoque ha'e Aimeleque, ha'e gui sacerdote ha'e levita kuery akã ikuai va'e ha'e javi oexaa py guive.

Oporei va'e kuery omba'epo aguã re ijayvuague

¹ Ha'e gui Davi ha'e omba'epo va'e kuery ruvixa ikuai va'e reve omoĩ Asafe, Hemã ha'e Jedutum ra'y kuery regua omba'epo aguã. Ha'e va'e kuery ma ikuai ayvu omombe'u aguã mba'epu ixã reta va'e reve, mbaraka ha'e hy'a pu reve. Ha'e rami aguã omoĩ va'ekue rery ma po rami:

² Asafe ra'y kuery ma Zacur, José, Netanias ha'e Asarela. Asafe ra'y kuery meme ikuai, ha'e ae opena ha'e kuery omba'epoa re. Ha'e rã Asafe omba'epoa re ma huvixave ae opena oikovy.

- ³ Ha'e gui Jedutum ra'y kuery ma Gedalias, Zeri, Jesaías, Hasabias ha'e Matitias, ha'e javi vy mboapy meme ikuai. Ha'e kuery ombo'epoa re tuu Jedutum ae opena oikovy. Mba'epu ixā reta va'e reve omombe'u 'rā ayvu, SENHOR oguerovy'aa rupi oporaeia py.
- ⁴ Ha'e gui Hemā ra'y kuery ma Buquias, Matanias, Uziel, Sebuel, Jerimote, Hananias, Hanani, Eliata, Gidalti, Romanti-Ézer, Josbecasa, Maloti, Hotir ha'e Maaziote.
- ⁵ Ha'e kuery ma Hemā ra'y kuery meme. Ha'e rā ha'e ma huvixave pegua profeta oiko. Nhanderuete oayvuague rami vy omombaraete, ha'e vy ixupe ome'ē catorze ta'y ha'e mboapy tajy kuery.
- ⁶ Ha'e kuery peteī-teī ombo'epoa re tuu ae opena oikovy. SENHOR pegua opy oporaei 'rā hy'a pu reve, mbaraka ha'e ixā reta va'e reve Nhanderuete pegua oo rupi ombo'epo vy. Ha'e rā tuu Asafe, Jedutum ha'e Hemā ombo'epoa re ma huvixave ae opena oikovy.
- ⁷ Ha'e kuery ryvy kuery ma SENHOR pe oporaei aguā re ombo'ea rā oporaei kuaa va'e meme. Ha'e javi vy duzentos e oitenta e oito ikuai.
- ⁸ Ha'e kuery oexa okuapy oxortea peteī-teī regua ombo'epo aguā oikuua aguā, yvyīgueve ha'e yvatekueve, nhombo'ea ha'e hemimbo'e kuery guive.
- ⁹ Jypy xortea oexa vy oikuua Asafe ra'y kuery va'e regua José. Mokoña ma Gedalias. Ha'e va'e ma guyvy ha'e gua'y kuery reve vy doze ikuai.
- ¹⁰ Ha'e gui mboapya ma Zacur. Ta'y ha'e tyvy kuery reve vy doze avi ikuai.
- ¹¹ Irundaya ma Izri. Ta'y ha'e tyvy kuery reve vy doze avi ikuai.
- ¹² Peteī nhiruña ma Netanias. Ta'y ha'e tyvy kuery reve vy doze avi ikuai.
- ¹³ Mboapy memea ma Buquias. Ta'y ha'e tyvy kuery reve vy doze avi ikuai.
- ¹⁴ Sete-a ma Jesarela. Ta'y ha'e tyvy kuery reve vy doze avi ikuai.
- ¹⁵ Oito-a ma Jesaías. Ta'y ha'e tyvy kuery reve vy doze avi ikuai.
- ¹⁶ Nove-a ma Matanias. Ta'y ha'e tyvy kuery reve vy doze avi ikuai.
- ¹⁷ Dez-a ma Simei. Ta'y ha'e tyvy kuery reve vy doze avi ikuai.
- ¹⁸ Onze-a ma Azarel. Ta'y ha'e tyvy kuery reve vy doze avi ikuai.
- ¹⁹ Doze-a ma Hasabias. Ta'y ha'e tyvy kuery reve vy doze avi ikuai.
- ²⁰ Treze-a ma Subael. Ta'y ha'e tyvy kuery reve vy doze avi ikuai.
- ²¹ Catorze-a ma Matitias. Ta'y ha'e tyvy kuery reve vy doze avi ikuai.
- ²² Quinze-a ma Jerimote. Ta'y ha'e tyvy kuery reve vy doze avi ikuai.
- ²³ Dezesseis-a ma Hananias. Ta'y ha'e tyvy kuery reve vy doze avi ikuai.
- ²⁴ Dezessete-a ma Josbecasa. Ta'y ha'e tyvy kuery reve vy doze avi ikuai.
- ²⁵ Dezoito-a ma Hanani. Ta'y ha'e tyvy kuery reve vy doze avi ikuai.
- ²⁶ Dezenove-a ma Maloti. Ta'y ha'e tyvy kuery reve vy doze avi ikuai.
- ²⁷ Vinte-a ma Eliata. Ta'y kuery, ha'e tyke'y tyvy kuery reve vy doze avi ikuai.
- ²⁸ Vinte e um-a ma Hotir. Ta'y ha'e tyvy kuery reve vy doze avi ikuai.
- ²⁹ Vinte e dois-a ma Gidalti. Ta'y ha'e tyvy kuery reve vy doze avi ikuai.
- ³⁰ Vinte e três-a ma Maaziote. Ta'y ha'e tyvy kuery reve vy doze avi ikuai.
- ³¹ Vinte e quatro-a ma Romanti-Ézer. Ta'y ha'e tyvy kuery reve vy doze avi ikuai.

26

Okē rarōarā kuery omoīague

- ¹ Ha'e gui okē rarōarā omoīa avi. Ha'e kuery va'e regua ma Coré ramymino kuery. Meselemias ma Coré ra'y, Asafe ramymino kuery va'e regua.
- ² Meselemias ra'y kuery ma jypygua Zacarias, mokoña ma Jediael, mboapya ma Zebadias, irundaya ma Jatniel,
- ³ peteī nhiruña ma Elão, mboapy memea ma Joanã, ha'e sete-a ma Elioenai.
- ⁴ Obede-Edom ra'y kuery ma jypygua Semaías, mokoña ma Jeozabade, mboapya ma Joá, irundaya ma Sacar, peteī nhiruña ma Natanael,
- ⁵ mboapy memea ma Amiel, sete-a ma Issacar, ha'e oito-a ma Peuletai, mba'eta Nhanderuete ha'e rami aguā omoingo porā rire.

- ⁶ Ha'e gui ta'y Semaías ra'y kuery avi ikuai. Ha'e kuery ma nguu ro re opena okuapy, avakue ipy'a guaxukueve meme.
- ⁷ Semaías ra'y kuery ma Otni, Rafael, Obede ha'e Elzabade. Tyvy kuery Eliú ha'e Semaquias ma avakue ipy'a guaxukueve meme.
- ⁸ Ha'e kuery ha'e javi ma Obede-Edom ramymino meme. Ta'y ha'e tyvy kuery reve vy ma sessenta e dois ikuai, avakue mbaraetekue ha'e ombo'epo kuaa va'e meme.
- ⁹ Meselemias ra'y kuery, ha'e tyvy kuery reve vy ma dezoito ikuai, avakue ipy'a guaxukueve meme.
- ¹⁰ Ha'e gui Merari ramymino Hosa ra'y ma Sinri. Ha'e va'e ma huvixarā tuu omoī va'ekue, jypygua e'ŷ teī.
- ¹¹ Ha'e gui mokoña ma Hilquias, mboapya ma Tebalias, ha'e irundaya ma Zacarias. Hosa ra'y kuery, tyvy kuery reve vy ma treze ikuai.
- ¹² Ha'e va'e okē rarōarā omoī mbyre ruvixa kuery pe ome'ea ojapo va'erā, guexegua kuery rami ombo'epo aguā SENHOR pegua opy rupi.
- ¹³ Peteī-teī okē ikuai va'e rarōarā re oexa okuapy oxortea, yvyīgueve ha'e yvatekueve ojapo va'erā oikuaa aguā, peteī-teī regua ikuia ramí vy.
- ¹⁴ Ha'e rami vy okē kuaray oua katyguarā omoī Selemias xortea oexaa rami vy. Ha'e va'e rire ma xortea oexa jevy vy omoī ta'y Zacarias. Ha'e va'e ma nhomongetaa py ijayvu porā kuaa va'e. Ha'e ma kuaray ijapu'a'ia katy okē oī va'e rarōarā oiko.
- ¹⁵ Obede-Edom ma kuaray puku-a katy oī va'e rarōarā oiko. Ha'e gui ta'y kuery ma mba'emo omoī porāaty rarōarā ikuai.
- ¹⁶ Supim ha'e Hosa ma kuaray oikea katy oī va'e rarōarā ikuai, okē Salequete 'ea va'e rexei'i rupi, tape yvy'ā katy oo va'e regua yvýry. Jovaive rupi harōarā ikuai.
- ¹⁷ Ha'e gui kuaray oua yke katy ma mboapya meme Levi regua kuery ikuai oarōa py. Ha'e gui kuaray ijapu'a'ia katy ha'e ipuku-a katy irundy 'rā ikuai ára nhavō. Ha'e gui oo mba'emo omoī porāaty jovaive re ikuai 'rā mokō-mokoī oarōa py.
- ¹⁸ Ha'e gui oka kuaray oikea katy oī va'e rarōarā ikuai irundaya tape joaxa va'e py, ha'e gui oka katyve'i ma mokoī ju.
- ¹⁹ Ha'e va'e kuery ma Coré ha'e Merari ramymino kuery va'e regua okē rarōarā omoī mbyre.

Hepyve va'e rarōarā kuery omoīague

- ²⁰ Tyvy kuery levita va'e regua ma omoīa mba'emo hepyve va'e Nhanderuete pegua opy ikuai va'e ha'e mba'emo iky'a e'ŷ va'e omoī porā mbyre rarōarā.
- ²¹ Gérson ra'y Ladā ramymino kuery re opena va'e ma Jeiel.
- ²² Jeiel ra'y kuery ma Zetā ha'e tyvy Joel. Ha'e va'e kuery ma opena hepyve va'e SENHOR pegua opy ikuai va'e re.
- ²³ Ha'e gui Anrāo ramymino kuery, Isar, Hebrón ha'e Uziel ramymino kuery va'e regua ma
- ²⁴ Gérson ra'y Sebuel, Moisés ramymino. Ha'e va'e ma oiko hepyve va'e omoī porā mbyre rarōa kuery re openaa rupi.
- ²⁵ Tyvy kuery ma Eliézer, ha'e ta'y Reabias, Reabias ra'y ma Jesaías, Jesaías ra'y ma Jorão, Jorão ra'y ma Zicri, Zicri ra'y ma Selomite.
- ²⁶ Ha'e gui Selomite ha'e tyvy kuery reve omoīa oarō aguā mba'emo hepyve va'e Nhanderuete pe omboaxa pyre. Ha'e va'e ma huvixa Davi, guetarā kuery re opena va'e kuery, ha'e xondaro kuery mil ha'e cem ikuai va'e ruvixa kuery omboaxa va'ekue.
- ²⁷ Joe opu'āa py ha'e kuery mba'emo ojou va'ekue omboaxapa SENHOR pegua oo omoatyrōa aguā.
- ²⁸ Ha'e rami ae avi opa mba'e profeta Samuel ome'ē va'ekue, ha'e gui Quis ra'y Saul, Ner ra'y Abner, Zeruia pi'a Joabe, ha'e kuery ha'e javi omboaxa va'ekue ma Selomite ha'e tyvy kuery oarō okuapy.

Yvatekueve ha'e mba'emo re oikuaa pota va'erā kuery omoīague

²⁹ Isar ramymino kuery regua Quenanias ha'e ta'y kuery avi omoña Israel kuery re opena va'erã, yvatekueve mba'emo hovai rupi oiko va'e re oikuaa pota aguã.

³⁰ Hebrom ramymino kuery va'e regua ma omoña Hasabias ha'e tyvy kuery reve. Ha'e va'e kuery ma avakue ipy'a guaxukueve, mil e setecentos ikuai. Ha'e kuery ma Israel kuery re openaa rupi ikuai, Jordão yakã rovai kuaray oikea katy. SENHOR pe ombo'eapoa rupi ikuai, huvixave mba'emo oguerekva'e re openaa rupi guive.

³¹ Hebrom ramymino kuery ruvixa ma Jerias oĩ. Ha'e kuery va'e regua tamoñ kuery ha'e hamymino kuery rery ha'e javi re oikuaa potaa, quarenta ma'etýa re ma Davi huvixave oĩ jave py. Ha'e rami vy ha'e kuery va'e regua ojoua avakue ipy'a guaxukueve Jazer pygua Gileade yvy re.

³² Ha'e va'e ryvy kuery ma dois mil e seiscentos ikuai avakue ipy'a guaxukueve, guetarã kuery re opena va'e meme. Ha'e va'e kuery ma huvixa Davi omoñ Rúben, Gade ha'e Manassés ramymino kuery oja'o va'ekue re opena va'erã. Opena avi 'rã mba'emo Nhanderuete pegua re, huvixave mba'emo oguerekva'e ha'e javi re guive.

27

Peteñ-teñ jaxy re huvixave pegua xondaro ikuai va'erã omoñague

¹ Israel ramymino kuery mbovy pa ikuiaia rami vy peteñ-teñ regua re opena va'e rery, ha'e mil ha'e cem ikuai va'e ruvixa kuery rery oĩa. Ha'e va'e kuery ma nguvixave pe ombo'eapo 'rã mba'emo ojapoa rupi, mba'eta peteñ-teñ jaxy re oike 'rã ha'e va'e jaxy reguarã, ha'e rã amboae kuery ma oẽ 'rã oje'oivy, ha'e rami ae tema ikuai ma'etýa pukukue re. Ha'e peteñ-teñ regua ma vinte e quatro mil ikuai.

² Ha'e gui jypyguia, jaxy ijypyra re ikuai va'e kuery ruvixa ma Zabdiel ra'y Jasobeão. Ha'e va'e kuery regua ma vinte e quatro mil ikuai.

³ Ha'e va'e ma Perez ramymino kuery va'e regua, jaxy ijypyra re xondaro kuery ikuai va'e ruvixa kuery re opena va'erã omoñ mbyre.

⁴ Ha'e gui mokoñ jaxy re ikuai va'e re opena va'e ma Aoí ramymino Dodai. Ha'e va'e pytyvõarã oiko Miclote. Ha'e va'e kuery regua ma vinte e quatro mil avi ikuai.

⁵ Ha'e gui mboapya xondaro kuery ruvixa, mboapy jaxy re ikuai va'e re opena va'e ma Benaia. Ha'e va'e ma huvixa oiko, sacerdote Joiada ra'y. Ha'e va'e kuery regua ma vinte e quatro mil avi ikuai.

⁶ Ha'e va'e Benaia ae trinta avakue ikuai va'e regua ipo'akave va'e, ha'e kuery akã oiko. Ha'e rami vy ojeupeguia kuery re opena uka gua'y Amizabade va'e pe.

⁷ Ha'e gui irundy, irundy jaxy re ikuai va'e re opena va'e ma Joabe ryvy Asael. Ha'e va'e rire ma oiko ta'y Zebadias. Ha'e va'e kuery regua ma vinte e quatro mil avi ikuai.

⁸ Peteñ nhiruña huvixa, peteñ nhiruñ jaxy re ikuai va'e re opena va'e ma Isar ramymino Samute. Ha'e va'e kuery regua ma vinte e quatro mil avi ikuai.

⁹ Mboapy memea huvixa, mboapy meme jaxy reguarã ma Tecoa pygua Iques ra'y Ira. Ha'e va'e kuery regua ma vinte e quatro mil avi ikuai.

¹⁰ Sete-a huvixa, sete jaxy reguarã ma Pelom pygua Heles, Efraim ramymino kuery va'e regua. Ha'e va'e kuery regua ma vinte e quatro mil avi ikuai.

¹¹ Oito-a huvixa, oito jaxy reguarã ma Husa pygua Sibecai, Zera ramymino kuery va'e regua. Ha'e va'e kuery regua ma vinte e quatro mil avi ikuai.

¹² Nove-a huvixa, nove jaxy reguarã ma Anatote pygua Abiezer, Benjamim ramymino kuery va'e regua. Ha'e va'e kuery regua ma vinte e quatro mil avi ikuai.

¹³ Dez-a huvixa, dez jaxy reguarã ma Netofa pygua Maarai, Zera ramymino kuery va'e regua. Ha'e va'e kuery regua ma vinte e quatro mil avi ikuai.

¹⁴ Onze-a huvixa, onze jaxy reguarã ma Piratom pygua Benaia, Efraim ramymino va'e regua. Ha'e va'e kuery regua ma vinte e quatro mil avi ikuai.

¹⁵ Doze-a huvixa, doze jaxy reguarã ma Netofa pygua Heldai, Otniel ramymino kuery va'e regua. Ha'e va'e kuery regua ma vinte e quatro mil avi ikuai.

Israel kuery peteĩ-teĩ regua ruvixa kuery rery oĩa

- ¹⁶ Ha'e gui Israel kuery peteĩ-teĩ regua rerekao ma po rami: Rúben ramymino kuery re opena va'e ma Zicri ra'y huvixa Eliézer. Simeão ramymino kuery re opena va'e ma Maaca ra'y Sefatias.
- ¹⁷ Levi ramymino kuery re opena va'e ma Quemuel ra'y Hasabias. Arão ramymino kuery re opena va'e ma Zadoque.
- ¹⁸ Judá ramymino kuery re opena va'e ma Davi ryke'y Eliú. Issacar ramymino kuery re opena va'e ma Micael ra'y Onri.
- ¹⁹ Zebulom ramymino kuery re opena va'e ma Obadias ra'y Ismaías. Naftali ramymino kuery re opena va'e ma Azriel ra'y Jerimote.
- ²⁰ Efraim ramymino kuery re opena va'e ma Azazias ra'y Oséias. Manassés ramymino kuery mbyte rupi oja'o va'ekue re opena va'e ma Pedaías ra'y Joel.
- ²¹ Ha'e rã Manassés ramymino kuery mboae Gileade yvy re hekoia va'e re opena va'e ma Zacarias ra'y Ido. Benjamim ramymino kuery re opena va'e ma Abner ra'y Jaasiel.
- ²² Dã ramymino kuery re opena va'e ma Jeroão ra'y Azarel. Ha'e va'e kuery ma Israel kuery peteĩ-teĩ regua ruvixa kuery ikuai va'ekue meme.
- ²³ Ha'e gui Davi ma ndoipapa ukai vinte ma'etý teri ndogueroko va'e, mba'eta SENHOR ijayvu ae ma rire jaxy-tata yva re ikuai va'e rami Israel kuery omboetave aguã re.
- ²⁴ Ha'e gui Zeruia pi'a Joabe ma omboypy heta va'e kuery oipapa aguã teĩ ndoipapapai, oipapaa káuxa Israel kuery áry poxya ou ramo. Ha'e nunga rupi ae oipapaague nomboparaai huvixa Davi rekokue oĩa re.

Davi mba'emo oguereko va'e re opena va'e kuery rery oĩa

- ²⁵ Adiel ra'y Azmavete ma huvixave mba'e hepyve va'e omoĩ porãaty re opena va'e. Ha'e rã yvy ituia rupi oguereko va'e re, tetã mboae rupi, tekao ha'e oo imbaraete va'e ikuia rupi oguereko va'e re opena va'e ma Uzias ra'y Jônatas.
- ²⁶ Mba'ety rupi omba'eapo ha'e oma'etý va'e kuery re opena va'e ma Querube ra'y Ezri.
- ²⁷ Uva onhotý mbyre re opena va'e ma Ramá pygua Simei. Ha'e gui vinho omoĩ porã mbyre re opena va'e ma Sifã pygua Zabdi.
- ²⁸ Oliveira ha'e sicômoro rembypy mba'ety rupi ikuai va'e re opena va'e ma Gedera pygua Baal-Hanã. Ha'e gui azeite omoĩ porã mbyre re opena va'e ma Joás.
- ²⁹ Mymba kuery Sarom yvýry rupi okaru okuapy va'e re opena va'e ma Sarom pygua Sitrai. Ha'e rã yvjugua rupi mymba ikuai va'e re opena va'e ma Adlai ra'y Safate.
- ³⁰ Mymba camelô kuery re opena va'e ma Ismael ramymino Obil. Mburika'i kuery re opena va'e ma Meronote pygua Jedias.
- ³¹ Ha'e rã mymba kyrigüeve'i re opena va'e ma hagareno regua Jaziz. Ha'e va'e kuery ma huvixa Davi mba'emo oguereko va'e ha'e javi re opena va'ekue meme.

Huvixave mongetaa kuery rery oĩa

- ³² Ha'e gui Davi ruvy'i Jônatas ma nhomonetaa rupi oiko. Ha'e va'e ma lei re nhombo'e va'ety hi'arandu va'e. Ha'e rã Hacmoni ra'y Jeiel ma huvixa ra'y kuery re opena oikovy.
- ³³ Aitofel ma huvixave mongetaa oiko. Arquita regua Husai ma huvixave irû ae oiko.
- ³⁴ Ha'e gui Aitofel noïvei ma rire Benaia ra'y Joiada ju oĩ, Abiatar guive. Ha'e gui Joabe ma huvixave pegua xondaro kuery ruvixa.

Davi rekovia Salomão ju oĩ aguã re ijayvuague

- ¹ Ha'e gui Davi oenoimbá Israel regua yvatekueve, peteĩ-teĩ regua ruvixa kuery, ojeupequa xondaro kuery ruvixa kuery, xondaro mil ha'e cem ikuai va'e re opena va'e, mba'emo ha'e ae ha'e ta'y kuery oguereko va'e re opena va'e, guembiguai yvatekueve ha'e ipo'akave va'e, ha'e avakue ipy'a guaxukueve ha'e javi. Jerusalém tetã py onhemboaty aguã oenoĩ.

² Ha'e rami vy Davi opu'ã ho'amy. Ha'e vy aipoe'i:

— Pendu ke, xeretarã kuery ha'e xevyguia kuery. Xee anhembopy'a va'ekue teĩ ajapo aguã peteĩ oo SENHOR guexeve guarã ojapo va'ekue ryru oĩ aguã, ha'e Nhanderuete py renderã. Ha'e rami vy xee areko katupa ma ajapo aguã.

³ Ha'e rami teĩ Nhanderuete aipoe'i xevy: “Ndee ma nda'evei rejapo aguã oo xerery renderã, mba'eta ndee ma joe repu'ãa py jouguy remoẽ vaipa va'ekue”, he'i.

⁴ Ha'e rami avi SENHOR Israel kuery ruete xeporavo xeru ro pygua kuery ha'e javi gui, Israel kuery ruvixarã aĩ aguã raka'e rã peve guarã. Mba'eta oiporavo raka'e Judá regua huvixarã, ha'e gui Judá regua mbyte gui ju oiporavo xeru ro pygua kuery, ha'e gui xeru ra'y kuery ikuai va'e gui xeporavo, Israel kuery ha'e javi ruvixaverã xemoĩ aguã.

⁵ Ha'e gui xera'y kuery ha'e javi gui — mba'eta heta ete ikuai xera'y kueryrã SENHOR ome'ẽ va'ekue — ha'e kuery va'e regua peteĩ va'e oiporavo Salomão, SENHOR pegua tenda Israel kuery re openaaty áry oĩ aguã.

⁶ Ha'e rami vy aipoe'i xevy: “Ndera'y Salomão ae 'rã xevy oo ojapo, oka guive, xera'yrã aiporavo rire, ha'e gui xee ma tuu 'rã aiko.

⁷ Ha'e rami vy ajapo 'rã raka'e rã peve guarã ipo'akaa oĩ aguã rami, xapy'a rei xee ajapo uka va'e ha'e aipotaa ha'e javi ri ojapopa ramo, aÿ peve oikoa rami”, he'i.

⁸ Ha'e gui aÿ Israel kuery SENHOR pe penhemboaty va'e ha'e javi renonde, ha'e Nhanderuete xeayvua oendu va'e renonde py xee aipoa'e pêvy: Pejapopa ete ke SENHOR Penderuete ojapo uka va'e, penhea'ã ke ha'e va'e rupi anho pendekuai aguã, kova'e yvy porãa re pendekoa riae aguã, ha'e gui pendera'y kuery rekoarã ju peja aguã, raka'e rã peve guarã.

⁹ — Ha'e gui ndee xera'y Salomão, eikuua porã pota ke nderu ruete. Ixupe ete ke eiko anhetã rupi ndepy'a ha'e nenhe'ẽ ha'e javi py. Mba'eta SENHOR ma oikuua pota katu'i 'rã nhandepy'a re oĩ va'e re, oikuua 'rã nhanhembopy'aa ha'e javi. Ndee reka ri ramo ojejou uka 'rã ndevy. Ha'e rã reja ri ramo ha'e ju ndereja 'rã raka'e rã peve guarã.

¹⁰ Ha'e gui aÿ ma, eikuua pota porã ha'e nunga ha'e javi re, mba'eta SENHOR ndeporavo ixupe rejapo aguã oo henda iky'a e'ý va'e oĩ aguã. Nembaraete ke ha'vy, ha'e ejapopa — he'i.

Gua'y Salomão pe Davi templo marã ramigua paa oexa ukaague

¹¹ Ha'e gui Davi gua'y Salomão pe ome'ẽ oo ra'angaa ombopara pyre, ha'e rami vy ojapo kuua aguã oka pygua, oo mboae ikuai va'erã, hepyve va'e omoõ porãaty, opy ja'o yvate rupi ha'e opyve rupi ikuai va'erã, ha'e oo teko vai mbogue atyrã.

¹² Onhembopy'aa ha'e javi rami vy ome'ẽ oo ra'angaa opa mba'e oĩa, SENHOR pegua oo yvýry rupi oguy ha'e opy ja'o ikuai va'erã, ha'e ixupegua opy mba'emo hepyve va'e ha'e ixupe omboaxa pyre omoõ porãaty guive,

¹³ ha'e gui sacerdote ha'e levita kuery peteĩ-teĩ regua SENHOR pegua opy rupi omba'eapo aguã, tembiporu opy rupi oiporu va'erã guive.

¹⁴ Davi oikuua uka avi tembiporu ouro guigua ikuai va'e ha'e javi poyia, peteĩ-teĩ omba'eapo rupi tembiporu ouro ha'e prata guigua ojapo pyrã mbovy pa opejaa aguã.

¹⁵ Ha'e rami vy peteĩ-teĩ tataendy renda ha'e hi'áry tataendy ikuai va'erã ojapoa rã oikuua uka mbovy poyia ouro guigua pa peteĩ-teĩ re oiporu va'erãa,

¹⁶ ha'e gui ouro guigua mbovy poyia avi Nhanderuete renonde mesa ikuai va'erã peguarã, peteĩ-teĩ oĩa rami vy, ha'e gui mesa prata guigua avi mbovy poyia paa.

¹⁷ Ouro ete gui anho 'rã ojapoa kuxa rakuarã, hy'a ha'e karo. Ha'e gui hy'a'i ouro guigua ikuai va'e peguarã oikuua uka peteĩ-teĩ poyia. Hy'a'i prata guiguarã voi ha'e rami ae avi, peteĩ-teĩ poyia oikuua uka.

¹⁸ Ha'e gui ouro oiky'a'opa pyre altar heakuã porã va'e rapyaty reguarã avi oikuua uka oa'angaaque rami vy, ha'e ouro anjo ipepo va'e ra'angaa renderã oĩ aguã voi, mba'eta ha'e va'e pepo oĩ 'rã SENHOR guexeve guarã ojapo va'ekue ryru áry rupi ojao'ipa aguã.

¹⁹ Ha'e nunga ha'e javi ra'angaa pejapo kuaapa aguã xevy pe omboparapa reve ome'ẽa SENHOR ijayvuague rami vy — he'i Davi nhomoneta vy.

²⁰ Ha'e gui gua'y Salomão pe ju Davi aipoe'i:

— Nembaraete ke, ndepy'a guaxu guive, rejapo va'erã va'e rejapopa aguã. Ekyje eme, ndekuerai eme guive, mba'eta SENHOR Nhanderuete, Xeruete va'e oiko 'rã ndereve. Nanderejai 'rã, nanepytyvõ e'ŷi 'rã guive, SENHOR pegua oo ha'e opy rupi oiporu pyrã rejapopa aguã.

²¹ Apy ma ikuai sacerdote ha'e levita kuery SENHOR pegua opy rupi ombo'epo va'erã amoĩ va'ekue. Ndereve ikuai avi opa mba'e py rei ombo'epo va'e o'arandua ha'e ojapoxea'i py, opa mba'e rei tema ojapo kuaa va'e. Yvatekueve ha'e heta va'e kuery ha'e javi ikuai avi 'rã rejapo uka va'e rei ojapo aguã — he'i.

29

Davi ha'e yvatekueve mba'emo ome'ëague

¹ Ha'e gui huixia Davi ijayvuve ju onhemboaty va'e kuery ha'e javi pe. Ha'e vy aipoe'i:

— Xera'y Salomão ae Nhanderuete oiporavo teĩ kunumi'i ha'e mba'eve ndojapo kuaai teri. Ha'e rami avi kova'e nunga ojapo va'erã heta ete oĩ. Mba'eta oo tuvixa va'e ojapo pyrã ma avakue peguarã e'ŷ, ha'e rã SENHOR Nhanderuete peguarã.

² Ha'e nunga rupi xee ma xembaraetea ha'e javi py ajoupa ma Xeruete pegua oo reguarã: ouro mba'emo ouro gui anho guarã, prata ma prata gui anho guarã, overa va'e ma overa va'e gui anho guarã, ferro ma ferro gui anho guarã, ha'e yvyra ma yvyra gui anho guarã. Ajou uka va'ekue avi ita ônix, ita mba'emo jeguarã, ita joo rami e'ŷ-e'ŷ pytã va'e, ita mba'emo ra'angaa ojapoa aguã va'e, ita porãgueve ha'e javi regua, ha'e gui ita mármore guive. Ha'e javi regua ma oata aguã rami e'ŷ oĩ.

³ Ha'e rami ae avi Xeruete pegua oo xee ayvu ete vy ouro ha'e prata xemba'e ae areko va'e ame'ëve ju 'rã Xeruete pegua oo reguarã, henda iky'a e'ŷ va'e reguarã areko katupa va'ekue áryve.

⁴ Ha'e va'e ma cem mil quilos ouro Ofir yvy guigua, ha'e duzentos e trinta mil quilos prata oiky'a'o pyre, oo mbotya ha'e javi ao'iarã.

⁵ Ouro oĩ 'rã mba'emo ouro gui anho guarã, prata guive oĩ prata gui anho guarã, opa marãguia ojapo kuaa va'e po py amboaxa va'e. Ha'e gui aŷ ma mava'e ju ome'ëxeia'i py ogueru 'rã SENHOR pe ome'ë va'erã? — he'i.

⁶ Ha'e ramo guetarã kuery re opena va'e kuery ome'ëxeia'i py ogueru okuapy ome'ë va'erã, Israel kuery peteĩ-teĩ regua ruvixa kuery, xondaro kuery mil ha'e cem ikuai va'e ruvixa kuery, ha'e huixave pe ombo'epo va'e kuery re opena va'e kuery guive.

⁷ Ha'e vy Nhanderuete pegua oo rupi ombo'epo va'e kuery peguarã ome'ë okuapy cento e sessenta e cinco mil quilos ouro anho rei va'e, dez mil hatã'i va'e ouro guigua, trezentos e trinta mil quilos prata guigua, sessenta mil quilos overa va'e guigua, ha'e gui três milhões e trezentos mil quilos ferro guigua.

⁸ Ita iporãve va'e oguerekva'e ogueru avi okuapy SENHOR pegua opy omoĩ porãaty pygumarã. Ha'e nunga re Gérson ramymino Jeiel opena aguã rami oiko.

⁹ Ha'e rami vy heta va'e kuery ha'e javi ov'y'apa okuapy ome'ëxeia'i py ome'ëmba vy. Mba'eta anhetê rupi ipy'a reve SENHOR pe ome'ë oata aguã rami e'ŷ. Ha'e ramo huixia Davi voi ov'y'a vaipa avi.

Davi onhembo'egue

¹⁰ Ha'e gui onhemboaty va'e kuery ha'e javi oendua py Davi oguerovy'a SENHOR. Ha'e vy aipoe'i:

— SENHOR Israel kuery ruete, Oreruete reiko va'e, ndere ae ta'ima'endu'a porãa yma ete guive raka'eve rã peve.

¹¹ SENHOR, ndere ae oĩ po'akaa, tuvixaa, ima'endu'a porãa aguã, opa mba'e re ndepo'aka aguã, ha'e yvatea. Mba'eta nemba'e meme oĩ yva ha'e yvy re ikuai va'e. SENHOR, ndere ae oĩ ndepo'aka aguã, ha'e pavẽ ikuai va'e áryve rupi ndeyvateve va'e repenaa py.

¹² Ndegui ae ou amongue oguerekopa aguã, omboetea guive. Ndee ma ha'e javi áry rupi repena va'e. Ndepo py ae oĩ mbaraetea ha'e po'akaa. Ndere anho oĩ renhomboyvatea ha'e renhomombaraetepã aguã.

¹³ Ha'e gui aŷ ma Oreruete, roguerov'y'a vy rogueroporaei rokuapy nderery hexakãmba va'e rupi.

¹⁴ Mba'eta mava'e tu xee aiko, xevyguia kuery voi mava'e regua tu ikuai kova'e regua ha'e javi rome'ëxeia'i py rome'ë aguã ha'eve va'e? Mba'eta ndegui meme ou opa marãguia, ha'e ndepo guiguare meme rome'ë ju.

¹⁵ Mba'eta ore kuery ma nerondenre rupi oikuaapy e'ŷ rami orekuai, oreramoĩ kuery ikuaiague rami ore kuery voi oguata rei va'e orekuai. Ore kuery ára ma kuaray'ã okanhya rami oaxa pojava avi yvy re, ropyta riae aguã ndoroguerekoi va'e vy.

¹⁶ Ha'e gui SENHOR Oreruete, kova'e nunga oata aguã rami e'ŷ rojou va'ekue peteĩ oo rojapo aguã nderery iky'a e'ŷ va'e renderã. Ha'e rami avi ndepo gui ae ou va'ekue, nemba'e meme ae.

¹⁷ Ha'e gui Xeruete, xee aikuua porã orepy'a re oĩ va'e reikuaapa va'ea, ha'e anhetë va'e rupi ikuai va'e anho rerovy'a va'ea. Ha'e gui xee voi xepy'a py anhetë rupi aiko vy kova'e nunga ha'e javi ame'ëxeia'i py ame'ë. Ha'e rami ae avi ndevyguia kuery apy onhemboaty va'e ome'ëxeia'i py mba'emo ndevy ome'ëmba rã aexa vy avy'a vaipa.

¹⁸ Ha'e nunga rupi SENHOR, oreramoĩ Abraão, Isaque ha'e Israel ruete reiko va'e, emoĩ riae ke ndevyguia kuery py'a re ha'e rami onhembopy'a ha'e ome'ëmbaxe aguã. Ipy'a re emoĩ avi ndevy ete ikuai aguã.

¹⁹ Xera'y Salomão re voi emoĩ anhetë rupi ipy'a aguã, rejapo uka va'ekue ojapopa aguã rami, ndeayvua ha'e ndeguigua lei ha'e javi guive. Tojapopa kova'e oo xee mba'emo areko katu rire – he'i.

²⁰ Ha'e gui Davi aipoe'i onhemboaty va'e kuery ha'e javi pe:

— Aŷ peporai SENHOR Penderuete pe — he'i. Ha'e ramo onhemboaty va'e ha'e javive oguerov'y'a okuapy SENHOR guamoĩ kuery ruete. Yvy re oakã omovaẽ reve omboete okuapy SENHOR, nguvixa renonde guive ojero'a okuapy.

²¹ Ko'ë jevy ma ha'e kuery ogueru SENHOR pe ome'ë va'erã. Ha'e vy ixupe oapy okuapy mil vaka ra'y, mil vexa'i ra'y ha'e mil vexa mba'emo rykue onhoẽ reve. Ome'ë mbyre guigua Israel kuery pe oata aguã rami e'ŷ ombojoja.

²² Mba'eta ha'e va'e ára okaru ha'e oy'u okuapy SENHOR renonde, ov'y'a ete guive.

Salomão nguvixaverã omoĩ okuapyague

Ha'e gui mokoïguea py ma Davi ra'y Salomão omoĩ okuapy nguvixaverã. Ha'e vy SENHOR renonde hexe omoĩa azeite huvixaverã, ha'e rã Zadoque re ma omoĩ sacerdote-rã.

²³ Ha'e ramo Salomão oguapy oiny SENHOR pegua tenda openaaty py, nguu Davi rekovia huvixave oĩ vy. Ha'e rire oiko porã, ha'e rã Israel kuery ha'e javi onhe'ë rendu okuapy.

²⁴ Ha'e rami vy yvatekueve, omboetevepy ha'e Davi ra'y kuery mboae oguerov'y'a okuapy huvixa Salomão.

²⁵ SENHOR voi omboyvate ete Salomão Israel kuery renonde rupi. Ha'e vy ixupe ome'ë huvixave rami ipo'aka aguã. Ha'e oĩ e'ŷ mbove neĩ peteïve Israel regua huvixa noĩ teri ha'e rami ete yvateve va'e.

Davi omanoague

²⁶ Jessé ra'y Davi ma Israel kuery ha'e javi re opena va'ekue.

²⁷ Quarenta ma'etŷ re opena Israel kuery re. Hebrrom py ranhe sete ma'etŷ re oĩ, ha'e gui Jerusalém tetã py ju trinta e três ma'etŷ re opena.

²⁸ Tuja'i raxa ma vy omano, heta ára oguerekovo reve. Iporiau e'ŷ re ha'e ipo'akapa va'e omano. Ha'e rã ta'y Salomão oĩ nguu rekovia.

²⁹ Ha'e gui huvixa Davi mba'emo ojapo va'ekue jypy guive opaa peve omboparaa ma imoiny kuaxia profeta Samuel, profeta Natã ha'e Gade ombopara va'ekue py voi.

³⁰ Oĩ avi ha'e opena jave py mba'emo oiko va'ekue ha'e javi, ipo'akaa ha'e hexe opa mba'e oiko va'ekue, Israel kuery ha'e yvy mboae re ikuai va'e ha'e javi re voi.

Mokoña Crônicas huvixa kuery rekoke oĩa Mokoña crônicas huvixa kuery rekoke oĩa

Kova'e kuaxia para re ma nomombe'ua vaipai Israel kuery regua ikuaria, ha'e rã Judá regua anho. Ha'e rami vy omombe'u huvixa Salomão Senhor pegua templo ojapoague. Ojapopaa ma ramo Salomão oguerovy'a ho'amy Nhanderuete, ijayvu guive ixupe heta va'e kuery ojapukai aguã re. Ha'e ramo Senhor ombovai: "Xapy'a rei xevyguia kuery xerery rupi ae aenoĩ va'ekue onhemoyvy'i vy onhembo'ea rupi xereka, ha'e gueko viai qui ojeko rerova ri ramo xee aendu 'rã yva re aĩa gui. Ha'e vy aperdoa 'rã ojejavyague ha'e amoingo porã ju 'rã ijyvy regua", he'i (7.14).

Opaa py omombe'u porâve mba'e re pa escravo-rã Nhanderuete ogueraa ukaague Judá kuery. Aipoe'i: "Senhor tamoĩ kuery Ruete va'e ma yma guive teĩ ijayvu ha'e kuery pe, ayvu mombe'ua kuery pe oayvu omombe'u uka tema, ojeupeguia kuery omboaxy ha'e ojeupeguia oo re oma'ẽ vy. Ha'e rami teĩ ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo Senhor ojeupeguia kuery rovai opoxya ombou ramo ha'e kuery pe noïvei ma oo jepe aguã", he'i (36.15-16).

*Gibeão py Nhanderuete pe Salomão mba'emo ome'ëague
1 Reis 3.3,4*

¹ Davi ra'y Salomão imbaraeteve tema ovvy openaa rupi. Hexeve SENHOR tuuete oiko vy ombovateve tema.

² Ha'e gui Salomão ijayvu Israel kuery ha'e javi pe, xondaro kuery mil ha'e cem ikuai va'e re opena va'e, nhomboayvu va'ety, Israel regua yvatekueve ha'e hetarã kuery akã ikuai va'e pe guive,

³ ha'e kuery ha'e javi reve oje'oi aguã Gibeão py ombojeroviaaty yvy'ã re oĩ va'e py, mba'eta ha'e py ma oĩ oguy nhemboaty oĩ atyrã tekao e'ÿa py SENHOR rembiguai Moisés ojapo va'ekue.

⁴ Ha'e rã Nhanderuete ayvu ryru ma Quiriate-Jearim gui Davi ogueru ruka ma vy omoĩ hendarã oguerekatatu ma voiague py, Jerusalém tetã py ae peteĩ oo'i ojapo va'ekue py.

⁵ Ha'e rã altar overa va'e guigua Uri ra'y Bezalel, Hur ramymino ojapo va'ekue ma SENHOR ombojeroviaaty renonde py oĩ. Ha'e py ae Salomão guetarã kuery reve oje'oi SENHOR pe oporandu okuapy aguã.

⁶ Ha'e py SENHOR renonde py ma Salomão ome'ë mymba kuery, oguy nhemboaty oĩaty py altar overa va'e guigua oĩ va'e áry. Ha'e va'e áry ma mil mymba oapy reve ome'ë.

1 Reis 3.5-15

⁷ Ha'e va'e pyavyve Nhanderuete ojexa uka Salomão pe. Ha'e vy aipoe'i:

— Ejerure ke xevy reipota va'e re, ha'e rã xee ame'ë 'rã.

⁸ Salomão ombovai:

— Xeru Davi pe rexu uka raka'e opa mba'e py reayvua. Ha'e gui xee ju xemoĩ hekovia.

⁹ Ha'e gui aÿ ma SENHOR Xeruete, ejapo xeru Davi pe ndeayvuague, ndee ae huvixarã xemoĩ rire kova'e kuery yvy ku'i rami heta ikuai va'e re apena kuaa aguã.

¹⁰ Aÿ gui ma eme'ë xe'arandurã ha'e aikuaa aguã, kova'e kuery areko kuaa aguã rami. Mba'eta mava'e 'rã tu oguerekotu kuaa kova'e kuery heta va'e? — he'i.

¹¹ Ha'e rami rã Nhanderuete aipoe'i Salomão pe:

— Ha'e ramigua ae ndepy'a re oĩ ramo nderejerurei mba'emo rerekopa aguã re, nemba'e rei-reirã, neĩ renhemboyvate aguã re, ndere ija'e e'ÿ va'e kuery omano aguã re, neĩ reiko pukuve aguã, ha'e rami 'rãgue py ne'arandurã ha'e reiko kuaa aguã re ae rejerure xevyguia kuery rerekopa aguã, huvixarã romoĩ rire.

¹² Ha'e ramo ndevy pe xee ame'ë ae 'rã ne'arandurã ha'e reiko kuaa aguã. Ame'ë avi 'rã nandeporiauei ha'e rerekopa aguã, romboyvate 'rã guive. Ha'e ramigua neĩ peteïve

huvixa pe ma voi nome'ẽai va'ekue ndee reĩ e'ŷ mbove, ha'e ndee nereĩvei ma rire ndoikovei 'rã ndee rami guarã — he'i.

¹³ Ha'e gui ma Salomão ma Gibeão py yvy'ã re ombojeroviaaty oĩ va'e gui ojevy ju Jerusalém tetã katy, oguy nhemboaty oĩaty renonde oĩague gui guive. Ha'e rami vy Israel kuery re opena oikovy ha'e py.

1 Reis 10.26-29

¹⁴ Salomão ma karóxa ha'e kavaju áry guarã oguerekopave ovy. Mil e quatrocentos karóxa oguerekko, ha'e doze mil kavaju áry guarã. Ha'e va'e ma joa py e'ŷ-e'ŷ 'rã oguerekko tetã karóxa ikuaiaty rupi, Jerusalém py ngoo katy'i guive.

¹⁵ Jerusalém tetã py ma prata ha'e ouro ma ita rami rive huvixa omboetave, yvyra yary voi ojapo sicômoro'y teko a e'ŷa rupi ikuai va'e rami oata e'ŷ aguã.

¹⁶ Salomão rymba kuery kavaju ma Egito ha'e Cilícia gui ogueru. Cilícia guigua ma huvixa rembiguai mba'emo vendea kuery ogueru hepy oĩa rami.

¹⁷ Ha'e rã karóxa ma Egito yvy gui 'rã ogueru. Peteĩ-teĩ repy ma seiscentos hatã'i va'e repy prata guigua, ha'e rã kavaju repy ma cento e cinqüenta. Ha'e rami ae avi mba'emo vendea kuery amboae katy 'rã ogueraa heteu ha'e Síria pygua huvixa kuery peguarã.

2

1 Reis 5.1-12

¹ Ha'e gui ma Salomão onhembopy'a templo ojapo aguã SENHOR rery oĩ atyrã, ngoo opena atyrã guive.

² Ha'e rami vy Salomão omoõ setenta mil avakue mba'emo reraarã, ha'e oitenta mil ju yvyty ikuai va'e gui ita mbovoarã, ha'e gui três mil e seiscentos ju omba'eapo va'e kuery re opena va'erã.

³ Ha'e gui Salomão aipoe'i uka Tiro pygua huvixa Hirão pe:

— Xeru Davi ndee reipytyvõ vy ngoorã ojapo aguã ixupe yvyra yary reme'ẽ va'ekue. Ha'ekue rami ae ju ke xepytyvõ.

⁴ Mba'eta ma'ẽ, xee aiko peteĩ oo SENHOR Xeruete rery oĩ atyrã ajapo aguã rami. Ixupe guarã ae amboaxa 'rã, henonde py heakuã porã va'e oapya aguã ha'e henonde mbojape omoõa riae jepi aguã, ha'e gui aje'ive ha'e ka'aru nhavõ mymba kuery oapy reve ome'ea aguã, sábado nhavõ, ha'e jaxy pyau jave guarã, ha'e gui ngaru SENHOR Oreruete pe oikoa ára py guive. Mba'eta ha'e rami aguã ae ha'e oeja raka'e ore Israel kuery rekora raka'e 'rã peve guarã.

⁵ Ha'e gui oo ajapo va'erã ma tuvixa 'rã, mba'eta Oreruete ma tuuete ra'angaa ikuai va'e gui yvateve va'e.

⁶ Ha'e rami avi mava'e 'rã tu ojapo kuaa oo ixupe guarã? Mba'eta yva oĩ va'e, ha'e yva yvatea peve nda'evei ha'e oĩ aguã. Mava'e tu ha'vy xee aiko oo ixupe guarã ajapo aguã, henonde heakuã porã va'e oapya aguã e'ŷ vy?

⁷ Ha'e nunga rupi aŷ emondouka xea katy peteĩ ava ouro re omba'eapo kuaa va'e, ha'e prata re, overa va'e, ferro, púrpura guigua, pytã ha'e hovy va'e guigua re, yvyra ombojegua kuaa va'e, xereve Judá ha'e Jerusalém py mba'emo ojapo kuaa va'e kuery ikuai va'e reve omba'eapo va'erã. Ha'e va'e kuery ma xeru Davi omba'eapo va'erã omoõ va'ekue.

⁸ Emondouka avi Líbano gui yvyra yary, cipreste ha'e sândalo aygue. Mba'eta xee aikuua porã nerembiguai kuery oikuua yvyra Líbano regua ojaya aguã. Ne'exa, apy xerembiguai kuery ikuai va'e ma nerembiguai kuery reve 'rã omba'eapo okuapy

⁹ yvyra omoatyrõ retaa py. Mba'eta oo ajapo va'erã ma tuvixa ha'e iporã raxa 'rã.

¹⁰ Ha'e ramo nerembiguai yvyra ayaa kuery pe xee ame'ẽ 'rã trinta mil ryru trigo ku'ikue, vinte mil ryru cevada, vinte mil ryru uva rykue, ha'e vinte mil ryru avi azeite — he'i.

¹¹ Ha'e ramo Tiro pygua huvixa Hirão ombovai vy kuaxia para ombou Salomão pe. Ha'e vy aipoe'i:

— Ndevygua kuery oayvu vy ae SENHOR nemoõ huvixaverã — he'i.

¹² Hirão aipoe'ive ju:

— Ima'endu'a porãmby toiko SENHOR Israel kuery ruete yva ha'e yvy apoare. Ha'e ma huvixa Davi pe ome'ẽ avi raka'e peteĩ ta'y hi'arandu va'erã, oiko kuaa ha'e mba'emo oikuaapa va'e, oo SENHOR peguarã ojapo va'erã, ha'e gui ha'e ae opena atyrã guive.

¹³ Ha'e nunga rupi aÿ ambou 'rã peteĩ ava oikuaapa ha'e hi'arandu raxa va'e, Hirão-Abi hery va'e.

¹⁴ Ha'e va'e xy ma Dã ramymino kuery regua, ha'e rã tuu ma Tiro tetã pygua ae. Ha'e ma mba'emo ojapo kuaa 'rã ouro gui, prata, overa va'e, ferro, ita ha'e yvyra gui, ajukue púrpura, hovy va'e, ipererí'i va'e ha'e pytã va'e gui. Ha'e ma yvyra ombojegua kuaa 'rã ixupe rexa ucaa rami rei, ndevygua ha'e xeruvixa Davi nderu oiko va'ekue pegua ombo'epo va'e kuery ha'e javi reve.

¹⁵ Ha'e gui aÿ ma xeruvixa, xea py xerembiguai kuery ikuiaia katy eraa uka trigo, cevada, azeite ha'e vinho ndeayvuague.

¹⁶ Ha'e ramo ore kuery ma Líbano yvy re rojayapa 'rã yvyra reipotaa rami. Ha'e gui ye'ẽ rupi 'rã romondouka ojokua-jokua pyre Jope tetã peve. Ha'e gui ndee ju 'rã reru ruka Jerusalém katy — he'i.

1 Reis 5.13-18

¹⁷ Ha'e gui ma Salomão oipapa ukapa avakue amboae guigua Israel yvy re hekoa va'e, nguu Davi ojapoague rami. Ha'e rami vy oikuaa cento e cinqüenta e três mil e seiscentos ha'e javi vy.

¹⁸ Ha'e kuery va'e regua omoõ setenta mil mba'emo reraarã, oitenta mil yvyty rupi ita mbovoarã, ha'e gui três mil e seiscentos ju ombo'epo va'e kuery re opena va'erã.

3

1 Reis 6.1-10

¹ Ha'e gui ma Jerusalém tetã py Salomão omboypy oo SENHOR peguarã ojapo aguã, Moriá yvyty áry. Ha'e py ma tuu Davi pe SENHOR ojexa ukaague, ha'e jebuseu Ornã mba'emo moa'yíaty py Davi oiporavo va'ekue.

² Salomão irundy ma'etýa re ma huvixa oĩ jave py, mokoõ jaxyta re ha'e mokoõ araa py omboypy ojapo aguã.

³ Po rami ma Salomão oa'ã Nhanderuete pegua oo renderã: ipuku-a ma vinte e sete metros ymave rupi oa'âague rami vy, ha'e rã ipya ma nove metros.

⁴ Henonde py oguy oĩ va'e ipya ma nove metros, henda iky'a e'ŷ va'e ipya rami ae. Yvatea avi nove metros. Opy rupi ma ouro ete py onhovãmba.

⁵ Ha'e gui opy ja'o tuvixave va'e mbotya rupi ma yvyrapo cipreste guigua anho omoõ, ha'e ouro ete py ju onhovãmba. Ha'e va'e rupi ombojegua imoiny pindo rakã ha'e corrente ra'angaa py.

⁶ Opy ja'o ombojegua avi ita iporãve va'e ha'e ouro Parvaim guigua py.

⁷ Ouro ete py onhovãmba opy rupi: yvyra hi'áry rupigua, okẽ yta, hi'áry rupigua ha'e okẽ ikuai va'e ha'e javi. Oo mbotya ha'e javi rupi ma ombojegua anjo ipepo va'e ra'angaa py.

⁸ Ojapo avi henda iky'a e'ŷ ete va'erã. Ipuku-a ha'e ipya ma nove metros, opy ja'o tuvixave va'e rami avi ipya. Onhovãmba ouro ete vinte mil quilos va'e py.

⁹ Ha'e rã karavo oiporu va'e ma cinqüenta hatã'i va'e ouro guigua rami ipoyi va'e. Opy ja'o yvate rupi ikuai va'e voi onhovãmba ouro py.

1 Reis 6.23-28

¹⁰ Ha'e gui henda iky'a e'ŷ ete va'e pygumarã ma yvyra gui ojapo avi mokoõ anjo ipepo va'e ra'angaa. Ouro py ju onhovã.

¹¹ Anjo pepo ha'e javi oipyo imoinya ma nove metros. Peteĩ va'e regua pepo ma mokoõ metros raxa'i ipuku-a va'e, ha'e oo mbotya re ovaõ oiny. Ha'e rã amboae pepo mokoõ metros raxa'i ipuku avi va'e ma ovaõ oiny amboae anjo hi'aí va'e pepo re.

¹² Amboae anjo pepo voi mokoõ metros raxa'i ipuku va'e, ha'e oo mbotya mboae re ovaõ oiny. Ipepo mboae voi mokoõ metros raxa'i ipuku va'e avi, ha'e amboae anjo pepo re ovaõ oiny. Mokoõve anjo pepo ha'e javi vy ma nove metros ipuku-a va'e.

¹³ Ha'e rami vy omopu'ã imo'amy mokoïve, henda iky'a e'ŷ va'e katy oma'ẽ ho'amy aguã rami.

¹⁴ Okẽrã ojapo avi hovy va'e, púrpura, pytã va'e ha'e ajukue iporãve va'e gui. Ombojegua avi imoiny anjo ipepo va'e ra'angaa py.

1 Reis 7.15-22

¹⁵ Oo yvy'iry ojapo avi mokoï oo ytarã dezesseis metros yvatea va'e. Peteĩ-teĩ áry guarã ma mokoï metros raxa'i yvatea va'e.

¹⁶ Ojapo avi corrente henda iky'a e'ŷ va'e py oĩ va'e rami guarã. Ha'e va'e ma omoï ijyta hi'aĩ va'e áry. Ojapo avi cem yvyra'a ra'angaa, ha'e vy corrente re omoï.

¹⁷ Oo ytarã ma omopu'ã imo'amy templo rokẽ py. Peteĩ ma omopu'ã oiporu kuaa regua re, ha'e rã amboae ma oiporu kuaa e'ŷa re. Oiporu kuaa regua re omopu'ã va'ekue ma omboery Jaquim, ha'e rã oiporu kuaa e'ŷa re omopu'ã va'ekue ma omboery Boaz.*

4

1 Reis 7.23-26

¹ Ojapo avi peteĩ altar overa va'e guigua. Ipuku-a ma nove metros, ipya ma nove metros avi, ha'e rã yvatea ma irundy metros raxa.

² Overa va'e ryku gui ojapo avi peteĩ yy mbotyarã. Ha'e va'e ma ojere rei va'e, irundy metros raxa ipya va'e, ha'e rã yvatea ma mokoï metros raxa'i. Ha'e gui ijyke rupi ixã treze metros raxa'i va'e oa'ãa.

³ Iguýry rupi ma omoï hy'akua ra'angaa, meio metro-a py dez kuerei 'rã omoï. Mokoï ryxy omoï, yy mbotya reve jojavi ojapo vy.

⁴ YY mbotya ma doze vaka ra'angaa áry oĩ. Mboapy ma kuaray ijapu'a'ia katy hi'aĩ, mboapy ma oikea katy, mboapy ma ipuku-a katy, ha'e rã mboapy ma kuaray oua katy hi'aĩ. Hevi ma mbyte katy ovaõ oiny. Ha'e va'e kuery áry ae yy mbotya oĩ.

⁵ Ipo guaxua ma irundy kuã oña rami. Ijyvýrykue ma karo rami hembe va'e, yvoty rami ojekuaa. Yy henyãa ma sessenta mil litros rivyvyi va'e.

1 Reis 7.27-50

⁶ Ojapo avi dez hy'a. Ha'e va'e regua ma peteĩ nhiruĩ omoï oiporu kuaa regua re, ha'e rã peteĩ nhiruĩ ma hovai re. Ha'e va'e ma ojoia aguã mba'emo oapy reve ome'ẽ mbyrã. Ha'e rã hy'a guaxu oĩ va'e ma sacerdote kuery anho ojejoi aguã.

⁷ Ouro gui ojapo avi dez tataendy 'yrã, ojapo ukaague rami ae. Ha'e va'e ma omoï templo py. Peteĩ nhiruĩ omoï oiporu kuaa regua re, ha'e rã peteĩ nhiruĩ avi hovai re.

⁸ Ojapo avi dez mesa-rã. Ha'e va'e voi omoï templo py. Peteĩ nhiruĩ ma oiporu kuaa regua re omoï, ha'e peteĩ nhiruĩ avi hovai re. Ha'e gui ojapo avi cem hy'a ouro gui.

⁹ Oka korarã ojapo avi sacerdote kuery anho ikuai aguã, ha'e gui oka tuvixa va'e. Ha'e va'e rokẽrã ojapo vy onhovãmba overa va'e py.

¹⁰ YY mbotya ma omoï oiporu kuaa regua re, kuaray puku-a yke katy.

¹¹ Ha'e gui ma Hirão ojapo avi oja, pá iky'a'oarã ha'e hy'a. Ha'e rami py ojapopa ma Nhanderuete pegua oo pygurarã huvixa Salomão pe ojapo 'rã va'ekue.

¹² Ha'e va'e ma oo yta mokoï va'e, mokoï ijyta árygua ojere rei va'e, ha'e gui mokoï kya yta árygua ojere rei va'e ao'iarã ojapopa.

¹³ Quatrocetros yvyra'a ra'angaa ojapo avi mokoï kya oĩ va'e reguarã, peteĩ-teĩ kya re mokoï ryxy yvyra'a oĩ aguã. Ha'e va'e py ma ojao'i ojere rei va'e mokoï oo yta áry oĩ va'e.

¹⁴ Ojapo avi hy'arã ijyta reve,

¹⁵ ha'e gui yy mbotya, hendarã doze vaka ra'angaa ikuai va'e reve.

¹⁶ Ha'e rami py huvixa Salomão pe Hirão-Abi ojapopa oja, pá iky'a'oarã, kuxa rakua ha'e tembiporu ha'e javi. Overa va'e oiky'a'o pyre gui ojapo SENHOR pegua oo pygurarã.

¹⁷ Jordão yakã katy'i yvy'ã guy py yvy yapo reveguia oña py ae huvixa ojapo uka overa va'e ryku gui, Sucote ha'e Zereda mbyte py.

¹⁸ Ha'e va'e ha'e javi ma oata aguã rami e'ŷ Salomão ojapo uka. Neĩ overa va'e ipoyia ma voi ndopejaai.

* 3:17 Tery Jaquim ma "Imoï atãa" 'ea, ha'e rã Boaz ma "Imombaraetea" 'ea, Nhanderuete re ima'endu'aa rupi omboery vy.

¹⁹ Salomão ojapo uka avi tembiporu henda SENHOR pegua iky'a e'ŷ va'e pyguarã: altar ouro guigua, mesa ouro guigua hi'áry SENHOR renonde mbojape omoña aguã,

²⁰ tataendy ha'e hi'y ouro ete'i guigua meme, gueko rami vy henda iky'a e'ŷ ete va'e renonde rupi omoendya aguã,

²¹ yvoty ra'angaa, tataendyrã ha'e tapyí jopyarã ma ouro guigua meme.

²² Ha'e gui tapyí araa, hy'a, hy'a'i heakuã porã va'e oapy atyrã, tapyí ryrurã ma ouro ete'i guigua meme. Ha'e gui oo oike atyrã, henda iky'a e'ŷ ete va'e rokẽ ha'e templo ropy henda iky'a e'ŷ va'e rokẽ ma ouro gui meme ojapo.

5

1 Reis 7.51

¹ Ha'e rami py huvixa Salomão ojapo ukapa oo SENHOR peguarã. Ha'e py ogueru avi mba'emo nguu Davi omboaxa va'ekue: prata ha'e ouro guigua, tembiporu ha'e javi guive omoñ SENHOR pegua oo re mba'emo hepyve va'e reve.

1 Reis 8.1-11

² Ha'e gui Salomão omboatypa Israel regua nhomoneta va'ety kuery, peteĩ-teĩ regua akã ikuai va'e, Israel regua yvatekueve guive. Jerusalém py ae omboaty tetã Davi rekoague Sião va'e gui templo katy ogueru aguã SENHOR guexeve guarã ojapo va'ekue ryru.

³ Ha'e ramo avakue Israel regua ha'e javi onhemboatypa okuapy huvixaa py. Ngaru ojapoa py ijaty sete jaxyaa py.

⁴ Israel regua nhomoneta va'ety kuery oupa ramo levita kuery hyru oupi vy

⁵ oguerova heravy yvy'ã katy. Oguv nhemboaty oïaty reve oguerova, ha'e tembiporu iky'a e'ŷ va'e ha'e py ikuai va'ekue ha'e javi. Levita regua sacerdote ikuai va'e ae ogueraa.

⁶ Ha'e rã huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oivy. Mymba kuery heta raxa ramo oipapaa aguã voi nda'evei.

⁷ Ha'e gui SENHOR guexeve guarã ojapo va'ekue ryru ma sacerdote kuery omoñ okuapy oñ aguã py ae, templo ropyve henda iky'a e'ŷ va'e py, henda iky'a e'ŷ ete va'e py ae, anjo ipepo va'e ra'angaa ikuai va'e pepo guy py.

⁸ Mba'eta anjo pepo ma oipyo imoiny hyru itui aguã áry rupi. Ha'e rami vy yvate rupi ojao'i hyru ha'e yvyra po'i'i hi'yrã ikuai va'e.

⁹ Yvyra po'i'i ipuku ete ramo henda iky'a e'ŷ va'e gui ojekuaa henda iky'a e'ŷ ete va'e rexei'i. Ha'e rã oka katy gui ma ha'e nunga ndojekuaai.

¹⁰ Ha'e py ma itui aŷ peve. Ha'e gui hyru py ma mba'eve nda'ipoi itape Moisés Horebe py omoñ va'ekue e'ŷ vy. Egito gui Israel kuery oje'oipa jave py guexeve guarã SENHOR ojapo va'ekue.

¹¹ Ha'e gui sacerdote kuery oëmba ju henda iky'a e'ŷ va'e gui. Ha'e va'e jave guarã sacerdote ikuai va'e ha'e javi ojeky'a'o uka ma voi va'ekue, ha'e va'e ára ombo'eapo aguã rami ikuai va'e anho e'ŷ.

¹² Levita kuery oporaei va'e ha'e javi ikuai avi ha'e py. Ha'e kuery va'e regua ma Asafe, Hemã, Jedutum ha'e tyvy kuery. Ha'e kuery ma ajukue ipererí'i va'e py onhemonde reve opu'âmba okuapy altar yvýry, kuaray oua katy. Hy'a pu, mbaraka ha'e ixã reta va'e reve ikuai. Ha'e kuery reve ikuai avi cento e vinte sacerdote mimby guaxu monhe'ea kuery.

¹³ Ha'e jave py peteĩ rami omonhe'ẽ okuapy mimby guaxu ha'e oporaei okuapy pavẽ oendu aguã rami, SENHOR oguerovy'a ha'e omboetea rupi. Ha'e rami vy oporaei atãve tema mimby guaxu, hy'a pu ha'e mba'epu mboae reve SENHOR mboetea rupi, "Mba'eta ha'e ma porayvu va'e, iporayvua ma opa va'erã e'ŷ", he'ia rupi. Ha'e rami rã peteĩ arai ou vy omoneyẽ templo SENHOR pegua opy rupi.

¹⁴ Ha'e ramo sacerdote kuery nda'evei opy rupi ombo'eapo aguã, arai SENHOR guigua rexakãa oña opy rupi omoneyẽ ramo.

6

1 Reis 8.12-21

- 1** Ha'e gui Salomão aipoe'i:
 — SENHOR aipoe'i va'ekue peteī arai ana mbyte oī aguā re.
- 2** Ha'e ramo SENHOR, xee ajapo peteī oo raka'e rā peve reī aguā — he'i.*
- 3** Ha'e gui ma huvixa ojere ju vy ogueroayvu porā Israel kuery onhemboaty va'e kuery ha'e javi, opu'āmba teri okuapy reve.
- 4** Ha'e vy aipoe'i:
 — Ta'ima'endu'a porāa SENHOR Israel kuery ruete re, mba'eta xeru Davi pe ijayvuague ojapopa ma opo'akaa rupi. Ha'e vy aipoe'i va'ekue:
- 5** “Egitō yvy gui xevyguia kuery Israel regua aipe'apa ára guive, Israel kuery ikuiaia tetā neī peteīve ndaiporavoi ha'e py peteī oo rejapo aguā xerery amoī aguā. Ha'e rami ae avi neī peteīve ava ndaiporavoi va'ekue Israel kuery ruvixarā.
- 6** Ha'e rami avi aiporavo Jerusalém ha'e py xerery oī atyrā, ha'e Davi voi aiporavo avi xevyguia kuery Israel regua ruvixarā”, he'i va'ekue.
- 7** Ha'e rami avi xeru Davi opy'a re omoī peteī oo SENHOR Israel kuery ruete rery oī atyrā ojapo aguā.
- 8** Ha'e rami teī xeru Davi pe SENHOR aipoe'i: “Peteī oo xerery oī atyrā rejapoxea py ha'evea rami ndeyp'a re remoī ha'e rami aguā.
- 9** Ha'e rami teī ndee e'ŷ 'rā oo rejapo, ha'e rā ndera'y ndegui oiko va'ekue ae 'rā ojapo xerery oī atyrā”, he'i raka'e.
- 10** Ha'e rami rire SENHOR ojapopa ma ijayvuague, mba'eta xeru Davi rekoria xee aī vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oī atyrā.
- 11** Ha'e py ma amoī avi ijayvu ryru. Ha'e va'e py oī itape Israel kuery reve SENHOR guexeve guarā ojapo va'ekue oī.
- 1 Reis 8:22-53**
- 12** Ha'e gui ma Israel kuery ha'e javi oexaa py Salomão oī SENHOR pegua altar renonde py. Ha'e vy opo oupi ho'amy.
- 13** Mba'eta Salomão ojapo uka ma voi va'ekue peteī pyrōarā overa va'e guigua. Ha'e va'e puku-a ha'e ipya ma mokoī metros raxa'i va'e, ha'e rā yvatekuea ma peteī metro raxa'i. Ha'e va'e oka mbyte py omoī rire hi'áry hi'aī vy guenapy'ā re oī Israel kuery ha'e javi oexaa py. Ha'e vy yva katy opo oupi vy
- 14** aipoe'i:
 — SENHOR Israel kuery ruete, yva re neī yvy re ndoikoi amboae ndee rami guarā ete, mba'eta nerembiguai kuery opy'a ha'e javi py nerentonde rupi ikuai va'e ndee rerekō 'rā ndereve guarā rejapo va'ekue rami, ha'e remboaxya rupi.
- 15** Mba'eta rejapo ae ma nerembiguai xeru Davi pe ndeayvuague. Ndee ae ndeayvu rire ndeop'akaa rupi rejapo, aŷ roexaa rami ae.
- 16** Ha'e gui aŷ SENHOR Israel kuery ruete, ejapopa ke nerembiguai xeru Davi pe ndeayvuague. Ha'e vy aipo're va'ekue: “Xerenonde ndoatai 'rā nderekoria tenda Israel kuery re openaaty áry oguapy oiny va'erā, xapy'a rei xerentonde rupi ndera'y kuery avi lei rupi ikuai aguā omoī porā ramo, ndee reikoague rami ae”, 're va'ekue.
- 17** Ha'e gui aŷ SENHOR Israel kuery ruete, tojeupity nerembiguai Davi pe ndeayvuague.
- 18** — Ha'e rami avi ha'eve 'rā ri nda'u ndee Oreruete yvy re reiko aguā ore avakue reve? Ma'ē, mba'eta yva neī yva yvatevea rupi peve voi nandejai 'rā, ha'e vy kova'e oo xee ajapo va'ekue py katuve ma nda'evei 'rā.
- 19** Ha'e rami avi SENHOR Xeruete, endu pota ke xee nerembiguai anhembo'e vy ajerurea re, rendu aguā aŷ nerentonde xee nerembiguai ajapukai reve anhembo'e.

* 6:2 Nhanderuete Moisés reve ijayvu jave aipoe'i va'ekue arai pytūa py oī aguā, heta va'e kuery ijayvua oendu teī oexa e'ŷ aguā (Êxodo 19.9). Ha'ekue rami ae avi templo ropy henda iky'a e'ŷ ete va'e py SENHOR ayvu ryru oīa py ma pytū rei, janela noī, ha'e oikeaty onhemboty ramo, ajukue hokērā omoī mbyre Jesus omano jave omondoroa peve (Mateus 27.51).

²⁰ Ha'e rami vy ara py ha'e pyávy kova'e oo re rema'ẽ riae aguã, ha'e kova'e henda “Xerery oĩ atyrã”, 'reague re, kova'e henda py nerembiguai onhembo'e oinya rendu aguã.

²¹ Ha'e gui aÿ, endu nerembiguai ha'e Israel kuery ha'e javi kova'e henda py rojapukai rokuapya. Endu ke yva re reĩa gui. Endu ha'e oreperdoa guive.

²² — Xapy'a rei amongue oirũ pe otekoavy ramo ha'ekue re omboayvua ramo ou vy kova'e ndevyguia opy altar oĩ va'e renonde py oura ramo

²³ endu ke yva re reĩa gui, ha'e embovai. Eikuua pota nerembiguai kuery re. Ha'e rami vy embopaga ojejavvy va'ekue, hexe ae ojeapa aguã ojapo vaiague. Ha'e rã ha'evea rami oiko va'e ma emboeko porã, ha'evea rami oikoa repy reme'ẽ vy.

²⁴ — Ha'e gui xapy'a rei ndevyguia Israel kuery ndevy ojejavvy 'rã, ha'e gui ngovaigua kuery renonde rupi ho'apa ma vy ndevy ju ojeko rerova 'rã okuapy. Ha'e vy nderery rupi ojapukai vy kova'e oo py nerendenre py onhembo'e ha'e ojerure ramo

²⁵ endu ke yva re reĩa gui, ha'e vy eperdoapa ndevyguia Israel kuery ojejavvyague. Ha'e gui ejapo tuu kuery yvyrã reme'ẽ va'ekue katy ju ojevy aguã rami.

²⁶ — Ha'e gui xapy'a rei yva rembotypa rã nda'okyvei 'rã, nderovai heta va'e kuery ojejavypa rire, ha'e gui kova'e henda py onhembo'e okuapy vy nderery rupi ojapukai 'rã, ha'e remoingo axy rire ojejavypaa gui ojeko rerova ramo

²⁷ endu yva re reĩa gui, ha'e vy eperdoapa nerembiguai kuery, ndevyguia Israel kuery ojejavvyague. Embo'e ju tape porã rupi ikuai aguã, ha'e embou nho oky yvy ndevyguia kuery ikuai aguã reme'ẽ va'ekue áry.

²⁸ — Ha'e gui ma xapy'a rei kova'e yvy re oiko 'rã karuai e'ŷ vy mba'eaxy vaikue, ha'e'ŷ vy hu'umbaa, hatãmba reia, e'ŷ vy tuku karu ha'e ape'i okaru va'e, xapy'a rei hovaigua kuery ojokopa 'rã ha'e kuery retã, ha'e'ŷ vy oiko 'rã ai vaikue e'ŷ vy mba'eaxy va'e rei,

²⁹ ha'e gui xapy'a rei mava'e rã rei onhembo'e vy ojerure 'rã, ha'e'ŷ vy ndevyguia Israel kuery ha'e javi 'rã ojerure okuapy, peteĩ-teĩ haxy va'e ha'e poriaua hexe oĩ va'e oendu vy kova'e oo oĩ katy opo omoĩ ramo

³⁰ endu ke yva re ne'amba py reĩa gui, ha'e vy eperdoa. Eme'ẽ peteĩ-teĩ pe oikoague repy, ha'e kuery py'a re oĩ va'e reikuaapa va'e vy, mba'eta ndee anho'i pavẽ py'a regua oikuaa va'e reiko.

³¹ Ha'e ramo nerendenre ha'e kuery ojererokyjea rupi ikuai aguã ndeguigua tape rupi, oreru kuery yvyrã reme'ẽ va'ekue re ikuia pukukue re.

³² — Ha'e gui amboae regua voi, ndevyguia Israel kuery regua e'ŷ ikuai va'eri oyvy mombyrya gui ou avi 'rã nderery tuvixa va'e rupi ikuai aguã, ndejyva reupi vy ndepo'akaa rexa ukaague ha'e kuery pe omombe'ua rã oendu rire. Ha'e gui ha'e kuery onhembo'e avi 'rã kova'e oo oĩ katy oma'ẽ reve, ha'e ramo

³³ endu yva re ne'amba py reĩa gui, ha'e ejapopa amboae regua kuery ndevy ojerurea, ha'e rami vy yvy regua ha'e javi nderery oikuaa aguã, ndevyguia Israel kuery rami ha'e kuery voi nerendenre ojererokyjea rupi ikuai aguã, ha'e oikuaapa aguã kova'e oo xee ajapo va'ekue py nderery remoĩague.

³⁴ — Ha'e gui xapy'a rei ndevyguia kuery oje'oi 'rã ngovaigua kuery reve joe opu'ã aguã katy, ha'e gui tape rupi remondoukaa py onhembo'e 'rã ndevy, kova'e tetã reiporavo va'ekue ha'e kova'e oo nderery oĩ atyrã rejapo uka va'ekue katy oma'ẽ ramo

³⁵ endu yva re reĩa gui onhembo'e vy ojerure okuapya, ha'e ejapo ha'evea rami.

³⁶ — Xapy'a rei ma ha'e kuery ojejavvy 'rã nderovai (mba'eta jipoi ava ojejavvy e'ŷ va'erã), ha'e ramo ha'e kuery rovai ndepoxy vy remboaxapa 'rã hovaigua kuery po py, ha'e kuery guekoa katy ogueraapa aguã escravo-rã, mombyry e'ŷ vy ha'e'i rupi teĩ ae ma.

³⁷ Ha'e gui yvy mamo rã rei ogueraa ague re ikuia py ha'e kuery onhemboaxy vy ojeko rerova 'rã, ha'e yvy escravo ikuia py ae ndevy ojerure vy aipoe'i 'rã okuapy: “Rojejavypa, tekó vai rupi anho orekuai va'ekue”, he'i 'rã, ha'e ndevy guarã ju ojeko rerova 'rã opy'a ha'e onhe'ẽ ha'e javi py.

³⁸ Ha'e rami vy yvy escravo-rã ogueraapaague py ae ndevy onhembo'e 'rã okuapy oyvyrã tuu kuery pe reme'ẽ va'ekue katy oma'ẽ reve, kova'e tetã ha'e kova'e oo nderery oĩ atyrã ajapo va'ekue katy guive. Ha'e ramo

³⁹ endu ke yva re ne'amba py reĩa gui ha'e kuery onhembo'e vy ojerure okuapya, ha'e ejapo ha'evea rami. Eperdoa ndevygua kuery nderovai rupi ojejavyague.

⁴⁰ — Ha'e gui aÿ ma Xeruete, nderexa tojepê'a, ha'e ndeapyxa toendu riae apy rojerure rã.

⁴¹ Ha'e gui Xeruete, epu'ã ke, eike ejuvy repytu'u aguã py, ndee ha'e ndeayvu ryru ndepo'akaa kuaa ukaa va'e reve. SENHOR Oreruete, tove ndevygua sacerdote kuery re toĩ reraa jepea kuaa ukaa, ha'e ndevygua iky'a e'ÿ va'e kuery toguerovy'a iporã va'e.

⁴² SENHOR Oreruete, eipytyvõ e'ÿ eme huvixaverã remoĩ va'ekue. Nema'endu'a ke nerembigui Davi reayvuague rami reiko riae aguã re — he'i.*

7

Nhanderuete rexakãa templo ropy rupi tyny ague

¹ Salomão onhembo'epa ma rire tata yva gui oguejy vy oapypa mymba kuery ome'ẽ va'erã ogueru va'ekue. Ha'e rami vy SENHOR rexakãa omony mba opy rupi.

² Neĩ sacerdote kuery ma voi nda'evei ikuaive aguã SENHOR pegua opy, mba'eta opy rupi SENHOR rexakãa tyny  ramo.

³ Ha'e ramo Israel ramymino kuery ikuai va'e ha'e javi ma tata reve SENHOR rexakãa oo re oguejy rã oexa vy ojero'a okuapy oka py ikuaia py. Ngova yvy re omova  reve omboete okuapy. Oguerovy'a okuapy SENHOR porayvua ha'e nhomboaxya opa e'ÿ va'e.

1 Reis 8:62-66

⁴ Ha'e gui huvixa ha'e heta va'e kuery ha'e javi SENHOR renonde ome'ẽ okuapy mymba kuery.

⁵ Huvixa Salomão avi ome'ẽ vinte e dois mil vaka ha'e cento e vinte mil vexa'i.

⁶ Ha'e rami py huvixa ha'e heta va'e kuery ha'e javi reve Nhanderuete pegua oo omboaxa okuapy ipo py. Sacerdote kuery ha'e javi ma pete -te  oĩ aguã py ae ikuai, levita kuery ha'e rami ae avi mba'epu reve oporaei okuapy SENHOR pe. Ha'e va'e ma Davi ojapo uka va'ekue ha'e kuery SENHOR oguerovy'aa rupi oiporu va'erã, mba'eta iporayvua oĩ riae 'rã. Ha'e kuery renonde py ma sacerdote kuery mimby guaxu monhe' a ikuai avi. Ha'e rami vy Israel kuery ha'e javi opu' mba nhogueno'amy.

⁷ Ha'e va'e  rave Salomão omboaxa avi oka SENHOR pegua oo rexei oĩ va'e. Mba'eta ha'e py ae ome'ẽ mymba oapy reve, hexeve pete  rami ju ikuai regua kyrakue guive. Mba'eta altar overa va'e guigua Salomão ojapo uka va'ekue py ma no mba reguai mymba oapy reve ome'ẽ va'e, mba'emo aju guigua ha'e hexeve pete  rami ikuai agu  regua kyrakue oapy va'e.

⁸ Ha'e rami py sete  ra re Salomão ojapo ngaru. Hexeve ikuai avi Israel kuery heta ete ijaty va'e, Hamate tekoá py nhava a'i ha'e Egito yak  katy'i gui ou va'ekue.

⁹ Ha'e gui oito araa guive ma omboypy ju ngaru oguy'i py ikuai agu  regua, sete  ra re ma altar omboaxa okuapy rire. Ha'e rami vy sete  ra re ju ojapo ngaru.

¹⁰ Ha'e gui sete jaxyha'e vinte e tr s araa py ma huvixa omondoukapa ju heta va'e kuery. Ha'e r  ha'e kuery oje'oipa ju ngoo katy, ovy'a ete ha'e opy'a py oguerovy'a reve Davi pe SENHOR mba'emo por  ojapoague, Salomão ha'e ojeupagua Israel kuery ha'e javi pe guive.

1 Reis 9:1-9

¹¹ Ha'e rami py SENHOR pegua oo huvixa Salomão ojapopa ma, ngoor  ae ha'e opa mba'e onhembopy'aa rami ojapoxe va'ekue voi. SENHOR pegua oo ha'e ngoo ae ojapoa py oiko por .

¹² Ha'e gui ma py av  SENHOR ojexa uka Salomão pe. Ha'e vy aipoe'i ixupe:

— Aendu rejerurea. Ha'e rami vy xevy guar  aiporavo kova'e oo mba'emo peme'  atyr .

* 6:42 Salmo 132.8-10

¹³ Ha'e gui ma xapy'a rei xee yva amboty 'rā nda'okyvei aguā rami, e'ŷ vy tuku karu yvy re onhotŷ mbyre ho'upa aguā re xeayvu, ha'e'ŷ vy xevyguia kuery ikuiaia rupi mba'emo vai ambou, ha'e ramo

¹⁴ xapy'a rei xevyguia kuery xerery rupi ae aenoī va'ekue onhemo'yvyi'i vy onhembo'ea rupi xereka, ha'e gueko vaia gui ojeko rerova ri ramo xee aendu 'rā yva re aña gui. Ha'e vy aperdoa 'rā ojejavyague ha'e amoingo porā ju 'rā ijyvy regua.

¹⁵ Xerexa ojepe'a riae 'rā, xeapyxa py voi aendu riae 'rā apy xevy pejerurea.

¹⁶ Mba'eta kova'e oo ma aiporavo vy xevy guarā ae aiky'a'opa, ha'e py xerery oī aguā raka'e rā peve guarā. Ha'e va'e re ama'ē vy xepy'a py xema'endu'a riae 'rā ára nhavō.

¹⁷ Ha'e gui ndee ma xapy'a rei xerenonde rupi nderu Davi oikoague rami ndee voi reiko ramo, ha'e ajapo uka va'ekue, xeayvuague ha'e aipotaa ha'e javi rejapopa ri ramo,

¹⁸ ndevy pe voi amoī atā 'rā ndepo'akaa raka'e rā peve guarā, nderu Davi pe xereve guarā ajapo va'ekue rami vy. Ha'e vy ixupe aipoa'e va'ekue: "Ndoiko e'ŷi 'rā nderekovia Israel kuery re opena va'erā", ha'eague rami vy.*

¹⁹ — Ha'e rami avi xapy'a rei peē ha'e pendera'y kuery xegui pejepe'a vy ajapo uka va'ekue ha'e xeayvuague ndapejapovei vy tuuete kuery mboae re peo vy pembojerovia ri ramo,

²⁰ ha'e ramo roipe'apa 'rā pendeyvyrā ame'ē va'ekue gui, ha'e kova'e oo xerery rupi aiky'a'opa va'ekue amombo 'rā mombyry xerenonde gui. Ha'e rami rire yvy regua kuery ojojai rei ha'e ijayvu rei okuapy aguā rive 'rā oī.

²¹ Mba'eta kova'e oo aŷ omboeteave va'eri ha'e jave py oīague rupi oaxa va'e kuery oexa vy onhemondyipa 'rā. Ha'e vy aipoe'i 'rā: "Mba'e re tu SENHOR guī rami ete ri oeja kova'e yvy ha'e kova'e oo?" he'i 'rā okuapy.

²² Ha'e gui ombovaia 'rā: "Ha'e rami ete oeja mba'eta ha'e kuery oejapa rire SENHOR guamoī kuery ruete Egito yvy gui oipe'a va'ekue, ha'e tuuete mboae pe ju ova vy omboete ha'e ombojerovia okuapy ramo. Ha'e nunga rupi ae rima ha'e kuery áry ombou raka'e guī rami ete ojexavai aguā", 'ea 'rā.

8

1 Reis 9.10-28

¹ Vinte ma'etŷa py mae ma Salomão ojapopa SENHOR pegua oo, ngoorā ae guive.

² Omoatyrō avi huvixa Hirão tetā ipo py omboaxa va'ekue. Ha'e va'e py ma Israel kuery ju omboekoa.

³ Ha'e va'e rire ma Hamate-Zoba tetā katy Salomão oo vy oipe'a.

⁴ Tekoa e'ŷa py ojapo avi Tadmor tetā. Hamate katy'i guive tetā ojapo reta tembi'u omoī porā atyrā.

⁵ Omoatyrō avi Bete-Horam, yvy'ā katy ha'e yvy'ā guy katy. Ha'e va'e tetā ha'e javi omombaraete vy ojapo imoiny korarā, okē jokoarā guive.

⁶ Omombaraete avi imoiny Baalate ha'e tetā rupi tembi'u omoī porā atyrā ha'e oguereko va'e ha'e javi, ha'e gui tetā karóxa ha'e guymba kavaju ikuai atyrā. Jerusalém py voi ojapoxe va'ekue ojapopa, Líbano yvy re ha'e oyvy openaa ha'e javi rupi.

⁷ Ha'e gui heteu kuery regua okuave va'e, amorreu, ferezeu, heveu ha'e jebuseu kuery Israel kuery regua e'ŷ ikuai va'e,

⁸ ha'e ta'y kuery okuave va'e Israel kuery ndojukapai va'ekue, ha'e va'e kuery ae Salomão omomba'eapo nhea'ā, aŷ peve guarā.

⁹ Ha'e rā Israel kuery va'e regua ma neī peteīve Salomão nomomba'eapoi escravo rami. Ha'e va'e kuery ma ixupe ikuai joe opu'āa rupi, huvixa kuery, ha'e gui karóxa ha'e imboguataaty kuery re openaa rupi ikuai.

¹⁰ Ha'e kuery ae huvixa Salomão rembiguai yvatekueve, duzentos e cinqüenta ikuai guetarā kuery re openaa rupi.

* ^{7:18} Ha'e rami Davi pe Nhanderuete ijayvu ma voi (1 Reis 9.6-9; 1 Crônicas 17.12-14).

¹¹ Ha'e gui ma Salomão ojapo Faraó rajy tetā Davi rekoague py oīague gui ova aguā rami hoorā ojapo uka va'ekue py. Mba'eta aipoe'i: "Xera'yxy ma nda'evei Israel kuery ruvixa Davi rogue py oiko aguā, mba'eta SENHOR ayvu ryru oīague ma iky'a e'ŷ va'e meme", he'i.

¹² Altar SENHOR peguarā Salomão ojapo va'ekue áry ome'ẽ jepi mymba kuery, oikeaty rexei'i.

¹³ Ko'ẽ nhavō 'rā ome'ẽ Moisés ijayvuague rami vy, sábado nhavō guive, ngaru jaxy ipyau'i jave ha'e oa'angaague ára py, mboapykue kuerei 'rā ome'ẽ ma'etŷa nhavō: ngaru mbojape imbovua revezua e'ŷa ára, semana regua ngarua ára ha'e oguy'i py ikuia aguā ára guive.

¹⁴ Nguu Davi ojapo ukaague rami vy omoĩ avi sacerdote kuery peteĩ-teĩ regua om̄ba'apo aguā, levita kuery ha'e rami ae avi peteĩ-teĩ omoĩ om̄ba'apo aguā rami, Nhanderuete pe oporaei aguā, sacerdote kuery renonde rupi oipytyvō aguā ko'ẽ nhavō ojapo 'rā va'ekue ojapoa rupi, okẽ rarõa kuery peteĩ-teĩ regua okẽ ikuai va'e oarõ aguā rami guive, ha'e rami aguā ae Nhanderuete rembiguai Davi ojapo uka rire.

¹⁵ Neĩ peteĩve henda py ma voi sacerdote ha'e levita kuery ndojapo e'ŷi huvixa ojapo uka va'ekue, peráta omoĩ porāa rupi voi.

¹⁶ Ha'e rami py Salomão ojapopa SENHOR pegua oo rupi ojapoxe va'ekue, omboypyá ára guive ojapopa peve. Ha'e rami py ae ojapopa oo SENHOR pegua.

¹⁷ Ha'e gui ma Salomão oo Eziom-Geber ha'e Elate py ye'ẽ rembe re, Edom yvy re.

¹⁸ Ha'e py oĩa py huvixa Hirão guembiguai kuery pe ogueru ruka kanoã ha'e omboguata kuua va'e kuery. Ha'e kuery ma Salomão rembiguai kuery reve Ofir py oje'oi vy ha'e gui ogueru okuapy quinze mil quilos ouro guigua. Huvixa Salomão pe ae ogueru.

9

1 Reis 10.1-13

¹ Ha'e gui Sabá pygua huvixa kunha oendu Salomão reko omombe'ua rā. Ha'e rami vy Jerusalém py ou haxy-axy va'e re oporandu aguā. Guembiguai kuery heta va'e reve ovaẽ. Guymba camelo kuery ombovoyi heruvy tembi'u irûrā, ouro ha'e ita iporāgueve va'e heta re guive. Ha'e gui Salomão renonde py ovaẽ vy ixupe oporandu onhembopy'aague ha'e javi rami.

² Ha'e ramo opa mba'e re oporandu rā Salomão ombovai, mba'eta ixupe ma neĩ peteĩ henda py ma voi ndaxyi omombe'u porāve aguā.

³ Ha'e ramo Sabá pygua huvixa kunha oendu Salomão 'arandua ha'e javi, oexa avi oo ojapo uka va'ekue,

⁴ mesa áry tembi'u oguerua va'e, yvatekueve ikuaiaty, hembiguai ha'e karô rerua kuery om̄ba'apoa, ijao guive, ha'e mymba kuery altar áry SENHOR pe oapyaty. Ha'e nunga ha'e javi oexa vy onhemondyi rei oiny.

⁵ Ha'e vy aipoe'i huvixa pe:

— Anhetē ete ae ra'e nderekō regua ayvua xerekoa py aendu va'ekue ha'e ne'arandua regua voi.

⁶ Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexâ py aexa e'ŷa ja. Anhetē neĩ mbyte rupi peve ma voi xevy nomombe'uai va'ekue, mba'eta nderekō omombe'ua rā aenduague gui ne'arandupave ra'e, rerekopave ha'e ndere ima'endu'a porā mbyve ete va'e.

⁷ Ovy'a ete 'rā okuapy ndevygua avakue, nerembiguai nerendirondé rupi ikuai va'ety, mba'eta ha'e kuery oendu 'rā ne'arandua rupi ndeayvua.

⁸ Ta'ima'endu'a porāa avi SENHOR Nderuete re, mba'eta ndererov'y a vy tenda Israel kuery re openaaty áry nemoĩ rire huvixa SENHOR nderuete peguarā. Mba'eta SENHOR ma Israel kuery raka'e rā peve omoingo porā aguā rami oayvu vy ae nemoĩ huvixara, ha'evea rami rerekō aguā teko porā rupi — he'i.

⁹ Ha'e rami vy huvixa Salomão pe kunha va'e ome'ẽ quatro mil quilos ouro guigua, heta tembi'u irûrã, ita iporâve va'e guive. Neĩ peteigueve ma ndogueruai teri mba'emo porã Sabá pygua huvixa kunha Salomão pe ome'ẽ va'ekue ramigua ete.

¹⁰ Ha'e gui huvixa Hirão ha'e Salomão rembiguai kuery Ofir gui ouro ogueru va'e ma ha'e katygui ogueru avi yvyra sândalo aygue ha'e ita iporâve va'e.

¹¹ Yvyra sândalo gui ma huvixa Salomão ojapo uka jopy-jopy ovaty SENHOR pegua opy ha'e ngopy guarã, ha'e gui harpa ha'e mbaraka oporaei va'e kuery peguarã. Ha'e nunga ma neĩ peteïve ma Judá yvy re oexapy e'ŷ teri.

¹² Ha'e gui Sabá pygua huvixa kunha pe huvixa Salomão ju ome'ẽ ixupe ogueru va'ekue gui hetave, mba'emo oipota ha'e ojerurea ha'e javi. Ha'e ramo ojevy vy oyvy katy ju oo, guembiguai kuery ha'e javi reve.

1 Reis 10.14-29

¹³ Ma'etýa nhavõ ouro Salomão pe oguerua va'e poyikue ma vinte e dois mil quilos,

¹⁴ mba'emo vendea kuery ha'e mba'emo mboekoviaaty gui ojou va'e áryve. Arábia pygua huvixa ha'e va'e yvy re opena va'ety kuery voi ome'ẽ 'rã ixupe ouro ha'e prata.

¹⁵ Ha'e ramo ouro ombole pyre gui Salomão ojapo duzentos hu'y jokoa tuvixa va'e. Peteï-tei hu'y jokoarã ma seis quilos ouro opejaa.

¹⁶ Ouro ombole pyre gui ojapo avi trezentos hu'y jokoa. Ha'e va'e regua hu'y jokoarã peteï-tei ma três quilos raxa ouro opejaa. Ha'e va'e ma huvixa omoï porã ukapa oo Líbano ka'aguy regua guigua py.

¹⁷ Huvixa ojapo avi peteï tenda opena atyrã tuvixave va'e marfim guigua, ha'e vy onhovãmba ouro ete py anho.

¹⁸ Tenda renonde guarã ma ojapo mboapy meme pyrõa. Oĩ avi peteï py renderã ouro gui ojapo pyre, tenda re omboja pyre. Ijyke joavaive re ma omoï avi jyva ytarã oguapyaty yvýry, ha'e ijyva yta yvýry ma mokoï guary ra'angaa omopu'ã imo'amy.

¹⁹ Mboapy meme pyrõa ikuai va'e áry ma doze avi omoï guary ra'angaa, peteï-tei pyrõa apy reguarã. Ha'e va'e nunga ma neĩ peteïve huvixa pe ma voi ojapoa va'e'ŷ teri.

²⁰ Karo huvixa Salomão oy'uat yva'e ma guive rã ouro guigua meme. Oo Líbano ka'aguy regua guigua py ikuai va'e voi ouro guigua meme avi. Ha'e rã prata ma Salomão oĩ jave mba'everã nombovarei merami.

²¹ Mba'eta huvixa oguereko reta kanoã guaxu Társis katy oo va'erã, Hirão rembiguai kuery reve omboguataa va'e. Mboapy ma'etýa py kuerei 'rã Társis gui kanoã guaxu ojevy okuapy vy ogueru ouro, prata, marfim, karaja ha'e jayru guaxu.

²² Ha'e rami vy huvixa Salomão yvy jave re huvixa kuery ikuai va'e gui ipo'akave, o'arandua py ha'e mba'emo oguerekopaa py.

²³ Ha'e ramo yvy jave gui huvixa kuery ou'rã ha'e oĩa py o'arandua rupi ijayvu rã oendu aguã.

²⁴ Ma'etýa nhavõ peteï-tei ogueru 'rã mba'emo ixupe ome'ẽ va'erã: ouro ha'e prata guigua, ajukue, tembiporu, kavaju ha'e mburika kunha, tembi'u irûrã guive.

²⁵ Ha'e gui Salomão oguereko quatro mil kavaju oguy py karóxa regua. Kavaju árygua doze mil ju oguereko imboguataarã. Ha'e va'e kuery ma tetã ikuai va'e rupi oguereko karóxa, Jerusalém tetã py ngoo katy'i py guive.

²⁶ Ha'e gui Salomão ipo'aka oiny huvixa kuery ha'e javi re, Eufrates yakã guive filisteu kuery yvy peve, ha'e gui Egito yvy apy peve.

²⁷ Prata ma Jerusalém py huvixa omboetave ita rami rive, yvyra yary guive ojapo oata aguã rami e'ŷ sicômoro'y tekoia e'ŷa rupi ikuai va'e rami.

²⁸ Kavaju Salomão peguarã ma Egito yvy ha'e yvy jave gui oguerua.

1 Reis 11.41-43

²⁹ Ha'e gui oĩve rei tema Salomão rekoke regua. Ha'e rami avi mba'emo ojapo va'ekue jypy guive opaa peve noĩ 'rã teve kuaxia Nebate ra'y Jeroboão rekoke profeta Natã ha'e Siloé pygua Aías ombopara va'ekue py, profeta Ido mba'emo oexa va'ekue ombopara va'ekue re guive?

³⁰ Quarenta ma'etý re Salomão opena oikovy Jerusalém py Israel kuery ha'e javi re.

³¹ Ha'e gui guamoī kueryague rami ndoikovevei'i ma ramo onhono porāa tetā Davi rekoague py ae. Ha'e gui ta'y Roboão ju oī nguu rekovia.

10

1 Reis 12.1-15

¹ Ha'e gui ma Roboão oo Siquém katy, ha'e py Israel kuery onhemboatypa ma ramo nguvixarā omoī aguā.

² Ha'e nunga Nebate ra'y Jeroboão avi oendu. (Ha'e va'e ma Egito yvy re teri oiko, huvixa Salomão gui onhaague py.) Ha'e gui Egito gui ojevy ju ramo

³ oenoī ukaa okuapy. Ha'e ramo Israel kuery ha'e javia py ou Roboão reve jogueroayvu aguā. Ha'e ramo ha'e kuery aipoe'i okuapy Roboão pe:

⁴ — Nderu ma orererekoxo axy ete va'ekue. Ha'e gui aŷ ma orererekoxo porā'i ju nderu orembojexavai ha'e orererekoxo axyague gui. Ha'e ramo ma ndevy ae 'rā orekuai.

⁵ Roboão ombovai ha'e kuery pe:

— Mboapy araa py ma peju ju xea py — he'i. Ha'e rā heta va'e kuery oje'oipa.

⁶ Ha'e gui ma huvixa Roboão onhemongoeta uka tujakueve nguu Salomão oikove teri jave henonde ikuai va'ekue pe. Ha'e vy aipoe'i:

— Mba'exa tu peē kuery xemongeta ta heta va'e kuery ambovai aguā?

⁷ Ha'e kuery ombovai:

— Xapy'a rei kova'e kuery re repena porā, ha'e rerorya rupi ndeayvu porā'i ramo ha'e kuery raka'e rā peve 'rā ikuai nerembiguai — he'i okuapy.

⁸ Ha'e rami teī ha'e noendu potai tujakueve omongoeta rā. Ha'e vy guembiguai kunumigue ojavegua ngupive ikuai va'e pe ju onhemongoeta uka.

⁹ Ha'e vy aipoe'i ha'e kuery pe:

— Peē kuery, mba'exa tu xemongeta ta kova'e kuery ambovai aguā? Mba'eta xevy ojerure vy “Orererekoxo porā'i ju nderu orererekoxo axyague gui”, he'i okuapy ramo.

¹⁰ Ha'e ramo kunumigue ijavegua hupive ikuai va'e ombovai:

— Po rami 'rā ndeayvu ha'e va'e kuery aipoe'i va'ekue pe: “Nderu orererekoxo axy, va'eri ndee orererekoxo porā'i ju”, he'i va'e kuery pe. Po rami 'rā ndeayvu: “Xekuā kyr'i ma xeru poataa gui tuvixave.

¹¹ Xeru pendererekoxo axy ae, ha'e rā xee ma roguerekoxo axyve ete 'rā. Xeru penembojexavai vaka pi py penenupā vy, ha'e rā xee ma japeuxa popia py 'rā rombojexavai”, 're 'rā — he'i okuapy.

¹² Ha'e va'e rire mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevy ju xea py”, he'iague rami vy.

¹³ Ha'e ramo huvixa Roboão ombovai vy ayvu poyi py ijayvu, tujakueve omongoetaa noendu potai rire.

¹⁴ Kunumigue omongoetaague rami rive ijayvu vy

— Xeru pendererekoxo axy, ha'e rā xee ma roguerekoxo axyve 'rā. Xeru ma penembojexavai vaka pi py, ha'e rā xee ma japeuxa popia py 'rā rombojexavai — he'i.

¹⁵ Ha'e rami vy huvixa Roboão noendu potai heta va'e kuery ayvu re, mba'eta ha'e rami aguā ma Nhanderuete gui ae oiko, Nebate ra'y Jeroboão pe Siló pygua Aías ijayvuague SENHOR omoingo aguā.*

1 Reis 12.16-20

¹⁶ Ha'e gui Israel kuery ha'e javi ayvu re huvixa Roboão ndojapyxaka potai ramo oexa vy ivai vaipa okuapy. Ha'e vy aipoe'i:

— Mba'e ha'vy jareko Davi ramymino kuery reve? Jessé ra'y reve guarā noīvei ri nhandevy! Israel kuery, jaje'oipa nhandro katy! Ha'vy Davi ramymino kuery, pepena pendero re ae! — he'i okuapy. Ha'e rami vy Israel kuery peteī-teī oje'oipa ju ngoo katy.

* ^{10:15} Profeta Aías Jeroboão pe ijayvu ma voi Israel kuery Nhanderuete omboja'o va'erāa rami (1 Reis 11.29-33). Ha'e gui Judá ha'e Benjamim regua kuery reve kuaray puk-a katy ikuai va'e gui ma Efraim regua, ha'e kuaray ijapu'a'ia katy ikuai va'e regua reve oja'o. Mokoī regua “Judá kuery” 'ea va'e gui dez regua “Israel kuery” 'ea va'e oja'o, ha'e kuery ojejavyague re Nhanderuete ombopaga ramo.

¹⁷ Ha'e rã Israel kuery Judá regua tetã rupi hekoa va'e re ma Roboão ae opena oikovy.

¹⁸ Ha'e gui huvixa Roboão omondouka omomba'epo nhea'ämby kuery re opena va'ety Adorão, teĩ ha'e va'e ma Israel kuery ha'e javi ojapipa ita py, ha'e ramo omano. Ha'e rã huvixa Roboão ma okaróxa ogueraa nho vy onha ovy Jerusalém katy.

¹⁹ Ha'e rami py Israel kuery onhemoingo Davi ramymimo kuery rovaigua, aÿ peve guarã.

11

1 Reis 12.21-24

¹ Jerusalém tetã py Roboão ovaẽ ma vy omboatypa Judá ha'e Benjamim regua kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e rami vy Roboão pe ju omboaxa okuapy aguã ipo'akaague.

² Ha'e rami teĩ SENHOR oayvu ombou peteĩ ava guemimbo'e Semaías va'e pe. Ha'e vy aipoe'i:

³ — Ndeayvu ke Salomão ra'y Roboão Judá pygua huvixa va'e pe, ha'e Israel kuery Judá ha'e Benjamim regua ikuai va'e ha'e javi pe. Ha'e vy aipo're:

⁴ “Po rami SENHOR ijayvu: ‘Tapeo eme, pepu'ã eme penderyvy kuery rovai. Peteĩ-teĩ pejevy ju pendero katy, mba'eta xee ae ha'e nunga amoingo va'ekue', he'i.’” Ha'e rami SENHOR ijayvua ha'e kuery oendu vy ndoo nhoi teve Jeroboão kuery rovai opu'ã aguã.

Roboão peteĩ-teĩ tetã ikorarã ojapoague rery oĩa

⁵ Roboão ma Jerusalém py hekoa oikovy vy ojapo Judá re tetã ikuai va'e korarã, ngovaigua kuery gui.

⁶ Ha'e rami vy ojapo Belém tetã korarã, Etã, Tecoa,

⁷ Bete-Zur, Socó, Adulão,

⁸ Gate, Maressa, Zife,

⁹ Adoraim, Laquis, Azeca,

¹⁰ Zorá, Aijalom ha'e Hebron tetã guive. Ha'e va'e tetã ikorapa va'e ma Judá ha'e Benjamim yvy regua meme.

¹¹ Ha'e va'e tetã omombaraetepa ma vy ha'e py omoingo harõarã kuery. Omoĩ avi mba'emo ho'u va'erã, azeite, vinho guive.

¹² Peteĩ-teĩ tetã py omoĩ reta hu'y jokoa tuvixa va'e ha'e hu'y guaxu. Omombaraetepa. Ha'e rami vy Judá ha'e Benjamim yvy jave rupi ipo'aka.

Jerusalém py sacerdote ha'e levita kuery oupa okuapyague

¹³ Ha'e rami ae avi Roboão-a katy sacerdote ha'e levita kuery Israel ha'e javi rupi gui oupa.

¹⁴ Mba'eta levita kuery tetã katy'i rupi gui ou vy mba'emo oguereko va'ekue oejapa vy oupa Judá ha'e Jerusalém katy, Jeroboão ha'e gua'y kuery omoxëmba rire SENHOR pe ikuavie e'ÿ aguã.

¹⁵ Ha'e kuery rekovia ma Jeroboão omoĩ sacerdote kueryrã ha'e ae oikuua rami, ombojeroviaaty yvy'ã rupi ikuai va'e pe, kavara ha'e vaka ra'y ra'angaa ojapo va'ekue peguarã rive.

¹⁶ Ha'e rami rã Israel kuery ha'e javi regua Jerusalém tetã py ou, opy'a py SENHOR Israel kuery ruete oeka aguã omoĩ va'ekue ha'e javi, SENHOR guamoĩ kuery ruete pe mba'emo ome'ẽ aguã.

¹⁷ Ha'e rami py ha'e kuery omombaraete Judá kuery, ojapo avi Salomão ra'y Roboão ipo'akave aguã rami, mboapy ma'etÿ re. Mba'eta mboapy ma'etÿa peve'i ikuai Davi ha'e Salomão oikoague rami.

Roboão ro pygua kuery rery oĩa

¹⁸ Ha'e gui ma Roboão gua'yxyrã ogueraa Maalate. Ha'e va'e ru ma Davi ra'y Jerimote, ha'e rã ixy ma Jessé rajy Eliabe memby Abiaail.

¹⁹ Ha'e va'e omemby kuery oguereko va'ekue ma Jeús, Semarias ha'e Zaã.

²⁰ Ha'e va'e rire ma gua'yxyrā ogueraa avi Absalão rajy Maaca. Ha'e va'e ma oguereko ju Abias, Atai, Ziza ha'e Selomite.

²¹ Gua'yxy ha'e gua'yxy jevy kuery gui Roboão oayvuve va'e ma Absalão rajy Maaca. Mba'eta dezoito gua'yxy ha'e sessenta gua'yxy jevy kuery oguereko. Vinte e oito ta'y kuery ha'e sessenta tajy kuery ikuai raka'e.

²² Maaca pi'a Abias ma Roboão omoī gua'y kuery mboae áryve, mba'eta oipota hekoria huvixarā oī.

²³ O'arandua rupi vy ojapo gua'y kuery Judá ha'e Benjamim oyvy jave rupi hekoa aguā rami, tetā ikorapa va'e rupi. Ha'e kuery pe ome'ẽ tembi'u oata aguā rami e'ŷ, ta'yxyrāojou reta avi.

12

1 Reis 14.25-28

¹ Roboão opo'akaa py oī atā ha'e imbaraete ma vy oeja SENHOR guigua lei, Israel kuery ha'e javi reve.

² Ha'e gui peteī nhiruī ma'etŷa re ma Roboão huvixa oī jave py Egito pygua huvixa Sisaque ou Jerusalém re opu'ã aguā, ha'e pygua kuery SENHOR rovai ojejavý okuapy rire.

³ Mil e duzentos karóxa ha'e sessenta mil kavaju árygua kuery reve ou. Hupive Egito yvy gui ou va'ekue ma heta raxa ikuai, Líbia guigua, suquita ha'e Etiópia guigua kuery guive.

⁴ Ha'e rami vy Judá regua tetā ikorapa va'e ha'e javi oipe'apa ma vy Jerusalém katy ju oo.

⁵ Ha'e gui ma Roboão-a py ou profeta Semaías, Judá regua yvatekueve Sisaque gui Jerusalém tetā py ono'õ va'ekue ikuiaia py guive. Ha'e vy profeta aipoe'i ha'e kuery pe:

— Po rami SENHOR ijayvu: “Peē kuery ma xerejapa pekuapy. Ha'e nunga rupi xee voi roeja ma Sisaque ju pendere ipo'aka aguā”, he'i.

⁶ Ha'e ramo Israel regua yvatekueve onhemo'yvyi'i okuapy, huvixa guive. Ha'e rami vy aipoe'i okuapy:

— SENHOR ma ha'evea rami nhandererekva'e — he'i.

⁷ Ha'e kuery onhemo'yvyi'i okuapy rā SENHOR oexa vy teīgue ju oayvu ombou uka Semaías pe. Ha'e vy aipoe'i:

— Ha'e kuery onhemo'yvyi'i okuapy ramo xee namombai 'rā. Ha'e rami 'rāgue py are e'ŷ'i re araa jepe 'rā, Jerusalém tetā re xepoxyambou uka e'ŷ aguā Sisaque po rupi.

⁸ Ha'e rami avi ha'e kuery ikuai 'rā hembiguarā, oikuua aguā yvy regua huvixa kuery pe ikuiaia gui xevy pe ikuai aguā ha'eveea — he'i.

⁹ Ha'e gui ma Egito pygua Sisaque ou vy Jerusalém re opu'ã. Ha'e rami vy ogueraapa SENHOR pegua opy iporāgueve oī va'ekue, huvixa ropy gui guive. Ogueraa avi hu'y jokoarā ouro gui Salomão ojapo va'ekue.

¹⁰ Ha'e va'ekue rekoria ma huvixa Roboão ojapo hu'y jokoa overa va'e gui rive. Ha'e va'e ma omboaxa huvixa rokē rarōa kuery rerekova po py.

¹¹ Ha'e gui SENHOR pegua oo py huvixa oike nhavō harōa kuery ou vy ogueraa avi 'rā hu'y jokoa. Ha'e va'e rire ogueru kuerei 'rā opy ja'o harōa kuery ikuaiaty py.

¹² Ha'e rami py huvixa onhemo'yvyi'i rire ixugui SENHOR oipe'a ju opoxya, omomba vyvoi e'ŷ aguā. Mba'eta Judá yvy re ma ikuai teri heko porā va'e.

1 Reis 14.21-31

¹³ Jerusalém py huvixa Roboão ipo'akave ovvy vy oīve tema huvixa rami. Ixy ma Amom guigua, Naamá hery va'e. Quarenta e um ma'etŷ ma oguerekaoa py Roboão omboopy huvixa oī aguā, ha'e gui dezessete ma'etŷ re opena Jerusalém py. Ha'e va'e tetā ma Israel re ikuai va'e gui SENHOR oiporavo va'ekue hery oī atyrā.

¹⁴ Ha'e rami teī ha'eve'ŷ va'e ojapo oikovy, opy'a re nomoī guive SENHOR oeka aguā.

¹⁵ Ha'e gui oīve tema Roboão rekukue regua. Ha'e rami avi mba'emo ojapo va'ekue jypy guive opaa peve noī 'rā teve kuaxia yma guare kuery rekukue oīa profeta Semaías ha'e Ido ombopara va'ekue py? Jeroboão kuery reve Roboão kuery joe opu'ã okuapy oikovea pukukue re.

¹⁶ Ha'e gui Roboão ndoikovevei'i ma guamoī kueryague rami. Ha'e ramo ha'e kuery reve onhono porāa tetā Davi rekoague py. Ha'e gui ta'y Abias ju oī nguu rekovia.

13

1 Reis 15.1-8

¹ Jeroboão dezoito ma'etý re ma huvixa oī jave py Abias oī Judá pygua huvixarā. Ha'e vy mboapy ma'etý re opena Jerusalém py.

² Ixy ma Gibeá pygua Uriel rajy Micaíá hery va'e. Ha'e gui ma Abias kuery joe opu'ã ju Jeroboão kuery reve.

³ Ha'e rami vy Abias ma joe opu'ã aguã katy ogueraa oxondaro kuery ipy'a guaxukueve quatrocentos mil avakue oiporavo va'ekue. Ha'e rā Jeroboão kuery ma hexe opu'ã aguã katy oje'oi oitocentos mil avakue reve, joe opu'ãa py ipy'a guaxukueve meme.

⁴ Ha'e gui Abias ma Zemaraim yvyty áry opu'ã ho'amy, Efraim regua yvyty ikuai va'e mbyte. Ha'e vy aipoe'i ho'amy:

— Jeroboão ha'e Israel kuery pendekuai va'e ha'e javi, pendu ke xeayvua.

⁵ Peē kuery ndapeikuaai ri ty'y SENHOR Israel kuery ruete Davi pe ae ome'ēague ha'e kuery ruvixa oī riae aguã? Mba'eta hexeve, ha'e ta'y ra'y kuery reve ojapo oguereko aguã juky rewegua.*

⁶ Ha'e rami teī ha'e kuery re Jeroboão kuery opu'ã nho. Ha'e va'e ma Davi ra'y Salomão rembiguai Nebate ra'y. Ha'e rami py onhembopoxy nguvixa rovai.

⁷ Ixupe guarā ono'õ avakue vare'ŷ, mba'emo vai apoa kuery rive. Ha'e va'e kuery reve onhemombaraete okuapy Salomão ra'y Roboão rovai. Ha'e jave py ma Roboão kunumi'i ha'e ndoiko kuaai teri vy ndojoko kuaai.

⁸ — Aŷ ma peē kuery peikuaa teī SENHOR po'akaa Davi ra'y kuery po py ome'ē va'ekue gui pendepo'akavea, mba'eta pendeta raxa, ha'e perekō avi vaka ra'y ra'angaa penderuete ra'angaarā ouro guigua Jeroboão ojapo va'ekue.

⁹ Ha'e rami teī ndapeipe'apai avi teve sacerdote kuery Arão ramymino SENHOR pe ikuai va'ekue, ha'e levita kuery voi? Ha'e kuery rekovia pendejeupe guarā sacerdote ramigua rive ju pejou, yvy mboae regua oguereko rami. Mba'eta amongue va'e rei sacerdote-rā onhemoi ukaxe vy ogueru 'rā peteī vaka ra'y ha'e sete vexa'i ra'y ome'ē va'erā. Ha'e rami ramo peē kuery pemoī 'rā sacerdote-rā, Nhanderuete peguarā e'ŷ guive.

¹⁰ Ha'e rā ore kuery ma SENHOR ae oiko Oreruete, ha'e neī peteīgue ma voi ndoroejai 'rā. Ha'e gui sacerdote kuery ore roguereko va'e ma SENHOR pe ae omba'eapo va'e. Ha'e va'e kuery ma Arão ramymino meme, ha'e levita kuery voi ikuai avi omba'eapoa rupi.

¹¹ Ha'e rami vy ko'ẽ nhavō, aje'ive'i ha'e ka'aru ha'e kuery ome'ē 'rā mymba ha'e heakuā porā va'e oapy reve. Ha'e gui mesa iky'a e'ŷ va'e áry ma SENHOR renonde omoī 'rā mbojape. Tataendy 'y ouro guigua, tataendy reve opena avi 'rā ka'aru nhavō, mba'eta ore kuery ae ma SENHOR Nhanderuete lei ojapo uka va'ekue rojapopa va'e. Ha'e rā peē kuery ma pejapa.

¹² Ha'e nunga rupi ne'exa, Nhanderuete ma ore kuery reve ae oiko, orerenonde oo. Ixupegua sacerdote kuery oje'oi avi mimby guaxu omonhe'ē heravy va'e, peē Israel kuery rovai roo aguã. Ha'e nunga rupi pepu'ã eme SENHOR peneramoī kuery ruete rovai, mba'eta peē kuery ma napendepo'akai 'rāe — he'i.

¹³ Ha'e ramo Jeroboão ijayvu ixupegua kuery onhemia py ikuai va'e ejere vy amboae kuery hakykue katy gui ou aguã re. Ha'e rami py ha'e kuery amongue va'e ma Judá kuery renonde, ha'e rā amboae kuery ma hakykue katy ikuai.

¹⁴ Ha'e ramo Judá kuery oma'ẽ vy oexa okuapy xondaro kuery henonde ikuai va'e, hakykue guive. Ha'e ramo SENHOR pe ojapukai okuapy, sacerdote kuery voi omonhe'ē okuapy mimby guaxu,

* 13:5 Juky reve ma ha'e kuery ojapo 'rā peteī rami ikuai aguã. Juky ma anhetē etea kuaa ukaarā (Levítico 2.13).

- ¹⁵ ha'e Judá regua avakue ojapukai atã okuapy. Ojapukai okuapy ramo Nhanderuete omoingo axy Jeroboão ha'e Israel kuery ha'e javi, Abias ha'e Judá kuery renonde gui.
- ¹⁶ Ha'e rami vy Judá kuery renonde gui Israel ramymino kuery onhamba, ipo py Nhanderuete omboaxa ramo.
- ¹⁷ Ha'e kuery regua Abias ha'e hexeve ikuai va'e ojuka reta. Ha'e ramo Israel kuery va'e regua ho'apa okuapy quinhentos mil avakue oiporavo pyre meme.
- ¹⁸ Ha'e va'e jave py ma Israel ramymino kuery omo'yvyimbaa raka'e. Judá ramymino kuery ae ipo'akapa okuapy, SENHOR guamoī kuery ruete re ojerovia ete vy.
- ¹⁹ Ha'e gui Abias ma Jeroboão oakykue monha vy ixupe guare tetã re ipo'aka avi: Betel, Jesana, Efrom ha'e teko'a'i ha'e'i rupi ikuai va'e re voi.
- ²⁰ Ha'e va'e rire Abias oĩa pukukue re ma Jeroboão ndojouvei ipo'aka jevy aguã. SENHOR omomba'eaxy rã omano.
- ²¹ Ha'e rã Abias ma imbaraeteve tema ovv vy gua'yxyrã ojou catorze kunhague. Ha'e vy vinte e dois ta'y, ha'e dezesseis tajy kuery ikuai.
- ²² Ha'e gui oïve rei tema Abias rekokue regua. Ha'e rami avi mba'emo ojapo va'ekue ha'e javi noï 'rã teve kuaxia profeta Ido ombopara va'ekue re?

14

1 Reis 15.9-12

- ¹ Ha'e gui ma Abias ndoikovevei'i ma guamoī kueryague rami. Ha'e ramo onhono porãa tetã Davi rekoague py. Ha'e gui ta'y Asa ju oĩ nguu rekoria. Ha'e va'e ma dez ma'etã peve huvixa oĩa ja ijyvy re joe opu'ã va'e ndoikoi.
- ² Asa ma SENHOR nguuete renonde rupi ha'evea rami oiko, heko porã va'e vy.
- ³ Mba'eta ombovaipa altar amboae regua ruete ra'angaa peguarã omopu'ã mbyre, ombovaipa avi ombojeroviaaty yvy'ã rupi ikuai va'ekue. Oitypa ita omopu'ã mbyre, oake'o avi ta'angaarã yvyla omopu'ã mbyre.
- ⁴ Ha'e rami vy omongoeta Judá kuery SENHOR guamoī kuery ruete oeka ha'e lei ojapo uka va'ekue rupi ikuai aguã re.
- ⁵ Ha'e rami ae avi Judá re tetã ikuai va'e rupi gui omomba ombojeroviaaty yvy'ã rupi ikuai va'ekue, altar heakuã porã va'e rapyaty guive. Ha'e ramo huvixa oĩa pukukue re ma ikuai porã anho.
- ⁶ Judá kuery ikuiai jave rupi ojapo tetã korarã, ijyvy rupi ikuai porã ramo. Oĩa ma'etã ha'e javi re ma jipoí hexe opu'ã va'e, ikuai rive aguã rami SENHOR ome'ẽ rã.
- ⁷ Ha'e nunga rupi ae aipoe'i Judá kuery pe:
- Nhamombaraete ma'vy apy tetã ikuai va'e, ikorarã ha'e torre jajapo guive. Okerã ijokoa revegua avi jajapo, nhandeyvy nhanerenonde itui va'e rupi mba'eve ndoikoi teria ja, mba'eta SENHOR Nhanderuete jaeka ramo jovaive rupi ome'ẽ nhandekuai rive'i aguã — he'i.
- ⁸ Ha'e ramo ha'e kuery tetã omoatyrõ vy ikuai porã. Huvixa Asa ma Judá regua xondaro kuery hu'y jokoa ha'e imo'ãa tuvixa va'e revegua oguereko trezentos mil. Ha'e gui Benjamim regua ma duzentos e oitenta mil ju ikuai hu'y jokoa ha'e guyrapa oiporu kuaa va'e. Avakue ipy'a guaxukueve meme ikuai.

Etiópia pygua Zerá re Asa ipo'akaague

- ⁹ Ha'e gui ma ha'e kuery rovai guarã ou peteĩ Etiópia pygua Zerá. Avakue um milhão va'e reve ou, trezentos karóxa reve guive. Ha'e vy ovaẽmba okuapy Maressa tetã peve.
- ¹⁰ Ha'e ramo ha'e kuery rovai Asa oo. Ha'e vy Maressa katy'i Zefatá regua yvy'ã guy py ma oiko katupa okuapy joe opu'ã aguã.

- ¹¹ Ha'e rami vy Asa ojapukai SENHOR nguuete pe. Ha'e vy aipoe'i:
- SENHOR, ndee e'ý vy amboae ndoikoi ikangy va'e repyarã imbaraete va'e reve joe opu'ãa py. Ha'e nunga rupi SENHOR Oreruete, oreptyvõ ke. Mba'eta ore ma ndere ae rojerovia va'e, ha'e nderery rupi roju kova'e kuery heta ikuai va'e rovai. SENHOR, ndee ma Oreruete. Avakue rive ta'ipo'aka eme ndere — he'i.

¹² Ha'e ramo Asa ha'e Judá kuery renonde py SENHOR oitypa Etiópia guigua kuery. Ha'e ramo onhamba jogueravy.

¹³ Hakykue rupi Asa ha'e hexeve ikuai va'e oje'oi Gerar peve. Ha'e gui Etiópia pygua kuery ho'apa, neĩ peteĩve ma voi ndoikovevei. Ha'e kuery omboa'ypaa SENHOR ha'e ixupegu xondaro kuery renonde. Ha'e ramo ogueraapaa tembiporu oeja pyre.

¹⁴ Gerar tetā yvy'iry ikuai va'e voi oitypa, SENHOR gui okyje reia anho oendu okuapy rã. Ha'e ramo ha'e va'e tetā ikuai va'e gui oipe'apa heravy mba'emo, ha'e py heta ikuai va'ekue ogueraapa.

¹⁵ Oitypa avi mymba ja kuery rekaoa. Ha'e rami vy oipe'a reta heravy vixa'i ha'e cameloo. Ha'e gui ma ojevypa ju Jerusalém katy.

15

Ha'evea rami ju Nhanderueteombojeroviaa aguã rami Asa ojapoague

¹ Ha'e gui ma Obede ra'y Azarias re ou Nhanderuete Nhe'ẽ.

² Ha'e ramo oẽ ov yuvixa Asa oña py. Ha'e vy aipoe'i ixupe:

— Pendu ke xeayvua, Asa, Judá ha'e Benjamim kuery ha'e javi. SENHOR ma oiko peẽ kuery reve, hexeve peẽ kuery peikoa ja. Peẽ kuery peka ri ramo ha'e ojejou uka 'rã pêvy. Ha'e rã peja ri ramo ha'e voi pendereja 'rã.

³ Mba'eta Israel kuery are ete ikuai Nhanderuete anhetẽ va'e reve'ŷ, sacerdote imbo'earã ha'e lei e'ŷ re.

⁴ Ha'e rami teĩ ojexavai etea anho oendu vy SENHOR nguuete pe ju ikuai aguã ojevypa ha'e oeka okuapy ramo ojejou uka ju.

⁵ Ha'e va'e jave py ma oẽ ov yva'e nda'ikuai porãi, neĩ ovaẽ ouvy va'e kuery voi. Mba'eta ha'e va'e yvy ikuai va'e ha'e javi nda'evei ete okuapy.

⁶ Mba'eta peteĩ-teĩ regua opu'ã 'rã amboae regua re, ha'e peteĩ-teĩ tetā opu'ã 'rã amboae tetā re. Ha'e rami vy nhomomba-mombave 'rã oje'oivy, Nhanderuete opa marâgua jexavaia py omoingo axy ramo.

⁷ Ha'e rami teĩ penembaraete ke, pemokangy eme pendepo. Mba'eta pemba'eapoague repy ome'ẽmbaa 'rã — he'i.

⁸ Pova'e ayvu profeta Odede ra'y omombe'u rã huvixa Asa oendu vy ipy'a guaxu ju. Ha'e rami vy omombopa ojeguarupy Judá ha'e Benjamim yvy re ikuai va'ekue, Efraim regua tetā yvyty rupi ikuai va'e gui guive. Ha'e va'e tetā ma ha'e oipe'a va'ekue meme. Ha'e rami vy oiky'a'o ukapa ju altar SENHOR pegua, oo ixupegu okẽ renonde oĩ va'e.

⁹ Ha'e rami vy omboatypa Judá ha'e Benjamim kuery ha'e javi, ha'e kuery mbyte rupi Efraim, Manassés ha'e Simeão regua ikuai va'e guive. Mba'eta heta avi Israel yvy gui ou va'ekue hexe guarã, hexeve SENHOR Tuuete oiko rã.

¹⁰ Jerusalém py ha'e kuery onhemboaty okuapy mboapy jaxyta py, quinze ma'etŷa re ma huvixa Asa oĩ jave py.

¹¹ Ha'e va'e ára ma SENHOR pe ome'ẽ okuapy joe opu'ãa gui ogueru va'ekue regua setecentos vaka ra'y ha'e sete mil vixa'i kuery.

¹² Jomeme jogueroayvu okuapy SENHOR guamoĩ kuery ruete pe anho ikuai aguã re, opy'a ha'e onhe'ẽ ha'e javi py,

¹³ ha'e rã SENHOR Israel kuery ruete ndoekai va'e rei ojuka aguã, kyrigueve ha'e tuvixakueve teĩ, avakue ha'e kunhague guive.

¹⁴ Ha'e rami aguã re oura okuapy SENHOR pe onhendu atã reve, oporaei vy mimby ha'e mimby guaxu reve.

¹⁵ Ha'e rami Judá kuery opy'a ha'e javi py oura ma vy ovy'a okuapy. SENHOR oekaxeia'i py oeka ramo ha'e kuery pe ojejou uka. Ha'e rami vy ha'e kuery pe SENHOR ome'ẽve ju oyvy jave rupi ikuai porã aguã.

¹⁶ Ojaryi Maaca eteve voi huvixa Asa oipe'a huvixa xy po'akaa gui, Aserá pe peteĩ ta'angaa ojeguarupy ojapo rire. Ta'angaa ojapo va'ekue ma Asa ombovaipa, ha'e iku'ikue oapypa Cedrom yvyugua py.

¹⁷ Ha'e rami teĩ Israel yvy re yvy'ã rupiombojeroviaaty ikuai va'e ma nombovaipai, va'eri Asa oikovea pukukue re ha'evea rami anho oiko opy'a py.

¹⁸ SENHOR pegua opy ogueru mba'emo porã tuu ha'e rami aguã rami omboaxa va'ekue, ha'e ae omboaxa va'ekue voi: prata, ouro ha'e tembiporu.

¹⁹ Trinta e cinco ma'etã re huvixa Asa oĩ peve ma joe opu'ã va'e ndoikoi.

16

1 Reis 15.16-22

¹ Trinta e seis ma'etã re ma huvixa Asa oĩ jave py Israel pygua huvixa Baasa ou Judá kuery rovai. Ha'e rami vy omombaraete Ramá tetã, Judá pygua huvixa Asa openaa gui mava'eve oo e'ý aguã, neĩ ovaãa e'ý aguã ha'e py.

² Ha'e ramo Asa oipe'apa ouro ha'e prata SENHOR pegua opy ha'e huvixa ropy omoĩ porã mbyre. Ha'e rami vy guembiguai kuery ayvu reraarã omondoukapa Síria pygua huvixa Ben-Hadade pe Damasco py oĩa py. Ha'e vy ixupe aipoe'i uka:

³ — Jajapo ke jomeme nhandekuai porã'i aguã, nderu xeru reve ikuaiague rami. Ne'exa, aru ruka ndevy ame'ẽ rive va'e, prata ha'e ouro. Ha'e rã tereo, Israel pygua huvixa Baasa-a py embovaipa hexeve guarã rejapo va'ekue, xee apenaa ojokoa gui ojepe'a aguã — he'i uka.

⁴ Ha'e ramo Asa ijayvua Ben-Hadade oendu vy omondouka xondaro ruvixa kuery Israel kuery retã re opu'ã aguã. Ha'e rami vy oitypa Ijom, Dã, Abel-Maim ha'e tetã tembi'u omoĩ porãatay Naftali yvy re ikuai va'e ha'e javi.

⁵ Ha'e nunga Baasa oendu vy opytu'u Ramá tetã omombaraetea gui, ndojapove jevyi guive.

⁶ Ha'e rire huvixa Asa ma Judá kuery ogueraapa vy Ramá tetã gui oguerupa ju ita ha'e yvyra Baasa omombaraetea py oiporu va'ekue. Ha'e va'ekue py ma huvixa Asa ju ojapo Geba ha'e Mispa tetã korarã.

Asa pe Hanani ijayvuaque

⁷ Ha'e va'e jave py Judá pygua huvixa Asa oĩa py ou Hanani. Ha'e vy aipoe'i ixupe:

— Ha'e gui Síria pygua huvixa re rive rejerovia vy SENHOR Nderuete re nderejeroviai ramo Síria pygua huvixa pegua xondaro kuery oo jepepa ma ndepo gui.

⁸ Ha'e rami avi xondaro kuery Etiópia ha'e Líbia gui ou va'ekue pa heta raxa e'ý raka'e? Heta ete e'ý teve karóxa ha'e kavaju áryguia kuery reve ou? Ha'e rami teĩ SENHOR re rejerovia ramo ndepo py omboaxapa raka'e.

⁹ Mba'eta SENHOR ma yvy jave rupi oexa potapa oiny, opo'akaa oexa uka aguã opy'a ha'e javi py ixupe ete ikuai va'e pe. Ha'e rã ndee ma reikoague py ne'arandua rupi e'ý reiko. Ha'e nunga rupi aÿ gui ma oiko 'rã nderovai opu'ã va'e — he'i.

¹⁰ Ha'e rami profeta ijayvu ramo Asa ivai vy omboty nhuã py, yvyra pa'ü py ombo'a, ha'e nungakue re ixupe ipoxy vy. Ha'e va'e jave py Asa omoingo axyve ju heta va'e kuery regua.

1 Reis 15.23,24

¹¹ Ha'e gui oïve rei tema Asa rekoke regua. Ha'e rami avi mba'emo ojapo va'ekue jypy guive opaa peve oĩ 'rã kuaxia Judá ha'e Israel pygua huvixa kuery rekoke oĩa re.

¹² Trinta e nove ma'etã re ma Asa huvixa oĩ jave py opy raxy gui nopu'âvei. Imba'eaxy raxa oupy. Ha'e rami teĩ SENHOR pe ma voi ndojerurei, poropoanoa kuery re rive ojeroviave vy.

¹³ Ha'e gui ma Asa ndoikovevei'i ma guamoĩ kueryague rami. Quarenta e um ma'etã re openaa py ma omano.

¹⁴ Ha'e ramo onhono porãa okuapy tetã Davi rekoague py nguparã ae ojo'o ukaague py. Ha'e rami vy peteĩ tupa áry onhono okuapy, ha'e ijyvýry rupi omonyé heakuã porã va'e, mba'emo heakuã porã va'e apoa kuery anho oikuua rami vy oguerekó katu va'ekue. Heta raxa avi hexe ima'endu'aa rupi mba'emo oapy okuapy va'e.

Josafá po'akaa omoī atāague

- ¹ Ha'e gui ma Judá pygua huvixa Asa rekovia ta'y Josafá ju oī. Ha'e rami vy mba'emo oguereko katu Israel kuery rovai guarā.
- ² Judá yvy rupi tetā ikorapa va'e ha'e javi rupi omoī xondaro kuery harōarā, ha'e Efraim yvy re tuu Asa tetā ojopy va'ekue rupi voi.
- ³ SENHOR oiko Josafá reve, mba'eta tamoī Davi jypy oikoague rami oiko ramo, Baal ra'angaa pe'ŷ.
- ⁴ Ha'e rami vy oeka oikovy nguu ruete, ojapo uka va'e rupi oiko vy, Israel kuery ikuiaia rami e'ŷ.
- ⁵ Ha'e ramo ipo py SENHOR omoī atāve huvixa oī aguā, ha'e ixupe Judá kuery pavē ome'ẽ okuapy mba'emo hepyve ha'e iporā va'e oguerekopa peve.
- ⁶ SENHOR guigua tape rupi oikoa rupi ipy'a guaxuve ovy. Ha'e vy Judá yvy jave gui ombovaipa yvy'ã rupi ombojeroviaaty ikuai va'ekue, mba'emo ra'angaarā yvyra omopu'ã mbyre guive.
- ⁷ Ha'e gui mboapy ma'etŷa re ma huvixa oī jave py omondouka guembiguai yvatekueve Ben-Hail, Obadias, Zacarias, Natanael ha'e Micaías, Judá regua tetā ikuiaia rupi nhombo'e aguā.
- ⁸ Ha'e va'e kuery reve omondouka avi levita kuery Semaías, Netanias, Zebadias, Asael, Semiramote, Jônatas, Adonias, Tobias ha'e Tobe-Adonias. Levita kuery reve omondouka avi sacerdote kuery Elisama ha'e Jeorão.
- ⁹ Ha'e ramo Judá yvy jave rupi kuaxia SENHOR guigua lei oĩa ogueraa vy nhombo'e jogueravy. Ha'e rami vy Judá re tetā ikuai va'e ha'e javi rupi ombo'e oje'oivy heta va'e kuery.
- ¹⁰ Ha'e ramo Judá yvýry rupi huvixa ikuai va'e áry ou SENHOR po'akaa gui okyjepa aguā, huvixa Josafá rovai nopus'āi aguā rami.
- ¹¹ Ha'e rami ae avi filisteu kuery va'e regua ogueru okuapy mba'emo Josafá pe, prata voi ome'ẽ ucaa rami ome'ẽ. Ixupe Arábia pygua kuery voi ogueru okuapy mymba kyrīgueve va'e: sete mil e setecentos vexa'i ava ha'e sete mil e setecentos kavara ava.
- ¹² Ha'e ramo Josafá ipo'akave tema ovy. Ha'e rami vy Judá re ojapove oo ikorapa va'e, ha'e tetā tembi'u omoī porā atyrā.
- ¹³ Judá re tetā ikuai va'e rupi ojapo reta mba'emo. Jerusalém tetā py oguereko avi avakue joe opu'ã aguā katy oo va'erā ipy'a guaxukueve anho.
- ¹⁴ Po rami ma ha'e kuery mbovy pa petei-tei regua ikuaria: Judá re ma ikuai huvixa kuery mil xondaro re opena va'e. Ha'e kuery ruvixa ma Adna oiko, ha'e hexeve ikuai avi trezentos mil avakue ipy'a guaxukueve va'e meme.
- ¹⁵ Ha'e rire ma huvixa Joanā, ha'e hexeveguia duzentos e oitenta mil.
- ¹⁶ Ha'e gui ma Zicri ra'y Amasias ju. Ha'e va'e ma opy'a ha'e javi py SENHOR pe omba'eapoxea rupi oiko. Hexeveguia ma duzentos mil avakue ipy'a guaxukueve ikuai ijayvua ojapo va'erā.
- ¹⁷ Ha'e gui Benjamim kuery va'e regua ava ipy'a guaxuve va'e ma Eliada. Hexeveguia ma duzentos mil ikuai guyrapa ha'e hu'y jokoa reveguia.
- ¹⁸ Ha'e va'e rire ma Jozabade ha'e hexeve cento e oitenta mil ikuai joe opu'ã aguā rami hembiporupa va'e.
- ¹⁹ Ha'e va'e kuery ma huvixa pe ikuai va'e meme, xondaro kuery mboae Judá yvy re tetā ikuai va'e rupi huvixa omoī va'ekue jaipapa e'ŷ re.

1 Reis 22,1-4

- ¹ Josafá ma mba'emo hepyve ha'e iporā va'e anho oguereko, oata aguā rami e'ŷ. Acabe reve onhemoirū guive.

² Ha'e rami vy mbovy ma'etŷ re rei e'ŷa py ma Acabe pou vy oo Samaria tetâ py oĩa py. Ha'e ramo Acabe omovaẽ vy ojuka vexa'i ha'e vaka ra'y oata aguã rami e'ŷ, Josafá ha'e hupive ou va'ekue ha'e javi pe. Ha'e vy ijayvu joupive Ramote-Gileade re opu'ã aguã katy jogueraa aguã re.

³ Ha'e vy huvixa Israel pygua Acabe oporandu Judá pygua huvixa Josafá pe:

— Ndee pa reo avi 'rã xereve Ramote-Gileade katy?

Josafá ombovai:

— Xee ma aiko 'rã ndereve, ha'e xevygua kuery voi ndevygua kuery reveguia ae avi 'rã ikuai. Roje'oi 'rã nderupive joe nhapu'ã aguã — he'i.

1 Reis 22.5-12

⁴ Ha'e gui ma Josafá aipoe'ive ju Israel pygua huvixa pe:

— Eikuua pota ranhe ke SENHOR ijayvua re.

⁵ Ha'e ramo Israel pygua huvixa omboatypa profeta kuery, quatrocentos avakue ha'e javi vy. Ha'e vy aipoe'i ha'e kuery pe:

— Taa pa Ramote-Gileade re apu'ã aguã, tyrã pa taa eme?

Ha'e kuery ombovai:

⁶ — Tereo oreruvixa, mba'eta Nhanderuete omboaxapa 'rã ndepo py — he'i okuapy.

Ha'e rã Josafá ma aipoe'i:

— Nda'ipoi teri pa apy profeta SENHOR pegua ete jaikuaa pota ranhe aguã?

⁷ Ha'e rã Israel pygua huvixa aipoe'i Josafá pe:

— Pete'i teri oiko ixupe SENHOR ayvu re nhaporandu uka aguã. Ha'e rã hexe ma xee ndaxe'a ei, mba'eta xerenonderã re nomombe'ui teri iporã va'e, iporã e'ŷ va'e anho.

⁸ Ha'e va'e ma Inlá ra'y Micaías — he'i.

Josafá ombovai:

— Huvixa, ha'e rami ndeayvu eme — he'i.

Ha'e gui ma Israel pygua huvixa pete'i guembiguai oenoĩ vy ixupe aipoe'i:

— Tou pojava ta'vy xea py Inlá ra'y Micaías — he'i.

⁹ Ha'e va'e javé py ma Israel pygua huvixa ha'e Judá pygua huvixa reve jogueroguapy nhoguenoiny pete'i-te'i guenda openaaty py ae, huvixa pegua ao py ae onhemonde reve, Samaria tetâ kora rokẽ yvýry, mba'emo moa'yíaty py. Ha'e kuery renonde ma profeta kuery ha'e javi ijayvu okuapy.

¹⁰ Ha'e gui Quenaana ra'y Zedequias ma oguerek vaka rakua ra'angaa ferro gui ojapo va'ekue. Ha'e vy aipoe'i:

— Po rami SENHOR ijayvu: “Kova'e ramigua py reipyxo 'rã Síria pygua kuery reitypa peve”, he'i.

¹¹ Ha'e gui profeta kuery mboae ma ha'e va'e ayvu rupi meme ijayvu vy

— Tereo ke Ramote-Gileade katy, oreruvixa, ha'e py ma ndepo'aka 'rã, mba'eta SENHOR omboaxapa 'rã ndepo py — he'i okuapy.

1 Reis 22.13-28

¹² Ha'e gui Micaías reruarã tembiguai oo va'ekue ixupe ijayvu vy aipoe'i:

— Ma'ë, profeta kuery ikuai va'e ma pete'i rami ijayvu kuri huvixa pe mba'emo porã re anho. Ndeayvu 'rãgue ha'e kuery ijayvuague rami ae, mba'emo porã re anho.

¹³ Micaías ombovai:

— Ha'e rami avi anhetê SENHOR oikove va'e rupi aura vy aipoa'e: Xee ma Xeruete aipoe'i ukaa rami ae 'rã xeayvu — he'i.

¹⁴ Ha'e gui huvixaa py ovaẽ ramove ixupe oporandu:

— Micaías, toroo ae pa Ramote-Gileade re ropu'ã vy, tyrã pa toroo eme?

Jypy Micaías ombovai:

— Tapeo, ha'e vy pendepo'aka 'rã, mba'eta ndepo py SENHOR omboaxapaa 'rã — he'i.*

¹⁵ Ha'e rami rã huvixa aipoe'ive ju ixupe:

* 18:14 Micaías ma profeta ramigua kuery ayvu rupi rive ranhe ijayvu, anhetê va'e'ŷa rami oikuaa uka vy.

— Mbovykue ma tu ndevy xeayvu, SENHOR rery rupi anhetē va'e re anho ndeayvu aguā?

¹⁶ Ha'e rā Micaás ombovai:

— Ha'e gui Israel kuery xee aexapa vyty áry rupi omoaímbaa ramo, vixa'i ija e'ý va'e rami. Ha'e ramo SENHOR aipoe'i: “Peva'e kuery ma ija e'ý va'e vy peteī-teī too porā ngoo katy”, he'i xevy.

¹⁷ Ha'e ramo Israel pygua huvixa aipoe'i Josafá pe:

— Aipo nda'eí ri ty'y ndevy: “Ha'e va'e ma xerenonderā re nomombe'ui ae iporā va'e, ha'e rā iporā e'ý va'e anho”, ha'e ma voi kuri?

¹⁸ Ha'e gui ma Micaás ijayvuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rā, ha'e oña py ikuai avi ixondaro kuery yva pygua ha'e javi, ijaxu e'ýa re ha'e ijaxua re.

¹⁹ Ha'e gui SENHOR oporandu: “Mava'e 'rā tu Acabe mbotavyarā oo, Ramote-Gileade py ho'a aguā?” Ha'e ramo peteī ma peteī rupi ijayvu, ha'e rā amboae ma amboae rami ijayvu.

²⁰ Ha'e gui peteī nhe'ē ou vy ojexa uka SENHOR renonde. Ha'e va'e aipoe'i: “Xee ma aa 'rā ambotavy”, he'i. Ha'e rā SENHOR oporandu: “Mba'e py ha'vy?”

²¹ Ombovai: “Aa 'rā nhe'ē imbotavyarā aí ixupeguia profeta kuery ha'e javi juru re”, he'i. Ha'e ramo SENHOR aipoe'i: “Ndee ma rembotavy 'rā, ndepo'aka 'rāe. Tereo, ejapo ha'e rami”, he'i.

²² Ha'e rami rā kova'e profeta kuery ndevygua ikuai va'e juru re SENHOR omoī ra'e nhe'ē nembotavyarā. Ha'e rā SENHOR ma nderovai ijayvu guive mba'emo vai oiko aguā re — he'i.

²³ Ha'e gui Quenaana ra'y Zedequias onhemboja vy oipete Micaás. Ha'e vy aipoe'i:

²⁴ — Ma rupi tu ha'vy xegui SENHOR nhe'ē oē ndevy ijayvu aguā?

Micaás ombovai:

— Reikuaa 'rā opy ja'o py renhemé aguā reike jave — he'i.

²⁵ Ha'e gui ma Israel pygua huvixa ju aipoe'i:

— Pejopy ke Micaás, ha'e pemboaxa tetā ruvixa Amom ha'e huvixa ra'y Joás po py.

²⁶ Ha'e vy aipopeje: “Po rami huvixa ijayvu: ‘Pemboty nhuā py kova'e ava, ha'e pembojexavai mbojape ha'e yy ruxā'i kuerei peme'ēa py, ajevy porā ju e'ýa ja’, he'i uka”, peje.

²⁷ Ha'e gui Micaás aipoe'i:

— Ha'e rami teī xapy'a rei anhetē ri rejevy porā ramo SENHOR ayvu rupi e'ý xeayvu ramo ma 'rā. Pendu pota pova'e re, peē kuery ha'e javi! — he'i.

1 Reis 22,29-40

²⁸ Ha'e gui ma Ramote-Gileade katy Judá pygua huvixa Josafá reve Israel pygua huvixa jogueraa.

²⁹ Israel pygua huvixa aipoe'i Josafá pe:

— Xee ma amboae rami anhemonde reve 'rā aa joe apu'ā aguā katy. Ha'e rā ndee ma ndeo py ae 'rā renhemonde — he'i. Ha'e rami vy Israel pygua huvixa amboae rami onhemonde reve oo joe opu'āa py.

³⁰ Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: “Ou va'e-va'e rovai rive pepu'ā eme yvatekueve teī, ha'e rā Israel pygua huvixa rovai anho'i”, he'i va'ekue.

³¹ Ha'e gui huvixa karóxa mboguataa kuery ma Josafá oexa vy aipoe'i okuapy:

— Peva'e ae ri nhi'ā Israel pygua huvixa — he'i vy ha'e katy oje'oi ojoko aguā. Ha'e ramo Josafá ojapukai rā SENHOR oepy vy ojoko oña katy oje'oi ve'ý aguā.

³² Ha'e gui huvixa karóxa mboguataa kuery ma Israel pygua huvixa e'ý ae ra'ea oikuua vy oejapa ju.

³³ Ha'e gui peteī ava guyrapa omoatā vy opoia katy rei opoi vy onhyvō Israel pygua huvixa pexo regua pa'ūa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'āa mbyte gui xereraa aguā, mba'eta xepyxoa ma — he'i.

³⁴ Ha'e va'e ára ma joe opu'ãve tema okuapy. Ha'e rã huvixa ma Síria kuery oexaa py opu'ã ho'amy okaróxa py ka'aru peve. Ha'e gui kuaray oike ma jave omano.

19

Josafá pe profeta Jeú ijayvu eteague

¹ Ha'e gui Judá pygua huvixa Josafá ma oiko porã'i reve ojevy ju Jerusalém py ngoo oĩ katy.

² Ha'e rã Hanani ra'y profeta Jeú ma oẽ ouvy huvixa Josafá ovaexí aguã. Ha'e vy aipoe'i ixupe:

— Ha'eve nda'u heko vai va'e reipytyvõ SENHOR re nda'ija'ei va'e kuery reayvvuea rupi? Ha'e nunga rupi nde'ary ou 'rã SENHOR poxya.

³ Ha'e rami avi ndere ojou guive iporã va'e, mba'eta nhandeyvy gui reipe'apa va'ekue ta'angaarã yvyra omopu'ã mbyre, ndepy'a re Nhanderuete reka aguã remoĩ guive — he'i.

Joguerekarã kuery omoĩague

⁴ Josafá ma Jerusalém pygua ae oiko va'eri oo avi 'rã heta va'e kuery ikuia rupi Berseba guive Efraim re yvyty ikuai va'e rupi. Ojapo 'rã ov y SENHOR guamoĩ kuery ruete pe ju ojevy aguã.

⁵ Ovyv jave rupi omoĩ joguerekarã kuery, tetã ikorapa va'e ha'e javi rupi, peteĩ-teĩ tetã py ikuai aguã.

⁶ Joguerekaoa kuery omoĩ vy aipoe'i ha'e kuery pe:

— Pexa pota 'rã mba'exa pa pejapo aguã re, mba'eta avakue 'arandua rupi rive e'ŷ 'rã peikuua pota, SENHOR guigua rupi anho. Ha'e ramo penhomboayvua py ha'e oĩ 'rã peẽ kuery reve.

⁷ Ha'e nunga rupi aŷ SENHOR renonde peiko tema pejererokyjea rupi. Penheangu tema pejoguerekaoa rupi, mba'eta SENHOR Nhanderuete re ma noĩ ha'eve'ŷa rami joguerekaoa aguã, mba'eta ha'e ma ndoayvuvei 'rã peteĩ anho, neĩ ndojopyi 'rã ome'ẽmby — he'i.

⁸ Ha'e rami ae avi Jerusalém tetã py ju Josafá ojevy ma rire ha'e py voi omoĩ levita ha'e sacerdote kuery va'e regua, Israel kuery akã ikuai va'e guive, SENHOR gui vy nhomboayvu ha'e joo rami e'ŷ-e'ŷ oikuaa va'e re oikuaa pota aguã.

⁹ Ha'e kuery omoĩ vy aipoe'i:

— Peteĩ rami pendepy'aa py ojeroviap 'rã peiko SENHOR renonde pejererokyjea rupi.

¹⁰ Ha'e gui peẽ kuerya py ou 'rã penderyvy kuery tetã py ikuiai gui, jouguy omoẽague re oikuaa pota uka vy, ha'e'ŷ vy lei re oĩ va'e re, ojapo uka pyre re, ombopara pyre e'ŷ vy imongetaague re mba'e. Ha'e ramo ha'e kuery pe pendeayvu 'rã SENHOR renonde ojejavý e'ŷ aguã, peẽ ha'e penderyvy kuery re ipoxya ou e'ŷ aguã. Ha'e rami ae ke peiko pejejavý e'ŷ aguã.

¹¹ Ha'e gui apy ma oĩ sacerdote yvateve va'e Amarias. Ha'e va'e ma opena 'rã mba'emo SENHOR regua ikuai va'e re. Ha'e rã mba'emo huvixa regua re opena va'e ma Ismael ra'y Zebadias, Judá regua yvateve va'e. Levita kuery voi ikuai 'rã penepytyvõarã. Penembaraete ke ha'vy pejoguerekaoa porã aguã. Ha'e gui SENHOR oiko 'rã heko porã va'e reve — he'i.

20

Moabe ha'e Amom pygua kuery re Josafá ipo'akaague

¹ Ha'e va'e rire ma Moabe ha'e Amom ramymino kuery ou okuapy Josafá re opu'ã aguã, meunita kuery regua reve.

² Ha'e ramo amongue ou vy Josafá pe omombe'u. Ha'e vy aipoe'i:

— Heta raxa ou ta okuapy nderovai opu'ã aguã, ye'ẽ rovai gui ha'e Síria yvy gui ou. Ne'exa, Hazazom-Tamar py ma ovaẽ, En-Gedi py — he'i.

³ Ha'e ramo Josafá okyje vy ojee omoĩ SENHOR oeka aguã. Ha'e rami vy ijayvu Judá regua ha'e javi okaru e'ŷ re ikuai aguã.

⁴ Ha'e ramo Judá kuery onhemboatypa okuapy SENHOR oepy aguã re ojerure aguã. Judá regua tetã ha'e javi rupigua ou okuapy SENHOR oeka aguã.

⁵ Ha'e gui ma Judá ha'e Jerusalém pygua kuery ijaty va'e renonde py Josafá opu'ã ho'amy, SENHOR pegua oo py, oka pyau yvy'iry.

⁶ Ha'e vy aipoe'i:

— SENHOR oreramoõ kuery ruete, ndee ae e'ŷ teve Oreruete yva pygua? Ndee ae e'ŷ teve ha'e javi regua ruvixa re ndepo'aka va'e? Mba'eta ndepo py oĩ mbaraetea ha'e po'akaa, nda'ipoi guive ndejokoarã.

⁷ Ha'e gui Oreruete, ndee e'ŷ ri ty'y kova'e yvy regua reipe'apa va'ekue ndevyguia Israel kuery renonde gui? Ha'e nerembiyvu Abraão ramymino kuery pe'ŷ teve kova'e yvy reme'ẽ raka'eve rã peve ikuai aguã?

⁸ Ha'e ramo apy ae ha'e kuery hekoia ha'e ojapo okuapy peteõ henda iky'a e'ŷ va'e nderery oĩ aguã. Ha'e vy aipoe'i:

⁹ “Xapy'a rei mba'emo vai orere ou ramo, kyxe oremonoingo axyarã, vixo vaikue e'ŷ vy karuai mba'e, ha'e ramo kova'e oo py roexa uka 'rã ndevy, mba'eta kova'e oo re ae nderery oĩ. Ha'e gui rojexavai reia py rojapukai 'rã ndevy. Ha'e ramo ndee ma rojapukaia rendu vy orerepy 'rã", he'i okuapy raka'e.

¹⁰ Ha'e gui aŷ ou ma Amom ha'e Moabe guigua, Seir yvyty guigua kuery guive. Ha'e va'e kuery yvy re ma Egito yvy gui Israel kuery reru jave nerembopo'akai va'ekue. Ha'e ramo oreramoõ kuery amboae katy ojepekuavo vy nomombai raka'e.

¹¹ Ha'e rami va'ekue ri aŷ ha'e kuery ou okuapy ndevyguia yvy gui oremoxẽmba aguã, oreyvyrã reme'ẽ va'ekue tei.

¹² Ha'e gui Oreruete, nerembopagai ta ri ty'y ha'e kuery? Mba'eta ore kuery re ma noĩ mbaraetea kova'e kuery orere opu'ã ouvy va'ekue rojoko aguã. Ore ma ndoroikuai rojapo aguã. Ha'e rami avi ndea katy roma'ẽ tema rokuapy — he'i.

¹³ Ha'e jave SENHOR renonde py Judá kuery ha'e javi opu'ã okuapy, kyrigue'i, kunhague ha'e ta'y kuery ha'e javi reve.

¹⁴ Ha'e gui ijaty va'e kuery mbyte py SENHOR Nhe'ẽ ou vy onhemonde Zacarias ra'y Jaaziel re. Ha'e va'e ma Benaia ra'y, Benaia ma Jeiel ra'y, Jeiel ma Matanias ra'y, Matanias ma levita, Asafe ramymino kuery va'e regua.

¹⁵ Ha'e ramo ha'e va'e aipoe'i:

— Pendu ke, peẽ Judá ha'e Jerusalém py penderekoa va'e, ndee huvixa Josafá voi, pendevy SENHOR ijayvua rã. Pekyje eme, penhemondyi eme guive kova'e kuery gui heta tei. Mba'eta ha'e kuery re opu'ã va'erã ma peẽ e'ŷ, Nhanderuete ae.

¹⁶ Ha'e nunga rupi ko'ẽ ramo peje'oi 'rã ha'e kuery rovai. Ha'e kuery ou 'rã okuapy Ziz yvy'ãmbea rupi, ha'e Jeruel tekao e'ŷa renonde katy 'rã ovaẽ.

¹⁷ Ha'e py peovaexi tei peẽ ma napenu'ãi 'rã ha'e kuery re. Pepyta ranhe pe'amy, ha'e gui pexa 'rã SENHOR pendereraa jepe ramo, Judá ha'e Jerusalém pygua kuery ha'e javi. Pekyje eme, penhemondyi eme guive. Ko'ẽ ramo tapeo ha'e kuery peovaexi aguã, mba'eta SENHOR oiko 'rã peẽ kuery reve — he'i.

¹⁸ Ha'e ramo huvixa Josafá oĩ guenapy'ã re, ngova yvy re omovaẽ reve. Judá ha'e Jerusalém py hekoia va'e kuery voi guenapy'ã re ikuai SENHOR renonde py. Ha'e rami vy omboete okuapy.

¹⁹ Levita Coate ha'e Corá ramymino kuery voi oporaei atã reve omboete okuapy SENHOR Israel kuery ruete.

²⁰ Ha'e gui ma ko'ẽgue aje'ive'i reve ovypa ma vy tekao e'ŷa katy oje'oi, Tecoa tetã rupi. Ha'e kuery oje'oi jave Josafá opu'ã ho'amy vy aipoe'i:

— Judá ha'e Jerusalém py penderekoa va'e, pendu ke xeayvu rã! Pejerovia tema SENHOR Penderuete re, ha'e ramo pei atã 'rã. Ixupeguia profeta kuery ijayvugue perovia tema, ha'e ramo peiko porã 'rã — he'i.

²¹ Heta va'e kuery reve ijayvu ju ranhe vy omoī SENHOR pe oporaei va'erā. Ha'e kuery ma ao iky'a e'ŷ va'e py onhemonde reve oje'oi xondaro kuery renonde rupi. Ha'e vy Nhanderuete pe oporaei vy aipoe'i:

— Perovy'a tema SENHOR, mba'eta nhanemboaxyo oī riae raka'e rā peve — he'i jogueravy.

²² Ha'e gui ha'e kuery oporaei reve omboete aguā omboopy ramove SENHOR ojapo Amom, Moabe pygua ha'e Seir yvyty pygua kuery Judá rovai guarā ou va'ekue re opu'ā aguā rami. Ha'e ramo oitypaa.

²³ Mba'eta Seir yvyty pygua kuery rovai re Amom ha'e Moabe pygua kuery ae opu'ā okuapy, omomba ha'e ojukapa aguā. Ha'e gui ha'e kuery omomba Seir pygua kuery rire jomeme nhomoirū-irū okuapy jova-jovai gui jojukapa peve.

²⁴ Ha'e gui Judá pygua kuery ma yvyty áry ovaēague gui yvy'ā guy katy oma'ē vy oexa pota rā heta va'ekue te'ōgue anho rive ikuai ra'e yvy rupi ho'apaague py, peteīve ma ndoikovevei.

²⁵ Ha'e rami vy Josafá ngupiveguia kuery reve oguejy jogueravy imba'e rei-reikue ogueraa aguā. Ha'e vy te'ōgue ikuai va'e mbyte rupi ojou okuapy mba'emo porāgue ha'e ovare ete va'e oata aguā rami e'ŷ. Omba'erā oipe'apa vyvoi aguā nda'evei. Heta vaipa rā mboapy ára re oipe'a okuapy mba'emo ikuai va'ekue.

²⁶ Ha'e gui irundy araa py mae ma onhemboaty ju okuapy yvyugua “Nhomoingo porāa” 'epy va'e py. Ha'e py ma oporaei okuapy SENHOR pe. Ha'e nunga rupi ae ha'e va'e yvyugua pe “Nhomoingo porāa” 'ea aŷ peve.

²⁷ Ha'e gui Judá ha'e Jerusalém pygua avakue ojevypa ju. Ha'e kuery renonde ma Josafá oo. Ha'e rami vy Jerusalém katy ojevypa ju jogueravy ovy'a reve, hovaigua kuery re SENHOR ombopo'akapa vy ombovy'a rire.

²⁸ Jerusalém tetā py ju ovaēmba okuapy. Mbaraka, ixā reta va'e ha'e mimby guaxu py omonhe'ē reve jogueraa SENHOR pegua oo peve.

²⁹ Ha'e gui amboae yvy regua kuery ma Israel rovaigua kuery re SENHOR opu'āague oendu okuapy ramo ha'e kuery re Nhanderuete ombou ndaekorāvei okuapy aguā.

³⁰ Ha'e rami py Josafá openaa rupi ikuai porā ju, jovaive-ive re optyu'u aguā Nhanderuete ome'ē rire.

1 Reis 22,41-50

³¹ Ha'e rami py Josafá opena Judá kuery re. Huvixa oī ypy'i jave trinta e cinco ma'etŷ oguereko. Ha'e vy vinte e cinco ma'etŷ re opena Jerusalém py. Ixy ma Sili rajy Azuba.

³² Ha'e ma nguu Asa oikoague rupi ae oiko. Ha'e va'e rupi oikoa gui ndojepe'ai vy ha'evea ramigua meme ojapo SENHOR renonde.

³³ Ha'e rami teī yvy'ā rupi ombojeroviaaty ikuai va'e ma nombovaipai, mba'eta heta va'e kuery opy'a re nomoī teri guamoī kuery ruete pe anho ikuai aguā.

³⁴ Ha'e gui oīve rei tema Josafá rekokue regua. Ha'e rami avi mba'emo ojapo va'ekue jypy guive opaa peve noī 'rā teve kuaxia Israel pygua huvixa kuery rekokue Hanani ra'y Jeú ombopara va'ekue re?

³⁵ Ha'e va'e rire ma Judá pygua huvixa Josafá onhemoirū Israel pygua huvixa Acazias reve, heko vai ete va'eri.

³⁶ Hexeve onhemoirū kanoā guaxu ojapo okuapy aguā Társis katy oo va'erā. Eziom-Geber py ojapo.

³⁷ Ha'e rami teī Josafá rovai profeta Maressa guigua Dodavá ra'y Eliézer ijayvu. Ha'e vy aipoe'i:

— Acazias reve renhemoirū ramo SENHOR omomba ma 'rā mba'emo rejapo uka va'ekue — he'i. Ha'e rami rire kanoā guaxu ha'e javi opēmba vy Társis katy ndooi.

2 Reis 8,16-24

¹ Ha'e gui ma Josafá ndoikovevei'i ma guamoī kueryague rami. Ha'e ramo onhono porāa tetā Davi rekoague py. Ha'e gui ta'y Jeorão ju oī nguu rekovia.

- ² Ikuai avi tyvy kuery Josafá ra'ykue mboae: Azarias, Jeiel, Zacarias, Azarias, Micael ha'e Sefatias. Ha'e va'e kuery ma Israel pygua huvixa Josafá ra'y kuery meme.
- ³ Ha'e kuery peguarã ma tuu ojapo uka reta va'ekue prata ha'e ouro guigua, mba'emo iporãgue ha'e Judá regua tetã ikorapa va'e voi. Ha'e rã huvixa oĩ aguã ma gua'y Jeorão pe oeja, jypykue ramo.
- ⁴ Ha'e gui ma nguu rekoria Jeorão oĩ ma vy onhemombaraeteve. Guyvy kuery voi ojukapa kyxe py, Israel pygua yvatekueve guive.
- ⁵ Jeorão ma huvixa oĩ ypy'i jave py trinta e dois ma'etýa oguereko. Ha'e gui oito ma'etý re opena Jerusalém py.
- ⁶ Ha'e ma Israel pygua huvixa kuery ikuaiague rupi rive oiko, Acabe ro pygua kuery ikuaiague rami avi, tajy re ae omenda rire. Ha'e rami vy SENHOR renonde rupi mba'emo vai anho ojapo oikovy.
- ⁷ Ha'e rami tei SENHOR nomombaxezi Davi ramymino kuery, Davi reve ngupive guarã ojapo rire. Mba'eta ixupe ijayvuague rami vy hekoria nhomoexakãarã omoi riae aguã re, ha'e gui hamymino kuery rekoria ju.*
- ⁸ Jeorão oĩ jave ma Edom pygua kuery opu'ã okuapy Judá kuery rovai ipo'akaa guy py nda'ikuaxevei vy. Ha'e rami vy omoi okuapy nguvixarã ae.
- ⁹ Ha'e nunga rupi Jeorão ma guembiguai yvatekueve ha'e karóxa oguereko va'e ha'e javi reve oje'oi ha'e katy. Ha'e rã Edom pygua kuery ojoko imbokuapy, ikaróxa ja ruvixa kuery guive. Ha'e rami tei pyavyve Jeorão kuery opu'ã vy oitypa.
- ¹⁰ Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aÿ peve guarã. Ha'e va'e jave ae avi Libna pygua kuery opu'ã avi Jeorão rovai, SENHOR guamoi kuery ruete gui ojepe'a rire.
- ¹¹ Judá re yvy'ã ikuai va'e áry Jeorão ojapo aviombojerovia atyrã. Ha'e va'e py ma ojapo Jerusalém pygua kuery mba'emo ra'angaa re rive ojerovia aguã rami, Judá kuery ha'e javi ndojejokoi aguã rami ojapo.
- ¹² Ha'e gui ipo py ome'ea peteí kuaxia para profeta Elias ombou va'ekue. Ha'e va'e re ipara oiny: "Po rami SENHOR neramoí Davi ruete ijayvu: 'Ndee ma nderu Josafá ha'e Judá pygua huvixa Asa oikoague rami e'ý reiko,
- ¹³ Israel pygua huvixa ikuaiague rami anho reiko va'e. Ha'e vy rejapo Judá ha'e Jerusalém pygua kuery mba'emo ra'angaa re rive ojerovia aguã rami, Acabe ro pygua kuery ombojerovia rami ae avi. Ha'e gui nderyvy kuery nderu ro pygua ae rejukapa, ha'e kuery ndegui hi'arandukueve va'eri.
- ¹⁴ Ha'e rami rire SENHOR ombojexavai 'rã ndevygua kuery opa marâguia mba'eaxy py, ndera'y ha'e ndera'yxy kuery guive, ha'e gui ndejeupe guarã rejou va'ekue ha'e javi.
- ¹⁵ Ha'e ramo rejexavai ete 'rã nderyekue rupi mba'eaxy rendu va'e gui, ko'ë nhavõ rejexavaive tema 'rã reovy, nderyekue oëmba peve', he'i."
- ¹⁶ Ha'e gui ma SENHOR ojapo Jeorão rovai filisteu kuery opu'ã aguã rami, Arábia pygua kuery Etiópia katy'i hekoa va'e guive.
- ¹⁷ Ha'e ramo ha'e kuery oupa vy opu'ã okuapy Judá kuery rovai. Ha'e rami vy huvixa ro py imba'e rei-rei ojou va'e ogueraapa, ta'y ha'e ta'yxy kuery voi. Nei peteí ta'y kuery va'e regua ndoejai, kunumive'i va'e Jeoacaz anho e'ý vy.
- ¹⁸ Ha'e nunga oikopa ma rire SENHOR omoingo axy hyekue rupi okuera aguã rami e'ý.
- ¹⁹ Ko'ë nhavõ ojexavaive tema ovu. Ha'e gui mokoí ma'etýa py ma mba'eaxy gua'y hyekue oëmba oiny. Ha'e vy ojexavai ete reve omano. Ha'e rã ixupe guare kuery ma heakuã porã va'e ndoapyi ima'endu'a aguã, guamoí kuery omano rã ojapooty rami e'ý.
- ²⁰ Ha'e va'e ma trinta e dois ma'etý oguereko huvixa oĩ ypy jave. Ha'e gui Jerusalém py opena oito ma'etý re. Omano ramo avave rei nda'ipy'a vai. Ha'e rami vy tetã Davi rekoague py onhono porãa tei yma guare huvixa kuery rupa yvýry e'ý guive.

* 21:7 Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui "Nhomoexakã" he'ia ma huvixave raka'eve rã oiko va'erã re ijayvu vy, Jesus Cristo rekorã re guive (Lucas 2.30-32; João 8.12).

22

2 Reis 8.25-29

¹ Jeorão rekovia Jerusalém pygua kuery nguvixarã omoĩ ta'y kyrĩve va'ekue Acazias, mba'eta ha'e kuery ikuaria py mba'emo pe'apaarã Arábia pygua kuery reve ovaẽ va'e tyke'y kuery ojukapa rire. Ha'e rami vy Jeorão ra'y Acazias ae oĩ Judá pygua ruvixarã.

² Acazias vinte e dois ma'etý oguereco jave oĩ ypy'i huvixa. Ha'e vy peteĩ ma'etý ete'i opena Jerusalém py.

³ Ixy ma Onri rajy Atalia. Ixy ombo'e vai rire Acazias oiko Acabe kuery ikuaria rami.

⁴ Acabe kuery ikuaria rami ae mba'emo vai anho ojapo SENHOR renonde rupi, mba'eta tuu omano rire ha'e kuery ae omongoeta okuapy okanhy aguã rami.

⁵ Ha'e kuery omongoeta rami oiko vy Israel pygua huvixa Jorão reve jogueraa Ramote-Gileade katy Síria pygua huvixa Hazael rovai opu'ã aguã. Ha'e ramo Síria pygua kuery oipxyo Jorão.

⁶ Ha'e ramo Acabe ra'y huvixa Jorão ma Ramá tetã py Síria pygua huvixa Hazael re opu'ãa py oipxyo okuapy. Ha'e ramo Jezreel tetã py ju ojevy okuera aguã. Ha'e gui Jezreel py Jorão imba'eaxy oupya py ou Judá pygua huvixa Jeorão ra'y Acazias oexa aguã.

Jeú Acazias ojukaague

⁷ Nhanderuete Acazias ojukaxe ramo ae oo huvixa Jorão pou vy. Mba'eta ha'e ou vyve Jorão reve jogueraa Ninsi ra'y Jeú rovai opu'ã aguã. Ha'e va'e ma SENHOR oiporavo ma voi huvixa Acabe ro pygua kuery mombaarã.

⁸ Ha'e ramo Jeú Acabe ro pygua kuery ojukapa ma rire ojou avi Judá regua yvatekueve ha'e Acazias ryvy ra'y kuery oipytyvõa rupi ikuai va'ekue. Ha'e rami vy ha'e kuery voi ojukapa.

⁹ Ha'e va'e rire oeka uka avi Acazias. Ha'e rã Samaria tetã py ojoua onhemia rupi oikoa py. Ha'e rami vy Jeú oña py ogueru vy ojuka okuapy. Hembiguai kuery ae onhono porã okuapy, mba'eta aipoe'i: "Josafá opy'a ha'e javi py SENHOR oeka va'ekue ra'y", he'i vy. Ha'e rami rire Acazias ro pygua kuery regua ndoikovei huvixa oĩ va'erã.*

2 Reis 11.1-3

¹⁰ Ha'e gui ma Acazias xy Atalia oendu opi'a omano maa. Ha'e vy opu'ã vy ojukapa Judá pygua huvixa ramyminokue ha'e javi.*

¹¹ Ha'e rã Acazias ra'y Joás ma ha'e kuery ojukaa ta jave huvixa Jeroão rajykue Jeosabeate ogueraa jepe huvixa ra'y kuery mbyte gui. Ha'e rami vy onhomni peteĩ opy mbyteve katy hexe opena va'ety reve. Atalia gui Jeosabeate onhomni vy ndojuka ukai nho. Jeosabeate ma huvixa Jeroão rajykue, sacerdote Joiada ra'yxy, ha'e Acazias reindy.

¹² Ha'e ramo Joás ma mboapy meme ma'etýa peve oiko ha'e kuery reve SENHOR pegua opy. Ha'e va'e jave ma Atalia ae huvixa oĩ ha'e va'e yvy re.

23

2 Reis 11.4-12

¹ Sete ma'etýa py ma Joiada* ipy'a guaxu vy ojapo peteĩ rami ikuai aguã xondaro kuery ruvixa ikuai va'e reve. Ha'e va'e kuery ma Jeorão ra'y Azarias, Joanã ra'y Ismael, Obede ra'y Azarias, Adaías ra'y Maaséias ha'e Zicri ra'y Elisafate.

² Ha'e va'e kuery ma Judá yvy jave rupi oje'oí vy Judá regua tetã ha'e javi gui omono'õmba heruvy levita kuery ha'e Israel kuery akã ikuai va'e. Ha'e ramo oupa okuapy Jerusalém py.

³ Ha'e va'e kuery ha'e javi Nhanderuete pegua opy oua py huvixa reve ojapo okuapy peteĩ rami ikuai aguã. Ha'e ramo ha'e kuery ha'e javi pe Joiada aipoe'i:

— Ne'exa, huvixa ra'ykue ae 'rã oĩ huvixarã, Davi ramymino kuery rekorã re SENHOR ijayvu ma voiague ramí vy.

* 22:9 2 Reis 9.21-29 * 22:10 Guemiarirõ kuery ojukapa ha'e ae onhembouvixaxe vy. * 23:1 Joiada ma sacerdote vy oipytyvõ SENHOR pegua templo ropy huvixa Joás onhomia aguã (22.11-12).

⁴ Po rami 'rā peẽ kuery pendekuai. Mboapy henda py 'rā pendekuai. Ha'e gui peteĩ regua sacerdote ha'e levita kuery pendekuai va'e ma sábado ára py peike vy okẽ rarõa rupi 'rā pendekuai.

⁵ Ha'e gui amboae regua ma huvixa ro py 'rā pearõ. Ha'e gui mboapya va'e regua ma Okẽ Yta 'epy va'e py 'rā pearõ. Ha'e rā heta va'e kuery ha'e javi 'rā ikuai SENHOR pegua oo roka py.

⁶ Ha'e rami avi SENHOR pegua opy ete avave rei ndoikeai 'rā, sacerdote ha'e levita kuery ipytyvõa rupi ikuai va'e e'ŷ vy. Ha'e kuery anho 'rā oike, iky'a e'ŷ va'e vy. Ha'e rā heta va'e kuery ha'e javi ma SENHOR ijayvuague rami ae 'rā ikuai.

⁷ Ha'e gui levita kuery pendekuai va'e ma huvixa yvýry ae 'rā pendekuai, peteĩ-teĩ pendepo py tembiporu perekó reve. Ha'e gui mava'e rā rei oo py oike ta va'e pejuka 'rā. Huvixa reve ae 'rā peiko oẽ ový jave, ha'e gui oike ouvy jave voi — he'i.

⁸ Ha'e ramo levita ha'e Judá pygua kuery ha'e javi ma sacerdote Joiada ojapo ukaague rami ikuai. Ha'e rami vy peteĩ-teĩ ogueraa guexeveguá avakue, sábado ára py oike ha'e oẽ ta va'e kuery, mba'eta sacerdote Joiada nomondoukai ombo'epoaty gui.

⁹ Ha'e ramo cem ikuai va'e-va'e ruvixa kuery pe sacerdote Joiada omboaxa huvixa Davi mba'ekue hu'y guaxu, hu'y jokoa ha'e imo'ãa tuvixa va'e, SENHOR pegua opy omoõ porã mbyre.

¹⁰ Ha'e gui heta va'e kuery ha'e javi ma peteĩ-teĩ opo py tembiporu oguerekó va'e reve ha'e omoõ huvixa ro yke jovaive re ha'e altar hi'aia peve, huvixa ombojere vy oarõ okuapy aguã.

¹¹ Ha'e gui mae ma oguenoẽ heruvy huvixa ra'ykue. Inhakã re coroa omoõ vy ixupe ome'ẽ kuaxia para Nhanderuete ayvu oña. Ha'e rami vy omoõ okuapy nguvixarã. Inhakã rupi Joiada ha'e ta'y kuery azeite oikyty reve ojapukai okuapy:

— Toiko riae nhanderuvixa!

2 Reis 11.13-16

¹² Ha'e gui heta va'e kuery onha-onhaa rupi huvixa pe oporai okuapy Atalia oendu vy ha'e kuerya py ou SENHOR pegua opy.

¹³ Ha'e vy oma'ẽ rā huvixa hi'aí ma oikeaty py oo yta yvýry. Huvixa renonde ikuai avi harõa kuery ruvixa ha'e mimby guaxu monhe'ëa kuery. Heta va'e kuery ha'e javi oguerovy'a okuapy, mimby guaxu omonhe'ë guive. Oporaei va'ety kuery voi ombo'epu reve ogueroporaei okuapy. Ha'e ramo Atalia oao omondoro reve ojapukai:

— Xerovaigua ra'e! Xerovaigua ra'e! — he'i.

¹⁴ Ha'e ramo sacerdote Joiada xondaro ruvixa kuery oka katy ogueru vy aipoe'i ha'e kuery pe:

— Kunha va'e penoẽ ke heravy hyxy okuapy va'e kuery mbyte rupi. Amongue hupive oo ta ramo pejuka 'rā kyxe py — he'i. Mba'eta sacerdote ae “Pejuka eme SENHOR pegua opy” he'iague rami.

¹⁵ Ha'e ramo kunha va'e ojopy okuapy vy kavaju rape oĩ va'e rupi ogueraa huvixa ro peve. Ha'e py mae ma ojuka.

2 Reis 11.17-21

¹⁶ Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery ha'e javi reve.

¹⁷ Ha'e ramo heta va'e kuery oyvy ha'e javi gui ou va'ekue ma Baal pegua oo py oike okuapy vy oitypa. Ixupegua altar ikuai va'ekue omopẽmba okuapy, ta'angaa ikuai va'e guive. Baal pegua sacerdote Matã voi ojuka altar yvý'iry.

¹⁸ Ha'e gui sacerdote regua levita ikuai va'e po py Joiada omboaxa SENHOR pegua oo re opena ha'e opy rupi ha'e kuery ombo'epo aguã Davi omoõague rami, ha'e gui SENHOR pe mba'emo oapy reve ome'ẽ aguã, Moisés kuaxia re lei oña rami vy, ový'a ha'e oporaei reve, Davi oejaague rami vy.

¹⁹ Omoõ avi SENHOR pegua oo rokẽ rarõarã kuery, ha'eve'ŷa oña va'e regua peteïve oike e'ŷ aguã.

²⁰ Joiada ogueraa xondaro kuery cem ikuai va'e-va'e ruvixa kuery, yvatekueve, guetarã kuery re opena va'e, ha'e ha'e va'e yvy regua kuery ha'e javi. Ha'e rami vy ha'e kuery reve SENHOR pegua oo gui ogueraa avi huvixave. Okẽ yvy'ã katy oĩ va'e rupi ogueroaxa heravy huvixa ro katy oje'oi vy. Ha'e py ma omboguapy imoiny tenda openaaty áry.

²¹ Ha'e va'e yvy regua kuery ovy'a pavẽ okuapy. Tetã pygua kuery voi ikuai porã'i, Atalia kyxe py ojukaa rire.

24

2 Reis 12.1-16

¹ Joás ma sete ma'etõ'i oguereko jave py oĩ ypy'i huvixa. Ha'e gui quarenta ma'etõ re opena Jerusalém py.

² Ixy ma Berseba pygua Zíbia. Joás ma ha'evea ramigua ojapo oikovy SENHOR renonde rupi, sacerdote Joiada oĩa pukukue re.

³ Ta'yxyrã Joiada ojou mokoñ kunha. Ha'e rami vy ta'y ha'e tajy kuery ikuai.

⁴ Ha'e va'e rire ma Joás onhembopy'a SENHOR pegua oo omoatyrõ uka aguã re.

⁵ Ha'e rami vy sacerdote ha'e levita kuery omboatypa vy aipoe'i ha'e kuery pe:

— Tapeo Judá yvy re tetã ikuai va'e rupi. Ha'e vy pemono'õ peráta Israel kuery ha'e javi gui, ma'etõa nhavõ ha'e kuery ome'ẽ va'erã, Penderuete pegua oo pemoatyrõmba aguã. Pejapo pojavave'i ke ha'e nunga — he'i. Ha'e rami tei levita kuery ma nonhea'ãi okuapy ha'e rami aguã.

⁶ Ha'e ramo huvixa oenoñ uka sacerdote yvateve va'e Joiada. Ha'e vy oporandu ixupe:

— Mba'e re tu neremondoukai ri levita kuery Judá ha'e Jerusalém pygua kuery peráta ome'ẽ 'rã va'ekue ogueru aguã? Ha'e nunga Israel kuery ha'e javi pe SENHOR rembiguai Moisés ome'ẽ uka raka'e, oo ijayvu oĩaty omoatyrõda aguã — he'i.

⁷ Mba'eta Atalia ha'e ipi'a kuery heko vaia rupi vy ombovaipa rei va'ekue Nhanderuete pegua oo. Mba'emo SENHOR pegua opy rupigua iky'a e'ý va'erã oĩ va'ekue oiporupa Baal kuery pe ikuiaia rupi rive.

⁸ Ha'e nunga rupi huvixa ijayvua rami vy ha'e kuery ojapo okuapy peráta ryrurã. Ha'e va'e ma omoñ oka py, SENHOR pegua oo rokẽ rexei'i.

⁹ Ha'e rami vy Judá yvy ha'e Jerusalém tetã rupi ijayvu SENHOR pe ogueru aguã peráta hembiguai Moisés ogueru rukaague rami vy, Israel kuery tekao e'ýa rupi ikuai jave ome'ẽ uka va'ekue.

¹⁰ Ha'e ramo yvatekueve ha'e heta va'e kuery ha'e javi ovy'a reve ogueru okuapy peráta ome'ẽ va'erã. Hyru py ae omoñ, oo omoatyrõmbaa peve.

¹¹ Peráta ryru levita kuery ogueraa 'rã opena va'erã kuery huvixa omoñ va'ekue ikuiaia py. Ha'e gui heta peráta oĩ maa ha'e kuery oexa ramo ou ju 'rã huvixa rembiguai kuaxia para re opena va'ety ha'e sacerdote yvateve va'e oĩa py. Ha'e kuery ju hyru gui peráta oguenoëmba vy hyru omoñ ju 'rã henda py ae. Ko'ẽ nhavõ ha'e rami ojapo vy peráta omono'õ reta okuapy oata aguã rami rei e'ý.

¹² Ha'e va'e ha'e javi ma huvixa ha'e Joiada ome'ẽmba SENHOR pegua oo moatyrõda kuery re opena va'e kuery po py. Opaga avi ita re ombo'eapo va'e ha'e oo apoarã kuery SENHOR pegua oo omoatyrõmba aguã. Ojou avi ferro ha'e overa va'e re ombo'eapo va'erã, SENHOR pegua oo omoatyrõmba aguã.

¹³ Ha'e ramo ombo'eapo va'erã omoñ mbyre ombo'eapo okuapy vy omoatyrõ porã heravy. Ha'e rami vy Nhanderuete pegua oo ha'ekue'i rami ae ju ojapo, omo'ã ratãmbave guive.

¹⁴ Ha'e nunga ojapopa ma vy huvixa ha'e Joiada pe ogueru okuapy peráta rembyrekue. Ha'e va'ekue gui ma ojapo uka mba'emo SENHOR pegua opy ha'e ombojeroviaa rupi oiporu pyrã. Ouro ha'e prata gui ojapo mba'emo oappyaty rupi oiporu va'erã, hy'a'i ha'e tembiporu ha'e javi. Ha'e ramo Joiada oĩa pukukue re ma SENHOR pegua opy mba'emo oappy reve ome'ëa jepi 'rã.

¹⁵ Ha'e gui ma Joiada tuja'i, ha'e hi'ára reta ma vy omano. Cento e trinta ma'etõ ma oguereko reve omano.

¹⁶ Ha'e ramo tetā Davi rekoague py onhono porāa huvixa kuery rupa yvýry, Nhanderuete pe ha'e ixupegua oo re vy ojapo porā rire Israel re.

Huvixa aipoe'iague rami vy Zacarias ojukaa okuapyague

¹⁷ Joiada omano ma rire ou okuapy Judá regua yvatekueve. Guenapy'ã re ikuai huvixa Joás renonde py. Ha'e kuery ijayvu rā huvixa oendu.

¹⁸ Ha'e kuery oejapa ma okuapy SENHOR guamoī kuery Ruete pegua oo. Ha'e rami vy ta'angaarā yvyra omopu'ã mbyre pe rive ikuai, ta'angaa mboae pe guive. Ha'e kuery káuxa ae Judá ha'e Jerusalém re ou poxya.

¹⁹ Ha'e rami teī ha'e kuerya py SENHOR omondouka profeta kuery ojeupe ju ogueru aguā teī. Ha'e ramo ha'e kuery rovai profeta kuery ijayvu rā noendu potai okuapy.

²⁰ Ha'e gui Nhanderuete Nhe'ẽ ou sacerdote Joiada ra'ykue Zacarias re. Ha'e ramo heta va'e kuery renonde py opu'ã ho'amy vy aipoe'i ha'e kuery pe:

— Po rami Nhanderuete ijayvu: “Mba'e re tu SENHOR ojapo uka va'ekue rupi e'ŷ pendekuai? Mba'eta napendekuai porāi 'rā. SENHOR pejapa ramo ha'e voi pendereja 'rā”, he'i.

²¹ Ha'e ramo Zacarias rovai ha'e kuery jogueroayvu vy ojapipa ita py. Huvixa aipoe'ia rami ojuka, SENHOR pegua oo roka py ae.

²² Ha'e rami py huvixa Joás na'ima'endu'ai Zacarias ru Joiada ixupe ojapo porāague re. Ha'e rami 'rāgue py ojuka uka ta'ykue. Ha'e va'e omano ta ma oupy vy aipoe'i:

— Rejapo va'e SENHOR oexa vy nembopaga 'rā — he'i.

Nhanderuete Joás ombopagaague

²³ Ha'e va'e ma'etŷa pyve ou Síria pygua xondaro kuery Joás rovai opu'ã okuapy aguā. Ha'e rami vy Judá ha'e Jerusalém peve ovaẽ vy heta va'e kuery yvatekueve ojukapa. Imba'e rei-reikue ma Damasco pygua huvixa pe omondoukapa.

²⁴ Síria guigua xondaro kuery mbovy'i ete ou teī SENHOR ombopo'aka Judá regua xondaro kuery heta raxa ikuai va'e re, guamoī kuery ruete oejapa rire. Nhanderuete huvixa Joás ombopaga aguā ae Síria pygua kuery ombou.

2 Reis 12.20,21

²⁵ Joás oĩa gui Síria pygua kuery ojepe'apa vy oeja omano rai'i va'e. Ha'e ramo hovai hembiguai kuery jogueroayvu. Ha'e rami vy hupa pyve ojuka, sacerdote Joiada ra'y kuery ruguy omoēague re.

²⁶ Ha'e ramo onhono porāa tetā Davi rekoague py teī yma guare huvixa kuery rupa yvýry e'ŷ guive. Hovai jogueroayvu va'ekue ma po rami: Amom pygua Simeate pi'a Zabade ha'e Moabe pygua Sinrite pi'a Jeozabade.

²⁷ Ha'e gui ta'y kuery rekoke, hovai ijayvu jepiague, ha'e Nhanderuete pegua oo omoatyrōague, ha'e nunga ha'e javi ma ipara oiny huvixa kuery rekoke oĩa re. Ha'e gui ta'y Amazias ju oĩ nguu rekopia.

25

2 Reis 14.1-6

¹ Amazias ma vinte e cinco ma'etŷ oguerekoo huvixa oĩ ypy'i jave py. Ha'e vy vinte e nove ma'etŷ re opena Jerusalém py. Ixy ma Jeoadã, Jerusalém pygua ae.

² SENHOR renonde rupi ha'evea rami oiko va'eri opy'a ha'e javi py e'ŷ guive.

³ Opo'akaa re oĩ atā ma rire ojuka ukapa guembiguai kuery tuu jukaare.

⁴ Ha'e rā ijukaare ra'y kuery ma ha'e ndojuka ukai. Ha'e rami 'rāgue py Moisés kuaxia re omboparaague rami oiko, mba'eta SENHOR ojapo uka vy aipoe'i: “Tuu kuery ma ndojukaai 'rā ta'y kuery ojapo vaiague re, neĩ ta'y kuery ndojukaai 'rā tuu kuery ojapo vaiague re. Peteī-teī ojukaa 'rā ha'e ae ojejavyague re”, he'iague rami.

2 Reis 14.7

⁵ Ha'e gui Amazias omboatypa Judá kuery ha'e javi. Ha'e vy peteī-teī ro pygua ikuai va'e omoī xondarorā, omoī avi mil ikuai va'e re ha'e cem ikuai va'e re opena va'erā. Judá ha'e Benjamim regua ha'e javi omoī ha'e rami aguā. Ha'e vy vinte ma'etŷ va'e guive

tujakue peve oipapa vy oikuua trezentos mil ikuia oiporavo pyre joe opu'ãa py hu'y guaxu ha'e hu'y jokoa tuvixa va'e ogueraa va'e meme.

⁶ Ha'e gui Israel kuery va'e regua ojoguave ju cem mil avakue ipy'a guaxukueve, três mil e trezentos quilos prata guigua re.

⁷ Ha'e rami teĩ oĩa py ou peteĩ ava Nhanderuete remimbo'e. Ha'e vy aipoe'i ixupe:

— Xeruvixa, eraa eme Israel regua xondaro kuery. Mba'eta Israel ha'e Efraim kuery reve'ŷ SENHOR oiko.

⁸ Ha'e nunga rupi tereo tema nhande kuery reve anho. Ha'e rami vy joe pepu'ã ramo ndepo'aka 'rã. Ha'e rami e'ŷ ri ramo Nhanderuete ojapo 'rã nhanderovaigua kuery renonde re'a aguã rami, mba'eta Nhanderuete ma nhopytyvõ ha'e joity aguã ipo'aka va'e — he'i.

⁹ Ha'e ramo Nhanderuete remimbo'e pe Amazias oporandu:

— Ha'e rami avi mba'exa tu ha'vy ajapo 'rã três mil e trezentos quilos prata guigua ajou ju aguã, ha'e va'e re Israel regua xondaro kuery ajogua rire?

Nhanderuete remimbo'e ombovai:

— Ha'e va'ekue gui SENHOR hetave oguereko ndevy ome'ẽ va'erã — he'i.

¹⁰ Ha'e ramo ojeupagua kuery ae gui huvixa Amazias omboja'opa xondaro kuery Efraim gui ou va'ekue, ngoo katy ju ojevypa aguã. Ha'e ramo ha'e kuery ivai ete okuapy Judá kuery rovai. Ipoxy reve ojevypa ju ngoo katy.

¹¹ Ha'e gui ma Amazias ipy'a guaxu reve ogueraa ojeupagua kuery ae. Ha'e rami vy oje'oi Yvyugua Juky 'ea va'e katy. Ha'e py ma dez mil ojuka Seir ramymino kuery va'e regua.

¹² Ha'e rami vy Judá kuery ma dez mil ju ojuka e'ŷ re ojopy vy ogueraapa peteĩ itaova yvatevea py. Ha'e va'e gui ma omombopa ramo omanomba hu'ũmba vy.

¹³ Ha'e rami teĩ xondaro kuery Amazias ngupive joe opu'ãa katy oje'oi e'ŷ aguã omondoukapa ju va'ekue ma ombovaipa Judá re tetã ikuai va'e Samaria guive Bete-Horom peve. Ha'e rami vy três mil ojuka okuapy ha'e pygua kuery, ha'e imba'e rei-reikue ma ogueraapa.

Amazias mba'emo ra'angaa pe oikoa re Nhanderuete omongoeta ukaague

¹⁴ Ha'e gui Edom pygua kuery ojukaague gui Amazias ojevy vy ogueru Seir ramymino kuery ruete ra'angaa oguereko va'ekue. Ha'e rami vy ngueterã ae rive omopu'ã imo'amy. Ha'e va'e omboetea rupi oapy imoiny heakuã porã va'e.

¹⁵ Ha'e ramo Amazias rovai SENHOR poxya hendy rã oĩa py ombou peteĩ profeta ixupe oporandu aguã:

— Mba'e re tu remboete reikovy ta'angaa, ndepo gui ojeupagua kuery ndogueraa jepei va'ekue ri? — he'i.

¹⁶ Ha'e ramo profeta ixupe ijayvu teri reve huvixa ombovai:

— Xapy'a rei tu ndee huvixa mongetaarã renhemoi? Epytu'u ma ta'vy. Mba'e re tu rejapo rojuka aguã rami? — he'i.

Ha'e ramo profeta optyu'u va'eri aipoe'i nho ju:

— Ha'e rami ete reiko ramo xee aikuua Nhanderuete nemomba taa, xee romongeta teĩ nerendui rire — he'i.

2 Reis 14.8-14

¹⁷ Judá pygua huvixa Amazias ma amboae rami onhemongeta uka rire omondouka ayvu mombe'uarã Israel pygua huvixa Jeoacaz ra'y Jeoás pe, Jeú ramymino va'e pe. Ha'e vy aipoe'i uka:

— Peju, jajoguero'a.

¹⁸ Ha'e rami teĩ Israel pygua huvixa Jeoás ombovai Judá pygua huvixa Amazias:

— Líbano yvy re ma je peteĩ juu rakuaendy hi'aĩ va'e aipoe'i uka yary ha'e py hi'aĩ avi va'e pe: “Eme'ẽ na nderajy xera'y ra'yxyrã”, he'i. Ha'e rami teĩ mymba Líbano yvy re ikuai va'e opyrõmba rive juu rakuaendy re.*

* 25:18 “Juu rakua endy” he'ia ma huvixa Amazias ombojaru reia rupi ijayvu vy, ha'e rã “Yary hi'aĩ va'e” he'ia ma ojee ae ijayvu vy.

¹⁹ Ha'e gui ndee ma “Edom pygua kuery ma xee ajukapa” 're vy nekuraxõ re oĩ renhemboyvate reixea ha'e rejou porã rivea. Aÿ ndero py ae repyta 'rãgue. Mba'e re tu rejeity ukaxe ri mba'emo vai py, Judá pygua kuery reve? — he'i uka.

²⁰ Ha'e rami teiñ Judá pygua huvixa Amazias noendu potai. Mba'eta ha'e rami aguã ma Nhanderuete gui ae ou, hovaigua kuery po py omboaxa aguã, Edom pygua kuery ruete ra'angaa pe oiko ramo.

²¹ Ha'e ramo Judá pygua huvixa Amazias oo nho Judá regua Bete-Semes tekoá py, Israel pygua huvixa Jeoás reve joe opu'ã aguã.

²² Ha'e gui ma Israel kuery renonde py Judá pygua kuery oitypaa. Ha'e vy peteñ-teiñ onhamba ngoo katy.

²³ Bete-Semes py ae Israel pygua huvixa Jeoás ombo'a Judá pygua huvixa Joás ra'y Amazias, Jeoacaz ramymino va'e. Ha'e rami vy Jerusalém re ogueraa vy oity tetã kora Efraim guive ojerea katy'i okẽ hi'aíague peve, cento e oitenta metros va'ekue ha'e javi.

²⁴ Tetã gui oipe'apa avi ouro, prata ha'e mba'emo ryru SENHOR ropy Obede-Edom openaague, ha'e huvixa ro py mba'emo omoõ porã mbyre ha'e javi. Ogueraa avi avakue mba'emo re omboekovia va'erã. Ha'e gui ma Samaria tetã katy ju ojevy.

2 Reis 14.17-20

²⁵ Jeoacaz ra'y Jeoás Israel pygua huvixa va'e omano rire Joás ra'y Amazias Judá pygua huvixa oikove ranhe quinze ma'etã re.

²⁶ Ha'e gui oïve rei tema Amazias rekoke regua. Ha'e rami avi mba'emo ojapo va'ekue jypy guive opaa peve noï 'rã teve kuaxia Judá ha'e Israel pygua huvixa kuery rekoke oïa re?

²⁷ Amazias ma SENHOR pe oikoa gui ojepe'a ramo hovai jogueroayvua Jerusalém py. Ha'e ramo Laquis katy onha teiñ hakykue omondoukaa avakue. Ha'e ramo Laquis py ae ojuka.

²⁸ Ha'e rami vy kavaju áry ogueru vy Jerusalém py ae onhono porã, tuu kuery rupa yvýry tetã Davi rekoague py.

26

2 Reis 14.21,22; 15.1-7

¹ Ha'e gui ma Judá kuery ha'e javi oiporavo Uzias dezesseis ma'etã oguereko va'e. Ha'e rami vy nguvixarã omoõ okuapy nguu Amazias rekovia.*

² Ha'e va'e ma ojapo Elate tetã, omoatyrõ avi Judá yvy ha'e javi rupi, tuu huvixa guamoõ kueryague rami ndoikovevei'i ma rire.

³ Uzias ma dezesseis ma'etã oguereko huvixa oï ypy'i jave py. Ha'e gui cinqüenta e dois ma'etã re opena Jerusalém py. Ixy ma Jecolias, Jerusalém pygua ae.

⁴ Ha'evea ramigua ojapo oikovy SENHOR renonde rupi, nguu Amazias ojapoague rami meme.

⁵ Ha'e rami vy ojee omoõ Nhanderuete oeka aguã. Imongetaaty Zacarias Nhanderuete guigua oexaa py hi'arandu va'e oikoa pukukue re ha'e rami oiko. SENHOR oekaa ja ma omoingo porã.

⁶ Ha'e gui ma filisteu kuery rovai opu'ã aguã oo vy ombovaipa Gate tetã kora, Jabnê ha'e Asdode py guive. Ha'e gui Asdode katy'i rupi ojapove ju tetã, filisteu kuery yvy ha'e javi rupi guive.

⁷ Nhanderuete oipytyvõ filisteu kuery rovai opu'ãa py, Arábia regua Gur-Baal pygua kuery rovai, meunita kuery rovai guive.

⁸ Uzias ipo'akapa rã Egito py nhavaëa'i peve ima'endu'a porã hexe. Ha'e ramo ixupe Amom pygua kuery voi ome'ë 'rã mba'emo.

⁹ Jerusalém tetã py Uzias ojapo reta torre: Okẽ Ojerea 'epy va'e py, Okẽ Yvyugua ha'e Okẽ Hakua 'epy va'e py ojapo, ha'e vy omombaraetepa.

¹⁰ Tekoa e'ÿa rupi guive ojapo torre, yguarã ojo'o reta guive hymba kuery heta ramo, yvyugua ha'e nhuündya rupi. Mba'ety rupigua oguerovy'a va'e vy guembiguai kuery

* 26:1 Uzias rery mboae ma Azarias raka'e (2 Reis 14.21-22, 15.1-7).

oguereko mba'ety rupi ombo'eapo va'e, uva ty rupi, yvyty ikuai va'e rupi, ha'e mba'ety porãa rupi.

¹¹ Uzias rembiguai regua ikuai avi xondaro kuery tembiporu oiporu kuaa ete va'e. Ha'e kuery ma joe opu'ã aguã katy hyxy 'rã jogueravy. Ha'e kuery rery ma kuaxia re opena va'ety Jeiel omboparapa imoiny, huvixa Maaséias reve, huvixa rembiguai yvateve va'e Hananias openaa rupi.

¹² Ha'e gui hetarã kuery akã ikuai va'e rery oĩ va'ekue ma dois mil e seiscentos, avakue ipy'a guaxukueve meme.

¹³ Hembigui xondaro kuery ma trezentos e sete mil e quinhentos ikuai. Ha'e va'e kuery ma ombaraeeta rupi opu'ã 'rã okuapy joe, hovaigua kuery gui huvixa oipytyvõ va'e.

¹⁴ Xondaro kuery ha'e javi rembiporurã Uzias ojapo uka hu'y jokoa, hu'y guaxu, akã regua, pexo regua, guyrapa ha'e ita momboa.

¹⁵ Jerusalém py ma mba'emo tuvixa va'e momboarã ojapo uka avi avakue ojapo kuaa va'e pe. Ha'e va'e ma torre ha'e kora ojerea áry omoõ 'rã hu'y ha'e ita tuvixakueve omombo aguã. Hexe ima'endu'aa mombyrya rupi peve, opa mba'e py SENHOR omombaraete ramo.

2 Reis 15.5-7

¹⁶ Ha'e gui Uzias ipo'aka ete ma vy opy'a py onhemboyvate rei, okanhy aguã rami oiko peve. Ha'e vy opa marã rei ojejavvy SENHOR nguuete rovai. Ha'e rami vy ixupegua opy oike altar oĩ va'e áry heakuã porã va'e oapy aguã.

¹⁷ Hakykue sacerdote Azarias oike avi SENHOR pegua sacerdote kuery oitenta ipy'a guaxukueve ikuai va'e reve.

¹⁸ Ha'e vy huvixa Uzias reve nhombovake okuapy. Ha'e vy aipoe'i okuapy ixupe:

— Ndee huvixa Uzias pe ma nda'evei SENHOR renonde py heakuã porã va'e reapy aguã, sacerdote kuery Arão ramymino ikuai va'e pe anho, ha'e rami aguã rami omoña rire. Eẽ ke henda iky'a e'ý va'e gui, mba'eta rejeyavy ma. SENHOR Nhanderuete nanemboete ukavei ma 'rã — he'i okuapy.

¹⁹ Ha'e ramo Uzias ivai vaipa, opo py heakuã porã va'e ryru oguereko reve. Sacerdote kuery pe ivai ramove hova mbyte re ojekuaa lepra ha'e kuery ha'e javi oexaa py, SENHOR pegua opy altar heakuã porã va'e oapyaty yvýry hi'aína pyve.

²⁰ Sacerdote yvateve va'e Azarias ha'e sacerdote kuery mboae hexe oma'ẽ vy oexa okuapy lepra hova re oĩ ra'ea. Ha'e ramo ogueraa pojava oka katy. Ha'e ae ma voi guive oẽ pojava ový, SENHOR omoingo axy rire.

²¹ Ha'e rami py huvixa Uzias ma omanoa ára peve lepra reveguia oiko. Lepra reveguia vy peteõ oo ha'e ae'i oĩ aguã ojapo pyre py oiko, SENHOR pegua opy gui omoxẽ rire. Ha'e gui ta'y Jotão ju opena oikovy huvixa ro re. Ovvy re ikuai va'e re oikuua pota avi oikovy.

²² Ha'e gui oíve rei tema Uzias rekokue regua. Ha'e rami avi mba'emo ojapo va'ekue jypy guive opaa peve noĩ 'rã teve kuaxia Amom ra'y profeta Isaías ombopara va'ekue re?

²³ Ha'e rire Uzias optyu'u ma guamoõ kueryague rami. Ha'e ramo tamoõ kuery onhono porãague rami avi onhono porãa peteõ yvyra ruparã huvixa kuery oguereko katu va'ekue py, ixupe “Lepra reveguia va'ekue” he'i okuapy vy. Ha'e gui ma ta'y Jotão ju oĩ nguu rekovia.

2 Reis 15.32-38

¹ Jotão ma vinte e cinco ma'etý oguereko jave py oĩ ypy'i huvixarã. Ha'e vy dezesseis ma'etý re opena Jerusalém py. Ixy ma Jerusa, Zadoque rajy.

² Ha'e ma ha'evea rami oiko SENHOR renonde rupi, nguu Uzias oikoague rami ae ju. Ha'e rami avi ndoikei guive SENHOR pegua opy. Ha'e rã heta va'e kuery ma mba'emo vai rupi tema ikuai.

³ Jotão ojapo uka SENHOR pegua oo rokẽ yvate rupi guarã, ha'e tetã kora Ofel 'epy va'e áry rupi heta avi ojapo mba'emo.

⁴ Judá re yvyty ikuai va'e rupi ojapo avi tetã, ha'e ka'aguy rupi ma oo ikorapa va'e ha'e torre ojapo.

⁵ Ha'e gui ma Amom kuery ruvixa rovai re opu'ã vy ipo'aka ha'e kuery re. Ha'e ramo ha'e va'e ma'etý re ma ixupe Amom kuery ome'ẽ três mil e trezentos quilos prata guigua, ha'e dez mil voxá trigo ha'e cevada. Ha'e ramigua ma Amom kuery mokoõ ma'etý, ha'e gui mboapy ma'etýa peve ome'ẽ okuapy ixupe.

⁶ Jotão ipo'akave tema ový, SENHOR nguu ete oipotaa rami oiko va'e vy.

⁷ Ha'e gui oïve rei tema Jotão rekukue regua. Ha'e rami avi joe opu'âague ha'e mba'emo ojapo va'ekue ha'e javi noï 'rã teve kuaxia Israel ha'e Judá pygua huvixa kuery rekukue oïa re?

⁸ Vinte e cinco ma'etý oguerekó jave py oï ypy'i huvixarã. Ha'e vy dezesseis ma'etý re opena Jerusalém py.

⁹ Ha'e rire Jotão ndoikovevi'i ma guamoõ kueryague rami. Ha'e ramo onhono porã tetã Davi rekoague py. Ha'e ramo ta'y Acaz ju oï nguu rekovia.

28

2 Reis 16.1-4

¹ Acaz oï ypy'i jave ma vinte ma'etý ramo'i oguerekó. Ha'e gui dezesseis ma'etý re opena Jerusalém py. Ha'e ma ha'eve'ya ramigua ojapo oikovy SENHOR nguuete renonde rupi, guamoõ Davi rami e'ŷ.

² Israel pygua huvixa kuery reko rami oiko, ha'e Baal kuery ra'angaarã ojapo mba'emo ryku gui.

³ Yvyugua Hinom ra'y rekoague py oapy avi heakuã porã va'e, gua'y kuery ae'i guive oapy, amboae regua kuery Israel kuery renonde gui SENHOR oipe'apa va'ekue opa marã rei ikuaiague rami ae.

⁴ Ombojeroviaaty yvy'ã rupi ikuai va'e py voi mba'emo ome'ẽ oikovy, heakuã porã va'e oapy avi yvy'ã rupi, yvyra rogue ana ikuai va'e guýry rupi guive.

⁵ Ha'e nunga rupi SENHOR tuuete omboaxa Síria pygua huvixa po py. Ha'e va'e kuery ma hexe ipo'aka vy ixupeguia kuery reve ogueraa Damasco tetã katy escravo-rã. Omboaxa avi Israel kuery ruvixa po py. Ha'e va'e ju ipo'aka vy omoingo axy raxa.

⁶ Ha'e rami vy peteñ ára pyve Remalias ra'y Peca ojuka cento e vinte mil avakue Judá regua imbaraetekueve, SENHOR guamoõ kuery ruete gui hexarai rire.

⁷ Ha'e gui ma peteñ ava Efraim regua ipy'a guaxuve va'e Zicri hery va'e ojuka huvixa ra'y Maaséias. Ojuka avi huvixa ro re opena va'ety yvateve va'e Azricão, huvixa irû Elcana guive.

⁸ Ha'e gui Israel ramymino kuery ju Judá gui ogueraa duzentos mil kunhague, ipi'a ha'e imemby kuery, ha'e kuery reve joegua ikuai va'eri. Ha'e rami vy imba'e rei-rei va'ekue oipe'a reta vy Samaria py ogueraapa.

⁹ Ha'e rami teñ ha'e py oï peteñ profeta SENHOR pegua, Odede hery va'e. Ha'e va'e ma oë ový xondaro kuery Samaria katy ojevy jogueruvy va'e ovaexí aguã. Ha'e vy aipoe'i ha'e kuery pe:

— Ne'ixa, SENHOR peneramoõ kuery ruete Judá pygua kuery pe ipoxy vy omboaxapa pendepo py meme. Ha'e ramo peñ kuery pendepoxy reve pejukapa yva peve oendua aguã rami.

¹⁰ Ha'e rami vy aÿ escravo-rã Peru ta Judá ha'e Jerusalém pygua avakue ha'e kunhague. Ha'e nunga py peñ voi e'ŷ teve SENHOR Penderuete rovai pendepo ky'a?

¹¹ Ha'e gui aÿ ma pendu ke xeayvua. Pembojevypa ju penderegua kuery escravo-rã Peru va'ekue, mba'eta SENHOR guigua poxya hendy ma pende'áry — he'i.

¹² Ha'e ramo amongue avakue Efraim regua opu'ã okuapy nhombovake aguã joe opu'âague gui ojevy va'e kuery reve. Ha'e va'e kuery ma Joanã ra'y Azarias, Mesilemote ra'y Berequias, Salum ra'y Jeizquias ha'e Hadlai ra'y Amasa.

¹³ Ha'e vy aipoe'i okuapy ha'e kuery pe:

— Peroike eme apy escravo-rã Peru va'ekue, mba'eta pemboetave 'rã SENHOR renonde py jajejavya ha'e nhandepo ky'aa. Nhandepo ky'aa tuvixa ma ramo nhande'áry hendy ma SENHOR guigua poxya — he'i okuapy.

¹⁴ Ha'e ramo yvatekueve ha'e heta va'e kuery ha'e javi oexaa py xondaro kuery oejapa ojokua reve ogueru va'ekue, imba'e rei-rei va'ekue voi.

¹⁵ Ha'e rami vy hery rupi oiporavo okuapy escravo-rã ogueru pyre re opena va'erã. Ha'e ramo ha'e kuery opu'ã vy omonhemondepa ju ipire rei va'ekue-'ekue mba'emo ogueru pyre py ae. Omonhemonde, ipy ryrurã ome'ẽ, omongarupa, omboy'u ha'e oipoano porãmba. Ha'e rã kangy gui ndoguatavei va'e ma mburika'i áry omoi vy ogueraa Jericó "Pindoty tetã" 'ea va'e py, hexegua kuery ikuia py. Ha'e gui ma ojevypa ju Samaria katy.

Assíria pygua kuery pe Acaz oipytyvõ aguã re ojerureague

¹⁶ Ha'e va'e jave py ma huvixa Acaz ojerure uka Assíria pygua huvixa kuery oipytyvõ aguã re.

¹⁷ Mba'eta Edom pygua kuery teigue ju ou vy Judá kuery re ipo'aka ramo, escravo-rã ogueraa guive.

¹⁸ Filisteu kuery voi ou vy opu'ã okuapy tetã yvy'ãmbe reia rupi, Judá regua kuaray pukua katy ikuai va'e re guive. Ha'e rami vy ipo'aka Bete-Semes tetã re, Ajalom, Gederote, Socó, Timna ha'e Ginzo ha'e ijyvýry rupi tekao ikuai va'e re. Ha'e rire ha'e kuery ju hekoia ha'e py.

¹⁹ Israel pygua huvixa Acaz káuxa ae SENHOR omo'yvy'i Judá kuery, huvixa opa marã ikuai aguã rami ojapoague re. Ha'e va'e eteve voi ndojejokoi SENHOR rovai heko vai aguã gui.

²⁰ Ha'e ramo oña py ou Assíria pygua huvixa Tiglate-Pileser tei oipytyvõ 'rãgue py omoi vaive.

²¹ Ha'e ramo Acaz ma mba'emo porã SENHOR pegua oo gui oguenoã vy omboaxapa Assíria pygua huvixa po py, ngoo gui ae, ha'e yvatekueve ikuai va'e ro gui guive. Ha'e rami tei ae ma mba'eve py noipytyvõi.

Nhanderuete ramigua rive pe huvixa Acaz oikoague

²² Huvixa Acaz ojexavai jave pyve heko vai raxave SENHOR rovai.

²³ Ha'e rami vy mba'emo mymba ome'ẽ tema Damasco pygua kuery ruete ramigua ikuai va'e pe, hexe ha'e kuery ipo'aka rire. Mba'eta aipoe'i:

— Síria pygua huvixa kuery ruete ramigua ma ha'e kuery oipytyvõ rire xee voi ha'e kuery pe ame'ẽ ta mba'emo anhepytyvõ uka vy — he'i. Ha'e rami tei ha'e rami oiko vy ojapo ha'e ae okanhy aguã rami, Israel kuery ha'e javi reve.

²⁴ Ha'e rami vy Acaz oipe'apa mba'emo ryru Nhanderuete pegua opy ikuai va'ekue. Omboa'ypa ma vy ombotypa ju SENHOR pegua okẽ ikuai va'e. Ha'e rami vy ojeupe guarã ojapo altar Jerusalém ha'e javi rupi.

²⁵ Judá regua tetã ha'e javi katy'i yvy'ã ikuai va'e rupi omopu'ã tuuete ra'angaa pe heakuã porã va'e oapy atyrã. Ha'e rami py ombopoxy SENHOR guamoñ kuery ruete.*

2 Reis 16,19,20

²⁶ Ha'e gui oïve rei tema Acaz rekoke regua. Ha'e rami avi ha'e oikoa jypy guive opaa peve ipara oiny kuaxia Judá ha'e Israel pygua huvixa kuery rekoke oña re.

²⁷ Ha'e gui Acaz ndoikovevei'i ma guamoñ kueryague rami. Ha'e ramo onhono porãa Jerusalém tetã py, tei Israel pygua huvixa kuery rupa yvýry e'ý guive. Ha'e gui ma ta'y Ezequias ju oñ nguú rekovia.

Ezequias templo oipe'a uka juague

¹ Ezequias ma vinte e cinco ma'etý oguerek huvixa oñ ypy'i jave py. Ha'e vy vinte e nove ma'etý re opena Jerusalém py. Ixy ma Zacarias rajy Abia.

² Ha'e ma ha'eve rami oiko SENHOR renonde rupi, guamoñ Davi ojapoague ha'e javi rami.

³ Ha'e gui jypyguia ma'etýa ha'e jypyguia jaxya pyve oipe'apa ju SENHOR pegua oo rokẽ ikuai va'e, omoatyrõmba guive.

* 28:25 2 Reis 16.10-16

⁴ Ha'e rami vy sacerdote ha'e levita kuery oguerupa vy omboatypa kuaray puku-a katy oka oĩ va'e py.

⁵ Ha'e vy aipoe'i ha'e kuery pe:

— Pendu ke xeavvua, levita kuery. Pejeky'a'o ukapa ke aŷ'i ma voi, ha'e gui peiky'a'opa avi SENHOR peneramoĩ kuery ruete pegua oo. Henda iky'a e'ŷ va'e gui peipe'apa ke mba'emo ky'akue oĩ va'e.

⁶ Mba'eta nhaneramoĩ kuery ma anhetẽ rupi e'ŷ ikuai vy SENHOR Nhanderuete renonde py ha'eve'ŷa ramigua ojapo. Oejapa okuapy vy SENHOR pegua oo oĩa katy gui ngova oguerova vy okupe rive oguerova okuapy.

⁷ Oka rokẽ ombotypa, tataendy ikuai va'e omboguepa, ixupe ndoapyvei guive heakuã porã va'e, neĩ mymba ma voi nome'êvei okuapy Israel kuery ruete pegua henda iky'a e'ŷ va'e rupi.

⁸ Ha'e nunga rupi Judá ha'e Jerusalém pygua kuery áry ou SENHOR poxya. Ha'e vy omboaxapa imongygearã, imondiyarã ha'e ijojai reiarã pe, peẽ kuery penderexa py ae pexaa rami.

⁹ Ha'e ramo nhaneramoĩ kuery kyxe py ojukapaa, ha'e gui nhandera'y kuery, nhanderajy kuery ha'e nhandera'yxy kuery ju escravo-rã ogueraa ague py ikuai.

¹⁰ Ha'e nunga rupi aŷ ma xejee amoĩ SENHOR Israel kuery ruete reve ajapo aguã peteĩ rami ju nhandekuai aguã, nhandegui oipe'a nho aguã opoxya tata rami nhanembojexavai va'e.

¹¹ Xera'y kuery, penderexarai eme pejapo 'rã va'e gui, mba'eta SENHOR ae pendoporavo henonde rupi pendekuai aguã, ixupe pemba'epo ha'e heakuã porã va'e peapy aguã — he'i.

Levita kuery templo oiky'a'opa jevyague

¹² Ha'e ramo levita kuery opu'ãmba okuapy. Coate ramymino kuery va'e regua ikuai Amasai ra'y Maate ha'e Azarias ra'y Joel. Merari ramymino regua ma Abdi ra'y Quis ha'e Jealelel ra'y Azarias. Ha'e gui Gérsom ramymino regua ma Zima ra'y Joá ha'e Joá ra'y Éden.

¹³ Elisafã ramymino regua ma Sinri ha'e Jeuel. Asafe ramymino regua ma Zacarias ha'e Matanias.

¹⁴ Hemã ramymino regua ma Jeuel ha'e Simei. Jedutum ramymino regua ma Semaías ha'e Uziel.

¹⁵ Ha'e kuery ma guyvy kuery omboaty ukapa vy ha'e kuery ae ranhe ojeky'a'o ukapa. Ha'e rire mae ma ou SENHOR pegua oo py ju huvixa aipoe'i ukaague rami vy oiky'a'opa aguã, SENHOR ijayvuague rupi guive.

¹⁶ Ha'e rami vy sacerdote kuery ma SENHOR pegua opy rupi oike jogueravy oiky'a'o aguã. Ha'e rami vy oka py, SENHOR pegua oka oĩ va'e py oguenoêmبا iky'akue templo ropy rupi ikuai va'ekue. Ha'e nunga levita kuery oipe'apa vy mombyrya py ogueraa, Cedrom yakã peve.

¹⁷ Jypyguia jaxy ha'e ára ypy'i py ma omboypy okuapy oiky'a'o aguã. Ha'e gui ma oito araa py oiky'a'o ma SENHOR pegua oo oikeaty peve. Ha'e gui oito araa jevy py oiky'a'opa SENHOR pegua opy rupi. Jypyguia jaxy ha'e dezesseis araa py ma oiky'a'opa ma okuapy.

¹⁸ Ha'e gui mae ma oje'oipa huvixa Ezequias ngoo py oĩa py. Ha'e vy aipoe'i okuapy:

— Roiky'a'opa ma SENHOR pegua oo, altar mymba rapyaty, tembiporu ikuai va'e, ha'e mesa SENHOR renonde mbojape omoñaty va'e, hexegua tembiporu ikuai va'e ha'e javi reve.

¹⁹ Ha'e gui mba'emo huvixa Acaz oĩ jave heko vai reia rupi oka katy rive omombo va'ekue ma romoatyrõmba ju, romboaxapa ma guive SENHOR peguarã. Ha'e nunga ha'e javi ma SENHOR pegua altar renonde py ju ikuai — he'i okuapy.

Nhanderuete ombojeroviaa aguã Ezequias omboypy jevyague

²⁰ Ha'e ramo huvixa Ezequias ma ko'ẽ rai'i teri reve ovy vy omboatypa yvatekueve tetã rupi ikuai va'e. Ha'e vy ogueraapa SENHOR pegua oo py.

²¹ Ogueru ruka avi sete vaka ra'y, sete vexa'i, sete vexa'i ra'y ha'e sete kavara, jejavya regua ome'ẽ aguã huvixa openaa rupi ikuai va'e re vy, henda iky'a e'ŷ va'e ha'e Judá kuery re guive. Ha'e va'e ma Arão ramymimo kuery sacerdote ikuai va'e pe ome'ẽ ukapa SENHOR pegua altar áry.

²² Vaka ra'y ma sacerdote kuery ojukapa ma vy huguykue oupi vy omboayvipa altar áry rupi. Ha'e gui vexa'i ha'e vexa'i ra'y ikuai va'e ju ojukapa ma vy huguykue omboayvipa avi altar áry rupi.

²³ Ha'e gui jejavya regua ome'ẽ va'erã kavara kuery ju ogueru huvixa renonde heta va'e kuery oexaa py. Ha'e va'e kuery áry ma omoõ okuapy opo.

²⁴ Ha'e rami vy sacerdote kuery ojukapa ma vy huguykue ma jejavya reguarã ome'ẽ altar yvy'iry rupi onhoẽ vy, Israel kuery ha'e javi ojejavyague ojao'i uka aguã, mba'eta huvixa ijayvu rire Israel kuery ojejavyague re oapy reve ome'ẽ aguã re.

²⁵ Omoõ avi levita kuery SENHOR pegua opy rupi hy'a pu, mbaraka ha'e ixã reta va'e reve ikuai aguã, Davi ojapo ukaague rami vy, huvixa pegua profeta kuery Gade ha'e Natã ijayvuague rami guive. Ha'e rami aguã ma SENHOR ae ojapo uka profeta kuery pe ijayvu vy.

²⁶ Ha'e gui ma levita kuery hi'aí okuapy mba'epu Davi oeja va'ekue reve, ha'e rã sacerdote kuery ma mimby guaxu reve ikuai.

²⁷ Ha'e gui mae ma Ezequias ijayvu altar áry mymba oapya aguã re. Ha'e ramo mymba oapya aguã omboypy ramove omboypy avi SENHOR pe oporaei okuapy aguã mimby guaxu omonhe'ẽ reve, mba'epu Israel pygua huvixa Davi oeja va'ekue reve guive.

²⁸ Ha'e ramo oporaei okuapy, ha'e mimby guaxu omonhe'ẽ atã ramove ijaty va'e kuery ha'e javi ikuai guenapy'ã re. Ha'e rami ae tema ikuai mymba oapypa e'ŷa ja.

²⁹ Ha'e gui mymba ome'ẽmba ma ramo huvixa Ezequias ha'e hexeve ikuai va'e ha'e javi voi guenapy'ã re ikuai avi omboetea py.

³⁰ Ha'e ramo huvixa ha'e hexeveguia kuery yvatekueve ijayvu levita kuery SENHOR pe oporaei okuapy aguã re, Davi ha'e profeta Asafe ijayvuague rupi. Ha'e ramo ha'e kuery ov'y a reve oporai, ha'e ojero'a reve avi omboete okuapy.

³¹ Ha'e gui Ezequias aipoe'ive ju:

— Aŷ SENHOR peguarã pejeky'a'o ukapa ma. Penhemboja ke ha'vy, ha'e Peru mymba peme'ẽ va'erã, perovy'a reve Peru SENHOR pegua oo oĩa katy — he'i.

Ha'e ramo ijaty va'e kuery ogueru okuapy mymba ome'ẽ va'erã, SENHOR oguerovy'aa rupi. Opy'a re ome'ẽxea omoõ va'ekue reve ogueru okuapy mymba oapya aguã py.

³² Ijaty va'e kuery mymba ogueru va'e oipapaa rã setenta vaka ikuai, cem vexa'i ava ha'e gui duzentos vexa'i ra'y. Ha'e nunga ha'e javi SENHOR pe oapy okuapy.

³³ Ixupe ome'ẽ avi seiscentos vaka ra'y ha'e três mil vexa'i.

³⁴ Ha'e rã sacerdote kuery ma mbovy'i ete vy ndoipiropa reguai. Ha'e ramo hexegua levita kuery oipytyvõ okuapy oipiropa, ha'e sacerdote kuery mboae ojeky'a'o ukapa peve. Mba'eta sacerdote kuery gui levita kuery opy'a py heko porâve va'e ikuai ojeky'a'o ukaa py.

³⁵ Ha'e gui mymba oapya va'erã heta raxa ogueru va'ekue áryve oĩ avi mymba peteĩ rami ikuai aguã regua ome'ẽ va'ekue kyrakue, ha'e uva rykue mymba oapya reve ome'ẽ va'e. Ha'e rami py omboypy ju SENHOR pe omba'eapo aguã.

³⁶ Heta va'e kuery ha'e javi reve Ezequias oguerovy'a ete Nhanderuete oipytyvõague, mba'eta ojapopa pojava okuapy vy.

Páscoa regua ngaru ojapo okuapyague

¹ Ha'e va'e rire Ezequias omondouka ayvu reraarã Israel ha'e Judá ha'e javi rupi. Efraim ha'e Manassés kuery pe voi ombopara kuaxia Jerusalém py oupa avi aguã, SENHOR pegua oo py Páscoa ára py okaru okuapy aguã SENHOR Israel kuery ruete pe.

² Mba'eta huvixa ma guembiguai yvatekueve ha'e Jerusalém pygua kuery ha'e javi pe onhemongeta uka ma mokoī jaxyia py Páscoa regua ngaru ojapo aguā re.

³ Mba'eta oa'angaague ára py porā nda'evei ngaru ojapo aguā, ha'e va'e ára peve sacerdote kuery mbovy'i ete ojeky'a'o uka ramo, ha'e pavē e'ŷ teri ono'õ Jerusalém py.

⁴ Ha'e nunga rupi heta va'e kuery reve huvixa oikuaa ha'e rami.

⁵ Ha'e rami vy onhembopy'a Israel kuery ikuiaia ha'e javi rupi omombe'u uka aguā, Berseba guive Dā peve, Jerusalém py oupa aguā Páscoa regua ngaru SENHOR Israel kuery ruete peguarā. Ha'e va'e ngaru py ha'e javi ete e'ŷ teri ikuai raka'e, ipara oĩa rami e'ŷ tei.

⁶ Ha'e gui huvixa ha'e yvatekueve kuaxia ombopara va'ekue reraa kuery oje'oipa Israel ha'e Judá jave rupi. Huvixa ijayvuague rami vy aipoe'i oje'oivy:

— Israel ramymino kuery, pejevy ju SENHOR Abraão, Isaque ha'e Israel ruetea katy. Ha'e ramo 'rāe ha'e ju ojevy Assíria pygua huvixa po'akaa gui peo jepe va'ekue repyarā. ⁷ Pendekuai eme penderu ha'e penderyke'y kuery ikuaiague rami. Ha'e kuery ma ojejavy va'ekue SENHOR guamoī kuery ruete rovai. Ha'e nunga rupi ae omboaxapa imombaarā pe, aŷ pexaa rami ae.

⁸ Aŷ gui ma peneakā ratāve eme penderu kuery ikuaiague rami e'ŷ. Pejerovia tema SENHOR re, ha'e peju ixupeguia henda iky'a'e'ŷ va'e raka'e rā peve guarā oiky'a'o va'ekue katy. SENHOR Penderuete pe anho pendekuai, ipoxy etea peē kuery áry ou va'ekue oaxa nho aguā.

⁹ Mba'eta xapy'a rei rā SENHOR peguarā ju pejeko rerova ramo omboaxy nho 'rā penderyvy ha'e pendera'y kuery escravo-rā ogueraapa pyre, kova'e yvy re ju ha'e kuery ojevypa aguā. Mba'eta SENHOR Nhanderuete nhomboaxy kuaa ha'e poroayvu va'e vy ngova nomo'ái 'rā peē kuerya gui, ixupe ete ri pejeko rerova ramo — he'i okuapy.

¹⁰ Ha'e gui ma ayvu reraa kuery ma tetā nhavō rupi oguata oje'oivy, Efraim ha'e Manassés yvy guive Zebulom peve. Ha'e rami tei ojojai rei, ojavyky rei okuapy.

¹¹ Ha'e rami tei ma Aser, Manassés ha'e Zebulom regua amongue onhemo'yvy'i reve oje'oi Jerusalém tetā katy.

¹² Judá regua kuery voi oendu opy'a py Nhanderuete opo omoī rā peteī rami huvixa ha'e yvatekueve ojapo uka va'ekue ojapo aguā, SENHOR ijayvuague rami vy.

¹³ Ha'e gui ma Jerusalém tetā py heta ono'õ okuapy ngaru mbojape imbovua reveguia e'ŷ ojapo aguā. Mokoī jaxyia py heta ete ou okuapy.

¹⁴ Ha'e rami vy ikyre'ŷa oendu reve oipe'apa heravy altar mboae Jerusalém py ikuai va'ekue, altar heakuā porā va'e rapyaty guive. Ha'e va'e ma Cedrom yvyugua py omombopa.

¹⁵ Ha'e ramo mae ma ojuka okuapy vexa'i Páscoa regua, mokoī jaxyia re ha'e catorze araa py. Sacerdote ha'e levita kuery ha'e nunga oexa vy oximbā vy ojeky'a'o ukapa okuapy. Ha'e rami vy ha'e kuery voi ogueru mymba SENHOR pegua oo py oapy reve ome'ẽ aguā py.*

¹⁶ Ha'e kuery ma ikuai aguā va'ekue py ae ju ikuai, Nhanderuete rembiguai Moisés lei omboparaague rami vy. Ha'e rami vy sacerdote kuery pe levita kuery mymba ruguykue ome'ẽ ramo omboayvi okuapy altar áry rupi.

¹⁷ Mba'eta heta teri ikuai onhemboaty va'e kuery regua ndojeky'a'o ukai teri va'ekue. Ha'e nunga rupi ha'eve'ŷ teri va'e kuery re vy vexa'i Páscoa reguarā ogueru va'ekue levita kuery ju ojuka, SENHOR peguarā oiky'a'opa aguā.

¹⁸ Mba'eta heta ete teri ikuai ndojeky'a'o ukai va'ekue: Efraim, Manassés, Issacar ha'e Zebulom kuery va'e regua. Ha'e kuery voi okuapy Páscoa regua re, ipara oĩa rami e'ŷ tei. Ha'e ramo Ezequias ojerure ha'e kuery re. Ha'e vy aipoe'i:

— SENHOR ha'evea rami orererekoo va'e, eperdoapa ke

¹⁹ opy'a py ndee SENHOR guamoī kuery ruete ndereka aguā omoī va'e ha'e javi, henda iky'a e'ŷ va'e regua lei rami ndojeky'a'o ukai teri va'e tei — he'i.

* ^{30:15} Sacerdote kuery oximbā mba'eta na'ikyre'ŷi va'ekue ngaru oiko rā guarā ojeky'a'o uka aguā (versículo 3 ha'e 29.34).

²⁰ Ha'e rami Ezequias ojerurea SENHOR oendu vy oiky'a'o heta va'e kuery py'a.

²¹ Ha'e rami py Jerusalém py Israel ramymino kuery ikuai va'e ojapo okuapy ngaru mbojape imbovua rewegua e'ŷ. Sete ára re ojapo ov'y'a ete reve. Ko'ẽ nhavõ levita ha'e sacerdote kuery oporaei okuapy SENHOR pe, mba'epu omonhendu atã guive SENHOR omboetea rupi.

²² Ha'e gui levita kuery SENHOR pe o'arandua rupi ombo'eapo va'e kuery pe ma Ezequias ijayvu porã'i ombopy'a guaxua rupi. Ha'e ramo sete ára re ha'e kuery okaru okuapy ngaru pygularã ome'ẽ mbyre re. Ome'ẽ avi peteĩ rami ikuai aguã regua, ha'e oporai okuapy SENHOR guamoĩ kuery ruete pe.

²³ Ha'e gui ijaty va'e kuery ojou porãmba okuapy sete ára re ju ngaru ojapove aguã. Ha'e rami vy ojapove ju oporaia rupi.

²⁴ Ijaty va'e kuery pe Judá pygua huvixa Ezequias ome'ẽ mil vaka ra'y ha'e sete mil vexa'i ojuka uka va'erã. Ha'e gui yvatekueve ju mil vaka ra'y ha'e dez mil vexa'i avi ome'ẽ ijaty va'e kuery pe. Ha'e gui sacerdote kuery regua heta ete ojeky'a'o uka.

²⁵ Ha'e rami vy Judá kuery ijaty va'e ha'e javi ov'y'a okuapy, sacerdote ha'e levita kuery, Israel gui ou va'ekue ha'e javi reve, amboae regua kuery Israel yvy güi ou va'ekue ha'e Judá pygua kuery ae guive.

²⁶ Jerusalém tetã py ov'y'a ete okuapy. Israel pygua huvixa Davi ra'y Salomão oña guive Jerusalém py ndoikoi teri va'ekue ha'e ramigua ngaru.

²⁷ Ha'e ramo sacerdote ha'e levita kuery opu'ã okuapy heta va'e kuery ogueroayvu porã aguã. Ha'e ramo ha'e kuery ijayvua ma Nhanderuete 'amba iky'a e'ŷa py onhendu, yvate etea peve.

31

¹ Ha'e nunga ha'e javi opa ma jave Israel kuery onhemboatypa va'ekue ma tetã Judá yvy re ikuai va'e rupi oje'oi vy omopẽmba ta'angaa ikuai va'e, oake'opa ta'angaarã yvyra omopu'ã mbyre, ha'e ombovaipa yvy'ã rupiombojerovia atyrã ojapo pyre, altar Judá rupi ikuai va'ekue, Benjamim, Efraim ha'e Manassés rupi guive, omomba ete peve. Ha'e rami vy mae ma Israel ramymino kuery peteĩ-teĩ ojeyvypa ju oyvy katy, e'ŷ vy guetã katy.

Sacerdote ha'e levita kuery peguarã huvixa Ezequias mba'emo ome'ẽ ukaague

² Ezequias omoĩ sacerdote ha'e levita kuery peteĩ-teĩ regua jorire-rire ombo'eapo aguã, ha'e kuery omoĩ ypyague rami ae. Ha'e ramo ha'e kuery ikuai mymba oapy reve ha'e peteĩ rami ikuai aguã regua ome'ẽ aguã rami, ha'e SENHOR pegua oo rokẽ py ombo'eapo ha'e oporaei okuapy aguã guive.

³ Huvixa ma guymba kuery ae ome'ẽ oapy reve ome'ẽa va'erã. Aje'ive ha'e ka'aru ju 'rã ome'ẽa oapy reve, sábado ára, jaxy pyau'i ha'e ngaru oiko nhavõ guive, SENHOR guigua lei re ipara oinya rami vy.

⁴ Ha'e rami vy heta va'e kuery Jerusalém py hekoa va'e pe ijayvu ha'evea rami ome'ẽ aguã re sacerdote ha'e levita kuery peguarã, ha'e va'e kuery SENHOR guigua lei oña rami anho ombo'eapo okuapy aguã.

⁵ Ha'e va'e ayvu omombe'ua ramove Israel ramymino kuery oata aguã rami e'ŷ ogueru mba'emo aju omono'õ ypy'i va'ekue iporãgueve, vinho, azeite, ei ha'e mba'ety rupi onhotõ va'ekue guigua ha'e javi. Opa mba'e oguerekva'e guiverokuapy dízimo oata aguã rami e'ŷ.

⁶ Ha'e gui Israel ha'e Judá regua Judá yvy re hekoa va'e ma dízimo-rã ogueru okuapy guymba vaka ha'e vexal'i, SENHOR nguuete peguarã omboaxa va'ekue guive. Ha'e nunga omboaty reta joapy e'ŷ-e'ŷ.

⁷ Mboapy jaxyva py ma omboypy okuapy omono'õ aguã. Ha'e gui sete jaxyva py mae ma omono'õmba okuapy.

⁸ Ha'e gui Ezequias ha'e yvatekueve ou vy ha'e nunga omboaty pyre oexa vy ogueroayvu porã SENHOR, ixupeguia Israel kuery guive.

⁹ Ha'e gui mba'emo omboaty pyre re Ezequias oporandu sacerdote ha'e levita kuery pe.

¹⁰ Ha'e ramo Zadoque ramymino sacerdote yvateve va'e Azarias ombovai:

— Ha'e nunga gui ma ore kuery rokaru porã rokuapy SENHOR pegua opy oguerua ypya ára guive aÿ peve, ororevyatãmba guive. Ha'e gui hembyre ju oata aguã rami e'ÿ, SENHOR ojeupegua kuery omoingo porã ramo. Guí rami ete tuvixa va'e ma hembyrekue itui — he'i.

¹¹ Ha'e ramo SENHOR pegua oo py Ezequias ojapo uka mba'emo omoõ porã atyrã.

¹² Ha'e nunga ojapopaa ma ramo ha'e py omoõ porã tema mba'emo ome'ë mbyre, dízimo ha'e mba'emo SENHOR pe omboaxa pyre. Ha'e nunga re openaa rupi oiko va'e ma levita Conanias. Ha'e rã ipytyvõarã ma tyvy Simei oï.

¹³ Ha'e gui Conanias ha'e tyvy Simei pytyvõarã ma omoõ avi Jeiel, Azarias, Naate, Asael, Jerimote, Jozabade, Eliel, Ismaquias, Maate ha'e Benaia. Ha'e va'e kuery ma huvixa Ezequias ha'e Nhanderuete pegua oo re opena va'ety Azarias ae omoõ.

¹⁴ Ha'e gui levita Imna ra'y Coré okẽ kuaray oua katy oï va'e rarõa ma omoõa avi Nhanderuete pe ome'ëxe'a'i py ome'ë mbyre re opena aguã. Ha'e nungakue ha'e javi omboja'o ju 'rã, SENHOR pe ome'ë mbyre, mba'emo iky'a e'ÿ ete va'e guive.

¹⁵ Ha'e va'e rembiguairã ikuai Éden, Miniamim, Jesua, Semaías, Amarias ha'e Secanias. Ha'e kuery ma sacerdote kuery tetã ikuai va'e rupi oje'oi 'rã ha'evea rami guyvy kuery pe omboja'o aguã peteñ-teñ regua ikuiaia rami, yvyigueve ha'e yvatekueve pe guive.

¹⁶ Ha'e rã avakue mboapy ma'etÿ guive va'e kuaxia re hery omboparaa va'ekue ma any guive, mba'eta ha'e kuery ma omoõague rami vy ko'ë nhavõ SENHOR pegua opy 'rã oike omba'eapo aguã.

¹⁷ Sacerdote kuery rery omboparaa peteñ-teñ ramoõ kuery ikuaiague rami, ha'e rã levita kuery vinte ma'etÿ guive va'e rery ma peteñ-teñ ombo'eapo aguã omoõague rami vy omboparaa.

¹⁸ Kuaxia re omboparaa avi ha'e kuery regua kyrigüe'i, kunhague, ta'y kuery ha'e tajy kuery rery ha'e javi. Heta ete ikuai, mba'eta ha'evea rami ombo'eapo okuapy mba'emo iky'a e'ÿ va'e ikuiaia rupi.

¹⁹ Ha'e gui Arão ramymino sacerdote kuery peteñ-teñ tetã yvýry rupi hekoia va'e regua omoõa hery rupi, sacerdote ha'e levita kuery mboae hery omboparaa va'ekue pe mba'emo omboja'o va'erã.

²⁰ Ha'e rami aguã huvixa Ezequias ojapo uka Judá yvy ha'e javi rupi. SENHOR nguuete renonde rupi iporã va'e, ha'evea ramigua ha'e anhetê va'e meme ojapo oikovy.

²¹ Opy'a ha'e javi py ojapo mba'emo Nhanderuete pegua opy, lei ha'e ojapo uka pyre rami vy. Nhanderuete oekaa rupi ojapo vy oiko porã.

32

2 Reis 18.13-18; Isaías 36.1-3

¹ Ha'e gui ha'e rami Ezequias anhetê rupi oiko rire teñ Síria pygua huvixa Senaqueribe kuery ou Judá yvy re. Ha'e kuery ovaëmba ma vy ojoko tetã ikorapa va'e ha'e javi, oipe'axe vy.

² Ha'e gui Senaqueribe kuery ou va'ekue Jerusalém tetã re opu'ã ta maa Ezequias oexa vy

³ onhemongeta uka guembiguai yvatekueve ha'e avakue ipy'a guaxukueve pe. Ha'e rami vy onhembopy'a yvu tetã rovai rupi ikuai va'e ojao'ipa aguã. Ha'e ramo ha'e kuery oipytyvõ okuapy.

⁴ Ha'e rami vy heta va'e kuery onhemboaty okuapy vy ojao'ipa yvu ikuai va'e ha'e javi, yvyugua rupi yy oxyry oiny va'e guive. Ha'e vy aipoe'i:

— Mba'e re tu jaeja rive Assíria pygua huvixa kuery ou vy yvu ikuai va'e ojoupa aguã?
— he'i okuapy.

⁵ Ha'e ramo huvixa ipy'a guaxu vy omoatyrõ ukapa ju tetã kora ivaipaague ha'e javi, ha'e hi'áry rupi ma ojapo torre. Ojapo avi kora hovai rupi oï va'erã, ha'e tetã Davi rekoague py ojapo Milo korarã. Ojapo avi tembiporu ha'e hu'y jokoarã oata aguã rami e'ÿ.

6 Heta va'e kuery rerekoarā omoī avi xondaro ruvixa. Ha'e rami vy tetā rokē rexei omboatypa vy ha'e kuery pe ijayvu ombopy'a guaxua rupi. Ha'e vy aipoe'i:

7 — Penembaraeke, pendepy'a guaxu guive. Pekyje eme, penhemondyi eme guive Assíria pygua huvixa gui, neī hupive ou va'e kuery gui heta teī. Mba'eta hexeve ikuai va'e gui ma nhande kuery reve peteī oiko pavē gui ipo'akave va'e.

8 Ha'e kuery reve ikuai va'e ma to'o guigua ijyva va'e. Ha'e rā nhanderevegu ma SENHOR Nhanderuete. Ha'e ma nhanepytyvō aguā rami oiko, nhandere opu'ā va'e kuery rovai opu'ā aguā — he'i. Ha'e rami Judá pygua huvixa Ezequias ijayvu ramo heta va'e kuery ipy'a guaxuve okuapy.

2 Reis 18.19-37; Isaías 36.4-22

9 Ha'e rire Assíria pygua huvixa Senaqueribe oxondaro kuery reve Laquis tetā ojoko okuapygui omondouka guembiguai kuery Jerusalém py Judá pygua huvixa Ezequias-a py. Ha'e vy aipoe'i uka:

10 — Po rami Assíria pygua huvixa Senaqueribe ijayvu: “Mba'e nunga re tu peē kuery pejerovia pekuapy? Mba'eta Jerusalém tetā pejoko ukapa ri.

11 Penhembotavy uka eme Ezequias pe, karuai ha'e yuvei gui rive pemanomba e'ŷ aguā. Mba'eta ha'e va'e aipoe'i: ‘Assíria pygua huvixa po gui ma SENHOR Nhanderuete nhandereraa jepe 'rā', he'i va'ekue teī.

12 Ha'e gui Ezequias ae e'ŷ teve Penderuete pegua pembojeroviaaty ha'e altar ikuai va'e mboipaare? Ha'e vy Judá ha'e Jerusalém pygua kuery pe ijayvu vy aipoe'i va'ekue: ‘Peteī i altar oī va'e py 'rā pejero'a. Ha'e va'e áry anho 'rā peapy heakuā porā va'e', he'i va'ekue.

13 Peē kuery ndapeikuai teve xee ha'e xeramoī kuery yvy regua kuery ha'e javi re rojapoague? Ha'e pygua kuery ruete ra'angaa ri ty'y ogueraa jepe raka'e xepo gui?

14 Mba'eta xeramoī kuery omomba va'ekue ruete ra'angaa kuery va'e regua mava'e tu ojeupeguai kuery ogueraa jepe raka'e xepo gui? Ha'e gui penderuete ju mba'exa tu xepo gui pendereraa jepe kuaa ta?

15 Ha'e nunga rupi aŷ gui ma penhembotavy ukave eme Ezequias pe. Ixupe pejererekouka eme, neī pejerovia eme hexe. Mba'eta peteīve yvy re ikuai va'e ruete, peteīve yvy regua ruete ta'angaa nda'ipoi xepo gui ojeupeguai kuery ogueraa jepe va'ekue, xeramoī kuery po gui e'ŷ guive. Ha'e gui penderuete katuve ma napendereraa jepei 'rā ri xepo gui", he'i uka teī.

16 Ha'e rami vy Senaqueribe rembiguai kuery ijayuve tema oje'oivy SENHOR Nhan-deruete ha'e hembiguai Ezequias rovai rupi.

17 Senaqueribe ombopara avi kuaxia SENHOR Israel kuery ruete ombojaru reia rupi. Hexe ijayvu vai vy aipoe'i: “Amboae yvy regua ruete ra'angaa xepo gui ojeupeguai kuery ndogueraa jepeiaque rami ae avi Ezequias ruete voi ojeupeguai kuery ndogueraa jepei avi 'rā xepo gui", he'i.

18 Hembiguai kuery voi judeu kuery ayvu py ojapukai atā okuapy Jerusalém pygua kuery tetā kora áry ikuai va'e rovai. Tetā re ipo'akaxe vy omondyi ha'e omongyea rupi ijayvu teī.

19 Jerusalém pygua kuery ruete re ijayvu yvy regua kuery ruete ra'angaa re rami rive, avakue opo py ojapo va'ekue meme teī.

20 Ha'e rami teī huvixa Ezequias ha'e Amoz ra'y profeta Isaías ojerure ha'e nunga re, Yva pygua pe ojapukai.

Assíria pygua xondaro kuery omombaague

21 Ha'e gui ma SENHOR omondouka peteī anjo Assíria pygua huvixa rembiguai kuery ikuaiap. Ha'e rami vy ojukapa avakue ipy'a guaxukueve, huvixa kuery ha'e yvatekueve ha'e javi. Ha'e ramo huvixa ma oximbaa ngova re oexa uka reve onha ju ovv oyvy katy. Ha'e rami vy nguete ra'angaa pegua opy oike ramo ta'y kuery ae ojuka kyxe py.

²² Ha'e rami py SENHOR ogueraa jepe Ezequias ha'e Jerusalém pygua kuery ha'e javi, Assíria pygua huvixa Senaqueribe ha'e hovaigua kuery ha'e javi po gui, ha'e kuery pe ome'ẽ guive ov'y'a aguã opa rupi.

²³ Ha'e ramo heta ete Jerusalém py ou vy ogueru okuapy SENHOR pe ome'ẽ va'erã, ha'e Judá pygua huvixa Ezequias pe voi ogueru mba'emo hepyve va'e. Ha'e rami rire yvy jave regua kuery omboete pave.*

2 Reis 20.1-11; Isaías 38.1-8

²⁴ Ha'e va'e jave py Ezequias imba'eaxy oupy vy omano aguã rami itui. Ha'e rami vy SENHOR pe ojerure ramo ombovai vy peteĩ mba'e oexa uka oikuaa aguã.

²⁵ Ha'e rami teĩ Ezequias ma Nhanderuete omoingo porãague rekovia mba'eve ndojapoi. Ha'e rami 'rãgue py opy'a py onhemboyvate rei. Ha'e nunga rupi hexe ou ipoxy etea, Judá ha'e Jerusalém pygua kuery re guive.

²⁶ Ha'e gui ma Ezequias opy'a py onhemo'yvy'i ju onhemboyvateague gui, Jerusalém pygua kuery reve. Ha'e nunga rupi huvixa Ezequias oĩ teria ja SENHOR poxya ndouwei ha'e kuery rovai.

²⁷ Ha'e gui Ezequias ma oguerekopa ogueroovy'aa anho oata rei aguã rami e'ŷ. Ojeupe guarã ojapo uka prata omoĩ porã atyrã, ouro, ita porãgueve, tembi'u irûrã, hu'y jokoa ha'e opa marãguia iporãve va'e oĩ aguã.

²⁸ Ojapo uka avi mba'emo ra'yigue omono'õ mbyre omoĩ porã atyrã, vinho ha'e azeite guive. Guymba kuery opa marãguia oguerekopva'e ikuai atyrã voi ojapo, vexa'i korarã guive.

²⁹ Ojapo uka avi tetã. Guymba kuery vexa'i ha'e vaka ra'y oguerekopva'e oata aguã rami e'ŷ, ixupe Nhanderuete heta raxa ome'ẽ ramo.

³⁰ Ha'e va'e Ezequias ae ojao'i yvy'ã Giom guive yvu gui oxyry va'e, ha'e vy ojapo tetã Davi rekoague regua kuaray oua katy rupi ju oxyry aguã rami. Mba'emo ojapoa ha'e javi py Ezequias oiko porã.

³¹ Ha'e rami teĩ ha'e oĩa py Babilônia pygua yvatekueve ayvu reraarã omondouka oikuaa pota aguã ijyvy re iporã va'e ikuai va'e re. Ha'e va'e jave py ma Nhanderuete noipytyvõi merami, anhetã pa ipy'a re oĩ va'e ha'e javi re oikuaa pota aguã.

2 Reis 20.20,21

³² Ha'e gui oĩve rei tema Ezequias rekukue regua. Ha'e rami avi mba'emo porayvua rupi ojapo va'ekue ha'e javi noĩ'rã teve kuaxia Amoz ra'y profeta Isaías mba'emo oexa va'ekue, ha'e Judá ha'e Israel pygua huvixa kuery rekukue oĩa re?

³³ Ha'e gui Ezequias ndoikovevei'i ma guamoĩ kueryague rami. Ha'e ramo onhono porãa yvy'ã re Davi ra'y kuery rupa ikuia py. Ha'e omano ramo Judá ha'e Jerusalém pygua kuery ha'e javi ima'endu'a porã okuapy. Ha'e gui ta'y Manassés ju oĩ nguu rekovia.

33

2 Reis 21.1-9

¹ Manassés ma doze ma'etã oguerekopva'e jave py oĩ huvixarã. Ha'e vy cinqüenta e cinco ma'etã re opena Jerusalém py.

² Ha'e va'e ma ha'eve'ŷ va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.

³ Ha'e rami vy omoatyrõmba ju ombojeroviaaty yvy'ã rupi ikuai va'e nguu Ezequias ombovaiipa va'ekue, ojapo avi altar Baal kuery peguarã. Omopu'ã avi imo'am yta'angaarã yvyra guigua. Ha'e vy guenapy'ã re oĩ yva re jaxy-tata ikuai katy omboetea rupi.

⁴ SENHOR pegua opy rupi eteve voi ojapo altar-rã, SENHOR aipoe'iague: "Jerusalém tetã py amoĩ'rã xerery raka'e rã peve guarã", he'iague py.

⁵ Ha'e vy SENHOR pegua oka mokoïve oĩ va'e rupi ojapo avi altar jaxy-tata yva re ikuai va'e ha'e javi peguarã.

⁶ Ha'e rami vy yvyugua Hinom ra'y rekoague py gua'y ae oapy reve ome'ẽ, ha'e arai rupi rive imba'ekuaa ha'e oexa'ã oikovy. Ha'e vy imba'evykyia rupi oiko, ha'e omanogue

* 32:23 2 Reis 19.35-36; Isaías 37.36-37

mboayvua ha'e imba'evyky va'e kuery pe rive oporandu oikovy. Ha'e rami vy SENHOR renonde rupi ojapo oikovy ha'eve'ŷ va'e meme, ombopoxy aguã rami rive.

⁷ Ha'e vy yvyra gui ta'angaarã ojapo uka va'ekue omoõ avi Nhanderuete pegua opy Davi ha'e ta'y Salomão pe aipoe'iague py: "Kova'e oo ha'e Jerusalém tetã aiporavo Israel regua ha'e javi gui, ha'e py xerery amoõ aguã raka'e rã peve guarã.

⁸ Mba'eta xee namoxêvei 'rã Israel kuery tuu kuery yvyrã ame'ẽ va'ekue gui, xapy'a rei xeguigua lei, anhombo'ea ha'e aipotaa xerembiguai Moisés pe ame'ẽ uka va'ekue rupi ha'e kuery ikuai ramo", he'iague py.

⁹ Ha'e rami py Manassés ojapo Judá ha'e Jerusalém pygua kuery ojejavvy aguã rami. Ha'e ramo amboae regua Israel kuery renonde gui SENHOR omomba va'ekue gui eteve voi heko vaive okuapy.

Manassés ombo'aa jave ojerureague

¹⁰ Manassés ha'e ixupeguia kuery pe SENHOR ijayvu teĩ noendu potai okuapy.

¹¹ Ha'e nunga rupi ha'e kuery re SENHOR ombou Assíria pygua huvixa rembiguai yvatekueve oxondaro kuery reve. Ha'e va'e kuery ou vy ojopy okuapy Manassés ty'aĩ py. Ha'e rami vy corrente py ju ojokua reve ogueraa Babilônia katy.

¹² Ha'e ramo ojexavaia oendu vy ojerure oiny SENHOR nguuete pe. Opa mba'e py onhemoyvy'i guamoõ kuery ruete renonde py.

¹³ Ha'e rami ojerure ramo Nhanderuete omboaxy. Ojerurea oendu vy ojapo Jerusalém tetã katy ju ojevy aguã rami, huvixa ju oĩ aguã. Ha'e ramo mae ma Manassés oikuua SENHOR ae Nhanderuete oikoa.

¹⁴ Ha'e va'e rire ma tetã Davi rekoague hovai katy rupi ojapo ikorarã, Giom regua kuaray oua katy, yvyugua rupi ha'e Okẽ Pira 'epy va'e rupi jaikea py. Ofel rupi ojapo ikora yvate ete va'erã. Ha'e gui Judá re tetã ikorapa va'e ha'e javi rupi omoõ harõarã kuery huvixa reve.

¹⁵ Ha'e rami vy SENHOR pegua opy gui oipe'apa tuuete ramigua, ta'angaa hi'aĩ va'ekue voi. Oipe'a avi altar SENHOR pegua yvyty áry ojapo pyre, Jerusalém tetã ha'e javi gui guive. Ha'e va'e ha'e javi omombo tetã gui mombyry'i.

¹⁶ Ha'e rã SENHOR pegua altar ma omoatyrõmba ju, ha'e hi'áry ome'ẽ hexeve peteĩ rami ju ikuia regua ha'e oguerovy'aa rupigua. Ha'e rami vy Judá kuery pe ijayvu SENHOR Israel kuery ruete pe anho ikuai aguã re.

¹⁷ Ha'e ramive ma yvy'ã ikuai va'e áry rupi teri heta va'e kuery mba'emo ome'ẽ okuapy, teĩ SENHOR Nhanderuete pe anho guive.

2 Reis 21.17,18

¹⁸ Ha'e gui oïve rei tema Manassés rekukue regua. Ha'e rami avi Nhanderuete pe ojerureague, ha'e ixupe SENHOR Israel kuery ruete rery rupi profeta kuery ijayvuague, ha'e gui mba'emo ojapo va'ekue ha'e javi oĩ 'rã kuaxia Israel pygua huvixa kuery rekukue oïa re.

¹⁹ Ha'e ojerureague, Nhanderuete omboaxyague, ha'e ojejavvyague ha'e javi, heko vai reiague, ha'e gui yvy'ã áry rupi ombojerovia atyrã ha'e yvyra gui ta'angaarã ojapoague, ha'e ta'angaa ita guigua voi onhemoyvy'i e'ŷ mbove omopu'ãmbaague, ha'e nunga ha'e javi ma oĩ profeta kuery rekukue ombopara pyre re.

²⁰ Ha'e gui Manassés ndoikovevei'i ma guamoõ kueryague rami. Ha'e ramo onhono porãa hekoague py ae. Ha'e gui ta'y Amom ju oĩ nguu rekovia.

2 Reis 21.19-26

²¹ Amom ma vinte e dois ma'etŷ oguereko huvixa oĩ ypy'i jave py. Ha'e gui mokoõ ma'etŷ re ete'i opena Jerusalém py.

²² Ha'e ma SENHOR renonde rupi ha'eve'ŷ va'e anho ojapo oikovy, nguu Manassés ojapoague rami. Mba'eta mba'emo ra'angaarã tuu Manassés ojapo va'ekue ha'e javi pe ta'y Amom ju ome'ẽ tema mymba, ha'e nunga pe rive oiko.

²³ Va'eri nguu Manassés oikoague rami e'ŷ Amom ma nonhemoyvy'i xeii SENHOR renonde py. Ha'e rami 'rãgue py ojejavvy tema ovy.

²⁴ Ha'e ramo hovai hembiguai kuery jogueroayvu vy hoo py ae ojuka okuapy.

²⁵ Ha'e rami teĩ ha'e va'e yvy pygua kuery ojukapa ju huvixa Amom jukaare kuery ha'e javi. Ha'e rami vy hekoria omoĩ ju ta'y Josias.

34

2 Reis 22.1,2

¹ Josias ma oito ma'etý oguereko huvixa oĩ ypy'i jave py. Ha'e vy trinta e um ma'etý re opena Jerusalém py.

² Ha'e va'e ma SENHOR renonde rupi ha'evea ramigua ojapo oikovy, guamoĩ Davi ojapoague ha'e javi rupi. Ha'e vy ndojep'e ai oiporu kuaa katy, neĩ oiporu kuaa e'ŷa katy ma voi.

2 Reis 23.4-20

³ Oito ma'etýa re ma huvixa Josias oĩ jave py kunumi'i teri reve omboypy guamoĩ Davi ruete oeka aguã. Ha'e gui doze ma'etýa py ma omboypy Judá ha'e Jerusalém oiky'a'o aguã yvy'ã áry rupi ombojerovia atyrã ojapo pyre gui, ta'angaa yvyra omopu'ã mbyre, ha'e gui ta'angaa ita ha'e mba'emo ryku gui ojapo pyre ha'e javi gui.

⁴ Ha'e ae oexaa py oity Baal kuery pegua altar ikuai va'ekue. Ha'e va'e áry rupi altar heakuã porã va'e rapyaty omoĩ mbyre ma ha'e ae ombovopa. Omopẽmba avi ta'angaa yvyra omopu'ã mbyre, ha'e mba'emo ra'angaa ita ha'e mba'emo ryku gui ojapo pyre ha'e javi. Ha'e nunga omongu'ipa ma vy iku'ikue omombopa ha'e nunga pe mba'emo ome'ẽ va'ekue rupa rupi rive.

⁵ Ha'e nunga pegua sacerdote ikuai va'ekue kãgue ma oapypa altar ha'e kuery ombojeroviaague áry ae. Ha'e rami py oiky'a'opa ju Judá ha'e Jerusalém ha'e javi rupi.

⁶ Ha'e rami ae avi ojapo Manassés, Efraim ha'e Simeão regua tetã ikuai va'e rupi, Naftali yvy ha'e javi rupi peve, tekoague ikuai va'e rupi guive.

⁷ Altar ha'e ta'angaa yvyra ha'e ita guigua oitypa ma vy omongu'ipa ju. Omboa'ypa avi altar heakuã porã va'e rapy atyrã Israel yvy jave rupi ojapo pyre. Ha'e gui ma ojevy ju Jerusalém katy.

2 Reis 22.3-7

⁸ Dezoito ma'etýa re ma huvixa Josias oĩ jave py ha'e va'e yvy ha'e Nhanderuete pegua oo oiky'a'o ukapa ma vy omboypy SENHOR nguuete pegua oo omoatyrõ uka aguã. Ha'e rami vy omondouka Azalias ra'y Safã, tetã re opena va'ety Maaséias, ha'e Joacaz ra'y kuaxia mboparaaty Joá.

⁹ Ha'e kuery ma sacerdote yvateve va'e Hilquias-a py oje'oi vy ixupe ome'ẽ peráta SENHOR pegua opy ogueru pyre levita regua okẽ rarõa kuery omoĩ porã va'ekue. Ha'e va'e peráta ma Manassés, Efraim ha'e Israel kuery ikuaria ha'e javi gui omono'õ mbyre, Judá ha'e Benjamim gui, Jerusalém tetã gui guive.

¹⁰ Ha'e va'e ma ha'e kuery ome'ẽ okuapy SENHOR pegua oo py omba'eapo va'e kuery re opena va'e pe, omba'eapoague repy ome'ẽ aguã, oo omoatyrõ vy ombopyaupa ju aguã.

¹¹ Oo apoa ha'e ita re omba'eapo va'e kuery pe ome'ẽ peráta ita omoatyrõ mbyre ojogua aguã, ha'e yvyra oo ytarã ha'e hi'áry ipyaxa va'erã, Judá pygua huvixa kuery ivaipa aguã rami rive oeja rire.

¹² Ha'e va'e avakue ma anhetẽ rupi meme ikuai omba'eapo py. Ha'e kuery re opena va'e ma levita regua Merari ramymino kuery Jaate ha'e Obadias, Coate ramymino kuery Zacarias ha'e Mesulão guive, omba'eapo va'e kuery re openaa rupi ikuai.

¹³ Ha'e gui levita kuery mba'epu ombopu kuaa va'e opena avi okuapy mba'emo reraa kuery re, mba'emo py omba'eapo va'e kuery ha'e javi re guive. Ha'e rã levita kuery mboae ma kuaxia re opena okuapy, ha'e'ŷ vy joe openaa ha'e okẽ rarõa rupi ikuai.

2 Reis 22.8-10

¹⁴ Ha'e gui peráta SENHOR pegua opy ogueru pyre oguenoẽa jave ma sacerdote Hilquias ojou kuaxia para SENHOR lei Moisés pe ome'ẽ uka va'ekue oĩa.

¹⁵ Ha'e rami vy Hilquias aipoe'i kuaxia re opena va'ety Safã pe:

— SENHOR pegua opy xee ajou kuaxia para lei oĩa — he'i.

¹⁶ Ha'e gui kuaxia ma Safã pe Hilquias ome'ẽ ramo ogueraa huvixa pe. Ha'e vy ixupe omombe'u vy aipoe'i:

— Nerembiguai kuery ojapopa ma rejapo uka va'ekue ha'e javi.

¹⁷ Ha'e rami vy peráta SENHOR pegua opy oĩ va'ekue ha'e kuery oipapa ma vy ome'ẽmba ombo'eapo va'e kuery re opena va'e po py, ha'e mba'emo apoa kuery pe — he'i.

¹⁸ Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ẽ kova'e kuaxia para — he'i. Ha'e rami vy huvixa renonde py Safã ogueroayvu.

2 Reis 22.11-20

¹⁹ Ha'e gui ma kuaxia para lei oĩ ogueroayvu rã huvixa oendu vy omondoropa oao.

²⁰ Ha'e rami vy huvixa ijayvu Hilquias pe, Safã ra'y Aicão, Mica ra'y Abdom, nhomongeta va'ety Safã ha'e guembiguai Asaías pe. Ha'e vy aipoe'i ha'e kuery pe:

²¹ — Tapeo ke, SENHOR pe peporandu uka xerekó re, ha'e Israel ha'e Judá pygua kuery ha'e javi re. Mba'eta nhande pavẽ áry SENHOR ombou opoxy etea, mba'eta kova'e kuaxia para re ayvu oĩ va'e rupi nhaneramoĩ kuery nda'ikuai raka'e, ipara oĩ va'e ha'e javi ndojapoi vy — he'i.

²² Ha'e ramo Hilquias ha'e huvixa omondouka va'ekue mboae reve oje'oi Jerusalém tetã yvy'ã guy katy profeta kunha Hulda oikoa py. Ha'e va'e ma Harás ra'y Tocate ra'y Salum sacerdote kuery ao re opena va'ety ra'xy. Ha'e gui kunha va'e pe ha'e kuery omombe'upa okuapy ha'e nunga.

²³ Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: Aipopeje ava xea py penembouare pe:

²⁴ Po rami SENHOR ijayvu: “Ma'ẽ, mba'emo vai ambou 'rã kova'e tekoá ha'e apy ikuai va'e áry, ayvu vai kuaxia para Judá pygua huvixa pe ogueroayvuague ha'e javi rami vy.

²⁵ Mba'eta ha'e kuery xerejapa vy amboae regua tuuete ramigua kuery pe rive oapy okuapy heakuã porã va'e, opo py mba'emo ojapo va'ekue py xembopoxy aguã rami. Ha'e nunga rupi xepoxya ou ta ma kova'e tekoá áry, ndoguei 'rã guive”, he'i.

²⁶ Ha'e gui pemombe'u 'rã Judá pygua huvixa SENHOR pe peporandu uka aguã penembouare pe: “Po rami SENHOR Israel kuery ruete ijayvu, ayvu rendu va'ekue omombe'u porãve vy:

²⁷ ‘Ndee ma kova'e tekoá ha'e apy hekoá va'e kuery rovai xeayvu rã rendu va'ekue, ha'e xee SENHOR renonde py renhemoyvy'i vy ndeao remondoro ha'e rejae'o va'ekue guive. Ha'e ramo xee aendu', he'i SENHOR.

²⁸ ‘Ha'e nunga rupi xee romombytu'u 'rã neramoĩ kueryague rami, ha'e rã nenhono porãa 'rã. Ha'e gui ndee ae nderexai 'rã mba'emo vai kova'e tekoá re ambou rã', he'i.”

Ha'e ramo kunha va'e ombovaiague ha'e kuery omombe'u okuapy huvixa pe.

2 Reis 23.1-3

²⁹ Ha'e rami rã huvixa ijayvu nhomongeta va'ety Judá re ha'e Jerusalém py ikuai va'e onhemboatypa okuapy aguã.

³⁰ Ha'e gui SENHOR pegua oo py huvixa oo Judá regua avakue, Jerusalém pygua, sacerdote, levita ha'e heta va'e kuery ha'e javi reve, yvyigüeve ha'e yvatekueve guive. Ha'e kuery ha'e javi oendua py ogueroayvu kuaxia para SENHOR pegua opy ojou pyre re guexeve guarã ojapo va'ekue regua ayvu oĩ va'e ha'e javi.

³¹ Huvixa hi'añaty py ae opu'ã ho'amy vy SENHOR renonde ojapo ixupe anho ha'e kuery ikuai aguã, ha'e vy opy'a ha'e onhe'ẽ ha'e javi py ojapopa okuapy aguã ha'e ojapo uka va'ekue, ijayvua ha'e oipotaa, ha'e rami vy ayvu kuaxia para re oĩ va'e rupi ikuai aguã, SENHOR guexeve guarã ojapo va'ekue rupi anho.

³² Ha'e ramo Jerusalém ha'e Benjamim py ikuai va'e ha'e javi onhemboayvu okuapy ha'e va'e ayvu rupi ikuai aguã re. Ha'e rami vy Jerusalém pygua kuery ha'e javi ikuai Nhanderuete guamoĩ kuery ruete va'e guexeve guarã ojapo va'ekue rupi.

³³ Ha'e gui Josias oipe'apa ojeguarupy Israel kuery oyvy re oguerekoo va'ekue ha'e javi. Ha'e rami vy ojapo Israel re hekoá va'e ha'e javi SENHOR nguuete pe anho ikuai aguã

rami. Ha'e rami rire ha'e oikovea ja ha'e kuery ndojepe'ai SENHOR guamoī kuery ruete pe ikuai gui.

35

2 Reis 23.21-23

¹ Ha'e gui huvixa Páscoa ára py Josias ojapo SENHOR pegua ngaru Jerusalém py. Ha'e ramo jypygua jaxy a catorze araa py ojuka okuapy Páscoa regua vexa'i.

² Ha'e omoī sacerdote kuery ombo'eapo aguā rami. Ha'e vy ombopy'a guaxuve SENHOR pegua opy rupi ombo'eapoa py.

³ Ijayvu avi levita kuery SENHOR peguarā ojeky'a'o uka va'ekue Israel kuery ha'e javi mbo'ea rupi ikuai va'e pe. Ha'e vy aipoe'i:

— Lei ryru iky'a e'ŷ va'e ma pemoī ju oo hendarā Davi ra'y Israel pygua huvixa Salomão ojapo va'ekue py. Ndapevoyivei ma 'rā pendeaxi'y áry. Pemba'eapo 'rā SENHOR Penderuete pe, ixupegua Israel kuery pe guive.

⁴ Peiko katu ke peteī-teī regua pendekuaia rami pemba'eapo aguā, penemoīague rami, pendevy Israel pygua huvixa Davi ha'e ta'y Salomão ijayvuague rami vy.

⁵ Pemba'eapo ke henda iky'a e'ŷ va'e py, heta va'e kuery penderyvy ikuai va'e peteī-teī regua rekoria penemoīague rami. Heta va'e kuery peteī-teī regua rekoria toī peteī levita kuery va'e regua.

⁶ Ha'e rami vy pejuka 'rā vexa'i Páscoa ára pyguarā. Pejeky'a'o uka reve perekō katu 'rā penderyvy kuery ho'u va'erā. Pejapopa tema SENHOR oayvu Moisés pe omombe'u uka va'ekue rami vy — he'i.

⁷ Ha'e gui ma heta va'e kuery ha'e javi pe Josias ome'ē vexa'i ha'e kavara. Guymba kuery regua ae ome'ē Páscoa ára py ojuka va'erā. Ha'e javi vy trinta mil mymba ome'ē ha'e py heta va'e kuery mbovy pa ikuai rami. Vaka ra'y ma três mil ju huvixa ome'ē, guymba kuery va'e regua meme.

⁸ Hembiguai yvatekueve voi ome'ēxe'a'i py avi ome'ē heta va'e kuery peguarā, sacerdote ha'e levita kuery pe guive. Nhanderuete pegua opy rupi openaa va'ety Hilquias, Zacarias ha'e Jeiel ma sacerdote kuery pe ome'ē dois mil e seiscentos vexa'i ha'e kavara, ha'e gui trezentos vaka ra'y Páscoa ára py oapy va'erā.

⁹ Ha'e gui tyvy kuery Conanias, Semaías ha'e Natanael, ha'e gui levita kuery ruvixa Hasabias, Jeiel ha'e Jozabade reve ma levita kuery mboae pe ome'ē cinco mil vexa'i ha'e kavara, ha'e gui quinhentos vaka ra'y Páscoa ára py ome'ē va'erā.

¹⁰ Ha'e rami py oguereko katupa ha'e kuery ojapo va'erā. Sacerdote kuery omoīa ikuai aguā va'ekue py, levita kuery voi omoīa avi peteī-teī regua ombo'eapo aguā rami, huvixa ojapo ukaague rami meme.

¹¹ Ha'e gui ma ojuka okuapy vexa'i Páscoa ára pyguarā ome'ē va'ekue. Huguykue ma levita kuery po gui sacerdote kuery ojopy vy omboayvi okuapy, oipiro avi ojuka va'ekue.

¹² Omboja'o okuapy heta va'e kuery oapy reve ome'ē va'erā, peteī-teī regua ikuai rami, heta va'e kuery ae SENHOR pe ome'ē aguā, Moisés kuaxia omboparaague rami vy. Ha'e rami ae avi ojapo vaka ikuai va'e re.

¹³ Tata py oexy okuapy vexa'i Páscoa ára pygua, hekorā oeja pyre rami vy. Oja py ombojy okuapy ome'ēmbi iky'a e'ŷ va'e, oja guaxu ha'e oja pe py guive. Ha'e gui levita kuery ju omboja'opa okuapy heta va'e kuery ha'e javi pe.

¹⁴ Ha'e va'e rire ma ojeupe guarā ju oexy okuapy, sacerdote kuery peguarā guive. Mba'eta sacerdote kuery Arão ramymino ikuai va'e ma pytū peve ombo'eapo mymba ojukaa ha'e ikyrakue rapya rupi. Ha'e nunga rupi levita kuery ojeupe guarā ae oexy, sacerdote kuery Arão ramymino ikuai va'e pe guive.

¹⁵ Ha'e gui Asafe ramymino kuery oporaei va'ety ikuai va'e ma ikuai aguā py meme ikuai, Davi ojapo ukaague rami vy, ha'e gui Asafe, Hemā ha'e huvixa pegua profeta Jedutum ojapo ukaague rami. Okē rarõa kuery voi okē nhavõ rupi ikuai. Neī peteīve ma voi ndojepe'ai okē oarõa gui, ha'e kuery peguarā tyke'y kuery levita regua oexy avi ramo.

¹⁶ Ha'e rami py ha'e va'e ára peteĩ-teĩ regua omoimbaa SENHOR pe omba'epo aguã py, Páscoa ára ngaru ojapo ha'e SENHOR pegua altar áry mymba ome'ẽ aguã, huvixa Josias ojapo ukaague rami vy.

¹⁷ Ha'e va'e jave py Israel kuery ha'e py ikuai va'e ojapo okuapy ngaru Páscoa ára py, ha'e gui ngaru mbojape imbovua revegua e'ŷ ju. Sete ára re ojapo okuapy.

¹⁸ Páscoa ára pygua ngaru ha'e ramigua Jerusalém py ndojapoai teri profeta Samuel oikoa ára guive. Mba'eta peteĩve huvixa Israel py Páscoa ára pygua ngaru ndojapoai va'ekue Josias ngaru ojapoague ramigua, sacerdote ha'e levita kuery reve, ha'e gui Judá ha'e Israel kuery ha'e py ikuai va'e ha'e Jerusalém pygua kuery ha'e javi reve.

¹⁹ Dezoito ma'etŷa re ma huvixa Josias oĩ jave py Páscoa ára pygua ngaru ojapo.

2 Reis 23.28-30

²⁰ Ha'e nunga oikopa rire Josias templo omoatyrõ ukapa ma ramo ou Egito pygua huvixa Neco, Carquemis tetã py joe opu'ã aguã Eufrates yakã yvýry. Ha'e ramo Josias voi oẽ ovvy ha'e kuery re opu'ã aguã.

²¹ Ha'e ramo Josias oĩ py Neco ombou ayvu reraarã kuery. Ha'e vy aipoe'i uka: "Judá pygua huvixa, mba'e tu areko ndereve? Xee ma aŷ nderovai guarã e'ŷ aju, xere opu'ã va'e kuery rovai anho. Ha'e gui Nhanderuete ijayvu xepojavave'i nho aguã re. Enheangu ke Nhanderuete re repu'ã e'ŷ aguã, ha'e ju nemomba e'ŷ aguã", he'i uka.

²² Ha'e rami teĩ huvixa Josias guakykue re ndojeysi. Ha'e rami 'râgue py amboae rami onhemonde ha'e kuery re opu'ã aguã. Noendu potai Nhanderuete ayvu rupi Neco ijayvuague re. Ha'e rami vy oo nho Megido yvyugua katy joe opu'ã aguã.

²³ Ha'e gui ma huvixa Josias-a katy guyrapa revegua kuery omombo okuapy. Ha'e ramo aipoe'i guembiguai kuery pe:

— Xepe'a ke apy gui, mba'eta xenhyvõa ete ra'e — he'i.

²⁴ Ha'e ramo hembiguai kuery ma ikaróxa gui ae oguenoẽ vy amboae karóxa oguerekva'e py oguerova vy ogueraa okuapy Jerusalém py. Ha'e py ma omano. Ha'e ramo onhono porãa guamoĩ kuery rupa yvýry. Huvixa Josias re Judá ha'e Jerusalém pygua kuery ha'e javi ojae'opa okuapy.

²⁵ Jeremias voi ombopara Josias re ipy'a vaia aguã regua. Ha'e gui aŷ peve guarã oporaei va'e kuery avakue ha'e kunhague ojae'o reve ima'endu'a 'rã Josias re. Ha'e rami aguã ojepokuaa okuapy Israel yvy re, kuaxia ipy'a vaia oĩa re ombopara guive imoiny.

²⁶ Ha'e gui oïve rei tema Josias rekukue regua. Ha'e rami avi SENHOR guigua lei ipara oinya rami vy mba'emo porã ojapoague,

²⁷ ha'e mba'emo ojapo va'ekue jypy guive opaa peve noĩ 'rã teve kuaxia Israel ha'e Judá pygua huvixa kuery rekukue oĩa re?

36

2 Reis 23.31-34

¹ Ha'e gui ma ha'e va'e yvy re hekoa va'e kuery Josias ra'y Jeoacaz ogueraa vy nguvixarã omoĩ okuapy tuu rekovia, Jerusalém tetã py ae.

² Jeoacaz oĩ ypy'i jave py ma vinte e três ma'etŷ oguerek, ha'e gui mboapy jaxy re ete'i opena Jerusalém py.

³ Mba'eta Egito pygua huvixa ma oipe'a Jeoacaz Jerusalém tetã py huvixa oĩa gui. Ha'e rami vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

⁴ Jeoacaz rekovia Egito pygua huvixa omoĩ tyvy Eliaquim Jerusalém ha'e Judá pygua kuery ruvixarã. Ha'e rami vy hery oguerova vy Jeaquim ju omboery. Ha'e rã tyke'y Jeaquim ma Egito yvy katy Neco ogueraa.

2 Reis 23.36-24.6

⁵ Jeaquim ma vinte e cinco ma'etŷ oguerek jave py huvixa oĩ ypy. Ha'e gui onze ma'etŷ re opena Jerusalém py. Ha'e va'e ma ha'eve'ŷ va'e anho ojapo oikovy SENHOR nguete renonde rupi.

6 Ha'e ramo hexe ou Babilônia pygua huvixa Nabucodonosor. Ha'e vy mokoï corrente overa va'e guigua py ojokua reve Babilônia katy ogueraa.

7 Babilônia katy Nabucodonosor ogueraa avi mba'emo ryru SENHOR pegua opy ikuai va'ekue. Ha'e py ma nguuete pegua templo py ju omoï.

8 Ha'e gui oïve rei tema Jeaquim rekukue regua. Ha'e rami avi ojeguarupy ojapoague, ha'e hexe oï va'ekue ha'e javi noï 'rā teve kuaxia Israel ha'e Judá pygua huvixa kuery rekukue oïa re? Ha'e gui ta'y Joaquim ju oï nguu rekovia.

2 Reis 24.8,9

9 Ha'e gui Joaquim ma dezoito ma'etÿ oguereko jave py huvixa oï ypy. Ha'e gui mboapy jaxy ha'e dez ára re ete'i opena Jerusalém py. Ha'e va'e ma ha'eve'ÿ va'e anho ojapo oikovy SENHOR renonde rupi.

2 Reis 24.18,19

10 Ha'e va'e ma'etÿ kuaray aku ypy'i jave py huvixa Nabucodonosor ogueraa uka Babilônia katy, mba'emo ryru iporâgueve SENHOR pegua opy ikuai va'ekue reve. Hekovia tyvy Zedequias ju omoï uka Judá ha'e Jerusalém pygua kuery ruvixará.

11 Zedequias ma vinte e um ma'etÿ oguereko jave py huvixa oï ypy. Ha'e gui onze ma'etÿ re opena Jerusalém py.

12 Ha'e ma ha'eve'ÿ va'e anho ojapo oikovy SENHOR nguuete renonde rupi. Ixupe profeta Jeremias SENHOR gui ijayvu tei nonhemo'yvyi'xei.

13 Nabucodonosor rovai opu'ã guive, Nhanderuete rery rupi oura aguã rami Nabucodonosor ojapo rire tei. Inhakã ratã vy opy'a py ndojeko rerovaxei tema SENHOR Israel kuery ruete pe ojevy e'ÿ aguã.

14 Ha'e gui sacerdote yvatekueve ha'e heta va'e kuery ha'e javi ojejavye tema oje'oivy, amboae regua kuery reko vaia rami rive. Ha'e rami vy omongy'apa okuapy oo SENHOR ojeupe guarâ Jerusalém py oiky'a'o va'ekue.

15 SENHOR tamoï kuery Ruete va'e ma yma guive tei ijayvu ha'e kuery pe, ayvu mombe'ua kuery pe oayvu omombe'u uka tema, ojeupeguia kuery omboaxy ha'e ojeupeguia oo re oma'ë vy.

16 Ha'e rami tei ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo SENHOR ojeupeguia kuery rovai opoxya ombou ramo ha'e kuery pe noïvei ma oo jepe aguã.

2 Reis 25.8-12; Jeremias 39.8-10; 52.12-16

17 Ha'e nunga rupi ae ha'e kuery rovai SENHOR ojapo caldeu kuery ruvixa opu'ã aguã rami.* Ha'e va'e huvixa ma kyxe py ojuka kunumigue regua, oo henda iky'a e'ÿ va'e oïa py eteve voi. Nomboaxyi kunumigue nei kunhataigüe, tujakue'i nei tujakueve'i ma voi, ipo py omboaxa pavê rire.

18 Babilônia katy ogueraapa avi mba'emo ryru Nhanderuete pegua opy ikuai va'ekue, tuvixakue ha'e kyrigue'i voi. Ha'e rami vy mba'emo porâ SENHOR pegua opy. ha'e huvixa ha'e yvatekueve ropy guive ikuai va'ekue ma Babilônia katy meme ogueraa.

19 Oapypa Nhanderuete pegua oo, oitypa guive Jerusalém kora. Huvixa ro ikuai va'ekue ha'e javi oapypa avi, ha'e py mba'emo porâ ikuai va'ekue omboavaipa.

20 Ha'e râ kyxe gui oo jepe va'ekue ma Babilônia katy ogueraa. Ha'e py ma hembiguai ikuai, ta'y kuery rembiguai guive, Pérsia pygua huvixa ipo'aka e'ÿa ja.

21 Ha'e nunga oiko SENHOR oayvu Jeremias pe omombe'u uka va'ekue ojeupity aguã, ha'e kuery yvy optya rive aguã sábado regua optyu'u aguã ma'etÿ ha'e javi ojeupitya e'ÿa ja.

* 36:17 Caldeu kuery ma Babilônia pygua kuery ae. Ha'e gui caldeu kuery ruvixa ma Nabucodonosor (versículo 6).

Yvy ivaipa reve opyta rive oiny ára nhavõ, setenta ma'etŷ oa'angaague ojeupitypa e'ŷa ja.[†]

Esdras 1.1-4

²² Ha'e gui peteĩ ma'etŷ re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue. Ha'e rami vy Ciro py'a re omoĩ openaa ha'e javi rupi pova'e ayvu omombe'u ukapa ha'e ombopara uka guive aguã. Ha'e vy aipoe'i uka:

²³ “Pérsia pygua huvixa Ciro po rami ijayvu: SENHOR Nhanderuete yvategua ma xevy omboaxapa yvy ha'e javi re apena aguã, xemoĩ guive peteĩ oo ixupe guarã ajapo uka aguã Judá re Jerusalém tetã py. Ha'e nunga rupi ixupagua pendekuai va'e ha'e javi tapeo. SENHOR Penderuete toiko peẽ kuery reve”, he'i uka.*

[†] 36:21 Nhanderuete lei oejaague rami vy ha'e kuery oyvy re nomba'eapoi 'rã tei sete ma'etŷa ojeupity nhavõ, ijyvy voi sábado regua ma'etŷ re oĩ rive aguã (Levítico 25.1-7). Ha'e rami tei ha'e kuery ma'etŷa nhavõ oyvy re omba'eapo tema ramo Nhanderuete oa'anga ju sábado regua ma'etŷ ijyvy noĩ riveiague rekovia, ha'e ramia peve yvy ivaipa reve opyta rive aguã (Levítico 26.40-45). Ha'e nunga rupi setenta ma'etŷ ijyvy noĩ riveiague rami avi setenta ma'etŷ re ju ivaipa reve opyta rive aguã rami ojapo, ha'e kuery Babilônia py escravo ikuai jave (Jeremias 25.1-14). Ha'e rami vy setenta ma'etŷ oaxapa rire ma ha'e kuery ojevy ju 'rã oyvy katy. * 36:23 Esdras 1.1-3

Esdras rekokue oĩ Esdras rekokue oĩ

Kova'e kuaxia re ma oĩ Israel kuery Babilônia py escravo-rã ogueraa pyre oyvy re ju ojevy va'ekue rekokue. Mba'eta huvixave Babilônia re opena va'e ae omondouka. Po rami ipara oiny: “Peteĩ ma'etý re ma Pérsia pygua huvixa Ciro oĩ jave py Senhor ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka: ‘Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py. Ha'e nunga rupi ixupeguia pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae', he'i” (1.1-3).

Ha'e gui ma omombe'u ha'e kuery oguataague, Jerusalém tetã py ovaẽague, templo omoatyrõ aguã omboypyague, hovaigua kuery omombytu'u ranheague, ojapopaague, ha'e gui oguerovy'aague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrõa rupi. Ijayvu avi heta va'e kuery gueko vaia gui ojepe'a aguã rami.

Huvixa Ciro oayvu omondoukaague

2 Crônicas 36.22,23

¹ Peteĩ ma'etý re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka:

² “Pérsia pygua huvixa Ciro po rami ijayvu: Xevy pe SENHOR Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py.

³ Ha'e nunga rupi ixupeguia pendekuai va'e ha'e javi reve Penderuete toiko, ha'e tapeo Judá regua Jerusalém py, SENHOR Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae.

⁴ Ha'e gui guekoa py ae avakue okuave va'e ha'e javi penepytyvõ 'rã prata ome'ẽ vy, ha'e gui ouro, ombo'e rei-rei ha'e mymba kuery oguereko va'e, Nhanderuete ro Jerusalém py oĩ va'e peguarã. Ha'e nunga ome'ẽ va'e áryve tome'ẽve ju ome'ẽxea'i rupi”, he'i uka.*

⁵ Ha'e ramo Judá ha'e Benjamim kuery akã ikuai va'e opu'ãmba jogueravy, sacerdote ha'e levita kuery guive, amboae kuery reve. Ha'e kuery ha'e javi py'a re Nhanderuete omoĩ Jerusalém py oje'oi vy oo SENHOR pegua oĩ va'ekue ojapo jevy aguã.

⁶ Ijyvýry rupi ikuai va'e voi oipytyvõ okuapy prata ome'ẽ vy, ha'e gui ouro, ombo'e rei-rei, mymba kuery oguereko va'e ha'e iporãgueve. Mba'emo ome'ẽ va'ekue áryve ome'ẽve ju ome'ẽxea'i rupi.

⁷ Huvixa Ciro voi oguenoẽ tembiporu SENHOR ropy ikuai va'ekue, Jerusalém gui Nabucodonosor ogueru vy nguete ra'angaa pegua ropy ju omoĩ va'ekue.

⁸ Ha'e va'e nunga ma Pérsia pygua huvixa Ciro ju oguenoẽ mba'emo re opena va'ety Mitredate oexaa py. Ha'e rã ha'e va'e oipapapa ma vy Judá regua yvateve va'e Sesbazar pe ju omboaxa.

⁹ Apy ma oĩ mbovy pa oĩa regua: trinta hy'a ouro guigua, mil hy'a prata guigua, vinte e nove kyxe,

¹⁰ trinta hy'a'i ouro guigua, quatrocentos e dez hy'a'i prata guigua amboae regua va'e, ha'e gui mil avi tembiporu mboae.

* 1:4 2 Crônicas 36.22-23

¹¹ Tembiporu ouro ha'e prata guigua ha'e javi vy ma cinco mil e quatrocentos. Ha'e javi ma Sesbazar ogueraapa Babilônia gui, ogueru pyre kuery Jerusalém katy ju ojevy jogueravy jave.

2

Babilônia gui ojevy va'ekue rery oĩa

¹ Pova'e ma ijyvy gui Babilônia pygua huvixa Nabucodonosor oyvy katy ogueraa va'ekue ramymino kuery. Ha'e va'e kuery ma escravo ikuaiague gui oẽ vy ojevy ju Jerusalém ha'e Judá katy, peteĩ-teĩ guekoa py ae.*

² Ha'e kuery ma oupa okuapy Zorobabel reve, Jesua, Neemias, Seraías, Reelaías, Mordecai, Bilsã, Mispar, Bigvai, Reum ha'e Baaná reve. Ha'e gui apy ma avakue Israel regua mbovy pa ikuaias:

³ Parós ramymino kuery ma dois mil cento e setenta e dois.

⁴ Sefatias ramymino kuery ma trezentos e setenta e dois.

⁵ Ara ramymino kuery ma setecentos e setenta e cinco.

⁶ Paate-Moabe ramymino kuery Jesua-Joabe ra'y kuery regua ma dois mil oitocentos e doze.

⁷ Elão ramymino kuery ma mil duzentos e cinqüenta e quatro.

⁸ Zatu ramymino kuery ma novecentos e quarenta e cinco.

⁹ Zacai ramymino kuery ma setecentos e sessenta.

¹⁰ Bani ramymino kuery ma seiscentos e quarenta e dois.

¹¹ Bebai ramymino kuery ma seiscentos e vinte e três.

¹² Azgade ramymino kuery ma mil duzentos e vinte e dois.

¹³ Adonicão ramymino kuery ma seiscentos e sessenta e seis.

¹⁴ Bigvai ramymino kuery ma dois mil e cinqüenta e seis.

¹⁵ Adim ramymino kuery ma quatrocentos e cinqüenta e quatro.

¹⁶ Ater ramymino kuery Ezequias ro pygua kuery regua ma noventa e oito.

¹⁷ Bezai ramymino kuery ma trezentos e vinte e três.

¹⁸ Jora ramymino kuery ma cento e doze.

¹⁹ Hasum ramymino kuery ma duzentos e vinte e três.

²⁰ Gibar ramymino kuery ma noventa e cinco.

²¹ Belém ramymino kuery ma cento e vinte e três.

²² Netofa guigua avakue ma cinqüenta e seis.

²³ Anatote guigua avakue ma cento e vinte e oito.

²⁴ Azmavete ramymino kuery ma quarenta e dois.

²⁵ Quiriate-Arim, Cefira ha'e Beerote ramymino kuery ma setecentos e quarenta e três.

²⁶ Ramá ha'e Geba ramymino kuery ma seiscentos e vinte e um.

²⁷ Micmás guigua avakue ma cento e vinte e dois.

²⁸ Betel ha'e Ai guigua avakue ma duzentos e vinte e três.

²⁹ Nebo ramymino kuery ma cinqüenta e dois.

³⁰ Magbis ramymino kuery ma cento e cinqüenta e seis.

³¹ Elão mboae guigua ramymino kuery ma mil duzentos e cinqüenta e quatro.

³² Harim guigua ramymino kuery ma trezentos e vinte.

³³ Lode, Hadide ha'e Ono guigua ramymino kuery ma setecentos e vinte e cinco.

³⁴ Jericó guigua ramymino kuery ma trezentos e quarenta e cinco.

³⁵ Senaá guigua ramymino kuery ma três mil seiscentos e trinta.

³⁶ Ha'e gui sacerdote kuery regua: Jedaías ramymino kuery Jesua ro pygua ikuai va'e regua ma novecentos e setenta e três.

³⁷ Imer ramymino kuery ma mil e cinqüenta e dois.

³⁸ Pasur ramymino kuery ma mil e duzentos e quarenta e sete.

³⁹ Harim ramymino kuery ma mil e dezessete.

* ^{2:1} Neemias 7.6-73

⁴⁰ Ha'e gui levita kuery ju: Jesua ha'e Cadmiel ramymino kuery Hodavias ra'y kuery regua ma setenta e quatro.
⁴¹ Oporaei va'e kuery Asafe ramymino kuery regua ma cento e vinte e oito.
⁴² Okẽ rarõa kuery ramymino kuery ju: Salum ramymino kuery, Ater, Talmom, Acube, Hatita ha'e Sobai ramymino kuery, ha'e va'e kuery ha'e javi vy ma cento e trinta e nove.
⁴³ Templo py nhopytyvõ va'ety kuery ju: Zia ramymino kuery, Hasufa, Tabaote,
⁴⁴ Queros, Sia, Padom,
⁴⁵ Lebana, Hagaba, Acube, Hagabe,
⁴⁶ Sanlai, Hanã,
⁴⁷ Gidel, Gaar, Reaías,
⁴⁸ Rezim, Necoda, Gazão,
⁴⁹ Uzá, Paseá, Besai,
⁵⁰ Asná, meunita ha'e nefuseu kuery ramymino kuery,
⁵¹ Baquebuque ramymino kuery, Hacufa, Harur,
⁵² Baslute, Meída, Harsa,
⁵³ Barcos, Sísera, Tama,
⁵⁴ Nesias ha'e Hatifa ramymino kuery.
⁵⁵ Ha'e gui Salomão rembiguai kuery ramymino kuery ju: Sotai ramymino kuery, Soferete, Peruda,
⁵⁶ Jaala, Darcom, Gidel,
⁵⁷ Sefatias, Hatil, Poquerete-Hazebaim ha'e Ami ramymino kuery.
⁵⁸ Templo py nhopytyvõ va'ety ha'e Salomão rembiguai kuery ramymino kuery ha'e javi vy ma trezentos e noventa e dois.
⁵⁹ Pova'e kuery ma Tel-Melá gui oje'oi va'ekue, Tel-Harsa, Querube, Adã ha'e Imer gui, teĩ ndoikuuai ae tema Israel regua ikuiaia:
⁶⁰ Delaías ramymino kuery, Tobias ha'e Necoda ramymino kuery ma seiscentos e cinqüenta e dois.
⁶¹ Ha'e gui sacerdote ramymino kuery voi: Habaías ramymino kuery, Coz ha'e Barzilai ramymino kuery. Ha'e va'e ma Barzilai Gileade pygua va'e rajy re omenda rire hery rupi ae oenoña.
⁶² Ha'e va'e kuery ma guery oeka okuapy kuaxia tery oĩa re teĩ ndojoui. Ha'e nunga rupi sacerdote ikuai aguã ha'eve'ŷ va'e.
⁶³ Ha'e ramo ha'e kuery pe huvixa aipoe'i:
 — Pe'u eme tembi'u iky'a e'ŷ va'e, Urim ha'e Tumim rupi sacerdote oikuua va'e oiko e'ŷa ja — he'i.
⁶⁴ Ha'e va'e kuery ha'e javi vy ma quarenta e dois mil trezentos e sessenta ikuai,
⁶⁵ hembiguai avakue ha'e kunhague sete mil trezentos e sete ikuai va'e reve'ŷ vy. Ha'e gui oporaei va'e avakue ha'e kunhague ma duzentos ju ikuai.
⁶⁶ Hymba kuery kavaju ma setecentos e trinta e seis. Ha'e gui mburika ma duzentos e quarenta e cinco ikuai.
⁶⁷ Mymba camelô ma quattrocentos e trinta e cinco ikuai. Mburiaka ra'y'i ma seis mil setecentos e vinte.
⁶⁸ Ha'e gui ovaẽ okuapy Jerusalém tetã py. SENHOR pegua oo oĩague py oo ramo hetarã kuery akã ikuai va'e regua ma mba'emo ome'ëxeia'i rupi ome'ë okuapy oo oĩague pyve ju ojapo jevy aguã.
⁶⁹ Ha'e kuery mba'emo ojoua rami vy ome'ë okuapy omba'eapo va'e kuery oiporu va'erã: sessenta e um mil hatã'i va'e ouro guigua, cinco mil prata guigua tuvixakueve va'e, ha'e gui cem ao sacerdote kuery pegua.
⁷⁰ Ha'e gui Israel kuery ha'e javi guetã rupi ae-ae ikuai: sacerdote kuery, levita ha'e heta va'e kuery regua, oporai va'e, okẽ rarõa, templo py nhopytyvõ va'ety kuery guive.

- ¹ Sete jaxy ovaẽ jave Israel ramymino kuery ikuipa ma guetã py ae-ae. Ha'e rami vy peteĩ'i rami onhemboatypa okuapy Jerusalém py.
- ² Ha'e ramo Jozadaque ra'y Jesua ha'e tyvy kuery sacerdote ikuai va'e, Sealtiel ra'y Zorobabel tyvy kuery reve onhemoi okuapy altar Israel kuery ruete peguarã ojapo ju aguã, ha'e va'e áry mymba kuery oapy reve ome'ẽ aguã Nhanderuete remimbo'e Moisés lei ombopara va'ekue oña rami vy.
- ³ Hendarã py ae ojapo okuapy altar. Hekoa yvýry ikuai va'e kuery gui okyje teri va'eri altar áry mymba kuery oapy reve ome'ẽ okuapy SENHOR pe, aje'ivekue, ka'arukue guive.
- ⁴ Ipara re oña rami vy ojapo avi okuapy ngaru oo'i regua. Ha'e rami vy ko'ẽ nhavõ mymba kuery oapy vy ome'ẽ okuapy, mbovy-mbovy 'rã pa peteĩ-tei ára py ome'ẽ ukaague rami vy.
- ⁵ Ha'e va'e rire mba'emo ome'ẽ jepi okuapy. Jaxy pyau nhavõ mba'emo ome'ẽ, ha'e gui ngaru SENHOR peguarã hi'ára py porã oiko aguã oa'angaague rami vy. Ikuai avi SENHOR pe mba'emo ome'ẽxeia'i py ogueru va'e.
- ⁶ Sete jaxy ijypy'i guive omboypy okuapy SENHOR pe mymba ome'ẽ aguã, ha'e jave py SENHOR pegua templo renderã nonhonombai teri tei.
- ⁷ Oo apoa ha'e ita re ombo'eapo va'e kuery pe ome'ẽ okuapy peráta. Sidom ha'e Tiro pygua kuery pe ome'ẽ avi tembi'u, oy'u va'erã ha'e azeite, Líbano gui yvyra yary haygue ha'e kuery ogueru aguã. Ye'ẽ áry rupi 'rã ogueru Jope tetã peve, Pérsia pygua huvixa Ciro va'e ojapo ukaague rami vy.

Templo renderã onhonombaa ague

- ⁸ Jerusalém tetã py Nhanderuete pegua oo py ovaẽ rire mokoĩ ma'etýa ha'e mokoĩ jaxy ma ojapo jave Sealtiel ra'y Zorobabel omboypy ojapo jevy aguã, Jozadaque ra'y Jesua reve, ha'e tyvy kuery sacerdote ha'e levita regua, ha'e gui escravo-rã ogueraa pyre kuery Jerusalém katy ojevy va'ekue ha'e javi reve. Ha'e va'e kuery omboypy okuapy SENHOR pegua oo re ombo'eapo aguã. Ha'e nunga re opena va'erã omoi okuapy levita kuery vinte ma'etý va'e guive tujakue peve.
- ⁹ Jesua gua'y ha'e guyvy kuery reve, Cadmiel gua'y kuery reve guive onhemoirũ okuapy Judá ramymino kuery, Nhanderuete pegua oo rupi ombo'eapo va'e kuery re opena aguã, Henadade ramymino kuery, ta'y ha'e tyvy kuery levita regua reve guive.
- ¹⁰ Ha'e gui oo apoa kuery templo SENHOR pegua renderã onhonomba ramo sacerdote kuery onhemondepa reve ikuai mimby guaxu reve. Levita kuery Asafe ramymino kuery regua avi ikuai hy'a pu reve SENHOR omboete aguã, Israel kuery ruvixa Davi ojapo ukaague rami vy.*
- ¹¹ Jorire-rire oporaei okuapy. SENHOR omboete ha'e oguerovy'a okuapy po rami: "Porayvu va'e vy oexa uka riae 'rã Israel kuery omboaxya", he'i okuapy. Ha'e gui ha'e kuery ha'e javive oguerovy'a vy onhendu atã reve oporaei okuapy SENHOR pe, oo renderã onhonomba ma rire.
- ¹² Heta avi ikuai sacerdote ha'e levita kuery jypy'igua oo oexa va'ekue, hetarã kuery akã tujakue'i guive. Ha'e rami vy ha'e kuery ma oo renderã onhonoa rã oexa vy ojae'o atã okuapy. Heta avi ikuai oguerovy'a rupi ojapukai va'e.
- ¹³ Ha'e rami vy mava'eve noendu kuaai ový'aa rupi ojapukai va'e, nei ojae'o va'e kuery onhendua. Mba'eta pavé onhendu atã reve ojapukai okuapy mombyry rupi ikuai va'e voi oendu aguã rami.

Templo ojapo okuapya gui hovaigua kuery omombytu'uague

- ¹ Judá ha'e Benjamim regua rovaigua kuery oendu avi okuapy ogueraapa pyre kuery ojevy ma vy SENHOR Israel kuery ruete pegua templo ojapo jevy okuapy.

* 3:10 Hy'a pu ma hy'a overa va'e gui ojapo pyre, ombotaa rã onhendu va'e.

² Ha'e rami vy ha'e kuery ovaẽmba okuapy Zorobabel ha'e hetarã kuery akã ikuaiia py. Ha'e vy aipoe'i okuapy:

— Ore voi toromba'epo peẽ kuery reve, mba'eta peẽ kuery rami ae ore kuery voi Penderuete pe 'rã orekuai. Ore voi ixupe mba'emo rome'ẽ ae ma, Assíria pygua huvixa Esar-Hadom apy oreru guive — he'i.*

³ Ha'e rami teĩ Zorobabel, Jesua ha'e hetarã kuery akã ikuai va'e ombovai:

— Peẽ kuery ma mba'eve ndaperekoi ore kuery reve Oreruete pegua oo rojapo jevya py. Ore kuery ae'i teĩ rojapopa 'rã SENHOR Israel kuery ruete va'e pe, Pérsia pygua huvixa Ciro ojapo ukaague rami vy — he'i.

⁴ Ha'e ramo ha'e va'e yvy regua kuery Judá kuery omba'epoa py omonogeta rei vy nomokyre'ývei.

⁵ Ha'e rami vy peráta re ogueru ha'eve'ýa rami omonogeta va'erã, Judá kuery ojapo 'rã va'ekue ndojapovei aguã. Pérsia pygua huvixa Ciro oĩa pukukue re ha'e rami ijayvu, huvixa Dario oĩa peve.

⁶ Ha'e gui Assuero huvixa oĩ ypy'i guive ma voi hovaigua kuery ombopara okuapy Judá ha'e Jerusalém pygua kuery rekokue ramigua rive.

⁷ Ha'e rami ae avi Pérsia pygua huvixa Artaxerxes oĩ jave Bislão, Mitredate ha'e Tabeel oirũ kuery reve ixupe ombopara okuapy peteĩ kuaxia aramaico ha'e Síria pygua kuery ayvu py.

⁸ Xondaro kuery ruvixa Reum ha'e kuaxia re opena va'ety Sinsai voi ombopara avi peteĩ kuaxia. Jerusalém pygua kuery rovai re ombopara huvixa Artaxerxes pe, po rami:

⁹ “Rombopara va'e ma xondaro kuery ruvixa Reum ha'e kuaxia re opena va'ety Sinsai oirũ kuery reve: dinaíta kuery, afarsaquita, tarpelita, afarsita, arquevita, Babilônia guigua kuery, Susã guigua, deavita kuery, Elão guigua kuery,

¹⁰ ha'e gui amboae kuery regua Samaria tetã py huvixa Osnapar ipo'akapa ha'e ima'endu'apy va'e orembou vy oremboekoa va'ekue, ha'e gui amboae kuery Eufrates yakã kyvõ rupi orerekaoa va'e.”

¹¹ Po rami ma kuaxia huvixa Artaxerxes pe ha'e kuery omboparaa ague:

¹² “Oreruvixa, ore nerembiuguai kuery Eufrates yakã kyvõ rupi orerekaoa va'e, kova'e ára rombopara rokuapy ndevy. Reikuua ae ma judeu kuery ndea gui oje'oiague Jerusalém tetã katy orerekaoa peve ete. Aý ha'e kuery ma ojapo ju okuapy ha'e va'e tetã ayvu vaipy joe opu'ãaty. Ikora voi omoatyrõ heravy, omoatyrõ avi 'rã ijytarã.

¹³ Oreruvixa, eikuua pota ke, mba'eta ha'e kuery tetã ojapo jevy vy ikora voi omoatyrõmba ma vy ndopagavei ma 'rã imposto neĩ pedágio opaga 'rã va'ekue. Ha'e rami vy 'rã ojapo peráta nderejopyvei aguã rami.

¹⁴ Ha'e rã ore kuery ma ndepo gui mba'emo rojopy jepi va'e vy orevy pe voi nda'evei ha'e kuery neremboetevei ramo. Ha'e nunga rupi ae oreayvua rogueru ruka ndevy.

¹⁵ Eikuua pota ke ha'vy kuaxia neramoĩ kuery rekokue oĩa re. Ha'e va'e kuaxia rejou vy reikuua 'rã ha'e va'e tetã pygua kuery opu'ãmba vy ojapo raka'e huvixa kuery ojexavai aguã rami, yvy openaa rupi voi. Yma guive tetã py oiko jepi joguero'aa. Ha'e nunga rupi ae tetã omombaa va'ekue.

¹⁶ Ha'e nunga rupi oreruvixa, ndevy roikuua uka xapy'a rei ha'e va'e tetã ha'e kora omoatyrõmba ma ramo Eufrates yakã kyvõ rupi yvy itui va'e re nandepo'akavei 'rãa.”

¹⁷ Ha'e ramo huvixa ombovai:

“Xondaro kuery ruvixa Reum, kuaxia re opena va'ety Sinsai ha'e irũ kuery Samaria py ikuai va'e pe xeayvu araa uka, Eufrates rovai hembyrekue ikuai va'e pe guive: Tapendekuai porã!

¹⁸ Ha'e gui kuaxia para orevy pembou va'ekue ma aendu kuaa aguã rami ogueroayvua xerenonde py.

* ^{4:2} Ha'e kuery ma Samaria pygua ikuai teĩ judeu regua e'ý, mombyry ikuaiague gui Assíria ruvixa kuery oguerova vy ha'e py omboekoa jevy va'ekue. SENHOR omboete merami teĩ nguu ete kuery ae omboete avi okuapy (2 Reis 17.24-41).

¹⁹ Ha'e rami rā xee ajapo uka rā oeka vy oikuua yma guive ae ma ha'e va'e tetā pygua kuery opu'ā ae ri okuapyague huvixa kuery rovai re, ha'e gui ha'e py oiko raka'e joguero'aa ha'e joe ijayvu rei va'e.

²⁰ Jerusalém tetā py ikuai avi va'ekue huvixa ipo'akapa va'e. Ha'e va'e kuery ma Eufrates yakā rovai ha'e javi rupi ipo'aka va'ekue. Ha'e kuery pe ae opagapaa va'ekue imposto ha'e pedágio opaga 'rā va'ekue.

²¹ Ha'e nunga rupi aŷ gui ma pendeayvu 'rā ha'e va'e avakue ombo'eapoa gui optyu'upa aguā rami, ha'e va'e tetā ndojapovei aguā, xee ajapo uka e'ŷa ja.

²² Penekyre'ŷ ke ha'e pejapo ete xee aipotaa. Mba'e re tu huvixa roiko va'e ndorojopyive-ive ri rovy?" he'i.

²³ Ha'e va'e kuaxia huvixa Artaxerxes ombopara va'ekue ma ogueroayyupaa Reum, kuaxia re opena va'ety Sinsai ha'e irū kuery renonde. Ha'e ramo ha'e kuery oje'oipa pojava Jerusalém tetā py judeu kuerya katy. Opo py tembiporu oguereko reve oo vy omombytu'u nhea'ā mba'emo ojapo okuapya gui.

²⁴ Ha'e rami py optyu'upa Nhanderuete pegua oo Jerusalém py oī va'e re ombo'eapoa gui. Ha'e rami vy Pérsia pygua huvixa Dario mokoī ma'etŷ re ma oī peve ndojapovei.

5

Ageu ha'e Zacarias nhomokyre'ŷa rupi ijayvuague

¹ Ha'e gui profeta Ageu ha'e Ido ra'y Zacarias ma ayvu omombe'u judeu kuery Judá ha'e Jerusalém py ikuai va'e pe. Mokoīve re Israel kuery ruete nhe'ē oī ramo hery rupi ae ijayvu.

² Ha'e ramo Sealtiel ra'y Zorobabel ha'e Jozadaque ra'y Jesua ma onhemoŷ vy omboypy ju okuapy Nhanderuete pegua oo Jerusalém py oī va'e omoatyrō aguā. Ha'e va'e kuery reve mokoīve profeta Nhanderuete pegua avi ikuai oipytyvō vy.

³ Ha'e va'e jave py ma ha'e kuerya py ou Eufrates yakā kyvō rupi opena va'e Tatenai ha'e Setar-Bozenai oirū kuery reve. Ha'e rami vy ha'e kuery pe oporandu okuapy:

— Mava'e tu pēvy ojapo uka ju upe va'e oo ha'e ikora?

⁴ Ha'e gui marā rami tu upe va'e ojapoa rupi ikuai va'e rery? — he'i okuapy oporandu vy.

⁵ Ha'e rami tei judeu kuery yvatekueve re Nhanderuete oma'ē ramo hovaigua kuery nomombytu'u reguai huvixa Dario-a py ayvu ogueraa ha'e kuaxia para rupi ombovague ou e'ŷa ja.

Huvixa Dario pe hovaigua kuery oayvu omondoukaague

⁶ Ha'e gui ma huvixa Dario pe Eufrates yakā kyvō rupi opena va'e Tatenai peteī kuaxia para omondouka, Setar-Bozenai ha'e oirū kuery afarsaquita va'e yakā kyvō rupi ikuai va'e reve. Ha'e va'e kuaxia omboparaague ma apy ju oī.

⁷ Kuaxia para re ma ixupe omondouka okuapy pova'e ayvu:

“Huvixa Dario, tove tereiko porā!

⁸ Oreruvixa, reikuua ae ma ore kuery Judá yvy katy roje'oiaque, Nhanderuete pegua oo tuvixa va'e py. Ha'e va'e ma ita tuvixa va'e gui anho ojapoave heravy va'e. Yvyrapo py ma omboty-mbotyve heravy. Ombo'eapoa aguā ikyre'ŷ okuapy vy ojapo pojava heravy.

⁹ Ha'e gui ma yvatekueve pe roporandu vy ‘Mava'e tu pēvy ojapo uka ju upe va'e oo ha'e ikora?’ ro'e va'ekue.

¹⁰ Ha'e rami ae avi yvatekueve pe roporanduve tema hery re, ndevy romombe'u aguā, ndevy rombopara rā avakue opena va'e rery reikuua aguā.

¹¹ Po rami orembovai vy ijayvu okuapy: ‘Ore kuery ma Nhanderuete yva ha'e yvy apoare rembiguai. Ha'e vy romoatyrō ju rokuapy kova'e oo yma raxa ma ojapo pyre. Peteī huvixa Israel pygua yvateve va'e ojapopa ypy va'ekue.

¹² Ha'e va'e rire ma oreramoŷ kuery ma Nhanderuete yva pygua ipoxy aguā rami ikuai ramo omboaxapa raka'e Babilônia pygua huvixa Nabucodonosor caldeu va'e po py. Ha'e va'e ae ma kova'e oo ombovaipa, ha'e Babilônia katy oreretarā kuery ogueraapa raka'e.

¹³ Ha'e rami teĩ Babilônia pygua huvixa Ciro ma jypy ma'etŷ re oĩ jave ojapo uka ju kova'e oo Nhanderuete peguarã.

¹⁴ Ha'e gui ma tembiporu ouro ha'e prata guigua Jerusalém py templo py ikuaiague gui Nabucodonosor ogueraapa vy Babilônia py templo oĩ va'e py ju omoĩ va'ekue. Ha'e nunga huvixa Ciro ha'e gui oguenoẽmba vy omboaxa raka'e peteĩ ava Sesbazar hery va'e pe. Ha'e va'e joe opena va'erã omoĩ vy

¹⁵ aipoe'i ixupe: “Ejopy kova'e tembiporu ikuai va'e, ha'e tereo. Eraapa Jerusalém py templo oĩ va'e pygumarã. Ha'e gui ejapo uka ju Nhanderuete pegua oo, oĩague py ae”, he'i va'ekue.

¹⁶ Ha'e gui ma Jerusalém py Sesbazar ou ma vy onhonomba ju Nhanderuete pegua oo renderã. Ha'e jave gui ma voi rojapo rokuapy teĩ ndorojapopai teri', ha'e kuery he'i va'ekue orevy.

¹⁷ Ha'e ramo ndee oreruvixa rejou porã ri vy reikuua pota uka 'räge Babilônia py huvixa kuery kuaxia ikuai va'e re, roikuua aguã anhetê pa ra'e huvixa Ciro Nhanderuete pegua oo ojapo ukaague Jerusalém py, ha'e gui orevy pe ju mba'emo rejapo uka aguã”, he'i okuapy.

6

Dario oayvu omondoukaague

¹ Ha'e ramo huvixa Dario ijayvu rã oikuua potaa Babilônia py huvixa mba'e kuaxia para omoĩ porãatyi rupi.

² Ha'e gui Média vyv re Acmetá py oo imbaraete va'e oĩ va'e py ojou peteĩ kuaxia oimama pyre. Ha'e va'e re ma nhomoma'endu'aarã ipara oiny po rami ijayvu va'e:

³ “Huvixa Ciro ma peteĩ ma'etŷa re oĩ jave oikuua uka pova'e ayvu: ‘Jerusalém py Nhanderuete pegua oo oĩ va'e ma ha'eve ojapoa ju aguã mymba oapy vy ome'ẽ atyra. Ha'e rami aguã ma omoĩ atãave 'rã hendarã. Ijyvatea ma vinte e sete metros peve 'rã. Ipya voi vinte e sete metros ae avi 'rã. Mboapy ryxy ita tuvixa va'e anho omoña 'rã, ha'e gui peteĩ ju yvyra pyau guigua.

⁴ Huvixa ro gui ae 'rã ome'ẽa mba'emo repyrã.

⁵ Ha'e rami ae avi mba'emo ryru ouro ha'e prata guigua Nhanderuete pegua opygua Jerusalém py templo oĩ va'e gui Nabucodonosor oguenoẽ vy Babilônia katy ogueraa va'ekue ma ome'ẽmbaa ju 'rã Jerusalém py templo oĩ va'e pygumarã. Peteĩ-teĩ tembiporu oĩague py ae ju 'rã omoña, Nhanderuete pegua opy”, he'i va'ekue.

⁶ “Ha'e nunga rupi Eufrates yakã rovai rupi repena va'e Tatenai, Setar-Bozenai ha'e peneirã kuery afarsaquita yakã rovai pendekuai va'e, pejepe'a ke ha'e gui mombyry katy.

⁷ Pemombytu'uve eme Nhanderuete pegua oo re ombo'eapo va'e kuery. Tove judeu kuery ruvixa ha'e yvatekueve tojapo ju Nhanderuete pegua oo oĩague py ae.

⁸ Xeayvu avi judeu kuery regua yvatekueve pe mba'emo peme'ẽ aguã, Nhanderuete pegua oo ojapo ju aguã. Yakã rovai peráta huvixa pegua omoiaty py oĩ va'e regua ma ha'e va'e avakue pe peme'ẽ jepi 'rã hi'ára py porã, ombo'eapoa gui opytu'u e'ŷ aguã.

⁹ Ha'e rami ae avi ha'e kuery pe ára nhavõ peme'ẽ kuerei 'rã peme'ẽ aguã va'e: vaka ra'y, vexa'i ha'e vexa'i ra'y oapy vy Nhanderuete yva pygua pe ome'ẽ mbyrã. Trigo, juky, vinho ha'e azeite voi peme'ẽ 'rã, Jerusalém py sacerdote kuery mbovy pa ikuia rami vy,

¹⁰ ha'e kuery ome'ẽ aguã mba'emo heakuã porã va'e Nhanderuete yva pygua ojou porã va'erã, huvixa ha'e ta'y kuery re ha'e kuery ojerure okuapy aguã guive.

¹¹ Po rami avi xeayvu: Ava oiko va'e rei kova'e kuaxia re oĩ va'e oguerova ramo ma hoo gui peteĩ yvyra omboia 'rã, ha'e gui ha'e va'e re ae oupia 'rã imoiny, ha'e rã hoogue ma ojapoa 'rã ytyrã.

¹² Ha'e rami ae avi xapy'a rei Jerusalém py Nhanderuete pegua oo oĩ va'e amongue huvixa e'ŷ vy pavẽ regua ombovaipaxe vy opo py kova'e ipara oguerova va'e rei tove Nhanderuete tomokanhymba, ha'e py guery omoĩ rire. Xee Dario ae kova'e ayvu amondouka va'e. Tojapopaa pojava.”

Templo ojapopa ma okuapyague

¹³ Ha'e gui ma huvixa Dario ijayvuague rami ae Eufrates yakā kyvō rupi opena va'e Tatenai, Setar-Bozenai ha'e oirū kuery ojapopa pojava okuapy.

¹⁴ Ha'e ramo judeu kuery regua yvatekueve ojapo tema heravy oo, ikuai porā guive profeta Ageu ha'e Ido ra'y Zacarias ijayvuague rami. Oo ojapopa Israel kuery ruete ojapo ukaague rami, ha'e gui huvixa Ciro, Dario ha'e Pérsia pygua Artaxerxes ijayvuague rami guive.

¹⁵ Oo ojapopa okuapy jaxyo Adar 'ea py mboapy araa py, huvixa Dario mboapy meme ma'etý re ma oī javé.

Nhanderuete po py templo omboaxa okuappyague

¹⁶ Ha'e gui Israel kuery, sacerdote, levita ha'e escravo ikuaiague gui ojevy va'ekue mboae kuery ou vy ma Nhanderuete pegua oo ojapopaague oguerovy'a reve omboaxa okuapy ipo py.

¹⁷ Omboaxa vy ome'ẽ okuapy cem vaka ra'y, duzentos vexa'i ra'y, quatrocentos vexa'i ha'e doze kavara ra'y. Israel kuery ha'e javi ojejavvyague reguarā ome'ẽ okuapy, mbovy regua pa ikuia rami.

¹⁸ Omoī avi okuapy sacerdote ha'e levita kuery peteī-teī Nhanderuete pe omba'eapo aguā Jerusalém py, Moisés kuaxia omboparaague rami vy.

Ngaru Páscoa regua ojapo okuappyague

¹⁹ Escravo ikuaiague gui ojevy va'ekue ha'e javi ma ngaru Páscoa regua ojapo okuapy peteī jaxyo ha'e catorze araa py.

²⁰ Mba'eta sacerdote ha'e levita kuery ma peteī'i rami ojeky'a'o ukapa ma vy ha'eve va'e ju ikuai. Ha'e rami vy ojuka okuapy Páscoa pygua vexa'i escravo ikuaiague gui ou va'ekue ha'e javi re, guyke'y kuery sacerdote ikuai va'e re, ojee ae guive.

²¹ Ha'e rami vy Páscoa ára py Israel ramymino kuery escravo ikuaiague gui ou va'ekue ha'e javi okaru okuapy, ha'e gui ha'e kuery reve onhemoirū avi amboae regua kuery SENHOR Israel kuery ruete oeka aguā ha'e va'e yvy re amboae regua kuery hekoia va'e reko vaia gui ojepe'a va'ekue.

²² Sete ára re ovy'aa rupi ojapo okuapy ngaru mbojape mbovua rewegua e'ŷ va'e regua, ovy'a aguā SENHOR ombou ramo. Mba'eta ha'e kuery re oma'ẽ vy huvixa Assíria pygua py'a oguerova va'ekue, Israel kuery ruete pegua oo ojapoa py omombaraete aguā rami.

Jerusalém katy huvixa Artaxerxes Esdras omondoukaague

¹ Ha'e va'e rire Pérsia pygua huvixa Artaxerxes oī javé ou Esdras. Ha'e va'e ma Seraías ra'y, Seraías ma Azarias ra'y, Azarias ma Hilquias ra'y,

² Hilquias ma Salum ra'y, Salum ma Zadoque ra'y, Zadoque ma Aitube ra'y,

³ Aitube ma Amarias ra'y, Amarias ma Azarias ra'y, Azarias ma Meraiote ra'y,

⁴ Meraiote ma Zeraías ra'y, Zeraías ma Uzi ra'y, Uzi ma Buqui ra'y,

⁵ Buqui ma Abisua ra'y, Abisua ma Finéias ra'y, Finéias ma Eleazar ra'y, Eleazar ma Arão sacerdote yvateve va'e ra'y raka'e. Ha'e va'e javé py ma Esdras ou avi Babilônia gui.

⁶ Ha'e va'e ma SENHOR Israel kuery ruete lei oeja rā Moisés ombopara va'ekue re nhombo'e va'ety oikuaapa va'e. Hexe SENHOR Tuuete po oī ramo ixupe huvixa ome'ẽmba ojerurea rami tema.

⁷ Jerusalém katy jogueru avi Israel ramymino kuery va'e regua sacerdote, levita, oporaei va'ety, okē rarõa ha'e templo py nhopytyvō va'ety kuery. Huvixa Artaxerxes sete ma'etý re ma oī javé py jogueru.

⁸ Ha'e gui huvixa sete ma'etý re ma oī javé peteī nhiruī jaxyo py Esdras ovaẽ Jerusalém py.

⁹ Mba'eta peteī jaxyo ára ypy'i py Babilônia gui ou rire peteī nhiruī jaxyo ára ypy'i py ma ovaẽ Jerusalém py, hexe Nhanderuete po oī ramo.

¹⁰ Mba'eta Esdras opy'a re omoõ ae ma va'ekue SENHOR guigua lei oĩa rami ixupe ete oiko aguã, ha'e gui ojapopa aguã, ha'e Israel ha'e javi rupi nhombo'e aguã Nhanderuete ayvu ha'e oipotaa oeja va'ekue re.

¹¹ Sacerdote Esdras ma SENHOR ayvu re nhombo'e va'ety, ojapo uka va'ekue ha'e oayvu Israel kuery peguarã oeja va'ekue ha'e javi re. Ixupe kuaxia para huvixa Artaxerxes ome'ẽ va'ekue ma po rami ipara oiny:

¹² "Xee ma Artaxerxes huvixa ikuai va'e ruvixa aiko. Kova'e kuaxia amondouka sacerdote Esdras, Nhanderuete yva pygua va'e guigua lei re nhombo'e va'ety pe: Tove tereiko porã!

¹³ Po rami xeayvu: Xee apenaa rupi Israel kuery va'e regua ikuai va'e, sacerdote ha'e levita kuery nderupive Jerusalém tetã katy ooxe va'e rei toje'oi.

¹⁴ Ha'e gui ma xee ha'e xemoneta va'ety kuery reve romondouka Judá ha'e Jerusalém tetã re reikuua pota aguã, nderuete guigua lei ndepo py rerekova va'e rami vy.

¹⁵ Reraa avi 'rã prata ha'e ouro xee ha'e xemoneta va'ety kuery Israel kuery ruete pe rome'ëxeia'i rupi rome'ẽ va'e, Jerusalém py ixupeguia oo oĩ ramo.

¹⁶ Ha'e rami ae avi prata ha'e ouro Babilônia vyv ha'e javi rupi rejou va'e reraapa avi 'rã, neretarã kuery ha'e sacerdote kuery ome'ëxeia'i py ome'ẽ va'e reve, Jerusalém py Nhanderuete pegua oo oĩ va'e pyguarã.

¹⁷ Ha'e va'e peráta re ma rejogua 'rã vaka ra'y, vexa'i, vexa'i ra'y, mba'emo ra'yigue ha'e mba'emo rykue reme'ẽ va'erã. Ha'e nunga ha'e javi reme'ẽ 'rã Jerusalém py Nhanderuete pegua opy altar oĩ va'e áry.

¹⁸ Ha'e rã prata ha'e ouro rembyrekue ma ndee ha'e nderyvy kuery peikuua rami ae 'rã peiporu. Penderuete oipotaa rami pejapo.

¹⁹ Ha'e gui tembiporu Nhanderuete pegua opy rupi oiporu pyrã ndevy ome'ẽ mbyre ma Penderuete renonde reme'ëmba ju 'rã Jerusalém tetã py.

²⁰ Ha'e rã amboae nunga Nhanderuete pegua opy guarã reikotevã va'e rei tema reraa avi 'rã xeropy mba'emo omoõ porãaty gui ae.

²¹ "Ha'e gui ma Eufrates yakã rovai mba'emo re pepena va'ety kuery pe ju xee huvixa Artaxerxes xeayvu: Pendevy sacerdote Esdras Nhanderuete yva pygua lei re nhombo'e va'e mba'emo re ojerure ramo peme'ëmba vyvoi.

²² Trinta e três mil quilos prata guigua peve tei, cem voxas de trigo, cem ryru vinho ha'e cem ryru azeite peve, ha'e gui juky oata aguã rami e'ŷ 'rã peme'ẽ.

²³ Ha'e gui ma Nhanderuete yva pygua ojapo ukaague rami vy tojapopaa vyvoi ixupeguia oo pyguarã. Mba'eta nda'evei ipoxy etea ou aguã xee huvixa ha'e xera'y kuery ropaanã re.

²⁴ Ha'e rami avi peteĩ re ju xeayvu pêvy. Sacerdote ha'e levita kuery, oporaei va'e, okẽ rarõa, Nhanderuete pegua opy ombo'eapo va'e kuery ha'e javi, ha'e kuery va'e regua pe ma peteive henda py napeme'ẽ ukai 'rã imposto neĩ pedágio.

²⁵ "Ha'e gui ndee Esdras, ne'arandua Nhanderuete gui ae rerekova va'e rami vy emõjoe opena va'erã ha'e nhomongetaarã. Ha'e va'e kuery ma opena 'rã Eufrates yakã rovai rupi ikuai va'e ha'e javi re, nderuete guigua lei oikuua va'e kuery ha'e javi re. Ha'e rã oikuua e'ŷ teri va'e ma ndee rembo'e avi 'rã.

²⁶ Ha'e rã Nhanderuete guigua ha'e huvixa guigua lei rupi e'ŷ ikuai va'e ma rembopaga vy rejuka 'rã, e'ŷ vy mombyrya katy 'rã remondouka, imba'e rei-rei va'ekue reipe'apa 'rã, e'ŷ vy rembo'a mba'e 'rã", he'i va'ekue.

²⁷ Ta'ima'endu'a porãa SENHOR nhaneramoõ kuery ruete re, mba'eta ha'e rami aguã oguerova huvixa py'a, Jerusalém py Nhanderuete pegua oo oĩ va'e omoatyrõ uka aguã.

²⁸ Xevy pe ojapo avi huvixa xemboaxy aguã rami, imongeta va'ety kuery ha'e yvatekueve ipo'akapa va'e renonde py aĩ jave. Ha'e rã xere SENHOR Xeruete po oĩ ramo aendu xembaraetea. Ha'e rami vy Israel kuery ruvixa va'e kuery regua amboaty xerupive oje'oi aguã.

Esdras rupive ojevy ju va'ekue rery oĩa

- ¹ Ha'e ramo Artaxerxes huvixa oĩ jave py heta va'e kuery akã regua oje'oi xerupive Babilônia gui. Ha'e kuery rery ma po ramí:
- ² Finéias ramymino kuery va'e regua ma Gérson. Itamar ramymino kuery va'e regua ma Daniel. Davi ramymino kuery va'e regua ma Hatus.
- ³ Secanias ha'e Parós ramymino kuery va'e regua ma Zacarias, ha'e gui hexeve cento e cinqüenta avakue rery avi omboparaa.
- ⁴ Paate-Moabe ramymino kuery va'e regua ma Zeraías ra'y Elioenai, ha'e hexeveguia duzentos avakue ju.
- ⁵ Secanias ramymino kuery va'e regua ma Jaaziel ra'y, ha'e hexeveguia trezentos avakue ju.
- ⁶ Adim ramymino kuery va'e regua ma Jônatas ra'y Ebede, ha'e hexeveguia cinqüenta avakue.
- ⁷ Elão ramymino kuery va'e regua ma Atalias ra'y Jesaías, ha'e hexeveguia setenta avakue ikuai.
- ⁸ Sefatias ramymino kuery va'e regua ma Micael ra'y Zebadias, ha'e hexeveguia oitenta avakue ikuai.
- ⁹ Joabe ramymino kuery va'e regua ma Jeiel ra'y Obadias, ha'e hexeveguia duzentos e dezoito avakue ikuai.
- ¹⁰ Bani ramymino kuery va'e regua ma Josifias ra'y Selomite, ha'e hexeveguia cento e sessenta avakue ikuai.
- ¹¹ Bebai ramymino kuery va'e regua ma Bebai ra'y Zacarias, ha'e hexeveguia vinte e oito avakue ikuai.
- ¹² Azgade ramymino kuery va'e regua ma Hacatã ra'y Joanã, ha'e hexeveguia cento e dez avakue ikuai.
- ¹³ Adonicão ramymino kuery va'e regua ma opa vyguia ovaëague. Ha'e kuery rery ma pova'e: Elifelete, Jeiel ha'e Semaías, ha'e gui ha'e kuery reveguia sessenta avakue ikuai.
- ¹⁴ Bigvai ramymino kuery va'e regua ma Utai ha'e Zabude, ha'e hexeveguia setenta avakue ikuai.

Esdras levita kuery ogueru rukaague

- ¹⁵ Ha'e va'e kuery ae amboatypa Aava katy yakã oxyry ový va'e yvýry. Ha'e py ma mboapy ára re ranhe ropyta. Ha'e kuery ha'e sacerdote kuery re aikuaa pota vy neĩ peteĩ ma voi ndajoui Levi ramymino va'e regua.
- ¹⁶ Ha'e rami vy aenoĩ uka huvixa kuery Eliézer, Ariel, Semaías, Elnatã, Jaribe, Elnatã, Natã, Zacarias ha'e Mesulão, ha'e gui hi'arandukueve va'e Joaribe ha'e Elnatã.
- ¹⁷ Ha'e va'e kuery ma Casifia pygua huvixa Ido oĩa katy amondouka vy ha'e kuery pe ame'ẽ ayvu ixupe omombe'u va'erã, ha'e gui tyvy kuery Casifia pygua templo rupi nhopytyvõ va'ety kuery pe voi, orea py ha'e kuery ogueru aguã Nhanderuete pegua opy rupi opena va'erã.
- ¹⁸ Ha'e ramo orere Nhanderuete po iporã va'e oĩ ramo orea py ogueru peteĩ ava hi'arandu va'e. Ha'e va'e ma Mali ramymino Serebias, Israel ra'y Levi ramymino va'e. Ta'y ha'e tyvy kuery reve vy dezoito ikuai.
- ¹⁹ Ogueru avi Hasabias, Merari ramymino kuery va'e regua Jesaías guive. Ha'e va'e kuery ryvy ha'e ta'y kuery reve vy vinte ikuai.
- ²⁰ Ha'e gui templo rupi levita kuery pytyvõarã Davi ha'e yvatekueve omoĩ va'ekue ma duzentos e vinte ikuai. Ha'e va'e kuery ma hery rupi meme omoña.

Okaru e'ŷ re ikuaiague

- ²¹ Ha'e gui ma Aava yakã yvýry orekuiaia pyve ae xeayvu rokaru e'ŷ re orekuai aguã, Nhanderuete renonde py ronhemo'yvy'i reve ixupe roguata porã aguã re rojapukai aguã, orera'y kue'iry ha'e oremba'e rei-rei ha'e javi reve guive.

²² Mba'eta xee axī huvixa pe xondaro ha'e kavaju árygua kuery re ajerure aguã roguataa rupi orerovaigua kuery gui orerarõarã, mba'eta ixupe oreayvu ae ma va'ekue: "Nhanderuete oeka va'e kuery ha'e javi re ipo iporã va'e oĩ imoingo porãarã. Ha'e rã ixugui hexaraipa va'e ha'e javi rovai ma opo'akaa ha'e javi reve ombou 'rã opoxya", ro'e rire.

²³ Ha'e nunga rupi ore kuery rokaru e'ŷ re orekuai vy Nhanderuete pe rojerure tema rokuapy. Ha'e ramo oreayvua oendu vy orepytyvõ.

Sacerdote kuery pe mba'emo re opena ukaa ague

²⁴ Ha'e ramo aiporavo doze yvatekueve va'e regua. Ha'e va'e kuery ma Serebias, Hasabias ha'e tyvy kuery dez ikuai va'e.

²⁵ Ha'e va'e kuery pe ma apena uka prata, ouro ha'e tembiporu Nhanderuete pegua opy guarã ome'ẽ mbyre re, apeja rire. Ha'e nunga ma huvixave, imongeta va'ety kuery, yvatekueve ha'e Israel kuery ha'e py ikuai va'e ome'ẽ va'ekue.

²⁶ Ha'e rami vy ha'e kuery po py amboaxa vinte mil quilos raxa prata guigua, tembiporu prata guigua três mil e trezentos quilos va'e, três mil e trezentos quilos ouro guigua,

²⁷ vinte karo ouro guigua oito quilos va'e meme, ha'e gui mokoĩ tembiporu overa va'e iporãve va'e guigua hexakãmba va'e, ouro rami avi hepy va'e.

²⁸ Ha'e rami vy aipoa'e ha'e kuery pe:

— Peẽ kuery ma SENHOR pegua omboaxa pyre pendekuai, kova'e tembiporu ikuai va'e voi omboaxa pyre meme. Mba'eta kova'e prata ha'e ouro ma SENHOR peneramoĩ kuery ruete peguarã ome'ẽxe'a'i py ome'ẽ mbyre.

²⁹ Ha'e nunga rupi pepena porã 'rã, pearõ 'rã Jerusalém py sacerdote yvatekueve va'e, levita ha'e Israel kuery akã ikuai va'e renonde py ju pepeja reve pemboaxaa ára peve — ha'e.

³⁰ Ha'e ramo sacerdote ha'e levita kuery ma prata, ouro ha'e tembiporu opeja pyre ojopypa, Jerusalém py Nhanderuete pegua oo oĩ va'e pyguarã ogueraa aguã.

Jerusalém py ovaẽmbaague

³¹ Ha'e gui Aava yakã gui ma ijypy jaxy doze araa py roje'oi, Jerusalém katy roo aguã. Orere Nhanderuete opo py opena porã vy orereraa jepe orerovaigua kuery ha'e tape rupi jojukaa kuery ikuai va'e ha'e javi gui.

³² Ha'e rami vy rovaẽ ma Jerusalém py. Ha'e py ma mboapy ára re ranhe ropyta.

³³ Ha'e gui irundy araa py ma Nhanderuete pegua oo py roo vy ropeja ju prata, ouro ha'e tembiporu. Ha'e vy sacerdote Urias ra'y Meremote pe je romboaxapa. Ha'e va'e reve oĩ Finéias ra'y Eleazar. Ha'e kuery reve ikuai avi levita kuery Jesua ra'y Jozabade ha'e Binui ra'y Noadias.

³⁴ Ha'e nunga roipapa ha'e ropejapa ma rire ipoyia ha'e javi ombopara kuaxia re.

³⁵ Ha'e gui escravo ikuaiague gui ou va'ekue ma ome'ẽ okuapy mymba Israel kuery ruete peguarã. Noventa e seis vexa'i, setenta e sete vexa'i ra'y ome'ẽ. Ha'e gui ma doze kavara ava ju jejavya reguarã. Oapy reve meme ome'ẽ SENHOR pe.

³⁶ Ha'e gui ma huvixave ayvu omombe'u okuapy hembiguai huvixa kuery Eufrates yakã kyvõ rupi opena va'e pe. Ha'e ramo ha'e kuery orepytyvõ okuapy Nhanderuete pegua oo romoatyrõa py.

Esdras onhembo'e vy ha'e kuery reko vaia omombe'upaague

¹ Ha'e nunga oikopa ma rire xea py ou okuapy yvatekueve va'e. Ha'e vy ha'e kuery aipoe'i okuapy:

— Israel kuery va'e regua sacerdote ha'e levita kuery ma ndojepe'ai okuapy amboae vyv regua reko vaia gui, cananeu kuery, heteu, ferezeu, jebuseu, Amom pygua, Moabe, Egito pygua ha'e amorreu kuery reko vaia gui.

² Mba'eta ha'e kuery va'e regua rajy kuery ae ogueraa gua'yxyrā, gua'y kuery ra'yxyrā guive. Ha'e rami vy nhande kuery nhandeky'a e'ŷ aguā va'ekue jaje'apa ma jakuapy kova'e yvy re ikuai va'e re. Yvatekueve ha'e huvixa kuery ranhe ho'apa ma ha'e rami ojejavya py — he'i okuapy.

³ Ha'e nunga xee aendu vy ajou vai vaipa. Ha'e rami vy amondoropa xea, xe-manto guive. Xeapte gui xe'a ha'e xerendyva aekyi reve aguapy ainy.

⁴ Ha'e ramo xea py onhemboatypa okuapy Israel kuery ruete ayvu oendu vy oryryipa va'e, escravo ikuaiague gui ojevy va'ekue ojejavypa rei okuapy re nda'evei vy. Ha'e ramo xee ma aguapy tema ainy ajou vai ete reve, ka'aru mymba ome'ēa jave peve.

⁵ Ha'e gui ka'aru mymba ome'ēa jave py ma apu'ā ha'amy anhemo'yvy'i ainya gui, xea ha'e manto oxorokue rei reve. Ha'e vy xerenapy'ā re ju aī vy xepo aupi SENHOR Xeruete oña katy.

⁶ Ha'e vy aipoe'i:

— Xeruete! Xee nda'evei rei aiko, ndea katy ama'ē aguā axīmba guive. Mba'eta rojejavya ma oĩ-oïve tema oreakā áryve rupi, orereko vaia ma yva peve oo.

⁷ Oreramoī kuery ikuaiia ára guive aŷ peve ore kuery voi orereko vai rokuapy. Rojejavypaague re ae oremboaxapa raka'e huvixa amboae yvy regua po py, oreruvixa ha'e sacerdote kuery voi. Ha'e rami vy orere ou kyxe revegua, escravo orekuai aguā, imonda va'e ha'e roxīmba aguā, aŷ peve roexaa rami ae.

⁸ Ha'e gui aŷ ma xapy'a'i ndee SENHOR Oreruete oremboaxy a rex a uka vy rejapo roo jepe nho aguā rami, ha'e henda iky'a e'ŷ va'e py ju orekuai porā aguā. Ha'e rami vy Oreruete, orevy reme'ē orerexa pyxo'i jevy aguā, ha'e teīgue ju nhoembiguai orekuai teī rokuave'i aguā.

⁹ Ore kuery nhoembiguai roikoa py teī ndee Oreruete, norepytyvō e'ŷi. Ha'e rami 'rāgue py oremboaxy a rex a uka vy Pérsia pygua huvixa kuery renonde rupi voi oremboaxy roendu. Ha'e rami vy orepy'a guaxuve ndevyguoo oitypaa va'ekue rojapo ju aguā, ivaipaague romoatyrō vy, ha'e gui Judá ha'e Jerusalém py orekuia rupi renhemoī kora rami orerepyarā.

¹⁰ — Ha'e vy aŷ Oreruete, kova'e nunga oiko rire mba'e ro'e 'rā tu? Mba'eta roejapa ma rejapo uka va'ekue

¹¹ nerembiguai profeta kuery pe aipo're uka va'ekue: "Yvy pendekoa aguā peoa va'e re ma ha'eve ūa oĩ, ha'e pygua kuery omongy'apa rire, mba'eta joavaive-ive rupi ha'e kuery ojejavypa rupi vy omonyēmba okuapy ojeguarupy.

¹² Ha'e nunga rupi napeme'ēi 'rā penderajy kuery ha'e kuery ra'y kuery ra'yxyrā, ha'e kuery rajy kuery re voi napemomendai 'rā pendera'y kuery. Ha'e kuery reve ndapejapoi 'rā peteī rami pendekuai aguā, neī pevy'a pekuapy aguā. Ha'e rami vy 'rāe penembaraeteve kova'e yvy re iporāgueve oiko va'e re pekaru pekuapy aguā, ha'e vy pendera'y kuery peguarā kova'e yvy peja aguā raka'e rā peve guarā", 're uka va'ekue.

¹³ Ha'e gui Oreruete, ore kuery orereko vaiague re ha'e rami ete mba'emo vai oiko, ha'e rami avi rojejavypaague re orembopaga aguā gui ndee norembopagaise guive, ha'e rami 'rāgue py rejapo rokuave'i va'ekue roo jepe nho aguā rami, roexaa rami.

¹⁴ Ha'e rami teī ha'e kue rami ae tema roejapa ju rejapo uka va'ekue, ha'e vy apygua kuery re romenda rokuapy, ojeguarupy rojapo vy. Ha'e rami rire orerovai nandepoxyi 'rā teve oremomba peve, neī peteīve oo jepe va'e naembyrei aguā rami?

¹⁵ SENHOR Israel kuery ruete va'e! Ndee ma nderekoi porā va'e, ha'e rā ore kuery ma oo jepe va'ekue regua rembyrekue rive, aŷ roexaa rami. Apy ma nerondenope py ma orereko vaia py orekuai, nerondenope peteīve heko vai va'e oĩ aguā nda'evei teī — he'i.

jogueruvy Israel kuery avakue, kunhague ha'e kyrīgue guive. Ha'e rami vy pavē rei ojae'o vaipa okuapy.

² Ha'e ramo Elāo ramymimo kuery va'e regua Jeiel ra'y Secanias ijayvu vy aipoe'i Esdras pe:

— Ore kuery ma Nhanderuete rovai orerekō vai va'ekue amboae regua kunhague re romendaa py, amboae regua re ae. Ha'e rami teī nhande Israel kuery pe oī teri nharō jaikovy aguā.

³ Mba'eta aŷ gui ma Nhanderuete reve rojapo 'rā ixupe ju orekuai aguā, orera'yxy kuery ha'e imemby kuery ha'e javi romondoukapa ju aguā Senhor ijayvuague rami vy, ha'e Nhanderuete ayvu gui oryryi va'e kuery ijayvua rami vy, lei oĩa rami ae 'rā rojapo.

⁴ Ha'e nunga rupi epu'ã ke, mba'eta kova'e nunga re ma ndee ae repena va'erā reī. Ha'e rā ore ma ndereve meme 'rā roiko. Nembaraete ha'vy rejapo ete aguā — he'i.

⁵ Ha'e ramo Esdras opu'ã vy ojapo sacerdote yvatekueve va'e oura aguā rami, levita ha'e Israel kuery ha'e javi guive, ha'e rami ijayvuague ha'e kuery ojapopa aguā. Ha'e ramo ha'e kuery oura okuapy ha'e rami.

⁶ Ha'e gui Nhanderuete pegua oo renonde Esdras oīague gui ojepe'a vy opy ja'o Eliasibe ra'y Joanā pegua py ju oike. Ha'e py ma ndo'ui oiny mbojape, neī ndoy'ui vinho. Ojae'o oiny escravo ikuaiague gui ojevy va'ekue ojejavypaa re.

⁷ Ha'e gui Judá ha'e Jerusalém rupi omombe'ua escravo ikuaiague gui ojevy va'ekue ha'e javi onhemboatypa aguā Jerusalém py,

⁸ ha'e gui xapy'a rei amongue mboapy araa py teī ndoui va'e ma imba'e rei-rei ha'e javi omomba aguā, yvatekueve ha'e nhomongeta va'ety kuery ijayvuague rami vy, ha'e gui ha'e ae ma voi oipe'aa aguā escravo ikuaiague gui ojevy va'ekue ikuia mbyte gui.

⁹ Ha'e ramo mboapy araa py Judá ha'e Benjamim regua avakue ha'e javive onhemboatypa okuapy Jerusalém py. Ha'e rami vy nove jaxyha'e vinte araa py ete ha'e kuery oguapypa okuapy Nhanderuete pegua oo rexei'i. Oryryi okuapy ha'e nunga káuxa, oky tuvixa va'e oiko va'e gui guive.

¹⁰ Ha'e gui ma sacerdote Esdras opu'ã vy aipoe'i ha'e kuery pe:

— Peē kuery ma penderekō vai pekuapy amboae regua kunhague re pemendaa py. Ha'e rami vy pejapo Israel kuery re hetave oī aguā ojejavya.

¹¹ Ha'e gui aŷ ma penhemombe'upa 'rā SENHOR peneramoī kuery ruete pe, pejapo ha'e oipota va'e anho. Peje'ave eme amboae yvy regua re, amboae regua kunhague re guive — he'i.

¹² Ha'e ramo ha'e kuery ombovai vy ijayvu atā reve aipoe'i okuapy:

— Ha'e rami ma ha'eve 'rā. Ndeayvua rami orekuai aguā ae ha'eve.

¹³ Ha'e ramive heta ae avi orekuai, oky vaipa ára guive. Ha'e nunga rupi nda'evei oka py nhandekuai aguā. Ha'e rami avi ha'e nunga ma peteī, mokoī ára'i guarā e'ŷ guive, mba'eta ha'e nunga py heta orekuai rojejavva'e.

¹⁴ Ha'e nunga rupi aŷ gui ma yvatekueve toikuua nhande kuery ha'e javi rekovia. Tove ára oa'angaague py ae ha'e kuerya py tou tetā ikuai va'e-va'e pygua amboae regua kunha re omenda va'ekue. Ha'e kuery reve tou avi peteī-teī tetā pygua nhomongetaa ha'e joguerekoa kuery, nhandegui Nhanderuete oipe'apa peve orerekō vaia káuxa opoxya ombou va'ekue — he'i okuapy.

¹⁵ Ha'e rami aguā Asael ra'y Jônatas ha'e Ticvá ra'y Jazeías anho ndojou porāi. Ha'e kuery reve levita regua Mesulão ha'e Sabetai avi nhomoirū.

¹⁶ Ha'e rami ae escravo ikuaiague gui ojevy va'ekue ojapo okuapy. Ha'e rami vy sacerdote Esdras oiporavo avakue hery rupi, dez jaxyha'yjypy'i araa py ha'e nunga re oikuua pota okuapy aguā. Ha'e va'e kuery ma hetarā kuery akā, nguu kuery ro pygua kuery ikuia rami omoī mbyre.

¹⁷ Ha'e rami vy peteī jaxyha'e yjypy'ia ára py oikuua potapa ma okuapy amboae regua kunhague re avakue omenda va'ekue re.

¹⁸ Ha'e gui sacerdote ramymino kuery va'e regua kunhague amboae regua re omenda va'ekue ma ojou okuapy pova'e: Jozadaque ra'y Jesua ramymino kuery ha'e tyvy kuery va'e regua ma Maaséias, Eliézer, Jaribe ha'e Gedalias.

¹⁹ Ha'e va'e kuery ma jopopyy reve jogueroayvu okuapy kunhague omondoukapa aguã re. Ha'e rami vy ojejavyague re peteĩ-teĩ ome'ẽ okuapy peteĩ vexa'i ikora py oguerekva'ekue gueko vaiague rekovia.

²⁰ Imer ramymino kuery va'e regua ma Hanani ha'e Zebadias.

²¹ Harim ramymino kuery va'e regua ma Maaséias, Elias, Semaías, Jeiel ha'e Uzias.

²² Pasur ramymino kuery va'e regua ma Elionai, Maaséias, Ismael, Natanael, Jozabade ha'e Elasa.

²³ Ha'e gui levita kuery va'e regua ma Jozabade, Simei, Quelaías hery mboae va'e Quelita, Petaías, Judá ha'e Eliézer.

²⁴ Oporaei va'ety kuery va'e regua ma Eliasibe. Okẽ rarõa kuery va'e regua ma Salum, Telém ha'e Uri.

²⁵ Ha'e gui Israel kuery va'e regua ju. Parós ramymino kuery va'e regua ma Ramias, Jezias, Malquias, Miamim, Eleazar, Malquias ha'e Benaia.

²⁶ Elão ramymino kuery va'e regua ma Matanias, Zacarias, Jeiel, Abdi, Jerimote ha'e Elias.

²⁷ Zatu ramymino kuery va'e regua ma Elionai, Eliasibe, Matanias, Jerimote, Zabade ha'e Aziza.

²⁸ Bebai ramymino kuery va'e regua ma Joanã, Hananias, Zabai ha'e Atlai.

²⁹ Bani ramymino kuery va'e regua ma Mesulão, Maluque, Adaías, Jasube, Seal ha'e Jerimote.

³⁰ Paate-Moabe ramymino kuery va'e regua ma Adna, Quelal, Benaia, Maaséias, Matanias, Bezalel, Binui ha'e Manassés.

³¹ Harim ramymino kuery va'e regua ma Eliézer, Issias, Malquias, Semaías, Simeão,

³² Benjamim, Maluque ha'e Semarias.

³³ Hasum ramymino kuery va'e regua ma Matenai, Matatá, Zabade, Elifelete, Jeremai, Manassés ha'e Simei.

³⁴ Bani ramymino kuery va'e regua ma Maadai, Anrão, Uel,

³⁵ Benaia, Bedias, Queluí,

³⁶ Vanias, Meremote, Eliasibe,

³⁷ Matanias, Matenai, Jaasai,

³⁸ Bani, Binui, Simei,

³⁹ Selemias, Natã, Adaías,

⁴⁰ Macnadbai, Sasai, Sarai,

⁴¹ Azarel, Selemias, Semarias,

⁴² Salum, Amarias ha'e José.

⁴³ Nebo ramymino kuery va'e regua Jeiel, Matitias, Zabade, Zebina, Jadai, Joel ha'e Benaia.

⁴⁴ Ha'e va'e kuery ha'e javive ma amboae regua kunhague gua'yxyrã ogueraa va'ekue meme, amongue ma kunhague re ta'y va'ekue guive.

Neemias rekokue oĩa Esdras rekokue oĩa

Kova'e kuaxia re ma oĩ Israel kuery Babilônia py escravo-rã ogueraa pyre oyvy re ju ojevy va'ekue rekokue. Mba'eta huvixave Babilônia re opena va'e ae omondouka. Po rami ipara oiny: “Peteĩ ma'etý re ma Pérsia pygua huvixa Ciro oĩ jave py Senhor ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka povae ayvu, ombopara uka guive. Ha'e vy aipoe'i uka: ‘Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py. Ha'e nunga rupi ixupergua pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae', he'i” (1.1-3).

Ha'e gui ma omombe'u ha'e kuery oguataague, Jerusalém tetã py ovaëague, templo omoatyrô aguã omboypyague, hovaigua kuery omombytu'u ranheague, ojapopaague, ha'e gui oguerovy'aague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrôa rupi. Ijayvu avi heta va'e kuery gueko vaia gui ojepe'a aguã rami.

Jerusalém tetã re Neemias ojerureague

¹ Hacalias ra'y Neemias ayvu oĩa. Ha'e gui vinte ma'etýa re, jaxy Quisleu 'ea jave py, Susã py huvixa ro imbaraete va'e oĩ va'e py xee aiko jave

² ou xervyv Hanani. Avakue Judá yvy gui ou va'ekue reve ovaë. Ha'e rã ha'e kuery pe aporandu judeu kuery oo jepe rã escravo-rã ndogueraai va'ekue re. Jerusalém tetã re voi aporandu.

³ Ha'e ramo ombovai:

— Escravo-rã ndogueraapaaai va'ekue ha'e py ae teri ikuai huvixa openaa yvy re. Ha'e va'e kuery ma ojexavai okuapy karuai gui, nda'ija'eai guive. Ha'e gui Jerusalém tetã kora ma oitypaa, hokẽ ikuai va'e voi oapypaa — he'i okuapy.

⁴ Ha'e ramigua aendu vy ajae'o ainy. Mbovy ára re rei e'ý nda'evei ete aiko. Akaru e'ý re aiko reve ajerure ainy Nhanderuete yva pygua renonde py.

⁵ Ha'e vy aipoa'e:

— AÝ SENHOR, Oreruete yva pygua ndepo'akapa ha'e okyjevepy va'e! Ndereve guarã rejapo va'ekue ha'e ndeporayvua rupi reiko, nderayvu va'e kuery rejapo uka va'ekue rupi ikuai va'e ha'e javi pe.

⁶ Tove ndeapyxa toendu, nderexa tojepe'a guive, xee nerembiguai ajerurea re reikuaa pota aguã. AÝ neretonde py aí. Ara py ha'e pyávy Israel kuery nerembiguai ikuai va'e re ajerure ainy. Amombe'u guive Israel kuery nderovai ojejavy okuapyague. Mba'eta xee ha'e xeru ro pygua kuery voi rojejavy va'ekue.

⁷ Opa mba'e vai rojapo va'ekue nderovai, ndorojapoi guive rejapo uka va'ekue, ndeayvu reja va'ekue, neí reipota va'e nerembiguai Moisés rupi rejapo uka va'ekue.

⁸ Nema'endu'a ke ayvu nerembiguai Moisés pe remombe'u va'ekue re. Ha'e vy aipo're va'ekue: “Xapy'a rei peẽ kuery naxenhe'ẽ rendui ramo romoaïmba 'rã yvy regua kuery mbyte rupi.

⁹ Ha'e rami teĩ xevy pe pejevy ju vy ajapo uka va'ekue rupi peiko vy pejapo ete ri ramo yva apy rupi ete penemomboa rire teĩ ha'e gui romboatypa ju 'rã heruvy henda xerery amoĩ aguã aiporavoague py”, 're va'ekue.

¹⁰ Mba'eta kova'e kuery ma nerembiguai ikuai, nembaraetepaa ha'e ndepo'akaa rupi ndejeupe guarã reraa jepe va'ekue.

¹¹ Ha'e nunga rupi SENHOR, ndeapyxa tojapyxaka tema xee nerembiguai ajerurea re, ha'e nerembiguai kuery ov'y'a reve nderery oendu vy nemboete va'e ojerure okuapy

re. Ejapo aŷ'i ma voi xee nerembiguai ajapo taa py aiko porã aguã rami. Ava renonde py aa rã ejapo ajerurea oendu aguã rami — ha'e, mba'eta ha'e va'e jave ma huvixave karo reruaty aiko.*

2

Jerusalém tetã katy Neemias omondoukaa ague

¹ Vinte ma'etŷ re ma huvixa Artaxerxes oĩ jave, jaxy nisã 'ea py ma vinho oy'u va'erã oguerua rã ajopy vy ame'ẽ ixupe. Ha'e va'e e'ŷ mbove ma neĩ peteigueve ma voi henonde xeporiaua ndaexa ukai teri.

² Ha'e ramo huvixa aipoe'i xevy:

— Mba'e re tu nemba'eaxy vy e'ŷ nderova poriau rei ri? Ndepy'a py ae 'rã ndeporiau — he'i.

Ha'e rã xee aendu akyje etea reve

³ ambovai:

— Xeruvixa, tereikove riae! Ha'e rami avi mba'exa tu xerova re avy'aa aexa uka 'rã tetã xeramoĩ kuery rupa oĩ ivaipa teria ja, hokẽ tata py oapypaa rire guive? — ha'e.

⁴ Huvixa oporandu ju xevy:

— Mba'e nunga re tu rejerure ta xevy?

Ha'e rã Nhanderuete yva pygua pe ranhe ajerure.

⁵ Ha'e rami vy ambovai huvixa:

— Xeruvixa, ndevy pe ha'eve ramo, ha'e nerondenre py xee nerembiguai xemboaxy ri ramo ajerure Judá yvy katy xemondouka aguã re, tetã xeramoĩ kuery rupa oĩ va'e amoatyrõ ju aguã — ha'e.

⁶ Ha'e gui huvixa, ijyvýry ta'yxy oĩ avi va'e reve aipoe'i xevy:

— Raka'e peve 'rã tu nereïvei apy? Raka'e 'rã tu rejevy ju?

Ha'e rã amombe'u raka'e peve pa ha'e py aiko ha'e ajevy aguã.

⁷ Ha'e gui aipoa'eve ju huvixa pe:

— Xeruvixa, rejou porã ri vy eme'ẽ ha'vey kuaxia para Eufrates yakã rovai rupi huvixa opena va'e kuery peguarã, ha'e kuery oyvy rupi xemboaxa rã Judá yvy re avaẽ aguã.

⁸ Eme'ẽ avi kuaxia huvixa pegua ka'aguy re opena va'ety Asafe pegua, xevy yvyra ome'ẽ aguã templo kora rokẽ ytarã, tetã korarã, ha'e oo aĩ aguã ojapoa avi aguã — ha'e. Ha'e ramo huvixa ome'ẽmba xevy, xere Nhanderuete po ipo'akapa va'e oĩ ramo.

⁹ Ha'e gui ma Eufrates yakã rovai huvixa kuery openaa py avaẽ vy ha'e kuery pe amboaxa kuaxia para huvixa ogueru ruka va'ekue. Xerupive huvixa ombou avi xondaro ruvixa ha'e kavaju árygua kuery.

¹⁰ Ha'e nunga ma Horonaim pygua huvixa Sambalate ha'e hembiguai Amom guigua Tobias oikuua vy ndojou porãi. Ojou vai ete Israel kuery aipytyvõ aguã ajuague.

Heta va'e kuery tetã kora omoatyrõ ju aguã re Neemias ijayvuague

¹¹ Ha'e gui Jerusalém tetã py avaẽ vy mboapy ára re ranhe aiko rive.

¹² Ha'e gui peteĩ pytû apu'ã avy. Xerupive mbovy'i ete avi avakue oje'oi, mba'eta avave pe namombe'ui teri Jerusalém py ajapo aguã xepy'a re Xeruete omoĩ va'ekue. Mymba kuery voi ndaraai xereve, xerymba aĩa e'ŷ vy.

¹³ Pyavyve aẽ avy Yvyugua Rokẽ gui, ha'e gui Teju Jagua Yvu oĩ katy ju aa Yty Renda Rokẽ katy aa vy. Ha'e py mae ma aexa Jerusalém tetã kora ivaipaa ha'e hokẽ ikuai va'ekue tata py oapypaague.

¹⁴ Ha'e gui ma aave Yvu Rokẽ ha'e huvixa pegua yy omboty pyre peve. Ha'e rami teĩ mamove noĩ xerymba aĩa oaxa aguã.

¹⁵ Ha'e rami vy pytû teri reve aẽve avy yakã rembe rupi. Ha'e py aexave ju tetã kora oĩ va'e. Ha'e gui ajevy vy Yvyugua Rokẽ rupi aike vy xero py ju aa.

* 1:11 “Ava” he'ia ma huvixave Artaxerxes pe ae (2.1). Ha'e va'e jave huvixa karo reruaty Neemias oiko va'e vy onhembopy'a henonde guetarã kuery re ojerure aguã re. Ha'e rami aguã re ojerure ma voi Nhanderuete pe, oo vy huvixa pe ojerure aguã irundy jaxy teri oata reve.

¹⁶ Huvixa kuery ma ndoikuuai marã katy pa aa ague, neĩ mba'e pa ajapoague voi, mba'eta mba'eve rei namombe'ui teri judeu kuery pe, sacerdote kuery, yvatekueve, huvixa kuery, neĩ omba'eapo va'erã kuery pe voi.

¹⁷ Ha'e gui ma xee aipoa'e ha'e kuery pe:

— Pexa ma aŷ opa mba'e py nhandekuai axya. Jerusalém tetã ivaipa, hokẽ voi oapypaa tata py. Peju ha'vy nhamoatyrõ ju Jerusalém kora. Ha'e ramo 'rãe nanhandejoiavei — ha'e.

¹⁸ Ha'e kuery pe amombe'u avi Xeruete po ipo'akapa va'e xere oĩa ha'e huvixave xereve ijayvuague.

Ha'e ramo ha'e kuery aipoe'i:

— Ronhemoi 'rã ha'vy nhamoatyrõ aguã — he'i okuapy. Ha'e rami vy ikyre'ŷ okuapy omba'eapo porã aguã.

¹⁹ Ha'e rã Horonaim pygua huvixa Sambalate, hembiguai Amom guigua Tobias ha'e Arábia guigua Gesém ha'e nunga oikuaa vy orejojai rei okuapy. Orembojaru reia rupi aipoe'i:

— Mba'e tu pejapo ta? Tyrã pa huvixave rovai pepu'ã ta?

²⁰ Ha'e rã xee ambovai:

— Oreruete yva pygua ae oreptyvõ 'rã rojapopa aguã rami. Ha'e nunga rupi hembiguai kuery orekuai va'e ronhemoi 'rã romoatyrõmba ju aguã. Ha'e rã peẽ kuery ma ore kuery reve mba'eve rei ndaperekoi Jerusalém tetã py. Ha'e py nda'evei guive peike aguã, pendere na'ima'endu'aai rã — ha'e.

3

Tetã kora omoatyrõa rupi omba'eapo va'e kuery rery oĩa

¹ Ha'e gui sacerdote yvateve va'e Eliasibe voi onhemoi avi tyvy kuery sacerdote ikuai va'e reve Vexa'i Rokẽ omoatyrõ ju aguã. Ha'e va'e ma Nhanderuete peguarã omboaxa, ha'e hokẽrã omoi. Ha'e gui Torre dos Cem ha'e Torre Hananel pegua oĩa peve omoatyrõ heravy kora.

² Ha'e va'e kuery yvýry ma avakue Jericó guigua ju omba'eapo okuapy. Ha'e va'e kuery yvýry Inri ra'y Zacur ju omba'eapo.

³ Ha'e gui Hassenaá ra'y kuery ma omoatyrõ okuapy Pira Rokẽ 'ea. Omboytapa ma vy okẽ ju omoi, ijokoarã ferro ha'e yvyra guigua reve.

⁴ Ha'e kuery yvýry ma Urias ra'y Meremote ju omba'eapo, Coz ramymino va'e. Ha'e va'e yvýry ma Berequias ra'y Mesulão ju omoatyrõ, Mesezabel ramymino. Ha'e va'e yvýry ma Baaná ra'y Zadoque ju omoatyrõ.

⁵ Ha'e va'e kuery yvýry ma Tecoa tetã pygua kuery omoatyrõ. Ha'e rã ha'e pygua yvatekueve ma nomba'eapoxei okuapy opena va'erã oĩ va'e pe.

⁶ Ha'e gui Paséia ra'y Joiada ha'e Besodias ra'y Mesulão omoatyrõ Okẽ Ymague. Ha'e rami vy omboytapa vy omoi ju imo'amy okẽ, ijokoarã ferro ha'e yvyra guigua reve.

⁷ Ha'e va'e kuery yvýry ma Gibeão pygua Melatias ha'e Merom pygua Jadom ju omba'eapo, ha'e gui avakue Gibeão ha'e Mispa guigua, Eufrates yakã rovai huvixa oĩ va'e rembiguai ikuai va'ekue meme.

⁸ Ha'e kuery yvýry ma omba'eapo avi Haraías ra'y Uziel ouro re omba'eapo va'ety. Ha'e va'e yvýry ma Hananias ju omba'eapo, heakuã porã va'e apoa. Ha'e rami vy ha'e kuery Jerusalém rupi omoatyrõmba Kora Ipyve Va'e oĩa peve.

⁹ Ha'e va'e kuery yvýry omba'eapo avi Jerusalém tetã mbyte rupi opena va'e Hur ra'y Refaías.

¹⁰ Ijyvýry omba'eapo avi Harumafe ra'y Jedaías. Ngoo yvýry rupi ae omoatyrõ. Ha'e va'e yvýry ma Hasabnéias ra'y Hatus ju omba'eapo.

¹¹ Amboae rupi ma Harim ra'y Malquias ha'e Paate-Moabe ra'y Hassube omoatyrõ heravy, Torre Tatakua 'ea voi.

¹² Ijyvýry omba'epo avi Jerusalém tetā mbyte rupi opena va'e Haloés ra'y Salum. Guajy kuery reve omba'epo okuapy.

¹³ Ha'e gui Yvyugua Rokē omoatyrō va'e ma Hanum, Zanoa pygua kuery mboae reve. Ha'e kuery omoatyrōmba imo'amy okē, ijokoarā ferro ha'e yvyra guigua reve. Kora quattrocentos e cinqüenta metros peve omoatyrō avi, Yty Renda Rokē oĩa peve.

¹⁴ Ha'e gui Yty Renda Rokē ae ma Bete-Haquerém pygua huvixa Recabe ra'y Malquias omoatyrō. Ha'e va'e omoatyrō okē, ijokoarā ferro ha'e yvyra guigua reve.

¹⁵ Yakā Ryapy Rokē omoatyrō va'e ma Mispa pygua huvixa Col-Hozé ra'y Salum. Omoatyrōmba ma vy ojao'i. Ha'e gui okē ju omoī imo'amy, ijokoarā ferro ha'e yvyra guigua reve. Kora omoatyrōve heravy yy omboty pyre Selá py oĩ va'e yvýry rupi, huvixa mba'e yvotyty rexei, Davi rekoague katy gui tape pyrō-pyrō'a oguejy ouvy va'e peve.

¹⁶ Ha'e rire Bete-Zur pygua huvixa Azbuque ra'y Neemias ju omoatyrō heravy. Davi rupa rexei peve omoatyrō, yy omboty pyre ha'e ipy'a guaxukueve rogue rupi peve.

¹⁷ Ha'e va'e rire levita kuery ju omoatyrō okuapy Bani ra'y Reum rewegua kuery. Ha'e va'e kuery yvýry ma Queila yvy mbyte rupi opena va'e Hasabias ju omba'epo.

¹⁸ Ha'e va'e rire ma tyvy ju omba'epo, Queila yvy mbyte rupi opena va'e Henadade ra'y Bavai.

¹⁹ Ijyvýry ma Mispa pygua huvixa Jesua ra'y Ezer ju omoatyrōve heravy tembiporu moī porãaty via tape oẽ ovvy va'e rupi, kora ojerea peve.

²⁰ Ha'e va'e rire ma Zabai ra'y Baruque ju ikyre'ŷ reve omoatyrō amboae rupi, kora ojerea guive sacerdote yvateve va'e Eliasibe rorokē peve.

²¹ Ha'e va'e rire ma Urias ra'y Meremote, Coz ramymino va'e ju omoatyrō heravy Eliasibe rorokē guive hoo apy peve.

²² Ha'e va'e rire sacerdote kuery tetā rovai rupi ikuai va'e ju omba'epo.

²³ Ha'e gui ma Benjamim ha'e Hassube ju omoatyrō heravy ngoo yvýry rupi ae. Ha'e va'e kuery rire ma Maaséias ra'y Azarias ju omoatyrō, Hananias ramymino, ngoo yvýry rupi.

²⁴ Ha'e va'e rire ma Henadade ra'y Binui ju omoatyrō amboae rupi, Azarias ro guive opa ovya'i peve, kora ojerea peve ete.

²⁵ Ha'e gui opa ovya'i guive ma Uzai ra'y Palal ju omoatyrō, ha'e nhuā roka yvýry huvixa ro oĩ va'e áry torre hi'aĩ va'e guive. Ha'e va'e rire ma Parós ra'y Pedaías ju omoatyrō,

²⁶ ha'e gui templo py omba'epo va'ety kuery Ofel py ikuai va'e guive. Yy Rokē oĩa guive omoatyrō heravy kuaray oua katy, torre yvateve va'e hi'aĩa peve.

²⁷ Ha'e va'e rire ma Tecoa tetā pygua kuery amboae rupi ju omoatyrō okuapy, torre guaxu hi'aĩa guive Ofel kora oĩa peve.

²⁸ Ha'e gui Kavaju Rokē rovai guive ma sacerdote kuery ae omoatyrō heravy, peteĩ-teĩ ngoo yvýry rupi ae.

²⁹ Ha'e va'e kuery rire ma Imer ra'y Zadoque ju omoatyrō heravy ngoo yvýry rupi ae. Ha'e va'e rire ma Secanias ra'y Semaías ju omoatyrō, okē kuaray oua katyguararõa.

³⁰ Ha'e va'e rire amboae rupi omoatyrō va'e ma Selemias ra'y Hananias ha'e Zalafe ra'y mboapy memea va'e Hanum. Ha'e va'e kuery rire ma Berequias ra'y Mesulão ju omoatyrō heravy ngoo yvýry rupi ae.

³¹ Ha'e va'e rire omoatyrō va'e ma ouro re omba'epo va'ety ra'y Malquias. Ha'e va'e ma omoatyrō heravy templo py omba'epo va'ety ha'e mba'emo vendea kuery ro ikuia peve, Harõa kuery Rokē rexei rupi, kora ojerea py opy oĩa peve.

³² Ha'e gui kora ojerea py opy oĩa guive Vexa'i Rokē peve omoatyrō va'e ma ouro re omba'epo va'ety ha'e mba'emo vendea kuery.

Ngovaigua kuery jokoarā omoiague

¹ Ha'e gui kora romoatyrōmba maa Sambalate oendu vy ipoxy ete. Ivai vaipa reve ijayvu vai judeu kuery rovai.

² Guyvy kuery ha'e Samaria pygua xondaro kuery ha'e javi oendua py ijayvu. Ha'e vy aipoe'i:

— Mba'e tu peva'e judeu kuery ikangykue ojapo ta? Ha'e rami aguã ojapo ukaa 'rã ri nda'u? Mba'emo mymba ojuka vy nda'u ome'ẽ 'rã ri? Petei ára pyve'i nda'u omomba 'rã? Ita ra'ykue oapypa pyre aty gui nda'u omoatyrõve ju 'rã? — he'i.

³ Hexeve hi'añ avi Amom guigua Tobias. Ha'e vy aipoe'i avi:

— Kora ita gui anho ha'e kuery ojapo tei hi'áry mbyku rive ojeupi vy oitypa 'rã — he'i.

⁴ Oreruete, endu ke mba'eta ombojaru reipy orekuai. Ha'e kuery re ae tojeapa ju orembojaru reiaque. Escravo-rã togueraapaa guive yvy mboae katy.

⁵ Ejao'i eme ha'e kuery reko vaiague, nerенонде gui embogue eme ojejavyague, mba'eta omba'eapo va'e kuery oendua py nembopoxy okuapy.

⁶ Ha'e rami py romoatyrõ heravy kora. Ha'e vy yvatea mbyte peve rombotypa, heta va'e kuery omba'eapo aguã ikyre'ý ramo.

⁷ Ha'e rami tei Sambalate ha'e Tobias ha'e nunga oendu. Arábia guigua kuery, Amom ha'e Asdode guigua kuery avi oendu okuapy Jerusalém kora romoatyrõve tema heravya. Kora pa'ü ikuai va'ekue rombotypa rai'i maa ha'e kuery oikuua vy ivai vaipa okuapy.

⁸ Ha'e rami vy ha'e kuery petei rami ono'õmba okuapy Jerusalém tetã re opu'ã vy oremoangeko rei aguã.

⁹ Ha'e rami tei Nhanderuete pe rojerure rokuapy. Harõarã romoõ guive kuery ara py ha'e pyávy ijokoarã.

¹⁰ Ha'e gui Judá regua avakue aipoe'i:

— Mba'emo reraa kuery na'imbaraetevei ma, mba'emo ra'ykue-'ykue aty heta vai ete rã. Kora jajapopa aguã nda'eve reguai — he'i okuapy.

¹¹ Orerovaigua kuery aipoe'i avi:

— Ha'e kuery mba'eve ndoikuuai nei ndoexai 'rã ha'e va'e kuery mbyte rupi roike vy rojukapa rã. Ha'e rami vy romombytu'upa 'rã omba'eapo va'e kuery — he'i okuapy.

¹² Ha'e gui ha'e kuery yvy'iry judeu kuery hekoa va'e mbovykue rei e'ý ou vy aipoe'i orevy:

— Opa rupi ha'e kuery ikuiaia gui ou ta nhanderovai opu'ã aguã — he'i ramo

¹³ heta va'e kuery petei-tei hoo pygua ikuiaia rami amoõ kora yvy'ã guy katy teri oĩa py oarõ aguã, onhembotypa e'ý teria rupi. Kora ropy katy amombytapa imo'amy kyxe, hu'y guaxu ha'e hapa reve-reve.

¹⁴ Ha'e vy aexa potapa ma vy apu'ã reve aipoa'e yvatekueve, huvixa kuery ha'e heta va'e kuery mboae pe:

— Pekyje rei eme. Penema'endu'a tema SENHOR re, mba'eta ha'e ma ipo'akapa ha'e okyjevepy va'e. Ha'e rami vy pejoguero'a penderyvy ha'e penderyke'y kuery repya rupi, pendera'y ha'e penderajy kuery, pendera'yxy ha'e pendero ikuai va'e repya rupi guive — ha'e.

¹⁵ Ha'e gui orerovaigua kuery oendu okuapy roikuua ae maa, Nhanderuete ojoko ramo ha'e kuery ojapoxea. Ha'e ramo kora oĩa katy ju roopa, petei-tei romba'eapo aguã katy ae.

¹⁶ Ha'e va'e ára guive xerembiguai kunumigue regua mbytekue ma omba'eapo 'rã okuapy kora re, ha'e rã amboae kuery ma hu'y guaxu reve ikuai, hu'y jokoa, guyrapa ha'e pexo regua reve guive. Ha'e gui opena va'e kuery ma Judá kuery mbopy'a guaxua rupi ikuai.

¹⁷ Ha'e rã mba'emo reraa kuery ma petei-tei opo rovai py oupi 'rã mba'emo, ha'e rã hovai re ma ojopy 'rã heravy guembiporu.

¹⁸ Omba'eapo va'e kuery ha'e rami ae avi petei-tei oku'a re oguerek 'rã kyxe. Ha'e rami py omba'eapo okuapy. Ha'e rã mimby guaxu monhe'earã amoõ va'ekue ma xeyvy'iry riae oiko.

¹⁹ Aipoa'e yvatekueve, huvixa ha'e heta va'e kuery ha'e javi pe:

— Jajapo va'erã oĩ va'e ma tuvixa ete, joapy e'ý-e'ý guive. Ha'e rami avi kora áry rupi ikuai va'e ma joegui mombyry-mbyry ikuai.

²⁰ Ha'e nunga rupi mimby guaxu nhe'ẽ pendu vyve ta'vy penha reve peno'õmba orea py. Mba'eta Nhanderuete ae 'rã opu'ã nhanderepya rupi — ha'e.

²¹ Ha'e rami py tema romba'eapo. Amongue va'e ma opo py hu'y guaxu reve ikuai kuaray hexakã guive ka'aru jaxy-tata ojekuaapa peve.

²² Ha'e va'e jave ma voi aipoa'e heta va'e kuery pe:

— Peteĩ-teĩ pepyta 'rã Jerusalém tetã py ae penerembiguai kunumigue reve, pyávy tetã rarõa rupi pendekuai, ha'e gui ara py ju pemba'eapo aguã — ha'e.

²³ Ha'e gui xee neĩ namboivei xeao xejegui, xeryvy kuery, xepytyvõa kuery, neĩ avakue tetã rarõa xerupive ikuai va'e ma voi. Peteĩ-teĩ roke rojupy orerembiporu reve.

5

Peráta omboekovia retave e'ŷ aguã re ijayvuague

¹ Ha'e rami teĩ heta va'e kuery kunhague reve ojapukai okuapy guyvy kuery judeu regua rovai.

² Ha'e vy amongue aipoe'i:

— Orereta raxa rima, orera'y ha'e orerajy kuery reve. Ha'e rami vy peme'ẽ na trigo ro'u va'erã rokuave'i aguã — he'i.

³ Ikuai avi aipoe'i va'e:

— Oreyvy, oremba'ety uva ha'e orero voi jopo py romboaxa ma trigo rekovia, kova'e karuai gui — he'i.

⁴ Ha'e gui ikuative ju aipoe'i va'e:

— Peráta orevy oiporukaa va'ekue orevy ha'e uvaty regua imposto ropaga aguã.

⁵ Oreryvy kuery reve pete'i to'o orekuai, orera'y kuery voi ha'e kuery ra'y kuery rami ae avi heko porã va'e. Ha'e rami teĩ ne'ixa, orera'y ha'e orerajy kuery romboaxa ma oreryvy kuery escravo-rã. Orerajy kuery va'e regua ma ogueraa ma escravo-rã. Ndorepo'akavei ma guive rogueru ju aguã, mba'eta oremba'ety ha'e uvaty ma jopo py opyta — he'i okuapy.

⁶ Ha'e rami ete ha'e kuery ojapukai reve ijayvu ramo aendu vy xeporiau vaipa.

⁷ Ha'e rami vy xee ae aikuua pota porã ma vy xeayvu ete yvatekueve ha'e huvixa kuery pe. Ha'e vy ha'e kuery pe aipoa'e:

— Peẽ kuery tu peteĩ-teĩ penderyvy kuery pe mba'emo peiporuka rire pemboekovia retave rima — ha'e.

Ha'e gui ma ha'e kuery ikuaria re aikuua pota aguã ajapo nhemboaty guaxu.

⁸ Ha'e vy aipoa'e ha'e kuery pe:

— Ore ma mba'emo rojou va'ekue re rojogua ju oreryvy kuery judeu ikuai va'e yvy regua kuery pe ovendeague gui. Ha'e rã peẽ ju ri ty'y penderyvy kuery pevende ta joupe, ore ju rojogua aguã? — ha'e.

⁹ Ha'e rami rã ha'e kuery okyrirõmba okuapy nombovai kuaai vy. Ha'e ramo aipoa'e ju:

— Peẽ kuery pejapo va'e ma ha'eve e'ŷ. Nda'evei ri ty'y Nhanderuete renonde pejererokyje aguã, amboae regua nhanderovaigua ikuai va'e nhanembojaru rei e'ŷ aguã?

¹⁰ Ha'e gui xee voi, xeryvy kuery ha'e xerembiguai kunumigue reve ha'e kuery pe roiporuka avi peráta ha'e trigo. Ha'e rami teĩ nhamboekovia retave eme jaiporuka va'ekue áryve.

¹¹ Ha'e nunga rupi aŷ'i ma voi peẽ kuery peme'ẽ ju ha'e kuery yvy, uvaty, oliveira ty ha'e hoo peipe'a va'ekue. Peme'ẽmba avi peráta pemboekovia retaveague, trigo, uvaty ha'e azeite ha'e kuery gui peipe'a va'ekue — ha'e.

¹² Ha'e ramo ombovai okuapy:

— Ha'e kuery pe rome'ẽmba ju 'rã ha'vy, ndorojerurevei ma 'rã guive. Ndee aipo'rea rami ae 'rã rojapo — he'i okuapy. Ha'e ramo aenoĩ avi sacerdote kuery, ha'e vy ajapo ha'e kuery oura aguã rami ha'e va'e ayvu ojapo avi aguã.

Neemias ojapo porãa re ijayvuague

¹³ Ha'e gui xeao ambovava ratã reve aipoa'e:

— Nami avi Nhanderuete tojapo, tombovava imondovy ava oayvuague ojapopa e'ŷ va'e. Ixugui toipe'apa hoo ha'e ombo'eapoa rupi ojou va'e ha'e javi — ha'e.

Ha'e ramo ijaty va'e kuery ha'e javi ombovai vy

— Ha'eve va'e! — he'i okuapy. Ha'e vy omboete okuapy SENHOR. Ha'e rire ma ha'e kuery ojapo oayvuague.

¹⁴ Ha'e gui ma Judá yvy rupi opena va'erā xemoīague ára guive, Artaxerxes huvixa oĩ vinte ma'etŷa guive trinta e dois ma'etŷa peve, ha'e javi vy doze ma'etŷ re aĩ jave ma xee neĩ xeryvy kuery voi ndoro'ui tembi'u huvixa peguarã xevy ome'ëa va'ekue gui.

¹⁵ Ha'e rã yma huvixa kuery xee aĩ e'ŷ mbove ikuai va'ekue ma heta va'e kuery ojavyky rei vy ha'e kuery gui oipe'apa va'ekue tembi'u ha'e vinho, quarenta hatã'i va'e prata guigua guive. Hembiguai kuery kunumigue voi oguerekó rei va'ekue heta va'e kuery. Ha'e rã xee ma ha'ekue rami ndajapoi Nhanderuete renonde ajererokyje vy.

¹⁶ Ha'e rami 'rãgue py tetã kora re ombo'eapoa py xee voi amoatyrõ aikovy. Neĩ peteĩ henda py ma voi ndajoguai xeyvyrã. Xerembiguai kunumigue voi ono'õmba ha'e py ombo'eapo avi aguã.

¹⁷ Ha'e rami ae avi xero py amovaẽ cento e cinqüenta avakue judeu regua huvixa kuery reve ou va'ekue, ha'e gui orea py yvy regua oreqvýry rupi hekoia va'e kuery ou rã amovaẽmba avi imbokuapy.

¹⁸ Ára nhavõ ha'e kuery ho'u va'erã ajuka uka 'rã peteĩ vaka ha'e mboapy meme vexa'i oiporavo pyre. Uru ma heta ajuka uka avi, ha'e gui dez araa py nhavõ ajogua reta avi vinho joequa e'ŷ-e'ŷ. Ha'e rã tembi'u huvixa peguarã ome'ëa va'ekue ma xee ndajopyi xejeupe ae, kova'e kuery pe mba'emo ome'ë ucaa reta ae ma ramo.

¹⁹ Ha'e nunga rupi Xeruete, nema'endu'a ke xere xemoingo porã aguã, kova'e kuery pe ajapo porã aikovya ha'e javi re.

6

Hovaigua kuery omongyjea rupi ijayvu okuapyague

¹ Ha'e gui Sambalate, Tobias, Arábia pygua Gesém ha'e orerovaigua kuery ha'e javi oendupa okuapy kora romoatyrõmba maa, mba'eta nda'ipovei ma kora pa'ũ ikuai va'ekue, ha'e va'e jave kora rokẽ noromoĩ teri teĩ.

² Ha'e rami vy Sambalate aipoe'i uka xevy:

— Eju ke orerovaexĩ Ono yvyugua py tekoia oĩa py — he'i, mba'emo vai xevy ojapoxe vy rive.

³ Ha'e ramo ha'e kuery pe amondouka po rami omombe'ua aguã:

— Xee ndaa reguai teve, mba'emo tuvixa va'e rojapo rokuapy ramo. Mba'e re tu amba'eapoa gui apytu'upa ta, peẽ kuerya katy aa aguã rive? — ha'e uka.

⁴ Irundykue ha'e kuery xerenoĩ uka ha'ekue rami ae. Ha'e rã xee voi ha'ekue rami ae tema ambovai.

⁵ Ha'e gui peteĩ nhiruíguea ma xea py Sambalate ombou guembiguai opo py kuaxia para omboja pyre'ŷ ogueraa va'e.

⁶ Ha'e va'e re ma po rami oĩ:

“Yvy regua kuery ikuiaia rupi oendu ndee ha'e judeu kuery ha'e javi reve nhanderuixave re pepu'axe vy rive pemoatyrõ tetã kora. Gesém voi ha'e rami ae omombe'u. Ha'e kuery oikuua rami vy ma je ndee ae reixe ha'e kuery ruvixarã.

⁷ Ha'e rami aguã vy rive ae ma je profeta kueryrã remoĩ Jerusalém py, nderekorã re ijayvu vy ‘Ha'e va'e ma Judá pygua ruvixa’, he'iarã. Ha'e rami ha'e kuery ijayvua omombe'ua rã nhanderuvixave avi 'rã oendu. Eju vyvoi ha'vy ha'e nunga re jajogueroayvu aguã”, he'i uka xevy.

⁸ Ha'e ramo xee aipoa'e uka ju:

— Ndeayvuague ma neĩ teigue ma ndoikoi. Neakã gui rive rima ndeayvu — ha'e uka.

⁹ Ha'e kuery oremongyje reixe tema okuapy, mba'eta aipoe'i:

— Ha'e kuery ojepe'a 'rā ombo'eapoa gui, ombo'eapoague gui mba'eve oiko e'ŷ aguā rami — he'i. Ha'e nunga rupi Xeruete, xemombaraete ke aŷ.

¹⁰ Ha'e gui ma aa Semaías ro py. Ha'e va'e Delaías ra'y, Meetabel ramymino, ngoo py ae onhemboty va'ekue. Ha'e gui ha'e va'e aipoe'i xevy:

— Jaa na Nhanderuete pegua oo py, ha'e templo ropy apy katy nhaï. Templo rokē ma nhamboty porā 'rā. Mba'eta pyávy oua 'rā ndejukaarā — he'i.

¹¹ Ha'e ramo xee aipoa'e:

— Ha'e rami avi ava xee ramigua teve onha 'rā? Mava'e tu xee ramigua oike 'rā templo ropy oikove aguā? Xee ndaikei 'rā neĩ peteīgueve — ha'e.

¹² Ha'e rami xeayvu mba'eta aikuaa Nhanderuete e'ŷ ae ha'e va'e ayvu mbouare. Ixupe Sambalate ha'e Tobias peráta ome'ẽ rire rive ha'e rami ijayvu xerekorā re.

¹³ Xemongyje reixe vy rive peráta ome'ẽ, xee ha'e ramia py ajejavy aguā, ha'e kuery xemboetea rupi e'ŷ ijayvu aguā.

¹⁴ Ha'e nunga rupi Xeruete, nderexarai eme Tobias ha'e Sambalate ojapo vaiague re. Eikuua pota avi profeta kunha Noadia ha'e profeta ramigua mboae kuery re, xemongyje reia rupi ijayvu okuapy rā.

Tetā kora omoatyrōmba ma okuapyague

¹⁵ Tetā kora rojapopa aguā ma cinqüenta e dois ára re romba'eapo, jaxya elul 'epy va'e re vinte e cinco araa peve.

¹⁶ Ha'e nunga orerovaigua kuery oendupa vy yvy regua kuery orevvýry rupi ikuai va'e ha'e javi okyjepa rei, okangya anho oendu okuapy, mba'eta oikuaa nho Nhanderuete po'akaa rupi ha'e nunga rojapopaague.

¹⁷ Ha'e va'e javé py Judá regua yvatekueve voi heta ombopara kuaxia Tobias pe ogueraa uka va'e, ha'e Tobias ju ha'e kuery pe kuaxia ombopara avi.

¹⁸ Mba'eta Judá py mbovy e'ŷ ikuai Tobias pe ikuai aguā re oura va'ekue, Ará ra'y Secanias rajy me oiko ramo. Ha'e gui ta'y Joanā ma Mesulão rajy Berequias ramymino re omenda va'e.

¹⁹ Ha'e kuery ma xee aendua py ijayvu okuapy mba'emo porā Tobias ojapo re. Ha'e rami avi xeayvuague ju 'rā omombe'ua ixupe. Heta ma Tobias ombopara kuaxia xemongyje aguā.

7

Jerusalém tetā rarōarā kuery Neemias omoīague

¹ Ha'e gui tetā kora rojapopa ha'e okē romoīmba ma rire amoī okē rarōarā kuery, oporaei va'erā ha'e levita kuery.

² Jerusalém tetā re opena va'erā ma mokoī amoī: xeryvy Hanani ha'e huvixa ro re opena va'ety Hananias reve. Hananias ma Nhanderuete renonde ojererokyjea rupi oiko, amboae kuery gui ojerovia pyve guive.

³ Ha'e gui ha'e kuery mokoīve pe xee aipoa'e:

— Peipe'a uka eme Jerusalém kora rokē kuaray hakupa porā e'ŷa ja. Ha'e gui ka'aru'i pemboty ju 'rā imoiny okē rarōa kuery ikuai teria ja, ijokoa pemoī guive. Pemoī avi Jerusalém py hekoa va'e kuery harōarā, peteī-teī omoīague py toarō ngoo rexei rupi ae — ha'e,

⁴ mba'eta tetā ma tuvixa va'eri mboapy'i orekuai ha'e py. Oo ikuai va'erā ma mbovy'i ete teri ojapoa.

Esdras 2.1-70

⁵ Ha'e gui xepy'a re Nhanderuete omoī amboatypa aguā yvatekueve, huvixa ha'e heta va'e kuery ha'e javi, tery ambopara uka aguā hamymino kuery rery oīa rami. Ha'e rami vy ajou kuaxia jypy'i ojevy va'ekue rery oīa. Ha'e va'e re ma po rami oī:

⁶ Po rami ma yvy mboae re escravo-rā ogueraa ague gui ojevy ju va'ekue rery. Ha'e va'e kuery ma Babilônia pygua huvixa Nabucodonosor escravo-rā ogueraa uka va'ekue ri ojevypa ju Jerusalém tetā ha'e Judá yvy katy, peteī-teī guekoague py ae.

- ⁷ Ha'e va'e kuery ma Zorobabel reve ojevy va'ekue, ha'e gui Jesua reve, Neemias, Azarias, Raamias, Naamani, Mordecai, Bilsã, Misperete, Bigvai, Neum ha'e Baaná reve. Pova'e ma Israel kuery va'e regua avakue meme.
- ⁸ Parós ramymino kuery va'e regua ma dois mil e cento e setenta e dois ojevy.
- ⁹ Sefatias ramymino kuery ma trezentos e setenta e dois.
- ¹⁰ Ara ramymino kuery ma seiscentos e cinqüenta e dois.
- ¹¹ Paate-Moabe, Jesua ha'e Joabe ramymino kuery ma dois mil oitocentos e dezoito.
- ¹² Elão ramymino kuery ma mil duzentos e cinqüenta e quatro.
- ¹³ Zatu ramymino kuery ma oitocentos e quarenta e cinco.
- ¹⁴ Zacai ramymino kuery ma setecentos e sessenta.
- ¹⁵ Binui ramymino kuery ma seiscentos e quarenta e oito.
- ¹⁶ Bebai ramymino kuery ma seiscentos e vinte e oito.
- ¹⁷ Azgade ramymino kuery ma dois mil trezentos e vinte e dois.
- ¹⁸ Adonicão ramymino kuery ma seiscentos e sessenta e sete.
- ¹⁹ Bigvai ramymino kuery ma dois mil e sessenta e sete.
- ²⁰ Adim ramymino kuery ma seiscentos e cinqüenta e cinco.
- ²¹ Ater ha'e Ezequias ramymino kuery ma noventa e oito.
- ²² Hasum ramymino kuery ma trezentos e vinte e oito.
- ²³ Bezai ramymino kuery ma trezentos e vinte e quatro.
- ²⁴ Harife ramymino kuery ma cento e doze.
- ²⁵ Gibeão ramymino kuery ma noventa e cinco.
- ²⁶ Avakue Belém ha'e Netofa guigua ma cento e oitenta e oito.
- ²⁷ Avakue Anatote guigua ma cento e vinte e oito.
- ²⁸ Avakue Bete-Azmavete guigua ma quarenta e dois.
- ²⁹ Avakue Quiriate-Jearim, Cefira ha'e Beerote guigua ma setecentos e quarenta e três.
- ³⁰ Avakue Ramá ha'e Geba guigua ma seiscentos e vinte e um.
- ³¹ Avakue Micmás guigua ma cento e vinte e dois.
- ³² Avakue Betel ha'e Ai guigua ma cento e vinte e três.
- ³³ Avakue Nebo mboae guigua ma cinqüenta e dois.
- ³⁴ Elão mboae guigua ramymino kuery ma mil duzentos e cinqüenta e quatro.
- ³⁵ Harim guigua ramymino kuery ma trezentos e vinte.
- ³⁶ Jericó guigua ramymino kuery ma trezentos e quarenta e cinco.
- ³⁷ Lode, Hadide ha'e Ono guigua ramymino kuery ma setecentos e vinte e um.
- ³⁸ Senaá guigua ramymino kuery ma três mil novecentos e trinta.
- ³⁹ Ha'e gui sacerdote kuery ju: Jedaías ramymino kuery Jesua ramymino ikuai va'e ma novecentos e setenta e três.
- ⁴⁰ Imer ramymino kuery ma mil e cinqüenta e dois.
- ⁴¹ Pasur ramymino kuery ma mil duzentos e quarenta e sete.
- ⁴² Harim ramymino kuery ma mil e dezessete.
- ⁴³ Ha'e gui levita kuery ju: Jesua, Cadmiel ha'e Hodeva ramymino kuery ma setenta e quatro.
- ⁴⁴ Oporai va'ety kuery: Asafe ramymino kuery ma cento e quarenta e oito.
- ⁴⁵ Okẽ rarõa kuery: Salum, Ater, Talmom, Acube, Hatita ha'e Sobai ramymino kuery ma cento e trinta e oito.
- ⁴⁶ Templo py ombo'eapo va'ety kuery ma Zia ramymino kuery, Hasufa, Tabaote,
- ⁴⁷ Queros, Sia, Padom,
- ⁴⁸ Lebana, Hagaba, Salmai,
- ⁴⁹ Hanã, Gidel, Gaar,
- ⁵⁰ Reaías, Rezim, Necoda,
- ⁵¹ Gazão, Uzá, Paséia,
- ⁵² Besai, Meunim, Nefusesim,
- ⁵³ Baquebuque, Hacufa, Harur,
- ⁵⁴ Bazlite, Meída, Harsa,

⁵⁵ Barcos, Sísera, Tama,

⁵⁶ Nesias ha'e Hatifa ramymino kuery guive.

⁵⁷ Salomão rembiguai kuery ramymino kuery ma Sotai ramymino kuery, Soferete, Perida,

⁵⁸ Jaala, Darcom, Gidel,

⁵⁹ Sefatias, Hatil, Poquerete-Hazebaim ha'e Amom ramymino kuery guive.

⁶⁰ Templo py omba'epo va'ety kuery Salomão rembiguai ramymino kuery reve ha'e javi vy ma trezentos e noventa e dois.

⁶¹ Pova'e kuery ma Tel-Melá gui ojevy va'ekue, ha'e Tel-Harsa, Querube, Adom ha'e Imer gui teĩ ndoikuuai ae tema Israel regua ikuai:

⁶² Delaías, Tobias ha'e Necoda ramymino kuery ma seiscentos e quarenta e dois ikuai.

⁶³ Sacerdote kuery ha'e rami ae avi: Habaías, Coz ha'e Barzilai ramymino kuery ikuai. Ha'e va'e Barzilai ma Gileade pygua rajy re omenda rire hery rupi ae oenoña.

⁶⁴ Ha'e kuery ma kuaxia para tery oña re guery oeka teĩ ndojou okuapy. Ha'e nunga rupi nda'evei sacerdote ikuai aguã, ha'eve va'e ndoikoi va'e vy.

⁶⁵ Ha'e ramo ha'e kuery pe huvixa aipoe'i tembi'u iky'a e'ŷ va'e ho'u e'ŷ aguã, sacerdote Urim ha'e Tumim reveyguo oiko e'ŷa ja.

⁶⁶ Ha'e va'e kuery ha'e javi vy ma quarenta e dois mil trezentos e sessenta ikuai,

⁶⁷ hembigui avakue ha'e kunhague jaipapa e'ŷ re. Ha'e va'e kuery ju ma sete mil trezentos e trinta e sete ikuai. Ikuai avi duzentos e quarenta e cinco oporaei va'ety avakue ha'e kunhague.

⁶⁸ Ha'e kuery rympba kavaju ma setecentos e trinta e seis oguereko. Ha'e rã hymba mburika ma duzentos e quarenta e cinco ikuai.

⁶⁹ Hymba camelo ma quatrocientos e trinta e cinco. Mburiaka'i ma seis mil setecentos e vinte ha'e javi vy.

Templo reguarã ome'ẽ okuapyague

⁷⁰ Ha'e gui hetarã kuery akã ikuai va'e regua ma mba'emo ome'ẽ okuapy omba'epo va'e kuery peguarã. Huvixa ma mil hatã'i va'e ouro guigua ome'ẽ omoõ porãaty py, cinqüenta hy'a ha'e quinhentos e trinta ao puku sacerdote pegua guive.

⁷¹ Ha'e rã hetarã kuery akã mboae ma omoõ porãaty py ome'ẽ avi vinte mil hatã'i va'e ouro guigua, ha'e dois mil e duzentos prata guigua tuvixakueve va'e.

⁷² Heta va'e kuery mboae ma hatã'i va'e ouro guigua ome'ẽ vinte mil, ha'e dois mil prata guigua tuvixakueve va'e, sessenta e sete ao puku sacerdote pegua guive.

⁷³ Ha'e gui sacerdote kuery, levita, okẽ rarõa, oporaei va'ety, heta va'e kuery regua, templo py omba'epo va'ety ha'e Israel kuery ha'e javi ma guekoague py ae ju ikuai.

8

Heta va'e kuery oendua py Neemias lei ogueroayvuague

¹ Ha'e gui sete jaxyo py Israel kuery guekoa py ikuiaia gui ou vy peteĩ'i rami ono'õmba okuapy tetã mbyte py Yy Rokẽ oĩ va'e yvýry. Ha'e rami vy lei re nhombo'e va'ety Esdras pe ojерure okuapy kuaxia Israel kuery peguarã lei oña ogueru aguã, Moisés pe SENHOR ombopara uka va'ekue ae.

² Ha'e ramo heta va'e kuery ijatya py sacerdote Esdras ogueru lei. Avakue ha'e kunhague ikuai, ha'e javi oendu kuaa va'e reve. Ha'e va'e ára ma sete jaxyo, jypy'ia ára.

³ Ha'e gui ma Yy Rokẽ rexei tetã mbyte py Esdras ogueroayvu ho'amy kuaxia lei oña, ko'ẽmba'i guive kuaray mbyte peve ogueroayvu, avakue, kunhague ha'e ha'e javi oendu kuaa va'e pe. Kuaxia lei oña ogueroayvu rã heta va'e kuery ojapyxaka porã okuapy.

⁴ Lei re nhombo'e va'ety Esdras ma hendarã yvýra gui ha'e va'e ára pyguarã ae ojapo pyre áry hi'aĩ. Oiporu kuaa regua re ikuai avi Matitias, Sema, Anaías, Urias, Hilquias ha'e Maaséias. Ha'e rã ijaxua re ma Pedaías, Misael, Malquias, Hasum, Hasbadana, Zacarias ha'e Mesulão ikuai.

⁵ Ha'e gui ma heta va'e kuery áry Esdras hi'aña py oipe'a kuaxia pavẽ oexaa py. Oipe'a ramove heta va'e kuery opu'ãmba okuapy.

⁶ Ha'e ramo Esdras omboete SENHOR Nhanderuete ipo'akapa va'e. Ha'e ramo heta va'e kuery ha'e javi ombovai vy

— Amém, amém — he'i okuapy opo oupi reve. Ha'e rami vy ojero'a reve SENHOR omboete okuapy, ngova yvy katy omoñ reve.

⁷ Ha'e ramo Jesua, Bani, Serebias, Jamim, Acube, Sabetai, Hodias, Maaséias, Quelita, Azarias, Jozabade, Hanã ha'e Pelaías levita kuery ombo'e okuapy heta va'e kuery lei re. Ha'e ramia ja heta va'e kuery ikuaria py ae optya okuapy.

⁸ Pavẽ oendu kuaa aguã rami ogueroayvu okuapy Nhanderuete guigua lei. Omombe'u porâve guive ogueroayvu rã heta va'e kuery oendu kuaa porãmba aguã rami.

⁹ Lei regua ayvu heta va'e kuery ha'e javi oendu vy ojae'opa okuapy. Ha'e ramo huvixa Neemias, lei re nhombo'e va'ety sacerdote Esdras ha'e levita kuery omongoeta vy aipoe'i ha'e kuery pe:

— Kova'e ára ma SENHOR Nhanderuete peguarã ae nhamboaxa va'ekue. Ha'e nunga rupi pendeporiau eme, pejae'o eme — he'i.

¹⁰ Aipoe'ive ju:

— Tapeo, pe'u xo'o ikyrave va'e, pey'u yre'ẽ, ha'e peraa uka oguerek e'ŷ'i va'e-va'e pe ho'u va'erã. Mba'eta kova'e ára ma SENHOR Nhanderuete pegua. Ha'e nunga rupi pendeporiau eme, mba'eta Nhanderuete guigua vy'aa oĩ penembaraeterã — he'i.

¹¹ Levita kuery voi heta va'e kuery omokyririmbã vy aipoe'i:

— Pekyrirí, mba'eta kova'e ára ma SENHOR pegua. Pendeporiau eme pekuapy — he'i okuapy.

¹² Ha'e ramo heta va'e kuery ngoo rupi ae ju oo okaru ha'e oy'u aguã, ha'e oguerek e'ŷ'i va'e kuery pe tembi'u ogueraa uka avi. Ha'e rami vy ov'y'a porãmba rei okuapy, ayvu oendu va'ekue omombe'ua porâve rã oikuaa porã rire.

Oguy'i py ikuai aguã regua ngaru ojapo okuapyague

¹³ Ko'ẽ jevy lei re nhombo'e va'ety Esdras oña py hetarã kuery akã ikuai va'e ha'e javi onhemboatypa ju okuapy sacerdote ha'e levita kuery reve, lei regua ayvu oikuaa porãvexe vy.

¹⁴ Ha'e rami vy lei Moisés pe SENHOR ombopara uka va'ekue re ojou imoiny sete jaxy regua ngaru oiko jave Israel kuery oguy'i py ikuai aguã.

¹⁵ Ha'e ramo Jerusalém ha'e tetã ha'e javi rupi oje'oi vy omombe'u. Ha'e vy aipoe'i:

— Tapeo yvyty ikuai va'e rupi, peru oliveira rogue, zambujeiro, murta, pindo ha'e yvyra hovana va'e rogue, ipara oña rami vy oguy'i pejapo aguã — he'i.

¹⁶ Ha'e ramo ha'e kuery oje'oi vy mba'emo rogue ogueru vy ojapo imoiny oguy'i ikuai aguã. Petei-tei ojapo ngoo ao'ia áry, ha'e'ŷ vy ngoka py, Nhanderuete pegua roka py mba'e, e'ŷ vy tetã mbyte py Yy Roké ha'e Efraim Roké avi va'e rexei.

¹⁷ Escravo ikuaiague gui ojevy va'ekue ha'e javi oguy'i ojapo vy ikuai ha'e py. Teigueve ma voi ha'e ramigua Israel kuery ndojapoi va'e teri Num ra'y Josué oikoa guive ha'e va'e ára peve. Ha'e rami vy ov'y'a porãmba rei okuapy.

¹⁸ Ko'ẽ nhavõ tema Esdras ogueroayvu kuaxia Nhanderuete guigua lei oña, jypy'ia ára guive opa peve. Sete ára re okaru okuapy. Ha'e gui oito araa py ma ipara oña rami vy oiko nhemboaty iky'a e'ŷ va'e.

Ojejavya omombe'u ha'e ojeko rerova okuapyague

¹ Ha'e va'e jaxy re vinte e quatro araa py ma Israel kuery onhemboaty ju. Okaru e'ŷ re ikuai, voxá vaikue py rive onhemonde okuapy, o'áry yvy ku'i omoñ reve.

² Israel kuery amboae regua kuery gui oja'opa vy opu'ãmba reve omombe'upa okuapy ojejavya, guamoñ kuery ojejavyague guive.

³ Três horas re opu'āmba okuapy jave ha'e kuery pe ogueroayvua kuaxia SENHOR Nguuete guigua lei oĩa. Ha'e gui três horas re ju ojejavya omombe'upa ha'e SENHOR Nguuete omboete okuapy.

⁴ Ha'e gui levita kuery ikuai aguã pyrõa oĩ va'e áry ma Jesua, Bani, Cadmiel, Sebanias, Buni, Serebias, Bani ha'e Quenani opu'ã vy ojapukai atã okuapy SENHOR Nguuete pe.

⁵ Ha'e rami vy levita kuery Jesua, Cadmiel, Bani, Hasabn  ias, Serebias, Hodias, Sebanias ha'e Peta  as aipoe'i okuapy:

— Pepu'āmba ke, pemboete SENHOR Penderuete imar   e'   va'e raka'e r   peve guar  .

Ha'e ramo heta va'e kuery aipoe'i okuapy:

— Tove nderery ima'endu'a por  mby toiko hexak  mba va'e, orema'endu'aa ha'e romboetea ha'e javi gui yvateve va'e vy.

⁶ Mba'eta ndee anho SENHOR reiko. Rejapo raka'e yva yvate oĩ va'e hexe ikuai va'e ha'e javi reve, yvy ha'e ye'   voi hexe ikuai va'e ha'e javi reve. Ha'e nunga ha'e javi moingovea ma ndee ae reiko. Ha'e ramo yva re ikuai va'e nemboete okuapy.

⁷ Ndee SENHOR Oreruete, ndejeupe guar   Abr  o reiporavo vy reipe'a raka'e caldeu kuery rekoia Ur gui. Ha'e vy remboery ju Abra  o.

⁸ Nerenonde py ojeroviapy oiko aguã ipy'a re o  a reikuua vy ixupe rejapo raka'e nderupive guar  , hamymino kuery pe reme'   aguã yvy cananeu kuery, heteu, amorreu, ferezeu, jebuseu ha'e girkaseu kuery ikuia. Ndeayvuague rejapopa guive, nderekopor   va'e vy.

⁹ Ha'e rami vy Egito yvy re oreramo   kuery ojexavai r   rexâ raka'e, rendu guive Ye'   Pyt  a yv  ry ojapukai okuapy r  .

¹⁰ Ha'e rami vy huvixa Fara   rovai rejapo oikuua pyr   ha'e ndepo'akaa regua, hembigui kuery ha'e ijyvy re ikuai va'e rovai, mba'eta reikuua ae onhemboyvate reia rupi ndevyguia kuery oguerekia. Ha'e rami vy rejapo nderery re ima'endu'aa aguã rami, a  y peve roexaa rami.

¹¹ Ha'e kuery renonde remboja'o avi ye'  , yvy piru rupi oaxa aguã. Ha'e r   hakykue monhaa kuery ma yy typyvea py remombopa, yy oxyry atã reia py ita oike vyvoi va'e rami.

¹² Ara py ndevyguia kuery reraa pete   arai hi'a   va'e py, ha'e gui py  vy ma tata hexak  mba va'e hi'a   va'e py reraa, ha'e kuery oexa vy oo aguã.

¹³ Ha'e gui Sinai yvyty apyte áry peve reguejy vy ha'e kuery reve ndeayvu raka'e yva py re  a gui. Ha'e vy ha'e kuery pe reikuua uka reipota va'e ha'evea ramigua, lei anhet   va'e ha'e gui ndeayvu rejapo uka va'e ipor   va'e ha'e javi.

¹⁴ Ha'e kuery pe reikuua uka avi s  bado \'  ra iky'a e'   va'er   reja va'ekue. Nerembigui Mois  s pe remombe'u uka rejapo uka va'e, rembo'ea ha'e lei ha'e javi.

¹⁵ Ha'e kuery inhembayyi ramo reme'   raka'e mbojape yva guigua, ha'e gui ijy'uvei r   rejapo itaova gui yy oxyry ouvy aguã rami. Ha'e kuery pe aipo're avi oje'oi vy yvy ndepo reupi ha'e reura reve reme'   aguã py hekoia aguã.*

¹⁶ — Ha'e rami te   oreramo   kuery ndojapyxaka potai raka'e. Inhak   rat   vy noendu potai rejapo uka va'e re.

¹⁷ Nanenhe'   renduxei vy na'ima'endu'ai guive ha'e kuery pe mba'emo por   rejapo va'ekue re. Inhak   rat  ve oje'oivy vy nderovai ete ikuai vy pete   omo   okuapy nguvixar  , Egito yvy re escravo ikuaiague py ju ojevpaxe vy. Ha'e r   ndee Oreruete oreperdoa kuaa va'e, orerayvu ha'e oremboaxy kuaa va'e. Nandevai voi va'e, ha'e opa mba'e py mborayvu rupi reiko va'e vy nderejai raka'e,

¹⁸ ha'e kuery nguueterr   vaka ra'y ra'angaa rive ojapo okuapy te  . Ha'e rami vy aipoe'i: "Kova'e ae ma Nhanderuete Egito yvy gui nhandereru va'ekue", he'i vy opa mar   rei ijayvu okuapy nderovai.

* 9:15 João 6.31

¹⁹ Ha'e rami teĩ ndee riae tema ndeporayvua ndopai va'e vy nderejai raka'e teko a e'ŷa re. Ha'e kuery renonde gui ndereipe'ai ara py arai hi'aĩ va'e oo aguã kuaa ukaa, neĩ tataendy pyávy hi'aĩ va'e voi ndereipe'ai guive, rex a uka ae tema oo aguã.

²⁰ Ha'e kuery rekombo'earã rembou avi Nenhe'ẽ Porã. Maná voi nereme'ẽ e'ŷi guive ho'u va'erã, ha'e ijy'uvei rã reme'ẽ avi yy.

²¹ Ha'e rami py quarenta ma'etý re te ko a e'ŷa rupi rerek o jave ha'e kuery pe ndoatai mba'eve. Ijao voi na'inhymai, nda'ipy rurupai guive.

²² Ha'e kuery po py remboaxa avi joyvy ha'e amboae regua kuery. Ha'e kuery peguarã remboja'o-ja'o yvy. Ha'e rami vy oyvyrã ojopy Hesbom pygua huvixa Seom ha'e Basã pygua huvixa Ogue yvykue.

²³ Ta'y kuery remboetave guive jaxy-tata yva re ikuai va'e rami. Ha'e rami vy reru yvy tuu kuery pe "Tapeo, pejopy penderekorã", 'reague py.

²⁴ Ha'e ramo ha'e va'e yvy re ta'y kuery oo vy ojopy. Ha'e kuery renonde gui cananeu kuery heko a va'ekue reitypa vy ndevygua kuery po py ju remboaxa ijyvykue, ha'e pygua huvixa ha'e yvy regua kuery guive, oipotaa rami ae oguerek o aguã.

²⁵ Ha'e rami ramo ojopy tetã imbaraeteve va'ekue ha'e yvy porãa. Ojopy avi oo mba'emo porãgue anho oĩa, yy renderã yvy ojo'o pyre, uvaty, oliveira-ty ha'e yvyra oata aguã rami e'ŷ ikuai va'e. Ha'e ramo okaru porã okuapy hevyatãmba peve, ikyrapa guive. Iporã va'e re anho okaru, ndeporayvua rupi.

²⁶ — Ha'e rami teĩ nanenhe'ẽ rendui jepi, nderovai guive opu'ã okuapy. Ndea katy okupe rive oguerova, ha'e profeta kuery ndevy pe ju ha'e kuery ojevy aguã re ijayu ramo ojuka. Ha'e rami vy opa marã rei ijayvu okuapy nderovai.

²⁷ Ha'e nunga rupi imoingo axyarã kuery po py remboaxa ramo ombojexavai ete imbokuapy. Ha'e ramo ojexavai ma vy mae ojapukai okuapy ndevy. Ha'e rã yva py reĩa gui rendu. Ha'e rami vy ndee nhomboaxya opa e'ŷ va'e vy rembou imoingo axy reia kuery po gui ogueraa jepe va'erã.

²⁸ Ha'e ramia gui ikane'õguapa ma vy neronden ojapove ju okuapy mba'emo vai. Ha'e ramo remboaxa ju hovaigua kuery po py ipo'aka aguã. Ha'e rami rã ha'e kuery ojeko rerova vy ojapukai ju okuapy ndevy. Ha'e ramo yva py reĩa gui rendu vy ndeporayvua rupi reraa jepe kuerei.

²⁹ Ha'e kuery pe ndeayvu jepi teĩ lei reja va'ekue rupi ikuai ju aguã. Ha'e rami teĩ ha'e kuery onhemboyvate rei vy noendu potai rejapo uka va'e. Ha'e rami vy ojejav y tema okuapy ndeayvu rovai rupi, ha'e va'e rupi jaiko vy jaikove'rã teĩ. Inhakã ratã vy okupe rive oguerova ndea katy. Onhemoakã ratã vy ndojapyxaka potai.

³⁰ Mbovy ma'etý re rei e'ŷ reropo'aka vy ha'e kuery rovai ndeayvu Nenhe'ẽ rupi, profeta kuery pe ndeayvu remombe'u uka vy. Ha'e rami teĩ ndojapyxakaxe ai okuapy. Ha'e rami rã remboaxa amboae yvy regua kuery po py.

³¹ Ha'e rami teĩ Oreruete, ndeporayvua opa e'ŷ va'e rupi vy neremombai neĩ nderejai, ndeporayvua ha'e renhomboaxy va'e vy.

³² — Ha'e nunga rupi aŷ Oreruete, ndeyvate ete ha'e ndepo'akapa va'e, okyjevepy guive reiko. Ndereve guarã rejapo va'ekue rupi, ha'e nhomboaxya rupi reiko va'e vy "Mba'e'ŷ" 'ere eme rojexavaia ou va'ekue pe. Ha'e nunga ma ore kuery re, oreruvixa, yvatekueve, oreregua sacerdote ha'e profeta kuery, oreramoĩ kuery ha'e ndevygua kuery ha'e javi re ou va'ekue, Assíria pygua huvixa kuery ou guive aŷ peve.

³³ Ha'e nunga ha'e javi orere ou teĩ ndee ma ha'evea rami orererek o. Ndee ma ojeroviap reiko, ha'e rã ore ma ojeroviap e'ŷ orekuai.

³⁴ Oreruvixa kuery, yvatekueve, sacerdote ha'e oreramoĩ kuery voi ojee nomoĩ ndeguigua lei rupi ikuai aguã, noendu potai guive rejapo uka va'ekue re, ha'e kuery rovai ndeayvu teĩ.

³⁵ Mba'eta ha'e kuery ma guetã py ikuai a py, opa mba'e reme'ẽ va'ekue oguerek o teĩ, yvy tuvixa ha'e iporã va'e ikuai aguã reme'ẽ va'ekue re ikuai teĩ ndevy pe ma ha'e kuery nda'ikuai, ndojeko rerovai guive mba'emo vai ojapo a gui.

³⁶ Ne'exa, aŷ ma nhoembiguai orekuai. Yvy oreramoĩ kuery mba'emo aju re okaru porã aguã reme'ẽ va'ekue re ae orekuai teĩ ha'e py voi nhoembiguai orekuai.

³⁷ Mba'emo aju iporâve va'e ma huvixa kuery orere rembopo'aka va'ekue pe remboaxa jepi rojejavypaague káuxa. Ha'e kuery oipotaa rami ae orererek, orerymba kuery guive. Ha'e rami rã ore kuery rojexavai ete rokuap — he'i.

Heta va'e kuery lei rupi ikuai aguã ojapo okuapyague

³⁸ Ha'e nunga ha'e javi rupi ore kuery rojapo rokuap le rupi ju orekuai aguã. Romoĩ atã aguã rombopara imoiny. Ha'e va'e re ma oreruvixa yvatekueve, levita ha'e sacerdote kuery ombopara imoiny guery.

10

¹ Kuaxia re guery ombopara va'ekue ma huvixa Hacalias ra'y Neemias, ha'e Zedequias,

² Seraías, Azarias, Jeremias,

³ Pasur, Amarias, Malquias,

⁴ Hatus, Sebanias, Maluque,

⁵ Harim, Meremote, Obadias,

⁶ Daniel, Ginetom, Baruque,

⁷ Mesulão, Abias, Miamim,

⁸ Maazias, Bilgai ha'e Semaías. Ha'e va'e kuery ma sacerdote ikuai.

⁹ Ha'e gui levita kuery ma Azanias ra'y Jesua, ha'e gui Henadade ramymino kuery Binui, Cadmiel,

¹⁰ tyvy kuery reve: Sebanias, Hodias, Quelita, Pelaías, Hanã,

¹¹ Mica, Reobe, Hasabias,

¹² Zacur, Serebias, Sebanias,

¹³ Hodias, Bani ha'e Beninu.

¹⁴ Ha'e gui heta va'e kuery ruvixa ikuai va'e ma Parós, Paate-Moabe, Elão, Zatu, Bani,

¹⁵ Buni, Azgade, Bebai,

¹⁶ Adonias, Bigvai, Adim,

¹⁷ Ater, Ezequias, Azur,

¹⁸ Hodias, Hasum, Bezai,

¹⁹ Harife, Anatote, Nebai,

²⁰ Magpias, Mesulão, Hezir,

²¹ Mesezabel, Zadoque, Jadua,

²² Pelatias, Hanã, Anaías,

²³ Oséias, Hananias, Hassube,

²⁴ Haloés, Pilha, Sobeque,

²⁵ Reum, Hasabna, Maaséias,

²⁶ Áias, Hanã, Anã,

²⁷ Maluque, Harim ha'e Baaná.

²⁸ Ha'e gui heta va'e kuery mboae, sacerdote ha'e levita kuery, okẽ rarõa, oporai va'ety kuery, templo py ombo'eapo va'ety, amboae yvy regua kuery gui oja'o va'ekue Nhanderuete guigua lei rupi ikuai aguã, ha'e gui ha'e kuery ra'yxy, gua'y ha'e guajy kuery reve, oendu kuaa va'e ha'e javive ma

²⁹ guyvy ha'e guyke'y kuery reve ojapo okuapy ha'e rami ikuai aguã. Ha'e rami vy huvixa kuery yvatekueve ou vy oura reve ojapo okuapy Nhanderuete guigua lei rupi anho ikuai aguã, Nhanderuete rembiguai Moisés rupi oikuaa uka rire. Ha'e kuery ojee omoĩ SENHOR Nhanderuete ojapo uka va'ekue ojapopa aguã, oipotaa ha'e ijayvuague oeja va'ekue ha'e javi;

³⁰ ha'e gui yvy regua kuery re guajy kuery omomenda e'ŷ aguã, neĩ ha'e kuery rajy kuery re ma voi gua'y kuery omomenda e'ŷ aguã;

³¹ ha'e gui sábado ára py yvy regua kuery guembiapo e'ŷ vy mba'emo aju ovende va'erã ogueru ramo ha'e kuery gui mba'eve ojogua e'ŷ aguã sábado ára py, neĩ ára mboae Nhanderuete peguarã omboaxa pyre py ma voi; ha'e gui sete ma'etŷa re ombo'eapoa gui optyu'u aguã, ha'e mba'emo oiporuka va'ekue áryve omboekoviave e'ŷ aguã.

³² Ha'e rami ae orerekorā romoī avi ma'etŷa nhavō hatā'i va'e irundy grama ipoyikue rome'ē aguā Nhanderuete pegua opy om̄ba'epo va'e kuery peguarā,

³³ ha'e henonde mbojape omoī mbyrā ojapo aguā, mba'emo aju guigua ha'e mba'emo oapy pyrā ome'ē jepi aguā, sábado pygurarā, ngaru jaxy pyau nhavō guarā, ngarua ára oa'angaa ague py mba'emo ojapo aguā, mba'emo iky'a e'ŷ va'erā ojapo aguā, jejavya re mba'emo ome'ē aguā, Israel kuery ojejavya ojao'i uka aguā regua ome'ē aguā, ha'e Nhanderuete pegua oo pygurarā mba'emo ojapo aguā.

³⁴ Ha'e gui ore kuery regua sacerdote, levita ha'e heta va'e kuery ha'e javi reve roexa rokuapy xortea mavae pa xakā Nhanderuete pegua opy ogueru aguā roikuua aguā. Ma'etŷa nhavō, ára oa'angaa ague py porā, peteī-teī regua orekuia rami vy rogueru aguā xakā SENHOR Nhanderuete pegua altar áry oapy pyrā, lei re oĩa rami vy.

³⁵ Ha'e gui ma'etŷa nhavō oremba'ety gui rogueru aguā iporāgueve romono'ō ypy'i va'e, vvyra hi'a va'e gui jypy'igua guive SENHOR pegua opy guarā,

³⁶ ha'e jypygua orera'y oiko va'ekue, orerymba vaka kuery jypy oiko va'ekue guive rome'ē aguā lei re ipara oinya rami vy, kavara ha'e vexta'i kuery ha'e rami ae avi jypy oiko va'ekue rogueru aguā Nhanderuete pegua opy, ha'e py sacerdote kuery om̄ba'epo va'e peguarā;

³⁷ ha'e gui romoapomo ypy va'ekue, ha'e mba'emo aju jypygua rome'ē avi aguā, opa marāguia vvyra'a gui, vinho ha'e azeite rogueru aguā sacerdote kuery pe Nhanderuete pegua opy. Ha'e gui oremba'ety gui oiko va'ekue guigua dízimo ma levita kuery pegua meme, mba'eta tetā oma'etŷ va'e ikuiaia va'e ha'e javi rupi ha'e kuery ae ikuai dízimo ojopy aguā rami.

³⁸ Sacerdote Arão ramymino va'e oĩ avi 'rā levita kuery dízimo ojopya py. Ha'e rā levita kuery oguerupa 'rā dízimo Nhanderuete pegua opy ja'o mba'emo omoī porāaty py.

³⁹ Mba'eta ha'e va'e opy ja'o py ae Israel ha'e Levi ramymino kuery ogueru 'rā mba'emo aju ome'ē mbyre, vinho ha'e azeite. Mba'eta ha'e py ae 'rā ikuai mba'emo ryru henda iky'a e'ŷ va'e pyguya, sacerdote kuery voi ha'e py ae 'rā om̄ba'epo, okē rarōa ha'e oporaei va'ety kuery guive. Ha'e rami vy 'rāe ndorerexarai Nhanderuete pegua oo gui.

11

Jerusalém py hekoia va'e kuery rery oĩa

¹ Heta va'e kuery ruvixa kuery yvatekueve ma Jerusalém tetā py ae ikuai. Ha'e rā amboae kuery ma oexa okuapy xortea ikuai aguā oikuua aguā. Ha'e rami vy dez ikuai va'e-va'e gui peteī-teī ha'e kuery ogueru 'rā Jerusalém tetā iky'a e'ŷ va'e py ikuai aguā, ha'e rā nove va'e ma amboae tetā rupi 'rā ikuai.

² Heta va'e kuery ima'endu'a porā avakue Jerusalém py hekoia aguā ooxea'i py oo va'ekue re.

³ Pova'e ma huvixa kuery oyvy re openaa rupi Jerusalém py ikuai va'e. Ha'e rā Judá regua tetā ikuai va'e rupi ma peteī-teī guekoa py ae ikuai, guetā rupi ae. Ha'e va'e kuery ma Israel kuery, sacerdote ha'e levita kuery, templo py om̄ba'epo va'ety ha'e Salomão rembiguai ramymino kuery.

⁴ Ha'e gui Jerusalém tetā py ae ikuai Judá ha'e Benjamim ramymino kuery va'e regua. Judá kuery va'e regua ma Ataías. Ha'e va'e ma Uzias ra'y, Uzias ma Zacarias ra'y, Zacarias ma Amarias ra'y, Amarias ma Sefatias ra'y, Sefatias ma Maalalel ra'y, Maalalel ma Perez ra'y.

⁵ Ha'e gui Maaséias ju. Ha'e va'e ma Baruque ra'y, Baruque ma Col-Hozé ra'y, Col-Hozé ma Hazaías ra'y, Hazaías ma Adaías ra'y, Adaías ma Joaribe ra'y, Joaribe ma Zacarias ra'y, Zacarias ma Siló pyguya ra'y.

⁶ Perez ramymino kuery Jerusalém py ikuai va'e ha'e javi vy ma quatrocentos e sessenta e oito avakue ipy'a guaxukueve.

⁷ Ha'e gui Benjamim ramymino kuery ma pov'a'e: Salu ma Mesulão ra'y, Mesulão ma Joede ra'y, Joede ma Pedaías ra'y, Pedaías ma Colaías ra'y, Colaías ma Maaséias ra'y, Maaséias ma Itiel ra'y, Itiel ma Jesaías ra'y.

⁸ Ha'e va'e rire jevygua ma Gabai ha'e Salai. Ha'e javi vy novecentos e vinte e oito ikuai.

⁹ Zicri ra'y Joel ma ha'e kuery re opena va'e. Ha'e va'e rire ju Senua ra'y Judá voi opena avi 'rã tetã re.

¹⁰ Ha'e gui sacerdote kuery ma Joiaribe ra'y Jedaías, Jaquim

¹¹ ha'e Seraías. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y,

¹² Meraiote ma Aitube ra'y. Ha'e va'e ma Nhanderuete pegua opy re opena va'e. Guyvy kuery reve mba'emo ojapo okuapy templo py, oitocentos e vinte e dois ikuai. Ha'e gui Adaías ma Jeroão ra'y, Jeroão ma Pelalias ra'y, Pelalias ma Anzi ra'y, Anzi ma Zacarias ra'y, Zacarias ma Pasur ra'y, Pasur ma Malquias ra'y.

¹³ Tyvy kuery peteĩ-teĩ regua akã ikuai va'e reve ma duzentos e quarenta e dois ikuai. Ha'e gui Amasai ma Azarel ra'y, Azareel ma Azai ra'y, Azai ma Mesilemote ra'y, Mesilemote ma Imer ra'y.

¹⁴ Tyvy kuery avakue ipy'a guaxukueve ikuai va'e reve ma cento e vinte e oito ikuai. Ha'e kuery re opena va'e ma Gedolim ra'y Zabdiel.

¹⁵ Ha'e gui levita kuery ma Hassube ra'y Semaías. Hassube ma Azricão ra'y, Azricão ma Hasabias ra'y, Hasabias ma Buni ra'y.

¹⁶ Sabetai ha'e Jozabade ma levita kuery akã ikuai, Nhanderuete pegua oo roka rupi ombo'epo va'e kuery re opena va'e.

¹⁷ Ha'e gui Mica ra'y Matatias. Mica ma Zabdi ra'y, Zabdi ma Asafe ra'y. Ha'e va'e ma onhembo'e okuapya py jogueroporaei 'rã. Ha'e gui Baquebuquias ma tyvy ju oiko. Ha'e va'e riregua ma Samua ra'y Abda. Samua ma Galal ra'y, Galal ma Jedutum ra'y.

¹⁸ Levita kuery tetã iky'a e'ŷ va'e py ikuai va'e ha'e javi vy ma duzentos e oitenta e quatro.

¹⁹ Ha'e gui okẽ rarõa kuery ma Acube, Talmom ha'e tyvy kuery. Okẽ rarõa kuery ha'e javi vy ma cento e setenta e dois ikuai.

Judá regua tetã ikuai va'e rupi hekoia va'e kuery rery oĩa

²⁰ Ha'e gui Israel kuery mboae, sacerdote ha'e levita kuery mboae voi tetã Judá yvy re ikuai va'e rupi hekoia, peteĩ-teĩ ijyvyrã oeja pyre py.

²¹ Templo py ombo'epo va'e kuery ma Ofel py ikuai. Ha'e va'e kuery re opena va'e ma Zia ha'e Gispa.

²² Ha'e gui levita kuery Jerusalém py ikuai va'e re opena va'e ma Bani ra'y Uzi. Ha'e gui Bani ma Hasabias ra'y, Hasabias ma Matanias ra'y, Matanias ma Mica ra'y, Mica ma Asafe ra'y kuery Nhanderuete pegua opy oporai va'e regua.

²³ Mba'eta ha'e kuery ombo'epo aguã re huvixa ae ijayvu, jogueroporaei va'e kuery pe voi oeja avi ko'ẽ nhavõ ojapo aguã.

²⁴ Ha'e gui Judá regua Mesezabel ra'y Petaías, Zera ramymino va'e ma huvixa ojapo ucaa rami oiko, heta va'e kuery re openaa ha'e javi rupi.

Tekoa ikuai va'e rupi hekoia va'e kuery rery oĩa

²⁵ Ha'e gui amongue Judá ramymino kuery hekoia okuapy imba'ety katy'i tekao ikuai va'e py: Quiriate-Arba ha'e ha'e'i rupi tekao ikuai va'e py, Dibom ha'e Jecabzeel ha'e ha'e'i rupi tekao ikuai va'e py voi,

²⁶ ha'e gui Jesua py, Moladá, Bete-Pelete,

²⁷ Hazar-Sual, ha'e gui Berseba ha'e ha'e'i rupi tekao ikuai va'e py,

²⁸ Ziclague py, ha'e Mecona ha'e ha'e'i rupi tekao ikuai va'e py,

²⁹ En-Rimom py, Zorá, Jarmute,

³⁰ Zanoa, ha'e Adulão, Laquis ha'e Azeca ha'e ha'e'i rupi tekao ikuai va'e py. Berseba guive Hinom yvyugua peve ha'e kuery ikuai.

³¹ Ha'e gui Benjamim ramymino kuery ma Geba tekao py ikuai, Micmás, Aia, Betel ha'e
ha'e'i rupi tekao ikuai va'e py voi,
³² Anatote, Nobe, Ananias,
³³ Hazor, Ramá, Gitaim,
³⁴ Hadide, Zeboim, Nebalate,
³⁵ Lode, Ono, ha'e gui yvyugua mba'emo apoa kuery ikuai py.
³⁶ Ha'e gui levita kuery va'e regua ma Judá ha'e Benjamim re ikuai.

12

Jerusalém py sacerdote kuery ou va'ekue rery oña

¹ Pova'e ma sacerdote ha'e levita kuery Sealtiel ra'y Zorobabel reve ojevy ju va'ekue,
Jesua reve voi: Seraías, Jeremias, Esdras,

² Amarias, Maluque, Hatus,
³ Secanias, Reum, Meremote,
⁴ Ido, Ginetoi, Abias,
⁵ Miamim, Maadias, Bilga,
⁶ Semaías, Joaribe, Jedaías,

⁷ Salu, Amoque, Hilquias ha'e Jedaías. Ha'e va'e kuery ma Jesua oĩ jave sacerdote kuery
re opena va'ekue, guyvy kuery re voi.

⁸ Ha'e levita kuery regua ikuai avi Jesua, Binui, Cadmiel, Serebias, Judá ha'e Matanias.
Ha'e va'e ma guyvy kuery reve jogueroporai va'e.

⁹ Ha'e va'e kuery yvýry ma tyvy kuery Baquebuquias ha'e Uni ikuai, peteĩ-teĩ ojapo aguã
va'ekue py ae.

¹⁰ Ha'e gui Jesua ra'y ma Joaquim, Joaquim ra'y ma Eliasibe, Eliasibe ra'y ma Joiada,

¹¹ Joiada ra'y ma Jônatas, Jônatas ra'y ma Jadua.

¹² Sacerdote Joaquim oĩ jave py sacerdote peteĩ-teĩ regua akã ma pova'e: Seraías
ramymino kuery akã ma Meraías, Jeremias ramymino kuery akã ma Hananias,

¹³ Esdras ramymino kuery akã ma Mesulão, Amarias ramymino kuery akã ma Joanã,

¹⁴ Maluqui ramymino kuery akã ma Jônatas, Sebanias ramymino kuery akã ma José,

¹⁵ Harim ramymino kuery akã ma Adna, Meraiote ramymino kuery akã ma Helcai,

¹⁶ Ido ramymino kuery akã ma Zacarias, Ginetom ramymino kuery akã ma Mesulão,

¹⁷ Abias ramymino kuery akã ma Zicri, Miniamim ha'e Moadias ramymino kuery akã ma
Piltai,

¹⁸ Bilga ramymino kuery akã ma Samua, Semaías ramymino kuery akã ma Jônatas,

¹⁹ Joaribe ramymino kuery akã ma Matenai, Jedaías ramymino kuery akã ma Uzi,

²⁰ Salai ramymino kuery akã ma Calai, Amoque ramymino kuery akã ma Héber,

²¹ Hilquias ramymino kuery akã ma Hasabias, Jedaías ramymino kuery akã ma Natanael.

²² Ha'e gui levita kuery va'e regua Eliasibe oĩ jave py pova'e kuery rery omboparaa
peteĩ-teĩ regua akã ikuai ramo: Joiada, Joanã ha'e Jadua, sacerdote kuery rery om-
boparaague rami avi, Pérsia pygua huvixarã Dario oĩ peve.

²³ Levi ramymino kuery peteĩ-teĩ regua akã rery omboparaa kuaxia huvixa kuery rekokue
oña re, Eliasibe ra'y Joanã oĩ peve.

²⁴ Ha'e gui levita kuery va'e regua akã ma Hasabias, Serebias ha'e Cadmiel ra'y Jesua.
Ha'e va'e kuery guyvy kuery reve ikuai jogueroporai ha'eombojerovia aguã Nhanderuete
rembiguai Davi oejaague rami vy, jorire rire oporaei aguã rami ikuai.

²⁵ Ha'e okẽ rarõa kuery ma Matanias, Baquebuquias, Obadias, Mesulão, Talmom ha'e
Acube. Ha'e va'e kuery okẽ katy'i mba'emo omoĩ porãaty oĩ va'e oarõ avi okuapy.

²⁶ Ha'e va'e kuery ma Jesua ra'y Joaquim, Jozadaque ramymino oĩ jave py ikuai, Neemias
huvixa oĩ jave, ha'e Esdras sacerdote ha'e lei re nhombo'e va'ety oĩ jave voi.

Nhanderuete po py tetã kora omboaxa okuapyague

²⁷ Ha'e gui Jerusalém tetā kora Nhanderuete po py omboaxa aguā ma oeka okuapy levita kuery opa rupi ikuiai gua' aguā, ovy'a reve kora omboaxa aguā, mboraei py, hy'a pu, mbaraka ha'e ixā reta va'e py guive.

²⁸ Ha'e ramo oporaei va'ety ra'y kuery voi oupa okuapy Jerusalém katy'i oyvy itui va'e gui, netofatita kuery rekoia ikuai va'e gui voi,

²⁹ ha'e gui Bete-Gilgal, Geba ha'e Azmavete katy'i yvvy itui va'e gui, mba'eta oporaei va'ety kuery ma guekoarā Jerusalém yvýry rupi ae ojou rire.

³⁰ Ha'e gui sacerdote kuery ojeky'a'o ukapa okuapy, levita kuery guive. Oiky'a'o avi heta va'e kuery, tetā rokē ha'e kora guive.

³¹ Ha'e gui ma xee ajapo Judá pygua huvixa kuery yvatekueve ojeupipa aguā kora áry. Mokoī henda rupi ajapo oporaei va'e kuery ojerojy jogueravy aguā rami. Peteī regua ma kora áry rupi ojerojy aiporu kuaa regua re Yty Renda Rokē katy.

³² Ha'e kuery rakykue rupi ma Hosaías ha'e Judá regua yvatekueve mbytekue oje'oi nhoguenoiny,

³³ ha'e gui Azarias, Esdras, Mesulão,

³⁴ Judá, Benjamim, Semaías ha'e Jeremias.

³⁵ Ha'e gui sacerdote ra'y kuery mimby guaxu reveguia oje'oi avi va'e ma Jônatas ra'y Zacarias. Jônatas ma Semaías ra'y, Semaías ma Matanias ra'y, Matanias ma Micaías ra'y, Micaías ma Zetur ra'y, Zetur ma Asafe ra'y.

³⁶ Tyvy kuery oje'oi avi va'e ma Semaías, Azareel, Milalai, Gilalai, Maai, Natanael, Judá ha'e Hanani, mba'epu Nhanderuete rembiguai Davi oeja va'ekue reveguia. Ha'e kuery renonde ma lei re nhombo'e va'ety Esdras oo oiny.

³⁷ Yakā Ryapy Rokē katy oẽ jogueravy tape pyrō-pyrō'a'i Davi rekoague katy oo va'e rupi. Ha'e py ma kora oaxa 'rā ovy Davi rogue áry rupi Yakā Rokē oĩ va'e peve, kuaray oua katy.

³⁸ Ha'e gui jevygua oporaei va'e kuery ma ha'e kuery rovai katy rupi oje'oi. Heta va'e kuery mboae oje'oi avi kora áry rupi Torre Tatakuia hi'aia guive Kora Ipyve 'ea va'e peve.

³⁹ Ha'e gui Efraim regua Rokē guive oaxa jogueravy Okē Yma ha'e Pira Rokē oĩ va'e áry rupi. Ha'e gui Hananel Torre rupi oaxave vy Cem Torre rupi avi oaxa Vaka Rokē peve. Ha'e gui optytapa Okē Rarōa 'ea va'e py.

⁴⁰ Ha'e gui oporaei va'e kuery jovaive rupi gui ou va'ekue optytapa Nhanderuete pegua oo py, xee voi, xereve huvixa kuery mbytekue oje'oi va'ekue guive.

⁴¹ Sacerdote kuery Eliaquim, Maaséias, Miniamim, Micaías, Elioenai, Zacarias ha'e Hananias ma mimby guaxu reve oje'oi,

⁴² Maaséias, Semaías, Eleazar, Uzi, Joanā, Malquias, Elão ha'e Ezer guive. Ha'e gui oporaei va'e kuery ma Jezraías ogueroporaei rā oporaei nhendu okuapy.

⁴³ Ha'e va'e ára ae avi mymba kuery heta ete oapy vy ome'ẽ okuapy ovy'a reve, Nhanderuete ombovy'a ete ramo. Kunhague ha'e kunumigue ovy'apa avi okuapy. Mombyry rupi peve oendua Jerusalém tetā py ovy'a reve oporaei va'e.

Sacerdote ha'e levita kuery pegua ome'ẽa aguā re ijayvuague

⁴⁴ Ha'e va'e árave omoña avakue templo ropy ja'o mba'emo porāgue omoñ porāaty re opena va'erā. Ha'e py ma mba'emo ome'ẽ mbyre, hi'a ypy'i va'ekue regua iporāgueve ha'e dízimo guive omoñ porāa. Ha'e py ae ha'e kuery omono'õ 'rā tetā ikuai va'e gui sacerdote ha'e levita kuery peguarā ome'ẽa va'erā lei oña rami vy. Ha'e ramo Judá kuery ovy'apa okuapy ha'e py sacerdote ha'e levita kuery opena ramo.

⁴⁵ Mba'eta ha'e kuery ombo'eapo 'rā Nguuete pe anho, mba'emo oiky'a'o 'rā guive, oporaei va'e ha'e okē rarōa kuery rami ae avi, Davi ha'e ta'y Salomão ojapo ukaague rami vy.

⁴⁶ Mba'eta ymave rupi Davi ha'e Asafe oiko jave voi ikuai avi raka'e oporaei va'e kuery re opena va'e, jogueroporaei, ha'e Nhanderuete rerovy'aa kuery re opena va'e.

⁴⁷ Ha'e nunga rupi Zorobabel ha'e Neemias oĩ jave voi Israel kuery pavē ome'ẽ 'rā okuapy jogueroporaei va'e ha'e okē rarōa kuery pe ko'ẽ nhavō ho'u va'erā. Ha'e kuery ome'ẽ avi

'rã levita kuery peguarã oipe'a pyre, ha'e gui levita kuery ju 'rã ome'ẽ Arão ramymino kuery peguarã.

13

Israel kuery mbyte gui amboae regua oipe'apaa ague

¹ Ha'e va'e ára ma heta va'e kuery pe ogueroayvua Moisés ombopara va'ekue. Ha'e va'e re ojou "Amonita ha'e moabita kuery Nhanderuete pegua kuery re nda'evei ae onhemoirũ aguã" he'ia oña,

² mba'eta ha'e va'e kuery ndogueraai raka'e tembi'u ha'e yy Israel kuery ovaexí aguã. Ha'e rami 'rãgue py Balaão pe opaga okuapy Israel kuery rovai ijayvu vai aguã re. Ha'e rami tei ijayvu vaikue 'rãgue py Nhanderuete ojapo ogueroayvua porã aguã rami.*

³ Ha'e va'e lei heta va'e kuery oendu vy Israel kuery mbyte gui oipe'a imondovy amboae regua ha'e javi.

Templo gui Tobias oipe'aa ague

⁴ Ha'e va'e e'ý mbove ma sacerdote Eliasibe onhemoirũ Tobias kuery re, Nhanderuete pegua opy mba'emo re opena aguã omoña tei.

⁵ Ha'e rami vy Tobias pe omboaxa peteí opy ja'o tuvixa va'e mba'emo aju ome'ẽ mbyre omoñ porãaty va'ekue, ha'e heakuã porã va'e, mba'emo ryru, dízimo mba'emo ra'yí guigua, vinho ha'e azeite guigua omoñ porã aty. Ha'e nunga ma levita kuery peguarã ome'ẽ ukaa va'ekue, oporaei va'ety, okẽ rarõa ha'e sacerdote kuery peguarã avi.

⁶ Ha'e nunga oiko Jerusalém tetã py xee naí jave, mba'eta trinta e dois ma'etý re ma Babilônia pygua huvixa Artaxerxes oí jave py ha'e oña katy aa rire. Ha'e gui kueve ma rire huvixa pe ajerure Jerusalém py ajevy ju aguã.

⁷ Ha'e gui mae ma aendu Eliasibe mba'emo vai ojapoague Tobias ombopy'a porãxe vy, mba'eta ixupe omboaxa opy ja'o Nhanderuete pegua oo roka py.

⁸ Ha'e nunga aendu vy xevai vaipa reve opy ja'o gui amombopa Tobias mba'e rei-rei.

⁹ Ha'e rami vy opy ja'o ikuai va'e aiky'a'o ukapa vy ha'e py aru rukapa ju tembiporu Nhanderuete pegua opygua, mba'emo aju ome'ẽ mbyre, heakuã porã va'e guive.

Levita kuery pegua ome'ea jevyague

¹⁰ Ha'e gui aendu avi levita kuery peguarã nome'ẽaveia. Ha'e nunga rupi levita ha'e jogueroporaei va'e kuery Nhanderuete pe ombo'epo aguã omoñ mbyre tei oejapa ma ra'e oje'ovy peteí-tei guekoia katy.

¹¹ Ha'e rami vy huvixa kuery pe xeayvu vy aipoa'e:

— Mba'e re tu napenavei ri Nhanderuete pegua oo re? — ha'e. Ha'e rami vy levita kuery teigüe ju aru vy amoñ ju ojapo aguã va'ekue py.

¹² Ha'e ramo Judá regua kuery ha'e javi ogueru ju okuapy dízimo mba'emo ra'yíguigua omoñ porãaty py, vinho ha'e azeite guigua guive.

¹³ Ha'e gui mba'emo ome'ẽ mbyre re opena va'erã amoñ sacerdote Selemias, kuaxia re ombo'epo va'e Zadoque ha'e levita Pedaías. Ha'e kuery ptyvõarã amoñ avi Zacur ra'y Hanã, Matanias ramymino va'e. Mba'eta ha'e va'e kuery ma pavõ oikuua ojeroviapy memea. Ha'e ramo ha'e kuery pe amboja'o uka tyvy kuery peguarã.

¹⁴ Ha'e nunga rupi Xeruete, nema'endu'a ke xere. Embogue eme guive mba'emo ndee Xeruete pegua oo re ajapo porãague, ha'e py ombo'epo va'e kuery pe guive.

Sábado ára omboetea jevy aguã re ijayvuague

¹⁵ Ha'e va'e jave Judá py aexa avi sábado ára py tei uva onhami va'e, trigo py kavaju ombovoysi heruvy va'e guive. Ha'e gui vinho, uva, figo ha'e opa mba'e rei sábado ára py tei ogueru avi 'rã Jerusalém tetã katy. Ha'e kuery pe xeayvu ete ha'e va'e ára py tembi'u ovende okuapy rã.

* 13:2 Balaão rekoke omombe'ua ma jaexa 'rã Deuteronômio 23.3-5 ha'e Números 22-24 py.

¹⁶ Ha'e gui Jerusalém py ikuai avi avakue Tiro tetā guigua. Ha'e va'e kuery ma sábado ára teī ogueru 'rā okuapy pira ha'e opa mba'e rei Judá kuery pe ovende va'erā, Jerusalém tetā rupi guive.

¹⁷ Ha'e rami vy Judá regua huvixa kuery pe xeayvu vy aipoa'e:

— Mba'e re tu mba'emo vai rive pejapo sábado ára pemongy'aa rupi?

¹⁸ Peneramoī kuery ha'e ramigua ojapo rire e'ŷ nda'u nhandere Nhanderuete ombou raka'e opa mba'e vai, kova'e tetā re guive? Ha'e ramive ma poxya tuvixave va'e ju pejapo Israel áry ou aguã, sábado ára pemongy'aa py — ha'e.

¹⁹ Xeayvu avi Jerusalém kora rokē sábado ára ovaẽ ta nhavō ombotya aguã kuaray'ã ojero'a ramove, ha'e gui sábado ára oaxa e'ŷa ja oipe'aa jevy e'ŷ aguã. Okē py amoī avi xerembiguai kuery, sábado ára peteīve ivoyi rewegua omoinge e'ŷ aguã.

²⁰ Ha'e gui ma mokoīgue mba'emo vendea ha'e ijoguaa kuery ipytū okuapy Jerusalém roka rupi.

²¹ Ha'e ramo ha'e kuery pe xeayvu vy aipoa'e:

— Mba'e re tu penepytū rive pekuapy tetā kora yvýry? Ha'ekue rami ju pejapo ramo rombo'a 'rā — ha'e. Ha'e va'e rire ma ha'e kuery ndouvei sábado ára py.

²² Ha'e gui levita kuery reve xeayvu kora rokē oiky'a'o ju aguã, ha'e ou vy oarō aguã, sábado ára iky'a e'ŷ va'e optya aguã. Ha'e nunga rupi voi Xeruete, nema'endu'a ke xere. Xeperdoa avi opa mba'e py renhomboaxy va'e vy.

Amboae regua re omenda va'ekue pe ijayvuague

²³ Ha'e va'e javé aexa avi Asdode guigua kunhague re judeu kuery omenda va'ekue, Amom ha'e Moabe guigua re guive.

²⁴ Ta'y kuery ma Asdode pygua ayvu py ijayvu vai-vai okuapy, nhande judeu ayvu py nda'ijayvu kuaai, amboae regua ayvu py anho rive.

²⁵ Ha'e nunga rupi ha'e kuery amongeta ete vy xeayvu vai, amondyi ete amongue, ha'e kuery regua'a voi amondoro. Ha'e vy Nhanderuete rery py aura reve aipoa'e:

— Pemomendave eme ta'vy penderajy kuery amboae regua ra'y kuery re. Peruve eme guive ha'e kuery rajy kuery pendera'y kuery ra'yxyrā, neī pendera'yxyrā eteve voi.

²⁶ Ha'e nunga py e'ŷ ri ty'y Israel kuery pegua huvixa Salomão ojejavy raka'e? Huvixa ha'e va'e ramigua ete ndoikoi raka'e yvy regua kuery mbovy e'ŷ mbyte rupi, tuuete rembiayvu oiko avi, Nhanderuete ae omoī va'ekue huvixarā Israel kuery ha'e javi re opena aguã. Ha'e ramive ma amboae regua kunhague oguerojejavy raka'e.

²⁷ Ha'e gui mba'exa tu roendu ha'e rami ete ha'eve'ŷ va'e pejapo? Mba'eta Nhanderuete rovai anhetē rupi e'ŷ pendekuai amboae regua kunhague re pemenda py — ha'e.

²⁸ Ha'e gui ma peteī ava sacerdote Joiada ra'y, Eliasibe ramymino va'e ma horonita pygua Sambalate rajy me oiko. Ha'e nunga rupi xee amoxē aĩa gui.

²⁹ Xeruete, eikuua pota ha'e kuery re, mba'eta omongy'apa sacerdote ikuiaia regua, sacerdote ha'e levita kuery rekorā reja va'ekue guive.

Neemias joguerekoo kuaa jevyague

³⁰ Ha'e rami py heta va'e kuery aiky'a'opa amboae regua kuery re onhemoirūague gui. Ha'e rami vy amoī ju sacerdote ha'e levita kuery peteī-teī ojapo 'rā va'ekue py omba'eapo aguã.

³¹ Ha'e gui ára oa'angaague py porā xakā oguerua aguã re xeayvu, ha'e mba'emo aju ypy'i va'ekue regua iporāgueve ome'ea aguã re. Xeruete, nema'endu'a ke xere aiko porā aguã.

Ester rekukue oĩa Ester rekukue oĩa

Judeu kuery pavẽ e'ŷ ojevy raka'e Judá yvy re. Heta ete optyta Babilônia ha'e Pérsia yvy re. Ha'e va'e kuery regua ma Ester oiko raka'e, Pérsia regua Susã tetã py.

Ester ma kunha iporã ete va'e ramo huvixave oguerovy'a vy ogueraa gua'yxyrã. Ha'e rami rã oendu omombe'ua rã peteĩ ava heko vai va'e Hamã hery va'e judeu kuery ha'e javive ojuka ukaxe. Huvixa eteve voi ixupe ojuka uka, ndoikuuai vy gua'yxy Ester ae judeu oikoa. Ha'e nunga Ester oikuua vy huvixa renonde ojerure guetarã kuery ogueraa jepe aguã re. Jeayvuveikue'i py e'ŷ ojerure huvixa pe, guenonde py noenoĩ ramo. Ha'e rami teĩ Ester mongakuaare aipoe'i uka ixupe: "Huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa teĩ. Mba'eta ha'e rami ete oiko taa ára rekyrirĩ ri ramo amboae henda gui ju 'rã oiko judeu kuery ptyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhi'ã ha'e rami aguã ae nemoia raka'e huvixa ra'yxyrã" he'i uka. Ester ombovai: "Tereo ha'vy, emboatypa judeu kuery Susã tetã py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ŷ re avi 'rã orekuai. Ha'e va'e rire ma aa 'rã huvixa oĩa py, lei oĩ va'e rovai teĩ ae ma. Xapy'a rei xejukaa aguã rami ri rã amano 'rã", he'i (4.13-16).

Huvixa renonde py Ester ou ramo omovaẽ porã, ojapo guive ojerureague. Ha'e rami rã judeu kuery ndojukaa raka'e. Ojukaa va'e ma ijukaxeare kuery anho. Ha'e rami rã judeu kuery ov'y'a vaipa okuapy, Nhanderuete ogueraa jepe ramo.

Huvixa Assuero ngaru tuvixa va'e ojapoague

¹ Huvixa Assuero ma Índia guive Etiópia peve opena oikovy cento e vinte e sete yvy oĩ va'e re. Ha'e va'e jave py

² huvixa Assuero tenda openaaty áry oguapy oiny Susã tetã py oo yvateve va'e oĩ va'e py.

³ Mboapy ma'etõa re ma huvixa oĩ jave ojapo peteĩ ngaru ojeupeguia kuery yvatekueve ha'e guembiguai kuery ha'e javi pe. Ha'e kuery ma Pérsia ha'e Média pygua ipo'akave va'e. Ha'e ramo yvatekueve ha'e hembiguai kuery yvy ikuai va'e re opena va'e oupa vy henonde ikuai.

⁴ Ha'e kuery pe huvixa oexa uka iporãgueve ha'e hepykueve openaa rupi oguerekva'e, yvate ete va'e vy iporãa guive. Heta ára ma ikuai, cento e oitenta ára peve.

⁵ Ha'e gui ha'e va'e ára opa ma rire huvixa ojapo peteĩ ngaru tuvixa va'e. Susã tetã py oo yvateve va'e oĩ va'e py ojapo tetã pygua kuery ha'e javi pe, yvatekueve ha'e yvyigueve pe guive. Sete ára re ojapo ngoka py yvotyty oĩ va'e py.

⁶ Ha'e py ma omoia ajukue xií ipererõ'i va'e ha'e púrpura regua, ixã ipererõ'i va'e ha'e púrpura py ojokua pyre. Ha'e va'e ma inhapyi va'e prata guigua re ojokuaa, oo yta ita alabastro guigua hi'aĩ va'e re guive. Tenda ikuai va'e ma ouro ha'e prata guigua py ombojeguia. Pyrõa ma ita xií, mármore, alabastro ha'e ita iporãve va'e guigua anho.

⁷ Ha'e kuery oy'u aguã ogueru ruka karo ouro guigua joegua e'ŷ-e'ŷ py. Heta avi oĩ vinho huvixa pegua anho rei, huvixa ome'ëxeia'i py ome'ë va'ekue.

⁸ Ha'e ramo huvixa oipotaa rami vy ha'e kuery oy'uxea rami oy'u okuapy, mba'eta ngoo rupi opena va'e kuery ha'e javi pe huvixa ijayvu peteĩ-teĩ oy'uxea rami ome'ë aguã re.

⁹ Huvixa Assuero ro py ta'yxy Vasti voi ojapo avi ngaru tuvixa va'e kunhague pegua anho.

Ngarua py huvixa ra'yxy Vasti ndouxeiague

¹⁰ Sete araa py huvixa optya re vinho gui ov'y'a anho rei. Ha'e rami vy ijayvu guembiguai kuery Meumã, Bizta, Harbona, Bigtã, Abagta, Zetar ha'e Carcas pe. Ha'e va'e avakue sete-ve va'e ma eunuco meme ikuai huvixa Assuero renonde rupi ombo'eapo va'e.

¹¹ Ha'e va'e kuery pe huvixa ijayvu henonde py ogueru aguã ta'yxy Vasti akã regua reve, iporã ete ramo amboae regua kuery ha'e yvatekueve ikuai va'e ha'e javi oexa aguã.

¹² Ha'e rami teĩ huvixa ra'yxy Vasti ma sete-ve eunuco kuery ijayvua rami e'ŷ ndouxei, huvixa ayvu ae ha'e kuery omombe'u teĩ. Ha'e rami rã huvixa oendu vy ojou vai, ipoxy vaipa guive.

¹³ Ha'e gui ma huvixa oporandu hi'arandu va'e kuery ára nhavõ mba'emo oikuaa porã va'e pe, (mba'eta ha'e rami ae 'rã huvixa oikuaa pota uka lei oña rami oikuaapa va'e kuery pe.

¹⁴ Ha'e va'e regua irũ kuery ae'ive va'e ma kova'e: Carsena, Setar, Admata, Társis, Meres, Marsena ha'e Memucã. Ha'e va'e sete-ve ma Pérsia ha'e Média pygua yvatekueve ikuai. Yvateve va'e vy huvixa renonde ikuai riae, openaa rupi oguapy avi 'rã okuapy.)

¹⁵ Ha'e gui ha'e kuery ma lei oña rami vy jogueroayvu okuapy mba'exa pa huvixa Assuero gua'yxy Vasti re ojapo aguã re, huvixa ayvu eunuco kuery omombe'u rã ndojapoi rire.

¹⁶ Ha'e gui ma Memucã aipoe'i huvixa ha'e yvatekueve va'e renonde py:

— Oreruvixa, nderal'yyx Vasti ma nderovai anho e'ŷ ojapo vai, ha'e javi regua yvatekueve ndee huvixa Assuero openaa ha'e javi rupi ikuai va'e rovai guive.

¹⁷ Mba'eta nderal'yyx oikoague regua ma kunhague ikuai va'e ha'e javi oendupa 'rã. "Huvixa Assuero oña py gua'yxy Vasti oenoĩ uka teĩ ndoui", 'ea rã oendu vy nomboeteveipa 'rã ome kuery.

¹⁸ Ange ma voi kunhague Pérsia ha'e Média pygua yvatekueve ma nderal'yyx oikoague oendupa vy ha'ekue rami ae ju 'rã ijayvu nerembiguai yvatekueve va'e pe. Ha'e rami rã heta 'rã ikuai nhomboetea rupi ve'ŷ, joupe ivaia rupi guive.

¹⁹ Ha'e gui ndee xeruvixa, rejou porã ri vy embopara uka peteĩ ayvu Pérsia ha'e Média pygua lei reguarã, ombovaipa pyrã e'ŷ. Ha'e va'e re toĩ ndee huvixa Assuero renonde py ta'yxy Vasti ndouwei aguã, ha'e nderal'yyx oikoague gui oipe'aa vy amboae kunha ha'eveva va'erã pe ome'ëa aguã.

²⁰ Oreruvixa, ha'e va'e ayvu repenaa ha'e javi rupi remombe'u uka rã oikuaapa ramo pavẽ kunhague omboete 'rã okuapy ome, yvatekueve ha'e yvyigueve guive — he'i.

²¹ Ha'e ramo ha'e va'e ayvu huvixa ojou porã, yvatekueve ikuai va'e avi. Ha'e rami vy ojapo Memucã ijayvuague rami.

²² Ha'e rami vy kuaxia huvixa ombopara uka ma vy omondouka openaa ha'e javi rupi. Peteĩ-teĩ yvy re ikuai va'e pe ombopara okuapy ha'e kuery oexa kuaa aguã rami, peteĩ-teĩ regua ayvu py ombopara, peteĩ-teĩ ava ngoo pygua kuery re ipo'aka aguã, ha'e guetarã kuery ayvu py ae ijayvu aguã.

2

Ester ju huvixa gua'yxyrã oiporavoague

¹ Ha'e va'e rire huvixa Assuero opoxya noenduvei ma vy ima'endu'a ju Vasti oikoague re, ha'e hexe ombopara uka va'ekue re.

² Ha'e ramo ixupe aipoe'i okuapy hembiguai kunumigue:

— Oreruvixa, toguerua nerondenonde kunhataigue'i iporägueve va'e anho.

³ Tove repenaa ha'e javi rupi tomoña ha'e nunga re opena va'erã, kunhataigue'i iporägueve va'e anho tomboatypa, Susã tetã py oupa aguã. Kunhague ro py ae toupa, nerembiguai eunuco Hegai kunhague ro rarõaty va'e opena aguã. Ha'e gui ma ha'e kuery pe tome'ë pire poã.

⁴ Ha'e gui oreruvixa, kunhataï rexu vy reayvuve va'e rei tema toĩ Vasti rekovia — he'i. Ha'e rami ijayvu ramo huvixa ojou porã. Ha'e vy ojapo uka ha'e rami ae.

⁵ Ha'e gui ma Susã tetã py oiko peteĩ ava judeu, Benjamim ramymino va'e, Mordecai hery va'e, Jair ra'y, ha'e Quis ra'y Simei ramymino va'e.

⁶ Ha'e va'e ma Jerusalém tetã gui escravo-rã ogueraapa pyre regua. Babilônia pygua huvixa Nabucodonosor ae ogueraa uka va'ekue Judá pygua huvixa Jeconias kuery reve.

⁷ Ha'e va'e ava ma omongakuaa otuty rajy ae'i Hadassa. Ha'e va'e ma Ester hery mboae, tuu ha'e ixv ve'ŷ va'e, kunhataī porā. Tuu ha'e ixv nda'ipovei ma ramo Mordecai ogueru va'ekue guajy ae'i rami omongakuaa aguā.

⁸ Ha'e gui ma huvixa ojapo uka va'ekue, ixuguigua lei omombe'upaa ramo heta omboaty heruvy kunhataīgue'i anho Susā tetā py oo yvateve va'e oĩ va'e py, Hegai opena aguā. Ha'e va'e kuery reve Ester voi herua huvixa ro py, kunhague re opena va'ety Hegai opena aguā py.

⁹ Ha'e va'e ma kunhataī oexa rā iporā vaipa, ojou porāa aguā rami oiko guive. Ha'e ramo Ester pe ojapura pire poã ogueru aguā, tembi'u ho'u va'erā guive. Hembiguairā ome'ẽ avi sete kunhataīgue oiporavo pyre huvixa ro py ikuai va'e. Ha'e vy hembiguai kunhataīgue reve omboaxapa kunhague pegua opy ja'o ha'eveea py.

¹⁰ Ha'e va'e jave py Ester nomombe'u porāi teri hetarā kuery mava'e regua pa ikuiaia, neĩ imongakuaare voi, Mordecai nomombe'u ukai rire.

¹¹ Ha'e gui ko'ẽ nhavō Mordecai ou 'rā kunhague ikuiaia roka py, oikuua pota 'rā Ester oiko porā paa, ha'e mba'e pa hexe oiko 'rāa re.

¹² Ha'e gui doze jaxy re ma kunhague rekorā va'ekue oĩa rami vy openambaa ma rire ovaẽ ta ma ára peteĩ-teĩ kunhataī huvixa Assuero oĩa py ojexa uka aguā. (Mba'eta ha'e rami ae 'rā oiko kunhague onhemoatyrōa ára ojeupitypa peve. Mboapy memea jaxy re azeite mirra guigua oikyty 'rā ojee, ha'e gui mboapy memea jaxy re ju amboae regua heakuā porā va'e ha'e kunhague pegua pire poã ae 'rā oikyty.)

¹³ Ha'e gui ma peteĩ-teĩ kunhataī ovaẽ 'rā huvixa oĩa py. Kunhague ikuiaia gui huvixa ro katy oo ta ramo peteĩ-teĩ ome'ẽa 'rā ogueraaxe va'e rei.

¹⁴ Ka'arukue ma oike 'rā opy, ha'e rā aje'ivekue ma oo ju 'rā amboae py kunhague ikuai aguā py. Ha'e va'e py huvixa rembiguai eunuco Saasgaz ju opena 'rā oikovy ta'yxy jevy kuery ikuai va'e re. Ha'e pygua kunhague neĩ peteĩve ndouwei ju 'rā huvixa oĩa py, huvixa oipota vy hery rupi ae oenoĩ uka e'ŷa ja.

¹⁵ Ha'e gui ovaẽ ma Ester ju huvixa oĩa py oo aguā. Ha'e ma Mordecai ryvy Abial rajykue'i, guajy ae'i rami omongakuaa va'ekue. Ha'e gui oo ta ma vy ha'e ae ndojerurei mba'eve ogueraa va'erā re, huvixa rembiguai eunuco Hegai kunhague ro rarōaty va'e ogueraa uka va'e anho ogueraa. Ha'e rami vy Ester rexaa kuery ha'e javi ojou porā rei okuapy.

¹⁶ Ha'e rami py huvixa Assuero ro py heraa Ester. Dez jaxy tebete 'ea va'e py ogueraa, sete ma'etŷ re ma huvixa opena oiny jave.

¹⁷ Ha'e gui huvixa ma kunhague mboae gui oayvuve Ester. Kunhataīgue'i mboae huvixa oĩa py ou va'e ha'e javi gui ojou porāve, oayvuve ete. Ha'e rami vy inhakā re akā regua ouro guigua huvixa omoĩ reve Vasti rekovicu ogueru gua'yxyrā.

¹⁸ Ha'e gui ma huvixa ojapo peteĩ ngaru tuvixa va'e ojeupegua kuery yvatekueve ha'e guembiguai kuery ha'e javi pe. Ester peguarā ae ojapo ngaru. Ha'e rami vy openaa ha'e javi rupi oikuua uka pavē opytu'u aguā ára, ha'e huvixa ome'ẽxeal'i py mba'emo ome'ẽ rive pavē pe.

¹⁹ Ha'e gui mokoīguea kunhataīgue omboaty ukaa jave ma Mordecai oguapy oiny tenda huvixa ro rokē py.

²⁰ Ha'e jave py ma Mordecai ijayvuague rami vy Ester ndoikuua ukai teri guetarā kuery ha'e imongakuaare mava'e regua paa. Ester onhe'ẽ rendu teri oikovy Mordecai omongakuaa jave rami ae.

Huvixa ojukaxe okuapy rā Mordecai oikuua ague

²¹ Ha'e va'e jave huvixa rokē py Mordecai oguapy oiny jave py ma huvixa Assuero rembiguai mokoī ikuai eunuco meme va'e, okē rarōa va'e regua Bigtā ha'e Teres hery va'e. Ha'e va'e kuery ma nguvixa pe ivai vaipa vy jogueroayvu ojuka aguā re.

²² Ha'e nunga Mordecai oikuua vy omombe'u uka huvixa ra'yxy Ester pe. Ha'e rā Ester ma huvixa pe ju omombe'u uka Mordecai rery rupi.

²³ Ha'e ramo ha'e nunga re oikuaa potaa rā anhetēguia ra'e. Ha'e rā mokoīve ojyryvipy imoiny yvate. Ha'e nunga ma huvixa renonde py omboparaa imoiny kuaxia mba'emo oikoague oĩa re.

3

Mordecai re Hamā nda'ija'eiague

¹ Ha'e nunga oikopa ma rire huvixa Assuero omboyvate Hamedata ra'y Hamā, Agague ramymino va'e. Ha'e vy oirū kuery yvatekueve ikuai va'e ha'e javi áry omoī.

² Ha'e ramo huvixa rembiguai kuery hokē py ikuai va'e ha'e javi ma Hamā oaxa nhavō ojero'a vy guenapy'ā re 'rā ikuai henonde, ha'e rami ae huvixa ojapo uka rire. Ha'e rā Mordecai ma henonde ndojero'ai, guenapy'ā re noī guive.

³ Ha'e rami rā huvixa rembiguai kuery hokē py ikuai va'e aipoe'i okuapy Mordecai pe:
— Mba'e re tu huvixa ojapo ukaague rami e'ŷ reiko? — he'i okuapy.

⁴ Ko'ě nhavō ixupe ha'e rami ijayvu okuapy teī ndojapyxaka potai. Ha'e ramo ha'e kuery omombe'u Hamā pe, oikuaaxe vy Mordecai pa ayvu py ipo'aka 'rāa. Mba'eta ha'e kuery pe onhemombe'u ma voi judeu oikoa.

⁵ Ha'e ramo Hamā oexa rā henonde py Mordecai ndojero'ai neī guenapy'ā re voi noī ramo ipoxy ete ixupe.

⁶ Ha'e rami avi onhembopy'a Mordecai ojuka uka aguā re, ha'e anho rive'ŷ guive ojukaxe. Mba'eta Hamā pe omombe'ua ma mava'e regua pa Mordecai oikoa. Ha'e rami vy Hamā onhembopy'a Mordecai retarā kuery judeu ikuai va'e ha'e javi ojuka uka aguā re, huvixa Assuero openaa ha'e javi rupi.

Hamā judeu kuery ojukapaxeague

⁷ Ha'e gui doze ma'etŷa re ma huvixa Assuero oī javé, jaxy ijypy'ia nisā 'epy va'e py ma Hamā guenonde py oexa uka xortea Pur 'epy py. Ko'ě nhavō guarā doze jaxya peve ojapo. Ha'e rami vy oikuaa jaxy adar 'epy va'e py ha'eve 'rāa.

⁸ Ha'e ramo Hamā aipoe'i huvixa Assuero pe:
— Xeruvixa, repenaa ha'e javi rupi pavē regua mbyte rupi peteī regua ikuai. Ha'e va'e kuery reko ma amboae regua ikuai va'e reko reve joo rami e'ŷ rei, lei remombe'u uka va'e rami e'ŷ guive ikuai. Ha'e va'e kuery ma nda'evei reja rive aguā.

⁹ Xeruvixa, ha'eve ri ramo embopara uka ha'e kuery ojukapaa aguā regua. Ha'e rami aguā ijukaarā kuery po py ame'ē 'rā trezentos e trinta mil quilos prata guigua, ndee huvixa mba'emo remoī porāaty pyguarā ae — he'i.

¹⁰ Ha'e ramo huvixa okuā gui kuā regua omboi vy ome'ē Hamedata ra'y Hamā, Agague ramymino ha'e judeu kuery rovaigua oiko va'e pe.*

¹¹ Ha'e vy aipoe'i ixupe:

— Ha'e va'e prata ma ndepo py ae topyta, judeu kuery ha'e rami ae avi. Ha'e kuery re ma reikuua rami ejapo.

Judeu kuery ojukapaa aguā huvixa oikuaa ukaague

¹² Ha'e gui peteī jaxya ha'e treze araa py ma oenoīa huvixa rembiguai kuaxia mboparaa kuery. Ha'e ramo Hamā ijayvua ombopara okuapy huvixa kueryrā huvixave omoī va'ekue peguarā, ijyvy ha'e javi re opena va'e pe, peteī-teī regua yvatekueve pe guive. Peteī-teī regua ayvu py ombopara okuapy, peteī-teī regua oendu kuaa aguā rami. Huvixa Assuero rery rupi ae ombopara, huvixa kuā regua py omboja vy hery omoī guive.

¹³ Ha'e va'e kuaxia para omondouka ayvu reraaty kuery pe. Huvixa pegua yvy ha'e javi rupi omondouka judeu kuery omomba, ojukapa ha'e omokanhymba vyvoi aguā regua, kunumigue ha'e tujakue, kyrīgue'i ha'e kunhague guive. Peteī ára pyve ojukapa aguā, doze jaxya adar 'epy va'e treze araa py, ha'e gui imba'e rei-reikue oipe'apa aguā guive.

* 3:10 Kuā regua omboi vy Hamā pe ome'ē guery rupi ojapo uka aguā.

¹⁴ Ha'e va'e ayvu oguerova avi peteĩ-teĩ yvy re lei ojapo pyre ogueroayvua aguã. Ha'e vy oguerova va'ekue ma ha'e javi regua pe omondouka, ha'e va'e ára pygumarã oiko katu pavẽ aguã.

¹⁵ Ha'e gui ma ayvu reraa kuery huvixa ojapo uka va'ekue oikuaa vy oje'oi pojava. Ha'e ramo Susã tetã py omombe'ua oo yvateve va'e oĩ va'e rupi. Huvixa ha'e Hamã ma oy'u aguã py oguapy okuapy, ha'e rã Susã tetã rupi ma onhemondyipa rei okuapy.

4

Judeu kuery re Ester ojerure aguã re ijayvuague

¹ Ha'e nunga ha'e javi Mordecai oendu vy omondoro oao ha'e ajukue voxvaikue guigua py rive onhemonde, tanhimbu guive omoĩ ojee. Ha'e gui oẽ vy tetã rupi oiko-iko. Ipy'a vai nhendu rei ovy nda'evei etea oendu vy.

² Ha'e rami vy huvixa rokẽ peve'i ovaẽ, mba'eta huvixa rokẽ rupi ma avave rei nda'evei oike aguã voxvaikue guigua py onhemonde reve.

³ Ha'e gui yvy mboae-mboae rupi huvixa ijayvuague ha'e lei ojapo va'ekue omombe'ua rupi judeu kuery ipy'a vai ete okuapy, okaru e'ŷ re ikuai, ojae'o ha'e hexay vaipa reve. Mbovy rei e'ŷ tanhimbu áry onhenokuapy voxvaikue guigua py onhemonde reve.

⁴ Ha'e gui Ester oĩa py hembiguai kunhague ha'e eunuco kuery ou vy ixupe omombe'u okuapy Mordecai oikoa ha'e javi. Ha'e nunga huvixa ra'yxy oendu vy nda'evei etea oendu. Ha'e vy ajukue mboae omondouka Mordecai pe voxvaikue guigua ojegui omboi vy onhemonde aguã. Ha'e rami teĩ ha'e ma ndoipotai.

⁵ Ha'e ramo Ester oenoĩ huvixa rembiguai eunuco va'e regua Hataque hery va'e, Ester rembiguairã ju omboaxa va'ekue. Ha'e va'e ma Mordecai oĩa py Ester omondouka mba'e nunga pa oikoa oikuaa aguã.

⁶ Ha'e ramo tetã mbyte py Hataque oo Mordecai reve nhovaexĩ aguã huvixa rokẽ py oguapy oinya py.

⁷ Ixupe Mordecai omombe'upa hexe oiko va'ekue ha'e javi, huvixa pe Hamã prata ome'ẽ vy judeu kuery omomba aguã re ijayvuague guive omombe'u.

⁸ Ixupe ome'ẽ avi ipara oguerova pyre Susã tetã rupi ogueraa uka pyre, judeu kuery omombaa aguã regua, Ester pe hembiguai oexa uka vy oikuaa avi aguã, ha'e ju huvixa oĩa py oo vy omboaxy aguã re ojerure aguã, henonde py guetarã kuery re ojerure aguã.

⁹ Ester oĩa py Hataque ojevy vy omombe'upa Mordecai ijayvuague ha'e javi.

¹⁰ Ha'e ramo Hataque pe Ester ombovai vy aipoe'i uka Mordecai pe:

¹¹ — Ha'e rami avi huvixa rembiguai kuery ha'e javi, ha'e ijyvy ikuai va'e regua oikuaa pavẽ ava e'ŷ vy kunha teĩ ha'e ae rive opy ja'o py huvixa pe ojexa uka vy oike va'e rei, ha'e va'e peguarã peteĩ'i ayvu oĩ, ojukaa aguã, xapy'a rei ixupe huvixa opo pygua ouro guigua omokuave'ẽ e'ŷ vy, oikove aguã. Ha'e gui xee ma kova'e jaxy ha'e javi re huvixa naxerenoĩ teri oĩa py aa aguã — he'i.

¹² Ha'e rami Ester ijayvuague ma Mordecai pe ju omombe'ua.

¹³ Ha'e ramo imombe'ua kuery pe Mordecai ombovai Ester pe omombe'u aguã:

— Ha'e rami avi huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa teĩ.

¹⁴ Mba'eta ha'e rami ete oiko taa ára rekyrirĩ ri ramo amboae henda gui ju 'rã oiko judeu kuery pytyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhi'ã ha'e rami aguã ae nemoĩa raka'e huvixa ra'yxyrã — he'i uka.

¹⁵ Ha'e rami rã Ester ju aipoe'i uka Mordecai pe:

¹⁶ — Tereo ha'vy, emboatypa judeu kuery Susã tetã py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ŷ re avi 'rã orekuai. Ha'e va'e rire ma aa 'rã huvixa oĩa py, lei oĩ va'e rovai teĩ ae ma. Xapy'a rei xejukaa aguã rami ri rã amano 'rã — he'i.

¹⁷ Ha'e ramo Mordecai oo vy ojapo Ester ojapo uka va'ekue ha'e javi.

5

Huvixa ha'e Hamā okaru aguā py Ester oenoīague

¹ Mboapy araa py Ester onhemoatyrō vy oao porāgueve py onhemonde. Ha'e vy oo vy huvixa ro roka py hi'aī, huvixa openaaty rexei. Ha'e rā huvixa ma guenda openaaty py oguapy oiny okē oī va'e yvy'iry.

² Ester oka py opyta ho'amy rā huvixa oexa vy oendu omovaēxea vy ixupe omokuave'ē po pygua ouro guigua. Ha'e rami rā Ester onhemboja vy po pygua apy re opoko.

³ Huvixa aipoe'i ixupe:

— Xera'yxy Ester, mba'e tu rerek, mba'e nunga re ha'vy rejerure ta? Mba'eta apenaa mbyte rupi peve teī xee ame'ē 'rā.

⁴ Ester ombovai:

— Xeruvixa, ndevy pe ha'eve ri ramo tereo ndee Hamā reve. Aŷ'i areko katupa ma ngaru ndevy — he'i.

⁵ Ha'e ramo huvixa aipoe'i:

— Pejapo ha'vy Hamā ojapura aguā rami, Ester oipota va'e rei rojapo aguā — he'i.

Ha'e gui huvixa ha'e Hamā ovaē ngaru tuvixa va'e Ester oguereko katu va'ekue py.

⁶ Vinho oy'u okuapya py huvixa oporandu Ester pe:

— Mba'e nunga re tu rejerure? Mba'eta xee ame'ē 'rā. Mba'e tu rejapo ukaxe? Apenaa mbyte rupi peve rejerure teī ojapoa 'rā.

⁷ Ha'e ramo Ester ombovai vy aipoe'i:

— Xee aipota va'e re ajerurea ma po rami:

⁸ Xeruvixa, xapy'a rei xemboaxy ramo, ha'e aipota va'e ojapoa aguā ndevy ha'eve ri ramo tove ko'ē ramo ju terevaē Hamā reve ngaru areko katu aguā py. Ha'e ramo mae ma rombovai 'rā, xeruvixa — he'i.

⁹ Ha'e va'e árave Hamā ojepe'a ov y ov y'aa onhenhandu reve. Ha'e rami teī huvixa rokē py Mordecai oguapy oinya py oexa rā henonde py nopu'āi neī nomboetei guive oiny ramo oendu Mordecai rovai ipoxy etea.

¹⁰ Ha'e rami teī Hamā ojejoko vy ngoo katy oo. Ha'e vy oirū kuery oenoī ukapa, gua'yxy Zeres guive.

¹¹ Ha'e kuery reve Hamā ijayvu iporiau e'ŷa re, gua'y kuery heta ikuia re, opa mba'e py huvixa omboete ukaague re, ha'e huvixa rembiguai kuery yvatekueve mboae áry omboyvateveague re guive.

¹² Ha'e vy aipoe'ive ju:

— Huvixa ra'yxy Ester ae ma voi avave noenoī ngaru oguereko katuague py oo aguā, xee e'ŷ vy. Ha'e rami ae avi ko'ē rā guarā voi xerenoi ju huvixa reve aa aguā.

¹³ Ha'e rami teī ha'e nunga ha'e javi ma naxembovy'ai, huvixa rokē py judeu Mordecai oguapy oiny rā aexaa ja — he'i.

¹⁴ Ha'e ramo ixupe ta'yxy Zeres ha'e irū kuery ikuai va'e ha'e javi aipoe'i:

— Ejapo uka ha'vy peteī jojyryvipy a renderā, vinte e dois metros yvatea va'e ejapo. Ha'e gui ko'ē rā aje'ive'i reve huvixa pe aipo'ere Mordecai ojyryvipy aguā. Ha'e gui ma revy'a reve 'rā reo huvixa reve ngarua py — he'i. Ha'e rami ijayvua Hamā oendu vy ojou porā. Ha'e rami vy ojapo uka jojyryvipy a renderā.

6

Hamā pe Mordecai omboete ukaa ague

¹ Ha'e va'e pyávy ma huvixa ndokei re oiko. Ha'e rami vy kuaxia mba'emo oiko va'ekue'-ekue oña ogueru ruka ramo henonde py ogueroayvua.

² Ha'e va'e kuaxia para re ojou Bigtā ha'e Teres ojapo vaixea Mordecai oikuua ukaague. Mba'eta ha'e va'e mokoīve eunuco huvixa rokē rarōa kuery va'e regua ae huvixa Assuero ojukaxe teī va'ekue.

³ Ha'e gui ma huvixa oporandu:

— Mordecai ha'e rami ojapoague re mba'e nunga tu ixupe ojapo porāa raka'e omboete ukaa rupi?

Huvixa renonde hembiguai kuery ikuai va'e ombovai:

— Mba'eve rei ixupe ndojapo porāai teri — he'i okuapy.

⁴ Ha'e va'e jave py Hamā oike ae ma ra'e huvixa roka apy rupi, jojryvipy renderā Hamā ojapo uka va'ekue py huvixa pe ojerure aguā Mordecai ojryvipy uka aguā. Ha'e ramo huvixa va'e oporandu:

— Mava'e tu oī oka py? — he'i.

⁵ Hembiguai kuery ombovai:

— Hamā rima oka py hi'aī — he'i. Ha'e ramo huvixa aipoe'i oike aguā.

⁶ Hamā oike ma ramo huvixa oporandu ixupe:

— Ava xee amboete ukaxe va'e pe ma mba'exa nda'u ha'eve 'rā ojapo porāa aguā? — he'i.

Ha'e rami rā Hamā ojeupe ae “Mava'e ha'vy oiko huvixa omboete uka vy oguerovy'ave 'rā, xee e'ŷ vy?” he'i.

⁷ Ha'e rami vy huvixa pe ombovai:

— Ava remboete ukaxe vy rejapo porāa va'e pe ma

⁸ toguerua ijaorā iporāve va'e ndee xeruvixa ae renhemondea va'ety regua, ha'e kavaju hi'āry riae ndee xeruvixa reikoaty va'e guive. Inhakā re ma tomoña akā regua ndee xeruvixa pegua ae.

⁹ Ndee xeruvixa rembiguai yvatekueva va'e ae tome'ē ijao ha'e kavaju ixupe, tomonhemonde avi ndee xeruvixa remboete ukaxe va'e. Ha'e gui ma kavaju áry togueraa tetā rupi tape ikuai va'e rupi, ha'e henonde rupi tomombe'u herekovy: “Ha'e rami ae ojapoa ava huvixa omboete ukaxe va'e pe”, te'i — he'i.

¹⁰ Ha'e ramo huvixa aipoe'i Hamā pe:

— Ejapura ke ha'vy. Ndeayvuague rami ae ejopy ao ha'e kavaju, ha'e huvixa rokē py judeu Mordecai oguapy oiny va'e pe ejapo. Neī peteī henda'i py ma voi ejapo e'ŷ eme ndeayvuague — he'i.

¹¹ Ha'e gui Hamā ma ao ha'e kavaju ogueraa vy omonhemonde Mordecai. Ha'e vy kavaju áry omoī vy tetā rupi ogueraa. Henonde rupi omombe'u herekovy:

— Ha'e rami ae ojapoa ava huvixa omboete ukaxe va'e pe — he'i ov.

¹² Ha'e va'e rire ma huvixa rokē py ju Mordecai ojevy. Ha'e rā Hamā ma oē vy onha ov yngoo katy. Nda'evei ete reve oakā onhovāmba ov.

¹³ Ha'e gui ma gua'yxy Zeres pe omombe'u oiko va'ekue ha'e javi, oirū kuery pe guive. Ha'e ramo irū kuery hi'aranduve va'e ta'yxy Zeres reve aipoe'i okuapy ixupe:

— Ha'e gui ma Mordecai renonde nemo'yvyī'ia ma. Judeu kuery regua oiko ramo nandepo'akai 'rā hexe. Ha'e rami 'rāgue py anhetē henonde py nemo'yvyī'i ete 'rā — he'i.

¹⁴ Hexeve ha'e kuery ijayvu teri reve ovaē okuapy huvixa rembiguai eunuco kuery. Ha'e vyve ogueraa pojava Hamā ngaru Ester oguereko katu va'ekue oiko aguā katy.

Hamā ojapoxea Ester omombe'u rire ojryvipyga ague

¹ Ha'e gui ma huvixa oguerovaē Hamā gua'yxy Ester reve oy'u okuapy aguā py.

² Mokoīguea ma vinho oy'u okuapy py huvixa oporandu Ester pe:

— Xera'yxy Ester, mba'e nunga re ete tu rejerure ta? Ndevy pe xee ame'ē 'rā. Mba'e ha'vy reipota? Xee ajapopa 'rā ndevy apenaa mbyte rupi peve rejerure teī.

³ Ha'e ramo ta'yxy Ester ombovai:

— Xeruvixa, xapy'a rei nerondenre py xemboaxy, ha'e ndevy pe ha'eve ri ramo eme'ē xee ajerurea xerekoverā re ae. Ha'e gui xee aipota va'e ma xeretarā kuery rejuka ukapa e'ŷ aguā.

⁴ Mba'eta ore kuery ma orevendepaa ma, xee ha'e xeretarã kuery reve, oremomba aguã, orejukapa ha'e oremokanhymba vyvoi aguã. Nhoembiguarã rive orevendea va'e rire xee akyrirĩ 'rãgue, mba'eta xeruvixa, ha'e rami va'e rire orerovaigua káuxa nda'evei 'rãgue romoangeko aguã — he'i.

⁵ Ha'e ramo huvixa Assuero oporanduve vy aipoe'i gua'yxy Ester pe:

— Mava'e tu ndeayvua va'e? Mamo tu oiko ha'e rami ete pendeapo aguã opy'a re oendu va'e?

⁶ Ester ombovai:

— Orerovaigua oremombaxe va'e ma peva'e mba'emo vai apoa Hamã — he'i.

Ha'e rami rã Hamã ma huvixa ha'e ta'yxy renonde py okyje reia anho oendu.

⁷ Huvixa ipoxy ete vy vinho oy'u oinya gui opu'ã vy oẽ ovy yvotyty ngoka py oĩ va'e katy. Ha'e rã Hamã ma opy optyta huvixa ra'yxy Ester pe ojerure aguã guekoverã re, mba'eta oikuua huvixa ombopaga aguã re onhembopy'a maa.

⁸ Ha'e gui yvotyty ngoka py oĩ va'e gui huvixa oike ju ramo opy vinho oy'u okuapyague py, ha'e va'e jave tenda Ester oĩa áry Hamã ho'a ra'e. Ha'e nunga huvixa oexa vy aipoe'i:

— Peva'e ta'vy omoangeko teve ra'e xera'yxy Ester xerenonde, xero py ae?

Huvixa ha'e rami ijayvu ramove onhovãa Hamã rova.

⁹ Ha'e ramo peteĩ huvixa rembiguai eunuco regua Harbona hery va'e aipoe'i:

— Hamã ro katy'i ko hi'aĩ peteĩ jojyryvipy a renderã ojapo va'ekue vinte e dois metros yvatea va'e, ha'e va'e py huvixa reraajeppeare Mordecai ojyryvipy aguã ojapo uka va'ekue — he'i.

Ha'e ramo huvixa aipoe'i:

— Ha'e va'e py ae pejyryvipy Hamã — he'i.

¹⁰ Ha'e ramo Mordecai ojyryvipy aguã Hamã ojuka uka va'ekue py ae ojuka okuapy. Ha'e ramo mae ma huvixa noenduvei opoxyague.

8

Ngovaigua kuery re judeu kuery opu'ã aguã re ijayvuague

¹ Ha'e va'e árave judeu kuery rovaigua Hamã rogue huvixa Assuero ome'ẽ gua'yxy Ester pe. Mordecai avi oguerua huvixa renonde py, huvixa pe Ester hetarã ae oikoa omombe'u rire.

² Ha'e ramo huvixa okuã regua Hamã gui ojopy ju va'ekue omboi vy Mordecai pe ju ome'ẽ. Hamã rogue re opena va'erã ma Ester omoĩ Mordecai ae.

³ Huvixa renonde py Ester ijayvuve tema. Ha'e vy ipy rupi ojero'a oiny vy ojae'o reve ojerure oiny ombovaipa aguã Agague ramymino Hamã judeu kuery ojukapa aguã regua ombopara va'ekue.

⁴ Ha'e ramo Ester-a katy peteĩgue ju huvixa omokuave'ẽ po pygua ouro guigua. Ha'e ramo Ester opu'ã ho'amy huvixa renonde py.

⁵ Ha'e vy aipoe'i ixupe:

— Xeruvixa, xapy'a rei ndevy pe ha'eve ramo, xemboaxya rendu ha'e ha'evea ramigua reikuua ramo, po rami aguã rejou porã ri ramo tomboparaa Hamedata ra'y Hamã Agague ramymino onhembopy'aague ombovaipa aguã regua, mba'eta yvy repenaa ha'e javi rupi judeu kuery ikuai va'e omombaa aguã ombopara uka.

⁶ Mba'exa 'rã tu xee aexa ha'e rami ete mba'emo vai xeretarã kuery re oiko rã? Mba'exa 'rã tu aexa xeretarã kuery ojukapaa rã? — he'i.

⁷ Ha'e ramo huvixa Assuero aipoe'i gua'yxy Ester ha'e judeu regua Mordecai pe:

— Ha'e gui ma Hamã judeu kuery ojukapaxe ramo Ester pe xee amboaxa ma hogue, ajyryvipy uka guive imo'amy.

⁸ Aÿ ma pembopara avi ha'vy judeu kuery pe. Xee penderuvixa rery rupi pembopara peikuua rami ae. Ha'e gui pemboja avi xekuã regua py xerery remoĩ reve. Mba'eta huvixa rery rupi pembopara vy ikuã regua py pemboja rire imbovaipa rive pyrã e'ÿ ae optyta — he'i.

⁹ Ha'e ramove oenoī huvixa rembiguai kuaxia mboparaaty kuery, mboapy jaxy a sivā 'epy va'e ha'e vinte e três araa py. Ha'e vy Mordecai ijayvua ha'e javi rami ombopara okuapy judeu kuery pe, opena va'e ha'e huvixa kuery pe guive, ha'e yvy mboae Índia ha'e Etiópia rupi yvatekueve opena va'e kuery pe. Cento e vinte e sete yvy re opena va'e kuery pe ombopara peteī-teī regua ayvu py, peteī-teī regua oendu kuaa aguā rami. Judeu kuery pe voi ha'e rami ae avi ombopara ha'e kuery ayvu py, oendu kuaa aguā rami.

¹⁰ Huvixa Assuero rery rupi ombopara, ha'e huvixa kuā regua py ju omboja. Ha'e rami vy kuaxia para ogueraa uka ayvu reraaty kuery pe. Ha'e va'e kuery ma kavaju iporāgueve huvixa rymbarā imoingo pyre áry oje'oi.

¹¹ Ha'e va'e kuaxia re ma tetā nhavō rupi judeu kuery ikuai va'e pe huvixa po rami ojapo uka, ono'õmba okuapy vy guekove oepya rupi joe opu'ā aguā. Ha'e kuery re, kyrīgue e'ŷ vy kunhague re ha'e va'e yvy regua amongue tembiporu reve ou va'e rei tema judeu kuery ha'eve ojuka aguā. Omomba 'rā okanhymba vyvoi aguā rami, oipe'apa 'rā guive imba'e rei-reikue.

¹² Peteī ára pyve ha'e nunga ojapo 'rā okuapy yvy huvixa Assuero openaa ha'e javi rupi, doze jaxy adar 'epy va'e ha'e treze araa py.

¹³ Ha'e va'e kuaxia lei ombopara pyre oĩa ma yvy ikuai va'e ha'e javi rupi ogueroayvu pavē aguā. Ha'e javi regua kuery pe ogueraa, ha'e va'e ára pygularā judeu kuery oiko katu aguā, ngovaigua kuery re opu'ā okuapy aguā.

¹⁴ Ha'e rami vy ayvu reraa kuery ma huvixa rymba kavaju áry ikuai vy oje'oipa pojava. Huvixa ijayvuague oikuaa vy inhakuāve tema oje'oivy. Susā tetā rupi voi oikuaa ukapa.

¹⁵ Ha'e gui Mordecai ma huvixa renonde gui oẽ vy onhemonde ov yao iporāve va'e yva rami hovy ha'e xii rei va'e py. Inhakā re ma akā regua tuvixave va'e ouro guigua oĩ. Imanto-rā ma omoī ajukue xii ipererī'i va'e púrpura rewegua. Ha'e ramo Susā tetā rupi ov y'apa okuapy.

¹⁶ Ha'e rami vy judeu kuery oendu okuapy ov y'aa. Oguerovy'apa okuapy, ha'e kuery omboetepaa ramo.

¹⁷ Ha'e rami ae avi yvy ha'e javi ha'e tetā ikuai va'e rupi huvixa ayvu oikuaa ukaa py rei tema judeu kuery ov y'a vaipa okuapy, joguerovy'a, ngaru guive ojapo. Ha'e gui yvy regua kuery heta avi judeu rami onhemoingo, judeu kuery gui okyjea anho oendu okuapy vy.

9

Ngovaigua kuery judeu kuery ojukapaague

¹ Ha'e gui doze jaxy adar 'epy va'e ha'e treze araa py ma ojeupity ma huvixa ayvu ojapoa aguā. Ha'e rami vy judeu kuery re hovaigua kuery ipo'aka aguā re oarō okuapyá ára ma oexa'āague rami e'ŷ oiko, mba'eta judeu kuery ae ipo'aka okuapy nda'ija'ei va'e kuery re.

² Mba'eta huvixa Assuero openaa yvy ha'e javi rupi judeu kuery ikuai va'e guekoatetā nhavō rupi ono'õmba okuapy imombaxeaa kuery omomba aguā. Avave rei ndojoko kuaai, mba'eta yvy regua ha'e javi oendu okuapy okyje reia anho.

³ Ha'e gui yvy ha'e javi pygua yvatekueve, opena va'e ha'e huvixa kuery huvixave omoī va'ekue ha'e javi ma oipytyvō okuapy judeu kuery, Mordecai gui okyjepa vy.

⁴ Mba'eta Mordecai ma huvixa ro pygua kuery gui yvateve va'e oiko, yvy ha'e javi rupi oikuaa guive. Ha'e rami vy ipo'akave ov y tema 'rā.

⁵ Ha'e rami py judeu kuery oitypa ngovaigua kuery. Kyxe py ojukapa, omomba. Ngovaigua kuery oguerekoxea rami tema oguerek.

⁶ Susā tetā py voi judeu kuery ojuka vy omomba quinhentos avakue ikuai va'ekue.

⁷ Ha'e rami ae ojuka avi Parsandata, Dalfom, Aspata,

⁸ Porata, Adalia, Aridata,

⁹ Farmasta, Arisai, Aridai ha'e Vaizata.

¹⁰ Ha'e va'e kuery ma judeu rovaigua Hamedata ra'y Hamā ra'y kuery dez ikuai va'ekue. Ha'e rā ha'e kuery mba'e rei-reikue re ma ndopokoi.

¹¹ Ha'e va'e árave huvixa pe omombe'ua mbovy pa Susā tetā py ojukapa pyre.

¹² Ha'e ramo huvixa aipoe'i gua'yxy Ester pe:

— Susā tetā py judeu kuery ojuka vy omomba va'ekue ha'e javi vy ma je quinhentos avakue, ha'e Hamā ra'y kuery dez va'ekue ju. Ha'vy yvy mboae rupi ikuai va'e ma mbovy ju 'rā nda'u ojukaa? Ha'e rami vy mba'e re tu aÿ rejerureve ju? Mba'eta ha'e nunga ome'ëa 'rā ndevy. Mba'e nunga ju reipota ajapo? Ha'e nunga ojapoa 'rāe — he'i.

¹³ Ha'e ramo Ester ombovai:

— Ha'e rami rā xeruvixa, xapy'a rei rejou porā ramo tove Susā tetā py judeu kuery ikuai va'e ko'ë rā ju ta'ikuai aÿ guarā re ndeayvuague rami. Ha'e rā Hamā ra'y kuery dez ikuai va'ekue retekue ma tombovavaa imoiny jojyryvipyra renderā ojapo pyre re — he'i.

¹⁴ Ha'e ramo huvixa aipoe'i ha'e rami ae tojapoa. Ha'e ramo Susā tetā py oikuaa ukapaa. Ha'e gui Hamā ra'y kuery dez va'ekue retekue ombovavaa imoiny.

¹⁵ Ha'e gui jaxy adar 'epy va'e ha'e catorze araa py ma judeu kuery Susā tetā py ikuai va'e ono'ombā okuapy vy trezentos avakue ju ojuka. Ha'e rā imba'e rei-reikue re ma ndopokoi.

Ngaru Purim 'epy va'e ojapo ypy okuapyague

¹⁶ Ha'e rami ae avi judeu kuery huvixa openaa yvy mboae rupi ikuai va'e voi ono'ombā okuapy vy guekove oepya rupi ikuai, ngovaigua kuery gui oo jepe aguā. Ha'e rami vy setenta e cinco mil ojuka ija'e e'ÿ va'ekue. Ha'e rā imba'e rei-reikue re ma ndopokoi.

¹⁷ Ha'e nunga ma jaxy adar 'epy va'e re oiko treze araa py. Ha'e gui catorze araa py ma optyu'upa okuapy. Ha'e va'e ára ojapo okuapy ngaru ov'y'a aguā.

¹⁸ Ha'e rā Susā tetā py judeu kuery ikuai va'e ma ha'e va'e jaxy re treze ha'e catorze araa py ju onhemboaty okuapy. Ha'e va'e kuery ma quinze araa py optyu'u vy ojapo ngaru ov'y'a aguā.

¹⁹ Ha'e rami ae avi judeu kuery tetā'i ikora e'ÿ va'e py ikuai va'e ma jaxy adar 'epy va'e re catorze araa py ae avi ojapo ngaru ov'y'a okuapy vy. Ha'e va'e ára ngaru ojapoa gui tembi'u ogueraa vy joupe-upe omboja'o okuapy.

²⁰ Ha'e nunga Mordecai ombopara vy kuaxia omondouka huvixa Assuero openaa yvy ha'e javi rupi judeu kuery ikuai va'e pe, ha'e'i rupi ha'e mombyry rupi ikuai va'e pe guive.

²¹ Ha'e kuery rekora ombopara ma'etÿa nhavō jaxy adar 'epy va'e re catorze araa py ngaru ojapo aguā quinze araa peve,

²² ha'e va'e ára py ae ngovaigua kuery gui oo jepepa rire. Ha'e va'e jaxy re ma iporiaupa okuapyague gui judeu kuery ov'y'aa rupi ju ikuai, ojae'opa reiague gui ngaru py ju ov'y'a okuapy. Ha'e nunga rupi ha'e oeja ov'y'a reve ngaru ojapo okuapy aguā, ha'e ngarua gui tembi'u ogueraa vy joupe-upe ome'ë aguā, iporiaukue'i pe guive.

²³ Ha'e ramo judeu kuery ojou porā okuapy guekorā va'ekue py ae ha'e rami ikuai aguā, Mordecai ojapo ukaague rami vy.

²⁴ Mba'eta ha'e va'e jave py Hamedata ra'y Hamā Agague ramymino judeu kuery rovaigua va'e onhembopy'a tei judeu kuery omomba aguā. Ha'e rami vy xorte Pur 'epy va'e oexa avi ombovaipa ha'e ojukapa aguā.

²⁵ Ha'e rami tei huvixa renonde py Ester oo ramo kuaxia ombopara vy ojapo Hamā judeu kuery ojukaxe hexe ae ju ojeapa aguā rami. Ha'e rami vy ojyryvipy uka, ta'y kuery guive.

²⁶ Ha'e nunga rupi ae ha'e va'e ára pe "Purim" 'ea, tery Pur va'e rami. Mba'eta ha'e va'e kuaxia para re oïa rami ha'e nunga ha'e javi oiko rā ha'e kuery oexa okuapy.

²⁷ Ha'e rami rire judeu kuery guekorā ojou porā okuapy ha'e va'e mokoï ára ojeupity nhavō ha'e rami ikuai aguā hexarai e'ÿ re, hamymino kuery ha'e onhemoirū va'e kuery ha'e javi peguarā. Ha'e rami vy ojee omoï ombopara pyre oïa rami ikuai aguā, ma'etÿa nhavō oa'angaague ára ojeupity jave.

²⁸ Ha'e rami vy hamymino kuery ikuai jevy-jevy va'e peguarā ha'e va'e ára re ima'endu'a okuapy aguā, peteï-tei oo pygua kuery, yvy ha'e tetā ikuai va'e pygua ha'e javi. Ha'e rami vy Purim ára ojeupity nhavō judeu ha'e hamymino kuery hexarai e'ÿ aguā raka'e rā peve.

²⁹ Ha'e gui ma Abiail rajy huvixa ra'yxy Ester, judeu Mordecai reve teīgue ju ombopara kuaxia. Opo'akaa ha'e javi rupi ombopara Purim omombe'u ypy va'ekue omoī atāve aguā.

³⁰ Opa rupi judeu kuery pe kuaxia para ogueraa uka cento e vinte e sete yvy huvixa Assuero openaa ha'e javi rupi. Ombovy'a aguā ombopara ombopy'a guaxua rupi.

³¹ Ha'e vy omoī atāve aguā Purim oa'angaague ára py porā ikuai aguā judeu Mordecai, huvixa ra'yxy Ester reve ojapo ukaague rami, mba'eta ha'e kuery ae ranhe ikuai ha'e rami, ha'e gui guamymino kuery peguarā ju oeja, iporiau vy okaru e'ŷ re ikuaiague re ima'endu'a aguā.

³² Ha'e rami py Purim ára re marā rami pa ha'e kuery ikuai aguā Ester ae ojapo uka, kuaxia re ombopara vy.

10

Mordecai yvatevea re ijayvua

¹ Ha'e nunga oikopa ma rire huvixa Assuero ojapo ha'e va'e yvy ha'e ye'ẽ rembe rupi ikuai va'e ha'e javi ixupe opaga aguā.

² Ha'e gui oīve rei tema huvixa Assuero rekukue regua. Ha'e rami avi opo'akaa rupi mba'emo ovareve va'e ojapo va'ekue, ha'e Mordecai omboyvateveague ha'e javi noī 'rā teve kuaxia Média ha'e Pérsia pygua huvixa kuery rekukue oĩa re?

³ Mba'eta judeu Mordecai ma huvixa Assuero rembiguai yvateve va'e oiko. Judeu kuery voi omboete vaipa, hetarā kuery ha'e javi omboetepa okuapy, mba'eta ha'e kuery pe mba'emo porā ojapoa rupi anho oiko, ha'e kuery ikuai porā aguā re onhea'ã oikovy guive.

Jó rekukue oĩa Jó rekukue oĩa

Jó ma peteĩ ava iporayvu va'e, iporiaukue va'e'ŷ, Nhanderuete re ojerovia ete va'e ha'e ov'y'aa rupi tema oiko va'e. Ha'e gui Nhanderuete pe Satanás ojerure Jó oeko a'ã aguã re, anhetẽ ri Nhanderuete pe oikoa oexaxe vy. Ha'e ramo Nhanderuete oeko a'ã uka. Ha'e rami rã Jó mba'emo oguerekva'e opa vyvoi, ta'y kuery omanomba xapy'a, ha'e Jó re ae ou ai vaikue imbojexavaiara.

“Ha'e ramo Jó opu'ã vy omondoro oao, onhopi oakã ha'e ipukupa oupy yvy rupi. Nhanderuete omboete vy aipoe'i: ‘Xepire rei reve aiko'i va'ekue ha'i rye gui, ha'e xepire rei reve ju 'rã aa. Senhor ma mba'emo me'ea, ha'e oipe'a va'erã avi oiko. Ta'ima'endu'a porãa Senhor rery re!’ he'i. Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ŷa rami joguerekova rami” (1.20-22).

Ha'e gui ma ou Jó irũ kuery mboapy ikuai va'e. Oĩa py optya are rire hexeve jogueroayvu okuapy ojexavaia re. Ha'e kuery oikuua rami tei Jó gueko vaia re oiko axy. Ha'e rã Jó ma “Xereko porã va'e” he'i, ndoikuuai guive mba'e re pa haxy va'e Nhanderuete ombouague. Amongue py Nhanderuete reko re ijayvu ndovy'aia rupi, ndoikuuai rei vy.

Ha'e gui opaa py ma Nhanderuete ombovai vy oexa uka pavẽ gui ipo'akapave ha'e hi'aranduve va'ea. Ha'e ramo Jó nda'evei ramo vy aipoe'i: “Anhetẽ ri aikuua vy e'ŷ xeayvu va'ekue, mba'emo xevy pe iporã vaipa ha'e aikuua va'erã e'ŷ re anho”, he'i (42.3b). Ha'e rami rire jypy guare gui Nhanderuete omoingo porãve Jó.

Jó heko porã ha'e mba'emo oguerekopaa re ijayvua

¹ Oiko peteĩ ava Uz yvy pygua, Jó hery va'e. Ha'e va'e ava ma anhetẽ rupi ipy'a ha'e heko porã va'e. Nhanderuete renonde ojererokyjea rupi vy mba'emo vai gui ojepe'a kuerei va'e.

² Sete gua'y ha'e mboapy guajy kuery oguerekovo.

³ Hymba kuery ma sete mil vexa'i, três mil camelos, quinhentos toros memos ha'e quinhentos mburika'i. Ixupe ombo'eapo va'e kuery voi mbovy rei e'ŷ ikuai. Ha'e rami vy kuaray oua katy ikuai va'e gui oguerekopave va'e oiko.

⁴ Ta'y kuery ma peteĩ-tei ro rupi oje'oi 'rã jorire-rire ngaru ojapo aguã. Ha'e rami vy mboapy gueindy kuery oenoĩ kuerei 'rã ha'e kuery reve okaru ha'e oy'u aguã.

⁵ Ha'e kuery okarupa ma nhavõ Jó gua'y kuery oenoĩmba kuerei vy oiky'a'o ukapa 'rã teko vai gui. Ha'e rami vy ko'ẽ ramove opu'ã vy mymba oapy reve ome'ẽ 'rã Nhanderuete pe ha'e kuery mbovy pa ikuia rami vy, mba'eta aipoe'i: “Xapy'a rei ma xera'y kuery ojejavý ra'e, ogypta py nguete rovai ijayvu vai vy”, he'i vy. Ha'e ramigua ae Jó ojapo riae oikovy.

⁶ Ha'e gui peteĩ ára Nhanderuete ra'y kuery ou okuapy SENHOR renonde ojexa uka aguã. Ha'e kuery reve anha voi ou.*

⁷ Ha'e ramo SENHOR oporandum anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

⁸ SENHOR oporanduve ju anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetẽ rupi ipy'a ha'e heko porã va'e, Nguete renonde ojererokyjea rupi vy mba'emo vai gui ojepe'a va'e — he'i.

⁹ Ha'e ramo anha aipoe'i SENHOR pe:

— Jó nda'u rive teve nguete renonde ojererokyjea rupi oiko?

* 1:6 “Nhanderuete ra'y kuery” he'ia ma hembiguai anjo kuery re ijayvu vy.

¹⁰ Mba'eta ndee ma repena porã hexe, hoo re ha'e opa mba'e oguereko va'e re guive. Ha'e rami vy opo py ojapo va'e rei remoingo porã, ha'e rejapo mba'emo yvy re oguereko va'e hetave ovv aguã rami.

¹¹ Ha'e rami tei emokuave'ẽ ndepo, ha'e ixugui eipe'apa opa mba'e oguereko va'e. Ha'e rami vy rex a'rã neronden py ijayvu vai rã nderovai — he'i.

¹² Ha'e rã SENHOR aipoe'i anha pe:

— Ma'ẽ, Jó oguereko va'e ha'e javi ma ndepo'akaa py oĩ, ha'e rã hexe anho ta'vy emoi eme ndepo — he'i. Ha'e ramo SENHOR renonde gui anha oo ju.

Jó ojexavaia py tei ndojejavvyague

¹³ Petei ára, ta'y kuery guyke'y jypyguia ro py okaru ha'e vinho oy'u okuapy.

¹⁴ Ha'e gui Jó-a py ou petei hembiguai aipoe'i va'e:

— Vaka kuery reve yvy roikaraĩ, ha'e kuery katy'i rupi mburika kuery avi okaru jave

¹⁵ ore kuery re sabeu kuery ou xapy'a vy ogueraapa. Ha'e rami vy nerembiguai kuery ikuai va'ekue ojukapa kyxe py. Xee anho'i aa jepe, ndevy pe amombe'u vy aju — he'i.

¹⁶ Ha'e va'e ijayvu teri reve ou amboae ju. Ha'e vy aipoe'i:

— Tata Nhanderuete-a guigua yva gui ho'a vy oapypa ra'e veva'i ha'e nerembiguai kuery ikuai va'ekue. Ha'e vy omomba. Xee anho'i aa jepe, ndevy pe amombe'u vy aju — he'i.

¹⁷ Ha'e va'e ijayvu teri reve ou amboae ju. Ha'e vy ha'e aipoe'i:

— Caldeu kuery mboapy henda rupi nhomboja'o vy camelu kuery re ou vy ogueraapa ra'e. Ha'e vy ojukapa nerembiguai kuery kyxe py. Xee anho'i aa jepe, ndevy pe amombe'u vy aju — he'i.

¹⁸ Ha'e va'e voi ijayvu teri reve ou amboae. Ha'e vy aipoe'i:

— Nderay ha'e nderajy kuery tujave va'e ro py okaru ha'e vinho oy'u okuapy jave

¹⁹ teko a e'ya katy gui yvytu atã opu'ã ouvy vy oo re ojeapi jova-jovai katy gui. Ha'e ramo ha'e kuery áry ho'a ramo omanomba. Xee anho'i aa jepe, ndevy pe amombe'u vy aju — he'i.

²⁰ Ha'e ramo Jó opu'ã vy omondoro oao, onhopi oakã ha'e ipukupa oupy yvy rupi. Nhanderuete omboete vy

²¹ aipoe'i:

— Xepire rei reve aiko'i va'ekue ha'i rye gui, ha'e xepire rei reve ju 'rã aa. SENHOR ma mba'emo me'ea, ha'e oipe'a va'erã avi oiko. Ta'ima'endu'a porãa SENHOR rery re! — he'i.

²² Ha'e nunga ha'e javi py Jó ndojejavvyi, nei nda'ijayvui Nhanderuete ha'eve'ya rami joguerekao rami.

2

¹ Petei ára Nhanderuete ra'y kuery ou ju SENHOR renonde ojexavaia uka aguã, ha'e anha voi ha'e kuery reve ou henonde ojexavaia uka avi aguã.

² Ha'e ramo SENHOR aipoe'i anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

³ SENHOR oporandu anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetã rupi ipy'a ha'e heko porã va'e, Nguuete renonde ojererokyjea rupi vy mba'emo vai gui ojepe'a va'e. Ha'e ma oĩ atã ha'evea rami oikoa py, hovai apu'ã vy amomba rive aguã rami ndee xeapoxe tei — he'i.

⁴ Ha'e ramo anha aipoe'i SENHOR pe:

— Opire ha'e javi'i ha'vy tome'ẽ, mba'eta avakue opa mba'e oguereko va'e ome'ẽ 'rã guekove rekovic.

⁵ Ekuave'eve ju ha'vy, ikägue ha'e ho'o re epoko. Ha'e rami vy rex a'rã neronden py nderovai ijayvu vai rã — he'i.

⁶ SENHOR aipoe'i anha pe:

— Ma'ẽ, ndepo'akaa py amboaxa, va'eri ejuka eme ta'vy — he'i.

⁷ Ha'e gui SENHOR-a gui anha oo vy omomba'eaxy Jó ai vaikue py, ipy mbyte guive ijapye peve.

⁸ Ha'e ramo Jó oguapy oiny tanhimbu áry, ha'e vy ojopy peteñ nhae'ũ ra'ykue onhekaraí aguã.

⁹ Ha'e gui ta'yxy ou vy aipoe'i ixupe:

— Reĩ atã teri va'e ty'y ha'evea rami reikoa py? Ndeayvu vai na Nhanderuete re, ha'e gui emanoo.

¹⁰ Ombovai:

— Oikuua ve'ŷ rei va'e rami ndeayvu. Nhanderuete gui iporã va'e anho ri ty'y jajopy 'rã, ha'e rã iporã e'ŷ va'e ma ndajajopyi avi 'rã teve? — he'i. Ha'e ramia ha'e javi py Jó ndojejavyi oayvu py.

¹¹ Ha'e gui ma mboapy Jó irũ kuery mba'emo vai hexe oikoague oendu vy peteñ-teñ ou guekoia gui: Temã pygua Elifaz, Sua pygua Bildade ha'e Naamá pygua Zofar. Ha'e va'e kuery jogueroayvu vy Jó oña katy jogueru omombaraete ha'e ombopy'a porã aguã.

¹² Mombyry rupi teri ha'e kuery oma'ẽ jogueru vy ndoexa kuaai okuapy. Ha'e rami vy onhendu ratã ha'e ojae'o okuapy. Ha'e vy peteñ-teñ oao puku omondoro, ha'e yvate rami oakã áry rupi omombo-mombo yvy ku'i.

¹³ Ha'e rami vy hexeve oguapy okuapy yvy py. Sete ára ha'e sete pytû re ikuai va'eri peteñve hexeve nda'ijayvui peteñ ayvu py ma voi, haxy ete va'e oendua oexa vy.

3

Jó otui'iague ára re ijayvu vaiague

¹ Ha'e va'e rire Jó ae ijayvu. Ha'e vy ijayvu vai otui'iague ára re.

² Ha'e vy aipoe'i:

³ — Xetui'iague ára ndoikoi ma voi va'e rire,

ha'e va'e pytû "Ixy oguereko peteñ ava'i", 'ea va'e avi.

⁴ Ha'e va'e ára pytûmba va'e rire,

Nhanderuete yvate gui nopenai ramo,
yvate oña gui omoexakã e'ŷ va'e rire.

⁵ Pytû reia ha'e kuaray'ã manoa anho oĩ va'e rire,

hil'áry rupi araipa va'e rire guive.

Ha'e va'e ára omoõumba va'e rire opa marã rei.

⁶ Ha'e va'e pyávy re ma pytû ete va'e omo'ã va'e rire.

Ma'etý re ára mboae ikuai va'e rami toguerovy'aave eme.

Ha'e va'e jaxy pe "Jaxy ikuai va'e regua" ta'eave eme.

⁷ Ha'e va'e pytû imemby e'ŷa va'e rire,

ha'e va'e py nonhenduai va'e rire ový'a va'e.

⁸ Ijayvu vai kuaa va'e kuery ma ha'e va'e ára re ijayvu vai ma va'e rire,

vixo vaikue ye'ẽ rupigua momyí kuaa kuery ae.

⁹ Tá, ha'e va'e pytû jaxy-tata ko'ẽ mbijarã ndojekuaai va'e rire,

ha'e hendy va'e oarõmby ndojekuaai va'e rire.

Ko'ẽ rai jave ko'ẽ oexaxe va'e kuery ndoexai ma voi va'e rire.

¹⁰ Mba'eta ha'e jave py nombotyi raka'e ha'i ryepy rokẽ,

xerexa py ajexavaia aexa e'ŷ aguã.

¹¹ — Mba'e re tu xee namanoi raka'e xeryru'i pyve?

Mba'e re tu ha'e va'e gui aiko'i vy ndaxeayvuẽvei?

¹² Mba'e re tu oiko raka'e o'u áry xekuavãarã?

Mba'e re tu oĩ ikã xemokambuarã?

¹³ Mba'eta ha'e va'e ndoikoi va'e rire aŷ apytu'u porã rei 'rãgue.

Ake ramo xevy oĩ 'rãgue apytu'u aguã,

¹⁴ huvinxave ha'e nhomongeta va'ety yvy re ikuai va'ekue

- onhono porāa aguā ojapo ma voi va'ekue py itui va'e rami,
¹⁵ ha'e rami e'ŷ vy yvatekueve ouro ha'e prata oguereko va'ekue py
 ngoo omonyē va'ekue itui va'e rami,
¹⁶ ha'e rami e'ŷ vy hyru'i py oĩ va'e ojuka nhemi va'e rami xee ndaikoi ma voi va'e rire,
 kyrī'i va'e hexakāa peteīgueve oexa e'ŷ va'e rami.
¹⁷ Ha'e py ma ha'eve'ŷa rami ikuai va'ekue nanhomoangekovei ma 'rā.
 Ikane'ō va'ekue guive ikane'ōgua nho 'rā ha'e py.
¹⁸ Ha'e py ma escravo-rā ogueraa pyre ikane'ōgua 'rā okuapy,
 hereko kuery ayvu nonhenduvei ramo.
¹⁹ Ha'e py yvyīgueve ha'e yvatekueve ikuai va'ekue itui pavē 'rā,
 tembiguai ikuai va'ekue voi opatō pe ve'ŷ ma 'rā ikuai.
²⁰ — Mba'erā tu iporiaukue ojapoia ri hendy va'e oexa riae aguā rami?
 Mba'erā tu ikuerai va'e okuave aguā rami ojapoia?
²¹ Ha'e kuery ma omano aguā anho oarō okuapy, ha'e rā novaēi.
 Ha'e kuery omano aguā oekave 'rā okuapy hepyve va'e onhomni mbyre oekaa rupi
 yvy ojo'o va'e gui.
²² Ha'e kuery ma onhono porāa rā ovy'a 'rā okuapy,
 oguerovy'a rei 'rā yvykua py ovaē vy.
²³ Mba'erā tu avakue pe oexa ukāa 'rā hexakā va'e haperā oikuaa uka e'ŷ re?
 Mba'eta Nhanderuete ojoko 'rā joa katy gui e'ŷ-e'ŷ.
²⁴ Mba'e re tu xee ha'u va'erā 'rāgue py ajou xepytuē atā aguā,
 ha'e yy onhoē va'e rami ajae'o ete aguā?
²⁵ Mba'eta akyjea ou ma xe'áry,
 aexā'āa oiko ma xere.
²⁶ Ndapytu'uvei, naī rivevei, neī naxekane'ōgua kuaavei,
 xepy'a reta rei aguā anho ou ramo — he'i.*

4

Jó pe Elifaz ijayvu eteague

- ¹ Ha'e ramo Temā pygua Elifaz ombovai. Ha'e vy aipoe'i Jó pe:
² — Xapy'a rei amongue ndevy ijayvu ramo nerendui 'rā ri ty'y?
 Ha'e rami avi mava'e tu ojejoko 'rā ijayvu e'ŷ aguā?
³ Ma'ẽ, ndee ma mbovy e'ŷ rei rekombo'e va'ekue,
 ha'e ipo kangy va'e remombaraete kuerei va'ekue.
⁴ Ndeavyua py reipytyvō va'ekue onhepyxanga va'e kuery,
 ha'e remombaraete ju va'ekue henapy'ā kangy va'e.
⁵ Ha'e rā aŷ ma ndere ju ha'e nunga ou ramo ndee nerenduxei 'rā.
 Ndee rejexavai vy nanderekorāvei.
⁶ Nhanderuete renonde rejererokyjea rupi ve'ŷ ri ty'y rejerovia,
 rearō reikovya ha'e nderekō porāa rupi ve'ŷ ri ty'y reiko?
⁷ — Nema'endu'a pota ke: Ojejavy e'ŷ va'e pa okanhy 'rā?
 Mamo tu heko porā va'e omombaague?
⁸ Xee aexaa rami, mba'emo vai nhotŷare kuery ma
 ha'e nungakue ae ju 'rā omono'ō.
⁹ Nhanderuete ipytuē ramo rive ha'e kuery ikuai axy 'rā.
 Opoxya rupi oipeju rā okanhymba 'rā.
¹⁰ Ha'e ramo guary kuery voi inharō tei okyrirī 'rā okororōa gui,
 guary ra'y kuery raĩ guive opēmba 'rā.
¹¹ Ha'e rami vy guary kuery ikangy 'rā oje'oivy mba'eve ndojukavei vy.

* 3:26 Jó ndoikuai raka'e mba'e re pa ojexavaia. Ha'e rami vy ndovy'aia rupi ijayvu Nhanderuete re. Ha'e gui opaa py Nhanderuete ijayvu ixupe omo'arandua rupi, capítulo 38 guive 40 peve, ha'e rā Jó ma nda'evei ramo ha'e rami ijayvuague re.

- Guary kunha ra'y kuery voi opa rupi 'rā oaīmba.
 12 — Peteī ayvu aendu xee ae'ia py omombe'ua rā.
 Haxy'i py aendu kuaa xeapyxa py ijayvua mbegue rā.
 13 Pyávy, ajexa ra'ua re aikuua pota ete reve,
 avakue oke vaipa jave
 14 ou karamboae xemondyi ha'e xemboryryipaarā.
 Xekāgue eteve voi oryryipa.
 15 Ha'e ramo peteī nhe'ē oaxa xerenonde rupi.
 Ha'e rami vy ojapo xe'a xerete rupi ikuai va'e opu'āmba aguā rami.
 16 Ha'e va'e opyta ho'amy va'eri ndaexa kuaai hova.
 Peteī mba'e rive ojekuaa aexaa py.
 Jypy nonhendui mba'eve. Ha'e gui ma aendu peteī aipoe'i va'e:
 17 "Imarā va'e kuery nda'u heko porā 'rā Nhanderuete renonde?
 Avakue nda'u iky'a e'ŷ va'e 'rā oiko imoingoare renonde?
 18 Ma'ē, Nhanderuete ma guembiguai kuery re ndojeroviai 'rā.
 Mba'eta guembiguai anjo kuery re eteve voi oikuaa tekō vai oīa.
 19 Ha'e rā yapo guigua py hoo va'e re katuve ma.
 Ha'e kuery ma yvyku'i gui rive ojapo pyre,
 ha'e tanambi rami rive ju 'rā omou'ūa.
 20 Aje'ive ha'e kuery itui'i 'rā, ha'e gui ka'arukue ju omombaa 'rā.
 Okanhy 'rā raka'e rā peve guarā, avave rei oikuaa pota e'ŷ re.
 21 Ha'e kuery rekove oipe'aa ramo
 omano 'rā 'arandua oupity e'ŷ re", he'i.

5

- Jó Nhanderuete oeka aguā re Elifaz ijayvuague*
- 1 — Ejapukai aŷ! Ha'e rami teī oiko ri nda'u nerenduarā?
 Mava'e anjo iky'a e'ŷ va'e pe tu renhepytvō uka ta?
 2 Mba'eta hi'arandu e'ŷ va'e ipoxya ae ombovaipa 'rā.
 Inhakā porā e'ŷ va'e ivaia rive 'rā ojuka.
 3 Xee ma aexa porā hi'arandu e'ŷ va'e onhemoingo porā merami ramo.
 Ha'e rami teī are'ŷ'i re aikuua hoo oīa ayvu vaipy oikoa.
 4 Ta'y kuery voi mombyry ikuai ipytyvoarā gui.
 Tetā kora rokē py ha'e kuery ojexa uka rā ombopagaa,
 heraa jepearā ndoikoi ramo.
 5 Ha'e kuery onhotŷ va'ekue ma ijajupa rā ikuuai va'e kuery ho'upa rive 'rā,
 juu mbyte rupi henhoī va'ekue voi oipe'apa 'rā.
 Ha'e mba'emo oguereko va'ekue ma oikuaa pota rei va'e kuery omokanhymba 'rā.
 6 Mba'eta tekō axy ma yvyku'i gui rive ndoikoi,
 yvy gui e'ŷ henhoī jajexavai aguā.
 7 Ha'e rami 'rāgue py avakue ojexavai aguā rami ae 'rā itui'i,
 tapyī gui tata raviju yvate katy ae 'rā ovevea rami.
 8 — Ha'e gui xee va'e rire ma aeka 'rāgue Nhanderuete,
 ixupe anho amboaxa 'rāgue xerekō.
 9 Mba'eta ha'e ma ojapo 'rā mba'emo tuvixa va'e oikuaa pyrā e'ŷ,
 ha'e nhomondyipaarā omombe'u kuaa pyrā e'ŷ.
 10 Ombo'oky 'rā yvy áry rupi,
 omoakŷ 'rā mba'ety ikuai va'e.
 11 Ha'e rami vy ogueraa jepe 'rā yvyīgue'i peteī henda yvatea py,
 ojae'o va'ekue oiko porāa rupi ov'y'a nho aguā.
 12 Ha'e rā jokorea kuery onhembopy'aa ma ha'e ombovaipa 'rā,
 opo py ojapoxe va'ekue ndojapo kuaai aguā.

- ¹³ Ombo'a 'rā oikuaapave va'e nhombotavya py ae.
 Ha'e ramo oikuaapa va'e onhembopy'aague opa rive 'rā.*
- ¹⁴ Ha'e kuery ma ara py teī ojou 'rā pytūa anho,
 kuaray mbyte jave teī pytū rupi merami ikuai, opovyvy 'rā oje'oivy.
- ¹⁵ Nhanderuete ma jogueraa jepe 'rā ha'e kuery juru gui kyxé oē va'e gui,
 ipo'akave va'e po gui ogueraa jepe 'rā ojexavai va'e.
- ¹⁶ Ha'e rami rā oī 'rā iporiaukue'i oarō okuapy aguā,
 ha'e rā joapo vaia kuery ma okyririmbā 'rā.
- ¹⁷ — Ovy'a ete 'rā avakue Nhanderuete omo'arandu va'e.
 Ha'e nunga rupi endu rive eme Ipo'akapave va'e nemo'arandu rā.
- ¹⁸ Mba'eta ha'e ma nhomboai 'rā, ha'e gui ha'e ae ju oipoano 'rā.
 Nhonomomba'eaxy 'rā, ha'e gui opo py ae ju 'rā omonguera.
- ¹⁹ Seis-kue rejexavaia gui ha'e ndereraa jepe 'rā,
 ha'e sete-a py voi mba'emo vai nanderupityi 'rā.
- ²⁰ Karuai py teī ndereraa jepe 'rā remano aguā gui,
 joe opu'āa py guive ndereraa jepe 'rā kyxé po'akaa gui.
- ²¹ Nderepy 'rā ayvu vai gui,
 ha'e ramo mba'emo mbovaipaarā ovaē rā rexa teī nderekylei 'rā.
- ²² Mba'emo mbovaipaa ha'e karuai oiko rā repuka 'rā,
 vixo ka'aguy regua gui guive nderekylei 'rā.
- ²³ Mba'eta yvy rupi ita ikuai va'e reve voi rejapo 'rā peteī rami ikuai porā aguā,
 mymba yvy regua voi ndereve ikuai 'rā peteī rami.
- ²⁴ Reikuuaa 'rā ndero py mby'a porā oīa,
 ha'e mba'emo rerekva'e ikuia rupi reikuuaa pota reovy rā ndoatai 'rā mba'eve.
- ²⁵ Reikuuaa avi 'rā neramymino kuery heta 'rāa,
 ndeguigua kuery yvy re jai rogue ikuai va'e rami 'rā heta.
- ²⁶ Ndetuja'i jave teī nembaraete reve 'rā reo yvyra rupa py,
 trigo ojokua pyre hi'ára py porā omono'ōa rami.
- ²⁷ — Ma'ē, ha'e nunga re roikuuaa pota rā ha'e rami ae.
 Ejapyxaka ndee voi, ha'e nunga re eikuuaa pota avi reiko porā aguā — he'i.

6

Jó onhemboeko porāa rupi ijayvuague

- ¹ Ha'e ramo Jó ombovai:
² — Ail! Xeayvua re anhetē oikuuaa potaa va'e rire,
 ha'e mba'emo opejaa py xeporiaua opejaa va'e rire
- ³ ha'e va'e ma anhetē ita ku'i ye'ē rembe rupi ikuai va'e gui ipoyive 'rāgue.
 Ha'e nunga rupi ae xevai reve xeayvu va'ekue.
- ⁴ Mba'eta Ipo'akapave va'e ma guembiporu hu'y py xenhyvōmba,
 ha'e ramo xenhe'ē py aendu veneno ramigua.
 Xerovai meme Nhanderuete ombou xemongyjearā.
- ⁵ Mburika'i yvy'āa rupigua nda'u nhuū re okaru reve onhe'ē 'rā teve?
 Vaka kuery nda'u onhe'ē 'rā okaru porāa py?
- ⁶ Juky e'ŷ re teve ja'u 'rā he'ē e'ŷ va'e?
 Tyrā uru rupi'a xiña re oī 'rā teve heea?
- ⁷ Xenhe'ē py nda'uxei va'ekue
 aŷ ajeguaru reve teī ha'u.*
- ⁸ — Nhanderuete ajerurea ojapo va'e rire,
 aipota va'e ha'e omoingo va'e rire!
- ⁹ Nhanderuete pe ha'eve va'e rire xemokanhy voi aguā,

* 5:13 1 Coríntios 3.19 * 6:7 Apy tembi'u hee e'ŷ va'e re Jó ombojoja, ojexavaia re ijayvu vy.

- opo oupi vy xejuka ete aguã!
- ¹⁰ Ha'e nunga oiko ma va'e rire xepy'a guaxu 'rāgue,
haxy aendu temaa py teī apo-apo 'rāgue avy.
Mba'eta xee ma Iky'a e'ŷ va'e ayvu rovai xeayvu va'e'ŷ.
- ¹¹ — Mba'e tu arōve ta, xembaraete vy e'ŷ?
Mba'erā tu aikove riae ta, amano aguã rami tema aiko vy?
- ¹² Xembaraetea nda'u ita rami hatā va'e?
Xero'o nda'u overa va'e guigua rami hatā va'e?
- ¹³ Any! Naendui ae xepytyvōarā.
Xegui oipe'apaa ma xembaraeterā va'ekue.
- ¹⁴ — Ojexavai va'e pe irū kuery omboaxy'a'i oexa uka va'e rire,
Nhanderuete renonde ojererokyjea gui ojepe'a e'ŷ rā.
- ¹⁵ Ha'e rā xeryvy kuery ma anhetē rupi e'ŷ xererekō.
Ha'e kuery ikuai peteī yakā oxyry atā vy hembe rupi oĩa rami
- ¹⁶ yro'y ogueroxyry reve,
yro'y apī hyku ovj javē,
- ¹⁷ ha'e rami teī haku jave oxyry atā va'ekue typa rive va'e rami,
ndaevovovei ha'e oxyryague rupi ndoxyryvei va'e rami.
- ¹⁸ Ha'e ramo oguata va'e kuery yy rekaa rupi ojepekuavo 'rā jogueravy tape oo aguã
va'ekue gui,
ha'e vy tekaoa e'ŷa katy oje'oi vy omanomba 'rā ha'e py.
- ¹⁹ Temā yvy gui oguata va'e kuery oeka teī yy oxyry atā va'e,
Sabá gui oguata va'e kuery voi iporiaupa 'rā yy re.
- ²⁰ Yy oĩ aguã re ojerovia va'ekue oxīmba 'rā okuapy.
Oxyryague py ovaẽ vy ndoikuaavei rei 'rā okuapy.
- ²¹ Ha'e rami ae peē kuery voi xevy pe mba'everā ovare e'ŷ va'e pendekuai.
Mba'eta ajexavai rā pexa vy penhemondyipa rive.
- ²² Xee nda'u aipoa'e: "Peme'ē ke mba'emo xevy", ha'e teve?
Tyrā pa "Peme'ē mba'emo pereko va'e xepytyvō aguã", ha'e teve?
- ²³ "Xereraa jepe ke xemoingo axya po'akaa gui",
e'ŷ vy "Xerepy ke porayvu e'ŷ va'e kuery po gui", ha'e teve pēvy?
- ²⁴ — Xerekombo'e na, ha'e rā xee akyrirī 'rā.
Pemombe'u porāve na mba'e nunga py pa ajejavyague.
- ²⁵ Anhetē ayvu ha'evea ramigua ma oenduxe vai pyrā meme!
Ha'e rā peē kuery ma mba'erā tu pendeayvu ete xevy?
- ²⁶ Peē kuery xemongetaxe ri ty'y xeayvua re,
peteī ndaekorāvei va'e yvytu pe rive ijayvu va'e rami xeayvu rire?
- ²⁷ Tyre'ŷ kuery re teve pexa 'rā xortea,
ha'e pejogueroayvu 'rā teve peneirū repyrā re?†
- ²⁸ Ha'e gui aŷ peē kuery xemboaxy'a'i ri vy pema'ē porā xere,
ha'e pexa penerenonde ndaxeapuia.
- ²⁹ Peikuua pota ju ke, ajerure pēvy, ha'eve'ŷa rami xekuaa e'ŷ aguã.
Peikuua pota ju, ha'e vy peikuua 'rā ha'evea rami aikoa.
- ³⁰ Xeayvua py teve ha'eve'ŷa ramigua pendu?
Xejuru py ha'eve'ŷ va'e re xeayvu va'e rire nda'u xee voi ndaikuuai 'rāgue teve?

Nhanderuete pe Jó ijayvuague

- ¹ — Yvy re avakue ojexavai aguã rami e'ŷ teve ikuai?
Oikovea ára ombo'eapo va'e rami e'ŷ teve ojexavai?
- ² Escravo kuaray'ā oeka teī va'e rami,

† 6:27 Apy Jó ijayvu oirū kuery nomboaxyia re.

- ha'e ombo'epo va'e opagaa aguā oarō va'e rami,
³ xevy pe ha'e rami ae avi ome'ea mba'erā e'ŷ aiko aguā jaxy nhavō re,
 ha'e pytū aiko axy aguā ome'ea avi.
- ⁴ Anheno vy aipoa'e: "Mbovy hora nda'u ha'eve 'rā avy ju aguā?"
 Ha'e rami teī pytū ipuku ramo
 xerupa rupi ajere-jere tema ajupy ko'ẽ peve.
- ⁵ Xero'o re oĩ taxo ha'e pekue vaikue.
 Xepire re ipekue oĩ va'e gui ipeu jepi.
- ⁶ Xe'ára ma mba'emo mbovyvya gui ipojavave,
 ha'e vy opa 'rā arō e'ŷkue re.
- ⁷ Nema'endu'a ke xerekovea yvytu rami rive oaxapa vyvoia re.
 Xerexa ndoexavei ma 'rā iporā va'e.
- ⁸ Aŷ xerexa okuapy va'e ma ndaxerexavei ma 'rā.
 Ha'e kuery rexa oxareko rei teī xee ndajekuaavei ma 'rā.
- ⁹ Arai ivaipa reve oaxa va'e rami avi
 onhono porā mbyre noẽvei 'rā.
- ¹⁰ Ha'e kuery ndojevyvei 'rā ngoo katy,
 ikuaiague py ae teī ha'e kuery re na'ima'endu'aavei ma 'rā.
- ¹¹ — Ha'e nunga rupi ae xee ndajokoi xejuru.
 Ha'e rami vy xeayvu 'rā xenhe'ẽ py ajexavaia aendu va'e re,
 anhemombe'u 'rā xerekove re ajexavaia rupi.
- ¹² Xee nda'u ye'ẽ, e'ŷ vy vixo ye'ẽ rupigua teve,
 ndee xerarō uka aguā?
- ¹³ Xee aipoa'e: "Xerupa py aĩa py avy'a 'rā,
 xerupa py apytu'u 'rā ajexavaia re xeayvua gui", ha'e.
- ¹⁴ Ha'e rami teī ndee xemondyi 'rā mba'emo aexa ra'u va'e gui,
 xemongyje aexa merami va'e gui.
- ¹⁵ Ha'e nunga rupi xenhe'ẽ pe ha'eveve 'rāgue xejyryvipyva va'e rire.
 Aiko axy 'rāgue py ha'eveve amano aguā.
- ¹⁶ Xevy pe ha'eve ma aikovea.
 Raka'e rā peve xee ndaikovexei.
 Xereja ha'vy, mba'eta xe'ára ma yvytu rami rive oaxapa vyvoi.
- ¹⁷ Mba'e nunga tu avakue ikuai rejou porā aguā,
 ha'e kuery re repena aguā?
- ¹⁸ Mba'eta ára nhavō reju reikuua pota aguā,
 ha'e hora nhavō 'rā rexa pota.
- ¹⁹ Raka'e peve tu ndereipe'ai 'rā nderexa xegui?
 Raka'e peve 'rā nda'evei xerendyry amokō aguā?
- ²⁰ Xapy'a rei ajejavvy vy mba'e nunga ha'eve'ŷ va'e tu ajapo ndevy,
 ndee avakue re reikuua pota va'e?
 Mba'e re tu xeapo hu'y rea'anga aguā,
 xejeupe ae ipoyi va'e apyta aguā rami?
- ²¹ Mba'e re tu neremboguei xerekovaia,
 ha'e ndereipe'ai ajejavvyague?
 Mba'eta aŷ ha'a ta ma yvy rupi.
 Ha'e va'e rire ndee xerekovaia vy ndaxejouvei ma 'rā — he'i.

- ¹ Ha'e ramo Sua pygua Bildade ombovai:
² — Raka'e peve 'rā tu pova'e nunga re ndeayvu?
 Raka'e peve 'rā tu ndejuru gui ndeayvuẽ yvytu atā va'e rami rive?

- ³ Nhanderuete nda'u ha'eve'ŷa rami 'rã oikuua pota?
Ipo'akapa va'e nda'u gueko porãa rupi e'ŷ 'rã nhanderereko?
- ⁴ Hovai nderay kuery ojejavy rire
omombo ma ojejavyague re opaga aguã py.
- ⁵ Ha'e rami avi xapy'a rei ndee Nhanderuete reka rã,
ha'e Ipo'akapa va'e pe nemboaxy aguã re rejerure rã,
- ⁶ xapy'a rei nandeky'aia ha'e nderekoo porãa rupi ri reiko ramo,
are'ŷ re ha'e onhemoo'i 'rã nepytyvõ aguã,
ha'e vy nemoi ju 'rã nderekoo porãa ojekuaa porã aguã py.
- ⁷ Jypy reikoague py ma anhetõ ne'yvy'i va'ekue,
ha'e rã opaa py ma ndeyvate ete 'rã.
- ⁸ — Ha'e gui aŷ ma xee ajerure ndevy, eporandu na ymagua kuery rekukue re,
eikuua pota neramoï kuery ikuaiague re.
- ⁹ Mba'eta nhande ma kue'ive guare jaiko vy mba'eve ndajaikuai.
Ha'e nhande'ára yvy re jaikoa ma kuaray'ã rami oaxa ov yva'e.
- ¹⁰ Neramoï kuery nanembo'eí ri ty'y,
ha'e kuery nanemongetai ri ty'y?
Ha'e vy ha'e kuery ae o'arandua rupi nomombe'ui ri ty'y po rami?
- ¹¹ Mba'eta papirō renhoï ma yapo py anho 'rã yvate,
juncō renhoï guive yy py anho 'rã oiko porã.
- ¹² Ha'e va'e nunga ipyau teri reve ojaya e'ŷ re tei
amboae jai rogue gui ipiru voive 'rã.
- ¹³ Ha'e rami ae avi ikuai Nhanderuete gui hexarai va'e kuery ha'e javi.
Mba'eta heko vai va'e kuery mba'emo oarõ okuapy va'e opa rive 'rã.
- ¹⁴ Ha'e kuery oï atã merami tei opa xapy'a 'rã,
ha'e kuery ojeroviaa ma nhandu kya rami rive 'rã ivaipa.
- ¹⁵ Ikya re amongue ojeko rã oxopa 'rã.
Ha'e va'e re amongue ojopy rã ivaipa rive 'rã.
- ¹⁶ Ha'e kuery ma ikuai kuaray py mba'emo rogue oiko porã vy
yvotyty ha'e javi rupi hoky pojava va'e rami.
- ¹⁷ Hapo ma onhemamamba 'rã ov yvy ita ijaty oupy va'e áry rupi,
henhoï vy oike 'rã kora hi'aï va'e re voi.
- ¹⁸ Ha'e rami tei xapy'a rei oïague gui Nhanderuete omondoro ramo
oïague py ae tei hexe na'ima'endu'aavei ma 'rã.
- ¹⁹ Ha'e rami rire hekove mba'everä ndovarei!
Ha'e gui yvy ku'i py henhoïague gui amboae ju 'rã henhoï.
- ²⁰ — Ha'e rã anhetõ rupi ipy'a va'e kuery ma Nhanderuete ndoejai 'rã,
nomboaxai 'rã guive heko vai va'e kuery po py.
- ²¹ Ha'e ma ndejuru py omoi 'rã nderory nho aguã,
nerembe re omoi 'rã revy'a aguã.
- ²² Ha'e rã ndejojai reiare kuery ma ojee ae omoi 'rã oximba reia.
Heko vai va'e kuery ro okanhymba 'rã — he'i.

9

Nhanderuete pe Jó nombovai kuaia rami ijayvuague

- ¹ Ha'e ramo Jó ombovai vy aipoe'i:
² — Anhetõ, xee voi aikuua rã ha'e rami ae.
Ha'e rami tei marã rami vy 'rã tu avakue onhemboeko porã Nhanderuete renonde?
- ³ Mba'eta xapy'a rei hexeve avakue nhombojovake ramo
mil-kue oporandua regua nei peteïve ma nombovai kuaai 'rã.
- ⁴ Ha'e ma opy'a py oikuapa ha'e ipo'akapave va'e.
Mava'e tu hexe opu'ã reiague gui oo porã ju 'rã?

- 5 Ha'e ma oipe'a 'rã vyty ikuai va'e oikuaa okuapy e'ŷ re.
Opoxya py ombovaipa 'rã.
- 6 Ha'e ma vy omomyĩ vy oguerova 'rã oĩa gui,
ha'e ramo ijyta oĩ va'e oryryipa 'rã.
- 7 Kuaray pe ha'e ijayvu rã ndojopevei 'rã.
Omo'ã 'rã guive jaxy-tata ikuai va'e.
- 8 Ha'e ae'i oipyo va'ekue yva,
ha'e ye'ẽ áry rupi oguata 'rã oikovy.
- 9 Ha'e ma jaxy-tata apoare: Ursa, Hendy guaxu va'e,
Eixu, jaxy-tata kuaray ijapu'a'ia katy ikuai va'e guive.
- 10 Ha'e ma mba'emo tuvixa va'e oikuaapy e'ŷ apoa,
mba'emo porã omombe'u kuaapy e'ŷ guive.
- 11 Ma'ẽ, xapy'a rei xeyvy'iry rupi ha'e oaxa rã xee ndaexai 'rã.
Xerenonde rupi ete oiko teĩ xee ndaikuai 'rã.
- 12 Mba'emo ha'e oipe'a ta ramo mava'e tu ojoko 'rã?
Mava'e tu aipoe'i 'rã ixupe: "Mba'e tu rejapo?"
- 13 — Nhanderuete ma nomboaxa rivei 'rã opoxya.
Ha'e ramo henonde rupi ojero'a 'rã okuapy Egito pygua pytyvõa kuery.
- 14 Ha'e ramo mba'exa tu xee ambovai ta?
Mba'exa tu aikuaa 'rã xeayvurã, hexeve ajogueroayvu aguã?
- 15 Xee xereko porã va'e rire teĩ ixupe ma ndaxeayvu kuaai 'rãgue.
Ha'e rami 'rãgue py xemboayvuarã pe ajerure 'rãgue xemboaxy aguã re.
- 16 Hery rupi ajapukai rã ombovai teĩ
xee aikuaa rã noendui 'rã ajerurea.
- 17 Mba'eta xemou'ũ vytyu atã va'e py,
ha'e mba'e re'ŷ xemoingo axyve tema.
- 18 Ha'e ndoejai xepytuẽ aguã rive.
Ha'e rami 'rãgue py xere ombou xereko axyarã.
- 19 Xapy'a rei ipo'akaa re aikuaa potaxe ramo ma ha'e aipoe'i 'rã: "Apy ma aĩ."
Ha'e gui anhemboeko porãxe ri ramo "Mava'e tu xerenoĩ?" he'i 'rã.
- 20 Xee ma heko porã va'e aiko va'e rire teĩ xeayvu py ae rive 'rãgue aexa uka xereko vaia.
Anhetẽ rupi xepy'a teĩ ae ma ha'e xekuaa 'rã otekoavy va'e rami.
- 21 — Ha'e rami avi xee ma anhetẽ rupi xepy'a va'e, xenhe'ẽ py ndajeayvuveikue py aiko,
neĩ xerekove re ae ma voi napenai.
- 22 Xevy pe ma opa mba'e pete'i rami meme merami.
Ha'e rami vy aipoa'e: "Ha'e ma joo rami 'rã omomba anhetẽ rupi ipy'a va'e ha'e
heko vai va'e", ha'e.
- 23 Mba'emo vai jojuka xapy'a ramo
ha'e ojojai 'rã ojejavý e'ŷ va'e ojexavai rã.
- 24 Heko vai va'e kuery po py omboaxaa ma yvy
teĩ Nhanderuete omo'ã joguerekoa kuery rova.
Ha'e'ŷ ri ha'e nunga moingoa oiko ramo mava'e tu omoingo?
- 25 — Xe'ára aikoa ma onha va'e gui oaxa pojavave.
Oaxa vyvoi, ha'e rã ndaexai xembovy'aarã va'ekue.
- 26 Oaxa pojava ovy kanoã jai rogue gui ojapo pyre rami,
ha'e taguato vixo'i re oguejy xapy'a va'e rami.
- 27 Xapy'a rei xee aipoa'e 'rã: "Xee xerexarai 'rã ajexavaia re,
ajep'e'a 'rã xeporiaua gui, ha'e vy avy'a 'rã", ha'e.
- 28 Ha'e rami va'e rire teĩ haxy aendu va'e xemongyje teri 'rãgue,
mba'eta aikuaa porã ndee xekuaa 'rã heko porã va'e rami e'ŷ.
- 29 Ha'e rami vy xembopaga 'rãe.
Ha'e ramo mba'erã tu anhea'âve ta?

- ³⁰ Xapy'a rei yro'y rykukue py ajau,
ha'e kavõ py xepo aiky'a'o
³¹ teĩ ndee yapo py ju 'rã xemombo.
Ha'e ramo xeao ae voi ojapo 'rã xegui ojeguarua aguã rami.
³² Mba'eta Nhanderuete ma xee ramigua ava e'ŷ oiko.
Ha'e rami e'ŷ va'e rire xee ambovai 'rãgue oremboayvu aguã katy rojoguerua rupi
ma voi.
³³ Ndoikoi orembyte
ore mokoïve re opo omoï va'erã.
³⁴ Xe'ary rupi gui yvyra po'i'i ha'e oipe'a,
ha'e naxemongyjevei ma va'e rire
³⁵ ha'eve 'rãgue akyje e'ŷ re xeayvu aguã.
Ha'e rami e'ŷ rã nda'evei xevy.

10

- Nhanderuete rovai Jó ijayvuague*
- ¹ — Xenhe'ẽ py ndarovy'avei ma xerekove.
Xeayvu 'rã ndavy'aia ha'e javi re,
xenhe'ẽ py ajexavaia aendu reve 'rã xeayvu.
² Aipoa'e 'rã Nhanderuete pe: "Xembopagave eme.
Eikuua uka porã ke mba'emo vai xere rejou va'e.
³ Ndee nda'u xembojexavaixe vai ri?
Mba'eta reja merami neremimoingo ndepo py ae rejapo va'ekue.
Tyrã pa heko vai va'e kuery onhembopy'aa rive rejou porãve?
⁴ Ndee voi teve to'o guigua nderexa va'e?
Avakue oexaa rami ae avi teve ndee voi rejoexa?
⁵ Imarã va'e kuery oikoa ára rami teve nde'ára voi oí?
Ha'e ndee reikoa ma'etý teve avakue oikoa ma'etý rami,
⁶ xerekovaia re reikuaa pota aguã,
ha'e ajejavya re rexaa pota aguã?
⁷ Ndee ma reikuuaa porã ojejavy va'ety e'ŷ aikoa.
Ha'e rami teĩ ndoikoi ndepo gui xereraa jepearã.
⁸ Ndepopy ae xembojexavaixe vai ri?
Aŷ ma xemombaxe ju.
⁹ Nema'endu'a ke yapo gui rive xeapoague re.
Ha'e rã aŷ ta'vy yvy ku'i ju xemoingoxe?
¹⁰ Kamby rami e'ŷ teve renhoẽ xerekove,
ha'e kamby kekue rami rive teve xeapo?
¹¹ Xepire ha'e xero'orã py xemonhemonde,
ha'e gui xekägue ha'e xerajyrã reipopë va'ekue.
¹² Xerekoverã reme'ẽ va'ekue ndeporayvua rupi,
ha'e xere repenaa rupi xerarõ va'ekue.
¹³ Ha'e nunga renhomni nekuraxõ py.
Va'eri aikuuaa porã po rami renhembopy'aa.
¹⁴ Xapy'a rei ajejavya ramo ndee reikuuaa pota 'rã.
Ha'e rami vy neremboguei 'rã xerekovaiae.
¹⁵ Xapy'a rei xerekovaiae rami nda'evei ete 'rã xevy!
Ha'e rami avi xerekovaiae porã vy ma nda'evei avi xekä amopu'ã aguã,
mba'eta aximba reve anho aexa xeporiaukuea.
¹⁶ Mba'eta xekä amopu'ã ramo ndee xembo'a 'rã guary inharõ va'e rami.
Ha'e vy xerovai rexaa uka ju 'rã ndepo'akapaa.
¹⁷ Rembou ju 'rã xerovai ijayvu va'erã,

- ha'e remboeta 'rā xerovai ndevaia.
 Mba'emo vai anho rembou 'rā xere opu'ā va'erā.
- ¹⁸ Mba'erā tu ha'vy xerenoē raka'e ha'i rye gui?
 Ai! Avave xerexa e'ŷ re amano ma voi va'e rire
- ¹⁹ xee ndaikoi ma voiague rami 'rāgue aī,
 ha'e xeryru'i py aīa guive xereraa 'rāgue xenhono porāa aguā katy.
- ²⁰ Mbovy'i e'ŷ teve oī xe'āra?
 Epytu'u ke ha'vy, xereja,
 xapy'a'i ri jepe xekane'ōguā aguā,
- ²¹ ha'e xee aa e'ŷ mbove peteī henda ha'e gui ajevy ju e'ŷa katy,
 yvy pytūa ha'e manoa'ā oīa py,
- ²² yvy huū reia, pytū etea,
 yvy manoa'ā ha'eve'ŷa ramigua anho oīa,
 hendy va'e eteve voi pytū py", he'i.

11

Jó ojejavya rami Zofar ijayvuague

- ¹ Ha'e ramo Naamá pygua Zofar ju ombovai:
- ² — Nanembovaiai 'rā ri ty' po rami ndeayvu reta rei rā?
 Ha'evea rami teve reiko ndeayvu kuaa etea py?
- ³ Ndeayvu reta rivea gui teve avakue okyrirī 'rā?
 Ha'e rā ndee rejojai 'rā teve avave rei nemoxīmbaa ju e'ŷ re?
- ⁴ Mba'eta aipo're: "Xee ma anhetēguā meme aikuua va'e,
 ha'e nerenonde iky'a e'ŷ va'e aiko", 're va'ekue.
- ⁵ Ai! Nhanderuete ijayvu ma va'e rire,
 nderovai ojuru oipe'a va'e rire,
- ⁶ omombe'u porāe 'rāgue 'arandua ndoikuua ukai teri va'e,
 mba'eta hi'arandua ma anhetē va'e meme, joo rami e'ŷ-e'ŷ oikuua uka teī.
 Ha'e rami teī reikuua pota pova'e re:
 Amongue henda py Nhanderuete neī ndoikuua potai rejavya ha'e javi re.
- ⁷ — Ndee teve reikuua 'rā Nhanderuete mba'emo oikuua uka e'ŷ va'e?
 Reikuua pota ta teve Ipo'akapa va'e re oī va'e ha'e javi re?
- ⁸ Mba'eta hi'arandua ma yvatea rupi peve oo.
 Mba'e tu ndee rejapo kuaa ta?
 Hi'arandua ma yvykua vaikue gui ipy pukuve va'e.
 Mba'e tu ndee reikuua ta?
- ⁹ Ko yvy gui eteve voi ipukuve va'e,
 ha'e ye'ē gui ipyve va'e.
- ¹⁰ Xapy'a rei ha'e oaxaa rupi amongue ombo'a vy
 omboayvu aguā katy ogueraa ta ramo mava'e 'rā tu ojoko?
- ¹¹ Mba'eta ha'e ma oikuua avakue ovare e'ŷ va'e ha'e javi,
 oexa pota e'ŷ re oexa ma voi 'rā heko vaia.
- ¹² Ha'e gui ava hi'arandu e'ŷ va'e onhemoingo kuaa 'rā teve hi'arandu va'e?
 Mburika'i yvy'ā rupigua ra'y ava ojeapo kuaa ramo mae ha'e nunga ha'eve.
- ¹³ — Xapy'a rei nekuraxō rerova vy
 Nhanderuete pe ndepo reupi,
- ¹⁴ xapy'a rei ndepo py rejapo vaiague mombyry remombo,
 ha'e ndero gui ha'eve'ŷa ramigua reipe'a vy,
- ¹⁵ ha'e rami vy mae nderova reupi 'rā ndeky'a e'ŷ reve,
 ha'e reī atā 'rā mba'eve nemongyjeve e'ŷ re.
- ¹⁶ Ha'e rami vy nderexarai 'rā rejexavaiague re,
 ha'e nungakue re nema'endu'a teī yy oxyry ovv va'ekue re rami rive.

- ¹⁷ Reikoa ma kuaray mbyte jave hexakāa gui hexakāve 'rā.
Pytū oĩa py teĩ ko'ea rami 'rā ndevy.
- ¹⁸ Renhenhandu porā 'rā, mba'eta oĩ ju 'rā rearō reikovy aguā.
Ndeyvýry rupi rema'ẽ ma vy reke porā 'rā.
- ¹⁹ Renheno rejupy ramo avave rei nanemondyi 'rā.
Heta 'rā ou ndevy onhepytyvō uka vy.
- ²⁰ Ha'e rā heko vai va'e ma ndaexa pyxovei 'rā,
ha'e kuery onhemi aguā va'ekue ivaipa 'rā.
Ha'e kuery oarō okuapya ma ojeapo 'rā inhe'ẽ okanhy aguā rami rive – he'i.

12

Oirū kuery ijayvuague Jó ombovaiague

- ¹ Ha'e ramo Jó ombovai:
² — Peẽ kuery anho ma nhi'ã avakue peiko,
ha'e pemano ramo ndoikovei 'rā hi'arandu va'e.
- ³ Ha'e rami avi xee voi peẽ rami xe'arandu va'e.
Xee ma pendegui xe'yvyīve va'e'ŷ.
Mava'e tu ndoikuuai 'rā ha'e ramigua?
- ⁴ Ha'e gui xee ma xeirū kuery xejojai rei va'e aiko,
Nhanderuete pe ajapukai rā xembovai teĩ.
Mba'eta heko porā ha'e ha'evea rami ikuai va'e ma ojojai rei pyrā meme ae ikuai.
- ⁵ Iporiau e'ŷ va'e kuery oikuaa rā iporiaukue'i ojou vaipy ikuai.
Ha'e rami vy ha'e kuery omoanha-anha 'rā ho'a rai'i va'e oityxe vy.
- ⁶ Porayvu e'ŷ va'e kuery ikuia py ovy'apa rei 'rā,
Nhanderuete re ijayvu rei va'e kuery ma iporiau e'ŷ va'e meme merami.
Ha'e kuery nguueterā rami oguereko opo mbaraetea rive.
- ⁷ — Ha'e rami teĩ eporandu na aŷ mymba ikuai va'e pe.
Ha'e rā ha'e kuery nembo'e 'rā ha'e nunga re.
Guyra oveve va'e pe reporandu rā ha'e kuery oikuaa uka 'rā ndevy.
- ⁸ Ha'e rami e'ŷ vy eporandu na yvy pe,
ha'e ramo nembo'e 'rā.
Pira ye'ẽ rupigua voi omombe'u porā 'rā ndevy.
- ⁹ Mava'e nda'u ha'e va'e kuery regua ndoikuuai 'rā
SENHOR opo py ha'e nunga ojapopaague?
- ¹⁰ Mba'eta opo py oguereko guemimoingo kuery ha'e javi,
avakue ha'e javive nhe'ẽ guive.
- ¹¹ Xeapyxa py nda'u naendu kuaa potai 'rā ayvu aendu va'e,
xejuru py tembi'u heea aendua rami avi?
- ¹² Tyrā pa tujakue'i re anho teve oĩ 'arandua?
Oikove puku va'ekue re anho teve oĩ mba'emo oikuaa aguā?
- ¹³ — Any! Nhanderuete re ae oĩ 'arandua ha'e mbaraetea.
Hexe ma oĩ nhomongeta ha'e mba'emo oikuaapa aguā.
- ¹⁴ Mba'emo ha'e oity va'ekue ma nomopu'ãavei 'rā.
Nhuā py ha'e ombo'a va'ekue avave rei ndoipe'a kuaai 'rā.
- ¹⁵ Yy ha'e ojoko ramo opa mba'e ipirupa 'rā.
Ha'e rā yy ha'e ombou ramo ombovaipa 'rā yvy.
- ¹⁶ Hexe anho oĩ mbaraetea ha'e 'arandua.
Ombotavy pyre ha'e imbotavya ma ha'e oguereko va'e meme.
- ¹⁷ Oipe'a 'rā nhomongeta va'ety kuery nhomongetaague gui,
nhomboayvua kuery voi ojapo 'rā na'inhakā porāvei aguā rami.
- ¹⁸ Ombovaipa 'rā huvixave kuery po'akaa,
ha'e omoxā uka 'rā heravy iku'a rupi.

- ¹⁹ Sacerdote kuery ma ha'e oipe'a 'rā sacerdote ikuaiague gui,
ha'e iporiau e'ŷ va'ekue ma oitypa vyvoi 'rā.
- ²⁰ Ijayvu kuaa va'e kuery gui ha'e oipe'a 'rā ayvu,
ha'e tujakueve gui ma oipe'a 'rā hi'arandua.
- ²¹ Yvatekueve re omoī 'rā nomboeteavei aguā,
ha'e ojora 'rā imbaraete va'e kuery ku'akuaa.
- ²² Pytū reia gui oexa uka 'rā mba'emo ndoikuuai pyre,
pytū ana eteve voi ogueru 'rā omoexakā aguā katy.
- ²³ Yvy regua kuery ha'e omboetave 'rā, ha'e gui omokanhymba ju 'rā.
Omoaīmba 'rā, ha'e gui omboatypa ju 'rā.
- ²⁴ Yvy regua yvatekueve gui oipe'a 'rā 'arandua,
ojapo 'rā tekao e'ŷ rupi oguata rei aguā rami, tape rupi e'ŷ.
- ²⁵ Ha'e ramo pytū reia rupi ha'e kuery opovyvy 'rā oje'oivy hendi va'e ndoguerekoi vy,
ojapo 'rā oka'u va'e rami ho'a-o'a oje'oivy aguā rami.

13

- Jó anhetē* va'e rupi oikoa re ijayvuague
- ¹ — Ma'ě, ha'e nunga ha'e javi xerexa oexa ma,
xeapyxa voi oendu ramo xee aikuaa ae ma.
- ² Peẽ kuery peikuua rami ae avi xee voi aikuaa.
Xee ma pendegui xe'yvyīve va'e'ŷ.
- ³ Ha'e rami avi Ipo'akapa va'e pe anho 'rā anhemombe'u,
Nhanderuete renonde ae anhemboeko porā ukaxe.
- ⁴ Mba'eta peẽ ma anhetēgu 'rāgue py apu rive pemoī.
Peẽ kuery ha'e javi ma poropoanoa mba'everā ovare e'ŷ va'e rami peiko.
- ⁵ Peẽ pekyrirīmba vyvoi va'e rire!
Ha'e rami vy 'rāe pexa uka pene'arandua!
- ⁶ Aŷ ma pejapyxaka xereko amombe'u rā,
pendu pota xejuru py mba'emo re xeayvua re.
- ⁷ Penhombotavya rupi nda'u pendeayvu ta Nhanderuete pemboete ukaxe vy?
Pemboete ukaxe vy ri nda'u pendeayvu ta apu rupi?
- ⁸ Ixupe vy ae nda'u peikuua potaa py peteĩ peayvuve ta joegui?
Ha'e rami ri ty'y peipytyvō ta Nhanderuete?
- ⁹ Peẽ kuery re ha'e oikuaa pota va'e rire nda'u peo jepe 'rāgue?
Ha'e rami e'ŷ vy pembotavy kuaa 'rā teve, amongue va'e rei pembotavya rami?
- ¹⁰ Joegui peteĩ peayvuve nhemi ramo
pendevy pe ijayvu atā 'rā.
- ¹¹ Napanemongyjei 'rā teve guexakāmbaa py?
Pende'áry nomboui 'rā teve penemongyjearā?
- ¹² Pendeayvu jepiaty ma ayvu tanhimbu ramigua rive,
penhemboytaa ma yapo guigua rive.
- ¹³ — Pekyrirī ranhe ke xerenonde, xee ju xeayvu aguā.
Ha'e va'e rire xere toiko oiko va'e rei.
- ¹⁴ Xeayvu ta xeraĩ py xero'o areko reve,
ha'e xerekove xepo py ajopy reve.*
- ¹⁵ Mba'eta anhetē ri ha'e ma xejuka ta ramo ndarekovei arō aguā.
Ha'e rami teĩ ae ma xeayvu 'rā xerekovo re.
- ¹⁶ Ha'e rami aiko vy aikuaa aa jepe aguā,
mba'eta heko vai va'e ma ndojexa ukai 'rā henonde.
- ¹⁷ Pendu pota ke xeayvua re,
pejapyxaka amombe'u va'e re.

* 13:14 Apy ma ndojeayvuveikue py Jó ijayvu.

- ¹⁸ Areko katu porāmba ma xereko amombe'u aguā.
Aikuaa porā guive Nhanderuete xemboeko porā aguā.
- ¹⁹ Mava'e tu xereve ijayvu ete 'rā?
Ha'e rami oiko ramo xee akyirirī 'rā, ha'e xenhe'ē amondouka 'rā.
- ²⁰ Eme'ē xevy po rami mokoī ete'i ajerurea.
Ha'e rami ri rā nanhemivei 'rā nderova gui.
- ²¹ Eipe'a ke ndepo xegui,
ha'e xemondyive eme xemongyjea py.
- ²² Ha'e gui eporandu xevy, ha'e rā xee rombovai 'rā.
Ha'e rami e'ŷ vy xee ranhe taxeayvu, ha'e gui ndee ju xembovai 'rā.
- ²³ — Mbovy henda py tu xereko vai ha'e ajejavvy?
Emombe'u porā ke xereko vaia ha'e ajejavvy.
- ²⁴ Mba'e re tu nderova remo'ā
nderovaigua rami xererekoy?
- ²⁵ Remongyje ta teve yvyra rogue yvytu ogueroveve heravy va'e rive?
Remonha ta teve jai rogue pirukue?
- ²⁶ Mba'eta xerovai rembopara mba'emo ipoyi va'e,
xekunumi reve ajejavvyague reikuaa vy.
- ²⁷ Ha'e rami vy xepy remboty yvyra pa'ū py,
reikuaa pota aikoa ha'e javi re.
Xejoko imoiny aẽ e'ŷ aguā,
- ²⁸ mba'emo ru'ūgue opa ovvya va'e,
e'ŷ vy ajukue vixo'i ho'upa va'e rami aiko tē.

14

- Nhanderekove oaxa pojava ovya re Jó ijayvuague*
- ¹ — Kunhague gui itui'i va'ekue ma xapy'a'i 'rā ikuai,
ha'e kuery re oĩ ojexavai aguā anho.
- ² Itui'i 'rā yvoty ixorī va'erā rami rive.
Kuaray'ā rami okanhy vy ndojekuaavei 'rā.
- ³ Ha'e ramigua avakue re ri ty'y reikuaa pota ta,
ha'e nerentonde remboayvu ta?
- ⁴ Mava'e nda'u ha'eve'ŷa gui oguenoẽ kuaa ta mba'emo ha'eve va'e?
Avave rei.
- ⁵ Ha'e kuery ikuai aguā ára reipapa ma voi imoiny,
ndereve ae oĩ mbovy jaxy pa ikuai aguā.
Avakue rekove rejoko rire
ha'e va'e rovai ndoaxai 'rāe.
- ⁶ Ha'e kuery re ema'ẽve eme ikane'õgu'a'i aguā,
omba'epo va'e rami o'ára opaa py ovvya'a'i aguā.
- ⁷ — Mba'eta yvyra voi oguerekooarō aguā,
mba'eta ojaya ma tē hoky jevy nho 'rā,
mbovy rei e'ŷ 'rā ikuai henhoī ju va'ekue.
- ⁸ Yvy re hapo inhyma ramo,
ha'e yvy py hi'y ipiru ramo
- ⁹ yy reakuā gui rive ju 'rā henhoī.
Ha'e rami vy hapo ju 'rā ovvya yvyra ipyau va'e rami.
- ¹⁰ Ha'e rā avakue ma omamo ma vy itui tema 'rā.
Avakue omamo rire mamo tu opyta?
- ¹¹ Yuppa py yy oĩ va'ekue typa,
ha'e yakā typa vy ipiru va'e rami,
- ¹² ha'e rami ae avi avakue onhenno vy nopu'āvei ma 'rā.

- Yva oime teria ja nomyīvei 'rā,
okeague gui nombovyā jevyi 'rāe.
- ¹³ Xenhono porāa ma ramo ndee xemo'ā 'rāgue,
xenhomī 'rāgue ndepoxyā ára oaxa peve!
Ha'e gui peteī ára rea'anga 'rāgue
xere nema'endu'a ju aguā!
- ¹⁴ Avakue omano ma rire nda'u ovvju 'rā ri?
Ha'e rami rā xee amba'epo poyi aikovya pukukue re arō 'rā aikovy
xerekoviarā ovaē peve.
- ¹⁵ Ndee xerenoī 'rā, ha'e rā xee ma rombovai 'rā.
Rexaxe ju 'rā neremimoingo ndepo py rejapo va'ekue.
- ¹⁶ Ha'e rami vy reipapapa 'rā aguataa,
ha'e nanema'endu'avei 'rā ajejavyague re.
- ¹⁷ Xerekova vaiague re nderexarai 'rā voxā py ombovru pyre re rami,
rejao'ipa 'rā atekoavyague.
- ¹⁸ Ha'e rami avi yvvyty iku'ipa ha'e ivaipa 'rā ovv,
itaova voi ho'a 'rā oīague gui,
- ¹⁹ yy omomba 'rā ita,
ha'e tyguaxu vy ogueroxyry 'rā heravy yvvy ku'i.
Ha'e rami ae avi ndee rembovaipa 'rā mba'emo avakue oarō va'e.
- ²⁰ Ha'e kuery re ndepo'aka riae ramo
ha'e kuery opa 'rā oje'oivy.
Ha'e kuery pe nderova amboae rami rexā uka reve
remondouka 'rā mombyry.
- ²¹ Ta'y kuery omboetea teī tuu kuery ndoikuuaai 'rā.
Ha'e rami e'ŷ vy omo'yvyy'ia teī ae ma tuu kuery ndoikuuaai 'rā.
- ²² Ha'e kuery ma guete re anho 'rā oendu haxy va'e,
ha'e guekovea re ae 'rā ojexavai — he'i.

15

Jó reko vaia re Elifaz ijayvuague

- ¹ Ha'e ramo Temā pygua Elifaz ombovai:
² — Hi'arandu va'e nda'u ombovai 'rā yvvytu rami rive?
Onhemonyē 'rā ri ty'y kuaray oua katy gui yvvytu ou va'e py?
- ³ Ayvu mba'everā ovare'ŷ va'e py nda'u ijayvu 'rā,
ayvu nhomoingo porā va'erā py 'rāgue py?
- ⁴ Mba'eta ndee ma Nhanderuete renonde ojererokyje va'e pe “Ovare va'e'ŷ” 're,
ha'e rejapoxe nomboeteavei aguā rami.
- ⁵ Mba'eta ndereko vaia rupi ae ndeayvu,
ha'e nhombotavy va'e kuery ayvu anho rejou porāve.
- ⁶ Ndejuru guigua ae 'rā nembopaga, xee e'ŷ.
Nerembe ae ijayvu nderovai.
- ⁷ — Ndee teve ava jypy'i itui va'ekue reiko?
Yvvyty ikuai e'ŷ mbove ma voi teve reiko raka'e?
- ⁸ Ndee teve rendu raka'e Nhanderuete opy'a re mba'emo omoī rā?
Ndere anho'i teve oī 'arandua?
- ⁹ Mba'e nunga tu ndee reikuua, ore kuery roikuua avi va'e'ŷ?
Mba'e nunga 'arandu tu ndere oī, ore kuery re oī va'e'ŷ?
- ¹⁰ Mba'eta oreregua ikuai avi tujakue'i hi'a xiīmba va'e,
nderu gui voi tujakue'ive va'e.
- ¹¹ Ndee teve nerembovareive ta Nhanderuete nembopy'a guaxu ukaa,
ha'e ayvu porā'i rupi ndevy oreayvua?

- ¹² Mba'e re tu rejereraa uka nekuraxõ py oĩ va'e rupi rive?
 Mba'e re tu rema'ẽ vaikue rei ri,
¹³ Nhanderuete rovai ndevaia rupi,
 ha'e rami ete ndeayvu aguã?
¹⁴ Marã ramigua tu avakue, iky'a e'ŷ va'e ikuai aguã?
 Marã ramigua tu kunha gui itui'i va'ekue, heko porã va'e oiko aguã?
¹⁵ Ma'ẽ, Nhanderuete ma ndojeroviae neĩ ojeupeguia iky'a e'ŷ va'e kuery re.
 Ha'e oexa rã neĩ yva re voi iky'a e'ŷ va'e noĩ.
¹⁶ Avakue katuve ma ojou vaipy ha'e ojeguarupy meme ikuai,
 yy oy'u va'e rami mba'emo vai ojee omoĩ va'e!

Heko vai va'e kuery opagaa aguã re Elifaz ijayvuague

- ¹⁷ — Ejapyxaka ke xeayvua re, ha'e rã rombo'e 'rã.
 Mba'emo aexa va'ekue amombe'u 'rã ndevy,
¹⁸ hi'arandu va'e kuery omombe'u va'ekue ae,
 nguu kuery gui oendu vy ndoikuua uka e'ŷi va'ekue.
¹⁹ (Ha'e va'e kuery pe ae yvy ome'ea raka'e,
 peteĩve henda rupi amboae regua kuery nda'ikuai.)
²⁰ Ha'e rã heko vai va'e kuery ma ko'ẽ nhavõ 'rã ojexavai,
 ikuia ma'etõ ijapu'a'i 'rã, nhomoingo axya kuery pegua ae.
²¹ Ha'e kuery apyxa py onhendu 'rã imongyjearã.
 Mba'emo oguerekopa rei teĩ ha'e kuery re ou 'rã imbovaipaarã.
²² Ha'e kuery ndogueroviae pytũ vaikuea gui ojevy ju aguã,
 ha'e rami 'rãgue py oarõ kyxé imombaarã rive.
²³ Ho'u va'erã oeka oje'oivy vy "Mamo tu oĩ?" he'i 'rã okuapy.
 Oikuua porã avi pytũ aguã ára hexe ou ta maa.
²⁴ Jexavaia ha'e moingo axya ma omongyjepa rei 'rã.
 Ha'e kuery re ha'e nunga ipo'aka 'rãe, huvixave joe opu'ã aguã oiko katu porã
 va'ekue rami,
²⁵ Nhanderuete rovai opo oupi rire,
 Ipo'akapa va'eombojaru rei vy.
²⁶ Ha'e rami vy hexe opu'ã okuapy onhea'ã rei reve,
 hu'y jokoa inhana va'e re rive ojerovia va'e rami.
²⁷ Hova re ikyra anho oĩ,
 ijyke kyrapa avi
²⁸ teĩ tetã ivaipa va'ekue py heko,
 oo oĩ aguã nda'eveia py,
 ombovaipa pyrã py rive ikuai.
²⁹ Ha'e nunga rupi ha'e kuery ndojou retai 'rã mba'emo,
 mba'emo ojapo va'e noĩ arei 'rã guive,
 imba'e rei-rei voi ndaetai 'rã yvy re.
³⁰ Ha'e kuery ndoo jepei 'rã pytũ vaikue gui.
 Tata rendy vuku-vuku overepa 'rã hoky.
 Ha'e gui Nhanderuete ojuru gui oipejua rive 'rã ogueraa.
³¹ Ha'e nunga rupi ovare e'ŷ va'e re ejerovia eme, ndee ae rejekore vy,
 mba'eta ovare e'ŷ va'e rive 'rã oĩ ndevy guarã.
³² Ha'e nunga omomba 'rã hi'ára ovaẽ e'ŷ mbove,
 ha'e ramo hakã nda'ipyauvei ma 'rã.
³³ Ha'e kuery ikuai 'rã uva aky'i oitypa pyre rami,
 ha'e oliveira ipoty ho'apa va'ekue rami rive.
³⁴ Mba'eta heko vai va'e kuery hetu ikuai teĩ ndata'yi 'rã,
 ha'e tata oapypa 'rã nhomba'e rei-rei pe'aare kuery ro.
³⁵ Ha'e kuery ma mba'emo vai anho oguerekoi rire oikuavã'i 'rã teko vai,

nhombotavy aguā rive opy'a re omoī rire — he'i.

16

Nhanderuete openaa re Jó ijayvuague

- 1 Ha'e ramo Jó ombovai:
- 2 — Aendu riae ma ha'e ramigua.
Peē ha'e javive ma xembopy'a porā 'rāgue py xemoangeko rei.
- 3 Ndopai 'rā teve yvytu rami pendeayvua?
Mba'e tu pendu ra'e ha'e rami ete xembovai aguā?
- 4 Xee voi xeayvu kuaa peē pendeayvua rami.
Xee aiko axya rami peē peiko axy va'e rire
xee voi xeayvu reta kuaa 'rāgue peē kuery pe,
penderovai xeakā ambovava reve.
- 5 Xee romombaraete kuaa avi 'rāgue xeayvua py,
xejuru py romboaxya aexa uka va'e py aipe'a aguā haxy pendu va'e!
- 6 — Xeayvu ainy teī haxy aendu va'e ndoaxai 'rā.
Ha'e rami e'ŷ vy akyrirī teī mba'e nunga py 'rā tu anhenhandu porā?
- 7 Anhetē opa ma xembaraetea areko va'ekue.
Ndee Xeruete remomba ma xero pygua kuery ha'e javi.
- 8 Ha'e nunga aexa uka xexorīmbaa py,
xeangaia voi xerovai opu'ā vy xembojexavai riae.
- 9 Ndepoxya py xemboa'ypa, xere nandea'ei vy.
Xerovai neraī jekyty ha'e rema'ē ratā xerovaigua rami.
- 10 Avakue voi xerovai oipe'a okuapy ojuru.
Ha'e rami vy xere ija'e e'ŷa rupi xepetepa,
xerovai ha'e javive ijaty okuapy.
- 11 Ojerovia e'ŷ va'e po py Nhanderuete xemboaxa,
heko vai va'e kuery po py ha'a aguā rami xeapo.
- 12 Xee aiko porā rei va'ekue ri ha'e xemopēmba.
Xeaju'y re ojopy vy xemboa'ypa.
Xemoī guembiporu hu'y oa'anga aguā.
- 13 Xejoko ngu'y py,
oipyxo xepyky raxī re xemboaxy e'ŷ re,
ha'e ramo xepy'a upia onheē yvy re.
- 14 Xemboguaiague rupi ae ju xemboguai,
ha'e vy xere ou joe opu'ā va'e ramigua.
- 15 Xejee amoī ae ajukue voxā guigua,
ha'e yvy ku'i py aity anhemboyvate reia rupi aikoague.
- 16 Ajae'o rā xerova ma pytāmba rei,
ha'e xerexa pepi ma manoa guigua omo'āmba,
- 17 xepo re ajojukaague noī,
ha'e xeky'a e'ŷa rupi anhembo'e teī.
- 18 — Ndee yvy, ejao'i eme xeruguy,
toī eme guive ajapukaia onhendu e'ŷa!
- 19 Ma'ē, aŷ ma voi xerekō mombe'u porāvearā oī yva re,
yvate ma oī xere ojerure va'erā.
- 20 Xeirū kuery xejojai rei okuapy ramo
Nhanderuete renonde xerexay reve tema aī,
- 21 arō vy Nhanderuete pe ha'e va'e ojerure aguā avakue re,
oirū pe avakue ra'y kuery joe ojerurea rami avi.
- 22 Mba'eta ma'etŷa oī reta ve'ŷa py
aa 'rā peteī tape rupi ndajevyvei aguā.

17

Jó mba'eve noarõveia re ijayvuague

- ¹ — Xenhe'ě opa ov y ma,
xe'ára voi opa avi ov y,
ha'e xerenonde oī va'e ma xenhono porā aguā anho.
- ² Anhetē porojojai rei va'e kuery xembojere rei okuapy,
xerexa py xemoangeko reia kuery anho rei aexa.
- ³ Ha'e gui eme'ě xevy mba'emo aikuaa aguā ndee xemboeko porā 'rāa.
Enhemoī ndee ae ha'e nunga kuaa ukaarā.
Mba'eta ndee e'ŷ vy mava'e 'rā tu ikuaa ukaarā oī?
- ⁴ Mba'e ha'e kuery kuraxō remboty ma hi'arandua oī e'ŷ aguā.
Ha'e rami vy neremboyvatevei ma.
- ⁵ Amongue oirū kuery imombaarā pe omboaxa ramo
ta'y kuery voi ndaexa pyxovei 'rā.
- ⁶ — Ha'e rā xee ma xemoña heta va'e kuery xejojai rei okuapy aguā.
Xemoingoa xerova re onyvõmbaa rei aguā.
- ⁷ Ha'e nunga rupi ae ndaxerexa pyxovei ma xeporiau rā,
ha'e xerete regua ha'e javi kuaray'ā rami ndojekuaa porāvei.
- ⁸ Heko porā va'e kuery xerexa vy onhemondyipa rei okuapy.
Ha'e rami vy ojejav y e'ŷ va'e kuery opu'ā 'rā heko vai va'e rovai.
- ⁹ Ha'e rami teī heko porā va'e kuery oo tema 'rā guape rupi ae,
ipo ky'a e'ŷ va'e kuery imbaraeteve 'rā oje'oivy.
- ¹⁰ Ha'e gui peē kuery ha'e javi pejevy, peju ju kyvõ katy.
Ha'e rami avi peē kuery regua peteīve ma ndajoui 'rā hi'arandu va'e.
- ¹¹ Xe'ára oaxa ma ov y,
anhembopy'aague voi oaxa rivepa ma,
xepy'a re aipotaa amoī va'ekue ha'e javi.
- ¹² Xevy pe pytū peikuua uka ára oīa rami rive.
Ha'e vy aipo peje: "Pytū teri teī hendy va'e ovaē rai'i ma", peje rive.
- ¹³ Ha'e rā xee ma xenhono porāa aguā py arō xerorā,
pytūa py ae xeruparā itui.
- ¹⁴ Xenhono porārā pe ajapukai vy "Ndee ma xeru", ha'e.
Taxo ikuai va'e pe voi "Peē ma ha'i ha'e xereindy kuery", ha'e.
- ¹⁵ Ha'e gui mba'e tu oī arō aikovy aguā?
Tá, xee arō va'e mava'e 'rā tu oikuua?
- ¹⁶ Ha'e nunga oguejy 'rā manoa rokē peve
xereve yvy ku'i py apytu'u ma jave — he'i.

18

Heko vai va'e kuery opa aguā re Bildade ijayvuague

- ¹ Ha'e ramo Sua pygua Bildade ju ombovai:
- ² — Raka'e peve 'rā tu ndeayvu aguā re renhea'ā?
Eikuua pota porā ranhe, ha'e gui ma jajogueroayvu 'rā.
- ³ Mba'e re tu mymba rami ri ndee orekuaa,
ha'e hi'arandu e'ŷ va'e roikoa rami reikuaa?
- ⁴ Ai! Ndee ndepoxya py ae renhemboa'ypa va'e,
ndere vy ri nda'u roejapa ta yvy?
Ha'e itaova ikuai va'e nda'u ova 'rā oīague gui?
- ⁵ — Anhetē, heko vai va'e kuery rataendy ogue 'rā,
neī hata raviju ma voi ndojekuaavei 'rā.
- ⁶ Ha'e kuery ro rupi hendy va'e oī va'ekue pytūmba 'rā,
yvate tataendy oupi imoiny va'ekue ogue 'rā.

- ⁷ Oguata porā oje'oivyague gui ipyxry 'rā ovy,
ha'e gui onhembopy'aague py ae oitya 'rā.
- ⁸ Mba'eta ha'e kuery py ae ombo'a 'rā,
nhuā juru áry rupi ae oo rire.
- ⁹ Mba'emo mbo'aa ojopy 'rā ipyta rupi,
ha'e nhuā ojopy 'rā.
- ¹⁰ Ha'e kuery ndoexai 'rā ixā yvy rupi itui va'e,
neī imbo'aarā tape py oī va'e.
- ¹¹ Jova-jovai katy gui imongyjearā ou vy omondyi 'rā,
omonha 'rā heravy oikoa nhavō rupi.
- ¹² Ha'e kuery áry ou 'rā imoingo axyarā omomba aguā,
ha'e iporiau aguā oarō 'rā ijvvýry.
- ¹³ Ha'e nunga ombovaipa 'rā hete regua ha'e javi.
Manoa regua jypygua omomba 'rā.
- ¹⁴ Heko vai va'e kuery oipe'aa 'rā ngoo py ojerovia oinyague gui,
ha'e vy ogueraa 'rā imongyjea tuvixave va'ea py.
- ¹⁵ Hoo pygua kuery peteīve ma noīvei 'rā hogue py,
ha'e oīague rupi omoāia 'rā enxofre.
- ¹⁶ Iguy rupi hapo ipirupa 'rā,
ha'e rā hakā ma hi'áry rupi 'rā ipirupa.
- ¹⁷ Ha'e kuery re na'ima'endu'aavei 'rā yvy re,
ha'e tetā mbyte gui nonhenduvei 'rā hery.
- ¹⁸ Hendya gui ha'e kuery omomboa 'rā pytūa py,
oipe'apaa 'rā yvy gui.
- ¹⁹ Ndata'yí neī namyminoi 'rā guetarā kuery mbyte,
ha'e hoo pygua kuery peteīve ma ndoikovevei 'rā hogue py.
- ²⁰ Okanhyague ára gui kuaray oikea katygua kuery onhemondyipa 'rā,
ko'ēa katygua kuery voi okyjepa 'rā okuapy.
- ²¹ Anhetē ha'e rami ae heko vai va'e kuery reko,
ha'e rami ae opa 'rā Nhanderuete oikuua e'ŷ va'e kuery — he'i.

19

Jó ojexavai teī hepyarā oikoa rami ijayvuague

- ¹ Ha'e ramo Jó ombovai:
- ² — Raka'e peve 'rā tu pemoingo axy xenhe'ẽ,
ha'e ayvu py xemou'ūmba rive?
- ³ Dez-kue ma pendeayvu rei xere,
xembojexavai aguā napexī vy.
- ⁴ Xapy'a rei anhetē xee ajejavy va'e rire
xere anho 'rāgue oī ajejavyague re apaga aguā.
- ⁵ Xapy'a rei xerovai penhemboyvatexe,
ha'e xemo'yvyī'iague re pendeayvu reixe vy,
- ⁶ peikuua porā pota aŷ pova'e re:
Nhanderuete ae xemoingo axy va'ekue okya py xejoko vy.*
- ⁷ Ajapukai: “Xemomba ta!” ha'e teī noenduai.
“Xepytyvõ ke!” ha'e teī ndoikoi xemboeko porāarā.
- ⁸ Xerape ha'e ojoko rā nda'evei aave aguā.
Xee aa aguā rupi ha'e omoī pytūa.
- ⁹ Omboetepy aikoague gui xepe'a vy
xeakā gui omboi xembojeguaarā oī va'ekue.

* 19:6 Jó ma “Nhanderuete xemoingo axy” he'i va'eri oayvu ha'e oguerovy'a (2.3-6).

- ¹⁰ Jova-jovaive gui xereity rire aa ma ainy.
Xegui oipe'a arõ va'ekue yvyra hi'añague gui oapo'o va'e rami.
- ¹¹ Xerovai hendy ipoxya,
ngovaigua rami xererekko ramo.
- ¹² Ixonدارو kuery ou okuapy xere.
Xerupity aguã ha'e kuery oguerekko katu guaperã,
ha'e vy xero yvýry rupi xejoko okuapy.
- ¹³ Xegui ha'e oipe'a xeryvy kuery mombyry.
Xekuaa va'e kuery voi ojepe'apa xegui, xerexa va'ety e'ŷ rami rive.
- ¹⁴ Xeretarã kuery xerejapa oje'oivy,
ha'e xekuaa va'e kuery hexaraipa ma xegui.
- ¹⁵ Xero py amovaë va'ekue ha'e xerembiguai kuery ma amboae yvy regua rami xekuaa,
ha'e kuery pe rã yvy mboae regua aiko.
- ¹⁶ Amongakuaa va'ekue ma aenoï teĩ naxembovaivei,
mba'emo re xee ae ajerure porã'i teĩ.
- ¹⁷ Xera'xyx ma noetûxevei ma xepytuëa,
ha'e xeryvy kuery pe ojeguarupy aiko xereakuã vaikue va'e vy.
- ¹⁸ Kyrigue voi naxemovaëxevei,
xee apu'âxe rã xejojai rei okuapy.
- ¹⁹ Xerayvu ete va'ekue xembojeguarupa okuapy,
ha'e xee ayvu va'ekue voi xerovaigua onhemoingo.
- ²⁰ Xepire ojapa ma xekâgue ha'e xero'o re,
ha'e haxy'i py aa jepe nho.
- ²¹ Xemboaxy ke, xerembiayvu kuery.
Xemboaxy, mba'eta Nhanderuete po xerupity.
- ²² Mba'e re tu xemonha rei pekuapy Nhanderuete xemonhaa rami?
Mba'e re tu ndapepytu'ui ri xero'o pemombaa gui?
- ²³ Xeayvua omboparaa va'e rire!
Kuaxia re ipara oiny va'e rire!
- ²⁴ Ferro rakua ha'e chumbo reve
ita re ipara va'e rire raka'e rã peve guarã!
- ²⁵ — Mba'eta xee aikuua xerepyarã oikoa,
ha'e opaa py opu'â 'rã kova'e yvy re.
- ²⁶ Ha'e va'e rire kova'e xepire ivaipa ma teĩ
xero'o reve ae 'rã aexa Nhanderuete.
- ²⁷ Aexa 'rã xee ae, xerexa py ae aexa 'rã, amboae nda'ei.
Aexaxe ete rã
xekuraxõ na'imbaraetevei ma xeryepy py.
- ²⁸ Xapy'a rei aipopeje 'rã: "Marã rami 'rã tu romoingo axy?
Ndekáuxa ae upe va'e mba'emo vai oiko", peje teĩ
- ²⁹ pejererokyje ikyxe gui,
mba'eta xere pendeayvua re ou 'rã ipoxya,
pendere oikuua pota va'erã oikoa peikuua aguã — he'i.

20

Heko vai va'e kuery ojexavai aguã re Zofar ijayvuague

- ¹ Ha'e ramo Naamá pygua Zofar ju ombovai:
² — Aikuua va'e re xeayvuxe vy
ajapura rombovai aguã.
- ³ Xee aendu ndeayvu etea xemoximba va'e,
xenhe'ẽ py aendu aikuua va'e rupi rombovaixea.
- ⁴ Ndee ndereikuuaai teve ha'e javi oiko ypy guive,

- yvy re avakue omoingo ypya guive
 5 heko vai va'e kuery xapy'a'i rive ov'y'a okuapya,
 ojerovia e'ŷ va'e kuery ov'y'a xapy'a'i 'rā?
 6 Ha'e kuery ojejou porāa yva re peve oo,
 ha'e arai re peve oakā oupi teĩ ae ma
 7 hu'ūmba 'rā raka'e rā peve guarā, hepoxi rami rive.
 Ha'e rā oexa va'ety kuery "Mamo tu ikuai?" he'i 'rā okuapy.
 8 Ha'e kuery ma oexa ra'u pyre rami okanhymba 'rā,
 ha'e rā ndojouavei 'rā.
 Omonhaa 'rā imondovy pyávy mba'emo oexa pyre rami.
 9 Hexaare kuery ndoexavei ma 'rā,
 ikuaiague py ae teĩ ha'e kuery re na'ima'endu'aavei ma 'rā.
 10 Ta'y kuery ju onhea'ā 'rā iporiaukue'i oguerorya rupi,
 ha'e vy opo py ae ome'ẽmba ju 'rā imba'e rei-rei oipe'aa va'ekue.
 11 Ikāgue kunumi jave rami imbaraete teĩ,
 imbaraete reve 'rā itui yvy ku'i rupi.
 12 — Ha'e kuery pe rā ijuru py mba'emo vai he'ẽ 'rā,
 ha'e vy oapekū guy py oguerek.
 13 He'ẽ ramo nomokõxei vy
 oguerek ranhe 'rā ojuru py.
 14 Ha'e rami teĩ hyepy py ma amboae rami 'rā ojeapo.
 Mboi guigua rami 'rā iro vaikue ojeapo hyepy py.
 15 Mba'emo oguerekopa va'e omokō va'ekue ombojeyvypa ju 'rā.
 Nhanderuete ae 'rā ojapo guyepy gui ombojeyvypa aguā rami.
 16 Mboi guigua veneno oy'u rire
 inshapekū ae ju ojuka 'rā.
 17 Ha'e kuery ndoguerovy'ai 'rā yakā'i oexa vy,
 neĩ ei ha'e kamby yakā rami oxyry va'e.
 18 Mba'eta omba'eapoague repy ojou va'ekue omokanhymba ju 'rā
 mba'eve ho'u e'ŷ re.
 Ojeupe guarā ojopy va'ekue regua peteĩve henda py ndojoui 'rā ombovyaarā,
 19 ha'e kuery iporiaukue'i omoingo axy ha'e noipytyvõi rire,
 ha'e oo ojapo va'ekue'ŷ gui mba'emo oipe'apa rire.
 20 — Oipotapa reia gui ndojepe'ai rire
 nda'evei 'rā mba'emo oipota va'ekue ogueraa jepe aguā.
 21 Oipotapa reia gui ndopytu'ui rire
 imba'e rei-rei noĩ arei 'rā.
 22 Ojoupa ete maa py ae 'rā ojexavai.
 Ha'e kuery re ou 'rā opa marāgua imomboriauarā.
 23 Ha'e kuery rye monyēarā Nhanderuete ombou 'rā opoxy etea.
 Temb'i'u 'rāgue py ha'e nunga anho ombou 'rā oky rami ha'e kuery áry.
 24 Tembiporu ferro guigua gui ha'e kuery ojava teĩ
 guyrapa overa va'e guigua py 'rā onhyvõa.
 25 Ha'e ramo okupe gui hu'y oekyi rā
 overa rei 'rā huguy re.
 Ha'e ramo oendu 'rā onhemondyia.
 26 Ha'e kuery peguarā omoña 'rā opa marā ojexavai aguā.
 Tata omomba 'rā avave rei oipeju e'ŷ teĩ,
 hoo py opyta va'ekue-'ekue omomba peve.
 27 Yva gui oikuaa ucaa 'rā heko vaia.
 Ha'e rā yvy gui ma opu'ã 'rā hovai guarā.
 28 Ngoo py oguerekopa va'ekue oipe'apaa 'rā

- Nhanderuete poxya ára py, yy onhoëa va'e rami.
 29 Ha'e ramigua ae 'rã avakue heko vai va'e ojopy Nhanderuete po gui.
 Ha'e nunga anho ha'e kuery peguarã oï Nhanderuete ijayvuague rami vy – he'i.

21

Heko vai va'e kuery ovy'aa re Jó ijayvuague

- ¹ Ha'e ramo Jó ombovai:
² — Pendu porã pota ke xeayvua.
 Ha'e ramia py peẽ xembopy'a porã 'rã.
³ Xereroangekove eme, ha'e rã xee ju xeayvu 'rã.
 Ha'e gui xeayvupa ma ramo mae ha'eve 'rã xejojaive aguã.
⁴ Avakue re rive teve xee xeayvu ndavy'aia rupi?
 Mba'e re'ý teve arõ are aguã nda'evei?
⁵ Pema'ë xere, ha'e vy pekyrirí 'rã.
 Ha'e ramia vy pejoko 'rã pendejuru pendepo py.
⁶ Mba'eta ha'e nunga re xema'endu'a vy rive ndaxerekorävei,
 ha'e xero'o ha'e javi re aendu xepirimbaa.
⁷ — Ha'e gui mba'exa tu heko vai va'e kuery okuave are?
 Mba'eta ha'e kuery tuja'i tei ipo'akapave tema 'rã.
⁸ Henonde ma ta'y kuery ikuai porã 'rã.
 Guamymino kuery voi oexa avi 'rã.
⁹ Ha'e kuery ro rupi oï mby'a porã,
 ha'e Nhanderuete nombopagai 'rã yvyra po'i py.
¹⁰ Hymba toro ma ta'y'i 'rã ma'etý nhavõ,
 hymba vaka ta'y vy ndoityi 'rã.
¹¹ Hoo pygua kyrígue'i ma onha-onha 'rã okuapy vexa'i rami,
 ta'y kue'iry voi opo-opo 'rã ovy'a vy.
¹² Oporaei 'rã okuapy pandeiro ha'e ixã reta va'e reve,
 mimby pu guive oendu vy oguerovy'a vaipa 'rã.
¹³ Ára nhavõ ha'e kuery oaxa 'rã oguerekopaa py,
 mby'a porã reve oguejy peve yvyra rupa py.
¹⁴ Ha'e kuery ae 'rã aipoe'i Nhanderuete pe: "Ejepe'a ke oregui!
 Ndoroikuaaxe i ndeguigua tape.
¹⁵ Mba'eta mava'e tu Ipo'akapa va'e, ixupe jaiko aguã?
 Mba'e tu jajopy 'rã ixupe nhanhembo'eague re?" he'i 'rã okuapy.
¹⁶ Ha'e ramia tei ma'ë, ha'e kuery oguerekopa aguã ma ipo gui ae e'ý ou.
 Xevy pe nda'evei ae heko vai va'e kuery onhemongetaa rami aiko aguã!
¹⁷ — Mbövykue tu heko vai va'e kuery rataendy omboguea?
 Mbövykue tu ha'e kuery áry omboua 'rã imombaarã?
 Mbövykue tu Nhanderuete opoxya rupi ombou 'rã ha'e kuery ikuai axy aguã?
¹⁸ Mbövykue tu ha'e kuery omoxëa 'rã jai pirekue yvytu ogueroveve heravy va'e rami,
 e'ý vy mba'emo pirekue yvytu jere ogueraa va'e rami?
¹⁹ Ha'e rã peẽ kuery aipopeje: "Nhanderuete ma oarõ 'rã heko vai va'e ra'y kuery
 ombopaga aguã", peje 'rã.
 Ha'e ramia tei ha'e kuery ae Nhanderuete ombopaga va'e rire, ha'e kuery ae oendu
 aguã haxyta.
²⁰ Ha'e kuery ae toexa imombaarã ou rã,
 ha'e kuery ae toy'u Ipo'akapa va'e poxya gui.
²¹ Mba'eta ha'e kuery omano ma rire, hekove oipe'aa ma ramo,
 mba'exa tu ha'e kuery oendu 'rã ngoo pyguare kuery reko gui?
²² Amongue nda'u omo'arandu kuaa 'rã Nhanderuete?
 Mba'eta ha'e ma yva re ikuai va'e re voi oikuaa pota va'e.

- ²³ Amongue ma imbaraete reve 'rā omano,
heko eta rei e'ŷ, mba'eve rei oendu e'ŷ re guive,
²⁴ imba'e yryru kamby tynyē reve,
ha'e ikāgue ratā e'ŷa hexaimbā rei reve.
²⁵ Ha'e rā amboae kuery ma ikuerai rei reve 'rā omano,
mba'emo porā ndojoui rire.
²⁶ Ha'e rami teī mokoīve regua joapy 'rā ikuai yvy ku'i py,
taxo ojao'ipa aguā py.
²⁷ — Ma'ẽ, xee aikuaa ae ma pejapoxea,
mba'eta ha'eve'ŷa rami penhembopy'a xembojexavaive aguā re.
²⁸ Mba'eta aipopeje: "Mamo tu opyta yvateve va'e
teko vai rupi oiko va'e rogue?" peje 'rā.
²⁹ Ha'e rami teī peporandu na oguataa rupi ikuai va'e pe.
Napendu potai teve mba'emo ha'e kuery omombe'u rā?
³⁰ Mba'eta aipoe'i 'rā: "Jexavaia ára py heko vai va'e kuery omboaxyā 'rā,
ogueraa jepea 'rā poxya ára gui", he'i 'rā.
³¹ Mava'e tu omboayvu 'rā ha'e kuery ikuia re?
Mava'e tu ombopaga 'rā ojapo vaiague re?
³² Mba'eta opaa py ha'e kuery retekue ogueraa 'rā onhono porāa aguā katy,
ha'e onhono porāague re openaa 'rā.
³³ Ha'e kuery rupa áry yvy itui va'e nda'ipoyi 'rā,
ha'e avakue ha'e javi oje'oi 'rā hetekue rakykue,
henonde oje'oi va'e voi mbovy rei e'ŷa rami avi.
³⁴ Ha'e nunga rupi mba'e re tu xembopy'a porāa rupi merami teī pendeayvu rive?
Pembovaia ha'e javi re ma apu anho oĩ — he'i.

22

- Jó ojejavy etea rami Elifaz ijayvuague*
- ¹ Ha'e ramo Temā pygua Elifaz ju ombovai:
² — Ha'e gui avakue nda'u mba'emo ovare 'rā ri Nhanderuete pe?
Any, oikuaapa va'e teī ojeupe ae ovare va'e.
³ Tyrā pa nderekō porāa teve ombovy'a 'rā Ipo'akapa va'e?
Xapy'a rei ndee rejajvy e'ŷ re reiko rā ha'e ojou porā 'rā teve?
⁴ Nhanderuete renonde rejererokyjea re teve nembopaga,
nderovai oikuaa potaa py?
⁵ Nderekō vaia ndatuvixai teve?
Rejejavya ma opa va'erā e'ŷ teve?
⁶ Mba'eta mba'e re'ŷ reipe'a mba'emo nderyvy gui,
ha'e iporiaukue'i gui voi reipe'a ijao.
⁷ Ikane'õ va'e pe ma yy nereme'ei oy'u aguā,
okaruxe va'e pe voi nerakāte'ŷ tembi'u re.
⁸ Ipo'akakueve pe rive yvy itui,
avakue yvatekueve anho 'rā ikuai ha'e py.
⁹ Ha'e rā imeve'ŷ va'e kuery ma ipo rei reve rembojevy,
ha'e tyre'ŷ kuery mbaraetea remomba.
¹⁰ Ha'e nunga rupi ae nhuā ndejokopa,
ha'e rekyjea rendu xapy'a vy renhemondyipa rei,
¹¹ pytūa guive, mba'eve rexā e'ŷ teī.
Ha'e ramo ae yy tyguaxu va'e ndeo'i 'rā.
¹² — Yva re yvatevea py e'ŷ teve Nhanderuete oĩ?
Ema'ẽ ha'vy jaxy-tata yva re ikuai va'e re.
Ha'e va'e ma nda'yvate ma ra'agai!

- ¹³ Ha'e rami teĩ aipo're: "Mba'e tu Nhanderuete oikuaa?
 Ha'e nda'u oikuaa pota 'rã mba'emo re,
 oexa 'rã teve pytū ana rupi?
- ¹⁴ Mba'eta yva apy rupi ha'e oguata oikovya rupi
 arai ana ojao'i 'rã
 mba'emo oexa aguã rami e'ŷ", 're.
- ¹⁵ Ha'e gui ndee nda'u reikoxe teri tape ymague rupi,
 heko vai va'e kuery ikuaiaty rupi?
- ¹⁶ Ha'e va'e kuery ma oipe'apaa vyvoi raka'e hi'ára ovaẽ e'ŷ mbove.
 Ha'e kuery ytarã oĩ va'ekue ma xyry atã va'e ogueraapa.
- ¹⁷ Mba'eta Nhanderuete pe aipoe'i: "Ejepe'a ke orea gui!
 Mba'e tu Ipo'akapa va'e ojapo 'rã orere?" he'i rire.
- ¹⁸ Ha'e rami teĩ ha'e kuery ro ha'e omonyẽ mba'emo porã anho.
 Ha'e rã xevy pe nda'evei ae heko vai va'e kuery onhemongetaa rami aiko aguã.
- ¹⁹ Ha'e kuery opa rã heko porã va'e kuery oexa vy ovy'a 'rã.
 Ha'e kuery re ojejavý e'ŷ va'e opuka 'rã.
- ²⁰ Ha'e vy aipoe'i 'rã: "Anhetõ, nhanderovaigua kuery omombaa ra'e,
 ha'e rã mba'emo oeja va'ekue ma tata ju omomba", he'i 'rã okuapy.
- ²¹ — Ha'e nunga rupi peteĩ rami ju pota ke eiko Nhanderuete reve,
 revy'a nho aguã.
 Ha'e ramo ndere ou 'rã iporã va'e.
- ²² Ajerure ndevy, ejapyxaka porã pota ke nembo'e rã,
 ha'e ndepy'a re emoi ijayvua.
- ²³ Mba'eta Ipo'akapa va'e pe rejeko rerova uka ramo reiko porã ju 'rã.
 Xapy'a rei ndero gui mba'emo vai reipe'a ramo,
- ²⁴ ha'e ouro rerekva va'e yvy ku'i py remombo ramo,
 ouro Ofir guigua rerekva teĩ yakã'i rupi ita ikuai va'e mbyte rupi remombo ri ramo,
- ²⁵ ha'e ramo Ipo'akapa va'e ae 'rã ndevyguia oiko
 ouro ha'e prata oiporavo pyre rami.
- ²⁶ Mba'eta rerovy'a 'rã Ipo'akapa va'e anho,
 ha'e nderova rembovy 'rã Nhanderuete-a katy.
- ²⁷ Ixupe rejapukai ramo oendu 'rã,
 ha'e ixupe ju rejapo 'rã renhemboayvuague.
- ²⁸ Mba'emo rejapo aguã re renhembopy'a ramo oiko porã 'rã,
 ha'e tape reikoa rupi omoexakãmba 'rã.
- ²⁹ Nhomo'yvy'i ia rã rexava vy "Emopu'ã ju ke" 're ramo
 Nhanderuete ogueraa jepe 'rã onhemo'yvy'i va'ekue,
- ³⁰ oepy 'rã ojejavý va'ekue teĩ.
 Ndepo iky'a e'ŷa re oma'ẽ vy 'rã ogueraa jepe — he'i.

23

Nhanderuete renonde Jó ojexa ukaxe re ijayvuague

- ¹ Ha'e ramo Jó ombovai:
- ² — Aŷ voi ju xeayvu ta opu'ã rei va'e rami,
 xepo py xepoaẽa ajoko teĩ.
- ³ Ai! Xee aikuua va'e rire Nhanderuete ajou aguã!
 Ha'e rami vy ajexa uka 'rãgue oikuua pota oinya py.
- ⁴ Henonde anhemombe'u porã 'rãgue,
 xejuru amonyẽ 'rãgue aikoa re xeayvu aguã.
- ⁵ Ha'e rami vy xembovai rã aikuua 'rãgue,
 aendu kuaa 'rãgue xevy ijayvu rã.
- ⁶ Opo'aka etea rupi nda'u ijayvu ete 'rãgue xevy?

- Any, oikuua pota porã'i 'rãgue xere.
- ⁷ Ha'e py ma heko porã va'e ijayvu 'rãgue hexeve,
ha'e raka'e rã peve xee aa jepe 'rãgue xemboayvu aguã gui.
- ⁸ — Ha'e rami teĩ ma'ẽ, xerenonde katy xee aa rã noĩ 'rã ha'e py.
Xerakykue katy ajevy teĩ ha'e py voi ndajoui.
- ⁹ Xeaxua katy mba'emo ojapo teĩ xee ndaexa reguai.
Xeaxua katy voi onhemeti rã xee ndaexai 'rãe.
- ¹⁰ Ha'e rã ha'e ma oikuapa xee aikoa.
Xera'anga va'e rire ouro iky'a e'ŷ va'e rami ajekuaa 'rãgue.
- ¹¹ Mba'eta xepy ma ha'e oikoa rupi anho oiko.
Aĩ atã ixuguigua tape rupi aikoa rupi, ndajepe'ai ae.
- ¹² Ojuru py ojapo uka va'e gui xee ndajepe'ai,
xepy'apy py amoĩ porã ijayvuague.
- ¹³ Ha'e rã ha'e ma mba'emo ojapo aguã re onhembopy'a ramo
mava'e 'rã tu ojoko?
Mba'eta ha'e ojapoxe vy ojapo 'rãe.
- ¹⁴ Ha'e rami vy ojapopa avi 'rã xerekorã re ijayvuague.
Ha'e va'e ramigua ma mbovy rei e'ŷ ojee omoĩ ojapo va'erã.
- ¹⁵ Ha'e nunga rupi xepy'a eta rei 'rã henonde.
Ha'e nunga re aikuua pota vy akyje.
- ¹⁶ Nhanderuete ojapo xepy'a re xekangya aendu aguã rami,
Ipo'akapa va'e ae xembopy'a eta rei.
- ¹⁷ Mba'eta pytû vaikue gui e'ŷ xekangya aendu,
pytû reia xerova ojao'i va'e gui e'ŷ guive.

24

- Mbonykue rei e'ŷ* heko vai va'e kuery nombopagaaia rami Jó ijayvuague
- ¹ — Mba'e re nda'u Ipo'akapa va'e noa'angai ri joe oikuua pota aguã ára?
Mba'e re tu oikuua va'e kuery ndoikuuaai ha'e va'e ára?
- ² Mba'eta ikuai yvy markaa oguerova rive va'e,
ha'e mymba re imonda vy guymba kuery reve ae omongaru va'e.
- ³ Ha'e kuery oipe'a 'rã tyre'ŷ rymba mburika,
imeve'ŷ va'e gui voi oipe'a 'rã hymba vaka.
- ⁴ Ojexavai va'e kuery pe ojavy uka 'rã tape.
Ha'e kuery gui iporiaukue'i yvy re ikuai va'e onhemimba 'rã okuapy,
- ⁵ Ha'e va'e kuery ma ombo'eapo aguã katy oje'oi 'rã kavaju'i teko a e'ŷa rupigua rami,
iporiaukue'i voi yvy joja reia rupi oeka 'rã oje'oivy ho'u va'erã.
Ha'e rami vy 'rãe ojou tembi'u ojeupe ha'e gua'y kuery pe.
- ⁶ Heko vai va'e mba'ety py omono'õ 'rã mba'emo aju,
ha'e omondoro 'rã uva.
- ⁷ Ipire rei reve oaxa 'rã pytû ao oguerekoy e'ŷ vy.
Onheovã aguã ndoguerekoy vy yro'y oendu.
- ⁸ Yvyty rupi inhakýmba 'rã oky gui.
Onhemeti aguã oguerekoy e'ŷ vy itaova rupi rive 'rã onhemeti okuapy.
- ⁹ Tyre'ŷ'i kuery omboia 'rã okambua gui,
ha'e iporiaukue'i gui oipe'a 'rã oguerekoy i va'ekue.
- ¹⁰ Ha'e ramo ha'e va'e kuery ipire rei va'e ikuai ao oguerekoy e'ŷ vy.
Karuai oendu vy ogueraa 'rã mba'emo aju ojokua pyre.
- ¹¹ Heko vai va'e kuery roka py onhami 'rã azeite-rã,
uva oumbiri avi teĩ oendu riae 'rã oy'uxea.
- ¹² Tetã rupi voi avakue ipoaõ 'rã okuapy, ojeaipy kuery ojapukai 'rã onhe'ẽ py.
Ha'e rami teĩ ha'e nunga re Nhanderuete ndoikuua potai merami.

- ¹³ — Ha'e rā heko vai va'e ma hendy va'e rovaigua ikuai,
ndoikuuai 'rā guive tape hendya katy oo va'e,
ha'e va'e rupi ndooxei guive.
- ¹⁴ Ko'ě rai jave jojuka rive-rive va'e opu'ă vy
ojuka 'rā iporiaukue'i ha'e ojexavai va'e.
Ha'e gui pyávy ma oo ju 'rā imonda aguā katy.
- ¹⁵ Itavy rei va'e voi oarō 'rā pytū'i ta maa.
Ha'e vy aipoe'i ojeupe: "Avave rei ndaxerexa kuaai 'rā", he'i vy omo'ă 'rā ovv ngova.
- ¹⁶ Pytū jave avakue oike 'rā joo rupi,
ha'e gui ara py ma ngoo rupi ae 'rā ikuai.
Neī ndoexaxevei 'rā hendy va'e.
- ¹⁷ Mba'eta ha'e kuery ma ko'ěa pe "Manoa pytū guigua" he'i 'rā,
ha'e rā pyávy nhomongyje reia ma ha'e kuery oexa va'ety ae oiko.
- ¹⁸ — Peē aipopeje: "Heko vai va'e kuery ma ogueraapaa vyvoi 'rā yxyrya py.
Yvy re ha'e kuery pegua oī va'e ma ayvu vaipy anho.
Ndoovei 'rā tape uvaty katy oo va'e rupi omba'eapo aguā.
- ¹⁹ Ipirua ha'e haku ma yro'y omboyku-a rami avi
manoa voi omomba 'rā ojejavy va'e kuery.
- ²⁰ Ha'e ramo ha'e kuery re ixy ae hexarai 'rā,
ho'okue re taxo ovv'a reve okaru 'rā okuapy.
Heko vai kuery re na'ima'endu'aavei ma 'rā.
Ha'e kuery omopēmbaa 'rā yvyra rami,
- ²¹ imemby va'erā e'ý ha'e kuery omomba rire,
ha'e imeve'ý va'e pe ndojapo porāi rire", peje.
- ²² — Any! Ha'e rami 'rāgue py Nhanderuete ombaraetea rupi ombopukuve 'rā ojerovia
rei va'e kuery ára.
Ha'e kuery ndaekorāvei teī opu'ă ju nho 'rā.
- ²³ Ha'e kuery pe ha'e ome'ě 'rā opytu'u aguā.
Ha'e ramo ikuai atā 'rā.
Nhanderuete oma'ě 'rā ha'e kuery ikuiai rupi.
- ²⁴ Ha'e kuery ma xapy'a'i 'rā ombovatea.
Ha'e rire oaxa ju xapy'a 'rā, amboae kuery rami oipe'apaa 'rā,
mba'emo ra'yigue rami avi ojaya 'rā.
- ²⁵ Ha'e rami e'ý rā mava'e 'rā tu oikuaa uka xeapua,
ha'e ombovaipa xeayvua? — he'i.

25

Nhanderuete renonde avave rei nonhemboeko porā kuaia rami Bildade ijayvuague

- ¹ Ha'e ramo Sua pygua Bildade ombovai:
- ² — Ha'e rami avi Nhanderuete pegua anho oī opena ha'e ipo'aka aguā.
Ha'e ma ojapo yva yvatevea rupi voi ikuai porāa aguā rami.
- ³ Guembigui xondaro kuery ma ndajaipapapa kuaai 'rā.
Ixuguigua hexakāa ojope 'rā ha'e javi áry.
- ⁴ Ha'e rami rā mba'exa tu avakue onhemboeko porā 'rā Nhanderuete renonde?
Mba'exa tu kunha gui itui'i va'ekue oiko 'rā iky'a e'ý va'e?
- ⁵ Ma'ě, ha'e oexa rā jaxy eteve voi naendyi
ha'e jaxy-tata ikuai va'e iky'a e'ý va'e ndoikoi.
- ⁶ Ha'e gui avakue katuve ma taxo rami rive 'rā yvyigueve'i.
Avakue ra'y kuery ma taxo ramigua meme ae ikuai — he'i.

26

Nhanderuete ipo'akapaa re Jó ijayvuague

- ¹ Ha'e ramo Jó ombovai:
² — Ikangy va'e pytyvõa merami rive reiko,
 ijyva mbaraete e'ŷ va'e reipytyvõ merami rive!
³ Hi'arandu e'ŷ va'e remongeta kuaa merami rive,
 ha'e anhetē va'e reikuua uka porãmba merami rive!
⁴ Mava'e nembo'ea rupi tu ndeayvu ha'e rami ete?
 Mava'e guigua nhe'ẽ tu ndere oĩ ndeayvu kuaa aguã?
⁵ — Ha'e gui omano va'ekue nhe'ẽ ma oryryipa 'rã okuapy
 yy guy py ikuiai py.
⁶ Nhanderuete gui manoa pygua kuery nonhemi kuaai,
 yvykua vaikue ao'iarã noĩ ramo.
⁷ Mba'eve oĩ e'ŷa áry ha'e oipyo kuaray apu'a'ia katyguia,
 mba'eve oĩ e'ŷa áry ae avi onhono yvy.
⁸ Arai ana ikuai va'e mbyte ojoko 'rã yy,
 ha'e rami tei arai ndoxoi 'rã iguy py.
⁹ Ojao'i 'rã guenda opena oinyaty,
 hil'áry arai pytúa py ojao'i vy.
¹⁰ Omoĩ raka'e yy apyrã,
 hexakää ha'e pytúa mbyte py.
¹¹ Ijayvu atã ramo yva yta
 oryryi 'rã onhemondyipa vy.
¹² Ombaraetea rupi omboja'o raka'e ye'ẽ,
 ha'e o'arandua rupi oity ngovaigua kuery.
¹³ Opejua py rive omoexakã 'rã yva,
 ha'e opo py ojuka 'rã teju jagua inhakuã va'e.
¹⁴ Ma'ẽ, ha'e ramigua ma hembiapo pyp rive!
 Mba'eta ixugui ma nhaendu mbegue'i anho.
 Ha'e gui mava'e tu oendu kuaa 'rã ipo'akaa ryapu atã va'e?

27

- Heko vai va'e kuery ikuai axy aguã re Jó ijayvuague*
- ¹ Jó ijayvuve tema. Ha'e vy aipoel'i:
² — Anhetē ete Nhanderuete Ipo'akapa va'e xevy guarã va'ekue pe'aa
 ha'e xenhe'ẽ moingo axya va'e rekove rupi aura vy aipoa'e:
³ xee aikove teria ja,
 ha'e xeapyigua py xepytue aguã Nhanderuete ome'ẽ teria ja
⁴ xejuru nda'ijayvui 'rã ha'eve'ŷa rami,
 xeapekũ nda'ijapui 'rã guive.
⁵ Nda'evei ete "Ha'evea rami pendeayvu", ha'e aguã!
 Amano peve ndajepe'ai 'rã anhetē rupi aikoa gui.
⁶ Aĩ atã 'rã xerekoo porãa re, ndajepe'ai 'rãe.
 Aikoa ára nhavõ xepy'apy py ndaikuai ajejavya.
⁷ — Xerovaigua kuery topa heko vai va'e rami,
 xerovai opu'ã va'e kuery ma ha'eve'ŷa rami ikuai va'e rami topa.
⁸ Mba'eta ojerovia e'ŷ va'e kuery ma mba'e tu oĩ oarõ aguã,
 hekove ojaya,
 ha'e inhe'ẽ Nhanderuete oipe'a rã guarã?
⁹ Ha'e kuery áry teko axy ou ramo
 Nhanderuete oendu 'rã teve ojapukaia?
¹⁰ Heko vai va'e nda'u oguerovy'a 'rã Ipo'akapa va'e?
 Ixupe ojapukai 'rã teve oikoa ha'e javi py?
¹¹ — Xee rombo'e 'rã Nhanderuete po'akaa re,

- namombe'u e'ŷi 'rã Ipo'akapa va'e reve mba'emo oĩ va'e.
- ¹² Mba'eta peẽ kuery ha'e javi pexa ae ma ha'e nunga.
Mba'e re tu ha'vy ovare e'ŷ va'e anho pejou porã?
- ¹³ Ma'ẽ, po ramigua anho heko vai va'e ojopy 'rã Nhanderuete po gui,
Ipo'akapa va'e gui nhomoingo axya kuery ojopy 'rã po rami.
- ¹⁴ Ha'e kuery ra'y kuery hetave oje'oivy teĩ kyxe pygurarã meme ikuai,
hamymino kuery voi ndojou retai 'rã ho'u va'erã.
- ¹⁵ Ha'e kuery va'e regua hembyre va'ekue ma mba'eaxy omomba 'rã,
ha'e rã ta'yxykue ndojae'oi 'rã.
- ¹⁶ Heko vai va'e ma yvyku'i rami 'rã omboaty prata,
oaorã guive yapo rami ojou-jouve 'rã.
- ¹⁷ Ha'e nunga omoi porã teĩ heko porã va'e kuery ju 'rã onhemonde,
prata oguerekova'ekue voi ojejavý e'ŷ va'e kuery ju omboja'o 'rã okuapy.
- ¹⁸ Heko vai va'e ngoorã ojapo va'e ma tanambi raity rami,
ha'e oguy'irã mba'ety rarõa ojapo va'e rami rive.
- ¹⁹ Iporiau e'ŷ va'e ma mba'emo oguerekopa va'e mbyte py onheno teĩ
guexa oipe'a ju vy ndoexavei 'rã.
- ²⁰ Ha'e kuery re imongyjeearã ou vy ipo'aka 'rã yy oxyry atã va'e rami,
pyávy ma yvytu vaikue ogueraapa 'rã.
- ²¹ Kuaray oua katy gui yvytu ou va'e ogueraa ramo okanhymba 'rã.
Oipe'apa 'rã heravy oñague gui.
- ²² Nhanderuete po gui ojava vyvoixe teĩ
hi'áry ha'e nunga ha'e javi ombou 'rã omboaxy e'ŷ re.
- ²³ Heko vai va'e ho'a rã ojepopetepaa 'rã,
okanhyy ovvy ramo otuvy nhe'ẽ pavẽ 'rã imondovy – he'i.

28

- Yvy guýry mba'emo porã oĩ va'e avakue oguenoẽ kuaa re Jó ijayvuague*
- ¹ — Anhetẽ, prata re yvy jo'oa ikuai,
oĩ avi ouro ky'a'oaty.
- ² Ferro guive oguenoẽ 'rã yvy gui,
ha'e rã overa va'e ma ita py ojoua.
- ³ Avakue omoexakã 'rã pytû anaa rupi,
ha'e hexakãa opaa peve oo vy oeka 'rã ita porãgueve
pytû anaa py oĩ va'e.
- ⁴ Ojo'o 'rã yvy oike aguã avakue ikuiai gui mombyry,
oguata va'e kuery oikuua e'ŷa py.
Ha'e kuery ikuiai gui mombyry 'rã ikuai
peteĩ ixã re ovava-vava oinya py.
- ⁵ Yvy gui ma oiko 'rã tembi'u,
ha'e rã iguýry ma tata py okaiague rami 'rã ojekuaa.
- ⁶ Ha'e pygua ita re oĩ 'rã safira,
ha'e gui iku'ikue re ma ouro oĩ.
- ⁷ — Ha'e va'e tape ma guyra jo'ua kuery ndoikuuai,
taguato ndoexai va'e ae.
- ⁸ Vixo inharõ ha'e tuvixa va'e nopyrõi 'rã ha'e rupi,
guary ra'y voi ndoaxai ha'e rupi.
- ⁹ — Avakue opo py tembiporu oguerekova'e py ombota-mbota 'rã ita re,
ha'e vy yvyty ikuai va'e oipe'a 'rã iguy peve.
- ¹⁰ Ombokua 'rã ita rupi
oexa aguã hepyve va'e oĩ va'e ha'e javi.
- ¹¹ Omboty 'rã yy rape ikuai va'e peteïve henda py otyky e'ŷ aguã rami,

hexakāa katy oguerupa aguā hi'ā py oī va'ekue.

- Arandu anhetē* va'e me'ēa Nhanderuete oikoa re Jó ijayvuague
- 12 — Ha'e rā 'arandua ma mamo tu oī?
Mamo tu oī mba'emo jaikuāa ete aguā?
- 13 Ha'e va'e repy ma avave ndoikuāai,
yvy re avakue ikuāia rupi ndojouai 'rāe.
- 14 Yvykua vaikue aipoe'i: "Xere ma ha'e nunga noī",
ye'ē voi "Xea py noī avi" he'i.
- 15 Ouro oiky'a'o pyre re teī nda'evei jajogua aguā,
neī prata voi nda'evei hekoria japeja aguā.
- 16 Mba'eta ouro Ofir gui ogueru pyre ha'e javi gui ovareve va'e,
ônix hepyve va'e ha'e safira ikuai va'e gui guive.
- 17 Ouro teī ma 'arandu rami e'ŷ iporā va'e, neī itaendy ma voi.
Jeguāa ouro oiky'a'o pyre guigua re teī nanhamboekoviai 'rā.
- 18 'Arandu oīa py ma ita coral ha'e itaendy ikuai va'e re nhanderexaraipa 'rā.
Pérola jajoua gui voi ha'eveve 'arandu jarekoia.
- 19 Etiópia gui topázio herua teī ha'e va'e ma 'arandu rami e'ŷ ovare,
neī ouro iky'a e'ŷ va'e voi.
- 20 — Ha'e nunga rupi magui tu ou 'arandu?
Mamo tu oī mba'emo jaikuāa aguā?
- 21 Mba'eta temimoingo ikuai va'e oexaa gui onhomia,
guyra yvate rupi oveve va'e gui guive.
- 22 Yvykua vaikue ha'e manoia aipoe'i:
"Oreapyxā py roendu rive 'arandu oikoa", he'i.
- 23 Nhanderuete anho oikuāa 'arandua katy tape oo va'e,
ha'e ae oikuāa oīa.
- 24 Mba'eta ha'e ma yvy apy rupi peve oexa pota,
yva guýry ikuai va'e ha'e javi 'rā oexapa.
- 25 Yvytu poyia ha'evea'i rami Nhanderuete oeja
yy guive ituia peve oa'anga jave,
- 26 oky nhavō guarā oeja,
ha'e yapu overa reve va'e raperā omoī jave,
- 27 ha'e va'e jave py ae 'arandu oexa avi vy oikuāa uka raka'e.
Ha'e va'e re oikuāa pota ma vy omoī atā raka'e.
- 28 Ha'e vy aipoe'i avakue pe: "Pendu ke:
SENHOR renonde pejererokyjea ma pene'arandurā oī,
ha'eve'ŷ va'e gui pejepē'a vy 'rāe peikuāa mba'emo", he'i.

29

Jó ymave rupi oiko porāague re ima'endu'aague

- ¹ Jó ijayvuve tema. Ha'e vy aipoe'i:
- 2 — Ai! Kueve'igua jaxy re aikoague rami ju aiko va'e rire,
Nhanderuete xere opena javegua re rami!
- 3 Ha'e jave ma xeakā áry rupi omooxakā va'ekue,
ha'e hendy va'e xererekō heravy ramo pytū rupi ete aguata aikovy va'ekue.
- 4 Ha'e jave ma xerexāi aikovy va'ekue,
xero áry rupi Nhanderuete xerayvua oexa uka rā.
- 5 Ha'e jave ma Ipo'akapa va'e oiko teri xereve,
ha'e xera'y kuery voi xeyvýry teri ikuai.
- 6 Kamby py xepy ajoī ainy va'ekue,
ha'e itaova gui yakā'i oxyry va'e rami azeite oxyry oiny jave.
- 7 — Tetā kora rokē katy aa,

- ha'e tetā mbyte py guive aguapy ainy aguā ome'ēa jave
⁸ kunumigue xerexa vy ojepe'apa,
 ha'e tujakue'i voi opu'āmba okuapy va'ekue.
⁹ Yvatekueve voi ijayvu ta vy ojuru ojoko okuapy va'ekue,
 ojuru re opo omoī reve.
¹⁰ Omboetevepy kuery ayvu nonhenduvei va'ekue,
 ijurupy py inhapekū nomyīvei ramo.
¹¹ Xeayvua rendua kuery ma "Ovy'a va'e" he'i okuapy xevy,
 xerexaa kuery voi xere ima'endu'a porā va'ekue.
¹² Mba'eta xee ma iporiaukue'i ojapukai rā aepy va'ekue,
 tyre'ŷ opytyvōarā oguerekō e'ŷ va'e kuery guive.
¹³ Omano ta va'e voi xereroayvu porā va'ekue,
 xee ajapo avi va'ekue imeve'ŷ va'e kuery okuraxō py ovy'a aguā rami.
¹⁴ Xejee amoī va'ekue teko porā,
 ha'e va'e anho oī va'ekue xeao rami.
 Manto ha'e akā nhovāa rami oī va'ekue ha'evea rami joe apenaa.
¹⁵ Xee ajeapo va'ekue ára revegua e'ŷ rexarā rami,
 hi'u rovaikue'i va'e pyrā rami guive.
¹⁶ Iporiaukue'i pe ma tuu aiko va'ekue,
 oikuapyp e'ŷ ikuai va'e re guive aikuua pota va'ekue.
¹⁷ Ha'e rā porayvu e'ŷ va'e kuery raī'y kā ma xee amopēmba va'ekue,
 ha'e kuery raī gui xee araa jepe va'ekue omokō ta va'e.
¹⁸ Xee aipoa'e va'ekue: "Xero py ae 'rā amano,
 amboetave 'rā xe'ára ita ku'i rami.
¹⁹ Xee aiko 'rā yy peve yvyra rapo ovy va'e rami,
 ha'e pyávy hakā re yxapy oīa va'e rami.
²⁰ Xemboeteave tema 'rā,
 ha'e xepo py xerapa ajopy atā tema 'rā aikovy", ha'e va'ekue.
²¹ — Xeayvu rā ojapyxaka va'e kuery oarō okuapy va'ekue amogeta aguā,
 xeayvua oendua rupi okyrirī pavē va'ekue.
²² Xee xeayvupa ma rā naxembovai kuaai va'ekue.
 Ha'e kuery áry xeayvua oguejy va'ekue yxapy rami.
²³ Ha'e kuery xerarō va'ekue oky re rami,
 ojuru oipe'a reve oarō okuapy xeayvu aguā, haku-a ára py oarō va'e rami.
²⁴ Ha'e kuery nda'ipy'a guaxui jave ha'e kuery pe xerory va'ekue.
 Xerova omoxakā rā xererovy'a va'ekue.
²⁵ Ha'e kuery raperā xee aiporavo va'ekue huvixa rami aguapy ainy reve,
 huvixave oxondaro kuery mbyte oī va'e rami,
 ha'e ojae'o va'e kuery mbopy'a porāa rami ajoguerekō va'ekue.

30

Jó iporiaua oguerojae'oague

- ¹ — Ha'e gui aŷ ma xegui kyrīgueve xejajai okuapy,
 ha'e va'e kuery ru ma neī jagua reve xerymba veva'i kuery oarō aguā katy
 namondoukai va'ekue ri.
² Mba'eta ha'e kuery inhangaipa ramo
 mba'e nunga py tu xevy ovare 'rāgue ipo mbaraetea?
³ Jexavai ha'e karuai gui ha'e kuery ikangypa okuapy.
 Oixu'u okuapy mba'emo pirukue,
 yma ma tekoa noīveia rupi mba'emo vaikue ikuai va'e guive.
⁴ Jai rogue ha'e yvyra'i rogue rive oipo'o,
 zimbro rapo guive ho'u okuapy.

- ⁵ Avakue mbyte gui omoxēa.
 Ha'e kuery rovai ojapukaia okuapy imonda va'e rakykue ojapukaia rami.
- ⁶ Yvy'ā peguy kuaray'ā reia rupi ikuai,
 yvykua ha'e itakua rupi.
- ⁷ Onhendu okuapy jai rupi,
 juu guy rupi rive ijaty okuapy.
- ⁸ Inhakā porā e'ŷ va'e ra'y kuery ikuai,
 ima'endu'apy e'ŷ regua,
 ijyvy gui omoxēmba pyre.
- ⁹ — Ha'e rā aŷ ma ha'e kuery xembojaru rei okuapy,
 ojojai pyrā aiko ramo.
- ¹⁰ Xegui ojeguaru vy ojepe'a 'rā mombyry'i,
 ndokyjei guive xerova re onyvō aguā.
- ¹¹ Mba'eta Nhanderuete ombopyu xerapa xā xembojexavai vy.
 Ha'e ramo ha'e kuery ndojejokovei ma xerenonde.
- ¹² Ha'e rami vy xeaxu e'ŷa re opu'ā okuapy xemoanha rei aguā,
 ha'e xerovai jogueroayvu okuapy xemomba vy ou aguā re.
- ¹³ Ombovaipa okuapy xee aa aguā va'e rupi,
 xeapo ajexavai aguā rami.
 Ha'e kuery ma oipytyvō pyrā e'ŷ ae.
- ¹⁴ Xere ou okuapy tetā kora oitypaague rupi oike va'e rami,
 ha'e kuery ouve tema 'rā ivaipaague mbyte rupi.
- ¹⁵ Xere ou xemongyjearā,
 yvytu ombovevepa rire omboetepy aikoague.
 Avy'aague oaxa ma ovy arai rami.
- ¹⁶ — Aŷ ma xepy'apy py anhenhandu xenhe'ē ivaipa maa rami.
 Xembojexavaia ára ou ma xere.
- ¹⁷ Pyávy xekāgue hu'ūmba ha'e ovapa va'e ramigua aendu,
 ha'e mba'emo vai xexu'u va'e ndopytu'ui.
- ¹⁸ Mba'emo vai aendu va'e gui xeao voi ojepokapa rei 'rā,
 mba'emo vai xejyryvipy 'rā xeao puku jyryvi rami.
- ¹⁹ Xeruete, ndee ae xemombo yapo py,
 ha'e ramo yvy ku'i ha'e tanhimbu rami aiko.
- ²⁰ Ndevy ajapukai rā ndee naxembovai.
 Apu'ā ha'amay teī rema'ē rive xere.
- ²¹ Porayvu e'ŷ va'e renhemingo xevy.
 Ha'e vy ndepo mbaraete reve repu'ā xere.
- ²² Rejapo yvytu xereupi vy hi'áry xereraa aguā rami.
 Xemou'ūmba ára vai revovo rupi.
- ²³ Ha'e gui xee aikuaa amano aguā katy xereraa,
 oikove va'e ha'e javi ikuai aguā katy.
- ²⁴ — Ha'e rami avi yty áry ava omomboa imoinyague gui nokuave'ēi 'rā teve,
 ojexavaia gui ndojapukai ratāi 'rā teve ipytyvōarā pe?
- ²⁵ Xee ndajae'oi va'ekue teve ojexavai va'e re,
 ha'e xenhe'ē py namboaxyi teve oiko axy va'e?
- ²⁶ Iporā va'e xee arō teī xere ou mba'emo vai.
 Hendy va'e arō va'e 'rāgue py pytū anho ou xere.
- ²⁷ Xeryepy rupi omyī va'e ndopytu'ui,
 xere aiko axya ára ou ramo.
- ²⁸ Xeporiau aikovy kuaray ojope e'ŷa rupi.
 Heta va'e kuery mbyte py ajerure ha'amay xepytyvōa aguā.
- ²⁹ Kee ma jagua-tuvy nhe'ē ryke'y,

- ha'e guyra nhandu ryvy aiko.
 30 Xepire hu'ũmba reve ho'apa xegui,
 xekāgue voi okai merami xepire raku gui.
 31 Ha'e nunga rupi ixā reta va'e ambopu 'rāgue py xeraxē ainy xepy'a vai vy,
 ha'e mimby amonhe'ẽ 'rāgue py ojae'o va'e rami anhendu.

31

- Jó anhetē* rupi oikoa re ijayvuague
 1 — Xerexa reve ajapo ma areko aguā.
 Mba'exá tu ha'vy xee apena reia rupi ama'ẽ ta kunhataĩ re?
 2 Ha'e rami rire mba'e 'rā tu xee ajopy Nhanderuete yvateguá gui,
 mba'e nunga tu yvate oña gui ome'ẽ 'rā xevy?
 3 Mba'eta heko vai va'e peguarā omoõ okanhy aguā,
 mba'emo vai apoá pe omoõ oiko axy aguā.
 4 Ha'e rā xee aikoa ma Nhanderuete oexapa,
 oipapa aguataa ha'e javi.
 5 — Ha'e gui aiko porā merami rive va'e rire,
 ha'e ajokore aguā katy xepy inhakuā ový va'e rire,
 6 (Nhanderuete toikuáa pota porā xere,
 anhetē rupi aikoa oikuáa aguā,)
 7 xapy'a rei tape porā gui ajepé'a vy
 mba'emo aexa va'e rupi rive anhembopy'a,
 e'ŷ vy xepo re iky'a va'e oĩ va'e rire,
 8 ha'e rami ri ramo amboae kuery rive to'u xee ama'etŷague gui,
 ha'e xemba'ety rupi henhoĩ va'ekue tomondoropa rive.
 9 — Xapy'a rei xekuraxō py kunha mboae re anhembotavy uka,
 ha'e xea katygua rokē py ama'ẽ mbeguea rupi aiko va'e rire,
 10 ha'e ramo xera'yxy tojapo tembi'u amboae ava pe,
 hexeve amboae tonhenó.
 11 Mba'eta ha'e rami aiko va'e rire nda'evei ete 'rāgue,
 ajeavyague re huvixa kuery xembopaga 'rāgue.
 12 Ha'e ramigua ma tata rami ombovaipa 'rāgue opa peve,
 omomba 'rāgue mba'emo areko va'e ha'e javi.
 13 — Xapy'a rei xerembiguai ava e'ŷ vy kunha mba'e
 ha'eve'ŷa rami xee areko va'e rire,
 14 mba'e tu xee ajapo 'rāgue Nhanderuete xere opu'ã ramo?
 Xere oikuáa pota ramo mba'exá tu xee ambovai 'rāgue?
 15 Mba'eta xeryru'i py aĩ aguā xemoingo va'ekue e'ŷ ri ty'y ha'e kuery voi omoingo
 raka'e?
 Ha'e e'ŷ teve nhanderyru'i py nhanemoingo pavē va'ekue?
 16 — Xapy'a rei iporiaukue'i oipota va'e name'ẽi vy
 imeve'ŷ va'e ndaexa pyxovei aguā rami ajapo va'e rire,
 17 ha'e rami e'ŷ vy xee ae'ia py akaru va'e rire
 tyre'ŷ pe amboja'o e'ŷ re,
 18 (mba'eta xekunumi guive xereve ae areko tuu rami,
 ha'e xeryru'i py aĩ guive imeve'ŷ va'e rerekao aiko,)
 19 xapy'a rei ijao e'ŷ va'e ojexavai rā ama'ẽ rive va'e rire,
 e'ŷ vy onheovā aguā oguerekó e'ŷ vy ojexavai rā,
 20 xapy'a rei xerymba vexa'i rague py namboakui ramo
 ha'e kuery opy'a py ndaxereroayvu porāi va'e rire,
 21 xapy'a rei okē py joguerekao kuery ikuai va'e xemboeko porā reve tei
 tyre'ŷ rovai xepo aupi va'e rire,

- ²² ha'e rami ri ramo to'a rive xeaxi'y kāgue,
ha'e tomboia xejyva oīague gui.
- ²³ Mba'eta ha'e rami va'e rire Nhanderuete xembopaga aguā gui ndaxerekorāvei 'rāgue,
hexakāa rive xee ndaropo'akai 'rāgue.
- ²⁴ — Xapy'a rei ouro re rive ajerovia vy
ouro oiky'a'o pyre pe "Ndere ajeko" ha'e va'e rire,
- ²⁵ xapy'a rei arekopa etea
ha'e xepo py ajou reta va'e arov'y'a va'e rire,
- ²⁶ xapy'a rei kuaray rexakāa re,
e'ŷ vy jaxy hendy porāa re ama'ẽ reve
- ²⁷ xepy'a py ajekore nhemia rupi
xepo py ayvua aikuua uka va'e rire,
- ²⁸ ha'e va'e py voi ajejav'y'rāgue joguerekoa kuery xembopaga aguā rami,
Nhanderuete yvategua e'ŷ amboete rire.
- ²⁹ — Ha'e gui xere ija'e'ŷ va'e kuery ojexavai rā aexa vy ndavy'ai,
ha'e kuery re mba'emo vai oiko rā ndarovy'ai.
- ³⁰ Ha'e rami avi ndarojejavyi xejuru
ha'e kuery omano aguā re ajerurea py.
- ³¹ Ha'e xero py ikuai va'e aipo nde'i:
"Xo'o ha'e nome'ẽ porāi rire ndajakaru porāi", nde'i,
- ³² mba'eta xee ndaejai yvy mboae guigua tape py rive pytū oaxa aguā,
xerokē aipe'a jepi riae oguata va'e kuery amovaẽ vy.
- ³³ Ha'e gui Adão rami e'ŷ xepy'apy py nanhomí
xereko vaia ha'e ajejavya.
- ³⁴ Mba'eta xee ma heta va'e kuery gui ndakyjei,
xeretarā kuery xere ija'e'ŷa naxemongyjei
akyrirī ha'e xero gui naẽi aguā rami.
- ³⁵ Xeayvu renduarā oĩ va'e rire!
Ma'ẽ, apy ma oĩ xereko regua xerery reve ambopara va'ekue!
Ipo'akapa va'e xembovai va'e rire,
ha'e rami e'ŷ vy xerovaigua ombopara va'e rire xere ijayvua!
- ³⁶ Ha'e va'e kuaxia para araa 'rāgue xeaxi'y áry,
xeakāáry ajokua 'rāgue coroa rami.
- ³⁷ Nhanderuete pe xee aikuua uka 'rāgue aikoa ha'e javi.
Ha'e oĩa py ajexá uka 'rāgue yvateve va'e rami.
- ³⁸ — Xapy'a rei xemba'ety káuxa xere ijayvua,
ha'e yvy aikaraĩ heravyague káuxa ojae'oa va'e rire,
- ³⁹ xapy'a rei ijaju ma ramo ha'u ombo'eapo va'e kuery pe ha'evea rami apaga e'ŷ re,
ha'e ijopyarā va'ekue amomba va'e rire,
- ⁴⁰ ha'e rami ri ramo trigo 'rāgue py juu rive toiko xevy,
ha'e cevada 'rāgue py toiko trigo ramigua rive — he'i.
Apy ma opa ma Jó ijayvuague.

32

Jó ha'e irū kuery mboapy ikuai va'e pe Eliú ivaiague

¹ Ha'e gui mboapyve avakue optyu'u ma Jó onhemboeko porāa rupi ijayvu rā ombovaia
gui.

² Ha'e ramo buzita Baraquel ra'y Eliú, Rão ramymino regua ju ivai Jó pe, Nhanderuete
gui eteve voi onhemboeko porāvexe ramo.

³ Irū kuery mboapyve pe voi ivai, mba'eta ha'e kuery nombovai kuaavei va'eri Jó rovai
tema ijayvu rire.

⁴ Ha'e gui Eliú ma Jó gui kunumive va'e vy oarō ranhe ixupe ijayvu aguā.

⁵ Ha'e rami avi mboapy avakue nombovai kuaaveia Eliú oexa vy ivaive oiny.

Jó pe ombovai ypy vy Eliú ijayvuague

- ⁶ Ha'e gui buzita Baraquel ra'y Eliú aipoe'i:
- Xee ma xekunumive va'e, ha'e rā peē ma pendetujakueve meme.
Ha'e rami vy xee arō ranhe, pendua py xee aikuaa va'e amombe'u aguā ndaxepy'a guaxui vy.
- ⁷ Xee aipoa'e va'ekue: "Heta ára ha'e ma'etŷ mbovy e'ŷ oguereko va'e kuery ranhe ta'ijayvu 'arandu re nhombo'ea rupi", ha'e va'ekue.
- ⁸ Ha'e rami teĩ anhetẽ avakue re oĩ 'rā peteĩ Nhe'ẽ,
mba'eta Ipo'akapa va'e oipejua py rive nhomo'arandu 'rā.
- ⁹ Hi'arandukueve ma tujakueve anho e'ŷ ikuai,
tujakue'i anho e'ŷ 'rā oikuaa ha'evea ramigua.
- ¹⁰ Ha'e nunga rupi xee aipoa'e: "Pejapyxaka ke xere,
ha'e gui xee voi amombe'u 'rā aikuaa va'e", ha'e.
- ¹¹ — Ma'ẽ, xee amoĩ porā pendeayvuague,
pendeayvua re ajapyxaka pota porā
pendeayvurā re teri peikuaa pota peiny reve.
- ¹² Ha'e gui pendeayvu aendu rā
peē kuery peteīve ma voi ndapeikuua ukai Jó ha'eve'ŷa rami ijayvua,
napembovai kuaai pekuapy ha'e ae oikuaa rami ijayvu rā.
- ¹³ Ha'e gui nda'evei penhemboeko porā ukaa rupi aipopeje aguā:
"Ore rojou ma 'arandu.
Nhanderuete ju tombovai, avakue ma nda'evei", peje aguā.
- ¹⁴ Ma'ẽ, xevy pe'ŷ ha'e ijayvu rire
xee ma pendeayvuague rupi e'ŷ 'rā ambovai.
- ¹⁵ — Jó, neirũ kuery mboapyve onhemondyi vy nanembovai kuaavei,
ha'e kuery pe oata ma merami ayvu.
- ¹⁶ Ha'e gui xee pa arōve ta ha'e kuery nda'ijayvui ma rire?
Mba'eta okyririmbä ma, peteĩ henda py ma voi nombovaivei vy.
- ¹⁷ Ha'e rami vy xee ju 'rā xeayvu,
amombe'u 'rā aikuaa va'e.
- ¹⁸ Mba'eta heta areko xeayvu aguā,
xenhe'ẽ oĩ va'e ae xemokyre'ŷ ramo.
- ¹⁹ Mba'eta xepy'apy rupi aendu vinho ryru mba'emo pirekue guigua ipyau va'e ramigua,
onhembotypa vy oxoro rai'i va'e rami.
- ²⁰ Ha'e rami vy tove taxeayvu oẽmba ovy aguā.
Aipe'a 'rā xejurū rombovaia rupi xeayvu vy.
- ²¹ Xee ma peteĩ rive joegui ayvuvea rupi e'ŷ 'rā xeayvu,
neĩ avakue pe ajejou porā ukaa rupi e'ŷ guive.
- ²² Mba'eta xee ma ajejou porā ukaa rupi ndaxeayvu kuaai.
Ha'e rami e'ŷ va'e rire xemoingoare xereraa voi 'rāgue.

Jó pe Eliú ijayvu eteague

- ¹ — Ha'e gui Jó, endu ke aikuaa va'e re xeayvu rā,
ejapyxaka xeayvua ha'e javi re.
- ² Aŷ ma xeayvu ta,
xejuru py xeapekū ijayvu aguā rami oĩ.
- ³ Xeayvua oikuaa uka 'rā xepy'a re anhetẽ va'e anho oĩa,
xeayvu 'rā mba'emo aikuaa va'e re anho.
- ⁴ Nhanderuete Nhe'ẽ ae xemoingo va'ekue,
Ipo'akapa va'e oipejua py rive ome'ẽ xerekoverā.

- ⁵ Xapy'a rei rembovai kuaa vy ke xembovai,
ereko katu reikuaa va'e xevy pe remombe'u va'erā.
- ⁶ Ma'ẽ, Nhanderuete renonde ma ndee ramigua ae avi aiko,
Yapo gui avi xeapo rire.
- ⁷ Ha'e ramo xee noromongyjei 'rā,
nde'áry noĩ 'rā xepo poyia.
- ⁸ — Anhetē xee aendua py ndeayvu rā
ange aendu kuri
- ⁹ “Ha'eve va'e aiko, ajejavvy va'e'ŷ.
Xeky'a va'e'ŷ ha'e xerekoo vai va'e'ŷ”, 're ramo.
- ¹⁰ “Ma'ẽ, Nhanderuete xembopagaa rupi onhea'ã,
hovaigua aikoa rami xekuaa vy.
- ¹¹ Ha'e rami vy yvyra pa'ũ py omboty xepy,
ha'e oikuaa pota 'rā aikoa ha'e javi re”, 're va'ekue.
- ¹² Ha'e rami ndeayvuague ha'eve'ŷa ramigua ramo
xee rombovai 'rā.
Mba'eta avakue ikuai va'e gui Nhanderuete yvateve va'e.
- ¹³ Mba'e re tu ixupe ndeayvu ete vy
“Peteīve henda py nerenhemombe'u porāi ri”, 're?
- ¹⁴ Ha'e rami 'rāgue py Nhanderuete ma peteī rami ijayvu ma vy
teīgue ju 'rā omombe'u porāve.
Ha'e rami teī ijayvua re avakue noendu porā potai 'rā.
- ¹⁵ Nhandevy pe oexa ra'u uka 'rā mba'emo, pyávy mba'emo jaexaa rupi,
nhanderopeyi vaipa reve
nhanderupa rupi jake jajupy jave.
- ¹⁶ Nhandeapyxa voi oipe'a vy
nhanembo'e 'rā oipota va'e re,
- ¹⁷ ojapo aguā nhanhembopy'aa gui jajepe'a aguā rami,
jajejou porā reia gui nhandereraa jepe aguā,
- ¹⁸ yvykua katy nhanderekove oo rā ojoko vy,
kyxe py nhandejukaa gui guive.
- ¹⁹ — Nhanderupa rupi nhendetui ramo nhanembopaga 'rā haxy va'e py,
nhanekāgue re haxy nhaendu riae va'e py.
- ²⁰ Ha'e ramo jajeguaru 'rā tembi'u gui,
tembi'u hee va'e teī nhanenhe'ẽ py ndaja'uxei ae.
- ²¹ Nhandro'o oĩ porā va'ekue aŷ ndojekuaavei.
Ha'e rā nhanekāgue ndojekuaai va'ekue ma aŷ ojekuaapa.
- ²² Nhanenhe'ẽ oo tema 'rā yvykua katy,
nhanderekove onhemboja 'rā ovv ip'e'aarā kuerya katy.
- ²³ — Xapy'a rei ou 'rā peteī anjo nhandere ojerure va'erā, mbovy e'ŷ ikuai va'e regua,
nhandevy oikuaa uka aguā ha'evea ramigua jajapo aguā.
- ²⁴ Ha'e ramo Nhanderuete nhanemboaxy vy aipoel'i 'rā anjo pe:
“Eraa jepe ke, yvykua py ho'a e'ŷ aguā.
Ajou ma hepyrā”, he'i 'rā.
- ²⁵ Ha'e ramo rā nhandro'o hexaĩ ju 'rā nhanekyri jave nhanembaraeteague rami,
nhanekunumi jave jaikoague rami ae ju 'rā jaiko.
- ²⁶ Ha'e ramo jajerure 'rā Nhanderuete pe, ha'e rā nhanepytyvō 'rā.
Ha'e ramo javy'a reve 'rā jaexa Nhanderuete rova.
Ha'e ramo nhanemboeko porā ju 'rā.
- ²⁷ Ha'e ramo avakue oendua py japoraei reve aipoja'e 'rā:
“Ajejavvy va'ekue, ha'eve'ŷa ramigua ajapo,
teī apaga aguā va'ekue rami e'ŷ guive xembopagaa.

- ²⁸ Nhanderuete ojogua xenhe'ẽ yvykua py ooa gui,
xerekove reve aexa aguã hendy va'e", ja'e 'rã.
- ²⁹ — Ha'e va'e ha'e javi ma Nhanderuete ojapo
nhandevy mokoõgue, mboapykue mba'e,
- ³⁰ yvykua gui nhanderekove ogueru ju aguã,
oikove va'e kuery moexakää py nhanderexape avi aguã.
- ³¹ Ha'e nunga rupi Jó, endu ke, ejapyxaka xeayvua re.
Ekyrirĩ ke, ha'e rã xee xeayvu 'rã.
- ³² Ndee ndeayvu aguã rereko ri vy xembovai.
Ndeayvu ke, mba'eta xee romboeko porãxe.
- ³³ Ha'e gui mba'eve ndererekoi ri ramo ejapyxakave tema xeayvua re.
Ekyrirĩ, ha'e rã rombo'e 'rã 'arandu re — he'i.

34

- Eliú Nhanderuete mboeko porãa rupi ijayvuague*
- ¹ Ha'e gui Eliú aipoe'ive ju:
² — Pene'arandu va'e, pendu ke xee aikuua va'e.
Penembo'epaa va'ekue, pejapyxaka xeayvua re.
- ³ Mba'eta nhandeapyxa py nhaendu kuaa 'rã ayvu,
nhandejuru py tembi'u heea nhaendu kuaa rami avi.
- ⁴ Ha'evea ramigua jaiporavo 'rã nhandejeupe.
Jojavi 'rã jaikuua iporã va'e.
- ⁵ Mba'eta Jó aipoe'i: "Xereko porã va'eri
Nhanderuete oipe'a xevy guarã va'ekue.
- ⁶ Ha'evea rami aiko teĩ ijapu va'e rami xekuua.
Xeai okuera va'erã e'ŷ oĩ, ajejavya oĩ ramo e'ŷ", he'i va'ekue.
- ⁷ — Oiko 'rã nda'u ava Jó ramigua?
Mba'eta ha'e ma ojojai 'rã Nhanderuete, yy oy'u va'e rami rive.
- ⁸ Ha'e rami vy onhemoirũ 'rã oikovy ojapo vai rei va'e kuery re,
avakue heko vai va'e kuery reve anho oiko.
- ⁹ Mba'eta aipoe'i: "Nhanderuete jarovy'a teĩ
mba'everã ndovarei nhandevy", he'i va'ekue.
- ¹⁰ — Ha'e nunga rupi peẽ avakue peneakã porã va'e, pejapyxaka xeayvua re.
Nhanderuete ma peteïve henda py ndojapo vai 'rã,
Ipo'akapa va'e ha'eve'ŷa rami ndajoguerekoi 'rã.
- ¹¹ Mba'eta ome'ẽ 'rãe jaikoague repy,
ojapo 'rã peteĩ-teĩ jaikoague repy jajou aguã rami.
- ¹² Anhetẽ ete, Nhanderuete ha'eve'ŷa rami ndoikoi 'rã.
Ipo'akapa va'e ndajoguerekoi 'rã ha'eve'ŷa rami.
- ¹³ Mba'eta mava'e tu omoõ raka'e yvy re opena va'erã?
Mava'e tu ipo py omboaxa raka'e ha'e javi regua?
- ¹⁴ Xapy'a rei Nhanderuete ojee rive opena va'e rire,
ha'e ojea katy onhe'ẽ ha'e pytuã oguerupa va'e rire
- ¹⁵ to'o ikuai va'e ha'e javi omanomba 'rãgue,
ha'e yvyku'i ju jajeapo 'rãgue.
- ¹⁶ — Ha'e gui Jó, ndere 'arandu oĩ ramo endu ke povae.
Ejapyxaka xeayvua re.
- ¹⁷ Ha'eve'ŷa rami joguerekoi va'e teve oĩ 'rã joe opena aguã?
Mba'e re tu ha'vy ndee ndeayvu Heko porã ha'e Ipo'akapa va'e ojejavya rami?
- ¹⁸ Huvixave oiko va'e pe nda'u "Mba'e vare'ŷ" 'ea 'rã teve?
Ha'e rami e'ŷ vy yvatekueve pe: "Pendeko vai va'e" 'ea 'rã teve?
- ¹⁹ Yvatekueve rive oayvuve e'ŷ va'e pe katuve ma nda'evei.

- Ha'e ma iporiaukue'i gui ndoavyuvei 'rā oguerekopa rei va'e kuery.
 Mba'eta ha'e javive ma opo py ojapo va'ekue meme ikuai.
- ²⁰ Ha'e kuery omano xapy'a va'erā meme.
 Pytū mbyte jave ha'e kuery oryryipa reve oaxa 'rā,
 ipo'aka va'ekue teī Ipo'akapa va'e jaexa e'ŷ va'e ogueraa 'rā.
- ²¹ — Nhanderuete ma oma'ẽ 'rā avakue ikuia rupi.
 Ha'e kuery oguataa ha'e javi ha'e oexapa 'rā.
- ²² Jipoi pytūa neī kuaray'ā ana
 mba'emo vai apoare kuery ixugui onhemi aguā.
- ²³ Mba'eta Nhanderuete ma avakue reko re oikuua pota are e'ŷ teī
 ojapo 'rā henonde ojexa uka aguā rami omboayvu aguā.
- ²⁴ Ha'e rami vy oikuua pota e'ŷ re omopēmba 'rā imbaraete va'e kuery,
 ha'e vy hekovia omoī 'rā amboae kuery.
- ²⁵ Ha'e kuery ikuia ha'e oikuua ae vy
 pyávy oity ramo omongu'i pyre ikuai.
- ²⁶ Pavē oexaa py
 omoingo axy 'rā heko vai va'e ha'e javi reve,
- ²⁷ ixugui ha'e kuery ojepe'a rire,
 peteīve ma voi ndoikuaaxeixuguigua tape.
- ²⁸ Ha'e kuery ojapo Nhanderuete renonde iporiaukue'i ojapukaia onhendu aguā rami.
 Ha'e ramo oendu ae ojexavai va'e kuery ojae'oa.
- ²⁹ Nhanderuete okyrirī teī mava'e 'rā tu ombopaga?
 Ngova omo'ã rā mava'e 'rā tu oexa, peteī regua ha'e javi e'ŷ vy peteī ava teī?
- ³⁰ Ha'e rami oiko heko vai va'e ipo'aka e'ŷ aguā,
 ha'e oiko e'ŷ aguā heta va'e kuery mbotavyarā.
- ³¹ — Xapy'a rei amongue aipoe'i 'rā Nhanderuete pe:
 "Aiko axy vaipa ma, ndajejavyei ma 'rā.
- ³² Xembo'e ke mba'emo xee ndaikuuai va'e re.
 Ha'eve'ŷa rami ajapo va'ekue teī ndajapovei ma 'rā", he'i 'rā.
- ³³ Ha'e rami rā Nhanderuete omboekovia kuaa aguā nda'u
 oporandu 'rā teve ndee reipotaa e'ŷ vy ndee ndereipotaia re?
 Ndevy pe teve aipoe'i 'rā: "Ndee ae eiporavo, xee'ŷ.
 Emombe'u ke reikuua va'e, ndeayvu ke", he'i 'rā teve?
- ³⁴ — Avakue hi'arandukueve omombe'u 'rā xevy,
 inhakā porā va'e kuery xeayvua re ojapyxaka vy aipoe'i 'rā xevy:
- ³⁵ "Jó ma oikuua vy e'ŷ ijayvu,
 ijayvua re 'arandua noi", he'i 'rā.
- ³⁶ Ha'e nunga rupi tove Jó reko re toikuua pota opa peve,
 heko vai va'e rami ombovai rire.
- ³⁷ Mba'eta ojejavya áryve omoī Nhanderuete re opu'ã rei aguā.
 Nhanembyte py ojepopete ombojaru reia rupi,
 ha'e Nhanderuete rovai ijayvu reta rive.

35

Eliú “Ojerovia e'ŷ va'e kuery ojexavai vy ojapukai teī Nhanderuete noendui”, he'iague

- ¹ Eliú aipoe'ive ju:
² — Ha'evea rami teve aipo're:
 "Nhanderuete gui xerekoporāve", 're va'ekue?
- ³ Mba'eta aipo're: "Mba'e nunga py tu xerekoporāa ovare?
 Mba'e tu xerekoporāa py ajouve 'rā ajejavya py ajou va'e gui?" 're va'ekue.
- ⁴ Ha'e ramo xee rombovai 'rā,
 ndee ha'e neirū kuery guive.

- ⁵ Ema'ẽ yva re ha'e exa.
 Exa pota nde'áry rupi arai yva re ikuai va'e re.
- ⁶ Rejejavya py mba'e nunga py tu hexe rejapo vai?
 Ndereko vaia hetave ovy rã mba'e tu rejapo hexe?
- ⁷ Ha'e rami e'ŷ vy ndereko porãa py mba'e tu reme'ẽ ixupe?
 Mba'e tu ojopy 'rã ndepo gui?
- ⁸ Ha'e rami 'rãgue py ndereko vaia ma avakue ndee ramigua pe ae 'rã ojapo vai.
 Ha'e ndereko porãa ma voi ha'e rami ae avi avakue ra'y kuery pe anho 'rã ojapo porã.
- ⁹ — Ha'e gui avakue omoingo axya vaipa rã haxẽ 'rã,
 ha'e vy ojapukai 'rã ipo'aka va'e kuery po gui ogueraa jepea aguã.
- ¹⁰ Ha'e rami teĩ avave rei aipo nde'i 'rã: "Mamo tu oĩ Nhanderuete xemoingoare,
 pyávy avy'a reve aporaei aguã ome'ẽ va'e?"
- ¹¹ Ha'e ma yvy rupi vixo ikuai va'e gui nhanderekombo'eve va'e,
 ha'e guyra yvate rupi oveve va'e gui nhanemo'aranduve va'e", nde'i.
- ¹² Ha'e kuery ojapukai teĩ ha'e nombovai,
 gueko vaia rupi rive onhemboyvate ramo.
- ¹³ Ojapukai rive ramo Nhanderuete noendui 'rã,
 ha'e kuery re Ipo'akapa va'e noma'ẽi 'rã.
- ¹⁴ Jó, ndee ma Nhanderuete nderexaia rami ndeayvu,
 ha'e rã henonde ma ndereko ojekuaapa.
 Ha'e nunga rupi earõ hexe.
- ¹⁵ Aŷ peve Nhanderuete opoxya rupi nanhombopagai,
 neĩ heko vai va'e re ndoikuaa potai teri ramo
- ¹⁶ ndejuru reipe'a vy ayvu ovare'ŷ va'e rupi ndeayvu.
 Ndeayvu reta ma, reikuua vy e'ŷ.

36

Eliú "Avakue ojexavaia py Nhanderuete oikuua uka 'rã iporã va'e", he'iague

- ¹ Eliú ijayuve tema. Ha'e vy aipoe'i:
- ² — Ejapyxakave'i ranhe, ha'e rã amombe'u porãve 'rã ndevy
 Nhanderuete amboeko porãa rupi xeayvu aguã arekove teri va'e.
- ³ Mombyry gui 'rã aru xe'arandurã
 Xemoingoare amboeko porã aguã.
- ⁴ Mba'eta anhetẽ, xeayvu ma rive'ŷ.
 Ndereve oĩ va'e ma mba'emo oikuaapa va'e.
- ⁵ — Ne'exa, Nhanderuete ma tuvixa ete va'e.
 Ha'e rami teĩ nopena e'ŷi 'rã peteĩve re.
 Oikuua py avi tuvixa ete va'e oiko.
- ⁶ Ndogueraa jepei 'rã heko vai va'e rekove,
 ha'e rã ojexavai va'e kuery ma ha'evea rami 'rã oguereko.
- ⁷ Ndopytu'ui 'rã heko porã va'e kuery re oma'ẽa gui.
 Ha'e rami 'rãgue py omboyvate vy huvixave kuery reve
 omboguapy 'rã henda openaaty py raka'e rã peve.
- ⁸ Xapy'a rei ha'e kuery corrente py ombo'aague py 'rã ikuai,
 ixã imoingo axyarã py ojokuaa rire.
- ⁹ Ha'e rami ha'e ojapo 'rã ha'e kuery ha'eve'ŷa rami ojapoague oikuua aguã,
 ojejou porã reia rupi ikuai rire.
- ¹⁰ Ha'e kuery apyxa oipe'a 'rã ombo'e aguã.
 Ha'e rami vy ha'e kuery pe ijayvu 'rã heko vaia gui ojeko rerova aguã.
- ¹¹ Xapy'a rei ha'e kuery onhe'ẽ rendu ha'e ixupe ju ikuai ramo
 opaa py oiko 'rã ha'e kuery ovy'a aguã ára,

- ha'e ma'etŷ mba'emo re ovy'a rei okuapy aguã.
- ¹² Ha'e rã ha'e kuery noendu potai ri ramo
 hu'y guaxu py rami onhyvõa 'rã,
 ha'e ramo omano 'rã hexa ogue reve.
- ¹³ Opy'a py heko vaia anho omoõ va'e ma ojeupe guarã omboaty 'rã poxya.
 Nhanderuete ombo'a uka teĩ ndojapukai 'rã okuapy heraa jepearã va'ekue pe.
- ¹⁴ Ha'e rami vy kunumi teri reve teĩ omokanhy 'rã guekove.
 Omano 'rã avakue ta'angaa pegua itavy rei va'e mbyte py.
- ¹⁵ Ha'e rã ojexavai va'e kuery ma ha'e ogueraa jepe 'rã ojexavaia py ae oeko mbo'e vy,
 mba'eta ombojexavaia rupi oipe'a 'rã ijapyxa.
- ¹⁶ — Ha'e rami ae ndee voi reiko axya gui Nhanderuete ndepe'axe avi
 peteĩ henda tuvixaa py, reiko axy ve'ŷ aguã py,
 ha'e rekaru aguã mesa áry tembi'u hee va'e anho oĩa py.
- ¹⁷ Ha'e rã ndee ma renhemonyẽ heko vai va'e kuery reve repaga aguã.
 Ha'e nunga rupi nderupity 'rã ndejou vaia ha'e nembopagaa aguã anho.
- ¹⁸ Enheangu ke ha'vy ipoxya rendua py rejojai rei e'ŷ aguã,
 ejepe'a ukaeme guive "Xerekovia heta ome'ëa" 're vy rive.
- ¹⁹ Rejae'o rei ha'e opa mba'e py renhea'ã ramo rive nda'u
 nemboaxy 'rã rejexavaia gui reo jepe aguã?
- ²⁰ Earõ eme eikovy pytû pygurarã,
 mba'eta heta ikuaiague gui oipe'apaa heravy aguã ae oĩ.
- ²¹ Enheangu ke teko vai re reo e'ŷ aguã,
 ha'e va'e pe "Jexavai gui ha'eveva va'e" 're vy rive.
- ²² Ma'ë, Nhanderuete opo'akaa py yvate ete va'e ojekuaa!
 Mava'e porombo'ea 'rã tu ha'e rami oiko?
- ²³ Mava'e tu omboeko mbo'e ta,
 ha'e'ŷ vy ixupe "Ha'eve'ŷa rami rejapo" he'i ta?

Nhanderuete yvate etea re Eliú ijayvuague

- ²⁴ — Nema'endu'a porã Nhanderuete rembiapo
 avakue pavẽ oguerovy'a va'e re.
- ²⁵ Ha'e nunga re avakue ha'e javi oma'ë vy
 mombyry gui ojou porã 'rã okuapy.
- ²⁶ Ma'ë, Nhanderuete ma yvate ete va'e, jaikuua aguã rami e'ŷ.
 Oikoa ma'etŷ guive ndajaipapa kuaai 'rã.
- ²⁷ Mba'eta ojea katy ogueru 'rã yy tykyrã,
 yvyxõi gui ombo'oky aguã.
- ²⁸ Ha'e rami vy arai gui onhoë 'rã
 avakue áry otyky reta va'erã.
- ²⁹ Amongue nda'u oikuua 'rã ri marã rami pa arai oipyo heravya,
 yapu guive oĩa gui omonhendua?
- ³⁰ Ma'ë, ha'e va'e áry rupi oexa uka 'rã imondovy nhemboxi,
 ye'ë typyvea ha'e javi rupi peve omoexakã va'erã.
- ³¹ Ha'e nunga py oguereko 'rã yvy regua ikuai va'e,
 ha'e vy ha'e kuery pe ome'ë 'rã tembi'u oata aguã rami e'ŷ.
- ³² Opo py overa va'e ojopy reta vy
 omombo 'rã ngovaigua kuery re.
- ³³ Ára vai revovo voi oikuua uka 'rã heko,
 mba'eta nda'evei etea oexa uka 'rã ha'eve'ŷa rami joguereko va'e rovai.

¹ — Ha'e nunga re xema'endu'a vy xekuraxõ oryryi rei,
 opo-opo guive, oĩaty gui oẽ ta merami.

- ² Pendu pota ke Nhanderuete guigua yapu re,
 ijuru gui hevovo va'e onhendu va'e re.
- ³ Yva guy ha'e javí rupi gui omondouka 'rā
 ojea gui overa va'e reve yvy apy peve.
- ⁴ Ha'e va'e rire ijayvu atā nhendu 'rā,
 yvatevea py onhemboxi 'rā hyapu reve.
 Ha'e ndopoi e'ŷi 'rā overa va'e ijayvua onhendua rupi.
- ⁵ Nhanderuete ijayvu reve hyapu 'rā nhomondyipaa rupi.
 Ojapo 'rā mba'emo tuvixa va'e, jaikuua e'ŷi va'e.
- ⁶ Mba'eta yro'y apī pe aipoe'i 'rā: "He'a ke yvy áry",
 ha'e gui oky ha'e oky xapy'a-py'a va'e pe ma "Penembaraeteve ke", he'i 'rā.
- ⁷ Ha'e rami vy ojapo 'rā avakue ha'e javi po oĩ rive aguā rami,
 hembiapo re ju ha'e kuery oikuaa pota aguā.
- ⁸ Vixo ikuai va'e voi oike 'rā onhemiaty py,
 ha'e vy okua py 'rā ikuai.
- ⁹ Yvytu jere oẽ 'rā ouvy opy ja'o oīaty gui,
 ha'e rā yvytu ro'y ma kuaray yke katy gui 'rā oipeju.
- ¹⁰ Nhanderuete oipejua py rive ho'a 'rā yro'y,
 ha'e ramo yupa itui va'e hatāmba 'rā oupy.
- ¹¹ Arai ana overa va'e oua ma
 omonyē 'rā okyrā.
- ¹² Ha'e ramo arai ikuai va'e omondouka rā
 oaĩmba 'rā oje'oivy opa rupi,
 yvy jave áry rupi, ijayvuague ojapo aguā.
- ¹³ Ha'e nunga ha'e javi ombou 'rā yvy regua kuery re oma'ẽ vy,
 omo'arandu e'ŷ vy omboaxy aguā.
- ¹⁴ — Jó, ejapyxaka pota na pov'a re,
 Nhanderuete rembiapo iporā va'e re reikuaa pota aguā.
- ¹⁵ Ndee reikuaa teve marā rami pa Nhanderuete ojapo
 overa va'e arai gui ojekuaa aguā rami?
- ¹⁶ Omombe'ua teve ndevy arai ikuai va'e marā rami pa yvate rupi ova-ova,
 e'ŷ vy Oikuaapa va'e rembiapo porāgue ha'e javi?
- ¹⁷ — Mava'e tu ojapo ndeo raku-a rendu aguā rami
 kuaray puku-a katy gui yvytu ou rā yvy jave rupi okyririmbā rei oiny jave?
- ¹⁸ Hexeve voi teve ndee yva reipyo kuaa avi yvate rupi,
 jajexaa mba'emo ryku guigua rami overa rei va'e?
- ¹⁹ Orembo'e ha'vy ore voi ixupe oreayvu kuaa avi aguā.
 Mba'eta ore ma pytū rupi orekuai va'e vy mba'eve noromombe'u kuaai ixupe.
- ²⁰ Amongue nda'u ixupe omombe'u 'rā xeayvuague?
 Ha'e rami avakue ikuai va'e onhemomba ukaxe vy ma 'rā.
- ²¹ — Ma'ẽ, avakue ma yva re kuaray rexakāa re noma'ẽ mbaraetei 'rā,
 yvytu oipejua rupi yva oiky'a'opa ma jave.
- ²² Kuaray apu'a'ia katy gui hexakā 'rā ouvy iju va'e,
 Nhanderuete yvýry rupi ojekuaa 'rā hexakāa nhomondyipaarā.
- ²³ Ipo'akapa va'e ma ndajaeko upityi 'rā.
 Ha'e ma opo'akaa py yvate ete va'e,
 ha'evea rami meme joguerekoo va'e guive, opa mba'e py heko porā va'e vy.
- ²⁴ Ha'e rami rā henonde avakue ojererokyje 'rā.
 Ha'e ma onhemo'arandu rei va'e kuery re noma'ẽi 'rā — he'i.

- ¹ Ha'e va'e rire ma SENHOR peteĩ yvytu jere mbyte gui ijayvu vy ombovai Jó. Ha'e vy aipoe'i:
- ² — Mava'e tu ndee mba'eve reikuua e'ŷ vy
xepy'aa ha'eve'ŷa rami remombe'u va'e?
- ³ Eiko katu ha'vy ava rami,
mba'eta xee aporandu 'rã ndevy.
Ha'e rã ndee ma xembovai 'rã.
- ⁴ — Mamo tu reĩ raka'e yvy ytara anhono jave py?
Ndeayvu ke, anhetẽ ri ne'arandu va'e vy.
- ⁵ Mava'e tu oa'ã raka'e yvy, xapy'a rei reikuua rã?
Mava'e tu ixã omoatã raka'e hi'áry rupi?
- ⁶ Mba'e nunga áry tu ijyta oĩ?
Ha'e mava'e tu omoõ raka'e ita jypy guarã?
- ⁷ Ha'e va'e jave py ma jaxy-tata ko'ẽ rai'i javeguia ov'y'a ete reve oporaei okuapy,
ha'e Nhanderuete ra'y kuery ikuai va'e oguerovy'a okuapy.
- ⁸ — Ha'e mava'e tu okẽ py rami ojoko raka'e ye'ẽ
iguy gui ovu ouvy jave?
- ⁹ Mba'eta xee ae arai amoõ ijaorã,
ha'e pytũ py anhovã ajukue py rami.
- ¹⁰ Xee ae amoõ raka'e yy apyrã,
okẽ py rami ajoko vy.
- ¹¹ Ha'e vy aipoa'e: "Apy peve'i 'rã reju, ndereaxavei 'rã.
Apy ae 'rã ndeguigua yai onhemboyvate reve ojeapi vy oxopa", ha'e va'ekue.
- ¹² — Ndee teve reikoa ára guive ndeayvu raka'e ko'ẽ rai ouvya va'e pe,
ko'ẽ va'e pe reikuua uka vy hexakã aguã,
- ¹³ yvy apy re ovaẽ aguã,
heko vai va'e kuery omondyi heravy vy?
- ¹⁴ Yvy ojekuaa 'rã yapo omou'ũ mbyre
ha'e ao ixorimba va'e rami.
- ¹⁵ Heko vai va'e kuery gui amokanhy 'rã "Nhandedevyguia hexakã va'e" he'ia va'e,*
ha'e amopẽ 'rã ijyva jojuka aguã oupi va'e.
- ¹⁶ — Ndee teve revaẽ ma ye'ẽ ryapy py,
e'ŷ vy reguata ma iguýry ttypyea rupi?
- ¹⁷ Ndevy pe teve oexa ukaa omanogue ikuiaia rokẽ?
Ndee rexma teve hokẽ pytũ anaa py oĩ va'e?
- ¹⁸ Reikuua teve marã rami ete pa yvy ipya?
Ndeayvu ke, xapy'a rei reikuua ri vy.
- ¹⁹ — Mamo rupi tu oĩ tape hendy va'e ro katy oo va'e?
Pytúa oñaty voi mamo tu oĩ?
- ²⁰ Erojevy ha'vy hekoa katy,
hoo via reikuua ri vy.
- ²¹ Ndee nhi'ã reikuua 'rã, ha'e va'e jave reiko ae ma rire,
ha'e reikoa ára mbovy rei e'ŷ!
- ²² — Ndee teve revaẽ ma yro'y apĩ amoõ porãaty py,
ha'e rexma teve amanda amoõ porãaty?
- ²³ Mba'eta ha'e va'e ma xee amboyrui moiny anhombojexavai aguã,
joguero'a ha'e joe opu'ãa jave guarã.
- ²⁴ — Mamo rupi tu oĩ tape hendy va'e oẽ ov'y aguã katy,
ha'e yvytu kuaray oua katy gui yvy áry rupi oipeju ouvya katy?
- ²⁵ Mava'e tu oipe'a 'rã oky xapy'a-py'a ou aguã,
ha'e tape hyapu ha'e overa va'e ou aguã?

* 38:15 Heko vai va'e kuery pegua hendy va'e ma pytũ ae, pytũ rupigua ae ikuai ramo (24.16-17).

- ²⁶ Mba'eta ambo'oky 'rā yvy áry
avave rei oĩ e'ŷa py, teko a e'ŷa rupi ae,
²⁷ amoakŷ aguã yvy teko a e'ŷa ipirupa va'e,
ajapo aguã jai roky yvate ov yaguã rami.
²⁸ Oky nda'u tuu va'e oiko?
Mava'e tu ojapo 'rā yxapy otyky aguã rami?
²⁹ Magui nda'u oiko yro'y hatã va'e?
Ha'e mava'e tu omoingo 'rā yro'y yva gui ho'a va'e?
³⁰ Mba'eta yy hatã 'rā ita rami,
yy typy rei teĩ hi'áry rupi ma hatãmba 'rā.
³¹ — Tyrã ndee teve rejokua kuaa Eixu jaxy-tata,
e'ŷ vy rejora kuaa Hendy guaxu va'e ojokuaague?
³² Ndee teve reru kuaa 'rā jaxy-tata ijaty va'e,
e'ŷ vy reraa 'rā teve henoiny Ursa ta'y kuery reve?
³³ Reikuua teve yva re ikuai va'e rekorã oeja pyre?
Reikuua teve marã rami pa yvy re ha'e kuery ipo'akaa?
³⁴ — Tyrã ndee teve renhendu kuaa 'rā arai ikuia peve,
oky vaipa aguã yy ndeo'o'i peve?
³⁵ Tyrã overa va'e pe ndeayvu kuaa 'rā teve,
nembovai vy ha'e kuery "Apy ma roĩ" he'i okuapy aguã?
³⁶ Mava'e tu omo'i arandu arai ikuai va'e áry?
Ha'e mava'e tu omo'arandu jaxy-tata ova aguã re?
³⁷ Mava'e nda'u o'arandu rupi oipapa kuaa 'rā arai ikuai va'e?
Ha'e rami e'ŷ vy mava'e nda'u onhoẽ kuaa 'rā yy yva re yryru ikuai va'e gui,
³⁸ yvy ku'i oĩ va'e ojeapo aguã oja va'e,
ha'e yvy hakytã joe oje'apa aguã?
³⁹ — Ndee teve rejuka 'rā guary kunha ho'u va'erã?
Ha'e guary ra'y kue'iry okaruxe rã remoevyatã kuaa 'rā teve
⁴⁰ okua rupi ikuai jave,
e'ŷ vy onhemiaty gui oma'ẽ mbegue jave?
⁴¹ Mava'e tu uruvu kuery pe ojou uka 'rā ho'u va'erã,
ta'y kue'iry Nguuete pe ojapukai reve
ho'u va'erã rekaa rupi ikuai ramo?

39

- ¹ — Ndee teve reikuua kavara yvy'ãa rupigua ta'yá ára?
Repena kuaa teve guaxu ta'y'i ta jave?
² Reipapa kuaa teve mbovy jaxy peve pa ha'e kuery ipuru'aa?
Reikuua teve ha'e kuery ta'y'i aguã ára?
³ Ha'e kuery ma ta'y'i aguã ojero'a 'rā,
ha'e rami vy ojegui omoẽ 'rā haxy va'ekue.
⁴ Ta'y kuery ma imbaraetepa 'rā okuapy,
nhuñdy rupi ae 'rā tuvixapa.
Oopa vy ndojevyvei 'rā oxy kuerya py.
⁵ — Mava'e tu opoi 'rā mburika'i ka'aguy regua?
Ha'e mava'e tu ojora kuaa 'rā mburika onha ratã va'e?
⁶ Ha'e va'e rekoarã ma teko a e'ŷa ame'ẽ,
yvy re'eroa rive ame'ẽ ikuai aguã.
⁷ Ha'e kuery ojojai 'rā tetã revovo,
noendui 'rā guive mymba reraa ojapuka-pukaia.
⁸ Yvy'ã ikuai va'e rupi ae okaruaty oĩ,
mba'eta hogue pyau va'e rekaa rupi ikuai.

- ⁹ — Toro ka'aguy rupigua teve omba'eapoxe 'rā ndevy?
 Ha'e va'e teve pytū oaxa 'rā nerymba okaruaty py?
- ¹⁰ Remoxā kuaa 'rā teve yvy karaña re?
 Ha'e va'e nda'u nderakykue rupi oikaraī 'rā heravy yvy?
- ¹¹ Hexe teve ndee rejerovia 'rā imbaraete vaipa va'e ramo?
 Ixupe teve reja 'rā remba'eapoa rupi opena aguā?
- ¹² Hexe rejerovia teve renhotŷ va'ekue nderropy ogueru aguā,
 e'ŷ vy mba'emo remoa'yī aguā py?
- ¹³ — Guyra-nhandu ma opepo ombota-mbota 'rā ovv'a reve.
 Ha'e rami teī guague ha'e opepo nda'u joayvu aguā ri oguerekō?
- ¹⁴ Any, ngupi'a oeja 'rā ovv'yvy py,
 yvy ku'i py rive haku aguā py.
- ¹⁵ Mba'eta hexarai 'rā amongue opyrō vy ombovopa va'erāa gui,
 vixo nhuñdy rupi ikuai va'e opyrōmba va'erāa gui guive.
- ¹⁶ Nopena porāi 'rā gua'y kuery re, gua'y kuery e'ŷ re rami.
 Ndoikuaa potai 'rā gua'y'i okanhymba teī,
- ¹⁷ hi'arandurā Tuuete nome'ēi rire,
 nome'ēi mba'emo re oikuua pota aguā.
- ¹⁸ Ha'e rami teī opo reve onha ovv'yvy opu'ā ma vy
 ojajai 'rā heravy kavaju ha'e hi'árygua.
- ¹⁹ — Ha'e gui ndee teve kavaju pe reme'ē 'rā imbaraeterā,
 e'ŷ vy ijaju'y áry rupi remoī 'rā haguerā?
- ²⁰ Rejapo kuaa teve tuku rami opo ovv'yvy aguā rami?
 Nhomondyi 'rā oapyīguia gui ipytuē raku rei reve onhendu vy.
- ²¹ Ojo'o 'rā heravy yvvyugua ombaraetea ae oguerovy'aa rupi.
 Ha'e vy ojepe'a 'rā ovv'yvy tembiporu revegua kuery reve joguero'a aguā.
- ²² Ojojai 'rā nhomongyjea kuery onhemondyi e'ŷ re.
 Ha'e rami vy guakykue katy ndojevyi 'rā kyxe revegua gui voi.
- ²³ O'áry hu'y ryru ogueraa va'e omoparā 'rā heravy,
 hu'y guaxu ha'e hu'y'i hexakā va'e reve.
- ²⁴ Ipoxy ha'e ivai reve omou'ūmba 'rā heravy tape,
 mimby guaxu nhe'ē oendu ma vy ndojejokoi 'rā.
- ²⁵ Mimby guaxu omonhe'ēa ramo “Tenonde katy!” he'i 'rā.
 Joe opu'āa gui mombyry teri oo reve oetū 'rā,
 oendu 'rā huvixa kuery ojapukai atāa ha'e tembiporu revovo.
- ²⁶ — Ndee ne'arandua rupi teve taguato oveve,
 kuaray apu'a'ia katy opepo oipyo reve?
- ²⁷ Ndeayvua rupi teve taguato guaxu oo 'rā yvate,
 ha'e yvatea py guaityrā ojapo?
- ²⁸ Ha'e va'e ma itaova yvate va'e re oī 'rā guaityrā ojapo aguā py,
 itaova yvate va'e apyte áry, mba'eve rei nomoangekoia py.
- ²⁹ Ha'e py oīa gui oexa pota 'rā guembiarā.
 Mombyry guive 'rā oexa.
- ³⁰ Ha'e va'e rire ta'y kuery oipyte 'rā tuguy.
 Mamo rā rei te'ōgue ituia py ha'e voi ovaē 'rā — he'i.

40

- ¹ Jó pe SENHOR aipoe'ive tema:
² — Ha'e gui ijayvu poyi va'e nda'u nhombovake ta Ipo'akapa va'e reve?
 Nguuete rovai ijayvu va'ekue tombovai aŷ — he'i.

Jó onhemo'yvy'iia rupi ombovaiague

³ Ha'e ramo Jó ombovai SENHOR. Ha'e vy aipoe'i:

- ⁴ — Xevy pe ma nda'evei. Mba'exa tu rombovai ta?
 Ajoko 'rā xejuru xepo py.
⁵ Peteigue xeayvu rire teī nambovai kuaavei ma.
 Mokoīgue katu va'eri ndaxeayvu reguavei ma — he'i.

- Nhanderuete po'akaa hembiapo oexa uka va'e re ijayvuague*
- ⁶ Ha'e ramo vytyu jere mbyte gui SENHOR ombovai ju. Ha'e vy aipoe'ive Jó pe:
⁷ — Eiko katu ha'vy ava rami.
 Xee aporandu 'rā ndevy, ha'e rā ndee xembovai 'rā.
⁸ Ndee ta'vy remboijke rive 'rā xerekoporā?
 Xemboeko vai 'rā teve renhemboeko porāvexe vy?
⁹ Tyrā ndee teve Nderuete rami ndejyva mbaraete va'e?
 Ndee voi ndeayvu ryapu rei 'rā teve xee xeayvua rami?
¹⁰ — Ndejee emoi ha'vy ndeyvatea ha'e ndetuvixaa.
 Enhemonde ndepo'akaa ha'e nerexakāa py.
¹¹ Xevy pe exa uka ndepoxya.
 Exa pota onhemboyvate rei va'e kuery re, ha'e eitypa.
¹² Exa pota onhemboyvate rei va'e ha'e javi re, ha'e emo'yvyī'imba.
 Epyrōmba vyvoi heko vai va'e kuery ikuaria re.
¹³ Ejatypa imbokuapy yvy ku'i py.
 Ejao'ipa hova ituia py.
¹⁴ Ha'e rami rā mae 'rā xeayvu
 reiporu kuaa regua py ae ndepo'akaa rami.
¹⁵ — Eikuua pota aŷ hipótamo ndereve amoingo avi va'ekue re.
 Ha'e va'e ma vaka rami nhuū ho'u oikovy va'e.
¹⁶ Imbaraetea ma hye re oĩ,
 ipo'akaa ma hyepy ro'o re ae.
¹⁷ Huguai ma yary rakā rami hatā va'e.
 Hi'u rajy ma oipopē mbyre rami oĩ.
¹⁸ Ikāgue ma overa va'e aygue rami imbaraete va'e.
 Hetyma ma ferro aygue ramigua.
¹⁹ Ha'e va'e ma Nhanderuete remimoingo regua omboetevepy.
 Imoingoare ae ome'ẽ kyxe hembiporurā.
²⁰ Anhetē, vyv'ā ikuai va'e áry rupi oĩ nhuū ho'u va'erā,
 vixo nhuūndy regua ikuaiaty rupi.
²¹ Onheno 'rā yvoty ikuai va'e guy rupi,
 takua'i ha'e yapo oĩ va'e rupi.
²² Ha'e ramo yvoty ae omo'ã 'rā inony.
 Yy rembe rupi yvyra ikuai va'e mbyte py itui.
²³ Yakā tyguaxu teī ndojapurai 'rā.
 Ijuru peve ete Jordão yakā typy teī oiko porā rei 'rā.
²⁴ Ha'e rā oma'ẽ ho'amy ramo amongue nda'u ojopy kuaa 'rā?
 Ha'eve 'rā nda'u ixī rupi omoxāa aguā?

41

- ¹ — Ndee renoẽ 'rā teve jakare pytā pinda py rive,
 ha'e'ŷ vy inhapekū rejokua 'rā ixā py?
² Jai 'ygue remboaxa 'rā teve inhappyīgua rupi?
 Ha'e rami e'ŷ vy remombu 'rā teve hañhykā jepo'oia py?
³ Ndevy pe ha'e ojerure 'rā teve mba'emo re?
 Ijayvu porā'i 'rā teve ndereve?
⁴ Ndereve ojapo 'rā teve peteī rami pendkuai aguā?
 Ha'eve 'rā teve reraa aguā nerembiguai raka'e rā peve guarā?

- 5** Rembojaru 'rā teve guyra'i rami?
Ha'e rami e'ŷ vy remoxā 'rā teve heruvy nderajy kuery rymbarā?
- 6** Neirū kuery teve jogueroayvu 'rā hepyrā oikuua aguā?
Ha'e rami e'ŷ vy mba'emo vendea kuery teve omboja'o 'rā ho'okue?
- 7** Pira kutua py teve reikutupa 'rā ipire,
e'ŷ vy inhakā rupi renhyvō 'rā pira nhylvōa py?
- 8** Hexe repoko ri vy nema'endu'a riae 'rā nderero'aague re,
ha'e rami vy neremoangekovei ma 'rā.
- 9** Ma'ẽ, pembo'a aguā pearō ri vy pejekore 'rā.
Hexe avakue oma'ẽ vy rive 'rā ojeity uka.
- 10** Avakue ipy'a guaxukueve teī ndoikoi omyī va'erā.
Ha'e rami rā xerenonde katuve ma mava'e tu ha'vy onhemboyvate aguā ha'eve va'e?
- 11** Mava'e tu ha'e ranhe xevy ome'ẽ mba'emo, xee ju amboekovia aguā?
Mba'eta yva guy re ikuai va'e ma xemba'e meme.*
- 12** — Xeayvuve ta jakare reko re,
imbaraete etea ha'e iporāa re.
- 13** Mava'e tu oipiro 'rā ikupe rupi,
e'ŷ vy oikutu 'rā ipekue jo'a va'e pa'ū rupi?
- 14** Mava'e tu oipe'a 'rā ijuru?
Mba'eta haĩ re onhemboja va'e oendu 'rā ngyje.
- 15** Ipekue hyxy ovya re ma ojejou porā,
peteī-teī joe oja 'rā omboja pyre rami.
- 16** Peteī-teī joe ovaẽ oiny
ipa'ū rupi neī yvytu oike aguā rami e'ŷ.
- 17** Peteī-teī joe ovv vy
oja ratā oiny oja'o aguā rami e'ŷ.
- 18** Ipytuē nhavō ojekuaa 'rā hendy va'e,
ha'e rā hexa ma ko'ëa rami hexakā va'e.
- 19** Ijuru gui ma oẽ 'rā hendy va'e,
ixugui tata raviju opo 'rā.
- 20** Inhapyīgua gui ma oẽ 'rā hataxī,
oja opupu va'e gui, e'ŷ vy jai rogue okai va'e gui rami.
- 21** Ipytuēa ma omoendy 'rā tapyīū.
Ijuru gui ma oẽ 'rā tataendy vuku.
- 22** Ijaju'y re ma imbaraetea oī.
Ha'e henonde gui opoa 'rā ovv onhemondyipa reia rupi.
- 23** Ho'o regua ma oje'a ratā 'rā.
Hexe oī atā 'rā, oi rive aguā rami e'ŷ.
- 24** Ipy'a ma ita rami hatā,
ita mba'emo mongu'ia regua rami.
- 25** Ha'e opu'ã ramo ipy'a guaxukueve voi onhemondyi 'rā okuapy.
Ha'e ou xapy'a ramo ndaekorāvei va'e rami ikuai.
- 26** Xapy'a rei kyxe py omboguaia teī mba'eve ndojapoi 'rā,
neī hu'y guaxu py, hu'y'i e'ŷ vy hu'y ete py teī.
- 27** Ferro guigua ha'e oikuua rā jai rogue pirukue rami rive,
ha'e overa va'e guigua ma vyvra ru'ūgue rami oikuua.
- 28** Hu'y gui ma ha'e nonhai 'rā.
Ita momboa py omomboa rā ha'e oikuua kapi'i rami rive.
- 29** Yvyra aygue py ojapia rā jai 'ygue rami rive 'rā oendu,
ojojai 'rā hu'y guaxu rewegua.
- 30** Hye guy rupi oī ipekue hakua va'e.

* 41:11 Romanos 11.35

- Yapo áry rupi otyryryague ma mba'emo ra'yí ykya rami ipore.
- ³¹ Yy guy katy oike vy ojapo 'rã oja opupu va'e yjuipaa rami,
ye'ẽ eteve voi mba'emo rykue ombojyaty rami ombokururu 'rã.
- ³² Guakykue oeja 'rã hape ovv va'e overa aguã rami.
Yy ha'e oña ma hi'a xiimba va'e rami yjuipa 'rã.
- ³³ Yvy re jipoi 'rã ha'e ramigua,
mba'eta okyjea oendu va'erã e'ŷ amoingo.
- ³⁴ Yvatekueve ha'e javi re oma'ẽ vy nombovarei 'rã,
vixo yvatekueve ikuai va'e ruvixave oiko vy — he'i.

42

Jó onhemombe'uague

- ¹ Ha'e ramo Jó ombovai vy aipoe'i SENHOR pe:
- ² — Aŷ aikuaa porã ma opa mba'e rejapo kuua va'ea,
ha'e renhembopy'aague peteĩve ndoiko e'ŷi 'rãa.
- ³ Ange xevy reporandu vy “Mava'e tu ndee mba'eve reikuua e'ŷ vy
xepy'aa ha'eve'ŷa rami remombe'u va'e?” 're va'ekue.
Anhetẽ ri aikuaa vy e'ŷ xeayvu va'ekue,
mba'emo xevy pe iporã vaipa ha'e aikuaa va'erã e'ŷ re anho.
- ⁴ Aipo're avi: “Ejapyxaka ke xeayvu re, ha'e rã xee xeayvu 'rã.
Xee aporandu 'rã ndevy, ha'e rã ndee xembovai 'rã”, 're va'ekue.
- ⁵ Ha'e rami avi xee roikuua va'ekue omombe'ua rã aendu vy rive,
ha'e rã aŷ ma xerexa py ae roexa ma.
- ⁶ Ha'e rami vy aŷ anhereroangeko vy anhemboaxy,
yvy ku'i ha'e tanhimbu áry aguapy ainy reve — he'i.

Jó irû kuery mboapyve pe Nhanderuete ijayvu eteague

- ⁷ Ha'e rami Jó pe SENHOR ijayvupa ma rire aipoe'i avi Temã pygua Elifaz pe:
— Xepoxya hendy ma nderovai, neirû kuery mokoïve rovai guive. Mba'eta anhetẽ rupi
e'ŷ peẽ kuery xemombe'u, xerembiguai Jó rami e'ŷ.
⁸ Ha'e nunga rupi peraa sete vaka ra'y ha'e sete vexa'i ava, ha'e tapeo xerembiguai Jó-
a py. Ha'e vy peapy reve peme'ẽ 'rã pejejavyague re. Ha'e gui xerembiguai Jó ojerure
'rã pendere, mba'eta ha'e ojerurea ma aendu 'rã, pene'arandua rupi e'ŷ peikoague re
rombopaga e'ŷ aguã. Mba'eta anhetẽ rupi e'ŷ peẽ kuery xemombe'u, xerembiguai Jó
rami e'ŷ — he'i.
- ⁹ Ha'e ramo Temã pygua Elifaz, Sua pygua Bildade ha'e Naamá pygua Zofar oje'oi vy
ojapo okuapy SENHOR ijayvuague. Ha'e ramo SENHOR oendu Jó ojerurea.

Nhanderuete Jó omoingo porã jevyague

- ¹⁰ Ha'e gui Jó oirû kuery re ojerure ma rire SENHOR omoingo porã ju. Ha'e vy mba'emo
oguerekove ju ome'õe retave ixupe.
- ¹¹ Ha'e ramo ha'e oña py ou tyvy ha'e heindy kuery, ymave rupi oexa va'ety ha'e javi
reve. Hexeve okaru okuapy hoo py. Omboaxy vy ombopy'a porã okuapy hexe SENHOR
mba'emo vai ombouague ha'e javi gui. Ixupe peteĩ-teĩ ome'ẽ peráta ha'e kuã regua ouro
guigua.
- ¹² Ha'e rami py SENHOR omoingo porãve Jó jypy guare gui. Ha'e ramo vexa'i kuery
oguerekove ju catorze mil, seis mil camelos, mil toro meme ha'e mil mburika.
- ¹³ Ta'y jevy avi sete ta'y ha'e mboapy tajy kuery re.
- ¹⁴ Jypyguia guajy omboery Jemima, amboae ma Quezia, ha'e rã mboapya ma Quéren-
Hapuque.
- ¹⁵ Ijyvy ha'e javi rupi kunhague ndoikoi Jó rajy kuery rami iporã va'e. Ha'e ramo ha'e
kuery pe tuu ome'ẽ mba'emo ikyvy kuery pe ome'ëa ramigua ae.

¹⁶ Ha'e va'e rire ma cento e quarenta ma'etŷ re ju Jó oiko. Ha'e rami vy oexa gua'y kuery, gua'y ra'y ha'e guajy memby kuery guive, irundykue ikuiaia peve.

¹⁷ Ha'e rire Jó omano, tuja'i ha'e hi'ára mbovy rei e'ŷ ma vy.

Salmos Israel kuery oporaeiaty Salmos Israel kuery oporaeiaty

Salmos ma yma gui oiporua Nhanderuete pe oporaeia rupi. Mbyte rupi peve huvixa Davi ojapo va'ekue, pov'a'e guive:

“Senhor ma vexa'i mongarua rami xere opena va'e oiko.

Ha'e ramo xevy pe ndoatai 'rā mba'eve rei” (23.1).

Davi omoī avi levita kuery Nhanderuete ombojeroviaa rupi oporai va'erā. Ha'e kuery va'e regua ojapove ju salmos. Três mil ma'etŷ ma ojapo, salmos ha'e javi rai'i ojapopaa ague. Salmo 80 ma ymave ete, Moisés ojapo va'ekue.

Jypy Israel kuery ranhe oiporu raka'e salmos Nhanderuete pe oporaia rupi. Jesus ha'e hemimbo'e kuery voi oiporu raka'e. Ha'e gui aŷ ma yvy jave rupi oiporua, nhande kuery guive.

Salmos ma joo ramigua e'ŷ-e'ŷ ikuai. Nhanderuete oguerovy'aa oĩ, ixupe onhepytyvõ ukaa, ixupe gueko vai oeja vy omombe'ua, ixupe mba'emo vai oiko va'e re oporandua, ixupe joe ojerurea, ixupe ngovaigua kuery gui ojepy ukaa, ha'e oĩ avi ixuguigua re nhombo'ea. Nhanderuete pe oporaia meme. Oĩ avi salmos Jesus rekorā re ijayvu ma voiague, Novo Testamento py ma omombe'u porāave.

“Yvy jave re pendekuai va'e,
peroporaei Senhor pевy'aa rupi!

Pевy'aa rupi Senhor pe ete peiko.

Henonde pejexa uka pejuvy peporaei reve” (100.1-2).
“Peporaei Senhor pe!

Ha'eve ha'e iporā ete Nhanderuete pe japoraeia.
Jaroporaeia ma iporā ixupe voi” (147.1).

1

Heko porā ha'e heko vai va'e ikuaria re ijayvua

¹ Ovy'a ete 'rā ava heko vai va'e kuery nhomongetaa rami ndoikoi,
ojejavypa rei va'e ikuaria rupi ndopytai,
nei nhombojaru rei va'e kuerya py voi oguapy e'ŷ va'e.

² Ha'e rami 'rāgue py SENHOR ayvu oguerovy'a vy
ara py ha'e pyávy ijayvua re anho oikuua pota oikovy va'e.

³ Ha'e va'e ma yvýra yakā yvýry onhotŷ mbyre rami oiko,
hi'a aguā ára py porā hi'a va'e rami,
nei hogue ma ipiru rive'ŷ va'e rami.

Ha'e ma ojapo va'e ha'e javi oiko porā 'rā.*

⁴ Ha'e rā heko vai va'e ma ha'e rami e'ŷ ikuai.
Ha'e kuery ma mba'emo pire yvytu opa rupi ogueraa va'e rami 'rā okanhy.

⁵ Ha'e nunga rupi nhomboayvua ára heko vai va'e ndoo jepei 'rā,
ojejavypa rei va'e ndopytai 'rā heko porā va'e ikuaria py.

⁶ Mba'eta SENHOR oma'ẽ heko porā va'e oikoa re.
Ha'e rā heko vai va'e oikoa ma okanhy 'rā.

2

Huvixarā Nhanderuete omoī va'ekue po'akaa re ijayvua

¹ Mba'e re tu yvy regua kuery ipoxypa ri?

Mba'e re tu yvy re ikuaria va'e onhembopy'a okuapy ovare e'ŷ va'e re?

² Mba'eta yvy regua huvixa kuery opu'ã okuapy,

* 1:3 Jeremias 17.5-8

- huvixa ikuai va'e SENHOR rovai jogueroayvu okuapy,
 huvixarã SENHOR omoĩ va'ekue rovai guive.*
 Ha'e vy aipoe'i:
³ “Nhamondo 'rã ha'e kuery nhanemoxãague,
 jajora 'rã nhandepokuaague” he'i okuapy.
⁴ Ha'e rã yva re oguapy oiny va'e ma opuka 'rã,
 SENHOR ojojai 'rã ha'e kuery.
⁵ Ha'e rami vy ipoxya rupi ijayvu ete 'rã ha'e kuery pe.
 Opoxya oexa uka vy omondyipa 'rã.
 Ha'e vy aipoe'i 'rã:
⁶ “Xee ma xejeupeguia huvixarã amoĩ ae ma
 vyty iky'a e'ŷ va'e Sião áry.”
⁷ Ha'e rã ha'e va'e ju aipoe'i: “Xee amombe'u 'rã SENHOR ijayvuague.
 Ha'e aipoe'i xevy: ‘Ndee ma xera'y.
 Kova'e ára romoĩ.*
⁸ Ejerure ke xevy,
 ha'e ramo ndevy guarã xee ame'ẽ 'rã amboae regua kuery,
 vy apy re peve ndepo'aka aguã.
⁹ Popygua ferro guigua py remopẽ 'rã,
 hyru yapo guigua ombovopaa rami 'rã remopẽmba', he'i va'ekue xevy.”*
¹⁰ Ha'e nunga rupi huvixa kuery, penheangu ke aŷ,
 vy regua huvixa kuery, pendu ke penemongeta rã.
¹¹ SENHOR pe ete ke pendekuai pejererokyjea rupi,
 peporaei ixupe peryryipa reve.
¹² Peayvua rupi pemboete Ta'y ipoxy e'ŷ aguã,
 peikoa gui pekanhy e'ŷ aguã.
 Ha'e rami e'ŷ rã are e'ŷ re oexa uka 'rã opoxya.
 Ovy'a ete 'rã hexe onhemí va'e kuery ha'e javi.

Ojexavai teĩ Nhanderuete re ojeroviaa re ijayvua
 Mboraerã Davi gua'y Absalão gui ojava jave py ombopara va'ekue (2 Samuel 15.1-30).

3

- ¹ SENHOR, heta pojava va'e ty'y xerovaigua kuery ikuai!
 Aipapapa aguã rami e'ŷ xere opu'ã va'e.
² Heta ete xevy aipoe'i okuapy va'e:
 “Nhanderuete tu ndogueraa jepei 'rã rima.”
³ Ha'e rami teĩ SENHOR, ndee ma mba'emo vai jokoa reiko xevy.
 Ndee ae roguerovy'a, ha'e rã xeakã remopu'ã kuerei 'rã.
⁴ Xeayvu atã reve ajapukai SENHOR pe.
 Ha'e rã vyty iky'a e'ŷ va'e áry gui xembovai.
⁵ Anheno vyve ake vyvoi 'rã,
 avy ju 'rã guive, xere SENHOR opena ramo.
⁶ Xee ma ndakyjei 'rã mbovy e'ŷ
 joavaive-ive re xere opu'ã va'e gui.
⁷ SENHOR, epu'ã ke.
 Xerepy ke, Xeruete.
 Xerovaigua kuery ha'e javi reunga 'rã hañhykã,
 remopẽmba 'rã heko vai va'e kuery rai.
⁸ Mba'eta SENHOR gui ou 'rã jaa jepe aguã.
 Tove ndevygua kuery re toĩ remoingo porãa.

* 2:2 Atos 4.23-28 * 2:7 Atos 13.33; Hebreus 1.5, 5.5 * 2:9 Apy Ta'y omombe'u Nguu ixupe aipoe'iague (Atos 13.33; Hebreus 1.5, 5.5; Apocalipse 2.26-27, 12.5, 19.11-16).

4

Oiko axy teĩ Nhanderuete re ojeroviaa re ijayvua

- Jogueroporaei va'e pe ixã va'e py ombojoguy reve guarã Davi ombopara va'ekue.
- 1 Xeruete xemboeko porãa, xembovai ke ajapukai ramo.
Xee ajexavai ramo xemoingo porã jevy va'ekue.
Xemboaxy jevy ke, ha'e endu anhembo'ea.
 - 2 Peẽ avakue, raka'e peve 'rã tu aximbã aguã rami xeapo pekuapy xemboete 'rãgue py?
Raka'e peve 'rã ovare e'ŷ va'e rive pejou porã,
ha'e peikuaa pota apu re?
 - 3 Peikuaa pota ke pova'e re:
SENHOR pe ikuai va'e kuery ma ha'e oiporavo 'rã ojeupe guarã.
Ha'e rami vy SENHOR oendu 'rã ixupe ajapukaia.
 - 4 Pendevai teĩ pejejavy eme.
Peneakãngya áry pendetui vy
pendepy'a py penhemoneta, ha'e pepytu'u.*
 - 5 Peme'ẽ ha'evea ramigua,
ha'e pejerovia SENHOR re.
 - 6 Heta ikuai aipoe'i va'e: "Mava'e nda'u nhandevy ombou 'rã mba'emo porã?"
SENHOR, ore kuery pe exa uka nderova rexakãa.
 - 7 Xepy'a re ma remoĩ avy'a aguã.
Ha'e kuery mba'emo ra'yí ha'e vinho ojou reta vy ov'y'a okuapya gui
xee avy'ave.
 - 8 Xepy'a porã reve anheno vyve ake 'rã,
mba'eta SENHOR, ndee anho xemombytu'u porã.

5

Heko vai va'e kuery gui ogueraa jepe aguã re ojerurea ague

- Jogueroporaei va'e pe mimby py ombojoguy reve guarã Davi ombopara va'ekue.
- 1 SENHOR, ejapyxaka ke xeayvu re,
endu ke xepoaẽ rã.
 - 2 Xeruvixa, Xeruete, endu ke ajapukai rã.
Ndevy pe ae ajapukai.
 - 3 SENHOR, aje'ive guive rendu 'rã xeayvua.
Aje'ive anhembo'e 'rã ndevy,
ha'e rire roarõ 'rã aikovy.
 - 4 Mba'eta ndee Xeruete, ndererovy'ai 'rã teko vai,
nerenonde ma heko vai va'e noĩ 'rã.
 - 5 Nerenonde ijayvu vaikue-ikue va'e ndopytai 'rã.
Teko vai re ikuai va'e rejou vai va'e meme.
 - 6 Ndee remomba 'rã ijapua re ikuai va'e.
SENHOR ojou vai 'rã jouguy moãa ha'e nhombotavypa rei va'e.
 - 7 Ha'e rã xee ma xemboaxy ete ramo aike 'rã ndevyguia opy,
ndevyguia templo iky'a e'ŷ va'e rexei,
xerenapy'ã re aĩ 'rã nerenonde ajererokyjea rupi.
 - 8 SENHOR, xerovaigua kuery gui
xererekko ke heravy ndeguigua teko porã rupi,
embo'yvi ke ndeguigua tape xerenonderã.
 - 9 Mba'eta ha'e kuery ma ijuru re anhetẽ va'e noĩ.
Joupe ojapo vai aguã re anho 'rã ipy'a okuapy.
Ijyryvi ma omanogue rupa ojepe'a va'e rami.

* 4:4 Efésios 4.25-27

- Oapekū py ma ijayvu porā merami rive 'rā.*
 10 Ha'e nunga rupi Xeruete, eikuua uka ha'e kuery reko vaia.
 Embo'apa ke jogueroayvuague py ae.
 Opa marā rei ikuua ramo eipe'apa nerentonde gui,
 nderovai opu'ā rei rire.
 11 Ha'e rā ndere ojerovia va'e kuery ma tovy'apa.
 Ndererovy'aa rupi toporaei atā okuapy raka'e rā peve,
 ndee repy ramo.
 Tove nderery oayvu va'e tandererovy'a okuapy.
 12 Mba'eta ndee SENHOR, remoingo porā 'rā heko porā va'e.
 Reayvu ete vy rejoko 'rā opa mba'e vai gui.

6

- Nhanderuete omboaxy aguā re Davi ojerureague*
 Jogueroporaei va'e pe ixā irundy meme va'e py ombojoguy reve guarā Davi ombopara
 va'ekue.
 1 SENHOR, ndepoxya rupi e'ŷ ke xemongeta,
 ndevaia rupi e'ŷ xembopaga.
 2 Xemboaxy ke SENHOR, mba'eta aendu xekangypaa.
 SENHOR, xemonguera ju ke, mba'eta xekāgue oku'epa rei ma,
 3 xenhe'ē voi nda'evei ete.
 Ha'e gui ndee SENHOR, raka'e peve 'rā tu naxepytyvōi?
 4 SENHOR, ejevy ju, eraa jepe xerekovea,
 xerepy ke xemboaxy vy.
 5 Mba'eta manoa py ma ndoikoi 'rā ndere ima'endu'a va'e.
 Onhono porāague py ituia gui mava'e 'rā tu oporaei ndevy?
 6 Xekane'ō ma xepoaē riae vy.
 Pytū nhavō xerexay omoakŷ xerupa,
 inhakŷmba peve.
 7 Xerovaigua kuery káuxa ajexavai ramo xerexa irurupa ma,
 tuja'i rami ndaexa porāi aikovy.
 8 Teko vai rupi pendekuai va'e, pejepe'apa ke xea gui,*
 mba'eta SENHOR oendu ma ajae'o reve xeayvu rā.
 9 Ajapukaia oendu vy
 oikuua pota ma guive ajerurea re.
 10 Ha'e ramo xerovaigua kuery oxīmba ha'e onhemondyipa 'rā okuapy.
 Ojepe'apa xapy'a 'rā oxīmba vy.

7

- Nhanderuete heko porā va'e kuery oepya re ijayvua*
 Benjamim regua Cuxé ijayvuague Davi oendu vy SENHOR pe oporaeiague.
 1 SENHOR Xeruete, ndere anhemi va'e.
 Xerepy ke xerakykue ou va'e ha'e javi gui,
 xereraa jepe guive.
 2 Ha'e rami e'ŷ rā xivi rami xerero'apa 'rā,
 xerepyarā ndoikoi ramo xemondoropa 'rā.
 3 SENHOR Xeruete, xere ha'e kuery ijayvu reia va'e nunga xee ajapo va'e rire,
 xapy'a rei xepo py ajejavv,
 4 e'ŷ vy xereve peteī rami ikuai porā va'e pe ajapo vai va'e rire —
 ha'e rā xee ma araa jepe kuerei mba'e py e'ŷ xembojexavai va'e —
 5 ha'e rami ajoapo vai va'e rire ma

* 5:9 Romanos 3.9-20 * 6:8 Mateus 7.23; Lucas 13.27

- xerovaigua kuery ha'evea rami 'rāgue xerakykue monha xenhe'ẽ oupity peve,
 xerekove re ha'evea rami opyrō 'rāgue yvy re,
 yvy ku'i rupi arov'yave va'ekue ombotyryry vy.
- ⁶ SENHOR, epu'ã ke ndepoxya rupi.
 Exa uka ndepo'akaa xerovaigua kuery ipoxypaa rejoko vy.
 Epu'ã ke xerepy aguã,
 ha'e kuery rembopaga aguã re ndeayvua rami vy.
- ⁷ Nerenonde tonhemboatypa yvy regua kuery.
 Ha'e gui ha'e kuery áryve rupi ndee ke eĩ yvate.
- ⁸ Mba'eta SENHOR omboayvu 'rā yvy regua kuery.
 SENHOR, xere voi eikuua pota xerekoporã
 ha'e anhetẽ rupi aikoa re.
- ⁹ Topa heko vai va'e kuery reko vaia,
 ha'e rã heko porã va'e kuery ma emoi atãve.
 Mba'eta Xeruete nderekoporã va'e,
 ndee reikuua pota nhane'arandua ha'e nhandepy'a re oĩ va'e re.*
- ¹⁰ Nhanderuete ma xejoko 'rā opa mba'e va'e gui.
 Ogueraa jepe 'rā opy'a py heko porã va'e.
- ¹¹ Nhanderuete ma anhetẽ rupi nhomboayvu va'e,
 ko'ẽ nhavõ oendu 'rā nhombopaga aguã.
- ¹² Ha'e rami vy avakue ndojeko rerovai ri ramo
 Nhanderuete oaĩmbe'e 'rā okyxe.
 Omoxã ae ma guive guyrapa, oguereko katupa ma.
- ¹³ Oguereko katu avi
 hu'y hendy va'e ijukaarã.
- ¹⁴ Heko vai va'e ma imemby raxy va'e rami oendu 'rā teko vai ojapoxea,
 oguereko'i 'rā nhombotavy aguã,
 ha'e gui oikuavã 'rā apu.
- ¹⁵ Ojo'o puku 'rā yvy,
 teĩ ikua ojo'oague py ha'e ae ju 'rā ho'a.
- ¹⁶ Inhakã re ae ju ojeapa 'rā joupe ojapo vaiague,
 ijapte re ae 'rā ojeapa ipoxyague.
- ¹⁷ Ha'e rã xee ma arov'y'a 'rā SENHOR
 anhetẽ rupi joe oikuua potaa re,
 aporaei 'rā guive SENHOR yvate va'e rery rupi.

8

Nhanderuete yvatea ha'e avakue po'akaa re ijayvua
 Jogueroporaei va'e pe Davi ombopara va'ekue "Uva'a nhamia" he'ia py oporaeia rami
 oporaei aguã.

- ¹ SENHOR, ore kuery SENHOR,
 yvy jave re nderery iporã ete!
 Yva gui voi reikuua uka ndeyvatevea.
- ² Kyrigue'i ha'e okambu va'e pe reme'ẽ oporaia aguã.
 Ha'e kuery oporaia ma remoi nderovaigua kuery jokoarã,
 remokyrirĩ aguã nderovaigua kuery ha'e joepya rupi jojuka va'e.*
- ³ Ha'e gui ma yva regua aexa ndepo py rejapo va'ekue,
 jaxy, jaxy-tata remoi va'ekue ha'e javi —
- ⁴ marã ramigua tu avakue ikuai, ha'e kuery re nema'endu'a aguã?
 Marã ramigua ru avakue ra'y kuery, ha'e kuery pe rejekuaa uka aguã?

* 7:9 Apocalipse 2.23 * 8:2 Mateus 21.14-17

- 5 Ha'e rami teĩ rembopo'aka ha'e remboete uka vy
rejapo Nhanderuete gui yvyíve'i ikuai aguã rami.*
6 Ndepo py rejapo va'ekue re rembopo'aka vy
opa marãguia remoĩ ipy guýry:*
- 7 vexa'i ha'e vaka kuery ha'e javi,
mymba oka regua guive,
8 ha'e gui guyra'i yva regua, pira ye'ẽ rupigua,
ha'e ye'ẽ guýry rupi ikuai va'e ha'e javi.
9 SENHOR, ore kuery SENHOR,
yvy jave re nderery iporã ete.

9

Jarovy'a ete aguã regua

Jogueroporaei va'e pe Davi ombopara va'ekue "Ta'y omano" he'ia py oporaeia rami oporaei aguã.

- 1 SENHOR, ndevy aporaei 'rã xepy'a ha'e javi py.
Amombe'upa 'rã nerembiapo porãa.
2 Avy'a ndere, roguerovy'a 'rã.
Ndeyvate ete va'e, aporaei 'rã nderery rupi.
3 Mba'eta xerovaigua kuery oguevipa.
Onhepyxanga vy okanhymba nerondenide gui.
4 Mba'eta ndee xerepy 'rã xemboeko porã vy.
Tenda repenaaty py reguapy vy ha'evea rami meme renhomboayvu reiny.
5 Ha'e rami vy yvy regua kuery pe ndeayvu ete 'rã,
remomba 'rã heko vai va'e.
Ha'e kuery rery voi rembogue raka'e rã peve guarã.
6 Ha'e ramo orerovaigua kuery okanhymba,
hetã voi rembovaipa raka'e rã peve.
Noîvei ma ha'e kuery re ima'endu'aa.
7 Ha'e rã SENHOR ma oĩ riae 'rã guenda openaaty py,
nhomboayvu oiny aguã omoĩ va'ekue py ae.
8 Ha'e rami vy omboayvu 'rã yvy regua kuery ha'evea rami.
Ha'evea rami meme oguereko yvy regua kuery.*
9 Ojexavai va'e pe ma onhemi aguã yvate va'e SENHOR oiko,
omoingo axya rã onhemi kuerei aguã.
10 Ha'e nunga rupi SENHOR, nderery oikuaa va'e kuery ojerovia ndere,
mba'eta ndee nereipytyvõ e'yi 'rã ndereka va'e.
11 SENHOR Sião py oiko va'e pe peporaei pemboete vy.
Yvy regua kuery mbyte rupi peikuua uka hembiapo porãa.
12 Mba'eta ima'endu'a 'rã joguy moëare nhombopaga aguã,
ndaexarai 'rã ojexavai va'e ojapukaia re.
13 SENHOR, xemboaxy ke.
Eikuua pota ke xerayvu e'ŷ va'e xemoingo axya re.
Ndee ma xemopu'ã ju manoa rokẽ gui,
14 Sião tetã rokẽ py ju amombe'u aguã ndereko porãa ha'e javi.
Roguerovy'a 'rã xereraa jepeague re.
15 Yvy regua kuery ma yvykuarã ojo'oague py ae ho'apa.
Nhuã omoĩ nhemi va'ekue py ipy ae ojejura.
16 SENHOR ojekuaa uka 'rã ha'evea rami joguerekaoa py.
Mba'eta heko vai va'e kuery ojexavai 'rã opo py ae ojapo va'ekue py.

* 8:5 Gênesis 1.26-28; Hebreus 2.5-9 * 8:6 1 Coríntios 15.27; Efésios 1.22 * 9:8 Atos 17.31

- ¹⁷ Heko vai va'e kuery ma omomboa 'rā ikuai axya aguā py,
ha'e javi regua Nhanderuete gui hexarai va'e meme.
- ¹⁸ Ha'e rā ojexavai rei va'e kuery gui ma SENHOR ndaexarai riae 'rā,
nomboaxa rivei 'rā ojexavai va'e oarō okuapya.
- ¹⁹ SENHOR, epu'ā ke.
Imarā va'e kuery ta'ipo'aka eme.
Yvy regua kuery tombopagapaa nerondenon.
- ²⁰ SENHOR, emongyje ete ha'e kuery.
Yvy regua toikuua imarā va'e meme ikuia.

10

- Heko vai va'e kuery ho'apa aguā re ijayvua ague*
- ¹ SENHOR, mba'e re tu mombyry rei?
Mba'e re tu rojexavai rā nderejekuaa ukai?
- ² Mba'eta heko vai va'e kuery ma ayvu vaikue-ikue py omoingo axy 'rā iporiaukue'i.
Ha'e kuery tojejurapa jojopy aguā omoī va'ekue py ae.
- ³ Mba'eta heko vai va'e ov'y'a 'rā oipotapa reia re rive,
mba'emo ojoupaxe va'e ijayvu vaikue-ikue 'rā SENHOR re,
ijayvu vai 'rā hexe.
- ⁴ Heko vai va'e ojee rive ojerovia vy ndoikuua potai 'rā mba'eve re.
Ha'e rami vy "Nhanderuete ndoikoi", he'i 'rā.
- ⁵ Ha'e kuery oikoa nhavō rupi ojoupa rei 'rā mba'emo.
Ndoikuuai 'rā guive ne'arandua rupi ndeayvua.
Ojojai rei 'rā okuapya ngovaigua kuery.
- ⁶ Mba'eta opy'a py aipoe'i: "Avave rei ndaxereityai 'rā.
Aŷ ha'e raka'e rā voi ndoui 'rā mba'emo vai xe'áry", he'i.
- ⁷ Ijuru tynyē oiny ayvu vai, nhombotavyarā ha'e ayvu poyi,
ha'e rami vy nhomboeko vai ha'e joapo vai aguā re anho 'rā ijayvu.*
- ⁸ Nhoarō 'rā tetā yvýry jojuka aguā.
Ojuka 'rā heko porā'i va'e nhemia py.
Oma'ē mbegue 'rā openamby e'ŷ oity aguā.
- ⁹ Nhoarō 'rā oiny guary okua yv'y'a peguy re oĩ va'e py nhoarō oinya rami.
Oarō 'rā oity aguā iporiaukue'i,
nhuā pyombo'a vy oimamamba aguā.
- ¹⁰ Onhemombe ov'y 'rā,
ipo'akaa py iporiaukue'i ho'apa aguā.
- ¹¹ Aipoe'i 'rā opy'a py: "Nhanderuete ma nopenai.
Ngovaombojere vy peteīve henda py ndoexa potai 'rā ajapo va'e."
- ¹² SENHOR, epu'ā ke!
Xeruete, eupi ndepo!
Nderexarai eme iporiaukue'i gui.
- ¹³ Mba'e nunga rupi tu heko vai va'e omboyke Nhanderuete?
Mba'eta opy'a py "Nhanderuete nopenai 'rāe" he'i.
- ¹⁴ Ha'e rami tei ndee ma rexa ae,
reikuua pota guive rojexavaia rupi romba'eapoa re,
ndepo py orerepy aguā.
Ndepo py onhemboaxa openamby e'ŷ ikuai va'e.
Ha'e ramo repy 'rā tyre'ŷ.
- ¹⁵ Emopē ke heko vai ha'e joupe ojapo vai va'e jyva.
Eikuua pota ha'e kuery reko vaia re
rejoupa peve.

* 10:7 Romanos 3.14

- ¹⁶ SENHOR ma Huvixave imarã e'ŷ va'e.*
 Ijyvy gui okanhymba 'rã amboae regua kuery.
- ¹⁷ SENHOR, rendu ae ma onhemo'yvy'i va'e kuery oipotaa.
 Ha'e rami vy rembopy'a guaxu ha'e reraa jepe 'rã,
- ¹⁸ repy aguã tyre'ŷ ha'e omoingo axy reipy,
 avakue yvy regua nanthomongyjevei aguã.

11

- SENHOR re nhanhemi aguã regua*
 Jogueroporaei va'e pe Davi ombopara va'ekue.
- ¹ Xee ma SENHOR re anhemi va'e.
 Ha'e nunga rupi mba'exa tu xenhe'ẽ pe aipopeje:
 "Ejava ke vytyt katy guyra'i rami.
- ² Mba'eta heko vai va'e kuery omoxã ma guyrapa,
 ixã re ma omoõ ma hu'y oa'anga vy,
 nhemia py heko porã va'e rovai opoi aguã.
- ³ Yvy ytaraõ omoõ va'ekue omombaa ramo
 mba'e tu heko porã va'e ojapo 'rã?"*
- ⁴ Ha'e rã SENHOR ma oĩ ojeupegu templo iky'a e'ŷ va'e py.
 Yva re SENHOR oĩ guenda openaaty py.
 Oma'ẽ oiny avakue ojapo va'e re.
- ⁵ SENHOR oikuua pota 'rã heko porã ha'e heko vai va'e re.
 Ojou vai 'rã jojukaa rupi anho ikuaixe vai va'e.
- ⁶ Heko vai va'e áry ombou 'rã tapyi rexakã enxofre revegua.
 Ha'e kuery oy'u aguã ombou 'rã vytyt tata revegua.*
- ⁷ Mba'eta SENHOR ma heko porã va'e oiko vy
 oayvu teko porã rupi ikuai va'e.
 Ha'e ramo heko porã va'e oexa 'rã hova.

12

- Apu gui onhepytyvõ ukaa ague*
 Jogueroporaei va'e pe ixã irundy meme va'e py ombojoguy reve guarã Davi ombopara va'ekue.
- ¹ SENHOR, orereraa jepe ke!
 Mba'eta ndevygua avakue ndoikovei.
 Avakue ra'y kuery mbyte gui okanhymba ma ojeroviapy.
- ² Ha'e ramo anhetẽ rupi e'ŷ 'rã ijayvu jomeme,
 opy'a py nhombotavy vy ijayvu mbegue rei okuapy.
- ³ SENHOR, ejaya ijayvu mbegue rei va'e kuery rembe,
 opa marã rei ijayvu va'e apekũ guive.
- ⁴ Mba'eta aipoe'i okuapy: "Nhaneapekũ py 'rãe nhandepo'aka,
 nhanerembe ma nhanemba'e ae.
 Mava'e tu nhandere ipo'aka 'rã?" he'i okuapy.
- ⁵ Ha'e ramo SENHOR aipoe'i:
 "Iporiaukue'i omoingo axya ha'e ojexavai va'e ipoaẽ ramo
 xee aendu vy apu'ã ta aŷ.
 Araa jepe 'rã aepy aguã oarõ oikovy va'e", he'i.
- ⁶ SENHOR ayvu ma iky'a e'ŷ va'e meme,
 prata sete-kue oiky'a'o pyre rami,

* 10:16 Apocalipse 11.15 * 11:3 Apy ma huvixave irû kuery oguerokyje vy ixupe ijayvu okuapy hovaigua kuery
 ojukaxea gui onha aguã re. Ha'e gui "Yvy ytaraõ omoõ va'ekue" he'ia ma huvixa openaa re ijayvu vy (Salmo 75.3, 82.5).

* 11:6 Apocalipse 20.10, 21.8

- tata rupa yapo gui ojapo pyre py.
⁷ Tá SENHOR, ndee ma orerepy 'rāe.
 Aýqua kuery gui orereraa jepe 'rā raka'e rā peve.
⁸ Ha'e rā heko vai va'e ma opa rupi ikuai,
 avakue ra'y kuery ma teko vai anho oguerovy'a.

13

- Ojeroviaa rupi ojerurea ague*
 Jogueroporaei va'e pe Davi ombopara va'ekue.
¹ SENHOR, raka'e peve 'rā tu nderexarai xegui?
 Raka'e peve 'rā tu xevy pe nderejexa ukavei?
² Raka'e peve 'rā tu nda'evei riae xepy'a py?
 Mba'eta ko'ē nhavō xepy'a py aendu ndavy'aia.
 Raka'e peve 'rā tu xerovaigua xere opu'ā rei?
³ SENHOR Xeruete, eikuua pota ke xere, xembovai guive!
 Xemboexa pyxo, manoa py ake e'ŷ aguā,
⁴ xerovaigua kuery "Xepo'aka ma hexe" he'i e'ŷ aguā,
 ha'e xerovaigua kuery xekangy ramo oexa vy ov'y'a rei e'ŷ aguā.
⁵ Ha'e rā xee ma ajerovia ndere xemboaxy a rupi xererek agoa.
 Xepy'a py arov'y'a xereraa jepea.
⁶ Aporaei 'rā SENHOR pe,
 opa mba'e py xemoingo porā rire.

14

- Salmo 53.1-6*
 Jogueroporaei va'e pe Davi ombopara va'ekue.
¹ Hi'arandu e'ŷ va'e ma opy'a py:
 "Nhanderuete ndoikoi" he'i.
 Ha'e kuery opa marā ikuai oejokoa rupi e'ŷ.
 Neĩ peteīve ma ndoikoi heko porā va'e.
² Ha'e rā SENHOR ma yva gui oma'ē 'rā avakue ra'y kuery ikuai re,
 oexa agoa amongue pa 'arandu rupi oikoa,
 amongue pa oiko Nhanderuete oeka va'e.
³ Ha'e rami teĩ ha'e javive ojepe'a, opa marā rei ikuai pavē rei.
 Ndoikovei ae teko porā rupi oiko va'e,
 neĩ peteīve ma.*
⁴ Teko vai rupi ikuai va'e 'arandurā noĩ teve?
 Ha'e kuery ma xevygua kuery omomba rivepa 'rā mbojape ho'ua rami.
 Ndojapukai 'rā guive Nhanderuete pe.
⁵ Ha'e rami teĩ ha'e kuery onhemondyipa 'rā
 oexa vy heko porā va'e kuery reve Nhanderuete oiko ramo.
⁶ Ha'e kuery ma yvyigüe'i nhomongeta ramo oojai rei okuapy,
 ha'e rā SENHOR ma onhemoi ha'e kuery onhemi agoa.
⁷ Sião gui ou ma va'e rire Israel kuery reraa jepearā!
 SENHOR ojeupagua kuery omoingo porā jevy ramo
 Jacó ramymino kuery, Israel kuery ov'y'apa 'rā okuapy.

15

- Yva pygua re ijayvua*
 Mboraerā Davi ombopara va'ekue.
¹ SENHOR, marā ramigua nda'u oiko 'rā ndevygua opy?

* 14:3 Romanos 3.9-20

- Marā ramigua nda'u oĩ 'rā ndevyguia yvyty iky'a e'ŷ va'e py?*
- ² Teko porā rupi ikuai va'e anho,
gueko porāa oexa uka va'e,
opy'a py anhetē rupi ijayvu va'e,
- ³ oapekū py joe ijayvu vai e'ŷ va'e,
amboae kuery pe ojapo vai e'ŷ va'e,
neĩ ngoo katy rai'i ikuai va'e re voi ima'endu'a vai e'ŷ va'e.
- ⁴ Ha'e kuery ndoguerovy'a rei 'rā ojou vaipy,
ha'e rā omboete 'rā SENHOR renonde ojererokyjea rupi ikuai va'e kuery anho.
Ijayvuague ndojapo e'ŷi 'rā guive,
ha'e nungakue py oiko axy tei.
- ⁵ Operáta oiporuka rire nomboekovia retavei 'rā,
neĩ nombopagai 'rā ojejavy e'ŷ va'e kuery mba'emo ome'ëa ta tei.
Ha'e rami ikuai va'e ma mba'eve py ndoityai 'rā.

16

- Nhanderuete pegua iky'a e'ŷ va'e reko re ijayvua*
Davi oporaeiague.
- ¹ Xeruete, epena porā ke xere,
ndere anhemi rire.
- ² SENHOR pe aipoa'e: "Ndee ma xe-Senhor.
Iporâve va'e xee ndarekoi ndee e'ŷ vy.
- ³ Ha'e gui ndevyguia iky'a e'ŷ va'e yvy re ikuai va'e ma
xee arov'y'a vy ha'e kuery pe 'Yvatekueve' ha'e."
- ⁴ Ha'e rā amboae tuueterā re SENHOR omboekovia va'e kuery ma ikuai axy 'rā.
Ha'e kuery ruete pe xee name'ëi 'rā tuguy revegua,
neĩ ndaxeayvui 'rā hery rupi.
- ⁵ SENHOR anho oiko mba'emo xevyguia me'ëa, xekaro pygua me'ëa guive.
Ndee anho remoĩ xerenonderâ.
- ⁶ Ha'e ramo xevyguia ma ha'eve va'e,
xevy guarâ ma iporâ va'e meme.
- ⁷ Aroayvu porā 'rā SENHOR xemo'arandua,
pyâvy voi xemoneta xepy'a re.
- ⁸ Xema'endu'a riae SENHOR xereve oikoa re.
Xeyvýry oĩ ramo ndaxereityai 'rā.
- ⁹ Ha'e rā xekuraxõ py avy'a,
xenhe'ë ov'y'a,
xerete avi opytu'u porâ 'rā.
- ¹⁰ Mba'eta xerekovea nderejai 'rā manoa py,
Ndevyguia iky'a e'ŷ va'e nderejai 'rā ivaipa aguâ py.
- ¹¹ Xevy rexâ uka 'rā tape tekove katy oo va'e.
Nerenonde oĩ avy'a ete aguâ,
ndeyvýry oĩ xembovy'a va'e raka'e râ peve guarâ.*

17

- Nhanderuete oepy aguâ re ojerurea ague*
Davi onhembo'eague.
- ¹ SENHOR, endu ke ajerure ramo ha'evea rami xerereko aguâ,
eikuua pota ajapukaia re,
ejapyxaka ajerurea re,

* 15:1 Salmo 24.2-6 * 16:11 Kova'e ayvu rupi Pedro ijayvu Jesus rekokue omombe'u vy (Atos 2.22-36), ha'e gui Paulo ju ijayvu (Atos 13.32-37; 1 Coríntios 15.4).

- mba'eta ijapu va'e juru gui e'ŷ xeayvu onhendu.
- ² Nerenonde gui eikuua uka xemboeko porāa regua.
Mba'eta orerexa vy ha'evea rami meme reikuua pota.
- ³ Xekuraxō re reikuua pota teī,
pyávy voi reikuua pota vy
tata py rami xerekō rea'ã teī
peteī henda py ma xere nderejoui 'rā teko vai.
Xejuru gui noēi 'rā ayvu vai.
- ⁴ Avakue opa marā ikuai teī xee ma ndeayvua rami vy
ajejoko jojuka va'ety ikuia rupi aiko e'ŷ aguā.
- ⁵ Ndeguigua tape rupi anho aiko,
ajavy e'ŷ re.
- ⁶ Xeruete, xee ajapukai ndevy,
mba'eta ndee xembovai 'rā.
Ejapyxaka ha'e endu xeayvua.
- ⁷ Exa uka opa mba'e py ndeporayvu etea.
Mba'eta ndere onhemi va'e kuery reraa jepe 'rā
ha'e kuery re opu'ã va'e gui.
- ⁸ Epena ke xere nderexa ra'yī re rami ae,
xeao'i ke ndepepo guy py
- ⁹ heko vai va'e kuery xembojexavaia gui,
xerovaigua kuery xejukaxea gui.
- ¹⁰ Mba'eta ipy'a ratā va'e kuery ma opy'a omboty reve
ijayvu vaikue-ikue 'rā.
- ¹¹ Aŷ voi orejoko rei okuapy,
orere oma'ẽ vaiipa yvy rupi orereityxe vy.
- ¹² Guary guembiarā ojouxva va'e rami ikuai,
guary ra'y onhemia gui oma'ẽ mbegue va'e rami guive.
- ¹³ SENHOR, epu'ã ke, ejoko ha'e eitypa.
Ndekyxe py eraa jepe xerekove heko vai va'e po gui.
- ¹⁴ SENHOR, ndepo py ae xereraa jepe avakue yvy regua gui.
Ha'e kuery ma aŷ oikove teri reve anho 'rā ojou iporā va'e.
Mba'eta ha'e kuery rye remonyē mba'emo porā.
Ha'e kuery ta'y reta 'rā.
Ha'e gui mba'emo ndoiporupai va'ekue ma oeja 'rā gua'y kuery pe.
- ¹⁵ Ha'e rā xee ma teko porā rupi vy ama'ẽ 'rā nderova re.
Apu'ã ju vy avy'a 'rā roexa vy.*

18

2 Samuel 22.1-51
Jogueroporaei va'e pe Davi SENHOR rembiguai ombopara va'ekue. SENHOR pe oporaei Saulo ha'e hovaigua kuery ha'e javi po gui oepy ramo. Ha'e vy aipoe'i:

- ¹ SENHOR xemombaraetea, xee roayvu.
- ² SENHOR, ndee ma xe'itaova.
Ndee ma oo ikorapa va'e ha'e xerepya.
Xeruete ma xe'itaova anhemiaty,
mba'emo vai jokoa, xereraa jepea imbaraete va'e ha'e oo imbaraete ete va'e.
- ³ SENHOR ogueroporaepy va'e pe xee ajapukai vy
aa jepe kuery 'rā xerovaigua kuery po gui.
- ⁴ Nhuā manoaa regua xejura va'ekue,
yai rami heko vai va'e xere opu'ã vy xemongyje.

* 17:15 Omanoague gui onhemboete ju aguā re ijayvu (Apocalipse 22.4).

- ⁵ Manoa pygua xejokua,
nhuā xā xejura xapy'a.
- ⁶ Ha'e ramo ajexavaia py ajapukai karamboae SENHOR pe.
Xeruete pe ajapukai xereraa jepe aguā.
Ha'e rā oīaty templo gui oendu xeayvua,
ijapyxa peve ajapukaia ovaē ramo.
- ⁷ Ha'e ramo yvy omyī ha'e oryryi.
Yvyty yta ikuai va'e voi ovavapa, oryryipa,
SENHOR ogueropoxy ramo.
- ⁸ Inhapyīguia gui opu'ā hataxī,
ijuru gui ma tata nhomombaarā oē,
tapyī hexakā va'e avi.
- ⁹ Yva omo'yvyī'i vy oguejy,
ipy guýry pytū vaikue oī reve.
- ¹⁰ Anjo ipepo va'e áry oī vy oveve ouvy,
yvytu opepo áry ou pojava.
- ¹¹ Pytū gui ojapo onheovā aguā.
Ha'e va'e ojee omoī ouvy.
Yy ha'e arai pytū va'e hoo rami oī.
- ¹² Hexakā henonde oo va'e gui ma arai ivaipa,
amandau ha'e tapyī hexakā va'e ho'a.
- ¹³ Ha'e gui ma SENHOR yapu yva re.
Yvate ete va'e ijayvu atā ramo
ho'a amandau ha'e tapyī hexakā va'e.
- ¹⁴ Ngu'y omombo vy omoaīmba xerovaigua kuery.
Overa vy omondyipa.
- ¹⁵ Ha'e ramo ojekuaa yy rupa peve,
yvy yta avi ojekuaapa,
ndeayvu atāa py SENHOR,
ndepoxya rupi neapyīguia gui nepytuē ramo.
- ¹⁶ Yvate gui SENHOR okuave'ē vy xerupity,
xerenoē yy tuvixa va'e gui.
- ¹⁷ Xereraa jepe xerovaigua kuery imbaraete va'e gui,
xemomboriau rei va'e kuery gui ae,
xegui ipo'akave ete va'ekue ri.
- ¹⁸ Ha'e kuery ma ajexavai jave opu'āmba rei va'ekue xere,
teī SENHOR onhemoī xepytyvōarā.
- ¹⁹ Ha'e rami vy xereru peteī henda ipa'ū ja'eavea py.
Xererovy'a vy xereraa jepe.
- ²⁰ Xerekō porāa rekoria SENHOR ome'ē iporā va'e,
xevy ome'ē ndaxepo ky'aia repy.
- ²¹ Mba'eta xee ma SENHOR guigua tape rupi anho aiko va'e,
Xeruete gui ndajep'e ai guive ha'eve'ŷa rami aiko aguā.
- ²² Xejee amoī ijayvuague ha'e javi,
xejegui ndaipe'ai ayu omoī va'ekue.
- ²³ Henonde aiko anhetē rupi,
ajejoko guive teko vai rupi aiko e'ŷ aguā.
- ²⁴ Ha'e ramo xevy SENHOR ome'ē xerekō porāa repy,
henonde rupi ndaxerekō ky'ai rire.
- ²⁵ Heko porā va'e kuery pe rejekuaa uka 'rā heko porā va'e,
anhetē rupi ikuai va'e pe rejekuaa uka anhetē rupigua avi,
- ²⁶ iky'a e'ŷ va'e pe rejekuaa uka iky'a e'ŷ va'e,

- ha'e rā heko vai va'e pe ma rejekuaa uka 'rā nhombopaga kuaa va'e.
- ²⁷ Mba'eta reraa jepe 'rā onhemo'yvy'i va'e,
ha'e rā oma'ē vaikue reia rupi onhemboyvate va'e ma remomba 'rā.
- ²⁸ Ndee rejapo xerata endy hexakāve aguā rami.
Pytū rupi aikoa rupi ma ndee SENHOR Xeruete remoexakāmba.
- ²⁹ Ndereve vy amomba 'rā xondaro kuery,
Xeruete reve vy apo 'rā tetā kora áry rupi.
- ³⁰ Nhanderuete guigua tape ma iky'a e'ŷ va'e,
SENHOR ayvu ma oa'anga pyre.
Hexe onhemi va'e ha'e javi pe ma mba'emo vai jokoa oĩ.
- ³¹ Mava'e tu Nhanderuete oiko SENHOR e'ŷ vy?
Mava'e tu nhande'itaova oiko Nhanderuete e'ŷ vy?
- ³² Xeruete xemombaraetea oiko,
omoatyrō 'rā aguata aguā rupi.
- ³³ Xepy ojapo 'rā guaxu rami inhakuā aguā.
Yvatea rupi aẽ teĩ xemoī atā.
- ³⁴ Xepo pe voi ome'ẽ joe apu'ã kuaa aguā.
Ha'e ramo guyrapa overa va'e guigua teĩ xee aipira 'rā.
- ³⁵ Mba'emo vai jokoarā reme'ẽ xereraa jepea,
reiporu kuaa regua xemoī atā,
xemboaxyu rupi xemboyvate.
- ³⁶ Apyrō aguā tape rembopyve ramo
ndaxepyxyryi 'rā.
- ³⁷ Xerovaigua kuery amonha 'rā aupitypa peve.
Ha'e gui amomba rire ajevy ju 'rā.
- ³⁸ Amou'ũmba opu'ã aguā nda'evevi peve.
Xepy yvýry ho'apa.
- ³⁹ Mba'eta ndee xemombaraete ajoguero'a kuaa aguā,
rejapo xere opu'ã va'ekue re xepo'aka aguā rami.
- ⁴⁰ Xerovaigua kuery rejapo ojavapa aguā rami.
Xerayvu e'ŷ va'e amomba.
- ⁴¹ Guepyarā pe ha'e kuery ojapukai teĩ ndoepyai.
SENHOR pe voi ha'e kuery ojapukai teĩ nombovai.
- ⁴² Ha'e ramo amongu'ipa yvy ku'i yvytu rupi ovevepa va'e rami,
yapo tape guiguare nhamomboa rami amokanhymba.
- ⁴³ Heta va'e kuery xere opu'ã teĩ xereraa jepe,
xemoī yvy regua kuery ruvixarā.
Amboae regua kuery ndaexai va'ety voi xevyguia ikuai.
- ⁴⁴ Xeayvu oendu vyve xenhe'ẽ rendu okuapy.
Yvy mboae regua oexa uka xevy ikuai,
- ⁴⁵ amboae regua kuery okanhymba,
onhemiague gui oẽmba onhemondyipa vy.
- ⁴⁶ SENHOR ma oikove va'e, togueroayvu porāa xe'itaova!
Tomboetea Nhanderuete xereraa jepea!
- ⁴⁷ Nhanderuete xerepy vy jojukapa,
heta va'e kuery re xembopo'aka.
- ⁴⁸ Nhanderuete ae xereraa jepe xerovaigua kuery gui.
Ndee ma xemboyvate xerovaigua kuery áryve,
ha'e xerepy avakue jojuka va'ety po gui.
- ⁴⁹ Ha'e ramo SENHOR, roguerovy'a 'rā yvy regua kuery oendua py,
aporaei 'rā nderery rupi.*

* 18:49 Romanos 15.9

- ⁵⁰ Ha'e ae ombopo'aka 'rā huvixaverā omoī va'ekue,
oexa uka 'rā guembiporavo oayvua,
Davi ha'e hamymino kuery pe, raka'e rā peve.

19

- Nhanderuete rembiapo ha'e ijayvua oguerovy'aa ague*
Jogueroporaei va'e pe Davi ombopara va'ekue.
- ¹ Yva re mba'emo ikuai va'e oikuaa uka Nhanderuete hexakāmba va'ea,
yvate rupi ikuai va'e oikuaa uka 'rā opo py ojapoague.
- ² Ára nhavō oikuaa uka 'rā ara pygua pe,
ha'e pytū nhavō oikuaa uka 'rā pytū rupigua pe.
- ³ Nda'ijayvui 'rā, neī nda'ijayvuai 'rā,
ha'e va'e gui mba'eve nonhendui 'rā.
- ⁴ Ha'e rami teī ha'e nunga 'arandu ma yvy jave rupi oikuaa,
yvy apy peve 'rā ha'e nunga re ayvua.*
Ha'e vy yva apy re omoī kuaray oike aguā.
- ⁵ Ha'e va'e ma omenda ramo va'e rami 'rā oē ouvy ngoo gui,
ovy'a 'rā ovy imbaraetepa va'e onha ovya rami.
- ⁶ Yva apy gui oē vy
oaxa 'rā ovy ijapy rovai peve.
Jipoi 'rā haku-a oguerovy e'ŷa.
- ⁷ Ha'e gui SENHOR guigua lei ma ha'eve vaipa ete vy
omombaraete ju 'rā nhanderekove.
SENHOR omombe'u va'e ma ogueroviap vy
omo'arandu 'rā hi'arandu e'ŷ'i va'e.
- ⁸ SENHOR nhombo'ea ma ha'evea ramigua vy
ombovy'a 'rā nhanekuraxō.
SENHOR ojapo uka va'e ma iky'a e'ŷ va'e vy
omoexakā 'rā nhanderexa.
- ⁹ SENHOR renonde jajererokyjea ma iky'a e'ŷ va'e,
raka'e rā peve guarā guive.
SENHOR joe oikuaa potaa ma anhetē rupigua,
ha'evea rami meme.
- ¹⁰ Ha'e nunga ma ouro gui jaipotave va'erā,
ouro oiky'a'o pyre gui iporāve ramo.
He'ēve 'rā ei
hetāgue gui onhami va'ekue gui.
- ¹¹ Ha'e va'e rupi nerembiguai kuery remongeta 'rā guive.
Ha'e va'e jajapo vy jajou reta 'rā iporā va'e.
- ¹² Mava'e nda'u oikuaapa 'rā ha'e ae ojejavyague?
Emboguepa ke aikuua e'ŷ-e'ŷ va'e guive.
- ¹³ Xejoko xee nerembiguai anhemboyvate reia gui voi.
Ha'e nunga ta'ipo'aka eme xere.
Ha'e rami rā iky'a va'e'ŷ 'rā aiko,
ha'e aa jepe 'rā ajejavvyve etea gui.
- ¹⁴ SENHOR, xe'itaova ha'e xerepya,
tove ayvu xejuru gui oē va'e ha'e xepy'aa xepy'a re oī va'e
nerenonde toī nembovy'aarā.

* 19:4 Romanos 1.18-25, 10.16-18

20

Huvixave re ojerurea ague

- Jogueroporaei va'e pe Davi ombopara va'ekue.
- ¹ Rejexavaia ára tove SENHOR tanembovai.
Jacó Ruete rery tandereraa jepe reĩ atã aguã py.
 - ² Tombou nderepyarã guenda iky'a e'ŷ va'e gui.
Sião gui ma voi topena ndere.
 - ³ Ta'ima'endu'a ixupe guarã reme'ẽ va'e ha'e javi re,
tojou porã mba'emo ixupe reapy rã.
 - ⁴ Tome'ẽmba ndepy'a re reipotaa oĩ va'e,
tojapopa rejapoxe va'e ha'e javi.
 - ⁵ Ha'e gui ma ndepo'aka ramo ore kuery rovy'a 'rã mboraei rupi,
Nhanderuete rery rupi roupi 'rã imoiny bandeira.
Ixupe SENHOR tomoingo renhemboayvua ha'e javi.
 - ⁶ Aŷ ma xee aikuaa SENHOR ogueraa jepe 'rãa huvixarã omoĩ va'ekue.
Ombovai 'rã o'amba iky'a e'ŷ va'e gui,
ha'e rami vy opo py oexa uka 'rã opo'akaa.
 - ⁷ Amongue ma ojerovia 'rã mba'eyru re,
amboae kuery ma kavaju re 'rã ojerovia.
Ha'e rã nhande kuery ma SENHOR Nhanderuete rery anho jarovy'a.
 - ⁸ Ha'e kuery ma ojero'a vy ho'apa 'rã.
Ha'e rã nhande kuery ma nhapu'ã 'rã jakuapy.
 - ⁹ SENHOR, embopo'aka ke oreruvixave.
Rojapukai ramo orembovai.

21

Ngovaigua kuery re huvixave ipo'aka rã oguerovy'aa ague

- Jogueroporaei va'e pe Davi ombopara va'ekue.
- ¹ SENHOR, nembaraetea re oreruvixave ov'y'a,
reraa jepeague re oporaei.
 - ² Mba'eta rejapo ma op'y'a py ojapoxe va'ekue,
nerendu e'ŷi ojapukaia.
 - ³ Mba'eta reavyu vy iporã va'e anho reme'ẽ ixupe.
Inhakã re remoĩ coroa ouro ete'i guigua.
 - ⁴ Guekove re ha'e ojerure ramo reme'ẽ,
raka'e rã peve guarã.
 - ⁵ Reraa jepeague ma pavẽ rei oguerovy'a okuapy.
Hexe remoĩ hexakãrã ha'e yvateve aguã.
 - ⁶ Raka'e rã peve guarã remoĩ nhomoingo porãarã.
Hexeve reiko ramo vy'a anho 'rã oendu.
 - ⁷ Mba'eta huvixave ojerovia SENHOR re.
Ha'e rami vy Yvate ete va'e omboaxy ramo peteĩve henda py ndo'ai 'rã.
 - ⁸ Ha'e rami vy ndepo oupity 'rã nderovaigua kuery ha'e javi,*
reiporu kuaa regua ojopypa 'rã ndere ija'e e'ŷ va'e.
 - ⁹ Ha'e kuery pe rejekuaa uka vy
rejapo 'rã tata rupa haku raxa va'e rami.
SENHOR opoxya rupi omomba 'rã,
tata oapypaa rami.
 - ¹⁰ Yvy gui remomba 'rã hamymino kuery,
avakue ra'y kuery ikuaia gui.
 - ¹¹ Nderovai ha'e kuery mba'emo vai ojapoxe teĩ

* 21:8 Apy guive huvixave pe ijayvu.

- nopu'ã kuaai 'rã, ndojapo kuaai 'rã ha'e nunga.
 12 Rejapo 'rã oguevipa aguã rami,
 ha'e kuery rova re rea'anga 'rã nderapa.
 13 SENHOR, tandeyvate ndepo'akaa py.
 Ha'e rã ore ma roporaei 'rã ndepo'akaa roguerovy'aa rupi.

22

Messias oiko axy rire ipo'aka ju aguã re ijayvua
 Jogueroporaei va'e pe Davi ombopara va'ekue, "Guaxu aje'iveguá" he'ia py oporaeia rami
 oporaei aguã.

- 1 Xeruete, Xeruete, mba'e re tu xereja ri?*
 Mba'e re tu ajexavaia rupi ajapukai teĩ
 mombryri repyta xegui xereraa jepe e'ŷ aguã?
 2 Xeruete, ára py ajapukai ramo naxembovai,
 pyávy voi ndapytu'ui ae.
 3 Ha'e rami teĩ ndee ma iky'a e'ŷ va'e reiko.
 Nerenda repenaaty py reguapy reiny Israel kuery oporaei okuapy va'e mbyte.
 4 Oreramoĩ kuery ma ndere ojerovia raka'e.
 Ojerovia ramo reraa jepe.
 5 Ndevy pe ha'e kuery ojapukai ramo reo jepe raka'e.
 Ndere ojerovia, nda'eve e'ŷi nho guive.
 6 Ha'e rã xee ma taxo, ava e'ŷ merami,
 mba'eta avakue pe ovare e'ŷ va'e,
 heta va'e kuery oipota va'e'ŷ aiko.
 7 Xerexaa kuery ha'e javi xejajai rei.
 Hembe'a rei reve oakã ombovava vy aipoe'i:
 8 "SENHOR re rejerovia ramo tanderepy.
 Ha'e ae tandereraa jepe, hexe ndererovy'a ri vy", he'i okuapy.
 9 Ha'e rami teĩ ndee ma xetui'i aguã rami xeapo va'ekue.
 Xere repena porã va'ekue akambu'i teri jave.
 10 Xetui'i guive ndevy aiko.
 Xeryru'i py aĩa pyve ndee Xeruete reiko.
 11 Aŷ ma enhemombyry eme xegui,
 mba'eta ovaẽ ma ajexavai aguã,
 ha'e xepytyvõarã ndoikoi.
 12 Heta ikuai toro nharõ rami xejoko va'e,
 toro mbaraekekueve Basã pygua xembojere rei okuapy.†
 13 Xere ha'e kuery ijuru jai,
 guary nhomboa'ypa va'e rami okororõ.
 14 Yy rami anheẽ,
 ha'e xekãgue ha'e javi oku'epa,
 xeryepy re xekuraxõ ma ei raity hykupa va'e rami ojeapo.
 15 Yapo guigua pêgue ipirupaa rami
 xembaraetea voi opa ma,
 xeapekũ guive xejurupy re oja ma oiny.
 Ha'e rami py ndee xereity yvy ku'i rupi amano aguã.
 16 Jagua kuery xembojere rei okuapy,
 joapo vai va'ety kuery nhomoirõmba va'e.
 Xepo ha'e xepy ombokuapa.

* 22:1 Kova'e salmo ha'e javi omombe'u ma voi Jesus kuruxu re omano jave guarã (Mateus 27.33-54, Marcos 15.22-32, João 19.17-30, Filipenses 2.5-11). † 22:12 Basã yvy re ma heta ikuai raka'e vaka. Ha'e rã apy ma toro re ete'ŷ, heko vai va'e kuery re ijayvu.

- ¹⁷ Aexapa xekāgue ha'e javi'i.
Ha'e kuery xere oma'ẽ okuapy xere ov'y'a reia py.
- ¹⁸ Xeao jomeme omboja'opa ma.
Xekamixa puku re oexa okuapy xortea.
- ¹⁹ Ha'e rã ndee SENHOR, ejep'e a eme xea gui.
Xemombaraeta, ejapura ke xerepy aguã.
- ²⁰ Eraa jepe xerekove ha'e kuery kyxe gui,
jagua kuery oipe'a ta va'e gui.
- ²¹ Xereraa jepe ke guary juru gui,
búfalo rakua gui guive.
Tá, ndee ma xembovai ma!
- ²² Ha'e rami rire xeryvy kuery oendua py xema'endu'a 'rã nderery re,*
heta va'e kuery mbyte rogueroporaei 'rã, po rami:
- ²³ "SENHOR renonde pejererokyjea rupi pendekuai va'e, peroporaei.
Pembojerovia, peẽ Jacó ramymino kuery ha'e javi.
Israel ramymino kuery ha'e javi, pemboete pekuapy.
- ²⁴ Mba'eta ha'e naxemboaxy e'ŷi ajexavai rã,
ndojequarui guive aiko axya gui,
ngova voi nomo'ái xegui.
Ha'e rami 'rãgue py oendu xereraa jepe aguã ajapukai ramo", ha'e 'rã.
- ²⁵ Mba'eta ndegui ae ou ijaty va'e kuery mbyte xee rogueroporaei aguã.
Nerenonde ojererokyjea rupi ikuai va'e oexaa py ajapo 'rã anhemboayvuague.‡
- ²⁶ Ha'e ramo iporiaukue'i okaru 'rã okuapy hevyatãmba peve.
SENHOR oeka va'e oguerovy'a 'rã okuapy.
Ha'e kuery kuraxõ toikove riae!
- ²⁷ Ha'e nunga rupi yvy apy peve ima'endu'aa 'rã SENHOR re,
ixupe guarã ojeko rerova 'rã okuapy.
Henonde guenapy'ã re yvy regua kuery ha'e javi oimb'a 'rã okuapy.
- ²⁸ Mba'eta SENHOR pegua ae ipo'aka aguã.
Ha'e ae 'rã opena yvy regua kuery re.
- ²⁹ Yvy regua oguerekopa rei va'e kuery voi okaru vy ombojerovia 'rã okuapy.
Yvy re onhono porã mbyre ha'e javi 'rã oĩ guenapy'ã re henonde,
guekove ae'i re nopena kuaai va'ekue.
- ³⁰ Tamymino kuery voi ha'e oipotaa rami 'rã ikuai.
Mba'eta raka'eve rã ikuai va'e pe ijayvua 'rã SENHOR reko re.
- ³¹ Ha'e kuery ou vy omombe'u 'rã ixuguigua teko porã.
Raka'eve rã ikuai va'erã pe omombe'ua 'rã ha'e ojapo va'ekue.

23

"*Xere SENHOR opena*" he'ia

Mboraeirã Davi ombopara va'ekue.

- ¹ SENHOR ma vexa'i mongarua rami xere opena va'e oiko.*
Ha'e ramo xevy pe ndoatai 'rã mba'eve rei.
- ² Xemombytu'u 'rã inony nhuñdy porã py rami.
Xereraa 'rã yy iky'a e'ŷi va'e py.
- ³ Omombaraete kuerei 'rã xenhe'ẽ.
Tape teko porã rupi 'rã xererekó,
guery omboete ukaa rupi vy.

* 22:22 Hebreus 2.10-12 ‡ 22:25 "Anhemboayvuague ajapo 'rã" he'i vy ma mba'emo mymba ojuka aguã re ijayvuague re ima'endu'a. Ha'e gui ho'okue omboja'o 'rã guetarã kuery pe Nhanderuete oguerovy'a okuapy aguã (Levítico 7.15-16). * 23:1 Apy ma vexa'i mongarua re ombojoja, Nhanderuete nhandere openaa re ijayvu vy (Apocalipse 7.15-17).

- ⁴ Yvyugua manoa guy pytū reia rupi aiko teī
ndakyjei 'rā mba'eve rei gui,
xereve ndee reiko ramo.
Ndepo pygua ha'e ndepopoka ma xembopy'a guaxu.
- ⁵ Rerekō katu akaru aguā[†]
xerovaigua kuery oexaa py.
Xeakā re renhoē 'rā azeite.
Kekaro remonyē 'rā onheēmba rei peve.
- ⁶ Anhetē xereve oī 'rā ndeporayvua ha'e xemboaxyā ára nhavō, aikovea pukukue re.
Ha'e gui SENHOR ro py aiko 'rā raka'e rā peve.

24

Huvixave hexakāmba va'e ou aguā re ijayvua

- Mboraeirā Davi ombopara va'ekue.
- ¹ SENHOR mba'e ae itui yvy ha'e opa mba'e hexe ikuai va'e,
yvy regua kuery ha'e javi guive.*
- ² Mba'eta ha'e onhono raka'e ye'ẽ áry rupi,
yy oxyry va'e áry omombyta.
- ³ Marā ramigua tu ha'eve SENHOR pegua yvyty re oẽ aguā?
Marā ramigua nda'u ha'eve henda iky'a e'ŷ va'e py oiko aguā?
- ⁴ Opo py ojejavy e'ŷ va'e, ipy'a ky'a e'ŷ va'e,
tuuete ramigua ovare e'ŷ va'e re onhe'ẽ nogueroma'endu'ai va'e,
neĩ ndoura rivei va'e.
- ⁵ Ha'e va'e kuery re ma ou 'rā SENHOR omoingo porāa,
ha'e ramo Nhanderuete heraa jepea po gui ojopy 'rā teko porā.*
- ⁶ Ha'e rami ikuai ixupe ojapukai va'e kuery,
Jacó Ruete oekaa rupi ikuai va'e.
- ⁷ Peipe'a ke okẽ ikuai va'e,
peipe'apave okẽ guaxu marā e'ŷ,
Huvixave hexakāmba va'e oike aguā.
- ⁸ Mava'e tu Huvixave hexakāmba va'e?
SENHOR imbaraete ha'e ipo'akapa va'e,
SENHOR joe opu'ãa rupi ipo'aka va'e.
- ⁹ Peipe'a ke okẽ ikuai va'e,
peipe'apave okẽ guaxu marā e'ŷ,
Huvixave hexakāmba va'e oike aguā.
- ¹⁰ Mava'e tu Huvixave hexakāmba va'e?
SENHOR ixondaro reta va'e,
ha'e ae Huvixave hexakāmba va'e.

25

Nhanderuete pe onhepytyvō ukaa ague

- Davi ombopara va'ekue.
- ¹ Ndere SENHOR, aroma'endu'a xenhe'ẽ.
- ² Xeruete, ndere xee ajerovia va'e.
Aximba rei aguā rami e'ŷ ke xererekō,
xerovaigua kuery xere ovy'a rei e'ŷ aguā.
- ³ Ha'e rā nerarō va'e kuery ma peteīve noximbai 'rā.
Oximba va'erā ma nhemi rupi joapo vai va'e kuery.
- ⁴ SENHOR, eikuua uka xevy ndeguigua tape.

[†] 23:5 Apy ma hoo va'e nhomovaẽ porā va'e re ombojoja. Ha'e va'e jave py hoo va'e ipoua kuery omovaẽ porā vy azeite onhoẽ'i vy oikyty 'rā inhakā re (Lucas 7.46). * 24:1 1 Coríntios 10.23-26

* 24:5 Mateus 5.8

- Xembo'e ke reikoa rupi aiko avi aguã.
- ⁵ Xerereko ndeguigua anhetẽ va'e rupi, xerekombo'e guive,
mba'eta ndee ma Xeruete xereraa jepea,
ndee ae roarõ aikovy ko'ẽ nhavõ.
- ⁶ SENHOR, nema'endu'a ke renhomboaxy ha'e ndeporayvua rupi
jypy guive reikoa re.
- ⁷ Nema'endu'a eme ke xekunumi jave ajejavvyague re,
neĩ nderovai xereko vaiague re.
SENHOR, xemboaxyu rupi anho ke nema'endu'a xere,
ndeporayvu va'e vy.
- ⁸ SENHOR ma iporayvu ha'e heko porã va'e vy
ojejavyapa va'e kuery pe oikuua uka 'rã tape.
- ⁹ Yvyigve ma ha'e oguereco 'rã teko porã rupi,
ombo'e 'rã ojeguigua tape rupi oiko aguã re.
- ¹⁰ SENHOR guigua tape ha'e javi rupi oĩ nhomboaxyu ha'e anhetẽ va'e,
guexeve guarã ojapo va'ekue ha'e ijayvuague rupi ikuai va'e pe.
- ¹¹ SENHOR, nderery remboete ukaa rupi vy
emboguepa xereko vaiague heta tei.
- ¹² Avakue SENHOR renonde ojererokyjea rupi ikuai va'e pe
oikuua uka 'rã tape oo aguã.
- ¹³ Ha'e ramo ha'e kuery nhe'ẽ optyu'u 'rã ov'y'a reve,
ha'e gui hamymino kuery jevy ikuai porã 'rã yvy re.
- ¹⁴ SENHOR renonde ojererokyjea rupi ikuai va'e ma ha'e omonhemboja 'rã.
Ha'e va'e kuery pe oikuua uka 'rã guexeve guarã ojapo va'ekue.
- ¹⁵ Ama'ẽ riae aikovy SENHOR re,
mba'eta ha'e ae oipe'a 'rã xepy nhuã gui.
- ¹⁶ Ejevy ju xea py, xemboaxy ju,
mba'eta xeae'i aĩ vy ajexavai.
- ¹⁷ Xemombytu'u ke xepy'a py nda'eveia gui,
xepe'a ke ajexavaia gui.
- ¹⁸ Eikuua pota aiko axya ha'e ajexavaia re,
ha'e emboguepa ajejavvyague ha'e javi.
- ¹⁹ Eikuua pota ke xerovaigua kuery re,
heta vaipa ramo.
Xere ija'e e'ŷ va'e kuery xembojeguaru rei okuapy.
- ²⁰ Earõ xenhe'ẽ re, ha'e xerepy.
Taiko eme aximba rei aguã rami,
ndere anhemis rire.
- ²¹ Anhetẽ rupi ha'e teko porã rupi aikoa tojapo akanhy e'ŷ aguã rami,
mba'eta ndee ae xee roarõ.
- ²² Xeruete, eraa jepe Israel kuery
ikuai axya ha'e javi gui.

Heko porã va'e ojapukaia

- Mboraeirã Davi ombopara va'ekue.
- ¹ SENHOR, xemboeko porã ke,
anhetẽ rupi anho aiko
ha'e SENHOR re ajeroviaa gui ndajepe'ai rire.
- ² SENHOR, eikuua pota ke aikoa re ha'e xekuua.
Exa pota xepy'aa ha'e anhembopy'aa re.
- ³ Mba'eta ndeporayvua re xema'endu'a riae aikovy,

- ndeguigua anhetē va'e rupi aiko.
- ⁴ Ndaguapyi guive avakue nhombotavypa rei va'e reve,
 joayvu merami rive va'e kuery reve nanhemoirūi.
- ⁵ Opa marā rei ikuai va'e xee ndajou porāi,
 ha'e heko vai va'e kuery reve ndaguapyi.
- ⁶ Ajepoei ajejavv e'ŷa aikuua uka vy.
 Ha'e rami vy SENHOR, aiko ndevyguia altar yvýry,
- ⁷ aporaei atā aguā ndevy,
 nerembiapo porāa amombe'upa aguā.
- ⁸ SENHOR, xee ma ayvu ndevyguia oo,
 nerexakā oīaty.
- ⁹ Eipe'a eme xerekove heko vai va'e kuery reve,
 xerekove eipe'a eme jouguy moēa kuery reve.
- ¹⁰ Ha'e kuery po ma jojukaague re iky'a,
 oiporu kuaa regua re ma teko vai repyrā rive oguereko.
- ¹¹ Ha'e rā xee ma xerekova porāa rupi aiko.
 Xerepy ke xemboaxy vy.
- ¹² Xepy oī atā yvy joja reia py.
 Ha'e rami vy heta va'e kuery oendua py xema'endu'a porā 'rā SENHOR re.

27

Nhanderuete reve oikoxea rupi ijayvua

Mboraeirā Davi ombopara va'ekue.

- ¹ SENHOR ma xemoexakāa ha'e xereraa jepea oiko.
 Mava'e gui 'rā tu akyje?
 SENHOR ma xerekovea onhemi aguā.
 Mava'e gui tu akyje ta?
- ² Ha'e gui joapo vai va'ety kuery xere ou vy xemomba aguā,
 xeavyky rei va'e ha'e xerovaigua kuery,
 ha'e kuery onhepyxanga vy ho'apa 'rā okuapy.
- ³ Xondaro kuery heta xembojere teī
 xepy'a py nanhemondyi 'rā.
 Xere anho opu'āmba teī ajerovia riae 'rā.
- ⁴ Peteī regua re tema ajerure SENHOR pe,
 ha'e va'e anho ajouxe:
 ha'e va'e ma SENHOR pegua oo py aiko aguā aikovea pukukue re,
 SENHOR rexakāa aexa aguā,
 ha'e ixupegua templo py anhembo'e aguā.
- ⁵ Ha'e rami vy aī vaia ára xenhomí 'rā ojeupagua opy,
 xemoinge 'rā ojeupagua oo py anhemi aguā.
 Xereraa 'rā itaova áry.
- ⁶ Ha'e jave py xeakā ombo'yvate ju 'rā
 xerovaigua kuery xembojere rei va'e áry.
 Ixupegua oo py arovya'vy mba'emo ame'ẽ 'rā.
 Aporaei ha'e ambopu 'rā SENHOR pe.
- ⁷ SENHOR, endu ke xeayvua,
 ndevy ajapukai rā.
 Xemboaxy ha'e xembovai.
- ⁸ Xepy'a re amoī "Xereka ke xereve reiko aguā" 'rea.
 Ha'e ramo roeka 'rā SENHOR, ndereve aiko aguā.
- ⁹ SENHOR, ejexa uka e'ŷ eme xevy.
 Ndepoxy reve xemoxē eme xee nerembiguai.

- Mba'eta ndee ma xepytyvõa reiko.
 Xeruete xereraa jepea,
 epena e'ŷ eme xere, xereja eme xeae'i.
- ¹⁰ Mba'eta xeru ha'e xexy xereja teĩ
 SENHOR xererau 'rã.
- ¹¹ SENHOR, xembo'e ke ndeguigua tape rupi aiko aguã,
 tape jojaa rupi xererekoo xere oma'ẽ mbegue va'e kuery gui.
- ¹² Xemboaxa eme xerovaigua kuery oipotaa rami xererekoo aguã.
 Mba'eta xerovai opu'ã rei okuapy ayvu rive py,
 joapo vai aguã re anho nhomongeta va'e.
- ¹³ Xee ajerovia SENHOR porayvua aexa aguã
 yvy re aikove teri reve.
- ¹⁴ Pearõ ke SENHOR.
 Pendekuerai eme, pendepy'a guaxu
 ha'e pearõ tema SENHOR.

28

- Oguerovy'a reve ojerurea*
- Mboraeirã Davi ombopara va'ekue.
- ¹ SENHOR, ndevy pe ajapukai.
 Xe'itaova, endu e'ŷ eme ke xeayvua,
 mba'eta naxembovai ramo
 yvykua py oguejy va'e kuery rami akanhy 'rã.
- ² Endu ke xereraa jepe aguã re ajapukai ramo,
 nerenda iky'a e'ŷ va'e katy xepo aupi reve.
- ³ Xembotyryry eme ke heko vai va'e kuery
 opa marã rei ikuai va'e reve.
 Ha'e kuery ma ikuai porã aguã re merami rive ijayvu oirũ pe,
 teĩ ipy'a re ma opa marãgua anho oĩ.
- ⁴ Embopaga ke ha'e kuery ojapoague rami,
 mba'emo vai ojapoague re.
 Eme'ẽ ha'e kuery opo py ojapoague rekovia,
 embojoja ha'e kuery ojapoague repy.*
- ⁵ Ha'e kuery ndoikuua potai SENHOR ojapo va'e re,
 neĩ opo py ojapo va'ekue re.
 Ha'e ramo SENHOR oitypa 'rã, nomopu'ã jevyvei 'rã guive.
- ⁶ Ta'ima'endu'a porãa SENHOR re,
 xereraa jepe aguã re ajapukai ramo xerendu rire.
- ⁷ SENHOR ae xemombaraetea ha'e mba'emo vai jokoa.
 Hexe xekuraxõ ojerovia.
 Ha'e xereraa jepe ramo xekuraxõ ov'y'a,
 ha'e ixupe aporaei reve amboete 'rã.
- ⁸ SENHOR omombaraete 'rã ixupe ikuai va'e,
 hembiporavo onhemi vy oo jepe aguã.
- ⁹ Eraa jepe ke ndevyguua kuery,
 emoingo porã ndevyguua kuery.
 Ha'e kuery re epena ha'e emboyvate raka'e rã peve.

29

Yapu ha'e overa rupi Nhanderuete ayvu onhendua re ijayvua
 Mboraeirã Davi ombopara va'ekue.

* 28:4 Mateus 16.27; Apocalipse 22.12

- ¹ Nhanderuete ra'y kuery pendekuai va'e, pemboete SENHOR,*
perovy'a SENHOR rexakāa ha'e imbaraeta.
- ² Pemboete SENHOR hery pemboete aguā ha'evea rami.
Pembojerovia SENHOR iky'a e'ŷa rexakāa py.
- ³ Yy áry rupi onhendu SENHOR ijayvua.†
Nhanderuete yapu guexakāa gui.
Yy tuvixa va'e áry rupi SENHOR oiko.
- ⁴ SENHOR ayvu ma ipo'akapa va'e.
SENHOR ayvu re yvatea anho oĩ.
- ⁵ SENHOR ayvu omopē 'rā yary ikuai va'e.
Tá, SENHOR omboa'ypa 'rā yary Líbano py ikuai va'e.
- ⁶ Líbano ha'e Siriom yvyty áry ikuai va'e
ojapo 'rā vaka ra'y rami opo-opo aguā rami, vaka ka'aguy regua rami.
- ⁷ SENHOR ayvu ojapo 'rā tata hendy ovy aguā rami.
- ⁸ SENHOR ayvu omboryryi 'rā tekao e'ŷa.
SENHOR ojapo 'rā Cades tekao e'ŷa rupi yvy oryryi aguā rami.
- ⁹ SENHOR ayvu ma ojapo 'rā guaxu kuery ta'y'i aguā rami,
oitypa 'rā ka'aguy.
Ha'e ramo ixupegua templo py ha'e javi "Iporā ete!" he'i okuapy.
- ¹⁰ SENHOR opena raka'e yy ou jave.
Huixave rami opena 'rā raka'e rā peve.
- ¹¹ SENHOR omombaraete 'rā ojeupegua kuery.
SENHOR omoingo porā 'rā ojeupegua kuery.

30

Omano ta ramo ogueraa jepe rire oguerovy'aa ague

Mboraeirā Davi ombopara va'ekue oo guaxu Nhanderuete pe omboaxa jave.

- ¹ SENHOR, xee ma romboete 'rā,
xereraa jepe rire.
Nderejapoi xerovaigua kuery xere ov'y'a rei aguā rami.
- ² SENHOR Xeruete, ndevy pe ajapukai va'ekue xereraa jepe aguā.
Ha'e ramo xemonguera.
- ³ Rejapo yvykua gui xenhe'ẽ oẽ ju aguā rami.
Xerekove re repena yvykua py aguejy e'ŷ aguā.
- ⁴ Peẽ ixupegua pendeky'a e'ŷ va'e, peporaei pekuapy SENHOR pe,
perovy'a hery iky'a e'ŷ va'e.
- ⁵ Mba'eta ipoxya ma xapy'a'i guarā anho.
Ha'e rā nhanderayvua ma jaikovea pukukue re 'rā oĩ.
Pytū ouvy rā onhendu 'rā ojae'o va'e.
Va'eri ko'ẽ ma rā ou 'rā vy'a.
- ⁶ Xee aiko porā rei jave
"Ndaxereityai 'rā" ha'e va'ekue.
- ⁷ Ndee SENHOR xemboaxy a rupi ae
rejapo xee aĩa yvyty oĩ atā aguā rami.*
Mba'eta nderejexa ukai ramo
xee ajexavai.
- ⁸ SENHOR, ndevy pe ajapukai.
SENHOR, ndevy ae ajerure.

* 29:1 "Nhanderuete ra'y kuery" he'ia ma amongue henda py yva pygua anjo kuery pe ijayvu vy (Salmo 103.20), ha'e rami e'ŷ vy ojerovia va'e kuery pe (Salmo 82.6, 96.7-9). † 29:3 Apy ma omombe'u Nhanderuete opo'akaa oexa uka vy oky ryapu ha'e overa yvytu reve ombou. Hyapu pe "Nhanderuete ijayvua" he'i. * 30:7 "Xevyguá yvyty" he'ia ma opo'akaa re ijayvu vy.

- ⁹ Mba'erā tu xeruguy ovare 'rā yvykua py aguejy rā?
 Ndevy pe iku'ikue oporaei 'rā ri ty'y?
 Ha'e nunga oikuaa uka 'rā teve ndeguigua anhetē va'e?
- ¹⁰ SENHOR, endu ha'e xemboaxy ke.
 SENHOR, enhemoī xepytyvōarā.
- ¹¹ Xerexaya gui xemombytu'u avy'a ju aguā.
 Xegui reipe'a ma ajukue vaikue,[†]
 hekovia avy'a ete aguā ju remoī,
- ¹² xenhe'ẽ opytu'u e'ŷ re oporaei aguā.
 SENHOR Xeruete, roquerovy'a 'rā raka'e rā peve.

31

- Iporiauague gui oguerovy'aa ague*
- Jogueroporaei va'e pe mboraeirā Davi ombopara va'ekue.
- ¹ SENHOR, ndere ae anhemī va'e.
 Taiko eme oxīmba rei va'e.
 Xereraa jepe ke nderekō porāa rupi vy.
- ² Endu ke ndeapyxa py, xereraa jepe pojava aguā.
 Enhemoī xevy oo ikorapa va'e,
 oo imbaraete vaipa va'e aa jepe aguā.
- ³ Mba'eta ndee ae xe'itaova ha'e oo ikorapa va'e reiko.
 Nderery remboete ukāa rupi vy xererekō ha'e xembo'e 'rā.
- ⁴ Xepe'a 'rā nhuā nhemi rupi omoī mbyre gui,
 mba'eta ndee ma xemombaraea.
- ⁵ Ndepo py ae amboaxa xenhe'ẽ.*
 SENHOR Xeruete anhetē va'e, ndee ae xerepy.
- ⁶ Rejou vai mba'emo ra'angaa ombojerovia va'e.
 Ha'e rā xee ma SENHOR re anho ajerovia.
- ⁷ Xee roquerovy'a, ajou porā 'rā ndeporayvua,
 mba'eta reikuua pota ajexavaia re,
 reikuua xenhe'ẽ oiko axya.
- ⁸ Naxemboaxai xerovaigua kuery po py.
 Xemopu'ā imo'amy peteī henda tuvixaa py aiko aguā.
- ⁹ SENHOR, ajexavaia aendu rā xemboaxy ke.
 Xeporiau reia gui xerexa voi opa ov.
- ¹⁰ Xerekovea ma iporiaua re anho oaxa ov,
- xepoaēa rupi tema aiko ma'et̄ā nhavō.
 Ajejavypa rire naxembaraeiteive-ive avy,
 xekāgue voi opa ov.
- ¹¹ Xerovaigua kuery ha'e javi ojeguaru aguā rami aiko,
 xero katy'i ikuai va'e kuery voi onhemondyipa xegui.
 Xerexa va'ety kuery ndaxerexa xeveipa okuapy,
 tape rupi xerexa va'e onha xegui.
- ¹² Xegui ha'e kuery hexaraipa ma opy'a py, omanogue gui rami,
 karo nhae'ū guigua vokue rami aiko.
- ¹³ Mba'eta xee aendu heta ijayvu mbegue okuapy ramo,
 xeyke jovaive rupi ikuai xemongyjexe vy.
 Xere ijayvu mbegue vy
 onhembopy'a okuapy xerekove oipe'a aguā.

[†] 30:11 Ajukue vaikue py ha'e kuery onhemonde 'rā ipy'a vai vy (Mateus 11.21). * 31:5 Kova'e ayvu rupi Jesus Cristo ijayvu kuruxu re omano jave (Lucas 23.46).

- ¹⁴ Ha'e rã xee ma ajerovia SENHOR re.
Ndevy pe "Ndee ma Xeruete" ha'e.
- ¹⁵ Ndepo py oĩ xe'ára.
Xepe'a ke xerovaigua kuery po gui,
xerakykue monhaa kuery xejukaxea gui.
- ¹⁶ Emoexakã ke nderova xee nerembigui áry.
Xemboaxy vy xereraa jepe.
- ¹⁷ SENHOR, ndevy pe ajapukai rire
ejapo eme axímba aguã rami.
Toxímba heko vai va'e kuery ae,
tokyrirímba omanoa py.
- ¹⁸ Emokyrirí ijapu va'e kuery,
heko porã va'e re opa marã rei ijayvu va'e,
onhemboarai rei, ojee ae ojerovia okuapy va'e.
- ¹⁹ Ndeporayvua ma yvate ete va'e,
nerenonde ojererokyjea rupi ikuai va'e pe rex a uka aguã rerekva'e.
Ha'e va'e ma rex a uka 'rã avakue ra'y kuery gui ndere onhemi va'e kuery pe anho.
- ²⁰ Ha'e kuery renhom 'rã ndejee ae avakue ojapo vaixea gui.
Ha'e py renhom 'rã opa marâgaa ayvu gui.
- ²¹ Ta'ima'endu'a porãa SENHOR re!
Mba'eta xemboaxy ete
peteĩ tetã py xejokopaa ramo.
- ²² Xee ajapura reve
"Navaẽvei ma 'rã nerенонде py" ha'e va'ekue.
Ha'e rami teĩ ndee rendu ajapukaia,
xereraa jepe aguã re ajapukai ramo.
- ²³ SENHOR pegua iky'a e'ý va'e ha'e javi, peayvu ke.
SENHOR ndoity ukai 'rã hexe ojerovia va'e.
Ha'e rã heko vai va'e ma ombopaga vaipa 'rã.
- ²⁴ SENHOR pearõ va'e kuery,
penembaraete ke, pendepy'a guaxu tema!*

32

- Ojejavyague omboguepa rire oguerovy'aa ague*
- Mboraerã Davi ombopara va'ekue nhanembo'e aguã.
- ¹ Ovy'a ete 'rã heko vaiague omboguepaa va'e,
ojejavyague ojao'ipaa ma ramo.
- ² Ovy'a ete 'rã ava ixupe SENHOR "Heko vai va'e" nde'i ramo,
ipy'a re onhenhom aguã noĩ va'e.*
- ³ Xee ma ajejavyague namombe'ui teri jave
xekãgue voi inhymave ovy ko'ẽ nhavõ xepoaẽ ramo.*
- ⁴ Mba'eta ara py ha'e pyávy xere aendu va'ekue ndepo poyia.
Ha'e ramo xembaraeeta opa ovy kuaray puku py yy typaa ramo.
- ⁵ Ha'e gui ma ajejavyague amombe'upa ndevy,
xereko vaia nanhomivei.
Xejeupe aipoa'e: "Amombe'u 'rã SENHOR pe xereko vaia."
Ha'e ramo remboguepa ajejavyague.
- ⁶ Ha'e ramo ndevygua kuery ha'e javi tojapukai ndevy
ndejou aguã ha'eve teria ja.
Ha'e rami vy ha'e kuery re yy tyguaxu ouvy teĩ ndoguerovyi 'rã.

* 31:24 1 Coríntios 16.13 * 32:2 Romanos 4.4-8 * 32:3 Davi ojejavyague ha'e onhemombe'uague re ijayvua ma 2 Samuel 11.1-12.14 py oĩ.

- ⁷ Ndee ma anhemiaty.
 Xereraa jepe 'rã ajexavaia gui,
 ha'e xereraa jepeague re remoõ avy'a reve rogueroporaei aguã.
- ⁸ Aipo're: "Romo'arandu ha'e rombo'e 'rã tape reo aguã re.
 Ndere ama'ẽ ha'e romongeta 'rã.
- ⁹ Kavaju, mburika rami e'ŷ eme eiko.
 Ha'e kuery ijuru xã, e'ŷ vy hova regua reve vy 'rãe rerekoo.
 Ha'e rami e'ŷ ramo ndoikoi 'rã reipotaa rami" 're.†
- ¹⁰ Heko vai va'e ma ojexavai ete 'rã.
 Ha'e rã SENHOR re ojerovia va'e ma omboaxya rupi 'rã oguereko.
- ¹¹ Pendereko porã va'e, perovy'a ke SENHOR, pevy'a ete.
 Pevy'aa rupi peporaei atã,
 pendep'y'a re teko porã oĩa va'e ha'e javi.

33

- Opa mba'e moingoare ha'e opena va'e pe oporaeia*
- ¹ Pendereko porã va'e, perovy'a SENHOR!
 Anhetẽ rupi ikuai va'e ogueroporaeia ma ha'eve va'e.
- ² Penema'endu'a SENHOR re ixã reta va'e reve pembojoguy vy.
 Ixupe peporaei mbaraka dez ixã va'e reve.
- ³ Pemonhendu mboraei pyau,
 pembopu ke pevy'aa rupi.*
- ⁴ Mba'eta SENHOR ayvu ma anhetẽ ete va'e,
 ha'e mba'emo ojapo ha'e javi rupi ojeroviapay oiko.
- ⁵ Oguerovy'a 'rã heko porã ha'e ha'evea rami joguereko va'e.
 Yvy jave re oĩ SENHOR porayvua.
- ⁶ Yva ma oayvu py rive ojapo raka'e,
 ijayvuẽ gui yva regua ha'e javi ikuai.
- ⁷ Yy avi omboaty raka'e ye'ẽ tuvixa va'erã,
 ono'õ reta vy omonyẽ hendarã va'ekue.
- ⁸ Yvy jave re pendekuai va'e, pemboete SENHOR.
 Yvy re pendekuai va'e ha'e javi, henonde pejererokyjea rupi pendekuai.
- ⁹ Mba'eta ijayvu ramo rive opa mba'e ojekuaa,
 ha'e ijayvua rupi opa mba'e oiko raka'e.*
- ¹⁰ SENHOR omboaxa rivepa 'rã yvy regua kuery onhembopy'a okuapya,
 ombovaipa 'rã ha'e kuery ojapoxe va'e.
- ¹¹ Ha'e rã SENHOR onhembopy'aa ma ndoaxa rivei 'rã raka'e rã peve guarã,
 opy'a re omoõ va'e oĩ 'rã ta'y jevy-jevy ikuiaia peve.
- ¹² SENHOR pe "Oreruete" he'i va'e regua ma ovy'a ete 'rã,
 ojeupe guarã ae oiporavo rire.
- ¹³ Yva guí SENHOR oma'ẽ oiny vy
 oexapa 'rã avakue ra'y kuery ikuiaia.
- ¹⁴ O'amba gui oexapa yvy regua kuery.
- ¹⁵ Peteĩ-teĩ kuraxõ apoare
 oexapa ha'e kuery ojapo va'e ha'e javi.
- ¹⁶ Nda'ipoi huvixave oxondaro kuery po'akaa rupi oo jepe va'erã,
 ojerovia rei va'e teĩ ombaraetea py rive ndoo jepei 'rã.
- ¹⁷ Kavaju voi nanhombopo'akai 'rã.
 Imbaraete teĩ ndogueraa jepei 'rã avave rei.
- ¹⁸ Ha'e rã SENHOR ma oma'ẽ 'rã oiny henonde ojererokyjea rupi ikuai va'e re,

† 32:9 Apy ma Nhanderuete ijayvu nhandevy. * 33:3 Apocalipse 5.9, 14.3 * 33:9 Hebreus 11.3

- omboaxy aguã oarõ okuapy va'e re.
- ¹⁹ Ha'e kuery rekovea ogueraa jepe 'rã omanoa gui,
karuai jave voi opena 'rã okuave aguã rami.
- ²⁰ Nhanenhe'ẽ py nharõ SENHOR nhanepytyvõ aguã,
nhanderepya ha'e mba'emo vai jokoa oiko ramo.
- ²¹ Hexe ae nhanekuraxõ ov'y'a 'rã,
hery iky'a e'ŷ va'e re jajerovia ramo.
- ²² SENHOR, orerereko ke oremboaxya rupi,
ndee ae roarõ ramo.

34

- "Peikuaa pota SENHOR porayvua re", he'ia*
 Abimeleque renonde Davi inhakã porã e'ŷa rami onhemoingo ramo omoxẽ jave oo vy
 mboraeirã ombopara va'ekue (1 Samuel 21.10-15).
- ¹ Ára nhavõ xema'endu'a porã 'rã SENHOR re.
 Ixupe aporaei riae 'rã.
- ² Xenhe'ẽ py voi aporaei 'rã SENHOR pe.
 Ha'e ramo yvyigue'i oendu vy ov'y'a 'rã.
- ³ Pemboete ke SENHOR xereve,
 peteĩ rami jarovy'a hery.
- ⁴ SENHOR pe ajapukai ramo xere opena karamboae.
 Xereraa jepe guive akyjea ha'e javi gui.
- ⁵ Pema'ẽ hexe, ha'e ramo penemoexakã 'rã.
 Pendere noïvei 'rã peximbaa.
- ⁶ Xee ajexavai vy ajapukaia SENHOR oendu vy
 xereraa jepe karamboae opa mba'e py aiko axya gui.
- ⁷ SENHOR renonde ojererokyjea rupi ikuai va'e yvýry ma
 ixuguigua anjo oiko ogueraa jepe aguã.
- ⁸ Peikuaa pota pexa aguã SENHOR porayvua.
 Ovy'a ete 'rã hexe onhemi va'e kuery.
- ⁹ SENHOR rembiporavo pendekuai va'e, pendekuai henonde pejererokyjea rupi,
 mba'eta ha'e rami ikuai va'e pe ndoatai 'rã mba'eve rei.
- ¹⁰ Guary ra'y kue'iry ojexavai ha'e oendu 'rã karuai.
 Ha'e rã SENHOR oeka va'e pe ma mba'emo porã ndoatai.
- ¹¹ Xera'y kuery, peju ke, pejapyxaka xeayvu re.
 Xee rombo'e 'rã SENHOR renonde pejererokyjea rupi peiko aguã re.
- ¹² Peẽ kuery tu pendekove reve peikoxe
 ha'e peikove pukuxe, iporã va'e rupi pevy'a aguã?
- ¹³ Ha'e rami ri vy pejoko peneapekũ mba'emo vaia rupi pendeayvua gui,
 pendejuru guive pejoko apu gui.
- ¹⁴ Pejep'e mba'emo vai gui, iporã va'e rupi anho peiko.
 Peka peteĩ rami pendekuai aguã, penhea'ã ha'e rami aguã re ae.
- ¹⁵ Heko porã va'e re SENHOR oma'ẽ 'rã oiny,
 ojapyxaka oendu aguã ojapukaia.
- ¹⁶ Ha'e rã mba'emo vai apoa ma SENHOR ndoexaxe,
 yvy gui omboguepa 'rã ha'e kuery re ima'endu'aa.*
- ¹⁷ Ha'e rã heko porã va'e ojapukai ramo ma SENHOR oendu 'rã,
 ogueraa jepe 'rã oiko axya ha'e javi gui.
- ¹⁸ SENHOR nonhemombyri 'rã opy'a py nda'evei va'ea gui,
 ogueraa jepe 'rã onhe'ẽ py ojexavai va'e.
- ¹⁹ Mbovykue rei e'ŷ 'rã oiko heko porã va'e ojexavai aguã.

* 34:16 1 Pedro 3.9-12

- Ha'e rami teĩ SENHOR ogueraa jepe 'rã ha'e nunga ha'e javi gui.
- ²⁰ Opena 'rã ikägue ha'e javi re,
neĩ peteĩ ma nomopẽ ukai 'rã.*
- ²¹ Teko vai ae ojuka 'rã heko vai va'e.
Heko porã va'e ndoayvui va'e kuery ombopagaa 'rã.
- ²² Ha'e rã guembiguai kuery rekove ma SENHOR oepy 'rã.
Hexe ojerovia va'e regua peteĩve nombopagaai 'rã.

35

- Hovaigua kuery ombopaga aguã re ojerurea ague*
Mboraeirã Davi ombopara va'ekue.
- ¹ SENHOR, emoingo axy ke xemoingo axy va'e kuery,
epu'ã xere opu'ã va'e re.
- ² Eru hu'y jokoa ha'e nemo'ãa tuvixa va'e,
epu'ã ejuvy xerepy aguã.
- ³ Eru hu'y guaxu,
ha'e ejoko xerakykue monhaa kuery.
Xenhe'ẽ pe aipo're:
“Xee ma ndereraa jepaea.”
- ⁴ Tove xejukaxe okuapy va'e nda'evei nho ta'ikuai ha'e toximba.
Xere ijayvu mbegue rei va'e toguevipa oximba reve.
- ⁵ Ta'ikuai mba'emo pire yvytu omboveve heravy va'e rami,
SENHOR-a guigua anjo omondyipa ramo.
- ⁶ Tojevy ju tape kyjea xxyi va'e rupi,
ha'e SENHOR-a guigua anjo toakykue monha.
- ⁷ Mba'eta mba'e py e'ŷ ha'e kuery xembo'axe okuapy nhuã py,
mba'e py e'ŷ yvy ojo'o xerekovea oipe'a aguã.
- ⁸ Ha'e ramo xerovaigua kuery tokanhymba xapy'a
noexa'ãvei ma jave.
Ha'e kuery ae to'a nhuã nhemi rupi ojapo va'ekue py.
Ha'e va'e py ae ho'a vy tokanhya.
- ⁹ Ha'e ramo xenhe'ẽ py xee avy'a 'rã SENHOR re,
xereraa jepeague re xema'endu'a 'rã.
- ¹⁰ Xerete ha'e javi py aipoa'e 'rã:
“SENHOR, mava'e nda'u ndee rami guarã oiko?
Mba'eta ndee ma ojexavai va'e reraa jepe 'rã imbaraeteve va'e gui.
Ndovy'ai va'e ha'e iporiaukue'i reraa jepe 'rã imbojexavaia kuery gui.”
- ¹¹ Heko vai va'e kuery opu'ã vy
xere ijayvu 'rã xee aikuaa va'e rupi e'ŷ.
- ¹² Mba'emo porã ajapoague rekivia mba'emo vai ha'e kuery ojapo xere,
xerekove omokanhyme vy.
- ¹³ Ha'e gui xee ma ha'e kuery imba'eaxy ramo
ajukue vaikue py anhemonde va'ekue.*
Xepy'a vai aikovy va'ekue akaru e'ŷ re,
xeakã amboguejy reve anhembo'e ainy.
- ¹⁴ Ha'e kuery re xepy'a vai aikovy xeirũ ae'i re rami, xeryvy re rami ae.
Jexavai gui ajero'a rei'i aikovy oxy re ojae'o va'e rami.
- ¹⁵ Ha'e rã xee anhepyxanga ramo
ha'e kuery ov'y'a vy onhemboaty okuapy xerovai.

* 34:20 Kova'e ayvu rami vy Jesus omano jave ikägue nomopẽai (João 19.28-37). * 35:13 Ajukue vaikue py onhemonde 'rã ipy'a vai vy (Salmo 30.11; Mateus 11.21).

- Omboetepy e'ŷ neĩ xee aexa va'ety e'ŷ ijayvu rei okuapy xere.
- ¹⁶ Ngarua py opa marã ov'y'a va'e rami
ha'e kuery haĩ jekyty okuapy xere.
- ¹⁷ SENHOR, raka'e peve 'rã tu rema'ẽ rive?
Eraa jepe xerekove ha'e kuery ipoxya gui,
guary kuery gui epy xerekove.
- ¹⁸ Ha'e ramo xee roquerovy'a 'rã heta va'e kuery ijatya py.
Ndevy aporaei 'rã heta mbyte.
- ¹⁹ Ha'e rã ndaxerayvui rive va'e ma tovy'a reive eme.
Mba'e py e'ŷ xere nda'ija'ei va'e toxapymi reive eme.*
- ²⁰ Peteĩ rami ikuai aguã re e'ŷ ae ha'e kuery ijayvu.
Ha'e rami 'rãgue py yvy re ikuai rive'i va'e ombotavy aguã re anho jogueroayvu
okuapy.
- ²¹ Ijuruja-rujai 'rã okuapy xere.
Ha'e vy aipoe'i 'rã:
“Jajopy ma, jajopy ma teve!
Mba'emo ojapo rã nhanderexa py ae jaexa.”
- ²² Ha'e rami teĩ ndee SENHOR rexia reiny ha'e kuery ikuiaia.
Ha'e rami vy ekyrirĩ eme.
SENHOR, ejep'e aeme xea gui.
- ²³ Emyĩ, evy ke xemboeko porã aguã.
Xe-SENHOR Xeruete, eikuua uka xerekoo porãa.
- ²⁴ SENHOR Xeruete, xerekoo re eikuua pota nderekoo porãa rupi.
Ejapo eme xere ha'e kuery ov'y'a rei okuapy aguã rami.
- ²⁵ Ha'e kuery aipo te'i eme opy'a py:
“Aŷ ma oiko ma jaipotaa rami!
Aŷ ma nhamomba 'rã!' te'i eme.
- ²⁶ Ha'e rami 'rãgue py toximba, tojekuaa heko vaia
ajexavai rã ov'y'a rei okuapyague re.
Ta'ikuai oximba ete va'e
xerovai onhemboyvate rei rire.
- ²⁷ Ha'e rã xerekoo porãa oguerovy'a va'e ma
toporaei okuapy ov'y'aa rupi.
Ha'e kuery ma aipo te'i riae: “Omboetepy toiko SENHOR,
hembiguai kuery ikuai porã rã ov'y'a va'e.”
- ²⁸ Xee avi xeayvu reve xema'endu'a 'rã ha'evea rami rejapoa re.
Ára pukukue re aporaei 'rã ndevy.

36

Avakue reko vaia ha'e Nhanderuete reko porãa re ijayvua
Jogueroporaei va'e pe Davi SENHOR rembiguai ombopara va'ekue.

- ¹ Heko vai va'e py'a re ma oĩ heko vaixea anho.
Ha'e kuery re noĩ SENHOR renonde ojererokyje aguã.*
- ² Mba'eta teko vai ojapo 'rã ojejou porã rei aguã rami rive.
Ha'e vy aipoe'i 'rã ojeupe: “Opa marã aiko teĩ avave rei ndoikuai 'rã,
neĩ ndaxejou vai 'rã guive”, he'i teĩ.
- ³ Ijuru gui ayvu oẽ va'e ma ayvu vai anho, ha'e nhombotavyarã.
Hi'arandua rupi ve'ŷ oiko, joupe ndojapo porãvei ma guive.
- ⁴ Ngupa py voi opa mba'e vai re rive onhemboyvate.
Tape iporã e'ŷ va'e rupi anho ooxe,

* 35:19 João 15.25 * 36:1 Romanos 3.18

- ndojejokoi guive mba'emo vai py.
- ⁵ Ha'e rā ndee SENHOR, ndeporayvua ma yva peve 'rā oo,
arai peve 'rā oo ojeroviapy reikoa.
- ⁶ Nderekō porāa ma ndevyguā yvyty rami tuvixa,
ha'e gui ne'arandua ma yvykua puku rami.
Ndee SENHOR rejapo 'rā avakue ha'e mymba okuave aguā rami.
- ⁷ Xeruete, ndeporayvua ma ha'eve ete!
Ha'e nunga rupi ae avakue ra'y kuery onhemi 'rā ndepepo 'ā py.
- ⁸ Ndero py orerevyatā 'rā mba'emo porā re anho,
ha'e rā roy'u aguā ma orembovy'a va'e anho reme'ē.
- ⁹ Mba'eta ndere ae oī yvu tekove me'ēa.
Nerekakāa py anho roexa 'rā hexakā va'e.
- ¹⁰ Ndekuua va'e kuery pe exa uka riae reayvua,
ha'e nderekō porāa eikuua uka anhetē rupi ipy'a va'e pe.
- ¹¹ Ojee rive ojerovia va'e kuery topyrō eme xere,
neī heko vai va'e tojapo eme ajepē'a aguā rami.
- ¹² Mba'eta teko vai rupi ikuai va'e ho'apa 'rā.
Ha'e kuery ho'aague gui nopus'āvei 'rā guive.

37

- “Heko vai va'e ovyy'aa opa voi 'rā” he'ia*
- Mboraeirā Davi ombopara va'ekue.
- ¹ Heko vai va'e kuery rexā teī eroangeko eme,
ejou vai eme guive joapo vai rei va'e oguerekopa ramo.
- ² Mba'eta ha'e kuery ma are'ŷ re ipiru 'rā nhuū rami,
jai rogue pyau ipirua rami 'rā okanhy.
- ³ Ejerovia SENHOR re, nderekō porā tema.
Eiko tema yvy re, anhetē va'e re anho eī atā.*
- ⁴ SENHOR ae erovy'a.
Ha'e ramo ha'e ojapo 'rā ndepy'a py reipotaa oī va'e.
- ⁵ SENHOR po py emboaxa reikoa, hexe ejerovia guive.
Ha'e ramo ha'e ojapopa 'rā.
- ⁶ Ha'e vy ojapo 'rā nderekō porāa tataendy rami ojekuaa aguā,
anhetē rupi reikoa oikuua uka 'rā kuaray mbyte rami.
- ⁷ Epytu'u ke SENHOR re, ha'e earō.
Eroangeko eme avakue mamo rā ooa rupi ojoupa ramo,
neī joapo vaixea rupi ikuai ramo voi.
- ⁸ Ejepē'a ndevaia gui, ndepoxyve eme.
Nda'evei opa marā ndepy'a aguā.
Ha'e ramo e'ŷ vy ndee ju 'rā nderekō vai.
- ⁹ Mba'eta heko vai va'e ma omombaa 'rā.
Ha'e rā SENHOR oarō va'e ma ikuai porā 'rā yvy re.
- ¹⁰ Are'ŷ'i re heko vai va'e ndoikovei 'rā.
Oīague py reka teī nderejouwei 'rā.
- ¹¹ Ha'e rā oiko rive'i va'e ma ikuai porā 'rā yvy re,
ha'e kuery ovyy'a 'rā okuapy ikuai porā aguā ojou vy.*
- ¹² Heko vai va'e onhembopy'a 'rā heko porā va'e rovai,
haī jekyty 'rā ojukaxe vy.
- ¹³ Ha'e ramo teī SENHOR ojojai 'rā,
opaga aguā ára ovaē rai'i maa oikuua vy.

* 37:3 Apy “Yvy” he'ia ma ojeupegua kuery pe Nhanderuete oeja va'ekue re ijayvu vy. * 37:11 Mateus 5.5

- ¹⁴ Heko vai va'e kuery oekyi okyxe, guapa guive oipira 'rā
ojuka aguā iporiaukue'i ha'e ojexavai rei va'e,
ojuka aguā tape porā rupi oiko va'e.
- ¹⁵ Ha'e rami teī ikyxe py ae 'rā oikutua ipy'a re,
hapa avi omopēmbaa 'rā.
- ¹⁶ Peteī heko porā va'e mbovy'i oguerekō teī
mbovy e'ŷ heko vai va'e oguerekopa va'e gui ovareve.
- ¹⁷ Mba'eta heko vai va'e po'akaa ma omombaa 'rā.
Ha'e rā heko porā va'e re ma SENHOR onhangareko.
- ¹⁸ SENHOR oikuua anhetē rupi oiko va'e oikoa,
ha'e kuery pegua ma raka'e rā peve guarā oī.
- ¹⁹ Mba'emo vai oiko teī ha'e kuery noximbai 'rā,
karuaia ára teī hevyatāmba 'rā.
- ²⁰ Ha'e rā heko vai va'e ma okanhymba 'rā.
Nhuñdy rami 'rā SENHOR rovaigua kuery okanhymba,
hataxīrā rive nhuñ okai vy ojeapoa rami.
- ²¹ Heko vai va'e ma oiporu aguā re ojerure teī nomboekoviai 'rā.
Ha'e rā heko porā va'e ma nhomboaxy vy ome'ẽ rive 'rā mba'emo.
- ²² SENHOR ogueroayvu porā va'e hekoa 'rā yvy re.
Ha'e rā ijayvu vaia va'e ma okanhymba 'rā.
- ²³ Heko porā va'e SENHOR oikoa oguerovy'a vy
ojapo 'rā oī atā aguā rami.
- ²⁴ Ha'e kuery ho'a teī nda'itui 'rā yvy rupi,
ipo re SENHOR ojopy rā.
- ²⁵ Xekunumi va'ekue ri aŷ ma xetuja'i ma
va'eri xee ndaexai teri heko porā va'e re nopenaai rā,
neī hamymino kuery voi mbojape re ojerurea rupi ikuai rā ndaexai.
- ²⁶ Ha'e kuery joayvua rupi vy oiporuka 'rā joupe.
Hamymino kuery voi joapo porā va'e ikuai.
- ²⁷ Ejep'e ke mba'emo vai gui,
ejapo iporā va'e anho.
Ha'e rami vy reiko riae 'rā.
- ²⁸ Mba'eta SENHOR oguerovy'a heko porā va'e.
Ndoeja rivei 'rā ojeupeguia iky'a e'ŷ va'e kuery.
Ha'e kuery re opena 'rā raka'e rā peve guarā.
Ha'e rā heko vai va'e ramymino kuery ma omombaa 'rā.
- ²⁹ Heko porā va'e kuery ikuai porā 'rā yvy re,
ha'e py ikuai 'rā raka'e rā peve.
- ³⁰ Heko porā va'e ijayvu 'rā 'arandu re,
anhetē rupi meme 'rā ijayvu.
- ³¹ Opy'a re omoī 'rā Nguuete guigua lei.
Na'ikangyi 'rā guive oikoa rupi.
- ³² Heko porā va'e re ma heko va'e va'e ojukaxe vy
oma'ẽ mbegue teī
- ³³ SENHOR nomboaxai 'rā ipo py,
nombopaga ukai 'rā guive omboayvua rā.
- ³⁴ Earō ke SENHOR, ha'e ixuguigua tape rupi eiko.
Ha'e ramo nemboyvate 'rā yvy re reiko porā aguā,
ha'e rexā 'rā heko vai va'e omombaa rā.
- ³⁵ Xee aexa va'ekue heko vai va'e ipo'akaa,
yary Líbano regua rami ipo'akave ovy opa rupi.
- ³⁶ Ha'e gui teīgue ju aaxa vy ama'ẽ rā okanhy ma ra'e.

- Aeka teĩ ndajouvei ma.
- ³⁷ Eikuaa pota ke anhetẽ rupi ikuai va'e re,
exa pota heko porã va'e oikoa re.
Mba'eta mby'a porã re ikuai va'e oguereko 'rã guamymino kuery.
- ³⁸ Ha'e rã ojejavypa rei va'e ma omombaa voi 'rã.
Heko vai va'e ramymino kuery voi omombaa 'rã.
- ³⁹ SENHOR gui ae ou heko porã va'e oo jepe aguã.
Ha'e kuery ojexavaia ára py hexe onhemi aguã onhemoi.
- ⁴⁰ SENHOR oipytyvõ ha'e ogueraa jepe 'rã,
heko vai va'e po gui oipe'a 'rã ogueraa jepe vy,
hexe onhemi ramo.

Ojejavague gui ojeko rerovaa rupi ijayvua ague
Mboraeirã Davi ombopara va'ekue nhomoma'endu'a aguã.

38

- ¹ SENHOR, ndepoxya rupi e'ŷ ke xemongeta,
ndevaia rupi e'ŷ ke xembopaga.
- ² Mba'eta xere nderu'y onhexyvõ ae,
ha'e ndepo poyi xe'áry oĩ.
- ³ Ndepoxy ramo xero'o naexaïvei,
xekägue voi naexaïvei ajejavague re.
- ⁴ Mba'eta xeakã áry peve ajejavague oo,
ndaropo'akavei guive mba'emo ipoyi va'e rami.
- ⁵ Xeai ivaipa rei, ipeupa ma ový,
ajekoreague re.
- ⁶ Ojero'a rei va'e rami anhenhandu naxembaraetevei vy.
Xepy'a vai rei aikovy ára pukukue re.
- ⁷ Xekupe oiko'õ rei,
noïvei ma xero'o rexäia.
- ⁸ Ajexavai aikovy, naxembaraetevei ma.
Xepy'a py nda'evei ete vy xepoaë aikovy.
- ⁹ SENHOR, xee aipota va'e ha'e javi ndevy pe meme amboaxa,
xepoaëna nerendu e'ŷi 'rã.
- ¹⁰ Xekuraxõ ma otyty atã xembaraetea opa ramo,
ndaxerexa pyxovei guive.
- ¹¹ Xereve xeirũ kuery ikuai va'ekue ojepe'apa ma xemba'eaxyäa gui,
xeretarã kuery voi onheguämba.
- ¹² Xerekove oipe'axe va'e onhembopy'a okuapy xejopy aguã,
xevy ojapo vaixe va'e opa marã ijayvu okuapy,
ára pukukue re oikuuaa pota xembotavy aguã re.
- ¹³ Ha'e rami teĩ xee ma ijapyxa e'ŷ va'e rami aendu rive,
ijayvu e'ŷ va'e rami nambovai.
- ¹⁴ Oendu e'ŷ va'e rami ajeapo,
xejuru ndaipe'ai ambovai aguã.
- ¹⁵ Mba'eta SENHOR, ndee ae roarõ.
SENHOR Xeruete, ndee ma xere reikuuaa pota 'rã.
- ¹⁶ Mba'eta aipoa'e jepi: "Ha'e kuery tovy'a rei eme xere,
xepyxry rã xerovai opu'ã rei e'ŷ aguã", ha'e.
- ¹⁷ Mba'eta xee ha'a aguã rami aiko,
xejee nda'eveia aendu riae tema.
- ¹⁸ Ha'e rami vy amombe'u xerekovaia.
Ajejavague py aendu mboriau.

- ¹⁹ Ha'e rã xerovaigua kuery ma hexaĩ ha'e imbaraete.
Heta ikuai mba'e py e'ŷ xere nda'ija'ei va'e.
- ²⁰ Ha'e rami ae ikuai ojapo porã va'ekue pe ojapo vai va'e.
Xerovaigua ikuai, teko porã rupi aiko rã.
- ²¹ SENHOR, xepytyvõ e'ŷ eme.
Xeruete, ejep'e eme xea gui.
- ²² SENHOR, xereraa jepea,
ejapura ke xerepy aguã.

Imarãa re ijayvua

Jogueroporaei va'e Jedutum pe Davi ombopara va'ekue.

39

- ¹ Xejeupe ae aipoa'e va'ekue: "Aŷ aiko kuaa pota 'rã
xeayvu py ajejavy e'ŷ aguã.
Amboty 'rã xejuru,
heko vai va'e xerenonde ikuai jave" ha'e va'ekue.
- ² Ha'e rami vy akyrirĩ, neĩ iporã va'e rupi voi ndaxeayvuvei.
Ha'e rami teĩ haxy aenduve tema.
- ³ Xepy'a re aendu tata rami hendy va'e.
Ha'e aikuaa pota rã hendyve ovy.
Ha'e ramo xee anhemombe'u vy aipoa'e:
- ⁴ " SENHOR, eikuaa uka ndaikovei aguã ára,
ha'e mbovy ára ete'i ma 'rã pa aiko,
xemarãa aikuaa aguã.
- ⁵ Ndee aikoa ára reme'ẽ va'ekue mokoĩ, mboapy po puku-a'i rami ipuku aguã.
Nerenonde aikoa opa rive va'erã.
Anhetẽ ae avakue ha'e javi oĩ atãve va'ekue teĩ mba'e e'ŷ meme ikuai.
- ⁶ Ha'e rami ae avakue oaxa 'rã ov y kuaray'ã rami.
Heko eta reia mba'everã ndovarei.
Ojeupe guarã opa marãgua omoĩ porã teĩ ndoikuuai guive mava'e 'rã pa ogueraa.
- ⁷ Ha'vy xee, SENHOR, mba'e tu xee arõ?
Ndee ae xee roarõ va'e.
- ⁸ Xereraa jepe ke xerekovaigua ha'e javi gui.
Xembojaru uka eme heko vai va'e pe.
- ⁹ Akyrirĩ ha'e ndaxeayvui va'ekue
ndee ae ha'e rami xemoingo ramo.
- ¹⁰ Eipe'a ke xegui ndee xemoingo axya.
Ndepo ipoyi ramo akanhy ma avy.
- ¹¹ Avakue ojejavypaague re ndeayvu ete ha'e rembopaga vy
rembovaipa 'rã ha'e kuery oguerovy'a va'ekue, vixo'i mba'emo ho'upaa rami.
Avakue ikuai va'e ma opa rive va'erã meme.
- ¹² SENHOR, endu ke ajerurea.
Xerepy aguã re ajapukai ramo ejapyxaka.
Ekyrirĩ eme xerexay rã rexay vy,
mba'eta nerendenon ma mombyry guigua rami rive aiko,
oguata rei va'e aiko xeru kuery ikuaiague rami avi.*
- ¹³ Eikuua potave eme xere,
akanhy avy e'ŷ re avy'a ju aguã."

Salmo 70.1-5

Jogueroporaei va'e pe Davi ombopara va'ekue.

* 39:12 Hebreus 11.13; 1 Pedro 2.11

40

- ¹ Arõ SENHOR ajerovia ete reve.
 Ha'e ramo xere oikuaa pota vy
 oendu xereraa jepe aguã re ajapukaia.
- ² Ha'e rami vy xerenoẽ yvykua py akanhyague gui,
 yapo hu'ũ rei va'e mbyte ha'aague gui.
 Ha'e gui xepy omoĩ atã ju itaova áry.
- ³ Ha'e xejuru py omoĩ mboraei pyau
 Nhanderuete arov'y a aguã.
 Ha'e nunga heta oendu vy
 ojererokyje 'rã SENHOR renonde, hexe ojerovia 'rã guive.
- ⁴ Ovy'a ete 'rã SENHOR re ojerovia oikovy va'e.
 Ha'e kuery nda'ikuai 'rã ojee anho rei ojerovia va'e rami,
 neĩ apu rupi oiko va'e rami guive.
- ⁵ SENHOR Xeruete, heta ete ikuai iporã va'e remoingo va'ekue,
 orevy rejapo porã aguã re ndepy'aa guive.
 Ndereve joo ramigua ndoikoi.
 Nderekó ha'e javi amombe'u ta va'e rire
 namombe'upai 'rãgue.
- ⁶ Ndee ndereipotai mymba ajuka vy ame'ẽ ndevy.
 Neĩ mba'emo apy reve jejavya regua nereme'ẽ ukai.
 Ha'e rami 'rãgue py reipe'a xeapyxa.
- ⁷ Ha'e ramo xee aipoa'e: "Apy ma aĩ.
 Kuaxia re ipara oiny xerekorã regua.
- ⁸ Ndee reipota va'e xee ajapoxe, Xeruete.
 Xepy'a re oĩ ndeguigua lei ajapo aguã", ha'e.*
- ⁹ Heta va'e kuery ijatya py
 amombe'u ayvu porã teko porã regua.
 Neĩ peteĩ henda py ma voi namombe'u e'ŷi.
 SENHOR, ndee ma reikuaa.
- ¹⁰ Xepy'a py ndaikuua uka e'ŷi ndeguigua teko porã.
 Arojapukai anhetẽ rupigua ha'e orereraa jepea reikoa.
 Ijaty va'e kuery gui namombe'u e'ŷi ndee oremboaxya ha'e ndeguigua anhetẽ va'e.
- ¹¹ Ha'e nunga rupi SENHOR, exa uka e'ŷ eme xemboaxya.
 Xemboaxya rupi riae ke xerereko,
 ndeguigua anhetẽ va'e rupi guive.
- ¹² Mba'eta mbovy e'ŷ ikuai mba'emo vai xejoko rei va'e.
 Xerekó vaia xerupity ma.
 Heta ete ramo ndaexapai.
 Xe'a xekã re ikuai va'e gui voi hetave.
 Xekuraxõ voi okanhy ma.
- ¹³ SENHOR, xereraa jepe na!
 SENHOR, ejapura ke xerepy aguã.
- ¹⁴ Xerekove oipe'axe va'e toximba,
 oximbaa anho toendu.
 Ajexavai ramo ov'y a rei va'e kuery
 oximba reve tojevypa ju guakykue katy.
- ¹⁵ Tove "Ha'evea rami! Ha'evea rami!" he'i rive okuapy va'e
 toximba nda'ijayvu kuaavei vy.
- ¹⁶ Ha'e rã ndereká va'e kuery ha'e javi ma tandererovy'a oporaei reve.
 Rejogueraa jepea oguerovy'a va'e

* 40:8 Hebreus 10.5-10

“ SENHOR ima'endu'a porāmby toiko!” te'i riae okuapy.
¹⁷ Ha'e gui xee ma iporiaukue'i, ojexavai rei'i va'e
 teĩ xere SENHOR opena porã.
 Ndee ma xepytyvõarã ha'e xerepyarã.
 Xeruete, ndeare eme ke!

Hovaigua kuery ijayvu reia gui Nhanderuete oepyague re ijayvua
 Jogueroporaei va'e pe Davi ombopara va'ekue.

41

- ¹ Ovy'a ete 'rã iporiaukue'i mboaxya kuery.
 Ha'e va'e kuery SENHOR ogueraa jepe 'rã nda'eveia ára.
- ² SENHOR oepy ha'e opena porã 'rã hekovea re.
 Ojapo 'rã yvy re ovy'a aguã rami.
 Nomboaxai 'rã hovaigua kuery po py ojavyky rei aguã.
- ³ SENHOR omombaraete ju 'rã imba'eaxygui.
 Imba'eaxy teĩ hupa ituia rejapo ha'eve rei'i aguã rami.
- ⁴ Ha'e gui xee aipoa'e: “ SENHOR, xemboaxy ke!
 Emonguera xerekovea, ndevy ajejavry rire teĩ” ha'e.
- ⁵ Xerovaigua kuery xere ijayvu vai vy
 “Raka'e tu omano 'rã, ha'e hery na'ima'endu'aavei 'rã?” he'i okuapy.
- ⁶ Ha'e kuery regua xerexa aguã ou vy ovare'ý va'e rupi 'rã ijayvu.
 Opy'a re mba'emo vai anho omoi.
 Oẽ vy ha'e nunga re teri rive 'rã ijayvu.
- ⁷ Ndaxerayvui va'e kuery ijayvu mbegue rei 'rã xere.
 Mba'emo vai rupi xere ijayvu vy
- ⁸ “Mba'eaxy vaikue hexe oĩ va'e gui rima imba'eaxy oupy,
 nopus'avei ma 'rã guive” he'i okuapy.
- ⁹ Xeirũ ayvvue vy ajeroviave va'ety voi
 opu'ã avi xerovai, xereve okaru va'ety ae.*
- ¹⁰ Ha'e rã ndee SENHOR xemboaxy ke.
 Xemopu'ã ju, ha'e kuery ambopaga aguã ojapo vaiague re.
- ¹¹ Ha'e nunga rupi xee aikuua ndee xemboaxya,
 mba'eta xerovaigua kuery pe ndaxereity ukai.
- ¹² Ha'e rami 'rãgue py anhetẽ rupi aikoa py xemombaraete,
 ha'e xemoi nerentonde raka'e rã peve guarã.
- ¹³ SENHOR Israel kuery Ruete toiko ima'endu'a porāmby
 jypy'i guive raka'e rã peve.
 Amém, amém.

Nhanderueteombojeroviaaty py oocea rami ijayvua ague
 Jogueroporaei va'e pe Coré ra'y kuery nhombo'e aguã ombopara va'ekue.

42

- ¹ Yy oxyry va'e gui guaxu oy'uxe va'e rami
 xenhe'ẽ py xee avi roeka, Xeruete.
- ² Xepy'a py aendu Nhanderuete re nda'evei etea, Nhanderuete oikove va'e re.
 Raka'e nda'u aa 'rã Nhanderuete renonde aĩ aguã?
- ³ Ara py ha'e pyávy xerexay re anho aiko akaru e'ý re.
 Ha'e ramia ja xevy aipo'ea riae: “Mamo tu oĩ Nderuete?”*
- ⁴ Ymave rupi aikoague re xema'endu'a vy

* 41:9 Judas rekorã re ijayvu ma voi Jesus ombo'a uka nhemi aguã re (João 13.18-30). * 42:3 Ipy'a vai oikovy mba'eta yvy mboae re heraa escravo-rã, Nhanderuete pegua templo gui mombyry. Ha'e py ma oocea oendu, Nhanderuete ombojeroviaxe vy.

xepy'a vai aikovy xenhe'ẽ py guive,
 mba'eta xema'endu'a heta va'e kuery reve aa ague re.
 Ajogueraa va'ekue Nhanderuete pegua oo katy.
 Rovy'aa rupi rojapukai rovy va'ekue roporaei reve,
 heta orekuai ngarua py.

⁵ Xenhe'ẽ, mba'e re tu ndeporiau ri?[†]

Mba'e re tu nda'evei rei reĩ xepy'apy py?
 Earõ tema Nhanderuete, mba'eta aroporaei nho 'rã.
 Ha'e ma Xeruete xepytyvõa oiko.

⁶ Xepy'a py aendu nda'evei etea.

Ha'e nunga rupi ndere xema'endu'a aikovy
 Jordão yvýry aikoa py, Hermom yvyty re ha'e Mizar yvy'ã'i re.

⁷ Peteĩ yvykua gui onhendu amboae yvykua peve ytu revovo.

Ha'e rami aendu ndeguigua yai xe'áry oaxa-axa va'e.

⁸ Ha'e rami teĩ ara nhavõ SENHOR oexa uka 'rã xemboaxy,
 ha'e pytõ nhavõ ou 'rã ixupe aporaei aguã,
 xenhe'ẽ Ruete pe anhembo'e aguã.

⁹ Nhanderuete xe'itaova pe aipoa'e:

“Mba'e re tu nderexarai xegui?
 Mba'e re tu ajexavai aikovy xerovaigua kuery xeavyky rei rã?” ha'e.

¹⁰ Mba'eta aendu xekägue ha'ypa va'e rami,
 xerovaigua kuery xere ijayvu rei ramo.

Ha'e kuery ijayvu vy
 “Mamo tu Nderuete oĩ?” he'i okuapy.

¹¹ Xenhe'ẽ, mba'e re tu ndeporiau ri?

Mba'e re tu nda'evei rei reĩ xepy'apy py?
 Earõ Nhanderuete, mba'eta aroporaei nho 'rã.
 Ha'e ma Xeruete xepytyvõa oiko.

43

Henda iky'a e'ŷ va'e py ooxea rami ijayvua ague

¹ Xeruete, xemboeko porã ke
 xere opu'ã va'e kuery gui.

Xereraa jepe avakue nhombotavy ha'e ijapu va'e gui.

² Mba'eta Xeruete, ndere ae anhemí.

Mba'e re tu naxeptyvõi?
 Mba'e re tu ajexavai aikovy xerovaigua kuery xeavyky rei rã?

³ Emboguejy nerexakã ha'e anhetẽ va'e,
 xereraa aguã ndevyguia yvyty iky'a e'ŷ va'e áry
 nembojeroviaaty oĩ va'e py.

⁴ Ha'e ramo aa aguã Xeruete pegua altar oĩa py,
 Xeruete arovya'a va'e renonde.

Xeruete, roqueroporaei 'rã mba'epu ixã reta va'e amonhendu reve.

⁵ Xenhe'ẽ, mba'e re tu ndeporiau ri?

Mba'e re tu nda'evei rei reĩ xepy'apy py?
 Earõ Nhanderuete, mba'eta aroporaei nho 'rã.
 Ha'e ma Xeruete xepytyvõa oiko.

Nhanderuete pe ojepy ukaa ague

Jogueroporaei va'e pe Coré ra'y kuery nhombo'e aguã ombopara va'ekue.

[†] 42:5 Apy “Xenhe'ẽ” he'ia ojeupe ae ijayvu vy.

44

- ¹ Oreruete, oreramoĩ kuery orevy omombe'u rã
roendu ma oreapyxa py
yma rupi rejapo va'ekue, ha'e kuery ikuai teri jave.
- ² Ha'e jave py ma ndepo py reipe'apa raka'e yvy regua kuery,
ikuaiague py oreramoĩ kuery ju remoĩ atã aguã.
Yvy regua kuery remoingo axy,
ha'e rã oreru kuery pe ma reme'ẽ opa rupi ikuai aguã.
- ³ Okyxé py e'ŷ ha'e kuery oipe'a yvy,
imbaraete vy e'ŷ guive ipo'aka.
Ha'e rami 'rãgue py ndepo, ndejyva ha'e nderova rexakãa py
rembopo'aka raka'e ha'e kuery reayvu vy.
- ⁴ Xeruete, ndee ma xeruvixave.
Rejapo Jacó kuery ipo'aka aguã.*
- ⁵ Ndee orepytvõ ramo orepo'aka 'rã orerovaigua kuery re.
Nderery rupi ropyrõ 'rã orere opu'ã va'e re.
- ⁶ Xerapa re e'ŷ ajerovia,
xekeyxe e'ŷ guive xereraa jepe 'rã.
- ⁷ Mba'eta ndee anho orerovaigua kuery gui orerepya reiko,
remoximba 'rã orere ija'e e'ŷ va'e.
- ⁸ Oreruete re ae rovy'a riae,
raka'e rã peve roporaei 'rã nderery rupi.
- ⁹ Ha'e rã aŷ ma ndee oremombo ma mombyry,†
ore kuery ju roximba aguã py oremoĩ.
Ndereovei guive orexonitaro kuery reve,
- ¹⁰ oreapo guive orerovaigua kuery gui ronhamba aguã rami.
Ha'e orere ija'e e'ŷ va'e kuery orereraa guembiguarã.
- ¹¹ Vexa'i rami oremboaxa ma orejuka aguã katy.
Oremoaimbã yvy regua kuery mbyte rupi.
- ¹² Mba'eve re'ŷ guive remboekovia ndevygua kuery,
hepykue re mba'eve rejou aguã e'ŷ guive.
- ¹³ Ndee oreapo orea katy'i ikuai va'e gui roximba aguã rami.
Orembojere okuapy va'e orere ijayvu rei ha'e orejojai rei.
- ¹⁴ Omombe'u pyrã rami oremoĩ yvy regua kuery mbyte.
Amboae regua oremboetea rupi e'ŷ ombovava-vava oakã.
- ¹⁵ Aximbaa oĩ riae xere,
xerova re aximbaa anho ojekuaa,
- ¹⁶ aendu xembojaru rei va'e, ijayvu vaikue-ikue va'e ojapukai ramo,
xerovaigua kuery xejukaxeaa aikuua vy.
- ¹⁷ Ha'e nunga ha'e javi orere oiko.
Ha'e rami teĩ ndorerexarai ndegui,
ndorojepe'ai guive ndereve guarã rejapo va'ekue gui,
- ¹⁸ orepy'a py ndorojevyi ha'ekue py,
ndorojavyi guive ndeguigua tape.
- ¹⁹ Oremou'ũ ukapa jagua-tuvy nhe'ẽ ikuiaia py,
ha'e manoalã py oreao'i.
- ²⁰ Oreruete rery gui orerexarai va'e rire,
ha'e rami e'ŷ vy tuuete ramigua rive pe orepo roupi va'e rire
- ²¹ ha'e ramo nda'u Oreruete ndoikuuai 'rãgue teve?
Ha'e ma nhandepy'a re oĩ va'e oikuapa.

* 44:4 "Jacó kuery" he'la ma Israel kuery re ijayvu vy. † 44:9 Apy ma ijayvu Nhanderuete ha'e kuery re hovaigua kuery ipo'aka aguã rami oejaague re.

- ²² Ha'e rami avi ndevyguia orekuai ramo ae
ko'ẽ nhavõ oremboaxaa orejukaarã pe.
Vexa'i ojukaa aguã katy heraa va'e rami orekuai.*
- ²³ Emyĩ ke! SENHOR, mba'e re tu reke?
Ema'ẽ ju ke orere, orejou vai riae eme.
- ²⁴ Mba'e re tu nderejexa ukavei?
Nderexarai teve roiko axy vy rojexavaia re?
- ²⁵ Mba'eta orerekovea ojexavai yvy ku'i peve,
orerete voi yvy re oje'apa maa rami.
- ²⁶ Epu'ã ke orerepy aguã.
Orereraa jepe ndeporayvua rupi.

Huvixarã Nhanderuete omoĩ va'e ha'e hembirekorã re ijayvua
Jogueroporaei va'e pe Coré ra'y kuery nhombo'e aguã ombopara va'ekue. Mboraei
mborayvu regua, “Yvoty lírio” he'ia py oporaeia rami oporaei aguã.

45

- ¹ Ayvu porã anho oĩ xekuraxõ re.
Huvixave peguarã ae kova'e mboraei ajapo.
Ombopara porã kuaa va'e rami 'rã xeayvu.
- ² Ndee ma avakue ra'y kuery ikuai va'e gui neporãve va'e.
Ndejuru gui ayvu porã anho oẽ.
Ha'e nunga rupi ae Nhanderuete nemoingo porã raka'e rã peve guarã.
- ³ Ndepy'a guaxuve va'e, emoĩ ndejee ndekyxe.
Emoĩ avi ndeyvatea ha'e ndepo'akaa.
- ⁴ Ndep'o'akaa rupi tereo kavaju áry,
anhetã va'e ha'e teko porã re vy.
Ha'e gui ndepo reiporu kuaa regua ojapo 'rã nhomondyipaarã ojekuaa aguã rami.
- ⁵ Oreruvixave, nderu'y ma hakua porã,
nderovaigua kuery kuraxõ re oike 'rã.
Ha'e ramo yvy regua kuery nenhe'ẽ rendua rupi 'rã ikuai.*
- ⁶ Xeruete, ndepo'akaa ma raka'e rã peve 'rã oĩ.
Ndep'o'akaa py anhetã rupi 'rã rejoguerek.
- ⁷ Rerovy'a teko porã, ha'e rã teko vai ma rejou vai.
Ha'e nunga rupi ae Nhanderuete Nderuete huvixaverã nemoĩ vy
neakã áry azeite omoĩ neirũ kuery gui ndererovy'ave vy.*
- ⁸ Ndeao ma mirra, aloés ha'e cássia gui heakuã porãmba.
Ndero ma marfim gui ojapo pyre.
Opy ma onhendu 'rã ixã va'e pu nembovy'aarã.
- ⁹ Kunhague ikuai 'rã nerembiguai, huvixave rajy kuery guive.
Reiporu kuaa regua re oĩ ndera'yxy,
ouro iporãve va'e Ofir guigua py ombojegua pyre.
- ¹⁰ Xerajy, endu ke. Eikuua pota xeayvua re.*
Nderexarai ke neretarã kuery ha'e nderu ro pygua kuery gui.
- ¹¹ Ha'e ramo ma huvixave oguerovy'a 'rã neporãa.
Ha'e ma nde-Senor ramo
henonde eĩ nerenapy'ã re.
- ¹² Ndea py ou 'rã Tiro pygua rajy mba'emo ome'ẽ va'erã reve.
Heta va'e kuery regua oguererekopave va'e ojerure 'rã reipytyvõ aguã.
- ¹³ Opy ma oĩ 'rã huvixave rajy pavẽ gui iporãve va'e.

* 44:22 Romanos 8.36 * 45:5 Apocalipse 19.11-16 * 45:7 Hebreus 1.8-9 * 45:10 Apy ma huvixave ra'yxy
pe ju ijayvu.

- Ijao ma ouro guigua py ojegua va'e.
¹⁴ Ijao potypa va'e reve ogueroikea 'rā heruvy huvixave renonde.
 Irū kunhataīgue hakykue ou va'e ogueru 'rā oīa py.
¹⁵ Ovy'a ete reve 'rā ogueru,
 huvixave ropy ogueroike 'rā.
¹⁶ Nderu kuery rekovia ndera'y kuery ikuai 'rā.
 Ha'e va'e kuery remoī 'rā huvixarā yvy jave re.
¹⁷ Xee ajapo 'rā nderery re ima'endu'aa riae aguā rami.
 Yvy regua kuery ndereroporaei 'rā raka'e rā peve.

Nhanderuete nhanhemiaty imbaraete va'e re ijayvua
 Jogueroporaei va'e pe Coré ra'y kuery kunhague oporaei aguā ombopara va'ekue.

46

- ¹ Nhanderuete ma nhanhemiaty imbaraete va'e oiko,
 nhandereraa jepearā jajexavai jave nhandea'i pyve oī va'e.
² Ha'e nunga rupi ndajakyjei 'rā amboae rami yvy ojeapo teī,
 ha'e yvyty ikuai va'e ye'ē mbyte py onhemombo,
³ yy opu'ā-pu'ā vy yjuipa,
 opu'ā ov yamo yvyty voi orryripa teī.*
⁴ Oī peteī yakā Nhanderuete pegua tetā mbyte rupi oxyry vy
 ombovy'a 'rā ha'e pygua kuery,
 Yvate ete va'e pegua oo iky'a e'ŷ va'e rupi voi.
⁵ Tetā mbyte ma Nhanderuete ae oī.
 Ha'e ramo neī peteī henda py ma voi ndoityai 'rā.
 Nhanderuete oipytyvō 'rā ko'ēmba guive.*
⁶ Yvy regua kuery haxēmba,
 tetā ikuai va'e omyī 'rā.
 Ha'e rā Nhanderuete oayvu omohendu ramo yvy tykupa 'rā.
⁷ Nhandereve ma oiko SENHOR ixondaro reta va'e,
 Jacó Ruete ae oī nhanhemi aguā.
⁸ Peju ke pexa SENHOR rembiapokue,
 yvy re mba'emo ombovaipaague.
⁹ Mba'eta yvy apy peve omomba joe opu'āa.
 Omopēmba guyrapa ha'e yvyra rakua,
 karóxa joe opu'āa pygua guive oapypa tata py.
¹⁰ Aipoe'i: "Pepytu'u peikuua aguā xee ae Penderuete aikoa.
 Xee ma xeyvate 'rā yvy regua kuery áryve,
 yvy jave re ete 'rā xeyvate", he'i.
¹¹ Nhandereve oiko SENHOR ixondaro reta va'e,
 Jacó Ruete ae oī nhanhemi aguā.

Nhanderuete yvy regua kuery ruvixave pe oporaeia
 Jogueroporaei va'e pe Coré ra'y kuery ombopara va'ekue.

47

- ¹ Ha'e javi regua kuery, pejepopete ke.
 Penema'endu'a Nhanderuete re, pevy'aa rupi penhendu.
² Mba'eta SENHOR yvateve ete va'e ma omboetevepy,
 huvixave yvateve va'e yvy jave re ipo'aka va'e.
³ Amboae regua kuery re nhanebopo'aka vy
 nhandepy guýry omoī yvy regua kuery.

* 46:3 Lucas 21.25-28 * 46:5 Tetā Nhanderuete pegua omombe'u porāve Apocalipse 21.23-22.5 py.

- 4** Nhandevy guarã oiporavo nhandekuai aguã.
Ha'e va'e yvy ma hembiayvu Jacó ojou porã va'ekue.
- 5** Nhanderuete oẽ ov yguerojapukai va'e mbyte rupi.
Mimby guaxu pu rupi guive SENHOR oaxa ov y.
- 6** Peporaei Nhanderuete pe,
peporaei porã ixupe.
Peporaei nhanderuvixave pe,
peporaei porã ixupe.
- 7** Nhanderuete ma yvy jave regua ruvixave oiko.
Ixupe peporaei mboraei porã rupi.
- 8** Nhanderuete ipo'aka 'rã yvy regua kuery re.
Oguapy 'rã tenda openaaty iky'a e'ý va'e py.
- 9** Yvy regua ruvixa kuery onhemboatypa vy
Abraão Ruete pegua ju ikuai.
Mba'eta Nhanderuete peguarã ae ikuai yvy regua kuery hu'y jokoa oguerek
va'ekue ha'e javi.*
Ha'e anho yvate ete va'e oiko.

Nhanderuete pegua tetã re ijayvua
Mboraerã Coré ra'y kuery ombopara va'ekue.

48

- 1** Yvate ete va'e ma SENHOR oiko,
ha'evea rami jaroporaei
Nhanderuete pegua tetã py.
- 2** Ixupeguia yvyty iky'a e'ý va'e ma yvate ete,
yvy jave re oguerovy'aa va'e.
Sião yvyty oĩ kuaray puku-a yke katy,
huvixave retã oĩa.
- 3** Tetã py oo ikorapa va'e rupi
Nhanderuete ojekuaa uka nhanhemi aguã yvate va'e rami.
- 4** Ha'e nunga rupi huvixa kuery nhomoirũmba jogueruvy va'ekue
okanhymba.
- 5** Tetã oexa vyve onhemondiyipa.
Okyjepa vy onhamba.
- 6** Ha'e py ngyje rive ipo'aka ha'e kuery re,
oendu guive haxy imemby ta va'e rami.
- 7** Yvytu kuaray oua katy gui ou va'e py
rembovaipa Társis gui kanoã ou va'ekue.
- 8** Omombe'ua rã nhaenduague rami
jaexa SENHOR ixondaro reta va'e pegua tetã py oiko va'e,
Nhanderuete pegua tetã py ae.
Nhanderuete omoõ atã 'rã raka'e rã peve.
- 9** Oreruete, renhomboaxya re orema'endu'a
ndeuygua templo mbyte roĩa py.
- 10** Oreruete, nderery oikuua pavẽ 'rã.
Ha'e rami vy ndevy oporaei rã yvy apy peve 'rã onhendu.
Ndepo py ha'evea rami rejoguerek.
- 11** Tovy'aa Sião yvyty re,
Judá rajy kuery avi tovy'a ne'arandua re.
- 12** Peguata ke Sião rupi,

* 47:9 Ha'e va'e jave py xondaro kuery omoõ 'rã imoiny hu'y jokoa nguvixa retã kora re, ixupeguia ikuia oikuua uka aguã (Cântico 4.4).

- ha'e javi rupi pejere.
 Peipapa torre ikuai va'e.
¹³ Peikuaa pota porā ikora yvatea re,
 ha'e pexa pota oo ikorapa va'e ikuai va'e re,
 raka'e rā ikuai va'erā pe pemombe'u kuaa aguā:
¹⁴ "Ha'e rami oiko Nhanderuete
 raka'e rā peve guarā.
 Nhandererekō 'rā nhamano peve."

Avakue okanhymba aguā re ijayvua
 Jogueroporaei va'e pe Coré ra'y kuery ombopara va'ekue.

49

- ¹ Ha'e javi regua, pendu pota ke pova'e.
 Yvy re pendekoa va'e ha'e javi, pejapyxaka ke.
² Yvyīgue'i ha'e yvatekueve,
 perekopa va'e ha'e pendeporiaukue'i ha'e javi.
³ Ha'e gui xejuru py xeayvu 'rā 'arandu re,
 xepy'a py 'arandua re anho 'rā aikuaa pota.
⁴ Ajapyxaka porā 'rā mba'emo re ombojoja vy ijayvua rā,
 ndoikuuai pyre amombe'u porāve 'rā ixā reta va'e pu rupi.
⁵ Mba'e re tu jexavaia ára py akyje 'rā?
 Xerakykue monha okuapy va'e ma teko vai rupi xejoko rei teī.
⁶ Ha'e kuery ma omba'e rei-rei re rive ojerovia,
 mba'emo oguerekō va'e re rive ov'y'a va'e.
⁷ Anhetē avave rei ndojogua kuaai 'rā guyvy rekove.
 Nhanderuete pe nome'ě kuaai 'rā jogueraa jepe aguā regua.
⁸ Mba'eta joekove jajogua aguā ma hepy vaipa.
 Raka'e rā peve nanhanhea'āvei 'rāgue
⁹ jajapo aguā oikove riae aguā rami,
 yvykua py oguejy e'ŷ aguā.
¹⁰ Ha'e gui jaexa rā hi'arandu va'e voi omano 'rā.
 Hi'arandu e'ŷ va'e ha'e ndoikuuai va'e joo rami meme 'rā opa,
 ha'e amboae pe ju oeja 'rā omba'e rei-reikue.
¹¹ Opy'a py aipoe'i: "Xero opa e'ŷ va'e hi'aĩ,
 xerekoague ma raka'eve rā ikuai va'e peguarā" he'i teī.
 Ha'e rami vy guery rupi ae 'rā omboery ovvy.
¹² Ha'e rami teī avakue ojejou porā va'eri nda'ikuai riae 'rā.
 Ha'e rami 'rāgue py mymba rami avi okanhy 'rā.
¹³ Ha'e rami ikuai ojee ae ojerovia va'e,
 hemimbo'e kuery ijayvua oguerovy'a va'e voi.
¹⁴ Ha'e rami teī vexa'i rami avi omboguejya 'rā yvykua py.
 Ha'e kuery re opena va'erā ma mano.
 Yvykua katy meme 'rā oguejy.
 Ha'e py ma iporāague hu'ūmba 'rā.
 Ha'e kuery rekoarā oĩ va'e ma yvykua ae.
¹⁵ Ha'e rā xerekove ma Nhanderuete oepy 'rā mano po'akaa gui,
 ojea py xereru vy.
¹⁶ Penhemondyi eme amongue imba'e rei-reipave ovvy rā,
 ha'e ngoo pygumarā mba'emo porā ojouve ovvy teī.
¹⁷ Mba'eta ha'e kuery omano vy mba'eve ndogueraai 'rā ngupive,
 mba'emo porā oguerekō va'ekue nomoirūvei 'rā.
¹⁸ Oikove teri jave ojejou porā 'rā,

ha'e ojeupe guarā ojou reta rā pavē ojou porā teī
 19 ha'e va'e oo avi 'rā tuu kuery ooague py,
 hexakā ndoexavei aguā py.
 20 Avakue ojou porāmby nai'arandui vy
 mymba rami avi 'rā okanhy.

Anhetē rupi Nhanderuete nhamboete aguā regua
 Mboraerā Asafe ombopara va'ekue.

50

- 1 SENHOR Nhanderuete Ipo'akapa va'e ijayvu vy
 oenōimba 'rā yvy regua kuery kuaray oua katy gui oikea katy peve ikuai va'e.
- 2 Siāo tetā iporāve ete va'e gui
 Nhanderuete oexa uka 'rā guxakāa.
- 3 Ha'e rami vy Nhanderuete ou 'rā, nokyrirī 'rā guive.
 Henonde ma ou tata nhomombaarrā,
 ijyvýry rupi yvytu vaikue hevovo.
- 4 Ojeupeda kuery omboayvu aguā ou.
 Ha'e rami vy yvate yva katy ojapukai 'rā,
 yvy katy guive. Ha'e vy aipoe'i:
- 5 "Pemboatypa ke xevygua kuery iky'a e'ŷ va'e,
 Ha'e va'e kuery ma mba'emo ome'ẽ va'e py xereve guarā onhemoingo va'ekue",
 he'i.
- 6 Yva gui oikuua uka heko porāa,
 mba'eta nhomboayvua ma Nhanderuete ae.
- 7 "Xevygua kuery, pejapyxaka ke, ha'e rā xee xeayvu 'rā.
 Israel kuery, amombe'u ta penderekokue.
 Xee ma Penderuete, 'Oreruete' pejea va'e.
- 8 Mba'emo peme'ẽague re e'ŷ xeayvu pēvy,
 mba'emo peapy reve xerenonde pemoi riae re e'ŷ guive.
- 9 Ha'e rami teī pendero gui xee ndaiptai vaka ra'y,
 neī kavara kora gui peme'ẽ va'e.
- 10 Mba'eta xerymba meme ikuai ka'aguy regua,
 yvyty áry mbovy rei e'ŷ vaka ikuai va'e guive.
- 11 Xee aikuua guyra yvyty áry ikuai va'e ha'e javi,
 xerymba meme ikuai vixo nhuūndy rupigua.
- 12 Xee akaruxe va'e rire aipo nda'ei 'rāgue pēvy,
 mba'eta yvy ma xemba'e itui,
 hexe ikuai va'e ha'e javi.*
- 13 Tyrā xee nda'u ha'u 'rā ri vaka ro'o?
 Ay'u 'rā ri nda'u kavara ruguy?
- 14 Any, Penderuete pe peme'ẽ perovy'aa,*
 ha'e Yvate ete va'e pe pejapo kuerei penhemboayvuague.
- 15 Pejapukai ke xevy pejexavaia ára.
 Ha'e ramo xee rogueraa jepe 'rā,
 ha'e rā peē ma xemboete 'rā", he'i.
- 16 Ha'e rā heko vai va'e pe ma Nhanderuete aipoe'i:
 "Nda'evei peē kuery xeayvua aeja va'ekue re pendeayvu aguā ha'ekue-'ekue rami,
 neī xereve guarā ajapo va'ekue rupi pendeayvu aguā.
- 17 Mba'eta napenhemō'arandu ukai,
 xeayvua napendu potai vy.

* 50:12 Atos 17.24-25 * 50:14 "Peme'ẽ 'rā perovy'aa", he'ia ma mboraei, e'ŷ vy nhandepy'a ha'e javi py nhamboetea re ijayvu vy (Hebreus 13.15).

- ¹⁸ Ha'e rã imonda va'e ma pexa vy perovy'a 'rã,
itavy rei va'e re guive penhemoirũxe vai.
- ¹⁹ Mba'emo vai re anho pendeayvu,
pendejuru py penhombotavya rupi anho pendekuai.
- ²⁰ Pendeayvu rei peiny penderyvy re,
pendeayvu vaikue-ikue 'rã pendexy pi'a re ae.
- ²¹ Ha'e rami pendekuai teĩ xee akyrirĩ ranhe va'ekue.
Ha'e ramo pexa'ã ndee ramigua ae xee aikoa re.
Ha'e rami teĩ xee romboayvu 'rãe.
Ha'e nunga ha'e javi amoimba 'rã pexaa py.*
- ²² Peẽ kuery Penderuete gui penderexarai va'e,
peikuaa pota pova'e re.
Ha'e rami e'ŷ ri ramo xee romondoropa 'rã,
ha'e ndoikoi 'rã penderepyara.
- ²³ Xererovy'aa ome'ẽ va'e ma xemboetea rupi ikuai.
Ha'e rami guape omoatyrõ va'e pe ma
aikuua uka 'rã Penderuete pendereraa jepea."

Davi onhemombe'u ha'e ojeko rerovaa rupi ijayvuague
Jogueroporaei va'e pe Davi ombopara va'ekue, Bate-Seba reve joguerekaoague re profeta
Natã ou vy ijayvu jave guare (2 Samuel 11.1-12.20).

51

- ¹ Xeruete, xemboaxy ke ndereko porãa rupi.
Opa mba'e py renhomboaxy rupi vy emboguepa ke ajejavyague.
- ² Xeky'a'o xerekoo vaia gui,
xejoi ke ajejavyague gui.
- ³ Mba'eta xee ma aikuua ae xerekoo vaia,
xema'endu'a riae aikovy ajejavyague re.
- ⁴ Nderovai ae ajejavy va'ekue, ndevy anho,
ndee rexaa py ajapo mba'emo vai.
Ha'e nunga rupi xee aikuua anhetẽ meme xere ndeayvua,
ha'evea rami xembopagaa guive.*
- ⁵ Xee ma tekoo vai py ma voi aiko'i va'ekue,
ha'i xererekoo'i guive xere oĩ ae ma ajejavy aguã.
- ⁶ Ha'e rã ndee ma orepy'a re anhetẽ va'e oĩ va'e rerovy'a va'e,
ha'e rami vy xepy'apy py reikuua uka 'arandua.
- ⁷ Xeky'a'o ke hissopo rogue py iky'a e'ŷ va'e ju aiko aguã,*
xejoi ke, yro'y xiĩ va'e gui xiĩ porâve va'e aiko aguã.
- ⁸ Ejapo ke oporaeia ha'e ovyy'aa rã aendu ju aguã rami,
kekägue remou'ũmba rire teĩ avy'a nho aguã.
- ⁹ Ema'ẽ eme ajejavyague re,
emboguepa ke xerekoo vaia.
- ¹⁰ Xeruete, xere emoĩ kuraxõ pyau iky'a e'ŷ va'e,
xenhe'ẽ py xembopyau xereitya ve'ŷ aguã rami.
- ¹¹ Xemoxẽ eme nerondenoo gui,
neĩ xegui eipe'a eme guive Nenhe'ẽ Ky'a E'ŷ.
- ¹² Xere emoĩ ju xereraa jepeague re avy'aa.
Xenhe'ẽ py xemombaraete ju xekyre'ŷ aguã rami.

* 50:21 Romanos 2.17-24 * 51:4 Romanos 3.4 * 51:7 Ha'e kuery reko rami vy sacerdote kuery joky'a'o vy hissopo rogue ojopy 'rã mymba ruguy oĩa. Ha'e va'e py ojejavy va'ekue áry omboayvi 'rã oiky'a'o aguã (Levítico 14.1-7; Hebreus 9.19). Ha'e rã apy ma Nhanderuete pe ojapukai ipy'a oiky'a'o aguã.

- ¹³ Ha'e ramo 'rāe ambo'e heko vai va'e kuery nderekō re,
ha'e ramo ojejavypa va'ekue ojeko rerova 'rā ndevy.
- ¹⁴ Xeruete, xereraa jepe ke tuguy amoēague gui,
Xeruete xereraa jepea.
Ha'e ramo aporaei reve arovya 'rā nderekō porāa.
- ¹⁵ SENHOR, eipe'a ke xejuru,
ha'e ramo rogueroporaei 'rā.
- ¹⁶ Mba'eta ndererovy'ai mymba rojuka vy rome'ẽ va'e.
Ha'e rami e'ŷ va'e rire xee ame'ẽ ma 'rāgue.
Mba'emo roapy reve rome'ẽ va'e guive ndererovy'ai.
- ¹⁷ Ndee Oreruete pe rome'ẽ rā rerovy'a va'erā va'e ma orenhe'ẽ py nda'eveia roendua.
Orep'y'a re rojejou vai ha'e ronhemboaxy ramo ma ndee Oreruete, noremboaxy e'ŷi
'rā.*
- ¹⁸ Emoingo porā ke Sião pygua kuery remboaxya rupi vy.
Emoatyrō uka ju Jerusalém tetā kora.
- ¹⁹ Ha'e rami vy rerovy'a 'rā teko porā rupi ikuai va'e mba'emo ome'ẽ ramo,
mba'emo oapy reve ome'ẽ va'e.
Ndevygua altar áry ome'ẽ 'rā okuapy vaka ra'y.

Heko vai va'e ombopagaa aguã re ijayvua

Jogueroporaei va'e pe nhombo'e aguã Davi ombopara va'ekue, Doegue Edom pygua Saul pe oikuaa uka ramo Abimeleque ro py Davi ovaēague (1 Samuel 22.6-23).

52

- ¹ Ava ndepo'akapa va'e, mba'e re tu teko vai ri rejou porā?
Mba'eta Nhanderuete porayvua ma opa va'erā e'ŷ.
- ² Ha'e rā ndee ma ndeayvu 'rā renhomomba aguã re anho.
Kyxe haimbe va'e jojuka va'e rami 'rā ndeayvu,
renhombotavy va'e vy.
- ³ Iporā va'e 'rāgue py mba'emo vai anho rejou porāve.
Anhetē rupi ndeayvu 'rāgue py ndeapuxe vai rive.
- ⁴ Ndee rejou porā va'e ma ayvu nhomokanhyarā anho,
renhombotavya rupi rive ndeayvu va'e vy.
- ⁵ Ha'e rami avi Nhanderuete nemomba 'rā raka'e rā peve.
Ndejopy vy ndepe'a 'rā heravy nderopy reĩa gui,
okuave va'e yvy gui ndepe'a xapy'a 'rā.
- ⁶ Ha'e nunga oiko rā
heko porā va'e kuery oexa vy ojererokyje 'rā.
Ha'e rami vy ojojai rei vy aipoe'i 'rā:
- ⁷ “Ha'e rami 'rā okanhy avakue Nhanderuete re e'ŷ imbaraete va'e.
Mba'eta omba'e rei-rei retaa re rive ojerovia,
ha'e opa marā re ikuiaia re rive onhemombaraete va'e.”
- ⁸ Ha'e rā xee ma oliveira rembypy ipyau va'e
Nhanderuete pegua roka py hi'aĩ va'e rami aiko.
Nhanderuete xemboaxya re ajerovia raka'e rā peve.
- ⁹ Ha'e rami repena rire
xee roguerovy'a 'rā raka'e rā peve.
Ndere ojerovia va'e kuery oendua py
roarō reve xema'endu'a 'rā nderery re, iporā ramo.

Salmo 14.1-7

Jogueroporaei va'e pe nhombo'e aguã Davi ombopara va'ekue mbaraka py ombojoguy aguã.

* 51:17 Mateus 5.3-6; Mateus 11.29-30; Lucas 18.9-14

53

- ¹ Opa marā rei heko va'e ma opy'a py ijayvu vy
 “Ndoikoi rima Nhanderuete” he'i 'rā.
 Ha'e kuery opa marā 'rā ikuai teko vai ojapo vy.
 Neī peteīve ma ndoikoi 'rā heko porāa rupi.
- ² Ha'e rā Nhanderuete ma yva gui oma'ē 'rā avakue ra'y kuery re,
 oexa aguā amongue pa o'arandua rupi,
 Nhanderuete oekaa rupi ikuiaia oexa aguā.
- ³ Ha'e rami teī ha'e javive ojepe'a vy opa marā rei ikuai.
 Ndoikovei ma teko porā rupi oiko va'e,
 neī peteīve.*
- ⁴ “Teko vai rupi ikuai va'e 'arandurā noī teve?
 Ha'e kuery ma xevyguia kuery omomba rivepa 'rā mbojape ho'ua rami.
 Nhanderuete pe ndojapukai 'rā guive.”†
- ⁵ Ha'e rami teī ha'e kuery onhemondyipa 'rā,
 okyje aguā jipoi teī.
 Peē kuery re opu'ā rei va'ekue kāgue Nhanderuete omoaīmba 'rā.
 Ha'e kuery oxīmba 'rā pendegui, Nhanderuete nopenavei ramo.
- ⁶ Siāo tetā gui Israel kuery reraa jepearā ou vy ojekuaa ma 'rāgue!
 Nhanderuete ojeupegua kuery omoingo porā jevy ramo
 Jacó ramymino kuery ov'y'a ete 'rā okuapy.

Nhanderuete oepy aguā re ojapukaia ague

Jogueroporaei va'e pe nhombo'e aguā Davi ombopara va'ekue mbaraka py ombojoguy aguā, Zife pygua kuery Saul pe aipoe'i ramo: “Orerekoa py e'ŷ teve Davi onhemi?” (1 Samuel 23.19, 26.1).

54

- ¹ Xeruete, xereraa jepe ke nderery rupi,
 xemboeko porā guive ndepo'akaa rupi.
- ² Xeruete, endu ke anhembo'e ramo,
 ejapyxaka ayvu xejuru gui oē va'e re.
- ³ Mba'eta xere opu'ā okuapy porojajai va'e kuery,
 jojuka va'ety kuery xejukaxe okuapy.
 Ha'e kuery ma Nhanderuete re ima'endu'aa rupi nda'ikuai.
- ⁴ Ha'e rā xee ma Nhanderuete oiko xepytyvōarā.
 SENHOR oiko xemoingovearā.
- ⁵ Ombopaga 'rā heko vai va'e xemoingo axyague re.
 Ojeroviapy reikoa rupi remomba 'rā.
- ⁶ Ndevy ame'ēxeal'i py ame'ē 'rā ome'ēmby.
 SENHOR, aporaei 'rā nderery rupi iporā ramo.
- ⁷ Mba'eta xereraa jepe ajexavaia ha'e javi gui.
 Ha'e ramo aexaa py xerovaigua kuery okanhymba.

Joapo vai va'e kuery omombaa aguā re ojerurea ague

Jogueroporaei va'e pe nhombo'e aguā Davi ombopara va'ekue mbaraka py ombojoguy aguā.

55

- ¹ Xeruete, ejapyxaka ke ajerurea re.
 Endu e'ŷ eme ajapukaia.
- ² Eikuua pota ke xere, embovai xeayvua.
 Ajexavai vy ndaikuai rei,

* 53:3 Romanos 3.9-20 py. † 53:4 Apy ma Nhanderuete ijayvu heko vai va'e reko re.

- nda'evei rei aikovy
 3 xerovaigua kuery ijayvu rei ha'e
 heko vai va'e xemoingo axy rei ramo.
 Mba'eta xere ha'e kuery ombou xembojexavaiarã.
 Xevy ipoxy vaipa vy xemomba 'rã.
 4 Xekuraxõ otytypaa aendu xepy'a re.
 Amano aguã gui akyjea aendu xere ou va'e.
 5 Aryryipa reve aendu akyjea,
 akyje vaipaa xere oĩ.
 6 Ha'e rami vy xee aipoa'e:
 "Apykaxu rami xepepo va'e rire
 aveve avy vy ajou 'rãgue apytu'u aguã.
 7 Ajava 'rãgue mombyry,
 tekoa e'ŷa rupi aiko 'rãgue.
 8 Ajou voi 'rãgue anhemi aguã,
 yvytu vaikue ha'e yai opu'ã va'e gui", ha'e.
 9 SENHOR, emomba ke xerovaigua kuery,
 ejapo nhomogetaa py ndoikuavei aguã rami,
 mba'eta tetã py xee aexa joguero'a ha'e joe nda'ija'ei va'e anho.
 10 Ara py ha'e pyáv ojere okuapy tetã kora yvýry rupi.
 Kora mbyte py ikuai opa marã rei ha'e mba'emo vai apoa kuery.
 11 Tetã mbyte oĩ 'rã nhomombaa.
 Tape rupi ma ikuai nhomoingo axya ha'e nhombotavya.
 12 Ha'e rami avi xerovaigua e'ŷ va'ekue ae xembojaru rei oikovy.
 Ha'e rami e'ŷ va'e rire aropo'aka kuaa 'rãgue.
 Ndaxerexaxeи va'ekue e'ŷ xere ov'y'a rei,
 ha'e rami e'ŷ va'e rire ixugui anhemi 'rãgue.
 13 Ha'e rami 'rãgue py ndee ava xee ramigua reiko va'e,
 xereve renhemoirû va'ekue ae,
 xeirû xepy'a py roayvvuva va'e.
 14 Joupive jaiko va'ekue, joupive javy'a va'ekue,
 teta rupi jaa va'ekue Nhanderuete pegua oo katy.
 15 Manoa tojopy voi ha'e kuery,
 ha'e oikove reve toguejy yvykua py.
 Mba'eta ngoo rupi mba'emo vai re anho oikuua pota opy'a py.
 16 Ha'e rã xee ma ajapukai 'rã Nhanderuete pe.
 Ha'e ramo SENHOR xereraa jepe 'rã.
 17 Aje'ive, kuaray mbyte ha'e ka'aru'i ju
 amombe'u 'rã aikotevã va'e ajapukai reve.
 Ha'e ramo SENHOR oendu 'rã xeayvua.
 18 Eraa jepe ke xerekovea xerakykue monha va'e kuery gui aiko porã ju aguã,
 mba'eta heta ete ikuai xerovaigua.
 19 Nhanderuete oendu vy ombovai 'rã,
 jypy'i guive opena va'e vy.
 Mba'eta ha'e kuery re noĩ ojeko rerova aguã,
 Nhanderuete renonde teī ojererokyjea rupi e'ŷ ikuai.
 20 Ha'e va'e ava ma opu'ã hexeve peteĩ rami ikuai va'ekue re,
 omboaxa rive peteĩ rami ikuai aguã ijayvuague.
 21 Ijuru ma manteiga gui yxyíve,
 ha'e rã ipy'a re ma joe opu'ã aguã anho oĩ.
 Ijayvua ma azeite gui iporãve merami
 teī kyxe oekyi pyre rami nhomomba.

²² SENHOR po py pemboaxa pendepy'a eta reia.
Ha'e ramo penemombarae 'rā.
Peteīve henda py ndoitly ukai 'rā heko porā va'e.*

²³ Xeruete, yvykua vaikue py remombo 'rā
avakue tuguy moēa ha'e nhombotavypa rei va'e.
Ha'e kuery ndoupityi 'rā oikove aguā va'ekue mbyte peve.
Ha'e rā xee ma ajerovia tema 'rā ndere.

Ojexavaia gui ombopy'a guaxu aguā re ojerurea ague

Jogueroporaei va'e pe “Apykaxu yvyra mombyrygua rupi ikuai” he'ia py oporaeia rami oporaei aguā Davi ombopara va'ekue Gate tetā py filisteu kuery ojopy ramo (1 Samuel 21.10-15).

56

¹ Xeruete, xemboaxy ke,
mba'eta avakue xejukaxe okuapy.
Ára pukukue re xemoingo axy xerero'a vy.

² Xere opu'ā va'e xejukaxe okuapy.
Heta ete ikuai xere opu'ā va'e onhemboyvatevexe vy.

³ Akyjea aendu vy
ajerovia 'rā ndere.

⁴ Nhanderuete re ajerovia, ijayvua arov'y'a guive.
Nhanderuete re ajerovia vy
ndakyjei 'rā mba'eve gui.
Mba'e 'rā tu imarā va'e ojapo kuaa xere?

⁵ Ára pukukue re ha'e kuery omombe'u 'rā xeayvukue ramigua.
Onhembopy'aa ma xere ojapo vai aguā anho.

⁶ Nhomboatypa okuapy nhemi rupi,
oma'ẽ mbegue 'rā aikoa re oikuua pota vy,
xemomba aguā oarō vy.

⁷ Embopaga ha'e kuery ojapo vaiague re.
Xeruete, eitypa yvy regua kuery ndepoxya py.

⁸ Reipapa ma ajexavaia rupi aikoague.
Xerexay voi remboyrupa nde'yryru py.
Xerekokue ha'e javi e'ŷ teve ipara ndekuaxia re?

⁹ Ndevy ajapukaia ára guive
xerovaigua kuery ojepe'apa 'rā.
Aikuua porā Nhanderuete xereve oikoa.

¹⁰ Nhanderuete re ajerovia, ijayvua arov'y'a guive.
SENHOR re ajerovia, ijayvua arov'y'a guive.

¹¹ Nhanderuete re ajerovia aguā amoī vy
ndakyjei 'rā mba'eve gui.
Mba'e 'rā tu avakue ojapo kuaa xere?

¹² Xeruete, ndevy anhemboayvuague ajapo ete 'rā,
roguerovy'a ete 'rā guive.

¹³ Mba'eta manoa gui xerekovea reraa jepe,
xepy guive reraa jepe ha'a aguā gui,
Xeruete renonde aiko aguā hexakā nhomoingovea rupi.

* 55:22 1 Pedro 5.7 py.

Salmo 108.1-5

Jogueroporaei va'e pe "Xemomba eme ke" he'ia py oporaeia rami oporaei aguã Davi ombopara va'ekue, Saul gui ojava vy itakua py onhemi jave (1 Samuel 24.1-7).

¹ Xeruete, xemboaxy ke.

Xemboaxy mba'eta ndere ae xerekovea anhomí.

Ndepepo 'ã py anhemi,
mba'emo vai oiko va'e oaxapa peve.

² Ajapukai Nhanderuete Yvate ete va'e pe,
mba'eta opa mba'e gui xerepy va'e.

³ Ha'e ramo yva gui xepytyvðarã ombou vy xereraa jepe.
Omximba xeavyky rei va'e kuery.

Exa uka renhomboaxyha ha'e ojeroviapy reikoa.

⁴ Mba'eta xerekovea ma guary ikuai va'e mbyte oiko.
Ha'e va'e kuery omondoropa 'rã avakue ra'y kuery.

Hu'y guaxu ha'e hu'y rami haã,
ha'e inhapekã ma kyxe haimbe porã va'e rami.

⁵ Xeruete, enhemboyvate yva áryve rupi,
ha'e yvy jave re tojekuaa nerexakãa.

⁶ Ha'e kuery ma xerenonde rupi omoõ xembo'a aguã.
Ha'e ramo xerekovea oiko axy.

Xerenonde ojo'o okuapy yvy,
tei ha'e kuery ae ju ho'a ha'e va'ekue py.

⁷ Xeruete, xekuraxõ oĩ atã ma,
xekuraxõ oĩ atã.
Aporaei vy roguerovy'a 'rã.

⁸ Xenhe'ẽ, evy ke!
Mbaraka ha'e mba'epu ixã reta va'e, pevy avi ke.

Xee ambovy 'rã ko'ẽ ju.*

⁹ Roguerovy'a 'rã yvy regua kuery mbyte,
ndevy aporaei 'rã ha'e javi regua mbyte.

¹⁰ Mba'eta renhomboaxyha oo 'rã yva peve,
ndereko porãa avi arai peve 'rã oo.

¹¹ Xeruete, enhemboyvate yva áryve rupi.
Yvy jave re tojekuaa nerexakãa.

Heko vai va'e kuery renonderã re ijayvua

Jogueroporaei va'e pe Davi ombopara va'ekue "Xemomba eme ke" he'ia py oporaeia rami oporaei aguã.

¹ Peẽ joe pepena va'e, ha'evea rami teve pendeayvu?
Anhetẽ rupi ri nda'u peikuaa pota avakue ra'y kuery re?

² Any teve.
Ha'e rami 'rãgue py pendepy'a re pemoõ teko vairã,
ha'e yvy jave re pejapo joguero'a aguã rami.

³ Heko vai va'e ma oguerekoi ramove ojepe'a 'rã ha'eve e'ŷa katy.
Itui'i vyve ojavy 'rã onhemboapu vy.

⁴ Jojukaarã oguerekoi mboi rami.
Oapyxa omboty 'rã mboi ijapyxa e'ŷ va'e rami,

⁵ oendu e'ŷ aguã imbo'ea ayvu,

* 57:8 "Xee ambovy 'rã ko'ẽ ju" he'i aje'ive'i reve Nhanderuete pe oporaei vy.

- ombo'e porāve teī.*
- 6** Xeruete, emopē ke ha'e kuery rā ijuru py.
SENHOR, emboi guary ra'y kue'iry rāñhykā.
- 7** Tokanhymba yy oxyry va'e rami,
ha'e hu'y omomboa rā opēmba rive va'e rami.
- 8** Hevo'ipe yvy re ijayxy ovy va'e rami ta'ikuai,
ha'e kyrī'i va'e ixy oity'i va'ekue rami kuaray oexa e'ŷ re ta'ikuai.
- 9** Juu'y okai vyvoi va'e e'ŷ vy ipyau va'e teī
oja omboaku e'ŷ mbove
yvytu jere ombovevepa va'e rami avi ta'ikuai.
- 10** Ha'e rā heko porā va'e ma hepyarā ou rā ovy'a 'rā.
Omoakŷ 'rā opy heko vai va'e ruguy py.
- 11** Ha'e ramo aipo'ea 'rā:
“Anhetē ae ra'e heko porā va'e ojopy 'rā ojeupegua.
Mba'eta Nhanderuete oiko yvy re nhombopaga va'e.”

Ojepy ukaa rupi ojerurea ague
Jogueroporaei va'e pe “Xemomba eme ke” he'ia py oporaeia rami oporaei aguā Davi
ombopara va'ekue Saul ojukaxe vy oo py oĩa oarō uka ramo (1 Samuel 19.11-12).

59

- 1** Xeruete, xereraa jepe xerovaigua kuery gui.
Xereupi xerovaigua kuery xererovy e'ŷ aguā py.
- 2** Xereraa jepe teko vai apoa kuery gui,
xerepy avakue jouguy moẽa gui.
- 3** Mba'eta ha'e kuery ma nhuā ojayvy xerekove oipe'a aguā.
SENHOR, imbaraetekueve onhemboaty okuapy xerovai,
xerekovai ramo e'ŷ, ajejavy ramo e'ŷ guive.
- 4** Mba'eve py atekoavy ramo e'ŷ ha'e kuery ojapura xemoingo axy aguā.
Emyī ke, eju xerepy aguā, exa pota guive.
- 5** Ndee ma SENHOR Xeruete ixondaro reta va'e,
Israel kuery Ruete reiko.
Ha'e nunga rupi emyī, eju voi guive
yvy regua kuery re reikuaa pota aguā.
Neī peteīve emboaxy eme hi'ā rupi teko vai ojapo va'ekue.
- 6** Ha'e kuery ma pytū ma ramo onhendu okuapy jagua rami
tetā yvýry rupi.
- 7** Opa marā onhendu okuapy.
Ijuru py ayvu oĩ va'e ma kyxe,
“Mava'e tu oiko nhanerenduārā?” he'i guive.
- 8** Ha'e rā SENHOR, ndee repuka 'rā ha'e kuery re.
Rejojai rei 'rā yvy regua kuery ha'e javi.
- 9** Xemombaraeeta, ndee ae roarō va'e,
mba'eta ndee ma Xeruete anhemiaty yvate va'e.
- 10** Xeruete xemboaxy vy ou 'rā xembojoyvvarā.
Xerovaigua kuery re aipota va'e oiko ramo Nhanderuete oexa uka 'rā xevy.
- 11** Ha'e rami avi ejukapa eme guive, xejaveguia kuery hexaraipa e'ŷ aguā.
Ha'e rami 'rāgue py emoaimbā opa rupi ndepo'akaa py ho'apa peve,
mba'eta SENHOR, orevy pe mba'emo vai jokoa reiko.
- 12** Tove ha'e kuery onhembovratea rupi ae to'apa
ojuru py ojejavyague re, guembe rupi ayvu oẽague re,
opa marā ikuaiague re ha'e apu omombe'uague re.

* 58:5 Apy ijayvu mboi mbo'ea re (Eclesiastes 10.11).

- ¹³ Emokanhy ndepoxya rupi, emokanhymba,
ha'e kuery opa peve,
yvy apy peve oikuua pavē aguā
Jacó ra'y kuery re Nhanderuete openaa.
- ¹⁴ Pytū ma ramo jagua rami ha'e kuery onhendu okuapy
tetā yvýry rupi.
- ¹⁵ Opa rupi ikuai ho'u va'erā oeka va'e rami,
ha'e naevyatāi vy opa marā onhendu okuapy.
- ¹⁶ Ha'e rā xee ma aporaei 'rā ndepo'akaa re.
Ha'e aje'ive reve aporaeive ju 'rā
xemboaxya re avy'aa rupi.
Mba'eta ndee ae anhemiaty yvate va'e reiko,
ajexavaia ára ndee ae xerepy 'rā.
- ¹⁷ Ha'e nunga rupi Xemombaraeeta, ndevy pe aporaei 'rā aikovy.
Xeruete anhemiaty yvate va'e reiko,
Xeruete xemboaxy va'e.

60

Salmo 108.6-13

Jogueroporaei va'e pe “Yvoty lírio omombe'ua va'e” he'ia py oporaeia rami oporaei aguā Davi ombopara va'ekue nhombo'e aguā, Síria regua kuery Mesopotâmia ha'e Zobá guigua re opu'ā jave, ha'e Joabe ou vy doze mil avakue Edom regua re Juky Ugua py ipo'aka jave (1 Samuel 8.13).

- ¹ Xeruete, ndee nerepenavei va'ekue orere,
oremoaīmba guive ndepoxy vy.
Oremono'ōmba ju ke aŷ.
- ² Remomyīmba va'ekue yvy, rembovopa guive.
Embotypa ju ke ipa'ū,
mba'eta oipave 'rā ov.
- ³ Rejapo va'ekue ndevygua kuery mba'emo vai py ikuai axy aguā rami,
oremboy'u vinho oremonoakanhyarā.
- ⁴ Nerenonde ojererokyjea rupi ikuai va'e peguarā reupi uka bandeira,*
guyrapa revegua gui onhemi kuaa aguā.
- ⁵ Ore kuery nerembiayvu orekuai va'e roo jepe aguā
orereraa jepe ke reiporu kuaa regua py, ha'e orembovai.
- ⁶ Nhanderuete ijayvu oky'a e'ŷa rupi:
“Xepo'akaa rupi vy amboja'o 'rā Siquém yvy,
aa'ā 'rā Sucote regua yvyugua guive.”†
- ⁷ Gileade ha'e Manassés yvy ma xemba'e meme itui.
Efraim yvy ma xengora ratā.
Judá ma xepo pygua.
- ⁸ Ha'e rā Moabe yvy ma hy'a ajejoiaty itui,
Edom yvy áry amombo 'rā xepy regua,
ha'e Filístia pygua kuery re xepo'aka vy avy'a nhendu 'rā.”‡
- ⁹ Mava'e nda'u xereraa 'rā tetā ikorapa va'ea py?
Mava'e nda'u xereraa 'rā Edom yvy re?
- ¹⁰ Mba'eta Oreruete, ndee orereja rive va'ekue.
Oreruete, ndereovei ma orexonitaro kuery reve!
- ¹¹ Orereraa jepe nho ke rojexavaia gui,

* 60:4 Bandeira hi'y reve ma joe opu'āa rupi 'rā ogueraa, oupia rā xondaro kuery oexa vy oĩa py oupa aguā (Jeremias 51.27). † 60:6 Apy ma ijayvu joyvy oipe'a va'ekue ojeupagua kuery pe omboja'o aguā re. ‡ 60:8 Ha'e jave py ma joyvy ojogua vy hi'áry omombo 'rā opy regua, oikuua uka aguā ija oikoa.

mba'eta avakue orereraa jepea ma mba'everā ndovarei.
¹² Nhanderuete re vy ae 'rā nhandepo'aka,
 mba'eta ha'e opyrō 'rā nhanderovaigua kuery re.

Huvixave re ojerurea ague

Jogueroporaei va'e pe Davi ombopara va'ekue mbaraka py ombojoguy aguā.

61

- ¹ Xeruete, endu ke ajapukaia.
 Eikuua pota anhembo'e ramo.
- ² Yvy apy gui ajapukai ndevy,
 xepy'apy py ajexavai vy.
 Xereraa ke itaova xegui yvateve va'e áry.
- ³ Mba'eta ndee ma anhemiaty,
 xerovaigua kuery gui torre imbaraete va'e reiko.
- ⁴ Taiko riae nembojeroviaaty rupi raka'e rā peve.
 Ndepepo guýry xee anhemi va'e.
- ⁵ Mba'eta Xeruete, ndee rendu anhemboayvu rā.
 Ha'e rami vy xevy pe reme'ě iporā va'e,
 nderery oendu vy ojererokyje va'e kuery reve.
- ⁶ Remoïve 'rā huvixave ára.
 Hi'ára ipukuve ete 'rā aýgua ha'e raka'e rāguia ikuia peve.
- ⁷ Toĩ riae Nhanderuete renonde.
 Nderekoo porāa ha'e ndeporayvua rupi vy toikove riae.
- ⁸ Ha'e rami rā nderery rupi aporaei 'rā raka'e rā peve,
 anhemboayvuague ajapo aguā ko'ě nhavō.

Jajerovia aguā regua

Jogueroporaei va'e Jedutum oporaeia rami oporaei aguā Davi ombopara va'ekue.

62

- ¹ Nhanderuete anho arō aikovy xenhe'ě py, xeayvu e'ŷ re.
 Mba'eta ixugui ae ou xereraa jepearā.
- ² Ha'e anho oiko itaova,
 xereraa jepea ha'e anhemiaty yvate va'e.
 Ha'e nunga rupi ndaxereityai 'rā.
- ³ Peẽ kuery ha'e javive, raka'e peve tu xee peteĩ ava re pepu'ā rei 'rā xereity aguā
 oo mbotya ojero'a va'e, e'ŷ vy kora ho'a rai'i va'e rami.
- ⁴ Ha'e va'e kuery xereityxe okuapy naxemboeteavei aguā.
 Apu rive ha'e kuery ojou porāve.
 Ojuru py ijayvu porā teĩ
 opy'a py ma ijayvu vaikue-ikue 'rā.
- ⁵ Nhanderuete anho xenhe'ě py arō aikovy xeayvu e'ŷ re,
 mba'eta ixugui ou 'rā arō aikovy va'e.
- ⁶ Ha'e anho oiko itaova aĩ aguā,
 xereraa jepea, anhemiaty yvate va'e.
 Ha'e ramo ndaxereityavei 'rā.
- ⁷ Nhanderuete gui ae ou aa jepe aguā ha'e xemboetea aguā.
 Nhanderuete re oĩ xembaraete aguā ha'e itaova anhemiaty.
- ⁸ Xereveguia kuery, pejerovia hexe ára nhavō.
 Ixupe pemombe'u guive pendepy'a re oĩ va'e ha'e javi.
 Nhanderuete ma nhanhemiaty oiko.
- ⁹ Avakue yvyigue'i ma mba'e'ŷ ikuai,
 ijyvatekueve voi anhetē rupigua e'ŷ meme ikuai.
 Mba'emo opejaa py ipoyia oexaa rā

- ha'e kuery ha'e javi teĩ mba'e'ŷ va'e gui nda'ipoyive 'rã.
- ¹⁰ Pejerovia eme pejokorea re,
neĩ penemondaa re pevy'a eme guive.
Penemba'e rei-rei hetave ovy teĩ
ha'e nunga re rive pejerovia eme pendepy'a py.*
- ¹¹ Peteigue Nhanderuete ijayvu, mokoiguea ma aendu pova'e:
Po'akaa ma Nhanderuete guigua meme.
- ¹² SENHOR, ndere anho oĩ oremboaxy aguã.
Peteĩ-teĩ pe reme'ẽ 'rã ojapoague repy.*

Nhanderuete jaeka aguã regua
Mboraeirã Judá regua teko e'ŷa rupi Davi oiko vy ombopara va'ekue (2 Samuel 15.1-30, 16.5-14).

63

- ¹ Xeruete, ndee ma Xeruete imbaraete va'e.
Xee ma roekaa rupi anhea'ã aikovy.
Ndere ma xerekovea nda'eveive.
Xerete re voi aendu ndere anhembojaxea,
yvy ipiru reia rupi yy re nda'evei va'e rami.
- ² Mba'eta ndevygua henda iky'a e'ŷ va'e py aĩ vy
aikuua pota va'ekue nembaraetea ha'e nerexakãa re.
- ³ Mba'eta xerekove 'rãgue py xee arovy'ave ndee xemboaxya.
Ha'e rami vy rogueroporaei 'rã.
- ⁴ Ha'e rami vy roguerovy'a 'rã aikove teria ja,
nderery rupi xepo upi 'rã guive.
- ⁵ Xenhe'ẽ py avy'a nhandy ha'e xo'o hee va'e ha'u vy avy'aa rami avi.
Roguerovy'aa rupi xejuru py rogueroporaei.
- ⁶ Xerupa py xetulia rupi voi xema'endu'a 'rã ndere,
pyávy ndakevei vy aikuua pota 'rã ndere,
- ⁷ xepytyvõa reiko ramo.
Ndepepo'ã py anhemi vy aporaei 'rã vy'a rupi.*
- ⁸ Xenhe'ẽ ma ndere anho oĩ.
Ndepo reiporu kuaa regua re xejopy.
- ⁹ Ha'e rã xerekovea oipe'axe vy xereka va'e kuery ma
ho'apa 'rã yvykua vaikue py.
- ¹⁰ Remboaxa 'rã kyxe py ipo'aka va'e kuery pe,
jagua-tuvy nhe'ẽ rembi'urã rive ikuai aguã.
- ¹¹ Ha'e rã huvinxave ma ovy'a 'rã Nhanderuete re.
Hery rupi oura va'e kuery avi ovy'a 'rã okuapy.
Ha'e rã apu rupi ikuai va'e ma okyririmbä 'rã.

Hovaigua kuery gui oepy aguã re ojerurea ague
Jogueroporaei va'e pe mboraeirã Davi ombopara va'ekue.

64

- ¹ Xeruete, endu ke ajexavai vy ajapukaia.
Eraa jepe xerekovea xerovaigua kuery poxya gui.
- ² Xenhomí heko vai va'e ojapoxe va'e gui,
heko vai va'e opa marã onhendu okuapya gui.
- ³ Ha'e va'e kuery ma kyxe oaĩmbe'ea rami oguerekó katu 'rã oapekũ,

* 62:10 Mateus 19.21-22; 1 Timóteo 6.17-19 * 62:12 Mateus 16.27; Romanos 2.6-16; Apocalipse 2.23 * 63:7 "Ndepepo'ã py" he'ia ma Nhanderuete opena porãa re ijayvu vy (Mateus 23.37).

hu'y oa'angaa rami oguereko katu 'rā ayvu vai,
⁴ nhemi rupi ojapo vai aguā anhetē rupi ikuai va'e re,
 ha'e kuery re opoi xapy'a 'rā okyje e'ŷ re.
⁵ Mba'emo vai rupi ikuiai gui ndojepe'ai 'rāe,
 nhemi rupi ijayvu 'rā joapo vai aguā re.
 Ha'e vy joupe-upe "Mava'e tu nhanderexa 'rā?" he'i.
⁶ Teko vai re rive oikuua pota 'rā,
 ha'e gui ojou 'rā ha'ekue rami ete ojapo aguā.
 Yvykua vaikue rami onhembopy'aa ha'e peteĩ-teĩ py'a.
⁷ Ha'e gui ma ha'e kuery re Nhanderuete ju 'rā opoi ngu'y.
 Ha'e kuery oendu xapy'a 'rā onhyvõague.
⁸ Po ramigua py ha'e kuery ho'a 'rā:
 ijayvuague rami ae oiko 'rā ha'e kuery re.
 Ha'e ramo hexaa kuery ha'e javi oakā ombovava 'rā,
⁹ ha'e avakue ikuai va'e ha'e javi ma ojererokyje reve
 oikuua uka 'rā Nhanderuete rembiapo,
 ha'e ojapo va'e oikuua vy.
¹⁰ Ha'e gui heko porā va'e ma oguerovy'a 'rā SENHOR,
 hexe ojerovia 'rā guive.
 Anhetē rupi ipy'a va'e ha'e javi ovv'a 'rā.

Mba'emo aju omono'õmbaa ogueroma'endu'aa ague
 Jogueroporaei va'e pe mboraeirā Davi ombopara va'ekue.

65

¹ Oreruete, ndere rojeroviaa rupi roqueroporaei 'rā Sião tetā py!
 Ndevy pe rojapo 'rā ronhemboayvuague.
² Ronhembo'ea rendu va'e,
 ndea py ou 'rā opa marāgua avakue
³ gueko vaiague re ndovy'ai vy.
 Rojejavyague orere ipo'aka ramo
 ndee rembogue 'rā.
⁴ Ovy'a ete 'rā ndejeupe guarā reiporavo va'ekue.
 Ha'e va'e kuery onhemboja 'rā ndere, nderoka py ikuai aguā.
 Ha'e ramo rovy'a vaipa 'rā ndero py oremboaxyra rexu uka va'e re,
 ndevygua templo iky'a e'ŷ va'e py.
⁵ Oreruete orereraa jepea, ndeguigua teko porā re rojapukai ramo
 ndee orembovai 'rā nhomondyipaarā rejapo vy.
 Yvy apy re ikuai va'e ha'e ye'ẽ mombyryve oĩ va'e rupigua
 ndee anho nerarō okuapy.
⁶ Nembaraetea rupi vy remombyta porā raka'e yvyty,
 ndepo'akaa py renhemonde reve.
⁷ Ye'ẽ revovo onhendu ramo remombytu'u ju,
 yai opu'ã-pu'ã va'e revovo,
 yvy regua kuery revovo guive.*
⁸ Ha'e ramo hexa pyrā rejapo va'e
 yvy apy re ikuai va'e oexa vy onhemondyipa 'rā okuapy.
 Kuaray oua katy gui ha'e oikea katy gui ou va'e
 rejapo 'rā ovv'a reve oporaei okuapy aguā rami.
⁹ Yvy re reikuua pota vy remoakŷ 'rā,
 remoingo porā ete 'rā.
 Yakā'i Nhanderuete pegua typy porā meme 'rā.

* 65:7 Lucas 8.12-15; 21.25-26

- Mba'emo ra'yī oiko porā 'rā,
ha'e rami aguā rami remoingo rire.
- ¹⁰ Ha'e rami vy remoakŷ 'rā yvy roikaraīague rupi,
rembojojapa 'rā yvy'ā ikuai va'e.
Oky rayvi py remoakŷ
ronhotŷ va'ekue remoingo porā vy.
- ¹¹ Ma'etŷa opaa py rexa uka 'rā ndeporayvua coroa rami iporā va'e.
Repyrōague rupi reja 'rā yvy moingo porārā,
- ¹² teko e'ŷa rupi jai rogue ikuai va'e re guive.
Yvy'ā ikuai va'e voi ovy'a 'rā.
- ¹³ Mymba heta 'rā ikuai nhuūndy rupi,
ha'e yvy'ā guy rupi ma hary anho 'rā ikuai.
Ha'e nunga ha'e javi ovy'a vy oporaei 'rā okuapy.

Nhanderuete oguerovy'aa ague
Jogueroporaei va'e pe mboraeirā ombopara pyre.

66

- ¹ Yvy jave re pendekuai va'e, peroporaei Nhanderuete!
- ² Peporaei hery rupi iporā ramo,
perovy'a mboraei rupi.
- ³ Nhanderuete pe aipo peje: “Rejapo va'ekue ma iporā ete!
Ndepo'aka etea rupi nderovaigua ikuai va'ekue ojexa uka 'rā nenhe'ē rendu vy.
- ⁴ Yvy jave regua nerentonde 'rā oī guenapy'ā re,
mboraei rupi oporaei 'rā ndevy,
nderery rupi oporaei 'rā okuapy.”
- ⁵ Peju ke, pexa Nhanderuete rembiapokue,
avakue ra'y kuery pe mba'emo porā ojapo va'ekue ha'e javi.
- ⁶ Ye'ē omboypa raka'e yvy piru reia rive opyta aguā rami,
ha'e yakā mbyte rupi guive oaxaa yvy rupi.*
Ha'e py ma javy'a hexe.
- ⁷ Opo'akaa rupi opena riae 'rā,
oexa pota 'rā yvy regua kuery re.
Nonhe'ē rendui va'e tonhemboyvate eme.
- ⁸ Yvy regua kuery, penema'endu'a porā ke Nhanderuete re,
pendu uka peporaeia.
- ⁹ Ha'e ma ojapo jaikove aguā rami,
ha'e ndojapoi 'rā nhandepyxyry aguā rami.
- ¹⁰ Mba'eta ndee Oreruete, orereko rexa,
oreky'a'o prata oiky'a'oa rami.
- ¹¹ Oreapo va'ekue nhuā py orembotya aguā rami,
orevoyirā remoī orekupe re.
- ¹² Rejapo avakue kavaju árygua kuery oreakā áry rupi oo aguā rami.
Oremboaxa va'ekue tata ha'e yy rupi.
Ha'e rami rire teī peteī henda tuvixaa py ju orereru.
- ¹³ Aike 'rā nderopy mba'emo ame'ē va'erā reve,
ndevy ajapo aguā anhemboayvuague,
- ¹⁴ ha'e rami aguā re xeayvu rire,
mba'eta ajexavaia ára ha'e rami aguā xeayvu.
- ¹⁵ Ndevy ame'ē 'rā ikyra va'e ojuka pyre,
kavara ro'okue reakuā reve.
Ajuka 'rā vaka ha'e kavara ra'y.

* 66:6 Éxodo 14.21-22, Josué 3.17

- ¹⁶ Nhanderuete renonde pejererokyjea rupi pendekuai va'e ha'e javi, peju ke, pendu, pěvy amombe'u 'rā xevy ojapo porā va'ekue.
- ¹⁷ Ixupe ajapukai karamboae,
xejuru py aroporaei guive.
- ¹⁸ Xepy'a re ovare e'ŷ va'e amoĩ va'e rire
SENHOR naxerendui 'rāgue.
- ¹⁹ Ha'e rami rā Nhanderuete xerendu ae,
oikuua pota guive ajerure vy xeayvu rā.
- ²⁰ Ima'endu'a porāmby toiko Nhanderuete.
Anhembo'ea noendu rivei,
neĩ ndoexa uka e'ŷi guive xemboaxya.

Yvy regua kuery oguerovy'a aguã regua
Jogueroporaei va'e pe mboraeirā ombopara pyre mbaraka py ombojoguy aguã.

67

- ¹ Nhanderuete topena porā nhandere,
tanhanemoingo porā,
ha'e jaikoa rupi tomboguejy ngova rexakā,
- ² yvy re ikuai va'e oikuua aguã nderekō,
yvy regua ha'e javi ikuia rupi oikuua aguã rejogueraa jepea.
- ³ Oreruete, yvy regua kuery tandereroporaei,
tandereroporaei ha'e kuery ha'e javi.
- ⁴ Amboae regua kuery voi tandererovy'a, tandereroporaei.
Mba'eta yvy regua re reikuua pota 'rā anhetē rupi,
yvy re ikuai va'e rerekopa.
- ⁵ Oreruete, yvy regua kuery tandereroporaei,
tandereroporaei ha'e kuery ha'e javi.
- ⁶ Nhanderuete nhanemoingo porā ramo
yvy re oiko ma mba'emo'a.
- ⁷ Oreruete, oremoingo porā ke,
ha'e ramo yvy apy guive ojererokyjea rupi ikuai 'rā nerondenode.

Nhanderuete ngovaigua kuery re ipo'akaa re ijayvua
Jogueroporaei va'e pe mboraeirā Davi ombopara va'ekue.

68

- ¹ Nhanderuete opu'ã vy omoaĩmba ngovaigua kuery.
Henonde gui onhamba oayvu e'ŷ va'e.
- ² Hataxī oaĩmba ovya rami ndee remoaĩ 'rā.
Tata gui ei raity hykupaa rami avi
heko vai va'e kuery okanhymba 'rā Nhanderuete renonde gui.
- ³ Ha'e rā heko porā va'e ma ovya'a 'rā okuapy,
Nhanderuete renonde oporaei 'rā.
Oguerovy'a pavē 'rā.
- ⁴ Peporaei ke Nhanderuete pe, hery rupi peporaei.
Pemboete arai áry rupi oiko va'e.
SENHOR ae hery. Pevy'a henonde.
- ⁵ Ha'e ma tyre'ŷ ikuai va'e ru, ha'e imeve'ŷ va'e re oikuua pota va'e oiko.
Nhanderuete oiko o'amba iky'a e'ŷ va'e py.
- ⁶ Nhanderuete ojapo 'rā amongue ha'e ae'i oiko va'ekue ngoo pygua heta reve ju oiko
aguã rami.
Nhuã py omboty pyre voi ogueraa jepe 'rā ikuai porā aguã py.
Onhe'ẽ rendu e'ŷ va'e kuery anho 'rā ikuai yvy porā e'ŷa re.

- ⁷ Oreruete, ndevygua kuery renonde reẽ reovy ramo,
 tekoa e'ŷa rupi reroguata ramo
- ⁸ yvy oryryipa raka'e,
 yva voi otykypa ndee Oreruete renonde.
 Sinai yvyty voi omyimba ndee ore Israel kuery Ruete renonde.*
- ⁹ Oreruete, oky ja'ea rembou ndeyvv re.
 Na'iporâvei ramo rembopyau.
- ¹⁰ Ha'e py ma ikuai nerymba kuery.†
 Oreruete, oikotevẽ va'e pe rejou uka mba'emo ndeporayvua rupi.
- ¹¹ SENHOR ae oikuua uka ayvu.
 Heta ete ikuai kunhague ayvu porã mombe'ua.
- ¹² Huvixave kuery onhamba, oxondaro kuery reve ojavapa,
 ha'e gui imba'e rei-rei va'ekue ma kunha hoo va'e ju omboja'o.
- ¹³ Mba'e re tu pepytu'u peiny mymba kora yvýry?‡
 Apykaxu pepo ma prata py onhovâmbaa mbyre,
 hague ipukuve va'e re ma ouro rexakâ oĩ.
- ¹⁴ Ha'e py Ipo'akapa va'e huvixave kuery omoaimbâ jave
 Zalmom yvyty áry ho'a yro'y apí.
- ¹⁵ Nhanderuete pegua yvyty ma Basã,
 yvy'ã yvateve va'e ma Basã regua yvyty.
- ¹⁶ Ha'e gui ndee yvyty yvateve va'e,
 mba'e re tu remoaruã reia rupi rema'ẽ yvyty Nhanderuete oiporavo va'ekue re?
 Ha'e py ma SENHOR oiko 'rã raka'e rã peve.
- ¹⁷ Nhanderuete pegua karóxa joe opu'ãa pygua ma vinte mil ikuai,
 tá, mbovy rei e'ŷ oguereko.
 Ha'e va'e kuery mbyte rupi SENHOR oiko.
 Sinai yvyty ojeapo henda iky'a e'ŷ va'e rami.
- ¹⁸ Yvate katy reo ju vy reraa nerembiguarã rejopy va'ekue.
 Rejopy avakue ndejeupe guarã, heko vai va'ekue guive,*
 SENHOR Oreruete, ha'e kuery mbyte reiko aguã.
- ¹⁹ Ima'endu'a porãmby toiko SENHOR ko'ẽ nhavõ nhandevoyi ogueraa va'e.
 Nhanderuete ma nhanderepya oiko.
- ²⁰ Nhanderuete ma jogueraa jepea.
 Nhanderuete SENHOR reve vy jaa jepe 'rã manoa gui.
- ²¹ Mba'eta Nhanderuete ombovo ngovaigua kuery akã,
 hi'a vuku va'e ha'e kuery ae oipotaa rupi ikuai va'ekue akã ombovopa.
- ²² SENHOR aipoe'i: "Basã yvy gui arojevy uka ju 'rã ha'e kuery,
 ye'ẽ typyvea peve ojava tei ha'e gui aru rukapa ju 'rã", he'i.
- ²³ Ha'e ramo pepyrõ 'rã penderovaigua kuery ruguy re,
 ha'e penerymba jagua kuery oy'upa 'rã.
- ²⁴ Xeruete, ojekuaa ndevygua kuery hyxy ov y va'e.
 Xeruete, Xeruvixave pegua hyxy jogueravy vy oike henda iky'a e'ŷ va'e py.
- ²⁵ Henonde ma oje'oi oporaei va'e,
 hakykue ma ixã va'e mbopua kuery oje'oi.
 Mbyte rupi ma kunhataigüe oparã'i va'e revegua ou.
- ²⁶ Teta mbyte penema'endu'a porã ke Nhanderuete re.
 Peẽ Israel ramymino kuery, penema'endu'a porã SENHOR re.

* 68:8 Egito yvy gui Nhanderuete judeu kuery ogueraa jepe vy henonderã omondouka arai ha'e tata (Êxodo 13.21-22).
Ha'e gui Sinai yvyty yvýry ha'e kuery ovaẽ ramo ojapo yvy oryryi aguã rami (Êxodo 19.16-18).

† 68:10 "Nerymba kuery" he'ia ma Nhanderuete pegua kuery re ijayvu vy (Salmo 100.3). ‡ 68:13 Kova'e ayvu rupi Débora ijayvu raka'e Rúben kuery pe joe opu'ã aguã katy ndooi ramo (Juízes 5.16). * 68:18 Efésios 4.7-13

- ²⁷ Pe py ma oĩ kyrïve va'e Benjamim regua, amboae kuery renonde re oo,
ha'e Judá regua huvixa kuery ngupivegua kuery reve.
Ou avi huvixa kuery Zebulom ha'e Naftali regua.
- ²⁸ Oreruete, exa uka ju ke nembaraetea,
mbaraete marã e'ŷ orerepya rupi reiporu va'ekue,
- ²⁹ Jerusalém tetã py ndevyguá templo guigua.
Huvixa kuery ome'ẽ 'rã mba'emo nemboetea rupi.
- ³⁰ Emondyipa vixo takuaty rupigua,§
heta regua kuery guive vaka rami imbaraete teĩ,
ha'e gui amboae regua vaka ra'y rami ikuai va'e.
Epyrõ prata oipota rei va'e kuery re.
Emoaïmba joe opu'axe vai va'e.
- ³¹ Huvixa kuery ou Egito yvy gui,
Etiópia pygua avi onha 'rã jogueruvy,
opo tynyẽ va'e omokuave'ẽ reve Nhanderuete pe.
- ³² Yvy regua pendekuai va'e, peporaei Nhanderuete pe,
peroporaei SENHOR.
- ³³ Ha'e ma yva áryve rupi oĩ, yva ymave guare áry rupi.
Ha'e ojapo 'rã ijayvua oendua aguã rami,
ijayvua ipo'akapa ramo.
- ³⁴ Peroporaei Nhanderuete Israel áry rupi ipo'akaa oexa uka va'e,
ombaraetea oexa uka arai yvatevegua re.
- ³⁵ Oreruete,omboetevepy reiko ndevyguá henda iky'a e'ŷ va'e py.
Israel kuery Ruete omombaraei ha'e ombopo'aka 'rã ojeupegua kuery.
Ima'endu'a porãmby toiko Nhanderuete!

Messias nda'eveia re ijayvua

Jogueroporaei va'e pe Davi ombopara va'ekue “Yvoty lírio” he'ia py oporaeia rami
oporaei aguã.

69

- ¹ Xeruete, xereraa jepe ke,
mba'eta yy ou ma xerekovea peve.
- ² Xepija ma yapo py,
yvy ndarovyi.
Yy typyvea py aĩ.
Oxyry atã vy xemoinge.
- ³ Ajapukai riae ete vy xekane'õ ma,
xejyryvi pirupa ma guive.
Xerexa voi ndoexavei ma,
Xeruete arõ riae ete rã.
- ⁴ Mba'e py e'ŷ ndaxerayvui va'e kuery ma
xe'a xekã regua gui hetave ikuai.
Xemombaxe va'e kuery ma ipo'aka va'e meme,
mba'e py e'ŷ xerovaigua kuery xere opu'ã va'e.*
Ha'e rami vy xeapo okuapy xemonda ague'ŷ voi ame'ẽ ju aguã rami.
- ⁵ Xeruete, ndee reikuaa porã xee ae 'arandua rupi e'ŷ aikoague,
atekoavyague ndereikuua e'ŷi.
- ⁶ SENHOR, Xeruete nexondaro reta va'e,
kekáuxa toximba eme ndere ojerovia va'e.
Israel kuery Ruete,
kekáuxa toĩ vai eme ndereka va'e kuery.

§ 68:30 “Vixo takua ty rupigua” he'ia ma Egito pygua ruvixa re ijayvu vy (Ezequiel 29.3, 32.2). * 69:4 João 15.25

- ⁷ Mba'eta ndevy aiko ramo xere ijayvua vaikue-ikue.
Xerova re axímbaa anho ojekuaa.
- ⁸ Xeryvy kuery rexaaty rami ve'ŷ ma aiko,
ha'i pi'a kuery voi ndaxerexa kuaavei ma.
- ⁹ Mba'eta ndevygua oo ayvu etea xemomba,
ndere ijayvu rei va'e kuery ijayvu reia ma xere ae ou.*
- ¹⁰ Ajae'o akaru e'ŷ re aikoa py.
Ha'e rami aikoa re ju ijayvua.
- ¹¹ Ajukue voxá guigua py anhemonde ramo*
ha'e kuery xembojaru rei rive 'rã okuapy.
- ¹² Okẽ py oguapy va'e opuka rei okuapy xere.
Oka'u rei va'e kuery voi xerery rupi oporaei 'rã okuapy.
- ¹³ Ha'e rã SENHOR, xee ma ndevy anhembo'e ha'eve jave.
Xembovai ke Xeruete, opa mba'e py renhomboaxya rupi,
mba'eta ojeroviapy reiko vy renhopytyvõ 'rã.
- ¹⁴ Xereraa jepe ke ijaxuru va'e py aike e'ŷ aguã.
Xereraa jepe xere ija'e e'ŷ va'e kuery gui,
yy tropyvea py aikeague gui.
- ¹⁵ Xereroxyry uka eme yy oxyry atã va'e pe,
yy jere py guive xemoinge uka eme,
vykua voi xe'áry tonhemboty eme.
- ¹⁶ SENHOR, xembovai ke renhomboaxya rupi rejoayvu va'e vy.
Opa mba'e py renhomboaxy va'e vy ejevy ju xea py.
- ¹⁷ Xee nerembiguai pe ejexa uka e'ŷ eme,
ajexavai aikovy ramo.
Xembovai voi ke.
- ¹⁸ Enhemboja xerekovea re, xerepy,
xereraa jepe xerovaigua kuery gui.
- ¹⁹ Ndee ma reikuaa ae xembojaru rei okuapy,
xemoxímbaa ha'e xemoi vai reia guive.
Xerovaigua kuery ha'e javi rexaa rupi meme ikuai.
- ²⁰ Axímbaa gui xepy'a ovopa, xekangy vy.
Xemboaxyarã ma arõ rive,
xembovy'aarã aeka teī ndajoui.
- ²¹ Ha'u va'erã iro va'e rive ome'ëa xevy,
ha'e xey'uvei ramo vinagre ome'ëa.†
- ²² Ha'e kuery mesa tojeapo nhuã rami ha'e kuery renonde,
imba'e rei-rei tropyta imbo'aarã.
- ²³ Ha'e kuery rexaa voi tapytumba ndoexavei aguã,
ikupe ma ejapo oryryipa aguã rami.*
- ²⁴ Ha'e kuery pe exa uka ndepoxya,
ndepoxya toupitypa.
- ²⁵ Hekoa tropyta tekao e'ŷa rami,
avave rei toiko eme hoogue py.‡
- ²⁶ Mba'eta ha'e kuery omoingo axy raxave rire ndee remoingo axy va'e,
ndee remboguai va'ekue ha'e kuery ojapo haxy oendu vaipave aguã rami.
- ²⁷ Ha'e kuery re emoïve tema teko vai káuxa opaga aguã,
remboaxy aguã rami e'ŷ ikuai aguã.

* 69:9 João 2.17; Romanos 15.3 * 69:11 Ha'e kuery ipy'a vai vy onhemonde 'rã ajukue voxá guigua py
gueko rami vy (Lucas 10.13; Apocalipse 11.3). † 69:21 Ha'e ramigua oiko Jesus kuruxu re oí jave (Mateus 27.33-34,
48; João 19.28-30). * 69:23 Romanos 11.9-10 ‡ 69:25 Kova'e ayvu rupi Judas rekokue re ijayvu Atos 1.15-26 py.

- ²⁸ Hery emboguepa kuaxia tekove oguereko va'e kuery rery oĩa gui,*
toĩve eme heko porã va'e kuery rery reve.
- ²⁹ Ha'e rã xee ma ndavy'ai ete aikovy ajexavai vy.
Xeruete anhemiaty yvate va'e, exa uka ju xereraa jepea.
- ³⁰ Nhanderuete rery rupi aporaei 'rã,
amboete 'rã arov'y'a reve.
- ³¹ Namigua ma SENHOR ojou porãve 'rã
vaka ra'y, e'ŷ vy vaka hakua ha'e ipyapẽ va'e ome'ẽmby gui.
- ³² Ha'e va'e ojexavai va'e kuery oexa vy ovy'a 'rã okuapy.
Peẽ Nhanderuete re penema'endu'a va'e,
tapendeky'a guaxuve ju.
- ³³ Mba'eta Nhanderuete ombovai 'rã iporiaukue'i ojapukaia,
ndaexarai 'rã nhuã py ixupeguia omboty pyre gui.
- ³⁴ Ha'e gui yva ha'e yvy regua, toporaei ixupe,
ye'ẽ ha'e opa mba'e hexe omyĩ va'e avi.
- ³⁵ Mba'eta Nhanderuete ogueraa jepe 'rã Sião pygua kuery,
ojapo ukapa ju 'rã guive Judá yvy regua tetã.
Ha'e py ma ha'e kuery heko ju 'rã, ixupeguia ae 'rã ikuai.
- ³⁶ Ha'e gui hembiguai ramymino kuery ju 'rã ikuai porã ha'e py,
hery oayvu va'e kuery ikuai avi 'rã ha'e py.

Salmo 40.13-17

Jogueroporaei va'e pe Davi ombopara va'ekue ima'endu'a aguã.

70

- ¹ Xeruete, xereraa jepe ke.
Ejapura ke SENHOR, xerepy aguã.
- ² Tove xerekove oipe'axe va'e toximba,
oximbaa anho toendu.
Ajexavaia re ovy'a rei va'e kuery
oximba reve tojevypa guakykue katy.
- ³ Tove ovy'a rei va'e xevy “Ha'evea rami! Ha'evea rami!”
he'i va'e kuery toguevipa.
- ⁴ Ha'e rã ndereka va'e kuery ha'e javi ma tandererovy'a oporaei reve.
Rejogueraa jepea oguerovy'a va'e
“Nhanderuete ima'endu'a porãmby toiko!” te'i riae okuapy.
- ⁵ Ha'e gui xee ma iporiaukue'i, ojexavai rei va'e aiko.
Xeruete, ejapura xerepy aguã.
Ndee ma xepytyvõa ha'e xerepyarã.
SENHOR, ndeare eme ke!

71

Tuja'i ojerureague

- ¹ SENHOR, ndere ae xee anhemiaty va'e.
Taiko eme oximba rei va'e.
- ² Xereraa jepe rejoguerako porãa rupi vy, xejogua ju.
Endu ke ndeapyxa py, ha'e xerepy.
- ³ Ndee ma xe'itaova anhemiaty.
Ndeayvu aa jepe aguã re,
mba'eta ndee ma xe'itaova ha'e oo imbaraete va'e.*
- ⁴ Xeruete, xereraa jepe ke heko vai va'e po gui,
avakue heko vai va'e, porayvu e'ŷ va'e xejopy va'e gui.
- ⁵ Mba'eta SENHOR Xeruete, ndee ma roarõ aikovy va'e,

* 69:28 Filipenses 4.3; Apocalipse 3.5, 13.8, 17.8, 20.11-15, 21.27 * 71:3 Salmo 31.1-3

- xekunumi guive ndere ajerovia va'e.
- 6** Ndere ae ajeko va'e xetui'i guive.
 Xeryru'i gui xepe'a va'ekue.
 Ha'e gui ndere vy 'rāe aporaei ára nhavō.
- 7** Heta pe nhomondyipaa aiko,
 teī ndee ma anhemiaty imbaraete va'e reiko.
- 8** Ndevy anho 'rā aporaei,
 roguerovy'a 'rā ára nhavō.
- 9** Xetuja'i ma teī xereja eme xee ae'i.
 Xembaraetea opa ramo xerepy e'ŷ eme.
- 10** Mba'eta xerovaigua kuery ma ijayvu okuapy xere.
 Xerekovea oipe'axe va'e nhomboaty tema okuapy.
- 11** Ha'e vy aipoe'i: "Nhanderuetendoepyvei ma 'rā.
 Nhamonha ke, jajopy,
 heraa jepearā ndoikoi ramo", he'i okuapy.
- 12** Xeruete, ejep'e eme xea gui.
 Xeruete, ejapura ke xerepy aguā.
- 13** Ha'e rā xerekovea rovaigua kuery ma toxīmba ha'e tokanhymba.
 Ejapo ke xemoī vaixe va'e kuery ae oxīmba aguā rami,
 omboeteve e'ŷpy ta'ikuai.
- 14** Ha'e rā xee ma ndee ae roarō ára nhavō,
 rogueroporaei riae guive.
- 15** Xejuru py amombe'u 'rā rejoguerekoporāa,
 ára nhavō amombe'u 'rā rejogueraa jepea,
 ndaikuaapai teī.
- 16** Anhenhandu SENHOR Xeruete mbaraetea rupi.
 Ha'e rami vy xema'endu'a jepi 'rā rejoguerekoporāa re,
 ndeguigua re anho.
- 17** Xeruete, ndee ma xekunumi guive xerekombo'e reikovy.
 Ha'e gui aŷ peve amombe'u aikovy iporā ete va'e rejapo va'ekue.
- 18** Ha'e nunga rupi Xeruete, xereja eme,
 xetuja'i ete ma, xe'a xiīmba ma teī,
 aŷgua kuery pe nembaraetea aikuaa ukapa peve,
 ndepo'akaa guive raka'e rā ikuai va'erā pe.
- 19** Xeruete, nderekoporāa ma yva peve 'rā oo.
 Mba'emo vaipa ete rejapo va'e, Xeruete.
 Mava'e nda'u ndee ramigua ete 'rā oiko?
- 20** Opa marāgua tekoviha'e jexavaia rupi xemboaxa rire teī
 xerekovea remoī porā jevy 'rā,
 yvykua vaikue gui xerenoē kuerei.
- 21** Xemoingo porā jevy ke,
 xemombaraeju.
- 22** Xee voi mbaraka py rogueroporaei 'rā.
 Xeruete, xema'endu'a 'rā ndeguigua anhetē va'e re.
 Ndevy aporaei 'rā mboraei ixā reta va'e pu rupi,
 Israel kuery ruete Iky'a e'ŷ va'e pe ae.
- 23** Roguerovy'aa rupi xejuru py aroporaei 'rā,
 xerekovea rupi voi roguerovy'a 'rā, xereraa jepe rire.
- 24** Xeapekū py ára nhavō aroma'endu'a 'rā rejoguerekoporāa,
 mba'eta xemoī vaixe va'e oxīmba ha'e nda'evei nho okuapy.

Huvixave raka'e rā peve ipo'aka aguā re ojerurea ague
 Salomão ombopara va'ekue.

72

- ¹ Oreruete, huvixave re emoī ke ne'arandua,
 huvixave ra'y guive emo'arandu joguerekō porā aguā rami.
- ² Ha'evea rami meme toikuua pota ndevyguá kuery re,
 teko porā rupi topena ojexavai rei'i va'e re.
- ³ Yvyty ikuai va'e gui ou 'rā heta va'e kuery moingo porāarā,
 yvy'ã gui voi ou 'rā teko porā.
- ⁴ Ha'e gui huvixa toikuua pota heta va'e kuery iporiaukue'i re,
 toepy ojexavai va'e ra'y kuery,
 ha'e rā nhomoingo axyare ma tomou'ūmba.
- ⁵ Ha'e ma oiko riae 'rā kuaray hexakā teria ja,
 jaxy hexakāa ja guive, yvy regua ha'e javi okuavea ja.
- ⁶ Huvixa toiko nhuūndy rupi oky ho'a va'e rami,
 oky xapy'a pyáv yvy omoakŷ va'e rami.
- ⁷ Ha'e oña ára heko porā va'e ta'ikuai porā,
 jaxy hexakā teria ja toiko ikuai porā aguā.
- ⁸ Ta'ipo'aka ye'ẽ ha'e javi peve,
 ha'e yakā oĩ va'e guive yvy apy peve.
- ⁹ Henonde toĩ tekao e'ŷa regua kuery ha'e javi guenapy'ã re.
 Hovaigua kuery tojero'apa yvy ku'i oere peve.
- ¹⁰ Ixupe Társis tetā ha'e yy pa'ũ pygua huvixa kuery tome'ẽ imposto repy,
 Sabá ha'e Sebá pygua huvixa voi tome'ẽ mba'emo ixupe.
- ¹¹ Henonde huvixave ikuai va'e toīmba guenapy'ã re.
 Ha'e javi regua ta'ikuai ixupe anho.*
- ¹² Mba'eta ha'e ma oepy 'rā iporiaukue'i ojapukai ramo,
 ojexavai va'e ha'e yvyigue'i guive.
- ¹³ Omboaxy 'rā ikangy'i ha'e ojexavai va'e,
 ogueraa jepe 'rā iporiaukue'i rekove.
- ¹⁴ Ojogua 'rā omoingo axy rei pyre ha'e ojuka pyrā rekove.
 Ixupe rā ha'e kuery ruguy hepyve ete.
- ¹⁵ Toikove puku,
 ha'e gui ixupe ome'ea 'rā ouro Sabá guigua.
 Hexe ojerurea riae 'rā,
 ima'endu'a porāa 'rā guive ko'ẽ nhavō.
- ¹⁶ Ijyvy re toiko porā mba'emo aju,
 tomyimba jekuaa yvyty apyte peve.
 Tai'a porā Líbano yvy pygua rami.
 Tetā pygua kuery voi taetave ovjai ipotya rami.
- ¹⁷ Hery re ta'ima'endu'aa riae raka'e rā peve,
 ta'ima'endu'a porāa kuaray hexakā teria ja.
 Hexe vy toiko porā ha'e javi regua avakue,
 ixupe yvy regua kuery "Ima'endu'a porāmby" te'i.
- ¹⁸ Ima'endu'a porāmby toiko SENHOR Nhanderuete, Israel kuery Ruete,
 ha'e anho nhomondyipaarā ojapo kuaa va'e ramo.
- ¹⁹ Ta'ima'endu'a porāa riae hery re, iporā ete ramo.
 Hexakāa tojekuaa yvy jave re.
 Amém! Amém!
- ²⁰ Opa ma Jessé ra'y Davi onhembo'ea.

*Heko vai va'e kuery reko re ijayvua
Mboraerā Asafe ombopara va'ekue.*

* 72:11 Apocalipse 21.22-26

73

- ¹ Nhanderuete anhetē Israel kuery oayvua rupi ete oiko,
 ipy'a ky'a e'ŷ va'e kuery pe.
- ² Ha'e rā xee ma aikoa rupi ajavy rai,
 kyrī'i oata ajavy aguā aguataa py.
- ³ Mba'eta xee ma amoaruā va'ekue ojee rive ojerovia va'e kuery,
 opa marā rei ikuai va'e imba'e rei-reipa rā aexa vy.
- ⁴ Ha'e kuery re noī ipy'a eta reia merami.
 Hete rexāi, imbaraete rei guive.
- ⁵ Ha'e kuery ma avakue imarā va'e rami e'ŷ na'ikane'ōi,
 neī ndojexavai 'rā avakue mboae rami e'ŷ.
- ⁶ Ojee omoī 'rā ojejou porā reia mbo'y rami,
 jojukaxea omoī 'rā ao puku rami.
- ⁷ Ikyra ete gui hexa ēmba rei 'rā,
 ha'e ipy'a re ma opa marā rei ikuai aguā anho oī.
- ⁸ Nhombojaru rei ha'e ijayvu vai rei 'rā okuapy joe,
 nhomoingo axy rei aguā re anho 'rā ijayvu onhemboyvate vy.
- ⁹ Yva pygua gui onhemboyvateve aguā re tema ijayvu 'rā okuapy,
 yvy jave re ikuai va'e re ijayvu.
- ¹⁰ Ha'e nunga rupi heta va'e kuery oje'oi 'rā hupive,
 yvu gui oy'uxea rami oy'u va'e rami.
- ¹¹ Aipoe'i 'rā: "Mba'exa nda'u Nhanderuete oikuua 'rā?
 Xapy'a rei nda'u Yvate ete va'e re oī ri oikuua aguā?" he'i.
- ¹² Ha'e rami ae ikuai heko vai va'e.
 Ha'e kuery noī vai 'rāe,
 omba'e rei-reirā ojou-jouve 'rā.
- ¹³ Ha'e nunga rupi xepy'a ky'a e'ŷa rupi aikoa mba'everā ndovarei,
 neī xepo ky'a e'ŷa guive.
- ¹⁴ Mba'e re tu aiko axy riae
 ko'ē nhavō xembopagaa rupi?
- ¹⁵ Ha'e rami xeayvu va'e rire
 ajapo 'rāgue ndera'y kuery ha'e javive pe nda'evei aguā rami.
- ¹⁶ Ha'e rami avi ha'e nunga re aikuua pota vy
 xevy pe ipoyi ete va'e aikuua.
- ¹⁷ Nhanderuete pegua henda iky'a e'ŷ va'e py aike peve.
 Ha'e gui mae ma aikuua ha'e kuery opa aguā.
- ¹⁸ Anhetē ndee remoī 'rā ha'e kuery yxyī reia py,
 rejapo 'rā ho'apa vy okanhy aguā rami.
- ¹⁹ Opa xapy'a 'rā,
 nhemondyi gui rive 'rā okanhymba.
- ²⁰ Oexa ra'ua gui oma'ē xapy'a va'e rami 'rā
 ndee voi SENHOR repu'ā vy ha'e kuery re nerema'ēvei.
- ²¹ Ha'e gui xepy'a raxy jave,
 xekuraxō py nda'evei reia anho aendu vy
- ²² xevai rei aikovy va'ekue aikuua e'ŷ vy.
 Nerenonde hi'arandu e'ŷ va'e rami aiko va'ekue.
- ²³ Ha'e rami avi ndereve riae xee aiko,
 ndee ma xepo aiporu kuaa regua re xejopy.
- ²⁴ Ndee xererekō 'rā xemongetaa rupi.
 Ha'e rire ma xemovaē 'rā nerekakāa py.
- ²⁵ Mava'e 'rā tu areko yva re ndee e'ŷ vy?
 Yvy re voi ndoikoi ndee rami arov'y'a va'e.

- ²⁶ Xero'o, xekuraxõ ikangypa teĩ
Nhanderuete oiko xepy'a mombaraetearã,
xevyguia oĩ raka'e rã peve guarã.
- ²⁷ Ndegui ojepe'a va'e ma okanhymba 'rã,
remomba 'rã ndere ojeroviaague rupi ve'ŷ ikuai va'e.
- ²⁸ Ha'e rã xevy ma ha'eve vaipa Nhanderuete reve aikoa.
SENHOR Nhanderuete re anhemí,
hembiapokue ha'e javi amombe'upa aguã.
- Oo iky'a e'ŷ va'e omongy'apaa re nda'eveia ague
Mboraeirã nhombo'e aguã Asafe ombopara va'ekue.*

74

- ¹ Oreruete, mba'e re tu orereja raka'e rã peve?
Mba'e re tu ndepoxy nerymba veva'i kuery ndeyvy regua ae orekuai va'e pe?
- ² Nema'endu'a ke ndevyguia orekuai va'e re,
yvy itui ypy'i guive ndejeupe guarã orejogua rire.
Orejogua raka'e ndevy guarã orekuai aguã.
Nema'endu'a ke Sião yvyty py reikoague re.
- ³ Eju ke ndevyguia oo ivaiipa are ma va'e py,
henda iky'a e'ŷ va'e nderovaigua kuery opa marã omongy'apaague py.
- ⁴ Mba'eta ronhemboatyague py nderovaigua kuery hevovo rei okuapy,
ha'e ojeupeguia ra'angaa rive ju omopu'ã imo'amy.
- ⁵ Ha'e kuery ma ka'aguy re haxa oiporu va'e rami avi ombovaipa.
- ⁶ Ha'e gui aŷ yvyrage ombojegua pyre ha'e javi
ha'e kuery omopẽmba va'ekue haxa ha'e karavo mbotaa py.
- ⁷ Ndevyguia henda iky'a e'ŷ va'e re omboja tata,
yvy peve oapy aguã nderery oĩague.
- ⁸ Ha'e kuery opy'a py "Aŷ ma nhamomba vyvoi", he'i okuapy.
Ha'e rami vy oreyvy jave re oapypa Nhanderuete pegua henda iky'a e'ŷ va'ekue ha'e javi.
- ⁹ Ha'e rami rire ndoroexavei ma orevy guarã oikuaa uka pyre.
Jipovei ma profeta,
orembyte ndoikoi guive raka'e peve 'rã paa oikuaa va'erã.
- ¹⁰ Oreruete, raka'e peve 'rã tu nderovaigua kuery orere opu'ã rei?
Raka'e peve nda'u nderovaigua kuery ijayvu vaikue rei 'rã nderery re?
- ¹¹ Mba'e re tu ndereupivei ri ndepo reiporu kuaa regua,
ndepexo yvýry remboapu'a va'ekue?
- ¹² Ha'e gui Xeruete Xeruvixave ma yvy itui ypy'i guive oiko.
Ha'e ae ojapo raka'e oo jepe aguã rami yvy mbyte.
- ¹³ Ndee ma ndepo'akaa rupi remboja'o raka'e ye'ẽ.
Ha'e gui yy re ae ju remou'ũ va'ekue ypo akã,*
- ¹⁴ jakare akã rembovopa,
ha'e hetekue reme'ẽ vixo tekaoa e'ŷa rupigua ho'u aguã.
- ¹⁵ Ndee reipe'a va'ekue yvurã ha'e yakã ikuai va'erã,
ha'e rã yakã guaxu ma remboypa va'ekue.
- ¹⁶ Ára ha'e pytû voi ndevyguia.
Jaxy ha'e kuaray guive ndee rejapo va'ekue meme.
- ¹⁷ Remoĩ avi yvy apy peve guarã.
Kuaray puku-a ha'e yro'ya ndee ae rejapo va'ekue.
- ¹⁸ Eikuua pota ke povae nunga re:

* 74:13 "Ypo" he'ia ma Egito pygua huvixa re ijayvu vy (Isaías 27.1, 51.9; Éxodo 14-15).

- ndee SENHOR re nderovaigua kuery ijayvu rei okuapy,
hi'arandu e'ŷ va'e regua ijayvu vaikue-ikue nderery re.
- ¹⁹ Emboaxa eme nerymba pyku'i kuery ho'u va'erā pe,
nderexarai eme ndevygua kuery rojexavai rokuapy va'e re.
- ²⁰ Nema'endu'a ke ndereve guarā rejapo va'ekue re,
mba'eta yvy re nda'evei etea py heko vai va'e anho ikuai.
- ²¹ Ojexavai va'e toximba rei eme.
Ojexavai va'e ha'e iporiaukue'i togueroporaei nho nderery.
- ²² Xeruete, epu'ã ke, eikuaa uka porā nderekō.
Nema'endu'a heko vai va'e ko'ẽ nhavō nembojaru reia re.
- ²³ Nderexarai eme nderovaigua kuery ojapukai rei okuapy re,
mba'eta nderovaigua kuery opa marā ijayuve tema okuapy.

Nhanderuete nhomboayvua re ijayvua

Jogueroporaei va'e pe mboraeirā Asafe ombopara va'ekue "Xemomba eme" he'ia py oporaeia rami oporaei aguā.

75

- ¹ Oreruete, roguerovy'a.
Roguerovy'a, rojapukai 'rā nderery rupi,
ha'e roikuaa ukapa 'rā nerembiapo porāa.
- ² Mba'eta aipo're: "Xee ma ambojeupity 'rā ára aa'angaague
ha'evea rupi anhomboayvu aguā.
- ³ Yvy omyimba, hexe ikuai va'e ha'e javi guive.
Ha'e rami teī xee amoī atāve 'rā ijytarā.*
- ⁴ Aipoa'e ojee ae ojerovia va'e pe: 'Penhemboyvate eme.'
Ha'e opa marā rei ikuai va'e pe voi: 'Peropu'ã eme penembaraetea.
- ⁵ Peropu'ã rive eme penembaraetea pendeyvatea py,
pendeayvu vaikue eme guive itaova aiko va'e re.' "
- ⁶ Mba'eta kuaray oua katy gui e'ŷ ou nhaneptyvōarā,
kuaray oikea katy e'ŷ, neī tekao e'ŷa gui e'ŷ guive.
- ⁷ Nhanderuete ae joe oikuaa pota va'erā oiko.
Amongue ma ha'e omomba 'rā,
ha'e rā amboae kuery ma omboyvate 'rā.
- ⁸ Mba'eta SENHOR po py ma oī peteī karo.
Ha'e va'e py ma oī vinho yjui va'e opa marāgu re omoirū mbyre.
Ha'e va'e gui ome'ẽ 'rā oy'ua aguā.
Ha'e ramo heko vai va'e yvy re ikuai va'e ha'e javi
oy'upa 'rā iky'akue reve.†
- ⁹ Ha'e rā xee ma raka'e rā peve 'rā aroporaei.
Arovy'aa rupi aporaei 'rā Jacó Ruete pe.
- ¹⁰ Amomba 'rā heko vai va'e mbaraeeta.
Ha'e rā heko porā va'e mbaraeeta ma omboyvatea 'rā.

Nhanderuete yvatea ha'e ipo'akaa re ijayvua

Jogueroporaei va'e pe mboraeirā Asafe ombopara va'ekue mbaraka py ombojoguy reve oporaei aguā.

76

- ¹ Nhanderuete reko ma Judá yvy re oikuapy,
hery ma omboetepy Israel kuerya py.
- ² Salém tetā py oī ombojeroviaaty,

* 75:3 "Yvy yta" he'ia ma ha'evea rami joguerekoa re ijayvu vy (Salmo 11.3, 82.5). † 75:8 Ha'e va'e karo re ijayvu ju Apocalipse 14.9-10 ha'e 16.19 py.

- Sião ma oĩaty ete.*
 3 Ha'e py omopẽmba hu'y rexakãgue,
 hu'y jokoa, kyxe ha'e joe opu'ã va'e ha'e javi.
 4 Ndee ma yvate ete ha'e ipo'akapave va'e
 yvyty imarã e'ý va'e gui voi.
 5 Ipy'a guaxukueve gui reipe'apa imba'e rei-rei.
 Ha'e kuery okepa ma oupy,
 peteñive ojerovia vai va'ekue ndoiporuvei 'rã opo.
 6 Ndee Jacó Ruete, ndeayvu atã ramo
 opytapa karóxa joe opu'ãa pygua ha'e kavaju.
 7 Anhetẽ ndee ma nhomongyjea reiko.
 Ndepoxy ramo mava'e 'rã tu optyta nerondenope
 8 Yva guive rendu uka ndeayvua.
 Yvy jave rupi oryryi ha'e okyririmba okuapy
 9 Nhanderuete opu'ã ramo nhomboayvu aguã
 ha'e yvyigüeve'i ogueraa jepe aguã.
 10 Mba'eta avakue poxya voi rejapo 'rã ndereroporaeia aguã rami,
 ha'e gui poxya mboae ma ndejee ae 'rã remoõ.
 11 SENHOR Penderuete pe penhemboayvu vy pejapo ete.
 Ijyvýry pendekuai va'e Peru peme'ë va'erã,
 mba'eta nhomongyjea oiko.
 12 Ha'e ma omomba 'rã huvixa kuery ojejou porãa.
 Ixugui huvixa yvy regua okyjepa 'rã okuapy.

Nhanderuete rembiapokue ha'e nhanemboaxya re ijayvua
 Jogueroporaei va'e Jedutum pe mboraeirã Asafe ombopara va'ekue.

77

- 1 Nhanderuete pe amonhendu xeayvua, ixupe ajapukai guive.
 Amonhendu 'rã xeayvua Nhanderuete pe xere oikuua pota aguã.
 2 Xee ajexavai ára nhavõ aeka SENHOR.
 Pytû mbukukue re audi xepo xekane'ô e'ý re,
 xenhe'ë py nanhembovy'a ukaxeí vy.
 3 Nhanderuete re xema'endu'a vy xepoae ainy.
 Mba'emo re aikuua pota ramo xenhe'ë na'imbaraetevei.
 4 Ndee rejapo ake aguã xerexa nambotyvei aguã rami,
 ajexavai ete rã xeayvu aguã voi nda'evevei.
 5 Aikuua pota ymave guare re,
 xema'endu'a ymave rupi ma'etÿa oaxa va'ekue re.
 6 Pyávy ma aikuua pota xepy'a py,
 ha'e rami vy xenhe'ë py aporandu:
 7 "Raka'e rã peve 'rã nda'u SENHOR nopenavei?
 Ndoexa ukavei 'rã nhanemboaxya?
 8 Opa ete ma nda'u iporayvua?
 Ijayvuague voi nda'u oaxa rive 'rã raka'eve rã peve?
 9 Nhanderuete hexarai ma teve joavyua gui?
 Tyrã ipoxy vy teve ndoexa ukavei nhanemboaxya?"
 10 Aipoa'eve ju:
 "Pova'e aroangeko aikovy,
 mba'eta Yvate ete va'e oiporu kuaa regua oiporuaty rami ve'ý oiporu", ha'e va'ekue.
 11 Xema'endu'a SENHOR rembiapokue re,
 mba'emo porã ymave rupi rejapo va'ekue re xema'endu'a aikovy.

* 76:2 Salém ma Jerusalém tetã rery mboae, Sião voi.

- ¹² Aikuua pota nerembiapokue ha'e javi re,
xema'endu'a nhomondyipaarā rejapo va'ekue re.
- ¹³ Xeruete, ndee reikoa ma peteī tape iky'a e'ŷ va'e.
Marā ramigua tuuete nda'u ndee Oreruete rami ipo'aka 'rā?
- ¹⁴ Ndee ma Oreruete nhomondyipaarā rejapo va'e.
Yvy regua kuery pe rexu uka ndepo'akaa.
- ¹⁵ Ndejyva py reraa jepe va'ekue ndevygua kuery,
Jacó ha'e José ramymino kuery.
- ¹⁶ Ha'e gui Oreruete, yy nderexu. Yy nderexu vy okyjea oendu raka'e.*
Typya voi omyimba.
- ¹⁷ Arai inhana va'e ojeapo yy.
Yva re yapu atā onhendu.
Ha'e gui hu'y voi oaxa jekuaa joa katy e'ŷ-e'ŷ.
- ¹⁸ Ndeguihua yapua hi'āgue-'āgue nhendu opa rupi,
overa va'e voi omoexakā ovu yvy re.
Yvy omyi vy oryryi.
- ¹⁹ Ye'ē rupi nderape ojekuaa,
repyrōa ma yy tuvixa va'e rupi oo.
Ha'e rami teī ndepypo ete ndojekuaai.
- ²⁰ Ndevygua kuery rerekoo va'ekue vexa'i rami,
Moisés ha'e Arão po rupi.

Nhanderuete opena porāa re ijayua
Mboraeirā nhombo'e aguā Asafe ombopara va'ekue.

78

- ¹ Xeretarā kuery, pejapyxaka ke xee rombo'e ramo.
Pejapyxaka porā ayvu xejuru gui oē va'e re.
- ² Xeayvu 'rā mba'emo re ambojojaa rupi.
Amombe'u porā 'rā ymagua kuery 'arandua.*
- ³ Mba'emo nhanderu kuery nhandevy omombe'u rā
nhaendu ha'e jaikuaa va'ekue,
- ⁴ ha'e nungakue nanhamombe'u e'ŷi 'rā nhandera'y kuery pe.
Raka'eve rā ikuai va'erā pe voi nhomombe'u 'rā
SENHOR opo'akaa rupi opa mba'e porā ojapo va'ekue jarovy'a aguā.
- ⁵ Ha'e ae oeja raka'e oayvu Jacó kuery pe,
Israel kuery pe oeja lei.
Ha'e nhaneramoī kuery pe ijayvu
gua'y kuery pe ju omombe'u aguā re,
- ⁶ ikuai jevy va'e kuery voi oikuaa aguā,
kyrīgue oiko'i va'erā teri va'e kuery voi.
Ha'e gui ha'e kuery ju opu'ā vy ha'e nungakue re ijayvu aguā guamymino kuery pe,
- ⁷ Nhanderuete re ojerovia aguā,
ha'e hexarai e'ŷ aguā Nhanderuete rembiapokue re,
ha'e rami 'rāgue py ojapo uka va'ekue rupi ete ikuai aguā,
- ⁸ tamoī kuery ikuaiague rami e'ŷ ikuai aguā,
nonhe'ē rendui va'e'ŷ ikuai aguā.
Ha'e kuery ma ha'ekue'ŷ-kue'ŷ rami ipy'a va'e,
onhe'ē py Nhanderuete pe e'ŷ ikuai raka'e.
- ⁹ Efraim ra'y kuery guyrapa reve-reve ikuai raka'e va'eri

* 77:16 Apy ijayvu Ye'ē Pytā Nhanderuete omboja'oague re (Êxodo 14). Ha'e gui yapu, overa va'e Nhanderuete ombou va'ekue re ijayvu. * 78:2 Mateus 13.35

- onhamba oje'oivy joe opu'ãa ára.
- ¹⁰ Ojepe'apa Nhanderuete guexeve guarã ojapo va'ekue gui,
ixuguigua lei rupi nda'ikuaixei vy.
- ¹¹ Hexaraipa okuapy hembiapokue
ha'e opa mba'e porã oexa uka va'ekue gui.
- ¹² Nhomondyipaarã tamoí kuery renonde ojapo teĩ,
Egito yvy Zoã regua nhuñdy rupi.*
- ¹³ Ye'ẽ omboja'o vy omboaxapa heravy ha'e va'e rupi,
yy omopu'ã imo'amy omboty vy.*
- ¹⁴ Ara py peteĩ arai ojekuaa va'e rupi ogueraa,
ha'e rã pyávy ma tata hexakãa rupi oguereko.*
- ¹⁵ Tekoa e'ÿa py itaova ombovo vy
omboy'u pavẽ typy vaipa va'e gui rami.
- ¹⁶ Ita gui omoẽ yy oxyry atã va'e,
yakã rami omboxyry.*
- ¹⁷ Ha'e rami teĩ ha'e kuery ojejavy tema okuapy henonde.
Tekoa e'ÿa py ikuai raka'e Yvate ete va'e rovai.*
- ¹⁸ Opy'a py Nhanderuete pe "Taexa" he'ia rupi ikuai.
Ho'u va'erã re rive tema ojerure okuapy.
- ¹⁹ Nhanderuete re ijayvu vy aipoe'i okuapy:
"Nhanderuete nda'u tekoa e'ÿa py ojou 'rã ja'u va'erã?"
- ²⁰ Ita re ombota uka vy ha'e va'e gui yy omboxyry va'ekue
mbojape voi nda'u ome'ẽ kuaa 'rã ja'u va'erã?
Xo'o voi nda'u ojou uka 'rã ojeupegua kuery pe?" he'i okuapy.
- ²¹ Ha'e nunga SENHOR oendu vy ojou vai.
Ha'e rami vy Jacó ra'y kuery re omoendy tata,
Israel kuery pe oexa uka opoxya.
- ²² Mba'eta ha'e kuery ndoyeroviai Nhanderuete re,
ndogueroviai guive ogueraa jepe aguã.
- ²³ Ha'e rami teĩ yva pe ha'e ijayvu vy
oipe'a uka yva rokẽ.
- ²⁴ Ojapo ha'e kuery áry ho'a aguã maná ho'u aguã.
Ha'e kuery pe ome'ẽ tembi'u yva guigua,*
- ²⁵ ha'e ramo peteĩ-teĩ ho'u okuapy mbojape anjo kuery rembi'u regua.
Hevyatãmba aguã rami ombou tembi'u.
- ²⁶ Ha'e gui ojapo yva gui yvytu kuaray oẽa katy gui oipeju aguã rami,
opo'akaa rupi ombou yvytu kuaray puku-a katy gui.
- ²⁷ Ha'e rami vy xo'o ju ombou ha'e kuerya py yvy ku'i rami,
guyra ombou ita ku'i ye'ẽ rembe re oĩ va'e rami heta va'e.
- ²⁸ Ojapo ha'e kuery ikuiaia mbyte ho'a aguã rami,
ha'e kuery ro yvýry rupi ae.
- ²⁹ Ha'e ramo ho'u okuapy hevyatãmba peve,
ha'e kuery oipota va'e ojapo ramo.
- ³⁰ Ha'e rami teĩ ha'e kuery nonhandu kuaavei.
Ijuru py tembi'u oime rei teri reve
- ³¹ Nhanderuete oexa uka opoxya ha'e kuery rovai.
Ha'e kuery regua imbaraetekueve voi ojuka,
oity inony Israel regua kunumigue.
- ³² Ha'e rami rire teĩ ha'e kuery ojejavy riae tema,

* 78:12 [Êxodo 7.8-11.10](#) * 78:13 [Êxodo 14.21-22](#) * 78:14 [Êxodo 13.21-22](#) * 78:16 [Êxodo 17.1-7; Números 20.1-13](#) * 78:17 [Êxodo 16; Números 11](#) * 78:24 [João 6.30-35](#)

- ndojeroviai okuapy tembiapo porã ojapo teĩ.
- ³³ Ha'e nunga rupi ha'e ojapo ha'e kuery oikovea yvytu rami rive oaxapa vyvoi aguã rami,
oikovea pukukue re okyje reia rupi anho ikuai aguã.
- ³⁴ Ojukapa ta ma ramo mae ma ojapukai okuapy ixupe,
onhemboaxyo oendu vy oeka okuapy Nhanderuete.
- ³⁵ Ima'endu'a ju Nhanderuete ha'e kuery pegua itaova oikoa re,
Nhanderuete Yvate ete va'e heraa jepea re.
- ³⁶ Ha'e rami teĩ ixupe ojapukai vy ijayvu porã merami rive okuapy,
oapekû py ma ijapu.
- ³⁷ Mba'eta opy'a py ndojerovia etei,
guexeve guarã ojapo va'ekue rupi e'ŷ ikuai.
- ³⁸ Ha'e rami teĩ Nhanderuete nhomboaxy va'e vy
omboguepa 'rã teko vai, nanhomombai 'rã guive.
Ha'e rami 'rãgue py mbovykue rei e'ŷ nomoõ 'rã ipoxy aguã,
opoxya oendu va'eri ndajoguerekoi 'rã ha'e rami.
- ³⁹ Ima'endu'a ha'e kuery to'o rive ikuia re,
yvytu oaxa rire ndojevyveia rami ikuai va'e ramo.
- ⁴⁰ Ha'e rami teĩ mbovykue rei e'ŷ hexe opu'ã rei okuapy tekao e'ŷa py,
ha'e kuery ae'i ikuia py ombopoxya rupi ikuai.
- ⁴¹ Nhanderuete pe "Taexa" he'i jepi,
ijayvu rei okuapy Israel kuery ruete Iky'a e'ŷ va'e re.
- ⁴² Na'ima'endu'avei okuapy ipo'akaa re,
hovaigua kuery gui ogueraa jepeague re voi,
- ⁴³ neĩ Egito yvy re hexa pyrã ojapoague re,
Zoã regua py nhomondyipaarã ojapoague re.
- ⁴⁴ Mba'eta ha'e py yakã oĩ va'e tuguy ju ojapo va'ekue,
yy gui ha'e kuery oy'u e'ŷ aguã.
- ⁴⁵ Ha'e kuerya py ombou heta mberu oixu'upa aguã,
ju'i voi heta ombou omomba aguã.
- ⁴⁶ Ha'e kuery mba'emo omono'õ 'rã va'ekue omboaxapa yxo rembi'urã,
tuku karu py omomba onhoty va'ekue'a.
- ⁴⁷ Amandau ombou vy omomba va'ekue ha'e kuery uva ty,
ha'e yvyra sicômoro ikuai va'e voi ojukapa yro'y py.
- ⁴⁸ Amandau py omomba hymba vaka kuery,
ha'e onhemboxi va'e py vexa'i kuery ojuka.
- ⁴⁹ Ha'e kuery pe oexa uka opoxya,
opa mba'e vai py omoingo axy opoxya rupi,
anjo kuery mba'emo vai rerua pe omboaxa.
- ⁵⁰ Opoxya rupi ete oiko va'ekue,
ha'e kuery rekovea ndogueraa jepei manoa gui,
ha'e rami 'rãgue py mba'eaxy vaikue pe omboaxa hekovea.
- ⁵¹ Ojukapa Egito pygua ra'y kuery jypyguare ha'e javi,
jypygu imbaraetekueve Cam regua.
- ⁵² Ha'e rã ojeupega kuery ma oipe'apa vexa'i rami,
vexa'i rami oguereko tekao e'ŷa rupi.
- ⁵³ Oguereko porã ramo okyjea noendui okuapy.
Ha'e rã hovaigua kuery ma oikepa ye'ẽ py.
- ⁵⁴ Ogueraa yvy iky'a e'ŷ va'e katy,
yvyty opo'akaa rupi oipe'a va'ekue peve.*
- ⁵⁵ Ha'e kuery renonde gui omoxẽmba ha'e va'e yvy pygua kuery,
ha'e gui ijyvy va'ekue ma Israel kuery peguarã ju omboja'o ukapa,

* 78:54 Josué 3, 11

- hoogue py omoingo Israel kuery.
- ⁵⁶ Ha'e rami teĩ Nhanderuete Yvate ete va'e pe “Taexa” he'i ju okuapy,
hexe opu'ãa rupi.
Ijayvuague rami e'ŷ ikuai.*
- ⁵⁷ Tamoĩ kuery ikuaiague rami ete ojepe'apa,
ojeroviaa rupi ve'ŷ ikuai.
Opa marã rei ikuai guyrapa hembia e'ŷ va'e rami.
- ⁵⁸ Mba'eta yvy'ã rupi ombojerovia atyrã ojapo vy
ombopoxy,
mba'emo ra'angaa rive omboetea rupi ojapo okuapy nda'evei etea oendu aguã rami.
- ⁵⁹ Ha'e nunga Nhanderuete oendu vy ipoxy.
Ha'e vy nopenavei Israel kuery re.
- ⁶⁰ Noĩvei ombojeroviaaty Siló tetã py oĩ va'e py,
avakue mbyte oo'i oĩ atyrã ojapo rire teĩ.*
- ⁶¹ Lei ryru ipo'akaa kuaa ukaa voi ogueraa uka amboae yvy katy,
hexakãa rexu ukaa oĩ va'ekue guive ngovaigua kuery po py omboaxa.
- ⁶² Ojeupegua kuery omboaxapa kyxe py ijukaarã pe,
ojeupegua kuery rovai ipoxy vy.
- ⁶³ Ha'e ramo kunumigue tata omomba ramo
kunhataĩgue ogueroporaei va'erã jipoi, neĩ omenda aguã.
- ⁶⁴ Sacerdote kuery voi kyxe py ojukapaa rã
ta'yxykue ojae'o aguã nda'evei.
- ⁶⁵ Ha'e gui mae SENHOR oikuuaa pota okeague gui omyí va'e rami,
ipy'a guaxu va'e vinho oy'u vy ojapukai atã va'e rami avi.
- ⁶⁶ Ha'e vy ngovaigua kuery ojuka vy omboguevi atãmba,
ojapo raka'e rã peve oximba aguã rami.
- ⁶⁷ Ha'e gui huixarã ma José ramymino kuery va'e regua ndoiporavoi,
neĩ Efraim regua.
- ⁶⁸ Ha'e rami 'rãgue py Judá regua oiporavo,
Sião vyty oayvu va'e guive.
- ⁶⁹ Ha'e áry ojapo ojeupegua henda iky'a e'ŷ va'e yva rami ete oĩ atã va'erã,
omoĩ atã raka'e rã peve guarã yvy onhono va'ekue rami.
- ⁷⁰ Ha'e rami vy oiporavo guembiguai Davi
vexa'i kora gui oipe'a vy.*
- ⁷¹ Vexa'i re opena oikovyäa gui ogueru vy
omoĩ Jacó kuery re opena va'erã,
ojeupegua kuery Israel re ae.
- ⁷² Ha'e ramo opena oikovy anhetẽ rupi ipy'a va'e vy,
arandu rupi ete oguerekoo opo py.

Ngovaigua kuery ombopaga aguã re ojerurea okuapyague
Mboraeirã Asafe ombopara va'ekue.

79

- ¹ Oreruete, yvy regua xondaro kuery ndevygua yvy re ou.
Ndevygua templo iky'a e'ŷ va'e omongy'apa,
ha'e Jerusalém tetã ha'e javi rupi omboavaipa.*
- ² Nerembiguai kuery retekue oeja guyra rembi'urã,
ndevy ikuai va'ekue ro'okue ma ka'aguy rupigua rembi'urã oeja.
- ³ Jerusalém ha'e javi rupi omoẽ huguy yy rami,

* 78:56 Juízes 2.6-15 * 78:60 1 Samuel 4; Jeremias 7.12-15 * 78:70 1 Samuel 16.1-13 * 79:1 2 Reis 25.1-21;
2 Crônicas 36.15-21; Jeremias 52.4-30

- nda'ipovei guive hetekue nhono porāarā.
- ⁴ Ha'e ramo orea katy rai'i rupi ikuai va'e ijayvu vaikue-ikue orere.
Opuka, ov'y'a rei guive orere.
- ⁵ SENHOR, raka'e peve 'rā tu ha'e rami oiko?
Orevy rexia uka riae 'rā teve nda'evei etea?
Orejou vaia nda'u tata rami riae 'rā ri hendy?
- ⁶ Yvy regua kuery pe jevy ke ndepoxy,
ndekuaa e'ŷ va'e kuery pe,
nderery rupi e'ŷ ojapukai va'e pe.
- ⁷ Mba'eta ha'e kuery ma omokanhymba Jacó kuery,
orerekaoa voi ombovaipa.
- ⁸ Orere emoī eme oreramoī kuery ojejavvyague.
Ha'e rami 'rāgue py orea py eju pojava oremboaxy aguā,
noronhanimavei ma ramo.
- ⁹ Oreruete orereraa jepea, orepytvō ke
nderery remboete ukaa rupi vy.
Orereraa jepe, ha'e emboguepa rojejavvyague
nderery re ae vy.
- ¹⁰ Mba'erā tu yvy regua kuery "Mamo tu Penderuete oī?" he'i okuapy?
Nerembiguai kuery ruguy onhoēague re
yvy regua rembopaga vy exa uka orevy.
- ¹¹ Endu ke nhuā py ikuai va'e poaēa.
Ndepo'akaa rupi emoinngove ju omano aguā rami ikuai va'e.
- ¹² SENHOR, orea katy rai ikuai va'e ndere ijayvu vai rei ramo
embopaga sete-kue áryve.
- ¹³ Ha'e rā ore ma ndevygua orekuai,
nerymba vexa'i kuery remongaru va'e ae.
Roguerovy'a riae 'rā.
Aŷ guive raka'e rā peve roporaei 'rā ndevy.

Omoingo porā ju aguā re ojerurea ague
Jogueroporaei va'e pe Asafe ombopara va'ekue "Yvoty lírio" he'ia py oporaeia rami
oporaei aguā.

80

- ¹ Israel kuery re repena va'ety, ejapyxaka ke.
Ndee rereko José ramymino kuery mymba rami.
Anjo ipopo va'e ikuiaia áry reña gui exa uka nerexakāa.
- ² Efraim, Benjamim ha'e Manassés regua kuery pe
exa uka ndepo'akaa, eju guive orereraa jepe aguā.
- ³ Oreruete, oremoingo porā ju ke.
Orevy pe exa uka nderova rexakāa, roo jepe aguā.
- ⁴ SENHOR Oreruete nexondaro reta va'e,
raka'e peve 'rā tu rendu rive ndevygua kuery onhembo'ea?
- ⁵ Orerexay re ae oremongaru tembi'u 'rāgue py,
karo remonyē orepy'a vaia roy'u aguā.
- ⁶ Rejapo orea katy'i ikuai va'e orere opu'ã aguā rami,
ha'e orerovaigua kuery orere opuka rei aguā.
- ⁷ Oreruete nexondaro reta va'e, oremoingo porā ju ke.
Orevy pe exa uka nderova rexakāa, roo jepe aguā.
- ⁸ Egito yvy gui reru raka'e peteī uva rakāgue'i.*
Yvy regua kuery remoxēague py renhotŷ.

* 80:8 "Uva rakāgue'i" he'ia ma Israel kuery re ijayvu vy (Isaías 5.1-7, 27.2-6; Lucas 20.9-19).

- ⁹ Yvy remboa'eveague rupi hapo porã ovy,
ha'e yvy áry rupi hakã'i oaĩ ovy.
- ¹⁰ Ha'e rami vy omokuaray'âmba yvyty ikuai va'e,
yary tuvixakueve va'e guive.
- ¹¹ Ye'ẽ peve oo oiny hovapý,
ha'e hoky ma yakã peve oo.
- ¹² Ha'e rire teĩ mba'e re tu ha'vy reity uka ikora?
Ha'e ramo tape rupi oaxa va'e tema omondo 'rã hi'a.
- ¹³ Tajaxu omou'ûmba 'rã,
ha'e mymba kuery nhuñdy rupigua ho'upa 'rã.
- ¹⁴ Oreruete nexondaro reta va'e, rojerure ndevy:
Ejevy ju oreá py.
Pe yva gui ema'ẽ orere,
eju eikuua pota aguã ndevyguá uva rembypy re.
- ¹⁵ Epy ke ndepo py ae renhoty va'ekue,
hakã pyau ndejeupe guarã ae remombaraete va'ekue.
- ¹⁶ Ojayapaa ma rire oapypaa ma tata py.
Tokanhymba orerovaigua kuery ndepoxya nderova py rexá uka ramo.
- ¹⁷ Tove ndepo toĩ ndeyke re ikuai va'e kuery re,
ava ra'y ndejeupe guarã ae remombaraete va'ekue re.
- ¹⁸ Ha'e rire ore kuery ndorojepé'avei ma 'rã ndea gui.
Oremoingove ju ke.
Ha'e ramo 'rãe nderery rupi rojapukai.
- ¹⁹ SENHOR Oreruete nexondaro reta va'e, oremoingo porã ju.
Orevy exa uka nderova rexakãa, roo jepe aguã.

*Jaroporai ha'e nhanhe'ẽ rendu aguã regua
Jogueroporaei va'e pe mboraerã Asafe ombopara va'ekue “Uva'a onhamiaty” he'ia py
oporaeia rami oporaei aguã.*

81

- ¹ Peporaei ke pevy'aa rupi Nhanderuete nhanemombaraetea pe.
Perovy'a Jacó Ruete.
- ² Peporaei vy pembojoguy pandeiro pu py.
Pembopu porã mba'epu ixã reta va'e ha'e mbaraka.
- ³ Pembopu ke mimby guaxu
jaxy pyau ha'e jaxy inhypyttu nhavõ,
nhandevyguá ngaru oikoa ára.
- ⁴ Ha'e rami aguã ae Jacó Ruete oeja va'ekue
Israel kuery rekora.
- ⁵ José kuery rekora oeja raka'e
Egito pygua kuery re opu'ã vy oo jave.
Peteĩ ayvu xee naendu kuaai va'ekue aendu ju aipoel'i rã:
- ⁶ “Pendevoyi amboguejy va'ekue pendeaxi'y áry gui,
pendepo voi aipe'a ajaka peupi heravyague gui.
- ⁷ Pejexavai vy xevy pejapukai ramo xee rogueraa jepe va'ekue.
Yapu mbyte gui xee rombovai,
roeko a'ã va'ekue guive Meribá py yy oĩ va'e yvýry”, he'i.*
- ⁸ “Xevyguá kuery, pejapyxaka ke pendevy xeayvu rã.
Israel kuery, peẽ kuery xenhe'ẽ rendu va'e rire.
- ⁹ Penembyte perekó eme Penderuete ramigua rive,

* 81:7 Meribá py oeko a'ãague re ijayvua ma Êxodo 17.1-7 py oĩ.

- tuuete mboae renonde pembojerovia eme.*
- ¹⁰ Xee ae ma SENHOR Penderuete,
 Egito yvy gui penerenoēare.
 Peipe'apa ke pendejuru, ha'e rã xee romongaru 'rã", ha'e va'ekue.
- ¹¹ Ha'e rami teĩ xevyguá kuery naxenhe'ẽ rendui.
 Israel kuery ndaxekuua potai.
- ¹² Ha'e rire xee ajapo ha'e kuery ae akã ratãa rupi ikuai aguã rami,
 ha'e kuery oipotaa rami rive ikuai aguã.
- ¹³ Xevyguá kuery xenhe'ẽ rendu va'e rire,
 Xeguigua tape rupi ae Israel kuery oo va'e rire
- ¹⁴ xee amomba voi 'rãgue hovaigua kuery,
 xepo'aka 'rãgue ija'e e'ŷ va'e ha'e javi re.
- ¹⁵ SENHOR re ija'e e'ŷ va'e kuery ikuai 'rãgue ixupe,
 ha'e rami ikuai 'rãgue raka'e rã peve.
- ¹⁶ Ha'e rã peẽ kuery ma trigo iporãve va'e re romongaru 'rãgue,
 ei ita pa'ũ gui guare ame'ẽ 'rãgue penevyatãmba peve.

*Ha'eve e'ŷa rami joe opena va'e kuery pe ijayvua
Mboraerã Asafe ombopara va'ekue.*

82

- ¹ Nhanderuete renonde ijapy okuapy ojeupegua kuery.
 Ha'e ramo tuuete kuery mbyte omboayvu oiny.*
- ² "Raka'e peve 'rã tu ha'eve'ŷa rami peikuaa pota joe?
 Heko vai va'ea katy jepi ri ty peiko.
- ³ Ha'evea rami ete 'rãgue peikuaa pota yvyigue'i ha'e tyre'ŷ re.
 Pepena porã ke ojexavai va'e ha'e oipytyvõ pyrã e'ŷ kuery re.
- ⁴ Peipytyvõ yvyigue'i ha'e iporiaukue'i,
 peraa jepe heko vai va'e po gui."
- ⁵ Ha'e kuery ma mba'eve ndoikuuai,
 neĩ ndoikuua potai va'e,
 pytû reia rupi ikuai.
 Ha'e ramo yvy yta omyimba.†
- ⁶ Xee aipoa'e va'ekue: "Peẽ kuery ma tuuete,
 Yvate ete va'e ra'y kuery pendekuai", ha'e va'ekue.*
- ⁷ Ha'e rami teĩ avakue rami rive 'rã pemano,
 pendekovea opa 'rã huvixa kuery mboae rami.
- ⁸ Oreruete, epu'ã ke, eikuaa pota yvy regua kuery re.
 Mba'eta yvy regua ma ndevy guarã meme.

*Nhanderuete nhombopaga aguã re ojerurea ague
Mboraerã Asafe ombopara va'ekue.*

83

- ¹ Oreruete, ekyrirĩ eme!
 Oreruete, ndeayvu e'ŷ eme, ei rive eme guive.
- ² Mba'eta nderovaigua kuery opu'ãmba okuapy,
 ndere ija'e e'ŷ va'e onhemboyvatepa.
- ³ Nhomongeta rei okuapy ndevyguá kuery rovai,
 jogueroayvu 'rã repenaa va'e kuery re.
- ⁴ Ha'e vy aipo'e'i: "Peju ke, jaa jaipe'a yvy re ikuai va'e mbyte gui,

* 81:9 Éxodo 20.1-6 * 82:1 "Tuuete kuery" he'ia ma joguerekooã omoĩ mbyre re ijayvu vy (João 10.34-36). † 82:5
"Yvy yta" he'ia ma ha'evea rami joguerekooa re ijayvu vy (Salmo 11.3, 75.3). * 82:6 João 10.34

- Israel kuery re ima'endu'aave e'ŷ aguā”, he'i okuapy.
- ⁵ Peteĩ rami 'rã jogueroayvu okuapy
nderovaigua ikuai aguā:
- ⁶ Edom regua ha'e Ismael guigua kuery,
Moabe regua ha'e Agar remiarirõ kuery,
- ⁷ Gibal pygua, ha'e Amom, Amaleque, Filístia
ha'e Tiro pygua kuery ha'e javi.
- ⁸ Assíria pygua kuery voi onhemoirũ 'rã ha'e kuery reve
Ló ramymino kuery oipytyvõ vy.
- ⁹ Ha'e kuery re ejapo Midiã regua kuery re rejapoague rami,
Sísera ha'e Jabim kuery re Quisom yakã yvýry rejapoague rami.*
- ¹⁰ Ha'e va'e kuery ma rejukapa va'ekue En-Dor py,
ha'e ramo hu'ũmba yvy re.
- ¹¹ Ha'e kuery regua yvatekueve re ejapo Orebe ha'e Zeebe re rejapoague rami,
huvíxa kuery re ejapo Zeba ha'e Zalmuna re rejapoague rami.†
- ¹² Mba'eta “Jajopy 'rã Nhanderuete yvy nhanderekooarã”, he'i okuapy.
- ¹³ Xeruete, emoaimbá ke yvyra rogue yvytu jere omboipa heravya rami,
mba'emo pire yvytu opa rupi ombovevea rami,
- ¹⁴ ka'aguy rupi tata oapypaa rami,
tata rendy yvyty ikuai va'e oapypaa rami.
- ¹⁵ Ha'e rami ae avi eakykue monha nde'yvytu vaikue py,
emondyipa heravy nde'yvytu atã py.
- ¹⁶ SENHOR, ejapo ha'e kuery oximbá aguā rami,
nderery rupi ha'e kuery voi ndereka aguā.
- ¹⁷ Tove ha'e kuery toximbá ha'e nda'evei nho ta'ikuai raka'e rã peve.
Nda'evei reia toendu ha'e tokanhymba.
- ¹⁸ Ha'e ramo 'rãe oikuua ndee anho SENHOR nderery va'e reikoa,
ha'e yvy jave áryve Yvate ete va'ea.

Templo re ima'endu'a etea

Jogueroporaei va'e pe mboraeirã Coré ra'y kuery ombopara va'ekue “Uva'a onhamiaty”
he'ia py oporaeiaty rami oporaei aguā.

84

- ¹ Xeruete nexondaro reta va'e,
xevy pe nembojeroviaaty ma iporã ete!
- ² Xenhe'ẽ py xepoaẽ SENHOR pegua oka re nda'evei vy.
Mba'eta xepy'a, xerete ha'e javi py arov'y'a Nhanderuete oikove va'e.
- ³ Kyky'i ma oo 'rã ojou oke atyrã,
mbyju'i voi ojou 'rã guaityrã'i gua'y kue'iry oguereko aguā,
ndevygua altar yvýry,
SENHOR nexondaro reta va'e, Xeruvixa ha'e Xeruete.
- ⁴ SENHOR, ov'y'a ete 'rã ndevygua oo py ikuai va'e.
Ha'e kuery oporaei riae 'rã ndevy.*
- ⁵ Ovy'a ete 'rã avakue ndere vy imbaraete va'e,
ha'e ipy'a re oĩ taperã omoatyrõ mbyre rupi oguata aguā.
- ⁶ Yvyugua ipiru rei va'e rupi oaxa teĩ
ha'e kuery pe ojeapo 'rã yy oxyry porã reia.
Oky ypy va'e omoaký porãmba 'rã guive.

* 83:9 Midiã regua re Nhanderuete mba'emo ojapoague omombe'u Juízes 7 py, ha'e rã Sísera ha'e Jabim re ojapoague ma Juízes 4 py. † 83:11 Ha'e va'e kuery Gideão ojukapa (Juízes 7.25–8.21). * 84:4 “Ndevygua oo py ikuai va'e” he'ia ma levita ha'e sacerdote kuery templo py ikuai va'e re ijayvu vy.

- ⁷ Ha'e kuery ma imbaraeteve teve 'rã oje'oivy.
 Peteĩ-teĩ ojexa uka 'rã Nhanderuete renonde Sião py.[†]
- ⁸ SENHOR, Xeruete nexondaro reta va'e, endu anhembo'ea.
 Jacó Ruete, ejapyxaka ke.
- ⁹ Oreruete mba'emo vai gui jokoa reiko va'e, eikuua pota ke,
 ema'ẽ huvixave reiporavo va'ekue re.
- ¹⁰ Amboae henda py mil ára aĩ 'rãgue py
 ha'eveve peteĩ'i ára ndevygua roka py aĩ aguã.
 Heko vai va'e rekoia py xerekooa 'rãgue py
 ha'eveve Xeruete pegua rokẽ arõ aikovy aguã.
- ¹¹ SENHOR Nhanderuete ma kuaray ha'e mba'emo vai jokoa.
 SENHOR nhanemboaxy ha'e nhanemoexakãarã.
 Teko porã rupi ikuai va'e pe nome'ẽ e'yi 'rã iporã va'e.
- ¹² SENHOR nexondaro reta va'e,
 ndere ojerovia va'e ov'y'a ete 'rã.

Ojejavyague Nhanderuete ombogue aguã re ojerurea ague
 Jogueroporaei va'e pe mboraeirã Coré ra'y kuery ombopara va'ekue.

85

- ¹ SENHOR, remoingo porã va'ekue ndeyvy,
 Jacó kuery guive remoingo porã ju.
- ² Ndevygua kuery ojejavyague remboguepa va'ekue,
 heko vaiague rejao'ipa.
- ³ Ndepoxya nderexa ukai orevy,
 ndepoxya rupi e'ŷ orererekoo va'ekue.
- ⁴ Oreruete orereraa jepea, peteĩgue ju ke oremonoinga porã,
 oregui eipe'a ju ndepoxya.
- ⁵ Tyrã ndepoxy riae 'rã teve orevy?
 Raka'e rã peve 'rã nda'u ndepoxy?
- ⁶ Noremoingo porãve jevyi 'rã ri ty'y,
 ndevygua kuery ndererovy'a aguã?
- ⁷ SENHOR, exa uka ndeporayvua orevy,
 ejapo roo jepe aguã rami.
- ⁸ Ajapyxaka 'rã SENHOR ijayvua re,
 mba'eta ijayvu ojeupegua iky'a e'ŷ va'e kuery omoingo porã aguã re,
 o'arandu e'ŷa py ho'a ve'ŷ aguã.
- ⁹ Ou ma oiny henonde ojererokyjea rupi ikuai va'ea py, ogueraa jepe aguã,
 nhandeyvy re hexakãa ojekuaa aguã.
- ¹⁰ Mborayvu nhomoirũ anhetẽ va'e reve,
 teko porã ha'e jaiko porãa oje'a jova ptye va'e rami.
- ¹¹ Yvy gui henhoi 'rã anhetẽ va'e,
 ha'e teko porã oma'ẽ 'rã yva gui.
- ¹² SENHOR ome'ẽ 'rã iporã va'e,
 ha'e nhandeyvy re oiko 'rã mba'emo'a.
- ¹³ Teko porã oo 'rã henonde,
 oguerekoo katu aguã haperã oo aguã.

Ojerure ha'e ojerovia etea
 Davi onhembo'eague.

86

- ¹ SENHOR, ejapyxaka ke ajapukai rã, xembovai guive,

[†] 84:7 Apy ma ijayvu Jerusalém py Nhanderuete omboete aguã katy oguata va'e kuery re.

- mba'eta ajexavai vy xeporiau aikovy.
- ² Ndere ajerovia ramo eraa jepe xerekove.
Xeruete, reraa jepe 'rā nerembiguai ndere ojerovia rā.
- ³ SENHOR, xemboaxy ke,
ára pukukue re ndevy ajapukai ramo.
- ⁴ Embovy'a ju nerembiguai py'a,
ndere xenhe'ẽ aroma'endu'a ramo.
- ⁵ Mba'eta SENHOR, porayyu ha'e nhomboaxy va'e reiko,
reayvu ete ndevy ojapukai va'e ha'e javi.
- ⁶ SENHOR, endu ke anhembo'ea,
eikuua pota ajapukaia re.
- ⁷ Ajexavaia ára ajapukai 'rā ndevy,
ndee xembovai ramo.
- ⁸ SENHOR, ndee ramigua tuuete mboae nda'ipoi.
Nda'ipoi avi rejapo va'e ramigua.
- ⁹ Ha'e javi regua remoingo va'ekue ou vy
guenapy'ã re oĩmba 'rā okuapy neronden,
ha'e guiomboete 'rā nderery, SENHOR.*
- ¹⁰ Mba'eta ndee ma yvate ete va'e, nhomondyipaarrā apoa guive.
Ndee anho Oreruete.
- ¹¹ SENHOR, xembo'e ke nderape rupi aa aguã.
Ha'e ramo aiko 'rā ndeguigua anhetẽ etea rupi.
Xepy'a re emoĩ nderery aendu vy ajererokyjea rupi anho aiko aguã.
- ¹² SENHOR Xeruete, xee roguerovy'a xepy'a ha'e javi py,
nderery rupi aporaei 'rā raka'e rā peve,
- ¹³ mba'eta ndee xerayvu ete vy
xerekove reraa jepe manoaa po'akaa gui.
- ¹⁴ Xeruete, ojejou porã rei va'e kuery opu'ã ma xere,
ojerovia rei va'e xejukaxe okuapy.
Ha'e kuery nemboetea rupi e'ŷ ikuai.
- ¹⁵ Ha'e rā ndee SENHOR Xeruete ma renhomboaxy ha'e ndeporayvu vaipa,
nandekuerai, opa mba'e py renhomboaxy ha'e anhetẽ rupi reiko va'e.
- ¹⁶ Ema'ẽ ke xere, xemboaxy guive.
Xemombaraete, mba'eta nerembiguai aiko,
eraa jepe nerembiguai pi'a.
- ¹⁷ Eikuua uka xerayvua,
xere ija'e e'ŷ va'e kuery oexa vy oximba aguã.
Mba'eta SENHOR, ndee ae xepytyvõ ha'e xembopy'a guaxua.

Nhanderuete Jerusalém tetã oayvua re ijayvua
Mboraerā Coré ra'y kuery ombopara va'ekue.

87

- ¹ Yvyty iky'a e'ŷ va'e áry SENHOR Sião* tetã omoĩ atã rire
² oayvu hokẽ ikuai va'e voi.
Jacó kuery rekoa ikuai va'e ha'e javi gui oayvuve.
- ³ Ndevy Nhanderuete pegua tetã, ayvu iporã ete va'e 'ea:
- ⁴ “Xekuua va'e kuery rekoa regua ma
Egito ha'e Babilônia.
Oĩ avi 'rā Filístia, Tiro ha'e Etiópia,
ha'e py ae itui'i rire.”
- ⁵ Mba'eta Sião tetã pe aipo'ea 'rā:

* 86:9 Apocalipse 15.4 * 87:1 Sião ma Jerusalém tetã rery mboae.

- “Kova'e ha'e peva'e voi ha'e pygua ae.
Yvate ete va'e omoī atā 'rā.”
- ⁶ SENHOR yvy regua rery ombopara vy aipoe'i 'rā:
“Kova'e ma ha'e pygua ae.”†
- ⁷ Oporaei va'e kuery ha'e javi opo-opo reve aipoe'i 'rā:
“Ndere anho oī xemoingo porāa ha'e javi.”

Ojexavai va'e ndovy'aia rupi ijayvuague
Jogueroporaei va'e pe mboraeirā Coré ra'y kuery nhombo'e aguā ombopara va'ekue
mbaraka py ombojoguy aguā, Ezra ramymino Hemā oporaei va'ekue.

88

- ¹ SENHOR ma Xeruete xereraa jepea.
Ára pukukue re, pyávy voi ajapukai ndevy.
- ² Anhembo'ea tonhendu nerentonde.
Ejapyxaka ke ajapukaia re.
- ³ Mba'eta xenhe'ẽ py aendu opa marāgua nda'eveia,
xerekove ma manoa katy'i ma ovaẽ.
- ⁴ Yvykua katy oguejy ma ový va'e rami xekuaa,
ava imbaraete va'e ve'ŷ ma aiko ramo.
- ⁵ Omanogue mbyte omombo pyre rami aiko,
yvykua py ojuka pyre itui va'e rami.
Ha'e kuery re ma nanema'endu'avei ma 'rā,
ha'e ndepo py nereipytyvōvei 'rā.
- ⁶ Ndee ae xemombo yvykua pukuvea py,
ijavaetevea ha'e yvykua vaikue py.
- ⁷ Mba'eta xe'áry ndepoxya ipoyi oiny,
yai py rami ndeguigua xemokangy.
- ⁸ Rejapo xerexa va'ety kuery xerejapa aguā rami,
ha'e kuery ojeguaru rei ma okuapy xegui.
Nhuā py xembo'aa rire aa jepe aguā ndaikuavei.
- ⁹ Ajexavai ete vy ndaxerexa pyxovei ma.
SENHOR, ndevy pe anho ajapukai ko'ẽ nhavõ,
ndevy ae xepo upi.
- ¹⁰ Omanogue pe nda'u rejapo 'rā ri hexa pyrā?
Ha'e kuery nda'u ovypa 'rā ri ndevy oporaei aguā?
- ¹¹ Ha'e kuery nda'u ituia py ijayvu 'rā ri ndeporayvua re?
Yvykua vaikue py nda'u ijayvu 'rā ri ojeroviapy reikoa re?
- ¹² Pytū reia py nda'u ojekuaa 'rā ri hexa pyrā rejapo va'e?
Yvy hexarai pyre ikuaia re teī nda'u ojekuaa 'rā ri ndereko porāa?
- ¹³ Ha'e gui SENHOR, xee ma ndevy ae ajapukai xepytyvō aguā.
Ko'ẽ te'ŷ'i re xee anhembo'e ndevy.
- ¹⁴ SENHOR, mba'e re tu xereja ri?
Mba'e re tu xevy pe nderejexa ukavei ri?
- ¹⁵ Xekunumi guive ajexavaia re aiko, amano rai'i ma aikovy.
Ndee xemongyje ramo xee ndaikuai rei aikovy.
- ¹⁶ Ndepoxya xere ou,
ndeguigua ngyje xemomba ta ma.
- ¹⁷ Ha'e nunga ha'e javi xembojere riae yy ou va'e rami,
jova-jovai gui xejoko.
- ¹⁸ Xerayvu va'e ha'e xeirū kuery ma xea gui mombyry reipe'apa.

† 87:6 “Ha'e py itui'i” he'ia ma ojeupagua kuery re ijayvu vy, Jerusalém pygua ae pe rami, mombyry itui'i va'ekue teī.

Ha'e ramo pytūa rive opyta aexa va'ety rami.

Messias ipo'aka aguā re ijayvua

Mboraeirā Ezra ramymino Etā nhombo'e aguā ombopara va'ekue.

89

- 1 SENHOR, aporaei riae 'rā renhomboaxya re,
raka'e rā peve xejuru py aikuua uka 'rā ojeroviapy reikoa.
- 2 Mba'eta aipoa'e: "Ndeporayvua ndopai 'rā,
ha'e ndereko porāa yva re remoī atā", ha'e.
- 3 Aipo're: "Xerembiguai Davi aiporavo va'ekue pe
aura reve ajapo xereve guarā. Ha'e vy aipoa'e:
- 4 'Neramymino kuery amoī atā 'rā raka'e rā peve guarā,
raka'e rā peve amoī 'rā ndepo'akaa', ha'e", 're.*
- 5 SENHOR, yva re oporaeia okuapy mba'emo porā rejapo va'ekue rupi,
ndevygua iky'a e'ŷ va'e kuery ijatya py ogueroma'endu'a okuapy ojeroviapy reikoa.
- 6 Mba'eta mava'e nda'u SENHOR rami ete oiko 'rā yva re?
Yva regua kuery mava'e 'rā tu SENHOR ramigua ete oiko?
- 7 Mba'eta ixupeguia iky'a e'ŷ va'e kuery ijatya py Nhanderuete yvateve ete va'e avi oĩ,
ijyvýry ikuai va'e ha'e javi gui okyjevepy oiko.
- 8 SENHOR Oreruete nexondaro reta va'e,
mava'e 'rā tu ndee rami ipo'akapa va'e oiko?
SENHOR, ndejee remoī ojeroviapy reikoa aguā.
- 9 Ye'ē opa marā omyī teī ndee ndepo'aka 'rā.
Yai opu'ā-pu'ā ramo remombytu'u.
- 10 Remokyrirī Raabe joguero'aa py ojuka pyre rami.†
Ndejyva ipo'aka va'e py remoāimba nderovaigua kuery.
- 11 Yva ma nemba'e oĩ, yvy voi.
Yvy ha'e hexe ikuai va'e ha'e javi ndee ae rejapo va'ekue.
- 12 Ndee rejapo va'ekue kuaray puku-a ha'e ijapu'a'ia.
Tabor ha'e Hermom yvnty oporaei 'rā okuapy nderery rupi.
- 13 Ndejyva ma opa mba'e gui ipo'akave.
Reiporu kuaa regua reupi vy rexā uka ndepo mbaraetea.
- 14 Ha'evea rami rejogueroko, ndereko porāa rupi reiko huvixa reĩa py.
Renhomboaxya ha'e anhetē va'e ma nerentonde 'rā ojekuaa.
- 15 Ovy'a ete 'rā ndereroporaeia rupi ikuai va'e.
Mba'eta SENHOR, ha'e kuery ndereve vy ikuai 'rā nerexakāa rupi.
- 16 Nderery rupi ovy'a riae 'rā okuapy,
oporaei 'rā ndereko porāa re.
- 17 Mba'eta ndee ma ha'e kuery mombaraetea ha'e imoexakāa.
Ndee oremboaxy ramo 'rāe ojekuaa orepo'akaa.
- 18 Mba'eta orevygua mba'emo vai jokoarā ma SENHOR pegua ae oĩ,
oreruvixaverā ma Israel kuery ruete Iky'a e'ŷ va'e pegua.
- 19 Ymave rupi ndevygua iky'a e'ŷ va'e kuery pe ndeayvu va'ekue mba'emo rexā ukaa
rupi.
Ha'e vy aipo're: "Xee ambopo'aka peteī ipy'a guaxu va'e penepytyvō aguā.
Peē kuery mbyte gui amboyvateve peteī aiporavo va'ekue.
- 20 Ha'e rami vy xerembiguairā Davi ajou vy
amoī raka'e, azeite iky'a e'ŷ va'e amoī uka vy hexe.*
- 21 Xepo py amoī atā 'rā,

* 89:4 Davi reve Nhanderuete ijayvuague ma 2 Samuel 7 py oĩ. (Salmo 132.11-12; Atos 2.30). † 89:10 Apy "Raabe" he'ia ma ypo ye'ē rupigua re ijayvu vy. * 89:20 1 Samuel 13.14, 16.1-13

- xepo'akaa py amombaraete 'rā.
- ²² Ha'e ramo hovaigua kuery nomoī vai 'rā,
heko vai va'e nomoingo axyi 'rā.
- ²³ Henonde amou'ūmba 'rā hovaigua kuery,
ajukapa 'rā hexe ija'e e'ŷ va'e.
- ²⁴ Ojeroviapy aikoa ha'e xeporayvua rupi 'rā areko.
Ha'e ramo xerery rupi vy ipo'akave 'rā ovy.
- ²⁵ Ajapo 'rā ye'ē ha'e yakā ikuai va'e re
ipo'aka aguā rami.
- ²⁶ Xevy pe ojapukai vy aipoe'i 'rā:
'Ndee ma Xeru, Xeruete,
ha'e itaova xereraa jepea guive', he'i 'rā.
- ²⁷ Ha'e rā ixupe aipoa'e: 'Xera'y jypy guare.
Yvy regua ruvixave ikuai va'e gui ndeyvateve', ha'e 'rā.‡
- ²⁸ Amboaxya rupi riae 'rā areko,
ha'e hexeve amoī atāve 'rā xereve guarā ajapo va'ekue.
- ²⁹ Hamymino kuery ajapo 'rā ikuai riae aguā rami,
ipo'akaa voi yva rami 'rā oī riae.
- ³⁰ Ha'e rā xapy'a rei ta'y kuery nda'ikuaixei 'rā lei aeja va'ekue rupi,
ambo'eague rami e'ŷ ikuai vy,
- ³¹ xapy'a rei xeayvuague rami nda'ikuai 'rā,
ajapo uka va'ekue ndojapoxei vy.
- ³² Ha'e rami ri ramo yvyla rovi py ambopaga 'rā otekoavyague re,
ambopi 'rā ojejavvyague re.
- ³³ Ha'e rami teĩ ixugui ma ndaip'eai 'rā ayvua,
ndajapo e'ŷi 'rā hexeve xeayvuague.
- ³⁴ Xereve guarā ajapo va'ekue ndajapo e'ŷi 'rā,
xeayvuague ndarovai 'rā guive.
- ³⁵ Peteigue'i xee aura karamboae xeky'a e'ŷa rupi ae
(ha'e xee aipo nda'e rivei 'rā Davi pe).
- ³⁶ Aipoa'e: 'Hamymino kuery ikuai riae 'rā,
ha'e ipo'akaa ma kuaray rami 'rā oī riae xerenonde.
- ³⁷ Raka'e rā peve guarā amoī 'rā jaxy rami,
oaxa rive va'e'ŷ 'rā oiko yva re ojekuaa va'e rami', ha'e va'ekue."
- ³⁸ Ha'e rami teĩ SENHOR, oreruvixa re ndee nerepenavei vy reja.
Ndevai guive nerembiporavo pe.
- ³⁹ Nerembiguai pe ndereve guarā rejapo va'ekue rembovaipa,
ixupagua coroa nerembovarei vy remombo yvy re.
- ⁴⁰ Ixupagua tetā kora ma reitypa,
hoo ikorapa va'ekue voi rembovaipa.
- ⁴¹ Mba'emo oguerekva'ekue-'ekue ma tape rupi oaxa va'e-va'e ogueraapa 'rā,
hoo katy rai'i ikuai va'e voi ovy'a rei okuapy hexe.
- ⁴² Hovaigua kuery ma rembopo'aka,
rejapo hexe ija'e e'ŷ va'e ha'e javi ovy'a aguā rami.
- ⁴³ Ha'e rā ikyxe ma rejapo naīmbei rei aguā rami,
ha'e joguero'aa py oo ramo nereipytyvōvei.
- ⁴⁴ Iporāague ma reipe'apa,
ha'e henda oīaty reity yvy rupi.
- ⁴⁵ Ikunumia ára remomba voi,
ha'e oxīmba aguā rami rejapo.
- ⁴⁶ SENHOR, raka'e peve 'rā ha'e ramigua oiko,

‡ 89:27 Apocalipse 1.4-5 py.

- raka'e peve nda'u nderejexa ukai 'rā?
 Ndepoxya nda'u hendy riae 'rā ri tata rami?
- ⁴⁷ Nema'endu'a xapy'a'i aikoa re.
 Mba'everā e'ŷ teve remoingo avakue ra'y kuery.
- ⁴⁸ Mava'e ava nda'u oikove 'rā manoaa oexa e'ŷ re?
 Mava'e nda'u onhe'ẽ ae ogueraa jepe kuaa 'rā yvyra rupa po'akaa gui?
- ⁴⁹ SENHOR, mba'e tu oiko ymave rupi ndeporayvu aguã re ndeayvuague,
 ha'e rami aguã re ojeroviapy reikoa rupi Davi pe reuraague rire?
- ⁵⁰ SENHOR, nema'endu'a ke nerembiguai kuery re ovy'aa rei okuapya re,
 ha'e heta regua ombojaru reia aropo'aka va'e re.
- ⁵¹ Nderovaigua kuery ijayvu vaikue-ikue, SENHOR.
 Nerembiporavo oikoa re ijayvu vaikue okuapya.
- ⁵² SENHOR re ta'ima'endu'a porãa raka'e rā peve.
 Amém! Amém!

Nhanderuete imarã e'ŷa ha'e avakue imarãa re ijayvua
Nhanderuete remimbo'e Moisés onhembo'eague.

90

- ¹ SENHOR, ndee ma ronhemiatiy reiko,
 ymave rupi oreramoĩ kuery ikuiai guive.
- ² Yvyty oiko e'ŷ mbove,
 yvy renhono e'ŷ mbove ma voi,
 jypy'i guive opa peve ndee ae SENHOR reiko.
- ³ Ndee ma avakue remombytapa ju 'rā yvy ku'i rive,
 "Ha'ekue rami ju pepyta, avakue ra'y kuery", 're vy.
- ⁴ Ndevy pe mil ma'etŷ oaxa va'e ma kueguára guare rami,
 peteĩ hora'i pyávy oaxa va'e rami guive.*
- ⁵ Ndee ma orembotyryry 'rā yy mba'emo ogueroxyry heravy va'e rami.
 Ha'e ramo oke va'e rami meme 'rā ropyta,
 jai rogue aje'ive'i reve henhoĩ va'e rami.
- ⁶ Mba'eta ha'e nunga ma yvate vyve ipotypa 'rā
 teĩ ka'aru jave he'õmba ha'e ipirupa 'rā.
- ⁷ Ndepoxya ma oremokanhy 'rā,
 ndevaia oremondyi 'rā.
- ⁸ Mba'eta nerondenre reru orerekva vaia,
 nhemi rupi rojeavyague voi remoĩ nederova rexakãa py.
- ⁹ Roikoa ára ma ndepoxya rupi meme 'rā oaxa ovy,
 ma'etŷa roguereko va'e ma xapy'a'i ropêxaa rami 'rā oaxa.
- ¹⁰ Setenta ma'etŷ ete'i 'rā roiko.
 Amongue'i imbaraeteve va'e tema oikove 'rā oitenta ma'etŷ peve'i.
 Ha'e rami teĩ roiko porãea py voi ngane'õ ha'e jexavai tema 'rā roendu.
 Mba'eta roikovea oaxapa voi 'rā,
 ha'e gui ma roopa 'rā.
- ¹¹ Mava'eve ndoikuuai ndepo'aka etea rupi ndepoxya.
 Mba'eta ndepoxya rupi orererekva gui ma rokyje ete.
- ¹² Orerekombo'e ke roikoa ára re roikuaa pota aguã re,
 orepy'a re 'arandu oĩ aguã.
- ¹³ SENHOR, eju ju!
 Raka'e peve 'rā tu nerepenai?
 Emboaxy ju nerembiguai kuery.
- ¹⁴ Aje'ive'i reve exa uka orerayvua, roporaei aguã.

* 90:4 2 Pedro 3.8-9

- Ha'e ramo rovy'a 'rã roikoa pukukue re.
- ¹⁵ Orembovy'a ju orembojexavaia ára oïague rami,
mbovy ma'etý rei e'ý rojexavaia anho roendu rire.
- ¹⁶ Ore nerembiguai kuery pe ju tojekuaa mba'emo rejapo va'e,
ha'e oreramymino kuery pe exa uka ju nerexakãa.
- ¹⁷ Orere toï SENHOR Oreruete oremboaxya.
Emoingo porã orepo py mba'emo rojapo va'e.
Tá, emoingo porã mba'emo rojapo va'e.

91

SENHOR re nhanhemi aguã regua

- ¹ Yvate ete va'e oĩa py onhemi va'e,
Ipo'akapa va'e 'ã py ikane'õguia va'e ma
- ² aipoe'i 'rã SENHOR pe: "Anhemia imbaraete va'e,
Xeruete, hexe ajeroviaa va'e", he'i 'rã.
- ³ Mba'eta ha'e ma ndereraa jepe 'rã nhuã py rami nembo'axe va'e gui,
mba'eaxy jojuka va'e gui guive.
- ⁴ Nemo'ã 'rã guague guy py.
Ipepo guy py reĩ rã mba'eve rei ndoikoi 'rã.
Ixuguigua anhetê va'e ma hu'y jokoa ha'e nhomo'ãa tuvixa va'e rami oĩ.
- ⁵ Ha'e ramo pytû rupi jojukaa oiko teĩ ndee nderekjei 'rã,
neĩ ára py hu'y ndere ou va'e gui,
- ⁶ mba'eaxy pytû rupi jojuka va'e gui,
neĩ mba'emo vai kuaray mbyte jave jojuka va'e gui ma voi.
- ⁷ Ndeyvýry mil ho'a,
ndeauxu e'ýa katy dez mil ho'a teĩ
ndere ma mba'eve rei novaëi 'rã.
- ⁸ Nderexa py rive 'rã rexia
heko vai va'e ombopagaa ramo.
- ⁹ Mba'eta Nhanderuete pe "Anhemia", 're,
ha'e Yvate ete va'e pe "Xee aãaty" 're ramo
- ¹⁰ neĩ peteĩ henda py ma voi nderejexavai 'rã,
neĩ peteïve mba'emo vai novaëi 'rã ndero py.
- ¹¹ Mba'eta ndere omopena uka 'rã ojeupagua anjo kuery pe,
reikoa ha'e javi rupi onhangareko aguã ndere.
- ¹² Ha'e ramo ha'e kuery opo py ndejopy 'rã
peteïve ita re renhepyxanga e'ý aguã.*
- ¹³ Ha'e ramo repyrõ 'rã guary ha'e mboi vaikue re,
guary ra'y ha'e mboi re voi repyrõ 'rã inony.
- ¹⁴ Aipoe'i 'rã: "Xerayvu va'e ma araa jepe 'rã,
aepy 'rã xerery oikuaa va'e.
- ¹⁵ Xevy pe ojapukai ramo xee ambovai 'rã.
Ojexavaia py xee aĩ 'rã hexeve.
Araa jepe 'rã, ha'e amboete uka 'rã.
- ¹⁶ Amoingo porã 'rã hekove puku aguã rami,
ha'e ixupe aexa uka 'rã araa jepea."

Nhanderuete oguerovy'aa rupi oporaeia
Mboraei sâbado pyguitarã ombopara pyre.

* 91:12 Kova'e ayvu rupi Satanás ijayvu Jesus omoangeko vy (Mateus 4:5-7; Lucas 4:9-12).

92

- ¹ SENHOR, ha'eve roguerovy'a
ha'e nderery rupi aporaei, Yvate ete va'e.
- ² Aje'ive aikuaa uka 'rā ndeporayvua,
ha'e pyávy ju aikuaa uka 'rā ojeroviapy reikoa,
- ³ mbaraka dez ixā va'e, mbaraka reve,
ha'e ixā reta va'e pu rupi guive.
- ⁴ Mba'eta SENHOR, mba'emo porā rejapo rā aexa vy avy'a.
Arovy'a mba'emo ndepo py rejapo va'e.
- ⁵ SENHOR, nerembiapo ma tuvixa ete va'e!
Ha'e renhembopy'aa guive haxy ete aikuaa aguā.
- ⁶ Hi'arandu e'ŷ va'e ndoikuuai 'rāe,
inhakā porā e'ŷ va'e ndoikuuai 'rā pova'e:
- ⁷ Heko vai va'e kuery ma jai rogue opa rupi henhoī va'e rami ikuai,
teko vai rupi ikuai va'e hetave oje'oivy teī
omombaa 'rā raka'e rā peve.
- ⁸ Ha'e rā SENHOR, ndee ma Yvate ete va'e raka'e rā peve guarā.
- ⁹ SENHOR, eexa pota nderovaigua kuery re.
Mba'eta nderovaigua kuery okanhymba 'rā,
teko vai rupi ikuai va'e oaimbā 'rā.
- ¹⁰ Ha'e rā xee ma xemombaraete 'rā toro ka'aguy regua rami,
xere azeite iporāve va'e remoī vy.
- ¹¹ Avy'a reve aexa 'rā xerovaigua kuery xemoī vai va'e re mba'emo oiko ramo,
aendu 'rā guive heko vai va'e xere opu'ā rei va'e kuery ho'apa rā.
- ¹² Ha'e rā heko porā va'e ma pindo rami 'rā oiko porā,
yvateve 'rā Líbano yvy re yary ikuai va'e rami.
- ¹³ SENHOR roka py onhoty mbyre rami 'rā ha'e kuery ikuai,
oiko porā 'rā okuapy Nhanderuete pegua roka rupi.
- ¹⁴ Ha'e nunga ma hi'yvyma ma teī hi'a riae 'rā,
tykue tynyē riae, ha'e ipyau riae 'rā.
- ¹⁵ Ha'e rami vy oikuaa uka 'rā SENHOR heko porā va'ea.
Ha'e ma xe'itaova, hexe ma teko vai noī.

93

Nhanderuete ipo'akaa ha'e yvatea re ijayvua

- ¹ SENHOR ma huvixave oī.
Hexe oī yvatea,
Ku'axā rami SENHOR ojee omoī opo'akaa.
Omoī atā yvy omyī e'ŷ aguā rami.
- ² Jypy'i guive repenaa oī atā,
jypy'i ete guive reiko.
- ³ SENHOR, yakā ikuai va'e opu'ā okuapy,
yakā opu'ā vy hevovo,
yakā hyapu rei teī.
- ⁴ Ha'e rā SENHOR yvate oī va'e ma
yy tuvixa va'e revovo gui ipo'akapave,
ye'ē py yai vaikue opu'ā-pu'ā va'e po'akaa gui voi.
- ⁵ Ndeayvuague ma oaxa rive va'erā e'ŷ.
SENHOR, nderopy ma iky'a e'ŷ va'e anho 'rā oī
raka'e rā peve guarā.

94

- Nhanderuete ha'evea rami oikuua pota aguã re ojerurea ague*
- 1 Ndee SENHOR Oreruete ma nhombopaga va'e reiko.
Oreruete nhombopaga va'e, exa uka nerexakãa!
 - 2 Epu'ã ke yvy regua ha'e javi remboayvu aguã.
Embopaga ojejou porã rei va'e kuery.
 - 3 Raka'e peve 'rã nda'u heko vai va'e kuery ov'y'a rei?
SENHOR, raka'e peve 'rã nda'u ha'e ramigua oiko?
 - 4 Ha'e kuery ma nhombojaru ha'e nhomotare'ý reia rupi ijayvu.
Teko vai rupi ikuai va'e ojejou porã reia rupi rive 'rã ijayvu.
 - 5 SENHOR, ha'e kuery omou'úmba ndevygua kuery,
ojavyky rei 'rã ndevygua ikuai va'e.
 - 6 Ojuka 'rã imeve'ý va'e ha'e mombyry guigua,
tyre'ý kuery voi omomba 'rã.
 - 7 Ha'e vy aipoe'i 'rã: “SENHOR ndoexai oiny.
Ha'e nunga re Jacó Ruete ndoikuua potai 'rã”, he'i okuapy.
 - 8 Xeretarã kuery peikuua axy va'e, peikuua pota!
Pene'arandu e'ý va'e, raka'e nda'u pemoi 'rã pene'arandurã?
 - 9 Apyxa apoare nda'u noendui 'rã ri pejapo va'e?
Texa apoare nda'u ndoexai 'rã ri?
 - 10 Yvy regua kuery pe ijayvu va'e nda'u nanhombopagai 'rã?
Avakue mo'arandua re nda'u noí 'rã 'arandua?
 - 11 SENHOR oikuua ae ma avakue onhembopy'aa,
oikuua ha'e kuery onhembopy'aa mba'everã ndovareia.*
 - 12 SENHOR, ov'y'a ete 'rã avakue remo'arandu va'e,
ndeguigua lei rupi rembo'e va'e.
 - 13 Ha'e va'e kuery re ojexavaia ára ou tei remombytu'u 'rã,
yvykua heko vai va'e kuery mbo'aarã rejapo peve.
 - 14 Mba'eta SENHOR ndoejai 'rã ojeupeguia kuery,
noipytyvõ e'ýi 'rã ixupe ikuai va'e.*
 - 15 Ha'e rami rã teko porã ojekuaa nho 'rã nhomboayvuaty py.
Ha'e va'e rupi anho 'rã ikuai anhetẽ rupi ipy'a va'e.
 - 16 Mava'e nda'u heko vai va'e re opu'ã 'rã xerepyarã?
Mava'e nda'u onhemoi'rã xea katy mba'emo vai apoa jokoarã?
 - 17 SENHOR naxepytyvõi va'e rire
xenhe'ë oo ma 'rãgue okyrirõi va'e anho ikuia katy.
 - 18 Ha'e rami 'rãgue py “Xepoxyry ta ma”, ha'e nhavõ
ndee xejoko 'rã xerayvua rupi.
 - 19 Xepy'a eta reia aendu ramo
ndee xembopy'a porã ha'e xembovy'a ju.
 - 20 Ndereve nda'u onhemoirõi 'rã ri teko vai rupi joe opena va'e,
lei oña rami merami joguerekõ tei joapo vai va'e?
 - 21 Mba'eta ha'e kuery ma nhemoirõi 'rã heko porã va'e rekove rovai,
ijayvu 'rã okuapy heko porã va'e ojuka aguã re.
 - 22 Ha'e rã xevy pe ma SENHOR oo ikorapa va'e oí,
Xeruete ma itaova anhemiaty.
 - 23 Ha'e kuery ma ombopaga 'rã heko vaiague re,
teko vai rupi ikuaiague re omokanhymba 'rã.
SENHOR Nhanderuete ae 'rã omomba.

* 94:11 1 Coríntios 3.19-20 * 94:14 Romanos 11.1-2

95

- SENHOR pe japoraei aguã regua*
- ¹ Peju ke, japoraei SENHOR pe!
Jarovy'a nhande'itaova nhandereraa jepea!
 - ² Jarovy'aa rupi jaa oĩa py,
jaroporaei ipo'akaa jarovy'a vy.
 - ³ Mba'eta SENHOR ma Nhanderuete Yvate ete va'e,
Huvixave ipo'akapa va'e oiko tuuete ikuai va'e áryve.
 - ⁴ Ipo py oĩ yvy guýry vegua,
yvyty yvatevea voi ixupegua meme.
 - ⁵ Ye'ẽ avi ixupegua oĩ, ha'e ae ojapo rire,
yvy voi opo py ojapo va'ekue itui.
 - ⁶ Peju ke, nhanderova yvy re nhamovaẽ nhamboete vy,
nhanerenapy'ã re nhaĩ SENHOR nhanemoingoare renonde.
 - ⁷ Mba'eta ha'e ma Nhanderuete.
Ha'e rã nhande ma hymba kuery vexa'i nhandekuai,
ikora rupi opo py openaa va'e.
 - Aỹ voi ijayvua pendu vy
 - ⁸ peneakã ratã eme, Meribá py guare rami e'ŷ,
Massá tekoa e'ŷa py guare rami e'ŷ.
 - ⁹ Mba'eta ha'e py ma peneramoĩ kuery xereko a'ã vy
xembopoxya rupi ikuai va'ekue,
opa mba'e porã ajapo rã oexa rire teī.
 - ¹⁰ Quarenta ma'etŷ re ajou vai ha'e kuery ikuiaia.
Ha'e rami vy "Ha'e kuery ma opy'a py ojerovia e'ŷ va'e!
Ndoikuuai ae xeguigua tape!" ha'e va'ekue.
 - ¹¹ Ha'e nunga rupi xepoxya rupi aura:
"Ha'e kuery ndoikei 'rãe opytu'u aguã ame'ẽ va'e py."*

96

- 1 Crônicas 16.23-33*
- ¹ Pemonhendu ke SENHOR pe mboraei pyau!
Yvy javé regua kuery, peporaei SENHOR pe!
 - ² Peporaei SENHOR pe, peroma'endu'a hery re.
Ko'ẽ nhavõ peikuua uka nhandereraa jepea.
 - ³ Yvy regua kuery pe peikuua uka hexakãa,
ha'e javi regua pe pemombe'u mba'emo porã ojapoa.
 - ⁴ Mba'eta SENHOR ma yvate ete va'e.
Ha'evea rami ixupe japoraeia,
mba'eta tuuete ramigua ikuai va'e gui okyjevepy.
 - ⁵ Mba'eta yvy regua kuery ruete ha'e javi ma mba'emo ra'angaa rive.
Ha'e rã SENHOR ma yva apoare.
 - ⁶ Guenonde oexa uka 'rã guexakãa ha'e ijyvatea.
Ipo'akaa ha'e iporãa ojekuaa henda iky'a e'ŷ va'e py.
 - ⁷ Yvy regua kuery, peroporaei ke SENHOR!
Peroporaei SENHOR rexakãa ha'e ipo'akaa.*
 - ⁸ Peroporaei SENHOR rery, iporã ete ramo.
Peme'ẽ va'erã peru vy peroike ixupegua roka py.
 - ⁹ Pembojerovia SENHOR iky'a e'ŷa rexakãa py.
Yvy javé regua kuery, peryryipa henonde.
 - ¹⁰ Yvy regua kuery ikuiaia rupi aipopeje: "SENHOR ma huvixave oĩ

* 95:11 Hebreus 3.7-4.11; Êxodo 17.1-7; Números 13.25-14.23 * 96:7 Salmo 29.1-2

Yvy omoī atā raka'e omyī e'ŷ aguā rami.
Anhetē rupi oikuaa pota 'rā yvy regua kuery re", peje.

- ¹¹ Tovy'a yva ha'e yvy.
Taevovo ye'ẽ ha'e ha'e py ikuai va'e ha'e javi!
- ¹² Tovy'a nhuñdy ha'e ha'e rupi ikuai va'e ha'e javi!
Tovy'apa vyvra ka'aguy re ikuai va'e
- ¹³ SENHOR renonde, mba'eta ou 'rā.
Ou vy oikuaa pota 'rā yvy regua kuery re.
Teko porā rupi 'rā oikuaa pota yvy ha'e
yvy regua kuery re, ojeroviapy oikoa rupi ae.

97

Nhanderuete yvatea ha'e ipo'akaa re ijayvua

- ¹ SENHOR ma huvixave oī.
Tovy'a yvy re ikuai va'e!
Tovy'a ypa'ū heta ikuai va'e regua!
- ² Ijyvýry rupi oī arai ha'e pytū reia.
Tenda openaaty ytarā ma teko porā ha'e ha'evea rami joguerekaoa oī.
- ³ Henonde oo 'rā tata
hovaigua kuery ijyvýry ikuai va'e rapypaarā.
- ⁴ Ixuguigua overa va'e ma omoexakā 'rā yvy.
Ha'e ramo yvy oexa vy oryryipa 'rā.
- ⁵ Yvyty ikuai va'e voi ei raity rami 'rā tykupa
SENHOR yvy jave re ipo'aka va'e renonde.
- ⁶ Yva ma oikuaa uka 'rā héko porāa.
Ha'e ramo ha'e javi regua oexa 'rā hexakāa.
- ⁷ Tove mba'emo ra'angaa pe ikuai va'e ha'e javi nda'evei nho ta'ikuai,
mba'emo ra'angaa rive oguerovy'a va'e.
SENHOR renonde toimba tuuete ramigua ikuai va'e SENHOR guenapy'ā re.
- ⁸ Sião tetā rupi ha'e nunga oendu vy ovy'aa 'rā okuapy,
Judá regua tekoa ikuai va'e rupi voi ovy'apaa 'rā,
SENHOR, ndereko porāa rexu uka ramo.*
- ⁹ Mba'eta ndee anho SENHOR Yvate ete va'e reiko,
yvy jave re ndepo'aka va'e.
Ndee ma tuuete ikuai va'e áryve reĩ va'e.
- ¹⁰ Peẽ kuery SENHOR peayvu va'e, pembojeguaru ke teko vai.
Mba'eta onhangareko 'rā ojeupegua kuery iky'a e'ŷ va'e nhe'ẽ re,
ogueraa jepe 'rā guive héko vai va'e po gui.
- ¹¹ Héko porā va'e pe ma ome'ẽ 'rā hexakā va'e,
ha'e anhetē rupi ipy'a va'e pe ome'ẽ 'rā ovy'a aguā.
- ¹² Pendeko porā va'e, perovy'a ke SENHOR.
Peporaei hery iky'a e'ŷ va'e rupi!

SENHOR ha'evea rami joguerekaoa re ijayvua
Mboraeirā ombopara pyre.

98

- ¹ Pemonhendu ke SENHOR pe mboraei pyau,
mba'emo iporā ete va'e ha'e ojapo ramo.
Ojyva oiporu kuaa regua imbaraete ha'e iky'a e'ŷ va'e py ipo'aka.
- ² SENHOR oikuaa uka jogueraa jepeague.

* 97:8 "Judá rajy kuery" he'ia ma Judá yvy re tekoa ikuai va'e re ijayvu vy.

- Yvy regua kuery oexaa rupi oexa uka ha'evea rami joguerekao.
- ³ Ndaexarai guive Israel kueryomboaxy rupi ojeroviapy oiko aguā re.
Ha'e ramo yvy jave re ha'e javi regua ikuai va'e oexa okuapy Nhanderuete nhandereraa jepeague.
- ⁴ Yvy jave re ha'e javi regua pendekuai va'e, peroporaei ke SENHOR pevy'aa rupi!
Peporaei, pevy'a ha'e perovy'a mboraei py!
- ⁵ Mba'epu ixā reta va'e reve peroporaei SENHOR,
ixā reta va'e pu rupi guive peporaei.
- ⁶ Pemonhe'ē mimby guaxu ha'e vaka rakuakue guigua.
Pevy'a SENHOR renonde, huvixave oī ramo.
- ⁷ Tonhendu ye'ē ha'e hexe ikuai va'e ha'e javi,
yvy ha'e hexe ikuai va'e guive!
- ⁸ Yakā ha'e javi tojepo pete!
Yvyty ikuai va'e voi toporaei ov'y'aa rupi
- ⁹ SENHOR renonde,
mba'eta ou yvy re ikuai va'e re oikuua pota aguā.
Teko porā rupi oikuua pota 'rā yvy ha'e
yvy regua kuery re, peteī rami joguerekao rupi.

99

- Nhanderuete iky'a e'ŷ va'ea re ijayvua*
- ¹ SENHOR ma huvixave oī.
Yvy regua kuery toryryipa.
Ha'e oguapy oiny anjo ipopo va'e kuery áryve.
Yvy tomyimba.
- ² SENHOR ma yvate ete Sião tetā py,
yvy regua kuery ha'e javi áryve oī.
- ³ Ha'e kuery togueroporaei hery yvate ete va'e okyjepy,
iky'a e'ŷ va'e ramo.
- ⁴ Ndee ma huvixave ipo'akapa va'e reiko,
teko porā reayvu va'e.
Peteī rami joguerekao remoī.
Jacó kuery mbyte rejoguerekao anhetē ete rupi, ha'evea rami meme.
- ⁵ Pemboete ke SENHOR Nhanderuete!
Ipyrōa renonde peī penerenapy'ā re,
iky'a e'ŷ va'e ramo.
- ⁶ Moisés ha'e Arão ma ixupegua sacerdote ikuai raka'e,
Samuel voi hery rupi ojapukai va'ekue regua.
SENHOR pe ha'e kuery ojapukai ramo ombovai.
- ⁷ Arai oī va'e gui ijayvu raka'e ha'e kuery pe.*
Ha'e ramo ha'e kuery onhe'ē rendu,
lei hekorā oeja va'ekue rupi ikuai raka'e.
- ⁸ SENHOR Oreruete, ndee ma rembovai va'ekue ha'e kuery ojapukai rā.
Ha'e kuery pe rexu uka Oreruete joperdoa va'e reikoa,
ojeavyague remboekovia va'e guive.
- ⁹ Peroporaei SENHOR Nhanderuete.
Ixupegua yvyty iky'a e'ŷ va'e renonde peī penerenapy'ā re,
SENHOR Nhanderuete iky'a e'ŷ va'e ramo.

Templo py oporaeia aguā regua
Mboraei oguerovy'aa aguā regua.

* 99:7 Éxodo 33.7-11

100

- ¹ Yvy jave re pendekuai va'e,
peroporaei SENHOR pevy'aa rupi!
- ² Pevy'aa rupi pendekuai SENHOR pe ete.
Henonde pejexa uka pejuvy peporaei reve.
- ³ Peikuua pota pova'e re: SENHOR ma Nhanderuete oiko.
Ha'e ae nhanemoingo rire ixupeguia meme jaiko.
Nhande kuery ma ixupeguia ae,
hymba kuery vexa'i openaa va'e.
- ⁴ Ixupeguia rokē rupi peike perovy'aa rupi,
hoka py peike mboraei reve.
Perovy'a, peroporaei hery rupi.
- ⁵ Mba'eta SENHOR ma porayvu va'e.
Nhanemboaxya rupi oiko 'rā raka'e rā peve,
ojeroviapy 'rā oiko ikuai jevy-jevy va'e peve.

Huvixave opena porā va'e reko re ijayvua
Mboraeirā Davi ombopara va'ekue.

101

- ¹ Xee aporaei 'rā ndeporayvu ha'e ha'evea rami rejoguerekao re.
SENHOR, ndevy pe ae aporaei.
- ² Anhea'ā 'rā xe'arandua rupi tape porā rupi anho aiko aguā.
Raka'e nda'u reju 'rā xea py?
- Xero py aikoa py voi xepy'a ky'a e'ŷa rupi pota 'rā aiko.
- ³ Xee aexaa py ma namoī 'rā teko vai.
Ndajou porāi ojepe'a va'e kuery ikuiaia.
Ha'e kuery reko neī peteī henda py voi noī 'rā xere.
- ⁴ Xevy pe nda'evei ete xepy'a ky'aa oī aguā.
Xee ndaikuaaxeit teko vai.
- ⁵ Ha'e gui nhemi rupi joe ijayvu vai va'e ma amokanhy 'rā.
Opy'a py ojejou porā ha'e onhemboyvate rei va'e ma xee ndaropo'akai.
- ⁶ Xee aexaxe va'e ma ojeroviapy yvy re ikuai va'e anho,
aru 'rā xero py xereve ikuai aguā.
Tape porā rupi ikuai va'e ma amoī 'rā xerembiguairā.
- ⁷ Xero py ma neī peteīve jokore va'e ndoikoi 'rā,
neī peteīve ijapu va'e voi ndoikoi 'rā xerenonde.
- ⁸ Ko'ē nhavō amokanhy 'rā heko vai va'e yvy gui,
SENHOR pegua tetā gui aipe'a aguā teko vai rupi ikuai va'e ha'e javi.

Jajeko rerova vy Nhanderuete nharō aguā regua
Ojexavai ha'e ikangy va'e SENHOR pe ojapukaiague.

102

- ¹ SENHOR, endu ke ajerurea.
Ndea py tonhendu ajapukaia.
- ² Xee ajexavaia ára ejexa uka e'ŷ eme.
Endu ke. Ajapukai ramo xepytyvō voi!
- ³ Mba'eta xerekove opa ma ovy hataxī rami,
kekāgue ma tata py okaia ramigua aendu.
- ⁴ Nhuū ojaya pyre ipirupaa rami avi xepy'a re oī va'e aendu.
Akaru aguā voi xerexarai jepi.
- ⁵ Xepire voi ojapa ma xekāgue re,
xepoaē atā ainya va'e gui.

- ⁶ Xee ma guyra tekao e'ŷa rupigua rami aiko,
urukure'a oogue rupi rive oiko va'e rami.
- ⁷ Ndale kuaavei,
guyra'i ha'e ae'i va'e oo áry oiko va'e rami.
- ⁸ Xerovaigua kuery ma ára pukukue re xere ov'y'a reia rupi ikuai.
Xevy ipoxy vy xerery rupi ijayvu vaikue-ikue.
- ⁹ Mbojape 'rāgue py tanhimbu re akaru,
xerexay re irūmba rei va'e ay'u aikovy.
- ¹⁰ Ha'e ramigua ae aendu ndee xejou vai vy ndevai ramo,
mba'eta xemboyvate va'ekue ri aŷ ma xereity.
- ¹¹ Xe'ára opa ov'y pytū rai'i ouvy vy kuaray'ã ovya rami.
Nhuū ipiru ov'y va'e rami akanhy.
- ¹² Ha'e rā ndee SENHOR, raka'e rā peve 'rā reiko.
Nderery re ima'endu'aa 'rā avakue okuave teria ja.
- ¹³ Ndee repu'ã vy remboaxy 'rā Sião tetā pygua kuery.
Ovaẽ ma ha'e kuery remboaxy a exa uka aguã,
hi'ora ovaẽ ma.
- ¹⁴ Nerembiguai kuery oayvu Sião py ita ikuai va'e voi,
ha'e pygua ku'ikue re eteve voi oexaxe vai okuapy.
- ¹⁵ Yvy regua kuery ha'e javi SENHOR rery oendu vy ikuai 'rā ojererokyjea rupi,
yvy regua ruvixave kuery voi ogueroporaei 'rā hexakãa.
- ¹⁶ Mba'eta SENHOR Sião tetā omoĩ atā vy
oexa uka guexakãa.
- ¹⁷ Oendu iporiaukue'i ojerurea,
ndojaxpyxaka e'ŷi ha'e kuery ojapukaia re.
- ¹⁸ Ha'e nunga ta'ipara toiny raka'eve rā guarã.
Ha'e rire ikuai jevy va'e voi ogueroporaei 'rā SENHOR:
- ¹⁹ “Guenda iky'a e'ŷ va'e ijyvate va'ea gui,
yva gui ae SENHOR oma'ẽ oiny yvy katy,
- ²⁰ oendu aguã nhuã py ikuai va'e poaẽa,
ha'e ogueraa jepe aguã omano aguã rami omoingo pyre.
- ²¹ Sião tetā py ima'endu'aa aguã SENHOR rery re,
ha'e Jerusalém py ogueroporaeia aguã.
- ²² Ha'e nunga oiko 'rā yvy regua kuery ono'õmba,
huixia kuery ipo'aka va'e voi
SENHOR pe ikuai aguã oupa jave.”
- ²³ Ha'e rami teĩ ha'e ma oipe'a xembaraetea,
omboapu'a'ive aikovea.
- ²⁴ Xee aipoa'e va'ekue:
“Xeruete, xereraa eme ke, aikovea mbyte teria ja.
Ha'e rā ndee ma reikove 'rā raka'e rā peve.
- ²⁵ Jypy'i ete ma renhono va'ekue yvy ytarã,
ndepo py ae rejapo va'ekue yva.
- ²⁶ Ha'e nunga ha'e javi okanhymba 'rā,
ha'e rā ndee ma reiko riae 'rā.
Ha'e nunga inhymave 'rā ov'y ajukue rami,
ao rami remboekovia 'rā.
Amboae rami 'rā opyta.
- ²⁷ Ha'e rā ndee ma ha'ekue ae 'rā reiko.
Nderekove ma opa va'erã e'ŷ.*
- ²⁸ Nerembiguai ra'y kuery voi ikuai porã 'rā,

* 102:27 Hebreus 1.10-12

hamymino kuery ma remoingo 'rā nerенонде."

Nhanderuete nhanemboaxy re ijayvua

Mboraeirā Davi ombopara va'ekue.

103

¹ Xenhe'ẽ, eroporaei ke SENHOR.

Xere oĩ va'e ha'e javi togueroporaei hery iky'a e'ŷ va'e rupi!

² Eroporaei SENHOR, xenhe'ẽ,

nderexarai eme guive neĩ peteĩve xevy ojapo porāague re.

³ Mba'eta omboguepa ajejavyague,

xemonguera 'rā guive xemba'eaxy gui.

⁴ Xereraa jepe 'rā amano aguã gui,

ha'e xemboaxyha'e xerayvua rupi xemoingo porā 'rā.

⁵ Xetu'a'i teĩ xembovy'a 'rā opa mba'e porā py,

taguato rami xembopyau vy.*

⁶ SENHOR ha'evea rami joguerekoy

oikuaa pota 'rā ojexavai rei'i va'e re.

⁷ Moisés pe oikuaa uka raka'e ojeguigua tape,

Israel kuery pe oexa uka guembiapo.

⁸ SENHOR ma nhomboaxyha'e iporayvua rupi oiko va'e.

Ivai ma rei-rei 'rā e'ŷ, iporayyu vaipa guive.*

⁹ Nhandevy nda'ijayvu ete riae 'rā,

mboxy rupi riae ndoikoi 'rā.

¹⁰ Jajejavyague rami ete e'ŷ nhanembopaga,

nhanderekoyvaia rami e'ŷ nhanderekoy.

¹¹ Mba'eta yvygui yva yvatevea rami avi

SENHOR nhomboaxyvoi yvate ete,

oexa uka 'rā henonde ojererokyjea rupi ikuai va'e pe.

¹² Kuaray oẽa gui kuaray oikea mombyrya rami avi

jajejavyague oipe'a mombyryete nhandegui.

¹³ Tuu kuery gua'y kue'iry omboaxyrami

SENHOR voi omboaxy 'rā henonde ojererokyjea rupi ikuai va'e.

¹⁴ Mba'eta oikuaa mba'e nunga gui pa jaiko,

oikuaa ae ma yvyku'i guigua rive jaikoa.

¹⁵ Ha'e rā avakue ma nhuū rami avi hekove apu'a'i,

jai ipoty va'e rami rive 'rā ikuai.

¹⁶ Mba'eta yvytu oipeju ramo ipoty okanhymba 'rā.

Ha'e rire ikuaiague py teĩ ha'e kuery re na'ima'endu'aavei ma 'rā.

¹⁷ Ha'e rā SENHOR ma jypy'i guive raka'e rā peve

omboaxy 'rā henonde ojererokyjea rupi ikuai va'e.

Gueko porāa oexa uka 'rā hamymino kuery raka'eve rāguape voi,

¹⁸ guexeve guarā ojapo va'ekue rupi ikuai va'e ha'e javi pe,

ojapo uka va'ekue ojapo ete aguã re ima'endu'a va'e kuery pe.

¹⁹ SENHOR ma yva re omoi guenda opena atyrā.

Huvixave vy opa mba'e re ipo'aka va'e.

²⁰ Ixupagua anjo kuery, peroporaei ke SENHOR,

penembaraete ha'e pendepo'akapa va'e,

ojapo uka va'e pejapo, ha'e penhe'ẽ rendu va'e!

²¹ Ixonitaro kuery pendekuai va'e ha'e javi, peẽ kuery voi peroporaei SENHOR,

peẽ hembiguai kuery oipota va'e pejapo va'e!

* 103:5 Taguato rague hekoviaa rami ome'ẽ 'rā nhanembaraete pyaurā (Isaías 40.31). * 103:8 Tiago
5.11

²² Hemimoingo pendekuai va'e ha'e javi, peroporaei SENHOR,
mamo rā ipo'akaa py ma guive rā!
Xenhe'ẽ, ndee voi eroporaei avi SENHOR!

104

Nhanderuete opa mba'e apoare pe japoraei aguã regua

- ¹ Xenhe'ẽ, eroporaei ke SENHOR!
SENHOR Xeruete, yvate ete va'e reiko!
Renhemonde 'rā nerexakāa py, nemarā e'ŷa py guive.
- ² Ajukue puku py rami renheovā 'rā nerexakāa py.
Yva ma reipyo 'rā heravy ajukue rami.
- ³ Yy yvate rupi oĩ va'e áry nderorā rejapo.
Arai ma remboguata 'rā heravy ndekaróxarā.
Yvytu ndereroveve 'rā heravy opepo áry.
- ⁴ Ndevygua anjo kuery rejapo 'rā yvytu,
nerembiguai kuery rejapo 'rā hendy vuku aguã rami.*
- ⁵ Yvy ma rembopta raka'e
neĩ peteĩ henda py ma omyĩ e'ŷ aguã.
- ⁶ Ijaorā typa remoĩ vy renhovā.
Ha'e ramo yvyty ikuai va'e áry rupi peve yy itui.
- ⁷ Ha'e gui ma ndeayvu ramove oxyry ju ovu,
yapu rupi ndeayvua oendu vy ojepe'a vyvoi.
- ⁸ Ha'e ramo yvyty opu'ã jekuaa ju,
yvyuguarā voi oguejy,
hendarā rereko katu va'ekue peve.
- ⁹ Yy rememberā guive remoĩ oaxave e'ŷ aguã,
yvy ojao'i jevy e'ŷ aguã.
- ¹⁰ Ha'e gui yvyugua rupi rejapo yvu oĩ aguã rami,
yvyty pa'ū-pa'ū rupi yy oxyry aguã rami.
- ¹¹ Ha'e va'e gui ka'aguy rupigua ha'e javi oy'u 'rā,
mburika ka'aguy regua voi oy'u 'rā.
- ¹² Yakā yvýry ma guyra'i ojapo 'rā guaityrā,
yvyra rakā mbyte 'rā onhe'ẽ okuapy.
- ¹³ Yva re reĩa gui remoaký 'rā yvyty ikuiaia rupi.
Ha'e ramo ndepo py mba'emo rejapo ramo yvy oĩmba porā 'rā.
- ¹⁴ Nhuũ ma rejapo 'rā mymba kuery rembi'urā henhoĩ aguã rami,
ha'e rā mba'emo rogue ma avakue pe reja.
Ha'e ramo yvy re oiko va'e gui ojou 'rā guembi'urā:
- ¹⁵ uva rykue imbovy'aarā,
azeite hova moexakãarā,
ha'e mbojape imombaraetearā guive.
- ¹⁶ Yvyra ikuai va'e voi SENHOR gui vy oiko porā avi 'rā,
yary Líbano yvy re onhotý va'ekue guive.
- ¹⁷ Ha'e va'e re ma guyra'i ojapo 'rā guaityrā.
Ha'e rā oko ma cipreste rakā re 'rā ojapo.
- ¹⁸ Yvyty áry ikuai 'rā kavara ka'aguy regua,
ha'e itape guy rupi ma tapixi kuery 'rā onhemi okuapy.
- ¹⁹ Jaxy ma rejapo ára kuaa ukaarā,
ha'e rā kuaray ma oike aguã hora py porā 'rā oike.
- ²⁰ Ha'e gui pytū ma rembou 'rā
ka'aguy regua pyávy oẽmba oje'oivy aguã.

* 104:4 Hebreus 1.7-14

- ²¹ Guary ra'y kuery ma okororõ 'rã guembiarã re,
oeka 'rã oje'oivy Nhanderuete ojou uka va'ekue ho'u va'erã.
- ²² Kuaray oẽ ju ramo ha'e kuery ojevypa ju 'rã,
okua py 'rã oikepa.
- ²³ Ha'e rã avakue ju ma oje'oi 'rã ombo'eapo aguã.
Ka'aru peve 'rã ombo'eapo okuapy.
- ²⁴ SENHOR, joo ramigua e'ŷ-e'ŷ rejapo va'ekue ikuai!
Ne'arandua rupi rejapo.
Yvy ma tynyẽ oiny mba'emo porã rejapo va'ekue.
- ²⁵ Oĩ avi ye'ẽ hembe'ŷ ha'e tuvixa va'e.
Ha'e va'e py mbovy e'ŷ ikuai neremimoingo kuery
kyr'i ha'e tuvixa va'e.
- ²⁶ Hi'áry rupi oaxa 'rã kanoã guaxu.
Oiko avi 'rã ypo guaxu remoingo va'ekue ha'e py ovy'a va'erã.
- ²⁷ Ha'e kuery ha'e javi oarõ 'rã okuapy ndepo guigua
hi'ára py porã ho'u va'erã reme'ẽ aguã.
- ²⁸ Reme'ẽ ramo 'rãe ha'e kuery ojou.
Rejou uka reta ramo ha'e kuery hevyatãmba 'rã.
- ²⁹ Nderezexa ukai ri ramo okyjepa 'rã.
Ipytuãa reipe'a ramo omano 'rã,
yvy ku'i ju 'rã opyta.
- ³⁰ Ha'e gui ma nenhe'ẽ rembou vy remoingo'i 'rã.
Ha'e rami vy rembopyau 'rã yvy re.*
- ³¹ Tove SENHOR rexakãa toĩ raka'e rã peve.
SENHOR toguerovy'a mba'emo omoingo va'ekue.
- ³² Yvy re ha'e oma'ẽ ramo rive oryryipa 'rã.
Yvyty re opoko ramo oẽ 'rã hataxí.
- ³³ Aporaei 'rã SENHOR pe aikovea ja.
Xeruete pe aporaei 'rã aikoa pukukue re.
- ³⁴ Hexe xema'endu'a ramo toguerovy'a.
Xee ma avy'a 'rã aikovy SENHOR re.
- ³⁵ Ha'e rã ojejavypa rei va'e kuery ma tokanhymba yvy gui,
tokuave eme opa marã rei ikuai va'e.
Xenhe'ẽ, eroporaei ke SENHOR!
Aleluia!

105

- ¹ Crônicas 16.8-22
- ¹ Perovy'a SENHOR, hery rupi pejapukai.
Yvy regua kuery pe peikuaa uka hembiapokue.
- ² Peporaei ke ixupe, peporaei salmos rupi.
Pemombe'u ke nhomondyipaarã ojapo va'ekue.
- ³ Perovy'a hery iky'a e'ŷ va'e rupi.
SENHOR rekaa rupi ikuai va'e tovy'a opy'a py.
- ⁴ Peka ke SENHOR, ipo'akaa guive.
Peka riae ke henonde peñ aguã.
- ⁵ Penema'endu'a ke mba'emo porã ojapo va'ekue re,
nhomondyipaa ha'e oipota va'e re ijayvuague re,
- ⁶ peñ hembiguai Abraão ramymino kuery,
peñ Jacó ra'y kuery hembiporavo pendekuai va'e.
- ⁷ Ha'e ma SENHOR Nhanderuete.

* 104:30 Yvy re ikuai va'e re Nhanderuete openaa re ijayvu avi Atos 17.24-28 ha'e Colossenses 1.15-17 py.

- Oipotaa ma yvy jave re ojekuaa.
- ⁸ Ima'endu'a riae 'rã guexeve guarã ojapo va'ekue re,
mbovy rei e'ŷ ikuai va'erã pe ojapo ukaa rupi ijayvuague re,
- ⁹ Abraão reve ngupive guarã ojapo va'ekue re,
Isaque pe ouraa rupi ijayvuague re guive.*
- ¹⁰ Ha'e nungakue re ma Jacó reve ju ijayvu,
raka'e rã peve guarã re ijayvu Israel reve.*
- ¹¹ Ha'e vy aipoe'i:
“Ndevy pe ame'ẽ 'rã Canaã pendeyvyrã”, he'i.
- ¹² Ha'e jave py ha'e kuery mbovy'i teri ikuai,
yvy mboae guigua ikuai raka'e mbovy'i ete,
- ¹³ oguata va'ekue yvy mboae-ae ikuai va'e rupi,
joyvy-yvy re.
- ¹⁴ Ha'e rami teĩ avave rei pe SENHOR ndoguereko axy ukai.
Ha'e kuery re oma'ẽ vy ijayvu ete huvixave ikuai va'e pe.
- ¹⁵ Ha'e vy aipoe'i: “Xerembiporavo kuery re pemoĩ eme pendepo,
pereko axy eme xevygua profeta kuery”, he'i.*
- ¹⁶ Ha'e gui ma yvy re ombou karuai,
ha'e vy ndojou ukavei tembi'u.*
- ¹⁷ Ha'e kuery renonde omondouka peteĩ ava
José hery va'e, tembiguairã ovende pyre.
- ¹⁸ Ipy corrente py ojokua,
ferro guigua omoĩ reve,
- ¹⁹ hekorã re ijayvuague ojeupity peve,
SENHOR ijayvuague hexe oiko aguã.
- ²⁰ Ha'e ramo huvixave opoi uka,
yvy regua ipo'akapave va'e oipe'a uka.
- ²¹ Ha'e vy ngoo re ae opena uka,
mba'emo oguereko va'e ha'e javi re opena aguã.
- ²² Omoĩ ha'e pygua ruvixa kuery re avi ipo'aka va'erã,
'arandu reombo'e aguã nhomongeta va'e kuery.
- ²³ Ha'e gui ma Egito yvy re Israel ju ovaẽ,
Jacó onhemboekoa Cam ramymino kuery yvy re.
- ²⁴ Nhanderuete ojapo ojeupega kuery ta'y reta aguã rami,
ojapo imoingo axya kuery gui imbaraeteve aguã rami.*
- ²⁵ Ha'e kuery py'a oguerovapa guive ixupeguia kuery re nda'ija'evei aguã,
hembiguai kuery ombotavypaa rupi oguereko aguã rami.
- ²⁶ Ha'e gui ha'e kuery ikuia py ombou guembiguai Moisés,
hembiporavo Arão guive.
- ²⁷ Ha'e va'e kuery po rupi ojapo uka hexa pyrã ikuia mbyte,
nhomondyipaarã ojapo Cam yvy re.
- ²⁸ Ha'e rami vy pytû ombou ramo opa rupi pytû
teĩ Moisés ha'e Arão ndojapo e'ŷi ijayvuague.
- ²⁹ Ha'e kuery ikuia rupi yy itui va'e ojapo tuguy,
pira ikuai va'ekue ojukapa vy.
- ³⁰ Ha'e kuery yvy re ju'i heta ombou,
huvixa ro py peve.
- ³¹ Ha'e ijayvu rã ou mberu arai rami,
ky voi ou yvy jave rupi.

* 105:9 Gênesis 12.7, 26.2-5 * 105:10 Gênesis 28.10-15 * 105:15 Gênesis 20.3-7 * 105:16 José rekokue ma
Gênesis 37-50 py oĩ. * 105:24 Éxodo 1.1-13.16

- ³² Oky 'rāgue py ombou amandau,
ha'e overa va'e gui tata ou yvy re.
- ³³ Omomba uva ha'e figo ty,
yvyra ikuai va'e rakā omopēmba vy.
- ³⁴ Ha'e ijayvu rā ou tuku-karu,
opo va'e heta ete ikuai oipapaa aguā rami e'ŷ.
- ³⁵ Ha'e va'e kuery ma yvy jave rupi ho'upa jai rogue,
omono'ō va'erā ikuai va'ekue guive.
- ³⁶ Ojukapa avi jypygua yvy re ikuai va'ekue,
jypygua imbaraete teri vy oguereko va'ekue.
- ³⁷ Ha'e gui ojeupeguia kuery oguenoē
ouro ha'e prata reve.*
Ha'e kuery regua peteīve jipoi hexaī e'ŷ va'e.
- ³⁸ Ha'e kuery oje'oi ramo Egito pygua kuery ov'y'apa okuapy,
ha'e kuery gui okyje teria ja.
- ³⁹ SENHOR ombou peteī arai ojeupeguia kuery áry rupi ija'o'iarā,
ha'e pyávy tataendy ju ombou omoexakā aguā.
- ⁴⁰ Ha'e kuery ojerure ramo ombou reta guyra,
yva gui mbojape ombou va'ekue re guive hevyatāmba.*
- ⁴¹ Peteī itaova ombovo uka ramo oē yy,
tekao e'ŷa rupi oxyry ov'y yakā rami.
- ⁴² Ijayvuague iky'a e'ŷ va'e re ima'endu'a vy ojapo,
guembiguai Abraão re guive.
- ⁴³ Ha'e rami py ojeupeguia kuery oguenoē ha'e gui,
hembiporavo kuery oporaei oje'oivy ov'y'aa rupi.
- ⁴⁴ Ha'e kuery pe ome'ē amboae regua yvy va'ekue,
ha'e ramo oipe'apa amboae regua mba'ety,*
- ⁴⁵ ha'e kuery onhe'ē rendu aguā ijayvuague,
ha'e lei oeja va'ekue rupi ikuai aguā.
Aleluia!

106

- ¹ Crônicas 16.35,36
- ¹ Aleluia!
Perovy'a ke SENHOR, porayvu va'e ramo,
mba'eta nhomboaxy opa va'erā e'ŷ.
- ² Mava'e nda'u omombe'u kuaa 'rā SENHOR opo'akaa rupi ojapo va'ekue,
tyrā pa ogueroporaei kuaa 'rā?
- ³ Ovy'a ete 'rā anhetē rupi ikuai va'e,
ára nhavō teko porā rupi ikuai va'e.
- ⁴ SENHOR, nema'endu'a ke xere,
ndevygua kuery reayvua rexu uka vy.
Eikuua pota xere xereraa jepe aguā,
- ⁵ nerembiporavo kuery ov'y'a rā xee aixa aguā,
ha'e avy'a avi aguā ndevygua kuery ov'y'aa py,
ndevygua kuery reve xee roguerovy'a aguā.
- ⁶ Ore kuery ma oreramoī kuery rami avi rojejavu rokuapy.
Opa marā orekuai, orereko vai guive rokuapy.
- ⁷ Egito yvy re oreramoī kuery ikuai jave

* 105:37 Éxodo 12.33-36 * 105:40 Éxodo 16.1-17.16; Números 20 * 105:44 Josué 11.16-23

- ndoikuuaa potai raka'e iporã ete va'e rejapoa re.*
 Na'ima'endu'ai okuapy mbovykue rei e'ŷ omboaxyague re.
 Ha'e rami vy ye'ẽ yvýry nonhe'ẽ rendui okuapy, Ye'ẽ Pytã va'e py.
- ⁸ Ha'e rami teĩ SENHOR ogueraa jepe raka'e guery omboete ucaa rupi vy,
 ha'e kuery pe opo'akaa oexa uka vy.
- ⁹ Ye'ẽ Pytã pe ijayvu ramo ipiru.
 Ha'e vy ojapo yy rupakue rupi oaxapa aguã rami,
 yvy piru reia rupi.
- ¹⁰ Ogueraa jepe ija'e e'ŷ va'e kuery po gui,
 oepy hovaigua kuery po'akaa gui.
- ¹¹ Imoingo axyare kuery áry rupi yy ojao'ipa,
 ha'e kuery regua neĩ peteĩve ndoo jepei.
- ¹² Ha'e ramo mae oguerovia okuapy ijayvuague,
 ha'e vy oporaei ixupe oguerovy'aa rupi.
- ¹³ Ha'e gui are e'ŷ re hexaraipa ju ojapo va'ekue re,
 ha'e oipotaa rupi ve'ŷ ju ikuai.*
- ¹⁴ Tekoa e'ŷa py ha'e kuery ae oipotapa reia rupi rive ikuai vy
 Nhanderuete pe "Taexa" he'i okuapy.
- ¹⁵ Ha'e rã ha'e ome'ẽmba ha'e kuery ojerurea,
 va'eri ojapo avi ha'e kuery nhe'ẽ ikangy ovv aguã rami.
- ¹⁶ Ha'e kuery rekaoa py ijayvu rei okuapy
 Moisés ha'e Arão SENHOR pegua iky'a e'ŷ va'e re.*
- ¹⁷ Ha'e ramo yvy ojepe'a vy omokõ Datã,
 Abirão kuery regua guive ojao'ipa.
- ¹⁸ Ha'e va'e kuery re tata omoendy vy
 oapypa raka'e heko vai va'e kuery.
- ¹⁹ Horebe yvyty py ojapo okuapy peteĩ vaka ra'y ra'angaa,
 ha'angaa ouro ryku gui ojapo pyre ombojerovia okuapy.†
- ²⁰ Ha'e rami Nhanderuete rexakãa omboekovia
 mymba nhuû ho'u va'e ra'angaa re rive.
- ²¹ Hexaraipa Nhanderuete heraa jepeare gui,
 Egito yvy re mba'emo porã ojapo rire teĩ.
- ²² Nhomondyipaarã ojapo Cam yvy re,
 ha'e Ye'ẽ Pytã py mba'emo porã ete ojapo rire teĩ.
- ²³ Hembiporavo Moisés henonde nonhemoi va'e rire
 ijayvuague rami vy omomba ete 'rãgue.
 Ha'e rami py Moisés ojapo raka'e opoxya rupi omomba e'ŷ aguã rami.
- ²⁴ Ha'e rami avi ha'e kuery ndooxei yvy iporã va'e py,
 ijayvua ndogueroviai vy.‡
- ²⁵ Ha'e rami 'rãgue py peteĩ-teĩ ropy rupi ijayvu rei okuapy,
 SENHOR ijayvua re noendu potai vy.
- ²⁶ Ha'e ramo opo oupi reve oura ha'e kuery pe,
 tekaoa e'ŷa rupi ae omokanhymba aguã re,
- ²⁷ ha'e gui hamymino kuery ju yvy regua kuery ikuia rupi oitypa vy
 yvy mboae rupi omaoimba aguã re.
- ²⁸ Ha'e gui ovapa oje'oivy Peor pygua kuery ruete ramigua Baal re.
 Ha'e vy ho'u okuapy ta'angaa hekove e'ŷ va'e pe ome'ẽ mbyre.§

* 106:7 Egito gui Nhanderuete ogueraa jepeague omombe'u Êxodo 14-15 py. * 106:13 Números 11 * 106:16 Números 16 † 106:19 Vaka ra'y ra'angaa ojapo okuapyague omombe'u Êxodo 32 py. ‡ 106:24 Yvy porã py ndooxei okuapyague omombe'u Números 13-14 py. § 106:28 Peor py ojejavyague omombe'u Números 25 py.

- ²⁹ Ha'e rami ete ikuai vy ombopoxy rive Nhanderuete.
 Ha'e rami vy oendu okuapy mba'eaxy vaikue.
- ³⁰ Ha'e ramo Finéias opu'ã vy otekoavy va'ekue ombopaga rire
 mba'eaxy opytu'upa.
- ³¹ Ha'e nunga py oexa uka heko porãa,
 raka'e rã peve guarã.
- ³² Ha'e gui ma Meribá py yy oĩa py ju ombopoxy.
 Ha'e va'e kuery káuxa mba'emo vai oiko raka'e Moisés pe.*
- ³³ Mba'eta Nhanderuete Nhe'ẽ rovai opu'ã rei okuapy ramo
 Moisés ijayvu 'rãgue'ŷ rupi ijayvu.
- ³⁴ Ha'e kuery ndojukapa etei amboae regua kuery
 SENHOR ojapo ukaague rami e'ŷ.†
- ³⁵ Ha'e rami 'rãgue py yvy regua kuery reve nhomomendapa vy
 ha'e pygua reko rami ikuai.
- ³⁶ Ha'e vy ombojerovia okuapy ha'e pygua kuery ta'angaa.
 Ha'e nunga opyta imbo'aarã.
- ³⁷ Gua'y ha'e guajy kuery oapy ukapa
 anha kuery pe.
- ³⁸ Ha'e vy omoẽ mba'eve py ojejavvy e'ŷ va'e ruguy teĩ,
 gua'y, guajy kuery ruguy ae,
 mba'emo ra'angaa Canaã pygua pe ojuka uka vy.
 Ha'e vy ijyvy iky'apa va'e opyta huguykue py.
- ³⁹ Ha'e rami ikuai vy onhemongy'apa ha'e kuery ae ojapoa py,
 itavy rei okuapy guembiapokue py.
- ⁴⁰ Ha'e nunga rupi SENHOR poxya hendy ixupeguia kuery rovai,
 ha'e ojeguaru ojeupe guarã va'ekue gui ae.
- ⁴¹ Ha'e vy omboaxapa amboae regua po py.
 Ha'e kuery re ija'e e'ŷ va'e kuery ipo'aka okuapy,
- ⁴² hovaigua kuery oguerekaxy,
 ha'e kuery po'akaa guy py omoingo.
- ⁴³ Mbovykue rei e'ŷ ogueraa jepe,
 ha'e rami teĩ ha'e kuery nhomongetaa rupi ikuai vy ombopoxy reive tema.
 Gueko vaia py ojexavaive oje'oivy.
- ⁴⁴ Ha'e rami rire teĩ ha'e oikuua pota ju ojexavaia re,
 ha'e oendu nho ha'e kuery ojapukaia.
- ⁴⁵ Ha'e kuery re vy ima'endu'a guexeve guarã ojapo va'ekue re.
 Ha'e vy porayvu ete va'e vy omboaxy ju.
- ⁴⁶ Ojapo escravo-rã heraa are kuery ha'e javi
 omboaxy nho aguã rami.
- ⁴⁷ SENHOR Oreruete, orereraa jepe ke!
 Oreno'õmba ju yvy regua kuery mbyte gui,
 nderery iky'a e'ŷ va'e rupi roguerovy'a aguã,
 ha'e rovy'aa rupi rogueroporaei aguã.
- ⁴⁸ Ima'endu'a porãmby toiko SENHOR Israel kuery Ruete
 aŷ, ha'e raka'e rã peve!
 Heta va'e kuery ha'e javive aipo te'i: "Amém!"
 Aleluia!

* 106:32 Meribá py ojejavvyague omombe'u Números 20 py. † 106:34 Ha'e kuery ojejavvy ramo Nhanderuete omboaxy kuereiague omombe'u Juízes 2 py.

- ¹ “Perovy'a ke SENHOR porayvu va'e ramo,
ha'e nhomboaxya opa va'erã e'ŷ”,
- ² te'i SENHOR oepy va'ekue,
hovaigua kuery po gui ogueraa jepe va'ekue.
- ³ Mba'eta ono'õmba ju amboae yvy re ikuaiague gui,
kuaray oua katy gui, oikea katy gui,
ipuku-a katy gui, ha'e ye'ẽ katy gui ma voi.
- ⁴ Tekoa e'ŷa rupi ha'e kuery oguata rei raka'e,
tape oikuaa e'ŷa rupi,
tetã ikuai aguã ndojoui guive.
- ⁵ Karuai ha'e yuvei
omokanhy ma heravy ha'e kuery nhe'ẽ.
- ⁶ Ha'e gui ojexavaia py ojapukai SENHOR pe.
Ha'e ramo ogueraa jepe ojexavaia gui.
- ⁷ Tape hi'yvi va'e rupi ogueraa
tetã ikuai aguã peve.
- ⁸ Ha'e kuery toguerovy'a SENHOR porayvua re,
avakue ra'y kuery pe mba'emo porã ojapo rire.
- ⁹ Mba'eta ijy'uvei va'e pe ome'ẽ oy'u aguã,
ha'e okaruxe va'e pe heta ojou uka mba'emo porã.
- ¹⁰ Amongue ma pytû reia rupi oiko, manoa guy py ae,
ojexavai oiny nhuã py ferro guigua py ojokua pyre reve.
- ¹¹ Nhanderuete nonhe'ẽ renduiague re ojexavai,
Yvate ete va'e ombo'ea re ndojapyxakai rire.
- ¹² Ha'e ramo ha'e kuery ikane'õmba omomba'eapoa vaipa ramo.
Ho'a teĩ avave rei ndoikoi ipytyvõarã.
- ¹³ Ha'e gui ojexavaia py ojapukai SENHOR pe.
Ha'e ramo ogueraa jepe ojexavaia gui.
- ¹⁴ Oguenoẽ pytû vaikue ha'e manoa guy gui,
ha'e kuery gui omondopa corrente ferro guigua.
- ¹⁵ Ha'e kuery toguerovy'a avi SENHOR porayvua re,
avakue ra'y kuery pe mba'emo porã ojapo rire.
- ¹⁶ Mba'eta oitypa okẽ overa va'e guigua,
ijokoa ferro guigua guive omopẽmba.
- ¹⁷ Ha'e gui hi'arandu e'ŷ va'e ojejavypaa rupi anho ikuia re
ojexavai okuapy gueko vaia py.
- ¹⁸ Ojeguaru opa marãgua tembi'u gui.
Ha'e rami vy ovaẽ manoa rokẽ peve.
- ¹⁹ Ha'e gui ojexavaia py ojapukai SENHOR pe.
Ha'e ramo ogueraa jepe ojexavaia gui.
- ²⁰ Oayvu ombou vy omonguerapa,
ogueraa jepe omanomba 'rãgue gui.
- ²¹ Ha'e kuery toguerovy'a avi SENHOR porayvua re,
avakue ra'y kuery pe mba'emo porã ojapo rire.
- ²² Ixupe tome'ẽ mba'emo oguerovy'a vy.
Ovy'aa rupi toikuua ukapa ojapo va'ekue.
- ²³ Ha'e gui amongue ma kanoã guaxu ojou vy ye'ẽ rupi oguata 'rã,
mba'emo vendea kuery yy tuvixa va'e rupi oo va'e.
- ²⁴ Ha'e va'e kuery oguataa rupi oexa SENHOR rembiapo,
mba'emo porã ete yy typyvea rupi ojapo ramo.
- ²⁵ Mba'eta ha'e ijayvu vy ojapo yvytu vaikue oipeju,
ha'e yai opu'ã-pu'ã aguã rami.

- ²⁶ Ha'e ramo yvate peve oje'oi,
ha'e gui yai oguejy ju iguy katy peve.
Ha'e rami ete ojexavai ramo inhe'ẽ ikangy ma ovy.
- ²⁷ Oguataa rupi ho'a rai-rai'i okuapy oka'u va'e rami.
Ha'e rami vy ndoikuaavei rei ma.
- ²⁸ Ha'e gui ojexavaia py ojapukai SENHOR pe.
Ha'e ramo ogueraa jepe ojexavaia gui.
- ²⁹ Omombytu'u yvytu vaikue,
yai guive omombytu'upa.
- ³⁰ Ha'e ramo ovy'apa ju opytu'upa ramo.
Ha'e rami ogueraa ojaaty py ovaẽxeague peve.
- ³¹ Toguerovy'a SENHOR porayvua re,
avakue ra'y kuery pe mba'emo porã ojapo rire.
- ³² Tomboete avi heta va'e kuery onhemboatya py,
toguerovy'a yvatekueve nhomongetaa py.
- ³³ Ha'e ojapo yakã ikuai va'e typa aguã rami,
ha'e rã yvu ma ipiru reia meme opyta aguã rami.
- ³⁴ Yvy porã va'ekue ma ojapo juky re'ẽ rive opyta aguã rami,
ha'e pygua kuery heko vai rei ramo.
- ³⁵ Ojapo tekoa e'ÿa va'ekue yupu ju opyta aguã rami,
ha'e yvy piru rei va'ekue ma yvu oĩ aguã rami.
- ³⁶ Ha'e py omboekoa okaruxe rei va'ekue.
Ha'e ramo ojapo okuapy peteĩ tetã ikuai aguã.
- ³⁷ Mba'etyrã mba'emo omoaĩ, uva guive onhotõ.
Ha'e vy heta ojou omono'õ va'erã.
- ³⁸ SENHOR omoingo porã heta ete oje'oivy aguã rami,
hymba kuery vaka ndoatai guive.
- ³⁹ Ha'e rami teĩ ha'e kuery ojavyky reia ramo iporiaupa ha'e ndaetavei,
ojexavai ha'e ikuai axy vy.
- ⁴⁰ SENHOR ojapo huviska kuery nomboeteavei aguã rami,
ojapo avi oguata rei aguã rami tape oĩa rupi e'ÿ.
- ⁴¹ Ha'e rã iporiaukue'i ma ogueraa jepe 'rã
ojexavai reia gui yvatea py oĩ porã aguã,
hoo pygua kuery voi omboetave vexa'i rami.
- ⁴² Ha'e nunga heko porã va'e oexa vy ovy'a 'rã.
Ha'e rã heko vai va'e ha'e javi ma omboty 'rã ojuru.
- ⁴³ Hi'arandu va'e ma toikuua pota ha'e nunga re,
toikuua pota SENHOR nhomboaxya re.

108

Mboraeirã Davi ombopara va'ekue.

Salmo 57.7-11; Salmo 60.5-12

- ¹ Xeruete, xekuraxõ oĩ atã ma.
Aporaei vy roguerovy'a 'rã xenhe'ẽ ha'e javi py.
- ² Mbaraka ha'e mba'epu ixã reta va'e, pevy ke.
Xee ambovy 'rã ko'ẽ ju.
- ³ SENHOR, roguerovy'a 'rã yvy regua kuery mbyte,
ndevy aporaei 'rã ha'e javi regua mbyte.
- ⁴ Mba'eta renhomboaxya oo 'rã yva peve,
ha'e ndereko porãa ma arai rovai peve 'rã oo.
- ⁵ Xeruete, enhemboyvate yva áry rupi,
ha'e yvy jave re tojekuaa nerexakãa,
- ⁶ ore nerembiayvu kuery roo jepe aguã.

- Orereraa jepe ke reiporu kuaa regua py, ha'e orembovai.
- ⁷ Nhanderuete ijayvu oky'a e'ŷa rupi:
“Xepo'akaa rupi vy amboja'o 'rã Siquém yvy,
aa'ã 'rã Sucote regua yvyugua guive.*
- ⁸ Gileade ha'e Manassés yvy ma xemba'e meme itui.
Efraim yvy ma xengora ratã.
Judá ma xepo pygua.
- ⁹ Ha'e rã Moabe yvy ma hy'a ajejoiaty itui,
Edom yvy áry ma amombo 'rã xepy regua,†
ha'e Filístia pygua kuery re xepo'aka vy avy'a nhendu 'rã.”
- ¹⁰ Mava'e nda'u xereraa 'rã tetã ikorapa va'ea py?
Mava'e nda'u xereraa 'rã Edom yvy re?
- ¹¹ Mba'eta Oreruete, ndee orereja rive va'ekue.
Oreruete, ndereovei ma orexonardo kuery reve!
- ¹² Orereraa jepe nho ke rojexavaia gui,
mba'eta avakue orereraa jepea ma mba'everã ndovarei.
- ¹³ Nhanderuete re vy ae 'rã nhandepo'aka,
mba'eta ha'e opyrõ 'rã nhanderovaigua kuery re.

Ngovaigua kuery ombopagaa aguã re ojerurea ague
Jogueroporaei va'e pe mboraeirã Davi ombopara va'ekue.

109

- ¹ Xeruete rogueroporaei va'e, ekyrirí eme ke!
- ² Mba'eta xerovai ijanu va'e kuery ma nhombotavya rupi ijayvu,
oapekú ijanu va'e py ijayvu okuapy xere.
- ³ Ha'e kuery xembojere rei vy xerayvu e'ŷa rupi ijayvu,
mba'e re'ŷ opu'ã okuapy xere.
- ⁴ Xee ayvuague repy ma xevy ivai okuapya oĩ.
Ha'e rã xee ma ajerure ainy.
- ⁵ Ajapo porãague repy ome'ẽ mba'emo vai,
ayvuague repy ma xere ija'e e'ŷa oĩ.
- ⁶ Hovai guarã emoĩ peteĩ heko vai va'e.
Oiporu kuaa regua re topu'ã hekokue mombe'uarã.
- ⁷ Ha'e gui ma omboayvua py tombopagaa.
Ojerureague tojekuaa teko vai rami.
- ⁸ Hekove topa voi,
ha'e gui ojapo aguã va'ekue amboae ju tojapo.*
- ⁹ Ta'y kuery ma tyre'ŷ meme ta'ikuai,
ha'e rã ta'yxy ma imeve'ŷ va'e toiko.
- ¹⁰ Ta'y kuery ma hoo e'ŷ va'e ta'ikuai
mba'emo re ojerurea rupi.
Tomoëmbaa hoo ombovaipa va'ekue gui.
- ¹¹ Mba'emo oguerekva'eke toipe'apaa oreveague re,
amboae yvy guigua tojopy ombo'epoague repy.
- ¹² Avave rei tomboaxy eme,
neĩ ta'ykue re voi avave rei topena eme.
- ¹³ Ta'ikuai eme hamymino kuery,
ha'e kuery ikuai aguã 'rãgue ta'ima'endu'aa eme hery re.
- ¹⁴ SENHOR ta'ima'endu'a riae tuu kuery ojejavague re,

* 108:7 Apy ma ijayvu joyvy oipe'a va'ekue ojeupeguia kuery pe omboja'o aguã re. † 108:9 Ha'e jave py ma joyvy ojogua vy hi'áry omombo 'rã opy regua, oikuaa uka aguã ija oikoa. * 109:8 Kova'e ayvu rupi ma Judas rekokue re ijayvu (Atos 1.20).

- tombogue eme ixy ojejavyague.
- ¹⁵ Ha'e nunga tojekuaa riae SENHOR renonde,
ha'e kuery re ta'ima'endu'aave eme yvy re.
- ¹⁶ Mba'eta ojee nomoī rire nhomboaxya.
Ha'e rami 'rāgue py oakykue monha ojexavai va'e ha'e iporiaukue'i,
ipy'a vaia rupi ikuai va'e guive,
manoa pe omboaxa aguā.
- ¹⁷ Joe ijayvu vaia rupi anho oiko rire hexe ae ju ha'e nungakue tojeapa.
Ndajogueroayvu porāxei rire togueroayvu porāa eme.
- ¹⁸ Ojee ayvu vai ao puku rami omoī rire
toike ipy'apy katy yy rami,
ikāgue peve too azeite rami.
- ¹⁹ Hexe toī oao onheovāa rami,
ha'e ku'akuua omoī va'ety rami.
- ²⁰ Ha'e rami ae SENHOR tombopaga xerovaigua kuery,
xerekove re ijayvu vai va'e.
- ²¹ Ha'e rā ndee SENHOR Xeruete, enhemoī xerepyarā nderery remboete ucaa rupi vy.
Xereraa jepe ke, ndeporayvua tuvixa ramo.
- ²² Mba'eta xee ma ajexavai, iporiaukue'i aiko.
Xepy'apy rupi ma xeaia anho aendu.
- ²³ Xerekove opa ov y kuaray ojero'a ovya rami.
Mombyry omombo pyre aiko tuku karu rami.
- ²⁴ Akaru e'ŷ re riae aiko ramo
xerenapy'ā ikangypa ma,
xeangai gui xero'o voi ipiru ma ov y.
- ²⁵ Ha'e kuery pe rā ojou vaipy aiko.
Xerexa vy oakā ombovava-vava 'rā.†
- ²⁶ SENHOR Xeruete, xepytyvō ke!
Xereraa jepe ke xemboaxya rupi,
- ²⁷ ha'e kuery oikuua aguā ndepo gui ae xereraa jepearā oua,
ndee SENHOR rejapo rire.
- ²⁸ Ha'e kuery joe ijayvu vai va'e.
Ha'e rā ndee ma rejogueroayvu porā va'e.
Tove xere opu'ā va'e kuery nda'evei nho ta'ikuai.
Ha'e rā nerembiguai ma tovy'a.
- ²⁹ Xerovaigua kuery re toī oxīmbaa.
Oxīmbaa tojao'ipa ao puku py rami.
- ³⁰ Xejuru py arov y'a ete 'rā SENHOR.
Rogueroporaei 'rā heta va'e kuery mbyte,
- ³¹ mba'eta iporiaukue'i ikuiai katy onhemoī ramo,
ojukaxe va'e kuery gui ogueraa jepe aguā.

Messias ipo'akaa ha'e sacerdote oikoa re ijayvua
Mboraerā Davi ombopara va'ekue.

110

- ¹ SENHOR aipoe'i xeruvixa pe:

“Eguapy ke aiporu kuaa regua re,
nderovaigua kuery ndepy guýry amoī peve”, he'i.*

† 109:25 Kova'e ayvu rupi ijayvu Jesus kuruxu re oī javegua re (Mateus 27.39-40). * 110:1 Apy “Xeruvixa” he'ia ma Cristo re ae ijayvu vy. Ha'e gui “Eguapy ke aiporu kuaa regua re” he'ia ma Nhanderuete ojee rami avi ombopo'aka aguā re ijayvu vy (Mateus 22.41-26; Marcos 12.36, Lucas 20.42-42, Atos 2.32-36; 1 Coríntios 15.24-28; Efésios 1.20; Colossenses 3.1; Hebreus 1.13, 8.1, 10.11-13).

- ² Sião tetã gui SENHOR omboaxa 'rã po pygua ndepo'aka aguã.
Ha'e vy aipoe'i 'rã: "Ndepo'aka ke nderovaigua kuery re", he'i 'rã.
- ³ Ha'e gui ma ndepo'akaa ára
ndevygua kuery ojexa ukapa 'rã ndere ouxe'a'i rami.
Ndevygua kunumigue ma iky'a e'ŷ va'e py onhemonde reve 'rã ikuai,
aje'ive'i yxapy ojekuaa va'e rami.
- ⁴ SENHOR ourague ndoguerovai 'rã:
"Ndee ma sacerdote reĩ raka'e rã peve guarã,
Melquisedeque reko rami nderekova'e vy", he'i rire.*
- ⁵ Senhor reiporu kuaa regua re oĩ va'e ma
ipoxya ára omou'ũmba 'rã huvixave kuery.
- ⁶ Ombopaga 'rã yvy regua kuery,
omonyẽ 'rã te'õgue anho.
Nhoakã omou'ũmba 'rã yvy jave re.
- ⁷ Oikoa rupi yxyry oĩ va'e gui oy'u 'rã oiny,
ha'e gui oakã omopu'ã ju 'rã ovy.

111

Nhanderuete opena porãague re ijayvua

- ¹ Aleluia!
Xepy'a ha'e javi py aroporaei 'rã SENHOR
heko porã va'e kuery ijatya py.
- ² SENHOR rembiapokue ma tuvixa meme.
Oguerovy'a va'e kuery ha'e javi oikuaa pota 'rã ha'e nunga re.
- ³ Guembiap ha'e javi py oexa uka guexakãa ha'e opo'akaa,
heko porãa avi oĩ 'rã raka'e rã peve.
- ⁴ Hembiapo porã re nhanema'endu'a aguã rami ojapo.
SENHOR ma porayvu ha'e nhomboaxy va'e.
- ⁵ Omongaru 'rã henonde ojererokyjea rupi ikuai va'e,
ima'endu'a riae 'rã guexeve guarã ojapo va'ekue re.
- ⁶ Ojeupeguia kuery pe oexa uka 'rã opo'akaa mba'emo ojapoa py,
ijyvyrã amboae regua kuery ikuaiague ome'ëa py.
- ⁷ Opo py ojapo va'e ma anhetê ha'e teko porã rupi meme ojapo,
nhanembo'ea voi ojeroviapy meme.
- ⁸ Ha'e nunga oĩ porã 'rã raka'e rã peve,
ojeroviapy oikoa ha'e teko porã rupi oeja rire.
- ⁹ Ojeupeguia kuery pe ombou heraa jepearã,
guexeve guarã ojapo vy raka'e rã peve guarã.
Hery ma iky'a e'ŷ va'e ha'e nhomongyjea.
- ¹⁰ SENHOR renonde jajererokyjea rupi jaiko vy 'rãe jaupity 'arandua.
Ha'e rami ikuai va'e ha'e javi oexa uka 'rã 'arandu.*
Jaroporaeia oĩ riae 'rã raka'e rã peve!

112

Heko porã va'e oikove aguã re ijayvua

- ¹ Aleluia!
Ovy'a ete 'rã avakue SENHOR renonde ojererokyjea rupi ikuai va'e,
ha'e ojapo uka va'ekue oguerovy'a va'e.
- ² Ha'e va'e kuery ramymino kuery voi ipo'akapa 'rã yvy re,
heko porã va'e ramymino kuery re ima'endu'a porãa 'rã.

* 110:4 Hebreus 5.1-10, 7.1-28 * 111:10 Provérbios 9.10

3 Hoo py ma opa mba'e 'rā oguereko,
 heko porāa oī 'rā raka'e rā peve.
 4 Heko porā va'e pe ma pytū 'rāgue py ojekuaa 'rā imoexakāarā.
 Porayvu, nhomboaxyha'e teko porā rupi ikuai.
 5 Nhomboaxy vy mba'emo oiporuka va'e ma ovy'a 'rā,
 ha'e imboayvua py teī oikuaa uka 'rā heko porā va'e oikoa.
 6 Ha'e kuery ndoitayai 'rāe.
 Ha'e kuery re raka'e rā peve 'rā ima'endu'aa.
 7 Nhomondyiārā oendu teī nonhemondyi 'rā.
 Ipy'a guaxu 'rā, SENHOR re ojerovia vy.
 8 Ipy'aa oī atā vy ndokyjei 'rā,
 oexa 'rā oipotaague hovaigua kuery re ojeupity ramo.
 9 Mba'emo oguereko va'e omboja'o oy ome'ē 'rā iporiaukue'i pe.
 Heko porāa oī 'rā raka'e rā peve.*
 Ipo'aka ramo omboetea ha'e ima'endu'aa porā 'rā.
 10 Ha'e nunga heko vai va'e oexa vy ivai 'rā teī,
 haī jekyty rei 'rā okanhy peve.
 Mba'eta heko vai va'e oipotaa ma opa 'rā.

113

SENHOR jaroporaei aguā regua

1 Aleluia!
 SENHOR rembiguai pendekuai va'e, peporaei ke,
 peroporaei SENHOR rery.
 2 Ta'ima'endu'a porāa SENHOR rery re,
 aŷ ha'e raka'e rā peve!
 3 Kuaray oēa guive oikea peve
 togueroporaiae SENHOR rery!
 4 SENHOR ma yvate ete va'e, yvy jave regua áryve,
 hexakāa voi yva áryve oo.
 5 Mava'e nda'u SENHOR Nhanderuete reve joo rami heko va'e?
 Henda openaaty ma yvatea py oī.
 6 Ojero'a 'rā guive oexa aguā
 yva ha'e yvy re mba'emo oiko va'e.
 7 Omopu'ā ju 'rā imo'amy yvy ku'i py omombo pyre,
 yty gui oipe'a 'rā iporiaukue'i,
 8 huvixa kuery yvýry ju omboguapy imoiny aguā,
 tá, omoī 'rā ojeupagua ruvixa kuery reve guarā.
 9 Ojapo 'rā kunha imemby e'ŷ va'ekue omemby kuery reve oiko aguā rami.
 Ha'e ramo ovy'a 'rā, kyrīgue xy oiko vy.
 Aleluia!

114

Egito yvy gui oēmba jave guare re ima'endu'aague

1 Israel kuery Egito yvy gui oē jave,
 Jacó ramymimo kuery ayvu mboae py ijayvu va'e ikuiai gui oēmba jave ma
 2 Judá kuery gui Nhanderuete ojapo guenda iky'a e'ŷ va'erā,
 ojapo Israel kuery ojeupe guarā ete.
 3 Ha'e nunga ye'ē oexa vy ojava ovy,
 Jordão yakā voi guakykue katy oxyry raka'e.*

* 112:9 2 Coríntios 9.9 * 114:3 Ye'ē Pytā ojavaague ma Éxodo 14 py omombe'u, ha'e rā Jordão yakā guakykue katy ojevyague ma Josué 3 py.

- ⁴ Yvyty ikuai va'e opopa vexa ava rami,
yvy'ã'i voi vexa'i ra'y rami opopa okuapy.
- ⁵ Ye'ẽ, mba'e tu oĩ ha'e rami rejava aguã?
Ha'vy ndee Jordão, mba'e re tu nderakyue katy rejevy?
- ⁶ Peẽ yvyty, mba'e re tu pepopa ri vexa ava rami?
Ha'vy peẽ yvy'ã, mba'e re tu vexa'i ra'y rami pepo?
- ⁷ Ndee yvy, eryryi ke SENHOR Jacó Ruete renonde.
- ⁸ Mba'eta itaty gui ojapo yy ruparã,
itaova ratã gui ojapo raka'e yvu.*

115

Nhanderuete anho nhambente aguã regua

- ¹ SENHOR, ore kuery e'ŷ toremboetea, ore e'ŷ,
ha'e rami 'rãgue py nderery anho tomboetea,
renhomboaxya ha'e ojeroviap reikoa re.
- ² Mba'e re tu amboae regua kuery joupe-upo oporandu vy
“Mamo tu oĩ ha'e kuery Ruete?” he'i 'rã okuapy?
- ³ Mba'eta Nhanderuete ma yva re oĩ,
opa mba'e ojapo oikovy ha'e ae oipotaa rami.
- ⁴ Ha'e rã ha'e kuery pegua tuuete ma prata e'ŷ vy ouro guigua rive,
avakue opo py ojapo va'ekue meme.*
- ⁵ Ijuru va'eri nda'ijayvui,
hexa va'eri ndoexai,
- ⁶ ijapyxa va'eri noendui,
inhapyigua va'eri noetui,
- ⁷ ipo va'eri mba'eve re ndopokoi,
ipy va'eri ndoguatai,
ijyryvi va'eri ha'e kuery gui neĩ peteĩ ayvu nonhendui.
- ⁸ Ijapoare kuery toptya ha'e nunga rami ae,
hexe ojerovia va'e kuery voi.
- ⁹ Ha'e gui Israel kuery ma SENHOR re ae tojerovia.
Ha'e anho ma ipytyvõa ha'e mba'emo vai jokoa oiko.
- ¹⁰ Arão ramymino kuery tojerovia SENHOR re.
Ha'e anho ma ipytyvõa ha'e mba'emo vai jokoa oiko.
- ¹¹ SENHOR renonde ojererokyjea rupi ikuai va'e ha'e javi tojerovia SENHOR re.
Ha'e anho ma ipytyvõa ha'e mba'emo vai jokoa oiko.
- ¹² Mba'eta nhandere SENHOR ima'endu'a vy nhanemoingo porã 'rã.
Omoingo porã 'rã Israel kuery,
omoingo porã 'rã Arão ramymino kuery,
- ¹³ omoingo porã 'rã henonde ojererokyjea rupi ikuai va'e,
yvatekueve ha'e yvyigueve voi.*
- ¹⁴ SENHOR tomoõve tema peiko porã aguã,
peẽ kuery ha'e penda'y kuery pe guive.
- ¹⁵ SENHOR yva ha'e yvy apoare va'e
ogueroayvu porã va'e tapendekuai.
- ¹⁶ Yva ma SENHOR pegua oĩ.
Ha'e rã yvy ma ome'ẽ avakue ra'y kuery pe.
- ¹⁷ Omanogue ma ndogueroporaei 'rã SENHOR,
okyrirõi va'e anho ikuaia py oguejy va'ekue.
- ¹⁸ Ha'e rã nhande kuery ma jarovy'a 'rã SENHOR,

* 114:8 Éxodo 17; Números 20

* 115:4 Salmo 135.15-18

* 115:13 Apocalipse 11.18, 19.5

aŷ guive raka'e rã peve.
Aleluia!

116

Oporai vy Nhanderuete oguerovy'aague

- ¹ Xee ma ayvu SENHOR,
 mba'eta ajerure ramo oendu xeayvua.
- ² Xea katy ojero'a vy ojapyxaka rire
 ixupe ajapukai 'rã aikovea ja.
- ³ Manoa regua nhuã xemboty va'ekue,
 jexavaia yvykua vaikue guigua xere ipo'aka va'ekue.
 Ha'e ramo aiko axya ha'e ndavy'aia py ha'a karamboae.
- ⁴ Ha'e rami vy ajapukai SENHOR rery rupi:
 “SENHOR, eraa jepe ke xerekove!” ha'e va'ekue.
- ⁵ SENHOR ma porayvu ha'e heko porã va'e,
 Nhanderuete ma nhanemboaxya rupi oiko va'e.
- ⁶ SENHOR ma hi'arandu e'ŷ'i va'e kuery re opena porã va'e.
 Ha'e rami vy ha'a ajupya py xerexa vy xereraa jepe karamboae.
- ⁷ Xenhe'ẽ, ejevy ju ke repytu'u aguã py,
 mba'eta xevy SENHOR mba'emo porã ome'ẽ oata aguã rami e'ŷ.
- ⁸ Ha'e rami vy xenhe'ẽ oepy amano taa gui.
 Oepy xerexa xerexaya gui,
 xepy guive oepy onhepyxangaa gui.
- ⁹ Ha'e ramo SENHOR renonde aiko 'rã
 okuave va'e yvy re.
- ¹⁰ Hexe ajerovia va'eri xejeupe xeayvu vy
 “Ajexavai ete rima aikovy”, ha'e va'ekue.*
- ¹¹ Xepy'a eta rei vy
 “Avakue ikuai va'e ma ijapu va'e meme”, ha'e va'ekue.
- ¹² SENHOR opa mba'e py xevy ojapo porãague re
 mba'e nda'u ame'ẽ 'rã ixupe?
- ¹³ Xereraa jepeague arovya vy aupti 'rã karo,*
 ha'e SENHOR rery rupi aroporai 'rã.
- ¹⁴ SENHOR pe ajapopa 'rã anhemboayvuague
 ixupeagua kuery ha'e javi oexaa py.
- ¹⁵ Hepy ete va'e SENHOR oexa 'rã
 ojeupeagua iky'a e'ŷ va'e kuery omano rã.
- ¹⁶ SENHOR, xee ma nerembiguai ete aiko,
 nerembiguai pi'a guive aiko.
 Remondopa ma xejokuaague.
- ¹⁷ Ha'e ramo ndevy ame'ẽ 'rã roguerovy'aa,
 ha'e SENHOR rery rupi aroporai 'rã.
- ¹⁸ SENHOR pe ajapopa 'rã anhemboayvuague,
 ixupeagua kuery ha'e javi ikuaria py,
- ¹⁹ SENHOR pegua roka
 Jerusalém mbyte py ae.
 Aleluia!

* 116:10 2 Coríntios 4.13 * 116:13 Apy ijayvu judeu kuery gueko rami vy Nhanderuete pe mba'emo ome'ẽ aguã re. Tembi'u ha'e vinho oupi 'rã ixupe, ha'e gui oguerovy'aa rupi ho'u 'rã (Salmo 22.23-26; Levítico 7.11-16).

117

SENHOR pe ha'e javi regua oporaei aguã regua

- 1 Peẽ yvy regua ha'e javi, peporaei ke SENHOR pe!
Peroporaei, ha'e javi regua!*
- 2 Mba'eta SENHOR ma opa mba'e py nhanemboaxy,
ha'e ojeroviapy 'rã oiko raka'e rã peve.
Aleluia!

118

Nhandereraa jepea jarovy'a aguã regua

- 1 Perovy'a ke SENHOR, porayvu va'e ramo.
Mba'eta nhomboaxya opa va'erã e'ŷ.
- 2 Israel kuery aipo te'i:
“Tá, nhomboaxya opa va'erã e'ŷ.”
- 3 Arão ramymino kuery aipo te'i:
“Tá, nhomboaxya opa va'erã e'ŷ.”
- 4 SENHOR renonde ojererokyjea rupi ikuai va'e ha'e javi aipo te'i:
“Tá, nhomboaxya opa va'erã e'ŷ.”
- 5 Ha'e gui xee ma ajexavaia py ajapukai SENHOR pe.
Ha'e ramo SENHOR oendu vy xerepy karamboae.
- 6 Xereve SENHOR oiko ramo xee ndakyjei 'rã.
Mba'e tu avakue ojapo 'rã xere?*
- 7 SENHOR xereve oiko xepytyvõarã.
Ha'e nunga rupi aexa 'rã xere ija'e e'ŷ va'e kuery re aipotaa ojeupity ramo.
- 8 Avakue re jajerovia 'rãgue py
ha'eveve SENHOR re nhanhemi.
- 9 Huvixa kuery re jajerovia 'rãgue py
ha'eveve SENHOR re nhanhemi.
- 10 Ha'e javi regua xembojere rei okuapy,
teĩ SENHOR rery rupi amomba.
- 11 Jova-jovai gui xejokopa,
teĩ SENHOR rery rupi amomba.
- 12 Eiru rami ete xeao'i okuapy,
teĩ tata py juu okaia rami okaipa.
SENHOR rery rupi amomba.
- 13 Opoxya rupi xemoanha ratã heravy xereity aguã,
teĩ SENHOR xepytyvõ.
- 14 SENHOR ma xemombaraetea oiko, aroporaei va'e guive,
xereraa jepe rire.*
- 15 Heko porã va'e rekoa rupi onhendu
heraa jepeare oguerovy'a va'e:
“SENHOR opo'akaa rupi ojapo mba'emo porã!
- 16 SENHOR opo oupi vy
mba'emo porã ojapo” he'i va'e.
- 17 Xee ma namanovei 'rã.
Ha'e rami 'rãgue py aikove 'rã,
SENHOR ojapo va'ekue amombe'upa aguã.
- 18 SENHOR xembopaga ete,
teĩ manoa pe naxemboaxai guive.
- 19 Peipe'a ke xevy tekó porã rokẽ,

* 117:1 Romanos 15.9-11 * 118:6 Hebreus 13.5-6 * 118:14 Éxodo 15.1-2; Isaías 12.1-2

- ha'e va'e rupi aike vy SENHOR aroporaei aguã.
 20 Ha'e va'e ae ma SENHOR rokẽ,
 ha'e va'e rupi heko porã va'e anho 'rã oike.
 21 Xee rogueroporaei 'rã,
 xepytyvõ vy xereraa jepe rire.
 22 Oo apoa kuery ita omombo va'ekue ma
 yvatevea py optya iporãvea pyguarã.
 23 Ha'e nunga ma SENHOR ae ojapo,
 ha'e jaexa rã iporã ete va'e.*
 24 Kova'e ára ma SENHOR omoingo va'ekue.
 Ha'e ramo javy'a ha'e jarovy'a 'rã.
 25 SENHOR, orereraa jepe ke, rojerure!
 Oremoingo porã ke, SENHOR!
 26 Ima'endu'a porãmby toiko SENHOR rery rupi ou va'e!*
 SENHOR pegua opy peẽ kuery ha'e javi peike va'e roguedayvu porã.
 27 SENHOR ma Nhanderuete ha'e nhanemoexakãa.
 Ngaru oiko aguã py pembojegua mba'emo rogue py,
 altar apy peve.
 28 Ndee ma Xeruete, xee rogueroporaei 'rã.
 Ndee Xeruete, xee aikuaa uka 'rã ndeyvatea.
 29 Perovy'a ke SENHOR, porayvu va'e ramo.
 Mba'eta nhomboaxya opa va'erã e'ŷ.

119

Nhanderuete guigua lei iporã re ijayvua

- 1 Ovy'a ete 'rã iky'a e'ŷa rupi oiko va'e,
 SENHOR guigua lei rupi ae.
 2 Ovy'a ete 'rã oikuaa uka va'ekue rupi oiko va'e,
 opy'a ha'e javi py onhe'ẽ rendu va'e.
 3 Ha'e va'e kuery ma mba'emo vai rupi e'ŷ ikuai,
 Nhanderuete guigua tape rupi anho.
 4 Rejapo uka va'e reikuua uka
 rojapopa ete aguã.
 5 Aguataa toĩ atã
 ndeayvu reja va'ekue rupi aiko aguã.
 6 Ha'e rami vy aximba aguã rami e'ŷ 'rã aiko
 rejapo uka va'e ha'e javi re aikuaa pota vy.
 7 Petei rami xepy'a reve roguerovy'a 'rã,
 ha'evea rami ndeayvuague aikuaa rire.
 8 Xee ma ajapo 'rã ndeayvu reja va'ekue.
 Xereja eme ke.
 9 Mba'exa vy nda'u kunumigue onhemongy'a e'ŷ re oiko 'rã?
 Ndeayvu rupi oiko ri vy tema.
 10 Xee ma xepy'a ha'e javi py roeka va'e.
 Ejapo eme rejapo uka va'ekue gui ajepe'a aguã rami.
 11 Xepy'a re amo'i 'rã ndeayvuague
 nderovai ajejavý e'ŷ aguã.
 12 SENHOR, xee ma rogueroporaei 'rã.
 Xembo'e ke ndeayvua reja va'ekue rupi aiko aguã re.
 13 Xeayvu tema xema'endu'a vy

* 118:23 Mateus 21.42, Marcos 12.10-11, Lucas 20.17, Atos 4.11; 1 Pedro 2.7

* 118:26 Mateus 21.8-9, 23.37-39;
 Marcos 11.9; Lucas 13.35, 19.38; João 12.13

- reikuua potaa rupi ndeayvuague ha'e javi re.
- ¹⁴ Opa mba'e porã gui
arovy'ave ndee reikuua uka va'ekue.
- ¹⁵ Anhembo'e aikovy ndee orembo'ea re,
aikuua pota 'rã reikoa re.
- ¹⁶ Ndeayvua reja va'ekue re xee avy'a.
Ndaxerexarai 'rã ndeayvuague re.
- ¹⁷ Ejapo porã xee nerembiguai pe,
aikove ha'e ndeayvuague rupi aiko aguã.
- ¹⁸ Eipe'a ke xerexa jokoa,
aexa kuaa aguã ndeguigua lei re iporã ete va'e oĩ va'e.
- ¹⁹ Ko yvy re aikoa ja heko a e'ŷ va'e rami aiko.
Eikuua uka e'ŷ eme ke rejapo uka va'ekue.
- ²⁰ Xepy'a py aendu nda'evei etea,
ne'arandua rupi ndeayvuague aenduxe riae vy.
- ²¹ Ndee ma ojejou porã rei va'e ha'e ayvu vaipy kuery pe ndeayvu ete va'e.
Ha'e kuery ojepe'a okuapy rejapo uka va'ekue gui.
- ²² Eipe'a ke xere ijayvu reia ha'e ov'y'a reia,
mba'eta xee ma reikuua uka va'ekue rupi aiko ramo.
- ²³ Xere huvixa kuery ijayvu aguã nhomboatypa tei
xee nerembiguai aikuua pota aikovy ndeayvu reja va'ekue re.
- ²⁴ Reikuua uka va'ekue ma xembovy'a va'e.
Ha'e va'e ma xemongetaa guive.
- ²⁵ Yvy rupi xereitya ma.
Xemoingo porã ju ke ndeayvuague rami vy.
- ²⁶ Xerekokue amombe'upa ramo ndee xembovai.
Xembo'e ke ndeayvua reja va'ekue rupi aiko aguã.
- ²⁷ Eikuua uka ke renhombo'eague rami aiko aguã,
ha'e xee aikuua pota 'rã iporã ete va'e reikuua uka va'e re.
- ²⁸ Xepy'a py xeporiau ndavy'avei vy.
Xemombaraete ju ke ndeayvuague rami vy.
- ²⁹ Xepe'a ke ijapu va'e kuery rape gui.
Xemboaxy ke ndeguigua lei re oĩa rami vy.
- ³⁰ Aiporavo tape vy'aa katygua,
amoĩ ne'arandua rupi aiko aguã.
- ³¹ Reikuua uka va'ekue rupi pota aiko.
SENHOR, xeapo eme aximba aguã rami.
- ³² Anha 'rã avy tape rejapo uka va'ekue oĩa rupi,
xepy'a py xembovy'a rire.
- ³³ SENHOR, xembo'e ke ndeayvua reja va'ekue rupi aiko aguã.
Ha'e va'e rupi aiko 'rã opa peve.
- ³⁴ Xemo'arandu ke, ha'e ramo aiko 'rã ndeguigua lei rupi.
Xepy'a ha'e javi py 'rã ajapo.
- ³⁵ Xerereko ke tape rejapo uka va'ekue oĩa rupi,
mba'eta ha'e va'e anho arov'y'a.
- ³⁶ Xepy'a re amoĩ reikuua uka va'ekue rupi aiko aguã,
mba'emo ajoupave aguã rupi e'ŷ.
- ³⁷ Xemoma'ẽ eme ovare e'ŷ va'e re.
Xembopy'a guaxu ke ndeguigua tape rupi.
- ³⁸ Nerembiguai pe amoĩ atâve ndeayvuague,
nerenonde ojererokyjea rupi ikuai va'e pe reme'ẽ rire.
- ³⁹ Eipe'a ke xere ijayvu reia xemongyje va'e,

- mba'eta ne'arandua anho ha'eve.
- ⁴⁰ Ma'ẽ, ndee xembo'ea rami anho aikoxe va'e.
Xembopy'a guaxu ke nderekō porāa rupi.
- ⁴¹ SENHOR, exa uka xemboaxy.
- Xereraa jepe guive ndeayvuague rami vy.
- ⁴² Ha'e ramo 'rāe ambovai kuaa xembojaru rei okuapy va'e,
ndeayvua re ajerovia vy.
- ⁴³ Xejuru gui eipe'a eme ayvu anhetē rupigua,
mba'eta xee ma arõ aikovy ne'arandua.
- ⁴⁴ Ha'e rami vy ndeguigua lei rupi aiko riae 'rā,
raka'e rā peve.
- ⁴⁵ Aiko 'rā aa jepea rupi,
ndee xembo'ea rupi pota aiko vy.
- ⁴⁶ Huvixave kuery renonde voi axī e'ŷ re
amombe'u 'rā reikuaa uka va'ekue.
- ⁴⁷ Xee arovya'a 'rā rejapo uka va'ekue,
xee ayvu vy.
- ⁴⁸ Rejapo uka va'ekue ayvu vy upi 'rā xepo,
ndeayvua reja va'ekue re aikuua pota 'rā guive.
- ⁴⁹ Nema'endu'a ke xee nerembiguai pe ndeayvuague re,
mba'eta xeapo arõ aguā rami.
- ⁵⁰ Ajexavaia py xembovy'a va'e ma pova'e:
ndeayvu xembopy'a guaxua.
- ⁵¹ Ojejou porā rei va'e kuery xejojai riae,
teĩ xee ndajepé'ai ndeguigua lei gui.
- ⁵² Xema'endu'a ymave ne'arandua rupi ndeayvuague re.
Ha'e va'e ma xembopy'a guaxu, SENHOR.
- ⁵³ Xee aendu xevaia,
heko vai va'e ndeguigua lei rupi ve'ŷ ikuai ramo.
- ⁵⁴ Mamo rā aguataa rupi oo py akea py
aroporaei aikovy ndeayvua reja va'ekue.
- ⁵⁵ SENHOR, pyávy xema'endu'a 'rā nderery re.
Ha'e rami vy ndeguigua lei rupi 'rā aiko.
- ⁵⁶ Pova'e ma xevy guarā oĩ va'e,
ndee xembo'ea rupi aiko aguā.
- ⁵⁷ SENHOR ae xevyguia oiko.
Ha'e ramo aipoa'e: "Ajapo 'rā ndeayvuague", ha'e.
- ⁵⁸ Xepy'a ha'e javi py ajerure xemboaxy aguā.
Xemboaxy ke ndeayvuague rami vy.
- ⁵⁹ Xee ae aikoa re aikuua pota vy
ajevy ju ndee reikuua uka va'ekue rupi aiko aguā.
- ⁶⁰ Anhea'ã 'rā, namboarei guive
rejapo uka va'ekue ajapo aguā.
- ⁶¹ Heko vai va'e kuery nhuā xejura
teĩ ndaxerexarai 'rā ndeguigua lei gui.
- ⁶² Pytū mbyte jave teĩ apu'ã 'rā roporaei aguā,
ne'arandua rupi ndeayvuague anhetē va'e meme ramo.
- ⁶³ Anhemoirū 'rā nerondenre ojererokyjea rupi
ha'e rembo'eague rami ikuai va'e reve.
- ⁶⁴ SENHOR, yvy jave re rexu uka ndeporayvua.
Xembo'e ke ndeayvua reja va'ekue re.
- ⁶⁵ SENHOR, xee nerembiguai pe rejapo porā,
ndeayvuague rami vy.

- ⁶⁶ Xembo'e ke 'arandu ha'e aikuaa aguã re,
rejapo uka va'ekue rupi ajerovia ramo.
- ⁶⁷ Ajexavai e'ŷ mbove ha'eve e'ŷa rami aiko va'ekue,
teĩ aŷ ma ajapo aikovy ndeayvua.
- ⁶⁸ Ndee ma heko porã ha'e ojapo porã va'e.
Xembo'e ke ndeayvua reja va'ekue re.
- ⁶⁹ Ojejou porã rei va'e kuery ma xere ijayvu rive
teĩ xepy'a ha'e javi py ajapo renhombo'egue.
- ⁷⁰ Ha'e kuery ma ipy'a ratã va'e.
Ha'e rã xee ma arovy'a ndeguigua lei.
- ⁷¹ Ajexavaiague ma ojapo porã xevy,
ndeayvu reja va'ekue aikuaa nho aguã.
- ⁷² Mbovy e'ŷ ouro ha'e prata guigua oĩ va'e rire
xevy pe ovareve 'rãgue ndejuru gui lei oẽ va'e.
- ⁷³ Ndepo py ae xeapo ha'e xemoingo raka'e.
Xembo'e ke aikuaa aguã rejapo uka va'ekue.
- ⁷⁴ Nerenonde ojererokyjea rupi ikuai va'e xerexa vy ovy'a okuapy,
ndeayvuague re ajerovia ramo.
- ⁷⁵ SENHOR, xee aikuaa porã ha'evea rami ndeayvua,
ojeroviapy reikoa rupi ae xemoingo axy va'ekue.
- ⁷⁶ Tou ha'vy ndeporayvua xembopy'a guaxu aguã,
xee nerembiguai pe ndeayvuague rami vy.
- ⁷⁷ Xere embou xemboaxy aikove aguã,
mba'eta ndeguigua lei re xee avy'a.
- ⁷⁸ Ojejou porã rei va'e kuery toximba, mba'e py e'ŷ xembojexavai rire.
Ha'e rã xee ma aikuaa pota 'rã ndee xembo'ea re.
- ⁷⁹ Nerenonde ojererokyjea rupi ikuai va'e toupa xeirurã,
reikuua uka va'ekue oikuaa va'e guive.
- ⁸⁰ Xepy'a py tajapopa ndeayvu reja va'ekue,
aximba e'ŷ aguã.
- ⁸¹ Ndee xereraa jepe aguã arõ vy xenhe'ẽ ikangy.
Ha'e rami teĩ arõ tema ndeayvuague.
- ⁸² Xerexa ikane'õmba ma ndeayvuague arõ rã.
“Raka'e 'rã tu xembopy'a guaxu?” ha'e.
- ⁸³ Tata áry hyru ipirekue guigua omoĩ mbyre ipirupaa ramigua aiko,*
teĩ ndaxerexarai ndeayvu reja va'ekue gui.
- ⁸⁴ Mbovy ára teri 'rã nda'u xee nerembiguai aikove?
Raka'e nda'u xerepy 'rã xerakykue monhaa kuery gui?
- ⁸⁵ Ojejou porã rei va'e kuery ndeguigua lei rupi e'ŷ ikuai va'e ma
yvykua ojo'o okuapy xembo'a aguã.
- ⁸⁶ Rejapo uka va'ekue ma anhetẽ va'e meme.
Xerepy ke mba'e py e'ŷ xerakykue monhaa kuery gui.
- ⁸⁷ Ha'e kuery xemomba rai'i ma ko yvy re.
Ha'e rami teĩ xee ndajepe'ai 'rã renhombo'ea gui.
- ⁸⁸ Xembopy'a guaxu ke xemboaxy rupi vy,
ha'e rã ajapo 'rã ayvu ndejuru gui oẽ va'e.
- ⁸⁹ SENHOR, yva re ndeayvuague oĩ atã 'rã
raka'e rã peve guarã.
- ⁹⁰ Ojeroviapy riae 'rã reiko raka'e rã peve guarã.
Yvy renhono rire ha'ekue py ae oĩ.

* 119:83 Ha'e va'e jave py vinho ryrurã ojapo 'rã vexa'i e'ŷ vy kavara pirekue gui. Hataxãa py omoĩa ramo ipiru ha'e ivaikueve 'rã ovy.

- ⁹¹ Ndeayvuague rami vy opa mba'e oīmba porā aŷ peve,
 mba'eta ndevygua meme ikuai.
- ⁹² Ndeguigua lei re'ŷ avy'a va'e rire
 yma ma amano 'rāgue aiko axy vaipa vy.
- ⁹³ Xee ma ndaxerexarai 'rā renhombo'eague re,
 ha'e va'e rupi xemoingove rire.
- ⁹⁴ Xereraa jepe ke ndevygua aiko ramo,
 mba'eta aeka renhombo'eague.
- ⁹⁵ Heko vai va'e kuery xerarō okuapy xemokanhy aguā,
 ha'e rā xee ma aikuua pota 'rā reikuaa uka va'ekue re.
- ⁹⁶ Xee aexa rā iporāgue ikuai va'e ha'e javi opa va'erā.
 Ha'e rā rejapo uka va'ekue ma opa va'erā e'ŷ.
- ⁹⁷ Xee ma ayvu ete ndeguigua lei!
 Ára pukukue re hexe anho aikuua pota.
- ⁹⁸ Rejapo uka va'ekue ojapo xerovaigua kuery gui xe'aranduve aguā rami,
 xepy'a re amoī riae ramo.
- ⁹⁹ Xembo'ea kuery ha'e javi gui xee aendu kuaave,
 reikuaa uka va'ekue re aikuua potaa rupi vy.
- ¹⁰⁰ Tujakue gui voi xe'aranduve,
 renhombo'eague rami aiko vy.
- ¹⁰¹ Tape vai ha'e javi gui xee ajepē'a,
 ndeayvuague re aikuua pota aguā.
- ¹⁰² Ha'e rā ndeayvuague gui ma xee ndajepē'ai 'rā,
 ndee xerekombo'e ramo.
- ¹⁰³ Ndeayvu aa'anga rā he'ē va'e ramigua,
 ei gui he'ēve xejuru pe.
- ¹⁰⁴ Renhombo'eague rupi vy xe'arandu 'rā.
 Ha'e rā tape anhetē e'ŷ va'e ma ajeguarua meme.
- ¹⁰⁵ Ndeayvu ma tataendy oī aguata aguā,
 aikoa rupi omoexakā va'e.
- ¹⁰⁶ Aura karamboae, ha'e auraague amoī atā guive,
 ha'evea rami ndeayvuague rupi aiko aguā.
- ¹⁰⁷ Xee ma aiko axy vaipa ma.
 SENHOR, xemoingove ke ndeayvuague rami vy.
- ¹⁰⁸ SENHOR, ejopy ke ame'ēxeal'i py xeayvu ame'ē va'e,
 ha'e xembo'e ndeayvuague re.
- ¹⁰⁹ Xejukaxea kuerya rupi riae aiko,
 teī ndeguigua lei gui ndaxerexarai 'rā.
- ¹¹⁰ Heko vai va'e kuery ma nhuā omoī xerovai,
 teī xee ndajepē'ai 'rā renhombo'ea gui.
- ¹¹¹ Reikuua uka va'ekue ma raka'e rā peve guarā amoī xejee,
 mba'eta xepy'a py arov'y'a.
- ¹¹² Xepy'a re amoī ndeayvu reja va'ekue rupi aiko aguā,
 raka'e rā ha'e opa peve.
- ¹¹³ Mokoī rupi rei ijayvu va'e ma xee ajou vai.
 Ha'e rā ndeguigua lei ma arov'y'a.
- ¹¹⁴ Ndee ma anhemiaty ha'e mba'emo vai jokoa reiko.
 Ndeayvua re ae ajerovia.
- ¹¹⁵ Mba'emo vai rupi pendekuai va'e, pejepe'a ke xea gui.
 Xee ma ajapoxe Xeruete ojapo uka va'e.
- ¹¹⁶ Xepytyvō ke ndeayvuague rami vy, aikove aguā.
 Emoingo e'ŷ eme arō va'e, axīmba e'ŷ aguā.

- ¹¹⁷ Xemombaraete ramo 'rāe aa jepe,
ha'e ndeayvu reja va'ekue rupi aiko.
- ¹¹⁸ Rejou vai ndeayvuague gui ojepe'a va'e,
mba'eta apu py ae ha'e kuery nhombotavypa 'rā.
- ¹¹⁹ Yty rami rive remombo 'rā heko vai va'e yvy jave re ikuai va'e.
Ha'e nunga rupi xee arov'y'a reikuua uka va'ekue.
- ¹²⁰ Nerenonde ajererokyje vy xero'o pirīmba,
ndeayvua re ae ajererokyje.
- ¹²¹ Xee ma anhetē ha'e teko porā rupi ajoguereko va'e.
Xemboaxa eme ke xerovaigua kuery po py.
- ¹²² Xee nerembiguai xerepy ke aiko porāve ju aguā.
Xembojexavai uka eme oejou porā rei va'e kuery pe.
- ¹²³ Xerexa ikane'ōmba ma xereraa jepearā arō riae vy,
nderekō porāa rupi ndeayvuague ojeupity aguā guive.
- ¹²⁴ Ereko nerembiguai remboaxyā rupi.
Xembo'e ke ndeayvu reja va'ekue re.
- ¹²⁵ Xee ma nerembiguai aiko.
Xemo'arandu ke reikuua uka va'ekue aikuua aguā.
- ¹²⁶ SENHOR, ovaē ma reikuua pota aguā ára,
mba'eta ndeguigua lei rupi nda'ikuaiai ramo.
- ¹²⁷ Xee ma ouro gui arov'y'ave rejapo uka va'ekue,
ouro oiky'a'o pyre gui voi.
- ¹²⁸ Ha'e nunga rupi renhombo'eague pe "Anhetē va'e meme" ha'e.
Ha'e rā ijapu va'e kuery reko ma ajou vai.
- ¹²⁹ Reikuua uka va'ekue ma iporā ete.
Ha'e va'e rupi aiko xepy'a ha'e javi py.
- ¹³⁰ Ndeayvu reikuua uka ramo omoexakā vy
omo'arandu 'rā hi'arandu e'ŷ'i va'ekue.
- ¹³¹ Xejuru aipe'a vy xepytuē atā,
rejapo uka va'ekue aikuua porāvexe vy.
- ¹³² Eju ju xea py, ha'e xemboaxy,
nderery oayvu va'e kuery pe rejapoaty rami vy.
- ¹³³ Emoī atā ke ndeayvuague rupi aikoa.
Ha'e rā teko vai va'e guive rā ta'ipo'aka eme xere.
- ¹³⁴ Xerepy ke avakue xemoingo axy reia gui,
ha'e ramo aiko 'rā renhombo'eague rami.
- ¹³⁵ Xee nerembiguai áry taexakā nderova,
ha'e xembo'e ndeayyu re.
- ¹³⁶ Xerexay ma yakā ramy oxyry,
ndeguigua lei rupi e'ŷ avakue ikuai rā aexa vy.
- ¹³⁷ SENHOR, ndee ma nderekō porā va'e,
ndeayvua guive anhetē va'e meme.*
- ¹³⁸ Reikuua uka va'ekue ma anhetē rupi reja,
ojeroviapy guive.
- ¹³⁹ Ndeayvu gui xerovaigua kuery hexaraipa rā aexa vy
nda'evei etea aendu va'e xemomba rai'i.
- ¹⁴⁰ Ndeayvua ma iky'a e'ŷ ete va'e.
Ha'e nunga rupi xee nerembiguai arov'y'a.
- ¹⁴¹ Xee ma yvy'i va'e, oayvupy e'ŷ aiko va'eri
ndaxerexarai renhombo'eague re.
- ¹⁴² Ndegugua tekō porā ma opa va'erā e'ŷ,

* 119:137 Apocalipse 16.5-7, 19.2

- ndeguigua lei ma anhetē va'e meme.
- ¹⁴³ Xe'áry jexavai ha'e ndavy'ai etea ou teĩ
rejapo uka va'ekue ma xembovy'a kuerei.
- ¹⁴⁴ Reikuua uka va'ekue ma ha'evea ramigua meme raka'e rā peve guarã.
Xemo'arandu ke ha'e va'e rupi, ha'e ramo aikove 'rā.
- ¹⁴⁵ Xepy'a ha'e javi py xee ajapukai ndevy.
SENHOR, xembovai ke, ha'e ramo ajapo 'rā ndeayvu reja va'ekue.
- ¹⁴⁶ Ndevy ajapukai. Xereraa jepe ke,
ha'e ramo aiko 'rā reikuua uka va'ekue rupi.
- ¹⁴⁷ Ko'ẽ e'ŷ mbove'i ajapukai,
ndeayvua arõ ajerovia reve.
- ¹⁴⁸ Pytū mbukukue re xerexa ndokei,
ndeayvuague re aikuua pota aguã.
- ¹⁴⁹ SENHOR, ndeporayvua rupi endu ke xeayvua.
Ndeayvuague rami vy xemoingove.
- ¹⁵⁰ Teko vai rupi ikuai va'e ovaẽ rai'i ma xea py.
Ha'e kuery ma ndeguigua lei gui ojepe'a va'e.
- ¹⁵¹ SENHOR, mombyry e'ŷ ndee reiko,
rejapo uka va'ekue ma anhetē va'e meme.
- ¹⁵² Yma ma aikuua ndeayvuague
raka'e rā peve guarã reja va'ekue.
- ¹⁵³ Eikuua pota ke aiko axya re, xereraa jepe guive,
mba'eta xee ma ndeguigua lei gui ndaxerexarai 'rā.
- ¹⁵⁴ Xerepy ke, ha'e xereraa jepe.
Ndeayvuague rami vy xemoingove.
- ¹⁵⁵ Heko vai va'e kuery ma oo jepe aguã gui mombyry ikuai,
ndeayvu reja va'ekue ndoikuaaxeи vy.
- ¹⁵⁶ SENHOR, opa mba'e py ndee oremboaxy 'rā!
Ndeayvuague rami vy xemoingove.
- ¹⁵⁷ Heta ete ikuai xerovaigua kuery xerakykue monha va'e,
teĩ xee ndajep'e ai 'rā reikuua uka va'ekue gui.
- ¹⁵⁸ Ojerovia e'ŷ va'e kuery aexa vy aendu ndajou porãia,
ndeayvuague rami e'ŷ ikuai rā.
- ¹⁵⁹ Eikuua pota ke renhombo'eague arov'y'aa re.
SENHOR, ndeporayvua rupi xemoingove.
- ¹⁶⁰ Ndeayvua ma jypy guive anhetē va'e meme.
Ha'evea rami ndeayvuague raka'e rā peve guarã.
- ¹⁶¹ Huvixa kuery mba'e py e'ŷ xemoingo axy
teĩ xepy'a py ajererokyjea va'e ma ndeayvu ae.
- ¹⁶² Mba'emo rejapo aguã re ndeayvuague aendu vy avy'a,
amongue ojou reta va'e rami.
- ¹⁶³ Xee ma ajeguaru apu gui, ajou vai ete guive.
Ha'e rā ndeguigua lei ma arov'y'a.
- ¹⁶⁴ Ára nhavõ sete-kue kuerei 'rā roqueroporaei,
ndeayvuague ha'evea ramigua meme ramo.
- ¹⁶⁵ Ndegugua lei oguerovy'a va'e ma ov'y'a ete 'rā,
ndoikoi 'rā guive ha'e kuery reityarã.
- ¹⁶⁶ SENHOR, arõ aikovy ndee xereraa jepe aguã,
rejapo uka va'ekue ajapo reve.
- ¹⁶⁷ Xepy'a py aiko reikuua uka va'ekue rupi,
arov'y'a ete vy.
- ¹⁶⁸ Renhombo'eague ha'e reikuua uka va'ekue rupi aiko,

- mba'eta nerondenode ojekuaa aikoa ha'e javi.
- ¹⁶⁹ SENHOR, ajapukaia tovaẽ ndea peve.
Xemo'arandu ke ndeayvuague rami vy.
- ¹⁷⁰ Nerenonde py tovaẽ ajerurea.
Xereraa jepe ke ndeayvuague rami vy.
- ¹⁷¹ Xejuru tandereroporaei,
mba'eta xembo'e ndeayvu reja va'ekue re.
- ¹⁷² Xeayvu py tarovy'a ndeguigua lei,
mba'eta rejapo uka va'ekue ha'evea ramigua meme.
- ¹⁷³ Embou ndepo xerepy aguã,
renhombo'eague aiporavo rire.
- ¹⁷⁴ SENHOR, arõ ete xereraa jepe aguã.
Ndeguigua lei anho arov'y'a.
- ¹⁷⁵ Emoingove xenhe'ẽ roqueroporaei aguã.
Ndeayvuague taxepytyvõ.
- ¹⁷⁶ Vexa'i kanhygue rami aiko. Xureka ke,
mba'eta xee nerembiguai ndaxerexarai 'rã rejapo uka va'ekue gui.

Ijayvu rei va'e kuery rovai ojerureague
Oguataa rupi ikuai va'e oporaei aguã.

120

- ¹ Ajexavaia py ajapukai SENHOR pe.
Ha'e ramo oendu xeayvu.
- ² SENHOR, xereraa jepe ke apu rupi ijayvu va'e gui,
nhombotavypaa rupi ijayvu va'e kuery gui.
- ³ Nhombotavypaa rupi ndeayvu va'e,
mba'e 'rã tu nderekko rekoria ome'ẽa,
mba'e 'rã tu ndevy guarã omboua?
- ⁴ Nembopagaa 'rã ipy'a guaxuve va'e ru'y hakua va'e py,
tapyĩ hexakã va'e zimbro guigua py guive.
- ⁵ Xevy pe nda'evei ete yvy mboae regua Meseque,
Quedar pygua kuery rekoa rupi aikoa.
- ⁶ Yma ete ma ha'e py aiko,
peteĩ rami nda'ikuaxei va'e kuery mbyte.
- ⁷ Xee ma peteĩ rami orekuai aguã re xeayvu teĩ
ha'e kuery ma joe opu'ã aguã re anho onhea'ã okuapy.

Nhandere Nhanderuete onhangareko re ijayvua
Oguataa rupi ikuai va'e oporaei aguã.

121

- ¹ Yvyty katy ama'ẽ.
Magui nda'u ou 'rã xerepyarã?
- ² SENHOR yva ha'e yvy apoare va'e gui ae
ou xerepyarã.
- ³ Ha'e ma nandereity ukai 'rã.
Nerarõa rupi ndoke oinyi 'rã.
- ⁴ Israel kuery rarõa ma oke va'erã e'ŷ,
ndojarparai 'rã guive.
- ⁵ SENHOR ae opena porã 'rã ndere.
Nemo'ãarã SENHOR oĩ reiporu kuaa regua re.
- ⁶ Ha'e ramo ara py kuaray nandeapo vai 'rã,
pyávy teĩ jaxy voi nandeapo vai 'rã.

- ⁷ SENHOR ndereraa jepe 'rã opa mba'e vai gui.
Nderekovea re opena porã 'rã.
⁸ Reẽ ha'e reike ju ramo SENHOR onhangareko 'rã ndere
aŷ guive raka'e rã peve.

Jerusalém tetã oĩ porã aguã re ojerurea
Oguataa rupi ikuai va'e oporaei aguã Davi ombopara va'ekue.

122

- ¹ Xevy pe "Jaje'oi ke SENHOR pegua oo py"
'ea rã aendu vy avy'a ete.
² Ndee Jerusalém tetã,
orepy ovaẽ ma nerokẽ py.
³ Jerusalém ma tetã peteĩ henda'i py ojapo pyre.
⁴ Ha'e katy oje'oi 'rã SENHOR pegua kuery ha'e javi regua,
SENHOR rery oguerovy'a aguã
Israel kuery oje'oi aguã va'e.
⁵ Ha'e py ma ikuai ha'evea rami oikuaa pota va'e renda,
Davi ramymino kuery openaaty ikuai.
⁶ Pejerure ke Jerusalém oĩ porã aguã.
Ndererovy'a va'e kuery ta'ikuai porã avi.
⁷ Ndekora mbyte ikuai va'e ta'ikuai porã,
huvixave ro pygua kuery voi toptytu'u porã.
⁸ Xeryvy kuery, xeirũ kuery re ama'ẽ vy
Jerusalém tetã re ajerure:
"Toĩ ha'e py ikuai porã aguã", ha'e.
⁹ SENHOR Nhanderuete pegua oo re ama'ẽ vy
anhea'ã 'rã aikovy oĩ porã aguã.

Nhanderuete oipytyvõ aguã ojerureague
Oguataa rupi ikuai va'e oporaei aguã.

123

- ¹ Xee ama'ẽ ne'amba re reiko va'ea katy.
² Tembiguai hereko po gui mba'emo oarõ va'e,
tembiguai kunha mba'e hereko po re oma'ẽ va'e rami
ore kuery voi roma'ẽ ndea katy
oremboaxy peve, SENHOR Oreruete.
³ SENHOR, endu ke oremboaxya, oremboaxy ke,
mba'eta orere ija'e e'ŷ va'e anho ikuai.
⁴ Orenhe'ẽ py roendu ha'e kuery ae oipotaa rami orembojaru reia anho,
ojejou porã rei va'e kuery orere nda'ija'eia roendu.

Nhanderuete nhanderepya ha'e nhandereraa jepea re ijayvua
Oguataa rupi ikuai va'e oporaei aguã Davi ombopara va'ekue.

124

- ¹ SENHOR e'ŷ nhanda katy oiko va'e rire —
Israel kuery aipo te'i —
² Nhandere avakue opu'ã ramo
SENHOR e'ŷ nhanda katy oiko va'e rire
³ ha'e kuery jaikove reve nhanemokõmba 'rãgue,
nhandevy ipoxypa vy.
⁴ Nhande'ary yy ou 'rãgue,
ty guaxu vy oaxa 'rãgue nhanderekove áry,

- ⁵ yy oxyry atã va'e
oaxa 'rãgue nhanderekove áry.
⁶ Ta'ima'endu'a porãa SENHOR re,
ha'e kuery pe nanhanemondoro ukai rire haĩ py.
⁷ Ha'e rami rã nhanenhe'ẽ oo jepe
guyra mbo'aa nhuã gui oo jepea rami.
Nhuã omondo ramo jaa jepe.
⁸ SENHOR yva ha'e yvy apoare rery rupi
jajapukai ramo ou nhanepytyvõarã.

Jajeroviaa re nhaĩ atã aguã regua
Oguataa rupi ikuai va'e oporaei aguã.

125

- ¹ SENHOR re ojerovia va'e ma Sião yvnty rami ikuai.
Ha'e va'e ma nomyĩ 'rã, oĩ atã 'rã raka'e rã peve guarã.
² Jerusalém tetã yvýry rupi yvýty ikuai va'e rami
SENHOR opena 'rã ojeupequa kuery yvýry,
aÿ guive raka'e rã peve.
³ Heko porã va'e kuery re
heko vai va'e nda'ipo'aka riae 'rã,
heko porã va'e opo py ojapo vai e'ŷ aguã.
⁴ SENHOR, emoingo porã ke heko porã va'e,
anhetẽ rupi ipy'a va'e kuery.
⁵ Ha'e rã tape karẽ rupi opia va'e ma
SENHOR ombopaga 'rã heko vai va'e kuery reve.
Israel kuery re toĩ ikuai porã aguã.

Ojae'o va'e ombopy'a porãa jevy aguã regua
Oguataa rupi ikuai va'e oporaei aguã.

126

- ¹ SENHOR Sião tetã py nhanemoingo porã ju ramo
oexa ra'u va'e rami nhandekuai va'ekue.
² Ha'e javé py nhanderory,
javy'aa rupi nhandeayvu guive.
Ha'e ramo amboae regua kuery joupe-upé aipoe'i:
“Ha'e kuery pe SENHOR ojapo porã ete”, he'i okuapy.
³ Anhetẽ SENHOR nhanemoingo porã va'ekue.
Ha'e nunga rupi ae javy'a.
⁴ SENHOR, peteigüe ju ke oreemoingo porã,
Neguebe rupi yy oxyry va'e rami.
⁵ Hexay reve mba'emo ra'yigüe onhoty va'ekue ma
ovy'a reve ju 'rã omono'ð.
⁶ Ojae'o reve onhoty ovy va'ekue ma
ovy'a vaipa reve 'rã ojevy ouvy,
mba'emo aju jokuaa ogueru vy.

Nhanderuete gui iporã va'e ha'e javi oua re ijayvua
Oguataa rupi ikuai va'e Salomão ombopara va'ekue.

127

- ¹ SENHOR ae oorã ojapo e'ŷ ramo
ijapoa kuery ombo'eapoa mba'everã ndovarei 'rã.
Tetã re SENHOR nonhangarekoi ri ramo

- harõa kuery onhangareko mba'everã ndovarei 'rã.
- ² Nda'eve ranhei ko'ẽ e'ŷ mbove nhapu'ãa,
ndajake voia, neĩ jajexavaia rupi mbojape jajoua.
Mba'eta hembiayvu kuery okepa okuapy reve voi
ha'e kuery pe ome'ẽ 'rã mba'emo.
- ³ Nhandera'y kuery ma SENHOR ome'ẽ va'ekue meme,
guyru'i gui oiko'i va'e ma nhandevy guarã ome'ẽ.
- ⁴ Nhanekunumi jave nhandera'y kuery jareko va'e ma
opo py xondaro hu'y oguereko va'e rami.
- ⁵ Ovy'a ete 'rã avakue hyru py oguereko reta va'e.
Tetã rokẽ py ngovaigua kuery reve jogueroayvu
teĩ nda'ipo'aka e'ŷi 'rã.

Nhanderuete renonde jajererokyjea rupi vy javy'a aguã regua
Oguataa rupi ikuai va'e oporaei aguã.

128

- ¹ Ovy'a ete 'rã SENHOR renonde ojererokyjea rupi ikuai va'e,
ixuguigua tape rupi ikuai vy.
- ² Remba'eapoa rupi rejou 'rã re'u va'erã.
Revy'a ete 'rã, ha'e opa mba'e oiko porã 'rã ndevy.
- ³ Ndero py ma ndera'yxy uva hi'a reta va'e rami 'rã oiko,
ha'e ndera'y kuery ma oliveira rembypy pyau'i rami meme 'rã ikuai mesa yvýry
oguapya py.
- ⁴ Ha'e rami SENHOR renonde ojererokyjea rupi ikuai va'e ma omoingo porã 'rã.
- ⁵ SENHOR tanemoingo porã Sião tetã gui,
reikove reve rexâ aguã
Jerusalém tetã py omoingo porã rã.
- ⁶ Rexa 'rã neramymino kuery.
Israel kuery re toĩ ikuai porã aguã.

Ogueraa jepeague re ima'endu'aa
Oguataa rupi ikuai va'e oporaei aguã.

129

- ¹ Xekunumi guive mbovykue rei e'ŷ xembojexavaia —
Israel kuery aipo te'i —
- ² Xekunumi guive xembojexavaia okuapy
teĩ xere nda'ipo'akaai.
- ³ Xekupe rupi xekaraõmbaa ma,
yvy karaña py rami xemboperepa vy.
- ⁴ Ha'e rami teĩ SENHOR heko porã va'e vy
ojayapa heko vai va'e xejokuaague.
- ⁵ Sião tetã re opu'ã va'e ha'e javi
toxõmba, tojavapa guive.
- ⁶ Oo áry mba'emo rogue henhoõ vy
ipoty e'ŷ re ipirupa va'e rami avi tokanhymba.
- ⁷ Ha'e nunga mba'everã ndovarei ramo
avave rei opo py nomono'ðai,
neĩ ojyva áry ndojokuuai heruvy guive.
- ⁸ Ha'e kuerya rupi oaxa va'e kuery aipo te'i eme:
“ SENHOR topena porã pendere!
SENHOR rery rupi ore rogueroayvu porã!” te'i eme.

Yy typyvea gui ojapukaia ague
Oguataa rupi ikuai va'e oporaei aguã.

130

- ¹ SENHOR, yy typyve etea gui ajapukai ndevy.
- ² SENHOR, endu ke ajapukaia!
Ndevy pe ajerurea re ejapyxaka pota ke.
- ³ SENHOR, rojejavague re reikuua pota va'e rire
mava'e 'rãgue tu oo jepe?
- ⁴ Ha'e rami avi ndere oĩ oreperdoa aguã,
nerenonde rojererokyjea rupi roiko aguã.
- ⁵ Xee ma arõ aikovy SENHOR,
xenhe'ẽ py arõ ijayvuague rupi.
- ⁶ Tetã rarõa kuery ko'ẽ aguã re ojapuraa gui
xenhe'ẽ py SENHOR arõve.*
Harõa kuery ko'ẽ aguã re ojapuraa gui
- ⁷ Israel kuery toarõve SENHOR.
Mba'eta SENHOR re oĩ nhomboaxy aguã,
opa mba'e gui joepy aguã guive.
- ⁸ Ha'e ae ma ogueraa jepe 'rã Israel kuery
heko vai ha'e javi gui.

Nhanderuete re vy japytu'u aguã regua
Oguataa rupi ikuai va'e oporaei aguã Davi ombopara va'ekue.

131

- ¹ SENHOR, xepy'a py xee ajejou porã rei va'e'ŷ.
Ama'ẽa py nanhembovatei guive,
mba'emo tuvixa va'e re nda'eveia rupi e'ŷ aiko.
Mba'eta mba'emo iporãve ete va'e ma xevy guarã e'ŷ ae.
- ² Ha'e rami 'rãgue py akyrirĩ vy apytu'u 'rã xepy'a py.
Kyrĩ'i va'e nokambuvei va'e oxy jyva áry oĩ rive'i va'e rami ae avi
xekuraxõ voi oĩ xepy'a py.
- ³ Israel kuery, pearõ ke SENHOR,
aŷ guive raka'e rã peve.

Ymave ijayvua ague
Oguataa rupi ikuai va'e oporaei aguã.

132

- ¹ SENHOR, nema'endu'a ke Davi re,
opa mba'e py oiko axy ramo.
- ² SENHOR pe Davi onhemboayvu vy
Jacó “Ipo'akapa va'e” he'ia va'e pe ijayvu raka'e po rami:
- ³ “Xee ma akeaty py ndaikevei 'rã,
tupa anheno ajupyaty py ndajeupivei 'rã,
- ⁴ xerexa nambotyvei 'rã ake aguã,
neĩ peteigue'i nanhenovei 'rã xerexa amombytu'u aguã,
- ⁵ SENHOR oĩ aguã ajou e'ŷa ja,
Jacó Ruete Ipo'akapa va'e oĩ atyrã”, he'i.*
- ⁶ Nhaendu omombe'ua rã Efrata yvy re lei ryru oĩa,

* 130:6 Ha'e va'e jave py pytũ mbukukue re tetã rarõa kuery optya 'rã ikora áry, ngovaigua kuery ovaẽ rã oexa aguã. * 132:5 Apy ma oĩ Davi ouraague Nhanderuete ayvu ryru ogueru vy hendarã py porã omoĩ aguã re (1 Crônicas 13.1-4).

- ha'e ramo Jaar yvy re ae jajou.[†]
- ⁷ Ha'e gui ma jaike ke oñaty py.
Nhambojerovia ipy renda renonde.
- ⁸ SENHOR, epu'ã ke, eike ejuvy repytu'u aguã py,
ndee ha'e hyru ndepo'akaa kuaa ukaa reve.
- ⁹ Ndevyguia sacerdote kuery re toĩ teko porã,
ha'e ndevy ete ikuai va'e toporaei ov'y'a vy.
- ¹⁰ Nerembiguai Davi re nema'endu'a vy
ema'ẽ e'ŷ eme nerembiporavo rova re.
- ¹¹ Davi pe SENHOR oura ete raka'e,
oayvuague gui ndaexarai 'rã guive. Aipoe'i:
“Nderekovia peteĩ ndero'o guigua ae
amoĩ 'rã tenda repenaaty py opena oiny aguã rami.
- ¹² Xapy'a rei xereve guarã ajapo va'ekue ndera'y kuery ikuai ramo,
xeayvua re ambo'eague rupi guive,
ha'e ramo ha'e kuery ra'y kuery ju 'rã oguapy
tenda repenaaty py raka'e rã peve.”*
- ¹³ Mba'eta SENHOR oiporavo raka'e Sião tetã,
ha'e py oĩ riae aguã. Aipoe'i:
- ¹⁴ “Apy apytu'u riae 'rã raka'e rã peve,
apy ae 'rã apena ainy, aixea py ae.
- ¹⁵ Ha'e py anhomoingo porã 'rã tembi'u oata aguã rami e'ŷ ajou uka vy,
iporiaukue'i pe voi ame'ẽ reta 'rã tembi'u.
- ¹⁶ Ha'e pygua sacerdote kuery ma amonhemonde 'rã ajogueraa jepea kuaa ukaa py.
Ha'e pygua ojerovia va'e kuery ov'y'a vy oporaei 'rã okuapy.
- ¹⁷ Ha'e py ajapo 'rã Davi po'akakue ojekuaia jevy aguã rami.
Xerembiporavo rekovia ambou 'rã nhomoexakãarã.[‡]
- ¹⁸ Hexe coroa oĩ va'e ma ipoty 'rã.
Ha'e rã hovaigua kuery re ma ambou 'rã imoximbaarã.”

Joegua-egua peteĩ rami ikuiaia re ijayvua

Oguataa rupi ikuai va'e oporaei aguã Davi ombopara va'ekue.

133

- ¹ Joegua kuery peteĩ rami ikuiaia ma
ha'eve 'rã, iporã ete guive.
- ² Ha'e rami ikuiaia ma azeite hepyve va'e
sacerdote Arão akã re onhoẽ ramo
hendyva re oxyry ov'y vy
ijao aju'y peve ovaẽ va'e rami.*
- ³ Ha'e rami ikuiaia ma Hermom yvyty gui yxapy ou va'e
Sião yvyty ombo'yxapypa va'e rami.[†]
Mba'eta ha'e py SENHOR ombou nhomoingo porãarã,
ha'e tekove raka'e rã peve guarã.

Ka'aru'i jave oporaeia aguã oenoia ague

Oguataa rupi ikuai va'e oporaei aguã.

[†] 132:6 Jaar yvy Efrata regua yvy re Quiriate-Jearim tetã py ranhe Nhanderuete ayvu ryru opyta raka'e, Jerusalém py Davi ogueru ruka e'ŷ mbove (1 Crônicas 13.5-6). * 132:12 2 Samuel 7.1-17; Atos 2.30 ‡ 132:17 Kova'e ayvu rupi ijayvu 1 Reis 11.34-36, 15.4, 2 Reis 8.19 ha'e 2 Crônicas 21.7 py. Ha'e gui “Hendy va'erã” he'ia ma huvíxa raka'eve rã oiko aguã re ijayvu vy, ha'e Jesus Cristo rekorã re guive (Lucas 2.30-32; João 8.12). * 133:2 Sacerdote-rã Arão omoia vy inhakã re omoi raka'e azeite (Êxodo 29.1-9), Nhanderuete ojeupega kuery omoingo porã aguã kuaa ukhaarã (Êxodo 29.43-46). † 133:3 Yxapy py Nhanderuete omoingo porã 'rã ha'e kuery onhotŷ va'ekue (Gênesis 27.28).

134

- ¹ Peroporaei ke SENHOR, hembiguai pendekuai va'e ha'e javi,
Pyávy SENHOR pegua opy rupi pemba'epo va'e.
² Henda iky'a e'ŷ va'e katy peupi ke pendepo
SENHOR peroporaei vy.
³ Sião tetã gui SENHOR yva ha'e yvy apoare
tapendereroayvu porã.

135

Nhanderuete pe japoraei aguã regua

- ¹ Aleluia!
Peoporaei SENHOR rery rupi,
peroporaei SENHOR, hembiguai pendekuai va'e,
² ixupegua oo rupi pemba'epo va'e,
Nhanderuete pegua roka rupi guive.
³ Peroporaei ke SENHOR, porayvu va'e ramo.
Peoporaei hery rupi, iporã ete ramo.
⁴ Mba'eta ojeupe guarã SENHOR oiporavo Jacó,
oiporavo Israel kuery oguereko aguã.
⁵ Xee aikuaa ae SENHOR yvate ete va'ea,
mba'eta tuuete ikuai va'e áryve Nhanderuete oiko.
⁶ SENHOR ma oipota va'e ha'e javi ojapo va'e,
yva ha'e yvy re, ye'ẽ py ha'e iguýry rupi.
⁷ Arai omopu'ã 'rã heruvy yvy apy katy gui,
overa va'e voi oguereko katu 'rã oky aguã.
Yvytu ma ojapo 'rã oĩa gui oipeju aguã rami.
⁸ Egito yvy re ha'e ae ojukapa va'ekue ta'y kuery jypy guare,
avakue ha'e mymba kuery guive.
⁹ Ha'e py ojapo hexa pyrã ha'e nhomondyipaarã
Faraó ha'e hembiguai kuery rovai.
¹⁰ SENHOR ma heta regua omomba va'ekue,
huvixave ipo'akapa va'e guive ojuka.
¹¹ Ojuka amorreu kuery ruvixa Seom
ha'e Basã pygua huvixa Ogue,
ha'e gui Canaã yvy regua huvixa kuery ha'e javi.
¹² Ha'e gui ma ijvykue
ojeupegua Israel kuery pe omboaxapa.
¹³ SENHOR, nderery oĩ 'rã raka'e rã peve,
raka'e rã ikuai va'e voi ima'endu'a 'rã ndere.
¹⁴ Mba'eta SENHOR ma ojeupegua kuery re oikuaa pota 'rã,
omboaxy 'rã guembiguai kuery.*
¹⁵ Ha'e rã yvy regua kuery ruete kuery ma
prata ha'e ouro guigua rive, avakue ae opo py ojapo va'ekue meme.*
¹⁶ Ijuru va'eri nda'ijayvui,
hexa va'eri ndoexai,
¹⁷ ijapyxa va'eri noendui,
ipytuẽ aguã voi nda'evei.
¹⁸ Ijapoare kuery ma ha'e rami ae ju 'rã ikuai,
hexe ojerovia va'e kuery ha'e javi guive.
¹⁹ Israel ramymino kuery, penema'endu'a porã SENHOR re!
Arão ramymino kuery, penema'endu'a porã SENHOR re!

* 135:14 Hebreus 10.30 * 135:15 Salmo 115.4-8

- ²⁰ Levi ramymino kuery, penema'endu'a porã SENHOR re!
SENHOR renonde pejererokyjea rupi pendekuai va'e, penema'endu'a porã SENHOR re!
- ²¹ Sião tetã guive ta'ima'endu'a porãa
SENHOR Jerusalém py oĩ va'e re.
Aleluia!

136

Nhanderuete nhomboaxya re ijayvua

- ¹ Perovy'a ke SENHOR porayvu va'e ramo,
mba'eta nhomboaxya opa va'erã e'ŷ.
- ² Perovy'a tuuete ikuai va'e Ruete,
mba'eta nhomboaxya opa va'erã e'ŷ.
- ³ Perovy'a senhor ikuai va'e SENHOR,
mba'eta nhomboaxya opa va'erã e'ŷ.
- ⁴ Ha'e anho ojapo mba'emo porã tuvixa va'e,
mba'eta nhomboaxya opa va'erã e'ŷ.
- ⁵ O'arandua rupi ojapo raka'e yva,*
mba'eta nhomboaxya opa va'erã e'ŷ.
- ⁶ Yvy avi onhono raka'e yy áry rupi,
mba'eta nhomboaxya opa va'erã e'ŷ.
- ⁷ Ojapo raka'e omoexakã va'erã tuvixa va'e,
mba'eta nhomboaxya opa va'erã e'ŷ.
- ⁸ Kuaray ojapo ara py ojope aguã,
mba'eta nhomboaxya opa va'erã e'ŷ.
- ⁹ Jaxy ha'e jaxy-tata ojapo avi pytû omoexakã va'erã,
mba'eta nhomboaxya opa va'erã e'ŷ.
- ¹⁰ Egito pygua kuery ra'y jypy guare ojukapa raka'e,*
mba'eta nhomboaxya opa va'erã e'ŷ.
- ¹¹ Ha'e vy ha'e kuery mbyte gui oipe'a Israel kuery,
mba'eta nhomboaxya opa va'erã e'ŷ.
- ¹² Opo oupi vy oexa uka opo'akaa,
mba'eta nhomboaxya opa va'erã e'ŷ.
- ¹³ Omboja'o Ye'ẽ Pytã mokoñ henda rupi,
mba'eta nhomboaxya opa va'erã e'ŷ.
- ¹⁴ Omboja'oague rupi ojapo Israel kuery oaxa aguã rami,
mba'eta nhomboaxya opa va'erã e'ŷ.
- ¹⁵ Ha'e gui ye'ẽ py omoinge Faraó, oxondaro kuery ha'e javi reve,
mba'eta nhomboaxya opa va'erã e'ŷ.
- ¹⁶ Tekoa e'ŷa rupi ogueroguata heravy ojeupegua kuery,
mba'eta nhomboaxya opa va'erã e'ŷ.
- ¹⁷ Ojuka huvixave kuery ipo'akapa va'ekue,†
mba'eta nhomboaxya opa va'erã e'ŷ.
- ¹⁸ Huvixave omboetevepy ojuka,
mba'eta nhomboaxya opa va'erã e'ŷ.
- ¹⁹ Ojuka amorreu kuery ruvixa Seom,
mba'eta nhomboaxya opa va'erã e'ŷ.
- ²⁰ Ojuka avi Basã pygua kuery huvixa Ogue,
mba'eta nhomboaxya opa va'erã e'ŷ.
- ²¹ Ha'e kuery yvykue omboaxa ojeupegua kuery pe,

* 136:5 Gênesis 1 * 136:10 Egito gui ogueraajepeague omombe'u Êxodo 12-14 py. † 136:17 Huvixave ojukaague omombe'u Números 21 py.

- mba'eta nhomboaxya opa va'erā e'ŷ.
- ²² Guembiguai Israel kuery yvyrā ome'ẽ,
 mba'eta nhomboaxya opa va'erā e'ŷ.
- ²³ Nanhanembaraevei ramo ima'endu'a nhandere,
 mba'eta nhomboaxya opa va'erā e'ŷ.
- ²⁴ Ha'e vy nhanderovaigua kuery po gui nhandereraa jepe,
 mba'eta nhomboaxya opa va'erā e'ŷ.
- ²⁵ Guemimoingo kuery ha'e javi pe ojou uka 'rā ho'u va'erā,
 mba'eta nhomboaxya opa va'erā e'ŷ.
- ²⁶ Peroporaei ke Nhanderuete yva regua,
 mba'eta nhomboaxya opa va'erā e'ŷ.

137

Guetā oexa nga'ua rupi ijayvuague

- ¹ Babilônia tetā py yakā oĩ va'e yvýry roguapy roinya py
 rojae'o va'ekue Jerusalém tetā re orema'endu'a vy.*
- ² Oremba'epu ixā reta va'e roupi imoiny va'ekue
 ha'e py yvyra ikuai va'e rakā re.
- ³ Mba'eta escravo-rā orereraa are kuery ojerure roporaei aguã.
 “Peoporaei na orevy Sião regua mboraei”, he'i okuapy.
- ⁴ Ha'e gui mba'exa 'rā tu roporaei mboraei SENHOR pegua
 yvy mboae re orekuai vy?
- ⁵ Mba'eta ndee Jerusalém tetā gui xerexarai ri ramo
 xepo aiporu kuaa regua ta'ipirupa.
- ⁶ Xeapekū tojapa xejuru py re
 xapy'a rei ndere naxema'endu'avei rā,
 e'ŷ vy Jerusalém gui mba'emo arov'yave ramo.
- ⁷ SENHOR, nema'endu'a ke Edom pygua kuery rembopaga aguã
 Jerusalém tetā oitya jave ikuaiague re.†
 Mba'eta ha'e kuery ma
 “Peitypa ke, peitypa yvy katy peve!” he'i okuapy va'ekue.
- ⁸ Babilônia tetā pygua kuery, peneretā voi ombovaipa pyrā oĩ.
 Ovy'a ete 'rā orere pejapoague re penembopaga va'e.‡
- ⁹ Ovy'a 'rā penda'y kuery voi ojopy vy
 ita re omou'ũmba avi va'e.

Nhanderuete ojeroviapy oikoa jarovy'a aguã regua
Mboraerā Davi ombopara va'ekue.

138

- ¹ SENHOR, xee roquerovy'a 'rā xepy'a ha'e javi py.
 Ipo'akakueve oendua py roqueroporai 'rā.
- ² Ndevyguia templo iky'a e'ŷ va'e oĩa katy ama'ẽ reve
 aĩ 'rā xerenapy'ã re nderery aroporaei aguã,
 ndeporayvu ha'e nderekō porā va'e ramo.
 Mba'eta opa mba'e gui remboyvateve nderery ha'e ndeayvu.
- ³ Mba'eta ndevy pe ajapukai ramo xerepy,
 xembopy'a guaxu vy xemombaraeteve guive.
- ⁴ SENHOR, yvy regua huvixave kuery ha'e javi oporaei 'rā okuapy ndevy,

* 137:1 Babilônia pygua kuery ma oipe'a raka'e Jerusalém tetā, ha'e guembiguairā ogueraa ha'e pygua judeu kuery regua. † 137:7 Jerusalém tetā re Babilônia pygua kuery ipo'aka rā Edom pygua kuery oexa vy ovy'a rei okuapy, judeu kuery regua rai tei (Obadias 8-14). ‡ 137:8 Babilônia pygua kuery ombopaga aguã re Apocalipse 18 py ijayvu.

- ndejuru gui ndeayvua oendu vy.
- ⁵ Ogueroporaei 'rā SENHOR reko,
SENHOR rexakāa tuvixa ete ramo.
- ⁶ SENHOR ma yvate ete va'eri
yvyīgue'i re oma'ē avi 'rā.
Ojejou porā rei va'e kuery ha'e oikuaa mombyry gui teī.
- ⁷ Xee ajexavai aikovy ramo
rembopyau 'rā xerekovea.
Ndepo reupi 'rā xerovaigua kuery poxya káuxa.
Reiporu kuaa regua py xereraa jepe 'rā.
- ⁸ Xevy pe SENHOR ojapo 'rā ojapo 'rā va'ekue ha'e javi.
SENHOR, renhomboaxya ma opa va'erā e'ŷ.
Eja eme ndepo py ae remoingo va'ekue.

Nhanderuete oikuaapa ha'e ipo'akapa va'ea re ijayvua
Jogueroporaei va'e pe mboraeirā Davi ombopara va'ekue.

139

- ¹ SENHOR, ndee ma xere reikuaa pota vy xekuaa porā va'e.
² Reikuua 'rā aguapy ha'e apu'ā ju rā.
 Mombyry gui teī reikuua xepy'a re oī va'e ha'e javi.
³ Aguata ha'e anheno ramo ndee xerexa 'rā.
 Reikuaapa 'rā aikoa ha'e javi.
⁴ Xeayvu aguāx xejuru py oī e'ŷ mbove voi
 ndee SENHOR reikuapa 'rā.
⁵ Xejoko 'rā xerakykue ha'e xerenonde katy,
 xere ndepo remoī vy.
⁶ Ha'e rami xekuaapaa ma iporā ete xevy.
 Yvate ete rā ndaikuai 'rāe.*
⁷ Marā katy nda'u anhemombyry 'rāgue Nenhe'ē gui?
 Marā katy nda'u ajava 'rāgue rexaa gui?
⁸ Yva re aa teī ha'e py ndee reī 'rāgue.
 Yvykua vaikuevea py anhemboupa teī ha'e py voi reī 'rāgue.
⁹ Kuaray oēa katy aveve avy vy
 ye'ē apy peve aa teī
¹⁰ ha'e py voi ndepo xerereko 'rāgue,
 reiporu kuaa regua xemombaraete 'rāgue.
¹¹ Xee aipoa'e ramo: "Pytū xeao'i 'rā,
 hexakāa xeyvýry rupigua pytūmba 'rā" ha'e teī
¹² ndevy pe pytūvea ete voi napytūi 'rāgue,
 mba'eta ndevy pe pytū ha'e hexakāa ma joo rami meme.
¹³ Mba'eta ndee ma xepy'a apoare,
 xexy rye py xemoingo va'ekue.
¹⁴ Xee roguerovy'a, anhemondyi aguā rami xeapo rire.
 Nerembiapokue ma iporā ete va'e meme.
 Ha'e rami aikuua porā xepy'a py.
¹⁵ Xekāgue ndereajo'i teri jave hi'ā py xeapo,
 ha'e gui xembotuvixa'i imoiny yvy guy py rami.
¹⁶ Naxeratāi teri jave ndee ma xerexa.
 Ndekuaxia re ipara ma voi xee aiko aguā ára ha'e javi,
 peteī-teī ipara oiny peteīve oiko e'ŷ mbove ma voi.

* 139:6 Romanos 11.33

- ¹⁷ Xeruete, renhembopy'aa ma iporā ete xevy.
Mbovy rei e'ŷ oĩ.
- ¹⁸ Xee aipapa va'e rire ita ku'i gui hetave 'rāgue.
Aipapa, aipapa teĩ ndaipapapai 'rāgue.
- ¹⁹ Xeruete, remomba voi 'rāgue heko vai va'e!
Avakue tuguy moõa, pejepe'apa xea gui!
- ²⁰ Ha'e kuery ma ndere opu'ã rei okuapy,
nderovaigua kuery ijayvu vaikue-ikue 'rā.
- ²¹ SENHOR, xee ajou vai ndejou vaia kuery.
Ndere opu'ã rei va'e kuery gui xee ajeguaru.
- ²² Ha'e kuery re ndaxe'aeveia oĩmba,
nderovaigua kuery ete ikuiaia aikuua.
- ²³ Xeruete, xerexa pota,
ha'e eikuaapa xepy'a re oĩ va'e.
Xera'anga, ha'e eikuaa anhembopy'aa ha'e javi.
- ²⁴ Exa xere pa oĩ ha'eve'ŷa rami aikoa,
ha'e xererekko tape imarā e'ŷ va'e rupi.

Ngovaigna kuery apu gui oo jepe aguã ojerureague
Jogueroporaei va'e pe mboraeirā Davi ombopara va'ekue.

140

- ¹ SENHOR, xereraa jepe ke heko vai va'e gui.
Xerepy avakue ojerovia rei va'e gui.
- ² Ha'e kuery ma mba'emo vai anho opy'a re omoĩ.
Joguero'axea rupi rive ikuai.
- ³ Mboi rami oaĩmbe'e 'rā oapekū,
ijayvua ma mboi guigua veneno rami ae.*
- ⁴ SENHOR, xerepy ke heko vai va'e po gui,
xereraa jepe avakue ojerovia rei va'e gui,
xembojepekuavo aguã re onhea'ã okuapy va'e kuery gui.
- ⁵ Ojejou porā rei va'e kuery ma nhemi rupi omoĩ 'rā nhuā xā xembo'a aguã,
tape yvýry oipyo 'rā xembo'aarā.
Omoĩ 'rā nhuā xembo'a aguã.
- ⁶ Aipoa'e SENHOR pe: "Ndee ma Xeruete."
SENHOR, ajerure ramo xepytyvō ke.
- ⁷ SENHOR xereraa jepea ndepo'akapa va'e,
joe opu'ãa ára py ndee xeakā rejao'i.
- ⁸ SENHOR, emoingo eme heko vai va'e oipota va'e.
Eja eme joapo vaixea rupi ikuai aguã rami.
- ⁹ Xejokopa rei va'e kuery onhemboyvate ri ramo
ejapo ha'e kuery re ae ju ijayvu vaiague ojeapa aguã rami.
- ¹⁰ Ha'e kuery áry tou tapyī, tomomboa tata py.
Yvykua vaikue py tomomboa, opu'ã ve'ŷ aguã py.
- ¹¹ Joe ijayvu rei va'e toĩ atã eme yvy re.
Teko vai toakykue monha avakue ojerovia rei va'e, omomba peve.
- ¹² Xee aikuua SENHOR oepy 'rāa iporiaukue'i,
opena 'rā oikotevē rei'i va'e kuery re.
- ¹³ Ha'e ramo heko porā va'e kuery oguerovy'a 'rā nderery,
anhetē rupi ipy'a va'e ikuai 'rā neretonde.

* 140:3 Romanos 3.13

Ka'aru'i jave oiky'a'o ha'e oipytyvõ aguã re ojerureague
Mboraerā Davi ombopara va'ekue.

141

- ¹ SENHOR, ndevy ae ajapukai.
Eju pojava ke xepytyvõ!
Ndevy pe ajapukai ramo endu.
- ² Ajerurea toẽ ndea py heakuã porã va'e rami.*
Xepo aupia toĩ ka'aru'i jave ome'ẽmby rami.
- ³ SENHOR, ejoko xejuru,
earõ xeayvua rokẽ.
- ⁴ Ajapo vaixea toĩ eme xepy'a re,
teko vai rupi aiko e'ŷ aguã
avakue joapo vai va'e ikuia rupi e'ŷ,
ha'e kuery okaru okuapya py xee voi akaru e'ŷ aguã.
- ⁵ Xevy pe heko porã va'e ijayvu ete teĩ ajou porã 'rã.
Xevy rã ijayvu okuapya ma azeite xreakã re omoña rami.
Xee ma naendu e'ŷi 'rã.
Heko vai va'e jajapo vai okuapy teĩ xee anhembo'e 'rã.
- ⁶ Ha'e kuery rerekoa kuery omombopaa 'rã itaova guy katy.
Ha'e kuery oendu 'rã ha'evea rami xeayvua anho,
- ⁷ xerupa gui xekâgue oipe'a vy ijyvýry rupi omoaimbá teĩ,
yvy oikarañague rupi rive.
- ⁸ Mba'eta SENHOR, ndere ae ama'ẽ aikovy.
Ndere ae ajerovia va'e.
Eja eme xerekovea.
- ⁹ Xereraa jepe ke heko vai va'e kuery
nhuã xã xembo'aarã omoõ va'ekue gui.
- ¹⁰ Heko vai va'e ae to'a nhuã omoõ va'ekue py,
ha'e rã xee ma aikove reve taa jepe.

Ijava etea py ojerureague
Itakua py Davi oĩ jave py onhembo'eague ombopara va'ekue nhombo'e aguã (1 Samuel 24).

142

- ¹ SENHOR pe ajapukai, xeayvu ainy.
Ajapukai vy xepytyvõ aguã re ajerure.
- ² Ixupe amombe'upa ndavy'aia,
henonde amombe'upa ajexavaia.
- ³ Xee nanhanimavei ma aikovy ramo
ndee reikuua 'rã aikoa ha'e javi.
Tape aguata aguã rupi xerovaigua kuery omoõ 'rã nhuã.
- ⁴ Ema'ẽ na aiporu kuaa regua re, ha'e exa pota,
mba'eta avave rei ndoikoi xerexa kuaa va'e.
Jipoi anhemi aguã,
xere avave rei noma'ẽ potai guive.
- ⁵ SENHOR, ndevy pe ae ajapukai.
Ha'e vy aipoa'e: "Ndee ae anhemiatiy.
Xevy guarã ndee anho reiko ko yvy re aikoa py."
- ⁶ Endu ke ajapukaia,
kekangy vaipa ete ramo.

* 141:2 Apocalipse 5.8

Xereraa jepe xerakykue monha va'e kuery gui,
xegui ha'e kuery imbaraeteve ramo.

- ⁷ Enoẽ xerekovea nhuã gui,
nderery rupi arov'y'a aguã.
Heko porã va'e kuery oupa 'rã xeyvýry,
xevy pe ha'e rami rejapo porã rire.

Ogueraa jepe aguã ojerureague
Mboraerã Davi ombopara va'ekue.

143

- ¹ SENHOR, endu ke anhembo'ea.
Ejapyxaka ajerurea re.
Xembovai ke, ojeroviapy ha'e heko porã va'e reiko vy.
- ² Nerembiguai aiko ramo xemboayvu eme,
mba'eta nerенонde heko porã ete va'e ndoikoi.*
- ³ Ha'e gui xerovaigua kuery ma xerakykue monha,
yvy rupi xereity vy xere opyrõmba.
Xemoĩ pytãa py,
yma ete ma omano va'ekue rami.
- ⁴ Ha'e nunga rupi xenhe'ẽ nonhanimavei,
xepy'a eta rei ma guive.
- ⁵ Xema'endu'a teĩ yma guare re.
Aikuua pota aikovy nerembiapokue ha'e javi re,
xema'endu'a ndepo py rejapo va'ekue re.
- ⁶ Ha'e nunga rupi xepo audi ndevy.
Xenhe'ẽ nda'evei ndere, yvy ipiru reia rami.
- ⁷ SENHOR, xembovai voi ke,
mba'eta xenhe'ẽ py nanhanimavei ma.
Ejexa uka e'ŷ eme xevy,
omanogue rupa py oguejy va'e rami apyta e'ŷ aguã.
- ⁸ Ndere ajerovia ramo
aje'ive reve taendu ndegui xemboaxya.
Ndere xenhe'ẽ aroma'endu'a ramo
exa uka tape aguata aguã va'e.
- ⁹ SENHOR, xereraa jepe ke xerovaigua kuery gui,
mba'eta ndee ma anhemiatiy.
- ¹⁰ Xembo'e ke ndee reipotaa rupi aiko aguã,
mba'eta ndee ae Xeruete.
Nenhe'ẽ Porã taxererekoo
yvy joja porãa rupi.
- ¹¹ SENHOR, nderery re vy xemoingove.
Ha'evea rami rejoguerekao rupi
eipe'a xenhe'ẽ ojexavaia gui.
- ¹² Xemboaxya rupi emokanhymba xerovaigua kuery.
Emomba ke xenhe'ẽ mbojexavaia kuery ha'e javi,
nerembiguai aiko ramo.

Nhanderuete oepy rire oguerovy'aa ague
Mboraerã Davi ombopara va'ekue.

144

- ¹ Ima'endu'a porãmby toiko SENHOR xe'itaova.
Ha'e ma omombaraete 'rã xepo joe apu'ã aguã,

* 143:2 Romanos 3.20; Gálatas 2.16

- xekuā voi ombo'e 'rā joe apu'ā aguā.
- ² Ha'e ma xemboaxya ha'e oo ikorapa va'e aī aguā,
anhemiatiy yvate va'e ha'e xereraa jepea,
mba'emo vai jokoa oiko ramo ajerovia hexe.
Ha'e ojapo xeretarā kuery apenaa rupi ikuai aguā rami.
- ³ SENHOR, marā ramigua tu avakue, ha'e kuery re reikuaa pota aguā?
Marā ramigua tu avakue ra'y kuery, reayvu aguā?*
- ⁴ Mba'eta avakue ma vytytu rami rive ikuai.
Oikovea ára ma kuaray'ā rami 'rā oaxa ov y va'e.
- ⁵ SENHOR, eipe'a ke yva, ha'e eguejy.
Epoko vytytu re, ha'e ramo oē 'rā hataxī.
- ⁶ Embou overa va'e xerovaigua kuery moaīmbaarā.
Emombo nderu'y omondyipa aguā.
- ⁷ Ekuave'ē yvate gui,
xereraa jepe ha'e xerenoē yy typya gui,
amboae regua kuery po'akaa gui ae.
- ⁸ Ha'e kuery ojuru gui apu rupi anho 'rā ijayvu,
ha'e oiporu kuaa regua py anhetē va'e'ŷ 'rā ojapo.
- ⁹ Xeruete, ndevy pe amonhendu 'rā mboraei pyau.
Mbaraka dez ixā va'e ambopu vy roqueroporaei 'rā.
- ¹⁰ SENHOR ojapo 'rā huvixa kuery ipo'aka aguā rami.
Guembiguai Davi ogueraa jepe 'rā kyxe jojukaa gui.
- ¹¹ Xereraa jepe ke, xepe'a amboae regua po'akaa gui.
Ha'e kuery ojuru gui apu rupi anho 'rā ijayvu,
ha'e oiporu kuaa regua py anhetē va'e'ŷ 'rā ojapo.
- ¹² Orera'y kuery ipyau va'e ta'ikuai mba'emo rogue iporā va'e rami,
ha'e orerajy kuery ta'ikuai ita oo ytarā rami,
huvixave ro reguarā ombojegua pyre rami.
- ¹³ Oreroguy tatynyē romono'ō va'ekue,
opa marāgua tembi'u toī.
Orerymba kuery vexa'i taetave tovy,
orevvy rupi mbovy rei e'ŷ tata'y.
- ¹⁴ Orerymba vaka voi ta'imbaraete,
toity eme gua'y'i, ta'ikuai porā e'ŷ eme guive.
Oreretā mbyte rupi tonhendu eme ipy'a vaia rupi ojae'o va'e.
- ¹⁵ Ovy'a ete 'rā ha'e rami ikuai va'e kuery.
Tá, ovy'a ete 'rā SENHOR pe "Nhanderuete" he'i okuapy va'e.

Nhanderuete porayvu, yvate ete ha'e opena porāa re ijayvua
Oqueroporaeia rupi Davi ombopara va'ekue.

145

- ¹ Xeruete xeruvixave, xee romboete 'rā.
Raka'e rā peve roqueroporaei 'rā nderery rupi.
- ² Ko'ē nhavō roquerovy'a 'rā,
nderery roqueroporaei 'rā raka'e rā peve.
- ³ SENHOR yvate ete ramo ha'evea rami jaroporaei.
Yvate etea ma jaikuaapa va'erā e'ŷ.
- ⁴ Tuu kuery voi gua'y kuery oendua py ogueroporaei 'rā nerembiapo,
omombe'upa 'rā ndepo'akaa rupi rejapo va'ekue.
- ⁵ Aikuua pota 'rā ndeyvate etea ha'e nerexakāa re,
mba'emo porā rejapo va'ekue re guive.

* 144:3 Salmo 8.4

- 6** Ijayvua 'rā okuapy ndepo'akaa rupi rejapo va'ekue re,
 xee voi amombe'u 'rā ndeyvatea.
- 7** Nhomoma'endu'aa 'rā ndeporayvu etea re,
 ovy'aa rupi ogueroporaiae 'rā nderekō porāa.
- 8** SENHOR ma porayvu ha'e nhomboaxy kuaa va'e.
 Nda'ivai voi kuaai, nhomboaxy aguā oī riae va'e.
- 9** Pavē pe SENHOR oexa uka 'rā mborayvu,
 nhomboaxya rupi opena porā 'rā guemimoingo kuery ha'e javi re.
- 10** SENHOR, remoingo va'ekue ha'e javi ndereroporaei 'rā.
 Ndevygua iky'a e'ŷ va'e kuery voi ndererov'y'a ete 'rā okuapy.
- 11** Ijayvu 'rā ndepo'akaa rupi nerexakāa ojekuaa va'e re,
 omombe'u porā 'rā ndepo'akaa,
- 12** avakue ra'y kuery oikuua aguā ndepo'akaa rupi rejapo va'ekue,
 ha'e repenaa rupi ndeyvatea ha'e nerexakāa ojekuaa va'e.
- 13** Ndепo'akaa ma raka'e rā peve guarā,
 ndee ma huvixave riae 'rā reĩ, ikuai jevy va'e peve.
- SENHOR ijayvua ha'e javi py ojeroviapy oiko,
 ojapo va'e ha'e javi py oexa uka 'rā iky'a e'ŷ va'ea.
- 14** SENHOR oipytyvō 'rā ikangy va'e ha'e javi,
 omopu'āmba ju 'rā ho'a va'ekue.
- 15** Ndere anho pavē oma'ē 'rā okuapy
 hi'ára py porā ho'u va'erā rejou uka aguā oarō vy.
- 16** Ndепo reipe'a vy
 neremimoingo ha'e javi pe reme'ē 'rā oikotevē va'e.
- 17** SENHOR ha'evea rami nhanderereko oikoa ha'e javi py,
 opa mba'e ojapoa py oexa uka 'rā oporayvua.
- 18** Ixupe ojapukai va'e ha'e javi yvýry onhemoi 'rā,
 anhetē ete rupi ojapukai ramo.
- 19** Henonde ojererokyjea rupi ikuai va'e pe ojapo 'rā oipota va'e.
 Ojapukaia oendu vy ogueraa jepe 'rā.
- 20** SENHOR opena porā 'rā oayvu va'e kuery re.
 Ha'e rā heko vai va'e ma omomba 'rā.
- 21** Xejuru py taroporaei SENHOR.
 Temimoingo kuery ha'e javi togueroporaei hery iky'a e'ŷ va'e rupi, raka'e rā peve.

146

Nhanderuete ojeroviapy oikoa re ijayvua

- 1** Aleluia!
 Xenhe'ē, eroporaei ke SENHOR.
- 2** Xee aikovea pukukue re aroporaei 'rā.
 Xeruete pe aporaei 'rā aikovea ja.
- 3** Pejerovia eme huvixa ikuai va'e re rive.
 Pejerovia eme avakue ra'y kuery ikuai va'e re,
 mba'eta ha'e kuery re noī jogueraa jepe aguā.
- 4** Ha'e kuery nhe'ē oē ramo yvy ku'i ju 'rā opyta.
 Ha'e va'e árave opa 'rā ojapo 'rā va'ekue ha'e javi.
- 5** Ovy'a ete 'rā Jacó Ruete pe "Xepytyvōa" he'i va'e,
 SENHOR Nguuete oarō va'e.
- 6** Ha'e ae yva ha'e yvy apoare,
 ye'ē ha'e opa mba'e hexe ikuai va'e guive.
 Raka'e rā peve oiko 'rā ojeroviapy.*

* 146:6 Atos 4.24, 14.15

- ⁷ Ha'evea rami oikuua pota 'rã ombojexavaia va'e kuery re,
ha'e okaruxe va'e pe ma ome'ẽ 'rã tembi'u.
SENHOR oguenoẽmba 'rã nhuã py ikuai va'ekue.
- ⁸ SENHOR oipe'a 'rã ára reveguia e'ŷ va'ekue rexia.
SENHOR omopu'ã 'rã omo'yvy'i mbyre.
SENHOR oayvu 'rã heko porã va'e.
- ⁹ SENHOR opena porã 'rã oyvy rupi e'ŷ oguata va'e re.
Oipytyvõ 'rã imeve'ŷ va'e ha'e tyre'ŷ kuery.
Ha'e rã heko vai va'e ikuia ma ombovaipa 'rã.
- ¹⁰ SENHOR oĩ 'rã huvixave raka'e rã peve.
Sião pygua kuery, Penderuete ipo'aka 'rã aŷ guive raka'e rã peve.
Aleluia!

147

Nhanderuete ipo'akapa va'e ogueroporaenia

- ¹ Peporaei SENHOR pe!
Ha'eve ha'e iporã ete Nhanderuete pe japoraeia.
Jaroporaenia ma iporã ixupe voi.
- ² SENHOR omoatyrõ ju Jerusalém tetã,
oguerupa ju Israel kuery omoaĩmba pyre.
- ³ Omonguerapa 'rã opy'a py ikangy va'e,
ijai oipoanombe 'rã guive.
- ⁴ Oipapa jaxy-tata ikuai va'e,
peteĩ-teĩ hery rupi 'rã oenoĩ.
- ⁵ Nhande-Senhor ma yvate ete ha'e ipo'akapa va'e.
Hi'arandua ndajaikuaapai 'rã.
- ⁶ SENHOR ma yvyigüe'i repya oiko,
ha'e rã heko vai va'e ma omombo 'rã yvy rupi.
- ⁷ Peporaei SENHOR pe perovy'aa rupi.
Mba'epu ixã reta va'e py pembojoguy vy peporaei Nhanderuete pe.
- ⁸ Ha'e ma yva onhovã 'rã arai py.
Oky oguereko katu yvy re guarã.
Yvyty ikuai va'e re ojapo mba'emo henhoĩ aguã rami.
- ⁹ Mymba kuery pe ome'ẽ 'rã ho'u va'erã,
uruvu ra'y kuery pe guive, ojapukai ramo.
- ¹⁰ Ha'e ma kavaju mbaraetea oguerovy'a va'e'ŷ,
neĩ xondaro mbaraetea e'ŷ guive.
- ¹¹ SENHOR oguerovy'a 'rã henonde ojererokyjea rupi ikuai va'e,
ha'e nhomboaxya oarõ okuapy va'e anho.
- ¹² Jerusalém pygua kuery, peroporaei ke SENHOR!
Sião tetã pygua, peroporaei Penderuete!
- ¹³ Mba'eta peneretã mbyte rupi omoĩ atãve ikora rokẽ jokoa,
ha'e penda'y kuery omoingo porã 'rã.
- ¹⁴ Pendeyvy katy rai'i rupi ikuai va'e reve omoĩ pendekuai porã aguã,
ha'e trigo iporãva'e re penemongaru.
- ¹⁵ Yvy rupi ha'e oikuua uka 'rã ojapo uka va'e,
ijayvua ojekuaa pojava 'rã ov.
- ¹⁶ Vexa'i rague rami ombou 'rã yro'y apĩ,
yro'y xiĩ voi omoaĩ 'rã tanhimbu rami.
- ¹⁷ Yro'y hatã va'e ha'e omombo 'rã ikurekue rami.
Mava'e nda'u ogueropo'aka 'rã yro'y ombou rã?
- ¹⁸ Ha'e gui ma oayvu ombou ramo tykupa ju 'rã.

- Yvytu oipeju aguã rami ojapo ramo
yy oxyry 'rã.
¹⁹ Oayvu oikuaa uka Jacó kuery pe,
ojeguigua lei ha'e nhombo'ea oeja Israel kuery pe.
²⁰ Ha'e ramigua ma amboae regua pe ma ndoejai.
Amboae kuery ma nhombo'ea ndoikuaai okuapy.
Aleluia!

148

- Pavẽ ogueroporaei aguã regua*
- ¹ Aleluia!
Peroporaei SENHOR yva áryve rupi,
peroporaei yvate etea rupi!
² Ixupeguia anjo kuery ha'e javi, peroporaei pekuapy.
Ixondaro kuery yva regua ha'e javi, peroporaei pekuapy!
³ Kuaray ha'e jaxy, peroporaei pekuapy!
Jaxy-tata hendy va'e ha'e javi, peroporaei pekuapy!
⁴ Yva yvatevea rupi oĩ va'e, eroporaei avi,
yva áry yy ikuai va'e voi.
⁵ Togueroporaei okuapy SENHOR rery!
Mba'eta ha'e ijayvu ramo opa mba'e oiko raka'e.
⁶ Omoĩ atã guive raka'e rã peve guarã.
Ha'e kuery ikuai aguã oeja va'ekue oaxa va'erã e'ŷ.
⁷ Yvy re pendekuai va'e, peroporaei SENHOR,
ypo tuvixa va'e ha'e typya regua ha'e javi!
⁸ Onhemboxi va'e ha'e amandau,
yro'y apĩ ha'e yvy rataxí,
yvytu atã onhe'ẽ rendu va'e,
⁹ yvyty ha'e yvy'ã'i ikuai va'e,
yvyra hi'a va'e ha'e yary ikuai va'e,
¹⁰ mymba inharõ va'e ha'e vaka kuery,
yvy rupi otyryry ha'e guyra'i oveve va'e,
¹¹ yvy regua huvixave kuery, ha'e javi regua guive,
yvatekueve ha'e yvy regua joe oikuaa pota va'e kuery ha'e javi,
¹² kunumigue ha'e kunhataígue,
kakuakueve'i va'e ha'e kyrígue.
¹³ Togueroporaei okuapy SENHOR rery,
mba'eta hery anho yvateve va'e.
Hexakãa ma yvy ha'e yva áryve rupi oĩ.
¹⁴ Ombopo'akave ojeupegua kuery,
ixupeguia iky'a e'ŷ va'e kuery ha'e javi ogueroporaei aguã,
hembiyvu Israel kuery regua guive.
Aleluia!

149

- Nhanderuete re ojerovia va'e kuery ogueroporaei aguã regua*
- ¹ Aleluia!
Pemonhendu SENHOR pe mboraei pyau!
Peroporaei ixupeguia kuery iky'a e'ŷ va'e ijatya py.
² Israel kuery toguerovy'a imoingoare.
Sião pygua kuery toguerovy'a nguvixave.
³ Peroporaei hery mimby pemonhe'ẽ reve.
Ixupe peporaei salmos, pandeiro ha'e mba'epu ixã reta va'e pembojoguy vy.

- ⁴ Mba'eta SENHOR oguerovy'a ojeupegua kuery.
Yvyīgue'i re omoĩ oo jepe aguã.
- ⁵ Ixupegua kuery iky'a e'ŷ va'e toguerovy'a hexakãa.
Ovy'aa rupi toporaei ngupa py.
- ⁶ Ha'e kuery juru py toĩ Nhanderuete pe oporaei atã aguã,
ha'e ipo py ma toĩ kyxe haimbe jovai va'e,
- ⁷ yvy regua kuery ikuiaia rupi nhombopaga aguã,
amboae regua ombopaga aguã,
- ⁸ huvinxave kuery corrente py oipokua aguã,
ha'e yvatekueve ferro guigua py
- ⁹ ha'e kuery ombopaga aguã ayvu ombopara pyre rami vy,
ixupegua kuery iky'a e'ŷ va'e ha'e javi omboetea aguã.
Aleluia!

150

Oguerovy'aa opa vygua

- ¹ Aleluia!
Peroporaei Nhanderuete, ixupegua henda iky'a e'ŷ va'e py!
Peroporaei yvate ipo'akaa oĩa rupi!
- ² Peroporaei opo'akaa rupi ojapo va'ekue re!
Peroporaei, yvate ete va'e ramo!
- ³ Peroporaei mimby guaxu pu rupi!
Peroporaei mbaraka ha'e mba'epu ixã reta va'e reve!
- ⁴ Peroporaei pandeiro py ha'e pejeroky reve!
Peroporaei mba'epu ixã va'e ha'e mimby reve!
- ⁵ Peroporaei hy'a pu reve!
Peroporaei hy'a pu onhendu ratãve va'e reve!
- ⁶ Ipytuẽ va'e ha'e javi togueroporaei SENHOR!
Aleluia!

'Arandu regua ayvu Provérbios Salomão omombe'u

va'ekue oĩa

'Arandu regua ayvu provérbios Salomão omombe'u

va'ekue oĩa*

Avakue ma opa marāgua re oikuua pota 'rã oikuaxe vy. "Ha'e rã 'arandua ma mamo tu oĩ? Mamo tu oĩ mba'emo jaikuua ete aguã?" (Jó 28.12). Kova'e kuaxia para re ma ombovaia: "Senhor renonde jajererokyjea rupi jaiko vy 'rãe jaupity 'arandua, Iky'a e'ý va'e jaikuua vy 'rãe jaiko kuaa" (9.10).

Huvixa Salomão pe ma Nhanderuete ome'ẽ raka'e pavẽ gui hi'aranduve aguã. Salomão ae ombopara va'ekue 'arandu regua ayvu kova'e kuaxia re oĩ va'e. Amongue henda py ete'i amboae kuery ombopara avi va'ekue. Ha'e va'e regua ayvu ma ijapu'a'i meme, nhanderexarai e'ý aguã.

Kova'e kuaxia para re ma avakue 'arandua rive'ý oĩ, Nhanderuete guigua anho. Ha'e vy "yvate guigua 'arandua ma jypy'i nhandereko 'rã nhanderek ky'a e'ý aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderek porã merami rivei 'rã guive" (Tiago 3.17).

Mba'erã pa 'arandu regua ayvu omombe'uague

¹ 'Arandu regua ayvu Davi ra'y Salomão Israel pygua huvixave va'e omombe'u va'ekue,

² jaikuua porã aguã 'arandua ha'e nhanembo'eague,

jaikuua avi aguã hi'arandu va'e kuery ijayvua,

³ ha'e nhanembo'ea nhaendu vy 'arandua rupi jaiko aguã,

teko porã rupi jaiko vy jaikuua pota, ha'e joo-joo'i rami jajoguerek aguã,

⁴ hi'arandu e'ý'i va'e kuery nhamo'arandu kuaa aguã,

kunumigue pe voi jaikuua uka 'arandua rupi ikuai aguã.

⁵ Hi'arandu va'e toendu hi'aranduve aguã,

ombo'e pyre voi toendu oikuua porãve aguã,

⁶ oikuua aguã 'arandu regua ayvu ha'e mba'emo re ombojoja reve ijayvua,

hi'arandu va'e kuery haxy-axyve va'e re ijayvu teī.

⁷ SENHOR renonde jajererokyjea rupi jaiko vy 'rãe mba'emo jaikuua.

Ha'e rã hi'arandu e'ý va'e kuery ma noenduxei 'rã hi'arandurã re ombo'ea teī.

Heko vai va'e kuery ayvu rupi jaiko e'ý aguã

⁸ Xera'y, endu ke nderu nembo'e ramo,

ejep'e eme ndexy ijayvuague rupi reikoa gui.

⁹ Mba'eta ha'e nunga ndeapo porã 'rã akã regua iporã va'e rami,

ha'e mbo'y ndeaju'y re oĩ va'e rami.

¹⁰ Xera'y, heko vai va'e kuery nembotavy aguã rupi ri ijayvu rã

enhembotavy uka eme.

¹¹ Ha'e kuery aipoe'i 'rã: "Eju ke orerupive,

jaa nhanhemi vy,

nhamo'ẽ mbegue ikuai rive'i va'e ruguy nhamoẽ aguã.

¹² Ha'e kuery ma oikove reve teī nhamomba 'rã yvykua py rami,

oikove teī yvyra rupa py onhono porã mbyre rami opyta aguã", he'i 'rã.

¹³ "Iporâgue jajou 'rã opa marāgua nhanemba'erã,

ha'e vy nhanderopy nhamonyẽ 'rã nhanemondakue.

¹⁴ Eju ha'vy enhemoirũ ore kuery reve,

*

: "Provérbios" 'epy va'e ma ayvu ijapu'a'i va'e 'arandu regua.

- ha'e rami vy pete'i voko jareko aguā", he'i 'rā okuapy.
¹⁵ Xera'y, ha'e rami ijayvu ramo eiko eme ha'e kuery reve,
 neī epyrō eme ha'e kuery ikuia rupi.
¹⁶ Mba'eta ha'e kuery onha-onha 'rā mba'emo vai ojapo aguā,
 ojapura 'rā jogueravy tuguy omoē aguā katy.
¹⁷ Guyra kuery oexaa py
 nda'evei imbo'aarā jajapo aguā.
¹⁸ Ha'e rami tei ha'e kuery ma nguguy ae 'rā omoē uka oma'ẽ mbeguea py,
 guekove ae oipe'a uka 'rā nhemi rupi joapo vaia py.
¹⁹ Ha'e rami ojoupa reixe va'e kuery ha'e javi opyta vai 'rā,
 ipy'a re oguerekopa reixa oī va'e ma hekove ae oipe'a 'rā heravy.

Arandua ijayvua

- ²⁰ Ha'e gui 'Arandua ojapukai 'rā tape rupi,
 tetā mbyte rupi onhendu atā 'rā oikovy.
²¹ Tetā kora áry gui voi ijayvu 'rā,
 okē jaikea py ha'e tetā ikuai va'e rupi ijayvu 'rā po rami:[†]
²² "Pene'arandu e'ŷ'i va'e! Raka'e peve 'rā tu perovy'a pene'arandu e'ŷa?
 Pendeporojojai rei va'e, raka'e peve 'rā tu pendeporojojai reia rive pejou porā?
 Pene'arandu e'ŷ va'e, raka'e peve 'rā tu pejou vai 'arandua?
²³ Pendu pota ke xeayvu re,
 mba'eta pēvy amombe'upa 'rā xepy'a re oī va'e,
 ajapo 'rā xeayvua peikuaapa aguā rami.
²⁴ Peē kuery xee roenoĩ tei napendu potai,
 pendea katy akuave'ẽ ramo oikuua pota va'e ndoikoi.
²⁵ Ha'e rami 'rāgue py pendu rivepa apomongetaa,
 napenduxei xeayvua.
²⁶ Ha'e nunga rupi pejexavai rā xee ju 'rā rojorai.
 Penemongyjearā ou rā aexa vy apuka rei 'rā peē kuery re,
²⁷ mba'eta penemongyjea ou 'rā yvytu atā rami,
 penemombaarā ou 'rā yvytu jere rami,
 ha'e penembojexavaiarā ha'e penemoingo axyarā ovaẽ avi 'rā.
²⁸ Ha'e jave py peē pejapukai 'rā xevy tei xee nambovai 'rā.
 Opa rupi peē kuery xereka tei ndaxejoui 'rā,
²⁹ Mba'eta 'arandua ndapeipotai rire,
 SENHOR renonde pejererokyje aguā napemoīxei vy.
³⁰ Xee apomongeta ramo napenduxei,
 pendevy xeayvu rā ndapeikuaaxei,
³¹ ha'e rami rire ma peikoague repy ae 'rā pejopy,
 pejeguaru 'rā penhemongetaague gui ae.
³² Mba'eta hi'arandu e'ŷ'i va'e kuery omanomba 'rā ojepe'aague py,
 hi'arandu e'ŷ va'e ojeupe 'Aiko porā' he'i riveague py ae 'rā okanhymba.
³³ Ha'e rā xeayvu oendu va'e ma oī atā 'rā,
 ikuai porā rei 'rā mba'eve gui okyje e'ŷ re."

Arandua iporā va'e re ijayvua

- ¹ Xera'y, xeayvu rejopy vy,
 ha'e ndejee ajapo uka va'e remoĩ ri vy,
² 'arandua re rejapyxaka pota vy,
 ha'e ndepy'a re mba'emo reikuaa aguā re rejerure ri vy,

[†] 1:21 Apy gui ma ijayvu va'e ma Arandua. Ha'e rami avi jaikuua pota porā vy Nhanderuete ae ijayvua.

- ³ xapy'a rei ne'arandurā re rejapukai vy,
ha'e rendu kuaa aguā re rejerure ete vy,
- ⁴ ne'arandurā reka reikovy vy prata oeka va'e rami,
mba'emo porā onhomī mbyre rekaa rami reka vy,
- ⁵ ha'e rami vy 'rā reikuua SENHOR renonde rejererokyjea rupi reiko aguā,
ha'e rejou 'rā Nhanderuete reikuua aguā.
- ⁶ Mba'eta SENHOR ae ome'ē 'arandurā,
ijuru gui ae ou nhane'arandurā ha'e jaikuua aguā.
- ⁷ Heko porā va'e kuery peguarā omoī porā 'rā 'arandua anhetē ete va'e,
ha'e ramo anhetē rupi ikuai va'e pe oī 'rā mba'emo vai jokoarā.
- ⁸ Opena porā 'rā teko porā rupi ikuai va'e re,
opena 'rā Nhanderuete pegua kuery iky'a e'ŷ va'e oikoa rupi.
- ⁹ Ha'e rami vy reikuua 'rā teko porā rupi reikoa, mba'emo re reikuua potaa, ha'e joo-joo'i
rami rejoguereko aguā.
Ha'e rami jaikoa ma tape porā meme.
- ¹⁰ Mba'eta ndepy'a re oī 'rā ne'arandurā,
reikuuae reikovyā voi nenhe'ē py nembovy'ave 'rā heravy.
- ¹¹ Ha'e ramo 'arandua opena 'rā ndere,
ne'arandua ae nemoingo porā 'rā.
- ¹² Ha'e rami vy ndereraa jepe aguā tape vai rupi ikuai va'e gui,
ha'e avakue nda'eveia rupi ijayvu va'e gui,
- ¹³ teko porā gui ojepe'a vy
pytū rupi anho ikuai va'e gui.
- ¹⁴ Ha'e kuery ma teko vai ojapo vy ovy'a rei 'rā,
heko vai va'e kuery oexa vy anho 'rā ovy'a okuapy,
- ¹⁵ tape karē rupi ikuai vy
oiko aguā va'ekue gui ojepe'apa va'e.
- ¹⁶ 'Arandua ndereraa jepe 'rā kunha itavy rei va'e gui voi,
kunha mboae tavy reia rupi ijayvu va'e gui.
- ¹⁷ Ha'e nunga ma oeja 'rā kunhataī guive ome reve joguerekaoa gui,
ha'e Nhanderuete pe oiko aguā re ijayvuague gui voi hexaraipa 'rā.
- ¹⁸ Mba'eta ha'e va'e ro katy reo vy manoia katy ae 'rā reo.
Ha'e oikoa ha'e javi ndereraa 'rā pytū guy py manoia po'akaa katy.
- ¹⁹ Ha'e ramo ha'e va'e kunha pou vy oo va'e ma ndojevyvei 'rā,
ndojojouvei 'rā tape tekove katy oo va'e.
- ²⁰ 'Arandua rupi vy reiko 'rā avakue heko porā va'e ikuiaia rupi,
nderejavyi 'rā teko porā rupi ikuiaia.
- ²¹ Mba'eta yvy pyau ma heko porā va'e peguarā itui,
ha'e va'e yvy re ikuai va'erā ma anhetē rupi oiko va'e kuery anho.
- ²² Ha'e rā opa marā heko va'e kuery ma oipe'apaa 'rā yvy gui,
jokorepa va'e kuery omoëmbaa 'rā ha'e gui.

- SENHOR nhanhe'* ē rendu aguā rupi nhanemo'arandua
- ¹ Xera'y, nderexarai eme xee rombo'eague re.
Ndepy'a re emoī porā ke ajapo uka va'ekue.
- ² Mba'eta ha'e nunga ma nemoingove puku 'rā,
ndere omoī retave 'rā ma'etŷa re reiko aguā.
- ³ Nderexarai eme mborayvu ha'e anhetē va'e rupi reikoa aguā gui.
Ha'e rami reiko aguā emoī ndeaju'y re mbo'y remoña rami.
Ndepy'a re embopara yvyrape re rami.
- ⁴ Ha'e rami vy reupity 'rā Nhanderuete nemboaxya,

- avakue voi nemboete 'rā.
- 5 Ndepy'a ha'e javi py ejerovia tema SENHOR re ae,
ha'e rā ndee ae 'arandua re ma ejerovia eme.
- 6 Opa mba'e rejapoa py nema'endu'a hexe.
Ha'e ramo ha'e oipe'a 'rā nereneronderā.
- 7 Enhemo'arandu eme ndee ae reikuaa rupi rive.
Eiko tema SENHOR renonde rejelerokyjea rupi, ha'e ejep'e a teko vai gui.
- 8 Ha'e rami reikoa ma ojapo 'rā ndere imbaraeteve aguā rami,
nekāgue voi omokane'ōguā 'rā.
- 9 Emboete ke SENHOR mba'emo rerekva'e py,
ha'e jypy'i rejou va'ekue-'ekue reme'ēa py.
- 10 Ha'e ramo nderoguy tynyēmba 'rā mba'emo ra'yīgue,
vinho hyru gui voi onheēmba rei 'rā.
- 11 Xera'y, endu rive eme ta'vy SENHOR nemo'arandu rā,
ndekuerai eme guive ndevy ijayvu ramo,
- 12 mba'eta SENHOR ma guembiajvu kuery pe ae 'rā ijayvu,
tuu gua'y oayvu va'e pe ijayvua rami avi.*
- 13 Ovy'a ete 'rā ava o'arandurā ojou va'e,
oikuua aguā oupity va'ekue.
- 14 Mba'eta ha'e rami jaikoague repy ma prata gui ovareve,
ouro iporāve va'e gui ovareve.
- 15 Pérola gui voi ovareve 'rā.
Opa mba'e reipota va'e ma 'arandu gui ndovareive.
- 16 Opo oiporu kuaa regua re 'arandu oguerekove ombopukuve aguā,
ha'e rā oiporu kuaa e'ŷa re ma oĩ mba'emo porā ha'e nemboetea aguā regua.
- 17 Ha'e va'e tape ma iporā va'e meme.
Ha'e va'e rupi jaa vy jaupity 'rā mby'a porā.
- 18 Oupity va'e pe ma vyvra tekove me'ēa hi'aī.
Ovy'a ete 'rā oupity va'e ha'e javi.
- 19 O'arandua rupi SENHOR yvy onhono raka'e,
oikuapaa rupi ojapo imoiny yva.
- 20 Opa mba'e oikuapa va'e vy yy ombou raka'e yvy guýry oīague gui,
ha'e rā arai gui ma ombou yxapy.
- 21 Xera'y, emboyke eme rexaa py remoī va'ekue,
ereko riae ke 'arandu anhetē va'e reiko kuaa aguā.
- 22 Mba'eta nenhe'ē pe ome'ē 'rā tekove,
ndeaju'y re mbo'y remoī vy renhembojeguaa rami avi.
- 23 Ha'e rami vy tape rupi reikoa rupi voi reiko porā 'rā,
renhepyxanga e'ŷ re.
- 24 Renheno ta ma vy nderekkyjei 'rā,
ha'e gui renheno ma vy reke porā 'rā.
- 25 Enhemondyi eme mba'emo oiko xapy'a teī,
neī heko vai va'e kuery mokanhyarā ou va'e gui.
- 26 Mba'eta SENHOR oĩ 'rā ndere ou va'e jokoarā,
ndepy re voi opena 'rā nembo'aa e'ŷ aguā.
- 27 Eipytyvō e'ŷ eme ojexavai rei'i va'e kuery,
ndepo py remboja'o aguā rerekovi vy.
- 28 Xapy'a rei aŷ ma voi mba'emo rerekovi vy
aipo're eme neirū pe: "Tereo ju, ha'e gui ko'ē rā ma eju ju.
Ha'e ramo ma ame'ē 'rā mba'emo", 're eme.
- 29 Enhembopy'a eme neirū re rejapo vai aguā,

* 3:12 Hebreus 12.5-6

- ndere ojeroviaa rupi ndero katy'i oĩ ramo.
- ³⁰ Nda'evei joupe ndeayvu ete-ete aguã mba'eve py e'ŷ,
 ndevy ojapo vai e'ŷ re.
- ³¹ Erov'y'a rei eme ojerovia rei va'e,
 eiko eme guive ha'e kuery ikuiaia rami,
- ³² mba'eta SENHOR ojeguaru heko vai va'e gui,
 ha'e rã heko porã va'e ma oirũ ae rami 'rã oguerek.
- ³³ SENHOR ijayvu vaiague opyta 'rã heko vai va'e ro re,
 ha'e rã heko porã va'e rekoia re ma imoingo porãarã anho oĩ 'rã.
- ³⁴ Mba'eta ha'e ojojai 'rã ojojai reia rupi ikuai va'e,
 ha'e rã yvyigueve'i ma omboaxy 'rã.*
- ³⁵ Hi'arandu va'e omboetepy 'rã ikuai,
 ha'e rã hi'arandu e'ŷ va'e ma oximba aguã rami ikuai.

4

Nhanderuete nhanemongetaa

- ¹ Xera'y kuery, pendu ke penderu penembo'ea.
 Pejapyxaka porã ke peikuua porã aguã.
- ² Mba'eta xee ma iporã va'e re rombo'e.
 Ha'e nunga rupi penderexarai eme rombo'eague re.
- ³ Ha'e gui xee voi ta'y aiko va'ekue xeru ro py.
 Naxembaraetei teri va'ekue, ha'i reve ipi'a pete'i'i va'e aiko vy.
- ⁴ Ha'e jave py xeru xembo'e vy aipoe'i:
 “Emoĩ ke xeayvua ndepy'a re.
 Ejapo tema ajapo uka va'e, ha'e vy 'rã reikove.
- ⁵ Emoĩ ne'arandurã ha'e mba'emo reikuua aguã.
 Nderexarai eme, ejep'e eme guive xeayvua gui.
- ⁶ Ejep'e eme 'arandua rupi reikoa gui. Ha'e ramo 'rãe ndere opena porã.
 Embovare ke, ha'e ramo 'rã nderepy.
- ⁷ 'Arandua ma iporãva'e ramo emoĩ ne'arandurã.
 Tá, mba'emo rejoua rupi rejou avi 'rã mba'emo reikuua aguã.
- ⁸ Embovare ete ke 'arandua, ha'e ramo 'rã nemboyvateve.
 Remoĩ ete ramo nemoingo 'rã omboetepy.
- ⁹ Neakã re omoĩ 'rã akã regua iporãva'e,
 coroa hexakãmba va'e ome'ẽ 'rã ndevy", he'i va'ekue xevy.
- ¹⁰ Xera'y, ejapyxaka ke, ha'e ejopy xeayvu.
 Ha'e vy 'rãe reikove puku.
- ¹¹ Mba'eta xee rombo'ea ma tape 'arandua katy oo va'e rupi reo aguã,
 heko porã va'e ikuiaia rupi avi reiko aguã.
- ¹² Ha'e va'e rupi reguata ramo
 mba'eve rei nandejokoi 'rã reikoa rupi.
 Renha tei' nerenhelyxangai 'rã.
- ¹³ Ha'e nunga rupi emoĩ porã ete rombo'eague, nderexarai eme.
 Emoĩ atã ndejee, mba'eta ha'e va'e rupi vy 'rãe reupity nderekoverã.
- ¹⁴ Nderepiai 'rã heko vai va'e kuery ooa katy.
 Eiko eme heko vai va'e ikuiaia rupi.
- ¹⁵ Ejapo eme ha'e kuery ojapo va'e.
 Ejep'e, tereo eme ha'e rupi.
 Ejepakuavo mombyry rupi.
- ¹⁶ Mba'eta ha'e kuery ma mba'emo vai ojapo e'ŷa ja ndokei 'rã.
 Ndokei 'rã joity e'ŷa ja.

* 3:34 Tiago 4.6, 1 Pedro 5.5

- ¹⁷ Mba'eta ha'e kuery mbojape ho'u va'e ma teko vai anho,
ha'e vinho oy'u va'e ma ojerovia reia.
- ¹⁸ Ha'e rā heko porā va'e ikuiaia ma ko'ẽ ouvy va'e rami hexakā,
hexakā porā-porāve 'rā ovy ko'ẽmba porā peve.
- ¹⁹ Ha'e rā heko vai va'e reko ma pytū rupi oo va'e rami.
Ha'e kuery ndoikuuai mba'e nunga re 'rā pa onhepyxanga aguā voi.
- ²⁰ Xera'y, endu pota xeayvua re.
Ejapyxaka ke xee rombo'ea re.
- ²¹ Emboyke eme nderexa py rexaa va'ekue.
Ndepy'a py re 'rā remoī.
- ²² Mba'eta oupuity va'e pe ma tekove me'ẽa oĩ,
ome'ẽ avi 'rā hete rexaīrā.
- ²³ Opa mba'e re repenaa gui epena porāve ndepy'a re,
mba'eta ha'e py ae oĩ nderekoverā.
- ²⁴ Emombytu'u ndejuru ndeapu reiaty gui,
eipe'a ndejegui ayvu vai rupi ndeayvua.
- ²⁵ Nderexa toexa porā ov y nereneronderā ae.
Nderova ma nereneronde re ae toī.
- ²⁶ Eikuua pota porā ke repyrōa re,
reikoa ha'e javi hi'yvi aguā.*
- ²⁷ Epia eme reiporu kuaa katy neĩ reiporu kuaa e'ŷa katy.
Ejoko ndepy teko vai katy oo ta ramo.

5

- Tavy reia rupi jaiko e'ŷ aguā re ijayvua*
- ¹ Xera'y, eikuua pota ke 'arandu rupi xeayvua re.
Ejapyxaka, aikuua va'e re xeayvu rā endu,
² 'arandu re reiko aguā,
ha'e reikuua va'e rupi anho ndeayvu aguā.
- ³ Ha'e rā kunha itavy rei va'e ijayvua ma ei rami ete he'ẽ,
azeite gui iporāve merami teĩ
⁴ opaa py ma tai va'e rami 'rā haxy ndevy,
kyxe hakua haímbe jovai va'e rami.
- ⁵ Ipy ma manoa katy oguejy ov y,
oguata 'rā tata ogue'ŷ va'e katy.
- ⁶ Ndoikuua potai ov y tape tekove katy oo va'e re,
ooa katy rei-rei oo va'e rupi 'rā oo oiny oikuua e'ŷ vy.
- ⁷ Ha'e nunga rupi aŷ xera'y, ejapyxaka xeayvu re,
ejep'e'a eme aipoa'eague rami reikoa gui.
- ⁸ Ejep'e'a ke kunha tavy rei gui,
neĩ hoo rokē katy ma voi enhemboja eme,
⁹ joupe remboaxa e'ŷ aguā nemboetea aguā va'ekue,
ha'e joayvu e'ŷ va'e pe reperde e'ŷ aguā nderekovea,
- ¹⁰ reikuua e'ŷ va'e pe rive remboaxa e'ŷ aguā nembal'e rei-rei,
ha'e remba'eapoague repy opyta e'ŷ aguā amboae kuery peguarā.
- ¹¹ Ha'e rami e'ŷ vy remano ta ma vy nepoaē 'rā rejupy,
ndero'o ha'e nderete opave ov y ramo.
- ¹² Ha'e vy aipo're 'rā:
“Mba'e re tu xee naenduxei karamboae xembo'ea rā!
Xepy'a re namoñxei xemongetaa ramo.
- ¹³ Naendu potai xembo'ea kuery ijayvua,

* 4:26 Hebreus 12.13

- ndajapyxakaxe karamboae xemo'aranduxea rā.
- ¹⁴ Mba'eta aŷ ma aĩ vai aguã rami aiko
heta va'e kuery ijaty va'e oexaa py", 're 'rā.
- ¹⁵ Ha'e nunga rupi ey'u nde'ygua gui ae,
ndevey guarā yxyry oiny va'e gui ae.*
- ¹⁶ Tyrā pa oka katy rive ri ty'y renhoẽ ta nde'ygua gui,
tetā mbyte rupi rive oxyry ov yaguã rami?
- ¹⁷ Ha'e rami 'rāgue py ndevey guarā ae 'rā rerekō,
amboae kuery pe rive remboaxa va'erā e'ŷ.
- ¹⁸ Toiko porā nde'ygua,
ha'e erovy'a ke nekunumi guive remendaague va'e.
- ¹⁹ Ha'e ae ndevygua toiko guaxu iporā va'e rami.
Ikā anho erovy'a riae.
Reikoa pukukue re erovy'a pejoayvua rupi.
- ²⁰ Xera'y, mba'e re 'rā tu renhembotavy uka kunha mboae pe?
Mba'e re 'rā tu kunha mboae kā rupi reikuavā?
- ²¹ Mba'eta nhande jaikoa ma SENHOR oexapa,
oikuua pota 'rā jaikoa ha'e javi re.
- ²² Heko vai va'e ma mba'emo vai ojapoague py ae 'rā ho'a.
Ha'e ae ojejavyague py ojejokua uka 'rā.
- ²³ Omano 'rā ndojejokoi reia py,
ho'a-o'a rei 'rā oikovy okanhý peve.

6

Jarevea re jaiko e'ŷ aguã re ijayvua

- ¹ Xera'y, xapy'a rei neirū orevea repaga aguã rami reiko 'rā,
e'ŷ vy rexa va'ety e'ŷ reve ha'e rami aguã re pejogueroayvu 'rā.
- ² Xapy'a rei rā aipo'reague py ae reiko 'rā ojokua pyre,
ndeayvua py renhembo'a uka vy.
- ³ Xera'y, ha'e rami ri ramo aŷ ma po rami 'rā reiko
reo jepe aguã, neirū po py re'a ma rire tē
tereo pojava, ejerure tema einy neirū pe.
- ⁴ Nda'evei reke ranhe aguã,
emboty eme ranhe nderexa.
- ⁵ Tereo jepe nho pota ke, guaxu e'ŷ vy guyra
imba'ejuka va'e po gui oo jepea rami.

Nhaneate'ŷ e'ŷ aguã re ijayvua

- ⁶ Ndee inhate'ŷ va'e, tereo eikuua pota tay kuery reko re,
ha'e kuery reko re reikuua pota vy ne'arandu nho aguã.
- ⁷ Ha'e kuery ma ndoguerokoi nguvixa,
nē hereko, nē imomb'a'epoarā.
- ⁸ Ha'e rami tē kuaray puku py voi ha'e kuery omōi porā 'rā ho'u va'erā,
nhamono'ða ára ha'e kuery voi omono'õ 'rā guemb'iurā.
- ⁹ Ndee inhate'ŷ va'e, raka'e peve tu renheno 'rā rejupy?
Raka'e peve 'rā tu reke rejupy?
- ¹⁰ Mba'eta "Takeve'i ju ranhe" 're vy repytu'uve tema 'rā,
ha'e renhekuavā 'rā rejupy.
- ¹¹ Ha'e rami ae 'rā ovā xapy'a nemomboriauarā imonda va'e rami,
nemōi axyarā ou xapy'a 'rā ava guembiporu revegua rami avi.

* 5:15 Apy ma ijayvu nhandera'yxy ae'i reve anho jajoguereko aguã re (Cântico 4.15).

- Teko vai rupi jaiko e'ŷ aguã re ijayvua*
- ¹² Avakue mba'everã ovare e'ŷ va'e, heko vai va'e ma
 opa marã rei 'rã ijayvu.
- ¹³ Oxapymi-pymi ha'e opy omomy-momyĩ rei 'rã okuapy,
 opo ombovava-vava 'rã guive nhombotavya rupi.
- ¹⁴ Ha'e gui ipy'a re ma ha'eve e'ŷ va'e anho 'rã oĩ,
 teko vai re ae 'rã onhembopy'a okuapy,
 ha'e joo rami e'ŷ-e'ŷ nhomoingoa re 'rã ikuai.
- ¹⁵ Ha'e nunga rupi imokanhyarã ou xapy'a 'rã.
 Ou xapy'a 'rã imopẽmbaarã, ha'e jipoi 'rã imongueraarã.
- ¹⁶ Mba'eta mboapy meme regua oiko SENHOR ndojou porãi va'e,
 sete-a voi oiko onhe'ẽ py ojou vai va'erã:
- ¹⁷ ha'e va'e ma guexa py onhemboyvate rei va'e,
 oapekũ py ijapu va'e,
 opo py heko porã'i va'e ruguy omoẽ va'e,
- ¹⁸ opy'a py mba'emo vairã re rive oikuaa pota va'e,
 opy py mba'emo vai ojapo aguã katy ojapurave va'e,
- ¹⁹ joekokue ramigua rive ijapu vy omombe'u va'e,
 ha'e joegua kuery joo rami e'ŷ-e'ŷ ikuai aguã rami ojapo va'e.
- Kunha mboae reve nhandetavy rei e'ŷ aguã re ijayvua*
- ²⁰ Xera'y, nderexarai eme nderu ijayvuague re,
 ejep'e eme ndexy nembo'eague rupi reikoa gui.
- ²¹ Emoĩ porã ke ndepy'a re,
 mbo'y ndeaju'y re remoĩa rami emoĩ riae ndejee.
- ²² Mba'eta ha'e va'e ayvu ma reguataa rupi ndererek 'rã,
 reke jave voi opena porã 'rã ndere,
 ha'e rekeague gui revy jave nemo'arandu teri 'rã.
- ²³ Mba'eta ojapo uka pyre ma tataendy rami 'rã oĩ,
 nhanembo'ea nhanemoexakã 'rã,
 arandu rupi nhanemongetaa ma tape tekove katy oo va'e oĩ,
- ²⁴ ndejoko aguã kunha itavy rei va'e gui,
 kunha mboae nembotavy aguã rupi ijayvu va'e gui.
- ²⁵ Ha'e nunga iporãa rexâ teī emoaruã rei eme,
 enhembotavy uka eme oma'ẽ ngatu teī.
- ²⁶ Mba'eta kunha itavy rei va'e pe ma mbovy'i 'rã opagaa peteĩ mbojape repyrã rive,
 ha'e rã omenda va'e reve itavy reia rekovia ma guekove ae 'rã ome'ẽ.
- ²⁷ Amongue opexo re tata oikuavã heravy ramo
 ijao ndokai 'rã ri?
- ²⁸ Ha'e rami e'ŷ vy tapyi áry oguata vy nda'u
 ipy ndokai 'rã ri?
- ²⁹ Ha'e rami ae 'rã oirû ra'yxy reve itavy va'e re oiko.
 Hexeve itavy rei va'ekue ma ndopaga e'ŷi 'rã.
- ³⁰ Imonda va'e minha karuai gui imonda teī
 ndajajou vai 'rã ri ty'y?
- ³¹ Mba'eta ha'e nunga ojoua ri vy sete-kue áryve 'rã ombopagaa.
 Ngoo py oguerekva'ekue ha'e javi ome'ẽmba 'rã.
- ³² Ha'e rã kunha mboae reve itavy rei va'e ma na'inhakã porãvei ae.
 Ha'e rami ikuai va'e ma ha'e kuery ae onhemomba ukaxe vy.
- ³³ Ha'e rire oendu 'rã oinupãmba rã oximba aguã.
 Raka'e rã peve ima'endu'aa riae 'rã ha'ekue re.
- ³⁴ Mba'eta ime hakate'ŷ vy ipoxy 'rãe,
 ha'e vy ombopaga aguã ára py noendui 'rã omboaxya.

³⁵ Neĩ mba'eve ndojopyxei 'rã onhemboaxy ucaa rupi ome'ẽ va'e voi,
ixupe mba'emo porã ome'ẽ reta ta teĩ.

7

Kunha itavy rei va'e re ijayvu jevyague

- ¹ Xera'y, nderexarai eme xeayvua re,
emoĩ ndepy'a re ajapo uka va'e.
- ² Ejapo ke ajapo uka va'e, ha'e vy 'rã reikove.
Ndejee emoĩ atã xeguigua lei, nderexa ra'yĩ huña'i re repenaa rami.
- ³ Emoĩ ke xee rombo'ea nekuã regua rami,
ndepy'apy re emoĩ, yvyrape re remboparaa rami.
- ⁴ 'Arandua pe ma aipo'ere: "Xereindy ae'i",
ha'e mba'emo reikuua aguã pe ma "Xeretarã ae'i" 'ere.
- ⁵ Mba'eta ha'e nunga ndejoko 'rã kunha mboae gui,
kunha itavy reia rupi ijayvu va'e gui.
- ⁶ Ha'e gui xero re janela yvate oĩ gui,
janela jokoa pa'ũ rupi ama'ẽ ainy vy
- ⁷ aexa reta karamboae hi'arandu e'ŷ va'e.
Ha'e va'e kunumigue aexa va'e mbyte py
peteĩ aexa avi hi'arandu e'ŷ ete va'e.
- ⁸ Ha'e va'e ma peteĩ tape'i rupi oo oiny,
kunha tavy rei va'e ro rexei'i rupi.
Ha'e vy hoo via rupi ae oo
- ⁹ ka'aru'i, kuaray oike ramo'i javé,
pytû ho'a javé.
- ¹⁰ Ha'e gui ma ha'e va'e kunha oẽ ovaexĩ aguã.
itavy rei va'e ao py onhemonde ouvy,
ombotavy aguã re onhembopy'aa rupi.
- ¹¹ Itavy aguã re anho 'rã ipy'a va'e,
ndopytai 'rã guive ngoo py, ndopyta kuaai rei 'rã.
- ¹² Amongue py tape pia rupi 'rã hekony,
amongue py ma tetã mbyte rupi 'rã oo,
opa rupi oma'ẽ 'rã oikovy nhoarõa rupi.
- ¹³ Ha'e gui ma kunumi va'e re onhemboaja vy oayvu.
Ha'e vy oma'ẽ tavy rei reve aipoe'i ixupe:
- ¹⁴ "Temb'i' areko ja'u aguã, ange amboaxa va'ekue regua.
Ange ajapopa ma kuri anhemboayvuague.
- ¹⁵ Ha'e rami vy aju ainy roeka vy.
Ha'e vy aŷ ma rovaexĩ ma.
- ¹⁶ Ha'e gui xerupa ma anhovãmba ma voi
ajukue iporâve va'e Egito guigua py.
- ¹⁷ Xerupa amoeakuãmba ma avi mirra py,
aloés ha'e cinamomo py guive.
- ¹⁸ Jaa ke, jajoayvua py nhaĩ pytû mbukukue re.
Javy'a vaipa 'rã jajoayvua rupi anho.
- ¹⁹ Ha'e gui xeme ma noĩ xero py.
Mombyry ete rupi oguata oikovy.
- ²⁰ Peráta hetá ogueraa ovoko py.
Raka'eve rã jaxy inhypytyu javé mae ma ou ju 'rã", he'i.
- ²¹ Ha'e rami vy kunha va'e ijayvu porã kuaa vy ombotavy ete,
oayvu kuaa rupi ojopy heravy aguã.
- ²² Ha'e ramo kunumi va'e ma are'ŷ'i re oo oiny hexeve,

vaka ojukaa aguã katy oo va'e rami,
 ha'e rami e'ŷ vy guaxu nhuã oña katy onha ovy va'e rami,
²³ ipy'a rupi hu'y onhyvõ peve,
 ha'e rami e'ŷ vy guyra'i mondepí katy oveve ovy va'e rami,
 ha'e py omano aguã oikuaa e'ŷ vy.
²⁴ Aŷ ma xera'y, ejapyxaka porã ke,
 eikuua pota porã xeayvua re.
²⁵ Neñ ndepy'a eme ha'e va'e nunga kunha reve rejereraa uka aguã,
 enhemokanhy uka eme oikoa rupi reoa py.
²⁶ Mba'eta ha'e nunga heta ma oity avakue, ombojexavai guive.
 Mbovy e'ŷ ma omano ikáuxa.
²⁷ Ha'e va'e ro via ma yyvra rupa katy nhandereraa va'e,
 nhandereroguejy 'rã heravy manoia katy.

8

Arandua opa mba'e gui iporâve va'ea re ijayvua

- ¹ 'Arandua voi nda'u ndojapukai avi 'rã ri?
 Ha'e rami vy nanhanerenoĩ 'rã ri ty'y mba'emo kuaa ukaa rupi?
- ² Mba'eta oĩ 'rã yvity yvateve va'e áry,
 tape yvýry, tape pia rexei rupi guive,
- ³ tetã kora rokẽ py nhavaë'i javya py,
 okẽ py ojapukai 'rã oiny.
- ⁴ Ha'e vy aipoe'i 'rã: "Xee voi aĩ peẽ avakue roenoĩ ainya py,
 xeayvu ainy avakue ha'e javi pe.
- ⁵ Ha'e gui pene'arandu e'ŷ'i va'e,
 peikuua pota ke peiko kuaa aguã re.
 Peẽ hi'arandu e'ŷ va'e, peikuua ke 'arandua.
- ⁶ Mba'emo iporã va'e re xeayvu rã pendu pota ke.
 Xeayvu 'rã ha'evea rami anho.
- ⁷ Mba'eta xeayvua ma anhetẽ meme,
 ha'e rã apu gui ma xee ajeguaru.
- ⁸ Xee aipoa'ea ma anhetẽ ete va'e meme.
 Xeayvua re ma peteïve henda py noĩ nhombotavyarã, neñ opa marã nhomoingoarã.
- ⁹ Oendu kuaa va'e pe ma anhetẽ va'e meme,
 ha'eve va'e meme oikuua aguã oupity va'e pe.
- ¹⁰ Prata 'rãgue py pejopy ke rombo'ea,
 ouro oiporavo pyre 'rãgue py pejopy mba'emo aikuua uka va'e.
- ¹¹ Mba'eta 'arandua ma ita ovareve va'e gui iporâve va'e,
 opa mba'e peipotaa gui ha'eveve.
- ¹² Xee 'Arandua ma peiko kuaa aguã rupi aĩ.
 Xee areko va'e ma peikuua aguã ha'e penemongetaarã.
- ¹³ SENHOR renonde ojererokyjea rupi oiko va'e ma ojou vai 'rã teko vai.
 Ha'e gui xee ajou vai va'e ma nhemboyvate reia, jejou porã reia,
 teko vai rupi ikuia ha'e opa marã ayvua.
- ¹⁴ Xegui ae 'rã pendu penemongetaa ha'e 'arandua anhetẽ ete va'e.
 Xee ma peikuua porã aguã ae aĩ, ha'e penembopo'akaarã.
- ¹⁵ Xegui ae huvixave kuery opena kuaa,
 ha'e huvixa ikuai va'e anhetẽ rupi 'rã ijayvu kuaa.
- ¹⁶ Xegui ma joguerekoa kuery opena kuaa 'rã,
 yvatekueve ha'e nhomboayvua kuery ha'e javi.
- ¹⁷ Xee ma ayvu 'rã xerayvu va'e kuery,
 ha'e xereka va'e ma xejou 'rã.

- ¹⁸ Xereve vy 'rã pejou mba'emo porã, ha'e omboetepy peiko,
mba'emo porã ivaipa va'erã e'ŷ ha'e teko porã 'rã pejou.
- ¹⁹ Mba'emo xee areko va'e ma ouro gui ovareve ete, ouro oiky'a'o pyre
ha'e prata oiporavo pyre gui ha'eveve va'e.
- ²⁰ Xee ma tape teko porã rupi anho aiko va'e,
tape joguerekoo kuaa aguã oĩa va'e mbyute rupi aguata va'e,
- ²¹ ha'e rami vy xerayvu va'e kuery pe ame'ẽ aguã iporã va'e,
ha'e kuery ro amonyẽ aguã iporã va'e anho.

Jypy'i guive 'Arandu oikoague re ijayvua

- ²² SENHOR mba'emo omoingo ypy'i guive xee ma voi xererekoo,
guembiapo ymavegua ojapo e'ŷ mbove ma voi.
- ²³ Yma voi xemoi, jypy'i ete guive,
yvy onhono e'ŷ mbove.
- ²⁴ Ye'ẽ oiko e'ŷ mbove voi xee aiko ae ma va'ekue,
yvu ndoikoi teri reve.
- ²⁵ Yvyty onhono e'ŷ mbove,
yvy'ã hendarã py omoi e'ŷ mbove xee aiko ae ma va'ekue.
- ²⁶ Ha'e va'e jave py ma yvy ha'e nhuñdy nomoingoi teri,
nei yvy ku'i nomboypyi teri.
- ²⁷ Ha'e gui yva hendarã py omoi jave xee aĩ ae ma,
ha'e yva apy ye'ẽ áry rupi oa'anga jave.
- ²⁸ Yva re arai omoi jave py xee aĩ ae ma,
ye'ẽ iguy gui oẽ aguã oipe'a jave,
- ²⁹ ye'ẽ remberã oa'anga jave voi
ha'e va'e rupi yy oxyry ov y e'ŷ aguã,
ha'e yvy ytarã omoi jave py,
- ³⁰ ha'e va'e jave py ma xee aĩ ae ma hexeve, ha'e oipota va'e apoarã.
Ko'ẽ nhavõ aĩ va'ekue ambovy'aa rupi,
henonde avy'aa rupi tema aiko.
- ³¹ Xee arovya va'ekue yvy tekoarã ojapo va'ekue,
avakue ra'y kuery ha'e javi guive.
- ³² Aŷ ma xera'y kuery, pendu ke.
Ovy'a ete 'rã xee aikoa rupi oiko va'e.
- ³³ Pendu ke xee rombo'ea pene'arandu aguã,
penduxe e'ŷ eme.
- ³⁴ Ovy'a ete 'rã xenhe'ẽ rendu va'e,
ko'ẽ nhavõ xerokẽ py oĩ va'e,
xero katy aikea'i py xerarõ oiny va'e.
- ³⁵ Mba'eta xejou va'e ojou avi 'rã tekove,
ha'e oupity 'rã SENHOR oguerovy'a aguã.
- ³⁶ Ha'e rã xerovai ojejavvy va'e ma onhe'ẽ pe ae ojapo vai.
Ha'e javi xejou vai va'e omano aguã rive oguerovy'ave vy."

Arandua ngaru ojapo va'e re ijayvua

- ¹ 'Arandua ojapo ngoorã,
ha'e vy omoatyrõ sete ijytarã.*
- ² Ojuka uka mymba ngaru ojapo aguã,
oguereko katu ma vinho, ha'e gui mesa áry omoimba.
- ³ Ha'e rami vy guembiguai kuery omondouka

* 9:1 Apy ma Arandua re ijayvu, hoo va'e ngaru pavẽ pe ojapo va'e re rami.

- tetā yvateve va'e áry rupi nhoenoī aguā. Aipoe'i uka:
- ⁴ “Ndapeikuuaai rei va'e, peikepa ke apy!” he'i uka.
 Hi'arandu e'ŷ va'e kuery pe aipoe'i uka:
- ⁵ “Peju ke pe'u mbojape xea py,
 ha'e pey'u vinho areko katupa va'ekue.
- ⁶ Pendekuaive eme 'arandu e'ŷa rupi, ha'e vy 'rā peiko areve.
 Tape 'arandu oĩa rupi anho peiko”, he'i uka.
- ⁷ Ha'e gui porojojai rei va'e kuery pe pendeayvu vy
 peẽ ae pejejojai uka rei,
 heko vai va'e kuery pe pendeayvu vy pejeavyky uka rei 'rā.
- ⁸ Nda'evei ae porojojaia pe nhandeayvu aguā, nhandeivy ipoxy e'ŷ aguā.
 Ha'e rā hi'arandu va'e pe nhandeayvu ramo ma nhanderayvu 'rā.
- ⁹ Hi'arandu va'e nhambo'e ramo ma hi'aranduve 'rā,
 heko porā va'e nhambo'e ramo oiko kuaave 'rā ov.
- ¹⁰ SENHOR renonde jajererokyjea rupi jaiko vy 'rāe jaupity 'arandua,
 Iky'a e'ŷ va'e jaikuaa vy 'rāe jaiko kuaa.
- ¹¹ Mba'eta xereve vy anho peiko pukuve 'rā,
 penerenonderā ma'etŷa amoī retave ramo.
- ¹² Pene'arandu ri vy pendejeupe guarā ae 'rā pejou,
 ha'e rā pejojai reia py ma peẽ ae 'rā penhemoī vai.

- Kunha hi'arandu e'ŷ va'e nhoenoī oinya*
- ¹³ 'Arandu e'ŷa ma kunha ojejoko kuaa e'ŷ ha'e opa marā rei onhendu va'e.
 Ha'e nunga ma mba'eve ndoikuuaai 'rā.
- ¹⁴ Oguapy 'rā oiny ngokē py,
 tetā yvatevea py tenda áry oĩ 'rā,
- ¹⁵ oaxa va'e-va'e ha'e omiba'eapo vy
 oje'oi va'e pe aipoe'i aguā:
- ¹⁶ “Ndapeikuuaai rei va'e, pejupa ke apy!”
 Hi'arandu e'ŷ va'e kuery pe aipoe'i 'rā:
- ¹⁷ “Yy mondakue ma yro'yxā porāve,
 ha'e mbojape nhemi rupi ja'u va'e ma heeve”, he'i.†
- ¹⁸ Ha'e rā ha'e pyguardā oenoī va'ekue ma ndoikuuaai oĩa py manogue anho ikuiai,
 ha'e py oike va'ekue ma yvykua manoia py meme ikuai.

Heko porā ha'e heko vai va'e reko re ijayvua

Arandu regua ayvu Salomão omombe'u va'ekue

10

- ¹ Ta'y kuery hi'arandu va'e ombovy'a 'rā nguu,
 ha'e rā ta'y kuery hi'arandu e'ŷ va'e ma omomboriau 'rā oxy.
- ² Mba'emo jajejavya rupi jajou va'e ma mba'everā ndovarei,
 ha'e rā teko porā ma nhandereraa jepe 'rā manoia gui.
- ³ SENHOR ndoejai 'rā heko porā va'e karuai oendu oikovy aguā,
 ha'e rā heko vai va'e ma SENHOR ojoko 'rā oipotapa rei va'e ojou e'ŷ aguā.
- ⁴ Inhate'ŷa rupi omiba'eapo va'e ndojoui 'rā mba'eve,
 ha'e rā ikyre'ŷa rupi omiba'eapo va'e ma ojou-jouve 'rā oipota va'e.
- ⁵ Kuaray aku porā jave ta'y hi'arandu va'e omono'õ 'rā mba'emo,
 ha'e rā mba'emo omono'õa ára py oke rive va'e ma omoximba rei 'rā nguu kuery.
- ⁶ Heko porā va'e akā re oĩ 'rā imoingo porāarā,
 ha'e rā heko vai va'e ma nhomoingo vai aguā rupi anho ijayvu.
- ⁷ Heko porā va'e re nhanema'endu'aa ma nhanemoingo porā 'rā,

† 9:17 Apy ma ijayvu nhemi rupi jajejavya re.

- ha'e rā heko vai va'e rery re nhanema'endu'aa ma mba'emo ru'ūgue rami rive.
- ⁸ Opy'a py hi'arandu va'e omoī porā 'rā ojapo uka pyre,
ha'e rā o'arandua rupi e'ŷ ijayvu va'e ma oī vai 'rā.
- ⁹ Anhetē rupi ikuai va'e oī atā 'rā,
ha'e rā tape karē rupi ikuai va'e re ma oikuua potaa 'rāe.
- ¹⁰ Nhombotavya rupi oxapymi-pymi va'e ma nhomomboriau va'e vy,
o'arandua rupi e'ŷ ijayvu va'e oī vai 'rāe.
- ¹¹ Heko porā va'e ayvu ma tekove me'ēa ae,
ha'e rā heko vai va'e ma jojuka aguā rupi anho ijayvu.
- ¹² Mborayvu rupi e'ŷ ikuai va'e nhomopu'āmba rei 'rā.
Ha'e rā porayvu va'e ma ojao'i uka 'rā ojejavya ague.*
- ¹³ Oiko kuaa va'e ijayvu rā nhaendu vy jajou 'rā nhane'arandurā,
ha'e rā hi'arandu e'ŷ va'e ma oinupāa aguā rami ikuai.
- ¹⁴ Hi'arandu va'e omoī porā 'rā 'arandua,
ha'e rā heko vai va'e ma onhemokanhy uka aguā rupi rive ijayvu.
- ¹⁵ Oguerekopa va'e ma omba'e rei-rei re oī atā, tetā ikorapa va'e py rami,
ha'e rā iporiaukue'i ma ikuai axy 'rā mba'eve ndoguerekoia py.
- ¹⁶ Heko porā va'e oikoague repy ma tekove,
ha'e rā heko vai va'e ma ojejavvyague repy ae 'rā ojou.
- ¹⁷ Ombo'ea ague rami ikuai va'e ma tape tekove katy oo va'e rupi oje'oi,
ha'e rā omongoeta ague rupi e'ŷ ikuai va'e ma ha'eve e'ŷa katy 'rā oje'oi.
- ¹⁸ Ijapu va'e ma opy'a re omoī 'rā joe nda'ija'eia,
joekokue omombe'u merami rive va'e ma hi'arandu e'ŷ va'e ae.
- ¹⁹ Ijayvu reta rei va'e ojejavvy 'rāe,
ha'e rā ayvu py ojejoko kuaa va'e ma oiko kuaa va'e vy ae.
- ²⁰ Heko porā va'e ayvu ma prata oiporavo pyre rami,
ha'e rā heko vai va'e kuraxō ma mba'erā ndovarei.
- ²¹ Heko porā va'e ayvu ma teta omongaru va'e rami,
ha'e rā hi'arandu e'ŷ va'e kuery ma omanomba rive 'rā, ndoikuua potaxei rire.
- ²² SENHOR nhandereroayvu porā vy ojapo jajou-jouve aguā rami,
neī peteīve henda py nanhanemomboriaui 'rā.
- ²³ Hi'arandu e'ŷ va'e oikuua ramo opa marā rei nhandekuaia rupi merami 'rā javy'a,
ha'e rā avakue oikuua ete va'e pe ma nhane'arandua rupi vy 'rāe javy'a.
- ²⁴ Heko vai va'e mba'emo gui okyjea va'e ae 'rā oiko hexe,
ha'e rā heko porā va'e oarō oikovya ma Nhanderuete ojapo 'rā ojeupity aguā rami.
- ²⁵ Yvytu vaikue opytu'u xapy'aa rami avi heko vai va'e kuery reko voi okanhy xapy'a 'rā,
ha'e rā heko porā va'e ma oī atā riae 'rā.
- ²⁶ Nhaneraī pe vinagre nda'evei, ha'e nhanderexa pe ma hataxī nda'evei,
ha'e rami ae inhate'ŷ va'e nda'evei avi ijokuia pe.
- ²⁷ SENHOR renonde jajererokyjea rupi vy jaikove puku 'rā,
ha'e rā heko vai va'e ikuia ma ijapy voi 'rā.
- ²⁸ Heko porā va'e oarōa ma ombovy'a 'rā,
ha'e rā heko vai va'e oarōa ma oaxa rive 'rā.
- ²⁹ SENHOR guigua tape ma anhetē rupi ikuai va'e onhemi aguā,
ha'e rā heko vai va'e pe ma imombaarā rive oī.
- ³⁰ Heko porā va'e ma raka'eve rā peve ndoitayai 'rā,
ha'e rā heko vai va'e ma nomombytaai 'rā yvy re.
- ³¹ Heko porā va'e ayvu nhomo'aranduve 'rā,
ha'e rā ijayvu vaikue rei va'e ma omombaa 'rā.
- ³² Heko porā va'e ayvu nhombovy'a 'rā,

* 10:12 1 Pedro 4.8

ha'e rā heko vai va'e ma ha'eve'ŷa rupigua re anho 'rā ijayvu.

11

- ¹ Jokorea rupi mba'emo opeja va'e gui SENHOR ojeguaru,
ha'e rā ha'evea'i rami opeja va'e ma oguerovy'a 'rā.
- ² Jajejou porā rei rive ramo avave rei nanhanemboeteai 'rā,
teĩ nhanhemo'vyvŷ'i vy ma jajou 'rā nhane'arandurā.
- ³ Heko porā va'e anhetē rupi ikuiaia ma oguerekō 'rā ha'evea rupi,
ha'e rā anhetē rupi e'ŷ ikuai va'e ma anhetē e'ŷa ae 'rā omomba.
- ⁴ Nhombopagaa ára py opa mba'e jarekopa va'ekue ndovarei 'rā mba'everā,
ha'e rā nhanderekō porāa ma nhandereraa jepe 'rā manoia gui.
- ⁵ Anhetē rupi ipy'a va'e pe ma heko porāa ae omoatyrō 'rā haperā,
ha'e rā heko vai va'e ma ho'apa 'rā ha'e kuery ae reko vaia py.
- ⁶ Heko porā va'e oo jepe 'rā ha'e kuery ae reko porāa py,
ha'e rā jokorea rupi ikuai va'e ma ha'e kuery ae reko vaia py 'rā ombo'aa.
- ⁷ Heko vai va'e omano ramo mba'emo oarōague voi opa 'rā,
heko vai va'e oarōague opa rive 'rāe.
- ⁸ Heko porā va'e ogueraa jepea 'rā ojexavaia gui,
ha'e gui heko vai va'e re jevy 'rā ha'e nunga ou.
- ⁹ Anhetē rupi e'ŷ ikuai va'e ma ayvu py rive oity 'rā oirū kuery,
ha'e rā heko porā va'e ma mba'emo oikuua rupi oo jepe 'rā.
- ¹⁰ Heko porā va'e ikuai porā ramo tetā pygua kuery ha'e javi 'rā ov'y'a okuapy,
ov'y'a avi 'rā okuapy heko vai va'e okanhy ramo.
- ¹¹ Heko porā va'e ogueroayvu porāa rupi tetā ha'e javi rupi 'rā ikuai porā,
ha'e rā heko vai va'e kuery ijayvua rupi ma oitya 'rā.
- ¹² Oirū pe "Mba'e vare'y" he'i va'e re ma noĩ 'arandua,
ha'e rā ava hi'arandu va'e ma okyrirī 'rā oikovy.
- ¹³ Joekokue ramigua rive omombe'u va'e onhea'ã 'rā onhomī mbyre oikuua aguā,
ha'e rā ojeroviapy ma onhomī mbyre nomboaxai 'rā.
- ¹⁴ Juguerekoa hi'arandu va'e ndoikoi ramo avakue pavē 'rā ho'apa,
teĩ nhomongetaa heta ikuai ramo ma ikuai porā 'rā.
- ¹⁵ Oirū orevea opaga aguā rami oiko va'e ojexavai 'rā.
ha'e rā ha'e rami ndoikoi va'e ma oĩ atā 'rā.
- ¹⁶ Kunha porayvu va'e ojou 'rā imboetearā,
ipo'akakueve ojou-joupavea rami avi.
- ¹⁷ Mborayvu rupi ikuai va'e ma ha'e kuery pe ae ojapo porā,
ha'e rā joapo vai rei va'e ma ha'e kuery ae onhemoĩ vai uka.
- ¹⁸ Heko vai va'e ojeupe guarā ojou va'e ma imarā va'erā,
ha'e rā teko porā rupi oiko va'e ma anhetē ete va'e guigua ojou 'rā oikoague repy.
- ¹⁹ Heko porā va'e oo 'rāe tekove katy,
ha'e rā teko vai rupi ikuai va'e ma omano ete 'rāe.
- ²⁰ Opy'a py opa marā ikuai va'e gui SENHOR ojeguaru ete 'rā,
ha'e rā anhetē rupi ikuai va'e ma oguerovy'a 'rā.
- ²¹ Heko vai va'e nombopagaa e'ŷi 'rā, jaikuua,
ha'e rā heko porā val'e kuery regua ma oo jepe 'rā.
- ²² Ouro guigua ma poryko x̄i jeguarā oĩ ramo nda'evei.
Ha'e rami ae kunha porā re hi'arandu e'ŷa oĩ ramo nda'evei.
- ²³ Heko porā va'e oipotaa rami vy oiko 'rā nhomoingo porāarā,
ha'e rā heko vai va'e ma mba'emo oarō va'ekue 'rāgue py oiko 'rā imbopagaarā.
- ²⁴ Joupe mba'emo ome'ẽ rive-rive'i va'e ojou retave 'rā heravy,
ha'e rā nome'ẽ rivexei va'e ma oipotapa rei 'rā.
- ²⁵ Imba'eme'ẽ porā kuaa va'e ma oiko porā 'rā,

- joupe oy'u va'erã ome'ẽ va'ekue ju omboy'ua 'rãe.
- ²⁶ Mba'emo aju nomboja'oxei va'e re ma heta va'e kuery ijayvu vai 'rã okuapy,
ha'e rã ivendeare ma ogueroayvu porãa 'rã.
- ²⁷ Joupe ojapo porãa rupi ikuai va'e omboetea 'rã,
ha'e rã teko vai rupi rive ikuai va'e ma ha'e kuery re ae ju 'rã ojeapa heko vaiague.
- ²⁸ Ombo'a rei-rei re rive ojerovia va'e ho'a 'rã,
ha'e rã heko porã va'e ma ijaguyje 'rã mba'emo rogue ipyaupaa rami.
- ²⁹ Ngopygua kuery ndoguerekoo kuaai va'e ojou 'rã vytyu rive,
ha'e hi'arandu e'ŷ va'e ikuai 'rã hi'arandu va'e rembiguairã.
- ³⁰ Heko porã va'e ma vyryra'a tekove me'ea rami ikuai,
tekoverã joua ma hi'arandu va'e ae vy ma 'rã.
- ³¹ Yvy re heko porã va'e ikuai teria ja ombopagaa 'rã.
Heko vai ha'e ojejavypa rei va'e kuery katuve ma ombopagaa 'rã.*

12

- ¹ Onhemoo'arandu uka va'e oguerovy'a 'arandua,
ha'e rã nonhemongeta ukai va'e ma hi'arandu e'ŷ va'e ae.
- ² Heko porã va'e oupity 'rã SENHOR omboaxya,
ha'e rã opa marã rei onhembopy'a va'e ma ombopaga 'rã.
- ³ Avakue ojejavvy reia rupi ikuai va'e noĩ atã kuaai 'rã,
ha'e rã heko porã va'e ma ndoipe'aai 'rã.
- ⁴ Kunhague hi'arandu va'e ma ime oguerovy'a 'rã,
ha'e rã oximba rei aguã rami ikuai va'e ma ikägue omou'ümbe heravy va'e rami.
- ⁵ Heko porã va'e ipy'a 'rã ha'evea rupi anho,
ha'e rã heko vai va'e ma nhombotavya rupi rive 'rã nhomongeta.
- ⁶ Heko vai va'e ayvu ma joguy omoëxe vy oma'ẽ mbegue va'e rami,
ha'e rã heko porã va'e ayvu ma jogueraa jepearã.
- ⁷ Heko vai va'e oitya rã noïvei ma 'rã,
ha'e rã heko porã va'e ramymimo kuery ma ikuai riae 'rã.
- ⁸ Avakue hi'arandu va'e re ima'endu'a porãa 'rã,
ha'e rã opa marã onhembopy'a va'e ma ojou vaia 'rã.
- ⁹ Nhanhemboyvate rei teī karuai nhaendu jepi 'rãgue py
ha'evee nhanhemoo'yvy'i reve nhamba'epo jaikovy aguã.
- ¹⁰ Heko porã va'e opena porã 'rã guymba kuery re,
ha'e rã heko vai va'e py'a re ma nhomoingo axyxea rive oĩ.
- ¹¹ Oyvy re omba'epo va'e oguerekoo reta 'rã tembi'u,
ha'e rã hi'arandu e'ŷ va'e kuery ma mba'emo rive ojou aguã rupi ikuai.
- ¹² Heko vai va'e ikuai 'rã teko vairã joua rupi rive,
ha'e rã heko porã va'e ma yvyra hapo porã ha'e hi'a porã va'e rami.
- ¹³ Heko vai va'e onhembo'a uka 'rã ha'e ae ijayvua py,
ha'e rã heko porã va'e ma oo jepe 'rã ojexavai aguã gui.
- ¹⁴ Avakue ijayvu porãa rupi ojou 'rã imoingo porãarã,
peteï-teī ojou 'rã opo py ojapoague repy.
- ¹⁵ Hi'arandu e'ŷ va'e ma ojeupe ae ha'evea rami merami oiko,
ha'e rã hi'arandu va'e ma omongoetaa rã ojapyxaka pota 'rã.
- ¹⁶ Hi'arandu e'ŷ va'e ma opoxya oexa uka vyvoi 'rã,
ha'e rã hi'arandu va'e ma hexe ijayvua teī ojejoko kuaa 'rã.
- ¹⁷ Anhetã rupi ijayvu va'e ojapo ha'evea rami oikuuaa potaa aguã rami,
ha'e rã ijapu va'e ma ojapo nhombotavypaa aguã rami.
- ¹⁸ Kyxe xĩ py rami avi ijayvuxa va'e ayvu nhomboperepa 'rã,
ha'e rã hi'arandu va'e ayvu ma moã.

* 11:31 1 Pedro 4.18

- ¹⁹ Anhetē rupi ijayvu va'e ikuai riae 'rā,
ha'e rā ijapu va'e ma xapy'a'i guarā rive.
- ²⁰ Heko vai va'e py'a re oī nhombotavy aguā rive,
ha'e rā peteī rami ikuai aguā re nhomongeta va'e ma oendu 'rā ov'y'aa.
- ²¹ Heko porā va'e re mba'emo vai ndoikoi 'rā,
ha'e rā heko vai va'e re ma imoingo axyarā rive 'rā ou.
- ²² Ijapu va'e gui SENHOR ojeguaru,
ha'e rā anhetē rupi ikuai va'e ma oguerovy'a.
- ²³ Hi'arandu va'e ndoikuua ukapa rei 'rā mba'emo oikuua va'e,
ha'e rā hi'arandu e'ŷ va'e ma oexa ukapa vyvoi 'rā o'arandu e'ŷa.
- ²⁴ Ikyre'ŷ va'e ipo'aka 'rā joe,
ha'e rā inhate'ŷ va'e ma omomba'epo nhea'āa rive 'rā.
- ²⁵ Avakue py'a re heko eta reia oī va'e ombojero'a rei 'rā,
ha'e rā ayvu porā'i ma ombovy'a 'rā.
- ²⁶ Heko porā va'e oguereko 'rā heravy oirū kuery,
ha'e rā heko vai va'e kuery ma ojavy uka 'rā tape.
- ²⁷ Inhate'ŷ va'e ndoexyi 'rā xo'o ojuka va'ekue,
ha'e rā ikyre'ŷ va'e ma mba'emo ojou va'ekue ombovare ete 'rā.
- ²⁸ Teko porā rupi oo va'e ojou 'rā tekove,
ha'e va'e tape rupi manoia noi.

13

- ¹ Ta'y hi'arandu va'e oendu pota porā 'rā tuu ombo'e rā,
ha'e rā jojojai rei va'e ma noendu potai 'rā omongetaa rā.
- ² Avakue ijayvu porāa rupi vy ojou 'rā iporā va'e,
ha'e rā anhetē rupi e'ŷ ikuai va'e ma joguero'axe vai rive.
- ³ Ayvu py ojejoko va'e omoī atā 'rā guekovea,
ha'e rā ijayvu katu raxa va'e ma ha'e ae onhemoī vai.
- ⁴ Inhate'ŷ va'e ma mba'emo oipota rei teī ndojoui 'rā,
ha'e rā ikyre'ŷ va'e ma ojoupave 'rā mba'emo.
- ⁵ Heko porā va'e ndojou porā'i 'rā apu,
ha'e rā heko vai va'e ma oxīmba rei 'rā, ojou vaipy ae vy.
- ⁶ Teko porā ogueraa jepe 'rā anhetē rupi ikuai va'e,
ha'e rā ojejavypa rei va'e ma tekovai oity 'rā.
- ⁷ Amongue ma "Arekopa" he'i va'eri mba'eve oguereko vy e'ŷ,
ha'e rā amboae kuery ma "Xeporiau'i" he'i va'eri opa mba'e oguereko.
- ⁸ Avakue oguerekopa va'e ome'ẽmba 'rā guekovia,
ha'e rā iporiaukue'i ma avave nomoangekoai 'rā.
- ⁹ Heko porā va'e rataendy hexakā porā 'rā,
ha'e rā heko vai va'e rataendy ma oguepa rive 'rā.*
- ¹⁰ Jajejou porā reia ma joe nhapu'ā rei aguā rive oī,
teī nhanhemoneta uka vy ma jajou 'rā 'arandu.
- ¹¹ Mba'e rei-rei jajou rive va'ekue opa rive avi 'rā,
ha'e rā nhamba'eapoa rupi jajou va'ekue ma hetave 'rā ov'y.
- ¹² Mba'emo nharoj jaikovya ndoiko voi ramo nhandekuerai 'rā,
teī jaipota va'ekue ojeupity rā vyvra tekove me'ēa rami oī.
- ¹³ Omongetaa rā noendu potai va'ekue ombopagaa 'rā,
ha'e rā ijayvua oendu vy ojererokyjea rupi ikuai va'e pe ma ome'ēa reta 'rā.
- ¹⁴ Hi'arandu va'e nhanembo'ea ma tekoverā me'ēa,
nhuā manoia gui jaa jepe aguā.
- ¹⁵ Hi'arandu porā va'e omboetea 'rā,

* 13:9 "Hataendy" he'ia py ma tekove re ijayvu vy.

- ha'e rā anhetē rupi e'ŷ ikuai va'e reve ma nda'evei nhandekuai aguā.
- ¹⁶ Hi'arandu va'e ha'e javi oiko kuaa 'rā,
ha'e rā hi'arandu e'ŷ va'e ma oexa uka 'rā o'arandu e'ŷa.
- ¹⁷ Heko vai va'e pe mba'emo omombe'u ukaa ramo oiko 'rā mba'emo vai,
ha'e rā ojeroviapy pe ri omombe'u ukaa ramo ma moā rami oiko.
- ¹⁸ Omongetaa rā noendu potai va'e ma iporiau ha'e oxīmba rei aguā rami ikuai,
ha'e rā omongetaa rā oendu porā pota va'e ma omboetea 'rā.
- ¹⁹ Jaipota va'ekue oiko ramo javy'a 'rā nhandepy'a py,
ha'e rā hi'arandu e'ŷ va'e ma ojeguaru 'rā gueko vaia gui ojepe'a va'e gui.
- ²⁰ Hi'arandu va'e reve ikuai va'e hi'aranduve 'rā,
ha'e rā hi'arandu e'ŷ va'e reve onhemoirū va'e ma ojexavai rive 'rā.
- ²¹ Mba'emo vai oupity 'rā ojejavypa rei va'e,
ha'e rā heko porā va'e pe ma mba'emo porā anho 'rā ome'ēa.
- ²² Avakue heko porā va'e ma gua'y ra'y kuery pe 'rā oeja ombo'e rei-reikue,
ha'e rā ojejavypa rei va'e mba'e rei-reikue ma heko porā va'e peguarā ae 'rā opyta.
- ²³ Iporiaukue'i oyvy omboa'eve ramo'lague py opa mba'e hi'a porā 'rā,
ha'e rā teko porā rupigua ndoikoi ramo oipe'apaa 'rā.
- ²⁴ Gua'y kuery noinupā potai va'e ma ndoayvui vy,
ha'e rā oayvu vy are e'ŷ re omo'arandu pota 'rā.
- ²⁵ Heko porā va'e oguereko reta 'rā ho'u va'erā,
ha'e rā heko vai va'e ma oendu 'rā karuui.

14

- ¹ Kunha hi'arandu va'e ojapo porā 'rā ngoorā,
ha'e rā hi'arandu e'ŷ va'e ma opo py ae ngoo ombovaipave 'rā heravy.
- ² Heko porā va'e ma SENHOR renonde ojererokyjea rupi 'rā ikuai,
ha'e rā tape vai rupi ikuai va'e ma omboete e'ŷ va'e.
- ³ Hi'arandu e'ŷ va'e oiko axy 'rā ojejou porā reia rupi ijayvuague py,
ha'e rā hi'arandu va'e ma ijayvu porāague py oo jepe 'rā.
- ⁴ Toro ra'y ombo'eapo va'e ndoikoi rā mba'emo ra'yī mboapy'i ae 'rā jareko nhamoī
porāaty py,
ha'e rā toro ra'y ovare va'e jareko vy nhamono'ō retave 'rā.
- ⁵ Anhetē rupi joeko mombe'ua nda'ijapui 'rā,
ha'e rā anhetē rupi e'ŷ nhomombe'u va'e ma opa mba'e py 'rā ijapu.
- ⁶ Jojojai rei va'e o'arandurā oeka teī ndojou 'rā,
ha'e rā hi'arandu va'e pe ma ndaxyi 'rā mba'emo oikuua aguā.
- ⁷ Ejepe'a ke avakue hi'arandu e'ŷ va'ea gui,
mba'eta ha'e kuery ijayvu teī peteīve henda py ndereikuua porāi 'rā.
- ⁸ Hi'arandu va'e oexa uka o'arandua ojee ae oikuua potaa py,
ha'e rā hi'arandu e'ŷ va'e ma ijarakuua e'ŷa py ojekore.
- ⁹ Hi'arandu e'ŷ va'e ojejavy teī "Mba'e'ŷ" he'i rive 'rā,
ha'e rā heko porā va'e ma joayvua rupi 'rā ikuai.
- ¹⁰ Nhandepy'a re nda'eveia oī va'e nhande ae 'rā nhaendu,
ha'e javy'aa voi ndajaexa uka kuaai 'rā jaexa va'ety e'ŷ pe.
- ¹¹ Heko vai va'e kuery ro ombovaipaa 'rā,
ha'e rā heko porā va'e roguy rupi ma ipotypa 'rā.
- ¹² Oī tape jaexa rā ha'eve rei va'e merami,
ha'e rami teī opaa py ma nhandereraa 'rā manoa katy.
- ¹³ Nhanderory rei reve teī nhandepy'a py ma ndajavy'ai,
javy'aa opa ramove mboriau ju 'rā nhaendu.
- ¹⁴ Opy'a py anhetē rupi e'ŷ ikuai va'e ojopy 'rā ikuaiague repy ha'e javi,
heko porā va'e oiko porāague repy ojopy va'erā ramigua e'ŷ.
- ¹⁵ Hi'arandu e'ŷ va'e ma ijayvua rā oendu vy ogueroviapa rei 'rā,

- ha'e rā hi'arandu va'e ma oikuua pota 'rā oiko aguā re.
- ¹⁶ Hi'arandu va'e oikuua pota vy ojepe'a 'rā mba'emo vai gui,
ha'e rā hi'arandu e'ŷ va'e ma ivai vyvoi 'rā ojee ae rive ojerovia vy.
- ¹⁷ Ipoxy rei rive va'e opa marā 'rā ikuai,
avakue joapo vai rei va'e re nda'ija'eai 'rāe.
- ¹⁸ Hi'arandu e'ŷ va'e ma 'arandu rupi e'ŷ 'rā ikuai,
ha'e rā hi'arandu va'e ma oiko kuaa-a py ijegua.
- ¹⁹ Heko vai va'e guenapy'ā re 'rā oī heko porā va'e renonde,
anhetē rupi e'ŷ oiko va'e ojerure 'rā oiny heko porā va'e rokē py.
- ²⁰ Iporiaukue'i re hoo katy'igua kuery ae voi nda'ija'ei 'rā,
ha'e rā oguerekopa va'e ma irū reta 'rā.
- ²¹ Ngoo katy'i rupi ikuai va'e re ija'e'ŷ va'e ojejavy,
ha'e rā iporiaukue'i mboaxyia ma ovy'a 'rā.
- ²² Mba'emo vairā rupi rive onhembopy'a va'e ndojejavyi 'rā teve?
Ha'e rā iporā re nhanhembopy'a ramo nhanderayvua ha'e ojeroviaa 'rā nhandere.
- ²³ Nhamba'eapoa ha'e javi rupi jajou retave 'rā,
teī nhandeayvu katu rivea py ma nhandeporiauve rive 'rā.
- ²⁴ Hi'arandu va'e mba'e rei-rei retaa ijegua 'rā,
ha'e rā hi'arandu e'ŷ va'e pegua ma nda'ijarakuaai reia.
- ²⁵ Anhetē va'e rupi joeko mombe'ua ma ogueraa jepe 'rā joekove,
ha'e rā ijapu rei va'e ma nhombotavypa rive 'rā.
- ²⁶ SENHOR renonde jajererokyjea rupi vy jajou nhanhemi aguā imbaraete va'e,
nhandera'y kuery voi ojou 'rā onhemi aguā.
- ²⁷ SENHOR renonde jajererokyjea rupi vy jaupity 'rā yvu tekove me'ēa,
nhuā manoia py ja'a e'ŷ aguā.
- ²⁸ Huvixa pegua kuery heta ramo oguerovy'a 'rā,
ha'e rā oatapa ramo huvixa nda'evei rei 'rā.
- ²⁹ Ivai rive e'ŷ va'e ma opa mba'e py oexa uka 'rā o'arandu,
ha'e rā ipoxy rive va'e ma oguerovy'a 'rā hi'arandu e'ŷa rive.
- ³⁰ Ha'eve rei'ia nhaendu vy nhanderete ha'e javi oiko porā 'rā,
ha'e rā joe nhanda'e e'ŷa py ma nhanekāgue hu'ūmbaa rami.
- ³¹ Iporiaukue'i momboriau reia kuery ma Imoingoare re voi opu'ā rei,
ha'e rā iporiaukue'i mboaxyia kuery ma Nhanderuete mboetea rupi avi ikuai.
- ³² Heko vai va'e ho'a 'rā gueko vaia py ae,
ha'e rā heko porā va'e ma omanoa py voi oguerekō 'rā oarō aguā.
- ³³ Hi'arandu va'e py'a re oī hi'arandua,
ha'e rā heko vai va'e py'a re oī va'e ma oikuua pavē 'rā.
- ³⁴ Peteī-teī regua teko porā rupi ikuia py yvateve 'rā,
ha'e rā jejavya re anho ikuai va'e ma ojou vai pavē 'rā.
- ³⁵ Huvixave oguerovy'a 'rā tembiguai kuery hi'arandu va'e,
ha'e 'rā ha'eve'ŷa rami ikuai va'e ma ombopaga vaipa 'rā.

15

- ¹ Nhambovai porā'i ramo ipoxy va'e optyu'u 'rā ipoxya gui,
va'eri nhandeayvu poyi rei vy ma nhambopoxyve 'rā.
- ² Hi'arandu va'e ijayvu rā jajou porā 'rā hi'arandua,
ha'e rā hi'arandu e'ŷ va'e ijayvu rā jaikuaa 'rā nda'ijarakuaaia.
- ³ SENHOR oexa 'rā opa rupi,
heko vai va'e ha'e heko porā va'e kuery ha'e javi re onhangareko oiny vy.
- ⁴ Ayvu porā ma yvyra tekove me'ēa,
ha'e rā ayvu vaikue rei ma nhanemonguerai rive 'rā.
- ⁵ Hi'arandu e'ŷ va'e ma tuu ombo'e ta teī noenduxei 'rā,

- ha'e rā omongoetaa rā oendu va'e ma oupity 'rā 'arandu.
- ⁶ Heko porā va'e ro py heta 'rā oī iporā va'e anho,
ha'e rā heko vai va'e ma ojou 'rā ojexavai aguā rive.
- ⁷ Hi'arandu va'e ijayvua py oexa uka 'rā hi'arandua,
ha'e rā heko vai va'e ma ha'e ramigua re'ŷ ae ipy'a.
- ⁸ Heko vai va'e SENHOR pe mba'emo ome'ẽ teĩ ojeguaru 'rā,
ha'e rā heko porā va'e onhembo'ea oendu vy oguerovy'a 'rā.
- ⁹ Heko vai va'e reko gui SENHOR ojeguaru,
ha'e rā teko porā rupi ikuai va'e ma oayvu.
- ¹⁰ Tape porā gui ojepe'a va'e ma ombopagaa raxa 'rā,
omongoetaa rā noenduxei va'e omano 'rāe.
- ¹¹ Yvy manoa ha'e ikua vaikue SENHOR oikuaapa va'e vy
avakue ra'y kuery py'a re oī va'e katuve ma oikuaapa!
- ¹² Jojojai rei va'e ma imongoetaa re nda'ija'ei 'rā,
neĩ nonhembojai 'rā hi'arandu va'e re.
- ¹³ Nhandepy'a re vy'a oī va'e ojapo 'rā nhanderova porā rei aguā rami,
ha'e rā nhandeporiau reia ma nhanemonguerai reive 'rā.
- ¹⁴ Hi'arandu va'e py'a re oī oiko kuaaxe,
ha'e rā hi'arandu e'ŷ va'e ijayvua py voi nda'ijarakuaaive tema.
- ¹⁵ Ojexavai rei va'e ára ma nda'evei va'e meme,
ha'e rā nhandepy'a py mby'a oī vy ojapo 'rā nhanhenhandu porā riae aguā rami.
- ¹⁶ Jarekopa reve nhanderekota rei 'rāgue py
ha'eveve nhandeporiaukue'i teĩ SENHOR renonde jajererokyjea rupi jaiko.
- ¹⁷ Jajoayvua rupi e'ŷ vaka ikyrave va'e ro'o mbixy ja'u 'rāgue py
ha'eveve tembi'u jaexa'i va'e tema ja'u jajoayvua rupi.
- ¹⁸ Ivai ja rei va'e jogueropoxy rive 'rā,
ha'e rā ivai rive e'ŷ va'e ma nhomombytu'u 'rā joguero'aa gui.
- ¹⁹ Inhate'ŷ va'e oikoa ma tape juu anho ikuaia rami,
ha'e rā heko porā va'e oikoa ma tape ijoja porā va'e rami.
- ²⁰ Ta'y hi'arandu va'e ombovy'a 'rā nguu,
ha'e rā hi'arandu e'ŷ va'e ma neĩ oxy voi ndoayvui.
- ²¹ Hi'arandu e'ŷ va'e oguerovy'a rei 'rā ijarakuaa e'ŷa,
ha'e rā avakue hi'arandu va'e ma ha'evea rami 'rā ikuai.
- ²² Nhanemongetaarā ndoikoi ramo jaipota va'e voi ndoikoi avi 'rā,
ha'e rā nhanemongetaa heta ikuai rā ha'eve 'rā.
- ²³ Avakue ha'evea rami ombovai vy ov'y'a 'rā,
ayvu oī porā aguā rami ijayvua py.
- ²⁴ Hi'arandu va'e tape ooa va'e ma yvate 'rā oo tekove katy,
manoa katy oguejy ov'y'a 'rāgue py.
- ²⁵ SENHOR oitypa 'rā ojejou porā rei va'e ro,
ha'e rā imeve'ŷ va'e kuery pegua ma omoī atā 'rā.
- ²⁶ SENHOR ojeguaru heko vai va'e kuery onhembopy'aa gui,
ha'e rā ayvu porā ma oendu vy oguerovy'a 'rā.
- ²⁷ Jokorea rupi ojou-joupavexe va'e ombojexavai 'rā ngoo pygua kuery,
ha'e rā teko vai rekoviārā ndojopyi va'e ma oikove riae 'rā.
- ²⁸ Heko porā va'e onhembopy'a porā ranhe 'rā ombovai kuaa aguā,
ha'e rā heko vai va'e ma opa marā rei 'rā ijayvu.
- ²⁹ Heko vai va'e ikuaiia gui SENHOR mombyry oī,
ha'e rā heko porā va'e onhembo'ea ma oendu 'rā.
- ³⁰ Nhandererovy'aa rupi oma'ēa ramo javy'a 'rā,
ayvu porā omombe'ua rā nhaendu vy nhanekāgue rupi voi nhanembaraeteve avi
'rā.

- ³¹ Ha'evea rupi nhanemongetaa rā jajapyxaka vy
hi'arandu va'e kuery reve 'rā nhanhemoirū.
- ³² Nonhemo'arandu ukai va'e ha'e ae guekove nombovarei,
ha'e rā omongetaa rā oendu pota va'e ma ojou 'rā 'arandu.
- ³³ SENHOR renonde jajererokyjea rupi jaiko ramo nhanembo'e 'rā 'arandu re,
ha'e nhanhemo'yvyī'i ramo nhanemboetea 'rā.

16

- ¹ Nhande nhanhembopy'a 'rā mba'emo jajapo aguā,
ha'e rā SENHOR gui ae 'rā ou nhambovai kuaa aguā.
- ² Nhandevy ma jaikoa ha'e javi ha'evepa rei teī
SENHOR oikuua pota 'rā nhandepy'a re.
- ³ Emboaxa SENHOR po py mba'emo rejapoxe va'e,
ha'e ramo omoingo 'rā reipotaa ha'e javi.
- ⁴ SENHOR opa mba'e omoingo ha'e ae oipotaa rami,
heko vai va'e voi omoingo ojexavai aguā.
- ⁵ Opy'a py ojejou porā rei va'e gui SENHOR ojeguaru vy
nombopaga e'ŷi 'rāe.
- ⁶ Nhanhomboaxya ha'e anhetē rupi jaiko ramo jajeavyague ojao'ipaa 'rā,
SENHOR renonde jajererokyjea rupi vy jaa jepe 'rā mba'emo vai gui.
- ⁷ Xapy'a rei ava oikoa SENHOR oguerovy'a vy
ojapo 'rā ngovaigua kuery reve voi irū jevy aguā rami.
- ⁸ Jarekopa rei reve teko vai rupi jaiko 'rāgue py
ha'eveve mboapy'i jareko reve teko porā rupi jaiko.
- ⁹ Jaiko aguā re nhande nhanhembopy'a teī
jaguataa rupi nhanderereko va'e ma SENHOR ae.
- ¹⁰ Huvixa ijayvu 'rā oikuapaa rupi ae.
Ha'e ramo nemboayvu rā ejavy eme ndeayvua py.
- ¹¹ SENHOR gui ae 'rā ou ha'evea rami mba'emo japeja ha'e nha'anga aguā,
voko py ha'evea ramigua poyia oī va'e ma ixuguigua meme.
- ¹² Huvixa kuery ojeguaru 'rā teko vai ha'e javi gui,
gueko porāa rupi ae 'rā opena oiny.
- ¹³ Anhetē rupigua ayvu huvixa oendu vy oguerovy'a 'rā,
oayvu 'rāe anhetē rupi ijayvu va'e.
- ¹⁴ Huvixa ipoxya nhaendu vy jaikuua 'rā jojuka ukaxea,
teī ha'e ramia gui hi'arandu va'e omombytu'u kuaa 'rā.
- ¹⁵ Huvixa ov'y'a ramo jaikuua nhomoingove ju aguā.
Iporayvua ma ára pyau py arai gui okya rami.
- ¹⁶ Ouro jajoua gui ha'eveve nhane'arandurā jajou,
prata gui ha'eveve va'e ma jaiko kuaavea.
- ¹⁷ Heko porā va'e oikoa ma teko vairā katy e'ŷ 'rā oo,
oiko aguā oikuua pota porā va'e ma ogueraa jepe 'rā guekove.
- ¹⁸ Jajejou porā reia ma opaa py nhanembojexavai 'rā,
ha'e nhandepy'a py nhanhemboyvate reia ma nhandereityarā oī.
- ¹⁹ Yvatekueve reve mba'emo jajoupa va'ekue nhamboja'o 'rāgue py
ha'eveve yvyīgueve'i reve nhanhemo'yvyī'i.
- ²⁰ Ombo'ea rā ojapyxaka va'e ojou 'rā mba'emo porā,
ha'e SENHOR re ojerovia va'e ov'y'a ete 'rā.
- ²¹ Okuraxō py hi'arandu va'e pe "Oiko kuaa va'e" 'ea 'rā,
ha'e ijayvu porā kuaa va'e ma nhombo'e porā 'rā.
- ²² 'Arandu ojou va'e pe ma tekove me'earā oī,
ha'e rā hi'arandu e'ŷ va'e ma opaga 'rā nda'ijarakuaai reiague re.

- ²³ Hi'arandu va'e okuraxõ py onhembo'e ranhe 'rã ijayvu kuaa aguã,
ha'e ramo onhe'ẽ rendu pavẽ 'rã.
- ²⁴ Ayvu porã ma ei he'ëa rami oĩ nhanekuraxõ re,
moã nhanderete moexaãa rami guive.
- ²⁵ Oĩ tape avakue oexa rã ha'eve rei va'e merami teĩ
opaa py ma manoa katy 'rã ogueraa.
- ²⁶ Om̄ba'eapo va'e ma nhembyayi gui ae 'rã om̄ba'eapo,
okaruxea ae omokyre'ŷ.
- ²⁷ Avakue vare'ŷ va'e onhea'ã 'rã okuapy teko vai re anho,
ha'e ijayvua ma tata mba'emo rapyarã.
- ²⁸ Avakue heko vai va'e ojapo 'rã joguero'a rei aguã rami,
ijayvu rei va'e ma joe irũ porã va'ekue teĩ omomboi 'rã joegui.
- ²⁹ Avakue ojerovia rei va'e oirũ kuery ombotavy vy
ogueroko 'rã tape vai rupi.
- ³⁰ Oxapymi rei va'e onhembopy'a 'rã oiny teko vai re,
ha'e gui onhembexu'u reve ojapo ete 'rã.
- ³¹ Omboetepy 'a xiãa ma ijeguarã oĩ,
tape teko porã katy oo va'e rupi oje'oi va'e pegua ae.
- ³² Joe nhapu'ã rei aguã re jajerovia rei 'rãgue py ha'eveve nhandevai vyvoi e'ŷa,
tetã ha'e javi re nhandepo'aka 'rãgue py ha'eveve nhande ae jajejoko kuaa.
- ³³ Xortea jaexa teĩ
SENHOR gui meme ou jaikuaa aguã.

17

- ¹ Nhandero py jajoguero'apa rei reve xo'o ja'u vaipa 'rãgue py
ha'eveve nhandekuai rivea py pete'i'i mbojape ja'u.
- ² Ta'y kuery oximba aguã rupi ikuai va'e gui ma tembiguai kuery hi'arandu va'e ipo'akave
'rã,
ha'e rami vy ojopy 'rã ta'y kuery peguarã va'ekue ae.
- ³ Prata ma hi'angaarã py 'rã nhamoï, ha'e ouro ma tata py,
ha'e rã nhandepy'a re oikuua pota va'e ma SENHOR ae.
- ⁴ Heko vai va'e ojapyxaka 'rã mba'emo vai rupi ijayvu va'e re,
ijapu va'e oenduxe vai 'rã ayvuxe.
- ⁵ Iporiaukue'i jojai reia kuery ma Imoingoare re voi ijayvu rei rire
jexavaia oguerovy'a rei va'e ndopaga e'ŷi 'rã.
- ⁶ Tamoï kuery oguerovy'a 'rã guamymino kuery,
ha'e rami ae avi ta'y kuery oguerovy'a 'rã nguu kuery.
- ⁷ Hi'arandu e'ŷ va'e nda'ijayvu porã kuaai 'rãe,
ha'e huvixa kuery nda'evei ijapu aguã.
- ⁸ Ha'eve'ŷa rami ojapo ukaxe vy mba'emo ome'ẽ va'e oikuua teĩ oipota va'e rei ita ojapoa
rami,
mba'eta mamo rã oikoa py tema oipotaa oiko 'rã.
- ⁹ Amboae kuery ojejavyague ndoikuua ukai va'e oexa uka oayvua,
ha'e rã mba'ekue omboaxa-axa rei va'e ma ojapo 'rã joe irûve va'ety joegui oja'o
aguã rami.
- ¹⁰ Hi'arandu e'ŷ va'e cem-kue oinupãa teĩ noendui 'rã merami,
ha'e rã hi'arandu va'e ma omongetaa rã oenduxe ete 'rã.
- ¹¹ Nanhonhe'ẽ rendui va'e kuery onhea'ã mba'emo vai re anho.
Ha'e nunga rupi ha'e kuery rovai omboua 'rã imbojexavaiarã.
- ¹² Urso gua'y'i re inharõ va'e reve nhanhovaexia gui nda'eveive
hi'arandu e'ŷ va'e ijarakuaa rupi e'ŷ ikuai va'e reve nhanhovaexi.
- ¹³ Amongue pe ojapo porãa 'rãgue py mba'emo vai re omboekovia rire
hoo py oiko riae 'rã mba'emo vai.

- ¹⁴ Yy ombotyague gui oxyry xapy'aa rami avi jajoguero'a ypya.
 Ha'e nunga rupi ha'eveve japytu'u voi, joegui jaja'o e'ŷ aguã.
- ¹⁵ SENHOR ndojou porã'i 'rã heko vai va'e omboeko porã rivea rã,
 neĩ heko porã va'e ombopaga rivea rã guive.
- ¹⁶ Hi'arandu e'ŷ va'e o'arandurã ojoguaxe vy merami peráta oguereko opo py,
 nai'arandui ae ma va'eri.
- ¹⁷ Nhaneirũ kuery nhanderayvu 'rã jaikoa jave re,
 ha'e rami vy jajexavaia py onhemoingo 'rã nhaneretarã ae'i rami.
- ¹⁸ Avakue hi'arandu e'ŷ va'e onhemoĩ vai uka rive vy
 ojea katy'igua orevea opaga aguã rami ikuai.
- ¹⁹ Joguero'a reixe vai va'e ojejavy reia rupi rive 'rã ikuai,
 ha'e ngokẽ ombotuvixa va'ekue py ae 'rã ojeity uka.
- ²⁰ Anhetẽ rupi e'ŷ ipy'a va'e ndojoui 'rã ha'eve va'e,
 peteĩ rupi e'ŷ ijayvu va'e ho'a 'rã mba'emo vai py.
- ²¹ Ta'y hi'arandu e'ŷ va'e omomboriau 'rã nguu kuery.
 Ndoiko kuaai rei va'e ru kuery ma ndovy'ai 'rã.
- ²² Nhandepy'a py vy'aa ma moã porã rami 'rã oĩ,
 ha'e rã nhanenhe'ẽ py nhandekueraia oĩ vy ma omombirupa 'rã nhanekãgue.
- ²³ Heko vai va'e onhevende nhemi 'rã peráta re,
 ha'eve e'ŷa ramigua rupi joguereko aguã.
- ²⁴ Mba'emo oikuua va'e onhea'ã 'rã hi'aranduve aguã anho,
 ha'e rã hi'arandu e'ŷ va'e ma yvy re mba'emo ikuai va'e re rei 'rã oma'ẽ oikovy.
- ²⁵ Ta'y hi'arandu e'ŷ va'e omomboriau 'rã nguu,
 omonguerai rei avi 'rã hereko'iare.
- ²⁶ Heko porã va'e nhambopaga aguã nda'evei,
 huvixa nhamoingo axy reia ma ha'eve'ŷ va'e ae.
- ²⁷ Ayvu py ojejoko va'e ma hi'arandu va'e,
 oiko rive'i va'e ma oiko kuaa va'e ae.
- ²⁸ Hi'arandu e'ŷ va'e teĩ okyrirĩ oiny rã jaikuua 'rã hi'arandua rami,
 ijayvua py ojejoko va'e jaikuua 'rã oiko kuaa va'e rami ae.

18

- ¹ Joexaxe e'ŷ rei va'e ma ha'e kuery ae oipotaa rami rive ikuai,
 ha'e vy noenduxei 'rã 'arandu anhetẽ ete va'e.
- ² Hi'arandu e'ŷ va'e ndoikuaaxei 'rã 'arandu,
 ha'e kuery ae akã gui rive 'rã ijayvu.
- ³ Teko vai oĩ ramo oĩ avi 'rã jojou vaia,
 ha'e nhaximba aguã rami nhandekuai ramo nanhanemboeteavei ma 'rã.
- ⁴ Avakue ijayvua ma yy typy va'e ramigua,
 ha'e hi'arandu va'e ayvu ma yakã'i oxyry va'e rami 'rã.*
- ⁵ Nda'evei otekoavy va'ekue nhamboko porã aguã,
 neĩ heko porã'i va'e nhambopaga aguã guive.
- ⁶ Hi'arandu e'ŷ va'e ijayvua ojapo 'rã joguero'a rei aguã rami,
 onhenupã ucaa rupi merami ijayvu.
- ⁷ Hi'arandu e'ŷ va'e ayvu ma ha'e kuery ae imombaarã rive,
 ijayvua ma nhuã py inhe'ẽ mbo'aarã.
- ⁸ Ijayvuxe reia ma he'ẽve va'e rami
 oguejy 'rã ipy'apy katy.
- ⁹ Inhate'ŷa rupi rive omiba'epo va'e ma
 mba'emo ojavyky rei va'e regua ae ikuai.

* 18:4 Yy typyve va'e ramigua ayvu ma haxyve va'e (20.5). Ha'e rã yakã'i oxyry ovy va'e ramigua ayvu ma nhanembovy'a va'e.

- ¹⁰ SENHOR rery ma torre imbaraeteve va'e,
ha'e py heko porã va'e onhemi vy oiko porã aguã.
- ¹¹ Oguerekopa va'e pe rã imba'e rei-rei ma tetã ikorapa va'e rami,
ha'e oikuua rã ikora yvate va'e rami ae.
- ¹² Avakue ikuai axy e'ÿa ja ojejou porã rei 'rã opy'a py,
ha'e rã onhemo'yvy'i va'e ma omboetea 'rã.
- ¹³ Nhaendu kuaa e'ÿ re nhambovai vy
nhaxímba rei 'rã nhane'arandu e'ÿa py.
- ¹⁴ Avakue imba'eaxy tei ipy'a guaxua omombaraete 'rã,
ha'e rã onhe'ë py ikueraia ma noguerombaraetei 'rã.
- ¹⁵ Hi'arandu va'e opy'a re omoï 'rã oikuua porâve aguã,
oapyxa rupi voi onhea'ä 'rã oikuua aguã.
- ¹⁶ Joupe avakue mba'emo ome'ë 'rã tape oipe'a uka vy,
yvatekueve reve ijayvu aguã peve.
- ¹⁷ Ha'e ranhe ojepy ukaa rupi ijayvu rã ixupe “Ha'evea ramigua” ja'e ranhe 'rã,
amboae kuery ou vy omboayvu e'ÿa ja.
- ¹⁸ Nhombovake va'e kuery xortea oexa vy opytu'upa 'rã joupe ijayvu atää gui,
ipo'akakueve tei oikuua vyvoi 'rã.
- ¹⁹ Nhanderegua nhambopoxy rire haxy ete 'rã ha'eve vai ju aguã,
ijayvu atää rupi onhemboty 'rã oo ikorapa va'e rokë jokoa rami.
- ²⁰ Nhandeayvuague rami oiko ramo javy'a 'rã nhanekuraxõ py,
nhandeayvua ojeupity ramo jarovy'a 'rã.
- ²¹ Nhandeayvua py jajoapo 'rã omano, e'ÿ vy oikove aguã rami.
Ijayvu porã kuaa va'e oiko porã 'rã.
- ²² Nhandera'xyrã jajou vy mba'emo porã jajou,
ha'e jaupity SENHOR nhanemoingo porãa.
- ²³ Iporiaukue'i ma mba'emo re ojerurea rupi 'rã ijayvu,
ha'e rã oguerekopa va'e ma ombovai atã rei 'rã.
- ²⁴ Avakue irû reta va'e omokanhy tema 'rã imondovy.
Ha'e rami tei peteí oiko avi nhaneirû nhanderegua ae'i gui nhanderayvuve va'e.

19

- ¹ Nanhamboetei 'rã hi'arandu e'ÿ va'e kuery anhetê rupi e'ÿ ijayvu va'e.
Ha'e rã iporiaukue'i va'eri anhetê rupi ikuai va'e ma nhamboete.
- ² Jaikuua porã pota e'ÿ re mba'emo jajapo aguã nda'evei,
mba'eta oikuua pota porã e'ÿ va'e ojejavý 'rã.
- ³ Nhande ae 'arandu e'ÿa rupi vy jajavy 'rã tape,
va'eri SENHOR rovai ae 'rã nhandevai nhandepy'a py.
- ⁴ Oguerekopa rei va'e heta 'rã ojou oirûrã,
ha'e rã iporiaukue'i gui ma irû kuery ae voi ojepe'apa 'rã.
- ⁵ Joekokue ramigua rive mombe'uare ma nombopagaa e'ÿi 'rã,
ha'e apu rupi ijayvu va'e voi ndoo jepei 'rã.
- ⁶ Mba'emo omboja'o-ja'o va'e oguerovy'a pavê 'rã,
mba'emo ome'ë rive va'e re onhemoirû pavê 'rã.
- ⁷ Iporiaukue'i ma hexegua kuery ae'i voi ndoexaxe'i 'rã,
irû kuery katuve ma ojepe'apa 'rã ixugui.
Ha'e kuery rakykue mba'emo re ojerure aguã onha tei ndouptyi 'rã.
- ⁸ O'arandurã ojou va'e ma guekove oayvu vy ae,
mba'emo re oikuua pota porã va'e ojou 'rã ha'eve va'e.
- ⁹ Joekokue ramigua rive mombe'uare ma nombopagaa e'ÿi 'rã,
ijapu rei va'e okanhý 'rãe.
- ¹⁰ Hi'arandu e'ÿ va'e oguerekopa rei aguã nda'evei,

- tembiguai katuve ma nda'eveive huvixa kuery re ipo'aka aguã.
- ¹¹ Jajejokoa rupi vy nanhandevai vyvoi 'rã,
nhandere ijayvu vaiague japerdoaa ma nhandejeguarã oĩ.
- ¹² Huvixa ipoxya ma guary okororõa rami,
ha'e rã iporayvua ma yxapy jai rogue omoakÿa rami.
- ¹³ Ta'y kuery hi'arandu e'ÿ va'e omoximba rei 'rã nguu,
ha'e ta'yxy ijayvu mbegue rei va'e ma otyky tema oiny va'e rami.
- ¹⁴ Nguu kuery gui avakue ojopy 'rã ngoorã ha'e omba'e rei-reirã,
ha'e rã gua'xyrã hi'arandu va'e ma SENHOR gui ae 'rã ojou.
- ¹⁵ Ate'ÿ gui ae nhanderopeyi riae 'rã,
ha'e nhañ rive riae vy nhaendu 'rã karuai.
- ¹⁶ Ojapo uka pyre rami ikuai va'e ma guekove re ae onhangareko va'e,
ha'e rã ojee ndoikuua potai va'e ma omano 'rã.
- ¹⁷ Iporiaukue'i mboaxyia ma SENHOR pe ae oiporuka va'e,
ha'e ramo ha'e ju 'rã omboekovia joapo porãague repy.
- ¹⁸ Ha'eve teri reve emo'arandu ke ndera'y,
tei rejuka aguã peve'ÿ ta'vy.
- ¹⁹ Ivai ja topaga ipoxy reiague re,
mba'eta ndee repy tei ha'ekue rami ae ju 'rã oiko.
- ²⁰ Nemongetaa rã ejapyxaka porã ke, endu pota nembo'ea rã,
hi'arandu va'e reiko aguã reikoa pukukue re.
- ²¹ Avakue ma opa mba'e re onhembopy'a tei,
ha'e rã SENHOR onhembopy'aa ma oiko 'rãe.
- ²² Nhanhomboaxyia rupi nhandekuai ramo nhandererovy'aa 'rã,
ijapu rei va'e 'rãgue py oguerovy'aave 'rã iporiaukue'i.
- ²³ SENHOR renonde jajererokyjea rupi vy jaupity 'rã tekove.
Ha'e rami ikuai va'e ov'y'a 'rã, ha'e kuery re ndoui 'rã mba'emo vai.
- ²⁴ Inhate'ÿ va'e ma hy'a py opo'ë tei
ojuru katy ndogueru potai 'rã.
- ²⁵ Jojojai rei va'ekue nhambopaga ramo hi'arandu e'ÿ va'ekue oexa vy oiko kuaa pota nho
'rã okuapy,
ha'e hi'arandu va'e nhamongeta rã oiko kuaave 'rã.
- ²⁶ Ta'y nguu ojavyky rei, ha'e oxy omoxë rire ma
nomboeteavei ramo oximba rei 'rã.
- ²⁷ Xera'y, nembo'ea nerendu potai ri vy
rejepe'a 'rã nemo'aranduarã va'ekue ayvu gui.
- ²⁸ Heko vai va'e joekokue omombe'ua py ombojaru rei 'rã imboayvua,
heko vai va'e kuery teko vai re anho 'rã ijayvu.
- ²⁹ Jojojai rei va'ekue ma ombopagaa aguã rami ae ikuai,
hi'arandu e'ÿ va'e ma oinupãmbaa aguã rami ikuai.

20

- ¹ Vinho nhomoingo 'rã jojojai rei aguã rupi, iro va'e ma nhomoingo 'rã joguero'a rei aguã
rupi.
Ha'e nunga ha'e javi py ojeity uka va'e ma hi'arandu e'ÿ va'e ae vy ma 'rã.
- ² Guary okororõa rami huvixa oexa uka 'rã opoxya.
Amongue ombopoxyve rive vy ha'e ae rekove rovai ojejavy.
- ³ Avakue omboetepy ojepe'a 'rã joguero'apa reia gui,
ha'e rã hi'arandu e'ÿ va'e ma oike 'rã ov'y ijayvu ete va'e kuery mbyte py.
- ⁴ Inhate'ÿ va'e yro'y py ombo'etyrã ndogueroko katui rire
omono'õ aguã va'ekue py ndojoui 'rã mba'eve.
- ⁵ Avakue py'a re oĩ va'e ma yy typy va'e rami rive,
tei hi'arandu va'e ma oikuua pota kuaa 'rã.

- ⁶ Heta 'rã iporayvua rami rive onhemombe'u,
ha'e rã ava ojeroziapy ete va'e ma mava'e 'rã tu ojou kuaa?
- ⁷ Heko porã va'e anhetẽ rupi 'rã ikuai,
ha'e rire ta'y kuery ju ovya'rã okuapy.
- ⁸ Huvixa nhomboayvuaty py oguapy va'e
oma'ẽ vy rive omomba 'rã mba'emo vai.
- ⁹ Mava'e tu ha'eve 'rã aipoe'i aguã: "Xee ae py'a aiky'a'opa ma vy
iky'a e'ŷ va'e ju aiko ajejavyague gui" he'i aguã?
- ¹⁰ Jokorea rupigua poyia ha'e hyru mba'emo oa'ã pyrã oiporua teĩ
mokoïve ma SENHOR ojeguarua meme.
- ¹¹ Kyrigue teĩ mba'emo ojapoa jaexa vy jaikuua 'rã
ojapo porãa, ha'e ha'evea rami pa oikoa.
- ¹² Nhandeapyxa nhaendu aguã, ha'e nhanderexa jaexa aguã,
SENHOR ojapo va'ekue meme.
- ¹³ Enhembopeyi pota rei eme, iporiau va'e reiko e'ŷ aguã.
Eipe'a nderexa, ha'e vy 'rãe rejou reta tembi'u.
- ¹⁴ Mba'emo ojoguaxe va'e ma ha'e nunga pe "Ovare va'e'ŷ, ovare va'e'ŷ", he'i 'rã.
Ha'e gui ma ojogua ma rire oguerovy'a rei 'rã.
- ¹⁵ Heta oiko ouro ha'e ita iporãve va'e,
ha'e rã 'arandu rupi ijayvu va'e ma ovareve ete va'e.
- ¹⁶ Oreve va'e rekovia opaga aguã rami amongue oiko rire ixugui ijaoo oipe'aa 'rã,
oexa va'ety e'ŷ rekovia onhemoingo va'ekue gui katuve ma oipe'aa 'rã.
- ¹⁷ Jokorepa reia rupi avakue mbojape ojou va'ekue ma hee 'rã merami,
ha'e rami teĩ opaa py ma ita ra'y ku'i rami rive 'rã oĩ ijuru py.
- ¹⁸ Nhanhemongeta ukaa rupi nhanhembopy'aa ma oiko porã 'rã.
Ha'e nunga rupi eikuua pota porã ranhe joe repu'ã aguã.
- ¹⁹ Ijayvu katu raxa va'e omombe'upa 'rã nda'evei rei va'e.
Ha'e nunga rupi neirũ eme ijayvuxre rei va'e re.
- ²⁰ Nguu ha'e oxy re ijayvu vai va'ekue rekovea ogue rive 'rã
tataendy rami pytûve etea py.
- ²¹ Mba'emo jajopy aguã ára ovaẽ e'ŷ re ri jajopy ramo
opaa py noĩ porãi 'rã nhandevy.
- ²² "Xee ae ajepy 'rã mba'emo vai re", 're eme.
Earõ tema SENHOR, ha'e ramo nderepy 'rã.
- ²³ Jokorea rupigua poyia ma SENHOR jeguarua meme,
jokorea rupi mba'emo oa'ãa ma na'iporãi.
- ²⁴ Avakue oguataa rupi SENHOR ae 'rã oguerekoo.
Mba'exa tu ha'e kuery ae oikuua 'rã tape oo aguã?
- ²⁵ Jaikuua pota e'ŷ re mba'emo pe "Iky'a e'ŷ va'e" ja'e vy jajekore 'rã,
nhanhemboayvupa rire mae ma nda'evei ramo 'rã.
- ²⁶ Huvixa hi'arandu va'e oikuua pota kuaa 'rã heko vai va'e re,
ombopaga aguã.
- ²⁷ Nhanenhe'ẽ ma SENHOR ae omoĩ nhanemoexakãarã,
nhandeypy'apy rupi oĩ va'e ha'e javi oikuua uka aguã.
- ²⁸ Huvixa ma porayvua ha'e ojeroziapy oiko vy 'rãe oĩ atã,
nhomboaxyu rupi ipo'akave tema 'rã oiny.
- ²⁹ Kunumigue imbaraetea ma ijeguarã oĩ,
ha'e rã ikakuua jeguaarã ma hi'a xiĩ porãa.
- ³⁰ Nhandeai pore ojapo 'rã mba'emo vai gui iky'a e'ŷ va'e ju jaiko aguã rami,
nhanenupãa ma nhanekuraxõ oĩ porã aguã rami ojapo.

21

- ¹ Yxyry rami huvixa py'a oĩ SENHOR po py,
 mba'eta SENHOR oipotaa rupi ae 'rã oguerek.
- ² Avakue pe rã ikuia ha'e javi ha'evea rami meme,
 ha'e rami tei SENHOR oikuua pota 'rã ipy'a re.
- ³ SENHOR pe mymba nhame'ëa gui
 oguerovy'ave 'rã nhandereko porãa ha'e ha'evea rami jajoguerek.
- ⁴ Jejou porã reia ha'e opy'a py nhemboyvate reia ma
 heko vai va'e kuery pe rã tataendy rami tei jejavya meme.
- ⁵ Oikuua pota porãa rupi onhembopy'a va'e ojoupa 'rã,
 ha'e rã ojapura rei va'e ma iporiau 'rã.
- ⁶ Apu rupi nhanhea'ã vy mba'emo jajoupa va'ekue ma
 opaa py ma mba'everã ndovarei 'rã, ha'e nhanembo'a 'rã manoa nhuã py.
- ⁷ Heko vai va'e ma nhomoingo axyague py ae omombaa 'rã,
 teko porã rupi ndoikoxei rire.
- ⁸ Ava otekoavypa rei va'e oikoa ma ikarë rei,
 ha'e rã heko porã va'e oikoa ma hi'yvi porã.
- ⁹ Nhanderopy kunha ivai ja rei va'e reve nhaïa gui
 ha'evee 'rãgue oo apyte áry nhaï.
- ¹⁰ Heko vai va'e opy'a re omoi 'rã mba'emo vai anho,
 nei nomboaxyi 'rã ngoo katy'igua voi.
- ¹¹ Jojojai rei va'ekue ombopagaa rã hi'arandu e'ÿ va'ekue oexa vy hi'arandu nho 'rã
 okuapy,
 ha'e hi'arandu va'eombo'ea rã oiko kuaave 'rã.
- ¹² Heko vai va'e ngoo py ae ojapo va'e re Heko porã ete va'e oikuua pota vy
 omokanhymba 'rã heko vaia rupi ae.
- ¹³ Iporiaukue'i ojapukaia noendu potai va'ekue ma
 ha'e ju ojapukai rã noendu potaai avi 'rã.
- ¹⁴ Mba'emo nhemi rupi amongue ome'ë rã nhomombytu'u 'rã ipoxy reiague gui,
 mba'emo oexaa py e'ÿ ome'ë rã nda'ipoxy reiavei 'rã.
- ¹⁵ Ha'evea rami jajoguerek ramo heko porã va'e kuery ovyp'a 'rã,
 ha'e rã heko vai va'e kuery ma onhemondyipa rei 'rã.
- ¹⁶ Oiko kuaa rupi oikoa gui ojepe'a va'ekue ma
 omanogue ikuia py 'rã opyta oupy.
- ¹⁷ Vy'aa rive oguerovy'a va'ekue ma iporiaupa 'rã,
 vinho ha'e azeite ho'uxre riae va'e ma mba'eve ndojouvei 'rãe.
- ¹⁸ Heko vai va'e ome'ëa 'rã heko porã va'e rekovia,
 ha'evea rupi ikuai va'e 'rãgue py ha'eve e'ÿa rupi ikuai va'e ojexavai aguã.
- ¹⁹ Kunha ivai rei ha'e ijayvu vaipa-ipa va'e reve nhaï 'rãgue py
 ha'evee peteí yvy tekao e'ÿa py nhaï.
- ²⁰ Hi'arandu va'e ro py oĩ 'rã imba'e rei-rei ha'e ho'u va'erã,
 ha'e rã hi'arandu e'ÿ va'e ma ha'e nunga mokanhymbaa.
- ²¹ Teko porã ha'e porayvua rupi ikuai va'e
 ojou 'rã tekove, teko porã ha'e omboetea aguã.
- ²² Ojerovia rei va'e kuery retã kora re hi'arandu va'e ojeupi vy
 oitypa 'rã ha'e kuery onhemiaty ojeroviavea va'ekue.
- ²³ Ojuru py ijayvu aguã gui ojejoko va'e ma
 ojoko avi onhe'ë imoingo axyarã gui.
- ²⁴ Onhemboyvatea py ojejou porã rei va'e rery ma jojojai rei va'e.
 Ha'e kuery ma ojerovia rei ha'e nda'ija'e rei va'e ae.
- ²⁵ Inhate'ÿ va'e omano 'rã mba'emo oikotevëa py,
 opo py nomba'eapoxei rire.

- ²⁶ Mba'emo omoaruã rei va'e ma ko'ẽ nhavõ 'rã omoaruã,
ha'e rã heko porã va'e ma ome'ẽ 'rã hakate'ŷ reve'ŷ.
²⁷ Heko vai va'e mba'emo ome'ẽ va'e ma jeguarua meme,
otekoavypa rei reve ome'ẽ rã katuve ma.
²⁸ Joekokue ramigua rive omombe'u va'ekue okanhy 'rã,
ha'e rã mba'emo oendu porã va'ekue mombe'ua ma nombovaia kuaai 'rã.
²⁹ Ava heko vai va'e ma ngova re voi oexa uka 'rã ipy'a ratãa,
ha'e rã heko porã va'e ma oikuua pota 'rã oiko aguã re.
³⁰ SENHOR rovai rupi ma ndoikoi 'arandua, neĩ mba'emo kuaapa va'e,
neĩ nhomongeta kuaa va'erã voi.
³¹ Joe opu'ã aguã kavaju oguerekó katupaa teĩ
ipo'aka aguã ma SENHOR gui ae 'rã ou.

22

- ¹ Nhanemba'e rei-rei retaa gui ovareve va'e ma nhanderery re ima'endu'a porãa.
Prata ha'e ouro gui ha'eveve va'e ma nhanemboetea.
² Oguerekopa rei va'e ha'e iporiaukue'i ma pete'i'i guigua meme,
moko'i've moingoare SENHOR ae oiko.
³ Hi'arandu va'e mba'emo vai oexa vy onhemi 'rã,
ha'e rã hi'arandu e'ŷ va'e ma oo tema 'rã ojexavai aguã katy rive.
⁴ SENHOR renonde jajererokyjea rupi vy nhanhemo'yvy'i vy
jaupity 'rã mba'emo porã, nhanemboetea aguã ha'e tekove.
⁵ Heko vai va'e oikoa rupi oĩ nhuã ha'e juu vaikue,
ha'e rã guekovea ombovare va'e ma ha'e va'e gui mombyrya rupi 'rã oo.
⁶ Pembo'e ke kyrigue oiko aguã re.
Ha'e rami rire tuja ma teĩ ndojepe'ai 'rã pembo'eague gui.
⁷ Oguerekopa va'e oguerekó axy 'rã iporiaukue'i,
ha'e nhomba'e oiporu va'ekue ma oiko 'rã iporukaare rembiguai rami.
⁸ Teko vai rive omaõ va'ekue omono'õ 'rã mba'emo vai ae,
ha'e yvyra py nhombojexavaiague opa 'rã.
⁹ Akate'ŷa rupi e'ŷ ome'ẽ va'ekue omoingo porãa 'rã,
iporiaukue'i pe ho'u va'e regua ome'ẽ rire.
¹⁰ Pemoxẽ ke jojojai reiaty, ha'e ramo opa avi 'rã joguero'a reiaty,
opytu'upaa 'rã nda'evei rei ha'e nanhomboetei reiague gui.
¹¹ Opy'a re teko porã anho omoõ reve ijayvu porã kuaa va'e ma
oiko 'rã huvixave irû.
¹² Hi'arandu va'e re SENHOR oma'ẽ vy omoõ atã 'rã,
ha'e rã heko vai va'e ijayvua ma omboaxapa rive 'rã.
¹³ Inhate'ŷ va'e aipoe'i 'rã: "Guary oka py hiny,
tape rupi aa ramo xejuka 'rã", he'i rive 'rã.
¹⁴ Kunha reko rei ijayvua ma yvykua puku rami,
ha'e py ho'a 'rã SENHOR omnopaga aguã rami ikuai va'e.
¹⁵ Kyrigue py'a re oĩ 'rã 'arandu e'ŷa,
teĩ yvyra rovi py nhamo'arandu vy jaipe'a 'rã.
¹⁶ Iporiaukue'i gui omba'e rei-reirã oipe'a va'e,
ha'e oguerekopa va'e pe mba'emo me'ëa kuery ma iporiau va'erã meme.

Nhanembo'ea ha'e nhanemonetaa oïa

- ¹⁷ Ejapyxaka porã ke rendu aguã hi'arandu va'e kuery ijayvua.
Emoõ ndepy'a re mba'emo aikuua uka va'e.
¹⁸ Mba'eta ndepy'a re remoõ ramo nembovy'a 'rã,
ha'e nunga ha'e javi re ndeayvu kuaa aguã.
¹⁹ SENHOR re rejerovia riae aguã rami

- aŷ ame'ẽ ne'arandurã, ndevy ae.
- ²⁰ Xapy'a rei nda'u ndevy namboparai ri ty'y mba'emo iporã ete va'e re,
nhomongetaa ha'e mba'emo kuaa ukaa regua,
- ²¹ ndevy aikuua uka aguã ayvu anhetẽ ete va'e,
nemondoukaare kuery rembovai porã aguã?
- ²² Nemonda eme iporiaukue'i gui, mba'eta iporiaukue'i ae ma,
ojexavai'i va'e ekorepa rei eme guive omboayvua py.
- ²³ Mba'eta ha'e va'e regua ma SENHOR ae oepy 'rã,
ha'e vy oipe'a 'rã imbojexavaire rekove.
- ²⁴ Neirũ eme ivai ja rei va'e re,
neĩ eiko eme avakue ojerovia rei va'e reve,
- ²⁵ ndee avi reiko e'ŷ aguã ha'e kuery reko vaia rupi,
mba'eta ha'e ramia py rembo'a uka 'rã nderekovea.
- ²⁶ Nda'evei ndee voi reiko aguã ha'e ae oĩ vai aguã rami ijayvu va'e regua,
oreve va'e rekovic opaga aguã rami opyta va'e kuery rami,
- ²⁷ mba'eta xapy'a rei nderejoui 'rã repaga aguã.
Mba'e re 'rã tu nderupa reipe'a uka ndeguy gui?
- ²⁸ Erova eme yvy markaarã
neramoĩ kuery yma omo'ã va'ekue.
- ²⁹ Rexa pa avakue ombo'eapo porã kuaa va'e?
Ha'e kuery ma huvixa kuery renonde 'rã omoĩa, yvyīgueve mbyte py e'ŷ.

23

- ¹ Huvixa reve rekaru aguã nemboguapy ri ramo
eikuua pota porã nerondenon py marã ramigua pa oĩ va'e re.
- ² Emboaxa petei kyxe ndejyryvi re,
okaru guaxu va'e ri reiko vy.
- ³ He'uxepa rei eme tembi'u porã omoĩmba teĩ,
mba'eta tembi'u ma nembotavyarã oĩ.
- ⁴ Enhea'ã rei eme rerekopaxea rupi rive,
emoĩ eme ha'e nunga ne'arandua py.
- ⁵ Mba'emo rei re rive teve rema'ẽ riae ta?
Mba'eta anhetẽ ete nemba'e rei-rei okanhymba vyvoi 'rã ipepo va'e rami,
taguato yvate rupi oveve ovya rami.
- ⁶ Nda'evei hakate'ŷ va'e rembi'u re rekaru aguã,
neĩ he'upaxe rei eme tembi'u porã omoĩ teĩ.
- ⁷ Mba'eta ha'e va'e oikuua pota rei 'rã ndere, ha'e ramigua ae vy.
Ndevy pe "He'uve ha'e ey'uve tema" he'i 'rã
teĩ opy'a py anhetẽ rupi e'ŷ oĩ ndereve.
- ⁸ Ha'e gui rembojevypa ju 'rã re'u vaipa vyvoi va'ekue,
ha'e ijayvu porãa rerovy'aague oaxapa rive 'rã.
- ⁹ Ndeayvu eme hi'arandu e'ŷ va'e kuery oendu aguã,
mba'eta oendu rivepa 'rã 'arandu rupi ndeayvua.
- ¹⁰ Perova eme yvy markaarã yma omo'ã mbyre,
neĩ peike eme ta'vy tyre'ŷ kuery yvy re,
- ¹¹ mba'eta ha'e kuery Repyarã ma imbaraete,
ha'e penderovai onhemoĩ 'rã ha'e kuery repyara.
- ¹² Emoĩ ndepy'a re nembo'eague,
ha'e ejapyxaka ayvu mba'emo kuaa ukaa re.
- ¹³ Emo'arandu e'ŷ eme kyrīgue.
Mba'eta yvyra rovi py reinupãa gui rive nomanoi 'rã.
- ¹⁴ Yvyra rovi'i py reinupã vy
inhe'ẽ reraa jepe 'rã omano aguã gui.

- ¹⁵ Xera'y, ndepy'a py ne'arandu ramo
 xee voi xepy'a py roguerovy'a 'rā.
- ¹⁶ Ha'evea rupi ndeayvu ramo
 xepy'apy re avy'a riae.
- ¹⁷ Ndepy'a py eroangecko rei eme ojejavypa rei va'e ikuaria.
 Ha'e rami 'rāgue py SENHOR renonde rejererokyjea rupi eiko ára nhavō.
- ¹⁸ Mba'eta ha'e rami vy 'rāe neronden oī porā,
 ha'e rearō reikovya ndoaxa rivei 'rā.
- ¹⁹ Xera'y, endu ke ne'arandu aguã,
 ha'e ereko nekuraxõ tape hi'yvi va'e rupi.
- ²⁰ Enhemoirũ eme vinho gui oka'u rei va'e kuery reve,
 neĩ xo'o ho'u raxa rei va'e kuery reve.
- ²¹ Mba'eta oy'u raxa ha'e okaru guaxu va'e ma iporiaupa 'rā,
 avakue hopeyi rei va'e ijao vaikue rei 'rā okuapy.
- ²² Endu ke nderu ndere ta'y va'ekue ayvu.
 Ndexy gui nderexarai rei eme guive, guaimi'live'i ma ovv ramo voi.
- ²³ Ejogua ke anhetẽ va'e, ha'e gui emboekovia ju eme.
 Ejogua avi 'arandu ha'e nembo'earā, reiko kuaa aguã.
- ²⁴ Heko porā va'e ru ma ovv'a vaipa 'rā,
 hi'arandu va'e re ta'y va'e ma oguerovy'a 'rā.
- ²⁵ Tandererovy'a nderu ha'e ndexy,
 ejapo ndererekoiare ndererovy'a aguã rami.
- ²⁶ Xera'y, eme'ẽ xevy nekuraxõ,
 ha'e nderexa toguerovy'a xee aikoa.
- ²⁷ Mba'eta kunha itavy rei va'e ma yvykua puku va'e rami,
 ha'e amboae ava ra'yxy ma yguarā ojo'o po'i'i pyre rami.
- ²⁸ Ha'e nunga kunha ma jojuka va'ety rami oma'ẽ mbegue 'rā oiny joe,
 heta avakue ma ojapo heko vai aguã rami.
- ²⁹ Mava'e pe 'rā tu haxypa rei?
 Mava'e pe 'rā tu ipoyi ete?
 Mava'e re 'rā tu joguero'aa rei?
 Mava'e pe 'rā tu onhemombe'u?
 Mava'e 'rā tu mba'e py e'ŷ ojejukapa rei?
 Mava'e 'rā tu hexa pytā rei va'e?
- ³⁰ Vinho oy'ua rupi tema ikuai va'e pegua ae,
 oy'u va'erā omoirū mbyre re onhea'ã va'e.
- ³¹ Ema'ẽ rive ke vinho pytā porā rei va'e re,
 karo py oī va'e jaexa rā hexakā rei'i ha'e onheẽ porā rei'i oiny tei,
- ³² va'eri opaa py ma ndexu'u 'rā mboi rami,
 nekaraĩ 'rā jai ra'y rami.
- ³³ Rexa 'rā mba'emo vaikue,
 ha'e opa marā 'rā ndeayvu ndepy'a py.
- ³⁴ Renhenhandu 'rā ye'ẽ mbyte oguataa rupi onheno oupy va'e rami,
 ajukue 'y áry itui va'e rami.
- ³⁵ Ha'e vy aipo're 'rā: "Xepetea ra'e va'eri ndaxyi!
 Xenupãa ra'e tei naendui!
 Raka'e 'rā tu akuera ju?
 Ay'uve ju ramo 'rāe ma ha'eve", 're 'rā.

- ² Mba'eta ha'e kuery ma opy'a re omoī 'rā jojukaxe aguā,
ha'e ojuru py ijayvu 'rā teko vairā re rive.
- ³ 'Arandu rupi vy jajapo 'rā nhanderorā,
mba'emo jaikuua rupi nhamo'ā atā 'rā.
- ⁴ Jaiko kuua vy 'rāe opy ja'o'i ha'e javi rupi nhamonyē
opa mba'e porā nhanembovy'aarā.
- ⁵ Imbaraete va'e gui hi'arandu va'e ipo'akave,
hexaī rei va'e gui oiko kuua va'e mba'emo ojapo kuaave 'rā.
- ⁶ Mba'eta jaikuua pota vy 'rāe joe nhapu'ā kuua,
nhanemongetaarā heta ikuai ramo nhandepo'aka 'rā.
- ⁷ Hi'arandu e'ŷ va'e pe haxy ete 'rā 'arandu oikuua aguā,
omboayvua py nombovai kuaai 'rā guive.
- ⁸ Teko vairā re rive onhembopy'a va'e pe ma
“Nhombo'e vaikue va'e” 'ea 'rā.
- ⁹ Hi'arandu e'ŷa rupi onhembopy'aa ma jejavya meme,
jojojai rei va'e re avakue nda'ija'ei 'rā.
- ¹⁰ Rejexavaia ára py nekangy ri vy ma
nembaraeeta ruxā'i ae.
- ¹¹ Peepy pota ke omano aguā katy heraa va'e kuery,
peraa jepe ojukaa aguā katy ho'a-o'a jogueravy va'e.
- ¹² Xapy'a rei aipopeje 'rā: “Ndoroikuuai va'ekue rima”,
teī nhandepy'a ha'e javi Rexaa ndoexai 'rā ri ty'y?
Nhandereko Kuua potaa ndoikuuai 'rā ri ty'y?
Ha'e nombopagai 'rā ty'y peteī-teī oikoague re?*
- ¹³ Xera'y, he'u ke ei, mba'eta nemoexaī 'rā,
hetāgue guive, mba'eta ndejurupy rupi voi he'ẽmba 'rā.
- ¹⁴ Ha'e rami ae avi 'arandu voi nemoingo porā 'rā nenhe'ẽ py.
Ha'e va'e rejou ramo ojapo 'rā nerenderā oī porā aguā rami,
rearō reikovya voi ndoaxa rivei 'rā.
- ¹⁵ Ndee heko vai va'e, nda'evei rema'ẽ mbegue aguā
heko porā va'e ro gui nemondaxe vy.
Embovaipa eme ha'e kuery opytu'uaty,
- ¹⁶ mba'eta heko porā va'e ma sete-kue ho'a rire teī opu'ā ju 'rā.
Ha'e rā heko vai va'e ma jexavaia py 'rāe ho'a.
- ¹⁷ Nderovaigua ho'a ramo nda'evei revy'a rei aguā,
onhepyxanga rā nda'evei ndepy'a py rerovy'a rei aguā,
- ¹⁸ ndereko SENHOR oexa vy ndojou porāi vy
nderovaigua gui oipe'a e'ŷ aguā opoxya.
- ¹⁹ Mba'emo vai apoa kuery káuxa eiko eme nda'evei reia rupi,
neī eroangeko rei eme heko vai va'e ikuiaia,
- ²⁰ mba'eta heko vai va'e renonderā ma iporā va'e'ŷ,
ha'e kuery rataendy oguepa rive 'rā.
- ²¹ Xera'y, eiko SENHOR ha'e huvixa kuery renonde rejererokyjea rupi.
Enhemoirū eme opu'ā rei va'e kuery reve,
- ²² mba'eta ha'e kuery mombaarā ou xapy'a 'rā.
SENHOR ha'e huvixa gui imoingo axyarā ou va'e tu mava'e 'rā oikuua?
- Hi'arandu va'e kuery 'arandu regua omombe'u va'ekue oīa*
- ²³ Pova'e ayvu voi 'arandu regua hi'arandu va'e kuery omombe'u va'ekue.
Renhomboayvua py nda'evei peteī reepyvea rupi rejoguerekō aguā.
- ²⁴ Heko vai va'e mboeko porāare re

* 24:12 Mateus 16.27, Romanos 2.6

- heta va'e kuery voi ijayvu vai 'rã, amboae regua avi nda'ija'ei 'rã okuapy.
- ²⁵ Ha'e rã heko vai va'e mbopagaare re ma ima'endu'a porãa 'rã,
ha'e hexe oĩ reta 'rã imoingo porãarã.
- ²⁶ Jojuru rayvu va'e rami avi
ayvu porã rupi nhombovaia iporã.
- ²⁷ Enhea'ã oka rupi mba'emo rejapo aguã,
erekó katupa nemba'etyrã,
ha'e gui mae ma ejapo nderorã.
- ²⁸ Ndero katy'igua re ndeayvu rive eme mba'e py e'ŷ,
embotavy eme guive ndeayvua py.
- ²⁹ Aipo're eme: "Ha'e va'e xere ojapo vaiague rekovia hexe ju 'rã xee ajapo ha'ekue rami.
Peteĩ-teĩ pe amboekovia 'rã ojapo vaiague re", 're eme.
- ³⁰ Xee aaxa avy inhate'ŷ va'e mba'ety rupi,
ava hi'arandu e'ŷ va'e uva onhotŷague rupi.
- ³¹ Ha'e vy aexa rã juuty anho itui,
pyno ojao'ipa ma yvy,
ikora ita guigua voi ivaipa ma.
- ³² Ha'e nunga aexa vy aikuua porã pota
vy ajopy xe'arandurã:
- ³³ Xapy'a'i rekeve jave, xapy'a'i nderopeyi vy
repytu'ua py renhekuavã jave ma
- ³⁴ ou xapy'a 'rã nemomboriauarã imonda va'e rami,
nembojexavaiarã ou 'rã ava guembiporu revegua rami.

25

Mba'emo re ombojoja reve nhanderekombo'ea oĩa

- ¹ Po rami voi 'arandu regua ayvu Salomão omombe'u rã Judá pygua huvixa Ezequias
rembiguai kuery ombopara va'ekue.
- ² Nhanderuete gueko ndoikuua ukapai ramo nhamboete,
ha'e rã huvixa kuery ma mba'emo re oikuua pota porã ramo nhamboete.
- ³ Huvixa kuery py'a re oĩ va'e jaikuua va'erã e'ŷ,
yva yvatea ha'e yvy guýry oĩ va'e rami avi.
- ⁴ Prata gui iky'a oĩ va'ekue oipe'aa ramo
opyta 'rã mba'emo ryrurã apoa pe.
- ⁵ Huvixa renonde gui heko vai va'e oipe'aa ramo
ipo'akaa oĩ atãve 'rã teko porã rupi anho.
- ⁶ Enhemboyvate rei eme huvixa renonde,
eĩ eme guive yvatekueve mbyte,
- ⁷ mba'eta huvixa renonde reĩ jave nemo'yvyi'i 'rãgue py
ha'eveve ndevy "Ejuve kyvõ katy" he'i.
- Mba'emo nderexa py rexâa va'ekue
- ⁸ nda'evei remombe'upa vyvoi rei aguã nemboayvua py.
Mba'eta opaa py mba'exa 'rã tu rejapo nderovaigua nemoĩ vai ramo?
- ⁹ Eikuua pota ha'e nungakue re ndea katy'igua reve anho'i,
eikuua uka eme oikuua uka e'ŷ pyre,
- ¹⁰ nerenduare ijayvu rei e'ŷ aguã ndere,
ha'e reximbâa py reĩ vai e'ŷ aguã.
- ¹¹ Ha'eve jave ayvu nhamombe'u va'e ma
maçã ouro guigua prata py ombojeguua rami avi.
- ¹² Namixã ha'e jegua ouro ete'i gui ojapo pyre rami avi,
hi'arandu va'e nhomogetaa ha'eve 'rã ojapyxaka porã va'e pe.
- ¹³ Mba'emo omono'õa ára py yro'y nhanemoro'yxâmba va'e rami avi

- tembiguai ojeroviapy ombovy'a 'rā imondoukaare kuery,
ipatō kuery onhe'ẽ py oguerovy'a ramo.
- ¹⁴ Mba'emo ome'ẽ aguã re ijayvu rive va'e ma
arai ha'e vytyu oky vy e'ŷ va'e rami avi.
- ¹⁵ Nhandevaia rupi e'ŷ nhandeayvu ramo huvixa kuery ojapo 'rā jajerurea,
nhandeayvu porã'ia ma ombovopa 'rā mba'emo kāgue voi.
- ¹⁶ Ei rejou ri vy he'u vaipa eme,
re'u vaipa vy rembojevypa e'ŷ aguã.
- ¹⁷ Tereo riae eme ndero katy'i oĩ va'ea py,
ndejou vai vy nedereroporiau e'ŷ aguã.
- ¹⁸ Avakue guetarã rekoke rive mombe'ua ma
nhomboguatiy, kyxe ha'e hu'y haimbe va'e rami avi 'rā nhomomba.
- ¹⁹ Jajexavaia py ojeroviapy re'ŷ jajeroviaa ma
nhaneraĩ opẽ va'e py jakaru, e'ŷ vy nhandepy vaikue'i py jaguataa rami avi.
- ²⁰ Iporiau'i va'e oĩa py oporaei rive reia ma
yro'y teĩ oao omboi va'e rami,
e'ŷ vy joai py vinagre oikyty va'e rami avi.
- ²¹ Ndere ija'e e'ŷ va'e kuery okaruxe ramo eme'ẽ ho'u va'erã,
ijy'uvei ramo eme'ẽ oy'u aguã,
- ²² mba'eta ha'e rami vy 'rā rejapo inhakã áry tapyĩ hexakã va'e ramigua oendu aguã
rami,*
ha'e rã ndevy pe ma SENHOR ome'ẽ 'rā mba'emo porã.
- ²³ Kuaray apu'a'ia katy gui vytyu oky oguerua rami avi
nhombotavya rupi ijayvu va'e nhombopoxypa 'rãe.
- ²⁴ Opy kunha ivai ja rei va'e reve nhaĩa gui
ha'eve 'rã oo apyte áry nhaĩ.
- ²⁵ Tekoa mombyrya guigua ayvu porã omombe'u rã nhaendua ma
nhandey'uvei reve yro'yxã jay'ua rami avi.
- ²⁶ Heko porã va'ekue ri heko vai va'e pe ojererek uka va'e ma
yvu yapo rei ha'e iky'a rei va'e rami avi.
- ²⁷ Nhande ae rive jajejou porã reia ma
ei ja'u vaipa rã nda'eveia rami avi.
- ²⁸ Avakue ojejoko e'ŷ va'e ma
peteĩ tetã nda'ikoravei vy oitypa pyre rami avi ikuai.

26

- ¹ Hi'arandu e'ŷ va'e nda'eve ranhei nhamboete aguã,
kuaray puku py yro'y apĩ ho'aa rami,
e'ŷ vy mba'emo nhamono'õa ára py oky riae rã nda'eveia rami avi.
- ² Mba'e py e'ŷ joe ijayvu vaia oakapa rive 'rã,
guyra'i ha'e mbyju'i oveve jogueravya rami avi.
- ³ Vakapi ma kavaju peguarã,
juruxã ma mburika peguarã,
ha'e rã vyrya rovi'i ma hi'arandu e'ŷ va'e kupe peguarã.
- ⁴ Hi'arandu e'ŷ va'e embovai eme 'arandu e'ŷa rupi ijayvuague rami,
ha'e va'e reko rami ndee voi reiko e'ŷ aguã.
- ⁵ Hi'arandu e'ŷ va'e 'arandu e'ŷa rupi ijayvu rã rembovai 'rãe,
ha'e ae oikuaapa va'e rami rive onhemoingo e'ŷ aguã.
- ⁶ Hi'arandu e'ŷ va'e pe ri ayvu nhamombe'u uka vy jajexavai 'rã
nhandepy rupi nhanhekixi, e'ŷ vy veneno jay'u rivea rami avi.
- ⁷ Hetyma rovaikue va'e oguata aguã nda'eveia rami avi

* 25:22 Apy ma ijayvu nhanderovaigua kuery oximbaa oendu va'e re (Romanos 12.20-21).

- arandu regua ayvu rupi hi'arandu e'ŷ va'e ijayvu aguã nda'evei.
- ⁸ Hi'arandu e'ŷ va'e nda'eve ranhei nhamboete aguã,
ita hepyve va'e mba'emo vaikue reiaty py omombo va'e rami avi.
- ⁹ Oka'u va'e opo py juu rakägue oguerekö aguã nda'eveia rami avi
arandu regua ayvu rupi hi'arandu e'ŷ va'e ijayvu aguã nda'evei.
- ¹⁰ Hi'arandu e'ŷ va'e ha'e otekoavy rei va'e kuery ombo'eapo aguã ojou va'e ma
hapa va'e nhonhyvõmbaa rami avi.
- ¹¹ Hi'arandu e'ŷ va'e ijarakuaa e'ŷague rami ae ikuai va'e ma
jagua ha'e aeombojevyague py ju oo va'e rami avi.*
- ¹² Rexa ma pa peteĩ ava ha'e ae oikuaa rami rive onhemo'arandu va'e?
Ha'e va'e gui hi'arandu e'ŷve va'ekue oikuaave 'rã.
- ¹³ Inhate'ŷ va'e ma aipoe'i:
“Peteĩ guary oiko tape rupi, peteĩ guary oĩ tape'i py”, he'i rive 'rã.
- ¹⁴ Inhate'ŷ va'e ngupa py itui va'e ma
okẽ oĩa re ae ojevy-jevy va'e rami.
- ¹⁵ Inhate'ŷ va'e hy'a py opo'ẽ teĩ
ndogueru potai 'rã ojuru katy.
- ¹⁶ Inhate'ŷ va'e ha'e ae oikuaa rami rive
sete avakue ombovai porã kuaa va'e gui oikuaave merami 'rã.
- ¹⁷ Jagua oaxa ovu va'e nambi re omoatã va'e ma
joe rive oikuaa pota va'e reve joo rami.
- ¹⁸ Inhakã porã e'ŷ va'e jojukaxe vy
tata ha'e hu'y omombo rive va'e rami,
- ¹⁹ ha'e rami ae ava oirũ omobotavypa rire teĩ
“Xeroryai vy rima ha'e rami ajapo”, he'i va'e.
- ²⁰ Yxakã e'ŷ ramo tata ogue 'rã,
ha'e rami ae avi ijayvu vaikue rei va'e ndoikoia py optyu'upa 'rã joguero'a rei va'e.
- ²¹ Tapyigue ma tapyirã, ha'e yxakã ma tatarã oĩa rami avi
ava ivai ja va'e ojapo 'rã joguero'a rei aguã rami.
- ²² Ijayvu vaikue rei va'e ijayvua ma
tembi'u hee va'e rami oguejy 'rã nhandepy'apy katy.
- ²³ Porayvua rupi merami ijayvu va'eri ipy'a re mba'emo vai anho oĩ va'e ma
mba'emo ryru yapo guigua hi'áry rupi rive prata py onhovã mbyre rami avi.
- ²⁴ Porayvu vy e'ŷ ijayvu porã'i merami va'e ma
opy'a re omoi 'rã nhombotavypa aguã rive.
- ²⁵ Ndereve ha'e va'e ijayvu porã'i teĩ erovia eme,
mba'eta ipy'a re oĩ sete-kue otekoavy aguã.
- ²⁶ Ha'e va'e onhenhomí 'rã ndajoayvui reia jaikuua e'ŷ aguã,
teĩ jaikuua pavẽ nho 'rã.
- ²⁷ Yvy jo'oare ho'a 'rã ha'ekue py ae,
ha'e ita mbojerea áry ae 'rã ojere.
- ²⁸ Apu rupi rive ijayvu va'e ombojexavai 'rã hendua kuery,
anhetẽ rupi e'ŷ ijayvu va'e ma nhomoingo axy 'rãe.

27

- ¹ Nda'evei ko'ẽ rã guarã rerovy'a ma voi aguã,
mba'eta ndereikuuai mba'e pa oiko 'rãa.
- ² Tove amboae kuery tandererovy'a, ndee ae e'ŷ.
Mombyry guigua tandererovy'a, ndee ae 'rãgue py.
- ³ Ita ma ipoyi va'e, ita ku'i voi voyi avi,
ha'e rami teĩ mokoïve gui ipoyive va'e ma hi'arandu e'ŷ va'e ipoxya rupi ijayvua.

* 26:11 2 Pedro 2.22

- ⁴ Ivai ja rei va'e nhomoingo axy 'rã, ojerovia rei va'e voi nhombojexavai 'rã,
ha'e rã oexa'ã vaikue rei va'e ma mava'e 'rã tu ojoko kuaa?
- ⁵ Jajoayvua ndajaexa ukai 'rãgue py
ha'eve anhetẽ ete va'e rupi nhanhomongeta porãa.
- ⁶ Nhanderayvu va'e nhandevy ijayvu ete teĩ ojapo porã 'rã,
ha'e rã nhandere ija'e e'ã va'e ma nhandejuru rayvu teĩ jaikuaa 'rã nhanembotavy
vy ria.
- ⁷ Hevyatã va'e ma ei retãgue omombo rive 'rã,
ha'e rã inhembyayi va'e pe ma iro va'e teĩ he'ẽ 'rã.
- ⁸ Ngoo gui mombyry rupi ava oguata rei oikovy va'e ma
guyra'i guaity gui mombyry oveve oikovy va'e rami avi.
- ⁹ Nhaneirã nhanemongeta porã ramo jajou porã 'rã,
azeite ha'e heakuã porã va'e nhanembovy'aa rami avi.
- ¹⁰ Nderexarai rei eme neirã gui, neĩ nderu irã gui,
ha'e rã nderegua ro py ma evaẽ eme rejexavaia ára.
Mba'eta ndero katy'i oĩ va'e nepytyvõve 'rã nderegua ae'i mombyry oĩ va'e gui.
- ¹¹ Xera'y, ne'arandu ke. Ha'e ramo 'rãe avy'a xepy'a py,
xere ijayvu rei va'e kuery pe ambovai kuaa 'rã guive.
- ¹² Hi'arandu va'e ma mba'emo vai ou rã oexa vy onhemi 'rã,
ha'e rã hi'arandu e'ã va'e ma oove tema vy oiko axyve rive 'rã.
- ¹³ Orevea rekovia opaga aguã rami opyta va'ekue gui iiao oipe'aa 'rã,
oexa va'ety e'ã rekovia onhemoingo va'ekue gui katuve ma oipe'aa 'rã.
- ¹⁴ Aje'ive'i reve ngoo katy'igua pe oxarura atã va'e ma
ijayvu vai va'e rami rive ojeapo.
- ¹⁵ Oky vaipa oiny jave otyky tema va'e ma
kunha ivai ja rei va'e reve joo rami;
- ¹⁶ ha'e va'e nanhamokyrirã kuaai 'rã yvytu nanhamombytu'u kuaia rami,
ha'e azeite nhandepo py rive nanhanoẽ kuaia rami avi.
- ¹⁷ Ferro guigua ma ferro py ae nhaimbe'e,
ha'e rami ae avi avakue oirã reve nhomombaraete.
- ¹⁸ Figo rembypy re opena porã va'e pe ha'eve 'rã hi'a gui ho'u aguã,
ha'e opatõ re oikuaa pota porã va'ety ma omboetea 'rã.
- ¹⁹ Yy py nhanderova 'ã ojekuaa 'rã,
ha'e rami ae avi nhandepy'a re oĩ va'e ojekuaa 'rã nhandekuaia re.
- ²⁰ Manoa ha'e yykua vaikue py oĩve tema 'rã,
ha'e avakue rexa voi oexapavexe tema.
- ²¹ Prata nhamboyku-a py, ha'e ouro tata rupa py jaiky'a'oa rami avi,
nhande voi nhanera'angaa 'rã nhandererovy'aa rã nhaendua py.
- ²² Mba'emo ra'yã nhamongu'ia rami avi
hi'arandu e'ã va'e re jajeai teĩ,
ndajaipe'ai 'rã ijarakuua e'ã.
- ²³ Eikuua pota porã ke nerymba vexa'i ikuuaia re,
ha'e epena porã nerymba kuery re,
- ²⁴ mba'eta mba'emo jareko va'e noĩ riae'i 'rã,
huixia po'akaa voi ndoiko riae'i 'rã hamymino jevy-jevy kuery peve.
- ²⁵ Yvyty ikuai va'e gui jai rogue reru aguã rejaya rire
hokypa ju 'rã,
- ²⁶ ha'e rire rerek'o 'rã vexa'i rague ndeaorã,
ha'e kavara ava gui rejou 'rã yvy repyrã.
- ²⁷ Kavara kunha gui ndoatai 'rã kamby rey'u aguã,
ndero pygua kuery ha'e javi okaru porã aguã,
nerembiguai kunhague ikuai va'e voi.

28

- Arandu regua ayvu joo ramigua e'ŷ-e'ŷ oĩa*
- 1 Heko vai va'e ojava 'rã ovy oakykue monhaa e'ŷ teĩ,
ha'e rã heko porã va'e ma guary rami 'rã ipy'a guaxu.
 - 2 Yvy re ikuai va'e heko vai rei ramo huvixa kuery nhomboekovia jepi 'rã,
va'eri peteĩ hi'arandu ha'e oiko kuaa va'e oĩ vy
ojapo 'rã ikuai porã ha'e oĩ atã aguã rami.
 - 3 Ava iporiaukue oirũ kuery iporiaukue'i avyky reia omomba 'rã,
oky mba'emo aju ogueroxyrypa ha'e neĩ mba'eve ndoejai va'e rami.
 - 4 Lei rupi e'ŷ ikuai va'e oguerovy'a rei 'rã heko vai va'e reko,
ha'e rã lei rupi ete ikuai va'e ma ndojou porãi 'rã.
 - 5 Avakue heko vai va'e ndoikuuai 'rã mba'e pa teko porã,
ha'e rã SENHOR oeka va'e ma oikuaapa 'rã.
 - 6 Iporiau e'ŷ va'e teko vai rupi ikuai va'e gui
ha'eveve iporiaukue'i iky'a e'ŷa rupi ikuai va'e.
 - 7 Lei rupi ta'y oiko va'e ma hi'arandu va'e,
ha'e rã opa marã rei ikuai va'e reve onhemoirũ va'e ma omoximba rei 'rã nguu.
 - 8 Jokorea ha'e ojou retavexea rupi mba'emo ojouve heravy va'e ma
iporiaukue'i mboaxy peguarã ae omono'õ.
 - 9 Lei py oĩ va'e re ndojapyxakaxeí vy oapyxha omboty va'ekue ma
mba'emo re ojerure ára teĩ ixugui ojeguarua 'rã.
 - 10 Tape vai rupi heko porã va'e reropiaare kuery ma
ha'e kuery ae ho'a 'rã yvykua ojo'oague py,
ha'e rã anhetẽ rupi ikuai va'e ma iporã va'e anho 'rã ojou.
 - 11 Avakue oguerekopa va'e ha'e kuery ae oikuua rami ojeupe "Hi'arandupa va'e", he'i 'rã,
ha'e rã iporiaukue'i hi'arandu va'e ma oikuua pota kuaa 'rã.
 - 12 Heko porã va'e ipo'aka ramo ovy'a pavẽ 'rã,
ha'e rã heko vai va'e ipo'akave ramo ma avakue onhemimba 'rã.
 - 13 Ojejayague onhomí va'e ndoiko porãi 'rã,
ha'e rã ojejayague omombe'u ha'e oejapa va'e ma oupity 'rã omboaxy aaguã.
 - 14 Ovy'a ete 'rã Nhanderuete renonde ojererokyjea rupi oĩ atã va'e,
ha'e rã inhakã ratã va'e ma ho'a 'rã teko vai py.
 - 15 Heko vai va'e guetarã kuery iporiaukue'i va'e re ipo'aka va'e ma
guary okororõ, e'ŷ vy urso joguero'a va'e rami avi.
 - 16 Huvixa hi'arandu e'ŷ va'e nhombojexavaive rive 'rã,
ha'e rã akate'ŷ reia ojou vai va'e ma oikove riae 'rã.
 - 17 Avakue tuguy moëa rupi ikuai va'e okanhy 'rã yvykua katy oo vy.
Mava'eve rei tojokoa eme.
 - 18 Anhetẽ rupi ikuai va'e oo jepe 'rã,
ha'e rã teko vai rupi ikuai va'e ma ho'apa vyvoi 'rã.
 - 19 Ovyv karaĩ riae va'e ojou reta 'rã mbojape,
ha'e rã ovare e'ŷ va'e kuery reve onhemoirũ va'e ma iporiaukue riae 'rã.
 - 20 Avakue ojeroviapiy va'e omoingo porãa 'rã,
ha'e rã oguerekopa aguã re rive nda'eveive va'e ma ndopaga e'ŷi 'rã.
 - 21 Peteĩ rive jayvuve ramo nda'evei,
mba'eta avakue onhemboapu 'rã peteĩ juru'i mbojape re rive.
 - 22 Guexa py oipotapa rei va'e ma omiba'e rei-reirã rakykue rupi rive 'rã onha-onha oikovy,
va'eri ndoikuuai guive imomboriauarã ou oinya.
 - 23 Oapekũ py ijayvu porã rei rive va'e 'rãgue py
nhomoneta porã va'e omboeteave 'rã.
 - 24 Nguu e'ŷ vy oxy gui imonda vy "Ajejavya e'ŷ" he'i va'e ma
nhomombaaty irũ oiko.

- ²⁵ Oipotapa rei va'e ojapo 'rã joguero'apa rei aguã rami,
ha'e rã SENHOR re ojerovia va'e ma oiko porã 'rã.
- ²⁶ Opy'a py ojee ae ojerovia va'e ma hi'arandu e'ŷ va'e,
ha'e rã 'arandu rupi ikuai va'e ma oo jepe 'rã.
- ²⁷ Iporiaukue'i pe mba'emo ome'ẽ va'e pe ma mba'eve ndoatai 'rã,
ha'e rã iporiaukue'i gui ojeova mo'ã va'e re ma ijayvu vaia 'rã.
- ²⁸ Heko vai va'e ipo'akave ovv ramo avakue onhemimba 'rã,
ha'e gui heko vai va'e okanhymba ma rire heko porã va'e hetave 'rã.

29

- ¹ Ava omongoetaa riae teĩ inhakã ratã va'e pe ma
ou xapy'a 'rã heityarã, oo jepe e'ŷ re.
- ² Heko porã va'e heta-etave ramo heta va'e kuery ovv'a 'rã,
ha'e rã heko vai va'e ipo'aka ramo heta va'e kuery ndovy'ai 'rã.
- ³ Ava hi'arandu va'e ombovy'a 'rã nguu,
ha'e rã kunha itavy rei va'e re irũ va'e ma omokanhymba rive 'rã oguereko va'ekue.
- ⁴ Huvixa heko porã va'e opena porã 'rã yvy re,
ha'e rã imposto re anho oiko va'e ma nhomoingo axy rei 'rã.
- ⁵ Ava ojea katy'igua oguerorya rupi rive oiko va'e ma
nhuã omoõ oikoaty rupi ae.
- ⁶ Heko vai va'e ojejavya py oĩ nhuã imbo'aarã,
ha'e rã heko porã va'e ma oporai 'rã ovv'aa rupi.
- ⁷ Heko porã va'e oikuaa pota 'rã iporiaukue'i re,
ha'e rã heko vai va'e ma ha'e kuery re ndoikuuaa potai 'rã.
- ⁸ Avakue porojojai rei va'e ojapo 'rã tetã ha'e javi rupigua joguero'a aguã rami,
ha'e rã hi'arandu va'e ma omombytu'u 'rã ipoxy va'e.
- ⁹ Heko vai va'e pe hi'arandu va'e ijayvu ramo
ipoxy, e'ŷ vy jojajai reia gui opytu'u e'ŷ re ae 'rã oiko.
- ¹⁰ Jouguy moëaty kuery nda'ijaiei 'rã anhetã rupi ipy'a va'e re,
ha'e vy onhea'a 'rã oipe'a aguã heko porã va'e rekove.
- ¹¹ Heko vai va'e oexa ukapa rei 'rã opoxya,
ha'e rã hi'arandu va'e ma onhenhomu kuaa 'rã.
- ¹² Ayvu anhetã e'ŷ va'e re rive huvixa ojapyxaka ramo
hembiguai kuery ha'e javi heko vai 'rã.
- ¹³ Iporiaukue'i ha'e imbojexavaiare pe joo ramigua oiko,
mba'eta mokoõe pe ma SENHOR oiko omoexakã va'e.
- ¹⁴ Iporiaukue'i re huvixa ha'evea rami oikuaa pota va'e
ojapo opo'akaa oĩ atã aguã raka'e rã peve guarã.
- ¹⁵ Yvyra rovi'i py 'rã nhanhomo'arandu, oikuaa aguã,
ha'e rã kyrigue ha'e kuery ae oikuaa rami rive ikuai vy omoximba rei 'rã oxy kuery.
- ¹⁶ Heko vai va'e hetave ovv ramo teko vai voi hetave 'rã ovv,
va'eri ha'e kuery okanhymba rã heko porã va'e kuery oexa 'rã.
- ¹⁷ Emo'arandu ke ndera'y kuery, ha'e ramo nembovy'a 'rã,
ojapo 'rã nenhe'ẽ py revy'a aguã rami.
- ¹⁸ Profeta ayvu nonhendui rã heta va'e kuery opa marã rei 'rã ikuai,
ha'e rã lei rupi ikuai va'e ma ovv'a 'rã.
- ¹⁹ Tembiguai ma nomo'aranduai 'rã ayvu py rive,
oendu kuaa rei teĩ nanhonhe'ẽ rendui 'rã.
- ²⁰ Rexa ma pa pete'i ava oikuaa pota e'ŷ re ijayvu va'e?
Ha'e va'e gui hi'arandu e'ŷ ve va'ekue hi'aranduve 'rã.
- ²¹ Nerembiguai kuery kyr'i guive rerory rive rire
raka'eve rã onhemoingoxe 'rã ndera'y ae'i rami.
- ²² Ivai ja rei va'e ojapo 'rã joguero'apa rei aguã rami,

- ojerovia rei va'e joapo 'rā otekoavyve aguā rami.
 23 Onhembovate va'e omo'yvyī'iave 'rā,
 ha'e rā onhe'ē py onhemō'yvyī'i va'ekue ma omboeteave 'rā.
 24 Imonda va'e re onhemoirū va'e ma onhe'ē re ae nda'ija'ei,
 ayvu poyi oendu teī mba'eve py nonhemombe'ui 'rā.
 25 Avakue gui okyjea rupi rive ikuai va'e ojejopy uka 'rā nhuā py,
 ha'e rā SENHOR re ojerovia va'e ma oī atā 'rā.
 26 Heta 'rā ikuai huvixa ojou porāa aguā rive onhea'ā va'e,
 ha'e rā ava mboeko porāarā ma SENHOR gui ae ou.
 27 Heko porā va'e pe rā heko vai va'e ma ojeguarupy,
 ha'e rā heko vai va'e ma ojeguaru 'rā heko porāa rupi oiko va'e gui.

30

Agur ayvu oīa

- ¹ Massá pygua Jaque ra'y Agur ijayvuague oīa:
 Amongue aipoe'i: "Xeruete, anhea'ā riae ete ma.
 Anhea'ā riae ete ma, Xeruete.
 Ha'e rami vy xekane'ō ma.
² Mba'eta xee ma ava rami e'ŷ aikuua axy raxa,
 neī ava 'arandua xee ndarekoi,
³ ndaikuuaai 'arandu,
 neī Iky'a e'ŷ va'e guigua voi ndaikuuaai va'e.
⁴ Mava'e tu yva re oo, ha'e gui oguejy ju?
 Mava'e tu opo py ojopy kuaa ta yvytu?
 Mava'e tu yy ojokua 'rā oao apy py?
 Mava'e tu onhono raka'e yvy ha'e javi, ijapy peve?
 Mba'exa tu hery, ha'e ta'y rery?
 Ndee nda'u ndereikuuaai ri?" he'i 'rā.
⁵ Nhanderuete ayvu ma iky'a e'ŷ va'e meme,
 hexe ojerovia va'e kuery pe mba'emo vai jokoa oiko.
⁶ Emoīve eme ijayvuague ramigua,
 ndevy ijayvu atā e'ŷ aguā, ha'e ijapu va'e reikoa oikuua e'ŷ aguā.
⁷ Mokoī regua re ajerure ndevy,
 eme'ē e'ŷ eme, aikove teria ja.
⁸ Eipe'a ke xegui anhetē rupi e'ŷ aikoa ha'e xeapu reixeia.
 Eme'ē eme xeporiaukue aguā, neī arekopa aguā.
 Eme'ē tembi'u aikotevē nhavō,
⁹ xapy'a rei arekopa ma rire ndegui xerexarai vy
 " Mava'e tu SENHOR?" ha'e e'ŷ aguā.
 Ha'e rami e'ŷ vy xeporiaukue'i vy xemonda aikovya rupi
 Nhanderuete rery iky'a va'ea rami aikuua uka e'ŷ aguā.
¹⁰ Tembiguai re ndeayvu rei eme ipatō renonde,
 ha'e va'e ju ndere ijayvu poyi e'ŷ aguā, ha'e repaga aguā rami reiko e'ŷ aguā.
¹¹ Ikuai nguu kuery re ijayvu vai va'e,
 ha'e oxy voi ndogueroayvu porāi va'e.
¹² Ikuai ha'e kuery ae ojeupe ae "Ojejavy va'e'ŷ" he'i va'eri
 peteīgueve ma voi gueko vaia gui ndojeky'a'o ukai.
¹³ Ikuai ojejou porā rei va'e,
 onhembovate rei va'e ha'e kuery ae oikuua rami, ha'e yvate rupi rei oma'ē va'e.
¹⁴ Ikuai kyxe guaxu rami haī va'e,
 kyxe rami haimbe va'e oguerek
 yvy gui omomba aguā iporiaukue'i,
 ha'e oipotapa rei va'e kuery, avakue mbyte gui.

- ¹⁵ Tuguy pytea ma oguereko mokoī guajy,
 ha'e va'e ma "Eme'ē, eme'ē", he'i va'e.
 Ha'e mboapy oiko hevyatā kuaa e'ŷ va'e,
 tá, irundy ikuai "Ha'eve ma!" nde'i kuaai va'e.
- ¹⁶ Ha'e va'e ma yvyra rupa,
 kunha imemby e'ŷ va'e ae,
 yvy pirukue yy noña,
 ha'e tata voi "Ha'eve ma" nde'i va'e.
- ¹⁷ Nguu ojojai rei va'e,
 ha'e oxy nonhe'ē rendui va'e rexma
 xapirē yakā yvýrygua omondoropa 'rā,
 ha'e taguato ra'y kuery ho'upa 'rā.
- ¹⁸ Mboapy nunga oiko xevy iporā ete va'e,
 tá, irundy ikuai aikuaa e'ŷ va'e:
- ¹⁹ ha'e va'e ma taguato yvate rupi oveve oikovy va'e,
 mboi ita áry otyryry ov yva'e,
 kanoā guaxu ye'ē mbyte rupi oaxa ov yva'e,
 ha'e avakue kunhataīgue reve joayvua.
- ²⁰ Po rami ma kunha itavy rei va'e reko.
 Okaru ha'e ojuru oiky'a'opa ma vy
 "Ma'b'eve py ndatekoavyi", he'i 'rā.*
- ²¹ Mboapy oiko yvy yta mboryryiarā,
 tá, irundy jaexa vy jaropo'aka va'erā e'ŷ:
- ²² ha'e va'e ma tembiguai huvixarā oīxe va'e,
 hi'arandu e'ŷa rupi tembi'u re hevyatā oikovy va'e,
- ²³ kunha omenda va'eri oayvupy e'ŷ,
 ha'e gui tembiguai kunha herekoia ha'e ju onhemoingo va'e.
- ²⁴ Irundy regua ikuai yvy re kyr̄i'i va'eri
 hi'arandu va'e kuery gui hi'aranduve va'e:
- ²⁵ ha'e va'e ma tay'i, ha'e kuery ma imbaraete va'e'ŷ va'eri
 kuaray aku py guembi'urā omoī porā va'e;
- ²⁶ ha'e anguja guaxu ipo'aka va'e'ŷ,
 ha'e rami teī ita pa'ū re ae 'rā hoo;
- ²⁷ tuku karu ma huvixa va'e'ŷ va'eri
 oguataa rupi hyxy porā'i 'rā jogueravy;
- ²⁸ ha'e gui ambere'i ma nhandepo py jajopy rive'i va'erā,
 teī huvixa ro py ae oiko va'e.
- ²⁹ Mboapy ikuai jaexa rā ojejou porā reia rupi oguata va'e,
 tá, irundy onhemboyvate reia rupi ikuai va'e:
- ³⁰ ha'e va'e ma guary mymba kuery pavē gui imbaraeteve va'e,
 ha'e neī avave gui guakykue katy ojevy va'erā e'ŷ;
- ³¹ ha'e uru ava opexo omopu'ā rei reve oguata va'e,
 ha'e kavara ava,
 ha'e gui huvixave ma hexe nhapu'ā aguā voi nda'evei va'e.
- ³² Ne'arandua rupi e'ŷ renhemboyvate ri vy,
 e'ŷ vy ndepy'a re mba'emo vairā remoī ri vy
 ejoko ndejuru ndepo py.
- ³³ Ma'b'eta kamby nhamomy-momyī ramo manteiga ojeapoa rami,
 ha'e oxīmby rā huguy oēa rami avi,
 ipoxy aguā rami joapo ramo joguero'apa rei 'rā.

* 30:20 Apy ma ijayvu itavy reia re.

31

Huvixave Lemuel ix y omongoetaague

- ¹ Pova'e ayvu ma Massá pygua huvixave Lemuel ix y ombo'e vy ijayvuague regua.
² Xepi'a, mba'e pa aipoa'e 'rā ndevy, xepi'a xeryepy pyguare?
 Mba'e pa ndevy aipoa'e 'rā, xepi'a anhemboayvu ma voi va'ekue?
³ Emboaxa rive eme nembaraetea kunhague mboae káuxa,
 emboaxa eme reikoa huvixave reitya kuery pe.
⁴ Lemuel, nda'evei huvixave ha'e rami oiko aguā,
 nda'evei huvixave vinho oy'u oikovy aguā,
 neī iro va'e re rive yvatekueve ikuai aguā,
⁵ rey'ua rupi rive lei gui nderexarai vy
 ojexavai rei'i va'e repya gui rejep'e a e'ŷ aguā.
⁶ Iro va'e ma omano rai'i va'e pe anho 'rā nhame'ẽ,
 ha'e vinho ma ipy'a raxy va'e kuery pegua anho,
⁷ ha'e kuery oy'u vy hexaraipa aguā iporiau reia re,
 ojexavai reia re riae ima'endu'a e'ŷ aguā.
⁸ Ndeayvu ke ijayvu e'ŷ va'e repya rupi,
 openamby e'ŷ ikuai va'e ha'e javi repy aguā.
⁹ Ha'veea rami ke ndeayvu renhomboayvua py,
 reikuua pota porā aguā iporiaukue'i ha'e oipotapa rei'i va'e pytyvõa rupi.

Kunhague hi'arandu va'e oguerovy'aa

- ¹⁰ Mava'e nda'u ojou kuaa 'rā kunha hi'arandu va'e?
 Ha'e ramigua ma ita iporâve va'e gui voi ovareve va'e.
¹¹ Ha'e va'e re ime ojerovia 'rā okuraxõ py,
 ixupe ndoatai 'rā mba'emo repyrã.
¹² Ome pe ojapo vai rei 'râgue py ojapo porā 'rā,
 ára nhavõ oikovea pukukue re.
¹³ Ogueru 'rā vexa'i rague ha'e nhimbo,
 ha'e gui ov'y'aa rupi 'rā ombo'eapo opo py.
¹⁴ Kanoã guaxu mba'emo rerua rami avi
 mombry gu'i 'rā kunha va'e ogueru tembi'u.
¹⁵ Pytū rei teri reve opu'ã 'rā
 omongaru aguā ngoo pygua kuery,
 ha'e guembiguai kuery kunhague pe mba'emo ojapo uka 'rā.
¹⁶ Mba'etyrã re oikuua pota porā ma vy ojogua 'rā,
 uva renhoī onhotŷ 'rā ombo'eapoague repykue re ojogua va'ekue.
¹⁷ Kyre'ŷ py onhemonde vy
 omombaraete 'rā ojyva ombo'eapo aguā.
¹⁸ Mba'emo repyrã ojouxre ramo
 pyávy teī hataendy ndoguei.
¹⁹ Okuave'ẽ 'rā nhimbo onhemama va'e re,
 opo rovai py hi'y re ojopy reve.
²⁰ Opo oipe'a 'rā ojexavai va'e
 ha'e oipota va'e kuery oipytvõ aguā.
²¹ Ha'e gui ngoo py ikuai va'e re oma'ẽ vy ndoguerokyjei 'rā yro'y vaipa teī,
 ao raku py peteī-teī onhemonde ramo.
²² Kunha va'e ojapo avi 'rā onheovā aguā,
 ha'e onhemonde 'rā ao porā púrpura guigua py anho.
²³ Ime ma huvixa kuery omboete pavē 'rā,
 oyvy re ikuai va'e mongetaa kuery reve oguapy oiny ramo.
²⁴ Ta'yxy ma nhimbo porāgue gui ojapo 'rā aorā, ovende 'rā guive,

- ku'axã ma mba'emo vendea kuery peguarã voi.
- ²⁵ Ojee omoĩ va'e ma ombaraeterã ha'eomboetepy oiko aguã.
 Ha'e rami vy ko'ẽ rã guarã re ma ndojapura rei 'rã.
- ²⁶ 'Arandu rupi 'rã ijayvu,
 ha'e joayvua rupi nhombo'e kuaa 'rã.
- ²⁷ Opena porã 'rã ngoo pygua kuery re,
 ha'e inhate'ŷ reiague re e'ŷ 'rã omongaru.
- ²⁸ Ha'e ramo imemby kuery opu'ãmba vy oxy pe "Ovy'a ete va'e" he'i 'rã okuapy.
 Ime voi oguerovy'a vy aipoe'i 'rã:
- ²⁹ "Kunhague hi'arandu va'e heta ikuai
 teĩ ndee ma pavẽ gui ne'aranduve va'e", he'i 'rã.
- ³⁰ Onhemoporãa re ikuai va'e ojekore 'rã, onhemoatyrõa voi opa rive 'rã.
 Ha'e rã kunhague SENHOR renonde ojererokyjea rupi ikuai va'e ma oguerovy'aa riae
 'rã.
- ³¹ Nhanema'endu'a porã 'rã opo py ojapo porãa re,
 pavẽ oendua py jarovy'a 'rã oiko porãa.

Eclesiastes ayvu mombe'ua ombopara va'ekue

Eclesiastes ayvu mombe'ua ombopara va'ekue

Kova'e kuaxia ma ha'eve jaikuua poräve aguã Jesus aipoe'iague: "Mba'e 'rã tu avakue ojou, yvy regua ha'e javi ojou va'erí guekove ae omokanhy vy?" he'iague (Marcos 8.36). Mba'eta kova'e kuaxia apoare ma opa marãguia ojeupe guarã ojou tei ha'e nunga ha'e javi pe "Opa rive va'erã meme" he'i.

Ojeupe ae "Ayvu mombe'ua" he'i. "Ha'e vy ayvu mombe'ua aipoe'i: 'Opa va'erã rive, opa mba'e ikuai va'e opa rive va'erã meme', he'i" (1.2). Aipoe'i avi: "Xejeupe ajapo yvotyty ha'e yvyraty, ha'e py yvyrá hi'a va'erã ha'e javi regua anhoty. Xejeupe yy ajoko vy yvyraty amoaký, yvyrá ikuai va'e iporã aguã. Heta guive ajogua xerembiguairã avakue ha'e kunhague. Xero py ae itui'i avi xerembiguairã. Areko avi va'ekue vaka ha'e vexa'i, xee aiko e'ý mbove Jerusalém tetã py ikuai va'ekue gui hetave areko. Xejeupe ajou reta avi prata ha'e ouro, mba'emo hepyve va'e ajogua avi amboae yvy re huvixave kuery opena va'e gui. ... Ha'e gui tembiapo xepo py ajapo va'ekue ha'e javi re aikuua pota, xekane'õ peve amba'eapoa ha'e javi re guive. Ha'e rã ha'e nunga ha'e javi ma opa rive va'erã meme ae ra'e, yvytu jere'i rakykue amongue onha rivea rami. Ha'e nunga ha'e javi py mba'eve rei ndajoui iporã va'e kuaray guýry", he'i (2.5-8a, 11).

Opaa py ayvu mombe'ua aipoe'i: "Opa mba'e rendu va'ekue gui ma yvateve va'e po rami: Nhanderuete renonde eiko rejererokyjea rupi, ha'e emoï porã ojapo uka va'ekue, mba'eta ha'e va'e ma avakue pavé ojapo aguã va'e. Mba'eta Nhanderuete oikuua pota 'rã jaikoa ha'e javi re, ojekuaa voi e'ý va'ekue guive, iporã va'e, ha'e iporã e'ý va'e tei" (12.13-14).

"Opa rive va'erã meme", he'iague

¹ Kova'e ma ayvu mombe'ua ijayvuague. Ha'e va'e ma Davi ra'y oiko Jerusalém pygua huvixave.*

² Ha'e vy ayvu mombe'ua aipoe'i: "Opa va'erã rive, opa mba'e ikuai va'e opa rive va'erã meme.

³ Mba'e nda'u avakue ojou 'rã kuaray guýry rupi omba'eapoague ha'e javi rekovia?" he'i.

Mba'emo ikuai va'e ha'ekue rami ae ju ikuiaia re ijayvuague

⁴ Petei javegua kuery oaxa 'rã, ha'e gui amboae javegua ju 'rã ikuai. Ha'e rã yvy ma itui riae 'rã.

⁵ Kuaray ma oẽ 'rã, ha'e gui oike ju 'rã. Ha'e gui oïague katy ju 'rã oo, oẽ ju aguã.

⁶ Yvytu ma oo 'rã kuaray puku-a katy, ha'e gui ojere vy kuaray ijapu'a'ia katy ju 'rã oipeju. Ojeapa 'rã ovy, ha'e gui ojevy ju 'rã ojeapaaty rupi.

⁷ Yakã ikuai va'e ma ye'ẽ katy oxyry va'e meme, ha'e rami tei ye'ẽ ndatyguaxui 'rã. Yakã oxyry oinyague katy ae ju 'rã oxyry oiny.

⁸ Opa mba'e ma nhanemongueraiarã ae ikuai, avave rei nomombe'u porã kuaai 'rã, guexa py oma'ẽ ha'e oapyxa py ojapyxakave riae tema tei.

⁹ Mba'emo oiko va'ekue ramigua ae ju 'rã oiko. Mba'emo ojapo pyre ae ju 'rã ojapoa. Ha'e rami vy ipyau ete va'e ndoikoi 'rã kuaray guýry rupi.

¹⁰ Oiko ri nda'u mba'emo jaexa vy "Ma'ẽ, kova'e ma ipyau va'e", ja'e aguã? Any! Jaiko e'ý mbove ára oiko jave py ma voi oiko va'ekue ae.

¹¹ Avave rei na'ima'endu'ai 'rã mba'emo ymave rupi oiko va'ekue re. Ha'e rami ae mba'emo oiko va'erã re voi ha'e rire ikuai va'erã kuery na'ima'endu'ai avi 'rã.

Ayvu mombe'ua gueko re ae ijayvuague

* 1:1 Huvixa Davi ra'y Salomão ma nguu rekovia oĩ raka'e Jerusalém pygua huvixa. Ha'e va'e ma pavé gui hi'aranduve va'e, oguerekopa rei va'e guive (1 Reis 4.29-34, 10.14-29).

- ¹² Xee ayvu mombe'ua ma Israel pygua huvixave aĩ Jerusalém py.
- ¹³ Ha'e rami vy xepy'a re amoĩ xe'arandua rupi aikuaa pota aguã mba'emo yva guýry rupi ikuai va'e ha'e javi re. Ha'e va'e tembiapo poyi ma avakue ra'y kuery re Nhanderuete omoĩ imo'aranduarã.
- ¹⁴ Ha'e rami vy aikuaa pota tembiapo kuaray guýry rupi ojapoa va'e ha'e javi re. Ha'e nunga ha'e javi ma opa rive va'erã meme, yvytu jere'i rakykue amongue onha rivea rami.
- ¹⁵ Ikarẽ va'e ma nombo'yviavei 'rã, ha'e mba'emo noĩ va'e ma ndoipapaai 'rã guive.
- ¹⁶ Xejeupe ae aipoa'e: "Ma'ẽ, xee ma xeyvate, ha'e vy xee aiko e'ŷ mbove Jerusalém py ikuai va'ekue ha'e javi gui xe'aranduve va'e", ha'e va'ekue, mba'eta anhetẽ ete aikoa ha'e javi rupi xekuraxõ py xe'arandu ha'e mba'emo aikuaa potaa rupi aiko va'e.
- ¹⁷ Ha'e rami vy xepy'a re amoĩ aikuaa aguã mba'e pa 'arandu ha'e 'arandu e'ŷa ovare e'ŷ va'e. Ha'e rami teĩ aikuaa ha'e rami aguã voi yvytu jere'i rakykue onha rive va'e rami aikoa.
- ¹⁸ Mba'eta 'arandua retaa py ma heta oĩ avi kueraia. Mba'emo oikuaapave va'ea py ma heta oĩ avi 'rã poriaua.

2

Mba'emo oguereko va'e opa rive aguã re ijayvuague

- ¹ Aipoa'e xejeupe ae: "Aa ta! Xejee ae aikuaa pota 'rã vy'aa py. Taendu ha'vy vy'aa", ha'e va'ekue ri ha'e va'e voi opa rive va'erã.
- ² Mba'eta xerorya pe ae "Ovare e'ŷ va'e" ha'e. Avy'aa ma mba'erã tu ovare?
- ³ Ha'e gui xepy'a re amoĩ vinho ay'ua rupi aiko aguã, teĩ xe'arandua py ajejoko teri reve. Ha'e rami vy anhemboaxa ovare e'ŷa rupi aiko aguã, aikuaa peve avakue ra'y kuery yva guýry rupi ikuai va'e o'ára mboapy'i oĩ teri jave py ojapo aguã ha'e eveve va'e.
- ⁴ Ajapo avi tembiapo tuvixa va'e. Xejeupe guarã ajapo reta oo, ha'e anhotŷ uva tyrã.
- ⁵ Xejeupe ajapo yvotyty ha'e yvyraty, ha'e py yvyrat hi'a va'erã ha'e javi regua anhotŷ.
- ⁶ Xejeupe yy ajoko vy yvyraty amoakŷ, yvyrat ikuai va'e iporã aguã.
- ⁷ Heta guive ajogua xerembiguarã avakue ha'e kunhague. Xero py ae itui'i avi xerembiguarã. Areko avi va'ekue vaka ha'e vexa'i, xee aiko e'ŷ mbove Jerusalém tetã py ikuai va'ekue gui hetave areko.
- ⁸ Xejeupe ajou reta avi prata ha'e ouro, mba'emo hepyve va'e ajogua avi amboae yvy re huvixave kuery opena va'e gui. Xejeupe ajou avakue ra'y kuery ojou porãve va'e: oporaei va'erã avakue ha'e kunhague, ha'e kunhague oata aguã rami e'ŷ guive.*
- ⁹ Ha'e gui xeyvate ha'e arekopave xee aiko e'ŷ mbove Jerusalém py ikuai va'ekue ha'e javi gui. Xere oĩ tema avi xe'arandua.
- ¹⁰ Mba'emo aexaxeve va'e rei tema xerexa pe ndaexa uka e'ŷi, ha'e peteĩve py nambovy'a e'ŷi xekuraxõ, mba'eta ha'e nunga py amba'epoague rekovia ajou. Xee arov'y'a va'ekue mba'emo ajapo va'e ha'e javi.
- ¹¹ Ha'e gui tembiapo xepo py ajapo va'ekue ha'e javi re aikuaa pota, xekane'õ peve amba'epoaga ha'e javi re guive. Ha'e rã ha'e nunga ha'e javi ma opa rive va'erã meme ae ra'e, yvytu jere'i rakykue amongue onha rivea rami. Ha'e nunga ha'e javi py mba'eve rei ndajoui iporã va'e kuaray guýry.

Hi'arandua voi opa rive 'rãa re ijayvuague

- ¹² Ha'e gui aikuaa pota 'arandu re, ha'e gui akã porã e'ŷa ha'e 'arandu e'ŷ reia re guive. Mba'eta huvixave rekovia ju ava mboae oĩ va'e, mba'e tu ojapove 'rã? Mba'eta amboae kuery ojapo va'ekue ramigua ae ju 'rã ojapo.
- ¹³ Ha'e gui aikuaa rã 'arandu e'ŷ reia gui 'arandu ha'e eveve, pytû va'e gui hendy va'e ha'e evevea rami.

* 2:8 Huvixa Salomão ma heta oguereko raka'e gua'yxy ha'e gua'yxy jevy kuery. Ha'e va'e kuery ta'angaa re ojerovia va'e káuxa Salomão ojope'a Nhanderuete pe oikoa gui (1 Reis 11.1-8).

¹⁴ Hi'arandu va'e ma oakā re guexa oguerekō 'rā oexa aguā, ha'e rā hi'arandu e'ŷ rei va'e ma pytūa rupi 'rā oiko. Ha'e rami teī aikuua avi mokoīve pe joo ramigua oiko 'rāa.

¹⁵ Ha'e nunga rupi xejeupe ae aipoa'e: "Hi'arandu e'ŷ va'e pe oiko va'e ramigua ma xevy pe voi oiko avi 'rā. Ha'e rami rā mba'erā tu xee aekave ta xe'arandurā?" ha'e. Xejeupe ae aipoa'e avi: "Xe'arandua voi opa rive va'erā", ha'e.

¹⁶ Mba'eta hi'arandu va'e re ha'e hi'arandu e'ŷ va'e re teī na'ima'endu'aa riaeī 'rā. Mba'eta are'i e'ŷ re opa mba'e re hexaraia 'rā. Mba'eta hi'arandu e'ŷ va'e omano 'rā, ha'e rami ae avi hi'arandu va'e voi omano 'rā.

¹⁷ Ha'e nunga rupi xekuerai xerekove re, mba'eta xee ndajou porāvei ma kuaray guýry rupi amba'eapoa. Anhetē ete, ha'e nunga ha'e javi ma opa rive va'erā meme, yvytu jere'i rakykue amongue onha rivea rami.

Omba'eapoa regua voi opa rive aguā re ijayvuague

¹⁸ Xekuerai avi kuaray guýry rupi amba'eapo poyia ha'e javi re, mba'eta hekovia repykue aejapa 'rā aiko rire ikuai va'erā kuery pe.

¹⁹ Ha'e mava'e tu oikuua ha'e nunga jopyarā hi'arandu va'e, e'ŷ vy hi'arandu e'ŷ va'e oiko 'rāa? Ha'e rami teī ma ha'e va'e ae 'rā ojopypa kuaray guýry xe'arandua rupi amba'eapoague repy. Ha'e va'e voi opa rive va'erā.

²⁰ Ha'e rami vy amboae rami aikuua vy xekuraxō py xekuerai etea aendu kuaray guýry rupi amba'eapo poyia ha'e javi re.

²¹ Mba'eta ikuai avakue o'arandua rupi om̄ba'eapo va'e, oikuua ha'e ikyre'ŷa rupi. Ha'e rami teī ha'e kuery om̄ba'eapoague repy oeja 'rā ha'e va'e re nomba'eapoi va'ekue peguarā. Ha'e va'e voi opa rive va'erā, ha'e nda'evei ete va'e.

²² Ha'e gui mba'e 'rā tu avakue ojou kuaray guýry rupi opy'a py guive om̄ba'eapo poyiague ha'e javi re?

²³ Mba'eta ára nhavō haxy oendu, ha'e om̄ba'eapoa re ikuerai 'rā. Pyávy teī ipy'a ndopytu'ui ae. Omba'eapoa regua voi opa rive va'erā.

²⁴ Avakue pe ha'eveva va'e ma okaru, oy'u ha'e om̄ba'eapoa oguerovy'a aguā. Mba'eta ha'e rami aguā aikuua Nhanderuete po gui meme oua.

²⁵ Mba'eta ixugui e'ŷ vy mba'exa 'rā tu jakaru, e'ŷ vy javy'a?

²⁶ Mba'eta avakue Nhanderuete mbovy'aa va'e pe ha'e ome'ē 'rā hi'arandurā, oikuua ha'e ov'y'a aguā. Ha'e rā ojejavv y va'e pe ma ome'ē 'rā om̄ba'eapo aguā, mba'emo omono'ō ha'e omboaty aguā Nhanderuete mbovy'aa kuery pe ju ome'ē va'erā. Ha'e va'e voi opa rive va'erā, yvytu jere'i rakykue amongue onha rivea rami.

3

Opa mba'e oiko aguā ára re ijayvuague

¹ Opa mba'e yva guýry ikuai va'e pe oiko aguā ára oī.

² Ovaē 'rā nhendetui'i aguā ha'e nhamano aguā ára. Ovaē 'rā nhama'etŷ aguā ha'e nhanhotŷ va'ekue nhamondoropa ju aguā ára.

³ Oī jojukaa aguā ha'e nhomongueraa aguā ára. Oī mba'emo nhambovaipa aguā ha'e jajapo aguā ára.

⁴ Ovaē 'rā jajae'o aguā ha'e japuka aguā ára. Ovaē 'rā nhandepy'a vai aguā ha'e guijajeroxy aguā ára.

⁵ Oiko 'rā ita nhamoā aguā ha'e nhamboaty aguā ára. Ovaē 'rā nhanhokuavā aguā ha'e nhanhokuavā ve'ŷ aguā ára.

⁶ Oī mba'emo jaeka aguā ha'e nhamokanhy aguā ára. Oī mba'emo nhamoī porā aguā ha'e nhamombo aguā ára.

⁷ Oī mba'emo nhamondoro aguā ha'e nhambovyvy aguā ára. Oī nhakyrirī aguā ha'e nhandeayvu aguā ára.

⁸ Oī jajoayvu aguā ha'e ndajajoayvuvei aguā ára. Oī joe nhapu'ā aguā ha'e nhandekuai porāa'i aguā ára.

Ára oa'angaague avakue ndoikuuaia re ijayvuague

- ⁹ Mba'e tu ombo'eapo va'e ojou 'rā ombo'eapo poyi oikovyague rekovia?
¹⁰ Mba'eta xee aexa rā avakue ra'y kuery ombo'eapo aguā ma imo'aranduarā Nhan-deruete ombou va'ekue.
¹¹ Opa mba'e Nhanderuete ojapo hi'ára py iporā aguā rami. Avakue py'a re omoī avi opa e'ý va'erā nunga, teī ha'e kuery ndoikuapai 'rā mba'emo Nhanderuete jypy guive opaa peve ojapo va'e ha'e javi.
¹² Aikuua avakue pe ha'eveva va'e ov'y'a ha'e ikuai porā aguā.
¹³ Avakue pe Nhanderuete ome'ē avi okaru, oy'u ha'e ombo'eapoague rekovia oguerovy'a aguā.
¹⁴ Xee aikuua rami Nhanderuete ojapo va'e ha'e javi ndopai va'erā meme. Ha'e va'e re nda'evei mba'eve omoīave aguā neī oipe'aa aguā guive. Ha'e rami Nhanderuete ojapo, henonde avakue ojererokyje aguā.
¹⁵ Mba'emo aý oí va'e ramigua oiko va'ekue ae ma, ha'e oiko va'erā ramigua voi oiko ae ma. Mba'eta Nhanderuete ojapo 'rā mba'emo oaxa va'ekue ramigua oiko jevy-jevy aguā rami.

Mymba rami avi avakue omano aguā re ijayvuague

- ¹⁶ Peteī mba'e ju aexa kuaray guyýry. Mba'eta ha'evea rami joguerekao aguā 'rāgue py ha'eve'ýa ramigua oiko, teko porā oí 'rāgue py ha'eve'ýa ramigua ae tema oiko.
¹⁷ Ha'e ramo aipoa'e xejeupe: "Nhanderuete ma omboayvu 'rā heko porā va'e ha'e heko vai va'e. Mba'eta oí ae ha'e oipota va'e ha'e javi oiko aguā ára, ha'e hembiaporā ha'e javi pe", ha'e.
¹⁸ Aipoa'eve ju xejeupe: "Nhanderuete oeko a'ã 'rā avakue ra'y kuery, ha'e kuery oikuua okuapy aguā mymba kuery rami ikuiaia", ha'e.
¹⁹ Mba'eta avakue ra'y kuery re oiko va'e ramigua ae oiko avi 'rā mymba kuery re. Peteī regua omanoa rami ae avi 'rā amboae regua omano. Oikove va'e ha'e javi joo rami ipytuē 'rā. Ndoikoi avakue mymba gui oiko areve va'erā, mba'eta ha'e javi ma opa rive va'erā meme.
²⁰ Pavē rei 'rā oo peteī henda py anho. Yvy ku'i gui meme oiko rire yvy ku'i ae ju 'rā opyta.
²¹ Mava'e oikuua ta avakue ra'y kuery nhe'ē yva re oo 'rāa, ha'e rā mymba nhe'ē ma yvy katy, yvy re rive oo 'rāa?
²² Aikuua rā avakue pe ha'eveva va'e ma ombo'eapoague rekovia aguā, mba'eta ha'e kuery peguarā oejaa. Mba'eta ha'e kuery oiko rire mava'e tu ogueru ju 'rā mba'e pa oikoa oexa aguā?

4

Jajexavai jaikovya re ijayvuague

- ¹ Aexa avi nhomoingo axy reia kuaray guýry rupi ikuai va'e ha'e javi. Aexa oguerekao axy reipy kuery rexay, avave rei nombopy'a guauxuai rā. Aexa avi joguerekao axy reia kuery imbaraeteve okuapya, ha'e ikuai axy va'e pytyvōarā ndoikoi.
² Ha'e nunga rupi aikuua rā okuave va'e kuery gui omano va'ekue ov'y'ave va'e ikuai.
³ Ha'e gui ha'e va'e mokoī gui ov'y'ave va'e ma ndoikoi teri va'e, mba'eta ha'e va'e ma mba'emo vai kuaray guýry rupi ojapoa rā neī ndoexai.
⁴ Ha'e ramo aexa avakue ombo'eapo ha'e mba'emo ojapo kuaa ha'e javi ojapo, oirū kuery gui oguerekopavexe vy rive. Ha'e va'e voi opa rive va'erā, yvytu jere'i rakykue amongue onha rivea rami.
⁵ Hi'arandu e'ý va'e ma onhekuavā 'rā oiny ngo'o ae ho'upa peve. Mba'eta aipoe'i:
⁶ "Xepojovaive py amba'eapo vaipa vy yvytu jere'i rakykue anha 'rāgue py ha'eveve peteī po renyē reve apytu'u ainy aguā", he'i.
⁷ Ha'e ramo kuaray guýry amboae nunga aikuua avi opa rive va'erā.
⁸ Ha'e va'e ma peteī ava ha'e ae'i oiko va'e, ta'y va'e'ý neī heindy e'ý va'e. Ha'e rami teī ombo'eapoa gui ndopytu'ui va'e, ha'e ndoexaxe ve'ýi oguerekopaa. Ha'e rami teī

aipo nde'i: "Mava'e pe tu xee amba'epo aikovy? Mba'erā pa xenhe'ẽ py ajejoko mba'emo porā arov'y'a aguā gui?" nde'i. Ha'e nunga voi opa rive va'erā, tembiapo nhomongueraiarā rive.

⁹ Ha'e ae'i oiko 'rāgue py ha'eveve mokoī joguerekō, mba'eta omba'epoa py ojouve 'rā.

¹⁰ Mba'eta xapy'a rei ho'a ramo peteī-teī omopu'ā ju 'rā oirū. Ha'e rā ha'e ae'i oiko va'e pe nda'evei ete, mba'eta ho'a ramo ndoikoi 'rā imopu'āarā.

¹¹ Ha'e mokoī joyvy okea py ha'e kuery oendu 'rā haku. Ha'e rā peteī'i oīa py ma marā rami 'rā tu haku?

¹² Ha'e rami ae avi peteī'i re opu'āa vy ipo'akaa 'rā, ha'e rā mokoī ikuai vy ojoko 'rā. Ixā mboapy ombojoyvy pyre rā nomondoa voi 'rā.

¹³ Peteī kunumi poriaukue'i hi'arandu va'e ma opena porāve 'rā huvixave tuja'i hi'arandu e'ŷ va'e vy nonhemongeta ukai va'e gui.

¹⁴ Xapy'a rei kunumi va'e huvixave oī aguā oguenoēa 'rā nhuā gui, e'ŷ vy ha'e va'e yvy py ae iporiaukue'i reve itui va'ekue teī ae ma.

¹⁵ Mba'eta aexa kuaray guýry ikuai va'e ha'e javi huvixave tuja'i rekovia kunumi oī va'ekuea katy anho oje'oi rā.

¹⁶ Ha'e ramo opena 'rā oikovy mbovy rei e'ŷ re. Ha'e rami teī ha'e va'e rire ju oī va'e na'ima'endu'a porāi 'rā hexe. Anhetē, ha'e nunga voi opa rive va'erā, yvytu jere'i rakykue amongue onha rivea rami.

5

"Nda'evei jaikuua pota porā e'ŷ re nhanhemboayvu ma voi mba'emo jajapo aguā re", he'iague

¹ Nhanderuete pegua opy reike ta vy eikuua pota porā ranhe reiko aguā re. Hi'arandu e'ŷ va'e kuery mba'emo ome'ẽ va'e rami rejapo vy reike 'rāgue py ha'eveve ayvu rendu aguā, mba'eta ha'e kuery ma gueko vaia re oikuua pota e'ŷ re ome'ẽ mba'emo.

² Ejapura eme ndejuru py, neī nekuraxō py ma voi Nhanderuete renonde renhemboayvu aguā. Mba'eta Nhanderuete oī yva re, ha'e rā ndee ma yvy py reiko. Ha'e nunga rupi mbovy'i tandeayvu.

³ Mba'eta nhamba'epo vaipaa gui ou nhandeke raia, ha'e rami ae avi nhandeayvu retaa py ha'eve'ŷa rami 'rā nhandeayvu.

⁴ Nhanderuete pe mba'emo rejapo aguā re renhemboayvu rire ejapo voi. Mba'eta ha'e ma ndoguerovy'ai 'rā hi'arandu e'ŷ va'e. Ejapo ete ndeayvuague.

⁵ Renhemboayvuague nderejapoia gui ha'eveve 'rāgue nerenhemboayvui ma voi va'e rire.

⁶ Ndeayvuague tojapo eme rejeyavy aguā rami, ha'e aipo're eme Nhanderuete ayvu mombe'ua pe: "Ha'e rami e'ŷ xeayvu ta va'ekue ri", 're eme. Mba'erā tu ndeayvua káuxa rejapo Nhanderuete ivai aguā rami, ndepo py rejapo va'ekue ombovaipa aguā?

⁷ Mba'e ta, nhandeke raia ha'e nhandeayvu reta reia ma opa rive va'erā. Ha'e nunga rupi Nhanderuete renonde rejelerokyjea rupi eiko.

Mba'emo jareko va'e opa rive 'rāa re ijayvuague

⁸ Xapy'a rei yvy re rexā 'rā iporiaukue'i oguerekō axya rei rā, ha'e ha'evea rami joguerekōa 'rāgue py imonda va'e rive oī rā. Ha'e ramigua rexā vy enhemondyi eme. Mba'eta joe opena va'e kuery áryve ikuai yvatekueve imbopagaarā, ha'e ha'e va'e kuery áryve amboae yvateve ete va'e ju imbopagaarā oī.

⁹ Ha'e rā yvy ma pavē oiporu va'erā itui. Huvixave voi okaru 'rā oikovy mba'ety gui.

¹⁰ Peráta re nda'eveive va'e ma ojouvexe tema 'rā. Mba'emo oguerekopa va'e voi ojouvexe avi 'rā. Ha'e ramigua voi opa rive va'erā.

¹¹ Omono'ō mbyre heta ramo heta avi 'rā ikuai okaru va'erā. Ha'e nunga rupi mba'e 'rā nda'u ija kuery ojou, guexa py oexa rive aguā e'ŷ vy?

¹² Omba'epo va'e oke porā 'rā, okaru porā e'ŷ vy ndokaru porāi teī. Ha'e rā oguerekopa va'e ma mba'emo oguerekopa va'e káuxa rive ndoke porā kuaai 'rā.

¹³ Amboae nunga ju aexa kuaray guýry nda'evei ete va'e, mba'eta amongue ojouve 'rā ombo'e rei-reirā ojeupe ae ojapo vai aguã rive.

¹⁴ Ha'e rami avi xapy'a rei mba'emo oiko rā ija omokanhymba ramo ta'y kuery voi mba'eve ndoguerekoi 'rā opo py.

¹⁵ Guyru'i gui mba'eve reve'ŷ oikoague rami avi, mba'eve reve'ŷ ae ju 'rā oo. Ouague rami ae ju 'rā oo, mba'eta mba'eve ndogueraai 'rā ombo'epoague gui.

¹⁶ Ha'e nunga voi nda'evei ete 'rā, mba'eta ouague rami ae ju 'rā oo. Ha'e gui mba'e 'rā tu ojou yvytu pe rive ombo'epoague re?

¹⁷ Mba'eta ára nhavõ ombo'epopma rire okaru 'rā pyávy, ikuerai ha'e imba'eaxy reve vy ndovy'ai reve.

¹⁸ Ha'e gui xee aexa avi jakaru ha'e jay'u aguã ma ha'eve ha'e iporā va'e meme, ha'e kuaray guýry nhamba'epo poyi rire nhamba'epoague peteī-teī jarovy'a aguã, mbovy'i ára re jaiko aguã Nhanderuete ome'ëa pukukue re. Mba'eta ha'e va'e ma nhandevygua ae.

¹⁹ Ha'e gui amongue avakue pe ma Nhanderuete ome'ë 'rā oguerekopa aguã mba'emo porā anho, ome'ë avi 'rā ha'e nunga gui okaru ha'e hekivia ojoupa aguã, ombo'epoague oguerovy'a aguã guive. Ha'e ramigua voi Nhanderuete ome'ë va'e meme.

²⁰ Ha'e va'e avakue ma ndoikuua pota vaipai 'rā ha'e kuery ae reko re, mba'eta ipy'a re Nhanderuete omoï ovv'a aguã anho.

6

¹ Ha'e gui peteī ju aexa kuaray guýry nda'evei ete va'e avakue áry ipoyi va'erā.

² Mba'eta amongue py avakue pe Nhanderuete ome'ë 'rā oguerekopa aguã mba'emo porā anho, ha'e omboetevepy ikuai aguã guive. Ha'e kuery pe mba'eve ndoatai 'rā opy'a py oipota va'e ha'e javi. Ha'e rami teī ha'e kuery pe Nhanderuete nome'ëi 'rā ha'e nunga gui okaru aguã. Ha'e rami 'rágue py oexa va'ety e'ŷ kuery 'rā ho'u okuapy. Ha'e nunga voi opa rive va'erā, ha'e ojexavai etea.

³ Xapy'a rei amongue oguerek 'rā cem gua'y kuery, ha'e vy heta ma'etŷ re 'rā oiko tuja'i ete peve. Ha'e rami teī xapy'a rei onhe'ë py mba'emo porā ndoguerovy'ai, neñ nonhono porāai 'rā guive. Xee aikuua rā ha'e va'e gui ma hyru'i gui oity pyre ovv'ave.

⁴ Mba'eta hyru'i gui oity pyre ma ou 'rā opa aguã rive, ha'e gui oo ju 'rā pytūa katy. Ha'e rami rire pytū py ma hery noendua.

⁵ Ha'e va'e ma neñ ndoexai 'rā kuaray, mba'eve ndoikuai 'rā guive. Ha'e rami teī amboae kuery gui opytu'u porāve 'rā,

⁶ amboae kuery iporā va'e oguerovy'a e'ŷ va'e dois mil ma'etŷ re oiko teī. Mba'eta mokoïve e'ŷ 'rā teve joa katy oo?

⁷ Avakue ombo'epo 'rā ojuru py guarā re anho teī noendu ve'ŷi 'rā okaruxea.

⁸ Tyrā hi'arandu va'e ma hi'arandu e'ŷ va'e gui ojouve 'rā teve? Mba'e 'rā tu iporiaukue'i ojouve amboae kuery oexaa py oiko kuaa rupi?

⁹ Mba'emo jarekopave 'rágue py ha'evee nhanderexa py jaexa va'e jarovy'aa. Ha'e rami e'ŷ rā opa rive va'erā jaiko, yvytu jere'i rakykue amongue onha rivea rami.

¹⁰ Mba'emo oiko va'erā rery ma oikuua pyre ae. Oikuua avi marā ramigua pa avakue ikuiaia, ha'e imbaraeteve va'e reve joguero'a aguã nda'eveia guive.

¹¹ Anhetē heta ikuai mba'emo ndovarevei va'e. Ha'e rami teī mba'erā tu avakue pe ha'e nunga ha'eve?

¹² Mava'e nda'u oikuua 'rā mba'e nunga pa avakue pe ha'evee va'ea? Mba'eta ha'e kuery ikuiaia ma kuaray'ã rami xapy'a'i 'rā oaxa, mba'emo opa rivea rami. Mava'e nda'u avakue pe omombe'u kuaa 'rā ha'e va'e rire mba'emo kuaray guýry oiko va'erā?

Arandua ha'e 'arandu e'ŷa re ijayvuague

¹ Heakuā porā va'e hepyve va'e gui ha'eveve nhandere ima'endu'a porāa rā. Nhandeduiague ára gui nhamanoa ára ha'eveve avi.

² Ngarua py jaa aguā gui ha'eveve peteī oo py ojae'o va'e ikuiaia py jaa aguā, mba'eta ha'e py jaikuaa 'rā avakue ha'e javi opa aguā. Ha'e nunga re ma nhande jaikove va'e jaikuaa pota aguā ha'eve.

³ Nhanderorya gui ha'eveve nhandeporiaua, mba'eta nhandeporiaua nhanderova py jaexa uka va'e ma ojapo porāve 'rā nhanekuraxō pe.

⁴ Hi'arandu va'e okuraxō py ima'endu'a 'rā ojae'o va'e ikuiaia re, ha'e rā hi'arandu e'ŷ va'e ma okuraxō py ima'endu'a 'rā ov'y'a rei va'e ikuiaia re rive.

⁵ Hi'arandu e'ŷ va'e oporaia nhaendu 'rāgue py ha'eveve hi'arandu va'e nhandevy ijayvu etea nhaendu.

⁶ Hi'arandu e'ŷ va'e kuery opuka okuapya ma juu'y pirukue oja guy py hendy vy hevovoа ramigua rive. Ha'e nunga voi opa rive va'erā.

⁷ Anhetē hi'arandu va'e voi omoingo axya rā na'inhakā porāvei 'rā, ha'e ome'ẽmby ojopy rā ombovaipa 'rā ikuraxō.

⁸ Mba'emo ypya gui ha'eveve 'rā opaa. Onhembovate va'e gui ha'eveve oarō are kuaa va'e.

⁹ Ndevai vyvoi eme, mba'eta hi'arandu e'ŷ va'e py'a re ae 'rā oī ivai aguā.

¹⁰ Aipo're eme: "Mba'exa tu aŷgua ára gui yma guare ha'eveve raka'e?" 're eme, mba'eta ha'e rami oporandum va'e ma nai'arandui.

¹¹ Mba'emo ojou va'e pe ma 'arandua ha'eve. Ojapo porā avi 'rā kuaray rexaa kuery pavē pe.

¹² Peráta rami avi 'arandua nhanderepy 'rā mba'emo vai gui. Hi'arandu va'e pe 'arandu ome'ẽ avi 'rā tekove.

¹³ Eikuua pota ke Nhanderuete rembiapokue re, mba'eta mava'e tu ombo'yvi kuaa 'rā mba'emo ha'e omokarē va'ekue?

¹⁴ Mba'emo rejoupaá ára erovy'a tema iporā va'e. Ha'e rā reiko axya ára ma eikuua pota pova'e re: Nhanderuete ae mokoïve ombou, ha'e ramo avakue ndoikuuai 'rā ha'e kuery oiko ma rire mba'e pa oiko 'rāa.

Opa mba'e py jaiko kuaa aguā re ijayvuague

¹⁵ Opa rive va'e rami aiko vy po ramigua avi aexa: Heko porā va'e ikuai gueko porā reve omano va'erā, ha'e heko vai va'e ikuai gueko vai reve oikove pukuve va'erā.

¹⁶ Enhemboeko porā raxa rei eme, enhemo'arandu raxa eme guive. Mba'erā tu ndee ae renhemomba uka ta?

¹⁷ Eiko eme heko vai ete va'e, neī inhakā porā e'ŷ va'e. Mba'e re tu remano ta nde'ára ovaẽ e'ŷ re?

¹⁸ Neī peteī rupi, neī amboae rupi eiko eme. Mba'eta Nhanderuete renonde ojererokyjea rupi ikuai va'e ma oo jepe 'rā opa mba'e gui.

¹⁹ 'arandu ojapo 'rā hi'arandu va'e dez ipo'akakueve tetā py ikuai va'e gui imbaraeteve aguā rami.

²⁰ Yvy re ndoikoi ava heko porā va'e, ojejavv e'ŷ re iporā va'e anho ojapo va'e.*

²¹ Ndepy'a py erovia eme ayvu omombe'ua va'e ma guive rā, endu rive guive nerembiguai ndere ijayvu vai rā,

²² mba'eta nema'endu'a mbovykue rei e'ŷ ndee voi amboae kuery re ndeayvu vaiague re.

Kunhague nhombotavya re ijayvuague

²³ Ha'e nunga ha'e javi re aikuua pota va'ekue xe'arandua rupi. Aipoa'e avi: "Xe'arandu pota 'rā", ha'e va'eri ndaupityi ae 'arandua.

²⁴ Mava'e tu oupity 'rā mba'emo mombyry ha'e haxy ete va'e?

* 7:20 Romanos 3.10

²⁵ Ha'e gui anhea'ā 'arandu aikuaa porā aguā, ha'e gui aikuaa pota ha'e aeka ete aguā opa mba'e ikuai va'e ha'e javi regua aikuaa aguā. Aikuaxe avi heko vai va'e 'arandu e'ŷa, ha'e hi'arandu e'ŷ va'e akā porā e'ŷa guive.

²⁶ Ha'e rami vy peteī ajou manoia gui nda'eveive va'e: peteī kunha opy'a re jojopy ha'e nhombo'a aguā anho omoī va'e, ha'e opo py corrente jokuaarā oguereko va'e. Ha'e va'e gui Nhanderuete renonde heko porā va'e oo jepe 'rā, ha'e rā ojejavy va'ety ma ou vy onhembo'a uka 'rā ixupe.

²⁷ Ayvu mombe'ua aipoe'i: "Ma'ē, po ramigua xee ajou va'ekue. Mba'emo amboae ramigua re ambojoja vy aikuaa porā aguā

²⁸ aikuaa pota aikovy teī ndaikuaa porāi teri: mil avakue mbyte peteī'i anho ajou ha'eve va'e, ha'e rā mbovy rei e'ŷ kunha mbyte ma peteīve ma voi xee ndajoui.

²⁹ Ma'ē, peteī anho aikuaa: Nhanderuete omoingo avakue heko porā va'erā, va'eri ha'e kuery opa marā onhembopy'a okuapy."

8

Huvixave nhanhe ē rendu aguā re ijayvuague

¹ Mava'e tu oiko hi'arandu va'e rami mba'emo omombe'u porāve kuaa 'rā? Mba'eta avakue 'arandua ma omoexakā 'rā hova, oguerova 'rā ivaia oexa ukaa gui.

² Xee aipoa'e ndevy: Enhe'ē rendu ke huvixave Nhanderuete renonde reuraague rami vy.

³ Ejapura eme huvixave renonde gui rejep'e a aguā, neī enhea'ā eme mba'emo vai rejapoa py, mba'eta ha'e ae oikuaa rami 'rā ojapo.

⁴ Mba'eta huvixave ayvu ma ipo'akave va'e. Mava'e tu ixupe "Mba'ē tu rejapo?" he'i 'rā?

⁵ Ha'e ojapo uka va'e moī porāa ma ndoiko axyi 'rā. Hi'arandu va'e opy'a py oikuaa 'rā raka'e ha'e marā rami pa mba'emo ojapo aguā.

⁶ Mba'eta opa mba'e pe oī oiko aguā ára ha'e marā rami pa ojapoa aguā, avakue re mba'emo vai ipoyi ete teī.

⁷ Mba'eta ha'e kuery ndoikuaai 'rā mba'e pa oiko 'rāa. Marā rami paa guive nomombe'uai 'rā ha'e kuery pe.

⁸ Avave rei ndojoko kuaai 'rā yvytu oipejua, ha'e omano aguā ára re katuve ma nda'ipo'akaai 'rā. Ha'e nunga re nhanheāa py ma noī 'rā japytu'u aguā, heko vai va'e kuery katuve ma ndoo jepi 'rā gueko vaia rupi.

⁹ Ha'e nunga ha'e javi kuaray guýry aexa mba'emo ojapo pyre re aikuaa potaa rupi, mba'eta amongue py avakue joe ipo'aka 'rā omomba aguā rive.

Joo rami e'ŷ-e'ŷ jajopy aguā re ijayvuague

¹⁰ Aexa avi heko vai va'e kuery onhono porāa py opytu'u rā, ha'e rā henda iky'a e'ŷ va'e py oo jepi va'ekue re ma hexaraipaa, ikuai porāague tetā py voi. Ha'e nunga voi opa rive va'erā.

¹¹ Joapo vaiare nombopagaa voi ramo avakue ra'y kuery opy'a re omoī 'rā ojapo vai aguā anho.

¹² Ha'e gui xapy'a rei ojejavy va'ety cem-kue 'rā ojapo vai va'eri hi'ára ipuku teī, aikuaa porā Nhanderuete renonde ojererokyjea rupi ikuai va'e ojou 'rāa iporā va'e.

¹³ Ha'e rā heko vai va'e kuery ma iporā va'e ndojoui 'rāe, hi'ára nda'ipukui 'rā guive. Kuaray'ā rami oaxa 'rā, Nhanderuete renonde ojererokyje rupi e'ŷ ikuai rire.

¹⁴ Oíve teri amboae nunga ju opa rive va'erā yvy re. Mba'eta heko porā va'e ikuai heko vai va'e rami ombopagaa va'e, ha'e heko vai va'e avi ikuai heko porā va'e rami omboekoviaa va'e. Aipoa'e ha'e nunga voi opa rive va'erā.

¹⁵ Ha'e nunga rupi xevy pe ha'eveva va'e ma vy'aa, mba'eta avakue pe kuaray guýry ha'eveva va'e ma okaru, oy'u ha'e ov'y'a aguā. Mba'eta ha'e ramigua ombovy'a 'rā ombo'eapo oikovya rupi, kuaray guýry Nhanderuete hi'ára ome'ēa pukukue re.

¹⁶ Anhea'ā avi aikuaa aguā 'arandu, ha'e aexa aguā yvy re ombo'eapo ha'e javi, mba'eta ara py neī pyávy voi avakue ndoke kuaai 'rā.

¹⁷ Ha'e rami vy Nhanderuete rembiapokue ha'e javi re aikuaa pota vy aikuaa rā avakue ndoikuapa reguai 'rā mba'emo kuaray guýry ikuai va'e. Avakue oikuaa aguā onhea'ā vaipa teī ndouptyi 'rā. Hi'arandu va'e voi "Aikuua 'rā", he'i teī ndouptyi 'rāe.

9

Ha'e javi pe joo rami merami ome'ēa re ijayvuague

¹ Anhea'ā ete ha'e nunga ha'e javi aikuaa aguā, mba'eta Nhanderuete po py ikuai heko porā ha'e hi'arandu va'e kuery, ha'e kuery reko ha'e javi guive. Ha'e rami teī avakue ndoikuai guenonderā mborayvu tyrā pa ivaia oīa. Henonde guarā ha'e javi ma oikuaapy e'ŷ.

² Opa mba'e oiko 'rā joo rami ae ha'e kuery ha'e javi re. Joo rami ae 'rā oiko heko porā va'e ha'e heko vai va'e re, mba'emo ome'ē va'e ha'e ome'ē e'ŷ va'e re, ojapo porā va'e ha'e ojejavy va'e re, oura va'e ha'e oura aguā gui okyje va'e re guive.

³ Ha'e ramigua nda'evei va'e oiko kuaray guýry pavē ikuia re, mba'eta pavē re 'rā oiko joo ramigua ae. Avakue py'a voi tynyē mba'emo vai, ha'e kuery re oī 'rā akā porā ve'ŷ oikovea ja. Ha'e rire ma manoa katy oje'oī.

⁴ Oikove va'e pe ma oī teri oarō oikovy aguā, mba'eta guary omano va'ekue gui ha'eve jagua oikove va'e.

⁵ Mba'eta oikove va'e kuery oikuaa omano 'rāa, ha'e rā omanogue ma mba'eve ndoikuavei, oikoague repy ndojouwei 'rā guive, mba'eta ha'e kuery re ima'endu'aa 'rāgue py oī hexaraipaa.

⁶ Ha'e kuery joayvua, ndajoayvua ha'e nda'evei reia opa ma. Ha'e kuery raka'e rā peve mba'eve ndoguererekovei 'rā kuaray guýry omba'eapo teri va'e kuery reve.

⁷ Ha'e nunga rupi tereo, he'u mbojape revy'a reve, ha'e ey'u porā vinho, mba'eta Nhanderuete ndererovy'a ae mba'emo rejapoa py.

⁸ Taxii porā riae renhemondea, ha'e toata eme neakā remoatyrō porāa.

⁹ Evy'a ke kunha reayvu va'e reve, nde'ára kuaray guýry Nhanderuete ome'ē va'e re, reikovea opa voi va'e pukukue re. Ha'e nunga ma Nhanderuete ome'ē kuaray guýry remba'eapo poyia rupi nekane'ðague rekovia.

¹⁰ Mba'emo ndepo py rejapo aguā rejou va'e ha'e javi ke ejapo nembaraetea rupi, mba'eta ha'e va'e rire reo aguā py noīvei 'rā remba'eapo aguā, mba'emo re renhembopy'a e'ŷ vy reikuua pota aguā, neī ne'arandu aguā.

Onhea'ā rive va'e re ijayvuague

¹¹ Kuaray guýry aeaxave ju inhakuā va'e kuery peguarā e'ŷ oī hekovia, ha'e ipy'a guaxukueve pegua e'ŷ oī ipo'aka aguā, hi'arandu va'e peguarā e'ŷ guive oī mbojape ho'u aguā, ha'e oiko kuaa va'e kuery peguarā e'ŷ oī mba'emo oguerekopa aguā, neī oikuaapa rei va'e kuery peguarā e'ŷ oī ogueroovy'aa aguā. Ha'e rami 'rāgue py pavē ára oaxa 'rā ovu, ha'e pavē re oiko 'rā oexa'āmbu e'ŷ.

¹² Mba'eta avakue ndoikuai o'ára ae. Pira imbo'aa py ho'a xapy'a, ha'e guyra'i nhuā py ojejura va'e rami ae avi avakue ra'y kuery voi ojejopy uka 'rā mba'emo vai oiko ramo, ha'e kuery re oiko xapy'a rā.

Arandu ovarea kuaa ukaa omombe'uague

¹³ Kuaray guýry peteī aeaxa avi 'arandu kuaa ukaa, xevy pe rā tuvixa va'e.

¹⁴ Mba'eta oī peteī tetā kyri'i va'e mbovy'i avakue ikuia. Ha'e va'e tetā re ou peteī huvixa ipo'akave va'e. Ojokopa ha'e hovai re omopu'ā okuapy tetā kora mbovaipaarrā.

¹⁵ Ha'e py oiko peteī ava poriaukue hi'arandu va'e. Ha'e va'e ma o'arandua rupi ogueraa jepe guetā. Ha'e rami rire teī ha'e va'e iporiaukue re avave rei na'ima'endu'aavei.

¹⁶ Ha'e ramo "Imbaraete va'e gui hi'arandu va'e ha'eveve", ha'e, iporiaukue'i 'arandua ndojou porāai, ha'e ijayvu noenduai teī.

¹⁷ Mba'eta hi'arandu e'ŷ va'e kuery ruvixa ojapukaia gui ha'eveve hi'arandu va'e ijayvu rā nhakyrirī reve nhaendu.

¹⁸ Tembiporu joe opu'āa pygua gui voi 'arandua ha'eveve. Ha'e rami avi pete'i ojejavy va'e teī mba'emo porā heta 'rā ombovai.

10

Arandu iporāa re ijayvuague

¹ Heakuā porā va'e ryru py mberu omano va'ekue omoeakuā vaikuea rami ae avi nhane'arandu e'ŷa ruxā'i oī teī ombovai 'rā nhane'arandua ha'e nhanemboetea.

² Hi'arandu va'e ipy'a 'rā oiporu kuaa katy oo aguā re, ha'e rā hi'arandu e'ŷ va'e ma oiporu kuaa e'ŷa katy oo aguā re ipy'a.

³ Hi'arandu e'ŷ va'e ma tape rupi oo vy voi ndoiko kuaai 'rā. Ha'e rami vy pavē pe oexa uka 'rā o'arandu e'ŷa.

⁴ Nderovai huvixa ivai reve opu'ā teī ejep'e a eme reīa gui, mba'eta ndepy'a guaxua omombytu'u 'rā opa marā ojapo vaise va'e kuery.

⁵ Pete'i ju aexa mba'emo vai kuaray guýry, huvixa ha'eve'ŷa rami opena va'e.

⁶ Ha'e va'e ma omo'i'rā hi'arandu e'ŷ va'e yvatevea py, ha'e rā oguerekopa va'e kuery ma yvy'iia py omo'i.

⁷ Aexa tembiguai kuery kavaju áry oo va'e, ha'e rā yvatekueve ma yvy rupi oguata oje'oivy tembiguai rami.

⁸ Yvykua ojo'o va'ekue ma ha'e py ae ju 'rā ho'a, ha'e kora ombovo va'e ma mboi oixu'u 'rā.

⁹ Ita omboi va'e ma ha'e va'e py ae 'rā oiko axy, ha'e yxakā ombovo va'e ma oexa 'rā ijavaete va'e.

¹⁰ Tembiporu ferro guigua naímbei va'e avave noaímbe'eai ramo iporua onhemomburuve 'rā. Ha'e rā hi'arandu va'e omoatyrō porā kuaa 'rā.

¹¹ Xapy'a rei mboi ombo'e porāa e'ŷ re ri joxu'u ramo imbo'eare ndojopyi 'rā hepyrā va'ekue.

¹² Hi'arandu va'e oayvu py onhemboete uka 'rā, ha'e rā hi'arandu e'ŷ va'e ma oayvu py onhemomba uka 'rā.

¹³ Jypy hi'arandu e'ŷ va'e ijayvu 'rā oikuaa e'ŷ reia rupi, ha'e rā opaa py ma ijayvu 'rā 'arandu e'ŷa ha'e joguerojejavya rupi anho.

¹⁴ Ava hi'arandu e'ŷ va'e ijayvu reta 'rā, mba'eta oiko va'erā avave ndoikuuai teī. Mava'e 'rā tu oikuaa ha'e rire oiko va'erā?

¹⁵ Hi'arandu e'ŷ va'e ombo'eapoa rupi ikane'ō 'rā, tetā re oo aguā ma voi ndoikuuai.

¹⁶ Yvy huvixave kyrī va'e openaa pe nda'evei ete 'rā, yvatekueve ko'ẽmba ramove ngaru ojapo okuapya pe guive.

¹⁷ Ha'e rā yvy yvateve va'e kuery ra'y huvixave openaa pe ma ha'eve 'rā, mba'eta ha'eve javé py yvatekueve oguapya 'rā okuapya mesa py onhemombaraete aguā, oka'u okuapya aguā nda'eí.

¹⁸ Hoo va'e inhate'ŷ ramo oo ao'ia ho'apa 'rā. Opo py nomba'eapoxei ramo otykypa 'rā.

¹⁹ Ngaru ojapoa 'rā ovy'a aguā, vinho nhombovy'a 'rā oikoa'i py, ha'e rā peráta ma opa mba'e repyrā ha'eve.

²⁰ Ndepy'a py voi ndeayvu vai eme huvixave re, neī nderopy ja'o ndeayvu eme oguerekopa rei va'e re. Mba'e guyra oveve va'e ogueraa 'rā ndeayvu, ipepo va'e kuery oendu uka 'rā ndeayvuague.

11

Hi'arandu va'e oiko kuaa-a re ijayvuague

¹ Yy áry rupi emoañ nerembi'u, mba'eta hare ma rire rejou ju 'rā.*

² Emboja'o sete e'ŷ vy oito pe, mba'eta ndereikuuai mba'emo vai yvy re ou va'erā.

* 11:1 Apy ma ijayvu mba'emo Nhanderuete ojou uka va'ekue nhamboja'o aguā re, mba'eta omboekovia ju 'rā nhandevy.

³ Araipa ramo oky xapy'a va'e ho'a 'rā yvy áry. Yvyra kuaray puku-a katy e'ŷ vy ijapu'a'ia katy ho'a rire ha'ekue py ae 'rā itui.

⁴ Yvytu re oma'ẽ-ma'ẽ oikovy va'e mba'eve 'rā nonhotŷi, ha'e arai re oma'ẽ-ma'ẽ va'e nomono'õi 'rā guive.

⁵ Ndee ndereikuuaai marupi pa yvytu rape oĩa, neĩ kunha hye guaxu'i va'e ryepy kyr'i i va'e kāgue'i ojeapo tema ovya voi. Ha'e rami ae avi Nhanderuete opa mba'e apoare rembiapokue katuve ma ndereikuuaai.

⁶ Aje'ive reve ke enhotŷ ha'yigue, ka'arukue voi emombytu'ueme ndepo, mba'eta ndereikuuaai marā ramigua pa oiko porā 'rāa, jypyguia tyrā amboae, tyrā mokoïve joo rami oiko porā 'rā paa.

⁷ Hendy va'e ma ha'eve, ha'e kuaray rexakāa jaexa rā iporā.

⁸ Ava heta ma'etŷ oguerekova'e ta'ima'endu'a o'ára oaxa va'ekue ha'e javi re. Ha'e rami teĩ toikuaa pota avi pytū aguã ára heta ou va'erā re. Mba'emo oiko va'e ha'e javi ma opa rive va'erā meme.

Kunumi teri va'e pe ijayvuague

⁹ Kunumi, erovy'a ke ndepyaua, ha'e nekuraxō py erovy'a nekunumia. Eiko tape nekuraxō ha'e nderexa ov'y'a aguã rupi. Ha'e rami teĩ eikuaa pota, mba'eta ha'e nunga ha'e javi re Nhanderuete nemboayvu 'rā.

¹⁰ Ha'e nunga rupi nekuraxō gui eipe'a imongueraiarā ha'e ndero'o moingo axyarā, mba'eta nekunumia ha'e ndepyaua ma opa rive va'erā meme.

12

Tuja'i ma va'e pe ijayvuague

¹ Nema'endu'a ke nemoingoare re nekunumi teri reve, ára vai ha'e "Noïvei avy'a aguã" 'rea ma'etŷa ovaẽ e'ŷ re.

² Mba'eta ha'e va'e jave py ma kuaray pytūmba merami 'rā, jaxy ha'e jaxy-tata nderekove rupi nemoexakā va'ekue guive, ha'e oky rire teĩ arai ou ju 'rā.

³ Oo re opena va'e rami ndejyva oryryipa 'rā, ha'e ava imbaraete va'ekue rami neretyma ikarẽ rei 'rā. Mba'emo mongu'ia ndejuru py ikuai va'e mbovy'i ma vy nomba'eapo porāvei 'rā, ha'e janela rupi hendy va'ekue rami nanderexa pyxovei 'rā.

⁴ Ha'e gui okē tape katyguia rami nerembeta onhemboty 'rā. Renhendu atā aguã nda'evevei 'rā, ha'e guyra'i nhe'ẽ rendu vyve 'rā revy. Ha'e rami teĩ kunhague oporaei va'e ayvu ma nonhendu atāvei merami 'rā.

⁵ Ha'e rami ae avi rekyje 'rā yvate va'e gui, ha'e tape rupi oo va'e gui rive renhemondyi 'rā. Ha'e gui nde'a xiimba 'rā yvyra ipoty xiĩ va'e rami. Tuku rive teĩ ipoyi 'rā ndevy, ha'e rekaruxea nerenduvei 'rā, mba'eta reo 'rā reiny oo opa e'ŷ va'e katy, ha'e ojae'o va'e kuery ikuai 'rā tape rupi.

⁶ Ha'e va'e jave py ixā prata guigua oxo 'rā, ha'e karo ouro guigua ovo 'rā, ha'e ygua py ovo 'rā yryru, ha'e yvu áry yryru renoea oĩ va'ekue ivaipa 'rā.

⁷ Ha'e rire yvy ku'i reikoague ojevy ju 'rā yvy re, ha'e rā nenhe'ẽ ma ojevy 'rā Nhanderuete imbuouarea py.

⁸ Opa va'erā rive, opa mba'e ikuai va'e opa rive va'erā meme, he'i ayvu mombe'ua.

Opa vy ijayvuague

⁹ Ayvu mombe'ua hi'arandu va'e vy ombo'e heta va'e kuery oikuua aguã rami. Ha'e gui ayvu re ojapyxaka ha'e oikuua potaa rupi heta omombe'u ayvu 'arandu regua.

¹⁰ Ayvu mombe'ua onhea'ã ayvu iporāgueve ojou aguã, ha'e ha'evea rami ombopara aguã ayvu anhetē va'e.

¹¹ Hi'arandu va'e kuery ayvu ma yvyra rakua mymba mondyia ha'e karavo ombota porā mbyre rami oĩ, Opena va'e pete'i oiko va'e ome'ẽ va'ekue meme.

¹² Xera'y, enheangu ke ha'e nunga rovai rupi reiko e'ŷ aguã. Mba'eta kuaxia ombopara pyre ma ndoatai 'rāe, ha'e va'e re nhanhembo'e riae vy nhandro'o kane'õmba 'rā.

¹³ Ha'e gui opa mba'e rendu va'ekue gui ma yvateve va'e po rami: Nhanderuete renonde eiko rejelerokyjea rupi, ha'e emoī porā ojapo uka va'ekue, mba'eta ha'e va'e ma avakue pavē ojapo aguā va'e.

¹⁴ Mba'eta Nhanderuete oikuuaa pota 'rā jaikoa ha'e javi re, ojekuaa voi e'ŷ va'ekue guive, iporā va'e, ha'e iporā e'ŷ va'e teĩ.

Mboraei iporāve va'e Cântico Salomão ojapo va'ekue Mboraei iporāve va'e cantares Salomão ojapo va'ekue

Kova'e kuaxia para py ma ijayvu peteĩ ava ha'e peteĩ kunha reve joayvua re. “Xee ma xerembiayvu mba'e, ha'e xerembiayvu ma xemba'e”, he'i (6.3). Ha'e ramigua ayvu oĩ va'e ma iporā va'e meme.

Jypy'i Nhanderuete omenda va'e kuery oguerovy'aa rupi ijayvu vy aipoe'i va'ekue: “Avakue oeja 'rã nguu ha'e oxy, gua'yxy reve joguereko aguã, mokoõ gui peteĩ'i to'o oiko aguã”, he'i va'ekue (Gênesis 2.24). Ha'e va'e ayvu Jesus omombe'u porāve vy aipoe'i: “Yvy itui ypy'i guive ma Nhanderuete omoingo ava ha'e kunha. Ha'e nunga rupi ava oeja 'rã nguu ha'e oxy, gua'yxy reve onhemoirũ aguã. Ha'e gua'yxy reve mokoõ 'rãgue py peteĩ'i to'o ma ikuai. Ha'e rami vy mokoõ ve'ŷ ikuai, peteĩ'i to'o ma. Ha'e nunga rupi Nhanderuete omoirũ rire avave rei tomboja'o eme”, he'i (Marcos 10.6-9).

¹ Kova'e mboraei iporāve va'e Salomão ojapo va'ekue.

Ta'yxy ijayvuague

² Xerayvu ndejuru py,
mba'eta vinho gui ha'eveve ndee xerayvua.

³ Nereakuã porāa aetû rã iporā,
nderery voi heakuã va'e onhoẽ mbyre rami ha'eve va'e.
Ha'e ramo kunhataïgue ha'e javi 'rã nderayvu.

⁴ Xereraa ndereve! Jaa pojaval!
Xeruvixave xereraa ndero py.

Irû kuery ijayvuague

Ndee ae roguerovy'a rovy'a etea rupi.
Rejoayvua re orema'endu'a porã 'rã, vinho gui ha'eveve ramo.
Ha'evea rami ha'e kuery nderayvu.

Ta'yxy ijayvuague

⁵ Kunhague Jerusalém pygua, xeñ va'eri xeporā.
Xepire ma Quedar rupi oo pirekue guigua rami huñ va'e,
ha'e ajukue Salomão ro py oĩ va'e rami.

⁶ Pema'ẽ ngatu eme xepire huña re,
mba'eta kuaray ae ma xemoũmba.
Xekyvy kuery xemotare'ŷ rei vy
xemondouka karamboae uvaty re apena aguã.
Ha'e rami rã xemba'e uvaty re ma xee napenai.*

⁷ Ha'e gui ndee xerekovea rembiayvu, emombe'u xevy:
Mamo tu remongaru 'rã herekovy nerymba kuery?
Mamo tu remombytu'u 'rã kuaray mbyte jave?
Emombe'u ke, xee roekaa rupi avaẽ e'ŷ aguã
neirũ kuery guymba re openaa py.

Ime ijayvuague

⁸ Kunhague pavẽ gui neporāve va'e, ha'e nunga ndereikuai ri vy
tereo ha'vy mymba kuery pypo rupi,
ha'e emongaru nerymba kavara kuery vexa'i re opena va'e kuery ikuai rupi.

⁹ Xerembiayvu, neporā vaipa
kavaju kunha Faraó mba'e karóxa regua rami.

* 1:6 “Xemba'e uvaty re napenai” he'ia ma ojee ae ijayvu vy, ipire kuaray omoũmba ramo.

¹⁰ Nderova ma iporã nemamixã mbyte,
ndeaju'y voi mbo'y oĩ reve.

¹¹ Ndejeguarã rojapo 'rã ouro gui,
prata py ijeguapa va'e gui voi.

Ta'xyx ijayvuague

¹² Xeruvixave okaruaty py oĩa py
oetû 'rã oiny xereakuã porãa.

¹³ Xevy pe ma xerembiayvu iporã
heakuã porã va'e ryru xekã mbyte oĩ va'e rami.

¹⁴ Yvoty En-Gedi katy uvaty ikuai va'e rupi henhoĩ va'e rami,
xevy pe xerembiayvu ha'e rami ae ha'eve.

Ime ijayvuague

¹⁵ Ma'ẽ xerembiayvu, ndee ma neporã.
Nderexa voi apykaxu rexa rami iporã.

Ta'xyx ijayvuague

¹⁶ Xerembiayvu, ndee voi neporã, roayvu.
Nhanderupa ma jai rogue pyau guigua.

¹⁷ Nhandro yta rami guarã yary ikuai,
ha'e rã yvyra ijao'ia ma cipreste guigua.

2

¹ Xee ma rosa poty Sarom rupigua rami,
ha'e yvoty yvyugua rupi ikuai va'e rami.

Ime ijayvuague

² Yvoty juu mbyte oĩ va'e rami ae avi
kunhataigue mbyte xerembiayvu iporã.

Ta'xyx ijayvuague

³ Ha'e gui yvyra ikuai va'e mbyte maçã'y hi'aĩ va'e rami
kunumigue mbyte xerembiayvu iporã.
Ikuaray'ã py aguapyxe vai,
ha'e hi'a voi he'ẽ porã xevy.

⁴ Xereraa opy ja'o okaruaty py,
ha'e xe'áry rupi omopu'ã bandeira xerayvua kuaa ukaarã.

⁵ Anhemombaraete 'rã uva pirekue py,
anhenhandu porã 'rã maçã ha'u vy.
Mba'eta ayvu vaipa vy naxeptyuẽ kuaavei.

⁶ Ijaxua regua toĩ xekã guýry,
ha'e rã oiporu kuaa regua ma taxekuavã.

⁷ Jerusalém memby kuery, pendevy pe ajerure
guaxu ha'e guaxu kunha ka'aguy rupi ikuai va'e rupi:
Pemomyĩ eme rojoayvua, tove toke ranhe,
ha'e ae ovixe e'ýa ja.

⁸ Aendu xerembiayvu ijayvu rã.
Ma'ẽ, ha'e ou pojava yvyty áry rupi,
yvy'ã ikuai va'e rupi opo-opo ouvy.

⁹ Xerembiayvu ma guaxu e'ý vy guaxu ra'y'i rami inhakuã va'e.
Ne'exa, orero mbotya kupe py hi'aĩ,
janela rupi oma'ẽ ho'amy,
oexa pota ho'amy janela jokoa pa'ũ gui.

¹⁰ Ha'e gui xerembiayvu ijayvu vy aipoe'i xevy:

Ime ijayvuague

- Xerembiayvu, epu'ã ke.
Xemba'e porã, eju.
- ¹¹ Mba'eta yro'y oaxa ma,
oky voi oakapa ma.
- ¹² Yvoty henhoimba ma yvy re,
ovaõ ma guyra kuery onhe'ẽ aguã ára.
Pyku'i voi onhe'ẽ nhendu ma nhandeyvy rupi.
- ¹³ Figo'y voi ijypy ma hi'a aguã,
uva poty reakuã voi nhaetã ma.
Epu'ã na xerembiayvu.
Xemba'e porã, eju ke.
- ¹⁴ Xerymba apykaxu,
ita pa'ũ ha'e itaova yvateve renhemia rupi reiko va'e,
exa uka na nderova,
ha'e taendu ndeayvu.
Mba'eta ndeayvua he'ẽ,
ha'e nderova ma aeaxaxe vai va'e.

Ta'xyx ijayvuague

- ¹⁵ Pejopy na mbyku ha'e mbyku'i uvaty ombovaipa va'e,
mba'eta oremba'e uvaty rupi ipotypa ma.
- ¹⁶ Xerembiayvu ma xemba'e, ha'e xee ma imba'e aiko.
Ha'e ma omongaru 'rã guymba kuery yvoty ikuia rupi.
- ¹⁷ Xerembiayvu, ára yro'y rei'i ha'e pytã e'ŷ teria ja ejevy ju.
Enha ejuvy guaxu e'ŷ vy guaxu ra'y'i rami, vyty itatya rupi.

3

- ¹ Pyávy xerupa py xetui jave
aea xerekovea rembiayvu.
Aeka-eka teĩ ndajoui.
- ² Ha'e gui apu'ã avy vy tetã rupi ajere aikovy.
Tetã mbyte ha'e tape ikuai va'e rupi aa vy
aea xerekovea rembiayvu, aeka teĩ ndajoui.
- ³ Ha'e gui tetã rarõa kuery xerovaexi tetã rupi onhangareko rupi.
Ha'e rã ha'e kuery pe xee aporandu: "Pexa pa xerembiayvu?" ha'e.
- ⁴ Ha'e gui ma ajep'e'a'i avy vy mae ma aovaexi xerembiayvu.
Aikuavã vy namondoukavei.
Ha'e gui aroike ha'i xemokambuare ro py.
- ⁵ Jerusalém memby kuery, pendevy pe ajerure
guaxu ha'e guaxu kunha ka'aguy rupi ikuai va'e rupi:
Pemomyi eme rojoayvua, tove toke ranhe,
ha'e ae ovixe e'ŷa ja.

Irũ kuery ijayvuague

- ⁶ Mba'e tu peva'e tekoa e'ŷa gui jogueru jekuaa nhoguenoiny va'e?
Tata rataxi opu'ã va'e ramigua ou,
ha'e heakuãmba ouvy mirra ha'e heakuã porã va'e okaia py,
opa marãgua heakuã porã va'e vendeaty kuery ogueru va'ekue py.
- ⁷ Ne'ixa, huvixa Salomão karóxa ae ou jekuaa.
Ijyke joavaive rupi sessenta avakue ogueru,
Israel regua ipy'a guaxukueve.
- ⁸ Ha'e kuery ha'e javi ma kyxo oiporu kuaa,
joe opu'ã kuaa va'e vy.

- Peteĩ-teĩ oku'a re kyxe oguereko,
ptyū rupigua gui joepy aguã.
- ⁹ Karóxa ma huvixa Salomão ojeupe guarã ae ojapo uka va'ekue
yvyra Líbano regua gui.
- ¹⁰ Ijytarã ma ojapo prata gui,
hendarã ma ojapo ouro gui,
ha'e rã oguapya aguã ma púrpura gui ojapo.
Opy ha'e javi rupi Jerusalém pygua kunhague
ombojegua porã'i oayvua rupi.
- ¹¹ Ha'e gui Sião memby kuery, peju, pema'ẽ
huvixa Salomão akã re coroa oĩ va'e re.
Ha'e va'e ma ixy ae ome'ẽ va'ekue
omendaa ára py, opy'a py oguerovy'a vy.

4

Ime ijayvuague

- ¹ Ma'ẽ xerembiayvu, ndee neporã vaipa!
Neporã ete!
Nderexa ma apykaxu rexa rami iporã,
nderova mo'ãa rovai teĩ nderexa pyxo porã.
Nde'a ma kavara kuery Gileade regua yvyty áry gui oguejy jogueruvy va'e rami huã.
- ² Neraĩ ma vexa'i kuery hague ojayapaa ramo'i va'ekue
ombojauague gui oẽ jogueravy va'e rami xiĩ.
Ha'e kuery peteĩ-teĩ oguereko mokoĩ'i ma voi va'e,
ha'e neĩ peteĩve ma voi ndata'y e'ŷi va'e rami.
- ³ Nerembe ma nhimbo pýtã iporã va'e rami.
Ndéjuru ma iporã ete.
Nderova ma romã'a omboja'o pyre rami xiĩ porã rei,
nderova mo'ãa rovai teĩ iporã jekuua.
- ⁴ Ndeaju'y ma Davi torre tembiporu moĩ porã atyrã ojapo va'ekue rami.
Ha'e va'e re mil hu'y jokoa ikuai xondaro ipy'a guaxukueve oupi imoiny va'ekue rami.
- ⁵ Nekã mokoïve ma guaxu ta'y'iague meme
yvoty ikuai va'e rupi okuapy va'e rami.

Ta'yxy ijayvuague

- ⁶ Ára yro'y rei'i ha'e pýtã e'ŷ teria ja
aa 'rã yvy'ã mirra ha'e heakuã porã va'e oĩa py.

Ime ijayvuague

- ⁷ Xerembiayvu, ndee ma neporã.
Ndere jipoi ndevaikuea.
- ⁸ Xerembireko, eju xereve Líbano gui,
eguejy xereve yvyty Líbano regua gui.
Ema'ẽ Amana yvyty apyte gui,
Senir ha'e Hermom yvyty gui,
guary kua ha'e yvyty xivi ikuiai gui.
- ⁹ Xereindy xerembireko, reipe'a ma xekuraxõ.
Reipe'a ma xekuraxõ rema'ẽa py rive'i,
ha'e peteĩ'i apu'a'i ndepo'y re oĩ va'e py.
- ¹⁰ Ndee xerayvua ha'eve vaipa, xereindy xerembireko.
Vinho gui xeayvua ha'eveve,
ha'e nereakuãa ma pavẽ heakuã va'e gui iporãve va'e.
- ¹¹ Xerembireko, ndejuru gui ei rami he'ẽ va'e otyky,

- neapekũ guy py ma ei ha'e kamby oĩ.
 Ndetupyja ma Líbano yvy regua rami heakuã porã.
- ¹² Xereindy xerembireko, ndee ma yvotyty ikorapa va'e rami reiko,
 peteĩ yvu ojao'i pyre rami.
- ¹³ Nderegua ma romã'y ty ikuaiia va'e rami,
 hi'a porã va'e meme.
 Ha'e py ikuai hena ha'e nardo'y,
¹⁴ nardo ha'e açafrão'y, cálamo ha'e canela'y.
 Opa marãguia yvyra ikuai avi heakuã porã va'e:
 mirra ha'e aloés, ha'e heakuã porãgueve ha'e javi ikuai.
- ¹⁵ Ndee ma yvu yvotyty moakŷa rami,
 ygua yy oxyry va'e oĩa,
 yakã Líbano regua yvyty gui oxyry atã va'e rami!

- Ta'yxy ijayvuague*
- ¹⁶ Yvytu kuaray apu'a'ia katyguia, eju na.
 Eju, ndee yvytu kuaray puku-a katyguia.
 Eipeju xe yvotyty rupi,
 eraa heakuã porã va'e oetãa aguã katy.
 Ha'e gui ma xerembiayvu tou omba'e yvotyty py,
 to'u yvyra'a iporãve va'e!

5

- Ime ijayvuague*
- ¹ Xereindy xerembireko, xee aike ma xeyvotyty py.
 Xee amono'õ ma mirra heakuã porã va'e reve.
 Ha'u ma ei hetã rewegua,
 ha'e ay'u ma vinho kamby reve.
 Xeirû kuery, pekaru ha'e pey'u.
 Pey'u ndapey'uxevei peve, xerembiayvu kuery.

- Ta'yxy ijayvuague*
- ² Xee ake teĩ xekuraxõ ma ndokei.
 Aendu xerembiayvu okẽ re ombota nhendu reve aipoe'i rã:

- Ime ijayvuague*
- “Xereindy xerembiayvu, eipe'a na.
 Xerymba apykaxu, ndevaikuea oĩ e'ŷ va'e.
 Mba'eta xeakã inhakŷmba yvyxí rayvi gui,
 xe'a yxapypa ma”, he'i.

- Ta'yxy ijayvuague*
- ³ Ha'e gui xee ma amboipa ma xeao puku.
 Amoĩ ju 'rã nda'u?
 Ha'e xepy voi ajoipa ma,
 teĩ amongy'a ju 'rã nda'u?
- ⁴ Peteĩ yvyra pa'ũ oĩ va'e rupi xerembiayvu opoko rã
 xekuraxõ omyimba ayvu vaipa rã.
- ⁵ Ha'e rami vy avy okẽ aipe'a aguã xerembiayvu pe.
 Xepo gui mirra amoeakuãague otyky rei oiny,
 xekuã gui voi okẽ pe'aa áry otyky ajopy rã.
- ⁶ Xerembiayvu pe aipe'a va'eri ojepe'a ju ma, oo ma ra'e.
 Ha'e rami rã xenhe'ẽ py xekangypa ijayvu rire.
 Aeka avy teĩ ndajoui, ha'e aenoĩ aikovy teĩ naxembovai.
- ⁷ Tetã rarõa kuery xerovaexí tetã re onhangarekoa rupi.

- Ha'e rami vy xepetepa vy xembojexavai.
 Ha'e gui tetā kora rarōa kuery ju omboi xeao puku.
⁸ Jerusalém memby kuery, ajerure pêvy.
 Xerembiayvu pexa vy mba'e pa pendeayvu 'rā ixupe?
 Pemombe'u xee amano ta maa ayvu vaipa vy.

Irū kuery ijayvuague

- ⁹ Ha'e gui ndee pavē kunhague gui neporāve va'e,
 mba'e py tu nerembiayvu amboae kuery gui ha'eve?
 Mba'e tu nerembiayvu amboae kuery gui iporāve va'e oguereko,
 ha'e rami aguā re orevy rejerure aguā?

Ta'yxy ijayvuague

- ¹⁰ Xerembiayvu ma xiī pytā rei,
 ha'e ma dez mil ikuai va'e gui teī omboetevepy.
¹¹ Inhakā ma ouro oiky'a'o porā mbyre rami.
 Hi'a ma guapytā xā ha'e xapirē rague rami huū va'e.
¹² Hexa ma apykaxu yakā rembe re ikuai va'e rexā rami.
 Kamby py omoxiī ha'e ombojegua pyre rami hexa.
¹³ Hova ma yvyra bálsamo ty rami heakuā va'e,
 ha'e yvyra rogue heakuā porā va'e omboaty pyre rami.
 Hembe ma yvoty gui mirra iporāve va'e otykyā rami.
¹⁴ Ijyva ma ouro guigua aygue ita porāgueve oīa rami.
 Iku'a ma marfim xiī va'e ita safira py ombojegua pyre rami.
¹⁵ Hetyma ma ita mármore guigua yta ouro ete áry omo'ā mbyre rami.
 Yvatea ma Líbano yvyty rami, yvyra yvate va'e rami ete.
¹⁶ Ijayvua ma he'ē porā va'e rami.
 Ha'e ma opa mba'e py xembovy'a.
 Ha'e rami rima xerembiayvu oiko.
 Ha'e rami xeme, Jerusalém memby kuery.

6

Irū kuery ijayvuague

- ¹ Kunhague pavē gui neporāve va'e,
 marā katy tu oo ra'e nerembiayvu?
 Mava'e tape rupi tu nerembiayvu oo ra'e?
 Ore roipptyvō 'rā reka aguā.

Ta'yxy ijayvuague

- ² Xerembiayvu ma ojeupagua yvotyty ha'e bálsamo ty katy oguejy,
 guymba kuery omongaru aguā yvotyty rupi, ha'e yvoty ikuai va'e oiporavo aguā.
³ Xee ma xerembiayvu mba'e, ha'e xerembiayvu ma xemba'e.
 Yvotyty rupi omongaru oikovy guymba kuery.

Ime ijayvuague

- ⁴ Xerembiayvu, Tirza tetā rami neporā,
 ha'e xembovy'a Jerusalém rami.
 Xondaro kuery bandeira revegua rami omboete reipy reiko.
⁵ Erova nderexa xegui, mba'eta xembopy'a eta rei.
 Nde'a ma kavara kuery Gileade yvyty áry gui oguejy jogueruvy va'e rami huū.
⁶ Neraī ma vexa'i kuery ombojauague gui oē jogueravy va'e rami xiī.
 Ha'e kuery peteī-teī oguereko mokoī'i ma voi va'e,
 ha'e neī peteīve ma voi ndata'y e'ŷi va'e rami.
⁷ Nderova ma romā'a omboja'o pyre rami xiī porā rei,

- nderova mo'aa oĩ teĩ iporãa ojekuaa.
- ⁸ Sessenta huvixa ra'yxy ikuai, ha'e oitenta ikuai ta'yxy jevy.
Hembiguai kuhataĩ ma mbovy rei e'ŷ ikuai.
- ⁹ Ha'e rã ayvu ete va'e ma pete'i ae,
xerymba apykaxu rami ivaikuea oĩ e'ŷ va'e.
Ha'e ma pete'i va'e ixv oguereko vy ikuavãare oayvuve va'e.
Kunhataĩgue oexa vy ijayvu okuapy iporãa rami.
Huvixa ra'yxy ha'e ta'yxy jevy ikuai va'e voi oexa vy oguerovy'a vaipa okuapy.

Irũ kuery ijayvuague

- ¹⁰ Mava'e tu peva'e ko'ẽ ramo'ia rami ojekuaa va'e?
Ha'e va'e ma jaxy rami iporã ha'e kuaray rexakã rami iky'a e'ŷ va'e.
Xondaro kuery bandeira reveguia rami omboete reipy oiko.

Ta'yxy ijayvuague

- ¹¹ Aguejy avy yvotyty ha'e yvyraty katy,
mba'emo renhoĩ pyau yvyugua rupi ikuai va'e aexa aguã,
ha'e uva henhoĩ paa aexa aguã, ha'e yvyla romã'y ipotypaa re.
- ¹² Mba'exa vy ete rã
xeretarã kuery yvatekueve mba'e karóxa py merami aĩ.

Irũ kuery ijayvuague

- ¹³ Sulamita, ejevy ju na.
Ejevy ju, ore kuery roexaxeve ju.

Ta'yxy ijayvuague

- Mba'e re tu pexaxe sulamita
Maanaim py ojeroky rã?

Ime ijayvuague

- ¹ Huvixa rajy, ndepy regua reve reguataa ma iporã meme.
Neretyma ku'a ma mbo'y hembiapo kuaa va'e rembiapo rami iporã.
- ² Nepuru'ã ma karo ojere va'e vinho oĩ riaeia rami.
Ndeku'a ma trigo omboaty pyre yvoty ombojerepy rami.
- ³ Nekã mokoïve ma guaxu ta'y'iague meme rami.
- ⁴ Ndeaju'y ma torre marfim guigua rami iporã.
Nderexa ma yy omboty pyre Hesbom py, Bete-Rabim rokẽ yvy'iry oĩ va'e rami.
Nexi ma Líbano yvy re torre Damasco katy ooa py hi'aĩ va'e rami.
- ⁵ Neakã ma Carmelo yvity rami.
Nde'a ma púrpura rami iporã.
Huvixave ojejopy uka nde'a reipopẽ va'ekue re.
- ⁶ Ndee ma neporã ha'e arov'y'a vaipa,
xembovy'a ete xerayvua py.
- ⁷ Nde'yvia ma pindo rami,
ha'e rã nekã ma guapytã rami.
- ⁸ Xee aipoa'e: "Ajeupi rã pindo re,
ajopy 'rã ixã rapo re", ha'e.
Nekã toĩ xevy uva arupõ xã rami,
nepytuëa taeakuã porã maçã rami.
- ⁹ Xerayvua ma vinho iporã va'e rami.

Ta'yxy ijayvuague

- Ha'e va'e vinho ma xerembiayvu toy'u tema,
toxyry ovvijuru ha'e haĩ rupi.

- ¹⁰ Xee ma xerembiayvu mba'e,
ha'e rā ha'e xepota.
- ¹¹ Eju xerembiayvu, jaa nhuündy rupi jaiko,
pytū jaaxa aguã teko'a'i rupi.
- ¹² Ko'ẽmba'i ramove javy voi vy jaa uvaty re nhama'ẽ vy.
Jaexa uva poty ojepe'a ma paa,
ha'e yvyra hi'a va'e henhoĩ paa.
Ha'e py ma xee aexa uka 'rā roayvu etea.
- ¹³ Mandrágora reakuã nhaetū,
ha'e nhanerokẽ rupi ikuai yvyra'a iporãgueve,
ipyau ha'e yma guare guive.
Xerembiayvu, ha'e nunga ha'e javi xee amoĩ porã ndevy peguarã.

8

- ¹ Ndee xekyvy va'e rire, xexy omokambu va'ekue ae!
Ha'e rami va'e rire tape rupi rovaex̄ vy
xee roayvu 'rāgue avave rei xejou vai e'ŷ re.
- ² Xee rogueraa vy rogueroike 'rāgue xexy ropy.
Ha'e gui ndee xembo'e 'rāgue.
Ha'e rā ndevy ame'ẽ 'rāgue rey'u aguã vinho iporãve va'e regua,
ha'e xe yvyra'a rykue.
- ³ Ndeaxua regua oĩ 'rāgue xekā guýry,
ha'e rā reiporu kuaa regua ma xekuavã 'rāgue.
- ⁴ Jerusalém memby kuery, ajerure pêvy:
pemomyĩ eme rojoayvua, tove toke ranhe,
ha'e ae ovyx e'ŷa ja.

Irũ kuery ijayvuague

- ⁵ Mava'e tu peva'e, teko'a e'ŷa katy gui oẽ ouvy vy
guembiayvu reve joe ojeko jogueruvy va'e?

Ime ijayvuague

- Maçã'y rembypy guy py xee romomyĩ.
Ha'e py ae ndexy ndererek'o'i raka'e.
Ha'e py ae ju nekuavãare oendu raka'e haxy va'e.
- ⁶ Emoĩ xerery nekuraxõ re imbojaarã rami, ndejyva re guive.
Mba'eta jajoayvua ma manoa rami ipo'aka.
Ha'e rā takâte'ŷ ma yvyra rupa rami nda'evei ete va'e.
Ha'e va'e regua tapyĩ ma hendy revegua,
tata rami okai oiny va'e.
- ⁷ Yy tuvixa va'e teĩ nomboguei 'rā jajoayvua,
yakã ikuai va'e ndoja'o'i 'rā.
Joayvua repyrã amongue oguereko va'e ha'e javi ome'ẽ teĩ mba'everã ndovarei.

Irũ kuery ijayvuague

- ⁸ Ore kuery orereindy roguereko ikã e'ŷ teri va'e.
Mba'e tu rojapo 'rā ixupe gua'yxyrã re ojerurea ramo?
- ⁹ Tetã kora ha'e oiko va'e rire
ixupe rojapo 'rāgue peteĩ torre prata guigua.
Ha'e rā okẽ va'e rire
ronhovã 'rāgue yvyrape yary guigua py.

Ta'yxy ijayvuague

- ¹⁰ Xee ma tetã kora, ha'e rā xekã ma torre rami oĩ.
Ha'e rami rā xerembiayvu xerexa vy xererovy'a 'rā.

Irũ kuery ijayvuague

- ¹¹ Baal-Hamom py Salomão oguereko peteĩ uvaty.
 Ha'e va'e omboaxa raka'e opena va'erã kuery pe.
 Ha'e ramo hi'a rekovia peteĩ-teĩ ogueru ixupe mil hatã'i va'e prata guigua.

Ta'yxy ijayvuague

- ¹² Ha'e rã xe uvaty ma xereve ae oĩ xee aipotaa rami areko aguã.
 Ha'e gui ndee Salomão, eju ejopy mil hatã'i va'e,
 ha'e hi'a re opena va'e kuery ju duzentos 'rã ojopy.

Ime ijayvuague

- ¹³ Ndee yvotyty rupi reiko va'e,
 nhaneirũ kuery oenduxe okuapy ndeayvua.
 Xee voi taendu.

Ta'yxy ijayvuague

- ¹⁴ Xerembiayvu, eju pojava!
 Enha ejuvy guaxu e'ŷ vy guaxu ra'y
 yvyty heakuã va'e áry rupi opo-opo ouvy va'e rami.

Isaías ayvu oĩa Isaías ayvu oĩa

“Kova'e ma Amos ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequiasju. ‘Ndee yva, endu ke, ha'e ndee yvy, eikuua pota ke, mba'eta ijayvu va'e ma Senhor ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy. Vaka kuery minha oikuua 'rã oja, ha'e mburika'i voi oikuua 'rã ija omongaruaty. Ha'e rã Israel kuery ma ndoikuuaai mba'eve, xevyguia kuery ndoikuuaai mba'eve ete”, he'i” (1.1-2). Profeta Isaías ijayvu raka'e Nhanderuete po'akaa ha'e pete'i oikoa re, guembiguai jogueraa jepearã ombou aguã re guive. Ha'e va'e ma Jesus Cristo.

Capítulo 1 guive 39 peve ijayvu Assíria pygua kuery Judá kuery ombojexavaia re. Ha'e rami teĩ profeta pe nda'eveive va'e ma hetarã kuery ojejavvy reia, Nhanderuete nonhe'ẽ renduia ha'e hexe ndojeroviai okuapy.

Capítulo 40 guive 66 peve omombe'u ha'e kuery yvy mboae rupi ombojexavaia teĩ Nhanderuete omboaxy vy oguerojevy ju ha'e ogueraa jepe aguã. “Nhanderuete aipoe'i: ‘Xevyguia kuery pe pendeayvu pembovy'aa rupi, pembovy'a ju ke. Pendeayvu porã'i ke Jerusalém pygua kuery pe. Ha'e vy aipopeje: “Opa ma pendere opu'ãa ague, mba'eta penderekoo vaiague omboguepaa ma. Pejejavvyague re pepaga aguã va'ekue mokoõgue ma pejopy Senhor po gui”, peje’” (40.1-2).

Ojejavypa va'e kuery pe ijayvuague

¹ Kova'e ma Amoz ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequias ju.*

² Ndee yva, endu ke, ha'e ndee yvy, eikuua pota ke, mba'eta ijayvu va'e ma SENHOR ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy.

³ Vaka kuery minha oikuua 'rã oja, ha'e mburika'i voi oikuua 'rã ija omongaruaty. Ha'e rã Israel kuery ma ndoikuuaai mba'eve, xevyguia kuery ndoikuuaai mba'eve ete”, he'i.†

⁴ Nda'evei ete 'rã ha'e rami ete pendeko vai va'e pe. Peẽ kuery pejejavya anho perekoo va'e, heko vai va'e regua, ha'e iky'apa va'e ra'y kuery pendekuai. Pepoipa ma SENHOR gui, pendeayvu vai Israel kuery Ruete Iky'a e'ŷ va'e pe, ha'e vy jypy guare rami ju pendekuai.

⁵ Mba'e re tu pendekuai axy reivexe ri pejejavypa vy? Mba'eta peneakã raxypa, pendepy'a voi ijipa ma.

⁶ Pendepy mbyte guive pendeapte peve penderete ivaipa ma, opa marãguia ai vaikue oĩ penderete re. Ha'e nunga ndoiky'a'oai 'rã, ndojokuaai 'rã, neĩ azeite py voi noipoanoai 'rã.

⁷ Pendeyvy ma ivaipa ma, peneretã ikuai va'e voi omombaa ma tata py. Peẽ kuery pexaa py amboae yvy guigua kuery ho'upa penereminhotygue. Ha'e ramo pendeyvy rupi tekoague rive opyta, amboae yvy guigua omomba rire.

⁸ Sião memby‡ voi opyta ha'e ae'i, oguy vaikue'i uvaty, e'ŷ vy pepino-ty mbyte py oĩ va'e rami, ha'e e'ŷ vy tetã ojokopaa va'e rami.

⁹ Ha'e gui SENHOR ixondaro reta va'e amongue'i jakuave aguã rami ndoejai va'e rire nhakanhymba 'rãgue Sodoma ha'e Gomorra tetã rami.§

* 1:1 Judá kuery kuaray puku-a katy, ha'e gui Israel kuery kuaray apu'a'ia katy ikuai va'e. Judá regua tetã tuvixave va'e ma Jerusalém Isaías reko, ha'e rã Israel regua tetã tuvixave va'e ma Samaria. † 1:3 Amongue py “Israel kuery” 'ea 'rã Israel kuery pe ae, ha'e rã amboae henda py ma mokoõve regua Judá ha'e Israel pe ijayvu. Apy ma mokoõve re ijayvu. ‡ 1:8 “Sião memby” he'ia ma Jerusalém tetã re ae ijayvu vy. § 1:9 Tetã Sodoma ha'e Gomorra ma Nhanderuete omomba vyvoi raka'e tata omboguejy vy, ha'e pygua kuery opa marã rei ikuai rire (Gênesis 18.1-19.29).

Ombojerovia merami rive va'e re ijayvuague

¹⁰ Peē Sodoma pygua huvixa kuery, pendu ke SENHOR ayvu! Gomorra tetā py pendekuai va'e, pejapyxaka Nhanderuete guigua lei rupi penembo'ea re.*

¹¹ SENHOR aipoe'i: "Mba'erā tu ha'e rami ete xevy peme'ẽ mba'emo? Xee ndaipotavei ma vexa'i ava ha'e mymba ikyra va'e peapy reve peme'ẽ va'e. Xee ndarovy'avei ma toro ra'y ruguy, xee ndaipotavei ma vexa'i ha'e kavara.

¹² Xerenonde pejexa uka aguā peju vy mava'e oipotaa rami tu penha-penha xevyguia templo roka rupi?

¹³ Peruve eme xevy ndovarei va'e regua peme'ẽ va'erā. Heakuā porā va'e xevy peapy va'e xembojeguaru ma, ha'e jaxy pyau'i ára ngaru pejapo va'e, ha'e gui sábado ha'e amboae ára py pendeatya voi, mba'eta ndaropo'akavei ma nhemboaty iky'a e'ŷ va'e oiko aguā py pejeavy pekuapya.

¹⁴ Jaxy pyau'i ára ngaru oikoa py, ha'e amboae ára pendeatya py ma xembopoxy pekuapy, ndaropo'akavei ma. Xekane'õ ma arojexavai vy.

¹⁵ Ha'e nunga rupi xevy pe pejapukaia rupi pendepo peupi ramo xee nama'ẽi 'rā. Mbovykue rei e'ŷ pejerure teĩ xee naendui 'rā, jouguy py pendepo ky'a ramo.

¹⁶ Pejejoi ke, pejeky'a'o, penderekvaia peipe'a xerenonde gui! Pejep'e pejapo vaia gui,

¹⁷ ha'e peikuaa pota iporā va'e rupi ju pendekuai aguā. Pejoguereko pota teko porā rupi. Pejoko nhombojexavaixe va'e, pepy tyre'ŷ kuery ojavyky reia rā, ha'e peipytyvõ imeve'ŷ va'e", he'i.

Imboaxya rupi "Peju ke" he'iage

¹⁸ SENHOR aipoe'i: "Peju ke toromongeta. Pejeavya pytā rei rire teĩ xee romoxiĩ 'rā yro'y rami. Pytā huū rei teĩ romoxiĩ 'rā vexa'i rague rami.

¹⁹ Ha'e rami peikoxe, ha'e xenhe'ẽ rendu ri ramo romongaru 'rā mba'emo porā yvy omoingo va'e re anho.

²⁰ Ha'e rā naxenhe'ẽ rendui vy pepu'ã rei ramo pendejukapaa 'rā kyxe py." SENHOR ae ha'e rami ijayvu va'ekue.

Jerusalém pygua kuery ombopaga rire oepy ju aguā re ijayvuague

²¹ Tetā Nhanderuete pe ojeroviapy peiko va'ekue ri kunha itavy rei va'e rami ju pendekuai. Pendea py heta ikuai va'ekue ri iporayvu'i ha'e peteĩ rupi ikuai va'e. Ha'e rā aŷ ma jojukaa rive anho ikuai.

²² Prata perekova va'ekue ma omombo pyrā rive opyta. Pende-vinho iporāve va'ekue ri yy re rive omoirūa.

²³ Pendea py huvixa kuery ikuai va'e voi heko vai va'e anho ikuai, imonda va'e kuery irū. Ha'e kuery peteĩ-teĩ ojeupe guarā mba'emo ome'ẽ uka opena aguā, ojoupave aguā re rive 'rā oo. Ha'e rami avi ndoepyvei ma tyre'ŷ kuery, imeve'ŷ va'e re voi nopenavei ma.

²⁴ Ha'e nunga rupi SENHOR ixondaro reta va'e, Israel kuery Ruete ipo'akapa va'e aipoe'i: "Aŷ gui xepoxy aexa uka ta ma xerovaigua kuery pe. Ajepy 'rā ndaxerayvuvei okuapyaque re.

²⁵ Penderovai aipi 'rā xepo, roiky'a'o 'rā kavō py rami, pendea gui aipe'a aguā iky'a va'e ha'e javi.

²⁶ Xee amoĩ ju 'rā joguerekoarā yma guare rami. Amoĩ 'rā penemonetaarā jypy guare rami. Ha'e ramo mae peneretā pe 'Teko porā oĩa' ha'e 'Ojeroviapy ikuua' 'ea ju 'rā.

²⁷ "Aepy ju 'rā Sião tetā ha'evea rami, teko porā rupi araa jepe 'rā ojeko rerova uka va'e ha'e javi.

²⁸ Ha'e rā teko vai rupi ikuai va'e ha'e ojejavypa rei va'e ma amomba vyvoi 'rā. Ha'e ramo SENHOR gui ojepe'a va'ekue okanhymba 'rā.

²⁹ Mba'eta peē kuery peximba 'rā yvyra pejou porā reiague re, ha'e nda'evei nho 'rā yvotyty pejou porāveague re.†

* 1:10 Apy ma guetarā kuery pe ae "Sodoma ha'e Gomorra pygua" he'i. † 1:29 Ha'e kuery ma yvyra ikuai va'e guýry, ha'e yvotyty rupi onhembo'e va'ekue amboae rami rei. Mba'emo ra'angaa ombojeroviaa rupi opa marā rei ikuai.

³⁰ Ha'e nunga rupi yvyra rogue omanomba rei va'ekue rami 'rā pendekuai, ha'e yvotyty ipirupa va'ekue rami avi.

³¹ Peē kuery va'e regua ipo'akave va'ekue ri mba'emo pire rami 'rā ikuai, ha'e ha'e kuery mba'emo ojapo va'ekue ma tata raviju rami 'rā optya, mba'eta mokoīve okanhymba 'rā tata py, imboguearā ndoikoi 'rā guive", he'i.

2

Miquéias 4.1-5

¹ Pova'e ma Amoz ra'y Isaías pe mba'emo oexa uka reve ayvu ombou va'ekue Judá ha'e Jerusalém re.

² Ha'e gui opaa ára yvyty SENHOR pegua oo oĩa ombo'yvateve 'rā yvyty ikuai va'e áry. Ha'e ramo yvy regua kuery ha'e javi oje'oi 'rā ha'e katy.

³ Heta regua kuery oo vy aipoe'i 'rā joupe-up: "Peju ke, jajaje'oi SENHOR pegua yvyty re, Jacó kuery Ruete pegua oo oĩa katy. Ha'e ma nhanembo'e 'rā oikoa re, ha'e va'e rupi nhande kuery voi nhandekuai aguã. Mba'eta Sião gui ma oikuua ucaa 'rā lei, Jerusalém gui onhendu 'rā SENHOR ayvu", he'i 'rā okuapy.

⁴ Ha'e gui ma SENHOR oikuua pota 'rā yvy regua kuery re, omo'arandu 'rā heta regua. Ha'e ramo ha'e kuery okyxé gui ojapo 'rā yvy karañarā, ha'e hu'y guaxu gui ojapo 'rā kyxe yvyra rakā ayaara. Mba'eta yvy regua kuery okyxé ndoguerojeroviavei 'rā, neĩ joe opu'ã aguã voi ndoikuavei ma 'rā.

⁵ Peju ke Jacó ramymino kuery, nhande kuery voi nhandekuai SENHOR rexakãa rupi.

Avakue onhemboyvate va'ekue omo'yvyi'i aguã re ijayvuague

⁶ Ha'e gui SENHOR, ndee rejapa va'e ty'y ndevyguia Jacó ramymino kuery. Mba'eta ndevyguia kuery ma kuaray oua katyguia gui oikuua amboae rami onhembo'e aguã, filisteu kuery rami ae 'rā imba'ekuua, yvy mboae regua ra'y kuery re 'rā irũ okuapy.

⁷ Ijyvy re ma heta oĩ prata ha'e ouro. Ndoipapa kuaavei ma opa mba'e porã oguerekoo va'e. Ha'e py oĩ kavaju anho, ha'e karóxa'i voi mbovy rei e'ŷ ikuai.

⁸ Ha'e kuery yvy re tynyê avi mba'emo ra'angaa ombojeroviapy. Ha'e kuery guenapy'ã re oĩ 'rā ha'e kuery ae po py ojapo va'ekue renonde, omboete 'rā ha'e kuery ae rembiapo.

⁹ Ha'e va'e rire ma omo'yvyi'imbaa, avakue pavẽ omoximbaa teĩ ndereperdoai ha'e kuery ojejavya.

¹⁰ Tapeo, peike itakua py penhemi! Yvy ku'i py penhemi SENHOR gui pekyje vy, hexakãa ha'e ipo'akaa gui.

¹¹ Mba'eta omomba 'rā avakue ojejou porã reiague, omo'yvyi'i 'rā onhemboyvate rei va'ekue. Mba'eta ha'e va'e ára SENHOR anho yvate 'rā.

¹² Mba'eta ovaõ 'rā ára SENHOR ixondaro reta va'e omo'yvyi'imba aguã ojejou porã rei va'ekue, onhemboyvateve va'ekue-'ekue ha'e yvateve va'ekue ha'e javi oitypa aguã,

¹³ oity aguã yvyra yary Líbano yvy regua yvatekueve, ha'e carvalho Basã yvy re ikuai va'e ha'e javi,

¹⁴ ha'e gui yvyty yvate va'e ha'e javi, yvy'ã ikuai va'e,

¹⁵ ha'e gui torre yvate va'e ha'e javi, ha'e tetã kora oĩ atã va'ekue meme,

¹⁶ ha'e gui kanoã guaxu Társis katy oo va'e ha'e javi, jaexa rã iporãve va'ekue teĩ.

¹⁷ Ha'e rami vy omomba 'rā avakue ojejou porãague, omo'yvyi'imba 'rā onhemboyvate-vea. Mba'eta ha'e va'e ára SENHOR anho yvate 'rā.

¹⁸ Ha'e gui ombovaipa 'rā mba'emo ra'angaa ha'e javi.

¹⁹ Ha'e ramo avakue onhemimba 'rā itakua py ha'e yvykua rupi SENHOR gui okyje vy, hexakãa ha'e ipo'akaa gui, ko yvy regua omondyipa aguã opu'ã ramo.

²⁰ Ha'e va'e ára anguja ha'e mbopi pe rive avakue omombo 'rā mba'emo ra'angaa prata ha'e ouro guigua, ha'e kuery ae omboete va'erã ojapo va'ekue.

²¹ Ha'e rami vy onhemimba 'rā itakua py ha'e itaova guy rupi SENHOR gui okyje vy, hexakãa ha'e ipo'akaa gui, ko yvy regua omondyipa aguã ha'e opu'ã ramo.

²² Ha'e nunga rupi pejeroviave eme avakue oapyīgua rupi rive ipytuē va'e re. Mba'erā tu ha'e kuery ovare?

3

Judá ha'e Jerusalém pygua kuery ikuia re guive SENHOR oikuua pota aguā re ijayvuague

¹ Mba'eta ma'ẽ, Jerusalém ha'e Judá gui SENHOR ixondaro reta va'e oipe'a 'rā mbojape, yy ha'e guekoverā oguerekō va'ekue ha'e javi,

² ha'e gui ipy'a guaxukueve, xondaro kuery, nhomboayvu va'ety, profeta, imba'ekuaa va'e kuery, ha'e tujakueve,

³ ha'e xondaro ruvixa cinqüenta re opena va'e, ha'e omboetevepy, nhomongetaa kuery, mba'emo ojapo kuaa va'e ha'e imba'evyky va'e kuery ha'e javi 'rā oipe'apa.

⁴ Ha'e rire huvixa ikuai va'ekue 'rāgue py kunumigue'i ju 'rā omoī. Ha'e ramo kyrīgue po py oī 'rā ha'e kuery re opena aguā.

⁵ Ha'e rire nhomoingo axy 'rā jomeme, peteī-teī ngoo katy'i ikuai va'e reve. Kunumigue'i opu'ā 'rā tujakueve re, ha'e opa marā rei ikuai va'e opu'ā 'rā omboetevepy re.

⁶ Ha'e va'e jave ma amongue nguu ro py ovaē vy guyke'y pe aipoe'i 'rā: "Ndee tu ndeo rima. Ha'eve reiko aguā oreruvixarā. Epena ha'vy kova'e tekoा ivaipa va'ekue re", he'i 'rā.

⁷ Ha'e rami teī ha'e va'e árave tyke'y ombovai vy aipoe'i 'rā: "Xee tu poropoanoa e'ŷ, ha'e xero py ndarekoi mbojape, neī ao. Nda'evei xee aī aguā heta va'e kuery ruvixarā", he'i 'rā.

⁸ Mba'eta Jerusalém ivaipa, Judá regua voi oitypaa, mba'eta oayvu py ha'e mba'emo ojapoа py ha'e kuery SENHOR re opu'ā okuapy, Hexakāmba va'e ombopoxya rupi rive ikuai.

⁹ Ha'e kuery rova re ojekuaa ojejavypa va'ea. Sodoma pygua kuery rami ete oexa uka 'rā ojejavypa reia onhomí e'ŷ re. Nda'evei ete 'rā ha'e kuery pe, ojeupe ae ojapo vai rire.

¹⁰ Ha'e rā heko porā va'e kuery pe ma aipo're: "Pēvy pe iporā va'e oiko 'rā", 're, mba'eta ha'e kuery ojopy 'rā ikuai porāague repy.

¹¹ Ha'e rā heko vai va'e pe ma nda'evei ete 'rā, opa mba'e py ikuai axy 'rā. Mba'eta ojapo vαιague ae ju 'rā ojeapa ha'e kuery re.

¹² Xeretarā kuery re opena va'e ma kunumigue meme, ha'e kuery re opena aguā ma kunhague po py oī. Xeretarā kuery, pendererekoa kuery ma penembotavypa, mba'eta ombovaipa tape peo aguā va'e.

¹³ Ha'e nunga rupi SENHOR ae 'rā oikuua pota, oiko katu ma omboayvu aguā yvy regua kuery ha'e javi.

¹⁴ SENHOR omboayvu 'rā ojeupergua kuery mongetaaty ha'e huvixa kuery. Ha'e vy aipoe'i 'rā: "Peē kuery ae ma xe'uvaty mombaare peiko. Iporiaukue'i gui peraa rive va'ekue ma pendero py ae oī.

¹⁵ Mba'e nunga rupi tu pemoingo axy xevygua kuery, ha'e pembojexavai iporiaukue'i?" he'i SENHOR ixondaro reta va'e.

Sião pygua kunhague ombopaga aguā re ijayvuague

¹⁶ Ha'e gui SENHOR aipoe'ive ju: "Pexa na Sião pygua kunhague ojejou porā rei okuapy va'e! Oaju'y omoatā reve rei 'rā oguata, oma'ẽ 'rā nda'evei reia rupi, opyrō py'i'i rei, ha'e opy nhu'ā regua oparā rei reve 'rā oguata", he'i.

¹⁷ Ha'e nunga rupi Sião pygua memby kuery akā SENHOR omboaipa 'rā, oexa ukapa 'rā guive ha'e kuery oxīmba aguā.

¹⁸ Ha'e va'e ára SENHOR oipe'apa 'rā onhembojeguaa ha'e kuery opy nhu'ā re oguerekō va'e, akā regua ha'e ijegua jaxy pēgue ramigua,

¹⁹ ha'e namixā, poapy regua, hova mo'āa ovava va'e,

²⁰ ajukue akā regua, corrente'i opy nhu'ā re oguerekō va'e, ku'axā, heakuā porā va'e ryru, mba'ekuaa ryru,

²¹ kuā regua, xī apy regua,

- ²² ao iporãve va'e, manto, aju'y regua, voko,
²³ ojexaa, kamixa perirí'i, 'a regua ha'e tova mo'ää ipukuve va'e ha'e javi.
²⁴ Ha'e va'e rire ha'e kuery onhemoeakuãmba rei oikovy 'rãgue py heakuã vaikue rei 'rã oikovy. Iku'axã 'rãgue py oiporu 'rã ixã va'e. Ha'e gui oje'avyky porã rei 'rãgue py inhakã pire rei 'rã. Ao iperirí'i va'e 'rãgue py voxá inhana rei va'e guigua 'rã oiporu. Ha'e iporã rei 'rãgue py optya 'rã ipere okaiague rupi.
²⁵ Ime kuery ma ojukapaa 'rã kyxe py, ipy'a guaxukueve voi omanomba 'rã joe opu'ää rupi.
²⁶ Ha'e ramo tetã rokẽ py kunhague opa marã ojae'o 'rã okuapy ipy'a vai vy. Sião tetã ivaipa ramo vyv py rive oguapy 'rã.

4

¹ Ha'e va'e ára sete kunhague ojopy 'rã peteí'i ava, ixupe aipoe'i 'rã: "Ore ae rojou 'rã ro'u va'erã ha'e oreaorã, ri teí tove nderery rupi toronhemboery rive, roximba reia rupi ve'ý roiko aguã", he'i 'rã okuapy.

SENHOR guigua Yvyra Rapytakue Renhoí re ijayvuague

- ² Ha'e va'e ára ma SENHOR guigua Yvyra Rapytakue Renhoí oiko vy yvate porã 'rã, ojou porãmbaa 'rã guive. Ijyvy rupi ikuai va'e voi iporã va'erã meme, Israel kuery oo jepe va'ekue oguerovy'apa ha'e ojou porã aguã.
³ Ha'e gui Sião pygua okuave va'e Jerusalém py optya va'ekue pe ma "Iky'a e'ý va'e" 'ea 'rã, oikove aguã Jerusalém py guery ombopara uka va'ekue ha'e javi pe.
⁴ Mba'eta SENHOR oiky'a'opa ju 'rã Sião memby kuery, Jerusalém pygua kuery gui omboguepa 'rã tuguy omoëague ha'e kuery re oí va'e, Onhe'ë teko porã rexaa ukaa ha'e joky'a'o va'e rupi ae.
⁵ Ha'e gui Sião vyvty áry, ha'e ha'e py ijatypa okuapy va'e áry SENHOR omoí 'rã peteí arai ara py, ha'e gui pyávy ma ombou 'rã tata rendy vuku hataxí reve. Ha'e ramo ha'e javi áry rupi hexakãa ojao'i 'rã oo ao'ia rami.
⁶ Ha'e nunga ma ara py oí 'rã kuaray'ärã, mba'eta ha'e py onhemi okuapy va'e pe ojoko 'rã kuaray haku, vyvty atã ha'e oky.

5

SENHOR mba'e uvaty re ijayvuague

- ¹ Aý ma aporaei ta xerembiayvu pe, ixupeguv uvaty re 'rã aporaei. Mba'eta xerembiayvu ma peteí uvatyrã onhoty raka'e vyv porãa py.
² Ha'e rami vy ojo'o vyv, oguenoëmba ita ikuai va'ekue, ha'e gui uva yky porãgueve anho onhoty. Uvaty mbyte ojapo torre yvate va'e oma'ë jepi atyrã, ojapo avi oja guaxu uva'a oumbiri atyrã. Ha'e gui ma oarõ oikovy onhoty va'ekue hi'a porã aguã. Ha'e rami teí ha'e va'e 'rãgue py iro va'e anho oiko hi'a.
³ Ha'e rire aipoe'i: "Aý ma Jerusalém ha'e Judá py pendekoa va'e, ajerure pêvy: Peikuaa pota xere ha'e xe'uvaty re.
⁴ Mba'e nunga tu anhoty va'ekue re ajapove aguã ha'eve 'rãgue ajapoague áryve? Ha'e mba'e re tu iporã va'e arõ va'e 'rãgue py iro va'e anho oiko?
⁵ Aý ma xee amombe'u ta pêvy xe'uvaty re ajapo aguã. Aipe'apa 'rã ikorarã juu anhoty va'ekue, xe'uvaty optya aguã mymba okaru atyrã rive. Aity 'rã ikora mymba kuery opyrõmba aguã.
⁶ Ajapo 'rã optya rive aguã rami. Ha'e ramo uva rembypy nomoatyrõavei 'rã, neí vyv voi nomboa'eveavei 'rã. Ha'e rami 'rãgue py juu ha'e juu rakuaendy rive 'rã ikuai. Ha'e arai pe xeayvu 'rã hi'áry nda'okyvei aguã re", he'i.
⁷ Mba'eta uvaty ojeupe guarã SENHOR onhoty va'ekue ma Israel kuery ae, uva rembypy oguerovy'a va'ekue ma Judá kuery. Ha'e oarõ oikovy teí ha'e kuery teko porã rupi ikuai aguã oexaxe vy. Ha'e rami teí lei rovai rupi rive ikuai ra'e. Teko porã 'rãgue py haxé reia rupi anho ikuai.

"Heko vai va'e pe nda'evei ete 'rā" he'iague

⁸ Nda'evei ete 'rā peẽ kuery penderorā pejapo-japove va'e ha'e pendeyvyrā pejoujouve va'e pe, amboae kuery oĩ aguã nda'evei peve. Ha'e rami vy peẽ kuery anho peiko pendeyvy mbyte rupi.

⁹ Ha'e gui SENHOR ixondaro reta va'e aipoe'i xevy: "Anhetẽ heta oo opyta rei 'rā, tuvixakueve ha'e iporãgueve voi, avave rei noñavei rā.

¹⁰ Ha'e va'e jave peteĩ alqueire uvaty rape ome'ẽ 'rā vinte litro ete'i, ha'e dez voxatrigora'yigue gui ma teĩ dez quilo ete'i 'rā ome'ẽ", he'i.

¹¹ Nda'evei ete 'rā oka'u va'e kuery pe. Ha'e va'e kuery ma ko'ẽ'i ramove vinho oy'u aguã omboypy vy pytû mbyte raxa peve 'rā oo, vinho py onhemboakupa peve!

¹² Ha'e kuery ngaru ojapoaa py ogueru 'rā mbaraka, mba'epu ixã reta va'e, pandeiro ha'e mimby. Vinho heta avi 'rā oĩ oy'u va'erã. Ha'e rā SENHOR ojapo va'e re ma ha'e kuery ndoikuua potai, na'ima'endu'ai guive opo py mba'emo ojapo va'ekue re.

¹³ Ha'e nunga rupi xevyguia kuery ogueraapaa 'rā escravo-rā, mba'eve re ndoikuua potaiague re rive. Ha'e kuery va'e regua yvatekueve teĩ oendu 'rā karuai, ha'e heta va'e kuery ojexavai 'rā okuapy ijy'uvei gui.

¹⁴ Ha'e nunga rupi xevyguia omokõvexe vy oipe'a vaipa 'rā ojuru, ha'e py Jerusalém pygua omboeteve pyre kuery oguejypa aguã, ov'y'a vy hevovo reia rupi ikuai va'ekue, ha'e rami ikuai rupi oguerov'y'a rei va'ekue voi.

¹⁵ Ha'e rami vy heta va'e kuery opa 'rā oje'oivy, avakue omo'yvy'imbaa 'rā. Ojejou porã rei va'ekue voi yvy katy rive 'rā oma'ẽ okuapy.

¹⁶ Ha'e rā SENHOR ixondaro reta va'e ma yvate 'rā joe oikuua potaa py. Nhanderuete iky'a e'ŷ va'e gueko porãa rupi vy oexa uka 'rā iky'a e'ŷ va'ea.

¹⁷ Ha'e py ma vexa'i kuery okaru 'rā okuapy ha'e kuery ae okaruaty py rami, ha'e hoo va'e'ŷ ju 'rā ojou okuapy guembi'urã oguerekopa rei va'ekue oyvy oajaague rupi.

¹⁸ Nda'evei ete 'rā teko vai rupi onhea'a va'e kuery pe, mba'emo ixã py oguerua rami nhombotavypa vy! Ha'e kuery ma karóxa omoatãa rami omoatã 'rā heravy gueko vaia.

¹⁹ Ha'e rami teĩ ha'e kuery aipoe'i 'rā: "Tove Nhanderuete tojapura, tojapopa vyvoi ojapoxe va'e, nhande kuery jaexa aguã. Tove Israel kuery ruete iky'a e'ŷ va'e onhembopy'aa toiko pojava jaikuua aguã mba'e nunga paa", he'i 'rā okuapy.

²⁰ Nda'evei ete 'rā iporã va'e pe "Mba'emo vai" he'i va'e kuery pe, ha'e rā mba'emo vai pe ma "Iporã" he'i va'e kuery pe. Ha'e kuery ma "Hexakãa" he'i 'rā pytû va'e pe rive, ha'e rā hexakãa pe ma "Pytãa" he'i 'rā. He'ẽ va'e pe "Iro va'e" he'i 'rā, ha'e rā iro va'e pe ma "He'ẽ va'e" he'i 'rā.

²¹ Nda'evei ete 'rā ojeupe ae "Hi'arandupa va'e" he'i va'e pe, mba'eta ha'e kuery anho oikuaapa va'ea rami oexa'ã teĩ.

²² Nda'evei ete 'rā vinho oy'u aguã anho ipy'a guaxuve va'e pe, ha'e iro va'e joo ramigua e'ŷ-e'ŷ omoirüa rupi ojerovia ete va'e kuery pe.

²³ Ha'e kuery ma ome'ẽmby ojopy 'rā omboeko porã aguã otekoavypa va'e, ha'e heko porã va'e omboeko vai aguã.

²⁴ Ha'e nunga rupi ha'e kuery opa 'rā tata mba'emo pire oapya rami, tataendy nhuñ pirukue omombaa rami. Ha'e rami ae avi ha'e kuery voi okanhymba 'rā, mba'emo rapo hu'ũmbaa rami avi, ha'e ipotykue yvytu ogueraapaa rami, yvy ku'i rami rive, mba'eta ha'e kuery nda'ikuaxiei rire SENHOR ixondaro reta va'e guigua lei rupi, noenduxei Israel kuery ruete iky'a e'ŷ va'e ayvu.

²⁵ Ha'e nunga rupi ae SENHOR poxya hendy ojeupergua kuery pe. Ha'e kuery rovai opo oupi reve ombopaga ramo yvyty ikuai va'e voi oryryipa. Ha'e ramo ha'e kuery re'õgue ma yty rami rive opyta tape rupi. Ha'e rami ete teĩ ipoxya ndoaxai teri. Opo oupi ae tema.

²⁶ Ha'e gui ma SENHOR oupi 'rā peteĩ bandeira oenoĩ aguã mombyry ikuai va'e. Ha'e pygua xondaro kuery pe otuvy nhe'ẽ 'rā yvy apy re ikuai gui ou aguã. Ha'e ramo ha'e kuery onha 'rā jogueruvy.

²⁷ Ha'e kuery va'e regua oua rupi neñ peteñe na'ikane'õi 'rã, nonhepyxangai 'rã guive. Neñ peteñe ma ndopytu'ui 'rã, neñ ndokei 'rã. Ha'e kuery ku'akuaa voi oñ atã porã 'rã, ixapatu xã voi ndoxo rivei 'rã.

²⁸ Hu'y voi hakua porã 'rã, guyrapa oguerekva'e xã voi oñ atã porã va'e meme. Hymba kavaju pyapẽ voi ita rami hatã 'rã, ha'e karóxa joe opu'ãa rupi oiporu va'e ruéra ma yvytu jere rami ojere pojava 'rã.

²⁹ Ha'e kuery ma reõ rami 'rã okororõ okuapy, reõ ra'y kuery rami ete. Ha'e kuery onhendu reve guembia ombotyryry 'rã heravy mombyry, ipo gui avave rei ojoguaa e'ŷ aguã.

³⁰ Ha'e va'e ára ha'e va'e kuery ye'ë rami 'rã onhendu Israel kuery rovai. Ha'e ramo amongue yvy re oma'ë va'e oexa 'rã pytüha'e jexavai anho. Mba'eta arai pytü va'e ojao'ipa ramo kuaray rexakaa ndojekuaavei 'rã.

6

Isaías pe mba'emo oexa ukaa ha'e ojapo ukaa ague

¹ Huvixave Uzias omanoa ma'etý re ma xee aexa SENHOR. Peteñ tenda openaaty yvate ha'e iporã ete va'e áry oguapy oiny rã aexa. Ijaõ ma templo ha'e javi rupi ojepyo oiny.

² Hi'áry rupi anjo kuery hexakãmba va'e ojekuaa. Ha'e kuery peteñ-teñ oguerekombóapy meme opopo: mokoõ py ojao'i ngova, mokoõ py ma ojao'i opy, ha'e gui amboae mokoõ py ma oveve 'rã oikovy.

³ Ha'e kuery ijayvu atã reve joupe-upé aipoe'i:

— SENHOR ixondaro reta va'e ma iky'a e'ŷ, iky'a e'ŷ, iky'a e'ŷ va'e ae. Hexakaa ma yvy jave rupi omonyé! — he'i okuapy.*

⁴ Ha'e kuery ayvu revovo gui templo yta ikuai va'e omyimba, ha'e opy rupi hataxí omonyemba ový.

⁵ Ha'e rami rã xee aipoa'e:

— Nda'evei ete 'rã xevy! Akanhy ta ma rima aŷ! Mba'eta xejuru ky'a va'e vy, ha'e ijuru ky'a va'e kuery mbyte rupi guive aiko vy ae xerexa py aexa Huvixave SENHOR ixondaro reta va'e! — ha'e.

⁶ Ha'e gui ma xea katy peteñ anjo hexakãmba va'e oveve ouvy. Opo py ogueru peteñ tapyí altar áry gui tapyí araa py oguenoë va'ekue.

⁷ Ha'e vy ma tapyí omboja xejuru re. Ha'e vy aipoe'i:

— Aŷ kova'e ma ndejuru re oja ma rire retekoavyague oipe'apaa ma, rejeyavyague omboguepaa ma — he'i.

⁸ Ha'e rire'ive aendu SENHOR ayvu aipoe'i ramo:

— Mava'e nda'u amondouka ta? Mava'e nda'u oo 'rã oreayvu mombe'uarã?

Ha'e ramo xee ambovai vy

— Xee ma apy aï. Xee ri xemondouka — ha'e.

⁹ Ha'e ramo SENHOR aipoe'i:

— Tereo ha'vy, aipo're heta va'e kuery pe: “Peñ kuery pejapyxaka porã teñ napendui 'rã mba'eve. Pexa porã nhea'ã teñ ndapexai 'rã mba'eve rei”, 're.

¹⁰ Ha'e rami vy emoakã ratã kova'e kuery. Ejapo nda'ijapyxakavei ha'e hexa pytumba aguã rami, guexa py oexa e'ŷ aguã, oapyxa py oendu e'ŷ aguã, ha'e opy'a py oikuaa e'ŷ aguã, ha'e kuery xea py ojevypa ju vy ojereraa jepe uka e'ŷ aguã rami — he'i.*

¹¹ Ha'e ramo xee aporandu:

— SENHOR, raka'e peve nda'u ha'e rami tema rerekop 'rã?

Ombovai:

— Ha'e kuery retã ombovaipaa peve, ha'e pygua va'ekue jipoavei peve, ha'e oo ikuai va'e voi opyta rivepa aguã, ijyvy voi omombaa peve,

¹² xee SENHOR mombyry amondoukapa peve, ha'e ijyvy py hepyarã ndoikoi ramo.

* 6:3 Apocalipse 4.8 * 6:10 Mateus 13.14-15, Marcos 4.12, Lucas 8.10, João 12.40, Atos 28.26-27

¹³ Xapy'a rei dez ikuaiague py pete'i opyta te'i ha'e va'e voi ojukaa 'rā. Ha'e rami avi yvyra terebinto ha'e carvalho oake'oa rā hapytakue optyaa rami avi xevyguia kuery iky'a e'ŷ va'e voi opyta 'rā hapytakue re, ha'yīgue re rami ae — he'i.

7

Israel ha'e Síria pygua kuery rovai ijayvuague

¹ Ha'e gui Jotão ra'y Acaz, Uzias ramymino va'e Judá pygua huvixa oĩ jave ma Jerusalém tetā re ou okuapy Síria pygua huvixa Rezim ha'e Israel pygua huvixa Remalias ra'y Peca. Tetā re ha'e kuery opu'ã okuapy te'i nda'ipo'akai.

² Ha'e jave Davi ramymino kuery oendu okuapy “Israel kuery reve Síria kuery onhemoirū okuapy nhanderovai”, 'ea rā.* Ha'e rami vy Acaz ha'e heta va'e kuery ha'e javi opy'a py okyjepa ete, yvyra ka'aguy re ikuai va'e yytu atā omomyimbaa rami oryryipa okuapy.

³ Ha'e ramo SENHOR aipoe'i Isaías pe:

— Aŷ tereo, ha'e eraa nderā'y hery “Okuave va'e ojevy va'erā” 'ea va'e, huvixa Acaz reve penhovaexī aguā. Ha'e va'e ma oĩ 'rā tape ajukue joiaty via rupi yupa yvy'ã katyve oĩ va'e py, yy rape apy py ae.

⁴ Ixupe ma aipo'ere: “Enhearō kuaa ke, enhemondyi eme guive huvixa Rezim poxya gui, Síria pygua kuery ha'e huvixa Peca gui. Ekyje eme, ndepy'a py ndekuerai rei eme guive. Ha'e kuery ma mokoõ tata'y hataxī oupy va'e rami rive ikuai.

⁵ Anhetē Síria kuery jogueroayvu okuapy va'ekue ndere ojapo vai aguā re, Efraim kuery ha'e Remalias ra'y reve. Ha'e vy aipoe'i okuapy:

⁶ ‘Nhapu'ã ke Judá yvy re. Nhamondyipa vy nhandepo'aka 'rā nhanemba'erā. Ha'e vy ha'e kuery mbyte nhamoõ 'rā Tabeal ra'y huvixaverā’, he'i va'ekue.

⁷ Ha'e rā SENHOR Nhanderuete ma aipoe'i: ‘Ha'e nunga ndoikoi 'rā.

⁸ Mba'eta Síria re pete'i anho oĩ tetā yvateve va'e. Ha'e va'e ma Damasco. Ha'e Damasco tetā py opena va'e ma Rezim anho. Ha'e rami ae avi Efraim kuery voi sessenta e cinco ma'etŷa py omombaa 'rā, ha'e rire nda'ikuavei 'rā.

⁹ Efraim re tetā yvateve va'e ma Samaria, ha'e Samaria py opena va'e ma Remalias ra'y anho. Ha'e gui peẽ kuery voi ndapejeroviai ri vy ndapekuavei avi 'rā', he'i.”

Emanuel rekorā re ijayvu ma voiague

¹⁰ Ha'e Acaz pe SENHOR oayvu omombe'u ukave ju:

¹¹ — Ejerure SENHOR nderuete pe hexa pyrā reikuua aguā, yvy katy ooa katy e'ŷ vy yvatea katy ojekuaa aguā te'i — he'i.

¹² Ha'e ramo Acaz aipoe'i:

— Xee ma ndajerurei 'rā, ndaeko a'ãi 'rā SENHOR — he'i.

¹³ Ha'e ramo profeta aipoe'i:

— Davi ramymino kuery, pendu ha'vy! Ha'e rami avi nda'evei teri teve avakue pemomboriaua? Ha'e gui aŷ ma Nhanderuete eteve voi pemomboriaux.

¹⁴ Ha'e rami te'i SENHOR ae 'rā oexa uka peikuua aguā. Ha'e gui pete'i kunhataõ oguereco'i 'rā kyrī va'e, oikuavā'i 'rā op'i'a'i. Ha'e vy omboery 'rā Emanuel.†

¹⁵ Ha'e va'e ma teko vai 'rāgue py iporā va'e ojapo kuaa jave kamby kekue ha'e ei rive 'rā ho'u oikovy.

¹⁶ Mba'eta ava'i mba'emo vai 'rāgue py iporā va'e ojapo kuaa e'ŷ mbove voi mokoõ huvixave gui rekyje reia va'e yvy ombovaipaa 'rā — he'i.

Jerusalém re mba'emo vai ou aguā re ijayvuague

¹⁷ — Ha'e gui ma nde'áry SENHOR ombou 'rā ha'e rami ete aguā ára, ndevyguia kuery ha'e nderu ro pygua kuery áry guive. Ha'e rami aguā ma Judá gui Efraim kuery ojepe'aague guive ndoikoi teri va'e ramigua. Assíria pygua huvixave rupi vy ombou 'rā.

* ^{7:2} Judá yvy re Síria kuery opu'ã okuapy Israel kuery rupive. Judá pygua ruvixave ma Acaz oĩ tamoõ Davi oñaague py. † ^{7:14} Tery Emanuel ma “Nhaderewe Senhor oĩ” 'ea, Mateus 1.23 py oña rami avi.

¹⁸ Mba'eta ha'e va'e ára SENHOR otuvy nhe'ẽ 'rã mberu yakã mombyry Egito re ikuai va'e pe, ha'e eiru Assíria yvy re ikuai va'e pe.

¹⁹ Ha'e rã ha'e va'e kuery oupa 'rã, oguejypa 'rã yvyty pa'ũ ha'e javi re, itakua rupi, juu'y ha'e mymba oy'uaty ha'e javi re.

²⁰ — Ha'e va'e ára ma SENHOR onhopimba 'rã peneakã, ha'e hi'a penderete regua. Omboipa avi 'rã penerendyva. Tendyva ayya rami oiporu 'rã yakã rovai guigua, Assíria pygua huvixa ae.

²¹ Ha'e va'e ára ma avakue oguerekove 'rã pete'i vaka ta'y'i ramo va'e ha'e mokoĩ vexa'i anho.

²² Ha'e rami teĩ ha'e va'e ae ikamby porã ete 'rã ha'e kuery ho'u aguã kamby kekue. Oyvy re okuave va'e ha'e javi ho'u 'rã kamby kekue ha'e ei.

²³ Ha'e va'e ára ma mil uva rembypy mil hatã'i va'e prata guigua re hepy 'rã va'ekue ikuaiague py optya 'rã juu ha'e juu rakuaendy tyrã rive.

²⁴ Ha'e py ma hu'y ha'e guyrapa reve 'rãe avakue oike, mba'eta juu'y ha'e juu rakuaendy ojao'i 'rã yvy ha'e javi.

²⁵ Ha'e gui yvyty avakue enxada reve oo jepiaty ha'e javi rupi ndooysi ma 'rã, juu ha'e juu rakuaendy gui okyje vy. Ha'e py ma vaka anho 'rã ha'eve okaru aguã, ha'e vexa'i opyrõmba aguã.

8

Assíria pygua kuery ou aguã re ijayvuague

¹ SENHOR aipoe'i avi xevy:

— Ejopy pete'i kuaxia tuvixa va'e, ha'e embopara porã'i pavẽ oexa kuaa aguã rami: “Eipe'a pojava ndejeupe guarã, ejopy ratã!” he'ia va'e.

² Ha'e nunga kuaa ukaarã ojeroviapy va'e xee ajou sacerdote Urias ha'e Jeberequias ra'y Zacarias.

³ Ha'e ramo xee ma profeta kunhaa py aa. Ha'e ramo oguerekoi kyrã va'e, ha'e vy oikuavã'i ava'i. Ha'e ramo SENHOR aipoe'i xevy:

— Heryrã emoi “Eipe'a pojava ndejeupe guarã, ejopy ratã” 'ea.

⁴ Mba'eta ava'i “Xeru” e'ŷ vy “Xexy” he'i kuaa e'ŷ mbove voi Damasco ha'e Samaria tetã pygua kuery mba'e rei-rei ogueraapaa 'rã Assíria pygua huvixave renonde guarã — he'i.

⁵ Ha'e gui SENHOR ijayvuve tema. Ha'e vy aipoe'i xevy:

⁶ — Kova'e kuery ma Siloé yakã oxyry mbeguei'i va'e ndojou porã'i ramo, ha'e Rezim renonde ha'e Remalias ra'y oua gui okyje ete okuapy rire,

⁷ ha'e rami rire ha'e kuery áry SENHOR ombou 'rã Eufrates yakã guigua, imbaraete ha'e oxyry atã va'e. Ha'e va'e ma Assíria pygua huvixave ae ou va'erã, mba'emo porã oguerekoi va'e ha'e javi reve. Ha'e nunga yy ma omonyẽ 'rã yakã rugua ha'e javi rupi, ha'e oẽ-oẽ rei 'rã ov yvy'ã rupi peve.

⁸ Ha'e vy Judá yvy re ae oo vy omonyẽmba 'rã. Ha'e va'e rupi oaxa vy ijaju'y peve 'rã ovaẽ. Mba'eta xondaro kuery jova-jovai gui oua rupi ojao'ipa 'rã ndeyvy, Emanuel.

SENHOR anho nharõ aguã re ijayvuague

⁹ Peẽ yvy regua kuery, pendepoxypa teĩ penembo'ipaa 'rã. Yvy mombyrygua re pendekuai va'e, pendu ke. Peiko katu teĩ penembo'ipaa 'rã, peiko katu teĩ penembo'ipaa 'rã.

¹⁰ Pejogueroayvu 'rã mba'emo pejapo aguã re, ha'e rami teĩ nda'evei 'rã pejapo ete aguã. Mba'emo pejapo uka teĩ ha'e nungakue ndojapoai 'rã, Nhanderuete orereve oiko ramo.

¹¹ Mba'eta xevy SENHOR ijayvu opo imbaraete va'e xere omo'i reve. Ha'e vy ijayvu kova'e kuery ikuiaia rupi xee aiko e'ŷ aguã. Ha'e vy aipoe'i:

¹² — Amongue pe kova'e kuery “Opu'ã nhemimba ra'e” he'i okuapy teĩ peẽ kuery ma nda'evei “Opu'ã nhemimba” peje aguã. Pekyje eme ha'e kuery mba'emo okyjea va'e gui, nda'evei ha'e nunga pe “Nhanemondyipaarã” peje aguã.

¹³ Ha'e rami 'rāgue py SENHOR ixondaro reta va'e pe ae "Iky'a e'ŷ va'e" peje. Henonde pejererokyje, ixugui anho peryryi.*

¹⁴ Ha'e ramo ha'e oĩ 'rā penhemí atyrā. Ha'e rā Israel kuery mokoīve regua pe ma oĩ 'rā ita onhepyxanga aguā ha'e kuery ho'apa aguā. Jerusalém py ikuai va'e pe oĩ 'rā nhuā xā ha'e nhuā.*

¹⁵ Ha'e kuery regua heta 'rā onhepyxanga vy ho'a. Ha'e rami vy ha'e kuery opēmba 'rā, ojurapaa ha'e ombo'apaa 'rā.

¹⁶ Ha'e nunga rupi emoi porā aikuaa uka va'ekue, emboty lei xeremimbo'e kuery py'a re – he'i.

¹⁷ Ha'e rami rā xee arō 'rā SENHOR, Jacó ramymino kuery gui ngova omo'ā ranhe tei. Hexe ae xee ama'ena 'rā.

¹⁸ Apy ma aĩ, xera'y kuery SENHOR xevy ome'ẽ va'ekue reve.* Ore kuery ma hexa pyrā, ha'e Israel kuery mondyipaarā. Ha'e rami aguā SENHOR ixondaro reta va'e Sião vvyty re oĩ va'e oremonoingo.*

¹⁹ Ha'e gui pendevy aipo'ea 'rā: "Peporandu ke omanogue mboayvua kuery pe, ha'e imba'ekuaa va'e, ojapukai rei ha'e ijayvu mbegue rei va'e kuery pe", 'ea 'rā. Ha'e rami tei nhande kuery nda'u nanhaporandui 'rā Nhanderuete pe? Jaikove va'e nhanheptyvō uka 'rā nda'u omano va'ekue pe?

²⁰ Ha'e rami 'rāgue py lei ha'e ayvu oikuaa uka pyre re tapeo! Mba'eta ha'e va'e ayvu rupi e'ŷ ri ha'e kuery ijayvu vy ndoexai 'rā hexakā va'e.

²¹ Ha'e rami vy vvy ha'e javi rupi ha'e kuery oguata rei vy ojexavai ha'e okaruxe reve 'rā ikuai. Ha'e gui okaruxe vy ipoxypa vy ijayvu vai 'rā nguvixave ha'e Nguuete re, yvate katy oma'ẽ vy.

²² Ha'e gui vvy re ju oma'ẽ vy oexa 'rā jexavai, pytū vaikue ha'e kuaray'ā reia mboriau anho. Ha'e gui ma omombopaa 'rā pytū vaikuea katy.

9

Huvixa Nhomongo porāa oiko ha'e ipo'aka aguā re ijayvuague

¹ Ha'e rami tei vvy re ojexavai va'ekue ma pytū vaikuea rupi riae e'ŷ 'rā ikuai. Mba'eta jypy'i ma Nhanderuete omo'yvy'i raka'e Zebulom ha'e Naftali vvy re ikuai va'e. Ha'e rā opaa py ma ojapo 'rā Galiléia judeu e'ŷ va'e kuery rekao ojou porāmbaa aguā rami, tape ye'ẽ rembe rupi oaxa va'e guive Jordão yakā kyvō rami peve.

² Ha'e kuery pytū reia rupi ikuai va'ekue ri oexa okuapy peteĩ hendy guaxu va'e. Hendy va'e ma hexakāmba kuaray'ā reia manoa rupi ikuai va'ekue ikuiaia rupi.*

³ Ha'e kuery va'e regua ndee remboetave ju vy rembovy'ave ete. Ha'e ramo nerondenode ov'y'a 'rā okuapy, mba'emo omono'õa rupi ov'y'aa rami, ha'e rami e'ŷ vy mba'emo porā ojou va'ekue omoboa'o-ja'oa py rami.

⁴ Mba'eta ndee remopē ma canga ha'e kuery aju'y rupi ipoyi oiny va'ekue, vvyra ikupe rupi oinupāaty, ha'e herereko axya po'akaa, midianita kuery remomba jave guare rami.

⁵ Mba'eta oapypaa 'rā xondaro kuery xapatu ikuai va'e, ijao tuguy py iky'apa rei va'ekue voi okaipa 'rā mba'emo pirekue rami rive.

⁶ Mba'eta peteĩ ava'i oiko nhandevy, peteĩ gua'y ome'ẽa nhandevy. Ha'e gui ijaxi'y áry ma oĩ 'rā ipo'aka aguā. Hery ma po rami 'rā 'ea va'e: Nhomongoeta Porā va'e, Nhanderuete Imbaraete va'e, Nhanderu Imarā e'ŷ va'e, ha'e Huvixa Nhomongo porāa.

⁷ Ipo'akave 'rā ovy, mby'a porā voi opa e'ŷ va'e 'rā ou. Tenda Davi openaaty áry 'rā oĩ vy opena 'rā oikovy Davi ipo'akaague re ae. Ha'e rami vy anhetē va'e ha'e teko porā rupi vy ipo'akaa oĩ atā 'rā, aŷ guive raka'e 'rā peve guarā. SENHOR ixondaro reta va'e ae 'rā ojapo, nhanderayvu etea rupi.

* 8:13 1 Pedro 3:14-15 * 8:14 Romanos 9:32-33, 1 Pedro 2:8 * 8:18 "Xera'y kuery SENHOR xevy ome'ẽ va'ekue" Isaías he'ia ma guemimbo'e kuery re ijayvu vy. * 8:18 Hebreus 2:13 * 9:2 Mateus 4:15-16

Israel kuery ikuai axy aguã re ijayvuague

⁸ Ha'e gui ma peteĩ ayvu SENHOR ombou Jacó kuery rovai guarã, ha'e ramo Israel kuery re ou.

⁹ Ha'e va'e ma heta va'e kuery ha'e javi oikuaapa 'rã okuapy, Efraim ha'e Samaria pygua kuery, ojejou porã ha'e opy'a py onhemboiyvate reia rupi aipoe'i va'e kuery:

¹⁰ “Yvy jykue ombojo'a pyre yvy py oitypaa teĩ oo jajapo ju 'rã ita ombope pyre gui. Yvyra sicômoro oitypaa ramo yary guigua py ju 'rã jajapo oïague py”, he'i va'e kuery.

¹¹ Ha'e rami teĩ ha'e kuery rovai guarã SENHOR omopu'ã 'rã Rezim rovaigua kuery, omboupa 'rã hovaigua kuery.*

¹² Kuaray oua katy gui ou 'rã Síria pygua kuery, ha'e kuaray oikea katy gui ma filisteu kuery ou 'rã. Ha'e ijuru jai vy omokõmba 'rã Israel kuery. Ha'e rami ete teĩ SENHOR poxya ndoaxai 'rã, opo oupi ae tema 'rã.

¹³ Ha'e rami ete teĩ kova'e kuery ndojevi okuapy Imoingo axyare pe, ndoekai okuapy SENHOR ixondaro reta va'e.

¹⁴ Ha'e nunga rupi peteĩ ára pyve SENHOR ojajapa 'rã Israel regua akã ha'e huguai, pindo ha'e nhuñ'y.

¹⁵ Inhakã ma nhomongeta va'ety kuery omboetevepy, ha'e rã huguai ma profeta ramigua kuery ijapu va'e.

¹⁶ Mba'eta kova'e kuery rerekaoa ma nhombotavypa rei va'e meme. Ha'e ramo ha'e kuery oguereko va'e kuery voi omombaa.

¹⁷ Ha'e nunga rupi SENHOR ndoguerovy'avei ha'e kuery va'e regua ipyaukue, nomboaxyvei 'rã guive tyre'ý neĩ imeve'ý va'e kuery, mba'eta ha'e kuery ha'e javi heko vai va'e ikuai, joapo vai ha'e ijayvu vaikue-ikue va'e meme. Ha'e rami ete teĩ ndoaxai 'rã ipoxya, opo oupi teri 'rã imoiny.

¹⁸ Mba'eta teko vai omomba 'rã heravy tata rami, omokanhy 'rã juu'y ha'e juu rakuaendy. Yvyra ka'aguy re ikuai va'e okaipa 'rã, hataxí arai huñ vaikue rami opu'ã ovvy reve.

¹⁹ SENHOR ixondaro reta va'e ipoxy ramo yvy opyta tapyí rami, ha'e rã heta va'e kuery ma nhuñ oapy pyrã rami ikuai. Avave rei nomboaxyvei ma 'rã guyvy kuery.

²⁰ Mba'emo oiporu kuaa re oĩ va'e omokõmba ma teĩ okaruxeve 'rã. Oiporu kuaa e'ýa re oĩ va'e ju omokõmba teĩ nonhandui 'rã. Ha'e vy peteĩ-teĩ ho'u 'rã oirũ kuery ro'okue.

²¹ Manassés kuery omokõ 'rã Efraim kuery, ha'e rã Efraim regua ma Manassés regua ju 'rã omokõ. Ha'e gui ha'e kuery mokoïve ma opu'ã 'rã Judá kuery re. Ha'e rami ete teĩ ndoaxai 'rã SENHOR poxya, opo oupi teri 'rã imoiny.

10

¹ Ha'e kuery va'e regua ojapo 'rã lei ha'eve e'ýa ramigua nhombojexavai aguã rive. Nda'evei ete 'rã ha'e kuery pe,

² mba'eta opa marã oguereko 'rã iporiaukue'i, neĩ noipytyvõ ukai 'rã xevygua kuery ojexavai rei va'e, oipe'apa 'rã imeve'ý va'e kuery gui, imondapa 'rã tyre'ý kuery gui.

³ Ha'e rami rire teĩ ma mba'e nda'u peẽ kuery pejapo 'rã nhombopagaa ára py jexavaia mombyry gui ou jave py? Mava'e pe tu pejapukai 'rã penderepy aguã? Mamo tu ha'eve 'rã mba'emo pejou porã va'e penhomí aguã?

⁴ Po rami anho 'rã ha'eve pendekuai aguã: pejero'a 'rã ombo'a pyre mbyte, e'ý vy pe'a 'rã omanogue mbyte. Ha'e rami ete teĩ SENHOR poxya ndoaxai 'rã, opo oupi teri 'rã imoiny.

Assíria pygua kuery rovai ijayvuague

⁵ — Nda'evei ete 'rã Assíria pygua kuery pe, xepoxya rupi nhombopaga aguã amon-douka va'ekue ri. Mba'eta yvyra ha'e kuery opo py oguereko va'e ma xepoxya aexa uka aguã ae.

⁶ Xee amondouka ma heko vai va'e ha'e xembopoxya kuery rovai. Ha'e vy aipoa'e ha'e kuery gui imba'e rei-rei oipe'apa vy opyrõmba aguã, tape rupi yapo oĩ va'e re rami.

* 9:11 “Rezim rovaigua kuery” he'ia ma Israel kuery re Assíria pygua kuery opu'ã aguã re ijayvu vy.

- ⁷ Ha'e rami teĩ ha'e kuery ma ha'e rami e'ŷ oexa'ã, opy'a py ha'e rami e'ŷ oikuaa. Ha'e rami 'rāgue py opy'a re omoĩ heta regua omokanhymba ha'e omomba ete aguã.
- ⁸ Mba'eta aipoe'i: "Xevyguá yvatekueve nda'u huvixaave meme e'ŷ teve?"
- ⁹ Calno tetã namombai ri ty'y Carquemis rami? Hamate tetã Arpade rami e'ŷ ri ty'y opyta? Ha'e Samaria tetã Damasco rami e'ŷ ri ty'y opyta?
- ¹⁰ Xepo'aka ma tetã mba'emo ra'angaa oĩa re, Jerusalém ha'e Samaria py ikuai va'e gui ipo'akave va'ekue teĩ.
- ¹¹ Ha'e gui Samaria ha'e mba'emo ra'angaa hexe ikuai va'e re ambovaipaague rami ae ju ndajapoi 'rā teve Jerusalém ha'e hexe ikuai va'e re?" he'i va'ekue.
- ¹² Ha'e nunga rupi Sião yvyty ha'e Jerusalém re SENHOR oipotaa rami nhombopagapa ma vy Assíria pygua huvixa ju 'rā ombopaga, opy'a py onhemboyvateve ha'e ojejou porã reiague re.
- ¹³ Mba'eta aipoe'i rire: "Ha'e nunga ha'e javi xee ae po'akaa py ajapo, xe'arandu ha'e aikuaapa va'e vy. Ha'e rami vy amarka pyau amboae regua kuery yvy, ha'e aipe'apa imba'e rei-rei va'ekue ha'e javi. Ipy'a guaxuve va'e rami aipe'a huvixa kuery henda py oñague gui.
- ¹⁴ Aipe'apa amboae regua kuery mba'emo oguerekoo va'ekue. Guyra'i rupi'a oeja pyre pe'aa rami xee voi xemba'erã ajopy yvy jave rupi. Mava'eve nomboguyi opepo, neĩ naxẽ'i guive", he'i va'ekue.
- ¹⁵ Ha'e rami avi haxa nda'u ha'eve ri ava iporua gui ojejou porãve aguã? Yvyra kyxia nda'u ha'eve ri oiporu oiny va'e gui oikuaave aguã? Ha'e rami va'e rire ma yvyra rovi ha'e ae porua oinupã 'rāgue, ha'e yvyra rive opu'ã 'rāgue ava yvyra guigua e'ŷ va'e re.
- ¹⁶ Ha'e nunga rupi SENHOR ixondaro reta va'e ombou 'rā mba'eaxy ha'e va'e regua avakue mbaraetea mombaarã, ikyrakueve meme teĩ. Ha'e kuery mba'emo ojou porã va'e omoendy 'rā, tata rami oapypa va'erã py.
- ¹⁷ Mba'eta Israel kuery moexakãa ma omomba 'rā tata rami, peteĩ ára pyve Nhanderuete Iky'a e'ŷ va'e oapypa 'rā juu'y ha'e juu rakuaendy Assíria yvy re ikuai va'e.
- ¹⁸ Oapypa 'rā ha'e va'e regua ka'aguy ha'e mba'ety oiko porãve va'e teĩ. Omomba 'rā ha'e kuery nhe'ẽ ha'e hete, imba'eaxy vy ikangyve ový va'e rami opyta peve.
- ¹⁹ Ha'e va'e rire ma ha'e py ka'aguy re yvyra ho'ame va'e mbovy'i ete 'rā opyta, kyrigue teĩ oipapa vy ombopara kuua 'rā mbovy paa.
- ²⁰ Ha'e va'e ára Israel kuery Jacó ramymino okuave va'e ma ijukaare kuery re ndojeroviavei ma 'rā. Ha'e rami 'rāgue py ojerovia 'rā okuapy SENHOR Israel kuery ruete Iky'a e'ŷ va'e re anho.
- ²¹ Ha'e rami vy Jacó ramymino kuery rembyrekue ojevy ju 'rā Nhanderuete imbaraete va'e pe.
- ²² Mba'eta peẽ Israel kuery, peẽ kuery aŷ peve ita ku'i ye'ẽ rembe rupigua rami pendereta teri teĩ amongue ete'i 'rā ojevy. Mba'eta oiko 'rāe nhomombaarã teko porã rupigua, yy tyguaxua rami 'rā ou.
- ²³ Mba'eta SENHOR ixondaro reta va'e nhomomba aguã re onhembopy'a ma voiague rami omoingo 'rā ha'e va'e yvy ha'e javi rupi.*
- ²⁴ Ha'e nunga rupi ae SENHOR ixondaro reta va'e aipoe'i:
- Xevyguá kuery Sião re penderekaoa va'e, pekyje eme Assíria pygua kuery gui yvyra rovi py penemoingo axy teĩ, ha'e Egito pygua kuery pendererekaoague rami yvyra py pendeavyky rei teĩ.
- ²⁵ Mba'eta are'i e'ŷ re opa 'rā peẽ kuery rombopagaa. Ha'e rami vy ha'e kuery ju amomba 'rā xepoxya rupi.

* 10:23 Romanos 9.27-28

²⁶ Ha'e rami vy SENHOR ixondaro reta va'e oinupā 'rā midianita kuery re ojukapaague rami, itaova Orebe py hi'aī va'e katy'i. Ye'ē áry rupi oupi ju 'rā opopoka Egito yvy re ojapoague rami.*

²⁷ Ha'e va'e ára pendekupe áry gui aipe'a 'rā ipoyi va'e, pendeaju'y gui aipe'a 'rā canga omoī mbyre. Ha'e nunga ma opē 'rā pendekyraa gui rive — he'i.

²⁸ Ha'e gui ma Assíria pygua kuery ou 'rā Aiate py, ha'e oaxa 'rā Migrom rupi. Ha'e gui Micmás py ovaē vy omboguejy 'rā ovoyi.

²⁹ Ha'e gui oaxa 'rā oje'oivy yvyty pa'ū rupi, ha'e oke 'rā okuapy Geba py. Ha'e ramo Ramá pygua kuery oryryipa rei 'rā okyje vy, ha'e Saul rekoague Gibeá pygua kuery ojavapa 'rā.

³⁰ Galim re penderekoa va'e, pejapukai atā ke! Laís pygua kuery, pendu ke! Nda'evei ete 'rā peē Anatote pygua kuery pe!

³¹ Ha'e gui Madmena re hekoa va'e kuery voi ojavapa 'rā oje'oivy, ha'e Gebim pygua kuery voi ojavapa 'rā oo jepe aguā.

³² Ha'e va'e árave Assíria pygua kuery optytu'u 'rā okuapy Nobe rekoaque py. Ha'e gui ma opo oupi 'rā, Siāo yvyty memby kuery Jerusalém py ikuai va'e omongyje aguā.

³³ Ha'e rami teī SENHOR ixondaro reta va'e ojaya 'rā yvyra rakā ikuai va'e. Ha'e rami vy oitypa 'rā yvyra yvatekueve, ha'e omo'yvyī'imba 'rā onhembovateve va'ekue.

³⁴ Haxa py oitypa 'rā yvyra ka'aguy regua. Ha'e ramo Líbano re yvyra ikuai va'e ho'apa 'rā imbaraete va'e oake'oa rami.

11

Jessé ramymino opena porā va'e rekora re ijayvuague

¹ Ha'e gui Jessé rembypykue gui oiko 'rā peteī hoky, hapytakue rapo gui oiko 'rā henhoī pyau jevy va'e.

² Ha'e va'e re ma oī 'rā SENHOR Nhe'ē. Ha'e va'e Nhe'ē ma imo'aranduarā ha'e oikuua ukapa va'e, imongetaa ha'e imbopo'akaarā, ha'e gui SENHOR kuaa ucaa ha'e henonde ojererokyje aguā re imbo'ea.

³ Ha'e ramo ovy'a reve 'rā oiko SENHOR renonde ojererokyjea rupi. Mba'emo oexa vy rive e'ŷ 'rā oikuua pota, ha'e mba'emo oendu vy rive e'ŷ nhomongeta 'rā.

⁴ Ha'e rami 'rāgue py teko porā rupi ete 'rā oikuua pota iporiaukue'i re, ha'evea rami oepy 'rā iporiaukue'i yvy re ikuai va'e. Oayvu py rive 'rā ombopaga yvy re ikuai va'e yvyra rovi py rami, optyuē py rive ojuka 'rā heko vai va'e.

⁵ Ku'akuua rami ojee omoī 'rā teko porā, ha'e joguereko 'rā ojeroviapy oikoa rupi.

⁶ Ha'e rami ramo vexa'i kuery reve aguara'i ikuai porā 'rā, ha'e xivi ipara va'e teī kavara ra'y'i reve optytu'u 'rā okuapy joa py. Reō reve vaka ra'y ikuai 'rā peteī rami, kyrī'i va'e rive oguerekopa 'rā.

⁷ Urso reve vaka kuery okaru 'rā joa py, ha'e ta'y'i kuery optytu'u 'rā joa py. Reō voi nhuū re okaru 'rā vaka rami.

⁸ Kyrīgue okambu'i va'e teī onhemboarai 'rā mboi ituia rupi, ha'e nokambuvei va'e ikua py opo'ē teī mba'eve ndoikoi 'rā.

⁹ Mba'eta xevygua yvyty iky'a e'ŷ va'e py ma ndoikovei ma 'rā mba'emo vai neī joapo vai va'e, mba'eta yvy jave re tynyē 'rā SENHOR oikuua va'e, ye'ē renda ha'e javi rupi yy tynyēa rami avi.

¹⁰ Ha'e va'e ára ma Jessé rapokue gui oiko 'rā peteī henhoī pyau jevy va'e. Ha'e va'e ma opu'aī 'rā bandeira oupi imo'amy mbyre rami, oīa katy ha'e javi regua kuery oexa vy oo aguā. Guexakāa re ae 'rā hekoa.*

Israel kuery moexakāa oiko pyau va'erā re ijayvuague

* 10:26 Orebe py Nhanderuete omomba raka'e midianita ruvixa kuery (Juízes 7.25). Ha'e gui Egito py ma Egito pygua kuery ju omomba ye'ē mbyte py (Êxodo 14.26-28). * 11:10 Romanos 15.12

¹¹ Ha'e va'e ára SENHOR opo omokuave'ẽ 'rã oguerupa ju aguã ojeupeguia kuery rembyrekue oejaague gui: Assíria yvy gui, Egito, Patros, Etiópia, Elão, Babilônia, Hamate ha'e ye'ẽ yvýry rupi yvy ikuai va'e gui.

¹² Peteĩ bandeira oupi 'rã yvy regua mbyte rupi ikuai va'e oexa aguã. Ha'e rami vy omboatypa 'rã Israel kuery yvy mboae re ikuaiague gui, ha'e Judá kuery oguerupa ju 'rã yvy apy jovaive irundy henda katy omoña ague gui.

¹³ Ha'e ramo Efraim kuery noenduvei ma 'rã ndajoayvuia, ha'e Judá kuery rovaigua kuery ha'e javi 'rã ndojouavei. Efraim kuery ndoayvu e'ŷvei 'rã Judá regua, ha'e Judá kuery voi nomoingo axyvei 'rã Efraim regua.

¹⁴ Ha'e rami 'rãgue py jogueraa 'rã kuaray oikea katy filisteu kuery rovai opu'ã aguã. Jojavi 'rã ipo'aka kuaray oua katy ikuai va'e re. Ha'e vy ojopy 'rã amboae kuery oguerekoo va'ekue-'ekue ha'e javi. Edom ha'e Moabe pygua kuery re voi ipo'aka 'rã. Amom pygua kuery voi ikuai 'rã hembiguairã.

¹⁵ SENHOR omboypa 'rã ye'ẽ rakã Egito yvýry oĩ va'ekue. Yvytu atã ombou vy ipo'aka 'rã Eufrates yakã re voi. Ha'e rami vy omboja'o 'rã sete yakã raperã, ipy regua va'e teĩ oaxa aguã ha'eve va'e.

¹⁶ Ha'e ixupeguia kuery Assíria re opyta teri va'ekue pe oĩ 'rã peteĩ tape porã ojevy aguã, Egito yvy gui Israel kuery oëmba jave guare rami.

12

Israel kuery oguerupa jevy rã oporaei okuapy aguã re ijayvuague

¹ Ha'e va'e ára ma aipopeje 'rã: “ SENHOR, xee roqueroporaei, mba'eta xevy ndepoxy va'ekue ri aÿ oaxapa ma ndepoxyague. Ha'e gui aÿ ma xembovy'a ju ma.

² Nhanderuete ma xereraa jepea oiko. Hexe ajerovia 'rã akyje e'ŷ re, mba'eta SENHOR Nhanderuete xemombaraetea ha'e aroporaei va'e. Ha'e gui aÿ ma xereraa jepea ju oiko.

³ Peju nhandereraa jepea re javy'a, yvu gui yy porã nhanoẽ vy javy'aa rami avi”, peje 'rã.

⁴ Ha'e va'e ára aipo pejeve ju 'rã: “Peroporaei ke SENHOR! Pejapukai hery rupi, ha'e javi regua pe peikuaa uka hembiapokue. Hery yvate ete ramo penhogueroma'endu'a.

⁵ Peroporaei ke SENHOR, mba'emo porã ete ojapo rire. Yvy jave rupi toikuaapa ha'e nunga!

⁶ Ha'e peẽ Sião pygua kuery voi pevy'a peporaei reve, mba'eta Israel kuery ruete iky'a e'ŷ va'e penembyte oĩ va'e yvate ete ramo”, peje.

13

Babilônia pygua kuery rovai ijayvuague

¹ Kova'e ma Isaías mba'emo oexa reve Babilônia pygua kuery rovai ayvu oendu va'ekue.

² “Eupi peteĩ bandeira yvyty ikatu rei va'e áry, ha'e ejapukai xondaro kuery pe ou aguã. Enoĩ ndepo py ha'e kuery oike aguã nhomoingo axya kuery retã rokẽ rupi.

³ Mba'eta po rami xeayvu xevygua kuery pe, aenoimba xevygua xondaro kuery ipy'a guaxukueve, ha'e kuery nhombopaga aguã xepoxya rupi. Ha'e kuery ma xepo'akaa re anho 'rã ov'y'a.

⁴ Ha'e ramo yvyty áry onhendu 'rã heta va'e ojapukaia! Heta regua joe opu'ã aguã py nhomboaty okuapy. SENHOR ixondaro reta va'e oexa pota 'rã oxondaro kuery joe opu'ã aguã katy oo ta va'e re.

⁵ “Mba'eta ha'e kuery ou 'rã yvy mombyrygua gui, yva apy guive 'rã ou SENHOR guembiporu opoxya oexa uka va'e reve, omomba aguã ha'e va'e yvy ha'e javi.

⁶ Pejae'o ke, mba'eta ovaẽ ta ma SENHOR ára. Ipo'akapa va'e ombou 'rã nhomombaarrã.

⁷ Ha'e ramo pavẽ jyva na'imbaraetevei 'rã, avakue nda'ipy'a guaxuveipa 'rã.

⁸ Onhemondyipa rei 'rã okuapy, ha'e kuery oendu 'rã haxy ogueroaxẽ peve. Kunha imemby raxy va'e rami 'rã ojepoka-poka. Joe-joe oma'ẽ 'rã okyje rei reve, ha'e hova pytãmba rei 'rã oximba vy.

⁹ “Ema'ẽ, ovaẽ ma ouvy SENHOR ára. Ha'e va'e ma nanhomboaxyvei aguã ára, poxya rexa ukaarã, yvy omomba ha'e ojejavypa va'ekue omokanhymba aguã yvy gui.

¹⁰ Jaxy-tata ijaty va'e yva re ikuai va'e naendyvei 'rã. Kuaray oẽ ouvy vyve pytãmba 'rã, jaxy voi naexakãvei 'rã.*

¹¹ Xee ambopaga 'rã yvy re ikuai va'e heko vaiague re, ha'e opa marã rei ikuai va'e ojeavyague re. Amomba 'rã ojejou porã rei va'e kuery onhemboyvatea, ha'e amo'yvý'imba 'rã ojerovia rei va'e.

¹² Ajapo 'rã avakue ouro porãguevee gui ndaetaive aguã rami, ouro ete Ofir regua gui.

¹³ Ajapo 'rã yva oryryipa aguã rami, ha'e yvy voi oryryi ete vy guenda gui ojepe'a aguã rami, SENHOR ixondaro reta va'e poxya gui, nhombopagapa ete aguã ára ovaẽ rã.

¹⁴ Ha'e kuery peteĩ-teĩ onha 'rã oje'oivy guaxu ijukaarã gui onha va'e rami, ha'e vexa'i kuery ija e'ŷ va'e rami. Peteĩ-teĩ ojevy 'rã guetarã kuery rekova katy, ojava 'rã oje'oivy oyvy katy ae.

¹⁵ Ha'e gui ojou pyre-pyre ma oixyvõmbaa 'rã, ojopy pyre ma ojukapaa 'rã kyxe py.

¹⁶ Ha'e kuery oexaa py ta'y kuery omou'ũmbaa 'rã. Hoo gui oipe'apaa 'rã, ha'e ta'yxy kuery voi oguero'aa 'rã.

¹⁷ “Mba'eta Babilônia pygua kuery rovai xee ambou 'rã Média pygua kuery. Ha'e va'e kuery ma prata re nda'evei rei va'e'ŷ, neĩ ouro re voi ndoikuaa potai va'e.

¹⁸ Ha'e kuery guapa py ojukapa 'rã kunumigue. Neĩ kyrígue'i itui ramo'i va'e voi nomboaxyi 'rã, kyrí'i va'e oexa vy ndojuka e'ŷi 'rã.

¹⁹ Babilônia ma yvy regua ojou porãve ha'e caldeu kuery oguerovy'ave va'ekue ri Nhanderuete omomba rã optya 'rã Sodoma ha'e Gomorra rami.

²⁰ Ha'e py ma avave ndopytaavei ma 'rã, noĩavei 'rã ha'e py. Neĩ árabe voi ha'e py ndoupivei 'rã ngoorã, ha'e vexa'i re opena va'e ndogueraavei 'rã guymba kuery ha'e py omongaru aguã.

²¹ Ha'e rami 'rãgue py vixo ka'aguy regua rive 'rã ikuai ha'e py, ha'e oogue ikuai va'e rupi urukure'a anho 'rã ikuai. Guyra nhandu rive avi 'rã heko ha'e py. Ha'e kavara ka'aguy regua opo-opo 'rã okuapy ha'e rupi.

²² Oo tuvixakueve rendakue rupi ma aguara'i ha'e jagua-tuvy nhe'ẽ tema onhe'ẽ 'rã. Ha'e nunga oiko aguã ovaẽ ma ouvy, oa'angaague ára ndarei 'rã.”

14

Babilônia tetã opa rã okuapy aguã re ijayvua

¹ Mba'eta teĩgue ju SENHOR omboaxy 'rã Jacó kuery, oiporavo nho 'rã Israel kuery. Ha'e rami vy ogueru ju 'rã ijyvy re ae. Ha'e kuery reve amboae yvy regua kuery voi ikuai 'rã, onhemoirû 'rã okuapy Jacó kuery re.

² Heta regua ma Israel kuery ogueraa vy oguerojevy 'rã ijyvy re. Ha'e gui SENHOR pegua yvy re ma Israel kuery ju oguerek 'rã yvy regua kuery guembiguarã. Yma rupi hexe hembiguai ha'e ipo'aka va'ekue re ha'e kuery ju 'rã ipo'aka.

³ Mba'eta ovaẽ 'rã Nhanderuete ou vy pemba'eapo poyiague gui penemombytu'u aguã ára, pejexavai reiague ha'e ipoyi va'e rupi amboae regua escravo rami pemba'eapoague gui.

⁴ Ha'e va'e ára pevy'a rei 'rã Babilônia pygua huvixave re. Ha'e vy aipopeje 'rã:

“Pexa ke nhanemoingo axyare okanhy ra'ea! Opa ra'e nhanderereko axy reiague!

⁵ Mba'eta SENHOR omopẽ ma heko vai va'e yvyra, omomba ma nhanemoingo axya po'akaa.

⁶ Ha'e kuery ma ipoxy vy amboae kuery oguerek 'rã axy va'ekue, jojukaa gui ndopytu'ui va'ekue guive. Opoxya rupi ipo'aka va'ekue yvy regua kuery re, optytu'u e'ŷ re oakykue monha jepi va'ekue.

⁷ Ha'e gui aŷ ma yvy jave rupi optytu'u, mby'a porã oĩ. Ha'e rami vy pavẽ oporaei okuapy oyv'a vy.

* 13:10 Mateus 24.29, Marcos 13.24-25

⁸ Yvyra cipreste ha'e yary Líbano re ikuai va'e voi ovy'a rei 'rā ndere. Ha'e vy aipoe'i 'rā okuapy: 'Ndee ndereitya ma rire avave rei ndouavei orerake'oarā', he'i okuapy.

⁹ "Pe yvy guy py manogue yvy re ma omyimba okuapy revaē taa oendu vy. Ha'e rami vy oemb'a 'rā jogueravy nerovaexī aguā. Nemovaē aguā opu'āmba 'rā jogueruvy yvatekueve ha'e huvixave yvy re ikuai va'ekue 'āgue. Yvy regua ruvixa ikuai va'ekue opu'ā 'rā okuapy guenda py oīa gui.

¹⁰ Ha'e vy ha'e kuery ha'e javi ijayvu vy aipoe'i 'rā ndevy: 'Ndee voi nanembaraetevei teve ra'e! Aŷ ndee voi ore rami ae ma repytal' he'i 'rā okuapy.

¹¹ Yvykua py ndereitya ma rejelou porāveague gui, ha'e ixā reta va'e pu renduxe vaiague gui. Ha'e gui ndeguýry nderuparā oī va'e ma mberu ra'y anho, ha'e hevo'i anho 'rā neovāarā ikuai.

¹² "Jaxy-tata ko'ē mbija rami reī va'ekue ri re'a ma yvate reīague gui. Yvy re ju ndereitya, yvy regua kuery re ndepo'aka va'ekue ri.

¹³ Ndepy'a py ndee aipo're va'ekue: 'Xee ajeupi 'rā yva re peve. Ha'e vy aguapy 'rā apena aguā Nhanderuete pegua jaxy-tata áryve. Xepo'aka 'rā ainy yvyty nhomboaty aty oī va'e áry, pe kuaray ijapu'a'ia apy katy.

¹⁴ Ajeupi 'rā arai yvateve va'e áry, ha'e vy Nhanderuete yvateve va'e rami ete 'rā aiko', 're va'ekue.

¹⁵ Ha'e rami teī omanogue ikuia py nemomboa 'rā, yvykua pukuvea py.

¹⁶ "Ha'e ramo omanogue nderexa vy onhemondyipa rei reve oma'ē ngatu 'rā ndere. Ha'e vy ndere ijayvu vy aipoe'i 'rā okuapy: 'Kova'e ava e'ŷ teve yvy omboryryipa va'ekue, ha'e yvy jave re ikuai va'e oryryi aguā rami ojapo va'ekue?

¹⁷ Ha'e e'ŷ ri nda'u yvy jave re ojapo raka'e tekao ve'ŷ optya aguā rami, ha'e tetā mbovaipaare? Ha'e gui guembiguarā ogueraa va'ekue voi ndopoi raka'e ngoo katy ojevy aguā', he'i 'rā okuapy.

¹⁸ Ha'e gui amboae yvy regua huvixave ikuai va'ekue onhono porā raka'e omboetea rupi, peteī-teī huparā va'ekue py ae.

¹⁹ Ha'e rā ndee ma nembojeguarua vy nenhono porāa aguā ojo'o pyre gui mombyry nemomboa va'ekue yvyra rakā ojaya pyre rami rive. Ha'e gui nde'áry omomboa 'rā kyxe py ojuka pyre retekue, yvykua py ita reve opyrōa rire.

²⁰ Ndee ma amboae kuery rami e'ŷ nanenhono porāai va'ekue, mba'eta yvy remomba ha'e ndevygua kuery ae rejukapa rire. Tove heko vai va'e ramymino kuery rery re ta'ima'endu'aave eme.

²¹ Ta'y kuery voi tojukapaa tuu kuery heko vaiague re, ha'e kuery ju opu'ā vy yvy re ipo'aka e'ŷ aguā, ha'e yvy omonyē e'ŷ aguā ha'e kuery retā", peje 'rā pekuapy.

²² Ha'e gui SENHOR ixondaro reta va'e aipoe'i:

— Xee apu'ā 'rā ha'e kuery re, Babilônia yvy gui ambogue 'rā hery. Amomba 'rā okuave va'ekue, ta'y kuery ha'e hamymino kuery ha'e javi guive.

²³ Ha'e gui hetā ikuaiague ajapo 'rā yapo optya aguā rami, kuī'i rive ikuai aguā. Ha'e xee aipei 'rā yty peia nhomokanhymbaa va'e py — he'i SENHOR ixondaro reta va'e.

Assíria pygua kuery rovai ijayvuague

²⁴ SENHOR ixondaro reta va'e oura vy aipoe'i:

— Xee anhembopy'aa oiko 'rāe. Xee ajapo ukaa rami ae 'rā ojapo.

²⁵ Ha'e rami vy amomba 'rā Assíria pygua kuery xeyvy re ou va'ekue. Xevyguia yvyty re apyrō 'rā, Israel kuery re ha'e kuery po'akaague opa aguā, ha'e kuery voyi aipe'a aguā ijaxi'y áry gui.

²⁶ Ha'e rami ae xee anhembopy'a yvy jave re oiko aguā. Kova'e ma xepo yvy regua ha'e javi áry rupi amokuave'ē va'e — he'i.

²⁷ Mba'eta SENHOR ixondaro reta va'e ha'e rami aguā rami onhembopy'a ma rire mava'e tu omboaxa rive ta? Opo omokuave'ē imoiny rire mava'e tu ojapo 'rā omboapu'a ju aguā rami?

Filístia pygua kuery rovai ijayvuague

²⁸ Ha'e gui huvixave Acaz omanoa ma'etŷ re ma pova'e ayvu aendu omombe'ua rã.

²⁹ — Peẽ filisteu kuery, nda'evei pevy'a aguã penenupãaty yvyra opěague pendu vy rive. Mba'eta mboi omano va'ekue gui oiko 'rã amboae nda'eveive va'e, hupi'a gui ma oiko 'rã mboi opo va'e.

³⁰ Ha'e gui iporiaukue'i ra'y jypyguia kuery re ma apena porã 'rã, oipotapa rei'i va'e kuery ma optyu'u porã 'rã okuapy. Ha'e rã pendera'y kuery re ma ajapo 'rã karuai gui omanomba aguã rami, ha'e pekuave va'ekue voi penemombaa 'rã.

³¹ Ndee tetã rokë, neraxë ke. Ha'e ndee tetã, ejapukai. Peẽ filisteu kuery ha'e javi, peryryipa ke. Mba'eta kuaray ijapu'a'ia katy gui ou 'rã hataxí rami, ha'e jipoi hyxy va'e gui ojep'e'a va'erã — he'i.

³² Marã rami nda'u pembovai 'rã judeu e'ŷ va'e regua ayvu mombe'ua pe oporandu rã? Aipopeje 'rã: “ SENHOR Sião tetã ojapo rire ha'e py ae 'rã ixupeguia kuery ojexavai rei'i va'e ojou onhemi aguã”, peje 'rã.

15

Moabe pygua kuery rovai ijayvuague

¹ Po rami ma Moabe pygua kuery rovai ayvu ou va'ekue.

“Anhetẽ ete peteĩ pytû pyve omombaa 'rã Ar tetã Moabe yvy re oĩ va'e. Quir tetã voi peteĩ pytû pyve avi 'rã omombaa.

² Ha'e gui Dibom tetã gui ha'e pygua kuery oẽ 'rã jogueravy ta'angaa pegua templo katy ojae'o aguã. Moabe pygua kuery ojae'o 'rã okuapy Nebo ha'e Medeba yvyty áry. Ha'e kuery ha'e javi 'rã oakã onhopí ha'e guendyva ojayapa reve oo.

³ Ao vaikue voxá guigua py onhemonde reve 'rã ikuai tape rupi. Ngoo áry ha'e tetã mbyte rupi haxë 'rã okuapy ojae'o vaipa reve.

⁴ Hesbom ha'e Eleale pygua kuery voi ojapukai avi 'rã. Jaza tetã peve 'rã onhendu. Ha'e nunga rupi Moabe pygua xondaro kuery voi ojapukai 'rã okuapy, ipy'a tytypa 'rã", he'i.

⁵ Xepy'a py xee voi ajapukai Moabe re nda'evei vy. Mba'eta ha'e kuery ojava 'rã Zoar tetã “Vaka ra'y mboapy ma'etŷ va'e” 'ea va'e peve. Ojae'o reve oẽ 'rã jogueravy Luíte yvyty re, ha'e tape Horonaim katy oo va'e rupi ojapukai nhendu 'rã nda'evei ete vy.

⁶ Mba'eta Ninrim re yy oĩ va'e typa ma. Ipirupa ma nhuũ mymba rembi'urã, ha'e jai rogue nda'ipovei.

⁷ Ha'e gui ha'e kuery mba'emo omoõ porã va'ekue, ojou ma vy omboyrupa va'ekue ha'e kuery ae ju 'rã ogueroaxa Salgueiros yakã rovai re.

⁸ Mba'eta ha'e kuery raxëa ma Moabe yvy ha'e javi rupi onhendu. Eglaim peve ete onhendu 'rã ojapukaia, ha'e Beer-Elim peve 'rã ojae'oa onhendu.

⁹ Mba'eta Dimom yvy rupi yakã ikuai va'e ma tynyëmba tuguy. Ha'e rami teĩ amoïve ju 'rã Dimom mbopagaarã. Ha'e ramo Moabe gui oo jepe va'ekue ha'e yvy re okuave va'e ha'e javi re ou 'rã reõ.

16

¹ Peraa uka ke vexa'i yvy re ipo'aka va'e peguarã. Sela gui peraa uka tekoa e'ŷa rupi Sião yvyty áry oĩ va'e pe.

² Moabe memby kuery ma guyra'i haity gui omomboa rã onhemondyi ovy va'e rami ikuai Arnom yakã rugua rupi. Ha'e vy aipoe'i okuapy:

³ “Oremongeta ke, peikuaa pota orekuiaia re, penhemoõ oremokuaray'äära, kuaray mbyte javegua rami. Oreyvy gui orepe'apaa ramo orenhomí ke, orerexa uka eme guive ronhemi va'ekue.

⁴ Tove penembyte ta'ikuai Moabe yvy gui oipe'a pyre, pendera py tonhemi imombaxeia kuery gui”, he'i okuapy. Ha'e gui ava ojerovia rei va'e okanhy ma ramo, nhomombaare noïvei ha'e nhombojexavai va'ety yvy gui oo ju ma ramo

⁵ tenda openaaty py oĩ 'rã peteĩ teko porã rupi opena va'e. Davi ro openaaty py oĩ 'rã oikuua potaa py ojeroviapy. Ha'e ma opena 'rã teko porã rupi, oikuua pota voi 'rã joe.

⁶ Nhande kuery ma nhaendu Moabe pygua kuery onhembovate rei okuapya. Ha'e kuery ma amboae kuery gui onhembovateve ojejou porā rei vy, ipoxy rei guive. Ha'e rami teī ha'e kuery onhembovatea opa rive 'rā.

⁷ "Ha'e nunga rupi Moabe pygua kuery haxēmba 'rā peteī-teī Moabe re ipy'a vai vy. Mby'a vai rupi ipoaē 'rā okuapy, Quir-Haresete py uva pirukue ikuai jave ho'u va'ekue re ima'endu'a vy.

⁸ Mba'eta Hesbom re mba'ety oī va'e ipirupa ma. Ha'e amboae regua huvixa kuery omomba uva rakā iporāve va'e Sibma pygua, Jazer ha'e tekao e'ŷa peve oo va'ekue, ha'e gui oove vy ye'ẽ rovai re oaxa va'ekue.

⁹ Ha'e nunga rupi xee voi ajae'o 'rā Jazer tetā pygua kuery Sibma re uvaty oī va'ekue re ojae'o okuapya rami. Peē Hesbom ha'e Eleale pygua, romoakŷ 'rā xerexay py. Mba'eta pendea py kuaray puku py uva'a oiko va'e oumbiri va'e kuery ov'y'a okuapy 'rāgue py onhendu nderovaigua kuery opu'ā vy ojapukaia.

¹⁰ Opa ma vy'aa ha'e poraeia uvaty rupi onhendu va'ekue. Uvaty rupi avave rei ndoporaeiavei ma, ndovy'a nhenduavei ma. Neī uva'a ma voi noumbiriavei oubiriatiy py. Mba'eta xee ajapo 'rā oumbiri va'e kuery ov'y'aa nonhenduvei aguā rami.

¹¹ Ha'e nunga rupi xee voi Moabe re nda'evei vy xekuraxō oryryi ixā reta va'e rami, Quir-Heres re voi xepy'a vai.

¹² Pexa 'rā Moabe pygua kuery yvyty ikuai va'e áry rupi ombojeroviaa py ikane'õmba rive rā, mba'eta ta'angaa oīatý py oike vy onhembo'e rā noenduai", he'i.

¹³ Ha'e va'e ayvu ma SENHOR yma ma voi Moabe rovai omombe'u uka va'ekue.

¹⁴ Ha'e rā aŷ ma ijayvu jevy vy aipoe'i:

— Mboapy ma'etŷa py omba'epo va'e oipapaa rami Moabe pygua kuery mba'emo oguerovy'a va'ekue ndojou porāavei 'rā, tetā pygua kuery mbovy e'ŷ va'ekue ha'e javi guive. Ha'e gui oo jepe va'ekue ma mboapy'i ete 'rā ikuai, ndaetavei neī na'imbaraetevei 'rā — he'i.

17

Damasco ha'e Efraim pygua kuery rovai ijayvuague

¹ Kova'e ma Damasco pygua kuery rovai ayvu ou va'ekue.

"Damasco tetā optya 'rā tekao ve'ŷ ha'e ombovaipa pyre rive.

² Aroer regua tetā ikuai va'e voi oejapaa 'rā. Ha'e py ma vexa'i kuery rive 'rā onheno, imondiyiarā ndoikoi rā.

³ Efraim py voi okanhymba 'rā oo ikorapa va'ekue, Damasco pygua huvixa openaa ha'e javi rupi avi. Ha'e gui Assíria pygua kuery okuave va'e ndaetavei 'rā, Israel kuery mba'emo oguerovy'ave va'ekue rami avi", he'i SENHOR ixondaro reta va'e.

⁴ "Ha'e va'e ára ma Jacó kuery mba'emo oguerovy'a va'ekue okanhya 'rā, ikyraa voi okanhymba 'rā.

⁵ Ha'e kuery oipe'apaa 'rā, trigo mono'õa kuery hi'ygue ojopy vy hi'a omono'õa rami avi, Refaim yakā rugua rupi trigo omono'õague rami.

⁶ Ha'e rami teī amongue henda py ete'i optya 'rā hembyrekue'i, azeitona omono'õa ma rire rami: mokoĩ, mboapy azeitona optya 'rā hovapy yvatevea re, irundy, e'ŷ vy peteī nhiruña hakā mbyte pyve oī va'e yvyra hi'a va'e re optya va'e rami", he'i SENHOR Israel kuery ruete.

⁷ "Ha'e va'e ára ma avakue oma'ẽ ju 'rā Imoingoare re, ima'endu'a 'rā Israel kuery Ruete iky'a e'ŷ va'e re anho.

⁸ Ha'e kuery noma'ẽvei 'rā altar opo py ae ojapo va'ekue re, ndoexaxevei 'rā okuā py ojapo va'ekue, mba'emo ra'angaa, neī altar mba'emo heakuā porā va'e oapyaty.

⁹ Ha'e va'e ára ma Israel kuery gui ha'e kuery oejapa 'rā guetā ikorapa va'ekue. Ha'e ramo optya 'rā peteī oguy ka'aguy re e'ŷ vy yvyty áry oeja pyre rami. Oī 'rā ombovaipa pyre rive,

¹⁰ mba'eta Nhanderuete pendereraa jepea gui penderexaraipa vy napenema'endu'avei Itaova imbaraete va'e penhemiaty re. Ha'e nunga rupi mba'ety porāve va'erā pejapo vy mba'emo renhoī mombyry guigua penhoty teī,

¹¹ penhotyā árave yvate aguā, ha'e ko'ē ju ipotypa aguā rami pejapo teī hi'a opa rive 'rā jexavaia ára py, teko axy okueraa ve'ŷ va'e oiko jave.

¹² “Nda'evei etea gui yvy regua kuery hevovo rei 'rā, onhendu 'rā ye'ē onhendua rami, yvy regua kuery opoxya rupi onhendu 'rā ye'ē revovo rami.

¹³ Ha'e kuery hevovo rei 'rā yai revovo rami, teī ha'e kuery pe Nhanderuete ijayvu ete 'rā, ha'e ramo ojavapa 'rā mombyry. Okanhymba 'rā mba'emo pirekue yvy'ā re oī va'e yvytu ogueroveve heravya rami, ha'e yvy rataxī yvytu hatā va'e oupi heravy va'e rami.

¹⁴ Mba'eta pytū ovaē ramo ha'e kuery oendu 'rā okyjea. Ha'e gui ko'ē e'ŷ mbove ndokuavei 'rā. Ha'e rami ae 'rā oiko nhandegui mba'emo oipe'apa ha'e imonda va'e kuery re.”

18

Etiópia pygua kuery rovai ijayvuague

¹ Nda'evei ete 'rā Etiópia yvy pe. Ha'e va'e yvy ma yakā rovai re vixo ipepo nhe'ē rei va'e ikuaria.

² Ha'e pygua kuery omondouka 'rā oayvu mombe'uarā ye'ē rovai katy peve, jai rogue guigua kanoā py. Ha'e ramo ha'e kuery pe aipo're: “Peē ayvu mombe'ua kuery, tapeo pojava ke peteī regua yvateve ha'e ipire vera rei va'e ikuaria py. Ha'e va'e kuery gui okyje 'rā mombyryguia kuery ha'e'i rupi ikuai va'e. Ha'e kuery ma ipo'akapa ha'e nhomou'ūmba va'e, ijyvýry rupi yakā oxyrya va'e.

³ Ha'e gui peē kuery yvy jave re pendekuai va'e, yvy re pendekoa va'e ha'e javi, pexa 'rā yvyty áry bandeira oupia rā, ha'e pendu 'rā mimby guaxu omonhe'ēa rā.

⁴ Mba'eta SENHOR xevy aipoe'i: ‘Xee ma xerenda aña gui ama'ē vy akyrirī 'rā ainy ranhe kuaray hexakāa rupi haku nonhendu reia rami, ha'e mba'emo omono'ōa ára kuaray aku-a rupi arai yxapy revegua oaxa oinya rami’, he'i.

⁵ Mba'eta uva omono'ōa e'ŷ mbove ipoty ho'a vy hi'a ijaju ma ramo, ha'e gui mae ma imoatyroā kyxe py ojaya 'rā hakā mombyry-mbyry oo va'e.

⁶ Ha'e rami ae avi ha'e kuery oejapaa 'rā yvyty rupi guyra ha'e mymba yvy regua ho'upa aguā rive. Ha'e kuery retekue re uruvu okaru 'rā okuapy kuaray aku-a pukukue re, ha'e gui yro'ya pukukue re ma mymba yvy regua ju okaru 'rā hetekue re.

⁷ “Ha'e va'e jave py ma SENHOR ixondaro reta va'e pe peteī regua yvateve ha'e ipire overa rei va'e ogueraa 'rā mba'emo ome'ē va'erā. Ha'e kuery gui ma mombyry ha'e'i rupi ikuai va'e okyjea, ipo'akapa ha'e nhomou'ūmba va'e, ijyvýry rupi yakā oxyrya va'e. Ha'e kuery voi mba'emo ogueraa avi 'rā SENHOR ixondaro reta va'e pe, Siāo yvyty re hery oīa py ae”, he'i.

19

Egito pygua kuery rovai ijayvuague

¹ Kova'e ayvu ma Egito pygua kuery rovai ou va'ekue.

“Ma'ē, SENHOR ma arai inhakuā va'e áry rupi oiko vy ou oiny Egito yvy katy. Ha'e ramo henonde Egito re mba'emo ra'angaa ikuai va'e oryryipa 'rā. Egito pygua kuery voi nda'ipy'a guaxuveipa 'rā.

² Ha'e gui xee ajapo 'rā Egito pygua kuery joe-joe opu'ā aguā rami, peteī-teī opu'ā 'rā okuapy guyvy ha'e oirū re. Peteī-teī tetā pygua kuery opu'ā 'rā amboae tetā pygua re, ha'e peteī-teī yvy guigua amboae yvy guigua re 'rā opu'ā.

³ Ha'e ramo Egito pygua kuery nda'ipy'a guaxuvei 'rā onhe'ē py, nhomongetaa amboaxa rivepa ramo. Ha'e ramo ha'e kuery oporandu 'rā mba'emo ra'angaa pe, imba'ekuaa va'e, omanogue mboayvua ha'e imba'evyky va'e pe.

⁴ Ha'e gui Egito pygua kuery amboaxa 'rā peteī huvixa nhomboaxy e'ŷ va'e po py, huvixave nda'evei ete va'e ha'e kuery re opena poyi va'erā pe", he'i SENHOR ixondaro reta va'e.

⁵ "Ha'e gui ma yy noīvei rā Nilo yakā typa 'rā, yakā ikuai va'e typa avi 'rā.

⁶ Yy rape ikuai va'e heakuā vaikue rei 'rā, ha'e Nilo py yakā'i ho'a va'e voi typave ovy 'rā opa peve. Ha'e ramo takua ha'e jai rogue ipirupa 'rā.

⁷ Ha'e gui Nilo yakā yvýry rupi nhuū ikuai va'e ipirupa 'rā, ha'e py yakā'i ho'a va'e rembe rupi, ha'e ijyvýry rupi mba'emo onhotŷ mbyre ha'e javi. Yvytu ogueraapa ramo okanhymba 'rā.

⁸ Ha'e nunga rupi pira mbo'aa rupi ikuai va'ekue ipoaē 'rā okuapy, ipytuē atā 'rā. Yy py pinda ha'e pira mbo'aa omombo va'e ikuerai rei rive 'rā okuapy.

⁹ Ha'e gui ajukue perirī'i apoa kuery ojexavai 'rā, mandyju gui ajukue apoa kuery voi.

¹⁰ Yvatekueve ikangypa 'rā, hembiguai kuery voi iporiaupa 'rā okuapy.

¹¹ "Anhetē ete ae Zoā tetā pygua yvatekueve nai'aranduvei. Faraó mongetaaty kuery hi'arandukueve teī ha'eve'ŷ rami rei omoneta 'rā. Mba'exa tu peē kuery Faraó pe aipopeje ta: 'Xee ma hi'arandu va'e ra'y, yma ete huvixave oiko va'ekue ramymino aiko', peje ta?

¹² Mamo tu ha'vy oī nemongetaa kuery hi'arandu va'ekue? Tove ha'vy ndevy ha'e kuery tomombe'u, toikuua ukapa Egito pygua kuery rovai SENHOR ixondaro reta va'e ojapo taa.

¹³ Zoā pygua huvixa kuery ma hi'arandu e'ŷ va'e ikuai, Mēnfis pygua yvatekueve teī ojekorepa okuapy. Mba'eta Egito regua joguerekao kuery ojapo ojeupergua kuery ojavy aguā rami.

¹⁴ Mba'eta ha'e kuery py'a re SENHOR omoī na'inhakā porāvei aguā. Ha'e ramo ha'e kuery ju ojapo Egito pygua kuery ha'eve'ŷa rami ikuai aguā mba'emo ojapo ha'e javi py, oka'u va'e ha'e ae ombojevyague py rive ho'a va'e rami avi.

¹⁵ Ha'e rami vy nda'evei 'rā Egito py mba'eve avave rei ojapo aguā, inhakā neī huguai, pindo neī jai rogue voi.*

¹⁶ "Ha'e va'e ára ma Egito pygua kuery kunha rami rive 'rā ikangypa. Ngyje gui oryryipa 'rā okuapy SENHOR ixondaro reta va'e gui, ha'e kuery rovai opo oupi reve omongyje ramo.

¹⁷ Ha'e gui Egito pygua kuery onhemondyipa 'rā okuapy, Judá yvy gui mba'emo omombé'ua rā oendu vy rive. Ha'e nunga re oikuua pota vy nda'evei ete 'rā, okyje reia oendu 'rā SENHOR ixondaro reta va'e ha'e kuery rovai ojapo taa oikuua vy.

¹⁸ "Ha'e va'e ára ma oī avi 'rā peteī nhiruī tetā Egito yvy re, Canaā pygua ayvu py ijayvu ha'e SENHOR ixondaro reta va'e rery rupi oura va'e kuery ikuiaia.† Ha'e va'e regua peteī ma Tetā Kuaray hery va'erā.

¹⁹ "Ha'e va'e ára ma SENHOR peguarā ojapo 'rā peteī altar Egito yvy mbyte py, yvy ja'oa rupi voi ita omopu'ā 'rā imo'amy SENHOR pe.

²⁰ Ha'e va'e nunga oī 'rā Egito yvy regua kuery SENHOR ixondaro reta va'e re ima'endu'a aguā. Ha'e ramo SENHOR pe ha'e kuery ojapukai 'rā omoingo axy reia rā, ha'e ramo ombou 'rā heraa jepearā ha'e hepyarā.

²¹ Ha'e rami py SENHOR ojekuaa uka 'rā Egito pygua kuery pe. Ha'e ramo ha'e va'e ára Egito pygua kuery oikuua nho vy omboete 'rā okuapy, ixupe ogueru 'rā guive mymba ha'e mba'emo aju ome'ē va'erā. Ha'e rami vy SENHOR pe anho 'rā onhemboayvu, ijayvuague ojapo ete 'rā guive.

²² SENHOR ombojexavai 'rā Egito pygua kuery, ha'e gui ombojexavai rire omoingo porā ju 'rā, mba'eta SENHOR pe ha'e kuery ojeko rerova 'rā. Ha'e ramo ha'e kuery ojapukaia re oikuua pota vy omonguerapa 'rā.

* 19:15 "Inhakā ha'e pindo" he'ia ma Egito pygua kuery va'e regua yvatekueve re ijayvu vy, ha'e rā "Huguai ha'e jai rogue" he'ia ma yvyīgueve re (9.14-15). † 19:18 Canaā ma judeu kuery ikuiaia.

²³ “Ha'e va'e ára oĩ 'rã peteĩ tape Egito yvy gui Assíria peve oo va'e. Ha'e va'e rupi ma Assíria pygua kuery ou 'rã Egito py, ha'e Egito pygua kuery ma Assíria katy 'rã oo. SENHOR pe Egito pygua kuery oporaei 'rã okuapy Assíria pygua kuery reve.

²⁴ Ha'e va'e ára ma Israel kuery mboapya 'rã ikuai Egito ha'e Assíria pygua kuery reve. Yvy mbyte nhomoingo poráarã 'rã ikuai.

²⁵ Mba'eta SENHOR ixondaro reta va'e ogueroayvu porã vy aipoe'i 'rã ha'e kuery pe: ‘Ima'endu'a porãmby ta'ikuai xevygua Egito pygua kuery, Assíria pygua kuery xepo py amoingo va'ekue, ha'e Israel kuery xevy guarã aiporavo va'ekue’, he'i 'rã.”

20

Egito ha'e Etiópia pygua kuery escravo-rã heraapaa aguã re ijayvuague

¹ Ha'e gui Assíria pygua huvixave Sargão ma Asdode tetã katy omondouka guembiguai Tartã, joe opu'ã vy oipe'a aguã.

² Ha'e va'e ma'etýa re ae SENHOR oayvu omombe'u uka Amoz ra'y Isaías pe. Ha'e vy aipoe'i:

— Tereo, ndeaxi'y áry gui emboi ajukue puku inhana rei va'e profeta pegua reiporu va'e. Emboi avi ndepy regua — he'i. Ha'e rami ojapo vy omboipa, ha'e ipy rei oikovy.*

³ Ha'e gui SENHOR aipoe'i:

— Guĩ rami xerembiguai Isaías mboapya ma'etý re ipire rei ha'e ipy rei oikovyague rami avi oiko 'rã Egito ha'e Etiópia pygua kuery re, mba'eta ikuua ukaarã Isaías oiko.

⁴ Mba'eta Assíria pygua huvixave ogueraapa 'rã Egito ha'e Etiópia pygua kuery escravo-rã. Kunumigue ha'e tujakue'i voi oje'oi 'rã ipire rei, ipy rei ha'e ho'oa ojekuaa rei reve, Egito pygua kuery oxímba aguã rami.

⁵ Ha'e ramo Israel kuery ha'e nunga oexa vy onhemondiyipa rei, oxímba rei 'rã okuapy Etiópia pygua kuery re ojerovia rire, ha'e Egito pygua kuery pe voi “Ipo'akapave va'e” he'i rire.

⁶ Ha'e va'e ára ha'e va'e yvy re hekoa va'e kuery aipoe'i 'rã okuapy: “Pexa, evoko rami ete va'e ty'y oiko nhande kuery nharõ jakuapy va'ekue re, mba'eta ha'e katy ae jajava Assíria pygua huvixa gui, ha'e kuery nhandereraa jepe aguã tei! Mba'exa 'rã'vy jaa jepe?” he'i 'rã okuapy.

21

Babilônia pygua kuery rovai ijayvuague

¹ Kova'e ayvu ma ye'lẽ yvýry tekao e'ŷa oĩ va'e pygua kuery rovai ou va'ekue.* Mba'eta kuaray puku-a katy gui yvytu vaikue ou va'e rami avi peteĩ ou 'rã vai tekao e'ŷa gui, nhomongyea kuery ikuiaa gui ae.

² Ipoyi ete va'e xevy oexa ukaa po rami amombe'u va'erã: “Anhetẽ rupi e'ŷ ikuai va'e anhetẽ rupi e'ŷve 'rã ikuai, ha'e mba'emo mombaa rupi ikuai va'e nhomombave 'rã heravy. Elão pygua kuery, pepu'ã ke ha'e kuery re. Média pygua kuery, pejoko ke. Mba'eta xee amombytu'upa ma ha'e kuery ipoaëa”, he'i.

³ Ha'e nunga aendu vy xerye rupi haxy va'e anho aendu, xere tekoaxy ipo'aka ma imemby raxy va'e rami. Haxy rã ajepoka-poka vy naendu kuaavei rei, xekangya gui ndaexa kuaavei ma guive.

⁴ Teko vai gui anhemondyi vy xepy'a tytypa. Pytũ xee arõ tei xemongyjarã rive ju oĩ.

⁵ Ha'e kuery omoi ma mesa, pyrõa rupi popẽ mbyre guive omoi, okaru ha'e oy'u okuapy aguã. Yvatekueve, pepu'ã ke, perekó katu hu'y jokoa.

⁶ Mba'eta po rami SENHOR ijayvu xevy: “Tereo, emoi peteĩ oikuaa pota va'erã, ha'e tomombe'u ou va'e-va'e oexa vy.

* 20:2 Isaías pe ijayvu escravo rami onhemonde aguã kaxõ py rive, ha'e kuery oikuaa aguã Egito ha'e Etiópia pygua kuery voi escravo ikuai 'rãa. * 21:1 Apy ma Babilônia tetã rovai ijayvu.

- ⁷ Ha'e gui kavaju árygua mokō-mokoī ou ramo, e'ŷ vy mburika, camelo árygua kuery ou ramo oexa vy ke tojapyxaka porā", he'i.
- ⁸ Ha'e ramo oikuua pota va'e ojapukai 'rā guary rami: " SENHOR, torre oikuua potaaty áry ára pukukue re ma apu'ā ha'amy, pytū mbukukue re guive ha'ā anhangarekoa rupi.
- ⁹ Pee ma avakue ou reta, kavaju árygua kuery mokō-mokoī jogueru jekuaa", he'i. Ha'e gui teīgue ju ojapukai vy aipoe'i: "Oitya ma, oitypaa ma Babilônia tetā! Ha'e rami vy ha'e kuery ruete ra'angaa ha'ypa oupy yvy rupi", he'i.
- ¹⁰ Ma'ē, xeretarā kuery! Ojyky ha'e oinupā mbyre penemoingoa, mba'emo moa'yīaty rupi oī va'e rami rive! Ha'e ramigua SENHOR ixondaro reta va'e Israel kuery ruete gui aendu va'ekue ae amombe'u pēvy.

Dumá pygua kuery rovai ijayvuague

- ¹¹ Kova'e ma Dumá pygua kuery rovai ayvu ou va'ekue. Seir yvy gui ojapukaia xevy: "Nhoarōa, mbovy hora ma tu nhaí pytū py? Nhoarōa, mbovy hora ma tu?"
- ¹² Ha'e ramo nhoarōa ombovai 'rā: "Ovaē ma ouvy ko'ē, ha'e gui pytū ju 'rā ou. Reporanduvexe vy ke eporandu. Any vy ejevy, ha'e gui eju ju", he'i 'rā.

Arábia pygua kuery rovai ijayvuague

- ¹³ Kova'e ayvu ma Arábia pygua kuery rovai ou va'ekue.
- "Peē Dedā pygua kuery peguataa rupi Arábia ka'aguy re peaxa 'rā pekuapy pytū.†
- ¹⁴ Peraa ke yy oy'uxe va'e kuery pe. Ha'e peē Tema yvy re pendekoa va'e, peraa ke mbojape ojava oje'oivy va'e pe.
- ¹⁵ Mba'eta ha'e kuery ma ojukapaa ta rā ojava, kyxe oekyia ha'e guyrapa omoatāa va'e gui ojava va'e, ha'e opoxya rupi ha'e kuery re opu'ā va'e gui."
- ¹⁶ Mba'eta xevy pe SENHOR aipoe'iague rami: "Peteī ma'etý'a'i pyve omaba'epo va'e oipapaa rami okanhymba 'rā Quedar yvy re mba'emo porā oī va'ekue.
- ¹⁷ Hapa va'e kuery opave ovy 'rā, Quedar pygua ipy'a guaxukueve voi mbovy'i ete 'rā ikuai", ha'e rami ae SENHOR Israel kuery Ruete ijayvu rire.

22

Jerusalém pygua kuery rovai ijayvuague

- ¹ Kova'e ayvu ma yvyugua mba'emo oexa ukaaty peguarā ou va'ekue. Mba'e tu oī ndea pygua kuery ha'e javi ngoo áry ojeupi okuapy aguā?
- ² Ndee tetā renhendu porā riae va'ety, tetā oguerovy'a ha'e ovy'a rei va'e anho ikuaiaty reiko va'ekue ri! Ndea py manogue ikuai va'erā ma kyxe py ojuka pyre'ŷ, neī joe opu'āa py e'ŷ ojukaa va'ekue.
- ³ Ndea pygua yvatekueve ojavapa vyvoi teī ombo'apaa guyrapa e'ŷ re. Ndea pygua ovaexia ma guive rā ombo'apaa, mombyry ma oo teī.
- ⁴ Ha'e nunga rupi aipoa'e: "Xere e'ŷ ke pema'ē, nda'evei etea rupi ajae'ove aguā. Nda'evei xembovy'a ju pekuapy aguā, xeretarā rajy kuery omombaa rire", ha'e.
- ⁵ Mba'eta kova'e ára ma hevovo, joguero'apa rei ha'e ndoikuuai reipa aguā ára SENHOR ixondaro reta va'e oa'anga va'ekue. Yvyugua mba'emo oexa ukaaty py ha'e nunga oiko 'rā. Ha'e ramo tetā kora oitya rā ojapukaia onhendu 'rā yvyty áry peve.
- ⁶ Mba'eta Elão pygua kuery hu'y ryru reve ou ma okuapy, karóxa ha'e kavaju árygua kuery reve. Quir pygua kuery voi hu'y jokoa moī porāaty oipe'a vy ojopypa heruvy.
- ⁷ Ha'e rami py peneretā yvýry rupi yvyugua iporāve va'e-va'e tynyē 'rā oiny karóxa anho, penerokē py kavaju árygua kuery voi optyapa ma okuapy.
- ⁸ Mba'eta oipe'apaa ma Judá pygua kuery repyarā va'ekue. Ha'e va'e ára penema'endu'a 'rā penembiporu oo yvyra gui ojapo pyre py pemoī porā va'ekue re.

† 21:13 Dedā (versículo 13), Tema (versículo 14) ha'e Quedar (versículos 16-17) ma Arábia yvy regua meme.

⁹ Ha'e gui Davi rekoague tetā kora pexa pota vy ipa'ũ pejou reta 'rã. Ha'e vy pembolsru 'rã yy omboty pyre gui peru va'e.*

¹⁰ Peipapa 'rã Jerusalém tetā py oo ikuai va'e, ha'e va'e regua peity 'rã tetā kora pemoatyrô aguã.

¹¹ Ha'e gui mokoï kora oĩ va'e mbyte pemboty 'rã ygua ymague gui yy ou va'e. Ha'e rami teĩ napanema'endu'ai 'rã yva pygua re, ha'e nunga ha'e javi ombou aguã re onhembopy'a va'ekue teĩ.

¹² SENHOR ixondaro reta va'e ijayvu ha'e va'e ára pejae'o aguã re, ha'e pendepy'a vai vy peneakã penhopimba, ha'e ajukue vaikue py penhemonde aguã re.

¹³ Ha'e rami teĩ peẽ kuery pevy'a rei ha'e penderory rive anho teri pekuapy. Ha'e rami vy pejuka 'rã vaka, pejyryvi kyxí 'rã vexa'i. Pe'u 'rã xo'o, ha'e pey'u 'rã vinho. Ha'e rami vy aipopeje 'rã: "Jakaru ha'e jay'u, mba'eta ko'ẽ rã nhamanomba 'rã", peje pekuapy.*

¹⁴ Ha'e ramo xee aendua py SENHOR ixondaro reta va'e ijayvu. Ha'e vy aipoe'i: "Anhetẽ ae, guĩ rami ete pendeko vaia namboguei 'rã pemanomba peve", he'i SENHOR ixondaro reta va'e.

Sebna omo'yvy'i aguã, ha'e rã Eliaquim ma omboyvateve aguã re ijayvuague

¹⁵ Ha'e gui SENHOR ixondaro reta va'e aipoe'i:

— Epu'ã ke, tereo huvinxave ro re opena va'ety Sebna oĩa py. Ha'e rami vy eporandu ixupe:

¹⁶ "Mba'e tu apy oĩ? Mava'e tu ndevy upe va'e ojapo uka, apy ndevyguia yvyra ruparã rejo'o aguã? Mba'eta apy yvyty áry rejapo ndevyguia yvyra ruparã, itaova re ndetui aguã.†

¹⁷ Ha'e rami avi SENHOR nemokanhy 'rã peteĩ ava imbaraete vaipa va'e rami. Ndejopy ratã vy

¹⁸ nenhovã 'rã peteĩ nheovãa py. Ha'e vy bola rami nembojere 'rã heravy peteĩ yvy tuvixaa katy. Ha'e py ma remano 'rã. Ha'e py ae avi opa 'rã karóxa'i rejou porãve va'ekue. Ha'e ramo ndekáuxa nderuvixa ro pygua kuery oximba 'rã okuapy.

¹⁹ Xee romombo 'rã reiaty gui mombyry. Roipe'a 'rã mba'emo rejapo aguã rami reikoague gui.

²⁰ "Ha'e va'e ára ma aenoĩ 'rã xerembiguai Eliaquim, Hilquias ra'y.

²¹ Ha'e va'e ju amonhemonde 'rã ao puku remoĩ va'ekue py, ha'e neku'axãgue py amoku'axã 'rã. Ipo py ju amboaxa 'rã ndepo'akaague. Ha'e ramo oiko 'rã Jerusalém ha'e Judá pygua kuery rurã.

²² Ijaxi'y áry xee amoĩ 'rã Davi ro pe'aa. Ha'e rami rire amongue henda py oipe'a ramo avave rei nombotyavei 'rã. Ha'e gui omboty ri ramo avave avi ndoipe'aai ju 'rã.

²³ Amoĩ atã 'rã yvyra rakua peteĩ henda oĩ atã aguã py rami. Ha'e ramo optya 'rã nguu ro pygua kuery omboetepa aguã rami.

²⁴ Hexe oĩ 'rã tuu ro py ikuai va'e ha'e javi re opena aguã, guetarã kuery, guamymino kuery, ha'e gui tembiporu kyrigüeve, hy'a'i ha'e hy'a kua ikuai va'e re voi", he'i.

²⁵ Ha'e gui SENHOR ixondaro reta va'e aipoe'i: "Ha'e va'e ára yvyra rakua oekyia ju 'rã oĩ atãague gui. Oipe'aa ramo ho'a 'rã. Ha'e ramo hexe oupi pyre voi ho'apa avi 'rã", he'i. Po rami ae SENHOR ijayvu, 're 'rã.

Tiro pygua kuery rovai ijayvuague

¹ Kova'e ayvu ma Tiro pygua kuery rovai ou va'ekue.

* 22:9 Ha'e kuery ombolsru yy hovaigua kuery ou rã guarã, yy oata e'ý aguã. * 22:13 1 Coríntios 15.32 † 22:16 Ha'e va'e jave py ojejou porã rei va'e ha'e ae ruparã ojapo ma voi 'rã iporãvea py, hexe ima'endu'a porãa aguã.

"Kanoā guaxu Társis guigua py peguata va'e, pendepy'a vai ke, mba'eta peneretā ombovaipaa 'rā. Oo ikuai va'e noīvei 'rā, neī kanoā onhembojaaty ma voi.* Chipre yvy gui ha'e nunga omombe'ua.

² Ye'ē yvýry rupi penderekaoa va'e, pekyririmbā ke. Peē kuery ma Sidom tetā gui mba'emo pejogua vy perekopa rei, ye'ē rupi riae pendekuai vy.

³ Paraguaxu rupi ndevy guarā oguerua va'ekue mba'emo ra'yigue yy rape Egito re ikuai va'e ha'e Nilo yakā yvýry omono'ō va'ekue. Tiro tetā, ndea py ma yvy regua kuery mba'emo vendeaty oī va'ekue.

⁴ Peē Sidom pygua kuery ye'ē yvýry tetā ikorapaa py penderekaoa va'e, peximbā ke, mba'eta ye'ē ijayvu vy aipoe'i: 'Xee naendui kyrī va'e raxy, neī kyrī va'e voi naikuavāi. Xee nambotujai avakue'i, neī kunhataīgue voi nambo'ei', he'i.[†]

⁵ Ha'e gui Tiro pygua kuery re oiko va'ekue Egito py omombe'ua ramo ha'e pygua kuery voi oendu 'rā nda'evei etea.

⁶ Ye'ē yvýry rupi pendekoa va'e, tapeo ke Társis katy pejae'o reve.

⁷ Ha'e rami ete ri ty'y oiko xapy'a peneretā pejou porā rei va'ekue re, yma pejapo va'ekue teī, ha'e mombyry katy ju peo pendekoa aguā?

⁸ "Ha'e gui mavā'e nda'u Tiro pygua kuery re ha'e rami ete oiko aguā re onhembopy'a va'ekue? Mba'eta ha'e va'e tetā pygua ma heta regua pe ovende va'ekue akā pyxīa. Ha'e pygua mba'emo joguaa rupi ikuai va'e ma yvatekueve meme, ha'e mba'emo vendea rupi ikuai va'e yvy jave rupi omboetevepy ikuai va'ekue.

⁹ SENHOR ixondaro reta va'e ae onhembopy'a ha'e rami, omomba aguā pavē gui ojejou porāve va'e, ha'e omo'yvy'imba aguā yvy jave rupi omboetevepy.

¹⁰ Társis pygua memby kuery, peguata ke peovy peguataxeia katy rei pendeyvy rupi, Nilo yakā oxyrya rami. Ndoikovei 'rā pendejokoarā.

¹¹ Mba'eta ye'ē áry rupi SENHOR opo oupi vy omoingo axy tetā ikuai va'e. Ha'e rami vy ijayvu Canaā re voi oo ikorapa va'e ombovaipaa aguā re.

¹² Ha'e vy aipoe'i: 'Aÿ ma Sidom pygua memby, nemoingo axya rire nerenduvei ma 'rā rejou porā reia. Epu'ā ke, tereo Chipre katy. Ha'e rami teī neī ha'e py voi nderejoui 'rā repytu'u aguā', he'i.

¹³ "Peikuua pota ke caldeu kuery yvy re oiko va'ekue re. Ha'e pygua kuery ma kue'i peve peteī regua neī nda'ikuaivei va'ekue, ha'e ijyvy Assíria kuery ombovaipa va'ekue vixo tekaoa e'ŷa rupigua rive ikuai aguā. Ha'e rami teī ha'e kuery ae torre ojapo vy ombovaipa raka'e Tiro pygua huvixave ro, ha'e vy omomba ete.

¹⁴ Kanoā guaxu Társis guigua py peguata va'e, pejae'o ke, mba'eta omombaa ma penhemiaty ikorapa va'ekue.

¹⁵ "Ha'e va'e ára rire ma Tiro tetā re hexaraia 'rā setenta ma'etý re, huvixave oiko puku-a ára peve. Ha'e gui setenta ma'etý opaa py ma Tiro re oiko ju 'rā kunha itavy rei va'e regua mboraei py oī va'e rami, po rami:

¹⁶ 'Kunha itavy rei va'e hexaraipy, ejopy ju ke mba'epu ixā reta va'e, ha'e tereo tetā rupi. Eporaei porā ke, rembopu vy ke jovaive-ive tema eovy, ndere ima'endu'aa nho aguā', 'ea va'e rami.

¹⁷ Mba'eta setenta ma'etý ojeupity maa py ma SENHOR omoingo porā ju 'rā Tiro tetā. Ha'e ramo ha'e kuery gueko vaia rupi ju ojouve 'rā oje'oivy. Ha'e rami vy yvy jave rupi itavy 'rā huvixave ikuai va'e reve.

¹⁸ Ha'e rami teī gueko vaia rupi ojou va'ekue SENHOR pe ae 'rā omboaxaa. Hepykue nomoī 'rā hyru py, neī nomoī porāi 'rā. Ha'e rami 'rāgue py hepykue optya 'rā SENHOR renonde ikuai va'e pe, ha'e kuery ojou reta aguā ho'u va'erā, ha'e iporā va'e py anho onhemonde aguā."

* ^{23:1} Tiro tetā ma ye'ē yvýry oī kanoā guaxu onhembojaaty. Sidom voi ha'e kuery va'e regua retā. † ^{23:4} Tiro ha'e Sidom pygua kuery pe "Ye'ē ra'y kuery" 'ea va'ekue teī ha'e kuery okanhymba rire ye'ē "Xera'y kuery ndokuavei" he'i.

24

¹ Ma'ē, SENHOR omomba 'rā yvy, ombovaipa ete 'rā. Amboae rami ojapo 'rā hi'áry rupi, ha'e omoaímba 'rā ha'e py heko va'ekue.

² Ha'e rami vy heta va'e kuery re mba'emo oiko va'e ma sacerdote kuery re avi 'rā oiko. Tembiguai kuery re oiko va'e ma ipatō re avi 'rā oiko. Tembiguai kunha re oiko va'e ma hereko re avi 'rā oiko. Mba'emo joguaa re oiko va'e ma mba'emo vendea re avi 'rā oiko. Mba'emo oiporuka va'e re oiko va'e ma iporua re avi 'rā oiko. Nhomboreve va'e re oiko va'e ma oreve va'e re avi 'rā oiko.

³ Mba'eta yvy ha'e javi rupi omombaa 'rā, hexe ikuai va'ekue oipe'apaa 'rā guive, SENHOR ae ha'e rami aguã re ijayvu rire.

⁴ Ha'e gui yvy jave rupi ipirupa vy overepa 'rā. Na'iporävei ha'e ipirupa 'rā, yvy regua yvatekueve voi nda'eveive ovy 'rā.

⁵ Anhetē ae yvy iky'apa va'e itui heko va'e kuery káuxa, lei ha'e hekorā ome'ē mbyre rovai ikuai ramo, ha'e ombovaipa rive rire Nhanderuete guexeve guarā imarā e'ŷ va'e ojapo va'ekue.

⁶ Ha'e nunga rupi ayvu vai omokanhy heravy yvy, hexe ikuai va'e voi iky'a va'e meme ikuai. Ha'e nunga rupi yvy regua kuery oapypaa 'rā, mbovy'i ete 'rā okuave.

⁷ Vinho opa ovy, uva'y ikuai va'e voi ipirupa ma. Ha'e ramo opy'a py ovy'a va'ekue ipoaëmba.

⁸ Opytu'upa pandeiro pu rupi ovy'a va'ekue, opa ovy'a nhendu ha'e ixā reta va'e pu rupi ovy'a va'ekue.

⁹ Ndoporaeiae 'rā vinho oy'u reve. Iro va'e oy'u va'e kuery pe ma iro raxa 'rā.

¹⁰ Ha'e rire tetā oeja rive pyre ma ombovaipaa ete. Oo ombotypaa ramo avave rei nda'eveei ma oike aguã.

¹¹ Ha'e kuery ojapukai okuapy tape rupi vinho re ojerure vy. Vy'a oī aguã va'ekue py ptūt̄ vaikue rive oī, ovy'a va'ekue oipe'apaa ma rire yvy gui.

¹² Tetā rupi ma omomba pyre anho oī, tetā rokē voi ombovaipaa ma.

¹³ Mba'eta ko yvy regua kuery ma mbovy'i ete okuave 'rā yvy re, azeitona'y gui hi'a oipo'opaague rami, ha'e uva ono'ða ma rire nomono'õmbai'i va'ekue oeka jevya rami.

Heko porā va'e kuery ovy'a aguã re ijayvuague

¹⁴ Ha'e gui okuave va'e kuery ma oporaei nhendu 'rā ovy'a vy. Ye'ē guive SENHOR rexakā oguerovy'a 'rā okuupy.*

¹⁵ Ha'e nunga rupi peẽ kuaray oua katy pendekuai va'e peroporaei ke SENHOR, ye'ē yvýry penderekao va'e voi peporaei SENHOR Israel kuery ruete rery rupi.

¹⁶ Ha'e ramo yvy apy gui nhaendu “Toguerovy'aa Heko porā ete va'e pe” oporaeia rā.

Heko vai va'e kuery okanhymba aguã re ijayvuague

Ha'e rami teĩ xee aipoa'e: “Xee ma ndavy'aia anho aendu, nda'evei ete xevy. Mba'eta anhetē rupi e'ŷ ikuai va'e ma nhombotavya rupi ae 'rā ikuai”, ha'e.

¹⁷ Ha'e nunga rupi yvy re penderekao va'e, pendere ou 'rā ngyje, yvykua ha'e nhuã.

¹⁸ Mba'eta ngyea gui ojava va'e ho'a 'rā yvykua py, ha'e yvykua gui oẽ ramo nhuã ju 'rāojura. Mba'eta yy yvate rupi ojoko pyre onhoëmba 'rā, ha'e yvy yta ikuai va'e omyimba 'rā.

¹⁹ Ha'e vy yvy opẽmba rei 'rā oiny, ha'ypa ha'e oryryi atā ete 'rā.

²⁰ Yvy ho'apa rei 'rā ovy oka'u va'e rami, ovava 'rā kya okeaty rami. Yvy re heko va'e kuery reko vaia ma ipoyi ete ma oiny yvy re. Ha'e nunga rupi ho'a vy nopus'avei ma 'rā.

²¹ Ha'e va'e ára SENHOR yva re ranhe ombopaga 'rā yva re ikuai va'e, ha'e gui yvy re ju ombopaga 'rā huvixave kuery yvy regua.

²² Ha'e kuery omono'õmba 'rā monde py ho'a va'ekue rami. Ha'e vy ombotypa 'rā nhuã py. Mbovy ára re rei ve'ŷ ma rire teĩ ombopagapa 'rā.

* 24:14 Apy ma ijayvu heko porā va'e kuery oo jepe vy ovy'aa re.

²³ Jaxy oxīmba vy naendyvei 'rā, kuaray voi okanhy 'rā SENHOR ixondaro reta va'e ou ramo Sião yvyty áry opena aguã Jerusalém tetā py. Ha'e rami vy ojeupegua ruvixa kuery oexaa py oexa uka 'rā guxakāa.

25

SENHOR nhomboaxya ogueroporaieiague

¹ SENHOR, ndee ma Xeruete. Xee romboete ha'e aroporaei 'rā nderery, nerembiapokue iporā ete ramo. Yma rupi ndeayvuague anhetē ete ha'e ojeroviapy va'e meme rupi reiko.

² Mba'eta tetā ikuai va'e rembovaipa rire itaty rive opyta, tetā imbaraete va'e teĩ tekoague rejapo. Yvy mboae regua tetā voi tetā ve'ý meme opyta, nomoatyrōavei ma 'rā.

³ Ha'e nunga rupi yvy regua imbaraetekueve nemboete 'rā okuapy, ha'e tetā pygua nhomoingo axy reia rupi ikuai va'ekue okyjepa 'rā ndegui.

⁴ Mba'eta renhemoi iporiaukue'i onhemi aguã, oipotapa rei'i va'e onhemi atyrā reiko ikuai axy rā, yvytu atā gui renhomí aguã, ha'e kuaray aku gui kuaray'ā rami. Mba'eta joguerekó axy va'e poxya ma tetā kora re yvytu atā oipejua rami ou,

⁵ ipiru reia rupi kuaray ojope raxyá rami avi. Ha'e rā ndee ma remomba 'rā yvy mboae regua poxya. Mba'eta arai huū va'e kuaray aku ojokoa rami avi ndee remokyrirī 'rā joguerekó axy va'e kuery ov'y'a reia rupi oporaeia.

⁶ Ha'e gui kova'e yvyty re SENHOR ixondaro reta va'e ojapo 'rā peteñ ngaru guaxu yvy regua kuery ha'e javive pe, ngaru vinho ymague oña, ha'e hy'a xo'o kyra ha'e vinho xií porā va'e ikuia.

⁷ Kova'e yvyty re ombovaipa 'rā ajukue heta va'e kuery ojao'iague, ha'e yvy regua kuery ha'e javi rexa mbotyarā omoña va'ekue.*

⁸ Ha'e rami vy omomba 'rā manoa po'akaa raka'e rā peve. SENHOR Nhanderuete texay omombirupa 'rā pavē rova gui, ha'e ojapo 'rā ixupegua kuery oxīague noenduvei aguã rami yvy jave rupi, SENHOR ae ha'e rami ijayvu rire.

⁹ Ha'e va'e ára aipo'ea 'rā: “Upe ma Nhanderuete nharō jakuapy va'ekue. Ha'e ae ma nhanderepy 'rā. Upe va'e ma SENHOR nharō jakuapy va'ekue. Ha'e nhandereraa jepe ramo jaroporaei ha'e jarovy'a 'rā', 'ea 'rā.

¹⁰ Mba'eta kova'e yvyty re SENHOR omoñ'rā opo. Ha'e rā Moabe yvy re ma opyrōmba 'rā, mba'emo pire mba'emo repoxi re nhapyrōmbaa rami.

¹¹ Ha'e nunga mbyte gui ma ha'e kuery okuave'ě 'rā, o'ytā va'e o'ytaa rupi okuave'ě-ve'ě rami. Ha'e rami teĩ SENHOR omomba 'rā onhemboyvate reia, okuave'ě teĩ.

¹² Oitypa 'rā tetā kora yvate ha'e imbaraete va'ekue. Ombovaipa 'rā, oitypa 'rā yvy rupi yvy ku'i opyta peve.

26

SENHOR opena ramo ojerovia etea rupi oporaeiague

¹ Ha'e va'e ára ma Judá yvy rupi oporaeia 'rā po rami:

“Nhaneretā ma imbaraete ete. Ikora ha'e torre nhanhemi aguã ma Nhanderuete ae omoñ nhandereraa jepearā.

² Peipe'a ke okē yvy regua kuery heko porā ha'e ojeroviaa rupi ikuai va'e oike aguã.

³ Ndee SENHOR, rembopy'a porā riae 'rā ndere ojerovia aguã omoñ atā va'e.

⁴ Pejerovia riae ke SENHOR re, mba'eta Nhanderuete ma itaova imarā e'ý va'e oiko.

⁵ Ha'e oitypa 'rā yvy'ā áry tetā oĩ va'e pygua kuery. Oity vy omo'yvy'í'i 'rā yvy re, yvy ku'i opyta peve.

⁶ Ha'e ramo opyrōa 'rā opy py. Oiko axy rei'i va'e ha'e iporiaukue'i ae 'rā opyrōmba.

⁷ “Heko porā va'e oguataa ma ijoja porā rei va'e meme. Ndee nderekō porā va'e ae rembojoja porā 'rā heko porā va'e oiko aguã.

* 25:7 Apy ma ijayvu manoa po'akaa SENHOR ombovaipa aguã re (1 Coríntios 15.54-58). * 25:8 1 Coríntios 15.54, Apocalipse 7.17, 21.4

⁸ SENHOR, roarõ rokuapy reipotaa oiko aguã. Orep'y'a re oĩ nderery re orema'endu'a riae aguã.

⁹ Xenhe'ẽ py pyávy xepytuẽ atã ndere. Xenhe'ẽ ha'e xep'y'a py roeka riae aikovy. Mba'eta yvy re reipotaa oiko ramo mae ma yvy regua kuery oikuua 'rã teko porã rupi ikuai aguã.

¹⁰ Mba'eta heko vai va'e remboaxya rexu uka teĩ ha'e kueryndoikuuaai 'rã teko porã rupi ikuai aguã. Ha'e kuery ma heko porã va'e ikuiaia rupi teĩ gueko vaia rupi tema ikuai, ndoikuuaai potai 'rã SENHOR yvatea re.

¹¹ SENHOR, ndepo reupi reiny teĩ ha'e kueryndoexai. Ha'e rami teĩ ndevyguia kuery repy ramo ha'e kuery oexa vy oximba 'rã. Ndepoxya rupi emokanhymba nderovaigua kuery.

¹² Ha'e rã orevy pe ma SENHOR, eme'ẽ ke mby'a porã, mba'eta mba'emo rojapo va'e ha'e javi ma ndee ae rejapo orevy.

¹³ SENHOR Oreruete, huvixa kuery mboae orere ipo'aka va'ekue, teĩ nderery anho 'rã ore roqueroporaei.

¹⁴ Ha'e kuery omanomba ma, ndoikove jevyi 'rã guive, hi'ãgue rive nonhemboetevei 'rã. Ha'e rami aguã ae rembopaga vy remomba ete. Rejapo ha'e kuery re na'ima'endu'aavei aguã rami.

¹⁵ Ha'e rã ndevyguia kuery ma remboetave 'rã. SENHOR, ndevyguia kuery remboetave ramo nemboetepa. Ijyvy voi rembotuvixave heravy.

¹⁶ Ha'e kuery ojexavai vy nderekha 'rã. SENHOR, ha'e kuery remo'arandu ramo onhembo'ea re 'rã ikuai.

¹⁷ Kunha hye guaxu'i va'e oikuavã'i aguã ovaẽ rai'i ma ramo ojepoka-poka ha'e haxy rã haxẽ 'rã, ha'e rami ae avi ore voi orekuai va'ekue neronden, SENHOR.

¹⁸ Mba'eta ore voi roguereko'i ma, rojepoka-poka haxy ramo oiko aguã, ha'e rã roguereko'i va'ekue ma yvytu rive. Ha'e rami vy ore ma yvy re ndoroguerui jogueraa jeppearã, ndorojapo kuaai yvy re oikoave aguã rami.

¹⁹ Ha'e rami teĩ penderegua omano va'ekue oikove ju 'rã, onhemboetepa ju 'rã, xeretekue voi. Yvy ku'i guýry pendekuai va'e, pemyi ke, ha'e pevy'a. Oreruete, ndeguigua ae nhomoingovearã rembou, ko'ẽ rai'i jave yxapy remboua rami avi. Ha'e ramo yvy gui oikove ju 'rã omano va'ekue."

²⁰ Ha'e nunga rupi xeretarã kuery, tapeo ranhe, peike opy ja'o'i py, ha'e pemboty okẽ peike rire. Penhemi ranhe xapy'a'i, ipoxya oaxa peve.

²¹ Mba'eta SENHOR oẽ 'rã ouvy oĩatyigui, yvy regua kuery ombopaga aguã heko vaiague re. Ha'e gui yvy re ojekuaapa 'rã tuguy omoẽ mbyre, ndojao'ivei ma 'rã omano va'ekue.

27

Nhanderuete ojeupagua kuery oayvu vy ogueraa jepe aguã re ijayvuague

¹ Ha'e va'e ára SENHOR ombopaga 'rã teju-jagua mboi inhakuã va'e, teju-jagua mboi ikarẽ-karẽ va'e. Okyxé hatã va'e, tuvixa ha'e imbaraete va'e py 'rã ojuka. Ojuka avi 'rã vixo tuvixa va'e ye'ẽ rupigua.

² Ha'e va'e ára SENHOR aipoe'i 'rã: "Peroporaei uva he'ẽ va'e 'y.

³ Xee SENHOR ma ha'e va'e re apena riae amoaký vy, avave rei ojapo vaia e'ý aguã apena aikovy, ara py ha'e pyávy.

⁴ Xere ma noĩ ha'e nunga pe xepoxya. Ha'e gui juu e'ý vy juu rakuaendy xerenonde hi'aĩ va'e rire ma apu'ã 'rãgue hovai, apypa vyvoi 'rãgue.

⁵ Ha'e rami e'ý vy tove ha'e kuery tojepy uka xevy xepo'akapa va'e ramo. Xereve peteĩ rami ta'ikuai. Tá, tojapo xereve peteĩ rami orekuai aguã", he'i 'rã.

⁶ Ha'e gui raka'eve rã Jacó kuery hapo porã 'rã, Israel kuery hoky vy ipoty 'rã. Ha'e rami vy yvy jave re tynyẽ 'rã hi'a.

⁷ Xapy'a rei nda'u SENHOR ju omoingo axy ri Israel kuery imoingo axyare omoingo axyague rami? Xapy'a rei nda'u ha'e kuery va'e regua ojuka ri ijukaare ojukaague rami?

⁸ Any teve! Ha'e rami 'rãgue py escravo-rã ogueraa ukaa py rive omoingo axy. Oipeju ratã reve omondouka yvytu kuaray oua katy guigua oipejua rami.

⁹ Ha'e gui po rami ojao'i 'rā Jacó kuery heko vaiague, po rami oikuaa uka 'rā ojejavyague omboguepa maague: Mba'eta ita ha'e kuery altar re oī va'e ha'e javi SENHOR omboa'ypa 'rā ita cal ha'ykue-'ykue'i rami. Ha'e ramo nomopu'āvei ma 'rā ta'angaarā yvyra gui ojapo va'ekue, neī altar heakuā porā va'e oapy atyrā voi.*

¹⁰ Mba'eta tetā ikorapa va'ekue ma ha'e ae'i optya, omboyke ha'e oejapa pyre, teko a e'ŷa rami. Ha'e py ma vaka ra'y kuery rive 'rā okaru, onheno ha'e ho'upa hoky.

¹¹ Ha'e py hakā ikuai va'e ipirupa ramo omopēmbaa 'rā. Ha'e ramo kunhague ou vy omoī 'rā tata py. Ha'e rami oiko 'rā kova'e kuery o'arandua rupi e'ŷ ikuai rire. Ha'e nunga rupi ijapoare noenduvei 'rā omboaxya, imoingoare ndoperdoavei 'rā.

¹² Ha'e va'e ára SENHOR oipo'o 'rā mba'emo ra'yī Eufrates yakā guive Egito katy'i yakā'i oī va'e yvýry peve. Ha'e rami vy peē Israel kuery pendeporavo 'rā peteī-teī.

¹³ Ha'e va'e ára ma omonhe'ea 'rā peteī mimby guaxu. Ha'e ramo Assíria yvy rupi okanhhygue rami ikuai va'e, ha'e Egito yvy katy omondoukapa pyre voi ojevypa ju 'rā. Ha'e vy omboete 'rā okuapy SENHOR Jerusalém py, yvyty iky'a e'ŷ va'e áry.

28

Efraim kuery ombopaga aguā re ijayvuague

¹ Nda'evei ete 'rā Efraim kuery retā oka'u va'e kuery ikuiaia "Coroa" 'ea va'e pe. Ha'e nunga ma yvoty iporā va'ekue teī ipirupa 'rā, yvy'ā re oī yvyugua vinho gui oka'u rei va'e ikuiaia áry.*

² Mba'eta SENHOR oiporavo peteī ava ipy'a guaxuve ha'e ipo'akapa va'e. Ha'e va'e ma amandau ho'a xapy'a va'e rami 'rā ou, yvytu vaikue omomba va'e rami, oky yvytu reve yy omonyē vyvoi va'e rami oitypa 'rā yvy py.

³ Ha'e va'e ma opyrō 'rā Efraim kuery oka'u va'e coroa oguerovy'a va'ekue re.

⁴ Ipoty ipiru va'ekue ma ha'e kuery ojou porā va'e yvy'ā re yvyugua opa mba'e oiko porāá áry oī va'e, ha'e va'e ma figo ijajua ára py e'ŷ ijaju va'e rami optya, mba'eta amongue oexa vai-vai'i vyve oipo'o vy ho'upa vyvoi 'rā.

⁵ Ha'e va'e ára ma SENHOR ixondaro reta va'e ae 'rā oiko ojeupagua okuave va'e kuery coroa oguerovy'a va'e, ipotyha'e iporā ete va'e.

⁶ Inhe'ē oī 'rā joe opena oiny va'ety mo'aranduarā anhetē rupi oikuaa pota kuaa aguā, ha'e ngovaigua kuery tetā rokē gui omoanha va'e mombaraetearā.

Jerusalém pygua kuery rovai ijayvuague

⁷ Ha'e rami teī kova'e kuery voi ho'a-o'a 'rā okuapy vinho gui, nopus'ā ho'amy kuaavei 'rā iro va'e gui. Sacerdote ha'e profeta kuery voi ho'a-o'a 'rā iro va'e gui, vinho pe 'rā ojeity uka. Neī opu'ā ho'amy aguā voi nda'evei 'rā iro va'e gui. Ha'e nunga rupi ha'e kuery ojavy 'rā mba'emo oexa ukaa rā ndoexa kuaa porāi vy, ha'e onhepyxanga 'rā joe oikuaa potaa py.

⁸ Mba'eta ha'e kuery mesa ha'e javi rupi ombojevyague anho oī, iky'a e'ŷa noī.

⁹ Ha'e ramo xevy oporandu rive vy "Mava'e tu rembo'e ta 'arandu re?" he'i okuapy. "Mava'e pe tu reikuua uka ta rendu va'ekue? Xapy'a rei nda'u nokambuvei va'e ix y kā gui omboia ramo'i pyre pe ri reikuua uka?

¹⁰ Mba'eta orembo'eague áryve orembo'e riae 'rā, orembo'e-mbo'eve tema. Reikuua ukaague áryve reikuua uka riae 'rā, reikuua ukaague ramive reikuua ukave tema. Mbovy'i 'rā apy ndeayvu, ha'e mbovy'i avi 'rā upe py ndeayvu", he'i okuapy xevy.

¹¹ Ha'e nunga rupi xeretarā kuery pe SENHOR ijayvu 'rā ijayvu kuaa porā e'ŷ va'e rami, ayvu mboae rupi guive.

* 27:9 Romanos 11.27 * 28:1 Efraim kuery retā ma Samaria. Peteī yvyugua yvýry oī yvy'ā re, ikorapa va'e guive. Ha'e nunga rupi jaexa rā coroa rami ojekuaa, e'ŷ vy yvoty rami. Ha'e pygua kuery ma oka'u rupi anho ikuai. Ha'e kuery judeu regua ikuai teī Nhanderuete nomboetevei okuapy. Ha'e ramo ha'e kuery rovai Nhanderuete ombou Assíria pygua kuery omomba aguā.

¹² Ha'e kuery pe aipoe'i va'ekue: "Kova'e ma aikuaa uka pepytu'u aguã, ikane'õ va'e pe ame'ẽ 'rã optytu'u aguã. Kova'e ae ma pepytu'u aguã ame'ẽ va'e", he'i rire teĩ ha'e kuery noendu potai.*

¹³ Ha'e rami rire ha'e kuery pe SENHOR ayvu ou 'rã po rami: "Penembo'eague áryve 'rã penembo'e, penembo'ea ramive penembo'eve tema. Oikuaa ukaague áryve oikuaa uka 'rã, oikuaa ukaague oikuaa ukave tema 'rã. Mbovy'i 'rã apy ijayvu, ha'e mbovy'i avi 'rã upe py ijayvu", he'i 'rã. Ha'e rami vy ha'e kuery oje'oia rupi ho'apa aguã guakykue katy, opẽmba ha'e ojejurapa vy onhemoi vai aguã.

¹⁴ Ha'e gui peẽ avakue penhombojaru reia rupi Jerusalém pygua kuery re pendepo'aka va'e, pendu ke SENHOR ayvu.

¹⁵ Mba'eta aipopeje: "Ore ma manoa ha'e yvyra rupa reve rojapo orepe'a e'ŷ aguã. Ha'e rami rire yy oxyry atã va'e rami orenupãarã ou teĩ ndorerupityi 'rã, mba'eta ronhemi aguã ma roguereko apu, ronhombotavya py ae 'rã ronhemi", peje.

¹⁶ Ha'e nunga rupi SENHOR Nhanderuete aipoe'i: "Ha'e gui xee ma peteĩ ita amoĩ Sião py, ita oiporavo pyre, ovare ete va'e, iporãvea py amoĩ atã va'e. Ha'e va'e re ojerovia va'e ma ndojapurai 'rã.†

¹⁷ Ha'e gui xee amoĩ 'rã ha'evea rami oikuaa pota va'erã metro rami, ha'e teko porã ma prumo rami 'rã aikuaa uka penera'ãarã. Ha'e rã apu penhemiague ma amandau ombovaipa 'rã, yy ogueroxyrypa 'rã penhemiaty", he'i.

¹⁸ Ha'e ramo manoa reve pejogueroayvague oaxapa rive 'rã, yvyra rupa reve pendeyvague ndoikovei 'rã. Ha'e gui yy rami penenupãarã ou vy penemou'ũmba 'rã.

¹⁹ Ha'e nunga oaxa nhavõ pendereraa 'rã. Ko'ẽ nhavõ oaxa 'rã, pytû nhavõ guive. Ha'e nunga oendu va'e okyjepa rei 'rã.

²⁰ Mba'eta ha'e nunga tupa ma ijapu'a'i ete ramo nda'evei 'rã hi'áry avave rei onheno aguã. Nheovãa voi ipo'i'i ete ramo avave rei nda'evei 'rã onheovã aguã.

²¹ Mba'eta SENHOR opu'ã 'rã Perazim yvyty áry rami, opoxya oexa uka 'rã Gibeão yvyugua py rami,‡ ojapo aguã guembiapo ojapo va'ety e'ŷ, ha'e nhaendu va'ety e'ŷ teri.

²² Ha'e nunga rupi aÿ pendeayvu vaikue-ikueve eme, corrente pendepokua ratãve heravy e'ŷ aguã. Mba'eta SENHOR Nhanderuete ixondaro reta va'e gui aendu penemombaarã ou aguã re ijayvu rã. Ha'e nunga ma pendeyvy ha'e javi re oiko 'rãe.

Nhanderuete opa mba'e py hi'arandua re ijayvague

²³ Peipe'a ke pendeapyxa, ha'e pendu xeayvua. Peikuaa pota porã xeayvua pendu kuaa aguã.

²⁴ Xapy'a rei nda'u yvy oikaraõ va'e ko'ẽ nhavõ 'rã ri oyvy oikaraõ riae mba'emo ra'yí omoaõ aguã? Ko'ẽ nhavõ 'rã ri ty'y oyvy ojo'o ha'e oikaraõa rupi ikuai?

²⁵ Ha'e rami 'rãgue py yvy ombojojapa ma rire omoaõ 'rã endro ha'e cominho ra'yígue. Omoaõ 'rã trigo hi'a aguã rupi, ha'e e'ŷ vy cevada mba'e omoaõ 'rãgue py, e'ŷ vy amboae nunga ra'yígue voi omoaõ 'rã ijyvýry rupi.

²⁶ Mba'eta ha'e kuery Ruete ma ha'e rami aguã rami ae omo'arandu, ha'evea rami meme 'rã ombo'e.

²⁷ Mba'eta endro ma nanhamoa'yí 'rã mba'emo moa'yíguea py, neĩ cominho ra'yígue áry voi namboaxai 'rã karóxa ruéra. Ha'e rami 'rãgue py endro ma nhainupã'i 'rã yvyra rovi'i py, cominho ra'yí guive.

²⁸ Xapy'a rei nda'u nhambao'ypa ete 'rã ri mba'emo ra'yí? Any. Oma'etý va'e ma riae e'ŷ 'rã ojyky mba'emo ra'yí, riae e'ŷ 'rã guive omboaxa karóxa ruéra hi'áry rupi guymba kavaju reve.

²⁹ Ha'e nunga ha'e javi ma SENHOR ixondaro reta va'e gui meme jaikuua. Ha'e nhanemoneta rã jarovy'a ete, opa mba'e py hi'arandu va'e ramo.

* 28:12 1 Coríntios 14.21 † 28:16 Ha'e va'e ita omombe'u porãve Romanos 9.33-10.11 ha'e 1 Pedro 2.4-8 py, Jesus reko re ijayvu vy. ‡ 28:21 Perazim yvyty áry ha'e Gibeão yvyugua py ma SENHOR opu'ã raka'e ojeupegua kuery repy vy (2 Samuel 5.17-25).

29

Jerusalém tetā ha'e hovaigua kuery re ijayvuague

¹ Nda'evei ete 'rā tetā "Nhanderuete peguarā oapyaty" 'epy va'e pe! Ha'e va'e tetā ma Nhanderuete peguarā oapyaty ae, Davi rekoague guive. Toī-toīve ma'etŷa nhavō, ha'e tojeupity-pityve tema ngarua ma'etŷa pukukue re ha'e py oiko va'e.

² Ha'e rami teī xee amoī vai 'rā "Nhanderuete peguarā oapyaty" 'epy va'e. Ha'e ramo ha'e kuery ojae'o ha'e hexay 'rā okuapy. Ha'e gui ma optyta 'rā xevy guarā oapyaty ete rami.

³ Mba'eta pendekuaia jovaive rupi rombojere uka 'rā, rojoko uka 'rā torre py, ha'e penderovai rupi amopu'ā 'rā pendejokoarā.

⁴ Ha'e gui yvy rupi romombo rire yvy gui ju pendeayvu 'rā. Yvy ku'i gui onhendu vai-vai'i 'rā pendeayvua. Yvy gui oē 'rā pendeayvu 'āgue rami, ayvu mbegue rami 'rā pendeayvua onhendu yvy ku'i gui.

⁵ Ha'e rā penderovaigua kuery heta ete va'eri yvy ku'i'i rami 'rā amoingo, ojerovia reia rupi ikuai va'e ma mba'emo pire yvytu omboveve heravy va'e rami 'rā okanhymba. Ha'e nunga ma oiko xapy'a 'rā, xapy'a'i pyve.

⁶ Mba'eta SENHOR ixondaro reta va'e gui ou 'rā imbopagaarā yapu reve, yvy ryryi, opororo hatā va'e, yvytu apu'a, yvytu vaikue ha'e tataendy nhomombaarā reve.

⁷ Pyávy jaexa ra'ua rami yvy regua kuery heta 'rā ou Nhanderuete peguarā oapyaty re opu'ā aguā. Ha'e rami vy pavē 'rā opu'ā tetā ha'e torre imbaraete va'e re. Ha'e vy omoī vai 'rā.

⁸ Ha'e gui ha'e kuery re oiko 'rā jakaruxe vaipa vy jakaru nhainy taa rami jaexa ra'u rire teī javy vy nhanenhembyayia ju nhaendua rami avi, ha'e rami e'ŷ vy nhandey'uvei vy jay'u taa rami jaexa ra'u rire teī javy vy nhandey'uvei ae tema nhainya rami. Ha'e rami ae avi 'rā yvy regua kuery re oiko, Sião yvyt re opu'ā jave.

Israel kuery onhe'ē py oexa e'ŷa ha'e anhetē rupi e'ŷ ikuiaia re ijayvuague

⁹ Peguejy ke, ha'e pendepukupa tema pejupy. Pejexa mboguepa ke, ára revegua ve'ŷ riae pendekuai. Oka'upa rei va'e rami pendekuai teī vinho gui e'ŷ ta'vy. Pe'a-pe'a rei teī iro va'e gui e'ŷ.

¹⁰ Mba'eta pendere SENHOR ombou nhe'ē penembopeyiārā. Ha'e rami vy omboty penderexa (ha'e va'e ma profeta kuery), ha'e onhovā peneakā (ha'e va'e ma oexa ukapy oexa va'e kuery).*

¹¹ Ha'e nunga rupi pendevy pe oexa ukapy ha'e javi ma kuaxia para imbojaa py omboty pyre rami rive optyta. Ha'e nunga ma ogueroayvu kuaa va'e pe ome'ēa vy "Ajerure, eroayvu kova'e", he'i ramo "Nda'evei, mba'eta imbojaa py ombotya rire", he'i 'rā.

¹² Ha'e gui ogueroayvu kuaa e'ŷ va'e pe ju ome'ēa vy "Eroayvu kova'e, ajerure", he'i ramo "Xee tu ndaroayvu kuaai rima", he'i 'rā.

¹³ Ha'e ramo SENHOR aipoe'i: "Kova'e kuery xere onhemboja teī ojuru py, oayvu py rive xemboete, ha'e rā opy'a py ma xegui mombyry ikuai. Xerenonde ojererokyje merami teī avakue ojapo kuaa rupi rive ikuai."*

¹⁴ Kova'e kuery mbyte rupi ajapo riae 'rā tembiapo porā, tembiapo porā ete imondiyipaarā. Ha'e nunga rupi ha'e kuery regua hi'arandukueve 'arandua voi opa aguā, ha'e ikuai kuaakue ikuiaia voi okanhymba aguā", he'i.*

¹⁵ Nda'evei ete 'rā opy'a re oī va'e SENHOR gui onhomí va'e pe, ha'e pytū rupi mba'emo ojapo oikovy va'e pe. Ha'e kuery ma joupe-upé "Mava'e tu nhanderexa? Mava'e tu nhandekuaia oikuua ta?" he'i teī.

¹⁶ Teko vai rupi ete rima pendekuai! Mba'eta nhae'ū re ombo'eapo va'e rovai nhae'ū onhemboyvate va'e rami pendekuai, ha'e tembiapokue ijapoare pe "Ha'e e'ŷ ae ma

* 29:10 Romanos 11.8 * 29:13 Kova'e ayvu rupi Jesus ijayvu heta va'e kuery pe, hexe ndojeroviai ramo (Mateus 15.8-9, Marcos 7.6-7). * 29:14 1 Coríntios 1.19

xeapo”, he'i va'e rami, tembiapokue ijapoare pe “Ha'e tu ndoikuuai rima”, he'i va'e rami avi.*

Israel kuery ogueraa jepea aguã re ijayvuague

- ¹⁷ Ha'e rami teĩ ma are e'ŷ'i re Líbano yvy ha'e javi rupi ojeapo 'rã yvyra'a tyrã, ha'e yvyra'a ty ikuai va'e ma ka'aguy regua rami ete 'rã oiko porã.
- ¹⁸ Ha'e va'e ára ma ijapyxa e'ŷ va'ekue oendu 'rã ayvu kuaxia para re oĩ va'e, ára revegua e'ŷ va'ekue voi oexa 'rã, pytúa gui oo jepe ma rire.
- ¹⁹ Yvyigüeve'i va'e ový'a 'rã SENHOR re, iporiaukue'i ový'a 'rã Israel kuery Ruete Iky'a e'ŷ va'e re.
- ²⁰ Ha'e rã joguereko axy va'e ma omombaa 'rã, ijayvu vaikue-ikue va'e nda'ikuavei 'rã, mba'eta tekó vai re anho ipy'a va'e opa 'rã.
- ²¹ Ha'e kuery ma peteĩ ayvu'i py rive nhomboeko vai 'rã, ha'e ombotavy 'rã huvixa kuery okẽ py oikuua pota oiny va'e, ha'e gui mba'eve py e'ŷ onhemboapu vy nomboeko porãi heko porã va'e.
- ²² Ha'e nunga rupi SENHOR Abraão reraa jepeare aipoe'i Jacó ramymino kuery pe: “Jacó pe ma ndoikovei ma 'rã oximba aguã rami, ndaova mboae reivei ma 'rã.
- ²³ Ha'e rami 'rãgue py ha'e kuery, ha'e ta'y kuery hexeve ikuai va'e xepo py mba'emo ajapo ramo oexa vy omboete 'rã okuapy xerery. Tá, Jacó ruete Iky'a e'ŷ va'e pe 'Iky'a e'ŷ va'e' he'i avi 'rã, Israel kuery ruete renonde ikuai 'rã ojererokyjea rupi.
- ²⁴ Ha'e gui onhe'ẽ py ojavy va'ekue ma oikuua nho 'rã, ha'e joe ijayvu rei va'ety voi onhembo'e uka 'rã”, he'i.

30

Egito pygua kuery pe ha'e kuery ojereraa jepe uka e'ŷ aguã re ijayvuague

¹ SENHOR aipoe'i: “Nda'evei ete 'rã xera'y kuery xenhe'ẽ rendu e'ŷ va'e pe. Ha'e kuery ma xee ajapo uka va'e rupi e'ŷ ikuai. Mba'eta amboae regua pe ojereraa jepe uka 'rã xee aipota ramo e'ŷ, ojejavya áryve ojejavyve rive.

² Mba'eta xevy pe oporandu e'ŷ re oje'oi 'rã Egito yvy katy, ha'e Faraó pe rive 'rã ojereraa jepe uka, Egito re kuaray'ã oĩ va'e py onhemi.

³ Ha'e rami teĩ pendereraa jepea Faraó ma penemoximbaarã rive 'rã oiko, ha'e Egito re kuaray'ã py penhemia py ma penemoi vaia 'rã.

⁴ Mba'eta Judá pygua huvixa kuery ma Zoã tetã py ikuai, ayvu reraa kuery ma Hanes py ovaẽ.*

⁵ Ha'e ramine ma ha'e kuery ha'e javi oximba 'rã peteĩ regua mba'everã ndovarei va'e gui, mba'eta Egito pygua kuery ma nda'evei 'rã oipytyvõ nei omoingo porã aguã, ha'e rã omoximba aguã rive, omboete uka aguã e'ŷ”, he'i.

⁶ Ha'e gui kova'e ayvu ma vixo kuery kuaray puku-a katygu re ou va'ekue.

“Peteĩ yvy ma jexavai ha'e ngye oĩa, guary ha'e guary kunha, ha'e gui mboi ha'e mboi opo va'e ikuaria. Ha'e va'e yvy rupi mburika'i áry ogueraa 'rã mba'emo ovareve va'e, camelo kupe áry mba'emo porã ogueraa 'rã peteĩ regua noipytyvõi va'erã pe ome'ẽ va'erã.

⁷ Mba'eta Egito pygua kuery oipytyvõa ma mba'everã ndovarei 'rã. Ha'e nunga rupi ha'e kuery pe ‘Mba'eve ojapo vy e'ŷ ijayvu rive rei va'e’, ha'e.

⁸ “Tereo, embopara yvyrapo'i re ha'e kuery oexaa py, embopara kuaxia re oĩ riae aguã raka'e rã peve guarã.

⁹ Mba'eta kova'e kuery ma xenhe'ẽ raxave va'e, ta'y kuery ijapu ha'e SENHOR guigua lei noendu potai va'e.

* 29:16 Romanos 9.20 * 30:4 Judá kuery re Assíria pygua kuery opu'ã okuapy ramo onhepytyvõ uka okuapy Egito pygua huvixa Faraó pe. Egito regua tetã Zoã ha'e Hanes py ha'e kuery oo raka'e onhepytyvõ uka vy, Nhanderuete re ojerovia 'rãgue py (31.1).

¹⁰ Ha'e kuery aipoe'i 'rā oexa ukapy oexa va'e kuery pe: 'Pexave eme oexa ukapy', he'i 'rā. Ha'e gui profeta kuery pe aipoe'i: 'Pemombe'uve eme orevy anhetē va'e. Ha'e rami 'rāgue py roenduxe vai va'e anho ke pemombe'u orembotavya rupi rive.

¹¹ Pejepkuavo ke tape gui, pejepe'a ke roiko aguā gui. Orevy pendeayvuve eme Israel kuery Ruete Iky'a e'ŷ va'e re', he'i 'rā okuapy."

¹² Ha'e nunga rupi Israel kuery ruete Iky'a e'ŷ va'e aipoe'i: "Pova'e ayvu napendu potai, ha'e rami 'rāgue py joavyky rei va'e re anho pejerovia, teko vai re guive. Ha'e nunga re rive pejeko va'e.

¹³ Ha'e rami ete pendeko vaia pendevy opyta 'rā tetā kora yvate va'e re ipa'ū oī va'e rami, mba'eta tye rami ojeapo vy ho'a xapy'a 'rā pexa'ā e'ŷ jave.

¹⁴ SENHOR ae ombovo 'rā, nhae'ū guigua hy'a ombovo vy omboa'ypa katuī'ia rami. Ha'e nungakue mbyte py ma ndojouai 'rā ipēgue neī tataypy gui tapyī ojopy aguā, neī yy renda gui ojaraa aguā voi."

¹⁵ Mba'eta SENHOR Nhanderuete, Israel kuery Ruete Iky'a e'ŷ va'e aipoe'i: "Pejeko rerova ha'e pejerovia vy 'rāe peo jepe. Pejapura rei e'ŷ re pejerovia ete vy 'rāe penembaraete. Ha'e rami teī peē kuery ma ndapeikuaaxei ha'e rami.

¹⁶ Ha'e rami 'rāgue py aipopeje: 'Any, kavaju áry rojavapa 'rā', peje rire ha'e rami ae 'rā pejava. Ha'e 'Kavaju inhakuā va'e áry roguata 'rā', peje rire penderakykue monhaa kuery inhakuāve 'rā.

¹⁷ Peē va'e regua mil onha 'rā peteī'i gui rive. Peteī nhiruī'i gui rive peē kuery ha'e javi penhamba 'rā, mba'emo'y e'ŷ vy bandeira yvy'ā re ha'e ae'i oeja pyre rami penderejaa peve", he'i.

Sião pygua kuery ombopy'a guaxua rupi ijayvuague

¹⁸ Po ramigua ae SENHOR oarō penemboaxy aguā. SENHOR Nhanderuete ma oiko katu ma penderepy aguā, teko porā rupi joguerekoa va'e vy. Ha'e ramo hexe ojerovia va'e ový'a ete va'erā meme.

¹⁹ Mba'eta ha'e kuery ikuai nho 'rā Sião ha'e Jerusalém tetā py. Ndapejae'ovei 'rā, mba'eta anhetē ae pejapukaia oendu vy penemboaxy 'rā. Ha'e rami pendeayvu rā oendu vy penembovai 'rāe.

²⁰ Ha'e gui SENHOR penembojexavai vy mbojape ha'e yy rive ojou uka teī nonhomivei ma 'rā penembo'ea kuery, penderexa py ae pexa 'rā.

²¹ Ha'e gui peiporu kuaa regua katy pejavy ta vy, e'ŷ vy peiporu kuaa e'ŷa katy mba'e, ha'e rami vy pendeapyxa py pendu 'rā penderakykue katy gui ijayvu vy "Kova'e ae ma tape, kova'e rupi 'rā peiko", he'i va'e.

²² Ha'e ramo prata mba'emo ra'angaa penhovāague pe ma "Ojeguarupy" peje 'rā, ouro mba'emo ra'angaa penhovāague pe guive. Ha'e nunga pemombopa 'rā mba'emo ovare e'ŷ va'e rami. Ha'e vy peteī-teī aipopeje 'rā: "Topa vyvoi apy gui."

²³ Ha'e gui mae ma SENHOR ombou 'rā oky yvy mba'emo ra'yī pemoaīague áry. Ha'e ramo mbojape heta ju 'rā oiko yvy gui, penemombaraetearā. Ha'e va'e ára penerymba vaka kuery voi okaru 'rā nhuñdy tuvixa va'e rupi.

²⁴ Ha'e gui penerymba vaka ha'e mburika yvy oikaraī va'e ma ho'u 'rā mba'emo kure juky reve, pá ha'e yvyra rakāmby py hembi'urā pemono'ō va'ekue.

²⁵ Ha'e gui yvyty yvate va'e, yvy'ā tuvixave va'e ha'e javi rupi ikuai 'rā yy oxyry'i va'e, jojukapa etea ára torre oitypaa jave py guive.

²⁶ Ha'e jaxy voi kuaray rami ete 'rā ojope, ha'e kuaray ma sete-kue ojope ratāve 'rā, sete ára pukukue ojope vyvoia rami 'rā hexakā. Ha'e va'e ára py ma SENHOR ojokuapa 'rā ojeupagua kuery ai, omonguera ju 'rā ha'e ae oikyxiague.

Assíria pygua kuery ombopaga aguā re ijayvuague

²⁷ Ha'e gui SENHOR guery oendu uka reve 'rā ou mombyry gui. Ipoxya hendy reve 'rā ou, arai huū rei va'e mbyte rupi. Ijuru py ma ipoxya anho 'rā oī, ha'e inhapekū ma tata nhomombaarā rami ojekuaa.

²⁸ Ipytuēa ma nhomomba 'rā yy oxyry atā va'e nhandejyryvi peve oua rami avi, mba'eta omomba 'rā yvy regua kuery yrupē py rami. Ha'e gui yvy regua kuery juru re omoī 'rā ijuru xārā ojavy uka aguā.

²⁹ Ha'e rā peē kuery mbyte ma onhendu 'rā peteī mboraei, pyávy ngaru iky'a e'ŷ va'e oikoa py ovy'a va'e kuery onhendua rami. Pendepy'a py pevy'a 'rā pekuapy, mimby omonhe'ē reve SENHOR pegua yvyty katy oē ovy va'e rami, Israel kuery pegua itaova oĩa katy.

³⁰ Ha'e gui SENHOR oendu uka 'rā oayvu ipo'akapa va'e, oexa uka 'rā opo jojuka va'e opoxya rupi omboguejy vy tataendy nhomombaarā mbyte, oky vaipa, yvytu vaikue ha'e amandau reve.

³¹ Mba'eta SENHOR ayvu gui Assíria pygua kuery onhemondyipa 'rā okuapy, yvyra rovi'i py ombopi ramo.

³² Ha'e gui SENHOR ombopaga vy yvyra rovi py ombopi nhavō pandeiro ha'e ixā reta va'e ombopua reve 'rā ombopi. Ha'e kuery re opu'ā vy 'rā ipo'aka.

³³ Mba'eta yma ete guive ma oguereko katu tata guaxu ha'e kuery ruvixave rapyarā. Oapy aguā ma yvate ha'e ipyve va'e oĩ, tata ha'e yxakā reve. Ha'e gui SENHOR oipejua py omoendy 'rā enxofre rami.

31

“Egito pygua kuery avakue rive ikuai, Nhanderuete e'ŷ”, he'iague

¹ Nda'evei ete 'rā Egito yvy katy ojereraa jepe uka vy oje'oi va'e pe, neī kavaju re rive ojerovia va'e kuery pe. Ha'e kuery ma karóxa re ojerovia 'rā heta ramo, kavaju árygua re ojerovia imbaraete rā. Ha'e rā Israel kuery Ruete Iky'a e'ŷ va'e re ma na'ima'endu'ai, SENHOR pe ndojapukai.

² Ha'e ma hi'arandu va'e ha'e nhomombaarā mboua, ijayvuague gui ojepe'a e'ŷ va'e. Ha'e ma opu'ā 'rā joapo vai va'e ha'e teko vai apoa rupi nhomoirū va'e kuery re.

³ Mba'eta Egito pygua kuery ma avakue rive ikuai, Nhanderuete e'ŷ. Hymba kavaju kuery voi ho'o va'e, nhe'ẽ e'ŷ. Ha'e gui Nhanderuete okuave'ē ramo yvy re ho'apa 'rā nhopytyvõa ha'e onhepytyvõ uka va'e ha'e javi. Ha'e rami vy mokoīve okanhymba vyvoi 'rā.

⁴ Mba'eta po rami SENHOR ijayvu xevy: “Guary gua'y kuery reve guembia re okororõ oiny rā hovai vexa'i re opena va'e heta ete ou teī nonhemondyi 'rā ha'e kuery ijayvua gui, nonhai 'rā guive heta ikuai teī, ha'e rami ae avi SENHOR ixondaro reta va'e ou 'rā Sião ojeupagua yvyty áry joe opu'ā aguā.

⁵ Guyra'i yvate rupi oveve-vevea rami avi SENHOR ixondaro reta va'e voi oarõ 'rā Jerusalém. Onhangareko vy ogueraa jepe 'rā, omboaxy vy oepy 'rā.

⁶ “Ha'e nunga rupi Israel kuery, pejeko rerova ju opa marā rei pendekuai vy penderekarai va'ekue re.

⁷ Ha'e va'e ára ma peteī-teī pemombo 'rā mba'emo ra'angaa perekoyva'ekue prata ha'e ouro guigua, pejejavu aguā pendepo py ae pejapo va'ekue.

⁸ Ha'e gui Assíria pygua kuery oiko vai 'rā avakue kyxe gui e'ŷ. Avakue kyxe py e'ŷ 'rā omombaa. Onhamba 'rā kyxe gui ramo ha'e kuery va'e regua kunumigue omomba'eapo nhea'āa 'rā imbokuapy.

⁹ Okyje vy rive ha'e kuery oeja 'rā itaova onhemiaty. Huvixa kuery voi onhemondyipa rei vy onhamba 'rā oje'oviy bandeira omopu'āa rā oexa vy”, he'i SENHOR Sião py hataypy va'e, Jerusalém py hata rupa va'e.

32

Huvixa teko porā rupi opena va'erā re ijayvuague

¹ Ha'e gui oĩ 'rā peteī huvixa teko porā rupi opena va'e, anhetē rupi 'rā oguereko yvatekueve.

- ² Ha'e ramo ha'e kuery peteī-teī oī 'rā yvytu ha'e yvytu vaikue gui onhemia aguā, yvy piru reia rupi yy oxyry va'e rami, ha'e itaova tuvixa va'e 'ā yvy piru reia py oī va'e rami.
- ³ Ha'e jave py ma oma'ē oiny va'e ndoexa e'ŷvei ma 'rā, ojapyxaka oiny va'e voi oendu potapa 'rā.
- ⁴ Inhakā porā e'ŷ va'ekue ma opy'a py oikuaa nho 'rā, ijayvu e'ŷ va'ekue apekū ma ijayvu kuaa vy ha'eve rei ju 'rā.
- ⁵ Ha'e rā hi'arandu e'ŷ va'e pe ma "Hi'arandu va'e" nda'eavei ma 'rā, jokorepa rei va'e pe "Iporayvu'i va'e" nda'eavei ma 'rā.
- ⁶ Mba'eta hi'arandu e'ŷ va'e ma o'arandu e'ŷa rupi ae 'rā ijayvu, ha'e mba'emo vai re anho 'rā ipy'a opa marā rei ikuai aguā, SENHOR rovai eteve voi onhemboapu aguā, okaruxe'i va'e pe ojou uka e'ŷ aguā ho'u va'erā, ha'e gui oy'uxe rei va'e pe ojou uka e'ŷ aguā oy'u aguā.
- ⁷ Jokorepa rei va'e guembiporu oguerekō va'e ma nda'eavei va'e meme. Mba'eta nhombotavypaa rupi anho 'rā onhembopy'a, ojexavai va'e ojavyky aguā apu rupi ijayvu vy, iporiaukue'i ha'evea rami ae ikuai teī.
- ⁸ Ha'e rā heko porā va'e ma teko porā rupi oiko aguā re anho 'rā onhembopy'a, teko porā re ae 'rā guive oī atā.

Jerusalém pygua kunhague pe ijayvuague

- ⁹ Kunhague mba'eve re peikuaa pota e'ŷ va'e, pepu'ā ke ha'e pendu xeayvu. Tajy kuery pevy'a rive va'e, pejapyxaka porā ke xeayvua re.
- ¹⁰ Kunhague mba'eve re peikuaa pota e'ŷ va'e, peteī ma'etŷa py ovaē 'rā peryryipa aguā, mba'eta uva opa 'rā, ndai'avei 'rā.
- ¹¹ Peryryipa ke, kunhague mba'eve re peikuaa pota e'ŷ va'e, tajy kuery pevy'a rive va'e. Pemboi ke penhemondea pendepire rei aguā, ha'e gui voxā guigua py ju penhemonde.
- ¹² Pendepexo re peipete-pete mba'ety oiko porā va'ekue ha'e uva hil'a porā va'ekue re pendepy'a vai vy.
- ¹³ Mba'eta xeretarā kuery yvy re oiko 'rā juu ha'e juu rakuaendy rive, oo ov'y'a okuapy va'e ikuaiague ha'e javi rupi, tetā ov'y'apa okuapyaty rupi guive.
- ¹⁴ Huvixave ro voi oeja 'rā, mba'eta tetā heta va'e kuery ikuaiague optyta rive 'rā. Torre ha'e oikuuaa potaaty ma itakua rami rive 'rā optyta raka'e rā peve, mburika ka'aguy rupigua optyu'u aguā ha'e vexa'i okaru atyrā rive.
- ¹⁵ Ha'e rami 'rā oiko pe yvate gui Nhe'ē ombou peve nhandere. Ha'e ramo tekaoa e'ŷague ojeapo 'rā yvyra'a ty ikuai va'e ma ka'aguy regua rami 'rā oiko porā.
- ¹⁶ Ha'e vy tekaoa e'ŷaty rupi anhetē rupi joguerekō va'e ju 'rā ikuai, ha'e yvyra'a ty rupi ma heko porā va'e ikuai 'rā.
- ¹⁷ Ha'e rami vy tekaoa e'ŷaty rupi ikuai vy ikuai porā 'rā okuapy. Teko porā gui ma ojeroviaa ha'e oī atāa 'rā oiko raka'e rā peve.
- ¹⁸ Ha'e rami vy xeretarā kuery rekaoa py oī 'rā mby'a porā anho. Hekoa oī atā 'rā, mba'eve ndoikoia ha'e mba'eve rei jipoia meme.
- ¹⁹ Xapy'a rei amandau vaikue gui ka'aguy ho'apa ha'e tetā ha'e javi rupi ombovaipa teī,
- ²⁰ peē ma pevy'a ete reve 'rā mba'emo ra'yī pemoaī yy ikuai va'e yvýry, ha'e penerymba vaka, mburika pepoi okaruxea rupi rei okaru aguā.

33

Jerusalém pygua kuery ojexavaiaque gui ogueraa jepea aguā re ijayvuague

- ¹ Nda'evei ete 'rā peē kuery penhomomba va'ety ri napenemombaaai teri va'e, ha'e anhetē rupi e'ŷ pejoguerekō va'eri anhetē rupi e'ŷ napendererekooai teri va'e pe. Mba'eta penhomomba ma rire peē ju 'rā penemombaa, ha'e anhetē rupi e'ŷ pejoguerekō rire peē ju 'rā anhetē rupi e'ŷ pendererekooa.*

* 33:1 Apy ma ijayvu Israel kuery rovaigua kuery re.

² SENHOR, endu ke oremboaxya. Ndee ae roarō rokuapy va'e. Ko'ẽ nhavō ke eiko oremombaraetearā, rojexavaia ára py orereraa jepearā eiko.

³ Mba'eta ndeguigua hevovo va'e yvy regua kuery oendu vy onhamba 'rā. Joe repu'ā ramo yvy regua kuery oaīmba 'rā.

⁴ Ha'e kuery mba'e rei-rei oipe'apaa 'rā tuku ono'õ va'e rami. Tuku opo-opoa rami avi avakue opo 'rā ha'e nunga áry.

⁵ Ha'e rā SENHOR ma yvate ete 'rā, yvate etea py ae oĩ va'e. Sião py omoneyē 'rā anhetē rupi joguerekoa ha'e teko porā.

⁶ Ha'e ramo Sião pygua kuery, peikovea ja oĩ 'rā peĩ atā aguā. Opa rupi oiko 'rā oo jepe va'e, hi'arandu ha'e oikuaa va'e. SENHOR renonde pejererokyjea rupi peiko ramo ha'e nunga ha'e javi 'rā oĩ pendevy guarā.

⁷ Ha'e rā nhande kuery va'e regua ipy'a guaxukueve ma ojae'o 'rā okuapy oka rupi. Peteĩ rami ikuai aguā re ojerure oje'oivy va'ekue ojae'o 'rā ipy'a vaia rupi.

⁸ Tape ikuai va'e optya rivepa, ha'e rupi oguata va'ekue optyu'upa rā. Mba'eta ombovaipaa ma peteĩ rami ikuai aguā re ijayvuague. Tetā ikuai va'e voi oejapaa ma, ha'e jipovei ma nhomboete va'e.

⁹ Yvy voi ipoae vy opa ma ovy. Líbano rupi oxīmba vy ipirupa. Sarom ma tekao e'ŷa rami optya. Basā ha'e Carmelo gui oipe'apaa ma mba'emo rogue.

¹⁰ SENHOR aipoe'i: "Aŷ ma xee apu'ā 'rā. Xee ae apu'ā 'rā, xemboyvatea 'rā guive.

¹¹ Mba'emo pirukue perekoo va'ekue gui mba'emo 'ygue rive pejou. Ha'e gui pendepoxya rupi pendekuiaque ma tata rami 'rā penemomba.

¹² Ha'e ramo heta va'e kuery oapypaa 'rā tata rugue rami optya peve, juu'y ojaya pyre tata py okaipa vyvoia rami.

¹³ Peẽ mombyry pendekuai va'e, pendu ke ajapo va'ekue omombe'ua rā. Ha'e peẽ ha'e'i py pendekuai va'e ma peikuaa pota xepo'akaa re", he'i.

¹⁴ Ha'e gui Sião pygua kuery ojejavypa va'e ma okyjepa 'rā, heko vai va'e oryryipa 'rā okuapy. Ha'e rami vy ha'e kuery oporandu 'rā: "Nhande kuery regua mava'e nda'u ogueropo'aka 'rā tata nhomombaarrā ha'e tataendy ogue e'ŷ va'e mbyte py?" he'i 'rā.

¹⁵ Teko porā rupi ikuai va'e anho 'rā ha'eve, ha'e anhetē rupi ijayvu va'e, nhomoingo axya rupi ojoupa va'e'ŷ. Mba'eta ha'e kuery ma opo py "Any" he'i reve ndojopyi 'rā teko vai repyrā. Oapyxa omboty 'rā oendu e'ŷ aguā jojuka aguā re ijayvua rā, ha'e guexa omboty 'rā teko vai oexa e'ŷ aguā.

¹⁶ Ha'e kuery anho 'rā ikuai yvatevea py. Itaova yvatevea oĩ 'rā onhemi atyrā. Ho'u va'erā ome'ea kuerei 'rā, oy'u aguā guive ojou ukaa 'rā.

¹⁷ Ha'e gui penderexa py ae pexa 'rā huvixave guexakāa rupi opena rā yvy mombyry peve oo va'e re.

¹⁸ Pendepy'a py mba'emo vai ete oiko va'ekue re penema'endu'a vy "Mamo tu optya tery mboparaa, mamo tu optya imposto-rā opejaa kuery? Ha'e mamo tu optya torre ikuai va'e papaaty?" peje 'rā.†

¹⁹ Mba'eta ha'e kuery ojejou porā rei va'ekue teĩ ndapexavei ma 'rā, neĩ amboae rami ijayvu va'e napendu kuaai rei va'ekue, amboae ayvu jaikuua e'ŷ va'e py ijayvu va'ekue.

²⁰ Pema'ẽ ke Sião tetā re. Ha'e py ma nhemboaty iky'a e'ŷ va'e jajapoaty. Ha'e vy penderexa py pexa 'rā Jerusalém ha'evepa reia, oguy oguerova pyrā ve'ŷ rami avi oĩ atā, yvyra rakua omo'ā mbyre ndoekyiaveia, ha'e ixã ikuai va'e nomondoa riveia rami.

²¹ Ha'e py ma SENHOR jaexa rā yvate ete 'rā. Ojapo 'rā yakā ipyve va'e oxyry aguā rami. Ha'e rami teĩ peteĩve kanoã oipykui va'e ma voi novaẽi 'rā ha'e rupi, neĩ kanoã tuvixa va'e voi ha'e rupi ndoui 'rā.

²² Mba'eta SENHOR ae 'rā oĩ nhandere oikuaa pota va'e, nhanderekorā rejaa ha'e nhanderuvixave. Ha'e ae 'rā nhandereraa jepe.

† 33:18 Hovaigua kuery imbojexavaiare ha'e tetā re opena va'ekue re ima'endu'a, ndoikovei ma rire.

²³ Ha'e rā aŷ ma ixā ikuai va'e ma ipyupa, hi'y nai'aĩ atāvei, ha'e ajukue oipyo aguã voi nda'evevei. Ha'e ramo ha'e kuery mba'emo oguerekopa va'ekue omboja'opaa 'rā. Ha'e nungakue oguata e'ŷ va'e kuery voi oipe'a 'rā heravy.

²⁴ Ha'e gui raka'eve rā Jerusalém py hekoia va'e kuery neĩ peteīve "Xemba'eaxy" nde'i 'rā, ha'e kuery ojejavyague omboguepaa 'rā guive.

34

Yvy regua kuery pe Nhanderuete ipoxya re ijayvuague

¹ Yvy regua kuery, penhemboja ke pendu aguã. Heta va'e kuery, pejapyxaka pekuapy. Pendu ke yvy ha'e opa mba'e hexe oĩ va'e, hexe ikuai va'e ha'e javi.

² Mba'eta yvy regua ha'e javi pe SENHOR ipoxy, opoxya oexa uka ha'e kuery regua xondaro kuery ha'e javi pe. Ha'e rami vy imombaarā ha'e ijukapaarā pe omboaxapa.

³ Ha'e kuery va'e regua ojukaa ma rire omombopaa 'rā mombyry. Hetekue heakuã vaikue 'rā, ha'e huguy ma ojao'ipa 'rā yvyty ikuai va'e.

⁴ Ha'e gui yva re ikuai va'e okanhymba 'rā, ha'e yva oĩ va'e onhemama 'rā ov yvy mba'emo pirekue rami. Yva regua ha'e javi ho'apa 'rā, uva ha'e figo'y rogue ho'apaa rami avi.*

⁵ Mba'eta xekyxé oka'u va'e rami oguejy 'rā yva gui. Edom yvy re 'rā oguejy nhombopaga aguã, ha'e kuery opa aguã rami amboaxa rire.

⁶ SENHOR kyxe re ma tuguy anho oĩ, vexa'i ha'e kavara ava ruguy, vexa'i pyky raxí kyra anho oĩ. Mba'eta SENHOR oa'anga Bozra tetā py jojuka aguã, ojukapa ete 'rā Edom yvy re.

⁷ Toro ka'aguy regua voi oity 'rā ha'e kuery reve, vaka ra'y ho'a avi 'rā toro reve. Ha'e ramo ijyvy tynyē 'rā huguy, ha'e yvy ku'i 'rāgue py yvy porā opyta 'rā ikyrakue gui.

⁸ Mba'eta ha'e va'e ára ma SENHOR nhombopaga aguã ára, ha'e va'e ma'etý ma Sião pygua kuery oepy aguã oa'anga.

⁹ Ha'e ramo yaká'i Edom yvy re ikuai va'e ojeapo 'rā piche rami, yvy ku'i ma enxofre rami 'rā opyta. Ha'e va'e yvy ma opyta 'rā piche hendy va'e rami.*

¹⁰ Ha'e va'e ndoguei 'rā ara py neĩ pyávy. Hataxí opu'ã 'rā raka'e rā peve. Ha'e ramo ijyvy opyta rivepa 'rā ta'y kuery ra'y kuery ikuai jevy-jevy peve. Ha'e vy raka'e rā peve ha'e va'e rupi ndoaxaavei 'rā.

¹¹ Ha'e rami 'rāgue py pelicano ha'e ku'i rive ha'e py ikuai 'rā. Ju'i ha'e xapirẽ ikuai 'rā ha'e py. Ha'e va'e áry rupi omoatāa 'rā ixā nhomombaarā, ha'e prumo nhomokanhymbaarā.

¹² Ha'e rami vy ndoikovei ma 'rā yvatekueve nguvixaverā omoĩ va'erā, huvixa kuery voi nda'ikuavei 'rā.

¹³ Ha'e gui huvixave rogue py voi juu rive 'rā henhoĩ, pyno guive. Oo ikorapa va'e py ha'e kuery onhemiaty va'ekue voi jaipa 'rā. Ha'e py ma jagua-tuvy nhe'ẽ rive 'rā ikuai, ha'e guyra nhandu onhemboaty 'rā.

¹⁴ Vixo vaikue tekoa e'ŷa regua anho 'rā ikuai aguara para reve, ha'e sátiro kuery rive 'rā onhe'ẽ okuapy joupe-upa. Ha'e py ma pyavygua voi ojou 'rā opytu'u aguã.

¹⁵ Urukure'a onhemboaty 'rā ha'e py. Ombo'a ha'e omboaku 'rā guive, kuaray'ã py oguerekó 'rā gua'y kuery. Xapirẽ voi ha'e py ae avi 'rā ijaty, peteī-teī oirū reve.

¹⁶ Peikuaa pota ke SENHOR guigua kuaxia re, ha'e peroayvu. Mba'eta ha'e va'e regua temimoingo neĩ peteīve ndoiko e'ŷi 'rā, peteīve irūndoatai 'rā, ha'e rami ae SENHOR ijayvu rire. Inhe'ẽ ae omboatypa 'rā.

¹⁷ Mba'eta oexa ma ixortea ha'e kuery ikuai aguã oa'anga vy, opo py ijyvyrā omboja'o ixā py. Ha'e py ae ha'e kuery ikuai 'rā raka'e rā peve, ta'y kuery jevy-jevy peve ikuai 'rā ha'e py.

* 34:4 Mateus 24.29, Marcos 13.24-25 * 34:9 Piche ha'e enxofre ma hendy vuku va'e meme, mba'emo moendya guive.

35

Sião pygua kuery ovy'a okuapy aguã re ijayvuague

¹ Tekoa e'ŷa rupi ovy'aa 'rã, yvy ha'e javi rupi guive. Yvy joja reia voi ovy'a vy ipoty 'rã yvotyty rami.

² Ipoty reta rã oporaeia 'rã oguerovy'a ete vy. Ha'e py ma omoporãa 'rã Líbano rami. Carmelo ha'e Sarom rami ete 'rã iporã. Ha'e gui ha'e pygua kuery oexa 'rã SENHOR rexakãa, Nhanderuete po'akaa.

³ Penhemombaraete ju ke napendepo mbaraaeteveia gui, ha'e penerenapy'ã ryryipaa gui.

⁴ Aipopeje ipy'a kangy va'e pe: “Penembaraete ke, pekyje eme. Upe ma Nhanderuete ou. Nhanderepya ou ma oiny, Nhanderuete nhombopagaa va'e. Ha'e ou vy nhandereraa jepe 'rã”, peje.

⁵ Ha'e rami rã ára reveguia e'ŷ rexa ojepe'a 'rã, ojepe'a avi 'rã ijapyxa e'ŷ va'e apyxa.

⁶ Oguata e'ŷ va'ekue opo 'rã guaxu rami, ha'e ijayvu e'ŷ va'ekue ma oporaei 'rã. Mba'eta tekoia e'ŷa rupi oxyry xapy'a 'rã yy, yakã'i oxyry 'rã yvy joja reia rupi.

⁷ Ha'e ramo ita ku'i xiñ reia va'ekue ojeapo 'rã yuparã, yvy yy jipoj reia que voi yvupa 'rã. Ymave rupi jagua-tuvy nhe'ẽ oikoague rupi henhoimba 'rã yvyra, takua ha'e jai rogue.

⁸ Ha'e va'e rupi ma oĩ 'rã peteĩ tape porã. Ha'e va'e tape pe ma “Tape iky'a e'ŷ va'e” 'ea 'rã. Ha'e va'e rupi ma ndojeky'a'o ukai va'e kuery ndoguatai 'rã, ixupeguia kuery anho. Ha'e va'e rupi oguata va'e ma ndojavyi 'rã, ndoiko kuaai tei.

⁹ Ha'e rupi ndoikoi 'rã guary, peteĩve mymba inharõ va'e ndoexaai 'rã ha'e rupi. Mba'eta ha'e rupi oguata va'e ma ogueraa jepe pyre anho.

¹⁰ Ha'e rami vy SENHOR ogueraa jepe va'ekue ojevypa 'rã, Sião py oupa 'rã ovy'aa rupi oporaei reve. Ha'e kuery re oĩ 'rã vy'a opa e'ŷ va'e, inhakã re coroa oĩa rami. Ha'e kuery oupity va'erã va'e ma mby'a porã ha'e vy'a anho. Ha'e rã mboriau ha'e mby'a vai ma okanhymba 'rã.

36

2 Reis 18.13-18; 2 Crônicas 32.1-8

¹ Ha'e gui catorze ma'etý re ma huvixave Ezequias oĩ jave py Assíria pygua huvixa Senaqueribe ou Judá yvy re tetã ikorapa va'e ha'e javi re opu'ã aguã. Ha'e vy oipe'apa ha'e kuery oguerekva'ekue ha'e javi.

² Ha'e gui huvixa Ezequias-a katy Assíria pygua huvixave omundouka guembigui Rabsaqué. Laquis tetã gui omundouka Jerusalém katy xondaro kuery heta ikuai va'e reve. Ha'e vy ha'e kuery ijatypa okuapy yy ombofy pyre yvy'ã re oĩ va'e gui yy rape ou va'e rovai katy, tape ao joiaty kuery yvy via yvýry.

³ Ha'e ramo Rabsaqué reve nhovaexi vy oje'oi Hilquias ra'y Eliaquim huvixa ro re opena va'ety, kuaxia mboparaa Sebna ha'e Asafe ra'y mba'emo oiko va'ekue mboparaaty Joá.

2 Reis 18.19-37; 2 Crônicas 32.9-19

⁴ Ha'e ramo ha'e kuery pe Rabsaqué aipoe'i:

— Aipopeje ke Ezequias pe: “Po ramo Assíria pygua huvixa yvateve va'e ijayvu: ‘Mba'e nunga re tu rejerovia?’

⁵ Ndevy pe ae xee xeayvu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejerovia reikovy, xerovai repu'ã aguã?

⁶ Egito pygua kuery re ri rejerovia, ha'e ramo tei ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

⁷ Ha'e rã xapy'a rei xevy aipo're 'rã: “Ore ma SENHOR Oreruete re ae rojerovia va'e”, 're tei ha'e va'e peguare e'ŷ teve ombojeroviaaty yvity rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: “Kova'e altar Jerusalém py oĩ va'e katy anho 'rã pembojerovia pekuapy”, he'i va'ekue pendevy.”

⁸ Ha'e nunga rupi ejerure na xeruvixa Assíria pygua pe, ha'e gui xee ma ndevy ame'ẽ 'rã dois mil kavaju, xapy'a rei avakue hi'áry guarã rejou ri ramo.

⁹ Ha'e gui mba'e re tu rejerovia Egito pygua karóxa ha'e kavaju árygua kuery re? Mba'eta xeruvixa rembiguai yvyigueve re teñ napendepo'aka kuaai ri.

¹⁰ Ha'e gui xapy'a rei xee nda'u SENHOR reve'ŷ ri aju peneretã amomba aguã? Any, mba'eta SENHOR ae xevy aipoe'i: 'Tereo ke, epu'ã ha'e kuery yvy re, ha'e emomba', he'i xevy.'

¹¹ Ha'e ramo Rabsaqué pe Hilquias ra'y Eliaquim, Sebna ha'e Joá ombovai vy aipoe'i okuapy:

— Rojerure ndevy: Ndeayvu ke aramaico ayvu py anho ore nerembiguai kuery pe, mba'eta ore roendu kuaa rã. Ndeayvuve eme judeu kuery ayvu py, heta va'e kuery tetã kora áry rupi ikuai va'e oendu kuaa e'ŷ aguã — he'i.

¹² Ha'e rami teñ Rabsaqué ombovai:

— Ha'e gui pêvy ha'e penderuvixa remiendurã anho teve xeruvixa xembou xeayvu aguã? Avakue tetã kora áry rupi ikuai va'e pe guive e'ŷ teve xeayvu, mba'eta peñ kuery rami avi ha'e kuery voi ikuai guepoxi ho'u, otyrai ae oy'u okuapy aguã rami — he'i.*

¹³ Ha'e rami vy Rabsaqué opu'ã vy ijayvu atã ho'amy judeu kuery ayvu py. Ha'e vy aipoe'i:

— Pejapyxaka ke Assíria pygua huvixa yvateve va'e ayvu re.

¹⁴ Po rami xeruvixa ijayvu: "Penhembotavy uka eme Ezequias pe, mba'eta ha'e ma napendereraa jepe 'rã.

¹⁵ Neñ Ezequias tapendeapo eme SENHOR re pejerovia aguã rami, mba'eta aipoe'i: 'SENHOR nhandereraa jepe 'rã, ha'e vy kova'e tetã nomboaxai 'rã Assíria pygua huvixa po py', he'i 'rã.

¹⁶ Pejapyxaka eme Ezequias ayvu re. Mba'eta po rami Assíria pygua huvixa ijayvu: 'Pejapo ke xereve peteñ rami nhandekuai aguã, ha'e vy peju xea katy. Ha'e rami vy peteñ-teñ pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

¹⁷ xee pendea py aju peve. Ha'e gui xee rogueraa 'rã peteñ yvy pendeyvy rami ae itui va'e katy. Ha'e va'e yvy ma mba'emo aju ha'e uva rykue oña, mbojape ha'e uva oata e'ŷa.

¹⁸ Penhembotavy uka eme Ezequias pe "SENHOR nhandereraa jepe 'rã", he'i ramo. Mba'eta yvy regua kuery ruete ra'angaa ikuai va'e nda'u ogueraa jepe ri yvy Assíria pygua huvixa po gui?

¹⁹ Mba'eta mamo tu ikuai Hamate ha'e Arpade pygua kuery ruete? Mamo tu ikuai Sefarvaim pygua kuery ruete ra'angaa? Ha'e kuery nda'u xepo gui ogueraa jepe raka'e Samaria tetã?†

²⁰ Ha'e va'e yvy re ikuai va'e ruete ra'angaa regua mava'e tu ogueraa jepe oyvy xepo gui? Mba'exa 'rã tu ha'vy SENHOR ogueraa jepe Jerusalém xepo gui?' he'i."

²¹ Ha'e ramo heta va'e kuery okyririmbä okuapy, peteñive ma voi nombovai, huvixa "Pembovai eme" he'i rire.

²² Ha'e ramo Hilquias ra'y mba'emo re opena va'ety Eliaquim, kuaxia re opena va'ety Sebna ha'e Asafe ra'y mba'emo oiko va'ekue ombopara va'ety Joá jogueraa ju Ezequias oña py. Oao omondoropa va'ekue reve ovaõ vy ixupe omombe'u okuapy Rabsaqué ijayvuague ha'e javi.

¹ Ha'e nunga huvixa Ezequias oendu vy omondoro oao, ha'e ajukue voxá guigua py rive onheovãmba vy oike SENHOR pegua oo py.

* ^{36:12} Ha'e rami ijayvu, mba'eta tetã ojokopa ramo ha'e pygua kuery ndojoui 'rã ho'u va'erã neñ yy oy'u aguã.

† ^{36:19} Hamate, Arpade, Sefarvaim ha'e Samaria.

² Ha'e rami vy Amoz ra'y profeta Isaías oña katy omondouka ngoo re opena va'ety Eliaquim, kuaxia re opena va'ety Sebna ha'e sacerdote yvatekueve va'e. Ha'e ramo ha'e kuery ajukue voxá guigua py onheovā va'ekue reve jogueraa

³ Isaías pe aipoe'i aguã:

— Po rami Ezequias aipoe'i: “Kova'e ára ma jajexavai aguã ha'e nhanembopagaa rã nhaximbá aguã ára, kunha oikuavã'i ta teñ oguereko ete aguã na'imbaraetevei va'e rami nhandekuai.

⁴ Mba'eta Assíria pygua huvixa remimbou Rabsaqué ijayvu va'ekue Nhanderuete oikove va'e rovai. Ijayvua SENHOR Nderuete oendu vy ijayvu ete 'râgue ixupe. Ha'e nunga rupi ejapukai ke ixupe jakuave'i teri va'e re”, he'i aguã.

⁵ Ha'e ramo Isaías oña py huvixa Ezequias rembiguai kuery ovaẽ ramo

⁶ Isaías aipoe'i ha'e kuery pe:

— Aipopeje ke penderuvixa pe: “Po rami SENHOR ijayvu: Ekyje eme ayvu rendu va'ekue káuxa. Ha'e va'e ayvu rupi ma Assíria pygua huvixa rembiguai kuery xerovai ae ijayvu okuapy.

⁷ Ha'e rami teñ hexe ambou 'rã peteñ nhe'ẽ imongyjearã. Ha'e ramo ixupe mba'emo omombe'ua rã oendu vy ojepe'a ju 'rã ovvy oyvy katy ae. Ha'e gui ma ha'e py ajapo 'rã kyxe py ojukaa aguã rami”, he'i.

2 Reis 19.8-13

⁸ Ha'e gui ma Rabsaqué oo ju vy oikuua Assíria pygua huvixa kuery Libna tetã re opu'ã okuapya, mba'eta oendu ma voi huvixa Laquis tetã re opu'ãa gui ojepe'a ma ovyyague.

⁹ Assíria pygua huvixa oendu avi “Etiópia pygua huvixa Tiraca ma je ou oiny nderovai opu'ã vy”, 'ea ramo. Ha'e rami oendu vyve peteñgue ju omondouka guembiguai kuery Ezequias oña katy. Ha'e vy aipoe'i uka ha'e kuery pe:

¹⁰ — Po rami pendeayvu 'rã Judá pygua huvixa Ezequias pe: “Enhembotavy uka eme nderuete re rejeroviaa py. Mba'eta aipo're: ‘Jerusalém tetã ma nomboaxai 'rã Assíria pygua huvixa po py’, 're.

¹¹ Ndee nerendui teve Assíria pygua huvixa kuery yvy jave re ojapo va'ekue? Mba'eta omomba ete. Ha'e nunga rupi ndee rexã'ã ri ty'y reo jepe aguã?

¹² Mba'eta yvy regua ruete ra'angaa ikuai va'e nda'u ogueraa jepe ri raka'e xeramoĩ kuery omomba aguã gui? Ha'e va'e kuery ma Gozã, Harã ha'e Rezefe pygua, ha'e Éden ramymino kuery Telassar py ikuai va'ekue.

¹³ Ha'e mamo tu oiko aŷ Hamate pygua huvixa, ha'e Arpade, Sefarvaim tetã, Hena ha'e Iva pygua huvixa kuery?” — he'i uka.

2 Reis 19.14-19

¹⁴ Ha'e gui ma tembiguai kuery po gui kuaxia para Ezequias ojopy vy ogueroayvu. Ha'e rami vy SENHOR pegua oo py oike vy oexa uka imoiny henonde.

¹⁵ Ha'e rami vy SENHOR renonde ojapukai vy aipoe'i:

¹⁶ — SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko yvy jave regua kuery ruete. Ndee ma yva ha'e yvy apoare.

¹⁷ SENHOR, ejapyxaka rendu pota aguã. Eipe'a ke nderexa, rexâ pota aguã. Ha'e vy endu pota Senaqueribe ijayvuague ha'e javi re, mba'eta ndee Oreruete reikove va'e, nderovai ae ijayvu.

¹⁸ Ha'e gui SENHOR, anhetã ete ae Assíria pygua huvixa kuery omomba raka'e yvy regua ikuai va'e, ha'e kuery yvy guive.

¹⁹ Ha'e gui oapypa guive ha'e kuery ruete ra'angaa oguereko va'ekue. Ha'e rami avi ha'e nunga ma tuuete e'ŷ ae, avakue rembiapo, yvyra ha'e ita guigua rive. Ha'e nunga rupi ae omomba.

²⁰ Ha'e ramo SENHOR Oreruete, orereraa jepe ke ipo gui, yvy regua ha'e javi oikuua aguã ndee anho SENHOR reikoa — he'i.

2 Reis 19.20-34

²¹ Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijayvu: Assíria pygua huvixa Senaqueribe káuxa xevy rejerure ramo

²² po rami xee SENHOR xeayvu hexe. Ndere ma kunhataigue'i Sião pygua rajy kuery opuka rei okuapy. Nderakykue Jerusalém pygua rajy kuery oguerova-rova oakā.

²³ Mba'eta mava'e re tu ndeayvu vai? Mava'e tu rejojai? Mava'e rovai rupi tu ndeayvu ha'e nderexa py rema'ẽ vaikue rei? Xee Israel kuery ruete xeky'a e'ŷ va'e rovai ae.

²⁴ Mba'eta nerembiguai kuery rembo'e SENHOR rovai ijayvu aguã re. Ha'e vy aipo're: "Xekaróxa reta va'e vy ajeupi 'rã yvyty áry peve, Líbano yvy re mombyryvea rupi tei. Xee aitypa 'rã ha'e py yary yvatekueve ha'e cipreste iporâgueve ikuai va'e, avaẽ 'rã mombyryvea py apyta aguã, ka'aguy inhanavea py peve.

²⁵ Ha'e gui yvy ajo'o vy ay'u amboae regua kuery pegua yy gui, ha'e Egito yvy re apyrõ vy rive amombirupa yakã ikuai va'e", 're va'ekue.

²⁶ — Ha'e rami tei nerendui teve yma rupi ma voi xee ae amoĩ ha'e va'e nunga oiko aguã, ymave guive anhembopy'a ae ma ha'e rami aguã re? Ha'e rami vy aŷ ma amoingo ete ma ha'e nungakue. Xee ae aipotaa rami vy ndee rembovaipa karamboae tetã ikorapa va'ekue.

²⁷ Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vy okanhymba vyvoi nhuû rami rive, e'ŷ vy jai rogue pyau, nhuû oo ao'ia áry henhoi rive va'e rami, e'ŷ vy mba'emo onhoty mbyre ijaju e'ŷ re okaipa va'e rami rive.

²⁸ Ha'e rã xee ma aikuua porã reguapy reiny rã, repu'ã reovy ha'e reike ju rejuveny nhavõ, ha'e gui xerovai repu'ã reia guive.

²⁹ Ha'e ramo xerovai repu'ã reia ha'e renhemboyvate reia aendupa ma vy aŷ ma nexi re amoĩ 'rã ty'aĩ ndereruarã, ndejuru re amoĩ avi 'rã juru xã, ha'e rami vy ajapo 'rã rejuvengue rupi ae ju rejevy aguã rami.

³⁰ — Ha'e gui ndee Ezequias reikuua aguã ma pova'e 'rã oiko: Aŷ kova'e ma'etŷ ma peẽ kuery pekaru 'rã mba'emo ha'e ae gui henhoi va'ekue re, ha'e gui amboae ma'etŷ ma ha'e va'ekue gui ikuai va'ekue re ju 'rã pekaru. Ha'e rã mboapy ma'etŷa py ma penhoty ju 'rã mba'emo, ha'e gui pemono'õ 'rã. Penhoty 'rã uva, hi'a pe'u aguã.

³¹ Ha'e gui Judá regua rembyre oo jepe va'ekue ma hapo ju 'rã yvy katy, ha'e vy hi'árykue ma hi'a ju 'rã.

³² Mba'eta Jerusalém tetã py ikuai 'rã okuave va'e, Sião yvyty re ikuai 'rã oo jepe va'ekue. SENHOR ixondaro reta va'e ae 'rã ojapo, nhanderayvu etea rupi.

³³ — Mba'eta po rami SENHOR ijayvu Assíria pygua huvixa rekorã re: "Ha'e ma kova'e tetã py ndoikei 'ræe, nei peteive hu'y nomomboi 'rã tetã katy, hu'y jokoa reve nonhembojai 'rã ouvy, nei yvy nombo'yvatei 'rã guive tetã kora áry rupi ojeupi aguã.

³⁴ Ha'e rami 'râgue py tape ouague rupi ae ju 'rã ojevy. Kova'e tetã py ndoikei 'ræe", he'i SENHOR.

³⁵ "Mba'eta xee ae ajoko 'rã tetã araa jepe vy, xejee ha'e xerembiguai Davi re ama'ẽ vy", he'i.

2 Reis 19.35-37, 2 Crônicas 32.21,22

³⁶ Ha'e gui ma anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'êgue okuave'i va'e ovvy vy oexa rã hetekue rive ikuai.

³⁷ Ha'e ramo Assíria pygua huvixa Senaqueribe ojepe'a ju ovvy. Ojevy vy guetã ae Nínive py ju opyta.

³⁸ Ha'e gui ma nguuete ra'angaa Nisroque pegua opy omboetea py oĩ javé ta'y kuery ae Adrameleque ha'e Sarezer ojuka kyxe py. Ha'e vy onhamba jogueravy Ararate yvy katy. Ha'e ramo ta'y Esar-Hadom ju oĩ nguu rekovia.

2 Reis 20.1-11, 2 Crônicas 32.24-31

¹ Ha'e va'e javé py huvixa Ezequias imba'eaxy vy omano ta ma oupy. Ha'e ramo oĩa py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: "Emoatyrõ mba'emo ndero py ikuai va'e, mba'eta remano 'rã, ndereikovevei ta ma", he'i.

² Ha'e ramo Ezequias ojere vy ngoo mbotya re ngova omboja oupy. Ha'e vy SENHOR pe ojerure vy

³ aipoe'i:

— SENHOR, ajerure ndevy. Nema'endu'a ke nerentonde rupi ha'evea rami aikoague re, xepy'a ha'e javi py. Ha'evea ramigua ajapo aikovy va'ekue nerentonde rupi — he'i. Ha'e vy ojae'o vaipa oupy.

⁴ Ha'e gui Isaías pe SENHOR ombou ju oayvu. Ha'e vy aipoe'i:

⁵ — Ejevy ke, ha'e vy aipo're Ezequias pe: Po rami SENHOR neramoī Davi ruete va'e ijayvu: “Xee aendu ma renhembo'e, nderekay aexa guive. Ha'e vy amoīve 'rā nde'ára quinze ma'et̄y peve ju.

⁶ Ha'e vy rogueraa jepe 'rā Assíria pygua huvixa po gui, kova'e tetā guive. Aepy 'rā kova'e tetā", he'i.

⁷ Pova'e nunga SENHOR oexa uka 'rā ndevy, reikuua aguā oayvuague ojapo 'rāa.

⁸ “Tape pyrō-pyrōarā Acaz ojapo va'ekue re ajapo 'rā kuaray'ā dez pyrōa hakykue katy ju ojevy aguā rami”, he'i. Ha'e gui ha'ekue rami ae ojapo kuaray'ā dez pyrōa peve hakykue katy ju ojevy aguā rami.

Ezequias oporaeiague

⁹ Ha'e ramo Judá pygua huvixa Ezequias imba'eaxy vaipa oupyague gui opu'ā ju ma rire po rami oporaei:

¹⁰ — Xee aipoa'e va'ekue:

“Xembaraete rei reve aikovea py teī
aÿ aike ta yvyra rupa rokē rupi.

Mba'eta xegui oipe'aa ta ma aikovea ma'et̄y”, ha'e va'ekue.

¹¹ Aipoa'eve ju va'ekue:

“Okuave va'e yvy re xee ndaexavei ma 'rā SENHOR.

Neñ peteīve ava ma voi ndaexavei ma 'rā yvy re hekoav a'e.

¹² Mba'eta xegui aikovea'i oipe'aa ta heravy mombyry,

vexa'i re opena va'e okeaty ombovaipaa rami.

Ajukue apoa rami rejaya ta xerekovea nhimbo rami.

Ára oaxa rā pytūa rami rejapo xerekovea opa aguā rami.

¹³ Xee arō are ma ainy ko'ē rai peve,

ha'e rā ha'e ma guary rami omopēmba xekāgue.

Ára oaxa rā pytūa rami rejapo xerekovea opa aguā rami”, ha'e va'ekue.

¹⁴ — Mbyju'i e'ŷ vy jeruxi rami avi anhe'ē aikovy va'ekue,

apykaxu rami xepoāe rei va'ekue.

Xerexa voi ikangypa ma yvate katy ama'ē riae ete rā.

“ SENHOR, ajexavai rei aikovy, xembovai ke”, ha'e va'ekue.

¹⁵ — Ha'e gui aÿ ma marā rami nda'u xeayvu 'rā?

Ndee ndeayvuague rami ae xererek.

Ha'e nunga rupi aikovea pukukue re ha'evepa rei'i 'rā aikovy,
xerekovea ojexavai vaipa rire.

¹⁶ SENHOR, ha'e rami ndee orerek ramo ore avakue roikove,

xenhe'ē voi ha'e nunga re ae 'rā oī.

Mba'eta xemoexaī vy xemoingove ju.

¹⁷ Xembopy'a porā ju aguā ae xembojexavai va'ekue.

Mba'eta ndee ma xerekovea reayvu vy

xereraa jepe yvykua py xevaipa aguā gui,

mba'eta underakykue katy remombopa ma ajejayvague ha'e javi.

¹⁸ Ha'e gui yvyra rupa py ma avave nandererovy'aai 'rā,

manoa py nanemboeteai 'rā.

Yvy kua katy oguejy va'ekue ma noarōvei 'rā okuapy anhetē ete va'e rupi reikoa.

¹⁹ Okuave va'e anho 'rā underoporaei,

- kova'e ára xee rogueroporaiae rami.
 Ha'e tuu kuery omombe'u 'rā gua'y kuery pe anhetē ete va'e rupi reikoa.
- 20** Mba'eta SENHOR ou vy xereraa jepe.
 Ha'e nunga rupi mba'epu ixā va'e nhambojoguy reve
 jaroporaei 'rā ára nhavō jaikovea pukukue re,
 SENHOR pegua oo py — he'i.
- 21** Mba'eta Isaías aipoe'i ae va'ekue: “Peru figo'a oubirí pyre, ha'e pemboja ijai re.
 Ha'e ramo okuera 'rā imba'eaxygui”, he'i va'ekue.
- 22** Ezequias voi aipoe'i va'ekue: “Mba'e nunga tu oiko 'rā aikuua aguã SENHOR ro py ju aa
 'rāa?” he'i va'ekue.

39

2 Reis 20.12-19

- 1** Ha'e va'e jave py Babilônia pygua huvixa Baladā ra'y Merodaque-Baladā va'e ma
 “Huvixa Ezequias haxy oupy” 'ea rā oendu vy oĩa katy ombou kuaxia para, mba'emo
 ome'ẽ va'erā reve.
- 2** Ha'e ramo herua kuery ovaẽ rā Ezequias oguerovy'a vy ha'e kuery pe oexa uka mba'emo
 omoĩ porãaty py oguereko va'e ha'e javi: prata, ouro, tembi'u irûrā, azeite iporãve va'e
 ha'e tembiporu joe opu'ãa pygua. Omoĩ porãaty py ikuai va'e ha'e javi oexa uka. Neĩ
 peteĩ'i voi Ezequias ndoexa ukai ha'e kuery pe, ngoo py ae, neĩ openaa ha'e javi rupi
 oguereko va'e.
- 3** Ha'e ramo huvixa Ezequias oĩa py profeta Isaías ou vy oporandu ixupe:
 — Mba'e nunga re tu avakue ou va'ekue ijayvu okuapy ra'e? Magui tu ou okuapy ndea
 py?
- Ezequias ombovai:
 — Peteĩ yvy mombyryvea gui ou, Babilônia gui ae — he'i.
- 4** Ha'e ramo oporanduve ju:
 — Mba'e tu ha'e kuery oexa okuapy ndero py?
- Ezequias ombovai:
 — Xero py oexa okuapy mba'emo ikuai va'e ha'e javi. Xemba'e amoĩ porãaty py oĩ va'e
 regua neĩ peteĩve ndaexa ukai ha'e kuery pe — he'i.
- 5** Ha'e gui ma Isaías aipoe'i Ezequias pe:
 — Endu ha'yv SENHOR ayvu.
- 6** “Ovaẽ 'rā ára ndero py ikuai va'e ha'e javi Babilônia yvy katy ogueraapaa aguã, ymave
 guive neramoĩ kuery omoĩ porã va'ekue kova'e ára peve. Ndoejaaai 'rā neĩ peteĩ regua ma
 voi”, he'i SENHOR.
- 7** Ndera'y kuery rerekoy va'ekue ae voi ogueraapaa avi 'rā okuapy, Babilônia pygua huvixa
 ro py oa'yijo pyre meme ikuai aguã — he'i.*
- 8** Ha'e ramo Ezequias aipoe'i Isaías pe:
 — Pova'e ayvu SENHOR guigua remombe'u va'e ma ha'eve va'e — he'i, ojeupe ae “Xee
 aikuua rā aikovea ja mby'a porã anho ha'e ha'evepa rei'i ta merami”, he'i vy.

40

SENHOR ou aguã re ijayvuague

- 1** Nhanderuete aipoe'i: “Xevygua kuery pe pendeayvu pembovy'aa rupi, pembovy'a ju
 ke.
- 2** Pendeayvu porã'i ke Jerusalém pygua kuery pe. Ha'e vy aipopeje: ‘Opa ma pendere
 opu'ãa ague, mba'eta penderekoi vaiague omboguepaa ma. Pejejavyague re pepaga aguã
 va'ekue mokoõgue ma pejopy SENHOR po gui’, peje.”
- 3** Ha'e gui ma onhendu 'rā tekao e'ŷa rupi ojapukai va'e po rami: “Perekó katu ke
 SENHOR raperã. Pembo'yvi ke tape tekao e'ŷa rupi oo va'e Nhanderuete ou aguã.

* 39:7 Ha'e va'e jave ma huvixave kuery oa'yijo uka 'rā guembigui kuery ngoo rupi guarã.

⁴ Mba'eta yvyugua ha'e javi omonyëmba 'rã. Ha'e gui yvyty ha'e yvy'ã ikuai va'e ombojojapa 'rã. Ikarẽ rei va'ekue-'ekue ombo'yvipa 'rã, ha'e yvy'ã guy rei va'ekue ijojapa 'rã.

⁵ Ha'e gui ma ojekuaa 'rã SENHOR rexakää. Avakue ha'e javi 'rã oexa, SENHOR ojuru py ae ijayvu rire."*

⁶ Ha'e gui peteĩ ayvu onhendu vy "Ejapukai", he'i.

Ha'e gui amongue oporandu: "Mba'e tu arojapukai ta?"

"Aipo'ere: 'Avakue ha'e javi ma jai rogue, ha'e ha'e kuery oguerovy'ave va'e ha'e javi ma ipoty rami rive oĩ.

⁷ Mba'eta jai rogue ipiru 'rã, ha'e ipoty okuipa 'rã, ha'e va'e re SENHOR oipeju ramo rive. Anhetẽ avakue ma jai rogue rami meme ikuai.

⁸ Jai ipiru ramo ipoty okuipa 'rã. Ha'e rã Nhanderuete ayvu ma oĩ riae 'rã raka'e rã peve guarã', 'ere."*

⁹ Ha'e gui ndee Sião pygua, eẽ ke yvyty yvateve va'e áry mba'emo pyau remombe'u aguã. Remombe'u 'rã mba'emo pyau Jerusalém pygua kuery pe, ayvu atã reve 'rã ndeayvu. Epu'ã ke, ekyje eme, emombe'u porã Judá tetã pygua kuery pe: "Pee ma ou oiny Nhanderuete!" 'ere.

¹⁰ Mba'eta SENHOR Nhanderuete ma opo'akaa reve ou 'rã, ojyva py ipo'aka aguã. Ha'e ogueru 'rã jaikoague repy, guenonde ombou 'rã nhandevy ome'ẽ va'erã.

¹¹ Ha'e rami vy onhangareko 'rã ojeupegua kuery re vexa'i re opena va'e rami. Ojyva áry ogueru 'rã vexa'i ra'y, oikuavã 'rã heruvy. Ha'e ta'y'i va'e ma mbeguei'i 'rã oguerek.

SENHOR yvateve va'ea re ijayvuague

¹² Ha'e gui mava'e nda'u opo ruguaa py yy oa'anga, ha'e okuã py yva oa'ã raka'e? Mava'e nda'u yvy ku'i ojopy ajaka py rami, ha'e gui yvyty ha'e yvy'ã ikuai va'e mba'emo opejaa py oa'ã raka'e?

¹³ Mava'e nda'u ombo'e raka'e SENHOR Nhe'ẽ? Mava'e nda'u imongetaarã oiko raka'e ombo'e aguã?*

¹⁴ Mava'e pe nda'u onhemoneta uka raka'e oikuaapa aguã rami? Mava'e nda'u ombo'e raka'e tape teko porã rupi oo aguã re, e'ŷ vy ombo'e 'arandu re, ha'e rami e'ŷ vy ixupe oikuaa uka tape oikuaa aguã katy oo va'e?

¹⁵ Mba'eta ixupe rã yvy regua ikuai va'e ma yryru gui peteĩ otyky va'e rami ikuai, ha'e e'ŷ vy mba'emo opejaa py peteĩ ku'i apĩ'i oĩ va'e rami. Ixupe rã yy pa'ũ ikuai va'e voi yvy ku'i opu'ã va'e rami ikuai.

¹⁶ Ixupe guarã japy aguã neĩ Líbano yvy re yvyra ikuai va'e ha'e javi nda'evei, ha'e py mymba ikuai va'e voi nda'evei japy reve nhame'ẽ aguã.

¹⁷ Ha'e oexa rã yvy regua ha'e javi mba'everã ndovarei va'e rami ikuai. Ha'e oikuaa rã mba'eve gui ma voi ndovareive va'e, mba'eve oĩ e'ŷ va'e rami.

¹⁸ Mava'e nda'u Nhanderuete reve joo rami ete 'rã heko va'e? Mba'e nunga nda'u hexe nhambojoja 'rã?

¹⁹ Mba'eta mba'emo apoa ma ojapo 'rã mba'emo ra'angaa. Ha'e gui ouro re ombo'eapo va'e ju 'rã onhovãmba ouro py, ha'e gui ixãrã ma prata gui ojapo 'rã.

²⁰ Ha'e rã iporiaukue'i ma yvyra ovo rive va'erã e'ŷ 'rã oiporavo 'rã. Ha'e vy ojou 'rã ojapo kuaapa va'e ojapo aguã ta'angaa omyí aguã rami e'ŷ.

²¹ Xapy'a rei nda'u ha'e nunga ndapeikuai ri? Napendui teve? Pêvy nda'u nomombe'uai ri jypy guive ma voi? Tyrã pa ndapeikuua potai ae yvy omboytaa ára guive?

²² Mba'eta Nhanderuete ma yvy apy jerekue áryve oguapy oiny va'e, ha'e oexa rã ha'e py hekoa va'e kuery tuku rami avi kyrí'i. Ha'e ae avi oipyo raka'e yva ajukue puku rami, oo'i ajukue guigua rami ojora vy oupi ha'e py oĩ aguã.

* 40:5 Kova'e ayvu rupi João Batista ijayvu Jesus ou 'rãa omombe'u vy (Mateus 3.3, Marcos 1.3, Lucas 3.4-6, João 1.23).

* 40:8 1 Pedro 1.24-25 * 40:13 Romanos 11.34, 1 Coríntios 2.16

²³ Ha'e ae avi omo'yvy'i 'rā huvixa kuery ikuai va'e, omokanhymba 'rā yvy regua joe oikuua pota va'e.

²⁴ Ha'e kuery ma mba'emo ra'yīgue rami onhotyā e'ŷ vy omoaĩ ramo yvy re hapo vy hi'y ypy'i 'rā, ha'e rami teī ha'e va'e rupi yvvytū oipeju ov yamo ipirupa vyvoi 'rā, ha'e gui ma yvvytū vaikue ogueraapa 'rā mba'emo pirekue rami avi.

²⁵ Ha'e nunga rupi Iky'a e'ŷ va'e aipoe'i: "Mava'e re nda'u peẽ kuery xembojoja 'rā? Mava'e tu xee ramigua oiko?" he'i.

²⁶ Penderova yva, ha'e pema'ẽ. Mava'e tu ha'e nunga ha'e javi ojapo raka'e? Ha'e ma jaxy-tata oipapa porāmba rire oxondaro kueryrā rami oguenoẽ 'rā heravy, peteĩ-teī rery rupi oenoĩ vy. Mba'eta imbaraete ha'e ipo'akapa va'e ramo peteĩve ma voi ndoatai 'rā.

²⁷ Ha'e nunga rupi mba'e re tu peẽ Jacó ha'e Israel kuery pendeayvu vy aipopeje: "Xee aikoa re ma SENHOR ndoexa potai, Nhanderuete ndoikuaa potai anhepytyvō uka teī", peje.

²⁸ Ha'e rami teī ndapeikuaai, napendui ri ty'y Nhanderuete Imarā e'ŷ va'e, SENHOR yvy apy apoare na'ikane'õi ha'e ndaxypai 'rā? Hi'arandua re ma nhande ndajaikuaa pota kuaai 'rā.

²⁹ Ha'e rami 'rāgue py ha'e ae omombaraete ju 'rā ikane'õ va'e, omombaraeteve 'rā na'imbaraetevei va'ekue.

³⁰ Mba'eta ipyaukue voi ikane'õ ha'e haxypa 'rā. Kunumigue ikangypa vy ho'apa 'rā.

³¹ Ha'e rā SENHOR oarõ oikovy va'e kuery ma ojouve ju 'rā ombaraeterā. Ha'e rami vy opu'ã ju 'rā taguato oveve ov yvy va'e rami. Onha teī na'ikane'õi 'rā, oguata teī ndaxypai 'rā.

41

Nhanderuete re ojerovia e'ŷ va'e kuery oenoĩ vy omboayvuague

¹ "Peẽ kuery yy pa'ũ re pendekoa va'e, pekyrirĩ ke xerenonde. Ha'e pygua pendekuai va'e, penhemombaraete ke, ha'e gui mae ma penhemboja xere, xee romboayvu rā pembovai aguã. Peju, jajogueroayvu.

² Ha'e gui mava'e tu kuaray oua katy gui ombou oguataa rupi rei joe ipo'aka va'erā? Mava'e tu ojapo heta va'e kuery onhe'ẽ rendu aguã rami, ha'e huvixave kuery ikuai va'e re opyrõ oiny aguã, okyxe py yvy ku'i rami omboa'ypa aguã, ha'e guapa py omoaĩmba aguã yvvytū mba'emo pirekue ombovevepa heravya rami?

³ Mba'eta ha'e ma oakykue monhamba ma vy henonderā oove 'rā mba'eve oiko e'ŷ re, oguataaty rupi e'ŷ teī.

⁴ Mava'e tu ojapo ha'e nunga ha'e javi oiko aguã rami? Jypy'i guive oayvu py rive heta va'e kuery omoingo va'ekue ae. Xee ae SENHOR jypy'i guive ha'e opaa py guarā aiko", he'i.

⁵ Ha'e nunga ye'ẽ yvýry hekoia va'e kuery ha'e nunga oexa vy onhemondyipa 'rā. Yvy apy gui voi oryryipa reve 'rā onhemboja jogueruvy.

⁶ Peteĩ-teī nhomombaraete 'rā. Ha'e vy oirū kuery pe "Nembaraete ke", he'i 'rā.

⁷ Ha'e rami vy mba'emo ra'angaa apoa omokyre'ŷ 'rā ouro re omba'eapo va'e, ha'e gui karavo mbotaa py ombojoja va'e ju aipoe'i 'rā ferro áry ombope va'e pe: "Rejapo porā rima ra'e", he'i 'rā. Ha'e rami vy karavo py mba'emo ra'angaa re ombota 'rā ho'a e'ŷ aguã.

⁸ "Ha'e rā ndee Israel ma xerembiguai reiko. Ndee Jacó ma xerembiporavo, xeirū Abraão ramymino.

⁹ Ndee ma yvy apy gui rogueru va'ekue, roenoĩ mombyryvea py reĩa gui. Ha'e vy aipoa'e: 'Ndee ma xerembiguai. Xee roiporavo rire ndoroejai 'rā.

¹⁰ Ekyje eme, mba'eta xee aiko ndereve. Enhemondyi eme, mba'eta xee ma Nderuete. Xee romombaraete 'rā, roipytyvō ha'e teko porā rupi roguereko 'rā aiporu kuaa regua py.

¹¹ Ha'e rã nderovai ipoxypa va'e kuery ma oximbá rei ha'e nda'evei nho 'rã okuapy. Ha'e va'e kuery ma omomba rivea 'rã ovare'ý va'e rami. Ha'e rami vy ndere ija'e e'ý va'e kuery okanhymba 'rã.

¹² Ha'e va'e rire ndere opu'ã va'ekue reka teĩ nderejoupei 'rã. Nderovai opu'ã va'ekue omombytaa 'rã ovare'ý va'e.

¹³ Mba'eta xee SENHOR Nderuete ma rojopy 'rã ndepo reiporu kuaa regua re. Ha'e vy aipoa'e 'rã: "Ekyje eme ke, xee roipytyvõ 'rã", ha'e.

¹⁴ "Ekyje eme Jacó ha'e Israel kuery, taxo'i rami mbovy'i ete pendekuai teĩ. Xee roipytyvõ 'rã", he'i SENHOR penderepya, Israel kuery ruete Iky'a e'ý va'e.

¹⁵ Ha'e gui peẽ rojapo 'rã mba'emo moa'yã haimbe ha'e ipyau va'e, haĩ jovai va'e rami. Ha'e ramo yvyty ikuai va'e pemboa'y 'rã pemongu'ipa peve, yvy'ã ikuai va'e voi pemombytapa 'rã mba'emo pirekue aty rami.*

¹⁶ Pembovevepa ramo yvytu ogueraapa 'rã, yvytu jere omoaï'rã. Ha'e rã peẽ ma perovy'a 'rã SENHOR, pemboete 'rã Israel kuery ruete Iky'a e'ý va'e.

¹⁷ "Ha'e gui ojexavai ha'e oipota rei'i va'e kuery ma yy oeka teĩ ndojoui 'rã. Inhapekũ ipirupa 'rã yuvei gui. Ha'e rami teĩ xee SENHOR aendu 'rã. Xee Israel kuery Ruete vy ndaeja rivei 'rã.

¹⁸ Ha'e rami vy yvy'ã ipiru reia gui teĩ xee amboxyry 'rã yy, ajapo 'rã yvyugua mbyte rupi yvu oiko aguã. Tekoa e'ýa rupi voi ajapo 'rã yupu oĩ aguã, ha'e yvy piru reia va'ekue ajapo 'rã yypa aguã rami.

¹⁹ Tekoa e'ýa py anhoty 'rã yary, acácia, murta ha'e oliveira. Ha'e joyvy-yvy tekaoa e'ýa py amoehoï 'rã cipreste, olmeiro ha'e buxo,

²⁰ pavẽ oexa vy oikuua aguã, oikuua pota ha'e oikuua porã aguã SENHOR po ae ha'e nunga ojapoague, Israel kuery ruete Iky'a e'ý va'e omoingoague."

Amboae regua kuery ruete ramigua kuery pe SENHOR ijayvuague

²¹ SENHOR aipoe'i: "Pemombe'u porã ke peikuaa va'e. Pendeayvu anhetê rupi peikoa re", he'i Jacó kuery Ruvixave.[†]

²² "Peru ke peikuaa va'e, pemombe'u mba'emo oiko va'erã. Pemombe'u ke ayvu yma guare, ha'e nunga re jaikuua pota aguã, jaikuua aguã ojeupity ete ma paa. Ha'e rami e'ý vy raka'eve rã guarã pemombe'u roendu aguã.

²³ Peikuaa uka ke raka'eve rã guarã, peẽ kuery ete pa tuuete peikoa roikuua aguã. Pemoingo ke mba'emo porã, e'ý vy mba'emo vai teĩ, ha'e rami vy rokyjepa aguã, ha'e jaexa pavẽ aguã.

²⁴ Ha'e rami avi peẽ kuery ma mba'everã ndapevarei, penerembiapokue voi ndovareive va'e meme. Pendeporavoa kuery voi ojeguarupy ikuai.

²⁵ "Ha'e gui xee ma kuaray apu'a'ia katy gui peteĩ ambou ramo ou 'rã. Kuaray oẽa katy oiko teri reve aenoĩ ramo ojapukai xerery rupi. Ha'e va'e ma opyrõ 'rã huvixa kuery re yapo rami, nhae'ũ re omiba'epo va'e yapo omou'ña rami avi.

²⁶ Mava'e nda'u jypy'i guive ha'e nunga omombe'u, oiko e'ý mbove ma voi jaikuua vy 'Ha'e rami ae ri', ja'e aguã? Ha'e rami avi jipoi avave rei imombe'uarã, ikuua ukaarã ndoikoi, pendeayvu oendu va'ekue voi ndoikoi.

²⁷ Xee ae ma jypy Sião pe amombe'u vy 'Ma'ë, upe ma oĩ!' ha'e va'ekue. Mba'eta Jerusalém pygua kuery pe ambou ayvu porã mombe'uarã.

²⁸ Xee ama'ë vy ndaexai peteїve, peẽ kuery va'e regua ndoikoi nhomongeta kuaa va'e, ha'e va'e pe nhaporandu rã ombovai va'erã.

²⁹ Peẽ kuery ha'e javi ma mba'everã ndapevarei. Penerembiapo voi mba'e e'ý meme. Mba'eta mba'emo ra'angaa ojapo pyre ma yvytu rive, hyrukue rei va'e ae."

* 41:15 Apy ma ijayvu ngovaigua kuery omomba aguã re. † 41:21 Apy ma tuuete ramigua kuery pe Nhanderuete ijayvu.

42

SENHOR rembiguai reko re ijayvuague

¹ “Apy ma oĩ xerembiguai ambopo'aka va'e. Xerembiporavo oiko, xenhe'ẽ py arovy'a va'e. Hexe amoĩ Xenhe'ẽ. Ha'e ramo amboae regua kuery pe oikuua uka 'rã teko porã regua.

² Ha'e rami avi ha'e ma nahnometare'yi 'rã, ndojapukai atãi 'rã, neĩ tetã mbyte rupi voi noendu ukai 'rã oayvu.

³ Takua omopẽ mbyre nomou'ui 'rã, neĩ nomboguei 'rã tataendy ra'y hataxí rive'i va'e voi. Ha'e rami 'rãgue py anhetẽ va'e rupi 'rã oikuua uka teko porã regua.

⁴ Ha'e ma ndopai 'rã, nokanhyi 'rã guive, yvy jave re teko porã regua oikuua ukapa e'ýa ja. Ha'e gui ye'ẽ yvýry ikuai va'e voi oarõ 'rã okuapy oeko mbo'e aguã.”*

⁵ Po rami ijayvu SENHOR Nhanderuete yva ojapo ha'e oipyo va'ekue, ko yvy onhono vy opa mba'e hi'a aguã rami ojapo va'ekue. Ha'e ae yvy regua kuery pe ome'ẽ raka'e ipytuerã oikove aguã, ha'e kuery re omoĩ avi inhe'ẽrã. Ha'e vy aipoe'i:

⁶ “Xee SENHOR ma roenoĩ va'ekue teko porã rupi. Ha'e rami rire ajopy 'rã ndepo re. Ndere anhangareko reve romoĩ 'rã neretarã kuery pe xereve guarã ajapo va'ekue reikuua uka aguã, ha'e amboae regua kuery voi remoexakã aguã rami.

⁷ Ha'e rami vy reipe'a aguã oma'ẽ e'ý va'e rexa, ha'e nhuã gui reipe'a aguã omboty pyre, nhuã pytãa py oĩ va'ekue voi.

⁸ Xee ma SENHOR, po rami ae xerery. Ha'e rami vy xerexakãa ma name'ei 'rã amboae pe, xerekovia namboete ukai 'rã mba'emo ra'angaa ojapo pyre.

⁹ Ma'ẽ, jypy amombe'u va'ekue-ekue ma ojeupitypa ma, ha'e gui mba'emo ipyau va'e ju aikuua uka pãvy. Ha'e nunga oiko e'ý mbove xee ajapo 'rã pendu aguã rami.”

Nhandereraa jepea re japoraei aguã

¹⁰ Pemonhendu ke SENHOR pe mboraei pyau. Peẽ kuery ye'ẽ rupi peguata va'e, pendu uka peporaeia yvy apy peve, ye'ẽ rupigua ha'e javi reve, ha'e ye'ẽ yvýry rupi pendekoa va'e ha'e javi.

¹¹ Pemonhendu ke pendeayvua tekao e'ýa rupi, tetã ha'e tekao Quedar regua py pendekuai va'e voi. Itaova rupi pendekoa va'e, pãvy'a ke, pejapukai yvyty apyte áry pendekuiai gui.

¹² Pemboete SENHOR. Pemombe'u hexakãa ye'ẽ yvýry rupi ikuai va'e pe.

¹³ Mba'eta SENHOR ma ipy'a guaxuve va'e rami avi oẽ ouvy vy kyré'ý re 'rã oo joe opu'ã va'e rami. Ojapukai atã 'rã joe opu'ã aguã katy oo va'e rami. Ha'e rami vy ngovaigua kuery pe oexa uka 'rã opo'akaa.

¹⁴ Ha'e gui Nhanderuete aipoe'i: “Xee ma yma ete guive akyrirí va'ekue, ajejoko vy mba'eve nda'eí va'ekue. Ha'e rã aý ma ajapukai 'rã imemby raxy va'e rami, anhea'ã 'rã ipytuerã atã va'e rami.

¹⁵ Mba'eta amomba 'rã yvyty ha'e yvy'ã ikuai va'e, ha'e amombirupa 'rã jai ha'e rupi ikuai va'e ha'e javi. Yakã ikuai va'ekue ajapo 'rã yvy piru rei oĩ aguã rami, ha'e yupa ikuai va'ekue amombirupa 'rã.

¹⁶ Ha'e gui ára revegua e'ý va'e kuery ma areko 'rã heravy tape ndoikuuaii va'e rupi, aroguata 'rã oikuua e'ýa rupi. Ha'e kuery renonde amoexakãmba 'rã pytã rei oĩ va'ekue rupi, tape vaikue rei va'ekue voi ambojojapa 'rã. Ha'e nunga ajapo 'rã ha'e kuery pe, ndaejai 'rãe.

¹⁷ Ha'e rã mba'emo ra'angaa ojapo pyre re ojerovia va'e kuery ma ojevy rivepa 'rã. Ha'e rami vy oximba 'rã okuapy ndoikuuaii rei vy, mba'emo ra'angaa ojapo pyre pe rive 'Oreruete', he'i rire.”

Israel kuery ára revegua e'ý rami ikuiai re ijayvuague

¹⁸ Pendeapyxa e'ý va'ekue, pendu ke. Ha'e peẽ ára revegua e'ý va'e, pema'ẽ pexa aguã.

* 42:4 Apy ma ijayvu ikangy va'e ha'e iporiaukue'i Jesus Cristo nomombai 'rãa re, ha'e rami 'rãgue py ogueraa jepe 'rã (Mateus 12.15-21).

¹⁹ Mava'e nda'u oiko ára rewegua e'ŷ, xerembiguai e'ŷ vy? Mava'e nda'u xeayvu mombe'uarã amondouka va'e rami nda'ijapyxai va'e oiko? Mava'e nda'u xereveguia "SENHOR rembiguai" ha'ea va'e rami ára rewegua e'ŷ oiko?[†]

²⁰ Mba'eta peẽ kuery ma opa mba'e pexa teĩ peteĩve ndapexa kuaai. Pendeapyxa ojepe'a porã va'eri napendui 'rã mba'eve.

²¹ SENHOR gueko porãa oikuaa uka vy ojeguigua lei ombovate ha'e omoexakãmba raka'e, oipotaa rami vy.

²² Ha'e rã kova'e kuery ma oipe'apaa rã okanhgue rami avi ikuai. Ha'e kuery ha'e javi ma itakua py ojokuapaa reve ombotya, nhuã py omboty pyre ikuai. Ho'u pyrã rami rive ombotya, heraa jepearã ndoikoi guive. Heraapa pyre ikuai, ha'e avave rei aipo nde'i 'rã: "Tapeo porã ju."

²³ Ha'e gui peẽ kuery va'e regua mava'e tu oendu kuaa 'rã ha'e nunga? Mava'e nda'u oikuaa pota reve oendu kuaa 'rã ha'e va'e rire mba'emo oiko va'erã?

²⁴ Mava'e tu Jacó regua kuery omboaxa raka'e heraapa pyrã, ha'e Israel kuery omboaxa ipe'aarã pe? SENHOR e'ŷ ri nda'u omboaxa raka'e, hovai ha'e kuery ojejavy rire? Mba'eta ixuguigua tape rupi ha'e kuery nda'ikuaxe, ixuguigua lei re ndojapyxakaxe guive.

²⁵ Ha'e nunga rupi ae ha'e kuery re ombou opoxy etea, joe opu'ãa py ho'apa aguã. Ha'e rami py tata omboja ijyvýry rupi. Ha'e rami ete teĩ ha'e kuery ndoikuuai. Oapypaa teĩ ha'e nunga re ndoikuuai potai.

43

Nhanderuete anho Israel kuery reraa jepea oikoa re ijayvuague

¹ Ha'e gui aŷ ma po rami ijayvu SENHOR nemoingoare, Jacó ha'e Israel kuery apoare. Aipoe'i: "Pekyje eme ke, mba'eta xee ma roepy. Penderery rupi roenoĩ rire xemba'e pendekuai.

² Ha'e rami rire yy rupi peaxa ramo xee aiko 'rã pendereve. Yakã rupi peaxa teĩ napendeao'i 'rã. Tata rupi peaxa ramo napenderapyi 'rã, hendy va'e voi napendeoverei 'rã.

³ Mba'eta xee ma SENHOR Penderuete, Israel kuery ruete lky'a e'ŷ va'e ha'e pendereraa jepea aiko. Ha'e rami vy penderekovia ame'ẽ 'rã Egito pygua kuery. Etiópia ha'e Sebá pygua voi ame'ẽ 'rã pendere.

⁴ Mba'eta xevy rã ovare ete va'e ha'e omboeteve pyrã pendekuai, xee roayvu guive. Ha'e nunga rupi ae penderekovia ame'ẽ 'rã amboae regua kuery, penderekovia aepy vy.

⁵ Ha'e nunga rupi pekyje eme, pendereve xee aiko ramo. Ha'e rami vy peneramymino kuery arupa ju 'rã kuaray oẽa ha'e oikea katy gui amono'õmba vy.

⁶ Kuaray ijapu'a'ia katyguia pe aipoa'e 'rã: 'Eme'ẽmba ju ke.' Ha'e kuaray puku-a katyguia pe avi 'Ejoko eme', ha'e 'rã. Peru ke xera'y kuery mombyry gui, peru xerajy kuery yvy apy gui,

⁷ xerery rupi aenoĩ va'ekue ha'e javi, xee ae anhemboete uka vy amoingo ha'e ajapo va'ekue.

⁸ "Peru ke hexa oĩ va'eri ndoexai va'e kuery, ha'e ijapyxa oĩ va'eri ndojapyxakaxe vi va'e guive.

⁹ Tou avi yvy regua kuery ha'e javi, ta'ijatypa opa marãguia kuery ikuai va'e. Ha'e kuery va'e regua mava'e tu omombe'u kuaa 'rã ha'e nunga, ha'e nhandevy oikuaa uka yma rupi amombe'u uka va'ekue-ekue? Ha'e rami vy toexa uka imombe'uarã oguereko ri vy, heko porãa kuaa ukaarã, nhaendu vy 'Anhetã ete ae' ja'e aguã.

¹⁰ "Ha'e rã peẽ ae ma xereko mombe'uarã pendekuai", he'i SENHOR. "Peẽ ma xerembiguairã aiporavo va'ekue xeayvua pendu vy perovia aguã, ha'e rami vy xee anho aikoa peikuua aguã, mba'eta xee aiko e'ŷ mbove peteĩve tuuete ndoikoi raka'e, ha'e xee aiko rire voi amboae ndoikoi 'rã.

¹¹ Xee, xee ae ma SENHOR. Xee e'ŷ vy ndoikoi jogueraa jepearã.

[†] 42:19 Apy "Xerembiguai" he'ia ma ojeupe guarã oiporavo va'ekue re ijayvu vy.

¹² Xee ma amombe'u uka ma voi ajogueraa jepe aguā. Ha'e va'e ambou ma vy aikuaa uka ju. Penembyte ndoikoi amboae ramigua tuuete, ha'e rā peē kuery ma xekuaa ukaarā pendekuai", he'i SENHOR. "Xee ae ma Penderuete.

¹³ Ára oiko e'ŷ mbove ma voi xee ae aiko raka'e. Ndoikoi guive xepo gui jope'aarā. Mba'eta xee mba'emo ajapo ta ramo mava'e tu xejoko ta?" he'i.

Babilônia pygua po'akaa gui ogueraa jepe aguā re ijayvuague

¹⁴ SENHOR pendereraa jepea, Israel kuery ruete Iky'a e'ŷ va'e ma po rami ijayvu: "Peē kuery roayvu vy Babilônia yvy re amondouka 'rā hovaigua kuery tetā re opu'ã okuapy va'erā. Ha'e rā ha'e pygua caldeu kuery ma ajapo 'rā onhamba aguā rami. Kanoã ha'e kuery oguerovy'a rei va'ekue py ae 'rā ojava.

¹⁵ Xee ma SENHOR Penderuete Iky'a e'ŷ va'e, Israel kuery moingoare, penderuvixave", he'i.

¹⁶ Po rami SENHOR ijayvu. Ha'e ma ymave ye'ẽ rupi ojapo va'ekue peteĩ tape, yy oxyry atā va'ekue mbyte rupi ixupeguia kuery oaxa aguā.*

¹⁷ Ha'e gui ha'e kuery rakykue ojapo va'ekue karóxa ha'e kavaju oje'oi avi aguā rami, xondaro kuery imbaraetekueve guive. Ha'e py ae ha'e kuery ho'apa, nopus'avei, neĩ ndoikovei 'rā guive, tataendy ogue va'ekue rami avi. Ha'e vy SENHOR aipoe'i:

¹⁸ "Aŷ gui ma penema'endu'ave eme mba'emo oiko va'ekue re rive, yma guare-guare re anho pendepy'a eme.

¹⁹ Mba'eta xee ajapo 'rā mba'emo pyau aŷ'i ma voi ojekuaa oiny aguā rami. Xapy'a rei nda'u ndapexai ri? Mba'eta teko a e'ŷa rupi ju 'rā xee aexa uka tape, ha'e yvy piru reiague rupi ajapo 'rā yakā oxyry aguā rami.

²⁰ Ha'e ramo mymba ka'aguy regua voi xemboete 'rā okuapy, jagua-tuvy nhe'ẽ ha'e guyra nhandu ra'y, teko a e'ŷa rupi yy amoī ramo, ha'e yakā yvy piru reiague rupi. Xevy guarā aiporavo va'ekue oy'u aguā rami ajapo,

²¹ peteĩ regua xejeupe guarā ae amoingo va'ekue pe, xere ima'endu'aa rupi xereroporaei aguā."*

SENHOR nhanemboaxya rupi nhandererekoa re ijayvuague

²² "Ha'e rami teĩ Jacó kuery, xevy pe ma peē kuery ndapejapukai. Ha'e rami 'rāgue py Israel kuery, penekane'õmba rive xevy pe pendekuaia gui.

²³ Mba'eta xevy pe ete ndaperui vexa'i ra'y peapy reve peme'ẽ va'erā, naxemboetei guive mba'emo pejukaa py. Xee ma norombovoyi mba'emo aju xejeupe guarā ame'ẽ uka vy, noromokane'õi guive heakuā va'e aapy uka vy.

²⁴ Xevy peguarā ndapejoguai takua heakuā porā va'e pendeperáta re, naxembovy'ai guive mba'emo peapy aguā pejuka va'ekue kyra peme'ẽ vy. Ha'e rami 'rāgue py pejejavya py rive xembovoyi, xemokane'õ guive pendeko vaia py.

²⁵ Ha'e ramive ma xee, xee ae penderekoi vaiaty ambogue va'e, xejee ae ama'ẽ vy. Ha'e rami vy naxema'endu'avei ma pejejavyague re.

²⁶ Xemoma'endu'a ke, jaa ke romboayvu aguā py. Penhemombe'u porā ke romboeko porā kuua aguā.

²⁷ Mba'eta penderu ypy ma heko vai, ha'e gui nhanembyte guarā amoī va'ekue ju ojejavy okuapy xerovai.

²⁸ Ha'e nunga rupi ae amboyke 'rā pembojeroviaaty rupigua yvatekueve. Jacó kuery ma amboaxa 'rā imombaarā pe, Israel kuery amboaxa 'rā ijojaiarā pe."

44

SENHOR anho Nhanderuete oikoa re ijayvuague

¹ "Aŷ ma peē Jacó kuery xerembiguai, ha'e Israel kuery xerembiporavo pendekuai va'e, pendu ke.

* 43:16 Apy ma ijayvu Ye'ẽ Pytā mbyte rupi Israel kuery oaxapaague re (Êxodo 14-15). * 43:21
1 Pedro 2.9

² Po rami ijayvu SENHOR penemoingoare, penderyru'i py ma voi pendeapo va'ekue, ha'e penepytyvõa: Jacó kuery xerembiguai, xerembiayvu kuery roiporavo va'ekue, pekyje eme.

³ Mba'eta oy'uxe rei va'e kuery pe anhoẽ 'rã yy, amboxyry 'rã yvy piru reiague rupi. Ha'e rami ae avi Xenhe'ẽ voi anhoẽ 'rã neramymino kuery áry, ha'e kuery áry anhoẽ 'rã amoingo porã aguã.

⁴ Ha'e ramo ha'e kuery ma jai ipotypa va'e rami avi ikuai porã 'rã, ha'e yakã yvýry yvyra hi'aĩ va'e rami.

⁵ Ha'e kuery va'e regua ma 'Xee ma SENHOR pegua', he'i 'rã. Ha'e rã amboae ma Jacó rery rupi onhemboery uka 'rã. Ha'e rã amboae ju opo re ae ombopara 'rã: 'Xee ma SENHOR pegua' he'ia va'e, ha'e guery apyrã omoĩ 'rã Israel rery py."

⁶ Po rami ijayvu SENHOR Israel kuery ruvixave, heraa jepea, SENHOR ixondaro reta va'e: "Xee ma jypy'i guive ha'e opaa py guarã aiko. Xee e'ŷ vy ndoikoi tuuete mboae.

⁷ Mava'e nda'u xee ramigua oiko ymave rupi mba'emo oiko va'erã mombe'ua, ymaveguia kuery amoingo guive? Ha'e rami ri ramo tove toikuaa uka, tomombe'u porã ha'vy xerenonde. Tomombe'u mba'emo oiko va'erã, mba'emo ndojeupityi teri va'e.

⁸ Penhemondyi eme, pekyje eme guive. Ha'e va'e ára guive namombe'ui teve ha'e nunga pêvy? Ndaikuua ukai ri ty'y? Peẽ kuery ma xekuaa ukaarã pendekuai. Oiko avi 'rã nda'u amboae tuuete xee ramigua? Any, amboae itaova ndoikoi xee aikuua va'e."

Mba'emo ra'angaa mbojeroviaa rupi ikuai va'e nai'aranduia re ijayvuague

⁹ Mba'emo ra'angaa apoa ikuai va'e ha'e javi ma mba'everã ndovarei, ta'angaa ha'e kuery ojou porãve va'e voi. Ha'e kuery ae oikuua uka mba'eve ndoexai ha'e ndoikuuaia, nda'evei nho aguã rami.

¹⁰ Mava'e nda'u tuueterã ojapo, e'ŷ vy mba'emo ryku gui mba'emo ra'angaarã ojapo 'rã, mba'everã ndovarei va'erã rive?

¹¹ Mba'eta ha'e nunga mboetea ma guive rã nda'evei nho 'rã, ijapoare ava meme ramo. Ha'e kuery toupa xerenonde ojexa uka aguã. Ha'e gui ma tonhemondyipa ju oje'oivy oximba vy.

¹² Ha'e gui ferro re ombo'eapo va'e ma ojapo 'rã peteĩ haxa. Ha'e gui ma tata py ombo'eapo vy mba'emo ra'angaa ju 'rã ojapo ombota-mbota vy. Ojapo 'rã heravy ojyva mbaraeetea py. Ha'e rami teĩ okaruxe vy ikane'õ 'rã, yy ndoy'ui vy na'imbaraetevei 'rã.

¹³ Ha'e gui yvyra gui mba'emo ra'angaa ojapo kuaa va'e voi ixã omoatã vy lápis py oa'ã 'rã heravy mba'emo ra'angaarã. Ha'e rami vy yvyra nhopã py ju 'rã onhopi-nhopi, ha'e oa'ã ju 'rã imarkaa py. Ha'e vy ojapo 'rã ava rami ete iporã rei va'e, oo'i oĩ atyrã py oĩ aguã.

¹⁴ Ha'e rami aguã ma avakue oake'o 'rã yary, ha'e e'ŷ vy cipreste, carvalho, yvyra ka'aguy re ikuai va'e gui oiporavo vy. Xapy'a rei onhoty 'rã pinho yky, oky ramo yvate ov yva'erã.

¹⁵ Ha'e nunga yvyra ma avakue oapy aguã ikuai. Amongue yvyra pêgue omoendy vy ojape'e 'rã oiny, mbojape ombojy 'rã guive. Ha'e va'e yvyra gui ae avi ojapo 'rã nguuete rea'angaarã. Ha'e rami vy henonde oĩ 'rã guenapy'ã re. Mba'emo ra'angaarã ojapo va'ekue renonde oĩ 'rã guenapy'ã re ombojerovia vy.

¹⁶ Peteĩ ijaygue ma oapy 'rã tata py. Ha'e va'e py ma ombojy 'rã xo'o ho'u aguã. Oexy ma vy hevyatã 'rã, ha'e ojape'e vy aipoe'i 'rã oiny: "Ha'eve ajape'e ma, ha'e aexa hexakãa", he'i 'rã.

¹⁷ Ha'e gui ijaygue mboae gui ma ojapo 'rã nguueterã, mba'emo ra'angaa rive. Ha'e va'e renonde ma oĩ 'rã guenapy'ã re. Ngova yvy re omovaẽ reve ojerure 'rã oiny ha'e nunga pe. Ha'e vy aipoe'i 'rã: "Xereraa jepe ke, mba'eta ndee ma xeruete", he'i 'rã.

¹⁸ Ha'e kuery ma mba'eve ndoikuuaai, o'arandurã nomoĩ, hexa ojapa ma oexa e'ŷ aguã, ikuraxõ py voi ndoikuuaavei ma.

¹⁹ Neĩ peteĩve ma ndoikuua pota porãi 'rã, nai'arandui ha'e mba'eve ndoikuuai aipoe'i aguã: "Peteĩ ijaygue ma apy tata py, ha'e tapyí áry aexy mbojape. Hi'áry ma xo'o aexy

ma vy ha'u. Ha'e ijaygue mboae gui nda'u ajapo 'rā ri ojeguaru pyrā? Xerenapy'ā re 'rā ri nda'u aĩ yvyra pēgue renonde?" nde'i 'rā.

²⁰ Ha'e nunga avakue ma tanhimbu rive ho'u oiny va'e rami ikuai, okuraxō py onhembotavy uka vy ojekore va'e. Ha'e va'e ma ndogueraa jepe kuaai guekove, neĩ aipo nde'i kuaai: "Apu re e'ŷ ri nda'u ajerovia?" nde'i.

Ogueraa jepe aguã re ijayvuague

²¹ "Jacó ha'e Israel kuery, penema'endu'a ke povae nungakue re, mba'eta peẽ ma xerembiguai kuery! Xee ae rojapo va'ekue xerembiguairā. Israel kuery, xee ndaxerexarai 'rā pendegui.

²² Ha'e rami 'rāgue py pejejavyaty amokanhymba 'rā yvyxī rami, ha'e pendereko vaiaty amomba 'rā arai rami. Pejevy ju ha'vy xea katy, xee rogueraa jepe rire."

²³ Ha'e nunga SENHOR ojapo rire peporai ke, yva regua pendekuai va'e. Ha'e peẽ yvy guyrygua kuery, peroporaei avi ke. Peẽ yvyty ha'e ka'aguy pendekuai va'e, ha'e yvyra pendekuai va'e ha'e javi, penhendu ke mboraei rupi, mba'eta SENHOR oepy Jacó kuery, ha'e Israel kuery ogueraa jepe vy onhemboete uka rire.

²⁴ Po rami ijayvu SENHOR pendereraa jepea, penderyru'i py ma voi penemboete'i va'ekue: "Xee ma SENHOR opa mba'e apoaa. Xee ae'i aipyo va'ekue yva, ha'e anhono va'ekue yvy.

²⁵ Xee ajapo profeta ramigua rive apu rupi ijayvua ojeupity e'ŷ aguã rami, ha'e namo'aranduveipa 'rā imba'ekuaa va'e. Mba'eta hi'arandu va'ekue ajapo 'rā ndoikuaavei aguã rami, hi'aranduague mba'emo vairā opytapa aguã.

²⁶ Ha'e rā xerembiguai ijayvuague ma xee amoingo 'rā, ajapo 'rā xeayvu mombe'ua kuery ijayvua ojeupity aguã rami. Ha'e rami vy Jerusalém tetā pe aipoa'e: 'Ha'e py ma ikuaiju 'rā.' Ha'e Judá yvy re tetā ikuai va'ekue pe ma 'Ojapoa ju 'rā', ha'e. Ha'e py oogue ho'apa va'ekue pe ma 'Xee amoatyrōmba ju 'rā', ha'e.

²⁷ Yy tyguaxu va'e pe aipoa'e: 'Ndepiru ke, ha'e nderegua yakā ikuai va'e voi xee amombirupa 'rā.'

²⁸ Ha'e gui Ciro pe ma aipoa'e: 'Ha'e ma xerymba vexa'i kuery re opena va'e vy ojapopa 'rā xee aipotaa ha'e javi', ha'e.* Jerusalém tetā pe avi aipoa'e: 'Omoatyrōa ju 'rā.' Templo pe voi 'Omboytaa ju 'rā', ha'e.'

45

Huvixa Ciro Israel kuery omondoukapa ju aguã re ijayvuague

¹ Po rami SENHOR ijayvu guembiporavo huvixave Ciro reko re: "Ipo oiporu kuaa regua re ajopy herekovy, ha'e henonde gui aipe'apa 'rā yvy regua kuery. Hexe ama'ẽ vy amokangy 'rā huvixave ikuai va'e, henonde rupi okē ikuai va'e aipe'apa 'rā nombotyavei aguã rami.

² Ha'e rami vy xee aa 'rā nerondenre rupi. Ndevy ambo'yvi 'rā tape ikarē-karē va'e, amopẽmba 'rā okē overa va'e guigua, ha'e ambovopa 'rā ijokoa ferro guigua oĩ va'e.

³ Ndevy pe amboaxapa 'rā mba'emo porā onhomimbyre, ha'e hepykueve ojao'i pyre, reikuua aguã xee ae SENHOR aikoa, Israel kuery ruete nderery rupi roenoĩ va'e.

⁴ Xerembiguai Jacó kuery, xerembiporavo Israel kuery ayvu vy ae xee roenoĩ nderery rupi, ha'e ndere amoĩ nderery apyrā, ndee ndaxekuaai tei.

⁵ Xee ma SENHOR, ndoikoi amboae. Xee e'ŷ vy ndoikoi tuuete. Xee ma romombaraete 'rā ndaxekuaai tei.

⁶ Ha'e ramo kuaray oua ha'e oikea katy peve oikuua pavē aguã xee e'ŷ vy amboae ndoikoia. Xee ae SENHOR, ndoikoi amboae.

⁷ Xee ma hendy va'e rexu ukua aiko, ha'e pytū moĩa guive. Ha'e rami ae avi ambou 'rā mby'a porā ha'e mba'emo vai. Xee SENHOR ae ha'e nunga ha'e javi moingoa aiko."

SENHOR opa mba'e apoare oikoa re ijayvuague

* 44:28 Ciro ma Pérsia pygua huvixave. Babilônia re ipo'aka ma vy Israel kuery omondoukapa ju ijyvy katy (Esdras 1-3).

⁸ “Toguejy teko porā yva yvatevea gui, ta'oky arai gui. Ha'e yvy re ma teko porā toike jogueraa jepea oiko aguā, toiko avi teko porā. Xee SENHOR ae ha'e nunga amoingo va'e”, he'i.

⁹ Nda'evei ete 'rā imoingoare re opu'ā rei va'e kuery pe, mba'eta nhae'ū pēgue ramigua rive ikuai. Tyrā nhae'ū guigua aipoe'i 'rā teve ijapoa pe: “Mba'e tu rejapo?” ha'e rami e'ŷ vy “Nerembiapo tu oata rima ixārā”, he'i 'rā teve?*

¹⁰ Nda'evei ete avi 'rā nguu pe “Mba'erā tu xemoingo?” he'i va'e, e'ŷ vy oxy pe “Mba'e re tu xererekoi'raka'e?” he'i va'e pe.

¹¹ Po rami ijayvu SENHOR Israel kuery ruete Iky'a e'ŷ va'e, ha'e kuery moingoare: “Peikuaaxe ri ty'y raka'eve rā guarā? Xapy'a rei nda'u peē xembo'exe ri xera'y kuery ha'e xepo py ae ajapo va'ekue areko aguā re?

¹² Mba'eta xee ma ajapo yvy, ha'e hexe guarā amoingo va'ekue avakue. Xepo py ae aipyo yva, ha'e hexe ikuai va'e ha'e javi 'rā ajokuai.

¹³ Ha'e gui xereko porāa rupi vy amoī Ciro huvixaverā, ha'e ambo'yvi oguata aguā ha'e javi'l rupi. Ha'e ramo ha'e omoatyrō uka ju 'rā xevyguia tetā, ha'e omboupa ju 'rā xevyguia kuery mombyry ogueraa pyre, hepy re e'ŷ 'rā ojapo, mba'emo ome'ē rivepy re e'ŷ guive”, he'i SENHOR ixondaro reta va'e.

¹⁴ Po rami ijayvu SENHOR: “Ndupo py amboaxapa 'rā mba'emo porā Egito ha'e Etiópia yvy re ikuai va'e, avakue Sabeu regua tuvixakueve guive. Ha'e va'e kuery ma nderakykue 'rā oje'oi oipokuapaa reve, ha'e vy nerondenon ju 'rā ikuai guenapy'ā re mba'emo re ojerurea py. Ha'e vy aipoe'i 'rā: ‘Ndereve anho Nhanderuete oiko, ha'e Nhanderuete mboae ndoikoi ha'e e'ŷ vy’, he'i 'rā okuapy.”

¹⁵ Anhetē ete ndee ma Oreruete ndereko roikuaapa 'rā e'ŷ, Israel kuery ruete orereraa jepea.

¹⁶ Ha'e gui ta'angaa ojapo va'e kuery ma oxīmba ha'e nda'evei nho 'rā okuapy. Ho'apa 'rā oxīmbaa py.

¹⁷ Ha'e rā Israel kuery ma SENHOR ogueraa jepe 'rā raka'e rā guarā. Ha'e kuery ma noxīmbai 'rā, nda'eve e'ŷi nho 'rā raka'e rā peve.

¹⁸ Mba'eta po rami ijayvu SENHOR yva moingoare, Nhanderuete yvy nhono porāare, ha'e yvy oī atā aguā rami ojapo va'ekue. Opyta rive aguā e'ŷ onhono, nhanderekorā ae ojapo va'ekue: “Xee ae SENHOR, ndoikoi amboae”, he'i.

SENHOR ha'e mba'emo ra'angaa re ijayvuague

¹⁹ “Xee ma nhemi rupi e'ŷ xeayvu, neī yvy pytūa py e'ŷ guive. Jacó ramymino kuery pe aipo nda'e: ‘Xereka rive rima’, nda'e. Xee SENHOR ma anhetē rupi xeayvu, anhetē ete va'e anho aikuua uka.

²⁰ Ha'e nunga rupi peē kuery yvy regua ikuiaia gui peo jepe va'ekue, penhemboaty ke pejuvy. Jojavi pevaēmba, mba'eta yvyra gui mba'emo ra'angaa ojapo va'ekue ojaxei heravy va'e kuery ma mba'eve ndoikuai, ojapukai 'rā okuapy nguuete ndogueraa jepei va'erā pe rive.

²¹ Penhemombe'u ke, pemombe'u peikuaa va'e. Penhomongeta porā ranhe pekuapy. Mava'e tu ha'e nunga ymave guive oikuua uka? Mava'e tu ha'e va'e ára guive omombe'u uka? Xee SENHOR aiko va'e e'ŷ ri ty'y? Mba'eta ndoikoi tuuete mboae xee e'ŷ vy. Tuuete heko porā va'e jogueraa jepea ndoikoi, xee e'ŷ vy.

²² Peē yvy regua kuery ha'e javi, xere ae ke pema'ē peo jepe aguā. Mba'eta xee ae ma Penderuete, ndoikoi amboae.

²³ Xejee ae aura va'ekue, xejuru gui anhetē ete va'e oē, ha'e xeayvuague ndopyta rivei 'rā. Ha'e vy aipoa'e: ‘Xerenonde ma pavē guenapy'ā re oī 'rā, pavē oapekū py oura 'rā xerery rupi’, ha'e.*

²⁴ Ha'e ramo xevy pe aipo'ea 'rā: ‘SENHOR re anho oī teko porā ha'e mbaraete. Ha'e oīa py oxīmba reve oupa 'rā hexe nda'ija'ei va'ekue ha'e javi’, 'ea 'rā.’

* 45:9 Romanos 9.20 * 45:23 Kova'e ayvu rupi ma Jesus reko re ijayvu (Romanos 14.11, Filipenses 2.9-11).

²⁵ Ha'e rã Israel ramymino kuery ma SENHOR re vy omboeko porãmbaa 'rã, hexe anho ov'y'a 'rã okuapy.

46

Babilônia py mba'emo ra'angaa ikuai va'ekue okanhymba aguã re ijayvuague

¹ Bel ha'e Nebo ra'angaa ma ojero'a-ro'a rei 'rã oiny, mba'eta ta'angaa omoña 'rã mymba áry. Nguuete ra'angaa ma ogueraa 'rã guymba kuery áry. Hymba kuery ikane'õ ma teĩ omokane'õve 'rã heravy ta'angaa ogueraa uka vy.*

² Ha'e rami vy tuuete ra'angaa ojero'a rei 'rã oiny. Ha'e nunga ma ndogueraa jepei 'rã hexe ojerovia va'e. Ha'e rami 'rãgue py ha'e nunga ae heraa 'rã amboae yvy re oguerekó aguã katy.

³ "Jacó ha'e Israel kuery pekuave va'e, pendu ke xeayyu. Peẽ kuery ma peiko'i guive xee roguerekó, penderyru'i py peĩ reve rogueraa va'e xejyva áry.

⁴ Ha'e gui pendetuja'ipa peve xee ha'ekue ae 'rã aiko, pende'a xiimba peve xee roguerekó 'rã. Ha'e rami vy 'rãe xee rogueraa, romombarae ha'e rogueraa jepe.

⁵ Mava'e nda'u xere pembojoja 'rã joo rami ete roikoa rami? Mba'e nunga xee ramigua nda'u pemombe'u kuaa?

⁶ Amongue ma ovoko gui ouro oguenoẽ 'rã, e'ŷ vy mba'emo opejaa py prata oa'ã vy opaga 'rã ouro re omba'eapo va'e pe nguueterã ojapo uka vy. Ha'e rami vy henonde oĩ 'rã guenapy'ã re yvy re ngova omovaẽ reve.

⁷ Ha'e gui oaxi'y áry ogueraa 'rã hendarã py omoñ aguã. Ha'e rã ha'e py ae 'rã oĩ. Guenda gui ndovai 'rã. Ha'e nunga pe ojapukai teĩ nombovai 'rã, neĩ peteïve ndogueraa jepei 'rã guive ojexavaia gui.

⁸ "Penema'endu'a ke pova'e re, pendepy'a guaxu aguã. Pejejavy va'ety kuery, pemoñ pendepy'a re.

⁹ Penema'endu'a ke ymave rupi oiko va'ekue re, mba'eta xee ae Penderuete, ndoikoi amboae xee ramigua.

¹⁰ Mba'eta jypy'i guive aikuaa uka va'ekue mba'emo oiko va'erã, yma voi mba'emo ndoikoi teri va'e aikuaa uka. Ha'e vy aipoa'e: 'Xeayvua oiko ae 'rã, ajapo 'rã aipota va'e ha'e javi', ha'e.

¹¹ Ha'e rami vy kuaray oua katy gui aenoñ peteñ xapirẽ, yvy mombyrya gui peteñ ava aenoñ xee amongetaa rupi oiko va'erã. Ha'e rami aguã re xeayvu rire amoingopa avi 'rã. Ha'e nunga xepy'a re amoñ rire ha'e rami ae ju 'rã ajapo.

¹² "Pendu ke xeayvua, mba'eta peneakã ratã va'e vy teko porã gui mombyry peiko.

¹³ Ajapo 'rã xeguigua teko porã ovaẽ aguã rami, namombyryvei ma ouvy, ajogueraa jepe aguã voi ndarei 'rã. Ha'e rami vy aexa uka 'rã ajogueraa jepea Sião py, Israel kuery mbyte py aexa uka 'rã xerexakãa."

47

Babilônia tetã okanhymba aguã re ijayvuague

¹ "Kunhatai Babilônia pygua rajy, eguejy ke reia gui, ha'e yvy ku'i py ju eguapy.* Caldeu rajy, eguapy ke yvy py ae, mba'eta jipovei ma tenda repenaaty, ha'e ndevy pe 'Kunhatai porã ojou porãvepy' nda'eavei ma 'rã.

² Ejopy ke mba'exoa, ha'e emongu'i mba'emo ra'yí. Eipe'a nderova mo'ãa reiporu va'ety, eupi ndeao apy, ha'e neretyma rei reve eaxa eovy yakã.

³ Mba'eta ndepire reia oexa pavẽ 'rã, oexa 'rã reximba rei rã. Mba'eta xee ajoepy vy namboaxyi 'rã avakue ma guive rã", he'i.

* 46:1 Bel ha'e Nebo ma Babilônia pygua kuery ruete ramigua oguerekó va'ekue. Ha'e gui apy ma omombe'u ha'e kuery ojava vy mymba áry ta'angaa omoñ rã ojero'a-ro'a've 'rã oje'oivy. * 47:1 "Babilônia pygua rajy" he'ia ma tetã Babilônia pygua kuery ha'e javi re ijayvu vy. Ha'e gui apy omombe'u ha'e kuery ikuai axy 'rãa.

⁴ Mba'eta nhande kuery repya ma SENHOR ixondaro reta va'e, Israel kuery ruete Iky'a e'ŷ va'e hery.

⁵ “Caldeu rajy, eguapy ke rekyrirī reve, ha'e gui tereo pytūa katy, mba'eta ndevy pe ‘Tetā ikuai va'e re ipo'aka va'e' nda'eavei 'rā.

⁶ Anhea'ā ete ma xevygua kuery re, ambovaipa uka xemba'erā va'ekue. Ha'e rami vy amboaxa ndepo py, teī ndee ma remboaxyu rupi e'ŷ rerek, tujakue'i voi rerek axy.

⁷ Ndee ma ‘Xee ma xepo'aka 'rā raka'e rā peve!’ 're va'ekue teī aŷ peve xeguigua neremoi ndepy'a re, neī repa aguā re voi ndereikuua potai.

⁸ “Ha'e nunga rupi reipotaa rupi rei reiko va'e, endu pova'e nunga. Reī atā teri vy ndejeupe ae aipo're: ‘Xee anho aiko, xee e'ŷ vy ndoikoi amboae. Xee ma imeve'ŷ va'e ndaikoi 'rā, neī xememby kuery ndoatai 'rā guive’, 're.

⁹ Ha'e rami teī ha'e nunga mokoīve ma ou xapy'a 'rā ndere, mba'eta peteī ára pyve nememby kuery omanomba 'rā, ha'e imeve'ŷ va'e reiko 'rā. Ha'e nunga ha'e javi oiko xapy'a 'rā ndere, ndevygua imba'evyky ha'e imba'ekuaa va'e heta ete teī.

¹⁰ Mba'eta nderekvaia re rive rejerovia vy ‘Jipoi avave rei xerexa va'erā’, 're. Ha'e rami teī ne'arandua ha'e reikuaapaa py ae rejekore 'rā, ndejeupe ae: ‘Xee anho aiko, xee e'ŷ vy ndoikoi amboae’, 're teī.

¹¹ Ha'e nunga rupi ndere ou 'rā mba'emo vai. Ha'e va'e ma ndevygua kuery mba'ekuaa rupi ikuai va'e ndojoko kuaai 'rā. Ha'e rami ete jexavai oiko 'rā ndere, ha'e va'e gui ndereo jepei 'rā nderekove rekoria mba'emo reme'ē teī. Mba'eta ndere oiko xapy'a 'rā ha'e ramigua ete teko vai nerexa'āi va'ekue.

¹² “Tereove tema mba'evyky ha'e mba'ekuaa rupi nekunhataī guive reikoague rami. Xapy'a rei ma mba'emo rejou nho 'rā ha'e nunga py, xapy'a rei renhomongyje 'rā.

¹³ Ndekuerai ma ha'e rami ete rejekuaa pota ukaague gui! Toupa aŷ yva regua re oikuuaa pota va'e, jaxy-tata re oma'ē oiny va'e, jaxy pyau'i nhavō mba'emo ndere oiko va'erā mombe'ua kuery.

¹⁴ Ha'e rami teī ha'e kuery re oiko 'rā mba'emo pirekue tata oapypaa ramigua. Ha'e vy ndojereraa jepe kuaai 'rā tata gui. Ha'e va'e rire neī peteī tapyī ma ndopytai 'rā ojape'ea aguā, neī tataypy yvýry oguanya aguā ma voi.

¹⁵ Ha'e rami py ndovareveipa 'rā ndevy omba'epo vaipa va'ekue, nekunhataī guive ha'e kuery reve mba'emo rejapoa va'ety. Ha'e kuery ma oka'u va'e rami oaimbā 'rā peteī-teī guape rupi ae. Ha'e gui avave rei nandereraa jepei 'rā.

48

Israel kuery anhetē rupi e'ŷ ikuiaia re ijayvuague

¹ “Peē Jacó kuery, pendu ke pova'e nunga. Israel rery rupi penderery va'e, ha'e Judá ramymino kuery pendekuai, ha'e SENHOR rery rupi peura va'e. Nhanderuete Israel kuery Ruete pe pejapukai va'eri anhetē rupi e'ŷ, teko porā rupi e'ŷ pendekuai.

² Pendejeupe ‘Tetā iky'a e'ŷ va'e pygua’ peje, ha'e ‘Ore roī atā Israel kuery ruete SENHOR ixondaro reta va'e hery va'e re’, peje teī.

³ Ha'e gui xee ma jypy mba'emo amombe'u yma guive. Xejuru rupi ae amombe'u, aendu uka porā guive. Ha'e gui ma amoingo xapy'a ramo ojeupitypa.

⁴ Mba'eta xee aikuuaa peneakā ratāa ha'e pendeaju'y kāgue ferro rami hatā va'ea, penderova voi overa va'e gui ojapo pyre rami ete hatā va'e.

⁵ Ha'e nunga rupi ae amombe'u ha'e va'e ára guive, ha'e nunga oiko e'ŷ mbove voi aikuuaa uka pēvy, peē kuery aipopeje e'ŷ aguā: ‘Ha'e nunga ma oreruete ra'angaa omoingo’, e'ŷ vy ‘Ta'angaa mba'emo ryku guigua omoingo’, peje e'ŷ aguā.

⁶ Ha'e nunga pendu ae ma rire aŷ peikuaa pota ke ha'e nunga ha'e javi re. Ha'e nunga pe ‘Anhetē ete va'e’ ndapejei 'rā teve? Ha'e gui aŷ ma mba'emo pyau ju aendu uka 'rā pendevy, mba'emo ndaikuua ukai teri ha'e ndapeikuuaai va'ekue.

⁷ Ha'e nunga ma aŷ mae amoingo, ymave rupi e'ŷ. Kova'e ára e'ŷ mbove napendui, ‘Aikuua ae ma’ peje e'ŷ aguā.

⁸ Mba'eta ha'e nunga peẽ napendui, ndapeikuaai teri, neĩ napendui guive pendeapyxa py, mba'eta xee aikuua anhetẽ rupi e'ŷ pendekuaia, penderyru'i gui peiko'i guive 'Heko vai va'e' 'ea pendevy.

⁹ Ha'e rami ete teĩ xerery amboete ukaa rupi vy ndaexa uka voi 'rã xepoxya, xee anhemboete ukaa re ae ajejoko 'rã romomba vyvoi e'ŷ aguã.

¹⁰ Ha'e rami avi xee roiky'a'opa teĩ prata rami ndapejekuaai, tata kua jexavaia py roa'anga teĩ.

¹¹ Ha'e rami ete teĩ xejee ae vy aiko ha'e rami. Mba'exa tu xee roguereko ta xerery nomboeteai aguã rami? Xee ma xerexakãa namboaxai 'rã amboae pe.

¹² "Jacó ha'e Israel kuery roenoĩ va'ekue, pejapyxaka ke. Xee ma ha'ekue ae aiko. Xee ma jypy'i guive ha'e opaa pygurarã.

¹³ Xepo py ae yvy anhono va'ekue, ha'e aiporu kuaa regua py ae aipyo yva. Ha'e nunga xee aenoĩ ramo ojekuaapa raka'e.

¹⁴ Penhemboatypa ke, ha'e pendu: Mava'e ta'angaa ikuai va'e regua nda'u ha'e nunga oikuua uka ma voi? Mba'eta xee SENHOR ma Ciro ayvu vy aity uka 'rã Babilônia tetã aipotaa rami, caldeu kuery rovai xejyva upi vy.

¹⁵ Xee amombe'u ae ma, ha'e gui xee ae ju aenoĩ xerembiguarã. Xee aru vy ajapo 'rã oikoa ha'e javi rupi ojapopa aguã rami.

¹⁶ Penhemboja ke xere, pendu pova'e nunga: Nhemi rupi e'ŷ xeayvu jypy guive. Ha'e nunga oiko ypy'i guive xee aiko ha'e py", he'i. Ha'e gui aŷ ma SENHOR Nhanderuete xembou, Onhe'ẽ reve.

¹⁷ Po rami SENHOR ndereraa jepea ijayvu, Israel kuery ruete Iky'a e'ŷ va'e: "Xee ma SENHOR Nderuete. Rombo'e iporã va'e re, ha'e tape reiko aguã rupi roguereko va'e.

¹⁸ Ha'e rami avi xeayvuague rendu va'e rire reiko porã 'rãgue yakã rami, ha'e nderekoo porãa opa rupi ojekuaa 'rãgue ye'ẽ re yai ikuai va'e rami.

¹⁹ Neramymino kuery ma ita ku'i ha'e mba'emo ra'yã rami 'rãgue heta. Hery voi xerenonde gui nomokanhya ha'e ndoipe'aa 'rãgue guive.

²⁰ "Ha'e nunga rupi tapeopa Babilônia tetã gui, pejava caldeu kuery mbyte gui. Ha'e gui pova'e nunga peikuaa uka ke peporaeia rupi. Perojapukai ke, yvy apy peve peikuaa uka. Ha'e vy aipopeje: 'SENHOR ogueraa jepe ma guembiguai Jacó kuery', peje.

²¹ Mba'eta peneramoĩ kuery ma teko a e'ŷa rupi SENHOR ogueraa teĩ noendui raka'e yuvei. Ha'e kuery pe ojapo avi itaova gui yy oẽ aguã rami. Itaova ombovo rã yy onheẽ raka'e.

²² Ha'e rã heko vai va'e kuery pe ma noĩ 'rã ikuai porã aguã", he'i SENHOR.

49

Judeu e'ŷ va'e ikuiaia rupi avi SENHOR rembiguai omoexakã aguã re ijayvuague

¹ "Peẽ ye'ẽ yvýry pendekuai va'e, pendu ke xeayvu. Peẽ mombyrygua kuery, pejapyxaka ke. Mba'eta aiko'i ramove SENHOR xerenoĩ, xeryru'i pyve ma voi omombe'u xerery.

² Ha'e vy xejuru gui oẽ va'e ojapo kyxe haimbe porã va'e rami, ha'e opo py xemo'ã. Xeapo hu'y hyxyi porã va'e rami, ha'e ngu'y ryru py xerereko.

³ Ha'e vy aipoe'i xevy: 'Ndee ma xerembiguai, Israel reiko. Ndee reikoa re vy xemboetea 'rã', he'i.

⁴ "Ha'e ramo xee aipoa'e: 'Ha'e rami avi xee amba'eapo rive, mba'everã ndovarei anhea'ãague. Ha'e rami teĩ SENHOR renonde ma oĩ xemboeko porã aguã, amba'eapo repy oĩ Xeruete po py', ha'e.

⁵ "Ha'e gui aŷ ma SENHOR xeryru'i py guembiguarã xemboeteare va'e ijayvu Jacó regua kuery aru ju aguã, ha'e oĩa py Israel kuery amboatypa aguã, mba'eta SENHOR ae xemboyvate, Xeruete xemombaraete.

⁶ Ha'e rami vy aipoe'i xevy: 'Tá, ha'e rami avi Jacó ha'e Israel regua okuave va'e rerupa ju aguã anho e'ŷ romoĩ xerembiguairã. Amboae regua kuery moexakãarã guive romoĩ, yvy apy rupi peve jogueraa jepearã', he'i.*

⁷ Po rami SENHOR Israel kuery reraa jepea Iky'a e'ŷ va'e ijayvu guembiguai avakue ndoayvui ete va'e pe, mba'eta heta va'e kuery ndoiptai ae, huvixa kuery ojokuai guive. Ha'e vy aipoe'i ixupe: 'Huvixave kuery nderexa vyve opu'amba 'rã, yvatekueve voi. Ha'e kuery nemboete 'rã okuapy xee SENHOR Israel kuery ruete Iky'a e'ŷ va'e re vy, ojeroviapy aikoa rupi roiporavo rire', he'i."

Israel kuery oguerupa ju aguã re ijayvuague

⁸ Ha'e gui SENHOR aipoe'i avi: "Xee romboaxy aguã ára aendu ndeayvua, rogueraa jepe aguã ára roipytyvõ. Ha'e rami vy anhangareko 'rã ndere, ha'e xevyguia kuery pe rome'ẽ 'rã xereve guarã ajapo vy. Ha'e ramo rembopyau ju 'rã ha'e kuery yvy omombyta rive pyre, ha'e peteĩ-teĩ pe reme'ẽ ju 'rã.*

⁹ Ha'e rami vy nhuã py omoboty pyre pe aipo're aguã: 'Peẽ ke', ha'e pytû rupi ikuai va'e pe 'Peju, pejekuaa ju', 're 'rã. Ha'e ramo ha'e kuery ikuai 'rã veva'i tape rupi okaru va'e rami, ha'e yvy'ã piru reia rupi teĩ ojou 'rã ho'u va'erã.

¹⁰ Ha'e rami vy ha'e kuery noenduvei 'rã kuarai neĩ yuvei. Haku-a neĩ kuaray ojopea voi nomoingo axyvei 'rã. Mba'eta imboaxya oguerekoy vy ogueraa 'rã yy porã oĩa py.*

¹¹ Xeyvy re yvyty ikuai va'e rupi ajapo 'rã haperã, ha'e amoatyrõmba ju 'rã tape ikuai va'e.

¹² Ma'ẽ, xevyguia kuery ou 'rã mombyry gui, amongue ma kuaray ijapu'a'ia katy gui, amboae kuery ma kuaray oikea katy gui, ha'e rã amboae kuery ma Sinim yvy gui 'rã ou."

¹³ Yva, eporaei ke! Yvy, evy'a ke! Ha'e peẽ yvy'ã pendekuai va'e voi pemonhendu mboraei, mba'eta SENHOR ombovy'a ju ojeupega kuery, ikuai axy va'e omboaxy vy.

¹⁴ Ha'e rami teĩ Sião aipoe'i: "SENHOR xereja ri, SENHOR hexarai ma xere", he'i.*

¹⁵ "Ha'e rami teĩ imemby kambu va'e nda'u hexarai 'rã ri omemby'i re, nomboaxyi 'rã ri nda'u oguerekoi va'ekue? Xapy'a rei omemby re hexaraia teĩ xee ma ndaxerexarai 'rã ndere.

¹⁶ Ema'ẽ, xepo mbyte re ambopara nderery, xejee riae amoĩ ndekora re xema'endu'a aguã.

¹⁷ Ha'e ramo nememby kuery ha'e ndepi'a kuery ma ojevy voi 'rã okuapy. Ha'e rã nemombaare ha'e ndererekoy axy reia kuery ma ojepa'e 'rã reĩa gui.

¹⁸ Ema'ẽ ndeyvýry rupi rexa aguã, mba'eta ndea py ono'õ jogueruvy. Anhetẽ ete xee ae rekove rupi aura vy aipoa'e: 'Ha'e kuery ma ndejee remoĩ 'rã renhembojeguaa rami, ha'e kuery re vy neporã 'rã kunhataĩ omenda ta va'e rami', he'i SENHOR.

¹⁹ "Nerenda ma tekao ve'ŷ ha'e ombovaipa pyre ranhe itui va'ekue. Ndeyvy voi ombovaipa pyre itui va'ekue teĩ aŷ ma ndee Sião, nekyrĩ'i vai ete 'rã ndere hekoia va'e kuery ha'e javi oĩmba aguã. Ha'e gui nemombaare kuery ma mombyry 'rã ikuai ndea gui.

²⁰ Nememby kuery ha'e ndepi'a kuery ndegui oipe'aa pyre heta ju vy aipoe'i 'rã okuapy ndevy: 'Kova'e henda ma kyrĩ'i vai ete orevy. Embotuvixave ke roĩ aguã', he'i 'rã okuapy.

²¹ Ha'e gui ndejeupe ae aipo're 'rã: 'Mava'e tu kova'e kuery omoingo va'ekue xememby ha'e xepi'arã? Mba'eta xegui ma xememby kuery ha'e xepi'a kuery oipe'apaa, ha'e na'imembyvei aguã rami aiko va'ekue, amboae yvy katy xereraa, ha'e oayvupy e'ŷ aiko va'ekue. Mava'e tu ha'vy omoingo kova'e kuery xememby ha'e xepi'arã? Xee ma xae'i xerejaa va'ekue ri kova'e kuery magui tu ou?' 're 'rã.'

* 49:6 Atos 13.47 * 49:8 2 Coríntios 6.2 * 49:10 Apocalipse 7.16 * 49:14 Apy ma Sião Jerusalém tetã ma peteĩ kunha rami ijayvu, ha'e ramo SENHOR ombovai 'rã tetã pe.

²² Ha'e gui po rami SENHOR ijayvu: "Xee ma upi 'rā xepo yvy regua kuery oexa pavē aguā, heta va'e kuery oexaa py upi 'rā xevyguá bandeira. Ha'e ramo ha'e kuery ojyva áry oguerupa 'rā nememby kuery ha'e ndepi'a kuery, oaxi'y áry guive.

²³ Ha'e ramo huvixave kuery ma onhemoingo 'rā tuyvrā, ha'e huvixa kunha ma omokambu 'rā. Ha'e rami vy neronde ha'e kuery guenapy'ā re ikuai 'rā, ha'e yvy re ngova omovaē reve onhemo'yvy'i 'rā okuapy ndepy yvýry. Ha'e ramo reikuua 'rā xee ae SENHOR aikoa, ha'e xere ojerovia va'e kuery noximbai 'rāa", he'i.

²⁴ Peteī ipy'a guaxuve va'e gui nda'u oipe'aa 'rā omba'erā ojou va'ekue? Peteī joguerekoxya gui nda'u oo jepe 'rā teve nhuā py ombo'a va'ekue?

²⁵ Ha'e rami teī po rami SENHOR ijayvu: "Ha'e rami avi nhuā py ombo'a pyre kuery oo jepe nho 'rā ipy'a guaxuve va'e gui, joguerekoxya gui ombo'a va'ekue ojep'e'a 'rāe, mba'eta ndere opu'ā va'e kuery re xee apu'ā vy araa jepe 'rā nememby kuery ha'e ndepi'a kuery.

²⁶ Ha'e rami vy ajapo 'rā ndererekoxyaare kuery ngo'o re ae okaru aguā rami, ha'e nguguy py ae vinho py rami oka'u okuapy aguā rami. Ha'e rami rā avakue ha'e javi oikuaapa 'rā xee ae SENHOR aikoa, ndereraa jepea ha'e nderepya, Jacó kuery ruete Ipo'akapa va'e aiko."

50

SENHOR rembiguai ojavykyia rei teī ojeroviap oikoa re ijayvuague

¹ Po rami SENHOR ijayvu: "Mamo tu oī kuaxia para pendexy re amendaai gui xee ajep'e'a ha'e amondouka aguā regua?*" Ha'e nunga ndoikoi ae. Ha'e rami e'ŷ vy mava'e tu xemboreveaty oiko ixupe peē kuery rovendeague? Any, penderekoxya vaia káuxa ae penevendepaa, pejejavyague re pendexy omondoukaa.

² Mba'ixa tu ha'vy xee aju teī avave rei ndojekuaai, ha'e xee roenoī teī avave rei nax-embovai? Xepo nda'u ijapu'a'i vai ete ri rogueraa jepe aguā? Tyrā pa naxembaraetevei ma rogueraa jepe aguā? Mba'eta ye'ē pe xeayvu vy rive amombirupa, ha'e yakā 'rāgue py ajapo tekota e'ŷa optya aguā rami, pira ha'e py ikuai va'e inemba peve. Yy jipoi ramo omanomba 'rā yuvei gui.

³ Xee ae ma yva amoūmba va'e, inhovāarā ajukue voxua guigua ramigua amoī vy", he'i.

⁴ "Ha'e gui xevy pe SENHOR Nhanderuete ome'ē hi'arandu va'e ayvu, ikane'ō va'e pe xeayvu kuaa aguā ambopy'a guaxua rupi. Ko'ē nhavō aje'ive xembovy 'rā, xeapyxa oipe'a 'rā hembiguai rami ajapyxaka aguā.

⁵ SENHOR Nhanderuete xeapyxa oipe'a ramo xee nanhe'ē rendu e'ŷi, ixugui ndajepe'ai guive.

⁶ Ha'e rami vy xekupe rupi anhenupā ukapa, xerova voi nanhomni xe'a moatāa kuery gui, xerova ndarovai xere ijayvu vaikue-ikue ha'e onyvōmba rei va'e gui.

⁷ Mba'eta Nhanderuete xepytyvō axīmba e'ŷ aguā rami. Ha'e ramo xerova ajapo ita rami hatā aguā, mba'eta aikuaa naxīmbai 'rāa.

⁸ Xemboeko porā va'e xea katy'i oī ramo mava'e tu ijayvu rei ta xere? Jajexa uka ha'vy joa py. Mava'e tu xerovai guarā oiko ta? Penhemboja ke ha'vy nhanhomboayvu aguā.

⁹ SENHOR Nhanderuete ae xepytyvōarā oiko ramo mava'e tu xembopaga 'rā? Ha'e rā ha'e kuery ma okanhymba 'rā ajukue vixo'i ho'upaa rami."

¹⁰ Mava'e peē kuery regua nda'u SENHOR mboetea rupi ete peiko, ha'e hembiguai penhe'ē rendu va'e? Pytū rupi tataendy revel'ŷ oiko va'e ma tojerovia SENHOR rery re, toī atā Nhanderuete re.

¹¹ Ha'e rā peē kuery tata pemoendy ha'e hu'y endy va'e perekota katu va'e ma tata ha'e hu'y pemoendy va'ekue rexakāa rupi tema peiko. Ha'e rami avi xegui ae 'rā ou penembopagaarā, roitypa 'rā pejexavai aguā py.

* 50:1 Apy ma Israel kuery pe SENHOR ijayvu. Mba'eta SENHOR e'ŷ opoi Israel gui, ha'e rā Israel kuery ae ojejavypaa rupi ojep'e'a okuapy ixugui.

Sião pygua kuery ovy'a ju aguã re ijayvuague

¹ “Teko porã rupi peikoxe ha'e SENHOR peka va'e, pendu ke xeayvua. Penema'endu'a ke itaova ha'e itakua ha'e va'e gui penemoingoague va'e re.

² Penema'endu'a ke penderu Abraão ha'e penekuavãare Sara re ae. Mba'eta Abraão aenoī jave peteī'i oiko. Ha'e gui aroayvu porã vy amboetave karamboae.

³ Mba'eta xee SENHOR ma Sião voi amboaxy. Amboaxy avi 'rã tetã rupi tekoague ikuai va'e ha'e javi. Ha'e vy ajapo 'rã ha'e rupi teko a e'ý oĩ va'e Éden pyguare rami iporã ju aguã, ajapo 'rã opyta rei va'ekue-'ekue xevygua yvotyty rami. Ha'e ramo oendua ju 'rã ovy'a va'e ha'e py, oguerovy'aa rupi oporaei va'e mba'epu reve.

⁴ “Peikuaa pota ke, xevygua kuery. Xevygua tetã pygua kuery, pendu ke xeayvua. Mba'eta xegui ae ojekuaa 'rã lei, xeguigua teko porã aikuaa uka 'rã yvy regua kuery moexakãmbaarã.

⁵ Mba'eta xeguigua teko porã ma mombyry e'ý oĩ, ojekuaa ma ajogueraa jepea voi. Ha'e rami vy xepo'akaa rupi areko 'rã yvy regua kuery. Ye'ẽ yvýry ikuai va'e voi xerarõ okuapy, xere ojerovia xepo'aka aguã.

⁶ Pema'ẽ ke yva re, ha'e gui yvy katy ju pema'ẽ. Mba'eta yva okanhymba 'rã hataxã rami, ha'e yvy ma inhymamba 'rã ao vaikue rami, hexe hekoa va'e kuery voi omanomba vyvoi 'rã mbarigui rami rive. Ha'e rã ajogueraa jepea ma oĩ riae 'rã, xeguigua teko porã voi nombovaipaai 'rã.

⁷ “Peẽ kuery teko porã peikuaa va'e, pendu ke xeayvu, penekuraxõ re xeguigua lei oĩa va'e. Pekyje eme avakue pendejojai rei teĩ, penhemondyi eme pendere ijayvua rei ramo.

⁸ Mba'eta ha'e kuery ma omombaa 'rã ajukue vaikue rami, vexa'i rague vixo'i ho'upaa rami ae. Ha'e rã xeguigua teko porã ma oĩ riae 'rã, ha'e ajogueraa jepea ma ta'y jevy-jevy ikuia peve 'rã oĩ.”

⁹ Emyĩ ke, SENHOR ndepo'akapa va'e, emyĩ ke. Ndejee emoĩ nembaraetea rexia uka aguã. Emyĩ ke ymave rupi ymagua kuery ikuai jave guare rami. Ha'e rami vy ndee e'ý ri ty'y Egito yvy mombaare, ha'e ye'ẽ rupigua jukaare?

¹⁰ Ndee e'ý ri ty'y ye'ẽ typya mombiruare? Mba'eta ye'ẽ mbyte rupi taperã rejapo va'ekue, reraa jepe va'e kuery oaxapa aguã.

¹¹ Ha'e rami vy SENHOR oepy va'e kuery ojevypa ju 'rã. Sião tetã py oupa 'rã okuapy oporaei reve. Ha'e kuery akã re ma vy'a opa e'ý va'e 'rã oĩ coroa rami. Ha'e kuery oupity va'erã va'e ma mby'a porã ha'e vy'a anho. Ha'e rã mboriau ha'e mby'a vai ma okanhymba 'rã.

¹² “Xee, xee ae rombovy'a va'e. Mba'exa tu ha'vy ndee rekyje 'rã avakue omano va'erã gui rive, ha'e avakue ra'y kuery jai rogue rami okanhya va'erã va'e gui?

¹³ Mba'exa 'rã tu ndee nderexarai SENHOR nemoingoare gui? Mba'eta ha'e ae yva pyoare ha'e yvy nhonoare oiko. Mba'e re tu ndee ko'ẽ nhavõ rekyje reikovy joavyky rei va'e nhomomba aguã rami ikuai va'e poxya gui rive? Mamo tu opyta joavyky rei va'e poxya?

¹⁴ Mba'eta escravo-rã heraa pyre opoipaa voi 'rã, nomanoí 'rã ha'e py, yvyra rupa py nomboguejyai 'rã ha'e py. Ha'e rami 'rãgue py ho'u va'erã ndoatai 'rã.

¹⁵ Mba'eta xee ma SENHOR Nderuete. Yai revovo onhendu aguã ye'ẽ omomyĩ va'e ma xee ae. SENHOR ixondaro reta va'e xerery.

¹⁶ Amoĩ 'rã xeayvu ndejuru py, ha'e romo'ã 'rã xepo py, yva pyau aipyo ha'e yvy pyau anhono aguã. Ha'e rami vy Sião pygua kuery pe ‘Peẽ ma xevygua kuery’, ha'e 'rã.”

¹⁷ Emyĩ ke, ndee Jerusalém tetã! Emyĩ ke, ha'e epu'ã ju! SENHOR po gui karo ipoxya oĩa rejopy va'ekue gui rey'u ae ma. Karo nhomoakanhymbaarã oĩa va'e gui rey'upa ma.

¹⁸ Nememby kuery, ndepi'a kuery rerekoi'i va'ekue regua neĩ peteīve ma nanepytyvõia rupi oiko. Remongakua'i va'ekue neĩ peteīve ma ndepo re ndojopy herekovyi.

¹⁹ Mava'e tu nemboaxyarã oĩ? Mba'eta ndere ou va'ekue mokoĩ regua: nembojexavaia ha'e nemombaa, karuai ha'e kyxe. Mba'exa tu ha'vy nembovy'aarã noĩ?

²⁰ Mba'eta nememby kuery ha'e ndepi'a kuery ho'apa ma inhakanhy vy. Tape oĩ va'e-va'e rupi ma onheno okuapy, nhuã py guaxu ombo'a pyre rami. Mba'eta ha'e kuery re ou SENHOR poxya, Nhanderuete ijayvu eteague.

²¹ Ndee rejexavai ha'e reka'u ri teĩ vinho gui e'ŷ ta'vy. Ha'e nunga rupi endu ke pova'e nunga.

²² SENHOR Nderuete, ojeupeguia kuery repya aipoe'i: “Ndepo gui aipe'a ju 'rã karo nemoakanhyarã ha'e xepoxya oĩa. Ha'e va'e gui ma nderey'uvei 'rã.

²³ Ha'e gui nembojexavai reia kuery po py ju 'rã amoĩ, ndevy pe ‘Ejero'a ke, nde'áry rupi roaxa aguã’, he'i va'ekue po py ae. Mba'eta renheno ramo ndekupe áry rupi ha'e kuery oguata va'ekue, yvy e'ŷ vy tape oĩ va'e rupi oguataa rami.”

52

¹ Emyĩ ke, ndee Sião tetã. Emyĩ ke, emoi nembaraete aguã. Ndee Jerusalém tetã iky'a e'ŷ va'e, enhemonde ke ndeao iporâve va'e py. Mba'eta ndea py ma opire omboi uka va'e e'ŷ ndoikevei 'rã, neĩ ndojeky'a'o ukai va'e kuery voi.

² Enhembojaity ke yvy ku'i gui. Evy ke Jerusalém, ha'e eguapy ju einy. Eipe'a ke corrente ndeaju'y jokuaague, Sião memby escravo-rã ndereraa va'ekue.

³ Mba'eta po rami SENHOR ijayvu: “Hepy re e'ŷ nevendeague rami peráta re e'ŷ ju 'rã rojogua”, he'i.

⁴ SENHOR Nhanderuete aipoe'ive ju: “Jypy'i ma xevyguia kuery Egito yvy katy oje'oi raka'e ha'e py ikuai aguã. Ha'e gui ma Assíria pygua kuery ju mba'e py e'ŷ ombojexavai.

⁵ Ha'e gui aŷ teigüe ju mba'e tu ha'e py oiko? Mba'eta xevyguia kuery ogueraapaa rive ju hepy re'ŷ. Ijavyky reia kuery ojapukai atã okuapy. Ha'e nunga rupi xerery re ijayvu vaikue-ikuea ko'ẽ nhavõ”, he'i SENHOR.*

⁶ “Ha'e rami teĩ xevyguia kuery oikuua nho 'rã xerery. Ha'e va'e ára ma oikuua 'rã okuapy xee ‘Apy ma aĩ’ ha'e va'ea”, he'i SENHOR.

⁷ Iporã ete! Yvyty áry rupi mba'emo pyau mombe'ua ou jekuaa! Ha'e va'e ma omonhendu ouvy nhandekuai porã ju aguã, omombe'u iporã va'e, nhandereraa jepea regua. Ha'e vy Sião pygua kuery pe ma “Penderuete ipo'aka ma”, he'i.*

⁸ Aipo ma, peneretã rarõa kuery ojapukai nhendu. Ha'e kuery ov'y a reve ojapukai atã okuapy, mba'eta oexa Sião tetã katy SENHOR ou jevy rã.

⁹ Peporaei ke pekuapy, peẽ tekoague Jerusalém py pendekuai va'e. Pevy'a pekuapy peteĩ rami, mba'eta SENHOR ombovy'a ju ma ojeupeguia kuery, oepy ma Jerusalém tetã.

¹⁰ Yvy regua kuery ha'e javi oexaa py SENHOR oupi ojyva iky'a e'ŷ va'e. Ha'e ramo yvy apy guive oexapa 'rã Nhanderuete nhandereraa jepe rã.

¹¹ Ha'e nunga rupi pejep'e a ke, pejep'e a upe gui, ha'e peju ju. Pejopy eme ha'eve'ŷ va'e re. Pejep'e a ke ha'e kuery mbyte gui. SENHOR pegua tembiporu peraa va'e kuery, pejeky'a'o ke.*

¹² Pejep'e a pojava rei eme guive, pejava eme, mba'eta SENHOR oo 'rã penerenonde, Israel kuery ruete penderakykue rupi avi 'rã oo penerarõ vy.

Nhanderekovia SENHOR rembiguai oiko axy aguã re ijayvuague

¹³ “Ha'e gui xerembiguai ma oiko kuaa 'rã. Ha'e ramo omboyvatea ha'e omboetea ete 'rã, pavẽ áryve 'rã oiko.

¹⁴ Ha'e rami avi heta oexa vy onhemondyi, mba'eta pavẽ gui ombovaikueave, ava rami ve'ŷ omombytaa rã.

¹⁵ Ha'e rami ae avi yvy regua kuery áry rupi omboayvi 'rã. Ha'e ramo huvixave kuery onhemondyipa vy ombotypa 'rã ojuru, mba'eta oexa 'rã ha'e kuery pe omombe'ua va'ekue'ŷ, ha'e oikuua nho 'rã oendu va'ekue'ŷ.”*

* 52:5 Romanos 2.24

* 52:7 Romanos 10.15

* 52:11 2 Coríntios 6.17

* 52:15 Romanos 15.21

53

¹ Mava'e tu oguerovia ayvu romombe'u va'ekue? Mava'e pe tu SENHOR oikuua uka opo'akaa?*

² Mba'eta henonde hembiguai yvate-vateve ov yvyra rapytakue renhoi rami, yvy piru reia py yvyra rapo gui hi'yky hoky va'e rami. Jaexa rā omboete pyrā e'ŷ merami, na'iporāi guive. Nei peteī henda py voi noī iporāa jarovy'a va'erā.

³ Oayvupy e'ŷve oiko, avakue pavē gui oipotapy e'ŷve ete. Ava oiko axy va'e, tekoaxy oendu jepi va'e guive. Ha'e ma avakue ndoayvui vy ixugui ngova omo'ã okuapy. Ha'e ramo nhande voi ndajaikuua potai va'ekue hexe.

⁴ Mba'eta anhetē ojee ae ogueraa nhanderekox kykue, nhanemba'eaxy omoimba ojee. Ha'e rā nhande ma jaikuua va'ekue ombopaga pyrā rā Nhanderuete omoingo axy ha'e ombojexavaia rami.*

⁵ Ha'e rami tei nhande nhanderekox vaiaty py ma oipyxoa, jajeavyague re ae omou'ūa. Hexe oī tekoaxy nhanemoingo porāarā, ha'e oinupāa ague re vy nhande jakuera.

⁶ Nhande kuery ha'e javi nhakanhyumba javy vixa'i rami, peteī-tei jajepe'a va'ekue tapegui. Ha'e ramo hexe ma SENHOR omoi nhande kuery ha'e javive reko vaiaty.*

⁷ Ha'e ma omoingo axya ha'e omo'yvy'i ia tei ndoipe'ai ojuru. Vixa'i ojukaa aguā katy ogueraa va'e rami, vixa'i rague ayaa renonde ogueraa rā okyrirī rata'i va'e rami ogueraa tei ojuru ndoipe'ai.

⁸ Anhetē rupi e'ŷ oikuua potaa reve ogueraa. Ha'e rami rā ta'y kuery re avave rei nei noexa'ai. Mba'eta oikove va'e kuery ikuiai gui oipe'aa. Xeretarā kuery ojeavyague re ae ojukaa.*

⁹ Ha'e hetekue ruparā ma ojoua heko vai va'ekue mbyte py, omano vy iporiau e'ŷ va'e revogua opyta tei. Ha'e rami avi teko vai ndojapoi, nei peteī henda py ma ayvu vai noenduai ijuru gui.*

¹⁰ Ha'e rami tei SENHOR oipotaa rami ae omou'ū ha'e omoingo axy uka. Ha'e ramo jejavya regua ome'ē mbyrā guekove ome'ē rire oexa nho'rā gua'y kuery, oiko pukuve 'rā guive. Ha'e ramo ipo py SENHOR oipota va'e oiko porā'rā.

¹¹ Ha'e gui ojexavaiague gui iporā va'e oiko ramo oexa vy ov'y'a vaipa 'rā. Mba'eta Xerembiguai heko porā va'e oikuua rupi vy heta 'rā omboeko porā, ojee ae ha'e kuery ojeavyague ogueraa rire.

¹² Ha'e nunga rupi heta 'rā xee ame'ē ixupe guarā. Ha'e ramo ipo'akapa va'e kuery mbyte omboja'o'rā mba'emo porā, omanoa py guekovea ome'ē rire. Heko vai va'e oikoa rami jaikuua va'ekue tei ojee ae ogueraa heta ojeavyague, heko vai va'e kuery re ojerure guive.*

54

Sião pygua kuery ikuai porā aguā re ijayvuague

¹ SENHOR aipoe'i: "Ndee kunha, nememby e'ŷ va'e ae kyrī va'e nereikuavāi va'ekue, eporei ke revy'aa rupi. Kyrī va'e raxy nerendui teri va'ekue, evy'a ke reporaei reve, erojapukai. Mba'eta kunha opoi pyre rami reiko va'ekue ri nememby kuery hetave 'rā ome reve riae oiko va'e memby kuery gui.*

² Ha'e nunga rupi embopyve ke ndero reia renda, emoitāve ke ndero ao'ia pei aguā. Embotuvixa e'ŷ eme, embopukue ikuuarā, ha'e emo'ã ratāve ke yvyra rakua ijytarā.

³ Mba'eta pei kuery penderetave 'rā peovy reiporu kuaa regua ha'e reiporu kuaa e'ŷa katy. Ha'e gui neremiarirō kuery ipo'aka 'rā yvy regua kuery re, ha'e heko ju 'rā tetā opyta rei va'ekue py.

* 53:1 João 12.38, Romanos 10.16 * 53:4 Mateus 8.17, 1 Pedro 2.24 * 53:6 1 Pedro 2.25 * 53:8 Atos 8.32-33

* 53:9 1 Pedro 2.22 * 53:12 Lucas 22.37 * 54:1 Apy ma Israel kuery ha'e Jerusalém tetā opyta rei va'ekue pe ijayvu, peteī kunha opoi pyre pe rami (Gálatas 4.27).

⁴ “Ekyje eme, mba'eta nanemoximbaavei 'rā. Eximba rei eme, nanemo'yvy'iavei 'rā. Mba'eta nderexaraipa 'rā nekunhatai jave reximba reia rupi reikoague re, imeve'ŷ va'e rami reikoague re guive.

⁵ Mba'eta nemoingoare ae oiko neme, SENHOR ixondaro reta va'e ma hery. Israel kuery ruete Iky'a e'ŷ va'e ma nderepya, ‘Yvy jave regua ruete’ 'epy va'e ae.’”

⁶ Nderuete aipoe'i: “Kunha opoi pyre iporiau rei va'e, ha'e kunhatai oeja pyre rami reiko va'ekue ri SENHOR nerenoj ju.

⁷ Xapy'a rai'i xee roeja va'ekue ri romboaxy etea rupi ju 'rā rogueru.

⁸ Xepoxy etea rupi ndegui xerova amo'ã xapy'a'i va'ekue ri romboaxya opa e'ŷ va'e ju aendu”, he'i SENHOR nderepya.

⁹ “Xevy pe rā ha'e nunga Noé oiko jave guare rami, mba'eta aura Noé oiko jave guare rami ve'ŷ yy py yvy ndajao'ivei aguā re. Ha'ekue rami ae aŷ ma ndevy pe ju aura ndaxevaivei, neñ ndorojou vaivei aguā re.

¹⁰ Mba'eta yvyty ikuai va'e ojepe'apa, ha'e yvy'ã voi ovapa 'rā tei romboaxya ma ndopai 'rā, ha'e ndevy pe xereve guarã ajapo va'ekue nombovaipaai 'rā”, he'i SENHOR nemboaxy va'e.

¹¹ “Ndee Sião tetā, reiko axy ha'e nanembovy'aavei rā rejexavai rei va'ekue. Ha'e rami tei ema'ẽ, ndea py ita oity pyre ambojo'a ju vy pytā va'e py 'rā amboja, ha'e ita safira py ju 'rā amboyta.†

¹² Ndea py torre ajapo ju 'rā rubi gui, kora rokē ma carbúnculo gui, ha'e tetā kora ha'e javi rupi ma itaendy iporāve va'e gui 'rā ajapo.

¹³ Nememby kuery ha'e ndepi'a kuery ha'e javi ma xee SENHOR ae 'rā ambo'e. Ha'e ramo ikuai porã 'rā opa mba'e py.*

¹⁴ Teko porã rupi 'rā anhangareko ndere nemoingo axyarã va'ekue gui mombyry, ha'e ramo nderekyevei 'rā. Nemondyiarã va'ekue gui voi mombyry 'rā reiko, ndouvei 'rā ndere.

¹⁵ Xapy'a rei ndere opu'ã va'e oiko tei xee ambou va'e e'ŷ 'rā. Ha'e ramo ndere opu'ã va'e oitypaa 'rā neronden.

¹⁶ Mba'eta xee ma ferro re ombo'eapo va'e moingoare, tata py hatapyi re oipeju vy tembiporurã ojapo va'ety. Amoingo avi nhomombaarã mba'emo ombovaipa aguā.

¹⁷ Ha'e rā nderovai ma tembiporu revegua ou vy ndojapoi 'rā mba'eve. Ndere ijayvu rei va'e ou tei ndee 'rā ndepo'aka. Ha'e ramigua ma xee SENHOR ambou xerembiguai kuery peguarã amboeko porã vy”, he'i SENHOR.

55

Nhomboaxypa aguā re ijayvuague

¹ “Peẽ kuery pendey'uvei va'e, pendu ke, ha'e peju yvu oĩa py pey'u. Pendeperáta e'ŷ va'eri peju pejogua ha'e pekaru. Tá, peju ke pejogua vinho ha'e kamby, peráta re'ŷ, hepy re'ŷ.

² Mba'e re tu peráta peme'ẽ 'rā tembi'u re'ŷ? Mba'e re tu pendery'ai 'rā penembovy'aarã re'ŷ? Pendu ke, pe'u iporã va'e. Ha'e rami vy pevy'a 'rā iporã ete va'e re.

³ Pejapyxaka porã ke, ha'e peju xea py. Pendu, peikove riae aguā. Mba'eta pendevy ajapo 'rā xereve guarã raka'e rā peve guarã, ha'e romboaxy 'rā Davi pe xeavyuague rami vy.*

⁴ Mba'eta ha'e va'e ma amoĩ raka'e xepo'akaa kuaa ukaarã yvy regua kuery pe, huvixa yvateve va'e ha'e kuery re opena va'erã.

⁵ Ma'ẽ, peẽ kuery penoĩ 'rā pexa va'ety e'ŷ regua kuery. Ha'e kuery penderexa va'ety e'ŷ tei onha 'rā jogueruvy pendea katy. Ha'e kuery ma SENHOR Penderuete, Israel kuery ruete Iky'a e'ŷ va'e re ojerovia etea rupi ou okuapy, penemboete uka ramo.”

⁶ Peka ke SENHOR ojejou uka teria ja, pejapukai ixupe ha'e'i py teri oĩa ja.

† 54:11 Safira ma itaendy hovy va'e, rubi ma pytã va'e, ha'e rā carbúnculo ma pytã va'e tuvixave va'e. Ita hepyve va'e meme. * 54:13 João 6.45 * 55:3 Atos 13.34

⁷ Tove heko vai va'e tojep'e'a oikoaty gui, ojejavy rei va'e tojep'e'a ha'eve'ŷa rami onhembopy'aa gui. Tojeko rerova SENHOR pe, mba'eta omboaxy 'rã. Tojevy Nhanderuetea py, opa mba'e py joperdoa va'e ramo.

⁸ "Mba'eta xee anhembopy'aa ma peẽ kuery penhembopy'aa ramigua e'ŷ, ha'e xerekovi peẽ kuery reko ramigua e'ŷ", he'i SENHOR.

⁹ "Mba'eta yvy gui yva yvate etevea rami avi penderekovi xerekovi voi yvateve, ha'e peẽ kuery penhembopy'aa gui anhembopy'aa yvateve avi.

¹⁰ Mba'eta oky ha'e yro'y yva gui ho'a vy ha'ekue katy ju ndooi 'rã yvy omoakŷ e'ŷ re, ha'e rami vy ojapo 'rã mba'emo ra'yĩ moaãare ojouve ju aguã rami, ha'e mbojape ho'uxe va'e voi ojou aguã rami,

¹¹ ha'e rami ae avi xeayvu xejuru gui oẽ va'e voi ndojevy rivei 'rã xea py. Ha'e rami 'rãgue py ojapo 'rã xee aipota va'e, anhembopy'aague ojapopa 'rã, ha'e rami aguã ae ambou rire.

¹² "Ha'e rami rã peẽ kuery peo 'rã pevy'a reve, pendekuai porã'ia rupi roguereko 'rã heravy. Penerenonde yvyty ha'e yvy'ã ikuai va'e poraei onhendu 'rã, yvyra ikuai va'e voi ojepopete 'rã okuapy.

¹³ Ha'e gui juu'y ikuaiague py yvyra tuvixa va'e henhoi 'rã, jai rogue rekoria henhoi 'rã murta.* Ha'e nunga ma SENHOR re ima'endu'a porãha'e omboetea aguã oiko 'rã imarã e'ŷ va'e, raka'e rã peve guarã."

56

Judeu e'ŷ va'e kuery avi oenoĩ aguã re ijayvuague

¹ SENHOR aipoe'i: "Teko porã rupi ete ke peiko, anhetã rupi pendekuai, mba'eta rogueraa jepea ovaẽ rai'i ma, xeguigua teko porã ojekuaa rai'i ma.

² Ovy'a ete 'rã avakue ha'e rami ikuai va'e, avakue ra'y kuery ha'e nunga re oĩ atã va'e, sábado ára omongy'a rei e'ŷ aguã ojejoko, ha'e opo py mba'emo vai ojapo rei e'ŷ va'e."

³ Amboae yvy guigua SENHOR re onhemboja va'e aipo te'i eme: "SENHOR xepe'a 'rã ojeupeguia kuery mbyte gui." Neĩ eunuco voi ojeupe "Yvyra pirukue rami rive aiko", te'i eme.*

⁴ Mba'eta SENHOR aipoe'i: "Eunuco teĩ xevygua sábado ára nhavõ xemboetea rupi oiko, xee aipota va'e ojee omoĩ ha'e xereve guarã ajapo va'ekue rupi oiko ramo

⁵ xero py ajapo 'rã ha'e va'e re ima'endu'a porãha'e aguã rami, xero korapy py, ha'e ixupe ame'ẽ 'rã peteĩ tery gua'y ha'e guajy kueryrã va'ekue gui oguerovy'ave va'erã. Ha'e kuery peteĩ-tei pe ame'ẽ 'rã heryrã imarã e'ŷ va'e, ivaipa va'erã e'ŷ.

⁶ Ha'e gui amboae yvy regua teĩ SENHOR omboete aguã onhemboja, ha'e SENHOR rery omboetea rupi hembiguairã ikuai aguã, tá, sábado ára omongy'aa rupi e'ŷ omboete, ha'e xereve guarã ajapo va'ekue rupi ikuai ramo

⁷ ha'e kuery voi xee araa 'rã xevygua yvyty iky'a e'ŷ va'e py, ambovy'a 'rã xevygua oo onhembo'eaty py. Ha'e ramo ha'e kuery ome'ẽ 'rã mba'emo ogueru va'e, ha'e xee ajou porã 'rã xevygua altar áry mba'emo ha'e kuery ome'ẽ va'e. Mba'eta xevygua oo pe ma 'Yvy regua kuery ha'e javi onhembo'e atyrã oĩ, 'ea 'rã."†

⁸ Israel kuery opa rupi oaĩmba va'ekue SENHOR Nhanderuete omboaty ju vy aipoe'i: "Xee amboatyve ju 'rã, ono'õ ma voi okuapy va'ekue amboetave vy", he'i.

Israel kuery rerekoa kuery árareveguia e'ŷ rami ikuai re ijayvuague

⁹ Peẽ mymba jai rupi pendekuai va'e, ha'e ka'aguy rupigua inharõ va'e, peju ke pekaru.

¹⁰ Mba'eta ha'e kuery retã rarõa kuery ma árareveguia e'ŷ rami meme ikuai, mba'eve ndoikuuai. Jagua onhe'ẽ e'ŷ va'e ikuai va'e meme, onhe'ẽ aguã nda'evei va'e. Ha'e kuery ma oexa ra'ua re rive 'rã ikuai, inhate'ŷ vy okexe vai va'e.

* 55:13 Murta ma yvyra tuvixa ha'e ovareve va'e. * 56:3 Eunuco ma tembiguai oa'yijo pyre. Ymave rupi eunuco ha'e amboae yvy guigua kuery ma nda'evei va'ekue Nhanderuete pegua kuery mbyte py ikuai aguã (Deuterônômio 23.1-3). Aŷ gui ma ha'eve, apy ijayvua rami. † 56:7 Kova'e ayvu rupi Jesus ijayvu Mateus 21.13, Marcos 11.17 ha'e Lucas 19.46 py.

¹¹ Ha'e kuery regua ma jagua rami ho'upa rei va'e guive, okaru teĩ naevyatã 'rã. Joe opena va'e mba'eve oikuua va'e'ŷ ikuai. Peteĩ-teĩ oiko 'rã ha'e ae oipotaa rami, peteĩ-teĩ ojoupavexea rupi rive 'rã oiko, ha'e rami ikuai va'e ma guive rã.

¹² Ha'e kuery joupe-upe aipoe'i 'rã: “Peju ke, aru 'rã vinho irove va'e jaka'u aguã. Ha'e gui ko'ẽ rã ange guare rami ae ju 'rã nhandekuai, ha'e rami e'ŷ vy jaka'upave 'rã”, he'i okuapy.

57

Mba'emo ra'angaa mboetea rupi Israel kuery ikuiaia re ijayvuague

¹ “Heko porã va'e kuery omano teĩ avave rei ndoikoi ha'e nunga re oikuua pota va'e. Avakue ojeroviapy heraa ramo avave rei noexa'ãi 'rã ha'e nunga re, mba'eta heko porã va'e kuery ranhe 'rã heraa nhomoingo axyarã ou e'ŷ re,

² ha'e ramo oike 'rã mby'a porã oendu aguã py. Mba'eta teko porã rupi ikuai va'ekue opytu'u 'rã ngupa rupi.

³ “Ha'e gui peẽ kunha imba'evyky va'e pi'a kuery, peju ke apy, itavy rei rã ojavyky reipy pi'a kuery.

⁴ Mba'exagua tu pembojaru rei pekuapy? Mba'exagua rovai tu peipe'a pendejuru, ha'e pendeayvu rei? Peẽ kuery tu teko vai ha'e apu guigua meme.

⁵ Peẽ kuery ma tavy reia rupi anho pendekuai yvyra hogue ana va'e mbyte rupi. Ha'e py ma pendera'y kuery ae pejuka uka 'rã yvyugua oĩ va'e py, ha'e itaova pa'ũ rupi.

⁶ Ha'e rami vy ita yxyi rei va'e mbyte rupi penderekó rami ae 'rã pendekuai. Ha'e va'e áry ae avi penhoë 'rã heakuã porã va'e, ha'e ta'angaa pe rive peme'ẽ 'rã mba'emo aju. Xee nda'u arovya'a 'rã ri ha'e rami pendekuaia?

⁷ Ha'e gui yvtyt yvateve va'e áry remoõ 'rã nderupa. Ha'e katy ju reẽ 'rã ta'angaa pe mba'emo reme'ẽ aguã.

⁸ Nerokẽ kupe ha'e okenda rupi rembopara 'rã nda'evei ete va'e py. Ha'e gui remoatã 'rã nheovãa, ha'e rejeupi 'rã tupa py, rembopy 'rã ndetavy aguã. Ha'e kuery reve pejogueroayvu 'rã reipota va'e re. Ha'e vy 'Nhandetavy ha'vy' 're vy rema'ẽ 'rã ipire reia re.

⁹ Ha'e gui huvixavea py reo 'rã mba'emo kyra ha'e heakuã porã va'e reme'ẽ va'erã reve. Ha'e gui mombyry katy 'rã remondouka ndeayvu reraarã, yvyra rupa peve.

¹⁰ Mombyry ete reguata vy nekane'õ teĩ 'Ovare va'e'ŷ ma ta'vy ajapo', nderei 'rã. Mba'eta rejou 'rãe reka va'e. Ha'e nunga rupi ae nanekangyi 'rã.

¹¹ “Ha'e gui mava'e gui nda'u rekyje, apu rupi reiko aguã? Mba'eta nanema'endu'ai xere, xerekó re ndereikuua potai guive. Yma guive akyrirĩ teve xerenonde ndere-jererokyjei aguã?

¹² Xee aikuua ukapa 'rã ha'e rami ete reikoa. Ha'e ramo nerembiapokue ma mba'everã ndovarei 'rã ndevy.

¹³ Rejapukai ramo tove mba'emo ra'angaa rerekó va'e ae tandereraa jepe! Ha'e nunga ma yvytu rive 'rã ombovevepa heravy, peteĩgue'i oipeju teĩ ogueraapa vyvoi 'rã. Ha'e rã xere ojerovia va'e kuery pe ma yvy ame'ẽ 'rã imba'erã, ha'e ramo hekoia 'rã xevygua yvtyt iky'a e'ŷ va'e áry.”

Ojeko rerova va'e kuery ikuai porã aguã re ijayvuague

¹⁴ Aipo'ea 'rã: “Pembojoja ke taperã, pembojoja ha'e perekó katu, xevygua kuery renonde gui peipe'apa onhepyxanga aguã oĩ va'ekue.”

¹⁵ Mba'eta po rami ijayvu Yvate ete va'e, Ipo'akapa va'e, Hi'amba marã e'ŷ va'e, Iky'a e'ŷ va'e hery va'e. Ha'e vy aipoe'i: “Xee ma yvate ete iky'a e'ŷa py aiko va'e. Aiko avi iporiau rei ha'e ikangy va'e reve, ambopy'a guaxu aguã ikangy va'e, ha'e ambovy'a ju aguã iporiau rei va'e.

¹⁶ Mba'eta riae e'ŷ 'rã xee ajojou vai, ndaxepoxy riae'i 'rã guive. Mba'eta ha'e rami aiko va'e rire ha'e kuery nhe'ẽ ikangypa vy ho'apa 'rãgue xerenonde, ha'e xee amoingo va'ekue pytuãa opa 'rãgue.

¹⁷ Heta va'e kuery mba'emo oipotapa reia rupi ikuai ramo ma xepoxy vy amoingo axy va'ekue. Ha'e rami vy xerova amo'ā, xepoxy teī xenhe'ē rendu e'ŷ va'e ma ha'e kuery ae oipotaa rami rive ikuai.

¹⁸ Ha'e kuery ikuai aexa teī amonguera 'rā. Ha'e vy areko ha'e ambovy'a ju 'rā ojae'o okuapy va'e.

¹⁹ Ha'e kuery xereroporai ramo ame'ē 'rā mby'a porā. Mby'a porā ame'ē 'rā mombyry ikuai va'e pe, ha'e'i py ikuai va'e pe guive. Ha'e rami vy xee amonguerapa 'rā", he'i SENHOR.

²⁰ "Ha'e rā heko vai va'e ma ye'ē omyī va'e rami ikuai. Mba'eta ha'e nunga ndopytu'ui 'rā, yy ojegui ae omombo 'rā yapo ha'e iky'akue.

²¹ Ha'e rami vy heko vai va'e re ma noī 'rāe mby'a porā", he'i Nhanderuete.

58

Ha'evea rami okaru e'ŷ re ikuai aguā re ijayvuague

¹ "Ejapukai atā, ejejoko eme, ejapukai mimby guaxu rami. Xevyguia kuery pe eikuaa uka heko vaia, Jacó kuery pe emombe'u ojeavya.

² Ha'e rami ete ikuai teī xereka merami 'rā ko'ē nhavō. Ovy'a merami xevyguia tape oikuua vy teko porā rupi ikuai va'e rami teī, ha'e nguuete reko gui ndojepe'ai va'e rami. Ha'e rami vy xevy oporandu 'rā teko porā re, onhemboja merami xee Nguuete va'e re.

³ Ha'e rami vy aipoe'i 'rā: 'Mba'e re tu rokaru e'ŷ re orekuai teī ndee ndereikuua potai? Mba'e re tu orenhe'ē py rojexavai ramo ndee underexa potai ri?' he'i okuapy. Mba'eta peē kuery pekaru e'ŷ re pendekuaia ára peē ae peipota va'e re rive 'rā pepena, ha'e pejapopa 'rā penerembiaporā oī va'e.

⁴ Ha'e rami vy pejoguero'aa rupi rive 'rā pendekuaia pekaru e'ŷ re, penhomotare'ŷ, ha'e pendepo iky'a va'e py pejojuka aguā. Aŷ ha'e rami ete pekaru e'ŷ re pendekuaia ramo pendeayvua noenduai 'rā yva re.

⁵ Ha'e rami ete ri nda'u pekaru e'ŷ re pendekuaia aguā xee aeja raka'e? Mba'eta pete'i i ára re avakue ojexavai 'rā onhe'ē py, oakā oity 'rā jai rogue rami, ha'e oguýry rupi oipyo 'rā ajukue voxá guigua tanhimbu reve. Ha'e ramia pe ri nda'u 'Jakaru e'ŷ re nhandekuaia ára SENHOR nhandejou porā 'rā', peje?

⁶ "Ha'e rami 'rāgue py po rami aguā e'ŷ teve pekaru e'ŷ re pendekuaia aguā aeja raka'e? Teko vai py ojokua pyre pepoi aguā e'ŷ teve, ha'e tembiguai jokuaa pejora aguā, ombojexavaipy peraa jepe, ha'e pete'i-teī oguereko axya pemomba aguā e'ŷ teve?

⁷ Okaruxe va'e pe mbojape pemboja'o aguā e'ŷ teve, ha'e pendero py iporiaukue hoo e'ŷ va'e pemovaē aguā, ipire rei va'e pexa vy pemonhemonde, ha'e peē ramigua gui napenhemí aguā e'ŷ teve?

⁸ Ha'e rami ri pekaru e'ŷ re pendekuaia ramo penerexakāa ojekuaa porā 'rā ko'ē rami, ha'e are e'ŷ re pekuera aguā avi 'rā ojekuaa. Penderekō porāa ojekuaa 'rā penerenonde, ha'e penderakykue ma SENHOR guexakāa rupi onhangareko 'rā pendere.

⁹ Ha'e ramo pejapukai ramo SENHOR ombovai 'rā. Pendereraa jepe aguā re pejapukai ramo 'Apy ma aí', he'i 'rā. Xapy'a rei penembyte gui peipe'a ramo pejoguererekō axya, penhomongyje reia ha'e ayvu rei guive,

¹⁰ xapy'a rei okaruxe va'e pe mba'emo pemboja'o aguā pendepy'a re pemoi, ha'e ojexavai rei va'e pemoevyatāmba aguā, ha'e ramo ma penerexakāa ojekuaa 'rā pytūa py, pendea py pytūa oī va'ekue ma kuaray mbyte rami 'rā hexakā.

¹¹ Ha'e ramo SENHOR pendererekō riae 'rā, penemoevyatā 'rā tekao e'ŷa py teī, ha'e omombaraetepa 'rā penekāgue. Peiko porā 'rā yvotyty omoakŷ riae py rami, ha'e yvu peteigüeve ma ipiru e'ŷ va'e rami avi.

¹² Ha'e gui penda'y kuery ju omoatyrō 'rā tekao ivaipa va'ekue. Pemboyta pyau ju 'rā oo ymague. Pendevy aipo'ea 'rā 'Kora pa'ū moatyrōa', ha'e 'Tekoa ha'e tape ymague mbopyaua', 'ea 'rā.

¹³ "Xapy'a rei sábado ára penhemongy'aa gui pejejoko, ha'e mba'emo peẽ ae pejapoxe va'e pejapoa gui xevyguá ára iky'a e'ŷ va'e py, ha'e rami 'rāgue py sábado ára pe 'Iporã ete SENHOR ára iky'a e'ŷ va'e nhambóete aguã' peje ramo, ha'e pendekuatiy rami ve'ŷ xemboete ramo, peẽ ae peipotaa rami ve'ŷ pendekuai aguã, neĩ ayvu reko rei py voi pendeayvu e'ŷ aguã,

¹⁴ ha'e rami rã xee SENHOR re ae 'rã pevy'a. Ha'e ramo xee ajapo 'rã yvyty yvate va'e re peẽ peovy aguã rami, ha'e romombaraete 'rã peneramoõ Jacó peguarã ame'ê va'ekue re", he'i. SENHOR ojuru py ae ijayvu.

59

Israel kuery reko vaia re ijayvuague

¹ SENHOR po ma ijapu'a'i va'e'ŷ pendereraa jepe e'ŷ aguã, nda'ijapyxa ve'ŷi guive pendeayvua oendu e'ŷ aguã.

² Ha'e rami 'rāgue py pejejavya rima penemboja'o Nhanderuete gui, penderekó vaia ae ojapo pendegui ngova omo'ã aguã rami, pendeayvua oendu e'ŷ aguã.

³ Mba'eta pendepo huguypa riae, ha'e penekuã re ma pejejavya anho oĩ. Pendejuru ma apu rupi 'rã ijayvu, ha'e peneapekû re ma teko vai anho 'rã oĩ.

⁴ Mba'eta avave rei ndoikoi teko porã re ojapukai va'erã, ndoikoi anhetã rupi ojexa uka va'erã huvixa kuery renonde. Ha'e rami 'rāgue py ovare e'ŷ va'e re rive ojerovia, ijapu rei 'rã okuapy. Ojejavy aguã tema oguereko'i 'rã, ha'e teko vai ju oikuavã.

⁵ Omboaku 'rã mboi rupi'a, ojapo 'rã nhandu kya. Hupi'a ho'u va'e omano 'rã, ha'e hupi'a re opyrõa ramo oiko 'rã mboi.

⁶ Ha'e gui ikyo ojapo va'ekue ma ndovarei 'rã aorã, mba'eta ha'e kuery rembiapo py avave rei nonheovãai 'rã. Ha'e rami 'rāgue py ha'e kuery rembiapo ma teko vai anho, ha'e ipo re ma jojukaague oĩ.

⁷ Ipy ma onha 'rã ojejavy aguã katy, ojapura 'rã heko porã'i va'e ruguy omoë aguã. Ha'e kuery ma teko vairã re rive 'rã ipy'a. Ha'e kuery ikuia rupi ma nhomombaague ha'e jojukaague anho oĩ.

⁸ Ndoikuaavei ma tape peteñ rami ikuai aguã katy oo va'e, teko porã noĩ avi 'rã ikuai re. Ha'e kuery ma teko vai rupi rive ikuai. Ha'e va'e rupi ikuai va'e ma ndoikuaai 'rã mby'a porã.*

⁹ Ha'e nunga rupi rima nhandegui mombyry oĩ anhetã rupi jajoguerekao, teko porã voi nanhanderovy. Nharõ tema hexakãa, ha'e rami teñ pytû anho oĩ. Hexakãa rupi 'rāgue py pytûa rupi nhandekuai.

¹⁰ Oo mbotya rupi japovyvya rupi jaiko, ára revugua e'ŷ rami avi, hexa e'ŷ va'e rami japovyvya jaikovy. Kuaray mbyte teñ nhanhepyxanga 'rã javy pytû rupi rami. Imbaraetekue mbyte rupi teñ omanogue rami jaiko.

¹¹ Nhande kuery ha'e javi nhakororõ 'rã urso rami, ha'e apykaxu rami 'rã nhanepoaẽ rei. Anhetã rupi joguerekorã nharõ teñ ndajajoui. Jaa jepe aguã jaeka teñ mombyry oĩ nhandegui.

¹² Mba'eta nerentononde ma rojejavyague heta-etave ovy, orerekó vaiaty ma orekuua ukaarã oĩ, mba'eta orere oĩ 'rã orerekó vaiaty anho, roikuua guive rojejavya.

¹³ Mba'eta SENHOR rovai jajekore ha'e nhandeapu 'rã. Jajep'e'a Nhanderuete gui, nhandeayvu 'rã nhanhombojexavai ha'e nhanhe'ẽ raxave aguã re anho. Nhandepy'a re nhamoña rami apu rupi anho 'rã nhandeayvu.

¹⁴ Ha'e nunga rupi ae anhetã rupi jajoguerekao aguã ojepe'a, teko porã ma mombyry oĩ. Mba'eta anhetã va'e ma onhepyxangapa oikovy nhaneretã mbyte rupi, ha'e teko porã ma nda'evei ovaẽ aguã.

¹⁵ Tá, anhetã va'e ma okanhy. Ha'e gui teko vai rupi oikoa gui ojepe'a va'ekue ma ojuka pyrã ikuai. Ha'e ramo SENHOR ma ha'e rami nhandekuiaia oexa vy ndojou porãi, teko porã noĩ rã.

* 59:8 Romanos 3.15-17

¹⁶ Joepyarā SENHOR oeka teī ndojoui, onhemondyi guive nhandere ojerure va'erā ndoikoi rā. Ha'e ramo ha'e ae onhemoī ojyva py nhandereraa jepe aguā, gueko porā rupi ae imbaraete.

¹⁷ Ha'e rami vy pexo regua py rami onhemonde teko porā py, ha'e oakā re ma ngora ratā rami omoī jogueraa jepea. Ha'e vy ao rami omoī joepya rupi oiko aguā, ha'e ajukue puku py rami onhemonde ikyre'ŷa py.

¹⁸ Ha'e rami vy nhombopaga 'rā peteī-teī ikuaiague rami. Opoxya oexa uka 'rā hexe ija'e e'ŷ va'e kuery pe, ngovaigua kuery ombopaga 'rā ha'evea rami. Ye'ē yvýry rupi ikuai va'e voi ombopaga avi 'rā.

¹⁹ Ha'e rami vy kuaray oikea katygua kuery SENHOR rery oendu vy ojererokyjea rupi 'rā ikuai, ha'e kuaray oua katygua kuery ma oexa 'rā hexakāa. Mba'eta yy oxyry atā xapy'a va'e rami 'rā ou, SENHOR guigua Nhe'ē ombou va'e.

²⁰ SENHOR aipoe'i: "Ha'e gui ma Sião py ou 'rā joepyarā, Jacó regua kuery ojeko rerova va'ekue ikuiaia py 'rā ou.

²¹ Ha'e gui xee ma po rami 'rā ajapo xereve guarā ha'e kuery pe. Mba'eta xeguigua Nhe'ē pendere oī va'e, ha'e xeayvu pendejuru py amoī va'ekue ma ndojepe'ai 'rā. Neñ pendera'y kuery gui, neñ pendera'y ra'y kuery gui voi ndojepe'ai 'rā, aŷ guive raka'e rā peve", he'i SENHOR.*

60

Jerusalém pyau hexakāmba va'e re ijayvuague

¹ "Epu'ā ke, enhemoexakā uka, mba'eta nemoexakāarā ou ma oiny, SENHOR rexakāa ojekuaa ma nde'áry.*

² Mba'eta ma'ē, yvy re pytū anho oī, yvy regua kuery áry oī pytū reia. Ha'e rā nde'áry rupi ma SENHOR omoexakāmba ma, nde'áry hexakāa ojekuaa.

³ Ha'e ramo nemoexakāa katy yvy regua kuery oupa 'rā, huvixave kuery voi ou 'rā hexakā va'e ndea py ojekuaa va'e katy.

⁴ Ema'ē ke ndeyvýry rupi rexa aguā. Mba'eta kova'e kuery ono'ōmba va'e ha'e javi ma ou ndea py. Ndepi'a kuery ou ju 'rā mombyry gui, nememby kuery voi oguerua 'rā ojyva áry.

⁵ "Ha'e nunga rexa vy revy'a ete 'rā. Revy'aa rupi ndepy'a tytypa ha'e ndepy'a guaxu 'rā, mba'eta ye'ē rupi mba'emo porā ikuai va'ekue oguerupaa 'rā ndevy, ha'e yvy regua kuery mba'emo oguerekopa va'ekue oguerupa 'rā ndea py.

⁶ Mymba camelo heta ou vy omonyē 'rā nderekoa rupi, camelo iporāve va'e Midiā ha'e Efa guigua. Sabá pygua kuery voi oupa vy ogueru 'rā ouro ha'e heakuā porā va'e. Ha'e rami vy oguerovy'a 'rā okuapy SENHOR.

⁷ Ndea py oguerua avi 'rā vexa'i kuery Quedar yvy gui. Nerymbarā oguerua 'rā vexa'i ava Nebaiote gui. Ha'e rami vy xemboetea rupi oguerupaa 'rā xevygua altar peve. Ha'e nunga py amboete ukave 'rā xevygua oo xerexakāa oīa.

⁸ "Mba'exagua nda'u ou arai yvate rupigua rami, e'ŷ vy apykaxu guaity katy oveve va'e rami?†

⁹ Mba'eta anhetē ye'ē yvýry ikuai va'e kuery xerarō avi okuapy. Jypy'i ma Társis guigua kanoā ranhe ou ndepi'a kuery ha'e nememby kuery mombyry gui ogueru va'e. Ha'e kuery reve ndea py ogueru avi 'rā ouro ha'e prata oguerekoo va'ekue, SENHOR Nhanderuete, Israel kuery ruete Iky'a e'ŷ va'e rery omboetea rupi, nemoexakāmba rire.

¹⁰ "Ha'e gui amboae regua kuery omoatyrō 'rā tetā kora ndevy, huvixave voi onhemongo 'rā nerembiguairā. Mba'eta xepoxya rupi rombopaga va'ekue teī roayvua rupi ju romboaxy.

* 59:21 Romanos 11.26-27 * 60:1 Apy ma Jerusalém tetā pe ijayvu peteī kunha pe rami, capítulo 54 py oīa rami avi. † 60:8 Apy ma ijayvu kanoā ajukue tuvixa xiī rei va'e ojekuaa ouvy va'e re.

¹¹ Neretā kora rokē ikuai va'e ojepe'a riae 'rā. Ara py ha'e pyávy teī nonhembotyi 'rā, ndea py yvy regua kuery mba'emo porā ogueru aguā. Ha'e nunga reve ndevy ogueru avi 'rā nguvixave kuery.

¹² Ha'e rā amongue yvy regua, e'ŷ vy tetā pygua ndevy ndoikoi va'e ma omombaa 'rā. Ha'e va'e tetā ombovaipaa katuī'i 'rā.

¹³ "Líbano yvy gui yvyra porāgueve oguerua 'rā ndea py: cipreste, olmeiro ha'e buxo oguerua 'rā xevyguia henda iky'a e'ŷ va'e ombojegua aguā. Ha'e rami py ajapo 'rā xepy renda iporā ete aguā rami.

¹⁴ Ndea py jogueru avi 'rā nembojexavaiare ra'y kuery. Ndepy yvýry ndere nda'ija'ei va'ekue ojero'a reve 'rā onhemboja okuapy, ha'e guenapy'ā re oī 'rā ngova yvy re omovaē reve. Ha'e rami vy ndevy pe 'Sião tetā SENHOR pegua, Israel kuery ruete Iky'a e'ŷ va'e oĩa', he'i 'rā okuapy.

¹⁵ "Hexarai reipy ha'e oeja reipy reiko va'ekue, ha'e ndea rupi avave rei ndoaxaai va'ekue. Ha'e rā xee ma ndere amoī 'rā hexakāa imarā e'ŷ va'e, neremiarirō jevy-jevy ikuai va'erā va'e ndererovy'a okuapy aguā rami.

¹⁶ Rey'u 'rā yvy regua kamby, huvixa kunhague ae 'rā nemokambu. Ha'e ramo reikuaa 'rā xee SENHOR ae ndereraa jepea aikoa, nderepya ha'e Jacó kuery ruete ipo'akapa va'e.

¹⁷ Ha'e gui ndea py overa va'e oīague py aru ruka 'rā ouro, ferro rekovia ma prata 'rā aru ruka, yvyra rekovia ma overa va'e, ha'e ita rekovia ma ferro 'rā aru ruka. Ha'e gui ndere oikuua pota va'ekue rekovia ma amoī 'rā mby'a porā, nembopagaare kuery rekovia ma teko porā 'rā oī.

¹⁸ Ha'e gui ndeyvy rupi noenduavei 'rā jojukaa, nhomombaa, neī ombovaipa pyre. Ha'e rami 'rāgue py neretā kora pe 'Jogueraa jepea' 'ea 'rā, ha'e rā tetā rokē pe ma 'Mboraei rokē' 'ea 'rā.

¹⁹ Ha'e gui ara py kuaray naexakāvei 'rā nde'áry, jaxy voi nanderexapevei 'rā. Mba'eta SENHOR ae 'rā oī nemoexakāarā opa e'ŷ va'e, Nderuete oī 'rā nerexakārā.

²⁰ Ha'e rami vy nde'áry rupi kuaray ndoikevei 'rā, ha'e jaxy ndopave ovyi 'rā. Mba'eta SENHOR ae 'rā oī nemoexakāarā opa e'ŷ va'e, ha'e rā ndeporiau reia ára ma opa 'rā.

²¹ Ndea pygua kuery ma heko porā va'erā meme, ha'e hekoa 'rā yvy re. Ha'e kuery ikuai 'rā yvyra renhoī xee anhotŷ va'ekue rami xepo py ae amoingo rire, xemboete pavē aguā.

²² Ha'e kuery va'e regua mbovyve'i va'ekue hetave 'rā mil ikuai peve, ha'e ikangyve va'ekue oiko 'rā imbaraeteve va'e. Ha'e rami aguā xee SENHOR ajapopa vyvoi 'rā hi'ára py porā."

61

Jogueraa jepea regua ayvu porā rupi ijayvuague

¹ "Xere oī SENHOR Nhanderuete Nhe'ẽ, mba'eta SENHOR xemoī ojexavai rei va'e pe ayvu porā amombe'u aguā. Xembou ikuraxō raxy vaikue rei va'e amonguera aguā, nhuā py omboty pyre pe amombe'u aguā oo jepe ju aguā, ha'e oipokua pyre ajorapa ju aguā,*

² SENHOR nhomboaxy aguā va'e ma'etŷ ovaē 'rāa amombe'u avi aguā, Nhanderuete nhombopaga aguā ára ovaē 'rāa guive amombe'u aguā, ha'e gui ojae'o va'e kuery ambovy'apa ju aguā,

³ ha'e Sião tetā py iporiaupa rei va'e kuery re tanhimbu 'rāgue py amoī aguā coroa iporāve va'e, texay 'rāgue py azeite imbovy'aarā, mby'a vai 'rāgue py xererovy'aa py amonhemonde aguā, ha'e kuery pe 'Yvyra imbaraetekueve va'e teko porā kuaa ukaa, SENHOR onhotŷ va'ekue omboete pavē aguā', 'ea aguā rami.

⁴ "Ha'e kuery omoatyrōmba ju 'rā tetā ymague ombovaipa pyre, ojapo ju 'rā ymave rupi oity pyre, ha'e omoatyrōmba 'rā tetā ivaipa va'ekue-'ekue, yma guive ombovaipa pyre.

* 61:1 Apy ma "Xee" he'ia py SENHOR rembiguai jaikuua. Ha'e gui kova'e ayvu rupi Jesus ijayvu ojee ae, Lucas 4.16–21 py.

⁵ Pexa va'ety e'ŷ pendevy ojexa uka jogueruvy vy opena 'rã penerymba kuery re. Amboae yvy regua kuery ombo'eapo 'rã pendevy mba'ety ha'e uvaty rupi.

⁶ Ha'e vy pendevy 'SENHOR pegua sacerdote kuery' ha'e 'Nhanderuete rembiguai' 'ea 'rã. Pe'u 'rã yvy regua kuery rembi'u iporâve va'e gui, ha'e penhembojegua 'rã mba'emo porâgueve oguereko va'ekue py.

⁷ Peximba 'rãgue py penemboeteave 'rã, ha'e penembojarua rei 'rãgue py pevy'a 'rã pendevy guarã oĩ va'e re. Ha'e nunga rupi pendevy re pendekuaia py hetave ete 'rã perekó mba'emo, pevy'a riae 'rã pekuapy guive.

⁸ Mba'eta xee SENHOR ayvu anhetê rupi joguereko va'e, ha'e rã imondaa rupi heko vai va'e ma ajou vai. Ha'e rami vy xevygua kuery pe ame'ẽ 'rã ixupe guarã, ha'e kuery pe ajapo avi 'rã xereve guarã imarã e'ŷ va'e.

⁹ Hamymino kuery voi omboete pavê 'rã yvy regua kuerya rupi, mba'eta hexaa kuery ha'e javi oikuaa 'rã SENHOR ra'y kuery omoingo porã va'ea."

¹⁰ Xee arov'y'a vaipa SENHOR, xenhe'ẽ py avy'a ete Nhanderuete re, mba'eta xemonhemonde ao jogueraa jepea regua py, ao puku py rami xemonheovã teko porã py, ava omenda va'erã onhemoatyrõ porã va'e rami, ha'e omerã oarõ va'e iporã va'e py anho onhembojegua va'e rami.

¹¹ Mba'eta yvy re mba'emo roky, ha'e yvotyty rupi onhoty mbyre henhoïa rami ae avi SENHOR Nhanderuete omoingo 'rã teko porã ha'e mboraei, yvy regua kuery ha'e javi oexaa py.

62

Jerusalém tetã re SENHOR omenda va'erãa rami ijayvuague

¹ Sião tetã re xea'e vy nakyrirõ 'rã hexe ajerurea gui, Jerusalém re xea'e vy ndapytu'ui 'rã heko porã overa va'e rami ojekuaa e'ŷa ja, ha'e oo jepea tataendy rami ojekuaa peve.

² Mba'eta yvy regua kuery oikuaa pavê 'rã nderekó porã, huvixave kuery voi oexa 'rã nerexakãa. Ha'e vy nemboerya 'rã tery pyau SENHOR ae oikuaa uka va'erã py.*

³ SENHOR po py reiko vy coroa hexakãmba va'e rami 'rã reiko, Nderuete po py vy akã pyxã huvixave pegua rami 'rã rei.

⁴ Ndevy aipo nda'eavei 'rã "Oejapa reipy", neĩ ndeyvy pe voi "Ombovaipa pyre" nda'eavei 'rã. Ha'e rami 'rãgue py ndevy aipo'ea 'rã "Oguerovy'apy", ha'e ndeyvy pe ma "Omenda va'e" ea 'rã, mba'eta SENHOR ov'y'a 'rã ndere, ha'e ndeyvy re omenda va'e rami 'rã oiko.

⁵ Mba'eta kuhatai re ava omendaa rami avi ndepi'a kuery heko 'rã ndere. Gua'yxyrã ava oguerovy'aa rami avi Nderuete undererovy'a 'rã.

⁶ Jerusalém tetã, ndevygua kora áry xee amoĩ 'rã harõarã. Ha'e kuery ma nokyrirõ 'rã ára pukukue neĩ pytû mbukukue re. Peẽ SENHOR pemoma'endu'a va'e voi pepytu'u eme ixupe pejapukaia gui,

⁷ pemombytu'u uka eme guive Jerusalém tetã ombopyau e'ŷa ja, yvy regua kuery ogueroporaei aguã rami.

⁸ Po rami SENHOR oura opo oiporu kuaa regua ha'e ojyva ipo'akapa va'e rupi ae. Ha'e vy aipoe'i: "Aŷ gui ma mba'emo ra'yí remono'õ va'ekue namboaxavei 'rã nderovaigua kuery pe ho'u aguã, neĩ amboae yvy regua pe voi nday'u ukavei ma 'rã vinho remba'eapo vy rejapo va'ekue.

⁹ Ha'e rami 'rãgue py mba'emo ra'yí mono'õare kuery ae 'rã ho'u, SENHOR ogueroporaei reve. Ha'e uva po'oare kuery ae 'rã oy'u tykue, xevygua oo iky'a e'ŷ va'e roka py", he'i.

¹⁰ Tapeo, peẽ ke tetã rokõ oĩ va'e rupi, ha'e perekó katu tape heta va'e kuery ou aguã. Pembojapá ke tape, pemboa'eve ita gui. Ha'e gui pemopu'ã bandeira yvy regua kuery oexa pavê aguã.

¹¹ Mba'eta yvy apy peve SENHOR omohendu 'rã pova'e ayvu. Aipopeje ke Sião memby kuery pe: "Upe ma ou pendereraa jepearã. Pendevy guarã ogueru, henonde oguerua peikoague rekoria", peje.

* 62:2 Apy "Ndee" he'ia ma Jerusalém tetã re ijayvu vy.

¹² Ha'e ramo pendevy “Iky'a e'ŷ va'e regua SENHOR ogueraa jepe va'ekue” 'ea 'rã. Ha'e gui Sião, ndevy pe ma “Oipotapy” ha'e “Tetã tekoague rei e'ŷ”, 'ea 'rã.

63

Nhanderuete ojeupegua kuery oepy aguã re ijayvuague

¹ Mava'e nda'u peva'e Edom yvy gui guexakãa rupi ou va'e? Mava'e nda'u Bozra tetã gui ou ao omopytãmba pyre py onhemonde reve, ombaraetea rupi oguata va'e?

“Xee ma teko porã rupi xeayvu, ha'e ajogueraa jepe aguã xepo'akapa va'e”, he'i.

² Mba'e re tu ha'vy renhemondea pytãmba rei, uva oumbiria rupi ikuai va'e rami ndeao pytãmba?

³ “Mba'eta uva aumbiria rupi xee ae'i apyrõ aikovy va'ekue, peteïve ava yvy regua xereve ndoikoi ramo. Xepoxya rupi uva re apyrõ, xevaia rupi amou'ũmba va'ekue. Ha'e ramo tykue hayvipa vy omongy'apa anhemondea ha'e javi.

⁴ Mba'eta ajoepy aguã ára reguarã amoĩ xepy'a re, ajogueraa jepe aguã ma'etõ ovaẽ ma ramo.

⁵ Ha'e rami avi aixa rã ndoikoi xepytyvõ va'erã. Xereve guarã ndoikoi ramo anhemondyi. Ha'e nunga rupi xee ae jyva py ajogueraa jepe, xepoxya ae xereveguia oiko.

⁶ Ha'e rami vy yvy regua kuery re apyrõ xepoxya rupi, xevaia rupi ajapo oka'u va'e rami ikuai aguã. Ha'e vy huguy amoẽ heravy yvy rupi”, he'i.

Peteïgue ju profeta Isaías ojерureague

⁷ Aroporaei 'rã SENHOR porayvua ha'e hembiapokue iporã ete memea re, mba'eta nhandevy pe SENHOR opa mba'e py ojapo porã, Israel kuery ha'e javi oayvua rupi. Mba'eta ha'e kuery omboaxy ha'e opa mba'e py oayvu vy ojapo porã ete.

⁸ Mba'eta aipoe'i: “Ha'e kuery ma anhetã xevygua ikuai, xera'y kuery ijapu va'erã e'ŷ”, he'i vy onhemoingo raka'e ha'e kuery reraa jepearã.

⁹ Ha'e kuery ikuai axya ha'e javi py ha'e voi oendu oiko axya, ha'e ramo ixuguigua anjo ogueraa jepe. Oayvu ha'e omboaxy rupi oepy. Ha'e rami vy ogueraa vy ára nhavõ oguerekoo raka'e.

¹⁰ Ha'e rami teī ha'e kuery onhe'ẽ raxave okuapy, ha'e omomboriau Inhe'ẽ ky'a e'ŷ. Ha'e ramo hovaigua ju onhemoingo vy ha'e ae opu'ã raka'e ha'e kuery re.

¹¹ Ha'e ramo ma ha'e kuery ima'endu'a ju yma Moisés oiko jave guare re. Ha'e vy aipoe'i: “Mamo tu aŷ oĩ SENHOR ye'ẽ rupi ojeupegua kuery renoẽare, ha'e kuery re opena va'ety reve? Mamo tu oĩ hexe Onhe'ẽ iky'a e'ŷ va'e moĩare?” he'i okuapy.

¹² “Mba'eta opo'akaa hexakãmba va'e ombou raka'e Moisés yvýry guarã. Ha'e kuery renonde rupi omombyta imoiny yy, raka'e rã peve hery re ima'endu'apaa aguã.

¹³ Ha'e gui yy typyague rupi ogueroaxapa raka'e, kavaju onhepyxanga e'ŷ ovu va'e rami ha'e kuery oaxapa peve tekao e'ŷa”, he'i okuapy.

¹⁴ Mba'eta mymba kuery yvŷ'ã guy katy ikane'õguia aguã oguejy va'e rami avi ojeupegua kuery pe SENHOR Nhe'ẽ ome'ẽ raka'e optyu'u aguã. Ha'e rami ae rerekoo raka'e ndejeupegua kuery, nderery re ima'endu'a porã pavê aguã rami.

¹⁵ Ha'e gui aŷ ma eikuua pota ke yva reīa gui, ne'amba iky'a e'ŷ ha'e hexakãmba va'e py reīa gui ema'ẽ orere. Mamo tu oĩ nekyre'ŷa, ndepo'akaa rupi mba'emo porã rejapoa py rexa uka va'ekue? Mba'eta xee aixa rã ndojekuaavei rejoayvu ha'e renhomboaxya ndeyp'a re oĩ va'e.

¹⁶ Ha'e rami teī ndee ma Oreruete ae reiko, Abraão ndorekuaavei teī. Israel voi ndorerexa kuaavei teī ndee ma SENHOR oreru reiko. Nderery ma Orerepya yma ae.

¹⁷ SENHOR, mba'e re tu rejapo ndeguigua tape rupi ve'ŷ roo aguã rami? Mba'e re tu oreapo oreakã ratã aguã rami, ndere rojerovia ve'ŷ aguã? Eju ju ke nerembiguai kuery reayvua rupi, ndevygua kuery re rema'ẽ vy.

¹⁸ Mba'eta xapy'a rai'i ndevygua kuery po py oĩ raka'e ndevygua henda iky'a e'ŷ va'e. Ha'e gui ma orerovaigua kuery ou vy opyrõmba nemboeteaty re.

¹⁹ Ha'e ramo ore ma ndee nerepenai ae va'ety rami orekuai, ha'e nderery rupi onhemboery uka e'ŷ va'e rami.

64

¹ Ha'e gui yva rembovo vy reguejy 'rāgue! Ha'e ramo vyty ikuai va'e oryryipa 'rāgue neronden.

² Tata vytyra ra'ykue'i re hendya rami, ha'e yy ombopupu va'e rami ke ndee voi eguejy nderovaigua kuery nderery oikuaa pavē aguā rami, neronden yvy regua kuery oryryipa aguā.

³ Mba'eta ymave rupi reguejy vy rejapo nda'evei ete va'e noroexa'āi va'ekue, ha'e ramo vyty ikuai va'e oryryipa raka'e neronden.

⁴ Mba'eta vyty itui ypy'i guive noenduai, apyxo noendui, neī texa voi ndoexai tuuete harōa kuery pe mba'emo ojapo va'e, ndee e'ŷ vy.*

⁵ Ndererovy'a reve teko porā rupi ikuai, ha'e nderekō re ima'endu'a va'e kuery ikuai py ndee reo 'rā reovaexī vy. Ha'e rami avi rojejavvy ramo ndepoxy 'rā guive. Yma ete rojejavvy re orekuai rire teī roo jepe nho 'rā teve?

⁶ Mba'eta ore kuery ha'e javi ma ha'eve'ŷ va'e orekuai, ha'e ore ae orerekō porāa ma ajukue iky'apa rei va'e rami meme opyta. Ore kuery ha'e javive orere'ōguepa 'rā jai rogue ixorimbāa rami, ha'e orerekō vaia ma vytyu rami 'rā orereraa.

⁷ Mava'eve rei ndoikoi nderery rupi ojapukaia rupi, neī reikuua pota aguā re oma'ena rupi. Mba'eta nderova remo'ā oregui, ha'e vy orerekō vaia re oremomba heravy.

⁸ Ha'e rami avi aŷ ma SENHOR, ndee ae oreru reiko. Ore kuery ma nhae'ū rami, ha'e rā ndee ma nhae'ū re ombo'eapo va'e rami reiko. Ore kuery ha'e javi ma ndepo py remoingo va'ekue orekuai.

⁹ SENHOR, ndepoxy ete eme, ha'e nema'endu'a riae eme rojejavvyague re. Rojerure, ema'ē ju ke orere, mba'eta ore ha'e javive ma ndevygua orekuai.

¹⁰ Ndevygua tetā iky'a e'ŷ va'e ikuai va'ekue ma tekoague meme opyta. Sião tetā voi tekaoa e'ŷa, Jerusalém omombaa.

¹¹ Orevy pegua templo iky'a e'ŷ ha'e hexakāmba va'e oreramoī kuery nemboeteague ma oapypaa tata py, ha'e mba'emo porā roguerekō va'ekue ma ombovaipa pyre meme opyta.

¹² Ha'e ramigua ete oiko teī ndereikuua potai teri ty'y? Rekyrirī reve orembojexavaive tema 'rā teve?

65

Nhanderuete ombovai vy “Ambopaga 'rā xenhe'ē raxave va'ekue”, he'ague

¹ SENHOR aipoe'i: “Ha'e gui xere oporandu e'ŷ va'e kuery pe ma ajeka uka, xereka e'ŷ va'ekue pe ajejou uka. Xerery rupi omboery e'ŷ pyre kuery pe ‘Apy ma aī, apy aī’, ha'e.

² Ko'ē nhavō xepo py ‘Peju ke’ ha'ea rami ajapo xenhe'ē raxave va'e kuery pe. Ha'e kuery ma tape porā rupi e'ŷ ikuai va'e, ha'e kuery ae onhembopy'aa rupi rive ikuaike vy.*

³ Ha'e kuery ma xembopoxy riae tema okuapy oxīa py e'ŷ, mba'eta ta'angaa pe mba'emo ojuka 'rā okuapy yvotyty rupi, ha'e heakuā porā va'e oapy 'rā altar yvy jykue gui ojapo va'ekue áry rive.*

⁴ Yvyra rupa rupi ha'e kuery ikuai, ha'e pyávy henda nda'evei reia rupi 'rā oo. Ho'u 'rā poryko ro'okue, ha'e oy'a py ojara 'rā mymba nda'evei va'e ro'o rykue.

⁵ Ha'e kuery joupe-upa aipoe'i 'rā: ‘Peī ke peīa py ae, pevaē eme xere, mba'eta xee ma pendegui ndaxeky'aive va'e’, he'i rive 'rā. Ha'e nunga ma hataxī ko'ē nhavō xeapyīgua ko'ō va'e rami ikuai.

⁶ Ma'ē, ha'e nunga ha'e javi omboparaa imoiny xerenonde. Ha'e ramo xee nakyrirīvei 'rā. Rombopaga 'rāe, romomba 'rā peē kuery ha'e javi,

* 64:4 1 Coríntios 2.9 * 65:2 Romanos 10.20-21 * 65:3 Altar-'rā ha'e kuery ojapo vy nda'evei yvy jykue oiporu aguā (Exodo 20.24-25).

⁷ pendereko vaiaty ha'e peneramoï kuery reko vaiague re. Mba'eta ha'e kuery voi heakuã porã va'e oapy rire yvyty ikuai va'e áry rupi, ha'e xembopoxya rupi ikuai yvy'ã ikuai va'e ary. Ha'e nunga rupi ambopagapa 'rã yma guive ojejavyague re", he'i SENHOR.

Nhanderuete "Araa jepe 'rã xere ojerovia va'e", he'iage

⁸ SENHOR aipoe'i: "Peẽ kuery ma peteñ xã uva revegua peipo'o vy amongue py hykue iro va'e pejou vy aipopeje 'rã: 'Nhamombo va'erã e'ŷ, mba'eta iporã va'e oĩ ruxã'i tei', pejea rami avi xee voi amboaxy 'rã xerembiguai kuery, ha'e vy namombai 'rã.

⁹ Ha'e rami vy amoingo 'rã Jacó ramymino kueryrã, ha'e Judá ramymino kuery va'e regua amoingo avi 'rã xevyguia yvyty re ipo'aka va'erã. Ha'e rami vy xerembiporavo kuery hekoa ju 'rã yvy re, ha'e py ae 'rã xerembiguai kuery hekoa.

¹⁰ Ha'e rami vy Sarom yvy itui 'rã nhuündy vexa'i rembi'u tyrã, ha'e Acor yvyugua rupi 'rã vaka kuery opytu'u. Xevyguia kuery xereka va'e pe ae 'rã ajapo.

¹¹ "Ha'e rã peẽ kuery ma SENHOR gui ojepe'a rive va'e pendekuai, xevyguia yvyty iky'a e'ŷ va'e gui penderexarai guive. Perekat ngaru pendexyete ramigua Xortea hery va'e pe, ha'e vinho pemoirũ tuuete ramigua Renonderã hery va'e peguarã.

¹² Ha'e rami rã peẽ kuery xee romboaxa 'rã kyxe revegua pe. Ha'e ramo peẽ kuery ha'e javive penerenap'yã re pei 'rã pendejukaarã renonde. Mba'eta xee roenoï ramo napembovai rire, xeayvu tei' ndapeikuaa potai guive. Ha'e rami 'rãgue py teko vai rupi tema pendekuai xerenonde, ha'e peiporavo xee arovya'e e'ŷ va'e."

¹³ Ha'e nunga rupi SENHOR Nhanderuete aipoe'i: "Xerembiguai kuery okaru 'rã, ha'e rã peẽ kuery ma pendu 'rã karuai. Xerembiguai kuery oy'u 'rã, ha'e rã peẽ kuery ma pendu 'rã yuvei. Xerembiguai kuery ovy'a 'rã, ha'e rã peẽ kuery ma peximba 'rã.

¹⁴ Xerembiguai kuery oporaei 'rã ipy'a py ovy'a vy, ha'e rã peẽ kuery ma peneraxê 'rã pendepy'a raxy vy, pejae'o 'rã penenhe'ẽ py peiko axya anho pendu vy.

¹⁵ Penderery peja 'rã xerembiporavo kuery ima'endu'a vai aguã. SENHOR Nhanderuete pendejukapa 'rã, ha'e rã guembiguai kuery ma omboery pyau ju 'rã.

¹⁶ Ha'e nunga rupi yvy re jogueroayvu porã va'e ma Nhanderuete anhetẽ ete va'e rupi meme 'rã jogueroayvu porã, ha'e yvy re oura va'e ma Nhanderuete anhetẽ ete va'e rupi 'rã oura. Mba'eta hexaraipaa 'rã ikuai axya oaxapa va'ekue re, xee voi naxema'endu'avei 'rã.

Yva pyau ha'e yvy pyau re ijayvuague

¹⁷ "Ha'e gui ma xee ajapo 'rã yva pyau ha'e yvy pyau. Ha'e rami rire na'ima'endu'aavei ma 'rã mba'emo oaxa va'ekue re, avave rei ndoikuaavei 'rã ha'e nungakue.*

¹⁸ Ha'e ramo peẽ kuery pevy'a ete 'rã pekuapy, raka'e rã peve perovy'a 'rã mba'emo xee amoingo va'e. Mba'eta Jerusalém py amoingo 'rã vy'a oendua va'erã, ha'e pygua kuery oguerovy'a ete 'rã.

¹⁹ Arovya'a 'rã Jerusalém, arovya'a avi 'rã xevyguia kuery. Mba'eta ha'e py ma noenduavei 'rã ojae'o ha'e haxẽ va'e.

²⁰ Ha'e py ma ndoikovei 'rã kyrĩ va'e xapy'a'i peve oiko va'e, nei tuja'i voi oikove aguã ára ndoupityi va'e. Mba'eta cem ma'etõ oguerekoi py omano va'e pe ma 'Ipyau reve teri omano' 'ea 'rã, ha'e cem ma'etõa peve ndoupityi va'e pe ma 'Ojejavy va'e vy ayvu vaipy oiko vy ma 'rã' 'ea 'rã.

²¹ Ha'e pygua kuery ngoorã ojapo vy ha'e py ae 'rã ikuai. Uva onhotõ ma vy ho'u 'rã hi'a.

²² Ngoorã va'ekue ndojapovei 'rã amboae kuery rive oĩ aguã, ha'e mba'emo nonhotõvei 'rã amboae kuery rive ju ho'u aguã. Mba'eta xevyguia kuery oiko puku 'rã yvyra rami, xerembiporavo kuery oiporu kuerei 'rã opo py ojapo va'ekue-'ekue.

²³ Ha'e rami vy nomba'eapo rivevei 'rã, nei kyrigue ndoguerekoi 'rã oiko vai va'erã, mba'eta SENHOR ogueroayvu porã va'e meme ikuai, ta'y kuery voi ikuai 'rã ha'e kuery reve.

²⁴ Ha'e kuery ojapukai e'ŷ mbove ma voi xee ambovai 'rã. Ijayvu teri reve xee aendu 'rã.

* 65:17 2 Pedro 3.13

²⁵ Aguara ha'e vexa'i ra'y reve joa py 'rā okaru okuapy, ha'e guary ma vaka rami avi 'rā ho'u oikovy mba'emo pirekue. Mboi ma yvy ku'i re rive 'rā okaru. Mba'eta joupe ndojapo vaiavei 'rā, mba'eve ndoikoi 'rā guive xevygua yvyty iky'a e'ŷ va'e áry ha'e javi rupi", he'i SENHOR.

66

Jerusalém pyau py Nhanderuete pe onhembo'e merami rive va'e kuery oike e'ŷ aguã re ijayvuague

¹ SENHOR aipoe'i: "Yva ma xerenda apenaaty, ha'e rā yvy ma xepy rupa itui. Mba'e nunga oo tu xevy pe pejapo ta? Mamo tu apytu'u atyrā oĩ?

² Mba'eta xepo py ae ha'e nunga ha'e javi ajapo raka'e. Ha'e ramo mae opa mba'e oiko", he'i SENHOR. "Ha'e rami avi xee ma po ramigua re ama'ẽ 'rā: onhe'ẽ py ojexavai rei'i ha'e ipy'a raxy rei va'e, ha'e xeayvu oendu vy oryryi va'e.*

³ Ha'e rā vaka xevy ojuka va'e ma jojukaa rami 'rā aikuua, vexa'i ra'y oapy va'e ma jagua aju'y omopẽ va'e ramo rive, ha'e mba'emo aju xevy ome'ẽ va'e ma poryko ruguy ome'ẽ va'e ramo aikuua. Ha'e rami ae avi heakuã porã va'e oapy va'e ma mba'emo ra'angaa ogueroayvu porã va'e ramo aikuua. Mba'eta ha'e kuery ae oipotaa rami rive ikuai, onhe'ẽ py ojeguarupy anho oguerovy'a va'e.

⁴ Ha'e ramo xee aipotaa rami vy amoingo axy 'rā, ha'e kuery re ambou 'rā okyje etea va'e. Mba'eta aenoĩ ramo peteĩve rei nombovai, xeayvu ramo noendu potai guive. Ha'e ramo 'rāgue py mba'emo vai anho ojapo okuapy xerenonde, ha'e oipota xee arov'y'a e'ŷ va'e", he'i.

⁵ Ha'e gui peẽ SENHOR renonde pejererokyjea rupi pendekuai va'e, pendu ke ijayvu: "Pendervy kuery ma xerery rupi pendekuai ramo pendere nda'ija'eí vy penemoxẽ mombyry. Ha'e vy pendejojai vy 'SENHOR toexa uka guexakãa, pevy'a ri rā roexa aguã', he'i okuapy. Ha'e rami tei ha'e kuery nda'evei nho 'rā okuapy.

⁶ Mba'eta tetã gui onhendu 'rā joe opu'ã ete va'e ayvu ramigua, templo gui ae 'rā onhendu. SENHOR ijayvu 'rā ngovaigua kuery ombopaga vy.

⁷ "Peteĩ kunha ma kyrĩ va'e raxy oendu e'ŷ mbove oikuavã'i ma 'rā kyrĩ va'e, haxy e'ŷ mbove oiko'i 'rā ava'i.

⁸ Mava'e nda'u ha'e ramigua oendu, e'ŷ vy oexa ma? Ha'eve ri nda'u peteĩ yvy ha'e javi re ikuai va'erã peteĩ ára pyve oiko aguã? Ha'eve ri nda'u peteĩ regua kuery ha'e javi oiko vyvoi aguã? Ha'e rami avi Sião ma haxy oendu e'ŷ mbove oguerek'o'i 'rā omemby kuery.

⁹ Mba'eta kyrĩ va'e ryru'i xee aipe'a tei namoingoi 'rā teve? Xee nda'u anhomongo va'eri amboty 'rā teve kyrĩ va'e ryru oiko e'ŷ aguã?" he'i SENHOR Nhanderuete.

Sião tetã py raka'e rā peve ovy'aa aguã re ijayvuague

¹⁰ "Peẽ kuery Jerusalém tetã peayvu va'e ha'e javi, pevy'a ke ha'e pygua kuery reve. Perovy'a ke, hexe pejae'o va'ekue ha'e javi.

¹¹ Mba'eta ikã penembovy'a va'e re pekambu vy penerevyatã 'rā, penhemongaru vy perovy'a 'rā hexakãa oĩ va'e ha'e javi pexa vy."*

¹² Mba'eta SENHOR aipoe'i: "Peẽ kuery pe ame'ẽ 'rā mby'a porã yakã oxyry va'e rami, ha'e yvy regua kuery mba'emo porã oguerek'o va'ekue ma peẽ kuery pe ju 'rā amboaxa yakã tyguaxu va'e rami. Ha'e ramo pekambu 'rā peiny. Ojyva áry pendereru 'rā, ha'e o'u áry pendererovy'a 'rā.

¹³ Ixy omemby omombo'o va'e rami avi xee rombovy'a 'rā peẽ kuery, ha'e pevy'a ju 'rā Jerusalém tetã re.

¹⁴ Peẽ ae pexa 'rā, pendepy'a py pevy'a 'rā, penekãgue voi ipyau 'rā jai rogue pyau rami. Mba'eta ha'e jave py SENHOR oexa uka 'rā opo'akaa guembiguai kuery pe, ha'e rā ngovaigua kuery pe ma ipoxy 'rā."

* 66:2 Atos 7.49-50 * 66:11 Apy ma Jerusalém tetã re ijayvu ha'e kuery xy re rami.

¹⁵ Mba'eta SENHOR ou 'rā tata rupi, ikaróxa ma yvytu jere rami 'rā ou, ipoxya oexa uka aguã nhomombaa rupi. Ijayvu ete 'rā tataendy rami.

¹⁶ Mba'eta tata ha'e kyxe reve SENHOR ou vy oikuua pota 'rā avakue ha'e javi re. Ha'e ramo heta ete 'rā SENHOR ojuka.

¹⁷ SENHOR aipoe'i: "Amongue kuery oxyete ramigua oguerekva'e peguarã rive onhem-boaxa ha'e ojeky'a'o va'ekue, ha'e rami vy yvotyty mbyte peve oike vy ho'u okuappy poryko ro'o, tembi'u ojeguarupy ha'e anguja ro'o rive. Ha'e va'e kuery ma omombaa vyvoi 'rā.

¹⁸ Mba'eta xee aikuua ae ha'e kuery ikuiaia ha'e onhembopy'aa ha'e javi. Ha'e rami vy aju 'rā amboatypa aguã yvy regua kuery ha'e amboae ayvu py ijayvu va'e ha'e javi. Ha'e ramo ha'e kuery ou vy oexa 'rā okuappy xerexakãa.

¹⁹ Ha'e kuery mbyte amoï 'rā xekuaa ukaarã. Ha'e araa jepe va'ekue regua amongue amondouka 'rā yvy regua kuerya katy, Társis tetã katy, guyrapa oiporu kuaa va'e ikuia Pul ha'e Lude yvy katy, ha'e gui Tubal, Javã ha'e ye'ẽ yvýry mombyryvea peve guive. Ha'e pygua kuery ma noendui teri xeregua ayvu, ndoexai teri guive xerexakã. Ha'e va'e yvy regua kuery pe ae 'rā ha'e kuery omombe'u xerexakã.

²⁰ Ha'e gui ma oguerupa 'rā penderyvy kuery ha'e javi. Yvy regua kuery mbyte gui ogueru 'rā SENHOR pe ome'ẽ va'erã rami. Kavaju áry 'rā ogueru, karóxa py, mburika ha'e camelo áry ogueru 'rā Jerusalém tetã py xevyguia yvity iky'a e'ý va'e py, hyru iky'a e'ý va'e py Israel kuery mba'emo aju ome'ẽ va'erã oguerua rami avi SENHOR pegua oo py", he'i.

²¹ "Ha'e ramo ha'e va'e regua voi amoï 'rā sacerdote ha'e levita-rã", he'i SENHOR.

²² "Mba'eta yva pyau ha'e yvy pyau ajapo va'erã va'e ma xerenonde riae 'rā oĩ. Ha'e ramo ae peneramymino kuery ikuai avi 'rã, penderery voi.

²³ Jaxy pyau ha'e sábado ojeupity nhavõ ma avakue ha'e javi ou 'rā xerenonde xemboete aguã", he'i SENHOR.

²⁴ "Ha'e gui ha'e kuery oo vy oexa 'rā okuappy xere opu'ã rei va'ekue retekue. Ha'e py ma taxo noamanovei 'rã, hata voi ndoguevei 'rã. Ha'e nunga gui ma avakue ha'e javi ojeguaru 'rã."*

Jeremias ayvu oĩa Jeremias ayvu oĩa

Profeta Jeremias ma ijayvu Judá pygua kuery re Babilônia pygua kuery opu'ã vy escravo-rã ogueraapa aguã re. Ha'e rami aguã ma Nhanderuete ae ombou ha'e kuery ojejavyague re. Mba'eta Jeremias oikuua nhandepy'a ky'a va'e memea: "Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuua 'rã?" he'i (17.9).

Ha'e rami teī Jeremias omombe'u avi Nhanderuete ojeupeguia kuery omboaxy vy ogueru ju aguã. "Senhor aipoe'i: 'Ne'ixa, ou ma oiny ára Israel ha'e Judá kuery reve xereve guarã ajapo pyau aguã, tamoĩ kuery reve ajapo va'ekue ramigua e'ý. Ha'e jave ma ha'e kuery po re ajopy reve anoëmba va'ekue Egito yvy gui. Ha'e rami teī ha'e kuery ombovaipa xereve guarã ajapo va'ekue, ime rami aiko teī. Ha'e gui ha'e va'e ára oaxapa ma rire po rami 'rã Israel kuery reve ajapo pyau xereve guarã. Ha'e kuery py'a re 'rã ambopara xeguigua lei, ikuaxõ re ae 'rã ambopara. Xee aiko 'rã Tuuete, ha'e rã ha'e kuery ma ikuai 'rã xevygua. Ha'e ramo peteĩ-teī nombo'evei ma 'rã oirũ neĩ guyvy kuery, "Peikuaa na Senhor", he'ia py, mba'eta ha'e javive xekuaa 'rã, yvyigueve ha'e yvatekueve voi. Mba'eta amboguepa 'rã heko vaiague, ojejavyague re naxema'endu'avei 'rã guive', he'i Senhor" (31.31-34). "Ha'e kuery pe ame'ẽ 'rã peteĩ'i rupi ipy'a aguã ha'e peteĩ'i tape, ko'ẽ nhavõ xerenonde ojererokyjea rupi ikuai aguã, ha'e kuery ikuai porã aguã, ha'e gui ta'y kuery voi" (32.39).

Jeremias pe jypy'i SENHOR ijayvuague

¹ Hilquias ra'y Jeremias ayvu oĩa. Ha'e va'e ma Benjamim yvy re Anatote tetã py sacerdote ikuai va'e regua.

² Ixupe ma SENHOR ombou oayvu Amom ra'y Josias Judá pygua huvixa treze ma'etý re ma oĩ jave py.

³ Ha'e gui Josias ra'y Jeoaquim Judá pygua huvixa oĩ jave ju ayvu omombe'u Josias ra'y Zedequias treze ma'etý re oĩa peve, ha'e gui Jerusalém tetã gui escravo-rã ogueraapaa ma rire peteĩ nhiruĩ jaxy peve ju.

⁴ Ha'e gui xevy pe SENHOR oayvu ombou vy aipoe'i:

⁵ — Nderyru'i py xee romoingo e'ý mbove xee roikuua ma voi, ndetui'i e'ý mbove roiporavo vy romoĩ profeta-rã yvy regua kuery pe xeayvu remombe'u aguã — he'i.

⁶ Ha'e ramo xee ambovai:

— Ai SENHOR Xeruete! Ne'ixa, xee ma ndaxeayvu kuaai, mba'eta xekyrí teri.

⁷ Va'eri SENHOR aipoe'i xevy:

— Nda'evei "Xekyrí teri" 're aguã. Mba'eta reo 'rã xee romondoukaa katy rei, ha'e remombe'upa 'rã ndevy xeayvuague ha'e javi.

⁸ Ekyje eme ha'e kuery renonde, mba'eta xee aiko 'rã ndereve rogueraa jepe aguã — he'i SENHOR.

⁹ Ha'e gui SENHOR okuave'ẽ vy opoko xejuru re. Ha'e vy aipoe'i xevy:

— Ne'ixa, ndejuru py amoĩ xeayvu.

¹⁰ Ha'e rami vy kova'e ára guive ma rombopo'aka yvy regua kuery ha'e huvixa kuery openaa ikuai va'e re, reipe'a ha'e reity aguã, rembovaipa ha'e remboa'y aguã, ha'e gui remopu'ã ha'e renhotý ju aguã.

Amêndoа 'y oexa ukaague

¹¹ Teigüe ju SENHOR ijayvu vy aipoe'i xevy:

— Jeremias, mba'e nunga tu rexas?

Ambovai:

— Aexa peteĩ yvyra'i amêndoа 'y — ha'e.

¹² Ha'e rami rã SENHOR aipoe'ive ju:

— Ha'evea rami rexa, mba'eta xeayvuague re xee ama'ẽ 'rã ojeupitypa aguã.*

Oja tata áry oĩ va'e oexa ukaague

¹³ Tēgue ju SENHOR ombou oayvu xevy. Ha'e vy aipoe'i:

— Mba'e tu rexa?

Ambovai:

— Aexa petēi oja tata áry oĩ va'e. Ha'e va'e ma ijuru kuaray ijapu'a'ia katy gui ojero'a oiny — ha'e.

¹⁴ Ha'e ramo SENHOR aipoe'ive ju xevy: “Kuaray ijapu'a'ia katy gui onheẽ 'rã ouvy mba'emo vai yvy re ikuai va'e ha'e javi áry.

¹⁵ Mba'eta xee aenoimba 'rã kuaray ijapu'a'ia katy ikuai va'e regua. Ha'e ramo ha'e kuery oupa 'rã. Ha'e rami vy Jerusalém tetã rokẽ katy'i petēi-tēi regua ruvixa omō 'rã guenda opena atyrã, tetã kora yvýry, Judá regua tetã ha'e javi kora yvýry guive”, he'i SENHOR.

¹⁶ “Ha'e va'e tetã pygua kuery rovai xeayvu 'rã heko vaiague re ambopaga aguã. Mba'eta xerejapa vy amboae ramigua nguuete pe oapy okuapy heakuã porã va'e, opo py ae ojapo va'ekue rive ombojerovia vy.

¹⁷ Ha'e rã ndee ma eiko katu ke. Ha'e vy tereo, ha'e kuery pe emombe'u xeayvuague ha'e javi. Enhemondyi eme ha'e kuery renonde, ajapo e'ŷ aguã ha'e kuery renonde renhemondiyive ete aguã rami.

¹⁸ Ne'exa, kova'e ára romō petēi tetã ikorapa va'e rami, ha'e ijyta ferro guigua ha'e tetã kora overa va'e guigua rami neretã pygua kuery ha'e javi rovai ndeayvu aguã, Judá pygua huvixa kuery, yvatekueve, sacerdote kuery ha'e neretarã kuery rovai.

¹⁹ Ha'e kuery ndere opu'ã tēi nda'ipo'akai 'rã, xee rogueraa jepe aguã ndereve aiko ramo”, he'i SENHOR.

2

Nhanderuete oayvu tēi heta va'e kuery onhe'ẽ raxavea re ijayvuague

¹ Ha'e gui xevy SENHOR oayvu ombou vy aipoe'i:

² “Tereo, ha'e ejapukai Jerusalém pygua kuery oendupa aguã: Po rami SENHOR ijayvu: ‘Xee ma xema'endu'a nekunhatai jave xee aipotaa rami reikoague re, ha'e xere remenda ramo jave xerayvuague re, teko a e'ŷa, yvy mba'ety jipoia rupi tēi xerupive reikoague re.”*

³ Mba'eta ha'e va'e jave py ma SENHOR pe ete Israel kuery ikuai, mba'emo ra'yigue porãgueve ixupe guarã omono'õ ypy pyre rami. Ha'e kuery mombaxea kuery ma ipo ky'a va'e meme onhemoingo, hi'áry mba'emo vai ou guive”, he'i SENHOR.

⁴ Pendu ke SENHOR ayvu, Jacó ha'e Israel kuery ha'e javi.

⁵ Po rami SENHOR ijayvu: “Mba'e nunga nda'u peneramō kuery oexa xere, xegui ojepe'apa aguã? Mba'eta mba'emo ra'angaa ovare e'ŷ va'e re rive ovapa vy ha'e kuery ae ju ovare e'ŷ va'e onhemoingo.

⁶ Ha'e kuery joupe-upa nēi noporandui: ‘Mamo nda'u oĩ SENHOR Egito yvy gui nhancerenoëare? Mba'eta teko a e'ŷa rupi nhandereraa va'ekue, yvy piru reia ha'e yvykua anho oña, yvy piru ha'e mano a 'ã oña rupi, yvy avave rei oguataa e'ŷa ha'e noñaia rupi’, nde'i.

⁷ Ha'e gui xee roguera va'ekue yvy porãa re, pekaru aguã mba'emo a ha'e mba'emo porã oiko va'e re. Ha'e rami tēi ha'e py pevaembia ma rire pemongy'apa, yvy xevy guarã va'ekue pejapo ojeguaru pyrã.

⁸ Sacerdote kuery ‘Mamo tu oĩ SENHOR?’ nde'i, lei re nhombo'e va'ety voi ndaxekuaa potai okuapy. Joe opena va'ety kuery xenhe'ẽ raxave okuapy, ha'e rã profeta kuery ma Baal rery rupi rive ijayvu vy ovare e'ŷ va'e rakykue rupi ikuai.”

Ndojeroviai reipa okuapyague re ijayvuague

* ^{1:12} Ha'e kuery ayvu py ma ayvu “Amêndo a'y” nhaendu rã “Ama'ẽ 'rã” nhaendua rami rai'i. * ^{2:2} Apy ma ojeupagua kuery pe Nhanderuete ijayvu gua'xy pe rami.

⁹ SENHOR aipoe'ive ju: "Xeayvuve tema 'rā peẽ kuery reko re. Pendera'y ra'y kuery pe voi xeayvu.

¹⁰ Peaxa ha'vy ye'ẽ rovai Chipre ha'e ijyvýry yvy ikuai va'e re, ha'e peikuaa pota. Quedar katy guive pemondouka penembiguai kuery, toikuua pota porãmba, peikuaa aguã ha'e ramigua peteïve henda py ndoikoi paa re.

¹¹ Tyrã pa oiko teve amboae regua nguuetu kuery omboekovia va'e, nguete e'ŷ guive oguerekotei? Ha'e rami tei xevygua kuery tu mba'everã ovare e'ŷ va'e re omboekovia Omoexakãa.

¹² Yva regua kuery, penhemondyi ke ha'e nunga gui! Pekyjepa, ha'e peryryipa", he'i SENHOR.

¹³ "Mba'eta xevygua kuery ma mokoñ henda py ojapo vai: jypy ojepe'apa yy imarã e'ŷ va'e xee ame'ẽ va'e gui, ha'e gui ygua ojeupe guarã ae ojo'o. Ha'e va'e ma ovopa rei vy yy ndopytaia guive.

¹⁴ "Israel kuery nda'u escravo ikuai teve? Joo py tembiguairã ha'e kuery itui'i va'ekue teve? Ha'e rami e'ŷ ramo mba'e re tu ombo'a pyrã ikuai?

¹⁵ Ha'e kuery rovai ma guary ra'y kuery okororõ ratã 'rã okuapy, ombovaipa 'rã guive ijyvý.† Ha'e ramo ha'e kuery retã okaipa, jipovei ha'e py oĩ va'erã.

¹⁶ Neakã ma Mênfis ha'e Tafnes pygua kuery voi onhopimba.‡

¹⁷ Ha'e nunga ha'e javi oiko ndevy, tape porã rupi SENHOR nderuete nderereko tei ixugui rejepa rire.

¹⁸ Ha'e gui aŷ mba'erã tu Egito yvy katy reo 'rã Nilo yakã gui rey'u aguã? Ha'e rami e'ŷ vy, mba'erã tu Assíria katy reo 'rã Eufrates yakã gui rey'u aguã?

¹⁹ Nderekovaia ae ndeapo vai 'rã, rejerovia etea rupi e'ŷ reikoa oikuua ucaa 'rã nderekovaia. Ha'e gui ma eikuua pota povae nunga re, mba'eta SENHOR nderuete gui rejepa'a rire rendu 'rã nda'evei etea ha'e iro vaikue va'e anho, xerenonde nderejererokyjei rire", he'i SENHOR ixondaro reta va'e.

Baal pe rive Israel kuery ikuiaia re ijayvuague

²⁰ "Yma ma canga ndere oĩ va'e amopẽmba, ha'e ndejokuaague amondopa 'rãgue, tei ndee ma 'Xee ndaikoxei ndevy', 're xevy. Mba'eta yvy'ã yvate ikuai va'e rupi, ha'e yvyla hovana va'e ha'e javi guy rupi renheno vy ndetavy.

²¹ Xee ae ronhoty va'ekue uva rembypy iporã va'e rami, ha'yigue iporâve va'e anho regua. Ha'e rami rire tei mba'exa tu uva iro va'e anho reme'ẽ xevy?

²² Kavõ py rejau, ha'e iky'akue mboia reikyty vaipa tei xerenonde ojekuaa teri nderekovaia ky'a", he'i SENHOR Nhanderuete.

²³ "Mba'exa tu aipo're: 'Xeky'aa noĩ, xee tu ndaikoi rima Baal ra'angaa kuery re', 're? Ha'e rami tei ema'ẽ na yvy'ã guy rupi ndepypo ojekuaa va'e re, eikuua pota na mba'e pa rejapoague re. Camelo ra'y inhakuã va'e tape rupi ojevy-jevy oikovy va'e rami reiko,

²⁴ ha'e mburika ka'aguy regua tekao e'ŷa rupi ava oeka vy yvytu rupi oetü oikovy va'e rami. Avave rei ndojokoi 'rã ojapoxe va'e ojapo aguã gui, hekaa kuery ikane'õ e'ŷ re ojou 'rã guive, ha'e rami aguã jaxy ovaẽ nhavõ.

²⁵ Enheangu ke ndepy rei re e'ŷ renha aguã, nei ndejyryvi remo peve e'ŷ guive. Va'eri ndee aipo're: 'Any, nda'evei teve. Mba'eta amboae regua ruete kuery xee ayvu vy aa 'ræe hakykue', 're.

²⁶ "Ha'e gui imonda va'e ojopya rã oximbaa rami avi Israel kuery voi oximba aguã rami ikuai: heta va'e kuery, huvixa kuery, yvatekueve, sacerdote ha'e profeta kuery voi.

²⁷ Mba'eta ha'e kuery ma yvyla guigua pe rive 'rã 'Ndee ma xeruete', he'i, ha'e ita guigua pe 'Ndee ma xemoingoare', he'i 'rã. Mba'eta xea katy ha'e kuery ikupe okuapy, hova e'ŷ. Ha'e rami tei ikuai axy vy ma 'Epu'ã ke, orereraa jepe', he'i 'rã xevy.

† 2:15 Apy guary ra'y kuery re ijayvua py ma ha'e kuery rovaigua kuery re ijayvu (50.7; Salmo 57.4; Isaías 5.29).

‡ 2:16 Ha'e va'e jave py hovaigua kuery ojavyky rei 'rã inhakã onhopimbaa py (Isaías 7.20).

²⁸ Ha'e gui mamo tu ikuai penderuete kueryrā peē ae pejapo va'ekue? Tove ha'e kuery ae tomyī, pendekuai axy rā pendereraa jepe aguā. Mba'eta peē Judá pygua kuery, penderuete ramigua heta perekō, peteī-teī tetā py.

²⁹ Mba'e re tu pendeayvu rei ri xere? Mba'eta peē kuery ha'e javi xerovai pejejavy va'e", he'i SENHOR.

³⁰ "Pendera'y kuery ambopaga rive, mba'eta xevy pe nonhemo'arandu ukai. Ha'e peē kuery ma pendekyxe py ae pejuka profeta kuery, guary nhomondoropa va'e rami.

³¹ Peē aÿgua kuery, peikuaa pota na SENHOR ayvu re. Xee nda'u peē Israel kuery pe ajapo vai ri teve tekao e'ÿa, e'ÿ vy yvy pytū poyivea py rami? Ha'e rami teī mba'e re tu xevygua kuery aipoe'i: 'Ore ma rooxea katy rei 'rā roo! Ndorojevyvei 'rā ndevy!' he'i okuapy?

³² Ha'e rami avi kuhataigüe nda'u hexarai 'rā ri ojeguaarā re, ha'e rami e'ÿ vy omenda va'erā va'e hexarai 'rā ri oku'akuaa re? Ha'e rami teī xevygua kuery ma hexaraipa xegui, mbovy ára rei e'ÿ.

³³ "Peē ma peikuaa porā pemoaruā va'e rakykue rupi peo aguā. Ha'e rami aguā re kunhague itavy rei va'e voi oikuua 'rā pendegui.

³⁴ Ha'e rami teī pendeao apy re ma iporiaukue'i ha'e oiko rive'i va'ekue ruguy oī. Ha'e kuery imondaa rupi e'ÿ teī pexa vy pejuka va'ekue. Ha'e ramigua ha'e javi pejapo

³⁵ teī aipopeje 'rā: 'Xee ma xepo ky'a va'e'ÿ teve. Xere ma ndoui 'rā Nhanderuete poxya', peje. Ne'ixa, 'Ndajejavyi' peje ramo xee aikuua pota 'rā pendere.

³⁶ Peikoaty gui pejepe'a merami rive 'rā. Mba'eta Assíria pygua kuery napenepytyvōi vy penemoximbaague rami avi Egito pygua kuery voi penemoximba 'rā.

³⁷ Mba'eta ha'e kuerya gui peo ju 'rā peneakā re pepoko reve, mba'eta pejeroviaa va'e kuery ma SENHOR oeja ramo ha'e kuery po py ndapejoui 'rā mba'eve."

3

Heta va'e kuery ojejavy va'ekue ri Nhanderuete omboaxy ju aguā re ijayvuague

¹ "Xapy'a rei peteī ava opoi 'rā gua'yxy gui, ha'e rā kunha va'e omeguea gui oo vy omenda ju 'rā ava mboae re. Ha'e gui ha'e va'e kunhaa py nda'u ime ae ojevy 'rā imerā? Any, ha'e ramigua oiko va'e rire yvy ha'e javi opyta 'rāgue omongy'a pyre.* Ha'e gui peē kuery voi mbovy e'ÿ pemoaruā va'e kuery reve pendetavy rei va'ekue. Ha'e rami ete teī pejevy ju xevy", he'i SENHOR.

² "Pema'ë na yytyt ita anho reia re, ha'e pexa. Mamo tu oī pendetavy rei e'ÿague? Mba'eta tape ikuai va'e rupi peguapy pemoaruā va'e kuery pearō vy, Arábia pygua tekao e'ÿa rupi oma'ë mbegue oinya rami. Ha'e rami vy pemongy'apa ma pendeyvy pendetavy reia ha'e penderekō vaia py.

³ Ha'e nunga rupi ae xee nambo'okyvei, ma'etÿa pyau jave teī. Ha'e rami teī peē ma itavy rei va'e rami penderova re pexa uka napexī kuaaveia.

⁴ Anhetē aÿ ma voi xevy pejapukai rive vy aipopeje: 'Xeru, ndee ma xekyrī guive xerayvu va'e reiko.

⁵ Raka'e peve 'rā tu ndepoxya rupi reiko? Tyrā pa opa peve ete 'rā teve ndepoxy?' peje. Tá, ha'e rami ae xevy pendeayvu va'eri pejejavyve tema 'rā peē ae peipotaa rami rive", he'i SENHOR.

⁶ Ha'e gui huvixa Josias oī jave SENHOR aipoe'ive ju xevy: "Rexa teve Israel kuery kunha itavy rei va'e rami anhetē rupi e'ÿ ikuia? Mba'eta oopa 'rā yytyt yvate va'e áry, ha'e yyvra hovana va'e ha'e javi guy rupi, opa marā rei 'rā itavy ha'e py.

⁷ Ha'e gui xee aexa'ã teī ha'e rami ete oiko ma rire xevy ju ojevy aguā, va'eri ndojevyi. Ha'e nunga ma ikypy'y itavy rei va'e Judá oexapa.

* 3:1 Ha'e kuery pegua lei rami vy itavy reia py ijyvy opyta 'rā iky'apa va'e (Levítico 18.24-28).

⁸ Mba'eta Israel kuery itavy reia ha'e javi re xee amondoukapa, ha'e ixupe ame'ẽ imondovy kuaxia romendaague ambovaipa aguã regua. Ha'e rami teĩ ikypy'y Judá nonhemboaxyi aexaa py. Ha'e rami 'rãgue py ha'e voi oo vy itavy reia rupi oiko avi.†

⁹ Ha'e gui itavy reia gui nonhemboaxyi vy omongy'apa oyvy. Mba'eta ita ha'e yvyra guigua pe rive oikoa py itavy rei tema oikovy.

¹⁰ Ha'e rami ete teĩ ikypy'y Judá anhetẽ rupi e'ŷgua va'e vy ndojevyi xevy opy'a ha'e javi py, ojevy merami rive", he'i SENHOR.

¹¹ SENHOR aipoe'i xevy: "Ha'e rami ete Israel kuery itavy rei va'eri Judá kuery gui heko porâve va'e ikuai.

¹² Ha'e nunga rupi tereo, pova'e ayvu emombe'u kuaray ijapu'a'ia katy rupi. Ha'e vy aipo're: 'Israel kuery pendetavy rei va'e, pejevy na. Ha'e ramo ma pende'áry xee nambouei 'rã xepoxyxa, anhomboaxy va'e vy', he'i SENHOR. 'Ndaxepoxy riaevei 'rã guive.

¹³ Ha'e rami avi peikuua pota na pendeko vaia re, peikuua pota SENHOR penderuete rovai pejeavyague re, mba'eta yvyra hovana va'e ha'e javi guy rupi pendetavy rei, xeayvu re ndapejapyxakai guive', he'i SENHOR."

"Pejeko rerova ke", he'iague

¹⁴ "Xera'y kuery xenhe'ẽ rendu e'ŷ va'e, pejeko rerova ke, mba'eta xee ae ma peneme rami aiko. Ha'e nunga rupi peteĩ-teĩ tetã gui xee roguera 'rã peteĩ, ha'e peteĩ-teĩ regua gui mokõ-mokoõ 'rã roguera. Ha'e vy rogueraa ju 'rã Sião py", he'i SENHOR.

¹⁵ "Ha'e py amoõ 'rã peẽ kuery re opena va'erã xee rami ipy'a va'e. Ha'e va'e kuery ma pendere opena 'rã oikuaapa ha'e o'arandu reve.

¹⁶ Ha'e rami rire pendereta ju 'rã yvy re, pendera'y kuery reta 'rã guive. Ha'e va'e jave ma napendeayvuvei 'rã SENHOR guexeve guarã ojapo va'ekue ryru re, mba'eta ha'e nunga re na'ima'endu'aavei 'rã, 'Oata' nda'eai 'rã guive. Neĩ hekovia ndojapoai 'rã amboae", he'i SENHOR.

¹⁷ "Ha'e va'e jave ma Jerusalém tetã pe 'SENHOR renda' 'ea 'rã. Ha'e py ma ha'e javi regua ono'õmba 'rã SENHOR rery rupi, ha'e vy inhakã ratã reia rupi ve'ŷ 'rã ikuai.

¹⁸ Ha'e va'e ára ma Judá kuery peteĩ rami 'rã ikuai Israel kuery reve. Ha'e vy kuaray ijapu'a'ia katy yvy itui va'e gui joupive peju 'rã pendeyvyrã peneramoõ kuery pe ame'ẽ va'ekue katy.

¹⁹ "Xejeupe ae aipoa'e va'ekue: 'Xee rogueraxe teĩ xera'y kuery mboae mbyte, ha'e pendevy ame'ëxe yvy oipotavepy, amboae regua kuery yvy gui iporâve va'e.' Aipoa'eve ju: 'Xevy pe "Xeru" peje 'rã, xegui ndapejep'eavei 'rã guive', ha'e.

²⁰ Ha'e rami teĩ peẽ Israel kuery, kunha ome gui opoi nhemi va'e rami avi peẽ voi xero py peiko itavy nhemi va'e rami", he'i SENHOR.

²¹ "Yvyty yvateve va'e-va'e rupi onhendu peteĩ ayvu, Israel kuery ojae'o ha'e ojerure nhendu okuapy ramo. Mba'eta ha'eve e'ŷa rami rei pendekuai, SENHOR penderuete gui penderexaraipa rire.

²² Pejevy ke, xera'y kuery xenhe'ẽ rendu e'ŷ va'e. Ha'e ramo xee amonguera 'rã xenhe'ẽ rendu e'ŷague gui", he'i.

Ha'e ramo aipo'ea: "Apy ma orekuai, roju ma ndea py. Mba'eta ndee ma SENHOR oreruete.

²³ Anhetẽ ete ae yvy'ã ikuai va'e áry rupi rojekorea rupi orekuai, yvyty áry rupi oretavy rei va'ekue. Mba'eta SENHOR Oreruete re anho oĩ ore Israel kuery roo jepe aguã.

²⁴ Mba'emo orekyri jave guive oremoximbaarã pe rive orekuia rupi rombovaipa oreramoõ kuery ombo'eapoa rupi ojou va'ekue. Ha'e ramo hymba vexa'i kuery, vaka jipovei, ta'y kuery ha'e tajy kuery voi.

† 3:8 Apy mokoõ kunha joegua oikoa rami ijayvu Israel ha'e Judá kuery re, Israel kuery ojeavyague rami ae ju Judá kuery ojeavy avi ramo. Ha'e va'e jave py ma Israel kuery ojeavyague re Nhanderuete escravo-rã omondoukapa ijyvy gui mombyry (2 Reis 17.6-20).

²⁵ Ro'apa 'rā'vy roxīmbaa py, mba'eta roiko kuaa e'ŷ reia oreao'ipa. Mba'eta rojejavy SENHOR Oreruete rovai, ore ha'e oreru kuery, orekyrī guive kova'e ára peve. Noroendu potai va'ekue SENHOR Oreruete ayvu", 'ea.

4

¹ "Ha'e ramo Israel kuery, pejevyxe ri vy ke xevy pe ete pejevy", he'i SENHOR. "Peipe'apa ojeguarupy xerenonde gui, ha'e pejepe'ave eme xegui.

² Anhetē rupi, 'arandua ha'e teko porāa rupi pendekuai reve peura xee SENHOR aikove va'e rery rupi. Ha'e rami ri pendekuai ramo yvy regua kuery xereroporaei 'rā okuapy, ha'e rā xee amoingo porāmba 'rā", he'i.

³ Mba'eta SENHOR aipoe'i Judá ha'e Jerusalém pygua avakue pe: "Perekō katu pyau penemba'etyrā, ha'e penhotŷve eme juu mbyte rupi.

⁴ Avakue Judá ha'e Jerusalém pygua, pendepire pemboiague rami SENHOR peguarā peiky'a'o avi ke penekuraxō, xepoxya tata rami oẽ vy penderapy e'ŷ aguā imboguarā oiko e'ŷ re, pendeko vaia rupi pendekuai rire."

Kuaray ijapu'a'ia katy gui mba'emo vai ou aguā re ijayvuague

⁵ "Pendu uka na Judá yvy re, pejapo Jerusalém tetā py oendua aguā rami. Ha'e vy aipopeje: 'Pemonhe'ẽ ke mimby guaxu yvy re!' Pejapukai ratā vy aipopeje: 'Peno'õmba ke, nhanha jaike tetā ikorapa va'e py!' peje.

⁶ Pemopu'ã ke imo'amy bandeira Sião katy peo aguā. Pejava na, pemboare eme. Mba'eta xee ajapo 'rā kuaray ijapu'a'ia katy gui mba'emo vai ou aguā rami nhomomba etearā.

⁷ Mba'eta guary ma ituiaty gui oẽ ma ouvy yvy regua kuery mombaarā.* Ou ae ma, oĩaty oeja ma ouvy pendeyvy ha'e peneretā ikuai va'e ombovaipa aguā, avave rei noĩavei aguā rami.

⁸ Ha'e nunga rupi pendejee pemoĩ ao penhemboaxya regua. Peneraxē ha'e pejae'o, mba'eta SENHOR ipoxy etea ndoaxa rivei 'rā nhandegui.

⁹ Ha'e va'e ára ma huvixa kuery nda'ipy'a guaxuvei 'rā, sacerdote kuery onhemondyipa 'rā, ha'e profeta kuery voi okyjepa 'rā", he'i SENHOR.

¹⁰ Ha'e ramo xee aipoa'e: "Ai SENHOR Xeruete! Kore rembotavy uka ra'e kova'e tetā Jerusalém pygua kuery, 'Pendekuai porā 'rā', 're uka vy. Ha'e rami teĩ kyxe ou ma orenhe'ẽ re peve", ha'e.

¹¹ Ha'e va'e javé py kova'e tetā Jerusalém pygua kuery pe SENHOR aipoe'i 'rā: "Xevyguia kuery re yvytu haku va'e oipeju 'rā yvy'ã ita anho reia gui, mba'emo pirekue omboveve aguā e'ŷ guive, neĩ oiky'a'o aguā e'ŷ.

¹² Ha'e rami aguā gui yvytu xea guigua ou va'e ma hatāve ete 'rā. Ha'e rami vy xeayvu 'rā ha'e kuery opaga aguā re", he'i.

¹³ Ne'exa, pee ma arai rami ou oiny imombaarā, ikaróxa ma yvytu atā va'e rami ou. Hymba kavaju kuery ma taguato gui inhakuâve va'e. Nda'evei ete nhandevy! Nhanemomba ta ma!

¹⁴ "Ha'e gui Jerusalém pygua kuery, peo jepe aguā peiky'a'o ke penekuraxō mba'emo vai oĩ va'e gui! Raka'e peve tu pendepy'a re pemoĩ 'rā ha'eve'ŷa rami rei pendekuai aguā?

¹⁵ Mba'eta Dā tetā guive peteĩ ayvu onhendu, yvy'ã reia Efraim re oĩ va'e guive omombe'ua mba'emo vai oikoague.

¹⁶ Perojapukai yvy regua ikuai va'e pe, pendu uka Jerusalém tetā re mba'emo oiko va'erā. Ha'e vy aipo peje: 'Peteĩ yvy mombyry ete va'e gui ou tetā jokoarā kuery, ojapukai jogueruvy Judá yvy re tetā ikuai va'e ha'e javi re', peje.

¹⁷ Mba'eta ha'e kuery ojokopa 'rā Jerusalém mba'ety re opena va'e oarõa rami, ha'e pygua kuery xerovai ikuai rire", he'i SENHOR.

¹⁸ "Mba'eta pendereko vai ha'e mba'emo vai pejapoaty ojapo ha'e nunga pende'áry ou aguā rami. Pendere oiko ta va'e ma iro vaikue va'e, penekuraxō re peve 'rā oo."

* 4:7 "Guary" he'ia ma Babilônia pygua kuery ombou aguā re Nhanderuete ijayvu vy, ojeupagua kuery ojejavyague re ombopaga aguā.

¹⁹ Ai xekuraxō, xekuraxō! Xee narombaraetevei ma haxy! Ai xekuraxō renda! Xekuraxō otytypa rei oiny! Akyrirī aguā nda'evei, mba'eta xenhe'ē py aendu mimby guaxu joe opu'āā pygua omonhe'ēā va'e ramigua.

²⁰ Mba'emo vai oiko jepi rā omombe'ua, yvy jave re ombovaipaa ramo. Xerekoa voi ombovaipaa vyvoi, xapy'a'i py aiaty ivaipa.

²¹ Raka'e peve nda'u aexa 'rā ha'e kuery bandeira omopu'ā rā, ha'e aendu 'rā mimby guaxu omonhe'ē rā?

²² “Xevyguia kuery ma na'inhakā porāveipa, ndaxe kuaavei ma rire. Ta'y kuery hi'arandu e'ŷ va'e ikuai, oendu kuaa ve'ŷ va'e. Mba'emo vai ojapo aguā re anho hi'arandu, ha'e rā iporā va'e ma ndojapo kuaavei.”

²³ Yvy re ama'ē rā natāi, mba'eve noī. Yva re ju ama'ē rā peteīve henda py naexakāi.

²⁴ Yvyty ikuai va'e re ama'ē rā oryryipa, yvy'ā ikuai va'e voi oryryipa avi.

²⁵ Ama'ē rā avakue jipoavei, guyra yvate rupi oveve va'e voi ojavapa ra'e.

²⁶ Ama'ēve ju rā yvy iporā va'ekue opyta ra'e tekao e'ŷa, ha'e tetā ikuai va'ekue oitypaa SENHOR renonde, ipoxy ete ramo.

²⁷ Mba'eta po rami SENHOR ijayvu: “Yvy jave rupi ivaipa 'rā. Ha'e rami teī pavē e'ŷ 'rā amokanhy.

²⁸ Ha'e nunga rupi yvy re ojae'oa 'rā, yva pytūmba 'rā guive. Mba'eta xeayvu ha'e anhembopy'a ae ma rire ndajeko rerovai 'rā, ha'ekue py ndajevyi 'rā guive.

²⁹ Kavaju árygua ha'e hu'y reveguia kuery revovo gui tetā pygua kuery ojavapa. Ka'aguy re oikepa, yvy'ā ikuai va'e rupi oē. Guetā ikuai va'e ha'e javi oeja rive, avave rei noīavei.

³⁰ “Ha'e gui aŷ ma ndee tetā ombovaipa pyre, mba'e re tu guĩ rami rejapo? Mba'eta pytā va'e py renhemonde, ouro guigua remoī, nderexa rembojegua, ha'e renhemoporā rive. Ha'e rami teī remoaruā va'ekue ndere nda'ija'evei vy ndejukaxe okuapy.†

³¹ Mba'eta peteī ayvu onhendu rā aendu kyrī va'e oikuavā'i ta va'e rami, jypyguia kyrī va'e raxy oendu vy ojexavai va'e rami haxē va'e. Ha'e va'e ma Sião memby raxē, ipytuē atā reve opo oupi vy aipoe'i va'e: ‘Aŷ nda'evei ete xevy! Mba'eta xenhe'ē py xekangy ma xejukaarā kuery gui’, he'i va'e.”

5

Jerusalém ha'e Judá pygua kuery ojejavya re ijayvuague

¹ “Peiko-iko Jerusalém tetā py tape ikuai va'e rupi. Pexa pota aŷ, peikuaa pota, peka tetā mbyte rupi peteī'i ri jepe pejou aguā ava teko porā rupi oiko va'e, anhetē va'e rekaa. Mba'eta pejou ri ramo xee aperdoa 'rā tetā pygua kuery ha'e javi.

² Mba'eta ha'e kuery oura vy ‘Anhetē ete SENHOR oikove va'e rery rupi aura’ he'i va'eri anhetē rupi e'ŷ oura”, he'i.

³ Ha'e gui SENHOR, anhetē rupi ikuai va'e e'ŷ ri ty'y rexaxe? Ndee rembojexavai teī ha'e kuery ma haxy noendui. Remomba teī ha'e kuery nonhemo'arandu ukai. Itaova gui hova ratāve va'e vy ndojevyxei ae ma ndevy.

⁴ Xejeupe ae aipoa'e: “Iporiaukue'i anho rima nai'arandui, mba'eta ndoikuuai SENHOR guigua tape neī nguuete oipota va'e.

⁵ Ha'e nunga rupi aa 'rā yvatekueve ikuiai py, ha'e kuery reve xeayvu aguā. Mba'eta ha'e kuery nhi'ā oikuua 'rā SENHOR guigua tape ha'e nguuete oipota va'e”, ha'e va'ekue. Ha'e rami teī ha'e kuery voi peteī rami omopē okuapy canga, ha'e omondopa ijokuaarā omoī mbyre.*

⁶ Ha'e nunga rupi guary ka'aguy regua ojukapa 'rā, aguara'i guaxu tekao e'ŷa regua ombovaipa 'rā, ha'e xivi oma'ē mbegue 'rā oiny ha'e kuery retā yvýry. Ha'e ramo tetā gui

† ^{4:30} Judá kuery ma Nhanderuete gui ojepe'apa vy kunha itavy va'e rami ikuai, amboae regua pe onhepytvō ukaxe vy. Ha'e rami teī ha'e kuery nda'ija'ei vy noipytyvōi. * ^{5:5} Apy “Canga” he'ia ma Israel kuery reko re ijayvu vy, mba'eta vaka om̄ba'eapo va'eri inharō teri, imāxo porā e'ŷ va'e rami ikuai (Deuteronomio 32.15; Atos 26.14).

peteĩ va'e rei oẽ ramo omboa'ypa 'rã, mba'eta gueko vaia ha'e itavy nhemia rupi ikuaive tema oje'oivy.

⁷ “Ha'e rami pendekuaia xee aexa vy mba'exa 'rã tu roperdoa? Mba'eta pendera'y kuery ma xerejapa vy oura 'rã okuapy nguuete e'ŷ rery rupi. Ha'e kuery xee amoevy-atãmba rire teĩ itavy rei okuapy, ono'õ ete okuapy kunhague ro py.

⁸ Kavaju omongaru porãmby rami ha'ekue-'ekue'ŷ katy onha va'e rami peteĩ-teĩ opena rei 'rã okuapy oirũ ra'yxy re ae.

⁹ Xee nda'u aeja rive 'rã ri ha'e rami ikuia ambopaga e'ŷ re? Nambopagai 'rã teve ha'e rami ete ikuai va'e regua?” he'i SENHOR.

¹⁰ “Tapeo ke uvaty ikuai va'e rupi, peitypa, va'eri ha'e javi e'ŷ ta'vy. Pemopẽ ke hakã, mba'eta SENHOR pegua e'ŷ ramo.[†]

¹¹ Mba'eta anhetẽ rupi e'ŷ Israel ha'e Judá kuery ikuai xerovai”, he'i SENHOR.

¹² “Mba'eta SENHOR gui ojepe'apa vy aipoe'i: ‘Ha'e'ŷ rima Nhanderuete’, ha'e ‘Mba'emo vai peteĩve henda py ndoikoi 'rã nhandere. Ndajaexai 'rã kyxe revegua, neĩ karuai’, he'i okuapy.

¹³ Profeta kuery eteve voi yvytu rami rive ikuai, mba'eta ayvu ndoguererekoi. Ha'e kuery nhomongyjeague ha'e kuery re ae ju 'rã ojeapa.”

¹⁴ Ha'e nunga rupi SENHOR Nhanderuete ixondaro reta va'e aipoe'i: “Ha'e rami ete ha'e kuery ijayvu ramo ndejuru py xeayvu amoï 'rã tata rami, ha'e rã ha'e kuery ma ajapo 'rã xakã rami huguepa aguã.

¹⁵ Ne'exa peẽ Israel kuery, mombyry gui ambou 'rã peteĩ regua pende'áry. Ha'e va'e kuery ma imbaraete va'e, yma guare ha'e ijayvu peikuaa e'ŷ va'e. Ha'e kuery ijayvu rã peẽ napendu kuaai 'rã”, he'i SENHOR.

¹⁶ “Ha'e kuery ru'y ryru ma yvyra rupa py ikua ojepe'a va'e rami nhomomba va'e. Ha'e va'e regua avakue ma ipy'a guaxuve va'e meme.

¹⁷ Ha'e kuery ho'upa 'rã mba'emo pemono'õ ha'e mbojape pejapo va'ekue. Omomba 'rã pendera'y ha'e penderajy kuery. Ho'upa 'rã penerymba vexa'i ha'e vaka kuery. Uva ha'e figo penhotŷ va'ekue voi ho'u 'rã. Okyxe py oitypa 'rã peneretã ikorapa va'e pejeroviaague ha'e javi.

¹⁸ Ha'e rami avi ha'e va'e ára teĩ xee noromomba katuĩ'i 'rã”, he'i SENHOR.

¹⁹ “Ha'e gui ndevy pe ha'e kuery oporandu 'rã: ‘Mba'e re tu SENHOR Nhanderuete ha'e nunga ha'e javi omoingo nhandere?’ he'i 'rã ndevy. Ha'e ramo rembovai 'rã: ‘Peẽ kuery xereja, ha'e pendeyvy re amboae ramigua tuuete pe pendekuai rire amboae regua kuery pe ju 'rã pendekuai pendeyvy re e'ŷ’, ‘re 'rã’.

²⁰ “Po rami emombe'u Jacó ramymino kuery pe, ejapo Judá kuery oendupa aguã rami. Ha'e vy aipo're:

²¹ ‘Napene'arandui ha'e napendu kuaai va'e kuery, pendu ke aŷ pova'e ayvu, mba'eta penderexa oĩ teĩ ndapexai, ha'e pendeapyxa oĩ teĩ napendui va'e.

²² Xerenonde ndapejererokyjei 'rã teve?’ ” he'i SENHOR. “Xerenonde teĩ napekyrirĩ 'rã ri? Mba'eta xee ma ita ku'i reia amoï va'ekue ye'ẽ jokoa raka'e rã peve guarã. Ha'e va'e re yai ojeapi-api teĩ ndojapoi 'rã mba'eve, hevovo ratã teĩ ndoaxai 'rã.

²³ Ha'e rã kova'e kuery ma opy'a re omoï xevy e'ŷ ikuai aguã, inhakã ratãa rupi. Ha'e rami vy xere opu'ã vy xerejapa oje'oivy.

²⁴ Mba'eta ha'e kuery aipo nde'i: ‘Aŷ ma nhandekuai 'rã SENHOR Nhanderuete gui jajererokyjea rupi, mba'eta ha'e ma ha'evea ára py oky ombou va'e, haku-a ypya ára ha'e opaa py voi, ha'e mba'emo nhamono'õ aguã ára ojeupity aguã ojapo va'e’, nde'i.

²⁵ Ha'e rami 'rãgue py penderekoi vaia ojapo mba'emo porã noĩvei aguã, pejejavya ojapo pendekuai porã aguã va'ekue novaẽi aguã rami.

²⁶ “Mba'eta xevygua kuery mbyte ikuai mba'emo vai ojapo va'e. Peteĩ-teĩ joe oma'ẽ mbegue 'rã okuapy guyra'i ombo'axe va'e rami. Ha'e kuery nhuã ojayvy 'rã avakue ombo'a aguã.

[†] 5:10 Apy ma Israel rovaigua kuery pe ijayvu.

²⁷ Guyra'i gaiola tynyē va'e rami ha'e kuery ropy tynyē 'rā jokoreague repy. Ha'e rami vy ipo'akave ha'e oguerekopave 'rā oje'oivy.

²⁸ Ikyrapa 'rā guive, hevyatāmba riae. Pavē gui heko vai raxave 'rā. Noipytyvōi 'rā tyre'ŷ kuery mba'emo oguerekō'i aguā, iporiaukue'i reko re ndoikuua potai 'rā guive.

²⁹ Xee nda'u aeja rive 'rā ri ha'e rami ikuia ambopaga e'ŷ re? Nambopagai 'rā teve ha'e rami ete ikuia re?" he'i SENHOR.

³⁰ "Ha'e gui ma mba'emo nhomondyipaarā ha'e nhomokanhyarā oiko yvy re.

³¹ Mba'eta profeta kuery omombe'u merami rive 'rā xeayvu, ha'e ha'e kuery re sacerdote kuery onhemoirū vy joguerekō poyi 'rā okuapy. Ha'e nunga ae rima xevyguia kuery ojou porā okuapy. Ha'e rami teī mba'e tu ha'e kuery ojapo 'rā ovaē ramo ha'e nunga opa aguā ára?"

6

Jerusalém tetā ojokopaa aguā re ijayvuague

¹ "Benjamim kuery, penhamba ke Jerusalém tetā mbyte gui. Pemonhe'ẽ mimby guaxu Tecoa tetā py, ha'e Bete-Haquerém áry rupi pemoendy tata ikuua ukaarā, mba'eta kuaray ijanpu'a'ia katy gui ou 'rā mba'emo ja'ea ha'eve'ŷ va'e nhomomba etearā.

² Mba'eta tetā porā Sião memby 'epyre ma xee aeja 'rā omboa'ypa pyrā.

³ Ha'e ramo hovaigua kuery ou 'rā guymba kuery reve. Ijyvýry rupi ojapo 'rā oo'i. Ha'e vy peteī-teī guymba kuery omongaru 'rā ikuai aguā py ae."*

⁴ "Peiko katu ke tetā re pepu'ã aguā! Pepu'ã ke, jaje'oi kuaray mbyte javé. Ai kore, nda'evei ete 'rā nhandevy! Ka'aru ma, ka'arua omokuaray'ã ma heravy.

⁵ Pepu'ã ke, ha'e kuery rovai jaje'oi pyavyve. Nhambovaipa ha'e kuery ro ikorapa va'e onhemiatiy", he'i 'rā okuapy.†

⁶ Mba'eta SENHOR ixondaro reta va'e aipoe'i: "Pejayapa yvyra, ha'e pemopu'ã Jerusalém pejoko aguā. Ha'e va'e tetā ma ambopaga va'erā ae oĩ. Mba'eta mbyte rupi ma nhomoingo axya anho ikuai.

⁷ Yguarā ojo'o pyre yy oĩ riae va'e rami avi tetā re oĩ riae heko vai va'e. Ha'e py ikuai jojukaa ha'e mba'emo mbovaipaarā. Xerenonde ma imba'eaxyha'e ijai oĩ riae.

⁸ Ndee Jerusalém, enhemo'arandu uka nho ke, ndegui xee ajope'a e'ŷ aguā, ha'e gui xee rombovaipa vy oia ve'ŷ aguā rami rojapo e'ŷ aguā."

Ha'e kuery ojejavya py hetā ombovaipaa aguā re ijayvuague

⁹ SENHOR ixondaro reta va'e aipoe'i: "Ky're'ŷ rupi oeka-ekaa 'rā Israel kuery okuave'i va'e, uva'a mono'õa hakā ikuai va'e mbyte rupi opovyvya rami", he'i.

¹⁰ Ha'e rami xeayvu vy ndeayvu amombe'u teī mava'e tu oendu 'rā? Ne'exa, ha'e kuery oapyxia ombotypa rire noendui 'rā. Ha'e kuery pe rā SENHOR ayvu ma ojeguarupy rami, noenduxei ramo.

¹¹ Ha'e rā xere ma oĩ SENHOR poxya amombe'u aguā. Xekane'õ ma aendu riae vy. Mba'eta aipoe'i: "Anhoë 'rā xepoxya kyrīgue tape rupi ikuai va'e ha'e kunumigue nhomboaty va'e áry. Ha'e ramo ombo'apaa 'rā ime kuery ta'yxy reve, tujakue'i ha'e ikarēmba rei'i va'e voi.

¹² Ha'e kuery rogue omboaxapaa 'rā amboae kuery pe, imba'ety ha'e ta'yxy oguerekō va'ekue voi, kova'e yvy re ikuai va'e rovai xepo aupi ramo", he'i SENHOR.

¹³ "Mba'eta peteī-teī ojou reta-retavea rupi ikuai, kyrīgueve ha'e tujakueve voi. Profeta ha'e sacerdote kuery voi jokorepa rei okuapy.

¹⁴ Ha'e kuery ma hi'a'iry rive 'rā omonguera xevyguia kuery. Ha'e vy 'Ha'evepa rei, mba'eve ndoikoi 'rā', he'i rive 'rā okuapy, ha'evepa rei ramo e'ŷ.

¹⁵ Ha'e kuery oxīmba 'rā, mba'eta oxī e'ŷa py ojapo okuapy ojeguarupy, noxī kuaavei guive. Ha'e nunga rupi ho'apa 'rā amboae kuery ho'aague rami. Xee ambopaga rā onhepyxangapa 'rā", he'i SENHOR.

* 6:3 Apy xondaro kuery Jerusalém jokoarā ou va'e re ijayvu. "Guymba kuery reve 'rā ou" he'ia ma xondaro kuery re ijayvu vy. † 6:5 Apy ma xondaro kuery jogueroayvu tetā re opu'ã aguā.

¹⁶ “Po rami SENHOR ijayvu: ‘Pepyta pe’amy tape joaxaa yvýry peexa pota aguã. Peporandu tape porã yma oĩ va’ekue re, ha’e tapeo ha’e va’e rupi ae. Ha’e rami vy pejou ‘rã penenhe’ẽ opytu’u aguã’, ha’e va’ekue teĩ ha’e kuery ma ‘Ore ma ndorooi ‘rã’ he’i okuapy.

¹⁷ Ha’e rami rã amoĩ peẽ kuery rekoaa rarõarã kuery. Ha’e vy aipoa’e: ‘Pejapyxaka ke peiny mimby guaxu ipu rã guarã’, ha’e teĩ ha’e kuery ‘Ore ma noroendui ‘rã’, he’i okuapy.

¹⁸ Ha’e rami rire yvy regua kuery, pendu ke. Peno’õ va’e kuery, peikuaa pota ke xevyguia kuery mbyte oiko va’erã va’e re.

¹⁹ Yvy regua kuery, pendu ke! Mba’eta ha’e kuery áry xee ambou ‘rã mba’emo vai. Ha’e kuery ae ikuaixeague repy ‘rã ambou, xeayvu re ndojapyxakai ha’e xeguigua lei omboyke okuapy rire.

²⁰ Ha’e nunga rupi mba’erã tu xea py ha’e kuery ogueru Sabá yvy guigua heakuã porã va’e ha’e yvyra aygue’i heakuã porã va’e yvy mombyryve guigua oapy aguã? Mba’eta xevy guarã peapy va’e ma xee ndarovy’ai, xee ndajou porãi peme’ẽ va’e.”

²¹ Ha’e nunga rupi SENHOR aipoe’i: “Ne’exa, xee amoĩ ‘rã kova’e kuery reityarã. Ha’e ramo ho’apa ‘rã okuapy, tuu kuery ha’e ta’y kuery voi. Ha’e katy’i rupi ikuai va’e voi omanomba ‘rã, irũ kuery guive.”

Kuaray ijapu'a'ia katy gui hovaigua kuery ou aguã re ijayvuague

²² SENHOR aipoe’i: “Peteĩ regua ou ‘rã kuaray ijapu'a'ia katy gui, heta ete va’e regua opu’ã ‘rã jogueruvy yvy apy gui.

²³ Guyrapa ha’e hu’y reve ‘rã ou. Ha’e kuery ma porayvu va’e’ŷ, nhomboaxy kuaa va’e’ŷ. Ye’ẽ rami ‘rã hevovo. Kavaju áry ‘rã ou. Ha’e rami vy xondaro kuery hyxypa ‘rã jogueruvy peẽ Sião pygua kuery re opu’ã okuapy aguã”, he’i.

²⁴ “Ha’e kuery oua omombe’ua rã nhaendu vy nhandepo hu’umba. Nanhanderekorrâveipa, omemby oikuavã’i ta va’e raxy ramigua nhaendu guive.

²⁵ Tapeo eme mba’ety rupi, neĩ peguata eme tape rupi, mba’eta nhanderovaigua kuery kyxe reve ou. Jova-jovai re ikuai nhanemongyjearã.

²⁶ Xeretarã rajy kuery, pemoĩ ke ao penhemboaxya regua, ha’e penhembojere pejupy tanhimbu rupi. Pejae’o ipi’i peteĩ’i va’e re ojae’o va’e rami, pejexavaia gui ae. Mba’eta nhande’áry ou xapy’i ‘rã nhanemombaarã.”

Oiky'a'o nhea'ã rivea re ijayvuague

²⁷ “Xevyguia kuery mbyte ndee romoĩ prata ky’a’oarã, ha’e oo imbaraete va’e rami, ha’e kuery reko rexa vy reikuaa pota aguã.

²⁸ Mba’eta ha’e kuery ma naxenhe’ẽ renduia rupi tema ikuai, joekokue mombe’u rivea rupi guive. Overa va’e ha’e ferro rami rive ikuai iky’apa va’e vy.

²⁹ Mba’eta tata áry prata ky’a’oa oipeju atã teĩ chumbo anho rei opyta tata opa rire. Aiky’i a’o nhea’ã rive, ha’e kuery mbyte gui heko vai va’e ndojepe’ai ramo.

³⁰ Ha’e kuery pe ma ‘Prata ky’akue rive’ ‘ea ‘rã, SENHOR omombopa ramo.”

Templo re rive ha’e kuery ojeroviaa re ijayvuague

¹ Po rami SENHOR oayvu ombou Jeremias pe:

² “Ei ke SENHOR pegua oo rokẽ py xeayvu remombe’u aguã. Ha’e vy aipo’ere: ‘Judá regua kuery kova’e okẽ rupi SENHOR pemboete aguã peike va’e ha’e javi, pendu ke SENHOR ayvu’, ‘re.”

³ Mba’eta SENHOR ixondaro reta va’e Israel kuery ruete aipoe’i: “Pejeko rova ke amboae rami pendekuai aguã. Ha’e ramo xee ajapo ‘rã kova’e tekaoa py pendekuaise aguã rami.

⁴ Pejeroviave eme po ramigua ayvu rive: ‘Apy ma oĩ templo SENHOR pegua, templo SENHOR pegua, templo SENHOR pegua’, he’i va’e re pejerovia eme.

⁵ Ha’e rami ‘rãgue py pejeko rova ke amboae rami pendekuai aguã, ha’e peteĩ-teĩ ha’evea rami pejapo peneirũ kuery reve.

⁶ Pejavyky rive eme amboae yvy regua, tyre'ŷ neĩ imeve'ŷ va'e kuery guive. Kova'e henda py pemoẽve eme heko porã va'e ruguy, peiko eme guive amboae ramigua tuuete kuery re, pendejeupe ae pejapo vai e'ŷ aguã.

⁷ Ha'e rami ri pendekuai ramo xee ajapo 'rã kova'e yvy re pendekuaive aguã rami, yma guive peneramoĩ kuery yvy raka'eve rã peve guarã ame'ẽ va'ekue py.

⁸ “Ne'exa, peẽ kuery ma ayvu rive perovia va'e, pendevy mba'everã ovare'ŷ va'eri.

⁹ Mba'e tu pejapo? Penemonda, pejojuka, pendetavy rei ha'e peura merami rive. Heakuã porã va'e peapy 'rã tuuete ramigua Baal pe, ha'e amboae ramigua tuuete peikuaa e'ŷ va'e katy peo.

¹⁰ Ha'e rire teĩ peju vy xerenonde pepu'ã 'rã pekuapy kova'e oo xerery oĩaty py. Ha'e vy aipopeje 'rã: ‘Jaa jepe ma’, peje teĩ mba'emo vai pejapove tema rive.

¹¹ Kova'e oo xerery oĩaty ma imonda va'e kuery onhemiaty rami teve peikuaa? Ne'exa, xee ma ha'e nunga ha'e javi aexapa”, he'i SENHOR.*

¹² “Ha'e gui tapeo opy xevygua Siló tetã py oĩague katy. Ha'e py ma jypy'i xerery amoĩague. Ha'e gui pexa ke ha'e py ajapo va'ekue, xevygua Israel kuery heko vaiague re ambopagaague.*

¹³ Aŷ ma ha'ekue nunga ae peẽ voi pejapo avi”, he'i SENHOR. “Pendevy xeayvu jepi ko'ẽ rai guive teĩ napendui. Peẽ kuery xee roenoĩ teĩ peẽ naxembovai.

¹⁴ Ha'e ramo Siló tetã re ambovaipaague rami ambovaipa avi 'rã kova'e oo xerery oĩaty re, ha'e va'e re rive pejerovia ramo, ha'e kova'e tekao re guive, pendevy ha'e peneramoĩ kuery pe ame'ẽ va'ekue ri.

¹⁵ Ha'e rami vy peẽ kuery roipe'apa 'rã xerenonde gui, penderyvy kuery Efraim regua aipe'apaague rami ae ju.”

Guetarã kuery re profeta ojerure e'ŷ aguã re ijayvuague

¹⁶ “Ha'e nunga rupi ejerureve eme kova'e kuery re, ejapukaive eme, enhea'ave eme renhembo'ea py, mba'eta xee naendui 'rã.

¹⁷ Ndee nda'u nderexai teve ha'e kuery ojapo va'e Judá re tetã ikuai va'e ha'e Jerusalém py tape ikuai va'e rupi?

¹⁸ Mba'eta ta'y kuery ogueru 'rã yxakã, ha'e tuu kuery ju omoendy 'rã tata. Ha'e rã kunhague ma omoapomo 'rã trigo mbojape ojapo aguã xyete ramigua yva pygua peguarã.† Tuuete kuery mboae pe voi ome'ẽ 'rã mba'emo rykue, xembopoxy aguã rami rive.

¹⁹ Ha'e rami avi xee ae ri nda'u ha'e kuery ombopoxya? Tyrã pa ha'e kuery ae e'ŷ teve onheroangeko, oximba rei aguã rami?” he'i SENHOR.

²⁰ Ha'e nunga rupi SENHOR Nhanderuete aipoe'i: “Ne'exa, kova'e tekao áry anhoẽ 'rã xepoxya ha'e ajou vaia, avakue ha'e mymba ikuai va'e áry, yvyla ikuai va'e ha'e mba'emo aju yvy gui oiko va'ekue áry guive. Ha'e gui ha'e nunga okai vy ndoguei 'rãe.”

Mba'emo nhame'ẽ jepia rive mba'everã ndovareia re ijayvuague

²¹ SENHOR ixondaro reta va'e, Israel kuery ruete aipoe'i: “Mymba peapy reve peme'ẽ va'erã Peru teĩ pendejeupe ae topyta ho'okue pe'u aguã.

²² Mba'eta jypy'i Egito yvy gui peneramoĩ kuery anoẽmba jave py ma ndaxeayvui va'ekue mba'emo oapy aguã re, neĩ mba'eve name'ẽ ukai xexeupe.

²³ Ha'e rami 'rãgue py povae nunga anho ajapo uka ha'e kuery pe. Aipoa'e: ‘Pejapyxaka ke xeayvu re. Ha'e ramo xee aiko 'rã Penderuete, ha'e rã peẽ ma xevygua kuery 'rã peiko. Peiko ke ajapo uka va'ekue ha'e javi rupi, pendekuai porã aguã’, ha'e va'ekue.‡

* 7:11 Mateus 21.13, Marcos 11.17, Lucas 19.46 * 7:12 Ha'e kuery tuuete mboae ramigua re ikuai ramo SENHOR ombovaipa raka'e Siló tetã (1 Samuel 4.1-11). † 7:18 Apy “Xyete yva pygua” he'ia ma Babilônia pygua kuery xyete “Rainha” 'epy va'e re ijayvu vy (44.17-19, 25). ‡ 7:23 Egito gui Nhanderuete ha'e kuery oguenoẽ jave py ma onhe'ẽ rendu aguã re anho ranhe ijayvu, mba'emo ome'ẽ aguã re'ŷ (Êxodo 19.3-6). Mba'eta mba'emo ixupe nhame'ẽa gui oipotave nhanhe'ẽ rendu (6.20; Salmo 40.6-8; Isaías 1.11-17).

²⁴ Ha'e rami teĩ ha'e kuery ndojapyxakai, noendu potai. Ha'e rami vy ha'e kuery ae onhemongetaa rupi ikuai, inhakã ratã reia rupi guive. Ha'e rami vy guakykue katy ojevy, guenonde katy ndooi.

²⁵ Egito gui peneramoĩ kuery anoẽmba ára guive aŷ peve pendea py ambou xerembiguai profeta kuery, ko'ẽ nhavõ, ko'ẽ rai guive ambou.

²⁶ Ha'e rami teĩ peẽ kuery ndapejapyxakai xeayvu re, ndapeikuua potai guive. Ha'e rami 'rãgue py peneakã ratã va'e vy peneramoĩ kuery gui nda'eveive va'e pejapo.

²⁷ "Ha'e nunga rupi ha'e kuery pe xeayvu ha'e javi remombe'u teĩ ha'e kuery ndojapyxakai 'rã ndeayvu re. Renoĩ teĩ nanembovai 'rã okuapy.

²⁸ Aipo'ere ha'e kuery pe: 'Peẽ kuery ma SENHOR Penderuete ayvu re peikuua pota va'e'ŷ, napenhemo'arandu ukai guive. Ha'e ramo anhetẽ va'e nonhenduvei ma, pendejuru py noïvei ma', 're.'

Judá kuery re Nhanderuete nopenavei aguã re ijayvuague

²⁹ Peẽ Jerusalém pygua kuery, pejajapa ke pende'a xevy pe iky'a e'ŷ va'erã pemboaxa va'ekue, ha'e pejae'o peovy yvyty yvateve va'e áry katy. Mba'eta SENHOR nopenavei ma 'rã peẽ aŷguia kuery re, pendejou vai vy napendereraa jepevei ma 'rã guive.

³⁰ Mba'eta SENHOR aipoe'i: "Xerenonde Judá kuery heko vai okuapy. Ha'e rami vy xerery oĩaty py omoĩ okuapy mba'emo ra'angaa ojeguarupy, omongy'apa aguã rami rive.

³¹ Hinom ra'y rekoague yvyugua py voi ojapo avi altar Tofete 'epy va'e, ha'e py gua'y kuery ha'e guajy kuery oapy aguã. Ha'e ramigua ma xee ajapo uka va'ekue'ŷ, neĩ nanhembopy'ai guive.

³² Ne'exa, ou 'rã ára ha'e va'e pe 'Tofete' nda'eavei aguã, neĩ 'Hinom ra'y rekoague yvyugua' nda'eavei voi. Ha'e rami 'rãgue py 'Yvyugua jojukaaty' 'ea 'rã. Mba'eta Tofete py ma ojatya 'rã omano va'ekue retekue, amboae henda py nda'evei ramo", he'i SENHOR.

³³ "Ha'e ramo ha'e kuery retekue opyta 'rã guyra yvate rupi oveve va'e ha'e mymba yvy guy rupigua ho'u va'erã. Ha'e nunga mondiyarã ndoikoi 'rã guive.

³⁴ Mba'eta Judá re tetã ikuai va'e ha'e Jerusalém py tape ikuai va'e rupi amombytu'upa 'rã ov'y'a rei va'e ayvu, omenda va'erã avakue ha'e kunhague ayvu guive. Ijyvy ojeapo 'rã ombovaipa pyre."

8

¹ SENHOR aipoe'i: "Ha'e va'e jave ma Judá regua huvixa kuery ha'e yvatekueve kãgue oguenoẽmbaa 'rã onhono porãague gui, sacerdote ha'e profeta kuery, ha'e Jerusalém pygua kuery kãgue ha'e javi.

² Ha'e rami vy omoãmbaa 'rã kuaray ojopea ha'e jaxy rexakãa rupi, ha'e yva re ikuai va'e ha'e javi guýry rupi, mba'eta ha'e nunga ha'e javi ha'e kuery omboete vy ha'e va'e pe ikuai rire, hakykue rupi mba'emo re oporandua rupi oo, ha'e henonde guenapy'ã re oĩ rire. Ha'e va'e rire ma ikãgue nomono'õave imbokuapyi 'rã, nonhono porãa jevyvei 'rã guive. Mymba repoxi rami rive 'rã opyta yvy re.

³ Kova'e kuery heko vai va'e okuave va'e amoai 'rã opa rupi. Ha'e ramo ha'e kuery oikovexe 'rãgue py omano voixe 'rã okuapy", he'i SENHOR ixondaro reta va'e.

Nhombopaga aguã re ijayvuague

⁴ Aipo'ereve tema: "Po rami SENHOR ijayvu: Avakue ho'a vy nda'u nopu'ã jevyi 'rã ri? Tape ojavy va'ekue nda'u ndojevyi 'rã ri guape py?

⁵ Ha'e rami teĩ mba'era tu Jerusalém pygua kuery ojeroviaa gui ojepe'a ma vy oeja riae ri? Mba'eta ha'e kuery ojekorea rupi ae tema ikuai, ndojevyxei vy.

⁶ Xee ajapyxaka, aendu pota ainy teĩ ha'e kuery nda'ijayvui ae ha'evea ramigua re. Avave rei ndoikoi heko vaia gui onhemboaxy vy 'Mba'e tu ajapo?' he'i va'e. Mba'eta peteĩ-teĩ ma guape rupi ae oiko atã 'rã, kavaju joe opu'ãa katy onha atã va'e rami.

⁷ Ha'e rã cegonha yvate rupi oveve va'e ma oikuua 'rã ojevy aguã ára. Pyku'i'i, mbyju'i ha'e grou voi oveve ov'y aguã ára re oikuua pota va'erã meme. Ha'e rã xevyguia kuery ma ndoikuua potai xee SENHOR ambopaga ta rã.

⁸ Mba'exa tu peẽ kuery aipopeje: ‘Nhande kuerya py SENHOR guigua lei oĩ ramo nhane'arandupa va'e’, peje? Mba'eta lei re nhombo'e va'ety kuery lei oguerova vy penembotavy.

⁹ Ha'e ramo hi'arandupa va'ekue oximba 'rã, ombo'apaa rã ndaekorävei rei vy. SENHOR ayvu ha'e kuery oeja ma ramo mba'e nunga 'arandu tu ha'e kuery re oĩ?

¹⁰ Ha'e nunga rupi ta'yxy kuery amboaxa 'rã amboae kuery pe, imba'ety guive amboaxapa 'rã ija pyaurã pe. Mba'eta peteĩ-teĩ jokorepaa rupi ikuai, yvyi'igueve ha'e yvatekueve voi. Profeta ha'e sacerdote kuery ma apu rupi ikuai va'e meme.

¹¹ Ha'e kuery ma hi'a'iry rive 'rã omonguera xevyguia kuery. Ha'e vy ‘Ha'evepa rei, mba'eve ndoikoi 'rã’, he'i rive 'rã okuapy teĩ ha'evepa rei ramo e'ŷ.

¹² Ha'e nunga rupi ha'e kuery omoximbaa 'rã, mba'eta oxí e'ŷa py ojapo okuapy ojeguarupy, noxí kuaavei guive. Ha'e nunga rupi ho'apa 'rã amboae kuery ho'aague rami. Xee ambopaga rã onhepyxangapa 'rã okuapy”, he'i SENHOR.

¹³ “Mba'eta xee amokanhymba 'rãe. Noïvei ma 'rã uva'a hakã re, neï figo hi'y re. Hogue voi overepa ma. Xeayvu ae ma ha'e kuery áry ha'e nunga ou aguã re”, he'i SENHOR.

¹⁴ Mba'e re tu apy teri jaguapy nhainy? Pendeaty ke tetã ikorapa va'e py jaikepa aguã nhamanomba aguã ha'e py. Mba'eta SENHOR ijayvu ae ma nhandejuka aguã re, jay'u aguã ome'ẽ ma yy veneno re irã va'e, SENHOR rovai jajejavvy rire.

¹⁵ Mba'emo porã nharõ teĩ iporã va'e jipoi, jakuera aguã ára 'rãgue py nhanemongy-jepaarã ou.

¹⁶ Dã tetã guive onhendu ma nhanderovaigua kuery renda kavaju pytuẽ. Yvy ha'e javi rupi oryyipa hymba kavaju onhendua gui. Ha'e kuery ou 'rã, ombovaipa 'rã nhandeyvy, yvy re mba'emo ikuai va'e ha'e javi guive, tetã ha'e ha'e pygua kuery ha'e javi reve.

¹⁷ “Mba'eta penembyte ambou 'rã mboi vaikue ha'e popia va'e, imomäxoarã jipoi 'rã guive. Ha'e ramo pendexu'upa 'rã”, he'i SENHOR.

Hetarã kuery ikuai axy rã profeta ndovy'aiague

¹⁸ Ai, xee anhembopy'a porã kuaa va'e rire xeporiaua gui! Xekuraxõ voi ikangypa ma.

¹⁹ Mba'eta xeretarã rajy kuery yvy mombyrya py ikuiai py ojapukai okuapy: “Sião tetã py nda'u SENHOR noïvei teve? Noïvei teve ha'e py Nhanderuvixave?” he'i okuapy.

Ha'e ramo aipoe'i: “Ha'e rami avi mba'e re tu xembopoxy pekuapy mba'emo ra'angaa pejapo va'ekue py, ha'e amboae regua kuery pegua ta'angaa pemboetea py?” he'i.

²⁰ Oaxa ma mba'emo nhamono'õ aguã ára, opa ma haku-a teĩ nhande ma ndajaa jepei teri.

²¹ Xeretarã kuery ikuai axy rã xee nda'evei ete aiko, ajae'o aikovy ha'e kuery re. Anhemondyi reia anho aendu.

²² Gileade yvy re jipovei teve moã? Ha'e py nhanepoanoarã jipovei teve? Mba'exa tu ndoikoi ri xeretarã kuery mongueraarã?

9

¹ Xeakã yvu ramigua ojeapo vy xerexay oẽ riae va'e rire ara py ha'e pyávy xee ajae'o 'rãgue xeretarã kuery regua omanogue re.

² Ha'e rami e'ŷ vy teko a'e ũa py oguata va'e okeaty ramigua areko va'e rire xeretarã kuerya gui mombyry 'rãgue aĩ, ha'e kuerya gui ajepe'a 'rãgue. Mba'eta ha'e kuery ma itavy rei ha'e nhombotavy rei va'e meme.

³ SENHOR aipoe'i: “Ha'e kuery ma guyrapa rami oapekũ omokarẽ va'e, ijapu aguã rive. Yvy re imbaraeteve 'rã oje'oivy va'eri anhetẽ rupi e'ŷ. Heko vaive aguã katy oove tema 'rã, ha'e rã xee ma ndaxekuaai okuapy.

⁴ Penheangu ke peteĩ-teĩ peneirã kuery gui, pejerovia eme penderyvy ae re teĩ. Mba'eta penderyvy kuery nhombotavypa reia rupi anho ikuai, ha'e peneirã kuery omombe'u rive 'rã joekokue ramigua.

⁵ Peteĩ-teĩ ojojai rei 'rã ojea katy'i rupi ikuai va'e, ha'e anhetẽ va'e rupi e'ŷ 'rã ijayvu. Apu rupi rive onhembo'e 'rã ijayvu aguã re. Ikane'õ 'rã okuapy mba'emo vai ojapoa rupi.

⁶ Anhetē rupi e'ŷ ikuai, anhetē rupi e'ŷ vy ndaxekuaa potai guive”, he'i SENHOR.

Ha'e kuery operdepa, ha'e escravo-rā ogueraapaa aguā re ijayvuague

⁷ Ha'e nunga rupi SENHOR ixondaro reta va'e aipoe'i: “Ne'exa, ha'e kuery xee aiky'a'o vy aa'anga 'rā. Tyrā pa marā rami pa areko ta xevygua kuery?

⁸ Mba'eta ha'e kuery apekū ma hu'y jojukaarā ramigua oī, nhombotavya rupi rive ijayvu va'e vy. Ojuru py ijayvu 'rā oirū kuery reve ikuai porā aguā re, ha'e rā opy'a py ma omoī 'rā ojuka aguā.

⁹ Xee nda'u aeja rive 'rā ri ha'e rami ikuia ambopaga e'ŷ re? Nambopagai 'rā teve ha'e rami ete ikuai va'e regua?” he'i SENHOR.

¹⁰ Xee ajae'o 'rā yvyty ikuai va'e re, xerexay vaipa 'rā nhuündy tekao e'ŷa rupi ikuai va'e re. Mba'eta okaipa ma, ha'e avave rei ndoaxaavei ma ha'e rupi. Vaka voi nonhe'ẽ nhenduvei ma ha'e py. Guyra yvate rupi oveve va'e ha'e mymba kuery okanhymba ma oje'oivy.

¹¹ Mba'eta aipoe'i: “Xee ajapo 'rā Jerusalém tetā mba'emo ra'ykuerā rive, ha'e jaguatuvy nhe'ẽ ikuai atyrā. Ha'e Judá yvy re tetā ikuai va'e ma ajapo 'rā tekoague oī aguā, avave rei noñavei aguā rami”, he'i rire.

¹² Ha'e gui mava'e ava nda'u hi'arandu va'e ha'e nunga oendu kuaa aguā, ixupe SENHOR oayvu oikuua uka rā? Mava'e nda'u omombe'u porāve kuaa 'rā mba'e re pa yvy ixaipa ha'e okai tekao e'ŷa rami, ha'e rupi avave rei ndoaxaavei aguā rami?

¹³ Ha'e ramo SENHOR ombovai: “Mba'eta ha'e kuery rekora xeguigua lei aeja va'ekue gui ojepe'apa rire. Ha'e kuery ndojapyxakai xeayvua re, neñ ha'e va'e rupi nda'ikuai guive.

¹⁴ Ha'e rami 'rāgue py inhakā ratā va'e vy ta'angaa Baal ikuai va'e re rive ikuai, tuu kuery ombo'eague rami ae”, he'i.

¹⁵ Ha'e nunga rupi SENHOR ixondaro reta va'e, Israel kuery Ruete aipoe'i: “Ne'exa, ha'e kuery xee amongaru 'rā veneno re, ha'e yy veneno re irū va'e ame'ẽ 'rā oy'u aguā.

¹⁶ Amoñmba 'rā yvy regua ha'e kuery tuu kuery oikuua e'ŷ va'e ikuia rupi. Ha'e gui ha'e kuery rakykue amondouka 'rā kyxe revegua, amomba peve”, he'i.

¹⁷ SENHOR ixondaro reta va'e aipoe'i: “Pendu ke! Penoī ke kunhague joguerojae'o kuaa va'e, peka uka ou aguā”, he'i.

¹⁸ Tove ha'e kuery tou pojava, nhande áry rupi tajoguerojae'o rei nhendu, nhande voi nhanderexaya ha'e nhanderexagui yy oē vaipa aguā.

¹⁹ Mba'eta Sião tetā gui onhendu peteī ojae'o va'e: “Nhanemoingo axya ha'e nhanemoximbaa ete ma! Mba'eta jaeja 'rā nhandeyvy, nhanderovaigua kuery nhanderokoa ombovaipa rire.

²⁰ Peñ kunhague, pendu ke SENHOR ayvu, pejapyxaka ijuru gui onhendu va'e re. Pembo'e penememby kuery ojae'o avi aguā re, peteī-teī pembo'e 'rā peneirū kuery ojae'o ete aguā.

²¹ Mba'eta manoia oike ma nhande janela ikuai va'e rupi, oo tuvixave va'e rupi guive. Ha'e rami vy omomba ma kyrīgue tape rupi, kunumigue tetā mbyte rupi ikuai va'ekue guive ojuka.”

²² Ndeayvu ke: “SENHOR aipoe'i: ‘Avakue re'ōgue mba'emo repoxi rami 'rā ikuai mba'ety rupi, mba'emo ra'yī imono'õa kuery rakykue rupi ho'aa rami. Ha'e rā ndoikoi 'rā avave rei imono'õarā’”, 'ere.

Nhanderuete jaikuua rupi anho jarovy'a aguā re ijayvuague

²³ SENHOR aipoe'i: “Tove hi'arandu va'e toguerovy'a rei eme o'arandua, imbaraete va'e toguerovy'a eme ombaraetea, ha'e oguerekopa rei va'e ma toguerovy'a eme mba'emo oguerekopaa.

²⁴ Ha'e rami 'rāgue py mba'emo rerovy'aa tovy'a xekuaa ha'e SENHOR aikoa oikuua re anho. Mba'eta xee yvy re aexa uka va'e ma anhomboaxya, anhetē rupi ajoguerekoa ha'e teko porā. Mba'eta xee arov'y'a va'e ma ha'e nunga anho”, he'i SENHOR.*

* 9:24 1 Coríntios 1.31, 2 Coríntios 10.17

²⁵ SENHOR aipoe'ive ju: “Ne'exa, ovaẽ ta ma ouvy ára ambopaga aguã opire omboi uka va'ekue ha'e omboi uka e'ŷ va'e kuery ha'e javi.

²⁶ Ha'e kuery ma Egito pygua, Judá ha'e Edom pygua kuery, Amom ha'e Moabe pygua kuery, o'a ojaya apu'a'i va'e, ha'e yvy piru reia rupi ikuai va'e ha'e javi. Mba'eta yvy regua ma guive rã opire omboi uka e'ŷ va'e ikuai, Israel kuery voi opire omboi uka e'ŷ va'e rami ikuai opy'a py.”

10

Mba'emo ra'angaa rami e'ŷ SENHOR oikoa re ijayvuague

¹ Peẽ Israel kuery, pendu ke SENHOR pendevy ijayvu rã.

² SENHOR aipoe'i: “Penhembo'eve eme amboae regua kuery reko rami pendekuai aguã re, penhemondyi eme guive yva re hexa pyrã oiko va'e gui, ha'e nunga gui amboae regua okyjepa rei teĩ.

³ Mba'eta yvy regua kuery reko ma mba'everã ndovarei. Mba'eta ha'e kuery ma ka'aguy re oo vy ojaya 'rã peteĩ yvyra, ha'e gui hembiapo kuaa va'e ma omoatyrõ 'rã heravy haxa py.

⁴ Ha'e gui ombojegua 'rã prata ha'e ouro py, ha'e gui martelo py ombota-mbota 'rã karavo re ho'a e'ŷ aguã.

⁵ Ha'e nunga ijayvu va'e'ŷ vy mba'emo ra'angaa ma pepino-ty py guyra mondyiarã omo'ã mbyre rami rive hi'aĩ. Oguata va'e'ŷ vy amongue ogueraa ramo mae ma 'rã oo. Ha'e nunga gui pekyje eme, mba'eta pendevy ndojapo vai 'rã, hexe noĩ guive pendevy ojapo porã aguã”, he'i.

⁶ Ha'e rã ndee SENHOR, avave rei ndoikoi 'rã ndee ramigua. Ndee ma ndeyvate, nderery voi ipo'aka ete va'e.

⁷ Ndee ma yvy regua kuery ruvixave. Mava'e tu ndojererokyjei 'rã nerенонде? Mba'eta ha'e rami aguã ma ndevygua ae. Ha'e rã yvy regua hi'arandukueve mbyte ndoikoi 'rã ndee ramigua, ha'e kuery openaa ha'e javi rupi teĩ.

⁸ Ha'e kuery ma nai'aranduvei ha'e na'inhakã porãvei va'e meme. Ha'e kuery mbo'ea ma mba'everã ndovarei, yvyra pãgue oikove va'e'ŷ vy.

⁹ Ha'e nunga peguarã Társis gui ogueru 'rã prata ombole pyre, ha'e Ufaz yvy gui ogueru 'rã ouro. Ta'angaa ikuai va'e ma hembiapo kuaa va'e rembiapo, ha'e ouro re omba'eapo va'e opo py ojapo va'ekue rive. Omonhemonde 'rã heravy hovy va'e ha'e púrpura guigua py. Ha'e nunga ma avakue hembiapo kuaa va'e rembiapo meme.

¹⁰ Ha'e rã SENHOR Nhanderuete ma anhetẽ ete va'e. Nhanderuete oikove va'e oiko, Nhanderuvixave imarã e'ŷ va'e. Ipoxy ramo yvy oryryipa 'rã, yvy regua kuery voi ndogueropo'akai 'rã ipoxyo.

¹¹ “Ha'e kuery pe aipo'ere: ‘Penderuete kuery ramigua ma yva ha'e yvy apoare e'ŷ vy okanhymba 'rã yvy gui, ha'e yva guýry gui.’”

¹² Mba'eta yvy ma SENHOR ae ojapo raka'e opo'akaa rupi. O'arandua rupi onhono yvy, ha'e rã yva ma oikuaapaa rupi oipyo.

¹³ Ha'e ma yapu onhendu atã aguã rami ojapo ramo yva re yy oĩ va'e omyimba 'rã, ha'e yvy apy gui opu'a 'rã ouvy yvyxí. Omoingo avi 'rã overa va'e oky aguã, yvytu guive oguenoẽ 'rã oĩaty gui.

¹⁴ Ha'e rã avakue ma nai'arandui ha'e mba'eve ndoikuaii va'e meme. Ouro re omba'eapo va'e kuery voi oximba va'erã meme ikuai mba'emo ra'angaa ojapoague re, mba'eta ta'angaa ikuai va'e avi anhetẽ va'e'ŷ meme, ipytuẽ va'e'ŷ guive.

¹⁵ Ha'e nunga ma mba'everã ndovarei va'e, ojojai rei pyrã rive. Nhombopagaa ára py okanhymba 'rã.

¹⁶ Ha'e rã Jacó Ruete ma ha'e rami e'ŷ. Mba'eta ha'e ma opa mba'e moingoare, Israel kuery voi ixupegua ikuai. Hery ma SENHOR ixondaro reta va'e.

Judá yvy ombovaipaa ague re ijayvuague

¹⁷ Ndee tetā ojokopaa va'e py nderekoa va'e, eupi ke yvy gui nemba'e rei-rei reraa aguā.

¹⁸ Mba'eta SENHOR aipoe'i: “Ne'exa, aŷ ma amoēmba 'rā xeyvy re ikuai va'e, amoingo axypa 'rā jexavaia oendu aguā”, he'i.

¹⁹ Nda'evei ete xevy, apave'i avy! Xeai ma haxy vai ete. Ha'e ramo xee aipoa'e: “Kova'e haxy ma ajexavai aguā ou, aropo'aka va'erā”, ha'e.

²⁰ Xeroguy ombovaipaa ma, ixā voi omondopaa. Xera'y kuery oopa ma, nda'ikuavei. Avave rei ndoikoi xeroguy moatyrō jevyarā, neĩ ijao'iarā omoñ ju va'erā.

²¹ Mba'eta joe opena va'e kuery ma nai'arandui vy ndoekavei okuapy SENHOR. Ha'e rami vy nda'ikuai porāvei, hymba kuery oaīmba guive.

²² Ne'exa, omombe'ua peteĩ ayvu! Mba'eta kuaray ijapu'a'ia katy gui ou oiny hevovo rei va'e. Ha'e nunga ma Judá regua tetā mbovaipaarrā ou, jagua-tuvy nhe'ẽ ikuai atyrā rive omombyta aguā.

²³ SENHOR, xee aikuua avave rei ndoiporavo kuaai 'rāa oiko aguā, oguata va'e ndoiporavo kuaai oguata aguā.

²⁴ SENHOR, xembopaga teĩ ke aropo'aka peve'i, ndepoxya py e'ŷ, ovare va'e'ŷ xee apyta e'ŷ aguā.

²⁵ Yvy regua kuery ndekuaa e'ŷ va'e áry enhoẽ ndepoxya, nderery rupi ojapukai e'ŷ va'e kuery áry. Mba'eta ha'e kuery ma omomba ma Jacó kuery, omokanhymba ha'e hekoague ombovaipa.

11

SENHOR guexeve guarā ojapo va'ekue rupi e'ŷ ikuia re ijayvuague

¹ Jeremias pe SENHOR oayvu ombou vy aipoe'i:

² “Endu ke xereve guarā ajapo va'ekue re ayvu oĩ va'e, ha'e emombe'u porā avakue Judá ha'e Jerusalém py ikuai va'e pe.

³ Ha'e vy aipo're: ‘Po rami SENHOR Israel kuery ruete ijayvu: Ayvu vaipy oiko 'rā avakue kova'e ayvu xereve guarā ajapo va'ekue regua noendu potai va'e.

⁴ Ha'e va'e ayvu ma peneramoĩ kuery pe xee aeja va'ekue Egito yvy gui anoēmba jave, ha'e tatakua ferro guigua gui. Ha'e vy aipoa'e va'ekue: “Pendu ke xeayvu, ha'e pejapopa pendevy ajapo uka va'e ha'e javi. Ha'e rami vy 'rā xevyguia kuery pendekuai, ha'e rā xee ma aiko 'rā Penderuete.

⁵ Ha'e rami vy 'rā ajapo xeayvuague peneramoĩ kuery yvyrā kamby ha'e ei oata e'ŷa ame'ẽ aguā re, aŷ ojekuaa rami”, ha'e va'ekue”, he'i.

Ha'e ramo xee ambovai vy aipoa'e: “Ha'eve va'e, SENHOR!”

⁶ Ha'e gui SENHOR aipoe'ive ju xevy: “Emombe'u ke pova'e ayvu ha'e javi Judá regua tetā ikuai va'e, ha'e Jerusalém py tape ikuai va'e rupi. Ha'e vy aipo're: ‘Pendu ke pova'e ayvu Nhanderuete guexeve guarā ojapo va'ekue regua, ha'e pejapopa’, ere.

⁷ Mba'eta Egito yvy gui peneramoĩ kuery anoẽ guive kova'e ára peve xeayvu pendevy ko'ẽ nhavõ, ko'ẽ rai guive aipoa'e: ‘Pendu na xeayvu’, ha'e.

⁸ Ha'e rami teĩ ha'e kuery noendu potai, ndojapyxakai. Ha'e rami 'rāgue py peteĩ-teĩ inhakā ratāa rupi ikuai. Ha'e rami rire ha'e kuery áry ambou ayvu vai xeayvuague ha'e javi, mba'eta ha'e kuery pe ajapo uka teĩ ndojapoi rire.”

⁹ SENHOR aipoe'ive ju xevy: “Judá ha'e Jerusalém pygua avakue ma nhemi rupi jogueroayvu teko vai rupi.

¹⁰ Mba'eta yma tamoi kuery xeayvu re ndojapyxakaxeague rami ae ju ikuai, ha'e rami vy amboae ramigua tuuete re ju ovapa ixupe ikuai aguā. Ha'e rami py Israel ha'e Judá kuery ma tamoi kuery pe xereve guarā ajapo va'ekue rupi e'ŷ ikuai.”

¹¹ Ha'e nunga rupi SENHOR aipoe'i: “Ne'exa, ha'e kuery áry xee ambou 'rā mba'emo vai, ndoo jepe kuaai aguā rami. Xevy pe ha'e kuery ojapukai teĩ xee naendui 'rā.

¹² Ha'e ramo Judá regua tetā ha'e Jerusalém py ikuai va'e ovapa 'rā tuuete ramigua kuery re, ha'e va'e pe heakuā porā va'e oapy ha'e ojapukai okuapy vy. Ha'e rami teī tuuete kuery ma neī peteīve henda py ndogueraa jepoi 'rā ikuai axya gui.

¹³ Mba'eta peē Judá pygua kuery, penderuete ramigua rive heta perekō, peteī-teī tetā py. Jerusalém tetā py voi peteī-teī tape py heta pejapo altar ojeguarupy Baal peguarā rive heakuā porā va'e peapy aguā.

¹⁴ Ha'e nunga rupi ndee Jeremias, ejerureve eme ha'e kuery re, ejapukaive neī enhembo'eve eme, mba'eta xevy pe ha'e kuery ojapukai teī xee naendui 'rā heko vaiaty káuxa.

¹⁵ “Xevyguia opy rupi xerembiaiyvu oiko teī opa marā ojejavya rupi rive. Ndee xerembiaiyvu, renhemboayvua ha'e xo'o reapy va'e ndeky'a'o 'rā ri ty'y ndereko vaia oī va'e gui? Ha'e rami va'e rire revy'a ete 'rāgue.

¹⁶ Ndevy pe SENHOR ‘Oliveira ipyau ha'e hi'a iporāve va'e’ he'i va'ekue ri aŷ ma hevovo rei va'e kuery ndeyvýry omoendy ma tata, ha'e vy oapypa 'rā nerakāgue.

¹⁷ Mba'eta xee SENHOR ixondaro reta va'e nenhotýare ae xeayvu ndere mba'emo vai ou aguā re. Ha'e nunga ma Israel ha'e Judá kuery o'áry ae ombou uka, Baal ra'angaa pe heakuā porā va'e oapya py xembopoxy vy rive.”

Jeremias ojuka aguā re jogueroayvu nhemi okuapyague

¹⁸ Ha'e kuery nhemi rupi jogueroayvua ma SENHOR xevy oikuua uka rā aikuua ma voi.

¹⁹ Xee ma vexa ra'y'i ojukaa aguā katy heraapy rami ha'evepa rei va'ekue, xerovai ojapo vai aguā re jogueroayvu okuapy teī xee ndaikuai va'ekue. Ha'e rami vy aipoe'i okuapy: “Jajayapa ke yvyra hi'a reve. Nhamomba okuave va'e kuery yvy gui, hery re na'ima'endu'aavei aguā rami”, he'i okuapy.

²⁰ Ha'e rā ndee ma SENHOR ixondaro reta va'e ha'evea rami reikuua pota, ha'e nhan-depy'a re oī va'e rexapa va'e. Ha'e nunga rupi taexa ha'e kuery rembopaga rā, mba'eta ndevy pe aikuua pota uka xerekō re.

²¹ Ha'e gui SENHOR ijayvu Anatote pygua avakue xejukaxe va'e re. Mba'eta ha'e kuery aipoe'i: “Ndeayvuve eme SENHOR rery rupi, orepo py ae rojuka e'ŷ aguā”, he'i xevy.

²² Ha'e ramo SENHOR ixondaro reta va'e aipoe'i: “Ne'ixa, xee ae 'rā ambopaga ha'e kuery. Ha'e ramo ipyaukue omano 'rā kyxe py, ta'y kuery, tajy kuery ma karuai gui 'rā omanomba.

²³ Ha'e kuery va'e regua neī peteīve ndoikovevei 'rā, mba'eta Anatote pygua avakue áry ambou 'rā mba'emo vai ambopaga vy.”

12

Nhanderuete pe Jeremias oporanduague

¹ SENHOR, ndee ma ha'evea rami meme 'rā xererekō neronde xee ajexa uka ramo. Ha'e rami avi ndevy pe aporandu ta rejoguerekoa re. Mba'e re tu heko vai va'e kuery ikuai porā? Mba'eta anhetē rupi e'ŷ rei ikuai va'e pe mba'eve ndoikoi.

² Ha'e kuery ma ndee renhotý ramo hapo porā ha'e yvate 'rā, hi'a porāmba 'rā guive. Ndere ima'endu'a 'rā ojuru py rive, ha'e rā opy'a py ma ndegui mombyry 'rā ikuai.

³ Ha'e rā xee ma ndee xekuaa porā. SENHOR, ndee xerexa vy rea'ã 'rā xepy'a py ndere apẽxaa oī va'e. Ha'e rā ha'e kuery ma eraapa vexa'i ojukaa aguā katy ogueraa va'e rami, emoimba na ojukaa ára pyguarā.

⁴ Araka'e peve tu yvy nda'evei 'rā, ha'e nhuündy rupi jai rogue ipirupa? Mymba ha'e guyra omanomba ha'e pygua kuery reko vaia káuxa. Ha'e rami teī ha'e kuery aipoe'i: “Ha'e ma ndoexai 'rā opaa py nhandere oiko va'e”, he'i.

Nhanderuete ombovaiague

⁵ “Ha'e rami avi avakue yvy rupi oguata va'e reve renha vy ri nekane'õ vy mba'exa 'rã tu renha kuaa kavaju árygua kuery reve? Peteĩ yvy mba'eve ndoikoia py ri rekyjea rendu vy mba'exagua 'rã tu rendu Jordão yakã yvýry ka'aguy re reo vy?”*

⁶ Mba'eta nderyvy ha'e nderu ro pygua kuery eteve voi nembo'a nhemixe okuapy. Ha'e kuery ae 'rã nderakykue monha okuapy ojapukai atã reve. Ha'e kuery re ejerovia eme, ndereve ijayvu porã'i merami teĩ.”

Yvy mbovaipaare kuery ombopaga aguã re ijayvuague

⁷ “Xee aeja ma xevyguia oo, aeja xevy guarã va'ekue ha'e javi. Xerembiaiyvu voi amboaxa ma hovaigua kuery po py.

⁸ Mba'eta xevyguia kuery ma guary ka'aguy regua rami onhendu ratã xerovai. Ha'e ramo xee ndaiptavei ma.

⁹ Ha'e rami vy xevy pe rã xevyguia kuery ma peteĩ guyra vaikue pytãmba rei va'e rami ikuai, mba'eta amboae guyra te'õgue 'ua ou vy oipyxopa 'rã. Ha'e nunga rupi tapeo tema, Peru mymba kuery inharõ va'e nhuñdy rupi ikuai va'e ho'upa aguã.

¹⁰ Mba'eta joe opena va'e kuery mbovy e'ŷ ou vy ombovaipa xemba'e uvaty, opyrõmba xemba'ety re. Ha'e rami vy xevyguia arov'y a va'ekue ma tekao e'ŷa omombyta.

¹¹ Ombovaipa ramo xevy pe ju ojapukai okuapy avave rei noipytyvõavei rã. Yvy ha'e javi rupi noïavei, ha'e va'e re opena va'erã ndoikoi ramo.

¹² Yvyty ita anho reia ha'e tekao e'ŷ regua áry rupi ou imbovaipaarrã kuery, mba'eta SENHOR guigua kyxe nhomokanhymba 'rã yvy apy peve, ha'e avave rei pe noïvei 'rã ikuai porã aguã.

¹³ Ha'e rami vy trigo pemoã teĩ juu rive ju pemono'õ. Pemba'eapoa rupi penekane'õmba va'eri mba'eve rei ndapejoui. Mba'eve napemono'õi ma vy peximba 'rã, pendere SENHOR poxya ou rire.”

Mba'erã pa Nhanderuete nhombopagaa re ijayvua

¹⁴ SENHOR aipoe'i: “Xevyguia Israel kuery peguarã aeja va'ekue ma ijyvýry ikuai va'e heko vai va'e oipe'apa. Ne'exa, ha'e va'e kuery ma xee aipe'apa 'rã ijyvy gui, ha'e gui ha'e kuery mbyte gui araa jepe 'rã Judá kuery.

¹⁵ Ha'e kuery aipe'apa ma rire amboaxy ju 'rã. Ha'e vy ajapo 'rã peteĩ-teĩ guekoa ha'e oyvy katy ju ojevy aguã rami.

¹⁶ Ha'e gui xapy'a rei xevyguia kuery reko rami ha'e kuery voi ikuaixe 'rã, ha'e xerery rupi anho oura vy 'Anhetẽ ete SENHOR oikove va'e rery rupi aura' he'i 'rã okuapy, ymave rupi xevyguia kuery Baal rery rupi oura aguã re ombo'e va'ekue ri. Ha'e rami rã ha'e kuery voi amoĩ 'rã xevyguia kuery mbyte ikuai aguã.

¹⁷ Ha'e rã peteĩ va'e regua noendu potai ri ramo xee aipe'a 'rã. Aipe'a vy amokanhymba 'rã", he'i SENHOR.

13

Ku'akuua ajukue iporãve va'e guigua py mba'emo oikuua ukaague

¹ SENHOR aipoe'i xevy:

— Tereo, ejogua peteĩ ku'akuua iporãve va'e. Ha'e gui ejeku'a jokua, yy py emoakŷeme guive.

² Ha'e ramo SENHOR aipoe'iague rami vy ajogua ku'akuua, ha'e ajeku'a jokua.

³ Ha'e ramo mokoïguea ma SENHOR oayvu xevy ombou vy aipoe'i:

⁴ — Ejopy ju ku'akuua rejogua ha'e rejeku'a jokuaague. Ha'e gui epu'ã, tereo Eufrates yakã katy, ha'e enhomi ha'e py peteĩ itakua py — he'i.

⁵ Ha'e ramo SENHOR aipoe'iague rami vy aa vy anhomni Eufrates rembe re.

⁶ Ha'e gui kueve ma rire SENHOR aipoe'i ju xevy:

— Epu'ã, tereo ju Eufrates katy, ha'e ejopy ju ku'akuua ha'e py anhomni uka va'ekue — he'i.

* 12:5 Jordão yakã yvýry ka'aguy oĩ va'e re ma mymba inharõ va'e ikuai (49.19, 50.44).

⁷ Ha'e ramo Eufrates py aa vy yvy ajo'o vy anoẽ ju ku'akuua anhomiaque gui. Ha'e rã ku'akuua hu'ũmba ma, ndovarevei ma mba'everã.

⁸ Ha'e ramo SENHOR oayvu xevy ombou vy aipoe'i:

⁹ "Po rami SENHOR ijayvu: Nami ae avi xee ambovaipa 'rã Judá ha'e Jerusalém pygua kuery onhemboyvate rei okuapya.

¹⁰ Mba'eta ha'e kuery heko vai va'e vy noenduxei okuapy xeayvu, inhakã ratãa rupi anho ikuai va'e, ha'e vy amboae ramigua tuuete kuery re ovapa, ixupe rive ikuai ha'e omboete aguã. Ha'e rami vy kova'e ku'akuua rami 'rã ikuai mba'everã ndovarevei vy.

¹¹ Mba'eta ku'akuua avakue ku'a re oĩa rami avi xee voi aipota teĩ Israel ha'e Judá kuery xere ikuai xevy guarã, xerery oguerovy'a ha'e xemboete pavẽ aguã, va'eri ha'e kuery ma ndojapyxakai okuapy", he'i SENHOR.

Hyru omboa'ypaa py mba'emo oikuua ukaague

¹² "Ha'e kuery pe emombe'u pova'e ayvu. SENHOR Israel kuery Ruete aipoe'i: 'Peteĩ-teĩ hyru tynyẽmba 'rã vinho', 'ere. Ha'e rã ha'e kuery aipoe'i 'rã ndevy: 'Ore kuery ndoroikuua porãi ri ty'y hyru ikuai va'e vinho tynyẽmba aguã?' he'i 'rã okuapy.

¹³ Ha'e rã ndee ju aipo're 'rã ha'e kuery pe: 'SENHOR aipoe'i: "Ne'ixa, kova'e yvy re ikuai va'e ha'e javi xee amonga'upa 'rã, huvixa kuery Davi renda openaaty py oguapy va'e, sacerdote, profeta kuery ha'e Jerusalém py ikuai va'e ha'e javi.

¹⁴ Amboa'ypa 'rã joe-joe amombo vy, tuu ha'e ta'y kuery voi. Ndaraa jepei 'rã, amboaxya naendui 'rã, namboaxyi 'rã guive amokanhy e'ŷ aguã", he'i SENHOR.' "

Ojeko rerova ha'e ombopagaa aguã re ijayvuague

¹⁵ Pendu ke, ha'e peikuaa pota. Penhemboyvate rei eme, mba'eta SENHOR ae ijayvu.

¹⁶ Pemboete na SENHOR Penderuete, pytũ ombou e'ŷ aguã, ha'e yvy'ã vaikuea re pejeapi e'ŷ aguã, ha'e hexakãa pearõ 'rãgue py manoa 'ã ha'e pytũ reia anho ombou e'ŷ aguã.

¹⁷ Mba'eta napendu potai ri ramo xepy'a py ajae'o nhemi 'rã penhemboyvate reia re. Xerexa ojae'o vaipa ete 'rã, xerexay vaipa ete 'rã, peẽ SENHOR rymba vexa'i kuery escravo-rã pendereraapaa rire.

¹⁸ "Aipo'ere huvixa ha'e ixy pe: 'Penhemo'yvy'i ke, ha'e peĩ yvy py, mba'eta peneakã gui ho'a ma coroa penemboyvateague.

¹⁹ Mba'eta kuaray puku-a katy tetã ikuai va'e tynyẽmba ma mba'emo ra'ykue, ipe'aarã ndoikoi guive. Judá kuery voi escravo-rã ogueraapaa ma, oipokuapaa heravy.

²⁰ Pema'ẽ kuaray ijapu'a'ia katy pexa aguã ou va'e. Aŷ ma mamo tu ikuai vexa'i kuery ndevy apena uka va'ekue, iporãgue anho rerekova va'ekue?

²¹ Mba'e 're 'rã tu neirũ kuery ikuai va'ekue ndere ipo'aka va'erã omoĩa ramo? Ndere haxy va'e nda'ipo'akai 'rã teve, kunha oikuavã'i ta va'e rami?

²² Ndejeupe ae ndeayvu vy "Mba'e re tu ha'e nunga ou xere?" 're 'rã. Ha'e rami vy reikuaa 'rã rejeyavypaaty re ae ndeo oupia, ha'e rejexavai ete aguã rami reikoa.

²³ Etiópia pygua kuery nda'u omboekovia kuaa 'rã ri opire, e'ŷ vy xivi voi nda'u omboekovia kuaa 'rã ri oparaa?* Ha'e rami aguã nda'evei ramo ae peẽ kuery voi mba'emo vai pejapo va'ety vy ndapejapo kuaai 'rã iporã va'e.

²⁴ Ha'e nunga rupi ha'e kuery amoã 'rã mba'emo pirukue yvytu tekua e'ŷa guigua ogueraa va'e rami.

²⁵ Ha'e nunga ae oiko 'rã pendere, pendevy guarã amoõ 'rã, xegui penderexarai vy apu rive perovia rire', he'i SENHOR.

²⁶ 'Ha'e nunga rupi pendeao audi uka 'rã peneakã áry peve, peximbaa ojekuaapa aguã.

²⁷ Mba'eta aexa ma yvy'ã ikuai va'e ha'e nhuündy rupi ojeguarupy pejapo pekuapya. Ha'e va'e ma pendetavy reia, penhomoaruãa ha'e pendetavyxeia rupi pendekuaia. Nda'evei ete 'rã pendevy, Jerusalém pygua kuery! Raka'e peve teri 'rã tu ndapejeky'a'oi?" he'i."

* 13:23 Etiópia pygua ma kamba va'e. Ha'e gui ha'e kuery opire nomboekovia kuaia rami avi nhande voi ndajapytu'u kuaai 'rã jajejavya gui.

14

Judá yvy re nda'okyvei puku-a re ijayvuague

- ¹ Nda'okyvei puku jave SENHOR ombou ju oayvu Jeremias pe. Ha'e vy aipoe'i:
² “Judá kuery ojae'opa okuapy, ha'e tetā rokē re nopenavei ma. Ojae'o reve oakā omboguejy yvy peve. Jerusalém py voi ojapukai ratāve ovy.
³ Ha'e pygua ipo'akakueve omondouka 'rā guemimongakuua kuery yy re. Ha'e rā ha'e va'e kuery ygua py oo vy yy ndojouvei vy yryru oguerojevypa rive ju 'rā. Onhemondyi ha'e ndoikuaavei rei vy onheakā ao'i 'rā jogueruvy.
⁴ Yvy re nda'okyvei ramo ikangypa. Ha'e nunga rupi mba'ety rupi omba'eapo va'e kuery onhemondyi rei reve 'rā onheakā ao'i okuapy.
⁵ Guaxu voi nhuündy rupi ta'y vy oeja rive 'rā, jai rogue ndojouvei vy.
⁶ Mburika ka'aguy regua voi yvy'ā ita anho reia rupi ipoaē reve oetū-etū 'rā jagua-tuvy nhe'ē rami. Ndaexa pyxovei ma, nhuū jipovei ramo.”

Jeremias jypy ojerure rā “Nda'evei” he'iague

- ⁷ Ha'e nunga rupi SENHOR, ore kuery orereko vaia anho roexa uka teī orepytyvō ke nderery remboete ukaa rupi vy. Mba'eta ore ma nenhe'ē raxave va'ekue. Nderovai ae rojeavy va'e.
⁸ Ndee ma Israel kuery oarō okuapy va'e, ha'e ikuai axy jave heraa jeprea reiko. Mba'e re tu ha'vy yvy mboae regua rami reiko, peteī oguata va'e pytū oaxa aguā amboae rupi oo va'e rami reiko?
⁹ Mba'e re tu ava ojopy xapy'a reipy rami reiko, ipy'a guaxuve va'eri jogueraa jepe kuaa e'ŷ va'e rami? Ha'e rā ndee SENHOR ma reī ae orembyte, ha'e ore ma nderery rupi oenoimby roiko. Orerepy e'ŷ eme.
¹⁰ Ha'e ramo SENHOR ijayvu xeretarā kuery reko re. Ha'e vy aipoe'i: “Ha'e rami avi ha'e kuery ma oguata reixe vai 'rā, ndojejokoi 'rā oo aguā gui. Ha'e nunga rupi SENHOR ndoguerovy'avei vy ima'endu'a 'rā ha'e kuery reko vaiague re, ombopaga 'rāe ojejavyague re.”
¹¹ SENHOR aipoe'ive ju xevy: “Ejerureve eme ha'e kuery amoingo porā aguā re.
¹² Mba'eta ha'e kuery okaru e'ŷ re ikuai teī xee naendui 'rā ojapukaia. Mymba ha'e mba'emo aju guigua oapy reve ome'ē va'erā ogueru teī xee ndarovy'ai 'rā. Ha'e rami 'rāgue py amomba 'rā kyxe py, karuai ha'e mba'eaxy vaikue py.”

Teīgue ju Jeremias ojerure ramo “Nda'evei” he'iague

- ¹³ Ha'e ramo xee aipoa'e:
— Ai SENHOR Xeruete! Ne'exa, profeta kuery ma aipoe'i va'ekue heta va'e kuery pe: “Ndoui 'rā kyxe revegua neī karuai. Ha'e rami 'rāgue py kova'e teko py ou 'rā pendekuai porā aguā anho”, he'i va'ekue — ha'e.
¹⁴ Ha'e ramo SENHOR aipoe'i xevy:
— Profeta ramigua kuery ma apu rive omombe'u okuapy xerery rupi. Teīgueve xee namboui, neī namombe'u ukai ha'e kuery pe, ha'e kuery pe ndaxeayvui guive. Ha'e kuery pendevy omombe'u va'e ma oexa ra'u merami rivea, imba'ekuua ramigua, ovare e'ŷ va'e rupi ikuaria, ha'e opy'a py onhembotavy ukaa rive.
¹⁵ Ha'e nunga rupi SENHOR aipoe'i profeta ramigua kuery re: “Xerery rupi omombe'u va'eri xee amombe'u uka ramo e'ŷ. Ha'e kuery ma 'Kyxe revegua ha'e karuai ndoui 'rā kova'e yvy re' he'i okuapy teī ha'e va'e profeta kuery ae 'rā kyxe ha'e karuai py opa.
¹⁶ Mba'eta ijayvu renduare kuery karuai ha'e kyxe gui omano va'ekue retekue omombopaa 'rā Jerusalém py tape ikuai va'e rupi. Jipoi 'rā avave rei inhono porāarā: ha'e kuery, ta'yxy, ta'y ha'e tajy kuery reve. Mba'eta ha'e kuery áry ambou 'rā heko vaiague rekovia.
¹⁷ “Ha'e gui ha'e kuery pe remombe'u 'rā po rami: ‘Xerexay oē 'rā ara py ha'e pyávy. Ndopytu'ui 'rā, mba'eta xeretarā kuery omoingo axya ramo ai haxy ete va'e py.

¹⁸ Ha'e rami vy mba'ety rupi aa vy aexa kyxe py ojuka pyre. Ha'e rā tetā py ju aike vy aexa 'rā karuai gui omano va'ekue. Profeta ha'e sacerdote kuery oguata rei 'rā yvy re, oo aguā ndoikuaavei vy. ”

Mboapykuea Jeremias ojerure rā “Nda'evei ae ma” he'iague

¹⁹ Ha'e rami avi rejapa ma teve Judá kuery? Ndepy'a py nderexaxevei teve Sião tetā? Mba'e re tu oremingo axy oremonguera e'ŷ re? Oremingo porā ju aguā roarō rokuapy va'eri iporā va'e ndoikoi ae. Rokuera aguā 'rāgue py ndorerekorāveia anho roendu.

²⁰ SENHOR, ore kuery ma roikuua orereko vaia ha'e oreru kuery ojapo vaiague, mba'eta nderovai ae rojejavy va'e.

²¹ Ha'e rami avi nderery remboete ukaa rupi vy orereja eme. Mba'emo vai py ejao'i uka eme nerenda iporāve va'e. Nema'endu'a na orevy ndereve guarā rejapo va'ekue re, embovaipa eme.

²² Mba'eta oiko 'rā teve mba'emo ra'angaa amboae regua kuery omboete va'e regua ombo'oky kuaa va'e? Ha'e rami e'ŷ vy yva ha'e ae ombou 'rā teve oky? Ha'e nunga moingoa ma ndee SENHOR Oreruete anho reiko. Ha'e nunga rupi ndegui ae roarō oky, mba'eta ndee anho ha'e nunga ha'e javi mboua reiko.

15

¹ Ha'e ramo SENHOR aipoe'i xevy: “Moisés ha'e Samuel xerenonde ojerure va'e rire xepy'a re noī 'rāgue kova'e kuery amboaxy aguā. Toipe'apa ha'e kuery xerenonde gui, toopa.

² Ha'e gui ndevy pe ha'e kuery oporandu vy ‘Marā katy 'rā tu roo?’ he'i ramo aipo're 'rā ha'e kuery pe: ‘Po rami SENHOR ijayvu: Omano va'erā kuery too omano aguā katy, ha'e rā kyxe py ojuka pyrā too kyxe revegua ikuaia katy, karuai pygurarā ma too karuaia katy, ha'e gui escravo-rā ogueraa pyrā ma ogueraa katy too.’

³ Mba'eta SENHOR aipoe'i: ‘Xee ma irundy rupi 'rā ambopaga ha'e kuery. Kyxe py ojukaa 'rā, jagua kuery omoatā heravy 'rā, ha'e gui guyra yvate rupi oveve va'e ha'e mymba inharō va'e nhuündy rupi ikuai va'e ma omondoropa vy ho'upa 'rā.

⁴ Amboaxapa 'rā yvy regua kuery oexa vy onhemondyipa aguā, Ezequias ra'y Judá pygua huvixa Manassés Jerusalém tetā py ojapo vaiague ha'e javi káuxa.’ ”

⁵ “Ha'e gui ndee Jerusalém, mava'e tu oiko 'rā nemboaxyarā? Mava'e tu ojae'o 'rā ndere? Mava'e tu ovaē 'rā reiko porā paa re oporandu aguā?

⁶ Mba'eta rejep'e a xegui, nderakykue katy ju rejevy vy. Ha'e ramo nderovai upi 'rā xepo romomba aguā. Xekane'õ ma romboaxya py”, he'i SENHOR.

⁷ “Ndeyyv re tetā ikuai va'e rokē py ambogua uka yrupē py rami, amokanhy ta'y kuery, amomba xevyguia kuery tei ikuaiaty gui ndojepe'ai.

⁸ Ha'e pygua imeve'ŷ va'e hetave ye'ẽ rembe rupi ita ku'i ikuai va'e gui. Kuaray mbyte jave tei ambou kyrīgue'i xy kuery mombaarā. Ha'e kuery áry ambou xapy'a ojexavai ha'e okyje aguā tei.

⁹ Sete opi'a kuery oguereko va'ekue ma omano xapy'a inhe'ẽ oata va'e rami, ara py teri tei ha'e kuery pe rā pytūmba ma. Oximba, nda'evei nho okuapy. Ha'e gui ha'e pygua okuave'i va'e ma amboaxapa kyxe revegua pe hovaigua kuery renonde”, he'i SENHOR.

Ojeupequa profeta SENHOR ombopy'a guaxuve juague

¹⁰ Nda'evei ete xevy, ha'e ha'i pe voi xekuavā'i rire, mba'eta ava opu'āa rei pyrā, pavē rei oguero'a rei va'erā oikuavā! Mba'eta xee nanhomborevei mba'emo hi'áryve ajopyve vy, amboae kuery voi naxemborevei ojopyve vy. Ha'e rami tei ha'e kuery petei-tei ijayvu vai xere.

¹¹ Ha'e ramo SENHOR aipoe'i: “Ha'e gui anhetē xee romombaraete 'rā reiko porā aguā. Ha'e rā nderovaigua kuery ma ojexavai ha'e ikuai axya ára ajapo 'rā ndere onhemboja vy ojerure porā'i aguā rami”, he'i.

¹² “Ha'e gui amongue nda'u omopē kuaa 'rā ri ferro kuaray ijapu'a'ia katy gui ou va'e, e'ŷ vy overa va'e?

¹³ Ha'e rami rā peẽ kuery romoingo axy 'rā pendeyvy jave rupi teko vai pejapoague re. Ha'e rami vy penemba'e rei-rei pemoĩ porā va'ekue hepy re'ŷ amboaxapa 'rā heraarā pe.*

¹⁴ Ha'e rami vy penderovaigua kuery pe xee rogueraa uka 'rā yvy peikuaa e'ŷa katy, mba'eta pende'âry xepoxya hendy ae ma, tata hendy va'e rami okai va'erā."

¹⁵ Ha'e gui SENHOR, ndee ma reikuua. Ha'e rami avi nema'endu'a ke xere, xepytyvõ ha'e xerepy ke xerakykue monhaa kuery gui. Renhomboaxya rupi vy xereraa uka eme. Reikuua ma roayvu vy ae ajejojai ukaa.

¹⁶ Ndeayvu ajou vy ha'u vyvoi. Mba'eta ndeayvu ma arov'y'a va'e xekuraxõ mbovy'aarā, mba'eta nderery rupi anherenoĩ uka ramo, SENHOR Xeruete nexondaro reta va'e.

¹⁷ Ha'e nunga rupi petēgueve ma voi aguapy va'e'ŷ teri ovy'a rei va'e kuery reve, ndarovy'ai guive. Ha'e rami 'rāgue py ndepo poyia xe'âry oĩ ramo xee ae'i aguapy ainy, mba'eta xee aendu va'e ma ndepoxya anho.

¹⁸ Mba'e re tu haxy va'e aendu riae tema? Mba'e re tu xeax haxy riae oiny ndokuera reguai vy? Ndee nda'u xembotavy 'rā teve yy ramo'i typa vyvoi va'e rami?

¹⁹ Ha'e ramo SENHOR aipoe'i xevy: "Ha'e gui rejeko rerova ri ramo xee rogueru ju 'rā xerenonde rupi reiko aguã. Ovare e'ŷ va'e 'rāgue py ha'evea ramigua re anho ndeayvu ri vy reiko 'rā xeayvu mombe'uarā. Ha'e kuery regua toje'oi ndea katy, ha'e rā ndee ma ndereaxai 'rā ha'e kuerya katy.

²⁰ Ha'e ramo ha'e kuery rovai xee romombaraete 'rā tetā kora overa va'e guigua rami. Ha'e ramo nderovai ha'e kuery opu'â teĩ nda'ipo'akai 'rā ndere, mba'eta ndereve xee aiko 'rā ha'e kuery gui rogueraa jepe aguã.

²¹ Ha'e rami vy roipe'a 'rā heko vai va'e kuery po gui, rogueraa jepe 'rā ipy'a ratā va'e kuery po gui", he'i SENHOR.

16

Profeta ha'e ae'i oiko aguã re ijayvuague, heta va'e kuery oikuaa aguã

¹ Ha'e gui SENHOR oayvu ombou ju xevy. Ha'e vy aipoe'i:

² "Ejou eme ndera'yxyrā, ndera'y ha'e nderajy e'ŷ aguã kova'e teko py", he'i.

³ Mba'eta po rami SENHOR ijayvu kova'e teko py ta'y ha'e tajy kuery itui'i va'erā rekora re, tuu ha'e ixy kuery rekora re guive. Ha'e vy aipoe'i:

⁴ "Ha'e kuery omano 'rā mba'eaxy gui teĩ ndojae'oai 'rā, nonhono poraai 'rā guive. Yvy irûrā rive 'rā opyta. Kyxe ha'e karuai py 'rā omano, ha'e he'ōgue opyta 'rā guyra yvate rupi oveve va'e ha'e mymba yvy rupigua rembi'urā."

⁵ Mba'eta po rami SENHOR ijayvu: "Eike eme omanogue re ojae'o okuapya py, ndepy'a vai eme, eronhemboaxy eme guive, mba'eta ha'e kuery gui aipe'a ma mby'a porā, ayvua ha'e amboaxya rupi aiko aguã", he'i SENHOR.

⁶ "Mba'eta kova'e yvy re omano 'rā yvatekueve ha'e yvyīgueve. Ha'e va'e kuery ma ndojatyai 'rā, ndojae'oai 'rā, ha'e kuery re ipy'a vaia rupi nonhekyximba reiai 'rā, neĩ oakā nonhopīai 'rā guive.*

⁷ Ojae'o va'e kuery pe ma nome'ēavei 'rā mbojape omanogue re ombopy'a porā ju aguã, neĩ petēive karo yy nome'ēai 'rā opo'o aguã regua, tuu e'ŷ vy ixy omano rire tei.

⁸ Eike eme oo ngaru oikoa py, ha'e kuery reve reguapy vy rekaru ha'e rey'u e'ŷ aguã."

⁹ Mba'eta SENHOR ixondaro reta va'e, Israel kuery Ruete aipoe'i: "Ne'exa, peikove teri reve, ha'e pexaa py ae amombytu'u 'rā pevy'aa kova'e tekoa gui, peporaeia, ha'e omenda va'erā oguerovy'aa rupi oporaeia guive.

¹⁰ "Neretarā kuery pe remombe'u 'rā pova'e ayvu ha'e javi. Ha'e ramo ha'e kuery oporandum 'rā: 'Mba'e re tu SENHOR ha'e rami ete oremongyje nda'evei ete va'e py? Mba'e nunga py tu orerekoi vai ha'e rojejavu SENHOR Nhanderuete rovai?' he'i 'rā ndevy.

* 15:13 Apy ma judeu kuery pe ijayvu. * 16:6 Hetarā omano rā amongue onhekyximba rei 'rā, ha'e'ŷ vy oakā onhopī 'rā ipy'a vai vy (41.5; Ezequiel 7.18; Miquéias 1.16).

¹¹ Ha'e ramo ndee rembovai 'rā: 'Mba'eta peneramoī kuery xerejapa', he'i SENHOR. 'Ha'e rami vy oje'oi amboae ramigua tuuete kuery re rive, ha'e kuery pe ju ikuai vy ombojerovia aguā. Ha'e rā xee ma xerejapa okuapy, xeguigua lei rami voi nda'ikuaixei raka'e.

¹² Ha'e gui peē kuery ma peneramoī kuery ikuaiague gui penderekovaive ju, mba'eta peneakā ratāa rupi peteī-teī pendekuai, xenhe'ē rendu e'ŷ vy.

¹³ Ha'e nunga rupi kova'e yvy gui roipe'apa 'rā peteī yvy peē ha'e peneramoī kuery ndapeikuaaiague katy. Xee noromboaxyvei ramo ha'e py ju 'rā pendekuai amboae ramigua tuuete pe, ara py ha'e pyáv.'

¹⁴ SENHOR aipoe'ive ju: "Ha'e rami teī ne'exa, ou ma oiny ára, 'Anhetē ete SENHOR oikove va'e Egito yvy gui Israel kuery oguenoē va'ekue rery rupi aura', ndapejeveia ára.

¹⁵ Ha'e rami 'rāgue py po rami 'rā peura: 'Anhetē ete SENHOR oikove va'e kuaray apu'a'ia katy gui ha'e yvy jave rupi omondoukapaague gui Israel kuery ogueru va'ekue rery rupi aura', peje 'rā. Mba'eta xee ajapo 'rā pendeyvy katy ae ju pejevypa aguā rami, peneramoī kuery yvyrā ame'ē va'ekue py ae."

¹⁶ SENHOR aipoe'i: "Ne'exa, ambou reta 'rā pira mbo'aa kuery. Ha'e va'e kuery ma Judá regua kuery ae 'rā ombo'a. Ha'e va'e rire ma imba'ejuka va'e kuery ju 'rā ambou reta, pira mbo'aa kuery ojuka aguā yvyty ha'e yvy'ā ikuai va'e áry rupi, ita pa'ū rupi guive ikuai va'e ojuka aguā.

¹⁷ Mba'eta aexa pota 'rā ha'e kuery ikuia ha'e javi rupi. Avave rei nonhemi 'rā xegui, gueko vai voi nonhomí 'rā aikuua pota aguā gui.

¹⁸ Jypy'i ma ambopagave ete 'rā heko vaiague ha'e ojejavyague re, mba'eta xevyguia yvy omongy'apa rire mba'emo ra'angaa ojou vaipy peguare kuery re'ōgue py, yvy xevy guarā va'ekue omonyēmba ojeguarupy rive."

¹⁹ Ha'e gui ndee SENHOR ma xemombaraetea reiko, ajexavaia ára anhemi aguā. Ha'e gui ndea py ou 'rā yvy regua kuery yvy apy guive. Ha'e vy aipoe'i 'rā okuapy: "Oreramoī kuery ma apu regua anho oguerekva'ekue, mba'emo ra'angaa ovare'ŷ va'e, iporā va'e noña.

²⁰ Ha'e gui avakue ha'e kuery ae nda'u ojapo 'rā ri nguueterā? Ha'e rami avi ha'e nunga ma tuuete e'ŷ ae guive", he'i 'rā okuapy.

²¹ "Ne'exa, aŷ ha'e kuery pe aexa uka 'rā xembaraeeta ha'e xepo'akapaa. Ha'e ramo ma ha'e kuery oikuua 'rā SENHOR aikoa."

17

Teko vai nhanembotavy ha'e nhanemokanhya re ijayvua

¹ "Ha'e gui Judá kuery ojejavya ma ferro rakua py ipara oiny, diamante omboakua pyre py guive. Ha'e nunga ma ha'e kuery kuraxō re ae ipara, ha'e altar ojapo va'ekue apy re guive.

² Ha'e va'e altar re ta'y kuery voi ima'endu'a 'rā, ha'e mba'emo ra'angaa yvyra hovana va'e guýry ha'e yvy'ā áry rupi omopu'ā imo'amy va'ekue re.

³ Ha'e gui ndee yvy mbyte yvyty repu'ā va'e, ndere mba'emo porā ha'e hepykueve oī va'ekue. Ha'e nunga ha'e javi ma jejavya káuxa amboaxa 'rā ipe'aarā pe, ombojeroviaaty ndee yvyty áry ikuai va'e guive.

⁴ Ndekáuxa ae oipe'apaa 'rā ndevy guarā ame'ē va'ekue. Ha'e ramo ajapo 'rā nderovaigua kuery pe reiko aguā rami yvy reikuua e'ŷa re, xepoxyta tata rami raka'e rā peve guarā remoendy rire."

⁵ SENHOR aipoe'i: "Ayvu vaipy 'rā ikuai avakue re rive ojerovia va'e. Ha'e kuery ma to'o imarā va'erā re rive ojerovia, ha'e opy'a py SENHOR gui mombyry ikuai.

⁶ Ha'e kuery ikuai 'rā jai rogue ha'e ae'i tekao e'ŷa py henhoī va'e rami. Iporā va'e teī ndoexai 'rā, mba'eta tekao e'ŷa py ae tema 'rā ikuai, yvy piru reia ha'e juky rive oīa rupi, avave rei noñaveia rupi.

⁷ Ha'e rā ayvu porāmby 'rā ikuai SENHOR re ojerovia ha'e SENHOR oarō oikovy va'e.

⁸ Mba'eta ha'e kuery ikuai porā 'rā yy yvýry yvyra onhoty mbyre rami. Hapo yakā'i peve oo ramo ndokyjei 'rā haku gui. Hogue ma hovy porā riae 'rā. Nda'okyveia ára tei nda'ipirui 'rā, ndai'a e'yi 'rā guive.

⁹ "Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuua 'rā?

¹⁰ Xee SENHOR ae aikuua pota 'rā ipy'a re, xee ha'ā 'rā guive onhembopy'aa, oikoague rekovia ame'ē aguā, peteñ-teñ oikoague rami ae.

¹¹ Inambu pytā ngupi'a ae e'ŷ omboaku-a rami avi ha'evea rami e'ŷ ojoupave va'e. Ha'e kuery oikove teri reve ha'e nunga oipe'apaa xapy'a 'rā, ha'e gui opaa py hi'arandu e'ŷ va'e 'rā ikuai."

Nhanderuete oepy aguā re Jeremias ojapukaiague

¹² Ore rombojerovia atyrā ma hexakāmba ha'e iky'a e'ŷ va'e, jypy'i guive yvate ete va'e oī.

¹³ Ndee SENHOR ma Israel kuery oarō okuapy va'e reiko. Ha'e rā nderejaare kuery ma oxīmba va'erā meme.

"Tá, xegui ojepe'a va'e rery ma yvy py rive 'rā ipara oiny, SENHOR yy marā e'ŷ me'ēa oeja rire", he'i.

¹⁴ SENHOR, xemonguera ke akuera ete aguā. Xereraa jepe ke aa jepe ete aguā. Mba'eta ndee anho roqueroporai.

¹⁵ Ne'exa, xevy pe ha'e kuery aipoe'i 'rā okuapy: "Mamo tu oī SENHOR ayvu? Tojeupity vyvoi!" he'i okuapy.

¹⁶ Xee ndajepe'ai ndevyguia kuery re apenaa gui, ikuai axy ára ou rā ndaexaxei teñ. Ndee ma reikuua. Xeayvu xejurū gui oē va'e voi reikuapa.

¹⁷ Enhemoingo eme xemondiyiarā, mba'eta nda'eveia ára ma ndere anho 'rā anhemi.

¹⁸ Xeavyky reia kuery toxīmba, ha'e rā xee ma taxīmba eme. Ha'e kuery tonhemondyipa, ha'e rā xee ma tanhemondy eme. Ha'e kuery áry ae embou ára vai, ha'e emokanhymba jevy-jevy.

Sábado ára omboetea aguā re ijayvuague

¹⁹ SENHOR aipoe'i xevy: "Tereo, epu'ā e'amy ha'e kuery retā rokē py, Judá pygua huvixa kuery oike ha'e oēaty py, ha'e Jerusalém tetā rokē ikuai va'e ha'e javi yvýry.

²⁰ Ha'e vy aipo'ere 'rā ha'e kuery pe: 'Peē Judá pygua huvixa kuery, pendu ke SENHOR ayvu, Judá ha'e Jerusalém pygua kuery kova'e okē rupi peike va'e ha'e javive.'

²¹ Po rami SENHOR ijayvu: Peē kuery peikove pukuxe vy sábado ára pevoyive eme mba'emo, peroike eme guive Jerusalém tetā rokē rupi.

²² Sábado ára penoēve eme voyi pendero gui, mba'eve pejapo eme guive. Ha'e rami 'rāgue py pemboete 'rā sábado ára, peneramoī kuery pe ajapo ukaague rami vy.

²³ Ha'e rami teñ ha'e kuery ma xeayvua re nopenai vy ndojapyxakai raka'e. Ha'e rami 'rāgue py inhakā ratā okuapy xeayvua noendu potai vy, onhemo'arandu uka e'ŷ aguā.

²⁴ "SENHOR ijayvuve ju: Ha'e rā peē kuery ma pendu ke xeayvua, ha'e pemboete sábado ára, tetā rokē rupi voyi peroike ve'ŷ ha'e mba'eve pejapo e'ŷ aguā.

²⁵ Ha'e rami ri ramo kova'e tetā rokē rupi oike nho 'rā penderuvixave kuery guembiguai yvatekueve reve, tenda Davi openaaty áry oguapy va'erā. Guembiguai kuery yvatekueve reve 'rā oaxa jogueruvy karóxa py, ha'e kavaju áry, avakue Judá ha'e Jerusalém pygua kuery reve. Ha'e rami rire kova'e tetā py ikuia 'rā raka'e rā peve.

²⁶ Ha'e gui oupaa 'rā Judá regua tetā ha'e Jerusalém yvýry rupi ikuia gui, Benjamim yvy, yvy reia ha'e yvy'ā reia kuaray puku-a katy gui. Ha'e rami vy ogueru 'rā mymba oapy reve ome'ē va'erā, mba'emo aju guigua ha'e heakuā porā va'e, SENHOR oguerov'yaa rupi ome'ē aguā ixupegu opy.

²⁷ Ha'e rami avi napendu potai vy sábado ára napemboetei ramo, xapy'a rei sábado ára Jerusalém tetā rokē rupi voyi peroike ramo tata py apypa 'rā okē ikuai va'e. Ha'e va'e tata omomba 'rā Jerusalém py huvixa ro ikuai va'e, ndoguevei 'rā guive."

18

Mba'emo ryru nhae'ũ guigua re ijayvuague

¹ Jeremias pe SENHOR oayvu ombou vy aipoe'i:

² — Epu'ã ke, tereo nhae'ũ gui mba'emo apoa ro py. Ha'e py ma rendu 'rã xeayvu — he'i.

³ Ha'e ramo aa nhae'ũ gui mba'emo apoa ro py. Ha'e py ama'ẽ rã ha'e va'e ombo'eapo oiny ojere va'e áry.

⁴ Ha'e gui mba'emo ryrurã nhae'ũ gui ojapo va'ekue ivaipa ramo ha'e va'ekue gui amboae ju ojapo ha'e ae oipotaa rami.

⁵ Ha'e ramo SENHOR oayvu ombou xevy.

⁶ Ha'e vy aipoe'i: “Upe va'e nhae'ũ gui mba'emo apoa ojapoa rami ha'eve xee voi peẽ Israel kuery roguereko aguã. Ne'exa, ipo py yapo oĩ va'e rami peẽ Israel kuery voi xepo py peĩ.

⁷ Mba'eta peteĩ regua e'ŷ vy peteĩ tetã re mba'e xeayvu 'rã aipe'apa aguã, aity ha'e ambovaipa aguã re.

⁸ Ha'e rami teĩ ha'e kuery gueko vai gui ojeko rerova ri ramo xee voi amboae rami 'rã areko, mba'emo vai ambou aguã re anhembopy'aague rami ve'ŷ.

⁹ Ha'e rami avi peteĩ regua e'ŷ vy peteĩ tetã re xeayvu 'rã amombaraete ha'e anhotõ aguã re.

¹⁰ Ha'e ramo xapy'a rei ha'e kuery ma xerenonde rupi teko vai rupi tema 'rã ikuai xeayvua noendu potai vy. Ha'e ramo xee amboae rami 'rã areko amoingo porã aguã re anhembopy'aague rami ve'ŷ.

¹¹ Ha'e nunga rupi aŷ ma ndeayvu ke Judá regua avakue ha'e Jerusalém pygua kuery pe. Ha'e vy aipo're 'rã: ‘Po rami SENHOR ijayvu: Ne'exa, xee ma ambou ta mba'emo vai, peẽ kuery rovai aiko aguã re anhembopy'a rire. Ha'e nunga rupi aŷ peteĩ-teĩ pejeko rerova na ha'eve'ŷa rami pendekuaia ha'e mba'emo vai pejapoa gui,’ ‘re 'rã.

¹² Ha'e rami teĩ ha'e kuery aipoe'i 'rã: ‘Nda'evevi ae ma teve, mba'eta ore kuery ma orekuaiive tema 'rã ore ae roipotaa rami. Peteĩ-teĩ roiko 'rã oreakã ratãa rupi, orereko vaia rami ae’, he'i 'rã okuapy.

¹³ “Ha'e nunga rupi SENHOR aipoe'i: ‘Peoporandu na aŷ amboae regua kuery ikuaiia rupi mav'a'e pa ha'e nunga oenduague re. Mba'eta ha'e ramigua ete Israel kuery ojapo va'ekue!

¹⁴ Ha'e gui Líbano yvyty re itaova oĩ va'e áry yro'y apĩ oĩaty gui nda'u okanhy 'rã ri? Tyrã pa typa 'rã ri yro'y rykukue mombyry guigua?*

¹⁵ Any, teĩ xevygua kuery ma hexaraipa okuapy xegui. Ha'e rami vy mba'emo ra'angaa pe rive oapy 'rã okuapy heakuã porã va'e. Ha'e nunga ma ojapo tape yma guare rupi ikuai vy onhepyxangapa aguã rami, tape joja e'ŷa rupi ju oje'oi aguã,

¹⁶ ha'e kuery yvy nhomondyipaarã opyta aguã rami, ha'e amboae kuery ojojai rei aguã rami. Mba'eta ha'e rupi oaxa va'e kuery onhemondyi vy ombovava 'rã oakã.

¹⁷ Mba'eta yvytu kuaray oua katy gui ou va'e py amoâimba 'rã hovaigua kuery renonde rupi. Ha'e kuery ikuai axya ára aexa uka 'rã xekupe, xerova e'ŷ.’ ”

Ngovaigua kuery rovai profeta ojerureague

¹⁸ Ha'e ramo aipoe'i okuapy: “Peju ke, mba'emo jajapo Jeremias rovai. Mba'eta oiko riae 'rã lei rupi sacerdote ha'e hi'arandu va'e nhanemongetaarã, ha'e profeta ayvu omombe'u va'erã. Peju na, nhamoĩ vai ayvu py, ijayvua nhaendu ve'ŷ aguã”, he'i okuapy xere.

¹⁹ Ha'e gui SENHOR, ema'ẽ na xere, ha'e endu pota xere ijayvu rei va'e kuery ijayvua.

²⁰ Iporã va'e re omboekovia 'rã teve ha'eve'ŷa ramigua? Mba'eta ha'e kuery ojo'o yvykua xenhe'ẽ ombo'a aguã. Nema'endu'a ke nerendone xee ajexa ukaague re, mba'eta ha'e kuery remoingo porã aguã re ajerure va'ekue, rejou vai aguã re'ŷ.

* 18:14 Líbano rery ma “Yvyty xiĩ va'e” 'ea, yvate etea py yro'y ojekuaa riae ramo. Ha'e gui yro'y rykukue oxyry ouvy vy oata e'ŷ re omoakŷ 'rã ha'e va'e yvy.

²¹ Ha'e nunga rupi ha'e kuery ra'y kuery emboaxa karuai pe, ejapo ke ta'y kuery karuai ha'e kyxe py omano aguã rami. Tove ta'yxy kuery gui toipe'apaa imemby kuery, imeve'ŷ va'e ta'ikuai. Tove ime kuery tomanomba mba'eaxy gui. Ha'e gui kunumigue ma joe opu'âa py tojukapaa kyxe py.

²² Ha'e kuery re opu'âa va'erâa kuery rembou xapy'a ramo tojapukai okuapy ngoo gui. Mba'eta ha'e kuery yvy ojo'o okuapy rire xejopy aguã, xepy rupi ojokua nhuã xembo'axe vy.

²³ Ha'e râ SENHOR, ndee reikuua ae ma xejukaxe vy nhomoneta okuapya ha'e javi. Eperdoa eme ha'e kuery reko vaiague re, embogue eme ojejavvyague nerentonide gui. Nerononde ojexa uka vy to'apa. Ndepoxya ára py embopaga ke.

19

Yryru ombovo aguã re ijayvuague

¹ SENHOR aipoe'i: “Tereo, ejogua peteĩ yryru nhae'ûa gui ojapo pyre. Nderupive eraa avi neretarâa kuery regua ha'e sacerdote regua nhomonetaa kuery.

² Tapeo Hinom ra'y rekoague yvyugua py, nhae'ûa gui mba'emo apoa rokê katy. Emombe'u ha'e py ndevy amombe'u uka va'e.

³ Ha'e vy aipo're 'râ: 'Judá pygua huvixa kuery ha'e Jerusalém py pendekuai va'e, pendu ke SENHOR ayvu. Po rami ijayvu SENHOR ixondaro reta va'e, Israel kuery Ruete: Ne'exa, kova'e tekoá áry ambou 'râ mba'emo vai. Ha'e ramo ha'e nunga oendu va'e ha'e javi nhemondyi gui ijapyxa nhe'embâa 'râ.

⁴ Mba'eta ha'e kuery xerejapa vy omongy'apa rei kova'e tekoá, nguuete mboae pe heakuã porâa va'e oapy vy, ha'e nunga peteigüeve oexa va'e'ŷ teri, tuu kuery, neî Judá pygua huvixa kuery voi. Ha'e vy kova'e tekoá ha'e javi rupi omoë okuapy heko porâa va'e ruguy.

⁵ Ha'e vy yvy'âa ikuai va'e áry rupi ojapo okuapy Baal ra'angaa mbojerovia atyrâa, tata py gua'y kuery oapy aguã Baal pe ome'ê vy. Teigüeve ma ha'e ramigua ajapo uka va'e'ŷ, ha'e rami aguã re ndaxeayvui, neî nanhembopy'ai guive.

⁶ Ha'e nunga rupi ou ma oiny ára kova'e tekoá pe neî "Tofete", neî "Hinom ra'y rekoague yvyugua" 'ea ve'ŷ aguã. Ha'e rami 'râgue py "Yvyugua jojukapaaty" 'ea 'râ, he'i SENHOR.

⁷ Mba'eta kova'e tekoá py ambovaipa 'râ Judá ha'e Jerusalém pygua kuery nhomongetaague, ajapo 'râ kyxe gui ho'apa aguã rami ngovaigua kuery renonde, ijukaxea kuery po py. Ha'e vy he'õgue amboaxa 'râ guyra yvate rupi oveve va'e ha'e mymba yvy rupi ikuai va'e rembi'urâ.

⁸ Kova'e tetâ amoï 'râ nhomondypaarâ, amboae kuery ojojai rei aguã. Ha'e rupi oaxa va'e ha'e javi onhemondyi vy ojojai rei 'râ, ha'e kuery re ha'e rami ete mba'emo vai oiko rire.

⁹ Hovaigua ijukaxea kuery ojokopa vy omoingo axy ramo ajapo 'râ ha'e kuery gua'y kuery ha'e guajy kuery ro'okue ho'u aguã rami, ha'e peteĩ-tei ho'u 'râ oirû ro'okue', 're 'râ.

¹⁰ "Ha'e ramo avakue nderupive oo va'ekue oexaa py rembovo 'râ yryru.

¹¹ Ha'e vy aipo're 'râ ha'e kuery pe: 'Po rami SENHOR ixondaro reta va'e aipoe'i: "Guî rami xee amomba 'râ kova'e kuery ha'e kova'e tetâ, yryru nhae'ûa gui ojapo pyre ombovoa rire ndojeapoveia rami avi. Ha'e ramo hetekue ojatya 'râ Tofete py, amboae henda py ojatya aguã jipoi ramo.

¹² Ha'e rami ae ajapo 'râ kova'e tekoá re, ha'e py ikuai va'e kuery re guive", he'i SENHOR. "Kova'e tetâ amombyta 'râ Tofete ramigua ete.

¹³ Mba'eta Judá pygua huvixave kuery ha'e Jerusalém pygua kuery ro ha'e javi ma Tofete rami avi 'râ ha'eve'ŷ va'e meme, yva re ikuai va'e pe heakuã porâa va'e oapyague ha'e amboae tuuete pe vinho onhoëague guive", he'i."

¹⁴ Ha'e gui Tofete py SENHOR ayvu omombe'u aguã omondoukaague gui Jeremias ojevy vy opu'âa ho'amy SENHOR pegua oo roka py. Ha'e vy aipoe'i heta va'e kuery ha'e javi pe:

¹⁵ “Po rami ijayvu SENHOR ixondaro reta va'e, Israel kuery Ruete: Ne'exa, kova'e tetā ha'e tekoal'i ikuai va'e áry ambou 'rā mba'emo vai xeayvuague ha'e javi, mba'eta xeayvu noenduxei vy inhakā ratāmba rire.”

20

Profeta Jeremias jokuaare re ijayvuague

¹ Ha'e va'e ayvu Jeremias omombe'u rā sacerdote Imer ra'y Pasur oendu. Ha'e va'e ma SENHOR pegua oo pygua ruvixa oiko.

² Ha'e vy Pasur profeta Jeremias oinupā uka ma vy ipy ojokua uka yvyra re. Ha'e va'e ma oī Benjamim regua okē yvatevea py, SENHOR pegua oo yvýry. Ha'e gui ko'ëgue ma Pasurojora ju Jeremias yvyra gui.

³ Ha'e ramo ixupe Jeremias aipoe'i:

— SENHOR nanemboeryvei ma 'rā Pasur, ha'e rā “Jovaive-ive re nhomongyje reia” he'ia anho.

⁴ Mba'eta po rami SENHOR ijayvu: “Ne'exa, xee rojapo 'rā ndee ae renhemongyje aguā rami, neirū kuery ha'e javi pe guive. Mba'eta rexaa py ae hovaigua kuery ojukapa 'rā kyxe py. Judá yvy ha'e javi amboaxa 'rā Babilônia pygua huvixa po py. Ha'e ramo ogueraapa 'rā Babilônia katy escravo-rā, kyxe py ojuka 'rā guive.

⁵ Kova'e tetā py perekopa va'ekue amboaxa avi 'rā, pemb'a eapoa gui pejoupa va'ekue ha'e hepykueve ha'e javi. Tá, Judá regua huvixa kuery omoī porā va'ekue ha'e javi amboaxa 'rā hovaigua kuery po py. Ha'e ramo ha'e kuery oipe'apa 'rā heravy Babilônia katy.

⁶ Ha'e gui ndee Pasur ndero py ikuai va'e ha'e javi reve penembo'a vy pendereraapa avi 'rā. Ha'e ramo Babilônia tetā katy 'rā peo. Ha'e py ma pemanomba 'rā, pendeatya 'rā guive: ndee ha'e neirū kuery ha'e javi, ha'e va'e kuery pe ayvu porā merami rive remombe'ua va'ekue reve.”

Profeta iporiau reia rupi ijayvuague

⁷ SENHOR, guī rami aiko aguā re ndeayvu ramo aiko. Xegui nembaraeteve va'e vy ndepo'aka. Ha'e ramo ko'ë nhavō ombojaru reipy aiko. Ha'e kuery va'e regua peteī-teī xejojai rei 'rā okuapy.

⁸ Mba'eta ajapukai ha'e xeayvu atā reve anho amombe'u aikovy remokanhy ha'e rembopaga aguā regua. Ha'e rami py ndee SENHOR ayvu káuxa aiko ovare e'ŷ va'e ha'e omoximba pyrā, ko'ë nhavō.

⁹ Ha'e gui anhembopy'a vy “Ha'e nunga namombe'uvei, ndaxeayvuvei ma 'rā hery rupi”, ha'e teī xekuraxō re ndeayvua hendy 'rā tata rami, xekāgue mbyte tata omboty pyre rami hendy. Ha'e ramo aiko axy vaipaa py xekane'ō ma, narombaraetevei ma 'rā guive.

¹⁰ Mba'eta mbovy rei e'ŷ aendu ijayvu rei rā: “Jovaive-ive re nhomongyjea! Pendeayvu na hexe, nhandeayvu na!” he'i va'e. Xerayvu ete va'ekue eteve voi anhepyxanga aguā oarō vy aipoe'i 'rā okuapy: “Onhembotavy uka ramo nhandepo'aka 'rā hexe, ha'e vy jajepy 'rā”, he'i okuapy.

¹¹ Ha'e rami teī SENHOR ma xereve oiko joe opu'ā va'ety ipo'akapa va'e rami. Ha'e ramo xeavyky reia kuery ae 'rā onhepyxangapa, nda'ipo'akai 'rā. Ha'e kuery oximba ete 'rā. Hi'arandu rupi e'ŷ ikuai rire ha'e kuery re ou 'rā oximba aguā raka'e rā peve guarā, ha'e va'e re ndaexaraivei 'rā.

¹² Ha'e gui ndee SENHOR ixondaro reta va'e, rexa 'rā heko porā va'e, reikuua pota 'rā jopy'a ha'e nhokuraxō re oī va'e re. Tove xee taexa ha'e kuery re repu'ā rā, ndepo py xerekove amboaxa rire.

¹³ Peporaei ke SENHOR pe, perovy'a SENHOR, mba'eta ojexavai rei va'e nhe'ë ogueraa jepe ojavyky rei va'e kuery po gui.

Jeremias itui'iague ára re ijayvu vaiague

¹⁴ Ayvu vaipy toiko xetui'iague ára. Togueroayvu porāa eme ha'i xekuavā'iague ára.

¹⁵ Ayvu vaipy toiko xeru pe ava ha'e nunga mombe'uare, ovy'a ete reve “Itui ma ndera'y”, he'i va'e.

¹⁶ Tove ha'e va'e ava toiko tetā SENHOR omboaxy e'ŷ re ombovaipa va'ekue rami. Ko'ẽmba jave toendu ojapukai va'e, ha'e rã kuaray mbyte jave ma taevovo rei.

¹⁷ Mba'e re tu Nhanderuete ndaxejukai raka'e xeryru'i pyve? Mba'e re tu ha'i ryepy aĩ reve norenhonoro porãai raka'e? Ha'e'ŷ vy raka'e rã peve ndaye guaxu'i ma voi va'e rire.

¹⁸ Mba'e re tu xeryru'i gui aẽ raka'e amba'eapo ha'e xeporiaua aendu aguã rive, ha'e aikoa ára opa peve aximba aguã?

21

Nabucodonosor Jerusalém tetā ombovaipa aguã re ijayvu ma voiague

¹ Jeremias pe SENHOR oayvu ombou va'ekue, mba'eta huvixa Zedequias ombou Malquias ra'y Pasur ha'e Maaséias ra'y sacerdote Sofonias aipoe'i aguã:

² “Eporandu na SENHOR pe orere, mba'eta Babilônia pygua huvixa Nabucodonosor ou orere opu'ã aguã. Xapy'a rei SENHOR orepytyvõ 'rã hexa pyrã ojapo vy, orea gui orerovaigua kuery ojepe'a aguã”, he'i.

³ Ha'e ramo Jeremias aipoe'i ha'e kuery pe: “Po rami pendeayvu 'rã huvixa Zedequias pe.

⁴ Po rami SENHOR Israel kuery Ruete ombovai: Ne'exa, xee ajapo 'rã tembiporu joe opu'ãa pygua pendepo py perekova ju oiporua aguã rami. Mba'eta peneretã kora rovai Babilônia pygua huvixa ha'e caldeu kuery re pepu'ã aguã py tembiporu peiporu va'ekue xee ajapo 'rã peneretã mbyte ju omboatypaa aguã rami.

⁵ Xee ae apu'ã 'rã peẽ kuery rovai xepo aipi vy xepo'akaa aexa uka reve, xepoxya, rojou vaia ha'e rombopaga etea rupi.

⁶ Ha'e rami vy kova'e tetā pygua kuery ajukapa 'rã, avakue ha'e mymba kuery guive. Mba'eaxy vaikue gui 'rã omanomba.”

⁷ SENHOR aipoe'ive ju: “Ha'e va'e rire ma amboaxa 'rã Judá pygua huvixa Zedequias hembiguai kuery reve. Kova'e tetā pygua kuery mba'eaxy gui, kyxe ha'e karuai gui nomanombai va'ekue ha'e javi amboaxa 'rã Babilônia pygua huvixa Nabucodonosor po py, hovaigua ijukaxeia kuery po py guive. Ha'e ramo ojukapa 'rã kyxe py. Ndojuka e'ŷi 'rã, noendui 'rã nda'evei nhhoa neñ omboaxy.

⁸ “Ha'e gui hetu va'e kuery pe ju aipo're 'rã: ‘Po rami SENHOR ijayvu: “Ne'exa, penerenonde amoï 'rã tape tekove katy oo va'e, ha'e manoia katy oo va'e guive.

⁹ Kova'e tetā py optya va'ekue omanomba 'rã kyxe py, karuai e'ŷ vy mba'eaxy gui. Ha'e rã caldeu kuery tetā jokopaa va'e pe ojereraa uka va'e ma oikove 'rã, guekove ogueraa jepe uka 'rã.

¹⁰ Mba'eta kova'e tetā katy xerova ha'amy mba'emo vai ambou aguã, iporã va'e e'ŷ”, he'i SENHOR. “Ha'e rami vy amboaxa 'rã Babilônia pygua huvixa po py oapypa aguã”, 're 'rã.’”

¹¹ “Ha'e gui Judá pygua huvixa ro pygua kuery pe ju aipo're 'rã: ‘Pendu ke SENHOR ayvu.

¹² Davi ramymino kuery, po rami SENHOR ijayvu: “Aje'ive reve peikuua pota na anhetẽ rupi, peraa jepe ikuai axy va'e imoingo axya po gui, xepoxya tata rami hendy e'ŷ aguã ha'eve'ŷa rami rei pendekuaia rovai, imboguearã oiko e'ŷ re.”

¹³ SENHOR aipoe'i: “Ne'exa, peẽ yvyugua pygua ha'e ita guaxu nhuũndy reia mbyte oĩ va'e rami pepu'ã va'e kuery, xee ma pendovaigua aiko. Peẽ kuery aipopeje: ‘Mava'e tu ou 'rã nhanderovai?’ ha'e ‘Mava'e tu oike 'rã nhanderekao py?’ peje tei penderovaigua aiko.

¹⁴ Ha'e rami vy rombopaga 'rã pendekuaiaque re. Peneretã re amoendy 'rã tata, ka'aguy re rami avi. Ha'e va'e ma pendeyvýrykue ha'e javi 'rã omomba”, he'i SENHOR.”

22

Judá pygua huvixa ro pygua kuery rovai ijayvuague

¹ SENHOR aipoe'i: “Tereo ke Judá pygua huvixa ro py, ha'e emombe'u povae ayvu ha'e py.

² Ha'e vy aipo're 'rā: 'Ndee Judá pygua huvixa, tenda Davi openaaty py reguapy va'e, endu ke SENHOR ayvu, nerembiguai kuery ha'e ndevyguia kuery kova'e okē rupi oike va'e ha'e javi reve.

³ Po rami SENHOR ijayvu: "Pejogueroko ke anhetē rupi, pepena porā. Ojexavai va'e peraa jepe imbojexavai reia kuery po gui. Pembojexavai rei eme amboae yvy regua, neī tyre'ŷ ha'e imeve'ŷ va'e. Emoē eme heko porā va'e ruguy kova'e tekoa re.

⁴ Mba'eta pova'e ayvu pejapo ete ramo kova'e okē rupi oike nho 'rā huvixa kuery tenda Davi openaaty py oguapy va'erā, karóxa py ha'e kavaju áry, guembiguai ha'e ojeupeguia kuery reve.

⁵ Ha'e rā pova'e ayvu napenduxei ramo xee ae rery rupi 'rā aura kova'e oo ombovaipa pyre rive amombyta aguā re", he'i SENHOR.' "

⁶ Mba'eta po rami SENHOR ijayvu Judá pygua huvixa ro re: "Ndee ma Gileade ha'e Líbano yvyty apyte rami ajou porā va'eri anhetē rojapo 'rā tekoague rive, tetā oĩa ve'ŷ aguā rami.*

⁷ Nderovai ambou 'rā nemombaarrā. Ha'e ramo peteī-teī guembiporu reve ou vy ojajapa 'rā yary reiporavo va'ekue, ha'e vy omombo 'rā tata py.

⁸ Ha'e rami rire pavē regua kova'e tetā rupi oaxa vy peteī-teī aipoe'i 'rā oirū pe: 'Mba'e re tu SENHOR guī rami ete ojapo kova'e tetā guaxu re?' he'i 'rā.

⁹ Ha'e ramo ha'e kuery pe ombovaia 'rā: 'Mba'eta ojepe'apa rire SENHOR nguuete guexeve guarā ojapo va'ekue gui, ha'e amboae ramigua tuuete ombojerovia, ha'e ixupe rive ikuai rire.' "

Judá pygua huvixa Salum rovai ijayvuague

¹⁰ Pejae'o eme huvixa omano va'ekue re, penhendu eme. Ha'e rami 'rāgue py pejae'o vaipa ete 'rā ta'ykue ogueraa pyre re. Mba'eta ha'e va'e ma ndojevyvei 'rā, ndoexavei 'rā yvy itui'ague.[†]

¹¹ Mba'eta SENHOR ijayvu Josias ra'y Judá pygua huvixa Salum, nguu Josias rekoria oĩ va'ekue re, kova'e tekoa gui oipe'a pyre re guive. Ha'e vy aipoe'i: "Ndojevyvei ma 'rā apy.

¹² Ha'e rami 'rāgue py escravo-rā ogueraa ague py ae 'rā omano. Ndoexavei 'rā kova'e yvy", he'i.

Judá pygua huvixa Jeoaquim rovai ijayvuague

¹³ "Nda'evei ete 'rā anhetē rupi e'ŷ joguerekaoa rupi ngoo ojapo va'e, jokorea rupi ngoorā ojapo aguā mba'emo ojou va'e pe. Ha'e va'e ma ojeupeguia kuery omomba'eapo teī ndopagai, omiba'eapoague repy nome'ēi va'e.

¹⁴ Mba'eta aipo're: 'Xerorā ajapo 'rā tuvixa va'e, ha'e opy ja'oa ikuai va'e ambopyve 'rā. Yvate rupi amoī 'rā janela-rā, yary guigua py aipyovāmba ha'e amopytā 'rā pytā va'e py', 're.

¹⁵ Ha'e rami teī ndee nda'u huvixa kuery mboae ramy rereko reta vy rive teve huvixa reī? Nderu nda'u ndokarui ha'e ndoy'ui teve raka'e? Ha'e nda'u ha'evea rami ndajogueroko, ha'e joe ndoikuua pota porāi teve? Ha'e ramo opa mba'e py oiko porā.

¹⁶ Ha'e ma oikuua pota va'ekue iporiaukue'i ha'e ojexavai va'e kuery re. Ha'e ramo ixupe ha'evea rami meme oiko. Ha'e rami e'ŷ teve xekuaa va'e kuery ikuai?" he'i SENHOR.

¹⁷ "Ha'e rā ndee ma nderexa ha'e ndepy'a py reikuua pota reikovy ndee ae reipota va'e re anho, heko porā va'e ruguy remoē aguā, ha'e rejerovia reia ha'e rejokorea rupi reiko aguā re anho."

* 22:6 Gileade ha'e Líbano yvyty apyte re ikuai yvyra tuvixakueve anho, yary, ha'e nunga. Ha'e gui huvixave ro pe "Oo Líbano regua ka'aguy guigua" 'ea (1 Reis 7.1-7). Ha'e gui versículo 23 py ma huvixave pe ae "Líbano pygua, yary guigua py ndero va'e" 'ea. † 22:10 Huvixave Josias heko porā va'e omano rire Israel kuery ojae'o vaipa okuupy hexe. Ha'e rā ta'y Salum ma Egito pygua huvixa ogueraa oyvy re omano aguā py (2 Reis 23.34). Ha'e gui Salum Jeoaquim ju oĩ hekovia.

¹⁸ Ha'e nunga rupi po rami SENHOR ijayvu Josias ra'y Judá pygua huvixa Jeoaquim re: "Pejae'o eme hexe, joupe-upé aipopeje eme guive: 'Ai, xeryvy!' ha'e'ý vy 'Ai, xereindy!' peje eme. Neñ hexe pendep'y'a vaia rupi 'Ai, xeruvixa!' ha'e'ý vy 'Ai, ipo'akapa va'ekue', peje eme.

¹⁹ Mba'eta mburika re'õgue omomboa rami avi hetekue omomboa 'rā. Ha'e rami vy ombotyryrya 'rā heravy Jerusalém rokē gui mombyry omombo aguã.

²⁰ "Ndee Jerusalém, ejeupi na Líbano yvyty áry, ha'e ejapukai. Enhendu Basã yvy rupi, ha'e ejapukai Abarim guive, mba'eta neirũ kuery re opyrõmbaa ma.

²¹ Ndeporiaua rupi e'ý reiko jave ndevy xeayvu ramo ndee 'Naendui 'rā', 're va'ekue. Ha'e rami ete reiko ndepyau guive, peteïgueve ma voi nerendui xeayvu.

²² Ha'e nunga rupi yvytu ogueraapa 'rā ndere opena va'ekue, neirũ kuery voi escravo-rā ogueraapaa 'rā. Ha'e ramo nderekó vaiague káuxa reximba ha'e nda'evei nho 'rā.

²³ Ndee Líbano pygua rami yary guigua py ndero va'e! Ha'e rami tei rejexavai aguã ou ramo nepoæ ete 'rā, omemby oikuavã ta va'e rami reiko axy aguã."

Judá pygua huvixa Jeconias rovai ijayvuague

²⁴ SENHOR aipoe'i: "Anheté ete xee ae rekove rupi aura vy aipoa'e: Jeoaquim ra'y Judá pygua huvixa Jeconias ma aiporu kuaa regua re xekuã regua xerery oĩa va'e oĩ va'e rire xee amboi 'rãgue ha'e gui.

²⁵ Ndee huvixa, romboaxa 'rā ndejukaxe ha'e rekyjea va'e kuery po py. Ha'e kuery ma Babilônia pygua huvixa Nabucodonosor ha'e caldeu kuery.

²⁶ Yvy mboae ndetui'iague katy e'ý 'rā romombo, ndexy nekuavã'iare reve. Ha'e py ma pemanu 'rā.

²⁷ Ha'e rā yvy pexaxeia katy ma ndapejeyvei 'rā.

²⁸ Ha'e gui ndee ava Jeconias nda'u ojou vaipy, omopẽ rive pyre ha'e oguerovy'a e'ýpy reiko? Mba'eta ndera'y kuery reve penemombo oka katy, yvy pexa e'ýa katy pendereraa", he'i.

²⁹ Ndee yvy, yvy, yvy! Endu na SENHOR ayvu.

³⁰ Po rami SENHOR ijayvu: "Jeoquim rery oĩa py pembopara ta'y e'ý va'e rami, ha'e ava oikoa pukukue re ndoko porã va'e, ha'e peteïve ta'y nda'ipo'akai 'rā tenda Davi openaaty py oguapy aguã Judá pygua huvixarã."

23

Ha'eve'ýa rami opena va'e kuery rovai ijayvuague

¹ "Nda'evei ete 'rā xerymba vixa'i kuery re opena va'erã amoĩ va'ekue pe, mba'eta omokanhymba ha'e nhuündy okaruaty gui omoaimba", he'i SENHOR.

² Ha'e nunga rupi po rami SENHOR Israel kuery Ruete ijayvu ojeupegua kuery re opena va'e re: "Peẽ kuery ma pemoaimba xerymba kuery, pemondoukapa, napenai ha'e kuery re. Ha'e nunga rupi xee ma apena 'rā peẽ kuery pepaga aguã re pejapo vaiague re", he'i SENHOR.

³ "Ha'e gui ma xee ae 'rā arupa xerymba kuery rembyrekue yvy jave mamo rā rei okanhymbaague gui. Ajapo 'rā okora py ae ju ojevypa aguã rami. Ha'e ramo ta'y reta ha'e hetave ju 'rā ovu.

⁴ Ha'e gui ha'e kuery re opena va'erã amoĩ 'rā omongaru porã va'erã kuery. Ha'e ramo xerymba kuery ndokyjevei neñ nonhemondyivei 'rā. Peteïve ma voi nokanhymbaivei 'rā", he'i SENHOR.

Jeremias 33.14-16

⁵ SENHOR aipoe'i: "Ne'exa, ou ma oiny ára peteï amoingo 'rā Davi rapytakue renhoi, hamymino heko porã va'erã. Ha'e va'e ma huvixa oĩ vy o'arandua rupi 'rā ipo'aka ha'e opena. Ha'evea rami 'rā oikuua pota ha'e joguereco yvy re.*

⁶ Ha'e oĩ jave ma Judá kuery oo jepe 'rā, Israel kuery voi mba'eve gui okyjea rupi e'ý 'rā ikuai. Pova'e tery rupi 'rā omboerya: 'SENHOR nhanderekó porãrã me'ëa', 'ea."

* 23:5 Isaías 4.2; Zacarias 3.8, 6.12

⁷ SENHOR aipoe'ive ju: “Ou ma oiny ára oura va'e aipo nde'ivei aguã: ‘Anhetẽ ete SENHOR oikove va'e Egito yvy gui Israel kuery oguenoẽ va'ekue rery rupi aura’, nde'ivei 'rã.

⁸ Ha'e rami 'rãgue py aipo'ea 'rã: ‘Anhetẽ ete SENHOR oikove va'e yvy kuaray ijapu'a'ia katyguha ha'e yvy jave rupi Israel ramymino kuery mamo rã rei heraapaague gui oguerupa va'ekue rery rupi aura’, 'ea 'rã. Ha'e ramo ha'e kuery ikuai 'rã oyvy re ae.”

Profeta ramigua rive ikuai va'e rovai ijayvuague

⁹ Ha'e gui profeta kuery reko gui xekuraxõ opẽmba xepy'apy py, xekãgue voi oryryipa. Xee ma ava oka'u va'e rami avi aiko, vinho oy'u vaipa va'e rami, teĩ SENHOR gui, ha'e ijayvu iky'a e'ŷ va'e amombe'ua káuxa ae nda'evei aikovy.

¹⁰ Mba'eta yvy tynyẽ ma tavy reia, ha'e rupi ojae'oa oiny Nhanderuete ijayvu vai rire. Tekoa e'ŷa rupi nhuündy ikuai va'e ipirupa ma. Mba'eta itavy rei va'e ikuaria ma nda'evei, ha'eve'ŷa rami rive 'rã ipo'aka joe.

¹¹ “Mba'eta profeta ha'e sacerdote kuery onhemongy'apa okuapy. Xevyguia oo py eteve voi ajou ha'eve'ŷa rami ikuaria”, he'i SENHOR.

¹² “Ha'e nunga rupi ha'e kuery ma tape xxyí reia rupi pytũ rupi ooa rami ikuai. Ha'e ramo omoanhambaa rã ho'apa 'rã. Mba'eta ha'e kuery áry ambou 'rã mba'emo vai ambopaga vy”, he'i SENHOR.

¹³ “Samaria pygua profeta ramigua kuery re ma xee aexa hi'arandu e'ŷa. Mba'eta Baal rery rupi rive ayvu omombe'u vy oguerojejavypa xevyguia Israel kuery.

¹⁴ Jerusalém pygua profeta kuery re voi aexa nda'evei ete va'e. Mba'eta ha'e kuery itavy rei 'rã okuapy, anhetẽ rupi e'ŷ 'rã ikuai, ha'e omombaraete 'rã joapo vaia kuery po, avave rei gueko vai gui ojeko rerova e'ŷ aguã rami. Xevy pe rã Sodoma pygua kuery ikuaiague rami meme, ha'e rã Jerusalém pygua kuery ma Gomorra pyguare rami ikuai.”

¹⁵ Ha'e nunga rupi po rami SENHOR ixondaro reta va'e ijayvu profeta ramigua kuery reko re: “Ne'exa, ha'e kuery xee amongaru 'rã veneno re, ha'e yy veneno re irũ va'e ame'ẽ 'rã oy'u aguã. Mba'eta profeta ramigua kuery Jerusalém pygua ojapo yvy jave rupi ha'eve e'ŷa rami ikuaria aguã.”

¹⁶ SENHOR ixondaro reta va'e aipoe'i: “Pejapyxaka eme profeta kuery penembyte rupi ayvu omombe'u va'e re, mba'eta ha'e kuery penemonyẽ 'rã pearõ rive aguã anho. Mba'emo ha'e kuery ae oexa va'ekue 'rã omombe'u, SENHOR juru guigua e'ŷ.

¹⁷ Xere ija'e e'ŷ va'e kuery pe ha'e kuery aipoe'i riae 'rã: ‘SENHOR ijayvu mba'eve ndoikoi aguã re pendere’, he'i 'rã. Inhakã ratãa rupi ikuai va'e pe ‘Pendere ndoui 'rã mba'emo vai’, he'i.

¹⁸ Ha'e rami avi ha'e kuery va'e regua mava'e tu oĩ SENHOR reve onhembopy'a oinya py, mba'emo oexa ha'e ijayvu oendu aguã rami? Mava'e tu SENHOR ayvu re ojapyxaka porã vy oendu ete va'e?

¹⁹ Ne'exa, SENHOR-a gui ou oiny ára vai! Ipoxya ou ma, yvytu jere vaikue 'rã ou heko vai va'e kuery áry.

²⁰ Ha'e rami vy SENHOR opoxya gui ndojep'eai 'rã, opy'a re omoĩ va'ekue ojeupity 'rã oikopa peve. Opaa ára py ma pexa kuaa porã 'rã ha'e nunga.

²¹ Xee ma ha'e ramigua profeta kuery namboui teĩ ha'e kuery onhamba 'rã oje'oivy. Ha'e kuery pe mba'eve namombe'u ukai teĩ omombe'u 'rã oje'oivy ayvu.

²² Ha'e gui anhetẽ ri anhembopy'a ainya py ha'e kuery ikuai va'e rire ha'e kuery pe aendu uka ete 'rãgue xeayvu xevyguia kuery peguarã, ha'e ajapo 'rãgue ha'e kuery ha'eve'ŷa rami ikuaria gui ojope'a aguã rami, tape porã rupi ju oo aguã.

²³ “Xee nda'u Penderuete ha'e'i rupi anho ri apena? Mombyry rupi guive e'ŷ teve apena?” he'i SENHOR.

²⁴ “Amongue nda'u aexaa gui onhemi kuaa 'rã? Xee nda'u yva ha'e yvy ha'e javi rupi naĩ 'rã?” he'i SENHOR.

²⁵ “Mba'eta aendu ae ma profeta ramigua kuery ijayvu rã, xerery rupi apu omombe'u vy ‘Peteĩ mba'e aexa ra'u, aexa ra'u ae ri’ he'i ramo.

- ²⁶ Raka'e peve nda'u ha'e nunga oī 'rā profeta kuery apu mombe'ua py'a re, opy'a re ojekorea oī va'e anho omombe'u va'e?
- ²⁷ Mba'eta ha'e kuery oexa ra'uague peteī-teī oirū kuery pe omombe'u vy ojapoxe xevygua kuery xerery gui hexarai aguā rami, Baal ra'angaa pe tuu kuery ikuiaia rupi xerery gui hexaraiague rami avi.
- ²⁸ Ha'e gui profeta oexa ra'u va'ekue tomombe'u oexa ra'u rive va'ekue rami. Ha'e rā amongue hexe xeayvu oīa va'e ma tomombe'u porā xeayvu anhetē rupi. Mba'eta mba'e tu trigo 'ygue rive oguereko hi'a reve?" he'i SENHOR.
- ²⁹ "Mba'eta xeayvu ma tata oiko, ha'e martelo ita guaxu mbovoia ramigua", he'i SENHOR.
- ³⁰ "Ha'e nunga rupi xee ma ha'e va'e profeta kuery rovaigua aiko. Mba'eta peteī-teī oirū gui imonda 'rā xeayvu merami rive omombe'u va'e re", he'i SENHOR.
- ³¹ "Ne'exa, xee ma ha'e va'e profeta kuery rovaigua aiko", he'i SENHOR. "Mba'eta oayvu ae omombe'u vy 'Po rami SENHOR ijayvu', he'i rive 'rā.
- ³² Ne'exa, xee ma apu rupi oexa ra'u va'ekue mombe'ua kuery rovaigua aiko", he'i SENHOR. "Mba'eta ha'e nunga anhetē rupi e'ŷ omombe'u vy oguerojejavypa xevygua kuery, xee namboui, mba'eve namombe'u ukai guive teī. Peteīve henda py ha'e kuery ndojapoi 'rā heta va'e kuery ikuai porā aguā rami", he'i SENHOR.
- ³³ "Ha'e gui ma ndevy pe heta va'e kuery, e'ŷ vy profeta, sacerdote mba'e oporandu vy aipoe'i 'rā: 'Mba'exa tu SENHOR guigua ayvu ipoyi va'e?' he'i 'rā. Ha'e ramo rembovai 'rā: 'Peē ae ma ipoyi va'e pendekuai, ha'e rā xee ma roipe'apa 'rā", he'i SENHOR', 're 'rā.
- ³⁴ Mba'eta profeta, e'ŷ vy sacerdote mba'e, ha'e rami e'ŷ vy heta va'e kuery regua 'Pova'e ayvu ma SENHOR guigua ipoyi va'e', he'i va'e ma ambopaga 'rā, hoo pygua kuery ha'e javi reve.
- ³⁵ Ha'e rami teī peteī-teī peneirū kuery pe aipopeje: 'Mba'e he'i tu SENHOR? Mba'exa tu SENHOR ijayvu ipoyi va'e?' peje pekuapy.
- ³⁶ Ha'e rami teī nda'eveei ma 'SENHOR guigua ayvu ipoyi va'e' peje aguā, mba'eta peteī-teī re ijayvuague ae 'rā oī ipoyi va'e. Mba'eta peē kuery ma ha'eve'ŷa rami pemombe'u ayvu Nhanderuete oikove va'e, SENHOR ixondaro reta va'e, nhande kuery Ruete guigua.
- ³⁷ Profeta ikuai va'e pe aipopeje: 'Mba'e he'i tu ndevy SENHOR? Mba'exa tu SENHOR ayvu ipoyi va'e?' peje.
- ³⁸ Ha'e rami teī 'SENHOR ayvu ipoyi va'e', peje rire po rami SENHOR ijayvu peē kuery pe: 'Xee aipotaa rami e'ŷ "SENHOR ayvu ipoyi va'e" peje rire
- ³⁹ xee roipe'apa 'rā xerenonde gui, tetā penderekorā ha'e peneramoī kuery rekorā aeja va'ekue reve.
- ⁴⁰ Ha'e rami vy pende'áry ambou 'rā pevare ve'ŷ ha'e peximba aguā opa e'ŷ va'e, hexarai pyrā e'ŷ, he'i."

24

Mokoī varai figo'a oīa oexa ukaague

¹ Ha'e gui SENHOR oexa uka xevy mokoī varai figo'a oīa, SENHOR pegua templo rexei omoī mbyre. Ha'e nunga oiko Babilônia pygua huvixa Nabucodonosor ha'e pygua kuery escravo-rā ogueraa rire: Jeoaquim ra'y Judá pygua huvixa Jeconias, Judá regua yvatekueve, ha'e gui Jerusalém pygua mba'emo apoa ha'e ferro re omiba'eapo va'e kuery. Babilônia katy ogueraapa.

² Peteī varai py figo'a oī va'e ma iporāgueve, hi'a ypy'i va'ekue. Ha'e rā amboae py ma oī ivaikueve va'e, ja'u aguā nda'evei va'e.

³ Ha'e gui SENHOR oporandu xevy:

— Jeremias, mba'e tu ndee rexā?

Ambovai:

— Xee aexa va'e ma figo iporāgueve, ha'e gui ivaikueve ju, ja'u aguā nda'evei va'e — ha'e.

⁴ Ha'e gui xevy pe ou SENHOR ayvu. Ha'e vy aipoe'i:

⁵ “Po rami SENHOR Israel kuery Ruete ijayvu: Peva'e figo porāgueve aexa vy ajou porāa rami avi Judá regua kuery escravo-rã ogueraa pyre aexa vy ajapo porā 'rã ha'e kuery pe, kova'e yvy gui caldeu kuery yvy katy araa uka va'ekue pe.

⁶ Ha'e kuery re ama'ẽ 'rã amoingo porā reve, ha'e vy ajapo 'rã kova'e yvy re ojevypa aguã rami. Amombaraete 'rã, amomba 'rã nda'e. Anhoty 'rã, ha'e namondoroi 'rã guive.

⁷ Ha'e kuery pe ame'ẽ 'rã kuraxõ SENHOR aikoa rami xekuaa aguã regua. Ha'e kuery ikuai 'rã xevygua, ha'e rã xee ma aiko 'rã ha'e kuery Ruete, mba'eta opy'a ha'e javi py ojevy 'rã xere.

⁸ “Ha'e rã figo vaikueve ja'u aguã nda'evei va'e ndajou porāia rami ae amoingo axy 'rã Judá pygua huvixa Zedequias ha'e hembiguai yvatekueve, Jerusalém pygua kuery mboae, kova'e yvy re opyta va'ekue ha'e Egito yvy re ikuai va'e ha'e javi”, he'i SENHOR.

⁹ “Ha'e kuery xee amoingo 'rã yvy jave regua kuery mondyipaarã ija'e e'ý aguã. Oximba aguã, ijayvua rei ha'e ojojai reipy, ha'e ayvu vaipy 'rã ikuai yvy jave rupi araa ukapaa rupi rei.

¹⁰ Ha'e kuery re ambou 'rã kyxe, karuai ha'e mba'eaxy vaikue, ha'e kuery ha'e tuu kuery yvyrã ame'ẽ va'ekue gui okanhymba peve.”

25

Setenta ma'etýa peve escravo ikuai aguã re ijayvuague

¹ Ha'e gui Jeremias pe ou ayvu Judá pygua kuery regua. Josias ra'y Judá pygua huvixa Jeaquim irundy ma'etý re ma oĩ jave py ou. Ha'e va'e ma'etýa ma Babilônia pygua huvixa Nabucodonosor peteĩ ma'etý re oĩa va'e.

² Ha'e gui ha'e va'e ayvu profeta Jeremias omombe'u Judá ha'e Jerusalém pygua kuery ha'e javi pe. Ha'e vy aipoe'i:

³ “Vinte e três ma'etýa re ma SENHOR ayvu ou xevy, Amom ra'y Judá pygua huvixa Josias treze ma'etý re ma oĩ guive aý peve. Ha'e ramo ko'ẽ rai guive pendevy xee amombe'u aikovy, ha'e rã peẽ ma napendu potai.

⁴ Ha'e rami ae avi ko'ẽ rai'i guive pendevy SENHOR ombou guembiguai profeta kuery ha'e javi, ha'e rã peẽ kuery ma ndapejapyxakai, neĩ pendeapyxa ndaperova-rovai pendu aguã.

⁵ Ha'e kuery aipoe'i: ‘Peteĩ-teĩ pejeko rerova ke ha'eve'ýa rami pendekuaiaty ha'e pejapo vai reiaty gui, penderekao aguã yvy peneramoĩ kuery pe yma ma voi SENHOR ome'ẽ va'ekue py raka'e rã peve guarã.

⁶ Tapeo eme amboae ramigua tuuete re ixupe peiko ha'e pemboete aguã, xembopoxy eme guive pendepo py mba'emo pejapo va'e py. Ha'e ramo peteigueve voi xee ndajapo vai 'rã peẽ kuery re', he'i.

⁷ Ha'e rami xeayvu va'ekue teĩ peẽ kuery ndapejapyxakai. Ha'e rami 'rãgue py xembopoxy pekuapy pendepo py mba'emo vai pejapo py, pendejee ae pejapo vai”, he'i SENHOR.

⁸ Ha'e nunga rupi SENHOR ixondaro reta va'e aipoe'i: “Xeayvua re ndapejapyxakai ramo

⁹ ne'ixa, kuaray ijapu'a'ia katy gui ambou 'rã ha'e javi regua”, he'i SENHOR. “Ambou avi 'rã xerembiguai Babilônia pygua huvixa Nabucodonosor. Ha'e kuery ambou 'rã kova'e yvy re, apygua kuery ha'e ha'e'i rupi ikuai va'e kuery rovai. Ha'e vy amomba katu'i 'rã, amoĩ 'rã nhomondyipaarã ha'e ojojai rei pyrã, ivaipa aguã raka'e rã peve.

¹⁰ Ha'e kuery ikuiai gui xee amombytu'u 'rã ikuai porā reia ha'e ovy'aa, omenda va'erã ijayvua, ha'e mba'emo mongu'ia onhendua, tataendy ikuai va'e voi amboguepa 'rã.

¹¹ Ha'e ramo kova'e yvy ha'e javi opyta 'rã tekao e'ýa ha'e nhomondyipaarã. Ha'e gui ha'e kuery regua ma setenta ma'etý re ikuai 'rã huvixa Nabucodonosor rembiguai.

¹² Ha'e gui setenta ma'etýa ojeupitypa maa py ma ambopaga 'rã Babilônia pygua huvixa ojapo vaiague re, kova'e yvy regua kuery guive”, he'i SENHOR. “Caldeu kuery yvy re voi anhombopaga 'rã, raka'e rã peve ivaipa aguã.

¹³ Ha'e va'e yvy ha'e javi re ajapo 'rā xeayvuague ojeupitypa aguā rami, kova'e kuaxia re ipara oī va'e ha'e javi, yvy regua ha'e javi rovai Jeremias omombe'u va'ekue.

¹⁴ Mba'eta ha'e kuery voi ikuai 'rā heta regua ha'e huvixa guaxu kuery rembiguai. Ha'e rami vy ha'e kuery ambopaga 'rā ojapo vaiague ha'e opo py mba'emo ojapoague re."

Karo Nhanderuete poxya oīa re ijayvuague

¹⁵ Ha'e gui SENHOR Israel kuery Ruete aipoe'i xevy:

— Ejopy ke xepo gui kova'e karo vinho xepoxya regua oīa. Ha'e vy eme'ē yvy regua ha'e javi pe oy'u aguā, mamo rā romondoukaa rupi rei,

¹⁶ ha'e kuery oy'u vy oryryipa ha'e na'inhakā porāvei aguā, ha'e kuery mbyte rupi kyxe amondoukaa va'e gui — he'i.

¹⁷ Ha'e ramo SENHOR po gui xee karo ajopy vy ame'ē yvy regua ha'e javi pe oy'u aguā, mamo rā SENHOR xemondoukaa rupi rei:^{*}

¹⁸ Jerusalém, Judá regua tetā ikuai va'e, ha'e pygua huvixa kuery ha'e hembiguai yvatekueve pe, ha'e kuery yvy optya aguā ombovaipa pyre nhomondyipaarā, ojojai reipy ha'e ayvu vaipy optya aguā, aŷ jaexaa rami;

¹⁹ ha'e gui Egito pygua huvixa Faraó pe, hembiguai kuery, yvatekueve ha'e heta va'e kuery ha'e javi pe,

²⁰ joegua e'ŷ-e'ŷ kuery ha'e javi, Uz yvy regua huvixa kuery, filisteu kuery yvy re huvixa ikuai va'e, Asquelom tetā, Gaza, Ecrom ha'e Asdode pygua okuave va'e,

²¹ Edom, Moabe ha'e Amom ramymino kuery,

²² Tiro ha'e Sidom tetā pygua huvixa kuery, ha'e ye'ē rovai re huvixa ikuai va'e ha'e javi,

²³ Dedā, Tema, Buz ha'e o'a ojaya apu'a'i va'e kuery ha'e javi,

²⁴ Arábia pygua huvixa kuery, ha'e teko a e'ŷa re joegua e'ŷ-e'ŷ ikuai va'e ruvixa kuery,

²⁵ Zimri, Elão ha'e Média pygua huvixa kuery,

²⁶ kuaray ijapu'a'ia katy huvixa ikuai va'e, ha'e'i rupi ha'e mombyry rupi ikuai va'e, ha'e yvy jave rupi tetā ikuai va'e ha'e javi oy'u va'erā joakykue-kykue. Ha'e gui opa vygua ma Babilônia pygua huvixa ju 'rā oy'u.

²⁷ “Ha'e gui ha'e kuery pe aipo're 'rā: ‘Po rami SENHOR ixondaro reta va'e, Israel kuery Ruete ijayvu: Pey'u na peka'upa ha'e pembojevypa peve. Pe'a ha'e napepu'āvei 'rā, kyxe peẽ kuery mbyte rupi amondoukaa va'e gui’, ‘re.

²⁸ Ha'e gui karo ndepo gui oy'u aguā ha'e kuery ndojopyxei ramo aipo're 'rā ha'e kuery pe: ‘Po rami SENHOR ixondaro reta va'e ijayvu: Pey'u 'rāe.

²⁹ Mba'eta ne'exa, tetā xerery rupi oīa gui amboypy 'rā anhombopaga aguā. Ha'e rā peẽ peo jepe 'rā teve? Any, ndapeo jepei 'rā, mba'eta yvy jave re ikuai va'e áry ambou 'rā kyxe', he'i SENHOR ixondaro reta va'e.

³⁰ “Ha'e gui ndee remombe'u 'rā pova'e ayvu ha'e javi. Ha'e vy aipo're 'rā ha'e kuery pe: ‘SENHOR okororō 'rā yvate o'amba iky'a e'ŷ va'e gui, ijayvu nhendu 'rā. Guary rami okororō ratā 'rā ojeupega kuery rovai. Ijayvu atā 'rā yvy re ikuai va'e ha'e javi rovai, uva onhami okuapya py ojapukaia rami avi.

³¹ Ha'e ramo yvy apy peve 'rā oendua ojapukaia, mba'eta SENHOR oguereko yvy regua kuery pe ijayvu ete aguā, to'o ha'e javi omboayvu aguā oī. Ha'e vy heko vai va'e omboaxapa 'rā kyxe rewegua pe', he'i SENHOR.”

³² SENHOR ixondaro reta va'e aipoe'i: “Ne'ixa, mba'emo vai oaxa 'rā ovy yvy regua ikuai va'e-va'e ha'e javi rupi, yvy apy gui omboypy 'rā ouvy ára vai”, he'i.

³³ Ha'e va'e ára ojuka pyrā SENHOR omboaxa va'ekue retekue ma ha'e va'e yvy jave rupi 'rā ikuai. Ha'e rami teñ ndojae'oai 'rā, nomboatyai 'rā, nonhono porāai 'rā guive. Ha'e rami 'rāgue py mba'emo repoxi rami rive 'rā ikuai yvy áry.

* ^{25:17} Apy ma karo re ombojoja Nhanderuete ayvu Jeremias omombe'u va'erā yvy regua kuery pe, ha'e kuery ombopaga aguā regua (versículo 16).

³⁴ Joe pepena va'e kuery, penhendu atā na, peneraxēmba rei. Peē mymba ja kuery, penhembojere-jere pejupy tanhimbu rupi, mba'eta ojeupity ma pendejukaa ha'e penemoaīmbaa ára. Ha'e rami vy peē ae pe'apa 'rā yryru hepyve ovopa va'e rami.

³⁵ Ha'e ramo joe opena va'e kuery ndojouwei 'rā onhemi aguā, mymba ja kuery ndojoui 'rā oo jepe aguā.

³⁶ Ne'exa, onhendu joe opena va'e kuery ojapukaia, kora ja kuery ojae'o ratā rei nhendu rā! Mba'eta SENHOR ombovaipa ma nhuūndy ikuaiaty.

³⁷ Kora ikuai porāaty ivaipa 'rā, SENHOR poxya hendy va'e gui.

³⁸ Mba'eta o'amba gui oẽ 'rā ouvy guary ra'y rami. Ha'e rami vy ojerovia rei va'e kyxe py ombovaipa 'rā ha'e kuery yvy, opoxya hendy va'e py guive.

26

Jeremias ojukaxe okuapyague

¹ Ha'e gui Josias ra'y Jeaquim Judá pygua huvixa oĩ ypy'i jave py ou pova'e ayvu SENHOR gui.

² Ha'e vy SENHOR aipoe'i: "Tereo xeroka py. Ha'e vy Judá regua tetā pygua kuery xevyguo oo py omboete vy ou ramo ha'e kuery pe emombe'u xeayvua ha'e javi. Neĩ peteīve ayvu emombe'u e'ŷ eme.

³ Ha'e ramo ha'e kuery xeayvu oendu vy ojeko rerova 'rā ha'eve'ŷa rami ikuiaigui. Ha'e ramo xee voi amboae rami 'rā areko, ha'e kuery ikuiai re ambopaga aguā re xeayvuague rami ve'ŷ.

⁴ Ha'e nunga rupi aipo're ha'e kuery pe: 'Po rami SENHOR ijayvu: Xeayvu re ndapejapyx-akai ri ramo xeguigua lei penerenonde amoĩ va'ekue rupi pendekuai aguā,

⁵ ha'e xerembiguai profeta kuery ko'ẽ rai guive pendea py ambou va'e ayvu pendu aguā, aŷ peve xeayvu napenduxeiague rami ae ju,

⁶ ha'e ramo ma kova'e oo ambovaipa 'rā Siló tetā re ambovaipaague rami, ha'e vy kova'e tetā ajapo 'rā ayvu vaipy opyta aguā rami, yvy regua kuery ha'e javi pe', 're 'rā.'*

⁷ Ha'e ramo SENHOR pegua oo py Jeremias ijayvu ramo sacerdote kuery, profeta ha'e heta va'e kuery ha'e javi oendu okuapy.

⁸ Heta va'e kuery pe SENHOR ijayvuague ha'e javi Jeremias omombe'upa ma ramo sacerdote kuery, profeta ha'e heta va'e kuery pavē ojopy okuapy. Ha'e vy aipoe'i Jeremias pe:

— Rojuka 'rā.

⁹ Mba'eta SENHOR rery rupi ndeayvu vy aipo're: "Kova'e oo ombovaipa 'rā Siló tetā rami, ha'e kova'e tetā ivaipa 'rā. Ha'e rā noñavei 'rā ha'e py", 're rire — he'i okuapy. Ha'e ramo vy heta va'e kuery ha'e javi ono'õ Jeremias rovai, SENHOR pegua oo pyve.

¹⁰ Ha'e gui Judá regua yvatekueve ma pova'e ayvu oendu vy huvixa ro gui jogueru SENHOR pegua oo py. Ha'e vy oguapy okuapy SENHOR pegua oo rokẽ ipyau va'e py.

¹¹ Ha'e ramo sacerdote ha'e profeta kuery jogueroayvu yvatekueve ha'e heta va'e kuery ha'e javi reve. Ha'e vy aipoe'i:

— Kova'e ava ma jajuka va'erā kova'e tetā re ijayvu rire, peē pendeapyxa py ae pendua rami — he'i okuapy.

¹² Ha'e ramo Jeremias ju ijayvu yvatekueve ha'e heta va'e kuery ha'e javi pe. Ha'e vy aipoe'i:

— SENHOR ae ma xembou kova'e oo ha'e kova'e tetā re ayvu pendu va'ekue ha'e javi amombe'u aguā.

¹³ Ha'e gui aŷ ma pejeko rerova ke, ha'e pendu SENHOR Penderuete ijayvua. Ha'e ramo SENHOR ndojapovei 'rā peē kuery rovai ijayvuague.

¹⁴ Ha'e rā xee ma pendepo py aĩ. Xererekoo peē ae peipotaa rami.

* 26:6 Siló tetā py SENHOR ojapo va'ekue ma tetā ombovaipa, ha'e kuery tuuete mboae ramigua re ikuai ramo (1 Samuel 4.1-11).

¹⁵ Ha'e rami avi peikuaa pota porã pova'e re. Xejuka ri vy pendejee ae 'rã pemoï heko porã va'e ruguy pemoëague re pepaga aguã, kova'e tetã ha'e apygua kuery ha'e javi re guive. Mba'eta anhetẽ ete SENHOR xembou peẽ kuerya py, pova'e ayvu amombe'u rã pendu aguã — he'i.

¹⁶ Ha'e ramo yvatekueve aipoe'i okuapy sacerdote ha'e profeta kuery pe:

— Kova'e ava ma pejuka aguã nda'evei, SENHOR Nhanderuete rery rupi nhandevy ijayvu ramo — he'i.

¹⁷ Ha'e gui opu'ã avi ha'e va'e yvy re nhomongeta va'ety kuery regua. Ha'e vy heta va'e kuery ijaty okuapy va'e pe ijayvu vy aipoe'i:

¹⁸ — Judá pygua huvixa Ezequias oĩ jave Moresete pygua Miquéias ayvu omombe'u oikovy vy ha'e voi ijayvu raka'e Judá pygua kuery ha'e javi pe. Ha'e vy aipoe'i: "Po rami SENHOR ixondaro reta va'e ijayvu: Sião tetã oikaraõa 'rã mba'etyrã rami, Jerusalém optya 'rã mba'emo ra'ykue atyrrã, yvy'ã templo oĩa ma jaipa rive 'rã guive", he'i va'ekue.

¹⁹ Ha'e rami Miquéias ijayvu tei Judá pygua huvixa Ezequias ojuka teve Judá pygua kuery reve? Ha'e rami 'rãgue py SENHOR renonde huvixa ojererokyjea rupi oiko raka'e, ha'e rami vy SENHOR pe ojapukai omboaxy aguã re. Ha'e ramo SENHOR ndojapovei ha'e kuery rovai ijayvuague. Ha'e nunga rupi aã mba'e re tu jaru 'rã ha'e rami ete nda'evei va'e nhanenhe'ẽ mombaarã? — he'i.

Profeta Urias ojukaa ague

²⁰ Oiko avi raka'e amboae ava Quiriate-Jearim pygua, Semaías ra'y Urias. Ha'e va'e voi SENHOR rery rupi ayvu omombe'u va'ety. Ha'e rami vy ha'e va'e tetã ha'e yvy re ijayvu avi, Jeremias ijayvuague ha'e javi rami ae.

²¹ Ha'e ramo ha'e ijayvu ramo huvixa Jeoaquim ha'e ixupegua ipy'a guaxukueve ha'e yvatekueve ha'e javi oendu vy ojukaxe. Ha'e rami tei Urias ha'e nunga oendu vy okyje vy ojava ový Egito katy.

²² Ha'e gui Egito katy huvixa Jeoaquim omondouka Acbor ra'y Elnatã avakue mboae reve.

²³ Ha'e kuery ma Egito yvy gui Urias oguenoẽ vy huvixa Jeoaquim-a py ju ogueru. Ha'e ramo huvixa ojuka uka kyxe py, he'õgue ogueraa uka guive iporiaukue'i pegua yvyra rupa py.

²⁴ Ha'e rã Jeremias ma Safã ra'y Aicão va'e oepy vy nomboaxa ukai raka'e heta va'e kuery ojukaxe va'e po py.

27

Canga mba'emo kuaa ukaarã omoi aguã re ijayvuague

¹ Josias ra'y Judá pygua huvixa Zedequias oĩ ypy'i jave pova'e ayvu SENHOR ombou Jeremias pe.

² "Po rami SENHOR ijayvu xevy: Ejapo peteĩ canga ixã va'e, ha'e emoï ndeaju'y rupi.

³ Ha'e gui emondouka ayvu mombe'uarã Edom ha'e Moabe pygua huvixaa py, Amom ramymino kuery ruvixaa py, Tiro ha'e Sidom tetã pygua huvixaa py guive. Ha'e guigua kuery Jerusalém py Judá pygua huvixa Zedequias pe ayvu reruare ae ha'eve ndeayvu reraarã.

⁴ Ha'e kuery pe aipo're uka 'rã huvixa kuery pe: 'Po rami SENHOR ixondaro reta va'e Israel kuery Ruete ijayvu. Po rami pendeayvu 'rã penderuvixa kuery pe:

⁵ Xee ae kova'e yvy apoare, ha'e gui avakue ha'e mymba yvy re ikuai va'e amoingo va'ekue, xepo'aka etea rupi, ha'e xepo aupi reve. Ha'e rami vy amboaxa 'rã arov'y aa va'e pe rei.

⁶ Aã ma yvy ha'e javi amboaxa 'rã xerembiguai Babilônia pygua huvixa Nabucodonosor po py. Ixupe amboaxa avi mymba nhuñdy rupi ikuai va'e, ixupegua ikuai aguã.

⁷ Ixupe ma yvy regua ha'e javi 'rã ikuai, ta'y ha'e hamymino pe guive, ovaẽ peve ijyvy ju amboaxa aguã. Ha'e va'e jave py heta regua ha'e huvixa kuery ipo'aka ete va'e ombo'a 'rã escravo-rã, he'i.

⁸ “ ‘Ha'e gui xapy'a rei amongue regua, e'ŷ vy amongue tetā pygua nda'ikuaixei 'rã Babilônia pygua huvixa Nabucodonosor pe, ha'e oaju'y rupi nomoĩ ukaxeい 'rã ixuguigua canga. Ha'e ramo ha'e va'e regua ambopaga 'rã kyxe py, karuai ha'e mba'eaxy vaikue py, ipo py amomba uka peve’, he'i SENHOR.

⁹ ‘Ha'e nunga rupi pendea py profeta, imba'ekuaa va'e, oexa ra'u kuaa va'e, oexa'ã va'ety ha'e imba'evyky va'e kuery ou vy ijayvu teĩ pejapyxaka eme, pendevy “Ndapeikoi 'rã Babilônia pygua huvixa rembiguai” he'i ramo.

¹⁰ Mba'eta pendevy ha'e kuery omombe'u 'rã apu rive pendeyvy gui mombyry peo aguã. Ha'e ramo xee rogueraa ukapa 'rã pemanomba aguã.

¹¹ Ha'e rã yvy regua oaju'y rupi Babilônia pygua huvixa guigua canga omoĩ uka, ha'e ixupe ikuai va'e ma xee aeja 'rã ijyvy re ae ikuai aguã. Ha'e py ae 'rã oma'etõ ha'e hekoia 'rã', he'i SENHOR.”

¹² Ha'e ramo ha'e va'e ayvu ha'e javi amombe'u Judá pygua huvixa Zedequias pe. Ha'e vy aipoa'e: “Pendeaju'y rupi ke pemoĩ uka Babilônia pygua huvixa guigua canga, ixupe pendekuai, guembiguai kuery pe guive. Ha'e rami vy peikove 'rã.

¹³ Mba'e re tu remano ta ndevyguia kuery reve, kyxe py, karuai ha'e mba'eaxy vaikue py? Mba'eta ha'e rami aguã SENHOR ijayvu yvy regua Babilônia pygua huvixa pe nda'ikuaixei va'e re.

¹⁴ Pejapyxaka eme profeta kuery ayvu re, pendevy ‘Ndapeikoi 'rã Babilônia pygua huvixa rembiguai’, he'i ramo. Mba'eta pendevy omombe'u va'e ma apu meme.

¹⁵ Mba'eta SENHOR aipoe'i: ‘Ha'e kuery ma xee namboui. Xerery rupi teĩ omombe'u merami rive 'rã ayvu. Mba'eta xee roipe'apa 'rã pemanomba aguã katy, pendevy ayvu omombe'u merami rive va'e reve’, he'i.”

¹⁶ Ha'e ramigua amombe'u sacerdote kuery ha'e heta va'e kuery ha'e javi pe. Ha'e vy aipoa'e: “Po rami SENHOR ijayvu: Pendu pota eme profeta kuery ayvu re, mba'eta pendevy omombe'u vy aipoe'i 'rã: ‘Ne'exa, mba'emo ryru SENHOR pegua oo pyguare ma are e'ŷ re oguerojevypaa 'rã Babilônia gui’, he'i 'rã. Ha'e ramigua ha'e kuery pendevy omombe'u va'e ma apu.

¹⁷ Pejapyxaka eme ha'e kuery ayvu re. Pendekuai tema Babilônia pygua huvixa pe. Ha'e rami vy pekuave 'rã. Mba'e re tu kova'e tetā okanhymba ta?

¹⁸ Xapy'a rei ha'e kuery profeta ete ri ikuai rã, ha'e kuery re anhetẽ ri SENHOR ayvu oĩ ramo tojerure ha'vy SENHOR ixondaro reta va'e pe, Jerusalém py SENHOR pegua oo py ha'e huvixa Judá pygua ropy tembiporu ndogueraapai va'ekue ogueraa uka e'ŷ aguã Babilônia katy.

¹⁹ Ha'e rami avi po rami SENHOR ixondaro reta va'e ijayvu oo yta hi'aĩ va'e re, yy mbotya, hy'a yta ha'e tembiporu mboae tetā py opyta va'ekue,

²⁰ Babilônia pygua huvixa Nabucodonosor Babilônia katy ndogueraapai va'ekue Jeoaquim ra'y Judá pygua huvixa Jeconias Jerusalém gui ogueraa jave, Judá ha'e Jerusalém pygua yvatekue ha'e javi reve,

²¹ tá, po rami SENHOR ixondaro reta va'e Israel kuery Ruete ijayvu Jerusalém py SENHOR pegua oo py ha'e Judá pygua huvixa ropy mba'emo opyta va'ekue re:

²² ‘Ha'e nunga ma Babilônia katy ogueraapaa va'erã meme. Ha'e py ma opyta 'rã ha'e kuery re aikuua pota aguã ára ovaẽ e'ŷa ja. Ha'e gui mae ma aru rukapa 'rã. Ha'e ramo kova'e tekaoa py ae ju 'rã oguerupaa’, he'i SENHOR.”

² — Po rami SENHOR ixondaro reta va'e, Israel kuery Ruete ijayvu vy aipoe'i: “Amopẽ ma Babilônia pygua huvixa guigua canga.

³ Ha'e rami vy mokoĩ ma'etŷa py apy ju aru rukapa 'rã tembiporu SENHOR pegua oo py oĩ va'ekue ha'e javi, apy gui Babilônia pygua huvixa Nabucodonosor oipe'a vy Babilônia katy ogueraa va'ekue.

⁴ Aru avi 'rã Jeoaquim ra'y Judá pygua huvixa Jeconias, ha'e Judá regua kuery Babilônia tetã katy escravo-rã ogueraapa pyre. Babilônia pygua huvixa guigua canga amopẽ ma vy arupa 'rã apy”, he'i SENHOR — he'i profeta ramigua rive.

⁵ Ha'e ramo profeta Jeremias ombovai profeta Hananias, sacerdote kuery ha'e SENHOR pegua opy heta va'e kuery oendua py.

⁶ Ha'e vy profeta Jeremias aipoe'i:

— Ha'eve va'e! Tove ha'e rami ae ri SENHOR tojapo. Tove SENHOR tojapopa ndeayvuague remombe'u va'ekue rupi, apy toguerupa ju Babilônia gui tembiporu SENHOR pegua oo pyguare, ha'e escravo-rã ogueraapa pyre ha'e javi.

⁷ Ha'e rami avi endu pova'e ayvu ndevy ha'e heta va'e kuery ha'e javi pe amombe'u va'e.

⁸ Profeta kuery yma ma voi xee neĩ ndee reiko e'ŷ mbove ikuai va'ekue ma omombe'u joe opu'ãa va'erã, mba'emo vai ha'e mba'eaxy vaikue oiko 'rãa heta yvy regua ha'e tetã tuvixa va'e re.

⁹ Ha'e gui peteĩ profeta mba'eve ndoikoi 'rãa rami omombe'u teĩ ijayvuague rami ete oiko ramo mae jaikuua 'rã anhetê SENHOR remimbou oikoa — he'i.

¹⁰ Ha'e ramo profeta Hananias ma canga profeta Jeremias aju'y rupi oĩ va'e gui omboi vy omopẽmba.

¹¹ Ha'e rami vy heta va'e kuery oendua py ijayvu:

— Po rami SENHOR ijayvu: “Guĩ rami mokoĩ ma'etŷa py amopẽ 'rã Babilônia pygua huvixa Nabucodonosor guigua canga yvy regua ha'e javi aju'y rupi oĩ va'e”, he'i. Ha'e rami rã profeta Jeremias ojepe'a ovv tape rupi.

¹² Ha'e gui ma profeta Hananias canga profeta Jeremias aju'y gui omopẽ rire Jeremias pe SENHOR ombou ju oayvu. Ha'e vy aipoe'i:

¹³ — Tereo, Hananias pe ndeayvu ju. Ha'e vy aipo're: “Canga yvyra guigua remopẽ teĩ hekoria ferro guigua ju 'rã ajapo.

¹⁴ Mba'eta po rami SENHOR ixondaro reta va'e Israel kuery Ruete ijayvu: Ha'e va'e regua kuery ha'e javi aju'y rupi amoĩ 'rã canga ferro guigua, Babilônia pygua huvixa Nabucodonosor rembiguai ikuai aguã. Ha'e ramo ikuai 'rãe ixupe. Ixupe guarã amboaxa avi mymba nhuündy rupi ikuai va'e”, he'i.

¹⁵ Ha'e gui profeta Jeremias aipoe'i profeta Hananias pe:

— Hananias, endu ke aŷ. SENHOR nanemboui va'eri ndee rejapo heta va'e kuery apu re rive ojerovia aguã ramí.

¹⁶ Ha'e nunga rupi po rami SENHOR ijayvu: “Ne'exa, roipe'a 'rã yvy áry reikoa gui. Kova'e ma'etŷa reve 'rã remano, mba'eta remombe'u SENHOR pe e'ŷ nhandekuai aguã regua”, he'i.

¹⁷ Ha'e gui ha'e va'e ma'etŷa reve profeta Hananias omano, sete jaxya py.

29

Babilônia katy ogueraa pyre kuery pe Jeremias kuaxia omboparaague

¹ Pova'e ayvu profeta Jeremias ogueraa uka kuaxia para py. Jerusalém gui ogueraa uka nhomongeta va'ety kuery mboae escravo-rã ogueraa pyre pe, sacerdote ha'e profeta kuery, ha'e heta va'e kuery Jerusalém gui Nabucodonosor Babilônia katy ogueraa va'ekue ha'e javi pe guive.

² Jerusalém gui huvixa Jeconias oo rire, ixy ha'e jopya kuery reve, Judá regua yvatekueve, ha'e Jerusalém pygua oo apoa ha'e ferro re ombo'eapo va'e kuery reve ogueraa avi rire ogueraa uka kuaxia.

³ Safā ra'y Elasa ha'e Hilquias ra'y Gemarias pe ae ogueraa uka kuaxia para. Ha'e ramo ha'e kuery Judá pygua huvixa Zedequias omondouka Babilônia katy, Babilônia pygua huvixa Nabucodonosor oexa va'erā. Kuaxia re oī va'e ma po rami:

⁴ “Po rami SENHOR ixondaro reta va'e Israel kuery ruete ijayvu Jerusalém tetā gui Babilônia katy escravo-rā araa uka va'ekue ha'e javi pe.

⁵ Pejapo ke penderorā, penderekoa guive Babilônia py pendekuaia py ae. Penhotō yvyra hi'a va'erā, ha'e pe'u hi'a.

⁶ Pejou ke pendera'yxyrā, pendera'y ha'e penderajy aguā. Pejou avi pendera'y kuery ra'yxyrā, penderajy kuery guive pemomenda 'rā imemby ha'e ipi'a aguā. Penderetave peovy ha'e py, pepave peovy eme.

⁷ Penhea'ā ke tetā rogueraa ukaague oī porā aguā re, SENHOR pe pejerure guive tetā re, mba'eta ha'e va'e tetā oī porā ramo peē voi pendekuai porā 'rā.

⁸ Mba'eta po rami SENHOR ixondaro reta va'e Israel kuery Ruete ijayvu: Penhembotavy uka eme profeta ha'e imba'ekuaa va'e kuery penembyte ikuai va'e pe. Pejapyxaka eme oexa ra'u kuaa va'e kuery ayvu re, mba'eta penduxea rami rive oexa ra'u ramo.

⁹ Ha'e kuery ma xerery rupi omombe'u merami rive 'rā. Xee ma namboui", he'i SENHOR.

¹⁰ Po rami ijayvu SENHOR: “Ha'e gui Babilônia tetā ára setenta ma'etŷa ojeupitypa ma ramo aikuua pota ju 'rā peē kuery re. Ha'e rami vy amoingo 'rā rogueroayvu porāague, kova'e tekaoa py roguerupa ju aguā.

¹¹ Xee anho'i aikuuaa penerenonderā re anhembopy'aa", he'i SENHOR. “Anhembopy'a pendekuai porā aguā re, pendekuai axy aguā nda'ei, opaa py pearōa rami romoingo porā aguā.

¹² Ha'e va'e jave pejapukai 'rā xevy, xevy ju 'rā pejerure. Ha'e ramo xee aendu 'rā pejerurea.

¹³ Peē kuery xereka ju 'rā, xejou ete 'rā guive, pendep'y ha'e javi py xereka vy.

¹⁴ Peē kuery xejou 'rāe. Ha'e ramo ambopyau 'rā pendekuaia. Romboatypa ju 'rā ha'e javi regua pendekuaia rogueraa ukaague gui, roguerupa ju 'rā escravo-rā rogueraa ukapaague gui", he'i SENHOR.

¹⁵ “Ha'e rami tei peē kuery ma aipopeje: ‘Babilônia tetā py ae SENHOR omoingo profeta kuery nhandevy', peje.”

¹⁶ Ha'e rami avi po rami SENHOR ijayvu tenda huvixa Davi openaaty py oguapy va'e, ha'e Jerusalém tetā pygua kuery ha'e javi re, penderyke'y kuery escravo-rā pendereve ndogueraai va'ekue re.

¹⁷ Po rami SENHOR ixondaro reta va'e ijayvu: “Ne'ixa, ha'e kuery rovai ambou 'rā kyxe, karuai ha'e mba'eaxy vaikue. Ha'e kuery re ajapo 'rā figo'a vaikueve ja'u aguā nda'evei va'e re rami.

¹⁸ Mba'eta ha'e kuery rakykue xee amondouka 'rā kyxe revegua, karuai ha'e mba'eaxy vaikue. Ajapo 'rā yvy regua tetā ikuai va'e mongyyearā ikuai aguā rami, amoī 'rā nhomondyipaarā ha'e oojai rei pyrā. Ha'e ramo yvy regua ha'e javi mbyte ikuai 'rā oxīmba reia rupi mamo rā amondoukaague py,

¹⁹ xeayvu re ha'e kuery ndojapyxakai rire", he'i SENHOR. “Ha'e va'e ayvu mombe'uarā ma ha'e kuerya py ambou xerembiguai profeta kuery ko'ē rai guive. Ha'e rā peē kuery napendui", he'i SENHOR.

²⁰ Ha'e nunga rupi pendu na SENHOR ayvu, Jerusalém gui Babilônia katy escravo-rā pendereraa va'ekue ha'e javi.

²¹ SENHOR ixondaro reta va'e, Israel kuery Ruete ma po rami ijayvu hery rupi merami rive ayvu mombe'ua kuery Colaías ra'y Acabe ha'e Maaséias ra'y Zedequias rekorā re: “Ne'ixa, ha'e kuery ma xee amboaxa 'rā Babilônia pygua huvixa Nabucodonosor po py. Ha'e ramo ojuka 'rā peē kuery pexaa py.

²² Ha'e rami rire Judá gui escravo-rā ogueraa pyre kuery ijayvu vai vy aipoe'i 'rā: ‘Tove SENHOR tandeapo Acabe ha'e Zedequias re ojapoague rami, mba'eta Babilônia pygua huvixa oapy tata py

²³ Israel kuery mbyte ha'eve'ŷa rami ojapoague re', he'i 'rā. Mba'eta ha'e kuery itavy rei oirū ra'yxy kuery reve, ha'e xerery rupi merami rive omombe'u ayvu xee amombe'u uka va'ekue'ŷ. Xee aikuua ha'e aexa ae ha'e nunga", he'i SENHOR.

²⁴ "Ha'e gui ndeayvu ke Neelão pygua Semaías pe. Ha'e vy aipo're:

²⁵ 'Po rami SENHOR ixondaro reta va'e, Israel kuery Ruete ijayvu: Ndee ma nderery rupi rive kuaxia para remondouka Jerusalém pygua kuery pe, Maaseías ra'y sacerdote Sofonias ha'e sacerdote kuery ha'e javi pe guive. Ha'e vy aipo're va'ekue:

²⁶ "Sacerdote-rā SENHOR nemoï raka'e sacerdote Joiada rekoria, SENHOR pegua oo re repena aguã. Ha'e ramo ava inhakā porā e'ŷ va'e profeta onhemoingo va'e rei rembo'a aguã, ha'e yvyra re rejokua uka aguã.

²⁷ Ha'e gui aŷ, mba'e re tu nandeayvu etei profeta Jeremias Anatote pygua ayvu omombe'u va'ety pe?

²⁸ Mba'eta ha'e va'e ma Babilônia katy omondouka po rami ayvu mombe'uarā kuery: 'Are teri 'rā escravo pendekuaia. Ha'e nunga rupi pejapo penderorā, penderekoa ha'e py ae. Penhotŷ yvyra hi'a va'erā, ha'e pe'u hi'a', he'i va'ekue kuaxia para re." "

²⁹ Kuaxia para ha'e va'e ayvu oĩa ma sacerdote Sofonias ogueroayvu profeta Jeremias oendua py.

³⁰ Ha'e ramo Jeremias pe SENHOR ombou oayvu. Ha'e vy aipoe'i:

³¹ "Aipo'ere uka ke escravo-rā ogueraa pyre ha'e javi pe: 'Po rami SENHOR ijayvu Neelão pygua Semaías re: "Semaías ma xee namboui va'eri pendevy ayvu omombe'u apu re rive perovia aguã."

³² Ha'e ramo po rami SENHOR ijayvu: "Ne'exa, ambopaga 'rā Neelão pygua Semaías, hamymino kuery reve. Ha'e ramo hamymino ndoikoi 'rā kova'e kuery mbyte heko a va'e, ndoexai 'rā guive mba'emo porā xevygua kuery pe ajapo rā, xerovai ijayvu rire", he'i SENHOR."

30

Nhanderuete ojeupegua kuery ogueru ju aguã re ijayvuague

¹ Jeremias pe SENHOR oayvu ombou vy aipoe'i:

² "Po rami SENHOR Israel kuery Ruete ijayvu: Embopara ke peteĩ kuaxia re ayvu xee aipo'a ea ha'e javi.

³ Mba'eta ou ma oiny ára xevygua Israel ha'e Judá kuery ikuia ambopyau aguã. Ha'e vy ajapo 'rā tamoi kuery yvyrā ame'ẽ va'ekue py ju ojevypa aguã rami, ha'e py ae heko a aguã", he'i SENHOR.

⁴ Ha'e gui Israel ha'e Judá kuery reko re ju SENHOR ijayvu.

⁵ Ha'e vy aipoe'i: "Roendu oryryipa ha'e okyjea nhendu, ikuai porāa e'ŷ.

⁶ Ha'e gui peporandu, pexa pota na pova'e re: Avakue nda'u oendu 'rā ri kyrī va'e raxy? Ha'e ramigua ndoikoi ramo mba'e re tu ha'vy aexa peteĩ-teĩ ava guye rupi opo omoi rā, kyrī va'e oikuavā'i ta va'e rami? Mba'e re tu hova xiiguepa rei okuapy?

⁷ Mba'eta ha'e va'e ára nda'evei ete 'rā, amboae ndoikoi 'rā guive ha'e ramigua! Jacó ramymino kuery ojexavai aguã ára ae 'rā. Ha'e rami teĩ ha'e kuery oo jepe 'rā.

⁸ Ha'e va'e ára ma xee amopẽmba 'rā pendeaju'y rupi canga oĩ va'e, amondopa 'rā guive ixā pendejokuaa", he'i SENHOR ixondaro reta va'e. "Ha'e rami rire yvy mboae regua ndogueraavei 'rā xevygua kuery escravo-rā.

⁹ Mba'eta SENHOR nguete pe ae 'rā xevygua kuery ikuai, Davi ha'e kuery ruvixarā amoí va'erā pe guive.

¹⁰ "Ha'e nunga rupi xerembiguai Jacó regua, ekyje eme. Israel regua, enhemondyi eme", he'i SENHOR. "Mba'eta rogueraa jepe 'rā yvy mombyrya escravo-rā ndereraa ague gui, neramymino kuery guive. Ha'e ramo Jacó kuery ojevypa ju vy ikuai rive'i 'rā avave rei nomoangekoai rā. Ndoikoi 'rā imongyjearā.

¹¹ Mba'eta xee aiko 'rā ndereve rogueraa jepe aguã", he'i SENHOR. "Ha'e rami aguã rami ae amomba 'rā yvy regua ha'e kuery rupi romoañague va'e. Ha'e rā

pende ma noromomba rivei 'rā. Ha'e rami avi rombopaga 'rā ha'evea rami, opa marā pendekuaiague re norombopaga e'ŷi 'rā."

¹² Mba'eta SENHOR aipoe'i: "Reiko axya ma omonguera pyrā e'ŷ, ndeai ma haxy ete va'e.

¹³ Avave ndoikoi nderepyarā. Ndeai pe ma jipoī moā, neī imbojaarā.

¹⁴ Neirū kuery hexaraipa ma ndegui, noroporanduvei ma ndere. Nderekō vai ha'e rejeady ete rire rojapo vai nderovaigua rami, ipy'a ratā va'e nhombopagaa rami.

¹⁵ Mba'e re tu neraxē ri reikovy ndeai gui? Haxy rendu va'e ma omonguera pyrā e'ŷ. Nderekō vai ha'e rejeady ete ramo ae roguereko ha'e rami.

¹⁶ Ha'e rā nemombaare kuery voi omombaa 'rā, nderovaigua kuery peteī-teī oguerapaa 'rā escravo-rā. Nemba'e rei-rei pe'aare kuery mba'e rei-rei ju oipe'apaa 'rā, ndegui ha'e kuery oipe'apa rive rire amboaxa 'rā oipe'apa rive va'erā po py.

¹⁷ Ha'e gui xee ae romoexaī ju 'rā", he'i SENHOR. "Xee ae romonguera ju 'rā ndeai, ndevy pe 'Oeja pyre' ha'e 'Siāo tetā re noporanduvei ma 'rā', he'i okuapy rire teī."

¹⁸ SENHOR aipoe'i: "Ne'exa, amoī porā ju 'rā Jacó kuery rekoa, amboaxy 'rā ikuiaia rupi. Guetā ma ojapo ju 'rā mba'emo ra'ykue aty áry, ha'e huvixa oī ju 'rā ngoo py, jypy guare rami ae.

¹⁹ Ha'e kuery oporaei 'rā jogueruvy oguerovy'a vy, ov'y'a ete vy oguerory 'rā okuapy. Amboetave 'rā, ha'e nomombaavei 'rā. Amboyvateve 'rā, ha'e nomo'yvy'iavei 'rā.

²⁰ Ta'y kuery ha'e tajy kuery ikuai porā 'rā jypy guare rami, ha'e kuery rekoa voi amoī atā 'rā xerenonde. Ha'e rā imoingo axyare kuery ma ambopagapa 'rā.

²¹ Huvixarā ma ha'e kuery regua ae 'rā oī, ha'e kuery mbyte gui oiko 'rā opena va'erā. Ha'e va'e amonhemboja ramo onhemboja 'rā xere. Mba'eta mava'e 'rā tu oakā gui ae ipy'a guaxu xere onhemboja aguā?" he'i SENHOR.

²² "Ha'e ramo peē kuery ma xevygua 'rā pendekuai, ha'e rā xee ma aiko 'rā Penderuete", he'i.

²³ Ne'exa, ou oiny SENHOR-a guigua yvytu atā! Ipoxya ojekuaa ma ouvy, yvytu jere rami heko vai va'e kuery akā áry ou aguā.

²⁴ SENHOR poxya raku ma ha'ekue py ndojevyi 'rā guive, opy'a re oipotaa oī va'e ojeupitypa e'ŷa ja. Ha'e nunga ma opaa ára py peikuuaa porā 'rā.

31

Iporiauague gui ombovy'a ju aguā re ijayvuague

¹ SENHOR aipoe'i: "Ha'e va'e jave py aiko 'rā Israel regua ha'e javi Ruete, ha'e rā ha'e kuery ma ikuai 'rā xevygua."

² Po rami SENHOR ijayvu: "Xevygua kuery kyxe gui oo jepe va'ekue amboaxy ju 'rā tekao e'ŷa rupi ikuiaia py. Xee anhemboja vy amokane'ōguia 'rā Israel kuery."

³ Mombyry gui SENHOR xevy ojexa uka vy aipoe'i: "Mborayvu opa e'ŷ va'e rupi roayvu. Ha'e rami vy roayvua rupi rogueru.

⁴ Peē kunhataīgue Israel regua, romopu'ā ramo pepu'ā ju 'rā pe'amy! Teīgue ju pandeiro reve peo 'rā ojeroky va'e kuery reve peporaeia rupi.

⁵ Samaria yvyty re penhotŷ nho 'rā uva. Inhotŷare kuery hi'a ho'u vy oguerovy'a 'rā okuapy.

⁶ Mba'eta oiko 'rā ára Efraim regua yvyty rupi tetā re opena va'e kuery 'Pepu'ā ke, jaje'oi Siāo tetā py SENHOR Nhanderuete oīa katy', he'i okuapy aguā."

⁷ Mba'eta po rami SENHOR ijayyu: "Peroporaei ke Jacó kuery pevy'a reve, yvy regua kuery akā ikuai ramo perovy'a. Pejapukai, peporaei. Ha'e vy aipopeje: 'SENHOR, eraa jepe avi ke ndevygua Israel kuery rembyrekue', peje.

⁸ Mba'eta ne'exa, aru 'rā yvy kuaray ijapu'a'ia katy itui va'e gui, amboatypa 'rā yvy jave rupi gui. Ha'e ramo ha'e kuery oupa 'rā: ára revegua e'ŷ, oguata vaikue'i va'e, imembryru va'e ha'e oikuavā va'erā teī. Ojevy pavē 'rā kyvō katy.

⁹ Ojae'o reve 'rā ou, xevy pe ojapukai 'rā jogueruvy arua rupi. Areko 'rā heruvy yakā'i oxyry porā va'e yvýry rupi, ha'e tape hi'yvi porā va'e onhepyxanga e'ŷ aguā rupi, mba'eta Israel kuery ru aiko, Efraim kuery ma xera'y jypyguá", he'i.

¹⁰ Peē yvy regua kuery, pendu ke SENHOR ayvu. Pemombe'u ke ye'ẽ yvýry mombyry etea rupi. Ha'e vy aipopeje: "Israel kuery moaímbaare ae ju omboatypa ta, ha'e kuery re opena 'rā veva'i re opena va'e rami.

¹¹ Mba'eta SENHOR oepy Jacó kuery, ogueraa jepe ha'e kuery gui imbaraetekueve po gui.

¹² Ha'e ramo ou vy oporaei 'rā okuapy Sião yvyty áry, ha'e kuery pe SENHOR mba'emo ome'ẽ rā oguerovy'a ete 'rā guive, mba'emo aju, vinho, azeite, veva'i ha'e vaka ra'y. Ha'e kuery nhe'ẽ oiko porā 'rā yvotyty omoakýmby rami, nda'ipiruvei ma 'rā guive.

¹³ Ha'e va'e jave py kunhataígue ový'a 'rā okuapy ojerokya py, kunumigue ha'e tujakue'i voi. Hexayague xee amombo'opa ramo ový'a ju 'rā. Ndovy'aiague gui ambovy'a ju 'rā.

¹⁴ Sacerdote kuery guive amongaru 'rā ikyra va'e re, xevyguá kuery hevyatãmba 'rā mba'emo porā ame'ẽ va'e re", he'i SENHOR.

¹⁵ Po rami SENHOR ijayvu: "Ramá tekao py onhendu va'ekue hevovo rei va'e, hexay ha'e ipy'a vai ete va'e. Ha'e va'e ma Raquel omemby kuery re ojae'oa. Imemby kuery jipovei ma ramo nonhembovy'a ukai."*

¹⁶ Ha'e rami teĩ po rami SENHOR ijayvu: "Ejae'ove eme, nderexayve eme guive. Mba'eta nememby kuery ojevypa ju 'rā ngovaigua kuery yvy gui.

¹⁷ Raka'eve rā oiko nho 'rā rearō reikovy va'e, mba'eta nememby kuery ojevypa ju 'rā oyvy re ae", he'i SENHOR.

¹⁸ "Xee aendu Efraim kuery ijayvu vy aipoe'i rā: 'Vaka ra'y imãxo porā e'ŷ va'e rami aiko va'ekue teĩ ndee xemo'arandu. Aŷ gui ma xerekorerova ke teko pyau re ju aiko aguā, mba'eta ndee ma SENHOR Xeruete.

¹⁹ Anhetê, ajeko rerova rire anhemboaxy va'ekue, xekunumi jave aikoague re xema'endu'a vy. Xerekombo'e rire xepexo re aipete-pete. Axímby ha'e ndaikuaavei rei va'ekue', he'i.

²⁰ Ha'e rami avi Efraim e'ŷ teve xera'y arový'a ha'e ayvu ete va'e? Mba'eta ixupe xeayvu nhavõ xema'endu'a ju hexe ayvu etea rupi. Hexe vy xepy'a tyty atã amboaxy ete vy", he'i SENHOR.

²¹ "Pemopu'ã ke pemo'amy yvy markaarã, peguataa rupi peja tape kuaa ukaarã, pexa pota ke peovy tape rupi peikoa re. Ha'e gui ma kunhataí Israel regua, ejevy ke, ejevy ke neretã rejaague katy.

²² Xeraj xenhe'ẽ rendu e'ŷ va'e, raka'e peve 'rā tu ha'eve'ŷa rami rei reiko? Mba'eta yvy re SENHOR omoingo mba'emo pyau: kunha oikuavã 'rā ava."

²³ Po rami ijayvu SENHOR ixondaro reta va'e, Israel kuery Ruete: "Judá kuery ikuia ambopyau ramo oyvy ha'e guetã ikuai va'e rupi ha'e kuery aipoe'i ju 'rā: 'Ndee yvyty iky'a e'ŷ va'e teko porā oĩa, tove SENHOR tandereroayvu porā', he'i rā okuapy.

²⁴ Mba'eta ha'e va'e yvyty re ju 'rā Judá kuery ikuai, tetã ikuai va'e ha'e javi re guive, mba'ety rupi omba'epo va'e ha'e veva'i re opena va'e kuery voi.

²⁵ Mba'eta amombarate inhe'ẽ kangy va'e, amongaru guive ho'a rai'i va'e", he'i.

²⁶ Ha'e gui amyí vy ama'ẽ ju. Akea ma xembovy'a ete va'ekue.

²⁷ Ha'e gui SENHOR aipoe'i: "Ne'ixa, ou ma oiny ára Israel ha'e Judá kuery amboetave ju aguā, avakue ha'e mymba kuery guive.

²⁸ Mba'eta ymave rupi ha'e kuery re aikuua pota va'ekue aipe'a aguā, aity, ambojexavai, ambovaipa ha'e amoingo axy aguā, teĩ aŷ gui ma ha'e kuery re aikuua pota 'rā amopu'ã ha'e anhotý ju aguā", he'i SENHOR.

²⁹ "Ha'e va'e ára ma aipo nda'eavei ma 'rā: 'Tuu kuery uva aky'i ho'u rire ta'y kuery rai voi nda'evei', nda'eavei 'rā.

* 31:15 Raquel ma Jacó ra'y José xy, ha'e Israel kuery jaryi jypy raka'e (Gênesis 30.22-24). Ha'e gui Ramá tekao ma Babilônia katy escravo-rã ogueraa pyrã kuery ojokuapaague (Jeremias 40.1). Aŷ ma Mateus 2.17-18 py kova'e ayvu rupi ijayvu ju, mba'eta Jesus ou jaja'e'oa gui nhanemombo'o aguā.

³⁰ Ha'e rami 'rāgue py ma peteī-teī omano 'rā gueko vaiague re ae. Uva aky'i 'uare kuery raī ae ma nda'evei 'rā."

Israel kuery pe Nhanderuete guexeve guarāojapo pyau aguā re ijayvuague

³¹ SENHOR aipoe'i: "Ne'exa, ou ma oiny ára Israel ha'e Judá kuery reve xereve guarāajapo pyau aguā,

³² tamoī kuery reve ajapo va'ekue ramigua e'ŷ. Ha'e jave ma ha'e kuery po re ajopy reve anoēmba va'ekue Egito yyy gui. Ha'e rami teī ha'e kuery ombovaipa xereve guarāajapo va'ekue, ime rami aiko teī.

³³ Ha'e gui ha'e va'e ára oaxapa ma rire po rami 'rā Israel kuery reve ajapo pyau xereve guarā. Ha'e kuery py'a re 'rā ambopara xeguigua lei, ikuraxō re ae 'rā ambopara. Xee aiko 'rā Tuuete, ha'e rā ha'e kuery ma ikuai 'rā xevyguia.

³⁴ Ha'e rami rire peteī-teī nombo'evei ma 'rā oirū neī guyvy kuery, 'Peikuua na SENHOR' he'ia py, mba'eta xekuaa pavē 'rā, yvyīgueve ha'e yvatekueve voi. Mba'eta amboguepa 'rā heko vaiague, ojejavyague re naxema'endu'avei 'rā guive", he'i SENHOR.*

³⁵ Po rami ijayvu SENHOR ara py kuaray ojope aguā rami ojapo va'ekue, ha'e gui jaxy ha'e jaxy-tata pyávy henty aguā oeja va'ekue, ye'ē omyī aguā ha'e yai opu'ā-pu'ā va'e hevovo-vovo aguā rami. Hery ma SENHOR ixondaro reta va'e. Ha'e vy aipoe'i:

³⁶ "Ha'e rami aguā aeja va'ekue xerenonde oaxa rive e'ŷa ja Israel kuery voi nokanhymbai 'rā xerenonde gui, peteī regua riae 'rā ikuai", he'i SENHOR.

³⁷ SENHOR aipoe'ive ju: "Yvate yva ha'e javi rupi pea'ā kuaapa e'ŷa ja, ha'e kyvō yyy guýry pexa pota kuaapa e'ŷa ja xee ndaejapa rivei 'rā Israel kuery, ha'e rami ete ha'e kuery ikuai rire teī", he'i SENHOR.

³⁸ SENHOR aipoe'ive ju: "Ne'exa, ou ma oiny ára kova'e tetā SENHOR peguarāojapoa ju aguā, Hananel torre hi'aña guive tetā kora ojerea py okē oĩa peve.

³⁹ Ha'e gui henondeve katy ju 'rā ixā oa'āaty omoatāa heravy Garebe yvy'ā peve, ha'e gui Goa katy ju 'rā ojere ovy.

⁴⁰ Ha'e gui yvyugua te'ōgue ha'e tanhimbu ikuaiaty, ha'e nhuñdy Cedrom yakā'i peve itui va'e, okē kavaju oikeaty kuaray oua katy oĩ va'e peve, ha'e va'e voi omboaxapaa 'rā SENHOR peguarā. Ha'e va'e rire Jerusalém tetā ndoityavei 'rā, nombovaipaavei 'rā guive."

32

Peteī yvy Anatote py itui va'e Jeremias ojoguaague

¹ Jeremias pe SENHOR oayvu ombou ju dez ma'etŷa re ma Judá pygua huvixa Zedequias oĩ jave py, ha'e dezoito ma'etŷ re ma huvixa Nabucodonosor oĩ jave py guive.

² Ha'e va'e jave py Babilônia pygua huvixa xondaro kuery ojokopa Jerusalém tetā, ha'e profeta Jeremias ombotya imoiny Judá pygua huvixa roka py harõa xondaro kuery ikuaiaty py.

³ Mba'eta Judá pygua huvixa Zedequias omboty uka vy aipoe'i va'ekue:

— Mba'e re tu ndee remombe'u SENHOR aipoe'ia rami: "Kova'e tetā omboaxa 'rā Babilônia pygua huvixa po py, ha'e rā oipe'apa 'rā", 're?

⁴ "Ha'e gui Judá pygua huvixa Zedequias ndoo jepei 'rā caldeu kuery po gui. Ha'e rami 'rāgue py omboaxaa 'rā Babilônia pygua huvixa po py. Ha'e ramo jomeme ijayvu 'rā jova re oma'ē reve.

⁵ Ha'e rire ha'e va'e ma Babilônia katy ogueraa 'rā Zedequias, ha'e py optya aguā SENHOR hexe oikuaa pota ju peve, aipoe'iague rami vy. Ha'e gui caldeu kuery re pepu'ā teī napendepo'akai 'rā", 're va'ekue — he'i.

⁶ Ha'e ramo Jeremias ombovai:

— SENHOR oayvu xevy pe ombou vy aipoe'i:

⁷ "Ne'exa, nderuvy'i Salum ra'y Hananel ndea py ou vy aipoe'i 'rā: 'Ejogua na xeyvy Anatote py itui va'e, mba'eta ndee anho ha'eve rejogua aguā', he'i 'rā."

* 31:34 Hebreus 8.8-12, 10.16-17

⁸ Ha'e gui SENHOR ayvu aipoe'ague rami xea py ou xeruvy'i ra'y Hananel oka harõa xondaro kuery ikuaiaty py. Ha'e vy aipoe'i xevy: "Ejogua na xeyvy Anatote py Benjamim regua yvy re itui va'e, mba'eta ndee anho ha'eve rejogua vy rejopy aguã. Ejogua na ha'vy", he'i. Ha'e rami aendu vy aikuua SENHOR ijayvuague rami oikoa.

⁹ Ha'e rami vy xeruvy'i ra'y Hananel gui ajogua yvy Anatote py itui va'e. Hepyrã dezessete hatã'i va'e prata guigua aa'ã karamboae.

¹⁰ Kuaxia re xerery ambopara rire amboja selo py, ikuua ukaarã aenoĩ guive. Ha'e vy hepyrã aa'ã mba'emo opejaa py.

¹¹ Ha'e rami vy araa ipara va'e ajoguaague regua. Lei re oĩa rami vy amboja va'ekue araa, ha'e oguerova pyre amboja e'ŷ va'ekue guive.

¹² Kuaxia mokoïve amboaxa Nerialas ra'y Maaséias ramymino Baruque po py. Hananel xeruvy'i ra'y oexaa py amboaxa, ajoguaague regua kuaa ukaarã kuery guery ombopara va'ekue oexaa py, ha'e gui judeu kuery oka py xondaro harõa kuery ikuaiaty py oguapy okuapy va'e ha'e javi oexaa py guive.

¹³ — Ha'e kuery oendua py Baruque pe xeayvu vy aipoa'e va'ekue:

¹⁴ "Po rami SENHOR ixondaro reta va'e Israel kuery Ruete ijayvu: 'Ejopy ke kuaxia para yvy rejoguaague regua. Omboja pyre ha'e omboja pyre'ŷ reraa vy emoĩ porã hyru nhae'ũ guigua py, heta ára re oĩ porã aguã.

¹⁵ Mba'eta po rami SENHOR ixondaro reta va'e Israel kuery Ruete ijayvu: Kova'e yvy re ma pejogua nho 'rã oo, mba'ety ha'e uvaty', he'i", ha'e va'ekue.

Nhanderuete omombe'u porãve aguã re Jeremias ojerureague

¹⁶ Ha'e gui kuaxia para yvy ajoguaague regua ma Nerialas ra'y Baruque pe amboaxa ma rire SENHOR pe anhembo'e ainy. Ha'e vy aipoa'e:

¹⁷ — Ai SENHOR Xeruete! Yva ha'e yvy rejapo va'ekue ndepo'aka etea rupi ha'e ndepo reupi reve. Mba'eve rei nda'ipoi ndevy haxy va'e nemondyiaraã.

¹⁸ Ndee ma mbovy e'ŷ pe rexu uka 'rã remboaxya, ha'e oreramoĩ kuery ojejavyague re rembopagaague regua ta'y kuery re remoĩ va'e guive. Ndee ma Oreruete yvate ha'e ipo'aka ete va'e. Nderery ma SENHOR ixondaro reta va'e.

¹⁹ Renhomongeta porã ha'e nerembiapo porã ete va'e. Mba'eta nderexa ojepe'a oiny avakue ra'y kuery ikuia rexapa aguã, peteĩ-teĩ pe ikuaiague rekovia reme'ẽ aguã, mba'emo ojapoague rami ae.

²⁰ Ndee ma hexa pyrã ha'e nhomondyipaarã rejapo va'ekue Egito yvy re, kova'e ára peve Israel kuery mbyte rupi guive, amboae regua ikuia rupi teĩ. Ha'e rami rejapo nderery oikuua pavã aguã rami, aý peve rejapoa rami.

²¹ Ndevygua Israel kuery Egito yvy gui renoẽmba va'ekue hexa pyrã ha'e nhomondyipaarã rexu uka vy, ndepo reupi vy ndepo'akaa rexu uka reve nhomondyipa etea rupi.

²² Ha'e kuery pe kova'e yvy reme'ẽ va'ekue, tamoĩ kuery pe reura reve ndeayvuague ae, kamby ha'e ei oata e'ŷa.

²³ Ha'e ramo ha'e py ha'e kuery ovaẽ vy hekoia okuapy teĩ nanenhe'ẽ rendui raka'e, ndeguigua lei rupi nda'ikuaxei vy. Rejapo uka va'ekue ma peteїve voi ha'e kuery ndojapoi. Ha'e nunga rupi ha'e kuery áry rembou guĩ nunga mba'emo vai.

²⁴ Ne'ixa, kova'e tetã jokoa kuery ma yvy ojo'o heruvy ipo'aka aguã. Anhetẽ tetã omboaxaa ma caldeu kuery orere opu'ã va'e kuery po py. Kyxe, karuai ha'e mba'eaxy vaikue py ndeayvuague rami meme oiko. Ndee ae rexapa.

²⁵ Ha'e rami teĩ SENHOR Oreruete, mba'ixa ru ndee aipo're xevy: "Ejogua ke yvy peráta re, ha'e enoĩ ikuua ukaarã guive", 're va'ekue, caldeu kuery po py tetã omboaxaa ma teĩ? — ha'e.

Nhanderuete ombovaiague

²⁶ Ha'e ramo SENHOR ombou oayvu Jeremias pe. Ha'e vy aipoe'i:

²⁷ "Ne'ixa, xee ma SENHOR, oikove va'e ha'e javi Ruete aiko. Ha'e rami vy oiko 'rã ri nda'u xevy pe haxy vai ete va'erã?"

²⁸ Ha'e nunga rupi SENHOR ijayvu po ramí: “Ne'exa, kova'e tetā amboaxa 'rā caldeu kuery po py. Babilônia pygua huvixa Nabucodonosor po py ae 'rā amboaxa. Ha'e ramo oipe'a 'rā.

²⁹ Kova'e tetā re caldeu kuery opu'ã vy ovaẽmba 'rā okuapy. Tetā re tata omoĩ vy oapypa 'rā oo ikuai va'e ha'e javi, ijapye áry Baal ra'angaa pe heakuã porā va'e ha'e pygua kuery oapyaque, ha'e nguuete ramigua mboae pe mba'emo rykue onhoẽague guive, xembopoxy aguã rami rive.

³⁰ Mba'eta Israel ha'e Judá kuery ma kunumi guive xerenonde ojapo mba'emo vai anho, mba'eve ndojapoi 'rā okuapy xembopoxyarā e'ŷ vy”, he'i SENHOR.

³¹ “Mba'eta kova'e tetā pygua kuery ma xembopoxy ha'e ndaxeia'eveia rupi anho ikuai, tetā ojapoa ára guive aŷ peve, xerenonde gui aipe'apa aguã rami.

³² Israel ha'e Judá kuery ojapo vaia ha'e javi rupi xembopoxy okuapy, huvixa kuery, yvatekueve, sacerdote ha'e profeta kuery, avakue Judá ha'e Jerusalém pygua ha'e javi guive.

³³ Ha'e kuery ma okupe rive oguerova xea katy, ngova e'ŷ. Ko'ẽ rai guive ambo'e teĩ ha'e kuery ndojapyxakai, xeayvua ndojopyxei vy.

³⁴ Ha'e rami 'rāgue py xerery oĩaty opy ete omoĩ okuapy ojeguarupy, omongy'apa rei vy.

³⁵ Baal ra'angaa pe ojapo okuapy imbojerovia atyrā Hinom ra'y rekoague yvyugua py, ha'e py gua'y kuery ha'e guajy kuery oapy aguã nguuete ramigua Moloque pe. Ha'e rami aguã ma teigueve xee ajapo uka va'e'ŷ, neĩ nanhembopy'ai guive ha'e ramigua ete ojeguarupy ha'e kuery ojapo aguã, Judá regua kuery oguerojejav aguã.”

³⁶ Ha'e rā aŷ ma, po rami SENHOR Israel kuery Ruete ijayvu kova'e tetā re: “Tetā re peẽ kuery pendeayvu vy ‘Omboaxaa ae ma Babilônia pygua huvixa po py, kyxe py, karuai ha'e mba'eaxy vaikue py guive’, peje teĩ.

³⁷ Ne'exa, tetā pyguare kuery ma xee amono'õmba ju 'rā heruvy yvy jave rupi ikuaiague gui. Ha'e katy xepoxya rupi, xea'e e'ŷa ha'e ajou vai etea rupi amondoukapa va'ekue teĩ kova'e tekao py ju 'rā arupa. Ha'e rami vy ajapo 'rā ha'e kuery mba'eve gui okyjea rupi e'ŷ ikuai aguã rami.

³⁸ “Ha'e rami ha'e kuery ikuai 'rā xevygua, ha'e rā xee aiko 'rā Tuuete.*

³⁹ Ha'e kuery pe ame'ẽ 'rā peteĩ'i rupi ipy'a aguã ha'e peteĩ'i tape, ko'ẽ nhavõ xerenonde ojererokyjea rupi ikuai aguã, ha'e kuery ikuai porā aguã, ha'e gui ta'y kuery voi.

⁴⁰ Ha'e kuery pe ajapo 'rā xerevegua opa e'ŷ va'erā. Ha'e va'e rupi vy ndajapo porā e'ŷi 'rā ha'e kuery pe. Ha'e rami 'rāgue py ha'e kuery kuraxõ re amoĩ 'rā xerenonde ojererokyjea rupi ikuai aguã, xegui ojep'e a ve'ŷ aguã.

⁴¹ Ha'e kuery arov'y a vy amoingo porā 'rā. Amoĩ atā 'rā kova'e yvy re, xekuraxõ ha'e xenhe'ẽ ha'e javi py.”

⁴² Mba'eta po rami SENHOR ijayvu: “Ha'e kuery áry ha'e rami ete mba'emo vai ambouague rami avi ha'e kuery re ambou avi 'rā iporā ete va'e xeayvuague ha'e javi rami vy.

⁴³ Ha'e ramo kova'e yvy re ojogua ju 'rā ombo'etyrā, ha'e va'e pe ‘Tekoa ve'ŷ oĩ, avakue neĩ mymba kuery jipoveia. Caldeu kuery po py ae ma omboaxaa’, pejeague py ae.

⁴⁴ Peráta re ojogua ju 'rā ombo'etyrā, ha'e gui ombopara uka 'rā ojoguaague regua kuaxia, selo py omboja 'rā, ha'e oenoĩ 'rā guive ikuua ukaarā. Benjamim yvy re voi 'rā ojogua, Jerusalém ha'e Judá re tetā ikuai va'e yvýry, yvy'ã reia ha'e yvyugua rupi tetā ikuai va'e yvýry, ha'e kuaray puku-a katy tetā ikuai va'e yvýry ojogua 'rā mba'etyrā, mba'eta ha'e kuery ikuai xee ambopyau 'rā”, he'i SENHOR.

33

Ha'e kuery ikuai porā ha'e mba'emo ojoupaju aguã re ijayvuague

¹ Ha'e gui SENHOR oayvu mokoïguea ombou Jeremias pe oka py xondaro harõa kuery ikuaiaty py ombotya teri reve. Ha'e vy aipoe'i:

* 32:38 2 Coríntios 6.16

² “Po rami ijayvu SENHOR opa mba'e moingoare: Xee SENHOR ae amoingo mba'emo oī atāmba aguā. Xerery ma SENHOR.

³ Ejapukai ke xevy, ha'e ramo rombovai 'rā. Ha'e vy ndevy amombe'u 'rā mba'emo porā anhomí rā ndee reikuua e'ŷ va'ekue”, he'i.

⁴ Mba'eta po rami SENHOR Israel kuery Ruete ijayvu kova'e tetā py oo ikuai va'e re, ha'e Judá regua huvixa kuery ro ikuai va'e re guive, mba'eta ngoo oitypa va'ekue ngovaigua kuery yvy jo'oa ha'e kyxe revegua ou va'ekue jokoarā,

⁵ caldeu kuery jokoa rupi ha'e pygua kuery opu'āa py. Ha'e ramo SENHOR aipoe'i: “Penderogue ma xee amonyē 'rā avakue re'ōgue xepoxyha'e ajou vaia rupi ajuka va'ekue. Mba'eta pendereko vaiague ha'e javi káuxa ndajexa ukai 'rā kova'e tetā pygua kuery pe.

⁶ Ne'exa, ha'e py ae ambou avi 'rā hexaī porāmba ju aguā amonguerapa vy. Mba'eta ha'e kuery pe ambou 'rā opa mba'e py ikuai porā aguā, mba'eve gui okyje ve'ŷ re.

⁷ Ambopyau 'rā Judá ha'e Israel kuery ikuaria. Amoatyrō ju 'rā jypy guare rami.

⁸ Aiky'a'opa 'rā heko vaia rupi xerovai ojejavyague ha'e javi gui. Amboguepa 'rā heko vaiague, ojejavyague ha'e xerovai ikuaiague guive.

⁹ Ha'e ramo Jerusalém tetā oī 'rā xerery omboetepaa ha'e xererovy'aa aguā, yvy regua kuery ha'e javi oendua py, mba'eta ha'e kuery oendu 'rā omombe'ua rā tetā re iporā va'e ajapoa. Ha'e rami vy onhemondyipa ha'e oryryipa 'rā okuapy peē kuery romoingo porā vy iporā va'e ambou rā oendu vy.”

¹⁰ Po rami SENHOR ijayvu: “Kova'e tekao pe peē kuery ‘Tekoa ve'ŷ oī, avakue ha'e mymba kuery ikuai e'ŷa’, peje, mba'eta Judá regua tetā ha'e Jerusalém py tape ikuai va'e rupi aŷ ombovaipaa, avakue ha'e mymba jipoi guive. Ha'e rami teī ha'e py oendua nho 'rā

¹¹ ov'y'a ha'e opuka nhendu va'e, omenda va'erā ijayvu ha'e oporaei nhendu vy aipoe'i va'e: ‘Perovy'a ke SENHOR ixondaro reta va'e, mba'eta joayvua ha'e nhomboaxya opa va'erā e'ŷ’, he'i va'e. Ha'e gui oguerovy'a reve mba'emo ome'ē 'rā SENHOR ro py. Mba'eta pendeyvy ambopyau 'rā jypy guare rami”, he'i SENHOR.

¹² SENHOR ixondaro reta va'e aipoe'ive ju: “Kova'e tekao aŷ tekao e'ŷa, avakue ha'e mymba kuery jipoi teī tetā yvýry ha'e javi rupi veva'i re opena va'e kuery hekoju 'rā guymba kuery omombytu'ua rupi.

¹³ Mba'eta yvy'ā ha'e yvyugua reia rupi tetā ikuai va'e yvýry rupi mymba kuery omboaxaa ju 'rā ipapaa kuery po guy rupi, kuaray puku-a katy Benjamim yvy re, Jerusalém yvýry ha'e Judá re tetā ikuai va'e ha'e javi rupi guive”, he'i SENHOR.

Jeremias 23.5,6

¹⁴ SENHOR aipoe'i: “Ne'exa, ou ma oiny ára Israel ha'e Judá kuery aroayvu porāague ojeupity aguā”, he'i SENHOR.

¹⁵ “Ha'e va'e ára, ha'e va'e jave py ma peteī amoingo 'rā Davi rapytakue renhoī, hamymino heko porā va'erā. Ha'e va'e ma ha'evea rami meme 'rā joguerek, ha'e teko porā rupi opena 'rā yvy re.

¹⁶ Ha'e va'e ára ma Judá regua kuery oo jepe 'rā, ha'e Jerusalém tetā py heko 'rā mba'eve gui okyjea rupi e'ŷ. Ha'e ramo ixupe 'SENHOR nhanderek porārā me'ēa' 'ea 'rā.”

¹⁷ Mba'eta SENHOR aipoe'i: “Davi rekoria ndoatai 'rā ava Israel kuery ruvixa tenda openaaty áry oguapy va'erā.

¹⁸ Neñ sacerdote kuery levita regua voi ndoatai 'rā xerenonde ikuai va'erā, ko'ē nhavō xevy mba'emo aju ha'e mymba oappy reve ome'ē aguā”, he'i.

¹⁹ Ha'e gui Jeremias pe SENHOR oayvu ombou vy aipoe'i:

²⁰ “Po rami SENHOR ijayvu: Ára ha'e pytū oiko riae aguā re xeayvuague peē napembo-vaipa kuaia rami avi

²¹ xee voi nambovaipai 'rā xerembiguai Davi reve xerupive guarā ajapo va'ekue, tenda openaaty áry hamymino oī aguā, ha'e gui levita regua sacerdote kuery xevy ikuai riae aguā.

²² Ha'e rami ae avi mba'emo yva re ikuai va'e ndapeipapa kuaai, ha'e ita ku'i reia ye'ẽ rembe rupi oĩ va'e napea'ã kuaia rami avi ndapeipapa kuaai 'rã xerembiguai Davi ramymino kuery, neĩ levita regua xerenonde ombo'eapo va'e kuery guive."

²³ Ha'e gui Jeremias pe SENHOR ijayvuve vy aipoe'i:

²⁴ "Endu rive heta va'e kuery ndevy 'Mokoĩ regua SENHOR oiporavo va'ekue ri aŷ ma ndoayvuvei ri?" he'i ramo. Mba'eta ha'e kuery xevyguia kuery ovare e'ŷa rami rive ijayvu. Ha'e kuery pe rã xevyguia kuery peteĩ regua ve'ŷ ma merami ikuai."

²⁵ Mba'eta SENHOR aipoe'i: "Ára ha'e pytū oiko aguã re xeayvuague namboaxa riveia rami, ha'e yva ha'e yvy re ikuai va'e xee ndaeja riveia rami

²⁶ xee ndaejai avi 'rã Jacó ramymino kuery neĩ xerembiguai Davi ramymino kuery. Mba'eta hamymino regua amoĩ 'rãe Abraão, Isaque ha'e Jacó ramymino kuery re opena va'erã. Mba'eta ambopyau ju 'rã ha'e kuery ikuia, amboaxya aexa uka vy."

34

Zedequias rekorã re ijayvuague

¹ Pova'e ayvu ma Babilônia pygua huvixa Nabucodonosor oĩ teri reve SENHOR ombou Jeremias pe. Mba'eta ha'e va'e jave ha'e va'e ogueru ojeupeguia xondaro kuery ha'e openaa ha'e javi pygua kuery, Jerusalém tetã re opu'ãmba okuapy aguã, ijyvýry tetã ikuai va'e re guive. Ha'e rami rã SENHOR aipoe'i:

² "Po rami SENHOR Israel kuery Ruete ijayvu: Tereo ndeayvu Judá pygua huvixa Zedequias pe. Ha'e vy ixupe aipo're 'rã: 'Po rami SENHOR ijayvu: Ne'exa, kova'e tetã xee amboaxa 'rã Babilônia pygua huvixa po py. Ha'e ramo oapypa 'rã tata py.

³ Ndee voi ndereo jepei 'rã ipo gui. Ha'e rami 'rãgue py nembo'aa vy nemboaxaa 'rã ipo py. Ha'e ramo Babilônia pygua huvixa reve pejogueroayvu 'rã joa'i gui joava re pema'ẽ reve. Ha'e ramo ndereraa 'rã Babilônia tetã py.

⁴ Ha'e rami teĩ ndee Judá pygua huvixa Zedequias, endu ke SENHOR ayvu. Po rami SENHOR ijayvu nderekorã re: Kyxe py e'ŷ 'rã remano.

⁵ Ha'e rami 'rãgue py remano porã'i 'rã, ha'e ndere ima'endu'aa rupi heakuã porã va'e oapya 'rã guive, reiko e'ŷ mbove neramoĩ kuery huvixa ikuai va'ekue re ima'endu'aague rami ae. Ojae'o vy "Ai SENHOR!" he'i 'rã okuapy, xee ae ha'e rami aguã re xeayvu rire', he'i SENHOR."

⁶ Pova'e ayvu ha'e javi rupi profeta Jeremias omombe'u Judá pygua huvixa Zedequias pe, Jerusalém py oĩa py.

⁷ Ha'e va'e jave Babilônia pygua huvixa kuery opu'ã okuapy Jerusalém re, ha'e Judá regua tetã oĩve teri va'e Laquis ha'e Azeca re guive. Mba'eta ha'e va'e anho'i optya Judá regua tetã ikorapa va'e ikuai va'ekue gui.

Escravo rerekaoa kuery rovai Nhanderuete ijayvuague

⁸ Ha'e gui pova'e ayvu ma Jeremias pe SENHOR ombou va'ekue. Ha'e va'e jave py Jerusalém pygua kuery reve huvixa Zedequias ijayvu okuapy escravo oguerekoo va'e opoipa ju aguã re.

⁹ Ha'e ramo peteĩ-teĩ opoi imondovy escravo hebreu regua avakue ha'e kunhague, guetarã kuery regua ae avave rei oguerekoo ve'ŷ aguã escravo.

¹⁰ Ha'e ramo yvatekueve ha'e heta va'e kuery ha'e javi reve ha'e rami aguã re ijayvu va'ekue onhe'ẽ rendu, ha'e vy peteĩ-teĩ escravo avakue e'ŷ vy kunhague opoipa. Onhe'ẽ rendu vy omondoukapa.

¹¹ Ha'e rami teĩ ha'e va'e rire ma nda'evei nho ju ikuai. Ha'e rami vy ojapo escravo avakue ha'e kunhague omondouka va'ekue ojevypa ju aguã rami. Ha'e vy escravo-rã ju omoingopa.

¹² Ha'e gui ma Jeremias pe SENHOR oayvu ombou vy aipoe'i:

¹³ "Po rami SENHOR Israel kuery Ruete ijayvu: Egito yvy peneramoĩ kuery escravo ikuaiague gui anoẽmba vy ha'e kuery reve ajapo va'ekue xereve guarã. Ha'e vy aipoa'e va'ekue:

¹⁴ Sete ma'etŷa opa nhavō peteĩ-teĩ pepoi 'rã peneretarã hebreu regua pendevy ovende pyre. Mboapy meme ma'etŷa re ndevy ha'e kuery om̄ba'epo rire pepoi 'rã imondovy escravo ve'ŷ ikuai aguã, ha'e va'ekue.* Ha'e rami teĩ peneramoĩ kuery naxenhe'ẽ rendui, xeayvu re ndojapyxaka potai guive okuapy.

¹⁵ Ha'e gui peẽ kuery ma aŷ rai'i pejogueroayvu xerenonde ha'evea rami pejapo aguã re. Ha'e vy peteĩ-teĩ pendeayvu peneretarã pepoi aguã re. Xerery oĩaty oo py ae pejogueroayvu ha'e rami aguã.

¹⁶ Ha'e rami teĩ ha'ekue rami e'ŷ pendekuai, xerery pemongy'apaa rupi. Mba'eta peteĩ-teĩ pende-escravo avakue ha'e kunhague pejapo ojevy ju aguã rami, escravo ve'ŷ ikuai aguã rami pemondouka va'ekue ri. Ha'e rami vy avakue ha'e kunhague pemoingo ju escravo-rã."

¹⁷ Ha'e nunga rupi po rami SENHOR ijayvu: "Peẽ kuery ma naxenhe'ẽ rendui, mba'eta ndapepoi etei penderyvy ha'e peneretarã kuery escravo rami perekva'e. Ha'e ramo ne'exa, xee ma peẽ kuery ropoipa ta imondovy kyxe, mba'eaxy vaikue ha'e karuai py pemanomba aguã katy. Xee rojapo 'rã yvy regua kuery ha'e javi penderexa vy onhemondiyipa aguã rami", he'i SENHOR.

¹⁸ "Mba'eta xereve guarã ajapo va'ekue rupi e'ŷ ikuai va'e, xerenonde ijayvuague ndojapoi va'e ma xee ajuka ukapa 'rã vaka ra'y re ha'e kuery ojukaaty rami avi, mba'eta ha'e kuery vaka ra'y ojuka vy mokoĩ rupi ojaya va'ekue mbyte rupi oaxa va'ekue.[†]

¹⁹ Mba'eta Judá ha'e Jerusalém pygua yvatekueve, huvixa ha'e sacerdote kuery reve oaxa va'ekue vaka ra'y ojaya va'ekue mbyte rupi, ijyvy re ikuai va'e ha'e javi reve.

²⁰ Ha'e rami ae avi xee amboaxa 'rã hovaigua ijukaxeia kuery po py. Ha'e ramo hetekue opyta 'rã guyra yvate rupi oveve va'e ha'e mymba yvy rupigua rembi'urã rive.

²¹ Ha'e rami vy Judá pygua huvixa Zedequias ha'e ixupequa yvatekueve amboaxapa 'rã hovaigua kuery Babilônia pygua huvixa ijukaxeia xondaro kuery po py, peneretã ojokoague gui ha'e kuery ojepe'a ranhe teĩ.

²² Mba'eta xeayvu vy rive ajapo 'rã kova'e tetã re ju ha'e kuery ojevypa aguã rami. Tetã re opu'ã okuapy vy oipe'a ha'e oapypa 'rã. Judá yvy re tetã ikuai va'e guive amboavaipa ukapa 'rã, teko a ve'ŷrã", he'i SENHOR.

35

Recabe ramymino kuery gueko rami vy ae ikuai re ijayvuague

¹ Ha'e gui Jeremias pe SENHOR oayvu ombouju, Josias ra'y Jeaquim Judá pygua huvixa oĩ javé. Ha'e vy aipoe'i:

² — Tereo Recabe ramymino kuerya py, ha'e ndeayvu ha'e kuery reve. Ha'e gui eraapa SENHOR pegua oo py, peteĩ opy ja'o oĩ va'e py. Ha'e py ma ha'e kuery pe reme'ẽ 'rã vinho oy'u aguã — he'i.

³ Ha'e ramo araa Recabe ramymino kuery ha'e javi: Jeremias ra'y Jazanias, Habazinias ramymino va'e, tyke'y ha'e ta'y kuery ha'e javi arapa.

⁴ Ha'e rami vy SENHOR pegua oo py araa peteĩ opy ja'o oĩ va'e py, Nhanderuete remimbo'e Jigdalias ra'y Hanã ra'y kuery ikuaiaty py. Ha'e va'e opy ja'o ma yvatekueve ikuaiaty oĩ va'e yvy'iry, Salum ra'y oikeaty rarõa Maaséias oĩaty áry guive.

⁵ Ha'e gui Recabe ramymino kuery amboguapypa ma vy henonde amoĩ reta hyru vinho oĩa, karo guive. Ha'e vy ha'e kuery pe aipoa'e:

— Pey'u ke vinho.

⁶ Ha'e rã ha'e kuery ombovai:

— Ore kuery ma nda'evei vinho roy'u aguã, mba'eta oreramoĩ Recabe ra'y Jonadabe orevy aipoe'i rire: "Pey'u eme vinho, neĩ pendera'y kuery voi.

* 34:14 Ha'e rami aguã ma Nhanderuete oeja Éxodo 21.1 ha'e Deuteronomio 15.12 py. † 34:18 Ha'e kuery reko rami vy ha'e rami ikuai jogueroayvuague omoĩ atã vy (Gênesis 15.9-17).

⁷ Pejapo eme guive penderorā neī mba'etyrā. Pema'etŷ eme, uvaty perekō eme guive. Ha'e rami 'rāgue py oguy'i py rive 'rā pendekuai peikovea pukukue re, yvy peguata peikovya rupi peikove puku aguā", he'i rire.

⁸ Ha'e nunga rupi ore kuery ma ronhe'ē nhendu 'rā oreramoī Recabe ra'y Jonadabe orevy ijayvuague ha'e javi rupi. Ha'e rami vy ae vinho ndoroy'ui 'rā roikovea pukukue re, orera'xyx kuery, orera'y kuery ha'e orerajy kuery voi.

⁹ Ha'e rami ae ore ndorojapoi orerorā roī aguā. Ndoroguerokoi uvaty, mba'ety, neī mba'emo ra'yīgue ma voi.

¹⁰ Ha'e rami 'rāgue py oguy'i py rive ore kuery orekuai. Ha'e rami py rojapopa rokuapy aguā oreramoī Jonadabe ijayvuague.

¹¹ Ha'e rami avi kova'e yvy re Babilônia pygua huvixa Nabucodonosor ou ramo aiporo'e joupe-upé: "Peju ke, jaje'oi Jerusalém tetā py xondaro kuery Caldéia ha'e Síria pygua gui nhanhemi aguā", ro'e va'ekue. Ha'e rami vy ae Jerusalém py ju orekuai — he'i okuapy.

¹² Ha'e gui Jeremias pe SENHOR oayvu ombou vy aipoe'i:

¹³ "Po rami ijayvu SENHOR ixondaro reta va'e Israel kuery Ruete: Tereo, aipo'ere avakue Judá ha'e Jerusalém pygua kuery pe: 'Romo'arandua rupi xeayvu rā napendui 'rā teve xenhe'ē rendu aguā?" he'i SENHOR.

¹⁴ 'Mba'eta Recabe ra'y Jonadabe guamymino kuery pe ijayvu vy "Pey'u eme vinho", he'ague rami ha'e kuery ikuai pavē. Ha'e rami vy aŷ peve ha'e kuery ndoy'ui 'rā okuapy vinho, guamoī ijayvuague rami ae 'rā ikuai. Ha'e rā peē kuery ma ko'ē rai guive pendevy xeayvu teī naxenhe'ē rendui pekuapy.

¹⁵ Mba'eta ko'ē rai guive peē kuerya py xerembiguai kuery ambou vy aipoa'e uka: "Peteī-teī pejeko rerova ke aŷ pendeko vaitaty gui, iporā va'e anho pejapo aguā. Tapeove eme guive amboae ramigua tuuete kuery re ha'e kuery pe pendekuai aguā. Ha'e rami vy 'rāe pendekuai puku pendevyvrā peneramoī kuery pe ame'ē va'ekue re", ha'e uka. Ha'e rami teī peē kuery ma ndapejapyxakai, naxenhe'ē rendui guive.

¹⁶ Recabe ra'y Jonadabe ramymino kuery minha ojapo ete okuapy guamoī ojapo ukaague rami. Ha'e rā kova'e kuery ma naxenhe'ē rendui ae', he'i.

¹⁷ Ha'e nunga rupi SENHOR ixondaro reta va'e, Israel kuery Ruete aipoe'i: 'Ne'exa, Judá ha'e Jerusalém py ikuai va'e áry xee ambou 'rā xeayvu vaiague ha'e javi. Mba'eta ha'e kuery pe xeayvu teī naxenhe'ē rendui okuapy, ajapuka-pukai teī ha'e kuery naxembovai', he'i."

¹⁸ Ha'e gui ma Recabe ramymino kuery pe ju Jeremias aipoe'i:

— Po rami ijayvu SENHOR ixondaro reta va'e, Israel kuery Ruete: "Peē kuery ma peneramoī Jonadabe ijayvuague rupi ae pendekuai, ojapo uka va'ekue ha'e javi pejapo vy.

¹⁹ Ha'e nunga rupi po rami SENHOR ixondaro reta va'e, Israel kuery Ruete ijayvu: Xerenonde ikuai riae 'rā Recabe ra'y Jonadabe ramymino regua", he'i.

36

Kuaxia Jeremias ayvu oīa templo py ogueroayvuaague

¹ Ha'e gui Josias ra'y Jeoaquim Judá pygua huvixa va'e irundy ma'etŷ re ma oī jave py pova'e ayvu SENHOR ombou Jeremias pe. Ha'e vy aipoe'i:

² — Ejou ke peteī kuaxia onhemama va'e. Ha'e va'e re ke embopara Israel kuery rovai xeayvuague ha'e javi, Judá kuery ha'e amboae regua ha'e javi rovai guive, huvixa Josias oīa ypya ára xeayvu guive aŷ peve.

³ Mba'eta xapy'a rei Judá kuery ma mba'emo vai ha'e kuery re ambou taa remombe'u rā oendo vy peteī-teī ojeko rerova 'rā ha'eve e'ŷa rami ikuiai gui. Ha'e rami ri ramo xee ambogue 'rā heko vaia ha'e ojejavvyague — he'i.

⁴ Ha'e gui Jeremias oenoī Nerias ra'y Baruque. Ha'e ramo kuaxia onhemama va'e re Baruque ombopara Jeremias ijayvua ha'e javi, ixupe SENHOR ijayvuague ha'e javi rami.

⁵ Baruque pe Jeremias ijayvuve ju vy aipoe'i:

— Xee ma xembotyague py aĩ vy nda'evei SENHOR pegua oo py xee aa aguã.

⁶ Ha'e rami rã ndee ae ha'e py reo vy heta va'e kuery oendua py reroayvu 'rã SENHOR ayvu amombe'u rã kuaxia onhemama va'e re rembopara va'ekue ha'e javi. SENHOR pegua opy ae 'rã reroayvu, ha'e kuery okaru e'ŷ re ikuiaia ára, Judá regua kuery guetã gui ou va'ekue ha'e javi oendua py.

⁷ Xapy'a rei ha'e kuery onhemo'yvyi ia rupi ojapukai ramo SENHOR oendu 'rã, peteĩ-teĩ ojeko rerova ramo ha'eve e'ŷa rami ikuiaia gui. Mba'eta kova'e kuery rovai SENHOR oexa uka reta ma ipoxya ha'e nda'evei etea — he'i.

⁸ Ha'e ramo Nerias ra'y Baruque ojapopa profeta Jeremias ijayvuague ha'e javi. Ha'e rami vy SENHOR pegua opy oike vy ogueroayvu SENHOR ayvu kuaxia re oĩ va'e.

⁹ Mba'eta peteĩ nhiruĩ ma'etŷ ha'e nove jaxyia re ma Josias ra'y Jeoaquim Judá pygua huvixa oĩ javé py oenoimbá Jerusalém pygua ha'e Judá regua tetã guigua kuery Jerusalém py ou aguã, SENHOR renonde okaru e'ŷ re ikuai aguã.

¹⁰ Ha'e gui ma Baruque ogueroayvu kuaxia re Jeremias ayvu oĩa. SENHOR pegua opy ogueroayvu, Safã ra'y Gemarias lei re nhombo'e va'ety oĩaty py, oka yvateve oĩ va'e py, SENHOR pegua oo rokẽ pyau rexei, heta va'e kuery ha'e javi oendua py.

Yvatekueve oendua py ju kuaxia ogueroayvuague

¹¹ Ha'e va'e kuaxia re SENHOR ayvu oĩ va'e ha'e javi Gemarias ra'y Micaías, Safã ramymino va'e oendu vy

¹² huvixa ro py oo, opy ja'o kuaxia mboparaaty oĩaty py ae. Ha'e py ma yvatekueve ha'e javi oguapy okuapy: kuaxia mboparaaty Elisama, Semaías ra'y Delaías, Acbor ra'y Elnatã, Safã ra'y Gemarias, Hananias ra'y Zedequias ha'e yvatekueve mboae kuery.

¹³ Ha'e va'e kuery pe ju Micaías omombe'upa, heta va'e kuery oendua py kuaxia para Baruque ogueroayvu rã oendu va'ekue ha'e javi.

¹⁴ Ha'e ramo Baruque-a katy yvatekueve omondouka Netanias ra'y Jeudi, Selemias ramymino, Cusi ramymino jevy va'e. Ha'e va'e pe aipoe'i uka Baruque pe: "Eru ke apy kuaxia para heta va'e kuery oendua py reroayvu va'ekue", he'i uka. Ha'e ramo Nerias ra'y Baruque kuaxia para ogueraa amboae kuerya py.

¹⁵ Ha'e ramo ixupe ha'e kuery aipoe'i:

— Aŷ ma eguapy, orevy ju ke eroayvu — he'i ramo Baruque ogueroayvu ju oiny ha'e kuery oendua py.

¹⁶ Ha'e va'e ayvu ha'e kuery oendupa ma vy joe-joe oma'ẽ okuapy onhemondyi vy. Ha'e vy aipoe'i Baruque pe:

— Huvixa pe romombe'u mate 'rãe pova'e ayvu ha'e javi — he'i.

¹⁷ Ha'e gui ha'e kuery ijayvuve ju vy oporandu Baruque pe:

— Emombe'u porã ke orevy, mba'exa tu rembopara ha'e nunga? Profeta e'ŷ teve ndevy omombe'u pova'e ayvu ha'e javi?

¹⁸ Baruque ombovai:

— Ha'e ete ae ri omombe'u pova'e ayvu xevy, ha'e rã xee ju ambopara kuaxia re tinta py — he'i.

¹⁹ Ha'e ramo yvatekueve aipoe'i Baruque pe:

— Tereo, enhemi, Jeremias voi. Avave rei toikuaa eme mamo pa peña.

Tata py huvixa kuaxia oapypaague

²⁰ Ha'e gui yvatekueve ma kuaxia para onhemama va'e omoĩ porã ranhe opy ja'o kuaxia mboparaa Elisama oĩaty pyve. Ha'e rire mae jogueraa huvixa oka py oguapy oinya py. Ha'e vy huvixa pe omombe'u okuapy ha'e va'e ayvu ha'e javi.

²¹ Ha'e ramo huvixa omondouka guembiguai Jeudi kuaxia para ogueru aguã. Ha'e rã Jeudi ma opy ja'o kuaxia mboparaaty Elisama oĩaty gui ojou vy ogueru huvixa ha'e hexeveguia yvatekueve ikuiaia py.

²² Nove jaxyia huvixa oguapy oinya py yro'y oendu ramo ijyvýry oĩ peteĩ tapyi ryru hexakãmba oinya va'e.

²³ Ha'e gui kuaxia para mboapy e'ŷ vy irundy henda py Jeudi ogueroayvu nhavõ huvixa ojaya 'rã kyxe'i kuaxia mboparaa rembiporu oguerekva'e py, ha'e vy omombo 'rã tapyĩ ryru tata oĩa py.

²⁴ Mba'eta huvixa ha'e hembiguai kuery ikuai va'e ha'e va'e ayvu ha'e javi oendu teĩ peteĩve ma voi nonhemboaxyi, oao nomondoroi guive.

²⁵ Ha'e rami avi Elnatã, Delaías ha'e Gemarias ma kuaxia para oapy e'ŷ aguã re huvixa reve onhea'ã okuapy teĩ ha'e kuery ayvu re ndojapyxakai.

²⁶ Ha'e rami 'rãgue py ijayvu Hameleque ra'y Jerameel pe, ha'e Azriel ra'y Seraías ha'e Abdeel ra'y Selemias pe, ha'e kuery ombo'a aguã kuaxia mboparaare Baruque ha'e profeta Jeremias. Ha'e rami teĩ SENHOR onhomi voi.

Teĩgue ju Baruque kuaxia omboparaague

²⁷ Ha'e ramo kuaxia Jeremias ijayvuague Baruque ombopara va'ekue huvixa oapypa ma rire teĩgue ju SENHOR oayvu ombou Jeremias pe. Ha'e vy aipoe'i:

²⁸ “Ejou kuaxia onhemama va'e mboae, ha'e va'e re ju embopara uka jypygua Judá pygua huvixa Jeaquim oapy va'ekue re oĩague ha'e javi rami.

²⁹ Judá pygua huvixa Jeaquim pe aipo're 'rã guive: Po rami ijayvu SENHOR: Ndee ma kuaxia onhemama va'e reapy vy aipo're va'ekue: ‘Mba'e re tu rembopara Babilônia pygua huvixa ou vy kova'e yvy ombovaipa, ha'e avakue ha'e mymba kuery omomba 'rãa rami?’ 're va'ekue.

³⁰ Ha'e nunga rupi po rami SENHOR ijayvu ndee Judá pygua huvixa Jeaquim rekorã re: ‘He'ögue ma omomboa 'rã, ara py kuaray ojopea py rive itui aguã, pyávy yro'y ho'aague rupi guive. Ha'e gui ta'y ha'e hamymino kuery neĩ peteĩve ma voi noĩ 'rã tenda Davi openaaty áry.

³¹ Mba'eta ambopaga 'rã ojejavyaty re, hamymino ha'e hembiguai kuery guive. Ha'e rami vy hi'áry, Jerusalém ha'e Judá pygua avakue áry guive ambou 'rã xeayvu vaiague ha'e javi, noendui potai rire', he'i.”

³² Ha'e gui ma Jeremias kuaxia onhemama va'e mboae ojou vy omboaxa Nerias ra'y kuaxia mboparaaty Baruque pe. Ha'e ramo ha'e ju ombopara Jeremias ayvu kuaxia Judá pygua huvixa Jeaquim oapy va'ekue re oĩague ha'e javi rami. Omombe'uve ju ayvu mboae jypygua ramigua.

37

Nhuã py Jeremias ombotya ague

¹ Ha'e gui ma Jeaquim ra'y Conias rekovia Babilônia pygua huvixa Nabucodonosor omoĩ Josias ra'y Zedequias. Ha'e ramo ha'e va'e ju opena Judá yvy re.

² Ha'e rami teĩ ndojapyxakai SENHOR oayvu profeta Jeremias omombe'u va'e re. Hembiguai kuery ha'e ijyvy re ikuai va'e voi ndojapyxakai okuapy.

³ Ha'e rami avi profeta Jeremias oĩa py huvixa Zedequias ombou Selemias ra'y Jucal ha'e Maaséias ra'y sacerdote Sofonias, ixupe ojerure vy “ SENHOR Nhanderuete pe ejapukai, ha'e eporandu ke orere”, he'i aguã.

⁴ Ha'e jave ma Jeremias oiko porã rei heta va'e kuery mbyte, nombo'aai teria ja.

⁵ Ha'e e'ŷ mbove ma Egito yvy gui Faraó pegua xondaro kuery ou. Ha'e nunga omombe'ua rã caldeu kuery oendu vy onheguãeba Jerusalém tetã ojokoague gui.

⁶ Ha'e ramo profeta Jeremias pe SENHOR oayvu ombou:

⁷ “Po rami ijayvu SENHOR Israel kuery Ruete: Po rami 'rã peẽ kuery pembovai Judá pygua huvixa pe, xevy pe ojerure uka aguã penembou rire: ‘Ne'exa, Faraó pegua xondaro kuery penderepyarã ou va'ekue ri ojevypa rive ju 'rã Egito yvy katy.

⁸ Ha'e ramo caldeu kuery ma oupa ju vy opu'ã 'rã okuapy kova'e tetã re. Ha'e rami vy tetã re oipe'a ha'e oapypa 'rã', peje 'rã.

⁹ Mba'eta po rami SENHOR ijayvu: ‘Pejekore eme “Caldeu kuery oopa 'rã ri nhanderekoa gui”, pejea py. Mba'eta ha'e kuery ndojep'e ai 'rãe.

¹⁰ Mba'eta caldeu regua xondaro kuery penderovai opu'ã va'e peitypa teĩ ae ma, ha'e kuery va'e regua mbovy'i ojuka rai'i pyre anho optya va'e rire peteĩ-teĩ oguy'i py ituiague gui opu'ã vy oapypa 'rāgue kova'e tetā', he'i."

¹¹ Ha'e gui caldeu regua xondaro kuery ma Faraó kuery oua omombe'ua rā oendu vy onheguāemba ranhe Jerusalém tetā gui.

¹² Ha'e va'e rire Jerusalém gui Jeremias oo ta Benjamim yvy katy, peteĩ yvy ojeupe guarā ojopy aguā hetarā kuery rekoya py itui va'e.

¹³ Ha'e vy Benjamim yvy rape rokē py ovaẽ jave ha'e py oĩ peteĩ xondaro ruvixa Jerias hery va'e, Selemias ra'y, Hananias ramymino va'e. Ha'e va'e ma profeta Jeremias ojoko vy aipoe'i:

— Ndee tu rejava ta rima reovy caldeu kuerya katy — he'i.

¹⁴ Jeremias ombovai:

— Apua rima, xee ndajavai caldeu kuerya katy — he'i. Ha'e rami teĩ ijayvua re Jerias ndojapyxakai. Ha'e rami vy Jeremias oipokuaa vy ogueraa yvatekueve ikuiaia py.

¹⁵ Ha'e ramo yvatekueve ipoxypa okuapy Jeremias pe. Ha'e vy oinupā ukapa vy omboty nhuā py kuaxia mboparaaty Jônatas ro py, nhuārā ju oejaa rire.

¹⁶ Opy ja'o'i Jeremias omoinge rire mbovy ára rei e'ŷ oĩ ha'e py.

¹⁷ Ha'e rire ma huvixa Zedequias ogueru ruka ju ngoo py. Ha'e vy nhemi rupi oporandu ixupe:

— Oĩ 'rā pa ayvu SENHOR ombou va'ekue?

Jeremias ombovai vy

— Oĩ rima. Nemboaxaa 'rā Babilônia pygua huvixa po py — he'i.

¹⁸ Jeremias aipoe'ive ju huvixa Zedequias pe:

— Mba'e py tu ajejavý raka'e nderovai, nerembiguai kuery, e'ŷ vy heta va'e kuery rovai, nhuā py xemboty uka aguā?

¹⁹ Mba'eta mamo tu aŷ ikuai profeta ramigua kuery pendevy aipoe'i va'ekue: "Babilônia pygua huvixa ndoui 'rā peẽ kuery re, neĩ kova'e yvy re opu'ã aguā", 'eare kuery?

²⁰ Ha'e nunga rupi aŷ xeruvixa, endu ke. Tove ajerurea toiko. Xemondouka eme ju kuaxia mboparaaty Jônatas ro katy, ha'e py amano e'ŷ aguā — he'i.

²¹ Ha'e ramo huvixa Zedequias ogueraa uka Jeremias harõa kuery ikuaiaty roka py ju optya aguā. Ára nhavõ ixupe ogueru ruka guive peteĩ mbojape, mbojape apoa gui ae, tetā rupi mbojape jipovei peve. Ha'e rami py harõa kuery ikuaiaty roka py Jeremias optya.

38

Yy kuarā va'ekue gui Jeremias ogueraa jepea ague

¹ Ha'e gui ma Matã ra'y Sefatias, Pasur ra'y Gedalias, Selemias ra'y Jucal ha'e Malquias ra'y Pasur oendu okuapy ayvu Jeremias heta va'e kuery pe omombe'u oikovy va'e. Mba'eta aipoe'i:

² "Po rami SENHOR ijayvu: Kova'e tetā py optya va'e kuery omano 'rā ma kyxe py, karuai ha'e mba'eaxy vaikue gui. Ha'e rā caldeu kuerya katy oo va'e ma oikove 'rā. Ha'e rami vy guekove reve 'rā oo jepe, oikove 'rā.

³ Po rami SENHOR ijayvu: Kova'e tetā omboaxaa ma 'rā Babilônia pygua huvixa pegua xondaro kuery po py. Ha'e rā ha'e kuery oipe'apa 'rā", he'i va'ekue Jeremias.

⁴ Ha'e ramo yvatekueve aipoe'i huvixa pe:

— Peva'e ava tomano, mba'eta ha'e rami ijayvu ramo heta va'e kuery joe opu'ã va'e ha'e kova'e tetā py ikuai va'e ha'e javi oendu vy ipo ikangypa 'rā. Mba'eta peva'e ava ma ndojapo porai 'rā heta va'e kuery pe, ojapo vai 'rā anho.

⁵ Huvixa Zedequias ombovai:

— Ne'exa, pendepo py Jeremias oĩ. Penderuvixave aiko va'eri mba'eve ndajapoi 'rā peẽ kuery peipotaa rami e'ŷ — he'i.

⁶ Ha'e rami rā ha'e kuery Jeremias ogueraa vy omombo peteĩ yguarā ojo'o pyre, huvixa ra'y Malquias pegua py, harõa kuery ikuaiaty roka py ae. Ha'e va'e py ma omboguejy

peteī ixā py. Yguarā ojo'o pyre py ma yy jipoi, yapo rive oī. Ha'e ramo Jeremias ipija ovy yapo py.

⁷ Huvixa ropy oī peteī Etiópia pygua Ebede-Meleque hery va'e, eunuco oiko. Ha'e va'e ma oendu Jeremias yguarā ojo'o pyre py omboguejyague omombe'ua rā. Ha'e javē py huvixa oguapy oiny oka py, Benjamim yvy rape rokē py.

⁸ Ha'e gui Ebede-Meleque ma huvixa ropy gui oē ovy vy aipoe'i ixupe:

— Xeruvixa, profeta Jeremias re avakue ojapo vai ete, yguarā ojo'o pyre py omombo vy. Mba'eta ha'e py oīa py omano 'rā karuai gui, tetā py mbojape jipovei ramo.

¹⁰ Ha'e ramo huvixa ma Etiópia pygua Ebede-Meleque ombovai vy aipoe'i:

— Tereo, eraa trinta avakue apy gui, ha'e enoē profeta Jeremias yvykua gui, omano e'ŷ aguā — he'i.

¹¹ Ha'e ramo Ebede-Meleque ma avakue ogueraa vy oo ranhe huvixa ropy ja'o mba'emo omoī porāaty guýry oī va'e py. Ha'e vy ao ymague ha'e ajukue ra'ykue-'ykue ojou vy ogueraa ha'e gui. Ha'e rami vy ixā rupi ha'e nunga omboguejy Jeremias oīa peve.

¹² Ha'e rami vy Etiópia pygua Ebede-Meleque aipoe'i Jeremias pe:

— Aŷ ma ndejyva guy rupi emōī upē va'e ao ymague ha'e ajukue ra'ykue, ha'e ejavoa ixā ha'e va'e py — he'i ramo Jeremias ojapo ha'e rami.

¹³ Ha'e rami vy ixā re omoatā heruvy vy oguenoē okuapy Jeremias yvykua gui. Ha'e rire xondaro harōa kuery ikuaiaty roka py ju Jeremias oiko.

Profeta pe Zedequias oporanduague

¹⁴ Ha'e gui ma huvixa Zedequias oīa py ogueru ruka profeta Jeremias, mboapya okē SENHOR pegua opy oikea va'e py. Ha'e vy aipoe'i ixupe:

— Peteī re ma aporandu ta ndevy. Emombe'u e'ŷ eme mba'eve — he'i.

¹⁵ Jeremias ombovai Zedequias:

— Ha'e gui ndevy pe amombe'u rā ndaxejukai 'rā ri ty'y? Xee romongeta ramo ndee nerendu potai 'rā guive — he'i.

¹⁶ Ha'e ramo Zedequias oura Jeremias pe ha'e kuery ae'ia py. Ha'e vy aipoe'i:

— Ha'e rami avi anhetē ete SENHOR oikove va'e nhanderekoverā me'ēa rery rupi aura vy aipoa'e: Xee ndorojukai 'rā, noromboaxai 'rā guive avakue ndejukaxeia kuery po py.

¹⁷ Ha'e gui ma Jeremias aipoe'i Zedequias pe:

— Po rami ijayvu SENHOR ixondaro reta va'e, Israel kuery Ruete: Babilônia pygua yvatekueve re reaxa ri vy reikove 'rā, kova'e tetā ndokai 'rā guive. Ndero pygua kuery reve peikovepa 'rā.

¹⁸ Ha'e rā Babilônia pygua huvixave rembiguai yvatekueve re ndereaxai ri ramo kova'e tetā amboaxa 'rā caldeu kuery po py. Ha'e ramo oapypa 'rā, ha'e ndee voi ndereo jepei 'rā ha'e kuery po gui — he'i.

¹⁹ Ha'e ramo huvixa Zedequias aipoe'i Jeremias pe:

— Ha'e rami avi xee akyje nhaneretarā judeu kuery caldeu kuery re oaxa va'ekue gui. Mba'eta ha'e kuery po py Babilônia pygua kuery xemboaxa ramo xeavyky rei 'rā okuapy — he'i.

²⁰ Jeremias ombovai:

— Any, nanemboaxai 'rāe. Endu ke SENHOR ijayvua ndevy amombe'u va'e, ajerure. Ha'e rami vy 'rāe reo porā, reikove guive.

²¹ Ha'e rā ha'e kuerya katy ndereoi ri ramo pova'e ae ayvu SENHOR xevy oikuua uka va'ekue:

²² “Ne'exa, kunhague Judá pygua huvixa ropy opyta va'e ogueraapaa 'rā Babilônia pygua huvixa rembiguai kuery yvatekueve peguarā. Ha'e ramo ha'e va'e kunhague aipoe'i 'rā ndevy: ‘Neirū kuery ae'i nembotavy vy ipo'aka okuapy ndere. Ha'e gui aŷ ndepy yapo py ipija ma ramo ha'e kuery nderejapa’, he'i 'rā okuapy.

²³ Ha'e ramo py ndea pygua kunhague ogueraapaa 'rā caldeu kuery peguarā, ndera'y kuery guive. Ndee voi ndereo jepei 'rā ha'e kuery po gui. Ha'e ramo 'rāgue py Babilônia pygua huvixa opo py ae 'rā nembo'a, ha'e ramo ndekáuxa ae kova'e tetā oapypaa 'rā”, he'i.

²⁴ Ha'e ramo Zedequias aipoe'i Jeremias pe:

— Avave rei toikuua eme jajogueroayvuague. Ha'e rami e'ŷ vy remano 'rã.

²⁵ Ha'e gui xapy'a rei yvatekueve oendu 'rã ndereve xeayvuague, ha'e ndea py ou vy aipoe'i 'rã ndevy: "Emombe'u ke aŷ huvixa reve ndeayvuague, ndereve ijayvuague guive. Mba'eve emombe'u e'ŷ eme orevy. Ha'e rami e'ŷ ramo rojuka 'rã", he'i okuapy ramo

²⁶ aipo're 'rã ha'e kuery pe: "Xee rima ajerure huvixa pe Jônatas ro py xemondouka ju e'ŷ aguã, ha'e py amano e'ŷ aguã", 're 'rã.

²⁷ Ha'e va'e rire yvatekueve Jeremias-a py ovaẽmba vy oporandu okuapy ixupe. Ha'e ramo ha'e kuery pe ombovai huvixa ijayvuague ha'e javi rupi. Ha'e ramo oeja porã ju, mba'eve ndoikuuai vy.

²⁸ Ha'e gui Jeremias ma xondaro harõa kuery ikuaiaty roka py oiko, Jerusalém tetã oipe'aa ára peve.

39

2 Reis 24.20-25.12; 2 Crônicas 36.17-21; Jeremias 52.1-16

¹ Po ramo Jerusalém tetã oipe'aa raka'e. Nove ma'etý ha'e dez jaxy re ma Judá pygua huvixa Zedequias oĩ jave py ou Babilônia pygua huvixa Nabucodonosor oxondaro kuery ha'e javi reve. Jerusalém tetã re ou vy ojokopa okuapy.

² Ha'e gui onze ma'etýha'e irundy jaxy re, nove araa py ma ombokua okuapy tetã kora.

³ Ha'e ramo vy Babilônia pygua huvixa rembiguai kuery yvatekueve oikepa vy oguapy okuapy Okẽ Mbyteguia py. Ha'e va'e kuery ma Nergal-Sarezer, Sangar-Nebo, Sarsequim, Rabe-Saris, Nergal-Sarezer, Rabe-Mague ha'e Babilônia pygua huvixa rembiguai yvatekueve ha'e javi.

⁴ Ha'e kuery oike rã Judá pygua huvixa Zedequias oexa vy ojava ojeupeguavakue opu'ãa pygua ha'e javi reve. Pyávy oẽmba tetã gui. Huvixa pegua yvotyty via tape rupi oo, mokoĩ kora mbyte py okẽ oĩ va'e rupi. Ha'e rã Zedequias ma yvy joja reia via rupi oo.

⁵ Ha'e ramo caldeu regua xondaro kuery huvixa Zedequias rakykue oje'oi vy oupity Jericó katy'i nhuündy oĩ va'e py. Ha'e vy ombo'a vy Ribla tetã py ogueraa, Hamate yvy re. Babilônia pygua huvixa Nabucodonosor oĩa py ogueraa. Ha'e ramo ha'e va'e ju ijayvu ombopaga aguã re.

⁶ Ha'e ramo vy Babilônia pygua huvixa Ribla pyve ju ojuka uka Zedequias ra'y kuery, tuu oexaa py. Ojuka uka avi Judá regua yvatekueve.

⁷ Ha'e gui ma omombu Zedequias rexajoavaive, ha'e mokoĩ corrente overa va'e guigua py ojokua vy Babilônia katy ogueraa.

⁸ Ha'e gui ma Jerusalém tetã py caldeu kuery oapypa huvixa ro, ha'e pygua kuery ro ha'e javi guive. Oitypa avi tetã kora.

⁹ Ha'e py ikuai amongue tetã py optya va'ekue, ojejopy uka ha'e heta va'e kuery okuave va'e. Ha'e kuery majopya kuery ruvixa Nebuzaradã escravo-rã ogueraapa Babilônia katy.

¹⁰ Ha'e rã Judá yvy re iporiaukue'i, mba'eve ndoguerekoi va'e ma jopya kuery ruvixa Nebuzaradã oeja ijyvy re ae. Ha'e va'e jave py ha'e kuery pe omboaxa uvaty ha'e mba'ety.

Jeremias re Nabucodonosor opena porã ukaague

¹¹ Ha'e gui Jeremias re ma Babilônia pygua huvixa Nabucodonosor opena uka ma voi va'ekue jopya kuery ruvixa Nebuzaradã pe. Ha'e vy ixupe aipoe'i:

¹² "Eraa Jeremias nderupive, epena porã guive hexe. Mba'eve py ejapo vai eme hexe. Ha'e rami 'rãgue py erekha'e ae ijayvua rami", he'i va'ekue.

¹³ Ha'e rami ae ju jopya ruvixa Nebuzaradã ijayvu guembiguai kuery Nebusazbã, Rabe-Saris, Nergal-Sarezer, Rabe-Mague ha'e Babilônia pygua huvixa rembiguai kuery yvatekueve ha'e javi pe.

¹⁴ Ha'e ramo ogueraa uka Jeremias harõa kuery ikuaiaty roka py oĩague gui. Ha'e vy omboaxa Aicão ra'y Gedalias, Safã ramymino va'e pe, hoo py ae ogueraa aguã. Ha'e ramo oiko tema heta va'e kuery mbyte.

¹⁵ Harõa kuery ikuaiaty roka py teri Jeremias oĩ jave ixupe SENHOR oayvu ombou vy aipoe'i va'ekue:

¹⁶ “Tereo, ndeayvu Etiópia pygua Ebede-Meleque pe. Ha'e vy aipo're 'rã ixupe: ‘Po rami ijayvu SENHOR ixondaro reta va'e, Israel kuery Ruete: “Ne'exa, kova'e tetã re xee ambou 'rã xeayvu vaiague, aroayvu porãague nda'ei. Ndee ae rexaa py ojeupitypa 'rã ha'e va'e ára.

¹⁷ Ha'e rã ndee ma rogueraa jepe 'rã ha'e va'e ára”, he'i SENHOR. “Avakue rekyjea va'e po py nanemboaxaai 'rã.

¹⁸ Mba'eta rogueraa jepe 'rãe, ndorojuka ukai 'rã kyxe py. Xere rejerovia va'e vy reraa jepe 'rã nderekove”, he'i.”

40

Gedalias openaa py Jeremias ha'e okuave va'e kuery ikuaiague

¹ Ha'e gui ma Jeremias pe SENHOR oayvu ombou Ramá tetã py jopya kuery ruvixa Nebuzaradã opoi ju rire. Mba'eta ha'e vale jave py Jerusalém ha'e Judá gui Babilônia katy ogueraa pyre kuery mbyte Jeremias avi oĩ corrente py ojokua reve.

² Ha'e gui jopya kuery ruvixa ma Jeremias ojou vy aipoe'i ixupe:

— SENHOR nderuete ma kova'e teko re ha'e rami ete oiko aguã re ijayvu va'ekue.

³ Ha'e nunga ma SENHOR ombou ete, ijayvuague ojapo vy. Peẽ kuery SENHOR rovai pejejavy, ha'e ijayvua napendui rire ha'e nunga ha'e javi oiko pendere.

⁴ Ha'e gui aÿ ma ne'exa, kova'e ára ropoi 'rã ndepo joavaive corrente py ndejokuaague gui. Babilônia tetã katy reoxe ri vy ke eju, ha'e ramo xee apena porã 'rã ndere. Ha'e rã xerupive Babilônia katy ndereoxei ri ramo ha'eve avi. Ne'exa, kova'e yvy ha'e javi itui nerendir. Reoxea katy rei ha'eve reo aguã, tereo ha'e katy ae — he'i.

⁵ Jeremias nombovai voi ramo huvixa aipoe'ive ju:

— Ejevy ju ha'vy Aicão ra'y Gedalias, Safã ramymino va'e ro py. Ha'e va'e ma Babilônia pygua huvixa omoñ Judá regua tetã pygua kuery ruvixarã. Eiko hexeve ae, neretarã kuery mbyte. Ha'e rami e'ÿ vy amboae katy reoxe vy ke ha'e katy tereo — he'i. Ha'e rami vy ixupe jopya kuery ruvixa ome'ë rive'i mba'emo, tembi'u guive. Ha'e rami vy omondouka.

⁶ Ha'e ramo Jeremias ma Mispa tetã py oo Aicão ra'y Gedalias oña py. Ha'e va'e oña py ju oiko, heta va'e kuery oyvy re optya va'ekue mbyte.

⁷ Tetã rovai rupi ikuai teri Judá pygua xondaro kuery huvixa kuery reve. Ha'e kuery oendupa okuapy Babilônia pygua huvixa omoñague Aicão ra'y Gedalias yvy re opena va'erã. Ikuai avi Babilônia katy ndogueraapaaai va'ekue avakue, kunhague, kyrigue ha'e iporiaukue'i, oyvy re ae optya va'ekue. Ha'e kuery ma Gedalias po py pavẽ omboaxaague xondaro kuery oendu vy

⁸ oupa Mispa py Gedalias oña py. Po rami ma ou va'ekue rery: Netanias ra'y Ismael, Careá ra'y kuery Joanã ha'e Jônatas, Tanumete ra'y Seraías, Netofa pygua Efai ra'y kuery, Maaca pygua ra'y Jazanias ha'e hexeveguia avakue ha'e javi.

⁹ Ha'e va'e kuery ha'e hexeveguia avakue pe Aicão ra'y Gedalias, Safã ramymino va'e oura. Ha'e vy aipoe'i ha'e kuery pe:

— Peteñive henda py pekyje eme caldeu kuery gui. Pendekuai tema nhandeyvy re, pemba'epo Babilônia pygua huvixa pe. Ha'e rami vy pendekuai porã 'rã.

¹⁰ Ha'e gui xee ma apyta 'rã Mispa py, caldeu kuery nhanda py ou va'ekue ayvu rupi apena aguã. Ha'e rã peẽ ma pemono'õ vinho-rã, ha'e gui kuaray puku jave py ma hi'a ha'e azeite-rã pemono'õ. Pemboyu 'rã hyrurã pereko va'e py. Ha'e rami vy 'rã pendekuai tetã pendekoague py ae — he'i.

¹¹ Ha'e rami ae avi Moabe yvy re judeu kuery ikuai va'e, Amom ramymino kuery mbyte, Edom ha'e yvy ha'e javi rupi ikuai va'e avi oendu okuapy Babilônia pygua huvixa oejaague Judá regua okuave va'ekue. Oendu avi Aicão ra'y Gedalias, Safã ramymino va'e ha'e kuery re opena va'erã omoñague.

¹² Ha'e rami oendu vy ojevypa ju opa rupi omoaña ague gui. Judá yvy re ju ou, Mispa tetā py Gedalias oña py. Ha'e rami vy omono'õ reta okuapy uva, kuaray puku jave py hi'a va'e guive.

Gedalias rovai Ismael opu'ãague

¹³ Ha'e gui Careá ra'y Joanã ha'e xondaro ruvixa kuery nhuündy rupi ikuai va'ekue ou okuapy Mispa tetā py Gedalias oña py.

¹⁴ Ha'e vy ixupe aipoe'i okuapy:

— Reikuua pa Amom kuery ruvixa Baalis ombouague Netanias ra'y Ismael ndejuka aguã? — he'i tei Aicão ra'y Gedalias ndogueroviai.

¹⁵ Ha'e ramo Careá ra'y Joanã ma Mispa pyve ijayvu Gedalias pe ha'e ae'ia py. Ha'e vy aipoe'i:

— Aÿ ma aa 'rã nhemi rupi Netanias ra'y Ismael ajuka aguã. Mba'e re tu ha'e ou 'rã ndejuka aguã? Ha'e rami ri ramo Judá kuery ndereve ikuai va'e ha'e javi oaimb'a 'rã, Judá regua okuave va'ekue okanhymba 'rã guive — he'i.

¹⁶ Ha'e rami tei Aicão ra'y Gedalias ombovai vy aipoe'i Careá ra'y Joanã pe:

— Ejuka eme. Mba'eta Ismael rovai ndeayvua ma anhetẽ e'ŷ.

41

¹ Ha'e gui sete jaxya py Netanias ra'y Ismael ou. Ha'e va'e ma Elisama ramymino va'e oiko, huvixa ro pyguare. Ngupive ogueru avi dez avakue huvixa rembiguai kuery. Mispa tetā py ovaemb'a Aicão ra'y Gedalias oña py. Ha'e rami vy hexeve okaru okuapy Mispa py.

² Ha'e jave py Netanias ra'y Ismael dez avakue ngupiveguia kuery reve opu'ã vy kyxe py ojuka Aicão ra'y Gedalias, Safã ramymino va'e, yvy re opena va'erã Babilônia pygua huvixa omoi va'ekue.

³ Mispa py Ismael ojuka avi judeu kuery Gedalias rewegua ikuai va'ekue ha'e javi, caldeu kuery joe opu'ã pygua ha'e py ikuai va'ekue guive.

⁴ Gedalias ojukaague avave rei ndoikuuai ranhe jave ko'ë ju

⁵ ha'e py ovaë avakue Siquém, Siló ha'e Samaria tetā gui. Oitenta avakue ou guendyva onhopimba reve, oao omondoropa ha'e onhekiximba rei reve guive.* Ha'e va'e kuery ogueru okuapy tembi'u ha'e heakuã porã va'e SENHOR pegua opy ome'ë va'erã.

⁶ Ha'e ramo Netanias ra'y Ismael ma ha'e kuery ovaexí vy oë Mispa tetā gui. Ojae'o reve oo. Ha'e rami vy ovaexí vy aipoe'i ha'e kuery pe:

— Peju ke Aicão ra'y Gedalias oña py — he'i.

⁷ Ha'e gui tetā mbyte peve ha'e kuery ovaë ramo Netanias ra'y Ismael ngupiveguia kuery reve ojukapa. Ha'e vy tetekue omombopa yvykua oï va'e py.

⁸ Ha'e rã ha'e kuery va'e regua dez avakue okuave va'e aipoe'i okuapy Ismael pe:

— Orejuka eme, mba'eta roguereko trigo, cevada, azeite ha'e ei romoï porã va'ekue. Petei mba'ety py ma ronhomni — he'i okuapy. Ha'e ramo ojuka e'ŷ re oeja, amboae kuery ojukaague rami e'ŷ.

⁹ Yvykua Gedalias rewegua avakue re'õgue Ismael omomboague ma huvixa Asa ojo'o va'ekue, hexe Israel pygua huvixa Baasa opu'ã ramo ojoko aguã. Ha'e va'ekue ae ju Netanias ra'y Ismael omonye te'õgue.

¹⁰ Ha'e gui Mispa tetā py optya va'ekue Ismael ogueraapa oipokua reve, huvixa rajy kuery ha'e heta va'e kuery Mispa py optya va'ekue ha'e javi. Ha'e va'e kuery re jopya kuery ruvixa Nebuzaradã opena ukaague Aicão ra'y Gedalias pe. Ha'e kuery ae Netanias ra'y Ismael ogueraapa oipokua reve. Amom ramymino kuery yvy katy oo.

Oipokuaa reve ogueraa pyre kuery Joanã ogueraa jepopaague

¹¹ Ha'e nunga Careá ra'y Joanã oendu, hexeveguia xondaro ruvixa kuery ha'e javi voi. Netanias ra'y Ismael ojapo vaiague ha'e kuery oendu vy

* 41:5 Ha'e rami ha'e kuery ikuai Jerusalém tetā ombovipaague re ipy'a vai vy.

¹² ogueraa ojeupegua avakue ha'e javi. Ha'e vy oje'oi Netanias ra'y Ismael re opu'ã aguã. Ha'e vy ojeupity yupa tuvixa va'e Gibeão py oĩ va'e yvýry.

¹³ Ha'e ramo heta va'e kuery Ismael ogueraa va'ekue ma Careá ra'y Joanã ha'e hupivegua xondaro ruvixa kuery ou rã oexa vy ový'a rei okuapy.

¹⁴ Ha'e rami vy Mispa gui Ismael oipokua reve ogueraa va'ekue ojevy vy oopa okuapy Careá ra'y Joanã-a katy.

¹⁵ Ha'e rã Netanias ra'y Ismael ma oo jepe Joanã gui. Oito avakue reve oo Amom ramymimo kuery yvy re.

¹⁶ Ha'e gui Careá ra'y Joanã ha'e hexevegua xondaro ruvixa kuery ogueru ju heta va'e kuery Netanias ra'y Ismael oipokua reve Mispa gui ogueraa va'ekue, Aicão ra'y Gedalias ojuka ma rire. Ha'e va'e kuery ma avakue ipy'a guaxukueve joe opu'ãa pygua, kunhague, kunumigue'i ha'e eunuco kuery Gibeão py ojou vy ogueraa va'ekue.

¹⁷ Ha'e kuery ogueraa vy optya ranhe Gerute-Quimã tekoa Belém katy'i oĩ va'e py, Egito yvy katy ojavaxe vy

¹⁸ caldeu kuery gui. Mba'eta okyje rei okuapy, mba'eta Aicão ra'y Gedalias yvy re opena va'erã Babilônia pygua huvixa omoõ va'ekue ri Netanias ra'y Ismael ojuka rire.

42

Egito katy heta va'e kuery oo e'ý aguã re Jeremias ijayvuague

¹ Ha'e gui Careá ra'y Joanã reve xondaro ruvixa kuery ovaẽmba, Hosaías ra'y Jezanias ha'e heta va'e kuery ha'e javi, yvatekueve ha'e yvyigüeve voi.

² Ha'e rami vy aipoe'i okuapy profeta Jeremias pe:

— Ndevy pe rojerure SENHOR Nderuete pe reporandu aguã orere ha'e kova'e kuery okuave'i va'e ha'e javi re. Mba'eta heta orekuai va'ekue ri mbovy'i aÿ orekuai, nderexa py ae rexaa rami.

³ Eporandu ke SENHOR Nderuete pe orevy oikuaa uka aguã tape marã katy roo aguã, ha'e mba'e pa rojapo aguã re — he'i.

⁴ Ha'e ramo ha'e kuery pe profeta Jeremias aipoe'i:

— Pendeayvua xee roendu ma vy aporandu 'rã SENHOR Penderuete pe pendeayvuague rami. Pendevy guarã SENHOR ijayvua ha'e javi ma amombe'u porã 'rã pendevy. Pendevy namombe'u e'ýi 'rã mba'eve — he'i.

⁵ Ha'e kuery aipoe'ive ju Jeremias pe:

— Ha'e gui SENHOR Nderuete ayvu orevy guarã ndevy ombou va'e ndorojapopai ri ramo tove SENHOR anhetã rupi ha'e ojeroviapy oikoa rupi topu'ã orerovai.

⁶ Ijayvua iporã e'ý vy ipoyi va'e teñ ronhe'ë rendu 'rã SENHOR Nhanderuete, ixupe ndevy roporandu uka rire. SENHOR Nhanderuete ronhe'ë rendu 'rã oremoingo porã aguã — he'i okuapy.

⁷ Ha'e gui ma dez araa py SENHOR oayvu ombou Jeremias pe.

⁸ Ha'e ramo oenoõ Careá ra'y Joanã, hexevegua xondaro ruvixa kuery ha'e heta va'e kuery ha'e javi, yvyigüeve ha'e yvatekueve voi.

⁹ Ha'e vy aipoe'i ha'e kuery pe:

— Po rami ijayvu SENHOR Israel kuery Ruete, henonde peẽ kuery xevy pejerure uka rire.

¹⁰ “Kova'e yvy re ri pepytá ramo romboyvate 'rã, roity 'rã nda'ei. Xee ronhoty 'rã, noromondorovei 'rã guive, mba'eta xee nda'evei aiko mba'emo vai pendere ambouague re.

¹¹ Pekyje eme guive Babilônia pygua huvixa gui, pekyjeague rami e'ý. Pekyjeve eme ixugui, mba'eta xee ae aiko 'rã peẽ kuery reve, rogueraa jepe ha'e ipo gui roipe'a aguã”, he'i SENHOR.

¹² “Ha'e rami vy xee roipytyvõ 'rã, romboaxya rupi roguereko 'rã pendeyvy re ae penderekao aguã.

¹³ Ha'e rami avi xapy'a rei ‘Oreyvy re ndoropytai 'rã’ peje 'rã, xapy'a rei SENHOR Nhanderuete ayvu napendui vy

¹⁴ aipopeje 'rā: 'Any, Egito yvy re 'rā roo, mba'eta ha'e py ma ndoroexavei 'rā joe opu'ā va'e, noroenduvei 'rā guive mimby guaxu pu, ha'e mbojape ndoatavei 'rā orevy. Ha'e py ae 'rā orekuai', peje 'rā.

¹⁵ Ha'e rami ri aipopeje ramo aŷ pejapyxaka SENHOR ayvu re, Judá pygua pekuave'i va'e. Po rami ijayvu SENHOR ixondaro reta va'e, Israel kuery Ruete: Egito yvy re penderekoa aguā katy peo aguā pendejee pemoĩ ete ramo

¹⁶ pova'e nunga oiko 'rā pendere: kyxe reveguia pekyjeague penderupity 'rā Egito yvy re, karuai pekyjeague voi penderakykue monha 'rā, ha'e py pemanomba aguā rami.

¹⁷ Ha'e ramigua ae 'rā oiko avakue Egito katy oo aguā ojee omoĩ va'e ha'e javi re. Ha'e kuery omanomba 'rā kyxe gui, karuai ha'e mba'eaxy vaikue gui. Ha'e kuery va'e regua ndokuavei 'rā peteīve, ndoo jepei 'rā mba'emo vai ha'e kuery áry ambou va'e gui."

¹⁸ Mba'eta po rami ijayvu SENHOR ixondaro reta va'e, Israel kuery Ruete: "Jerusalém pygua kuery áry xepoxya ha'e ajou vaia amboague rami avi pende'áry voi ambou 'rā xepoxya, Egito katy peo ramo. Ayvu vaipy 'rā peiko, nhomondyipaarā guive. Pendeavykya rei 'rā, napendejou porāavei 'rā. Ha'e ramo ndapexavei 'rā kova'e teko." "

¹⁹ Mba'eta Judá regua pekuave'i va'e, pendevy pe SENHOR "Tapeo eme Egito katy" he'i rire penderexarai eme kova'e ára pendevy xeayvuague re.

²⁰ Mba'eta peẽ ma penderekove rekoria ae pejekore, mba'eta SENHOR Penderuete pe aporandu aguā peju vy aipopeje va'ekue: "Eporandu orere SENHOR Nhanderuete pe. Ha'e gui orevy pe emombe'u ju SENHOR ijayvuague ha'e javi. Ha'e ramo ma rojapopa 'rā", peje va'ekue ri.

²¹ Ha'e rami teĩ ha'e nunga ha'e javi aŷ peẽ kuery pe amombe'u porā teĩ ndapejapyxakai pekuapy SENHOR Penderuete peteīve ayvu pendevy amombe'u va'e re voi.

²² Ha'e nunga rupi aŷ gui ma peikuaa pota porā pova'e re: Pemanomba 'rā kyxe gui, karuai ha'e mba'eaxy vaikue gui, Egito yvy re penderekoa aguā peoxeague py ae.

43

Egito katy heta va'e kuery Jeremias ogueraa okuapyague

¹ Ha'e rami py heta va'e kuery pe Jeremias omombe'upā SENHOR Nguuete ijayvuague ha'e javi, SENHOR Tuuete omombe'u aguā ombou va'ekue.

² Ha'e ramo Jeremias pe ijayvu okuapy Hosaías ra'y Azarias, Careá ra'y Joanā ha'e avakue onhemboyvate rei va'e. Ha'e vy aipoe'i okuapy:

— Po rami ndeavvua ma apu, mba'eta SENHOR Nhanderuete nanemboui aipo're aguā: "Peo eme Egito katy penderekoa aguā ha'e py", 're aguā.

³ Nerias ra'y Baruque rima nembo'e ra'e orerovai, caldeu kuery po py oremboaxa aguā, ha'e kuery orejukapa, e'ŷ vy Babilônia katy escravo-rā orereraapa aguā — he'i okuapy.

⁴ Ha'e rami py Careá ra'y Joanā nonhe'ē rendui SENHOR Judá yvy re optya aguā, xondaro ruvixa kuery, neĩ heta va'e kuery voi.

⁵ Ha'e rami 'rāgue py Careá ra'y Joanā ha'e xondaro ruvixa kuery ogueraapa Judá regua kuery okuave'i va'ekue. Ha'e javi regua mbyte rupi ojavapaague gui ojevypa va'ekue Judá yvy re ju ikuai aguā teĩ.

⁶ Ogueraa avakue, kunhague, kunumigue'i, ha'e huvixa rajy kuery. Ogueraa avi heta va'e kuery Aicão ra'y Gedalias, Safã ramymino va'ea py jopya kuery ruvixa Nebuzaradā oeja va'ekue ha'e javi. Ogueraa avi profeta Jeremias, Nerias ra'y Baruque guive.

⁷ Ha'e rami vy ovaẽmba Egito yvy re, SENHOR ayvu noendu potai vy. Tafnes tetā py ovaẽmba okuapy.

Egito yvy re Nabucodonosor ipo'aka aguā re Jeremias ijayvuague

⁸ Ha'e gui ma Tafnes tetā py SENHOR oayvu ombou ju Jeremias pe. Ha'e vy aipoe'i:

⁹ "Eraa ndepo py ita tuvixakueve'i, ha'e emboje'apa pyrōa yvy jykue guigua py, Faraó rokē rexel'i Tafnes py oĩ va'e py. Judeu regua avakue oexaa py ejapo.

¹⁰ Ha'e vy aipo're 'rã ha'e kuery pe: 'Po rami ijayvu SENHOR ixondaro reta va'e, Israel kuery Ruete: Ne'exa, apy ae xee ambou 'rã xerembiguai Babilônia pygua huvixa Nabucodonosor. Ha'e vy henda opena atyã amoõ uka 'rã kova'e ita amboje'a uka va'ekue áry. Ha'e ramo kova'e ita áry rupi ojapo 'rã oguy'i guenda openaaty ao'iarã.

¹¹ Ha'e va'e ou vy ombovaipa 'rã Egito yvy. Ha'e rami vy ojuka 'rã ojuka pyrã ikuai va'e ha'e javi, escravo-rã heraa pyrã ma ogueraa 'rã escravo-rã, ha'e rã kyxe py ojuka pyrã ma kyxe py ae 'rã ojukapa.

¹² Mba'eta omoendy 'rã oo Egito pygua kuery ruete peguare, oapypa 'rã. Ha'e rã mba'emo ra'angaa optyta va'e ma oipe'apa 'rã heravy. Oipe'apa 'rã heravy mba'emo Egito yvy re ikuai va'ekue, vexa'i re opena va'e kamixa puku py onhemonde ovya rami avi. Ha'e rami vy oo porã ju 'rã ha'e gui.

¹³ Omboa'ypa 'rã ita mba'emo ra'angaarã Egito yvy re omopu'ã mbyre, Bete-Semes py ikuai va'ekue. Oapypa 'rã guive oo Egito pygua kuery ruete peguare.' "

44

Egito yvy re judeu kuery ikuai va'e ojerovia e'ýa re ijayvuague

¹ Ha'e gui SENHOR oayvu ombou Jeremias pe, judeu kuery Egito yvy re ikuai va'e ha'e javi reko re, Migdol tetã py, Tafnes, Mênfis ha'e Patros yvy re ikuai va'e re guive. Ha'e vy aipoe'i:

² "Po rami SENHOR ixondaro reta va'e, Israel kuery Ruete ijayvu: Pexa ma opa mba'e vai Jerusalém ha'e Judá re tetã ikuai va'e áry ambou va'ekue. Ne'exa, aý minha tekoa ve'ý ma optyta, ha'e py ikuai va'ekue jipoavei.

³ Ha'e kuery re ha'e nunga oiko mba'emo vai anho ojapoague re. Xembopoxy rive okuapy amboae ramigua tuuete re ovapa vy, ha'e va'e pe heakuã porã va'e oapy aguã. Ha'e nunga ma teígueve voi ha'e kuery oikuaa va'ekue'ý, neĩ peẽ kuery, peneramoõ kuery voi oexa kuaa va'ekue'ý teĩ.

⁴ Xee ma ko'ë rai'i guive ha'e kuery pe ambou va'ekue xerembiguai profeta kuery, ha'e kuery pe aipoe'i aguã: 'Nda'evei guĩ nunga ojeguarupy xee ajou vai va'e pejapoa rupi pendekuai aguã', he'i aguã.

⁵ Ha'e rami teĩ ha'e kuery noendu potai, neĩ ndojapyxakai gueko vai gui ojeko rerova e'ý aguã, amboae ramigua tuuete kuery pe mba'emo oapy okuanya gui guive.

⁶ Ha'e ramo mae ambou xepoxyha'e namboaxyveia. Judá re tetã ikuai va'e áry ou, Jerusalém py tape ikuai va'e rupi guive. Ha'e ramo ombovaipa pyre, tekoa ve'ý optyta, aý minha jaexaa rami", he'i.

⁷ Aý ma po rami ju ijayvu SENHOR ixondaro reta va'e, Israel kuery Ruete: "Mba'e re tu pendejeupe ae ri pejapo vaia rupi pendekuai? Mba'eta Judá kuery mbyte gui pemokanhymba avakue, kunhague, kyrigue ha'e okambu va'e kuery voi, peẽ kuery va'e regua oikove e'ý aguã.

⁸ Mba'e re tu xembopoxy teri pekuapy mba'emo pendepo py pejapoa py rive? Mba'eta mba'emo ra'angaa pe rive 'rã peapy heakuã porã va'e Egito yvy re peoague py. Ha'e rami py peẽ ae penhemokanhy peovy, ha'e penhemoingo yvy regua kuery ojojai rei ha'e ojou vai va'erã.

⁹ Penderexarai ma teve peneramoõ kuery reko vaiague re, ha'e Judá pygua huvixa kuery avakue ha'e kunhague reko vaiague re? Penderexarai teve pendera'yxy kuery reve penderekoi vaiague re, ha'e Judá yvy re ha'e Jerusalém mbyte rupi ae pendekuaiague re?

¹⁰ Mba'eta aý peve peẽ kuery napenhemo'yvyi'i, xerenonde teĩ pejererokyje rupi e'ý pendekuai, mba'eta xeguigua lei rupi e'ý pendekuai, pendevy ha'e peneramoõ kuery pe xeayvu aeja va'ekue rupi e'ý guive."

¹¹ Ha'e rami vy SENHOR ixondaro reta va'e Israel kuery Ruete aipoe'i: "Ne'exa, aý penderovai arova 'rã xerova pendere ajapo vai aguã, Judá regua kuery amokanhymba aguã.

¹² Ha'e rami vy aipe'apa 'rā Judá regua okuave'i va'e Egito yvy re ikuai aguā onhea'ā rei va'ekue. Ha'e ramo ha'e kuery omanomba 'rā ha'e py ae. Kyxe py ojukaa 'rā, e'ŷ vy karuai gui 'rā ho'a. Kyrīgue'i ha'e tujakue'i okanhymba 'rā. Kyxe py, e'ŷ vy karuai gui omanomba 'rā. Ayvu vaipy 'rā ikuai, nhomondyipaarā, ojou vaipy ha'e ojojai reipy.

¹³ Mba'eta Jerusalém tetā re ajapoague rami ae xee ambopaga 'rā Egito yvy re ikuai va'e, kyxe, karuai ha'e mba'eaxy vaikue ambou vy.

¹⁴ Ha'e va'e gui ma mava'eve ndoo jepeai 'rā, Judá gui Egito yvy re ikuai aguā oo va'ekue regua. Ndoikoavei 'rā Judá yvy katy ojevy va'erā, ha'e katy ju ojevyxe tei. Ha'e katy ndojevyavei 'rā, amongue ete'i oo jepe va'ekue e'ŷ vy."

Jeremias ayvu ombovai atā okuapayague

¹⁵ Ha'e gui Egito yvy re Patros py heta ikuai kunhague tuuete kuery mboae pe rive heakuā porā va'e rapya kuery. Kunhague ha'e rami ikuia ma ime kuery oikuua avi. Ha'e rami vy ome kuery reve ijaty okuapy, heta va'e kuery ha'e javi reve. Jeremias pe ha'e kuery ombovai vy aipoe'i okuapy:

¹⁶ — Nhanderuete rery rupi ayvu orevy remombe'u tei ore ma ndorojapo 'rā ndeavyua.

¹⁷ Ha'e rami 'rāgue py oreayvua rami ae 'rā rojapo. Ha'e rami vy mba'emo heakuā porā va'e roapyve tema 'rā yva re orexyete oī va'e pe. Ixupe rome'ē avi 'rā mba'emo rykue orekuaiaty rami ae, oreramoī kuery ikuaiague rami guive, oreruvixave kuery ha'e yvatekueve Judá regua tetā ikuai va'e rupi ha'e Jerusalém tetā mbyte rupi ikuaiague rami. Mba'eta ha'e va'e jave ma orevyndoatai va'ekue mbojape. Roiko porā va'ekue, mba'emo vai ndoikoi guive.

¹⁸ Ha'e gui aŷ ma orexyete yva pygua pe heakuā porā va'e roapyaty gui roipytu'u rire, ha'e ixupe mba'emo rykue norome'ēvei ma rire opa mba'e oatapa orevy. Kyxe py roiko vaipa, karuai ha'e mba'eaxy vaikue gui guive.

¹⁹ Ha'e rami avi oreme kuery reve e'ŷ ri ty'y orexyete yva pygua pe rome'ē heakuā porā va'e ha'e mba'emo rykue roapy? — he'i okuapy.

Ha'e kuery ombopagaa aguā re Jeremias ijayvuague

²⁰ Ha'e ramo Jeremias ombovai heta va'e kuery ha'e javi: avakue, kunhague ha'e pavē rei ha'e rami ete ixupe ijayvu va'ekue guive. Ha'e vy aipoe'i:

²¹ — SENHOR nda'u hexarai ha'e ndoikuua potai 'rā ri ha'e nungakue re, Judá regua tetā ha'e Jerusalém mbyte rupi mba'emo peapy pekuapayague re, peneramoī kuery voi, penderuvixa kuery, yvatekueve, ha'e pendeyvy jave rupi ikuai va'e ojapoague re?

²² Any, pendeko vai pekuapya ma SENHOR ndogueropo'akavei ma, ojeguarupy anho pejapo ramo. Ha'e nunga rupi ae pendeyvy optya tekao ve'ŷ ha'e nhomondyipaarā, ha'e py jipoavei aguā, aŷ jaexaa rami ae.

²³ Mba'eta SENHOR rovai ae pejejavy heakuā porā va'e peapy pekuapya py. Napendu potai guive SENHOR ayvu. Ixuguigua lei ojapo uka va'ekue rupi e'ŷ pendekuai. Ha'e nunga rupi ae ri pendere ou mba'emo vai, aŷ jaexaa rami — he'i.

²⁴ Jeremias aipoe'ive ju heta va'e kuery pe, kunhague pe guive:

— Peē kuery Judá regua Egito yvy re pendekuai va'e ha'e javi, pejapyxaka ke SENHOR ijayvua re.

²⁵ Mba'eta SENHOR ixondaro reta va'e, Israel kuery Ruete aipoe'i: “Peē ha'e pendera'yyxu kuery reve ma pendejuru py anho e'ŷ pejejavya pekuapya, pendepo py ae pejapo penhemboayvuague. Mba'eta aipopeje: ‘Orexyete yva pygua pe ronhemboayvu rokuapy mba'emo roapy ha'e mba'emo rykue rome'ē aguā re. Ha'e gui oreayvuague rojapopa 'rā', peje va'ekue. Ha'e nunga rupi aŷ pejapopa na pendeyvuague, ojeupitypa ete aguā rami pejapo”, he'i.

²⁶ Ha'e rami avi Judá regua Egito yvy re pendekuai va'e, pendu ke SENHOR ayvu: “Ne'exa, xee ma aura 'rā xerery ipo'akapa va'e rupi ae, raka'e rā tei Egito yvy jave rupi Judá kuery

juru gui nonhenduvei ma 'rā xerery rupi oura vy 'Anhetē ete SENHOR oikove va'e rery rupi aura', he'i va'e.

²⁷ Mba'eta ne'exa, ha'e kuery re xee aikuua pota 'rā mba'emo vai ambou aguā, mba'emo porā nda'e. Ha'e ramo Judá kuery Egito yvy re ikuai va'e ha'e javi oiko vai 'rā kyxe py e'ŷ vy karuai gui, okanhymba peve.

²⁸ Amongue ete'i 'rā kyxe gui oo jepe vy Egito yvy gui ojevy Judá yvy katy. Ha'e rā Judá kuery Egito yvy re ikuai aguā oo va'ekue mboae ma oikuapa 'rā xeayvu pa ojeupity va'ea, tyrā pa ha'e kuery ayvu.

²⁹ Pova'e nunga ajapo 'rā peikuaa aguā kova'e tekoia py rombopaga 'rāa, ha'e anhetē xeayvuague ojeupitypa 'rāa peē kuery re mba'emo vai ambou aguā regua", he'i SENHOR.

³⁰ "Ne'exa, po rami 'rā peikuaa. Egito pygua huvixa Faraó Hofra hery va'e ma xee amboaxa 'rā hovaigua ijukaxeia kuery po py, Judá pygua huvixa Zedequias minha hovaigua ijukaxeia Babilônia pygua huvixa Nabucodonosor po py amboaxaague rami ae", he'i SENHOR.

45

Baruque pe Jeremias ayvu omombe'uague

¹ Josias ra'y Joaquim Judá pygua huvixa va'e irundy ma'etŷ re ma oī jave profeta Nerias ra'y Baruque ombopara oiny Jeremias ayvu kuaxia re. Ha'e gui ixupe ju Jeremias ijayvu vy aipoe'i:

² — Baruque, po rami SENHOR Israel kuery Ruete ijayvu ndereko re.

³ Ndee ma aipo're va'ekue: "Xee tu nda'evei ete aikovy! Mba'eta xee aiko axya áryve SENHOR ombou ndavy'aive aguā. Xekane'ō ma xepoaẽ riaeia py, ndajoui apytu'u aguā", 're va'ekue.

⁴ Ha'e ramo aipoe'i uka ndevy: "Po rami ijayvu SENHOR: Ne'exa, xee ma aitypa ju 'rā amopu'a va'ekue, ha'e amondoro ju 'rā anhotŷ va'ekue. Ha'e nunga oiko 'rā yvy jave re.

⁵ Ha'e gui ndee ha'vy ndeyvateve nheia'ã teve? Enhea'âve eme ha'e rami. Mba'eta ne'exa, avakue ha'e javi áry xee ambou 'rā mba'emo vai. Ha'e rā ndee ma rojapo 'rā nderekoverā rejou aguā rami, mamo rā rei reoa py", he'i SENHOR.

46

Egito pygua kuery rekora re ijayvuague

¹ Po rami profeta Jeremias pe SENHOR ombou oayvu yvy regua kuery rovai.

² Egito yvy re ranhe ayvu oī, Egito pygua huvixa Faraó Neco xondaro kuery rovai. Mba'e ha'e va'e xondaro kuery re Babilônia pygua huvixa Nabucodonosor opu'ã vy ipo'aka. Carquemis tetā re ipo'aka Eufrates yakā yvýry, irundy ma'etŷ re ma Josias ra'y Jeoaquim Judá pygua huvixa oī jave py. Ha'e vy aipoe'i:

³ "Pereko katu ke hu'y jokoarā ha'e nhomo'āa tuvixa va'e. Ha'e vy tapeo joe pepu'ã aguā katy.

⁴ Pembokupe árygua kavaju, kavaju árygua kuery guive toimba. Ha'e vy ngora hatā va'e reve pejexa uka pavē. Pereko katu ke hu'y, penhemonde guive pexo regua py.

⁵ Ha'e rire tei mba'exa tu aexa okyje va'e ojevypa jogueruvy rā? Mba'eta ipy'a guaxukueve re ipo'akaa ra'e. Ha'e ramo ha'e kuery ma guakykue re oma'ẽ e'ŷ re onhamba oje'oivy, jovaive-ive re imongygearā ombojere ouvy ramo", he'i SENHOR.

⁶ "Ha'e kuery onha ratā tei nda'evei ojava ete aguā, ipy'a guaxukueve tei ndoo jepesi. Mba'eta kuaray ijapu'a'ia katy Eufrates yakā yvýry rupi onhepyxanga vy ho'apa joguerupy.

⁷ "Mava'e kuery tu Nilo yakā oxyry atāa rami oē jogueruvy va'e, yakā yy omyi atā-atā va'e rami?

⁸ Egito pygua kuery ae ri Nilo yakā oxyry atāa rami oē jogueruvy va'e. Mba'eta ha'e kuery aipoe'i okuapy: 'Nhaẽ vy jajao'ipa 'rā yvy jave rupi, nhambovaipa 'rā tetā ikuai va'e, ha'e pygua kuery ha'e javi guive', he'i tei.

⁹ Neĩ ke kavaju árygua kuery, tapeo, pemondyi heravy karóxa mboguataa kuery, ipy'a guaxukueve ha'e javi toẽmba avi. Etiópia pygua ha'e Pute pygua kuery voi oo hu'y jokoa reve, Líbia pygua kuery guyrapa oiporu kuaa va'e voi.

¹⁰ Mba'eta ha'e va'e ára ma SENHOR ára, SENHOR ixondaro reta va'e ngovaigua kuery ombopaga aguã. Ha'e nunga rupi omomba 'rã kyxe py. Ha'e ramo nhomomba 'rã inhakanhympa ha'e tuguy py oka'upa peve. Mba'eta SENHOR ixondaro reta va'e ae oa'anga jojuka aguã, kuaray ijapu'a'ia katy Eufrates yakã yvýry.

¹¹ "Ha'e gui Egito pygua rajy kuery, tapeo Gileade katy moã peru aguã. Ha'e rami avi moã pejou reta teĩ nda'evei, mba'eta moã jipoi penemongueraarã.

¹² Yvy regua kuery oendu ma okuapy penemoximbaarã ou rã, yvy jave rupi peneraxẽ rei nhendu ramo. Ha'e vy pendea pygua ipy'a guaxukueve onha jogueravy vy ojeapi 'rã ipy'a guaxukueve mboae re. Ha'e rami vy jojaví 'rã ho'apa."

¹³ Ha'e gui po rami SENHOR ijayvu profeta Jeremias pe. Babilônia pygua huvixa Nabucodonosor ou vy Egito yvy regua kuery re opu'ã aguã re ijayvu.

¹⁴ "Pemombe'u ke pova'e ayvu Egito yvy re. Migdol py ke pendu uka, Mênfis ha'e Tafnes tetã py guive. Ha'e vy aipopeje 'rã: 'Pejexa uka ke, peiko katupa, mba'eta kyxe omomba ma heravy pendeyvýry ikuai va'e ha'e javi', peje 'rã.

¹⁵ Mba'exa tu oitya ma penderuete ra'angaa Toro pejea? Nai'aĩ ranhei ma voi, SENHOR ae oity ramo.

¹⁶ SENHOR ma heta ete ojapo onhepyxanga vy ho'a aguã rami. Ha'e kuery jo'a-jo'a ho'a ový vy aipoe'i 'rã: 'Pevy ke, jajevypa ju nhanceretarã kuerya katy, nhanekeyrí'iague py, kyxe py nhanemombaa gui', he'i 'rã.

¹⁷ Ha'e py ma Egito pygua huvixa Faraó ojavykya rei vy ixupe 'Hevovo rei va'e rive', he'i 'rã okuapy, mba'emo ojapoa ára omboaxa rive rire", he'i.

¹⁸ Ha'e gui ma Huvixa SENHOR ixondaro reta va'e hery va'e aipoe'i: "Anhetẽ ete xee ae rekove rupi aura vy aipoa'e: Ou 'rã peteĩ ipo'akave ete va'e, Tabor yvity pavẽ gui yvatevea rami, ha'e Carmelo yvity ye'ẽ yvýry oĩa rami ojekuaa porã va'e.

¹⁹ Ha'e nunga rupi Egito pygua rajy kuery, perekó katu ke penemba'e rei-rei peraa aguã escravo-rã pendereraa katy. Mba'eta Mênfis tetã ma ombovaipaa ma, omokanhymbaa ma avave rei noñavei aguã rami.

²⁰ Egito yvy ma vaka ra'y iporãve va'e ramigua teĩ ou ma oiny mbytu kuaray ijapu'a'ia katy gui.

²¹ Ha'e ramo xondaro kuery peráta re ha'e kuery ojou va'ekue voi vaka omongyra pyre rami ikuai teĩ ojekupe rerova vy ojavapa 'rã jogueravy. Joe nopus'ãi 'rãe, mba'eta ha'e pygua kuery re ou imombaarã ha'e ombopagaa aguã ára.

²² Ha'e rami vy Egito pygua kuery ma mboi onha vy hevovo rei ovya rami 'rã onhendu, mba'eta ha'e kuery rovai hovaigua kuery ou ma oiny haxa reve, yvyra rake'oa rami.

²³ Ha'e kuery ojayapa 'rã ka'aguy inhana ete teĩ", he'i SENHOR. "Ha'e kuery ma tuku-karu gui hetave 'rã, mbovy e'õ 'rã ikuai.

²⁴ Ha'e nunga rupi Egito pygua rajy kuery oximba ma, kuaray ijapu'a'ia katy guigua kuery po py omboaxaa rire."

²⁵ Ha'e gui ma SENHOR ixondaro reta va'e, Israel kuery Ruete aipoe'i: "Ne'exa, ambopaga 'rã Nô tetã pygua kuery ruete Amom, ha'e gui Faraó, Egito yvy regua kuery, ha'e pygua tuuete ramigua kuery guive. Faraó reve ambopaga avi 'rã hexe ojerovia va'e kuery.

²⁶ Ha'e kuery amboaxapa 'rã ijukaxea kuery po py, Babilônia pygua huvixa Nabucodonosor po py ae, hembiguai kuery po py guive. Ha'e rami teĩ ha'e va'e rire ma ha'e py hekoju 'rã yma guare rami ae", he'i SENHOR.

²⁷ "Ha'e nunga rupi xerembigui Jacó kuery, pekyje eme. Israel kuery, penhemondyi eme. Mba'eta xee rogueraa jepe 'rã yvy peoague gui mombyry teĩ, peneramymino kuery arupa ju 'rã yvy escravo-rã ogueraa ague gui. Ha'e ramo Jacó kuery ojevypa ju 'rã, ogyptu'ha'e ikuai porã'i 'rã, imongyjarã jipovei ramo.

²⁸ Ha'e nunga rupi xerembiguai Jacó kuery, pekyje eme, mba'eta xee aiko pendereve. Xee amomba 'rā yvy regua kuery romondoukaague pygua. Ha'e rā peē kuery ma noromombai 'rā. Xee rombopaga 'rā teī ha'evea peve'i, mba'eta noromboeko porā rivei 'rā", he'i SENHOR.

47

Filisteu kuery rekorā re ijayvuague

¹ Ha'e gui filisteu kuery regua ayvu ju profeta Jeremias pe SENHOR ombou va'ekue, Gaza tetā re Faraó kuery opu'ā e'ŷ mbove.

² Ha'e vy SENHOR aipoe'i: "Ne'exa, kuaray ijapu'a'ia katy gui yy opu'ā-pu'ā vy oxyry atā 'rā ouvy. Ha'e rami vy ojao'ipa 'rā heravy yvy ha'e ikuai va'e ha'e javi, tetā ha'e ha'e pygua kuery guive.* Ha'e ramo avakue ojapukai pavē 'rā, yvy re ikuai va'e ojae'opa 'rā okuapy,

³ mba'eta oendu 'rā kavaju pyambu ha'e hevovo rei ouvya, karóxa parāa ha'e iruéra nhe'ē reia. Ha'e rami vy tuu kuery noipytyvō kuaavei 'rā gua'y kuery, ipo kangypaa gui rive.

⁴ Mba'eta omombaa aguā ára ovaē ma oiny filisteu kuery, Tiro ha'e Sidom tetā pytyvōarā ikuai va'ekue rembyrekue omokanhymbaa aguā. Ha'e rami vy SENHOR omomba 'rā filisteu kuery, Caftor ye'ē pa'ū re okuave'i va'ekue guive.

⁵ Ha'e ramo Gaza tetā pygua kuery onhopīmba 'rā oakā, Asquelim pygua kuery voi okyrirīmba 'rā okuapy, yvyugua rupi ikuai va'e ha'e javi reve. Raka'e peve tu penhekxyxīmba rei 'rā?

⁶ "Aipopeje: 'Ai SENHOR guigua kyxe, raka'e peve nda'u repytu'ua rupi e'ŷ 'rā reiko? Ejevy ju ke nderyru py, repytu'u ha'e reī rive ju aguā", peje teī.

⁷ "Ha'e rami avi kyxe, mba'exa tu repytu'u ta SENHOR ndevy mba'emo ojapo uka teri ramo? Mba'eta reo 'rā Asquelim tetā re, ye'ē yvýry ikuai va'e re guive, mamo rā nemondoukaa katy rei."

48

Moabe pygua kuery rekorā re ijayvuague

¹ Ha'e gui Moabe yvy regua ayvu ju SENHOR ixondaro reta va'e, Israel kuery Ruete ombou va'ekue: "Nda'evei ete 'rā Nebo tetā pygua kuery pe, ombovaipaa ma ramo. Quiriataim pygua kuery voi oxīmba 'rā, ha'e kuery re ipo'akaa rire. Tetā ikorapa va'e py voi oxīmba ha'e onhemondyipa 'rā okuapy.

² Mba'eta Moabe yvy re ndojouavei ma iporāgueve ikuai va'ekue. Hesbom tetā py jogueroayvua 'rā ha'e kuery rovai opu'ā aguā re. Ha'e vy aipo'ea 'rā: 'Peju ke, nhamomba, peteī regua ikuai ve'ŷ aguā', 'ea. Ha'e ramo ndee Madmém tetā pygua kuery voi pekyrirīmba 'rā, ha'e kyxe rewegua penderakykue monha 'rā.

³ Horonaim gui voi haxē rei va'e onhendu, ombovaipaa ha'e omombaa ete rire.

⁴ Ha'e rami py Moabe yvy ivaipa ma. Ha'e ramo ha'e pygua ra'y kue'iry ojapukai nhendu 'rā okuapy.

⁵ Luíte yvy'ā katy oē ovya rupi ojae'oa 'rā jogueravy opo'o e'ŷ re. Ha'e gui Horonaim yvy'ā guy katy oguejy ovya rupi ipy'a vai nhendu 'rā jogueravy omokanhymbaa rā.

⁶ Pejava ke penderekove peraa jepe aguā, yvy piru reia py peteī yvyra'i ha'e ae'i hi'aī va'e rami teī.

⁷ Ndee ae mba'emo rejapo va'e re ha'e mba'emo rerekopa va'ekue re rive rejerovia rire ndee voi ndepe'aa 'rā. Mba'eta tuuete ramigua Quemos voi heraa 'rā, ixupeguia sacerdote kuery ha'e yvatekueve guive.

⁸ Mba'eta peteī-teī tetā re ou 'rā imbovaipaarā, neī peteīve ma ndoo jepei 'rā. Ha'e ramo yvyugua rupi ikuai va'ekue omanomba 'rā, nhuñdy rupi ikuai va'e voi, ha'e rami aguā SENHOR ijayvu rire.

* 47:2 "Yy ou" he'ia ma Babilônia pygua kuery joe opu'ā vy ou aguā re ijayvu vy.

⁹ “Moabe pygua kuery pe tome'ëa ipeporä, oveve vy oo jepe aguã. Mba'eta ha'e kuery retä ombovaipaa 'rã, avave rei noñavei ma 'rã ha'e py.

¹⁰ Ayvu vaipy toiko SENHOR pe kyre'ÿa rupi e'ÿ om̄ba'eapo va'e, jouguy moña py okyxe ndoiporui va'e.

¹¹ Mba'eta Moabe pygua kuery ma jypy'i guive ikuai porä'i va'ekue, vinho hyru py oky'akue reve opyta riae oiny va'e rami, ha'e hyru mboae py teñgueve ndoguerovaai teri va'e rami, mba'eta ha'e kuery ma peteñgueve ma voi escravo-rã heraa va'e'ÿ teri. Ha'e rami vy jypy guare rami ae hee ha'e heakuã porä tema va'e rami ikuai tei.”

¹² Mba'eta SENHOR aipoe'i: “Ne'exa, ou ma oiny ára ha'e kuery rovai ambou aguã vinho onhoëa rami avi oipe'apa va'erã kuery. Ha'e ramo ha'e kuery onhoëmba 'rã hyru gui, hyrukue ombovopa 'rã guive.

¹³ Ha'e ramo Moabe pygua kuery oximba 'rã nguuete ramigua Quemos re rive ojerovi-aague gui, Israel kuery Betel py mba'emo re ojeroviaague gui oximba okuapyague rami.

¹⁴ Mba'exa vy tu aipopeje: ‘Ore kuery ma orepy'a guaxukueve, ava mbaraetekue joe ropu'ña pyguarã meme orekuai', peje?

¹⁵ Mba'eta Moabe yvy ombovaipaa ramo ha'e pygua kuery oëmba ma jogueravy guetä gui. Ha'e pygua kunumigue xondarorã oiporavo pyre voi heraapa ma ojukaa aguã katy”, he'i Huvixa guaxuve, SENHOR ixondaro reta va'e hery va'e.

¹⁶ “Ovaë rai'i ma Moabe pygua kuery okanhymba aguã, ovaë rai'i ete ma mba'emo vai.

¹⁷ Ha'e kuery ijyvýry pendekuai va'e pemboaxy ke, hery peikuaa va'e ha'e javi. Ha'e vy aipopeje: ‘Mba'exa tu yvyra imbaraete, popoka iporä va'ekue opë vyvoil' peje.

¹⁸ Ha'e gui Dibom pygua rajy kuery, peguejy ma penerenda porä gui, ha'e yvy py rive ju peguapy peiny. Mba'eta penderovai oë ma ouvy Moabe yvy mombaarã, peneretä ikorapa va'ekue guive ombovaipa.

¹⁹ Ha'e gui Aroer pygua kuery voi, peñ ke tape yvýry, ha'e pexa pota peiny. Ha'e vy peporandu ke ojava ha'e oo jepe va'e kuery pe: ‘Mba'e tu oiko?’ peje.

²⁰ Ombovai 'rã: ‘Moabe pygua kuery oximba ma okuapy, onhemondyipa rei guive. Penhendu ha'e pejapukai, ha'e Arnom yakã peve pemombe'u Moabe yvy ombovaipaa maa', he'i 'rã.

²¹ Nhuñdy ikuai va'e re voi ou imokanhymbaarã, Holom tetä, Jaza ha'e Mefaate áry,

²² ha'e gui Dibom, Nebo ha'e Bete-Diblataim áry,

²³ Quiriataim, Bete-Gamul ha'e Bete-Meom áry,

²⁴ Queriote ha'e Bozra áry, Moabe yvy re tetä ikuai va'e ha'e javi áry, mombyry ha'e ha'e'i rupigua guive.

²⁵ Omombaa ma Moabe pygua kuery po'akaa, ijyva omopëmbaa ma”, he'i SENHOR.

²⁶ “Pemoakanhymba oka'u va'e rami, SENHOR rovai onhemboyvate rei rire. Ha'e ramo Moabe pygua kuery onhembojere-jere 'rã nhoguenoiny ombojevyague rupi ae, ijojai reia kuery oexaa py.

²⁷ Mba'eta peñ kuery nda'u Israel kuery napendejajai rei avi? Ha'e kuery nda'u imonda va'e kuery reve ri ombo'aa, pejajai reia rupi pendeayvu aguã?

²⁸ Ha'e nunga rupi Moabe pygua kuery, pejaja ke peneretä, itaova guýry rive ju pendekuai aguã. Itakua rupi apykaxu onhemboaitya rami rive pendekuai.

²⁹ Roendu ma Moabe pygua kuery onhemboyvate reia omombe'ua rã. Mba'eta opa mba'e py onhemboyvate ha'e ojejou porä rei okuapy opy'a py. Okuraxõ py ojee anho rei ojerovia.”

³⁰ SENHOR aipoe'i: “Xee aikuua ma ha'e kuery ojerovia reia. Ha'e rami tei ha'e rami ikuua ma mba'everä ndovarei. Ijapu reia ndoikoi 'rãe.

³¹ Ha'e nunga rupi ae xepoaë Moabe yvy re, Moabe py ikuai va'e ha'e javi re ajae'o, ha'e avakue Quir-Heres pygua re xepy'a vai.

³² Jazer kuery ojae'oa gui xee ajae'ove peñ Sibma tetä pygua kuery uva rembypy hi'añ va'e rami pendekuai va'ekue re. Mba'eta jypy ma penderapo oo ye'ë rovai peve, ye'ë rembe

Jazer oĩa peve ete oo va'ekue. Ha'e rami teĩ imokanhyařā ou ma nde'a kuaray puku jave py ikuai va'ekue re.

³³ Ha'e rami vy Moabe yvy gui oipe'apa ma ikuai rive reia ha'e mba'ety porā re ovy'a rei okuapya. Mba'eta ajapo uva oubiriaty gui vinho nonheẽvei aguã rami, ha'e ramo ndoikoavei ma 'rā ovy'a reve vinho oubiri va'erā. Ojapukai va'e ma ovy'aa rupi ve'ŷ 'rā ojapukai.

³⁴ Ha'e rami 'rāgue py oendua 'rā Hesbom pygua kuery haxēa, Eleale ha'e Jaza peve. Zoar guive oendua 'rā Horonaim ha'e Eglate-Selisias peve. Ninrim py yy oĩ va'e typa avi.

³⁵ Mba'eta Moabe gui amokanhymba 'rā yvy'ā rupi nguuete ramigua pe mba'emo oapy va'ekue, heakuã porā va'e rapyare kuery guive", he'i SENHOR.

³⁶ "Ha'e nunga rupi Moabe pygua kuery re xepy'a py xepoaẽ ratā mimby pu rami. Mimby rami ajae'o Quir-Heres pygua avakue re, ha'e kuery oguerekopa va'ekue okanhymba ramo.

³⁷ Ha'e nunga rupi ha'e kuery ha'e javi ojayapa o'a ha'e guendyva. Opo rupi guive onhekxyimba, ha'e voxvaikue py rive onhemama.*

³⁸ Moabe yvy jave rupi ikuai ojae'o va'e ngoo áry ha'e tetā mbyte rupi, Moabe amboa'ypa rire mba'emo ryrukue nhae'ū guigua ndoiptaaveipy rami. Ha'e nunga rupi ae ombovaipa pyre optya", he'i SENHOR.

³⁹ "Ha'e ramo ha'e kuery hevovo rei okuapya. Moabe pygua kuery okupe rive oguerova okuapya oximba rei vy. Mba'eta ijyvýry ikuai va'e regua pe Moabe yvy itui oojai reipy ha'e nhomondyipaarařā."

⁴⁰ Mba'eta po rami SENHOR ijayvu: "Ne'exa, Moabe rovaigua kuery ma taguato ovevea rupi opepo oipyo va'e rami ou.

⁴¹ Ha'e ramo tetā ikuai va'e oipe'apa, oo ikorapa va'ekue guive. Ha'e va'e ára ma Moabe pygua ipy'a guaxukueve va'ekue ipy'a tytypa rei 'rā kunha imemby raxy va'e rami.

⁴² Ha'e rami Moabe pygua kuery okanhymba 'rā, peteĩ regua ikuai ve'ŷ aguã, SENHOR rovai onhemboyvate rire.

⁴³ Moabe pygua kuery, pende'áry ou oiny tekora ve'ŷ, yvykua ha'e nhuã xã", he'i SENHOR.

⁴⁴ "Ha'e gui tekora ve'ŷ gui onha va'e ho'a 'rā yvykua py, ha'e yvykua gui oẽ ovy va'e ma nhuã xã re ju 'rā ho'a. Mba'eta Moabe pygua kuery áry ambou 'rā ambopaga aguã ma'etý", he'i SENHOR.

⁴⁵ "Ha'e gui oo jepe va'ekue ikangypa vy optya 'rā okuapya Hesbom tetā yvýry. Ha'e rami teĩ Hesbom gui oẽ 'rā tata, Siom mbyte gui oẽ 'rā hendy vuku-a Moabe pygua kuery apyte rapyarā. Ha'e rami vy oapypa 'rā hevovo rei va'ekue inhaká áry rupi.

⁴⁶ Moabe pygua kuery, nda'evei ete 'rā pendevy. Pekanhymba ma, Quemos guigua pendekuai va'e. Ha'e ramo pendera'y kuery escravo-rã heraapaa ma, nderajy kuery guive.

⁴⁷ Ha'e rami teĩ opaa ára py ma ambopyau 'rā Moabe pygua kuery ikuaiia", he'i SENHOR. Apy peve opa ma Moabe rovai ayvu ombou va'ekue.

49

Amom pygua kuery rekorā re ijayvuague

¹ Ha'e gui Amom ramymino kuery re ma po rami SENHOR ijayvu: "Xapy'a rei nda'u Israel kuery ndoikoi ri? Neĩ teĩve Israel ramymino teve ndoikoi? Ha'e rami ri ramo mba'e re tu tuuete ramigua Milcom pegua kuery ikuai Gade regua yvy re? Ha'e katy'i tetā ikuai va'e rupi voi ixupeguia kuery ikuai."*

² Ha'e nunga rupi SENHOR aipoe'i: "Ne'exa, ovaẽ ma ára ajapo aguã Amom regua Rabá tetā pygua kuery mimby guaxu oendupa aguã rami, ha'e kuery re opu'aa ta ouvy rā.

* 48:37 Gueko rami vy ha'e rami 'rā ikuai onhemboaxya oendu vy. * 49:1 Milcom ma Amom pygua kuery ruete ramigua. Ha'e gui ixupeguia kuery Amom regua ma Israel kuery retā oipe'a vy Gade yvy re heko, amboae kuery Israel kuery re opu'ā javé.

Ha'e ramo tetā opyta 'rā mba'emo ra'ykue aty rive, ha'e katy'i tekoai ikuai va'e okaipa 'rā guive. Ha'e gui Israel kuery ju oipe'a 'rā guetā jopyare kuery retā", he'i SENHOR.

³ "Ha'e nunga rupi Hesbom pygua kuery, penhendu rei pekuapy, mba'eta Ai tetā ombovaipaa ma. Ha'e Rabá tetā pygua kuery, pejapukai ke ha'e penhemonde ajukue vaikue voxua guigua py. Pejae'o reve pejere-jere peneretā kora rupi, mba'eta penderuete ramigua Milcom ogueraa avi 'rā, ixupeguia sacerdote kuery ha'e yvatekueve reve.

⁴ Ha'e gui tajy onhe'ē raxave va'e, mba'e re tu yvyugua mba'emo porā oīa ndeyvy re ikuai va'e rejou porāa rupi anho rei ri ndeayvu? Mba'emo rerekopa va'e re anho rejerovia. Ha'e vy aipo're: 'Mava'e tu ou 'rā xerovai?' 're.'

⁵ Ha'e nunga rupi SENHOR ixondaro reta va'e aipoe'i: "Nde'áry ambou 'rā nanderekorāvei rei aguā, ndeyvýry ikuai va'e ha'e javi gui. Ha'e rami vy peē kuery peteī-teī penemoxēa 'rā heravy hovai katy, ndoikoi 'rā guive penha va'ekue pendereru ju va'erā.

⁶ Ha'e rami teī ha'e va'e rire ma ambopyau 'rā Amom kuery ikuiaia", he'i SENHOR.

Edom pygua kuery rekora re ijayvuague

⁷ Ha'e gui Edom pygua kuery re ma po rami SENHOR ixondaro reta va'e ijayvu: "Temā tetā py nda'u ndoikoi ri hi'arandu va'e? Ha'e va'e kuery hexaraipa ma nda'u hi'arandu va'e omongetaague re? Tyrā pa hi'arandua okanhymba ete teve?"*

⁸ Dedā py pendekoa va'e, pejava, pejere peovy, ha'e peike itakua ikuai va'e py. Mba'eta peē kuery áry xee ambou 'rā Esaú ramymino kuery penembopagaarā, pepaga aguā ára ovaē ma ramo.

⁹ Ha'e gui uva mono'ōa kuery pendea py ou va'e rire ndoejai 'rāgue nda'u amongue uva xā? E'ŷ vy pyávy imonda va'e ou va'e rire oipota va'e anho'i ri nda'u ogueraa 'rāgue?

¹⁰ Ha'e rā xee ma aipe'apa rei 'rā Esaú kuery gui, ha'e onhemiaty ajou ukapa ramo nonhemi kuaavei ma 'rā. Ha'e rami vy hamymino kuery omokanhymbaa 'rā, ta'y kuery, ha'e'i rupigua kuery guive. Ha'e rami rire ndoikovei ma 'rā.

¹¹ Peja ke tyre'ŷ kuery, ha'e rā xee anhangareko 'rā okuave aguā rami. Pendegua imeve'ŷ va'e kuery voi tojerovia xere."

¹² Mba'eta po rami SENHOR ijayvu: "Ne'exa, karo gui oy'u aguā rami e'ŷ ikuai va'ekue oy'upa ma. Ha'e rā ndee nda'u romboeko porā rive 'rā ri? Any, xee noromboeko porāi 'rāe, ha'e ramo ndee voi rey'u 'rā."

¹³ Mba'eta SENHOR aipoe'i: "Xerery rupi ae aura Bozra tetā opyta aguā re nhomondyi-paarā, ojou vaipy, ombovaipa pyre ha'e ayvu vaipy. Ha'e katy'i tetā ikuai va'e voi opyta 'rā tekoai ve'ŷ meme, raka'e rā peve."

Edom pygua kuery ojeavyague re ombopagaa aguā re ijayvuague

¹⁴ Ha'e gui SENHOR gui ayvu mboae ju aendu ombou va'ekue. Mba'eta yvy regua kuery pe peteī ayvu mombe'uarā omondouka. Ha'e ramo aipoe'i 'rā: "Penhemboaty ke, tapeo ha'e kuery rovai, peiko katupa ke Edom yvy re pepu'ā aguā", he'i 'rā.*

¹⁵ "Mba'eta ne'exa, yvy regua kuery mbyte rupi xee rojapo 'rā mbovy'i ete pendekuai aguā, ha'e avave rei napenemboeteavei aguā rami.

¹⁶ Mba'eta renhomongyjea ha'e renhembovate reia ndepy'a re remoīa py ndee ae rejekore. Itakua ha'e yvyty áry rupi reiko, ha'e taguato rami yvate ete rupi renhemboaity teī xee roity 'rā ha'e gui", he'i SENHOR.

¹⁷ "Ha'e nunga rupi Edom yvy itui 'rā nhomondyipaarā. Pavē rei ha'e rupi oaxa va'e onhemondyipa ha'e ojojai rei 'rā jogueravy, ikuai axy ete rā oexa vy.

¹⁸ Mba'eta Sodoma ha'e Gomorra minha, ha'e tetā ha'e katy'i ikuai va'e amokanhymbaague rami avi Edom yvy re voi avave rei ndaekoavei 'rā, avave rei noīavei 'rā ha'e py", he'i SENHOR.

¹⁹ "Ne'exa, guary minha Jordão yakā yvýry ka'aguy oī va'e gui oē 'rā ouvy vexa'i nhuūndy hovy rei va'e rupi okaru okuapy va'e re. Ha'e rami ae xee voi amondyipa vyvoi 'rā imondovy Edom pygua kuery. Ha'e rami vy ha'e py amoī 'rā aiporavo va'e rei. Mba'eta

* 49:7 Obadias 5-6 * 49:14 Obadias 1-4

mava'e tu oiko xee rami etegua? Mava'e tu oiko xemboayvuarā? Mava'e joe opena va'e tu oiko xejokoarā?"

²⁰ Ha'e nunga rupi pendu Edom rovai SENHOR onhembopy'aa, Temā pygua kuery rovai guive. Mba'eta mymba kuery regua kyrīve'i va'e teī anhetē oipe'apaa 'rā, ikuaiaty guive ombovaipa 'rā ha'e kuery káuxa ae.

²¹ Ha'e kuery ho'apa rā yvy oryryipa rei 'rā tevovo onhendu va'e gui. Ha'e kuery raxēa ma Ye'ē Pytā rupi peve 'rā onhendu.

²² Ne'exa, taguato ovevea rupi opepo oipyo ovya rami avi peteī oē 'rā ouvy Bozra tetā re. Ha'e va'e ára Edom pygua ipy'a guaxukueve ikuai va'ekue teī ipy'a tytypa 'rā okuapy, kunha imemby raxy va'e rami.

Damasco pygua kuery rekorā re ijayvuague

²³ Ha'e gui Damasco tetā pygua kuery regua ayvu ma po rami: "Hamate ha'e Arpade pygua kuery oxīmba rei 'rā okuapy. Mba'emo omombe'ua rā oendu vy onhemondyipa 'rā, ye'ē omyī reia rami avi ndopytu'u kuaavei 'rā okuapy.

²⁴ Mba'eta Damasco pygua kuery ikangypa. Onhamba aguā ojere va'eri oryryipa rive okuapy. Nhemondyia ha'e haxy va'e anho oendu, kunha imemby raxy va'e rami.

²⁵ Mba'exa tu Damasco tetā oejapaa, pavē ojou porā va'ekue ha'e xee voi arov'y'a va'ekue ri!

²⁶ Ha'e rami teī tetā mbyte rupi ho'apa 'rā kunumigue. Ha'e va'e ára ha'e pygua avakue joe opu'ā va'ety omokyrirīmbaa 'rā", he'i SENHOR ixondaro reta va'e.

²⁷ "Amoendy 'rā tata Damasco tetā kora re, huvixa Ben-Hadade ro guive imombaarā."

Arábia pygua kuery rekorā re ijayvuague

²⁸ Ha'e gui SENHOR ijayvu Quedar ha'e Hazor yvy re tetā ikuai va'e re Babilônia pygua huvixa Nabucodonosor opu'ā aguā re. Ha'e vy aipoe'i: "Pepu'ā ke, tapeo Quedar yvy re, pemomba kuaray oua katyguia kuery.

²⁹ Peipe'apa ha'e kuery rekoia, hymba kuery, ajukue oo ao'ia, imba'e rei-rei, hymba camelio kuery guive peraapa penembā'erā. Ha'e ramo ha'e kuery pe 'Jova-jovai katygui ou penemongyjeearā', ea 'rā ojojai rei vy.

³⁰ Ha'e nunga rupi Hazor py penderekia va'e, pejavapa, tapeo mombyry, itakua rupi ju pendekuai", he'i SENHOR. "Mba'eta Babilônia pygua huvixa Nabucodonosor onhemongeta vy onhembopy'a peē kuery rovai opu'ā aguā re.

³¹ Ha'e gui peē Babilônia pygua kuery, pepu'ā ke. Tapeo peteī yvy regua ikuai porā'i ha'e mba'eve gui okyjea rupi e'ŷ ikuai va'e rovai", he'i SENHOR. "Ha'e va'e kuery retā re ma okē noī, ijokoa voi jipoi. Ha'e kuery ae'i ikuai va'e.

³² Ha'e kuery rymba camelio ma omoxāmbaa 'rā heravy, hymba vaka voi mbovy e'ŷ ikuai teī oipe'apaa 'rā. Ha'e rami vy yvytu oipejua katyrei amoā'i 'rā imondovy o'a apy ojaya va'e ha'e javi. Jova-jovai gui ambou 'rā imbovaipaarrā", he'i SENHOR.

³³ "Ha'e rire ma Hazor tetā opyta 'rā jagua-tuvy nhe'ē ikuai atyra rive, raka'e rā peve 'rā ivaipa. Mava'eve noīai 'rā ha'e py, peteīve avakue ma voi noīavei 'rā."

Elão pygua kuery rekorā re ijayvuague

³⁴ Ha'e gui profeta Jeremias pe ayvu Elão pygua kuery rovai SENHOR ombou, Zedequias Judá pygua huvixa oī ypy'i jave py. Ha'e vy aipoe'i:

³⁵ "Po rami ijayvu SENHOR ixondaro reta va'e: Ne'exa, xee amopē 'rā Elão pygua kuery rapa, ha'e va'e rupi vy ipo'akapa rei ramo.

³⁶ Mba'eta Elão re ambou 'rā yvytu yva apy irundy oī va'e gui oipeju va'e. Ha'e rami vy amoāimba 'rā imondovy yvytu oipejua ha'e javi rupi. Ha'e ramo yvy ha'e javi rupi 'rā Elão guigua ojava.

³⁷ Mba'eta ajapo 'rā ngovaigua kuery renonde Elão pygua kuery oryryipa reve ojexa ukapa aguā rami, ijukaxeia kuery renonde ae. Elão pygua kuery áry ambou 'rā mba'emo vai, xepoxya hendy va'e", he'i SENHOR. "Ha'e gui hakykue ju ambou 'rā kyxe revegua, omomba peve.

³⁸ Ha'e gui Elão py xerenda apena atyrã amoĩ vy amokanhymba 'rã ha'e pygua huvixa ha'e yvatekueve", he'i SENHOR.

³⁹ "Ha'e rami teĩ opaa ára py ma Elão pygua kuery arupa ju 'rã escravo-rã ogueraa ague gui", he'i SENHOR.

50

Babilônia pygua kuery rekorã re ijayvuague

¹ Ha'e gui pova'e ayvu ma Babilônia ha'e caldeu yvy re SENHOR omombe'u uka va'ekue profeta Jeremias pe.

² "Emombe'u ke pova'e yvy regua ikuiaia rupi. Endu ukapa, emopu'ã bandeira-rã, ha'e emombe'u porâve. Eikuaa uka e'ý eme. Ha'e vy aipo're 'rã: 'Babilônia yvy ma oipe'aa ma. Ha'e ramo tuuete ramigua Bel nda'evei nho, Merodaque voi ndovy'avei ma oikovy. Ha'e pygua ta'angaa ikuai va'e re ma oximbaba anho oĩ, oryryipa oiny guive okyjepa vy.

³ Mba'eta ha'e kuery rovai jogueru kuaray ijapu'a'ia katygui peteĩ regua Babilônia tetã mbovaipaarrã. Ha'e ramo nda'ipoavei 'rã ha'e py, avakue ha'e mymba kuery onhamba jogueravy rire', 're 'rã."

⁴ Mba'eta SENHOR aipoe'i: "Ha'e va'e ára, ha'e va'e jave ma Israel kuery ojevypa ju 'rã jogueruvy, Judá kuery reve. Ojae'o reve 'rã oguata jogueruvy, SENHOR Nguuete oeka jevy vy.

⁵ Ha'e kuery oporandu 'rã tape Sião katy oo va'e re. Ha'e katy oma'ẽ reve anho 'rã aipoe'i okuapy: 'Peju, nhano'õmba ju SENHOR peguarã. Nhandekuai 'rã guexeve guarã ojapo va'ekue opa e'ý va'e, hexaraipy e'ý rupi', he'i 'rã okuapy.

⁶ Mba'eta xevygua kuery ma mymba vexa'i okanhhygue rami ikuai. Ha'e kuery re opena va'erã omoĩ mbyre ojapo okuapy ojavy aguã rami rive, oejapa yvy'ã ikuiaia katy rupi oguata rei aguã rami. Ha'e ramo yvy'ã ikuai va'e-va'e rupi oguata rei 'rã, okora ikuaiaty re hexaraipa rire.

⁷ Ha'e ramo ojou va'e rei ojuka 'rã. Ha'e vy hovaigua kuery aipoe'i 'rã: 'Jajukapa teĩ nanhandepo ky'ai 'rã, mba'eta ha'e kuery ae SENHOR rovai ojejavvy rire. Hexe anho teko porã oĩ, tamoi kuery oarõ okuapy va'ekue', he'i 'rã.

⁸ Ha'e nunga rupi pejava Babilônia mbyte gui, pejep'e caldeu kuery yvy gui. Myumba kuery renonde rupi kavara ava oo va'e rami peiko.

⁹ Mba'eta ne'ixa, Babilônia yvy re xee ambou reta 'rã yvy regua kuery joe onhemoirû va'e. Kuaray ijapu'a'ia katy oyvy itui va'e gui 'rã ou. Babilônia pygua kuery rovai ou 'rã opu'ã aguã, oipe'apa 'rã guive. Hu'y majoe opu'ã kuaa porã va'e mba'e rami 'rã omombo, mba'eta ha'e kuery ndojevy rivei 'rã oipe'apa e'ý re.

¹⁰ "Ha'e rami py oipe'apa 'rã caldeu kuery yvy gui. Ipe'aa kuery oguerekopa rei 'rã", he'i SENHOR.

¹¹ "Ha'e nunga rupi peẽ kuery xevygua yvy gui peipe'apa va'ekue pevy'apa rei pekuapy teĩ, vaka ra'y nhuñdy rupi opo-opo va'e rami pevy'a, kavaju ojeupixe va'e rami penhendu teĩ

¹² pendexy oximbaba ete 'rã, penekuavãare ndovy'ai ete 'rã.* Ha'e rami vy opyta 'rã yvy regua pavẽ gui nomboetei veþy, tekaoa ve'ý, yvy piru reia ha'e avave rei noñaveia.

¹³ SENHOR ipoxy ramo ae 'rã noñai. Ha'e rami 'rãgue py opa rupi ojeapo 'rã tekaoa e'ýa. Ha'e rami rire Babilônia yvy rupi oaxa va'e rei tema onhemondyi 'rã, ojojai rei 'rã oyv mba'emo vai oikoague oexa vy.

¹⁴ Ha'e gui penderyxy porã ke Babilônia re pepu'ã aguã, penerembiporu guyrapa reve. Ha'e rami vy pemombo hu'y ha'e kuery re, pemombo e'ý eme, SENHOR rovai ha'e kuery ojejavvy rire.

¹⁵ Pejapukai tetã katy pembojere vy. Ha'e rami avi ha'e kuery ojejopy uka ma. Oo ikorapa va'ekue ho'apa ma, tetã kora hi'aí va'ekue oitypaa, ha'e rami ete SENHOR opoxya oexa uka ramo. Ha'e nunga rupi pembopagapa, ha'e kuery re ju pejapo joe ojapoague rami.

* 50:12 Apy "Pendexy" he'ia ma ha'e kuery retã Babilônia re ijayvu vy.

¹⁶ Babilônia tetā gui pemomba oma'etŷ va'e ha'e foice py mba'emo omono'õ va'e kuery. Ha'e kuery kyxe py nhomomba rire ha'e gui tojevy peteĩ-teĩ guetarã kuerya katy, peteĩ-teĩ tojava oyvy katy ae.

¹⁷ Mba'eta Israel kuery ma vexa'i kanhygue rami ikuai, guary omonhamba va'ekue rami. Jypy ho'u va'ekue ma Assíria pygua huvixa, ha'e gui opa vyguia ma Nabucodonosor ju omokâguepa."

¹⁸ Ha'e ramo po rami SENHOR ixondaro reta va'e, Israel kuery Ruete ijayvu: "Ne'exa, ambopaga 'rã Babilônia pygua huvixa, ijyvy guive, Assíria pygua huvixa ambopagaague rami avi.

¹⁹ Ha'e rã Israel kuery ma ajapo 'rã guekoa katy ae ju ojevypa aguã rami. Ha'e ramo ha'e kuery okaru ju 'rã okuapy nhuündy Carmelo ha'e Basã regua rupi, Efraim regua yvyty rupi, ha'e Gileade yvy re ju ikuai vy okaru porã 'rã."

²⁰ SENHOR aipoe'i: "Ha'e va'e ára, ha'e va'e jave ma Israel kuery ojejavyague oekaa teĩ ndojouavei 'rã. Judá regua ojejavya voi ndojouai 'rã, mba'eta aperdoa 'rã okuave va'erã aeja va'ekue.

²¹ "Ha'e gui ndee kyxe reveguia, tereo naxenhe'ẽ rendui ete va'ekue yvy re, tereo ha'e va'e yvy regua opaga aguã rami ikuai va'e kuery rovai. Emokanhymba ete, ha'e gui ha'e kuery rakykue rupi reo vy embovaipave ju heravy. Ejapopa tema ajapo ukaa rami ae", he'i SENHOR.

²² "Yvy re oiko joe opu'ã nhendua ha'e nhomombaara.

²³ Yvy jave rupi karavo mbotaa nhomboa'ypaare ma omboa'ypaa avi. Ha'e ramo Babilônia tetã opyta yvy regua kuery onhemondyipa aguã.

²⁴ Mba'eta ndee Babilônia pygua, ndere nhuã ajayvy vy rombo'a vyvoi, reikuua e'ŷ re. Xapy'a py rojopy vy rombo'a, SENHOR rovai reiko rire.

²⁵ SENHOR guembiporu omoõ porãaty oipe'a vy ha'e gui oguenoẽ opoxya rupi oiporu va'erã. Mba'eta SENHOR ixondaro reta va'e ma mba'emo oguereko caldeu kuery yvy re ojapo va'erã.

²⁶ Ha'e gui yvy apy re pendekuai va'e, peju, pepu'ã hovai, peipe'a mba'emo omoõ porãaty, pemombyta mba'emo ra'ykue aty rive, pembovaipa katuñ'i, hembyre aguã rami e'ŷ.

²⁷ Kyxe py pejukapa toro kuery ipy'a guaxukueve. Ha'e kuery toguejypa ojukapaa aguã katy. Nda'evei ete 'rã ha'e kuery pe, hi'ára ou ma ramo ambopaga aguã.

²⁸ Ha'e gui Babilônia yvy gui onha vy oo jepe va'ekue ma Sião py ovaõa py omombe'u 'rã okuapy SENHOR Nhanderuete pegua templo oepy vy nhombopagaague.

²⁹ "Penoõmba guyrapa reveguia kuery Babilônia re oupa aguã. Pendeaty ijerea jovaive rupi, mava'eve too jepe eme. Pemboekovia peteĩ-teĩ ojapo vaiague. Ojapoague ha'e javi rami ae pembopaga, mba'eta SENHOR Israel kuery Ruete Iky'a e'ŷ va'e rovai onhemboyvate rei rire.

³⁰ Ha'e nunga rupi ha'e pygua kunumigue ho'apa 'rã tape rupi, avakue joe opu'ãa pyguare voi okyirirõmba 'rã ha'e va'e ára", he'i SENHOR.

³¹ "Renhemboyvate rei va'e, ne'exa, xee ma nderovai aiko", he'i SENHOR ixondaro reta va'e. "Mba'eta ou ma rombopaga aguã ára.

³² Ha'e ramo onhemboyvate va'ekue onhepyxanga vy ho'apa 'rã, imopu'ãarã ndoikoi 'rã guive. Ha'e rami vy ha'e kuery retã ikuai va'e re amboja 'rã tata jova-jovaive rupi omomba va'erã."

³³ Ha'e gui po rami SENHOR ixondaro reta va'e ijayvu: "Israel ha'e Judá kuery ojexavai okuapy. Heraare kuery oguereko tema guekoa py, nomondoukai ae.

³⁴ Ha'e rami teĩ ha'e kuery repyarã ma imbaraete, SENHOR ixondaro reta va'e hery va'e. Ha'e ma oikuua pota 'rãe ha'e kuery re. Ha'e rami vy omombytu'u 'rã ha'e kuery yvy, ha'e rã Babilônia yvy ma nomombytu'ui 'rãe.

³⁵ Ha'e rami 'rãgue py caldeu kuery áry ombou 'rã kyxe reveguia, Babilônia pygua kuery ha'e yvatekueve áry", he'i SENHOR.

³⁶ “Kyxe ou 'rā ijayvu rive va'e kuery áry, ha'e ramo optya 'rā inhakā porā e'ŷ va'e meme. Ha'e pygua ipy'a guaxukueve áry guive ou 'rā, ha'e ramo onhemondyipa 'rā.

³⁷ Kyxe ou avi 'rā hymba kavaju kuery, joe opu'āa pygua karóxa, ha'e joegua e'ŷ-e'ŷ ikuai va'e áry. Ha'e ramo kunhague rami meme 'rā optya. Kyxe ou avi 'rā mba'emo porā omoī porāaty áry, ha'e ramo oipe'apaa 'rā.

³⁸ Kyxe ou avi 'rā yy itui va'e áry, ha'e ramo typa 'rā. Mba'eta ha'e va'e yvy ma ta'angaa ojapo pyre pegua, ha'e py ikuai va'e na'inhakā porāi okuapy ha'e nunga nda'evei ete va'e rupi vy rive.

³⁹ Ha'e nunga rupi Babilônia optya 'rā mymba inharō va'e tekao e'ŷa regua ikuaiaty rive, jagua-tuvy nhe'ê, ha'e nunga. Guyra-nhandu voi ikuai 'rā ha'e py. Nda'ipoavei riae 'rā, ikuai jevy-jevy peve noīavei 'rā ha'e py.

⁴⁰ Mba'eta Nhanderuete Sodoma ha'e Gomorra ombovaipaague rami tetā ha'e katy'i rupi ikuai va'e reve, ha'ekue rami ae Babilônia py voi avave noīavei 'rā, neī peteīve ava ma voi ndoikoi 'rā", he'i SENHOR.

⁴¹ “Ne'exa, kuaray ijapu'a'ia katy gui ou ma oiny peteī regua. Yvy apy gui yvy regua opu'ā reta 'rā jogueruvy, heta avi 'rā huvixa kuery.

⁴² Guembiporu ogueru 'rā guyrapa ha'e hu'y guaxu. Ha'e kuery ma ipy'a ratā va'e, nanhomboaxy kuaai vy. Ha'e kuery onhendua ma ye'ē revovo ratāa rami 'rā nhaendu. Kavaju áry jogueru, peteī-teī hyxy porā'i 'rā pendere opu'ā aguā, Babilônia pygua kuery.

⁴³ Ha'e kuery reko omombe'ua rā Babilônia pygua huvixa oendu avi. Ha'e rami vy ipo kangypa. Tekorā ve'ŷ anho oendu, kunha imemby raxya ramigua.

⁴⁴ Ne'exa, guary ra'y minha Jordão yakā yvýry ka'aguy oī va'e gui ou 'rā vexa'i nhuū hovya rupi okaru okuapy va'e rovai, ha'e rami ae avi xee voi aipe'apa vyvoi 'rā Babilônia tetā gui, ha'e hekovia amoī 'rā xee ae amoīxe va'e. Mava'e tu xee rami ete oiko? Mava'e tu xere oikuua pota kuaa 'rā? Mava'e joe opena va'e tu xejoko 'rā?”

⁴⁵ Ha'e nunga rupi pendu pota Babilônia rovai SENHOR onhembopy'aa oikuua uka va'e, caldeu kuery yvy re ojapo aguā ojee omoī va'ekue re. Mba'eta anhetē mymba kuery regua kyrīve'i va'e teī oipe'apaa 'rā, ikuaiaty voi ombovaipa 'rā ha'e pygua kuery káuxa.

⁴⁶ Ha'e gui Babilônia oipe'aa rā onhendu va'e gui oryryipaa 'rā yvy jave rupi. Yvy regua ikuia rupi haxēa onhendu.

51

Babilônia pygua kuery ipo'akapa va'ekue oitypaa aguā re ijayvuague

¹ Ha'e gui SENHOR ijayvu po rami: “Ne'exa, Babilônia pygua kuery rovai xee ambou 'rā yvytu tetā mbovaipaarrā, Lebe-Camai pygua kuery rovai guive.

² Babilônia re ambou 'rā mba'emo pirekue mbovevea kuery. Ha'e va'e kuery ma omboveve vy oipe'apa 'rā ha'e va'e yvy gui. Mba'eta okanhya ára ou 'rā jova-jovai gui imbojexavaiarā.

³ Tove hu'y momboa kuery tomoxā guapa ngovaigua kuery hu'y momboa ha'e hu'y jokoa reveguia rovai. Pejuka e'ŷ eme ha'e kuery regua kunumigue, pemokanhymba ixondaro kuery ha'e javi.

⁴ Ha'e kuery omano vy to'apa caldeu kuery yvy re, tape ikuai va'e rupi topyaxapa oupy.

⁵ Mba'eta Israel ha'e Judá kuery ma Nhanderuete SENHOR ixondaro reta va'e ndoejai imeve'ŷ va'e rami ikuai aguā. Ha'e rā caldeu kuery ma ipo ky'apa va'e ikuai Israel kuery ruete īky'a e'ŷ va'e renonde.

⁶ Pejavapa ke Babilônia mbyte gui, peteī-teī penderekove reve peo jepe. Penhemokanhy uka eme ha'e kuery reko vaia py. Mba'eta ovaē ma SENHOR ombopaga aguā ára. Ha'e rami vy omboekovia 'rā ha'e kuery ikuaiague.

⁷ “Babilônia ma karo ouro guigua SENHOR po py oī va'ekue. Ha'e va'e py ma omonga'upa va'ekue yvy regua kuery ha'e javi. Mba'eta vinho ha'e py oī va'e ma yvy regua kuery oy'u vy na'inhakā porāvei va'ekue.

⁸ Ha'e gui ma Babilônia oitya xapy'a ramo ivaipa. Pejae'o hexe, ha'e peru moã ijai reguarã. Xapy'a rei okuera nho 'rã."

⁹ "Ha'e rami avi nhamongueraxe teĩ Babilônia va'eri ndokuerai ae. Peja ha'vy, peteĩ-teĩ tapeo pendeyvy katy ae. Mba'eta yva re peve ovaẽ ha'e kuery opaga aguã, arai yvateve va'e peve.

¹⁰ SENHOR nhanemboeko porã ju. Peju, nhamombe'u Sião py SENHOR Nhanderuete ojapo va'ekue."

¹¹ "Pemboakua hu'y! Pereko katu hu'y jokoa! Mba'eta SENHOR omokyre'ŷ Média pygua huvixa kuery Babilônia rovai guarã, omombaxe vy. Ha'e rami vy SENHOR joepy 'rã, ojeupegua templo oepya rupi.

¹² Pemopu'ã bandeira Babilônia tetã kora rovai pepu'ã aguã. Pemoĩ retave jopya kuery, pemoĩ nhoarõarã, pema'ẽ mbegue joe pepu'ã xapy'a aguã. Mba'eta SENHOR ha'e rami aguã re onhembopy'a, ha'e gui ojapo ete Babilônia pygua kuery re ijayvuague.

¹³ Ndee Babilônia, yy heta rei va'e yvýry reĩ ha'e mba'emo rerekopa va'e, ovaẽ ma rekanhy aguã, rejoupaxe reiague reve.

¹⁴ Mba'eta ojee ae SENHOR ixondaro reta va'e oura vy aipoe'i: 'Anhetẽ ndere ambou 'rã avakue tuku-karu rami heta va'e nemonyéarã. Ha'e ramo ha'e kuery ndere ový'a rei 'rã uva umbiria kuery ový'a reve ojapukaia rami', he'i.

¹⁵ "Ha'e ae ma ko yvy ojapo va'ekue opo'akaa rupi. Oikuaapaa rupi onhono yvy, ha'e o'arandua rupi oipyo yva.

¹⁶ Ha'e gui yapu onhendu atã aguã rami ojapo ramo yva re yy oĩ va'e omyí 'rã, ha'e yvy apy gui opu'ã 'rã ouvy yvyxí. Omoingo avi 'rã overa va'e oky aguã, oguenoẽ yvytu guive oĩaty gui.

¹⁷ Ha'e rã avakue ma nai'arandui ha'e mba'eve ndoikuuai va'e meme. Ouro re omba'eapo va'e kuery voi oximbá va'erã meme mba'emo ra'angaarã ojapoague re, mba'eta ta'angaa ikuai va'e ma anhetêgua e'ŷ meme, ipytuẽ va'e'ŷ guive.

¹⁸ Ha'e nunga ma mba'everã ndovarei va'e, oojai rei pyrã rive. Nhombopagaa ára py okanhymba 'rã.

¹⁹ Ha'e rã Jacó peguarã Me'ëare ma ha'e rami e'ŷ. Mba'eta ha'e ma opa mba'e moingoare, ha'e Israel kuery ma ixupagua ikuai. Hery SENHOR ma SENHOR ixondaro reta va'e.

²⁰ "Ha'e gui ndee Babilônia ma xerembiporu mba'emo mbotaa rami areko, joe apu'ãa rupi aiporu va'ekue. Ndevy pe ambovaipa uka yvy regua, amokanhy uka huvixa kuery guive.

²¹ Ndevy pe amokanhy uka kavaju ha'e hi'árygua kuery. Amokanhy uka karóxa ha'e ija kuery.

²² Ndevy amokanhy uka avakue ha'e kunhague, tujakue ha'e ipyaukue, kunumigue ha'e kunhataigüe.

²³ Ndevy amokanhy uka vexa'i re opena va'e ha'e hymba kuery, yvy oikaraĩ va'e ha'e vaka omba'eapo va'e, yvy re opena va'e kuery ha'e yvatekueve guive.

²⁴ Ha'e rami teĩ pexaa py ae ambopaga 'rã Babilônia ha'e caldeu kuery ha'e javi, Sião tetã py ojapo vaiague re", he'i SENHOR.

²⁵ "Ne'ëxa, ndee ma yvyty nhomokanhyia yvateve va'ekue, yvyty ha'e javi mokanhyia reiko va'ekue ri xee ma nderovai aiko", he'i SENHOR. "Nderovai aupti 'rã xepo, itaova áry gui roity 'rã yvy'ã guy katy, ha'e reiague ajapo 'rã mba'emo ra'ykue aty okai oiny va'e rive.

²⁶ Reiague gui ma noguenoẽai 'rã ita, neĩ oo ytarã ha'e oo renderã, tekao ve'ŷ rojapo rire raka'e rã peve guarã", he'i SENHOR.

²⁷ "Pemopu'ã bandeira yvy re, pemonhe'ẽ mimby guaxu guive yvy regua kuery ikuia rupi. Penoimba yvy regua kuery Babilônia rovai guarã. Penoĩ Ananote, Mini ha'e Asquenaz tetã pygua kuery. Hovai guarã pemoĩ xondaro kuery ruvixa, peru ruka kavaju tuku-karu rami.

²⁸ Hovai guarã penoĩ yvy regua kuery, Média pygua huvixave kuery voi, ha'e pygua opena va'e ha'e huvixa kuery, openaa rupigua kuery ha'e javi guive."

²⁹ Ha'e gui yvy oryryi vy omyī rei oiny haxya re, mba'eta Babilônia rovai SENHOR onhembopy'aa oī atā va'e meme, Babilônia yvy tekao ve'ŷ ojapo aguā, ha'e py noīavei aguā.

³⁰ Ha'e ramo Babilônia pygua ipy'a guaxukueve teĩ nopus'âvei 'rā joe, oo ikorapa va'e py tema 'rā onhemi. Na'imbaraetevei ma, kunhague rami ikangy va'e. Ha'e kuery ro okaipa, ha'e tetā kora rokē jokoa omopēmbaa ma.

³¹ Ha'e nunga rupi kuaxia reraa ha'e ayvu mombe'uarā kuery jorire-rire oē 'rā oje'oivy, Babilônia pygua huvixa pe omombe'u aguā joavaive gui hetā oipe'apaague,

³² yakā oaxaaty ikuai va'e re ipo'akapaague, oo ikorapa va'ekue oapypaague, ha'e gui joe opu'aa pygua kuery ndaekorāveipa okuapy guive.

³³ Mba'eta po rami SENHOR ixondaro reta va'e, Israel kuery Ruete ijayvu: "Babilônia tetā opyta mba'emo moa'yīaty ombojoja pyre, opyrōmba porā'i mbyre rami, mba'eta hare'ŷ re ovaē 'rā omono'ōa aguā ára", he'i.

³⁴ "Babilônia pygua huvixa Nabucodonosor ma oremokanhymba, oremou'ūmba ha'e oreapo mba'emo ryrukue oiporuve pyrā e'ŷ. Yy rupigua rami rive oremondoropa, ha'e vy guye omonyē tembi'u iporāve va'e orererekova rei, ha'e gui ma orembojevypa ju.

³⁵ Ha'e gui ma Sião pygua aipote'i: 'Tove Babilônia re toiko xeapo vaiague ha'e xero'o ombovaipaague ramigua.' Jerusalém pygua aipote'i: 'Tove caldeu kuery re toĩ xeruguy omoēague re opaga aguā', te'i."

³⁶ Ha'e nunga rupi SENHOR aipoe'i: "Ne'exa, aikuua pota 'rā penderekova re, ha'e roepy 'rā pendeapo vaiague re. Ha'e rami vy amboypa 'rā ha'e kuerya py yy ha'e yguia ikuai va'e.

³⁷ Ha'e ramo Babilônia opyta 'rā mba'emo ra'ykue aty, jagua-tuvy nhe'ē ikuai atyrā rive, nhomondyipaarā ha'e ojojai rei pyrā. Ha'e gui nda'ipoai 'rā ha'e py oī va'erā.

³⁸ Guary onhendua rami ha'e kuery onhendu teĩ, guary ra'y kuery okororō reia rami.

³⁹ Ha'e gui ha'e kuery okaruxe rami ha'e kuery pe ajapo uka 'rā peteī ngaru, amonga'upa 'rā guive. Ha'e ramo ha'e kuery ovypaaga rei ma vy okepa 'rā okuapy, raka'eve rā peve 'rā nomyīvei", he'i SENHOR.

⁴⁰ "Ajapo 'rā vexa'i ra'y kuery ojukaa aguā katy oguejypaa rami avi ha'e kuery voi okanhymba aguā, vexa'i ha'e kavara rami ete.

⁴¹ "Ha'e rami py ae 'rā Babilônia tetā oitya. Oipe'aa xapy'a 'rā, yvy regua ojou porāmba teĩ. Babilônia opyta 'rā yvy regua kuery onhemondyipa reia va'e rive.

⁴² Babilônia áry rupi ye'ē ou ramo yai opu'ā-pu'ā vy ojao'ipa 'rā.

⁴³ Tetā ikuai va'e ivaipa, yvy voi ipiru ha'e tekao ve'ŷ opyta avave rei oī e'ŷ aguā, ha'e rupi avakue ndoaxavei 'rā guive.

⁴⁴ Babilônia py ambopaga avi 'rā ta'angaa Bel. Ha'e vy ajapo 'rā mba'emo omokō va'ekue ombojevypa ju aguā rami. Ha'e rire yvy regua kuery ndooovei 'rā ixupe ikuai aguā. Babilônia tetā kora guive oitypaa 'rā.

⁴⁵ "Ha'e nunga rupi xevygua kuery, tapeopa ha'e kuery mbyte gui. Peteī-teĩ peraa jepe penderekovea SENHOR opoxya tapyī rami oexa uka va'e gui.

⁴⁶ Pendeporiau eme pendepy'a py, pekyje eme guive yvy jave rupi ayvu omombe'ua rā pendu vy. Mba'eta peteī ma'etŷa omombe'ua 'rā peteī ayvu, ha'e rā ma'etŷa jevy py amboae rami ju 'rā omombe'ua. Yvy re oiko 'rā ipo'aka va'e kuery meme joe opu'āa.

⁴⁷ Mba'eta ne'exa, ovaē ma oiny ára mba'emo ra'angaa Babilônia pygua kuery ojapo va'ekue ambopagapa aguā. Ha'e ramo ijyvy ha'e javi rupi omoximba 'rā okuapy, ha'e yvy mbyte py ha'e regua oipyxoaa rā ho'apa 'rā.

⁴⁸ Ha'e ramo yva ha'e yvy, ha'e hexe ikuai va'e ha'e javi oguerovy'a 'rā Babilônia tetā re oiko va'e, kuaray ijapu'a'ia katy gui imbovaipaarā ou ramo", he'i SENHOR.

⁴⁹ "Mba'eta Babilônia pygua kuery Israel kuery oipyxo vy oitypaaage rami ae Babilônia py ju yvy jave guigua oipyxo vy oitypa 'rā.

⁵⁰ “Ha'e nunga rupi peẽ kuery kyxe gui peo jepe va'ekue, tapeo na, pepytave eme ha'e py. Mombyry peikoa py penema'endu'a ke SENHOR re, ha'e pemoĩ pendepy'a re Jerusalém katy peguata aguã.

⁵¹ Aipopeje: ‘Nhaxímba jakuapy, nhanembojaru reia rupi ijayvu va'e nhaendu rire. Nhanderova re ojekuaa nhaxímbaa anho rei, mba'eta amboae regua ou vy SENHOR pegua oo iky'a e'ŷ va'e py oikepa ramo’, peje.

⁵² Ha'e rami teĩ ou ma oiny ára mba'emo ra'angaa ha'e kuery pegua ambopaga aguã”, he'i SENHOR. “Ha'e ramo oipyxoa rã onhendu rei 'rã okuapy ha'e kuery yvy ha'e javi rupi.

⁵³ Mba'eta Babilônia pygua kuery yvate ojeupi, ha'e oo ikorapa va'e yvate rupi omombaraeteve teĩ xea gui ou 'rã imbovaipaarrã”, he'i SENHOR.

⁵⁴ “Babilônia gui haxẽ va'e onhendu, caldeu kuery yvy gui onhendu ratã opa rupi ombovaipaa rã hevovo rei va'e.

⁵⁵ Ha'e gui SENHOR Babilônia ombovaipa vy omokyrirímba 'rã onhendu va'e. Ha'e gui ma onhendu 'rã yy heta va'e yai revovo rami avi hovaigua kuery onhendu ratã rei va'e.

⁵⁶ Mba'eta Babilônia pygua kuery rovai ou oiny imbovaipaarrã. Ha'e ramo ombo'apaa ma ipy'a guaxukueve, ha'e kuery rapa guive omopẽmbaa ma. Mba'eta SENHOR Nhanderuete ombopagina 'rã, omboekovia 'rãe.

⁵⁷ “Amonga'upa 'rã ha'e pygua huvixa kuery, hi'arandu va'e, yvy re opena va'e, huvixa irũ kuery ha'e ipy'a guaxukueve teĩ. Ha'e ramo ha'e kuery oke riae 'rã okuapy, ndovyvei 'rã”, he'i Huvixave SENHOR, ixondaro reta va'e hery va'e.

⁵⁸ Po rami SENHOR ixondaro reta va'e ijayvu: “Babilônia tetã kora hi'aĩ va'e ipo ruxu teĩ oitypaa 'rã. Hokẽ ikuai va'e voi yvateve teĩ tapyímba 'rã tata gui. Mba'eta yvy regua kuery omomba'emo pyre ojapo rive okuapy, tata peguarã rive ikane'õmba okuapy tetã ojapoa py”, he'i.

⁵⁹ Pova'e ayvu ma Babilônia katy profeta Jeremias omondouka va'ekue Nerias ra'y Seraías, Maaséias ramymino va'e po py, Judá pygua huvixa Zedequias reve ogueraa jave, irundy ma'etã re ma oĩ jave py. Seraías ma hembiguai opy rupi opena va'ekue.

⁶⁰ Peteĩ kuaxia re Jeremias ombopara vy omombe'u Babilônia áry ha'e rami ete mba'emo vai ou va'erã. Babilônia rovai ayvu ha'e javi ombopara.

⁶¹ Ha'e vy Seraías pe Jeremias aipoe'i: “Babilônia py revaẽ vy ne'exa, eroayvu ratã ha'e va'e ayvu ha'e javi.

⁶² Aipo're 'rã guive: ‘SENHOR, kova'e tekaoa re ndeayvu va'ekue remomba ete aguã re, ha'e py mba'eve re nda'ipoavei aguã, avakue neĩ mymba, ha'e raka'e rã peve ivaipa ete va'e opyta aguã re’, 're 'rã.

⁶³ Kuaxia reroayvupa ma vy ejokua ju peteĩ ita re, ha'e emombo Eufrates yakã mbyte py.

⁶⁴ Ha'e vy aipo're: ‘Nami 'rã Babilônia omoingea, noẽvei 'rã guive, hexe mba'emo vaia ára ambou rire. Ha'e py ikuai va'e omanomba 'rã', 'ere.’

Apy ma Jeremias ayvu oĩ opa ma.

52

2 Reis 24.18-25.22; 2 Crônicas 36.10-21; Jeremias 39.1-10

¹ Zedequias ma vinte e um ma'etã oguereko jave py oĩ ipy huvixa. Ha'e gui onze ma'etã re opena Jerusalém py. Ixy rery ma Hamutal, Libna pygua Jeremias rajy.

² Zedequias ma ha'eve 'ŷ va'e anho ojapo oikovy SENHOR renonde rupi, guyke'y Jeoaquim ojapoague ha'e javi rami.

³ Ha'e nunga oiko Jerusalém ha'e Judá pygua kuery rovai SENHOR ipoxy ramo, guenonde gui oipe'apa aguã. Ha'e gui huvixa Zedequias ju opu'ã Babilônia pygua huvixa rovai.

⁴ Huvixa Zedequias nove ma'etã re ma huvixa oĩ jave, dez jaxyha'e dez araa py ma Babilônia pygua huvixa Nabucodonosor ou Jerusalém py. Oxondaro kuery ha'e javi reve oupa vy ijaty okuapy tetã rovai rupi. Jovaive re omopu'ã imo'amy ijokoarã.

⁵ Onze ma'etã re ma huvixa Zedequias oĩ peve ojokopa tetã.

⁶ Ha'e gui irundy jaxya re nove araa py ma tetā ha'e javi rupi karuai oiko rā ha'e pygua kuery ndojouwei ho'u va'erā.

⁷ Ha'e va'e jave py ombokuaa tetā kora. Ha'e ramo ha'e va'e pygua avakue joe opu'āa pygua onhamba pyávy. Mokoī kora pa'ū okē oī va'e rupi oje'oi, huvixa mba'e yvotyty oī va'e yvýry tape oī va'e rupi, caldeu kuery tetā joavaive re ikuai teī. Ha'e rā huvixa ma yvy joja reia rupi tape oī va'e rupi onha.

⁸ Ha'e ramo caldeu regua xondaro kuery huvixa Zedequias rakykue oje'oi vy oupity Jericó katy'i nhuündya oī va'e py. Ha'e ramo hexeveguia xondaro kuery oaīmba vy oejapa oje'oviv.

⁹ Ha'e ramo ojopy vy ogueraa Ribla py Babilônia pygua huvixa oīa py, Hamate yvy re. Ha'e ramo ijayvu ombopaga aguā re.

¹⁰ Ha'e rami vy Babilônia pygua huvixa ojukapa Zedequias ra'y kuery tuu oexaa py. Ribla tetā pyve ojukapa avi Judá regua yvatekueve.

¹¹ Ha'e rami vy omombupa Zedequias rexa. Ha'e vy mokoī corrente overa va'e guigua py ojokua reve ogueraa Babilônia katy. Ha'e py oī tema nhuā py omano peve.

¹² Ha'e gui dezenove ma'etý re ma Babilônia pygua huvixa Nabucodonosor oī jave py, peteī nhiruī jaxya re dez araa py ma peteī ou Jerusalém py, Babilônia pygua huvixa rembiguai, jopya kuery ruvixa Nebuzaradā hery va'e.

¹³ Ha'e va'e ma oapypa SENHOR pegua oo, huvixa rogue, ha'e Jerusalém tetā rupi oo ikuai va'ekue ha'e javi. Oapypa avi oo iporāgueve ikuai va'ekue.

¹⁴ Ha'e rami vy jopya kuery ruvixa reve caldeu regua xondaro kuery ou va'ekue oitypa okuapy Jerusalém tetā yvýry rupi kora oī va'ekue.

¹⁵ Tetā py iporiaukueve ha'e amboae kuery optya va'ekue ma jopya kuery ruvixa Nebuzaradā ogueraapa escravo-rā, Babilônia pygua huvixa pe ojejopy uka va'ekue guive.

¹⁶ Ha'e rā yvy re iporiaukueve'i regua ma jopya kuery ruvixa Nebuzaradā oeja ha'e py ae, uva nhotýarā ha'e mba'ety rupi ombo'epo va'erā.

¹⁷ Ha'e gui caldeu kuery omopēmba okuapy SENHOR pegua oo ytarā overa va'e guigua hi'aī va'ekue. Ha'e vy overa va'e oī va'ekue ogueraapa Babilônia katy.

¹⁸ Ogueraa avi oja, pá, tapyī araa, heakuā porā va'e ryru, ha'e tembiporurā overa va'e gui ojapo pyre ha'e javi. Ha'e nunga Nhanderuete mboetea rupi oipor va'ekue meme.

¹⁹ Jopya kuery ruvixa ogueraa avi karo, tapyī ryru, hy'a guaxu, oja, tata renda, heakuā porā va'e ryru, hy'a'i, ha'e gui tembiporu ouro ha'e prata guigua ha'e javi.

²⁰ Ha'e gui mokoī ooyta hi'aī va'ekue, mba'emo ojoiaty ha'e henda SENHOR pegua oo pyguarā Salomão ojapo va'ekue, ha'e nunga ha'e javi re overa va'e oī va'ekue poyia ma noa'ā kuaai.

²¹ Ha'e gui ooyta hi'aī va'ekue yvatea ma oito metros, ha'e rā ojerea rupi ma peteī ixā cinco metros raxa'i va'e oo. Ipo guaxua ma irundy kuā, inhyvyī rei va'e vy.

²² Hi'árygua rupi oī imbojeguaarā overa va'e guigua. Peteī-teī yvatea ma mokoī metros raxa'i. Ha'e gui ijegua áry rupi oī kya ha'e yvyra'a ra'angaa overa va'e guigua.

²³ Ha'e rami ae ju amboae ijyta re yvyra'a ra'angaa oī avi. Ijyvýry rupi oī raka'e noventa e seis yvyra'a. Ha'e gui ijyvýry yvyra'a ra'angaa kya áry ikuai va'e ha'e javi vy cem.

²⁴ Jopya kuery ruvixa ogueraa avi sacerdote yvateve va'e Seraías, sacerdote yvýive va'e Sofonias, ha'e gui okē rarōa kuery mboapy ikuai va'ekue guive.

²⁵ Tetā gui ogueraa avi peteī xondaro kuery ruvixa oī va'ekue, ha'e gui sete avakue huvixa mongetaaty tetā py ojou va'ekue, ha'e xondarorā ha'e py ikuai va'e rery ombopara va'ety, ha'e gui sessenta avakue ha'e pygua tetā rupi ojou va'ekue.

²⁶ Ha'e va'e kuery ma jopya kuery ruvixa Nebuzaradā ojopy vy ogueraapa Babilônia pygua huvixa Ribla py oīa py.

²⁷ Ha'e ramo Babilônia pygua huvixa oipyxo uka vy ojuka ukapa Ribla py, Hamate yvy re.

²⁸ Ha'e rami py Judá kuery escravo-rā ogueraa ijyvy gui. Nabucodonosor escravo-rā ogueraa va'ekue ma po rami: sete ma'etýa re ma três mil e vinte e três judeu kuery ogueraa,

²⁹ ha'e gui dezoito ma'etýa re ma Nabucodonosor oĩ jave py Jerusalém gui escravo-rã ogueraa avi oitocentos e trinta e dois ju,

³⁰ ha'e gui vinte e três ma'etýa re ma Nabucodonosor oĩ jave py jopya kuery ruvixa Nebuzaradã escravo-rã ogueraa avi judeu kuery regua setecentos e quarenta e cinco. Ha'e javi vy ogueraa raka'e quatro mil e seiscentos.

2 Reis 25,27-30

³¹ Ha'e gui Judá pygua huvixa Joaquim trinta e sete ma'etý re ma ombo'aa jave, vinte e dois jaxy re vinte e cinco araa py, Babilônia pygua huvixa Evil-Merodaque oĩ ypy'i vyve opoi uka. Ha'e rami vy omondouka ju nhuã py ombo'aague gui.

³² Hexeve ijayvu ha'eve vai'i reve. Ha'e vy omoõ amboae huvixa kuery Babilônia py hexeve ikuai va'e gui omboetevea rupi.

³³ Ha'e ramo Joaquim oao nhuã py oiporu va'ekue omboekovia vy huvixa renonde ae okaru oikovy ko'ẽ nhavõ, oikovea pukukue re.

³⁴ Ko'ẽ nhavõ oikovea ja Babilônia pygua huvixa po gui ixupe ome'ẽa mba'emo oipota va'e repyrã, omano 1peve.

**Jeremias nhogueronhemboaxya rupi ijayvuague
Jeremias nhogueronhemboaxya lamentações [esta
palavra em português] rupi ijayvuague**

Kova'e kuaxia para re ma Jeremias ipy'a vaia rupi ijayvu Babilônia pygua kuery Jerusalem tetā oitypaague re. Ha'e rami teĩ kuaxia mbyte py ma ojerovia etea rupi ijayvuague avi oĩ:

“Mba'eta Senhor nhanemboaxy ramo ma nanhanemombaai,
mba'eta nhanemboaxya ma opa va'erā e'ŷ.

Opa mba'e py ojeroviapy reiko vy
rexā uka pyau 'rā ko'ẽ nhavō.

Xejeupe ae aipoa'e: ‘Xevy guarā oĩ va'e ma Senhor ae.
Ha'e nunga rupi arō tema 'rā hexe', ha'e.

Senhor opena porā 'rā harōa kuery re,
onhe'ẽ py oeka va'e kuery ae.

Ha'eve nharō Senhor nhandereraa jepe aguã,
nhakyrirī reve” (3.22-26).

Jerusalém tetā ombovaipa ha'e oejapaa ague re ndovy'aaiaque

¹ Tetā yma heta riae ikuaiague teĩ aŷ ma oejapaa ma!*

Aŷ ma kunha imeve'ŷ va'e rami optyta,
yvy regua kuery omboeteve va'ekue ri.
Amboae tetā ikuai va'e gui huvixa rajy rami yvateve va'ekue ri
aŷ joupe rive ha'e kuery omomba'eapo nhea'ãa.

² Ojae'o, ojae'o tema okuapy pyávy,
hexay oxyry tema 'rā hetovape rupi.

Ndoikoi imbopy'a porāarā
hembiayvu heta ikuai va'ekue ri.
Hembiayvu ikuai va'ekue ha'e javi ma anhetē rupi e'ŷ oguereko,
ha'e hovai guarā rive ju ikuai.

³ Mba'eta Judá kuery ma escravo-rā ogueraapaa,
oguereko axya ha'e omomba'eapoa poyi anho rei.
Yvy regua kuery mbyte rupi ikuia py
ndojoui optyu'u aguã voi.
Ikuai axy reia py
hakykue monhaa kuery oupitypa ma.

⁴ Sião tetā katy tape oo va'e rupi ojae'oa,
mba'eta ndoikovei ma nhemboaty iky'a e'ŷ va'e katy oo va'e.
Tetā kora rokē ha'e javi ombovaipaa.
Ha'e pygua sacerdote kuery ipoaẽ rei,
kunhataigue voi iporiaupa okuapy.
Tetā py ojexavaia anho oendu.

⁵ Ha'e rami rā hovaigua kuery ov'yapa rei okuapy,
ija'e'ŷ va'e kuery ikuai porāmba rei,
ha'e pygua kuery anhetē rupi e'ŷ riae ikuai ramo
SENHOR omoingo axy rā oexa vy.
Ta'y kue'iry voi hovaigua kuery
omondyi heravy escravo-rā.

* 1:1 “Tetā” he'ia ma Jerusalém re ae ijayvu vy, Babilônia pygua kuery ombovaipa rire (2 Reis 24-25; 2 Crônicas 36; Jeremias 39, 52).

- ⁶ Sião pygua kuery gui oaxapa ma
iporãa oĩ va'ekue ha'e javi.
Ha'e py yvatekueve ikuai va'ekue voi
guaxu ho'u va'erã ndojouvei va'e rami ma ikuai,
ikangypa rei vy ho'apa rive 'rã okuapy
imonhaa kuery renonde py tei.
- ⁷ Aŷ mombyry ogueraa ague py ombojexavaia rã
Jerusalém guigua kuery ima'endu'a 'rã okuapy
omba'e rei-rei oguerovy'a va'ekue re,
ymave rupi mba'emo oguereko va'ekue re,
heraa jepearã ndoikoi ramo
ngovaigua kuery po py ho'apaague re guive,
ha'e gui ho'a rã hovaigua kuery oexa vy
ojajai rei okuapyague re.
- ⁸ Jerusalém pygua kuery ojejavý vaipa ete okuapy.
Ha'e rami vy ae ojeguaru reipy ikuai.
Imboeteare kuery ma nonhemoirüvei okuapy
ipire reia rupi ikuai rã oexa vy.
Ha'e kuery ae voi ipoaë reve
ojepe'a 'rã okuapy oximba rei vy.
- ⁹ Ijaõ re ojekuaa ha'eve'ýa,
noexa'ái guive va'ekue omombaa aguã re.
Ha'e rami vy oitya rã onhemondyipa rei okuapy,
ha'e avave rei ndoikoi imbopy'a porã jevyarã.
SENHOR, exa ke aiko axya,
mba'eta hovaigua kuery ijayvu vaive rive tema okuapy.†
- ¹⁰ Ore kuery mba'e rei-rei roguerovy'ave va'ekue ma
orerovaigua kuery ojopy vy ombo'erã ae ogueraapa.
Roexa avi yvy regua kuery oike okuapy rã
rombojeroviaaty iky'a e'ý va'e py voi,
“Nda'evei xevygua kuery ijatya py ha'e kuery ikuai avi aguã” aipo're va'ekue ri.
- ¹¹ Tetã pygua kuery ha'e javi ipoaë 'rã okuapy
tembi'u'i rekaa rupi ikuai vy.
Ombo'e rei-rei ha'e kuery oguerovy'ave va'ekue ome'ëmba ma
tembi'u ho'u va'erã rekoria, imbaraeteve'i ju aguã.
SENHOR, exa ke, eikuua pota guive,
mba'eta xere nda'ija'eavei ma.
- ¹² Peẽ kuery tape rupi peaxa va'e,
ha'e nunga pexa vy napendui ri ty'y oremboaxya?
Pema'ë ha'e peikuaa pota.
Oiko 'rã nda'u haxy va'e xee aendu va'e ramigua,
xe'áry ou va'ekue ramigua ete?
Mba'eta SENHOR opoxya oexa ukaa ára xemoingo axy avi.
- ¹³ Ha'e rami vy yvate gui tata ombou xekágue ikuai va'e re
ípo'aka ete vy.
Ha'e gui xepy rupi ju kya omoï va'e py
xerakykue katy gui xemoatã vy xereity.
Ha'e rami vy xemomba tema heravy,
xemomba'eaxy ko'ë nhavõ.
- ¹⁴ Ajejavýague ma opo py ae ojokua vy

† 1:9 Jeremias “Aiko axya” he'i mba'eta ha'e ae voi opyta Judá yvy re Babilônia pygua kuery ndogueraapai va'ekue reve (Jeremias 40.1-6).

- ojapo xe-cangarã rami.
 Ha'e vy oipopẽ va'ekue xeaju'y rupi peve ovaẽ.
 Ha'e rami py SENHOR omomba ma xembaraetea,
 xemboaxa guive xegui ipo'akave va'e kuery po py.
- ¹⁵ SENHOR omaimba avi ma ipy'a guaxukueve
 xereve ikuai va'ekue.
 Ombou reta xerovai ono'õ va'erã,
 xea pygua kunumigue omou'ũmba avi aguã.‡
 Kunhata'i rami Judá pygua kuery ndojexavai va'ekue ri
 SENHOR opyrõ ukapa uva omou'ũaty py rami.
- ¹⁶ Ha'e nunga re ae xee ajae'o,
 xerexay gui xerexa ndoexavei.
 Xegui ojepé'a ma xembopy'a guaxuarã
 xembaraete ombopyau 'rã va'ekue.
 Xera'y kuery voi ojexavai reia rupi ikuai,
 hovaigua ipo'aka ramo.
- ¹⁷ Sião pygua kuery opo oupi teĩ
 avave rei ndoikoi ipytyvõarã.
 Mba'eta Jacó regua kuery re SENHOR ijayvu rire
 ha'e katy'i rupi ikuai va'e hovaigua ju ikuai.
 Ha'e ramo Jerusalém tetã pe ha'e kuery
 "Ha'eve'ŷ va'e" he'i okuapy.
- ¹⁸ Ha'e rami avi SENHOR ma heko porã va'e,
 ha'e rã xee ma nanhe'ẽ renduxei va'ekue.
 Peẽ yvy regua kuery ha'e javive, pendu ke,
 pema'ẽ guive haxy aendu va'e re.
 Xea pygua kinhataigüe ha'e kunumigue
 ogueraapaa ma escravo-rã.
- ¹⁹ Xeirũ kuery aenoĩ
 teĩ ha'e kuery xembotavy.
 Xea pygua sacerdote ha'e nhomongeta va'ety kuery voi
 omanomba tetã rupi,
 tembi'u rekaa rupi ikuai vy
 imbaraetepa'i ju aguã.
- ²⁰ Ema'ẽ SENHOR, mba'eta xee ajexavai.
 Xenhe'ẽ py nda'evei ete aikovy,
 xekuraxõ py ndaxerekorãvei ma xeryepy rupi,
 opa mba'e py noronhe'ẽ rendui rire.
 Oka rupi xera'y kuery ojukapaa kyxe py,
 ha'e rã opy rupi ma mano anho oiko.
- ²¹ Xepoaẽa onhendu
 teĩ avave rei ndoikoi xepytyvõarã.
 Mba'emo vai aendua xere ija'e'ŷ va'e kuery oikuua vy
 ovy'a reipa okuapy, ndee xemoingo axy ramo.
 Ha'e rami avi ára ndeayvuague ovaẽ ramo
 xee aiko axya ramo avi ha'e kuery voi ikuai axy 'rã.
- ²² Tove ha'e kuery ojeavyague tojekuaapa nerentonde.
 Ereko ha'e kuery voi xere rejapoague rami,
 xee anhetẽ rupi e'ŷ aikoa py.
 Mba'eta xepoaẽ vaipa ete,
 xekuraxõ opa rai'i ma.

‡ 1:15 Apy "Xee" he'ia ma Jerusalém ae ijayvua rami Jeremias ijayvu vy, ojee e'ŷ.

2

“SENHOR gui ae ou Sião pygua ikuai axy aguã”, he’iague

¹ Arai rami SENHOR ojao’i Sião pygua kuery opoxya py.

Yva gui oity Israel kuery po’akaa yvy py,
Opoxya oexa ucaa ára ovaẽ ramo
na’ima’endu’avei ipy renda oĩ va’ekue re.*

² Ha’e rami vy SENHOR omboaxy e’ŷ re
omboavaipa Jacó regua kuery rekoa ha’e javi.
Opoxya rupi oity

Judá kuery ro ikorapa va’ekue.
Yvy rupi oitypa, nombovarevei ae
yvatekueve ha’e openaague.

³ Opoxya py omomba Israel kuery po’akaa ha’e javi.
Hovaigua kuery ou teĩ omboapu’i ju oiporu kuaa regua.
Ha’e vy Jacó kuery rovai imoendyarã ombou
tata rendy vuku ijyvýry rupi oapypa va’erã.

⁴ Ha’e kuery re oipira guapa hovaigua rami.
Hovaigua rami ete onhemomburu oiporu kuaa regua re.
Ha’e vy omokanhymba iporã va’ekue ha’e javi.
Tata rami opoxya omonhemboja Sião tekoa áry.

⁵ Hovaigua rami SENHOR oiko vy
omokanhymba Israel kuery.
Omboavaipa huixia kuery ro ha’e javi,
oo ikorapa va’ekue oitypa.
Ha’e vy Judá kuery ikuia py omboetave tema
ojae’o ha’e ipy’i vai va’e.

⁶ Ojeupeguia templo voi omboavaipa vyvoi
mba’emo rogue’i onhotŷ mbyre rami rive.
Omboavaipa ojeupeguia kuery ombojeroviaaty.
SENHOR ojapo orerexaraipa aguã rami
Sião py ngaru rojapo ha’e sábado ára romboeteague re.
Opoxya rupi omboyke avi
huixia ha’e sacerdote ikuai va’ekue.

⁷ SENHOR ndoiptavei ojeupeguia altar,
ojeupeguia oo iky’i e’ŷ va’e ndojou porâvei vy.
Hovaigua kuery po py omboaxa
oo tuvixakueve kora.
Ha’e ramo SENHOR pegua opy rupi ha’e kuery ojapukai okuapy
ngaru oikoa ára py rami.

⁸ SENHOR ojee omoõ avi
Sião tetã kora omboavaipa uka aguã.
Ha’e rami vy omoatã uka ixã mba’emo a’ãarã,
ndoipe’ai guive opo omboavaipa e’ŷa ja.
Ojapo kora ha’e imbotya opurupa rei aguã rami,
ha’e nunga ha’e javi ikangypave ovy.

⁹ Kora rokẽ voi oitypa yvy rupi.
Okẽ jokoa voi omopẽ, omboa’ypa ete.
Ha’e pygua huixia ha’e yvatekueve reve ma
yvy regua ikuia rupi rive ikuai,
lei oikuia e’ŷ va’e ikuia rupi,

* 2:1 “Ipy renda” he’ia ma Jerusalém py templo oĩ va’ekue re ijayvu vy (Salmo 132.7).

- ha'e profeta kuery pe ma SENHOR ndoexa ukavei mba'eve.
- ¹⁰ Sião pygua nhomongeta va'ety kuery ma
okyririmbá reve oguapy okuapy yvy py.
Oakā re omoī okuapy yvy ku'i,
ajukue vaikue py rive onhemonde reve.
Jerusalém pygua kuhataīgue voi
oakā oity okuapy yvy peve.
- ¹¹ Xerexay py rive xerexa nda'eveei ma,
xenhe'ẽ py ndaxerekorāvei aikovy,
xekuraxõ voi ojero'a oiny aiko axy ramo,
xevyguia kuery omombaa ague re xepy'a vaia py.
Mba'eta kyrīgue okambu'i va'e voi omanomba
tetā rupi tape ikuai va'e rupi.
- ¹² Oxy kuery pe kyrīgue aipoe'i:
“Mamo nda'u jajou 'rã mbojape ha'e vinho?”
he'i okuapy teĩ tetā rupi tape ikuai va'e rupi,
ha'e rami teĩ kyxe gui rami ho'apa okuapy,
ha'e rami e'ŷ vy oxy kuery jyva áry oĩ reve
onhe'ẽ oeja ovy.
- ¹³ Ndee Jerusalém pygua, marã rami tu xee rombovai ta?
Ndee Sião pygua, mba'e nunga re tu rombojoja 'rã,
mava'e re tu romboje'a 'rã rombopy'a porã aguã?
Mba'eta nemombaarã ou va'e ma ye'ẽ rami tuvixa.
Mava'e tu nepytyvõ 'rã?
- ¹⁴ Ndea pygua profeta kuery ma ndevy pe omombe'u
oexa ra'u va'ekue ramigua mba'eve ovare'ŷ va'e.
Ha'e rã nderekova re ma ha'e kuery nda'ijayvui
nemoingo porã ju aguã.
Ha'e rami 'rãgue py oexa ra'u va'ekue ramigua rive omombe'u vy
ojapo escravo-rã ndereraa aguã rami.
- ¹⁵ Ha'e nunga rupi tape rupi oaxa va'e kuery ma
ojepopete ha'e oakā ombovava reve oje'oi
Jerusalém pygua kuery ojojai rei vy.
“Peva'e tetā pe teve ‘Pavē gui iporāve va'e,
yvy jave regua oguerovy'a va'e', 'ea va'ekue?’” he'i oje'oivy.
- ¹⁶ Ndere ija'e'ŷ va'e kuery
ojuru oipe'a 'rã nderovai,
ndejojai rei reve haĩ jekyty rei 'rã okuapy.
Ha'e vy aipoe'i 'rã: “Nhamondoropa ke.
Anhetẽ ete, kova'e ára ae nharōague.
Ojeupity rã jaexa ma”, he'i okuapy.
- ¹⁷ Mba'eta SENHOR ae ojapo onhembopy'aague.
Yma guive nderovai ijayvuague
ojapo ojeupitypa aguã rami.
Ha'e rami vy nemboaxy e'ŷ re ndereity.
Ojapo nderovaigua kuery ndere ovypa rei aguã rami,
ha'e kuery ombopo'akapave vy.
- ¹⁸ Jerusalém pygua kuery okuraxõ py ojapukai okuapy SENHOR pe.
Ndee Sião tetā kora,
nderexay toxypy yakā'i rami,
ara py ha'e pyávy.
Epytu'u eme, nderexa topytu'u eme ojae'oa gui.

- ¹⁹ Epu'ã ke, ejapukai pyávy
pytū ypy'i ramove.
SENHOR renonde enhoẽ yy rami ndepy'a re oĩ va'e.
Ixupe eipi ndepo ndera'y ha'e nderajy kue'iry rekove re.
Mba'eta ha'e kuery ma karuai gui rive ho'apa okuapy
tape ikuai va'e ha'e javi rupi.
- ²⁰ Ema'ẽ SENHOR, ha'e eikuaa pota
marã ramigua kuery ha'e rami ete remoingoa re!
Mba'eta kunhague ho'u 'rã teve oikuavã va'ekue ae,
omemby kuery oayvua'i rupi oguereko va'ekue?[†]
Ha'e rami e'ŷ vy SENHOR pegua oo iky'a e'ŷ va'e py
ojukapaa 'rã teve sacerdote ha'e profeta kuery?
- ²¹ Mba'eta kunumigue ha'e tujakue'i re'õgue
yvy rupi ikuai tape ikuai va'e rupi.
Xea pygua kunhataigue ha'e kunumigue
ojukapaa kyxe py.
Ndee ae ma rejuka uka ndepoxya ára py.
Remboaxy e'ŷ re rejuka uka.
- ²² Opa rupi gui rembou xemongyjearã,
ndevygua nhemboaty oikoa py rami.
SENHOR opoxya oexa ucaa ára ma
ndoikoi oo jepe va'e neĩ optyta va'erã.
Mba'eta hovaigua kuery omomba ma
xee ayvua'i rupi amongakuaa va'ekue.

3

Ojexavaia re ijayvuague

- ¹ Xee ma ava jexavai aendu va'ekue
Nhanderuete opoxya rupi yvyra po'i'i ombou rã.
- ² Mba'eta xereraa vy ojapo karamboae pytū rupi aiko aguã,
hexakãa rupi e'ŷ.
- ³ Mbovykue rei e'ŷ xerovai omoõ opo,
ára pukukue re.
- ⁴ Omoxorimba xero'o, xepire voi.
Xekãgue omopẽmba guive.
- ⁵ Xerovai omopu'ã xejokoarã kuery.
Veneno ha'e haxy va'e py ae xejoko.
- ⁶ Ojapo pytúa py xerekao aguã rami,
raka'e rã peve guarã omano va'ekue rami.
- ⁷ Kora py xejoko rã nda'evevei ma aẽ aguã.
Corrente overa va'e guigua py xejokua.
- ⁸ Ajerure ha'e ajapukai tei
noendui anhembo'ea.
- ⁹ Ita guaxu omoatyrõ mbyre py ojopia xerape,
omokarẽ rei guive.
- ¹⁰ Xerarõ oiny urso oma'ẽ mbegue va'e rami,
ha'e xivi onhemi oiny va'e rami avi.
- ¹¹ Ha'e rami vy xerape gui xepe'a xapy'a vy xemboa'ypa.
Ombovaipa pyre rami xereja inony.
- ¹² Guapa oipira vy

[†] 2:20 Ha'e nunga ae oiko tetã ojokopaa rã. Tembi'u oata rã ix y kuery ho'u omemby kuery ae (Jeremias 19.9; Levítico 26.29).

- xemoī guembiarā.
- ¹³ Xekuraxō re oipyxo
 ngu'y hyru guigua py.
- ¹⁴ Xeapo xeretarā kuery ha'e javi xejojai aguā rami.
 Ára pukukue re xembojaru rei okuapy.
- ¹⁵ Jexavaia re anho xemongaru,
 xevy ho'u uka reta haxy va'e.
- ¹⁶ Xeapo ita ra'y re xeraī amopēmba aguā rami.
 Xeao'i tanhimbu py rive.
- ¹⁷ Xenhe'ẽ gui oipe'a aiko porā aguā va'ekue.
 Ha'e ramo xerexarai iporā va'e aexaague re.
- ¹⁸ Ha'e rami vy “Opa ma xeporāague,
 SENHOR aarōague voi”, ha'e.
- ¹⁹ Nema'endu'a nho ajexavaia ha'e ajae'o aikovya re,
 haxy va'e ha'e veneno ay'u va'e re guive.
- ²⁰ Xee ma ha'e nunga re xema'endu'a riae aikovy xenhe'ẽ py.
 Ha'e ramo xeryepy rupi xenhe'ẽ nda'evei ju.
- ²¹ Ha'e rami teĩ xema'endu'axe ju
 pova'e nunga arō aikovy va'e re.
- Nhanderuete omboaxyo rupi oipytyvõ aguā re ojerureague*
- ²² Mba'eta SENHOR nhanemboaxy ramo nanhanemombaai,
 mba'eta nhanemboaxy ma opa va'erā e'ŷ.
- ²³ Opa mba'e py ojeroviapy reiko vy
 rexu uka pyau 'rā ko'ẽ nhavõ.
- ²⁴ Xejeupe ae aipoa'e; “Xevy guarā oĩ va'e ma SENHOR ae.
 Ha'e nunga rupi arō tema 'rā hexe”, ha'e.
- ²⁵ SENHOR opena porā 'rā harōa kuery re,
 onhe'ẽ py oeka va'e kuery ae.
- ²⁶ Ha'eve nharō SENHOR nhandereraa jepe aguā,
 nhakyrirī reve.
- ²⁷ Nhandevy pe ha'eve
 nhanekunumi teri reve canga jexavaia regua jaropo'aka kuaa.
- ²⁸ Ha'e rami vy tajaguapy nhande ae'ia py, tanhakyrirī nhainy,
 mba'eta ha'e va'e canga ae nhandere Nhanderuete omoī va'e.
- ²⁹ Tajajero'a nhanderova yvy ku'i re omovaẽ peve.
 Xapy'a rei ma oiko nho 'rā nharō jaikovy va'ekue.
- ³⁰ Tanhaunga uka nhanderova nhaneungaxe va'e pe.
 Tanhendu rive opa marā nhandojai reia teĩ.
- ³¹ Mba'eta SENHOR ma
 nanhandereja riae 'rā.
- ³² Xapy'a rei nhanemomboriau ranhe teĩ
 nhomboaxy ete va'e vy oexa uka nho 'rā nhanemboaxy.
- ³³ Mba'eta nhomoingo axyxreia py e'ŷ
 ombojexavai avakue ra'y kuery.
- ³⁴ Xapy'a rei amongue opyrō imoiny 'rā
 nhuā py ikuai va'e re,
- ³⁵ ha'e rami e'ŷ vy Yvate ete va'e renonde teĩ
 ha'eve'ŷa rami oikuaa pota 'rā joe,
- ³⁶ ha'e rami e'ŷ vy avakue ojerure rā oendu rive 'rā,
 teĩ SENHOR ndoexai 'rā teve ha'e rami oikoa?
- ³⁷ Mava'e ayvu rupi rive tu mba'emo oiko 'rā,
 SENHOR omoingo e'ŷ rā?

- ³⁸ Yvate ete va'e gui nda'u ndoikoi 'rā ri
 mba'emo vai ha'e iporā va'e?
- ³⁹ Mba'e re tu ha'vy avakue imarā va'e ndojou porāia rupi ijayvu,
 ojejavyague re ombopaga rā?
- ⁴⁰ Jaikuua pota ke jaikoa re ae.
 Ha'e gui jaikuua porā ma vy jajevy ke SENHOR pe.
- ⁴¹ Nhandepo jaupi reve ke nhanekuraxō voi jaupi
 Nhanderuete yva re oī va'e pe. Ha'e vy aipo ja'e:
- ⁴² "Rojejavy, noronhe'ẽ rendui guive ramo
 ndee ma ndoreperdoai teri.
- ⁴³ Ndee ma ndepoxya py oreao'i reve orerakykue monha.
 Oremboaxy e'ŷ re oremokanhymba.
- ⁴⁴ Arai py renhem
 ndea py peve ronhembo'ea onhendu e'ŷ aguā.
- ⁴⁵ Yty omombo pyrā rami rive oremoingo
 yvy regua kuery ikuiaia rupi.
- ⁴⁶ Orerovai orerovaigua kuery ha'e javi
 oipe'a okuapy ojuru.
- ⁴⁷ Ore'áry ou ndorerekorāvei aguā ha'e yvykua py orembo'aarā,
 orereityarā ha'e oremokanhymbaa'rā."
- ⁴⁸ Xeretarā kuery omokanhymbaa rā
 xerexay oxyry atā ete.
- ⁴⁹ Xerexa ojae'o tema.
 Ndopo'oi, ndopytu'ui 'rā guive
- ⁵⁰ SENHOR opena e'ŷa ja,
 ha'e yva gui oexa pota peve.
- ⁵¹ Mba'emo aexa va'e gui xeporiau xenhe'ẽ py,
 kunhague xeretā rupi ikuai va'e re mba'emo oiko va'ekue káuxa.
- ⁵² Mba'e re'ŷ xerovaigua kuery
 xejukaxe okuapy guyra'i rami rive.
- ⁵³ Xemombaxe vy xemombo yvykua py,
 ha'e ita py xeapipa.
- ⁵⁴ Xeakā áry rupi yy oxyry atā ouvy.
 Ha'e ramo "Akanhy ta ma!" ha'e.
- ⁵⁵ Ha'e gui ma SENHOR, yvykua pukuvea py aĩa gui
 ajapukai nderery rupi.
- ⁵⁶ Ha'e ramo ndee rendu xeayvua.
 Emboty eme ndeapyxa ajae'oa ha'e ajapukaia gui.
- ⁵⁷ Ndevy pe ajapukaia ára ndee ae renhemboja xere.
 Ha'e rami vy xevy pe "Ekyje eme" 're.
- ⁵⁸ SENHOR, xerekove re reikuua pota vy
 xereraa jepe va'ekue aikove aguā rami.
- ⁵⁹ SENHOR, rexia reiny ha'eve'ŷa rami xererekoko okuapyague.
 Eikuua pota 'rāgue xere!
- ⁶⁰ Rexapa xeapo vai okuapy
 ha'e xerovai onhembopy'aa ha'e javi.
- ⁶¹ SENHOR, rendu xere ijayvu rei okuapy rā,
 xerovai onhembopy'aa nhavō,
- ⁶² xerovaigua kuery xerekokue ramigua rive omombe'u rā,
 ha'e ára pukukue re xere ijayvu mbegue rei okuapy rā.
- ⁶³ Exa pota tema ha'e kuery re, oguapy ha'e opu'ã ju ramo.
 Mba'eta xembojaru rei rive okuapy.

- ⁶⁴ SENHOR, ndee rembopaga 'rã
 opo py mba'emo ojapoague re.
⁶⁵ Remopytumba 'rã ha'e kuery py'a,
 ha'e kuery re rembou 'rã ayvu vai.
⁶⁶ Ndepoxya py remonha 'rã heravy.
 Ha'e rami vy remokanhymba 'rã ndevyguia yva guy gui.

4

- Tetã ojokopaa jave ikuai axya re ijayvuague*
- ¹ Mba'exa vy nda'u ouro oĩ va'ekue huũmba?
 Mba'exa vy tu ouro ombovera pyre ndoveravei?
 Ha'e rami ae avi oo iky'a e'ŷ va'e re ita ikuai va'ekue
 omoaĩmbaa tape joaxa-axaa ha'e javi rupi!
- ² Mba'eta Sião pygua yvatekueve ma
 ouro oiky'a'o pyre rami ikuai va'ekue ri
 aŷ ma ha'e kuery pe “Yapo guigua rive” 'ea,
 nhae'ū re ombo'epo va'e rembiapo ramigua!
- ³ Jagua-tuvy nhe'ě minha omokambu 'rã gua'y kue'iry.
 Ha'e rã xeretarã kuery ma porayvu ve'ŷ ma ikuai
 guyra-nhandu tekao e'ŷa rupigua rami.*
- ⁴ Ha'e ramo kyrigue okambu va'e apekũ ipirupa ma,
 ijy'uvei gui oja ijuru re.
 Kyrigue mbojape re ojerurea rupi ikuai
 teĩ avave rei nome'ěai 'rã.
- ⁵ Tembi'u porã re okaru va'ekue ma
 ho'apa 'rã okuapy tape rupi.
 Onhemonde porãa rupi ikuai va'ekue ma
 yty rupi rive ikuai.
- ⁶ Sodoma tetã minha xapy'a'i py omokanhymbaa raka'e
 avave po py e'ŷ.
 Ha'e rami teĩ Sodoma pygua kuery ojejavyague gui voi
 xeretarã kuery ojejavyve va'e ikuai.
- ⁷ Mba'eta yvatekueve ma yro'y ha'e kamby gui xiîve va'ekue,
 ita coral va'e gui ipire pytâve va'ekue,
 ha'e ita safira rami iporã va'ekue ri
- ⁸ aŷ ma hova tapyí gui ete huûve va'e.
 Tape rupi ooa rupi avave rei ndoexa kuaavei.
 Ipire ma ojapa ikâgue re,
 yvyra rakã rami ipirupa va'e vy.
- ⁹ Mba'eta karuai gui omano va'e kuery gui
 ovy'ave kyxe py ojukapy.
 Mba'eta ndokarui va'e ma mbeguei'i opa oje'oivy.
 Ho'u va'erã mba'ety rupi ndoikovei ramo omano tema 'rã oje'oivy.
- ¹⁰ Kunhague ymave rupi porayvu va'ekue ri
 aŷ ma opo py ae omomimoĩ 'rã omemby kuery.
 Ha'e kue'iry re ae 'rã okaru
 xeretarã kuery omokanhymbaa ramo.
- ¹¹ SENHOR opoxya rupi oiko vy
 ombou opoxya nhomoendyara.
- Sião re tata omonhemboja vy
 ijyta peve oapypa.

* 4:3 Guyra-nhandu ma ombo'a ma vy ngupi'a oeja rive 'rã (Jó 39.13-18).

- ¹² Yvy regua ruvixa kuery ha'e yvy re ikuai va'e ha'e javi
ndogueroviai okuapy omombe'ua rã
Jerusalém rokẽ rupi hovaigua kuery oikepa maague.
- ¹³ Ha'e va'e oiko ha'e pygua profeta kuery ojejavyague re,
sacerdote kuery ojapo vaiague re guive,
mba'eta tetã mbyte rupi
omoẽ okuapy heko porã va'e ruguy.
- ¹⁴ Ha'e kuery ma ára reveguia e'ŷ rami oguata rei tape rupi,
tuguy omoẽ va'ekue py iky'apa va'e ikuai,
ha'e ijao re ma voi avave rei ndovyxeai.
- ¹⁵ Ha'e kuery pe ojapukaia: “Ha'eve'ŷ va'e kuery, pejepe'a ke!
Pejepe'a ke, pexyry ke, pepoko eme orere!” 'ea.
Ha'e ramo ojava oje'oivy, ha'e ovaẽa py rei
ha'e kuery pe yvy regua kuery
“Apy ma nda'evei ae pendekuai aguã.”
- ¹⁶ Mba'eta SENHOR ae omoã imondovy opoxya rupi.
Ha'e rami vy nopenavei ma ha'e kuery re.
Hovaigua kuery katuve ma nomboetei 'rã sacerdote kuery,
ha'e nhomboaxya rupi e'ŷ 'rã oguerekohomongogeta va'ety kuery.
- ¹⁷ Ha'e gui ma ore kuery rexâ ikangypa ma
orepytyvõarã ou va'erã re roma'ena vy teī.
Roikuaa potaaty py roarõ reve roma'ẽ tema
peteĩ regua orereraa jepe va'erã re teī ndoui ae.
- ¹⁸ Orerovaigua kuery ma orekuiaia rupi oma'ẽ mbegue okuapy ramo
oreretã mbyte rupi orekuai aguã voi nda'evei.
Ropa aguã ovaẽ rai'i ma,
ore'ára ojeupity ma,
aŷ ovaẽ ma ropa aguã ára.
- ¹⁹ Oremonhaa kuery ma
guyra yvate rupi oveve va'e gui inhakuãve va'e.
Yvyty ikuai va'e áry rupi ete oremonha,
tekoa e'ŷa rupi voi nhuã omoõ okuapy orembo'a aguã.
- ²⁰ Ha'e gui oreruvixave orerekombo'earã SENHOR omoõ va'ekue ae
ombo'a ma okuapy nhuã py.
Ixupe ma ore kuery “Nekuaray'ã py 'rã orekuai
yvy regua kuery mbyte rupi teī”, ro'e va'ekue ri.
- ²¹ Peẽ Edom pygua kuery Uz yvy re pendekuai va'e,
orejojai tema, pevy'a rei tema 'rã orere.
Ha'e rami avi pendea py voi 'rã omboaxaa kova'e karo.
Ha'e ramo peka'upa vy pendepire reipa 'rã peikovy.
- ²² Ha'e rã peẽ Sião pygua kuery, opa ma pendeko vaiague re penembopagaague.
SENHOR napendereraa ukavei ma 'rã escravo-rã.
Ha'e rã peẽ Edom pygua kuery, araka'eve rã ojekuaapa 'rã
pendeko vaia ha'e pejejavyague.

“Oremboaxy ke” he'iague

- ¹ SENHOR, nema'endu'a ke mba'emo vai orere oiko va'ekue re.
Eikuuaa pota ha'e ema'ẽ roiko axya re.
- ² Oreyvyrã reme'ẽ va'ekue oaxapa ma amboae regua kuery pe,
orrogue voi amboae yvy guigua kuery pe ju oaxa.
- ³ Ore kuery ma tyre'ŷ tuu ve'ŷ va'e rami orekuai.

- Ha'e rã orexy kuery ma imeve'ŷ va'e ikuai.
- ⁴ Yy roy'u va'erã ma peráta re rive 'rã rojogua,
yxakã voi peráta re anho 'rã rojou.
- ⁵ Orerakykue monhaa kuery ma oreaju'y re ma ikuai.
Orekane'õ ma teĩ ropytu'u aguã voi noĩ.
- ⁶ Egito ha'e Assíria pygua kuery pe rojejopy uka
ro'u va'erã rojou aguã teĩ.
- ⁷ Oreru kuery ma ojejavypa rire jipovei ma.
Ha'e gui ore kuery ju 'rã roiko axy ha'e kuery ojapo vaiague re.
- ⁸ Escravo kuery rive 'rã ipo'aka orere.
Ndoikoi avave rei ha'e kuery po gui orereraa jepe va'erã.
- ⁹ Rojeayvu e'ŷkue py 'rã rojou ro'u va'erã,
kyxe tekao e'ŷa rupi oguerekva'e gui.
- ¹⁰ Karuai roendu vaipa ramo
orepire ma tata kua rami hakupa rei.
- ¹¹ Sião py oguero'apaa kunhague ikuai va',
kunhataïgue guive, Judá tetã ikuai va'e rupi.
- ¹² Hovaigua kuery ojyryvypa yvatekueve va'ekue,
tujakue'i voi ojou vy ombojaru rei okuapy.
- ¹³ Ha'e rã kunumigue ma ogueraa 'rã mba'emo mongu'ia py omba'eapo aguã,
avakue'i voi yxakã re ombovoyi rã onhepyxanga rive oje'oivy.
- ¹⁴ Ha'e ramo nhomongetaa rupi ikuai va'ekue ma ndoguapyvei ma tetã kora rokẽ py,
kunumigue ndoporaeivei ma guive.
- ¹⁵ Rovy'aague okanhymba ma orekuraxõ gui.
Rojeroky 'rãgue py mboriau anho rei roendu.
- ¹⁶ Oreakã gui ho'a ma akã regua oĩ va'ekue.
Nda'evei ete orevy, rojejavry rire!
- ¹⁷ Ha'e nunga rupi ae orekuraxõ py oremba'eaxy,
ndorerexa pyxoveipa guive.
- ¹⁸ Sião yvyty ombovaipa rire
mbyku anho ikuai ha'e rupi.
- ¹⁹ Ha'e rã ndee SENHOR, ndepo'aka riae 'rã.
Tenda repenaaty oĩ 'rã raka'e rã peve guarã.
- ²⁰ Mba'e re tu riae ta ri nderexarai orere?
Mba'e re tu remboare orepytyvõ aguã?
- ²¹ SENHOR, orerekko rerova ju ke ndejeupe guarã.
Ha'e ramo 'rãe rojeko rerova.
Embopyau ju ore'ára yma guare rami.
- ²² Mba'e re tu orerezapa ete ri?
Mba'e re tu ndepoxy anho ta ore kuery rovai?

Ezequiel ayvu oĩa Ezequiel ayvu oĩa

Profeta Ezequiel ma Babilônia tetã py ae hekoia, ha'e py escravo-rã Israel kuery mboae reve heraa rire. Israel kuery ha'e javi pe ayvu omombe'u raka'e, Babilônia py ikuai va'e pe, Jerusalém pygua kuery pe guive. Nhanderuete mba'emo oexa uka reve oayvu ombou raka'e Ezequiel pe. Ha'e gui Ezequiel ju mba'emo ojapoa py oikuaa uka guetarã kuery pe, oayvu py anho e'ŷ.

Nhanderuete rexakãa re ijayvu. “Ha'e gui oky jave arai re karugua ojekuaa va'e rexakãa rami ae avi hexakã jekuaa ijyvýry rupi. Ha'e va'e ma Senhor rexakãa ae aexa. Ha'e nunga aexa vy xerenapy'ã re aĩ, yvy re xerova amovaẽ reve. Ha'e vy ma aendu ijayvua” (1.28).

Ijayvu avi nhanderekoo vaia káuxa omano va'ekue rami jaiko teñ Nhanderuete opo'akaa rupi nhanemoingove ju aguã re. “Ha'e gui xere Senhor opo omoĩ vy xereraa Onhe'ẽ rupi. Ha'e vy xemoĩ peteĩ yvyugua ikãgue anho ikuiaia mbyte py. ... Aipoe'ive ju xevy: ‘Ndeayvu na kova'e ikãgue ikuai va'e pe, ha'e vy aipo're: “Ikãgue ymague, pendu ke Senhor ayvu.” ... Ha'e ramo ijayvuague rami ae xeayvu. Xeayvu teri reve hevovo rei nhendu va'e aendu, peteĩ-teĩ kãgue joe onhembota-mbota vy oparãgue rei. Ha'e rami vy peteĩ-teĩ kãgue onhemboje'apa joe. Ha'e ramo ama'ẽ rã ikãgue hajy ha'e ho'opa ma. Ipire voi ojekuaa, ha'e rã inhe'ẽrã ma noĩ teri. Ha'e gui Senhor aipoe'i xevy: ‘Ava ra'y, Nhe'ẽ pe ju ndeayvu. Ndeayvu vy aipo're ixupe: “Po rami Senhor Nhanderuete ijayvu: Ndee Nhe'ẽ, eju irundy henda yvytu oipejua katy gui. Ha'e vy ke eipeju kova'e omanogue áry rupi, okuave ju aguã rami”, 're. Ha'e ramo ijayvuague rami xeayvu ramo ikãgue ikuai va'e re ou Nhe'ẽ. Ha'e ramo oikovepa jevy vy opu'ãmba ju joguerokuapy, xondaro kuery rami mbovy rei e'ŷ ikuai” (37.1, 4, 7-10).

Irundy temimoingo kuery oexaague

¹ Trinta ma'etý re, irundy jaxyha ha'e peteĩ nhiruĩ araa py xee aiko Quebar yakã yvýry rupi, xeretarã kuery escravo-rã ogueraapa pyre mbyte.* Ha'e va'e jave py ma yva ojepe'a rã aexa mba'emo Nhanderuetea oexa uka rã.

² Ha'e va'e jave py peteĩ nhiruĩ ma'etý ma ojapo huvíxa Joaquim escravo-rã ogueraaa ague. Ha'e gui ha'e va'e jaxy re peteĩ nhiruĩ araa py ae

³ SENHOR oayvu xee Buzi ra'y Ezequiel aiko va'e pe. Sacerdote aiko caldeu kuery yvy re, Quebar yakã yvýry rupi. Ha'e py ae xere SENHOR opo omoĩ rã aendu.

⁴ Ha'e gui ma ama'ẽ rã kuaray ijapu'a'ia katy gui ou oiny peteĩ arai tuvíxa va'e, tata rami joa py e'ŷ-e'ŷ hexakã va'e. Arai yvýry rupi hendy va'e ojekuaa avi. Ha'e va'e mbyte py ma peteĩ aexa overa va'e rykukue ramigua, tata mbyte gui ojekuaa oiny.

⁵ Arai mbyte gui oẽ avi irundy temimoingo kuery. Ha'e va'e kuery jaexa rã ava ramigua meme.

⁶ Peteĩ-teĩ re ma irundy kuerei hova oĩ, ipepo ma irundy-rundy avi.

⁷ Hetyma ma hi'yvi va'e meme. Ha'e rã ipy ma vaka ra'y py rami ojekuaa, overa va'e omoexakã mbyre rami hendy guive.

⁸ Ipepo guy rupi ma avakue po ramigua oĩ, irundy henda jovaive rupi. Irundyve temimoingo ma irundy-rundy ngova ha'e opepo oguereko.

⁹ Ha'e kuery ma ovaẽ okuapy joe, amboae katy ova-ova e'ŷ re oguata guive. Peteĩ-teĩ ma guenonde katy anho oguata oje'oivy.

¹⁰ Ha'e kuery rova ma avakue rova rami. Oiporu kuaa re ma guary rami hova. Ijaxua re ma vaka rova. Irundyve peteĩ-teĩ oguereko avi taguato guaxu rova.*

* 1:1 Ha'e jave py ma profeta Ezequiel Babilônia yvy re oiko, heta va'e kuery ogueraapaa ague py. * 1:10 Apocalipse 4.8

¹¹ Ha'e rami ae hova ojekuaa. Ipepo ma mokõ-mokoõ oupi 'rã o'áry rupi, temimoingo kuery mboae pepo re omovaẽ reve. Ha'e rã opepo mboae mokoõ py ma ojao'i imoiny guete.

¹² Ha'e kuery peteĩ-teĩ guenonde rami anho 'rã oguata oje'oivy. Mamo rã rei Nhe'ẽ ooa katy ha'e kuery voi oje'oi avi. Amboae katy ova-ova e'ŷ re oguata oje'oivy.

¹³ Temimoingo kuery jaexa rã tapyõ hexakã va'e rami hendy, tataendy rami guive. Ha'e kuery mbyte rupi ma tata rendy vuku oaxa-axa. Ha'e kuery gui oẽ avi overa va'e.

¹⁴ Temimoingo kuery oguata vy overa va'e rami avi ojevy-jevy ha'ekue'ŷ-kue'ŷ katy.

Irundy iruéra oexaque

¹⁵ Ha'e gui temimoingo kuery aexa rã peteĩ-teĩ yvýry oĩ avi peteĩ ruéra yvy rupi oo va'e.*

¹⁶ Iruéra ikuai va'e jaexa rã itaendy berilo rami hexakã va'e. Irundyve ma joo rami ae ojekuaa. Peteĩ-teĩ ruéra jaexa rã amboae ruéra mbyte rupi joaxa oiny.

¹⁷ Ha'e va'e ma ooa katy rei 'rã oo. Amboae katy ova-ova e'ŷ re oguata ovy.

¹⁸ Inhapyõ va'e ma yvate ete nhomongyje aguã rami. Peteĩ-teĩ ruéra apyõ re ma texa anho tynyõ ha'e javi rupi.

¹⁹ Temimoingo kuery oguata oje'oivy reve iruéra ijyvýry ikuai va'e oo avi 'rã. Ha'e kuery ojeupi ramo iruéra voi ojeupi avi 'rã hexeve.

²⁰ Nhe'ẽ ooa katy rei tema ha'e kuery oo avi 'rã, Nhe'ẽ oguerekao rupi. Ha'e kuery reve iruéra ikuai va'e oo avi 'rã, mba'eta iruéra ikuai va'e re ae temimoingo kuery nhe'ẽ oĩ.

²¹ Ha'e kuery oguata oje'oivy ramo iruéra ikuai va'e voi oo avi 'rã. Ha'e kuery opyta ramo iruéra voi opyta avi 'rã. Yvy gui ha'e kuery opu'ã oje'oivy ramo ha'e kuery reve opu'ã avi 'rã iruéra ha'e javi, mba'eta iruéra ikuai va'e re ae oĩ temimoingo kuery nhe'ẽ.

²² Temimoingo kuery akã áry rupi ma peteĩ ijaõ'ia oĩ itaendy guigua rami nhomongy-jea. Ha'e kuery akã áry rupi ojekuaa oiny.

²³ Ijaõ'ia guýry rupi ae ha'e kuery opepo oupi imoiny, peteĩ-teĩ joa katy. Peteĩ-teĩ ma mokoõ opepo ju oguerekao jovaive rupi ojeao'i aguã.

²⁴ Ha'e kuery oguata oje'oivy ramo aendu ipepo revovo reia yy revovo rami, Ipo'akapa va'e onhendua rami avi. Hevovo aendu rã xondaro kuery pyambu rami onhendu. Ha'e gui ha'e kuery opyta vy opepo voi omboguejypa ju avi 'rã.

²⁵ Ha'e gui ma ha'e kuery akã áry rupi ijaõ'ia oĩ va'e áry gui aendu peteĩ ayvu. Ha'e ramo ha'e kuery opytapa okuapy, opepo guive omboguejypa.

Nhanderuete rexakãa oexaque

²⁶ Ha'e gui ha'e kuery akã áry rupi ijaõ'ia oĩ va'e áry aexa peteĩ tenda huvixa openaaty ramigua, itaendy safira guigua rami. Ha'e va'e tenda áry ma peteĩ oguapy jekuaa oiny ava ramigua.

²⁷ Ha'e va'e aexa rã iku'a guive yvate katykue ma itaendy rami ojekuaa oiny, ha'e ijyvýry rupi ma tata rami avi hexakã. Ha'e gui rã iku'a guive yvy katykue ma tata ete rami ojekuaa. Ijyvýry ha'e javi rupi tata rami hexakãmba.

²⁸ Ha'e gui oky jave arai re karugua ojekuaa va'e rexakãa rami ae avi hexakã jekuaa ijyvýry rupi. Ha'e va'e ma SENHOR rexakãa ae aexa. Ha'e nunga aexa vy xerenapy'ã re aĩ, yvy re xerova amovaẽ reve. Ha'e vy ma aendu ijayvua.

Ezequiel reve ijayvuague

¹ Ijayvu va'e ma aipoe'i xevy:

— Ava ra'y, epu'ã ke he'amy, ha'e ramo xeayvu 'rã ndereve — he'i.

² Ha'e ramo xereve ijayvu jave xere Nhe'ẽ oĩ vy xemopu'ã imo'amy. Ha'e rami vy aendu xevy ijayvu rã.

³ Ha'e ramo aipoe'i xevy:

— Ava ra'y, xee romondouka 'rā Israel kuery pe. Ha'e kuery ma peteī regua xerovai opu'ā okuapy va'e. Nguu kuery rami avi anhetē rupi e'ŷ ikuai xerovai, aŷ peve.

⁴ Mba'eta ta'y kuery voi inhakā ratā okuapy, ipy'a ratā guive. Ha'e kuery pe ae xee romondouka ta. Ha'e vy ha'e kuery pe "Po rami SENHOR Nhanderuete ijayvu" 're 'rā.

⁵ Ha'e ramo ha'e kuery xere opu'ā va'ety ikuai va'e oikuaa 'rā okuapy ha'e kuery mbyte rupi profeta oikoa, oendu pota, e'ŷ vy noendu potai teī.

⁶ Ha'e rā ndee ava ra'y, ekyje eme. Ekyje eme guive ha'e kuery ndere ijayvua gui, ha'e nunga juu ha'e juu rakuadny rami ndekutu teī, mba'eta japeuxa ramigua mbyte rupi reiko 'rā. Ekyje eme ndere ha'e kuery ijayvua gui, enhemondyi eme guive ha'e kuery rova gui, mba'eta xere opu'ā va'ety ae ikuai.

⁷ Ha'e rā ndee ma ha'e kuery pe remombe'u 'rā xeayvu, oenduxe, e'ŷ vy noenduxei teī, mba'eta xere opu'ā rei va'ety ae ikuai.

Kuaxia para onhemama va'e oexaague

⁸ — Ndee ava ra'y, endu ke ndereve xeayvu rā. Epu'ā rei eme xerovai opu'ā rei va'ety kuery rami e'ŷ. Eipe'a ke ndejuru, ha'e vy he'u ame'ē ta va'e — he'i.

⁹ Ha'e ramo ama'ē rā ha'e py peteī po xea katy okuave'ē jekuaa va'e. Ha'e va'e py oī peteī kuaxia para onhemama va'e.

¹⁰ Ha'e va'e ma xerenonde rupi oipyo inony rā hi'áry ha'e iguy rupi ipara oiny ra'e. Ha'e va'e re ipara oiny ojae'oa aguā, ipy'a vaia ha'e nda'evei va'e oiko va'erā regua.

3

¹ Ha'e gui aipoe'ive ju xevy:

— Ava ra'y, he'u rejou va'e. He'u ke kova'e kuaxia para. Ha'e gui ma tereo Israel kuery pe ndeayvu — he'i.

² Ha'e ramo xejuru aipe'a ramo xevy pe ome'ē kuaxia para ha'u aguā.

³ Ha'e vy aipoe'i xevy:

— Ava ra'y, emokō nderyepy katy peve guarā. Emonyē ete nderye kova'e kuaxia para ndevy ame'ē va'e — he'i. Ha'e ramo xee ha'u ramo xejuru py ei rami he'ē va'e aendu.*

Profeta-rā Ezequiel omoiągue

⁴ Ha'e gui aipoe'ive ju:

— Ava ra'y, tereo aŷ Israel kuery ikuiaia py, ndeayvu ha'e kuery pe xeayvu rupi.

⁵ Mba'eta amboae rami rei ijayvu va'e kuery pe e'ŷ xee romondouka, ha'e rā Israel kuery pe ae.

⁶ Heta regua pe e'ŷ guive romondouka, amboae rami ijayvu va'e nerendu kuaai aguā katy e'ŷ. Ha'e va'e kuery regua pe xee romondouka va'e rire ma anhetē ojapyxaka 'rāgue okuapy ndeayvua re.

⁷ Ha'e rā Israel kuery ma ndojapyxakai 'rā, xeayvu re eteve voi ndojapyxakaxeí va'e vy. Mba'eta Israel kuery ma inhakā ratā ha'e opy'a py oikuaa axy va'e meme.

⁸ Ha'e nunga rupi nderova ajapo 'rā hatā aguā rami ha'e kuery rova rami avi, ha'e kuery akā ratā rami ae avi 'rā rojapo ha'e kuery rovai neakā ratā aguā rami.

⁹ Diamante rami hatā va'e ajapo 'rā nderova, itaendy gui hatāve va'e. Ha'e ramo ekyje eme ha'e kuery gui, neī enhemondyi eme guive ha'e kuery ngova re oexa uka va'e gui, mba'eta xere opu'ā rei va'ety ae ikuai — he'i.

¹⁰ Ha'e gui aipoe'ive ju xevy:

— Ava ra'y, endu ke ndeapyxa py ndevy pe xeayvu ha'e javi, emoī porāmba guive ndeypy'a re.

¹¹ Ha'e gui ma tereo, neretarā kuery escravo-rā ogueraa pyre ikuiaia py. Ha'e kuery oenduxe, e'ŷ vy noenduxei teī ndeayvu tema ha'e kuery pe. Ha'e vy "Po rami SENHOR Nhanderuete ijayvu", 're 'rā — he'i xevy.

* 3:3 Apocalipse 10.9-10

¹² Ha'e gui ma Nhe'ẽ xereupi heravy. Ha'e ramo xerakykue katy gui aendu peteĩ hyapu rei va'e. Ha'e va'e ma oĩa gui onhendu vy aipoe'i:

— Ta'ima'endu'a porãa SENHOR rexakãa re — he'i.

¹³ Aendu avi temimoingo kuery opepo jopepo re ombota-mbota rã, iruéra ha'e kuery reve ikuai va'e revovo guive. Aendu avi hyapu ratãve va'e.

¹⁴ Ha'e rami py Nhe'ẽ xereupi heravy. Xenhe'ẽ py nda'evei etea aendu reve aa ainy. Ha'e rami teĩ xere SENHOR opo imbaraete va'e omoĩ xejokoarã.

¹⁵ Ha'e ramo Tel-Abibe tetã katy aa, Quebar yakã yvýry xeretarã kuery escravo-rã ogueraa pyre ikuiaia py. Ha'e vy ha'e kuery ikuiaia py ju aĩ. Ha'e kuery mbyte py sete ára re aguapy ainy nda'evei etea aendu reve.

Tetã rarõa rami Israel kuery pe ijayvu aguã omoïague

¹⁶ Ha'e gui sete araa py ma xevy pe SENHOR ombou oayvu. Ha'e vy aipoe'i:

¹⁷ — Ava ra'y, xee ma tetã rarõa rami romoĩ Israel kuery pe ayvu remombe'u aguã. Ha'e rami rã xejuru gui ayvu rendu va'e remombe'u 'rã ha'e kuery pe xerekovia.

¹⁸ Ha'e gui ma xapy'a rei heko vai va'e kuery pe "Pemanô 'rã" ha'e teĩ ndee ju ha'e kuery pe neremombe'ui ramo tape vai gui ojepe'a vy oo jepe aguã, ha'e rami ri ramo heko vai va'e omano 'rã gueko vaia py, teĩ ndee rombopaga avi 'rã huguy ndepo re oĩ va'e káuxa.

¹⁹ Ha'e rã xapy'a rei heko vai va'e kuery pe ha'e rami ndeayvu teĩ ha'e kuery ndojeko rerovai 'rã teko vai rupi ikuiaia gui. Ha'e ramo ha'e kuery omano 'rã gueko vaia py ae, ha'e rã ndee ma reo jepe 'rã.

²⁰ Ha'e gui xapy'a rei heko porã va'ekue ma heko porãague gui ojepe'a 'rã ha'eve'ŷ va'e ojapo vy. Ha'e gui ha'e kuery renonde py xee amoĩ 'rã onhepyxanga aguã, ha'e ramo omano 'rã. Ndee nandeayvui ramo ha'e kuery omano 'rã gueko vaia py, ha'e na'ima'endu'aavei 'rã teko porã rupi oikoague re. Ha'e rami teĩ ndee rombopaga avi 'rã huguy ndepo re oĩ va'e káuxa.

²¹ Ha'e rami teĩ heko porã va'e pe ojejavy e'ŷ aguã re ndee ndeayvu ramo ndojejavyi vy anhetẽ oikove 'rã ha'e rami ndeayvu rire. Ndee voi reo jepe 'rã — he'i.

²² Ha'e gui xere SENHOR opo omoĩ vy aipoe'i xevy:

— Epu'ã ke, tereo yvyugua katy, ha'e py ma ndereve xeayvu aguã — he'i.

²³ Ha'e ramove apu'ã vy yvyugua katy aa. Ha'e py ama'ẽ rã SENHOR rexakãa oĩ ra'e, Quebar yakã yvýry hexakãa aexaague rami. Ha'e vy xerenapy'ã re aĩ xerova yvy re amovaẽ reve.

²⁴ Ha'e ramo xere Nhe'ẽ oĩ vy xemopu'ã imo'amy. Ha'e rami vy xevy ijayvu vy aipoe'i:

— Tereo ndero katy, ha'e enhemboty ha'e py.

²⁵ Mba'eta ava ra'y, ma'ẽ. Ha'e kuery ma ndea py ixã ogueru vy ndejokua 'rã imoiny, ha'e kuery mbyte katy reo ve'ŷ aguã.

²⁶ Ha'e gui xee ajapo 'rã neapekũ ndejuru re ojapa aguã rami, ha'e kuery pe ndeayvu e'ŷ aguã. Ha'e ramo ijayvu e'ŷ va'e 'rã reiko remonheangu ve'ŷ ranhe aguã, mba'eta xere opu'ã rei va'ety ae ikuai.

²⁷ Ha'e rami teĩ ndereve xeayvu jevy vy aipe'a ju 'rã ndejuru ndeayvu aguã. Ha'e ramo ha'e kuery pe "Po rami SENHOR Nhanderuete ijayvu", 're 'rã. Ha'e ramo oenduxe va'e toendu, ha'e rã noenduxei va'e ma tove toendu eme, mba'eta xere opu'ã rei va'ety ae ikuai.

Jerusalém tetã jokoarã ramigua oexaague

¹ — Ha'e gui aŷ ndee ava ra'y, eru peteĩ yvy jykue, enhono imoiny nerondenode'i py, ha'e vy ha'e va'e re embopara Jerusalém tetã ra'angaarã.

² Ha'e va'e rovai emoĩ ijokoarã ra'angaa jovaise rupi, ejapo oo imbaraete va'e ra'angaarã, tetã kora re emopu'ã yvy ivã va'erã, jovae-jovaise re ejapo xondaro kuery nhoarõ aguã, ha'e ijyvýry rupi emoĩ tetã kora reityarã.

³ Eru avi peteī oja ferro guigua, ha'e vy ndee ha'e tetā oīa mbyte py emopu'ā imo'amy oja ferro guigua kora rami. Ha'e vy ema'ē einy tetā katy. Ha'e rami 'rā opyta tetā ojokopy rami, ijokoarā remoī ramo. Ha'e va'e ma Israel kuery oikuua aguā 'rā oī.

⁴ — Ha'e gui ma enheno ejupy reiporu kuaa e'ŷa re, ndejee remoī aguā Israel kuery reko vaia. Renheno rejupya ára ha'e javi re ndere oī 'rā heko vaia.

⁵ Mba'eta ndee romoī 'rā ha'e kuery reko vaia ma'etŷa kuaa ukaarā, peteī-teī ára renhenoa ma peteī ma'etŷ ovare aguā, ha'e javi vy trezentos e noventa ára peve. Ha'e rami rā ndejee meme 'rā rerekō Israel kuery ojejavyague.

⁶ Ha'e va'e ára opa ma rire reiporu kuaa regua re ju 'rā renheno rejupya, Judá kuery ojejavyague ju ndejee rerekō aguā.

⁷ Ha'e rami vy quarenta ára re ju ajapo 'rā renheno aguā rami, peteī-teī ára peteī ma'etŷ ovare aguā. Ha'e ramo Jerusalém tetā ojokoa katy rema'ē reiny 'rā ndejyva pire rei reve. Ha'e rami vy 'rā ndeayvu ete ha'e kuery rovai.

⁸ Aŷ rojokua uka 'rā ixā py, hovai katy neī kyvō katy rema'ē e'ŷ aguā, tetā ojokoa aguā ára opa e'ŷa ja.

⁹ — Eru avi trigo ha'e cevada, kumanda ha'e kumanda pe'i. Emoī peteī oja py mbojaperā, trezentos e noventa ára re ndeyke re renheno peve re'u rejupya aguā.

¹⁰ Opeja pyre anho 'rā re'u, duzentos e quarenta gramas 'rā ko'ē nhavō. Ha'eve jave-jave 'rā re'u.

¹¹ Ha'e gui yy voi oa'ā mbyre meme 'rā rey'u, peteī karo'i ha'eve jave-jave 'rā rey'u.

¹² Re'u va'e ma mbojape cevada guigua rami 'rā. Rexy 'rā avakue repoxi pirukue áry, heta va'e kuery oexaa py.

¹³ Mba'eta ha'e rami ae 'rā Israel kuery ho'u okuapy tembi'u ha'eve'ŷ va'e, pavē regua ikuiaia rupi aipe'a ukaague py — he'i SENHOR.

¹⁴ Ha'e ramo xee aipoa'e:

— Kore SENHOR Xeruete! Ma'ē, xekunumi guive aŷ peve xee nanhemongy'ai ae va'erī, mba'eta ha'u va'e'ŷ teri mymba omano rive va'ekue neī ka'aguy rupigua omondoropa pyre, xo'o nda'evei va'e xejuru py amoī e'ŷ aguā — ha'e.*

¹⁵ Ha'e ramo aipoe'i xevy:

— Ha'e ramo avakue repoxi 'rāgue py ha'eve 'rā vaka repoxi áry mbojape rembojy aguā — he'i.

¹⁶ Aipoe'ive ju xevy:

— Ava ra'y, mba'eta ma'ē, Jerusalém tetā py ajapo 'rā tembi'urā ojoua ve'ŷ aguā rami. Ha'e kuery ho'u 'rā tembi'u opeja pyre nda'evei rei etea oendu reve, ha'e yy oa'ā mbyre oy'u 'rā okuapy ndaekorāveia reve.

¹⁷ Ha'e kuery pe tembi'u ha'e yy oata ramo joexa vy rive onhemondyipa 'rā, gueko vai reia py opa jogueravy vy.

5

¹ — Ha'e gui ava ra'y, eru peteī kyxe haimbe porā va'e nerendyva ayaarā. Ha'e vy enhopīmba neakā ha'e nerendyva ha'e javi rupi. Eru avi mba'emo opejaa nde'ague repeja aguā. Repejaa rupi emboja'o mboapy henda py.

² Peteī henda py oī va'e ma reapy 'rā tetā mbyte py, ojokoa aguā ára opa ma rire. Ha'e rā amboae henda py nde'ague oī va'e ma reikutu 'rā kyxe py tetā yvýry. Ha'e rā amboae ju ma vytyu ombovevea rupi 'rā remoaīmba imondovy. Ha'e va'e kuery rakykue rupi aekyi uka 'rā kyxe.

³ Ha'e gui mboapya regua amongue ete'i ma rejokua 'rā ndeao apy'i re.

⁴ Ha'e va'e regua gui ae ju remombo 'rā tata py okai aguā. Ha'e va'e gui ma tata oē 'rā Israel kuery ha'e javi rovai.

* ^{4:14} Ezequiel ma avakue repoxi pirukue áry mbojape oexy aguā re SENHOR ijayvu, mba'eta tetā ojokoa jave heta va'e kuery ndojou 'rā xakārā. Ha'e ramo Ezequiel ndojou porāi, mba'eta ha'e nunga áry oexy pyre nda'evei sacerdote kuery ho'u aguā, onhemongy'a e'ŷ aguā.

Mba'e re pa Jerusalém tetā SENHOR ojoko uka 'rāa re ijayvuague

⁵ Ha'e gui SENHOR Nhanderuete po rami ijayvu:

— Jerusalém tetā upe py oī va'e ramigua ma yvy regua mbyte py amoī va'ekue, ha'e ijyvýry rupi ikuai va'e yvy mbyte.

⁶ Ha'e rami teī ha'e kuery xee aipota va'e rovai opu'ā vy yvy regua kuery gui voi ojapo vaive tema okuapy, ha'e oyvýry rupi ikuai va'e gui ombokepave xeayvu aeja va'ekue. Hexaraipa okuapy xee aipotaa gui, xeayvu rupi nda'ikuai guive.

⁷ Ha'e nunga rupi po rami SENHOR Nhanderuete ijayvu:

— Peē kuery ma amboae regua pendeyvýry rupi ikuai va'e gui pepu'āve xerovai, ndapejapoxei guive xee aipotaa rami, neī amboae kuery pendeyvýry rupi ikuai va'e reko ndapeupityi.

⁸ Ha'e nunga rupi xee, xee ae ju 'rā aiko nderovai guarā — he'i SENHOR Nhanderuete. — Ha'e rami vy penembyte py rombopaga 'rā yvy regua kuery oexaa py.

⁹ Ojeguarupy pejapoaa ha'e javi káuxa penembyte py ajapo 'rā peteīgueve ajapo e'ŷ teri va'e, ha'e neī ndajapovei 'rā va'e.

¹⁰ Ha'e rami rā penembyte py tuu kuery ho'u 'rā okuapy gua'y kuery ae, ha'e ta'y kuery ho'u 'rā nguu kuery ae. Penembyte py rombopaga 'rā, ha'e gui penderegu hembyre va'ekue ma amoāimba 'rā imondovy yvytu ha'e javi rupi.

¹¹ Ha'e nunga rupi anhetē ete xee SENHOR Penderuete xee ae rekove rupi aura vy aipoa'e: Xevyguoo iky'a e'ŷ va'e pemongy'apa rei rire mba'emo vai pejapo ha'e ojeguarupy pembojeroviaa py, ha'e ramo xee nama'ēvei 'rā pendere romboaxya rupi, ndorogueraa jepoi 'rā guive.

¹² Ha'e ramo pende kuery regua peteī henda py peman 'rā mba'eaxy vaikue gui, ha'e penembyte py pekanhymba 'rā karuai gui. Ha'e rā amboae henda py ma pendeyvýry rupi pe'a 'rā pekuapy kyxe gui. Ha'e gui amboae henda py ju romoaīmba 'rā yvytu ha'e javi rupi, ha'e vy penderakykue rupi aekyi uka 'rā kyxe.

¹³ — Ha'e rami vy 'rāe xepoxyaa oaxa. Ha'e kuery re xepoxyaa amboupa ma rire "Ha'eve ma" ha'e 'rā apytu'u vy. Ha'e ramo oikuaapa 'rā xekyre'ŷa rupi xeayvuague, ha'e kuery áry ambou ramo.

¹⁴ Mba'eta ombovaipa pyre rami romoī 'rā yvy regua pendea katy'i rupigua kuery pendejojai aguā, oaxa va'e kuery ha'e javi oexaa py.

¹⁵ Ha'e rami rā pepyta 'rā ombojaru rei ha'e oojai pyrā, yvy regua kuery pendea katy'i ikuai va'e oikuaa vy onhemondyipa aguā, mba'eta rombopaga 'rā xepoxyaa ha'e rojou vaia rupi, opa marā romoingo axya py, po rami xee SENHOR ae xeayvu rire.

¹⁶ Ha'e kuery rovai ma hu'y rami ambou 'rā karuai. Hu'y nhomombaarā ambou 'rā penemomba aguā. Ha'e rami vy karuai amoīve ju 'rā peē kuery re, peē kuery gui mbojape pe'u 'rā va'ekue aipe'apa vy.

¹⁷ Peē kuery re ambou 'rā karuai ha'e mymba nharō penderajy ha'e penderajy kuery mokanhymbaarā. Pendere ou 'rā mba'eaxy vaikue ha'e tuguy moēarā. Kyxe revegua voi ambou 'rā pendere. Xee SENHOR ae xeayvu.

6

Israel kuery mba'emo ra'angaa re rive ojerovia okuapya re ijayvuague

¹ Ha'e gui ma xevy pe SENHOR ombou ju oayvu. Ha'e vy aipo'e'i:

² — Ava ra'y, ema'ē Israel regua yvyty ikuiaia katy, ha'e kuery re ndeayvu aguā. Ha'e vy aipo're:

³ Israel regua yvyty pendekuai va'e, pendu ke SENHOR Nhanderuete ayvu. Po rami SENHOR Nhanderuete ijayvu yvyty, yvy'ā, yakā ha'e yvyugua ikuai va'e pe:^{*} Aŷ xee, xee ae ambou 'rā kyxe peē kuery re, pende'áry ta'angaa ombojeroviaaty ikuai va'e mbovaipaarā.

* 6:3 Israel regua yvyty, yvy'ā, yakā ha'e yvyugua ikuai va'e pe Nhanderuete ijayvu mba'eta ha'e va'e rupi ma ikuai mba'emo ra'angaa mbojeroviaaty.

⁴ Ha'e ramo pende altar ombovaipaa 'rā, ha'e altar heakuā porā va'e rapyaty ikuai va'e voi omopēmbaa 'rā. Kyxe py ajuka uka va'ekue aejapa 'rā imbokuapy ta'angaaombojeroviaague renonde rupi ae.

⁵ Ta'angaa ikuai va'e renonde rupi aeja 'rā Israel kuery retekue, ha'e rā ikāgue ma amoāimba 'rā altar ombojeroviaague renonde rupi.

⁶ Ha'e gui tekao ha'e tetā pendekuiaague ha'e javi rupi omombaa 'rā, ta'angaa pembojeroviaague ombovaipaa 'rā, altar pembojeroviaague ha'e javi oitya ha'e ombovaipaa aguā, ha'e ta'angaa voi omopēmbaa ha'e omombaa aguā. Altar heakuā porā va'e peapyaty voi oipe'apaa 'rā, penerembiapokue ha'e javi ombovaipaa 'rā.

⁷ Ha'e gui penembyte rupi kyxe py ojuka pyre ho'apa 'rā, xee ae SENHOR aikoa peikuaa aguā.

⁸ — Ha'e rami avi aeja 'rā hembyrekue'i, mba'eta peē kuery regua amongue ete'i 'rā oo jepe kyxe gui yvy regua kuery ikuia rupi, ha'e kuery yvy rupi romoāi jave.

⁹ Ha'e gui amboae kuery yvy rupi escravo-rā ogueraa ague py oo jepe va'ekue ima'endu'a ju 'rā xere. Mba'eta xee ma nda'evei ete aiko opa marā pendepy'aa rupi xegui pejepe'a ramo, ha'e penderexa ta'angaa anho rive oexaxe rā xegui pejepe'a ramo. Ha'e gui ma ha'e kuery ojeguaru 'rā ojegui ae, opa marā ikuia rupi nda'evei ete va'e ojapoague re.

¹⁰ Ha'e rami vy ma ha'e kuery oikuua 'rā xee ae SENHOR aikoa, mba'eta ha'e kuery re mba'emo vai ambou aguā re ndaxeayvu rivei.

¹¹ Po rami SENHOR Nhanderuete aipoe'i xevy:

— Ejepopete ke, embota-mbota ndep, ha'e vy aipo're: “Nda'evei teve, mba'eta Israel kuery opa marā ojeguarupy ojapoague re ho'apa 'rā kyxe py, karuai ha'e mba'eaxy vaikue gui”, 're.

¹² Mba'eta mombyry rupi ikuai va'e omano 'rā mba'eaxy vaikue gui, ha'e rā ha'e'i rupigua ma kyxe py 'rā omano. Ha'e gui amongue hembyrekue ma ojokoa rā omano 'rā karuai gui. Ha'e rami vy 'rāe ha'e kuery pe xepoxyague oaxa.

¹³ Ha'e ramo peikuaa 'rā xee ae SENHOR aikoa, peē kuery regua ta'angaa mbyte rupi kyxe py ojuka pyre ikuai ramo, ha'e altar ikuai va'e yvýry rupi, yvy'ā ha'e yvyty apyte ikuai va'e ha'e javi rupi, ha'e yvyra hogue ana ha'e yvyra porāgueve ikuai va'e guy rupi, mba'eta ha'e rupi ae opa marāgu ta'angaa pe heakuā porā va'e peme'ēaty ikuai.

¹⁴ Ha'e nunga áry rupi xepo amoāi vy ambovaipa 'rā yvy tekao e'ŷa guive Ribla peve, tekao ikuiaague ha'e javi rupi nda'ikuaiavei aguā. Ha'e ramo peikuaa 'rā xee ae SENHOR aikoa.

7

“Opa ta ma! Opa ta ma!” he'ague

¹ Teīgue ju SENHOR oayvu ombou xevy. Ha'e vy aipoe'i:

² — Ava ra'y, po rami SENHOR Penderuete ijayvu Israel kuery yvy re: Opa ta ma! Irundy henda rupi ha'e ijyvy apy rupi ikuia peve 'rā ou opa aguā.

³ Ha'e rami vy aŷ ma ou ma pepa aguā ára. Mba'eta pendere ambou 'rā xepoxy, rombopaga 'rā pendekuiaague re, pendere ambou 'rā ojeguarupy rupi pendekuiaague rekovia.

⁴ Mba'eta pendere nama'ēvei 'rā rogueraa jepea rupi neī romboaxya rupi. Ha'e rami 'rāgue py pendere ambou 'rā pendekuiaague rekovia, ha'e ojeguarupy rupi pendekuiaague ojekuaapa 'rā penembyte. Ha'e ramo peikuaa 'rā xee ae SENHOR aikoa.

⁵ Po rami SENHOR Nhanderuete ijayvu:

— Ma'ē, mba'emo vai ou-ouve tema 'rā.

⁶ Ovaē ta ma opa aguā, ou ma oiny, opu'ā ma penderovai.

⁷ Yvy regua kuery, ou ma pekanhy aguā. Ovaē ma ára, yvyty ikuai va'e áry rupi vy'aa 'rāgue py ovaē ma opa marā ipy'aa aguā.

⁸ Aŷ pende'áry anhoē ta xepoxy, roguereko 'rā xepoxya rupi. Aikuua pota 'rā pendekuiaague re, ha'e pende'áry ambou 'rā ojeguarupy rupi pendekuiaague rekovia ha'e javi.

⁹ Ha'e rami vy pendere nama'ëvei 'rā rogueraa jepea rupi, neñ romboaxya rupi. Pendekuaiague re ae 'rā rombopaga. Ha'e ramo ojeguarupy rupi pendekuaiague ojekuaapa 'rā penembyte. Ha'e ramo peikuaa 'rā xee SENHOR ae ajapoaque.

¹⁰ — Ma'ë, ára ovaë ma ouvy. Ojekuaa ma rombopagapa aguã, mba'eta yvyra rovi'i ipotypa ma, onhemboyvate reia voi hokypa ma.

¹¹ Jojukaa kuery opu'ã ma yvyra rovi'i nhombojexavaiarã. Ha'e ramo mba'eve noñvei ma ha'e kuery peguare, imba'e rei-reikue, ha'e kuery re ima'endu'aague, neñ oguerovy'aaague ma voi.

¹² Mba'eta hi'ára ou ma oiny, ovaë ae ma. Ha'e nunga rupi mba'emo joguaa tovy'a eme, ha'e rā mba'emo vendea ma ta'iporiau eme. Mba'eta ha'e kuery ha'e javi re ou poxya hendy va'e.

¹³ Mba'eta yvy vendeare ma ndojevyvei ma 'rā ovende va'ekue oiporu ju aguã, oikove'i teñ ae ma. Mba'eta ndoiko e'ÿi 'rā heta va'e kuery regua ayvu omombe'u pyre. Ha'e ramo avave rei ndoiko pukuvei 'rā gueko vaia py onhemombaraetea rupi.

¹⁴ — Omonhe'ëa ma mimby guaxu, oguerekatupaa ma teñ joe opu'ã aguã katy ndooai 'rā, mba'eta ha'e kuery ha'e javi re ou xepoxya hendy va'e.

¹⁵ Oka rupi ma kyxe revegua ikuai, ha'e rā opy ma mba'eaxy vaikue ha'e karuai oï. Mba'ety rupi oiko va'ekue ojukaa 'rā kyxe py, ha'e rā tetã pygua kuery ma karuai ha'e mba'eaxy vaikue gui 'rā opa.

¹⁶ Xapy'a rei ha'e kuery regua amongue ojava vy oo jepe 'rā. Ha'e rami vy yvyty áry rupi 'rā ikuai, yvyugua rupigua apykaxu rami peteñ-teñ ipoaë rei 'rā ojejavvyague gui.

¹⁷ Pavẽ po ma ikangypa 'rā, ha'e pavẽ renap'yã ma yy rami meme 'rā ikangy.

¹⁸ Ajukue voxá guigua py onhemonde 'rā okuapy tekorã ve'ÿ anho oendu vy. Ha'e javi rova re ojekuaa 'rā oxia, oakã voi onhopimba 'rā.

¹⁹ Ha'e kuery prata oguerekova'ekue ma omombopa 'rā tape rupi, ouro eteve voi ha'e kuery pe rā iky'apa va'e rami 'rā. Mba'eta SENHOR poxya ára py ma prata neñ ouro ma voi ndogueraa jepoi 'rā. Ha'e nunga py nda'eveei 'rā ha'e kuery okaru neñ guye omonyé aguã, mba'eta ha'e nunga ma teko vai py ho'a aguã imonhepyxangaarã rive.

²⁰ Ha'e kuery ita porägueve oguerovy'a rei va'e py ma ta'angaa ojeguaru pyrã ojapo va'ekue, mba'emo vai ra'angaa ombojerovia pyrã guive.

²¹ Ha'e rami teñ xee ma ha'e nunga ajapo iky'apa va'e rami ha'e kuery pe optya aguã rami, ha'e gui amboae regua kuery po py amboaxapa ogueraa rive va'erã. Yvy regua heko vai rei va'e kuery pe ete amboaxa ogueraa va'erã. Ha'e ramo ojavyky rei 'rā.

²² Ha'e kuery gui xerova arova rā omongy'apaa rive 'rā xembojeroviaaty. Ha'e py imongy'aarã kuery oike vy oipe'apa 'rā mba'emo.

²³ — Tojapoa corrente jojokuaarã, mba'eta kova'e yvy tynyë ma jouguy omoëa va'ekue. Tetã rupi voi opa mba'e vai anho oï.

²⁴ Ha'e ramo yvy regua mbyte gui ambou 'rā heko vaive va'e hoogue pe'aarã. Ha'e rami vy amomba 'rā ojerovia rei va'e kuery onhemboyvatea. Ha'e ramo ha'e kuery pegua henda iky'a e'ÿ va'ekue omongy'apaa 'rā.

²⁵ Ovaë ma imbovaipaarã. Ha'e ramo ha'e kuery oeka 'rā ikuai porã aguã teñ noñvei ae ma.

²⁶ Ou 'rā imbojexavaiarã ha'e ayvuxé áry jevy-jevygua. Ha'e ramo oporandu 'rā okuapy profeta kuery mba'emo oexaa re, teñ sacerdote kuery ndoguerekovei lei, ha'e nhomongoeta va'ety kuery nanhomongoeta kuaavei 'rā.

²⁷ Huvixave ojae'o 'rā oiny, yvatekueve re voi oï 'rā tekorã ve'ÿ. Yvy re ikuai va'e po ma oryryipa 'rā ngyje gui. Mba'eta ambopaga 'rā ha'e kuery ikuaiague rami ae, ha'e aikuua pota 'rā ha'e kuery re joe oikuaa potaa rami ae avi. Ha'e ramo oikuaa 'rā xee ae SENHOR aikoa.

¹ Ha'e gui mboapy meme ma'etýa va'e mboapy meme jaxy py, teñ nhiruñ araa py xero py aguapy ainy. Xerenonde py Judá pygua nhomongoeta va'ety kuery oguapy avi okuapy. Ha'e gui aña py SENHOR Nhanderuete omboguejy opo xe'áry.

² Ha'e ramo ama'ẽ rã oĩ peteñ ava ramigua tata guigua. Iku'a guive yvy katykue ma tataendy anho oĩ. Ha'e rã iku'a guive yvate katykue ma overa va'e rami hexakã.

³ Opo ramigua oguereko va'e ma omokuave'ẽ vy ojopy xeakã re xe'a oĩ va'e. Ha'e rami vy yvate katy Nhe'ẽ xereupi heravy yvy áry rupi. Ha'e vy Nhanderuete guigua aexa rã xereraa Jerusalém tetã re, templo roka py okẽ kuaray apu'a'ia katy oĩ va'e peve. Ha'e py ma oĩ ra'e ta'angaa Nhanderuete nda'evei etea oendu aguã rami ojapo va'e.

⁴ Ha'e py ojekuaa avi Israel kuery ruete rexakã, tekoa e'ýa py hexakã aexaague rami ae ju.

⁵ Ha'e gui ha'e va'e aipoe'i:

— Ava ra'y, ema'ẽ ke aý kuaray apu'a'ia katy — he'i. Ha'e ramo ha'e katy ama'ẽ rã altar rokẽ katy oĩ ae tema ta'angaa Nhanderuete nda'evei etea oendu aguã rami ojapo va'e, jaikeal'i py.

⁶ Aipoe'ive ju xevy:

— Ava ra'y, rexa pa ha'e kuery ojapo okuapy va'e? Ha'e va'e ma ojeguarupy tuvixa va'e Israel kuery apy ojapo va'e, xevyguia oo iky'a e'ý va'e gui ajepe'a aguã rami. Ha'e rami avi rexa ju 'rã ojeguarupy nda'eveive va'e — he'i.

⁷ Ha'e gui okẽ jaikeal'i katy ju xereraa. Ha'e py oo mbotya oĩ va'e re oĩ peteñ kua. Ha'e vy aipoe'i xevy:

— Ava ra'y, ejo'o pova'e imbotya re.

⁸ Ha'e ramo imbotya re ajo'o ma vy ama'ẽ rã oĩ peteñ okẽ.

⁹ Aipoe'i xevy:

— Eike na, ha'e vy rexa 'rã ojeguarupy tuvixa va'e ha'e py ojapo okuapy va'e — he'i.

¹⁰ Ha'e gui aike vy aexa. Ha'e rã ha'e py imbotya joava-jovaive rupi iparapa ra'e opa marãguia yvy rupi otytyry va'e ha'e mymba ojeguarupy, ha'e gui ta'angaa Israel kuery ombojerovia va'ety ha'e javi.

¹¹ Ha'e va'e ta'angaa ombopara pyre renonde rupi opu'ã okuapy setenta avakue Israel kuery mongetaa kuery regua. Ha'e kuery mbyte py hi'aí avi Safã ra'y Jazanias. Ha'e kuery peteñ-teñ opo py oguereko heakuã porã va'e hy'a'i py okai va'e. Heakuã porã va'e rataxí ma ojeupi ovv arai rami.

¹² Ha'e gui aipoe'i xevy:

— Ava ra'y, rexa pa Israel kuery mongetaa kuery pytú guy rupi ojapo okuapy va'e? Ha'e kuery peteñ-teñ ikuai 'rã oo'i ta'angaa kuery oñaty rupi. Mba'eta ha'e kuery aipoe'i: "SENHOR ma nanhanderexai 'rã, nopenavei ma kova'e yvy re", he'i okuapy teñ.

¹³ Ha'e gui aipoe'ive ju xevy:

— Rexave tema 'rã ojeguarupy nda'eveive va'e ha'e kuery ojapo okuapy va'e — he'i.

¹⁴ Ha'e gui xereraa ju SENHOR pegua oo rokẽ kuaray apu'a'ia katy oĩ va'e peve. Ha'e py aexa tuuete ramigua Tamuz omanoague re kunhague oguapy reve ojae'o okuapy va'e.*

¹⁵ Ha'e vy aipoe'i:

— Ava ra'y, rexa pa? Ha'e rami avi ojeguarupy rexave ju 'rã kova'e gui nda'eveive va'e — he'i.

¹⁶ Ha'e gui ma SENHOR pegua oo katy ju xereraa. Ha'e py ikuai SENHOR pegua opy oikea'i okẽ ha'e altar oĩ va'e mbyte aexa rã vinte e cinco avakue ikuai. Ha'e kuery ma ikupepa okuapy SENHOR pegua templo katy, ha'e gui kuaray oua katy hova okuapy. Kuaray omboetea rupi ikuai, kuaray oua katy oma'ẽ okuapy reve.

¹⁷ Ha'e ramo aipoe'i xevy pe:

* ^{8:14} Tamuz ma amboae regua kuery ruete ramigua. Ha'e kuery oikuaa rã ma'etý nhavõ omano 'rã yro'y ypy'i jave, ha'e gui ára pyau py onhemboete kuerei 'rã. Imbojeroviaa kunhague ma ojae'o 'rã okuapy omano rã, ha'e opa marã 'rã itavy rei okuapy onhemboete ju aguã.

— Ava ra'y, rexa pa? Ha'e gui Judá kuery ma apy namigua ojeguarupy ojapo va'e pe "Mba'e'ŷ" he'i okuapy, ha'e gui oyvy rupi joguero'a 'rā okuapy xembopoxya rupi. Ma'ẽ, oxí re omovaẽ okuapy yvyra rakã'i.

¹⁸ Ha'e ramo xepoxya rupi ae 'rā areko. Ha'e kuery re nama'ẽvei 'rā araa jepea rupi neĩ amboaxya rupi. Ha'e gui xeapyxa py ha'e kuery ojapukai atã teĩ xee naendu potai 'rā.

9

Jerusalém pygua kuery mbopagaarã re ijayvuague

¹ Ha'e ramo aendu rā ojapukai atã reve aipoe'i:

— Peju ke, peẽ tetã pygua jukaarã kuery, peteĩ-teĩ pendepo py tembiporu nhomombaarã reve — he'i.

² Ha'e ramo ama'ẽ rā kuaray apu'a'ia katy okẽ tuvixa va'e oĩ va'e gui ou okuapy mboapy meme avakue. Ha'e kuery ma peteĩ-teĩ opo py ogueru tembiporu nhomombaarã. Ha'e kuery mbyte ma ou peteĩ ava ijaoo xiĩ rei va'e, oku'a re oguereko voko mba'emo mboparaaty ryru. Ha'e gui ha'e kuery oike oje'oivy vy altar overa va'e guigua yvy'iry ovaẽ nhogueno'amy.

³ Ha'e gui ma Israel kuery ruete rexakãa opu'ã ovy anjo ipopo va'e ikuai va'e mbyte gui. Ha'e vy oẽ ovy okẽ jaike'a'i peve ranhe. Ha'e gui ava ijaoo xiĩ rei va'e pe SENHOR ijayvu, mba'emo mboparaaty ryru oku'a re oguereko va'e pe ae.

⁴ Ha'e vy aipoe'i ixupe:

— Eaxa ke eovy Jerusalém tetã mbyte rupi, ha'e gui emo "x" avakue ha'e kuery mbyte rupi ojeguarupy ojapo okuapya káuxa ojae'o ha'e ipoaẽ rei va'e rova re — he'i.*

⁵ Ha'e gui xee aendua py amboae kuery pe ju aipoe'i avi:

— Peẽ voi peaxa ke peovy tetã rupi ha'e va'e rakykue rupi. Ha'e rami vy pejojuka 'rā peovy. Ha'e kuery re pema'ẽ eme peraa jepea rupi neĩ pemboaxya rupi.

⁶ Pejuka 'rā tujakue'i, kunumigue ha'e kunhataigüe'i, kyrígue'i ha'e kunhague, pemomba peve. Ha'e rā avakue "x" py omarka pyre re ma napevaẽi 'rā. Pemboypy 'rā xevygua oo iky'a e'ŷ va'e gui ranhe — he'i.

⁷ Ha'e ramo ha'e kuery jypy ojuka oo renonde rupi nhomongeta va'ety kuery ikuai va'ekue. Ha'e gui jojukaa kuery pe Nhanderuete aipoe'ive ju:

— Pemongy'apa ke oo. Ha'e vy pemonyẽ oka omanogue anho. Ha'e gui ma peẽ ju — he'i. Ha'e ramo oẽmba vy jojukave jogueravy tetã rupi.

⁸ Ha'e gui ha'e kuery jojukaa rupi oje'oijave xee ae'i apyta ha'e py. Ha'e rami vy xerenapy'ã re aĩ, xerova yvy re amovaẽ reve. Ha'e vy ajapukai reve aipoe'e:

— Ai SENHOR Xeruete! Remomba ta pa Israel regua kuery rembyrekue ha'e javi, Jerusalém áry ndepoxya renhoẽa py?

⁹ Ha'e ramo xembovai:

— Israel ha'e Judá kuery reko vaia ma tuvixa ete. Ijyvy tynyẽ ma tuguy, ha'e tetã rupi voi ha'eve'ŷa rami joguerekao anho ikuai. Ha'e rami teĩ ha'e kuery aipoe'i: "SENHOR ma kova'e yvy re nopenavei ma, nanhanderexai ae 'rā", he'i okuapy.

¹⁰ Ha'e nunga rupi ae ha'e kuery re nama'ẽvei 'rā araa jepea rupi neĩ amboaxya rupi. Ha'e rami 'rāgue py ha'e kuery akã re ae ambojeapa 'rā hembiapokue — he'i.

¹¹ Ha'e gui ava ijaoo xiĩ rei va'e ou, oku'a re mba'emo mboparaaty ryru oguereko va'e. Ha'e rami vy omombe'u vy aipoe'i:

— Ajapopa ma rejapo uka va'ekue — he'i.

10

Tapyi hexakã va'e oexaague

¹ Ha'e gui ama'ẽ rā anjo ipopo va'e kuery akã áry rupi ojekuaa peteĩ tenda huvixave openaaty ramigua ita safira gui ojapo pyre.

² Ha'e ramo SENHOR ijayvu ava ijaoo xiĩ va'e pe. Ha'e vy aipoe'i:

* 9:4 Apocalipse 7.3

— Tereo iruéra ikuai va'e mbyte rupi, anjo ipepo va'e ikuai va'e mbyte peve. Ha'e vy emonyē ndepo tapyī hexakā va'e anjo ikuiai gui. Tetā áry rupi remombopa 'rā — he'i. Ha'e ramo ha'e va'e oike ov y aexaa gui.

³ Ava oike jave ma anjo ipepo va'e templo yke oiporu kuaa regua re ikuai. Ha'e gui peteī arai omonyē opy ja'o mbyte pygua.

⁴ Ha'e ramove anjo ikuai va'e áry gui SENHOR rexakāa opu'ā ov y oo jaikea'i oī va'e katy. Ha'e ramo oo ha'e javi rupi tynyē jekuaa arai. Oka rupi voi hexakāmba oiny SENHOR po'akaa gui.

⁵ Anjo kuery pepo ma hevovo rei nhendu oka apy peve, Nhanderuete Ipo'akapa va'e ijayvu vy onhendua rami.

⁶ Ha'e gui ma ava ijaō xiī rei va'e pe SENHOR ijayvu. Ha'e vy aipoe'i:

— Eru tata iruéra ikuai va'e mbyte gui, anjo kuery ikuiai gui ae — he'i. Ha'e ramo ha'e oike vy iruéra ikuai va'e mbyte hi'aī.

⁷ Ha'e ramo peteī anjo okuave'ē anjo kuery mbyte tata oī va'e katy. Ha'e va'e oguenoē vy ma ava ijaō xiī va'e po py omoī. Ha'e va'e ju ojopy vy oē ov y.

⁸ Anjo ikuai va'e ma avakue po ramigua oguereko opepo guýr.

Irundy iruéra oexaque

⁹ Ha'e gui ama'ē rā anjo ikuai va'e yvýry ikuai irundy ruéra.* Peteī-teī anjo ikuai va'e yvýry ma iruéra ikuai. Iruéra ikuai va'e jaexa rā itaendy berilo rami hexakāmba.

¹⁰ Irundyve jaexa rā joo rami meme ojekuaa. Jaexa rā peteī-teī ruéra amboae ruéra mbyte rupi joaxa oiny.

¹¹ Iruéra oguata vy ha'eve rei irundyve katy rei oo aguā. Amboae katy ova-ova e'ŷ re oguata ov y. Tenondegua ooa rupi tema amboae kuery voi oje'oi 'rā, amboae katy ndovai guive oguata oje'oivya rupi.

¹² Anjo ikuai va'e rete ha'e javi rupi hexa oīmba rei, ikupe, ipo ha'e ipepo ikuai va'e re guive, ha'e iruéra irundyve ikuai va'e re voi.

¹³ Iruéra ikuai va'e pe ma xee aendu rā “Opyryryī va'e” 'ea.

¹⁴ Temimoingo kuery peteī-teī ma hova irundy va'e. Jypyguha hova ma anjo rova ae, mokoña ma ava rova, mboapya ma guary rova, ha'e rā hova irundaya ma taguato rova.

¹⁵ Ha'e gui anjo ikuai va'e ojeupive'i. Ha'e va'e kuery ma temimoingo kuery Quebar yakā yvýry jypy aexa va'ekue ae.*

¹⁶ Ha'e gui anjo kuery oguata rā iruéra ikuai va'e voi oje'oi avi 'rā ha'e kuery reve. Anjo kuery ma yvy áry ojeupi aguā opepo oupi okuapy teī ha'e kuerya gui iruéra ikuai va'e ndoi.

¹⁷ Anjo kuery opyta ramo iruéra opyta avi. Ojeupi jogueravy ramo iruéra ojeupi avi 'rā, mba'eta iruéra ikuai va'e re oī temimoingo kuery nhe'ē.

Templo gui Nhanderuete rexakāa ojepe'aague

¹⁸ Ha'e gui SENHOR rexakāa ma oo jaikea'i áry oīa gui ova ov y vy anjo kuery áry rupi ju opyta.

¹⁹ Ha'e gui xee aexa rā anjo kuery opepo oupipa okuapy reve ojeupi yvy gui. Ha'e kuery oje'oi rā iruéra ikuai va'e voi oje'oi avi hexeve. Opytapa okuapy SENHOR pegua oo rokē kuaray oua katy oī va'e áry. Ha'e kuery áry rupi ma Israel kuery ruete rexakāa ojekuaa oiny.

²⁰ Ha'e va'e kuery ae temimoingo Israel kuery ruete oīa guy rupi aexa va'ekue, Quebar yakā yvýry. Ha'e ramo mae aikuaa anjo ipepo va'e ikuiai.

²¹ Ha'e kuery peteī-teī ma irundy hova ha'e irundy ipepo va'e. Ha'e rā opepo guýr ma avakue rami ipo va'e.

²² Ha'e kuery rova ma Quebar yakā yvýry aexa va'ekue rova rami. Joo rami ae ojekuaa, temimoingo kuery ae vy. Ha'e peteī-teī ma guenonde katy anho 'rā oguata oje'oivy.

* 10:9 Ezequiel 1.5-25 * 10:15 Capítulo 1 py “Temimoingo kuery aexa” he'ia ma anjo ipepo va'e kuery re ijayvu vy, Nhanderuete po'akaa kuaa ukaa.

11

Nhanderuete yvatekueve ombopaga aguā re ijayvuague

¹ Ha'e gui ma Nhe'ẽ xereupi vy xereraa SENHOR pegua oo rokẽ kuaray oua katy oĩ va'e py. Okẽ jaikea'i py ikuai vinte e cinco avakue. Ha'e kuery mbyte aexa heta va'e kuery regua yvatekueve Azur ra'y Jaazanias ha'e Benaia ra'y Pelatias.

² Ha'e vy SENHOR aipoe'i xevy:

— Ava ra'y, kova'e avakue ma mba'emo vairã re rive jogueroayvu, ha'eve'ŷa rupi nhomongeta okuapy kova'e tetã py.

³ Mba'eta ha'e kuery aipoe'i okuapy: “Novaẽi teri ri ty'y oorã jajapo aguā? Mba'eta kova'e tetã ma oja rami oĩ, ha'e rã nhande kuery ma xo'o rami”, he'i okuapy.*

⁴ Ha'e nunga rupi ndeayvu 'rã ha'e kuery rovai. Ndee ava ra'y ae 'rã ndeayvu — he'i.

⁵ Ha'e gui xe'áry peve SENHOR Nhe'ẽ oguejy vy aipoe'i xevy:

— Emombe'u ke: Po rami SENHOR ijayvu: Israel kuery, nami ae pendeayvu pekuapy, mba'eta mba'emo re penhembopy'aa ma xee aikuaapa ae ma.

⁶ Kova'e tetã rupi heta ma pejuka, ha'e tetã regua tape ikuai va'e rupi pemonyẽ ma tetekue.

⁷ Ha'e nunga rupi Nhanderuete aipoe'i: Pejuka ha'e tetã mbyte rupi pemombo va'ekue ae rima xo'o rami, ha'e rã tetã ma oja rami oĩ. Ha'e rã peẽ kuery ma roipe'apa 'rã ha'e gui.

⁸ Kyxe gui pekyje pekuapy va'eri kyxe ae 'rã ambou peẽ kuery re — he'i SENHOR Nhanderuete.

⁹ — Tetã mbyte gui xee roipe'a vy romboaxapa 'rã amboae regua kuery po py. Ha'e rami py 'rã rombopaga.

¹⁰ Ha'e ramo pendereitya 'rã kyxe py. Israel yvy jave rupi 'rã rombopaga. Ha'e ramo peikuua aguā xee ae SENHOR aikoa.

¹¹ Ha'e gui kova'e tetã ma oja rami e'ŷ 'rã oĩ peẽ kuery pe, ha'e tetã mbyte py xo'o rami e'ŷ 'rã pendekuai. Mba'eta rombopaga 'rã Israel yvy jave rupi.

¹² Ha'e ramo 'rã peikuua xee ae SENHOR aikoa. Mba'eta xeayvuague rupi e'ŷ pendekuai, xee aipotaa ndapejapoi guive. Ha'e rami 'rãgue py amboae regua kuery pendeyvýry rupi ikuai va'e oipotaa rupi rive pendekuai — he'i.

¹³ Ha'e gui xeayvu teri reve Benaia ra'y Pelatias omano xapy'a. Ha'e ramo xerenapy'ã re aĩ, xerova yvy re amovaẽ reve. Ha'e vy ajapukai atã reve aipoa'e:

— Ai SENHOR Xeruete! Israel kuery ha'e javi ri ty'y remomba ta? — ha'e.

Israel kuery ogueru ju aguā re ijayvuague

¹⁴ Ha'e gui xevy SENHOR oayvu ombou vy aipoe'i:

¹⁵ — Ava ra'y, nderyvy kuery, neretarã kuery ae'i, ha'e Israel kuery ha'e javi pe Jerusalém pygua kuery aipoe'i okuapy: “Peẽ kuery ma SENHOR gui pejepa mombyrya py. Ha'e rã orevy pe ma kova'e yvy ome'ẽ orekuai aguā”, he'i okuapy.

¹⁶ Ha'e nunga rupi aipo're: Po rami SENHOR Nhanderuete ijayvu: Ha'e kuery ma mombyry aipe'a amboae regua ikuiaia rupi, ha'e amboae yvy rupi amoã tei ha'e kuery pe xee ae aiko 'rã oo iky'a e'ŷ va'erã, yvy mboae rupi ooague py xapy'a'i ikuia ja.

¹⁷ Aipo'reve ju: Po rami SENHOR Nhanderuete ijayvu: Xee amono'õmba ju 'rã amboae regua kuery ikuiaia mbyte gui, arupa ju 'rã yvy araa ukaague gui. Ha'e rami vy ha'e kuery pe ae ju 'rã ame'ẽ Israel yvy.

¹⁸ Ha'e py ojevypa ju ma vy ha'e gui oipe'apa 'rã ta'angaa ojou vaipy ha'e ojeguarupy oguerekva'ekue ha'e javi.

¹⁹ Ha'e ramo ha'e kuery pe ame'ẽ 'rã pete'i rami ipy'a aguā, ha'e kuery re amoõ 'rã nhe'ẽ pyau. Ha'e kuery gui amboi 'rã ikuraxõ ita guigua, ha'e hekovia ame'ẽ 'rã kuraxõ ho'o guigua,

* 11:3 Ha'e rami ijayvu okuapy ojee anho ojeroviaa rupi, Nhanderuete omomba ta maa ndogueroviai vy. Tetã pe “Oja” he'i mba'eta oexa'ã tei tetã kora mba'emo vai ojoko aguā re.

²⁰ xeayvua rupi ju ha'e kuery ikuai aguā, ha'e xee aipotaa omoī porā vy ojapo ete aguā. Ha'e kuery ikuai 'rā xevyguia, ha'e rā xee ma aiko 'rā Tuuete.

²¹ Ha'e rā amboae kuery opy'a py ta'angaa ojou vaipy ha'e ojeguarupy rive oguerovy'a va'e ma ajapo 'rā inhakā re ae ikuaiague ojeapa aguā rami — he'i SENHOR Nhanderuete.

²² Ha'e gui ma anjo ikuai va'ekue opepo oupi reve ojeupi, iruéra ikuai va'e voi ojeupi avi ovy ha'e kuery reve. Ha'e rā ha'e kuery áry oime Israel kuery ruete rexakāa yvateve rupi.

²³ Ha'e gui tetā mbyte gui SENHOR rexakāa ojeupi ovvy vy opyta oiny tetā gui mombyry'i yvyty kuaray oua katy oī va'e áry.

²⁴ Ha'e gui ma ra'u rupi Nhanderuete guigua Nhe'ē xereupi ju vy xereraa henoiny Caldéia yvy re escravo-rā ogueraapa pyre ikuiaia katy. Ha'e gui ma xee ndaexavei mba'emo oexa uka pyre.

²⁵ Ha'e gui escravo-rā ogueraaa pyre ikuai va'e pe amombe'upa SENHOR xevy oexa uka va'ekue ha'e javi.

12

Escravo-rā ogueraaa pyre kuery ikuiaia re ijayvuague

¹ Ha'e gui ma xevy SENHOR oayvu ombou vy aipoe'i:

² — Ava ra'y, ndee ma xere opu'ā va'e kuery mbyte rupi reiko. Ha'e kuery ma guexa oguerekō oma'ē aguā va'eri ndoexai va'e, oapyxa oguerekō oendu aguā va'eri noendui va'e, mba'eta xere opu'āa rupi ae ikuai.

³ Ha'e rā ndee ava ra'y, ereko katu ke nemba'e rei-rei amboae katy reguata aguā merami. Ha'e gui ára pyve eē ha'e kuery oexaa py, amboae yvy katy reo aguā merami. Tereo nderekoa gui amboae katy ha'e kuery oexaa py ju. Xapy'a rei ma ha'e kuery oikuua 'rā okuapy, xere opu'āa rupi ae ikuai va'eri.*

⁴ Ara py ae eraa tape py ha'e kuery oexaa py pendevoyirā reguata aguā. Ha'e gui ka'aru'i jave tereo ha'e kuery oexaa py, amboae yvy katy amongue oguata va'e rami.

⁵ Ha'e kuery oexaa py embokua ndero mbotya, ha'e eē eovy ha'ekue rupi.

⁶ Pavē oexaa py 'rā rejaxe. Pytū rai'i reve 'rā reraa. Ejeova mo'āmba eovy yvy reoa rexa e'ŷ aguā. Mba'eta ndee romoī Israel kuery nderexa vy oikuua aguā — he'i.

⁷ Ha'e rami rā xevy ojapo ukaague rami ae xee ajapo. Ha'e rami vy ara py araa oka py amboae yvy katy araa va'erā merami. Ha'e gui ka'aru'i jave xepo py ae ambokua xero mbotya. Pytū ma jave xee aē vy pavē oexaa py xekupe re amoīmba xevoyi araa va'erā.

⁸ Ha'e gui ko'ēgue ju xevy SENHOR oayvu ombou vy aipoe'i:

⁹ — Ava ra'y, Israel kuery xere opu'ā okuapy va'e noporandui teve ndevy: "Mba'e tu ndee rejapo reiny?" nde'i okuapy?

¹⁰ Aipo're ha'e kuery pe: Po rami SENHOR Nhanderuete ijayvu: Kova'e ma Jerusalém pygua huvixa ha'e Israel kuery ha'e javi oikuua aguā.

¹¹ Aipo're: Xee aikoa ma peē kuery peikuua aguā. Xee ajapoague rami ae peē kuery re ojapoa 'rā. Ha'e ramo escravo-rā pendereraa 'rā amboae yvy katy pendekuai aguā.

¹² Peē kuery ruvixa peē kuery mbyte oiko va'ekue voi ogueraa 'rā ovoyi okupe re ae. Pytū jave 'rā oē. Ha'e va'e oo jepe aguā ma ombokuaa 'rā tetā kora. Ojeova mo'āmba 'rā ovvy yvy ooa oexa e'ŷ aguā.

¹³ Ha'e rami teī hi'áry rupi aipyo 'rā xekya, ha'e ramo ho'a 'rā xenhuā py. Araa uka 'rā Babilônia yvy katy, caldeu kuery yvy re ae. Ha'e rami teī ha'e va'e yvy ndoexavei 'rā, omano peve ha'e py ae oiko teī.†

¹⁴ Ha'e rā hexeveguia kuery oipytyvōa rupi ikuai va'ekue ma amoīmba 'rā yvytu ikuai va'e oipejua katy, ixupegua xondaro kuery guive. Ha'e kuery rakykue rupi aekyi uka 'rā kyxe.

* ^{12:3} Ezequiel ma oguata ete aguā re'ŷ ijayvu, ha'e kuery pe Nhanderuete guigua oikuua uka aguā rive. † ^{12:13} Huvixa Zedequias ndoexai raka'e Babilônia yvy, mba'eta ha'e py ovaē e'ŷ mbove hexa omombua (2 Reis 25.7).

¹⁵ Ha'e ramo oikuua pavẽ 'rã xee ae SENHOR aikoa, amboae regua ikuiaia rupi araa uka vy amboae yvy rupi amoaimba ramo.

¹⁶ Ha'e rami avi amongue ete'i 'rã aeja kyxe gui oo jepe va'ekue, karuai ha'e mba'eaxy vaikue gui guive, amboae regua ikuiaia rupi ha'e kuery omombe'u aguã ojeguarupy ojapoague ha'e javi. Ha'e ramo oikuua 'rã xee ae SENHOR aikoa — he'i.

¹⁷ Ha'e ramo xea py SENHOR oayvu ombou vy aipoe'i:

¹⁸ — Ava ra'y, rekyje reve 'rã re'u reiny mbojape, ha'e reryryipa ha'e nanderekorâveia py rey'u 'rã yy.

¹⁹ Ha'e rami vy aipo're 'rã yvy re ikuai va'e kuery pe: Po rami SENHOR Nhanderuete ijayvu Israel yvy re Jerusalém pygua kuery ha'e javi pe: Pe'u 'rã mbojape napenderekorâveia py, ha'e pey'u 'rã yy penhemondyipa reve, mba'eta pendeyvy gui oipe'apaa 'rã mba'emo ikuai va'ekue ha'e javi, ha'e pygua kuery ojapo vaiague ha'e javi re.

²⁰ Ha'e rami vy tetã ikuai va'ekue ho'apa 'rã ivaipa reve, yvy voi ombovaipa pyre 'rã optya. Ha'e ramo peikuaa 'rã xee ae SENHOR aikoa — he'i.

²¹ Ha'e gui xevy SENHOR oayvu ombou vy aipoe'ive:

²² — Ava ra'y, mba'e nunga ayvu tu nami peẽ kuery pemombe'u va'ety Israel yvy re? Mba'eta aipopeje: “Are teri ha'e va'e ára ovaõ aguã, ayvu SENHOR ombou va'ekue ndojeupityi 'rãe guive”, peje.

²³ Ha'e nunga rupi aipo're ha'e kuery pe: “Po rami SENHOR Nhanderuete ijayvu: Xee ajapo 'rã ha'e va'e ayvu rupi pendeayvu ve'ý aguã rami, Israel kuerya rupi nomombe'uavei 'rã. Mba'eta ára ovaõ ma ouvy xee SENHOR ayvu ha'e javi ojeupitypa aguã”, 're ha'e kuery pe.

²⁴ Mba'eta Israel kuery mbyte rupi ndoikovei ma 'rã anhetêguia e'ý oexa ra'u va'e, neñ nhombotavya rupi imba'ekuaa va'e.

²⁵ Mba'eta xee SENHOR ae xeayvu 'rã, ha'e ramo ayvu xee amombe'u va'e ma are'i e'ý 'rã oiko. Mba'eta xere pepu'ã rei va'e kuery, pekuave teri reve xeayvu 'rã, ha'e ayvu amombe'u va'ekue oiko 'rã — he'i SENHOR Nhanderuete.

²⁶ Ha'e gui xevy pe teigue ju SENHOR oayvu ombou vy aipoe'i:

²⁷ — Ava ra'y, ma'ë, Israel kuery aipoe'i okuapy: “Ezequiel pe oexa ukaa va'ekue ma mbovy rei e'ý ára reguarã, ayvu omombe'u va'e ma raka'eve rã teri oiko va'erã”, he'i okuapy.

²⁸ Ha'e nunga rupi aipo're ha'e kuery pe: Po rami SENHOR Nhanderuete ijayvu: Xeayvu peteïve ma voi ndarei 'rã, ha'e ayvu amombe'u va'e oiko 'rãe — he'i SENHOR Nhanderuete.

13

Profeta kuery ramigua rive rovai ijayvuague

¹ Ha'e gui ma xevy SENHOR oayvu ombou vy aipoe'i:

² — Ava ra'y, ndeayvu Israel pygua profeta kuery rovai, mba'eta ha'e kuery ma oakã gui rive ayvu omombe'u vy “Pendu SENHOR ayvu”, he'i 'rã okuapy.

³ Po rami ijayvu SENHOR Nhanderuete: Nda'evei ete 'rã profeta kuery hi'arandu e'ý va'e pe, mba'eta ha'e kuery ma onhe'ë ae gui 'rã ijayvu mba'eve oexa e'ý re.

⁴ Israel kuery, penderegua profeta kuery ma aguara'i tetã ivaipaague rupi ikuai va'e rami rive.

⁵ Mba'eta ha'e kuery ma nomoatyrõi Israel kuery retã kora pa'û, neñ kora ndojapo retavei guive peẽ kuery retã rupi, SENHOR poxya ára py peẽ kuery re opu'ã okuapy va'e rovai peñ atã aguã.

⁶ Ha'e kuery ma anhetê rupi e'ý oexa ra'u, ha'e nhombotavya rupi imba'ekuaa 'rã okuapy. Mba'eta “SENHOR ae ijayvu”, he'i 'rã okuapy xee namboui va'eri. Ha'e kuery oarõ okuapy teñ oayvuague oiko aguã.

⁷ Ha'e kuery anhetê rupi e'ý oexa ra'u, nhombotavya rupi rive imba'ekuaa guive. Mba'eta “SENHOR ae ijayvu”, he'i 'rã okuapy xee ndaxeayvui va'eri.

⁸ Ha'e nunga rupi po rami SENHOR Nhanderuete ijayvu:

— Anhetē rupi e'ŷ mba'emo pexa ra'u, ha'e penhombotavya rupi penemba'ekuaa ramo xee aiko peẽ kuery rovai, he'i SENHOR Nhanderuete.

⁹ Ha'e gui xepo amokuave'ẽ 'rā profeta kuery anhetē rupi e'ŷ oexa ra'u ha'e nhombotavya rupi imba'ekuaa va'e rovai. Ha'e rami rire ha'e kuery nomongetavei 'rā xevyguia kuery, hery noīvei 'rā kuaxia Israel kuery rery oĩa re, neĩ ndoikevei 'rā guive Israel yvy re. Ha'e rami rā peikuaa 'rā xee ae SENHOR Penderuete aikoa.

¹⁰ Mba'eta ha'e kuery ma xevyguia kuery mbotavypaa rupi ikuai. Ha'e vy "Mba'eve ndoikoi 'rā", he'i 'rā okuapy, opa marāguia oiko ta va'eri. Kora ojapoa nhavō profeta kuery omoxiĩ rei rive 'rā.

¹¹ Ha'e nunga rupi imoxiĩa kuery pe "Kora ho'apa ta ma" 're. Mba'eta oiko 'rā oky ja'ea. Peẽ amandau kuery, pe'a ke, ha'e gui ndee yvytu guaxu, eipeju.

¹² Ha'e gui ne'ixa, kora ho'a ma jave "Mamo tu opyta xiĩ va'e ha'e va'e py pemoxiĩague?" 'ea 'rā pendevy.

¹³ Ha'e nunga rupi po rami SENHOR Nhanderuete ijayvu: Xepoxya rupi ambou 'rā yvytu guaxu, oky ja'ea nhombopagaarã ha'e amandau jojukapaarã, amomba aguã.

¹⁴ Ha'e rami vy aitypa 'rā kora pemoxiĩ va'ekue, ajapo 'rā yvy py rive itui aguã, ha'e aexa uka 'rā ijytarã va'ekue. Kora ho'a ramo pekanhymba 'rā iguy rupi. Ha'e ramo peikuaa 'rā xee ae SENHOR aikoa.

¹⁵ Ha'e rami py aexa ukapa 'rā xepoxya kora rovai, pemoxiĩ rive va'e kuery rovai guive. Ha'e vy aipoa'e 'rā pendevy: "Kora ma noīvei ma, imoxiĩare kuery okanhymba avi.

¹⁶ Ha'e va'e kuery ma Israel pyguia profeta kuery, mba'eta Jerusalém tetā re mba'eve ndoikoi 'rā rami ijayvu, opa marāguia oiko ta va'eri", he'i SENHOR Nhanderuete.

Kunhague profeta ramigua rive rovai ijayvuague

¹⁷ — Ava ra'y, xevyguia kunhague regua ma oakã gui rive omombe'u SENHOR guigua. Eiko ke ha'e kuery rovai, ndeayvu guive ha'e kuery rovai,

¹⁸ ha'e vy aipo're: Po rami SENHOR Nhanderuete ijayvu: Nda'evei ete 'rā peẽ kunhague opa marāguia poapy kuaa ha'e tova mo'ãa joo rami e'ŷ-e'ŷ pajerã pejapo va'e pe, nhonhe'ẽ ppendea katy guarã pejopy aguã rive! Tyrã pa pemokanhyme vi xevyguia kuery nhe'ẽ, ha'e rā amboae kuery ma peraaxe pendejeupe guarã?

¹⁹ Peẽ kuery ma xevyguia kuery mbyte naxemboetei pekuapy, peteĩ po'i cevada ha'e peteĩ pëgue mbojape rekovia rive. Ha'e rami vy pejuka 'rā okuave aguã rami ikuai va'ekue, ha'e rā omano aguã rami ikuai va'ekue ma ndapejukai. Xevyguia kuery pe pendeapu rive, apu oenduxe vai okuapy ramo.

²⁰ — Ha'e nunga rupi po rami SENHOR Nhanderuete ijayvu: Ma'ẽ, xee ma aiko pajerã pejapo va'e rovai, mba'eta ha'e va'e py nhonhe'ẽ pejopy guyra mbo'aa rami. Ha'e rami vy aipe'apa 'rā pendepo gui, ha'e guyra rami araa jepepa 'rā nhonhe'ẽ pejopy va'ekue.

²¹ Pendegui amondoropa avi 'rā pendeova mo'ãa peiporu va'ety. Ha'e rami vy xevyguia kuery araa jepepa 'rā pendepo gui. Ha'e rami rire ha'e kuery nonhembojavei 'rā pendere pejopy ve'ŷ aguã. Ha'e ramo peikuaa 'rā xee ae SENHOR aikoa.

²² Pendeapua rupi pemomboriau heko porã va'e kuery py'a xee namomboriau ukai va'eri, ha'e rā heko vai va'e po ma pemombaraete, ha'e kuery tape vai gui ojepe'a e'ŷ aguã, tekove oupity e'ŷ aguã.

²³ Ha'e nunga rupi ndapexavei 'rā anhetē rupi e'ŷguia, napenemba'ekuaavei 'rā guive. Xevyguia kuery araa jepepa 'rā pendepo gui. Ha'e ramo peikuaa 'rā xee ae SENHOR aikoa.

Ta'angaa mbojeroviaa kuery ombopaga aguã re ijayvuague

¹ Ha'e va'e rire xea py ovaõ Israel regua nhomongeta va'ety kuery. Ha'e kuery ovaẽmba ma vy oguapy okuapy xerenonde.

² Ha'e ramo SENHOR oayvu ombou vy aipoe'i xevy:

³ — Ava ra'y, kova'e avakue ma opy'a py ae omopu'ã okuapy ta'angaaombojerovia aguã. Ha'e nunga ma guenonde py oguerekotiae tekovai py ojeity uka aguã. Xapy'a rei nda'u xee aeja 'rã ri ha'e kuery oporandu uka aguã xevy? Any.

⁴ Ha'e nunga rupi ha'e kuery pe ndeayvu vy aipo're: Po rami SENHOR Nhanderuete ijayvu: Israel kuery va'e regua ma ta'angaa omopu'ã 'rã opy'a py ae, ha'e gui ha'e nunga tekovai py ojeity uka aguã oguerekoteri reve ou 'rã profeta oĩa py oporandu aguã. Ha'e kuery ou ramo xee SENHOR ae ambovai vy xeayvu 'rã ta'angaa mbovy rei e'ŷ oguerekoa re.

⁵ Ha'e rami aiko 'rã xejeupe guarã ajopy ju aguã Israel kuery py'a, ta'angaa re oje'oi vy xegui ojepe'apa rire.

⁶ — Ha'e nunga rupi aipo're Israel kuery pe: Po rami SENHOR Nhanderuete ijayvu: Pejeko rerova ke, ha'e pejep'e'a ta'angaa perekova'e gui. Pendekupe ke ojeguarupy perekova'e ha'e javi katy.

⁷ Mba'eta Israel kuery va'e regua, e'ŷ vy Israel yvy re amboae regua ikuai va'e teĩ xegui ojepe'a vy opy'a py ae omopu'ã 'rã ta'angaa, ha'e gui ma tekovai py ojeity uka aguã oguerekoteri reve ou 'rã profeta oĩa py ixupe oporandu uka aguã xevy. Ha'e va'e ma xee SENHOR ae 'rã ambovai.

⁸ Ha'e va'e avakue rovai arrova 'rã xerova ajou vaia rupi. Ha'e rami vy ajapo 'rã ojojai ha'e ayvu vai pyrã, xevyguakuery mbyte gui aipe'a 'rã guive. Ha'e ramo peikuaa 'rã xee ae SENHOR aikoa.

⁹ Ha'e gui xapy'a rei peteĩ profeta mba'emo omombe'u 'rã ojekorea rupi, ha'e va'e ma xee SENHOR ae ambotavy uka rã ijayvu. Ha'e rami teĩ hexe xepo amokuave'ẽ vy aipe'a 'rã xevyguakuery mbyte gui.

¹⁰ Ha'e rami rã mokoïve re 'rã oĩ ojejavyague re opaga aguã: xevy pe oporandu uka rive va'e opaga 'rã, profeta ramigua opagaa rami avi.

¹¹ Ha'e ramo Israel kuery xea gui ojepe'a ve'ŷ aguã, nonhemongy'avei aguã gueko vaia ha'e javi py. Ha'e ramo xevyguakuery 'rã ikuai, ha'e rã xee ma Tuuete 'rã aiko — he'i SENHOR Nhanderuete.

Nhanderuete ha'evea rami nhombopaga aguã re ijayvuague

¹² Ha'e gui teĩgue ju SENHOR oayvu ombou xevy. Ha'e vy aipoe'i:

¹³ — Ava ra'y, xapy'a rei peteĩ yvy regua kuery ojejavy 'rã xerovai nda'evei ete va'e ojapoa py. Ha'e ramo ha'e kuery rovai xepo amokuave'ẽ vy ha'e kuery pe ndajou ukavei 'rã ho'u va'erã. Ha'e rami vy ha'e kuery re ambou 'rã karuai avakue ha'e mymba kuery amomba aguã ha'e va'e yvy gui.

¹⁴ Ha'e va'e yvy re mboapyavakue, Noé, Daniel ha'e Jó ikuai teĩ guekove anho ha'e kuery ogueraa jepe 'rãgue gueko porãa re — he'i SENHOR Nhanderuete.

¹⁵ — Ha'e gui ma xapy'a rei ha'e va'e yvy re xee ambou 'rã mymba inharõ va'e nhomombaara. Ha'e ramo ha'e va'e yvy ombovaipa pyre ae 'rã opyta, ha'e inharõ va'e kuery gui avave rei ndoaxavei 'rã ha'e rupi.

¹⁶ Ha'e gui anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue gua'y neĩ guajy kuery ma voi. Ha'e kuery anho'i 'rãgue oo jepe, ha'e rã yvy ma ombovaipa pyre 'rãgue opyta — he'i SENHOR Nhanderuete.

¹⁷ — Ha'e rami e'ŷ vy xapy'a rei ha'e va'e yvy re kyxe ambou vy aipoa'e 'rã: "Kyxexa ke ha'e va'e yvy rupi, avakue ha'e mymba kuery amomba aguã", ha'e 'rã.

¹⁸ Anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue neĩ gua'y neĩ guajy kuery ma voi. Ha'e kuery anho'i 'rãgue oo jepe — he'i SENHOR Nhanderuete.

¹⁹ — Ha'e rami e'ŷ vy ha'e va'e yvy rovai xapy'a rei ambou 'rã mba'eaxy vaikue, e'ŷ vy anhoë 'rã xepoxyatuguy moearã ambou vy, ha'e gui amokanhymba aguã avakue va'e mymba kuery.

²⁰ Anhetē ete xee ae rekove rupi aura vy aipoa'e: Ha'e va'e yvy re Noé, Daniel ha'e Jó ikuai teĩ ndogueraa jepet 'rāgue gua'y neĩ guajy kuery. Gueko porāa re guekove anho 'rāgue ogueraa jepe — he'i SENHOR Nhanderuete.

²¹ Mba'eta SENHOR Nhanderuete aipoe'i:

— Jerusalém tetā re katuve ma avakue ha'e mymba kuery okanhy 'rā, nhombopagaarã irundyve regua ambou ramo: kyxe, karuai, mymba inharõ va'e ha'e mba'eaxy vaikue.*

²² Ha'e rami teĩ hembyrekue optya 'rā mbovy'i ete. Ha'e va'e kuery ma ogueraa jepe 'rā gua'y ha'e guajy kuery. Ha'e gui ma peẽ kuerya py ju ovaẽ ramo pexa 'rā ha'e kuery reko mba'emo vai ojapo rā. Ha'e ramo pendepy'a porā ju 'rā mba'emo vai Jerusalém re ambou va'ekue ha'e javi gui.

²³ Ha'e rami py ha'e kuery penembopy'a porā ju 'rā pexa ramo ha'e kuery reko mba'emo vai ojapo rā. Ha'e gui ma peikuua 'rā rive e'ŷ Jerusalém re mba'emo vai ambouague — he'i SENHOR Nhanderuete.

15

Yxypo 'ygue re Jerusalém tetā ombojojaague

¹ Ha'e gui SENHOR oayvu ombou vy aipoe'i xevy:

² — Ava ra'y, yxypo 'ygue ma amongue henda py nda'u amboae yvyra ka'aguy re ikuai va'e gui ha'eveva va'e?

³ Yxypo 'ygue nda'u pejou 'rā mba'emo pejapo aguā? Tyrā pa oo mbotya re pemo'ā 'rā imoiny, mba'emo peupi imoiny aguā?

⁴ Any, yxypo 'ygue ma tata py pemombo rive 'rā okai aguā. Ha'e gui xapy'a rei ijapy'i joavaive re, ha'e mbyte rupi voi okaipa ma ramo ha'eve 'rā teve peiporu aguā mba'emo pejapo aguā?

⁵ Ha'e nunga rupi ne'exa, okai e'ŷ mbove mba'everā ndovarei va'ekue ma tata py okai rire katuve ma ndovarei, tapyū rive optya rire. Ha'e nungakue gui nda'eve 'rā mba'emo pejapo aguā.

⁶ Ha'e nunga rupi yxypo 'ygue yvyra ka'aguy rupi ikuai va'e mbyte gui Peru va'ekue tata py pemombo rivea rami avi xee voi ajapo 'rā Jerusalém pygua kuery re — he'i SENHOR Nhanderuete.

⁷ — Ha'e rami vy ha'e kuery re aikuua pota 'rā ambopaga aguā. Xapy'a rei tata gui ha'e kuery va'e regua oo jepe teĩ tata omomba nho 'rā. Ha'e rā peikuua 'rā xee ae SENHOR aikoa, ha'e kuery re aikuua pota ramo.

⁸ Ha'e rami vy ambovaipa 'rā ha'e kuery yvy, teko vai rupi anho ikuai rire — he'i SENHOR Nhanderuete.

16

Jerusalém pygua kuery itavy reia re ijayvuague

¹ Ha'e gui SENHOR oayvu ombou vy aipoe'i xevy:

² — Ava ra'y, ndeayvu ke Jerusalém pygua kuery pe ojeguarupy ojapo okuapya re.

³ Ha'e vy aipo're: Po rami SENHOR Nhanderuete ijayvu Jerusalém tetā pe: * Cananeu kuery yvy re neramoī kuery ikuiaia py ae reiko'i raka'e. Nderu ma amorreu, ha'e rā ndexy ma heteu raka'e.

⁴ Ha'e gui ndetui'ia ára py ma nepuru'ā ndojayaai raka'e, yy py nanemoakŷai guive ndeky'a'o aguā, juky py nandekytyai, neĩ nanenhouvāai raka'e ajukue py.

⁵ Avave rei nanemboaxyai vy ndere noma'ēai raka'e ha'e rami opena aguā. Ha'e rami 'rāgue py reiko'ia ára py nemomboa raka'e mba'ety rupi rive, ndegui ojeguaru pavē vy.

⁶ — Ha'e nunga rupi ndea'i rupi xee aaxa vy aixa nderuguy re remy-remyī rejupy rā. Ha'e vy ndevy pe aipoa'e va'ekue: “Nderuguy re teri ndetui teĩ eikove. Tá, nderuguy re teri ndetui teĩ eikove tema”, ha'e va'ekue.

* 14:21 Apocalipse 6.8 * 16:3 Kova'e capítulo py Jerusalém tetā re Nhanderuete ijayvu, peteĩ kunha re ombojoja vy.

⁷ Ha'e gui ma xee romboetave mba'ety henhoī pyaupaa rami. Ha'e ramo ndeyvate, ndetuvixave reovy vy neporā ete. Nekārā ojeapo, nde'a voi ipuku. Ha'e rami teī ndepire rei teri, nerenhemondei vy.

⁸ Ha'e gui ndea katy'i rupi aaxa avy vy roexa rā ovaē ma ra'e rejoayvu aguā ára. Ha'e ramo nde'áry aipyo xeao puku apy'i, ndepire reia anhovā aguā. Ha'e vy ndevy pe aura reve ajapo xereve guarā. Ha'e rire xera'yxyrā reiko — he'i SENHOR Nhanderuete.

⁹ — Ha'e gui ma yy py rombojau vy roiky'a'opa nderuguy gui, ha'e gui roikyty azeite py.

¹⁰ Romonhemonde avi ao ombojegua pyre py, ndepy reguarā ame'ẽ mba'emo pirekue iporāve va'e guigua, romoku'axā ajukue ipererī'i va'e py, romonheovāmba guive ajukue seda guigua py.

¹¹ Rombojeguapa avi poapy regua py voi, ndeaju'y re amoī guive mbo'y.

¹² Nexī re ma rombojegua peteī ojere'i va'e py, romonamixā, ha'e neakā re ma akā regua iporā va'e amoī.

¹³ Ha'e rami py ouro ha'e prata py ndejeguapa. Ndeao ma ajukue pererī'i, seda guigua ha'e ombojegua pyre py. Romongaru trigo iporāve, ei ha'e azeite py. Ha'e ramo neporā ete vy huvixave ra'xyx rami reiko.

¹⁴ Yvy regua ikuiaia rupi nderekō oendupaa neporā ete rā, mba'eta ndevaikuea noī, ndere xerexakāa amoī rire — he'i SENHOR Nhanderuete.

¹⁵ — Ha'e rami teī neporā reia re rive rejerovia vy ndetavy reia rupi reiko, nderekō pavē oendu rā. Ha'e rami vy oaxa va'e pe rei renheme'ẽ ixupe guarā rive.

¹⁶ Ha'e rami vy ajukue rerekō va'ekue regua reiporu yvy'ã áry ombojerovia atyrā joegua e'ŷ-e'ŷ pytā va'e py rembojegua vy. Ha'e py ma ndetavy rei. Ha'e va'e nunga ma nda'evei ae oiko aguā.

¹⁷ Ita porāgueve, ouro ha'e prata ndejeguarā ame'ẽ va'ekue remboi vy ava ra'angaarā rejapo. Ha'e rami vy rejeyavy ha'e nunga re.

¹⁸ Ha'e nunga ndeoao ombojegua pyre remboi avi vy ta'angaa renhovāmba. Ha'e gui azeite ha'e heakuā porā va'e ame'ẽ va'ekue ma ta'angaa renonde py remoī.

¹⁹ Ha'e gui tembi'u ame'ẽ va'ekue, trigo iporāve va'e, azeite ha'e ei romongaruague voi remoīmba ha'e nunga renonde py heakuā porāve va'e reve. Ha'e rami ete rejapo reikovy — he'i SENHOR Nhanderuete.

²⁰ — Ha'e ramigua áryve nememby kuery ha'e ndepi'a kuery xera'yague ae reraa avi vy rejuka uka ta'angaa pe rive oapya py. Ha'e rami ete ndetavy reia nda'u mba'e e'ŷ'i ri?

²¹ Mba'eta xera'y kuery rejuka uka vy ta'angaa pe remboaxapa tata py reapy reve.

²² Ha'e rami ojeguarupy rejapo ha'e ndetavy reia ha'e javi py nderexaraipa nekunhataī rā guare re, ndepire rei ha'e nandaoi reve nderuguy py remy-remyī rejupy jave guare re guive.

²³ SENHOR Nhanderuete aipoe'ive ju:

— Nda'evei, nda'evei ete 'rā ndevy! Mba'eta opa marāgua ha'eve'ŷ va'e rejapo ma rire tetā mbyte ha'e javi rupi ae ju rejapo rembojerovia atyrā, altar-rā heta guive rejapo.

²⁵ Mba'eta ndea py tape ojerea ikuai va'e ha'e javi rupi rejapo altar-rā, neporāague remongy'apa vy. Ha'e rami vy oaxa va'e pe rei tema reipe'a neretyma, tavy rei rejapove tema reovy vy.

²⁶ Ndetavy rei avi ndea katyguia kuery Egito guigua ra'y kuery hete guaxupa rei va'e reve. Ha'e rami py xembopoxy aguā rami remboetave tema ndetavy reia.

²⁷ Ha'e nunga rupi ae nderovai amoī xepo ndeyvy namboetaive vy. Romboaxa avi filisteu kuery ndere ija'e'ŷ va'e kuery pe, ha'e kuery oipotaa rami rei ndererekō aguā, opa marā rei reikoa gui ha'e kuery ojeguaru rire.

²⁸ Assíria pygua ra'y kuery reve voi ndetavy rei, ha'e rami reiko aguā anho tema nda'eveive vy. Ha'e kuery reve ndetavy rei va'eri nderepytu'uxei.

²⁹ Ha'e rami 'rāgue py Canaā yvy ha'e javi rupi ndetavy reive tema Caldéia yvy peve. Ha'e rami teī nderepytu'uxei ae tema.

³⁰ Ha'e gui ma SENHOR Nhanderuete aipoe'ive ju:

— Ha'e rami reikoa py ndepy'a re nekangya anho oĩ, kunha tavy rei oxĩ kuaa e'ŷ va'e rami reiko vy.

³¹ Ha'e rami vy tetã rupi jaikea'i nhavõ rupi rejapo reikovy ombojerovia atyrã, ha'e rã tetã mbyte rupi ma altar-rã rejapo. Ha'e rami avi kunha tavy rei rami e'ŷ guive reiko, mba'eta peráta re'ŷ ndetavy rei vy.

³² Ta'lyxy itavy rei va'e rami ae reiko, ome 'rãgue py avakue mboae omovaẽ va'e rami rive.

³³ Mba'eta kunha tavy rei pe ma mba'emo ome'ea 'rã, ha'e rã ndee ma mba'emo reme'ẽ rivepa jepi 'rã repenaa kuery pe, ndea katy opa rupi gui ou aguã ndereve itavy rei aguã.

³⁴ Ha'e nunga rupi ndetavy reia py kunha tavy rei rami e'ŷ reiko, mba'eta itavy rei aguã ndereka okuapy va'e ndevy mba'emo ome'ẽ 'rãgue py ndee ae mba'emo reme'ẽ 'rã ha'e kuery pe — he'i.

³⁵ — Ha'e nunga rupi kunha tavy rei reiko va'e, endu ke SENHOR ayvu.

³⁶ Po rami SENHOR Nhanderuete ijayvu: Repenaa kuery reve opa marã ndetavy rei reikovy ndepire reia rupi. Ha'e gui ta'angaa remopu'ã va'ekue pe ojeguarupy anho rejapo, mba'eta ha'e nunga pe nememby kuery ha'e ndepi'a kuery rejuka vy remoẽ huguykue.

³⁷ Ha'e nunga rupi ma'ẽ, aŷ ma amboatypa 'rã ndere opena va'ekue ha'e repenaa va'ekue ha'e javi, ndere ija'e'ŷ va'e kuery ha'e javi reve. Nderovai ae ambou 'rã opa rupi gui. Ha'e rami vy ha'e kuery renonde py rombopire reipa 'rã ha'e kuery pavẽ nderexa aguã.

³⁸ Ha'e rami vy xee rombopaga 'rã itavy rei va'e ha'e jojukaare ombopagaa rami. Ha'e vy romoingo axy 'rã xepoxy ha'e nda'evei etea rupi.

³⁹ Ha'e rami vy romboaxa 'rã ha'e kuery po py. Ha'e ramo ha'e kuery oitypa 'rã ombojerovia atyrã ha'e altar-rã rejapo va'ekue. Omboipa 'rã ndeao, oipe'apa 'rã guive ita porãgueve ndejeguaague. Ha'e rami vy ndereja 'rã ndepire rei ha'e nandeaovei reve.

⁴⁰ Ha'e gui ma ha'e kuery heta ombou 'rã nderovai guarã. Ha'e ramo ndeapipa 'rã okuapy ita py, kyxe py ndepyxo 'rã guive.

⁴¹ Oapypa 'rã oo ndea py ikuai va'e, ha'e gui nembopaga 'rã mbovy e'ŷ kunhague oexaa py. Ha'e rami vy amombytu'upa 'rã ndetavy reiague, ha'e ramo mba'eve nereme'ẽvei ma 'rã ndetavy rei aguã.

⁴² Ha'e rami vy mae anhenhandu porã ju 'rã ndevy xepoxyague ha'e nda'evei ete aikoague gui. Apytu'u ete 'rã, ndevy ndaxepoxyvei aguã rami.

⁴³ Mba'eta nekunhataĩ rã guare re nanema'endu'avei vy ha'e rami ete xembopoxy rire, aŷ nde'áry ambou 'rã reikoague rekoria, ojeguarupy rejapoague áryve rejapo ve'ŷ aguã ha'e rami ete ha'eve'ŷ va'e — he'i SENHOR Nhanderuete.

⁴⁴ — Ha'e gui aŷ gui ma ijayvuxa va'e meme 'rã nderovai aipoe'i: “Oxy rami ae avi 'rã imemby voi oiko”, he'i 'rã.

⁴⁵ Mba'eta ndee ma ndexy ramigua ae ju, mba'eta ndexy ma ome ha'e omemby kuery gui ojeguaru raka'e. Ha'e ndekypy'y kuery rami ae avi reiko, mba'eta ha'e kuery ma ome ha'e omemby kuery gui ojeguaru va'ekue meme. Ndexy ma heteu, ha'e rã nderu ma amorreu raka'e.

⁴⁶ Ha'e gui nderyke ma Samaria tetã, kuaray apu'a'ia katy hekoia omemby kuery reve. Ha'e rã ndekypy'y ma Sodoma tetã, kuaray puku-a katy omemby kuery reve hekoia va'e.

⁴⁷ Ha'e gui ndee ma ha'e kuery rami avi reiko ha'e kuery ojeguarupy ojapoa ha'e javi rupi. Ha'e rami anho e'ŷ, ha'e kuery rami ete reikoa áryve ma ha'e kuery gui renhemongy'ave tema reikoa ha'e javi rupi.

⁴⁸ Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Sodoma tetã omemby kuery reve ma ndaeko vai raka'e ndee tyke nememby kuery reve penderekko vaia rami ete.

⁴⁹ Mba'eta po rami ma ndekypy'y Sodoma heko vai: Omemby kuery reve ojejou porã reia rupi tembi'u ndoatai ha'e ov'y'a rei va'eri peteïve henda py noipytyvõi iporiaukue'i ha'e ojexavai va'e kuery.

⁵⁰ Ha'e rami vy xerenonde rupi ojeguarupy anho ojapo okuapy ojejou porā reia rupi. Ha'e ramo ha'e nunga aexa vy aipe'apa vyvoi ikuaiague gui.

⁵¹ Ha'e gui Samaria tetā ma ndee rejjavva ramigua neī mbyte rupi peve ndojapoi. Mba'eta ndee ma ndekypy'y kuery áryve rejapove tema heravy ojeguarupy, ha'e rami vy ndejegui remboeko porāve ndekypy'y kuery, opa mba'e vai rejapoa py rive.

⁵² Ha'e gui ma ndere oī 'rā ndetavyague gui rexī aguā. Rejapo ndekypy'y kuery nombopagaave aguā rami, mba'eta ha'e kuery gui ojeguaruvepy py rejjavvy rā ndegui ha'e kuery heko porāve. Ha'e nunga rupi rexī voi, ndere toī rexīa, ndejegui ndekypy'y kuery nerembopaga ukaive rā.

⁵³ — Ha'e gui amoingo porā ju 'rā ndekypy'y kuery, Sodoma ha'e imemby kuery reve, Samaria imemby kuery reve guive. Ha'e kuery reve ndee voi romoingo porā ju 'rā,

⁵⁴ ha'e rami reikoague ha'e javi gui rexīa oī aguā ha'e kuery rembopy'a porā ju aguā rami.

⁵⁵ Ha'e gui ndekypy'y kuery Sodoma ha'e Samaria imemby kuery reve jypy ikuai porāague rami ae ju ikuai ramo ndee ha'e nememby kuery voi pendekuai porā ju 'rā jypy pendekuaiague rami ae.

⁵⁶ Ha'e gui rejjavvy porā rei vy ndeayvu rei va'ekue ndekypy'y Sodoma re,

⁵⁷ nderekvaia ndojekuaai teri jave. Ha'e gui aīy ma ndere voi ha'e kuery re rami avi Síria ha'e Filístia pygua kunhague ijayvu rei okuapy, ijyvýry rupi ikuai va'e ha'e javi voi.

⁵⁸ Mba'eta ndere oī 'rā repaga aguā opa marā reikoague ha'e ojeguarupy rejapoague re — he'i SENHOR.

⁵⁹ Mba'eta po rami SENHOR Nhanderuete ijayvu:

— Xee ma ndere ajapo 'rā ndee ae rejapoague rami, mba'eta ndee ma remboyke rive aura vy xereve guarā ajapo va'ekue.

⁶⁰ Ha'e rami teī xema'endu'a nho 'rā nekunhataī jave py xereve guarā ndevy ajapo va'ekue re. Ha'e rami vy ndevy ajapo ju 'rā xereve guarā raka'e rā peve oī va'erā.

⁶¹ Ha'e va'e ára py reikoague re nema'endu'a vy rexīmba 'rā ndekypy'y kuery removaē vy. Mba'eta nderyke ha'e ndekypy'y ikuai va'ekue ma ndevy ame'ē 'rā nememby kuery rami, va'eri xereve guarā ajapo va'ekue rami vy e'ŷ ta'vy.

⁶² Mba'eta ndevy pe ajapo 'rā xereve guarā, ha'e peikuua 'rā xee ae SENHOR aikoa,

⁶³ nema'endu'a ha'e rexīmba aguā, ha'e romo'yvy'i rire rejjavvy porā reia rupi ve'ŷ ndeayvu aguā, reikoague ha'e javi gui roperdoapa rire — he'i SENHOR Nhanderuete.

17

Mba'emo re ombojojaa rupi mokoī taguato ha'e uva'y omombe'uague

¹ Ha'e gui xevy SENHOR oayvu ombou vy aipoe'i:

² — Ava ra'y, emombe'u peteī ayvu mba'emo re rembojoja vy Israel kuery oikuua aguā.

³ Ha'e vy aipo're: Po rami SENHOR Nhanderuete ijayvu: Oiko peteī taguato tuvixa va'e. Ipepo ha'e hague ma ipuku, hague ma joo rami e'ŷ-e'ŷ pytā va'e. Ha'e va'e ma Líbano yvy re ou. Ha'e vy oipe'a heravy yary rovapy.

⁴ Yvyra rovapy omondo heravy vy ogueraa peteī yvy mba'emo vendea ikuiaia py. Mba'emo vendea kuery retā py ae oeja ov.

⁵ Ha'e gui henhoīgue pendeyvy guigua ju ogueraa vy onhotŷ peteī yvy porāa py. Ojopy vy onhotŷ yy reia py, yy rembe rupi yvyra ikuai va'e rami oiko porā aguā.

⁶ Ha'e va'e ma yvate vy uva'y hovana rei va'e oiko. Nda'yvatei rei va'eri hakā ma taguato-a katy ova oiny, iguy rupi hapo porā guive. Ha'e rami vy uva'y ete oiko, hakā porā ha'e hoky pyau guive.

⁷ — Ha'e gui oiko taguato tuvixa va'e mboae. Ha'e va'e ma ipopo puku va'e, hague reta guive. Ha'e ramo ha'e katy ju ova uva'y rapo, hakā guive. Hi'yvypy guive oo ha'ea katy, onhemoakŷ uka vy.

⁸ Yvy porāa py, ha'e yy anho oīa rupi onhotŷ hakā ha'e hi'a reta aguā, ha'e uva'y iporāve va'e oiko aguā.

⁹ Aipo're: Po rami SENHOR Nhanderuete ijayvu: Ha'e va'e uva'y oiko porā 'rā teve? Taguato jypygua ou vy nomondoroi 'rā teve hapo, ha'e ndojayai 'rā ri hi'a, hogue ha'e ipyau jevy va'ekue ipirupa aguā? Mba'eta imbaraete e'ŷ va'e, avakue mbovy'i ete tei oapo'opa 'rā.

¹⁰ Ha'e gui amboae henda py onhoty ramo ha'e py nda'u oiko porā 'rā ri? Any, mba'eta yvytu kuaray oua katy oipeju ramo ipirupa rive 'rā. Hi'yvypy guive 'rā ipirupa ov.

¹¹ Ha'e ramo xevy pe SENHOR oayvu ombou vy aipoe'i:

¹² — Aŷ ma aipo're xere opu'â rei va'e kuery pe: Ndapeikuuai teve mba'erā pa kova'e nunga oikoa? Ma'ë, Babilônia pygua huvixa Jerusalém tetā re ou vy oipe'a heravy raka'e huvixave ha'e yvatekueve ikuai va'ekue. Babilônia tetā katy ogueraapa.

¹³ Ha'e vy huvixave ra'y kuery regua peteī ojou vy hexeve ojapo peteī rami ikuai aguā, oura uka guive. Ha'e gui ijyvy gui ogueraapa ipo'aka va'ekue

¹⁴ openaa ha'e javi rupi yvyîve'i aguā nonhemboyvatevi aguā rami. Ha'e rami avi peteī rami ikuai aguā regua ojapo va'ekue rami ikuai va'e rire okuave'i nho 'rāgue.

¹⁵ Ha'e rami tei ha'e va'e huvixa ma Babilônia pygua huvixa rovai opu'â vy guembiguai kuery omondouka raka'e Egito katy, kavaju ha'e heta avakue ogueru aguā ha'e gui. Ha'e rami ete mba'emo vai apoare nda'u oo jepe 'rā ri? Peteī rami ikuai aguā ojapo pyre ombovaipa rire nda'u oo jepe 'rā teve?

¹⁶ Any, anhetē ete xee SENHOR Penderuete xee ae rekove rupi aura vy aipoa'e: Ha'e va'e omano 'rā Babilônia yvy py, huvixarā moñare yvy py ae, ha'e oña py ae 'rā omano, ourague ha'e peteī rami ikuai aguā ojapoague ombovaipa rire.

¹⁷ Ha'e rā Egito pygua huvixa Faraó ma ixondaro ha'e hexegua kuery heta tei noipytyvōi 'rā joe opu'âa py, mba'eta tetā rovai yvy omboaty 'rā kora áry rupi oaxa aguā jojuka retaa rupi.

¹⁸ Mba'eta ourague omboyke, ha'e peteī rami ikuai aguā jopoppy ratā reve ojapo va'ekue ombovaipa vy ha'e nunga ha'e javi ojapo raka'e. Ha'e nunga rupi ae ndoo jepei 'rā.

¹⁹ Ha'e nunga rupi anhetē ete xee SENHOR Penderuete xerekove rupi aura vy aipoa'e: Xerery rupi ourague omboykeague ha'e peteī rami ikuai aguā ojapo va'ekue ombovaipaague ma ajapo 'rā inhakā re ae ojeapa aguā rami.

²⁰ Ha'e rami vy hi'áry aipyo 'rā xekya, ha'e vy ambo'a 'rā xenhuā py. Babilônia yvy katy araa uka vy ha'e py aikuua pota 'rā xerovai opu'â reiague re.

²¹ Hexeve ojava va'ekue, ixondaro kuery ha'e javi reve ojukapaa 'rā kyxe py. Ha'e rā okuave'i va'e ma amoaimba 'rā yvytu ha'e javi oipejua katy. Ha'e ramo peikuua 'rā xee SENHOR ae xeayvuague.

²² — Po rami SENHOR Nhanderuete aipoe'i: Xee ma teigüe ju aipe'a 'rā peteī yary rovapy anhoty aguā. Hakā iporâvea gui ajaya 'rā ipyauvea oí va'ekue, ha'e gui peteī yvyty yvateve ha'e iporâve va'e áry ju 'rā anhoty.

²³ Israel regua yvyty re ae 'rā anhoty. Ha'e ramo hakā reta ha'e hi'a porā 'rā. Ha'e rami vy yary iporâve va'e 'rā oiko. Iguýry ma opa marâguia mymba kuery ikuai 'rā. Hakā rupi ma kuaray'âa py opa marâguia guyra ju 'rā onhemboaty okuapy.

²⁴ Ha'e rami rire yvyra ikuai va'e ha'e javi oikuua 'rā xee SENHOR ae yvyra yvatekueve reitya aiko, ha'e rā yvyigueve ma ambo'vrate va'e. Yvyra pyau amombiru va'e, ha'e rā ipirukue ma ambopyau ju va'e. Xee aipoa'eague xee SENHOR ae ajapo ju.

Peteī-tei queko re ae oikuua pota aguā re ijayvuague

¹ Ha'e gui SENHOR oayvu ombou vy aipoe'i xevy:

² — Mba'ixa tu peê kuery Israel yvy re mba'emo oiko va'e pexa vy aipopeje: "Tuu kuery uva aky ho'u rire ta'y kuery raí ju nda'evei", peje?

³ Anhetē ete xee SENHOR Penderuete xerekove rupi aura vy aipoa'e: Pova'e ayvu ma napemombe'uvei ma 'rā Israel yvy rupi.

⁴ Mba'eta temimoingo nhe'ẽ ha'e javi ma xevyguia meme. Tuu kuery nhe'ẽ ha'e ta'y kuery nhe'ẽ voi xevyguia ae. Ojejavy va'e ae omano 'rã.

⁵ — Ha'e gui xapy'a rei peteĩ ava heko porã va'e vy ojapo 'rã ha'evea ramigua joguerekoa py.

⁶ Ha'e rami vy ndo'ui 'rã xo'o yvyty áry rupi ta'angaa pe ome'ẽ mbyre, neĩ nomá'ẽi 'rã guive Israel kuery ta'angaa oguerekva'e re, ndoguerojejavyi 'rã oirũ ra'yxy, neĩ nonhembojai 'rã kunha gueko re oĩ va'e re.

⁷ Nombojexavai 'rã avave rei, mba'emo oiporu va'ekue ome'ẽ kuerei 'rã iporukaare pe, na'imondai 'rã, guembi'u omboja'o 'rã okaruxe va'e pe, ha'e omonhemonde 'rã guive ijao e'ŷ va'e kuery.

⁸ Ha'e va'e ma operáta oiporu uka rire nomboekovia retavei 'rã, hi'áryve ndojopyi 'rãe. Ojoko 'rã opo ha'eve'ŷa rami ojapo e'ŷ aguã, ha'e vy avakue re oikuua potaa py ha'evea rami meme 'rã joguerekko anhetẽ ete rupi.

⁹ Ha'e va'e xeayvu aeja va'ekue rupi vy ojapo 'rã aipota va'e, ha'evea rami meme 'rã oiko. Ha'e gui ma ha'e va'e heko porã va'e oikove 'rã — he'i SENHOR Nhanderuete.

¹⁰ — Ha'e gui xapy'a rei ha'e va'e oguerek 'rã gua'y imonda va'e, jojukaa, e'ŷ vy ha'e nunga va'e rei tema guyvy kuery pe ojapo va'e.

¹¹ Ha'e va'e ma peteїve ojapo 'rã va'ekue ndojapoi. Ha'e rami 'rãgue py ho'u 'rã xo'o yvyty áry rupi ta'angaa pe rive ome'ẽ mbyre, oguerojejavyi 'rã oirũ ra'yxy,

¹² ombojexavai 'rã iporiaukue'i ha'e oipotapa rei va'e, imondaa rupi 'rã oiko, nome'ẽvei ojerureague, ta'angaa re rive oma'ẽ, ojeguarupy anho ojapo,

¹³ peráta oiporu uka rire ojopy retavexe 'rã guive. Ha'e gui ma ha'e va'e nda'u oikove 'rã? Ndoikovei 'rãe. Ha'e ramigua ojeguarupy ha'e javi ojapo rire ojukaa 'rã, ha'e hexe ae 'rã oĩ huguy omoëague re opaga aguã.

¹⁴ — Ha'e gui aŷ ma, xapy'a rei oiko 'rã peteĩ ta'y nguu ojejavy rã oexapa teĩ ha'e kue ramigua ndojapoi va'e.

¹⁵ Ha'e rami vy ndo'ui 'rã xo'o yvyty áry rupi ta'angaa pe ome'ẽ mbyre, nomá'ẽi 'rã ta'angaa Israel kuery oguerekva'e re, oirũ ra'yxy ndoguerojejavyi 'rã guive.

¹⁶ Neĩ nanhomomboriau rei 'rã, nome'ẽ e'ŷi 'rã ojerureague, na'imondai 'rã, guembi'u omboja'o 'rã okaruxe va'e pe, omonhemonde 'rã ijao e'ŷ va'e,

¹⁷ opo ndoipe'a e'ŷi 'rã iporiaukue'i pe, peráta oiporu uka rire nomboekovia retavei 'rã, hi'áryve ndojopyi 'rã, ojapo 'rã guive xee aipota va'e xeayvuague rupi oiko vy. Ha'e va'e ma nomanoi 'rã nguu ojejavyague re. Oikove 'rãe.

¹⁸ Ha'e rã tuu ma ojukaa 'rã heko vaiague re, jokorea rupi oiko rire, oirũ kuery gui imondaa rupi, ha'e heta va'e kuery mbyte rupi ha'eve'ŷa ramigua ojapo guive rire.

¹⁹ — Ha'e rami teĩ peporandu 'rã: "Mba'e re tu ta'y ndopagai 'rã nguu ojejavyague re?" peje 'rã. Ha'e rami mba'eta ta'y ma teko porã ha'e ha'evea ramigua ojapo oikovy, ha'e xeayvuague omoï porã vy ojapo avi oikovy. Ha'e nunga rupi ae oikove 'rã.

²⁰ Mba'eta ojejavy va'e ae 'rã omano. Ta'y ma ndopagai 'rã nguu ojejavyague re, neĩ tuu ma voi ndopagai 'rã gua'y ojejavyague re. Heko porã va'e re oĩ 'rã teko porã rekivia, ha'e gui heko vai va'e re ma oĩ 'rã gueko vaiague re opaga aguã.

²¹ — Ha'e rami avi xapy'a rei ojejavy va'ekue ojeko rerova 'rã ojejavyague ha'e javi gui, ha'e xeayvuague omoï porãmba vy ojapo 'rã teko porã ha'e ha'evea ramigua. Ha'e rami vy oikove 'rã, nomanoi 'rãe.

²² Ha'eve'ŷa ramigua ojapoague re ma na'ima'endu'aavei 'rã. Teko porã rupi oiko rire oikove 'rã.

²³ Mba'eta xee nda'u arov'y'a ri heko vai va'e omano rã? Any, xee aipota ojejavyague gui ojeko rerova oikove aguã — he'i SENHOR Nhanderuete.

²⁴ — Ha'e rami teĩ xapy'a rei heko porã va'ekue ma gueko porãague gui ojepe'a vy ojejavy ju 'rã, heko vai va'e ojeguarupy ojapoa rami avi ojapo oikovy vy. Ha'e va'e nda'u oikove 'rã teve? Any, mba'eta teko porã rupi oikoague ha'e javi re na'ima'endu'aavei 'rã. Ha'e va'e omano 'rã gueko vai ha'e ojejavy reia py.

²⁵ — Ha'e rami teī aipopeje 'rā: “ SENHOR reko ma ha'eve'ŷa ramigua”, peje 'rā. Aŷ ma Israel kuery, pendu ma: Xereko nda'u ha'eve'ŷa ramigua teve? Peē kuery reko e'ŷ teve ikarē-karē va'e?

²⁶ Ha'e nunga rupi xapy'a rei heko porā va'ekue ma gueko porāague gui ojep'e a vy teko vai rupi anho ri oiko vy omano 'rā ha'e nunga py. Gueko vaia py ae 'rā omano.

²⁷ Ha'e rami teī xapy'a rei heko vai va'e ma gueko vaiague gui ojeko rerova vy teko porā ha'e ha'evea ramigua anho ri ojapo vy ojapo 'rā onhe'ē oikove aguā rami.

²⁸ Mba'eta ojee ae oikuuaa pota vy teko vai rupi oikoague gui ojeko rerova ri vy oikove 'rā, nomanovei 'rāe.

²⁹ Ha'e rami teī Israel kuery ma “ SENHOR reko ma ha'eve'ŷa ramigua”, he'i okuapy. Xereko nda'u ha'eve'ŷa ramigua teve? Israel kuery, peē kuery reko e'ŷ teve ikarē-karē va'e?

³⁰ — Ha'e nunga rupi Israel kuery, xee roikuuaa pota 'rā peteī-teī reko re — he'i SENHOR Nhanderuete. — Pejeko rerova ha'e pejep'e a ke pendeko vaia ha'e javi gui. Ha'e ramo 'rāe teko vai napendereityvei.

³¹ Ha'e rami vy peipe'a pendejegui penderekovaia ha'e javi, ha'e gui pendejee pemoī uka penekuraxō pyaurā ha'e penenhe'ē pyaurā. Mba'eta Israel kuery, mba'e re 'rā tu pemano?

³² Mba'eta xee ma ndarovy'ai peteīve pemano rā. Ha'e nunga rupi pejeko rerova peikove aguā — he'i SENHOR Nhanderuete.

19

Guary re Israel kuery ombojojaague

¹ — Ha'e gui ndeayvu ke Israel regua yvatekueve pe omboaxy va'e rami.

² Ha'e vy aipo're 'rā: Marā ramigua tu pendexy raka'e? Peteī guary kunha guary kuery mbyte oiko, ha'e gua'y kuery mbyte onheno oupy va'e. Ha'e va'e ma omongakuaa gua'y kuery.

³ Peteī gua'y oguerekovaia ha'e tuja ma vy imba'ejuka kuaa, avakue ho'upa peve.

⁴ Ha'e ramo ha'e nunga omombe'ua rā yvy regua ikuai va'e oendupa okuapy. Ha'e rami vy ombo'a yvykua ha'e kuery ojapo va'ekue py. Ha'e vy ty'aī re ogueraa Egito yvy katy.

⁵ Ha'e ramo ixy guary kunha va'e ma gua'y oarō va'ekue ogueraa rā nda'evei oikovy. Ha'e ramo vy gua'y mboae ju omongakuaa.

⁶ Ha'e ramo ha'e va'e ju tuja guary kuery mbyte rupi. Ha'e vy imba'ejuka kuaa, avakue ho'upa peve.

⁷ Avakue ojukaa rupi ojapo reta avi imeve'ŷ aguā, ha'e tetā ikuai va'e omombytapa tekova ve'ŷ. Ha'e ramo okororō rā yvy regua kuery oendu vy ndaekorāvei rei okuapy.

⁸ Ha'e rami vy yvy regua kuery ha'e katy ikuai va'e onhemboatypa okuapy hovai. Ha'e ramo vy hi'ary rupi kya omombo vy ombo'a yvykua ojapo va'ekue py.

⁹ Ty'aī py ojopy vy ombo'a nhuā py. Ha'e rami vy Babilônia pygua huvixaa py ogueraa. Ha'e py ma omboty peteī henda ikorapa va'e py, Israel regua yvyty rupi ijayvua noenduavei aguā.

Uva'y re ju ombojojaague

¹⁰ — Ha'e gui pendexy ma uva'y yakā yvýry onhotŷ mbyre rami oiko. Yy reia py onhotŷa rire hi'a porā, hakā reta guive.

¹¹ Hakā ma imbaraete raxa, huvixa po pyguarā. Ha'e vy hakā ha'e hoguepa reve yvateve ovu rā pavē rei oexa okuapy yvate etea.

¹² Ha'e rami teī opoxy reve omondoroa, ha'e yvy rupi oitya. Ha'e ramo hi'a ma yvytu kuaray oua katy gui oipeju va'e omombirupa. Hakā mbaraetekue ma omopēmbaa rā ipirupa. Ha'e gui tata py ju oapypaa.

¹³ Ha'e gui aŷ ma tekoa e'ŷa py rive ju onhotŷa yvy piru reia ha'e yy noŷa py.

¹⁴ Ha'e gui peteī hakā tuvixave'i va'e gui ma tata ou vy omomba hi'a. Ha'e ramo hexe noŷvei hakā imbaraete va'e huvixa po pyguarā — he'i.

— Po rami 'rā reronhemboaxy, ha'e peronhemboaxy pavē aguā.

20

Egitoyv yvy gui Israel kuery oo rire ojeguarupy rupi ae temai kuia re ijayvuague

¹ Ha'e gui sete ma'etŷa ha'e peteñ nhiruñ jaxy re, dez araa py ma Israel regua nhomongeta va'ety kuery jogueru xea py, SENHOR pe oporandu uka aguā. Ha'e rami vy oguapypa okuapy xerenonde.

² Ha'e ramo xevy pe SENHOR ombou oayvu. Ha'e vy aipoe'i:

³ — Ava ra'y, ndeayvu ke Israel regua nhomongeta va'ety kuery pe. Ha'e vy aipo're: Po rami SENHOR Nhanderuete ijayvu: Peñ kuery pa xevy peporandu ukaxe vy peju? Anhetē ete xee SENHOR Penderuete xee ae rekove rupi aura vy aipoa'e: Nda'evei peñ kuery peporandu uka aguā xevy.

⁴ Ha'e gui ndee ava ra'y, ndeayvu ta pa ha'e kuery reko vaia re? Eikuua uka ke ha'vy tamoñ kuery ojeguarupy ojapoague.

⁵ Ha'e vy aipo're: Po rami SENHOR Nhanderuete ijayvu: Israel kuery xejeupe guarā aiporavo vy xepo aipi reve aura va'ekue Jacó ramymino kuery pe ajekuaa uka reve. Egito yvy re ikuai jave xepo aipi reve ha'e kuery pe aura vy "Xee ma SENHOR Penderuete", ha'e va'ekue.

⁶ Ha'e va'e ára xepo aipi reve ha'e kuery pe aura Egito yvy gui aipe'apa aguā re, peteñ yvy ha'e kuery peguarā aiporavoague py araa aguā, kamby ha'e ei ndoataia ha'e yvy jave gui iporāvea py.

⁷ Ha'e rami vy aipoa'e ha'e kuery pe: "Peteñ-teñ peipe'a 'rā pendejegui mba'emo ojeguarupy pexaxe vai va'ekue. Penhemongy'ave eme Egito pygua ta'angaa pembojeroviaa py. Mba'eta xee ae ma SENHOR Penderuete aiko", ha'e va'ekue.

⁸ Ha'e rami teñ ha'e kuery naxenhe'ẽ renduxei vy opu'āmba okuapy xerovai. Ha'e rami vy mavae'rei ojegui ndoipe'ai ojeguarupy oexaxe vai va'e, ndojepe'ai guive Egito pygua ta'angaa ombojeroviaa gui.

— Ha'e ramo xee aipoa'e va'ekue ha'e kuery áry xepoxya anhoñ aguā re, ha'e kuery pe xepoxya aexa ukapa peve Egito yvy re ikuia py.

⁹ Ha'e rami teñ amboae rami ju ha'e kuery re ajapo xerery amboete ukaa rupi vy, xerery re yvy regua ijayvu rei e'ŷ aguā ha'e kuery yvy re xevygua kuery ikuia rupi, mba'eta yvy regua kuery oexaa py ae xevygua kuery pe ajekuaa uka rire Egito yvy gui aipe'apaa py.

¹⁰ Ha'e rami vy aipe'apa Egito yvy gui, ha'e tekao e'ŷa katy ju araa.

¹¹ Ha'e kuery pe ame'ẽ xeayvua, aikuua uka guive aipota va'e. Ha'e va'e ma avakue ojapopa ri vy okuave 'rā ha'e va'e rupi.

¹² Ha'e kuery rekorā ame'ẽ avi sâbado ára omboete aguā, xee aeko mbo'e aguā, ha'e gui ha'e kuery oikuua aguā xee SENHOR ae iky'a'oa aikoa.

¹³ Ha'e rami teñ Israel kuery ma tekao e'ŷa py araa ague py ju opu'āmba okuapy xerovai. Ha'e rami vy nda'ikuaxei xeayvuague ha'e aipotaa aikuua uka va'ekue rupi, ha'e va'e avakue ojapopa vy okuave 'rā va'eri. Ha'e rami vy opa mba'e py omongy'a okuapy sâbado ára pyguarā aeja va'ekue. Ha'e nunga rupi tekao e'ŷ pyve xeayvu ha'e kuery áry xepoxya anhoñ aguā re, amokanhymba ete aguā.

¹⁴ Ha'e rami teñ ha'e kuery re amboae rami ju ajapo xerery amboete ukaa rupi vy, xerery re yvy regua kuery ijayvu rei e'ŷ aguā, ha'e kuery yvy gui xevygua kuery aipe'apa rire.

¹⁵ Ha'e rami vy tekao e'ŷa py ju xepo aipi reve ha'e kuery pe aura va'ekue ijyvyrā va'ekue py araa ve'ŷ aguā re, kamby ha'e ei ndoataia ha'e yvy jave gui iporāvea py.

¹⁶ Mba'eta ha'e kuery ndojapoxei okuapy xeayvuague, aipotaa rami nda'ikuaxei guive, sâbado ára pyguarā amoñ va'ekue voi omongy'apa, mba'eta okuraxõ py ta'angaa kuery re rive oje'oixe.

¹⁷ Ha'e rami teñ ha'e kuery re ama'ẽ aperdoaa rupi, amokanhymba 'rāgue py, namomba etei tekao e'ŷa rupi ikuia py.

18 — Ha'e rami teĩ ha'e kuery ra'y kuery pe ma xeayvu tekao e'ŷa py. Ha'e vy aipoa'e va'ekue: “Peiko eme penderu kuery ikuaiague rupi, pejapo eme ha'e kuery oipotaa rami, penhemongy'a eme guive ha'e kuery ta'angaa oguereko va'e rupi rive.

19 Mba'eta xee ae ma SENHOR Penderuete aiko. Pendekuai ke xeayvuague rupi, ha'e pemoĩ porã xee aipota va'e pejapopa aguã.

20 Pemboete sâbado ára pygurarã aeja va'ekue, mba'eta oĩ 'rã xee roeko mbo'e aguã, xee ae SENHOR Penderuete aikoa peikuua aguã”, ha'e va'ekue.

21 Ha'e rami teĩ ta'y kuery voi opu'amba okuapy xerovai. Ha'e rami vy xeayvuague rupi nda'ikuai, nomoĩ porãi guive aipota va'e, ha'e va'e avakue ojapopa vy okuave 'rã va'eri. Ha'e rami 'rãgue py omongy'apa rei okuapy sâbado ára pygurarã aeja va'ekue.

— Ha'e rami rire xee xeayvu ha'e kuery áry xepoxya anhoẽ aguã re, tekao e'ŷa py ikuiaia py ha'e kuery pe xepoxya aexa ukapa peve.

22 Ha'e rami teĩ xerery amboete ukaa rupi vy xepo ajoko va'ekue, xerery re yvy regua kuery ijayvu rei e'ŷ aguã ha'e kuery oexaa py xevyguia kuery aipe'apa rire.

23 Ha'e rami vy tekao e'ŷa py xepo aupti reve ha'e kuery pe aura yvy regua kuery ikuiaia rupi amoaimba aguã re, ijyvy ha'e javi rupi.

24 Mba'eta xevyguia kuery ndojapoi karamboae xeayvuague, nda'ikuaixei aipotaa rami, omongy'apa sâbado ára pygurarã aeja va'ekue, ha'e ta'angaa nguu kuery oguereko va'ekue oexa vy oendu avi ombojeroviaxeia.

25 Ha'e nunga rupi ha'e kuery pe aeja uka amboae regua ayvu iporã e'ŷ va'e rupi ikuai aguã, ha'e heko mboaerã ha'e va'e rupi ikuai aguã va'ekue'ŷ.

26 Ha'e rami vy aeja ta'angaa pe mba'emo ome'ea py onhemongy'apa rei aguã, gua'y kuery oiko ypy'i va'ekue tata py oapya py. Ha'e rami ikuai aguã aeja namboekorãvei aguã, xee ae SENHOR aikoa oikuua pavã aguã.

27 — Ha'e nunga rupi ndee ava ra'y, ndeayvu ke Israel kuery pe. Ha'e vy aipo're: Po rami SENHOR Nhanderuete ijayvu: Peneramoĩ kuery ma pova'e py ju opu'ã rei okuapy xerovai.

28 Mba'eta yvy ha'e kuery pe ame'ẽ aguã re xepo aupti reve auraague py araa ma rire teĩ, ha'e kuery peteĩ yvy'ã yvate va'e, e'ŷ vy peteĩ yvyra hogue ana va'e oexa nhavõ ha'e py rive mba'emo ome'ẽ okuapy ta'angaa pe, heakuã porã va'e omoĩ ha'e mba'emo rykue onhoẽ okuapy xembopoxy aguã rami rive.

29 Ha'e ramo xee aipoa'e ha'e kuery pe: “Mba'e yvyty tu kova'e, ha'e katy peẽ kuery peo pekuapy aguã?” ha'e va'ekue. Mba'eta hery ma Yvyty Ombojeroviaaty oĩa, kova'e ára peve.

30 Ha'e nunga rupi aŷ aipo're Israel kuery pe: Po rami SENHOR Nhanderuete ijayvu: Peẽ kuery voi penhemongy'apa pekuapy, peneramoĩ kuery rami ae ju. Mba'eta peẽ kuery ju pendetavy tema ojeguarupy ha'e kuery oguereko va'ekue rupi peo vy.

31 Mba'eta aŷ peve penhemongy'apa 'rã ta'angaa pe mba'emo peme'ea py, pendera'y kuery ae peapy vy guive. Ha'e rami teĩ Israel kuery, peju ri ty'y xevy peporandu uka vy? Anhetẽ ete xee SENHOR Penderuete xerekove rupi aura vy aipoa'e: Peẽ kuery ma nda'evei ae xevy peporandu uka aguã.

32 Peẽ kuery aipopeje: “Ore ma yvy regua kuery reko rami 'rã orekuai yvyra ha'e ita guigua rive rombojeroviaa rupi, amboae yvy re ikuai va'e reko rami”, peje. Ha'e rami teĩ peneakã gui rive ha'e rami pendekuaxea ndoikoi 'rãe.

33 Mba'eta anhetẽ ete xee SENHOR Penderuete xerekove rupi aura vy aipoa'e: Peẽ kuery re xepo'aka 'rã xepo aupti vy xepo'akaa aexa uka reve, xepoxya anhoẽa rupi.

34 Ha'e rami vy roipe'apa ju 'rã yvy regua kuery ikuiaia mbyte romoañague gui, romboatypa ju 'rã yvy pendekuaiague gui. Xepo aupti vy xepo'akaa aexa uka reve 'rã ajapo, xepoxya anhoẽa rupi guive.

35 Ha'e rami vy yvy regua ikuiaia katy ju rogueraa 'rã tekao e'ŷa katy rami. Ha'e gui ha'e py ma aikuua pota 'rã peẽ kuery re, jova re nhama'ẽ reve.

³⁶ Mba'eta Egito regua tekoa e'ŷa rupi peneramoĩ kuery re aikuaa potaague rami ae ju peẽ kuery re voi aikuaa pota 'rã — he'i SENHOR Nhanderuete.

³⁷ — Ajapo 'rã xepopoka guýry rupi peaxa aguã rami. Ha'e rami vy romo'arandu 'rã xereve guarã ajapo va'ekue rami vy.

³⁸ Penembyte gui aipe'apa 'rã xere opu'ã ha'e naxenhe'ẽ rendui va'ekue. Ha'e kuery ikuaiague yvy gui aipe'a teĩ ndooi 'rã Israel yvy re. Ha'e ramo peikuaa 'rã xee ae SENHOR aikoa.

³⁹ — Ha'e rã peẽ Israel kuery pe xee SENHOR Penderuete aipoa'e: Naxenhe'ẽ renduxei vy tapeo, peteĩ-teĩ pendekuai ta'angaa pe rive aŷ ha'e raka'eve'i peve. Ha'e rami teĩ pemongy'a reive eme xerery iky'a e'ŷ va'e, ta'angaa pe mba'emo peme'ẽa py.

⁴⁰ Mba'eta xevyguia yvyty iky'a e'ŷ va'e, Israel regua yvyty yvatevea áry ma Israel kuery ha'e javi 'rã xembojerovia okuapy — he'i SENHOR Nhanderuete. — Ha'e va'e yvy re ae 'rã ha'e javive xembojerovia. Ha'e py ma xee arov'y'a ju 'rã. Ha'e py ae aipota 'rã mba'emo xevy peme'ẽ, mba'emo perekva'e jypyguia iporãgueve, mba'emo iky'a e'ŷ va'e guive.

⁴¹ Yvy regua kuery mbyte gui roipe'a vy peaïmbaague gui romboatypa ju rire xee rojou porã 'rã heakuã porã va'e rami. Ha'e ramo yvy regua kuery oexaa py aikuaa uka 'rã iky'a e'ŷ va'e aikoa, peẽ kuery pendekuaia rupi.*

⁴² Ha'e gui Israel yvy re roquerupa ma ramo peikuaapa 'rã xee ae SENHOR aikoa, ha'e va'e yvy xepo audi reve peneramoĩ kuery pe ame'ẽ aguã re auraague py ae.

⁴³ Ha'e py ma penema'endu'a 'rã mba'emo vai rupi pendekuaia py penhemongy'apaague re. Ha'e rami vy pejeguaru 'rã pekuapy pendejegui ae, penderekvaia rupi pendekuaigue re.

⁴⁴ Ha'e gui xerery amboete ukaa rupi vy romboaxy ju ramo peikuaa 'rã xee ae SENHOR aikoa. Mba'eta Israel kuery, pendeko vaiague re norombopagavei 'rã, opa marã pendekuaigue re'ŷ guive — he'i SENHOR Nhanderuete.

Kuaray puku-a katyguia kuery rovai ijayvuague

⁴⁵ Ha'e gui SENHOR oayvu ombou ju vy aipo'e'i xevy:

⁴⁶ — Ava ra'y, ema'ẽ kuaray puku-a katy, ha'e vy ndeayvu ha'e kuery rovai. Emombe'u xeayvu ka'aguy kuaray puku-a katyguia rovai.*

⁴⁷ Ha'e vy aipo're ha'e py ikuai va'e pe: Pendu ke SENHOR ayvu. Po rami SENHOR Nhanderuete ijayvu: Aŷ ma amoendy 'rã tata penda py yvyra pyau ha'e ipirukue ha'e javi mokanhyarã. Ndoguevei 'rã tata rendy. Ha'e rami 'rãgue py penderova okaipa 'rã kuaray puku-a katy guive ijapu'a'ia katy peve.

⁴⁸ Pavẽ avakue oikuaa 'rã xee SENHOR ae imoendyare aikoa. Ndoguevei 'rãe — he'i.

⁴⁹ Ha'e ramo xee aipo'e':

— Ai SENHOR Xeruete! Ha'e kuery ijayvu 'rã xere: “Ha'e va'e e'ŷ ri ty'y ayvu rive mombe'uat y oiko?” he'i 'rã okuapy xevy — ha'e.

21

SENHOR guigua kyxe re ijayvuague

¹ Ha'e gui xevy SENHOR oayvu ombou vy aipo'e'i:

² — Ava ra'y, ema'ẽ Jerusalém katy. Ha'e vy ndeayvu ha'e kuery ombojeroviaaty ikuai va'e rovai. Emombe'u xeayvu Israel yvy ha'e javi rovai.

³ Ha'e vy aipo're: Po rami SENHOR Nhanderuete ijayvu: Ma'ẽ, peẽ kuery rovai aiko. Ha'e rami vy xekyxe aekyi 'rã hyru gui penembyte gui amomba aguã heko porã ha'e heko vai va'e guive.

⁴ Mba'eta penembyte gui amomba 'rã heko porã ha'e heko vai va'e. Xekyxe aekyi 'rã hyru gui temimoingo ha'e javi rovai rupi, kuaray puku-a katy guive ijapu'a'ia katy peve.

⁵ Ha'e ramo oikuaa pavẽ aguã xee SENHOR ae hyru gui xekyxe aekyi va'ea, hyru py noĩ jevyvei 'rã guive.

* 20:41 2 Coríntios 6.17 * 20:46 Apy ma profeta ijayvu Jerusalém tetã ha'e Judéia yvy regua kuery re.

⁶ — Ha'e nunga rupi ndee ava ra'y, nepoaẽ nhendu ke. Ha'e kuery oendua py nepoaẽ nhendu 'rã ndepy'a py nda'evei ete reve.

⁷ Ha'e gui ha'e kuery oporandu 'rã ndevy: "Mba'e re tu ha'e rami ete nepoaẽ ri?" he'i 'rã ndevy. Ha'e ramo aipo're 'rã: "Mba'emo aendu ramo'i va'ekue re rima xepoaẽ. Mba'eta ha'e nunga oiko rã pavẽ opy'a py onhemondyipa 'rã, pavẽ po ikangypa, pavẽ rei onhe'ẽ py ndaekorävei 'rã okuapy, pavẽ renapy'ã yy rami rive 'rã opyta na'imbaraetevei vy. Ha'e nunga ou ma oiny, ojeupity 'rãe, he'i SENHOR Nhanderuete", 're 'rã.

⁸ Ha'e gui tēgue ju SENHOR oayvu xevy ombou. Ha'e vy aipoe'i:

⁹ — Ava ra'y, emombe'u ju xeayvu. Ha'e vy aipo're: Po rami SENHOR ijayvu: Kyxe oāimbe'epa ha'e omboverapa pyre oī.

¹⁰ Jojuka aguã oāimbe'ea, ha'e overa va'e rami ete omboveraa.

— Ha'e rami tē Israel kuery aipoe'i 'rã: "Javy'a nho 'rã jakuapy! Xera'y po pygua ma yvyra amboae kuery oguerekva'e gui ipo'akapave", he'i 'rã okuapy.*

¹¹ Ha'e rami tē Nhanderuete ombovai:

— Ha'e va'e kyxe ma omboveraa rei mba'eta oiporua 'rãe. Oāimbe'epa ha'e omboverapaa ma jojukaarã po py amboaxa aguã.

¹² Ha'e nunga rupi ndee ava ra'y, neraxẽ ha'e nepoaẽ rei ke, mba'eta xevyguia kuery rovai 'rã oiporua, Israel regua yvatekueve ha'e javi rovai guive. Ha'e va'e kuery ma amboaxapa 'rã kyxe rewegua pe, xevyguia kuery ha'e javi reve. Ha'e nunga rupi eipete-pete nde'u rupi.

¹³ Mba'eta ou 'rã pendereko a'ãarã. Ha'e gui penderuvixa ipo pygua va'e nhomoingo axy va'ekue nōivei ramo mba'exa 'rã tu peiko? — he'i SENHOR Nhanderuete.

¹⁴ — Ha'e gui ndee ava ra'y, emombe'u ke xeayvu, ejepopete-pete guive. Tove kyxe mokoõgue tajopyxo, mboapykue peve tajojuka, jova-jovaive gui tou jojukaa rupi.

¹⁵ Ha'e kuery okuraxõ py onhemondyi rei aguã, ha'e okẽ oẽaty ha'e javi rupi heta ho'a aguã. Ajapo 'rã kyxe overa va'e rami hexakã aguã. Mba'eta jojuka aguã ae omboveraa ha'e oāimbe'epaa.

¹⁶ Ha'e gui ndee kyxe, tereo reiporu kuaa katy nembaraetea ha'e javi reve, ha'e gui reiporu kuaa e'ŷa katy ju tereo, reoa katy rei.

¹⁷ Ha'e ramo xee voi ajepopete avi 'rã xepoxyague gui apytu'u vy. Xee SENHOR ae xeayvu va'e — he'i.

¹⁸ Ha'e gui xevy SENHOR ombou ju oayvu. Ha'e vy aipoe'i:

¹⁹ — Ndee ava ra'y, ejapo ke mokoõ tape ra'angaa, ha'e va'e regua petē rupi Babilônia pygua huvixa okyxe reve ou aguã. Mokoõve ma petē'i yvy gui ou va'e. Ha'e gui tetã oẽaty katy'i emoõ avi mokoõ yvyrapé'i tape rexa ukaa.

²⁰ Embopara imoiny petē tape Amom kuery rekoa Rabá katy kyxe reve oo aguã, ha'e rã amboae ma Judá ha'e Jerusalém tetã ikorapa va'e katy oo aguã.

²¹ Mba'eta Babilônia pygua huvixa opyta 'rã ho'amy tape rakãmby py, mokoõ tape joa katy e'ŷ oĩa py, nguu ete kuery pe ranhe imba'ekuaa aguã. Ha'e rami vy hu'y ombovava-vavaa ma ramo petē oekyi 'rã, ta'angaa ngoo gui ogueru va'ekue pe oporandu 'rã, ha'e mba'emo py'akue rupi avi 'rã imba'ekuaa.

²² Ha'e gui imba'ekuaa rupi oikuua 'rã oiporu kuaa regua re Jerusalém tetã katy ae oo aguã. Ha'e rami vy oiko katu 'rã tetã rokẽ omopẽ aguã, jojuka aguã re ijayvu atã, joe opu'aa aguã re ojapukai, okẽ mopẽa py tetã rokẽ re ombota, tetã kora re yvy omboaty vy omovã, ha'e torre ojapo aguã.

²³ Ha'e gui judeu kuery hexeve petē rami ikuai aguã re oura va'ekue ma ha'e nunga oendu vy "Apu" he'i 'rã okuapy. Ha'e rami tē ha'e kuery reko vaiague re Nhanderuete oikuua pota 'rã ombo'a ukapa aguã.

²⁴ Ha'e nunga rupi SENHOR Nhanderuete aipoe'i:

* 21:10 Israel kuery "Xera'y" he'ia ma nguvixave re ijayvu vy, hexe anho rei ojeroviaa rupi.

— Anhetē ae peẽ kuery xemoma'endu'a pendereko vaia re aikuua pota aguã, mba'eta pendereko vaia ojekuua porã, mba'emo pejapoa ha'e javi py pexa uka pejejavya. Ha'e rami ete xemoma'endu'a rire rombo'apa 'rã ha'e nungakue re.

²⁵ Ha'e gui ndee Israel kuery ruvixa opa marã rei ndereko vai ete va'e, ovaẽ ma oiny nde'ára opaa py rombopaga aguã.

²⁶ Po rami SENHOR Nhanderuete ijayvu ndevy: Emboi ke neakã regua ha'e coroa, mba'eta ha'ekue rami ve'ý 'rã oiko. Mba'eta yvyigueve'i omboyvatea 'rã, ha'e rã yvatekueve ma omo'yvyi'ia 'rã.

²⁷ Ivaipa, ivaipa 'rã! Aý ma xee ambovaipa 'rã neretã, ha'e ramo noívei 'rã, opena kuaa va'erã ou e'ýa ja. Ha'e va'e pe ma amboaxa ju 'rã.

²⁸ — Ha'e gui ndee ava ra'y, emombe'u ke xeayvu. Po rami SENHOR Penderuete ijayvu Amom pygua kuery ijayvu reia re. Ha'e gui aipo're 'rã: Kyxe, kyxe hyru gui oekyia ma, omboveraa jojuka aguã, nhomomba ha'e overa va'e rami hexakã aguã.

²⁹ Ha'e va'e ma ojaya 'rã opa marã heko vai va'e kuery aju'y, mba'eta ovaẽ ma hi'ára opaa py ambopaga aguã, mba'eta peẽ kuery rekorã oexa'ãa rupi rive omombe'u rire, ha'e kuery ae oexa ra'uague rupi.

³⁰ — Ha'e gui emoí ju ndekyxe hyru py. Mba'eta yvy reikoague py ae ju 'rã rombopaga.†

³¹ Ha'e rami vy nde'áry ambou 'rã xepoxya, nderovai rupi aipeju 'rã tata rami xepoxya regua, ha'e gui romboaxa 'rã avakue nhomboaxya rupi e'ý nhomoingo axy raxa va'e kuery po py.

³² Ha'e ramo reiko 'rã mba'emo pirekue oapy pyrã rami. Nderuguy omoëa 'rã ndeyvy re ae. Ndere na'ima'endu'aavei 'rã, xee SENHOR ae xeayvu rire.

22

Jerusalém pygua kuery ojeguarupy ojapo okuapya re ijayvuague

¹ Ha'e gui xevy SENHOR oayvu ombou ju vy aipoe'i:

² — Ha'e gui ndee ava ra'y, ndeayvu ta pa tetã pygua kuery jouguy omoëague re? Ndeayvu ke ha'vy ojeguarupy ojapo okuapya ha'e javi re.*

³ Ha'e gui aipo're: Po rami SENHOR Nhanderuete ijayvu: Nda'evei ete 'rã tetã jouguy moëa ikuiai va'e pe. Mba'eta ta'angaa pejapo va'ekue rupi penhemongy'a vy penderovairã ae pejapo pekuapy pepagaa ára pyguarã ovaẽ peve.

⁴ Mba'eta jouguy pemoëa py pendepo ae pemongy'apa. Mba'eta ta'angaa peẽ ae pejapo va'ekue rupi penhemongy'a vy pejapo pepaga aguã ára ovaẽ aguã rami. Penema'etýa opa ta ma. Ha'e nunga rupi ae xee ajapo amboae regua kuery yvy jave rupi ikuai va'e pendejojai rei ha'e penembojaru rei aguã rami.

⁵ Pendea katy'i ha'e mombyry rupi ikuai va'e voi ijayvu vaikue rei 'rã okuapy pendere, mba'eta oikuua pavẽ opa marã rei pendekuaia.

⁶ — Ha'e gui Israel regua yvatekueve voi, peteí-teí opo'akaa rupi mba'eve ndojapoi 'rã jouguy omoë e'ý vy.

⁷ Ha'e rami vy penembyte rupi ha'e kuery nomboetei 'rã nguu ha'e oxy, okorepa rei 'rã amboae regua, ha'e ha'eve'ýa rami 'rã oguerekoyre'ý ha'e imeve'ý va'e kuery.

⁸ Nomboetei mba'emo xevygua iky'a e'ý va'e, omongy'apa guive sâbado ára pyguarã aeja va'ekue.

⁹ Penembyte rupi ikuai avi avakue jouguy omoë ukaxe vy joe ijayvu rei va'erã. Penembyte rupi ae ho'u 'rã okuapy xo'o ta'angaa pe ome'ë mbyre yvyty áry rupi, opa marã rei ikuai vy.

¹⁰ Pendekuaia mbyte rupi ojejavy 'rã nguu pe, onhemboja 'rã guive kunhague gueko re oiko va'e re.

¹¹ Amongue ma ojejavy 'rã oirü ra'yxy reve, amboae ma omongy'apa rei 'rã gua'y ra'yxy ae, ha'e rã amboae ma onheno 'rã gueindy nguu rajy reve ae.

† 21:30 Apy ma Babilônia pygua huvixa pe ju Nhanderuete ijayvu ombopaga aguã re. * 22:2 “Tetã” he'ia ma Jerusalém ae (Mateus 23.37; Lucas 13.34).

¹² Pendekuaia rupi mba'emo ome'ëa rãojopy 'rã jouguy omoë aguã. Peráta oiporu uka rire oipe'a retave 'rã okorea rupi. Oirũ kuery ombotavypaa py oipe'apa 'rã oguerekova'ekue. Ha'e ramia py na'ima'endu'avei okuapy xere — he'i SENHOR Nhanderuete.

¹³ — Aÿ ma pejokore ha'e jouguy pemoëa py pendepo ky'apa ramo ajepopete 'rã xepoxya aexa uka vy. Ha'e ramo penembaraete 'rã ri ty'y pendepy'a py?

¹⁴ Pendepo imbaraete avi 'rã ri ty'y rombopaga vy ajua ára pyguarã? Mba'eta xee SENHOR xeayvu rire ajapo 'rãe.

¹⁵ Ha'e rami vy romoaïmba 'rã yvy regua kuery ikuiaia rupi, ha'e rogueraa ukapa 'rã yvy mboae rupi. Ha'e rami vy 'rãe pendegui aipe'a ha'eve'ÿa oï va'e.

¹⁶ Ha'e gui yvy regua kuery oexaa py penhemongy'apa ma rire peikuua 'rã xee ae SENHOR aikoa.

¹⁷ Ha'e gui SENHOR oayvu ombou vy aipoe'i xevy:

¹⁸ — Ava ra'y, xevy pe rã Israel kuery ikuai tata rupa py prata oiky'a'oa rã mba'emo ky'akue optya va'e rami: overa va'e, estanho, ferro ha'e chumbo ky'akue rami rive.

¹⁹ Ha'e nunga rupi po rami SENHOR Nhanderuete ijayvu: Mba'emo ky'akue peë kuery pendekuai ramo aÿ xee romboatypa 'rã Jerusalém mbyte py.

²⁰ Mba'eta prata, overa va'e, ferro, chumbo ha'e estanho ma omoïmbaa 'rã tata rupa py, oipejua rã tata raku py hykupa aguã. Ha'e rami ae avi xepoxya rupi rojou vai reve romono'õmba vy ha'e py roeja 'rã romboykupa aguã.

²¹ Romono'õague py peë kuery áry rupi aipeju 'rã xepoxya reve. Ha'e ramo penderykupa 'rã Jerusalém mbyte py.

²² Tata rupa py prata hykupaa rami avi peë kuery penderykupa 'rã ha'e py. Ha'e ramo peikuua 'rã xee SENHOR ae peë kuery áry xepoxya anhoëague — he'i.

²³ Ha'e gui SENHOR oayvu xevy ombou ju. Ha'e vy aipoe'i:

²⁴ — Ava ra'y, aipo're ha'e kuery yvy pe: Ndee yvy, nderejeky'a'o ukai rire xepoxya aexa ukaa ára nda'okyi 'rã nde'áry.

²⁵ Yvy mbyte rupi profeta kuery jogueroayvu 'rã nhonhe'ë mombaxe vy, guary okororõ reve guaí axí re guembia omoatãa rami. Mba'eta oipe'apa 'rã joperáta ha'e nhomba'e rei-rei. Ha'e rami vy yvy mbyte rupi omboetave tema imeve'ÿ va'e kuery.

²⁶ Ha'e kuery regua sacerdote kuery voi xeguigua lei rupi nda'ikuai, omongy'apa 'rã guive mba'emo xevygua iky'a e'ÿ va'e. Ha'e kuery oikuua rã iky'a e'ÿ va'erã omboaxa pyre ha'e omboaxa pyre'ÿ ma joo ramigua. Ndoikuuai merami ha'eve va'e ha'eve'ÿ va'e joo ramigua e'ÿa. Ha'e rami vy sábado ára aeja va'ekue py oiko va'e gui omboty 'rã guexa. Ha'e rami vy omboetepy e'ÿ rami aiko ha'e kuery mbyte.

²⁷ Ha'e kuery regua yvatekueve ma aguara'i guaí axí py guembia omoatãa rami avi omoë 'rã jouguy, nhonhe'ë omombaa rupi ojopy aguã jokoreague rive.

²⁸ Ha'e gui ha'e kuery regua profeta kuery ma cal py ha'e nunga ha'e javi omoxiïmba rive 'rã apu oexa ra'uague omombe'ua py. Mba'eta ijapua rupi rive ayvu omombe'u vy aipoe'i 'rã: “SENHOR Nhanderuete ma po rami ijayvu”, he'i 'rã SENHOR ijayvuague rupi e'ÿ va'eri.

²⁹ Ha'e rami vy yvy re ikuai va'e jokorea rupi ikuai, imondaa rupi oguerekox 'rã ojexavai va'e ha'e iporiaukue'i, mba'e re'ÿ omoingo axy 'rã guive amboae guigua kuery.

³⁰ Ha'e kuery mbyte xee aeka teñ peteñ ri jepe ava xerenonde py tetã kora omoatyrõ nho aguã, ha'e rami e'ÿ vy ipa'ü py oï aguã mba'emo jokoarã, kova'e yvy xee amokanhymba e'ÿ aguã. Ha'e rami teñ ndajoui peteñ.

³¹ Ha'e nunga rupi ae ha'e kuery áry anhoë xepoxya tata rami, amokanhymba aguã ajou vaia rupi. Ha'e rami vy ha'e kuery áry ambou ikuaiague re opaga aguã — he'i SENHOR Nhanderuete.

- ² — Ava ra'y, ikuai karamboae mokoī kunhague, peteī'i re ixy va'e.
- ³ Ha'e va'e kuery ma Egito yvy re ikuiaia rupi itavy rei okuapy. Kunhataī teri reve itavy rei. Ha'e rami rā okāmbiripaa, kunhataī teri reve okā rupi onhekuavā ukapa.
- ⁴ Tyke ma Oolá hery va'e, ha'e rā ikypy'y ma Oolibá. Ha'e va'e kuery ma xemba'e ae, ha'e ikuai avi ipi'a ha'e imemby kuery. Ha'e gui hery reikuua porāve aguā Oolá ma Samaria, ha'e rā Oolibá ma Jerusalém.
- ⁵ — Ha'e gui Oolá ma xemba'e teri reve teī itavy rei. Ha'e rami vy oendu avakue mboae reve itavyxea, ha'e katy'i Assíria pygua kuery ikuai va'e reve.
- ⁶ Ha'e va'e kuery ma hovy porā rei va'e py anho onhemonde va'e, huvixa joe opena va'e kuery, avakue pyau omoaruāmby, kavaju árygua meme.
- ⁷ Ha'e va'e avakue reve ae kunha va'e itavy, Assíria pygua ra'y kuery iporāve va'e ramo. Ha'e kuery ha'e javi reve itavyxea oendu, ha'e ta'angaa oguereko va'e rupi onhemongy'a avi.
- ⁸ Ha'e rami vy ndoejai ae ojeguarupy Egito gui ogueru va'ekue, mba'eta kunhataī teri reve hexeve onhenoa vy okāmbiripaa rire, hexeve itavy reia py.
- ⁹ Ha'e nunga rupi Assíria pygua ra'y kuery po py amboaxa hexeve itavy rei va'e, ha'e kuery reve itavyxea anho rei oendu ramo.
- ¹⁰ Ha'e ramo ha'e kuery ombopire reipa okuapy ha'e oipe'apa heravy ipi'a kuery ha'e imemby kuery. Ha'e rā kunha va'e ma ha'e kuery ojuka okuapy kyxe py. Ha'e ramo ixupe "Kunhague pavē gui ayvu vaivepy", 'ea, ombopagaa rā.
- ¹¹ — Ha'e gui ikypy'y Oolibá ma ha'e nunga oexapa teī guyke gui oenduve itavy reixe. Ha'e rami vy guyke gui voi itavyve.
- ¹² Ha'e rami vy itavyxe ha'e katy'i rupi Assíria pygua ra'y kuery ikuai va'e reve, mba'eta huvixa joe opena va'e, ao hepyve va'e py onhemonde va'e, kavaju árygua, ha'e avakue omoaruāmby meme ramo.
- ¹³ Ha'e gui xee aexa rā onhemongy'apa ma, guyke reve joo rami ae tema heko vai vy.
- ¹⁴ Ha'e gui ojejavye tema, mba'eta oo mbotya re oexa avakue caldeu kuery oo ra'angaa pytā va'e py ombopara pyre.
- ¹⁵ Ha'e kuery ma iku'akuua porā ha'e inhakā regua va'e. Ha'e javi oexa rā Babilônia pygua ra'y kuery yvatekueve rami, Caldéia yvy re itui'i va'ekue meme.
- ¹⁶ Ha'e kuery ra'angaa oexa vy itavy reixe anho oendu. Ha'e rami vy Caldéia yvy katy omondouka oayvu reraa.
- ¹⁷ Ha'e ramo Babilônia pygua ra'y kuery oupa kunha va'e reve guarā. Avakue reve hupa onhenoaty py onhemboja vy omongy'apa okuapy itavy reia py. Ha'e ramo kunha va'e ma ha'e kuery reve onhemongy'apa ma vy ojeguarupa. Ha'e vy oejapa.
- ¹⁸ Ha'e va'e ojekuua uka ha'e ipire reia rupi oiko rire ma xenhe'ẽ py aendu ndaxeae'vevia, tyke re ndaxeae'veviaque rami.
- ¹⁹ Ha'e rā ikypy'y ma heko vaive tema, mba'eta ima'endu'a Egito yvy re kunhataī teri reve itavy rei oikovyague re.
- ²⁰ Ha'e py oendu avakue reve itavyxea, mburika rami hakuaī ha'e kavaju rami ityy va'e rami ikuai rā.
- ²¹ Ha'e ramia py ima'endu'a kunhataī teri reve ha'eve'ŷ va'e rupi anho oikoague re, Egito pygua kuery okāmbiripa jave guare re.
- ²² Ha'e nunga rupi po rami SENHOR Nhanderuete ijayvu Oolibá pe:
- Aŷ ma xee ajapo 'rā avakue ndereve guare nderovai opu'āmba aguā rami. Ha'e kuery re rejeguaru reve rejapa va'ekue ri nderovai arupa ju 'rā jova-jovai rupi gui.
- ²³ Ha'e kuery ma Babilônia pygua ra'y kuery, ha'e caldeu kuery Pecode, Soa ha'e Coa guigua, ha'e gui ha'e kuery reve ou avi 'rā Assíria pygua ra'y kuery ha'e javi, avakue pyau omoaruāmby, huvixa joe opena va'e kuery, yvatekueve ha'e omboetevepy, kavaju áry ou va'e meme 'rā.
- ²⁴ Nderovai kuaray apu'a'ia katy gui jogueru 'rā karóxa, mba'eyru ha'e heta va'e reve. Nderovai 'rā ikuai jova-jovaive rupi hu'y jokoa ha'e imo'āa tuvixa va'e, ha'e gui ngora

ratā reve. Ha'e kuery pe xee rombopaga uka ramo nembopaga 'rā okuapy ha'e kuery ae oikuua rami vy.

²⁵ Nderovai aiko 'rā nda'evei etea rupi, ha'e ramo ha'e kuery voi ndeavyky rei 'rā opoxya rupi. Ha'e vy ojaya 'rā nexī ha'e nenambi, ha'e gui hembyrekue ma ojukapa 'rā kyxe py. Ha'e vy nememby kuery ha'e ndepi'a kuery oipe'apa 'rā heravy, ha'e gui hembyrekue ma omokanhymba 'rā tata py.

²⁶ Ndeao oipe'apa 'rā, ha'e gui ogueraapa 'rā renhembojeguaague.

²⁷ Ha'e rami py amomba 'rā ha'eve'ŷ va'e rupi Egito yvy guive reikoague, ndetavy reia rupi. Ha'e rami rire nerema'ēvei 'rā Egito pygua kuery re, ijyvy re voi nanema'endu'avei 'rā.

²⁸ Mba'eta po rami SENHOR Nhanderuete ijayvu: Aŷ ma xee romboaxa 'rā ndereayvuvei va'e kuery po py, ha'e kuery gui rejeguaru reve reja va'ekue.

²⁹ Ha'e ramo ha'e kuery ndererekko axy 'rā opoxya rupi, ndegui oipe'apa 'rā remba'eapoague repy. Ndeao oipe'apa ma vy ndereja 'rā ndepire rei reve, ojekuaapa aguā ndetavy reiague, ha'eve'ŷ va'e rupi anho reikoague ha'e renhemongy'apa reiague.

³⁰ Ha'e rami ete ndererekko 'rā amboae regua kuery reve ndetavy rei rire, ha'e kuery ta'angaa oguereco va'e reve renhemongy'apa rei rire guive.

³¹ Nderyke oikoague rami ae reiko rire ndepo py ju ame'ē 'rā karo ixupe guare.

³² Po rami SENHOR Nhanderuete ijayvu: Rey'u 'rā nderyke peguare karo tuvixa ha'e iporuxu va'e gui. Ha'e va'e py heta oĩ ojojai reipy ha'e ayvu vaipy anho.

³³ Ha'e va'e ma nemonga'u 'rā, nemoingo axy 'rā guive. Mba'eta karo nderyke Samaria peguare ma nhomondyi rei ha'e nhombovaipaarrā.

³⁴ Ha'e va'e gui ma ndee rey'upa 'rā. Iky'akue voi re'upa 'rā, ha'e nekā rupi reikaraimb'a 'rā. Xee ae ha'e rami xeayvu — he'i SENHOR Nhanderuete.

³⁵ Ha'e nunga rupi po rami ijayvu SENHOR Nhanderuete:

— Xegui nderexarai vy xea katy ndekupe rive rerova rire ndere oĩ 'rā repaga aguā rejou porā reiague ha'e ndetavy reiague re — he'i.

³⁶ Ha'e gui SENHOR aipoe'ive ju xevy:

— Ava ra'y, aŷ ndeayvu ta pa Oolá ha'e Oolibá reko vaia re? Eikuua uka ha'vy ojeguarupy ha'e kuery ojapoague.

³⁷ Mba'eta ha'e kuery itavy rei, ipo ky'apa ma guive jouguy omoēague re. Ta'angaa oguereco va'e reve avi itavy rei, ha'e omemby kuery xera'y kueryrā oguereco va'ekue ri ta'angaa kuery pe rive ome'ē tata py omombaa py.

³⁸ Ha'e gui ma po ramigua ju ojapo avi xerovai: Ha'e va'e árave ma voi omongy'apa xevygua oo iky'a e'ŷ va'e, omboyke guive sábado ára pyguarā aeja va'ekue.

³⁹ Mba'eta ta'angaa pe omemby kuery ha'e opi'a kuery oapy okuapy ma rire ha'e va'e árave ju xevygua oo iky'a e'ŷ va'e re ou okuapy omongy'a rei aguā. Ha'e rami ete ojapo okuapy xevygua opy rupi.

⁴⁰ Ha'e gui oĩve teri, mba'eta penoĩ uka avakue mombyry gui. Ha'e vy ha'e kuerya katy pemondouka pendeayvu reraa, ha'e ramo ou okuapy. Ha'e kuery reve pendetavy rei aguā ma pejau, penderexa rupi pemopytā, ha'e penhembojegua porā rei.

⁴¹ Ha'e vy tenda iporāve va'e áry peguapy peiny, peteĩ mesa oguereco katupa pyre yvýry. Ha'e va'e áry pemoĩ avi heakuā porā va'e ha'e azeite xevy guarā va'ekue.

⁴² Ha'e gui kunhague yvýry rupi onhendu heta ete ovy'a reia rupi ikuai va'e. Avakue ojou vaipy reve tekoa e'ŷa gui oguerua oka'u va'e regua. Ha'e kuery ma kunhague po re omoĩ okuapy poapy regua, ha'e gui inhakā re ma akā regua iporāgueve omoĩ.

⁴³ Ha'e nunga rupi xee aipoa'e ymave guive itavy rei va'e re: "Itavy reia rupi ae ta ri ty'y oiko?" ha'e.

⁴⁴ Ha'e ramo kunha va'e re onhemboja pavē, kunha itavy rei va'e reve joguereco va'e rami. Ha'e rami vy joguereco okuapy Oolá ha'e Oolibá reve, kunhague itavy rei va'e ae rā.

⁴⁵ Ha'e gui avakue heko porā va'e ma ombopaga 'rā kunhague tavy rei ha'e jojukaa kuery ombopagaa rami. Mba'eta kunhague itavy rei va'e ikuai, ha'e ipo ky'apa jouguy omoēa py.

⁴⁶ Ha'e nunga rupi SENHOR Nhanderuete aipoe'i:

— Ha'e va'e kunhague rovai ma heta 'rā ambou, mba'eta opa marā oguerekva'era pe amboaxa 'rā, mba'emo pe'apaarā kuery pe guive.

⁴⁷ Ha'e ramo heta ete va'e ojapipa 'rā ita py, kyxé py oikyxiimba 'rā guive. Ojukapa 'rā imemby kuery ha'e ipi'a kuery, ha'e oapypa 'rā hoo.

⁴⁸ Ha'e rami vy ha'e kuery yvy gui amomba 'rā ha'eve'ŷ va'e rupi anho ikuaiague, kunhague mboae kuery oexa vy onheangu aguā ha'e va'e kunhague ojejou porā reiague rami e'ŷ ikuai aguā. Mba'eta pende'áry ou 'rā ha'eve'ŷ va'e rupi anho peikoague re pepaga aguā, ta'angaa reve pejejavyague re voi. Ha'e ramo peikuua 'rā xee ae SENHOR aikoa.

24

Mba'emo re ombojoja vy oja omombe'uague

¹ Ha'e gui nove ma'etŷa ha'e dez jaxya va'e, dez araa py SENHOR ombou oayvu xevy. Ha'e vy aipoe'i:

— Ava ra'y, embopara ke kova'e ára rery. Mba'eta kova'e ára ae Babilônia pygua huvixa ou 'rā Jerusalém tetā re.

³ Ha'e nunga rupi kova'e kuery naxenhe'ẽ rendui va'e rovai emombe'u pete'i ayvu mba'emo re rembojoja vy. Ha'e vy aipo're ha'e kuery pe: "Po rami SENHOR ijayvu: Pemoï oja tata áry, pemoï ke aŷ, ha'e gui pemoï avi yy.

⁴ Ha'e va'e py pemoï avi xo'o ra'ykue. Iporâgueve anho pemoï, hi'ugue ha'e ijaxi'ykue. Pemonyê ikâgue peiporavo va'ekue,

⁵ penerymba kuery vexa'i gui iporâve va'e regua anho. Ha'e gui oja guýry rupi pemoï reta yxakâ. Pemboaku opupu porā aguā rami, oja py ojypa porā aguā ikâgue", 're.

⁶ Mba'eta po rami SENHOR Nhanderuete ijayvu:

— Nda'evei ete 'rā kova'e tetā jouguy moëa kuery ikuiaia pe, mba'eta oja iky'apa rei va'e rami optya, ndojeky'a'o ukai rire! Penoëmba ke xo'o ra'ykue oja gui, peiporavo e'ŷ re.

⁷ Mba'eta tetā mbyte rupi ikuai jouguy omoëague re ipo ky'a va'e. Itaova áry ae omoë, yvy rupi yvy ku'ikue ojao'i aguā rupi e'ŷ.

⁸ Ha'e gui xee ma itaova áry rupi ju amoï tuguy ojao'ipaa e'ŷ aguā py, opoxya rupi nhombopagaarā ambou aguā.

⁹ Ha'e nunga rupi po rami SENHOR Nhanderuete ijayvu: Nda'evei ete 'rā kova'e tetā jouguy moëa kuery ikuiaia pe! Mba'eta xee voi amoï reta 'rā yxakâ.

¹⁰ Yxakâ amoï reta ma vy amoendy 'rā tata, xo'o ambojy ha'e tykue amoana aguâ, ikâgue ikuai va'e okaipa peve.

¹¹ Ha'e gui pemoï oja tapyi áry, hexakâmba peve haku aguâ, ha'e rami vy iky'akue iporâ e'ŷague ha'e javi oipa aguâ.

¹² Ha'e ramia py xee anhea'ã rive, mba'eta iky'akue heta oï rā ndoipai, tata áry tei.

¹³ Mba'eta pendeky'aa ma ha'eve'ŷ va'e rupi anho pendekuaia. Ha'e gui xee roiky'a'oxe tei peë ma ndapejeky'a'o ukaxe. Ha'e nunga rupi napendeky'a'oai 'râe, pendevy xepoxya aexa ukapa e'ŷa ja.

¹⁴ Xee SENHOR ae aipoa'e: Ha'e rami ae 'râ oiko, xee ajapo 'râe. Ndajevyi 'râ ha'ekue py, noromboaxyi 'râ, amboae rami ndajapoi 'râ guive. Mba'eta rombopaga 'râ pendekuaiaque ha'e pejapo vaiague re — he'i SENHOR Nhanderuete.

Ezequiel ra'xy omanoague

¹⁵ Ha'e gui SENHOR oayvu ombou vy aipoe'i xevy:

¹⁶ — Ava ra'y, ma'ë, ndegui aipe'a xapy'a ta reayyuve va'ekue. Ha'e rami tei ndepy'a vai eme, ejae'o eme, nei nderexay eme guive.

¹⁷ Nepoaē 'rā rekyrirī reve, erojae'o eme omano va'ekue. Ha'e rami 'rāgue py neakā reemoī akā regua, ndepy re ma py regua emoi, nerendyva voi ta'ipuku eme, ha'e ipy'a vai va'e pegua tembi'u oguerua teī he'u eme — he'i.

¹⁸ Ha'e gui ko'ēgue aje'ive'i reve heta va'e kuery pe xeayvu rire ka'arukue xera'yxy omano ma. Ha'e gui ko'ē jevy ma Nhanderuete aipoe'iague rami aiko.

¹⁹ Ha'e rami rā heta va'e kuery aipoe'i xevy:

— Emombe'u ke orevy mba'erā pa nami reikoa.

²⁰ Ha'e rā xee ambovai:

— Xevy pe SENHOR oayvu ombou. Ha'e vy aipoe'i:

²¹ Aipo're Israel kuery pe: Po rami SENHOR Nhanderuete ijayvu: Aŷ ma xee ae ajapo 'rā xevygua oo iky'a e'ŷ va'e nomboeteavei aguā rami, ha'e va'e perovy'ave ha'e pexaxeve va'e, ha'e pejou porā ete va'e teī. Ha'e gui pendera'y kuery ha'e penderajy kuery ha'e py peja va'ekue ojukapaa 'rā kyxe py.

²² Ha'e rire teī peē voi peiko avi 'rā xee aikoa rami. Ha'e vy penerendyva ndapejai 'rā ipuku aguā rami, ha'e ndape'ui 'rā tembi'u ipy'a vai va'e pegua oguerua ramo voi.

²³ Peneakā re perekō 'rā akā regua, ha'e pendepy re oī 'rā py regua. Napendepy'a vai 'rā, ndapejae'oi 'rā. Ha'e rami avi pepa 'rā peovy pejejavyague re, ha'e vy peteī-teī penepoaē 'rā joa py.

²⁴ Mba'eta Ezequiel ma nami oiko peikuaa aguā, ha'e oikoa rami ae avi peē kuery voi pendekuai 'rā. Ha'e nunga oiko ramo peikuaa 'rā xee ae SENHOR aikoa — he'i.

²⁵ — Ava ra'y, raka'eve rā ha'e kuery gui aipe'a 'rā ojou porāve ha'e oguerovy'ave va'e, oexaxeve ha'e onhe'ē py ogueroporaei va'e. Aipe'a avi 'rā ta'y kuery ha'e tajy kuery.

²⁶ Ha'e va'e ára ndea py ou 'rā peteī oo jepe va'ekue, ha'e ae ma voi omombe'u 'rā ndevy.

²⁷ Ha'e va'e ára ma ndeayvu nho 'rā oo jepe va'ekue oīa py. Ndeayvu 'rā, nerekyrirīvei 'rā. Ha'e rami reiko 'rā ha'e kuery oikuaa aguā. Ha'e ramo ha'e kuery oikuaa 'rā xee ae SENHOR aikoa.

25

Amom pygua kuery rovai ijayvuague

¹ Peteīgue ju SENHOR oayvu ombou. Ha'e vy aipoe'i xevy:

² — Ava ra'y, ema'ē e'amy Amom ra'y kuery ikuaia katy. Ha'e vy xeayvu emombe'u ha'e kuery pe.

³ Aipo're Amom ra'y kuery pe: Pendu ke SENHOR Nhanderuete ayvu. Po rami ijayvu: Peē kuery ma xevygua oo iky'a e'ŷ va'e omongy'apaa rā “Ha'evea rami!” peje va'ekue, Israel yvy ombovaipaa, ha'e Judá kuery escravo-rā ogueraapaa ramo.

⁴ Ha'e nunga rupi aŷ romboaxapa 'rā kuaray oua katyguā kuery pe. Ha'e ramo pendeyyy re ha'e kuery ovaembā vy hekoā 'rā penembyte py. Ha'e vy ha'e kuery ho'u 'rā okuapy mba'emo pemboaju va'ekue, oy'u 'rā guive kamby penoē va'ekue.

⁵ Ha'e gui Rabá tetā ajapo 'rā camelō kuery ikuai atyrā, ha'e Amom kuery rekoague ajapo 'rā vexa'i kuery korarā. Ha'e ramo peikuaa 'rā xee ae SENHOR aikoa.

⁶ — Mba'eta po rami ijayvu SENHOR Nhanderuete: Peē kuery ma Israel yvy re pevy'a reia rupi pejepopete-pete ha'e pendepy pembota-mbota va'ekue penenhe'ē py mba'emo vai perekō va'e ha'e javi rupi.

⁷ Ha'e rami rire penderovai xepo audi vy rojapo 'rā amboae regua kuery pendepe'apa aguā rami. Yvy regua mbyte gui roipe'a vy romokanhymba 'rā yvy gui. Romomba ete 'rā. Ha'e ramo peikuaa 'rā xee ae SENHOR aikoa.

Moabe pygua kuery rovai ijayvuague

⁸ Ha'e gui SENHOR Nhanderuete aipoe'i:

— Moabe ha'e Seir pygua kuery aipoe'i: “Ma'ē, Judá kuery ma yvy regua kuery ha'e javi rami opyta ikangy va'e”, he'i okuapy ramo

⁹ aŷ aipe'a 'rā Moabe yvy ja'oa tetā oguerovy'ave va'e Bete-Jesimote, Baal-Meom ha'e Quiriataim guive.

¹⁰ Ha'e va'e tetā amboaxapa 'rā kuaray oua katyguia kuery rekoarā, Amom kuery re ajapoague rami avi, ha'e kuery re na'ima'endu'aavei aguā yvy regua ikuiaia rupi.

¹¹ Ha'e rami vy ambou 'rā Moabe pygua kuery mbopagaarā. Ha'e ramo ha'e kuery voi oikuua 'rā xee ae SENHOR aikoa.

Edom pygua kuery rovai ijayvuague

¹² Po rami SENHOR Nhanderuete ijayvu:

— Edom pygua kuery ma Judá kuery rovai opu'āmba vy ipo ky'apa va'ekue ha'e kuery re opu'āa py.

¹³ Ha'e rami rire SENHOR Nhanderuete aipoe'i: Edom pygua kuery rovai voi xepo aupi vy amomba 'rā avakue ha'e hymba kuery, teko a e'ya ju oī aguā. Ha'e vy Temā tetā guive Dedā peve ojukapaa 'rā kyxe py.

¹⁴ Edom pygua kuery ambopaga uka 'rā xevygua Israel kuery pe. Ha'e ramo ha'e kuery ombopaga 'rā Edom kuery xepoxya ha'e ajou vaia rupi. Ha'e ramo Edom kuery xekuaa avi 'rā ambopaga rā — he'i SENHOR Nhanderuete.

Filisteu kuery rovai ijayvuague

¹⁵ Po rami SENHOR Nhanderuete ijayvu:

— Filisteu kuery ma onhe'ē py Israel kuery jou vai etea rupi opu'ā rei okuapy ha'e kuery re, raka'e rā peve guarā omomba aguā tei.

¹⁶ Ha'e ramo SENHOR Nhanderuete aipoe'i: Ma'ē, xepo aupi 'rā filisteu kuery rovai, queretita kuery amomba, aguā, ha'e ye'ē yvýry ikuai va'e voi amokanhymba avi aguā.

¹⁷ Opa marā ambopaga 'rā xepoxya rupi ajou vai reve. Ha'e ramo ha'e kuery ambopaga ma rire oikuua 'rā xee ae SENHOR aikoa.

26

Tiro pygua kuery rovai ijayvuague

¹ Ha'e gui onze ma'etŷa, jaxyia ypy'ia ára py SENHOR ombou ju oayvu xevy. Ha'e vy aipoe'i:

² — Ava ra'y, Jerusalém tetā ombovaipaa rā Tiro pygua huvixa ijayvu: “Ha'evea rami! Opẽmba ma tetā rokē yvy regua oikeaty. Ha'e vy ojep'e a oiny xevy. Ha'e ramo ajoupa 'rā mba'emo, tetā ombovaipaa rire”, he'i.

³ Ha'e rami tei SENHOR Nhanderuete ijayvu po rami: Ha'e gui Tiro pygua kuery, xee ma penderovai aiko. Ha'e rami vy ajapo 'rā peneretā re heta regua opu'ā aguā rami, ye'ē rupi yai opu'ā-pu'āa rami.

⁴ Ha'e ramo ha'e kuery oitypa 'rā Tiro tetā kora, torre ikuai va'e guive. Tetā gui xee aipe'a ukapa 'rā yvy ku'i peve, ita mbeju rive aejapa aguā.

⁵ Ha'e gui ye'ē pa'ū peñague opyta 'rā pira mbo'aa mombiru atyrā, ha'e rami xeayvu ma voi rire — he'i SENHOR Nhanderuete. — Opyta 'rā yvy regua kuery mba'emo oipe'apa aguā rive.

⁶ Ha'e rā peneretarā kuery ye'ē rembe rupi ikuai va'e ma kyxe py meme 'rā ojukapaa. Ha'e ramo peikuua 'rā xee ae SENHOR aikoa.

⁷ Mba'eta po rami SENHOR Nhanderuete ijayvu:

— Mba'eta Tiro tetā re ambou 'rā Babilônia pygua huvixa Nabucodonosor, huvixa ikuai va'e ruvixave va'e. Ha'e ramo kuaray apu'a'ia katy gui 'rā ou kavaju reve, karóxa, kavaju áryguia kuery ha'e heta regua reve.

⁸ Ha'e rami peneretarā kuery ye'ē rembe rupi ikuai va'e ha'e ojukapa 'rā kyxe py. Ha'e gui peneretā rovai'i ojapo 'rā torre, ha'e tetā kora re xondaro kuery omboaty 'rā imoiny yvy, hu'y jokoa tuvixakueve o'áry rupi oguereko reve.

⁹ Ha'e gui tetā kora re ombota-mbota 'rā yvyra aygue py. Torre ikuai va'e voi oitypa 'rā ferro guigua py.

¹⁰ Hymba kuery kavaju ma heta ete vy peneretā py oikepa vy ojao'ipa 'rā yvy ku'i py. Tetā rokē rupi kavaju árygua kuery, karóxa kyrīve ha'e tuvixakueve oike ramo tetā kora omyimbā 'rā hevovo rei va'e gui rive, tetā kora omopa'ūague rupi oikepa ramo.

¹¹ Hymba kavaju opoapē py ma ombovaipa rive 'rā tetā rape ikuai va'e. Hi'árygua kuery ma kyxe py ojukapa 'rā peneretarā kuery, ha'e ita tuvixa va'e pemopu'ā va'ekue oitypa 'rā yvy rupi.

¹² Ha'e gui ogueraapa 'rā mba'emo porā pereko va'ekue, oipe'a 'rā mba'emo pevende 'rā va'ekue, oitypa 'rā tetā kora ha'e oo porāgueve penderekaoa va'ekue. Ha'e gui ita, yvyra ha'e mba'emo ku'ikue pendea py ikuai va'ekue omombopa 'rā ye'ē mbyte rupi.

¹³ Ha'e rami py amombytu'upa 'rā peporaeia revovo. Ha'e rire nonhenduvei 'rā ixā reta va'e pembopua.

¹⁴ Peneretā aeja 'rā ita mbeju rive, pira mbo'aa mombiru atyrā rive opyta aguā. Ndojapoavei 'rā guive, mba'eta xee SENHOR ae ha'e rami xeayvu rire — he'i SENHOR Nhanderuete.

¹⁵ Ha'e gui po rami SENHOR Nhanderuete ijayvu Tiro pygua kuery pe:

— Ye'ē rembe rupi ikuai va'e ma peneretā oitypaa rā hyapu rei va'e gui ndoryryipai 'rā ri ty'y, penepoaē reia ha'e tetā mbyte rupi pendejukapaa rā oendu avi vy?

¹⁶ Ha'e rami vy ye'ē rembe rupigua huvixa ikuai va'e ma oguejypa 'rā guenda openaaty gui, ha'e ojegui omboipa 'rā kamixa puku ha'e oao ombojeguapa pyre. Pendegui onhemondyipa rei vy orryripa reve 'rā oguapypa yvy py, orryripa rei anho 'rā oiny.

¹⁷ Ha'e rami vy ijayvu 'rā penereronhemboaxya rupi. Ha'e vy aipoe'i 'rā okuapy: "Ndee tetā omboetevepy ha'e heta ikuiaia reiko va'ekue, mba'exa tu rekanhy xapy'a? Mba'eta yy áry rupi ndea pygua kuery oje'opia rupi pendepo'akapa va'ekue, ha'e ndea katy'i ikuai va'e kuery remongyjepa rei va'ekue!

¹⁸ Ha'e gui aŷ ma ye'ē pa'ū pygua kuery ha'e javi orryripa 'rā re'a rā oendu vy, nda'evei ete 'rā ikuai nereivei ma ramo", he'i okuapy.

¹⁹ Mba'eta po rami SENHOR Nhanderuete ijayvu:

— Xee ma rojapo tetā oejapa pyre, tetā avave rei nda'ipoaveia rami, ha'e gui pende'áry rupi ambou yai, yy reta pendeao'ipa aguā.

²⁰ Ajapo avi 'rā peguejypa aguā rami, yvykua py oguejy va'e kuery reve. Ha'e rami vy ymagua kuery ikuiaia py romoingo 'rā yvy guyvea py, tekao e'ŷa ymavea py pepyta aguā yvykua py oguejy va'ekue ikuiaia py, penderekague py nda'ikuaiavei aguā. Ha'e rā temimoingo kuery ikuiaia rupi ma ajapo 'rā mba'emo porā ete.

²¹ Rojapo 'rā nhomondyipaarā, mba'eta napeïvei ma 'rā. Penderekaa tei napendejouavei 'rā — he'i SENHOR Nhanderuete.

27

Tiro tetā omboaxy vaipaa rupi ijayvuague

¹ Ha'e gui SENHOR oayvu xevy ombou ju. Ha'e vy aipoe'i:

² — Ha'e gui ndee ava ra'y, ndeayvu ke Tiro tetā pe omboaxy va'e rami.

³ Mba'eta Tiro ma ye'ē pa'ū re oĩ, ha'e tetā mboae ye'ē yvýry rupi ikuai va'e katy ha'e kuery oo va'ekue mba'emo vendea rupi. Aipo're Tiro tetā pe: Po rami SENHOR Nhanderuete ijayvu: Ndee Tiro aipo're: "Xee ma kanoã guaxu opa mba'e py iporāve va'e rami aiko", 're.

⁴ Mba'eta anhetē ye'ē mbyte rupi peve ndepo'aka, ha'e ndeapoa kuery neporā aguā rami ete ndeapo va'ekue.

⁵ Ha'e rami vy nderegua pyrōa ma yvyra cipreste Senir gui ogueru pyre gui ojapoa va'ekue. Nderegua ajukue 'yrā ma Líbano gui oguerua yary.*

⁶ Ndepykuiarā ma yvyra carvalho Basā gui ogueru pyre gui ojapo. Tendarā ma ojapo marfim gui, yvyra pinho yy pa'ū Quitim gui ogueru pyre py ombojegua vy.

* ^{27:5} Apy ma Tiro tetā ombojoja kanoã guaxu re ajukue oipyo imoinya rami, mba'eta ha'e pygua kuery ma ye'ē áry rupi 'rā oo mba'emo vendea rupi.

⁷ Ndere ajukue oipyo va'erā ma Egito guigua iperirī'i va'e ha'e ombojeguapa pyre anho omoī, bandeira-rā guive. Ndeao'iarā ma ajukue hovy ha'e púrpura va'e ogueru yy pa'ū Elisá gui.

⁸ Ndepykui va'erā ma Sidom ha'e Arvade pygua kuery ojou. Nemboguataarā ma ndee Tiro tetā pygua hi'arandukueve ae ojou.

⁹ Ndere mba'emo moatyroarā ma Gebal pygua nhomongeta va'ety ha'e hi'arandukueve ojou. Ha'e gui ndere onhembojapa okuapy kanoā ye'ē rupigua ha'e imboguataa kuery ha'e javi, mba'emo rerekva va'e omboekoviaxe vy.

¹⁰ — Ha'e gui ndevyguia xondarorā ma Pésria, Lídia ha'e Pute gui ou va'ekue, ndevyguia ikuai joe opu'ā va'e meme. Ha'e kuery ma ombo'e hu'y jokoa ha'e ngora ratā oupipa imoiny tetā kora ha'e javi rupi, ndepo'akaa oikuua uka aguā.

¹¹ Ha'e gui ndekora áry rupi nerarōa kuery ma ndea pygua ae, Arvade guigua xondaro kuery guive. Ha'e gui torre ikuai va'e py nerarōa kuery ma Gamade pygua. Ha'e kuery voi tetā kora rupi oupipa imoiny hu'y jokoa, nembojeguia porāmba aguā.

¹² — Opa mba'emo rerekova ramo Társis pygua kuery voi mba'emo omboekovia va'ekue ndereve. Mba'emo rerekva va'e re omboekovia prata, ferro, estanho ha'e chumbo.

¹³ Javā, Tubal ha'e Meseque tetā pygua kuery voi mba'emo omboekovia va'ekue ndereve. Ha'e kuery ma mba'emo rerekva va'e re omboekovia va'ekue escravo kuery ha'e tembi-poru overa va'e guigua.

¹⁴ Ha'e rā Togarma guigua kuery ma mba'emo rerekva va'e rekova ome'ē kavaju, kavaju joe opu'āa rupigua ha'e mburika.

¹⁵ Dedā ramymino kuery voi mba'emo omboekovia va'ekue ndereve. Heta ikuai va'ekue ye'ē yvýry rupigua mba'emo ndea py ojapo pyre joguaarā. Ha'e nunga rekova ogueru elefante raīgue marfim ha'e yvyra Ébano guigua.

¹⁶ Síria pygua kuery voi omboekovia va'ekue mba'emo ndea py ojapo pyre re. Ha'e nunga rekova ome'ē va'ekue ita esmeralda, ajukue púrpura ha'e iperirī'i va'e ombojeguapa pyre, ha'e gui ita coral, ita hepykueve guive.

¹⁷ Judá ha'e Israel yvy regua kuery voi mba'emo ojogua va'ekue ndegui. Mba'emo rerekva va'e rekova ome'ē va'ekue trigo Minite guigua, tembi'u porāgueve, ei, azeite ha'e yvyra bálsamo.

¹⁸ Damasco pygua kuery voi mba'emo ojogua reta va'ekue ndea py ojapo pyre. Opa mba'emo porā rerekva va'e rekova ome'ē va'ekue Helbom guigua vinho ha'e Saar guigua vexa'i rague.

¹⁹ Dā ha'e Javā pygua kuery voi Uzal yvy gui ou vy mba'emo rerekva va'e rekova ome'ē va'ekue ferro guigua, cássia ha'e cálamo. Ha'e ramigua reve ou mba'emo ojogua aguā.

²⁰ Dedā pygua kuery ma ndevy ovende va'ekue kavaju kupe áry guarā.

²¹ Ha'e gui Arábia ha'e Qedar pygua yvatekueve ikuai va'e voi ojogua va'ekue mba'emo ndea py ojapo pyre. Ha'e rami vy ndevy ome'ē va'ekue vexa'i ra'y, vexa'i ha'e kavara ava. Ha'e nunga re ndereve imba'ejogua va'ekue.

²² Sabá ha'e Ramá pygua kuery voi mba'emo ojogua va'ekue ndegui. Mba'emo rerekva va'e re omboekovia va'ekue heakuā porā va'e, ita hepykueve va'e ha'e ouro.

²³ Ndereve mba'emo re omboekovia avi va'ekue Harā, Cane ha'e Éden pygua kuery, ha'e gui Seba, Assíria ha'e Quilmade pygua mba'emo ojogua va'ety kuery voi.

²⁴ Ha'e kuery ma ndereve omboekovia va'ekue ajukue púrpura ombojeguapa pyre, tapete joo rami e'ŷ-e'ŷ pytā va'e, ha'e ixā oipoka pyre ijy ete va'e.

²⁵ Ha'e gui kanoā Társis guigua ma ndea gui mba'emo ogueraa va'ekue. Ha'e ramo opa mba'emo rejoupa ramo ye'ē rupigua kuery ha'e javi oendupa va'ekue ndereko.

²⁶ Ha'e ramo ndevyguia kanoā pykuia kuery ma undereraa yy ja'ea áry rupi, teī kuaray oua katy gui yvytu ou va'e nemopēmba 'rā yy mbyte py.

²⁷ Ha'e ramo opa mba'emo rerekva va'ekue oikepa 'rā yy guy py. Hepykueve rerekva va'ekue, mba'emo rejapo ha'e revende va'ekue, ndevyguia ye'ē rupigua kuery, kanoā mboguataa,

mba'emo moatyrōaty, mba'emo vendeaty, xondaro kuery, ha'e kanoā py oguata va'ekue ha'e javi. Ndevaipa ramo yy guy py meme 'rā oike.

²⁸ Ha'e gui kanoā mboguataa kuery haxēmba rei rā yy rembe rupi ikuai va'e ha'e javi oendu vy oryryipa 'rā okuapy.

²⁹ Ha'e gui yy rupi ikuai va'ekue ma kanoā gui oguejypa vy yvy reia py ju 'rā ikuai: kanoā pykuia kuery, imbooguata ha'e yy rupigua ha'e javi.

³⁰ Ha'e rami vy pavē 'rā ojae'o rei nhendu okuapy ndere. Oakā áry omombo-mombo 'rā yvy ku'i, ha'e tanhimbu rupi onhembojere-jere 'rā okuapy.

³¹ Ndere vy o'a onhopīmba 'rā oakā gui. Onhe'ē py ndere nda'eveia anho oendu vy onhemonde 'rā ajukue vaikue voxā guigua py rive, ojae'o ha'e ipy'a vai reve.

³² Ha'e rami vy ojae'o reve nereronhemboaxy 'rā okuapy nda'evei etea rupi. Ha'e vy aipoe'i 'rā: "Mava'e kuery tu Tiro pygua kuery rami ikuai, ye'ē mbyte py okyrirī aguā katy oguejy va'ekue rami?"*

³³ Mba'eta mba'emo revende va'erā ye'ē rupi ogueraa jave ma heta regua kuery rejapo oguerekopa aguā rami, mbovy rei e'ŷ rerekova'e revende rupi rejapo va'ekue yvy regua huvixa kuery ojoupa aguā.

³⁴ Ha'e rami teī aŷ ma yy mbyte py remopēmbaa rā mba'emo revende 'rā va'ekue oikepa ma yy typyvea py, ndereveguia kuery ha'e javi reve", he'i 'rā okuapy.

³⁵ Ha'e rami ye'ē yvýry rupi ikuai va'e onhemondyipa rei 'rā okuapy ndere. Ha'e kuery regua huvixave kuery voi oryryipa reve ngova re oexa uka 'rā nda'evei etea.

³⁶ Ha'e kuery regua imba'ejogua va'ety kuery voi ndejojai rei 'rā jogueravy, nhomondyiarā rive repyta rire. Ha'e va'e rire nanemopu'āavei 'rā.

28

Tiro pygua huvixave rovai ijayvuague

¹ Ha'e gui SENHOR oayvu xevy ombou ju. Ha'e vy aipoe'i:

² — Ava ra'y, ndeayvu Tiro pygua huvixa pe: Po rami SENHOR Nhanderuete ijayvu: Ndepy'a py renhemboyvate rei, ha'e vy aipo're: "Xee ma tuuete aiko. Ha'e rami vy tenda tuuete openaaty py ae aguapy ainy ye'ē jova-jovai rupi oī va'e mbyte", 're va'eri ava rive reiko, tuuete e'ŷ, xee Nderuete rami ndepy'a reikovy va'eri.

³ Tá, Daniel gui renhemo'aranduve, reikuua e'ŷ va'e jipoi merami.

⁴ Ha'e rami vy ne'arandua ha'e reikuaapaa rupi vy ndepo'aka ha'e rejoupa va'ekue ouro ha'e prata remoī porā aguā.

⁵ Mba'eta mba'emo vendea rupi reiko kuaa va'e vy rejoupave tema reovy va'ekue. Ha'e rami vy ae renhemboyvate rei ndepy'a py.

⁶ Ha'e nunga rupi SENHOR Nhanderuete aipoe'i:

— Xee Nderuete rami ndepy'a reikovy ramo

⁷ ma'ē, aŷ ma ndere ambou 'rā amboae regua kuery pavē gui ijavaeteve va'e. Ha'e va'e kuery ma okyxe oekyi 'rā okuapy neporā ha'e ne'arandupa reia rovai. Ha'e vy ombovaipa 'rā ndepo'akaa ha'e javi.

⁸ Ha'e rami vy ha'e kuery ndereity 'rā yvykua py, ha'e ramo reiko vai 'rā ye'ē mbyte py ojukapy rami.

⁹ Ha'e ramo ndejuka ta va'e pe nda'u "Xee ma tuuete", 're 'rā ri ty'y? Mba'eta ndejukaarā po py romboaxa ramo ava rive 'rā repyta, tuuete e'ŷ.

¹⁰ Ha'e rami vy remano 'rā xevygua kuery omanoa rami, amboae regua po py, ha'e rami ae xeayvu rire — he'i SENHOR Nhanderuete.

Teīgue ju Tiro pygua huvixave omboaxy va'e rami ijayvuague

¹¹ Ha'e gui SENHOR oayvu ombou ju xevy. Ha'e vy aipoe'i:

* 27:32 Apocalipse 18.13-19

¹² — Ava ra'y, ndeayvu ke Tiro pygua huvixave re omboaxy va'e rami. Ha'e vy aipo're ixupe: "Po rami SENHOR Nhanderuete ijayvu: Ndee ma pavē gui reiko porāve va'ekue, ne'arandua ha'e neporāa py.

¹³ Nhanderuete pegua yvotyty Éden py ae reiko va'ekue. Ita iporāve va'e anho ndejee remoī va'ekue: sárdio, topázio, diamante, berilo, ônix, jaspe, safira, carbúnculo ha'e esmeralda. Ndejeguaarā ma ouro gui ojapoa. Nemoingoa ára guive ma voi ha'e nunga ojapoa ndevy.

¹⁴ Ndee ma anjo ipepo va'e nhoarōarā roiporavo va'ekue, ha'e rami aguā rami ae romoī. Ha'e ramo Nderuete pegua yvyty iky'a e'ŷ va'e rupi reiko va'ekue, itaendy ikuiai rupi.

¹⁵ Nemoingoa ára guive ha'evea ramigua meme rejapo va'ekue, ndere teko vai ajou peve.

¹⁶ Ha'e gui ma mba'emo vendea rupi reiko vy ndepy'a re remoī rejojukaa anho. Ha'e rami vy rejjavý. Ha'e rami rā romombo 'rā xevyguá yvyty gui mombyry, renhemongy'apa rire. Itaendy ikuiai mbyte gui romokanhy 'rā, anjo ipepo va'e nhoarōarā roiporavo rire tei.

¹⁷ Mba'eta neporā va'e vy nekuraxō py renhemboyvate, ha'e nerexakāmba va'e vy renhemongy'a ne'arandupaa py. Ha'e rami rire huvixa kuery ikuai va'e renonde py romombo 'rā yvy katy, ha'e kuery nderexa okuapy aguā.

¹⁸ Opa mba'e py rejjavýa py, ha'e mba'emo vendea rupi rejogueroko axya py remongy'apa oo iky'a e'ŷ va'e ndea py ikuai va'ekue. Ha'e nunga rupi ndegui ae xee amoē tata romomba aguā. Ha'e rami vy pavē oexaa py ajapo yvy re tanhimbu rive repyta aguā rami.

¹⁹ Mba'eta yvy regua nderexaaty kuery onhemondyipa ndegui. Nhomondyipaarā repyta, nerepu'avei 'rā guive."

Sidom tetā pygua kuery rovai ijayvuague

²⁰ Ha'e gui ma xevy SENHOR oayvu ombou ju vy aipoe'i:

²¹ — Ava ra'y, ema'ẽ Sidom tetāa katy, ha'e kuery rovai ndeayvu aguā.

²² Aipo're 'rā: Po rami SENHOR Nhanderuete ijayvu: Ma'ẽ, xee aiko peẽ Sidom pygua kuery rovai, ha'e gui pendekuaia mbyte xemboetea 'rā. Ha'e gui peneretā mbyte py rombopaga, ha'e iky'a e'ŷ va'e aikoa aikuua uka ramo peikuua 'rā xee ae SENHOR aikoa.

²³ Mba'eta peẽ kuery rovai ambou 'rā mba'eaxy vaikue tape rupi tuguy onheẽ peve. Kyxe revugua jovalygui ou ramo oipyxo pyre kuery ho'a 'rā peneretā mbyte rupi. Ha'e ramo peikuua 'rā xee ae SENHOR aikoa.

²⁴ Ha'e rā Israel kuery re ma imbojaru reia kuery ijyvýry ikuai va'e regua ndouwei 'rā juu ikutuarā, nei juu rakuaendy rami. Ha'e ramo ha'e kuery voi oikuua 'rā xee ae SENHOR Tuuete aikoa.

²⁵ Po rami SENHOR Nhanderuete ijayvu:

— Xee amono'õmba ju 'rā Israel kuery yvy regua ikuiai rupi amoāague gui, ha'e kuery mbyte rupi aikuua uka 'rā guive iky'a e'ŷ va'e aikoa yvy regua kuery oexaa py. Ha'e ramo ha'e kuery ikuai 'rā oyvy re ae, xerembiguai Jacó pe ame'ẽ va'ekue py.

²⁶ Ha'e py ma ikuai porā 'rā, ojapo 'rā ngoorā, uva onhoty 'rā guive. Tá, ha'e py ikuai porā 'rā, mba'eta ijyvýry rupi ikuai va'e ha'e javi ambopaga 'rā ombojaru reiague re. Ha'e ramo oikuua 'rā okuapy xee ae SENHOR Tuuete aikoa.

Egitó pygua kuery rovai ijayvuague

¹ Ha'e gui dez ma'etý ha'e dez jaxya re, doze araa py ju SENHOR oayvu ombou xevy. Ha'e vy aipoe'i:

² — Ava ra'y, ema'ẽ Egitó pygua huvixa Faraó-a katy, hovai ndeayvu aguā, Egitó pygua kuery ha'e javi rovai guive.

³ Ndeayvu vy aipo're 'rā: Po rami SENHOR Nhanderuete ijayvu: Egitó pygua huvixa Faraó, xee aiko nderovai. Ndee ma jakare tuvixa ete va'e yy py itui va'e rami reiko, mba'eta aipo're: "Kova'e yy ma xemba'e ae, xejeupe guarā ae ajapo", 're.

⁴ Ha'e rami teĩ neraĩ'ykã re xee amoĩ rã pinda, ha'e ajapo 'rã ndepekue re pira yakã rupigua ojapa aguã rami. Ha'e rami vy yy reĩa mbyte gui xee roguenoẽ 'rã, ndepekue re pira ojapa va'e ha'e javi reve.

⁵ Romombo 'rã tekao e'ŷ katy, ndee ha'e pira ndere oja va'e ha'e javi reve. Ha'e ramo yvy piru reia py 'rã re'a. Ndereruavei 'rã, nderetekue ndojatyai 'rã guive. Ha'e rami 'rãgue py romboaxa 'rã mymba kuery yvy regua ha'e guyra yva regua rembi'urã.

⁶ Ha'e ramo Egito pygua kuery oikuaapa 'rã xee ae SENHOR aikoa. Ndee ma Israel kuery pe repyta popoka takua'i guigua rive.

⁷ Mba'eta ha'e kuery ma opo py takua ojopy vy ojepytaxo ramove ovo rive vy ijaxi'y peve oixu'upa. Ha'e rami ae avi ndere ha'e kuery ojeko rã ndee nemopẽa ramo ha'e kuery oendu 'rã haxy va'e, ha'e guyepy rupi voi oryryipa 'rã okuapy.

⁸ Ha'e nunga rupi po rami SENHOR Nhanderuete ijayvu:

— Ma'ẽ, ndere ambou 'rã kyxe revegua, ndea gui avakue ha'e mymba kuery mombaarã.

⁹ Ha'e ramo Egito yvy optya 'rã ombovaipa pyre ha'e tekao ve'ŷ. Ha'e ramo peikuua 'rã xee ae SENHOR aikoa.

¹⁰ — Mba'eta ndee aipo're va'ekue: "Yakã oĩ va'e xemba'e ae, xee ae ajapo va'ekue", 're rire aŷ ma nderovai aiko, ndea py yakã ikuai va'e rovai guive. Ha'e rami vy ajapo 'rã Egito ombovaipa pyre yvy tekao ve'ŷ optya aguã rami Migdol guive Sevène peve, ha'e Etiópia yvy apy peve.

¹¹ Ha'e va'e rupi ndoaxavei 'rã avakue neĩ mymba kuery ma voi, quarenta ma'etŷ peve 'rã ndaekoavei 'rã ha'e py.

¹² Mba'eta ajapo 'rã Egito yvy ivaipa va'e gui ivaipave aguã rami. Ha'e va'e re tetã ikuai va'e voi tetã ivaipa va'e gui ivaipave 'rã optya, quarenta ma'etŷ opa peve. Ha'e rami vy Egito pygua kuery amoãimba 'rã yvy regua kuery ikuiaia rupi, yvy jave rupi 'rã araa ukupa.

¹³ Ha'e rami teĩ SENHOR Nhanderuete ma po rami ijayvu avi:

— Quarenta ma'etŷ opaa py ma Egito pygua kuery arupa ju 'rã yvy regua ikuiaia rupi amoãague gui.

¹⁴ Ha'e rami vy amoingo porã ju 'rã. Patros yvy oje'oiague re ju aru rukapa 'rã. Ha'e py ma peteĩ tetã kyrĩ'ia py 'rã ikuai.

¹⁵ Tetã mboae ikuai va'e gui kyri'iive 'rã optya, neĩ amboae regua áryve nonhemboyvat-evei ma 'rã. Xee amo'yvy'i ma rire nda'ipo'akavei 'rã amboae regua kuery re.

¹⁶ Ha'e rami rire ha'e kuery re Israel kuery ndojeroviavei 'rã. Ha'e rami 'rãgue py Egito kuery re ojerovia ha'e onhepytyvõ ukaague re ha'e kuery ima'endu'a nhavõ oikuua 'rã ojejavyaague. Ha'e rami vy oikuua 'rã okuapy xee ae SENHOR aikoa — he'i.

¹⁷ Ha'e gui sete ma'etŷ ha'e jypyguia jaxy, jypy'ia ára py ju SENHOR oayvu ombou xevy. Ha'e vy aipoe'i:

¹⁸ — Ava ra'y, Babilônia pygua huvixa Nabucodonosor ma Tiro tetã re oxondaro kuery omondoukaa py ombo'eapo vaipa va'ekue xevy. Mba'eta peteĩ-teĩ akã rupi ipire rei, ha'e peteĩ-teĩ kupe rupi haxypa. Ha'e rami teĩ ixupe ma Tiro gui ndogueraa porãi ombo'eapoague repy, neĩ ixondaro kuery pe voi.

¹⁹ Ha'e nunga rupi SENHOR Nhanderuete aipoe'i:

— Aŷ ma Babilônia pygua huvixa Nabucodonosor pe amboaxave ju 'rã Egito yvy. Ha'e ramo ha'e gui ogueraapa 'rã ha'e pygua kuery, oipe'apa 'rã imba'e rei-rei va'ekue ha'e javi, oxondaro kuery peguarã.

²⁰ Tiro tetã re oje'oria py ombo'eapoague repyrã amboaxa 'rã Egito yvy, xevy pe ojapo rire — he'i SENHOR Nhanderuete.

²¹ — Ha'e va'e ára ma ajapo 'rã Israel kuery imbaraete ju aguã rami. Ndee voi rojapo avi 'rã ha'e kuery mbyte rupi ndeayvu reikovy aguã rami. Ha'e ramo ha'e kuery oikuua 'rã xee ae SENHOR aikoa.

30

Egitoyvy re Babilônia pygua kuery ipo'aka aguã re ijayvuague

¹ Ha'e gui xevy SENHOR oayvu ombou vy aipoe'i:

² — Ava ra'y, emombe'u ke xeayvu. Ha'e vy aipo're: Po rami SENHOR Nhanderuete ijayvu: Ha'e va'e ára re peẽ kuery penepoaẽ 'rã.*

³ Mba'eta ha'e va'e ára ovaẽ rai'i ma. Tá, ovaẽ rai'i ma SENHOR ára. Araipa 'rã ha'e va'e ára, mba'eta amboae regua kuery ikuai axy aguã ára.

⁴ Ha'e rami vy Egito yvy re ou 'rã kyxre revegua. Etiópia rupi voi ikuai axya ete 'rã, Egito rupi oipyxo pyre ho'apa jave. Mba'eta ha'e pygua kuery ogueraapaa 'rã escravo-rã, omombaa 'rã guive imbaraetekueve.

⁵ Ha'e ramo amboae regua kuery Egito reve onhemoirũ va'ekue ho'apa avi 'rã kyxre gui: Etiópia, Pute, Lude, Arábia pygua ha'e javi, ha'e Cube pygua kuery voi.

⁶ Po rami SENHOR ijayvu:

— Egito yvy pygua ptyvõare kuery ho'apa 'rã, opo'akaa re ojejou porã reiague re omo'yvy'i ia rã. Migdol teko guive Sevne peve 'rã ho'a kyxre gui — he'i SENHOR Nhanderuete.

⁷ — Ha'e ramo yvy mboae ivaipa va'ekue mbyte ombovaipa pyre 'rã opyta, ha'e tetã mboae opa va'ekue rami avi 'rã omombaa tetã.

⁸ Ha'e ramo Egito yvy re tata amboja, ha'e iptyvõare kuery amokanhymba ma ramo ha'e kuery oikuua 'rã xee ae SENHOR aikoa.

⁹ Ha'e va'e ára ma xerenonde rupi ayvu reraa kuery kanoã guaxu py oje'oi 'rã Etiópia katy, ha'e ramo omondyipa 'rã onheangu e'ý rei va'ekue. Mba'eta ha'e yvy re voi ou 'rã teko vai, Egito pygua kuery ára py rami avi. Ha'e nunga ou ae ma oiny — he'i.

¹⁰ Po rami SENHOR Nhanderuete ijayvu:

— Babilônia pygua huvixa Nabucodonosor pe xee amomba uka 'rã Egito pygua kuery onhemboyvate reia.

¹¹ Ha'e rami vy hexeveguia kuery reve amondoukapa 'rã Egito yvy mombaarã, mba'eta pavẽ regua gui ijavaeteve va'e. Ha'e ramo okyxe oekyi 'rã okuapy Egito yvy re, ha'e yvy jave rupi omonyẽmba 'rã ojukapa va'ekue.

¹² Xee amboypa 'rã yakã ikuai va'e, ijyvy voi amboaxapa 'rã heko vai va'e kuery po py. Amboae kuery pe ambovaipa ukapa 'rã yvy, hexe ikuai va'e ha'e javi guive. Xee SENHOR ae ma ha'e rami xeayvu va'e.

¹³ Po rami SENHOR Nhanderuete ijayvu:

— Amokanhymba avi 'rã ha'e kuery ruete kuery ra'angaa, ta'angaa Mênfis py ikuai va'ekue voi amomba 'rã. Egito yvy re yvatekueve nda'ikuavei 'rã. Ijyvy jave rupi ambou 'rã ndaekorãveia.

¹⁴ Ha'e rami vy ambovaipa 'rã Patros tetã, Zoã re amboja uka 'rã tata, ha'e anhombopaga 'rã Nô py.

¹⁵ Sim tetã Egito yvy re ikorapave va'e áry anhoẽ 'rã xepoxya, ha'e heta 'rã amomba Nô py.

¹⁶ Egito yvy jave rupi amboja 'rã tata. Ha'e ramo Sim py oendua 'rã ojexavai etea, Nô py okanhymbaa 'rã, ha'e ara py tei Mênfis rovaigua kuery ojekuaapa 'rã.

¹⁷ Kunumigue Áven ha'e Pi-Besete pygua ho'apa 'rã kyxre gui. Ha'e va'e tetã gui ma ogueraapaa 'rã escravo-rã.

¹⁸ Tafnes py ma ára pytúmba 'rã, mba'eta ha'e py amopẽmba 'rã Egito pygua po'akaa, amomba avi 'rã opo'akaa re onhemboyvate reia. Petei arai ojao'ipa 'rã, ha'e rã tajy kuery ma escravo-rã meme 'rã ogueraapaa.

¹⁹ Ha'e rami 'rã anhombopaga Egito yvy rupi. Ha'e ramo ha'e kuery oikuapa 'rã xee ae SENHOR aikoa — he'i.

²⁰ Ha'e gui onze ma'etýa, jypygua jaxyre, sete araa py ju pe SENHOR ombou oayvu xevy. Ha'e vy aipoe'i:

* 30:2 Apy ma Egito pygua kuery pe ijayvu.

²¹ — Ava ra'y, xee amopẽ ma Egito pygua huvixa Faraó jyva. Ha'e rami teĩ ndojokuaai, noipoanoai, neĩ nomboje'aa jevyi, ha'e rami e'ŷ rã imbaraete ma vy kyxe oiporu ju aguã.

²² Ha'e nunga rupi po rami ijayvu SENHOR Nhanderuete:

— Ma'lẽ, xee aiko Egito pygua huvixa Faraó rovai. Ha'e rami vy ijyva rovai imbaraeteveague ju 'rã amopẽ, hovai amopẽ ma voiague rami. Ha'e rami vy ajapo 'rã ipo gui kyxe ho'a aguã rami.

²³ Ha'e gui Egito pygua kuery amoãimba 'rã yvy regua ikuia rupi, araa ukapa 'rã yvy jave rupi.

²⁴ Ha'e rã Babilônia pygua huvixa jyva ma amombaraete 'rã, ha'e ipo py amoõ 'rã xekyxe. Ha'e rã Faraó jyva ma amopẽ 'rã. Ha'e ramo Babilônia pygua renonde ipoaõ rei 'rã oipyxo pyre rami.

²⁵ Aupi 'rã Babilônia pygua huvixa jyva, ha'e rã Faraó jyva ma ho'a rive 'rã. Ha'e gui Babilônia pygua huvixa po py xekyxe amoõ va'ekue Egito yvy rupi oiporu ramo oikuaapa 'rã xee ae SENHOR aikoa.

²⁶ Mba'eta Egito pygua kuery amoãimba 'rã yvy regua ikuia rupi, araa ukapa 'rã yvy jave rupi. Ha'e ramo oikuaa pavẽ 'rã xee ae SENHOR aikoa.

31

Egito yvy re mba'emo oiko aguã re ijayvuague

¹ Ha'e gui onze ma'etõa, mboapy jaxy re, ijypy'ia ára py ju SENHOR ombou oayvu xevy. Ha'e vy aipoe'i:

² — Ava ra'y, aipo're Egito pygua huvixa Faraó ha'e ixupeguia kuery ha'e javi pe: Mava'e regua tu ndee rami ipo'akapa va'e?

³ Eikuua pota ha'vy Assíria yvy re oiko va'ekue re. Ha'e kuery ma peteĩ yary Líbano py hi'aĩ va'e rami ikuai va'ekue, mba'eta hakã porã va'e vy ka'aguy rupi kuaray'ã porã va'ekue. Yvateve va'e hi'aĩ, hovapy ma yvyra rovapy rogue áryve rupi ovaõ va'ekue.

⁴ Yvy guy katy gui yvu oĩ va'e omoakŷ vy ojapo va'ekue yvate aguã rami. Ojapo avi ijyvypya gui yy omboxyry opa rupi, yvyra yvy re ikuai va'e ha'e javi omoakŷ aguã.

⁵ Ha'e nunga rupi ae onhemboyvate va'ekue yvyra yvy re ikuai va'e ha'e javi áryve, hakã retave ha'e ipukuve ovy guive, heta yy omoakŷ vy ombotuvixa ramo.

⁶ Hakã'i ikuai va'e rupi guyra ojeaity apo va'ekue, hakã guy rupi ha'e javi mymba ta'y'i okuapy, ha'e ikuaray'ã py ma yvy regua ipo'akakueve oguapypa okuapy va'ekue.

⁷ Ha'e rami vy heta yy rupi hapo va'e vy tuvixaa ha'e hakã retaa py iporã ete va'ekue.

⁸ Yary Nhanderuete pegua yvotyty rupi ikuai va'e gui iporãve va'ekue. Yvyra cipreste voi ha'e va'e rami e'ŷ hakã va'ekue, yvyra plátano voi ha'e va'e rami ndaokyi va'e. Mba'eta iporã rami peteïve yvyra Nhanderuete pegua yvotyty py hi'aĩ va'e ndoikoi va'ekue.

⁹ Ha'e rami ajapo va'ekue hakã reta vy iporã rei aguã rami. Yvyra Éden py Nhanderuete pegua yvotyty rupi ikuai va'e ha'e javi ojou porãmba rei okuapy va'ekue.

¹⁰ Ha'e gui SENHOR Nhanderuete ijayvuve ju:

— Ha'e va'e yvyra yvateve tema ovy yvyra hovana va'e áryve ramo okuraxõ py onhemboyvate rei.

¹¹ Ha'e ramo xee amboaxa 'rã yvy regua ipo'akakueve po py, ha'e kuery omoingo axy aguã heko vaia re. Ha'e rami vy aipe'a 'rã oka katy.

¹² Ha'e ramo amboae regua kuery pavẽ gui ijavaeteve va'e ou vy oake'o 'rã, oeja rive 'rã guive. Ha'e ramo hakãgue ho'apa yvyty ha'e yvyugua ha'e javi rupi. Hoky voi omopẽmbaa 'rã yvy jave rupi yakã ikuai va'e yvýry. Ikuaray'ã py yvy regua ikuai va'ekue ha'e javi ojepe'apa 'rã oje'oivy.

¹³ Hapytakue re ma ha'e javi regua guyra 'rã ikuai, ha'e rã hakãgue guy rupi ma ha'e javi regua vixo ojeaity apo 'rã okuapy.

¹⁴ Ha'e rami yvate etea rami amboae yvyra yy rembe rupi ikuai va'e onhemboyvate e'ŷ aguã, amboae yvyra ikuai va'e gui yvate ve'ŷ aguã, neĩ yy reta oĩa py yvateve hi'aĩ va'e voi ojee ojerovia rei e'ŷ aguã. Mba'eta ojejou porã reia ha'e javi ma okanhy aguã

rami omboaxaa. Ha'e ramo ho'apa 'rā yvykua vaikue py, avakue ra'y kuery yvykua py omboguejy pyre mbyte py optya aguā.

¹⁵ Po rami ijayvu SENHOR Nhanderuete:

— Ha'e va'e yvyra okanhya jave xee ajapo yvy jave re ipy'a vaia aguā rami. Mba'eta ha'e va'e káuxa yvy guýry yvu ikuai va'e ajao'ipa vy ajokopa yy oxyry va'ekue, yy heta ve'ŷ aguā. Ikáuxa ma Líbano yvy ha'e javi rupi ajao'ipa ajukue huū rei va'e py, ha'e ramo yvy re yvyra ikuai va'e ipirupa.

¹⁶ Ha'e va'e yvyra ho'a rā hevovo reia gui ajapo yvy regua ha'e javi oendu vy okyjepa aguā, yvykua vaikue py omanogue mbyte amboguejy ramo. Ha'e ramo yvyra ho'a va'ekue ový'apa ju 'rā okuapy yvy guýry rupi ikuia py, Éden pyguare, Líbano yvy regua iporāve va'ekue, ha'e yy etaa rupi ikuai va'ekue ha'e javi.

¹⁷ Ha'e gui ma amboae regua kuery ipytyvōare ha'e ikuaray'ā py oguapy okuapy va'ekue voi oopa 'rā hexeve yvykua vaikue py kyxe py ojuka pyre reve optya aguā.

¹⁸ — Ha'e gui Faraó, ndee voi yvyra Éden py ikuai va'e ha'e javi gui neporāve ha'e ndeyvateve va'e. Ha'e rami teĩ ha'e kuery reve reguejy avi 'rā yvy guy katy. Ha'e rami vy repyta 'rā opire omboi uka e'ŷ va'ekue mbyte, kyxe py ojuka pyre kuery reve guive. Ha'e rami vy Faraó ha'e iporāague ha'e javi okanhymba 'rā — he'i SENHOR Nhanderuete.

32

Egitó pygua huvixa Faraó omboaxy va'e rami ijayvuague

¹ Ha'e gui doze ma'etŷa, doze jaxya re ijypy'ia ára py ju SENHOR oayvu ombou. Ha'e vy aipoe'i xevy:

² — Ava ra'y, ndeayvu ke Egito pygua huvixa Faraó pe omboaxy va'e rami. Ha'e vy aipo're 'rā ixupe: Ndevy ma “Guary ra'y yvy regua mondoroa”, 'ea va'eri peteĩ jakare yakā oĩa py opyrōmba reve yy omongy'apa rei va'e rami rive reiko.*

³ Po rami ijayvu SENHOR Nhanderuete:

— Nde'áry amombo 'rā xekya yvy regua kuery mbyte, ha'e ramo ha'e kuery nemoatā 'rā heravy xekya py.

⁴ Ha'e rami vy xee roeja 'rā imoiny yvy py, romombo 'rā nhuū reia py. Ha'e vy nde'áry ambou 'rā opa marāgua guyra, mymba yvy regua voi okaru 'rā okuapy ndero'o re.

⁵ Ndero'okue amoai 'rā yvyty áry rupi, ha'e yvyugua ikuai va'e rupi amonyē 'rā ndekyrakue.

⁶ Nderuguy onheẽ va'ekue ma omoakŷmba 'rā yvy yvyty áry peve, amonyē avi 'rā yakā.

⁷ Xee rojuka ma vy ajao'ipa 'rā yva, jaxy-tata ikuai va'e voi amopytūmba 'rā. Kuaray ma amo'āmba 'rā arai py, jaxy voi naexakāvei 'rā.

⁸ Ndekáuxa ajapo 'rā yva re hexakā va'ekue pytūmba aguā rami, ha'e nderekoague rupi ambou 'rā pytū reia — he'i SENHOR Nhanderuete.

⁹ — Ajapo 'rā yvy regua heta rei ipy'a vai aguā rami, mba'eta pavē regua oendu 'rā rekanhymba maa omombe'ua rā, yvy reikuua e'ŷague rupi voi.

¹⁰ Nderekó heta regua oendu vy onhemondyipa rei 'rā, huvixa kuery voi nderovai xekyxé aekyi rā oexa vy oryryipa 'rā. Ndee re'a ramo peteĩ-teĩ oryry-ryryipa 'rā, guekove oguerojeayvu vy.

¹¹ Mba'eta po rami SENHOR Nhanderuete ijayvu:

— Ndea py ou 'rā Babilônia pygua huvixa okyxe reve.

¹² Ndevyguia kuery heta va'ekue teĩ ajapo 'rā ipy'a guaxukueve pavē regua gui ijavaeteve va'e oitypa aguā rami okyxe py. Ha'e ramo ha'e kuery omomba 'rā Egito yvy re onhemboyvate va'e ikuai va'e, mba'emo porā oĩ va'ekue ha'e javi guive.

¹³ Nerymba kuery ma amokanhymba 'rā yy heta ikuai va'e rupi. Ha'e gui avakue neĩ mymba ma voi nomongy'avei 'rā yy.

¹⁴ Ha'e rami vy yy ha'e py ikuai va'e ajapo 'rā itui porā ju aguā rami. Yakā ikuai va'e ma ajapo 'rā azeite rami oxyry porā aguā — he'i SENHOR Nhanderuete.

* 32:2 Apocalipse 1.15

¹⁵ — Mba'eta ambovaipa uka 'rā Egito yvy, opa mba'e ikuai va'ekue noīvei aguā rami. Ajuka ukapa 'rā ha'e py ikuai va'ekue. Ha'e ramo peikuaa 'rā xee ae SENHOR aikoa.

¹⁶ Ha'e rami yvy regua kuery ijayvu 'rā Egito yvy ha'e mba'emo porā oī va'ekue ha'e javi ogueronhemboaxya rupi — he'i SENHOR Nhanderuete.

Egito pygua kuery amboae regua reve manoia py ikuai aguā re ijayvuague

¹⁷ Ha'e gui doze ma'etŷa ha'e jypyguia jaxyia re, quinze araa py ju SENHOR oayvu ombou vy aipoe'i xevy:

¹⁸ — Ava ra'y, ejae'o ke Egito yvy re heta ikuai va'ekue re, mba'eta ha'e kuery oguejypa 'rā yvy guyve katy, amboae regua kuery omboeteve pyre yvykua katy oguejy va'e kuery reve.

¹⁹ Peē nda'u amboae gui peneporāve ri ty'y? Peguejy ke ha'vy, ha'e penheno pejupy opire omboi uka e'ŷ va'ekue reve.

²⁰ Mba'eta peē kuery voi pe'a 'rā kyxe py ojuka pyre mbyte. Kyxe omboaxaa ma penderovaigua pe: "Pembovaipa 'rā Egito yvy, ha'e py ikuai va'ekue ha'e javive reve", 'ea ixupe.

²¹ Ha'e ramo ipy'a guaxukueve regua ipo'akave va'ekue ha'e ipytyvōare kuery reve ma pendevy ojapukai 'rā okuapy manoia py ikuiai gui. Ha'e py opire omboi uka e'ŷ va'ekue oguejy vy onhonomba inony kyxe py ojukapa pyre.

²² — Ha'e py ma itui Assíria pygua huvixa ojeupeguia kuery ha'e javi reve. Ijyvýry rupi ikuai kyxe py ojukaa rā onhono porāmba pyre, kyxe py ho'apa va'ekue meme.

²³ Mba'eta ha'e kuery rupa ma yvykuapy rupi ikuai, ha'e onhono porāague yvýry ikuai ha'e pyguare kuery ha'e javi. Kyxe py oipyxo vy ojuka pyre meme, okuave teri jave joyvy rupi nhomongyjepa rei va'ekue ri.

²⁴ — Ha'e py oī avi Elão pygua ojeupeguia kuery ha'e javi reve, onhono porā mbyte yvýry rupi. Ha'e kuery ma kyxe py oipyxo vy ojuka pyre meme. Ha'e rami vy opire nomboi ukai va'ekue oguejypa yvykua py. Okuave teri jave joyvy rupi nhomongyjepa rei va'ekue ri oximba reve opytapa yvykua py oguejy va'ekue mbyte.

²⁵ Ojuka pyre kuery mbyte rupi ma ojapoa huparā, ojeupeguia kuery ha'e javi mbyte. Ha'e kuery rupa ma ijyvýry rupi ikuai. Opire omboi uka e'ŷ va'ekue meme, kyxe py ojukapa pyre. Okuave teri jave joyvy rupi nhomongyjepa rei va'ekue ri oximba reve opytapa yvykua py oguejy va'ekue mbyte, ojuka pyre mbyte rupi onhono porāa.

²⁶ — Ha'e gui ha'e py ma ikuai Meseque ha'e Tubal pygua ojeupeguia kuery ha'e javi reve. Ha'e kuery rupa ma ijyvýry rupi ikuai. Opire omboi uka e'ŷ va'ekue meme, kyxe py ojukapa pyre, okuave teri jave joyvy rupi nhomongyjepa rei va'ekue ri.

²⁷ Ha'e kuery ma ymave rupigua ipy'a guaxukueve mbyte rupi e'ŷ ikuai, opire nomboi ukai va'ekue yvykua py oguejy va'ekue guembiporu joe opu'āa py oiporu va'ekue inhakā guýry omoña reve-reve ikuiai rupi e'ŷ. Mba'eta ha'e kuery reko vaiague re opaga aguā ma inhakā re ae opyta. Okuave teri jave joyvy rupi ipy'a guaxukueve voi nomboekorāvei va'ekue ri.

²⁸ Ha'e gui peē Egito pygua kuery voi penemopēmbaa avi 'rā opire omboi uka e'ŷ va'e kuery mbyte py, penenhono porāa 'rā guive kyxe py ojuka pyre kuery mboae reve.

²⁹ — Ha'e py ma Edom pygua huvixa kuery ha'e yvatekueve ha'e javi ikuai. Ha'e kuery ipo'akapa va'ekue ri omboguejypaa kyxe py ojuka pyre-pyre reve. Ha'e ramo opire omboi uka e'ŷ va'ekue reve onhonoa yvykua py omboguejy pyre ha'e javi reve.

³⁰ — Ha'e py ikuai avi kuaray apu'a'ia katyguia yvatekueve. Ha'e kuery ma Sidom pygua kuery oipyxo pyre reve omboguejya avi, oximba reve ikuai, opo'akaa py nanhomboeko-rāvei va'ekue ri. Ha'e py opire omboi uka e'ŷ va'ekue reve ikuai, kyxe py ojuka pyre kuery oximba rei reve yvykua py omboguejypaa va'ekue mbyte.

³¹ — Faraó ma ha'e kuery ha'e javi oexa vy ový'apa 'rā ojeupeguia kuery reve. Tá, Faraó ha'e ixondaro kuery ha'e javi 'rā ový'a, kyxe py ojukaa avi va'ekue mbyte onhono porāa ramo — he'i SENHOR Nhanderuete.

³² — Mba'eta Faraó ha'e ixondaro kuery ha'e javi ma nhomondyipaarā amoī va'ekue okuave va'e kuery yvy re. Va'ekue ri ha'e voi onhono porāa 'rā opire omboi uka e'ŷ va'ekue kyxe py ojuka pyre mbyte py — he'i SENHOR Nhanderuete.

33

Tetā rarōa oikuua pota porā aguā re ijayvuague

¹ Ha'e gui SENHOR oayvu ombou ju xevy. Ha'e vy aipoe'i:

² — Ava ra'y, ndeayvu ke neretarā kuery pe. Ha'e vy aipo're ha'e kuery pe: Peteĩ yvy re kyxe revegua ambou ramo ha'e pygua kuery oiporavo 'rā peteĩ ava ha'e pygua ae, ha'e vy omoī 'rā guetā rarōarā.

³ Ha'e ramo ha'e va'e ma yvy re kyxe revegua ou rā oexa vy mimby guaxu omonhe'ē 'rā guetarā kuery omonheangu aguā.

⁴ Ha'e gui xapy'a rei mimby guaxu nhe'ē amongue oendu teĩ nonheangui rei ramo kyxe revegua ou vy ojuka 'rā. Ha'e rami rā hexe ae 'rā oī huguy omoēague re opaga aguā,

⁵ mba'eta mimby guaxu nhe'ē oendu teĩ nonheangui rire. Hexe ae 'rā oī huguy omoēague re opaga aguā. Ha'e rā mimby nhe'ē oendu vy onheangui va'e ma ogueraa jepe 'rā guekove.

⁶ Ha'e rami teĩ xapy'a rei tetā rarōarā omoī mbyre ma kyxe revegua ou rā oexa teĩ mimby guaxu nomonhe'ēi tetā pygua kuery omonheangu aguā. Ha'e gui kyxe revegua ou vy oipe'apa 'rā tetā pygua rekove. Xapy'a rei ojuka pyre heko vaia reve 'rā ojukaa teĩ huguy omoēague re ambopaga 'rā tetā rarōa.

⁷ — Ha'e gui ma ndee ava ra'y, xee romoī Israel kuery rarōarā, ayvu xejuru guigua ndee rendu vy ha'e kuery pe ju remombe'u aguā.

⁸ Xapy'a rei heko vai va'e kuery pe aipoa'e 'rā: “Ndee nderekoi vai va'e, anhetē ete remano 'rā”, ha'e teĩ ndee ha'e kuery pe nandeayvui 'rā ikuaiaty gui ojepe'a aguā re. Ha'e rami rā ha'e kuery omano 'rā gueko vaiague py teĩ huguy onheēague re ndee 'rā rombopaga.

⁹ Ha'e gui xapy'a rei heko vai va'e kuery pe ndeayvu ikuaiaty gui ojepe'a aguā re, va'eri ha'e kuery ndojeko rerovai vy ma omano 'rā gueko vaia py ae. Ha'e rā ndee ma reo jepe 'rā.

¹⁰ — Ha'e gui ndee ava ra'y, ndeayvu ke Israel kuery pe. Ha'e vy aipo're 'rā: Peẽ kuery aipopeje: “Nhandeapua ha'e jajejavya nhandere oī va'e káuxa ae japa javy. Mba'exa 'rā tu ha'vy jaikove?” peje.

¹¹ Aipo're ha'e kuery pe: Anhetē ete xee SENHOR Penderuete xee ae rekove rupi aura vy aipoa'e: “Xee ndavy'ai heko vai va'e kuery omano rā, ha'e rā gueko vaiaty gui ojeko rerova vy oikove ju ramo anho. Ha'e nunga rupi Israel kuery, pejeko rerova, pejeko rerova ke pendeko vaia gui. Mba'erā tu pemano rive?” ha'e.

¹² — Ha'e nunga rupi ava ra'y, aipo're 'rā neretarā kuery pe: Xapy'a rei heko porā va'ekue heko vai ri ramo ymave rupi teko porā rupi oikoague ndogueraa jepei 'rā. Ha'e rami ae avi heko vai va'ekue ojeko rerova ri ramo ymave rupi teko vai rupi oikoague ma nomokanhyi 'rā. Ha'e rami ae avi heko pora va'ekue ri ojejavya ára py heko porāague rive ndojapoi 'rā oikove aguā ramí.

¹³ Ha'e gui xapy'a rei heko porā va'e pe “Anhetē ete reikove riae 'rā” ha'e teĩ ha'e va'e ma gueko porāa re rive ojeroviaa rupi ojejavvy ramo xee naxema'endu'avei 'rā teko porā rupi oikoague re. Ha'e rami 'rāgue py omano 'rā gueko vaia py ae.

¹⁴ Ha'e rami ae avi xapy'a rei heko vai va'e pe “Anhetē remano 'rā” ha'e teĩ ojejavvytaty gui ojeko rerova vy ha'evea rami ha'e teko porā rupi anho ju 'rā oiko.

¹⁵ Ha'e rami vy ha'e va'e heko vai va'ekue omboekovia ju 'rā mba'emo oiporu uka va'ekue, opaga 'rā ju mba'emo re imondaague repy, ha'e ayvu tekove me'ea rupi oiko, heko vaiague rupi 'rāgue py. Ha'e rami ri vy oikove 'rā, noomanovei 'rā.

¹⁶ Mba'eta heko vaiague re naxema'endu'avei 'rā hovai. Ha'evea rami ha'e teko porā rupi ju oiko vy oikove 'rā.

¹⁷ — Ha'e rami teĩ neretarã kuery aipoe'i: “ SENHOR ma ha'eve'ŷa rami nhanderereko”, he'i va'eri ha'e kuery ae ha'eve'ŷa rami ikuai va'e.

¹⁸ Mba'eta heko porã va'ekue ma xapy'a rei teko porã gui ojope'a vy teko vai rupi ju oiko vy ma omano 'rã gueko vaia káuxa rive.

¹⁹ Ha'e rã heko vai va'ekue ma heko vaitaty gui ojeko rerova vy ha'evea rami ha'e teko porã rupi ju oiko vy ma oikove 'rã.

²⁰ Ha'e ramive ma peẽ kuery aipopeje: “ SENHOR ma ha'eve'ŷa rami nhanderereko”, peje. Ha'e nunga rupi peẽ Israel kuery, xee aikuua pota 'rã peteĩ-teĩ peikoa re.

Israel kuery ojee rive ojeroviaa re ijayvuague

²¹ Ha'e gui doze ma'etý re ma escravo-rã nhandereraa ague py nhandekuai jave, dez jaxya ha'e cinco araa py ma peteĩ ava ou xea py Jerusalém gui onha va'ekue. Ha'e vy aipoe'i:

— Tetã oipe'aa ma — he'i.

²² Ne'exa, ha'e va'e ka'aru ma xere SENHOR po oĩ va'ekue, onha va'ekue ovaẽ e'ŷ mbove. Ha'e rami vy ko'ëgue ju ha'e va'e ava xea py ou e'ŷ mbove'i xejuru oipe'a ju. Ha'e ramo xeayvuve ju, nakyrirívei.

²³ Ha'e ramo xevy SENHOR ombou oayvu. Ha'e vy aipoe'i:

²⁴ — Ava ra'y, Israel kuery regua tetã ombovaipa pyre rupi ikuai va'e ijayvu vy aipoe'i okuapy: “Abraão ma ha'e ae'i oiko va'eri ipo py omboaxaa raka'e kova'e yvy. Ne'exa, nhande kuery katuve ma nhandereta ete ramo kova'e yvy ome'ẽa ae nhandekuai aguã”, he'i okuapy.

²⁵ Ha'e rami teĩ aipo're ha'e kuery pe: Po rami ijayvu SENHOR Nhanderuete: Peẽ kuery ma xo'o ha'e huguy rewegua pe'u, ha'e tuuete ra'angaa perekó va'e re pema'ẽ, joguy pemoẽ pekuapy guive. Ha'e nunga rupi peẽ kuery nda'u penderekoa 'rã teve yvy re?

²⁶ Peẽ kuery ma pendekyxe re rive pejeroviave va'e, ojeguarupy pejapo, peneirũ kuery ra'yxy reve guive pejejavy. Ha'e nunga rupi nda'u yvy re penderekoa 'rã teve?

²⁷ — Aipo're ha'e kuery pe: Anhetẽ ete xee SENHOR Penderuete xee ae rekove rupi aura vy aipoa'e: Tetã ombovaipa pyre ikuai va'e ojukaa 'rã kyxe py, ha'e rã tetã rovai rupi ikuai va'e ma amboaxa 'rã mymba nharõ omondoropa ha'e ho'upa aguã. Ha'e gui onhemiaty ha'e itakua rupi onhemi va'e ma mba'eaxy gui 'rã omano.

²⁸ Mba'eta pendeyvy xee ambovaipa uka 'rã tekao ve'ŷ optya aguã, ha'e ramo pendepo'akaa pejou porã 'rãgue py penemo'yvy'i ia 'rã. Israel regua yvyty ikuai va'e rupi voi jipoavei 'rã avave rei, ha'e rupi ndoaxaavei 'rã guive.

²⁹ Ha'e ramo peikuua 'rã xee ae SENHOR aikoa, pendeyvy tekao ve'ŷ optya aguã xee ambovaipa uka ramo, ojeguarupy pejapo rupi pendekuaia re.

³⁰ — Ha'e gui ndee ava ra'y, tetã kora ha'e ngoo rokẽ rupi neretarã kuery ijayvu okuapy ndere. Joupe-upa 'rã ijayvu peteĩ-teĩ guyvy ha'e guyke'y kuery reve. Ha'e vy aipoe'i 'rã: “Ajerure pêvy, peju ke, jaa nhaendu aguã SENHOR ayvu omombe'ua rã”, he'i okuapy.

³¹ Ha'e rami vy ha'ekue rami ae 'rã ou ndea py, ha'e nerendone rupi oguapypa 'rã okuapy xevygua kuery rami. Ha'e vy ndeayvua oendu 'rã teĩ nda'ikuaxiei ha'ekue rami. Ojuru py porayvu va'e rami ijayvu, ha'e rã opy'a py ma jokorepaa rupi anho ikuai.

³² Mba'eta ha'e kuery pe rã ndee mborayvu rupi oporai va'e rami reiko, amongue oporai porã ha'e imba'epu kuaa va'e rami rive. Mba'eta ndeayvua oenduxe vai merami teĩ nda'ikuaxiei ha'ekue rami.

³³ Ha'e nunga ha'e javi oiko, ojeupitypa ramo ha'e kuery oikuua 'rã ha'e kuery mbyte rupi profeta oiko ra'eague.

Israel kuery re nopena porãi va'e kuery rovai ijayvuague

¹ Ha'e gui SENHOR oayvu ombou vy aipoe'i xevy:

² — Ava ra'y, ndeayvu ke Israel kuery re opena va'e kuery rovai. Ha'e vy aipo're: Po rami ijayvu SENHOR Nhanderuete. Nda'evei ete 'rã Israel kuery re opena va'erã omoĩ

mbyre va'eri ojee ae rive opena va'e kuery pe! Xevyguá vexa'i kuery re opena va'erā omoī mbyre e'ŷ teve?

³ Mba'eta xo'o ikyra-kyrave va'e pe'upa pekuapy, hague py ma penhemonde, ha'e pemongyrapa va'ekue ma pejuka tema pekuapy. Ha'e rami teĩ vexa'i kuery re ma napepenai.

⁴ Mba'eta ikangykue napemombaraetei, imba'eaxy va'e napeipoanoi, opē va'ekue napemboje'ai, ojepe'a va'ekue ndaperujeysi, ha'e okanhugue ma voi ndapeka jeysi. Ha'e rami 'rāgue py perekoyi, pemboaxya rupi e'ŷ.

⁵ Xerymba kuery re opena porā va'e ndoikoi ramo oaīmba oje'oivy, ha'e mymba inharō va'e nhuūndy rupigua rembi'urā rive ikuai.

⁶ Ha'e ramo xerymba kuery ma opa rupi ikuai yvyty ha'e yvy'ā ikuai va'e áry rupi. Yvy jave rupi oaīmba okuapy, hekaarā ha'e heru jevarā ndoikoi ramo.

⁷ — Ha'e nunga rupi joe opena va'erā omoī mbyre kuery, pendu ke SENHOR ayvu:

⁸ Anhetē ete xee SENHOR Penderuete xee ae rekove rupi aura vy aipoa'e: Xevyguá vexa'i kuery pemboaxapa hi'uarā kuery pe, ha'e ramo mymba inharō va'e nhuūndy rupigua kuery rembi'urā ikuai, opena va'erā ndoikoi ramo, mba'eta joe opena va'erā amoī va'ekue ndokai okuapy xevyguá kuery, ojee ae rive opena okuapy, xevyguá kuery re'ŷ.

⁹ Ha'e nunga rupi joe opena va'erā romoī va'ekue, pejapyxaka ke SENHOR ayvu re.

¹⁰ Po rami ijayvu SENHOR Penderuete: Ne'exa, xee ma aiko joe opena va'e kuery rovai, ha'e rami vy ha'e kuery po py ndaejavei 'rā xevyguá vexa'i kuery. Amomba 'rā joe openaa, ojee ae rive nopenavei aguā. Ha'e kuery juru gui xee araa jepeda 'rā xevyguá vexa'i kuery, ho'u va'erā rive ikuai ve'ŷ aguā.

Ojeupeguá kuery re SENHOR opena porā aguā re ijayvuague

¹¹ Ha'e nunga rupi po rami SENHOR Nhanderuete ijayvu:

— Ne'exa, xee ae aeka 'rā xevyguá kuery, arupa 'rā guive.

¹² Mba'eta mymba kuery re opena va'e ma ha'e kuery oaīmba rā oexa vy oguerupa ju 'rā. Ha'e rami ae avi xee voi aru 'rā xevyguá kuery. Araipa ha'e pytūmbaa ára py ha'e kuery omoāfagie ha'e javi rupi gui xee araa jepe 'rā.

¹³ Opa rupi yvy regua ikuiai gui aipe'a vy amboatypa 'rā, ha'e vy ijyvy re ae ju 'rā aru. Amongaru 'rā Israel regua yvyty ikuai va'e rupi, yakā ikuai va'e yvýry, tekao rupi guive.

¹⁴ Nhuūndy porā rupi 'rā areko, Israel regua yvyty yvateve va'e ikuiai rupi. Ha'e ramo onheno 'rā okuapy nhuūndy porā reia rupi Israel regua yvyty re.

¹⁵ Xee ae 'rā apena xevyguá kuery re, amombytu'u 'rā guive — he'i SENHOR Nhanderuete.

¹⁶ — Ha'e rami vy aeka 'rā okanhugue, ojavy va'ekue ma arupa ju 'rā, opēgue ha'e ikangykue ma amombaraete ju 'rā. Ha'e rā ikyra rei va'e ha'e ipo'akakueve ma amomba 'rā. Mba'eta teko porā rupi 'rā apena.

¹⁷ — Ha'e gui peẽ kuery xevyguá pendekuai va'e re ma po rami SENHOR Penderuete ijayvu: Ne'exa, aikuua pota 'rā xerymba kuery ha'e javi re, vexa'i ava ha'e kavara ava re guive.

¹⁸ Peẽ kuery peguarā nhuūndy porā reia ame'ē va'e nda'u nda'evei ri? Mba'exa tu ha'vy nhuūndy mboae rupi voi pepyrōmba rei rive? Peẽ kuery pe nda'evei ri ty'y yy porā ame'ē va'ekue? Mba'exa tu ha'vy yy mboae voi pepyrō vy pemongy'apa rei?

¹⁹ Mba'eta xerymba kuery ma nhuū pepyrōmbaague rupi rive okaru, ha'e yy pemongy'apa va'ekue oy'u okuapy.

²⁰ Ha'e nunga rupi po rami SENHOR Nhanderuete ijayvu joguereko axya kuery pe:

— Ne'exa, xee ae aikuua pota 'rā vexa'i kuery ikyrakueve ha'e iporiaukue re.

²¹ Mba'eta peẽ kuery ma pendeaxi'y py penhomoanha-anha heravy, ha'e penderakua py peikutu pekuapy ikangykue'i, pemoxēmba peve.

²² Ha'e rā xee ma araa jepeda 'rā xevyguá kuery ho'upa pyrā rive ikuai e'ŷ aguā, vexa'i ikuai va'e re aikuua potaa py.

²³ Ha'e kuery pe peteī ambou 'rā opena va'erā omongaru porā aguā. Xerembiguai Davi ae 'rā omongaru ha'e opena.

²⁴ Xee aiko 'rā ha'e kuery ruete, ha'e rā xerembiguai Davi ma ha'e kuery mbyte rupi 'rā oiko huvixave. Xee SENHOR ae xeayvu ha'e rami.

²⁵ — Ha'e gui ha'e kuery pe ajapo 'rā xereve ikuai porā aguā. Ha'e rami vy amomba 'rā mymba nharō yvy re ikuai va'ekue. Ha'e ramo xevyguia kuery tekoia e'ŷa rupi ikuai, ha'e ka'aguy rupi oke teī mba'eve ndoikoi 'rā.

²⁶ Mba'eta xee amoingo porā 'rā, xevyguia yvyty yvýry rupi voi. Ha'e rami vy hi'ára py porā 'rā ambou oky amoingo porāa rupi.

²⁷ Ha'e gui yvyra ikuai va'e hi'apa 'rā, ha'e yvy re oiko 'rā mba'emo aju pyau. Ha'e ramo yvy re ha'e kuery ikuia rupi mba'eve ndoikoi 'rā. Ha'e kuery oikuua 'rā xee ae SENHOR aikoa, mba'eta ha'e kuery re canga omoī mbyre amopēmba vy aipe'apa 'rā escravo-rā ogueraa va'ekue po gui.

²⁸ Ha'e rami rire ha'e kuery nda'ikuaivei ma 'rā amboae regua kuery omokō va'erā, mymba yvy re ikuai va'e voi nomondorovei 'rā. Ha'e rami 'rāgue py ikuai porā 'rā, imondiyarā ndoikoi rā.

²⁹ Ha'e kuery pe ajapo 'rā onhotŷ va'ekue oiko porā ete aguā, ha'e ramo yvy re ikuai teri reve karuai omomba ve'ŷ aguā. Noenduvei 'rā guive amboae regua kuery ojojai reia.

³⁰ Ha'e ramo oikuua 'rā ha'e kuery reve xee SENHOR tuuete aikoa, ha'e rā Israel kuery ae xevyguia ikuia — he'i SENHOR Nhanderuete.

³¹ — Peē xerymba vexa'i kuery pendekuai va'e ma avakue peiko, ha'e rā xee ma Penderuete — he'i SENHOR Nhanderuete.

35

Seir yvyty re ikuai va'e kuery rovai ijayvuague

¹ Ha'e gui xevy SENHOR oayvu ombou vy aipoe'i:

² — Ava ra'y, ema'ẽ na Seir yvyty katy, ha'e vy ndeayvu ke ha'e kuery rovai.*

³ Aipo're ha'e kuery pe: Po rami SENHOR Nhanderuete aipoe'i: Ne'exa Seir yvyty re pendekuai va'e, xee ma penderovai aiko. Ha'e rami vy penderovai xepo aupi vy ajapo 'rā pekanhymba aguā rami nhomondyipaarā.

⁴ Peē kuery retā ambovaipa uka 'rā tekoague opyta aguā. Ha'e ramo peikuaa 'rā xee ae SENHOR aikoa.

⁵ Mba'eta Israel kuery re napenda'e riae vy pemboaxa kyxe py ojuka va'erā pe, ha'e kuery opaa py omoingo axya ete jave.

⁶ Ha'e nunga rupi anhetē ete xee SENHOR Penderuete xee ae rekove rupi aura vy aipoa'e: Peē kuery voi xee romboaxa 'rā penderuguy moēarā pe, penderakykue monha aguā. Jouguy pexaxe vai rire penderuguy moēarā ju 'rā ou penderakykue.

⁷ Mba'eta Seir yvyty ambovaipa ete vy ha'e gui amomba 'rā oaxa ha'e ojevy aguā va'ekue ha'e javi.

⁸ Ha'e va'e yvyty amonyē 'rā oipyxo pyre anho. Mba'eta kyxe py oipyxo pyre ho'a 'rā pendeyvy rupi yvyty, yvyugua ha'e yakā ikuai va'e yvýry.

⁹ Ha'e rami vy pendekuaia ma raka'eve rā peve ajapo 'rā tekoia ve'ŷ oī aguā rami, peneretā py noīavei aguā. Ha'e ramo peikuaa 'rā xee ae SENHOR aikoa.

¹⁰ — Mba'eta aipopeje va'ekue: "Mokoī regua ha'e mokoīve yvy opyta 'rā xemba'e ae. Xee ae 'rā aiko ha'e py, SENHOR ha'e py oiko avi tei", peje va'ekue.†

¹¹ Ha'e nunga rupi anhetē ete xee SENHOR Penderuete xee ae rekove rupi aura vy aipoa'e: Xee rombopaga 'rā joupe pendepoxy ha'e joe napenda'eia rami ae, mba'eta pendevai rei reve perekoxa va'ekue xevyguia kuery. Ha'e gui peē kuery re aikuua pota ramo ha'e kuery voi oikuua 'rā xereko.

* 35:2 Seir yvyty ma Edom kuery ikuia. Ha'e kuery ma Israel kuery rovaigua ikuai raka'e. † 35:10 "Mokoī regua" he'ia ma Judá ha'e Israel kuery re ijayvu vy.

¹² Israel regua yvyty re pendeayvu vai vy aipopeje: “Ombovaipaa ma ramo nhandevy pe ju optya 'rā nhuñndyrā rive”, peje va'ekue. Ha'e rami pendeayvu rā xee SENHOR aendupa, ha'e peē voi peikuaa 'rā xee aenduague.

¹³ Mba'eta peē kuery ma pendeayvu py penhemboyvate reive va'ekue xerovai, xere pendeayvu rei vaipa. Ha'e ramo xee aendupa.

¹⁴ Ha'e nunga rupi SENHOR Penderuete ijayvu po rami: Yvy jave rupi ov'y'a pavē jave teī peē kuery ma xee romokanhymba 'rā.

¹⁵ Israel kuery omokanhymbaa jave pevy'a reiague rami ae 'rā xee ju ajapo pendere. Mba'eta peē Seir yvyty re Edom kuery pendekuai va'e, penemokanhymbaa katu'i 'rā. Ha'e ramo peikuaa 'rā xee ae SENHOR aikoa.

36

Israel regua yvyty ikuai va'e pe ijayvuague

¹ — Ndee ava ra'y, emombe'u ke xeayvu Israel regua yvyty ikuai va'e pe. Ha'e vy aipo're: Israel regua yvyty pendekuai va'e, pendu ke SENHOR ayvu.

² Po rami SENHOR Nhanderuete ijayvu: Penderovaigua kuery pendevy aipoe'i: “Ha'evea rami! Tekoa imarā e'ŷ va'ekue ma nhandevy meme optya”, he'i okuapy.

³ Ha'e rami rā ndee Ezequiel, emombe'u ke xeayvu, ha'e vy aipo're yvyty ikuai va'e pe: Po rami ijayvu SENHOR Nhanderuete: Amboae regua kuery penemomba ha'e jova-jovai katy gui penemombaxe ojeupe ju penemombyta aguā, xevyguia kuery re ijayvu vai guive ojojal reia rupi.

⁴ Ha'e rami teī, peē Israel regua yvyty pendekuai va'e, pendu ke SENHOR Nhanderuete ayvu. Po rami SENHOR ijayvu yvyty ha'e yvy'ā ikuai va'e pe, yakā ha'e yvyugua ikuai va'e pe, ha'e tekoia e'ŷa ombovaipa pyre, ha'e tetā oeja pyre ikuai va'e pe, mba'eta ha'e katy'i rupi amboae regua kuery ikuai va'e oipe'apa, ojojal rei okuapy guive.

⁵ Ha'e rami teī po rami SENHOR Nhanderuete ijayvu: Anhetē xee nda'evei etea hendy va'e rupi xeayvu yvy regua kuery ha'e Edom pygua ha'e javi pe, mba'eta xeyvy ha'e kuery ojopy va'ekue omba'erā, okuraxō py ov'y'a rei ha'e onhe'ē py xejojai rei reve. Ha'e ramo vy oipe'apa hekoya va'ekue, ogueraapa guive imba'e rei-rei va'ekue.

⁶ Ha'e nunga rupi emombe'u xeayvu Israel yvy re. Ha'e vy aipo're yvyty ha'e yvy'ā, yakā ha'e yvyugua ikuai va'e pe: Po rami ijayvu SENHOR Nhanderuete: Ne'exa, xee ma nda'evei etea ha'e xepoxya rupi xeayvu, mba'eta yvy regua kuery pendejnjai rei okuapy.

⁷ Ha'e nunga rupi po rami ijayvu SENHOR Nhanderuete: Xepo aupti reve xee aura yvy regua kuery pendejnjai reiague ma pendevyvýry rupi ikuai va'e áry ae ju 'rā ojeapa.

⁸ — Ha'e rā peē Israel regua yvyty pendekuai va'e, pendere ikuai nho 'rā yvyra hakā ha'e hi'a va'e xevyguia Israel kuery pe, mba'eta ha'e kuery ou ju aguā ramo ikuai.

⁹ Mba'eta ne'exa, xee aiko 'rā pendereve. Ajevy 'rā pendea py. Ha'e ramo pende'áry rupi yvy oikaraña ha'e oma'etŷa ju 'rā.

¹⁰ Pende'áry amboeta ju 'rā avakue, Israel kuery ha'e javi regua, tá, ha'e javi 'rā ikuai. Ha'e ramo ha'e kuery ma guetā rupi ae ju 'rā ikuai, mba'eta ivaipaague py ojapo ju 'rā ngoorā.

¹¹ Pende'áry rupi amboeta 'rā avakue ha'e mymba kuery. Ha'e kuery heta ha'e ta'y reta 'rā ov'y. Jypy guare gui xee romoingo porāve 'rā. Ha'e ramo peikuaa 'rā xee ae SENHOR aikoa.

¹² Pende'áry rupi ajapo 'rā xevyguia Israel kuery oguata ju aguā ramo. Pepyta 'rā ha'e kuery pegua, ndapejapovei 'rā guive ta'y kuery okanhy aguā ramo.

¹³ Po rami SENHOR Nhanderuete ijayvu ha'e kuery yvy pe:

— Ndevy pe aipo'rea: “Ndee ma yvy avakue mombaa, ha'e ta'y kuery okanhy aguā ramo rejapo va'e”, 'ea va'ekue teī.

¹⁴ Ha'e nunga rupi ndee neremombavei ma 'rā avakue, ndapejapovei 'rā ndea pygua ra'y kuery okanhy aguā ramo — he'i SENHOR Nhanderuete.

¹⁵ — Xee ma amboae regua kuery pe ndorojojai rei ukavei 'rā rendu aguā, ha'e ramo nerenduvei 'rā yvy regua kuery nembojaru reia, nderejapovei 'rā guive ndea pygua kuery ojejavu aguā rami — he'i SENHOR Nhanderuete.

Israel kuery omoingo porā ju aguā re ijayvuague

¹⁶ SENHOR oayvu ombou vy aipoe'i xevy:

¹⁷ — Ava ra'y, Israel kuery oyvy re ikuai teri reve opa marā ikuai ha'e mba'emo ojapoa py omongy'apa rei va'ekue. Kunha gueko re oiko va'e rami ha'e kuery voi ha'eve'ŷ va'ekue xerenonde.

¹⁸ Ha'e nunga rupi ha'e kuery re ambou xepoxya, ha'e kuery yvy re jouguy omoē okuapy ha'e mba'emo ra'angaa py omongy'apaague re.

¹⁹ Ha'e rami vy amoāimba va'ekue yvy regua kuery ikuiaia rupi, araa ukapa yvy jave rupi. Xee ambopaga opa marā ikuai ha'e mba'emo ojapoague re.

²⁰ Ha'e rami py yvy regua kuery ikuiaia py mamo rā ha'e kuery oje'oia rupi ojapo okuapy xerery iky'a va'ea rami rive oikuua aguā rami, mba'eta ha'e kuery pe aipo'ea: "Peva'e kuery ma SENHOR pegua va'eri ijyvy gui omoxēmba va'ekue", 'ea.

²¹ Ha'e rami rā Israel kuery oje'oia rupi ojapo okuapy yvy regua kuery xerery iky'a e'ŷ va'e nomboetei aguā rami. Ha'e rami teñ xee amboete uka nho.

²² — Ha'e nunga rupi aipo're Israel kuery pe: Po rami SENHOR Nhanderuete ijayvu: Peẽ Israel kuery re ama'ẽ vy e'ŷ ha'e nunga ajapo, ha'e rā xerery iky'a e'ŷ va'e amboete ukaa rupi vy, mba'eta pee kuery ma yvy regua kuery mbyte rupi peoa py xerery napemboete ukai ramo.*

²³ Ha'e nunga rupi amboete uka ju 'rā xerery yvate ha'e iky'a e'ŷ va'e, yvy regua kuery mbyte peoa rupi pemongy'a uka va'ekue ri. Ha'e ramo yvy regua kuery oikuua 'rā xee SENHOR ae aikoa, ha'e kuery renonde iky'a e'ŷ va'e aikoa aexa uka ramo — he'i SENHOR Nhanderuete.

²⁴ — Ha'e rami vy yvy regua kuery mbyte gui xee roguenoẽ 'rā, ha'e yvy jave rupi gui pendeyvy py ae ju rogueru vy romboaty 'rā ha'e py.

²⁵ Ha'e vy pende'áry rupi amboayvi 'rā yy iky'a e'ŷ va'e, napendeky'avei aguā. Ha'e rami vy roiky'a'o 'rā ha'eve'ŷa ha'e mba'emo ra'angaa perekoo va'ekue ha'e javi gui.

²⁶ Pendevy ame'ẽ 'rā kuraxõ pyau, pendere amoī 'rā nhe'ẽ pyau. Pendegui aipe'a 'rā kuraxõ ita guigua, ha'e vy hekivia amoī 'rā pendero'o guigua.

²⁷ Pendere amoī 'rā Xenhe'ẽ ae, ajapo 'rā guive xeayvu rupi pendekuai aguā, xee aipota va'e pemoī porā vy pejapopa aguā rami.

²⁸ Ha'e ramo pendekuai 'rā pendeyvyrā peneramoī kuery pe ame'ẽ va'ekue re. Peiko 'rā xevygua kuery, ha'e rā xee ma aiko 'rā Penderuete.

²⁹ Rogueraa jepe 'rā ha'eve'ŷa ha'e javi gui. Trigo voi ambou reta 'rā, ha'e rā karuai ma nambouvei 'rā pendere.

³⁰ Ajapo 'rā yvyra hi'a porā ha'e mba'ety rupi ipyau va'e oiko porā aguā rami, karuai káuxa yvy regua kuery pendejajai rei ve'ŷ aguā.

³¹ Ha'e ramo penema'endu'a 'rā ha'eve'ŷa rami pendekuaiague ha'e ha'eve'ŷ va'e pejapoague re. Pendejegui ae 'rā pejeguaru pendereko vai ha'e penhemongy'apaague káuxa.

³² Peikuaa porā pota ke: pendere ama'ẽ vy e'ŷ ha'e nunga ajapo. Israel kuery, pexīmba ke ha'e perovy'ave eme pendekuaiague — he'i SENHOR Nhanderuete.

³³ Po rami SENHOR Nhanderuete ijayvu:

— Pendereko vaia ha'e javi gui roiky'a'o vy ajapo avi 'rā peneretā rupi pendekuai ju aguā rami. Ha'e ramo penderorā pejapopa ju 'rā tekao e'ŷague rupi.

³⁴ Peikaraĩ ju 'rā yvy tekao e'ŷa rupi, oaxa va'e kuery oexa vy "Oeja pyre itui" nde'ivei 'rā.

³⁵ Ha'e rami 'rāgue py aipo'ea 'rā: "Kova'e yvy oeja pyre ma Éden yvotyty rami ju iporā. Tetā tekao e'ŷa, oeja pyre ha'e ombovaipa pyre voi ikorapa ha'e oīmbaa ju", 'ea 'rā.

* 36:22 Romanos 2.24

³⁶ Ha'e ramo yvy regua kuery pendeyvýry rupi okuave va'e oikuua 'rā xee SENHOR ae tetā ombovaipa pyre ajapo juague, ha'e pendeyvy oeja pyre rupi ama'etý juague. Xee SENHOR ha'e rami aguã re xeayvu rire ajapopa 'rā.

³⁷ Po rami SENHOR Nhanderuete ijayvu:

— Israel kuery ha'eve ju 'rā xevy ojerure aguã mymba kuery rami amboetave aguã.

³⁸ Ha'e ramo tetā oeja pyre rupi heta ju 'rā xevy guarā omboaxa pyre, Jerusalém tetā py ngaru oiko jave py mymba kuery heta va'ekue rami. Ha'e ramo oikuapa 'rā xee ae SENHOR aikoa.

37

Yvyugua py ikāgue pirukue ikuai va'e oexaague

¹ Ha'e gui xere SENHOR opo omoī vy xereraa Onhe'ẽ rupi. Ha'e vy xemoī peteī yvyugua ikāgue anho ikuiaia mbyte py.

² Ha'e vy ojapo ikāgue yvýry rupi aguata aguã rami. Ikāgue heta ete ikuai yvyugua rupi, ipiru ratā guive.

³ Ha'e gui ma oporandu xevy:

— Ava ra'y, kova'e ikāgue nda'u okuave ju 'rā?

Xee ambovai:

— SENHOR Xeruete, ndee ae 'rā reikuua — ha'e.

⁴ Aipoe'ive ju xevy:

— Ndeayvu na kova'e ikāgue ikuai va'e pe, ha'e vy aipo're: Ikāgue ymague, pendu ke SENHOR ayvu.

⁵ Po rami SENHOR Nhanderuete ijayvu ikāgue ikuai va'e pe: Ne'exa, peē kuery re amoī 'rā Xenhe'ẽ peikove ju aguã.

⁶ Ha'e gui pendere amoī 'rā hajykuerā, ajapo 'rā guive pendero'o ha'e pendepirepa ju aguã rami. Ha'e gui ma pendere amoī 'rā Nhe'ẽ. Ha'e ramo peikove ju 'rā, ha'e peikuua 'rā xee ae SENHOR aikoa — he'i.

⁷ Ha'e ramo ijayvuague rami ae xeayvu. Xeayvu teri reve hevovo rei nhendu va'e aendu, peteī-teī kāgue joe onhemboita-mbota vy oparāgue rei. Ha'e rami vy peteī-teī kāgue onhemboje'apa joe.

⁸ Ha'e ramo ama'ẽ rā ikāgue ikuai va'e hajy ha'e ho'opa ma. Ipire voi ojekuaa, ha'e rā inhe'ẽrā ma noī teri.

⁹ Ha'e gui SENHOR aipoe'i xevy:

— Ava ra'y, Nhe'ẽ pe ju ndeayvu. Ndeayvu vy aipo'ere ixupe: "Po rami SENHOR Nhanderuete ijayvu: Ndee Nhe'ẽ, eju irundy henda yvytu oipejua katy gui. Ha'e vy ke eipeju kova'e omanogue áry rupi, okuave ju aguã rami", 're — he'i.

¹⁰ Ha'e ramo ijayvuague rami xeayvu ramo ikāgue ikuai va'e re ou Nhe'ẽ. Ha'e ramo oikovepa jevy vy opu'ãmba ju joguerokuapy, xondaro kuery rami mbovy rei e'ŷ ikuai.

¹¹ Ha'e gui ma aipoe'ive ju xevy:

— Ava ra'y, kova'e kāgue ma Israel kuery ikuai. Mba'eta aipoe'i okuapy: "Orekāgue ma ipirupa ma, ha'e vy roarō rokuapya voi opa ma. Noīvei ma orerekovea", he'i okuapy.

¹² Ha'e nunga rupi ndeayvu ke. Aipo're ha'e kuery pe: " SENHOR Nhanderuete ma po rami ijayvu: Ne'exa xevygua kuery, aipe'apa ju 'rā penderupa penhono porāague, ha'e rami vy roguenoẽmba ju 'rā ha'e gui, Israel yvy re rogueru aguã.

¹³ Ha'e ramo xevygua kuery, penderupa gui roguenoẽmba ma ramo peikuua 'rā xee ae SENHOR aikoa.

¹⁴ Ha'e gui ma pendere amoī 'rā Xenhe'ẽ, ha'e gui peikove ju 'rā. Rogueru 'rā pendeyvy re ae pendekuai aguã. Ha'e ramo peikuua 'rā xee SENHOR ae ha'e rami aguã re xeayvu ha'e ajapo ete guive", he'i SENHOR.

Judá ha'e Israel kuery reve peteī'i regua ju ikuai aguã re ijayvuague

¹⁵ Ha'e gui SENHOR oayvu ombou vy aipoe'i xevy:

¹⁶ — Ndee ava ra'y, ejou ke peteī yvyra'i, ha'e va'e re embopara po rami: Judá kuery regua, ha'e gui ha'e kuery reve Israel kuery onhemoirū va'ekue regua guive. Ha'e gui ma

amboae yvyra'i ju ejopy vy ha'e va'e re embopara: José ha'e Efraim regua, ha'e gui ha'e kuery reve Israel kuery onhemoirū va'ekue regua guive.

¹⁷ Ha'e gui emboje'a mokoīve, peteī'i yvyra rami ndepo py rerekō aguā.

¹⁸ Ha'e gui ma neretarā kuery oporandu 'rā ndevy. Ha'e vy aipoe'i 'rā: "Emombe'u ke orevy mba'erā he'ia pa nami rejapo va'e?" he'i 'rā okuapy.

¹⁹ Ha'e ramo ndee aipo're 'rā ha'e kuery pe: "Po rami SENHOR Nhanderuete ijayvu: Ne'exa, xee ajopy 'rā José regua yvyra'i Efraim po py oī va'ekue, ha'e gui ha'e kuery reve Israel kuery onhemoirū va'ekue regua guive. Ha'e gui ha'e va'e ma amboje'a 'rā yvyra'i Judá regua reve, peteī'i yvyra rami areko aguā, mba'eta peteī'i 'rā ojeapo xepo py", 're.

²⁰ Ha'e kuery renonde ndeayvu reve ndepo py rerekō 'rā mokoīve yvyra'i ipara oīa va'e.

²¹ — Ha'e gui aipo're 'rā ha'e kuery pe: Po rami SENHOR Nhanderuete ijayvu: Ne'exa, xee anoēmba 'rā Israel kuery yvy regua kuery mbyte ha'e kuery ooague gui, opa rupi gui 'rā amboatypa. Ha'e rami vy arupa ju 'rā ijyvy re ae.

²² Ha'e vy ha'e va'e yvy re ajapo 'rā peteī'i regua ikuai aguā, Israel regua yvyty re. Peteī'i 'rā oī avi ha'e kuery ha'e javi ruvixaverā. Mokoī regua ve'ŷ ma 'rā ikuai. Raka'eve rā teī ndoja'ovei 'rā mokoī reguarā.

²³ Nonhemongy'avei 'rā guive ta'angaa oguereko va'ekue py rive, neī ojeguarupy ha'e tekō vai rupi ikuiai py ma voi. Mba'eta araa jepepa 'rā xegui ojepe'aa rupi ojejavague gui, ha'e gui aiky'a'opa ju 'rā. Ha'e rami vy ikuai 'rā xevygua kuery, ha'e rā xee aiko 'rā Tuuete.

²⁴ — Ha'e kuery re xerembiguai Davi ae 'rā opena. Peteī'i 'rā oiko ha'e kuery re opena va'e. Ha'e ramo xee aipotaa rami anho 'rā ikuai, omoī porā 'rā okuapy xeayvu ojapo ete aguā.

²⁵ Ha'e kuery ikuai 'rā yvy xerembiguai Jacó pe ame'ēague re, tamoī kuery ikuaiague re ae. Ha'e py ae 'rā hekoā, ta'y kuery ha'e hamymino kuery voi, raka'eve rā peve. Huvixaverā ma xerembiguai Davi ae 'rā oiko raka'e rā peve guarā.

²⁶ Ha'e kuery pe ajapo 'rā xereve ikuai porā aguā regua raka'e rā peve guarā. Amoingo porā, amboetave 'rā guive. Ha'e kuery mbyte amoī 'rā xevygua oo iky'a e'ŷ va'e raka'e rā peve guarā.

²⁷ Ha'e kuery mbyte ae 'rā oī xembojerovia aty. Xee aiko 'rā Tuuete, ha'e rā ha'e kuery ma ikuai 'rā xevygua.*

²⁸ Yvy regua kuery voi oikuua 'rā okuapy xee SENHOR ae Israel kuery ky'a'oa aikoa, ha'e kuery mbyte xevygua oo iky'a e'ŷ va'e oī ramo raka'eve rā peve.

38

Huvixa Gogue rovai ijayvuague

¹ Ha'e gui ma SENHOR oayvu ombou vy aipoe'i xevy:

² — Ava ra'y, ema'ē Magogue pygua huvixa Gogue oīa katy. Ha'e va'e ma Rôs, Meseque ha'e Tubal pygua kuery re opena va'e.* Ndeayvu ke hovai,

³ ha'e vy aipo're: SENHOR Nhanderuete po rami ijayvu: Ndee Gogue, Rôs, Meseque ha'e Tubal pygua kuery ruvixa reiko va'e, xee ma nderovai aiko.

⁴ Xee rojapo 'rā rejere aguā rami. Ndejuru py pinda amoī reve rogueraa 'rā mombyry, nexondaro kuery ha'e javi reve. Kavaju ha'e hi'ārygua kuery hembiporupa va'e meme, heta 'rā oje'oi hu'y jokoa ha'e imo'āa tuvixa va'e reve, opo py kyxē reve guive.

⁵ Ha'e kuery irūrā oje'oi avi 'rā Pérsia, Etiópia ha'e Pute pygua kuery, hu'y jokoa ha'e ngora ratā reveyga meme.

⁶ Oje'oi avi 'rā Gômer pygua oxondaro kuery ha'e javi reve, ha'e kuaray ijapu'a'ia katy gui jogueru 'rā Togarma pygua oxondaro kuery ha'e javi reve. Heta ete 'rā oje'oi nderupive.

⁷ — Ha'e nunga rupi Gogue, eiko katu ke. Epu'ā ke nderupiveguia kuery ha'e javi reve, ha'e vy epena ha'e kuery re.

* 37:27 2 Coríntios 6.16 * 38:2 Apocalipse 20.8-9

⁸ Mba'eta hare ma rire roenoī 'rā. Ma'etŷa opaa py ma reo 'rā peteī yvy kyxe gui ndokyjeaveia katy. Ha'e va'e kuery ma yvy regua ikuaiague gui ono'ōmba 'rā jogueruvy Israel regua yvyty hare ma ivaipa va'ekue áry. Ha'e kuery ma yvy regua kuery mbyte gui oipe'aa heruvy rire ikuai porāmba ju 'rā mba'eve gui okyje rei e'ŷ re.

⁹ Ha'e gui ma ha'e kuery rovai peju 'rā yvytu atā rami. Peju 'rā arai yvy ojao'ipa va'e rami, nexondaro kuery ha'e mbovy e'ŷ regua nderupive ou va'e reve.

¹⁰ — Po rami ijayvu SENHOR Nhanderuete: Ha'e va'e ára ma ndepy'a re remoī 'rā mba'emo vai rejapo aguã.

¹¹ Ha'e vy aipo're 'rā: "Aa 'rā peteī yvy tekoa ikora e'ŷ va'e re apu'ã aguã, aa 'rā optyu'u rei va'e kuery rovai. Ha'e kuery ma ikuai porā rei tekoa ikora e'ŷ va'e rupi, okẽ neĩ okẽ jokoa noĩa rupi", 're 'rā.

¹² Ha'e rami vy reo 'rā imba'e rei-rei reipe'a aguã, mba'emo reraapa ha'e ha'e kuery rovai ndepo reupi aguã, mba'eta yvy oeja pyre py ha'e kuery hekoia 'rā yvy regua mbyte gui ono'ō jogueruvy rire. Ha'e kuery ma guymba ha'e omiba'e rei-rei oguerekopa, ha'e yvy mbyte py ikuai va'e.

¹³ Ndevy pe Sabá ha'e Dedā pygua kuery oporandu 'rā okuapy, Társis tetā py mba'emo vendea ha'e huvixa mba'emo pe'aaty kuery voi. Ha'e vy aipoe'i 'rā okuapy ndevy: "Nhomba'e rei-rei peraa aguã pa peju? Mba'emo peipe'a aguã pa nderupiveguia kuery remboatypa? Peipe'a ta pa prata ha'e ouro, peraa ta pa mymba kuery ha'e mba'e rei-rei? Peipe'apa ete 'rā teve?" he'i 'rā okuapy.

Israel yvy re Gogue kuery ou aguã re ijayvuague

¹⁴ — Ha'e gui ava ra'y, ndeayvu ke Gogue pe, ha'e vy aipo're: Po rami ijayvu SENHOR Nhanderuete: Ha'e va'e ára xevygua Israel kuery ikuai porā jave ndee Gogue nda'u ndereikuai 'rā ri ndere oiko va'erā?

¹⁵ Mba'eta kuaray ijapu'a'ia katy nderekhoa gui reju 'rā mbovy e'ŷ regua reve. Kavaju árygua meme 'rā peju, xondaro kuery heta rei ha'e imbaraete va'e meme reve.

¹⁶ Ha'e vy peju 'rā xevygua kuery Israel regua rovai, arai yvy ojao'ipa va'e rami avi. Opaa ára rogueru 'rā xeyvy rovai guarā pavē regua xekuua aguã, mba'eta ha'e kuery oexaa py aexa uka 'rā iky'a e'ŷ va'e aikoa, ndee Gogue re mba'emo ajapoa py.

¹⁷ Po rami SENHOR Nhanderuete ijayvu:

— Nderekorā re yma ma voi xeayvu va'ekue, xeremimbo'e kuery Israel regua profeta ikuai va'e rupi, mba'eta ha'e kuery mbovy e'ŷ rei ma'etŷ re ijayvu va'ekue xevygua kuery rovai guarā xee rogueru aguã re — he'i.

¹⁸ SENHOR Nhanderuete aipoe'ive ju:

— Ha'e va'e ára Israel yvy re Gogue ou ramo aexa uka ete 'rā xepoxya.

¹⁹ Mba'eta xee nda'evei ete ha'e xepoxya hendy va'e rupi aipoa'e: Ha'e va'e ára amboryryipa 'rā Israel yvy jave rupi.

²⁰ Ha'e ramia gui xerenonde oryryipa 'rā pira ye'ē rupigua, guyra yva regua, mymba yvy regua, yvy rupi otyryry va'e, ha'e avakue yvy re ikuai va'e ha'e javi. Yvyty ikuai va'e ho'apa 'rā yvy'ã guy katy, itaova ha'ypa 'rā, ha'e tetā kora ikuai va'ekue voi ho'apa 'rā yvy py.

²¹ SENHOR Nhanderuete aipoe'i:

— Ha'e gui Gogue kuery rovai ambou 'rā kyxe, yvyty re ha'e kuery ikuai rupi. Ha'e ramo peteī-teī okyxe oiporu 'rā oirū kuery rovai ae.

²² Mba'eta ambopaga 'rā mba'eaxy ha'e huguy moẽarā py. Hi'áry ambou 'rā oky ja'ea, amandau tuvixa va'e ha'e tata enxofre reveguia. Ha'e nunga ho'a 'rā ixondaro kuery ha'e hexeveguia yvy regua kuery heta ikuai va'e áry.

²³ Ha'e rami vy xee anhemboyvate 'rā, aexa uka 'rā guive iky'a e'ŷ va'e aikoa. Pavē regua oexaa py 'rā ajekuua uka. Ha'e ramo pavē 'rā oikuaa xee ae SENHOR aikoa.

¹ — Ha'e nunga rupi ndee ava ra'y, ndeayvuve ju Gogue rovai. Ha'e vy aipo're: Po rami ijayvu SENHOR Nhanderuete: Ne'ixa Gogue, xee aiko nderovai, Rôs, Meseque ha'e Tubal pygua ruvixa reiko va'e.

² Xee rojapo 'rã rejere aguã rami, kuaray ijapu'a'ia katy gui roguenoẽ 'rã heruvy Israel regua yvyty ikuai va'e re.

³ Ha'e gui nderapa aipe'a 'rã ndeaxua gui, ha'e hu'y ma aitypa 'rã reiporu kuaa regua gui.

⁴ Ha'e ramo re'a 'rã Israel regua yvyty re nexondaro kuery ha'e yvy regua kuery nderupive ou va'ekue ha'e javi reve. Ha'e ramo romboaxapa 'rã opa marãgua guyra ha'e mymba yvy regua pe pende'u aguã.

⁵ Pe'a 'rã nhuündy rupi rive, ha'e rami aguã re xeayvu rire — he'i SENHOR Nhanderuete.

⁶ — Amboja 'rã tata Magogue yvy re ha'e ye'ẽ yvýry okyje e'ŷ re ikuai va'ekue re. Ha'e ramo oikuaa pavẽ 'rã xee ae SENHOR aikoa.

⁷ Xevygua Israel kuery mbyte rupi aikuaa uka 'rã xerery iky'a e'ŷ va'e, namongy'a ukavei ma 'rã guive. Ha'e ramo yvy regua kuery oikuaapa 'rã Israel kuery mbyte rupi xee SENHOR iky'a e'ŷ va'e aikoa.

⁸ Ne'ixa, ha'e nunga ou ma oiny, oiko ta ma. Kova'e ára re ae xeayvuague — he'i SENHOR Nhanderuete.

⁹ — Ha'e gui ma Israel regua tetã pygua kuery oẽmba jogueruvy vy oapypa 'rã ngovaigua kuery rembiporukue: hu'y jokoa, imo'aa tuvixa va'e, guyrapa, hu'y, yvyra raimbe ha'e hu'y guaxu. Sete ma'etý peve 'rã ogueraa ha'e nunga ha'e javi oapypa aguã.

¹⁰ Ha'e va'e jave ma ndoguerui 'rã yxakã mba'ety gui neĩ ka'aguy gui, mba'eta tembi-porukue gui ae 'rã ojapo tata. Ha'e rami vy ogueraapa ju 'rã mba'emo reraa are kuery mba'ekue, oipe'apa ju 'rã mba'emo pe'aare kuery mba'ekue — he'i SENHOR Nhanderuete.

Gogue pegua xondaro kuery re'õgue ojatypaa ague

¹¹ — Ha'e va'e ára Gogue kuery pe ame'ẽ 'rã Israel yvy re he'õgue ruparã rive, yvyugua ye'ẽ regua kuaray oua katy oguataaty rupi. Ha'e py ma ojatya 'rã Gogue ixondaro kuery ha'e javi reve. Ha'e rami rire omboerya 'rã yvyugua Gogue kuery ikuiaia.

¹² Sete jaxy peve 'rã Israel kuery ojaty he'õgue, oyvy oiky'a'opa ju aguã.

¹³ Ha'e va'e yvy regua kuery ha'e javi 'rã ojaty. Ha'e kuery ima'endu'a riae 'rã xee anhemboyvatea ára re — he'i SENHOR Nhanderuete.

¹⁴ — Ha'e gui oiporavoa 'rã avakue yvy jave rupi oiko-oiko tema va'erã, oeka vy amboae guigua re'õgue ojaty pyrã, yvy oiky'a'opa ju aguã. Sete jaxy rire mae ma omboypy 'rã te'õgue oeka aguã.

¹⁵ Ha'e kuery ma yvy jave rupi oiko-oiko temaa rupi ava kãgue oexa nhavõ omarka 'rã ijyvýry rupi, ha'e gui ijatyarã ju ou vy ojaty aguã yvyugua Gogue kuery ikuiaia py.

¹⁶ Ha'e va'e tetã voi omboerya 'rã Gogue kuery ikuiaia. Ha'e rami vy 'rã oiky'a'opa ju oyvy.

SENHOR peguarã ojukapaa aguã re ijayvuague

¹⁷ — Ha'e gui ndee ava ra'y, endu ke. Po rami SENHOR Penderuete ijayvu. Aipo're 'rã guyra ikuai va'e ha'e mymba ka'aguy regua pe: Peno'õmba pejogueruvy, opa rupi gui peju ajuka uka va'ekue pe'upa aguã. Pendevy pe areko katu, Israel regua yvyty ikuai va'e rupi ajuka uka reta. Ha'e ramo pe'u 'rã xo'o ha'e pey'u 'rã tuguy.

¹⁸ Mba'eta pe'u 'rã ipo'akapa va'e ro'okue, ha'e pey'u 'rã yvy regua yvatekueve ruguy, vexa'i ava ha'e ta'y'i, kavara ha'e vaka ra'y Basã yvy re omongyra pyre ro'okue ramigua.

¹⁹ Xee ajuka uka va'ekue, pendevy pe areko katu va'ekue gui pe'u 'rã ikyrakue penevy-atãmba peve, ha'e pey'u 'rã huguy peka'upa peve.

²⁰ Ngaru ajapoa py pe'u 'rã pekuapy kavaju ha'e ija kuery, ipy'a guaxukueve ha'e joe opu'ãa rupigua ro'okue — he'i SENHOR Nhanderuete.*

²¹ — Ha'e rami vy aexa uka 'rã xerexakãa yvy regua kuery mbyte, ha'e ramo pavẽ regua 'rã oexa xee aikuaa pota rã, ha'e kuery áry xepo aupi ramo.

²² Ha'e va'e ára guive ma Israel kuery oikuaa 'rã xee ae SENHOR Tuuete aikoa.

* 39:20 Apocalipse 19,17-21

²³ Yvy regua kuery voi oikuua 'rā okuapy Israel kuery ojejavyague py ae escravorrā ogueraapaague, mba'eta xere ndojeroviai rā ha'e kuery gui amo'ā va'ekue xerova. Hovaigua kuery po py amboaxapa ramo ojukapa kyxé py.

²⁴ Ha'e kuery onhemongy'apa rei ha'e heko vai reia py ae areko ha'e rami, xerova amo'ā reve.

²⁵ Ha'e nunga rupi po rami ijayvu SENHOR Nhanderuete:

— Ha'e rami teī aŷ ma ambopyau ju 'rā Jacó kuery ikuaria, amboaxypa ju 'rā Israel kuery, xerery iky'a e'ŷ va'e amboete uka ju vy.

²⁶ Ha'e gui oyvy re ae ju ikuaria py imondiarā ndoikoi ramo ha'e kuery hexaraipa 'rā oxímbaague ha'e xere ojerovia e'ŷa rupi naxenhe'ē rendui okuapyague re.

²⁷ Mba'eta arupa ju 'rā yvy regua kuery ikuaria mbyte rupi gui, amboatypa ju 'rā heruvy hovaigua kuery yvy gui. Ha'e rami vy ha'e javi regua oexaa py xee aexa uka 'rā iky'a e'ŷ va'e aikoa, ha'e kuery mbyte.

²⁸ Ha'e ramo ha'e kuery oikuua 'rā xee ae SENHOR Tuuete aikoa, oexa vy yvy regua ikuaria rupi araa uka rā, ha'e gui oyvy katy ju amono'ō ukapa heruvy rā guive, ha'e kuery va'e regua neī peteīve aeja e'ŷ re.

²⁹ Ha'e kuery pe xee ndajexa uka ve'ŷi ma 'rā. Ha'e rami 'rāgue py Israel kuery áry ambou 'rā Xenhe'ē — he'i SENHOR Nhanderuete.

40

Templo pyau oexaque

¹ Ha'e gui vinte e cinco ma'etŷ re ma amboae yvy re orereraapaa rire, ma'etŷ ypy'i jaxyha'e dez araa py, catorze ma'etŷ re ma Jerusalém tetā oipe'aa rire, ha'e va'e ára py ae xere SENHOR opo omoi vy xereraa ha'e katy.

² Mba'emo xevy oexa ukaa rupi Nhanderuete xereraa Israel yvy katy. Ha'e vy xemopu'ā imo'amy peteī yvyty yvateve va'e áry. Ha'e va'e re ma kuaray puku-a katy ojekuaa oo guaxu tetā regua.*

³ Ha'e katy ae ju xereraa rā oī peteī ava overa va'e rami hexakāmba va'e. Ha'e va'e ma oo kora rokē py hi'aĩ, ha'e opo py oguerekoo ixā ipo'i'i va'e, ha'e gui peteī yvyra'i mba'emo a'āarā.*

⁴ Ha'e gui ava va'e aipoe'i xevy:

— Ava ra'y, exa mba'emo nderexa py, ha'e endu ndeapyxa py. Ha'e rami vy ndepy'a re emoimba ke aexa uka ta va'e, mba'eta ha'e rami aguā ae ndererua apy peve. Ha'e gui ma Israel kuery pe ju emombe'u rexaa va'ekue ha'e javi — he'i.

⁵ Ha'e gui aexa oo roka ha'e javi rupi peteī kora ojere oiny va'e. Ava va'e opo py yvyra'i mba'emo a'āarā oguerekoo va'e ma mboapy metros ipuku-a, mba'eta mba'emo nhaa'āaty ipukuve'i. Ha'e gui ma ha'e va'e py oa'ā oiny ikora. Ha'e rā ikora po guaxua ma peteī yvyra, ha'e rā yvatea voi peteī yvyra avi.

⁶ Ha'e gui ma okē kuaray oua katy oī va'e py ju ovaē vy ojeupi ovy pyrōa oī va'e rupi. Ha'e vy okē oī va'e oa'ā rā peteī yvyra ipya, ha'e amboae voi ha'e rami ae avi peteī yvyra ipya va'e.

⁷ Ha'e gui opy ja'o'i ikuai va'e ma peteī yvyra ipuku-a ha'e peteī yvyra ipya joo rami meme. Ha'e rā opy ja'o'i mboae gui ma mboapy metros. Ha'e rā okē oguy puku regua pya ma peteī yvyra.

⁸ Ha'e gui oguy puku okē opy katy oī va'e regua oa'ā avi rā peteī yvyra ipya.

⁹ Okē rexei opy ja'o'i oī va'e oa'ā avi rā irundy metros ipya, ha'e rā ijyta po guaxua ma peteī metro meme. Oguay puku ma opy guive okē peve oo.

¹⁰ Ha'e gui okē kuaray oikea katy oī va'e jova-jovai rupi ikuai mboapy opy ja'o'i joo rami meme tuvixa va'e. Ijyta jovaive rupi ikuai va'e voi joo rami meme tuvixa va'e.

¹¹ Ha'e gui oa'āve ju okē oikeaty. Ha'e va'e pya ma cinco metros, ha'e rā ipuku-a seis metros raxa'i.

* 40:2 Apocalipse 21.10 * 40:3 Apocalipse 11.1

¹² Ha'e gui opy ja'o'i ikuai va'e renonde rupi ma meio metro va'e meme. Peteĩ-teĩ opy ja'o'i ma mboapy metros ipya ha'e ipuku-a.

¹³ Ha'e gui opy ja'o'i rokẽ ikuai va'e ma joexei'i meme. Oa'ã rã peteĩ opy ja'o'i rokẽ guive amboae oĩa peve ma doze metros raxa'i ipya.

¹⁴ Oo yta ikuiaia peve oa'ã rã trinta metros. Opy ja'o mbyte pygua ma oo yta okẽ yvýry hi'aĩ va'e peve ovaẽ ový.

¹⁵ Okẽ oka katyguia guive opy oguy puku oĩ va'e peve ma vinte e cinco metros oĩ.

¹⁶ Ikuai avi janela yvyra po'i'i reve oo mbotya re yvate rupi, opy ja'o'i ikuai va'e ha'e opy ja'o okẽ rexei oĩ va'e mbotya jerea rupi. Ha'e va'e re ma pindo ra'angaa hiny.

¹⁷ Ha'e gui ma oka oĩ va'e py ju xereraa. Ha'e va'e yvýry oĩ opy ja'o'i, ha'e oka ha'e javi rupi ita itui pyrõarã. Ha'e va'e rexei rupi ikuai avi trinta opy ja'o'i.

¹⁸ Ha'e va'e pyrõa ma okẽ ikuai va'e rupi peve itui, pyrõa yvyïve'i va'e itui.

¹⁹ Ha'e gui ipya ju oa'ã okẽ yvyïve va'e guive opy ja'o mbyte pygua peve, kuaray oua katy ha'e ijapu'a'ia katy rupi ma cinqüenta metros meme.

²⁰ Ha'e gui okẽ kuaray ijapu'a'ia katy oĩ va'e, oka katy oĩ va'e ma oa'ã avi ipuku-a ha'e ipya.

²¹ Jovaive re mboapy opy ja'o'i ikuai va'e ma jypyguia rami tuvixa va'e, ijyta voi. Ha'e okẽ rexei opy ja'o oĩ va'e ma jypyguia rami avi tuvixa va'e. Ipuku-a ma vinte e cinco metros, ha'e rã ipya ma doze raxa'i.

²² Ha'e gui janela ikuai va'e, oguy puku ha'e pindo ra'angaa ojapo pyre ma kuaray oua katy okẽ oĩ va'e regua rami tuvixa va'e. Okẽ rexei ma sete pyrõa oĩ, opy ja'o voi.

²³ Ha'e gui opy ja'o mbyte pygua rokẽ ma okẽ kuaray ijapu'a'ia katy ha'e kuaray oua katyguia rexei'i oĩ. Mokoïve okẽ mbyte rupi oa'ã rã cinqüenta metros.

²⁴ Ha'e gui kuaray puku-a katy ju xereraa. Ha'e py ma aexa peteĩ okẽ kuaray puku-a katy oĩ va'e. Ha'e va'e yta ha'e oguy puku oa'ã rã ha'ekue rami ae tuvixa.

²⁵ Opy ja'o ikuai va'e jerea rupi ikuai avi janela, janela aexa ypy va'ekue ramigua. Opy ja'o puku-a ma vinte e cinco metros, ha'e rã ipya ma doze raxa'i.

²⁶ Okẽ rexei oĩ sete pyrõa, ha'e henonde ma oguy puku oĩ. Ijyta jovaive re hi'aĩ va'e re hiny pindo ra'angaa.

²⁷ Ha'e gui kuaray puku-a katy oĩ avi peteĩ okẽ opy ja'o mbyte pygua re. Ha'e ramo kuaray puku-a katy rupi oa'ã rã cinqüenta metros peteĩ okẽ guive amboae peve.

²⁸ Ha'e gui ma okẽ kuaray puku-a katy oĩ va'e rupi xereraa ju opy ja'o mbyte pygua py. Okẽ kuaray puku-a katy oĩ va'e oa'ã rã ha'ekue rami ae tuvixa va'e.

²⁹ Ha'e gui opy ja'o'i, ijyta ha'e oguy puku ikuai va'e ma jypyguia reve joo rami meme tuvixa avi. Oka jerea rupi ikuai avi janela. Oka puku-a ma vinte e cinco metros, ha'e rã ipya ma doze raxa'i.

³⁰ Ijyvýry rupi oĩ oguy puku. Ipuku-a ma doze metros raxa'i, ha'e rã ipya ma mokoï raxa'i.

³¹ Oguy puku oĩ va'e ma opy ja'o mbyte pygua katy oo, oka katy. Ijyta re hiny pindo ra'angaa, ha'e rã pyrõa oito oĩ va'e.

³² Ha'e gui ma kuaray oua katy ju xereraa opy ja'o mbyte pygua py. Ha'e py ma okẽ oa'ã rã ha'ekue rami ae tuvixa va'e.

³³ Opy ja'o'i, ijyta ha'e oguy puku ikuai va'e voi ha'ekue rami ae ju tuvixa. Oka jerea rupi ikuai avi janela. Oguy puku-a ma vinte e cinco metros, ha'e rã ipya ma doze raxa'i.

³⁴ Oguy puku ma opy ja'o mbyte pygua katy oo, oka katy ae. Ijyta jovaive re hiny pindo ra'angaa. Okẽ rexei pyrõa oito oĩ va'e.

³⁵ Ha'e gui ma okẽ kuaray ijapu'a'ia katy oĩ va'e katy ju xereraa vy oa'ã avi ha'e py. Ha'e rã ha'ekue rami ae tuvixa.

³⁶ Opy ja'o'i, ijyta ha'e oguy puku, ha'e gui ojerea rupi janela ikuai va'e oa'ã avi rã oguy puku-a ma vinte e cinco metros, ha'e rã ipya ma doze raxa'i.

³⁷ Ijyta ikuai va'e ma opy ja'o mbyte pygua katy opyta. Ijyta jovaive re hiny pindo ra'angaa. Okẽ rexei pyrõa oito oĩ va'e.

³⁸ Ha'e va'e regua opy ja'o'i ha'e oikeaty ma oka py ikyta ikuai va'e rexei'i optya, mymba oapy reve ome'ẽ mbyrã ojoiaty oña py ae.

³⁹ Okẽ rexei oguy puku oĩ va'e jovaive re ma mokoĩ mesa oĩ. Ha'e va'e áry ma ojukaa 'rã mymba kuery, oapy vy ome'ẽ mbyrã, ha'e gui jejavya regua ha'e mba'emo omboekovia aguã regua ome'ẽ mbyrã.

⁴⁰ Ha'e gui kuaray ijapu'a'ia katy okẽ oĩ va'e rexei ma mokoĩ mesa oĩ, oikeaty rexei pyrõa oĩ va'e yvýry. Okẽ rexei oka oĩ va'e rovai re ma mokoĩ ju mesa oĩ.

⁴¹ Ha'e rami vy jovaive re ma irundy mesa ikuai. Okẽ rexei ma ha'e javi vy oito mesa ikuai mymba kuery ojuka vy onhono aty.

⁴² Irundy mesa mymba kuery oapy reve ome'ẽ mbyrã ojukaaty ma itape gui ojapo pyre. Ipuku-a ha'e ipya ma meio metro raxa'i, ha'e rã yvatea ma meio metro ete'i. Ha'e va'e áry omoña 'rã kyxe mymba oapy reve ome'ẽ mbyrã ojuka aguã.

⁴³ Oo mbotya jerea rupi ikuai ty'aí peteĩ po ipuku va'e. Ha'e rã mesa áry ma omoña 'rã xo'o ome'ẽ mbyrã.

⁴⁴ Ha'e gui okẽ opyve katy oĩ va'e rovai mokoĩ opy ja'o'i optya oporai va'e ikuai atyrã, opy ja'o mbyte pygua py. Peteĩ ma kuaray ijapu'a'ia katy okẽ oĩ va'e rexei, ha'e rã amboe ma okẽ kuaray puku-a katy oĩ va'e rexei.

⁴⁵ Ha'e gui ava va'e aipoe'i xevy:

— Kova'e opy ja'o'i kuaray puku-a katy ojepe'a va'e ma templo rarõa sacerdote kuery pegua.

⁴⁶ Ha'e rã opy ja'o'i kuaray ijapu'a'ia katy ojepe'a va'e ma altar rarõa sacerdote kuery pegua. Ha'e va'e kuery ma Zadoque ramymino ikuai, Levi ramymino kuery regua SENHOR renonde rupi om̄ba'epo va'erã — he'i.

⁴⁷ Ha'e gui opy ja'o mbyte pygua oa'ã rã ipuku-a ha'e ipya ma cinqüenta metros meme. Ha'e rã altar ma templo rexei oĩ.

⁴⁸ Ha'e gui ma templo rupi oguy puku oĩ va'e py ju xereraa vy oa'ã ikyta ikuai va'e. Jovaive re ma mokoĩ metros raxa'i. Ha'e rã okẽ pya ma mokoĩ metros rai'i jovaive re.

⁴⁹ Ha'e rã oguy puku-a ma dez metros, ha'e rã ipya ma mboapy meme. Pyrõa oĩ va'e rupi jaike. Okẽ yta ikuai va'e yvýry ma oo yta ikuai jovaive re.

41

¹ Ha'e gui ma templo ropy ju xereraa vy oa'ã okẽ yta, mboapy metros ipya va'e meme, ombojerovia aty pya rami ae.

² Oikeaty pya ma cinco metros, ha'e rã ikyke jovaive pya ma mokoĩ metros raxa'i meme. Oikea rupi oa'ã avi rã vinte metros, ha'e rã ipya ma dez.

³ Ha'e gui oike ma vy templo rokẽ yta ju oa'ã rã peteĩ metro ipo guaxua. Oikea yvatea ma mboapy metros, ha'e rã ipya ma mboapy raxa'i.

⁴ Ipuku-a oa'ã avi rã dez metros, ha'e gui ipya ma dez avi templo renonde rupi. Ha'e vy aipoe'i xevy:

— Kova'e ma henda iky'a e'ŷ ete va'e — he'i.

⁵ Ha'e gui ma templo mbotya po guaxua oa'ã rã mboapy metros. Ha'e gui ikyke rupi opy ja'o'i ikuai va'e ma mokoĩ metros meme, templo jerea ha'e javi rupi.

⁶ Ijerea rupi opy ja'o'i ikuai va'e ma mboapy henda rupi yvate ikuai. Peteĩ-teĩ pyrõa re ma trinta ikuai. Templo mbotya jerea rupi oĩ opy ja'o'i pyrõa yta renderã, templo mbotya rupi omoña e'ŷ aguã.

⁷ Ha'e gui opy ja'o'i yvateve ikuai va'e ma ipyve 'rã ovy yvýive rupigua gui, templo mbotya jerea rupi ipo'iive ovya rami. Ha'e rami py templo ropy ja'o'i ikuai va'e ma yvatevea rupi ipyve va'e 'rã. Ha'e gui opy rupi oĩ peteĩ tape pyrõ-pyrõa'i yvy guive yvatevea katy peve nhaẽ aguã.

⁸ Ha'e gui templo yvýry rupi aexa pyrõa yvateve va'e. Ha'e va'e ma opy ja'o'i ikuai va'e yta renderã optya. Yvatea ma peteĩ yvýra pukukue mboapy metros va'e.

⁹ Ha'e rā opy ja'o'i ijerea rupi ikuai va'e mbotya oka katyguia po guaxua ma mokoī metros raxa'i. Ha'e gui templo ropy ja'o'i ikuai va'e guive

¹⁰ opy ja'o'i mboae ikuiaia peve ma dez metros va'e ipya templo jerea ha'e javi rupi.

¹¹ Ha'e gui opy ja'o'i oikea ma oka katy opyta mokoī, kuaray ijapu'a'ia katy ha'e ipuku-a katy. Opy ma mokoī metros raxa'i ijerea rupi.

¹² Ha'e gui oī avi peteī oo ha'e ae'ia py, kuaray oikea katy. Ha'e va'e ma trinta e cinco metros ipya va'e. Oo mbotya po guaxua ma mokoī metros raxa'i ijerea rupi, ha'e rā ipuku-a ma quarenta e cinco metros.

¹³ Ha'e gui ma oa'ā templo. Ipuku-a ma cinqüenta metros, oka ha'e oo mbotya reve joo rami ipuku cinqüenta metros meme.

¹⁴ Ha'e gui kuaray puku-a katy rupi templo mbotya ma cinqüenta metros avi, oka puku-a rami avi, ijapy ikuai va'e mbyte.

¹⁵ Ha'e gui templo rovai oo ha'e ae'ia py oī va'e oa'ā rā cinqüenta metros avi ipuku, jovaive re oguy ikuai va'e reve.

Templo ropy rupi ete ma ojao'ipaa, henda iky'a e'ŷ ete va'e ha'e opy ja'o mbyte pygua jerea ha'e javi rupi voi.

¹⁶ Ha'e va'e mboapyve henda yvýry rupi ma janela ikuai, yvyra po'i'i reve. Opy ha'e javi rupi ma oo mbotya ojao'ia yvyrape py, pyrōa guive janela ikuiaia peve. Ikuai avi janela mbotyara.

¹⁷ Okē áry rupi ha'e templo jerea rupi ikuai mba'emo ra'angaa ojapo pyre, oo mbotya ha'e javi rupi, opy katy ha'e oka katy voi,

¹⁸ anjo ipopo va'e ha'e pindo ra'angaa hiny. Pindo ra'angaa nhavō ma mokoī anjo ra'angaa mbyte oī. Ha'e rā anjo ma mokoī hova va'e meme.

¹⁹ Peteī hova ava rova ramigua ma oma'ē 'rā pindo ra'angaa oyke katy, ha'e 'rā amboae guary ra'y rova ramigua ma pindo mboae katy 'rā oma'ē. Ha'e rami tema ojapoa oo mbotya ha'e javi rupi.

²⁰ Pyrōa guive okē áry peve ojapoa anjo ha'e pindo ra'angaa, templo mbotya ha'e javi rupi.

²¹ Templo rokē ma ijapy irundy va'e. Henda iky'a e'ŷ ete va'e rokē ma ha'e rami ae avi ojapoa.

²² Ha'e rā altar ma yvyrape gui ojapo pyre. Yvatea ma mokoī metros rai'i, ha'e rā ipuku-a ma peteī'i. Ijapy, henda ha'e imbotya ma yvyra guigua meme. Ha'e vy ava va'e aipoe'i xevy:

— Kova'e mesa ma SENHOR renonde 'rā oī — he'i.

²³ Ha'e gui templo ha'e henda iky'a e'ŷ ete va'e rokē re ma mokoī ojepe'aa oī.

²⁴ Peteī-teī okērā ma mokoī yvyrape guigua ojapoa. Mokoīve yvyrape ma ojerea oī va'e meme.

²⁵ Templo rokē re ma ojapoa avi anjo ipopo va'e ha'e pindo ra'angaa, oo mbotya rupi ojapoague rami avi. Oī avi okē ao'iarā yvyra guigua, oguy puku oka katy oī va'e re.

²⁶ Ha'e gui oguy puku jovaive rupi, templo ropy ja'o'i ikuai va'e rupi ha'e okē ao'ia rupi ikuai janela, yvyra ipo'i'i va'e ha'e pindo ra'angaa py ombojegua pyre.

42

¹ Ha'e va'e rire ma kuaray ijapu'a'ia katy oka oī va'e py ju ava va'e xereraa, opy ja'o'i kuaray ijapu'a'ia katy ikuiaia peve. Ha'e va'e opy ja'o'i ma oo ha'e ae'ia py oī va'e rexei, kuaray ijapu'a'ia katy oo ojepe'a va'e rexei.

² Ha'e va'e oo kuaray ijapu'a'ia katy ojepe'a va'e ma cinqüenta metros ipuku va'e, ha'e rā ipya ma vinte e cinco.

³ Ha'e py ma opy ja'o'i ikuai mboapy henda rupi yvatea py, oka dez metros va'e renonde rupi, ha'e opy ja'o mbyte pygua pyrōa rexei.

⁴ Ha'e gui opy ja'o'i ikuiaia rupi oī peteī oguy puku cinco metros ipya va'e opy rexei'i, ha'e cinqüenta metros ipuku, opy katy rupi oo va'e. Opy ja'o'i rokē ikuai va'e ma kuaray ijapu'a'ia katy meme ojepe'a.

⁵ Opy ja'o'i yvatevea py ikuai va'e ma ipo'ive'i va'e, mba'eta oguy puku oĩ va'e ma opy katy oove iguyvea rupi ha'e mbyte rupi oĩ va'e gui.

⁶ Mba'eta ha'e va'e opy ja'o'i ma mboapy henda rupi yvate. Ijytarã ma noĩ, opy ja'o mbyte pygua rami e'ŷ. Ha'e nunga rupi ae yvatevea py oĩ va'e ma mbyte ha'e iguyve rupi oĩ va'e gui ipo'ive'i.

⁷ Ha'e gui opy ja'o'i ikuai va'e rexei'i oĩ oka kora. Ha'e va'e ma oka yvýry rupi oĩ, opy ja'o'i rexei'i, vinte e cinco metros ipuku va'e.

⁸ Mba'eta opy ja'o'i oka katy ikuai va'e puku-a ma vinte e cinco metros ae. Ha'e rã templo renonde rupi oka oĩ va'e ma cinqüenta metros va'e.

⁹ Ha'e va'e opy ja'o'i ma iguyve rupi 'rã oikea oĩ, oka katy gui 'rã oike kuaray oua katy gui.

¹⁰ Ha'e gui kuaray oua katy oka oĩ va'e kora rupi ikuai avi opy ja'o'i, oo ha'e ae'ia py oĩ va'e rexei'i.

¹¹ Oĩ avi peteĩ oguy puku. Opy ja'o'i kuaray ijapu'a'ia katy ikuai va'e rami ae avi ojapoa, ipuku-a ha'e ipya ma joo rami ae, oẽaty voi joo rami ae, opa mba'e py joo rami ae. Oikeaty voi

¹² opy ja'o'i kuaray puku-a katy hokẽ ikuai va'e rami ae avi, mba'eta oguy puku kuaray oua katy oĩ va'e apy rupi gui 'rã oikea ha'e va'e opy ja'o'i py.

¹³ Ha'e gui ma ava va'e aipoe'i xevy:

— Kuaray ijapu'a'ia katy ha'e ipuku-a katy oka ha'e ae'ia py oĩ va'e rexei opy ja'o'i ikuai va'e ma iky'a e'ŷ va'e meme, mba'eta ha'e va'e rupi sacerdote kuery SENHOR renonde ombo'eapo va'e okaru 'rã okuapy, mba'emo iky'a e'ŷ va'e omoĩ porã aguã. Ha'e va'e ma mba'emo aju guigua ome'ẽ mbyre, jejavya regua ha'e mba'emo omboekovia aguã regua ome'ẽ mbyre. Ha'e nunga rupi ha'e va'e henda ma iky'a e'ŷ va'e.

¹⁴ Ha'e va'e py sacerdote kuery oike vy ma oo iky'a e'ŷ va'e gui noẽi 'rã oka katy oao ombo'eapoa py onhemondea oejapa e'ŷ re, iky'a e'ŷ va'e ramo. Amboae regua ao py onhemonde ma vy 'rã oẽ heta va'e kuery ikuia katy — he'i.

¹⁵ Ha'e gui ava va'e templo oa'ãmba ma rire kuaray oua katy okẽ oĩ va'e rupi ju xerenoẽ. Ha'e vy oka ju oa'ã ijyvýry rupi.

¹⁶ Kuaray oua katy rupi yvyra py oa'ã rã quinhentos yvyra pukukue.

¹⁷ Kuaray ijapu'a'ia katy rupi ju oa'ã rã quinhentos yvyra pukukue.

¹⁸ Kuaray ipuku-a katy rupi oa'ã rã quinhentos yvyra pukukue.

¹⁹ Ha'e gui kuaray oikea katy ju ojevy vy oa'ã rã quinhentos yvyra pukukue avi.

²⁰ Ha'e rami py irundy henda katy rupi oa'ãmba. Oka yvýry rupi kora oĩ va'e ma quinhentos yvyra ipuku ha'e ipya, omboja'o aguã mba'emo iky'a e'ŷ va'erã omboaxa pyre, ha'e omboaxa pyre'ŷ.

43

Templo ropy rupi SENHOR rexakãa omonyẽmbaague

¹ Ha'e gui ma okẽ kuaray oua katy oĩ va'e py ju ava va'e xereraa.

² Ha'e ramo ama'ẽ rã kuaray oua katy gui tape ou va'e rupi ou jekuaa Israel kuery ruete rexakãa. Ijayvua ma heta yy revovo rami, ha'e rã hexakãa ma yvy rupi omoexakãmba.

³ Aexa va'e ma jypy rã Jerusalém tetã ombovaipa aguã ou jave aexa va'ekue ramigua, ha'e Quebar yakã yvýry aexa va'ekue rami avi. Ha'e rami vy ajero'a, yvy re xerova amovaẽ peve.

⁴ Ha'e gui ma SENHOR rexakãa ma templo py oike kuaray oua katy okẽ oĩ va'e rupi.

⁵ Ha'e gui Nhe'ẽ xereupi heravy opy ja'o mbyte pygua oĩ va'e katy. Ha'e ramo aexa rã SENHOR rexakãa templo ropy rupi omonyẽmba.

⁶ Ha'e ramo peteĩ ayvu aendu templo mbyte gui onhendu va'e. Ha'e ramo ava va'e opu'ã ho'amy xeyvýry, ha'e SENHOR aipoe'i xevy:

⁷ — Ava ra'y, kova'e henda ma xerenda apenaaty oĩa, apyrõ ainyaty guive, Israel kuery mbyte rupi aiko riae aguã. Ha'e gui ma Israel kuery nomongy'avei 'rã xerery iky'a e'ŷ

va'e, neñ huvixa kuery voi, mba'eta itavy reia rupi neñ ombojeroviaaty py nguvixa kuery re'õgue ojatya rupi ve'ŷ 'rã ikuai.

⁸ Mba'eta ha'e kuery ngoorã ojapo vy ngokẽ omboje'a va'ekue xevyguo oo rokẽ re rive, ijyta voi omboje'a va'ekue xero yta re, ha'e kuery ha'e xee aña mbyte peteĩ oo mbotya rive oĩ aguã. Ha'e rami ojeguarupy anho ojapo okuapy vy xerery omongy'apa rei va'ekue. Ha'e nunga rupi xee amomba va'ekue xepoxyo rupi.

⁹ Ha'e gui aŷ ma ha'e kuery tomombopa xea gui mombyry itavy reiague ha'e nguvixa kuery re'õgue mboetea rupi ikuaiague. Ha'e rami rã ha'e kuery mbyte rupi aiko riae 'rã.

Altar mba'emo oapy reve ome'ê atyrã re ijayvuague

¹⁰ — Ha'e gui ndee ava ra'y, Israel kuery pe exa uka ke kova'e templo, gueko vaia gui oximba aguã. Ha'e kuery ju templo ra'angaa aexa uka va'ekue oa'ã vy toikuaa pota porã.

¹¹ Ha'e gui xapy'a rei ha'e kuery gueko vaia ha'e javi gui oximba ri ramo ha'e kuery pe eikuua ukapa kova'e oo mba'exa pa oĩa, mamo pa mba'emo ikuia, oëaty ha'e oikeaty ikuai va'e, mba'emo ikuai va'e ha'e javi, ha'e gui hexegua ayvu, aipota va'e ha'e lei oĩ va'e ha'e javi. Embopara ke ha'e nunga ha'e javi ha'e kuery oexaa py, ayvu oĩ va'e ha'e lei aeja va'ekue re oikuua pota vy ojapopa ete aguã.

¹² Po rami ma templo regua lei. Ijyty templo oĩa áry ha'e ijyvýry rupi ma iky'a e'ŷ ete va'e meme 'rã. Ha'e rami ma lei templo regua.

¹³ — Po rami ma altar oa'âague, mba'emo pea'âaty raxa'i py. Ijyvýry rupi guarã pejo'o 'rã meio metro ipy puku-a, ha'e ipya ma meio metro va'e avi 'rã. Ha'e rã hembe ha'e javi rupi ma peteĩ po 'rã yvatea. Ha'e va'e optya 'rã altar yvýry rupi.

¹⁴ Ha'e gui yvy guive iguy rupi ita ombojo'aa peve ma peteĩ metro. Ha'e rã ipya ma meio metro. Ita kyrigueve'i ombojo'aa gui tuvixakueve ombojo'aa peve ma mokoï metros. Ha'e rã ipya ma meio metro.

¹⁵ Tata renderã oĩ va'e ma mokoï metros yvatea va'erã. Ha'e gui tata renda áry ma omoï avi 'rã irundy hakua va'e.

¹⁶ Tata renda puku-a ha'e ipya ma seis metros meme, jovaive rupi ijapy irundy va'erã.

¹⁷ Ita ombojo'aa puku-a ha'e ipya ma sete metros meme 'rã, ijapy irundyve oĩa rupi. Ijyvýry rupi hemberã oĩ va'e ma peteĩ po pukukue. Altar yvýry rupi ojo'oague ma meio metro ete'i 'rã. Ha'e gui kuaray oua katy 'rã oĩ pyrõa yvate katy oo va'e.

Altar Nhanderuete pe omboaxaa aguã re ijayvuague

¹⁸ Ha'e gui SENHOR aipoe'i xevy:

— Ava ra'y, po rami SENHOR Penderuete ijayvu: Po rami pejapo va'erã altar pemboaxaa ára, hi'áry mba'emo peapy reve peme'ê, ha'e hi'áry rupi tuguy pemboayvi aguã.

¹⁹ Sacerdote kuery levita regua Zadoque ramymino ikuai va'e ma xea katy onhemboja 'rã xevy pe mba'emo ojapo aguã. Ha'e kuery pe reme'ê 'rã peteĩ vaka ra'y ha'e kuery ojejavague regua ome'ê va'erã — he'i SENHOR Nhanderuete.

²⁰ — Ha'e gui ma huguy reru vy altar áry 'rã remoï irundy hakua ikuai va'e re, ita ombojo'aa irundyve apy re, ha'e gui hembe ojerea ha'e javi rupi voi. Ha'e rami 'rã reiky'a'o altar pejejavague rejao'i uka vy.

²¹ Ha'e gui jejavya regua vaka ra'y ome'ê mbyre ma oo iky'a e'ŷ va'e gui mombyry'i 'rã reraa peteĩ henda oo oĩ va'e py oapya aguã.

²² Ha'e gui mokoï araa py ma reme'ê 'rã peteĩ kavara ava ivaikue rei e'ŷ va'e jejavya regua. Ha'e gui altar peiky'a'o ju 'rã vaka ra'y py peiky'a'oague rami ae.

²³ Reiky'a'opa ma vy reme'ê 'rã peteĩ vaka ra'y ha'e peteĩ vexa'i ivaikue rei e'ŷ va'e meme.

²⁴ SENHOR renonde py ae 'rã reme'ê. Hi'áry ma sacerdote kuery juky omoï vy ome'ê 'rã SENHOR pe oapy reve.

²⁵ Ha'e gui sete ára re ma ko'ê nhavõ reru 'rã peteĩ kavara ava pejejavya regua peme'ê va'erã. Peru avi 'rã peteĩ vaka ra'y ha'e peteĩ vexa'i ivaikue rei e'ŷ va'e.

²⁶ Sete ára re 'rã peiky'a'o altar pejejavya pejao'i uka vy. Ha'e rami py pemboaxa 'rã xevy guarã.

²⁷ Ha'e va'e ára ha'e nunga sacerdote kuery ojapopa ma vy oito araa guive altar áry mba'emo ome'ë 'rã oapy reve, ha'e gui Nhanderuete reve peteï rami ju ikuiaia regua guive. Ha'e ramo xee roguerovy'a 'rã — he'i SENHOR Nhanderuete.

44

Oo iky'a e'ý va'e rupi ombo'eapo va'erã kuery omoï jevyague

¹ Ha'e gui ma oo iky'a e'ý va'e rokẽ py ju ava va'e xereraa kuaray oua katy, oka katy ojepe'a va'e py. Ha'e rami tei ha'e va'e okẽ onhemboty ra'e.

² Ha'e gui SENHOR aipoe'i xevy:

— Kova'e okẽ ma onhemboty ae 'rã oiny, ndojepe'aai 'rã ha'e rupi, ha'e rupi SENHOR Israel kuery ruete oike rire. Ha'e rami rire onhemboty ae 'rã oiny.

³ Ha'e rã huvixave ma ha'e py oguapy 'rã SENHOR renonde okaru aguã, huvixave ae vy. Okẽ regua oguy puku rupi 'rã oike ha'e oẽ ju 'rã ov — he'i.

⁴ Ha'e gui ma kuaray ijapu'aia katy oo rokẽ oĩ va'e py ju ava va'e xereraa. Ha'e py ma ama'ë rã SENHOR rexakãa omonyëmba ra'e ixupegua opy rupi. Ha'e ramo ajero'a yvy re xerova amovaë peve.

⁵ Ha'e ramo SENHOR aipoe'i xevy:

— Ava ra'y, eikuua pota porã ke. Exa nderexa py, ha'e endu ndeapyxa py SENHOR pegua oo re xeayvu ramo, ha'e va'e regua lei ha'e javi re guive. Eikuua pota porã ke mava'e pa templo py oike aguã ha'evea re, ha'e oo iky'a e'ý va'e py oike aguã nda'eveia re guive.

⁶ Ha'e gui ma aipo're Israel kuery naxenhe'ë rendui va'e pe: Po rami ijayvu SENHOR Nhanderuete: Israel kuery, ha'eve ma pendekuai ojeguarupy pejapoa rupi!

⁷ Mba'eta xevygua oo iky'a e'ý va'e py peroike va'ekue amboae regua kuery, ngo'o py ha'e opy'a py opire omboi uka e'ý va'ekue. Ha'e rami vy pemongy'apa rei xevygua oo, xevy pe mbojape, mba'emo kyrakue ha'e tuguy peme'ë tei. Opa marâgua ojeguarupy pejapo vy xereve guarã ajapo va'ekue rupi e'ý pendekuai va'ekue.

⁸ Pendevy mba'emo iky'a e'ý va'e xevy omboaxa pyre regua ayvu aeja tei ha'e va'e rupi e'ý pendekuai va'ekue. Ha'e rami 'rãgue py amboae regua rive pemoï xevygua oo iky'a e'ý va'e re opena va'erã.

⁹ — Po rami SENHOR Nhanderuete ijayvu: Amboae regua Israel kuery mbyte rupi ikuai va'e nei peteï ma voi ndoikevei 'rã xevygua oo iky'a e'ý va'e py, opy'a py ha'e ngo'o py opire omboi uka va'e'ý vy.

¹⁰ Ha'e rã levita kuery ma xegui ojepe'apa va'ekue Israel kuery ha'eve'ý rami ikuai vy ta'angaa re oje'oria rupi xegui mombyry ojepe'apa va'e reve. Ha'e rire levita kuery re 'rã oĩ ojeavyague re opaga aguã.

¹¹ Ha'e rami tei ha'e kuery ma ha'eve nho 'rã xevygua oo iky'a e'ý va'e rupi ombo'eapo aguã. Ha'e rami vy templo rokẽ rarõa rupi 'rã ikuai, opy rupi voi. Ha'e kuery ojuka 'rã guive mymba oapy reve ome'ë va'erã heta va'e kuery rekovia. Heta va'e kuery renonde 'rã ikuai mba'emo ojapoa py.

¹² Mba'eta Israel kuery mba'emo ra'angaa ombojerovia va'e reve ha'e kuery voi ombojerovia avi va'ekue, ha'e rami vy nhomonhepyxangaarã ikuai va'ekue mba'emo vai ojapoa py. Ha'e nunga rupi xepo aipi reve aura ha'e kuery re oĩ aguã gueko vaiague re opaga aguã — he'i SENHOR Nhanderuete.

¹³ — Ha'e rami vy sacerdote rami e'ý ha'e kuery nonhembojavei 'rã xere, nei novaëi 'rã guive peteïve ma voi mba'emo xevygua iky'a e'ý va'e re. Ha'e rami 'rãgue py ojee ae meme 'rã ogueraa ojeguarupy anho ojapoaque re oximba aguã.

¹⁴ Ha'e rami tei xee amoï 'rã templo rarõarã, mba'emo apoa re opena aguã guive.

Sacerdote kuery mba'emo ojapo aguã re ijayvuague

¹⁵ — Ha'e gui levita regua sacerdote kuery Zadoque ramymino ikuai va'e, xegui Israel kuery ojepe'apa tei ha'e kuery ma xevygua oo iky'a e'ý va'e regua ojapopa ete va'ekue. Ha'e rami rire ha'e kuery onhemboja 'rã xere, xevy pe ombo'eapo aguã. Ha'e

kuery ma xerenonde 'rã ikuai mba'emo kyrakue ha'e tuguy ome'ẽ aguã — he'i SENHOR Nhanderuete.

¹⁶ — Ha'e kuery ma xevyguia oo iky'a e'ŷ va'e py oike vy onhemboja 'rã xe-mesa re, xevy pe ombo'epo ha'e ajapo uka va'ekue ojapopa aguã.

¹⁷ Ha'e rami avi opy ja'o mbyte pygua rokẽ rupi ha'e kuery oike vy ma ao iporãve va'e py anho 'rã onhemonde. Vexa'i rague guigua ma ojee nomoõ 'rã templo ropy rupi opy ja'o mbyte pygua py ombo'epo aguã.

¹⁸ Onheakã jokua 'rã ajukue iporãve va'e py, kaxõ iporãve va'e py 'rã onhemonde guive. Nonheovãi 'rã imboy'aipaarã py.

¹⁹ Ha'e gui opy ja'o mbyte pygua gui ha'e kuery oẽ ju vy heta va'e kuery ikuaria katy oka katy, ha'e vy omboipa 'rã ao ombo'epo aguã onhemondeague, ha'e vy omoõ porã ju 'rã opy ja'o'i iky'a e'ŷ va'e py. Ha'e rami vy amboae ao py ju 'rã onhemonde, jypyguia ao py heta va'e kuery iky'a e'ŷ va'e rami rive opyta e'ŷ aguã.

²⁰ Nonhopi 'rã o'a oakã regua, neĩ ndai'a vukui 'rã guive. Ha'evea rami anho 'rã ojaya o'a.

²¹ Peteïve sacerdote ndoy'ui 'rã vinho opy ja'o mbyte pygua py oike ta jave.

²² Nomendai 'rã guive imeve'ŷ va'e re, neĩ opoi pyre re. Ha'e rami 'rãgue py gua'yxyrã ogueraa 'rã Israel regua kunhatai'i, e'ŷ vy sacerdote ra'yxykue'i.

²³ Ha'e kuery ombo'e 'rã xevyguia kuery mba'emo iky'a e'ŷ va'erã omboaxa pyre ha'e omboaxa pyre'ŷ reve joo rami e'ŷa oikuaa aguã rami, ha'eve va'e ha'e ha'eve'ŷ va'e guive.

²⁴ Ha'e gui jojoko-jokoa ramo ha'e kuery oikuaa potaa rupi 'rã ikuai. Xeguigua teko porã rupi anho 'rã oikuaa pota. Ha'e gui ngaru oiko nhavõ py ojapo uka 'rã xeguigua lei ha'e xeayvu aeja va'ekue. Ojapo 'rã guive xevyguia sâbado ára iky'a e'ŷ va'ea oikuaa pavẽ aguã rami.

²⁵ Nonhembojai 'rã omanogue re onhemongy'a e'ŷ aguã. Nguu e'ŷ vy oxy ae, gua'y, guajy, guyvy, gueindy imeve'ŷ va'e ae rã tema ha'eve onhemongy'a aguã.

²⁶ Ha'e gui ojeky'a'opa ma rire sete ára peve ranhe 'rã oarõ.

²⁷ Ha'e gui mae ma toike ju henda iky'a e'ŷ va'e py ombo'epo aguã, opy ja'o mbyte pygua py ae. Ha'e rami vy ome'ẽ 'rã jejavya regua — he'i SENHOR Nhanderuete.

Ha'e va'e yvy omboja'oa aguã re ijayvuague

²⁸ — Sacerdote kuery pe ma oĩ ae 'rã imba'erã, mba'eta xee ae aiko ha'e kuery mba'e. Ha'e nunga rupi ha'e kuery pe napeme'ẽi 'rã ijyvyrã Israel yvy re. Xee ae aiko ha'e kuery pegua.

²⁹ Ha'e kuery ho'u 'rã mba'emo aju guigua ome'ẽ mbyre gui, jejavya regua ha'e mba'emo rekovia regua guive. Israel kuery iky'a e'ŷ va'erã omboaxa va'ekue ma ha'e kuery mba'e meme 'rã.

³⁰ Ha'e rami vy sacerdote kuery mba'erã opyta 'rã mba'emo aju jypyguia ha'e mba'emo ome'ẽ mbyre gui iporãgueve ha'e javi. Sacerdote kuery pe peme'ẽ avi 'rã jypyguia trigo guigua, penderopy oĩ aguã penemoingo porãarã.

³¹ Ha'e rã mymba omano rive va'ekue ma sacerdote kuery ndo'ui 'rã, neĩ guyra e'ŷ vy mymba omondoropa va'ekue guive.

45

¹ — Ha'e gui yvy ma xortea rami 'rã pemboja'o peteï-teï mba'erã peikuua aguã. Ha'e javé py ma SENHOR pe ranhe pemboaxa 'rã peteï henda iky'a e'ŷ va'erã. Ha'e va'e puku-a ma doze quilômetros raxa'i 'rã, ha'e rã ipya ma dez 'rã. Ha'e javi rupi oĩ 'rã iky'a e'ŷ va'e.

² Ha'e rã oo iky'a e'ŷ va'e ma ipuku-a ha'e ipya joo rami, duzentos e cinqüenta metros meme. Ijyvýry rupi oĩ 'rã yvy vinte e cinco metros ipya va'e.

³ Ha'e va'e yvy iky'a e'ŷ va'e puku-a ma doze quilômetros raxa'i 'rã, ha'e rã ipya ma cinco 'rã. Ha'e py ae 'rã oĩ oo iky'a e'ŷ va'e. Ha'e va'e henda ma iky'a e'ŷ ete va'e.

⁴ Ha'e gui yvy iky'a e'ŷ va'e ma sacerdote kuery rekoarã itui, mba'eta oo iky'a e'ŷ va'e re opena va'e, ha'e SENHOR re onhemboja 'rã ombo'epo aguã. Ha'e va'e henda ma ha'e kuery pe peme'ẽ 'rã hoo ikuai aguã, oo iky'a e'ŷ va'e oĩ aguã guive.

- ⁵ Ha'e rã levita kuery oo re opena va'e pe ma peme'ẽ avi 'rã yvy doze quilômetros raxa'i ipuku-a, ha'e cinco ipya va'e, ha'e kuery rekoarã vinte ikuai aguã.
- ⁶ Ha'e rã tetã yvýry rupi guarã ma peme'ẽ 'rã yvy dois quilômetros raxa'i ipya, ha'e gui doze quilômetros raxa'i ipuku-a va'e. Ha'e rã tetã ma yvy iky'a e'ŷ va'e rexel'i 'rã oĩ, Israel regua ha'e javi ikuai aguã.
- ⁷ Ha'e rã huvixave yvyrã ma yvy iky'a e'ŷ va'e ha'e tetã yvýry rupigua joavaive re, kuaray oikea katy ha'e oua katy. Ipuku-a ma peteĩ regua yvy oĩ va'e reve joo rami 'rã, kuaray oikea katy guive oua katy peve.
- ⁸ Ha'e va'e yvy ma huvixave mba'e 'rã itui Israel yvy re. Ha'e gui xevygua yvatekueve ma nombojexavaivei 'rã xevygua kuery. Ha'e rami 'râgue py omboja'opa 'rã Israel kuery yvyrã, peteĩ-teĩ regua ikuia rami vy.

Yvatekueve ikuai va'e pe ijayvuague

- ⁹ Po rami SENHOR Nhanderuete ijayvu:
- Peẽ Israel kuery yvatekueve, ha'eve ma pejoguereco axy. Pejepe'a pejojukaa ha'e penhombojexavaia gui, ha'e vy pejapo ha'evea ramigua ha'e teko porã. Pekoreve eme ma xevygua kuery — he'i SENHOR Nhanderuete.
- ¹⁰ — Ha'evea rami anho ke pepeja mba'emo, ajaka ha'e hy'akua ha'evea'i rami meme 'rã guive peiporu.
- ¹¹ Ha'e gui ajaka renyẽ ma oja guaxu reve joo rami 'rã. Ha'e rã peteĩ ômer ma dez oja guaxu renyẽ, ha'e dez ajaka renyẽ 'rã oĩ. Ômer py ae 'rã mba'emo pea'ã kuaa.
- ¹² Ha'e gui peteĩ hatã'i va'e ma doze gramas 'rã ipoyi. Ha'e rã peteĩ hatã'i va'e ovareve va'e ma sessenta hatã'i va'e mboae rami 'rã ipoyia.
- ¹³ — Po rami 'rã ma Peru peme'ẽ va'erã: trigo ma dez oja guaxu nhavõ gui mboapy litros 'rã Peru, cevada ma ha'e rami ae avi mboapy litros 'rã Peru.
- ¹⁴ Ha'e gui azeite ma mba'emo pirekue renyẽ nhavõ gui mokoĩ litros 'rã Peru, mba'eta mba'emo pirekue ma peteĩ ômer rami avi 'rã dez oja guaxu renyẽ va'e.
- ¹⁵ Ha'e gui vexa'i kuery ma peteĩ-teĩ kora duzentos ikuia nhavõ gui peteĩ peipe'a 'rã Israel re nhuũndy porâvea rupi pemongaru va'ekue anho. Ha'e nunga ha'e javi peme'ẽ 'rã mba'emo aju guigua, oapy revegua, e'ŷ vy Nhanderuete reve peteĩ rami ju pendekuaia reguarã. Ha'e rami vy 'rã pejao'i uka heta va'e kuery ojejavyague — he'i SENHOR Nhanderuete.
- ¹⁶ — Pendeyvy re ikuai va'e ha'e javive 'rã ome'ẽ mba'emo Israel pygua huvixave pe.
- ¹⁷ Ha'e rã huvixave ma ogueru 'rã mba'emo oapy reve ome'ẽ mbyrã, mba'emo aju guigua ha'e mba'emo rykue, jaxy pyaua ára py ngaru pyguarã, sábado ára nhavõ, ha'e ngaru Israel kuery peguarã oa'angapy oiko nhavõ. Ogueru avi 'rã jejavya regua, mba'emo aju guigua, mba'emo oapy revegua mymba ha'e Nhanderuete reve peteĩ rami ju pendekuaia reguarã, Israel kuery ojejavyague ojao'i uka aguã.

Ára pyau py mba'emo ome'ẽa aguã re ijayvuague

- ¹⁸ Po rami SENHOR Nhanderuete ijayvu:
- Jypygua jaxyha ha'e jypy'i araa py ma Peru 'rã peteĩ vaka ra'y ivaikue rei e'ŷ va'e, ha'e va'e py oo iky'a e'ŷ va'e peiky'a'o aguã.
- ¹⁹ Huguykue ma sacerdote ogueru vy templo rokẽ yta ikuai va'e rupi 'rã omoĩ, ha'e gui altar irundy henda py ijapy ikuai va'e py, ha'e opy ja'o mbyte pygua rokẽ yta rupi guive.
- ²⁰ Ha'ekue rami ju 'rã pejapo sete araa py. Potae vy e'ŷ, peikuaa vy e'ŷ pejejavyague re 'rã pejapo. Ha'e rami py 'rã peiky'a'o templo.

Páscoa ára pyguarã re ijayvuague

- ²¹ — Ha'e gui jypygua jaxyha ha'e catorze araa py ma pejapo 'rã ngaru Páscoa. Sete ára re 'rã pejapo. Mbojape imbovua revegua e'ŷ 'rã pe'u.
- ²² Ha'e va'e árave ma huvixave ogueru 'rã peteĩ vaka ra'y ha'e ae ojejavyague reguarã, yvy re ikuai va'e ha'e javi pe guive.

²³ Ha'e gui sete ára re ngaru oikoa ja ma ogueru 'rā SENHOR pe oapy reve ome'ẽ mbyrã, sete vaka ra'y ha'e sete vexa'i ra'y ivaikue rei e'ŷ va'e, sete ára pyguarã. Ha'e gui ko'ẽ nhavõ ome'ẽa 'rā peteĩ kavara jejavya re.

²⁴ Oguereko katu avi 'rā mba'emo aju guigua ome'ẽ mbyrã. Vaka ra'y nhavõ reve guarã ogueru 'rā peteĩ ajaka, vexa'i nhavõ guive, ha'e gui peteĩ galão azeite ju ajaka mba'emo aju oĩ nhavõ.

²⁵ Ha'e gui sete jaxyha'e quinze araa guive ha'ekue rami ae tema 'rā ojapo sete ára re ngaru oikoa ja. Jejavya regua 'rā ome'ẽ ha'ekue rami ae, mba'emo oapy reveguia, mba'emo aju guigua ha'e azeite guive.

46

Sábado ára ha'e jaxy pyau nhavõ ngaru oiko jave pyguarã re ijayvuague

¹ Po rami ijayvu SENHOR Nhanderuete:

— Opy ja'o mbyte pygua rokẽ kuaray ou katy oĩ va'e ma onhemboty tema 'rā pemba'epoia ára mboapy meme va'e re. Sábado ára anho 'rā ojepe'a, ha'e gui jaxy pyau jave ngaru oikoa ára py guive.

² Ha'e gui huvixave ma oka katygui oike 'rā okẽ regua oguy puku rupi. Okẽ yvýry optya 'rā ho'amy. Ha'e ramia ja sacerdote kuery ma mba'emo ogueroko katu 'rā oapy reve ome'ẽ va'erã huvixave ogueru va'ekue, Nhanderuete reve peteĩ rami ikuiaia regua guive. Ha'e ramo huvixave ombojerovia 'rā okẽ py hi'aĩ reve, ha'e gui oẽ ju 'rā. Ka'aru e'ŷa ja okẽ nombotyai 'rā.

³ Ha'e va'e okẽ rexei ae avi yvy re ikuai va'e kuery ombojerovia 'rā okuapy SENHOR renonde, sábado ha'e jaxy pyau ngaru oikoa ára py guive.

⁴ Sábado ára ma huvixave oapy reve ome'ẽ 'rā SENHOR pe mboapy meme vexa'i ra'y ha'e peteĩ vexa'i ava ivaikue rei e'ŷ va'e meme.

⁵ Mba'emo aju guigua ma vexa'i ava ome'ẽ nhavõ ome'ẽ avi 'rā peteĩ ajaka. Ha'e rã vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteĩ ajaka ome'ẽ nhavõ ome'ẽ avi 'rā mboapy litros azeite.

⁶ Ha'e rã jaxy pyau jave ngaru oikoa ára py ma peteĩ vaka ra'y 'rā ome'ẽ mboapy meme vexa'i ra'y ha'e peteĩ vexa'i ava reve, ivaikue rei e'ŷ va'e meme.

⁷ Vaka ra'y ha'e vexa'i ava ome'ẽ nhavõ ogueru avi 'rā peteĩ ajaka mba'emo aju guigua. Ha'e rã vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteĩ ajaka ome'ẽ nhavõ ome'ẽ avi 'rā mboapy litros azeite.

⁸ Ha'e gui huvixave ma okẽ regua oguy puku rupi 'rā oike, ha'e gui ha'ekue rupi ae ju 'rā oẽ.

Mba'emo ome'ẽmby re ijayvuague

⁹ — Ngaru oikoa py MA yvy re ikuai va'e ou 'rā okuapy SENHOR renonde omboete aguã. Ha'e kuery va'e regua kuaray ijapu'a'ia katy okẽ oĩ va'e rupi oike va'ekue ma kuaray puku-a katy ju 'rā oẽ, ha'e rã kuaray puku-a katygui oike va'ekue ma kuaray ijapu'a'ia katy 'rā oẽ jogueravy. Okẽ oikeague rupi e'ŷ ju 'rā oẽ, hovai re 'rā oẽ.

¹⁰ Ha'e kuery oike joguerovy jave huvixave voi oike 'rā ha'e kuery mbyte rupi. Ha'e gui ma ha'e kuery oẽ jogueravy jave ma ha'e voi oẽ ju 'rā ov.

¹¹ Nhemboaty iky'a e'ŷ va'e ha'e ngaru oiko va'e py ma vaka ra'y ha'e vexa'i ava ome'ẽ nhavõ mba'emo aju guigua peteĩ ajaka ome'ẽa avi 'rā. Ha'e rã vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteĩ ajaka ome'ẽ nhavõ ome'ẽ avi 'rā mboapy litros azeite.

¹² Xapy'a rei huvixave ome'ẽxe'a'i py 'rā SENHOR pe ogueru mba'emo oapy reve, e'ŷ vy hexeve peteĩ rami ikuiaia reguarã. Ha'e ramo ixupe oipe'aa 'rā okẽ kuaray oua katy oĩ va'e, mba'emo oapy reve ome'ẽ aguã, hexeve peteĩ rami ikuiaia regua guive, sábado ára py ojapoaty rami ae. Ha'e gui oẽ ma ramo okẽ ombotyai ju 'rā.

¹³ — Ko'ẽ nhavõ SENHOR pe peme'ẽ 'rā peteĩ vexa'i ra'y peteĩ ma'etŷ va'e ivaikue rei e'ŷ va'e peapy reve. Ko'ẽ nhavõ tema 'rā peme'ẽ.

¹⁴ Ha'e va'e reve guarā ma ko'ẽ nhavō perekō katu avi 'rā mba'emo aju guigua SENHOR pe peme'ẽ va'erā. Mboapy litros 'rā perekō katu, azeite peteĩ litro raxa'i reve, trigo reve omoapomoa aguā. Ha'e va'e ayvu ma ko'ẽ nhavō 'rā pejapo raka'e rā peve guarā.

¹⁵ Ha'e rami ae ko'ẽ nhavō jepi 'rā perekō katu vexa'i ra'y, mba'emo aju guigua ha'e azeite, oapy reve ome'ẽ mbyrā.

¹⁶ Po rami ijayvu SENHOR Nhanderuete:

— Amongue py huvixave peteĩ yvy oguereko va'e ome'ẽ 'rā gua'y kuery pe. Ha'e ramo ta'y kuery mba'e ae 'rā opyta, raka'e rā peve guarā.

¹⁷ Ha'e rā guembiguai kuery pe ri yvy ome'ẽ ramo imba'e opyta 'rā ma'etŷ jubileu 'epy va'e oiko peve'i. Ha'e ramo huvixave pe ae ju 'rā opyta, mba'eta ta'y kuery mba'erā ae.

¹⁸ Huvixave ma neĩ ruxā'i ma voi ndogueraai 'rā guembiguai kuery pegua oĩ va'e, ndoipe'ai 'rā guive ijyvy gui. Oyvy gui ae 'rā ome'ẽ gua'y kuery pe, xevygua kuery peteĩ-teĩ ijyvy gui ndoipe'aai aguā — he'i.

¹⁹ Ha'e va'e rire ava xereraa va'e ma oikeaty yke katy okẽ oĩ va'e rupi ju xereraa. Kuaray ijapu'a'ia katy xereraa sacerdote kuery pegua opy ja'o'i iky'a e'ŷ va'e py. Ha'e vy ijapy kuaray oikea katy oĩ va'e re oexa uka peteĩ henda.

²⁰ Ha'e vy aipoe'i xevy:

— Kova'e henda py ma sacerdote kuery ombojoj 'rā mba'emo omboekovia aguā regua ome'ẽ mbyre, jejavya regua ha'e mba'emo aju guigua guive, oka katy amboae henda py heta va'e kuery ikuiaia py ogueraa e'ŷ aguā, heta va'e kuery iky'a e'ŷ va'e rami rive opyta e'ŷ aguā — he'i.

²¹ Ha'e gui ma oka katy oguy oĩ va'e py ju xereraa, irundy henda py oguy apy ikuai va'e rupi. Ha'e gui ijapy oĩ va'e py oguy mboae aexa avi.

²² Mba'eta oguy apy ikuai va'e re oguy kyrīve'i va'e ju oĩ, vinte metros ipuku-a ha'e quinze ipya va'e. Ha'e va'e oguy irundyve va'e ma joo rami ae tuvixa.

²³ Ha'e gui oguy ikuai va'e nhavō rupi oĩ ikora, irundyve rupi. Kora yvy'iry ha'e javi rupi ikuai tata rupa.

²⁴ Ha'e ramo xevy pe aipoe'i:

— Koropi ma templo re opena va'e kuery ombojoj 'rā heta va'e kuery mba'emo ome'ẽ va'ekue.

47

Yy mba'emo ky'a'oarā oxyry va'e re ijayvuague

¹ Ha'e va'e rire ma teĩgue ju xereraa templo rokẽ py. Ha'e py aexa templo rokẽ guy rupi yy oẽ oiny rā. Kuaray oua katy oxyry. Mba'eta templo ma kuaray oua katy ae ojepe'a oiny.

Ha'e gui yy ma iguy oiporu kuaa regua gui oẽ ouvy, altar regua kuaray puku-a katy gui.*

² Ha'e gui kuaray ijapu'a'ia katy okẽ ojepe'a va'e py ju xereraa, ha'e vy oka katy xererojere heravy, kuaray oua katy okẽ oĩ va'e peve. Aexa rā yy oxyry oiny oiporu kuaa regua rupi.

³ Ha'e gui ava va'e ma kuaray oua katy ju oẽ ovy, opo py ixã mba'emo a'ãarã oguereko reve. Ha'e vy quinhentos metros oa'ãa py xemboaxa yy rupi. Ha'e rā yy ovaẽ ouvy xepy nhu'ã peve.

⁴ Ha'e vy quinhentos metros ju oa'ãvea py ma teĩgue ju xemboaxa yy rupi. Ha'e ramo xerenapy'ã peve yy ovaẽ. Ha'e gui quinhentos metros ju oa'ãa py ma yy rupi xemboaxa rā xeku'a peve ovaẽ.

⁵ Ha'e gui quinhentos metros ju oa'ãa py ma yakã ete ma oxyry, aaxa aguā nda'evei va'e, mba'eta yakã ma typy raxa ja'yta reve jaaxa aguā ha'eve va'e, avave rei oaxaa va'erā nunga e'ŷ.

⁶ Ha'e gui aipoe'i xevy:

— Ava ra'y, rexpa pa ha'e nunga? — he'i vyve yakã rembe peve ju xereraa.

⁷ Ha'e py avaẽ ju ma vy yakã rembe rupi heta aexa yvyra, jovaive rupi ikuai va'e.

⁸ Ha'e vy aipoe'i xevy:

* 47:1 Apocalipse 22.1-2

— Kova'e yy ma kuaray oua katy oẽ vy oxyry 'rã ovy yvy joja reia rupi, ha'e gui Ye'ẽ Manoa 'epy va'e py 'rã ovaẽ. Ha'e ramo yy ha'e py voi iporã rei ju 'rã.

⁹ Kova'e yakã oxyry oinya rupi rei ma temimoingo kuery omyĩ va'e heta ete ikuai, pira voi. Mamo rã rei yy ovaẽa py ma ye'ẽ rupi tei yy porã ete 'rã opyta. Yakã oaxaa rupi ma opa marãgua ikuai.

¹⁰ Hembe rupi ma pira mbo'aa kuery ikuai. En-Gedi guive En-Eglaim peve oĩ 'rã pira mbo'aa omomboa aguã. Pira peteĩ-tei regua ikuai va'e ma ye'ẽ tuvixa va'e py rami heta ete.

¹¹ Ha'e rã yapo jaxuru reia rupi ma yy na'iporãi 'rã, jukyrã rive opyta.

¹² Yakã rembe jovaise rupi ma vyryra ikuai. Opa marãgua hi'a va'e ikuai, ja'u va'erã meme. Hogue na'ixorã 'rã, ndai'a e'yi 'rã guive. Jaxy nhavõ 'rã hi'a, oo iky'a e'yi va'e gui yy oẽ rire. Hi'a ma ja'u va'erã, ha'e rã hogue ma moã meme.

Israel yvy apy re ijayvuague

¹³ Ha'e gui po rami SENHOR Nhanderuete ijayvu:

— Po rami 'rã yvy pemboja'o Israel kuery regua doze ikuai va'e peguarã. José kuery ma mokoĩ henda py 'rã ojopy.*

¹⁴ Peteĩ-tei regua pe pemboja'o 'rã joo rami guarã. Mba'eta xepo audi reve aura ae ma karamboae peneramoĩ kuery pe ame'ẽ aguã. Ha'e rami rire pendevy pe ju kova'e yvy ome'ẽa 'rã.

¹⁵ — Po rami 'rã oĩ pendeyvy apy. Kuaray ijapu'a'ia katy rupi oo 'rã yakã guaxu guive Hetlom tetã via rupi Zedade py nhavãea peve.

¹⁶ Ha'e gui ma Hamate rupi, Berota, Sibraim tetã (ha'e va'e ma Damasco ha'e Hamate mbyte oĩ va'e), Hazer-Haticom tetã Haurã yvy apy katy'i oĩ va'e rupi voi oo.

¹⁷ Ha'e rami py ye'ẽ guive Hazar-Enom peve 'rã oo, Damasco tetã katy'i peve. Ha'e gui kuaray ijapu'a'ia katyve opyta 'rã Hamate yvy. Ha'e rami 'rã opyta yvy apy kuaray ijapu'a'ia katy rupi oo va'e.

¹⁸ Ha'e gui kuaray oua katy rupi ma Haurã ha'e Damasco guive oo 'rã Gileade ha'e Israel yvy mbyte rupi, Jordão yakã rupi ae. Ha'e gui kuaray ijapu'a'ia katy oĩ va'e guive ye'ẽ kuaray oua katyguia peve 'rã pea'ã.

¹⁹ Kuaray puku-a katy rupi ma Tamar guive 'rã oo Meribá-Cades regua yy peve, ha'e yakã Egito katy'i oĩ va'e guive ye'ẽ tuvixa va'e peve. Ha'e rami 'rã yvy apy kuaray puku-a katyguia oĩ.

²⁰ Ha'e rã yvy apy kuaray oikea katyguia ma ye'ẽ tuvixa va'e guive Hamate tetã py nhavãea peve. Ha'e rami 'rã kuaray oikea katyguia oĩ.

²¹ — Ha'e rami py pemboja'opa 'rã yvy peẽ kuery peguarã, Israel regua ikuai va'e peteĩ-tei pe.

²² Xortea pexaa rupi 'rã peme'ẽ peẽ kuery pe ae ha'e amboae regua penembyte ikuai va'e ta'y va'e kuery pe. Pendevy rã ha'e kuery Israel kuery mbyte ikuai 'rã ha'e pygua ae rami avi. Peẽ kuery reve avi ojopy 'rã oyvyrã Israel regua ikuai va'e mbyte rupi.

²³ Amboae regua kuery mamo rã ikuiaia py ae 'rã peme'ẽ ijyvyrã — he'i SENHOR Nhanderuete.

48

Sete regua ha'e sacerdote kuery yvyrã re ijayvuague

¹ — Po rami ma Israel regua rery oĩ. Dã regua yvy apy ma kuaray ijapu'a'ia katy guive oo 'rã Hetlom rupi Hamate yvy re nhavaẽa ha'e Hazar-Enom peve, ha'e gui Damasco yvy apy kuaray ijapu'a'ia katyguia rupi Hamate peve, kuaray oua katy guive oikea katy peve.

² Ha'e gui Dã yvy re ma Aser yvy ju 'rã oje'a, kuaray oua katy guive oikea katy peve.

³ Ha'e gui Aser yvy re ma Naftali yvy ju 'rã oje'a, kuaray oua katy guive oikea katy peve.

* 47:13 José ma mokoĩ ta'y raka'e, Efraim ha'e Manassés, ha'e José pe ome'ẽa ta'y jypyguia pegua (1 Crônicas 5.1). Ha'e nunga rupi guyvy kuery gui ojopyve, mokoĩ henda py.

- ⁴ Ha'e gui Naftali yvy re ma Manassés yvy ju 'rã oje'a, kuaray oua katy guive oikea katy peve.
- ⁵ Ha'e gui Manassés yvy re ma Efraim yvy ju 'rã oje'a, kuaray oua katy guive oikea katy peve.
- ⁶ Ha'e gui Efraim yvy re ma Rúben yvy ju 'rã oje'a, kuaray oua katy guive oikea katy peve.
- ⁷ Ha'e gui Rúben yvy re ma Judá yvy ju 'rã oje'a, kuaray oua katy guive oikea katy peve.
- ⁸ Ha'e gui Judá yvy re ma oje'a 'rã yvy iky'a e'ý va'e pemboja'o va'erã, kuaray oua katy guive oikea katy peve. Israel regua yvy rami avi 'rã doze quilômetros raxa'i ipya ha'e ipuku-a, kuaray oua katy guive oikea katy peve. Mbyte py oĩ 'rã oo iky'a e'ý va'e.
- ⁹ SENHOR peguarã yvy pemboja'o va'erã puku-a ma doze quilômetros raxa'i, ha'e rã ipya ma cinco.
- ¹⁰ Ha'e va'e yvy sacerdote kuery pegua iky'a e'ý va'e puku-a ma doze quilômetros raxa'i 'rã kuaray ijapu'a'ia ha'e ipuku-a katy rupi, ha'e rã ipya ma cinco quilômetros 'rã kuaray oikea ha'e oua katy rupi. Mbyte py oĩ 'rã SENHOR pegua oo iky'a e'ý va'e.
- ¹¹ Ha'e va'e yvy optya 'rã Zadoque ramymino kuery sacerdote-rã oiky'a'o pyre peguarã, mba'eta ha'e kuery ma ojapo 'rã va'ekue ojapo ete raka'e, Israel kuery mboae opa marã rei ikuai teĩ, levita kuery eteve voi.
- ¹² Ha'e va'e yvy ma yvy iky'a e'ý va'e mbyte py oĩ 'rã iky'a e'ý ete va'e, ha'e oje'a 'rã levita kuery yvy re.

Levita kuery yvyrã re ijayvuague

- ¹³ — Ha'e gui levita kuery yvy ma sacerdote kuery yvy re oje'a 'rã. Ipuku-a ma doze quilômetros raxa'i, ha'e rã ipya ma cinco. Ha'e rami 'rãe ipuku-a ha'e ipya.
- ¹⁴ Ha'e kuery ma neĩ peteĩve henda py novendei 'rã, nomboekoviai, neĩ yvy porãa nomboaxai 'rã amboae kuery peguarã, SENHOR pe iky'a e'ý va'e ramo.

Tetã oĩ aguã re ijayvuague

- ¹⁵ — Ha'e gui yvy rembyrekue dois quilômetros raxa'i ipya ha'e doze raxa'i ipuku-a va'e ma optya 'rã tetã pygua kuery ikuai aguã, tetã yvýry rupi guarã. Ha'e rã tetã ma mbyte py 'rã optya.
- ¹⁶ Po rami 'rã tuvixaa oĩ: dois quilômetros raxa'i 'rã oo kuaray ijapu'a'ia katy, ipuku-a katy, oua katy ha'e oikea katy.
- ¹⁷ Ha'e rã tetã yvýry rupigua ma cento e vinte cinco metros 'rã oo kuaray ijapu'a'ia katy, ipuku-a katy, oua katy ha'e oikea katy.
- ¹⁸ Ha'e gui yvy iky'a e'ý va'e re oje'a va'e rembyrekue ma cinco quilômetros peve 'rã oo kuaray oua katy ha'e oikea katy, yvy iky'a e'ý va'e apy peve. Ha'e va'e rupi mba'emo aju oiko va'e optya 'rã tetã py ombo'epo va'e kuery peguarã.
- ¹⁹ Tetã py ombo'epo va'e kuery ae 'rã oma'etý okuapy ha'e py, Israel kuery ha'e javi regua.
- ²⁰ Ha'e va'e yvy ma doze quilômetros raxa'i jova-jovaive re, yvy iky'a e'ý va'e ha'e tetã yvýry rupigua reve.

Huvixave yvy re ijayvuague

- ²¹ — Yvy iky'a e'ý va'e ha'e tetã yvýry rupigua rembyrekue ma huvixave pe 'rã optya. Huvixave pegua ma yvy iky'a e'ý va'e doze quilômetros raxa'i ipya va'e regua kuaray oua katy ha'e oikea katy oo, Israel regua kuery yvy ooa rami avi. Ha'e va'e mbyte py 'rã oĩ yvy iky'a e'ý va'e ha'e henda iky'a e'ý va'e templo regua.
- ²² Ha'e rami vy Judá ha'e Benjamim regua yvy mbyte oĩ va'e ma huvixave peguarã 'rã optya, mbyte py levita kuery pegua ha'e tetã oĩ va'e reve'ý vy.

Peteĩ nhiruĩ regua kuery pegua yvy re ju ijayvuague

- ²³ — Ha'e gui Israel regua kuery mboae pegua yvy ju peikuua aguã, Benjamim kuery yvy ma kuaray oua katy guive oikea katy peve 'rã oo.
- ²⁴ Ha'e gui Benjamim yvy re ma Simeão yvy ju 'rã oje'a, kuaray oua katy guive oikea katy peve.

- ²⁵ Ha'e gui Simeão yvy re ma Issacar yvy ju 'rā oje'a, kuaray oua katy guive oikea katy peve.
- ²⁶ Ha'e gui Issacar yvy re ma Zebulom yvy ju 'rā oje'a, kuaray oua katy guive oikea katy peve.
- ²⁷ Ha'e gui Zebulom yvy re ma Gade yvy ju 'rā oje'a, kuaray oua katy guive oikea katy peve.
- ²⁸ Ha'e vy Gade yvy apy ma kuaray puku-a katy rupi oo 'rā Tamar guive Meribá-Cades regua yy ituia peve, ha'e Egito katy'i yakā oī va'e pukukue rupi ye'ē tuvixave va'e peve ju.
- ²⁹ Ha'e rami ae 'rā itui yvy xortea pexaa rupi Israel regua kuery pe pemboja'o va'erā, peteĩ-teĩ regua ikuiaia rami vy — he'i SENHOR Nhanderuete.

Tetā kora rokē re ijayvuague

- ³⁰ — Ha'e gui tetā kora rokē ma po rami 'rā opyta: Kuaray ijapu'a'ia katygua dois quilômetros raxa'i oo va'e re ma
- ³¹ mboapy okē 'rā ikuai: Rúben rokē, Judá ha'e Levi rokē, mba'eta tetā rokē ikuai va'e ma Israel kuery rery rupi 'rā omboerya.
- ³² Ha'e gui kuaray oua katygua dois quilômetros raxa'i oo va'e re ma mboapy okē ju 'rā ikuai, José, Benjamim ha'e Dā rokē.
- ³³ Kuaray puku-a katygua dois quilômetros raxa'i oo va'e re ma mboapy okē ju 'rā ikuai, Simeão, Issacar ha'e Zebulom rokē.
- ³⁴ Ha'e gui kuaray oikea katygua dois quilômetros raxa'i oo va'e re ma mboapy okē ju 'rā ikuai, Gade, Aser ha'e Naftali rokē.
- ³⁵ Tetā ojerea ha'e javi vy ma nove quilômetros. Ha'e va'e ára guive tetā omboerya 'rā “Ha'e py SENHOR oī” 'ea.*

* 48:35 Apocalipse 21.12-13

Daniel ayvu oĩa Daniel ayvu oĩa

Daniel ma kunumi teri reve Babilônia katy escravo-rã heraa va'ekue, irũ kuery reve. Ixupe Nhanderuete oexa uka mba'emo, ome'ẽ avi oexa ra'u pyre omombe'u porâve aguã. Ha'e nunga rupi Babilônia pygua huvixa ogueru guembiguarã. Heko vai va'e kuery mbyte Daniel oirũ kuery reve ikuai teĩ Nhanderuete pe ikuiaia py oĩ atã okuapy. Ha'e ramo opo'akaa oexa uka vy ogueraaa jepe tata ha'e guary kora gui voi (capítulos 3 ha'e 6).

Nhanderuete po'akaa re ae Daniel ijayvu. “Mba'eta ixuguigua hexa pyrã ha'e oexa uka va'e ma tuvixa ete. Nhomondyipaarã omoingo va'e py oexa uka imbaraetea. Ipo'akaa ma opa va'erã e'ŷ, openaa ma raka'e rã peve guarã” (4.3).

Peteĩ ava ra'y rami ojekuaa va'e rekorã re avi ijayvu, Nhanderuete ombopo'aka aguã re: “Pyávy aexa va'e re ama'ẽ ajupy vy peteĩ ju aexa arai reve yva gui ou ramo, ava ra'y rami ojekuaa va'e. Ha'e va'e ma Jypy guive guare oĩa py oo ramo omonhemboja. Ombopo'aka ha'e omboyvate ete huvixave oĩ aguã, ixupe hetia ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'ŷ, ndoaxai 'rãe, openaa nombovaipaai 'rã guive” (7.13-14). Novo Testamento py ma Jesus Cristo ha'e rami ae ijayvu ojee: “Xee ae ha'e. Ha'e gui pexa 'rã Ipo'akapa va'e oiporu kuaa regua re Ava ra'y ojeapo va'ekue oguapy ha'e yva gui ou ramo arai rupi”, he'i (Marcos 14.62).

Daniel ha'e irũ kuery oeko a'ãa ague

¹ Mboapy ma'etã re ma Judá pygua huvixa Jeoaquim oĩ jave, Babilônia pygua huvixa Nabucodonosor ou Jerusalém tetã py. Ha'e vy ojokopa tetã.

² Ipo py SENHOR omboaxa Judá pygua huvixa Jeoaquim, Nhanderuete pegua opy mba'emo ryru ikuai va'ekue guive. Ha'e ramo Sinar yvy re mba'emo ryru ogueraapa ngruuete pegua oo oĩ va'e pygurarã. Ha'e vy omoõ porãmba ngruuete pegua va'e py.

³ Ha'e gui huvixa aipoe'i tembiguai kuery rerekao Aspenaz pe, ogueru avi aguã amongue Israel kuery regua, huvixa ra'y kuery, yvatekueve,

⁴ kunumigue ivaikue reia peteĩ henda py ma voi oĩ e'ŷ va'e, hova porã rei va'e, 'arandua ha'e javi re ombo'e pyre, mba'emo ojapo kuaa va'e guive huvixave ro py omba'eapo aguã, caldeu kuery reko ha'e ijayvu re ombo'e porãa ma ramo.*

⁵ Ha'e va'e kunumingue pe ma ko'ẽ nhavõ huvixave ome'ẽ uka 'rã tembi'u iporâve va'e anho, huvixave ho'u va'e regua ae. Ome'ẽ uka avi vinho ha'e oy'u va'e regua, mboapy ma'etã re ha'e kuery ikuai aguã ha'e nunga re, ha'e va'e ára opaa py huvixave ro py omba'eapo aguã.

⁶ Ha'e kuery regua ma Daniel, Hananias, Misael ha'e Azarias, Judá regua meme ikuai.

⁷ Ha'e kuery rery ma tembiguai kuery rerekao oguerova ju, po rami: Daniel ma Beltessazar, Hananias ma Sadraque, Misael ma Mesaque, ha'e rã Azarias ma Abed-Nego.†

⁸ Ha'e rami teĩ Daniel opy'a re omoõ onhemongy'a e'ŷ aguã huvixave ho'u va'e ha'e vinho oy'u va'e regua py. Ha'e vy tembiguai kuery rerekao pe ojerure onhemongy'a e'ŷ aguã.

* ^{1:4} Caldeu kuery ma Babilônia pygua ae. Babilônia rery mboae ma Sinar (versículo 2). † ^{1:7} Ngruuete ramigua rery rupi omboery oayvu py ae, Israel kuery ayvu py Nhanderuete rery rupi 'rãgue py. Tery Daniel ma “Nhanderuete xerepya” 'ea rekoria omboery Beltessazar “Bel oeko repya” 'ea ngruuete ramigua Bel rery rupi. Ha'e gui tery Hananias “SENHOR nhanemboaxy” 'ea rekoria omboery Sadraque “Aku rembiguai” 'ea ngruuete ramigua Aku rery rupi. Ha'e gui tery Misael “Nhanderuete rami oiko va'e” 'ea rekoria omboery Mesaque “Aku rami oiko va'e” 'ea ngruuete ramigua Aku rery rupi ae. Ha'e gui Azarias “SENHOR oipytyvõ va'e” 'ea rekoria ma omboery Abede-Nego “Nego pegua” 'ea ngruuete ramigua Nego rery rupi.

⁹ Ha'e ramo Nhanderuete ojapo tembiguai kuery rerekao Daniel ojou porā ha'e omboaxy aguā rami.

¹⁰ Tembiguai kuery rerekao ombovai Daniel pe:

— Ha'e rami avi xee ma xeruvixa gui akyje, pe'u ha'e pey'u va'erā ome'ē uka rire. Mba'exā 'rā tu peē kuery pendejavegua kunumigue ikuai va'e gui penderova re penekangyve oexa aguā? Ha'e rami vy pendekáuxa huvixave ojaya 'rā xeakā — he'i.

¹¹ Oiko avi peteī ava Daniel, Hananias, Misael ha'e Azarias mongaruarā tembiguai kuery rerekao omoī va'ekue. Ha'e va'e pe ju Daniel ojerure vy aipoe'i:

¹² — Xee ajerure ndevy ore nerembiguai kuery orera'anga aguā dez ára peve, ha'e rami vy ro'u va'erā reme'ē aguā mba'emo rogue rive, ha'e yy roy'u aguā guive.

¹³ Ha'e gui mae ma reikuua pota 'rā orerova re, kunumigue huvixave tembi'u ho'u va'e regua ho'u va'e rova re guive. Ha'e gui rexaa kuaa rami 'rā orerereko nerembiguai kuery rami — he'i.

¹⁴ Ha'e rami rā ojou porā vy dez ára re oa'anga.

¹⁵ Dez ára opaa py ma ha'e va'e oexa rā ha'e kuery rova iporāve kunumigue huvixave rembi'u ho'u va'e kuery gui, imbaraetepave okuapy guive.

¹⁶ Ha'e rami rā tembi'u mbojya ha'e kuery pe nome'ēvei tembi'u iporā rei va'e regua ho'u va'erā neī vinho oy'u va'erā va'ekue. Mba'emo rogue'i anho ome'ē ha'e kuery pe ho'u aguā.

¹⁷ Ha'e va'e irundy kunumigue pe ma Nhanderuete ome'ē oiko kuaa aguā, mba'emo ojapo kuaa aguā guive guekorā ombopara pyre ha'e 'arandua ha'e javi py. Ha'e rā Daniel pe ma omo'aranduve, mba'emo oexa uka pyre ha'e oexa ra'u pyre oikuaa aguā.

¹⁸ Ha'e gui ma huvixave ogueru ruka aguā ára oa'angaague ovaē ma ramo tembiguai kuery rerekao oguerupa Nabucodonosor renonde.

¹⁹ Ha'e kuery reve huvixave ijayvu vy oikuaa pavē gui Daniel, Hananias, Misael ha'e Azarias hi'aranduve va'ea. Ha'e rami vy ha'e kuery ma huvixave ro py ikuai mba'emo ojapoa py.

²⁰ Mba'eta opa mba'e py ha'e kuery oikuaa ha'e hi'arandu aguā re huvixave oporandu vy oikuaa ha'e kuery dez-kue hi'aranduvea imba'ekuaa ha'e mba'emo oikuaa va'e kuery openaa rupi ikuai va'e ha'e javi gui.

²¹ Ha'e gui Daniel ma ha'e py ae oiko tema huvixave Ciro peteī ma'etē re ma oī peve.

2

Nabucodonosor oexa ra'uague mba'erā paa Daniel omombe'u porāveague

¹ Huvixave Nabucodonosor mokoī ma'etē re ma oīa py peteī mba'e oexa ra'u. Ha'e vy onhe'ē py onhemondyi rei vy ndoke kuaavei.

² Ha'e rami vy huvixave oenoī uka imba'ekuaa va'e kuery, hexa pyrā apoa, imba'evyky va'e ha'e caldeu kuery, huvixa oexa ra'u va'ekue omombe'u porāve aguā. Ha'e kuery oupa ma vy huvixave renonde ojexa uka okuapy.

³ Huvixa aipoe'i ha'e kuery pe:

— Xee aexa ra'u kuri peteī. Xenhe'ē py nda'eveia aendu guive aikuaaxe vy teī.

⁴ Ha'e ramo huvixa pe caldeu kuery aipoe'i okuapy aramaico ayvu py:

— Toikove huvixa raka'e rā peve! Emombe'u ke ha'vy rexaa ra'u va'ekue ore nerembiguai kuery pe. Ha'e ramo romombe'u porāve 'rā ndevy — he'i okuapy.

⁵ Huvixa ombovai vy aipoe'i caldeu kuery pe:

— Peteī mba'e ma xee po ramo aikuaa: Jypy xevy pemombe'u'rā aexa ra'uague, ha'e gui mba'erā paa guive. Ha'e nunga napemombe'u porāi ri ramo pendeayapaa 'rā, pendero voi ombovaipaa 'rā.

⁶ Ha'e rā xapy'a rei aexa ra'u va'ekue ranhe pemombe'u porā, ha'e guive mba'erā paa guive pemombe'u ri ramo mba'emo porā ete ame'ē 'rā pēvy, romboete uka 'rā guive. Ha'e nunga rupi pemombe'u xevy aexa ra'u va'ekue, ha'e gui mba'erā paa guive — he'i.

⁷ Ha'e gui mokoīguea ma ombovai vy

— Oreruvixave, ore nerembiguai kuery pe jypy remombe'u 'rāgue rexa ra'u va'ekue. Ha'e ramo ma romombe'u 'rā mba'erā paa — he'i okuapy.

⁸ Ha'e gui ma huvixa ijayvu vy aipoe'i:

— Xee aikuua pemboare rivea teī, mba'eta peikuua xeayvuague oiko ete 'rāa,
⁹ po rami: Aexa ra'u va'ekue napemombe'ui ri ramo peteīgue'i pyve rombopagapa
'rā. Mba'eta apu rupi pejogueroayvu ra'e, xerenonde xembotavya rupi pendeayvu teī,
pemboare xemboexaraixe vy. Nda'evei. Pemombe'u na aexa ra'u va'ekue. Ha'e ramo
mae ma aikuua 'rā mba'erā paa voi pemombe'u porā kuaa — he'i.

¹⁰ Ha'e ramo huvixave renonde caldeu kuery ombovai vy aipoe'i:

— Ha'e rami avi oreruvixave, yvy re jipoi ndee remombe'u uka va'e omombe'u kuaa
va'erā. Mba'eta huvixa yvatekueve ha'e ipo'akapave va'e teī ae ma, peteīve ma voi pova'e
ramigua nomombe'u ukaai 'rā guembiguai kuery imba'ekuaa va'e pe, hexa pyrā apoa, neī
caldeu kuery pe guive.

¹¹ Oreruvixave, ndeayvua ma haxy vai ete va'e. Avave rei jipoi ndevy omombe'u kuaa
va'erā, tuuete kuery e'ŷ vy. Ha'e rami avi ha'e va'e kuery ma nhande kuery reve ndoikoi
— he'i okuapy.

¹² Ha'e rami rā huvixave ivai vy ipoxy vaipa. Ha'e vy oayvu omondouka imba'ekuaa
va'e kuery Babilônia py ikuai va'e ha'e javi ojukapaa aguā.

¹³ Ha'e ramo ijayvuague imba'ekuaa va'e kuery ojukapaa aguā regua oikuua pavē ramo
Daniel ha'e irū kuery voi oekaa avi ojuka aguā.

¹⁴ Babilônia pygua imba'ekuaa va'e kuery jukapaarā oo va'e ma huvixave pegua
xondaro ruvixa Arioque hery va'e. Ha'e va'e reve ma Daniel o'arandua ha'e oiko kuaa
rupi jogueroayvu.

¹⁵ Ha'e vy huvixave rembiguai Arioque pe Daniel aipoe'i:

— Mba'e re tu po rami ete huvixave ijayvu? — he'i. Ha'e ramo Arioque ombovai vy
Daniel pe omombe'u mba'emo oiko va'ekue.

¹⁶ Ha'e ramo huvixavea py Daniel oo vy ixupe ojerure oa'anga pukuve'i ju aguā re,
huvixave pe omombe'u porā aguā oexa ra'u va'ekue mba'erā paa.

¹⁷ Ha'e gui ma Daniel ngoo py oo vy oirū kuery Hananias, Misael ha'e Azarias pe ju
omombe'u.

¹⁸ Ha'e kuery reve Nhanderuete yva pygua pe ojerure okuapy,omboaxy vy oikuua e'ŷ
pyre oikuua uka aguā re, Babilônia py imba'ekuaa va'e kuery ojukapaa py Daniel ha'e irū
kuery ojukaa avi e'ŷ aguā.

¹⁹ Ha'e ramo oikuua e'ŷ pyre Daniel pe oikuua uka pyávy mba'emo oexa ukaa py. Ha'e
ramo Nhanderuete yva pygua re Daniel ima'endu'a porā.

²⁰ Ha'e vy aipoe'i:

— Tove Nhanderuete rery re ta'ima'endu'a porāa raka'e rā peve, mba'eta ixuguigua ae
ou 'arandu ha'e po'akaa.

²¹ Ha'e ae ma oguerova 'rā ára, hi'ára py porā mba'emo ojapoa aguā. Oipe'a 'rā huvixa
kuery, ha'e gui amboae ju 'rā omoī huvixarā. Omo'aranduve 'rā hi'arandu va'e, mba'eta
oendu kuaa va'e pe oikuua ukave 'rā mba'emo.

²² Ha'e rami vy oikuua uka 'rā ndoikuai pyre ha'e onhomni mbyre voi. Ha'e ma pytūa py
mba'emo oī va'e voi oikuua va'e. Ha'e gui hendy va'e ma hexegua ae.

²³ Xeru kuery ruete, ndee ae rogueroovy'a ha'e romboete, mba'eta xevy pe reme'ē
xe'arandurā ha'e xembaraete aguā. Ange reikuua uka kuri huvixave oexa ra'u va'ekue
xee rojerureague — he'i.

²⁴ Ha'e gui ma Babilônia py imba'ekuaa va'e kuery jukapaarā omoī mbyre Arioque
va'ea py ju Daniel oo. Ha'e py oike vy aipoe'i ixupe:

— Ejuka eme imba'ekuaa va'e kuery Babilônia pygua. Xereroike huvixave renonde,
ha'e ramo huvixave pe xee amombe'u 'rā oexa ra'u va'ekue mba'erā paa — he'i.

²⁵ Ha'e rami rā Arioque ma huvixave renonde ogueroike pojava Daniel. Ha'e vy aipoe'i
ixupe:

— Peteĩ ava ajou Judá gui escravo-rã jaru va'ekue regua. Ha'e va'e ma omombe'u 'rã rexa ra'u va'ekue mba'erã paa — he'i.

²⁶ Ha'e ramo huvixave ombovai vy Daniel Beltessazar hery mboae va'e pe aipoe'i:

— Ndee pa remombe'u ta aexa ra'u va'ekue, ha'e gui mba'erã paa?

²⁷ Ha'e ramo huvixave renonde Daniel oĩa py ombovai:

— Xeruvixa, oikuua e'ŷ pyre remombe'u uka teĩ avave rei nomombe'u kuaai 'rã ndevy, imba'ekuua va'e kuery, hexa pyrã apoia, neĩ imba'evky va'e kuery voi.

²⁸ Ha'e rami teĩ peteĩ oiko Nhanderuete yva re. Ha'e va'e ae ma oikuua uka 'rã ndajaikuuai va'e. Ha'e rami vy xeruvixa Nabucodonosor, ndevy pe oikuua uka opaa ára mba'emo oiko va'erã. Ha'e gui ma nderupa py reke rejupya py ndeke rupi rexa ra'u va'ekue ma po rami:

²⁹ Xeruvixa, nderupa rupi ndetui reve repêxa rejupya va'ekue raka'eve rã mba'emo oiko va'erã re. Ha'e ramo ndajaikuuai va'e kuaa ukaa ae oikuua uka ndevy mba'emo oiko va'erã.

³⁰ Ha'e gui ma xevy pe ju oikuua uka, pavẽ hi'arandu va'e gui xe'aranduve ramo e'ŷ guive, ha'e rã ndee xeruvixa pe amombe'u aguã mba'erã paa, ndee reikuua porâve aguã ndeke rupi repêxa reiague.

³¹ — Ha'e gui xeruvixa, ndee rexa rã peteĩ ava ra'angaa tuvixa va'e ojekuaa. Ha'e va'e ma tuvixa ete, overaa nda'evei ete va'e opu'ã ho'amy nerenton, jaexa rã nhanemongye rei va'e.

³² Inhakã ma ouro guigua. Ipexo ha'e ijyva ma prata guigua. Hye ha'e hi'u rupi peve ma overa va'e guigua.

³³ Hetyma ma ferro guigua. Ha'e rã ipy ma ferro ha'e yapo guigua.

³⁴ Rema'ẽ rã peteĩ ita oi ouvy oïague gui, avave rei omboia ramo e'ŷ. Ha'e va'e ma ipy ferro ha'e yapo guigua áry ho'a vy omongu'ipa.

³⁵ Ha'e rami vy ta'angaa ha'e javi iku'ipa vyvoi: ferro guigua, yapo, overa va'e, prata ha'e ouro guigua. Iku'ipa vy mba'emo pirekue aty ramigua rive ojeapo rã yvytu oguerovevepa heravy. Oïague py ha'e nungakue jipovei. Ha'e rã ita ava ra'angaa ombovaipa va'ekue ma yvyt guaxu ojeapo vy yvy jave re omonyõ.

³⁶ — Ha'e ramigua rima rexa ra'u va'ekue. Ha'e gui xeruvixa, mba'erã paa voi romombe'u avi 'rã ndevy.

³⁷ Xeruvixa, ndee ae ma huvixa ikuai va'e ruvixave reĩ. Ndevy pe Nhanderuete yva pygua ome'ẽ huvixa reĩ aguã. Ha'e rami vy nembopo'aka, nemombaraete ha'e nemboyvate.

³⁸ Ndepo py omboaxa guive avakue opa rupigua, mymba nhuñdy rupi ikuai va'e, ha'e guyra oveve va'e, ha'e kuery ha'e javi re ndepo'aka aguã. Ndee ae ma inhakã ouro guigua.

³⁹ Ha'e gui ndee ndereikovei ma ramo nderekovia amboae ju 'rã ipo'aka ndegui iporiauve va'erã. Ha'e gui peteĩ ju 'rã opu'ã mboapya ipo'aka aguã. Ha'e va'e ma overa va'e guigua, yvy jave re ipo'aka avi va'erã.

⁴⁰ Ha'e va'e gui irundaya ipo'aka va'e ma ferro rami ete 'rã imbaraete, ferro nhomopẽmbaa ha'e nhomboa'ypaa rami 'rã joguereko. Ferro opa mba'e omopẽmbaa rami ha'e va'e voi nhomopẽmbaa ha'e nhomboa'ypa 'rã.

⁴¹ Ha'e rami avi ipy ha'e ipyxã rexa va'ekue ma amongue henda py yapo guigua, ha'e rã amboae henda py ma ferro guigua 'rã oĩ, mba'eta ha'e va'e openaa ma oja'o 'rã. Ha'e rami teĩ hexe oĩ 'rã ferro rami oĩ atã aguã, ferro ha'e yapo re irũ va'e rexaague rami.

⁴² Ipyxã ma ferro guigua ha'e yapo guigua reve ikuia rami avi ha'e va'e po'akaa voi amongue henda py imbaraete 'rã, ha'e rã amboae rupi ma ikangy 'rã.

⁴³ Ha'e gui ferro yapo re irũ va'e rexaague rami ha'e va'e kuery voi amboae regua re omenda vy irúmba 'rã okuapy teĩ joe nonhembojai 'rã guive, ferro yapo re ndoje'aia rami.

⁴⁴ Ha'e gui ma ha'e va'e huvixave kuery oĩ jave Nhanderuete yva pygua peteĩ omoĩ 'rã ipo'akapa va'e omomba pyrã e'ŷ. Ha'e va'e po'akaa ma amboae regua pe ndoaxai 'rã. Ha'e rami 'rãgue py omboa'ypa ha'e ombovaipa 'rã amboae kuery po'akaa ha'e javi, ha'e vy ha'e ae oĩ 'rã raka'e rã peve.

⁴⁵ Ha'e rami vy yvyty gui ita omboia ramo e'ŷ oi ouvy va'e rexa va'ekue ma omboa'ypa 'rã: ferro guigua, overa va'e, yapo, prata ha'e ouro guigua ha'e javi. Ha'e rami xeruvixa, ndevy pe Nhanderuete yvate ete va'e oikuua uka râ'e raka'eve râ'oiko va'erâ. Pova'e ae rexa ra'u va'ekue, ha'e mba'erâ paa voi ha'e rami ae, oguerovia pyrâ meme — he'i.

⁴⁶ Ha'e gui ma huvixave Nabucodonosor guenapy'ã re oĩ Daniel renonde, ngova yvy re omovaẽ reve. Ha'e vy ijayvu tembi'u ha'e heakuã porâ va'e ixupe oguerua aguã re.

⁴⁷ Huvixave aipoe'i Daniel pe:

— Anhetê ete peẽ kuery ruete ma tuuete ikuai va'e gui yvateve va'e, huvixave ikuai va'e ruvixa, oikuua e'ŷ pyre kuaa ukaa guive, mba'eta aikuua e'ŷ va'ekue reikuua uka xevy — he'i.

⁴⁸ Ha'e ramo huvixave omboyvate Daniel. Ha'e vy ixupe ome'ẽ reta iporâ ete va'e, omoĩ guive Babilônia katy'i rupi ikuai va'e ha'e javi re opena aguã, Babilônia py imba'ekuua va'e kuery ha'e javi ruvixarâ guive omoĩ.

⁴⁹ Daniel ojerure râ huvixave irû kuery omoĩ avi Babilônia py mba'emo ikuai va'e re opena aguã: Sadraque, Mesaque ha'e Abede-Nego hery va'e. Ha'e râ Daniel ma huvixave ro py ae oiko.

3

Daniel irû kuery tata gui oo jepeague

¹ Huvixave Nabucodonosor ojapo uka peteĩ ta'angaa ouro guigua. Yvatea ma trinta metros, ha'e râ ipya ma mboapy metros. Ha'e va'e ma Dura nhuñdy py omopu'ã imo'amy, Babilônia katy'i.

² Ha'e gui huvixave Nabucodonosor omboaty ukapa huvixa kuery mboae, tetâ ha'e estado re opena va'e, nhomboayvu va'ety, peráta re opena va'e, joe opena va'e, nhomongeta va'ety, ha'e openaa rupi guembiguai ikuai va'e ha'e javi, ha'e kuery ou vy huvixave Nabucodonosor ta'angaa omopu'ã uka va'ekue omboete ypy aguã.

³ Ha'e ramo huvixa kuery ijatypa okuapy, tetâ ha'e estado re opena va'e, nhomboayvu va'ety, peráta re opena va'e, joe opena va'e, nhomongeta va'ety, ha'e openaa rupi hembiguai ikuai va'e ha'e javi. Ha'e kuery ijatypa okuapy huvixave Nabucodonosor ta'angaa omopu'ã uka va'ekue omboete ypy aguã. Ha'e vy opu'ãmba okuapy ta'angaa Nabucodonosor omopu'ã uka va'ekue renonde rupi.

⁴ Ha'e gui ma huvixa ayvu mombe'ua ijayvu atâ vy aipoe'i:

— Peẽ kuery pe ma po rami huvixa ojapo uka, heta va'e kuery, amboae yvy regua ha'e ayvu mboae py pendeayvu va'e ha'e javi pe:

⁵ Mimby guaxu pendu vy, mimby, ixâ reta va'e, mbaraka ixâ irundy va'e, mbaraka, gaita ha'e opa marâguia mba'epu ombopua râ pendu vy ma pejero'apa 'râ pekuapy yvy re, ta'angaa ouro guigua huvixave Nabucodonosor omopu'ã uka va'ekue pemboete aguã.

⁶ Ha'e râ peteĩ va'e rei xapy'a rei ndojero'ai ha'e nomboetei va'e ma ha'e ramove omomboa 'râ tata rupa haku ratâvea py — he'i.

⁷ Ha'e rami râ ha'e kuery ha'e javi ma mimby guaxu, mimby, ixâ reta va'e, mbaraka ixâ irundy va'e, mbaraka, gaita ha'e opa marâguia mba'epu ombopua râ oendu vy ojero'apa okuapy: heta va'e kuery, amboae yvy regua ha'e ayvu mboae py ijayvu va'e ha'e javive. Ha'e vy omboetepa okuapy ta'angaa ouro guigua huvixave Nabucodonosor omopu'ã uka va'ekue.

⁸ Ha'e rami jave amongue avakue caldeu regua ou vy ijayvu okuapy judeu kuery re.

⁹ Ha'e vy huvixave Nabucodonosor pe aipoe'i okuapy:

— Oreruvixave, tereikove riae!

¹⁰ Ha'e gui oreruvixave, po rami ndeayvu va'ekue: avakue ha'e javive mimby guaxu oendu vy, mimby, ixâ reta va'e, mbaraka ixâ irundy va'e, mbaraka, gaita ha'e opa marâguia mba'epu ombopua râ oendu vy ojero'apa reve ta'angaa ouro guigua omboete aguã.

¹¹ Ha'e rā peteĩ va'e rei ndojero'ai ha'e nomboetei va'e ma omomboa 'rā tata rupa haku ratāvea py.

¹² Ha'e gui apy ikuai amongue avakue judeu regua Babilônia katy'i rupi ikuai va'e re opena va'erā remoĩ va'ekue. Ha'e va'e kuery ma Sadraque, Mesaque ha'e Abede-Nego. Oreruvixave, ha'e va'e avakue ma nanemboetei. Mba'eta ndojeroviai nderuete kuery rerekō va'e re, nomboetei guive ta'angaa ouro guigua remopu'ã uka va'ekue — he'i okuapy.

¹³ Ha'e rami Nabucodonosor oendu vy ivai ha'e ipoxy vaipa. Ha'e rami vy oenoĩ uka Sadraque, Mesaque ha'e Abede-Nego. Ha'e rā huvinxave renonde oguerua.

¹⁴ Ha'e ramo Nabucodonosor aipoe'i ha'e kuery pe:

— Sadraque, Mesaque ha'e Abede-Nego, anhetē teve peẽ ndapejeroviai xeruete kuery re, neĩ napemboetei guive ta'angaa ouro guigua amopu'ã uka va'ekue?

¹⁵ Ha'e gui aŷ ma pendu pota 'rāgue mimby guaxu, mimby, ixā reta va'e, mbaraka ixā irundy va'e, mbaraka, gaita ha'e opa marāgua mba'epu ombopua rā, pejero'a vy ta'angaa ajapo uka va'ekue pemboete aguã. Mba'eta napemboetei ramo ha'e ramove'i penemomboa 'rā tata rupa haku ratāvea py. Ha'e va'e rire mava'e tuuete 'rā tu pendereraa jepe xepo gui? — he'i.

¹⁶ Ha'e ramo Sadraque, Mesaque ha'e Abede-Nego ombovai huvinxave pe:

— Oreruvixa Nabucodonosor, ha'e nunga py ma ore kuery rombovai e'ŷ teĩ ha'eve.

¹⁷ Mba'eta oreruete ixupe roikoa va'e ma tata rupa gui orereraa jepe kuaa va'e, ndepo gui guive.

¹⁸ Ha'e rami e'ŷ teĩ oreruvixave, eikuua pota ke pova'e re: Ore ma nderuete kuery pe ndoroikoi 'rā, noromboetei 'rā guive ta'angaa ouro guigua remopu'ã uka va'ekue — he'i.

¹⁹ Ha'e ramo Nabucodonosor ipoxy vaipa vy Sadraque, Mesaque ha'e Abede-Nego pe hova vaikuera. Ha'e rami vy tata rupa py omoendy jepiaty áryve sete-kue omoendy ukave vy

²⁰ ijayvu oxondaro kuery imbaraeteve va'e pe ojokuapa aguã Sadraque, Mesaque ha'e Abede-Nego, ha'e gui tata rupa haku ratāvea py omombopa aguã.

²¹ Ha'e ramo ha'e kuery ija puku, kamixa, xapeo ha'e ija mboae reve-reve ojokuapa vy omombo tata mbyte py.

²² Huvinxave ojapo uka vyvoi, ha'e tata kua py hendy guaxu oiny ramo hendy vuku va'e ojukapa avakue Sadraque, Mesaque ha'e Abede-Nego momboa kuery.

²³ Ha'e rā mboapy avakue Sadraque, Mesaque ha'e Abede-Nego ma ojokuapaa ague reve meme ho'apa tata mbyte py.

²⁴ Ha'e gui ma huvinxave Nabucodonosor oma'ẽ vy onhemondyi, ha'e opu'ã pojava ovvy aipoe'i ojeupegua nhomongeta va'ety kuery pe:

— Mboapy avakue e'ŷ ri ty'y ojokua pyre tata py nhamombo va'ekue?

Ombovai okuapy huvinxave pe:

— Anhetē ma oreruvixa — he'i.

²⁵ Ha'e gui ijayvu ju vy aipoe'i:

— Mba'ixa tu ha'vy irundy avakue aixa ojokua pyre e'ŷ tata mbyte rupi oguata okuapy rā, mba'eve py ikuai axy e'ŷ re. Irundaya ma tuuete kuery ra'y rami ojekuaa — he'i.

²⁶ Nabucodonosor onhembojave ovvy tata rupa py hendy oiny va'e rokẽ katyve'i. Ha'e ovvy ojapukai vy aipoe'i:

— Sadraque, Mesaque ha'e Abede-Nego, tuuete yvateve va'e rembiguai kuery, peẽ ke upe gui, peju! — he'i. Ha'e ramo Sadraque, Mesaque ha'e Abede-Nego ma tata mbyte gui oẽmba jogueruvy.

²⁷ Ha'e ramo ikuua py ono'õmba okuapy huvinxava mboae kuery, tetā ha'e estado re opena va'e, ha'e huvinxave pegua nhomongeta va'ety kuery. Ha'e kuery oexa okuapy rā mboapy avakue re mba'eve py tata ndojapo vai ra'e, hi'a inhakã áry ndoverei, oao oguereko va'e amboae rami ndopytai, neĩ tata pixe noĩ ra'e ha'e kuery re.

²⁸ Ha'e rami rā Nabucodonosor ijayvu vy aipoe'i:

— Ta'ima'endu'a porāa Sadraque, Mesaque ha'e Abede-Nego ruete re, mba'eta ojeupegua anjo ombou vy ogueraa jepe guembiguai kuery. Ha'e kuery ma hexe ojerovia vy huvixave ayvu rupi e'ŷ ikuai. Amboae ramigua tuuete re ojerovia ha'e omboete 'rāgue py omboaxa guete, nguuete pe anho ikuai vy.

²⁹ Ha'e nunga rupi xee ma po rami ajapo uka: Xapy'a rei heta va'e kuery regua, amboae regua ha'e ayvu mboae py ijayvu va'e ma Sadraque, Mesaque ha'e Abede-Nego ruete re ijayvu vai ramo ojayapaa 'rā, hoo ombovaipaa 'rā guive. Mba'eta tuuete mboae jipoi kova'e rami nhandereraa jepe va'erā — he'i.

³⁰ Ha'e rami vy Babilônia yvy re huvixave omoingo porā Sadraque, Mesaque ha'e Abede-Nego.

4

Huvixa Nabucodonosor na'inhakā porāvei ranhe oikovyague re ijayvua

¹ Ha'e gui huvixave Nabucodonosor oayvu omondouka yvy regua kuery ha'e javive pe, amboae regua ha'e ayvu mboae py ijayvu va'e yvy jave re ikuai va'e pe. Ha'e vy aipoe'i: “Toĩ pendekuai porā ete aguā!

² Peẽ kuery pe xee amombe'ux hexa pyrā ha'e iporā ete va'e Nhanderuete yvate ete va'e xere ojapo va'ekue.

³ Mba'eta ixuguigua hexa pyrā ha'e oexa uka va'e ma tuvixa ete. Nhomondyipaarā omoingo va'e py oexa uka ipo'akaa. Ipo'akaa ma opa va'erā e'ŷ, openaa voi raka'e rā peve guarā.

⁴ “Ha'e gui xee Nabucodonosor ma xero py aiko porā va'ekue, xevyguia opy avy'a aikovy va'ekue.

⁵ Ha'e gui ma peteĩ aexa ra'u va'e xemondyi. Xerupa rupi xetui jave apēxaa ha'e xeke rupi aexa va'e xembopy'a eta rei.

⁶ Ha'e rami vy aenoĩ ukapa imba'ekuaa va'e Babilônia py ikuai va'e ha'e javi, xevy pe omombe'u aguā aexa ra'u va'ekue mba'erā paa.

⁷ Ha'e ramo oike okuapy imba'ekuaa va'e kuery, hexa pyrā apoa, caldeu ha'e imba'evyky va'e kuery ha'e javi. Ha'e kuery pe amombe'u aexa ra'u va'ekue, va'eri ha'e kuery ma nomombe'u kuaai mba'erā paa.

⁸ Opaa py ma ou Daniel. Ha'e va'e ma Beltessazar hery va'e xeruete rery rupi ae. Ha'e rā ha'e va'e re ma oĩ Nhanderuete iky'a e'ŷ va'e Nhe'ẽ. Ha'e ramo ixupe aexa ra'u va'ekue amombe'u vy aipoa'e:

⁹ ‘Beltessazar, imba'ekuaa va'e kuery ruvixa, xee ma aikuua ndere oĩ Nhanderuete iky'a e'ŷ va'e Nhe'ẽ. Ha'e nunga rupi oikuua e'ŷ pyre teĩ ndevy pe ndaxyi 'rā. Po rami ma xeke rupi aexa ra'u va'ekue. Emombe'u ke mba'erā paa.

¹⁰ Xerupa rupi xetui vy xeke rupi aexa va'ekue ma po rami: Xee ama'ẽ vy peteĩ aexa yvy mbyte yvyra hi'aĩ va'e, yvate ete va'e.

¹¹ Ha'e va'e yvyra ma yvateve ha'e imbaraeteve ovy, yva re ovaẽ peve. Yvy apy rupi gui voi oexaa.

¹² Hogue ma iporā, hi'a reta guive. Hexe oĩ opa marāgua rembi'urā. Hi'yvypy rupi ma mymba nhuũndy rupigua ojou kuaray'ā. Hakā re ma guyra oveve va'e onhemboaitiy okuapy. Hexe ma temimoingo kuery ha'e javi okaru.

¹³ Xerupa rupi xetui vy aexa ra'u va'e py ma peteĩ ju aexa mba'emo rarōa iky'a e'ŷ va'e. Ha'e va'e ma oguejy ouvy yva gui.

¹⁴ Ijayvu atā ete vy aipoe'i: “Peake'o ke yvyra, hakā pejayapa guive. Pemboipa hogue, hi'a voi pemombopa. Pemondyipa mymba iguy gui, ha'e rā hakā gui ma pemondyi imondovy guyra kuery.

¹⁵ Ha'e rā hapytakue ma yvy re topyta hapo reve. Pejokua ke ferro ha'e overa va'e guigua corrente py, nhuũndy mbyte oĩa py ae. Yxapy yva guigua tomoakŷ, ha'e mymba ikuai va'e rami tokaru oikovy jai rogue yvy re ikuai va'e re.

¹⁶ Amboae rami ta'ikuraxõ, avakue regua kuraxõ oĩ ve'ŷ aguã rami. Ha'e rami 'râgue py ixupe tome'ëa kuraxõ mymba regua. Ha'e nunga toĩ hexe sete ma'etõ oaxa peve", he'i.*

¹⁷ Ha'e rami ae mba'emo rarõa kuery ijayvuague, iky'a e'ŷ va'e kuery oayvu omondouka va'ekue, ha'e ramo okuave va'e ha'e javi oikuua aguã avakue ipo'aka va'e gui Yvate ete va'e ipo'akapave va'ea. Ha'e rami vy ombopo'akaxe va'e rei 'râ ombopo'aka, avakue regua yvyf'igueve teñ omoñ 'râ pavẽ re opena aguã.

¹⁸ Ha'e nunga ma xee huvixave Nabucodonosor aexa ra'u va'ekue. Ha'e gui ndee Beltessazar, emombe'u ke mba'erã paa, mba'eta imba'ekuua va'e kuery apenaa rupi ikuai va'e ha'e javi nomombe'u kuaai. Ha'e râ ndee ma remombe'u kuaa 'râ, mba'eta ndere oĩ Nhanderuete iky'a e'ŷ va'e Nhe'ë', ha'e.

¹⁹ "Ha'e ramo Daniel Beltessazar hery avi va'e onhemondyi rei reve optya are ranhe, opõxa ha'e ipy'a eta reia py. Ha'e rami râ xee huvixave teñgue ju xeayvu vy aipoa'e ixupe: 'Beltessazar, ndep'y'a eta reieme aexa ra'uague gui, neñ mba'erã paa re voi', ha'e.

"Ha'e ramo Beltessazar ombovai vy aipoe'i: 'Xeruvixa, rexâ ra'uague ma ndere ija'e e'ŷ va'e kuery re oiko va'e rire, mba'erã paa voi oiko va'e rire nderovaigua kuery re anho.

²⁰ Ha'e gui yvyra rexâ va'ekue ma yvateve ha'e imbaraeteve ov yva re peve, yvy jave gui oexaa guive.

²¹ Hogue porã, hi'a reta guive pavẽ ho'u va'erã va'e re. Iguy py ma mymba nhuündy rupigua ojou kuaray'ã, ha'e hakâ re ma guyra oveve va'e onhemboaitu okuapy.

²² Ha'e va'e yvyra ma ndee ae, xeruvixa. Mba'eta ndeyvateve reovy, nembaraete guive. Ndeporiau e'ŷa ma yva re peve ojekuaave ov yvy, ndep'o'akapaa yvy apy re peve oendua.

²³ Ha'e gui ndee xeruvixa rexâ avi mba'emo rarõa iky'a e'ŷ va'e yva gui oguejy ouvy râ. Ha'e va'e aipoe'i: "Peake'o ke yvyra, pembovaipa ete. Ha'e râ hapytakue ma yvy re topyta hapo reve, nhuündy mbyte oïa py ae topyta ferro ha'e overa va'e guigua corrente py pejokua reve. Yxapy yva guigua tomoakŷ, ha'e tokaru oikovy mymba nhuündy rupi ikuai va'e okarua rami, sete ma'etõ oaxa peve", he'i.

²⁴ Xeruvixa, po rami ma mba'erã paa, pova'e ma Yvate ete va'e oikuua uka va'ekue. Ha'e nunga ma ndere ae 'râ ou, xeruvixa.

²⁵ Mba'eta nemoxëa 'râ avakue ikuiai gui. Ha'e ramo mymba nhuündy rupi ikuai va'e mbyte ju 'râ nderekao. Ndevygua ma nhuñ vaka ho'ua rami re'u reiny aguã. Neakŷ 'râ yxapy yva guigua py. Ha'e nunga ma sete ma'etõ re oiko 'râ ndere, avakue ipo'aka va'e gui Yvate ete va'e ipo'akapave va'ea reikuua peve, mba'eta ombopo'akaxe va'e rei ombopo'aka 'râ.

²⁶ Ha'e gui "Hapytakue peja 'râ hapo reve", he'ia ma ha'ekue rami ae nembopo'aka ju aguã re ijayvu vy, Yva pygua ipo'akapave va'ea reikuua ma rire.

²⁷ Ha'e nunga rupi xeruvixa, ejapyxaka ke xeayvu re, ha'e teko porã rupi vy ejep'e'rejejavya ha'e nderekao vaia gui, iporiaukue'i remboaxya rupi ju reiko aguã. Ha'e ramo ri reiko vy reiko porã pukuve 'râ', he'i Daniel xevy.

²⁸ "Ha'e gui ma ha'e nunga ha'e javi oiko xee huvixave Nabucodonosor re.

²⁹ Doze jaxy opaa py xee huvixave xero Babilônia tetã py oĩ va'e py aïjave

³⁰ xeayvu vy aipoa'e: 'Kova'e Babilônia tetã tuvixa va'e e'ŷ teve xerekoarã ajapo va'ekue, xepo'akaa ha'e xeyvate etea aexa uka aguã?' he'i.

³¹ Ha'e rami xee huvixave xeayvu teri reve yva gui oguejy peteñ ayvu aipoe'i va'e: 'Huvixave Nabucodonosor, ndevy aipo'ea: Ndegui oaxa ma ndep'o'aka reinyague.

³² Ha'e rami vy nemoxëa 'râ avakue ikuiai gui, ha'e mymba nhuündy rupi ikuai va'e reve ju 'râ reiko. Ndere omoña 'râ vaka rami nhuñ re'u aguã. Ha'e nunga ma sete ma'etõ re oiko 'râ ndere, reikuua peve avakue ipo'aka va'e gui Yvate ete va'e ipo'akapave va'ea, mba'eta ombopo'akaxe va'e pe rei ombopo'aka 'râ', he'i.

* ^{4:16} Apy ma huvixave ojee ae ijayvu vy "Yvyra" he'i. Mba'eta Nhanderuete oipe'a ranhe huvixa oïague gui, Nhanderuete ipo'akapa va'ea oikuua peve.

³³ Ha'e ramove ojeupity xee Nabucodonosor regua ayvu. Ha'e rami vy xemoxēa avakue ikuai gui. Ha'e ramo vaka rami ha'u aikovy nhuū. Xerete ma yxapy yva guigua py inhakŷ. Xe'a ma taguato rague rami ipuku, ha'e rā xepoapē ma guyra poapē rami optyta.

³⁴ "Ha'e va'e ára opaa py ma xee Nabucodonosor yva re ama'ẽ ramo oĩ ju xe'arandua. Ha'e vy Yvate ete va'e re xema'endu'a porā, arov'y a guive raka'e rā peve oikove va'erā, mba'eta ha'e va'e openaa ma opa va'erā e'ŷ, ipo'akaa ma raka'e rā peve guarā.

³⁵ Ixupe rā yvy re ikuai va'e ha'e javi ma mba'everā ndovarei. Ha'e oipotaa rami ae 'rā opena oxondaro kuery yva re ikuai va'e re, yvy regua kuery re guive. Avave rei jipoi hexe opo omoi va'erā, neĩ ixupe 'Mba'e tu rejapo?' he'i va'erā.

³⁶ Ha'e gui xe'arandua ou jevy ramove ou avi huvixa rami apena ju aguā, apenaague ha'e javi re. Xeyvatea ha'e xeporāa voi ou xere pavē oikuua aguā rami. Xevyguia nhomongetaaty kuery ha'e huvixa kuery xea py oupa ju okuapy. Ha'e rami py xemoia ju huvixave aĩ aguā. Ha'e vy xeyvateve ete.

³⁷ Ha'e gui aŷ ma xee Nabucodonosor arov'y a ha'e ambojerovia Huvixave yva pygua. Mba'eta ha'e va'e mba'emo ojapo va'e ma anhetē meme, oikoa voi ha'evea rami meme. Omo'yvyf'i kuaa avi 'rā onhemboyvate va'ekue", he'i.

5

Oo mbotya re ipara va'e ojekuaa ague

¹ Ha'e gui huvixave Belsazar ojapo peteĩ ngaru tuvixa va'e mil huvixa kuery pe. Ha'e vy mil va'e oexaa py oy'u oiny vinho.*

² Belsazar vinho oy'uxea rupi oy'u tema oiny vy ima'endu'a mba'emo ryru ouro ha'e prata guigua Jerusalém py templo oīague gui tuu Nabucodonosor ogueru va'ekue re. Ha'e va'e ma ogueru ruka huvixave ha'e hexeve huvixa kuery ikuai va'e ha'e va'e py oy'u okuapy aguā, ta'yxy ha'e ta'yxy jevy kuery reve.

³ Ha'e ramo oguerua mba'emo ryru ouro guigua Nhanderuete pegua oo Jerusalém py oīague gui ogueru pyre. Ha'e va'e py ma huvixave ha'e hexeve huvixa ikuai va'e oy'u okuapy, ta'yxy ha'e ta'yxy jevy kuery reve.

⁴ Vinho oy'u reve omboete okuapy nguete kuery ouro guigua, prata, overa va'e, ferro, vyvra ha'e ita guigua rive.

⁵ Ha'e ramove peteĩ ojekuaa ava po. Ha'e va'e ma huvixave ro mbotya xiña re ombopara oiny tataendy rexei. Ha'e rā huvixa oexa oiny ipo ombopara va'e.

⁶ Ha'e ramo huvixave ndaekorävei vy onhemondyi rova vyvoi. Ijaxi'y oku'ea, henapy'ã voi onhembotapa rei joe.

⁷ Ha'e gui huvixave ojapukai reve ijayvu oguerupaa aguā hexa pyrā apoa kuery, caldeu ha'e imba'evyky va'e kuery. Oguerua rā huvixave aipoe'i Babilônia pygua imba'ekuaa va'e kuery pe:

— Peteĩ va'e rei kova'e ipara ogueroayvu ha'e mba'erā paa xevy omombe'u porā va'e ma amonhemonde 'rā púrpura py, ha'e ijaju'y reguarā oguerua 'rā mbo'y ouro guigua. Ha'e gui xee reve mboapya 'rā oĩ apenaa re ipo'akaa py — he'i.

⁸ Ha'e ramo huvixave pegua imba'ekuaa va'e kuery oike va'ekue ndogueroayvu kuaai, neĩ mba'erā paa nomombe'u kuaai guive huvixave pe.

⁹ Ha'e ramo huvixave Belsazar onhemondyi ete vy hova mboaepa vaipa. Hexeve huvixa kuery ikuai va'e voi onhemondyipa okuapy.

¹⁰ Ha'e gui ma huvixave ha'e hexeve ikuai va'e re mba'emo oiko rā ixy oendu vy oike avi okaruaty py. Ha'e vy aipoe'i:

— Xeruvixa, tereikove riae! Ndepy'a eta rei eme, nderova mboae rei eme guive.

¹¹ Mba'eta repenaa re ma oiko peteĩ ava. Hexe ma oĩ Nhanderuete iky'a e'ŷ va'e Nhe'ẽ. Nderu oĩ jave py ma roikuaa hexe oĩa mba'emo oikuua aguā, ha'e hi'arandu ha'e imba'ekuaa nguete 'arandua rupi. Ha'e nunga rupi nderu rāgue'i huvixave

* ^{5:1} Belsazar ma Nabucodonosor ramymino raka'e. Daniel tuja'i ma jave oĩ Babilônia pygua huvixave.

Nabucodonosor oĩ jave omoña imba'ekuaa va'e kuery ruvixarã, hexa pyrã apoa kuery, caldeu ha'e imba'evky va'e kuery ha'e javi ruvixarã guive.

¹² Mba'eta Daniel re nhe'ẽ oĩ va'e ma omo'arandu porã 'rã mba'emo oikuua aguã, oexa ra'u pyre omombe'u aguã, ha'e oikuua e'ŷ pyre haxyve va'e teĩ oikuua uka aguã. Ha'e va'e reryrã nderu rãgue'i omoĩ va'ekue ma Beltessazar. Ha'e nunga rupi enoĩ uka Daniel. Ha'e ramo ndevy pe omombe'u 'rã mba'erã paa — he'i.

¹³ Ha'e ramo huvinxave renonde omoingea Daniel. Huvinxava ijayvu vy aipoe'i Daniel pe:

— Ndee pa Daniel, Judá pygua escravo-rã xeru rãgue'i huvinxave oĩ jave Judá gui ndereru va'ekue?

¹⁴ Ha'e gui xee aendu omombe'ua rã ndere Nhanderuete Nhe'ẽ oĩa, mba'emo reikuua aguã, ne'arandu ha'e nemba'ekuaa ete aguã guive.

¹⁵ Ange'i xerenonde ogueroikea imba'ekuaa va'e ha'e hexa pyrã apoa kuery, kova'e ipara va'e ha'e kuery ogueroayvu vy xevy pe omombe'u aguã mba'erã paa. Ha'e rami teĩ ha'e kuery ma kova'e ayvu mba'erã paa nomombe'u kuaai.

¹⁶ Ha'e rã ndere ima'endu'aa rã xee aendu remombe'u kuaa va'ea mba'erã paa, ha'e mba'emo haxyve va'e teĩ remombe'u porãve va'ea. Aŷ ma, xapy'a rei kova'e ipara va'e reroayvu vy mba'erã paa xevy remombe'u ramo nemonhemondea 'rã púrpura py, rerek'o 'rã mbo'y ouro guigua ndeaju'y re, ha'e xee rire mboapya 'rã reĩ apenaa re ndepo'akaa py — he'i.

¹⁷ Ha'e rami rã Daniel ombovai vy aipoe'i huvinxave renonde:

— Mba'emo reme'ẽ aguã ndeayvuague ma ndereve ae topyta, e'ŷ vy eme'ẽ amboae pe. Ha'e rami avi ndevy pe xee aroayvu 'rã ipara va'e, mba'erã paa amombe'u 'rã guive.

¹⁸ Xeruvixa, ne'exa! Nderu rãgue'i Nabucodonosor pe Nhanderuete yvate ete va'e ome'ẽ va'ekue huvinxave oĩ aguã, ipo'aka, iporã ha'e yvate aguã guive.

¹⁹ Ipo'aka aguã ome'ẽ rire ma henonde heta regua, amboae yvy regua ha'e ayvu mboae py ijayvu va'e kuery oryryi reve ojererokyjepa okuapy. Mba'eta ojukaxe va'e rei ojuka raka'e, ha'e rã omoingovexe va'e ma omoingove. Omboyvate ombovatexe va'e, ha'e rã omo'yvy'i xe va'e ma omo'yvy'i raka'e.

²⁰ Ha'e rami avi opy'a py onhembovate ete, onhe'ẽ py guive ndoikuua potavei ha'e ojejou porãve rive. Ha'e rami rã oipe'aa raka'e huvinxave oĩa gui, ixupe oaxapa guive mba'emo oguerovy'aague.

²¹ Omoxõa raka'e avakue mbyte gui. Ikuraxõ ma ojapoa mymba kuraxõ rami, ha'e omboekooa mburika ka'aguy rupi ikuai va'e reve. Vaka pe rami ome'ẽa nhuũ ho'u aguã, omoakŷ guive yxapy yva guigua py, oikuua peve Nhanderuete yvate ete va'e avakue po'akaa ha'e javi re ipo'aka va'ea, ha'e ombopo'akaxe va'e rei ombopo'aka 'rã avakue re opena va'erã.

²² Ha'e gui ndee Belsazar ma ta'y reiko vy ha'e nunga ha'e javi reikuaapa teĩ ndepy'a py nerenhemo'yvy'i.

²³ Ha'e rami 'rãgue py repu'ã raka'e SENHOR yva pygua rovai. Ha'e rami vy hoo gui nerondenon mba'emo ryru oguerua ramo ha'e va'e py ndee ha'e huvinxava kuery ndereve ikuai va'e pey'u pekuapy vinho, pendera'yxy ha'e pendera'yxy jevy kuery reve. Ha'e rami avi remboete tuuete ramigua kuery prata guigua, ouro, overa va'e, ferro, yvyra ha'e ita guigua rive, ha'e nunga oma'ẽ e'ŷ va'e, noendui va'e, neĩ mba'eve ndoikuuaii va'e teĩ. Nhanderuete po py reikovea oĩ va'eri neremboetei.

²⁴ — Ha'e rami rire ixugui ae ou ipo kova'e mboparaarã.

²⁵ Pova'e ma ipara oiny va'e: *Mene, mene, tequel* ha'e parsim.

²⁶ Ha'e rã mba'erã paa ma po rami: “*Mene*” he'ia py ma ndepo'akaa Nhanderuete oipapa vy omomba maa, reikuua aguã.

²⁷ “*Tequel*” he'ia py ma mba'emo opejaa py ndepeja vy ojoua oataa, reikuua aguã.

²⁸ Ha'e rã "Peres" he'ia py ma ndepo'akaa omboja'oa ma, ha'e Média ha'e Pérsia pygua kuery pe ju omboaxa maa, reikuaa aguã — he'i.[†]

²⁹ Ha'e rami rã Belsazar ijayvu Daniel omonhemondea aguã púrpura py, ha'e ijaju'y re mbo'y ouro guigua omoña aguã, ha'e gui omombe'ua aguã ha'e openaa re ipo'akaa py mboapya oña rami.

³⁰ Ha'e va'e pyavyve ojukaa caldeu regua huvixave Belsazar.

³¹ Ha'e rire openaague re Média pygua huvixa Dario ju ipo'aka, sessenta e dois ma'etý oguereko reve.

6

Yvykua guary ikuaria py Daniel omomboa ague

¹ Ha'e gui huvixave Dario ma oipotaa rami omoñ raka'e cento e vinte huvixarã, ha'e kuery opena aguã huvixave openaa ha'e javi rupi.

² Ha'e va'e kuery áry mboapy ju omoñ huvixa yvatekueverã. Ha'e va'e kuery regua ma Daniel. Ha'e va'e kuery ma huvixa kuery mboae re opena, huvixave pegua nome'ëa e'ëi aguã.

³ Ha'e rã Daniel ma huvixa yvatekueve ha'e huvixa kuery mboae gui hi'aranduve, mba'eta hexe nhe'ë oï va'e ma imo'arandu porã etea. Ha'e nunga rupi huvixave onhembopy'a openaa ha'e javi re ombopo'aka aguã.

⁴ Ha'e ramo huvixa yvatekueve ha'e huvixa mboae kuery ma Daniel openaa re oikuua pota okuapy hexe ijayvu reixe vy. Ha'e rami teñ hexe ndojoui ha'eve'ëa rami oikoa. Daniel ojeroviapi ramo hexe ndojoui ojavya, neñ ojejavya.

⁵ Ha'e gui ma ha'e va'e avakue joupe-upa aipoe'i okuapy:

— Mba'eve py ndajajoui 'rã Daniel re nhandeayvu aguã, nguuete guigua lei rupi oikoa py e'ëi vy — he'i okuapy.

⁶ Ha'e ramo huvixa yvatekueve ha'e huvixa mboae kuery ma huvixavea py jogueraa. Ha'e vy aipoe'i ixupe:

— Oreruvixa Dario, tereikove raka'e rã peve.

⁷ Repenaa py huvixa orekuai va'e ha'e javi, tetã ha'e estado re ropa va'e, huvixa mboae ha'e ronhomongoeta va'ety kuery rojerure ndee oreruvixa remombe'u uka aguã peteñ ayvu, po ramigua rejapo uka aguã: Avakue ha'e javive ma trinta ára peve ojerure e'ëi aguã nguuete va'e pe rei, neñ avakue va'e pe rei, ha'e rã ndevy pe anho. Ha'e rami e'ëi rã ndee oreruvixa remombo 'rã yvykua guary ikuaria py.

⁸ Ha'e gui aë ma ndee oreruvixave, embopara uka ke ndeayvu, nderery emoñ guive avave rei oguerova e'ëi aguã, mba'eta Média ha'e Pérsia pygua kuery pegua lei ma oguerova pyrã e'ëi ae — he'i okuapy.

⁹ Ha'e rami rã huvixave Dario ma ha'e va'e ayvu ombopara uka, guery omoñ guive.

¹⁰ Ha'e gui Daniel ma ombopara ha'e guery omoñ maa oendu vy ngoo py ranhe oike. Ha'e rami vy opy ja'o yvate oï va'e py oo, okë'i Jerusalém katy ojepe'a va'e oña py. Ha'e py ma ára nhavõ mboapykue kuerei 'rã guenapy'ëa re oï. Ha'e py ae onhembo'e oiny ha'e oguerovy'a nguuete, jepiaty rami ae.

¹¹ Ha'e ramo ha'e va'e avakue jogueraa vy oexa okuapy Daniel nguuete pe onhembo'e ha'e ojerure oiny rã.

¹² Ha'e rami vy huvixavea py ju oo vy huvixave omoma'endu'a oayvu omombe'u uka va'ekue re. Ha'e vy aipoe'i ixupe:

— Oreruvixa, nerembopara ukai ri ty'y ha'e javive avakue nguuete va'e pe rei e'ëi vy avakue pe ojerure ramo yvykua guary ikuaria py omomboa aguã, ha'e rã ndevy pe anho?

Huvixave ombovai:

— Ha'e va'e ayvu ma anhetë, Média ha'e Pérsia pygua kuery pegua lei oguerova pyrã e'ëi ae — he'i.

[†] 5:28 Ayvu mene, mene, tequel ha'e parsim he'ia ma "Oipapa, oipapa, opeja ha'e omboja'o" 'ea. Ha'e gui Média ha'e Pérsia pygua kuery ma Babilônia pygua kuery rovaigua ikuai raka'e.

¹³ Ha'e ramo ha'e kuery aipoe'i huvixave pe:

— Ha'e gui Oreruvixave, Judá gui escravo-rã heru pyre Daniel ma nanemboetei, neĩ ayvu rembopara uka va'ekue guive ndojapoi. Ha'e rami 'râgue py ára nhavõ mboapykue kuerei 'rã ojerure oikovy — he'i okuapy.

¹⁴ Ha'e nunga huvixave oendu vy onhemboaxy ete vy ha'e ae onhembopy'a Daniel ogueraa jepe aguã re. Ha'e vy kuaray oike peve onhea'ã teĩ oikovy ogueraa jepexe vy.

¹⁵ Ha'e ramo ha'e va'e avakue ma huvixavea py ojevy vy aipoe'i okuapy ixupe:

— Ha'e rami avi Oreruvixa, ndeayvuague ma Média ha'e Pérsia pygua kuery pegua lei oguerova pyrã e'ŷ ae. Ha'e nunga rupi nda'evei ae oaxa rive aguã — he'i okuapy.

¹⁶ Ha'e ramo mae ma huvixave ijayvu Daniel heru ha'e omomboa aguã yvykua guary ikuaria py. Huvixa aipoe'i Daniel pe:

— Tove nderuete renhe'ẽ rendu reikovy va'e tandereraa jepe — he'i.

¹⁷ Ha'e gui ma peteĩ ita oguerua vy omboty guary ikuaria rokẽ. Ombojaague py ma huvixave okuã regua py ae hery omoĩ, ixupeguva yvatekueve voi ha'e rami ae avi ojapo okuapy, Daniel oguenoëa e'ŷ aguã ha'e gui.

¹⁸ Ha'e gui huvixave ngoo katy oo vy okaru e'ŷ re oaxa pytû, guenonde mba'epu ndogueru rukai guive. Ndoke kuaavei ae.

¹⁹ Ha'e gui ma ko'ẽ aje'ive'i reve huvixave ovv vy onha ovv yvykua guary ikuaria katy.

²⁰ Ha'e py ovaẽ vy Daniel pe ojapukai nda'evei ete reve. Po rami huvixave ijayvu Daniel pe:

— Daniel, Nhanderuete oikove va'e rembiguai, nderuete renhe'ẽ rendu va'e nda'u ndereraa jepe ri ra'e guary kuery gui?

²¹ Ha'e ramo Daniel ombovai huvixave pe:

— Xeruvixa, tereikove riae!

²² Xeruete ma ojea pygua anjo ombou va'ekue guary kuery juru omboty aguã xere ojapo vai e'ŷ aguã, henonde ojejavy e'ŷ va'e aiko ramo. Ndee xeruvixa rovai voi xee ndajapo vai mba'eve — he'i.

²³ Ha'e ramo huvixave ovv'a ete vy yvykua gui oguenoë uka. Ha'e gui Daniel oguenoëa ramo neĩ peteĩ henda py ma voi hexe ndojouai guary raĩgua, nguuete re ojerovia ramo.

²⁴ Ha'e ramo huvixave ma teĩgue ju ijayvu vy ogueru ruka avakue Daniel re ijayvu rei va'ekue. Ha'e ramo yvykua guary kuery ikuaria py omombo ukapa, ta'y kuery ha'e ta'yxy kuery reve. Ha'e gui yvy py ovaẽ e'ŷ re guary kuery ojukapa, ikãgue omopëmba guive.

²⁵ Ha'e ramo huvixave Dario ombopara heta regua kuery pe, amboae regua ha'e ayvu mboae py ijayvu va'e yvy jave re ikuai va'e pe. Ha'e vy aipoe'i: “Toĩ peẽ kuery re pendekuai porã aguã!

²⁶ Xee ma po rami ajapo uka: Apenaa ha'e javi rupi avakue oryryipa reve tojererokyje Daniel ruete renonde. Mba'eta ha'e va'e tuete anho ma oikove va'e, raka'e rã peve oiko va'erã guive. Ipo'akaa ma nombovaipaai 'rã, openaa ma ndopai 'rã.

²⁷ Ha'e ma joepy ha'e jogueraa jepe 'rã. Yva ha'e yvy re ojapo avi 'rã hexa pyrã ha'e nhomondyipaarã”, he'i.

²⁸ Ha'e rire Daniel ma huvixave Dario oĩ pukukue re oiko porã ae tema, ha'e gui Pérsia pygua huvixa Ciro oĩ jave voi.

Irundy mymba Daniel oexa ra'uague

¹ Peteĩ ma'etŷ re ma Babilônia pygua huvixave Belsazar oĩ jave Daniel ngupa rupi itui vy oexa ra'u peteĩ. Ha'e rami vy oexa ra'u va'ekue ombopara vyvoi, omombe'upa.

² Daniel ijayvu vy aipoe'i:

— Ha'e gui pyávy xevy pe oexa ukaa rã aexa ra'u irundy henda gui yvytu oipeju va'e ye'ẽ tuvixa va'e omomyimba rã.

³ Ha'e gui ye'ẽ gui oẽ jogueruvy irundy mymba tuvixa va'e joo ramigua e'ŷ-e'ŷ.*

⁴ Jypyguia ma guary rami ojekuaa, taguato pepo rami ipepo va'e guive. Xee ama'ẽ rã ipepo oguereko va'ekue omboipaa. Ha'e vy yvy gui omopu'ã imo'amy ipy moko'i re, ava rami ae. Ixupe ome'ea avi ava rami hi'arandu aguã.

⁵ Ama'ẽve tema. Ha'e vy ma mokoña mymba ju aexa, kaguare-jagua ramigua. Ha'e va'e ma opy joavaire re opu'ã ouvy. Ojuru py ma guaĩ re ogueru mboapy inharukāgue. Ha'e rã ixupe aipo'ea: "Epu'ã ke, he'u porã xo'o", 'ea.

⁶ Ha'e va'e rire ama'ẽve tema. Ha'e vy amboae ju aexa xivi pytã ramigua. Ha'e va'e kupe re ma irundy guyra pepo oĩ. Ha'e va'e mymba ma inhakã irundy va'e. Ixupe ome'ea joe ipo'aka aguã.

⁷ Ha'e va'e rire ama'ẽve tema pyávy aexa va'e re. Ha'e vy mymba irundaya ju aexa nda'evei ete va'e, nhomondiyiarã ha'e imbaraete vaipa va'e. Haĩ ma tuvixa va'e, ferro guigua meme. Nhomondoropa, nhomboa'ypa, ha'e rã hembyrekue re ma opyrõmba 'rã. Mymba kuery mboae ojekuaa ma va'ekue rami e'ŷ ojekuaa va'e, dez hakua va'e guive.

⁸ — Hakua ikuai va'e re xee aikuua pota vy aexa mbyte gui hakua kyrĩ'i va'e ju oẽ oiny rã. Ha'e va'e renonde gui ma mboapy hakua jypy guare omboia. Ha'e va'e hakua re ma oĩ hexa ava rexu ramigua, ha'e rã ojuru py ma onhemboyvatea rupi ijayvu.

⁹ — Ama'ẽve tema vy aexa tenda omoña rã huvixa kuery opena atyrã. Ha'e va'e áry ma Jypy'i guive guare ranhe oguapy oiny. Ijaõ ma yro'y rami xiõ va'e. Hi'a inhakã regua ma veva'i rague rami ete. Henda ma tata rendy, iruéra ikuai va'e voi hendi oiny.†

¹⁰ Henonde gui ma tata oẽ ouvy yakã rami. Henonde ma heta ete ikuai ixupeguia kuery, jaipapapa aguã rami e'ŷ. Ha'e gui ma nhomboayvu va'erã kuery ju oguapypa. Oipe'aa avi kuaxia para ikuai va'e.*

¹¹ Ha'e ramo ama'ẽve tema vy hakua oẽ va'ekue aendu onhemboyvate etea rupi ijayvu rã. Ama'ẽ vy aexa mymba ojukaa rã. Ha'e gui he'õgue ma ombovaipaa vy tata py omombo okaipa aguã.

¹² Ha'e gui mymba kuery mboae gui ma oipe'aa ipo'akaague. Ha'e rami teĩ ha'e kuery pe ome'ea avi ikuuive ranhe aguã, oa'angaague ára ovaẽ e'ŷa ja.

¹³ — Pyávy oexa ukaa va'e re ama'ẽ ajupy vy peteĩju aexa arai reve yva gui ou ramo, ava ra'y rami ojekuaa va'e. Ha'e va'e ma Jypy'i guive guare oĩa py oo ramo omonhemboja.‡

¹⁴ Ombopo'aka ha'e ombovate ete huvixave oĩ aguã, ixupe heta ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'ŷ, ndoaxai 'rãe, openaa nombovaipaa 'rã guive.*

¹⁵ — Ha'e gui xee Daniel ma xepy'a py aendu xenhe'ẽ onhemondyi rã, xeke rupi aexa va'ekue nda'evei rei ramo.

¹⁶ Ha'e gui ma ha'e'i py ikuai va'e regua peteĩ re anhemboja vy ixupe ajerure ha'e nunga ha'e javi omombe'u porãve aguã re. Ha'e ramo po rami omombe'u xevy, ha'e nunga mba'erã paa omombe'u porãve vy.

¹⁷ Mymba tuvixakue irundy aexa va'ekue ma irundy huvixaverã yvy gui oẽ ouvy va'erã.

¹⁸ Ha'e rami teĩ Yvate ete va'e pegua iky'a e'ŷ va'e kuery pe 'rã ome'ẽ ipo'aka aguã. Ha'e rã ha'e kuery ma ipo'aka riae 'rã raka'e rã peve.

¹⁹ Ha'e gui mymba irundaya va'e reko ju aikuua porãvexe. Ha'e va'e ma amboae kuery ramigua e'ŷ, mba'eta nhomongyje ete va'e, haĩ ferro guigua va'e, ipoapẽ overa va'e guigua, nhomondoropa, nhomboa'ypa ha'e hembyrekue re opyrõmba va'e.

* ^{7:3} Apocalipse 13.1 py oĩa rami mymba ye'ẽ gui ou va'e oexa. Ha'e gui amongue py "Ye'ẽ" he'ia py Nhanderuete rovai opu'ã va'e kuery re ijayvu vy (Isaías 57.20-21). † ^{7:9} Apy ma ijayvu Nhanderuete renda oexa ukaague re. Karóxa'i tata rendy ramigua ojekuaa, iruéra va'e (Ezequiel 1). * ^{7:10} Apocalipse 20.12 ‡ ^{7:13} Mateus 24.30 ha'e 26.64 py oĩa rami oexa Jesus Cristo Ava ra'y ojeapo va'ekue ipo'aka aguã ou ramo (Apocalipse 11.15, 14.14).

* ^{7:14} Mateus 24.30, 26.64; Marcos 13.26, 14.62; Lucas 21.27; Apocalipse 1.13, 14.14

²⁰ Ha'e gui ma inhakā re dez hakua oī va'ekue reko aikuaaxe avi, amboae ju oē va'ekue guive, ha'e va'e renonde mboapy oitya va'ekue. Ha'e va'e hakua re ma hexa oī, ha'e ojuru py ojejou porā reia rupi ijayvu, ha'e aexa rā jypy guare kuery gui imbaraeteve va'e.

²¹ Ama'ẽ vy aexa rā ha'e va'e hakua ma iky'a e'ŷ va'e kuery rovai opu'ã vy ipo'aka ete ha'e kuery re,*

²² Jypy guive guare ou peve. Ha'e va'e ma ou vy oepy 'rā Yvate ete va'e pegua iky'a e'ŷ va'e kuery. Ha'e gui ovaẽ 'rā ha'e kuery ju ipo'aka aguā ára.

²³ — Ha'e ramo anjo aipoe'i: "Irundaya mymba ma irundaya ae 'rā ipo'aka yvy re. Ha'e va'e ma amboae po'akaague rami e'ŷ 'rā ipo'aka. Ha'e vy omendoropa 'rā yvy jave re ikuai va'e, opyrōmba ha'e omboa'ypa 'rā.

²⁴ Ha'e gui dez hakua ikuai va'e ma dez huvixave ikuai va'erā ha'e va'e jave py ae. Ha'e va'e kuery oaxapa ma rire amboae ju 'rā oiko. Ha'e va'e ma jypy guare rami e'ŷ va'e vy oity 'rā mboapy huvixa.*

²⁵ Yvate ete va'e re voi ijayvu vai 'rā, ixupeguia iky'a e'ŷ va'e kuery ojavyky rei 'rā guive. Oguerova 'rā mba'emo ojapoaty ára ha'e lei. Ipo py ma peteĩ ma'etŷ re omboaxapaa 'rā iky'a e'ŷ va'e kuery, ha'e gui mokoĩ ma'etŷ re ju, irundaya ma'etŷ mbyte peve. §

²⁶ Ha'e rami teĩ ha'e va'e rire ma nhomboayvu va'erā kuery ou vy oipe'a 'rā ipo'akaague. Ha'e rami vy omomba ha'e omokanhy 'rā raka'e rā peve guarā.

²⁷ Ha'e gui ma Yvate ete va'e pegua iky'a e'ŷ va'e kuery pe ju ome'ẽ 'rā ipo'aka aguā yva guy ha'e javi rupi ikuai va'e re. Ha'e kuery pe ome'ẽ avi 'rā opena ha'e yvateve aguā. Mba'eta Yvate ete va'e ma raka'e rā peve 'rā ipo'aka. Ixupe ma ha'e javi regua 'rā ikuai, onhe'ẽ rendu pavē 'rā okuapy", he'i.*

²⁸ — Ha'e rami py opa aexa ha'e aendu va'ekue. Ha'e gui xee Daniel ma nda'evei rei ete ranhe aiko, xerova voi xiimba rei. Ha'e rami teĩ ha'e nunga ha'e javi amoĩ porā herekovy xepy'a re.

8

Vexa'i ava ha'e kavara tuja oexaague

¹ Mboapy ma'etŷ re ma huvixave Belsazar oī jave xee Daniel peteĩ ju aexa ra'u, jypy'i aexa ra'u va'e rire.

² Ha'e gui aexa ra'u vy Susā tetā ikorapa va'e py merami aiko, Elão yvy re. Ha'e vy ama'ẽ rā Ulai yakā yvy'iry merami ha'ã.

³ Ha'e gui ama'ẽ vy peteĩ vexa'i ava aexa yakā rembe re hi'aĩ va'e. Ha'e va'e ma mokoĩ hakua va'e. Ha'e gui mokoĩ hakua oguereko va'e ma yvate ovu va'eri peteĩ ma amboae gui yvateve. Ha'e rami vy takykue yvate ovu va'e ma yvateve.

⁴ Aexa rā vexa'i ma guakua py jopyxo oikovy kuaray oikea katy, ijapu'a'ia katy ha'e ipuku-a katy guive. Ha'e va'e re ma peteĩve mymba ikuai va'e nda'ipo'akai, ipo'akaa gui ndoo jepe kuaai guive. Ha'e rami vy ha'e ae oipotaa rami ojapo oikovy, imbaraeteve tema ovu guive.

⁵ Xee aexa pota vy peteĩ aexa kavara tuja, kuaray oikea katy gui ou oiny rā. Yvy jave áry rupi ou va'eri yvy re opyrō vy e'ŷ. Ha'e va'e kavara ma peteĩ guakua oguereko ngova mbyte re.

⁶ Kavara ma vexa'i hakua mokoĩ va'ea katy oo oiny, yakā rembe re hi'aĩ rā aexa va'ekuea py. Ha'e vy onha ovu opo'akaa rupi ipoxy reve.

⁷ Aexa rā vexa'ia py ovaẽ vy ixupe ipoxy etea rupi ombota. Ha'e vy omopẽ hakua mokoïve. Ha'e rā vexa'i ma na'imbaraetevei hexe opu'ã aguā. Ha'e ramo kavara oity yvy rupi, opyrōmba hexe. Jipoi avi ipo'akaa gui vexa'i reraa jepearā.

* 7:21 Daniel 8.24, 11.33; Apocalipse 13.7 * 7:24 Apocalipse 17.12 § 7:25 Apy ma três anos e meio re ijayvu (Daniel 12.7; Apocalipse 11.2-3, 12.14). * 7:27 Apocalipse 11.15

⁸ Kavara ma ipo'akave ete. Ha'e rami teĩ onhemombaraetea pyve hakua tuvixa va'e omopẽa. Hakua opẽague gui irundy ju oẽ tuvixa va'e. Ha'e va'e nunga joa katy e'ŷ-e'ŷ oje'oi irundy henda yvvtu oipejua katy.

⁹ Hakua ikuai va'e regua peteĩ oĩ hakua kyrĩ'i va'e. Ha'e va'e ma imbaraete ete oiny kuaray puku-a yke katy ha'e kuaray oẽa katy, yvy porãa katy guive.

¹⁰ Yvate ete vy oupity yva pygua kuery po'akaa peve. Ha'e vy oity yva pygua regua yvy rupi, amongue regua jaxy-tata guive. Ha'e vy opyrõmba.

¹¹ Tá, yva pygua ruvixa rami ete onhembovate vy omomba ixupe guarã oapy jepiaty va'e. Ixupergua oo iky'a e'ŷ va'e voi oity yvy katy.

¹² Onhe'ẽ raxavea py hakua va'e pe yva pygua kuery omboaxapaa, mba'emo ome'ẽ jepi va'e regua guive. Ha'e ramo oity yvy rupi anhetẽ va'e ae, mba'emo ojapo va'e ha'e javi oiko porã guive.

¹³ Ha'e va'e rire aendu iky'a e'ŷ va'e kuery regua peteĩ ijayvu rã. Ha'e rã amboae iky'a e'ŷ va'e aipoe'i:

— Araka'e peve nda'u oĩ 'rã oexa ra'u pyre ojeupitypa aguã, mba'emo ome'ẽ jepi va'e ha'e onhe'ẽ raxavea py nhomombaarrã va'e regua? Mba'eta oexa ra'ua ague rami vy oo iky'a e'ŷ va'e omboaxaa 'rã, yva pygua kuery guive, opyrõmbaa aguã — he'i.

¹⁴ Ha'e ramo xevy pe ju ombovai:

— Dois mil e trezentos ka'aru ha'e ko'ẽ jevy peve 'rã oo. Ha'e rire ma oo iky'a e'ŷ va'e oiky'a'oa ju 'rã — he'i.

¹⁵ Ha'e ramo xee Daniel aikuaxe aexa ra'u va'ekue mba'erã paa. Ha'e rã peteĩ ou xea py ava rami hova va'e.

¹⁶ Ha'e gui peteĩ ava aendu Ulai yakã rembe gui ijayvu nhendu rã. Ha'e va'e ma ojapukai vy aipoe'i:

— Gabriel, upe va'e pe eikuua uka na oexa ra'u va'ekue mba'erã paa — he'i.

¹⁷ Ha'e ramo xee aĩa katy'i ou. Ovaẽ ramo xee akyje. Ha'e vy xerenapy'ã re aĩ, xerova yvy re amovaẽ reve. Ha'e rami teĩ aipoe'i xevy:

— Ava ra'y, endu kuuak ke, mba'eta rexaa ra'u va'ekue ma opaa pygularã — he'i.

¹⁸ Xereve ijayvu ramo ha'a vy ndaikuavei ranhe ajupy, xerova yvy re amovaẽ reve. Ha'e ramo xere opoko reve xemopu'ã imo'amy xe'aigue py.

¹⁹ Ha'e vy aipoe'i:

— Ne'exa, ndevy pe xee aikuua uka ta poxya opaa ára py mba'emo oiko va'erã. Mba'eta rexaa ra'u va'ekue ma opaa pygularã.

²⁰ Vexa'i ava hakua mokoĩ va'e rexaa va'ekue ma Média ha'e Pérsia pygua huvixave.

²¹ Ha'e rã kavara tuja hague vuku va'e ma Grécia pygua huvixave. Hova mbyte re hakua tuvixa va'e oĩ va'e ma jypyguia huvixave.

²² Ha'e va'e omopẽa ague gui irundy ju oẽ va'e ma irundy huvixave ha'e va'e regua ae. Ha'e va'e kuery opu'ã avi 'rã teĩ jypyguia imbaraeteague rami ha'e kuery imbaraete va'erã e'ŷ ta'vy.

²³ Ha'e rã ha'e va'e huvixave kuery openaa ára opa ramo, ha'e anhetẽ rupi e'ŷ ikuai va'e opa ma ramo peteĩ ju opu'ã 'rã huvixave ipoxy ete reve, nhombotavy kuaapa va'e.

²⁴ Ha'e va'e ma ipo'aka ete 'rã, va'eri ha'e ae opo'akaa rupi e'ŷ guive. Opa rupi ombovaipa 'rã oikovy mba'emo, ha'e imbaraeteve ov yv ojapoxea rami rei 'rã ojapo. Ojukapa 'rã ipo'akakueve va'ekue, iky'a e'ŷ va'e kuery guive.

²⁵ Ijapua rupi onhemombarandu oikovy vy ojapo 'rã apu ipo'akave aguã rami. Opy'a py onhembovate 'rã, ha'e mbovy e'ŷ ojuka 'rã ikuai rive'i va'e. Opu'ã 'rã yvatekueve re Ipo'aka va'e rovai. Ha'e rã omopẽa 'rã avakue po'akaa py e'ŷ ta'vy.

²⁶ Ka'aru ha'e ko'ẽ rã guarã rexaa va'ekue amombe'u porãavea ma anhetẽ va'e meme. Ha'e rami teĩ emoĩ porã rexaa va'ekue, mba'eta heta ete ára guarã teri — he'i.

²⁷ Ha'e gui ma xee Daniel xekangy vy mbovy ára rei e'ŷ xemba'eaxy. Ha'e gui apu'ã ju vy apena aikovy huvixave pegua ikuai va'e re. Aexa ra'u va'ekue gui anhemondyi rei aikovy, oikuua ete va'erã jipoí ramo.

Gueterã kuery re Daniel ojerureague

- ¹ Peteĩ ma'etý re ma Média pygua Assuero ra'y Dario oĩ jave caldeu kuery ruvixa,
² ha'e va'e ma peteĩ ma'etý re ma opena jave xee Daniel aikuua mbovy ma'etý re pa Jerusalém tetã ombovaipa pyre opyta 'rãa, kuaxia para profeta Jeremias pe SENHOR ijayvuague oĩa rami vy. Ha'e rami vy setenta ma'etý 'rãa aikuua.*
³ Ha'e nunga rupi SENHOR Nhanderuetea katy ama'ẽ reve anhembo'e ha'e ajerurea rupi aeka aguã, akaru e'ŷ re, ao voxá guare py anhemonde ha'e tanhimbu xejee amongurengure reve guive.

- ⁴ Ha'e rami vy anhembo'e SENHOR xeruete pe. Anhemombe'u vy aipoa'e:
— Xe-SENHOR! Xeruete ndepo'akapa ha'e okyjevepy va'e, ndereve guarã rejapo va'ekue rupi reiko va'e, renhomboaxya re ndeayvuague re nderexarai e'ŷ va'e.
⁵ Ore kuery ma rojejavy, teko vai rojapo. Orerekovaia rupi orekuai, orekuai vaikue rei nderovai, rejapo uka va'ekue ha'e ndereve guarã rejapo va'ekue gui rojepe'apa vy.
⁶ Nerembiguai profeta kuery re ndorojapyxakai guive, ha'e kuery nderery rupi ijayvu tei oreruvixa kuery pe, yvatekueve, oreru kuery ha'e yvy jave re ikuai va'e pe guive.
⁷ SENHOR, ndere ma oĩ teko porã. Ha'e rã orere ma oĩ roximbaa rive oĩ, aŷ ojekuaa rami. Mba'eta ore Judá pygua avakue ha'e javi re oĩ, Jerusalém py orekuai va'ekue re, Israel kuery ha'e javi, ha'e'i rupi ha'e mombyry orekuai va'e, yvy jave re mamo rã rei oremomboague rupi orekuai va'e re guive oĩ roximbaa, ha'eve'ŷa rami nderovai orekuaiague re.
⁸ SENHOR, orere ma roximba reia oĩ, oreruvixa kuery re, yvatekueve ha'e oreru kuery re, nderovai rojejavypa rire.
⁹ Ha'e rã SENHOR Oreruete, ndere ma oĩ oremboaxy ha'e oreperdoa aguã, mba'eta ndere ore kuery ropu'ã rei.
¹⁰ SENHOR Oreruete, ndorojapoi ndeayvua, ndeguigua lei rupi ndorekuai vy, nerembiguai profeta kuery rupi orerekorã reja va'ekue ri.
¹¹ Tá, Israel kuery ha'e javive ma ndeguigua lei ndojapoi okuapy, ojepe'apa guive ndeayvu oendu e'ŷ aguã. Ha'e nunga rupi ae orere ayvu vai ou nderovai rojejavya re. Mba'eta Oreruete, nerembiguai Moisés lei ombopara va'ekue re oĩa rami vy ae oiko mba'emo vai.*
¹² Mba'eta ndee rejapo ndeayvu ojeupitypa aguã rami, orerovai ha'e oreruvixa oremboayvu va'ety kuery rovai ndeayvuague. Ha'e rami vy mba'emo vai ete rembou ore'áry. Mba'eta yva guy jave rupi oiko va'e'ŷ teri Jerusalém tetã re oiko va'ekue ramigua.
¹³ Moisés rupigua lei re oĩa rami vy ha'e ramigua ete ou ore'áry. Ha'e rami tei ore ma ndee SENHOR Oreruete pe ndorojerurei rokuapy orepytvõ aguã, orerekovaia gua rojeko rerova aguã, neñ ndeguigua anhetê va'e rupi orekuai aguã.
¹⁴ Ha'e nunga rupi ae SENHOR, renhembopy'aague rami vy rembou ore'áry. Mba'eta ndee SENHOR Oreruete ma nderekopoi porã ete va'e opa mba'e rejapo py. Ha'e rã ore ma noronhe'ẽ rendui.
¹⁵ SENHOR Oreruete, anhetê Egito yvy gua ndevygua kuery renoẽ raka'e ndepo'akaa rexa uka vy, nemboete pavẽ aguã rami rejapo aguã guive, aŷ peve ojekuaa rami. Ha'e rã ore ma rojejav, ha'eve'ŷa rami ete orekuai.
¹⁶ SENHOR, opa mba'e py nderekopoi porã rupi eipe'a nho ke ndepoxya ha'e ndevaia ndevygua tetã Jerusalém ha'e ndevygua yvyty iky'a e'ŷ va'e re rembou va'ekue. Rojejav ha'e oreru kuery voi heko vai rire orea katy'i rupi ikuai va'e ojojai okuapy Jerusalém tetã, ore ndevygua kuery guive.

* 9:2 Apy 70 ma'etý re ijayvu (Jeremias 25.11-12, 29.10). Mba'eta Jerusalém pygua kuery SENHOR pe ojejav yamo ombovaipa uka tetã (2 Crônicas 36.11-21). * 9:11 Deuteronômio 28.15-68

¹⁷ Ha'e gui aŷ ma Oneruete, xee nerembiguai anhembo'e ha'e ajerure ramo endu. Ha'e vy SENHOR, ndeporayvua rupi vy tove nderova tomoexakā ju ndevyguia oo iky'a e'ŷ va'e ombovaipa pyre áry.

¹⁸ Xeruete, ejapyxaka ke ha'e endu. Eipe'a nderexa, ha'e ema'ẽ orekuai axya re, tetā nderery oĩa re guive, mba'eta ore kuery ma ore ae reko porãa rupi e'ŷ rojerure nerondenon de ha'e rami, ha'e rã ndee renhomboaxy ete va'e ramo anho.

¹⁹ SENHOR, endu ke. SENHOR, oreperdoa ke. SENHOR, eikuua pota orere, ha'e orepytyvõ. Xeruete, emboare eme guive, ndee ae renhemboete uka aguã. Mba'eta ndevyguia tetā ha'e ndevyguia kuery re ma nderery oĩ — he'i.

Setenta vezes sete ma'etŷ re ijayvuague

²⁰ Ha'e rami xeayvu ainy, ha'e anhembo'e vy amombe'u ainy xee ae ajejavyague, xeretarã Israel kuery ojejavyague guive. Ha'e vy SENHOR Xeruete renonde ajerure ainy Xeruete pegua yvyty iky'a e'ŷ va'e re.

²¹ Xee xeayvu ha'e anhembo'e teri ainy reve ava rami aexa ra'u ypy va'ekue ou pojava, Gabriel hery va'e. Oveve ouvy vy opoko xere. Ha'e rami oiko ka'arukuegua ome'ẽa jave.

²² Ha'e va'e ma xereve ijayvu xembo'e vy. Ha'e vy aipoe'i:

— Daniel, aŷ ma apy aju, ndevy pe amombe'u porãe aguã ha'e nunga mba'erã paa.

²³ Rejerure ypy ramove xemboua. Ha'e ramo xee aju amombe'u aguã ndevy, hayvupy ete reiko ramo. Ha'e ramo eikuua pota ha'e nunga re, mba'emo rexâa va'ekue reikuua aguã.

²⁴ — Setenta vezes sete ma'etŷ teri oata neretarã kuery ha'e peneretã iky'a e'ŷ va'e renonderã oa'angaague, teko vai omombaa aguã, ojejavya opa aguã, ojapo vaiague gui oiky'a'oa aguã, teko porã opa e'ŷ va'e oguerua aguã, oexa ra'u pyre ha'e profeta kuery ijayvuague ojeupitypa aguã, ha'e Iky'a e'ŷ ete va'e huvixarã omoña aguã.†

²⁵ Endu ke ha'vy reikuua porã aguã. Jerusalém tetã omoatyrôa ha'e ojapopaa ju aguã re ijayvua ára guive huvixarã Omoñ mbyrã oiko peve ma sete vezes sete ma'etŷ oiko 'rã, ha'e gui sessenta e duas vezes sete ju.‡ Tape ikuai va'e ha'e tetã kora ma teigue ju 'rã omoatyrômbaa, ikuai axy ete ma jave ta'vy.

²⁶ Ha'e gui sessenta e duas vezes sete ma'etŷ oaxa ma rire ojukaa 'rã huvixarã Omoñ mbyre, ha'e ramo noívei 'rã ranhe. Ha'e rã huvixa oiko teri va'erã retã pygua kuery ju ou vy omomba 'rã Jerusalém tetã, oo iky'a e'ŷ va'e guive. Imombaarã ma yy rami 'rã ou xapy'a. Ha'e gui opaa ára peve oiko 'rã joe opu'ã va'e. Mba'emo mombaarã ou aguã va'ekue avi 'rã ou.

²⁷ Ha'e gui ha'e va'e ma heta va'e kuery reve ojapo 'rã peteñ rami oguereko aguã sete ma'etŷ peve guarã. Ha'e rami teñ ha'e va'e jave mbyte py ma ha'e kuery pe nome'ẽ ukavei 'rã mymba neñ mba'emo aju guigua. Mba'emo ojeguarupy reve 'rã ou nhomombaarã, hexe ju ou peve imombaarã va'ekue.§

10

Tigre yakã yvýry Daniel mba'emo oexaaque

¹ Mboapy ma'etŷ re ma Pérsia pygua huvixa Ciro oĩ jave peteñ ayvu oikuua ucaa xee Daniel Beltessazar xerery mboae va'e pe. Ha'e va'e ayvu ma anhetê va'e, joe heta opu'ã aguã regua guive. Xee aendu kuaa aguã rami ayvu ou, mba'emo oexa ucaa reve.

² Ha'e va'e ára guive ma xee Daniel nda'evei ete aiko mboapy semana re.

³ Tembi'u ha'uxe vai va'ety regua nda'uvei, xo'o neñ vinho namoñ xejuru py. Neñ azeite ma voi ndaikyti xejee, mboapy semana oaxapa peve.

† ^{9:24} Apy “setenta vezes sete ma'etŷ” he'i, versículo 2 py setenta ma'etŷ re Daniel oikuua potaague, ha'e va'e rire raka'eve rã guarã omombe'u vy (Levítico 25.8). Ha'e javi py ma 490 ma'etŷ oa'angaa. ‡ ^{9:25} Apy ma ijayvu 483 ma'etŷ re ($7 \times 7 = 49$ mais $62 \times 7 = 434$). Ha'e gui versículo 27 py omombe'u porãe sete ma'etŷ opaa pygua ju, ha'e javi vy 490 ma'etŷ ojapo aguã. Ha'e gui “Huvixarã Omoñ mbyrã” he'ia ma Cristo re ae ijayvu vy, hebraico ayvu py “Messias” 'ea. § ^{9:27} Daniel 11.36 py oĩa rami ijayvu templo py mba'emo vai nhomokanhyarã ou aguã re (Mateus 24.15, Marcos 13.14).

⁴ Ha'e gui jypyguia jaxy vinte e quatro araa py ma Tigre yakā guaxu yvýry xee aiko vy
⁵ xerova yva vy ama'ē. Ha'e vy peteī ava aexa ajukue perirī'i py onhemonde va'e. Ijaxi'y
 rupi ma ouro iky'a e'ŷ va'e guigua oĩ, Ufaz gui heru pyre.

⁶ Hete ma itaendy berilo rami hendy. Hova ma overa va'e rami, hexa ma tataendy rami
 ojekuaa. Ipo ha'e ipy ma overa va'e guigua ombovera pyre rami overa rei. Ha'e rā ijayvu
 vy mbovy e'ŷ ikuai va'e ayvu rami onhendu.*

⁷ Xee Daniel anho'i aexa ha'e nunga. Ha'e rā avakue xereve ikuai va'e ma mba'eve
 ndoexai. Ha'e rami avi ha'e kuery okyje ete aguã ou xapy'a rā onhamba, onhemimba
 okuapy.

⁸ Ha'e gui ma xee ae'i apyta. Ha'e rami vy aexave tema ha'e va'e iporā ete va'e ojekuaa
 rā. Ha'e vy naxembaraeteveia aendu. Naxembaraetevei vy xerova xiiguepa rei, ha'ekue
 rami ve'ŷ oĩ.

⁹ Ha'e rami teī aendu porā ijayvu nhendu va'e. Aendu vyve ha'a, xerova yvy re amovaẽ
 reve ndaikuaavei ranhe ajupy.

Daniel omombaraetea juague

¹⁰ Ha'e gui peteī ou vy xere opoko. Xemomy-momyī vy xerenapy'ā ha'e xepo re xemoī.

¹¹ Ha'e va'e ma aipoe'i xevy:

— Daniel ava oayvupy ete va'e, ejapyxaka ke ayvu re ndevy pe aipoa'e rā. Epu'ā ke
 he'amy, mba'eta ndea py xemboua — he'i. Po rami xereve ijayvu ramo xee apu'ā ha'amy
 aryryipa reve.

¹² Ha'e ramo aipoe'ive ju xevy:

— Daniel, ekyje eme, mba'eta ndepy'a re reikuaxea remoī. Ha'e ramo Nderuete
 renonde renhemo'yvyī'i ypya ára guive oendu ndeayvu. Ha'e gui ndeayvua rupi vy ae
 aju.

¹³ Ha'e rā Pérsia yvy re ipo'aka va'e ma xejoko ranhe vinte e um ára peve. Ha'e rami
 teī anjo yvateve va'e Miguel ou vy xepytyvō. Ha'e ramo mae ma xepo'aka Pérsia pygua
 huvixa kuery re.

¹⁴ Aŷ ma aju ndevy pe aikuua uka aguã neretarā kuery opaa ára py oiko va'erā. Mba'eta
 mba'emo rexia va'ekue ma raka'e rā ete guarā — he'i.

¹⁵ Ha'e rami xevy ijayvu ramo xee akirirī vy ama'ē ha'amy yvy re.

¹⁶ Ha'e gui peteī ava ra'y ramigua opoko xejuru re. Ha'e ramo xeayvu jevy vy aipoa'e
 xerenonde hi'ai va'e pe:

— Xeruvixa, ange mba'emo aexa rire ou xere haxy va'e. Ha'e ramo naxembaraetevei
 ete.

¹⁷ Ha'e nunga rupi Xeruvixa, mba'exa 'rā tu ndereve SENHOR rembiguai aiko va'e xeayvu?
 Mba'eta xere noīvei ete xembaraetea, neī xepytuē aguã ma voi noīvei ma — ha'e.

¹⁸ Ha'e ramo ava ramigua va'e teīgue ju opoko xere. Ha'e vy xemombaraeteve.

¹⁹ Ha'e vy aipoe'i:

— Ava oayvu etepy, ekyje eme. Evy'a ju. Nembaraete ke, nembaraete.

Po rami ijayvu ramove xembaraete. Ha'e vy aipoa'e:

— Xeruvixa, ndeayvu ke aŷ, xembaraete ju rire — ha'e.

²⁰ Ha'e ramo aipoe'i:

— Reikuua pa mba'e re pa aju ndea py? Mba'eta aa ju ta Pérsia pygua huvixa re apu'ā
 aguã. Ha'e gui xee aa ma rire Grécia pygua huvixa ju 'rā ou.

²¹ Ha'e rā ndevy amombe'u porâve 'rā ipara re anhetē va'e oĩa rami. Ha'e gui ha'e va'e
 kuery rovai apu'āa py jipoi avave rei xereve guarā, peẽ kuery re opena va'e Miguel e'ŷ
 vy.

¹ — Peteĩ ma'etŷ re ma Média pygua huvixa Dario oĩ jave xee apu'ã amombaraete ha'e amokyre'ŷ aguã.

² — Aŷ ma amombe'u porã ta ndevy anhetê va'e. Ne'exa, mboapy huvixa teri 'rã ikuai Pérsia pygua. Ha'e gui irundaya ma pavẽ gui oguerekopave 'rã. Ha'e va'e ma iporiau e'ŷ va'e vy imbaraaeteve 'rã ovy. Ha'e rami vy opa mba'e py 'rã opu'ã Grécia pygua huvixa re.*

³ Ha'e va'e rire ma peteĩ huvixa ju oiko 'rã ipo'aka va'e. Ha'e va'e ma ipo'aka etea rupi 'rã joguerek. Ha'e vy oiko 'rã ha'e ae oipotaa rami rei.

⁴ Ha'e rã ipo'akapave ma jave openaa omboja'o, ha'e omboaxaa 'rã irundy henda yvytu oipejua katy ikuai va'e pe. Va'eri ta'y kuery pe e'ŷ 'rã omboaxaa, ha'e ipo'akaague rami e'ŷ ipo'aka va'e kuery opena 'rã, mba'eta ipo'akaague oipe'aa vy amboae kuery pe ju 'rã omboaxaa, ta'y kuery pe 'râgue py.

⁵ — Ha'e gui kuaray puku-a katyguia huvixa ma imbaraaete 'rã, peteĩ hembiguai yvateve va'e voi. Ha'e va'e ma herekoare gui voi imbaraaeteve 'rã. Ha'e vy ha'e ju 'rã oĩ huvixa, openaa tuvixa 'rã guive.

⁶ Ha'e gui oĩa ma'etŷ opaa py ma ha'e kuery onhemoirū 'rã joe. Ha'e rami vy kuaray ijapu'a'ia katyguia huvixa ma omenda 'rã kuaray puku-a katyguia huvixa rajy re, peteĩ rami ikuai aguã. Ha'e rami teĩ kunha va'e ma ndajoguerek kuaai 'rã, ime voi nda'ipo'aka pukui 'rã. Mba'eta kunha va'e ma omboaxaa 'rã joupe, heruare kuery guive, tuu ha'e ojeupe guarã heruare voi.

⁷ Ha'e rã hemiarirõ kuery va'e regua peteĩ oĩ 'rã hekivia. Ha'e va'e ma kuaray ijapu'a'ia katyguia huvixa xondaro kuery re opu'ã vy oike 'rã ha'e kuery onhemiaty py. Ha'e kuery re opu'ã vy ipo'aka 'rã.

⁸ Ha'e kuery nguuete ramigua oguerekva'e ha'e javi voi ogueraapa 'rã Egito yvy katy ojeupe guarã, mbovy e'ŷ ta'angaa mba'emo rykukue gui ojapo pyre, mba'emo hepyve va'e ha'e ouro guigua guive. Ha'e gui ma mbovy ma'etŷ re rei e'ŷ nopu'ãvei 'rã kuaray ijapu'a'ia katyguia huvixa re.

⁹ Ha'e va'e rire mae ma ou vy opu'ã kuaray puku-a katyguia huvixa re. Ha'e rami teĩ ojevy rive ju 'rã oyvy katy.

¹⁰ — Ha'e gui ma ta'y kuery ju joe opu'ãa rupi 'rã ikuai. Ha'e vy mbovy e'ŷ xondaro kuery omono'ð. Ha'e kuery va'e regua peteĩ ma ou pojava 'rã. Opa marãguia omboavaipa ma vy oove 'rã guenonde katy. Ha'e vy joe opu'ã ju 'rã ovy kuaray puku-a katyguia huvixa onhemiaty oĩa peve.

¹¹ Ha'e ramo ha'e va'e ipoxy reve oo 'rã opu'ã aguã huvixa kuaray ijapu'a'ia katyguia re. Ha'e rã ha'e va'e ma heta ete ogueraa 'rã hexe opu'ã aguã py teĩ hexeve oo va'ekue omboaxapaa 'rã ipo py.

¹² Huvixa kuaray puku-a katyguia ma heta va'e kuery omomba vy onhemboyvate 'rã opy'a py. Mbovy e'ŷ ojuka 'rã teĩ nda'ipo'akai 'rã.

¹³ Mba'eta hexe kuaray ijapu'a'ia katyguia huvixa ou jevy vy jypy guare gui hetave 'rã ogueru joe opu'ã aguã. Ha'e gui mbovy rei e'ŷ ma'etŷ opaa py ma ou pojava 'rã mbovy e'ŷ xondaro kuery ha'e mba'emo oiporu va'ety reve.

¹⁴ Ha'e jave ma mbovy e'ŷ 'rã opu'ã huvixa kuaray puku-a katyguia re. Neretarã kuery va'e regua ojerovia rei va'e voi hexe opu'ã 'rã profeta ijayvuague ojeupity aguã rami. Ha'e rami teĩ ha'e kuery nda'ipo'akai 'rã.

¹⁵ Ha'e gui huvixa kuaray ijapu'a'ia katyguia ou vy omopu'ã 'rã tetã kora áry rupi ojeupi aguã. Ha'e rami vy oipe'a 'rã tetã ikorapa va'e. Ha'e rã kuaray puku-a katyguia ipo'akakueve teĩ ndojoko kuaai 'rã. Ha'e kuery va'e regua oiporavo pyre voi nda'ipo'akai 'rã ojoko aguã.

¹⁶ Ha'e nunga rupi hovaigua ou va'e ma oipotaa rami ete 'rã ojapo. Avave rei ndojoko kuaai 'rã. Yvy porãa py ma voi opyta 'rã, ipo py opa mba'e omboaxaa ramo.

* 11:2 Apy ma omombe'u porâve ju Pérsia ha'e Grécia pygua huvixa kuery joe opu'ã aguã (capítulo 8 py voi).

¹⁷ Openaa jave rupi ojeupegua ipo'akakueve oenoī vy ogueru vy huvixa kuaray puku-a katyguia reve ojapo 'rā peteī rami ikuai aguā. Ha'e rami vy ixupe ome'ē 'rā peteī kunhataī omenda aguā, ipo'akaa ombovaipa aguā. Ha'e rami teī ha'e nunga oaxa rive 'rā, ixupe ndovarei 'rā mba'everā.

¹⁸ Ha'e va'e rire ma ye'ē yvýry ju 'rā oo joe opu'ā aguā, ha'e vy heta re ipo'aka 'rā. Ha'e rami teī peteī yvateve va'e omomba 'rā ojerovia reia. Ha'e vy ojapo 'rā ojerovia reiague hi'áry ae ju ojeapa aguā rami.

¹⁹ Ha'e ramo ojevy rive 'rā oyvy re onhemiaty oī va'e katy. Va'eri onhepyxanga vy ho'a 'rā. Ha'e va'e rire ma ndojouavei 'rā.

²⁰ — Ha'e va'e rire ma hekvia oī ju 'rā peteī. Ha'e va'e ma oyvy iporāvea rupi omondouka 'rā peteī guembiguai imposto re nhombopagaa rupi oiko aguā. Ha'e rami teī are e'ŷ re omomba 'rā, ixupe ivaia py e'ŷ, neī hexe opu'ā reia rupi e'ŷ guive.

²¹ Ha'e va'e rire ha'e va'e rekivia oī ju 'rā peteī ava heko vai ete va'e, huvixarā nomoñai va'eri. Ha'e rami 'rāgue py okyrirī reve ou vy nhemi rupi 'rā oī huvixarā.

²² Henonde ma xondaro kuery heta ou teī omokanhymba 'rā. Omomba ete 'rā, guexeve peteī rami omoingo va'ekue regua yvateve va'e voi.

²³ Ha'e va'e reve peteī rami ikuai aguā ojapoa ramive ma ombotavy 'rā. Ha'e rami vy mbovy'i reve va'eri opu'āve vy ipo'akave 'rā ov.

²⁴ Okyrirī rei reve ovaē avi 'rā oguerekopave ete va'e rekoia rupi. Ha'e rami py ojapo vai 'rā tuu kuery ha'e tamoi kuery ojapoague ramigua e'ŷ. Ha'e rami vy mba'emo oipe'a vy omboja'o 'rā ojeupegua kuery pe, imba'e rei-rei va'ekue ha'e javi. Ha'e gui onhembopy'a 'rā oo ikorapa va'e re voi opu'ā aguā, teī xapy'a'i guarā rive.

²⁵ Ha'e gui onhemombaraete ha'e onhembopy'a guaxu 'rā huvixa kuaray puku-a katyguia re opu'ā aguā, oxondaro kuery imbaraetekueve mbovy e'ŷ ogueraa vy. Ha'e rami teī nda'ipo'akai 'rā, hovai opu'āa nhemi ramo.

²⁶ Ha'e gui ma hembi'u gui okaru va'e kuery omokanhymba 'rā. Oitypa 'rā okuapy ixondaro kuery, ha'e ramo heta ete ho'a 'rā oipyxopa rā.

²⁷ Ha'e va'e huvixa kuery mokoīve ma mba'emo vai ojapo aguā rami anho 'rā ikuai. Peteī'i mesa pyve oguapya py ijapu 'rā oiny joupe. Ha'e rami teī ha'e nunga oaxa rive 'rā, mba'eta oa'angaague ára py ou 'rā imombaarā.

²⁸ Ha'e ramo ava heko vai ete va'e ojevy 'rā oyvy katy. Oguerekopa vy ov'y'a reve 'rā ou. Ha'e gui onhembopy'a 'rā omomba aguā Nhanderuete guexeve guarā ojapo va'ekue iky'a e'ŷ va'e rupi ikuai va'e pe. Ha'e ae oipotaa rami 'rā oiko. Ojevy ma ramo Nhanderuete guexeve guarā ojapo va'ekue iky'a e'ŷ va'e gui amongue ojepe'a ramo oguerovy'a 'rā.

³¹ Ixupegua imbaraetekueve oo vy omongy'a rei 'rā oo iky'a e'ŷ va'e, oo yvate va'e guive. Ha'e vy ko'ē nhavō ome'ē mbyrā va'ekue oipe'a vy omoī 'rā ojeguarupy nhomokanhya.[†]

³² Ombotavy 'rā Nhanderuete guexeve guarā ojapo va'ekue iky'a e'ŷ va'e gui ojepe'a va'e kuery, ijayvu porā'ia rupi rive. Ha'e rā Nguuete oikuaa va'e kuery ma imbaraete vy ojapo 'rā okuapy mba'emo.

³³ Ha'e kuery va'e regua hi'arandu va'e ma ombo'e 'rā heta va'e kuery. Ha'e rami teī ojukaa 'rā kyxe ha'e tata py, escravo-rā ogueraa rupi, ha'e ogueraa rive-rivea rupi. Are peve 'rā ha'e nunga oiko.

[†] 11:31 Apy ha'e Daniel 9.27 py "Ojeguarupy nhomokanhya" he'ia ma Jesus omombe'u porāve Mateus 24.15 ha'e Marcos 13.14 py.

³⁴ Ha'e kuery va'e regua ho'a ramo ma xapy'a'i oipytyvõa 'rā. Ha'e rā ha'e kuery re heta onhemoirū 'rā anhetē rupi e'ŷ.

³⁵ Mba'eta hi'arandu va'e regua ho'a 'rā oeko a'ña aguã, oiky'a'oa ha'e omoxiña aguã opa rā guarā, mba'eta oa'angaague ára py ha'e nunga oiko 'rāe.

³⁶ — Ha'e gui huvixa ma ha'e ae oipotaa rami 'rā oiko. Ha'e vy opu'ã vy onhemboyyateve 'rā tuuete ramigua ikuai va'e ha'e javi áry. Tuuete ikuai va'e gui Nhanderuete yvateve va'e rovai eteve voi 'rā ijayvu nda'evei etea rupi. Ha'e rami teĩ mba'emo ojapo kuaapa ranhe 'rā, ixupe ipoxya aguã ojeupity peve. Mba'eta hexe ijayvuague oiko 'rāe.[‡]

³⁷ Ha'e va'e ma nomboetei 'rā nguu kuery ruete, neĩ kunhague ojou porâve va'e, neĩ tuuete ramigua va'e rei guive, pavẽ áry onhemboyyateva'e vy.

³⁸ Tuuete ramigua ikuai va'e omboete 'rāgue py omboete 'rā imbaraete va'e ruete ramigua anho, ha'e nunga tuuete ma tuu kuery ndoikuuai va'ekue ri. Ouro py 'rā ombojerovia, prata py, ita hepyve va'e ha'e mba'emo iporâve va'e py guive.

³⁹ Ha'e gui amboae regua ruete pe onhepytyvõ uka vy opu'ã 'rā oo ikorapa va'e re. Ha'e gui amongue omovaẽ porã ramo omboete uka ete 'rā. Ha'e vy omoĩ 'rā mbovy e'ŷ re ipo'aka aguã, ha'e kuery pe omboja'o 'rā guive yvy.

⁴⁰ — Ha'e gui opa aguã ára ovaẽ ramo hexe opu'ã 'rā huvixa kuaray puku-a katyguia. Huvixa kuaray ijapu'a'ia katyguia voi opu'ã 'rā hexe karóxa ha'e kavaju áryguia kuery reve, ha'e mbovy e'ŷ kanoã guaxu py ikuai va'e reve. Heta yvy re ha'e kuery ovaẽ vy omonyẽmba 'rā, ha'e gui amboae katy ju 'rā oo.

⁴¹ Yvy porãa re voi ovaẽ avi vy heta 'rā oity. Ha'e rā ipo'akaa gui amongue oo jepe 'rā, Edom, Moabe ha'e Amom pygua yvatekueve anho.

⁴² Heta yvy áry oupi 'rā opo. Egito yvy re ikuai va'e voi ndoo jepei 'rā.

⁴³ Oipe'apa 'rā ouro ha'e prata guigua, hepykueve Egito yvy re ikuai va'e guive. Líbia ha'e Etiópia pygua kuery voi oje'oi 'rā hembiguarã.

⁴⁴ Ha'e rami teĩ kuaray oua katy ha'e ijapu'a'ia katy gui mba'emo omombe'ua rā oendu vy onhemondyi 'rā. Ha'e vy oove ju 'rā ipoxy reve, mba'emo ombovaipa ha'e ojuka reta aguã.

⁴⁵ Ha'e rami vy ye'ẽ pa'ũ py oupi 'rā ngoorã tuvixa ete va'e, yvyty porã iky'a e'ŷ va'e rovai. Ha'e rami teĩ ovaẽ 'rā imombaarã, ha'e ndoikoi 'rā heraa jepearã.

12

Opaa ára py guarã re ijayvuague

¹ — Ha'e va'e jave ma anjo yvateve va'e Miguel opu'ã avi 'rā, neretarã kuery repya va'e. Ha'e va'e ára ma ikuai axy ete aguã. Ha'e ramigua oiko va'e'ŷ teri, ha'e kuery va'e regua ikuai ypya ára guive ha'e va'e ára peve. Ha'e rami teĩ ha'e jave py neretarã kuery ogueraa jepe 'rā, kuaxia re hery oĩ va'e ha'e javive.

² Yvy re onhono porã mbyre heta 'rā onhemboete ju okeague gui. Amongue oo 'rā tekove marã e'ŷ oupity aguã katy, ha'e rā amboae kuery ma oximba ha'e raka'e rā peve ikuai axy aguã katy 'rā oo.

³ ¹Arandua rupi ikuai va'ekue ma hexakã 'rā yva re ikuai va'e rami. Teko porã katy jogueraa reta va'ekue ma jaxy-tata rami 'rā hexakã riae, raka'e rā peve.

⁴ Ha'e gui ndee Daniel, emoĩ porã ha'e va'e ayvu, emboja guive kuaxia mbojaa py, opaa ára py guarã. Heta oikuaave 'rā oje'oivy — he'i.*

⁵ Ha'e ramo xee Daniel ama'ẽ vy mokoĩ ju aexa hi'aĩ va'e. Peteĩ ma yakã kyvõguia re, ha'e rā amboae ma hovaigua re hi'aĩ.

⁶ Ha'e kuery va'e regua peteĩ ma aipoe'i yy áry ava hi'aĩ va'e ajukue perirõ'i py onhemonde va'e aexa va'ekue pe:[†]

[‡] 11:36 Nhanderuete re ijayvu vaia re Apocalipse 13.6 py voi ijayvu avi. * 12:4 Apocalipse 10.4 py oĩa rami avi profeta kuery pe nomombe'u ukapai ayvu oendu va'ekue, ára novaẽi teri ramo. [†] 12:6 “Ava ajukue perirõ'i py onhemonde va'e” he'i'a va'e ma Daniel oexa ma voi va'ekue (10.4).

— Raka'e tu ojeupity 'rā ha'e va'e nhomondyipaarā? — he'i.

⁷ Ha'e ramo yy áry ava hi'aī va'e ajukue perirī'i py onhemonde va'e ombovai rā xee aendu. Mba'eta yva re opo oiporu kuaa ha'e oiporu kuaa e'ŷa regua oupi vy oura raka'e rā peve oiko va'erā va'e rery rupi. Ha'e vy aipoe'i:

— Ha'e nunga oiko 'rā peteī ma'etŷ, ha'e gui mokoī ma'etŷ ju, ha'e irundy ma'etŷa mbytea py. Iky'a e'ŷ va'e kuery po'akaa ombovaipaa ma jave mae ojeupity 'rā ha'e nunga ha'e javi — he'i.[‡]

⁸ Ha'e rami xee aendu va'eri naendu kuaai. Ha'e vy xee aporandu:

— Xeruvixa, opaa py ha'e nunga oiko ramo mba'exa tu 'rā oiko orere?

⁹ Ombovai:

— Tereo Daniel, mba'eta pova'e ma nomombe'u porāavei 'rā ranhe. Omoī porāa ma opaa ára peve guarā.

¹⁰ Heta 'rā oiky'a'oa, omoxiña ha'e oeko a'āa guive. Ha'e rā heko vai va'e kuery ma heko vaive tema 'rā, ha'e kuery va'e regua neī peteīve noendu kuaai 'rā. Ha'e rā 'arandua rupi ikuai va'e ma oendu kuaapa 'rā.

¹¹ Ha'e rami avi mymba ko'ē nhavō ome'ē jepiaty omombaa ma rire, ha'e ojeguarupy nhomokanhyarā omoīa ma rire mil duzentos e noventa ára ju 'rā oaxa.

¹² Ovy'a ete 'rā amongue oarō porāa rupi mil trezentos e trinta e cinco ára peve oupity va'e.

¹³ Ha'e rā ndee ma tereo tema tape reikoa va'e rupi ae, opa peve. Mba'eta repytu'u 'rā, ha'e gui opaa ára py repu'ā ju 'rā ndevygua oī va'e rejopy aguā — he'i.

[‡] 12:7 Apy ma três anos e meio re ijayvu (Daniel 7.25 ha'e Apocalipse 12.14 py oīa rami).

Oséias ayvu oĩa Oséias ayvu oĩa

Profeta Oséias ayvu omombe'u jave ma hetarã kuery Israel regua ipo'akave ha'e heko vaive okuapy, mba'emo ra'angaa riveombojeroviaa py. Ha'e kuery pe Oséias ijayvu ojeko rerova aguã, Nhanderuete ombopaga e'ŷ aguã. Mba'eta nhandereko vaiaty jaeja vy Nhanderuete pe jajeko me'ẽ ramo nhanemboaxy vy ojee nhandereru ju 'rãe.

Ayvu py anho e'ŷ Oséias oikuaa uka raka'e Nhanderuete nhomboaxy, ha'e ae oikoa py, Nhanderuete ojapo ukaague rami vy. Mba'eta "Oséias pe oayvu omombe'u uka aguã Senhor ijayvu ypy'i vy aipoe'i: 'Tereo, ndera'yxyrã eraa peteĩ kunha itavy rei va'erã, itavy reia rupi omemby oguerekova'erã, mba'eta pendeyvy re ikuai va'e Senhor gui opoipa vy itavy rei avi okuapy', he'i" (1.2). Ha'e ramo Oséias ha'e rami ojapo vy omenda rire ta'yxy itavy rei vy opoi ixugui.

Ha'e rami tei "Senhor aipoe'ive ju xevy: 'Teigue ju tereo, eayvu ju kunha neirũ oayvu va'ekue itavy rei tei. Senhor Israel kuery oayvua rami eiko, ha'e kuery nguete ramigua pe mbojape uva pirukue reveguia ome'ẽxe vai va'erí', he'i. Ha'e ramo xee ma xera'yxyrã ju ajogua. ... Ha'e vy ixupe aipoa'e: 'Ha'e gui ndee ma heta ára re teri 'rã xerarõve. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy', ha'e. Mba'eta Israel kuery voi heta ma'etõ re 'rã ikuai nguvixa e'ŷ re, opena va'e e'ŷ re, Nhanderuete pe mba'emo ome'ẽ e'ŷ re, ta'angaarã ita omopu'ã mbyre e'ŷ re, sacerdote pegua manto e'ŷ re, ha'e mba'emo ra'angaa oo rupi oguerekova'erã e'ŷ re guive. Ha'e va'e rire ma Israel kuery ojevypa vy oeka'rã okuapy Senhor nguete ha'e Davi nguvixara. Ha'e rami vy opaa ára ha'e kuery oryryipa reve 'rã onhemboja jogueruvy Senhor re onhemboaxy uka vy" (3.1-2a, 3-5).

Profeta Oséias gua'yxy oayvu jevyague rami ae avi "Nhanderuete ma po rami oexa uka nhanderayvua: jajejavya rupi teri jaiko reve Cristo omano raka'e nhandere" (Romanos 5.8).

Oséias omenda aguã re ijayvuague Israel kuery ndojeroviaia oikuaa uka aguã

¹ Beeri ra'y Oséias pe SENHOR oayvu ombou va'ekue. Ha'e va'e ayvu ma Judá pygua huvixa kuery Uzias, Jotão, Acaz ha'e Ezequias ikuai jave ombou, Israel pygua huvixa Joás ra'y Jeroboão oĩ jave guive.

² Oséias pe oayvu omombe'u uka aguã SENHOR ijayvu ypy'i vy aipoe'i:

— Tereo, ndera'yxyrã eraa peteĩ kunha itavy rei va'erã, itavy reia rupi omemby oguerekova'erã, mba'eta pendeyvy re ikuai va'e SENHOR gui opoipa vy itavy rei avi okuapy — he'i.

³ Ha'e ramo oo vy gua'yxyrã ojou Diblaim rajy Gômer. Ha'e rã ha'e va'e oguerekova'i vy oikuavã peteĩ ava'i.

⁴ Ha'e gui SENHOR aipoe'ive ju Oséias pe:

— Pemboery 'rã Jezreel, mba'eta are e'ŷ re ambopaga 'rã Jeú ramymino kuery Jezreel tetã py jouguy omoëague re.* Ha'e rami vy amomba 'rã Israel kuery re ipo'akaa.

⁵ Ha'e va'e ára py amopẽmba 'rã Israel kuery rapa Jezreel katy'i yvugua oĩ va'e py ae — he'i.

⁶ Ha'e gui ta'yxy oguerekova'i vy kunha'i ju oikuavã. SENHOR aipoe'i Oséias pe:

— Ha'e va'e ma pemboery 'rã Omboaxypy e'ŷ, mba'eta xee namboaxyvei 'rã Israel kuery, aperdoaa rupi ve'ŷ 'rã areko.*

* 1:4 Jezreel tetã py ma Jeú jojuka vy ojopy va'ekue Israel kuery re ipo'aka aguã (2 Reis 9.14-27). Ha'e gui Jeroboão versículo 1 py ijayvua ma Jeú ramymino. * 1:6 1 Pedro 2.10

⁷ Ha'e rā Judá kuery ma amboaxy 'rā. Ha'e rami vy araa jepe 'rā xee SENHOR Tuuete po'akaa rupi ae. Guyrapa rupi e'ŷ 'rā araa jepe, kyxe rupi e'ŷ, joe opu'āa rupi e'ŷ, kavaju rupi e'ŷ, neñ kavaju árygua kuery rupi e'ŷ guive — he'i.

⁸ Ha'e gui Omboaxypy e'ŷ nokambuvei ma jave oguereko ju ava'i.

⁹ Ha'e ramo SENHOR aipoe'i Oséias pe:

— Ha'e va'e ma pemboery 'rā Xevyguia e'ŷ, mba'eta xevyguia e'ŷ peẽ kuery pendekuai, ha'e xee voi Penderuete e'ŷ 'rā aiko.

¹⁰ Ha'e rami avi Israel kuery ma ye'ē rembe rupi ita ku'i oña rami 'rā heta, mba'eta ita ku'i oa'āa va'erā e'ŷ, neñ oipapa kuaa va'erā e'ŷ guive. Ha'e gui “Peẽ ma xevyguia e'ŷ” 'ea 'rāgue py “Nhanderuete oikove va'e ra'y kuery”, 'ea 'rā pěvy.*

¹¹ Ha'e rami vy Judá ha'e Israel kuery reve ju 'rā nhomoirūmba. Petei'i 'rā omoī okuapy nguvixarā. Ha'e rami vy yvy pendekuaia gui peopa ju 'rā, mba'eta iporā vaipa 'rā Jezreel ára py.†

2

¹ — Ha'e gui penderyvy kuery pe “Xevyguia kuery” peje 'rā, ha'e rā penereindy kuery pe ma “Omboaxypy” peje.

Ha'e kuery ndojeroviai tei Nhanderuete ojeroviapy oikoa re ijayvuague

² — Pendeayvu pendexy pe, pendeayvu ete ixupe, mba'eta xera'xyx ve'ŷ ma oiko, xee voi imeve'ŷ ma. Ha'e rami ajapo ojegui oipe'a aguā itavy reia, okā mbyte gui gueko vaia oipe'a aguā guive.*

³ Ha'e rami e'ŷ rā xee aeja 'rā ipire rei va'e, oiko ramo'i jave guare rami ae. Ha'e rami tekao e'ŷa rami amoingo 'rā, yvy piru reia rami ete ajapo 'rā yuvei py ajuka vy.

⁴ Neñ imemby kuery voi xee namboaxyi 'rā, itavy reia rupi ixy oguereko rire.

⁵ Mba'eta ixy ma itavy raka'e, ikuavāare gueko vaia rupi anho oiko. Ha'e rami vy aipoe'i: “Xee aa 'rā apena va'e kuery rakykue. Ha'e ramo ha'e kuery ma xevy pe ome'ē 'rā mbojape, yy, vexa'i rague, ajukue perirī'i, azeite ha'e ay'u va'erā”, he'i.

⁶ Ha'e rami tei xee ajoko 'rā hape rupi juu amoī vy. Hovai ajapo 'rā kora, tape oo aguā ojou e'ŷ aguā.

⁷ Ha'e ramo opena va'ekue rakykue oo tei ndouptyi 'rā. Oeka tema tei ndojoui 'rā. Ha'e rami vy aipoe'i 'rā: “Aa 'rā, xeme ypya py ae ju ajevy, mba'eta aŷguia gui ha'eveve xevy guare”, he'i.

⁸ Mba'eta ndoikuuai xee ae trigo, vinho, azeite ha'e nunga ome'ē va'ekuea. Ixupe guarā xee ae amboetave va'ekue prata ha'e ouro. Ha'e rā ha'e ma Baal ra'angaa pe rive ome'ē va'ekue.

⁹ Ha'e nunga rupi xee ma trigo omono'ōa ára, vinho ojapoa ára aju vy aipe'apa ju 'rā ixugui. Aipe'apa ju 'rā vexa'i rague ha'e ajukue perirī'i, ha'e nunga opire reia ojao'i aguā ame'ē va'ekue.

¹⁰ Aŷ ma oxia aixa uka 'rā opena va'ekue oexaa py. Xepo gui avave rei ndogueraa jepei 'rā guive.

¹¹ Amomba 'rā ovv'aague ha'e javi, jaxy pyau nhavō ngaru ojapo jepiague, sábado nhavō ijatyague, ha'e ngaru oa'anga va'ekue ha'e javi.

¹² Ambovaipa 'rā ha'e kuery mba'e uvaty ha'e figoty aipoe'ia va'e: “Kova'e ma apena va'e kuery opaga vy xevy ome'ē va'ekue”, he'ia. Ha'e nunga ma xee ajapo 'rā ka'aguy rive, ha'e ramo ka'aguy regua mymba nharō kuery ho'upa 'rā.

¹³ Xee ambopaga 'rā Baal ra'angaa pe heakuā porā va'e oapy okuapyague re. Ha'e va'e jave ojere'i va'e ha'e ita hepykueve py onhembojegua vy opena va'e kuery rakykue oo. Ha'e rā xegui ma hexaraipa — he'i SENHOR.

* 1:10 Romanos 9.25-26 † 1:11 Tery Jezreel ma “Nhanderuete omoāi va'e” 'ea. Jypy ma Nhanderuete omoāimbā ijyvy gui omoxē vy, ha'e gui opaa py ma mba'emo ra'yīgue nhamoāia rami ju omoāi 'rā heruvy omboetave aguā (2.22-23). * 2:2 “Pendexy” he'ia py ma Israel kuery re ae ijayvu vy.

¹⁴ — Ha'e rami teĩ ajapo 'rã xere ju ima'endu'a aguã rami. Ha'e rami vy tekao e'ŷa katy araa vy xeayvu porã'i 'rã opy'a py oendu va'erã re.

¹⁵ Ha'e gui ma ame'ẽ ju 'rã uvaty oguerekva'ekue ramigua. Ixupe Acor yvyugua ajapo 'rã peteĩ okẽ rami, ha'e va'e rupi oaxa vy oendu ju aguã oarõ oikovy aguã.[†] Ha'e ramo xererovy'a ju 'rã, kunhatai jave Egito yvy gui oẽ javé guare rami.

¹⁶ Ha'e va'e ára ju xevy pe "Xeme" he'i 'rã, xevy pe "Baal" nde'ivei ma 'rã — he'i SENHOR.

¹⁷ — Mba'eta ha'e kuery juru gui anoẽmba 'rã Baal rery, hery re ima'endu'a ve'ŷ aguã rami.[‡]

¹⁸ Ha'e va'e ára ha'e kuery re ama'ẽ vy mymba ka'aguy re ikuai va'e ajapo 'rã ha'e kuery pe inharõ ve'ŷ aguã rami, guyra yvate rupi oveve va'e ha'e vixo yvy rupi onhembotyryry va'e guive. Ha'e gui ha'e kuery yvy gui ma aipe'a 'rã guyrapa ha'e kyxe oiporu pyre ha'e javi, joe opu'ãa ve'ŷ aguã. Ha'e rami vy xevygua kuery ajapo 'rã opytu'u okuapy aguã rami, mba'eve oiko e'ŷa py.

¹⁹ Xejee ae romomenda ju 'rã raka'e rã peve. Teko porã rupi roguerekva'ekue romomenda 'rã xejee, ha'evea rami aikuua potaa py, roguerekva'ekue porã'ia ha'e romboaxya rupi guive.

²⁰ Ojeroviapy aikoa rupi 'rã romomenda xejee. Ha'e rami vy reikuua 'rã SENHOR aikoa — he'i.

²¹ SENHOR aipo'e:

— Ha'e va'e ára py ma xee rombovai 'rã roayvu porã vy. Yva voi aroayvu porã rã omoingo porã ju 'rã yvy.

²² Ha'e gui yvy ju omoingo porã 'rã trigo, vinho ha'e azeite. Ha'e ramo ha'e nunga omoingo porã 'rã xevygua kuery Jezreel pygua kuery.

²³ Mba'eta Israel kuery yvy jave rupi xee amoã 'rã mba'emo ra'yí rami, xevy guarã. Amboaxy aguã rupi e'ŷ ikuai va'ekue pe xee aexa uka ju 'rã amboaxya. "Xevygua e'ŷ" ha'e va'ekue pe aipo'e 'rã: "Ndee ma xevygua ae!" Ha'e ramo ombovai vy "Ndee ma Xeruete!" he'i 'rã xevy.*

3

Nhanderuete nhomboaxy aguã re ijayvuague

¹ SENHOR aipo'e: ju xevy:

— Teĩgue ju tereo, eayvu ju kunha neirũ oayvu va'ekue itavy rei teĩ. SENHOR Israel kuery oayvua rami eiko, ha'e kuery ma nguuete ramigua pe mbojape uva pirukue reveguia ome'exe vai va'eri — he'i.*

² Ha'e ramo xee ma xera'yxyrã ju ajogua, quinze hatã'i va'e prata guigua ha'e quinze vox cevada ame'ẽ vy.

³ Ha'e vy ixupe aipo'e:

— Ha'e gui ndee ma heta ára re teri 'rã xerarõve. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy — ha'e.

⁴ Mba'eta Israel kuery ma heta ma'etõ re 'rã ikuai nguvixa e'ŷ re, opena va'e e'ŷ re, Nhanderuete pe mba'emo ome'ẽ e'ŷ re, ta'angaarã ita omopu'ã va'ekue e'ŷ re, sacerdote i-manto va'e e'ŷ re, ha'e mba'emo ra'angaa ngoo rupi oguerekva'ekue e'ŷ re guive.

⁵ Ha'e va'e rire Israel kuery ojevypa vy oeka ju 'rã okuapy SENHOR nguuete ha'e Davi nguvixarã. Ha'e rami vy opaa ára ha'e kuery oryryipa reve 'rã onhemboja jogueruvy SENHOR re onhemboaxy uka vy.

[†] ^{2:15} Tery Acor ma "Jexavaia" 'ea. Yma Acor yvyugua py Israel kuery Egito gui ovaẽ jave ojejavvy ramo ombopagaa raka'e (Josué 7.24-26). Ha'e rami teĩ aý ha'e va'e rupi oaxa jevy vy ojou 'rã oarõ va'e. [‡] ^{2:17} Tery Baal ma "Nhandererekoa" 'ea. Nhanderuete ndoiptavei ha'e va'e rery rupi ojapukai okuapy. ^{*} ^{2:23} Romanos 9.25-26, 1 Pedro 2.10 ^{*} ^{3:1} Apy ma Nhanderuete ijayvu Oséias gua'xyx ogueru ju aguã re, ha'e ae nhanderuera rami avi jajejavvy va'eri. Gua'xyx escravo oikoague gui Oséias ojogua, nhande voi jejavya pe jaikoague gui Nhanderuete nhandejoguaague rami.

4

Israel kuery opa mba'e py ojejavya re ijayvuague

- 1 — Peẽ Israel kuery, pendu ke SENHOR ayvu, mba'eta SENHOR oguereko yvy regua kuery re oikuaa pota aguã, mba'eta ha'e kuery re ma anhetẽ va'e noĩ, neĩ mborayvu, neĩ Nhanderuete oikuaaxeia guive.
- 2 Ha'e kuery oguerovy'ave va'e ma oura rivea, apu, jojukaa, imondaa ha'e tavy reia rive. Ha'e rami vy joo oipe'a rive 'rã, ha'e jojuka vyve jojuka vyvoi ju 'rã.
- 3 Ha'e nunga rupi ae ijyvy nda'evelei, hexe ikuai va'e voi ikangypa okuapy, mymba nhuündy rupi ikuai va'e, guyra yvate rupi oveve va'e guive. Pira ye'ẽ rupi ikuai va'e voi omanomba.
- 4 — Ha'e rami teĩ mava'eve ndoikuua potai, nanhomongetaai guive. Mba'eta peẽ kuery ma sacerdote kuery ojou vaipy rami pendekuai.
- 5 Mba'eta ara py teĩ penhepyxanga 'rã, pendereve profeta kuery ikuai va'e voi onhepyxanga 'rã pyávy. Ha'e nunga rupi xee amomba 'rã pendexy.
- 6 Xevyguia kuery ma hi'arandurã va'ekue noĩ ramo omombaa ma heravy. Ndee sacerdote, 'arandua reja rire xee ju roeja 'rã, xerenonde sacerdote reiko ve'ŷ aguã. Nderuete guigua lei gui nderexarai ramo xee voi xerexarai 'rã nderay'kuery gui.
- 7 Ha'e kuery heta-etave ovya ramive ma xerovai ojejavye tema 'rã oje'oivy. Ha'e nunga rupi ha'e kuery omboetepy ikuai 'rãgue py xee ajapo 'rã oximba aguã rami.
- 8 Ha'e kuery ma xevyguia kuery ojejavya re rive 'rã onhemongaru, opa marã rei ikuai rã oexa vy rive 'rã ov'y'a.
- 9 Ha'e nunga rupi heta va'e kuery xee areko 'rã sacerdote kuery areko rami avi. Mba'eta mokoïve ambopagapa 'rã heko vaiague re, ame'ẽ 'rã ikuaiague repy ae.
- 10 Ha'e ramo ha'e kuery okaru teĩ naevyatãi 'rã. Itavy reia rupi ikuai va'eri ndaetave ovyi 'rã, SENHOR ombojeroviaa gui ojepe'apa rire.
- 11 Mba'eta ha'e kuery itavy reia, vinho ha'e vinho pyau re oka'upa reia oipe'apa hi'arandua.
- 12 Xevyguia kuery oporandu 'rã yvyra ra'ykue oguereko va'e pe rive, ha'e ramo yvyra ipo'i'i va'e ju ombovai 'rã. Nhe'ẽ imbotavy reia pe onhembotavy uka vy Nguuete gui hexaraipa okuapy itavy reia rupi.
- 13 Yvy'ã yvate va'e-va'e rupi rive 'rã ome'ẽ okuapy mba'emo, heakuã porã va'e voi oapy 'rã yvy'ã-vy'ã'i rupi, yvyra carvalho, choupo ha'e terebinto ikuai va'e guy rupi guive, kuaray'ã porã rei ramo rive. Ha'e nunga rupi ae penderajy kuery itavy rei okuapy, penderay'ra'yxy kuery voi.
- 14 — Ha'e rami teĩ penderajy kuery ma xee nambopagai 'rã itavy reia re, neĩ penderay'ra'yxy kuery guive. Mba'eta avakue ae oje'oi 'rã kunhague tavy rei reve itavy rei aguã, ha'e kuery regua reve mba'emo ome'ẽ 'rã ta'angaa pe. Ha'e rami vy hi'arandu e'ŷ va'e kuery ma okanhy aguã katy oo.
- 15 — Ha'e gui peẽ Israel kuery, pendetavy reia rupi tema peoxe teĩ tove Judá tojejavy eme ha'e nunga py. Too eme Gilgal py, too eme Bete-Áven py, neĩ ouraa rupi “SENHOR oikove va'e rupi aura” te'i eme.*
- 16 Mba'eta vaka oja rovai opu'ã va'e rami Israel kuery opu'ã okuapy xere. Mba'exa 'rã tu ha'vy SENHOR omongaru herekovy nhuündy tuvixave va'e rupi, vexa'i ra'y'i rami?
- 17 Mba'eta Efraim kuery ma ta'angaa pe rive onheme'ẽmba. Tove ta'ikuai.
- 18 Ha'e kuery oka'upa rei vy itavy reia rupi ju 'rã ikuai. Yvatekueve voi oximba reia rupi rive ikuaixeve.
- 19 Ha'e rami rire yvytu atã ogueraapa 'rã opepo py. Ha'e ramo oximba 'rã ta'angaa pe mba'emo ome'ẽague re.

* 4:15 Tery Bete-Áven ma “Jejavya ro” 'ea. Ha'e va'e tery py Betel “Nhanderuete ro” 'ea va'e re ijayvu, mba'eta ha'e katy'i huvixa omopu'ã rire vaka ra'y ra'angaa ha'e ombojerovia atyrã (10.5.8). Jaikuaa porâve aguã jaexa avi 'rã 1 Reis 12.28-33 py.

5

Sacerdote kuery ha'e yvatekueve pe ijayvu atāague

- ¹ — Sacerdote kuery, pendu ke. Israel kuery, pejapyxaka. Huvixave ro py pendekuai va'e, pejapyxaka avi. Mba'eta pova'e ayvu ma penderovai ae. Mispa tetā py nhuā pejayvy, ha'e Tabor yvyty áry rupi guyra'i mbo'aa ramigua peipyo.
- ² Opa marā pendekuaive peovy pavē gui. Ha'e rā xee rombopagapa 'rā ha'e nunga ha'e javi re.
- ³ Aikuua Efraim kuery reko ha'e javi, Israel kuery nonhemi 'rā xegui. Mba'eta aŷ Efraim kuery, pendetavya py Israel kuery ha'e javi voi onhemongy'apa rei.
- ⁴ Ha'e rami ikuai riae vy nda'evevi Nguuete pe ojevy aguā. Ha'e kuery mbyte nhe'ẽ imbotavyarā oĩ ramo ndoikuaavei okuapy SENHOR.
- ⁵ — Israel kuery onhemboyvatea py ae onhemoĩ vai. Israel ha'e Efraim kuery ma ha'e kuery reko vaia re ae 'rā ho'a, Judá kuery voi ho'a avi 'rā ha'e kuery reve.
- ⁶ Ha'e va'e kuery ma guymba kuery vexa'i ha'e vaka ome'ẽ va'erā reve 'rā oo SENHOR reka vy merami teĩ ndojoui 'rā, ha'e kuery gui ojep'e a ma rire.
- ⁷ SENHOR pe e'ŷ ha'e kuery ikuiaia rupi kyrīgue ogueroko va'e omendaa py e'ŷ. Aŷ jaxy pyau re ngaru ojapoa py omokanhymbaa 'rā, ijyvy guive.
- ⁸ — Tombopua mimby guaxu Gibeá py, Ramá tetā py voi tonhendu! Tojapukaia Bete-Áven py! Penheangu ke, Benjamim kuery!
- ⁹ Efraim kuery opaga aguā ára py ivaipa ete 'rā. Israel kuery mbyte rupi aikuua uka ma mba'emo oiko va'erā.
- ¹⁰ Judá regua yvatekueve ma yvy markaa oguerova rive va'e rami ikuai. Ha'e nunga rupi ha'e kuery áry anhoẽ 'rā xepoxya yy rami.
- ¹¹ Efraim kuery ambopaga rā ikuai axy, iporiaupa rei guive, ovare e'ŷ va'e re nda'eveia rupi ikuai rire.
- ¹² Ha'e nunga rupi amomba 'rā Efraim kuery vixo'i rami, Judá kuery guive hu'ūgue rami 'rā amomba.
- ¹³ Efraim kuery oikuua omiba'eaxy, ha'e Judá kuery voi oai vaikue oexa vy Efraim kuery ma Assíria katy oo. Ha'e pygua huvixave pe ojerure oipytyvō aguā. Ha'e rami teĩ nomonguera kuaai imba'eaxygui, neĩ ijai gui guive.
- ¹⁴ Mba'eta Efraim kuery amomba 'rā guary rami, Judá kuery guive amomba 'rā guary ra'y rami. Xee, xee ae amopẽmba, aejapa 'rā guive. Xee aipe'apa heravy ramo nda'ipoai 'rā xegui ogueraa jepea va'erā.

Anhetē rupi e'ŷ ojeko rerova okuapya re ijayvuague

- ¹⁵ — Ha'e rami vy xee aa ju 'rā aikoaty py ranhe apyta aguā, ha'e kuery ojejavya omombe'u vy xereka peve. Mba'eta ha'e kuery ojexavai vy xereka voi 'rā. Aipoe'i:

6

- ¹ “Peju, jajevy ju SENHOR pe. Mba'eta nhanemopẽmba teĩ nhanemonguera ju 'rā. Nhanemboaipa teĩ nhanepoano ju 'rā.
- ² Mokoĩ ára rire nhanemombaraete ju 'rā. Mboapy araa py ma nhanemopu'ã 'rā. Ha'e ramo teĩgue ju 'rā nhandekuai henonde rupi.
- ³ Jaikuua ke SENHOR, nhanhea'ã tema jaikuua ete peve. Mba'eta ou 'rā kuaray oua rami. Nhandere oguejy 'rā oky rami, ára pyau jave oky ou vy yvy omoakŷ va'e rami”, he'i okuapy.
- ⁴ — Efraim kuery, mba'e 'rā tu ajapo pendere? Ha'e vy peẽ Judá kuery, mba'e 'rā tu ajapo pendere? Mba'eta peẽ kuery ma ko'ẽmba'i arai ojekuaa rive ouvy va'e rami xerayvu, ha'e yxapy ko'ẽ rai ramove ipirupa ovvy va'e rami guive.
- ⁵ Ha'e nunga rupi xee roitypa 'rā profeta kuery ayvu py rive. Xejuru gui ayvu oẽ va'e py ae rojuka, rombopaga aguā ma hexakā va'e rami ojekuaa.

⁶ Mba'eta xee aipota va'e ma penhomboaxya, mba'emo rive xevy pe peme'ẽ nda'ei. Mba'emo peapy reve peme'ẽa gui aipotave Nhanderuete peikuua ete.*

⁷ — Ha'e rami teĩ ha'e kuery ma Adão rami ae avi nda'ikuaxe xereve guarã ajapo va'ekue rami. Xerovai ha'e kuery ikuai anhetẽ rupi e'ŷ.

⁸ Mba'eta Gileade tetã ma heko vai va'e anho ikuiaia, jouguy gui iky'apa guive.

⁹ Sacerdote kuery voi ikuai tape rupi oguata ou va'e ojukaxe vy oma'ẽ mbegue va'e rami, mba'eta Siquém katy tape oo va'e py jojuka ma. Ha'e rami vy ojapo okuapy ojeguarupy.

¹⁰ Peteĩ mba'e aexa nda'evei ete va'e Israel kuery ikuiaia mbyte. Ha'e py oĩ Efraim kuery itavy rei okuapy. Ha'e va'e gui ma Israel kuery ha'e javi onhemongy'apa.

¹¹ Judá kuery, peẽ voi pendeayapaa 'rã.

7

Huvixa kuery ha'e yvatekueve ojejavvy okuapy re ijayvuague

¹ — Xevyguia kuery aipytyvõ ta ha'e Israel kuery amonguera ta nhavõ ojekuaa kuerei Efraim kuery ojejavva ha'e Samaria pygua kuery reko vai, mba'eta anhetẽ va'e rupi e'ŷ ikuai. Opy rupi imonda va'e anho ikuai, oka rupi voi jojuka va'e kuery imonda 'rã okuapy.

² Ha'e kuery opy'a py aipo nde'i: “Nhanderekvaia re Nhanderuete oikuaa pota 'rã”, nde'i. Ha'e nunga rupi aŷ ha'e kuery ojapo vaia ae ojoko, xerenonde voi ojekuaapa.

³ Ha'e kuery reko vaia anho rive 'rã huvixa oguerovy'a. Yvatekueve voi oguerovy'a rei okuapy ijapua.

⁴ Itavy reia rupi meme ikuai. Mbojape apoa imbojaty py omoendyague rami hakupa. Mba'eta omoendy ma vy omoapomo oiny jave omoendy ve'ŷ ranhe teĩ ha'eve mbojaperã ovu porã peve.

⁵ Huvixave pegua ngaru oikoa ára py yvatekueve imba'eaxy rai okuapy vinho py oka'ua gui. Huvixa eteve voi onhemoirũ nhombojaru rei va'e kuery reve.

⁶ Ha'e rã ha'e kuery opy'a re omoõ mbojape mbojaty ramigua, joe oma'ẽ mbegue okuapy vy. Pyávy ipoxya optytu'u teĩ ko'ëgue hendy ju 'rã tataendy rami.

⁷ Ha'e kuery ha'e javi ma tata rami inhakã raku vy omomba nguvixa kuery. Ha'e ramo huvixa ikuai va'ekue omanomba. Ha'e rami teĩ peteïve ma xevy pe ndojapukaiai.

⁸ — Ha'e gui ma Efraim kuery onhemoirũ 'rã okuapy amboae regua kuery reve. Mbojape ombojere e'ŷ re oexy pyre rami ndovarei.

⁹ Imbaraetea ma amboae regua kuery ombovaipa teĩ ndoikuuai rei. Ijapyte rupi hi'a xiimba ma teĩ ndoikuuai potai.

¹⁰ Israel kuery onhemboyvatepa rei pavẽ oexaa py. Ha'e rami teĩ SENHOR Nguuete pe ndojevi. Ha'e kuery re ha'e rami ete oiko teĩ ndoeka potai okuapy.

¹¹ Mba'eta Efraim kuery ma apykaxu ombotavy pyre rami ndoiko kuaai rei okuapy. Egito kuery pe oenoõ 'rã onhepytyvõ uka vy, Assíria yvy katy avi 'rã oo.

¹² Ha'e katy oo ramo ha'e kuery áry rupi xee aipyo 'rã xekya, ambo'apa 'rã guyra yvate rupi oveve va'e rami. Ha'e rami vy ambopaga 'rã, ha'e kuery iyatya py ayvu aendu ukaague rami vy ae.

¹³ Nda'evei ete 'rã ha'e kuery pe, xegui ojepe'a rire! Xere opu'ã rei rire hi'áry ho'a 'rã imombhaarã! Xee aepy 'rãgue teĩ xerovai ijapu okuapy.

¹⁴ Ngupa py onheno oupya py haxẽ rive okuapy teĩ opy'a py e'ŷ ojapukai xevy. Trigo ha'e vinho ojouxe vy onhemboaty, ha'e rã xere ma opu'ã rei 'rã okuapy.

¹⁵ Xee amo'arandu, amombaraete guive teĩ ijayvu vai 'rã xerovai.

¹⁶ Ha'e kuery ma Yvate ete va'ea katy e'ŷ ojevy. Guyrapa ikarẽ rive va'e rami ikuai. Ha'e nunga rupi ha'e kuery va'e regua yvatekueve ojukapaa 'rã kyxe py, onhemboyvatea rupi rei ijayvu rire. Egito yvy re oo teĩ ha'e pygua kuery ojojai rei 'rã okuapy.

8

Opagaa aguã ovaẽ rai maa re ijayvuague

* 6:6 Mateus 9.13, 12.7

¹ — Pemoī pendejuru py mimby guaxu! Mba'eta xee SENHOR pegua oo re hovaigua kuery ou oiny taguato rami,* xereve guarā ajapo va'ekue rupi ha'e kuery nda'ikuaixei rire, xeguigua lei rovai rupi rive ikuai.

² Xevy pe ojapukai vy “Oreruete! Ore Israel kuery ma ndekuaa va'e roiko”, he'i okuapy

³ teī Israel kuery omboyke ma iporā va'e. Ha'e nunga rupi ae hovaigua kuery ou hakykue.

⁴ Ha'e kuery ma nguvixaverā omoī teī xegui e'ŷ ojou. Nguvixa kueryrā omoī teī xee aikuaa ucaa rupi e'ŷ. Ojeupegua mba'emo ra'angaarā ojapo prata ha'e ouro gui. Ha'e ramia py onhemokanhy uka rive. he'ia

⁵ Samaria pygua kuery vaka ra'y ra'angaa omboete va'e ma xee ndajou porāi. Ha'e nunga rupi ha'e kuery rovai xepoxya hendy. Raka'e peve 'rā tu ha'e kuery ndojeky'a'o ukaxeiyapu?

⁶ Mba'eta ha'e nunga ma Israel kuery rembiapo ae, hembiapo kuaa va'e ojapo va'ekue rive, xee e'ŷ aī. Ha'e ramo vaka ra'y ra'angaa Samaria py oī va'e omboa'ypaa 'rā.

⁷ — Yvytu ha'e kuery onhotŷ rire yvytu vaikue 'rā omono'ō. Ndoikoi 'rā mba'emo aju omono'ō aguā. Trigo rembypy gui ndoikoi 'rā iku'ikuerā. Ha'e rami e'ŷ vy oiko teī amboae guigua kuery ho'upa 'rā.

⁸ Israel kuery eteve voi ho'upaa. Aŷ ma voi amboae regua ikuiaia rupi ikuai ojou vaipy rami.

⁹ Mba'eta Assíria yvy katy ha'e kuery oo mburika yvy'ā regua ha'e ae'i oiko va'e rami. Efraim kuery opaga okuapy opena va'ety repyrā.

¹⁰ Ha'e rami avi ojereraa jepe ukaxe vy amboae regua ikuiaia rupi oo teī xee ae amboatypa 'rā. Huvixa ha'e yvatekueve omoingo axy rā mboapy'ive ma ovy.

¹¹ Efraim kuery ojejavyague re altar ojapo reta va'ekue ri ojejavyve aguā ae ha'e nunga opyta.

¹² Xapy'a rei xeguigua lei dez mil ayvu py xee ambopara va'e rire ha'e va'e pe “Mba'emo rei rive” he'i 'rāgue.

¹³ Ha'e kuery ojukaxe vai mymba xevy ome'ē aguā. Ha'e rami avi mymba ojuka 'rā xo'o ho'uxe vai vy rive. Ha'e kuery ho'u rā xee SENHOR ndajou porāi. Aŷ ma ha'e kuery reko vaia re aikuaa pota vy ambopaga 'rā ojejavya re. Ha'e ramo ha'e kuery ma Egito katy ju 'rā ojevypa.

¹⁴ Mba'eta Israel kuery ma imoingoare gui hexarai vy ngoo tuvixa va'erā rive ojapo. Judá kuery voi heta-etave ojapo heravy guetā ikorapa va'erā. Ha'e rami teī ha'e kuery retā re xee ambou 'rā tata. Ha'e va'e tata ma oapypa 'rā oo guaxu ha'e kuery ojapo va'ekue.

9

Israel kuery ombopagaa maague re ijayvuague

¹ Israel kuery, pevy'a eme, amboae kuery rami e'ŷ pevy'a eme. Mba'eta pendetavya py pejepa' Penderuete gui. Peipotave va'e ma pendetavya repy mba'emo ra'yigue ojkyaty ha'e javi rupi pejopy va'e.

² Ha'e rami avi nda'evei pekaru riae aguā mba'emo ra'yigue ha'e vinho re rive. Mba'eta opa 'rā vinho pyau.

³ Napendekuai riae 'rā SENHOR pegua yvy re. Ha'e rami 'rāgue py Efraim kuery ma Egito katy 'rā ojevy. Assíria yvy re voi ho'u 'rā okuapy ha'eve'ŷ va'e imongy'aarā.

⁴ Ha'e py ma SENHOR pe napenhoëvei 'rā uva rykue. Myumba kuery ixupe peme'ē va'e voi ndoguerovy'ai 'rā. Mbojape pe'u va'e ma ipy'a vai va'e rembi'u, ha'e va'e re okaru va'e ma ha'eve'ŷ va'e 'rā ikuai. Ha'e va'e mbojape ma peē kuery ae 'rā pe'u, mba'eta SENHOR pegua opy peme'ē aguā nda'evei.*

⁵ Mba'exa tu pejapo 'rā SENHOR pegua ngaru ojapoa ára py, ha'e penhemboatya ára ojeupity jave?

* 8:1 “Taguato rami ou va'e” he'ia ma Assíria pygua kuery re ijayvu vy. * 9:4 Ha'e rami ijayvu mba'eta amboae vyv re escravo-rā ogueraa ague py jipoi 'rā Nhanderuete pegua oo, ha'e py mba'emo ome'ē aguā.

⁶ Mba'eta imombaarā ou va'e gui penetarā kuery oopa va'eri Egito pygua kuery ju 'rā ombo'apa. Ha'e rami vy Mênfis tetā py 'rā ojatypaa. Prata guigua hepykueve ha'e kuery oguereko va'ekue ma pynondy mbyte rive 'rā opyta. Ha'e kuery rekoague rupi ma juu rive 'rā ikuai.

⁷ Ovaē ma ha'e kuery re oikuua potaa ha'e opaga aguā ára. Ha'e nunga oiko rā Israel kuery oikuua 'rā. Israel kuery, pendeko vai riae ha'e joe napenda'evei ete vy profeta kuery pe "Oikuua e'ŷ rei va'e" peje, ha'e avakue Nhe'ẽ oĩa va'e pe "Inhakā porā e'ŷa va'e" peje.

⁸ Mba'eta ore profeta kuery ma Efraim kuery reko re ijayvu va'erā oremoña va'ekue, Xeruete rami ae avi. Ha'e rami teī ore kuery roo aguā ha'e javi rupi omoña guyra'i mbo'aa ramigua, Nguuete pegua opy rupi eteve voi ikuai ore kuery re opu'ā rei va'e.

⁹ Opa mba'e py heta va'e kuery onhemongy'a Gibeá py ojapoague rami ae ju.† Ha'e kuery reko vaia re SENHOR oikuua pota vy ombopaga 'rā ojejayvague re.

¹⁰ SENHOR aipoe'i:

— Israel kuery ajou ypy vy uva rembypy tekao e'ŷa py ojou va'e rami arov'y'a raka'e. Peneramoñ kuery aexa vy figo'y hi'a ramo'i va'e ojou va'e rami raka'e. Ha'e rami teī Baal-Peor ra'angaa katy ha'e kuery oopa vy ta'angaa imoxia pe rive ikuai. Ha'e rami vy ojeguarupy ikuai, ta'angaa omboete va'e rami avi.

¹¹ Mba'eta Efraim kuery mba'emo oguerovy'ave va'e ma guyra oveve va'e rami 'rā okanhymba vyvoi. Ndoikovei ma 'rā imembya, imemby ryru'i va'e, neī kyrī va'e oguereko'i va'e ma voi.

¹² Gua'y kuery omongakuua teī xee aipe'apa 'rā, neī peteīve ava oikove aguā rami e'ŷ. Ha'e kuery gui ajope'a ramo nda'evei ete 'rā ha'e kuery pe!

¹³ Xee anhembopy'aague rami vy Tiro tetā rami Efraim tetā voi iporāvea py mba'emo renhoñ onhotŷ mbyre rami oĩ. Ha'e rami teī gua'y kuery ae Efraim kuery ogueraa 'rā ojukaa aguā katy — he'i.

¹⁴ Ha'e nunga rupi SENHOR, eme'ẽ ha'e kuery pe ... mba'e tu ha'evea rami reme'ẽ 'rā? Ejapo ha'e kuery imemby e'ŷ va'erā, ha'e ikāry e'ŷ va'e ikuai aguā rami.

¹⁵ SENHOR aipoe'i:

— Gilgal py ha'e kuery heko vai okuapy rā ha'e py aendu ndaxe'a'eveia. Ha'e kuery ojapo vai rei okuapy ramo aipe'apa 'rā xevygua oo gui, ndayvuvei ma 'rā guive. Ha'e kuery va'e regua yvatekueve ma xenhe'ẽ rendu e'ŷ va'e meme.

¹⁶ Efraim kuery ma imba'eaxy okuapy, mba'emo renhoñ hapo guive ipirupa va'e rami ikuai. Ndai'avei ma 'rā. Gua'y kuery, guajy kuery oguereko teī hyru'i pyve xee ajuka uka 'rā, oayvuve va'e voi — he'i.

¹⁷ Xeruete xeretarā kuery nonhe'ẽ renduvei ramo oejapa 'rā. Ha'e ramo oguata rei va'e rami 'rā ikuai yvy regua ikuia rupi.

10

Israel kuery mba'emo vai onhotŷ rire imombaarā omono'õ aguā re ijayvuague

¹ — Israel kuery ma uva rembypy porā hi'a riae va'e rami ikuai va'ekue. Ha'e rami teī hi'a retaa rami heta avi ojapo altar. Ha'e kuery yvy iporāvea rupi heta-etave tema omopu'ā avi ita ombojerovia aguā.

² Ha'e kuery ma anhetē rupi e'ŷ ipy'a va'e. Ha'e nunga rupi ipo ky'a va'e ikuai. Altar ojapo va'ekue SENHOR omopẽmba 'rā, oitypa avi 'rā ita ombojerovia atyrā ojapo va'ekue.

³ Ha'e rami teī aŷ ha'e kuery aipoe'i: "SENHOR renonde jajererokyjea rupi e'ŷ nhan-dekuai rire ndajarekovei huvixave. Ha'e gui nhanderuvixa oĩ va'e rire mba'exa ha'vy nhanepytyvõ 'rāgue?" he'i okuapy.

⁴ Ayvu rive rupi ijayvu: oura rive 'rā okuapy, amboae regua reve nhropytyvõ aguā ojapo guive. Ha'e nunga rupi joekokue re oikuua pota va'e oiko jepi, mba'ety rupi mba'emo rogue jojukaarā oikoa rami avi.

† 9:9 Gibeá py ojapo va'ekue mba'emo vai ete (Juízes 19-21).

⁵ — Bete-Áven py Samaria pygua kuery vaka ra'y ra'angaaomboete va'ety oipe'aa ramo okyjepa rei 'rā okuapy.* Iporā etea okanhy ramo ixupe guare kuery ojae'o 'rā, ta'angaa pegua sacerdote kuery voi oryryipa 'rā okuapy.

⁶ Vaka ra'y ra'angaa oipe'aa vy heraa 'rā Assíria yvy katy huvixave pe ome'ẽ va'erā. Ha'e ramo Efraim kuery oendu 'rā oxīmbaa anho, Israel kuery oxīmba 'rā ha'e kuery oipotaa rami rive ikuai rire.

⁷ Oipe'aa avi 'rā Samaria pygua huvixa, yy áry yvyra ra'ykue'i ogueroxyry heravy va'e rami.

⁸ Áven tetā katy'i yvy'ã áry ombovaipaa avi 'rā ombojeroviaaty Israel kuery ojejavaty. Ha'e py altar ojapo va'ekue áry ma jaia ha'e juutya anho 'rā ikuai. Ha'e ramo yvyty pe aipoe'i 'rā okuapy: “Oreao'i!” Ha'e yvy'ã-vy'ã pe ma “Pe'a ore'áry!” he'i avi 'rā okuapy.†

⁹ — Israel kuery, Gibeá py pejejavague ára guive pejejavya re ae tema pendekuai. Ha'e rami rire Gibeá pyve e'ŷ 'rā teve penderupity heko vai va'e mbopagaarā?

¹⁰ Mba'eta xee aipotaa rami ae 'rā anhombopaga. Mokoï rupi ha'e kuery ojejavvy rire ambopaga ramo yvy regua ha'e javi 'rā ijaty ha'e kuery rovai.

¹¹ Mba'eta Efraim kuery ma vaka ra'y kunhaombo'ea pyre trigo oipiroa rupi ombo'eaxpe vai va'e rami ikuai va'ekue. Ha'e gui aŷ ijaju'y porāa re kanga amoī vy karóxa re amoxā 'rā Efraim kuery. Judá kuery voi oikaraī 'rā yvy, Jacó guigua kuery ha'e javi oikaraī 'rā heravy yvy atāa.

¹² Ha'e gui xee aipoa'e: “Mba'emo ra'yigue rami pemoaī peikovy penderekoporārā, ha'e rami vy 'rāe pemono'õ penemboaxya. Peikaraī yvy pema'etÿague rupi e'ŷ. Mba'eta ovaē ma SENHOR peka aguā, ha'e ou vy oky rami pendere teko porā omboguejy peve”, ha'e va'ekue.

¹³ Ha'e rami teī peē ma teko vai rive penhoty aguā yvy peikaraī rire teko vaia anho pemono'õ. Ha'e rami vy apua'a rive pe'u, mba'eta pendekaróxa re ae pejerovia vy, penderegua ipy'a guaxukueve re guive.

¹⁴ Ha'e rami teī pendekuaia py voi onhendu 'rā joe opu'ã va'e. Ha'e rami vy oitypa 'rā peneretā ikorapa va'ekue ha'e javi, joe Salmā opu'ã vy Bete-Arbel tetā oitypaague rami avi. Ha'e jave py ma ixy kuery ojukapaa imemby kuery reve.

¹⁵ Ha'ekue ramigua ae ju 'rā ojapo peē Betel pygua kuery re voi, penderekovaia tuvixa ramo. Ko'ẽ rai'i jave hexakāa oaxa ouvya rami avi ojukaa 'rā Israel pygua huvixa.

11

Nhanderuete oayvu ete va'eri Israel kuery ndoikuaxeia re ijayvuague

¹ — Israel kyr̄ teri reve xee ayvu vy Egito yvy gui aenoī raka'e xera'y.*

² Ha'e rami aguā aenoīve ramive ma ojepe'ave tema xegui. Ha'e rami vy Baal ra'angaa pe rive ome'ẽ okuapy mba'emo, heakuā porā va'e guive oapy ta'angaa ojapo pyre pe.

³ Ha'e ramive ma Efraim kuery xee ambo'e raka'e oguata aguā re, xeivyva py aikuavā guive teī ndoikuua potai okuapy xee apena aikovya re.

⁴ Ha'e kuery aru raka'e ixā avakue oendu va'e nunga py, ayvua py ae. Ha'e kuery aju'y gui kanga oipe'a va'e rami aiko, ajero'a guive ho'u va'erā ame'ẽ aguā.

⁵ — Ha'e kuery ndojevyi 'rā Egito yvy katy. Ha'e rami 'rāgue py Assíria pygua ae 'rā huvixarā, ndojeko rerovaxeiri.

⁶ Ha'e kuery retā re ou 'rā kyxe. Ha'e rami vy omopēmba 'rā okē jokoa, omomba ete 'rā, ha'e kuery oipotaa rami ae ikuai rire.

⁷ Mba'eta xevygua kuery ma xegui ojepe'a aguā rami ae ikuai. Yvate ete va'e pe ojapukai aguā re ombo'ea teī ae ma avave rei ndojapo.

⁸ — Ha'e rami teī Efraim kuery, mba'exatutu'rā xee roeja? Israel kuery, mba'exatutu'rā romboaxa joupe? Mba'exav y 'rā tu rojapo Admá e'ŷ vy Zeboim tetā re ajapoague rami teve? Xekuraxō omyī nhendu, xee romboaxya aendu xapy'a hendy va'e rami.

* 10:5 Kova'e ayvu omombe'u porāve 4.15 py. † 10:8 Ha'e rami ijayvu 'rā ojeayvua oendu vy (Lucas 23.30;

Apocalipse 6.16). * 11:1 Mateus 2.15

⁹ Ha'e rami vy xepoxya rupi ve'ŷ ma 'rã aiko. Efraim kuery, xee noromombavei ma 'rã, mba'eta xee ma Penderuete, ava e'ŷ aiko, Iky'a e'ŷ va'e aiko penembyte. Xepoxya rupi ndajuvei 'rã pendere.

¹⁰ — Ha'e va'e kuery oguata 'rã SENHOR rakykue rupi. SENHOR onhendu 'rã guary rami. Ha'e rami onhendu rã ta'y kuery oryryipa reve 'rã ou kuaray oikea katy gui.

¹¹ Oryryipa reve 'rã ou Egito yvy gui, guyra'i rami, apykaxu rami 'rã ou Assíria gui. Ha'e ramo ajapo 'rã ngoo py ae ju ikuai aguã rami — he'i SENHOR.

¹² — Efraim kuery xembojere va'ekue oapua rupi, Israel kuery nhombotavya aendu va'ekue jovaive rupi gui. Ha'e rã Judá ma Nguuete reve vy ipo'aka nho 'rã, ojeroviapy teri 'rã ikuai Iky'a e'ŷ va'e reve.

12

Jacó rekokue rupi Israel kuery ombo'eague

¹ Efraim kuery ma yvytu re rive onhemongaru, ára pukukue re oo 'rã yvytu kuaray oikea katy guigua rakykue rive. Ijapu ha'e nhomombave tema ovy. Ha'e rami vy Assíria kuery reve ojapo nhopytyvõ aguã, Egito katy guive ogueraa azeite.

² Judá kuery re voi SENHOR oguerek oikuaa pota aguã. Ombopaga 'rã Jacó kuery heko vaia re. Ojapo vaiague repy ae 'rã omboaxa.

³ Mba'eta guyru'i py Jacó oĩ teri jave ojopy oiny guyke'y pya re. Ha'e gui tuja ha'e imbaraete ma vy Nhanderuete reve ju joguero'a.

⁴ Ha'e rami vy anjo reve joguero'aa py ipo'aka raka'e. Ojae'o reve ojerure omboaxy aguã re. Betel py ma ojou raka'e Nhanderuete. Ha'e ramo nhandereve Nhanderuete ijayvu raka'e ha'e py.*

⁵ SENHOR Nhanderuete ixondaro reta va'e, SENHOR ae hery va'e.

⁶ Ejeko rerova Nderuete peguarã reiko aguã. Eiko mborayvu ha'e teko porã rupi. Ha'e vy earõ riae Nderuete.

⁷ Ha'e gui Efraim kuery ma mba'emo vendea rupi ikuai. Opo py oguerek mba'emo opejaa jokorearã. Nhombojexavaia rupi anho ikuaxeve.

⁸ Ha'e rami teĩ aipoe'i: “Anhetẽ arekopa, heta ma ajogua rire. Ha'e rami aguã rami anho anhea'ã teĩ xere ndojouai teko vai, ajejavva noĩ”, he'i.

⁹ — Ha'e rami ndeayvu teĩ xee ma SENHOR Nderuete, Egito yvy gui rogueruague ára guive. Teĩgue ju ajapo 'rã oo'i py reĩ aguã rami, ngarua ára javegua rami.

¹⁰ Xeayvu ambou profeta kuery pe, mba'emo aixa uka jepi guive. Mba'emo re ambojoaa rupi guive xeayvu amombe'u uka profeta kuery pe.

¹¹ — Gileade py ikuai ojejavva va'e, mba'eta ndovarei va'e meme ae. Gilgal py ikuai avi vaka ojuka reve ome'ẽ va'e, teĩ altar oguerek va'e ma mba'ety rupi ita omboaty pyre rami rive 'rã opyta.

¹² Jacó Israel hery va'e ma Assíria yvy katy ojava vy, peteĩ kunha re omba'eapo oikovy va'ekue. Hexe omenda aguã mymba kuery re opena oikovy va'ekue.

¹³ Ha'e gui SENHOR ma peteĩ profeta pe oguenoẽ uka raka'e Israel kuery Egito yvy gui, profeta pe guive opena uka ha'e kuery re.

¹⁴ Ha'e rami teĩ Efraim kuery ma ombopoxy vaipa. Ha'e nunga rupi ha'e kuery re SENHOR oeja 'rã jouguy omoẽ va'ekue opaga aguã, ojapo 'rã guive ha'e kuery re ae ju joapo vaiague ojeapa aguã rami.

13

Nhombopaga aguã re ijayvuague

¹ — Efraim ijayvu ramo oryryipaa va'ekue, Israel kuery voi omboetepa va'ekue. Ha'e rami teĩ Baal ra'angaa pe oikoa rupi onhemongy'a vy omano raka'e.

* 12:4 Jacó Israel hery mboae va'e rekokue omombe'u Gênesis 28-31 py.

² Aŷ ma ha'e kuery ojejavyve tema oje'oivy. Ha'e rami vy prata oguereko va'e ryku gui ojapo 'rã ta'angaa, mba'emo ra'angaa ha'e kuery ojapo oikuaa rami rive. Ha'e nunga ha'e javi ma avakue ojapo kuaa va'e rembiapo rive. Ha'e gui ma joupe-upe "Peme'ẽ mba'emo ha'e nunga pe", he'i 'rã okuapy. Ha'e ramo avakue oova rayvu 'rã okuapy vaka ra'y ra'angaa!

³ Ha'e nunga rupi ha'e kuery okanhy 'rã ovy aje'ive'i arai ojekuaa va'e rami, yxapy ko'ẽmba'i ramove ipirupa vyvoi va'e rami, mba'emo pirukue oka gui omomboa rive va'ekue, ha'e hataxí janela rupi oẽ ovya rami.

⁴ Ha'e rã xee ma SENHOR Nderuete, Egito yvy re pendekuaia ára guive. Ha'e nunga rupi amboae tuuete ramigua ndapeikuaai 'rã xee e'ŷ vy, mba'eta xee e'ŷ vy pendereraa jepea ndoikoi.

⁵ — Xee roikuaa raka'e teko a e'ŷa py, yvy piru reia py.

⁶ Nhuū ikuiaia ja ma ha'e kuery hevyatãmba. Ha'e gui hevyatãmba vy onhemboyvate opy'a py. Ha'e rami vy xegui hexaraipa okuapy.

⁷ Ha'e rami rã xee ma guary rami 'rã ajekuaa uka ha'e kuery pe, xivi ipara va'e tape py oma'ẽ mbegue oiny va'e rami.

⁸ Urso kunha ta'y'i re imondaa pyre rami avi xee ha'e kuery aro'a vy amondoropa 'rã ipy'a ryru guive. Guary rami amokõmba 'rã ha'e py, inharõ va'e ka'aguy rupi ikuai va'e omboa'ypaa rami avi.

⁹ Israel kuery, pekanhy aguã ma pendegui ae ou, ha'e rã peo jepe aguã ma xeguigua anho.

¹⁰ Mamo tu aŷ penderuvixa oĩ, peneretã ha'e javi rupi pendereraa jepe aguã? Ha'vy pendererekoa kuery, ha'e kuery pe "Pejou nhanderuvixaverã ha'e yvatekueve va'erã kuery" pejeague va'e?

¹¹ Ha'e ramo penderuvixaverã ma xepoxya rupi ambou raka'e, ha'e gui xepoxya rupi ae ju xee aipe'a.

¹² — Efraim kuery reko vaiague ma ojokuaa ma imoiny, ojejavyague regua oĩa ma omoĩ porãmbaa avi.

¹³ Ha'e kuery re ou 'rã kunha kyrĩ va'e oguereko rai'i rã haxyia ramigua. Ta'y hi'arandu e'ŷ va'e ikuai, guyru'i gui hexakãa py noẽ kuaai va'e rami avi, itui'i aguã ovaẽ ma teĩ.

¹⁴ Xee araa jepe 'rã tata ogue'ŷ va'e po'akaa gui, aepy 'rã manoia gui. Ndee manogue, mamo tu oĩ renhomongo axy aguã? Ha'vy ndee tata ogue'ŷ va'e, mamo tu oĩ renhomomba aguã? Teĩve henda py xee ndaexai anhomboaxy aguã.*

¹⁵ Guyvy kuery gui ha'e kuery imbaraeteve teĩ kuaray oikea katy gui ou 'rã yvytu SENHOR-a guigua. Tekoa e'ŷa gui ou vy omombirupa 'rã ijyvy re yakã ikuai va'e, omombirupa 'rã yvu ha'e py. Oipe'a ukapa 'rã guive mba'emo porã omoĩ porãaty py oguereko va'ekue.

¹⁶ Samaria pygua kuery re oĩ 'rã ojejavyague re opaga aguã, Nguuete rovai opu'ã rire. Ha'e kuery ho'apa 'rã kyxe py, ta'y kuery omboa'ypaa 'rã, ha'e ta'yxy kuery imemby ryru'i va'e rye oipe'ãa 'rã guive.

14

Joperdoa aguã re ijayvuague

¹ — Israel kuery, pejevy ju Penderuete pe, mba'eta pejejavva ae pendereity.

² Pejeko rerovaa rupi pendeayvu reve pejeko me'ẽ SENHOR pe. Aipopeje: "Embogue ke rojejavva ha'e javi ha'e oremovaẽ porã ju, mba'eta vaka ra'y 'rãgue py ayvu orejuru py roguereko va'e rome'ẽ ndevy.

³ Assíria kuery ma ndorereraa jepei 'rã. Kavaju áry ore ndoroovei 'rã ha'e katy. Orepo py rojapo va'ekue pe 'Ndee ma oreruete' ndoro'evei 'rã guive. Ndere anho tyre'ŷ kuery ojou 'rã imboaxyarã", peje.

⁴ — Ha'e rami rã xee romonguera 'rã pejeroviaa rupi e'ŷ pendekuaiaque gui. Xejegui ae roayvu ju 'rã, mba'eta peẽ kuery pe xepoxyague oaxapa ma.

* 13:14 1 Coríntios 15.55

⁵ Israel kuery pe xee aiko 'rã yxapy rami. Ha'e rami vy amoingo porã 'rã yvoty lírio rami, ha'e Líbano regua yary rami avi hapove ovy aguã rami.

⁶ Ha'e rami vy hakã ipukupave 'rã ovy, oliva'y rami ete 'rã iporã, ha'e Líbano regua yary rami 'rã heakuã porã.

⁷ Ha'e gui ma Israel kuaray'ã py oguapy va'ekue ojevypa ju 'rã. Mba'emo aju rami 'rã ikuai porã ju, ipotypa ju 'rã uva rakã rami avi. Uva rykue Líbano guigua rami oikuua pavẽ 'rã.

⁸ — Ha'e gui Efraim kuery, mba'e tu xee areko mba'emo ra'angaa reve? Pendeayvua xee aendu vy apena 'rã pendere. Yvyra pyau rami xee aiko, mba'eta xere anho oĩ pendekuai porã aguã.

Opa vy ijayvuague

⁹ — Hi'arandu va'e kuery toikuua kova'e nunga. Oiko kuaa va'e kuery toikuua avi. Mba'eta SENHOR reko ma tape hi'yvi porã va'e meme. Ha'e va'e rupi anho 'rã heko porã va'e kuery oo. Ha'e rã heko vai va'e kuery ma ho'apa 'rã ha'e py.

Joel ayvu oĩa Joel ayvu oĩa

Judá yvy re tuku-karu ou vy nhuũ ha'e ojou va'e tema ho'upa, yakã voi omombirupa ramo mymba kuery omanomba yuvei gui. Profeta Joel oikuua rã ha'e rami ae 'rã oiko araka'eve rã Nhanderuete ojejavý rei va'e kuery ombopaga ramo. Ha'e va'e ára pe ma "Senhor ára" he'i. "Ha'e va'e ára ma ha'e rami ete 'rã! Mba'eta ovaẽ rai'i ma Senhor ára. Mba'emo mbovaipaa rami 'rã ou Ipo'akapa va'e gui" (1.15). "Ha'e va'e ára ma pytumba 'rã, arai huãmba rei 'rã. Yvyty áry ko'ẽ jekuua ouvya rami avi ou 'rã peteĩ regua heta ha'e imbaraete ete va'e. Ha'e ramigua ma yma guive oiko e'ŷ va'ekue teri, neĩ ha'e va'e rire voi ndoikovei 'rã, ikuai jevy-jevy va'e pe voi. Ha'e kuery renonde oo oiny tata nhomombaaraã, ha'e rã hakykue ma tataendy joapy va'e ou. Henonde ma Éden yvotyty rami yvy itui, ha'e rã hakykue ma yvy mbovaipaa. Avave rei ndoo jepeai 'rã" (2.2-3).

Senhor aipoe'i avi: "Araka'eve rã avakue ha'e javi re anhoẽ 'rã imbouvy Xenhe'ẽ. ... Yva ha'e yvy re aexa uka 'rã nhomondyipaarã: tuguy, tata ha'e hataxí. Senhor ára opa mba'e py nda'evei va'e ou ra ramo kuaray pytumba 'rã, ha'e rã jaxy ma tuguy rami 'rã ojekuua. Ha'e ramo ha'e javi Senhor rery rupi ojapukai va'e oo jepe 'rã" (2.28a, 30-31a).

Tuku-karu ha'e nda'okyveia pukukue gui ikuai axypaa re ijayvuague

- ¹ Ayvu SENHOR guigua Petuel ra'y Joel pe ombou va'ekue.
- ² Peẽ tujakue, pendu povae. Nhandeyvy re pendekuai va'e, pejapyxaka pavẽ. Oiko ma pa ha'e ramigua pendekuai jave? Tyrã pa penderu kuery ikuai jave oiko?
- ³ Pemombe'u ha'e nunga pendera'y kuery pe, ha'e pendera'y kuery ju tomombe'u gua'y kuery pe, ha'e gui ta'y kuery jevy pe guive.
- ⁴ Mba'eta tuku mba'emo ayaa ndo'upai va'ekue ma tuku oguata va'e ho'u, ha'e tuku oguata va'e ndo'upai va'ekue ma tuku mba'emo 'ua ho'u, ha'e gui tuku mba'emo 'ua ndo'upai va'ekue ma tuku mba'emo mbovaipaa ho'u.*
- ⁵ Peka'u rei va'e, pemyi ke, ha'e pejae'o. Vinho pey'u peikovy va'e ha'e javi penhendu ratã vinho pyau káuxa, mba'eta pendejuru pyguarã va'ekue oipe'aa.
- ⁶ Mba'eta xeyvy rovai guarã ou oiny peteĩ regua imbaraetekue mbovy e'ŷ va'e. Haĩ ma guary raĩ rami, guary kunha rami ete haĩ apĩ va'e.†
- ⁷ Xeyvy re ha'e kuery ombovaipa uva rembypy onhotŷ mbyre, figo'y guive omomba. Oipiropa vy ipirekue rive omombo yvy re, rire hakã ha'e javi ma ojepiropa rei va'e optya.
- ⁸ Pejae'o ke kunhatai'i voxvaikue py onhemonde reve omerã va'ekue kunumi re ipy'a vai va'e rami.
- ⁹ Ha'e gui SENHOR pegua oo py nda'ipovei mba'emo aju ha'e mba'emo rykue peme'ẽ 'rã va'ekue, rire SENHOR rembiguai sacerdote kuery voi iporiaupa rei okuapy.
- ¹⁰ Mba'ety ikuai va'e ivaipa, yvy ipirupa oiny guive, mba'emo aju ivaipa, uva rembypy ipirupa, ha'e oliveira'a hu'umba.
- ¹¹ Mba'ety rupi peiko va'e, peximba ke. Ha'e uva re pepena va'e, penhendu ratã, trigo ha'e cevada re guive, mba'eta okanhymba ma pemono'õ 'rã va'ekue.
- ¹² Uva rembypy ikuai va'e ipirupa, figo'y na'iporãvei, romã rogue, pindo ha'e maçã 'y voi. Yvyra yvy re ikuai va'e ha'e javi ipirupa. Ha'e va'e gui noîvei ma avakue ra'y kuery ov'y aguã.
- ¹³ Sacerdote kuery, penhemonde ke ajukue voxvaikue py, ha'e pejae'o. Penhendu ratã, altar rupi pemba'epo va'e. Xeruete ropy rupi pendekuai va'e ha'e javi ke peju. Voxa

* 1:4 Apy ijayvu irundy regua tuku ha'e py ikuai va'e re. Ha'e nunga ombovaipa ha'e kuery yvy, ho'upa mba'emo rogue, uva rogue, ha'e yvyra pire guive. Nhanderuete ombou ojejavý re, raka'eve rã SENHOR ára py mba'emo vai ombou va'erã rami avi. † 1:6 "Guary rami haĩ va'e" he'ia ma tuku-karu re ijayvu vy, mba'emo 'ua ramo.

guigua py penhemonde pytū mbukukue re, mba'eta Nhanderuete pegua oo py mba'emo aju ha'e mba'emo rykue ndogueruavei ramo.

¹⁴ Pavē pe pendu ukapa okaru e'ŷ re ikuai aguā, pejapo nhemboaty iky'a e'ŷ va'e, penoīmba yvatekueve ha'e nhandevy re ikuai va'e ha'e javi SENHOR Nhanderuete ropy oupa aguā. Ha'e gui pejapukai SENHOR pe.

¹⁵ Ha'e va'e ára ma ha'e rami ete 'rā! Mba'eta ovaẽ rai'i ma SENHOR ára.[‡] Mba'emo mbovaipaa rami 'rā ou Ipo'akapa va'e gui.

¹⁶ Pexaa py e'ŷ ri ty'y pe'u 'rā va'ekue okanhymba? Ha'e Nhanderuete ro gui voi ndoipe'aai 'rā ri ty'y javy'aa ha'e mby'a porā?

¹⁷ Mba'eta mba'emo ra'yigue ma ipirupa oiny yvy guýry. Mba'emo moĩ porāaty ivaipa, mba'emo pemono'ō va'ekue moĩ porāaty ho'apa, pemono'ō 'rā va'ekue okanhymba ramo.

¹⁸ Nhuū nda'ipovei rā vaka kuery iporiaupa okuapy, penerymba kuery ha'e javi nda'eveei rei ikuai. Vexa'i kuery voi okanhymba oje'oivy.

¹⁹ SENHOR, ndevy pe ajapukai, mba'eta nhuūndy ikuai va'e ma tata oapypa, yvyra voi tata omotapyimba.

²⁰ Yy ipirupa rā ha'e javi mymba'i nhuūndy rupigua onhe'ē rei okuapy ndevy pe ipoaē vy, ha'e nhuūndy ikuai va'ekue tata omomba rire guive.

2

¹ Pemonhe'ē ke mimby guaxu Sião py, pemonhendu atā xevygua yvyty áry. SENHOR ára ou oiny ramo toryryipa yvy re ikuai va'e, mba'eta ovaẽ rai'i ma.

² Ha'e va'e ára ma pytūmba 'rā, arai huūmba rei 'rā. Yvyty áry ko'ē jekuaa ouvya rami avi peteī regua ou 'rā heta ha'e imbaraete ete va'e. Ha'e ramigua ma yma guive oiko va'ekue'ŷ teri, neī ha'e va'e rire voi ndoikovei 'rā guive, ikuai jevy-jevy va'e pe voi.

³ Ha'e kuery renonde oo oiny tata nhomombaarā, ha'e rā hakykue ma tataendy joapy va'e ou. Henonde ma Éden yvotyty rami yvy itui, ha'e rā hakykue ma yvy mbovaipaa. Avave rei ndoo jepeai 'rā.

⁴ Ha'e kuery jaexa rā kavaju rami ojekuaa. Kavaju joe opu'āa rupigua rami ete onha oje'oivy.

⁵ Omoparāgue rei jogueruvy karóxa kavaju regua rami. Yvyty áry rupi oaxa, ombopororo-roro 'rā jogueravy ka'aguy okai vy opororo-roroa rami, avakue heta vaipa ete joe opu'ā aguā katy oje'oi va'e rami avi.

⁶ Henonde ma yvy regua okyjepa, hova xiīguepa rei 'rā guive.

⁷ Ha'e kuery ma ipy'a guaxukueve rami 'rā onha. Avakue joguero'aa py ikuai va'e rami 'rā ojeupi tetā ikuai va'e kora áry. Peteī-teī oje'oi 'rā guape rupi ae, hyxy jogueravya gui ndojepe'ai 'rā.

⁸ Nanhomoanha-anhai 'rā guive, peteī-teī ma oo aguā va'ekue rupi ae 'rā oo. Ndopyta rive-rivei 'rā tape rupi.

⁹ Oje'oi pojava 'rā tetā re opu'ā vy. Onha 'rā kora áry rupi, ojeupi 'rā oo ikuai va'e oipe'axe vy, imonda va'e rami 'rā oike janela rupi.

¹⁰ Ha'e kuery renonde yvy oryryi 'rā, yva omyī 'rā guive. Kuaray ha'e jaxy pytūmba 'rā. Jaxy-tata voi naendyvei 'rā.

¹¹ SENHOR ma guembiguai kuery heta raxa ikuai va'e renonde ijayvu ratā 'rā. Mba'eta ijayvua rupi ikuai va'e ma ipo'aka ete. Tá, SENHOR ára ma ipoyi ete 'rā, ivaikue raxa 'rā guive! Mava'e tu ogueropo'aka 'rā?

SENHOR nhomboaxy rupi ijayvuague

¹² Ha'e rami teī SENHOR aipoe'i:

— Aŷ'i ma voi pejeko rerova pendepy'a ha'e javi py, xevygua eterā. Pekaru e'ŷ re pendekuai, pejae'o ha'e penhemboaxy rei reve.

[‡] ^{1:15} Apy “SENHOR ára” he'ia py ma raka'eve rā SENHOR nhombopaga aguā re ijayvu vy (Ezequiel 30.1-3; Joel 2.1-2; Amós 5.18-20; Obadias 15-17; Sofonias 1.7-18; 2 Pedro 3.10-13).

¹³ Pemondoro pendepy'a, pendeao e'ŷ — he'i. Ha'e rami vy pejeko rerova SENHOR peguarã. Mba'eta nhomboaxy kuaa ha'e poroayvu va'e oiko. Nda'ivai rive-rivei 'rã, nhanderayvu ete ha'e mba'emo vai gui ojejoko va'e.

¹⁴ Xapy'a rei ma nhandere SENHOR ojevy vy ndojapovei 'rã ojapo 'rã va'ekue, ha'e rami 'rãgue py oeja 'rã nhanemoingo porãarã, ha'e ramo mba'emo aju ha'e mba'emo rykue teigue ju jajou aguã SENHOR Nhanderuete pe nhame'ẽ va'era.

¹⁵ Ha'e nunga rupi mimby guaxu pemonhe'ẽ Sião py, peikuua uka aguã pekaru e'ŷ re pendekuai ha'e nhemboaty iky'a e'ŷ va'e pejapo aguã.

¹⁶ Pemboaty ke heta va'e kuery ha'e javi, peiky'a'o ukapa guive onhemboaty va'e. Pemono'õ tujakueve, pemboaty pendera'y kue'iry, okambu'i va'e guive. Tou ava omenda ramo va'e, ta'yxy voi toẽ ouvy opy ja'o oïague gui.

¹⁷ SENHOR rembiguai sacerdote kuery avi tojae'o templo rokẽ ha'e altar mbyte rupi ikuia py. Tojerure po rami: “SENHOR, emomba uka eme ndevygua kuery. Emboaxa eme ndevygua kuery ija'e e'ŷ va'e pe ojojai rei aguã, amboae regua kuery ‘Mamo tu Penderuete oĩ?’ he'i e'ŷ aguã”, te'i.

¹⁸ Ha'e rami rã SENHOR oexa uka oyvy re opena porãa, ojeupegu kuery omboaxy ju guive.

¹⁹ Ha'e rami vy ombovai vy aipoe'i ha'e kuery pe:

— Ne'ixa, pendevy ambou 'rã mba'emo aju, uva rykue ha'e azeite. Ha'e va'e gui penerevyatã ju 'rã. Peẽ kuery noromboaxavei 'rã amboae regua kuery pe pendejajai rei aguã.

²⁰ Ha'e rã kuaray ijapu'a'ia katy gui xondaro kuery ou va'ekue ma peẽ kuerya gui aipe'apa ju 'rã mombyry. Petei yvy piru reia katy 'rã amondouka, teko a'e'ya re. Henondevegu kuery amondouka 'rã kuaray oua katy ye'ẽ oĩ va'e re, ha'e rã hakykuegu kuery ma ye'ẽ kuaray oikea katy 'rã. He'õgue ma heakuã vaikue 'rã, xepo'akaa rupi roepy rire — he'i.

²¹ Ha'e nunga rupi ndee yvy, ekyjeve eme. Evy'a ha'e eĩ porã, SENHOR mba'emo porã ete ojapo ramo.

²² Ha'e mymba nhuñdy rupi pendekuai va'e, pekyjeve eme mba'eta nhuñ iporãmba ju 'rã teko a'e'ya rupi, yvyra ikuai va'e voi hi'apa ju 'rã, figo ha'e uva voi hi'a porãmba 'rã.

²³ Peẽ Sião pygua kuery, pevy'a avi ke, perovy'a SENHOR Penderuete, mba'eta ombo'oky ju 'rã ha'evea rupi. Ha'ekue rupi ae ju 'rã ombo'oky pema'etõ jave, ha'e gui henhoimba jave guive.

²⁴ Mba'emo ra'yigue ykya ma tynyẽ ju 'rã trigo, ha'e mba'emo ryru ikuai va'e tynyẽmba 'rã uva rykue ha'e azeite.

²⁵ — Pendevy amboekovia 'rã ma'etõ oaxa va'ekue py tuku oguata va'e ho'upa va'ekue, ha'e tuku mba'emo mbovaipaa, tuku mba'emo ayaa ho'u va'ekue guive, mba'eta xevygua xondaro kuery penderovai ambou va'ekue meme.

²⁶ Ha'e ramo pekaru porã ju 'rã penevyatãmba peve. Ha'e rami vy perovy'a 'rã SENHOR Penderuete rery, penderereko porã ramo. Ha'e va'e rire xevygua kuery nomoximbaavei ma 'rã.

²⁷ Ha'e gui peikuua 'rã Israel kuery mbyte aia, ha'e xee SENHOR Penderuete aikoa, mba'eta ndoikoi amboae. Ha'e ramo xevygua kuery nomoximbaavei ma 'rã raka'e rã peve.

Nhe'ẽ Ky'a E'ŷ ombou aguã re ijayvuague

²⁸ — Araka'eve rã avakue ha'e javi re anhoẽ 'rã imbouvy Xenhe'ẽ. Ha'e ramo pendera'y ha'e penderajy kuery ijayvu 'rã xegui. Kakuaakueve ma oexa ra'u 'rã mba'emo, ipyaukueve pe voi aexa uka 'rã.

²⁹ Tembiguai kuery avakue ha'e kunhague re voi ambou 'rã Xenhe'ẽ ha'e va'e ára.

³⁰ Yva ha'e yvy re aexa uka 'rã guive nhomondyipaarã: tuguy, tata ha'e hataxí.

³¹ SENHOR ára opa mba'e py nda'evei va'e ou ta ramo kuaray pytumba 'rã, ha'e rã jaxy ma tuguy rami 'rã ojekuaa.

³² Ha'e ramo ha'e javi SENHOR rery rupi ojapukai va'e oo jepe 'rā. Sião yvyty re ha'e Jerusalém tetā py ikuai 'rā oo jepe va'e, SENHOR ijayvuague rami. Okuave va'e ha'e javi 'rā ikuai SENHOR oenoī va'ekue.*

3

Ngovaigua kuery Nhanderuete ombopaga aguã re ijayvuague

¹ — Ne'exa, ha'e va'e ára, ha'e va'e jave ma ambopyau ju 'rā Judá ha'e Jerusalém pygua kuery ikuiaia.

² Amon'õmba avi 'rā ha'e javi regua, ajapo 'rā Josafá yvyugua py oguejypa aguã rami. Ha'e py ma ambopagapa 'rā xevyguia kuery káuxa, mba'eta xevyguia Israel kuery ha'e kuery omoaõmba rire amboae regua ikuiaia rupi, xeyvy guive jomemeomboja'o-ja'o va'ekue.

³ Xevyguia kuery re ha'e kuery oexa okuapy va'ekue oxortea. Avakue'i ha'e kuery omboekovia itavy rei va'e re, ha'e kunhague'i ma vinho oy'u va'erā re rive omboekovia va'ekue.

⁴ Tiro ha'e Sidom pygua, ha'e Filístia pygua ha'e javi, mba'e tu perekoxere? Pepu'axe ri ty'y xere? Ha'e ramo are'ŷ re xee ajapo 'rā pendevaia peneakā re ae ju ojeapa aguã rami.

⁵ Mba'eta peraa va'ekue xevyguia prata ha'e ouro. Xemba'e iporãgue voi templo perekova'e rupi pemoi,

⁶ ha'e Judá ha'e Jerusalém pygua kuery ma peráta re pevendepa va'ekue grego kuery pe, oyvy gui mombyry ikuai aguã rami.

⁷ Ne'exa, xee arupa ju 'rā pemboaxaague gui. Ha'e vy pendevaia ajapo 'rā peneakā re ae ju ojeapa aguã rami.

⁸ Pendera'y kuery ha'e penderajy kuery ju amboaxa 'rā Judá regua kuery pe. Ha'e gui ha'e va'e kuery ju ome'ẽ 'rā sabeu kuery mombyry raxa ikuai va'e pe, SENHOR ae ijayvu rire.

⁹ — Peikuaa uka pova'e nunga amboae regua kuery pe: "Pemombe'u joe pepu'ã aguã, penoõmba ipy'a guaxukueve. Ha'e ramo avakue joe opu'ãa pygua tovaõmba, ha'e toõmba ju oje'oivy.

¹⁰ Yvy karaña perekova'e gui pejapo kyxerā, ha'e mba'emo 'ygue gui pejapo hu'yrā. Tove ikangy va'e 'Xee ma xembaraete va'e', te'i.

¹¹ Ijyvýry pendekuai va'e ha'e javi, pejapura pejuvy, penhemboatypa", peje.

Ha'e gui SENHOR, ha'e py embou avi ke ndeguigua ipy'a guaxukueve.

¹² — Topu'ã yvy regua kuery, Josafá yvyugua katy toupa. Mba'eta ha'e py ma xee aguapy 'rā ainy yvy regua kuery ambopaga aguã.

¹³ Pejopy pavē ke foice, mba'ety ijajupa ma ramo. Peju, pepyrō, mba'eta uva rykue oubiriatiy py tynyẽ ma hi'a, hyru ikuai va'e tynyõmba guive, ha'e kuery ojejavyague tuvixa ete rire.*

¹⁴ Ha'e gui heta-etave 'rā ou yvyugua ombopagaa aguã katy! Mba'eta SENHOR ára ovaẽ rai'i ma yvyugua nhombopaga aguã py.

¹⁵ Kuaray ha'e jaxy pytõmba, jaxy-tata voi naendyvei.

¹⁶ Ha'e gui SENHOR ijayvu atã 'rā Sião gui, Jerusalém gui oendu uka 'rā. Ha'e ramo yva ha'e yvy oryryipa 'rā. Ha'e rami tei SENHOR oiko 'rā ixupeguia kuery onhemi atyrā, Israel kuery pegua oo imbaraete va'e 'rā oiko.

¹⁷ — Ha'e ramo mae peikuaa 'rā xee SENHOR Penderuete aikoa, ha'e xevyguia yvyty iky'a e'ŷ va'e Sião py aĩ va'ea. Ha'e gui Jerusalém tetā nda'iky'avei 'rā. Ha'e rupi ndoaxavei ma 'rā amboae regua.

Israel kuery omoingo porã ju aguã re ijayvuague

* 2:32 Kova'e ayvu rupi ijayvua Pentecostes ára py (Atos 2.1-21, 38-40). Ha'e gui "SENHOR rery rupi ojapukai va'e oo jepe 'rā" he'ia ma Romanos 10.12-13 py omombe'u porâve avi. * 3:13 Ha'e va'e jave py ha'e kuery oubiri 'rā uva opyrō vy. Ha'e rami avi apy ijayvu Nhanderuete nhombopaga aguã re (Apocalipse 14.14-20).

¹⁸ — Ha'e va'e ára ma yvyty ikuai va'e gui oxyry 'rã oiny uva rykue. Yvy'ã áry gui oxyry avi 'rã kamby. Ha'e ramo Judá regua yakã ha'e javi tyguaxupa 'rã. Ha'e gui SENHOR pegua oo gui yy oxyry ouvy vy omoakýmba 'rã Sitim yvyugua ha'e javi rupi.

¹⁹ Ha'e rã Egito yvy ma ombovaipaa 'rã, Edom voi yvy piru reia oejapa pyre 'rã opyta, Judá regua kuery jukaa rupi ikuaiague re, oyvy re huguy omoë rire mba'e re'ý tei.

²⁰ Ha'e rã Judá yvy ma hekoa riae 'rã, Jerusalém tetã voi, ta'y jevy-jevy ikuai peve.

²¹ Xee anhombopaga 'rã huguy omoëague nambopagai teriague re — he'i, mba'eta SENHOR oiko 'rã Sião py.

Amós ayvu oĩa Amós ayvu oĩa

Amós ma vexa'i re openaa rupi oiko jave ixupe Nhanderuete oayvu ombou Israel kuery peguarã, mba'eta ha'e va'e kuery heko vai ete ramo Nhanderuete ombopaga aguã rami oiko. Ha'e kuery heko porã merami rive va'e vy ha'eve'ýa rami joguerek, nhomboaxy 'rãgue py jokorepa. Ha'e rami nhandekuaia Senhor ndojou porã vy nhanembopaga 'rã. "Senhor onhendu atã 'rã Sião gui, Jerusalém tetã guive oendupaa aguã ijayvua. Ha'e ramo nhuündy vexa'i re openaaty overepa 'rã, Carmelo yvyty apyte peve 'rã ipirupa", he'i (1.2).

Marã rami tu ha'vy nhandekuai aguã re profeta ijayvu? "Peka ke mba'emo porã peikove aguã, mba'emo vai nda'ei. Ha'e ramo 'rãe Senhor oiko peẽ kuery reve, aipopejeaty rami ae. Pejeguaru ke mba'emo vai gui, perovy'a iporã va'e anho. Ha'evea rami pota ke pejoguerek tetã rokẽ py. Ha'e ramo José ramymino kuery pekuave'i va'e, xapy'a rei Senhor Nhanderuete ixondaro reta va'e penemboaxy nho 'rã" (5.14-15).

Yvy regua kuery rovai ijayvuague

¹ Kova'e ayvu ma Amós pe mba'emo oexa ucaa rupi ombou pyre. Ha'e va'e ma Tecoa tetã pygua, vexa'i re opena va'ety kuery va'e regua. Israel kuery reko re ijayvu Judá pygua huvixa Uzias ha'e Joás ra'y Israel pygua huvixa Jeroboão oĩ jave, mokoĩ ma'etý teri yvy oryryi aguã oata jave guive.

² Ha'e gui ma aipoe'i: SENHOR onhendu atã 'rã Sião gui, Jerusalém tetã guive oendupaa aguã ijayvua. Ha'e ramo nhuündy vexa'i re openaaty overepa 'rã, Carmelo yvyty apyte peve 'rã ipirupa.

³ Po rami SENHOR ijayvu:

— Mboapykue, irundykue Damasco pygua kuery ojapo vaiague re nambopaga e'ývei ma 'rã, mba'eta ferro guigua py ha'e kuery omou'umba rire Gileade pygua kuery.

⁴ Ha'e nunga rupi amboja 'rã tata Hazaél ro re. Ha'e rami vy oapypa 'rã Ben-Hadade ro tuvixa va'e ha'e javi.*

⁵ Amopẽmba 'rã Damasco kora rokẽ jokoa. Amomba avi 'rã Biqueate-Áven ikuai va'e, Bete-Éden re opena va'e guive. Ha'e gui Síria pygua kuery escravo-rã ogueraapaa 'rã Quir katy — he'i SENHOR.

⁶ Po rami SENHOR ijayvu:

— Gaza pygua kuery ju mboapykue, irundykue ojapo vaiague re xee nambopaga e'ývei ma 'rã, tetã re ikuai va'e ha'e javi escravo-rã ogueraapa rire Edom pygua kuery po py omboaxapa aguã.

⁷ Ha'e nunga rupi Gaza tetã kora re amboja 'rã tata oo tuvixakueve mbovaipaarrã.

⁸ Amomba 'rã Asdode pygua kuery, Asquelom re opena va'e guive. Ha'e gui Ecrom rovai ju 'rã apu'ã xepo'akaa rupi. Ha'e ramo filisteu kuery rembyrekue omanomba 'rã — he'i SENHOR.

⁹ Po rami SENHOR ijayvu:

— Tiro tetã pygua kuery ju mboapykue, irundykue ojapo vaiague re xee nambopaga e'ývei ma 'rã, ha'e kuery ma nhombo'a vy omboaxapa rire Edom pygua kuery po py. Na'ima'endu'ai okuapy joegua kuery reve ikuai porã aguã ojapo va'ekue re.

¹⁰ Ha'e nunga rupi Tiro tetã kora re amboja 'rã tata oo tuvixakueve ikuai va'e mbovaipaarrã.

¹¹ Po rami SENHOR ijayvu:

— Edom pygua kuery voi mboapykue, irundykue ojapo vaiague re xee nambopaga e'ývei ma 'rã, ha'e kuery ma guyvy kuery ae kyxe reve omonha rire, omboaxya noendui

* ^{1:4} Hazaél ha'e Ben-Hadade ma Síria yvy regua huvixa ikuai raka'e. Ha'e kuery retã ma Damasco.

guive. Ha'e rami 'rāgue py opoxya anho oendu vy nhomboa'ypa tema, ha'e nunga anho oendu, raka'e rā peve guarā.

¹² Ha'e nunga rupi Temā tetā re amboja 'rā tata Bozra py oo tuvixakueve ikuai va'e mbovaipaarrā.

¹³ Po rami SENHOR ijayvu:

— Amom pygua kuery ju mboapykue, irundykue ojapo vaiague re xee nambopaga e'ŷvei ma 'rā, ha'e kuery ma Gileade pygua kuery memby ryru'i omondoropa rire oyvyrā ombotuvixave aguā rive.

¹⁴ Ha'e nunga rupi Rabá tetā kora re amboja 'rā tata oo tuvixakueve ikuai va'e mbovaipaarrā, joe opu'ā va'e ojapukaia reve, ára vai py yvytu vaikue ramigua.

¹⁵ Ha'e ramo ha'e pygua huvixa heraa 'rā escravo-rā, hembiguai yvatekueve reve — he'i SENHOR.

2

¹ Po rami SENHOR ijayvu:

— Moabe pygua kuery voi mboapykue, irundykue ojapo vaipaague re xee nambopaga e'ŷvei ma 'rā, ha'e kuery ma Edom pygua huvixa kāgue oapypa rire, iku'ikue rive optya peve.

² Ha'e nunga rupi Moabe yvy re amboja 'rā tata, Queriote tetā py oo tuvixakueve ikuai va'e mbovaipaarrā. Ha'e ramo Moabe pygua kuery omanomba 'rā yapu rei, tevovo rei ha'e mimby guaxu omonhe'ea mbyte py.

³ Ha'e kuery mbyte gui amomba 'rā joguerekao, ajuka ukapa avi 'rā ixupegua yvatekueve ha'e javi — he'i SENHOR.

Judá kuery rovai ijayvuague

⁴ Po rami SENHOR ijayvu:

— Ha'e gui Judá kuery ju mboapykue, irundykue ojapo vaiague re nambopaga e'ŷvei ma 'rā, ha'e kuery ma SENHOR guigua lei rupi nda'ikuaikei vy ovapa rire ojapo uka va'ekue gui. Ha'e gui anhetē va'e rupi e'ŷ ombojeroviaa rupi ju onhembotavy uka okuapy, guamoī kuery ikuaiague rami ae.

⁵ Ha'e nunga rupi Judá re amboja 'rā tata, Jerusalém py oo tuvixakueve ikuai va'e mbovaipaarrā.

Israel kuery rovai ijayvuague

⁶ Po rami SENHOR ijayvu:

— Ha'e gui Israel kuery ju mboapykue, irundykue ojapo vaiague re nambopaga e'ŷvei ma 'rā, mba'eta joguerekao kuery ma peráta re rive omoingo axy heko porā va'e, iporiaukue'i ombo'apa 'rā py regua repy re rive.

⁷ Ha'e kuery ombojexavai 'rā iporiaukue'i oakā áry yvy ku'i omombo peve, ha'e oiko rive'i va'e pe omokarē tape. Ta'y peteī kunhataī ogueronheno va'ekue ae tuu ju 'rā ojopy. Ha'e rami vy omongy'a rive okuapy xerery iky'a e'ŷ va'e.

⁸ Ha'e gui altar oī va'e yvýry onheno 'rā oupy ajukue nhomborevea rupi ojopy va'ekue áry. Nguuete ropy eteve voi oy'u 'rā okuapy vinho jokorepaa rupi oipe'a va'ekue.

⁹ Ha'e rami teī ha'e kuery renonde gui amomba va'ekue amorreu kuery yary rami yvate va'ekue teī, yvyra carvalho rami imbaraete va'ekue. Amomba va'ekue yvy guy hapo oīa guive hovapy rupi hi'a ikuaipe veve.

¹⁰ Ha'e rami ae avi Egito yyy gui xee roquerupa vy quarenta ma'etŷ re roqueroko va'ekue tekao e'ŷa rupi, amorreu kuery yvy re penderekao aguā.

¹¹ Pendera'y kuery va'e regua amoī va'ekue profeta-rā, ha'e peneramymino kuery ju amoī nazireu regua ikuai va'erā. Ha'e rami e'ŷ ri ty'y Israel kuery? — he'i SENHOR.*

¹² — Ha'e rami teī nazireu kuery pe peē kuery pey'u uka vinho, ha'e profeta kuery pe pendeayvu vy “Pemombe'uve eme na ayvu”, peje.

* 2:11 Nazireu ma Nhanderuete pe anho'i oiko aguā rami onhemboayvu va'ekue. Ha'e rami vy ndojayai 'rā o'a, ha'e ndoy'ui 'rā vinho (Números 6.1-12).

¹³ Ha'e nunga rupi ne'exa, yvy amboryryipa 'rā peẽ kuerya rupi, karóxa mba'emo ajuojokuapaa rā tynyē vy ovava rei ovya rami.

¹⁴ Peneakuâve va'e teĩ nda'evei 'rā pejava aguã, imbaraetekueve voi nda'evei 'rā ombaraeetea rupi ikuai aguã, neĩ ipy'a guaxukueve ma voi ndoo jepei 'rā.

¹⁵ Hapa va'e ma nopu'ã kuaavei 'rā joe, ipojava va'e voi ndoo jepei 'rā, kavaju áryguaeteve voi ndoo jepei 'rā.

¹⁶ Ha'e va'e ára ma ojeroviakue ipy'a guaxukueve ikuai va'ekue ma opire rei reve rive 'rā onhamba — he'i SENHOR.

3

Israel kuery ojapo vaia re ombopaga aguã re ijayvuague

¹ Peẽ Israel kuery, pendu ke SENHOR penderovai ijayvu rā, Egito yvy gui pendererupa va'ekue ha'e javi avi. Ha'e vy aipoe'i:

² — Yvy regua kuery ha'e javi gui peẽ kuery anho'i aiporavo va'ekue ri rombopaga 'rā pejejavypa reia re.

³ Ha'eve 'rā nda'u mokoĩ joupive oguata aguã jogueroayvu e'ŷ re?

⁴ Xivi nda'u mba'eve ojou e'ŷ re ri okororõ rei 'rā ka'aguy rupi? Ha'e xivi ra'y nda'u guaity py ikuiaia py hevovo rei 'rā ri ho'u va'erã oguereko e'ŷ vy?

⁵ Guyra'i nda'u yvy py rive ho'a 'rā ri nhuã'i ojayvya e'ŷ re? Nhuã yvy py oĩ va'e ovyxapy'a 'rā ri mba'emo ho'a e'ŷ re?

⁶ Tetã rupi mimby guaxu omonhe'ea 'rā nda'u ha'e pygua kuery oryryipa e'ŷ re? Tetã re oiko 'rā nda'u mba'emo vai ete SENHOR ombou e'ŷ re?

⁷ Mba'eta jaikuua porã SENHOR Nhanderuete mba'eve ndojapoi 'rā guembiguai profeta kuery pe ranhe onhembopy'aa oikuua uka e'ŷ re.

⁸ Xivi okororõ rā nda'u ndokyjeai 'rā? Ha'e SENHOR Nhanderuete oayvu ombou rā mava'e profeta nda'u nomombe'ui 'rā?

⁹ — Pova'e nunga ke pendu uka Asdode py ha'e Egito yvy re hoo tuvixakueve ikuiaia rupi. Ha'e vy aipopeje uka 'rā: "Penhemboatypa ke pejogueruvy Samaria regua yvyty ikuai va'e áry. Ha'e vy pexa 'rā ha'e kuery hevovo rei ha'e nhomoingo axya rupi ikuai va'e."

¹⁰ Mba'eta Israel kuery ma ndoikuuai ha'evea ramigua. Ha'e rami vy ha'e kuery ngoo tuvixa va'e py omoĩ porã 'rā jojukaa rupi ojou va'ekue, mba'emo mbovaipaa rupi guive — he'i SENHOR.

¹¹ Ha'e nunga rupi po rami SENHOR Nhanderuete ijayvu:

— Penderovaigua kuery peteĩ regua ojokopa 'rā pendeyvy. Ha'e rami vy penhemiaty ikorapa va'ekue oity vy oipe'apa 'rā heravy mba'emo pendero tuvixakueve py oĩ va'ekue.

¹² Po rami SENHOR ijayvu:

— Xivi juru gui vexa'i re opena va'e ogueraa jepe 'rā ipykue mokoĩve, ha'e'ŷ vy inambi apyrekeue'i, ha'e rami ae 'rā Israel kuery Samaria py ikuai va'e voi amongue'i oo jepe ngupa pêgue'i reve, e'ŷ vy okeaty ra'ykue'i rive.

¹³ Pendu ke, ha'e pendeayvu Jacó kuery rovai — he'i SENHOR Nhanderuete ixondaro retava'e.

¹⁴ — Israel kuery ojejavyague re ambopagaa ára py ma Betel py altar ojapo va'ekue re avi 'rā aikuua pota. Ha'e ramo altar apy ikuai va'e ojaya rā ho'apa 'rā yvy rupi.

¹⁵ Aity 'rā oo yro'y jave ikuai aguã, kuaray aku pygua guive. Marfim gui oo ojapo pyre okanhymba 'rā, oo guaxu ikuai va'e ivaipa 'rā — he'i SENHOR.

4

Samaria pygua kunhague pe ijayvuague

¹ — Vaka kunha Basã pygua rami Samaria yvyty re pendekuai va'e, pendu ke pova'e ayvu: Pereko axy rei iporiaukue'i, pemokanhy inhembyayi'i va'e, peneme kuery pe "Eruve na vinho jay'u aguã", peje guive.

² Ha'e nunga rupi SENHOR Nhanderuete oky'a e'ŷa rupi ae oura vy aipoe'i:

— Pendere ovaẽ 'rã ára pinda py rami tetã gui penerenoëmbaa heravy aguã, ha'e penerembyrekue ma pira renoëa py 'rã pendereraa.

³ Peteĩ-teĩ peẽ 'rã peje'oivy tetã kora pa'ũ ikuai va'e gui. Ha'e rami teĩ Hermom katy 'rã penemombopaa — he'i SENHOR.

Israel kuery onhe'ẽ py ára reveguia e'ŷ rami ikuiaia re ijayvuague

⁴ — Pejejavyxe vy tapeo ha'vy Betel py, Gilgal py voi peo pejejavyve aguã py rive. Ko'ẽ nhavõ peru mymba kuery peme'ẽ va'erã, ha'e mboapy ára rire kuerei 'rã Peru dízimo.*

⁵ Mbojape mbovua reveguia Peru perovy'aa rupi peme'ẽ va'erã, pemombe'upa rive 'rã mba'emo peme'ẽxea'i py peme'ẽ va'e, mba'eta ha'e rami anho rive peikoxeve, peẽ Israel kuery — he'i SENHOR Nhanderuete.

⁶ — Ha'e nunga rupi ae peneretã ikuai va'e rupi ajapo tembi'u pejou ve'ŷ aguã rami, penderekaoa nhavõ rupi mbojape oata ramo. Ha'e rami teĩ xevy peguarã ndapejeko rerovai — he'i SENHOR.

⁷ — Ha'e rami rã mboapy jaxy re nambo'okyvei pende'áry, mba'emo pemono'õ aguã ára e'ŷ mbove. Amongue tetã rupi ambo'oky, ha'e rã amboae tetã rupi ma nambo'oky. Amongue mba'ety áry oky, ha'e rã amboae áry ma nda'okyi rã ipirupa.

⁸ Mokoõ, mboapy tetã pygua kuery pejogueraa tetã mboae py yy pey'uxe vy, teĩ nda'evei pey'u porã aguã. Ha'e rami ete teĩ ndapejeko rerovai xevy guarã — he'i SENHOR.

⁹ — Xee romoingo axy va'ekue mba'emo rogue verepa ha'e imou'ümbaarã ambou vy. Mba'emo rogue'i perekoo va'e tuku ho'upa, uvaty, figoty ha'e oliveira-ty voi. Ha'e rami teĩ ndapejeko rerovai xevy guarã — he'i SENHOR.

¹⁰ — Pendere ambou mba'eaxy Egito py pendu va'ekue ramigua. Pendera'y kuery avi ajuka uka kyxe py. Penerymba kavaju araa ukapa guive. Ha'e rami ete ajapo pendekuaia rupi heakuã vaikue peetã aguã rami. Ha'e rami teĩ ndapejeko rerovai xevy guarã — he'i SENHOR.

¹¹ — Penembyte gui amokanhy amongue, Sodoma ha'e Gomorra amokanhyague rami ae. Peẽ kuery ma tata gui tata'y oguenoẽ mbyre rami pepyta va'ekue ri ndapejeko rerovai xevy guarã — he'i SENHOR.

¹² — Ha'e nunga rupi peẽ Israel kuery, po rami 'rã rojapo. Ha'e po rami ete rojapo ta ma ramo peiko katu ke Penderuete pe pejexa uka aguã — he'i.

¹³ Mba'eta Nhanderuete ae yvyty onhono va'ekue, yvytu omoingo, ha'e avakue pe oikuaa uka opy'a re oĩ va'e ha'e javi. Ko'ẽ jave teĩ omoptümba 'rã, ha'e yvyty áry rupi opyrõ 'rã ový. SENHOR Nhanderuete ixondaro reta va'e ae hery va'e.

5

“Peka Nhanderuete peikove aguã”, he'iague

¹ Peẽ Israel kuery, pendu ke povae ayvu peẽ kuery re nda'eveia rupi xeayvu rã.

² Mba'eta ho'a ma Israel kuery kunhataigue rami ikuai va'ekue, nopu'ã kuaavei ma guive. Ovy re ae ho'a oupy, ha'e ndoikoi imbovyarã.

³ Mba'eta po rami SENHOR Nhanderuete ijayvu:

— Tetã gui mil Israel regua joe opu'ãa katy oje'oi teĩ cem ete'i ju 'rã ojevy, ha'e cem oo va'ekue regua ma dez ete'i 'rã ojevy.

⁴ Ha'e gui po rami SENHOR ijayvu Israel kuery pe:

— Xereka ke peikove aguã.

⁵ Peka eme mba'emo Betel py oĩ va'e, neĩ Gilgal ha'e Berseba katy ma voi tapeove eme. Mba'eta Gilgal pygua kuery ma ogueraapaa 'rã escravo-rã, Betel tetã voi ombovaipaa 'rã — he'i.

⁶ Peka ke SENHOR anho peikove aguã. Ha'e rami e'ŷ rã José kuery ikuiaia py ou 'rã tata rami imokanhymbarã. Ha'e va'e mboguearã ma ndoikoi 'rã Betel tetã py.

* ^{4:4} Betel ha'e Gilgal py ha'e kuery ombojeroviaaty oĩ, teĩ Nhanderuete pe ikuaxea rupi e'ŷ oo ha'e py, onhemboeko porâxe vy rive.

⁷ Peẽ kuery ma ha'evea rami pejoguerekaoa gui pejepe'a vy penhombojexavai, yvy py rive peity vy teko porã rupi pejoguerekoo aguã va'ekue.

⁸ Peka ke jaxy-tata Eixu ha'e Órion apoare, ha'e ko'ë ju aguã pytü reia oguerova va'e, ha'e pytü aguã ju ára oguerova va'e. Ha'e ma ye'ë ogueru vy yvy áry rupi ju onhoë va'e. SENHOR ma hery va'e.

⁹ Ha'e ae ombou 'rã imbaraetekueve mokanhymbaarã, oo ikorapa va'e mbovaipaarã guive.

¹⁰ Ha'e rã peẽ kuery ma napenduxei tetã rokë py penemongetaa rã, anhetë rupi ijayvua rã pejou vai guive.*

¹¹ Ha'e nunga rupi iporiaukue'i re pepyrõmba rei vy ha'e kuery pe trigo pendejeupe guarã ae peme'ë uka rire napeïvei 'rã penderorã ita gui pejapo va'ekue py, ndapey'uvei 'rã guive vinho uva porägueve penhotÿ va'ekue guigua.

¹² Mba'eta xee aikuaa mbovykue rei e'ë pendeko vai rã, opa marã rei pejejavvy ramo guive. Mba'eta pembojexavai heko porã va'e, ha'eve'ëa rami guarã pejopy peráta, ha'e tetã rokë py iporiaukue'i ojerure rã peẽ kuery napepenai.

¹³ Ha'e nunga rupi oiko kuaa va'e kuery okyrirí 'rã, mba'eta kova'e ára nda'evei va'e.

¹⁴ Peka ke mba'emo porã peikove aguã, mba'emo vai nda'e. Ha'e ramo 'rãe SENHOR oiko peẽ kuery reve, aipopejeaty rami ae.

¹⁵ Pejeguaru ke mba'emo vai gui, perovy'a iporã va'e anho. Ha'evea rami pota ke pejoguerekoo tetã rokë py. Ha'e ramo José ramymino kuery pekuave'i va'e, xapy'a rei SENHOR Nhanderuete ixondaro reta va'e penemboaxy nho 'rã.

¹⁶ Mba'eta po rami SENHOR nhandererekooa ijayvu, Nhanderuete ixondaro reta va'e:
— Tetã mbyte ha'e javi rupi onhendu 'rã ojae'o va'e. Tape ikuai va'e rupi “Ai! Ai!” 'ea 'rã. Ombo'eapo va'e kuery voi oenoïmbaa 'rã ojae'o aguã, ojae'o kuaa va'e kuery reve.

¹⁷ Uvaty ha'e javi rupi ikuai 'rã ojae'o va'e, pendekuaia mbyte rupi aaxa ramo — he'i SENHOR.†

¹⁸ Nda'evei ete 'rã SENHOR ára pearõ va'e pe! Mba'erã tu pearõ pekuapy SENHOR ára? Mba'eta ha'e va'e ára ma pytümba rive 'rã, hexakã 'rã e'ë.

¹⁹ Mba'eta oiko 'rã xivi gui ava onha rã ursu ju ojoua rami, ha'e'ë vy ngoo py oike vy oo mbotya re opoko ho'amy ramo mboi oixu'ua rami.

²⁰ SENHOR ára ma hexakã aguã e'ë, pytü vaikue anho 'rã. Ha'e javi ete rupi pytümba 'rã, hexakã va'e peteive henda py ojekuaa e'ë re.

“Nhanderuete oipota mba'emo nhame'ë 'rãgue py ha'evea rami jajoguerekoo”, he'iague
²¹ SENHOR aipoe'i:

— Xee ndajou porãi, ajou vai ete ngaru pejapo pekuapya, peteï henda py ma voi xevy guarã nhemboaty pejapo va'e ndarovy'ai guive.

²² Xevy pe mba'emo peapy va'erã peru, mba'emo aju guigua guive teï ha'e nunga xee ndarovy'ai, xereve peteï rami pendekuaia regua mymba iporägueve peme'ë teï xee nama'ëi 'rã ha'e nunga re.

²³ Xee naenduxei peporaeia revovo rive, naendui 'rãe penembaraka pu.

²⁴ Ha'e rami 'rãgue py toï ha'evea rami pejoguerekoo yy oxyry va'e rami, toï penderekoo porãa yakã oxyry riae va'e rami.

²⁵ Ha'e gui peẽ Israel kuery, quarenta ma'etÿ re tekoa e'ëa rupi pendekuai jave py xevy pe teve peme'ë raka'e mymba ha'e mba'emo aju guigua?

²⁶ Mba'eta Sicutre ra'angaa rive peraa va'ekue penderuvixarã, Quium ra'angaa, jaxy-tata ra'angaa guive penderueterã peẽ ae pejapo va'ekue.

* 5:10 Ha'e kuery reko rami vy tetã rokë py huvixa kuery nhomongeta ha'e mba'emo re oikuuaa pota raka'e. † 5:17 Nhanderuete Egito pygua kuery ombopaga vy ha'e kuery mbyte rupi oaxa ovu va'ekue, ha'e rã ojeupega kuery áry rupi ma oaxa rive ogueraa jepe vy (Êxodo 12.12-13). Ha'e rã apy ma ijayvu Israel kuery mbyte rupi ombopaga vy oaxa aguã re.

²⁷ Ha'e nunga rupi xee ma Damasco tetā rovai peve rogueraa ukapa 'rā escravo-rā — he'i SENHOR Nhanderuete ixondaro reta va'e hery va'e.*

6

Israel kuery opa marā ikuiaia re omokanhymba aguā re ijayvuague

¹ Nda'evei ete 'rā Sião py ha'e kuery ae oipotaa rami ikuai va'e pe, Samaria tetā py mba'eve gui okyje e'ŷa rupi ikuai va'e pe voi. Peē kuery ma omboetevepy pendekuai yvatekueve regua, peē kuerya katy anho 'rā ou Israel kuery!

² Peaxa ha'vy Calné py pexa aguā. Ha'e gui ma tetā guaxu Hamate py ju tapeo, ha'e gui filisteu kuery rekao Gate py ju tapeo pexa pota. Ha'e va'e kuery rekao teve peē kuery rekao gui iporāve? Ha'e kuery yvy teve pendeyvy gui tuvixave?

³ Mba'eta peē kuery ma “Ára vai novaẽ voi 'rā” peje teĩ pejapo penembojexavai arā ovaẽ voi aguā rami.

⁴ Peke pekuapy tupa marfim guigua áry, peneate'ŷ rei 'rā pejupy hi'áry. Pekaru 'rā vexa'i ha'e vaka ra'y iporāgueve ro'o re anho.

⁵ Peporaei 'rā guive mbaraka pembojoguy reve. Davi rami ae pejapo mba'epurā pendejeupe ae.

⁶ Vinho pey'u 'rā pekuapy karo iporā-porāve va'e py, ha'e pendejee peikyty 'rā azeite iporāve va'e. Ha'e rami teĩ José regua kuery ojexavai rā pexa vy napemboaxyi.

⁷ Ha'e nunga rupi ae aŷ peneranhe pendereraapaa 'rā escravo-rā ogueraa va'e kuery reve. Ha'e ramo ndoikovei 'rā peneate'ŷa rupi pekaru guaxua.

⁸ Mba'eta SENHOR Nhanderuete ixondaro reta va'e guery rupi ae oura vy aipoe'i:

— Ambojeguaru Jacó kuery onhemboyvatepa reia, ajou vai ete ha'e kuery ro tuvix-akueve va'e ojapo rā. Ha'e rami vy napenavei 'rā hetā re, neĩ ha'e py ikuai va'e re guive — he'i.

⁹ Peteĩ'i oo py dez avakue optya teĩ ha'e kuery voi omanomba avi 'rā.

¹⁰ Ha'e gui xapy'a rei ovaẽ 'rā hetarā ae'i hetekue oapy aguā. Ha'e vy hetekue oka katy ogueraa aguā oupi vy oporandu 'rā opy rupi okuave va'e pe rei: “Oĩa pa ndee reve?” he'i rā ombovai vy “Noiavei” he'i ramo ixupe ju aipoe'i 'rā: “Ekyrirí ha'vy, ndeayvu eme SENHOR rery rupi”, he'i 'rā.

¹¹ Mba'eta ma'ẽ, SENHOR ojapo ukaague rami vy ombovaipaa 'rā oo guaxu ikuai va'ekue, omboa'ypaa avi 'rā oo kyrí'i va'e.

¹² Itaova áry rupi nda'u kavaju kuery onha 'rā? Ha'e rami e'ŷ vy vaka kuery nda'u yvy oikaraĩ 'rā ri ha'e rupi? Ha'e rami teĩ peē kuery ma pejogueroko porā 'rāgue py peme'ẽ veneno, ha'e teko porā 'rāgue py penhombojexavai.

¹³ Peē kuery ma Lo-Debar tetā peity vy pevy'a rei va'ekue. Aipopeje avi: “Nami ma Carnaim re voi nhandepo'akapa nhande ae mbaraetea py”, peje.

¹⁴ Ha'e rami teĩ SENHOR Nhanderuete ixondaro reta va'e aipoe'i:

— Peē Israel kuery, penderovai xee ambou 'rā peteĩ regua penembojexavai arā, Hamá tetā re oikea guive Arabá yakā oĩa peve — he'i.

7

Tuku-karu, tata ha'e ixã oexaague

¹ Ha'e gui povaei SENHOR oexa uka xevy. Xee aexa rā omoingo tuku-karu mba'emo roky henhoĩ ngypa'i jave, huvixave pegua omono'õmbaa ma rire henhoĩ jave.

² Ha'e gui tuku-karu ma mba'emo renhoĩ yvy gui oiko va'ekue ha'e javi ho'upa ma ramo xee aexa vy aipoa'e:

— SENHOR Oreruete, oreperdoa ke, ajerure. Ha'e rami e'ŷ rā mba'exa 'rā tu ore Jacó kuery rokuave? Mba'eta mbovy'i ete orekuai — ha'e.

³ Ha'e ramo SENHOR ha'e nunga nomboui.

— Ha'e nunga ma ndoikoi 'rā ha'vy — he'i SENHOR.

* 5:27 Atos 7,42-43

⁴ Ha'e gui peteī ju SENHOR Nhanderuete oexa uka xevy. Aexa rā SENHOR Nhanderuete ombou tata nhombopagaarā. Ha'e va'e ma omboypa yvy guýry yy oī va'ekue. Omomba avi heravy SENHOR pegua yvy itui va'ekue.

⁵ Ha'e ramo xee aipoa'e:

— SENHOR Oreruete, ha'eve ma. Mba'exa 'rā tu ore Jacó kuery rokuave? Mba'eta mbovy'i ete orekuai — ha'e.

⁶ Ha'e ramo ha'e nunga voi SENHOR Nhanderuete nomboui vy

— Ha'e nunga voi ndoikoi 'rā — he'i.

⁷ Ha'e gui ma pova'e nunga avi oexa uka. Aexa rā SENHOR hi'aī peteī ikora hi'yvi porā va'e áry. Opo py omboguejy ho'amy peteī ixā oo mbotya ra'āarā.

⁸ SENHOR aipoe'i xevy:

— Amós, mba'e tu rexa?

Xee ambovai vy

— Peteī ixā oo mbotya ra'āa — ha'e.

Ha'e ramo SENHOR aipoe'i ju xevy:

— Ne'exa, ixā py xee aa'ā 'rā xevyguia Israel kuery reko. Ha'e va'e rire xee ndaaxa rivevei ma 'rā ha'e kuery mbyte rupi.

⁹ Mba'eta ambovaipa 'rā Isaque ramymino kuery ombojerovia aty yvy'ā rupi ikuai va'e, Israel kuery pegua henda iky'a e'ŷ va'e voi amomba 'rā. Jeroboão ro pygua kuery rovai avi 'rā apu'ā kyxe reve — he'i.

“Amós ma je huvixa rovai ijayvu”, he'iague

¹⁰ Ha'e gui Betel pygua sacerdote Amazias omombe'u uka Israel pygua huvixa Jeroboão pe:

— Amós ma je nderovai ijayvu vai ra'e Israel kuery mbyte. Ha'e va'e ijayvua ma nda'evei nhandeyvy pe.

¹¹ Mba'eta po rami Amós ijayvu: “Jeroboão oiko vai 'rā kyxe py. Ha'e gui Israel kuery ma escravo-rā ogueraapaa 'rā oyvy gui mombyry”, he'i va'ekue.

¹² Ha'e gui Amós pe ju Amazias aipoe'i:

— Ndee profeta, ejepe'a ke apy gui. Enha Judá yvy katy. Ha'e py ju ekaru ha'e ayvu emombe'u eikovy.

¹³ Ha'e rā apy Betel py ma aŷ guive emombe'uve eme ayvu. Mba'eta apy ma oī huvixa pegua oo iky'a e'ŷ va'e ha'e orerekoa pygua templo — he'i.

¹⁴ Ha'e ramo Amós ombovai vy aipoe'i Amazias pe:

— Xee ma profeta e'ŷ aiko va'ekue, neī profeta remimbo'e e'ŷ guive. Ha'e rami 'rāgue py mymba re apenaa rupi aiko va'ekue, sicômoro'a mono'ōa rupi guive.

¹⁵ Va'eri mymba re apenaa gui SENHOR xepe'a vy aipoe'i xevy: “Tereo ke xeayvu emombe'u xevyguia Israel kuery pe”, he'i karamboae.

¹⁶ Ha'e nunga rupi endu ke SENHOR ayvu. Ndee aipo're: “Emombe'uve eme ayvu Israel kuery rovai regua, Isaque ramymino kuery rovai ndeayvu eme guive”, 're.

¹⁷ Ha'e rā SENHOR ma aipoe'i ndevy: “Nderal'xy ma itavy rei 'rā oikovy tetā rupi. Ha'e gui ndera'y kuery ha'e nderajy kuery oiko vai 'rā kyxe py. Ndeyvy rerekoo va'ekue ma omboja'opaa 'rā ixā py oa'āa vy. Ha'e vy remano 'rā peteī yvy ha'eve'ŷ va'e oīa re. Ha'e gui Israel kuery ma herapaa 'rāe, escravo-rā ogueraapaa 'rā oyvy gui mombyry”, he'i.

Ajaka yvyra'a oīa oexa ukaague

¹ Ha'e gui xevy pe SENHOR oexa uka avi peteī ajaka yvyra'a kuaray aku javegua oīa.

² Ha'e vy oporandu xevy:

— Amós, mba'e tu rexa?

Xee ambovai vy

— Peteī ajaka yvyra'a kuaray aku javegua oīa aexa — ha'e.

Ha'e rā SENHOR aipoe'i:

— Ovaẽ ma xevyguia Israel kuery opa aguã ára. Ha'e kuery rupi xee ndaaxa rivevei ma 'rã.

³ Ha'e va'e ára ma templo ha'e kuery oporaeiaty py taxẽmbel 'rã oiko. Mba'eta ha'e kuery re'õgue heta-etave 'rã ovv. Opa rupi omombopaa 'rã oka rupi. Ha'e gui nonhenduavei 'rã mava'eve rei — he'i SENHOR Nhanderuete.

"Israel kuery okanhymba aguã ovaẽ rai'i ma", he'ague

⁴ Peẽ kuery ma pekore iporiaukue'i, ha'e yvy ha'e javi rupi pemokanhymba ojexavai rei va'e. Ha'e nunga rupi pendu ke pov'a'e.

⁵ Mba'eta aipopeje: "Topa voi ngaru jaxy pyau regua, jaa vy mba'emo aju nhavende ju aguã. Ha'e sábado ára topa voi avi, trigo omoõ porãaty jaipe'a aguã. Ha'e rami vy nhaa'ã ajaka kyr'i va'e py hepyrã jajopyve aguã, ha'e mba'emo opejaa ha'eve'ÿa ramigua py jajokore aguã.

⁶ Ha'e rami vy peráta re rive 'rã jajogua iporiaukue'i, ha'e gui py regua repy re rive 'rã jajogua ojexavai'i va'e kuery, trigo ipire ku'ikue revegua nhavenda py", peje.

⁷ Ha'e nunga rupi SENHOR Nhanderuete oura guery Jacó oguerovy'a va'ety rupi ae:

— Xee ma raka'e rã peve teī ndaxerexarai 'rã pejapo vaia re!

⁸ Ha'e nunga gui yvy oryryipa 'rã. Ha'e ramo hexe ikuai va'e ipy'a vai 'rã okuapy. Mba'eta yvy ha'e javi omy-omyi vy opu'ã-pu'ã 'rã Nilo yakã rami, ha'e gui typa 'rã Egito katy'i yakã oĩ va'e rami.

⁹ Ha'e va'e ára ma ajapo 'rã kuaray mbyte teī oike aguã rami. Ha'e rami vy ara py teī amopytumba 'rã yvy jave rupi — he'i SENHOR Nhanderuete.

¹⁰ — Ngaru pejapo va'ety xee amboekovia 'rã pendepy'a vai aguã. Peporaeia amboekovia 'rã pejae'o anho aguã. Romonhemonde 'rã ajukue voxu guigua py, peneakã penhopimba reve. Ha'e rami romoingo 'rã gua'y pete'i'i va'ekue re ipy'a vai va'e rami. Ha'e gui opaa py ma oiko 'rã py'a vai etea ára.

¹¹ SENHOR Nhanderuete aipoe'i:

— Ne'ixa, ovaẽ ouvy ára yvy jave re karuai ambou aguã, tembi'u re okaruxea e'ÿ, neī yy re ijy'uveia e'ÿ guive, ha'e rã SENHOR ayvu oenduxe regua ae.

¹² Ha'e ramo SENHOR ayvu oenduxe va'e oguata 'rã ye'ë nhavõ rupi, kuaray ijapu'a'ia katy guive kuaray oua katy peve. Opa rupi 'rã ikuai ayvu rekaa rupi teī ndojoui 'rã.

¹³ Ha'e va'e ára kunhataī porãgueve ha'e kunumigue ma ho'apa 'rã yuvei gui.

¹⁴ Samaria py ta'angaa oĩ va'e rupi oura va'ekue voi ho'apa 'rã, "Anhetê Ete Dã e'ÿ vy Berseba pygua tuuete ramigua rekove rupi aura", he'i va'ekue. Ha'e kuery ma ho'apa ma vy ndovyvei 'rã — he'i.

9

Nhombopagaarã Nhanderuete ombou aguã re ijayvuague

¹ Ha'e gui aexa altar yvýry SENHOR hi'aĩ rã. Ha'e vy aipoe'i xevy:

— Emboguai na oo yta ikuai va'e, okẽ pyrõa peve omyimbä aguã. Emboa'ypa, opy ikuai va'e akã áry ho'apa aguã rami. Mba'eta ha'e kuery ajukapa katu'i'i 'rã kyxe py. Peteive ndojavai 'rã, peteive ma voi ndoo jepei 'rã.

² Yvykua vaikue py ha'e kuery oo teī ha'e gui anoë 'rã xepo py ae. Yva re peve oo teī ha'e gui voi amboguejy ju 'rã.

³ Carmelo yvyty áry onhemi aguã oo teī hakykue aa 'rã ha'e gui aru aguã, aipe'apa 'rã ikuiai gu. Ye'ë guýry xegui onhemi aguã oo teī ha'e py ambou 'rã mboi ixu'upaarã.

⁴ Escravo-rã hovaigua kuery ogueraapa ramo ha'e py voi ajuka ukapa 'rã kyxe py. Ha'e kuery re ama'ë 'rã amoingo axy aguã, amoingo porã aguã e'ÿ — he'i.

⁵ Mba'eta Nhandererekoa SENHOR ixondaro reta va'e ma yvy re opoko ramo hykupa rive 'rã, yvy re ikuai va'e ha'e javi ojexavai 'rã okuapy. Opu'ã-pu'ã 'rã Nilo yakã rami, ha'e gui typa 'rã Egito katy'igua yakã rami.

⁶ Nhanderuete ma yva re ojapo oĩ aguã, ha'e rã yvy re ma ijytarã omoõ va'ekue. Ha'e gui ye'ë gu yv oĩ va'e oenoõ vy onhoëmba 'rã yvy re. SENHOR ae hery va'e.

⁷ SENHOR aipoe'i:

— Peẽ Israel kuery, Etiópia pygua kuery arekoague rami avi e'ŷ ri ty'y xee roguereko? Mba'eta Israel kuery ma Egito yvy gui anoẽ va'ekue, filisteu kuery Caftor yvy gui, ha'e Síria pygua kuery Quir yvy gui anoẽague rami avi.

⁸ Ne'exa, xee SENHOR aiko kova'e kuery ojejavypa va'e rovai. Ha'e rami vy amomba 'rã yvy gui. Ha'e rami teĩ namokanhymbai 'rã Jacó kuery — he'i SENHOR.

⁹ — Mba'eta xeayvu rã ombovavaa 'rã yvy regua mbyte rupi Israel kuery ikuaria, yrupẽ py trigo ra'yigue omboguaa rami avi, peteĩve ra'yĩ'i yvy py ho'a e'ŷ re.

¹⁰ Xevygua Israel kuery va'e regua ojejavý va'ekue ma omanomba 'rã kyxe py, “Mba'emo vai nanhanderupityi 'rã, nhandere ndoikoi 'rãe!” he'i okuapy va'ekue ri.

Nhe'ẽ rupi Israel kuery ikuai va'e omoingo porã ju aguã re ijayvuague

¹¹ — Ha'e va'e ára ma ajapo ju 'rã Davi rogue ho'a va'ekue, amoatyrõmba ju 'rã ovoague. Ho'aague gui amopu'ãmba vy jypy guare rami ju 'rã ajapo,

¹² xevygua kuery oguereko aguã Edom pygua kuery okuave'i va'e, amboae regua kuery xerery rupi oenoimby ha'e javi guive — he'i SENHOR ha'e nunga apoarã va'e.*

¹³ SENHOR aipoe'i:

— Ne'exa, ovaẽ ma ouvy ára yvy karaĩa kuery oupity aguã mba'emo mono'õa kuery, ha'e uva umbiria kuery oupity aguã ha'yigue nhotýa kuery. Yvyty gui uva rykue oxyry 'rã ouvy, yvy'ã ikuai va'e gui oxyrypa 'rã.

¹⁴ Mba'eta ambopyau 'rã xevygua Israel kuery ikuaria. Ha'e ramo ojapo ju 'rã guetã ombovaipa pyre, ha'e gui ikuai ju 'rã ha'e py. Onhotý ju 'rã uva, ha'e oy'u 'rã hykue. Onhotý avi 'rã yvyra hi'a va'erã, ha'e gui ho'u 'rã hi'a.

¹⁵ Mba'eta ha'e kuery voi xee anhotý ju 'rã ijyvy re. Ha'e rami rire ijyvyrã ame'ẽ va'ekue gui ndoipe'aavei 'rã — he'i SENHOR Penderuete.

* 9:12 Kova'e ayvu rupi Tiago ijayvu Atos 15.16-18 py. Ha'e gui “Davi rogue ho'a va'ekue” he'ia ma Davi ramymimo kuery na'imbaraetei va'e re ijayvu vy, mba'eta Nhanderuete omoatyrõ uka ju 'rã, ha'e amboae regua voi ogueru avi 'rã.

Obadias ayvu oĩa Obadias ayvu oĩa

Babilônia pygua kuery Jerusalém tetã oitypa ramo Edom pygua kuery ovy'a rei okuapy, oipe'apa guive tetã pygua kuery mba'e rei-rei va'ekue. Ha'e nunga rupi profeta Obadias ijayvu Edom pygua kuery ojeavyague káuxa Nhanderuete ombopaga aguã re. Ha'e rã Israel kuery ma omoingo porã ju 'rã. Ha'e rami aguã ma Edom ha'e Israel kuery pegua anho e'ý oĩ. "Mba'eta Senhor ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiague peneakã re ae ju 'rã ojeapa" (versículo 15). Ha'e jave py "opo'akaa rupi opena va'e ma Senhor ae 'rã oĩ" (versículo 21b).

*Edom pygua kuery ojeavyague re ombopaga aguã re ijayvuague
Jeremias 49.14-16*

¹ Kova'e ma Obadias pe oexa uka pyre oĩa. Ha'e gui SENHOR Nhanderuete ijayvu Edom yvy re.* Roendu ma SENHOR po rami ijayvu rã:

— Amboae regua kuery pe peteĩ omboua ayvu mombe'uarã, "Pepu'ã ke, Edom yvy re nhapu'ã jajojuka aguã", he'i va'erã.

² Ne'ixa, Edom pygua kuery, peẽ kuery rojapo amboae regua gui pene'yvy'iive aguã rami, ija'epy e'ý guive.

³ Mba'eta pendepy'a py penhemboyvate reia oĩ va'e penembotavy. Yvatea py itaova pa'ũ rupi penderekao va'e vy pendepy'a py "Mava'e tu xereity 'rã yvy katy?" peje.

⁴ Ha'e rami avi taguato rami pendeyvate peovy teĩ, ha'e jaxy-tata mbyte peve pejeaita apo va'e rire ha'e gui voi xee roity 'rãgue — he'i SENHOR.

⁵ — Peẽ ma omomba pyrã pendekuai! Mba'eta pyávy imonda va'e kuery oo py ovaẽ vy nhomba'e rei-rei oiporavopa 'rã iporãgueve anho ogueraa vy. Uva re imonda va'e voi ou vy ndoejai 'rã teve amongue uva'a xã ri jepe?

⁶ Ha'e rami teĩ Esaú kuery, mba'ixa'vy tu penemba'e rei-rei ogueraapaa!† Mba'ixa'vy peráta penhomí va'ekue ojoupaa?

⁷ Mba'eta peneirã va'ekue ae pendepe'a penderekaoa gui. Pendereve peteĩ rami ikuai va'ekue penembotavy vy ipo'aka okuapy pendere. Pendereve okaru va'ekue ae omoõ nhuã pendepy rupi penembo'a aguã. Ha'e rami teĩ Edom yvy re ndoikoi 'rã ha'e nunga oikuua va'e.

⁸ Ha'e va'e ára amomba 'rã Edom pygua hi'arandukueve, Esaú yvyty re ikuai va'e 'arandua guive — he'i SENHOR.

⁹ — Temã tetã pygua ipy'a guaxukueve okyjepa 'rã, ha'e ramo Esaú yvyty áry peteĩ-teĩ ojukapaa 'rã.

¹⁰ Penderyvy Jacó ramymino kuery rovai pejapo vai raka'e. Ha'e ramo peximba ha'e penemokanhy 'rã raka'eve rã peve.

¹¹ Ha'e va'e jave Israel kuery mba'e rei-rei amboae regua ogueraapa teĩ peẽ kuery ma peĩ rive rei pekuapy. Mombyry guigua kuery Jerusalém rokẽ rupi oike vy oexa okuapy oxortea mba'emo ogueraa aguã. Ha'e kuery reve peẽ kuery voi penhemoirã va'ekue.

¹² Ha'e rami avi penderyvy kuery ojexavaia ára ndaperovy'a rei va'e rire, Judá ramymino kuery omombaa ára. Ha'e kuery iporiau reia ára ha'e kuery re napendeayvui va'e rire pekaru porã rei reve.

* ^{1:1} Israel kuery re Babilônia pygua kuery opu'ã jave ma Edom pygua kuery voi ha'e kuery re opu'ã avi, Israel kuery reve joegua'i ae va'eri (versículos 10-14; 2 Crônicas 28.17; Salmo 137.7; Amós 1.11-12). Ha'e nunga rupi Edom pygua kuery pe SENHOR ijayvu ombopaga aguã re (Isaías 34.5-15; Jeremias 49.7-22). † ^{1:6} Edom pe "Esaú" he'i, mba'eta Esaú ma ha'e kuery ramoõ oiko raka'e (Gênesis 36.9).

¹³ Xevyguia kuery ikuai axya ára ma hetã rokẽ rupi ndapeikei, ha'e perovy'a rei reve ikuai axya re napema'ëi, neñ imba'e rei-rei ndapeipe'ai heravy raka'e va'e rire.

¹⁴ Tape rakãmby ha'e kuery regua onha va'e pejukaxe vy napearõi, neñ joupe okuave'i va'e napemboaxai raka'e va'e rire ha'e kuery ojexavaia ára.

Israel kuery ikuai porã ha'e ov'y'apa ju aguã re ijayvuague

¹⁵ Mba'eta SENHOR ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiague peneakã re ae ju 'rã ojeapa,

¹⁶ mba'eta xevyguia yvyty iky'a e'ŷ va'e áry peka'u pekuapy raka'e. Ha'e rami ae ju ha'e javi regua oy'upa 'rã okuapy. Ha'e kuery oy'u tema 'rã hevyatãmba peve.[‡] Ha'e rami vy opyta 'rã ndoikoi ae va'ekue rami.

¹⁷ Ha'e rã Sião yvyty re ikuai va'e pe ma ojekuaa 'rã oo jepe aguã. Ha'e va'e yvyty ma iky'a va'erã e'ŷ. Ha'e gui Jacó kuery ojopy 'rã ojeupe guarã va'ekue.

¹⁸ Jacó kuery ma tata rami 'rã, ha'e José kuery ma hendy 'rã, ha'e rã Esaú kuery ma mba'emo pirekue rami 'rã ikuai. Ha'e gui ha'e kuery omoendy 'rã Esaú kuery, oapypa 'rã. Ha'e ramo mava'eve ndoikovei 'rã Esaú regua, ha'e rami aguã re SENHOR ijayvu rire.

¹⁹ Ha'e rire Esaú yvyty ma Neguebe pygua kuery pe 'rã itui. Ha'e rã filisteu kuery yvy ma yvy joja reia rupi ikuai va'e pe 'rã itui. Ha'e kuery ipo'aka avi 'rã Efraim ha'e Samaria nhuündya re, ha'e rã Benjamim kuery ma Gileade regua re 'rã ipo'aka.[§]

²⁰ Israel kuery escravo-rã ogueraa pyre ma cananeu kuery rekoae re ipo'aka 'rã Sarepta peve. Ha'e rã Jerusalém guigua kuery escravo-rã ogueraa pyre Sefarade tetã py ikuai va'e ma tetã kuaray puku-a katy ikuai va'e re 'rã ipo'aka.

²¹ Ha'e rami vy jogueraa jepea kuery oë 'rã Sião yvyty áry, Esaú yvyty regua kuery re oikuua pota aguã. Ha'e gui opo'akaa rupi opena va'e ma SENHOR ae 'rã oï.

[‡] 1:16 “Oy'u” he'ia ma ha'e kuery opaga aguã re ijayvu vy (Isaías 51.17; Habacuque 2.16; Apocalipse 14.10). § 1:19 Apy ma ijayvu Israel kuery hovaigua kuery rekoague re ipo'aka aguã re. Ha'e va'e ma SENHOR ipo'aka ramo 'rã oiko (versículo 21).

Jonas rekukue oĩa Jonas rekukue oĩa

Profeta Jonas ma Nhanderuete omondouka Assíria regua Nínive tetã katy ayvu porã omombe'u aguã. Ha'e va'e kuery ma Israel kuery reve joe opu'ã va'e. Jonas ndooxei vy amboae henda katy oo. Yy rupi ooa rupi Nhanderuete ojapo peteĩ pira guaxu omokõ aguã rami. Nhanderuete ogueraa jepe ramo oo nho Nínive tetã py. Ayvu omombe'u ramo ha'e kuery ojeko rerova okuapy. Ha'e ramo Nhanderuete nombopagai raka'e.

Ha'e rami rã Jonas ndojou porãi, ha'e pygua kuery nomboaxyi vy. Ha'e rã Nhanderuete ma nhomboaxy va'e ae. Ha'e rami Jonas pe ijayvu vy aipoe'i: "Ha'e gui xee ma ha'evea rami e'ý teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuaa regua ha'e oiporu kuaa e'ýa oikuua e'ý va'e. Heta avi ikuai mymba kuery", he'i (4.11). Ha'e ramia py Nhanderuete oexa uka nhanderayvu etea.

Nhanderuete Jonas oenoĩ rã ojava ramo omoingo axyague

¹ SENHOR oayvu ombou Amitai ra'y Jonas pe. Ha'e vy aipoe'i:

² — Eiko katu ke ha'e tereo tetã guaxu Nínive katy.* Ndeayvu ha'e kuery rovai, mba'eta xea py peve heko vaia onhendu — he'i.

³ Ha'e ramo Jonas oiko katu va'eri SENHOR renonde gui oo aguã Társis katy ojava vy. Ha'e rami vy Jope py ovaẽ vy ojou peteĩ kanoã guaxu Társis katy oo va'erã. Oo aguã repy opaga ma vy ha'e py oĩ ha'e kuery reve oje'oi aguã Társis katy, SENHOR renonde gui mombyry.

⁴ Ha'e gui ma ye'ẽ áry ha'e kuery ooa rupi SENHOR ombou peteĩ yvytu atã. Yvytu vaikue omoingo ye'ẽ áry rupi. Ha'e ramo kanoã opẽmba aguã rami ma oo.

⁵ Ha'e ramo kanoã mboguataa kuery onhemondyipa vy peteĩ-teĩ ojapukai nguuete ramigua pe. Ha'e rami vy kanoã py mba'emo ipoyikueve oĩ va'ekue omombopa yy py iveauive aguã. Ha'e rã Jonas ma yapy py oguejy ma vy oke rei oupy.

⁶ Ha'e ramo Jonas ituia py kanoã ja kuery ruvixa ou vy aipoe'i ixupe:

— Mba'e tu oiko ndereve? Reke porã rei ri ty'y rejupy? Epu'ã ke, ndee voi ejapukai avi nderuete pe. Xapy'a rei nderuete nhandere ima'endu'a nho 'rã nhakanhyba e'ý aguã — he'i.

⁷ Ha'e gui ha'e kuery joupe-upe aipoe'i:

— Peju ke, jaexa xorte, mava'e káuxa pa guĩ nunga nda'evei ete va'e oiko jaikuua aguã — he'i. Ha'e vy oexa okuapy xorte. Xorte oexaa py oikuua okuapy Jonas re ae.

⁸ Ha'e ramo aipoe'i okuapy ixupe:

— Aý ma enhemombe'u porã orevy. Mava'e káuxa tu kova'e nunga ete ou nhande'áry? Mba'e nunga rupi tu ndee reiko? Mamo gui tu reju? Mamo ndeyvy va'e tu? Mava'e regua tu ndee?

⁹ Ha'e ramo ombovai vy aipoe'i ha'e kuery pe:

— Xee ma hebreu, SENHOR re ae ajerovia va'e. Ha'e va'e ma Nhanderuete yva pygua, ye'ẽ ha'e yvy apoare — he'i.

¹⁰ Ha'e rami rã avakue okyje vaipa ete okuapy. Ha'e vy aipoe'i ixupe:

— Mba'e tu ha'vy rejapo? — he'i. Mba'eta oikuua okuapy SENHOR renonde gui ojava ovya, ha'e kuery pe omombe'u ae rire.

¹¹ Ha'e gui ye'ẽ opu'ã-pu'ãve tema ovvy ramo aipoe'ive ju okuapy ixupe:

— Mba'e ha'vy torojapo ndere ye'ẽ optyu'u aguã?

¹² Ombovai:

— Xejopy ha'e xemombo ye'ẽ py. Ha'e ramo ye'ẽ optyu'upa 'rã. Mba'eta xee aikuua xekáuxa ae ha'e rami etegua yvytu vaikue oikoa — he'i.

* ^{1:2} Nínive tetã ma Assíria regua tuvixave va'e. Ha'e pygua kuery ma Israel kuery rovaigua ikuai, nhomboaxy kuaa e'ý va'e guive.

¹³ Ha'e rami teĩ avakue oipykui atãve tema okuapy, onhea'ãve tema yvy'ã re ovaẽ aguã. Ha'e rami teĩ nda'evei, mba'eta ye'ẽ nda'eveive tema ov y ha'e kuery oove e'ŷ aguã.

¹⁴ Ha'e ramo mae ma ojapukai okuapy SENHOR pe. Ha'e vy aipoe'i:

— Ha'e gui SENHOR, rojerure ndevy kova'e ava káuxa rokanhymba e'ŷ aguã. Orere emoĩ eme kova'e ava ruguy onheéague re ropaga aguã, mba'eta orevy rã mba'eve py ndojapo vai. Mba'eta ndee SENHOR rejapo reipotaa rami anho oiko aguã rami — he'i.

¹⁵ Ha'e rami vy Jonas ojopy okuapy vy omombo ye'ẽ py. Ha'e ramo ye'ẽ ma porã opu'ã-pu'ãa gui optyu'upa porã.

¹⁶ Ha'e rami rã ha'e kuery okyje ete okuapy SENHOR gui. Ha'e vy SENHOR pe mba'emo ome'ẽ okuapy, onhemboayvu guive mba'emo ojapo aguã re.

¹⁷ Ha'e gui Nhanderuete ma peteĩ pira guaxu ombou Jonas omokõ aguã. Ha'e ramo pira rye py ma Jonas oĩ mboapy ára ha'e mboapy pytû re.*

2

Pira rye py Jonas oĩa gui ojapukaiague

¹ Ha'e gui Jonas ma pira rye py oĩa gui ojerure SENHOR Nguuete pe.

² Ha'e vy aipoe'i:

— Ajexavai vy ajapukai SENHOR pe.

Ha'e ramo xembovai.

Pytû vaikue reia gui ajapukai ramo
ndee rendu xeayvua.

³ Mba'eta ndee ae xemombo uka ye'ẽ typya py,
ye'ẽ mbyte py.

Ha'e ramo yy oxyry atã vy xejoko.

Ndeguigua yai opu'ã-pu'ã vy oaxa tema xe'áry rupi.

⁴ Ha'e ramo xee aipoa'e:

“Xemombo ma rexaa gui mombyry.

Xapy'a rei nda'u aexa ju 'rã ri

ndevygua templo iky'a e'ŷ va'e?”

⁵ Yy xeao'i xerekovea peve,

yy typya ma xejoko.

Yxypo ikuai va'e onhemama xeakã rupi.

⁶ Yvy'ã guy py peve aguejy avy,

yvy peve ete aguejy.

Ha'e nunga raka'e rã peve xe'áry rupi xejokopa ta va'ekue.

Ha'e rami teĩ omanogue ikuiaia gui ndee renoẽ ju xerekovea,
SENHOR Xeruete.

⁷ Xeryepy py xenhe'ẽ oĩ va'e ikangy ramo

xema'endu'a SENHOR re.

Ha'e vy ajerurea re aroma'endu'a ndea py,

Ndevygua templo iky'a e'ŷ va'e py ae.

⁸ Amongue mba'emo ra'angaa pe rive ojeko me'ẽ vy
ojepe'a imboaxyarã va'ekue gui.

⁹ Ha'e rã xee ma avy'aa amonhendu reve

ame'ẽ 'rã mba'emo ndevy,

ha'e ajapo 'rã va'ekue ajapopa nho 'rã — he'i.

¹⁰ Ha'e gui ma pira pe SENHOR ijayvu ramo ombojevy Jonas yy rembe re.

3

Nínive tetã py Nhanderuete ayvu Jonas omombe'uague

¹ Ha'e gui teĩgue ju SENHOR oayvu ombou Jonas pe. Ha'e vy aipoe'i:

* 1:17 Mateus 12.40

² — Eiko katu ke, ha'e tereo tetā guaxu Nínive katy. Emombe'u ke ha'e kuery pe aipoa'e uka va'e ndevy — he'i.

³ Ha'e ramo Jonas ma SENHOR ijayvuague rami vy opu'ã vy oo Nínive tetā katy. Nínive tetā ma tuvixa ete itui Nhanderuete renonde. Ha'e javi rupi mboapy ára mae ma jaexapa 'rã.

⁴ Ha'e gui Jonas omboypy tetā rupi oiko aguã. Peteĩ ára re oguata oikovy. Ayvu omombe'u oikovy vy aipoe'i:

— Quarenta araa py Nínive tetā omombaa 'rã — he'i.

Nínive pygua kuery ojeko rerova okuapyague

⁵ Ha'e gui ma Nínive pygua kuery ojerovia okuapy Nhanderuete re. Ha'e rami vy ojapo okaru e'ŷ re ikuai aguã. Onhemonde okuapy ajukue voxua guigua py, yvatekueve, yvyigueve guive.*

⁶ Ha'e rami ikuia Nínive pygua huvixa voi oendu. Ha'e rami vy guenda openaaty gui opu'ã ho'amy vy omboi oao huvixa pegua, ha'e vy ajukue vaikue voxua guigua py ju onhemonde, tanhimbu py oguapy oiny guive.

⁷ Ha'e rami vy Nínive tetā ha'e javi rupi omondouka po rami omombe'u va'erã: "Huvixa ha'e ixupegua yvatekueve ojapo ucaa rami vy avakue, mymba kuery vaka ha'e vexa'i kuery voi ndo'ui 'rã mba'eve, ndaperaai 'rã okaruaty py, neĩ yy ndoy'ui 'rã guive.

⁸ Ha'e rami 'râgue py avakue ha'e javi tonhemonde ajukue voxua guigua py, mymba kuery voi. Pejapukai atã ke Nhanderuete pe. Peteĩ-teĩ pejeko rerova ke ha'eve e'ŷa rami rei peikoa gui, mba'emo vai pendepo py pejapoaty gui guive.

⁹ Xapy'a rei nhl'ã Nhanderuete amboae rami onhembopy'a vy ojepe'a 'rã ojapo taa gui, ha'e vy nda'ipoxyvei 'rã nhamanomba e'ŷ aguã", he'i.

¹⁰ Ha'e rami ha'e kuery ikuai ramo Nhanderuete oexa, mba'eta ha'eve e'ŷa rami ikuiai gui ojeko rerova okuapy. Ha'e ramo Nhanderuete nomoingoi mba'emo vai ombou 'rã va'ekue, ndojapoi oayvuague.

4

Jonas ndovy'aiague

¹ Ha'e rã Jonas ma ha'e rami ha'e kuery ikuiai ndojou porãi ete vy ivai oiny.

² Ha'e rami vy onhembo'e Nhanderuete pe. Aipoe'i:

— Ai SENHOR! Po rami e'ŷ teve xeayvu va'ekue xeyvy re teri aiko reve? Ha'e nunga rupi ae aa pojava va'ekue Társis katy ajava vy, mba'eta aikuua ndee Nhanderuete poroayvu va'e reikoa, renhomboaxy, nandevai voi, ha'e opa mba'e py rejapo porã va'ea. Ha'e rami vy aikuua mba'emo vai rejapo taa gui rejape'a 'rãa.

³ Ha'e nunga rupi SENHOR, ndevy pe ajerure, eipe'a na xerekove, mba'eta aikove 'râgue py ha'eveve amano aguã — he'i.*

⁴ Ha'e ramo SENHOR aipoe'i:

— Ha'evea rami ri ty'y evoko rami ete ndevaia? — he'i.

⁵ Ha'e gui ma tetā gui Jonas ojepe'a vy mombyry'i oguapy oiny kuaray oua katy. Ha'e py ojapo ngoguyrã, iguy py opytu'u aguã kuaray'ã py, mba'emo tetā re oiko va'e oexaxe vy.

SENHOR ombo'eague Jonas

⁶ Ha'e ramo Nhanderuete ojapo mba'emo roky henhoĩ aguã rami. Ha'e va'e ma ojeupi ovu Jonas áry, inhakã áry rupi omokuaray'ã, ome'ẽ aguã opytu'u aguã. Ha'e ramo Jonas ma mba'emo roky oexa vy ovu'a ete oiny.

⁷ Ko'ẽ jevy rã kuaray oẽ ovu jave Nhanderuete ombou avi peteĩ mbii. Ha'e va'e ma mba'emo roky ho'u rã ipirupa.

* 3:5 Ha'e kuery ma ha'e rami ikuai onhemboaxy rupi. * 4:3 Jonas ndovy'ai mba'eta ndoipotai Nhanderuete omboaxy vy ogueraa jepe Nínive pygua kuery, hovaigua ikuai ramo. Ha'e rã Nhanderuete ma nhomboaxy va'e vy ndoipotai okanhy (Ezequiel 33.11; João 3.16; 2 Pedro 3.9).

⁸ Kuaray yvateve ovy ramo Nhanderuete ombou avi peteĩ yvytu aku kuaray oẽa katy gui oipeju va'e. Jonas akã re kuaray ojope ratã ramo ikangypaa oendu. Ha'e rami vy omano aguã re ojerure. Ha'e vy aipoe'i:

— Aikove 'rãgue py ha'eveve amano aguã — he'i.

⁹ Ha'e ramo Nhanderuete oporandu Jonas pe:

— Ha'evea rami ri ty'y evoko rami ete ndevai reiny mba'emo roky re rive?

Ombovai:

— Anhetãa rupi xevai vy amanoxe guive — he'i.

¹⁰ Ha'e ramo SENHOR aipoe'i:

— Ndee ma remboaxy ri mba'emo roky'i remba'eapo ramo e'ŷ henhoĩ va'ekue, ha'e rembo'yvate va'ekue'ŷ teĩ. Ha'e nunga ma peteĩ pytũ re henhoĩ rire amboae pytũ ju okanhy ju va'e.

¹¹ Ha'e gui xee ma ha'evea rami e'ŷ teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuaa regua ha'e oiporu kuaa e'ŷa oikuua e'ŷ va'e. Heta avi ikuai mymba kuery — he'i.

Miquéias ayvu oĩa Miquéias ayvu oĩa

Profeta Miquéias ijayvu raka'e Judá ha'e Israel kuery heko vai ramo Nhanderuete ombopaga aguã re. "Ha'e nunga rupi pendekáuxa Sião tetã ombovaipaa 'rã mba'etyrã yvy karaña rami, Jerusalém optya 'rã mba'emo ra'ykue aty rive. Yvyty templo oĩa voi optya 'rã yvy'ã'i jaipa va'e rive" (3.12).

Ijayvu avi araka'eve rã Senhor ogueraa jepe vy omoingo porã ju aguã re. Judeu kuery anho e'ý guive, yvy jave re ikuai va'e ixupe anho 'rã ikuai. "Opaa ára py ma yvyty Senhor pegua oo oĩa va'e ombo'yvateve 'rã yvyty ha'e yvy'ã ikuai va'e áry. Ha'e ramo yvy regua kuery oje'oi 'rã ha'e katy. Heta va'e regua kuery oo vy aipoe'i 'rã joupe-upe: 'Peju ke, jaje'oi Senhor pegua yvyty re, Jacó kuery Ruete pegua oo oĩa katy. Ha'e ramo nhanembo'e 'rã oikoa re, ha'e va'e rupi nhande kuery voi nhandekuai aguã', he'i 'rã okuapy" (4.1-2a).

Israel ha'e Judá kuery rovai opu'ã okuapya re ijayvuague

¹ Moresete pygua Miquéias pe SENHOR oayvu ombou va'ekue. Judá pygua huvixa Jotão, Acaz ha'e Ezequias ikuai jave ijayvu Samaria ha'e Jerusalém tetã re.

² Yvy regua kuery ha'e javi, pendu ke. Ndee yvy, ejapyxaka avi ke, ha'e yvy re pendekuai va'e ha'e javi. SENHOR Nhanderuete ijayvu ta penderovai, ojeupagua templo iky'a e'ý va'e gui ae.

³ Mba'eta ne'exa, SENHOR ma o'amba gui oguejy ouvy vy oguata 'rã ovy yvyty yvateve va'e áry rupi.

⁴ Iguýry yvyty ikuai va'e ma hykupa 'rã, yvyugua voi ovopa 'rã tata raku py iraity omoõ mbyre hykua rami, yvy'ã guy katy yy oxyry atã va'e rami guive.

⁵ Ha'e nunga ha'e javi oiko 'rã Jacó kuery heko vaia re, Israel kuery ojejavya re ae. Ha'e gui mava'e kuery tu ikuai Jacó regua heko vai va'e? Samaria pygua kuery e'ý teve? Ha'e mamo tu oĩ yvyty áry Judá kuery ta'angaa mbojerovia atyrã ojapo va'ekue? Jerusalém tetã py e'ý teve?

⁶ Ha'e nunga rupi SENHOR aipoe'i:

— Samaria tetã ma xee ajapo 'rã mba'ety mbyte ita omboaty pyre rami rive, ha'e uva onhotýa aguã. Mba'eta ha'e py ita ombojoja pyre ambojerepa 'rã heravy yvy'ã guy katy, oo renda ojekuaapa peve.

⁷ Ha'e gui ta'angaa ojapo pyre ma omboa'ypaa 'rã, onhemongy'a reia repy oapypaa 'rã, ha'e ta'angaa oguereco va'e ha'e javi xee ambovaipa 'rã. Mba'eta ha'e kuery itavy reia repykue re rive ojou rire ha'e rami ikuai va'e pe ae ju 'rã ogueraa uka — he'i.

⁸ Ha'e nunga rupi xee ajae'o, anhendu ratã aikovy, xeporiaua rupi aiko xepire rei reve. Jagua-tuvy nhe'ẽ rami ajae'o aikovy, ha'e guyra-nhandu rami xepy'a vai nhendu.

⁹ Mba'eta xeretarã kuery ai ma okuera ve'ý ae va'e. Mba'emo vai ete ou Judá re, ovaẽ ma xeretarã kuery rekua Jerusalém rokẽ peve ete.

¹⁰ — Ha'e nunga pemombe'ueme Gate tetã py, pejae'o eme guive.* Bete-Leafra py penhembojere-jere yvy ku'i rupi.

¹¹ Peẽ Safir pygua kuery, pendepire rei ha'e peximba reve 'rã peo. Zaanã pygua kuery voi ndoo jepei 'rã. Bete-Ezel pygua kuery ojae'o reia pendu vy peikuaa 'rã napenepytyvõvei 'rãa.

¹² Mba'eta Jerusalém tetã rokẽ peve SENHOR guigua mba'emo vai ou ramo Marote pygua kuery oarõ okuapy mba'emo porã oiko 'rã.

* 1:10 Profeta Miquéias ndoiptai hovaigua kuery Gate py ikuai va'e ha'e nunga oendu, oojai rei e'ý aguã.

¹³ Ha'e gui Laquis pygua kuery, pemoxāmba kavaju kuery karóxa re. Mba'eta peẽ kuery ranhe pejapo Sião pygua kuery ojejavy aguã rami, pendere oĩ ra'e Israel kuery heko vai aguã.

¹⁴ Ha'e Moresete-Gate pygua kuery pe ma peme'ẽ 'rã mba'emo oxẽ ta ma ramo. Aczibe py oo ikuai va'e ma Israel pygua huvixa kuery ojekore aguã rive opyta.

¹⁵ Ha'e gui Maressa pygua kuery, pendea py voi ambou 'rã pendere ipo'aka va'erã. Adulão peve voi ovaẽ 'rã Israel regua yvatekueve.

¹⁶ Pejayapa pende'a hi'yvypy'i rupi pendera'y kuery perovy'a va'ekue re pendepy'a vai vy. Pendeapte rupi penhopimba ke xapirẽ rami, pendegui ha'e kuery oipokuaa reve ogueraapaa ta ma ramo.

2

"Joguereko axya kuery pe nda'evei ete 'rã", he'iague

¹ Nda'evei ete 'rã ngupa py oĩa py ojejavy aguã anho opy'a re omoĩ va'e kuery pe. Ha'e va'e kuery ma ko'ēgueve ha'ekue rami ae 'rã ikuai, ha'e rami aguã ipo'aka va'e vy.

² Ha'e kuery ma nhomba'ety ojopyxeia oendu vy oipe'a 'rã, joo voi ojopy 'rã. Ha'e rami vy omokanhy 'rã avakue ha'e hoo py ikuai va'e guive. Omomba 'rã hoo va'e imba'e rei-rei reve.

³ SENHOR aipoe'i:

— Ha'e nunga rupi ha'e kuery re ambou 'rã mba'emo vai. Ha'e va'e gui ma ndapeo jepevei 'rã. Penhemboyvatea rupi ve'ỹ 'rã pendekuai, mba'emo vai oikoa ára.

⁴ Ha'e va'e ára penderovai omombe'ua 'rã peteĩ ayvu penereronhemboaxya rupi merami. Ha'e vy aipo'ea 'rã: "Nhanemokanhymba ma! Nhanderuete joupe omboaxapa ma xeretarã kuery yvy oguereko va'ekue! Xegui voi oipe'apa! Nhande kuery mba'ety ikuai va'ekue ma anhetẽ rupi e'ỹ ikuai va'e pe ju omboaxa", 'ea 'rã.

⁵ Ha'e nunga rupi SENHOR pegua kuery teigue ju ijaty okuapy teĩ pendeyvyrã oa'ã va'erã ma ndoikoi 'rã, xorte oexaa rupi, neĩ ixã omoatãa rupi voi.

Profeta ramigua rive re ijayvuague

⁶ Ha'e rã heta va'e kuery ma aipoe'i okuapy xevy:

— Ndeayvuve eme ha'e rami, ndeayvu riae eme. Mba'eta orere ndoui 'rã roximba aguã.

⁷ Jacó kuery re ma ndoui 'rã remombe'u reikovy va'e. Tyrã pa SENHOR Nhe'ẽ ivai vi nhandevy? Po ramigua ae 'rã teve ojapo? — he'i okuapy.

SENHOR ombovai:

— Tá, teko porã rupi ikuai va'e pe ma xeayvu ojapo porã 'rã.

⁸ Ha'e rã xevygua kuery ma kue'i teri xere opu'ã okuapy xerovaigua rami. Ha'e rami vy pendea rupi oaxa rive'i ovy va'e gui peipe'a 'rã ijao, i-capá voi, pendere opu'ã aguã re onhembopy'a e'ỹ teĩ.

⁹ Xevygua kunhague gui voi peipe'a ngoo py ovy'a aguã va'ekue. Imemby kuery gui voi peipe'a mba'emo porã raka'e rã peve guarã ame'ẽ aguã va'ekue.

¹⁰ Pepu'ã ma ha'vy, tapeopa, mba'eta peiague py nda'evei pepytu'uve aguã. Tapeo, mba'eta penhemongy'apaague ojapo penemokanhymba aguã rami, penemokanhya 'rãe.

¹¹ Ha'e gui penembyte xapy'a rei oiko 'rã yvytu rami rive ijapu vy aipoe'i va'e: "Xee ma vinho ha'e nga'ua rupigua rive amombe'u va'e", he'i. Ha'e va'e rive 'rã ha'eve peẽ kuery pegua profeta oiko aguã.

Israel kuery okuave'i va'e SENHOR omono'õ ju aguã re ijayvuague

¹² — Ha'e gui peẽ Jacó regua kuery ma xee romono'õmba ju 'rã. Amboatypa 'rã Israel kuery okuave'i va'e. Joa py meme 'rã romoĩ, vexa'i kuery ma kora py, e'ỹ vy nhuündy mbyte py ikuai va'e rami. Ha'e ramo heta ete ju ikuai vy onhendu ratã rei 'rã okuapy.

¹³ Ha'e kuery renonde rupi peteĩ oo 'rã tape apoarã. Ha'e ramo ha'e kuery oẽmba 'rã, okẽ rupi oike ha'e oẽ ju 'rã jogueravy. Ha'e kuery renonde rupi oo 'rã Huvixave ae. Tá, SENHOR ae 'rã oo ha'e kuery renonde rupi — he'i.

3

Huvixa, sacerdote ha'e profeta kuery rovai ijayvuague

¹ Ha'e gui xee aipoa'e:

— Peē Jacó akā ha'e Israel kuery ruvixa pendekuai va'e, pendu ke aŷ. Peē kuery e'ŷ teve ha'evea rami joguerekorā penemoingoa pyre?

² Mba'eta peē kuery ma ndaperovy'ai 'rā iporā va'e, ha'e rā mba'emo vai rive pejou porā. Ha'e rami vy peipiropa 'rā heta va'e kuery, ho'o voi pemboi 'rā ikāgue gui.

³ Ha'e rami vy pe'u 'rā xevyguia kuery ro'okue, ipire pemboipa 'rā, ha'e ikāgue ma pemopẽmba rive 'rā. Ha'e vy pembo'ipa 'rā ho'okue oja py, oja ixā va'e pygumarā guive.

⁴ Ha'e rami rire SENHOR pe pejapukai ramo noendui 'rā pendeayvua. Ha'e rami 'rāgue py ha'e va'e jave peē kuery pe ndojexa ukavei 'rā, ha'eve e'ŷa rami pendekuai ramo.

⁵ Ha'e gui profeta ramigua kuery xeretarā kuery oguerojejavy ramo po rami SENHOR ijayvu avi ha'e kuery re.

— Peē kuery ma pe'u va'erā ome'ea ja “Ha'evepa rei 'rā” peje. Ha'e rā pe'u va'erā nome'ei va'e kuery pe ma “Ou 'rā pendere opu'ā va'erā” peje.

⁶ Ha'e nunga rupi peē kuery áry ou 'rā pytū mba'eve ndapexavei aguā, oiko 'rā pytū reia mba'eve penemba'ekuaa e'ŷ aguā. Profeta kuery pe ma kuaray oike xapy'a 'rā, ha'e kuery pe ara py teī pytūmba 'rā.

⁷ Ha'e ramo mba'emo oexa va'ety kuery oxīmba 'rā, imba'ekuaa va'e kuery ndoikuaavei rei 'rā. Tá, ha'e kuery ojoko 'rā ojuru, Nhanderuete mba'eve py nombovai ramo — he'i.

⁸ Ha'e rā xere ma SENHOR Nhe'ẽ po'akaa anho oĩ. Ha'e rami vy xere oĩ ha'evea rami ajoguerekō aguā ha'e xembaraeterā, Jacó kuery pe amombe'u porā aguā heko vaia, ha'e Israel kuery ojejavaya.

⁹ Peē Jacó akā ha'e Israel kuery ruvixa peiko va'e, pendu ke aŷ, mba'eta ha'eve'ŷa rami pejoguerekō, ha'e ha'evea ramigua pe “Nda'evei va'e” peje.

¹⁰ Peē kuery ma tuguy pemoēa rupi rive pejapove oorā Sião tetā re, mba'emo vai rupi anho pejapo Jerusalém re.

¹¹ Ha'e pygua huvixa pendekuai va'e ma peráta pejopy vy rive 'rā peikuaa pota mba'emo re, sacerdote kuery ma nhombo'e 'rā mba'emo ojouxe vy rive, ha'e profeta kuery ma peráta re rive 'rā imba'ekuaa. Ha'e rami teī SENHOR re pejeroviaa rupi merami pendeayvu vy “Nhanembyte e'ŷ teve SENHOR oĩ? Ha'e ramo nhandere ndoui 'rā mba'emo vai”, peje rive 'rā.

¹² Ha'e nunga rupi pendekáuxa Sião tetā ombovaipaa 'rā mba'etyrā yvy oikaraña rami, Jerusalém optya 'rā mba'emo ra'ykue aty rive. Yvyty templo oĩa voi optya 'rā yvy'a'i jaipa va'e rive.

4

Isaías 2.1-4

¹ Ha'e rami teī opaa ára py ma yvyty SENHOR pegua oo oĩa va'e ombo'yvateve 'rā yvyty ha'e yvy'ā ikuai va'e áry. Ha'e ramo yvy regua kuery oje'oi 'rā ha'e katy.

² Heta va'e regua kuery oo vy aipoe'i 'rā joupe-up: “Peju ke, jaje'oi SENHOR pegua yvyty re, Jacó kuery Ruete pegua oo oĩa katy. Ha'e ramo nhanembo'e 'rā oikoa re, ha'e va'e rupi nhande kuery voi nhandekuai aguā”, he'i 'rā okuapy. Mba'eta Sião gui ma oikuaa ukaa 'rā lei, Jerusalém gui onhendu 'rā SENHOR ayvu.

³ Ha'e gui ma SENHOR oikuaa pota 'rā yvy regua mbovy e'ŷ ikuai va'e re, omo'arandu 'rā yvy regua ipo'akave va'e ha'e mombyrya rupigua. Ha'e ramo ha'e kuery kyxe gui ojapo 'rā yvy karañarā, ha'e hu'y guaxu gui ojapo 'rā kyxe yvyra rakā ayaarā. Mba'eta yvy regua kuery ndoguerojeroviavei 'rā kyxe, neī joe opu'ā aguā voi ndoikuaavei ma 'rā.

⁴ Ha'e rami 'rāgue py petēi-teī oguapy 'rā okuapy ombo'e uva rembypy, e'ŷ vy figo'y guy rupi, mba'eta ndoikovei 'rā imondiyarā, SENHOR ixondaro reta va'e ojuru py ae ijayvu rire.

5 Yvy regua kuery ma nguuete ramigua rery rupi peteĩ-teĩ ikuai. Ha'e rã nhande ma SENHOR Nhanderuete rery rupi 'rã nhandekuai, raka'e rã peve.

6 Ha'e gui SENHOR aipoe'i:

— Ha'e va'e ára ma arupa 'rã oguata vaikue'i va'e kuery, amono'õmba avi 'rã ambopagaa rupi araa uka va'ekue.

7 Oguata vaikue'i va'e amoingo 'rã peteĩ regua okuave va'e, ha'e mombyry ogueraa pyre ma amoingo 'rã ipo'akave va'e. Ha'e rami vy ha'e kuery re apena 'rã Sião yvyty áry, aÿ guive raka'e rã peve.

8 Ha'e gui ndee torre vexa'i kuery rarõaty, Sião yvyty, tá, ndea py 'rã ou jypy guare rami ipo'aka va'erã, Jerusalém pygua ae ipo'aka ju aguã.

9 Ha'e gui aÿ ma, mba'e re tu ha'e rami ete peneraxẽ? Noĩ teve penderuvixave? Penemongeta va'ety okanhya ae teve? Pendere teve imemby raxy va'e rami haxy va'e ou?

10 Peẽ Sião pygua kuery, aÿ pejexavai reve penhealã peiny imemby raxy va'e rami, mba'eta aÿ peo 'rã peneretã gui hovai rupi rive pendekuai aguã. Babilônia tetã peve 'rã peo. Ha'e rami teĩ penemondoukaa ju 'rã ha'e gui, mba'eta ha'e gui SENHOR pendereraa jepe 'rã penderovaigua kuery po gui.

11 Aÿ ma heta ete ikuai yvy regua kuery pendere opu'ã okuapy va'e. Ha'e kuery aipoe'i: "Sião tetã tomongy'apaa, nhanderexa py ae tajaexajaipota va'e, ha'e pygua kuery re oiko rã", he'i okuapy.

12 Ha'e rami teĩ ha'e kuery ndoikuuai SENHOR opy'a re oguereko va'e, ndoikuuai onhembopy'aague mba'emo aju jokuaa ojykyo aguã py rami omono'õmba aguã.

13 Ha'e nunga rupi Sião pygua kuery, pepu'ã ke ha'e pejyky. Ha'e rami aguã ame'ẽ penderakuarã ferro guigua, ha'e penepoapẽrã overa va'e guigua. Ha'e ramo heta 'rã pejyky yvy regua kuery.* Ha'e rã ha'e kuery oguereko va'ekue ma pemboaxapa 'rã SENHOR pe, imba'e rei-reikue peme'ẽ 'rã SENHOR yvy jave re ipo'aka va'e pe.

5

1 Ha'e nunga rupi aÿ pemboatypa ke pendea pygua xondaro kuery. Mba'eta nhande-jokoa 'rã okuapy, ha'e yvyra py oinupã 'rã Israel kuery rerekao rova rupi.

Huvixaverã SENHOR ombou rã itui'i ha'e ipo'aka aguã re ijayvuague

2 Ha'e gui ndee Belém tekoia Efrata 'epy va'e, ndee ma kyr'i ete Judá regua ikuai aguã teĩ ndegui ae 'rã ou xevygua Israel kuery re opena va'erã. Ha'e va'e ma yma guive ijypy va'e, ijypy ete ára guive.*

3 Ha'e rami teĩ ha'e va'e kuery SENHOR omboaxa 'rã ranhe, imemby raxy va'e oikuavã'ia ára peve. Ha'e va'e jave py ma tyvy kuery mboae ojevypa ju 'rã Israel kuery ikuia py.

4 Ha'e gui guetarã kuery re opena va'e oĩ atã vy SENHOR po'akaa rupi 'rã opena oikovy, SENHOR nguuete rery iporã ete va'e rupi. Ha'e ramo ha'e kuery ikuai porã 'rã, mba'eta ha'e jave py huvixa pe "Yvate ete va'e" 'ea 'rã yvy apy peve.

5 Ha'e ae 'rã oiko nhanemoingo porãarã.

Ha'e gui Assíria pygua kuery ma nhandeyvy re ou vy huvixa ro ikuai va'e rupi oaxa jogueravy ramo nhande kuery va'e regua opu'ã 'rã ha'e kuery rovai, sete joe opena va'e ha'e irundy meme avakue rerekao 'rã opu'ã.

6 Ha'e va'e kuery ma kyxe py ombovaipa 'rã Assíria ha'e Ninrode yvy, ha'e kuery ropy ae. Ha'e rami py nhandereraa jepe 'rã Assíria pygua kuery gui, ha'e kuery nhandeyvy re ou vy nhanderekao re opyrõ ramo.

* 4:13 Ha'e jave py ma mba'emo ra'yî ha'e kuery ojyky 'rã vaka opyrõa rupi. Ha'e gui apy ma Jerusalém pygua kuery pe Nhanderuete ijayvu guymba pe rami, yvy regua kuery ombopaga aguã. * 5:2 Belém tekoia ma huvixa Davi itui'ague (Rute 1.2; 1 Samuel 17.12). Ha'e nunga rupi Belém pe "Davi rekoague" 'ea (Lucas 2.4). Ha'e gui kova'e ayvu rupi vy Jesus voi itui'i raka'e Belém py (Mateus 2.3-6).

⁷ Ha'e gui Jacó regua rembyrekue ma yvy regua kuery mbyte rupi 'rā ikuai SENHOR guigua yxapy rami, jai rogue áry oky rayvi ho'a va'e rami guive, mba'eta ha'e nunga ma avakue re'ŷ oarõ va'e, avakue ra'y kuery re'ŷ ojeko va'e.

⁸ Ha'e rami vy Jacó regua kuery rembyrekue ma amboae regua kuery mbyte rupi ikuai 'rā mymba kuery ka'aguy regua mbyte rupi guary oiko va'e rami. Yvy regua kuery ikuia rupi ikuai 'rā vexa'i kuery ikuia rupi guary ra'y oiko va'e rami, mba'eta guary oaxaa rupi joe opyrō reve omboa'ypa 'rā, heraa jepearā ndoikoi rā guive.

⁹ Ha'e rami ae avi ndepo'aka 'rā nderovaigua kuery re. Ha'e ramo ha'e kuery omokanhymbaa 'rā.

¹⁰ SENHOR aipoe'i:

— Ha'e va'e ára ma penembyte gui aipe'apa 'rā penerymba kavaju kuery, ha'e ambovaipa 'rā penerenda karóxa joe opu'ãa pygua.[†]

¹¹ Pendeyvy re ambovaipa 'rā tetā ikuai va'e, ha'e aitypa 'rā oo ikorapa va'e pejapo va'ekue.

¹² Pendepo gui aipe'apa 'rā mba'evyky, ndapejouvei ma 'rā imba'ekuaa va'erā.

¹³ Peẽ kuery mbyte gui aipe'a 'rā mba'emo ra'angaa pejapo va'ekue, ha'e ita pembo- jerovia aguã pemopu'ã va'ekue. Ha'e rami rire ndapejero'avei 'rā pendepo py ae pejapo va'ekue renonde.

¹⁴ Penembyte gui aipe'apa 'rā ta'angaarã yvyra pemopu'ã va'ekue, ha'e ambovaipa 'rā peneretā ikuai va'e.

¹⁵ Ha'e gui ajou vai ha'e xepoxya rupi ambopaga 'rā yvy regua xenhe'ẽ rendu e'ŷ va'ekue.

6

Ojeupegua kuery re oikuua pota aguã re Nhanderuete ijayvuague

¹ Pendu ke aŷ SENHOR ayvu. Aipoe'i:

— Pepu'ã ke, yvyty ikuai va'e renonde pemombe'u pendereko, yvy'ã ikuai va'e oendu aguã pendeayvua.*

² Ha'e peẽ yvyty pendekuai va'e voi ke pendu SENHOR oikuua va'e omombe'u rā, ha'e peẽ yvy yta ymagua peiko va'e reve. Mba'eta SENHOR oguerekoojeupegua kuery regua omombe'u va'erā, Israel kuery omboayvu aguã.

³ — Ha'e gui xevygua kuery, mba'e tu ajapo pendere? Mba'e nunga py tu rombovoyi? Xembovai na!

⁴ Mba'eta Egito yvy gui roguenoẽ va'ekue, escravo pendekuaiague gui roepy vy. Ha'e gui penerenonderā amondouka raka'e Moisés, Arão ha'e Miriã.

⁵ Xevygua kuery, penema'endu'a ke aŷ Moabe pygua huvixa Balaque penemombaxeague re, ha'e ixupe Beor ra'y Balaão ombovaiague re. Penema'endu'a avi Sitim guive Gilgal peve pendere oiko va'ekue re, peikuua aguã SENHOR ha'evea rami meme pender- erekoague — he'i.

⁶ Ha'e gui SENHOR pe ajexa ukaxe vy mba'e nunga 'rā tu aru, xerenapy'ã re aĩ aguã Nhanderuete yvate ete va'e renonde? Henonde aju vy mba'emo aapy reve ame'ẽ va'erā teve 'rā aru? Vaka ra'y peteĩ ma'etŷ va'e aru 'rā teve?

⁷ SENHOR oguerovy'a 'rā teve mbovy e'ŷ vexa'i, ha'e e'ŷ vy dez mil yakã'i azeite anho tynyẽ va'e? Xerekoo vaiague re ame'ẽ 'rā teve xera'y peteĩ'i va'ekue, xerete guigua ae'i teve ame'ẽ 'rā xepy'a guive ajejavvyague rekovicia?

⁸ Any avakue, mba'eta pendevy pe SENHOR omombe'u ae ma iporā va'e oipota va'e. Ha'e va'e ma ha'evea rami pejoguerekoojeupegua kuery omboayvu aguã, ha'e Penderuete reve penhemboyvate reia rupi e'ŷ peiko aguã.

Ha'eve'ŷa rami joguerekoojeupegua kuery ombopaga aguã re Nhanderuete ijayvuague

[†] 5:10 Ha'e kuery ma joe opu'ã aguã anho oguerekoojeupegua kuery oenoĩ guenonde ojexa uka aguã, ha'e kuery omboayvu aguã. Ha'e gui yvyty ha'e yvy'ã ikuai va'e oenoĩ avi henduarã rami.

* 6:1 Apy ma Nhanderuete ojeupegua kuery

⁹ Ha'e gui SENHOR oenoī 'rā tetā pygua kuery. Ha'e ramo hi'arandu va'e kuery ma hery oendu vy ojererokyjea rupi 'rā ikuai. Ha'e gui ma SENHOR aipoe'i:

— Yvy regua kuery, pendu ke penerenoña.

¹⁰ Heko vai va'e ro py oī teri teve jokorea rupi ojou va'ekue, ha'e mba'emo ryru jokore aguā va'e?

¹¹ Xee amboeko porā 'rā teve mba'emo opejaa ha'eve'ŷ ramigua peiporu rā, e'ŷ vy poyia jokore aguā regua hyru gui penoē rā?

¹² Mba'eta tetā py oguerekopa rei va'e kuery jojukaa rupi anho ikuai, ha'e pygua kuery ha'e javi ijapu va'e meme, nhombotavya rupi anho ae 'rā ijayvu.

¹³ Ha'e rami rā xee rombojexavai 'rā, pejejavya káuxa aipe'apa 'rā pendegui.

¹⁴ Ha'e ramo mba'emo pe'u teī napenhandui 'rā, penderye py pendu riae 'rā penenhem-byayia. Penemba'e rei-rei pemoī porāmba teī ndapejouvei 'rā. Ha'e rā mba'emo pejou nho va'e ma xee amboaxa 'rā kyxe revegua pe.

¹⁵ Mba'emo penhotŷ teī napemono'ōi 'rā. Azeitona reumbiri teī azeite ndaperekoi 'rā pendejee peikyty va'erā. Uva voi peumbiri teī ndapey'ui 'rā vinho.

¹⁶ Mba'eta huvixa Onri ojapo uka va'ekue rupi rive pendekuai, Acabe ro pygua kuery ikuaiague ha'e nhomongetaa rami guive.[†] Ha'e nunga rupi xee romokanhymba 'rā. Peneretā ikuai va'e ajapo 'rā ojojai rei pyrā. Ha'e rami vy ajapo 'rā yvy regua kuery pendejou vai aguā rami.

7

Israel kuery opa marā ikuai re ijayvuague

¹ Nda'evei ete 'rā xevy, mba'eta xee ma kuaray puku jave mba'emo'a omono'ōmbaague rupi ndojouvei va'e rami aiko, ha'e rami e'ŷ vy uva omono'ōmbaa ma rire ivaikue anho ojou va'e rami avi, mba'eta nda'ipovei ma hi'a oipyte pyrā, neī figo jypygua ja'uxe vai va'e nunga voi.

² Mba'eta yvy gui okanhymba ma porayvu va'ekue. Avakue ikuai va'e regua peteīve jipoí heko porā va'erā. Pavē rei oma'ē mbegue 'rā okuapy jouguy omoē aguā. Peteī-teī ma kya py rami guyvy kuery ae ombo'aa rupi 'rā ikuai.

³ Ha'e kuery opo py ojapo 'rā mba'emo vai anho, onhea'ā 'rā guive ojapo ete peve. Huvixa ma nhombopagaxea rupi anho oiko, joe oikuua pota va'e kuery ma peráta re anho ojapo, yvatekueve ma ijayvu 'rā okuapy opy'a py ojapo vaixea oī va'e re. Ha'e rami vy peteī rami ete 'rā ikuai mba'emo vai apoa rupi.

⁴ Ha'e kuery va'e regua heko porāve va'e ma juu rami nhomoingo axy va'e, ha'evevea ramive merami ikuai va'e ma juuty gui nda'eveive va'e. Ha'e nunga rupi ovaē ma ára peneretā rarōa kuery omombe'u va'ekue, pejexavai aguā ára ae. Ovaē ma ha'e kuery ndoikuavei rei aguā.

⁵ Pejerovia eme peneirū re, pejerovia eme peneirū kuery re. Pejoko ke pendejuru pendepexo re ojero'a va'e pe eteve voi mba'eve pemombe'u e'ŷ aguā.

⁶ Mba'eta ta'y kuery ndoayvuvei 'rā nguu kuery, tajy kuery voi opu'ā 'rā oxy kuery rovai, ipi'a ra'yxy kuery voi ome xy kuery rovai 'rā opu'ā. Ha'e rami vy peteī-teī rovaigua kuery ma ngoo pygua ae 'rā ikuai.*

⁷ Ha'e rā xee ma ama'ē tema 'rā SENHOR re, arō 'rā Nhanderuete xereraa jepea. Ha'e ramo Xeruete oendu 'rā xeayvua.

Israel kuery omboaxy aguā re SENHOR ijayvuague

⁸ Ha'e gui xerovaigua kuery, pevy'a rei eme xere. Xee ha'a rire teī apu'ā ju 'rā. Pytū rupi aiko teī SENHOR omoexakā 'rā aikoa'i rupi.

[†] 6:16 Huvixave Onri ha'e Acabe ma pavē gui heko vaive va'e (1 Reis 16.25, 30). * 7:6 Mateus 10.35, Lucas 12.53

⁹ SENHOR pe ajejavy rire ajexavai 'rã ipoxya gui, teĩ xereko re oikuaa pota vy xemboeko porã peve'i. Ha'e rami vy xerenoẽ ju 'rã guexakãa py, ha'e ramo xee aexa 'rã ha'evea rami xererekoa.

¹⁰ Ha'e nunga xerovaigua okuapy oexa vy oendu 'rã oximbaa, xevy pe "Mamo tu SENHOR Nderuete oĩ?" he'i rire. Ha'e nunga oiko rã aexa 'rã xerexa py ae, tape rupi yapo oĩ va'e rami opyrõa ramo.

¹¹ Ha'e gui peneretã kora omoatyrõa jevya ára py penembotuvixave 'rã.

¹² Ha'e va'e ára ma penda py jogueru 'rã Assíria guive Egito peve ikuai va'ekue, ha'e Egito tetã guive Eufrates yakã peve, ye'ẽ guive ye'ẽ mboae peve, ha'e yvyty oĩa guive yvyty mboae peve ikuai va'ekue.

¹³ Ha'e rami teĩ pendeyvy omboavaipaa 'rã ha'e py ikuai va'e káuxa, ojapo vai rei rire.

¹⁴ Epena ke ndevygua kuery re ndepopoka py. Ha'e kuery ma nerymba rami ikuai. Ha'e kuery ae'i ikuai yvyraty reia rupi, yvy porã reia mbyte. Tove yma guare rami tokaru okuapy Basã ha'e Gileade yvy rupi.

¹⁵ — Ha'e ramo peẽ kuery pe xee aexa uka 'rã mba'emo porã, Egito yvy gui roguenoẽ jave guare rami — he'i.

¹⁶ Yvy regua kuery ha'e nunga oexa vy oximba 'rã okuapy ipo'akaa gui. Ojuru ojoko 'rã opo py, ijapyxa voi opyta 'rã oendu ve'ŷ va'e.

¹⁷ Mboi rami oere 'rã nhoguenoiny yvy ku'i. Mboi minha yvy rupi otyryry vy onhemiaque gui oryryipa reve oẽ va'e rami avi ha'e kuery voi oryryipa reve 'rã ojexa uka SENHOR Nhanderuete renonde, ixugui okyje vaipa reve.

¹⁸ Oreruete, mava'e tu oiko ndee rami ete? Ndee ma remboguepa 'rã orerekovaia que, nderexaraipa 'rã guive ndevygua kuery rokuave va'e orerekovaia que re. Mba'eta SENHOR nhomboaxyxe vai va'e vy riae e'ŷ 'rã oĩ ivaia.

¹⁹ Ha'e rami vy nhanemboaxy ju 'rã, opyrõmba 'rã nhanderekovaia que re, jajejavyague omombopa 'rã ye'ẽ typyvea py.

²⁰ Ha'e ramo Jacó kuery pe oexa uka 'rã anhetẽ rupi oikoa, Abraão kuery pe oexa uka 'rã omboaxy, yma guive nhaneramoĩ kuery pe ouraague rami vy.

Naum ayvu oĩa Naum ayvu oĩa

Profeta Naum oiko jave ma Assíria pygua kuery omongyje rei okuapy Judá kuery. Ha'e kuery ma nhomboaxy va'e'ŷ ha'e ipo'akapave va'e ikuai, oitypaxe guive Judá kuery. Mava'e 'rã tu ojoko Judá kuery omomba e'ŷ aguã? Naum ombovai: "Senhor Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe Senhor ipoxy vy ombopaga 'rã ija'e e'ŷ va'e. ... Senhor ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive" (1.2,6).

Ha'e rã Nhanderuete pegua kuery pe ma aipoe'i: "Senhor ma poroayvu va'e. Jajexavaia ára ma nhanhemi aguã oiko, mba'eta oikuua hexe onhemi va'e kuery ha'e javi", he'i (1.7). Ha'e nunga rupi mba'emo oiko tei jarovy'a 'rã Nhanderuete nhandere openaa.

Nhanderuete poxya ha'e nhomboaxy re ijayvua

¹ Nínive tetã pygua kuery rovai ayvu oĩa.* Kova'e kuaxia para re oĩ Elcos pygua Naum pe oexa uka pyre.

² SENHOR Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe SENHOR ipoxy vy ombopaga 'rã ija'e e'ŷ va'e.

³ SENHOR ma nda'ivai ma rei 'rã va'eri ipo'akapa va'e vy nomboeko porãi 'rã heko vai va'e. Yvytu jere ha'e yvytu atãa rupi SENHOR oguata va'e, ha'e arai re opyrõ 'rã yvy ku'i rupi rami.

⁴ Ye'ẽ pe ijayvu vy omboypa, yakã ikuai va'e voi omboypa kuaa va'e. Ha'e ramo Basã ha'e Carmelo yvy rupi ipirupa. Líbano yvy re yvoty ikuai va'e voi ixorimbã 'rã.

⁵ Henonde ma yvyty ikuai va'e oryryipa, yvy'ã ikuai va'e voi okanhymba. Henonde rupi yvy opu'ã 'rã ho'amy, yvy ha'e javi, ha'e yvy re ikuai va'e voi.

⁶ SENHOR ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive.

⁷ SENHOR ma poroayvu va'e. Jajexavaia ára ma nhanhemi aguã oiko, mba'eta oikuua hexe onhemi va'e kuery ha'e javi.

⁸ Ha'e rã Nínive tetã ma SENHOR omomba vyvoi 'rã, yy tuvixa va'e oua rami. Ngovaigua kuery oakykue monha 'rã pytû rupi.

⁹ Mba'exa tu penhembopy'a pekuapy SENHOR rovai? Ha'e ae 'rã penemomba vyvoi. Penembojexavaiarã ou vy peteigue'i pyve penemokanhymba 'rã.

¹⁰ Mba'eta peẽ kuery ma juuty mbyte py penhemimba, ha'e oka'u va'e rami vinho pendejee penhoëmba tei penemokanhymba 'rã mba'emo pirekue okaia rami.

¹¹ Nínive tetã pygua kuery, pendea gui peteĩ oo SENHOR rovai onhembopy'a va'e, ha'eve'ŷa rami nhomongeta va'e.

¹² Po rami SENHOR ijayvu:

— Penembaraete ha'e pendereta tei penemombaa 'rã. Ha'e rami vy pekanhymba 'rã. Xee ae 'rã rombojexavai, ha'e gui ma norombojexavaivei 'rã.

¹³ Ha'e gui peẽ Judá kuery, pende'áry gui ma amopëmba 'rã ha'e kuery canga omoĩ va'ekue. Amondopa 'rã ixã pendejokuaague.

* ^{1:1} Nínive tetã ma Assíria yvy regua tuvixave va'e. Ha'e katy Nhanderuete omondouka Jonas ojeko rerova aguã regua omombe'u aguã. Ha'e kuery ojeko rerova va'eri ha'ekue rami ae ikuai, nanhomboaxyi vy amboae regua omokanhymbaa rupi.

¹⁴ Ha'e rā peẽ Assíria pygua kuery, SENHOR ijayvuague rami vy nda'ipoavei 'rā peneramymimo kuery penderery rupi oenoī mbyrā. Penderuete ramigua kuery pegua oo gui ma amomba 'rā ta'angaa ikuai va'e, mba'emo ryku guigua guive. Penderekko vai ramo ajapo 'rā yvykua py penenhonoa aguā rami. — he'i.

¹⁵ Ne'exa, yvnty áry rupi ou oiny ayvu porā mombe'ua, pendekuai porā aguā regua omombe'u va'erā. Ha'e nunga rupi Judá kuery, pejapo ju ngaru, ha'e pejapo penhemboayyuague, mba'eta pendea py avakue heko vai va'e ndouvei ma 'rā. Ha'e va'e kuery ma omokanhymbaa ae ma.

2

Nínive tetāojokoa vy ipo'akaa ete aguā re ijayvuague

¹ Nínive tetā pygua kuery, ou ma oiny penemokanhyarā. Penhangareko oo ikorapa va'e re, pearō tape, pemombaraete pendekupe, pemono'õmba pendexondaro kuery tei.*

² (Ha'e rami avi SENHOR omoõmba ju 'rā Jacó kuery po'akaa, Israel kuery po'akaa omoõ ju 'rāa rami ae avi, imba'e rei-rei oguereko va'ekue oipe'apaa ha'e uva'y ikuai va'ekue ombovaipaa rire tei.)

³ Nínive pygua kuery va'e regua imbaraetekueve ma oguereko hu'y jokoa pytā va'e, avakue ipy'a guaxukueve ma pytā va'e py 'rā onhemonde, karóxa oguereko katupa ára py aço oĩ va'e overapa, hu'y guaxu voi overa rei va'e.

⁴ Tape ikuai va'e rupi karóxa oaxa-axa va'e ma oo atā, ha'e tetā mbyte rupi joaxa-axa 'rā inhakuā reve. Tataendy rami 'rā onha, overa va'e rami.

⁵ Ha'e pygua yvatekueve oenoī ukapaa va'eri ha'e kuery onhepyxangapa 'rā ouvy tape rupi. Tetā kora yvýry ovaẽ aguā ojapura jogueravy tei nhovaexi 'rā ngovaigua kuery ojerovia rei ha'e hembiporupa va'e reve.

⁶ Yakā jokoa ikuai va'e oipe'aa rā ombovaipa huvixa ro.

⁷ Nínive tetā ma huvixa kunha rami opyta va'ekue ri ijayvuague rami vy ixugui oipe'apaa mba'emo, ha'e pygua kuery escravo-rā ogueraapaa guive. Ha'e ramo hembiguai kunhataigüe apykaxu rami ojae'o okuapy opexo re oipete-pete reve.

⁸ Nínive tetā ma oiko ypy guive yy omboty pyre rami ae tema oĩ va'ekue ri aŷ ma okanhymba ma ovy. Ojapukai reve "Pepyta! Pepyta!" 'ea tei mava'eve ndojevyai.

⁹ Ha'e gui "Peipe'a na prata ha'e ouro oĩ va'e, mba'eta mba'emo omoõ porā mbyre ndogueraapaa teri. Oĩ reta teri opa mba'e oipotapy", 'ea.

¹⁰ Ha'e gui ma "Aikore! Mba'eve noïvei ma, ivipa va'e anho, ombovaipaa ma!" 'ea. Ha'e rami vy ha'e kuery py'a hykupa, henapy'ã ryryipa rei guive, pavē ryepy rupi ojexavaia anho oendu, ha'e javi rova xiïguepa rei guive.

¹¹ Mamo tu oĩ aŷ guary kuery kua ha'e ta'y'i kuery okaruaty? Mba'eta ha'e va'e rupi guary oiko-ikoaty, guary kunha ta'y'i reve mava'eve omondyi e'ŷ re oiko va'ekue.†

¹² Guary ojuka reta va'ekue gua'y kue'iry ho'u va'erā, guaĩ py ojuka va'ekue guary kunha pe omboja'o va'erā. Itakua oñaty omonyëmba va'ekue ojuka va'ekue-'ekue re'õgue, xo'o anho ikua rupi oĩ va'ekue.

¹³ SENHOR ixondaro reta va'e aipoe'i:

— Ne'exa, xee ma nderovai aiko. Ha'e rami vy aapypa 'rā ndekaróxa hataxí reta reve, kyxe py ajuka ukapa 'rā ndera'y kue'iry, ha'e ndeyvy gui aipe'a ukapa 'rā nerembia. Ha'e ramo noenduavei ma 'rā ndeayvu reraa kuery — he'i.

3

Nínive tetāombovaipaa aguā re ijayvuague

¹ Nda'evei ete 'rā tetā jouguy moña anho ikuiaia va'e pe. Ijapua ha'e mondaa tynȳ va'e, ha'e mba'emo oipe'aague oĩ riae!

* 2:1 Apy ma Nhanderuete omombe'u uka ma voi Nínive tetā re hovaigua kuery opu'ã okuapy 'rāa. † 2:11 Nínive tetā pygua huvixa kuery pe ma "Guary kuery" 'ea raka'e.

² Pendu ke: vaka pi revovo, karóxa ruéra ryapu, kavaju ou nhendua, ha'e karóxa oaxa nhendu va'e.

³ Ne'exa, kavaju árygua kuery ogueronha atā, kyxe hexakāmba, hu'y guaxu overapa, oikutu pyre heta ikuai, manogueaty, manogue opa e'ŷ va'e. Omanogue ikuai va'e re onhepyxangapaa rive.

⁴ Ha'e nunga ha'e javi ma kunha tavy reia iporā va'e káuxa. Ha'e va'e ma mba'evyky ja avi. Ovende amboae regua otavya py, oo pygua kuery ovende avi omba'evyky a.*

⁵ SENHOR ixondaro reta va'e aipoe'i:

— Ne'exa, xee aiko nderovai. Aupi 'rā ndetupyja hapy gui nderova áry peve. Ha'e rami vy amboae regua kuery pe aexa uka 'rā ndepire reia, ha'e tetā ikuai va'e pe aexa uka 'rā rexia.

⁶ Nde'áry amombo 'rā ha'eve'ŷ va'e, rombojaru rei 'rā, ha'e roeja 'rā pavē rembiexarā.

⁷ Ha'e ramo nderexaa kuery onhamba 'rā ndegui. Ha'e vy aipoe'i 'rā: “Nínive tetā ivaipa ma. Mava'e tu omboaxy 'rā? Magui tu ajou 'rā heronhemboaxyarā?” he'i 'rā.

⁸ Nínive tetā, ndee teve Nô-Amom gui ha'eveva va'e? Mba'eta ha'e va'e tetā ma Nilo yakā ha'e yyomboty pyre mbyte py oī va'ekue. Jovaive rupi yy oī. Ha'e rami vy tetā kora 'rāgue py ye'ē oī va'ekue hovaigua jokoarā.†

⁹ Etiópia ha'e Egito yvy pygua opa mba'e py oipytyvō aguā rami ikuai va'ekue. Pute ha'e Líbia yvy pygua voi ipytyvōarā ikuai avi va'ekue.

¹⁰ Ha'e rami teī ogueraapaa raka'e escravo-rā. Ta'y kuery voi ojukapa tape ojerea ikuai va'e rupi. Yvatekueve re oexaa okuapy xortea, ha'e ipo'akakueve voi ombo'apaa corrente py ojokua reve.

¹¹ Ha'e rami ae avi Nínive tetā, ndee voi neakanhy vy renhemi 'rā. Ndee reka avi 'rā nderovaigua kuery gui renhemi aguā.

¹² Ndea py oo ikorapa va'e ha'e javi ma ára pyau jave figo'a rami rive opyta. Mba'eta ombovavaa ramo rive ho'apa 'rā hi'uxea kuery juru py.

¹³ Ne'exa, ndea py xondaro kuery ikuai va'e ma kunhague rami meme opyta. Ndeyyv rupi tetā kora rokē ikuai va'e ojepe'apa 'rā nderovaigua kuery oikepa aguā, okē jokoa okaipa rire.

¹⁴ Penoē yy peneretā ojokoa jave guarā, pemombaraeteve pendero ikorapa va'e. Tapeo yapo py, pepyrō yapo hapomo rei re, yvy jykue ombojo'aague pemoatyrō aguā.

¹⁵ Ha'e rami teī penemomba 'rā tata py, kyxe py guive pendejukaa 'rā. Tuku rami 'rā penemokanhymba. Tuku rami pendereta, tuku-karu gui penderetave teī,

¹⁶ jaxy-tata yva re ikuai va'e gui mba'emo vendea kuery perekva'e hetave teī tuku-karu oike 'rā pendea py, ha'e gui oē ju 'rā oveve reve.

¹⁷ Pendereguia yvatekueve ma tuku rami ikuai, ha'e pendea py joe opena va'e kuery ma tuku tuvixakueve rami, mba'eta yro'y jave py onhemi 'rā oo mbotya re, va'eri kuaray yvate'i ramo ovevepa 'rā oje'oivy. Ha'e ramo ndoikuaavei 'rā ooague.

¹⁸ Ndee Assíria pygua huvixave, ndevygua joe opena va'e kuery oikepa okuapy, yvatekueve voi. Ndevygua kuery oaïmba ma yvy'ã ikuai va'e katy, ha'e ndoikoi imono'õ jevyarā.

¹⁹ Ndeai pegua moā ma ndoikoi, okuera e'ŷ va'erā ae. Nderekokue oendu va'e kuery ojepopetepa 'rā nderovai. Mba'eta ha'e javi regua re rembou va'ekue imoingo axyarā.

* 3:4 Nínive tetā pe ae “Kunha tavy reia” he'i profeta. † 3:8 Nô-Amom ma tetā guaxu Egito yvy re oī va'ekue ri Assíria pygua kuery ombovaipa raka'e.

Habacuque ayvu oĩa Habacuque ayvu oĩa

Profeta Habacuque ma ngovaigua kuery Babilônia pygua po py hetarã kuery ojexavai taa oikuua vy oporandu Nhanderuete pe: “Senhor, raka'e peve 'rã tu ndevy ajapukai teĩ ndee nerendui? Ndevy ajapukai vy ‘Joguero'a reia rupi ikuai!’ ha'e teĩ ndee ma ndorereraa jepei”, he'i (1.2). Ha'e ramo Nhanderuete ombovai vy ijayvu ojeupeguia kuery ombopaga aguã re. Ha'e va'e ayvu “ndoaxa rivei 'rã. Hare teĩ earõ tema, mba'eta anhetẽ ou 'rãe are e'ŷ re. Peikuaa pota ke onhemboyvate rei va'e kuery re! Ha'e kuery nhe'ẽ ma ha'eve e'ŷa rami oĩ. Ha'e rã heko porã va'e ma ojeroviaa rupi 'rã ikuai” (2.3b-4).

Nhanderuete nhombopaga aguã ára ou aguã Habacuque pe omombe'u ramo aipoe'i: “Ha'e nunga aendu vy anhemondyipa. Ndeayvua gui xerembe ryryipa. Xekâgue hu'ũmba rei, xerenapy'ã voi ikangypa. Ha'e rami teĩ akyrirĩ reve 'rã arõ aikovy jexavaia ára ovaẽ aguã, mba'eta ou 'rãe orere opu'ã rei va'e kuery áry. Xapy'a rei figo'y nda'ipoty porãi 'rã, ha'e uva'y re hi'a noĩ, oliveira ndai'a porãi, ha'e mba'ety rupi voi ja'u va'erã ndoikoi, vexa'i kuery oipe'apaa 'rã heravy ikora gui, ha'e vaka voi ikora py nda'ipovei teĩ, xee ma arovya'r riae 'rã Senhor, avy'a 'rã Nhanderuete xereraa jepea re”, he'i (3.16-18). Salmo py oĩa rami: “Pearõ ke Senhor. Pendekuerai eme, pendepy'a guaxu ha'e pearõ tema Senhor” (Salmo 27.14).

Judá kuery reko vaia re ijayvuague

¹ Kova'e ayvu ma profeta Habacuque pe oikuua uka va'ekue.

² SENHOR, raka'e peve 'rã tu ndevy ajapukai teĩ ndee nerendui? Ndevy ajapukai vy “Joguero'a reia rupi ikuai!” ha'e teĩ ndee ma ndorereraa jepei.

³ Mba'e re tu xevy pe rexia uka heko vaia, ha'e xeapo nhombojexavaia aexa aguã rami? Mba'eta xerenonde oĩ riae mba'emo mbovaipaa ha'e joguero'a reia. Jojoko-joko reia rupi ikuai, nhombojovake kuerei 'rã.

⁴ Ha'e nunga rupi lei rupi ve'ŷ joguerekao, ha'evea rami joguerekao ndojekuaavei ma. Heko vai va'e kuery heko porã va'e ojokopa rei ramo ha'eve'ŷa rami joguerekao.

Judá pygua kuery heko vai ramo Nhanderuete ombopaga uka aguã re ijayvuague

⁵ SENHOR aipoe'i:

— Pexa pota ha'vy yvy regua kuery re ajapo taa re. Pema'ẽ vy penhemondyipa rei 'rã peneakanhymba peve. Mba'eta peikove teri reve voi ajapo 'rã mba'emo, pendevy omombe'ua teĩ perovia va'erã nunga e'ŷ.*

⁶ Mba'eta ambou 'rã caldeu kuery. Ha'e va'e kuery ma nhomoingo axy etea ha'e ivai ja. Yvy ha'e javi rupi oguataa rupi oipe'apa 'rã okuapy amboae kuery rekoia.

⁷ Ha'e kuery ma nhomongyje ha'e ijavaeteve va'e. Ha'e kuery ae guekorã oeja, ha'e onhemboyvate rei okuapy.

⁸ Hymba kavaju kuery ma xivi para gui inhakuãve va'e. Kavaju árygua kuery voi guarý pytû rupigua gui inharõve va'e, opa rupi ogueronhaa rupi. Ha'e va'e regua kavaju árygua kuery mombyry gui ovaẽ xapy'a vy oveve merami jogueruvy, taguato ho'u va'erã re ho'a xapy'a va'e rami avi.

⁹ Ha'e kuery ma joguero'a reia rupi anho 'rã ou. Ngova re onhea'ã rei 'rã oove tema aguã, ha'e escravo-rã ojou va'ekue ma ita ku'i reia rami heta.

¹⁰ Ha'e kuery ma huvixave kuery mbojaru reia rupi ikuai. Yvatekueve teĩ ojojai rive 'rã okuapy. Ojojai avi 'rã oo ikorapa va'e ha'e javi, mba'eta yvy omboaty vy oipe'a kuaa.

¹¹ Ha'e gui yvytu oipejua rami oopa ju 'rã. Ipo ky'apa va'e meme, ha'e ae po'akaa pe rive “Nhanderuete” he'i guive.

* 1:5 Atos 13.41

Heta va'e kuery re profeta ojerureague

¹² Ha'e gui SENHOR Xeruete iky'a e'ŷ va'e, ndee ma jypy'i guiveguia e'ŷ teve reiko? Ha'e ramo ore kuery noromanoi 'rā. SENHOR, ndee reiporavo Babilônia pygua kuery orembopaga aguã ae. Xe'itaova, ndee ae rembou oremono'arandu aguã.

¹³ Nderexa ky'a e'ŷ va'e vy nda'evei mba'emo vai rexia aguã, nhombojexavaia re nda'evei rema'ẽ rive aguã. Mba'e re 'rā tu ha'vy nerembopagai anhetē rupi e'ŷ ikuai va'e, mba'e re rekyrirī 'rā heko vai va'e omokanhy ramo ha'e kuery gui heko porâve va'e?

¹⁴ Mba'e re tu remoingo uka avakue pira ye'ẽ rupigua rami, ha'e e'ŷ vy yvy rupi onhembotyryry va'e rami? Mba'eta ha'e va'e kuery ma nguvixa ndoguerekoi.

¹⁵ Mba'eta avakue ha'e javi re hovaigua kuery pinda reve opu'ã ovvy vy oguenoẽ atā 'rā. Pira mbo'aa py omono'õmba 'rā. Ha'e nunga anho ha'e kuery oguerovy'a vy ovvy'a rei 'rā okuapy.

¹⁶ Ha'e nunga rupi ombo'a pira mbo'aa pe ae 'rā ha'e kuery ome'ẽ mba'emo ombojeroviaa rupi, pira renoẽa pe rive 'rā oapy okuapy heakuã porâva'e. Mba'eta ha'e rupi ae 'rā ojouve tema ovvy. Ha'e rami vy guembi'u mba'emo kyrakue py omoirū reve 'rā ho'u okuapy.

¹⁷ Ha'e rami ete pira mbo'aa py ha'e kuery nhoguenoẽ tema 'rā teve? Nhomboaxya rupi e'ŷ ojuka tema 'rā teve yvy regua kuery?

2

SENHOR ombovaiague

¹ Ha'e gui xee ma apu'ã 'rā ha'amay aarõaty torre py. Oo ikorapa va'e áry aĩaty py ama'ẽ 'rā aikuua pota aguã ajerurea Nhanderuete ombovai vy mba'e he'i pa ra'ea re.

² Ha'e gui SENHOR xembovai vy aipoe'i:

— Embopara ndevy aexa uka ta va'e. Yvyrapo re emboparapa, onha reve oaxa va'e tei oexa kuaa aguã.

³ Mba'eta aexa uka va'e ma raka'e rā teri ojeupity va'erā, hi'ára py porâ. Oo pojava guive ojeupitypa aguã, ndoaxa rivei 'rā. Hare tei earõ tema, mba'eta anhetē ou 'rāe are e'ŷ re.

⁴ Peikuaa pota ke onhemboyvate rei va'e kuery re! Ha'e kuery nhe'ẽ ma ha'eve e'ŷa rami oñ. Ha'e rā heko porâva'e ma ojeroviaa rupi 'rā ikuai.*

⁵ Ha'e gui vinho nhombotavya rami ae avi onhemboyvate va'e kuery voi noñ riae 'rā. Ha'e kuery ho'upaxe vy ojuru oipe'a yvyra rupa rami, manoaa rami ae avi "Ha'eve ma" nde'i kuaai va'e. Ha'e kuery voi ojeupe guarã oguerupa 'rā yvy regua kuery, amboae regua ha'e javi re 'rā ipo'aka.

Caldeu kuery pe "Nda'evei ete 'rā pendekuai" he'iague

⁶ Ha'e nunga rupi ha'e kuery rovai amboae kuery ijayvu 'rā okuapy porojai va'e ayvu rupi. Ha'e vy aipoe'i 'rā okuapy:

"Nda'evei ete 'rā imondaague omboaty va'e pe, ha'e oreve va'ekue ombopagaa rupi rive oguerekopa va'e pe! Raka'e peve 'rā tu ha'e rami reiko?"

⁷ Mba'eta oreve va'e kuery opu'ãmba 'rā ndere. Ha'e kuery omyi vy nemondyipa xapy'a 'rā. Ha'e ramo mba'emo rereko va'e optya 'rā ha'e kuery oipe'apa va'erā.

⁸ Yvy regua heta va'e mba'e rei-rei reipe'apa rire amboae regua kuery ju oipe'apa 'rā ndea gui, avakue ruguy remoëague ha'e ijyvy rembovaipaague re, tetâ ha'e tetâ pygua kuery ha'e javi guive.

⁹ "Nda'evei ete 'rā jokorea rupi oipe'a va'ekue ngoo py omboaty va'e pe. Yvatea py renhemixe tei mba'emo vai gui reo jepe aguã.

¹⁰ Ndero pygua kuery oximba aguã rami rejapo. Heta regua remombaa py nenhe'ẽ pe ae rejapo vai.

¹¹ Mba'eta ndero mbotya re ita oñ va'e ae 'rā ijayvu nderovai, ha'e yvyra opyaxa va'e nemombe'u 'rā.

* 2:4 Romanos 10.17, Gálatas 3.11, Hebreus 10.37-38

¹² “Nda'evei ete 'rã jouguy moëa rupi rive guetã ojapo va'e pe, ha'e teko vai rupi omoï atã va'e pe.

¹³ Mba'eta SENHOR ixondaro reta va'e gui ae pov'a'e ou: Yvy re ikuai va'e ombo'epoia rupi mba'emo ojou va'ekue ma tata oapypa va'erã meme. Ha'e nunga rupi ha'e javi regua haxypa rive 'rã.

¹⁴ Mba'eta yvy jave re tynyẽ 'rã SENHOR rexakãa oikuaa va'e, ye'ẽ yy tynyãa rami avi.

¹⁵ “Nda'evei ete 'rã oirũ kuery omonga'upa va'e pe, ha'e vinho reve nda'evei va'e omoirũ vy oirũ kuery oxña oexaxe va'e pe.

¹⁶ Mba'eta nemboetepaa 'rãgue py reximb'a 'rã. Ndee voi rey'u 'rã ha'e nunga, ha'e rexa uka 'rã ndepire regua remboi uka e'ŷ va'ekue reikoa. Mba'eta ovaẽ 'rã ndee voi rey'u aguã karo SENHOR oiporu kuaa regua py ome'ẽ va'e gui. Ha'e ramo reximb'aa ojao'ipa 'rã ndepo'akaague.

¹⁷ Mba'eta Líbano yvy rembovaipaague rekovia ndeoal'i 'rã, mymba inharõ va'e re-jukaague regua voi nemongyje rei 'rã, avakue ruguy remoëague re, ha'e yvy, tetã ha'e tetã pygua kuery remokanhymbaague re guive.

¹⁸ “Mba'erã tu ovare mba'emo ra'angaa, ijapoia kuery ae ojapo rire? Ta'angaa mba'emo ryku guigua voi apu ja meme. Mba'exa 'rã tu ijapoare ojerovia ha'e ae ojapo va'ekue re, mba'eta ta'angaa ijayvu e'ŷ va'e rive ojapo rire?

¹⁹ “Nda'evei ete 'rã yvyra guigua pe rive ‘Evy ke!’ he'i va'e kuery pe, ha'e ita ijayvu e'ŷ va'e pe ‘Endu ke!’ he'i va'e pe guive. Ta'angaa rive nda'u nhanderekombo'e 'rã? Ne'exa, ouro ha'e prata py ojao'ipaa va'eri iguýry ma ipytuãa noĩ.

²⁰ Ha'e rã SENHOR ma ojeupegua templo iky'a e'ŷ va'e py oĩ. Tove yvy jave re ikuai va'e tokyririmba henonde.”

3

Nhanderuete pe Habacuque onhembo'eague

¹ Po rami ma profeta Habacuque onhembo'e mboraei ojapo reve.

² SENHOR, ndeayvua aendu vy
aendu avi anhemondyia.

SENHOR, ore kuery ára py ju ejapo ymave rupi rejapo va'ekue ramigua.

Ore'ára py ju ejapo ha'e nunga oikuaapaa aguã rami.

Ndepoxya ramive ma nema'endu'a avi ke renhomboaxy aguã re.

³ Nhanderuete ma ou oiny Temã gui,
Parã yvyty gui ou Iky'a e'ŷ va'e.
Hexakãa omonyẽ yva,

yvy voi tynyẽ ogueroporai va'e.

⁴ Hexakãa ma tataendy rexakã rami,
ipo gui ma nhemboxi ojekuaa,
opo'aka onhomiaque gui.

⁵ Guenonde rupi ombou mba'eaxy vaikue,
guakykue rupi voi nhomoingo axya omoingo.

⁶ Ha'e opyta vy rive ojapo yvy oryryipa aguã rami.
Oma'ẽ ho'amy vy rive ombojaity yvy regua kuery.
Ha'e ramo yvy jypyguva va'e iku'ipa,
yvy'ã oĩ riae 'rã va'ekue voi ho'apa.
Ha'e rã Nhanderuete oikoa ma imarã e'ŷ va'e.

⁷ Cusã yvy re aexa oguy py ikuai va'e ojexavai rã,
ha'e Midiã yvy re ijaty va'e kuery oryryipa.

⁸ SENHOR, yakã pe teve ndepoxy?
Yakã'i ikuai va'e pe teve,
e'ŷ vy ye'ẽ pe ndevai?
Mba'eta reguata reovy nerymba kavaju áry,

- ndekaróxa py reju ndepo'akaa rexa uka vy.
- ⁹ Nderapa renoẽ renhomiaque gui,
 nderu'y ryru ma tynyẽ vaipa.
 Yvy remboja'o yakã renhono vy.
- ¹⁰ Yvyty ikuai va'e nderexa vy ojero'a okuapy,
 ha'e vy ojapo yvy'ã guy katy yy oxyry atã aguã rami.
 Ye'ẽ voi typyvea guive hevovo nhendu,
 ha'e yvate katy oupi opo.
- ¹¹ Kuaray ha'e jaxy ma oĩa py ae opyta
 nderu'y onhe'ẽ ový va'e hexakãmba rã,
 ha'e nderu'y guaxu hexakã va'e overa gui.
- ¹² Rejou vaia rupi reguata reovy yvy jave rupi,
 ndepoxya rupi repyrõmba yvy regua kuery re.
- ¹³ Ndejeupegua kuery reraa jepe vy ae reo,
 huvixarã remoõ va'ekue reraa jepe aguã.
 Ha'e rami vy rembovaipa heko vai va'e kuery ro ao'ia,
 hoo yta voi remboipa.
- ¹⁴ Nderovaigua xondaro kuery ru'y py ae reikutu inhakã rupi,
 ha'e kuery yvytu atã rami xemokanhya aguã ou jave.
 Ovy'a reve ou va'ekue nhemi rupi iporiaukue'i omokanhymbaa rami.
- ¹⁵ Ha'e gui ndee ma ye'ẽ áry rupi reguata rejuyv nerymba kavaju kuery reve,
 yy oje'apa va'e rupi ae.
- ¹⁶ Ha'e nunga aendu vy anhemondyipa.
 Ndeayvua gui xerembe ryryipa.
 Xekãgue hu'ũmba rei,
 xerenapy'ã voi ikangypa.
 Ha'e rami teĩ akyrirĩ reve 'rã arõ aikovy jexavaia ára ovaẽ aguã,
 mba'eta ou 'rãe orere opu'ã rei va'e kuery áry.
- ¹⁷ Xapy'a rei figo'y nda'ipoty porãi 'rã,
 ha'e uva'y re hi'a noĩ,
 oliveira ndai'a porãi,
 ha'e mba'ety rupi voi ja'u va'erã ndoikoi,
 vexa'i kuery oipe'apaa 'rã heravy ikora gui,
 ha'e vaka voi ikora py nda'ipovei teĩ,
- ¹⁸ xee ma arov'y a riae 'rã SENHOR,
 avy'a 'rã Nhanderuete xereraa jepea re.
- ¹⁹ SENHOR Nhanderuete ma anhemiaty oĩ.
 Ha'e ojapo xepy oĩ atã aguã rami guaxu rami ae,
 yvate rupi aiko aguã.
 Jogueroporaei va'e pe ombopara pyre, mbaraka ixã va'e py ombojoguy reve guarã.

Sofonias ayvu oĩa Sofonias ayvu oĩa

Profeta Sofonias omombe'u Nhanderuete ombopaga ete aguã Judá ha'e Jerusalém py ikuai va'e, mba'eta aipoe'i: “Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal pegua ra'angaa pegua ha'e javi, ta'angaa pe mba'emo ome'ẽ va'e rery, ta'angaa pegua sacerdote ikuai va'ekue guive”, he'i (1.4). Ha'e pygua kuery anho e'ŷ ombopaga 'rã. “Ha'e nunga rupi Senhor aipoe'i: ‘Xerarõ ke pekuapy, anhomokanhymba aguã apu'ãa ára peve. Ha'e rami vy amboatypa 'rã peteĩ-teĩ regua, ha'e kuery re xeayvu vaiague amoingo aguã, xepoxya ha'e javi guive. Mba'eta tata py amomba 'rã kova'e yvy ha'e javi, nda'evei etea aexa uka vy’”, he'i (3.8).

Ha'e rã hexe ojerovia va'e kuery pe ma aipoe'i: “Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendepy'a ha'e javi py, pevy'a. Mba'eta Senhor omboguepa ae ma pepaga aguã va'ekue, omoxẽ ma guive penderovaigua kuery. Penembyte oĩ Senhor Israel kuery ruvixa va'e. Ha'e ramo mba'emo vai ndouwei ma 'rã pexa aguã”, he'i (3.14-15).

Judá ha'e Jerusalém pygua kuery rovai ijayvuague

¹ SENHOR oayvu Sofonias pe ombou va'ekue. Ha'e va'e ma Cusi ra'y, Cusi ma Gedalias ra'y, Gedalias ma Amarias ra'y, ha'e Amarias ma Ezequias ra'y. Amom ra'y Josias Judá pygua huvixa oĩ jave py oayvu ombou.

² Ha'e vy SENHOR aipoe'i:

— Anhetẽ ete, amomba 'rã yvy re ikuai va'e ha'e javi.

³ Amomba 'rã avakue ha'e mymba, guyra yvate rupi oveve va'e ha'e pira ye'ẽ rupigua. Amomba avi 'rã nhomboeko ky'aa rupi ikuai va'e, heko vai reve. Yvy gui amokanhymba 'rã avakue — he'i SENHOR.

⁴ — Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal ra'angaa pegua ha'e javi, ta'angaa pe mba'emo me'ẽa kuery rery, ta'angaa pegua sacerdote ikuai va'ekue guive.

⁵ Amomba avi 'rã oo áry yva re ikuai va'e mbojeroviaa kuery, ha'e SENHOR ombojerovia vy hexe oura reve tuuete ramigua Milcom re voi oura avi va'e.

⁶ Amomba avi 'rã SENHOR gui ojepe'a va'e, ha'e SENHOR oeka e'ŷ, neĩ ixupe noporandui va'e kuery guive — he'i.

SENHOR opoxya oexa uka aguã ára re ijayvuague

⁷ Pekyrirĩ SENHOR Nhanderuete renonde, mba'eta ovaẽ rai'i ma SENHOR ára. Mba'eta SENHOR oguerekat mba'emo ojuka vy ixupe ome'ẽa aguã, oiky'a'opa ma guive ha'e py ou aguã oenoĩ va'ekue.

⁸ SENHOR aipoe'i:

— Ha'e va'e ára ma ambopaga 'rã joe opena va'e, huvixave ra'y kuery, ha'e amboae regua ao py onhemonde va'e ha'e javi.

⁹ Ha'e va'e ára ambopaga avi 'rã ta'angaa pegua opy oike va'e ha'e javi, ha'e opatõ kuery ro py jojukaa ha'e jokorea rupi rive ikuai va'e.

¹⁰ Ha'e va'e ára peteĩ haxẽ va'e onhendu 'rã Pira vendeaty rokẽ oĩa guive, ojae'o nhendu 'rã tetã yvy'ã guyve rupi guive, hevovo rei nhendu 'rã yvy'ã'i ikuai va'e guive — he'i SENHOR.

¹¹ — Mactés tetã pygua kuery, peneraxẽ avi, mba'eta Canaã yvy pygua kuery ha'e javi omokanhymbaa ma, prata opeja va'e kuery guive omombaa.

¹² Ha'e va'e jave ma Jerusalém tetã ha'e javi rupi aikuua pota 'rã aikovy tataendy reve, ambopaga aguã avakue vinho gui oka'upa rei vy opy'a py “ SENHOR ma iporã va'e moingoa e'ŷ, neĩ mba'emo vai omoingo va'e'ŷ guive”, he'i va'e kuery.

¹³ Ha'e nunga rupi ha'e kuery mba'e rei-rei oipe'apaa 'rā, hoo ombovaipaa 'rā guive. Ha'e kuery ngoorā ojapo ju teī noī 'rā ha'e py, uva onhoty teī ndoy'ui 'rā vinho.

¹⁴ Ovaē rai'i ma SENHOR ára ijavaete va'e. Ovaē rai'i ma, ou atā oiny. Pejapyxaka ke! SENHOR ára ma nhomoingo axy aguā, avakue ipo'akapa va'e voi haxēmba rei aguā guive.

¹⁵ Ha'e va'e ára ma opoxya oexa uka rā ojexavaia aguā ára, nda'ikuai kuaavei rei ha'e okanhymbaa aguā ára, pytū vaikue rei ete 'rā, arai ha'e pytū vaipaa ára,

¹⁶ mimby guaxu omonhe'ea aguā, ha'e gui tetā ikorapa va'e ha'e torre yvateve va'e re opu'ā va'e kuery ojapukai aguā ára.

¹⁷ SENHOR aipoe'i:

— Avakue ikuai va'e re ambou 'rā imbojexavaiarā. SENHOR rovai ha'e kuery ojejavy rire ára revegua e'ŷ rami 'rā ikuai. Ha'e kuery ruguy onhoēa 'rā yvy ku'i rami, ha'e rā ho'okue ma mba'emo repoxi rami 'rā omomboa — he'i.

¹⁸ Ha'e kuery prata ha'e ouro oguereko va'ekue ma SENHOR opoxya oexa ukaa ára ndogueraa jepet'i 'rā. Mba'eta nda'evei etea rupi yvy ombovaipa 'rā tata nhombopagaarā py. Anhetē ete omokanhymba vyvoi 'rā yvy re ikuai va'e ha'e javi.

2

Filisteu kuery rovai ijayvuague

¹ Peē pexī kuaa e'ŷ va'e, penhemboaty ke ha'e peikuua pota porā penderekō re,

² oa'angaague ára ovaē e'ŷ mbove, mba'eta ha'e va'e ára ou ma oiny mba'emo pirekue oveve ovya rami. Pende'áry SENHOR opoxya oexa uka aguā ou e'ŷ mbove peikuua pota pendejee, tá, pendere ou e'ŷ mbove SENHOR opoxya oexa uka aguā ára.

³ Ha'e gui peē yvy re peiko rive'ia rupi SENHOR ayvu pejapopa va'e, peka pota ke SENHOR. Teko porā rupi pota ke pendekuai, peiko rive'ia rupi reve. Ha'e rami rā SENHOR poxya ára py xapy'a rei penenhomī 'rā.

⁴ Mba'eta Gaza tetā ma oejaā 'rā, Asquelom voi opyta 'rā tekao e'ŷa. Asdode gui ma kuaray mbyte jave py omoēmbaa 'rā, ha'e Ecrom gui ma oipe'apaa 'rā.

⁵ Nda'evei ete 'rā Quere pygua kuery ye'ě yvýry ikuai va'e pe. Ha'e gui ndee Canaā yvy filisteu kuery ikuia, nderovai SENHOR ijayvu vy "Xee romomba 'rā, hekoa va'ekue ndoikoavei peve", he'i 'rā.

⁶ Ye'ě yvýry ma opyta 'rā nhuñdy vexa'i okaru atyrā rive, vexa'i re opena va'e rekoarā, ha'e vexa'i kuery kora oī aguā.

⁷ Ye'ě yvýryguia ma Judá kuery mba'erā opyta 'rā. Ha'e py omongaru 'rā guymba kuery, ha'e ka'aru nhavō onhenomba 'rā Asquelom tetā py oo ikuai va'e py, mba'eta ha'e kuery re SENHOR Tuuete oikuua pota vy ombopyau 'rā ikuia.

Moabe ha'e Amom pygua kuery rovai ijayvuague

⁸ — Xee aendu ma Moabe pygua kuery nhombojaru reia rupi ijayvu va'e, Amom pygua kuery jojojai reia guive. Xevygua kuery rovai ijayvu rei okuapy, ijyvy re guive.

⁹ Ha'e nunga rupi anhetē ete xee ae rekove rupi aura vy aipoa'e: Moabe opyta 'rā Sodoma tetā rami, ha'e Amom pygua kuery ma Gomorra pygua rami 'rā opyta, pynondyrā, ygua juky rei va'erā ha'e ombovaipa pyre raka'e rā peve guarā. Ha'e rā xevygua kuery rembyrekue ma mba'emo oipe'apa 'rā ha'e gui, xevygua kuery okuave va'e ojopy 'rā ombo'erā — he'i SENHOR ixondaro reta va'e, Israel kuery Ruete.

¹⁰ Ha'e kuery re ha'e nunga oiko 'rā onhemboyvate reiague re, mba'eta ojojai reia rupi onhemboyvate rei okuapy SENHOR ixondaro reta va'e pegua kuery rovai.

¹¹ Ha'e ramo ha'e kuery rovai SENHOR oexa uka 'rā oavaetea, yvy gui tuuete ramigua ikuai va'e omokanhymba vy. Ha'e rami rire yy pa'ū rupi ikuai va'e kuery ombojerovia 'rā okuapy, peteī-teī guekoia py ae.

Etiópia ha'e Assíria pygua kuery rovai ijayvuague

¹² Ha'e gui peē Etiópia pygua kuery ma pendejukapaa 'rā SENHOR guigua kyxe py.

¹³ Kuaray ijapu'a'ia katy opo oupi vy ombovaipa avi 'rā Assíria yvy. Ha'e rami vy Nínive tetā ombovaipa ramo yvy piru reia 'rā optya mba'eve jipovei rā.

¹⁴ Ha'e va'e tetā mbyte py vexa'i kuery optyu'u 'rā okuapy, mymba kuery mboae ijaty avi 'rā. Oo ytkue ikuai va'e áry ma oko guaxu ha'e ku'i onhemboauty 'rā. Janelia ikuaiague rupi onhendu 'rā guyra nhendua, ha'e rā okē py ma yty rive 'rā optya, yvyrage yary guigua oipe'apaa rire.

¹⁵ Ha'e va'e tetā py ma ov'y'a rei ha'e okyjea rupi e'ŷ ikuai va'ekue. Ha'e pygua kuery ojeupe ae "Xee ma petei'i va'e aiko, xee rami etegua jipoi avave", he'i va'ekue. Ha'e rami tei tetā ombovaipa pyre optya, ka'aguy rupigua optyu'u atyrā rive! Oaxa va'e kuery ojojai reia rupi otuvy nhe'ê ha'e okuave'ê 'rā jogueravy.

3

Jerusalém pygua kuery re ijayvuague

¹ Ha'e gui nda'evei ete 'rā nhomoingo axya kuery retā pe, mba'eta nonhe'ê rendui ha'e iky'apa va'e ikuai.

² Ha'e kuery ma nomboetei avave rei, onhemo'arandu ukaxe e'ŷ va'e, SENHOR re ojerovia e'ŷ va'e, neñ Nguuete re onhembojaxe e'ŷ va'e.

³ Ha'e pygua yvatekueve ma guary okororõ va'e rami joguerek. Nhomboayvua kuery ma aguara'i pytū guýry joguero'aa rami ikuai, ikâgue rive'i ma voi ko'ëgue jevy guarã ndoejai va'e rami.

⁴ Ha'e pygua profeta kuery voi hi'arandu e'ŷ va'e, anhetê rupi e'ŷ ikuai va'e meme. Ha'e pygua sacerdote kuery ma omongy'apa 'rā oo iky'a e'ŷ va'e, lei rupi e'ŷ ikuai vy.

⁵ Ha'e rā SENHOR ma heko porā ete va'e oiko ha'e kuery mbyte, teko vai ojapo va'e'ŷ. Ko'ë nhavõ 'rā oexa uka teko porā rupi oikoa. Ha'e ma ndojapo e'ŷi oayvuague. Ha'e rā heko vai va'e kuery ma noxí kuaai.

⁶ Ha'e nunga rupi SENHOR aipoe'i:

— Amokanhymba yvy regua, ha'e kuery pegua torre ikuai va'ekue voi ambovaipa ma. Hetā mbyte rupi ajapo noñavei aguã rami, ha'e rupi oaxa va'erā jipoi ramo. Ha'e kuery retā ikuai va'ekue ambovaipa ma, mava'eve ete noñavei aguã.

⁷ Ha'e rire xee aipoa'e: "Aŷ ma ri nhi'ã peñ kuery xerenonde pejererokyjea rupi 'rā pendekuai, xevy pe penhemo'arandu uka 'rā guive, penderekao ombovaipaa e'ŷ aguã, ambovaipa aguã re xeayvu tei", ha'e. Ha'e rami tei ha'e kuery ko'ë rai reve ov'y vy onhemongy'apa reive okuapy.

Jerusalém pygua kuery ogueraa jepe aguã re ijayvuague

⁸ Ha'e nunga rupi SENHOR aipoe'i:

— Xerarõ ke pekuapy, anhomokanhymba aguã apu'ãa ára peve. Mba'eta xepy'a re amoñ yvy regua kuery amono'õmba aguã. Ha'e rami vy amboatypa 'rā petei-tei regua, ha'e kuery re xeayvu vaiague amoingo aguã, xepoxyha'e javi guive. Mba'eta tata py amomba 'rā kova'e yvy ha'e javi, nda'evei etea aexa uka vy.

⁹ Ha'e gui ma yvy regua kuery pe ame'ê ju 'rā ijuru iky'a e'ŷ va'erā, SENHOR rery rupi ojapukai ha'e hexeve petei rami ikuai aguã.

¹⁰ Ha'e ramo Etiópia yvy regua yakã ikuai va'e rovai rupi ikuai avi xemboetea kuery, amoñmba va'ekue ramymino kuery. Ha'e va'e kuery voi xevy pe ogueru 'rā ome'ê va'erā.

¹¹ Ha'e va'e ára xee noromoximbai 'rā mba'emo pejapoague gui, naxenhe'ê rendui rire tei. Mba'eta penembyte gui aipe'apa 'rā onhemboyvatea rupi ov'y'a rei va'e. Ha'e rami rire napenhemboyvatei ma 'rā xevygua yvyty iky'a e'ŷ va'e áry.

¹² Ha'e rami 'râgue py penembyte aeja 'râ ikuai rive'i ha'e onhemo'yvy'i kuaa va'e, xee SENHOR rery rupi ojerovia va'erā.

¹³ Ha'e ramo Israel kuery rembyrekue ndojejavyvei ma 'râ, neñ nda'ijapuvei ma 'râ. Ha'e kuery juru py noñivei 'râ apekñ nhombotavya rupi ijayvu va'e, mba'eta arupa 'râ mymba kuery nhuñdy rupi onhenomba va'e rami ikuai aguã, ha'e jipoavei 'râ imondiyarâ.

¹⁴ Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendepy'a ha'e javi py, pevy'a.

¹⁵ Mba'eta SENHOR omboguepa ae ma pepaga aguã va'ekue, omoxẽ ma guive penderovaigua kuery. Penembyte oĩ SENHOR Israel kuery ruvixa va'e. Ha'e ramo mba'emo vai ndouvei ma 'rã pexa aguã.

¹⁶ Ha'e va'e ára py Jerusalém pe aipo'ea 'rã: “Sião pygua kuery, pekyje eme. Pemoe'õgue eme pendejyva.

¹⁷ Mba'eta penembyte rupi oiko SENHOR Penderuete. Ha'e ma ipo'akapa va'e pendereraa jepe aguã, pendererovy'a ete 'rã guive. Penderayvua rupi vy penembopyau 'rã, pendererovy'a 'rã oporaeia rupi”, 'ea 'rã.

¹⁸ SENHOR aipoe'i:

— Xevygua ngaru oiko aguã py ndoo reguai vy iporiaupa va'ekue ma xee arupa ju 'rã. Ha'e va'e kuery ma pendereguia ae teĩ ojojai poyi pyrã ikuai va'ekue.

¹⁹ Ne'exa, ha'e va'e jave py ambopagapa 'rã penembojexavaiare kuery. Ha'e rã oguata vaikue'i va'e ma xee araa jepe 'rã, omoxẽ mbyre arupa ju 'rã. Ha'e rami vy ha'e kuery ajapo 'rã omboetepaa ha'e hery re ima'endu'aa aguã rami, yvy ha'e javi oximba rei okuapyague nhavõ rupi ae.

²⁰ Ha'e va'e jave py xee roguerupa vy romono'õmba ju 'rã. Ha'e rami vy anhetẽ ete ajapo 'rã yvy regua kuery ha'e javi gui penderery re ima'endu'a porãave ha'e penemboeteave aguã rami, pexaa py pendekuaia ambopyau ramo — he'i SENHOR.

Ageu ayvu oĩa Ageu ayvu oĩa

Israel kuery Babilônia py escravo-rã heraapaague gui Jerusalém tetã py ju ojevy teĩ nomoatyrõi ranhe Nhanderuete pegua templo. Ha'e ramo “Po rami ijayvu Senhor ixondaro reta va'e: Kova'e kuery aipoe'i: ‘Novaẽi teri Senhor pegua oo jajapo ju aguã’, he'i okuapy. Ha'e nunga rupi profeta Ageu pe Senhor oayvu ombou vy aipoe'i: ‘Ha'evea rami teve xevyguia oo ivaipa oiny teri reve peẽ kuery ro yvyrape py penhovã porãmba va'ekue py peĩ aguã? Ne'exa ha'vy. Po rami ijayvu Senhor ixondaro reta va'e: Peikuaa pota nho ke pendere mba'emo oiko va'e-va'e re. Mba'eta mba'emo penhotõ vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri y'uvei. Penhemonde va'eri peteïve henda py napenderete rakui. Peráta'i pejou va'eri pendevoko opukue py merami pemboyrú”, he'i (1.2-6). Mba'eta Nhanderuete oipota raka'e ha'e kuery omoatyrõ ixupequa templo, peteĩ-teĩ ngoo anho e'ŷ.

Nhanderuete re nhanema'endu'a e'ŷ re nhandejeupe guarã re anho nhanhea'ã aguã nda'evei, Nhanderuete nanhanemoingo porãi 'rã guive. “Ha'e rami 'rãgue py jypy'i peka 'rã ipo'akaa ha'e ixuguigua teko porã. Ha'e ramo 'rãe peikotevã va'e ha'e javi ome'ẽ avi pêvy” (Mateus 6.33).

Guetarã kuery pe Ageu ijayvuague templo ojapo ju aguã re

¹ Mokoĩ ma'etõ re ma huvixa Dario oĩ jave, mboapy meme jaxyia, ijypy'ia ára py ma SENHOR ombou oayvu. Profeta Ageu rupi ombou Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe guive. Ha'e vy aipoe'i:

² — Po rami ijayvu SENHOR ixondaro reta va'e: Kova'e kuery aipoe'i: “Novaẽi teri SENHOR pegua oo jajapo ju aguã”, he'i okuapy.*

³ Ha'e nunga rupi profeta Ageu pe SENHOR oayvu ombou vy aipoe'i:

⁴ — Ha'evea rami teve xevyguia oo ivaipa oiny teri reve peẽ kuery ro yvyrape py penhovã porãmba va'ekue py peĩ aguã?

⁵ Ne'exa ha'vy. Po rami ijayvu SENHOR ixondaro reta va'e: Peikuaa pota nho ke pendere mba'emo oiko va'e-va'e re.

⁶ Mba'eta mba'emo penhotõ vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri yuvei. Penhemonde va'eri peteïve henda py napenderete rakui. Perata'i pejou va'eri pendevoko opukue py merami pemboyrú.

⁷ Po rami ijayvu SENHOR ixondaro reta va'e:

— Peikuaa pota ke pendere mba'emo oiko va'e-va'e re.

⁸ Aŷ ma tapeo, yvyty gui Peru yvyra xevyguia oorã pejapo aguã. Ha'e va'e ma arovya'a 'rã, xemboyvatea 'rã guive — he'i.

⁹ SENHOR ixondaro reta va'e aipoe'ive ju:

— Mba'emo pemono'õ va'erã pearõ reta teĩ mbovy'i ete oiko. Ha'e gui mbovy'i va'ekue pendero py peraa ramo ma xee aipeju vy rive amoaimba imondovy. Mba'e re tu oiko ha'e rami? Mba'eta xevyguia oo ivaipa teri oiny, ha'e rã peẽ kuery peteĩ-teĩ pendero re anho nda'eveive peovy.

¹⁰ Ha'e nunga rupi ae yva gui nda'okyvei pende'áry, ha'e yvy gui voi mba'eve ndoikoi.

¹¹ Pendeyvy ha'e yvyty ikuai va'e rupi amombirupa. Mba'emo aju ikuai va'e re, vinho, azeite, ha'e yvy gui mba'emo oiko 'rã va'ekue ha'e javi re ambou ipirupa aguã, avakue re guive, mymba kuery ha'e pendepo py pejapo va'e ha'e javi re guive.

Heta va'e kuery SENHOR onhe'ẽ rendu okuapyague

* ^{1:2} Ha'e va'e e'ŷ mbove ma Nhanderuete pegua oo ha'e kuery ojapo aguã omboypy teĩ hovaigua kuery omombytu'u ojapopa ete aguã gui (Esdras 3.8-4.5, 24). Ha'e gui apy ma Ageu rupi Nhanderuete ijayvu ojapopa ete aguã re.

¹² Ha'e ramo Salatiel ra'y Zorobabel ha'e Jozadaque ra'y sacerdote yvateve va'e Josué onhe'ẽ rendu okuapy SENHOR Nguuete heta va'e kuery ha'e javi reve, profeta Ageu pe SENHOR oayvu omombe'u uka va'ekue ojapopa vy. Ha'e rami vy ha'e kuery ojererokyjea rupi ikuai SENHOR renonde.

¹³ Ha'e gui SENHOR remimbou Ageu ijayvu heta va'e kuery pe. SENHOR ijayvuague omombe'u vy aipoe'i:

— SENHOR aipoe'i: “Xee aiko peẽ kuery reve”, he'i.

¹⁴ Ha'e rami vy SENHOR omokyre'ŷ Salatiel ra'y Judá pygua huvixa Zorobabel ha'e Jozadaque ra'y sacerdote yvateve va'e Josué, heta va'e kuery ha'e javi guive. Ha'e ramo ha'e kuery oupa vy onhemoi ju okuapy oo ojapoa rupi Nguuete SENHOR ixondaro reta va'e peguarã.

¹⁵ Mboapy meme jaxya ha'e vinte e quatro araa py ma ha'e rami ikuai.

2

Mokoia templo omoexakã aguã re Nhanderuete ijayvuague

¹ Ha'e gui mokoõ ma'etŷ re ma huvixa Dario oĩ jave py, sete jaxya ha'e vinte e um araa py profeta Ageu pe SENHOR ombou ju oayvu. Ha'e vy aipoe'i:

² — Ndeayvu ke aŷ Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe, ha'e heta va'e kuery ha'e javi pe guive. Ha'e vy aipo're:

³ “Mava'e peẽ kuery aŷ peve pekuave va'e regua pa pexa raka'e kova'e oo jypy guare iporãmba teri jave? Ha'e gui aŷ ma mba'exa tu pexa? Mba'everã ndovarevei va'e rami e'ŷ teve optya aŷ?”

⁴ Ha'e rami tei po rami aŷ SENHOR ijayvu: “Zorobabel, ndepy'a guaxu ke. Jozadaque ra'y sacerdote yvateve va'e Josué, ndee voi ke ndepy'a guaxu. Ha'e heta va'e kuery pendeyvy re pendekuai va'e voi ke pendep'y'a guaxu pemba'epo aguã, mba'eta peẽ kuery reve xee aiko”, he'i SENHOR ixondaro reta va'e.

⁵ “Egitó yvy gui pejupa jave xereve guarã ajapo va'ekue rami vy Xenhe'ẽ oiko 'rã penembyte rupi. Pekyje eme ha'vy.”

⁶ Mba'eta po rami ijayvu SENHOR ixondaro reta va'e: “Teigue ju amboryryipa 'rã yva ha'e yvy, ye'ẽ ha'e yvy yy e'ŷa guive.*

⁷ Amboryryi 'rã yvy regua ha'e javi. Ha'e ramo yvy regua ha'e javi oguerupa 'rã mba'emo ojou porãve va'e. Ha'e rã kova'e oo xee amonyẽmba 'rã hexakã va'e”, he'i SENHOR ixondaro reta va'e.

⁸ “Prata ha'e ouro oĩ va'e ma xemba'e meme”, he'i SENHOR ixondaro reta va'e.

⁹ “Kova'e oo ma jypy guare gui hexakãmbave 'rã. Ha'e rami vy kova'e henda re ambou 'rã pendekuai porã aguã”, he'i SENHOR ixondaro reta va'e.

Heta va'e kuery ndoyeroviai ramo ijayvu eteague

¹⁰ Ha'e gui mokoõ ma'etŷ re ma huvixa Dario oĩ jave py, nove jaxya ha'e vinte e quattro araa py SENHOR peteigue ju oayvu ombou profeta Ageu pe. Ha'e vy aipoe'i:

¹¹ — Po rami ijayvu SENHOR ixondaro reta va'e: Eporandu ke sacerdote kuery ikuai va'e pe lei re oĩ va'e re. Ha'e vy aipo're:

¹² “Xapy'a rei amongue xo'o iky'a e'ŷ va'erã omboaxa pyre onhovãa 'rã heravy oao py. Ha'e gui xapy'a rei xo'o ombouya rive 'rã mbojape, tembi'u ombojy pyre, vinho ryru, azeite ryru, ha'e'ŷ vy tembi'u oĩ va'e re rei. Ha'e rami rã ha'e va'e tembi'u voi nda'u optya 'rã iky'a e'ŷ va'e?” 're.

Ha'e rami sacerdote kuery pe aporandu rã ombovai:

— Any — he'i okuapy.

¹³ Ha'e ramo Ageu oporanduve ju:

— Ha'e gui xapy'a rei amongue mba'emo re'õgue re opoko vy ha'eve'ŷ va'e optya rire ma kova'e nunga iky'a e'ŷ va'e re ju ojopy 'rã. Ha'e rami rã kova'e nunga ju nda'u optya 'rã ha'eve'ŷ va'e?

* 2:6 Hebreus 12.26-27

Sacerdote kuery ombovai:

— Tá, opyta 'rã ri ha'eve'ŷ va'e — he'i.

¹⁴ Ha'e ramo Ageu aipoe'ive ju:

— SENHOR aipoe'i: “Ha'e rami ae avi kova'e kuery ikuai, mba'eta kova'e regua ma ha'eve'ŷ va'e meme ikuai xerenonde. Ha'e rami ae ju opyta opo py mba'emo ojapo va'e, xevy pe ome'ẽ va'e voi. Iky'a va'e meme opyta.”*

¹⁵ Aŷ ma peikuua porã pota ha'e va'e ára jave guive pendere oiko va'ekue ha'e javi re. Mba'eta templo SENHOR peguarã pejapo aguã ita pembojoja ypy e'ŷ mbove,

¹⁶ ha'e va'e jave e'ŷ mbove ma vinte ryru mba'emo pemoõ porãague py peo vy dez ete'i 'rã pejou va'ekue. Vinho voi cinqüenta ryru pemboyruague py peo peraa aguã vy ma vinte ete'i 'rã pejou va'ekue.

¹⁷ Ha'e rami avi peẽ kuery re xee ambou yvytu raku, mba'emo ru'ũ ha'e amandau, pendepo py pejapo va'e ha'e javi áry. Ha'e ramive ma peẽ kuery neĩ peteĩve ndapejeko rerovai xevy guarã”, he'i SENHOR.

¹⁸ “Xee xeayvu ju: Aŷ guive peikuua porã pota, nove jaxyha'e vinte e quatro ára guive, SENHOR pegua templo pejapo aguã pemboypyára guive, peikuua pota ha'e nunga ha'e javi pendere oiko va'ekue re.

¹⁹ Mba'eta jipovei ma mba'emo ra'yigue pemoõ porãague py. Uva'y ndai'avei avi, figo voi, romã, neĩ oliva voi. Ha'e rami teĩ kova'e ára guive xee romoingo porã 'rã”, he'i.

Zorobabel pe SENHOR ojapo porã aguã re ijayvuague

²⁰ Ha'e gui nove jaxyha'e vinte e quattro araa pyve SENHOR teĩgue ju ombou oayvu Ageu pe. Ha'e vy aipoe'i:

²¹ — Aipo're ke Judá pygua huvixa Zorobabel pe: “Amboryryipa 'rã yva ha'e yvy.

²² Aity 'rã huvixa ikuai va'e po'akaague, ambovaipa 'rã yvy regua kuery imbaraeteague. Ambovaipa 'rã karóxa, ogueroguata va'e kuery guive. Ha'e ramo kavaju ha'e hi'árygua kuery ho'apa 'rã kyxe py peteĩ-teĩ jokutu vy.”

²³ — SENHOR aipoe'ive ju: “Ha'e gui ndee Salatiel ra'y Zorobabel xerembiguai reiko va'e, ha'e va'e ára py rogueru vy roguereko 'rã xekuã regua xerery oĩa va'e rami, xee ae roiporavo rire”, he'i SENHOR ixondaro reta va'e.

* ^{2:14} Ha'e kuery reko rami vy mba'emo iky'a va'e amboae regua re ombovy rive teĩ ha'e va'e voi opyta 'rã iky'a va'e. Ha'e kuery voi Nhanderuete nonhe'ẽ renduia rupi ikuai vy ixupe iky'a va'e opyta.

Zacarias ayvu oīa

“Pejeko rerova ke”, he’iague

¹ Mokoī ma'etŷa ha'e oito jaxyā re ma huvixave Dario oī jave py SENHOR ombou oayvu Berequias ra'y profeta Zacarias, Ido ramymino va'e pe. Ha'e vy aipoe'i:

— Peneramoī kuery pe SENHOR ipoxy ete va'ekue.

³ Ha'e nunga rupi aipo're neretarā kuery pe: Po rami SENHOR ixondaro reta va'e ijayvu: Pejevy ju ke xevy. Ha'e ramo xee voi aiko ju 'rā peē kuery reve.

⁴ Pendekuaive eme peneramoī kuery ikuaiague rami. Mba'eta ha'e kuery pe ma profeta kuery yma guare ijayvu vy aipoe'i va'ekue: “Po rami ijayvu SENHOR ixondaro reta va'e: Pejeko rerova ke aŷ opa marā rei pendekuaia ha'e mba'emo vai pejapoа gui”, he'i va'ekue ri ha'e kuery noendui, naxenhe'ẽ rendui guive — he'i SENHOR.

— Mamo tu aŷ peneramoī kuery ikuai? Profeta kuery voi ndokuave riae avi.

⁶ Ha'e rā xeayvu ha'e aipota va'e xerembiguai profeta kuery pe aikuaa uka va'ekue ma ojeupitypa ma peneramoī kuery ambojexavaia py. Ha'e gui ma ha'e kuery ojeko rerova vy aipoe'i: “SENHOR ixondaro reta va'e ma nhanembopaga aguā re onhembopy'a raka'e nhanderekova ikuague ha'e mba'emo vai jajapoague re. Ha'e rami vy ojapo ae ma”, he'i okuapy.

Jypy kavaju kuery oexaque

⁷ Ha'e gui mokoī ma'etŷa ha'e onze jaxyā sebate 'epy va'e, vinte e quattro araa py, huvixa Dario mokoī ma'etŷa re ma oī jave py SENHOR oayvu ombou ju Berequias ra'y profeta Zacarias, Ido ramymino va'e pe.

⁸ Ha'e ramo peteī pytū aexa ra'u rā ojekuaa peteī ava kavaju pytā va'e árygua. Ha'e va'e ma peteī yvyugua puku py oī, yvyra murteira ikuai va'e mbyte. Hakykue re ojekuaave ju kavaju pytā va'e, xiī rai'i va'e ha'e xiī va'e guive.

⁹ Ha'e ramo xee aporandu:

— Xeruvixa, marā ramigua tu peva'e?

Ha'e ramo anjo xereve ijayvu va'e ombovai:

— Xee aikuaa uka 'rā marā ramigua paa — he'i.

¹⁰ Ha'e ramo yvyra ikuai va'e mbyte ava oī va'e ju ombovai. Ha'e vy aipoe'i:

— Ha'e va'e kuery ma yvy jave rupi oguata va'erā SENHOR ombou va'ekue — he'i.

¹¹ Ha'e gui ha'e va'e kuery ju ijayvu SENHOR pegua anjo yvyra ikuai va'e mbyte oī va'e pe. Ha'e vy aipoe'i:

— Ore ma yvy jave rupi roikopa ma. Ha'e ramo ha'e pygua kuery opytu'upa, yvy ha'e javi rupi ikuai porāmba guive — he'i okuapy.

¹² Ha'e ramo anjo SENHOR pegua ombovai:

— SENHOR nexondaro reta va'e, raka'e peve 'rā tu remboaxya nderexa ukavei Jerusalém tetā pygua kuery pe, neī Judá regua tetā ikuai va'e pygua kuery pe? Mba'eta ha'e kuery re setenta ma'etŷ re ma ndepoxya oī — he'i.

¹³ Ha'e gui anjo xereve ijayvu va'e pe SENHOR ijayvu porā'i nhombopy'a porāa rupi.

¹⁴ Ha'e ramo ha'e va'e ju ijayvu xevy:

— Emombe'u atā ke: Po rami SENHOR ixondaro reta va'e ijayvu: Xee ma nda'evei etea aendu Jerusalém ha'e Sião pygua kuery re.

¹⁵ Ha'e rā amboae regua kuery pe ma xepoxy ete, mba'eve gui okyje e'ŷ re ikuai va'e pe. Mba'eta ha'e kuery pe amongue py ete'i xepoxy va'ekue ri aŷ ma ha'e kuery xembopoxyve ete.

¹⁶ Ha'e nunga rupi po rami SENHOR ijayvu: Xee ma Jerusalém tetā re ajevy ju 'rā anhomboaxya rupi. Ha'e gui xevygua oo ma ojapoа ju 'rā ha'e py. Teīgue ju ixā mba'emo a'āa omoatāa 'rā Jerusalém tetā rupi — he'i SENHOR ixondaro reta va'e.

¹⁷ — Ha'e gui teīgue ju remombe'u atā vy aipo're 'rā: Po rami ijayvu SENHOR ixondaro reta va'e: "Xevygua tetā ikuai va'e tynyē nho 'rā mba'emo porā", he'i. Mba'eta SENHOR ombopy'a guaxu nho 'rā Sião pygua kuery, Jerusalém tetā oiporavo ju 'rā guive.

Irundy vaka rakuoa oexaague

- ¹⁸ Ha'e gui teīgue ju ama'ẽ vy aexa irundy vaka rakuakue.
¹⁹ Ha'e rami vy aporandu anjo xereve ijayvu va'e pe:
— Mba'e nunga tu peva'e?
Ha'e rā xembovai:
— Peva'e vaka rakuakue ma Judá, Israel ha'e Jerusalém pygua kuery moaīmbaare — he'i.
²⁰ Ha'e rire ma SENHOR oexa uka avi irundy ferro re ombo'eapo va'e kuery.
²¹ Ha'e rā xee aporandu:
— Ha'vy peva'e kuery, mba'erā tu ou?
Ombovai:
— Vaka rakuakue ma yvy regua kuery Judá kuery rovai opu'ã vy opo'akaa rupi omoaīmba va'ekue, neĩ avave rei oakā nomopu'ã kuaavei aguā rami. Ha'e gui kova'e ferro re ombo'eapo va'e kuery ma vaka rakuakue mongygearā ha'e heitypaarā ou — he'i.

2

Jerusalém tetā rupi mba'emo a'ātarā oexaague

- ¹ Ha'e gui ama'ẽ vy peteĩ ava hi'aĩ va'e ju aexa. Ha'e va'e ma opo py oguerekopeteĩ ixā mba'emo a'āa.
² Ha'e ramo aporandu ixupe:
— Marā katy reo?
Ombovai:
— Jerusalém tetā ra'ã vy aa, ipya ha'e ipuku-a aikuua aguā — he'i.
³ Ha'e gui anjo xereve ijayvu va'e oo ta ma ramo amboae anjo ou vy ovaexī.
⁴ Ha'e vy aipoe'i ixupe:
— Tereo pojava ke, ha'e emombe'u peva'e kunumi va'e pe: "Jerusalém tetā re heta ete avakue ha'e mymba kuery ikuai ramo tekoa'i rami 'rā optya ikora ve'ŷ va'e", 're.
⁵ Mba'eta SENHOR aipoe'i: "Xee ae 'rā aĩ tetā korarā tata guigua rami. Xee aiko 'rā ha'e kuery mbyte rupi imoexakāarā", he'i.

Sião tetā katy ju Israel kuery ojevy aguā re ijayvuague

- ⁶ Ha'e gui SENHOR aipoe'i:
— Pendu ke! Pendu ke! Pevapa ke peovy aŷ kuaray ijapu'a'ia katy yvy oĩ va'e gui, irundy henda katy yvytu yva rupi oipejua katy xee romoaīmba rire teĩ.
⁷ Pendu ke! Peẽ Sião pygua kuery Babilônia kuerya py pendekuai va'e, tapeo jepe ke.
⁸ Mba'eta SENHOR ixondaro reta va'e po rami SENHOR ijayvu: " SENHOR onhemboete ukaa rupi xembou yvy regua penemba'e rei-rei pe'apaare kuery rovai, mba'eta ixupe rā penderovai opo oupity va'e ma hexa ra'yī re opoko va'e reve nda'eveia rami.
⁹ Ma'ẽ, ha'e kuery rovai xee xepo aypi ramo hembiguai ikuai va'ekue ae ju 'rā oipe'apa imba'e rei-rei. Ha'e ramo peikuaa 'rā SENHOR ixondaro reta va'e ae xembouague", he'i.*
¹⁰ SENHOR aipoe'i:
— Sião pygua kuery, peporai ke pevy'a reve, mba'eta aju 'rā penembyte aiko aguā.
¹¹ Mba'eta ha'e va'e ára ma heta regua 'rā onhemboaty xee SENHOR re, xevy guarā. Ha'e gui penembyte aiko ramo peikuaa 'rā SENHOR ixondaro reta va'e ae pendea py xembouague.
¹² Ha'e va'e jave py SENHOR ojeupe guarā ogueru 'rā Judá kuery. Yvy iky'a e'ŷ va'e re jevy 'rā ogueru, ha'e teīgue ju oiporavo 'rā Jerusalém tetā.

* ^{2:9} Apy ma SENHOR ae ijayvu vy "SENHOR xembou", he'i. Mba'eta SENHOR remimbou hexeve joo rami ete, Marcos 12.35-37 py Jesus ojee ae ijayvua rami.

¹³ Ha'e nunga rupi peẽ avakue ha'e javi, pekyririmba ke SENHOR renonde, mba'eta o'amba iky'a e'ŷ va'e gui opu'ã ma ouvy.

3

Sacerdote yvateve va'e Josué oexaague

¹ Ha'e gui xevy pe Nhanderuete oexa uka sacerdote yvateve va'e Josué, SENHOR guigua anjo renonde hi'aĩ rã. Ha'e va'e oiporu kuaa regua re Satanás hi'aĩ avi hovai ijayvu aguã.

² Ha'e rã SENHOR ma aipoe'i Satanás pe:

— Satanás, SENHOR ta'ijayvu ete ndevy. Tá, SENHOR Jerusalém tetã poravoare ta'ijayvu ete ndevy. Mba'eta peva'e ava ma tata'y tata py okaia gui oipe'a pyre rami — he'i.

³ Josué ma anjo renonde hi'aĩ reve ao iky'apa va'e py onhemonde ho'amy.

⁴ Ha'e gui ma anjo ju ijayvu. Ha'e vy aipoe'i guenonde ikuai va'e pe:

— Pemboi ijaõ iky'apa rei va'e — he'i.

Josué pe aipoe'i avi:

— Ne'exa, ndegui aipe'apa ma ndereko vaiague, ha'e gui ao porâgue py ju 'rã romonhemonde — he'i.

⁵ Ha'e ramo xee ju aipoa'e:

— Inhakã re ma pemoõ avi akã regua iky'a e'ŷ va'e — ha'e. Ha'e ramo inhakã re omoõ akã regua iky'a e'ŷ va'e, ao ha'evea ramigua py omonhemonde guive.*

Ha'e gui ma SENHOR guigua anjo hi'aĩ va'e ju

⁶ aipoe'i Josué mongetaa rupi:

⁷ — Po rami ijayvu SENHOR ixondaro reta va'e: Xee aikoa rupi ndee reiko, ha'e ajapo uka va'e rejapopa ri vy ndee repena 'rã xevygua oo re, xevygua oguy ikuai va'e re avi 'rã renhangareko. Ha'e gui ajapo 'rã apy ikuai va'e rami avi ndee voi xere renhemboja aguã rami.

⁸ Ha'e gui sacerdote yvateve va'e Josué, endu ke, neirũ kuery nerondenre oguapy va'e ha'e javi reve, mba'eta peẽ avakue ma raka'eve rã guarã kuaa ukaarã peiko. Mba'eta ne'exa, ambou 'rã xerembiguai Yvyra Rapytakue Renhoï 'epy va'e.

⁹ Mba'eta ma'ẽ, apy Josué renonde itui peteĩ ita aeja va'ekue. Kova'e ita peteĩ'i va'e re ma sete texa oĩ. Ha'e va'e ita re ambopara 'rã, mba'eta peteĩ ára pyve aipe'apa 'rã kova'e vvy regua kuery reko vaia — he'i SENHOR ixondaro reta va'e.

¹⁰ — Ha'e va'e ára ma peẽ kuery peteĩ-teĩ pendea katy'i ikuai va'e penoõ 'rã pendereve oguapy aguã uva'y ha'e figo'y guy py — he'i SENHOR ixondaro reta va'e.

4

Mokoõ oliveira rembypy mbyte py tataendy'y hi'aĩ va'e oexaague

¹ Ha'e gui teigüe ju anjo xereve ijayvu va'ekue ou vy xemomyí imo'amy, avakue okeague gui omomyã rami.

² Ha'e rami vy oporandu xevy:

— Mba'et nunga tu rex?

Ambovai:

— Xee aexa peteĩ tataendy'y ouro guigua hi'aĩ va'e, ha'e gui hi'áry oĩ peteĩ azeite ryru. Tataendy'y re ma sete tataendy renda ikuai, ha'e sete ikuai avi tataendy rykue raperã, peteĩ-teĩ tataendy peve azeite ovaã aguã.*

* 3:5 Sacerdote yvateve va'e Josué ma anjo renonde hi'aĩ guetarã kuery rekobia ojejavya ombogue uka aguã, teĩ ha'e voi iky'a va'e py onhemonde ho'amy ojejavva'e vy. Satanás ha'e py hi'aĩ avi Josué ojejavva'e rami ijayvu aguã. Ha'e rami teĩ anjo SENHOR rery rupi oĩ va'e ma ojejavvyague ombogue vy ao porã py ju omonhemonde, Nhanderuete pe oiko aguã sacerdote-rã (Êxodo 39.1-31). Kova'e Josué ma Moisés irû e'ŷ, amboae ava Jesua hery avi va'e, Esdras ha'e Neemias javegua sacerdote yvateve va'e (Esdras 2.2; Neemias 7.7). * 4:2 Judas

³ Ha'e nunga yvýry ma mokoõ oliveira rembypy hi'aĩ. Peteĩ ma azeite ryru oiporu kuaa regua re, ha'e rã amboae ma oiporu kuaa e'ÿa re hi'aĩ — ha'e.*

⁴ Ha'e gui xee aporandu ju anjo xereve ijayvu va'e pe:

— Xeruvixa, mba'erã tu peva'e?

⁵ Ha'e ramo anjo xereve ijayvu va'e ombovai:

— Ndee nderekuaai teri va'e ty'y peva'e nunga mba'erã paa?

Xee ambovai vy — Any, xeruvixa — ha'e.

⁶ Ha'e ramo ijayuve vy aipoe'i xevy:

— Peva'e ma Zorobabel pe SENHOR ixondaro reta va'e aipoe'iague: “Ndee ae mbaraetea rupi e'ÿ 'rã mba'emo rejapo, ndee ae po'akaa rupi e'ÿ guive, ha'e rã Xenhe'ẽ rupi ae 'rã rejapo”, he'iague.†

⁷ Ha'e gui ndee yvyty tuvixa va'e, marã ramigua tu ndee? Mba'eta Zorobabel renonde ma yvy joja reia rive 'rã repyta. Mba'eta ita opa vy guarã Zorobabel omoõ ramo pavẽ oguerovy'a vy “Tomoingo porã! Tomoingo porã!” he'i 'rã okuapy.

⁸ Teïgue ju xevy pe SENHOR ombou oayvu. Ha'e vy aipoe'i:

⁹ — Zorobabel ma opo py ae kova'e oo omboypy rire ha'e ae ju 'rã omomba, ha'e rami peikuua aguã SENHOR ixondaro reta va'e pendea py xembouague.

¹⁰ Ha'e gui mba'emo kyr'i va'e anho ojapoa rã amongue oexa vy nombovarei tei ha'e kuery ae ju 'rã oguerovy'a oexa vy Zorobabel opo py peteĩ ixã oo mbotya ra'aa oiporu ramo — he'i. Ha'e gui sete texa ikuai va'e ma SENHOR rexax yvy jave rupi oexa pota oikovy va'e.‡

¹¹ Ha'e gui xee aporanduve ju ixupe:

— Mba'erã tu mokoõ oliveira rembypy oiporu kuaa ha'e oiporu kuaa e'ÿa re tataendy'y joavaive re hi'aĩ va'e?

¹² Teïgue ju xeayvu vy aporandu avi:

— Ha'yv mba'erã tu mokoõ oliveira rakägue yvy'iry azeite iju porã rei va'e rape ouro guigua oĩ va'e?

¹³ Aipoe'i:

— Nderekuaai teri va'e ty'y?

Xee ambovai vy

— Any, xeruvixa — he'i.

¹⁴ Ha'e ramo aipoe'i:

— Peva'e mokoõ ma SENHOR yvy jave re ipo'aka va'e pe omba'eapo va'erã omoõ mbyre — he'i.

5

Kuaxia oveve va'e oexaque

¹ Ha'e gui teïgue ju ama'ẽ vy aexa peteĩ kuaxia oveve-veve rã.

² Ha'e ramo anjo oporandu xevy:

— Mba'e nunga tu rex?

Xee ambovai:

— Peteĩ kuaxia oveve va'e rima aexa — ha'e. Ha'e va'e puku-a ma dez metros, ha'e rã ipya ma irundy raxa'i.

³ Ha'e ramo xevy pe anjo aipoe'i:

— Peva'e ma ayvu vai mbouarã yvy jave rupi oo va'e. Mba'eta peva'e ayvu vai rami vy imonda va'e ha'e oura rive va'e omoxëmbaa 'rã.

* ^{4:3} Apocalipse 11.3-4 py oĩa rami mokoõ oliveira rembypy ma mokoõ ava Nhanderuete pegua, Nhe'ẽ rupi vy mba'emo ojapo kuaa va'e. Apy ma Josué ha'e Zorobabel 'rã jaikuaa (versículos 13-14 py).

† ^{4:6} Ha'e va'e jave ma Zorobabel oĩ Israel kuery ruvixa Jerusalém py. Sacerdote yvateve va'e Josué reve Zorobabel ojapo ju Nhanderuete pegua templo oity pyre, amboae regua kuery ndojapo ukaxeí tei (Esdras 3-6). ‡ ^{4:10} Templo omboyta jave py hetarã kuery amongue ojae'o rei templo yma guare tuvixave ete va'ekue re ima'endu'a vy (Esdras 3.10-12). Sete texa ikuai va'e re ma ijayvu ju 'rã Apocalipse 5.6 py.

⁴ Mba'eta SENHOR ixondaro reta va'e aipoe'i: “Xee ha'e nunga ambou vy ajapo 'rā imonda va'e kuery ro py oike aguā rami, xerery rupi oura rive va'e ro py guive. Ha'e va'e ma opy pytū oaxa vy ombovaipa 'rā oo regua yvyra ha'e ita”, he'i.

Ajaka py kunha oī va'e oexaague

⁵ Ha'e gui anjo xee reve ijayvu va'e ou jevy vy aipoe'i xevy:

— Aŷ ma yvate katy ju ema'ē rexa aguā mba'emo ou oiny va'e.

⁶ Xee aporandu:

— Mba'e tu peva'e nunga?

Xembovai:

— Ha'e va'e ou jekuaa va'e ma peteī ajaka. Ha'e va'e py ma oī yvy jave rupigua kuery reko vaja — he'i.

⁷ Ha'e gui ajaka juru mbotya chumbo guigua oipe'aa ramo peteī kunha va'e oguapy oiny ra'e ajaka py.

⁸ Ha'e gui anjo aipoe'ive ju:

— Peva'e ma teko vai — he'i vyve ajakapy py ju kunha va'e omoanha vy omboty ju chumbo guigua ipoyi ete va'e py.

⁹ Ha'e gui teīgue ju ama'ē vy aexa mokoī kunhague jogueru nhoguenoiny rā. Guyra guaxu rami ipepo va'e vy ipepo rupi yvytu oipeju reve ou. Ha'e va'e kuery ma ajaka oupi heravy yvy gui yvatevea peve.

¹⁰ Ha'e gui xee aporandu anjo xereve ijayvu va'e pe:

— Marā katy tu ha'e kuery ogueraa 'rā ajaka?

¹¹ Ombovai:

— Sinar yvy katy rima ogueraa, kunha va'e rorā ojapo aguā py. Ha'e gui ojapopa ma vy omoī 'rā ha'e py, henda py ae — he'i.*

6

Irundy karóxa oexaague

¹ Teīgue ju ama'ē vy aexa mokoī yvyty overa va'e guigua. Ha'e va'e yvyty mbyte gui ma irundy karóxa joe opu'āa pygua omoatāa heruvy.

² Jypyguia karóxa re kavaju ikuai va'e ma pytā va'e anho. Ha'e rā mokoīa re kavaju ikuai va'e ma huū va'e anho.

³ Mboapya re ma xiī va'e, ha'e rā irundaya re kavaju ikuai va'e ma xiī rai'i va'e. Ha'e va'e kuery ma imbaraete va'e meme.*

⁴ Ha'e ramo anjo xereve ijayvu va'e pe xee aporandu:

— Xeruvixa, mba'e nunga tu peva'e?

⁵ Anjo ombovai:

— Peva'e kuery ma yva rupi irundy henda gui yvytu oipeju va'e, SENHOR yvy jave re ipo'aka va'e renonde ikuaiague gui ou.

⁶ Ha'e gui karóxa kavaju huū va'e omoatā va'e oo 'rā kuaray ijapu'a'ia katy yvy itui va'e re. Ha'e va'e rakykue rupi ma xiī va'e ju 'rā oo. Ha'e rā xiī rai'i va'e ma kuaray puku-a katy 'rā oo yvy itui va'e re — he'i.

⁷ Ha'e gui ma kavaju kuery pe SENHOR ijayvu vy “Tapeo, yvy jave rupi peiko”, he'i. Ha'e ramo imbaraetea rupi oje'oi vy onhea'ā jogueravy yvy jave rupi oguata aguā. Ha'e rami py yvy jave rupi ete oje'oi.

⁸ Ha'e gui SENHOR xerenoī vy aipoe'i xevy:

— Kuaray ijapu'a'ia katy yvy itui va'e re kavaju oo vy ojapo 'rā ha'e py Xenhe'ē optytu'u aguā rami — he'i.†

* 5:11 Sinar ma Babilônia rery mboae. Babilônia tetā ma teko vai renda ae raka'e (Apocalipse 17). * 6:3 Apocalipse 6.2-8 py oīa rami oexa irundy kavaju joo rami e'ŷ-e'ŷ ojekuaa va'e, mba'eta joo rami e'ŷ-e'ŷ 'rā ou nhomoingo axyarā. † 6:8 Kuaray ijapu'a'ia katy oī Babilônia ha'e amboae regua Israel kuery rovai opu'ā va'ekue, Nhanderuete pe e'ŷ ikuai va'e meme. Ha'e gui kavaju oo 'rā ha'e kuery ombopaga aguā heko vaia re. Ha'e ramo ma Nhanderuete Nhe'ē optytu'u 'rā.

Josué akā re coroa omoī, ha'e Yvyra Rapytakue Renhoī omombe'u porāveague

⁹ Ha'e gui teīgue ju SENHOR oayvu ombou xevy. Ha'e vy aipoe'i:

¹⁰ — Ndevy pe neretarā kuery escravo-rā ogueraa pyre regua ome'ē 'rā mba'emo. Ha'e va'e kuery ma Heldai, Tobias ha'e Jedaías, Babilônia tetā gui ou va'ekue meme. Ha'e nunga rejopy vy ha'e va'e árave eraa, ha'e eike Sofonias ra'y Josias ro py.

¹¹ Prata ha'e ouro ha'e kuery ome'ē va'ekue rejopy va'ekue gui ejapo coroa. Ha'e va'e ma emōī Jozadaque ra'y sacerdote yvateve va'e Josué akā re.

¹² Ha'e rami vy aipo're 'rā ixupe: "Po rami SENHOR ixondaro reta va'e ijayvu: Ne'exa, apy ava oī va'e pe ma 'Yvyra Rapytakue Renhoī 'ea 'rā. Mba'eta ha'e va'e ma oīague gui henhoī jevy vy ojapo 'rā templo SENHOR peguarā.

¹³ Ha'e ae 'rā oiko SENHOR pegua templo apoa rupi. Hexakāa py onhemonde reve oguapy 'rā oiny guenda openaaty áry. Joe opena 'rā oikovy, ha'e guenda py joe opena oiny reve oiko avi 'rā sacerdote. Mokoī rupi 'rā oiko va'eri ha'evea rupi meme", 're 'rā.

¹⁴ Ha'e gui coroa ma remoī porā uka ju 'rā Helém, Tobias, Jedaías ha'e Sofonias ra'y Hem pe. SENHOR pegua templo py ae 'rā omoī porā penema'endu'a pavē aguā.

¹⁵ Mba'eta mombyry guigua kuery voi ou 'rā penepytyvō aguā SENHOR pegua templo pe-japoa rupi, ha'e rami peikuua aguā SENHOR ixondaro reta va'e ae pendea py xembouague. SENHOR Penderuete ayvu pejapopa ete ramo ha'e nunga ha'e javi 'rā oiko.

7

Okaru e'ŷ re ikuai teī Nhanderuete ndoguerovy'aia re ijayvuague

¹ Ha'e gui irundy ma'etŷ re ma huvinxave Dario oī jave py SENHOR ombou oayvu Zacarias pe, nove jaxya quisleu 'epy va'e ha'e irundy araa py.

² Mba'eta Betel pygua kuery ombou va'ekue Sarezer ha'e Regén-Meleque hexeveguia avakue reve, SENHOR pe ojapukai vy oporandu uka aguā.

³ Ha'e ramo ha'e kuery ma SENHOR ixondaro reta va'e pegua ropy sacerdote kuery ikuai va'e pe oporandu, profeta kuery pe guive: "Ha'evea rami pa peteī nhiruī jaxya py rokaru e'ŷ re rojae'ove ju aguā mbovy ma'etŷ re'ŷ ma orekuaiague rami?" he'i okuapy.

⁴ Ha'e ramo SENHOR ixondaro reta va'e ombou oayvu xevy. Ha'e vy aipoe'i:

⁵ — Rembovai 'rā sacerdote kuery ha'e kova'e yvy re ikuai va'e ha'e javi pe. Ha'e vy aipo're: "Setenta ma'etŷ oaxa va'ekue re ma peteī nhiruī jaxya ha'e sete jaxya py ju pekaru e'ŷ re pendekuai va'ekue pejae'o reve, ha'e rami teī xevy pe ete ri nda'u pekaru e'ŷ re pendekuai? Xevy pe ete nda'u pejapo?

⁶ Ha'e rami ae avi pekaru ha'e pey'ua ára py ma pendejeupe ae e'ŷ ri ty'y pekaru ha'e pey'u?

⁷ Mba'eta ymave rupi Jerusalém tetā py nhande kuery ikuai porā'i jave, ijyvýry rupi tekao ikuai va'e py guive, kuaray puku-a katy ha'e yvy joja reia ha'e javi rupi tekao ikuai jave ma profeta kuery pe SENHOR omombe'u uka ae ma raka'e oayvu. Peē kuery napendui ri ty'y ha'e nunga?" 're 'rā.

Ha'e kuery Nhanderuete nonhe'ē rendui rire ogueraa ukapaague re ijayvua

⁸ Ha'e gui Zacarias pe SENHOR oayvu ombou vy aipoe'i:

⁹ — Po rami SENHOR ixondaro reta va'e ijayvu va'ekue: "Pejoguereko ke ha'evea rami, anhetē rupi ete. Peteī-teī ke pexa uka mborayvu ha'e penderyvy kuery pemboaxya.

¹⁰ Pembojexavai eme imeve'ŷ va'e kuery, tyre'ŷ, mombyry guigua kuery, neī iporiaukue'i ma voi. Ha'e peteī-teī pendepy'a re pemoīve eme peneirū kuery pe pejapo vai aguā", he'i va'ekue.

¹¹ Ha'e rami teī ha'e kuery noendu potai okuapy. Ha'e rami vy ivai rei reve okupe rive oguerova xea katy, oapyxa omboty guive, noenduxei vy.

¹² Ha'e rami py ha'e kuery diamante rami onhemoakā ratā okuapy, lei aeja va'ekue oendu e'ŷ aguā, neī SENHOR ixondaro reta va'e oayvu Onhe'ē rupi ae ombou va'ekue, neī profeta kuery ymave rupigua omombe'u va'ekue guive. Ha'e nunga rupi ae ou SENHOR ixondaro reta va'e poxya.

¹³ Xee aenoī ramo ha'e kuery noendu potai rire ha'e kuery xevy ojapukai rā xee voi naendu potai va'ekue — he'i SENHOR ixondaro reta va'e.

¹⁴ — Ha'e rami vy yvytu guaxu rami amoāimba yvy regua ikuiaia rupi, ha'e kuery ndoexai teri va'e rupi ae. Ha'e oyvy oejaague voi ombovaipaa avi, ha'e va'e rupi avave rei ndoaxaavei neī ndojevyavei aguā rami. Mba'eta yvy porā rei va'ekue ojapoa na'iporāvei aguā rami.

8

Sião tetā ojapo ju aguā re ijayvuague

¹ Ha'e gui teīgue ju SENHOR ixondaro reta va'e ombou oayvu xevy. Ha'e vy aipoe'i:

² — Po rami SENHOR ixondaro reta va'e ijayvu: Xee aendu Sião pygua kuery re nda'evei etea. Ndajou porāi etea ha'e nda'eveia aendu ha'e kuery ikuai axya re.

³ Po rami ijayvu SENHOR: Aju ju 'rā Sião tetā py, aiko ju 'rā Jerusalém tetā mbyte rupi. Ha'e ramo Jerusalém pe "Tetā anhetē rupi ikuiaia" 'ea 'rā, ha'e SENHOR ixondaro reta va'e pegua yvyty pe ma "Yvyty ky'a e'ŷ" 'ea 'rā.

⁴ Po rami ijayvu SENHOR ixondaro reta va'e: Teīgue ju Jerusalém tetā mbyte rupi tujakue'i ha'e guaimigue'i oguapy 'rā okuapy. Okakua'i ete ma vy peteī-teī opo py oguereko 'rā popoka.

⁵ Tetā mbyte rupi avakue'i ha'e kunhague'i ono'ō avi 'rā okuapy onhevangaa rupi ikuai va'e.

⁶ Po rami ijayvu SENHOR ixondaro reta va'e: Ha'e nunga kova'e kuery rembyrekue oexa vy onhemondyipa rei teī xee voi teve 'rā anhemondyi? Any — he'i SENHOR.

⁷ — Po rami ijayvu SENHOR ixondaro reta va'e: Ne'ixa, mba'eta xee araa jepe 'rā xevygua kuery. Ha'e rami vy aipe'a 'rā kuaray oua katy ha'e oikea katy yvy itui va'e gui.

⁸ Xee aru ramo Jerusalém tetā py ju 'rā ikuai. Ha'e gui ha'e kuery ikuai 'rā xevygua, ha'e rā xee ma tuuete 'rā aiko. Anhetē rupi ha'e teko porā rupi 'rā areko.

⁹ — Po rami ijayvu SENHOR ixondaro reta va'e: Aŷ ma peē kuery pendu pekuapy kova'e ayvu profeta kuery yma guare omombe'u va'ekue SENHOR pegua oo ojapo ypy'i jave. Ha'e nunga rupi aŷ ma pemombaraete pendepo xevygua templo pejapopa ju aguā.

¹⁰ Mba'eta ha'e va'e jave e'ŷ mbove ma avakue neī mymba kuery mba'eve ndojoui omba'eapoague gui. Ngovaigua kuery káuxa oē va'e neī ovaē va'e kuery ma voi ndojoui ikuai porā aguā, mba'eta xee ajapo avakue peteī-teī oirū kuery re opu'ā aguā rami.

¹¹ Ha'e rami teī aŷ gui ma kova'e kuery okuave'i va'e jypy arekoague rami ve'ŷ 'rā areko — he'i SENHOR ixondaro reta va'e.

¹² — Mba'eta mba'emo ra'yīgue onhotŷ ramo oiko porā 'rā. Uva'y hi'a porā 'rā guive, yvy gui mba'emo pyau henhoī 'rā, ha'e yva gui ho'a 'rā oky rayvi. Mba'eta kova'e kuery rembyrekue pe ajapo 'rā ha'e nunga ha'e javi oiko aguā rami.

¹³ Ha'e gui peē Judá ha'e Israel kuery, amboae regua kuery ikuiaia rupi ayvu vaipy pendekuai va'ekue ri aŷ ma rogueraa jepe rire ayvu porāmby ju 'rā peiko. Ha'e nunga rupi pekyjeve eme, ha'e vy pemombaraete ke pendepo.

¹⁴ Mba'eta po rami SENHOR ixondaro reta va'e ijayvu: Peneramoī kuery xembopoxya rupi ikuai jave py penderovai anhembopy'a mba'emo vai ajapo aguā re, ndajapo e'ŷi guive.

¹⁵ Ha'e rami teī aŷ gui ma anhembopy'a Jerusalém ha'e Judá pygua kuery pe ajapo porā ju aguā re. Pekyjeve eme ha'vy.

¹⁶ Po rami 'rā pendekuai: Peteī-teī anhetē rupi 'rā pendeayvu peneirū kuery pe, ha'evea rami 'rā pejogueroko peneretā kora rokē py, anhetē rupi ha'e peteī rami penhomoingoa rupi.*

¹⁷ Peteīve opa marā penhembopy'a eme peneirū kuery rovai, pendejee pemoī eme guive peura rivea rupi pendekuai aguā, mba'eta ha'e nunga ha'e javi xee ajou vai ete — he'i SENHOR.

¹⁸ Ha'e gui SENHOR ixondaro reta va'e oayvu ombou ju xevy. Ha'e vy aipoe'i:

* 8:16 Efésios 4.25

19 — SENHOR ixondaro reta va'e po rami ijayvu: Peẽ Judá kuery, irundy jaxyia py pekaru e'ŷ re pendekuai va'ekue, ha'e gui peteĩ nhiruĩ jaxyia, sete ha'e dez jaxyia py voi pekaru e'ŷ re pendekuai va'ekue. Ha'e rami teĩ aŷ gui ma ha'e va'e jave opyta 'rã pevy'a aguã. Pevy'a reve 'rã pejapo ngaru iky'a e'ŷ va'e, pendejee pemoĩ avi ke anhetẽ rupi ha'e peteĩ rami penhomoingo aguã.

20 Po rami ijayvu SENHOR ixondaro reta va'e: Pova'e nunga oiko avi 'rã: heta regua, heta tetã pygua kuery jogueru 'rã okuapy.

21 Ha'e rami vy peteĩ-teĩ tetã pygua kuery amboae tetã katy oo vy ha'e kuery pe aipoe'i 'rã: “Pejapura ke, jaje'oi SENHOR pe jajapukai aguã. Jaeka SENHOR ixondaro reta va'e. Xee avi aa 'rã”, he'i 'rã okuapy.

22 Jerusalém tetã py heta regua ipo'akakueve va'e jogueru 'rã SENHOR ixondaro reta va'e reka vy, ixupe ojapukai aguã.

23 Po rami ijayvu SENHOR ixondaro reta va'e: Ha'e va'e ára ma dez avakue ou vy peteĩ judeu reve onhemoirũ 'rã okuapy. Joo rami e'ŷ-e'ŷ ijayvu va'e, ha'e javi regua ou 'rã peteĩ judeu oikuavã vy ijao apy rupi ojopy reve. Ha'e vy aipoe'i 'rã ixupe: “Ore avi toroo nderupive, mba'eta omombe'ua rã roendu pende kuery reve Nhanderuete oikoa”, he'i 'rã.

9

Yvy regua kuery ombopaga aguã re ijayvuague

1 — Kova'e ayvu ma Hadraque yvy regua kuery rovai SENHOR omombe'u uka va'ekue, Damasco tetã re guive ombou. Mba'eta SENHOR ma avakue ha'e javive re oma'ẽ 'rã oikovy, Israel regua ikuai va'e re guive.

2 Ha'e rami vy oayvu ombou Hamate yvy re voi. Ha'e va'e ma Hadraque yvy katy'i itui. Ha'e gui Tiro ha'e Sidom tetã pygua kuery re voi ombou, ha'e kuery hi'arandupa va'eri teĩ.

3 Mba'eta Tiro pygua kuery ma heta ojapo oo ikorapa va'e onhemi aguã. Prata heta avi omoĩ porã yvy ku'i rami, ouro guive omoĩ porã yapo tape rupi oĩ va'e rami rive.

4 Ha'e rami teĩ ne'exa, ha'e kuery mbaraetea SENHOR oipe'apa vy omombopa 'rã ye'ẽ mbyte py. Ha'e rã hetã ma tata py 'rã ombovaipa.

5 Ha'e nunga Asquelom pygua kuery oexa vy okyjepa 'rã okuapy. Gaza pygua kuery voi ikuai axy 'rã. Ecrom pygua kuery ha'e rami ae avi 'rã ikuai, guenonderã rupi oarõ va'e ndoikovei rã. Gaza pygua huvinave omano 'rã, ha'e Asquelom py voi noíavei 'rã.

6 Asdode py ma peteĩ regua joegua e'ŷ-e'ŷ hekoia 'rã. Ha'e rami py xee amomba 'rã filisteu kuery onhemboyyate reia.

7 Ha'e kuery juru gui anoẽ 'rã ta'angaa pe mymba ome'ẽ va'ekue ruguykue nomokõmbai va'ekue, ha'e haĩ ma'ũ gui ma amboi 'rã xo'o ra'ykue'i. Ha'e rire okuave'i va'e ma peteĩ regua 'rã ikuai Nhanderuete peguarã. Judá pygua kuery va'e regua 'rã ikuai. Ecrom pygua kuery voi jebuseu kuery rami avi 'rã okuave.

8 Ha'e gui xee ma xevygua oo aarõ 'rã aikovy ijyvýry rupi, xondaro kuery hexe opu'ã va'e ajoko aguã, ha'e va'e rupi ndoaxaavei neĩ ndoikeavei aguã, ha'e pygua kuery re imbojexavaiarã ndouvei aguã, mba'eta aŷ gui ma aexa pota 'rã xerexa py ae.

Sião gui Huvixave ou aguã re ijayvuague

9 — Peẽ Sião pygua kuery, pevy'a ete ke. Jerusalém pygua kuery, pevy'a avi ke. Mba'eta ne'exa, ou ma oiny Penderuvixaverã. Ha'e va'e ma heko porã va'e ha'e jogueraa jepea. Onhemoyvy'i va'e vy ou 'rã mburika áry, mburika ombovoyipy ra'y áry.*

10 Mba'eta Efraim gui ambovaipa 'rã karóxa joe opu'ãa pygua, ha'e Jerusalém gui ma amokanhymba 'rã kavaju kuery. Guyrapa joe opu'ãa pygua guive ambovaipa 'rã. Mba'eta Huvixave ma yvy regua kuery pe omombe'u 'rã peteĩ rami ikuai aguã. Ipo'akaa oo 'rã ye'ẽ nhavõ rupi, Eufrates yakã guive 'rã oo yvy apy peve.

* 9:9 Kova'e ayvu rami ae oiko Jesus re (Mateus 21.1-5; João 12.14-16).

¹¹ — Ha'e gui peẽ Sião pygua kuery, tuguy amoẽ uka reve xereve guarã ajapo va'ekue rami vy roguenoẽ 'rã yvykua py yy noña py penembo'aague gui.

¹² Escravo-rã pendereraa teĩ pearõ nho peikovy va'e, pejevy ju ke peneretã ikorapa va'e katy. Aÿ guive pendevy amombe'u mba'emo ame'ẽ retave ete aguã, perekó ae ma va'ekue áryve.

¹³ Ha'e gui Judá kuery aiporu 'rã guyrapa oipiraxa va'e rami, ha'e hu'yrã amoĩ 'rã Efraim kuery. Mba'eta peẽ Sião pygua kuery, pendera'y kuery ajapo 'rã Grécia pygua ra'y kuery rovai opu'ã aguã rami. Xee roiporu 'rã ojerovia rei va'e kyxe rami.

¹⁴ Ha'e gui Sião ra'y kuery ikuaria áry rupi ojekuaa 'rã SENHOR, ha'e oĩa gui hu'y hendy va'e omombo 'rã overa va'e rami. SENHOR Nhanderuete mimby guaxu omonhe'ẽ uka reve oo 'rã kuaray puku-a katyguia yvytu jere áry rupi.

¹⁵ Ha'e rami vy SENHOR ixondaro reta va'e oepy 'rã ojeupequa kuery. Ha'e ramo ha'e kuery omokanhymba 'rã inhyvõare kuery, opyrõmba 'rã guive. Vinho rami oy'upa 'rã huguy, ome'ẽ mbyre hy'a tynyẽ va'e rami 'rã hevyatãmba, opyta 'rã altar yvýry mba'emo ruguykue onhoëague rami.

¹⁶ Ha'e va'e ára ma Tuuete SENHOR ogueraajepe 'rã ojeupequa kuery guymba kuery rami. Mba'eta ixupe rã ha'e kuery coroa re ita porãgueve oĩ va'e rami ikuai, ixupequa yvy re overa 'rã okuapy.

¹⁷ Mba'eta ha'e kuery ma opa mba'e py porayvu ha'e iporã va'e 'rã ikuai! Kunumigue hexaïmba 'rã mba'emo aju gui, ha'e kunhataïgue ma hexaï avi 'rã vinho gui.

10

Judá ha'e Israel kuery omoingo porã aguã re Nhanderuete ijayvuague

¹ Ára pyau jave pejerure ke oky re SENHOR pe, mba'eta SENHOR ae 'rã ojapo arai oky aguã. Ha'e rami vy avakue pe ombou oky porã, ha'e nhuñdy rupi omoingo nhuñ roky.

² Ha'e rã ta'angaa oo pygua ma nhombotavya rupi 'rã ijayvu. Imba'ekuaa va'e voi ijapua meme oikuuaa. Nhombotavya rupi meme 'rã omombe'u oexa ra'uague, ijayvu porã merami rive 'rã guive, anhetẽ rupi e'ÿ. Ha'e nunga rupi ae heta va'e kuery ojexavai rei 'rã vexa'i kuery re opena va'e ndoikoia rami.

³ Ha'e nunga rupi xepoxya hendy joe opena va'e kuery rovai. Ha'e rami vy ambopaga 'rã kavara joguerecoarã omoĩ mbyre. Ha'e gui SENHOR ixondaro reta va'e ae 'rã opena guymba kuery Judá regua ikuai va'e re, oguerovy'a 'rã guive, kavaju joe opu'ã aguã katy oo va'e rami.

⁴ Mba'eta Judá gui ma oiko 'rã ita omboeteve pyrã, ha'e kuery gui oiko avi 'rã oguy ytara, guyrapa joe opu'ãa pygua ha'e huvixarã ha'e javi.

⁵ Ha'e kuery ikuai 'rã ipy'a guaxukueve, joe opu'ãa py ngovaigua kuery re opyrõmba va'e rami. Ha'e vy opyrõmba 'rã tape rupi yapo oĩ va'e re rami. Ha'e kuery reve SENHOR oiko ramo opu'ã kuaa 'rã. Ha'e rami yy ojapo 'rã hovaigua kuery kavaju áry ou va'ekue voi oxõmba aguã rami.

⁶ SENHOR aipoe'i:

— Xee amombaraete 'rã Judá kuery, araa jepe avi 'rã José kuery. Amboaxy ete vy ajapo 'rã ojevypa ju aguã rami. Ha'e ramo ha'e kuery ikuai 'rã namoxẽi va'ekue rami, mba'eta xee SENHOR Tuuete aendu 'rã ijayvua.

⁷ Ha'e ramo Efraim kuery ikuai porã 'rã ipy'a guaxukueve rami. Opy'a py ovy'a 'rã okuapy vinho gui rami. Ta'y kuery voi oexa vy ovy'a vaipa avi 'rã, ha'e opy'a py xee SENHOR xererovy'a 'rã.

⁸ Mba'eta ha'e kuery aepy rire aenoĩ vy amono'õmba ju 'rã. Ha'e gui amboeta ju 'rã ymave rupi hetaague rami.

⁹ Yvy regua kuery mbyte rupi amoãmba teĩ mombyry ikuaria py ima'endu'a 'rã okuapy xere. Gua'y kuery reve okuave ha'e ojevypa ju 'rã.

¹⁰ Mba'eta xee ae ajapo 'rã Egito yvy gui ojevypa aguã rami, Assíria gui voi amono'õmba 'rã heruvy. Gileade ha'e Líbano yvy gui 'rã aru, hoo renderã noïvei peve.

¹¹ Ye'ẽ rupi rami ha'e kuery oaxa 'rã ojexavaia rupi. Ha'e rami teĩ yai ainupã rã typa 'rã, Nilo yakã typyveague rupi voi ipirupa 'rã. Ha'e rami py amomba 'rã Assíria pygua kuery onhembovate reia. Egito pygua kuery po'akaa voi omokanhymbaa 'rã.

¹² Ha'e gui ajapo 'rã xee SENHOR re vy imbaraetepa aguã rami. Ha'e rami vy xerery rupi ae 'rã ikuai — he'i SENHOR.

11

¹ Ha'e gui Líbano pygua kuery, peipe'a ke peneretã rokẽ, tata oapypa aguã yary pendeyvy re ikuai va'e.

² Ha'e ndee voi yvyra cipreste ne'aĩ va'e, ejae'o avi yary oitypaa ma rire. Yvyra iporãgueve ikuai va'ekue ombovaipaa ma. Peẽ voi yvyra carvalho Basã yvy re pendekuai va'e, pejae'o, ka'aguy re yvyra heta ikuai va'ekue oake'opaa ma rire.

³ Pendu ke vexa'i re opena va'e raxẽmbei reia, mba'eta ha'e kuery ojou porãve va'ekue ombovaipaa ma ramo. Pendu ke guary ra'y kuery hevovo reia, Jordão yakã yvýry rupi ka'aguy iporãve va'ekue ombovaipaa ma ramo.

Vexa'i re ha'evea rami opena va'e re mba'emo ombojoja vy ijayvuague

⁴ Po rami ijayvu SENHOR Xeruete:

— Epêna ke vexa'i kuery ojuka pyrã ikuai va'e re.

⁵ Mba'eta ijoguaare kuery ojuka rive 'rã, ombopagaa e'ŷ re. Ha'e gui ivendeare kuery ma aipoe'i 'rã okuapy: “Tomboetea SENHOR, mba'eta aŷ arekopa 'rã”, he'i. Vexa'i re opena aguã omoõ mbyre voi noendui okuapy omboaxya.

⁶ Ha'e rami ae avi xee voi namboaxyvei ma 'rã kova'e yvy re ikuai va'e — he'i SENHOR. — Ha'e rami vy peteĩ-teĩ amboaxapa 'rã irũ kuery ha'e huvixave po py. Ha'e ramo ha'e va'e kuery ma kova'e yvy regua omoingo axy teĩ xee ndaraa jepei 'rã ipo'akaa gui.

⁷ Epêna ha'vy vexa'i kuery ojuka pyrã ikuai va'e, vexa'i mboae gui iporiaukueve'i va'e re — he'i.

Ha'e ramo xee araa mokoõ yvyra'i. Peteĩ ma amboery “Nhomboaxy aguã”, ha'e rã amboae ma “Peteĩ rami nhomoingo aguã.” Ha'e rami py apena aikovy vexa'i kuery re.

⁸ Ha'e gui peteĩ jaxy pyve amoxẽ mboapy avakue opena va'erã omoõ mbyre. Ha'e rami teĩ ndaropo'akavei ma vexa'i kuery. Ha'e kuery voi ndaxerayvuvei.

⁹ Ha'e ramo xee aipoa'e ha'e kuery pe:

— Napenavei ma 'rã peẽ kuery re. Pemanoxe va'e pemano tema. Pekanhyxe va'e ma pekanhy tema. Ha'e gui penerembyrekue ma peteĩ-teĩ 'rã pe'u peneirũ kuery ro'okue ae — ha'e.

¹⁰ Ha'e rami vy yvyra'i “Nhomboaxy aguã” amboery va'ekue ajopy vy amopẽ, ambovaipa aguã yvy regua ha'e javi areko aguã ajapo va'ekue.

¹¹ Ha'e va'e árave ambovaipa. Ha'e rã vexa'i poriaukue'i xerexa vy oikuua okuapy SENHOR ayvu rupi ae ri ty ajapo ra'ea.

¹² Ha'e gui xee aipoa'e vexa'i kuery pe:

— Peẽ kuery pe ha'eve ri ramo peme'ẽ ha'vy amba'eapoague repy. Ha'e rami e'ŷ vy tove ri — ha'e. Ha'e ramo xevy pe opeja okuapy trinta hatã'i va'e prata guigua amba'eapoague repyrã.

¹³ Ha'e ramo SENHOR aipoe'i xevy:

— Hatã'i va'e emombopa ke nhae'ũ re ombo'eapo va'e pe, remba'eapoague repyrã mbovy rei e'ŷ ome'ẽ rire — he'i. Ha'e ramo trinta hatã'i va'e prata guigua ajopy vy araa SENHOR pegua oo py, nhae'ũ re ombo'eapo va'e oĩ va'e peguarã.*

¹⁴ Ha'e gui yvyra'i mboae ju amopẽ avi, “Peteĩ rami nhomoingo aguã” 'epy va'e, Judá ha'e Israel kuery joegua rami ve'ŷ ikuai aguã.

Vexa'i re o'arandua rupi e'ŷ opena va'e re ijayvuague

* ^{11:13} Profeta hetarã kuery nombovarei vy trinta hatã'i va'e ete'i ome'ẽ okuapy ixupe, escravo repy rami rive (Êxodo 21.32). Ha'e gui Jesus oiko jave hemimbo'e Judas ombo'a uka ramo ixupe ha'e rami ae avi opagaa (Mateus 26.14-16, 27.3-10).

¹⁵ Ha'e gui SENHOR aipoe'ive ju xevy:

— Aŷ ma ndejeupe guarã eru vixa'i re o'arandua rupi e'ŷ opena va'e rembiporu,

¹⁶ mba'eta ne'exa, ijyvy re peteĩ amoĩ 'rã joe opena va'erã teĩ ha'e va'e ma ndoikuua potai 'rã omano rai'i ma okuapy va'e re, okanhhygue ndoekai 'rã, ijaipa va'e noipoanoi 'rã, neĩ hexaĩ va'e nomongarui 'rã guive. Ha'e rami 'rãgue py ho'u 'rã oikovy ikyrakueve ro'o, ipyapẽ voi omboi 'rã.

¹⁷ Nda'evei ete 'rã o'arandua rupi e'ŷ opena, ha'e mymba kuery oejapa ovv va'ekue pe. Mba'eta ha'e va'e jyva ma oikyxia 'rã kyxe py, hexa oiporu kuaa regua rupi avi oikyxia 'rã. Ha'e ramo ijyva ipirupa 'rã, hexa oiporu kuaa regua voi oguepa 'rã.

12

Jerusalém pygua kuery SENHOR ogueraa jepe aguã re ijayvuague

¹ Po rami SENHOR ijayvu Israel kuery rovai. SENHOR yva pyoare, yvy nhonoare ha'e avakue re inhe'ẽrã omoĩ va'ekue aipoe'i:

² — Ne'exa, Jerusalém tetã ma xee ajapo 'rã peteĩ karo ha'e javi regua ijyvýry ikuai va'e oy'u aguã, ha'e rami vy inhakanhymba aguã, ha'e kuery Jerusalém tetã ojokopa rire, Judá yvy guive.

³ Ha'e va'e ára ma Jerusalém tetã ajapo 'rã peteĩ ita ipoyi ete va'e, ha'e javi regua kuery pe. Ha'e ramo ha'e va'e oupi va'e rei oiko axy ete 'rã. Mba'eta yvy jave regua ha'e javi 'rã ono'õmba okuapy Jerusalém re opu'ã aguã.

⁴ SENHOR aipoe'i:

— Ha'e va'e ára ma amoingo axy 'rã kavaju kuery nhemondyi gui rive, ha'e rã hi'arygua kuery ma akã porã ve'ŷ rupi 'rã amoingo axy. Aipe'a 'rã Judá kuery rex, ha'e yvy regua kuery rymba kavaju rex, voi amboguepa avi 'rã.

⁵ Ha'e ramo Judá pygua huvixa kuery ma oexa'ã 'rã: “Aŷ ma Jerusalém pygua kuery ha'e javi ma SENHOR ixondaro reta va'e nguuete re vy imbaraete 'rã okuapy”, he'i 'rã.

⁶ Mba'eta ha'e va'e ára ajapo 'rã Judá pygua huvixa kuery tapyi yxakã guýry hendy va'e rami. Ajapo 'rã takua ryxa mba'emo 'ygue hendy va'e rami ikuai aguã rami. Mba'eta oiporu kuaa regua ha'e oiporu kuaa e'ŷa rupi ha'e kuery omokanhymba 'rã ijyvýry ikuai va'e regua ha'e javi. Ha'e ramo Jerusalém pygua kuery ma Jerusalém tetã py oikoague py ae ju 'rã heko.

⁷ Judá regua rekoia ikuai va'e ranhe 'rã SENHOR ogueraa jepe, Judá kuery áry gui Davi ramymimo kuery ha'e Jerusalém pygua kuery onhemboyvate e'ŷ aguã.

⁸ Ha'e va'e ára SENHOR opena 'rã Jerusalém pygua kuery re. Ha'e ramo ha'e pygua ikangykuveva'ekue ma Davi rami 'rã imbaraete, ha'e rã Davi ramymimo kuery ma Nhanderuete rami 'rã imbaraete, mba'eta ha'e kuery renonde SENHOR guigua anjo oo 'rã.

⁹ Ha'e va'e ára guive amboypy 'rã amomba aguã ha'e javi regua Jerusalém tetã re opu'ã aguã ou va'ekue.

Jerusalém pygua kuery ojeko rerovapa aguã re ijayvuague

¹⁰ — Ha'e gui Davi ramymimo kuery ha'e Jerusalém pygua kuery re ambou 'rã Nhe'ẽ amboaxya rex, ukaarã, xevy pe ju ha'e kuery ojapukai aguã rami ojapo va'erã. Ha'e ramo ha'e kuery oexa ju 'rã oipyxo va'ekue. Ha'e va'e re ipy'a vai 'rã okuapy gua'y pete'i'i va'e re ipy'a vai va'e rami, hexe ojae'o 'rã gua'y jypy guare re ojae'o raxa va'e rami.*

¹¹ Ha'e va'e ára Jerusalém tetã py heta ete 'rã ikuai ojae'o va'e, Megido yvyugua re Hadade-Rimom py ojae'oague rami.

¹² Ha'e rami vy oyvy ha'e javi rupi ojae'o 'rã okuapy, peteĩ-teĩ oo pygua kuery ikuiaia py ae. Ha'e rami vy Davi ramymimo kuery ma ha'e kuery ae'ia py 'rã ojae'o, ta'yxy kuery voi

* 12:10 Kova'e ayvu rupi ma João 19.37 py Jesus reko re ijayvu. Ha'e gui raka'eve rã judeu kuery hexe vy ojeko rerovapa 'rã (Romanos 11.25-27; Apocalipse 1.7).

ha'e kuery ae'ia py ae, Natā ramymino kuery ma ha'e kuery ae'ia py ae, ha'e gui ta'yxy kuery voi ha'e kuery ae'ia py ae ju 'rā ojae'o okuapy,

¹³ ha'e gui Levi ramymino kuery ma ha'e kuery ae'ia py ae, ta'yxy kuery ma ha'e kuery ae'ia py ae, Simei ramymino kuery ma ha'e kuery ae'ia py ae, ta'yxy kuery voi ha'e kuery ae'ia py ae 'rā ojae'o.

¹⁴ Ha'e gui amboae oo pygua kuery voi ha'e rami ae tema 'rā ikuai. Peteī-teī oo pygua kuery ha'e kuery ae'ia py ae ojae'o, ta'yxy kuery voi ha'e kuery ae'ia py ae ju 'rā ojae'o okuapy.

13

Mba'emo ra'angaa ha'e profeta kuery ramigua rive oipe'apaa aguā re ijayvuague

¹ Ha'e va'e ára ma ojekuaa 'rā peteī yvu Davi ramymino kuery ha'e Jerusalém pygua kuery ha'e javi pe, ojeavyague ha'e iky'apaa gui oiky'a'o va'erā.

² Mba'eta SENHOR ixondaro reta va'e aipoe'i: — Ha'e va'e ára ma ijyvy gui amokanhymba 'rā mba'emo ra'angaa rery ha'e javi, ha'e va'e re rive na'ima'endu'aavei aguā. Ijyvy gui aipe'a avi 'rā profeta ramigua kuery, nhe'ẽ vai guive.

³ Ha'e gui xapy'a rei amongue onhemoingo 'rā profeta ramigua. Ha'e ramo ha'e va'e pe tuu ha'e ixy imbotujaare kuery ae aipoe'i 'rā: "Nda'evei reikoveve aguā, SENHOR ayvu rupi merami rive ndeapu rire", he'i 'rā okuapy. Ha'e rami vy tuu ha'e ixy imbotujaare kuery ae 'rā ojuka profeta ramigua rive onhemoingo rire.

⁴ Ha'e va'e ára ma profeta kuery peteī-teī oximba rei 'rā oexa ra'uague rive omombe'uague re. Ha'e rami vy nhombotavya rupi nonhemondevei ma 'rā mba'emo rague py.

⁵ Ha'e rami 'rāgue py aipoe'i 'rā: "Xee ma profeta e'ŷ aiko, ama'etŷa rupi rive xee aiko va'e. Mba'eta xekunumi guive escravo-rā xejoguaa va'ekue", he'i 'rā.

⁶ Ha'e gui xapy'a rei ixupe amongue oporandu 'rā: "Mba'exa'vy tu ndepo re kyxīague oī?" he'i ramo ombovai vy "Kyxīague xere oī va'e ma xeirū kuery ro py aī jave xekyxīa rive", he'i rive 'rā.*

Nhanderuete remimbou joe opena va'e ojukaa aguā re ijayvuague

⁷ Ha'e gui SENHOR ixondaro reta va'e aipoe'i:

— Ha'e gui ndee kyxe, epu'ã ke xeremimbou xea katyguia ete joe opena va'e rovai. Ejuka ke joe opena va'e. Ha'e ramo hymba vixa'i kuery ma oāmba 'rā.† Mba'eta xepo aupi 'rā vvyīgueve'i rovai — he'i.

⁸ SENHOR aipoe'i:

— Ijyvy ha'e javi rupi mboapy ikuai nhavō py mokō-mokoī ojukaa kuerei 'rā, okanhy ete 'rā. Ha'e rā mboapya va'e regua ma oikoveve 'rā.

⁹ Mba'eta mboapya va'e regua ma ajapo 'rā tata rupi oaxa aguā rami. Ha'e rami vy aiky'a'o 'rā prata oiky'a'oa rami, aa'anga 'rā ouro oa'angaa rami. Ha'e ramo mae ma ha'e kuery ojapukai 'rā xerery rupi, ha'e ramo xee aendu 'rā. Ha'e kuery pe "Xevyguā" ha'e 'rā. Ha'e rā ha'e kuery ma "SENHOR ae ma Xeruete" he'i 'rā okuapy.

14

Jerusalém tetā pygua kuery ha'e imbojexavaia kuery moingo axyarā ou aguā re ijayvuague

¹ Ne'ixa, ovaē ma ouvy SENHOR ára, mba'emo perekō va'ekue omboja'opaa aguā pendekuaia mbyte gui.

² Mba'eta vvy regua ha'e javi amono'õmba 'rā imbouvy Jerusalém tetā re opu'ã aguā. Ha'e ramo ha'e kuery ipo'aka ete 'rā tetā re. Ha'e rami vy mba'emo oipe'apa 'rā oo ikuai

* 13:6 Amongue py profeta ramigua rive gueko rami vy onhekiximba 'rā nguuete ramigua pe ojapukai reve (1 Reis 18.27-28). Mba'emo rague py onhemonde 'rā guive, profeta Elias rami avi (2 Reis 1.7-8). † 13:7 Kova'e ayvu ramo ae oiko avi Jesus re (Mateus 26.31 ha'e Marcos 14.27).

va'e gui, kunhague ikuai va'e ma oguero'apaa rive 'rã guive. Tetã pygua kuery mbytekue peve 'rã ogueraa escravo-rã, ha'e rã hembyrekue ma tetã gui ndoipe'aai 'rã.

³ Ha'e gui ma SENHOR oẽ 'rã ouvy yvy regua kuery rovai opu'ã aguã, joe opu'ã va'e rami ae.

⁴ Ha'e va'e ára ma SENHOR hi'aí 'rã Jerusalém regua kuaray oua katy Oliveiras vyty oĩ va'e áry. Ha'e ramo ha'e va'e vyty ma xapy'a 'rã ovo mbyte rupi, kuaray oua katy gui oikea katy peve. Ha'e rami vy vyty mbyte rupi ojekuaa 'rã peteĩ vyv'ã ugua, mba'eta vyty mbytekue oja'o 'rã kuaray ijapu'a'ia katy, ha'e rã hovaikue ma kuaray puku-a katy 'rã oo.

⁵ Ha'e ramo peẽ kuery pejava 'rã peovy xevyguia vyv'ã ugua rupi, mba'eta Azal peve 'rã oo vyv'ã ugua. Tá, pejava 'rã Judá pygua huvixa Uzias oĩ jave py yvy ryryi oiko va'e gui ojavapaague rami. Ha'e gui mae ma ou 'rã SENHOR Xeruete, ha'e hupive iky'a e'ý va'e kuery ha'e javi voi.

⁶ Ha'e va'e ára ma ndoikoi 'rã hexakãa, yro'y atã anho 'rã itui.

⁷ Ha'e va'e ára ma peteĩ'i 'rã, SENHOR anho oikuua va'e regua. Ndoikoi 'rã ára, neĩ pytũ ma voi noĩ 'rã. Ha'e rami teĩ ka'aru peve ojekuaa 'rã hexakãa.

⁸ Ha'e va'e ára ma Jerusalém tetã guive oxyry 'rã ovy yy imarã e'ý va'e. Ha'e gui yy oja'o vy amongue oxyry 'rã ovy kuaray oua katy ye'ẽ oĩ va'e katy, ha'e rã amboae ma kuaray oikea katy ye'ẽ oĩ va'e katy 'rã oxyry ovy. Oxyry riae 'rã, kuaray puku jave e'ý vy yro'y jave teĩ.

⁹ Ha'e gui SENHOR ae 'rã oĩ huvixave yvy jave rupi opena va'e. Ha'e va'e ára ma peteĩ'i anho 'rã oiko SENHOR, ha'e peteĩ'i avi 'rã hery oĩ.

¹⁰ Ha'e gui ma vyv ha'e javi rupi opyta 'rã vyv joja reia Jerusalém regua kuaray oua katy Geba ha'e Rimom vyvýry rami. Ha'e rã Jerusalém tetã ma yvateve 'rã oiny, oĩa py ae 'rã ikuia guive, Benjamim rokẽ oĩa guive jypyguia okẽ peve, ha'e okẽ kora ojerea rupi oĩ va'e peve, ha'e gui Hananel regua torre oĩa guive huvixa pegua uva onhamiaty peve ju.

¹¹ Ikuia 'rã ha'e py ae. Ndouei 'rã ayvu vai imbovaipaarã. Oĩ porãmba 'rã Jerusalém tetã.

¹² Ha'e rã vyv regua kuery Jerusalém tetã re opu'ã va'ekue ma po rami 'rã SENHOR omoingo axy. Ho'okue hu'üm̄ba 'rã, opu'ã teri ho'amy reve teĩ. Hexa voi hu'üm̄ba 'rã okua py oĩ reve, ha'e inhapekũ hu'üm̄ba avi 'rã ijuru py oĩ reve.

¹³ Ha'e kuery ikuia py SENHOR ombou avi 'rã opa marãguia imondyipa reiarã. Ha'e rami vy peteĩ-teĩ oirũ kuery po re ojopy vy oguero'a 'rã, peteĩ-teĩ opu'ã 'rã oirũ kuery re ae.

¹⁴ Judá kuery voi Jerusalém tetã oepy vy opu'ã 'rã okuapy joe. Ha'e rami vy omboatypa 'rã ha'e'i rupi vyv regua ikuai va'e mba'emo oguereko va'ekue, ouro ha'e prata guigua, ao mbovy e'ý ete guive.

¹⁵ Ha'e rami ae omoingo axy avi 'rã hymba kuery kavaju, mburika, camelo, mburika'i, ha'e ikuia rupi guymba oguereko va'ekue ha'e javi.

"Nhandeuete pegua tetã py iky'a e'ý va'e anho 'rã oĩ" he'iague

¹⁶ Ha'e gui ma vyv regua kuery Jerusalém tetã re opu'ã va'ekue rembyrekue ma ma'etýa nhavõ 'rã ojevy jogueruvy omboete aguã huvixave SENHOR ixondaro reta va'e, ha'e ngaru oguy'i pygua ára ikuai aguã guive.

¹⁷ Ha'e gui xapy'a rei amongue regua ndooi 'rã Jerusalém py huvixave SENHOR ixondaro reta va'e omboete aguã. Ha'e rami rã ha'e kuery vyv re nda'okyi 'rã.

¹⁸ Xapy'a rei Egito pygua kuery mba'e ngaru oguy'i pygua py ndooi ramo ha'e kuery vyv re nda'okyi 'rã. Ha'e kuery áry ou 'rã imoingo axyarã, vyv regua ndooi va'ekue áry SENHOR ombou va'e ramigua ae.

¹⁹ Ha'e rami ae 'rã omoingo axy Egito pygua kuery ha'e vyv regua ha'e javi, ngaru oguy'i pygua py ndooi va'ekue.

²⁰ Ha'e gui ha'e va'e ára ma kavaju xã mbojeguua oĩ va'e re voi omboparaa 'rã imoiny "SENHOR pegua iky'a e'ý va'e" he'ia. SENHOR pegua opy oja oiporua va'e rei iky'a e'ý va'e avi 'rã, altar yvýry hy'a guaxu oiporua va'e rami ae.

²¹ Tá, Jerusalém tetã rupi ha'e Judá yvy re oja ikuai va'e ma iky'a e'ŷ va'e meme 'rã ikuai SENHOR ixondaro reta va'e pegua. Ha'e ramo mba'emo ome'ẽ va'erã ogueru va'e kuery ha'e javi ma oja oĩ va'e rive ojou vy ha'e va'e py ae 'rã ombojy SENHOR pegua xo'o. Ha'e va'e ára ma SENHOR ixondaro reta va'e pegua oo py noïvei 'rã mba'emo vendea rupi rive ikuai va'e.

Malaquias ayvu oĩa Malaquias ayvu oĩa

Israel kuery Jerusalém tetā py ikuai va'e templo omoatyrō ju teĩ Nhanderuete ojapo uka va'ekue rupi e'ŷ teri ikuai. Ha'e kuery pe profeta Malaquias ijayvu ojeko rerova aguã, mba'eta Senhor ára ou oiny ramo. “Senhor ixondaro reta va'e aipoe'i: ‘Ou ma oiny ára tatakua rami haku raxa va'erã. Onhemboyvate rei ha'e teko vai rupi ikuai va'ekue okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neĩ hi'ygue. Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakãa rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi. ... Ha'e gui Senhor ára tuvixa ha'e ijavaete va'e ovaẽ ta ramo pendea py ambou ju 'rã profeta Elias. Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py’ ”, he'i (4.1-2, 5-6).

Ha'e rami py Antigo Testamento ijapy. Ha'e va'e rire 400 ma'etŷ rivyvyia py ma Jesus Cristo ou.

Jacó oayvua rami SENHOR ijayvuague

¹ Kova'e ayvu ma Malaquias pe SENHOR omombe'u uka va'ekue Israel kuery rovai.

² — Xee ma roayvu va'e — he'i SENHOR.

Ha'e rã peẽ kuery ma peporandu:

— Mba'exa vy tu ndee orerayvu?

SENHOR ombovai:

— Esaú ma Jacó ryke'y e'ŷ teve raka'e? Ha'e rami teĩ Jacó ae ayvu,

³ ha'e rã Esaú re ma ndaxea'ei, ha'e rami vy ha'e kuery rekoarã vyty ome'ẽ mbyre ambovaipa vy amboaxa raka'e jagua-tuvy nhe'ẽ tekaoa e'ŷa rupigua pe rive — he'i.*

⁴ Ha'e gui ma xapy'a rei Edom pygua kuery* aipoe'i 'rã: “Kore nhanderekoa SENHOR ombovaipa teĩ oityague py ae ju 'rã jajapopa”, he'i 'rã okuapy.

Ha'e rã SENHOR ixondaro reta va'e ma aipoe'i: “Ha'e kuery ojapopa teĩ xee aitypa ju 'rã. Ha'e rami rire Edom yvyomboerya 'rã: ‘Yvy teko vai renda’, ha'e ‘Ha'e kuery pe SENHOR ipoxy raka'e rã peve' 'ea 'rã.

⁵ Ha'e nunga penderexa py ae 'rã pexa. Ha'e vy ‘SENHOR tu ipo'akapa va'e rima ra'e, Israel kuery ikuiaia rupi anho e'ŷ, peje 'rã”, he'i.

Sacerdote kuery pe SENHOR ijayvu eteague

⁶ SENHOR ixondaro reta va'e aipoe'i:

— Ta'y kuery ikuai va'e omboete 'rã nguu, ha'e tembiguai kuery voi omboete 'rã herekooa. Ha'e rami teĩ xee ri Penderu aiko teĩ mamo tu oĩ xemboetea? Xee ri Pendererekaoa ae avi aiko teĩ mamo tu ha'vy oĩ xemboetea? Mba'eta peẽ sacerdote kuery pendekuai va'eri xerery napemboetei va'e.

— Ha'e rã peẽ kuery ma peporandu 'rã: “Mba'e nunga py tu noromboetei ri nderery?” peje 'rã.

⁷ — Ambovai: “Mba'eta mbojape ha'eve'ŷ va'e rive peme'ẽ xevygua altar áry”, ha'e.

— Ha'e gui peporanduve tema: “Mba'e nunga py tu ndee noromboetei?”

— Ambovai: “Mba'eta aipopeje: ‘SENHOR pegua mesa ma ojou vaipy’ pejea py.

⁸ Mba'eta xevy pe peme'ẽ 'rã mymba oma'ẽ e'ŷ va'e. Ha'e nunga rive Peru ramo nda'evei e'ŷ teve? Ha'e rami e'ŷ vy hetyma rovai va'e, e'ŷ vy imba'eaxykue Peru ramo nda'evei

* 1:3 Romanos 9.13 * 1:4 Edom ma Esaú rery mboae (Gênesis 25.30). Ha'e rami vy Edom pygua kuery ma Esaú ramymino ikuai. Ha'e rã Israel kuery ma Jacó ramymino ikuai.

e'ŷ avi teve? Xapy'a rei penderuvixa pe ha'e ramigua peme'ẽ va'e rire ha'e va'e nda'u pendejou porã vy pendererovy'a 'rāgue? Any", he'i SENHOR ixondaro reta va'e.

⁹ — Aŷ ma pejapukai ke Penderuete pe penemboaxy nho aguã. Ha'e rami avi namigua pendepo py peme'ẽ va'erã peru ramo xee rojou porã 'rā teve? — he'i SENHOR ixondaro reta va'e.

¹⁰ — Ha'eveve 'rāgue peẽ kuery va'e regua xerorokē pembotypa va'e rire, xevyguia altar áry tata napemoendy rivevei aguã. Mba'eta xee ma ndoroguerovy'ai ruxã'i ma voi. Ha'e rami vy ndajopyi 'rā guive peme'ẽ va'erã pendepo py peru va'e — he'i SENHOR ixondaro reta va'e.

¹¹ — Ha'e rã yvy regua ikuiaia rupi ma xerery omboete 'rā okuapy, kuaray oëa katy guive oikea katy peve. Opa rupi xevy oapy 'rā heakuã porã va'e, ha'e iky'a e'ŷ va'e anho 'rā ogueru ome'ẽ va'erã. Mba'eta xerery omboetea 'rāe yvy regua kuery ikuiaia rupi — he'i SENHOR ixondaro reta va'e.

¹² — Ha'e rã peẽ kuery ma pemongy'apa xerery, mba'eta aipopeje: "SENHOR pegua mesa ma ha'eve'ŷ va'e, ha'e hi'áry tembi'u nhame'ẽ va'e voi ojou vaipy", peje.

¹³ Aipopeje avi: "Ai nhanekane'õ rive ma!" peje vy xemboetea rupi e'ŷ pendekuai. Mba'eta oixu'upa pyre peme'ẽ, hetyma rovaikue, ha'e imba'eaxykue guive. Namigua rive peme'ẽ ramo xee ajopy 'rā ri ty'y pendepo gui? Any — he'i SENHOR ixondaro reta va'e.

¹⁴ — Ijayvu vaipy toiko xembotavypaxe va'e, guymba hexaïmba va'e oguereko vy ha'e va'e ae SENHOR pe ome'ẽ aguã re ijayvu teĩ hekovia ivaikue'i rive ome'ẽ va'e. Mba'eta xee ma huvixave yvate ete va'e aiko. Ha'e ramo yvy regua kuery ma xerery oendu vy oikuua pavẽ 'rā ijavaete va'e aikoa — he'i SENHOR ixondaro reta va'e.

2

Sacerdote kuery ombopaga aguã re ijayvuague

¹ SENHOR ixondaro reta va'e aipoe'i:

— Aŷ peẽ sacerdote kuery, pendevy pe xeayvu mba'emo ajapo uka vy.

² Ha'e gui napendu potai, ha'e pendep'y'a re xerery pembboete aguã napemoõ ramo pende'áry ambou 'rā ayvu vai. Rogueroayvu porã 'rāgue py xeayvu vai 'rā pendevy. Xeayvu vai ae ma guive, ha'e rami aguã pendep'y'a re napemoõ rire.

³ Ne'exa, peneramymino kuery pe voi xeayvu 'rā, ha'e penderova re amombo 'rā mymba peme'ẽ va'erã Peru va'ekue repoxi, ha'e nunga reve pendereraapaa avi aguã.*

⁴ Ha'e ramo peikuaa 'rā Levi ramymino kuery pe xereve guarã ajapo va'ekue oĩ riae aguã ajapo uka po rami — he'i SENHOR ixondaro reta va'e.

⁵ — Mba'eta Levi ramymino kuery pe xereve guarã ajapo va'ekue ma tekove ha'e ikuai porã aguã regua. Ha'e va'e mokoïve ame'ẽ xerenonde ojererokyjea rupi ikuai aguã. Ha'e ramo ha'e kuery ma xerenonde ojererokyjea rupi oryryi ete karamboae xerery oendu vy.

⁶ Ijuru py oĩ va'ekue anhetẽ ete rupi nhombo'ea, ha'e rã ha'eve e'ŷa rami joguereko aguã ma noĩ va'ekue ijuru py. Xereve peteĩ rami ikuai va'ekue teko porã rupi. Ha'e rami vy heta va'e kuery ombo'e ojejavya gui ojepe'a aguã rami.

⁷ Mba'eta sacerdote kuery ma ojuru py 'arandu re ijayvu aguã rami ikuai, ha'e kuery juru gui avakue oendu aguã o'arandurã, mba'eta SENHOR ixondaro reta va'e ayvu reraa ikuai.

⁸ Ha'e rã peẽ kuery ma ha'e va'e tape gui pejep'e vy penhombo'ea rupi heta ma pejapo ojejavy aguã rami. Pejep'e rive Levi ramymino kuery pe xereve guarã ajapo va'ekue gui — he'i SENHOR ixondaro reta va'e.

⁹ — Ha'e nunga rupi ae xee rojapo ojou vaipy ha'e omboetepy e'ŷ pendekuai aguã rami heta va'e kuery renonde, tape aeja va'ekue rupi napendekuai, ha'e lei rupi e'ŷ, ha'eve'ŷa rami anho pejogueroko rire — he'i.

Nhandera'yxy kuery pe jajejavý e'ŷ aguã re ijayvuague

* 2:3 Ha'e kuery iky'apa va'e ikuiaia rami ijayvu, mba'eta mymba repoxi ma oapya aguã py 'rā heraa (Levítico 16.27).

¹⁰ Nhanderu ma pete'i va'e'ŷ ri ty'y oiko? Nhanderuete e'ŷ teve nhanemoingo pavẽ raka'e? Mba'e re tu ha'vy anhetẽ rupi e'ŷ jajoguerek? Ha'e rami vy nhambovaipa nhaneramoĩ kuery pe Nhanderuete guexeve guarã ojapo va'ekue.

¹¹ Mba'eta Judá kuery ma ojeroviapy rupi e'ŷ ikuai vy ojeguarupy ojapo Israel yvy re, Jerusalém tetã py guive. Mba'eta SENHOR pegua oo iky'a e'ŷ va'e oguerovy'a ete va'e ma Judá kuery omongy'apa vy omenda tuuete ramigua mboae mboetea kuery re.

¹² Ha'e gui avakue ha'e rami ete ojapo va'e rei SENHOR omokanhymba 'rã Jacó kuery ikuiai gui, SENHOR ixondaro reta va'e pe mba'emo ome'ẽ va'eri.

¹³ Pova'e nunga pejapo avi va'e. Mba'emo peme'ẽ va'e re ha'e noma'ëvei, pendepo gui ndojopyvei ndoguerovy'avei vy. Ha'e ramo SENHOR pegua altar pejao'i 'rã pendexay py. Pejae'o reve penepoaẽ rei pekuapy.

¹⁴ Ha'e rami vy peporandu guive vy "Mba'e re tu nanhandererovy'avei?" peje. Mba'eta SENHOR oikuua porã nekunumi vy ndera'xyrã reraa va'ekue reve pete'i rami pejoguerek aguã pejapoague. Pendera'xyx kuery ma peneirũ oiko, pete'i rami pendekuai aguã pejapoague regua tei ha'e kuery pe pejejav.

¹⁵ SENHOR pete'i rami e'ŷ teve ava ha'e kunha omoingo raka'e, pete'i'i nhe'ẽ omoĩ reve? Mba'erã tu pete'i rami omoingo raka'e? Mba'eta oipota ta'y kuery ha'e hamymino kuery ixupe ete ikuai. Ha'e nunga rupi peikuaa pota pendejee ae. Avave rei tojajevy eme gua'xyrã kunumi jave ogueraa va'ekue pe.

¹⁶ Mba'eta SENHOR Israel kuery Ruete aipoe'i: "Xee ndajou porãi joegui opoi va'e, nei joguero'aa rupi onhemongy'apa rei va'e", he'i SENHOR ixondaro reta va'e. Ha'e nunga rupi peikuaa pota pendejee ae, joupe pejejav e'ŷ aguã.

SENHOR ou jevy e'ŷ mbove ixupegu Anjo ojekuaa aguã re ijayvuague

¹⁷ Peẽ kuery pemomboriau SENHOR pendeayvu py. Ha'e ramo aipopeje: "Mba'e nunga py tu romomboriau?" peje. Mba'eta pendejeupe ae aipopeje: " SENHOR omboeko porã 'rã teko vai apoa kuery, oguerovy'a guive", peje. Ha'e rami e'ŷ vy "Mba'exa tu oiko Nhanderuete nhombopaga aguã?" peje rive.

3

¹ SENHOR ixondaro reta va'e aipoe'i:

— Xerenonde rupi amondouka 'rã xeayvu reraarã tape oguerek katu aguã. Ha'e gui ma Senhor pearõ pekuapy va'e ou xapy'a 'rã ojeupagua templo py. Ha'e va'e ma xeremimbou, xereve guarã ajapo va'ekue kuaa ukaarã ambou va'e, peipota va'e ae. Ne'exa, ou ma oiny.*

² Ha'e rami avi mava'e tu ogueropo'aka 'rã oua ára? Ha'e ojekuaa ramo mava'e tu optya 'rã ho'amy? Mba'eta tata ouro ky'a'oa rami oiko, kavõ ao joia rami guive.

³ Mba'eta openaaty py oguapy 'rã joky'a'o aguã prata omboyku reve oiky'a'oa rami. Ha'e vy oiky'a'o 'rã Levi ramymino kuery, ouro ha'e prata rami ete 'rã oiky'a'o. Ha'e ramo mae SENHOR pe ha'e kuery oguer 'rã ha'evea ramigua ome'ẽ va'era.

⁴ Ha'e ramo SENHOR oguerovy'a 'rã mba'emo Judá ha'e Jerusalém pygua kuery ome'ẽ va'e, yma guare rami, ára jypy guare rami.

⁵ — Pendere aikuua pota vy 'rã aju pendea py. Ha'e rami vy are'ŷ'i re xeayvu 'rã imba'evyky va'e kuery rovai, itavy rei va'e, oura rive-rive va'e, ombo'eapo va'e pe ha'eve'ŷ'a rami opaga va'e kuery, imeve'ŷ va'e ha'e tyre'ŷ moingo axya, amboae yvy guigua rerekoyxa, ha'e xerenonde ojererokyje rupi e'ŷ ikuai va'e ha'e javi rovai — he'i SENHOR ixondaro reta va'e.

Dízimo ha'e mymba nome'ẽ porãi okuapya py imonda rã ijayvuague

⁶ — Mba'eta xee SENHOR ma ojeko rerova va'e'ŷ aiko. Ha'e nunga rupi peẽ Jacó ramymino kuery, napekanhyi.

* 3:1 Mateus 11.10, Marcos 1.2, Lucas 7.27

⁷ Mba'eta peneramoī kuery ikuai guive ma voi pejepe'a xeayvu aeja va'ekue gui, ndapejapoi ete. Pejevy ju ha'vy xea py, ha'e ramo xee voi ajevy ju 'rā peēa katy — he'i SENHOR ixondaro reta va'e.

— Ha'e rami teī peē kuery aipopeje: “Mba'exa tu rojevy aguā rami roiko?” peje.

⁸ Ha'e rami avi peē avakue penemonda 'rā ri ty'y Penderuete gui? Mba'eta peē kuery penemonda xegui. Ha'e ramo aipopeje: “Mba'e nunga py tu oremonda ndegui?” peje ramo xee ambovai: “Dízimo ha'e mymba napeme'ē porāia py”, ha'e.

⁹ Xegui penemonda rire ayvu vaipy peiko, peē kuery ha'e javi.

¹⁰ Peru ke ha'vy dízimo ha'e javi mba'emo omoī porāaty py, xevygua opy oī aguā tembi'u. Xera'ā ke ha'e nunga py — he'i SENHOR ixondaro reta va'e. — Ha'e rami rā yva re janela oī va'e aipe'a vy peē kuery áry anhoē 'rā penemoingo porāarā, oīmba aguā nda'evei peve.

¹¹ Peē kuery re ama'ē vy xeayvu ete 'rā mba'emo aju 'upaa pe, pendeyvy gui mba'emo aju oiko rā omomba e'ŷ aguā, uva penhotŷ va'ekue voi ndai'a ve'ŷi aguā — he'i SENHOR ixondaro reta va'e.

¹² — Ha'e gui pendeyvy iporā ete ramo pendevy ha'e javi regua “Ovy'a ete va'e” he'i 'rā okuapy — he'i SENHOR ixondaro reta va'e.

Heko porā va'e ha'e heko vai va'e joo ramigua e'ŷ ikuiaia re ijayvuague

¹³ SENHOR aipoe'i:

— Pendeayvua ma nda'evei ete xevy. Ha'e rami teī peē ma aipopeje: “Mba'exa tu oreayvu ndere?” peje.

¹⁴ Mba'eta aipopeje: “Nda'eve ranhei Nhanderuete pe nhandekuaia. Mba'e 'rā tu jajou ijayvua jajapo vy, ha'e SENHOR ixondaro reta va'e renonde rupi jaja'e'o reve nhandekuai vy?

¹⁵ Mba'eta nhande jaikuaa onhemboyvate rei va'e kuery ov'y'a reia. Ha'e kuery opa marā rei ikuai teī ma ikuai porā. SENHOR re voi opu'ā va'eri oo jepe”, peje rive.

¹⁶ Ha'e rā SENHOR renonde ojererokyjea rupi ikuai va'e ma jomeme ijayvu okuapy. Ha'e ramo SENHOR oendu pota. Ha'e rami vy SENHOR renonde peteī kuaxia omboparaa, henonde ojererokyje ha'e hery re ima'endu'aa rupi ikuai va'e rery oīa, ha'e kuery re avi ima'endu'aa riae aguā.

¹⁷ SENHOR ixondaro reta va'e aipoe'i:

— Aikuua pota aguā ára ovaē ramo ha'e kuery ma xevygua arov'y'a ete va'e ikuai 'rā. Ha'e kuery re apena 'rā peteī ava gua'y ixupe ae oiko va'e re openaa rami avi.

¹⁸ Ha'e gui teīgue ju peikuaa 'rā heko porā va'e ha'e heko vai va'e joo ramigua e'ŷ ikuiaia, mba'eta Nhanderuete ma ojeupagua kuery ha'e ojeupagua e'ŷ joo rami e'ŷ 'rā oguerek.

4

Kuaray rami teko porā ojekuaa aguā re ijayvuague

¹ SENHOR ixondaro reta va'e aipoe'i:

— Ou ma oiny ára tatakua rami haku raxa va'erā. Onhemboyvate rei ha'e teko vai rupi ikuai va'ekue ma okaipa 'rā mba'emo pirukue rami rive, mba'eta ára ou ramo okaipa 'rāe. Ha'e rami vy ndopytai 'rā hapokue neī hi'ygue.

² Ha'e rā peē kuery xerery pendu vy xerenonde pejererokyjea rupi pendekuai va'e pe ma kuaray rami 'rā ojekuaa teko porā. Hexakāa rupi 'rā ou nhomoingo porāarā. Ha'e ramo pepo-pepo reve 'rā peēmba, vaka ra'y kuery kora gui oē va'e rami avi.

³ Ha'e rami vy pepyrōmba 'rā heko vai va'e re, pendepy guýry tanhimbu rami 'rā ha'e kuery opyta, aikuua pota aguā ára ovaē ramo — he'i SENHOR ixondaro reta va'e.

⁴ — Penema'endu'a ke lei xerembiguai Moisés ombopara va'ekue re. Mba'eta Israel kuery ha'e javi pe aeja va'ekue Horebe yvyty áry, xeayvua ha'e aipota va'e reve.

⁵ — Ha'e gui xee SENHOR ára tuvixa ha'e ijavaete va'e ovaẽ ta ramo pendea py ambou ju 'rã profeta Elias.*

⁶ Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py.

* ^{4:5} João Batista ou jave heta va'e kuery onhe'ẽ rendu va'e rire ma ha'e ae oiko 'rãgue Elias ou ju 'rã va'ekue. Ha'e rami teĩ heta va'e kuery nonhe'ẽ rendui ramo Elias ou teri aguã rami oiko (Mateus 11.13-14, 17.10-13; Lucas 1.17).

Mateus ayvu porā ombopara va'ekue

Mateus ayvu porā ombopara va'ekue

Kova'e kuaxia para rupi Jesus remimbo'e Mateus omboaxa nhandevy arandu iporā va'e, Jesus rekoke omombe'u vy. Yma rupi Jesus ramoī kuery ikuai jave, ha'e kuery pe Nhanderuete omombe'u ma voi Jesus ou vy teko vai gui nhandererova aguā. Ha'e rami aguā ma Antigo Testamento py oī. Mateus omombe'u Jesus oikoa rupi Nhanderuete ijayvu ma voiague oiko va'ekue. Yma guive Nhanderuete omombe'u uka ma voi nhandereraa jepearā omoī vy ombou aguā. Ha'e va'e pe hebreu kuery ayvu py "Messias" 'ea, ha'e rā grego ayvu py ma "Cristo" 'ea. Tery Jesus voi "Jogueraa jepea" 'ea. Ha'e nunga rupi Jesus itui'iague Mateus omombe'u vy aipoe'i: "Remboery 'rā Jesus, mba'eta ojeupeguia kuery ogueraa jepe 'rā heko vaia gui" (1.21b).

Peteī regua anho ogueraa jepe aguā e'ŷ Jesus ou, ha'e rā yvy jave re ha'e javi regua. Ha'e rami vy omombe'u ko yvy re Nhanderuete po'akaa ou aguā. Ha'e vy aipoe'i: "Pejeko rerova ke, mba'eta namombyryvei ma yva pygua po'akaa ojekuaa aguā" (4.17b). Nhanderuete po'akaa ojekuaa raka'e Jesus ojapo porāa ha'e nhombo'ea rupi ae.

Heta Mateus omombe'u Jesus nhombo'eague, ha'e mba'emo re ombojoja vy Nhanderuete po'akaa omombe'u porāveague guive. Porombo'ea ikuai va'e gui nhombo'e porā kuaave. Ha'e anho'i ha'eve jaikoa omoexakā aguā Nhanderuete oipotaa rami, Nhanderuete Ra'y ae vy.

Jesus Cristo ramoī kuery rery oīa

Lucas 3.23-38

¹ Kova'e kuaxia re ma oī Jesus Cristo ramoī ypy kuery rery. Jesus ma Davi ramymimo oiko, ha'e Davi ma Abraão ramymimo raka'e.

² Abraão ra'y ma Isaque, Isaque ra'y ma Jacó, Jacó ra'y ma Judá ha'e tyvy kuery.

³ Judá Tamar re ta'ya ma Perez ha'e Zerá. Perez ra'y ma Esrom, Esrom ra'y ma Arão,

⁴ Arão ra'y ma Aminadabe, Aminadabe ra'y ma Naassom, Naassom ra'y ma Salmom,

⁵ Salmom ra'y Raabe guigua ma Boaz. Boaz ra'y Rute guigua ma Obede, ha'e Obede ra'y ma Jessé.

⁶ Jessé ra'y ma huvixave Davi, ha'e huvixa Davi ra'y ma Salomão, Urias ra'yxykue pi'a va'e.

⁷ Salomão ra'y ma Roboão, Roboão ra'y ma Abias, Abias ra'y ma Asa,

⁸ Asa ra'y ma Josafá, Josafá ra'y ma Jorão, Jorão ra'y ma Uzias,

⁹ Uzias ra'y ma Jotão, Jotão ra'y ma Acaz, Acaz ra'y ma Ezequias,

¹⁰ Ezequias ra'y ma Manassés, Manassés ra'y ma Amom, Amom ra'y ma Josias,

¹¹ Josias ra'y ma Jeconias ha'e tyvy kuery, Babilônia katy ogueraapaa jave py oiko va'ekue.

¹² Ha'e gui Babilônia katy escravo-rā ogueraapaa ma rire oiko Jeconias ra'y Salatiel, Salatiel ra'y ma Zorobabel,

¹³ Zorobabel ra'y ma Abiúde, Abiúde ra'y ma Eliaquim, Eliaquim ra'y ma Azor,

¹⁴ Azor ra'y ma Sadoque, Sadoque ra'y ma Aquim, Aquim ra'y ma Eliúde,

¹⁵ Eliúde ra'y ma Eleazar, Eleazar ra'y ma Matã, Matã ra'y ma Jacó.

¹⁶ Ha'e gui Jacó ra'y ma Maria me José. Maria pi'a ma Jesus, Cristo 'epy va'e.

¹⁷ Ha'e rami vy Abraão oiko guive Davi oiko peve ma catorze-kue hamymimo ikuai. Ha'e Davi oiko guive Babilônia katy escravo-rā ogueraapaa peve catorze-kue ju ikuai. Ha'e gui Babilônia katy ogueraapaa guive Cristo oiko peve ma catorze-kue ju ikuai.

Lucas 2.1-7

¹⁸ Ha'e gui Jesus itui'iague ma po rami: José re ixyrā Maria omenda va'erā oikovy jave, joupe ojekuaa uka e'ŷ mbove oguerekō'i kyrī va'e Nhe'ē Ky'a E'ŷ gui.

¹⁹ Ha'e rā imerā José heko porā va'e vy ndokuua ukaxe. Ha'e rami vy onhembopy'a oeja aguā avave rei oikuua e'ŷ re.

²⁰ Ha'e nunga re onhembopy'a oikovy. Ha'e gui oexa ra'u rā ixupe ojexa uka peteī anjo Senhor-a guigua. Ha'e vy aipoe'i:

— Davi ramymimo José, ekyje eme Maria reraa aguā nderayxyrā, mba'eta kyrī va'e oguerekoi va'e ma Nhe'ē Ky'a E'ŷ guigua.

²¹ Ha'e ramo oikuavā 'rā peteī ava'i. Remboery 'rā Jesus, mba'eta ojeupagua kuery ogueraa jepe 'rā heko vaia gui.

²² Ha'e nunga ha'e javi ma ojeupity aguā profeta pe Senhor aipoe'i ukaague:

²³ “Peteī kunhataī ete'i oiko va'e oguerekoi 'rā kyrī va'e, oikuavā 'rā ava'i. Ha'e va'e pe ma ‘Emanuel’ 'ea 'rā.” (Ha'e va'e tery ma “Nhanderuete nhandereve oiko” 'ea.)*

²⁴ Ha'e rami rā José okeague gui ovvy vy oiko Senhor-a guigua anjo aipoe'iague rami. Ha'e vy ogueraa gua'yxyrā.

²⁵ Ha'e rami avi oguerekoi rive ranhe, ava'i oikuavā e'ŷa ja. Ha'e va'e ma omboery Jesus.

2

Imba'ekuaa va'e kuery oipouague

¹ Huvixave Herodes oī jave, Judéia regua Belém teko py Jesus itui'i rire ou amongue imba'ekuaa va'e kuery. Kuaray oua katygui ou Jerusalém tetā py.

² Ha'e kuery oporandu jogueruvy:

— Mamo tu itui judeu kuery ruvixaverā oiko ramo'i va'ekue? Mba'eta kuaray oua katy roexa karamboae ikuua ukaa jaxy-tata. Ha'e rami vy apy roju romboete aguā — he'i.

³ Ha'e nunga omombe'ua rā huvixa Herodes oendu vy onhemondyi, Jerusalém py ikuai va'e ha'e javive reve.

⁴ Ha'e rami vy oenoimba judeu kuery regua sacerdote yvatekueve va'e ha'e kuaxia re nhombo'e va'ety kuery. Ha'e va'e kuery pe oporandu mamo pa Cristo itui'i 'rāa re.

⁵ Ha'e kuery ombovai:

— Judéia regua Belém teko py 'rā itui'i, mba'eta po rami oī profeta ombopara va'ekue:

⁶ “Ndee Judá yvy regua Belém teko, Judá regua tetā tuvixakueve ikuai va'e gui mba'eve py nane'yvyīvei, mba'eta ndea gui ae 'rā oiko Joguekoarā, xevygua Israel kuery re opena va'erā”, he'i va'ekue.*

⁷ Ha'e nunga Herodes oendu vy imba'ekuaa va'e kuery ju oenoī uka ha'e ae'ia py. Ha'e kuery pe oporandu vy oikuua pota raka'e ete pa jaxy-tata ojekuaa ague re.

⁸ Ha'e gui Belém katy omondouka vy aipoe'i ha'e kuery pe:

— Tapeo, peikuua pota porā ava'i reko re. Pejou vy ke pemombe'u uka xevy, xee voi aa aguā amboete vy — he'i.

⁹ Ha'e ramo huvixa ayvu ha'e kuery oendupa vy oje'oi. Ha'e gui jaxy-tata kuaray oua katy ikuai teri reve oexa va'ekue ma ha'e kuery renonde ju oaxa ovvy, ava'i ituia áry ovaẽ peve. Ha'e py ma optya.

¹⁰ Ha'e kuery jaxy-tata oexa vy ovvy'a ete.

¹¹ Oo py oike vy oexa ava'i, ixy Maria reve. Ha'e rami vy guenapy'ā re oī vy omboete okuapy, ha'e mba'emo porā oguenoē vy ixupe ome'ē ogueru va'ekue: ouro, heakuā porā va'e ha'e mirra.

¹² Ha'e gui oexa ra'u rā Nhanderuete oikuua uka huvixa Herodes-a rupi ve'ŷ ojevy aguā. Ha'e ramo tape mboae rupi ojevy oyvy katy.

Egito yvy katy oguerojava heravyague

¹³ Ha'e kuery oje'oipa rire José oexa ra'u jevy rā ixupe ojexa uka peteī anjo Senhor-a guigua. Ha'e vy aipoe'i ixupe:

— Epu'ā ke, eraa ava'i ha'e ixy. Pejava Egito yvy katy. Ha'e py ma peiko xeayvu jevy e'ŷa ja, mba'eta Herodes oeka ta ava'i ojukaxe vy — he'i.

¹⁴ Ha'e ramo opu'ā pyavyve. Ava'i ha'e ixy ogueraa vy Egito katy oje'oi.*

* 1:23 Isaías 7.14 * 2:6 Miquéias 5.2 * 2:14 Apocalipse 12.1-6

¹⁵ Ha'e py optya Herodes omano e'ŷa ja, profeta pe Senhor aipoe'i ukaague ojeupity aguã: “Egitó gui aenoĩ Xera'y”, he'iague.*

Avakue'i ojukapaague

¹⁶ Herodes ma imba'ekuaa va'e kuery ombotavyague oikuua vy ipoxy vaipa. Ha'e rami vy ojuka ukapa avakue'i Belém teko, ha'e ha'e katy'i rupi ikuai va'e ha'e javi. Mokoĩ ma'etŷ ete'ŷ-te'ŷ oguerekva'e guive ojuka ukapa, imba'ekuaa va'e kuery gui raka'e pa oikoague omombe'uague rami vy.*

¹⁷ Ha'e rami oiko raka'e profeta Jeremias pe aipoe'i ukaague ojeupity aguã:

¹⁸ “Ramá teko py onhendu hevovo rei va'e. Hexay [ha'e ojae'o va'e], ipoaẽ rei va'e guive, Raquel opi'a kuery re ojae'o okuapy vy. Imemby kuery jipovei ma ramo nonhembovy'a ukai.”*

Egito gui ojevyague

¹⁹ Ha'e gui Herodes omano ma rire Egito yvy re José oikoa py ra'u rupi ojexa uka peteĩ anjo Senhor-a guigua. Ha'e vy aipoe'i:

²⁰ — Epu'ã ke, eraa ava'i ha'e ixy. Tapeo ju Israel yvy re, mba'eta ava'i jukaxeare kuery omanomba ma — he'i.

²¹ Ha'e ramo opu'ã. Ava'i ha'e ixy ogueraa vy ojevy ju Israel yvy re.

²² Ha'e gui Judéia pygua huvixa Herodes rekoria ta'ykue Arquelau ju oĩa oendu vy okyje ha'e katy ju oo aguã. Ha'e gui oexa ra'u rã Nhanderuete oikuua uka jevyague rami oiko vy Galiléia yvy katy ojepe'a ový,

²³ peteĩ tetã Nazaré hery va'e py ikuai aguã. Ha'e rami oiko ojeupity aguã profeta kuery pe aipoe'i ukaague: “Ixupe ‘Nazaré pygua’ 'ea 'rã”, he'iague.

3

Marcos 1.2-6; Lucas 3.1-9

¹ Ha'e va'e jave py ojekuaa João Batista. Ha'e va'e ma Judéia katy'i teko e'ŷa rupi omombe'u oikovy ayvu.* Ha'e vy aipoe'i:

² — Pejeko rerova ke, mba'eta namombyryvei ma yva pygua po'akaa ojekuaa aguã — he'i.

³ Ha'e va'e rekorã ma profeta Isaías pe omombe'u ukaa va'ekue: “Tekoa e'ŷa rupi onhendu 'rã ‘Pereko katu Senhor raperã, pembo'yvi ou aguã’, he'i oikovy va'e.”*

⁴ João ao ma camelô rague guigua, ha'e rã iku'axã ma ipire guigua. Ho'u va'e ma tuku ha'e ei ka'aguy regua.

⁵ Ha'e ramo ha'e oĩa py oje'oi Jerusalém tetã pygua kuery, Judéia ha'e Jordão yakã yvýry ikuai va'e kuery ha'e javi reve.

⁶ Ixupe onhemongarai ukapa Jordão yakã py, ojejavyague omombe'upa vy.

⁷ Nhomongaraia py heta avi ou fariseu ha'e saduceu kuery. Ha'e rã oexa vy aipoe'i ha'e kuery pe:

— Peẽ mboi ramigua, mava'e tu aipoe'i poxya ou va'erã gui peo jepe 'rãa rami?*

⁸ Pendekuai ha'vy yvyra hi'a porã va'e rami, pejeko rerovaague pexa uka aguã.

⁹ Ha'e jomeme pemboypy eme “Nhande ma Abraão ramymino jaiko” peje aguã. Mba'eta xee aipoa'e pêvy: Kova'e ita ikuai va'e gui voi Nhanderuete omoingo kuaa Abraão ramyminorã.

¹⁰ Ha'e gui haxa py omboguai ta ma yvyra rapo re. Yvyra hi'a porã e'ŷ va'e ha'e javi ojaya vy omombo 'rã tata py.†

Marcos 1.7,8; Lucas 3.15-17; João 1.19-28

* 2:15 Oséias 11.1 * 2:16 Apocalipse 12.13-18 * 2:18 Jeremias 31.15 * 3:1 João 1.19-23 * 3:3 Isaías

40.13 * 3:7 Ha'e kuery pe “Mboi ramigua” he'i mba'eta mboi yma guare rami ha'e kuery voi nhombotavya rupi ikuai, ndojeko rerovaxeui guive. † 3:10 “Haxa py yvyra ojaya 'rã” he'ia py Nhanderuete pe ndojeko rerovai va'e ombopagapa 'rã re ijayvu vy.

¹¹ — Xee ma pejeko rerova ramo yy py rive romongarai va'e. Ha'e rā xerakykue ou va'e ma xegui yvateve va'e. Ha'e va'e gui xe'yvyīve ete va'e vy neī ipy regua araa aguā voi nda'evei. Ha'e ma Nhe'ē Ky'a E'ŷ reve 'rā penemongarai, tata py guive.

¹² Mba'eta opo py oguereko ma trigo mbovevea, ha'e vy ombovevepa 'rā ha'yī oī va'e. Trigo ra'yī ete omoī porā 'rā omoī porāaty py, ha'e rā ipirekue ma oapy 'rā tata ogue e'ŷ va'e py.

Marcos 1.9-11; Lucas 3.21,22; João 1.32-34

¹³ Ha'e jave py Galiléia yvy gui Jesus oo Jordão yakā katy, João pe onhemongarai uka aguā.

¹⁴ Ha'e rami teī João nomongaraixei ranhe vy aipoe'i:

— Xee ma ha'eve ndevy pe anhemongarai uka aguā. Ndee ri ty'y xea py reju?

¹⁵ Ha'e rā Jesus ombovai:

— Tove ha'e rami teī, mba'eta ha'e rami vy 'rāe teko porā ha'e javi jajapo — he'i. Ha'e ramo omongarai.

¹⁶ Jesus onhemongarai ma vy yy gui oē ju ramove yva ojepe'a jekuaa ramo oexa Nhanderuetea guigua Nhe'ē oguejy ouvy rā peteī apykaxu'i rami. Ha'e va'e ou vy hexe oī.

¹⁷ Ha'e gui onhendu peteī ayvu yva gui:

— Peva'e ma Xera'y ayvu ete ha'e arov'y'a va'e — he'i va'e.

4

Marcos 1.12,13; Lucas 4.1-13

¹ Ha'e rire tekao e'ŷa py ju Nhe'ē ogueraa Jesus, anha oeko a'ā aguā py.*

² Ha'e ramo quarenta ára, quarenta pytū re oiko okaru e'ŷ re. Ha'e rire okaruxe ma.

³ Ha'e ramo oīa py poroeko a'āa onhemboja vy aipoe'i:

— Nhanderuete Ra'y ri reiko vy ndeayvu kova'e ita oī va'e pe tojeapo mbojape.

⁴ Ha'e ramo Jesus ombovai:

— Ipara oiny: “Mbojape re anho e'ŷ 'rā avakue oikove, ha'e rā ayvu Nhanderuete juru gui oē va'e ha'e javi re” — he'i.*

⁵ Ha'e gui anha ogueraa tetā iky'a e'ŷ va'e py, templo apyte áry omoī.

⁶ Ha'e vy aipoe'i:

— Nhanderuete Ra'y ri reiko vy enhemombo apy gui yvy katy, mba'eta ipara oiny: “Ombou 'rā ojeupegua anjo kuery ndere opena aguā.” Ha'e rā “Ha'e kuery ndejoko 'rā opo py, ita re renhepyxanga e'ŷ aguā” — he'i.*

⁷ Jesus ombovai:

— Ipara avi oiny: “Eko a'ā eme Senhor Nderuete” — he'i.*

⁸ Ha'e gui yvyty yvateve va'e áry ju anha ogueraa vy ixupe oexa uka ko yvy re tetā ikuai va'e, mba'emo porā oī va'e ha'e javi guive.

⁹ Ha'e vy aipoe'i ixupe:

— Peva'e nunga ha'e javi ame'ēmba 'rā ndevy, xapy'a rei nerenapy'ā re reī reve xemboete ramo.

¹⁰ Ha'e ramo Jesus aipoe'i ixupe:

— Satanás, ejepe'a ke apy gui, mba'eta ipara oiny: “Senhor Nderuete anho 'rā remboete ha'e rembojerovia” — he'i.*

¹¹ Ha'e rami rā anha oeja ov, ha'e rā anjo kuery ju ou vy opena hexe.

Marcos 1.14,15; Lucas 4.14,15

¹² João nhuā py ombotya ague omombe'ua rā Jesus oendu vy ojepe'a ov y Galiléia katy.

¹³ Nazaré tetā oeja vy Cafarnaum py ju oo oiko aguā, ye'ē yvýry, Zebulom ha'e Naftali yvy katy'i,

¹⁴ profeta Isaías pe aipoe'i ukaague ojeupity aguā:

* 4:1 Hebreus 2.18; 4.15 * 4:4 Deuteronômio 8.3 * 4:6 Salmo 91.11-12 * 4:7 Deuteronômio 6.16 * 4:10 Deuteronômio 6.13

¹⁵ “Zebulom ha'e Naftali yvy, ye'ẽ katy tape oo va'e yvýry, Jordão yakã rovaigua re, judeu e'ŷ va'e kuery ikuia Galiléia rupi,

¹⁶ ha'e pygua kuery ma pytû rupi ikuai va'ekue ri oexa henty tuvixa va'e. Ha'e rã henty va'e omoexakã manoa guy pytû reia rupi ikuai va'ekue” he'i ukaague rami.*

¹⁷ Ha'e va'e guive Jesus omboypy ayvu omombe'u aguã. Ha'e vy aipoe'i:

— Pejeko rerova ke, mba'eta namombyryvei ma yva pygua po'akaa ojekuaa aguã.

Marcos 1.16-20; Lucas 5.1-11

¹⁸ Galiléia regua yupa yvýry oikoa rupi oexa mokoï joegua: Simão Pedro hery va'e ha'e André. Yy py pira mbo'aa omombo okuapy rã oexa, pira mbo'aa rupi ikuai ramo.

¹⁹ Ha'e rami vy aipoe'i ha'e kuery pe:

— Peju ke xerakykue. Xee ma avakue jouarã ju 'rã romoingo — he'i.

²⁰ Ha'e ramo ha'e kuery ma pira mbo'aa oejapa vyvoi vy oje'oi hupive.

²¹ Oovea py mokoï joegua ju oexa: Zebedeu ra'y kuery Tiago ha'e tyvy João. Ha'e va'e kuery ma nguu reve kanoã py pira mbo'aa omoatyro okuapy rã oexa. Ha'e vy oenoï.

²² Ha'e ramove ha'e kuery kanoã ha'e nguu oeja vy oje'oi hakykue.

Lucas 6.17-19

²³ Galiléia yvy ha'e javi rupi Jesus oiko. Onhembo'eaty ikuai va'e rupi nhombo'e vy omombe'u ayvu porã Nhanderuete po'akaa regua. Heta va'e kuery omonguera guive opa marâguia gui imba'eaxy va'e.

²⁴ Ha'e ramo mba'emo ojapo oikovya omombe'ua rã oendu pavê Síria yvy ha'e javi rupi. Ha'e ramo oĩa py oguerua imba'eaxy va'e opa marâguia mba'eaxy oendu va'e gui omonguera aguã: anha onhemondea va'e, he'o'ã va'e ha'e oguata e'ŷ va'e guive. Ha'e ramo omonguerapa.

²⁵ Ha'e rire heta ju Galiléia gui ou, ha'e Decápolis, Jerusalém, Judéia ha'e Jordão rovaigua gui. Ou vy oje'oi hakykue.

5

Lucas 6.20-23

¹ Heta va'e kuery ou rã Jesus oexa vy oẽ yvy'ã re, ha'e oguapy. Ha'e ramo hemimbo'e kuery ma ijyvy'iry ou.

² Ha'e ramo ombo'e vy aipoe'i:

³ — Ovy'a ete 'rã onhe'ẽ py iporiaukue'i va'e, mba'eta ha'e kuery peguarã yva pygua po'akaa oĩ.

⁴ — Ovy'a ete 'rã ojae'o va'e, mba'eta ombovy'aa ju 'rã.

⁵ — Ovy'a ete 'rã ivai rei e'ŷ va'e, mba'eta ha'e kuery peguarã yvy itui.

⁶ — Ovy'a ete 'rã teko porã re okaruxe ha'e ijy'uvei va'e, mba'eta ojoupa 'rã.

⁷ — Ovy'a ete 'rã nhomboaxy va'e, mba'eta ha'e kuery voi omboaxy 'rã.

⁸ — Ovy'a ete 'rã ipy'a ky'a e'ŷ va'e, mba'eta ha'e kuery oexa 'rã Nhanderuete.

⁹ — Ovy'a ete 'rã petei rami nhomoingo va'e, mba'eta ha'e kuery pe “Nhanderuete ra'y kuery” 'ea 'rã.

¹⁰ — Ovy'a ete 'rã heko porã ramo rive oguereko axy reia va'e, mba'eta ha'e kuery peguarã yva pygua po'akaa oĩ.

¹¹ — Pevy'a ete 'rã xekáuxa pendere ijayvu rei ha'e pendererekoy rei ramo, ha'e ijapu vy opa marã pendere ijayvu vai rã guive.

¹² Pevy'a ha'e peporai, mba'eta heta oĩ yva re pendevy guarã. Mba'eta ha'e rami ae oguereko axya raka'e profeta kuery peiko e'ŷ mbove ikuai va'ekue.

Marcos 9.49,50; Lucas 14.34,35

¹³ — Peẽ kuery ma juky rami peiko yvy regua moe'earã. Ha'e rã xapy'a rei juky nae'ẽvei ramo mba'exa 'rã tu he'ẽ ju? Ndovarevei 'rã mba'everã. Ha'e ramo oka py rive 'rã nhamombo, avakue opyrõmba aguã py.

Guemimbo'e kuery henty va'e re ombojojaague

* 4:16 Isaías 9.1-2

14 — Peẽ kuery ma hendy va'e peiko yvy regua moexakãarã. Yvyty áry tetã ojapo pyre ma ndojekuaa e'ŷi 'rã.

15 Tataendy voi avave rei omoendy vy nomoïai 'rã ajaka guýry. Oïaty py ae 'rã omoïa, opy ikuai va'e javi omoexakã aguã.

16 Ha'e rami ae hendy va'e perekva'e voi taexakã avakue renonde, pendereko porãa ha'e kuery oexa vy oguerovy'a avi aguã Penderu yva pygua.

Lei ojeupitypa aguã Jesus oua re ijayvuague

17 — Pexa'ã eme lei ha'e profeta kuery ombopara va'ekue ambovaipa aguã ajua re. Ambovaipa aguã e'ŷ aju, ojeupity aguã.

18 Mba'eta anhetê aipoa'e pêvy: Yva ha'e yvy okanhhy e'ŷa ja neĩ peteĩ ipara'i, neĩ peteĩ ikarê'i va'e nokanhhyi 'rã lei gui, ha'e javi ojeupity e'ŷa ja.*

19 — Ha'e gui ijayvua yvyi've va'e teĩ ha'e va'e rami e'ŷ ikuai ha'e nhombo'e va'e pe ma "Yvyive'i va'e" 'ea 'rã yva pygua po'akaa py. Ha'e rã ha'e rami ete ikuai ha'e nhombo'e va'e pe ma "Yvateve va'e" 'ea 'rã yva pygua po'akaa py.

20 Mba'eta xee aipoa'e pêvy: Kuaxia re nhombo'e va'ety ha'e fariseu kuery reko gui peẽ kuery napendeko porãavei vy yva pygua po'akaa py ndapeikei 'rãe.

Ymagua kuery pe aipo'ea ague Jesus omombe'u porãveague

Jojukaa re ijayvua

21 — Pendu ma ymagua kuery pe aipo'ea ague: "Pejojuka eme." Ha'e rã "Amongue jojuka ramo ombopagaa 'rã", 'ea ague.*

22 Ha'e rã xee ma aipoa'e pêvy: Ha'e javive [mba'e re'ŷ] guyvy kuery pe ivai va'e ombopagaa 'rã. Guyvy pe "Mba'e vare'ŷ" he'i va'e ma heraa 'rã nhomongoeta va'ety ikuiaia py. Ha'e rã guyvy pe "Inhakã porã ve'ŷ va'e" he'i va'e ma tata ogue e'ŷ va'e py 'rã opaga.

23 — Altar oĩa py mba'emo reme'ẽ va'erã reru vy ha'e py xapy'a rei nema'endu'a 'rã nderyvy nderovai mba'emo oguerekao re.

24 Ha'e rami vy ejaa ranhe altar yvy'iry mba'emo reme'ẽ va'erã, tereo ha'e peteĩ rami ju pejogueroayvu nderyvy reve. Ha'e gui mae ma ejevy ju eme'ẽ reme'ẽxe va'ekue.

25 — Pejogueroayvu porã voi 'rã nderovaigua reve tape rupi peo reve, huvixa po py nderovaigua nemboaxa e'ŷ aguã, ha'e gui jopya pe ju huvixa nemboaxa e'ŷ aguã, ha'e nhuã py nembo'a e'ŷ aguã.

26 Anhetê aipoa'e ndevy: Nereëi 'rã ha'e gui repagapa katuñ'i e'ŷa ja.

Tavy reia re ijayvua

27 — Pendu aipo'ea ague: "Ndetavy rei eme."*

28 Ha'e rã xee ma aipoa'e pêvy: Kunhague re itavyxea rupi oma'ẽ va'e voi hexeve itavy ae ma opy'a py.

29 Xapy'a rei nderexa reiporu kuaa regua ri ndereity ramo enoẽ, emombo ndejegui. Mba'eta nderete ha'e javi reve reiko axy aguã py nemomboa 'rãgue py ha'eveve peteĩ nderete regua remokanhy.

30 Xapy'a rei ndepo reiporu kuaa regua ri ndereity ramo ejaya, eipe'a ndejegui. Mba'eta nderete ha'e javi reve reiko axy aguã py reo 'rãgue py ha'eveve peteĩ nderete regua remokanhy.

31 Aipo'ea avi va'ekue: "Gua'yxy gui opoixe va'e tome'ẽ ixupe kuaxia para omendaague ombovaipa aguã", 'ea va'ekue.*

32 Ha'e rã xee ma aipoa'e pêvy: Gua'yxy itavy rei ramo e'ŷ opoi va'e ma ojapo 'rã itavy rei va'e oiko aguã rami, ha'e opoi pyre re omenda va'e voi itavy rei avi.

Ouraa re ijayvua

* 5:18 Lucas 16.16,17

* 5:21 Êxodo 20.13, Deuteronômio 5.17

* 5:27 Êxodo 20.14, Deuteronômio 5.18

Deuteronômio 24.1

* 5:31

³³ — Pendu avi ymagua kuery pe aipo'ea ague: “Peura rive eme. Senhor pe pejapo ete 'rā peuraague” 'ea ague.

³⁴ Ha'e rā xee ma aipoa'e pēvy: Nda'evei mba'eve re peura aguā, neī yva re, mba'eta Nhanderuete openaaty;

³⁵ neī yvy re, mba'eta opyrōa; neī Jerusalém tetā re, mba'eta Huvixa yvateve va'e pegua.

³⁶ Neī peura eme peneakā re, mba'eta peteīve pende'a napemoxiī kuaai, neī napemoū kuaai guive.*

³⁷ Ha'e rami 'rāgue py po rami 'rā pendeayvu: “Tá, tá”, e'ŷ vy “Any, any”, peje 'rā. Ha'e ramia gui pendeayvuve aguā ma poromboeko vaia guigua.

Jepya re ijayvua

Lucas 6.27-30

³⁸ — Pendu ma aipo'ea ague: “Joexa mombuare rexā ju 'rā omombua, ha'e nhoaĩ mopẽare raĩ ju 'rā omopẽa” 'ea ague.*

³⁹ Ha'e rā xee ma aipoa'e pēvy: Pēvy amongue ojapo vai ta ramo pejoko eme. Ha'e rami 'rāgue py penderova peiporu kuaa regua oipete rā perova hovai re ju oipete aguā.*

⁴⁰ Huvixa kuerya py pendereraa vy pendeparito oipe'aa rā pendecapa avi peipe'a uka.

⁴¹ Xapy'a rei peteī quilômetro amongue pendereraa nhea'ã ramo mokoña peve tapeo hupive.

⁴² Peme'ẽ 'rā pēvy ojerure va'e pe rei, ha'e pendekupe rei eme mba'emo oiporuxe va'e katy.

Mborayvu re ijayvua

Lucas 6.32-36

⁴³ — Pendu aipo'ea ague: “Peayvu 'rā peneirũ kuery, ha'e rā penderovaigua kuery re ma pendea'e eme” 'ea ague.*

⁴⁴ Ha'e rā xee ma aipoa'e pēvy: Peayvu 'rā pendovaigua kuery voi, ha'e Nhanderuete pe pejerure 'rā pendererekoy va'e re,

⁴⁵ Penderu yva pygua ra'y kuery pendekuai aguā. Mba'eta ha'e ma kuaray ombou vy omoexakā 'rā heko vai va'e ha'e heko porā va'e áry. Oky voi ombou 'rā heko porā va'e ha'e heko vai va'e pe.

⁴⁶ Ha'e gui penderayvu va'e kuery anho ri peayvu vy mba'e 'rā tu pejopy ha'e nunga repy? Mba'eta imposto re nhombopaga va'ety kuery voi ha'e rami ikuai.

⁴⁷ Penderegua kuery pe anho ri pexarura vy mba'e nunga py tu amboae kuery gui pendekuai porāve? Mba'eta amboae regua kuery voi ha'e rami ikuai.

⁴⁸ Ha'e rā peē ma heko porā va'e 'rā peiko opa mba'e py, Penderu yva pygua opa mba'e py heko porāa rami avi.

6

Nhanderuete pe mba'emo jajapoa re ijayvua

¹ — Peiko kuaa pota avakue renonde e'ŷ mba'emo pejapo aguā Nhanderuete pe, ha'e kuery oexa aguā rive. Ha'e rami ri vy Penderu yva pygua gui mba'eve ndapejopyi 'rā hekovia.*

Mba'emo nhame'ẽa re ijayvua

² — Ha'e rami vy iporiaukue'i pe mba'emo peme'ẽ vy penerenonde rupi pemonhe'ẽ uka eme mimby guaxu. Ha'e rami heko porā merami rive va'e ojapo 'rā okuapy onhembo'eaty py ha'e tape rupi, avakue pe onhemboete ukaxe vy rive. Anhetē aipoa'e pēvy: Ha'e kuery ojopy ae ma hekovia.

³ Ha'e rā peē ma mba'emo peme'ẽ vy pendeaxua regua pe voi peikuaa uka eme pendeaxu e'ŷa ojapo va'e,

* 5:36 Tiago 5.12 * 5:38Êxodo 21.24, Levítico 24.20 * 5:39 Romanos 12.14 * 5:43 Levítico 19.18 * 6:1 Mateus 23.1-5

⁴ joupe mba'emo peme'ẽ rã avave oikuaa e'ŷ aguã. Ha'e gui peikuaa uka e'ŷ va'e Penderu oexa vy ome'ẽ 'rã hekovia.*

Nhanhembo'e aguã re ijayvua

⁵ — Ha'e gui penhembo'e vy heko porã merami rive va'e rami e'ŷ pendekuai, mba'eta ha'e kuery ma onhembo'eat py ha'e tetã mbyte rupi onhembo'exe vai 'rã ho'amý avakue oexa aguã rive. Anhetẽ aipoa'e pãvy: Ha'e kuery ojopy ae ma hekovia.

⁶ Ha'e rã peẽ ma penhembo'exe vy peike 'rã penderopy, okẽ pemboty 'rã guive. Ha'e gui mae ma 'rã penhembo'e Penderu pexa e'ŷ va'e pe. Ha'e ramo peikuaa uka e'ŷ va'e Penderu oexa vy ome'ẽ 'rã hekovia.*

⁷ — Penhembo'ea py ha'ekue'-ekue'i rupi pendeayvu eme amboae regua kuery rami, mba'eta ha'e kuery oexa'ã teĩ ijayvu reta rã oendua aguã re.

⁸ Ha'e rã peẽ ma peiko eme ha'e kuery rami, mba'eta Penderu oikuaa ma voi peipota va'e, pejerure e'ŷ mbove.

Lucas 11.2-4

⁹ — Ha'e vy po rami 'rã penhembo'e: "Oreru yva pygua, tove nderery tomboetea.

¹⁰ Tovaẽ ndepo'akaa ojekuaa aguã. Reipota va'e tojapoa yvy re, yva re ojapoa rami avi.

¹¹ Ko'ẽ nhavõ ejou uka ro'u va'erã.

¹² Ha'e emboguepa ke ndevy rorevea, ore voi orevy oreve va'e roperdoaa rami avi.

¹³ Orereity uka eme poromoangecko pe, orereraa jepe ke mba'emo vai gui. [Mba'eta ndepo'akaa, nembaraetea ha'e nerexakãa oĩ riae 'rã raka'e rã peve guarã. Amém,]" peje 'rã.

¹⁴ — Mba'eta amboae kuery otekoavyague peperdoa ramo Penderu yva pygua voi ombogue 'rã pejejavyague.

¹⁵ Ha'e rã amboae kuery [otekoavyague] ndapeperdoi ri ramo Penderu voi nomboguei 'rã pejejavyague.

Nhanderuete pe jakaru e'ŷ re jaikoa re ijayvua

¹⁶ — Ha'e gui pekaru e'ŷ re peiko vy pexa uka eme pendeporiau reia heko porã merami rive va'e rami, mba'eta ha'e kuery ma iporiaua oexa uka 'rã amboae kuery oikuaa aguã okaru e'ŷ re ikuaria. Anhetẽ aipoa'e pãvy: Ha'e kuery ojopy ae ma hekovia.

¹⁷ Ha'e rã peẽ ma pekaru e'ŷ re peiko vy pemoatyrõ pende'a, ha'e pejeovai guive,

¹⁸ pekaru e'ŷ re peikoa amboae kuery oikuaa e'ŷ aguã, Penderu pexa e'ŷ va'e anho. Ha'e ramo peikuaa uka e'ŷ va'e Penderu oexa vy ome'ẽ 'rã hekovia.

Yva re nhandejeupe guarã nhamoĩ porã aguã re ijayvua

¹⁹ — Ko yvy re pemoĩ porã eme mba'emo pendejeupe guarã, mba'eta vixo'i ho'upa ha'e iky'a ombovaipa 'rã, ha'e imonda va'e oipe'a ha'e ogueraapa 'rã.

²⁰ Yva re ae pemoĩ porã uka 'rãgue pendejeupe guarã. Ha'e py ma jipoi 'rã vixo'i ho'upa va'erã, iky'a nombovaipai 'rã, neĩ imonda va'e ndoipe'a heravyi 'rã guive.*

²¹ Mba'eta pendevy guarã pemoĩ porãa py ma penekuraxõ avi 'rã oĩ.

Lucas 11.33-36

²² — Penderexa ma penderete moexakãarã oĩ. Xapy'a rei penderexa iporã ramo penderete ha'e javi 'rã hexakãmba.

²³ Ha'e rã penderexa na'iporãi ri ramo penderete pytãmba 'rã. Ha'e penemoexakãarã oĩ va'e pytã ramo pytã ete 'rã pãvy.

Mokoĩ patõ re ijayvua

²⁴ — Avave rei nomba'eapoi 'rã mokoĩ patõ pe. Mba'eta peteĩ re nda'ija'eive 'rã amboae oayvuve vy, ha'e'ŷ vy peteĩ ojou porãve vy amboae ma ndojou porãive 'rã. Nda'evei Nhanderuete pe peiko aguã, mba'emo perekopaa rupi nda'evei reve.*

Lucas 12.22-31

* 6:4 Lucas 21.1-4 * 6:6 Lucas 18.9-14 * 6:20 Lucas 12.33,34; 2 Timóteo 4.8; 1 Pedro 1.3,4 * 6:24 Lucas 16.13

²⁵ — Ha'e nunga rupi ae xee aipoa'e pēvy: Pendepy'a eta rei eme pendekove re, neī pe'u ha'e pey'u va'erā pejou aguā re guive, penderete re pemoī va'erā re voi. Mba'eta penderekove nda'u tembi'u gui ndovareive teve? Ha'e penderete nda'u ao gui ndovareive teve?*

²⁶ Peikuua pota guyra kuery oveve va'e reko re. Ha'e kuery ma mba'eve nonhotyī, nomono'ōi, neī omoī porāaty py nomboatyi guive. Ha'e rami teī ha'e kuery pe Penderu yva pygua ojou uka 'rā ho'u va'erā. Peē kuery nda'u guyra'i gui ndapevareive ri?

²⁷ Mava'e nda'u pendepy'a eta rei vy pembopukuve kuaa 'rā ruxā'i peikove aguā?

²⁸ Mba'e re tu pendeaorā re ri nda'eveive pendekuai? Peikuua pota ha'vy yvoty nhuūndy rupi ikuai va'e re. Ha'e va'e ma omba'epo va'e'ŷ, neī oipopē va'e'ŷ.

²⁹ Ha'e rami teī xee aipoa'e pēvy: Huvixa Salomão minha opa marāgua oguerekopa va'eri kova'e yvoty rami nonhemondei raka'e.

³⁰ Nhanderuete omonhemonde porā 'rā jai rogue aŷ nhuūndy re ikuai va'e, ha'e gui ko'ē tata py omomboa va'erā va'eri. Ha'e gui peē ndapejerovia porāi va'e, peē kuery re katuve ma opena porāve 'rā.

³¹ Ha'e nunga rupi pendepy'a eta rei eme, ha'e aipopeje eme: “Mba'e tu ja'u 'rā, ha'e jay'u 'rā? Ha'e mba'e py tu nhanhemonde 'rā?” peje eme.

³² Mba'eta ha'e nunga jouxea rupi amboae regua kuery ikuai, ha'e Penderu yva pygua oikuua ae ha'e nunga peikotevē va'ea.

³³ Ha'e rami 'rāgue py jypy'i peka 'rā ipo'akaa ha'e ixuguigua teko porā. Ha'e ramo 'rāe peikotevē va'e ha'e javi ome'ē avi pēvy.

³⁴ — Ha'e nunga rupi pendepy'a eta rei eme ko'ē rā guarā re, peja ko'ē ramo guarā ae. Mba'eta ára nhavō oiko 'rāe mba'emo vai ha'e jave guarā.

7

Lucas 6.37,38,41,42

¹ — Penhombopagaxe rei eme, penembopagaa e'ŷ aguā.*

² Mba'eta penhombopagaague rami ae 'rā peē ju penembopagaa, ha'e joe pejapoague rami pendere ju ojapoa 'rā.

³ Mba'et re tu nderyvy rexā py iky'a oī va'e re rexā pota, ha'e rā nderexā py ae yvyra oī va'e re ma ndereikuua potai?

⁴ Mba'et re tu aipo're nderyvy pe: “Tove tanoē iky'a nderexā gui”, 're, nderexā py ae yvyra oī teri reve?

⁵ Heko porā merami rive va'e, enoē ndee ranhe yvyra nderexā gui. Ha'e vy 'rāe rexā porā nderyvy rexā gui iky'a renoē aguā.

Jagua pe iporā va'e nhame'ē e'ŷ aguā re ijayvua

⁶ — Jagua kuery pe peme'ē eme mba'emo iky'a e'ŷ va'e, ha'e poryko ikuiai katy pemombo eme ovareve va'e, ha'e kuery opyrōmba rive'ŷ aguā, ha'e gui ojere vy penemondoropa avi e'ŷ aguā.*

Lucas 11.9-13

⁷ — Pejerure, ha'e ramo ome'ēa 'rā. Peka, ha'e vy pejou 'rā. Penhendu uka, ha'e ramo okē oipe'aa 'rā pēvy.*

⁸ Mba'eta ha'e javive ojerure va'e ojopy 'rā, oeka va'e ojou 'rā, ha'e onhendu uka va'e pe oipe'aa 'rā.

⁹ Mava'e peē avakue nda'u pendera'y kuery mbojape re ojerure rā peme'ē 'rā ita?

¹⁰ Ha'e rami e'ŷ vy pira re ojerure rā mboi ri nda'u peme'ē 'rā?

¹¹ Ha'e nunga rupi peē penderekoi vai va'eri pendera'y kuery pe mba'emo porā peme'ē kuaa va'e. Ha'e gui Penderu yva pygua katuve nda'u nome'ēi 'rā ri mba'emo porā ojerure va'e pe?

* 6:25 Filipenses 4.6; 1 Pedro 5.7

* 7:1 Romanos 2.1-3; 1 Coríntios 4.5; Tiago 4.11,12

* 7:6 Lucas 9.5 * 7:7

João 14.13,14; 1 João 5.14,15

12 — Pēvy avakue ojapo aguã peipotaa rami ae avi peẽ voi pejapo ha'e kuery pe, mba'eta ha'e rami ae oĩ lei ha'e profeta kuery omboparaague re.

Lucas 13.24

13 — Peike okẽ ipo'i'i va'e rupi. (Mba'eta okẽ ha'e tape okanhy aguã katy oo va'e ma ipy vaipa ramo heta 'rã ikuai ha'e va'e rupi oo va'e.)

14 Ha'e rã tekove katy okẽ ha'e tape oo va'e ma ipo'i'i ramo mbovy'i ete 'rã ojou.

Lucas 13.25-27; 2 Coríntios 13.5

15 — Penheangu ke profeta ramigua kuery gui. Ha'e kuery ma vexa'i pirekue py onhemonde va'e, ha'e rã iguýry ma guary nhomondoropa va'e ikuai.*

16 Mba'emo rembypy'a re peikuaa pota vy peikuaa 'rã mba'e nunga paa. Tyrã uva nda'u nhamondo 'rã ri juu'y gui? Ha'e rami e'ŷ vy juu rakua endy gui nda'u nhamondo 'rã ri figo?

17 Ha'e rami avi yvyra porã ma hi'a porã avi 'rã. Ha'e rã yvyra iporã e'ŷ va'e ma ndai'a porãi 'rã.

18 Yvyra porã ma ndai'a vaikuei 'rã, ha'e yvyra iporã e'ŷ va'e voi ndai'a porãi 'rã.

19 Yvyra hi'a iporã e'ŷ va'e ojapaa vy omomboa 'rã tata py.

20 Ha'e nunga rupi ha'e kuery reko re peikuaa pota vy peikuaa 'rã marã ramigua paa.*

21 — Pavẽ e'ŷ xevy “Senhor, Senhor” he'i va'e oike 'rã yva pygua po'akaa py, ha'e rã Xeru yva pygua oipotaa rami ikuai va'e anho.

22 Ha'e va'e ára heta 'rã aipoe'i xevy: “Senhor, Senhor, nderery rupi e'ŷ ri ty'y ore romombe'u raka'e Nhe'ẽ guigua? Ha'e nderery rupi e'ŷ ri ty'y roipe'a anha, ha'e heta rojapo ndepo'akaa rupigua?” he'i 'rã.

23 — Ha'e ramo ha'e kuery pe xee ambovai 'rã: “Peẽ kuery ma xee roikuua va'e'ŷ. Pendeko vai va'e, pejep'e a ke xea gui!” ha'e 'rã.

Lucas 6.46-49

24 — Ha'e javive ha'e rami xeayvu rã oendu vy ha'ekue rami ikuai va'e ma ava hi'arandu va'e ngoorã ita áry ojapo va'e rami ikuai.

25 Mba'eta oky ou rã yy tyguaxu vy oxyry atã 'rã. Yvytu oipeju atã vy ha'e va'e oo re ojeapi-api tei ndoityi 'rã, ita áry omboyta porã rire.

26 — Ha'e rã xeayvua oendu tei ha'ekue rami ndoikoi va'e kuery ma ava hi'arandu e'ŷ va'e ngoorã ita ku'i reia áry rive ojapo va'e rami ikuai.

27 Ha'e gui oky ou rã yy tyguaxu 'rã. Yvytu oipeju vy ha'e va'e oo re ojeapi vy oity, ombovaipa ete 'rã — he'i.*

Opa vy ma yvyty áry ijayvuague

28 Jesus pova'e ayvu omombe'upa rã heta va'e kuery onhemondyipa ombo'ea gui,

29 mba'eta ipo'akapa va'e rami ombo'e, kuaxia re nhombo'e va'ety kuery rami e'ŷ.*

8

Marcos 1.40-44; Lucas 5.12-14

1 Yvy'ã gui Jesus oguejy rã heta ete oje'oi hakykue.

2 Ha'e gui ma peteĩ lepra revegua onhemboja hexe. Omboete vy aipoe'i:

— Senhor, lepra gui xeky'a'oxe vy ke xeky'a'o — he'i.

3 Ha'e ramo Jesus okuave'ẽ vy opoko hexe. Ha'e vy aipoe'i:

— Xee ma roiky'a'oxe ae, ekuera ke — he'i. Ha'e ramove lepra okanhymba.

4 Ha'e ramo Jesus aipoe'i ixupe:

— Ma'ẽ, emombe'ueme avave rei pe. Ha'e rami 'rãgue py tereo sacerdote pe anho ejexa uka, ha'e eme'ẽ mymba Moisés omboparaague rami, heta va'e kuery oikuua aguã.

Lucas 7.1-10

5 Cafarnaum tetã py Jesus ovaẽ ma ramo hexe onhemboja peteĩ xondaro ruvixa. Ha'e vy ojerure ixupe:

* 7:15 2 Pedro 2.1-3

* 7:20 Lucas 6.43,44; Tiago 3.11,12; 1 João 3.10; 4.6

* 7:27 Tiago 1.22-25; 1 João 2.3-6

* 7:29 Marcos 1.22; João 7.46

6 — Senhor, xero py amongakuua va'ekue itui tupa py. Ndoguatavei, ojexavai guive — he'i.

7 Jesus ombovai:

— Xee aa 'rã amonguera — he'i.

8 Ha'e rã xondaro ruvixa aipoe'ive ju:

— Xee ma xe'yvyi'i ete xero py revaẽ aguã. Peteĩ ayvu rive ri eraa uka. Ha'e ramo xerembiguai kunumi va'e okuera 'rã.

9 Mba'eta xee voi huvixa oipotaa rami aiko va'e. Ikuai avi xondaro kuery xeayvu rami ikuai va'e. Peteĩ pe “Tereo”, ha'e ramo oo 'rã. Ha'e rã amboae pe ma “Eju”, ha'e rã ou 'rã. Xerembiguai pe “Ejapo ha'e nunga”, ha'e ramo ojapo 'rã — he'i.

10 Ha'e nunga Jesus oendu vy onhemondyi. Ha'e vy aipoe'i hakykue oje'oi va'e pe:

— Anhetẽ aipoa'e pãvy: Neĩ Israel kuerya rupi voi ndajoui teri kova'e rami ojerovia ete va'e.

11 Aipoa'e pãvy: Heta ou 'rã kuaray oua katy ha'e oikea katy gui, yva pygua po'akaa py ikuai 'rã mesa py Abraão, Isaque ha'e Jacó reve.

12 Ha'e rã Nhanderuete po'akaa pygurarã va'ekue ma oka py 'rã omomboa pytãa py. Ha'e py ojae'opa ha'e opa marã onhendu 'rã okuapy — he'i.

13 Ha'e gui xondaro ruvixa pe ju Jesus aipoe'i:

— Tereo ju. Ndee rejeroviaa rami toiko — he'i. Ha'e va'e hora-ve hembiguai okuera.

Marcos 1.29-31; Lucas 4.38,39

14 Ha'e gui ma Pedro ro py ju Jesus ovaẽ. Ha'e vy haixo oexa ipire raku vaipa vy tupa py itui ramo.

15 Ipo re Jesus ojopy rã ipire raku oaxa. Ha'e ramo opu'ã vy mba'emo ojapo ha'e kuery pe.

Marcos 1.32-34; Lucas 4.40,41

16 Ka'aru'i jave oĩa py heta oguerua anha onhemondea va'e. Ha'e ramo ayvu py rive oipe'a nhe'ẽ iky'a va'e, omonguera avi imba'eaxy va'e ha'e javi.

17 Ha'e nunga oiko profeta Isaías pe aipoe'i ukaague ojeupity aguã: “Ha'e ae oipe'a jaiko axya, ogueraapa nhanemba'eaxy”, he'iague.*

Lucas 9.57-62

18 Jesus oyvýry heta ikuai va'e oexa vy ijayvu yy rovaigua re oaxa aguã.

19 Ha'e va'e jave py hexe peteĩ kuaxia re nhombo'e va'ety onhemboja vy aipoe'i:

— Porombo'ea, xee aa ta nderupive reoa katy rei.

20 Ha'e rã Jesus ombovai:

— Aguara'i oguereko 'rã okua, guyra oveve va'e voi oguereko guaity. Ha'e rã Ava ra'y ojeapo va'ekue ma neĩ oakã omboguejaty ndoguererekoi — he'i.

21 Amboae hemimbo'e ju aipoe'i ixupe:

— Senhor, taa ranhe xeru tanhono porã.

22 Jesus ombovai:

— Eju xerupive, tove omanogue ae tonhono porã omano va'ekue.

Marcos 4.35-41; Lucas 8.22-25

23 Ha'e gui kanoã py Jesus oĩ ramo hemimbo'e kuery oje'oi hupive.

24 Yy rupi oaxa jave ou yvytu vaikue. Yai ojeapi-api kanoã re. Ha'e ramia ja Jesus oke upy.

25 Ha'e ramo hemimbo'e kuery ou vy omomyi. Ha'e vy ojapukai reve aipoe'i:

— Senhor, orereraa jepe ke! Nhamanomba ta ma — he'i okuapy.

26 Ha'e ramo Jesus aipoe'i ha'e kuery pe:

— Pejeroviaa kyr'i va'e, mba'e re tu pekyje ri? — he'i. Ha'e rami vy opu'ã vy yvytu ha'e ye'ẽ pe ijayvu atã. Ha'e ramove optyu'upa.

27 Ha'e ramo ha'e kuery onhemondyipa vy aipoe'i:

— Marã ramigua tu peva'e ava, yvytu ha'e yai voi onhe'ẽ rendu aguã?

Marcos 5.1-20; Lucas 8.26-39

* 8:17 Isaías 53.4

²⁸ Yupa rovaigua Gadara pygua kuery yvy re ovaē ramo ovaexī jogueruvy mokoī ava anha onhemondea va'e. Yvyra rupa oī va'e gui ou. Ivai vaikue rei rā avave rei ndoguataavei ha'e va'e tape rupi.

²⁹ Ha'e gui ha'e kuery ou vy ojapukai:

— Nhanderuete Ra'y, mba'e tu xee areko ndereve? Oremoingo axy aguā teve reju oa'angaague ára ovaē e'ŷ mbove? — he'i.

³⁰ Ha'e katy'i heta ikuai poryko okarua py.

³¹ Ha'e ramo anha kuery ojerure Jesus pe:

— Orepe'a vy ta'vy oremondouka poryko kuerya katy.

³² Ha'e rā — Tapeo ha'vy — he'i Jesus. Ha'e gui ha'e kuery ojepe'a vy poryko re ova. Ha'e rā poryko kuery ma yvy'ā guy katy onhamba. Ho'apa ye'ē py, yy py omanomba.

³³ Ha'e ramo poryko re opena va'e kuery onhamba oje'oivy. Tetā py ovaē vy omombe'u oiko va'ekue ha'e javi, anha onhemondea va'e re oiko va'ekue guive.

³⁴ Ha'e ramo tetā pygua kuery oupa Jesus oexa aguā. Oexa vy ojerure ijyvy gui oo ju aguā re.

9

Marcos 2.1-12; Lucas 5.17-26

¹ Kanoā py Jesus oī vy yy rovaigua re oaxa. Ha'e vy guetā katy oo.

² Ha'e oīa py oguerua peteī oguata e'ŷ va'e hupa reve. Ha'e kuery ojerovia etea Jesus oexa vy aipoe'i oguata e'ŷ va'e pe:

— Xera'y, ndepy'a guaxu ke. Rejejavyague omboguepaa ma — he'i.

³ Ha'e ramo kuaxia re nhombo'e va'ety ikuai va'e aipoe'i ojeupe ae:

— Peva'e tu ijayvu vai — he'i okuapy.

⁴ Ha'e rā Jesus ma ha'e kuery ojeupe ae ijayvua oikuua vy aipoe'i:

— Mba'e re tu po rami ri pendeayvu pendepy'a py?

⁵ Mba'e ayvu rupi tu ndaxyive xeayvu aguā: “Rejejavyague omboguepaa ma”, tyrā pa “Epu'ā, ha'e eguata” ha'e aguā?

⁶ Ha'e rami teī peikuaa aguā Ava ra'y ojeapo va'ekue ko yvy re oiko teī joeko vaiague ombogue aguā voi ipo'aka va'ea —

Oguata e'ŷ va'e pe ju aipoe'i:

— Epu'ā ha'vy, eupi nderupa, ha'e tereo ndero py — he'i.*

⁷ Ha'e ramo opu'ā vy ngoo katy oo.

⁸ Ha'e nunga heta va'e kuery oexa vy okyjepa reve ombojerovia okuapy Nhanderuete, ha'e rami aguā avakue ombopo'aka ramo.

Marcos 2.13,14; Lucas 5.27,28

⁹ Jesus ha'e gui oo vy oexa peteī ava Mateus hery va'e, imposto opagaaty py oguapy oiny ramo. Ha'e va'e pe ijayvu vy

— Eju xerupive — he'i. Ha'e ramo opu'ā vy oo hupive.

Marcos 2.15-17; Lucas 5.29-32

¹⁰ Ha'e gui oo py mesa py Jesus oī ramo heta ou imposto re nhombopaga va'ety ha'e heko vai va'e. Ha'e va'e kuery ma Jesus ha'e hemimbo'e kuery reve onhemboja avi okuapy.

¹¹ Ha'e nunga fariseu kuery oexa vy oporandu hemimbo'e kuery pe:

— Mba'e re tu penembo'ea okaru ri imposto re nhombopaga va'ety ha'e ojejavypa va'e kuery reve?

¹² Ha'e ramo Jesus oendu vy ombovai:

— Hexaī va'e kuery ma ndoipotai 'rā poropoanoa, imba'eaxy va'e anho 'rā oipota.

¹³ Tapeo, peikuaa pota pova'e ayvu mba'e he'ia paa re: “Xevy pe mymba peme'ē 'rāgue py aipota teī penhomboaxy.” Mba'eta xee ma heko porā va'e aenoī aguā e'ŷ aju, ha'e rā heko vai va'e aenoī aguā [ojeko rerova aguā].*

Marcos 2.18-22; Lucas 5.33-39

* 9:6 João 10.37,38 * 9:13 Oséias 6.6

¹⁴ Ha'e rire João Batista remimbo'e kuery ou. Ha'e vy oporandu ixupe:
 — Mba'e re tu ore kuery [mbovykue rei e'ŷ] rokaru e'ŷ re orekuai, fariseu kuery voi, ha'e rã neremimbo'e kuery ma ha'e rami e'ŷ ikuai?

¹⁵ Jesus ombovai:

— Omendaa py ha'eve nda'u oenoĩ mbyre kuery iporiau aguã, ha'e kuery reve omenda va'e oĩ teria ja? Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e ára mae ma ha'e kuery ikuai 'rã okaru e'ŷ re.

¹⁶ — Avave rei ao ymague re nombojai 'rã ajukue pyau ra'ykue, mba'eta ombojaague omboi 'rã ao gui. Ha'e ramo oxoroa tuvixave 'rã.

¹⁷ Ha'e avave rei hyru ymague py nomboyru 'rã vinho pyau, mba'eta ombovaipa 'rã hyru. Vinho onheẽmba 'rã, ha'e hyru voi ivaipa avi 'rã. Ha'e rami 'rãgue py vinho pyau rã hyru pyau py 'rã omoĩ, mokoive oĩ porã aguã.

Marcos 5.21-24a; Lucas 8.40-42a

¹⁸ Ha'e nunga re ijayvu teri reve ou peteĩ huvixa. Onhemboja vy omboete. Ha'e vy aipoe'i:

— Xerajy omano ange'i. Ha'e rami teĩ eju, emoĩ ndepo hexe oikove ju aguã — he'i.

Marcos 5.24b-34; Lucas 8.42b-48

¹⁹ Ha'e ramo Jesus opu'ã vy oo hexeve, hemimbo'e kuery voi.

²⁰ Oiko avi peteĩ kunha, doze ma'etŷ re ma gueko re riae oiko va'e. Ha'e va'e ma hakykue gui ou vy opoko ijaap re,

²¹ mba'eta ojeupe ae “Ijaap re rive apoko teĩ akuera 'rã” he'i.

²² Ha'e ramo Jesus ojere vy oexa. Ha'e vy aipoe'i:

— Xerajy, ndepy'a guaxu ke. Rejeroviaa ndereraa jepe — he'i. Ha'e ramove kunha va'e okuera.

Marcos 5.35-43; Lucas 8.49-56

²³ Huvixa ro py Jesus ovaẽ vy oexa mimby monhe'ea ha'e heta va'e kuery ojae'o rã. Ha'e vy aipoe'i:

²⁴ — Pejepe'a ke, mba'eta kunha'i nomanoi, oke rima — he'i. Ha'e ramo ojojai rei okuapy.

²⁵ Ha'e gui Jesus omoẽmba vy oike. Kunha'i va'e po re ojopy ramo opu'ã.

²⁶ Ha'e nungakue oendupaa ha'e va'e yvy ha'e javi rupi.

Mokoĩ ára revegua e'ŷ omongueraague

²⁷ Ha'e gui Jesus oo rã hakykue rupi ou mokoĩ ára revegua e'ŷ. Ojapukai jogueruvy:

— Davi ramymino, oremboaxy ke — he'i.

²⁸ Ha'e gui oo py Jesus oike jave hexe onhemboja jogueruvy ára revegua e'ŷ. Ha'e ramo oporandu ha'e kuery pe:

— Perovia pa pejerurea rami ajapo aguã xepo'aka va'ea?

Ha'e kuery ombovai:

— Tá, Senhor — he'i.

²⁹ Ha'e ramo ha'e kuery rexâ re opoko vy aipoe'i:

— Toiko ha'vy pejeroviaa rami — he'i.

³⁰ Ha'e ramove hexa ojepe'a.

Ha'e gui Jesus aipoe'ive ju:

— Pejejoko ke avave rei pe pemombe'u e'ŷ aguã — he'i.

³¹ Ha'e rami teĩ ha'e kuery oo vy ha'e va'e yvy ha'e javi rupi omombe'upa.

Peteĩ ava ijayvu e'ŷ va'e omonguera ramo fariseu kuery ijayvu reiaque

³² Ha'e kuery oje'oi rire oĩa py oguerua peteĩ ava anha onhemonde ramo nda'ijayvui va'e.

³³ Anha oipe'a rã ijayvu e'ŷ va'ekue ijayvu. Ha'e ramo heta va'e kuery onhemondyipa vy aipoe'i:

— Peva'e nunga jaexa va'e'ŷ teri Israel kuerya rupi — he'i.

³⁴ Ha'e rã fariseu kuery ma ijayvu rei okuapy:

— Anha ruvixa po'akaa rupi rima oipe'a anha.*

Opa rupi Jesus ojapo porā, ha'e om̄ba'epo va'e kuery re ombojojaague

³⁵ Ha'e gui Jesus ma tetā ha'e tekoia ikuai va'e rupi oguata oikovy, onhembo'eaty oī va'e rupi guive. Nhombo'e vy omombe'u oikovy Nhanderuete po'akaa, nhomonguera guive opa marāgua mba'eaxy gui.

³⁶ Heta va'e kuery oexa vy omboaxy, mba'eta vexa'i ija e'ŷ va'e rami ojexavai ha'e ikangy okuapy ramo.*

³⁷ Ha'e rami vy guemimbo'e kuery pe aipoe'i:

— Anhetē heta oī omono'ōa aguā, ha'e rā om̄ba'epo va'e kuery ma mbovy'i.*

³⁸ Ha'e nunga rupi pejerure Senhor mba'ety ja va'e pe ombouve aguā imba'ety rupi om̄ba'epo va'erā.

10

Marcos 3.13-19; Lucas 6.12-16

¹ Ha'e gui guemimbo'e kuery doze-ve Jesus oenoī vy ombopo'aka nhe'ē vai oipe'a, ha'e opa marāgua mba'eaxy gui nhomonguera aguā.

² Doze apóstolo kuery rery ma po rami: Jypyguia ma Simão Pedro hery va'e, ha'e gui tyvy André, Zebedeu ra'y kuery Tiago ha'e tyvy João,

³ Filipe ha'e Bartolomeu, Tomé ha'e imposto re nhombopaga va'ekue Mateus, Alfeu ra'y Tiago ha'e Tadeu,

⁴ Simão Zelote hery va'e ha'e ijopy uka nhemiarā Judas Iscariotes avi.

Marcos 6.7-11; Lucas 9.1-5

⁵ Ha'e gui doze guemimbo'e kuery Jesus omondouka ta vy po rami ijayvu:

— Tapeo eme judeu e'ŷ va'e ikuiaia rupi, neī Samaria pygua kuery retā py voi pevaē eme.

⁶ Ha'e rā tapeo vexa'i kuery Israel regua okanhy va'e peka.

⁷ Peoa rupi pemombe'u yva pygua po'akaa ojekuaa aguā namombyryvei maa.

⁸ Pemonguera imba'eaxy va'e, pemboete ju omano va'ekue, peiky'a'o lepra revegua, ha'e peipe'a anha. Mba'emo pejopy rive rire peme'lē rive ju 'rā joupe.

⁹ Pendeku'a re peraa eme peráta, ouro, prata neī overa va'e guigua,

¹⁰ neī voko peraa eme tape rupi, neī mokoī kamixa, pendepy regua, neī pendepopoka guive, mba'eta om̄ba'epo va'e rei ha'eve ojopy aguā ho'u va'erā.

¹¹ Ha'e tetā py e'ŷ vy tekoia oī va'e rupi pevaēa py peporandu 'rā heko porā va'e oiko va'ea re. Ha'e va'e kuery ro py ae 'rā pepyta, peove aguā ára peve.

¹² Oo py pevaē vy pexarura 'rā ha'e pygua kuery pe.

¹³ Ha'e ramo oo pygua kuery heko porā ri ramo ha'e kuery re oī 'rā peroayvu porāague. Ha'e rā heko vai ramo pendere ae ju tojevy peroayvu porāague.

¹⁴ Ha'e kuery napenemovaēi, neī pendeayvu noenduxei ramo ha'e va'e oo e'ŷ vy tetā gui peo ju vy pendepy regua gui peity-ity 'rā yvy ku'i.*

¹⁵ Anhetē aipoa'e pēvy: Nhombopagaa ára py ha'e va'e tetā pygua kuery gui omboaxyave 'rā Sodoma ha'e Gomorra pygua kuery.*

Mba'emo gui omonheanguague

¹⁶ — Ma'ē, xee ma vexa'i rami romondouka aguara mbyte rupi. Ha'e nunga rupi peiko kuaa 'rā mboi rami, ha'e rā apykaxu'i rami 'rā pendekuai rive.

¹⁷ Penheangu ke avakue gui, mba'eta penemboaxa 'rā huvixa kuery po py, ha'e penenupā 'rā onhembo'eaty oī va'e rupi.

¹⁸ Xekáuxa pendereraa 'rā huvixa kuery ha'e huvixave renonde. Ha'e ramigua oiko 'rā ha'e kuery ha'e judeu e'ŷ va'e kuery pe xeregua ayvu pemombe'u aguā.

¹⁹ Ha'e rami avi penemboaxaa ramo pepēxa rei eme marā rami e'ŷ vy mba'e nunga re pa pendeayvu aguā re, mba'eta ha'e va'e hora-ve pendeayvurā oikuaa ukaa 'rā pēvy.

* 9:34 Lucas 11.14-18 * 9:36 Marcos 6.34 * 9:37 Lucas 10.2 * 10:14 Atos 13.50,51; 18.6 * 10:15 Lucas 10.1-12

- ²⁰ Mba'eta pendejegui ae e'ŷ 'rā pendeayvu, ha'e rā Penderu Nhe'ẽ ijayvu 'rā pēgui.*
²¹ Amongue ojopy uka 'rā guyvy ae ojuka uka aguã, ha'e tuu kuery ojopy uka 'rā gua'y kuery ae. Ta'y kuery opu'ã 'rā nguu kuery re ojuka uka avi aguã.
²² Xerery káuxa pavẽ nda'ija'e 'rā pendere. Ha'e rami teĩ opa peve ogueropo'aka va'e oo jepe 'rā.
²³ Ha'e gui tetã py pendere opu'ã reia ramo amboae henda katy ju penha, mba'eta anhetẽ aipoa'e pêvy: Ava ra'y ojeapo va'ekue ou peve napevaẽmba jepei 'rā Israel regua tetã ikuai va'e rupi.

Omokyre'ŷa rupi ijayvuague

- ²⁴ — Temimbo'e kuery ma imbo'ea gui yvateve va'e'ŷ, tembiguai kuery voi opatõ gui yvateve va'e'ŷ guive.
²⁵ Ha'eve temimbo'e kuery ikuai aguã imbo'ea reko rami, ha'e tembiguai kuery ikuai aguã opatõ oikoa rami. Hoo va'e pe “Anha ruvixa Belzebu” 'ea ramo hoo pygua kuery pe katuve 'rā teve.*
²⁶ Ha'e rami teĩ pekyje eme ha'e kuery gui, mba'eta mba'emo onhomí mbyre oexa ukapaa 'rā, ha'e oikuua e'ŷ pyre voi oikuapaa 'rā.
²⁷ Pytãa py xee rombo'eague ma hexakãa py ju 'rā pemombe'u, pendeapyxa'i py xeayvuague ma oo apyte áry gui ju 'rā pemombe'u.
²⁸ Pekyje eme penderete jukaa kuery gui, mba'eta penenhe'ẽ ma ha'e kuery ndojuka kuaai 'rā. Pejererokyje 'rā nhonhe'ẽ ha'e joete tata ogue e'ŷ va'e py omokanhy aguã ipo'aka va'e renonde anho.
²⁹ — Mokoï guyra'i nda'u pete'i i hatã'i va'e repy e'ŷ ri? Ha'e rami teĩ yvy py neĩ peteïve ndo'ai 'rā Penderu oipota e'ŷ rā.
³⁰ Peẽ kuery re katuve ma opena, mba'eta pende'a peneakã re oĩ va'e voi oipapapa.
³¹ Ha'e nunga rupi pekyje eme, mba'eta hetá guyra'i gui peẽ pevareve.
³² Ha'e nunga rupi avakue renonde xevy pe oikoa omombe'u va'ekue ha'e javi ma xee voi ha'e rami 'rā amombe'u Xeru yva pygua renonde.
³³ Ha'e rā avakue renonde naxemombe'uxei va'ekue ma xee voi namombe'ui 'rā Xeru yva pygua renonde.*

Haxy va'e re ijayvuague

- ³⁴ — Pexa'ã eme ko yvy re aju peteĩ rami nhomoingoarã aru aguã. Peteĩ rami nhomoingoarã aru aguã e'ŷ aju, ha'e rā kyxe.
³⁵ Mba'eta aju rire avakue joo rami e'ŷ 'rā ikuai nguu reve, ha'e imemby kuery ha'e rami ae 'rā ikuai oxy reve, ha'e ipi'a ra'yxy kuery avi ome xy reve 'rā ikuai.
³⁶ Ha'e rami vy avakue rovaigua ma hoo pygua kuery ae 'rā ikuai.*
³⁷ Amongue xegui nguu, e'ŷ vy oxy ri oayvuve vy nda'evei xerupiveguia oiko aguã. Ha'e rami ae avi gua'y e'ŷ vy guajy ri xegui oayvuve vy nda'evei xerupiveguia oiko aguã.
³⁸ Ha'e ojeupeguia kuruxu ndogueraaxe, ha'e xerupive ndooxei va'e ma nda'evei xeremimbo'erã.
³⁹ Nomanoxei va'ekue omokanhy 'rā guekove. Ha'e rā xekáuxa omano va'e ma ojou ju 'rā guekove.*

Mba'emo rekovia re ijayvuague

- ⁴⁰ — Amongue penemovaẽ ramo xee avi ha'e kuery xemovaẽ, ha'e xemovaẽ va'e ma xembouare avi omovaẽ.
⁴¹ Profeta kuery pe “Profeta” he'i vy omovaẽ va'ekue ma hekovia ojopy 'rā profeta pegua rami. Ha'e heko porã va'e kuery pe “Heko porã va'e” he'i vy omovaẽ va'ekue ma hekovia ojopy 'rā heko porã va'e pegua rami.

* 10:20 Lucas 12.11,12; 1 Pedro 3.13-17; 4.12-19 * 10:25 Lucas 6.40; João 15.20 * 10:33 Lucas 12.29-31 * 10:36 Miquéias 7.6, Lucas 12.51-53, 14.26,27 * 10:39 Marcos 8.34,35; Lucas 9.24; Apocalipse 12.11

⁴² Ha'e rami ae avi anhetē aipoa'e pēvy, amongue kova'e kyrī va'e rami ikuai va'e pe "Jesus remimbo'e" he'i vy peteī karo yro'yxā ome'ē va'ekue voi ndojopy e'yi 'rā hekovia.*

11

Tetā ikuai va'e rupi Jesus ayvu omombe'uague

¹ Ha'e rami guemimbo'e kuery doze-ve Jesus ombo'epa ma vy ojepe'a ha'e gui. Nhombō'e ha'e ayvu omombe'u oikovy ha'e katy'i tetā ikuai va'e rupi.

Lucas 7.18-23

² Nhuā py João Batista oĩa py Cristo mba'emo ojapo oikovy omombe'ua rā oendu vy ixupe ombou guemimbo'e kuery po rami oporandu aguā:

³ "Ndee ae teve reju 'rā va'ekue, tyrā pa roarōve 'rā amboae?" he'i aguā.

⁴ Ha'e rā Jesus ombovai vy aipoe'i ha'e kuery pe:

— Tapeo ju João pe pemombe'u mba'emo pendu ha'e pexa va'ekue,

⁵ mba'eta ára reveguā e'ŷ oma'ē ju, oguata e'ŷ va'ekue oguata ju, lepra reveguā ojeky'a'o ju, ijapyxa e'ŷ va'ekue oendu ju, omano va'ekue onhemboete ju, ha'e iporiaukue'i pe omombe'ua ayvu porā.*

⁶ Ovy'a ete 'rā xere ojeroviaa gui ndojepe'ai va'e.

Lucas 7.24-35

⁷ Ha'e kuery oopa ma rire heta va'e kuery pe ju Jesus ijayvu João Batista reko re. Aipoe'i:

— Marā ramigua pexa aguā tu peo raka'e tekao e'ŷa py? Takua'i yvytu omomy-momyī va'e ramigua rive ri ty'y?

⁸ Ha'e rami e'ŷ rā marā ramigua pexa aguā tu peo? Peteī ava ao porā py onhemonde va'e ri ty'y? Ha'e rami avi onhemonde porā va'e ma huvixa ro py ikuai va'e anho.

⁹ Marā ramigua tu ha'vy peo pexa? Profeta? Tá, xee aipoa'e pēvy: João Batista ma profeta ikuai va'e gui voi yvateve va'e.

¹⁰ Mba'eta hekorā re ae ipara oiny: "Nerenonderā xee amondouka 'rā peteī xerembiguai, nderaperā oguereko katu aguā."*

¹¹ Anhetē aipoa'e pēvy: Kunhague gui oiko va'ekue jipoi João Batista gui yvateve va'e. Ha'e rami avi yva pygua po'akaa py yvyīgueve'i va'e ma ixugui yvateve.

¹² Mba'eta João Batista oikoa ára guive aŷ peve ma onhea'āa 'rā oupity aguā yva pygua po'akaa, onhea'āa va'e kuery anho 'rā oupity.

¹³ Mba'eta profeta kuery ha'e lei ma João oikoa ára peve'i omombe'ua.

¹⁴ Ha'e gui peē perovia ri ramo ha'e ae Elias ou 'rā va'ekue oiko.

¹⁵ Ijapyxa [oendu aguā] oĩ va'e toendu.

¹⁶ — Mba'e nunga re nda'u ambojoja 'rā aŷgua kuery reko? Ha'e va'e kuery ma ikuai kyrīgue tetā mbyte rupi oguapy vy oirū kuery pe ojapukai va'e rami:

¹⁷ "Mimby romonhe'ẽ ramo peē ndapejerokyxei, ha'e rā omanoa pygua ju romonhendu teī ndapejae'oxei", he'i va'e kuery rami.

¹⁸ Mba'eta João Batista ou vy okaru ha'e oy'u e'ŷ re oiko. Ha'e rami rā ixupe "Anha reve rima oiko" 'ea.

¹⁹ Ha'e rā Ava ra'y ojeapo va'ekue ma ou vy okaru ha'e oy'u ramo ixupe "Peva'e ma okaru guaxu, vinho oy'u, ha'e imposto re nhombopaga va'ety ha'e heko vai va'e kuery re irū va'e", 'ea. Ha'e rā hi'arandu va'e ma mba'emo ojapoa py oexa uka 'rā o'arandu.

Lucas 10.13-15

²⁰ Ha'e gui Jesus omboypy tetā ikuai va'e pygua kuery re ijayvu aguā, mba'eta ha'e va'e rupi mba'emo porā heta ojapo teī ndojeko rerovai rire. Ha'e vy aipoe'i:

²¹ — Peē Corazim ha'e Betsaida pygua kuery pe nda'evei ete 'rā. Mba'eta pendea py hexa pyrā ajapo va'e ramigua Tiro ha'e Sidom py ojapoa va'e rire, ha'e pygua kuery ojeko rerova voi 'rāgue. Ha'e rami vy ajukue vaikue py onhemonde 'rāgue tanhimbu py oguapy reve.

* 10:42 Mateus 25.34-40; Marcos 9.41; João 13.20 * 11:5 Lucas 4.16-21 * 11:10 Malaquias 3.1

²² Ha'e nunga rupi aipoa'e pēvy: Nhombopagaa ára py peē kuery gui omboaxyave 'rā Tiro ha'e Sidom pygua kuery.

²³ Ha'vy peē Cafarnaum pygua kuery, peo 'rā teve yva peve? Any, tata ogue e'ŷ va'e py 'rā pe'a. Mba'eta mba'emo porā pendea py ajapo va'e ramigua Sodoma py ojapoa va'e rire ma kova'e ára peve oī 'rāgue.

²⁴ Pēvy aipoa'e: Nhombopagaa ára py pendegui omboaxyave 'rā Sodoma yvy regua kuery.
Lucas 10.21,22

²⁵ Ha'e jave py Jesus ijayvu atā:

— Xeru yva ha'e yvy re ndepo'aka va'e, xee roquerovy'a, mba'eta ha'e nunga ma hi'arandukue pe e'ŷ reikuua uka, neī ombo'e pyre pe e'ŷ guive. Yvyīgueve'i pe anho reikuua uka.

²⁶ Tá, Xeru, ha'e rami ae reipota.

²⁷ — Opa mba'e Xeru omboaxapa xevy. Avave rei ndoikuuai Ta'y, Tuu e'ŷ vy. Ha'e avave rei ndoikuuai Tuu, Ta'y e'ŷ vy, ha'e amongue pe Ta'y oikuua ukaxea va'e ete'i.

"Peju ke xea py", he'iague

²⁸ — Peju ke xea py penekane'õ ha'e pevoyi va'e ha'e javi. Ha'e rā xee romokane'õguia'rā.*

²⁹ Pendejee pemoī xeregua canga, peikuua xegui, mba'eta xepy'a re xevai reia noī, ha'eve rei'ia anho. Ha'e rami vy pejou 'rā penenhe'ẽ opytu'u aguā.

³⁰ Mba'eta xeregua canga ma ndaxyi, ha'e xevoyi nda'ipoyi guive.*

12

Marcos 2.23-28; Lucas 6.1-5

¹ Ha'e jave py sábado ára Jesus oaxa trigoty rupi. Ha'e gui hemimbo'e kuery okaruxe vy omboypy hi'a oipo'o vy ho'u heravy aguā.

² Ha'e nunga fariseu kuery oexa vy aipoe'i ixupe:

— Ma'ě, neremimbo'e kuery ojapo sábado ára py nda'evei va'e — he'i okuapy.

³ Ha'e ramo Jesus aipoe'i ha'e kuery pe:

— Ndaperoayvui teve Davi okaruxe vy oirū kuery reve ojapo va'ekue?

⁴ Mba'eta Nhanderuete ro py Davi oike vy ho'u raka'e mbojape Senhor renonde pe omoī mbyre, ha'e kuery ho'u aguā nda'evei va'eri, neī hupive ikuai va'e, sacerdote kuery pe anho ha'eve.

⁵ Ha'e ndaperoayvui teve lei re oī va'e? Mba'eta sábado py sacerdote kuery ma iky'a va'e opyta e'ŷ re ojapo 'rā mba'emo templo ropy rupi sábado py amboae kuery ojapo aguā nda'evei va'e. Ha'e rami avi xee aipoa'e pēvy:

⁶ Apy oī va'e templo gui yvateve va'e.

⁷ Ha'e nunga rupi pova'e ayvu: "Mba'emo peapy reve xevy peme'ẽ 'rāgue py aipotave penhomboaxy", he'iague peikuua va'e rire ndapejou vai 'rāgue ojejav y e'ŷ va'e.*

⁸ Mba'eta Ava ra'y ojeapo va'ekue ma sábado ára re voi ipo'aka va'e.

Marcos 3.1-6; Lucas 6.6-11

⁹ Jesus ha'e gui oo vy oike ha'e kuery onhembo'eaty py.

¹⁰ Ha'e py oī petei ava ipo rovai piru va'e. Ha'e ramo Jesus re ha'e kuery ijayvu reixe vy oporandu okuapy Jesus pe:

— Ha'evea rami ri nda'u sábado ára py nhanhomongueraa? — he'i okuapy.

¹¹ Ha'e ramo ombovai:

— Mava'e peē kuery regua nda'u sábado py penerymba vixa'i yvykua py ho'a rā napenhea'āi 'rā ha'e gui penoē aguā?

¹² Vixa'i gui nhande va'e ovareve ramo ha'eve sábado py joupe jajapo porā aguā — he'i.

¹³ Ha'e gui ava pe ju Jesus aipoe'i:

— Embo'yvi ndepo — he'i. Ipo ombo'yvi rā iporā ju ipo rovai rami.

¹⁴ Ha'e rā fariseu kuery ma ojepe'a vy jogueroayvu hovai, ojuka uka aguā re.

Jesus ojepe'aague

¹⁵ Jesus ha'e nunga oikuua vy ojepe'a ha'e gui. Heta avi oje'oi hakykue. Ha'e ramo omonguerapa.

¹⁶ Ha'e vy omongoeta avave rei pe ha'e kuery omombe'u e'ŷ aguā,*

¹⁷ profeta Isaías pe aipoe'i ukaague ojeupity aguā:

¹⁸ "Ma'ē, pee ma oī xerembiguarā aiporavo va'ekue, xerembiayvu Xenhe'ē py arov'y'a va'e. Hexe amoī 'rā Xenhe'ē. Ha'e ramo amboae regua kuery pe voi omombe'u 'rā ha'evea rami joguerekoa.

¹⁹ Nanhomotare'ŷi 'rā, nda'ijayvu atāi 'rā, neī tetā mbyte rupi nda'ijayvui 'rā guive.

²⁰ Nomondoi 'rā takua opē va'e, neī nomboguei 'rā tataendy ogue rai'i va'e, ha'evea rami joguerekoa ipo'aka aguā rami ojapo e'ŷa ja.

²¹ Ha'e ramo hery rupi amboae regua kuery voi oarō 'rā okuapy."*

Marcos 3.20-30; Lucas 11.14-23

²² Jesus oīa py oguerua peteī ava hexe anha onhemonde rā ndoexai neī nda'ijayvui va'e. Omonguera ramo ijayvu e'ŷ va'ekue ijayvu ha'e oexa ju.

²³ Ha'e ramo heta va'e kuery oexa vy onhemondyipa. Ha'e vy

— Peva'e e'ŷ nda'u Davi ramymino? — he'i okuapy.

²⁴ Ha'e rā fariseu kuery ma ha'e nunga oendu vy ijayvu rei okuapy:

— Peva'e tu anha ruvixa Belzebu po'akaa rupi rima oipe'a oikovy anha kuery — he'i.

²⁵ Ha'e ramo ha'e kuery py'a py ijayvua Jesus oikuua vy aipoe'i:

— Tetā pygua kuery minha jomeme ri opu'ā vy nhomomba 'rā. Tetā, ha'e e'ŷ vy oo pygua jomeme opu'ā vy okanhymba 'rā.

²⁶ Ha'e rami ae avi Satanás kuery meme ri jope'a va'e rire ojee ae opu'ā 'rāgue. Mba'exa tu ha'vy ipo'akave ta?

²⁷ Anhetē ri Belzebu po'akaa rupi xee anha aipe'a ramo, mba'exagua po'akaa rupi tu ha'vy pendera'y kuery oipe'a? Ha'e nunga rupi ha'e kuery ae oikuua uka 'rā pendeayvu rivea.

²⁸ Ha'e rā Nhanderuete guigua Nhe'ē po'akaa rupi ae xee anha aipe'a ramo anhetē ete Nhanderuete po'akaa ojekuaa ra'e peē kuery pe.

²⁹ Ha'e rami ae avi mba'exa 'rā tu ojerovia vaipa va'e ro py amongue oike vy ojokua ranhe e'ŷ re imba'e rei-rei re imonda? Mba'eta ojokua vy 'rāe ogueraapa hoo gui.

³⁰ Xereveguia e'ŷ va'e ma xerovaigua ikuai, ha'e xea py ndajoguerui va'e ma xegui nhomonheguāemba 'rā.

³¹ Ha'e nunga rupi aipoa'e pēvy: Avakue ojeavyague ha'e ijayvu vaiague ha'e javi omboguea 'rā. Ha'e rā Nhe'ē re ijayvu vaiague ma nombogueai 'rā.

³² Ava ra'y ojeapo va'ekue re teī amongue ijayvu vai ramo ha'e nungakue omboguea 'rā. Ha'e rā Nhe'ē Ky'a E'ŷ re ri ijayvu vaia ramo nombogueai 'rā kova'e yvy re, neī yvy pyau re voi.

Lucas 6.43-45

³³ — Peiko ke yvyra porā ha'e hi'a porā va'e rami, ha'e rami e'ŷ vy yvyra porā e'ŷ ha'e hi'a iporā e'ŷ va'e rami peiko. Mba'eta yvyra ikuai va'e ma hi'a re jaikuua pota vy 'rāe jaikuua.

³⁴ Mboi ramo pendekuai va'e, mba'exa tu pendeko vai va'eri pendeayvu ta mba'emo porā re? Mba'eta nhandejuru py nhandeayvu 'rā mba'emo nhandepy'a re tynyē va'e re.

³⁵ Heko porā va'e ma mba'emo porā omoī porā va'ekue gui oguenoē 'rā mba'emo porā anho. Ha'e rā heko vai va'e ma mba'emo vai omoī porā va'ekue gui oguenoē 'rā mba'emo vai.

³⁶ Aipoa'e pēvy: Avakue ijayvuague ndovarei va'e ha'e javi re 'rā opaga nhomboayvua ára py.

³⁷ Mba'eta pendeayvuague re ae penemboeko porāa, ha'e ramo e'ŷ vy pendeayvuague re penembopagaa 'rā.

Lucas 11.29-32

* 12:16 Marcos 3.7-12 * 12:21 Isaías 42.1-4

³⁸ Ha'e ramo kuaxia re nhombo'e va'ety ha'e fariseu kuery regua aipoe'i:

— Porombo'ea, ore roexaxe hexa pyrā rejapo rā — he'i.*

³⁹ Ha'e ramo ombovai:

— Heko vai ha'e itavy rei va'e kuery ae 'rā ojerure hexa pyrā ajapo aguā. Ha'e rami teī ha'e kuery pe peteīve ndojapoai 'rā, profeta Jonas re oiko va'ekue ramigua e'ŷ vy.

⁴⁰ Mba'eta Jonas mboapy ára ha'e mboapy ptytū re pira guaxu rye py oīague rami avi Ava ra'y ojeapo va'ekue voi mboapy ára ha'e mboapy ptytū re oī 'rā vy guýry.*

⁴¹ Ha'e nunga rupi nhomboayvua ára py Níniwe pygua kuery opu'ã vy ijayvu 'rā okuapy aýgua kuery re, mba'eta Jonas ayvu omombe'u rā ha'e kuery oendu vy ojeko rerovapa rire. Ha'e rā apy oī va'e ma Jonas gui yvateve va'e.

⁴² Nhomboayvua ára py kuaray puku-a katyguia huvixave kunha voi opu'ã vy ijayvu 'rā aýgua kuery re, mba'eta yvy apy gui ou raka'e Salomão arandua oendu aguā. Ha'e rā apy oī va'e ma Salomão gui yvateve va'e.

Lucas 11.24-26

⁴³ — Ha'e rami avi avakue gui nhe'ẽ vai oẽ vy tekoia e'ŷa rupi ju 'rā oiko, ikane'ōguia aguā oeka vy. Ha'e gui ndojoui vy

⁴⁴ ojeupe aipoe'i 'rā: "Aa ju ta xero ajepe'aague py", he'i 'rā. Ha'e rami vy ou ju vy ojou 'rā oo avave rei noñai va'e, oipeipa ha'e omoatyrõmba pyre.

⁴⁵ Ha'e gui oo ranhe vy sete nhe'ẽ ju ogueru 'rā ixugui nda'eveive va'e, ha'e py oike vy ikuai va'erā. Ha'e rami rire opaa py jypy guare gui nda'eveive 'rā ava va'e pe. Ha'e ramigua ae 'rā oiko kova'e kuery heko vai va'e re.

Marcos 3.31-35; Lucas 8.19-21

⁴⁶ Heta va'e kuery pe Jesus ijayvu teri jave ixy ha'e tyvy kuery ovaẽ oka py, hexeve ijayvuxe vy.

⁴⁷ Ha'e ramo amongue aipoe'i ixupe:

— Ndexy ha'e nderyvy kuery, pee oka py ikuai. Ndereve ijayvuxe okuapy — he'i.

⁴⁸ Ha'e ramo imombe'uare pe ombovai:

— Marā ramigua tu ha'i ha'e xeryvy kuery ikuai? — he'i.

⁴⁹ Ha'e gui guemimbo'e kuerya katy okuave'ẽ vy aipoe'i:

— Peva'e ae ma ha'i ha'e xeryvy kuery.

⁵⁰ Mba'eta Xeru yva pygua oipotaa rami ojapo va'e ma ha'i, xeryvy ha'e xereindy kuery ikuai.*

13

Marcos 4.1-9; Lucas 8.4-8

¹ Ha'e va'e árave oo gui Jesus oo vy oguapy ye'ẽ yvýry.

² Heta ijyvýry ono'õ ramo peteī kanoã py ju oī vy oguapy oiny ha'e py. Ha'e rā heta va'e kuery ma ita ku'i reia rupi opu'ã okuapy.

³ Ha'e gui ha'e kuery pe opa mba'e re ijayvu mba'emo re ombojoja vy. Ha'e vy aipoe'i:

— Peteī ava oo mba'emo ra'yī moaī vy.

⁴ Ha'e va'e omoaĩ ramo amongue ha'yīgue ho'a tape yvýry rupi. Ha'e nunga ma guyra'i ou vy ho'upa.

⁵ Amboae ma itaty yvy mbovy'i reia rupi ho'a. Ha'e nungakue ma yvy re ndoike pukui rire henhoī voi'i.

⁶ Ha'e rami teī kuaray oẽ vy omombirupa, ndapoi rā.

⁷ Amboae ma juu mbyte rupi ho'a. Ha'e gui juu yvate vy ojukapa.

⁸ Ha'e rā amboae ma yvy porāa rupi ho'a. Ha'e nungakue ma hi'a, cem, sessenta, trinta ra'yī oiko peteī-teī gui.

⁹ Ijapyxa [oendu aguā] oī va'e toendu.

Marcos 4.10-20; Lucas 8.9-15

¹⁰ Ha'e gui hemimbo'e kuery onhemboja vy oporandu ixupe:

— Mba'e re tu mba'emo re rembojoja vy anho ndeayvu ha'e kuery pe?

* 12:38 Marcos 8.11,12 * 12:40 Jonas 1.17 * 12:50 Hebreus 2.11,12

11 Ha'e ramo ombovai:

— Pendevy pe yva pygua oikuua uka opo'akaa py mba'emo oiko va'e ndoikuua ukai teri va'ekue. Ha'e rā ha'e kuery pe ma ndoikuua ukai.

12 Mba'eta mba'emo oguereko va'e pe ome'ēave 'rā, oguereko retave aguā. Ha'e rā oguereko e'ŷ va'e gui ma oguereko'i va'e voi oipe'aa 'rā.

13 Ha'e nunga rupi ae mba'emo re ambojoja vy xeayvu ha'e kuery pe. Mba'eta ha'e kuery oma'ẽ teĩ ndoexai, ha'e oendu teĩ noendu kuaai, neĩ ndoikuuaai guive,

14 Isaías aipoe'iague ojeupity aguā: “Pendeapyxa py pendu teĩ mba'eve napendu kuaai 'rā. Penderexa py pexa teĩ mba'eve ndapexa kuaai 'rā.

15 Mba'eta kova'e kuery ma inhakā ratā va'e. Oapyxa py noenduxei okuapy, ha'e guexa ombofy oexa e'ŷ aguā, oapyxa py oendu e'ŷ aguā, ha'e opy'a py mba'eve oikuua e'ŷ aguā, ha'e rami vy ojeko rerova e'ŷ aguā, xevy pe onhemonguera uka e'ŷ aguā”, he'iague.*

16 Ha'e rā peẽ kuery ma pevy'a 'rā, mba'eta penderexa oexa, ha'e pendeapyxa oendu.

17 Mba'eta anhetē aipoa'e pēvy: Heta ikuai raka'e profeta kuery ha'e heko porā va'e peẽ kuery pexa va'e oexaxe va'eri ndoexai, ha'e pendu va'e oenduxe va'eri noendui.

18 — Pejapyxaka ke ha'vy mba'emo ra'yī moaĩa re ambojojaague amombe'u porāve rā.

19 Amongue Nhanderuete po'akaa regua ayvu oendu teĩ noendu kuaai ramo ha'e kuery ha'e javia py ou 'rā poromboeko vaia, ha'e ipy'a gui oipe'a 'rā ha'yī omoaĩ mbyre. Ha'e va'e ma tape yvýry omoaĩ mbyre rami ikuai.

20 Ha'e gui yvy itaty reia rupi omoaĩ mbyre rami ikuai va'e ma ayvu oendu vy ojopy voi 'rā ový'a reve.

21 Ha'e rami teĩ ndapo pukui va'e rami avi ikuai vy opa voi 'rā. Ayvu káuxa oguereko axya, e'ŷ vy opu'aa rei ramo ndarei re ojepe'a 'rā.

22 Ha'e gui juu mbyte rupi omoaĩ mbyre rami ikuai va'e ma ayvu oendu teĩ ko yvy re mba'emo ikuai va'e re openavea ha'e ombo'e rei-rei re nda'eveivea ojao'ipa 'rā ayvu, hi'a e'ŷ aguā rami.

23 Ha'e rā yvy porāa rupi omoaĩ mbyre rami ikuai va'e ma ayvu oendu vy oikuua porā va'e. Ha'e va'e ma hi'a 'rā cem, sessenta, trinta peteĩ-teĩ gui.

Trigo ramigua re ambojojaague

24 Amboae ayvu ju ha'e kuery pe omombe'u mba'emo re ombojoja vy. Ha'e vy aipoe'i:

— Yva pygua po'akaa py oiko 'rā peteĩ ava ombo'ety rupi trigo ra'yī iporāve va'e omoaĩ va'e rami.

25 Ha'e gui pavē oke jave hovaigua ou vy trigo mbyte rupi omoaĩ trigo ramigua rive, ha'e vy ojepe'a ju.

26 Ha'e gui onhotŷ mbyre yvate ha'e hi'a ramo trigo ramigua avi ojekuaa ra'e.

27 Ha'e ramo ija rembiguai kuery ou vy aipoe'i ixupe: “Senhor, trigo ra'yī iporā va'e e'ŷ ri ty'y remoaĩ nemba'ety py? Magui nda'u oiko trigo ramigua?”

28 Ombovai: “Nhanderovaigua rima ojapo ra'e”, he'i.

— Ha'e gui hembiguai kuery oporanduve ju: “Reipota pa roo romondoro trigo ramigua?”

29 Ombovai: “Any, trigo ramigua pemondoro vy trigo avi pemondoro e'ŷ aguā.

30 Tove ranhe, ta'yvate jojaví omono'õa ára peve. Ha'e gui mae ma aipoa'e 'rā imono'õa kuery pe: ‘Trigo ramigua ranhe pemono'õ, pejokua oapypaa aguā. Ha'e rā trigo ma pemoi porā xeroguy py.’ ”*

Marcos 4.30-32; Lucas 13.18,19

31 Amboae ayvu ju ha'e kuery pe omombe'u mba'emo re ombojoja vy. Ha'e vy aipoe'i:

— Yva pygua po'akaa py oiko 'rā peteĩ mostarda ra'yī peteĩ ava ojopy vy ombo'ety re onhotŷ va'e rami.

* 13:15 Isaías 6.9-10 * 13:30 Mateus 13.36-43

³² Ha'e nunga ma anhetē ha'yī ikuai va'e gui ruxāve'i va'e. Ha'e rami teī yvate vy mba'emo nhanhotȳ va'e ha'e javi gui tuvixave 'rā. Yvyra ete oiko ramo guyra oveve va'e ou vy hakā re ojapo 'rā guaityrā.

Lucas 13,20,21

³³ Amboae ayvu ju omombe'u ha'e kuery pe mba'emo re ombojoja vy:
— Yva pygua po'akaa py oiko 'rā trigo mbovua rami, mba'eta peteī kunha ogueraa vy omoirū 'rā trigo re irūmba peve.

Marcos 4,33,34

³⁴ Pova'e nunga ha'e javi Jesus omombe'u heta va'e kuery pe mba'emo re ombojoja vy. Mba'emo re ombojoja e'ŷ re nda'ijayvui ha'e kuery pe,

³⁵ profeta pe aipo'ea ukaague ojeupity aguā: “Xeayvu 'rā mba'emo re ambojoja vy. Aikuua uka 'rā mba'emo [yvy] itui ypy'i guive ndoikuaa ukai pyre”, he'iague.*

Trigo ramigua re ombojoja va'ekue omombe'u porāveague

³⁶ Ha'e gui Jesus heta va'e kuery omondoukapa ma vy oo avi oo oīaty katy. Ha'e ramo hemimbo'e kuery hexe onhemboja vy aipoe'i:

— Emombe'u porāve ju trigo ramigua mba'ety rupi onhotȳ mbyre re ndeayyuague.

³⁷ Ha'e ramo ombovai:

— Mba'emo ra'yī iporāve va'e moaīa ma Ava ra'y ojeapo va'ekue ae.

³⁸ Mba'ety ma kova'e yvy, mba'emo ra'yī iporāve va'e ma Nhanderuete po'akaa pygua kuery, ha'e rā trigo ramigua ma poromboeko vaia ra'y kuery.

³⁹ Ha'e nunga moaīa ma nhanderovaigua anha. Ha'e gui omono'ōa aguā ma opaa ára, ha'e rā imono'ōarā ma anjo kuery.

⁴⁰ Mba'eta trigo ramigua omono'ō vy tata py omomboa rami avi 'rā oiko opaa ára py.

⁴¹ Ava ra'y ojeapo va'ekue omondouka 'rā ojeupega anjo kuery, openaa gui oipe'apa aguā nhombojejavya ha'e mba'emo vai apoa kuery ha'e javi.

⁴² Ha'e vy omombopa 'rā tata hendy va'e py. Ha'e ramo ojae'opa ha'e opa marā onhendu 'rā okuapy ha'e py.*

⁴³ Ha'e rā heko porā va'e kuery ma kuaray rami hexakā 'rā okuapy Nguuete po'akaa py. Ijapyxa [oendu aguā] oī va'e toendu.

Mba'emo ovareve va'e onhomī mbyre re ijayvua

⁴⁴ — Yva pygua po'akaa py oiko 'rā mba'emo ovareve ete va'e peteī mba'ety py onhomī mbyre rami. Ha'e va'e ma peteī ava ojou vy onhomive ju ranhe. Ha'e gui ovy'a vaipa reve oo vy opa mba'e oguereco va'e ovendepa. Ha'e vy ojeupe ae ojogua ha'e va'e mba'ety.*

Pérola re ijayvua

⁴⁵ — Yva pygua po'akaa py oiko 'rā peteī ava pérola porāgueve ojoguaxe vy oekaa rupi oiko va'e rami.

⁴⁶ Ha'e gui peteī pérola ovareve ete va'e ojou vy opa mba'e oguereco va'e ovendepa 'rā ojogua aguā.*

Pira mbo'aa re ijayvua

⁴⁷ — Yva pygua po'akaa py oiko 'rā pira mbo'aa ye'ē py omomboa rami avi. Opa marāguia ombo'a 'rā pira.

⁴⁸ Ha'e gui tynyē ma ramo pira jopoia kuery omoatā 'rā heruvy yvy'ā re, ha'e oguapy vy oiporavo 'rā ombo'a va'ekue. Iporāgueve omboyrū 'rā ajaka py, ha'e rā iporā e'ŷ va'e ma omombopa ju 'rā.

⁴⁹ Ha'e rami ae 'rā oiko opaa ára py. Anjo kuery ou vy heko vai va'e kuery oipe'apa 'rā heko porā va'e kuery mbyte gui,

⁵⁰ ha'e vy omombo 'rā tata hendy va'e py. Ha'e py ma ojae'opa ha'e opa marā onhendu 'rā okuapy.*

* 13:35 Salmo 78,2 * 13:42 Mateus 13,47-50

* 13:44 Proverbios 2,4,5; Filipenses 3,7,8

* 13:46 Proverbios

8,11 * 13:50 Mateus 13,24-30,36-43

Mba'emo pyau ha'e inhymague re ijayvua

⁵¹ Ha'e vy oporandu guemimbo'e kuery pe: — Pendu kuaa pa pova'e nunga?

— Tá — he'i okuapy.

⁵² Ha'e ramo aipoe'i ha'e kuery pe:

— Ha'e rami vy yva pygua po'akaa py mba'emo oiko va'e re ma kuaxia re nhombo'e va'ety ombo'ea porā ramo hoo va'e kuery rami avi 'rā oiko, mba'eta omoī porāague gui oguenoē 'rā mba'emo pyau ha'e mba'emo ymague.*

Marcos 6.1-6; Lucas 4.16-30

⁵³ Pova'e nunga ayvu Jesus mba'emo re omomboja vy omombe'upa ma vy ojepe'a ha'e gui.

⁵⁴ Guekoa py ae ovaē vy nhombo'e oikovy onhembo'eaty py. Ha'e ramo ijayvua ha'e kuery oendu vy onhemondyipa. Ha'e vy aipoe'i okuapy:

— Magui nda'u peva'e ava oikuua o'arandurā ha'e opo'akaa rupi mba'emo ojapo aguā?

⁵⁵ Peva'e nda'u oo apoa ra'y e'ŷ ri? Maria nda'u ixy e'ŷ ri? Tiago, José, Simão ha'e Judas e'ŷ ri ty'y tyvy kuery ikuai?

⁵⁶ Heindy kuery nda'u nhanembyte rupi e'ŷ ri ikuai? Magui ha'vy oikuua ha'e nunga ha'e javi? — he'i okuapy.

⁵⁷ Ha'e rami vy ndojeroviai okuapy hexe.

Ha'e ramo Jesus ombovai:

— Profeta ikuai va'e ma hekoia pygua ha'e hoo pygua kuery anho nomboetei — he'i.

⁵⁸ Ha'e rami vy mba'emo porā ndojapo retai ha'e py, ha'e kuery ndojeroviai ramo.*

14

Marcos 6.14-29; Lucas 9.7-9

¹ Ha'e jave py huvixave Herodes oendu omombe'ua rā Jesus mba'emo ojapo oikovya.

² Ha'e vy aipoe'i guembiguai kuery pe:

— Ha'e va'e ma João Batista omanoague gui onhemboete ju va'ekue. Ha'e rami vy 'rāe ipo'aka mba'emo porā ojapo aguā — he'i.

³ Mba'eta Herodes ojopy ae va'ekue João, ha'e ojokua vy nhuā py ombo'a tyvy Filipe ra'yxy Herodias káuxa.

⁴ Mba'eta João “Nda'evei nderai'xyrā rerekō aguā” he'i ramo.

⁵ Huvixa ojukaxe teī okyje heta va'e kuery gui, profeta oikoa ramo oikuua okuapy ramo.

⁶ Ha'e gui Herodes ituiague ára ovaē ramo pavē ikuai va'e renonde Herodias memby ojeroky ramo huvixa oguerovy'a.

⁷ Ha'e rami vy oura vy ijayvu ojerure va'e rei tema ome'ẽ aguā re.

⁸ Ha'e ramo kunhatai ma ixy ombo'eague ramo vy aipoe'i:

— Eme'ẽ xevy peteī hy'a py João Batista akāgue — he'i.

⁹ Ha'e ramo huvixa ndovy'avei. Ha'e rami teī hexeve mesa py ikuai va'e oendua py oura rire ojapo uka nho.

¹⁰ Ha'e vy ijayvu João akā ojayaag uka nhuā py.

¹¹ Ha'e gui inhakāgue peteī hy'a py oguerua vy kunha'i va'e pe ome'ẽa ramo oxy pe ju ogueraa.

¹² Ha'e ramo João remimbo'e kuery ou. Hetekue ogueraa vy onhono porā. Ha'e rire oje'oi, Jesus pe omombe'u.

Marcos 6.30-44; Lucas 9.10-17; João 6.1-14

¹³ Jesus ha'e nunga oendu vy ojepe'a ha'e gui. Peteī kanoā py oo tekua e'ŷa py ha'e kuery ae'i oĩ aguā katy. Ha'e rami teī heta va'e kuery oikuua avi vy tetā ikuai va'e gui oupa, hakykue oje'oi yvy rupi.

¹⁴ Ha'e ramo kanoā gui Jesus oguejy vy oexa heta ikuai va'e. Ha'e vy omboaxy vy omonguera imba'eaxy gui.

¹⁵ Ka'aru'i jave hemimbo'e kuery ou Jesus oña py. Ha'e vy aipoe'i ixupe:

* 13:52 Romanos 1.1-4; 2 Coríntios 1.20

* 13:58 João 1.11

— Apy ma tekaoa e'ŷa py nhandekuai, pytū ta ma guive. Ha'e nunga rupi emondoukapa heta va'e kuery, tekaoa rupi oo vy ho'u va'erā ojogua aguā — he'i okuapy.

¹⁶ Ha'e rā Jesus aipoe'i ha'e kuery pe:

— Oje'oi e'ŷ teī ha'eve. Peē ae peme'ẽ ho'u va'erā — he'i.

¹⁷ Ha'e rā ha'e kuery ombovai:

— Mba'eve ndoroguererekoi apy peteñ nhiruñ mbojape ha'e mokoñ pira'i e'ŷ vy.

¹⁸ Ha'e ramo aipoe'i:

— Peru ha'vy apy — he'i.

¹⁹ Ha'e gui Jesus heta va'e kuery nhuñ áry omboguapypa vy ojopy peteñ nhiruñ mbojape ha'e mokoñve pira. Yva re oma'ẽ reve oguerovy'a Nhanderuete. Ha'e rire mbojape oipe'ã-pe'ã'i vy ome'ẽ guemimbo'e kuery pe, ha'e kuery ju ome'ẽ-me'ẽ aguā heta va'e kuery pe.

²⁰ Ha'e javive okaru vy hevyatāmba. Ha'e gui hembyrekue omono'õ vy doze varai omonyé.

²¹ Okaru va'ekue ma cinco mil avakue, kunhague ha'e kyrīgue reve e'ŷ vy.

Marcos 6.45-52; João 6.15-21

²² Ha'e rire'ive guemimbo'e kuery pe aipoe'i kanoã py oĩmba vy oje'oi aguā henonderā hovaigua re, heta va'e kuery ha'e ae omondoukapaa ja.

²³ Ha'e gui heta va'e kuery omondoukapa ma vy yvyty áry katy oẽ ovvy, ha'e ae'ia py onhembo'e aguā. Ka'aru ete peve ha'e py oiko ha'e ae'i.

²⁴ Ha'e ramia ja kanoã mombyry ma oo yy rembe gui. Yai ojeapi-api, ha'eve e'ŷa katy gui yvytu ramo.

²⁵ Ko'ẽ rai jave Jesus ou ha'e kuerya katy, ye'ẽ áry oguata ouvy.

²⁶ Yy áry oguata rā hemimbo'e kuery oexa vy onhemondyipa. Ha'e vy aipoe'i:

— Âgue rima! — he'i. Okyje vy haxẽmba okuapy.

²⁷ Ha'e ramo Jesus ijayvu ha'e kuery pe:

— Pendep'y a guaxu ke. Xee rima, pekyje eme — he'i.

²⁸ Ha'e gui Pedro ijayvu vy aipoe'i:

— Senhor, ndee ri vy aipo're ndea py xee aa aguā yy áry rupi.

²⁹ Ha'e ramo

— Eju ha'vy — he'i.

Ha'e rā Pedro kanoã gui oguejy vy oguata yy áry, Jesus-a katy.

³⁰ Ha'e gui yvytu atāa re oma'ẽ vy oendu okyjea. Ha'e oike ovvy vy ojapukai:

— Senhor, xereraa jepe ke!

³¹ Ha'e ramove Jesus okuave'ẽ vy ojopy. Ha'e vy aipoe'i ixupe:

— Ava rejeroviaa kyri'i va'e, mba'e re tu nderejeroviai ri? — he'i.

³² Ha'e gui ma kanoã py mokoñve oĩ ramove yvytu opytu'u.

³³ Ha'e rā kanoã py opytu va'ekue omboete vy aipoe'i:

— Anhetẽ ete ra'e ndee Nhanderuete Ra'y!

Marcos 6.53-56

³⁴ Ha'e gui hovaigua re ovaẽ vy Genesaré yvy re ikuai.

³⁵ Ha'e va'e yvy regua avakue oexa kuaa vy omombe'u uka ha'e'i rupi ikuai va'e ha'e javi pe. Ha'e ramo oña py ogueru imba'eaxy va'e.

³⁶ Ixupe ojerure avi ijao apy re ri jepe opoko aguā. Ha'e gui opoko va'e rei okuerapa.

Marcos 7.1-23

¹ Ha'e gui Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue. Ha'e vy oporandum:

² — Mba'e re tu neremimbo'e kuery nda'ikuai ri ymagua kuery nhombo'eague rami? Mba'eta ojepoei e'ŷ re okaru.

³ Ha'e ramo ombovai:

— Ha'vy peẽ kuery mba'e re tu ndapejapo Nhanderuete ojapo uka va'e, ymagua kuery nhombo'eague pejou porãve vy?

⁴ Mba'eta Nhanderuete ma ojapo uka “Emboete nderu ha'e ndexy. Ha'e rã amongue nguu re, oxy re ijayvu vai va'e ma topaga ojukaa py” he'iague.*

⁵ Ha'e rã peẽ kuery ma aipopeje: “Nguu e'ŷ vy oxy pe amongue aipoe'i 'rã: ‘Pãvy peguarã areko va'ekue ma Senhor pe ju amboaxa’,

⁶ he'i tei ha'eve”, peje. Ha'e rami vy tuu ha'e ixy napeipytyvõ ukai. Ha'e rami py pemboyke Nhanderuete ayvu, ymagua kuery penembo'eague pejou porãve vy.

⁷ Heko porã merami rive va'e, ha'evea rami peẽ kuery reko re Isaías ijayvu vy aipoe'i:

⁸ “Kova'e kuery ma ojuru py rive xemboete, ha'e rã ipy'a ma mombyry xegui.

⁹ Avakue ijayvuague rupi rive nhombo'e vy xemboete merami rive okuapy”, he'i va'ekue.*

¹⁰ Ha'e gui heta va'e kuery ju oenoimba vy aipoe'i ha'e kuery pe:

— Pejapyxaka porã peikuua aguã:

¹¹ Pendejuru rupi oike va'e'ŷ penemboeko ky'a, pendejuru gui oẽ va'e anho 'rã penemboeko ky'a — he'i.

¹² Ha'e ramo hemimbo'e kuery hexe onhemboja vy aipoe'i:

— Reikuaa teve fariseu kuery ndeayvu oendu vy ojou vaia?

¹³ Ombovai:

— Mba'emo renhoi Xeru onhoty va'ekue e'ŷ ma omendoropaa 'rã.

¹⁴ Tove ta'ikuai. Ha'e kuery ma ára revegua e'ŷ va'eri ára revegua e'ŷ rerekoa rupi ikuai. Ha'e gui ára revegua e'ŷ ri oirũ oguereko vy mokoõve 'rã ho'a hugua katy — he'i.

¹⁵ Ha'e ramo Pedro aipoe'i ixupe:

— Emombe'u porãve orevy pova'e ayvu mba'emo re rembojoja vy remombe'u va'ekue — he'i.

¹⁶ Jesus ombovai:

— Peẽ voi napendu kuaai teri teve?

¹⁷ Napendu kuaai ri ty'y opa mba'e pendejuru rupi oike va'e penderyepy katy rive 'rã oguejy, ha'e penderete gui ju oaxapa 'rã?

¹⁸ Ha'e rã avakue juru gui oẽ va'e ma ipy'a gui ou. Ha'e nunga ae oĩ imboeko ky'aa.

¹⁹ Mba'eta avakue py'a gui ae 'rã ou opa marã rei oikoxea: jojukaxe, itavy reixe, kunhague mboae re opena reixe, imondaxe, joe ijayvu reixe ha'e gui ijayvu vaikue reixe.

²⁰ Ha'e nunga anho imboeko ky'aarã oĩ. Ha'e rã ojepoei e'ŷ re okarua ma nomboeko ky'ai 'rã.

Marcos 7.24-30

²¹ Ha'e gui Jesus ojepe'a ov y Tiro ha'e Sidom katy.

²² Ha'e rami jave ou peteñ kunha Canaã pygua ha'e katy'i gui. Ha'e va'e ojapuka-pukai:
— Senhor, Davi ramymino, xemboaxy ke. Xememby re anha onhemonde ramo nda'evei ete itui — he'i.

²³ Ha'e rami tei Jesus nombovai ranhe.

Ha'e ramo hemimbo'e kuery onhemboja vy aipoe'i ixupe:

— Emondouka na, mba'eta ojapukai ouvy nhanderakykue.

²⁴ Ha'e rã Jesus ombovai:

— Israel kuery regua vexa'i okanhy va'ekue anho aeka aguã xemboua — he'i.

²⁵ Ha'e gui kunha va'e ou vy omboete. Ha'e vy aipoe'i:

— Senhor, xepytyvõ ke.

²⁶ Jesus ombovai vy aipoe'i:

— Nda'evei ta'y kuery po gui mbojape jajogua vy jagua'i ikuai va'e pe nhamombo aguã — he'i.*

* 15:4 Êxodo 20.12, 21.17; Levítico 20.9; Deuteronômio 5.16 * 15:9 Isaías 29.13 * 15:26 Jesus “Ta'y kuery” he'ia ma guetarã kuery pe ijayvu vy, ha'e rã “Jagua'i” he'ia ma amboae regua pe. Kunha va'e ma amboae regua va'eri Jesus re ojerovia ete.

²⁷ Ha'e ramo kunha va'e aipoe'i:

— Tá, Senhor. Ha'e rami avi jagua'i teñ ho'u 'rã oja mesa gui tembi'u kure ho'a va'ekue.

²⁸ Ha'e rami rã Jesus aipoe'i:

— Kunha rejerovia ete va'e, toiko reipota va'e — he'i. Ha'e va'e jave py ma imemby okuera ma.

*Galiléia ye'*ẽ rembe katy Jesus ojevy vy heta ju omongueraague

²⁹ Jesus ha'e gui oo vy Galiléia ye'ẽ rembe rupi ranhe oo. Ha'e gui vyvty re oẽ vy oguapy ha'e py.

³⁰ Oĩa py heta ou. Heta ogueru hetyma rovai piru va'e, ikarëgue'i, ára revegu e'ŷ, ijayvu e'ŷ va'e ha'e amboae rami imba'eaxy va'e. Jesus py yvýry onhonomba. Ha'e ramo omonguerapa.

³¹ Heta va'e kuery onhemondyipa oexa vy ijayvu e'ŷ va'ekue ijayvu rã, ikarëgue'i va'ekue oiko porã, hetyma pirupa va'ekue oguata, ha'e ára revegu e'ŷ va'ekue voi oexapa ju ramo. Ha'e rami vy omboete okuapy Israel kuery Ruete.

Marcos 8.1-10

³² Ha'e gui Jesus guemimbo'e kuery oenoĩ vy aipoe'i:

— Amboaxy kova'e kuery, mba'eta mboapy ára ma xerupive ikuai rire mba'eve ndoguererekoi ho'u va'erã. Namondoukaxeui guive okaru e'ŷ re, tape rupi ho'apa e'ŷ aguã — he'i.

³³ Ha'e rã hemimbo'e kuery aipoe'i:

— Mamo nda'u kova'e teko a'ŷa py oĩ 'rã mbojape heta va'e kuery nhamongarupa aguã?

³⁴ Jesus oporandu ha'e kuery pe:

— Mbovy ha'vy perek mbojape?

Ombovai:

— Sete, ha'e mbovy'i pira'i guive — he'i.

³⁵ Ha'e ramo Jesus heta va'e kuery omboguapy ukapa yvy py.

³⁶ Ha'e vy ojopy sete-ve mbojape ha'e pira. Nhanderuete oguerovy'a rire oipe'ã-pe'ã'i vy ome'ẽ guemimbo'e kuery pe, ha'e kuery ju heta va'e kuery pe ombojoja aguã.

³⁷ Ha'e javive okarupa vy hevyatãmba. Ha'e gui hembyrekue ma sete ajaka renyẽ omboyu.

³⁸ Okaru va'e ma quattro mil avakue, kunhague ha'e kyrigue reve e'ŷ vy.

³⁹ Ha'e gui Jesus heta va'e kuery omondoukapa ma rire kanoã py oĩ. Ha'e vy Magadã regua katy oo.

16

Marcos 8.11-13

¹ Ha'e gui fariseu ha'e saduceu kuery ju onhemboja hexe. Oeko a'ã vy ojerure hexa pyrã yva guigua ojapo aguã re.

² Ha'e ramo ombovai:

— Peẽ kuery ma ka'aru ramo aipopeje 'rã: “Ára porã 'rã, mba'eta yva re pytãmba.”

³ Ha'e rã ko'ẽmba jave ma “Kova'e ára oiko 'rã ára vai, mba'eta yva pytã rei”, peje 'rã. Ha'e rami yva re pema'ẽ vy mba'emo peikuaa va'eri ndapexa kuaai va'e ty'y aŷ oiko va'e?

⁴ Heko vai ha'e itavy rei va'e kuery anho 'rã ojerure hexa pyrã re. Ha'e rami teñ ha'e kuery pe neñ peteñ hexa pyrã ndojapoai 'rã, Jonas re oiko va'ekue ramigua e'ŷ vy — he'i. Ha'e rami vy ojepe'a ovy ha'e kuerya gui.*

Marcos 8.14-21

⁵ Ha'e gui yupa rovaigua katy oo vy hemimbo'e kuery oikuua pota rã hexarai ra'e mbojape ogueraa aguã re.

⁶ Ha'e ramo Jesus aipoe'i ha'e kuery pe:

— Ma'ẽ, penheangu ke fariseu ha'e saduceu kuery regua trigo mbovua gui — he'i.

⁷ Ha'e ramo ha'e kuery jomeme ijayvu vy aipoe'i:

* 16:4 Mateus 12.38-42; Lucas 12.54-56

— Ha'e rami ijayvu mbojape ndajarui rire — he'i okuapy.

⁸ Jesus ha'e nunga oikuaa vy aipoe'i:

— Avakue pejeroviaa kyr'i va'e, mba'e re tu mbojape ndaperekia re pendeayvu?

⁹ Ndapeikuaai teri, neĩ napenema'endu'ai teve cinco mil avakue peguarã peteĩ nhiruĩ mbojape ha'eveague re, neĩ mbovy varai pa hembyrekue pemboyuague re?

¹⁰ Neĩ quatro mil avakue peguarã sete mbojape ha'eveague re napenema'endu'ai teve, neĩ mbovy ajaka pa hembyrekue pemboyuague re guive?

¹¹ Mba'exa tu napendu kuaai mbojape re ete'ŷ xeayvua, ha'e rã trigo mbovua rami fariseu ha'e saduceu kuery nhombo'ea gui penheangu aguã re — he'i.

¹² Ha'e ramo mae ma ha'e kuery oikuaa mbojape mbovua gui ete'ŷ omonheangu-a, ha'e rã fariseu ha'e saduceu kuery nhombo'ea gui.

Marcos 8.27-30; Lucas 9.18-21

¹³ Cesaréia Filipe pegua tetã katy Jesus ooa rupi oporandu guemimbo'e kuery pe:

— Marã ramigua Ava ra'y ojeapo va'ekue oikoa rami tu heta va'e kuery oikuaa?

¹⁴ Ha'e kuery ombovai:

— Amongue ma “João Batista” he'i. Amboae ma “Elias” he'i. Ha'e rã amboae kuery ma “Jeremias” e'ŷ vy “Profeta mboae” he'i.

¹⁵ Oporanduve ju:

— Ha'vy peẽ kuery, marã ramigua aikoa pa peikuaa?

¹⁶ Simão Pedro ombovai vy

— Ndee ma Cristo Nhanderuete oikove va'e Ra'y — he'i.

¹⁷ Ha'e ramo ixupe Jesus aipoe'i:

— Simão, João ra'y, revy'a ete 'rã, mba'eta ho'o ha'e huguy va'e e'ŷ ha'e nunga oikuaa uka ndevy, ha'e rã Xeru yva pygua ae.

¹⁸ Aipoa'e avi ndevy: Ndee ma Pedro, ha'e kova'e ita áry ajapo 'rã xevygua igreja. Ha'e gui xevygua igreja re ma manoa rokẽ rupi nhomoingea voi nda'ipo'akai 'rã.

¹⁹ Ndevy pe ma yva pygua po'akaa rokẽ pe'aa ame'ẽ 'rã. Mba'emo yvy re rejokua va'e ma yva re voi ojokua pyre 'rã oiko. Ha'e rã yvy re rejora va'e ma yva re voi ojora pyre 'rã oiko — he'i.

²⁰ Ha'e gui ma guemimbo'e kuery pe aipoe'i avave rei pe omombe'u e'ŷ aguã Cristo oikoa.

Marcos 8.31-33; Lucas 9.22

²¹ Ha'e va'e ára guive Jesus Cristo omboypy guemimbo'e kuery pe omombe'u aguã Jerusalém katy oo 'rãa, ha'e nhomongeta va'ety kuery po py oiko axy 'rãa opa mba'e py, sacerdote yvatekueve ha'e kuaxia re nhombo'e va'ety kuery po py guive. Ojukaa 'rã, ha'e gui mboapy araa py onhemboete ju 'rãa voi omombe'u.

²² Ha'e ramo Pedro oenoĩ ha'e ae'ia py. Ha'e vy ndojou porãia rami ijayvu vy aipoe'i ixupe:

— Senhor, enhemboaxy na ha'e nunga ndere oiko e'ŷ aguã.

²³ Ha'e rã Jesus ojere vy ombovai Pedro pe:

— Satanás, ejep'e a ke xea gui. Ndee ma ita xereityxea reiko, mba'eta Nhanderuete guigua e'ŷ reikuua, ha'e rã avakue guigua rive.

Marcos 8.34-9.1; Lucas 9.23-27

²⁴ Ha'e ramo Jesus aipoe'i guemimbo'e kuery pe:

— Xerupive oikoxe va'e taexarai ojegui ae, togueraa ojeupagua kuruxu, ha'e tou xerakykue.

²⁵ Mba'eta nomanoxei ete va'e kuery omokanhý 'rã guekove. Ha'e rã xekáuxa omano va'e ma ojou ju 'rã guekove.*

²⁶ Mba'e 'rã tu avakue ojou, mba'emo yvy regua oguerekopa va'eri guekove ae omokanhý vy? Mba'e nunga 'rã tu ome'ẽ onhe'ẽ rekovia?

²⁷ Mba'eta Ava ra'y ojeapo va'ekue ou 'rã Nguu rexakãa rupi, ojeupagua anjo kuery reve. Ha'e rami vy peteĩ-teĩ pe ombojoja 'rã ojapo va'ekue rekovia.*

* 16:25 João 12.24-26; Apocalipse 2.10; 12.11 * 16:27 Provérbios 24.12

²⁸ Anhetē aipoa'e pēvy: Apy peī va'e regua amongue napemanoi 'rā Ava ra'y ojeapo va'ekue opo'akaa reve ou rā pexa e'ŷa ja.

17

Marcos 9.2-8; Lucas 9.28-36

¹ Oito araa py Jesus ngupive ogueraa Pedro, tyvy Tiago ha'e Joāo ha'e kuery ae'i ikuai aguā py peteī vytyt yvate va'e áry.

² Ha'e py ha'e kuery oexaa py ma guexakā py ojekuaa. Hova hexakā kuaray rami, ha'e rā ijaio ma xiimba rei hendy va'e rami ojekuaa.*

³ Hexeve ojekuaa avi Moisés ha'e Elias. Ha'e va'e kuery ma hexeve ijayvu okuapy.

⁴ Ha'e ramo Pedro aipoe'i Jesus pe:

— Senhor, ha'eve apy nhaíve aguā. Ha'e ramo reipota rā ajapo 'rā mboapy oo'i: peteī ma ndevy guarā, amboae ma Moisés pe, ha'e gui amboae ju ma Elias peguarā — he'i.

⁵ Pedro ijayvu teria ja peteī arai hexakā va'e ou vy ojao'ipa. Arai gui onhendu peteī ayvu aipoe'i va'e:

— Peva'e ma Xera'y ayvu ete ha'e arov'y a va'e. Pejapyxaka ijayvua re ae — he'i.

⁶ Ha'e nunga hemimbo'e kuery oendu vy ho'apa okyje vy, vy re ngova omovaẽ reve.

⁷ Ha'e kuery re Jesus onhemboja vy opoko. Ha'e vy aipoe'i:

— Pevy ke, pekyje eme — he'i.

⁸ Ha'e kuery guexa oipe'a vy avave rei ndoexavei, Jesus e'ŷ vy.

Marcos 9.9-13

⁹ Yvyty áry gui ha'e kuery oguejy rā Jesus aipoe'i:

— Avave rei pe ke pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ŷa ja — he'i.

¹⁰ Ha'e gui hemimbo'e kuery oporandu:

— Mba'e re tu ha'vy kuaxia re nhombo'e va'ety kuery ijayvu okuapy Elias ranhe ou 'rāa re?

¹¹ Jesus ombovai:

— Anhetē ae Elias ou vy opa mba'e omoimba porā ju 'rā.*

¹² Ha'e rami avi xee aipoa'e porāve pēvy: Elias ma ou ae ma teī heta va'e kuery ndoikuuai okuapy. Ha'e rami vy ha'e kuery oipotaa rami ae ojapo okuapy hexe. Ha'e rami ae avi ha'e kuery po py Ava ra'y ojeapo va'ekue voi oiko axy 'rā — he'i.

¹³ Ha'e ramo hemimbo'e kuery oikuaa Joāo Batista reko re ijayvua rami.

Marcos 9.14-29; Lucas 9.37-43a

¹⁴ Ha'e gui heta va'e kuery ikuaia py ha'e kuery ovaẽ rā peteī ava onhemboja hexe. Ha'e va'e guenapy'ā re oī vy aipoe'i:

¹⁵ — Senhor, emboaxy xera'y, mba'eta he'o'ā vy oiko axy. Mbovykue rei e'ŷ ho'a tata py ha'e yy py.

¹⁶ Neremimbo'e kuerya py aru kuri teī ha'e kuery nomonguera kuaai — he'i.

¹⁷ Jesus aipoe'i:

— Peē pejerovia e'ŷ ha'e pendeko vai va'e, raka'e peve 'rā tu aiko pendereve, roqueropo'aka aguā? Eru ha'vy ava'i apy — he'i.

¹⁸ Ha'e gui anha pe Jesus ijayvu atā ramo ojepe'a ava'i gui. Ha'e va'e hora-ve ava'i okuera.

¹⁹ Ha'e ramo hemimbo'e kuery Jesus re onhemboja vy oporandu ha'e ae'ia py:

— Mba'e re tu ore ndoroipe'a kuaai ra'e anha?

²⁰ Ombovai ha'e kuery pe:

— Mba'eta pejeroviaa kyr'i rā. Anhetē aipoa'e pēvy: Peteī mostarda ra'y'i rami ri jepe pejeroviaa oī va'e rire kova'e vytyt pe “Ejepe'a ke apy gui, ki katy tereo”, peje ramo ojepe'a 'rāgue. Mba'eve rei ndaxyi 'rāgue pēvy.

²¹ [Ha'e gui ha'e va'e nunga anha ma nhanhembo'e ha'e jakaru e'ŷ re jaiko vy 'rāe jaipe'a.]

Marcos 9.30-32; Lucas 9.43b-45

* 17:2 2 Pedro 1.16-18 * 17:11 Malaquias 4.5-6

²² Ha'e gui Galiléia yvy re hemimbo'e kuery ijatypa ju ma ramo Jesus aipoe'i ha'e kuery pe:

— Ava ra'y ojeapo va'ekue omboaxaa 'rā avakue po py.

²³ Ha'e kuery ojuka 'rā. Ha'e gui mboapy araa py onhemboete ju 'rā — he'i. Ha'e rā hemimbo'e kuery oendu vy iporiaupa.

Jesus imposto opaga ukaague

²⁴ Cafarnaum py ha'e kuery ovaẽ jave Pedro oĩa py ou imposto re nhombopaga va'ety kuery. Ha'e rami vy oporandu okuapy mokoĩ hata'i va'e opaga aguã re:

— Penembo'ea ndopagai 'rā teve mokoĩ hatā'i va'e? — he'i okuapy.

²⁵ — Tá, opaga ri — he'i ombovai vy.

Ha'e gui opy Pedro ovaẽ ramove ixupe Jesus oporandu vy aipoe'i:

— Simão, mba'exa tu reikuua? Mava'e kuery tu kova'e yvy regua huvixa kuery ombopaga 'rā imposto re: gua'y kuery tyrā pa amboae regua?

²⁶ Pedro ombovai:

— Amboae regua ri — he'i.

Jesus aipoe'i ixupe:

— Ha'e rami rā ta'y kuery opaga e'ŷ teĩ ha'eve.

²⁷ Ha'e rami avi ha'e kuery ivai e'ŷ aguã tereo, eity pinda yy py, ha'e enoẽ pira ogueraa ypy va'e. Ha'e va'e juru reipe'a vy rejou 'rā peteĩ peráta hatā'i va'e ovareve'i va'e. Eraa, ha'e kuery pe eme'ẽ xegui ha'e ndeguigua.*

18

Marcos 9.33-37; Lucas 9.46-48

¹ Ha'e jave hemimbo'e kuery Jesus re onhemboja vy oporandu:

— Mava'e nda'u yvateve va'e oiko 'rā yva pygua po'akaa py?

² Ha'e ramo Jesus peteĩ kyrī va'e oenoĩ vy omo'ã ha'e kuery mbyte.

³ Ha'e vy aipoe'i:

— Anhetē aipoa'e pêvy: Ndapejeko rerovai, ha'e kyrī va'e rami ndapeikoi ri vy ndapeikei 'rā yva pygua po'akaa py.

⁴ Ha'e nunga rupi kova'e kyrī va'e rami onhemo'yvyi'i va'e anho 'rā yvateve yva pygua po'akaa py.*

⁵ Ha'e xerery rupi peteĩ kyrī va'e kova'e ramigua omovaẽ va'e ma xee avi xemovaẽ.

Marcos 9.42-48; Lucas 17.1,2

⁶ — Ha'e rā kova'e kyrīgue va'e ramigua xere ojeroviaa gui amongue oity 'rāgue py ha'eveve oityxe va'e aju'y re ita guaxu mba'emo mongu'ia ojokua pyre reve ye'ẽ typyvea py oy'upa va'e rire.

⁷ — Nda'evei ete 'rā yvy regua kuery pe heityarā oiko ramo. Mba'eta oiko 'rāe joityarā, teĩ joityare pe ma nda'evei 'rā.

⁸ Ha'e nunga rupi ndepo, e'ŷ vy ndepy ri ndereity ramo ejaya, emombo ndejegui. Mba'eta ndepo e'ŷ vy ndepy jovaive reve tata ogue'ŷ va'e py nemomboa 'rāgue py ha'eveve ndepo, ndepy rovaikue'i reve reikove aguã py reike aguã.

⁹ Ha'e peteĩ nderexa ri ndereity ramo enoẽ, ha'e emombo ndejegui. Mba'eta mokoĩve nderexa reve tata py reiko axy aguã py nemomboa 'rāgue py ha'eveve peteĩ'i nderexa reve reikove aguã py reike aguã.

Lucas 15.3-7

¹⁰ — Ma'ẽ, nda'evei kova'e kyrī va'e rami oiko va'e pe rei “Mba'e vare'ŷ” peje aguã. Mba'eta aipoa'e pêvy: Ha'e kuery rarõa anjo kuery ikuai riae Xeru yva pygua renonde.

¹¹ [Mba'eta Ava ra'y ojeapo va'ekue ou okanhygue ogueraa jepe aguã.]

¹² — Mba'exa tu peẽ peikuaa? Xapy'a rei peteĩ ava oguerek 'rā cem vexa'i. Ha'e gui ha'e va'e regua peteĩ okanhy ramo noventa e nove ikuai va'e oejapa 'rā yvyty áry, okanhy va'ekue oeka vy oo aguã.

* 17:27 Romanos 13.5-7; 1 Coríntios 10.32-11.1 * 18:4 Filipenses 2.3-7; 1 Pedro 5.5,6

¹³ Ha'e gui anhetē aipoa'e pēvy: Ojou ma vy noventa e nove okanhy e'ŷ va'e gui oguerovy'ave 'rā.

¹⁴ Ha'e rami ae avi Penderu yva pygua voi ndoipotai neĩ peteĩ kova'e kyrigue va'e regua okanhy.

Irmão otekoavy va'ekue nhamongeta aguã re ijayvua

¹⁵ — Xapy'a rei nde-irmão [ndeiy] otekoavy ramo tereo ha'e ae'ia py ndeayvu ixupe. Ha'e gui ndeayvu re ojapyxaka ramo peteĩ rami ju 'rā peiko nde-irmão reve.*

¹⁶ Ha'e rā ndeayvu re ndojapyxakaxeí ramo peteĩ, mokoĩ ju eraa nderupive, mokoĩ e'ŷ vy mboapy pendu rire ayvu oiko va'e oikuua porā aguã.*

¹⁷ Ha'e gui xapy'a rei noendu potai ae ramo remombe'u 'rā igreja kuery pe. Ha'e rā igreja kuery ayvu re voi ndojapyxakai ramo amboae regua rami 'rā perekó, imposto re nhombopaga va'ety rami.

¹⁸ Anhetē aipoa'e pēvy: Yvy re pejokua va'e rei yva re voi oiko 'rā ojokua pyre. Ha'e rā yvy re pejora va'e rei ma yva re voi oiko 'rā ojora pyre.

¹⁹ Anhetē aipoa'e avi pēvy: Peẽ kuery va'e regua mokoĩ teĩ mba'emo re pejerure vy joo rami peikuaa ramo Xeru yva pygua ojapo 'rā pēvy.

²⁰ Mba'eta mokoĩ e'ŷ vy mboapy teĩ xerery rupi pendeatya py xee voi aĩ 'rā peẽ kuery mbyte.

Lucas 17,3,4

²¹ Jesus oia py Pedro ou vy oporandu:

— Senhor, xevy pe xe-irmão otekoavy ramo mbovykue peve 'rā tu aperdoa? Sete-kue peve ri nda'u?

²² Ombovai:

— Sete-kue peve'i nda'ei, ha'e rā setenta vezes sete-kue peve 'rā peperdoa.*

Nhomboreveare nhomboaxy e'ŷ va'e re ijayvua

²³ — Ha'e nunga rupi yva pygua po'akaa py oiko 'rā peteĩ huvixave guembiguai kuery orevea ombopaga uka va'e rami.

²⁴ Jypy'i ha'e oĩa py peteĩ oguerua dez mil poyikue prata guigua oreve va'e.

²⁵ Ha'e va'e ma opaga aguã ndoguerekoi ramo ipatõ aipoe'i ovendea aguã escravo-rā, ta'yxy, ta'y kuery ha'e oguereko va'e ha'e javi guive, orevea omboekoviapa aguã.

²⁶ Ha'e ramo hembiguai guenapy'ã re oĩ reve ojerure: “Xerarõve'i ranhe, apagapa 'rā”, he'i.

²⁷ Ha'e ramo ipatõ omboaxy vy omondouka rive, oreveague omboguepa.

²⁸ — Ha'e gui ha'e va'e tembiguai oo vy peteĩ oirũ ojou cem ára repy ete'i ixupe oreve va'e. Ha'e vy oguero'a vy ojyryvipy. Ha'e vy aipoe'i: “Epagapa ke rerevea.”

²⁹ Ha'e ramo irũ ipy yvy'iry oĩ vy aipoe'i ixupe: “Xerarõve'i ranhe, apagapa 'rā”, he'i.

³⁰ Ha'e rami teĩ noendu potai. Ha'e rami 'rāgue py oo vy omboty uka nhuã py orevea opagapa peve.

³¹ — Ha'e rami joguereko axy rā irũ kuery oexa vy iporiaupa okuapy. Opatõa py jogueraa vy omombe'u oiko va'ekue ha'e javi.

³² Ha'e ramo ipatõ guembiguai oenoĩ uka ju vy aipoe'i ixupe: “Tembiguai heko vai va'e, ndee rejerurea rami xee amboguepa rereveague ha'e javi.

³³ Ha'vy ndee nda'evei ri ty'y xee romboaxyague rami neirũ remboaxy aguã?” he'i.

³⁴ Ha'e vy ipoxy vy omboaxa hereko axyarã kuery pe, orevea opagapa peve.

³⁵ Ha'e rami ae avi Xeru yva pygua penderereko 'rā, pendepy'a py peteĩ-teĩ pende-irmão peperdoa e'ŷ ramo.*

* 18:15 Gálatas 6,1,2; 2 Tessalonicenses 3,14,15; Tiago 5,19,20
4,32; Colossenses 3,13 * 18:35 Mateus 6,14,15

* 18:16 Deuteronômio 10,15

* 18:22 Efésios

¹ Ha'e rami Jesus ijayvupa ma vy ojepe'a Galiléia gui, Judéia katy'i oo Jordão yakã rovaigua re.

² Heta ete oje'oi hakykue. Ha'e ramo omonguerapa ha'e py.

Marcos 10.2-12; Lucas 16.18

³ Jesus oña py ou amongue fariseu kuery. Oeko a'ā vy oporandu okuapy:

— Ha'eve nda'u mba'emokue py rive ime kuery opoi aguã gua'yxy gui?

⁴ Ha'e ramo ombovai:

— Ndaperoayvui teve Penemoingoare jypy'i guive ava ha'e kunha ojapoague?*

⁵ Ha'e vy aipoe'i: “Ha'e nunga rupi ava oeja 'rã nguu ha'e oxy, onhemoirũ 'rã gua'yxy re, mokoï 'rãgue py pete'i to'o ikuai aguã” he'iague?*

⁶ Ha'e rami vy mokoï ve'ŷ ma ikuai, pete'i to'o ma. Ha'e nunga rupi Nhanderuete omoirũ rire avave rei tomboja'o eme — he'i.*

⁷ Ha'e gui oporanduve ju ixupe:

— Mba'e re ha'vy Moisés ome'ẽ uka raka'e kuaxia para omendaague mbovaipaarã, omenda va'e opoi aguã?

⁸ Jesus ombovai:

— Peneakã ratã ramo Moisés penemomboi uka raka'e pendera'yxy gui. Ha'e rami tei jypy'i guive e'ŷ oeja ha'e ramigua.

⁹ Ha'e rã xee ma aipoa'e pêvy: Itavy reiague re'ŷ ri gua'yxy gui ava opoi vy amboae re omenda va'e ma itavy, [ha'e opoi pyre re omenda va'e voi itavy avi] — he'i.

¹⁰ Ha'e gui ma hemimbo'e kuery ju aipoe'i ixupe:

— Ha'e rami ri avakue gua'yxy kuery reve joguereko ramo ha'eve omenda e'ŷ re ae ikuai aguã.

¹¹ Jesus ombovai:

— Ha'e ramigua ayvu ma pavẽ pegua e'ŷ, amongue pe ete'i, ha'e rami aguã ome'ea va'e pe anho.

¹² Mba'eta ikuai itui'i guive omenda e'ŷ va'erãe. Ikuai avi ha'e rami aguã rami avakue ojapo va'ekue. Ha'e amboae ju ikuai avi yva pygua po'akaa rupi vy omenda e'ŷ va'e. Ha'e va'e ayyu rami oiko aguã ha'eve va'e toiko ha'e rami.

Marcos 10.13-16; Lucas 18.15-17

¹³ Ha'e gui Jesus oña py oguerua kyrigue, ha'e kuery re opo omoi reve onhembo'e aguã. Ha'e ramo herua kuery pe hemimbo'e kuery ijayvu ete.

¹⁴ Ha'e rami rã Jesus aipoe'i:

— Tove tou kyrigue'i xea py, pejoko eme, mba'eta kova'e ramigua'i peguarã ae yva pygua po'akaa — he'i.

¹⁵ Ha'e vy kyrigue re opo omoi ma rire ojepe'a ha'e gui.

Marcos 10.17-22; Lucas 18.18-23

¹⁶ Ha'e jave Jesus oña py pete'i ou vy oporandu:

— Porombo'ea, mba'e nda'u ajapo 'rã iporã va'e, tekove marã e'ŷ aupity aguã?

¹⁷ Jesus ombovai:

— Mba'e re tu iporã va'e rejapoa re reporandu ri? Heko porã va'e ma pete'i anho oiko. Ha'e gui tekove reupityxe vy ejapo ha'vy ojapo uka pyre — he'i.

¹⁸ Ha'e ramo oporanduve ju ixupe:

— Marã ramigua ojapo uka pyre ha'vy?

Jesus ombovai:

— Ejojuka eme, ndetavy eme, nemonda eme, ndeapu eme,

¹⁹ emboete nderu ha'e ndexy, ha'e gui eayvu neirũ ndee ae rejeayvua rami — he'i.*

²⁰ Kunumi va'e aipoe'i:

— Ha'e nunga ha'e javi ajapopa ae ma. Mba'e tu xevy oata teri?

²¹ Jesus ombovai:

* 19:4 Gênesis 1.27, 5.2 * 19:5 Gênesis 2.24 * 19:6 Mateus 5.31,32; 1 Coríntios 7.10-16 * 19:19 Levítico 19.18

— Opa mba'e py nderekoko poräxe vy tereo, evenedepa rerekoko va'e ha'e javi, ha'e gui hepykue ma eme'ëmba iporiaukue'i pe. Ha'e rami vy 'rã rerekoko ovareve va'e yva re. Ha'e gui mae ma eju xerupive — he'i.*

²² Ha'e rami ijayvu rã kunumi va'e oendu vy iporiau reve ojepe'a, oguerekopa va'e vy.

Marcos 10.23-31; Lucas 18.24-30

²³ Ha'e ramo Jesus aipoe'i guemimbo'e kuery pe:

— Anhetë aipoa'e pëvy: Haxy ete oguerekopa va'e kuery yva pygua po'akaa py oike aguã.*

²⁴ Aipoa'e avi pëvy: Nhanderuete po'akaa py oguerekopa va'e oikea gui ndaxyive juu nambi kua rupi mymba cameloo oaxa aguã — he'i.

²⁵ Hemimbo'e kuery ha'e nunga oendu vy onhemondyipa. Ha'e vy aipoe'i okuapy:

— Ha'e rami vy mba'e xagua 'rã tu oo jepe?

²⁶ Ha'e kuery re Jesus oma'ë vy ombovai:

— Ha'e nunga ma avakue pe haxy ete, ha'e rã Nhanderuete pe ma mba'eve ndaxyi — he'i.

²⁷ Ha'e ramo Pedro aipoe'i ixupe:

— Ore kuery ma opa mba'e roejapa va'ekue nderupive orekuai aguã. Mba'e 'rã tu ha'vy ore rojopy?

²⁸ Jesus ombovai:

— Anhetë aipoa'e pëvy: Peẽ kuery xerupive peo va'e, opa mba'e ipyaupaa ára py Ava ra'y ojeapo va'ekue tenda openaaty hexakãmba va'e áry oguapy ramo peẽ voi peguapy 'rã doze tenda áry, Israel kuery doze regua ikuai va'e re pepena vy.

²⁹ Ha'e gui ha'e javi xerery káuxa ngoo oeja va'e, guyvy, gueindy, nguu, oxy, [gua'yxy,] gua'y e'ý vy oyvy, ha'e kuery ma ojou retave 'rã, ha'e gui tekove marã e'ý avi 'rã oupity.

³⁰ Ha'e rami teñ tenonde pyguare ma heta 'rã optyta takykue py, ha'e rã takykue pyguare ma tenonde py 'rã ikuai.

20

Uvaty py omba'eapo va'e kuery omombe'uague

¹ — Mba'eta yva pygua po'akaa py oiko 'rã peteñ hoo va'e oikoa rami. Ha'e va'e ma ko'ë rai ramove oo omba'e uvaty rupi omba'eapo va'erã reka vy.

² Ha'e gui omba'eapo va'erã kuery reve jogueroayvu peteñ-teñ pe peteñ ára repy ome'ë aguã re. Ha'e rami vy omontouka uvaty katy.

³ Kuaray mbyte e'ý mbove oo vy tetã mbyte py ojou ikuai rive va'e.

⁴ Ha'e vy aipoe'i: “Tapeo peẽ voi uvaty py. Ha'e rã xee ma ha'evea rami 'rã apaga”, he'i. Ha'e ramo ha'e kuery avi oo.

⁵ — Kuaray mbyte jave teñgue ju oo, ha'e gui kuaray ojero'a jave guive oo vy ha'ekue rami ae ju jogueroayvu.

⁶ Ha'e gui ka'aru rai'i jave ju oo vy amboae kuery ojou ikuai rive va'e. Ha'e vy oporandu ha'e kuery pe: “Mba'e re tu ára pukukue re peñ rive apy?”

⁷ Ombovai: “Mba'eta avave rei noremomba'eapoai”, he'i okuapy. Ha'e ramo aipoe'i: “Peẽ voi ke tapeo ha'vy uvaty py.”

⁸ — Ha'e gui ka'aru jave uvaty ja aipoe'i kapata pe: “Enoñmba omba'eapo va'e kuery, ha'e epaga. Takykue py oo va'ekue gui remboypy 'rã oo ypy va'ekue peve”, he'i.

⁹ Ha'e ramo ka'aru rai'i jave omba'eapo va'ekue ou ramo peteñ-teñ pe ome'ë peteñ ára repy.

¹⁰ Ha'e gui tenonde py oo va'ekue ju ovañ vy oexa'ã ojopy retave aguã re. Ha'e rami teñ ha'e kuery pe voi peteñ ára repy ae ome'ë.

¹¹ Ha'e va'e ojopy rire ija re ijayvu rei okuapy.

* 19:21 Romanos 3.19,20; Tiago 2.10 * 19:23 1 Timóteo 6.6-10

¹² Ha'e vy aipoe'i: "Peva'e kuery takykue py ou va'ekue tu pete'i hora ete'i omba'epo va'eri ore rami ae repaga, ore ára pukukue re kuarayaku roqueropo'aka va'ekue ri", he'i okuapay.

¹³ — Ha'e ramo ha'e kuery va'e regua pe ija ombovai vy aipoe'i: "Xeirū, xee ma ha'eve e'ŷa rami ndoroguerokoi. Ndereve ndorojogueroayvui ri ty ra'e pete'i ára repy re?

¹⁴ Ejopy ha'vy ndeperáta, tereo, mba'eta takykue py ou va'ekue pe avi ame'ẽxe pêvy ame'ẽa rami.

¹⁵ Nda'evei ri nda'u xee aipotaa rami mba'emo areko va'e aiporu aguã? Tyrã pa rejou vai teve xeporayvua?" he'i.*

¹⁶ Ha'e rami vy takykue pyguare ma opyta 'rã tenonde py. Ha'e rã tenonde pyguare ma takykue py 'rã opyta. [Mba'eta heta 'rã oenoña, ha'e rã mbovyl'i 'rã oiporavoa.]

Marcos 10.32-34; Lucas 18.31-33

¹⁷ Jerusalém tetã katy Jesus oo vy doze guemimbo'e kuery oenoñha'e kuery ae'i. Tape rupi oje'oria rupi aipoe'i ha'e kuery pe:

¹⁸ — Pendu ke. Aŷ ma jaje'oi nhainy Jerusalém katy. Ha'e py ma Ava ra'y ojeapo va'ekue omboaxaa 'rã sacerdote yvatekueve va'e ha'e kuaxia re nhombo'e va'ety kuery pe. Ha'e rã ha'e kuery ma ojuka uka 'rã.

¹⁹ Ha'e gui amboae regua kuery pe ju 'rã omboaxa ojavyky rei, oinupã ha'e kuruxu re omoñaguã. Ha'e gui ma mboapy araa py onhemboete ju 'rã.

Marcos 10.35-45

²⁰ Ha'e gui Jesus oña py Zebedeu ra'yxy ou opi'a kuery reve. Omboete vy ojerure oipytyvõ aguã re.

²¹ Ha'e ramo Jesus oporandu ixupe:

— Mba'e tu reipota?

Kunha va'e ombovai:

— Ndepo'akaa py ma kova'e mokoñ xepi'a toguapy pete'i reiporu kuaa regua re, ha'e amboae ma ndeaxua re — he'i.

²² Ha'e ramo Jesus ombovai:

— Peẽ ndapeikuuai mba'e nunga re pa pejerurea. Ha'eve 'rã ri ty'y karo xee ay'u aguã va'e gui peẽ voi pey'u aguã?

Ombovai:

— Ha'eve 'rã — he'i okuapy.

²³ Ha'e ramo aipoe'i ha'e kuery pe:

— Pey'u 'rãe xekaro gui. Ha'e rã aiporu kuaa regua re ha'e xeaxua re oguapy va'erã ma xee e'ŷ 'rã aiporavo. Ha'e rami aguã ma Xeru oiporavo va'ekue pe anho — he'i.

²⁴ Ha'e rã hemimbo'e kuery mboae dez ikuai va'e ma ha'e nunga oendu vy ivai okuapy mokoñ joegua pe.

²⁵ Ha'e ramo Jesus oenoñmba vy aipoe'i:

— Yvy jave regua huvixa kuery ma joguerekoo atã 'rã, ha'e kuery va'e regua yvatekueve ipo'aka 'rãe joe.

²⁶ Ha'e rã pende kuery ma ha'e rami e'ŷ 'rã pendekuai. Ha'e rami 'rãgue py peẽ kuery va'e regua joegui yvatevexe va'e toiko pavẽ rembiguai rami.*

²⁷ Tenondexe va'e ma nhoembiguai rami toiko,

²⁸ Ava ra'y ojeapo va'ekue rami avi, mba'eta ha'e ma jojokuai aguã e'ŷ ou, ha'e rã tembiguai rami ou guekove ome'ẽ aguã heta rekovia, ogueraa jepe aguã.

Marcos 10.46-52; Lucas 18.35-43

²⁹ Ha'e kuery Jericó tetã gui oo jave heta ete oje'oi hupive.

³⁰ Ha'e jave tape yvýry mokoñ ára revegua e'ŷ oguapy oiny va'e ma Jesus oaxa ovya oendu vy ojapukai:

— Senhor, Davi ramymino, oremboaxy ke! — he'i.

³¹ Ha'e ramo heta va'e kuery ijayvu okyrirí aguã. Ha'e rami teĩ ha'e kuery ojapukaive tema:

* 20:15 Romanos 9.14-16 * 20:26 Romanos 12.3,10,16; Filipenses 2.3-8; 1 Pedro 5.3

- Senhor, Davi ramymino, oremboaxy ke!
- ³² Ha'e ramo Jesus opyta ho'amy vy oenoī. Oporandu ha'e kuery pe:
- Mba'e tu peipota ajapo pēvy?
- ³³ Ombovai:
- Senhor, ore ma roexaxe — he'i.
- ³⁴ Ha'e ramo Jesus omboaxy vy opoko ha'e kuery rexa re. Ha'e ramove oexa ju, ha'e vy oje'oi hakykue.

21

Marcos 11.1-11; Lucas 19.28-40; João 12.12-15

- ¹ Ha'e gui ma Jerusalém py Jesus ovaē rai'i ma vy Betfagé tekoá py ranhe ovaē, Oliveiras vyty katy'i. Ha'e gui omondouka mokoī guemimbo'e. Ha'e vy aipoe'i:
- ² — Tapeo peē ranhe peva'e tekoá oī va'e py. Ha'e py pejou 'rā peteī mburika ixā re hi'aī va'e. Ha'e va'e reve peteī ta'y'i avi hi'aī. Pejora vy ke peru.
- ³ Ha'e gui xapy'a rei amongue pendevy ijayvu ramo ha'e kuery pe “Senhor ma oipota” peje 'rā. Ha'e ramo ogueru ruka 'rā pēvy — he'i.
- ⁴ Ha'e nunga oiko ojeupity aguā profeta pe aipoe'i ukaague:
- ⁵ “Aipo'ere Sião pygua kuery pe: ‘Pee ma ou oiny penderuvixaverā. Ha'e ma onhemboy-vate va'e'ý vy mburika áry ou, mburika'i ombovoyipy ra'y áry’, ‘re.’”*
- ⁶ Ha'e ramo hemimbo'e kuery oo vy Jesus aipoe'iague rami ojapo.
- ⁷ Ha'e vy ogueru mburika ta'y'i reve. Hi'áry omoī oao. Ha'e ramo Jesus oī hi'áry.
- ⁸ Ha'e gui heta va'e kuery tape rupi oipyo okuapy oao, ha'e amboae kuery ma yvyra rogue oyaya vy onhono avi tape rupi.
- ⁹ Ha'e gui heta va'e kuery tenonde ha'e hakykue oje'oi va'e ojapukai vy aipoe'i:
- Toguerovy'aa Davi ramymino! Ta'ima'endu'a porāa Senhor rery rupi ou va'e re!
- Toguerovy'aa yvatevea py! — he'i oje'oivy.*

¹⁰ Jerusalém tetā py ovaē ma ramo tetā pygua kuery mava'e paa ndoikuai vy oporandu okuapy:

— Mava'e tu peva'e?

¹¹ Ha'e ramo heta va'e kuery ojapukai:

— Peva'e ma profeta Jesus, Galiléia regua Nazaré pygua.

Marcos 11.15-17; Lucas 19.45,46

¹² Templo py Jesus oike vy oipe'apa mba'emo vendea ha'e mba'emo joguaa kuery ha'e py ikuai va'ekue. Oitypa guive peráta mboekoviaa kuery mesa, ha'e apykaxu vendea kuery renda.

¹³ Ha'e vy aipoe'i ha'e kuery pe:

— Ipara oiny “Xero ma onhembo'e atyrā oī” 'ea va'eri peē ma pejapo imonda va'e onhemiaty rami.*

Templo py nhombo'eague

¹⁴ Templo py Jesus oīa py ou ára revegua e'ý ha'e oguata e'ý va'e kuery. Ha'e ramo omonguerapa.

¹⁵ Ha'e rā sacerdote yvatekueve va'e ha'e kuaxia re nhombo'e va'ety kuery ma Jesus mba'emo porā ojapo rā oexa vy ndojou porāi okuapy, ha'e kyrīgue “Toguerovy'aa Davi ramymino” he'i okuapy rā oendu vy guive.* Ha'e rami vy oporandu okuapy ixupe:

¹⁶ — Rendu ma'ã peva'e kuery aipoe'ia?

Jesus ombovai:

— Xee aendu ma. Ha'vy peē ndaperoayvui ri ty'y po ramigua: “Kyrīgue'i ha'e okambu'i va'e pe ma mboraei iporā ete va'e py rejererovy'a uka”, he'iague?*

¹⁷ Ha'e rami vy tetā gui ojepe'a vy Betânia katy ju. Ha'e py ma oke.

Marcos 11.12-14,20-24

* 21:5 Zacarias 9.9 * 21:9 Salmo 118.26 * 21:13 Isaías 56.7, Jeremias 7.11 * 21:15 Marcos 11.18,19; Lucas 19.47,48 * 21:16 Salmo 8.2

¹⁸ Ko'ẽ aje'ive'i reve tetã katy ojevya rupi inhembyayi.
¹⁹ Tape yvýry peteĩ figo'y hi'aĩ va'e oexa vy ovaẽ ha'e py, teĩ mba'eve ndojoui hogue e'ŷ vy. Ha'e rami vy ha'e va'e pe aipoe'i: "Toikove eme nde'a", he'i ramove figo'y ipirupa vyvoi.

²⁰ Hemimbo'e kuery ha'e nunga oexa vy onhemondyipa. Ha'e vy aipoe'i:
— Ipiru vyvoi nda figo'y.
²¹ Ha'e gui Jesus aipoe'i ha'e kuery pe:
— Anhetẽ aipoa'e pêvy: Pexa'ã rei 'rãgue py pejerovia ete ramo figo'y re oiko va'ekue ramigua anho e'ŷ 'rã oiko. Kova'e vytyt pe "Ejepe'a, enhemombo ye'ẽ py", peje ramo voi oiko 'rã.
²² Pejeroviaa rupi ri penhembo'e vy pejopy 'rã pejerurea.

Marcos 11.27-33; Lucas 20.1-8
²³ Templo py Jesus ovaẽ vy nhombo'e oiny. Ha'e ramo sacerdote yvatekueve va'e ha'e heta va'e mongetaaty kuery ombojere rei vy oporandu okuapy:

— Mava'e po'akaa rupi tu ha'e nunga rejapo reikovy? Mava'e tu nembopo'aka?
²⁴ Jesus ombovai:

— Xee voi aporandu ta pêvy. Xevy pe pembovai ramo xee voi amombe'u 'rã mava'e po'akaa rupi pa ha'e nunga ajapoa.

²⁵ Maguigua nda'u João Batista nhomongaraia? Yva guigua tyrã pa avakue guigua raka'e?
— he'i.
Ha'e ramo ha'e kuery joo meme ranhe ijayvu okuapy:

— Xapy'a rei "Yva gui", ja'e ramo ha'e ombovai ju 'rã: "Mba'e re ha'vy ndapejeroviai hexe?" he'i 'rã nhandevy.

²⁶ Ha'e rã "Ava gui", ja'e aguã nda'evei avi, heta va'e kuery gui jakyje vy, mba'eta oikuaa pavê João Batista profeta oikoa — he'i okuapy.

²⁷ Ha'e rami vy aipoe'i Jesus pe:
— Ore ma ndoroikuuai.
Ha'e rã ha'e ju ombovai:
— Xee voi namombe'ui 'rã pêvy mava'e po'akaa rupi pa ha'e nunga ajapo aikovya.

Mokoĩ ta'y re ombojojaague
²⁸ — Mba'exa tu peikuua? Oiko peteĩ ava mokoĩ ta'y va'e. Tyke'y oĩa py oo vy aipoe'i:
"Xera'y, tereo aŷ, emba'eapo xemba'e uvaty py."

²⁹ Ha'e ramo "Ha'eve senhor", he'i va'eri ndooi.
³⁰ — Ha'e gui tyvy oĩa py ju tuu oo vy ha'ekue rami ae ijayvu. Ha'e rã ha'e va'e ma aipoe'i: "Xee ndaa reguai" he'i rire nda'evei nho vy oo.

³¹ Mava'e ete nda'u mokoĩ va'e gui ojapo nguu oipotaa rami?
Ombovai:
— Tyvy rima — he'i okuapy.

Jesus omombe'u porâve ha'e kuery pe:
— Anhetẽ aipoa'e pêvy: Peẽ kuery gui imposto re nhombopaga va'ety kuery ha'e kunhague itavy rei va'ekue ranhe 'rã oike Nhanderuete po'akaa py.

³² Mba'eta João Batista ou vy peẽ kuery pe oikuaa uka raka'e tape porã, teĩ peẽ ma ijayvua ndapejeroviai. Ha'e rã imposto re nhombopaga va'ety kuery ha'e kunhague itavy rei va'e ma oguerovia. Peẽ ma ha'e nunga pexa va'eri ndapejeko rerovai ijayvua, neĩ ndaperoviai.*

Marcos 12.1-12; Lucas 20.9-19
³³ — Pejapyxaka ke mba'emo re ambojoja vy ayvu mboae amombe'u rã. Oiko peteĩ ava hoo va'e. Ha'e va'e onhotŷ uva, ha'e rire ijyvýry rupi ojapo kora. Ojapo uva oumbiri atyrã ha'e torre. Ha'e rami vy omboaxa opena va'erã kuery po py. Ha'e rire oo guekoagui.

³⁴ — Hi'a omono'õa ára ovaẽ ramo opena va'e kuerya py ija ombou guembiguai kuery, ojopy aguã uva'a ixupeguia.

* 21:32 Mateus 7.21

- ³⁵ Ha'e ramo opena va'e kuery hembiguai kuery ojopy vy amongue oinupāmba, amboae ojuka, ha'e rā amboae ma ojapipa ita py.
- ³⁶ Ha'e gui ma ija hetave ju ombou guembiguai. Ha'e rā ha'ekue rami ae ju oguerek.
- ³⁷ Opa vygua ombou gua'y ae. Ha'e vy aipoe'i: "Xera'y ete ramo omboete 'rā ko", he'i.
- ³⁸ — Ha'e rami teī ombo'eapo va'e kuery ta'y oexa vy aipoe'i joupe-upe: "Peva'e ma uvaty jarā ete. Jajuka teve, uvaty nhandevy ju optyta aguā", he'i okuapy.
- ³⁹ Ha'e gui ojopy vy uvaty gui ogueraa vy ojuka.
- ⁴⁰ — Ha'e gui uvaty ja ou vy mba'e nda'u ojapo 'rā opena va'e kuery re?
- ⁴¹ Ha'e ramo ombovai okuapy:
— Ojuka ukapa 'rā heko vai va'e kuery, ha'e vy amboae kuery pe ju 'rā omboaxa uvaty, hi'a ára py ixupeguia ome'ē va'erā pe — he'i okuapy.
- ⁴² Ha'e ramo Jesus oporandu ha'e kuery pe:
— Ha'vy peē ndaperoayvui teve ipara oī va'e: "Oo apoa kuery ita ndoipotai va'ekue optyta omboeteve pyrā, tenonde pyguitarā. Ha'e nunga ma Senhor gui ae oiko, ha'e jaexa rā iporā ete va'e", he'iague?*
- ⁴³ Ha'e nunga rupi aipoa'e pēvy: Pendegui Nhanderuete oipe'a 'rā opo'akaa, amboae regua pe ju 'rā omboaxa, ixupeguia ome'ē va'erā kuery pe.
- ⁴⁴ Ha'e va'e ita re ho'a va'e opēmba 'rā. Ha'e rā amongue áry ita ho'a ramo iku'ipa 'rā — he'i.
- ⁴⁵ Pova'e ayvu omombe'u rā sacerdote yvatekueve va'e ha'e fariseu kuery oendu vy oikuua ha'e kuery re ae ri Jesus ijayvua.
- ⁴⁶ Ha'e vy ojopyxe teī okyje heta va'e kuery gui, profeta oikoa rami oikuua pavē ramo.

22

Omendaa py okaru okuapy va'e re ombojojaague

- ¹ Teīgue ju Jesus mba'emo re ombojoja vy ijayvu. Ha'e vy aipoe'i ha'e kuery pe:
- ² — Yva pygua po'akaa py oiko 'rā peteī huvixave ta'y omendaa py ngaru ojapo va'e rami avi.*
- ³ Ha'e gui guembiguai kuery omondouka omombe'u aguā omendaa py ou va'erā va'e pe ou aguā, teī ha'e kuery ndouxei.
- ⁴ Amboae guembiguai ju omondouka po rami ijayvu reve: "Aipo're ke aenoī va'e kuery pe: 'Areko katupa ma ngaru. Xerymba vaka ha'e vaka ra'y ikyra va'e ajuka, ha'e javi oīmba ma. Peju ke ngaru oīa py', 're 'rā."
- ⁵ — Ha'e rami teī ha'e kuery ndoikuua potai vy oje'oipa. Peteī oo omba'ety katy, ha'e rā amboae ma vendeaty katy oo.
- ⁶ Amboae kuery ma tembiguai kuery ojopy vy ojavyky rei, ojuka guive.
- ⁷ Ha'e ramo huvixave ipoxy. Ha'e vy xondaro kuery ju omondouka vy ojuka ukapa jojukaare kuery, ha'e omoendy uka ha'e kuery retā.
- ⁸ — Ha'e rire guembiguai kuery pe ju aipoe'i: "Areko katupa ma ngaru teī aenoī uka va'ekue ma nda'evei amovaē aguā.
- ⁹ Ha'e rami ri rā tapeo tape pia ikuai va'e rupi, peovaexī va'e rei penoī omendaa py ou aguā", he'i imondovy.
- ¹⁰ Ha'e ramo tembiguai kuery tape rupi oje'oi vy omboaty ojou va'e ha'e javi, heko porā ha'e heko vai va'e guive. Ha'e rā opy okaru aguā py tynyē oenoī va'ekue.
- ¹¹ — Ha'e gui huvixave oike vy mesa py ikuai va'e oexapa. Oexa avi peteī ava omendaa pygua ao py e'ŷ onhemonde va'e.*
- ¹² Ha'e vy oporandu ixupe: "Xeirū, mba'exa tu apy reike omendaa pygua ao remoī e'ŷ re?" he'i ramo ha'e va'e nombovai.
- ¹³ — Ha'e ramo huvixave aipoe'i guembiguai kuery pe: "Pejokua ipo ha'e ipy, ha'e pemombo oka katy pytūa py", he'i. Ha'e py ma ojae'opaa ha'e opa marā onhendua 'rā.

* 21:42 Salmo 118.22-23 * 22:2 Lucas 14.15-24 * 22:11 1 Coríntios 6.9-11; Efésios 5.5,6; Apocalipse 19.7,8

14 Mba'eta heta 'rã oenoña, ha'e rã mbovy'i 'rã oiporavoa.

Marcos 12.13-17; Lucas 20.20-26

15 Ha'e ramo fariseu kuery ojepe'a vy joo meme oikuua pota okuapy marã rami vy pa omoñ vai aguã re ayvu py.

16 Ha'e rami vy guemimbo'e kuery ombou Herodes-a katygua kuery reve, Jesus pe aipoe'i aguã:

— Porombo'ea, ore roikuua ndee anhetẽ va'ea, ha'e anhetẽ rupi renhombo'e Nhan-deruete oipota va'e re. Neñ joegui peteñve ndereayvuvei, mba'eta nderekuaa potai avakue yvatea re.

17 Ha'e gui aipo'ere ke orevy: Mba'exa tu ndee reikuua? Ha'evea rami ri nda'u César pe nhame'e imposta repy, tyrã pa any?

18 Jesus ha'e kuery ija'e e'ÿa oikuua vy aipoe'i:

— Pendeko porã merami rive va'e, mba'e re tu xerek a'axe ri?

19 Pexa uka ha'vy xevy peteñhata'i va'e imposta peguarã — he'i. Ha'e ramo ixupe ogueru peteñ hatã'i va'e.

20 Ha'e rã oporandu ha'e kuery pe:

— Kova'e re ma mava'e ra'angaa ha'e mava'e rery tu oí?

21 Ombovai okuapy:

— César mba'e rima.

Ha'e ramo aipoe'i ha'e kuery pe:

— César mba'e ri rã peme'ë ha'vy César pe. Ha'e rã Nhanderuete pegua ma Nhanderuete pe ae 'rã peme'ë — he'i.*

22 Ha'e nunga ha'e kuery oendu vy onhemondyipa reve oejapa oje'oivy.

Marcos 12.18-27; Lucas 20.27-40

23 Ha'e va'e árave oia py ou saduceu kuery va'e regua. Ha'e va'e kuery ma ndogueroviai nhanhemboete ju 'rãa. Ha'e gui oporandu okuapy ixupe:

24 — Porombo'ea, Moisés aipoe'i: “Amongue ta'y e'ÿ re omano ramo tyvy ju omenda 'rã imeve'ÿ va'e re, omano va'e ra'yrã va'ekue oguereko aguã”, he'i raka'e.*

25 Ha'e gui ikuai raka'e sete joegua. Tujave va'e ma omenda va'ekue ri ta'y e'ÿ re omano vy gua'xykue oeja guyvy pe.

26 Ha'ekue rami ae ju oiko tyvy re, mboapya, ha'e gui sete ikuai va'e ha'e javive re.

27 Ha'e kuery ha'e javi omanomba rire kunha va'e avi omano.

28 Ha'e gui onhemboete jeyva ára nda'u sete joegua ikuai va'e gui mava'e etel'i 'rã oiko kunha va'e me? Mba'eta kunha va'e re sete-ve omenda rire.

29 Jesus aipoe'i ha'e kuery pe:

— Pejavy, mba'eta ndapeikuaai ipara re oia, neñ Nhanderuete po'akaa.

30 Mba'eta onhemboetepa ju va'ekue ma nomendaavei, neñ nanhomomendaavei ma 'rã guive. Ha'e rami 'rãgue py anjo kuery rami 'rã ikuai yva re.

31 Ha'e gui omanoague gui onhemboetepa ju 'rãa re ndaperoayvui teve Nhanderuete pendevy aipoe'iague:*

32 “Xee ma Abraão, Isaque ha'e Jacó Ruete aiko” he'iague? Ha'e ramo ma omanogue Ruete e'ÿ oiko, ha'e rã oikove va'e Ruete — he'i.*

33 Ha'e rami ombo'e rã heta va'e kuery oendu vy onhemondyipa.

Marcos 12.28-34

34 Ha'e gui Jesus saduceu kuery omokyiriríague fariseu kuery oendu vy ha'e kuery ju nhomboaty jogueroayvu aguã.

35 Ha'e gui peteñha'e kuery regua lei re nhombo'e va'ety ou oeko a'ã vy. Ha'e vy oporandu ixupe:

36 — Porombo'ea, mba'e nunga lei re ojapo uka pyre tu pavê gui yvateve va'e?

37 Jesus ombovai:

* 22:21 Romanos 13.7 * 22:24 Deuteronômio 25.5 * 22:31 1 Coríntios 6.14, 15.12-28; 1 Tessalonicenses 4.13-18

* 22:32 Éxodo 3.6

— “Reayvu 'rā Senhor Nderuete ndepy'a ha'e javi py, nderekō ha'e ne'arandua ha'e javi py guive”, he'i va'e.*

³⁸ Ha'e va'e ojapo uka pyre ma iporāve ha'e yvateve va'e oī.

³⁹ Ha'e va'e rire ma po rami ju: “Reayvu 'rā neirū kuery ndee ae rejeayvua rami”, he'i va'e.*

⁴⁰ Pova'e mokoī ojapo uka pyre guigua ma lei ha'e profeta kuery nhombo'eague ha'e javi — he'i.

Marcos 12.35-37; Lucas 20.41-44

⁴¹ Fariseu kuery ijatypa rā Jesus oporandu ha'e kuery pe:

⁴² — Mba'exa tu peikuaa Cristo oikoa? Mava'e ramymino tu oiko?

Ha'e kuery ombovai:

— Davi ramymino rima — he'i okuapy.

⁴³ Jesus aipoe'i:

— Mba'exa tu ha'vy ixupe Davi “Senhor” he'i Nhe'ē gui? Mba'eta aipoe'i:

⁴⁴ “Senhor aipoe'i xe-Senhor pe: ‘Eguapy ke aiporu kuaa regua re, ndepy guýry nderovaigua kuery amoī e'ŷa ja’, he'i raka'e.”

⁴⁵ Ha'e rami vy Davi voi “Senhor” he'i ixupe. Mba'exa tu ha'vy hamymino avi ri oiko? — he'i.*

⁴⁶ Ha'e rā peteīve nombovai kuaai. Ha'e va'e ára guive neī peteīve nda'ipy'a guaxuvei ixupe oporandu aguā mba'emo re.

23

Marcos 12.38-40; Lucas 11.37-52; 20.45-47

¹ Ha'e ramo heta va'e kuery pe ju Jesus aipoe'i, guemimbo'e kuery guive:

² — Kuaxia re nhombo'e va'ety ha'e fariseu kuery oguapy 'rā okuapy Moisés renda py.

³ Ha'e nunga rupi pejapo ha'e pemoī porā 'rā ha'e kuery ojapo uka va'e ha'e javi. Ha'e rami teī peiko eme ha'e kuery ikuiaia rami, mba'eta ha'e kuery nhombo'e teī ndojapoi 'rā oayvua ae.

⁴ Ha'e kuery ma nhombovoyi raxa 'rā [ndogueropo'akai va'erā py], ijaxi'y áry oupi va'e rami. Ha'e rami teī ha'e kuery ma neī okuā py voi nanhopytyvōi 'rā.

⁵ Ha'e kuery ikuiaia ha'e javi ma amboae kuery oexa aguā rive. Ha'e rami vy lei ryru'i ipyve va'e anho ojee ojokua, ha'e oao apy voi ombopotypa 'rā ipukuve va'e py.*

⁶ Okarua py ha'e onhembo'eaty py oguapy 'rā tenda tenondeve oī va'e py anho.

⁷ Tetā mbyte rupi ikuai vy oipota 'rā avakue oxarura vy “Xembo'ea” he'i aguā.

⁸ — Ha'e rā peē ma pendejeupe “Xembo'ea” peje uka aguā nda'evei, mba'eta peteī'i anho oiko penembo'ea, ha'e rā peē ma joegua'i meme pendekuai.

⁹ Ha'e apy yvy re avave rei pe “Oreru” peje eme, mba'eta Penderu peteī'i oiko yva pygua.

¹⁰ Neī joupe “Xererekoa” peje aguā nda'evei, mba'eta peteī'i oiko pendererekoa. Ha'e va'e ma Cristo.

¹¹ Ha'e rā peē kuery regua yvatekueve va'e ma pavē rembiguai rami 'rā pendekuai.

¹² Ha'e javive onhemboyvateve va'ekue ma omo'yvy'iave 'rā. Ha'e rā onhemo'yvy'i va'ekue ma omboyvateave 'rā.

Jesus “Nda'evei ete 'rā”, he'ague

¹³ — Peē kuery kuaxia re nhombo'e va'ety ha'e fariseu kuery pe nda'evei ete 'rā. Heko porā merami rive va'e pendekuai, mba'eta yva pygua po'akaa rokē pemboty amboae kuery oike e'ŷ aguā. Mba'eta peē ndapeikei 'rā, ha'e oikexe va'e pejokopa.

¹⁴ [— Peē kuaxia re nhombo'e va'ety ha'e fariseu kuery pe nda'evei ete 'rā. Heko porā merami rive va'e pendekuai, mba'eta peipe'a rivepa 'rā imeve'ŷ va'e kuery ro gui. Ha'e penhemboeko porā ukaxe vy penhembo'e are 'rā. Ha'e nunga rupi pepaga raxa ete 'rā.]

* 22:37 Deuterônômio 6.5 * 22:39 Salmo 118.26 * 22:45 Romanos 1.3,4 * 23:5 Judeu kuery gueko rami vy ngova ha'e ojyva re ojokua 'rā hyru'i lei regua ayvu oīa.

¹⁵ — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta ye'ẽ ha'e yvy jave rupi peo 'rã petei'i ri jepe pejou aguã penemimbo'erã. Ha'e gui pejou vy tata ogue'ỹ va'e pyguarã pemoingo pendegui heko vaive va'e.

¹⁶ — Peẽ kuery pe nda'evei ete 'rã, joguerekoa ára revegua e'ỹ rami pendekuai ramo. Aipopeje 'rã: "Henda iky'a e'ỹ va'e ropy mba'emo oĩ va'e re jaura teĩ ovare va'e'ỹ. Ha'e rã henda iky'a e'ỹ va'e ropy ouro oĩ va'e re ri jaura rire jajapo 'rãe jauraague", peje.

¹⁷ Hi'arandu e'ỹ ha'e ára revegua e'ỹ pendekuai va'e, mava'e tu joegui omboetevepy: ouro rive, tyrã pa henda iky'a e'ỹ va'e? Mba'eta henda iky'a e'ỹ va'e ma ojapo ouro avi iky'a e'ỹ va'e opyta aguã.

¹⁸ — Peẽ kuery aipopeje avi: "Altar re jaura teĩ ovare va'e'ỹ. Ha'e rã altar áry omoĩ mbyre re ri jaura rire jajapo 'rãe jauraague", peje.

¹⁹ Ára revegua e'ỹ pendekuai va'e, mba'eta tu joegui omboetevepy: mba'emo ome'ẽ mbyre, tyrã pa altar? Mba'eta altar ma ojapo hi'áry oĩ va'e avi iky'a e'ỹ va'e opyta aguã.

²⁰ Mba'eta altar re amongue oura va'e ma ha'e va'e re anho e'ỹ, altar áry oĩ va'e ha'e javi re avi oura.

²¹ Ha'e henda iky'a e'ỹ va'e ropy re amongue oura va'e ma ha'e va'e re oura, ha'e ha'e py oiko va'e re avi.

²² Ha'e yva re amongue oura va'e ma Nhanderuete renda openaaty re oura, guenda py oguapy oiny va'e re avi.

²³ — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta dízimo peme'ẽ hortelã, endro ha'e cominho regua gui, ha'e rã lei regua ojapo uka pyre yvateve va'e rupi ma ndapeikoxei: ha'e va'e ma pendeko porã aguã, penhomboaxy ha'e pejerovia aguã. Ha'e va'e rupi voi pendekuai 'rãgue, amboae nunga pejapoa rami avi.

²⁴ Ára revegua e'ỹ joguerekoa pendekuai va'e, karo gui nhexĩ pemoẽ va'eri pemokõ camelio oĩ va'e.

²⁵ — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta hi'árykue rupi rive pejoi karo ha'e hy'a. Ha'e rã pendepy'apy py ma oĩ pejokorea ha'e pejejoko e'ŷa anho.^f

²⁶ Fariseu kuery ára revegua e'ỹ, karo ryepy rupi oĩ va'e ranhe peiky'a'o. Ha'e ramo ma hi'árykue rupi avi 'rã nda'iky'ai.

²⁷ — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta omano va'ekue ryru omoxiimba pyre rami pendekuai. Ha'e nunga ma hi'árykue rupi iporã rei, ha'e rã ipy rupi ma omano va'ekue kãgue ha'e opa marãgua ky'akue oĩ.

²⁸ Ha'e rami ae avi peẽ kuery voi avakue penderexa rã heko porã va'e merami peiko, ha'e rã pendepy'a re ma pendeko porã merami rivea ha'e pendeko vaia anho oĩ.

²⁹ — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta profeta kuery rupa áry guarã pejapo oo ra'angaa'i, ha'e pemoatyrõmba 'rã guive heko porã va'e onhono porãague.

³⁰ Ha'e vy aipopeje: "Nhaneramoĩ kuery ikuai jave ma voi jaiko va'e rire ha'e kuery rami profeta jukaa rupi nhande ndajaikoi 'rãgue", peje.

³¹ Ha'e rami vy pendejee ae pendeayvu profeta jukaare ramymino kuery peikoa rami.

³² Pejapopa ha'vy penamoĩ kuery omboypy va'ekue.

³³ Peẽ mboi joxu'u va'e regua, mba'eta 'rã tu peo jepe tata ogue e'ỹ va'e py pepaga aguã gui?

³⁴ Ha'e nunga rupi peẽ kuery pe xee ambou 'rã profeta ha'e hi'arandu va'e kuery penembo'earã. Ha'e va'e kuery regua amongue pejuka 'rã kuruxu re pemoĩ vy. Ha'e rã amboae kuery ma peinupã 'rã penhembo'eaty py, ha'e tetã nhavõ gui pemoxẽ 'rã,

^f 23:25 Lei re nhombo'e va'ety ha'e fariseu kuery opa marãgua ojoi va'erã okaru e'ỹ mbove, nonhemongy'a ukaxe vy (Marcos 7.3,4). Ha'e rã apy ma Jesus ijayvu ha'e kuery py'a re iky'a va'e oĩa re.

³⁵ peẽ kuery ae pepaga aguã heko porã va'e ruguy omoëague ha'e javi re, heko porã va'e Abel ruguy omoëague guive'i Baraquias ra'y Zacarias ruguy omoëa peve. Ha'e va'e ma pejuka va'ekue henda iky'a e'ŷ va'e ha'e altar mbyte.

³⁶ Anhetẽ aipoa'e pêvy: Aŷgua kuery re ha'e nunga rekovia ha'e javi 'rã ou.

Lucas 13.34,35

³⁷ — Jerusalém, Jerusalém, profeta kuery jukaaty, ha'e ndea py ombou pyre kuery ita py rejapipa va'ety. Mbovykue rei e'ŷ xee aikuavâmbaxe teĩ nememby kuery, uru gua'y kue'iry opepo py ojao'ipaa rami. Ha'e rami teĩ peẽ kuery ndapeipotai.

³⁸ Ha'e rami rire pendero opyta rivepa 'rã.

³⁹ Aipoa'e porã pêvy: Peẽ kuery ndaxerexavei ma 'rã, ovaẽ e'ŷa ja “Ta'ima'endu'a porãa Senhor rery rupi reju va'e re” peje aguã ára.*

24

Marcos 13.1,2; Lucas 21.5,6

¹ Templo gui Jesus oẽ ovy jave hemimbo'e kuery hexe onhemboja vy ixupe oexa uka templo mba'emo porã gui anho ojapoague.

² Ha'e ramo aipoe'i ha'e kuery pe:

— Peexa pa peva'e nunga ha'e javi? Anhetẽ aipoa'e pêvy: Oitypaa ramo peteïve ita ndopytai 'rã amboae ita áry.

Lucas 13.3-13; Lucas 21.7-19

³ Oliveiras yvyty py Jesus oguapy oiny jave hemimbo'e kuery onhemboja ju hexe. Ha'e vy oporandu okuapy:

— Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuaa aguã reju jevy taa, ha'e ára opa ta maa?

⁴ Ombovai:

— Penheangu ke ha'vy penhembotavy uka e'ŷ aguã avave rei pe.

⁵ Mba'eta heta 'rã ou xerery rupi “Xee ae ma Cristo” he'i rive va'e. Ha'e rami vy heta 'rã ombotavy.

⁶ Pendu avi 'rã “Joe opu'ã ma”, e'ŷ vy “Joe opu'ã 'rã” 'ea rã. Peikuaa pota ke penhemondyi e'ŷ aguã, mba'eta ha'e nunga ranhe 'ræe oiko teĩ opa aguã e'ŷ teri.

⁷ Peteĩ-teĩ tetã pygua kuery opu'ã 'rã amboae tetã pygua kuery re, ha'e peteĩ-teĩ regua amboae regua re 'rã opu'ã. Opa rupi oiko 'rã karuai ha'e yvy ryryi.

⁸ Pova'e nunga ha'e javi ma ikuai axya ypy'i aguã.

⁹ — Ha'e va'e jave penembojexavai ha'e pendejukaa 'rã. Xerery káuxa pavẽ nda'ija'e'i 'rã pendere.

¹⁰ Ha'e va'e jave heta 'rã ojeity uka vy jojopy uka ndajoayvuvei vy.

¹¹ Heta 'rã ikuai profeta ramigua rive, heta 'rã ombotavy.

¹² Ha'e gui heta-etave heko vai ramo pavẽ rai ojepe'a 'rã porayvua gui.*

¹³ Ha'e rã opa peve oĩ atã va'e ma oo jepe 'rã.

¹⁴ Nhanderuete po'akaa regua ayvu porã omombe'ua 'rã yvy jave re, ha'e javi regua oikuua aguã. Ha'e gui mae ma opa ete 'rã.

Lucas 13.14-23; Lucas 21.20-24

¹⁵ — Ha'e gui henda iky'a e'ŷ va'e py pexa 'rã ojeguarupy nhomokanhyařa oĩ rã, profeta Daniel omombe'u ma voi va'ekue. (Tove ogueroayvu va'e toikuaa.)*

¹⁶ Ha'e ramo Judéia pygua kuery tonhamba yvyty re.

¹⁷ Ngoo áry oĩ va'e totegejy eme ngopy gui mba'emo oguenoẽ aguã,

¹⁸ ha'e mba'ety rupi ikuai va'e tojevy eme guive oparito ogueraa aguã.

¹⁹ Ha'e va'e ára nda'evei 'rã imemby ryru'i ha'e imemby kambu va'e pe.

²⁰ Pejerure ke yro'y py e'ŷ penha aguã, neĩ sâbado ára py voi,

²¹ mba'eta ha'e va'e ára py ma ojexavaia ete 'rã. Jypy'i guive aŷ peve ndoikoi teri ha'e ramigua ete, neĩ ndoikovei ma 'rã guive ha'e rami.

* 23:39 Romanos 11.25-27

* 24:12 Apocalipse 6.1-17; 2 Timóteo 3.1-9

* 24:15 Daniel 9.27; 11.31; 12.11

22 Ha'e va'e ára Nhanderuete nomomba voi va'e rire avave rei ndoo jepei 'rāgue. Va'eri ojeupe guarā oiporavo va'ekue re oma'ë vy omomba voi 'rā.

23 — Ha'e gui amongue pēvy aipoe'i 'rā: "Ma'ë, apy ma Cristo", e'ŷ vy "Pee py ma hiny", he'i ramo perovia eme,

24 mba'eta oiko 'rāe Cristo ramigua ha'e profeta ramigua rive. Ha'e kuery voi ojapo 'rā hexa pyrā ha'e nhomondyipaarā oiporavo pyre kuery voi ombotavy aguā tei, ha'eve va'e rire.

25 Peiko kuaa pota ke, xee romonheangu ma voi.

26 Ha'e nunga rupi xapy'a rei pēvy "Tekoa e'ŷa py Cristo oī", 'ea ramo tapeo eme. Xapy'a rei "Pee oopy ma hiny", 'ea ramo perovia eme.

27 Mba'eta overa va'e minha kuaray oua katy gui oē vy oikea peve ojekuaa va'e rami avi ojekuaa 'rā Ava ra'y ojeapo va'ekue ou rā.

28 Mamo rā te'ōgue ituia py xapirē onhemboaty 'rā okuapy.

Marcos 13:24-27; Lucas 21:25-28

29 — Ha'e va'e ára ojexavaia rire'ive kuaray pytūmba 'rā, jaxy voi naendyvei 'rā. Jaxy-tata ho'apa 'rā yva gui, ha'e yva re ipo'akakueve ikuai va'e voi oitypaa 'rā.*

30 Ha'e gui yva re ojekuaa 'rā hexa pyrā Ava ra'y ojeapo va'ekue guigua. Ha'e ramo ha'e javi regua yvy re ikuai va'e ojae'o 'rā okuapy oexa vy Ava ra'y ojeapo va'ekue yva gui ou rā arai rupi, opo'aka ha'e guexakāmba reve.*

31 Ha'e vy mimby guaxu onhe'ẽ atā reve omondouka 'rā guembiguai anjo kuery. Ha'e kuery omboatypa 'rā heruvy hembiporavo kuery irundy henda yvytu oipejua gui, yva guy jovaive gui.

Marcos 13:28-37; Lucas 21:29-36

32 — Peikuua pota ke figo'y re mba'emo ambojoja vy amombe'u rā. Mba'eta hakā ipyaupa ha'e hogue hokypa rā pexa vy peikuua 'rā ára pyau ovaẽ rai'i maa.

33 Ha'e rami ae avi peē kuery voi xeayvuague ha'e javi oiko rā pexa vy peikuua 'rā xe'ára ovaẽ rai'i maa, okē py ae.

34 Anhetē aipoa'e pēvy: Aŷgua kuery opa e'ŷ re ha'e nunga ha'e javi oiko 'rā.

35 Opa 'rā yva ha'e yvy. Ha'e rā xeayvuague ma ndoaxa rivei 'rā.

36 — Ha'e rami teī ha'e va'e ára ha'e hora raka'e paa avave rei ndoikuuai, neī anjo kuery yva pygua, neī xee Ta'y voi ndaikuuai. Xeru anho'i oikuaa.

37 Ava ra'y ojeapo va'ekue oua ára ma Noé oiko jave py oikoague rami avi 'rā oiko.

38 Mba'eta yy ou e'ŷa ja okarua ha'e oy'ua okuapy, omendaa ha'e nhomomendaai guive, kanoã py Noé oikea ára peve.

39 Noexa'ái rei okuapy raka'e, yy ou vy ogueroxyrypa heravya ára peve. Ava ra'y ojeapo va'ekue ou jave voi ha'ekue rami ae 'rā oiko.

40 Ha'e va'e jave py mokoï 'rā ikuai mba'ety py. Peteī heraa 'rā, ha'e rā amboae ma oeja 'rā.

41 Mokoï kunhague ombo'epo 'rā omongu'ia py. Peteī heraa 'rā, ha'e rā amboae ma oeja 'rā.

42 Ha'e nunga rupi peiko kuaa pota, mba'eta ndapeikuuai mba'e ára pa pende-Senhor ou 'rāa.

43 Peikuua pota ke pova'e nunga re: Hoo va'e ma mba'e hora pa imonda va'e ovaẽ 'rāa oikuua va'e rire oikuua pota 'rāgue ngopy gui ogueraa ukapa e'ŷ aguā.

44 Ha'e nunga rupi peē voi peiko kuaa pota, mba'eta napexa'ái rei jave Ava ra'y ojeapo va'ekue ou 'rā.*

Lucas 12:42-46

45 — Ha'e gui mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatō omoï 'rā oirū kuery okaru aguā hora py omongaru aguā.

46 Ovy'a ete 'rā tembiguai ipatō ou rā ha'e rami ojapo va'e.

47 Anhetē aipoa'e pēvy: Ha'e va'e pe opena uka 'rā opa mba'e oguerekō va'e re.

* 24:29 Isaías 13.10, 34.4

* 24:30 Daniel 7.13-14

* 24:44 Lucas 12.35-40; 17.20-37, 1 Tessalonicenses 5.1-3

⁴⁸ Ha'e rā xapy'a rei ha'e va'e tembiguai heko vai vy ojeupe ae "Xepatō ndou voi 'rā teve", he'i 'rā.

⁴⁹ Ha'e rami vy oinupāmba 'rā oirū kuery. Ha'e rā oka'u va'e kuery reve ma okaru ha'e oy'u 'rā.

⁵⁰ Ha'e rami vy tembiguai noexa'āi reia ára ha'e ndoikuuai reia hora 'rā ipatō ou.

⁵¹ Ha'e rami rire ombopaga vy oguereko axy 'rā heko porā merami rive va'e kuery reve. Ha'e ramo ojae'o ha'e opa marā 'rā onhendu.

25

Dez kunhataīgue re ombojojaague

¹ — Ha'e va'e jave yva pygua po'akaa py oiko 'rā dez kunhataīgue guataendy ogueraa vy omenda va'e ovaexī aguā oje'oi va'e rami avi.

² Ha'e kuery regua peteī nhiruī hi'arandu e'ŷ va'e, ha'e rā peteī nhiruī ma hi'arandu va'e.

³ Hi'arandu e'ŷ va'e kuery ma guataendy ogueraa, ha'e rā tykue ma ndogueraai.

⁴ Ha'e rā hi'arandu va'e kuery ma tataendy reve tykue avi ogueraa hyru py.

⁵ Ha'e gui ma omenda va'erā ndou voi ramo kunhataīgue hopeyipa. Ha'e vy okepa.

⁶ — Pytū mbyte jave onhendu peteī ojapukai va'e: "Ou ma oiny omenda va'erā. Peē ke peovaexī", he'i va'e.

⁷ Ha'e ramo kunhataīgue ha'e javive opu'ā vy omoatyrō guataendy.

⁸ Ha'e ramo hi'arandu e'ŷ va'e kuery aipoe'i oirū kuery hi'arandu va'e pe: "Pemboja'o na orevy penderataendy rykue, mba'eta orerataendy ma ogue ta ma", he'i okuapy.

⁹ — Ha'e ramo hi'arandu va'e kuery ombovai: "Nda'evei teve, orevy oata e'ŷ aguā, ha'e pēvy voi. Tapeo ivendeaty py pejogua aguā", he'i.

¹⁰ Ha'e gui ha'e kuery ojogua aguā oje'oi jave ovaē ma omenda va'erā. Ha'e ramo ngarua py oiko katu va'ekue oike oje'oviv hupive. Ha'e gui okē omobotya.

¹¹ — Are ma jave kunhataīgue hi'arandu e'ŷ va'e ovaē vy ojapukai: "Senhor, Senhor, eipe'a ke okē orevy", he'i okuapy.

¹² — Ha'e ramo ombovai: "Anhetē aipoa'e pēvy: Peē ma xee aikuaa va'e'ŷ", he'i.

¹³ Ha'e nunga rupi peiko kuaa pota, mba'eta ndapeikuuai ára, neī hora.*

Peráta oiporuka pyre re ombojojaague

¹⁴ — Ha'e nunga oiko 'rā peteī ava oyvy gui oo ta ma vy guembiguai kuery oenoī va'e rami avi. Ha'e va'e ma guembiguai kuery pe oiporuka mba'emo oguereko va'e.

¹⁵ Ha'e vy jypygua pe ome'ē peteī nhiruī poyikue prata guigua, amboae pe ma mokoī, ha'e rā opa vygua pe ma peteī'i poyikue ome'ē. Peteī-teī oiporu kuaa-a rami ome'ē. Ha'e gui mae ma oo.

¹⁶ — Peteī nhiruī poyikue jopyare oo voi mba'emo ojogua aguā. Ha'e vy teī nhiruī mboae ju onganave.

¹⁷ Ha'e rami ae mokoī poyikue jopyare voi mokoī ju ongana.

¹⁸ Ha'e rā peteī'i jopyare ma oo vy ojo'o yvy, ha'e ojaty opatō peráta.

¹⁹ — Yma ete ma rire tembiguai kuery patō ojevy. Ha'e vy oikuaa pota ha'e kuery ojapoague re.

²⁰ Ha'e ramo teī nhiruī poyikue jopyare ou vy teī nhiruī mboae ju ogueru. Ha'e vy aipoe'i: "Senhor, xevy pe reiporuka va'ekue peteī nhiruī poyikue prata guigua. Koo, aru peteī nhiruī mboae ju angana va'ekue."

²¹ — Ixupe ipatō aipoe'i: "Ha'evea rami, tembiguai porā ha'e ojeroviapy reiko va'e. Mbovy'i va'e re repena kuaa rire romoī 'rā heta va'e re ju repena aguā. Eike ke xee nepatō reve javy'a aguā py", he'i.

²² — Ha'e gui mokoī poyikue jopyare ou vy aipoe'i: "Senhor, mokoī poyikue xevy reiporuka. Apy mokoī ju aru angana va'ekue."

* 25:13 1 Tessalonicenses 5.1-3

²³ — Ixupe ipatō aipoe'i: “Ha'evea rami, tembiguai porā ha'e ojeroviapy reiko va'e. Mbovy'i re repena kuaa rire romoī 'rā heta va'e re ju repena aguā. Eike ke xee nepatō reve javy'a aguā py”, he'i.

²⁴ — Opa vygua ovaē peteī'i poyikue jopyare. Ha'e vy aipoe'i: “Senhor, xee aikuua rā ndee porayvu va'e'ŷ. Mba'eta renhotŷague gui e'ŷ 'rā remono'ō, ha'e remoaīague gui e'ŷ 'rā remoa'yīgue, xee aikuua rā.”

²⁵ Ha'e rami vy akyje vy peráta reiporuka va'ekue anhomí karamboae yvy guy py. Koo, aru ju nemba'e peráta”, he'i.

²⁶ — Ha'e rami rā ipatō ombovai: “Tembiguai porā e'ŷ ha'e inhate'ŷ va'e, reikuua va'e ri ty'y anhotŷague gui e'ŷ amono'ōa ha'e amoāīague gui e'ŷ amoā'yīgue?

²⁷ Ha'e rami vy xeperáta reiporu uka va'e rire peráta porua kuery pe, xee ajevy vy hetave ju ajopy aguā.”

²⁸ Ha'e gui amboae kuery pe ju aipoe'i: “Peipe'a ixugui prata guigua, ha'e dez oguereko va'e pe ju peme'ē.

²⁹ Mba'eta mba'emo oguereko va'e pe ome'ēave 'rā, oguereko retave aguā. Ha'e rā oguereko e'ŷ va'e gui ma oguereko'i va'e voi oipe'aa 'rā.

³⁰ Ha'e gui tembiguai ovare'ŷ va'e ma pemombo oka py, pytūa py. Ha'e py ma ojae'opaa vy opa marā 'rā onhendu okuapy.”

Nhomboayvu aguā ára re ijayvua

³¹ — Mba'eta Ava ra'y ojeapo va'ekue ou 'rā guexakā ha'e anjo kuery ha'e javive reve. Ha'e rami vy guexakāa py oguapy 'rā oiny tenda openaaty áry.

³² Ha'e gui henonde omboatypaa 'rā yvy regua kuery ha'e javi. Ha'e ramo peteī-teī omboja'o 'rā joa gui, vexa'i re opena va'e kavara mbyte gui guymba kuery omboja'oa rami avi.

³³ Mba'eta omoī 'rā vexa'i kuery oaxu e'ŷa re, ha'e rā kavara kuery ma oaxua re 'rā omoī.

³⁴ Ha'e gui oaxu e'ŷa re ikuai va'e pe huvixave aipoe'i 'rā: “Xeru penembov'y'a va'e, peju ke. Peike ke ipo'akaa py yvy itui ypy'i guive pendevy oguereko katu va'ekue pejopy aguā.

³⁵ Mba'eta akaruxe ramo peme'ē ha'u va'erā. Xey'uvei ramo peme'ē ay'u aguā. Peēa rupigua e'ŷ aiko ramo xemovaē.

³⁶ Ndaxeaoeui ramo xemonhemonde. Xemba'eaxy rā xepou. Nhuā py xembotya rā peju xerexa aguā”, he'i.

³⁷ — Ha'e ramo heko porā va'e kuery oporandu 'rā: “Senhor, araka'e tu rekaruxe rā roexa vy rome'ē re'u va'erā, ha'e ndey'uvei rā roexa vy rome'ē rey'u aguā?

³⁸ Araka'e tu orea rupigua e'ŷ reiko rā roexa vy romovaē, ha'e nandeaovei rā romonhemonde?

³⁹ Araka'e tu nemba'eaxy, e'ŷ vy nhuā py reī rā roexa vy roo roipou?” he'i okuapy.

⁴⁰ — Ha'e ramo huvixa ombovai vy aipoe'i 'rā ha'e kuery pe: “Anhetē aipoa'e pēvy: Kova'e xe-irmão kuery yvyīgueve'i va'e pe ha'e nunga pejapo nhavō xevy pe avi pejapo”, he'i.

⁴¹ — Ha'e gui oaxua re ikuai va'e pe ju huvixa ijayvu vy aipoe'i 'rā: “Ayvu vaiipy pendekuai va'e, pejepe'a ke xea gui. Tapeo tata ogue e'ŷ va'e anha ha'e hembiguai kuery pe oguereko katu pyre katy.

⁴² Mba'eta akaruxe teī napeme'ēi ha'u va'erā. Xey'uvei teī napeme'ēi ay'u aguā.

⁴³ Peēa rupigua e'ŷ aiko ramo naxemovaēi. Ndaxeaoeui teī naxemonhemondei. Xemba'eaxy, ha'e nhuā py aī ramo ndapeoi xerexa aguā”, he'i.

⁴⁴ — Ha'e ramo ha'e kuery oporandu 'rā ixupe: “Senhor, araka'e tu rekaruxe rā roexa, e'ŷ vy ndey'uvei rā, orea rupigua e'ŷ reiko, e'ŷ vy nandeaovei rā, nemba'eaxy, ha'e e'ŷ vy nhuā py reī rā roexa teī noroipytyvōi?”

⁴⁵ — Ha'e ramo ombovai 'rā: “Anhetē aipoa'e pēvy: Kova'e kuery yvyīgueve'i ikuai va'e pe ha'e nunga ndapejapo nhavō, xevy pe avi ndapejapo”, he'i.

⁴⁶ Ha'e gui ha'e va'e kuery oo 'rā ikuai axy riae aguā katy. Ha'e rā heko porā va'e kuery ma tekove marā e'ŷ katy 'rā oo.*

26

Marcos 14.1,2; Lucas 22.1,2; João 11.45-53

¹ Ha'e nunga re Jesus nhombo'epa vy aipoe'i guemimbo'e kuery pe:
² — Mokoī araa py oiko 'rā ngaru Páscoa regua, peikuaa. Ha'e gui Ava ra'y ojeapo va'ekue omboaxaa 'rā kuruxu re omoña aguā — he'i.

³ Ha'e gui ma sacerdote yvatekueve va'e ha'e heta va'e mongetaaty kuery nhomboaty okuapy sacerdote yvateve va'e Caifás hery va'e ro py.

⁴ Ha'e py jogueroayvu Jesus ojopy nhemi vy ojuka aguā re.

⁵ Ha'e vy aipoe'i okuapy:

— Ngaru oiko jave ma nda'evei, heta va'e kuery opu'āmba e'ŷ aguā.

Marcos 14.3-9; João 12.1-8

⁶ Ha'e gui Betânia tetā py Simão lepra oguereko va'ekue ro py Jesus oī jave
⁷ hexe onhemboja peteī kunha. Peteī hyru ogueru ita xiī va'e guigua, heakuā porā va'e hepyve va'e tynyē va'e. Ha'e va'e ma mesa py Jesus oī jave onhoē inhakā re.

⁸ Ha'e nunga hemimbo'e kuery oexa vy ndojou porāi. Ha'e vy joupe-upe aipoe'i:

— Mba'erā tu guī rami ojavyky rei?

⁹ Mba'eta peva'e heakuā porā va'e ma heta peráta re ovende va'e rire, iporiaukue'i pe ome'ē aguā — he'i.

¹⁰ Ha'e rami ijayvua Jesus oikuaa vy aipoe'i ha'e kuery pe:

— Mba'e re tu pendeayvu rei kova'e kunha va'e re? Mba'eta mba'emo porā ete ojapo xevy.

¹¹ Ha'e rami avi iporiaukue'i ikuai riae 'rā pendereve. Ha'e rā xee ma ndaxerexa riae 'rā.

¹² Kova'e kunha ma xerete re heakuā porā va'e onhoē xenhono porāa rā guarā.

¹³ Anhetē aipoa'e pēvy: Mamo rā yvy jave re kova'e ayvu porā omombe'ua py omombe'ua avi 'rā kunha va'e ojapo va'ekue, hexe ima'endu'aa vy.

Marcos 14.10,11; Lucas 22.3-6

¹⁴ Ha'e gui hemimbo'e kuery doze ikuai va'e regua Judas Iscariotes hery va'e oo sacerdote yvatekueve va'e ikuiai py. Ha'e vy aipoe'i ha'e kuery pe:

¹⁵ — Mba'e tu peme'ē ta xevy, pendepo py amboaxa aguā? — he'i ramo ixupe opaga trinta hatā'i va'e prata guigua.

¹⁶ Ha'e va'e ára guive oikuaa pota oikovy ha'eve jave ojopy uka aguā re.

Marcos 14.12-16; Lucas 22.7-13

¹⁷ Ngaru mbojape imbovua reveguia e'ŷ ijypya ára ma hemimbo'e kuery ou Jesus-a py. Ha'e vy oporandu okuapy:

— Mamo tu reipota roguereko katu Páscoa ára py jakaru aguā?

¹⁸ Ombovai:

— Tapeo ha'vy tetā py peteī ava oīa py. Ixupe aipopeje: “Orembo'ea aipoe'i uka kuri: ‘Xe'ára ovaē rai'i ma. Páscoa ára py rokaru 'rā ndero py xeremimbo'e kuery reve’, he'i uka”, peje.

¹⁹ Ha'e ramo Jesus ijayvuague rami ha'e kuery ojapo vy oguereko katu Páscoa py okaru okuapy aguā.

Marcos 14.17-21; Lucas 22.21-23; João 13.21-30

²⁰ Ka'aru'i ma jave doze guemimbo'e kuery reve ikuai mesa py.

²¹ Okaru okuapy jave Jesus aipoe'i:

— Anhetē aipoa'e pēvy: Peē kuery regua peteī va'e xejopy uka nhemi 'rā — he'i.

²² Ha'e ramo ha'e kuery iporiaupa vy omboypy peteī-teī ixupe oporandu aguā:

— Senhor, xee teve?

²³ Ombovai:

— Xereve hy'a py opo'ē va'e ae 'rā xejopy uka nhemi.

* 25:46 Apocalipse 20.11-15

²⁴ Mba'eta Ava ra'y ojeapo va'ekue ma hekorā ipara oĩa rami ae 'rā oo. Ha'e rā ijopy uka nhemiare pe ma nda'evei ete 'rā. Ixupe ha'eveve 'rāgue ndoikoi ma voi va'e rire — he'i.

²⁵ Ha'e ramo ijopy uka nhemiarā Judas oporandu:

— Xembo'ea, xee teve?

Jesus ombovai:

— Ndee ae aipo're — he'i.

Marcos 14.22-26; Lucas 22.14-20; 1 Coríntios 11.22-25

²⁶ Okaru okuapy jave Jesus ojopy peteī mbojape. Nhanderuete oguerovy'a ma vy oipe'ā-pe'ā'i, ha'e guemimbo'e kuery pe ome'ē vy aipoe'i:

— Pejopy, pe'u. Kova'e ma xerete — he'i.

²⁷ Ha'e rire karo ju ojopy. Oguerovy'a ma vy ombojoja guemimbo'e kuery pe. Ha'e vy aipoe'i:

— Pey'u ha'e javive.

²⁸ Mba'eta kova'e ma xereve guarā [ipyau va'e] ajapo va'e regua, heta re vy xeruguy amoē uka ta va'e rupi ojeavyague omboguepaa aguā.

²⁹ Aipoa'e pēvy: Aŷ gui ma kova'e regua uva rykue xee nday'uvei ranhe 'rā, peē kuery reve Xeru po'akaa py ipyau va'e ju ay'u e'ŷa ja — he'i.

³⁰ Ha'e gui peteī mboraei oporaei rire oje'oi Oliveiras vyty katy.

Marcos 14.27-31; Lucas 22.31-34; João 13.36-38

³¹ Ha'e ramo Jesus aipoe'i ha'e kuery pe:

— Kova'e pytū ma peē kuery ha'e javive pejeity ukapa 'rā xekáuxa. Mba'eta ipara oiny: "Ajuka uka 'rā vexa'i re opena va'e. Ha'e ramo vexa'i kuery oāmba 'rā", he'i va'ekue.*

³² Ha'e gui anhemboete ju ma rire penerenonde xee aa 'rā Galiléia katy — he'i.

³³ Pedro aipoe'i ixupe:

— Ndekáuxa ha'e javive ojeity ukapa teī xee any 'rā.

³⁴ Jesus ombovai:

— Anhetē aipoa'e ndevy: Kova'e pyavyve uru ojapukai e'ŷ mbove, mboapykue renhemombe'u 'rā xekuaa e'ŷ va'e rami.

³⁵ Pedro aipoe'i:

— Ndereve xejukaa 'rā teī ae ma peteīve henda py ndaxeayvui 'rā roikuaa e'ŷa rami — he'i. Hemimbo'e kuery ha'e javive ha'e rami meme ijayvu.

Marcos 14.32-42; Lucas 22.40-46

³⁶ Ha'e rire'ive Jesus oo guemimbo'e kuery reve peteī henda Getsêmani 'epy va'e py. Ha'e vy aipoe'i ha'e kuery pe:

— Peguapy ke apy, pe'i py xee anhembo'e ainya ja — he'i.

³⁷ Ngupive ogueraa Pedro ha'e Zebedeu ra'y kuery mokoīve. Ha'e vy iporiaua ha'e nda'eveia oendu.

³⁸ Ha'e vy aipoe'i ha'e kuery pe:

— Xepy'a re aendu nda'evei etea xejuka ta va'e rami. Pepyta apy, peikuua pota xereve — he'i.

³⁹ Ojepe'ave'i ov yv vy ngova omovaē vy re. Onhembo'e vy aipoe'i:

— Xeru, ha'eve rā xegui oaxa 'rāgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

⁴⁰ Ha'e gui guemimbo'e kuerya py ojevy vy oexa rā okepa ra'e. Ha'e ramo aipoe'i Pedro pe:

— Neī peteī hora voi teve nda'evei xereve peikuua pota aguā?

⁴¹ Peikuua pota, ha'e penhembo'e penderekō a'āa py pejeity ukapa e'ŷ aguā. Penenhe'ē ma anhetē ikyre'ŷ, ha'e rā pendero'o re ma penekangy — he'i.

⁴² Ha'e gui ojepe'a ju. Onhembo'e jevy vy aipoe'i:

— Xeru, kova'e karo gui ay'u e'ŷ re oaxa aguā nda'evei ri ramo toiko ndee reipota va'e — he'i.

⁴³ Ha'e gui ojevy vy oexa rā okepa ju ra'e, hopeyi vaipa vy.

* 26:31 Zacarias 13.7

- ⁴⁴ Ha'e gui oejapa ju vy mboapykuea ma oo onhembo'e. Ha'ekue'i rupi ae ju ijayvu.
- ⁴⁵ Ha'e vy guemimbo'e kuerya py ojevy vy aipoe'i ha'e kuery pe:
— Pekepa teri va'e ty'y pejupy? Ovaẽ ma hora heko vai va'e kuery po py Ava ra'y ojeapo va'ekue omboaxaa aguã.
- ⁴⁶ Pepu'ã, jaje'oi. Pee ma ou oiny xejopy ukaarã.
Marcos 14.43-50; Lucas 22.47-53; João 18.2-11
- ⁴⁷ Jesus ijayvu teri jave ovaẽ ma ouvy hemimbo'e kuery doze va'e regua Judas. Hexeve heta ete ou kyxe ha'e yvyra revegua, sacerdote yvatekueve va'e ha'e heta va'e mongetaaty kuerya gui.
- ⁴⁸ Mba'eta ha'e kuery pe ijopy uka nhemia aipoe'i va'ekue: “Hova py ayvu va'e ae 'rã pejopy”, he'i va'ekue.
- ⁴⁹ Ha'e gui ma Jesus re onhemboja ouvy vy aipoe'i:
— Xembo'ea, ha'eve vai pa? — he'i vyve oayvu hova py.
- ⁵⁰ Ha'e ramo Jesus aipoe'i ixupe:
— Xeirũ, mba'e re tu reju? — he'i. Ha'e ramove ha'e kuery oupa vy Jesus re opoko, ojopy okuapy.
- ⁵¹ Ha'e jave Jesus revegua kuery va'e regua peteĩ oekyi xapy'a kyxe. Omboguai sacerdote yvateve va'e rembiguai nambi rupi, ha'e vy omboi.
- ⁵² Ha'e ramo Jesus aipoe'i ixupe:
— Emboyrú ke ndekyxé, mba'eta kyxe oiporu va'ekue ma kyxe py ae ju 'rã omano.
- ⁵³ Ndereikuai ri ty'y xepo'akaa Xeru pe ajerure ramo aÿ'i ma voi doze aty anjo kuery ombou aguã?
- ⁵⁴ Ha'e rami avi namigua ajapo va'e rire mba'exa tu ojeupity 'rãgue ipara re xerekorã oĩa?
— he'i.
- ⁵⁵ Ha'e gui ma heta va'e kuery pe ju Jesus aipoe'i:
— Peẽ kuery kyxe ha'e yvyra reve ri ty'y peju jojuka rive va'ety rami xejopy aguã? Ko'ë nhavõ templo py [peẽ kuery pendekuaia rupi] aiko vy xee anhombo'e teĩ ndaxejopyi va'ekue.
- ⁵⁶ Ha'e rami avi guĩ nunga oiko profeta kuery ombopara va'ekue ha'e javi ojeupitya aguã
— he'i.
Ha'e ramo hemimbo'e kuery ha'e javive oeja onhamba vy.
Marcos 14.53-65; Lucas 22.63-71; João 18.12-14,19-24
- ⁵⁷ Ha'e gui Jesus jopyare kuery ogueraa sacerdote yvateve va'e Caifás ro py. Ha'e py ma ijaty ma kuaxia re nhombo'e va'ety ha'e nhomboayvu va'ety kuery.
- ⁵⁸ Ha'e rã Pedro ma hakykue mombyry'i rupi oo sacerdote roka peve. Ha'e py ovaẽ vy oguapy oiny tembiguai kuery mbyte, opa peve oexa aguã.
- ⁵⁹ Ha'e gui sacerdote yvatekueve va'e ha'e nhomongeta va'ety kuery Jesus ojuka ukaxe vy ojouxe okuapy hekokue ramigua mombe'uarã.
- ⁶⁰ Ha'e rami teĩ ndojoui, mbovy e'ŷ hekokue ramigua mombe'uarã ikuai va'eri.
Ha'e gui are rire mokoĩ ava ou vy aipoe'i:
⁶¹ — Peva'e ma aipoe'i: “Xepo'aka Nhanderuete pegua templo ambovaipa aguã, ha'e gui mboapy araa py ajapo ju aguã guive”, he'i va'ekue.
- ⁶² Ha'e gui sacerdote yvateve va'e opu'ã vy oporandu Jesus pe:
— Nerembovai va'e ty'y po rami ndere ijayvu va'e?
- ⁶³ Ha'e rami teĩ Jesus okyrirí.
Ha'e gui sacerdote yvateve va'e aipoe'i ixupe:
— Xee aipoa'e ndevy Nhanderuete oikove va'e rery rupi: Emombe'u orevy ndee pa Cristo Nhanderuete Ra'y reikoa — he'i.
- ⁶⁴ Jesus ombovai:
— Ndee ae ri tu aipo're. Ha'e gui xee amombe'u porãve ta pãvy: Aÿ gui ma pexa 'rã Ava ra'y ojeapo va'ekue Ipo'akapa va'e oiporu kuaa regua re oguapy oiny rã, ha'e yva gui arai rupi ou ramo guive — he'i.*

* 26:64 Daniel 7.13-14

- ⁶⁵ Ha'e ramo sacerdote yvateve va'e oao omondoro vy aipoe'i:
 — Ijayvu vai rima! Mba'erā tu jaipotave hekokue mombe'uarā? Pendu ae ma ange'i ijayvu vai rā.
- ⁶⁶ Mba'exa tu peikuua?
- Ha'e kuery ombovai:
 — Jajuka aguā rami ijayvu — he'i okuapy.
- ⁶⁷ Ha'e ramo amongue onyvō hova re, oungapa guive. Amboae kuery ma oipete vy aipoe'i:
 — Cristo, emombe'u ke orevy, mava'e ete pa nembota ra'e?
Marcos 14.66-72; Lucas 22.55-62; João 18.15-18,25-27
- ⁶⁸ Ha'e ramia ja Pedro oguapy oiny oka py. Ha'e gui hexe peteī kunha'i omongakuaapy onhemboja vy aipoe'i ixupe:
 — Ndee voi teve Galiléia pygua Jesus reve reiko va'ety.
- ⁷⁰ Ha'e rā Pedro ma ha'e javive oendua py onhenhomni. Ha'e vy aipoe'i:
 — Xee ndaikuuai rima mba'e nunga re pa ndeayvua — he'i.
- ⁷¹ Ha'e gui oka katy oē ovv rā amboae kunha'i omongakuaapy ju oexa. Ha'e va'e ma aipoe'i ha'e py ikuuai va'e pe:
 — Peva'e ma oiko avi kuri Nazaré pygua Jesus reve.
- ⁷² Ha'e rā Pedro oendu vy oura reve onhenhomni ju:
 — Xee tu rima ha'e ava — he'i.
- ⁷³ Ha'e rireve'i ha'e py ikuuai va'e onhemboja vy aipoe'i Pedro pe:
 — Anhetē ndee voi ha'e kuery regua reiko, mba'eta ha'e kuery rami ae ndeayvu va'e.
- ⁷⁴ Ha'e ramo ijayvu vaikue ha'e oura reve aipoe'i:
 — Xee tu ndaikuuai ha'e ava! — he'i. Ha'e ramove uru ojapukai nhendu.
- ⁷⁵ Ha'e ramo Pedro ima'endu'a Jesus ixupe aipoe'iague re: "Kuri uru ojapukai e'ŷ mbove ndee mboapykue 'rā renhemombe'u xekuaa e'ŷ va'e rami", he'iague re. Ha'e rami vy ojepe'a vy ojae'o vaipa.

27

Marcos 15.1; Lucas 23.1,2; João 18.28-32

- ¹ Ko'ēgue aje'ive reve sacerdote yvatekueve va'e ha'e heta va'e mongetaaty kuery ha'e javi jogueroayvu okuapy Jesus ojuka uka aguā re.
- ² Ha'e rami vy oipokua vy ogueraa uka, huvixa Pilatos pe ju omboaxa.

Judas ojejukaague

- ³ Ha'e gui ijopy uka nhemiare Judas ma Jesus ojuka ta ma okuapy rā oexa vy onhemboaxy. Ha'e vy trinta hatā'i va'e prata guigua ome'ẽ ju sacerdote yvatekueve va'e ha'e nhomoneta va'ety kuery pe. Ha'e vy aipoe'i:
 — Ojejavy e'ŷ va'e ruguy amoē ukaa py xee ajejavy — he'i.
- Ha'e kuery ombovai:
 — Mba'e tu ore roguereko guī nunga reve? Ndereve ae topyta — he'i okuapy.
- ⁵ Ha'e ramo Judas ma templo ropy katy hatā'i va'e omombopa vy ojepe'a. Oo vy ojejyryvipy.*
- ⁶ Ha'e gui hatā'i va'e ma sacerdote yvatekueve va'e omono'õ vy aipoe'i:
 — Nda'evei ome'ẽmby ryru py nhamoī aguā, mba'eta tuguy repykue — he'i.
- ⁷ Ha'e gui jogueroayvuve rire ojogua peteī yvy nhae'ũ re ombo'eapo va'ety gui, amboae regua omano ramo onhono porāa aguā.
- ⁸ Ha'e ramo vy ha'e va'e yvy aŷ peve hery Yvy-Tuguy.
- ⁹ Ha'e ramo oiko vy ojeupity profeta Jeremias pe aipoe'i ukaague: "Trinta hatā'i va'e prata guigua hepyrā Israel kuery regua oikuua va'ekue ogueraa vy.

* 27:5 Atos 1.16-19

¹⁰ Ha'e vy opaga nhae'ũ re ombo'epo va'ety yvy re. Ha'e rami ae Senhor aipoe'i uka xevy", he'iaque.*

Marcos 15.2-15; Lucas 23.1-5,13-25; João 18.33-19.16

¹¹ Huvixave renonde Jesus hi'aĩ ramo oporandu vy aipoe'i:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're — he'i.

¹² Ha'e gui sacerdote yvatekueve va'e ha'e nhomongoeta va'ety kuery hexe ijayvu rei ramo mba'eve nde'i.

¹³ Ha'e ramo Pilatos oporandu ixupe:

— Nerendui ri ty'y mbovy e'ŷ ndere ijayvua rā?

¹⁴ Ha'e rami teĩ Jesus neĩ peteĩ ayvu py nombovai. Ha'e ramo huvixave onhemondyi vaipa.

¹⁵ Ngaru oikoa ára nhavõ huvixa opoi jepi 'rā peteĩ nhuã py oĩ va'e, heta va'e kuery oipota va'e rei.

¹⁶ Ha'e va'e jave py ma peteĩ oĩ nhuã py pavẽ oikuua va'ety Barrabás hery va'e.

¹⁷ Ha'e gui heta va'e kuery ijatypa rā Pilatos oporandu ha'e kuery pe:

— Mava'e tu peipota apoi pěvy: Barrabás tyrā pa Jesus, Cristo hery va'e? — he'i,

¹⁸ mba'eta oikuua ha'e kuery ija'e e'ŷ vy rive ipo py omboaxaague.

¹⁹ Ha'e gui nhomboayvuaty py huvixa oĩ jave ta'yxy aipoe'i uka ixupe:

— Mba'eve ejapo eme peva'e ava heko porā va'e re, mba'eta ange ajexavai vaipa ra'u ikáuxa — he'i.

²⁰ Ha'e rami teĩ sacerdote yvatekueve va'e ha'e nhomongoeta va'ety kuery ombo'e heta va'e kuery Barrabás re ojerure okuapy aguã, ha'e rā ojuka uka aguã Jesus.

²¹ Teĩgue ju ha'e kuery pe huvixave oporandu:

— Mava'e tu mokoïve gui peipota apoi?

Ha'e kuery ombovai:

— Barrabás — he'i okuapy.

²² Pilatos oporanduve ju ha'e kuery pe:

— Mba'e 'rā tu ha'vy ajapo Jesus, Cristo hery va'e re?

— Emoĩ kuruxu re! — he'i pavẽ.

²³ — Mba'e nunga py tu ojapo vai raka'e? — he'i Pilatos oporandu vy.

Ha'e rā ojapukaive tema:

— Emoĩ kuruxu re! — he'i okuapy.

²⁴ Pilatos mba'eve rei ndojapo kuaa reguai vy, ha'e pavẽ nda'eveive oje'oivy rā oexa vy ogueru ruka yy, ha'e vy heta va'e kuery oexaa py ojepoei. Ha'e vy aipoe'i:

— Xee ma mba'eve ndarekoi kova'e [heko porā va'e] ruguy pemoẽ ukaxeа reve. Pendereve ae toptyta ha'e nunga!

²⁵ Ha'e ramo heta va'e kuery aipoe'i:

— Orere ae toĩ huguy romoẽ ukaague re ropaga aguã, orera'y kuery re guive — he'i.

²⁶ Ha'e rami rā Pilatos ha'e kuery ayvu oendu vy opoi Barrabás. Ha'e rā Jesus ma oinupã ukapa rire omboaxa kuruxu re omoña aguã.

Marcos 15.16-20; João 19.2,3

²⁷ Ha'e rire'ive huvixavea pegua xondaro kuery ma opy Jesus ogueroike vy omboaty xondaro kuery ha'e javi.

²⁸ Ijao omboipa vy omonhemonde peteĩ ao pytā va'e py,

²⁹ ha'e juu gui peteĩ coroa ramigua ojapo vy omoĩ inhakã re, ha'e ipo oiporu kuaa regua re peteĩ takua ojopy uka. Ha'e vy henonde guenapy'ã re oĩ vy ojojai rei reve aipoe'i:

— Iporā ete judeu kuery pegua huvixave! — he'i okuapy.

³⁰ Ha'e gui hexe onyvõ reve takua ojopy vy oinupã inhakã rupi.

* 27:10 Zacarias 11.13

³¹ Ha'e gui ojojai reipa rire ao omboi vy ijaо ae py ju omonhemonde. Ha'e gui ma ogueraa kuruxu re omoї aguã katy.

Marcos 15.21; Lucas 23.26

³² Ha'e kuery oje'oi vy ovaexĩ peteї Cirene pygua Simão hery va'e. Ha'e va'e pe ogueraa uka okuapy kuruxu.

Marcos 15.22-32; Lucas 23.32-43; João 19.17-24

³³ Ha'e gui ovaẽ peteї henda Gólgota "Akägue renda" 'epy va'e py.

³⁴ Ha'e vy ixupe ome'ẽ vinho iro va'e re omoirũ va'ekue. Ha'e rami teї oa'anga vy ndoy'uxei.

³⁵ Kuruxu re omoї rire oexa okuapy xorte ijaо jomeme omboja'o aguã.*

³⁶ Ha'e gui oguapypa ha'e py oarõ vy.

³⁷ Inhakã a'iry oupi imoiny ipara va'e hexe ijayvua: "Kova'e ma Jesus, judeu kuery pegua huvixave" he'ia.

³⁸ Kuruxu mboae re hexeve omoї avi mokoї imonda va'e: ijaxu e'ŷa re peteї omoї, ha'e rã amboae ma ijaxua re.

³⁹ Ha'e rupi oaxa ovv va'e ijayvu vai oje'oivy hexe. Oakã ombovava reve aipoe'i:

⁴⁰ — Ndee ma templo rembovaipa rire mboapy araa pyve ju rejapo 'rã va'ekue, ejereraa jepe ha'vy ndee ae, Nhanderuete Ra'y ri vy. Eguejy kuruxu gui — he'i oje'oivy.

⁴¹ Ha'e rami ae avi sacerdote yvatekueve va'e, kuaxia re nhombo'e va'ety ha'e nhomongeta va'ety kuery ojojai rei vy aipoe'i:

⁴² — Amboae kuery ogueraa jepe va'eri ha'e ae ndojereraa jepe kuaai. Israel kuery pegua huvixave ri oiko vy totejy kuruxu gui. Ha'e ramo jajerovia 'rã hexe.

⁴³ Nhanderuete re ojerovia rire tou ha'vy togueraa jepe, anhetẽ ri oayvu vy. Mba'eta "Xee ma Nhanderuete Ra'y" he'i.

⁴⁴ Imonda va'e kuery hexeve kuruxu re omoї mbyre voi ojojai rei.

Marcos 15.33-41; Lucas 23.44-49; João 19.28-30

⁴⁵ Kuaray mbyte jave pytumba yvy jave re, kuaray ojero'a puku peve.

⁴⁶ Ha'e gui kuaray ojero'a jave Jesus ojapukai atã reve aipoe'i:

— Eli, Eli, lamá sabactâni — he'i, "Xeru, Xeru, mba'e re tu xereja?" he'ia.*

⁴⁷ Ha'e py ikuai va'e regua oendu vy aipoe'i:

— Elias rima oenoї — he'i okuapy.

⁴⁸ Ha'e ramo ha'e kuery regua peteї va'e onha pojava ovv, peteї esponja ogueru. Vinagre py omoaký, ha'e takua apy re omoї vy omovaẽ oy'u aguã.

⁴⁹ Ha'e rã amboae kuery aipoe'i:

— Tove, Elias ou vy ogueraa jepe rã jaexa aguã — he'i.

⁵⁰ Ha'e gui ma Jesus teїgue ju ojapukai atã reve omondouka onhe'ẽ.

⁵¹ Ha'e ramove henda iky'a e'ŷ va'e ropy ajukue okẽ regua oĩ va'e oxoro mbyte rupi. Yvate gui oxoro yvy peve. Yvy oryryi, ha'e itaova ovopa guive.

⁵² Ha'e gui yvyra rupa ikuai va'e oipe'aa ramo heta onhemboete ju iky'a e'ŷ va'e oke va'ekue,

⁵³ ha'e vy onhono porãague gui oẽmba. Jesus onhemboete ju rire ha'e kuery voi tetã iky'a e'ŷ va'e py ovaẽ vy heta pe ojexa uka.

⁵⁴ Ha'e gui ma xondaro ruvixa ha'e oirũ kuery Jesus rarõa ikuai va'e ma yvy oryryi ha'e opa mba'e oiko rã oexa vy okyjepa okuapy. Ha'e vy aipoe'i:

— Anhetẽ ae ra'e peva'e ava Nhanderuete Ra'y — he'i.

⁵⁵ Ha'e py heta avi ikuai kunhague mombyry'i gui oma'ẽ okuapy va'e. Ha'e va'e kuery ma Galiléia guive Jesus rakykue ou vy oipytyvõ va'ekue.

⁵⁶ Ha'e kuery regua ma Maria Madalena, Tiago ha'e José xy Maria, ha'e gui Zebedeu ra'xy.

Marcos 15.42-47; Lucas 23.50-56; João 19.38-42

⁵⁷ Ka'aru'i jave ou peteї ava Arimatéia pygua oguerekopa va'e, José hery va'e. Jesus remimbo'e oiko.

* 27:35 Salmo 22.18 * 27:46 Salmo 22.1

⁵⁸ Ha'e va'e ma Pilatos-a py oo vy ojerure Jesus retekue re. Ha'e ramo Pilatos ogueraa uka.

⁵⁹ Ha'e ramo José ma hetekue ogueraa vy onhovā peteī ajukue puku xiī porā va'e iky'a e'ŷ va'e py.

⁶⁰ Ha'e vy onhono porā nguparā itaova re ojo'o uka va'ekue py. Ha'e gui peteī ita tuvixa va'e ombojere itakua rokē omboty aguā. Ha'e vy oo ju.

⁶¹ Ha'e ramia ja onhono porāague rexei oguapy okuapy Maria Madalena ha'e Maria mboae.

Onhono porāague huvixa oarō ukaague

⁶² Ko'ēgue mba'emo oguerekoo katupaa ára rire ma sacerdote yvatekueve va'e ha'e fariseu kuery nhomboaty. Ha'e gui Pilatos-a py jogueraa vy

⁶³ aipoe'i okuapy ixupe:

— Oreruvixa, orema'endu'a ha'e va'e ijapu va'e oikove teri reve aipoe'iague re: "Mboapy ára rire anhemboete ju 'rā", he'iague re.

⁶⁴ Ha'e nunga rupi mboapy ára peve rearō uka 'rāgue onhono porāague, hemimbo'e kuery ou vy hetekue re imonda e'ŷ aguā, ha'e gui heta va'e kuery pe omanoague gui onhemboete jevyague rami omombe'u e'ŷ aguā. Mba'eta ha'e rami ri ijapu rire jypy guare gui nda'eveive 'rā — he'i okuapy.

⁶⁵ Pilatos ombovai:

— Apy ma xondaro kuery ikuai. Peraa, pearō uka onhono porāague peikuua rami — he'i.

⁶⁶ Ha'e ramo ha'e kuery oje'oi vy oarō uka onhono porāague. Omboja ita imbotyarā oī va'e, ha'e oeja imbokuapy xondaro kuery ha'e py.

28

Marcos 16:1-8; Lucas 24:1-12; João 20:1-10

¹ Sábado oaxa rire semana ijypya ára ko'ē rai'i jave ma Maria Madalena ha'e amboae Maria jogueraa itakua re oma'ē aguā.

² Ha'e gui yvy oryryi atā xapy'a, mba'eta peteī anjo Senhor-a guigua yva gui oguejy rā. Oguejy vy ombojere ita, ha'e vy oguapy hi'áry.

³ Ha'e va'e ma overa va'e rami ojekuaa, yro'y rami onhemondea xiīmba va'e.

⁴ Ha'e rā itakua rarōa kuery okyje vy oryryipa okuapy, omanogue rami ikuai.

⁵ Ha'e gui kunhague pe anjo aipoe'i:

— Pekyje eme, mba'eta aikuaa peē kuery kuruxu re omoī mbyre Jesus pekaa.

⁶ Ha'e va'e ma apy noīvei, onhemboete ju ma aipoe'iague rami vy. Peju pexa onhono porāague.

⁷ Ha'e gui tapeo pojava, pemombe'u hemimbo'e kuery pe omanoague gui onhemboete jevy maa, ha'e vy penerenonderā oo 'rāa Galiléia katy. Ha'e py ma pexa ju 'rā. Ha'e va'e arho areko pendevy amombe'u va'erā — he'i.

⁸ Ha'e ramo itakua gui ha'e kuery ojepe'a vy oo pojava. Okyje ha'e ov'y'a reve onha jogueravy hemimbo'e kuery pe omombe'u aguā.

⁹ Ha'e gui ma Jesus ae ovaex̄ ouvy. Ha'e vy aipoe'i:

— Tapeiko porā — he'i.

Ha'e rā ha'e kuery onhemboja vy oikuavā ipy rupi, omboete.

¹⁰ Ha'e ramo Jesus aipoe'i ha'e kuery pe:

— Pekyjeve eme. Tapeo pemombe'u xe-irmāo kuery pe Galiléia katy oje'oi aguā. Ha'e py ma ha'e kuery xererexa 'rā.

Xondaro kuery ijapu aguā judeu kuery opagaague

¹¹ Ha'e gui kunhague oo ma ramo onhono porāague rarōa kuery regua tetā re oo vy sacerdote yvatekueve va'e pe omombe'u oiko va'ekue ha'e javi.

¹² Ha'e ramo nhomongeta va'ety kuery reve ha'e kuery nhomboaty vy heta ome'ē peráta xondaro kuery pe.

¹³ Ha'e vy aipoe'i:

— Aipopeje 'rā: "Pyávy roke jave hemimbo'e kuery ou vy imonda hetekue re", peje 'rā.

¹⁴ Ha'e gui xapy'a rei huvixave ha'e nungakue oendu ramo oreayvu 'rā hexeve, pendere mba'eve oiko e'ŷ aguã — he'i okuapy.*

¹⁵ Ha'e ramo xondaro kuery peráta ogueraa vy aipoe'i ukaague rami ijapu. Ha'e rami rire ha'e nungakue aŷ peve omombe'ua judeu kuery ikuia rupi.

Galiléia yvy re guemimbo'e kuery pe Jesus ojexa ukaague

¹⁶ Ha'e rā hemimbo'e kuery onze-ve ma Galiléia katy oje'oi, yvyty Jesus oikuaa uka va'ekue py.*

¹⁷ Ha'e py ma oexa vyomboete. Ha'e rā amongue ma ndoguerovia porāi.

Marcos 16.15-18; Lucas 24.44-49

¹⁸ Ha'e kuery re Jesus onhemboja vy aipoe'i:

— Opa mba'e py xembopo'akaa yva ha'e yvy re ikuai va'e ha'e javi re.

¹⁹ Ha'e nunga rupi tapeo, penhomoingo xeremimbo'erā ha'e javi regua gui.* Ha'e vy pemongarai 'rā Tuu, Ta'y ha'e Nhe'ẽ Ky'a E'ŷ rery rupi.

²⁰ Pembo'e 'rā pêvy ajapo uka va'ekue ha'e javi rupi ikuai aguã. Ha'e rā xee ma ko'ẽ nhavõ aiko 'rā peẽ kuery reve, opaa ára peve.

* 28:14 Lucas 16.31 * 28:16 Mateus 28.7,10; Marcos 14.27,28 * 28:19 João 20.21; Atos 1.6-8

Marcos ayvu porã ombopara va'ekue

Marcos ayvu porã ombopara va'ekue

Jesus rekukue Marcos omombe'u vy ijayvu Mateus ha'e Lucas omombe'ua rupi avi. Jypy guive Marcos omombe'u Jesus nhandereraa jepe aguã ipo'aka va'ea, mba'eta ipo'aka nhe'ẽ vai gui oipe'a aguã (1.21-27), nhomonguera aguã (1.32-34), jajejavyague ombogue aguã (2.1-12), yvytu atã omombytu'u aguã (4.35-41) ha'e omano va'ekueomboete jevy aguã (5.22-42).

Jesus ipo'akapa va'eri ndou raka'e joguerekoy poyi aguã, ha'e rã nhanderekovia guekove ome'ẽ aguã, ha'e ae aipoe'iague rami vy: "Ava ra'y ojeapo va'ekue eteve voi jojokuai aguã e'ý ou, ha'e rã tembiguai rami oiko aguã, ha'e guekove ome'ẽ aguã heta rekovia, ogueraa jepe aguã" (10.45). Ojeupe ae "Ava ra'y ojeapo va'ekue" he'i, mba'eta Nguuetea gui ko yvy re ou vy ava ojeapo vy onhemoyvyl'i ete raka'e, kuruxu re omano guive. Ha'e rami teī omanoague gui onhemboete ju, ha'e guemimbo'e kuery pe ojexa uka guive. Ha'e kuery pe aipoe'i: "Tapeo opa rupi, yvy jave re ikuai va'e ha'e javive pe pemombe'u ayvu porã" (16.15). Ha'e nunga rupi nhandevy pe voi omombe'ua ayvu porã Jesus nhandereraa jepea regua.

¹ Nhanderuete Ra'y Jesus Cristo reko regua ayvu porã ijypy.

Mateus 3.1-6; Lucas 3.1-6

² Profeta Isaías ombopara vy aipoe'iague rami oiko: "Ne'exa, nerendera ambou 'rã xerembiguai. Ha'e va'e oguerekoy katu 'rã nderaperã."*

³ Ha'e rami vy tekao e'ýa py ijayvu atã 'rã: 'Pereko katu Senhor raperã, pembo'yvi ou aguã', he'i 'rã.'*

⁴ Ha'ekue rami ae João Batista ojekuaa raka'e tekao e'ýa py. Omombe'u oikovy pavẽ oyeko rerova vy onhemongarai uka aguã, ojejavyague omboguepaa aguã.*

⁵ Ha'e va'e oikoa py jogueru Judéia katy'i ikuai va'e ha'e Jerusalém pygua kuery ha'e javi. Ojejavyague omombe'upa ramo omongarai Jordão yakã py.

⁶ João ao ma camelو rague guigua, ha'e rã iku'a xã ma ipirekue guigua. Tuku ha'e ei ka'aguy regua ho'u oikovy.

Mateus 3.11; Lucas 3.15,16; João 1.19-28

⁷ João ayvu omombe'u vy aipoe'i:

— Xerakykue ou 'rã peteĩ xegui yvateve va'e. Ha'e va'e gui xe'yvyi've va'e vy nda'evei ajero'a vy ipy regua xã ajora aguã voi.

⁸ Xee ma romongarai yy py. Ha'e rã ha'e ma Nhe'ẽ Ky'a E'ý reve 'rã penemongarai.*

Mateus 3.13-17; Lucas 3.21,22; João 1.32-34

⁹ Ha'e va'e jave Galiléia regua Nazaré tetã gui Jesus ou. Ha'e vy João pe onhemongarai uka Jordão yakã py.

¹⁰ Yy gui oẽ vyve oexa yva ojepe'a, ha'e apykaxu'i rami hexe Nhe'ẽ oguejy ouvy rã.

¹¹ Ha'e ramo onhendu peteĩ ayvu yva gui:

— Ndee ma Xera'y roayvu ete ha'e roguerovy'a va'e — he'i va'e.

Mateus 4.1-11; Lucas 4.1-13

¹² Ha'e rire'ive tekao e'ýa katy Nhe'ẽ ogueraa.

¹³ Ha'e py ma quarenta ára oĩ Satanás oeko a'ã rã. Mymba inharõ va'e mbyte py oĩ teī anjo kuery opena.*

Mateus 4.12-17; Lucas 4.14,15

¹⁴ Nhuã py João ombotya ma rire Jesus ojevy ju Galiléia katy, Nhanderuete guigua ayvu porã omombe'u vy.

* 1:2 Malaquias 3.1 * 1:3 João Batista ma Jesus raperã oguerekoy katua rupi ijayvu raka'e, mba'eta heta va'e kuery pe omombe'u oikovy opa marã rei ikuiaia gui ojepe'a vy Jesus re ojerovia aguã (Isaías 40.3). * 1:4 João 1.6-8,19-23

* 1:8 Atos 19.4 * 1:13 Hebreus 2.18, 4.15

15 Ha'e vy aipoe'i:

— Ára ojeupity ma, namombyryvei ma Nhanderuete po'akaa ojekuaa aguã. Pejeko rerova, ha'e perovia ayvu porã.

Mateus 4.18-22; Lucas 5.1-11

16 Galiléia yupa yvýry rupi oiko vy oexa mokoï joegua Simão ha'e André. Ha'e kuery ma pira mbo'aa rupi ikuai vy yy py pira mbo'aa omombo okuapy.

17 Ha'e va'e kuery pe Jesus aipoe'i:

— Peju ke xerakykue. Xee ma avakue jouarã ju 'rã romoingo — he'i.

18 Ha'e ramove ha'e kuery oejapa vyvoi pira mbo'aa, ha'e oje'oi hupive.

19 Oove'ia py oexa Zebedeu ra'y Tiago ha'e tyvy João, kanoã py pira mbo'aa omoatyrõ okuapy rã.

20 Ha'e vyve oenoï. Ha'e rã ha'e kuery ma nguu Zebedeu ha'e hembiguai kuery kanoã py oeja vy oo Jesus rakykue.

Lucas 4.31-37

21 Ha'e rire ovaẽ Cafarnaum tetã py. Sábado ára py onhembo'eaty oĩ va'e py oo nhombo'e vy.

22 Nhombo'e rã pavẽ oendu vy onhemondyi okuapy, mba'eta opo'akaa rupi ijayvu, kuaxia re nhombo'e va'ety kuery rami e'ý.

23 Are'ý'i re onhembo'eaty py ou peteĩ ava nhe'ë vai onhemondea va'e. Ha'e va'e ma ojapukai atã:

24 — Jesus Nazaré pygua va'e, mba'e tu ndee rerekorereve? Oremokanhy aguã teve rej? Xee ma aikuua ndee Nhanderuete guigua iky'a e'ý va'e reikoa — he'i.

25 Ha'e ramo ixupe Jesus ijayvu atã vy aipoe'i:

— Ekyrirí, ha'e ejep'e a upe va'e ava gui — he'i.

26 Ha'e ramo nhe'ë vai omboryryipa ha'e ojapukai atã reve ojepe'a ixugui.

27 Ikuai va'e kuery ha'e javi onhemondiyipa vy oporandu joupe-up:

— Mba'erã 'rã nda'u guĩ ramigua oiko? Mba'emo pyau re nhombo'earã teve? Mba'eta opo'akaa rupi ijayvu rã nhe'ë vai voi onhe'ë rendu — he'i okuapy.

28 Ha'e rire Galiléia yvy katy ha'e javi rupi onhendu Jesus mba'emo porã ojapoague.

Mateus 8.14,15; Lucas 4.38,39

29 Onhembo'eaty gui Jesus oẽ vy Tiago ha'e João reve jogueraa Simão ha'e André ro py.

30 Oo py ma Simão raixo ipire raku oupy. Ha'e ramo Jesus pe omombe'ua imba'eaxy.

31 Ha'e ramo onhemboja vy ipo re ojopy ramove ipire raku oaxa. Ha'e ramo opu'ã vy mba'emo ojapo ha'e kuery pe.

Mateus 8.16,17; Lucas 4.40,41

32 Ka'aru kuaray oike ta ma jave Jesus-a py oguerua imba'eaxy va'e ha'e anha gui oiko axy va'e ha'e javi.

33 Tetã pygua kuery ha'e javi onhemboaty avi okẽ py.

34 Ha'e ramo heta omonguera opa marãguia mba'eaxy gui oiko axy va'e, heta avi anha oipe'a omboayvu e'ý re, mba'eta ha'e kuery oikuua mava'e paa.

Lucas 4.42-44

35 Ko'ë rai ramove Jesus opu'ã vy oo peteĩ henda tekao e'ýa oĩ va'e katy. Ha'e py ma onhembo'e oiny Nhanderuete pe.

36 Ha'e ramo Simão ma ou oeka vy, hupive ikuai va'e reve.

37 Ojou vy aipoe'i:

— Pavẽ rei ndereka.

38 Ha'e ramo Jesus aipoe'i:

— Amboae henda katy jaa kii rai'i tekao ikuai va'e ha'e javi rupi, ha'e py voi ayvu amombe'u aguã, mba'eta ha'e rami aguã ae aju — he'i.

39 Ha'e rami vy Galiléia yvy ha'e javi rupi oiko. Ha'e pygua onhembo'eaty ikuai va'e rupi omombe'u ayvu, oipe'a guive anha kuery.

Mateus 8.1-4; Lucas 5.12-16

40 Hexe onhemboja ouvy peteĩ lepra revegua. Ha'e vy guenapy'ã re oĩ reve ojerure:

— Lepra gui xeky'a'oxe vy xeky'a'o 'rãgue — he'i.

- ⁴¹ Jesus omboaxy vy okuave'ẽ, ha'e hexe opoko vy aipoe'i:
 — Xee ma roiky'a'oxe ae, ekuera ke — he'i.
- ⁴² Ha'e ramove lepra okanhymba ramo okuera.
- ⁴³ Ha'e gui ixupe ijayvuve imondovy
- ⁴⁴ vy aipoe'i:
 — Emombe'u eme avave rei pe. Va'eri tereo sacerdote pe ejexa uka, ha'e rekueraague re eme'ẽ mymba Moisés omboparaague rami, heta va'e kuery oikuua aguã — he'i.
- ⁴⁵ Ha'e rami teĩ ava va'e oo vy opa rupi omombe'u. Ha'e rami rire tetã ikuai va'e rupi nda'eveei Jesus ovaẽ aguã. Tekoa e'ŷa rupi rive oiko mombyry. Ha'e ramo opa rupi gui jogueru oĩa py.

2

Mateus 9.1-8; Lucas 5.17-26

- ¹ Kueve ma rire Jesus ovaẽ ju Cafarnaum py. Ha'e ramove opa rupi omombe'upaa oo py oĩa.
- ² Heta ete ou ramo okẽ rexei'i oĩ aguã voi nda'evei. Ha'e rã ha'e kuery pe ayvu omombe'u.
- ³ Oĩa py peteĩ oguata e'ŷ va'e oguerua. Irundy avakue ogueru teĩ
- ⁴ heta va'e kuery gui nda'evei hexe onhemboja aguã. Ha'e ramo oĩa áry oo ao'ia oipe'a vy oipe'aague rupi omboguejy imba'eaxy va'e hupa reve.
- ⁵ Ha'e kuery ojeroviaa Jesus oexa vy aipoe'i oguata e'ŷ va'e pe:
 — Xera'y, rejejavyague omboguepaa ma — he'i.
- ⁶ Ha'e gui kuaxia re nhombo'e va'ety kuery ha'e py oguapy okuapy va'e opy'a py aipoe'i:
⁷ — Mba'e re tu po rami ijayvu? Po ramigua ma ayvu vai. Mava'e tu ombogue kuaa joeko vaiague, peteĩ'i e'ŷ vy? Ha'e va'e ma Nhanderuete — he'i okuapy.
- ⁸ Ha'e kuery opẽxaa Jesus oikuua vy aipoe'i:
 — Mba'e re tu po rami ri pendeayvu pendepy'a py?
- ⁹ Mba'exa nda'u ndaxyive xeayvu aguã oguata e'ŷ va'e pe: “Rejejavyague omboguepaa ma” tyra pa “Epu'ã, eupi nderupa, ha'e tereo”, ha'e aguã?
- ¹⁰ Ha'e rami avi peikuaa aguã Ava ra'y ojeapo va'ekue ko yvy re joeko vaiague ombogue aguã voi ipo'aka va'e —
 Oguata e'ŷ va'e pe ju aipoe'i:
¹¹ — Xee aipoa'e ndevy: Epu'ã, eupi nderupa, ha'e tereo ndero katy — he'i.*
- ¹² Ha'e ramove opu'ã vy oupi ngupa ituiaty, ha'e oẽ ovy pavẽ oexaa gui.
 Ha'e kuery onhemondyipa vy ombojerovia Nhanderuete. Ha'e vy aipoe'i okuapy:
 — Guĩ ramigua jaexa va'e'ŷ teri aŷ peve.
- Mateus 9.9; Lucas 5.27,28*
- ¹³ Teigue ju Jesus oo yupa katy. Heta va'e kuery ha'e javi ou ovaexi aguã. Ha'e ramo ombo'e.
¹⁴ Oovea py oexa Alfeu ra'y Levi imposto opagaaty py oguapy oiny rã. Ha'e vy aipoe'i:
 — Eju xerupive — he'i. Ha'e ramove opu'ã vy oo hupive.
- Mateus 9.10-13; Lucas 5.29-32*
- ¹⁵ Ha'e gui Levi ro py Jesus oĩ mesa py. Hexeve ha'e hemimbo'e kuery reve heta ikuai imposto re nhombopaga va'ety ha'e heko vai va'ekue, mba'eta ha'e kuery ma Jesus rupive ikuai va'ety meme.
- ¹⁶ Ha'e rã fariseu kuery regua kuaxia re nhombo'e va'ety ikuai va'e ma oexa okuapy Jesus okaru rã heko vai va'ekue ha'e imposto re nhombopaga va'ety kuery reve. Ha'e rami vy oporandu hemimbo'e kuery pe:
 — Mba'e re tu Jesus okaru [ha'e oy'u] ri imposto re nhombopaga va'ety ha'e ojejavyapa va'e kuery reve?
- ¹⁷ Ha'e nunga Jesus oendu vy ombovai ha'e kuery pe:

* 2:11 João 10.37,38

— Hexaĩ va'e kuery ma ndoipotai 'rã poropoanoa, imba'eaxy va'e anho 'rã oipota. Ha'e rami vy xee ma heko porã va'e aenoĩ aguã e'ŷ aju, ha'e rã heko vai va'e anho.

Mateus 9.14-17; Lucas 5.33-39

¹⁸ João remimbo'e ha'e fariseu kuery okaru e'ŷ re jepi 'rã ikuai. Ha'e ramo amongue ou vy oporandu Jesus pe:

— Mba'e nunga rupi tu João remimbo'e ha'e fariseu remimbo'e kuery okaru e'ŷ re jepi ikuai, ha'e rã neremimbo'e kuery ma ha'e rami nda'ikuai?

¹⁹ Jesus ombovai:

— Omendaa py ha'eve nda'u oenoĩ mbyre kuery okaru e'ŷ re ikuai aguã, ha'e kuery reve omenda va'e oĩ teria ja? Any, omenda va'e oĩ teria ja ha'e kuery nda'ikuai 'rãe okaru e'ŷ re.

²⁰ Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e jave mae 'rã ha'e kuery okaru e'ŷ re ikuai.

²¹ — Avave rei ao ymague re nombojai 'rã ajukue pyau ra'ykue, mba'eta ombojaague omboi 'rã ao ymague gui. Ha'e ramo oxoroa tuvixave 'rã.

²² Ha'e avave rei hyru ymague py nomboyru 'rã vinho pyau. Ha'e rami e'ŷ rã ombovaipa 'rã hyru. Vinho ha'e hyru ivaipa 'rã. Ha'e rami 'rãgue py vinho pyau rã hyru pyau py 'rã omoi.

Mateus 12.1-8; Lucas 6.1-5

²³ Peteĩ sâbado ára py Jesus guemimbo'e kuery reve oaxa ovvy trigoty rupi. Hemimbo'e kuery ma ooa rupi oipo'o heravy hi'a.

²⁴ Ha'e ramo fariseu kuery ha'e nunga oexa vy aipoe'i ixupe:

— Ma'ë, mba'e re tu neremimbo'e kuery ojapo sâbado py nda'evei va'eri?

²⁵ Ombovai:

— Ndaperoayvui teve Davi ojexavai ha'e okaruxe vy oirũ kuery reve ojapo va'ekue?

²⁶ Mba'eta Nhanderuete ro py oike raka'e sacerdote yvateve va'e Abiatar oĩ jave py, ha'e vy ho'u mbojape Senhor renonde omoĩ mbyre, ha'e kuery ho'u aguã nda'evei va'eri, sacerdote pe anho ha'eve. Ngupive ikuai va'e pe voi ome'ë avi — he'i.

²⁷ Ha'e vy aipoe'ive ju:

— Sâbado ára ma avakue pe oejaaa raka'e, ha'e rã sâbado pe avakue oejaaa nda'e.

²⁸ Ha'e nunga rupi Ava ra'y ojeapo va'ekue ma sâbado ára re voi ipo'aka va'e.

3

Mateus 12.9-14; Lucas 6.6-11

¹ Teïgue ju Jesus ovaẽ onhembo'eaty py. Ha'e py oĩ peteĩ ava ipo rovai piru va'e.

² Ha'e py ikuai va'e ma Jesus re oexa pota okuapy, sâbado py rã pa nhomonguera ra'ea oexa aguã, ijayvu reixe vy.

³ Ha'e rã Jesus ma ava ipo piru va'e pe aipoe'i:

— Eju mbyte katy.

⁴ Ha'e gui ha'e kuery pe ranhe oporandu:

— Ha'eve ri nda'u sâbado ára py jajapo porã tyrã pa jajapo vai? Ha'eve ri nda'u joekove jaraa jepe, tyrã pa tove tomano? — he'i. Ha'e rami teĩ okyririmbä okuapy.

⁵ Ha'e ramo ipoxy ha'e iporiau rei reve oma'ë ijyvýry ikuai va'e re, ha'e kuery inhakã ratã ramo. Ha'e vy aipoe'i ava pe:

— Embo'yvi ndepo.

Ha'e ramo opo ombo'yvi vyve okuera.

⁶ Ha'e rã fariseu kuery ma ojepe'a vy hovai jogueroayvu Herodes-a katyguia kuery reve. Marã rami pa ojuka uka aguã re ijayvu okuapy.

Ye'ë rembe re heta omongueraague

⁷ Ha'e gui Jesus guemimbo'e kuery reve oje'oi yupi katy. Heta ete ou Galiléia gui, Judéia,

⁸ Jerusalém, Iduméia, Jordão yakã rovaigua, Tiro ha'e Sidom gui avi heta ete ou. Jesus mba'emo ojapoague omombe'ua rã oendu vy jogueru oña py.

- ⁹ Ha'e ramo guemimbo'e kuery pe Jesus aipoe'i peteī kanoā ogueru aguā ha'e oī aguā, heta va'e kuery omboty rei e'ŷ aguā.
- ¹⁰ Mba'eta heta omonguera ramo imba'eaxy va'e kuery nhomoanha-anha jogueruvy hexe opokoxe vy.*
- ¹¹ Nhe'ē vai reveguia voi oexa vy henonde guenapy'ā re oī vy ojapukai reve aipoe'i:
— Ndee ma Nhanderuete Ra'y.
- ¹² Ha'e ramo ha'e kuery pe Jesus ijayvu atā oikuaa uka e'ŷ aguā re.
Mateus 10.1-4; Lucas 6.12-16
- ¹³ Ha'e rire vyty oī va'e áry oē vy oenoī ha'e ae oipota va'e kuery. Ha'e ramo oīa py ha'e kuery ou.
- ¹⁴ Ha'e ramo doze oiporavo hexeve ikuai va'erā, ha'e gui ayvu omombe'u aguā katy omondouka aguā,
- ¹⁵ ha'e ipo'akaa rupi anha kuery oipe'a aguā guive.
- ¹⁶ Doze oiporavo va'ekue ma pova'e: Simão hery mboaerā Pedro omoī va'ekue,
- ¹⁷ ha'e gui Zebedeu ra'y kuery Tiago ha'e tyvy João. Ha'e va'e kuery reryrā omoī Boanerges, "Yapu va'e ra'y kuery" he'ia.
- ¹⁸ Ha'e gui André, Filipe, Bartolomeu, Mateus, Tomé, Alfeu ra'y Tiago, Tadeu, Simão Zelote,
- ¹⁹ ha'e ijopy uka nhemiarā Judas Iscariotes avi.
Mateus 12.22-32; Lucas 11.14-23
- ²⁰ Ha'e ramo ngoo katy ju oo. Ha'e ramive ma heta ete ju onhemboaty ramo neī okaru aguā ma voi nda'evei.
- ²¹ Jesus retarā kuery ha'e nunga oendu vy ou ogueraa aguā, mba'eta omombe'ua rā oendu na'inhakā porāveia rami.
- ²² Ha'e py ikuai avi kuaxia re nhombo'e va'ety kuery Jerusalém gui ou va'ekue. Ha'e va'e kuery aipoe'i:
— Hexe tu anha ruvixa Belzebu rima onhemonde. Anha po'akaa rupi ae rima oipe'a oikovy anha kuery — he'i.*
- ²³ Ha'e ramo Jesus oenoīmba vy ha'e kuery pe ijayvu mba'emo re ombojoja reve. Ha'e vy aipoe'i:
— Mba'exa 'rā tu anha ha'e ae onhemoxē?
- ²⁴ Mba'eta joa pygua meme joe opu'ā vy nhomomba 'rā.
- ²⁵ Peteī oo pygua meme joe opu'ā vy nhomomba avi 'rā.
- ²⁶ Ha'e rami ae avi anha kuery jomeme opu'ā vy joo rami e'ŷ ikuai va'e rire nda'ikuavei 'rāgue, okanhymba 'rā guive.
- ²⁷ — Avave rei ma ndoikei 'rā ava ojeroviave va'e ro py imba'e rei-rei re imonda aguā, oipokua ranhe e'ŷ re. Oipokua rire vy 'rāe oipe'apa.
- ²⁸ — Anhetē aipoa'e pendevy: Avakue ojejavague ha'e ijayvu vaiague omboguea aguā ma ha'eve meme.
- ²⁹ Ha'e rā Nhe'ē Ky'a E'ŷ re ijayvu vaia ague ma nombogueai 'rā, ha'e nunga jejavya ma omboguea va'erā e'ŷ — he'i.
- ³⁰ Po rami ijayvu mba'eta "Hexe anha onhemonde" he'i okuapy ramo.
Mateus 12.46-50; Lucas 8.19-21
- ³¹ Ha'e rami jave ovaē ixy, tyvy ha'e heindy kuery. Oka py ikuaiia py oenoī uka.
- ³² Ha'e ramo heta ijyvýry oguapy okuapy va'e aipoe'i ixupe:
— Pee oka py ma ndexy, nderyvy ha'e nereindy kuery ikuai. Nderekia vy je ou — he'i.
- ³³ Ha'e ramo ombovai:
— Marā ramigua tu ha'i ha'e xeryvy kuery?
- ³⁴ Ha'e oyvýry oguapy va'e kuery re oma'ē vy aipoe'i:
— Peva'e ae ma ha'i ha'e xeryvy kuery.

* 3:10 Mateus 4.23-25; Lucas 6.17-19 * 3:22 Lucas 12.10

³⁵ Mba'eta Nhanderuete oipotaa rami ojapo va'e ma ha'i, xeryvy ha'e xereindy kuery ikuai.*

4

Mateus 13.1-9; Lucas 8.4-8

¹ Teīgue ju Jesus nhombo'e oiny yupa yvýry. Ha'e py heta ikuai ramo peteī kanoā py oī. Yy rembe re heta va'e kuery ikuiai gui mombyry'i oguapy oiny. Ha'e rā heta va'e kuery ye'ē rembe re ikuai, ita ku'i reia py.

² Ha'e gui opa mba'e re ombo'e mba'emo re ombojoja vy. Ha'e vy aipoe'i:

³ — Pejapyxaka ke. Peteī ava oo mba'emo ra'yī moaī vy.

⁴ Ha'e va'e omoaī rā amongue ha'yīgue ho'a tape yvýry. Ha'e nunga ma guyra'i ou vy ho'upa.

⁵ Amboae ma itaty yvy mbovy'i reia rupi ho'a. Ha'e nungakue ma yvy re ndoike pukui rire henhoī voi'i.

⁶ Ha'e rami teī kuaray oē vy omombiru, ndapoi rā.

⁷ Amboae ma juu mbyte rupi ho'a rire juu yvate vy ojukapa. Ha'e ramo ndai'ai.

⁸ Ha'e rā amboae ma yvy porāa rupi ho'a. Ha'e nungakue ma henhoī porā, yvate ha'e hi'a porā guive. Trinta, sessenta, cem ha'yī peve oiko peteī-teī gui — he'i.

⁹ Ha'e vy aipoe'ive ju:

— Ijapyxa oendu aguā oī va'e toendu.

Mateus 13.10-23; Lucas 8.9-15

¹⁰ Jesus-a gui ojepe'apaa ma ramo hupive ikuai va'e hemimbo'e kuery doze va'e reve ou vy oporandu okuapy mba'emo re ombojoja vy ayvu omombe'u va'ekue re.

¹¹ Ha'e ramo ombovai:

— Pendevy pe Nhanderuete oikuua uka ipo'akaa py mba'emo oiko va'e ndoikuua ukai va'ekue. Ha'e rā amboae kuery ma mba'emo re ambojoja rupi anho'rā ambo'e,

¹² ha'e kuery oma'ē teī ndoexa kuaai aguā, ha'e oendu teī noendu kuaai aguā, ojeko rerova e'ŷ aguā ndoperdoaai aguā — he'i.*

¹³ Ha'e gui ma ha'e kuery pe oporandu:

— Napendu kuaai teve mba'e nunga re ambojoja vy pa pova'e ayvu amombe'uague? Mba'exa tu ha'vy pendu kuaa ta ayvu amombe'u va'e ha'e javi?

¹⁴ Ha'e gui mba'emo moaī ma omoaī ayvu.

¹⁵ Po rami ikuai tape yvýry omoaī mbyre rami: Ayvu oendu vy ojapyxaka teī Satanás ou vy ayvu oipe'a'rā ha'e kuery re oī va'ekue.

¹⁶ Ha'e gui po rami ma itaty reia rupi omoaī mbyre rami ikuai: Ayvu oendu vy ojopy vyvoi'rā ov'y'a reve.

¹⁷ Ha'e rami teī ndapo pukui va'e rami avi ikuai. Are'ŷ'i re ovaē'rā imoingo axyarā, ha'e ayvu porā káuxa ijavyky reiarā. Ha'e nunga oiko rā ayvu porā rupi ikuaiague gui ojepe'apa'rā.

¹⁸ Ha'e gui juu mbyte rupi omoaī mbyre rami ikuai va'e ma ayvu oendu avi,

¹⁹ teī ko yvy re mba'emo ikuai va'e re openave vy, peráta, opa marāgua ojou porāve vy noendu potavei'rā ayvu. Ha'e rami vy ndai'ai.

²⁰ Ha'e rā yvy porāa rupi omoaī mbyre rami ikuai va'e ma ayvu oendu vy ojopy'rā, hi'a porā'rā guive trinta, sessenta, cem peteī-teī gui.

Lucas 8.16-18

²¹ Ha'e gui aipoe'i avi:

— Tataendy nda'u nhamoendy vy jajao'i'rā ri ajaka py, ha'e e'ŷ vy tupa guýry'rā ri nhamoī? Any, imoiny oīaty py ae'rā jaupi imoiny.

²² Mba'eta ndoexa ukai pyre ojekuaapa'rā, ha'e onhomni mbyre oikuua ukapaa'rā.

²³ Ijapyxa oendu aguā oī va'e toendu — he'i.

²⁴ Ha'e kuery pe aipoe'ive ju:

* 3:35 Hebreus 2.11,12 * 4:12 Isaías 6.9-10

— Peikuaa pota porā ayvu pendu va'e re. Mba'eta joupe pejapoague rami ae 'rā ojapoa pendevy, ojapoave 'rā guive.

²⁵ Mba'eta mba'emo oguerekō va'e pe ome'ēave 'rā. Ha'e rā oguerekō e'ŷ va'e gui ma oipe'apaa 'rā oguerekō rei'i merami va'ekue.*

Mba'emo ra'yī re ombojojaague

²⁶ Aipoe'i avi:

— Nhanderuete po'akaa py oiko 'rā yvy re ava mba'emo ra'yīgue onhotŷ va'e rami.

²⁷ Mba'eta oke 'rā pyávy, ha'e rā ára py ovy 'rā. Ha'e ramia ja ha'yīgue henhoī ha'e yvate 'rā marā rami paa oikuua e'ŷ re.

²⁸ Yvy ae ojapo 'rā hi'a aguā rami. Jypy'i ma henhoī, ha'e gui ipoty, ha'e gui ma ha'yī omonyē 'rā hi'a.

²⁹ Hi'a ijajupa ma ramo ojaya 'rā kyxe py, mba'eta ovaē ma omono'ō aguā.

Mateus 13.31,32; Lucas 13.18,19

³⁰ Aipoe'ive ju:

— Marā ramigua nda'u Nhanderuete po'akaa py oiko va'e reve joo ramigua? Mba'e nunga re nda'u ha'eve ambojoja aguā?

³¹ Mostarda ra'yī re ha'eve, mba'eta ha'yīgue ikuai va'e gui ruxāve'i va'e 'rā nhanhotŷ.

³² Ha'e gui nhanhotŷ ma rire yvate 'rā, mba'emo nhanhotŷ va'e ha'e javi gui tuvixave 'rā guive. Hakā voi tuvixa ramo guyra'i oveve va'e ou vy kuaray'ā py ojapo 'rā guaityrā.

Mateus 13.34,35

³³ Heta ayvu ha'ekue ramigua omombe'u ha'e kuery pe mba'emo re ombojoja vy, ojapyxaka va'e kuery oendu kuaa peve.

³⁴ Ha'e rami avi mba'emo re ombojoja e'ŷ re nda'ijayvui ha'e kuery pe. Ha'e rā guemimbo'e kuery pe ma omombe'u porāve kuerei 'rā ha'e kuery ae'ia py.

Mateus 8.23-27; Lucas 8.22-25

³⁵ Ha'e va'e ára ka'aru'i Jesus aipoe'i ha'e kuery pe:

— Jaaxa yupa rovaigua re — he'i.

³⁶ Ha'e ramo heta va'e kuery omondoukapa ma vy ogueraa Jesus kanoā py oīague reve ae. Ha'e rā amboae kuery ma kanoā mboae py oo hakykue.

³⁷ Ha'e gui ou yvytu atā ramo kanoā re yai ojeapi-api. Ha'e ramo kanoā py yy tynyē ta ma.

³⁸ Ha'e rā Jesus ma kanoā revi katy oke oupy akāngyta áry. Ha'e ramo omomyī vy aipoe'i:
— Orembo'ea, ndee nerepenai va'e ty'y nhamanomba taa re?

³⁹ Ha'e ramo ovy vy ijayvu atā yvytu ha'e yai pe. Ha'e vy aipoe'i:

— Epytu'u, ekyrirī ke — he'i. Ha'e ramove yvytu optytu'u, yai okyrirīmba guive.

⁴⁰ Ha'e gui ma aipoe'i:

— Mba'e re tu guī rami pekyjepa? Mba'e re tu noī pejeroviaa? — he'i.

⁴¹ Ha'e ramo ha'e kuery onhemondyipa vy joupe-upē ju aipoe'i:

— Marā ramigua tu peva'e ava, yvytu ha'e ye'ē voi onhe'ē rendu aguā?

5

Mateus 8.28-33; Lucas 8.26-34

¹ Ha'e rire yupa rovaigua re ovaē Gerasa pygua kuery yvy re.

² Oguejy ramove yvyra rupa oī va'e gui ovaexī ouvy peteī ava nhe'ē vai onhemondea va'e.

³ Ha'e va'e ma itakua rupi tema oiko. Neī corrente py teī avave rei nomombytaai.

⁴ Mba'eta ojopya vy ipy rupi corrente py ojokuaa teī omondo kuerei 'rā, ipy jokoa ferro guigua voi omondopa. Avave rei nda'ipo'akaa hexe.

⁵ Pytū nhavō ha'e ára pukukue re ojapukai oikovy itakua rupi, yvyty áry guive. Onheungapa rei oikovy ita re.

⁶ Ha'e gui ma mombyry gui oexa Jesus. Ha'e vy onha ouvy vy omboete.

⁷ Ojapukai reve aipoe'i:

* 4:25 Mateus 13.10-15; Lucas 8.18; Tiago 1.22-25

— Nhanderuete Yvate ete va'e Ra'y Jesus, mba'e tu ndee rerekoxereve? Nhanderuete rery rupi ajerure xemoingo axy e'ŷ aguā — he'i,

⁸ mba'eta nhe'ē vai pe Jesus aipoe'i ae ma: “Ejepe'a ke upe va'e ava gui.”

⁹ Ha'e gui Jesus oporandu:

— Marā rami tu nderery?

Ombovai:

— Xerery ma Heta va'e, mba'eta heta orekuai — he'i.

¹⁰ Ha'e vy ojerure ha'e va'e yvy gui oipe'a e'ŷ aguā.

¹¹ Ha'e'i py heta ikuai poryko yvyty áry okaruaty py.

¹² Ha'e ramo nhe'ē vai kuery aipoe'i Jesus pe:

— Oremondouka 'rāgue poryko kuery katy ha'e kuery re ju roī aguā — he'i.

¹³ Ha'e ramo Jesus omondouka. Ha'e gui nhe'ē vai kuery ojepe'a vy poryko re ju onhemonde. Dois mil poryko rānda'u ikuai. Ha'e gui poryko kuery onhemondyipa vy yvy'ā guy katy onha oje'ovy, ha'e yy py ho'apa vy oy'upa.

¹⁴ Poryko re opena va'e kuery onhamba jogueravy tetā katy, ha'e mba'ety rupi ikuai va'e kuery pe guive omombe'u aguā.

Mateus 8.34; Lucas 8.35-39

Ha'e ramo ha'e pygua kuery oupa oexa aguā oiko va'ekue.

¹⁵ Jesus oĩa py ha'e kuery ovaẽ vy oexa ava anha kuery onhemondeague va'e onhemonde ha'e hi'arandua oĩ porā ju ramo. Ha'e rami vy ndaekorāvei rei okuapy.

¹⁶ Ha'e nunga hexaare kuery omombe'upa ava anha onhemondea va'e re oiko va'ekue, ha'e poryko re guive.

¹⁷ Ha'e rami vy Jesus pe ojerure okuapy ha'e kuery rekoia gui ojepe'a aguā.

¹⁸ Ha'e ramo kanoã py Jesus oĩ ramo ava anha onhemondeague va'e ojerure hupive oo aguā.

¹⁹ Ha'e rami teĩ Jesus ndogueraai. Ha'e vy aipoe'i:

— Tereo ndero katy, ha'e neretarā kuery pe emombe'u Senhor nemboaxya rupi ojapo va'ekue ha'e javi — he'i.

²⁰ Ha'e ramo oo vy Decápolis tetā rupi omboypy omombe'u aguā ixupe Jesus ojapo va'ekue ha'e javi. Ha'e ramo onhemondyi pavē.

Mateus 9.18,19; Lucas 8.40-42

²¹ Yy rovaigua re kanoã py Jesus oo ju ramo heta ete oje'oi avi ye'ē rembe re oĩa katy.

²² Ovaẽ avi peteĩ ava Jairo hery va'e, onhembo'eaty pygua ruvixa. Ha'e va'e ma oexa Jesus vyve guenapy'ā re oĩ henonde.

²³ Ha'e vy ojerure ete:

— Xerajy'i omano rai'i ma oupy. Eju ke hexe epoko, okuera vy oikove nho aguā — he'i.

²⁴ Ha'e ramo Jesus oo hexeve.

Mateus 9.20-22; Lucas 8.43-48

Heta va'e kuery omboity rei oje'ovy hupive.

²⁵ Oiko avi peteĩ kunha doze ma'etŷ re ma gueko re riae oiko va'e.

²⁶ Poropoanoa kuery opa marā oguereko va'ekue, ha'e kuery pe kunha va'e mba'emo oguereko va'ekue ha'e javi ma ome'ē teĩ ndokuerai. Ha'e rami 'rāgue py nda'eveive tema ovy.

²⁷ Jesus mba'emo ojapo oikovya omombe'ua rā kunha va'e oendu vy hakykue gui ou. Heta va'e mbyte gui opoko ijao re,

²⁸ mba'eta aipoe'i vy: “Ijao re rive apoko teĩ akuera 'rā” he'i.

²⁹ Ha'e ramove imba'eaxy optyu'u vyvoi, guete re oendu ombo'eaxy gui okuera ma ra'ea.

³⁰ Ha'e gui Jesus oikuua vyvoi ixugui ipo'akaa oẽ rā. Ha'e vy heta mbyte pyve oyere vy oporandu:

— Mava'e tu xere opoko?

³¹ Ha'e ramo hemimbo'e kuery ombovai:

— Mba'e re tu teta nemboty rei va'eri “Mava'e tu xere opoko?” 're?

³² Ha'e gui Jesus oyvýry rupi oma'ē ho'amy, mava'e pa hexe opoko va'ekue oexa aguā.

³³ Ha'e ramo kunha va'e ma okueraague oikuua vy okyje va'eri oryryipa reve ou. Henonde guenapy'ã re oĩ vy omombe'u oiko va'ekue.

³⁴ Ha'e ramo aipoe'i:

— Xerajy, rejeroviaa ndereraa jepe. Tereo porã ke, tanemba'eaxyve eme.

Mateus 9.23-26; Lucas 8.49-56

³⁵ Jesus ijayvu teri ho'amy reve amongue ou onhembo'eaty pygua ruvixa ro gui. Ha'e vy tuu pe aipoe'i okuapy:

— Nderajy omano ma. Mba'erã tu remoangeko teri porombo'ea?

³⁶ Ha'e rã Jesus ma ha'e nunga ayvu re nopenai. Ha'e vy onhembo'eaty pygua ruvixa pe aipoe'i:

— Enhemondyi eme, ejerovia tema — he'i.

³⁷ Avave rei ndogueraai ngupive, Pedro, Tiago ha'e tyvy João e'ŷ vy.

³⁸ Onhembo'eaty pygua ruvixa ro py Jesus ovaẽ vy oendu opa marã onhendu va'e, ojae'o ha'e haxẽ-axẽ va'e guive.

³⁹ Ha'e oike vy aipoe'i:

— Mba'e re tu opa marã penhendu pejae'o vy? Kunha'i nomanoi, oke rima — he'i.

⁴⁰ Ha'e ramo ojojai rei okuapy. Ha'e gui omoẽ ukapa ma rire kunha'i va'e ituia py ogueroike tuu, ixy ha'e ngupive ogueraa va'ekue.

⁴¹ Ipo re ojopy vy aipoe'i:

— Talitá cumi — he'i, “Kunha'i, evy ke”, he'ia.

⁴² Ha'e ramove kunha'i va'e opu'ã vy oguata. Doze ma'etý ma oguereko. Ha'e ramo onhemondyi pavẽ.

⁴³ Ha'e rã Jesus aipoe'i avave rei pe omombe'u e'ŷ aguã. Ha'e gui omongaru uka kunha'i va'e.

6

Mateus 13.53-58; Lucas 4.16-30

¹ Ha'e gui Jesus guekoa katy oo guemimbo'e kuery reve.

² Sâbado ovaẽ ramo nhombo'e onhembo'eaty py.

Nhombo'e rã heta oendu vy onhemondypa, ha'e vy aipoe'i:

— Magui nda'u ha'e rami oikuua? Mba'exa tu ha'e ramigua 'arandu ixupe ome'ëa? Mba'exa nda'u mba'emo porã ojapo opo py?

³ Peva'e e'ŷ ri nda'u oo apoa, ha'e Maria memby, Tiago ryke'y, José, Judas ha'e Simão ryke'y? Ha'e apy nhanembyte rupi e'ŷ teve ikuai heindy kuery? — he'i okuapy. Ha'e vy ndojou porãi.*

⁴ Ha'e ramo Jesus aipoe'i:

— Neĩ peteĩve profeta nda'ipoi hekao pygua kuery ae omovaẽ porã va'erã — he'i.

⁵ Ha'e rami rã ha'e py nda'evei mba'eve ojapo aguã opo'akaa rupi. Mbovy'i re opo omoõ vy omonguera mba'eaxygui.

⁶ Ha'e kuery ndojeroviaia oexa vy onhemondyi. Ha'e rami vy tekao ha'e katy rai-rai'i oĩ va'e rupi oo nhombo'e aguã.

Mateus 10.5-15; Lucas 9.1-6

⁷ Doze guemimbo'e kuery Jesus oenoĩ vy ombopo'aka nhe'ë vai re. Ha'e vy mokõ-mokoõ omondouka.

⁸ Ha'e kuery pe aipoe'i:

— Mba'eve peraa eme tape rupi peguataa rupi, peteĩ popoka e'ŷ vy, neĩ mbojape, voko, neĩ peráta nda'evei.

⁹ Pendepy regua pemoõ aguã ha'eve teĩ peraa eme mokoõ kamixa.

¹⁰ Ha'e gui peteĩ oo py pevaëa py ae 'rã pepyta ha'e va'e tekao gui peove peve.

¹¹ Ha'e rã tekao py napenemovaëai ha'e pendeayvua noendu potaai ramo pejep'e a 'rã ha'e gui. Ha'e pendepy regua gui peity-ity 'rã yvy ku'i, ha'e kuery pe peikuaa uka aguã peja peovy — he'i.*

* 6:3 João 1.11 * 6:11 Atos 13.50,51; 18.6

¹² Ha'e gui ma hemimbo'e kuery oje'oi vy heta va'e kuery pe omombe'u ojeko rerova aguã.

¹³ Oipe'a reta anha kuery, ha'e heta avi imba'eaxy va'e omonguera azeite oikyty reve.

Mateus 14.1-12; Lucas 9.7-9

¹⁴ Jesus re opa rupi ima'endu'aa ramo huvixave Herodes avi oendu. Ha'e va'e pe amongue aipoe'i avi:

— João Batista rima omanoague gui onhemboete ju. Ha'e vy 'rãe mba'emo ojapo oikovy opo'akaa rupi.

¹⁵ Amboae ju aipoe'i ixupe:

— Elias rima — he'i.

Ha'e gui amboae ju aipoe'i:

— Peteĩ profeta oiko, yma oiko va'ekue ramigua rima — he'i.

¹⁶ Ha'e rã Herodes ma ha'e nunga oendu vy aipoe'i:

— João akã xee ae ajaya uka va'ekue ri nhi'ã onhemboete ju — he'i.

¹⁷ Mba'eta Herodes ae João ojopy vy nhuã py ojokua uka va'ekue guyvy Filipe ra'yxy Herodias káuxa, hexe omenda rire.

¹⁸ Mba'eta ixupe João “Nda'evei nderyvy ra'yxy rerekaguã” he'i ramo.

¹⁹ Ha'e nunga rupi Herodias ndoayvui vy ojukaxe teĩ nda'evei,

²⁰ mba'eta João pe Herodes “Heko porã ha'e iky'a e'ŷ va'e” he'i vy okyje. Ha'e rami vy opena porã. Ijayvua oendu vy ndoikuuai rei teĩ ojapyxaka porã.

²¹ Peteĩ ára ta'yxy oipotaa rami oiko. Herodes ituiague ára py ngaru ojapo guembiguai kuery yvatekueve reve, xondaro ruvixa ha'e Galiléia pygua huvixa kuery pe guive.

²² Ha'e kuery ikuiai py Herodias memby oike vy ojeroky ramo Herodes ha'e oenoĩ uka va'ekue oexa vy ojou porã okuapy. Ha'e ramo kunhataĩ pe huvixa aipoe'i:

— Ejerure reipota va'e re, xee ame'ẽ 'rã.

²³ Oura guive:

— Mba'emo areko va'e mbyte rupi peve rejerure teĩ ame'ẽ 'rã — he'i.

²⁴ Ha'e ramo kunhataĩ oo vy oxy pe ranhe oporandu:

— Mba'e nunga re tu tajerure?

Ixy ombovai:

— João Batista akãgue re — he'i.

²⁵ Ha'e ramove huvixa oña py ju ou pojava vy aipoe'i:

— Aipota aŷ'i ma voi xevy reme'ẽ João Batista akãgue peteĩ hy'a py — he'i.

²⁶ Ha'e ramo huvixa iporiau vaipa, teĩ mesa py hexeve ikuai va'e oendua py oura rire nda'evei ndojapoi aguã.

²⁷ Ha'e rami vy ijukaarã omondouka vy ijayvu João akãgue ogueru aguã. Ha'e ramo nhuã py oo vy ojaya inhakã,

²⁸ ha'e peteĩ hy'a py ogueru. Kunhataĩ pe ome'ẽ rã oxy pe ju ogueraa.

²⁹ João remimbo'e kuery ha'e nunga oendu vy ou. Hetekue ogueraa vy onhono porã huparã ojapo pyre py.

Mateus 14.13-21; Lucas 9.10-17; João 6.1-14

³⁰ Ha'e gui Jesus oña py apóstolo kuery ojevypa ju vy ixupe omombe'u ojapo va'ekue ha'e nhombo'eague ha'e javi.

³¹ Ha'e ramo aipoe'i ha'e kuery pe:

— Jaje'oi nhande kuery ae'i japytu'u ranhe peteĩ henda tekao e'ŷa py — he'i, mba'eta heta oo ha'e ou va'e gui ha'e kuery okaru aguã ma voi nda'evei.

³² Ha'e rami vy ha'e kuery ae'i kanoã py oje'oi tekao e'ŷa katy.

³³ Ha'e kuery oje'oi rã heta oexa. Oexa kuaa vy tetã ikuai va'e ha'e javi gui onha jogueravy ha'e katy. Yvy rupi oo vy ha'e kuery ranhe ovaẽmba.

³⁴ Ha'e ramo kanoã gui Jesus oguejy vyve heta ikuai va'e oexa. Ha'e vy omboaxy, mba'eta vexa'i ija e'ŷ va'e rami ikuai. Ha'e vy opa mba'e re ombo'e oiny.

³⁵ Ka'aru'i jave Jesus-a py hemimbo'e kuery ou vy aipoe'i:

— Apy ma tekao e'ŷa py nhandekuai, ka'aru ete ma guive.

³⁶ Emondoukapa ha'vy imba'ety ha'e kii rai'i tekao ikuai va'e rupi, ho'u va'erā ojogua aguā — he'i okuapy.

³⁷ Ha'e ramo aipoe'i ha'e kuery pe:
— Peē ae peme'ẽ ho'u va'erā.
Ha'e rami rā ha'e kuery ombovai:
— Ore kuery pa toroo duzentos ára repy re torojogua mbojape ha'e kuery ho'u aguā?
— he'i.

³⁸ Ha'e ramo aipoe'i:
— Mbovy mbojape ha'vy perek? Tapeo pexa.
Ha'e kuery oikuaa vy ombovai:
— Peteī nhiruī mbojape roguereko, mokoī pira'i guive — he'i.
³⁹ Ha'e ramo nhuū hovy reia oī va'e py Jesus omboguapy ukapa peteī henda-endā py.
⁴⁰ Ha'ekue rami omboja'o peteī-teī henda py cem, ha'e rā amboae py ma cinqüenta ikuai aguā rami.

⁴¹ Ha'e gui Jesus ma peteī nhiruīve mbojape ha'e mokoīve pira ojopy vy yva re oma'ẽ reve oguerovy'a Nhanderuete. Oipe'ã-pe'ã'i vy ome'ẽ guemimbo'e kuery pe ombojoa aguā, mokoīve pira'i guive omboja'o heta va'e kuery pe.

⁴² Ha'e javive okaru ma vy hevyatāmba.
⁴³ Ha'e gui doze varai ju omono'õ mbojape ra'ykue ha'e pira rembyrekue.
⁴⁴ Mbojape re avakue okaru va'ekue ma cinco mil.

Mateus 14.22-33; João 6.16-21

⁴⁵ Ha'e rire'ive Jesus omondouka guemimbo'e kuery kanoā py ha'e kuery ranhe oaxa aguā yupa rovaigua re Betsaida katy, heta va'e kuery ha'e omondoukapa peve.

⁴⁶ Omondoukapa ma vy yvyty áry oẽ ov yonhembo'e aguā.
⁴⁷ Pytū'i jave yy mbyte rupi kanoā oo oiny jave Jesus ma yvyty áry ha'e ae'i oī.

⁴⁸ Hemimbo'e kuery renonde katy gui yvytu oipeju ramo ndopykui porāvei rā Jesus oexa. Ha'e gui ko'ẽ rai jave mae ha'e kuerya katy oo. Yy áry rupi oguata ouvy, ha'e kuery renonde oaxa ta merami.

⁴⁹ Yy áry rupi oguata ouvy rā ha'e kuery oexa vy “!Águe po” he'i vy ojapukai okuapy.
⁵⁰ Mba'eta ha'e kuery Jesus oexa vy ndaekorāveipa.

Ha'e ramo ha'e kuery pe ijayvu vy aipoe'i:
— Pendepy'a guaxu ke, xee rima. Pekyje eme — he'i.

⁵¹ Ha'e vy ha'e kuery reve kanoā py oī ramove yvytu optyu'u. Ha'e ramo onhemondiyipa okuapy,

⁵² mba'eta inhakā ratā vy ndoikuaai teri neī opo'akaa rupi mbojape omboetaveague.

Mateus 14.34-36

⁵³ Yy rovaigua re oaxa vy Genesaré yvy re ovaē. Ha'e py ma kanoā omboja.

⁵⁴ Kanoā gui ha'e kuery oẽmba ramove heta va'e kuery oexa kuaa okuapy Jesus.

⁵⁵ Ha'e rami vy tekao ikuai va'e ha'e javi rupi onha-onha vy ogueru imba'eaxy va'e kuery. Hupa reve ogueru Jesus oĩa oendua katy.

⁵⁶ Ha'e gui ma tekao py Jesus ovaēa py rei, tetā e'ŷ vy imba'ety va'e kuerya py, e'ŷ vy tetā mbyte py mba'e ovaē rā oguerua 'rā imba'eaxy va'e kuery. Ovaē aguā py omoī vy ixupe ojerure ijao apy'i re ri jepe opoko aguā. Ha'e ramo opoko va'e ha'e javi okuera.

Mateus 15.1-20

¹ Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue.

² Ha'e vy oexa rā hemimbo'e kuery regua ojepoei e'ŷ re okaru.

³ (Ha'e rā fariseu ha'e judeu kuery ha'e javi ma ymagua kuery nhombo'eague rami vy ojepoei ma vy mae 'rā okaru.

⁴ Tetā mbyte gui ovaẽ vy voi onhemoakŷ ranhe 'rā okaru aguã. Ha'e rami vy hekorā oeja pyre heta oguerekō mba'emo ojoi aguã: karo, yryru, oja overa va'e guigua, [ha'e tupa guive].)

⁵ Ha'e nunga rupi fariseu ha'e kuaxia re nhombo'e va'ety kuery oporandu Jesus pe:
— Mba'e re tu neremimbo'e kuery ma ymagua kuery nhombo'eague rami nda'ikuai?
Mba'etaojepoei e'ŷ re okaru.

⁶ Ha'e ramo ombovai:
— Pendeko porā merami rive va'e, peẽ kuery reko re profeta Isaías ha'evea rami ijayvu raka'e. Ha'e vy ombopara imoiny: "Kova'e kuery ma ojuru py rive xemboete, ha'e rā ipy'a ma mombyrry xegui.

⁷ Avakue ojapo uka va'e re nhombo'e vy xembojerovia merami rive", he'i va'ekue.*

⁸ Ha'e rami vy peẽ kuery Nhanderuete ojapo uka va'ekue ndapejapoi pekuapy, avakue ojapo uka va'e rive pejapoxeve vy — he'i.

⁹ Aipoe'ive ju:
— Peẽ kuery opa marā pemboyke Nhanderuete ojapo uka va'ekue, pende ae reko rami rive pendekuai aguã.

¹⁰ Mba'eta Moisés aipoe'i: "Remboete 'rā nderu ha'e ndexy. Ha'e rā nguu ha'e oxy re ijayvu vai va'e pejuka 'rā", he'i va'ekue.*

¹¹ Ha'e rā peẽ ma aipopeje: "Nguu e'ŷ vy oxy pe amongue aipoe'i 'rā: 'Mba'emo pêvy peguarā areko va'ekue ma Nhanderuete pe ju amboaxa', he'i teĩ ha'eve", peje.

¹² Ha'e rami vy tuu ha'e ixy naapeipytyvõ ukai.

¹³ Ha'e rami py pemboyke Nhanderuete ayvu, pendereko rami rive penhomingo vy. Peẽ kuery ha'e rami anho penhombo'e. Oĩ retave ju ha'e va'e ramigua pejapo va'e — he'i.

¹⁴ Teǐgue ju heta va'e kuery oenoĩ vy aipoe'i:
— Pejapyxaka pavẽ peikuaa aguã.

¹⁵ Avakue ryepy py mba'emo oike va'e'ŷ omboeko ky'a. Avakue gui oẽ va'e anho 'rā omboeko ky'a.

¹⁶ [Ijapyxa oendu aguã oĩ va'e toendu] — he'i.

¹⁷ Ha'e gui heta va'e kuery oeja vy oike opy. Ha'e ramo hemimbo'e kuery ou vy ojerure mba'emo re ombojojaague omombe'u porâve aguã re.

¹⁸ Ha'e ramo ombovai:
— Peẽ voi teve napendu kuaai, ha'e ndapeikuaai? Avakue ryepy py oike va'e'ŷ 'rā omboeko ky'a,

¹⁹ mba'eta ndoikei 'rā ikuraxõ re. Hye rupi oaxa vy oẽ ju 'rā hete gui — he'i. Ha'e rami vy tembi'u ma guive rā nanhanemboeko ky'ai 'rāa re ijayvu.

²⁰ Aipoe'i avi:
— Mba'emo avakue gui oẽ va'e anho 'rā omboeko ky'a.

²¹ Avakue py'a gui ae 'rā oẽ imboeko ky'aarā: opa marā rei oikoxea, imondaxeal, jojukaxea, itavy reixeal,

²² nhomba'e re hakāte'ŷa, ojapo vaixea, nhombotavypaxea, ndojekokoia, joapo vaixea, ijayvu vaixea, onhembovate reixeal ha'e na'inhakā porâveia rupi oikoa.

²³ Ikuraxõ gui ha'e va'e nunga oẽ va'e anho 'rā imboeko ky'aarā oĩ.

Mateus 15.21-28

²⁴ Jesus opu'ã vy oo ha'e gui Tiro [ha'e Sidom] yvy katy. Peteĩ oo py ovaẽ vy oĩa ndoikuua ukaxeal avave rei pe teĩ nda'evei onhemi aguã.

²⁵ Mba'eta peteĩ kunha ou imembry re nhe'ẽ vai onhemondea va'e. Jesus re ima'endu'aa rā oendu vy ou, ha'e vy guenapy'ã re oĩ ipy yvýry.

²⁶ Ha'e va'e kunha ma Siro-fenícia pygua, ha'e grego ayvu py ijayvu va'eri ojerure oiny imembry gui anha oipe'a aguã.

²⁷ Ha'e ramo Jesus aipoe'i:

* 7:7 Isaías 29.13 * 7:10 Éxodo 20.12, 21.17; Levítico 20.9; Deuteronômio 5.16

— Tove ta'y kuery ranhe tokarupa. Nda'evei mbojape jajopy aguã ta'y kuery po gui, jagua'i ikuai va'e pe nhamombo aguã.*

²⁸ Kunha va'e ombovai:

— Tá, Senhor. Ha'e rami avi jagua'i teĩ mesa guýry ho'u 'rã kyrĩ va'e rembi'u kure — he'i.

²⁹ Ha'e ramo Jesus aipoe'i:

— Po rami ri rembovai rire tereo ju. Nememby gui anha ojepe'a ma — he'i.

³⁰ Ha'e ramo ngoo py ovaẽ vy ojou kunha'i va'e tupu rupi itui porã rã, ixugui anha ojepe'a ma ra'e.

Noendui ha'e nda'ijayvui va'e omongueraague

³¹ Tiro yvy gui ojepe'a vy oaxa ov y Sidom rupi. Galiléia yupa peve oo Decápolis yvy rupi.

³² Ha'e ramo oĩa py peteĩ oguerua noendui ha'e nda'ijayvui va'e. Ha'e vy ojerure hexe opoko aguã.*

³³ Ha'e ramo heta va'e mbyte gui Jesus ogueraa ranhe mombyry'i ha'e ae'ia py. Ha'e vy ijapyxa py opo'ë, inhapekũ re opoko guive guendyry reve.

³⁴ Yva re oma'ë vy ipytuë atã. Ha'e vy aipoe'i:

— Efatá — he'i, “Ejepe'a ke” he'ia.

³⁵ Ha'e ramo oendu xapy'a, na'inhapekũ ratãvei vyvoi guive. Ha'e vy ijayvu porã.

³⁶ Ha'e gui ha'e kuery pe aipoe'i avave rei pe omombe'u e'ë aguã. Ha'e rami teĩ omongogetavea ramive ma omombe'uve tema oje'oivy.

³⁷ Mba'eta onhemondyipa vy aipoe'i okuapy:

— Ha'evea rami meme ojapo. Mba'eta ojapo nda'ijayvui va'ekue ijayvu, ha'e noendui va'ekue oendu ju aguã rami.

8

Mateus 15.32-39

¹ Ha'e javet heta va'e kuery ono'õa py teĩgue ju ndoguerekoi ho'u va'erã. Ha'e ramo Jesus guemimbo'e kuery oenoĩ vy aipoe'i:

² — Xee amboaxy kova'e kuery, mba'eta mboapy ára ma xerupive ikuai rire mba'eve ndoguerekovei ho'u va'erã.

³ Okaru e'ë re hoo katy amondouka ramo ho'apa 'rã tape rupi, mombyry gui ou rire — he'i.

⁴ Ha'e rã hemimbo'e kuery aipoe'i:

— Apy tekao e'ëa py magui 'rã tu jajou mbojape kova'e kuery peguarã?

⁵ Jesus oporandu:

— Mbovy tu mbojape perekó?

Ha'e kuery ombovai:

— Sete — he'i.

⁶ Ha'e gui Jesus aipoe'i heta va'e kuery oguapy aguã yvy py, ha'e vy ojopy sete-ve mbojape. Nhanderuete oguerovy'a vy oipe'ë-pe'ë'i, ha'e guemimbo'e kuery pe ome'ë heta va'e kuery pe ju omboja'o-ja'o aguã.

⁷ Oguereko avi amongue pira'i. Ha'e gui oguerovy'a vy aipoe'i ha'e va'e voi ombojoja aguã.

⁸ Ha'e kuery okaru ma vy hevyatãmba. Ho'u va'ekue rembyre ma sete ajaka py omboyu.

⁹ Quatro mil avakue rãnda'u ikuai. Ha'e gui mae ma Jesus omondoukapa.

¹⁰ Ha'e rire'ive guemimbo'e kuery reve kanoã py oï vy Dalmanuta yvy katy ju oje'oi.

Mateus 16.1-4

¹¹ Jesus oĩa py fariseu kuery jogueru vy hexeve ijayvu ete okuapy. Ha'e rami vy oeko a'ë vy ojerure yva guigua hexa pyrã ojapo aguã re.

* ^{7:27} Judeu e'ë va'e kuery pe judeu kuery “Jagua kuery” he'i. Ha'e rami Jesus ijayvu ojerovia ete paa oexaxe vy. * ^{7:32} Mateus 15.29-31

- ¹² Ha'e ramo Jesus opy'apy guive ipytuē atā vy aipoe'i:
 — Mba'e re tu peē kuery pejerure yva guigua hexa pyrā re? Anhetē aipoa'e pēvy:
 Aŷguia kuery pe ndojapoai 'rā peteīve — he'i.
- ¹³ Ha'e gui ojepe'a vy oī ju kanoā py, ha'e yy rovaigua re oo.
Mateus 16.5-12
- ¹⁴ Hupive hemimbo'e kuery oo vy hexarai mbojape ogueraa aguā. Peteī'i mbojape
 anho oguerekō kanoā py.
- ¹⁵ Jesus aipoe'i:
 — Ma'ē, penheangu ke fariseu kuery ha'e Herodes regua trigo mbovua gui — he'i.
- ¹⁶ Ha'e ramo ha'e kuery aipoe'i jomeme:
 — Po rami ijayvu mbojape ndoroguerui rā — he'i.
- ¹⁷ Ha'e nunga Jesus oikuua vy oporandu:
 — Mba'e re tu pendeayvu mbojape ndaperekoia re? Peneakā ratā vy napendu kuaai,
 neī ndapeikuai teri teve?
- ¹⁸ Penderexa oī va'eri ndapexai teve, pendeapyxa voi oī va'eri napendui teve? Napen-
 ema'endu'ai teve
- ¹⁹ cinco mil pe peteī nhiruī mbojape aipe'ā-pe'ā'i jave mbovy varai renyē tu ha'ykue
 pemono'ō raka'e?
- Ha'e kuery ombovai:
 — Doze — he'i okuapy.
- ²⁰ — Ha'vy quattro mil pe sete mbojape aipe'ā-pe'ā'i jave mbovy ajaka renyē tu ha'ykue
 pemono'ō?
- Ha'e kuery
 — Sete — he'i okuapy.
- ²¹ Ha'e ramo Jesus aipoe'i:
 — Ndapeikuai teri teve?
- Betsaida py ára revegua e'ŷ omongueraague*
- ²² Ha'e gui ma Betsaida py ovaē. Ha'e ramo ixupe peteī ára revegua e'ŷ herua vy
 ojerurea opoko aguā re.
- ²³ Ha'e ramo ára revegua e'ŷ po re Jesus ojopy vy oguerojepe'a tekao gui. Ha'e gui hexa
 re oikyty guendyry, ha'e hexe opoko vy oporandu:
 — Rexa ma pa mba'emo?
- ²⁴ Ha'e rā oma'ē vy ombovai:
 — Aexa avakue va'eri yvyra merami oguata rā — he'i.
- ²⁵ Ha'e ramo opoko ju. Ha'e ramo okuera vy opa mba'e oexa porā.
- ²⁶ Ha'e vy Jesus aipoe'i imondovy:
 — Tereo ke ndero py tekao py revaē e'ŷ re.
Mateus 16.13-20; Lucas 9.18-21
- ²⁷ Ha'e rire Jesus guemimbo'e kuery ogueraa Cesaréia de Filipe regua tekao ikuai va'e
 katy. Tape rupi ooa rupi oporandu ha'e kuery pe:
 — Marā ramigua aikoa rami tu heta va'e kuery oikuua?
- ²⁸ Ha'e kuery ombovai:
 — João Batista. Ha'e rā amboae kuery ma “Elias” he'i. Ha'e rā amboae kuery ju ma
 “Peteī profeta” he'i 'rā ndevy — he'i okuapy.
- ²⁹ Ha'e ramo oporanduve ju:
 — Ha'vy peē kuery, marā ramigua aikoa pa peē peikuaa?
- Pedro ombovai:
 — Ndee ma Cristo — he'i.
- ³⁰ Ha'e ramo Jesus aipoe'i avave rei pe nomombe'ui ranhe aguā.
Mateus 16.21-23; Lucas 9.22
- ³¹ Ha'e gui omboypy po rami ombo'e aguā:

— Ava ra'y ojeapo va'ekue oiko axy 'rāe opa mba'e py. Hexe opu'ā rei 'rā nhomongeta va'ety, sacerdote yvatekueve va'e ha'e kuaxia re nhombo'e va'ety kuery. Ojukaa 'rā. Ha'e rire mboapy araa py onhemboete ju 'rā.

³² Ha'e rami Jesus ijayvu vy onhemombe'u porā. Ha'e ramo Pedro ha'e ae'ia py oenoī vy ndojou porāia rami ijayvu.

³³ Ha'e ramo Jesus ojere vy guemimbo'e kuery ikuiaia katy ju oma'ē. Ha'e vy Pedro pe ijayvu vy aipoe'i:

— Satanás, ejep'e a ke xea gui, mba'eta ndee ma Nhanderuete guigua ndereikuuai, avakue guigua anho.

Mateus 16.24-28; Lucas 9.23-27

³⁴ Ha'e gui ma guemimbo'e kuery oenoīmba, heta va'e kuery guive. Ha'e kuery pe aipoe'i:

— Xerupive oikoxe va'e taexarai ojegui ae, togueraa ojeupagua kuruxu, ha'e gui tou xerakykue.

³⁵ Mba'eta nomanoxei ete va'e ma omokanhy 'rā guekove. Ha'e rā xekáuxa ha'e ayvu porā káuxa omano va'e ma ogueraa jepe uka 'rā guekove.*

³⁶ Mba'e 'rā tu avakue ojou, mba'emo yvy regua ha'e javi oguerekopa va'eri guekove ae omokanhy vy?

³⁷ Mba'e nunga 'rā tu ome'ē onhe'ē rekovia?

³⁸ Mba'eta aŷgua kuery itavy rei ha'e ojejavypa rei va'e mbyte amongue ikuai vy xereroxī 'rā, ha'e xeayvua guive. Ha'e rami rire ha'e kuery ma Ava ra'y ojeapo va'ekue voi ogueroxī 'rā Nguu rexakā rupi ou vy, anjo iky'a e'ŷ va'e kuery reve.

9

¹ Aipoe'ive ju:

— Anhetē aipoa'e pêvy: Apy peī va'e regua amongue napemanoí 'rā Nhanderuete po'akaa ojekuaa ouvy rā pexa e'ŷa ja, opo'akaa oexa uka javé.

Mateus 17.1-8; Lucas 9.28-36

² Mboapy meme araa py Jesus ngupive ogueraa Pedro, Tiago ha'e João ha'e kuery ae'i. Peteī vytyt yvate va'e áry oo. Ha'e py ma guexakā py ojekuaa ha'e kuery renonde.

³ Ijaõ voi hexakāmba ha'e xiîmba rei. Ao joia jipoí ha'e rami ojoi kuaa va'e.

⁴ Hexeve ojekuaa avi ho'amy Elias ha'e Moisés. Ha'e vy ijayvu okuapy Jesus reve.

⁵ Ha'e ramo Pedro aipoe'i:

— Orembo'ea, ha'eve apy nhaïve aguã. Ha'e rami vy rojapo 'rā mboapy oo'i: peteī ma ndevy guarã, amboae ma Moisés pe, ha'e gui amboae ju ma Elias peguarã — he'i.

⁶ Oikuua vy e'ŷ ijayvu, mba'eta ha'e kuery onhemondyipa.

⁷ Ha'e ramove peteī arai ou vy ojao'ipa. Ha'e va'e mbyte gui peteī ayvu onhendu:

— Peva'e ma Xera'y ayvu ete va'e. Pejapyxaka ijayvua re ae — he'i va'e.*

⁸ Ha'e ramo ha'e kuery oyvýry rupi oma'ẽmba teī peteīve ndoexavei hexeve. Oexa va'e Jesus anho.

Mateus 17.9-13

⁹ Yvyty áry gui ha'e kuery oguejy jogueruvy rā Jesus aipoe'i:

— Avave rei pe pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ŷa ja — he'i.

¹⁰ Ha'e rami ijayvuague ha'e kuery omoī porā. Ha'e rami avi jomeme oporandu okuapy omanoague gui onhemboete ju 'rāa oikuaaxe vy.

¹¹ Oporandu avi okuapy Jesus pe:

— Mba'e re tu ha'vy kuaxia re nhombo'e va'ety kuery ijayvu okuapy Elias ranhe ou 'rāa re?

¹² Ombovai:

* 8:35 João 12.24-26; Apocalipse 2.10; 12.11 * 9:7 2 Pedro 1.16-18

— Anhetē ae Elias ha'e ranhe ou vy opa mba'e omoīmba porā ju 'rā. Ha'e rami avi Ava ra'y ojeapo va'ekue rekorā re ipara oinya py, mba'exa tu oī oiko axy ha'e ombojatu reia 'rāa rami?

¹³ Xee aipoa'e pēvy: Elias ou ae ma teī hekorā re ipara oinya rami vy hexe ha'e kuery ojapo okuapy oipotaa rami ae.*

Mateus 17.14-21; Lucas 9.37-43

¹⁴ Hemimbo'e kuery mboae ikuiaia py ovaē jogueruvy ramo heta avi ou ha'e py. Ha'e rā kuaxia re nhombo'e va'ety kuery ijayvu okuapy ha'e kuery reve.

¹⁵ Heta va'e kuery Jesus oexa vy onhemondyipa okuapy. Ha'e vy onhamba jogueruvy oxarura aguā.

¹⁶ Ha'e ramo kuaxia re nhombo'e va'ety kuery pe Jesus oporandu:

— Mba'e nunga re tu pendeayvu ra'e ha'e kuery reve?

¹⁷ Ha'e gui heta va'e mbyte gui peteī aipoe'i:

— Porombo'ea, ndea py aru xera'y nhe'ē vai nomboayvui rā.

¹⁸ Mba'eta oikoa rupi oity xapy'a jepi 'rā. Ijuru ryjui ha'e haī jekyty, inhagai ma ovv. Ajerure teī neremimbo'e kuery oipe'a aguā, ha'e kuery ndoipe'a kuaai — he'i.

¹⁹ Ha'e ramo Jesus aipoe'i:

— Peē pejerovia e'ŷ va'e, raka'e peve 'rā tu aiko pendereve? Raka'e peve 'rā tu rogueropo'aka? Eru ha'vy ava'i apy — he'i.

²⁰ Ha'e ramo ogueru. Ha'e gui ava'i Jesus oexa ramove nhe'ē ombovava ratā vyvoi. Ha'e vy yvy rupi ho'a vy ojere-jere oupy, ijuru ryjuipa guive.

²¹ Jesus oporandu kyrī va'e ru pe:

— Araka'e ma tu guī nunga oiko hexe?

Tuu ombovai:

— Kyrī'i guive.

²² Mbovykue rei e'ŷ ma tata py ha'e yy py oity ojukaxe vy. Ndevy pe ha'eve ri rā oremboaxy 'rāgue, oreptyvō.

²³ Jesus ombovai:

— “Ha'eve ri rā” 're va'e ty'y? Opa mba'e ndaxyi ojerovia va'e pe — he'i.

²⁴ Ha'e ramo kyrī va'e ru [hexay reve] ojapukai:

— Xee ajerovia. Xepytyvō avi ajeroviave aguā — he'i.

²⁵ Heta va'e kuery oupa rā Jesus oexa vy ijayvu atā nhe'ē vai pe:

— Nhe'ē nanhomboayvui ha'e nanhomboapyxai va'e, ejepē'a ke kyrī va'e gui, ejuve eme hexe — he'i.

²⁶ Ha'e ramo nhe'ē vai ojapukai reve ombovava ratā vy ojepē'a, oeja ovv he'ōgue rami. Pavē rei “Omano” he'i okuapy.

²⁷ Ha'e rā Jesus ma ipo re ojopy vy ombovy ramo opu'ā ho'amy.

²⁸ Ha'e gui ma opy oike ma ramo hemimbo'e kuery oporandu ha'e kuery ae'ia py:

— Mba'e re tu ore ndoroipe'a kuaai ra'e anha?

²⁹ Ombovai:

— Ha'e va'e nunga ma nhanhembo'e [ha'e jakaru e'ŷ re nhandekuai] vy 'rāe jaipe'a.

Mateus 17.22,23; Lucas 9.43b-45

³⁰ Ha'e kuery oje'oi vy oaxa Galiléia rupi. Jesus ndoipotai avave rei oikuua oīa,

³¹ mba'eta guemimbo'e kuery ombo'e vy aipoe'ia rami:

— Ava ra'y ojeapo va'ekue omboaxaa 'rā avakue po py, ha'e rā ha'e kuery ojuka 'rā. Ha'e gui mboapy araa py onhemboete ju 'rā omanoague gui — he'i.

³² Ha'e rā ha'e kuery ndoikuuai teī nda'ipy'a guaxui vy noporandui guive ha'e nunga re.

Mateus 18.1-5; Lucas 9.46-48

³³ Ha'e gui Cafarnaum katy ju ha'e kuery oje'oi. Opy Jesus oike vy oporandu guemimbo'e kuery pe:

— Mba'e nunga re tu pendeayvu ra'e tape rupi?

* 9:13 Elias re ijayvu João Batista re ijayvu vy. Mateus 17.11-13

³⁴ Ha'e ramo ha'e kuery okyrrirī okuapy, mba'eta mava'e pa joegui yvateve 'rāa re tape rupi ijayvu rire.

— Ha'e ramo oguapy oiny vy oenoī doze-ve guemimbo'e kuery. Ha'e vy aipoe'i:

— Ha'e ranhexe va'e ma opyta 'rā takykue pavē rembiguairā — he'i.

³⁶ Ha'e gui peteī kyrī va'e ogueru vy omopu'ā heno'amy ha'e kuery mbyte. Oikuavā vy aipoe'i ha'e kuery pe:

— Amongue xerery rupi peteī kyrī va'e kova'e ramigua omovaē vy xee avi xemovaē. Ha'e xemovaē va'e ma xee anho e'ŷ xemovaē, xembouare avi omovaē.

Marcus 9,49,50

³⁸ Ha'e gui João aipoe'i:

— Orembo'ea, roexa kuri peteī ava nderery rupi anha oipe'a rā, nhanderupive e'ŷ oiko va'e. Ha'e ramo ndoroipe'a ukavei, nhanderupivegua e'ŷ ramo — he'i.

³⁹ Ha'e ramo Jesus ombovai:

— Nda'evei ndapeipe'a ukai aguā, mba'eta xerery rupi tembiapo porā ojapo va'e nda'ijayvu vai 'rā xere.

⁴⁰ Mba'eta nhanderovaigua e'ŷ va'e ma nhanderupivegua ae.

⁴¹ Anhetē aipoa'e pēvy: Cristo pegua peiko ramo xerery rupi amongue peteī karo yy ri jepe pendevy ome'ē rire ndojopy e'ŷi 'rā ojapoague repy.

Mateus 18,6-9; Lucas 17,1,2

⁴² — Ha'e rā kova'e kyrīgue va'e regua ojeroviaa gui amongue oity 'rāgue py ha'evee oityxe va'e aju'y re ita guaxu mba'emo mongu'ia ojokua pyre reve ye'ē mbyte py omomboa va'e rire.

⁴³ Xapy'a rei rā ndepo ri ndererojejavvy ramo ejaya, mba'eta ha'evee ndepo rovaikue'i reve reikove aguā py reike aguā, ndepo jovaive reve tata ogue e'ŷ va'e py reo 'rāgue py.

⁴⁴ [Mba'eta ha'e py ma yxo noomanovei ma 'rā, neī tata voi ndoguevei ma 'rā.]

⁴⁵ Ha'e rami e'ŷ vy ndepy ri ndererojejavvy ramo ejaya. Mba'eta ha'evee ndepy rovaikue'i reve reikove aguā py reike aguā, ndepy jovaive reve tata ogue e'ŷ va'e py nemomboa 'rāgue py.

⁴⁶ [Ha'e py ma noomanovei ma 'rā yxo, neī tata voi ndoguevei ma 'rā.]

⁴⁷ Xapy'a rei nderexa ri ndererojejavvy ramo enoē. Mba'eta ha'evee Nhanderuete po'akaa py peteī'i nderexa reve reike aguā, mokoīve nderexa reve tata ogue e'ŷ va'e py nemomboa 'rāgue py.

⁴⁸ Ha'e py ma noomanovei ma 'rā yxo, neī tata voi ndoguevei ma 'rā.*

Mateus 5,13; Lucas 14,34,35

— Mba'eta peteī-teī tata rupi peaxa vy omoe'ē mbyre 'rā pendekuai.

⁵⁰ Juky ma iporā vaipa. Ha'e rā xapy'a rei nae'ēvei rire mba'eda 'rā tu he'ē ju? Peē kuery voi pendejee ae perekō 'rāgue juky, jomeme pendekuai porā aguā.

10

Mateus 19,1,2

¹ Jesus opu'ā vy oo ha'e gui Judéia rupi Jordāo yakā rovaigua re. Teīgue ju oĩa py heta va'e kuery ono'ō okuapy. Ha'e ramo ojapoaty rami vy ombo'e ju.

Mateus 19,3-9; Lucas 16,18

² Ha'e jave py fariseu kuery regua onhemboja jogueruvy vy oeko a'ā. Ha'e vy oporandu okuapy:

— Ha'eve ri nda'u ime kuery opoi aguā gua'yxy gui?

³ Ha'e ramo ha'e ju oporandu ha'e kuery pe:

— Mba'e tu Moisés ojapo uka pendevy?

⁴ Ha'e kuery ombovai:

— Moisés ojapo uka raka'e kuaxia omendaague regua ombovaipa aguā, ha'e gui ma opoi aguā — he'i.

⁵ Ha'e ramo Jesus aipoe'i:

— Peneakā ratā ramo ha'e rami oeja ipara va'e pejapo aguā.

* 9:48 Isaías 66,24

⁶ Ha'e rā yvy itui ypy'i guive ma Nhanderuete omoingo ava ha'e kunha.*

⁷ Ha'e nunga rupi ava oeja 'rā nguu ha'e oxy, [gua'yxy reve onhemoirū aguā].*

⁸ Ha'e gui gua'yxy reve mokoī 'rāgue py peteī'i to'o ma ikuai. Ha'e rami vy mokoī ve'ŷ ikuai, peteī'i to'o ma.

⁹ Ha'e nunga rupi Nhanderuete omoirū rire avave rei tomboja'o eme – he'i.*

¹⁰ Opy ikuai jave ixupe hemimbo'e kuery oporandu ju ha'e nunga re.

¹¹ Ha'e ramo aipoe'i:

— Gua'yxy gui ava opoi vy amboae re omenda va'e ma itavy gua'yxy ae pe.

¹² Ha'e rami ae ome gui kunha va'e opoi vy amboae re omenda va'e voi itavy avi.

Mateus 19.13-15; Lucas 18.15-17

¹³ Ha'e gui oña py oguerua kyrīgue ha'e kuery re opo omoī aguā. Ha'e rā hemimbo'e kuery ma herua kuery pe ijayvu ete.

¹⁴ Jesus ha'e nunga oexa vy ndojou porāi. Ha'e vy aipoe'i:

— Tove tou kyrīgue'i xea py, pejoko eme, mba'eta peva'e ramigua'i peguarā ae Nhanderuete po'akaa.

¹⁵ Anhetē aipoa'e pēvy: Amongue kyrīgue rami e'ŷ Nhanderuete po'akaa nomovaẽxei vy ndoikei 'rāe ha'e py – he'i.

¹⁶ Ha'e gui kyrīgue oikuavā vy ha'e kuery re opo omoī ogueroayvu porā reve.

Mateus 19.16-22; Lucas 18.18-23

¹⁷ Ha'e gui tape rupi Jesus oo ju ma oiny rā onha ouvy peteī ava ovaexī aguā. Guenapy'ā re oī vy oporandu:

— Porombo'ea ndereko porā va'e, mba'e nda'u ajapo 'rā tekove marā e'ŷ aupity aguā?

¹⁸ Jesus ombovai:

— Mba'e re tu "Ndereko porā va'e", 're xevy? Avave rei ndaeko porāi peteī'i e'ŷ vy. Ha'e va'e ma Nhanderuete.

¹⁹ Reikuaa ae ma ojapo uka va'ekue: Ejojuka eme, ndetavy eme, nemonda eme, ndeapu eme, ejokore eme, emboete nderu ha'e ndexy – he'i.

²⁰ Ha'e ramo ava va'e ombovai:

— Porombo'ea, ha'e nunga ha'e javi ajapopa ae ma, xekyrī guive.

²¹ Ha'e rā Jesus hexe oma'ẽ vy oayvu. Ha'e vy aipoe'i:

— Peteī mba'e ma oata teri ndevy. Tereo evendepa rerekva'e ha'e javi, ha'e hepykue eme'ẽmba iporiaukue'i pe. Ha'e vy 'rāe rerekva'e ovareve va'e yva re. Ha'e gui mae eju xerupive – he'i.*

²² Ha'e rami ijayvuague ava va'e ndojou porāi vy iporiau ovy, oguerekopa va'e vy.

Mateus 19.23-30; Lucas 18.24-30

²³ Ha'e gui Jesus oyvýry oma'ẽ vy aipoe'i guemimbo'e kuery pe:

— Haxy ete oguerekopa va'e kuery Nhanderuete po'akaa py oike aguā – he'i.

²⁴ Ha'e rami ijayvu rā hemimbo'e kuery oendu vy onhemondyipa. Ha'e ramo Jesus aipoe'ive ju:

— Xera'y kuery, haxy ete mba'emo oguerekopa va'e re rive ojerovia va'e oike aguā Nhanderuete po'akaa py.

²⁵ Nhanderuete po'akaa py oguerekopa va'e oikea gui ndaxyive cameloo oaxa aguā juu nambi kua rupi – he'i.*

²⁶ Ha'e ramo ha'e kuery onhemondyipave vy aipoe'i jomeme:

— Marā ramigua 'rā tu ha'vy oo jepe?

²⁷ Ha'e kuery re Jesus oma'ẽ vy aipoe'i:

— Ha'e nunga ma avakue pe haxy ete, ha'e rā Nhanderuete pe ma any, mba'eta Nhanderuete pe mba'eve ndaxyi – he'i.

²⁸ Ha'e ramo Pedro aipoe'i:

— Ore kuery ma opa mba'e roejapa va'ekue nderupive orekuai aguā.

²⁹ Jesus ombovai ju:

* 10:6 Gênesis 1.27 * 10:7 Gênesis 2.24 * 10:9 1 Coríntios 7.10-16 * 10:21 Romanos 3.19,20; Tiago 2.10

* 10:25 1 Timóteo 6.6-10

— Anhetē aipoa'e pēvy: Ha'e javi xekáuxa ha'e ayvu porā káuxa ngoo oeja va'e, guyvy, gueindy, oxy, nguu, gua'y e'ŷ vy omba'ety,

³⁰ ha'e kuery ma aŷ voi ojou retave 'rā: guyvyrā, gueindyrā, oxyrā, gua'yrā ha'e omba'etyrā ojou 'rā oiko axy reve, ha'e gui yvy pyau re ju oupity 'rā tekove marā e'ŷ.

³¹ Ha'e rami avi tenonde pyguare heta optya 'rā takykue py, ha'e rā takykue pyguare ma optya 'rā tenonde py.

Mateus 20.17-19; Lucas 18.31-33

³² Ha'e gui ma Jerusalém katy oguata oje'oivy. Jesus ma guemimbo'e kuery renonde oo oiny. Ha'e rā ha'e kuery ma onhemondyi ha'e okyje rei reve hakykue oje'oi. Ha'e gui ma ha'e kuery ae'i ikuai aguã py Jesus ogueraa doze guemimbo'e kuery. Ha'e vy ha'e kuery pe omombe'u porâve hexe oiko va'erā. Ha'e vy aipoe'i:

³³ — Pendu ke. Aŷ ma jaje'o nhainy Jerusalém katy. Ha'e py ma Ava ra'y ojeapo va'ekueojopy ukaa 'rā sacerdote yvatekueve va'e ha'e kuaxia re nhombo'e va'ety kuery pe. Ha'e kuery ojuka uka vy omboaxa 'rā amboae regua kuery pe.

³⁴ Ha'e kuery ojavyky rei ha'e onyvõmba 'rā hexe, ha'e gui oinupãmba ma rire ojuka 'rā. Ha'e gui mboapy araa py onhemboete ju 'rā.

Mateus 20.20-28

³⁵ Ha'e ramo Jesus re onhemboja Zebedeu ra'y kuery Tiago ha'e João. Ha'e vy aipoe'i:

— Orembo'ea, ejapo orevy rojerure taa.

³⁶ Ha'e ramo oporandu ha'e kuery pe:

— Mba'e tu peipota ajapo pēvy?

³⁷ Ha'e kuery ombovai:

— Nerexakā reve reju vy oremoi 'rāgue peteĩ ndeaxu e'ŷa re, ha'e rā amboae ma ndeaxua re — he'i.

³⁸ Jesus ombovai:

— Ndapeikuaai mba'e nunga re pa pejerurea. Peẽ nda'u pey'u 'rā ri karo xee ay'u aguã va'e gui? Penhemongarai uka 'rā ri xee anhemongarai ukaa rami?*

³⁹ Ha'e kuery aipoe'i:

— Ha'eve.

Jesus aipoe'i ju:

— Pey'u 'rāe karo xee ay'u aguã gui, ha'e penhemongarai uka avi 'rā xee anhemongarai ukaa rami.

⁴⁰ Ha'e rā xeaxu e'ŷa re ha'e xeaxua re oguapy va'erā ma xee e'ŷ 'rā aiporavo. Ha'e rami aguã ma oguereko katu pyre pe anho — he'i.*

⁴¹ Ha'e nunga hemimbo'e kuery mboae dez ikuai va'e ma ha'e nunga oendu vy ijayvu rei okuapy Tiago ha'e João re.

⁴² Ha'e ramo Jesus ojea py oenoimbä vy aipoe'i:

— Yvy jave regua huvixa kuery ma joguereko atā 'rā, ha'e kuery va'e regua yvatekueve ipo'aka 'rā joe, peikuaa rami

⁴³ Ha'e rā pende kuery ma ha'e rami e'ŷ 'rā pendekuai. Ha'e rami 'rāgue py peẽ kuery va'e regua joegui yvatevexe va'e ma penerembiguai rami toiko.

⁴⁴ Peneranhexe va'e ma peiko 'rā pavē rembiguai.

⁴⁵ Mba'eta Ava ra'y ojeapo va'ekue eteve voi jojokuai aguã e'ŷ ou, ha'e rā tembiguai rami oiko aguã, ha'e guekove ome'ẽ aguã heta rekovia, ogueraa jepe aguã.

Mateus 20.29-34; Lucas 18.35-43

⁴⁶ Ha'e vy Jericó tetā py ranhe ovaē. Ha'e gui tetā gui guemimbo'e kuery ha'e heta va'e kuery reve oje'oi jave peteĩ ava ára revegua e'ŷ oguapy oiny tape yvýry. Timeu ra'y Bartimeu hery va'e mba'emo re ojerurea py oī.

⁴⁷ Ha'e va'e ma Jesus Nazaré pygua va'e ou oinya oendu vy ojapukai reve aipoe'i:

— Davi ramymino Jesus, xemboaxy ke — he'i.

⁴⁸ Ha'e ramo heta ijayvu okyrirī aguã. Ha'e rami teĩ ojapukaive tema. Ha'e vy aipoe'i:

* 10:38 “Anhemongarai” ha'e “Karo gui ay'u” he'ia ma oiko axy aguã re ijayvu vy. * 10:40 Lucas 22.24-30; Filipenses 2.3-8; 1 Pedro 5.3

— Davi ramymino, xemboaxy ke.
⁴⁹ Ha'e ramo Jesus opyta vy aipoe'i:
 — Penoi.
 Ha'e ramo oenoña ára revegua e'ý. Ha'e vy aipoe'i:
 — Ndepy'a guaxu, epu'ã ke, mba'eta nerenoï.
⁵⁰ Ha'e ramo capa omboi vy opo reve opu'ã ov y Jesus-a katy.
⁵¹ Jesus oporandu:
 — Mba'e tu reipota ajapo ndevy?
 Ára revegua e'ý ombovai:
 — Xee ma aexaxe — he'i.
⁵² Ha'e ramo Jesus aipoe'i:
 — Tereo, rejeroviaa ndereraa jepe ma.
 Ha'e ramove ava va'e oexa ju vy Jesus rakykue oo tape rupi.

11

Mateus 21.1-17; Lucas 19.28-40; João 12.12-19

¹ Jerusalém py ha'e kuery ovaẽ rai'i ma. Ha'e vy Oliveiras yvyty re Betfagé ha'e Betânia tekoa rupi oaxa vy Jesus omondouka mokoï guemimbo'e.

² Ha'e vy aipoe'i:

— Tapeo tenonde peva'e tekoa oĩ va'e py. Ha'e py pevaẽ vyve pejou 'rã peteĩ mburika'i ixã va'e, hi'áry avave rei noñai teri va'e. Pejora vy ke peru.

³ Xapy'a rei amongue oporandu 'rã mba'e re pa pejoraa re. Ha'e rami rã aipopeje: "Senhor ma oipota, ha'e gui ogueru ruka voi ju 'rã apy", peje 'rã.

⁴ Ha'e ramo oje'oi vy tape py ojou mburika'i ixã va'e peteĩ kora rokẽ rexei. Ha'e vy ojora.

⁵ Ha'e py ikuai va'e regua ijayvu:

— Mba'erã tu pejora mburika'i?

⁶ Ha'e rã hemimbo'e kuery ma Jesus aipoe'iague rami ombovai. Ha'e ramo ogueraa uka.

⁷ Ha'e gui mburika'i ogueru ma vy hi'áry omoñ oao. Ha'e ramo Jesus oĩ hi'áry.

⁸ Tape rupi heta oipyo okuapy oao, ha'e rã amboae kuery ma jai rogue mba'ety yvýry gui ojaya va'ekue onhono.

⁹ Ha'e gui henonde ha'e hakykue oo va'e kuery ojapukai vy aipoe'i:

— Iporã ete! Ta'ima'endu'a porãa Senhor rery rupi ou va'e re!*

¹⁰ Ima'endu'a porãmby toiko opo'akaa rupi ovaẽ ouvy va'e, nhaneramoï Davi rami ipo'aka va'e. Toguerovy'aa yvatevea py! — he'i oje'oivy.

¹¹ Ha'e gui Jerusalém py ovaẽ ma vy templo py oike. Ha'e vy oma'ẽmba ma rire ka'aru ma ramo Betânia katy ju oo doze guemimbo'e kuery reve.

Mateus 21.18-22

¹² Ko'ẽ jevy Betânia gui oo vy inhembyayi.

¹³ Mombypy gui oexa peteĩ figo'y hogue va'e. Ha'e gui oo oexa aguã mba'emo ojou rivyyvi gui. Ha'e rami teĩ yvyra hi'aña py ovaẽ vy mba'eve ndojoui hogue e'ý vy, mba'eta figo oikoa ára e'ý rã.

¹⁴ Ha'e ramo Jesus aipoe'i:

— Aý gui ma to'uave eme nde'a — he'i. Ha'e ramo hemimbo'e kuery oendu.*

Mateus 21.12-17; Lucas 19.45-48

¹⁵ Ha'e gui Jerusalém tetã py ovaẽ. Templo py oike vy omoẽmba mba'emo vendea ha'e mba'emo joguaa kuery ha'e py ikuai va'ekue. Oity peráta mboekoviaa kuery mesa, ha'e apykaxu vendea kuery renda guive.

¹⁶ Templo rupi avave rei pe ndogueraa ukai mba'emo ryru.

¹⁷ Ha'e vy nhomongeta vy aipoe'i:

* 11:9 Salmo 118.25-26 * 11:14 Figo'y pe Jesus ijayvu vai oikuua uka aguã judeu kuery ndojeroviaia re Nhanderuete ombopaga taa (Lucas 13.5-9).

— Ipara oiny “Xero ma onhembo'e atyrā oī” 'ea va'eri peē ma pejapo imonda va'e onhemiaty rami — he'i.*

¹⁸ Ha'e nunga ma sacerdote yvatekueve va'e ha'e kuaxia re nhombo'e va'ety kuery oendu. Ha'e vy oikuaa pota okuapy marā rami vy pa ojuka aguā. Ha'e rami teī okyje guive, mba'eta ombo'e rā heta va'e kuery ha'e javi ojou porā.

¹⁹ Ha'e gui ka'aru ma ramo Jesus ha'e hemimbo'e kuery oje'oi ju tetā gui.

Ojerovia va'e po'akaa re ijayvua

²⁰ Ha'e gui ko'ēgue aje'ive'i reve ha'e kuery ojevy jogueruvy vy oexa rā figo'y ipiru ma ra'e hapo ha'e javi.

²¹ Ha'e ramo Pedro ima'endu'a vy aipoe'i:

— Orembo'ea, ema'ē. Figo'y ndeayvu vaiague nda ipiru ra'e — he'i.

²² Ha'e ramo Jesus ombovai:

— Pejerovia tema Nhanderuete re.

²³ Mba'eta anhetē aipoa'e pēvy: Amongue peva'e yvyty pe “Epu'ā ke, enhemombo ye'ē py”, he'i vy opy'a py oexa'ā rei 'rāgue py ijayvuague oiko 'rāa oguerovia ete ramo ha'ekue rami ae 'rā oiko ixupe.

²⁴ Ha'e nunga rupi aipoa'e pēvy: Penhembo'e vy pejerurea pejopy maa re pejerovia ramo ha'ekue rami ae 'rā oiko pēvy.

²⁵ Ha'e gui penhembo'e vy xapy'a rei amongue reve mba'emo perekoy vy peperdoa ranhe, Penderu yva pygua pejejavvyague avi operdoa aguā.

²⁶ [Ha'e rā ndapejoperdoai ramo Penderu yva pygua voi ndoperdoi 'rā pejejavvyague.]*
Mateus 21.23-27; Lucas 20.1-8

²⁷ Ha'e gui Jerusalém katy ojevy ju jogueravy. Ha'e vy templo rupi oiko jave oīa py ou sacerdote yvatekueve va'e, kuaxia re nhombo'e va'ety ha'e nhomongetaa kuery.

²⁸ Ha'e vy oporandu ixupe:

— Mba'e nunga po'akaa rupi tu rejapo ha'e nunga? Mava'e tu nembopo'aka guī rami rejapo aguā?

²⁹ Jesus ombovai:

— Xee voi aporandu ta pēvy. Pemombe'u ke. Ha'e ramo xee voi amombe'u 'rā pēvy mba'e nunga po'akaa rupi pa ha'e nunga ajapoa.

³⁰ João nhomongaraia pa yva guigua tyrā avakue guigua raka'e? Pembovai ke — he'i.

³¹ Ha'e ramo ha'e kuery jomeme ranhe ijayvu okuapy:

— Xapy'a rei “Yva gui”, ja'e ramo ha'e ombovai ju 'rā: “Mba'e re tu ha'vy ndapejeroviai hexe?” he'i 'rā nhandevy.

³² Ha'e rā “Avakue gui”, ja'e aguā nda'evei avi — he'i okuapy, mba'eta ha'e kuery okyje heta va'e kuery gui, João anhetē profeta oikoa pavē oikuaa ramo.

³³ Ha'e rami vy aipoe'i Jesus pe:

— Ore ma ndoroikuuai.

Ha'e ramo Jesus ju ombovai:

— Xee voi namombe'ui 'rā pēvy mava'e po'akaa rupi pa ha'e nunga ajapoa aikovya.

12

Mateus 21.33-46; Lucas 20.9-19

¹ Ha'e rire ha'e kuery pe Jesus omombe'u peteī ayvu mba'emo re ombojoja vy.

— Peteī ava onhoty uva. Ojapo ikora yvate va'erā, ojapo guive uva oumbiri atyrā ha'e torre, ha'e gui ma opena va'erā kuery po py ombooxa. Ha'e vy oo guekoa gui.

² — Omono'ōa ára ovaē ramo opena va'e kuerya py ombou peteī guembiguai, ixupegua uva'a ome'ē okuapy aguā.

³ Ha'e rami teī ha'e kuery ojopy vy oinupā ha'e ojavyky rei ma rire omondouka rive ju.

⁴ — Amboae guembiguai ju ombou. Ha'e ramo ha'e va'e voi oinupāmba inhakā rupi, ojavyky rei.

* 11:17 Isaías 56.7, Jeremias 7.11 * 11:26 Tiago 1.6; Mateus 6.14,15

5 — Amboae ju ombou. Ha'e va'e ma ojuka. Amboae kuery heta ombou avi. Ha'e kuery oinupāmba amongue, ha'e rā amboae kuery ma ojuka.

6 — Peteī'i ma oguerek teri, gua'y oayvuve va'e anho. Ha'e va'e ma ija ombou vy "Xera'y ramo omboete 'rā ko", he'i.

7 — Ha'e ramo omba'epo va'e kuery aipoe'i joupe-up: "Peva'e ma uvaty jarā ete. Jajuka na, uvaty nhandevy ju opyta aguā", he'i okuapy.

8 Ha'e rami vy ojopy vy ojuka, ha'e gui uvaty gui omombo mombyry'i.

9 — Mba'e nda'u uvaty ja ojapo 'rā? Ha'e va'e ou vy omomba 'rā opena va'ekue, ha'e rā amboae kuery pe ju 'rā omboaxa uvaty.

10 Ha'vy peē ndaperoayvui teri teve po rami ipara va'e: "Oo apoa kuery ita ndoipotai va'ekue opyta omboeteve pyrā, tenonde pygurarā.

11 Ha'e nunga ma Senhor gui ae oiko, ha'e jaexa rā iporā ete va'e", he'iague?*

12 Ha'e rami rā ha'e kuery ojopyxe teī heta va'e kuery gui okyje, mba'eta ha'e kuery re ae ri ijayvua oikuaa. Ha'e rami vy ojepe'apa jogueravy.

Mateus 22.15-22; Lucas 20.20-26

13 Ha'e ramo Jesus oĩa py omboua fariseu regua ha'e Herodes-a katygua kuery, ayvu py ojopy aguā.

14 Ha'e va'e kuery ovaẽmba vy aipoe'i ixupe:

— Porombo'ea, ore roikuua ndee anhetē va'ea, ha'e ndereikuua potai 'rā mava'e paa re, mba'eta nerema'ei avakue yvatea re, ha'e anhetē rupi renhombo'e Nhanderuete oipota va'e re. Ha'evea rami ri nda'u César pe nhame'ẽ imposto repy, tyrā pa any? Ha'eve tyrā pa nda'evei nhame'ẽ aguā?

15 Jesus oikuaa ha'e kuery ijayvu rivea. Ha'e vy ombovai:

— Mba'e re tu xerek a'âxe ri? Peru ha'vy peteī hatā'i va'e, taexa — he'i.

16 Ha'e ramo ha'e kuery ogueru ramo ha'e ju oporandu:

— Mava'e ra'angaa ha'e mava'e rery tu kova'e re oĩ?

Ha'e kuery ombovai:

— César mba'e rima.

17 Ha'e ramo Jesus aipoe'i:

— César mba'e ri rā peme'ẽ ha'vy César pe. Ha'e rā Nhanderuete pegua ma Nhanderuete pe ae 'rā peme'ẽ — he'i. Ha'e ramo onhemondyipa ijayvua gui.

Mateus 22.23-33; Lucas 20.27-38

18 Jesus oĩa py ou saduceu kuery va'e regua. Ha'e va'e kuery ma ndogueroviai nhanhemboete ju 'rāa. Ha'e gui oporandu okuapy ixupe:

19 — Porombo'ea, Moisés oeja raka'e po rami ipara va'e: "Ta'y e'ŷ re tyke'y omano ramo tyvy ju 'rā omenda imeve'ŷ va'e re, omano va'ekue ra'yrā va'ekue oguerek aguā", he'i va'ekue.*

20 Ha'e gui ikuai raka'e sete joegua. Tujave va'e ma omenda va'ekue ri ta'y e'ŷ re omano.

21 Ha'e ramo tyvy ju omenda imeve'ŷ va'e re teī ha'e va'e voi omano ta'y e'ŷ re. Ha'e gui mboapya ma ha'ekue rami ae ju.

22 Ha'e rami py sete-ve ndata'yi. Ha'e gui mae ma kunha va'e avi omano.

23 Ha'e gui onhemboetepa jeyva ára ha'e kuery onhemboete ju rā mava'e ete'i 'rā oiko kunha va'e me? Mba'eta kunha va'e re sete-ve omenda rire — he'i.

24 Ha'e ramo Jesus ombovai:

— Pejavy, mba'eta ipara re oĩa neī Nhanderuete po'akaa peikuaa e'ŷ vy.

25 Mba'eta omanoague gui onhemboete ju va'ekue ma nomendavei 'rā, neī nanhomomendavei 'rā. Anjo kuery yva pygua rami 'rā ikuai.

26 Ha'e gui omano va'ekue onhemboetepa ju 'rāa re ndaperoayvui teri teve Moisés ombopara va'ekue? Mba'eta yvyra yky hendy va'e mbyte gui Nhanderuete aipoe'i ixupe: "Xee ma Abraão, Isaque ha'e Jacó Ruete aiko", he'i raka'e.*

* 12:11 Salmo 118.22-23

* 12:19 Deuteronômio 25.5

* 12:26 Éxodo 3.6

²⁷ Ha'e ma omanogue Ruete e'ŷ oiko, ha'e rā oikove va'e Ruete. Ha'e nunga rupi pejavy vaipa.*

Mateus 22.34-40; Lucas 10.25-28

²⁸ Ou avi peteĩ kuaxia re nhombo'e va'ety. Ha'e va'e ma amboae kuery reve Jesus ijayvu ha'e ombovai porā rā oendu ma vy oporandu:

— Mba'e nunga ojapo uka pyre tu pavē gui yvateve va'e?

²⁹ Jesus ombovai:

— Yvateve va'e ma pova'e: “Israel kuery, pendu ke: Senhor Penderuete ma peteĩ'i.*

³⁰ Reayvu 'rā Nderuete ndepy'a ha'e javi py, nderekō, ne'arandua ha'e nembaraetea ha'e javi py guive” he'iague.*

³¹ Ha'e va'e rire ma po rami ju oī: “Reayvu 'rā neirū kuery ndee ae rejeayvua rami” he'iague. Amboae ojapo uka pyre pova'e gui yvateve va'e ma jipoi — he'i.*

³² Ha'e ramo kuaxia re nhombo'e va'ety aipoe'i:

— Porombo'ea, ha'evea rami ndeayvu anhetē rupi meme. Mba'eta Nhanderuete ma peteĩ'i, amboae jipoi ha'e e'ŷ vy.*

³³ Ha'e gui Nhanderuete jayvu 'rā nhandepy'a, nhane'arandua ha'e nhanembaraetea ha'e javi py. Ha'e nhaneirū kuery ma nhande ae jajeayvua rami 'rā jayvu. Ha'e nunga jajapo aguā ma ixupe mymba nhame'ēa gui ha'eveve — he'i.

³⁴ Ha'e rami o'arandua rupi ombovai rā Jesus oendu vy aipoe'i:

— Ndee ma mombyry e'ŷ reiko Nhanderuete po'akaa gui — he'i.

Ha'e va'e rire avave rei nda'ipy'a guaxuavei ixupe oporandu aguā mba'eve re.

Mateus 22.41-46; Lucas 20.41-44

³⁵ Ha'e gui templo py Jesus nhombo'e vy oporandu:

— Mba'exa nda'u kuaxia re nhombo'e va'ety kuery Cristo reko re ijayvu vy aipoe'i Davi ramymino oikoa rami?

³⁶ Mba'eta Davi eteve voi Nhe'ē Ky'a E'ŷ gui aipoe'i: “Senhor aipoe'i xe-Senhor pe: ‘Eguapy ke aiporu kuaa regua re, ndepy guýry nderovaigua kuery amoī e'ŷa ja’, he'i va'ekue.”*

³⁷ Ha'e rami vy Davi voi “Senhor” he'i ixupe. Mba'exa tu ha'vy hamymino avi ri oiko? — he'i.*

Ha'e rami ijayvu rā heta va'e kuery oenduxe vai.

Mateus 23.1-7,14; Lucas 20.45-47

³⁸ Ha'e gui nhombo'e vy aipoe'i ju:

— Penheangu ke lei re nhombo'e va'ety kuery gui, mba'eta ha'e kuery ma ao puku py 'rā onhemonde, ha'e tetā mbyte rupi ikuai vy oipota 'rā oxarura porāa.

³⁹ Onhembo'eaty py ha'e ngaru oīa py ha'e kuery oguapy 'rā tenda tenondeve oī va'e py anho.

⁴⁰ Ha'e rami avi ha'e kuery ogueraa rivepa 'rā imeve'ŷ va'e kuery ro gui oipota va'e, ha'e onhemboeko porāxe vy onhembo'e are 'rā. Ha'e nunga rupi ha'e kuery opaga raxa ete 'rā.

Lucas 21.1-4

⁴¹ Ha'e gui templo py Jesus oguapy oiny hyru peráta omoīaty oī va'e rexei'i. Ha'e vy oexa heta va'e kuery peráta ome'ē vy hyru py omoī rā. Oguerekopa va'e kuery ome'ē retave.

⁴² Peteĩ imeve'ŷ va'e iporiaukue'i oexa avi mokoī hatā'i va'e ndovareive'i va'e omoī rā.

⁴³ Ha'e rami vy guemimbo'e kuery oenoīmba vy aipoe'i:

— Anhetē aipoa'e pêvy: Peva'e imeve'ŷ va'e ma iporiaukue'ia ramive ma peráta me'ēa kuery ha'e javi gui omoī retave hyru py.

⁴⁴ Mba'eta amboae kuery ma hembyrekue gui rive ome'ē. Ha'e rā peva'e ma iporiaukue'ia ramive mba'emo'i ojogua aguā oguerekoko va'ekue ha'e javi'i omoī.

* 12:27 1 Coríntios 6.14; 15.12-28; 1 Tessalonicenses 4.13-18
6.5 * 12:31 Levítico 19.18 * 12:32 Deuteronômio 4.35

* 12:29 Deuteronômio 6.4
* 12:36 Salmo 110.1

* 12:30 Deuteronômio
* 12:37 Romanos 1.3,4

13

Mateus 24.1,2; Lucas 21.5-9

¹ Templo gui Jesus oẽ ov yave peteĩ hemimbo'e aipoe'i:

— Orembo'ea, ne'ema'ẽ ave ita tuvixakue gui anho nda ojapo raka'e!

² Jesus ombovai:

— Aŷ pexa pa kova'e oo tuvixa va'e? Oitypaa ramo peteĩve ita ndopytai 'rã amboae ita áry.

Mateus 24.3-14; Lucas 21.7-19

³ Ha'e gui templo rexei Oliveiras vyty py Jesus oguapy oiny jave Pedro, Tiago, João ha'e André oporandu ha'e kuery ae'ia py:

⁴ — Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuua aguã ha'e nunga ha'e javi ojeupity rai'i maa?

⁵ Jesus ombovai:

— Penheangu ke ha'vy penhembotavy uka e'ŷ aguã avave rei pe.

⁶ Mba'eta heta 'rã ou xerery rupi "Xee ae ma Cristo" he'i rive va'e. Ha'e rami vy heta 'rã ombotavy.

⁷ Penhemondyi eme guive "Joe opu'ã", 'ea rã pendu vy, nei "Joe opu'ã 'rã", 'ea tei. Ha'e nunga ranhe 'rãe oiko tei opa aguã e'ŷ teri.

⁸ Mba'eta peteĩ-tei tetã pygua kuery opu'ã 'rã amboae tetã pygua kuery re, ha'e peteĩ-tei regua amboae regua re 'rã opu'ã. Amongue henda py oiko 'rã vy ryryi ha'e karuai. Ha'e nunga ma jypy'i ojexavaia aguã.

⁹ — Peiko kuaa pota ke, mba'eta pendejopy ukaa 'rã, ha'e pendereraa 'rã nhomboayvua kuery ha'e onhembo'eaty pygua ruvixa pe penemboayvu uka aguã. Xekáuxa penenupãa ha'e pendereraa 'rã pejexa uka aguã huvixa ha'e huvixave renonde. Ha'e ramo ha'e kuery pe pemombe'u 'rã ayvu.

¹⁰ Mba'eta jypy'i ha'e javi regua pe ayvu porã omombe'ua 'rãe.

¹¹ Ha'e nunga rupi pendereraa ha'e pendejopy ukaa tei pendep'y eta rei eme pendeayvurã re. Ha'e va'e hora ayvu py ae pendeayvurã ome'ëa va'e rupi 'rã pendeayvu. Mba'eta pendejegui ae e'ŷ 'rã pendeayvu, ha'e rã Nhe'ë Ky'a E'ŷ gui.

¹² — Tyke'y kuery ojopy uka 'rã guyvy ojukaa aguã, ha'e tuu kuery ojopy uka 'rã gua'y kuery. Ta'y kuery nguu kuery re opu'ã vy ojuka uka avi 'rã.

¹³ Xerery káuxa pavã nda'ija'evei 'rã pendere. Ha'e rã opa peve oï atã va'e ma oo jepe 'rã.

Mateus 24.15-28; Lucas 21.20-24

¹⁴ — Ha'e gui pexa 'rã ojeguarupy nhomokanhyarã ha'eve e'ŷa py oï rã. (Tove ogueroayvu va'e toikuua.) Ha'e ramo Judéia pygua kuery tonhamba vyty re.*

¹⁵ Ngoo áry ikuai va'e toteqey eme, toike eme ngopy gui mba'emo oguenoë aguã,

¹⁶ ha'e mba'ety rupi ikuai va'e voi tojevy eme oparito re.

¹⁷ Ha'e va'e ára nda'evei 'rã imemby ryru'i ha'e imemby kambu va'e pe.

¹⁸ Pejerure ke ha'e nunga oiko e'ŷ aguã yro'y py.

¹⁹ Mba'eta ha'e va'e ára ojexavaia ete 'rã. Ha'e rami ete ndoikoi teri jypy'i Nhanderuete vyv onhono guive aŷ peve, ha'e gui ha'e va'e rire ndoikovei 'rã ha'ekue ramo.

²⁰ Senhor ha'e va'e ára nomomba voi va'e rire avave rei ndoo jepei 'rãgue. Va'eri ojeupe guarã oiporavo va'ekue re oma'ë vy omomba voi 'rã ha'e va'e ára.

²¹ — Ha'e gui pêvy amongue aipoe'i 'rã: "Ma'ë, apy ma Cristo", ha'e e'ŷ vy "Pe py ma hiny", he'i ramo perovia eme,

²² mba'eta oiko 'rãe Cristo ramigua ha'e profeta ramigua kuery rive. Ha'e kuery voi ojapo 'rã hexa pyrã ha'e nhomondyipaarã ombotavy aguã Nhanderuete rembiporavo kuery, ha'eve va'e rire.

²³ Peiko kuaa pota ke, opa mba'e gui xee romonheangu ma voi.

Mateus 24.29-31; Lucas 21.25-28

²⁴ — Ha'e va'e ára ojexavaia rire'ive kuaray pytumba 'rã, jaxy voi naendyvei 'rã.

²⁵ Jaxy-tata ho'apa 'rã yva gui, ha'e yva re ipo'akakueve ikuai va'e voi oitypaa 'rã.*

* 13:14 Daniel 9.27, 11.31 * 13:25 Isaías 13.10, 34.4

²⁶ Ha'e gui oexa pavē 'rā Ava ra'y ojeapo va'ekue arai rupi ou rā opo'aka ha'e guexakāmba reve.*

²⁷ Ha'e vy ojeupegua anjo kuery omondouka 'rā irundy henda yvytu oipejua rupi hembiporavo kuery omboaty heruvy aguā, yvy apy guive yva apy peve.

Mateus 24.32-44; Lucas 21.29-36

²⁸ — Peikuaa pota ke figo'y re mba'emo ambojoja vy amombe'u rā. Mba'eta hakā ipyaupa ha'e hokypa rā pexa vy peikuaa 'rā ára pyau ovaē rai'i maa.

²⁹ Ha'e rami ae avi peē kuery voi xeayvuague oiko rā pexa vy peikuaa 'rā xe'ára ovaē rai'i maa, okē py ae.

³⁰ Anhetē aipoa'e pēvy: Aŷguia kuery opa e'ŷ re ha'e nunga ha'e javi oiko 'rā.

³¹ Opa 'rā yva ha'e yvy. Ha'e rā xeayvuague ma ndoaxa rivei 'rā.

³² Ha'e va'e ára ha'e hora raka'e paa avave rei ndoikuuai, neī anjo kuery yva pygua, neī xee Ta'y voi ndaikuuai. Xeru anho'i oikuua.

³³ — Peiko kuaa pota, peiko katu [ha'e penhembo'e] guive, mba'eta ndapeikuuai raka'e pa ha'e va'e ára ovaē 'rāa.

³⁴ Ha'e nunga oiko 'rā peteī ava guekoa gui oo va'e rami. Ngoo oeja vy guembiguai kuery pe opena uka 'rā. Peteī-teī pe ojapo uka 'rā mba'emo. Ha'e rā okē rarōa pe ma oikuua pota uka 'rā.

³⁵ Peē voi peiko kuaa pota 'rāgue, mba'eta ndapeikuuai raka'e pa hoo va'e ou 'rāa. Ka'aru tyrā pa pytū mbyte jave, uru ojapukai jave tyrā pa ko'ẽmba'i jave paa voi ndapeikuuai,

³⁶ mba'eta ovaē xapy'a vy peke reve pendejou ramo nda'evei 'rā.

³⁷ Pendevy aipoa'e rami ma aipoa'e pavē pe: Peiko kuaa pota ke.

14

Mateus 26.1-5; Lucas 22.1,2

¹ Mokoī ára'i ma oata ovaē aguā Páscoa ha'e ngaru mbojape imbovua revegua e'ŷ va'e ára. Ha'e gui sacerdote yvatekueve va'e ha'e lei re nhombo'e va'ety kuery oikuua pota okuapy nhemi rupi ojopy vy ojuka aguā.

² Mba'eta aipoe'i okuapy: "Ngaru oiko jave ma nda'evei, heta va'e kuery opu'āmba e'ŷ aguā."

Mateus 26.6-13; João 12.1-8

³ Betânia tetā py Jesus oĩ mesa py, Simão lepra oguereko va'ekue ro py. Oĩa py ou peteī kunha heakuā porā va'e ryru ita xii va'e guigua ogueru va'e. Heakuā va'e ma hepyve va'e, nardo anho'i tynyē. Ha'e gui ma hyru oipe'a vy Jesus akā re onhoẽ heakuā porā va'e.

⁴ Amongue ikuai va'e ojou vai vy jomeme aipoe'i:

— Mba'erā tu ojavyky heakuā porā va'e?

⁵ Mba'eta ha'e nunga ma trezentos raxa ára repy re ovende va'e rire, iporiaukue'i pe ome'ẽ aguā — he'i. Ha'e vy ijayvu rei okuapy hexe.

⁶ Ha'e ramo Jesus aipoe'i:

— Tove ri. Mba'e re tu pendeayvu rei kunha va'e re? Mba'emo porā ete ojapo xevy.

⁷ Mba'eta iporiaukue'i ma pendereve riae 'rā ikuai. Peipytyvõxea hora rei ha'eve peipytyvõ aguā. Ha'e rā xee ma ndaiko riae 'rā pendereve.

⁸ Kunha va'e ma ha'eve va'e ojapo. Amano e'ŷ mbove voi omoeakuā xerete xenhono porāa rā guarā.

⁹ Anhetē aipoa'e pēvy: Mamo rā yvy jave re ayvu porā omombe'ua py omombe'ua avi 'rā kunha va'e ojapo va'ekue, hexe ima'endu'aa vy.

Mateus 26.14-16; Lucas 22.3-6

¹⁰ Hemimbo'e kuery doze va'e regua Judas Iscariotes hery va'e ma sacerdote yvatekueve va'ea py oo, Jesus ojopy uka aguā.

¹¹ Ha'e kuery ha'e nunga oendu vy oguerovy'a rei, ha'e vy ixupe ijayvu peráta ome'ẽ aguā re. Ha'e ramo Judas oikuua pota ha'eve jave ojopy uka aguā re.

Mateus 26.17-19; Lucas 22.7-13

* 13:26 Daniel 7.13-14

¹² Ha'e gui ovaẽ ngaru mbojape imbovua revegua e'ŷ ijypya ára, Páscoa pyguarã vexa'i ojukaa aguã. Ha'e ramo hemimbo'e kuery oporandu Jesus pe:

— Mamo tu reipota roo roguereko katu Páscoa ára py jakaru aguã?

¹³ Ha'e ramo mokoõ guemimbo'e omondouka vy aipoe'i:

— Tapeo ha'vy tetã re. Ha'e py penerovaexi 'rã peteĩ ava yryru ogueraa va'e.

¹⁴ Tapeo hupive, ha'e mamo rã oikea py hoo va'e pe aipopeje: "Orembo'ea oporandu uka kuri: 'Mamo pa opy ja'o oĩ Páscoa ára xeremimbo'e kuery reve rokaru aguã?' he'i uka", peje.

¹⁵ Ha'e ramo pendevy pe oexa uka 'rã peteĩ opy ja'o tuvixa va'e opa mba'e oĩmba ma voia. Ha'e py 'rãe perekko katu — he'i.

¹⁶ Ha'e ramo hemimbo'e kuery tetã re oo vy Jesus aipoe'iague rami ae ojou. Ha'e rami vy oguereko katu Páscoa py okaru okuapy aguã.

Mateus 26.20-25

¹⁷ Ka'aru'i ma jave oo doze guemimbo'e kuery reve.

¹⁸ Ha'e gui mesa py okaru okuapy jave Jesus aipoe'i:

— Anhetê aipoa'e pãvy: Peẽ kuery xereve pekaru va'e regua peteĩ xejopy uka nhemi 'rã — he'i.

¹⁹ Ha'e ramo ha'e kuery iporiaupa vy jorire-rire aipoe'i:

— Xee teve?

²⁰ Ha'e ramo ombovai:

— Xeremimbo'e kuery doze pendekuai va'e regua peteĩ, xereve hy'a py opo'ẽ oiny va'e ae.

²¹ Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiare pe ma nda'evei ete 'rã. Ixupe ma ha'eveve 'rãgue ndoikoi ma voi va'e rire.

Mateus 26.26-30; Lucas 22.16-20,39

²² Ha'e kuery okaru teri reve Jesus ojopy peteĩ mbojape. Nhanderuete oguerovy'a ma vy oipe'ã-pe'ã vy ome'ẽ ha'e kuery pe. Ha'e vy aipoe'i:

— Pejopy, kova'e ma xerete — he'i.

²³ Ha'e rire karo ju ojopy. Oguerovy'a ma vy ombojoja guemimbo'e kuery pe. Ha'e rã ha'e javive oy'u.

²⁴ Ha'e gui aipoe'i:

— Kova'e ma xereve guarã [ipyau va'e] ajapo va'e regua, heta re vy xeruguy amoẽ uka ta va'e rupi.

²⁵ Anhetê aipoa'e pãvy: Uva rykue xee nday'uvei ranhe 'rã, Nhanderuete po'akaa py ipyau va'e ju ay'u e'ŷa ja — he'i.*

²⁶ Ha'e gui peteĩ mboraei oporaei rire Oliveiras yvyty katy oje'oi.

Mateus 26.31-35; Lucas 22.31-34; João 13.36-38

²⁷ Ha'e gui Jesus aipoe'i:

— Peẽ kuery ha'e javive xerejapa 'rã, mba'eta ipara oiny: "Ajuka uka 'rã vexa'i re opena va'e. Ha'e ramo vexa'i kuery oaĩmba 'rã", he'iague.*

²⁸ Ha'e gui anhemboete ju ma rire penerenonderã aa 'rã Galiléia katy — he'i.

²⁹ Pedro aipoe'i:

— Ha'e kuery ha'e javive nderejapa teĩ xee any 'rã.

³⁰ Jesus ombovai:

— Anhetê aipoa'e ndevy: Kova'e pyavyve uru mokoõgue ojapukai e'ŷ mbove, mboapykue 'rã renhemombe'u xekuaa e'ŷ va'e rami — he'i.

³¹ Ha'e rami teĩ Pedro aipoe'i:

— Ndereve xejukaa ta teĩ ae ma peteïve henda py ndaxeayvui 'rã roikuaa e'ŷa rami — he'i. Hemimbo'e kuery ha'e javive ha'e rami meme ijayvu.

Mateus 26.36-46; Lucas 22.39-46

³² Ha'e gui Jesus oo peteĩ henda Getsêmani 'epy va'e py. Ha'e py ovaẽ vy aipoe'i guemimbo'e kuery pe:

— Peguapy apy, xee anhembo'e ainya ja — he'i.

* 14:25 1 Coríntios 11.23-26

* 14:27 Zacarias 13.7

³³ Ngupive ogueraa Pedro, Tiago ha'e João. Ha'e vy oendu nda'eveia ha'e ojexavai etea.

³⁴ Ha'e vy aipoe'i:

— Xepy'a re aendu nda'evei etea xejuka ta va'e rami. Pepyta apy peikuua pota aguā — he'i.

³⁵ Ojepe'ave'ia py ngova omovaē yvy re. Ha'e vy ojerure ha'eve ramo ha'e va'e hora oaxa aguā.

³⁶ Ha'e vy aipoe'i:

— Xeru, xeru, opa mba'e ndevy ha'eve. Xegui oaxa 'rāgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

³⁷ Ha'e gui ojevy vy oexa rā okepa okuapy. Ha'e rā aipoe'i Pedro pe:

— Simão, reke ri ty'y? Neī peteī hora voi teve nda'evei reikuua pota aguā?

³⁸ Peikuua pota, ha'e penhembo'e penderekko a'āa py pejeity ukapa e'ŷ aguā. Penenhe'ẽ ma anhetē ikyre'ŷ, ha'e rā pendero'o re ma penekangy — he'i.

³⁹ Ha'e gui ojepe'a ju vy onhembo'e. Ha'ekue'i rupi ae ju ijayvu.

⁴⁰ Ojevy vy oexa rā okepa ju, hopeyi vaipa vy. Ha'e vy ha'e kuery pe ijayvu rā nombovai kuuai.

⁴¹ Ha'e gui ma mboapykuea ma ou vy aipoe'i:

— Peke teri va'e ty'y pejupy? Ha'eve ma. Ovaē ma hora heko vai va'e kuery po py Ava ra'y ojeapo va'ekue omboaxaa aguā.

⁴² Pepu'ā ke, jaje'oi. Pee ma ou oiny xejopy ukaarā.

Mateus 26.47-56; Lucas 22.47-53; João 18.1-11

⁴³ Are'ŷ'i re Jesus ijayvu teri reve ovaē peteī hemimbo'e kuery doze ikuai va'e regua, Judas hery va'e. Hexeve heta avi ou kyxe ha'e yvyra reveguia kuery. Sacerdote yvatekueve va'e, lei re nhombo'e va'ety ha'e nhomongetaa kuerya gui ou va'ekue.

⁴⁴ Mba'eta ha'e kuery pe ijopy ukaa aipoe'i va'ekue: “Hova py ayvu va'e ae 'rā pejopy, ha'e gui peipokua reve peraa”, he'i va'ekue.

⁴⁵ Ha'ekue rami vy ovaē vyve Jesus re onhemboja. Ha'e vy

— Xembo'ea — he'i vy oayvu.

⁴⁶ Ha'e ramo ojopy vy ojokua okuapy.

⁴⁷ Ha'e rami rā ha'e py peteī hi'aī va'e regua okyxe oekyi vy omboguai sacerdote yvateve va'e rembiguai nambi rupi, ha'e vy omboi.

⁴⁸ Ha'e gui Jesus aipoe'i ha'e kuery pe:

— Peē kuery kyxe ha'e yvyra reve ri ty'y peju jojuka rive va'ety rami xejopy aguā?

⁴⁹ Ko'ẽ nhavõ templo py peē kuery pendekuaia rupi aiko vy anhombo'e teī ndaxejopyi va'ekue. Ha'e rami avi guī nunga oiko ipara oiny va'e ojeupitypa aguā — he'i.

⁵⁰ Ha'e rami rā hemimbo'e kuery ha'e javive ojepe'apa ojava vy.

Kunumi Jesus rakykue ooague

⁵¹ Hakykue oo peteī kunumi ajukue puku py onheovā va'e. Ha'e rā ojopya ta ramo

⁵² ajukue puku gui ojepe'a vy ojava avi ovy ipire rei reve.

Mateus 26.57-68; Lucas 22.63-71

⁵³ Ha'e gui ma sacerdote yvateve va'ea py ogueraa Jesus. Ha'e py ijatypa sacerdote yvatekueve va'e, nhomongetaa ha'e kuaxia re nhombo'e va'ety kuery ha'e javive.*

⁵⁴ Ha'e ramia ja hakykue Pedro oo avi mombyry'i rupi, sacerdote yvateve va'e roka peve. Ha'e vy tembiguai kuery reve ojape'e oiny tata yvýry.

⁵⁵ Ha'e gui sacerdote yvatekueve va'e ha'e nhomboayvu va'ety kuery Jesus ojuka ukaxe vy ojouxte hekokue mombe'uarā, teī ndojou.

⁵⁶ Mba'eta Jesus re heta ijayvu rive va'eri ha'ekue rami e'ŷ-e'ŷ guive.

⁵⁷ Ha'e rami vy amongue opu'ā vy hekokue ramigua omombe'u vy aipoe'i:

⁵⁸ — Ore roendu aipoe'i rā: “Xee ambovaipa 'rā kova'e templo avakue ojapo va'ekue, ha'e mboapy araa py amboae ju 'rā ajapo avakue rembiapo e'ŷ”, he'i va'ekue.

⁵⁹ Ha'e rami teī ijayvuague rami e'ŷ ae tema ijayvu.

* 14:53 João 18.12-14,19-24

- ⁶⁰ Ha'e gui ha'e kuery mbyte py sacerdote yvateve va'e opu'ã vy oporandu Jesus pe:
 — Nerembovai va'e ty'y ndere ayvua ramo?
- ⁶¹ Ha'e rã Jesus okyrirí, mba'eve nde'i.
 Ha'e gui sacerdote yvateve va'e oporanduve ju:
 — Ndee ma nhi'ã Nhanderuete ijayvu porãmby Ra'y Cristo?
- ⁶² Ha'e ramo Jesus ombovai:
 — Xee ae ha'e. Ha'e gui pexa 'rã Ipo'akapa va'e oiporu kuaa regua re Ava ra'y ojeapo
 va'ekue oguapy ha'e yva gui ou ramo arai rupi — he'i.*
- ⁶³ Ha'e ramo sacerdote yvateve va'e omondoro oao reve aipoe'i:
 — Mba'erã tu jaipotave hekokue mombe'uarã?
- ⁶⁴ Pendu ae ma ijayvu vai rã. Mba'exa tu peikuua?
 Ha'e javive ombovai:
 — Jajuka aguã rami ijayvu — he'i okuapy.
- ⁶⁵ Ha'e gui hexe amongue onyvõ, ha'e hova onhovã vy ouna guive. Ha'e vy aipoe'i:
 — Emombe'u ke mava'e pa neunga ra'e — he'i. Xondaro kuery voi oipetepa okuapy.
Mateus 26.69-75; Lucas 22.55-62; João 18.15-18,25-27
- ⁶⁶ Ha'e ramia ja oka yvy reia py Pedro oña py ou peteĩ kunha'i sacerdote yvateve va'e
 omongakuaa va'ekue.
- ⁶⁷ Pedro ojape'e oiny rã oexa vy oma'ẽ porã, ha'e vy aipoe'i:
 — Ndee voi teve reiko Jesus Nazaré pygua va'e reve.
- ⁶⁸ Ha'e ramo onhenhomni vy aipoe'i:
 — Xee ndaikuuai, neĩ ndeayvua voi naendu kuaai — he'i. Ha'e vy oẽve oka katy. [Ha'e
 jave uru ojapukai nhendu.]
- ⁶⁹ Ha'e gui teǐgue ju omongakuaa pyre oexa vy amboae kuery pe
 — Peva'e voi ha'e kuery regua — he'i.
- ⁷⁰ Ha'e ramo onhenhomni ju.
 Ha'e rire'ive ha'e py ikuai va'e aipoe'i Pedro pe:
 — Anhetẽ teve ndee ha'e kuery regua, mba'eta ndee voi Galiléia pygua.
- ⁷¹ Ha'e ramo ijayvu vaikue, oura guive:
 — Xee tu ndaikuuai rima ava pendeayvua! — he'i.
- ⁷² Ha'e ramove mokoõguea ma uru ojapukai nhendu.
 Ha'e ramo Pedro ima'endu'a Jesus aipoe'iague re: "Kuri mokoõgue uru ojapukai e'ŷ
 mbove ndee mboapykue 'rã renhemombe'u xekuaa e'ŷa rami", he'iague re. Ha'e rã
 onhemboaxy vy ojae'o vaipa.

15

Mateus 27.1,2,11-26; Lucas 23.1-7,13-25; João 18.28-19.16

- ¹ Ko'ẽ aje'ive'i reve sacerdote yvatekueve va'e jogueroayvu, nhomongetaa kuery,
 kuaxia re nhombo'e va'ety ha'e nhomboayvua kuery ha'e javi reve. Ha'e vy Jesus ojokua
 uka vy Pilatos-a py ju ogueraa.
- ² Ha'e gui ma Pilatos oporandu ixupe:
 — Ndee ma nhi'ã judeu kuery pegua huvixave?
 Jesus ombovai:
 — Ndee ae ma aipo're — he'i.
- ³ Ha'e ramo sacerdote yvatekueve va'e opa marã ijayvu hexe.
- ⁴ Ha'e gui teǐgue ju Pilatos oporandu:
 — Nerembovai 'rã ri ty'y? Ne'endu po ramí ete ndere ayvu ou.
- ⁵ Ha'e ramí teǐ Jesus nombovai ae. Ha'e ramo Pilatos onhemondyi vaipa.
- ⁶ Ha'e gui ngaru oikoa ára nhavõ huvixa opoi jepi 'rã peteĩ nhuã py oĩ va'e regua, heta
 va'e kuery ojerurea va'e rei.
- ⁷ Peteĩ oĩ nhuã py Barrabás hery va'e, oirũ kuery reve joe opu'ã vy jojukaague py.

* 14:62 Daniel 7.13-14

⁸ Ha'e gui heta va'e kuery ou vy huvixa pe ojerure okuapy jepiaty rami ojapo aguã.

⁹ Ha'e ramo Pilatos oporandu:

— Peipota pa apoi judeu kuery pegua huvixave? — he'i,

¹⁰ mba'eta oikuaa sacerdote yvatekueve va'e ija'e e'ŷ vy rive ipo py omboaxaague.

¹¹ Ha'e ramo ha'e kuery ombo'e heta va'e kuery Barrabás re ojerure okuapy aguã.

¹² Ha'e rami rā Pilatos oporandu:

— Mba'e 'rā tu ha'vy ajapo “Judeu kuery pegua huvixave” pejea re?

¹³ Ha'e ramo ha'e kuery ojapukai vy

— Emoĩ kuruxu re! — he'i okuapy.

¹⁴ Ha'e rā Pilatos aipoe'i:

— Mba'e nunga py tu ojapo vai raka'e?

Ha'e rā ha'e kuery ojapukaive rei:

— Emoĩ kuruxu re! — he'i okuapy.

¹⁵ Ha'e rami rā Pilatos heta va'e kuery ombovy'axe vy opoi Barrabás, ha'e rā Jesus ma oinupā uka rire omboaxa kuruxu re omoña aguã.

Mateus 27.27-31

¹⁶ Ha'e gui ma huvixa ro guaxu py ju xondaro kuery ogueraa. Ha'e py ijatypa xondaro kuery ha'e javi.

¹⁷ Ha'e rami vy ajukue púrpura guigua py omonhemonde, ha'e juu gui peteĩ coroa ramigua ojapo vy omoĩ inhakā re.

¹⁸ Ha'e vy aipoe'i:

— Iporā ete judeu kuery pegua huvixave! — he'i okuapy.

¹⁹ Takua py oinupā inhakā rupi, hexe onyvõ, ha'e guenapy'ã re oĩ vy omboete.*

²⁰ Ojavyky rei ma rire ajukue púrpura guigua omboi vy ijaoo py ae ju omonhemonde. Ha'e gui oka katy ogueraa kuruxu re omoĩ aguã.

Mateus 27.32; Lucas 23.26

²¹ Ha'e va'e jave peteĩ oaxa ov y mba'ety gui ou va'ekue, Cirene pygua Simão hery va'e, Alexandre ha'e Rufo ru. Ha'e va'e pe ma ogueraa uka okuapy kuruxu.

Mateus 27.33-44; Lucas 23.33-43; João 19.17-24

²² Ha'e gui ma Gólgota, “Akágue renda” 'epy va'e katy ogueraa Jesus.

²³ Ixupe ome'ẽ vinho mirra reveguia teĩ ndoy'ui.

²⁴ Ha'e gui omoĩ kuruxu re, ha'e ijaoo omboja'o-ja'o jomeme. Oexa okuapy xortea mba'e pa peteĩ-teĩ ogueraa 'rää oikuaaxe vy.

²⁵ Nove hora jave kuruxu re omoĩ.

²⁶ Hi'áry oupi imoiny ipara va'e hexe ijayvua: “Judeu kuery pegua huvixave”, he'ia.

²⁷ Kuruxu mboae re hexeve omoĩ avi mokoĩ imonda va'e: ijaxu e'ŷa re peteĩ omoĩ, ha'e rā amboae ma ijaxua re.

²⁸ [Ha'e rami ojeupity ipara “Heko vai va'e kuery reve oguerekao” he'iague.]

²⁹ Oaxa oje'oviy va'e ijayvu rei hexe. Oakã ombovava-vava vy aipoe'i:

— Ndee templo rembovaipa rire mboapy araa pyve ju rejapo 'rā va'ekue,

³⁰ ejereraa jepe ha'vy ndee ae kuruxu gui reguejy vy — he'i okuapy.

³¹ Ha'e rami ae avi kuaxia re nhombo'e va'ety kuery reve sacerdote yvatekueve va'e ojojai rei vy aipoe'i:

— Amboae kuery ogueraa jepe va'eri ha'e ae ndojereraa jepe kuaai.

³² Tove Israel kuery pegua huvixave Cristo toguejy kuruxu gui, jaexa vy jajerovia aguã — he'i okuapy. Hexeve kuruxu re omoĩ mbyre kuery voi ojojai rei.

Mateus 27.45-56; Lucas 23.44-49; João 19.25-30

³³ Kuaray mbyte jave pytūmba yvy jave re, kuaray ojero'a puku peve.

³⁴ Ha'e gui kuaray ojero'a puku jave Jesus ojapukai atā:

— Eloí, Eloí, lamá sabactâni? — he'i, “Xeruete, Xeruete, mba'e re tu xereja?” he'ia.*

³⁵ Ha'e py ikuai va'e regua ha'e nunga oendu vy aipoe'i:

* 15:19 João 19.2,3

* 15:34 Salmo 22.1

— Ne'endu, Elias rima oenoī — he'i okuapy.

³⁶ Ha'e rami vy peteī ha'e kuery va'e regua onha vy vinagre py peteī esponja omoakŷ, ha'e takua apy re omovaē oy'u aguā. Ha'e vy aipoe'i:

— Tove, tajaexa Elias pa ou ra'e omboguejy aguā — he'i.

³⁷ Ha'e gui ma Jesus onhendu atā vy omano.

³⁸ Ha'e ramo henda iky'a e'ŷ va'e ropy ajukue okē regua oī va'e oxoro mbyte rupi, yvate gui yvy peve.

³⁹ Ha'e rami omano ramo kuruxu rexei'i xondaro ruvixa hi'aī va'e oexa vy aipoe'i:

— Anhetē ae ra'e peva'e ava ma Nhanderuete Ra'y — he'i.

⁴⁰ Ha'e py ikuai avi amongue kunhague mombyry'i gui oma'ē okuapy va'e. Ha'e kuery regua ma Maria Madalena, Tiago kyrīve va'e ha'e José xy Maria, ha'e gui Salomé.

⁴¹ Ha'e kuery ma Galiléia rupi Jesus oiko jave hupive ikuai va'ekue oipytyvõa rupi. Ha'e kuery reve hetave ju hupive oje'oi va'ekue Jerusalém katy.

Mateus 27.57-61; Lucas 23.50-55; João 19.38-42

⁴² Ha'e va'e ára ma sábado pyguarā mba'emo oguereko katupaa aguā ára. Ha'e nunga rupi ka'aru jave

⁴³ ou peteī Arimatéia pygua José hery va'e, nhomoneta va'ety kuery regua omboetevepy, Nhanderuete po'akaa ojekuaa aguā oarō oikovy va'e. Ha'e va'e ma Pilatos-a py oo vy ojerure Jesus retekue re.

⁴⁴ Ha'e ramo Pilatos ma Jesus omano ma ra'ea omombe'u rā oendu vy onhemondyi. Ha'e rami vy xondaro ruvixa oenoī vy ixupe oporandu aje'i ma pa omano ra'ea re.

⁴⁵ Xondaro ruvixa omombe'u rā oikuua porā rire hetekue ogueraa uka José pe.

⁴⁶ Ha'e ramo José ma kuruxu gui hetekue omboguejy vy onhovā peteī ajukue puku xiī porā va'e ojogua va'ekue py. Ha'e vy onhono porā peteī tuparā itaova re ojo'o pyre py, ha'e peteī ita juombojere hokē omboty aguā.

⁴⁷ Ha'e ramia ja Maria Madalena ha'e Maria José xy oexa pota ho'amy oikuua aguā mamo pa onhono porā ra'ea.

16

Mateus 28.1-8; Lucas 24.1-10; João 20.1-10

¹ Sábado ára oaxa rire Maria Madalena, Tiago xy Maria ha'e Salomé ojogua heakuā porā va'e, oje'oi vy hetekue omoeakuā aguā.

² Ha'e gui ko'ẽmba'i jave semana ijypyā ára kuaray oẽ ouvy jave oje'oi hupa katy.

³ Joupe-upē aipoe'i jogueravy:

— Mava'e nda'u hupa rokē gui oipe'a 'rā ita jaike aguā? — he'i.

⁴ Ha'e gui ha'e kuery oma'ē vy oexa ita tuvixa va'erī ombojerea ma ra'ea.

⁵ Ha'e rami vy ikua py oike vy peteī kunumi va'e oexa onhemondea xiīmba va'e, oiporu kuua regua re oguapy oiny rā. Ha'e va'e ma ha'e kuery oexa xapy'a vy okyje okuapy.

⁶ Ha'e ramo ava va'e aipoe'i:

— Pekyje eme. Peka pekuapy kuruxu re omoī mbyre Jesus Nazaré pygua va'e. Ha'e va'e ma onhemboete ju ma, noīvei ma apy. Pema'ē ha'vy ituiague py.

⁷ Ha'e gui ma tapeo hemimbo'e kuery ha'e Pedro pe aipopeje: "Galiléia katy Jesus oo 'rā penerenonderā. Ha'e py ma pexa 'rā aipoe'iague rami", peje.

⁸ Ha'e gui itakua gui oẽ vy onhamba jogueravy onhemondiyipa ha'e okyje reve. Okyje vy avave rei pe nomombe'ui ranhe.

João 20.11-18

⁹ Semana ijypyā ára aje'ive Jesus onhemboete ju rire Maria Madalena pe ranhe ojexa uka, ixugui sete anha oipe'aague va'e pe.

¹⁰ Ha'e ramo kunha va'e oo vy Jesus irū kuery pe omombe'u. Ha'e kuery ma ojae'o ha'e iporiaupa teri vy

¹¹ ndogueroviai ranhe oikove jevya, kunha pe ojexa ukaague omombe'u rā oendu va'eri.

Lucas 24.13-35

¹² Ha'e rire Jesus amboae rami ojexa uka mokoī ha'e kuery regua tetā rovai katy oo va'e pe.

¹³ Ha'e rami rire ha'e kuery ojevy vy amboae kuery pe omombe'u teī ha'e kuery ndogueroviai.

Ayvu porā omombe'ua aguā re ijayvua

¹⁴ Ha'e rire guemimbo'e kuery onze-ve pe ju Jesus ojexa uka, mesa py ikuai jave. Ha'e vy ha'e kuery pe ijayvu ndogueroviaiague ha'e inhakā ratāa re, mba'eta hexaare kuery "Onhemboete ju ma", he'i rā oendu teī ndogueroviai rire.

¹⁵ Ha'e gui aipoe'i avi:

— Tapeo opa rupi, vyv javre ikuai va'e ha'e javive pe pemombe'u ayvu porā.*

¹⁶ Ha'e ramo oguerovia vy onhemongarai uka va'e oo jepe 'rā. Ha'e rā ndogueroviai va'e ma ombopagaa 'rā.

¹⁷ Ojerovia va'e kuery ombopo'akaa 'rā po ramigua hexa pyrā ojapo aguā. Xerery rupi oipe'a 'rā anha, ha'e ayvu mboae py ijayvu 'rā.

¹⁸ Ojopy 'rā mboi, ha'e veneno oy'u teī mba'eve ndoikoi 'rā. Imba'eaxy va'e kuery re opoko ramo okuera 'rā guive.

Lucas 24.50,51; Atos 1.6-11

¹⁹ Ha'e kuery reve Senhor Jesus ijayvupa ma rire heraa yva re. Ha'e gui ma Nhanderuete oiporu kuaa regua re oguapy oiny.

²⁰ Ha'e ramo hemimbo'e kuery oje'oi vy opa rupi omombe'u ayvu. Senhor voi oipytyvō hexa pyrā ojapoa py, ha'e kuery ayvu omombe'ua rupi anhetē memea oikuua uka aguā.

* ^{16:15} Mateus 28.18-20; Lucas 24.44-49; João 20.21; Atos 1.6-8

Lucas ayvu porã ombopara va'ekue

Lucas ayvu porã ombopara va'ekue

Lucas ma poropoanoa ha'e apóstolo Paulo hirũ raka'e. Jesus Cristo yva re ju oo rire Lucas mokoĩ kuaxia ombopara raka'e. Jypyguia ma kova'e, Jesus rekoke oĩa. Ha'e gui amboae ma apóstolo kuery rembiapokue oĩa Atos 'epy va'e ju. Atos omboypyia py Lucas aipoe'i: "Jypyguia kuaxia ndevy Teófilo ambopara va'ekue ma amombe'u aguã Jesus ojapo va'ekue ha'e nhombo'eague ha'e javi, yvate heraa ára peve" he'i va'ekue (Atos 1.1-2a).

Lucas ma heta ombopara Jesus mba'emo re ombojoja reve nhombo'eague. "Ava ra'y ojeapo va'ekue ou ojou ha'e ogueraa jepe aguã okanhy va'ekue" (19.10). "Okanhy va'ekue" he'ia py ma nhande kuery re ae ijayvu vy, amboae henda py ipara oinya rami: "Nhande kuery ha'e javi nhakanhymba javy vexta'i rami, peteĩ-teĩ jajepe'a va'ekue tape gui. Ha'e ramo hexe ma Senhor omoĩ nhande kuery ha'e javive reko vatiy" (Isaías 53.6). Ha'e nunga rupi nhande kuery re ae Jesus ombojoja vy omombe'u raka'e vexta'i okanhy va'e, peráta hatã'i va'e okanhy va'e ha'e ta'y okanhy va'e (capítulo 15). Nhande kuery rekaa rupi Jesus ou raka'e, nhanderekova vaiatygui nhandereraa jepe aguã. Nhanderuete nhanemboaxy ete vy Gua'y Jesus ombou raka'e nhandereraa jepe aguã, mba'eta Gua'y re nhanderekova vaiatyha'e javi omoĩ raka'e nhanderekova opaga aguã.

Ijayvu ypyague

- ¹ Heta ma ikuai ore kuery mbyte rupi mba'emo oiko va'ekue mboparaare.
- ² Ha'e kuery ombopara jypy'i guive hexaare ha'e ayvu mombe'ua kuery orevy ijayvuague rami vy.
- ³ Ha'e rami ae avi xeruvixa Teófilo, xee voi jypy'i guive ha'e nunga ha'e javi aikuua porã rire aý ambopara poráve ndevy jorire-rire optya porã aguã,
- ⁴ nembo'eague reikuua aguã anheté etea.*

Zacarias ha'e Isabel re ijayvua

- ⁵ Ha'e gui Judéia pyguia huvixave Herodes oĩ jave oiko peteĩ sacerdote Zacarias hery va'e, Abias ramymino kuery regua. Ta'yxy ma Arão ramymino Isabel hery va'e.
- ⁶ Ha'e kuery ma Nhanderuete renonde heko porã va'e ikuai, Senhor ijayvua ha'e ojapo uka va'e ha'e javi ojapo vy.
- ⁷ Ta'y va'e'ý guive, mba'eta Isabel imemby va'erã e'ý, ha'e mokoĩve ikakuaakue meme.

João Batista itui'i aguã omombe'u ma voiague

- ⁸ Ha'e gui Zacarias ma Nhanderuete renonde rupi omba'eapo oikovy sacerdote reko rami vy, xortea oexaa rupi oiporavoa rire.
- ⁹ Ha'e vy sacerdote kuery reko rami vy oike Senhor pegua henda iky'a e'ý va'e py heakuã porã va'e oapy aguã.
- ¹⁰ Ha'e ramia ja heta va'e kuery ma oka py ikuai onhembo'e okuapya py.
- ¹¹ Ha'e gui ixupe ojexa uka peteĩ anjo Senhor-a guigua, altar heakuã va'e rapyaty oiporu kuaa regua re.
- ¹² Zacarias oexa vy onhemondyi vaipa, okyje guive.
- ¹³ Ha'e rã anjo aipoe'i ixupe:
 - Zacarias, ekyje eme. Oendua ma rejerurea. Ha'e nunga rupi aý ndera'yxy Isabel oikuavá'i 'rã ndera'y, ha'e rã remboery 'rã João.
- ¹⁴ Ha'e va'e ma rerovy'a vaipa 'rã, ha'e heta 'rã ov'y'a oiko'iague oendu vy.
- ¹⁵ Ha'e ma omboypatepy 'rã oiko Senhor renonde, ndoy'ui 'rã virinho, neĩ iro va'e. Hexe Nhe'ẽ Ky'a E'ý anho 'rã oĩ, ixy oguerekova ia ára guive.
- ¹⁶ Ha'e ojapo 'rã Israel kuery heta ojeko rerova aguã rami Senhor Nguuete re.

* 1:4 Atos 1.1,2

¹⁷ Ha'e oo 'rā Senhor renonderā, Elias rami inhe'ē ha'e ipo'aka va'e vy, ojapo aguā tuu kuery opy'a py gua'y kuery oayvu, ha'e onhe'ē rendu e'ŷ va'ekue heko porā va'e ju ikuai aguā rami, ha'e rami vy peteī regua oguerekō katu aguā Senhor peguarā — he'i.

¹⁸ Ha'e gui Zacarias oporandu anjo pe:
— Mba'exā tu aikuā ta ha'e nunga? Mba'eta xee ma xetuja'i ma, ha'e xera'yxy voi guaimi'i ma.

¹⁹ Anjo ombovai:
— Xee ma Gabriel, Nhanderuete renonde aiko va'e. Ha'e ae xembou ndevy mba'emo porā amombe'u aguā.

²⁰ Ha'e rami teī xeayvua ndereroviai rire nandeayvuēvei 'rā, nda'evevei 'rā ndeayvu aguā ha'e nunga ojeupity e'ŷa ja, mba'eta ojeupity 'rā oa'angaague py ae — he'i.

²¹ Ha'e ramia ja heta va'e kuery oarō okuapy Zacarias. Ha'e kuery onhemondyipa, henda iky'a e'ŷ va'e py oiko are rā.

²² Ha'e gui ha'e oē vy nda'evevei ijayvu aguā. Ha'e ramo oikuā okuapy henda iky'a e'ŷ va'e py mba'emo oexa ra'eague. Okuā py rive omombe'u, nda'ijayvuēvei vy.

²³ Ha'e gui guembiaporā va'ekue ojapopa ma vy oo ju ngoo katy.

Isabel ov'y'a vaipa oikovyague

²⁴ Ha'e rire ma ta'yxy Isabel oguerekō'i ma vy ndojexa ukavei peteī nhiruī jaxy re. Ha'e vy aipoe'i:

²⁵ — Ha'e rami Senhor ojapo xevy, xere oma'ē vy, amboae kuery ndaxejou vaivei aguā.

Jesus oiko aguā omombe'u ma voiague

²⁶ Mboapy meme jaxya py ma Galiléia yvy re Nhanderuete ombou anjo Gabriel Nazaré tetā py.

²⁷ Ha'e py oiko peteī kunhataī omenda va'erā peteī ava Davi ramymino José hery va'e re. Kunhataī rery ma Maria.*

²⁸ Ha'e va'e oīa py anjo oike vy aipoe'i:
— Temimboaxy ete evy'a ke, ndereve Senhor oī ramo — he'i.

²⁹ Pova'e ayvu Maria oendu vy onhemondyi vy opēxa rei: “Mba'e he'i vy nda'u po rami oxarura xevy?” he'i.

³⁰ Ha'e rā anjo aipoe'i:
— Maria, ekyje eme, mba'eta Nhanderuete nemboaxy.

³¹ Ha'e rā rerekō'i 'rā, reikuavā 'rā peteī ava'i. Remboery 'rā Jesus.

³² Ha'e va'e ma yvate 'rā, ha'e ixupe “Yvate ete va'e Ra'y”, 'ea 'rā. Senhor Nhanderuete omoī 'rā huvixarā, tamoi Davi rekovia.

³³ Jacó ramymino kuery re opena riae 'rā, ipo'akaa ndopai 'rā guive — he'i.

³⁴ Ha'e ramo Maria aipoe'i anjo pe:
— Mba'exā 'rā tu ha'e nunga oiko? Mba'eta xee peteīgueve ma avakue pe ndajekuaa ukai teri va'eri.

³⁵ Anjo ombovai:
— Ndere oguejy 'rā Nhe'ē Ky'a E'ŷ, ha'e Yvate ete va'e po'akaa ndeo'i 'rā okuaray'ā py. Ha'e nunga rupi iky'a e'ŷ va'e oiko ramo ixupe “Nhanderuete Ra'y” 'ea 'rā.

³⁶ Neretarā Isabel voi oguerekō'i ma oikovy, guaimi'i ma teī. Kova'e re mboapy meme jaxya ma oguerekō'iague, imemby 'rā e'ŷ va'ekue ri.

³⁷ Mba'eta Nhanderuete pe ma nda'ipoi haxy va'e ijayvuague ha'e javi py — he'i.

³⁸ Ha'e ramo Maria aipoe'i:
— Apy ma aī Senhor rembiguai. Tove toiko xevy ndeayvuague — he'i. Ha'e gui anjo ojope'a ju oīa gui.

Maria oipouague Isabel

³⁹ Ha'e va'e jave ma Maria oiko katu vy oo pojava yvy'ā ikuai va'e katy, peteī tetā Judá regua py.

* 1:27 Mateus 1.18-21

⁴⁰ Zacarias ro py oike vy oxarura Isabel pe.

⁴¹ Maria oxaruraa ha'e oendu rā kyrī va'e omyī guyru'i py. Ha'e ramo Isabel re Nhe'ẽ Ky'a E'ŷ anho oĩ ramo

⁴² ijayvu atā:

— Kunhague ikuai va'e gui ndere ima'endu'a porāave, ha'e rereko'i va'e voi ima'endu'a porāmby ete 'rā.

⁴³ Marā ramigua nda'u aiko ndee xe-Senhor xy xepou vy reju aguã?

⁴⁴ Mba'eta rexaruraa aendu ramove kyrī va'e ov'y'a vy omyī guyru'i py.

⁴⁵ Revy'a ete 'rā rerovia rire, mba'eta ojeupity 'rā Senhor ndevy ijayvuague — he'i.

Maria oporaeiague

⁴⁶ Ha'e ramo Maria aipoe'i:

— Xepy'a py amboete Senhor,

⁴⁷ ha'e xenhe'ẽ ov'y'a Nhanderuete xereraa jepeare re.

⁴⁸ Mba'eta oma'ẽ xee hembiguai yvy'í'i va'e aikoa re.

Ha'e ramo aŷ guive xevy "Ovy'a ete" he'i pavē 'rā,

⁴⁹ mba'eta Ipo'akapa va'e ojapo porā xevy,

Iky'a e'ŷ va'e hery va'e.

⁵⁰ Ha'e ma omboaxy 'rā henonde ojererokyjea rupi ikuai va'e,
raka'eve rā ikuai jevy-jevy va'e kuery voi.

⁵¹ Ipo'akapaa rupi oiko vy omoaimbā opy'a py onhemboyvate rei va'e kuery.

⁵² Oipe'a ipo'akakueve, ha'e rā yvyigueve'i ma omboyvateve.

⁵³ Omoevyatāmba inhembyayi va'ekue,
ha'e rā iporiau e'ŷ va'e kuery ma omondoukapa rive.

⁵⁴ Omboaxya rupi vy oepy guembiguai Israel kuery ijayvuague re ima'endu'a vy,

⁵⁵ Abraão ha'e hamymino kuery pe ojapo porā riae aguã re,
nhaneramoĩ kuery pe ijayvuague rami vy — he'i.

⁵⁶ Ha'e gui Maria ma mboapy jaxy re optya Isabel ro py. Ha'e va'e rire oo ju ngoo katy.

João Batista itui'ague

⁵⁷ Ha'e gui Isabel oguerekoi'i aguã ára ovaẽ ramo oikuavã ava'i.

⁵⁸ Ha'e ramo Senhor omboaxya ha'e katy'i ikuai va'e ha'e heta va'e kuery oikuua vy ov'y'a avi okuapy hexeve.

⁵⁹ Oito araa py jogueraapa ava'i pire omboi uka aguã. Ha'e rami vy omboeryxe okuapy tuu Zacarias rery rupi.

⁶⁰ Ha'e ramo ixy aipoe'i:

— Any teve. Ha'e rami 'rāgue py João 'rā hery — he'i.

⁶¹ Ha'e ramo hetarā kuery aipoe'i:

— Ha'e gui ha'e rami peneretarā kuery hery va'e ndoikoi va'eri — he'i okuapy.

⁶² Ha'e rami vy tuu pe ju opo py oporandu marā rami pa omboeryxea re.

⁶³ Ha'e gui tuu ojerure peteĩ yvyra pe'i re, ha'e vy ha'e va'e re ombopara: "Hery ma João" he'ia. Ha'e ramo ha'e javive onhemondyipa okuapy.

⁶⁴ Ha'e ramove ijuru oipe'aa rā ijayvuẽ ju. Ha'e vy omboete Nhanderuete.

⁶⁵ Ha'e py ikuai va'e ha'e javi onhemondyipa, ha'e Judéia katy'i yvy'ã reia rupi ikuai va'e kuery pe voi omombe'upaa.

⁶⁶ Ha'e javive ha'e nunga oendu vy opy'a re omoĩ okuapy. Ha'e vy aipoe'i:

— Mba'e nungarā nda'u ha'e va'e ava'i oiko? — he'i okuapy. Mba'eta hexe Senhor po oĩ.

Zacarias oporaeiague

⁶⁷ Ha'e gui tuu Zacarias re Nhe'ẽ Ky'a E'ŷ anho oĩ ramo omombe'u ayvu. Ha'e vy aipoe'i:

⁶⁸ — Ta'ima'endu'a porāa Senhor Israel kuery Ruete re,
mba'eta oikuua pota ma guembiporavo ikuai va'e re oepy aguã.

- ⁶⁹ Ha'e vy ombou peteñ nhandereraa jepearã ipo'akapa va'e guembiguai Davi ramymino.
- ⁷⁰ Ha'e rami ojapo aguã yma guive omombe'u uka
profeta iky'a e'ÿ va'e kuery ijayvua rupi,
- ⁷¹ nhanderovaigua kuery gui nhandereraa jepe aguã,
ha'e nhandere ija'e e'ÿ va'e ha'e javi po gui.
- ⁷² Ha'e rami vy nhaneramoĩ kuery omboaxyague rami ju oiko aguã,
guexeve guarã iky'a e'ÿ va'e ojapo va'ekue re ima'endu'a vy,
- ⁷³ nhaneramoĩ Abraão pe ouraague re guive.
- ⁷⁴ Mba'eta ijayvu raka'e nhanderovaigua kuery po gui nhandereraa jepe aguã re,
jakyje e'ÿ re nhambojerovia aguã,
- ⁷⁵ ha'e jaikoa pukukue re henonde
iky'a e'ÿ va'e jaiko aguã teko porã rupi.
- ⁷⁶ — Ha'e gui ma ndee ava'i, ndevy pe "Yvate ete va'e pegua profeta" 'ea 'rã.
Mba'eta Senhor renonde rupi reiko 'rã haperã rerekataguã.
- ⁷⁷ Ha'e rami vy ixupeguia kuery pe reikuua uka 'rã
ojejavyague gui oo jepe aguã,
- ⁷⁸ Nhanderuete nhanemboaxy etea rupi.
Mba'eta kuaray oẽ ouvya rami avi ojekuaa uka 'rã yva gui
- ⁷⁹ omoexakã aguã manoia guy pytû reia rupi ikuai va'e,
nhanderereko aguã tape jaiko porã aguã rupi — he'i.
- ⁸⁰ Ha'e gui ava'i ma tuja pojava ha'e imbaraeteve tema ovy onhe'ẽ re guive. Tekoa e'ÿa
rupi oiko Israel kuery pe ojekuaa uka aguã ára peve.

2

Mateus 1.18-25

- ¹ Ha'e va'e jave py ma César Augusto omombe'u uka pavẽ oje'oi aguã guery ombopara
uka vy.
- ² Ha'e va'e ma tery mbopara uka ypy'ia, Síria pygua huvixa Quirino oĩ jave py oiko va'e.
- ³ Ha'e rami rã ha'e javive oo guery ombopara uka vy, peteñ-teñ guekoia py ae.
- ⁴ Ha'e rami vy José voi oo. Davi ramymino oiko vy oguata Galiléia regua Nazaré tetã
gui, Judéia regua tetã Davi rekoague Belém tetã katy oo vy.
- ⁵ Guery ombopara uka vy oo gua'yxy Maria hye guaxu'i va'e reve.
- ⁶ Ha'e gui Belém py ikuai jave py ma ovaẽ oikuavã aguã ára.
- ⁷ Ha'e ramo oikuavã omemby ypy'i, ava'i. Ha'e vy onhovãmba vy onhono inony mymba
karua'i py, mba'eta okeaty py jipovei ma ha'e kuery avi oke aguã.

Vexa'i re opena va'e kuery pe anjo kuery ojexa ukaague

- ⁸ Ha'e katy rai ikuai vexa'i re opena va'e kuery. Pyávy nhuündy re ikuai guymba kuery
re openaa rupi.
- ⁹ Ha'e gui ha'e kuery ikuiaia py oguejy peteñ anjo Senhor-a guigua. Ha'e kuery yvýry rupi
Senhor omoexakãmba xapy'a. Ha'e ramo onhemondyipa okuapy.
- ¹⁰ Ha'e kuery pe anjo aipoe'i:
— Penhemondyi eme, mba'eta xee aju pëvy amombe'u aguã mba'emo porã nhom-
bovy'a ete va'erã, heta va'e kuery ha'e javi peguarã.
- ¹¹ Mba'eta ange Davi rekoague py itui'i ma pendereraa jepearã Cristo Senhor.
- ¹² Po rami oiko peẽ kuery peikuaa aguã: Ava'i pejou 'rã mymba karua'i py, ajukue py
onhovã ha'e onhonoa inony va'e — he'i.
- ¹³ Ha'e gui anjo reve hetu ju ojexa uka xapy'a irũ yva pygua xondaro kuery. Ha'e kuery
ma Nhanderuete oguerovy'aa rupi aipoe'i okuapy.
- ¹⁴ — Yvate etea py toporaeia Nhanderuete pe, ha'e yvy re voi toĩ avakue hemimboaxy
ikuai porã aguã — he'i okuapy.
- ¹⁵ Ha'e gui ma vexa'i re opena va'e kuerya gui anjo kuery yva re ojepe'apa ramove
aipoe'i joupe-up:

— Jaje'oi Belém tetā katy jaexa aguã nhandevy Senhor oikuua uka va'ekue — he'i okuapy.

¹⁶ Ha'e rami vy ha'e kuery oje'oi pojava, ha'e vy ojou Maria ha'e José, kyri'i va'e guive ojou mymba karua'i py itui'i rã.

¹⁷ Ha'e kuery oexa vy omombe'u ava'i oikoa ha'e kuery pe oikuua ukaa ague.

¹⁸ Ha'e rami vexa'i re opena va'e kuery omombe'u rã oendu va'e kuery ha'e javi onhemondyipa.

¹⁹ Ha'e rã Maria ma pova'e ayvu ha'e javi opy'a re omoĩ porã ima'endu'a riae aguã.

²⁰ Ha'e gui vexa'i re opena va'e kuery ojeyvypa ju. Oporaei jogueravy Nhanderuete oguerovy'aa rupi, omombe'uague rami ae oendu ha'e oexa rire.

Jesus pire omboiaague

²¹ Oito araa py ovaẽ ava'i pire omboia aguã. Ha'e gui ma omboerya Jesus, oguereko'i e'ŷ mbove ma voi anjo omboery ukaague rami vy.*

Templo py Jesus oexa ukaague

²² Ha'e gui Moisés lei omboparaague rami vy ha'e kuery ojeky'a'o uka aguã ára oaxapa ma ramo ogueraa ju Jerusalém tetā py Senhor pe oexa uka aguã,

²³ Senhor guigua lei re ipara oĩa rami vy: “Ava jypy'i oiko va'e ha'e javi 'rã pemboaxa Senhor peguarã.”*

²⁴ Ha'e kuery ogueraa avi “mokoĩ jeruxi, e'ŷ vy mokoĩ apykaxu'i” Nhanderuete pe ojuka uka aguã, ha'e kuery lei re ipara oĩa rami vy.*

Simeão oporaeiague

²⁵ Jerusalém tetā py oiko peteĩ ava Simeão hery va'e. Ha'e va'e ma heko porã ha'e ojerovia ete va'e, Israel kuery repyarã oarõ oikovy va'e. Nhe'ẽ Ky'a E'ŷ hexe oĩ.

²⁶ Ixupe Nhe'ẽ Ky'a E'ŷ oikuua uka ma voi omano e'ŷ mbove Senhor remimbou Cristo oexa 'rãa.

²⁷ Ha'e rami vy Nhe'ẽ ogueraa rã templo py oo. Ha'e va'e jave py tuu kuery ogueru ava'i Jesus ha'e kuery lei re oĩa rami ojapo aguã.

²⁸ Ha'e ramo Simeão ojopy ava'i ojyva áry, ha'e Nhanderuete oguerovy'aa rupi aipoe'i:

²⁹ — Aŷ ma Senhor, ha'eve xee nerembiguai xemondouka porã aguã ndeayvuague rami vy,

³⁰ mba'eta aexa ma orereraa jepearã rembou va'ekue.

³¹ Ha'e va'e ma ha'e javi regua renonde py rerekoy katu va'ekue

³² imoexakãarã, judeu e'ŷ va'e kuery oikuaapa aguã, ha'e nerembiporavo Israel kuery voi oguerovy'a aguã — he'i.

³³ Ha'e rami ijayvu ma ramo tuu ha'e ava'i xy onhemondyi.

³⁴ Simeão ma ha'e kuery ogueroayvu porã vy ixy Maria pe ju aipoe'i:

— Kova'e ava'i oiko ramo heta okanhy 'rã, ha'e heta avi oo jepe 'rã Israel kuery va'e regua. Ikuai avi 'rã hexe ijayvu rei va'e,

³⁵ heta py'a re oĩ va'e ojekuaa aguã. Ndepy'a re voi rendu 'rã kyxe py oikutu imoiny va'e rami — he'i.

Profeta kunha Ana ovaẽ aviague

³⁶ Oiko avi peteĩ profeta kunha Fanuel rajy, Ana hery va'e, Aser ramymino kuery regua. Kakuaa vaipa ma oiko, omenda rire sete ma'etŷ ete'i ime oiko,

³⁷ ha'e gui oitenta e quattro ma'etŷ re ma oiko imeve'ŷ va'e. Ha'e va'e ma templo gui ndooi 'rãe. Ara py ha'e pyávy omboetea rupi oiko. Okaru e'ŷ re jepi 'rã oiko onhembo'ea rupi.

³⁸ Ha'e va'e jave ete'i kunha va'e ovaẽ vy oguerovy'a Nhanderuete. Ha'e vy Jerusalém pygua kuery guepyarã oarõ okuapy va'e ha'e javi pe omombe'u oikovy ava'i oikoa.

* 2:21 Mateus 1.21 * 2:23 Êxodo 13.2,12 * 2:24 Iporiaukue'i Senhor peguarã vexa'i ndojoui vy ome'ẽ 'rã mokoĩ jeruxi e'ŷ vy mokoĩ apykaxu'i (Levítico 5.11, 12.1-8).

Nazaré tetā py ava'i Jesus oiko jave guare

³⁹ Senhor guigua lei re oña rami ha'e kuery ojapopa ma vy ojevy ju Galiléia regua guekoa Nazaré katy.

⁴⁰ Ava'i ma tuja ha'e imbaraeteve pojava, hi'aranduve guive ovy, Nhanderuete omboaxy ramo.

Porombo'ea kuery mbyte py ava'i Jesus oïague

⁴¹ Ha'e gui ma'etýa nhavô tuu kuery jogueraa 'rã Jerusalém py Páscoa ára ngaru oiko aguã py.

⁴² Doze ma'etý ava'i oguereco jave ha'e kuery gueko rami vy oje'oi ju Jerusalém katy ngaru oiko aguã py.

⁴³ Ngaru opa jave ha'e kuery ojevy ju ngoo katy. Ha'e rã ava'i Jesus ma Jerusalém py teri optyta, tuu kuery oikuua e'ý re.

⁴⁴ Tuu kuery ma oirû kuery reve ha'e oua rami oexa'ã vy peteñ ára re ranhe oguata. Ha'e gui mae ma oeka oje'oivy hetarã ha'e hexaaty kuery mbyte rupi.

⁴⁵ Ndojoui vy Jerusalém tetã katy ju ojevy oeka aguã.

⁴⁶ Mboapy araa py ojou templo py oguapy oiny rã, porombo'ea kuery reve ijayvua re ojapyxaka ha'e oporandu oinya py.

⁴⁷ Ijayvu rã oendu va'e kuery ha'e javi onhemondyipa okuapy o'arandua rupi ombovai rã.

⁴⁸ Ha'e gui tuu kuery oexa vy onhemondyi. Ha'e vy ixy aipoe'i:

— Xepi'a, mba'e re tu evoko rami rejapo orevy? Nderu reve nda'evei vaipa roiko va'ekue roekaa rupi.

⁴⁹ Ombovai nguu kuery pe:

— Mba'e re tu xereka ri? Ndapeikuuaii va'e ty'y Xeru ro py 'rãe aikoa? — he'i.

⁵⁰ Ha'e rami teñ ha'e kuery ndoikuuaii mba'e he'ia paa.

⁵¹ Ha'e gui ma nguu kuery reve oo ju guekoa Nazaré py. Ojapo oikovy ha'e kuery oipota va'e ha'e javi. Ha'e rã ixy ma ha'e nunga ha'e javi omoñ porã opy'a re.

⁵² Ha'e gui Jesus ma tuja pojava vy hi'aranduve ovy. Ha'e ramo Nhanderuete ha'e avakue renonde rupi oguerovy'aa.

3

Mateus 3.1-10; Marcos 1.2-5

¹ Quinze ma'etý re ma Tibério César huvixa oí jave py, ha'e Judéia pygua huvixa Pôncio Pilatos oí jave, Galiléia pygua huvixa Herodes, ha'e gui Ituréia ha'e Traconites pygua huvixa tyvy Filipe oí jave, Abilene pygua huvixa Lisâncias oí,

² ha'e gui sacerdote yvateve va'e Anás ha'e Caifás ikuai, ha'e va'e jave py ma Nhanderuete ombou oayvu Zacarias ra'y João pe, teko a'ýa rupi oikoa py.

³ Ha'e ramo João ma Jordão yakã yvýry ha'e javi rupi oiko. Omombe'u oikovy pavê ojeko rerova vy onhemongarai uka aguã, ojejavyague omboguepaa aguã.

⁴ Mba'eta profeta Isaías kuaxia ombopara vy aipoe'iague rami: “Tekoa e'ýa py onhendu 'rã aipoe'i va'e: Pereko katu Senhor raperã, pembo'yvi ou aguã.

⁵ Yvyugua ha'e javi ijojapa 'rã, yvyty ha'e yvy'ã'i ha'e javi guive. Tape ikarẽ va'ekue hi'yvipa 'rã, ha'e ijoja e'ýague voi ijojapa 'rã.

⁶ Ha'e gui avakue ha'e javi 'rã oexa Nhanderuete guigua jogueraa jepea", he'iague rami.*

⁷ Ha'e gui heta va'e kuery onhemongarai uka vy ou va'e pe João aipoe'i:

— Peê mboi ramigua, mava'e tu aipoe'i poxya ou va'erã gui peo jepe 'rãa rami?

⁸ Peiko ha'vy yvyra hi'a porã va'e rami, pejeko rerovaague pexa uka aguã. Ha'e pemboypy eme jomeme “Nhande kuery ma Abraão ramymino jaiko” peje aguã. Mba'eta xee aipoa'e pévy: Kova'e ita gui voi Nhanderuete omoingo kuaa Abraão ramymínorã.

⁹ Ha'e gui haxa py omboguai ta ma yvyra rapo re. Yvyra hi'a porã e'ý va'e ma ojayapa 'rã tata py omombo aguã — he'i.

* 3:6 Isaías 40.3-5

- ¹⁰ Ha'e ramo heta va'e kuery oporandu ixupe:
 — Mba'e 'rā tu ha'vy rojapo?
- ¹¹ Ombovai:
 — Mokoī kamixa oguereko va'e tome'ẽ oguereko e'ŷ va'e pe. Tembi'u oguereko va'e ha'e rami ae tomboja'o — he'i.
- ¹² Imposto re nhombopagaaty kuery voi jogueru onhemongarai uka aguã. Ha'e vy oporandu:
 — Porombo'ea, mba'e tu ore rojapo 'rā?
- ¹³ Ombovai ha'e kuery pe:
 — Nda'evei penhombopaga aguã opaga aguã va'ekue áryve — he'i.
- ¹⁴ Xondaro kuery voi oporandu ixupe:
 — Ha'vy ore, mba'e 'rā tu rojapo?
 Aipoe'i ha'e kuery pe:
 — Pejoavyky rei eme, joekokue ramigua pemombe'uve eme, neĩ peipotave eme pemba'epoague repy áryve — he'i.
- Mateus 3.11,12; Marcos 1.7,8; João 1.19-27*
- ¹⁵ Ha'e jave ma pavẽ rei oarõ okuapy jogueraa jepearã. Ha'e rami vy João re oexa'ã okuapy opy'a py. Ha'e vy aipoe'i:
 — Ha'e'ŷ ri nda'u Cristo oiko?
- ¹⁶ Ha'e ramo João aipoe'i ha'e javive pe:
 — Xee anhetẽ yy py rive romongarai va'e. Ha'e rami teĩ ou 'rā peteĩ xegui yvateve va'e. Ha'e va'e gui ma xe'yvyive ete va'e vy nda'evei ipy regua xã ajora aguã voi. Ha'e ma penemongarai 'rā Nhe'ẽ Ky'a E'ŷ reve, tata py guive.
- ¹⁷ Ojopy ae ma trigo mbovevea oiky'a'o ha'e omboyrupa aguã omoĩ porãaty py. Ha'e rã ipirekue ma oapy 'rā tata ogue e'ŷ va'e py — he'i.*
- ¹⁸ Ha'e rami vy ayvu porã omombe'u oikovy heta va'e kuery pe, opa mba'e ayvu py omongoeta reve.
- ¹⁹ Huvixa Herodes pe voi ijayvu tyvy ra'yxy Herodias káuxa, ha'e Herodes ae ojapo vαιague re.
- ²⁰ Ha'e ramo huvixa ojapo vaive ju, nhuã py João ombo'a vy.
Mateus 3.13-17; Marcos 1.9-11; João 1.32-34
- ²¹ Pavẽ onhemongarai uka jave py Jesus voi oo onhemongarai uka vy. Ha'e ramo onhembo'e oiny jave yva ojepe'a ramo
- ²² hexe Nhe'ẽ Ky'a E'ŷ oguejy ouvy apykaxu'i rami. Ha'e gui onhendu peteĩ ayvu yva gui:
 — Ndee ma Xera'y roayvu ete ha'e roguerovy'a va'e — he'i va'e.
- Mateus 1.1-17*
- ²³ Jesus ma trinta ma'etŷ rivyvyi oguereko reve omboypy nhombo'e aguã. Ixupe ma “José ra'y” 'ea.* Ha'e rã José ma Heli ra'y,
- ²⁴ Heli ma Matã ra'y, Matã ma Levi ra'y, Levi ma Malqui ra'y, Malqui ma Janai ra'y, Janai ma José ra'y,
- ²⁵ José ma Matatias ra'y, Matatias ma Amós ra'y, Amós ma Naum ra'y, Naum ma Esli ra'y, Esli ma Nagai ra'y,
- ²⁶ Nagai ma Maate ra'y, Maate ma Matatias ra'y, Matatias ma Semei ra'y, Semei ma José ra'y, José ma Jodá ra'y,
- ²⁷ Jodá ma Joanã ra'y, Joanã ma Resa ra'y, Resa ma Zorobabel ra'y, Zorobabel ma Salatiel ra'y, Salatiel ma Neri ra'y,
- ²⁸ Neri ma Melqui ra'y, Melqui ma Adi ra'y, Adi ma Cosã ra'y, Cosã ma Elmadã ra'y, Elmadã ma Er ra'y,
- ²⁹ Er ma Josué ra'y, Josué ma Eliézer ra'y, Eliézer ma Jorim ra'y, Jorim ma Matã ra'y, Matã ma Levi ra'y,

* 3:17 Atos 19.4 * 3:23 Jesus ma José ra'y ete'ŷ raka'e, amboae kuery José ra'y rami rive oikuua. Jesus ma Nhanderuete ra'y ae oiko, Nhe'ẽ Ky'a E'ŷ po'akaa rupi Maria oguereko'i va'ekue ava reve'ŷ, Mateus 1.18 ha'e Lucas 1.30-35 py oĩa rami.

- ³⁰ Levi ma Simeão ra'y, Simeão ma Judá ra'y, Judá ma José ra'y, José ma Jonã ra'y, Jonã ma Eliaquim ra'y,
³¹ Eliaquim ma Meleá ra'y, Meleá ma Mená ra'y, Mená ma Matatá ra'y, Matatá ma Natã ra'y, Natã ma Davi ra'y,
³² Davi ma Jessé ra'y, Jessé ma Obede ra'y, Obede ma Boaz ra'y, Boaz ma Salá ra'y, Salá ma Naassom ra'y,
³³ Naassom ma Aminadabe ra'y, Aminadabe ma Admim ra'y, Admim ma Arni ra'y, Arni ma Esrom ra'y, Esrom ma Peres ra'y, Peres ma Judá ra'y,
³⁴ Judá ma Jacó ra'y, Jacó ma Isaque ra'y, Isaque ma Abraão ra'y, Abraão ma Terá ra'y, Terá ma Naor ra'y,
³⁵ Naor ma Serugue ra'y, Serugue ma Ragaú ra'y, Ragaú ma Faleque ra'y, Faleque ma Éber ra'y, Éber ma Salá ra'y,
³⁶ Salá ma Cainã ra'y, Cainã ma Arfaxade ra'y, Arfaxade ma Sem ra'y, Sem ma Noé ra'y, Noé ma Lameque ra'y,
³⁷ Lameque ma Metusalém ra'y, Metusalém ma Enoque ra'y, Enoque ma Jaredé ra'y, Jaredé ma Maalalel ra'y, Maalalel ma Cainã ra'y,
³⁸ Cainã ma Enos ra'y, Enos ma Sete ra'y, Sete ma Adão ra'y, ha'e rã Adão ma Nhanderuete ra'y raka'e.

4

Mateus 4.1-11; Marcos 1.12,13

¹ Jesus re Nhe'ẽ Ky'a E'ŷ anho oĩ ramo ojevy ju Jordão yakã gui, ha'e tekoa e'ŷa py ju Nhe'ẽ ae ogueraa.

² Quarenta ára re anha oeko a'ã herekovy. Ha'e jave ma mba'eve ndo'ui. Ha'e rire okaruxe ma.

³ Ha'e ramo ixupe anha aipoe'i:

— Nhanderuete Ra'y ri reiko vy ndeayvu kova'e ita oĩ va'e pe tojeapo mbojape.

⁴ Jesus ombovai:

— Ipara oiny: “Mbojape re anho e'ŷ 'rã avakue oikove” — he'i.*

⁵ Ha'e gui yvatevea py anha ogueraa vy ixupe oexa ukapa vyvoi ko yvy re tetã ikuai va'e.

⁶ Ha'e vy aipoe'i ixupe:

— Kova'e tetã ame'ẽmba 'rã ndevy, ha'e mba'emo porã ko yvy regua ha'e javi, mba'eta xevy ome'ẽmbaa rire ame'ẽ 'rã ame'ẽxeva va'e pe.

⁷ Xapy'a rei nerenaipy'ã re reĩ reve xemboete ramo ha'e javi 'rã nemba'e.

⁸ Ha'e ramo Jesus ombovai:

— Ipara oiny: “Senhor Nderuete anho 'rã remboete ha'e rembojerovia” — he'i.*

⁹ Ha'e gui anha ma Jerusalém py ju ogueraa, templo apyte áry omoĩ. Ha'e vy aipoe'i:

— Nhanderuete Ra'y ri reiko vy enhemombo apy gui yvy katy.

¹⁰ Mba'eta ipara oiny: “Ombou 'rã anjo kuery ndere opena aguã.”

¹¹ Ha'e rã “Ha'e kuery ndejoko 'rã opo py, ita re renhepyxanga e'ŷ aguã” — he'i.*

¹² Jesus ombovai:

— Aipoe'i avi: “Eko a'ã eme Senhor Nderuete” — he'i.*

¹³ Opa mba'e py anha oeko a'ãmba ma vy ojepe'a ixugui, ha'eve aguã ára ovaẽ peve.*

Mateus 4.12-17; Marcos 4.14,15

¹⁴ Ha'e gui Nhe'ẽ po'akaa rupi Jesus oo ju Galiléia yvy katy. Ha'e ramo ha'e katy rai-rai ikuai va'e oendupa mba'emo ojapo oikovy.

¹⁵ Onhembo'eaty ikuai va'e rupi nhombo'e oikovy ramo omboete pavẽ.

Mateus 13.54-58; Marcos 6.1-4

¹⁶ Nazaré tetã py ombokakuaague py oo vy sábado ára py oike onhembo'eaty py gueko rami vy. Ha'e vy opu'ã ho'amy kuaxia ogueroayvu aguã.

* 4:4 Deuteronomio 8.3 * 4:8 Deuteronomio 6.13 * 4:11 Salmo 91.11-12 * 4:12 Deuteronomio 6.16 * 4:13

Hebreus 2.18; 4.15

¹⁷ Ha'e ramo ixupe ome'ëa profeta Isaías ombopara va'ekue. Kuaxia oipe'a vy ojou po rami ipara va'e:

¹⁸ "Senhor-a guigua Nhe'ë xere oï vy xemoï iporiaukue'i pe amombe'u aguã ayvu porã. Xembou nhuã py ikuai va'e pe amombe'u aguã oëmba ju aguã, ára revegua e'ŷ'i ikuai va'e pe amombe'u aguã oma'ëmba ju aguã, ha'e omoingo axy reipy apoi ju aguã,

¹⁹ ha'e gui amombe'u aguã Senhor nhomboaxy aguã ma'etŷa" — he'i.*

²⁰ Ha'e gui kuaxia omboty vy ome'ë ju kuaxia re opena va'ety pe. Ha'e vy oguapy. Ha'e ramo ha'e py ikuai va'e ha'e javive hexe anho oma'ë okuapy.

²¹ Ha'e ramo Jesus aipoe'i:

— Kova'e ára ojeupity ma kuaxia para re oï va'e penduague — he'i.

²² Ha'e rami rã ha'e javive hexe ima'endu'a porã, mba'eta ayvu porã rupi ijayvu rã oendu vy onhemondyi. Ha'e vy oporandu okuapy:

— Peva'e nda'u José ra'y e'ŷ ri?

²³ Ha'e ramo Jesus aipoe'i ha'e kuery pe:

— Xevy pe aipopeje 'rã: "Poropoanoa, enhemonguera ndee ae. Apy nderekaoa py ae ejapo avi roendu rã Cafarnaum py rejapo va'ekue ramigua ha'e javi", peje 'rã xevy.

²⁴ Aipoe'ive ju:

— Anhetë aipoa'e pendevy: Neñ peteïve profeta nda'ipoi hekoa pygua kuery ae omovaë porã va'erã.

²⁵ Anhetë aipoa'e pêvy: Elias oiko jave heta ikuai raka'e Israel kuery regua imeve'ŷ va'e. Ha'e va'e jave mboapy ma'etŷ rire mboapy meme jaxy re nda'okyvei ramo yvy jave re karuai oiko.

²⁶ Ha'e rami teñ ha'e pygua kuery neñ peteïvea py ma Elias nombouai, peteï imeve'ŷ va'e Sidom katy'i Sarepta tetã pyguaa py e'ŷ vy.

²⁷ Ha'e gui profeta Eliseu ju oiko jave ma heta avi ikuai raka'e Israel kuery regua lepra revegua. Ha'e rami avi neñ peteïve ma ixupe ndoiky'a'o ukaai, Síria pygua Naamã e'ŷ vy — he'i.*

²⁸ Ha'e ramo ha'e javive onhembo'eaty py ikuai va'e pov'a'e ayvu oendu vy ipoxypa.*

²⁹ Ha'e vyve opu'ëmba vy tetã gui oguenoë vy ogueraa peteï itaova áry peve, mba'eta ha'e va'e áry tetã oï ramo, ha'e gui yvy'ë guy katy oity aguã.

³⁰ Ha'e rami teñ ha'e kuery mbyte rupi Jesus oaxa vy ojepe'a ovv.

Marcos 1.21-28

³¹ Ha'e gui ma Galiléia regua Cafarnaum tetã py ju oo. Sábado ára py nhombo'e oiny.

³² Ha'e nhombo'e rã oendu va'e onhemondyipa okuapy, opo'akaa rupi ijayvu ramo.

³³ Onhembo'eaty py oï avi peteï ava hexe anha iky'a va'e onhemondea va'e. Ha'e va'e ma ojapukai atã:

³⁴ — Jesus Nazaré pygua va'e, mba'e tu orereve ndee rerek? Oremomba aguã teve reju? Xee ma aikuua ndee Nhanderuete guigua iky'a e'ŷ va'e reikoa — he'i.

³⁵ Ha'e ramo ixupe Jesus ijayvu atã vy aipoe'i:

— Ekyrirí, ha'e ejep'e ava gui — he'i. Ha'e ramo pavë renonde yvy rupi anha oity ma vy ojepe'a ava gui, ojapo vai e'ŷ re.

³⁶ Ha'e javive onhemondyipa vy aipoe'i joupe-up:

— Mba'e nunga ayvu tu pov'a'e? Mba'eta opo'akaa rupi ijayvu rã nhe'ë vai kuery voi ojepe'a 'rã — he'i okuapy.

³⁷ Ha'e ramo ha'e nungakue ha'e katy rai-rai'i rupi ikuai va'e oendupa.

Mateus 8.14,15; Marcos 1.29-31

³⁸ Onhembo'eaty gui Jesus oë vy Simão ro py ju ovaë. Simão raixo ma imba'eaxy oupy, ipire raku vaipa vy. Ha'e ramo Jesus pe ojerure okuapy kunha va'e re.

³⁹ Ha'e ramo ituia katy ojero'a vy ipire raku pe ijayvu atã ramove oaxapa vyvoi. Ha'e rire'ive opu'ë vy ojapo mba'emo ha'e kuery pe.

Mateus 8.16,17; Marcos 1.32-34

* 4:19 Isaías 61.1-2 * 4:27 Profeta kuery pe Nhanderuete oipptyvõ uka raka'e amboae yvy pygua kuery, hekoa py ae nomboeteai ramo. * 4:28 João 1.11

⁴⁰ Kuaray oike jave ma oĩa py ogueru okuapy opa marāgua mba'eaxy gui imba'eaxy va'e. Ha'e ramo peteĩ-teĩ re opoko vy omonguerapa.

⁴¹ Heta gui anha kuery ojapukai reve ojepe'a vy aipoe'i:

— Ndee ma Nhanderuete Ra'y — he'i ramo ha'e kuery pe ijayvu atã okyrirĩ aguã re, Cristo oikoa oikuua ramo.

Marcos 1.35-39

⁴² Ko'ẽmba'i ramove ojepe'a vy oo tekao e'ŷa katy. Ha'e rã heta va'e kuery oeka vy jogueraa oĩa peve. Ha'e vy ixupe ojerure okuapy oeja e'ŷ aguã.

⁴³ Ha'e ramo aipoe'i ha'e kuery pe:

— Xee ma amboae tetã rupi voi ayvu porã Nhanderuete po'akaa regua amombe'u aguã rami aiko, ha'e rami aguã ae xemboua rire — he'i.

⁴⁴ Ha'e rami vy ayvu omombe'u oikovy Judéia regua onhembo'eaty ikuai va'e rupi.

5

Pira ombo'a retaague

¹ Ha'e gui ma Genesaré yupa yvýry rupi ju oiko. Ha'e jave heta va'e kuery omboty rei okuapy Nhanderuete ayvu oenduxe vy.

² Ha'e rã oexa mokoĩ kanoã yy rembe re oĩ va'e. Pira mbo'aa kuery ma oẽmba ra'e pira mbo'aa ojoi aguã.

³ Peteĩ kanoã Simão mba'e py oike vy ojerure yy rembe gui ogueraave'i aguã. Ha'e gui kanoã py oguapy vy ombo'e oiny heta va'e kuery.

⁴ Ijayvupa ma vy aipoe'i Simão pe:

— Eraa kanoã typyvea py, ha'e pemombo pira mbo'aa pembo'a aguã.

⁵ Simão ombovai:

— Orembo'ea, pytũ mbukukue re romba'eapo teĩ norombo'ai mba'eve. Teĩ ndeayvua rupi vy amombo ju 'rã pira mbo'aa — he'i.

⁶ Ha'e rami ojapo vy ombo'a reta pira, pira mbo'aa voi oxopa rai.

⁷ Ha'e ramo opo py oenoĩ oirũ kuery kanoã mboae py ikuai va'e ou aguã oipytyvõ vy. Ha'e vy mokoïve kanoã omonyẽ pira ramo yy py ogueroike rai-rai'i heravy.

⁸ Ha'e nunga Simão Pedro oexa vy guenapy'ã re oĩ Jesus renonde. Aipoe'i:

— Senhor, ejepe'a ke xea gui, mba'eta xee ma ajejavypa va'e — he'i.

⁹ Mba'eta heta ete pira ho'a rã oexa vy onhemondyi, irũ kuery ha'e javive reve.

¹⁰ Irũ kuery Zebedeu ra'y Tiago ha'e João voi onhemondyi.

Jesus aipoe'i Simão pe:

— Enhemondyi eme, aÿ gui ma avakue jouarã 'rã reiko — he'i.

¹¹ Ha'e ramo ha'e kuery yy rembe re kanoã omboja vy oejapa oje'oivy hupive.

Mateus 8.1-4; Marcos 1.40-45

¹² Peteĩ tetã py Jesus oiko jave ou peteĩ ava hete ha'e javi rupi lepra oĩ va'e. Ha'e va'e ma oexa Jesus vy guenapy'ã re oĩ henonde, ngova yvy re omovaẽ. Ha'e vy ojerure ixupe:

— Senhor, lepra gui xeky'a'oxe vy ke xeky'a'o — he'i.

¹³ Ha'e ramo okuave'ẽ vy opoko hexe. Ha'e vy aipoe'i:

— Xee ma roiky'a'oxe ae, ekuera ke — he'i. Ha'e ramove lepra okanhymba.

¹⁴ Ixupe Jesus aipoe'ive ju avave rei pe omombe'u e'ŷ aguã.

— Va'eri tereo, sacerdote pe ejexa uka, ha'e rekueraague re eme'ẽ mymba Moisés omboparaague rami vy, heta va'e kuery oikuua avi aguã — he'i.

¹⁵ Jesus aipoe'iague rami e'ŷ ava va'e oo vyve omombe'upa. Ha'e ramo heta-etave ma ou Jesus oĩa py ijayvua oendu aguã, ombo'eaxy gui okueraxe vy guive.

¹⁶ Ha'e rã Jesus ma ojepe'a jepi 'rã ha'e ae'ia py onhembo'e aguã.

Mateus 9.1-8; Marcos 2.1-12

¹⁷ Peteĩ ára Jesus nhombo'e oiny jave fariseu ha'e lei re nhombo'e va'ety kuery oguapy okuapy ha'e py, opa rupi gui ou va'ekue, Galiléia, Judéia ha'e Jerusalém gui. Senhor po'akaa hexe oĩ nhomonguera aguã.

- ¹⁸ Ha'e gui ou avi amongue avakue peteī oguata e'ŷ va'e hupa reve ogueru va'e. Ogueroikexe teī Jesus renonde py onhono aguā.
- ¹⁹ Heta va'e kuery gui nda'evei ogueroike aguā. Ha'e ramo oguerojeupi oo áry, ha'e oipe'aague rupi hupa reve omboguejy ikuai va'e mbyte py, Jesus renonde.
- ²⁰ Avakue ojerovia etea Jesus oikuua vy aipoe'i oguata e'ŷ va'e pe:
— Ava, rejejavague omboguepaa ma — he'i.
- ²¹ Ha'e rami rā lei re nhombo'e va'ety ha'e fariseu kuery ndojou porāi vy aipoe'i:
— Marā ramigua tu po rami ijayvu vai va'e? Avave rei nombogue kuaai 'rā joeko vaiague, Nhanderuete e'ŷ vy — he'i okuapy.
- ²² Ha'e kuery opēxaa Jesus oikuua vy aipoe'i:
— Mba'e re tu po rami ri pendeayvu pendep'y a py?
- ²³ Mba'e ayvu rupi tu ndaxyive xeayvu aguā: "Rejejavague omboguepaa ma", tyrā pa "Epu'ā, ha'e eguata" ha'e 'rā?
- ²⁴ Va'eri peikuaa aguā Ava ra'y ojeapo va'ekue ko yvy re oiko vy joeko vaiague ombogue aguā voi ipo'aka va'ea —
Oguata e'ŷ va'e pe ju aipoe'i:
— Xee aipoa'e ndevy: Epu'ā, eupi nderupa, ha'e tereo ndero katy — he'i.*
- ²⁵ Ha'e ramove opu'ā pavē oexaa gui, oupi ngupa ituiaty, ha'e oo ngoo katy. Nhanderuete pe oporaei ovv.
- ²⁶ Ha'e javive onhemondyipa vyombojerovia Nhanderuete. Okyjepa reve aipoe'i:
— Ange ma jaexa mba'emo porā — he'i okuapy.
Mateus 9.9; Marcos 2.13,14
- ²⁷ Ha'e va'e rire Jesus oo jevy vy oexa peteī imposto re nhombopaga va'ety Levi hery va'e, imposto opagaaty py oguapy oiny rā. Ha'e vy aipoe'i ixupe:
— Eju ke xerupive — he'i.
- ²⁸ Ha'e ramo opu'ā vy oejapa ovv hupive oo aguā.
Mateus 9.10-13; Marcos 2.15-17
- ²⁹ Ha'e rire Jesus pe Levi ojapo peteī ngaru tuvixa va'e ngoo py. Heta avi ikuai ha'e py, imposto re nhombopaga va'ety ha'e amboae kuery hexeve okaru aguā.
- ³⁰ Fariseu ha'e irū kuery lei re nhombo'e va'ety ijayvu okuapy Jesus remimbo'e kuery re. Ha'e vy oporandu:
— Mba'e re tu pekaru ri imposto re nhombopaga va'ety ha'e oejavypa va'e kuery reve?
- ³¹ Jesus ombovai:
— Hexaī va'e kuery ndoipotai 'rā poropoanoa, imba'eaxy va'e kuery anho 'rā oipota.
- ³² Ha'e rami vy xee ma heko porā va'e aenoī aguā e'ŷ aju, ha'e rā heko vai va'e aenoī aguā ojeko rerova aguā — he'i.
Mateus 9.14-17; Marcos 2.18-22
- ³³ Ha'e kuery aipoe'i ixupe:
— João remimbo'e ha'e fariseu remimbo'e kuery ma okaru e'ŷ re ikuai jepi 'rā onhembo'e vy. Ha'e rā neremimbo'e kuery ma any, okaru ha'e oy'u 'rā.
- ³⁴ Ha'e ramo Jesus aipoe'i ha'e kuery pe:
— Omenda py pejapo 'rā ri ty'y oenoī mbyre kuery okaru e'ŷ re ikuai aguā rami, ha'e kuery reve omenda va'e oī teria ja?
- ³⁵ Ha'e rami avi ovaē 'rā ha'e kuerya gui omenda va'e oipe'aa aguā ára. Ha'e va'e ára mae 'rā ha'e kuery ikuai okaru e'ŷ re — he'i.
- ³⁶ Ha'e kuery pe omombe'u avi peteī ayvu mba'emo re ombojoja vy:
— Avave rei ao pyau gui nomboi 'rā ha'ykue ao ymague re omboja aguā. Ha'e rami vy omondoro 'rā ipyau, ha'e ipyau ra'ykue voi ndoja porāi 'rā inhymague re.
- ³⁷ Ha'e avave rei hyru ymague py nomboyru 'rā vinho pyau, mba'eta vinho pyau ombovaipa 'rā hyru. Vinho onheēmba 'rā, hyru voi ivaipa 'rā.
- ³⁸ Ha'e rami 'rāgue py vinho pyau ma hyru pyau py 'rā omboyro. [Ha'e ramo 'rāe mokoīve oī porā.]

* 5:24 João 10.37,38

³⁹ — Ha'e rami avi avave rei vinho ymague oy'u rire ndoy'uxei 'rā ipyau va'e, mba'eta aipoe'i 'rā: “Inhymague ma iporāve.”

6

Mateus 12.1-8; Marcos 2.23-28

¹ Peteī sâbado py trigoty rupi Jesus kuery oaxa jogueravy jave hemimbo'e kuery hi'a oipo'o vy ho'u heravy oipokyty va'ekue.

² Ha'e ramo amongue fariseu kuery aipoe'i:

— Mba'e re tu evoko rami pejapo sâbado ára py nda'evei va'eri?

³ Jesus ombovai:

— Ndaperoayvui teve Davi okaruxe vy oirū kuery reve ojapo va'ekue?

⁴ Ha'e ma Nhanderuete ro py oike vy ojou mbojape Senhor renonde omoī mbyre, ha'e ho'u. Ome'ẽ avi ngupive ikuai va'e pe, ha'e kuery ho'u aguã nda'evei va'eri, sacerdote kuery pe anho ha'eve — he'i.*

⁵ Ha'e aipoe'ive ju ha'e kuery pe:

— Ava ra'y ojeapo va'ekue ma sâbado ára re voi ipo'aka va'e.

Mateus 12.9-14; Marcos 3.1-6

⁶ Sâbado jevy py onhembo'eaty py ju oike vy nhombo'e oiny. Ha'e py oī avi peteī ava ipo oiporu kuaa regua re ipiru va'e.

⁷ Lei re nhombo'e va'ety ha'e fariseu kuery ikuai va'e oexa pota okuapy sâbado ára py pa nhomonguera 'rāa re, hexe ijayvu reixe vy.

⁸ Ha'e rā ha'e kuery opěxaa Jesus oikuaa vy aipoe'i ava ipo piru va'e pe:

— Epu'ā ejuvy mbyte katy — he'i ramo opu'ā ouvy.

⁹ Ha'e ramo Jesus aipoe'i amboae kuery pe:

— Mba'eda tu peikuaa? Ha'eve ri nda'u sâbado ára py jajapo porā, tyrā pa jajapo vai? Ha'eve ri nda'u joekove jaraa jepe, tyrā pa tove tomano? — he'i.

¹⁰ Ha'e gui oyvýry ikuai va'e ha'e javive re oma'ẽ reve aipoe'i ava va'e pe:

— Embo'yvi ndepo.

Ha'e rami opo ombo'yvi ramo okuera.

¹¹ Ha'e rami rā amboae kuery ma ipoxypa, ha'e joupe-upo operando mba'e pa Jesus re ojapo aguã re.

Mateus 10.1-4; Marcos 3.13-19

¹² Ha'e va'e jave py oo yvyty áry onhembo'e aguã. Ha'e vy pytū mbukukue re onhembo'e oiny Nhanderuete pe.

¹³ Ko'embā jave ojea py oenoī guemimbo'e kuery ha'e javi, ha'e vy oiporavo doze. Ha'e va'e kuery pe ma “Apóstolo” he'i:*

¹⁴ Simão hery mboaerā Pedro omoī va'ekue ha'e tyvy André, Tiago ha'e João, Filipe ha'e Bartolomeu,

¹⁵ Mateus ha'e Tomé, Alfeu ra'y Tiago ha'e Simão “Zelote” 'ea va'e,

¹⁶ Tiago ra'y Judas ha'e Judas Iscariotes Jesus jopy uka nhemiarā va'e avi.

Mateus 4.23-25

¹⁷ Ha'e kuery reve oguejy vy yvy joja reia py ju ovaẽ, hemimbo'e kuery mboae ha'e heta rei va'e ikuia py. Judéia ha'e javi gui, Jerusalém, Tiro ha'e Sidom ha'e ye'ẽ rembe katy gui ou va'ekue.

¹⁸ Ha'e kuery ma ayvu oenduxe vy ou va'ekue, omba'eaxy gui okueraxe vy guive. Nhe'ẽ vai omoangeko va'e guive ou rā omonguerapa.

¹⁹ Heta va'e kuery ha'e javive opokoxe hexe, mba'eta ixugui ipo'akaa oẽ va'e py nhomonguerapa ramo.

Mateus 5.1-12

²⁰ Ha'e gui guemimbo'e kuery re oma'ẽ vy aipoe'i ha'e kuery pe:

— Iporiaukue'i pendekuai va'e, pevy'a ete 'rā, mba'eta Nhanderuete po'akaa pendevy guarā oī.

* 6:4 1 Samuel 21.1-6 * 6:13 “Apóstolo” 'ea ma Cristo rembiporavo guery rupi omondouka va'e ayvu omombe'u ha'e nhomonguera aguã.

²¹ — Pevy'a ete 'rā aŷ pekaruxe va'e, mba'eta perekopa 'rā.

— Aŷ pejae'o va'e, pevy'a ete 'rā, mba'eta penderory riae 'rā.

²² — Pevy'a ete 'rā Ava ra'y ojeapo va'ekue káuxa avakue pendere nda'ija'ei vy penemoxē, pendere ijayvu rei ha'e penderery vaikue va'e rami oikuua ramo.

²³ Ha'e nunga oiko rā pevy'a ha'e peporaei, mba'eta heta mba'e yva re oĩ pendevy guarā. Mba'eta yma rupi ha'e rami ae tamoĩ kuery oguerekox raka'e profeta kuery.

Nda'evei ete 'rāa re ijayvuague

²⁴ — Ha'e rā aŷ perekopa va'e pe ma nda'evei ete 'rā, mba'eta perekopa ma penembovy'aarā.

— Nda'evei ete 'rā pekaru porā va'e pe, mba'eta pendu 'rā karuai.

— Nda'evei ete 'rā pevy'a rei va'e pe, mba'eta pendep'y'a vai ha'e pejae'o 'rā.

²⁶ — Nda'evei ete 'rā pendejou porā va'e ha'e javi pe, mba'eta ha'e rami ae peneramoĩ kuery ojou porā rei raka'e profeta ramigua kuery.

Mateus 5.38-42

²⁷ — Ha'e rā xeayvua re pejapyxaka va'e pe ma aipoa'e: Peayvu 'rā pendovaigua kuery, pejapo porā 'rā pendere ija'e e'ŷ va'e pe.

²⁸ Peroayvu porā 'rā pendere inhe'ẽ vai va'e, ha'e pejerure 'rā pendere ijayvu rei va'e re.*

²⁹ Amongue pendova pete rā perova hovai re ju oipete aguã. Amongue pendeparito oipe'a rā penekamixa avi 'rā peraa uka.

³⁰ Peme'ẽ 'rā pêvý ojerure va'e ha'e javi pe. Amongue penemba'e ogueraa ramo nda'evei "Eme'ẽ ju" peje aguã.

³¹ Pêvý avakue ojapo aguã peipotaa rami ae avi peẽ voi pejapo ha'e kuery pe.

Mateus 5.43-48

³² — Xapy'a rei penderayvu va'e anho ri peayvu vy mba'e 'rā tu pejopy ha'e nunga repy? Mba'eta heko vai va'e kuery voi oayvu 'rā guayvua kuery.

³³ Pendevy ojapo porā va'e pe anho ri pejapo porā vy mba'e 'rā tu pejopy ha'e nunga repy? Mba'eta heko vai va'e kuery voi ha'e rami ikuai.

³⁴ Pendevy omboekovia va'erā pe anho ri mba'emo peiporuka vy mba'e 'rā tu pejopy ha'e nunga repy? Mba'eta heko vai va'e kuery voi joupe oiporuka 'rā mba'emo ha'ekue rami ju ojopy aguã.

³⁵ — Ha'e rā peẽ ma peayvu 'rā pendovaigua kuery voi, ha'e pejapo porā joupe, mba'emo peiporuka 'rā hekivia re'ŷ. Ha'e rami rā 'ræ heta omoĩ porāa pendevy guarā, ha'e Yvate ete va'e ra'y pendekuai. Mba'eta ha'e ma ojapo porā 'rā hexe ima'endu'a e'ŷ va'e ha'e heko vai va'e kuery pe voi.

³⁶ Penhomboaxy kuaa 'rā Penderu nhomboaxya rami.

Mateus 7.1-5

³⁷ — Peikuaa pota rei eme joe, pendere oikuua potaa e'ŷ aguã. Penhombopaga eme penembopagaa e'ŷ aguã. Pejoperdoa 'rā pendeperdoaa aguã.*

³⁸ Joupe mba'emo peme'ẽ ri ramo pendevy ju ome'ea 'rā mba'emo. Omboyru porā'i, omomy-momyi, ojapete ramo tynyẽ vaipa vy onheẽmba rei va'e 'rā ome'ea pendevy. Mba'eta joupe pejapoaa rami avi pendevy ju ojapoaa 'rā.

Ára revegua e'ŷ meme jogueraa va'e re ijayvuague

³⁹ Ha'e kuery pe omombe'u avi peteĩ ayvu mba'emo re ombojoja vy:

— Ha'eve ri nda'u ára revegua e'ŷ ogueraa aguã amboae ára revegua e'ŷ? Ha'e rami vy nda'u mokoïve ndo'ai 'rā ri hugua katy?

⁴⁰ Temimbo'e kuery ma imbo'ea gui yvateve va'e'ŷ. Imbo'e porā mbyre ma imbo'eare rami avi 'rā ikuai.*

⁴¹ — Mba'e re tu nderyvy rexa py iky'a oĩ va'e re rexa pota, ha'e rā yvyra nderexa py oĩ va'e re ma ndereikuua potai?

* 6:28 Lucas 23.34; Romanos 12.14 * 6:37 Romanos 2.1-3; 1 Coríntios 4.5; Tiago 4.11,12 * 6:40 Mateus 10.24; João 13.16

⁴² Mba'e re tu nderyvy pe “Xeryvy, tove tanoē iky'a nderexa gui” 're va'eri nderexa py yvyra oī va'e re ma ndereikuaa potai? Heko porā merami rive va'e, enoē ndee ranhe yvyra nderexa gui. Ha'e vy 'rāe rexā porā nderyvy rexā gui iky'a renoē aguā.

Mateus 12.33-37

⁴³ — Jipoi yvyra porā hi'a iporā e'ŷ va'e, neī yvyra iporā e'ŷ va'e voi jipoi hi'a porā va'e.

⁴⁴ Mba'eta yvyra ikuai va'e jaikuua 'rā hi'a re vy. Figo ma nanhamondoi 'rā juu'y gui, ha'e uva ma nanhamondoi 'rā juu rakuaendy gui.

⁴⁵ Heko porā va'e oexā uka 'rā opy'a re mba'emo porā omoī va'ekue, ha'e rā heko vai va'e ma mba'emo vai omoī va'ekue 'rā oexā uka. Mba'eta nhandepy'a re oī va'e re ae 'rā nhandeayvu.

Mateus 7.24-27

⁴⁶ — Mba'e re tu xevy “Senhor, Senhor” peje va'eri ndapejapoi ajapo uka va'e?

⁴⁷ Ha'e javive xea py ou, xeayvu oendu ha'e ha'ekue rami ikuai va'e ma xee amombe'u ta marā rami pa ikuiaia.

⁴⁸ Ha'e kuery ma ikuai peteī ava oorā ojapo vy ijyta kuarā yvy ojo'o puku vy ita áry omo'ā va'e rami. Ha'e gui yy tyguaxu vy oo re ojeapi-api teī ndoityi, omboytā porā rire.

⁴⁹ Ha'e rā xeayvu oendu teī ha'ekue rami nda'ikuai va'e ma ava oorā ojapo vy omboytā vai-vai va'e rami. Ha'e gui oo re yy ojeapi-api vy oitypa vyvvoi, ombovaipa katuī'i.*

7

Mateus 8.5-13

¹ Ha'e va'e ayvu heta va'e kuery pe Jesus omombe'upa ma vy oo Cafarnaum tetā py.

² Ha'e py ma peteī xondaro ruvixa rembiguai oayvu ete va'e imba'eaxy vy omano rai'i oupy.

³ Jesus re ima'endu'aa ramo huvixa oendu vy oīa katy omondouka amongue judeu mongetaaty kuery, ha'e kuery ojerure rā ou vy omonguera aguā hembiguai.

⁴ Ha'e kuery ma Jesus-a py ovaē vy ojerure ete okuapy. Ha'e vy aipoe'i:

— Huvixa ma ha'eve reipytyvō aguā,

⁵ mba'eta nhande kuery irū oiko vy ojapo karamboae ronhembo'e atyrā — he'i okuapy.

⁶ Ha'e ramo Jesus oo ha'e kuery reve.

Oo py ovaē rai'i ma ovy jave xondaro ruvixa omondouka ju oirū kuery regua aipoe'i aguā:

— Senhor, xero py revaē e'ŷ teī ha'eve, mba'eta xee xe'yvy'i ete xero py romovaē aguā.

⁷ Ha'e nunga rupi ndaxepy'a guaxui xee aju aguā ndea py. Peteī ayvu ri eruruka xerembiguai tokuera.

⁸ Mba'eta xee voi xeruvixa oī va'e oipotaa rami aiko va'e. Ikuai avi xondaro kuery xeayvua rami ikuai va'e. Peteī pe “Tereo” ha'e ramo oo 'rā. Ha'e rā amboae pe ma “Eju” ha'e rā ou 'rā. Xerembiguai kuery pe “Ejapo ha'e nunga” ha'e ramo ojapo 'rā — he'i.

⁹ Pova'e ayvu Jesus oendu vy onhemondyi. Ha'e rami vy hupive ou va'e kuerya katy oyere vy aipoe'i:

— Xee ma aipoa'e pēvy: Neī Israel kuerya rupi voi ndajoui teri ha'e rami ojerovia ete va'e — he'i.

¹⁰ Ha'e gui omondouka pyre oo katy ojevy vy oexā rā tembiguai okuera ma ra'e.

Naim tetā py kunha imeve'ŷ va'e pi'a omboete jevyague

¹¹ Ha'e va'e rire'i Jesus oo peteī tetā Naim hery va'e katy. Hupive hemimbo'e kuery ha'e heta va'e kuery oje'oi.

¹² Tetā kora rokē py ovaē rai ovy jave oē jekuaa mba'e guaxu reraa kuery. Ha'e va'e kuery ma peteī kunha imeve'ŷ va'e pi'a peteī'i va'ekue ogueraa. Ixykue'i reve heta avi oje'oi tetā pygua kuery.

¹³ Ha'e nunga Senhor oexā vy omboaxy kunha va'e. Ha'e vy aipoe'i:

— Ejae'o eme.

* ^{6:49} Tiago 1.22-25; 1 João 2.3-6

¹⁴ Ha'e rami vy onhemboja vy opoko omano va'e rupa re. Heraa kuery omombyta vy aipoe'i:

— Kunumi, xee aipoa'e ndevy: Epu'ã ke — he'i.

¹⁵ Ha'e ramo omano va'ekue oguapy oiny vy ijayvu. Ha'e rã ixy pe ju Jesus omboaxa.

¹⁶ Ha'e javive onhemondyipa vy Nhanderuete omboetea rupi aipoe'i:

— Profeta ipo'akapa va'e oiko nhande kuery mbyte, Nhanderuete ojekuaa uka ra'e ojeupequa kuery pe — he'i okuapy.

¹⁷ Ha'e va'e omombe'ua rã oendupaa Judéia ha'e javi rupi, ha'e gui ha'e katy'i rupi ikuai va'e ha'e javi.

Mateus 11.2-6

¹⁸ Ha'e nungakue ha'e javi João Batista pe hemimbo'e kuery omombe'u. Ha'e rã ha'e kuery regua mokoï João oenoï vy

¹⁹ omondouka Senhor-a katy oporandu aguã: “Ndee teve reju 'rã va'ekue, tyrã pa roarõve 'rã amboae?” he'i aguã.

²⁰ Jesus oña py avakue ovaẽ vy aipoe'i ixupe:

— João Batista orembou apy ndevy roporandu aguã: Ndee ae pa reju 'rã va'ekue, tyrã pa roarõve 'rã amboae? — he'i.

²¹ Ha'e va'e jave Jesus heta omonguera imba'eaxy va'e oiko axyague gui, anha onhemondea va'e guive. Heta avi omoma'ẽ ára revegu e'ŷ.

²² Ha'e gui mae ma Jesus ombovai ha'e kuery pe:

— Tapeo pemombe'u João pe pexa ha'e pendu va'ekue: ára revegu e'ŷ oma'ẽ ju, oguata e'ŷ va'ekue oguata, lepra revegu ojeky'a'o, ijapyxa e'ŷ va'ekue oendu, omano va'ekue onhemboete, ha'e iporiaukue'i pe omombe'ua ayvu porã.

²³ Ovy'a ete 'rã xere ojeroviaa gui ndojepo'ai va'e — he'i.

Mateus 11.7-19

²⁴ Oporandu aguã ombou pyre kuery oje'oi ju rire João reko re Jesus ijayvu heta va'e kuery pe: Ha'e vy aipoe'i:

— Marã ramigua pexa aguã tu peo tekao e'ŷa py? Takua'i yvytu omomy-momyí va'e ramigua ri ty'y?

²⁵ Marã ramigua pexa aguã tu peo raka'e? Peteĩ ava ao porã py onhemonde va'e? Ha'e rami avi onhemonde porã ha'e oguerekopa va'e ma huvixa ro py ikuai va'e anho.

²⁶ Marã ramigua tu ha'vy peo pexa? Profeta? Tá, xee aipoa'e pêvy: João Batista ma profeta ikuai va'e gui voi yvateve va'e.

²⁷ Mba'eta hekorã re ae ipara oiny: “Xee amondouka 'rã peteĩ xerembiguai nerenderã, nderaperã oguerekopu katu aguã”, he'i va'ekue.*

²⁸ Xee aipoa'e pêvy: Kunha gui oiko va'ekue jipoi João Batista gui yvateve va'e. Ha'e rã Nhanderuete po'akaa py yvyigueve'i va'e ma ixugui yvateve — he'i.

²⁹ Ha'e javive oendu va'e ha'e imposto re nhombopaga va'ety kuery voi Nhanderuete guigua teko porã João omombe'u rã oendu vy ixupe onhemongarai uka va'ekue.

³⁰ Ha'e rã fariseu ha'e lei re nhombo'e va'ety kuery ma Nhanderuete oipotaa rami nda'ikuaxiei vy João pe nonhemongarai ukai va'ekue. Ha'e gui aipoe'ive ju:

³¹ — Mba'e nunga re nda'u ambojoja 'rã aŷguakuery reko? Marã rami nda'u ha'e kuery ikuai?

³² Ha'e kuery ma ikuai kyrigue tetã mbyte rupi oguapy vy joupe-upo ojapukai va'e rami: “Mimby romonhe'ẽ ramo peẽ ndapejeroky, ha'e gui omanoa pygua romonhendu ramo ma ndapejae'oi”, he'i va'e kuery rami.

³³ Mba'eta João Batista ou vy mbojape ho'u e'ŷ re oiko, vinho ndoy'ui guive. Ha'e rami rã ixupe peẽ kuery “Anha reve rima oiko”, peje.

³⁴ Ha'e rã Ava ra'y ojeapo va'ekue ma ou vy okaru ha'e oy'u ramo ixupe “Peva'e ma okaru guaxu, vinho oy'u, ha'e imposto re nhombopaga va'ety heko vai va'e kuery re onhemoirũ va'e”, peje.

³⁵ Ha'e rã hi'arandu va'e kuery ha'e javi ma ojou porã 'rã 'arandu rupi ikuai va'e — he'i.

* 7:27 Malaquias 3.1

Kunha heko vai va'ekue Jesus py re heakuā porā va'e oikytyague

³⁶ Peteī fariseu oenoī Jesus hexeve oo vy okaru aguā. Ha'e rā fariseu ro py Jesus ovaē ma vy mesa py oī.

³⁷ Peteī kunha heko vai va'ekue ha'e va'e tetā pygua ae oikuua fariseu ro py okaru oinya. Ha'e rami vy oīa py peteī heakuā porā va'e ryru ogueru, ita xiī va'e guigua.

³⁸ Hakykue gui onhemboja vy ojae'o reve omoakī ipy guexay py, ha'e o'a py ju omombiru. Ipy rupi oayvu reve oikyty heakuā porā va'e.

³⁹ Ha'e nunga fariseu henoīare oexa vy aipoe'i ojeupe ae:

— Peva'e ma profeta ete va'e rire oikuua 'rāgue mba'e nunga kunha pa hexe opoko va'ea, mba'eta heko vai va'e — he'i.

⁴⁰ Ha'e ramo Jesus aipoe'i fariseu pe:

— Simão, peteī mba'e areko amombe'u va'erā ndevy.

Ombovai:

— Emombe'u ha'vy, porombo'ea — he'i.

⁴¹ Aipoe'i:

— Oiko peteī nhomboreve va'ety. Ha'e va'e pe mokoī oreve. Peteī oreve quinhentos ára repy, ha'e rā amboae ma cinqüenta oreve.

⁴² Neī peteīve ma ndoguerekoi omboekovia aguā. Ha'e ramo imboreveare omboguepa mokoīve orevea. Mokoīve gui mava'e nda'u oayvuve?

⁴³ Simão ombovai:

— Xee aikuua rā oreve retave va'ekue — he'i.

Ha'e ramo aipoe'i ixupe:

— Ha'veea rami rembovai — he'i.

⁴⁴ Ha'e gui kunha va'e re ranhe oma'ē vy aipoe'ive ju Simão pe:

— Rexa pa kova'e kunha? Ndero py xee avaē ramo ndee ndererui yy xepy ajoī aguā. Ha'e rā peva'e kunha ma guexay py ae ojoi xepy, ha'e gui o'a py ju omombiru.*

⁴⁵ Ndee ma xerova rupi ndereayvui. Ha'e rā peva'e ma avaē guive xepy rupi oayvupa.

⁴⁶ Ndee ma azeite ndereikyti xeakā re. Ha'e rā peva'e ma xepy re oikyty oiny heakuā porā va'e.

⁴⁷ Ha'e nunga rupi aipoa'e ndevy: Peva'e ojejavy eteague omboguepaa ma, mba'eta xerayvu ete. Ha'e rā ojejavyague nombogueaive va'e ma ndaxerayvui 'rā — he'i.

⁴⁸ Ha'e gui ma kunha va'e pe aipoe'i:

— Rejejavyague omboguepaa ma.

⁴⁹ Ha'e ramo hexeve okaru va'e kuery joupe-upa aipoe'i:

— Mava'e nda'u peva'e ava jejavya voi ombogue va'e? — he'i okuapy.

⁵⁰ Ha'e ramo Jesus aipoe'i kunha va'e pe:

— Rejeroviaa ndereraa jepe ma. Tereo porā ke.

8

Kunhague Jesus pytyvōa kuery rery oīa

¹ Ha'e rire Jesus oguata oikovy tetā ha'e tekoia ikuai va'e rupi. Omombe'u ovy ayvu porā Nhanderuete po'akaa regua. Hupive hemimbo'e kuery doze va'e oje'oi,

² ha'e amongue kunhague anha gui ha'e mba'eaxy gui ogueraa jepe va'ekue avi: Maria Madalena hery va'e sete anha gui oepy va'ekue,

³ huvíxa Herodes rembiguai Cuza ra'yxy Joana, ha'e gui Suzana. Heta avi kunhague mboae oje'oi mba'emo py oipytyvō va'ety kuery.

Mateus 13.1-9; Marcos 4.1-9

⁴ Jesus oīa py heta ou opa rupi tetā ikuai va'e gui. Ha'e ramo omombe'u peteī ayvu mba'emo re ombojoja vy:

* ^{7:44} Ha'e kuery reko rami vy oo py ovaē ramo hoo va'e omovaē vy ogueru ruka 'rā yy ipoua kuery ojepyei aguā, tape rupi yvy ku'i heta va'e gui (Gênesis 19.2, 24.32, 43.24, Juízes 19.21, João 13.1-14).

⁵ — Peteĩ ava oo mba'emo ra'yĩ moaĩ vy. Ha'e va'e omoaĩ ramo amongue ha'yĩgue ho'a tape yvýry. Ha'e nunga re opyrõmbaa, guyra'i ho'upa guive.

⁶ Amboae ma itaty reia rupi ho'a. Ha'e nungakue yvate'i vyve ipiru, na'inhakyi ramo.

⁷ Amboae ma juu mbyte rupi ho'a. Ha'e nungakue jojavi yvate vy ojukapa.

⁸ Ha'e rã amboae ma yvy porãa rupi ho'a. Ha'e nungakue ma yvate ha'e hi'a porã. Cem ra'yĩ peteĩ-teĩ gui oiko.

Ha'e rami ijayvupa ma vy aipoe'i:

— Ijapyxa oendu aguã oĩ va'e toendu.

Mateus 13.10-23; Marcos 4.10-20

⁹ Hemimbo'e kuery oikuua porãvexe vy oporandu ixupe:

— Mba'e nunga re tu pova'e rembojoja?

¹⁰ Jesus ombovai:

— Pendevy ma Nhanderuete oikuua uka opo'akaa py mba'emo oiko va'e ndoikuua ukai va'ekue. Ha'e rã amboae kuery pe ma mba'emo re ambojaa rupi rive amombe'u ayvu, ha'e kuery oexa teĩ ndoexa kuaai aguã, ha'e oendu teĩ noendu kuaai aguã.*

¹¹ — Pova'e nunga re ma ambojoja kuri. Ha'yĩgue'i ma Nhanderuete ayvu.

¹² Tape yvýry ho'a va'ekue rami ikuai va'e ma ayvu oendu teĩ anha ou vy ipy'a gui oipe'a 'rã, oguerovia e'ŷ ha'e oo jepe e'ŷ aguã.

¹³ Itaty reia rupi ho'a va'ekue rami ikuai ayvu oendu vy ojou porã ha'e oguerovy'a va'e. Ndapo pukui va'e rami avi ikuai vy xapy'a'i anho 'rã ojerovia. Ha'e gui mba'emo oiko rã ojepe'a 'rã.

¹⁴ Juu mbyte rupi ho'a va'ekue rami ikuai va'e ma ayvu oendu teĩ mba'emo yvy regua re, omba'e rei-reirã ha'e mba'emo imbovy'aarã re openave vy hexaraipa. Ha'e rami vy ndai'ai.

¹⁵ Ha'e rã yvy porãa rupi ho'a va'ekue rami ikuai va'e ma ayvu oendu vy opy'a re omoi. Ha'e kuery ma ojepe'a e'ŷ vy hi'a porã.

Marcos 4.21-25

¹⁶ — Avave rei tataendy nhamoendy vy ndajajao'i 'rã mba'emo ryru py, neĩ tupu guýry nanhamoĩ. Ha'e rami 'rãgue py imoiny oĩaty py ae 'rã jaupi, oike va'e kuery oexa aguã hendy va'e.

¹⁷ Ndoexa ukai pyre ojekuaapa 'rã, ha'e onhomu mbyre oikuua ukapaa 'rã.

¹⁸ Ha'e nunga rupi peikuua pota ke marã rami pa pendua re. Mba'eta mba'emo oguereko va'e pe ome'ẽave 'rã. Ha'e rã oguereko e'ŷ va'e gui ma oipe'apaa 'rã oguereko rei'i merami va'ekue — he'i.*

Mateus 12.46-50; Marcos 3.31-35

¹⁹ Jesus oĩa py ixy ha'e tyvy kuery ovaẽxe teĩ heta va'e kuery ikuai va'e gui nda'evei ovaẽ ete aguã.

²⁰ Ha'e ramo omombe'ua ixupe:

— Ndexy ha'e nderyvy kuery, pee oka py ikuai nderexaxe vy — he'i.

²¹ Ombovai:

— Ha'i ha'e xeryvy kuery ma Nhanderuete ayvu oendu vy ha'ekue rami ae ikuai va'e.*

Mateus 8.23-27; Marcos 4.35-41

²² Peteĩ ára oĩ kanoã py guemimbo'e kuery reve. Ha'e vy ha'e kuery pe

— Jaaxa yupa rovai re — he'i. Ha'e vy oje'oi.

²³ Yy rupi ooa ja ha'e oke oupy.

Ha'e gui yupa áry rupi ou yvytu atã. Ha'e ramo kanoã oike rai-rai'i yy py.

²⁴ Ha'e ramo ha'e kuery ovaẽ Jesus ituia py. Omomyi vy aipoe'i:

— Orembo'ea, orembo'ea, nhamanomba ta rima! — he'i okuapy. Ha'e ramo Jesus omyi vy ijayvu atã yvytu ha'e yai pe. Ha'e ramove optyu'upa, nda'yvytuvei.

²⁵ Ha'e ramo aipoe'i ha'e kuery pe:

— Mamo tu oĩ pejeroviaa?

Ha'e ramo ha'e kuery onhemondyipa, okyje guive. Ha'e vy aipoe'i joupe-up:

* 8:10 Isaías 6.9-10

* 8:18 Marcos 4.24, Tiago 1.22-25

* 8:21 Hebreus 2.11,12

— Marā ramigua tu peva'e, yvytu ha'e yai pe ijayvu ramo voi onhe'ẽ rendu aguā?
Mateus 8.28-33; Marcos 5.1-14

26 Ha'e gui geraseno kuery yvy katy ju oje'oi Galiléia yupa rovaigua re.

27 Kanoā gui oguejypa ramove ou peteī ava tetā gui. Ha'e va'e re ma anha onhemonde ramo yma rei ma ao nomoīvei, neī ngoo rupi ndopytavei va'e. Yvyra rupa rupi rive tema oiko.

28 Ha'e va'e oexa Jesus vyve guenapy'ã re oī henonde. Ha'e vy aipoe'i ojapukai atā reve:

— Jesus Nhanderuete Yvate ete va'e Ra'y, mba'e tu xee areko ndereve? Xee ajerure xemoingo axy e'ŷ aguā — he'i.

29 Mba'eta anha pe Jesus ijayvu ae ma ava gui oēmba aguā, mba'eta mbovykue rei e'ŷ ma oguereko axy. Ipy ha'e ipo corrente py ojokuapaa teī omondopa kuerei. Ha'e ramo anha kuery ogueraa 'rā tekaoa e'ŷa rupi.

30 Ha'e gui ma Jesus oporandu ixupe:

— Mba'exa tu nderery?

Ombovai vy

— Heta va'e — he'i, hexe heta anha onhemonde ramo.

31 Ha'e vy ojerure yvykua vaikue py omondouka e'ŷ aguā.

32 Ha'e katy'i ma heta ikuai poryko okarua py yvyty re. Anha kuery ojerure omondouka aguā poryko re ju onhemonde aguā. Ha'e ramo Jesus omondouka.

33 Ha'e ramo ava gui anha kuery oēmba vy poryko re ju onhemonde. Ha'e ramo yvy'ã guy katy onhamba jogueravy. Yy py ho'apa vy oy'upa.

34 Ha'e gui ma poryko re opena va'e kuery mba'emo oiko va'e oexa vy onhamba jogueravy, omombe'u tetā ha'e tekaoa ikuai va'e rupi.

Mateus 8.34; Marcos 5.14-20

35 Ha'e pygua kuery ou oiko va'ekue oexaxe vy. Jesus oīa py ovaẽ vy oexa ava anha kuery oēmbaague va'e. Ha'e va'e ma onhemonde ha'e hi'arandua oī porā ju ma. Jesus yvy'iry oguapy oiny. Ha'e rā ha'e kuery ndaekorāvei rei okuapy.

36 Ha'e kuery pe hexaare regua omombe'u marā rami vy pa anha gui oepyague.

37 Geraseno kuery opa rupi gui ou va'ekue okyje vy ixupe ojerure ha'e kuery rekoaa gui ojepe'a aguā. Ha'e ramo kanoā py Jesus ojeupi vy oo ju.

38 Ha'e rā ava anha kuery oēmbaague va'e ma ojerure hupive oo aguā. Ha'e rami teī Jesus omondouka vy aipoe'i:

39 — Tereo ndero pygua kuery pe emombe'u Nhanderuete ndevy ojapo va'ekue — he'i. Ha'e ramo tetā jave rupi oo vy omombe'u hexe Jesus ojapo va'ekue ha'e javi.

Mateus 9.18,19; Marcos 5.21-24

40 Ha'e gui Jesus ojevy ramo heta va'e kuery oarō okuapy va'e omovaẽ porā ov'y'a reve.

41 Ha'e jave py ma ou peteī ava Jairo hery va'e, onhembo'eaty pygua huvixa. Ha'e va'e ma Jesus renonde guenapy'ã re oī vy ojerure hoo py ovaẽ aguā,

42 mba'eta tajy peteī'i va'e doze ma'etŷ oguereko va'e omano rai'i oupy ramo.

Mateus 9.20-22; Marcos 5.24-34

Jesus ooa rupi heta va'e kuery omboty rei oje'oivy.

43 Oiko avi peteī kunha doze ma'etŷ re ma gueko re riae oiko va'e. Avave rei nomonguer-avei ma, [ha'e oguereko va'ekue ha'e javi ome'ẽ ma poropoanoa kuery pe.]

44 Ha'e va'e ma Jesus rakykue gui ovaẽ vy opoko ijaop re. Ha'e ramove optytu'u vyvoi hekoaxy.

45 Ha'e ramo Jesus aipoe'i:

— Mava'e tu xere opoko?

Ha'e javive nomombe'uxei ramo Pedro [oirū kuery reve] aipoe'i:

— Orembo'ea, heta nderakykue ou va'e ndejopy rei heravy nemboty rei vy, [va'eri ndee "Mava'e tu xere opoko?" 're.]

46 Ha'e rami teī Jesus aipoe'ive tema:

— Amongue ta'vy xere opoko teve, mba'eta aendu xegui xepo'akaa oē rā — he'i.

⁴⁷ Ha'e ramo kunha va'e onhenhomu aguā nda'evei ramo ou oryryipa reve, guenapy'ā re oī henonde. Ha'e vy pavē oendua py onhemombe'u mba'e re pa hexe opokoa, ha'e opoko vyve okueraague.

⁴⁸ Ha'e ramo ixupe aipoe'i:

— Xerajy, rejeroviaa ndereraa jepe. Tereo porā ke.

Mateus 9.23-26; Marcos 5.35-43

⁴⁹ Jesus ijayvu teri ho'amys reve peteī ou onhembo'eaty pygua ruvixa ro gui. Ha'e vy aipoe'i ixupe:

— Nderajy omano ma. Nda'eveei ma porombo'ea remoangekove aguā — he'i.

⁵⁰ Ha'e nunga Jesus oendu vy aipoe'i tuu pe:

— Enhemondyi eme, ejerovia tema. Ha'e ramo oo jepe 'rā — he'i.

⁵¹ Ha'e gui oo py ovaē vy avave rei ndogueroikei, Pedro, João, Tiago, ha'e kunha'i ru ha'e ixy e'ŷ vy.

⁵² Ha'e javive ipy'a vai vy ojae'o okuapy rā oexa vy aipoe'i:

— Pejae'o eme. Kunha'i va'e nomanoi, oke rima — he'i.

⁵³ Ha'e ramo ojojai rei okuapy, omano maa oikuaa vy.

⁵⁴ Ha'e rā kunha'i va'e po re Jesus ojopy vy ijayvu atā reve aipoe'i ixupe:

— Kunha'i, evy ke.

⁵⁵ Ha'e ramove hexe inhe'ē ojevy ramo opu'ā. Ha'e ramo omongaru uka.

⁵⁶ Tuu kuery onhemondiyipa. Ha'e ramo ha'e kuery pe aipoe'i avave rei pe omombe'u e'ŷ aguā oiko va'ekue.

9

Mateus 10.1,5-15; Marcos 6.7-13

¹ Doze guemimbo'e kuery Jesus oenoī vy ombopo'aka anha kuery ha'e javi re, ha'e nhomonguera aguā re.

² Ha'e vy omontouka Nhanderuete po'akaa regua omombe'u ha'e imba'eaxy va'e omonguera aguā.

³ Ha'e vy aipoe'i ha'e kuery pe:

— Mba'eve rei peraa eme peoa rupi, neī popoka, voko, mbojape, peráta ha'e kamixa voi peraa eme mokoī.

⁴ Oo py pevaēa py ae pepyta peove peve.

⁵ Ha'e gui tetā re napenemovaēai ramo pendepy regua gui peity-ity 'rā peovy yvy ku'i, ha'e kuery pe peikuaa uka aguā peja peovya — he'i.*

⁶ Ha'e ramo hemimbo'e kuery ma tekua ha'e javi rupi oje'oi vy ayvu porā omombe'u ha'e nhomonguera opa rupi.

Mateus 14.1-12; Marcos 6.14-29

⁷ Ha'e gui huvixa Herodes oendu omombe'u rā Jesus mba'emo ojapo oikovya. Ha'e vy ndoikuuai rei, mba'eta amongue aipoe'i:

— João omanoague gui onhemboete ju va'ekue.

⁸ Amboae ma — Elias rima oiko — he'i.

Ha'e rā amboae ma — Peteī profeta yma oiko va'ekue rima oiko — he'i.

⁹ Ha'e rā Herodes ma aipoe'i:

— João akā ma xee ae ajaya uka va'ekue. Marā ramigua tu ha'vy oiko ha'e nunga apoa omombe'ua rā aendu? — he'i. Ha'e rami vy onhea'ā oexa aguā.

Mateus 14.13-21; Marcos 6.30-44; João 6.1-14

¹⁰ Apóstolo kuery ojevypa ma vy Jesus pe omombe'upa ojapo va'ekue ha'e javi. Ha'e ramo ogueraa Betsaida tetā py ha'e kuery ae'i ikuai aguā.

¹¹ Ha'e rami teī heta va'e kuery oikuaa vy oje'oi hakykue. Ha'e ramo omovaēmba vy ijayvu Nhanderuete po'akaa re, imba'eaxy va'e voi omonguera.

¹² Ka'aru rai jave hemimbo'e kuery doze va'e ou vy aipoe'i ixupe:

* 9:5 Atos 13.50,51; 18.6

— Emondoukapa ju heta va'e kuery, tetā ha'e tekao kii rai'i ikuai va'e rupi oje'oi vy oke ha'e ho'u va'erā ojou aguā, mba'eta apy ma tekao e'ŷa py nhandekuai — he'i okuapy.

¹³ Ha'e rā aipoe'i ha'e kuery pe:

— Peẽ ae peme'ẽ ho'u va'erā.

Ha'e kuery ombovai:

— Mba'eve ndoroguererekoi, peteĩ nhiruĩ mbojape ha'e mokoĩ pira'i e'ŷ vy. Tyrā pa ore ae toroo tembi'u rojogua aguā ha'e javive peguarā? — he'i.

¹⁴ Ha'e py rānda'u ikuai cinco mil avakue.

Ha'e gui ma aipoe'i guemimbo'e kuery pe:

— Pemboguapy peteĩ-teĩ henda py cinqüenta ikuai aguā rami — he'i.

¹⁵ Ha'e ramo ha'e kuery ha'e rami ojapo vy omboguapypa.

¹⁶ Ha'e gui Jesus ma peteĩ nhiruĩ mbojape ha'e mokoĩ pira ojopy vy yva re oma'ẽ reve oguerovy'a Nguuete. Ha'e vy oipe'ãmba'i vy ome'ẽ guemimbo'e kuery pe, ha'e kuery ju ome'ẽ-me'ẽ aguā heta va'e kuery pe.

¹⁷ Ha'e javive okaru vy hevyatāmba. Ha'e ramo hembyrekue omono'õ vy doze varai ju omonyē.

Mateus 16.13-21; Marcos 8.27-31

¹⁸ Ha'e ae'i onhembo'e oinya py hemimbo'e kuery ou ramo oporandu ha'e kuery pe:

— Marā ramigua aikoa rami tu heta va'e kuery oikuua?

¹⁹ Ha'e kuery ombovai:

— João Batista. Amboae kuery ma “Elias” he'i. Ha'e rā amboae kuery ma peteĩ profeta ymave guare renhemboete ju va'ekue reikoa rami oikuua — he'i.

²⁰ Ha'e gui ma oporanduve ju:

— Ha'vy peẽ kuery, marā ramigua aikoa pa peikuaa?

Ha'e ramo Pedro ijayvu vy aipoe'i:

— Ndee ma Cristo Nhanderuete remimbou — he'i.

²¹ Ha'e rami rā aipoe'i omombe'u e'ŷ aguā avave rei pe.

²² Ha'e vy aipoe'i:

— Ava ra'y ojeapo va'ekue ma oiko axy 'rāe. Mba'eta nhomongeta va'ety, sacerdote yvatekueve va'e ha'e lei re nhombo'e va'ety kuery nda'ija'ei 'rā hexe. Ha'e gui ojukaa rire mboapy araa py onhemboete ju 'rā.

Mateus 16.24-28; Marcos 8.34-9.1

²³ Ha'e gui ma aipoe'i pavē pe:

— Xerupive oikoxe va'e taexarai ojegui ae, ko'ẽ nhavō togueraa ojeupegua kuruxu, ha'e tou xerakykue.

²⁴ Mba'eta nomanoxei ete va'e ma omokanhý 'rā guekove. Ha'e rā xekáuxa omano va'e ma ogueraa jepe uka 'rā guekove.*

²⁵ Mba'e 'rā tu avakue ojou, mba'emo yvy regua ha'e javi oguerekopa va'eri guekove ae omokanhý vy, e'ŷ vy ha'e ae onhemoingo axy uka rire?

²⁶ Mba'eta amongue xee ha'e xeayvua ogueroxí rire, ha'e kuery ma Ava ra'y ojeapo va'ekue voi ogueroxí 'rā guexakā rupi ou jevy ma vy, Nguu rexakā ha'e anjo iky'a e'ŷ va'e kuery rexakā rupi.

²⁷ Anhetē aipoa'e pêvy: Apy peĩ va'e regua amongue napemanoi 'rā Nhanderuete po'akaa ojekuaa ouvy rā pexa e'ŷa ja.

Mateus 17.1-8; Marcos 9.2-8

²⁸ Ha'e rami ijayvu rire oito araa py ma ngupive Pedro, João ha'e Tiago ogueraa vy peteĩ vytytá áry oẽ onhembo'e aguā.

²⁹ Onhembo'e oiny jave hova guexakā py ojekuaa, ha'e ijaõ ma xiimba rei hexakāmba vy.

³⁰ Ha'e jave mokoĩ avakue ijayvu jekuaa hexeve, Moisés ha'e Elias.

³¹ Ha'e va'e kuery ma hexakā rupi ojekuaa vy hexeve ijayvu okuapy Jerusalém tetā py Jesus oo vy ojexavai ranhe aguā oiko va'erā re.

* 9:24 João 12.24-26; Apocalipse 2.10, 12.11

³² Ha'e rā Pedro ha'e oirū kuery ma hopeyi vaipa okuapya ramive ndoke etei'i vy oexa hexakā ha'e mokoī avakue hexeve hi'aī va'e.

³³ Jesus-a gui ha'e kuery ojepe'a ta ma ramo Pedro aipoe'i ixupe:

— Orembo'ea, ha'eve apy nhaīve aguā. Ha'e ramo rojapo 'rā mboapy oo'i: peteī ma ndevy guarā, amboae ma Moisés pe, ha'e gui amboae ju ma Elias peguarā — he'i. Oikuaa vy e'ŷ ha'e rami ijayvu.

³⁴ Ha'e rami ijayvu teria ja peteī arai ou vy ojao'ipa. Arai ojao'i rā ha'e kuery okyjepa.

³⁵ Ha'e va'e mbyte gui ou nhendu peteī ayvu aipoe'i va'e:

— Peva'e ma Xera'y xerembiporavo. Pejapyxaka ijayvua re — he'i.*

³⁶ Ha'e va'e nonhenduvei rire Jesus ha'e ae'i ju hi'aī. Ha'e va'e rire ma hemimbo'e kuery okyrirī okuapy, ha'e va'e jave avave rei pe nomombe'ui oexa va'ekue.

Mateus 17.14-18; Marcos 9.14-27

³⁷ Ko'ē jevy yvyty gui oguejy jogueruvy ramo heta ou Jesus ovaexī vy.

³⁸ Teta mbyte gui peteī ava ojapukai nhendu vy aipoe'i:

— Porombo'ea, ajerure rema'ē aguā xera'y re, peteī'i va'e ramo.

³⁹ Hexe ma nhe'ē vai onhemonde ramo ojapukai xapy'a vy ho'a 'rā yvy rupi. Anha oguereko axy rei vy ombojuru ryjuipa ha'e ombojejukapa ma vy mae ma 'rā oeja.

⁴⁰ Ajerure teī neremimbo'e kuery oipe'a aguā, ha'e kuery ndoipe'a kuaai — he'i.

⁴¹ Ha'e ramo Jesus ombovai:

— Peē pejerovia e'ŷ ha'e pendeko vai va'e, raka'e peve 'rā nda'u xee aiko pendereve, rogueropo'aka aguā? Eru ha'vy ndera'y — he'i.

⁴² Oguerovaē heruvy rā anha oity ju yvy rupi. Opa marā rei oguereko ramo Jesus ijayvu atā anha pe. Ha'e rami vy kunumi va'e omonguera vy omboaxa ju tuu pe.

⁴³ Ha'e ramo pavē rei onhemondyipa Nhanderuete po'akaa oexa uka rā oexa vy.

Mateus 17.22,23; Marcos 9.30-32

Jesus ojapo va'e pavē oexa vy onhemondyipa ramo aipoe'i guemimbo'e kuery pe:

⁴⁴ — Penema'endu'a riae ke pov'a'e ayvu re: Ava ra'y ojeapo va'ekue omboaxaa 'rā avakue po py — he'i.

⁴⁵ Ha'e rami teī ha'e kuery noendu kuaai, ndoikuua uka porāvei ramo. Nda'ipy'a guaxui vy noporandui guive ha'e nunga re.

Mateus 18.1-5; Marcos 9.33-37

⁴⁶ Ha'e kuery joupe-upē ijayvu mava'e ete pa joegui yvateve va'e omoña 'rāa re.

⁴⁷ Ha'e rā Jesus ma ha'e kuery py'a re oī va'e oikuua vy ojee monhemboja peteī kyrī va'e, ha'e omoñ oyvy'iry.

⁴⁸ Ha'e vy aipoe'i guemimbo'e kuery pe:

— Amongue xerery rupi kova'e kyrī va'e omovaē vy xee avi xemovaē. Ha'e xemovaē va'e ma xembouare avi omovaē. Mba'eta peē kuery va'e regua pavē gui yvyīve va'e ma yvateve va'e oiko.

Marcos 9.38-40

⁴⁹ João aipoe'i:

— Orembo'ea, peteī ava roexa kuri nderery rupi anha oipe'a rā. Ha'e ramo ndoroipe'a ukavei, mba'eta nhanderupivegua e'ŷ ramo — he'i.

⁵⁰ Ha'e ramo Jesus ombovai:

— Nda'evei ndapeipe'a ukai aguā, mba'eta penderovaigua e'ŷ va'e ma penderupivegua ae.

Samaria pygua kuery Jesus nomovaēiague

⁵¹ Yva re ju heraa aguā ovaē rai'i ma ramo, hova re ojekuaa Jerusalém katy oo aguā opy'a re omoñ va'ekue.

⁵² Ha'e vy guenonderā omondouka imombe'uarā. Ha'e ramo ha'e kuery oo vy peteī Samaria pygua kuery rekoa py ovaē oguereko katu aguā oke aguā.

⁵³ Ha'e rā ha'e pygua kuery ma nomovaēxei, Jerusalém katy ooa oikuua vy.*

* 9:35 2 Pedro 1.16-18 * 9:53 Samaria pygua kuery nomovaēxei, mba'eta judeu kuery reve joe ija'e e'ŷ va'e vy (João 4.9).

- ⁵⁴ Ha'e nunga hemimbo'e kuery Tiago ha'e João oexa vy oporandu ixupe:
 — Senhor, reipota pa rombou uka tata yva gui ha'e kuery omomba aguã?
- ⁵⁵ Ha'e ramo Jesus ojere vy ijayvu atã ha'e kuery pe. [Ha'e vy aipoe'i:
 — Peẽ kuery ndapeikuuai mba'e nunga nhe'ẽ gui pa peikoa.
- ⁵⁶ Mba'eta Ava ra'y ojeapo va'ekue ma avakue nhe'ẽ omomba aguã e'ŷ ou, ha'e rã ogueraa jepe aguã — he'i.]
- Ha'e gui amboae tekoa katy ju oje'oi.
- Mateus 8.18-22*
- ⁵⁷ Ha'e kuery oje'oia rupi amongue aipoe'i:
 — Xee aa ta nderupive reoa katy rei.
- ⁵⁸ Ha'e rã Jesus ombovai:
 — Aguara'i oguerekro 'rã okua, guyra'i oveve va'e voi oguerekro guaity. Ha'e rã Ava ra'y ojeapo va'ekue ma neĩ oakã omboguejaty ndoguerekoi — he'i.
- ⁵⁹ Amboae pe Jesus aipoe'i:
 — Eju katu xerupive.
- Ha'e va'e ombovai:
 — Taa ranhe xeru tanhono porã.
- ⁶⁰ Ha'e ramo Jesus aipoe'ive ju:
 — Tove omanogue ae tonhono porã omano va'ekue. Ha'e rã ndee ma tereo emombe'u Nhanderuete po'akaa — he'i.
- ⁶¹ Amboae ju aipoe'i ixupe:
 — Senhor, xee aa ta nderupive. Ha'e rami teĩ taa ranhe tamombe'u xero pygua kuery pe.
- ⁶² Ha'e rã Jesus ombovai:
 — Avave rei yyv karaia re ojopy heravy reve guakykue re oma'ẽ va'e nda'evei Nhanderuete po'akaa pygurã — he'i.

10

- Setenta guemimbo'e kuery omondoukaague*
- ¹ Ha'e va'e rire Senhor ma setenta ju oiporavo, ha'e vy guenonderã mokõ-mokoĩ omondouka tetã ha'e tekoa nhavõ ha'e oo aguã rupi.
- ² Ha'e kuery pe aipoe'i imondovy:
 — Mba'ety ma tuvixa, ha'e rã ombo'eapo va'e kuery ma mbovy'i. Ha'e nunga rupi pejerure Senhor mba'ety ja pe omboou retave aguã imba'ety rupi ombo'eapo va'erã.
- ³ Tapeo. Xee romondouka vexa'i rami aguara mbyte rupi.
- ⁴ Peraa eme voko, popoka, neĩ py regua. Tape rupi pexarura eme guive avave pe.
- ⁵ Joo py pevaẽ vy aipopeje 'rã: "Kova'e oo pygua kuery ta'ikuai porã", peje.
- ⁶ Xapy'a rei ha'e py oiko porãxe va'e oĩ ramo hexe oiko 'rã peroayvu porãague. Ha'e rã jipoi ramo pendere ae 'rã ojeapa peroayvu porãague.
- ⁷ Oo pevaẽague py ae 'rã pepyta. Pe'u ha'e pey'u 'rã ha'e kuery ome'ẽ va'e rei. Mba'eta ombo'eapo va'e kuery ma ha'eve ojopy aguã ombo'eapoague repy. Peva eme oo mboae-ae rupi.
- ⁸ Tetã pevaẽa py penemovaẽ porã ri ramo pe'u 'rã ome'ẽ va'e rei.
- ⁹ Ha'e py pemonguera 'rã imba'eaxy va'e, ha'e aipopeje ha'e kuery pe: "Pendevy namombyryvei ma Nhanderuete po'akaa ojekuaa aguã", peje.
- ¹⁰ Ha'e rã tetã pevaẽa py napenemonhembojaai ramo tape rupi peo vy aipopeje 'rã:
- ¹¹ "Peneretã guigua yyv ku'i orepy re oja va'ekue voi roitypa, penderovai roikuua uka aguã roeja ma rovya. Ha'e rami teĩ peikuua pota povae re: Namombyryvei ma Nhanderuete po'akaa ojekuaa aguã", peje.*
- ¹² Aipoa'e peẽ kuery pe: Opaa ára ha'e va'e tetã pygua kuery gui Sodoma pygua kuery nombopagaive 'rã.

Mateus 11.20-24

* 10:11 Lucas 9.5

¹³ — Peē Corazim ha'e Betsaida pygua kuery pe nda'evei ete 'rā.* Mba'eta pendea py hexa pyrā ajapo va'e ramigua Tiro ha'e Sidom tetā py ajapo va'e rire, ha'e kuery ojeko rerova voi 'rāgue. Ha'e rami vy ajukue vaikue py onhemonde vy oguapy 'rāgue tanhimbu py.

¹⁴ Ha'e nunga rupi nhombopagaa ára peē kuery gui omboaxyave 'rā Tiro ha'e Sidom pygua kuery.

¹⁵ Ha'vy peē Cafarnaum pygua kuery, peo 'rā teve yva peve? Any, pe'a 'rā tata ogue e'ŷ va'e py.

¹⁶ — Pendeayvu oendu va'e ma xeayvu avi oendu, ha'e rā napenenhe'ẽ rendui va'e ma xee avi naxenhe'ẽ rendui. Ha'e rā naxenhe'ẽ rendui va'e ma xembouare avi nonhe'ẽ rendui.

Setenta oo va'ekue ojevypaague

¹⁷ Ha'e gui setenta omondouka va'ekue ov'y'a reve ojevy vy aipoe'i okuapy:

— Senhor, nderery rupi oreayvu ramo anha kuery voi orenhe'ẽ rendu karamboae! — he'i okuapy.

¹⁸ Ha'e rā ombovai:

— Xee ma Satanás aexa karamboae overa va'e rami yva gui ho'a rā.

¹⁹ Ha'e gui peē kuery rombopo'aka mboi ha'e japeuxa re pepyrō aguā, nhanderovaigua po'akaa ha'e javi re guive, pendere mba'eve rei oiko e'ŷ re.

²⁰ Ha'e rami teī perovy'a eme anha kuery re pendepo'akaa rive, ha'e rā yva re penderery omboparaa ma imoinyague.*

Mateus 11.25-27

²¹ Ha'e va'e jave ae Jesus ov'y'a Nhe'ẽ Ky'a E'ŷ gui. Ha'e vy aipoe'i:

— Xeru yva ha'e yvy re ndepo'aka va'e, xee roguerovy'a, mba'eta ha'e nunga ma hi'arandukue pe nderekuaa ukai, neī ombo'e pyre pe'ŷ guive. Yvyigueve'i pe anho reikuua uka. Tá, Xeru, ha'e rami ae reipota.

²² — Opa mba'e Xeru ome'ẽmba xevy. Avave rei ndoikuuai Ta'y, Tuu e'ŷ vy. Ha'e avave rei ndoikuuai Tuu, Ta'y e'ŷ vy, ha'e amongue pe Ta'y oikuua ukaxea va'e ete'i — he'i.

²³ Ha'e gui ma guemimbo'e kuery pe ju aipoe'i ha'e kuery ae'ia py:

— Ovy'a ete 'rā mba'emo peē kuery pexa va'e rexaa kuery.

²⁴ Mba'eta xee aipoa'e porāve pēvy: Heta ikuai raka'e profeta ha'e huvixave peē kuery pexa va'e oexaxe teī ndoexai, ha'e pendu va'e oenduxe avi teī noendui raka'e.

Samaria pygua porayvu va'e omombe'uague

²⁵ Peteī ava lei re nhombo'e va'ety opu'ã ho'amy Jesus oeko a'ã vy. Ha'e vy aipoe'i:

— Porombo'ea, mba'e nda'u ajapo 'rā tekove marā e'ŷ aupity aguā?

²⁶ Ha'e ramo ixupe ju Jesus oporandu:

— Mba'e tu ipara oiny lei re? Mba'exa tu reikuua?

²⁷ Ava va'e ombovai:

— “Reayvu 'rā Senhor Nderuete ndepy'a ha'e javi py, nderekoo, nembaraetea ha'e ne'arandua ha'e javi py guive.” Ha'e “Reayvu 'rā neirū kuery ndee ae rejeavua rami” — he'i.*

²⁸ Ha'e rami rā Jesus aipoe'i:

— Ha'evea rami rembovai. Ha'e rami rejapo vy reupity 'rā tekove — he'i.

²⁹ Ha'e rami teī ava va'e onhemboeko porāxe vy oporandu Jesus pe:

— Marā ramigua tu xeirū kuery?

³⁰ Ha'e rā Jesus ombovai:

— Peteī ava ma Jerusalém tetā gui oguejy ov'y Jericó katy oo vy. Ha'e gui ha'e va'e ma jojuka va'ety kuery po py oī vai ramo ixugui oipe'apa, oinupāmba guive. Ha'e vy oeja oje'ovy omano rai'i va'e.

³¹ — Ha'e jave py tape rupi ou peteī sacerdote. Ha'e va'e oexa teī ojepekuavo ov'y.

* 10:13 Tiro ha'e Sidom tetā ma yma heko vai ete va'e ikuaiague (Isaías 23.1-18). * 10:20 Apocalipse 3.5 * 10:27 Levítico 19.18, Deuteronômio 6.5

- ³² — Ha'e rami ae avi peteī levita ha'e rupi ou vy oexa teī ojepekuavo avi ovy.
- ³³ — Ha'e gui ma peteī Samaria pygua oguata ouvy vy oaxa avi ha'e rupi. Ha'e va'e ma oexa vy omboaxy.
- ³⁴ Ha'e vy onhemboja vy ojokuapa ijai,azeite ha'e vinho oikyty reve. Guymba áry ae oupi vy ogueraa peteī okea aty py opena aguā.
- ³⁵ — Ko'ẽ ju mokoī ára repy oguenoẽ vy ome'ẽ hoo va'e pe. Ha'e vy aipoe'i: “Epena porã tema kova'e ava re. Ha'e gui xapy'a rei repenaa rupi regatave ri ramo ajevy vy amboekovia 'rã”, he'i.
- ³⁶ — Ha'e va'e mboapy va'e regua, ndee reikuua rã mava'e nda'u jojuka va'ety kuery po py oĩ vai va'ekue irũ oiko?
- ³⁷ Ha'e rã lei re nhombo'e va'ety ombovai:
- Omboaxy va'ekue rima.
- Ha'e ramo Jesus aipoe'i ixupe:
- Tereo ha'vy, ndee voi ha'ekue rami eiko.*

Maria ha'e Marta ro py oĩ jave guare

- ³⁸ Ha'e kuery oovea rupi Jesus ovaẽ peteī tetã'i py. Ha'e ramo peteī kunha Marta hery va'e omovaẽ ngoo py.
- ³⁹ Ha'e py oiko avi ikypy'y Maria hery va'e. Ha'e va'e ma oguapy oiny Senhor yvýry ombo'e rã oendu aguā.
- ⁴⁰ Marta ma ha'e ramia ja opy rupi mba'emo ojapo vy ojapura rei oikovy. Ha'e vy Jesus-a py ou vy aipoe'i:
- Senhor, rexâ rive va'e ty'y xekypy'y xee ae'i mba'emo ajapo aguā oeja rã? Aipo'ere na tou taxeptyvõ.
- ⁴¹ Ha'e rã Senhor ombovai:
- Marta, Marta, ndereguapyi rei ndepy'a eta reia rupi.
- ⁴² Mbovy'i jajapo teī ha'eve va'e, ha'e rami e'ŷ vy peteī'i anho. Ha'e rã Maria ma oiporavo iporãve va'e. Ha'e ramo ha'e nunga ndoipe'aai 'rã ixugui.

11

Mateus 6.9-13

- ¹ Peteī ára Jesus onhembo'e oiny peteī henda py. Ijayvupa ma jave peteī hemimbo'e ojerure ixupe:
- Senhor, orembo'e na ronhembo'e kuaa aguā re, João guemimbo'e kuery ombo'eague rami avi.
- ² Ha'e ramo ombo'e. Ha'e vy aipoe'i:
- Penhembo'e vy aipopeje 'rã: “Xeruete, tove nderery tomboetea. Tovaẽ ndepo'akaa ojekuaa aguā.
- ³ Ha'e ko'ẽ nhavõ ejou uka ro'u va'erã.
- ⁴ Emboguepa rojejavyague, ore voi orevy oreve va'e roperdoaa rami avi. Orereity uka eme guive poromoangecko pe”, peje 'rã.

Irũ mba'emo re ojerure anho rei va'e omombe'uague

- ⁵ Jesus aipoe'i avi:
- Amongue peẽ kuery va'e regua pytū mbyte jave peneirũ ovaẽ 'rã pendero py. Ha'e vy aipoe'i 'rã pêvy: “Xeirũ, eiporuka xevy mboapy mbojape.
- ⁶ Mba'eta peteī xeirũ oguataague gui ovaẽ teī mba'eve ndarekoi ixupe ame'ẽ va'erã”, he'i 'rã.
- ⁷ Ha'e rã penderopy gui pembovai 'rã: “Xemoangeko eme, mba'eta okẽ onhemboty ma, ha'e xera'y kuery onhenomba ma xereve. Ndavy reguavei ame'ẽ aguā ndevy”, peje 'rã.

* 10:37 1 João 3.17,18

⁸ Ha'e rami teĩ xee aipoa'e pẽvy: Peneirũ ae teĩ xapy'a rei napenu'ãxei 'rã mba'emo peme'ẽ aguã. Ha'e ramia gui onhea'ave tema ramo peme'ẽ nho 'rã oikotevẽ va'e ha'e javi.*

Mateus 7.7-11

⁹ — Ha'e nunga rupi aipoa'e pẽvy: Pejerure, ha'e ramo ome'ea 'rã. Peka, ha'e vy pejou 'rã. Penhendu uka, ha'e ramo okẽ oipe'aa 'rã pẽvy.

¹⁰ Mba'eta ha'e javive ojerure va'e ojopy 'rã, oeka va'e ojou 'rã, ha'e onhendu uka va'e pe oipe'aa 'rã.

¹¹ Mava'e peẽ avakue nda'u pendera'y [mbojape re ojerure rã peme'ẽ 'rã ita? Xapy'a rei rã] pira re ojerure rã mboi ri nda'u peme'ẽ 'rã pira rekovia?

¹² Ha'e rami e'ŷ vy uru rupi'a re ojerure rã japeuxa ri nda'u peme'ẽ 'rã?

¹³ Pendu ke, peẽ kuery penderekoi vai va'erí mba'emo porã peme'ẽ kuaa va'e pendera'y kuery pe. Ha'e gui Nhanderu yva pygua katuve nda'u nome'ëi 'rã ri Nhe'ë Ky'a E'ŷ ojerure va'e pe?

Mateus 12.22-30; Marcos 3.20-27

¹⁴ Amboae py Jesus oipe'a anha nhomboayvu e'ŷ va'e. Anha ojepe'a rire ijayvu e'ŷ va'ekue ijayvu ju ma. Ha'e ramo heta va'e kuery onhemondyipa.

¹⁵ Ha'e rami teĩ ha'e kuery va'e regua amongue aipoe'i:

— Peva'e tu anha ruvixa Belzebu po'akaa rupi rima oipe'a oikovy anha kuery — he'i.

¹⁶ Ha'e ramo amboae kuery oeko a'ã vy ixupe ojerure yva guigua hexa pyrã ojapo aguare.

¹⁷ Ha'e rami rã ha'e kuery py'a re oĩ va'e ha'e oikuapa vy aipoe'i:

— Tetã pygua kuery minha jomeme ri opu'ã vy nhomomba 'rã, ha'e peteĩ-teĩ oo pygua kuery joguero'a 'rã.

¹⁸ Ha'e rami ae avi Satanás kuery meme ri joe opu'ã va'e rire mba'exa tu ipo'akave ta? Po ramo xeayvu mba'eta aipopeje Belzebu po'akaa rupi anha kuery aipe'aa rami.

¹⁹ Anhetẽ ri xee Belzebu po'akaa rupi anha aipe'a ramo, mba'e xagua po'akaa rupi tu ha'vy pendera'y kuery oipe'a? Ha'e nunga rupi ha'e kuery ae oikuua uka 'rã pendeayvu rivea.

²⁰ Ha'e rã Nhanderuete po rupi ae xee anha aipe'a ramo anhetẽ ete Nhanderuete po'akaa ojekuaa ra'e peẽ kuery pe.

²¹ — Ha'e gui peteĩ ava ojerovia vaipa va'e ngoo oarõ oikovy ramo opa mba'e oguereko va'e oĩ porã 'rã.

²² Ha'e gui ma peteĩ ixugui ojeroviae va'e ou vy oity 'rã. Ha'e vy hembiporu ojeroviaague oipe'apa vy joupe omboja'opa 'rã oguereko va'ekue.

²³ — Xereveguia e'ŷ va'e ma xerovaigua ikuai, ha'e xea py ndajoguerui va'e ma xegui nhomonheguæmba 'rã.

Mateus 12.43-45

²⁴ — Ha'e rami avi peteĩ ava gui nhe'ë vai ojepe'a vy oo 'rã tekoia e'ŷa rupi oiko, ikane'õguia aguã oeka vy. Ha'e gui ndojoui vy ojeupe aipoe'i 'rã: “Aa ju ta xero ajepa'aague py”, he'i 'rã.

²⁵ Ha'e rami vy ou ju vy ojou 'rã ngopy oipeipa ha'e omoatyrõmba pyre.

²⁶ Ha'e gui ma oo vy sete irûrã ju ogueru 'rã nhe'ë ixugui nda'eveive va'e, ha'e py ovaẽ vy ikuai va'erã. Ha'e rami rire ava va'e pe ma opaa py jypy guare gui nda'eveive 'rã.

Peteĩ kunha ijayvu nhenduague

²⁷ Ha'e rami Jesus ijayvupa ma ramo teta mbyte gui peteĩ kunha ijayvu nhendu. Ha'e vy aipoe'i ixupe:

— Ovy'a ete 'rã nekuavãare, nemokambuare.

²⁸ Ha'e rã ombovai:

— Ha'e rami 'rãgue py ovy'a ete 'rã Nhanderuete ayvu oendu vy ha'ekue rami ikuai va'e — he'i.*

Mateus 12.38-42

* 11:8 Lucas 18.1; Efésios 6.18 * 11:28 Lucas 8.19-21

²⁹ Heta va'e kuery ijatypa ramo Jesus aipoe'i:

— Kova'e kuery ma heko vai va'e vy ojerure mba'emo kuaa ukaarā ajapo aguā. Ha'e rami teī ha'e kuery pe peteīve ndojapoai 'rā, Jonas re oiko va'ekue ramigua e'ŷ vy.

³⁰ Mba'eta Nínive pygua kuery oikuua aguā Jonas oikoague rami avi Ava ra'y ojeapo va'ekue voi oiko 'rā aŷgua kuery oikuua aguā.

³¹ Nhomboayvua ára py huvixave kunha kuaray puku-a katyguá opu'ã ho'amy vy ijayvu 'rā aŷgua kuery re, mba'eta yvy apy gui kunha va'e ou rire Salomão 'arandua oendu aguā. Ha'e rā apy oĩ va'e ma Salomão gui yvateve va'e.

³² Nhomboayvua ára py Nínive pygua kuery voi opu'ã vy ijayvu 'rā okuapy aŷgua kuery re, mba'eta Jonas ayvu omombe'u rā ha'e kuery oendu vy ojeko rerovapa rire. Ha'e rā apy oĩ va'e ma Jonas gui yvateve va'e.

Mateus 6.22,23

³³ — Avave rei tataendy omoendy vy nomoĩ 'rā hi'ã py, neĩ ajaka guýry guive. Oĩaty py ae 'rā omoña, oike va'e kuery hendy va'e oexa porā aguā.

³⁴ Ha'e rami ae avi nhanderexa ma nhanderete moexakāarā oĩ. Xapy'a rei nderexa iporā vy omoexakā 'rā nderete ha'e javi rupi. Ha'e rā nderexa na'iporāi ramo ma nderete ha'e javi pytūmba 'rā.

³⁵ Ha'e nunga rupi eikuua pota ke nemoexakāarā oĩ va'e pytū e'ŷ aguā.

³⁶ Ha'e rā xapy'a rei nderete ha'e javi omoexakāa, neĩ peteī henda py pytūa noĩ ri ramo tataendy rami 'rā omoexakā opa rupi.

Fariseu kuery pe Jesus ijayvu eteague

³⁷ Opa ma Jesus mba'emo reombojoja vy ijayvupa ramo peteī fariseu aipoe'i hupive oo aguā okaru vy. Ha'e ramo hoo py ovaẽ vy oguapy okaru aguā py.

³⁸ Ha'e gui fariseu ma Jesus ojepoei e'ŷ re okaru ta ramo oexa vy onhemondyi.

³⁹ Ha'e ramo ixupe Senhor aipoe'i:

— Peẽ fariseu kuery ma karo ha'e hy'a pejoi 'rā hi'árykue rupi rive. Ha'e rā pendepy'apy rupi ma pejokore ha'e pejejoko e'ŷa anho oĩ.*

⁴⁰ Pene'arandu e'ŷ va'e, penderete apoare e'ŷ ri nda'u pendepy'a apoare avi oiko?

⁴¹ Ha'e rami 'rāgue py iporiaukue'i pe mba'emo perekva'e peme'ẽ vy 'rāe opa marāguá gui ha'eve va'e ju 'rā peiko.

⁴² — Peẽ fariseu kuery pe nda'evei ete 'rā, mba'eta dízimo peme'ẽ 'rā hortelā, arruda ha'e mba'emo rogue'i ha'e javi regua gui. Ha'e rā ha'evea rami pejoguerekó ha'e Nhanderuete peavyua rupi ma napendekuaixe. Ha'e nunga voi pejapo 'rāgue amboae ramigua pejapo rami avi.

⁴³ — Peẽ fariseu kuery pe nda'evei ete 'rā, mba'eta penhembo'eaty py peix'e 'rā tenda tenondeve oĩ va'e py anho. Tetā mbyte rupi voi peipota 'rā pendevy oxaruraa porā'i.

⁴⁴ — Nda'evei ete 'rā pēvy. Yvyra rupa ndojekuaavei va'e rami pendekuai, mba'eta ha'e va'e áry rupi avakue oaxa 'rā oikuua e'ŷ vy.*

Lei re nhombo'e va'ety pe nda'evei ete 'rāa re ijayvuague

⁴⁵ Ha'e ramo peteī lei re nhombo'e va'ety ombovai vy aipoe'i Jesus pe:

— Porombo'ea, ha'e rami ndeayvu vy ore kuery re voi rima ndeayvu ra'e.

⁴⁶ Ha'e ramo ombovai:

— Peẽ kuery lei re penhombo'e va'ety pe voi nda'evei ete 'rā, mba'eta avakue pembovoysi 'rā ndogueropo'akai va'erā py. Ha'e rā peẽ ma neĩ penekua py voi napeipytyvõi 'rā.*

⁴⁷ — Peẽ kuery pe nda'evei ete 'rā, mba'eta pejapo 'rā oo ra'angaa'i penamoĩ kuery profeta kuery jukaare rupa áry guarā.

⁴⁸ Ha'e nunga rupi peikuaa uka penamoĩ kuery jojukaague pejou porāa, mba'eta ha'e kuery ma profeta kuery ojuka rire peẽ ju pejapo hupa áry guarā.

* 11:39 Mateus 23.5-7,23-28; Marcos 7.1-5

* 11:44 Ha'e kuery reko rami vy yvyra rupa áry rupi oaxa vy

onhemongy'a 'rā. Ha'e nunga rupi omoxi'i 'rā pavē oexa vy oikuua aguā (Mateus 23.27). * 11:46 Mateus 23.1-4,13,29-36

⁴⁹ Ha'e nunga rupi Nhanderuete o'arandua rupi aipoe'i va'ekue: "Ha'e kuerya py xee ambou 'rā profeta ha'e apóstolo kuery. Ha'e va'e kuery regua amongue ojuka 'rā, ha'e rā amboae kuery ma oguereko axy 'rā", he'i va'ekue.

⁵⁰ Ha'e rami aŷguia kuery ikuai yvy itui ypy guive profeta ruguy omoēague re opaga aguã rami,

⁵¹ Abel ruguy omoēague guive'i Zacarias ruguy omoēa peve. Ha'e va'e ma Nhanderuete ropy altar oī va'e yvýry ojukaa va'ekue. Ha'e nunga rupi xee aipoa'e porāve pēvy: Aŷguia kuery ae 'rā opaga ha'e nungakue re.

⁵² — Peẽ kuery lei re penhombo'e va'ety pe nda'evei ete 'rā, mba'eta peipe'a mba'emo kuaa ukaarā oī va'e. Peẽ ae voi ndapeikuua pota etei, ha'e oikuaaxe va'e kuery pe ma ndapeikuua ukai guive.

Jesus ojuka aguã re onhembopy'a okuapyague

⁵³ Jesus ojepe'a ta ma ov yv rā lei re nhombo'e va'ety ha'e fariseu kuery ipoxypa vy ijayvu ete okuapy ixupe. Opa mba'e re oporandum omoī vaixe vy,

⁵⁴ ijayvuague py ae ojopy vaixe vy.

12

Trigo mbovua re fariseu kuery reko ombojoja reve nhomonetaague

¹ Heta va'e kuery ono'õmba vy joe ojeapi-api rei okuapy ramo Jesus aipoe'i guemimbo'e kuery pe anho'i:

— Penheangu ke fariseu kuery regua trigo mbovua gui. Ha'e va'e ma heko porā merami rivea.

² Mba'eta onhomni mbyre oexa ukapaa 'rā, ha'e oikuaa uka e'ŷ pyre oikuaapaa 'rā.

³ Ha'e rami vy opa mba'e pytū py pemombe'u va'ekue hexakāa py ju oendupaa 'rā, ha'e opy joapyxa py pendeayvuague oo apyte áry gui ju omombe'ua 'rā.

⁴ — Xeirū kuery, xee aipoa'e porāve pēvy: Pekyje eme penderete jukaarā kuery gui, mba'eta ha'e va'e rire mba'eve ndojapo kuaavei ma 'rā pendere.

⁵ Xee amombe'u ta mava'e renonde pa ha'eve pejererokyje aguā: Pejererokyje 'rā jojuka rire tata ogue e'ŷ va'e py nhomombo aguā ipo'aka va'e renonde. Tá, aipoa'e pēvy, ha'e va'e renonde ae ha'eve pejererokyje aguā.*

⁶ Peteñ nhiruñ guyra'i nda'u mokoñ hatā'i va'e repy rive e'ŷ ri? Ha'e rami va'eri neñ peteñ re Nhanderuete ndaexarai.

⁷ Pende'a peneakā re oī va'e voi oipapapa ma. Ha'e nunga rupi pekyje eme, mba'eta heta guyra'i gui voi peẽ pevareve.

⁸ — Aipoa'e avi: Avakue renonde xevy pe oikoa omombe'u porā va'ekue ha'e javi ma Ava ra'y ojeapo va'ekue voi omombe'u 'rā Nhanderuete pegua anjo kuery renonde.

⁹ Ha'e rā avakue renonde naxemombe'uxei va'ekue ma xee voi namombe'ui 'rā Nhanderuete pegua anjo kuery renonde.

¹⁰ Mba'eta Ava ra'y ojeapo va'ekue re teñ amongue ijayvu vai ramo ha'e nungakue omboguepaa 'rā. Ha'e rā Nhe'ē Ky'a E'ŷ re ijayvu vaia ague ma nombogueai 'rā.*

¹¹ — Onhembo'eat py pendereraa ramo, ha'e rami e'ŷ vy huvixa ha'e nhomboayvu va'ety kuery renonde teñ pendepy'a eta rei eme pembovai ha'e pendeayvu aguā re.

¹² Mba'eta ha'e jave py Nhe'ē Ky'a E'ŷ oikuaa uka 'rā pendeayvu aguā.

Mba'e rakāte'ŷa re ijayvuague

¹³ Ha'e va'e jave peteñ ava tetu mbyte gui aipoe'i ixupe:

— Porombo'ea, aipo're ke'y pe tomboja'o orevy peguare xevy.

¹⁴ Ha'e ramo Jesus aipoe'i ixupe:

— Ava, mava'e tu xemoī penderuvixarā, penemba'e amboja'o uka aguā? — he'i.

¹⁵ Ha'e vy aipoe'i ha'e kuery pe:

* 12:5 Mateus 10.26-33 * 12:10 Mateus 12.31,32; Marcos 3.28-30

— Peiko kuaa ke, penheangu opa mba'e re penerakāte'ŷa gui, mba'eta avakue rekove ma mba'emo oguerekopaa re'ŷ.*

¹⁶ Ha'e gui ma ha'e kuery pe omombe'u peteĩ ayvu mba'emo re ombojoja vy. Ha'e vy aipoe'i:

— Peteĩ ava iporiau e'ŷ va'e onhotŷ va'ekue oiko porā.

¹⁷ Ha'e rami vy ojeupe ae aipoe'i: "Mba'e nda'u ajapo 'rā, mba'eta ndarekovei amono'ō va'ekue amoī porā aguā."

¹⁸ Aipoe'ive ju: "Po rami ajapo ta: Ambovaipa ta mba'emo amoī porāaty, ha'e gui tuvixave va'e ju 'rā ajapo, ha'e va'e py amoī porā aguā amono'ō va'ekue ha'e areko va'e ha'e javi.

¹⁹ Ha'e gui ma aipoa'e 'rā xejeupe: 'Heta mba'e porā areko heta ma'etŷa reguarā. Aŷ ma apytu'u 'rā, akaru, ay'u ha'e avy'a 'rā aikovy', ha'e 'rā", he'i.

²⁰ — Ha'e rā ixupe Nhanderuete aipoe'i: "Mba'e 'arandu e'ŷ, kova'e pyavyve oipe'aa 'rā nenhe'ē. Ha'vy mba'emo remoī porā va'ekue, mava'e pe 'rā tu opyta?" he'i.

²¹ — Ha'e rami ae 'rā oiko ojeupe guarā mba'emo omoī porā teĩ Nhanderuetea py ma mba'eve ndoguerekoi va'e re.

Mateus 6.25-34

²² Ha'e gui Jesus aipoe'i guemimbo'e kuery pe:

— Ha'e nunga rupi xee aipoa'e pêvy: Pendepy'a eta rei eme pendekove re, neĩ pe'u va'erā ha'e penderete re pemoī va'erā re guive.

²³ Mba'eta penderekove ma tembi'u gui ovareve, ha'e penderete ma ao gui ovareve.

²⁴ Peikuaa pota na uruvu kuery re. Ha'e kuery ma mba'eve nonhotŷi, nomono'ōi, nomoī porāi, neĩ oguy ma voi ndoguerekoi guive. Ha'e rami teĩ Nhanderuete omongaru herekovy. Peẽ kuery ma guyra'i gui voi pevareve.

²⁵ Mava'e nda'u pendepy'a eta rei vy pembopukuve kuaa 'rā ruxā'i peikove aguā?

²⁶ Mba'emo ruxā'i va'e ndapejapo kuaai va'eri mba'e re tu mba'emo mboae re rive nda'eveive pendekuai?

²⁷ — Peikuaa pota na yvoty ikuai va'e re. Ha'e va'e ma mba'emo oipopē va'e'ŷ, omboyvi kuaa va'e'ŷ guive. Ha'e rami teĩ xee aipoa'e pêvy: Salomão minha opa marāgua oguerekopa va'eri kova'e yvoty rami nonhemondei raka'e.

²⁸ Ha'e gui Nhanderuete ha'e rami omonhemonde 'rā jai rogue aŷ nhuūndy re ikuai, ha'e gui ko'ē tata py omomboa va'erā va'eri. Peẽ kuery re katuve opena porāve 'rā, ndaperovia porāi va'eri.

²⁹ Ha'e nunga rupi pendekuai eme pe'u ha'e pey'u va'erā pejouxea rupi rive, neĩ pejapura rei eme,

³⁰ mba'eta ha'e nunga jouxea rupi amboae regua kuery ikuai yvy jave re. Penderu ma oikuua ae ha'e nunga peikotevē va'ea.

³¹ Ha'e nunga rupi jypy'i peka 'rā ipo'akaa. Ha'e ramo 'rāe opa mba'e ome'ē avi pendevy.

³² — Xerymba kuery mbovy'i pendekuai teĩ pekyje eme, mba'eta Penderu pendererovy'a vy pendevy ome'ē 'rā opo'akaa.

³³ Ha'e nunga rupi pevendepa ke perekoo va'e, ha'e hekoviakue peme'ē iporiaukue'i pe. Ha'e rami vy 'rā yva re pejou voko ivaipa e'ŷ va'erā ha'e mba'emo imarā e'ŷ va'e, mba'eta ha'e py ma imonda va'e novaēi 'rā, neĩ vixo'i ma voi ndo'upa rei 'rā guive.*

³⁴ Mba'eta penembovy'a va'e oĩa py penekuraxō py peẽ voi peixe avi 'rā.

Tembiguai opatō oarō kuaa va'e omombe'uague

³⁵ — Pejeku'a jokua ke, tataendy pembogue uka eme guive.

³⁶ Pendekuai ke avakue opatō omendaa gui ojevy rā guarā oarō va'e rami, mba'eta okē re ombota xapy'a ramo ha'e kuery oipe'a vyvoi aguā.*

³⁷ Ha'e rami vy hembiguai kuery ovy'a ete 'rā ipatō ou vy oexa rā oarō okuapy va'e. Anhetē aipoa'e pêvy, ha'e ae oiko katu vy omboguapypa 'rā mesa py, ha'e vy ou vy ojara 'rā ha'e kuery pe.

* 12:15 1 Timóteo 6.9,10

* 12:33 1 Pedro 1.3-5

* 12:36 Mateus 24.42-44; Marcos 13.32-37; Lucas 21.34-36

³⁸ Pytū mbyte e'ŷ vy pytū mbyte raxa'i jave ovaẽ xapy'a teĩ oarõ okuapy va'e ov'y'a ete 'rã ha'e rami ikuia py ojou ramo.

³⁹ — Ha'e rami avi peikuua pota ke pova'e re: Peteĩ hoo va'e oikuua va'e rire mba'e hora pa imonda va'e ovaẽ 'rãa, [oarõ vy] ndogueraa ukapai 'rãgue ngopy gui.

⁴⁰ Pendekuui kuaa pota ke peẽ voi, mba'eta ndapeikuua potavei rei jave 'rã Ava ra'y ojeapo va'ekue ou — he'i.

⁴¹ Ha'e ramo Pedro oporandu:

— Senhor, pova'e ayvu pa ore kuery pe anho, tyrã pa amboae kuery pe avi remombe'u?

⁴² Senhor ombovai:

— Ha'vy mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatõ omoĩ 'rã oirũ kuery okaru aguã hora py omongaru va'erã.

⁴³ Ovy'a ete 'rã tembiguai kuery ipatõ ou ramo ha'e rami ojapo va'e.

⁴⁴ Anhetẽ aipoa'e pêvy: Ha'e va'e pe opena uka 'rã opa mba'e oguereko va'e re.

⁴⁵ Ha'e rã xapy'a rei ha'e va'e tembiguai ojeupe “Xepatõ ndou voi 'rã teve”, he'i vy oinupãmba 'rã avakue ha'e kunhague hexeve ikuai va'e. Okaru ha'e oy'u 'rã oka'u peve.

⁴⁶ Ha'e gui ma ha'e va'e tembiguai noarõvei vy ndoikuua potavei rei oikovy jave ipatõ ovaẽ 'rã. Ha'e rami vy ombopaga 'rã heko vai va'e kuery reve.

⁴⁷ — Ha'e gui tembiguai ipatõ oipota va'e ojapo aguã oikuua va'eri ndoiko katui, neĩ oipotaa rami ndojapoi va'ekue ma oinupãa vaipa 'rã.

⁴⁸ Ha'e rã opatõ oipota va'e ndoikuai vy ri ha'eve e'ŷa rami ojapo oikovy va'ekue ma noinupãa vaipai 'rã. Mba'eta amongue pe ome'ẽ retaave rire ixugui oipotaave 'rã. Ha'e rami ae avi amongue pe opena uka retaave rire ixupe ojerureave 'rã.

Mateus 10.34-36

⁴⁹ — Xee aju tata amboja aguã ko yvy re. Xevy pe ha'eve 'rãgue hendy ma va'e rire.*

⁵⁰ Ha'e rã xevy peguarã oĩ avi peteĩ nhemongarai ha'e va'e py anhemongarai uka aguã. Ha'e nunga oiko e'ŷa ja xee nda'evei aiko.

⁵¹ Tyrã pa peẽ kuery pexa'ã aju yvy re ikuai va'e peteĩ rami ikuai aguã? Any, xee ma aipoa'e pêvy: Joo rami e'ŷ-e'ŷ ikuai aguã aju.

⁵² Mba'eta aŷ gui ma peteĩ oo py peteĩ nhiruĩ ikuai va'e oja'o 'rã: mboapy ikuai 'rã mokoĩ rovai, ha'e mokoĩ ikuai 'rã mboapy rovai.

⁵³ Tuu opu'ã 'rã gua'y re, ha'e ta'y opu'ã 'rã nguu re. Ixy opu'ã 'rã omemby re, ha'e imemby opu'ã 'rã oxy re. Ime xy opu'ã 'rã opi'a ra'yxy re, ha'e ipi'a ra'yxy opu'ã 'rã ome xy re.*

Mba'emo kuaa ukaarã oĩ va'e re ijayvuague

⁵⁴ Heta va'e kuery pe aipoe'i avi:

— Ka'arua katy arai ojekuaa rã pexa vy aipopeje 'rã: “Oky ta.” Ha'e gui ma ha'ekue rami ae 'rã oky.

⁵⁵ Ha'e kuaray puku-a katy gui yvytu oipeju ramo “Kuaray haku ta” peje 'rã. Ha'ekue rami ae avi kuaray haku 'rã.

⁵⁶ Pendeko porã merami rive va'e, yvy ha'e yva re pema'ẽ vy peikuua 'rã mba'emo. Ha'e rami va'eri ndapexa kuaai aŷ oiko va'e.*

⁵⁷ Mba'e re tu ndapeikuua potai pendejegui ae, ha'evea rami peiko aguã?

⁵⁸ Ha'e rami vy pendovaigua reve huvixaa py peo vy tape rupi ma voi peikuua pota ipo gui peo jepe aguã. Ha'e rami e'ŷ ramo penemboaxa 'rã penemboayvuarã pe, ha'e penemboayvua ma jopya pe ju 'rã penemboaxa, ha'e gui jopya ma penembo'a 'rã nhuã py.

⁵⁹ Xee aipoa'e pêvy: Napeei 'rã ha'e gui pepagapa e'ŷa ja.

13

Galiléia pygua kuery omanoague, ha'e Siloé py torre ho'aague re ijayvuague

* 12:49 Mateus 10.34-36

* 12:53 Miquéias 7.6

* 12:56 Mateus 16.1-4

¹ Ha'e va'e jave py amongue ovaẽ vy Jesus pe omombe'u Galiléia pygua kuery mymba ojuka reve ome'ẽ jave py ha'e kuery ruguy avi huvixa Pilatos omoẽ ukaague, mymba ruguy onheẽague pyve.*

² Ha'e ramo ha'e aipoe'i:

— Peẽ kuery pexa'ã teve Galiléia pygua kuery mboae gui ha'e va'e kuery heko vaivea, ha'e rami oiko vai aguã?

³ Any, xee aipoa'e porãve pãvy: Peẽ voi ndapejeko rerovai vy pekanhymba avi 'rã ha'e kuery rami.

⁴ Ha'e gui Siloé py dezoito ikuai va'ekue áry torre ho'a vy ojukapa raka'e. Ha'e kuery nda'u amboae kuery Jerusalém py ikuai va'e gui ojejavypave ri?

⁵ Any, xee aipoa'e porãve pãvy: Peẽ voi ndapejeko rerovai vy pekanhymba avi 'rã ha'e kuery rami.*

Figo'y hi'a e'ŷ va'e omombe'uague

⁶ Ha'e gui Jesus omombe'u pova'e ayvu mba'emo re ombojoja reve:

— Peteĩ ava oguerekó peteĩ figo'y, uvaty mbyte onhoty va'ekue. Hi'a re ija ou teĩ ndojou.

⁷ Ha'e vy aipoe'i uvaty re opena va'e pe: "Mboapy ma'etŷ re ma apy hi'a re aju teĩ mba'eve ndajoui. Ejaya na. Mba'erã tu hi'a vy e'ŷ yvy re hi'aĩ riae?"

⁸ Ha'e rã ombovai: "Senhor, tove ranhe kova'e ma'etŷ re. Ajo'o 'rã hembypy rupi, yty ru'ügue amoõ 'rã guive.

⁹ Ha'e gui hi'a ramo ha'eve ete 'rã. Ha'e rami e'ŷ rã rejaya uka 'rã", he'i.*

Peteĩ kunha oiko axy va'e omongueraague

¹⁰ Peteĩ sâbado py Jesus nhombo'e oiny onhembo'eaty oĩ va'e py.

¹¹ Ha'e py ou peteĩ kunha dezoito ma'etŷ re ma nhe'ẽ vai omoingo axy va'e. Ojero'a rei oikovy, onhembo'yvi aguã nda'evei ramo.

¹² Ha'e gui Jesus oexa vy oenoõ. Ha'e vy aipoe'i:

— Kunha, rekuera ma nemba'eaxygui — he'i.

¹³ Hexe opoko ramove hi'yvi vyvoi. Ha'e vy oguerovy'a Nhanderuete.

¹⁴ Ha'e gui ma onhembo'eaty pygua huvixa ma sâbado ára py Jesus nhomonguera rã oexa vy ndojou porã ete. Ha'e vy aipoe'i heta va'e kuery pe:

— Mboapy meme ára oĩ nhamba'eapo aguã. Ha'e va'e ára py 'rã peju pekuera aguã, sâbado py e'ŷ — he'i.

¹⁵ Ha'e ramo ixupe Senhor aipoe'i:

— Heko porã merami rive va'e kuery, peteĩ-teĩ nda'u sâbado ára py teĩ ndapejorai 'rã ri penerymba vaka e'ŷ vy mburika okaruaty gui pemboy'u vy peraa aguã?

¹⁶ Mba'e re nda'u nda'evei sâbado py jaraa jepa aguã kova'e kunha Abraão ramymino va'e dezoito ma'etŷ re ma Satanás omoingo axy va'ekue? — he'i.

¹⁷ Ha'e ramo ijayvu rã hexe ija'e e'ŷ va'e kuery oendu vy oximbá. Ha'e rã heta va'e kuery ma ový'a okuapy opa mba'e porã Jesus ojapo rã oexa vy.

Mateus 13.31,32; Marcos 4.30-32

¹⁸ Ha'e gui ma aipoe'i avi:

— Mba'e nunga nda'u Nhanderuete po'akaa reve joo ramigua? Mba'e nunga re nda'u ha'eve ambojoja aguã?

¹⁹ Mostarda ra'yí peteĩ ava ngoka py onhoty va'e rami ae. Mba'eta yvate vy yvyra rami 'rã hi'aĩ, ha'e hakã re ma guyra'i oveve va'e ojapo 'rã guive guaityrã.

Mateus 13.33

²⁰ Aipoe'ive ju:

— Mba'e nunga re nda'u Nhanderuete po'akaa ambojoja 'rã?

* 13:1 Apy ijayvu templo py huvixa Pilatos jojukaague re. Ha'e va'e jave py Galiléia gui ha'e kuery ou va'ekue Nhanderuete pe mymba ojuka uka vy ome'ẽ aguã. Ha'e rã Pilatos ojuka ha'e py. * 13:5 Ezequiel 33.11 * 13:9 Romanos 2.4; 2 Pedro 3.9

²¹ Trigo mbovua rami avi ha'eve, mba'eta kunhague ojopy vy mboapy ryru trigo re omoirū 'rā irūmba peve.

Okē ipo'i'i va'e re ijayyuague

²² Jesus oaxa ovvy tetā ha'e tekoai ikuai va'e rupi. Nhombo'e ovvy Jerusalém katy oo vy.

²³ Ha'e gui ma amongue ou vy oporandu ixupe:

— Senhor, mbovy'i teve ikuai oo jepe va'erā?

²⁴ Jesus ombovai:

— Penhea'ā ha'vy okē ipo'i'i va'e rupi peike aguā. Mba'eta xee aipoa'e pēvy: Mbovy e'ŷ oikexe teī ndoikei 'rā.*

²⁵ Ha'e gui hoo va'e opu'ā vy omboty 'rā ngokē. Peē kuery ma okē re pembota-mbota 'rā oka katy gui. Ha'e vy "Senhor, eipe'a na okē orevy" peje 'rā guive.

— Ha'e ramo ombovai vy "Xee ndaikuaai maguigua pa peē kuery peikoa", he'i 'rā.

²⁶ — Ha'e ramo aipopejeve ju 'rā: "Ore ma ndereve rokaru ha'e roy'u va'ekue, orerekao rupi renhombo'e va'ekue guive."

²⁷ — Ha'e ramo aipoe'i 'rā pēvy: "Xee ndaikuaai maguigua pa peē kuery peikoa. Pendeko vai va'e, pejepa ke xea gui", he'i 'rā.

²⁸ — Ha'e py ma pejae'opa ha'e opa marā 'rā penhendu, pexa vy Nhanderuete po'akaa py Abraão, Isaque, Jacó ha'e profeta kuery ha'e javive ikuai ramo, ha'e rā peē kuery ma oka py penemombopaa rire.

²⁹ Heta 'rā ou kuaray oua katy gui, oikea katy gui, ijapu'a'ia katy gui ha'e ipuku-a katy gui, ha'e vy mesa py oguapypa 'rā okuapy Nhanderuete po'akaa py.

³⁰ Ha'e rami teī takykue pyguare ma tenonde pygurarā, ha'e tenonde pyguare ma takykue pygurarā ikuai.

Mateus 23.37-39

³¹ Ha'e va'e jave py fariseu kuery ou vy aipoe'i ixupe:

— Ejepe'a na, tereo apy gui, huvixa Herodes ndejukaxe ramo — he'i okuapy.

³² Ombovai:

— Tapeo aipopeje ha'e va'e mbyku pe: "Ko'ē rā aipe'a 'rā anha, anhomonguera 'rā guive aikovy. Ko'ē mboae ramo mae ma ajapopa 'rā", peje.†

³³ Mba'eta xee ma aŷ, ko'ē rā ha'e ko'ē mboae rā peve aguata aguā rami aiko, mba'eta Jerusalém py e'ŷ ndojukaai 'rā profeta.

³⁴ — Jerusalém, Jerusalém, profeta kuery jukaaty, ndevy ombou pyre ita py rejapipa va'ety! Mbovykue rei e'ŷ xee aikuavāmbaxe teī nememby kuery, opepo py uru gua'y kuery ojao'ipaa rami. Ha'e rami teī peē kuery ndapeipotai.

³⁵ Ha'e rami rire pendo opyta rivepa 'rā. Anhetē ae aipoa'e pēvy: Peē kuery ndaxerexavei 'rā ovaē e'ŷa ja aipopeje aguā: "Ta'ima'endu'a porāa Senhor rery rupi reju va'e re."*

14

Peteī ava ijyke rurupa va'e omongueraague

¹ Peteī sábado ára py Jesus oo peteī fariseu ruvixa ro py okaru aguā. Ha'e ramo hexe ha'e kuery oma'ě ngatu okuapy.

² Oĩ avi peteī ava ijyke rurupa va'e.

³ Ha'e ramo Jesus oporandu lei re nhombo'e va'ety ha'e fariseu kuery ikuai va'e pe:

— Ha'eve pa sábado ára py nhanhomonguera aguā, tyrā pa any? — he'i.

⁴ Ha'e rā ha'e kuery ma mba'eve nde'i. Ha'e ramo ava va'e po re ojopy vy omonguera, ha'e gui omondouka ju.

⁵ Ha'e rire oporandu ikuai va'e pe:

— Peē kuery nda'u pendera'y e'ŷ vy penerymba vaka yvykua py ho'a ramo napenoẽ potai 'rā ri, sábado ára py teī? — he'i.

* 13:24 Mateus 7.13,14; João 10.7-10 † 13:32 Ha'e kuery "Mbyku" he'i 'rā nhombotavypa rei va'e pe. Salmo 118.26, Romanos 11.25-27

* 13:35

6 Ha'e ramo ha'e kuery nombovai kuaai.

Tenondeve py ikuai va'e re ijayvuague

7 Ha'e gui Jesus oma'ẽ vy oexa oenoĩ mbyre kuery tenda tenondeve oĩ va'e anho oiporavo rã oĩ aguã. Ha'e rami vy ha'e kuery pe omombe'u peteĩ ayvu mba'emo re ombojoja vy:

8 — Amongue omendaa py penerenoĩ ramo nda'evei tenda tenondeve oĩ va'e py peĩ aguã. Mba'eta xapy'a rei pendegui yvateve va'e oenoĩ mbyre ou ramo

9 penerenoĩare ou vy “Eme'ẽ peva'e pe tenda py oguapy aguã”, he'i 'rã pãvy. Ha'e ramo peximba reve 'rã peva tenda ijapy'i py oĩ va'e py.

10 Ha'e rami 'rãgue py amongue penerenoĩ ramo ha'eveve tenda ijapy'i py oĩ va'e py peĩ. Ha'e ramo penerenoĩare ou vy “Xeirũ, kyvõve ke eguapy”, he'i 'rã pãvy. Ha'e ramo oenoĩ mbyre kuery ha'e javi oikuua 'rã penemboetevea.

11 Mba'eta ha'e javive onhemboyvate va'ekue omo'yvyi'iave 'rã. Ha'e rã onhemo'yvyi'i va'ekue ma omboyvateave 'rã — he'i.*

12 Ha'e gui ma henoĩare pe ju aipoe'i:

— Ngaru rejapo vy nda'evei renoĩ aguã neirũ kuery anho, nderyvy kuery, neretarã kuery, neĩ ndea katy'i iporiau e'ŷ va'e kuery, ndevy pe ha'e kuery ju ha'ekue rami ojapo e'ŷ aguã omboekovia vy.

13 Ha'e rami 'rãgue py ngaru rejapo vy renoĩ 'rã iporiaukue'i, hetyma rovaikue va'e, oguata e'ŷ va'e ha'e ára rewegua e'ŷ ikuai va'e.

14 Ha'e rami vy nemoingo porãa 'rã, mba'eta ha'e kuery ndojoui 'rã omboekovia aguã. Ha'e nungakue rekovia rejopy 'rã heko porã va'e kuery omboete jevya ára py.*

Ngaru re ombojojaague

15 Ha'e rami ijayvu rã mesa py hexeve oguapy oiny va'e regua peteĩ oendu vy aipoe'i:
— Ovy'a ete 'rã Nhanderuete po'akaa py okaru okuapy va'e.

16 Ha'e rã ombovai vy aipoe'i:

— Peteĩ ava ojapo ngaru tuvixa va'e, heta oenoĩ uka guive.

17 Okaru aguã ovaẽ ma ramo omondouka guembiguai oenoĩ uka va'ekue pe “Peju, oguereko katupa ma”, he'i aguã.

18 Ha'e rami teĩ ha'e javive omombe'u oo aguã nda'eveia rami. Peteĩ ma aipoe'i: “Xee ma ajogua xeyvyrã, ha'e py ranhe aa ta ama'ẽ vy. Ha'e rami vy ajerure remombe'u aguã ndaa reguaia”, he'i.

19 Amboae aipoe'i avi: “Xee ma peteĩ nhiruĩ meme vaka ajogua rire aa ta ha'anga. Ha'e rami vy ajerure remombe'u aguã ndaa reguaia”, he'i.

20 Amboae ma “Xee ma amenda ramo vy ndaa reguai”, he'i.

21 — Ha'e gui ma tembiguai ojevy vy omombe'upa opatõ pe. Ha'e ramo hoo va'e ivai reve aipoe'i guembiguai pe: “Tereo pojava tetã rupi tape ikuai va'e rupi. Eru apy iporiaukue'i, oguata e'ŷ va'e, ára rewegua e'ŷ ha'e ijyva rovaikue va'e”, he'i.

22 — Ha'e va'e rire hembiguai ou vy aipoe'i: “Xepatõ, ajapopa ma rejapo uka va'ekue. Ha'e rami teĩ oĩve teri tenda.”

23 — Ha'e ramo ipatõ ombovai: “Tereo ju tape ikuai va'e rupi, ejapo ha'e javive ou vy xeropy omonyẽ aguã.

24 Xee aipoa'e avi pãvy: Avakue aenoĩ uka ypy va'ekue ma neĩ peteĩve ndokarui 'rã ngaru ajapoa py.”

Cristo rupive jaikoxe vy jaejapa aguã re ijayvuague

25 Heta ete va'e hupive oje'oi ramo ojere vy aipoe'i ha'e kuery pe:

26 — Amongue xea py ouxe teĩ nguu, oxy, gua'yxy, gua'y kuery, guyvy kuery, gueindy kuery ha'e guekove ae oayvuve va'e nda'evei xeremimbo'erã.*

* 14:11 Mateus 23.6,12; Proverbios 25.6,7

* 14:14 Proverbios 19.17

* 14:26 Mateus 10.37-39; Lucas 9.57-62

²⁷ Amongue xerupive oikoxe teĩ ojeupegua kuruxu ndogueraai va'e ma nda'evei avi xeremimbo'erã.

²⁸ Mba'eta peẽ kuery va'e regua ma torre pejapo ta vy peguapy ranhe 'rã peikuua pota aguã ha'eve paa pejapopa aguã.

²⁹ Ha'e rami e'ŷ vy pemboypy rire ndapejapopai rã pavẽ oexa vy pendejajai rei 'rã,

³⁰ ha'e vy aipoe'i 'rã: "Peva'e ava omboypy rive, ndojapopai", he'i 'rã okuapy.

³¹ — Huvixa oiko va'e amboae huvixa re opu'ã aguã oo ta vy ha'e rami ae avi 'rã oiko, oguapy 'rã ranhe oikuua pota aguã dez mil xondaro reve vy pa vinte mil hovaigua ou va'e re ipo'aka 'rãa re.

³² Ha'e rami aguã nda'evei ramo amboae kuery mombyry teri ou reve ombou 'rã peteĩ guembiguai amboae kuery reve ikuai porã ju aguã re ojerure aguã.

³³ Ha'e rami avi peẽ kuery voi mba'emo perekoo va'e pejapa e'ŷ vy nda'evei xeremimbo'e peiko aguã.

Mateus 5.13; Marcos 9.50

³⁴ — Juky ma iporã vaipa. Ha'e rã xapy'a rei nae'ẽvei rire mba'exa 'rã tu he'ẽ ju?

³⁵ Nda'evei 'rã yyy, neĩ yty reguarã guive. Nhamombo rive 'rã oka py, Ijapyxa oendu aguã oĩ va'e toendu.

15

Jesus omova ague heko vai va'e kuery

¹ Ha'e javive imposto re nhombopaga va'ety ha'e heko vai va'e kuery ma Jesus ayvu oenduxe vy onhemboja okuapy hexe.

² Ha'e rã fariseu ha'e lei re nhombo'e va'ety kuery ma ha'e nunga oexa vy ijayvu rei vy aipoe'i:

— Peva'e tu omova  rima ojejavypa va'e kuery, ha'e kuery reve okaru guive — he'i okuapy.*

Mateus 18.10-14

³ Ha'e ramo Jesus omombe'u pova'e ayvu mba'emo re ombojoja vy:

⁴ — Mava'e nda'u perekoo 'rã cem vexa'i, ha'e gui peteĩ pemokanhy vy noventa e nove ikuai va'e ndapejai 'rã teve tekao e'ŷa py, ha'e vy pa ndapeoi 'rã teve okanhy va'ekue pejou peve aguã?

⁵ Pejou ma vy pejaxe 'rã heruvy pevy'a vy.

⁶ Pendo py peva  ma vy pemboatypa 'rã peneir  ha'e penetar  kuery. Ha'e vy aipopeje 'rã: "Javy'a ke xereve, mba'eta ajou ju ma xerymba amokanhy va'ekue", peje 'rã.

⁷ — Xee aipoa'e p vy: Ha'ekue rami avi yva re oguerovy'aa ete 'rã peteĩ heko vaiague gui ojeko rerova ramo, noventa e nove heko porã va'e vy ndojeko rerovai va'e gui oguerovy'ave 'rã.

Hat i va'e omokanhy mybre omombe'uague

⁸ — Mava'e kunha dez hat i va'e oguerekoo va'e nda'u peteĩ omokanhy vy nomoendyi 'rã tataendy, ha'e ngoguy rupi ndoipei 'rã ri omokanhy va'ekue ojou peve?

⁹ Ojou ma vy omboatypa 'rã oir  ha'e guetar  kuery. Ha'e vy aipoe'i 'rã: "Javy'a ke xereve, mba'eta ajou ju ma per ta amokanhy va'ekue", he'i 'rã.

¹⁰ — Xee aipoa'e p vy: Ha'e rami ae avi Nhanderuete pegua anjo kuery oguerovy'a 'rã okuapy peteĩ heko vaiague gui ojeko rerova ramo.

Ta'y okanhy ranhe va'ekue omombe'uague

¹¹ Aipoe'ive ju:

— Peteĩ ava oguerekoo moko  gua'y.

¹² Kunumive va'e aipoe'i nguu pe: "Xeru, eme'  xemba'er  va'ekue rerekoo va'e", he'i. Ha'e ramo omboja'o oguerekoo va'e.

¹³ — Kueve'i ma rire ta'y kunumive va'e omono' mba oguerekoo va'e, ha'e oo mombyry amboae yvy re. Ha'e py omokanhymba oguerekoo va'e, opa mar  rei oikoa rupi.

* 15:2 Lucas 5.29-32

- ¹⁴ Oguereko va'ekue omomba rire ha'e va'e yvy re oiko karuai. Ha'e ramo oiko aguā.
- ¹⁵ Ha'e rami vy oo omiba'eapo peteī ava ha'e va'e yvy regua pe. Ha'e va'e omondouka poryko kuera ikuia rupi opena aguā.
- ¹⁶ Ha'e rami oiko vy alfarroba rope poryko ho'u va'e ha'e voi ho'uxe teī ixupe avave rei nome'ēi mba'eve.
- ¹⁷ — Ha'e gui ma onhemboaxy vy ojeupe ae aipoe'i: “Mbovy pa ikuai xerua py omiba'eapo vy okaru porā va'e, ha'e rā xee ma apy amano ta ma karuai gui.
- ¹⁸ Apu'ā ta, ha'e vy aa 'rā xerua py. Ha'e vy aipoa'e 'rā ixupe: ‘Xeru, xee ajejavy yva pygua rovai, nderovai guive.
- ¹⁹ Nda'eveei ma nderā'y aiko aguā. Xererekoo omiba'eapo va'e rami rive'i, ha'e 'rā.”
- ²⁰ Ha'e rami vy opu'ā vy oo ju nguua katy.
— Mombyry teri ou jekuaa reve tuu oexa vy omboaxy. Ha'e vy onha ovu, oikuavā reve ovayvu.
- ²¹ Ha'e ramo ta'y aipoe'i: “Xeru, xee ajejavy yva pygua rovai, nderovai voi. Nda'eveei nderā'y aiko aguā”, he'i.
- ²² — Ha'e rami teī tuu aipoe'i guembiguai kuery pe: “Peru pojava ao iporāve va'e, pemonhemonde. Ikuā re ma pemoī kuā regua, ha'e gui ipy re ma pemoī py regua.
- ²³ Peru avi vaka ra'y ikyra va'e, ha'e pejuka. Jakaru ha'e javy'a,
- ²⁴ mba'eta kova'e xera'y omano va'ekue ri oikove ju. Okanhy va'ekue ojoua ju”, he'i. Ha'e rami vy ovu'a okuapy.
- ²⁵ — Ha'e ramia ja ta'y tujave va'e mba'ety rupi oiko. Ha'e gui ojevy, oo py ovaē rai'i ouvy vy oendu mba'epu ha'e ojeroky va'e.
- ²⁶ Ha'e vy peteī tembiguai oenoī vy oporandu mba'e pa oikoa re.
- ²⁷ Ombovai: “Nderyvy ou ramo rima nderu ojuka uka kuri vaka ra'y ikyra va'e, hexaī reve ou ramo”, he'i.
- ²⁸ — Ha'e ramo tyke'y ipoxy vy ndoikexe. Ha'e ramo tuu oē ombopy'a porā aguā.
- ²⁹ Ha'e ramo aipoe'i nguu pe: “Mbovy ma'et̄y re ma pa mba'emo ajapo aikovy ndevy? Peteīgueve ma voi noronhe'ē apo e'yi. Ha'e rami teī neī peteīgueve ma kavara'i nereme'ēi xeirū kuery reve avy'a aguā.
- ³⁰ Ha'e rā nderā'y kunhague re nemba'e rei-rei omokanhymba va'ekue ou ramo ma je rejuka uka vaka ra'y ikyra va'e”, he'i.
- ³¹ — Ha'e rā tuu ombovai: “Xera'y, ndee ma xea py riae reiko va'e, ha'e mba'emo areko va'e ma nemba'e meme.
- ³² Ha'e rami avi jarovy'a 'rāe, javy'a 'rā, mba'eta nderyvy omano va'ekue ri oikove ju, okanhy va'ekue ojoua ju.”*

16

Tembiguai ojeroviap y e'ŷ va'e omombe'uague

¹ Guemimbo'e kuery pe Jesus aipoe'i avi:

— Oiko peteī ava iporiau e'ŷ va'e. Ha'e va'e ma peteī ava omopena omiba'e rei-rei re. Ha'e va'e re ayvu oiko imba'e rei-rei re nopena porāia rami.

² — Ha'e ramo ija oenoī vy aipoe'i ixupe: “Anhetē pa ndere ayvu oiko va'e? Emombe'u rejapo va'ekue ha'e javi, mba'eta nda'eveei ma xevy pe remba'eapove aguā”, he'i.

³ — Ha'e ramo mba'e rei-rei re opena va'ety aipoe'i ojeupe: “Mba'e nda'u ajapo 'rā? Mba'eta xepatō xepe'a ta ma amba'eapoa gui. Mba'ety rupi amba'eapo aguā ma nanhanimai, ha'e rā ajerurea rupi aiko aguā ma axī.

⁴ Aikuua ma mba'e pa ajapo 'rāa, amba'eapoa gui xepe'a ramo ngoo py xemovaēa aguā”, he'i.

⁵ — Ha'e rami vy oenoīmba ipatō pe oreve va'e kuery peteī-teī. Jypygua pe aipoe'i: “Mbovy tu rereve xepatō pe?”

* 15:32 Efésios 2.1-10; Tiago 4.8-10

⁶ Ombovai: “Cem ryru azeite.” Ha'e ramo aipoe'i: “Ejopy ke rereveague oĩa, eguapy, ha'e embopara cinqüenta ryru ete'i”, he'i.

⁷ — Amboae pe ju oporandu: “Ha'vy ndee, mbovy tu rereve?” Ha'e ombovai: “Cem ryru trigo.” Ixupe aipoe'i: “Ejopy ke rereveague oĩa, ha'e embopara oitenta ete'i”, he'i.

⁸ — Ha'e rami rã ipatõ oguerovy'a guembiguai ojeroviapy e'ŷ teĩ oiko kuaa ramo, mba'eta hendy va'e ra'y kuery gui ma ko yvy regua kuery ikuai kuaave 'rã joguerekoo py.

⁹ Ha'e nunga rupi xee aipoa'e pêvy: Pereko kuaa pota ke mba'emo ko yvy regua peneirûrã pejouve aguã ramo, ha'e nunga opa ramo ha'e kuery ju penemovaẽ aguã oo imarã e'ŷ va'e py.*

¹⁰ Mba'eta mbovy'i oguerekoo kuaa va'e ma heta va'e voi oguerekoo kuaa 'rã. Ha'e rã mbovy'i va'e ndoguerekoo kuaai va'e ma heta va'e voi ndoguerekoo kuaai 'rã.

¹¹ Ha'e nunga rupi mba'emo ko yvy regua ndaperekoo kuaai rire mava'e tu pendepo py omboaxa ta mba'emo iporã ete va'e?

¹² Nhomba'e re napepena porãi rire mava'e tu ome'ẽ ta pendevy guarã va'ekue?

¹³ — Avave rei nomba'eapoi 'rã mokoĩ patõ pe. Mba'eta peteĩ re nda'ija'eive 'rã amboae oayvuve vy. Ha'e rami e'ŷ vy peteĩ ojou porãve vy amboae ma ndojou porãive 'rã. Nda'evei Nhanderuete pe peiko aguã, peráta re nda'evei reve.

Fariseu kuery pe Jesus ijayvu eteague

¹⁴ Fariseu kuery ha'e nunga oendu vy oojai rei okuapy, peráta re nda'eveive va'e vy.

¹⁵ Ha'e ramo Jesus aipoe'i ha'e kuery pe:

— Peẽ kuery ma penhemboeko porã amboae kuery oexaa rupi. Ha'e rã Nhanderuete ma oikuaapa pendepy'a re oĩ va'e. Mba'eta avakue ojou porãve va'e ma Nhanderuete pe ha'eve'ŷ va'e.

¹⁶ — Lei ha'e profeta ombopara va'ekue ma João Batista oikoa ára peve'i guarã va'ekue. Ha'e va'e rire ma ayvu porã Nhanderuete po'akaa regua omombe'ua ramo pavẽ onhea'ã oupity aguã.

¹⁷ Ha'e rami avi yva ha'e yvy okanhymbaa gui haxyve peteĩ ipara'i lei re oĩ va'ekue oaxa rive.*

Mateus 19.9; Marcos 10.10-12

¹⁸ — Gua'yxy gui opoi vy amboae re omenda va'e ma itavy, ha'e kunha oeja pyre re omenda va'e itavy avi.

Oguerekopa va'e ha'e Lázaro omombe'uague

¹⁹ — Oiko peteĩ ava iporiau e'ŷ va'e, púrpura ha'e ajukue iporãve va'e py anho onhemonde va'e, ko'ẽ nhavõ ngaru ojapo va'e.

²⁰ Oiko avi peteĩ ava poriaukue'i Lázaro hery va'e, ijaipa'i va'e. Iporiau e'ŷ va'e rokẽ yvy'iry omoña.

²¹ Ha'e va'e ma ho'uxe iporiau e'ŷ va'e mesa gui ikure-kure'i ho'a va'ekue. Ijai re ma jagua kuery ou vy oere guive.

²² — Iporiaukue'i omano ma ramo anjo kuery ogueraa Abraão yvýry optytu'u aguã py. Ha'e rã iporiau e'ŷ va'ekue omano ramo ma onhono porãa.

²³ — Haku vaikuea py iporiau e'ŷ va'ekue oiko axy reve oma'ẽ vy oexa mombyry Abraão ha'e Lázaro ijyvýry oĩ rã.

²⁴ Ha'e ramo ojapukai vy aipoe'i: “Xeru Abraão, xemboaxy ke, ha'e vy embou Lázaro tomoaký okuã yy py xeapekũ omboaku ro'y aguã, mba'eta tataendy raku py aiko axy”, he'i.

²⁵ — Ha'e rã Abraão aipoe'i: “Xera'y, nema'endu'a ke reiko teri vy opa mba'e porã rerekaoague re. Ha'e rã Lázaro ma oiko axy rei va'ekue. Aŷ ma apy oiko optytu'ua py, ha'e rã ndee ma reiko axya py rei.*

* 16:9 1 Timóteo 6.17-19

* 16:17 Mateus 11.12,13; 5.17,18

* 16:25 Lucas 6.20-26

²⁶ Oĩ avi nhandekuaia mbyte peteĩ yvykua tuvixa va'e. Ha'e va'e gui nda'evei kylvõ katy gui upe katy oaxaa aguã, neĩ upe katy gui kylvõ katy nda'evei avi", he'i.

²⁷ — Ha'e gui ma aipoe'ive ju: "Xeru, xee ajerure xeru ro py Lázaro remondouka aguã ²⁸ xeryvy kuery peteĩ nhiruĩ areko va'e ikuiaia py, ha'e kuery omonheangu aguã, ha'e kuery ou e'ŷ aguã oiko axy aguã py."

²⁹ — Abraão ombovai: "Ha'e rami avi ha'e kuery oguereko ae ma Moisés ha'e profeta kuery ombopara va'ekue. Toendu ha'e nunga", he'i.

³⁰ — Ha'e rã ojerureve: "Any xeru Abraão, amongue omanoague gui onhemboete vy ha'e kuerya py oo ramo 'rãe ojeko rerova."

³¹ — Ha'e rami rã Abraão ombovai: "Moisés ha'e profeta kuery ombopara va'ekue re noendu potai ri vy ndogueroviai 'rã amongue omanoague gui onhemboete ramo voi."*

17

Mateus 18.6,7; Marcos 9.42

¹ Jesus aipoe'i guemimbo'e kuery pe:

— Oiko riae 'rã joityarã. Ha'e rami teĩ nda'evei ete 'rã joityare kuery pe.

² Mba'eta kova'e kyrigue va'e regua amongue oity 'rãgue py, ha'eveve oityxe va'e aju'y re ita mba'emo mongu'ia ojokua pyre reve ye'ẽ py omomboa va'e rire.

Mateus 18.21,22

³ — Peiko kuaa pota ke. Ndevy pe nderegua otekoavy ri ramo ndeayvu 'rã ixupe. Ha'e rã ojeko rerova ramo reperdoa 'rã.

⁴ Peteĩ ára pyve sete-kue ndevy otekoavy teĩ sete-kue ae ndea py ou vy "Nda'eveia aendu", he'i ramo eperdoa ju — he'i.*

⁵ Ha'e ramo apóstolo kuery aipoe'i Senhor pe:

— Emoïve ke rojeroviaa.

⁶ Senhor ombovai:

— Pejeroviaa ma peteĩ mostarda ra'yí'i rami ri jepe oĩ va'e rire kova'e amora rembypy pe "Ejeapo'o ha'e enhenhoty ye'ẽ py" peje teĩ pendeayvua oiko 'rãgue.

⁷ — Peẽ kuery ma perekó 'rã penembiguai mba'ety rupi e'ŷ vy vaka re openaa rupi ombo'epo va'e. Ha'e va'e ma ombo'epoa gui ou ramo "Eju ke ekaru" peje 'rã teve?

⁸ Ha'e rami 'rãgue py aipopeje 'rã: "Ejapo ranhe ke xee ha'u va'erã. Enhemboekovia vy ejara xevy akaru ha'e ay'u peve. Ha'e rire ma ndee ju 'rã rekaru ha'e rey'u", peje 'rã.

⁹ Penembiguai kuery pendeayvua ojapo teĩ ha'e kuery pe "Ha'eve ete ko" ndapeje riae 'rã.

¹⁰ Peẽ kuery voi ha'e rami avi, pendevy pe ojapo uka pyre pejapopa ma vy ha'eve aipopeje aguã: "Ore ma tembiguai oguerovy'a pyrã e'ŷ, mba'eta rojapo 'rã va'ekue anho rojapo."

Dez lepra revegua omongueraague

¹¹ Jerusalém tetã katy Jesus oo vy oaxa Samaria ha'e Galiléia mbyte rupi.

¹² Peteĩ tekao py ovaẽ ramove dez lepra revegua ovaexi jogueruvy.

¹³ Mombyry jogueropytaa py ixupe ojapukai reve aipoe'i:

— Jesus, Porombo'ea, oremboaxy ke.

¹⁴ Jesus oexa vy ombovai:

— Tapeo ha'vy pejexa uka sacerdote kuery pe — he'i. Ha'e ramo ha'e kuery ooa rupive okuerapa.

¹⁵ Ha'e kuery dez va'e regua peteĩ ma okuerapaa oexa vy ojevy ju oĩa py. Ijayvu atã reve Nhanderuete pe oporaei ouvy,

¹⁶ ha'e Jesus renonde guenapy'ã re oĩ, yvy re ngova omovaẽ oguerovy'aa rupi. Ha'e va'e ma Samaria pygua.

¹⁷ Ha'e rami rã Jesus oporandu ixupe:

— Dez e'ŷ teve pekuera ra'e? Mamo tu amboae kuery nove ikuai?

* 16:31 Mateus 28.11-15

* 17:4 Efésios 4.32; Colossenses 3.13

¹⁸ Jipoi ri nda'u Nhanderuete pe oporaei vy ojevy va'erā, kova'e amboae regua e'ŷ vy? — he'i.

¹⁹ Ha'e vy aipoe'ive ju:
— Epu'ã katu, tereo. Rejeroviaa ndereraa jepe.

Nhanderuete po'akaa ojekuaa 'rāa re ijayvuague

²⁰ Fariseu kuery oporandu raka'e pa Nhanderuete po'akaa ojekuaa 'rāa re. Ha'e ramo ha'e kuery pe Jesus ombovai:

— Nhanderuete po'akaa ma jaexa va'erā rami e'ŷ ojekuaa va'e.

²¹ Ha'e nunga pe aipo nda'eai 'rā: “Apy rima”, neĩ “Pe py rima oĩ” nda'eai 'rā, mba'eta Nhanderuete po'akaa ma penembyte ae oĩ — he'i.

²² Ha'e gui ma guemimbo'e kuery pe ju aipoe'i:
— Ovaẽ 'rā Ava ra'y ojeapo va'ekue ojekuaa rā pexaxe rei aguā ára, teĩ ndapexai ranhe 'rā.

²³ Pendevy pe “Apy rima” e'ŷ vy “Pe py rima oĩ” 'ea teĩ tapeo eme ha'e kuery rupive.

²⁴ Mba'eta overa vy yva jave re hexakā ouvya rami avi ojekuaa 'rā Ava ra'y ojeapo va'ekue ára.

²⁵ Ha'e rami teĩ ha'e va'e'ŷ mbove hexe aŷgua kuery nda'ija'ei rā oiko axy 'rāe.

²⁶ — Noé oiko jave py oikoague rami avi oiko 'rā Ava ra'y ojeapo va'ekue ára.

²⁷ Mba'eta okaru ha'e oy'u okuapy, omenda ha'e nhomomenda raka'e Noé kanoã py oikea ára peve. Ha'e gui ma yy ou vy omomba ha'e javive.*

²⁸ Ha'ekue rami avi oiko Ló oiko jave py. Okaru, oy'u, mba'emo ojogua, ovende, onhotŷ ha'e ojapo okuapy.

²⁹ Ha'e gui ma Sodoma tetā gui Ló ojepe'a ramove yva gui ho'a raka'e tata enxofre reveguia, omomba ha'e javive.

³⁰ Ha'ekue rami avi oiko 'rā Ava ra'y ojeapo va'ekue ojekuaa uka aguā ára.

³¹ Ha'e va'e ára ma amongue ngoo áry oĩ va'e toguejy eme ngopy oguereko va'e oguenoẽ aguā. Ha'e rami ae omiba'epoa rupi ikuai va'e tojevy eme guakykue.

³² Penema'endu'a ke Ló ra'yxy re oiko va'ekue re.*

³³ Mba'eta nomanoxei va'ekue omokanhya 'rā guekove. Ha'e rā ojuka uka va'e ma ogueraa jope uka 'rā guekove.

³⁴ Aipoa'e pêvy: Ha'e va'e pytū mokoõ oke 'rā oupy peteĩ tupa py. Peteĩ heraa 'rā, ha'e rā amboae ma oeja'a 'rā.

³⁵ Mokoõ kunhague ikuai 'rā omiba'exoa py. Peteĩ heraa 'rā, ha'e rā amboae oeja'a 'rā.

³⁶ [Mokoõ ikuai 'rā mba'ety py. Peteĩ heraa 'rā, ha'e rā amboae oeja'a 'rā] — he'i.

³⁷ Ha'e ramo ixupe oporandu okuapy:

— Senhor, mamo 'rā tu ha'e nunga oiko?

Ombovai ha'e kuery pe:

— Mamo rā te'õgue ituia py xapirē voi onhemboaty 'rā okuapy — he'i.

18

Nhomboayvu va'ety porayvu e'ŷ vy e' omombe'uague

¹ Ha'e gui Jesus omombe'u peteĩ ayvu mba'emo re ombojoja vy, nhandekuerai e'ŷ re nhanhembo'e riae aguā.*

² — Peteĩ tetā py oiko peteĩ nhomboayvu va'ety Nhanderuete renonde ojererokyjea rupi e'ŷ oiko va'e, neĩ avakue omboete e'ŷ va'e guive.

³ Ha'e va'e tetā py oiko avi peteĩ imev'ŷ va'e. Ha'e va'e ma huvixa oĩa py ou vy aipoe'i: “Eikuua pota na xerovaigua kuery xemoangeko reia re”, he'i.

⁴ — Ha'e rā ha'e ma ndoikuuaa potaxei ranhe ha'e nunga re. Ha'e rire mae ma aipoe'i ojeupe: “Anhetē ae ndajeroviai Nhanderuete re, ha'e neĩ avakue namboetei.

* 17:27 Mateus 24.37-44 * 17:32 Ló ra'yxy ma Sodoma tetā gui oo jepe vy guakykue re oma'ẽ ramo Nhanderuete ojuka raka'e, ha'e ramo juky rive opyta (Gênesis 19.26). * 18:1 Lucas 11.5-10;
1 TessalonICENSES 5.17

⁵ Ha'e gui imeve'ŷ va'e ojerure riae ete ma ramo aikuua pota nho 'rã, xemoangeko rei riae e'ŷ aguã", he'i.

⁶ Ha'e ramo Senhor aipoe'i:

— Peikuaa pota ke huvinha porayvu e'ŷ va'e ijayvuague re.

⁷ Ha'e gui Nhanderuete nda'u ndoikuua pota voi 'rã ri hembiporavo kuery ára pukukue re ha'e pytû mbukukue re ixupe ojapukai va'e re? Oikuua pota aguã are merami tei

⁸ xee aipoa'e: Oikuua pota voi 'rã pendere. Ha'e rami tei Ava ra'y ojeapo va'ekue ou ju vy nda'u ojou 'rã ri ojerovia va'e ko yvy re?

Fariseu ha'e imposto re nhombopaga va'ety omombe'uague

⁹ Omombe'u avi pova'e ayvu mba'emo re ombojoja vy, amongue ojee ae ojerovia ha'e onhemboeko porâxe vy jojou vai va'e re ijayvu vy.

¹⁰ — Mokoõ ava oo templo py onhembo'e aguã. Petei ma fariseu, ha'e rã amboae ma imposto re nhombopaga va'ety.

¹¹ Fariseu va'e opu'ã ho'amy vy ojeupe ae onhembo'e po rami: "Xeruete, xee roquerovy'a, mba'eta avakue mboae rami rami e'ŷ aiko, imonda va'e, jokorepa rei, itavy rei va'e, peva'e imposto re nhombopaga va'ety rami e'ŷ guive.

¹² Semana nhavõ re mokoõgue kuerei 'rã aiko akaru e'ŷ re. Ha'e opa mba'e ajou va'ekue gui ame'ẽ aikovy dízimo", he'i.

¹³ — Ha'e rã imposto re nhombopaga va'ety ma mombyry'i hi'aĩ, nei yva re oma'ẽ aguã voi nda'ipy'a guaxui. Opexo re oipete-pete reve aipoe'i: "Xeruete, xemboaxy ke, xee ajejavypa va'e aiko", he'i.

¹⁴ — Xee aipoa'e pêvy: Ha'e va'e anho omboeko porã mbyre oo ngoo katy, fariseu ma any. Mba'eta ha'e javive ha'e ae onhemboyvate va'e omo'yvy'iave 'rã. Ha'e rã onhemo'yvy'i va'ekue ma omboyvateave 'rã.*

Mateus 19.13-15; Marcos 10.13-16

¹⁵ Ha'e oia py oguerua kyrigue ha'e kuery re opo omoi aguã. Ha'e rã hemimbo'e kuery oexa vy ijayvu ete okuapy herua kuery pe.

¹⁶ Ha'e rã Jesus ma ojea py kyrigue oenoi vy aipoe'i:

— Tove tou kyrigue, pejoko eme, mba'eta peva'e ramigua'i peguarã ae Nhanderuete po'akaa.

¹⁷ Anhetã aipoa'e pêvy: Kyrigue'i rami e'ŷ Nhanderuete po'akaa nomovaõi va'e ma ndoikei 'rãe ha'e py.

Mateus 19.16-22; Marcos 10.17-22

¹⁸ Petei ava omboetevey oĩ va'e oporandu ixupe:

— Porombo'ea nderekoo porã va'e, mba'e nda'u ajapo 'rã tekove marã e'ŷ aupity aguã?

¹⁹ Jesus ombovai:

— Mba'e re tu "Nderekoo porã va'e", 're xevy? Avave rei ndaeko porãi Nhanderuete e'ŷ vy.

²⁰ Reikuua ae ma ojapo uka pyre: "Ndetavy eme, ejojuka eme, nemonda eme, ndeayvu rive eme joe, emboete nderu ha'e ndexy", he'i.

²¹ Ava va'e aipoe'ive ju:

— Ha'e nunga ha'e javi ajapopa ae ma, xekyrí guive.*

²² Jesus oendu vy aipoe'i:

— Petei mba'e ma oata teri ndevy. Evendepa rerekoo va'e ha'e javi, ha'e hepykue eme'ẽmba iporiaukue'i pe. Ha'e vy 'rãe rerekoo ovareve va'e yva re. Ha'e gui mae ma eju xerupive — he'i.

²³ Ha'e ramo ha'e va'e ayvu oendu vy ndovy'ai ete, oguerekopa va'e vy.

Mateus 19.23-30; Marcos 10.23-31

²⁴ Jesus ma ava va'e ndovy'aveia oexa vy aipoe'i:

— Haxy ete oguerekopa va'e kuery Nhanderuete po'akaa py oike aguã — he'i.*

* 18:14 Mateus 6.5-8; João 9.41; 1 Pedro 5.5,6 * 18:21 Romanos 3.10,19,20; Tiago 2.10 * 18:24 1 Timóteo 6.9,10

²⁵ Nhanderuete po'akaa py oguerekopa va'e oikea gui ndaxyive juu nambi kua rupi camelo oaxa aguã — he'i.

²⁶ Ha'e ramo oendu va'e kuery aipoe'i:

— Mba'e xagua 'rã tu ha'vy oo jepe?

²⁷ Ombovai:

— Avakue pe haxy va'e ma Nhanderuete pe ndaxyi — he'i.

²⁸ Ha'e ramo Pedro aipoe'i:

— Ore kuery ma orero roejapa va'ekue nderupive orekuai aguã.

²⁹ Ha'e ramo Jesus ombovai ha'e kuery pe:

— Anhetẽ aipoa'e pãvy: Ha'e javi Nhanderuete po'akaa rupi oiko aguã ngoo oeja va'e, gua'yxy, guyvy kuery, nguu e'ŷ vy gua'y kuery,

³⁰ ha'e kuery ma aŷ voi ojou retave ete 'rã, ha'e gui raka'eve rã oupity 'rã tekove marã e'ŷ.

Mateus 20.17-19; Marcos 10.32-34

³¹ Ngupive doze guemimbo'e kuery Jesus ogueraa vy aipoe'i ha'e kuery pe:

— Ma'ë, aŷ ma jaje'oi nhainy Jerusalém katy. Ha'e py ma ojeupity 'rã Ava ra'y ojeapo va'ekue rekorã profeta kuery omboparaague ha'e javi.

³² Mba'eta omboaxaa 'rã amboae regua kuery pe, ha'e ramo ojavyky rei, ojojai rei ha'e onyvõmba 'rã okuapy.

³³ Oinupãmba ma rire ojukaa 'rã. Ha'e gui mboapy araa py onhemboete ju 'rã — he'i.

³⁴ Ha'e rami teĩ ha'e kuery neĩ peteĩ henda py noendu kuaai pov'a'e ayvu, mba'e he'ia paa ndoikuua ukai ramo. Ha'e kuery ndoikuai ae ijayvua.

Mateus 20.29-34; Marcos 10.46-52

³⁵ Jericó tetã py ovaẽ rai'lí ovya py peteĩ ára revegua e'ŷ oguapy oiny tape yvýry mba'emo re ojerurea py.

³⁶ Ha'e va'e ma heta va'e kuery oaxa nhendua oendu vy oporandu mba'e pa oikoa re.

³⁷ Ha'e ramo ixupe omombe'ua Nazaré pygua Jesus oaxaa.

³⁸ Ha'e ramo ojapukai:

— Jesus Davi ramymino, xemboaxy ke — he'i.

³⁹ Ha'e ramo tenonde oje'oi va'e aipoe'i okyrirí aguã. Ha'e rami teĩ ojapukaive tema:

— Jesus Davi ramymino, xemboaxy ke.

⁴⁰ Ha'e ramo Jesus opyta vy ogueru ruka. Ha'e ovaẽ ramo oporandu ixupe:

⁴¹ — Mba'e tu reipota ndevy ajapo?

Ombovai:

— Senhor, xee ma aexaxe — he'i.

⁴² Ha'e ramo Jesus aipoe'i:

— Exa ha'vy. Rejeroviaa ndereraa jepe ma.

⁴³ Ha'e ramove oexa, ha'e Nhanderuete pe oporaei ovvy hupive. Heta va'e kuery ha'e javive ha'e nunga oexa vy oporaei avi jogueravy Nhanderuete pe.

19

Imposto re nhombopaga va'ety Zaqueu oo jepeague

¹ Jericó py Jesus oike vy oaxa ovvy tetã rupi.

² Ha'e py oiko peteĩ ava Zaqueu hery va'e, imposto re nhombopaga va'ety ruvixa oguerekopa va'e.

³ Ha'e va'e oexaxe mava'e pa Jesus, teĩ nda'evei heta va'e kuery gui, ikarape'i va'e vy.

⁴ Ha'e vy onha ovvy henonderã, ojeupi peteĩ sicômoro rakã re oexa aguã, ha'e rupi 'rãe oaxa ramo.

⁵ Ha'e py Jesus ovaẽ vy yvate oma'ë reve aipoe'i ixupe:

— Zaqueu, eguejy pojava ke, kova'e ára ma apyta 'rã ndero py — he'i.

⁶ Ha'e ramo oguejy pojava, ovvy'a reve oguerovaã.

⁷ Ha'e javive ha'e nunga oexa va'e ijayvu rei okuapy, heko vai va'e ro py ovaẽ ramo.

⁸ Ha'e gui ma Zaqueu opu'ã vy aipoe'i Senhor pe:

— Senhor, xee anhenhandu iporiaukue'i pe mba'emo areko va'e ame'ẽ aguã, mbyte rupi peve. Ha'e xapy'a rei amongue mba'emo py akore rire irundykue ju 'rã ame'ẽ hekovia — he'i.*

⁹ Ha'e ramo Jesus aipoe'i ixupe:

— Kova'e ára ma oĩ kova'e oo py oo jepe va'e, mba'eta kova'e ava voi Abraão ramymino oiko.*

¹⁰ Mba'eta Ava ra'y ojeapo va'ekue ou ojou ha'e ogueraa jepe aguã okanhy va'ekue.

Dez hatã'i va'e ouro guigua omombe'uague

¹¹ Ha'e nunga ha'e kuery oendu ramo Jesus peteĩ ayvu ju omombe'u mba'emo re ombojoja vy, mba'eta Jerusalém py ovaẽ rai'i ma ramo oexa'ã teĩ okuapy Nhanderuete po'akaa ojekuaa ta ma aguã re.

¹² Ha'e ramo aipoe'i:

— Peteĩ ava yvatekueve regua oo amboae yvy re onhembopo'aka uka, ha'e gui ojevy ju aguã.

¹³ Ha'e vy dez guembiguai oenoĩ vy ha'e kuery pe oiporuka dez hatã'i va'e ouro guigua ovareve va'e. Ha'e vy aipoe'i: “Kova'e peráta pemboetave ke ajevy peve”, he'i.

¹⁴ — Ha'e rã hetarã kuery mboae nda'ija'ei vy hakykue omondouka huvixave oĩ va'e pe aipoe'i va'erã: “Ore kuery ma ndoroipotai ha'e va'e oreruvixarã”, he'i va'erã.

¹⁵ — Ha'e rami teĩ ombopo'aka ma ramo ou ju, ha'e vy oenoĩ uka guembiguai kuery peráta jopyare, marã rami pa peteĩ-teĩ oguerekoague oikuaa aguã.

¹⁶ — Tenonde ou va'e aipoe'i: “Xeruvixa, ndeperáta gui ma dez ju ajouve.”

¹⁷ — Ha'e ramo huvixa ombovai: “Ha'eve ete ma tembiguai porã. Mbovy'i va'e re repena kuaa rire dez tetã re ju ndepo'aka 'rã”, he'i.

¹⁸ — Amboae ju ou vy aipoe'i: “Xeruvixa, ndeperáta gui ajouve ju peteĩ nhiruĩ.”

¹⁹ — Ha'e va'e pe ma aipoe'i: “Ndee ma peteĩ nhiruĩ tetã re 'rã ndepo'aka”, he'i.

²⁰ — Ha'e gui amboae ju ou vy aipoe'i: “Xeruvixa, apy ma aru ju ndeperáta ajukue py anhovã vy amoĩ porã va'ekue.

²¹ Mba'eta ndegui xee akyje, ivai rei va'e reiko ramo. Remoĩ porãaty gui e'ŷ renoẽ, ha'e renhotýague gui e'ŷ 'rã remono'õ va'e”, he'i.

²² — Ha'e ramo ombovai: “Tembiguai heko vai va'e, ndeayvuague rupi ae 'rã rombopaga. Reikuua ri ty'y xevai rei va'ea, amoĩ porãaty gui e'ŷ teĩ anoẽ, ha'e anhotýague gui e'ŷ amono'õ 'rãa?

²³ Ha'e rami vy mba'e re tu xeperáta ma peráta renda py neremoĩ, ajevy vy ajopy retave aguã?” he'i.

²⁴ — Ha'e gui ha'e py ikuai va'e pe ju aipoe'i: “Peipe'a na peráta ixugui, ha'e peme'ẽ dez oguereko va'e pe.”

²⁵ — Ha'e rã ha'e kuery aipoe'i: “Xeruvixa, ha'e tu oguereko ae ma dez.”

²⁶ — Ombovai: “Xee aipoa'e pêvy: Mba'emo oguereko va'e ha'e javi pe ome'ẽave 'rã. Ha'e rã ndoguerekoi va'e gui ma oguereko'i va'e voi oipe'aa 'rã.

²⁷ Ha'e gui xerovaigua kuery nguvixarã ndaxepotai va'ekue ma Peru, pejukapa aexaa py.”

Mateus 21.1-11; Marcos 11.1-11; João 12.12-19

²⁸ Po rami ijayvupa rire Jesus oove ju Jerusalém katy.

²⁹ Betfagé ha'e Betânia py ovaẽ rai'i ma ovy vy yvyty Oliveiras katy'i, omondouka mokoĩ guemimbo'e.

³⁰ Ha'e kuery pe aipoe'i imondovy:

— Tapeo tenonde peva'e teko aõ va'e py. Ha'e py pevaẽ vy pejou 'rã peteĩ mburika'i ixã re hi'aï va'e, hi'áry avave rei noïai teri va'e. Pejora vy ke Peru.

³¹ Ha'e gui xapy'a rei pêvy amongue oporandu 'rã mba'e re pa pejoraa re. Ha'e ramo pembovai vy “Senhor ma oipota”, peje 'rã.

* 19:8 Lucas 3.8,12,13 * 19:9 Gálatas 3.7,29 py oña rami, “ojerovia va'e ae Abraão ramymino kuery ikuai”, ha'e “Cristo pegua peiko vy peẽ kuery voi Abraão ramymino kuery pendekuai.”

- ³² Ha'e ramo omondouka va'ekue oje'oi vy Jesus aipoe'iague rami meme ojou.
- ³³ Mburika'i ojora jave ija aipoe'i:
— Mba'e re tu pejora?
- ³⁴ Ha'e kuery ombovai:
— Senhor ma oipota — he'i.
- ³⁵ Ha'e vy mymba ogueru vy hi'áry oipyo oao, ha'e oupi Jesus hi'áry.
- ³⁶ Hi'áry oo oiny ramo tape rupi oipyo okuapy oao.
- ³⁷ Ha'e gui yvytý Oliveiras gui oguejy ovya py ovaë rai'i ma jave hemimbo'e kuery ha'e javi oguerovy'a vy Nhanderuete pe oporaei atã oje'oivy mba'emo porã ojapo rã oexa va'ekue ha'e javi re.
- ³⁸ — Ta'ima'endu'a porãa Huvixave Senhor rery rupi ou va'e re. Ta'ikuai porãa yva re, toporaeia yvatevea py! — he'i oje'oivy.*
- ³⁹ Ha'e rã amongue fariseu kuery heta va'e kuery mbyte ikuai avi va'e ma aipoe'i ixupe:
— Porombo'ea, ndeayvu na neremimbo'e kuery pe.
- ⁴⁰ Ha'e rã ha'e kuery pe ombovai:
— Xee aipoa'e pãvy: Ha'e kuery okyrirí va'e rire ita eteve voi oporaei 'rãgue — he'i.
- Jerusalém tetã Jesus oexa vy ojae'oague*
- ⁴¹ Jesus ovaë ovya vy tetã oexa vy ojae'o.
- ⁴² Ha'e vy aipoe'i:
— Kova'e ára rexaa kuaa va'e rire nemoingo porãarã ou va'e. Tei aý ha'e nunga ndoikuaa ukaai ndevy.†
- ⁴³ Mba'eta ovaë 'rã nderovaigua kuery ndejokopa aguã ára, jovalovai katy gui nemboty heravy aguã.
- ⁴⁴ Nerenda ombovaipa vy ojukapa 'rã nememby kuery. Nei peteí ita ma ndoejai 'rã amboae ita áry, ndea py aju tei ndaxerexa kuaai rire.
- Mateus 21.12,13; Marcos 11.15-17*
- ⁴⁵ Ha'e gui templo py oike vy oipe'apa mba'emo vendea kuery ha'e py ikuai va'ekue.
- ⁴⁶ Ha'e vy aipoe'i ha'e kuery pe:
— Ipara oiny “Xero ma onhembo'e atyrã oí” 'ea va'eri peã ma pejapo imonda va'e onhemiaty rami.*

Templo py nhombo'eague

- ⁴⁷ Ko'ẽ nhavõ Jesus nhombo'e oikovy templo py. Ha'e rã sacerdote yvatekueve va'e, lei re nhombo'e va'ety ha'e heta va'e ruvixa kuery ma ojukaxe okuapy,*
⁴⁸ tei ndojuka uka kuaai teri, heta va'e kuery ha'e javi ojapyxaka vy ojou porã okuapy ramo.

20

Mateus 21.23-27; Marcos 11.27-33

¹ Peteí ára templo py Jesus ombo'e oiny heta va'e kuery. Ayvu porã omombe'u jave oia py jogueru sacerdote yvatekueve va'e, lei re nhombo'e va'ety ha'e nhomongeta va'ety kuery.

- ² Ha'e vy aipoe'i okuapy ixupe:
— Emombe'u orevy mava'e po'akaa rupi pa ha'e nunga rejapo reikovy. Mava'e tu nembopo'aka?
- ³ Ha'e ramo ombovai:
— Xee voi aporandu ta pãvy. Pemombe'u ke:
- ⁴ João nhomongaraia pa yva guigua tyrã avakue guigua raka'e? — he'i.
- ⁵ Ha'e ramo ha'e kuery joupe-upa ranhe aipoe'i okuapy:
— “Yva gui”, ja'e ramo “Mba'e re tu ha'vy ndapejerovai hexe?” he'i 'rã nhandevy.

* 19:38 Salmo 118.26 † 19:42 “Ndee” he'ia py ma peteí'i pe rami ijayvu tei tetã pygua kuery ha'e javive pe.
* 19:46 Isaías 56.7, Jeremias 7.11 * 19:47 Mateus 21.14-17

6 Ha'e rā "Avakue gui", ja'e ramo ma heta va'e kuery nhandeapipa 'rā ita py, mba'eta ha'e kuery oikuua João profeta oikoa — he'i okuapy.

7 Ha'e rami vy ombovai:

— Ore ma ndoroikuuaai.

8 Ha'e rā Jesus ju ombovai:

— Xee voi peē kuery pe namombe'ui 'rā mava'e po'akaa rupi pa ha'e nunga ajapo aikovya.

Mateus 21.33-44; Marcos 12.1-11

9 Ha'e rire pova'e ayvu ju Jesus omombe'u heta va'e kuery pe, mba'emo re ombojoja vy:

— Peteī ava onhoty uva, ha'e vy omboaxa opena va'erā kuery po py. Ha'e gui ma guekoai oguata oiko are aguā katy.

10 Omono'õa ára ovaẽ ramo opena va'e kuerya py ombou peteī guembiguai, ixupe uva'a ome'ẽ okuapy aguā. Ha'e ramo ha'e kuery oinupā ha'e ojavyky rei ma rire ombojevy rive ju.

11 — Amboae guembiguai ju ombou. Ha'e ramo ha'e va'e voi oinupāmba. Ojavyky rei rire ombojevy rive ju.

12 — Ha'e gui mboapya ma ombou. Ha'e va'e re voi ojeaipa ma rire omoxē ju avi.

13 — Ha'e ramo uvaty ja aipoe'i ojeupe: "Mba'e nda'u ajapo 'rā? Amondouka 'rā xera'y ayvu ete va'e. Xapy'a rei rā ko omboetea 'rā", he'i.

14 — Ha'e rami teī opena va'e kuery ta'y oexa vy aipoe'i joupe-up: "Peva'e ma uvaty jarā ete. Jajuka na, uvaty nhandevy ju opyta aguā", he'i okuapy.

15 Ha'e vy uvaty gui oguenoẽ vy ojuka.

— Mba'e nda'u uvaty ja ojapo 'rā ha'e kuery re?

16 Ha'e ou vy omomba 'rā opena va'ekue, ha'e amboae kuery pe ju omboaxa 'rā uvaty — he'i.

Ha'e rā ha'e va'e ayvu oendu va'e kuery aipoe'i:

— Ha'e nunga ete ta'vy toiko eme.

17 Ha'e rā Jesus ha'e kuery re oma'ẽ vaipa vy aipoe'i:

— Mba'e he'ia tu ha'vy ipara: "Oo apoa kuery ita ndoiptai va'ekue opyta omboeteve pyrā, tenonde pygurarā", he'ia.*

18 Ha'e va'e ita re ho'a va'e ha'e javi opēmba 'rā. Ha'e amongue áry ita ho'a ramo iku'ipa 'rā.

Mateus 22.15-22; Marcos 12.13-17

19 Ha'e jave ae lei re nhombo'e va'ety ha'e sacerdote yvatekueve va'e ojopyxe teī, ha'e kuery re ri ty ra'e ijayvua oikuua vy. Ha'e rami teī heta va'e kuery gui okyje guive.

20 Ha'e rami vy oikuua pota okuapy hexe, amongue pe peráta ome'ẽ guive, heko porā va'e rami onhemoingo vy ayvu py omoi vai vy huvixa po py omboaxa aguā.

21 Ha'e vy ixupe oporandu vy aipoe'i:

— Porombo'ea, ore roikuua ndee ndeayvu ha'e renhombo'e porāa. Ndereikuua pota rei avave re, ha'e anhetē rupi renhombo'e Nhanderuete oipota va'e re.

22 Ha'evea rami ri nda'u César pe nhame'ẽ imposto repy, tyrā pa any?

23 Ha'e rā Jesus ma ha'e kuery omoi vaixea oikuua vy ombovai:

24 — Pexa uka ha'vy xevy peteī hatā'i va'e. Mava'e ra'angaa ha'e mava'e rery ha'vy oī?

Aipoe'i okuapy:

— César mba'e ri.

Ha'e ramo Jesus aipoe'i ha'e kuery pe:

25 — César mba'e ri rā peme'ẽ ha'vy César pe. Ha'e rā Nhanderuete pegua ma Nhanderuete pe ae 'rā peme'ẽ — he'i.*

26 Ha'e rami rā heta va'e kuery oendua py ha'e kuery ndojopy reguai ayvu py. Ombovai kuaa rā oendu vy okyririmbā guive onhemondyipa vy.

Mateus 22.23-33; Marcos 12.18-27

* 20:17 Salmo 118.22-23

* 20:25 Romanos 13.7

²⁷ Ovaẽ avi amongue saduceu kuery. Ha'e kuery ma nhanhemboete ju 'rãa ndogueroviai va'e.

²⁸ Ha'e vy oporandu okuapy ixupe:

— Porombo'ea, Moisés oeja raka'e po rami ipara va'e: “Amongue ta'y e'ŷ re omano ramo tyvy ju omenda 'rã imeve'ŷ va'e re, omano va'ekue ra'yrã va'ekue oguereko aguã”, he'iague.*

²⁹ Ha'e gui ikuai raka'e sete joegua. Tujave va'e ma omenda va'ekue ri omano ta'y e'ŷ re.

³⁰ Ha'e ramo tyvy mokoĩa va'e, ha'e gui mboapya va'e ju omenda ranhe imeve'ŷ va'e re.

³¹ Ha'e rami py sete-ve omano ta'y e'ŷ re meme.

³² Ha'e gui mae ma kunha va'e avi omano.

³³ Ha'e gui onhemboete jeyva ára nda'u mava'e ete'i 'rã oiko kunha va'e me, kunha va'e re sete-ve omenda rire? — he'i.

³⁴ Ha'e rã Jesus ombovai ha'e kuery pe:

— Ko yvy re ikuai va'e ma omenda ha'e nhomomenda 'rã.

³⁵ Ha'e rã ára pyau onhemboete aguã ára ouputy aguã oiporavo pyre ma nomendavei, neĩ nanhomomendavei ma 'rã.

³⁶ Nomanovei ma 'rã guive, mba'eta omboete ju rire anjo kuery rami ma 'rã ikuai Nhanderuete ra'y kuery ikuai vy.

³⁷ Ha'e gui omano va'ekue onhemboete ju aguã regua ma Moisés ae ombopara. Mba'eta yvyra rogue okai va'e omombe'ua py Senhor pe “Abraão, Isaque ha'e Jacó Ruete”, he'i va'ekue.*

³⁸ Ha'e nunga rupi Nhanderuete ma omanogue Ruete e'ŷ oiko, ha'e rã oikove va'e Ruete, ixupe pavẽ oikove ramo — he'i.*

³⁹ Ha'e ramo lei re nhombo'e va'ety regua aipoe'i:

— Porombo'ea, rembovai porã — he'i.

⁴⁰ Ha'e va'e rire avave rei nda'ipy'a guaxuvei ixupe oporandu aguã.

Mateus 22.41-45; Marcos 12.35-37

⁴¹ Ha'e gui ma ha'e kuery pe ju Jesus oporandu:

— Mba'exá nda'u Cristo reko re pendeayvu vy aipopeje Davi ramymino oikoa rami?

⁴² Mba'eta Davi eteve voi aipoe'i Salmo py: “Senhor aipoe'i xe-Senhor pe: ‘Eguapy ke aiporu kuaa regua re,

⁴³ ndepy guýry nderovaigua kuery amoĩ e'ŷa ja', he'i va'ekue.”*

⁴⁴ Ha'e rami vy Davi voi “Senhor” he'i ixupe. Mba'exá tu ha'vy hamymino avi ri oiko?*

Mateus 23.1-7; Marcos 12.38-40

⁴⁵ Heta va'e kuery ha'e javi oendua py Jesus aipoe'i guemimbo'e kuery pe:

⁴⁶ — Penheangu ke lei re nhombo'e va'ety kuery gui, mba'eta ha'e kuery onhemonde 'rã ao puku py, ha'e tetã mbyte rupi oipota 'rã oxaruraa porã. Onhembo'eaty py ha'e ngaru oĩa py oguapy 'rã tenda tenondeve oĩ va'e py anho.

⁴⁷ Ha'e rami avi ha'e kuery ogueraa rivepa 'rã imeve'ŷ va'e kuery ro gui oipota va'e, ha'e onhemboeko porãxe vy onhembo'e are 'rã. Ha'e nunga rupi ha'e kuery opaga raxa ete 'rã.

21

Marcos 12.41-44

¹ Jesus templo py oma'ẽ oiny vy oexa oguerekopa va'e kuery peráta ome'ẽ vy hyru py omoĩ rã.

² Oexa avi peteĩ imeve'ŷ va'e omoĩ rã mokoĩ hatã'i va'e ndovareive'i va'e.

³ Ha'e vy aipoe'i:

— Anhetẽ aipoa'e pêvy: Peva'e imeve'ŷ va'e iporiaukue'ia ramive pavẽ gui ome'ẽ retave.

* 20:28 Deuteronomio 25.5 * 20:37 Êxodo 3.6 * 20:38 1 Coríntios 6.14 * 20:43 Salmo 110.1 * 20:44 Romanos 1.3,4

⁴ Mba'eta amboae kuery ma hembyrekue gui rive ome'ẽ. Ha'e rã peva'e ma iporiaukue'ia ramive mba'emo'i ojogua aguã oguerekva'ekue ha'e javi'i omoi.

Mateus 24.1,2; Marcos 13.1,2

⁵ Amongue ijayvu templo ojou porãa rupi, mba'eta ita porã ha'e ome'ẽ mbyre py ombojeguaa rire.

⁶ Ha'e ramo Jesus ombovai:

— Aÿ pexa pa peva'e nunga? Ovaẽ 'rã oitypaa ára, neĩ peteĩ ita amboae ita áry ndopytai aguã.

Mateus 24.3-13; Marcos 13.3-13

⁷ Oporandu okuapy ixupe:

— Orembo'ea, araka'e 'rã tu ha'e nunga oiko? Mba'exa tu roikuaa 'rã ovaẽ rai'i maa?

⁸ Ombovai:

— Penheangu ke ha'vy penhembotavy uka e'ÿ aguã. Mba'eta heta 'rã ou xerery rupi "Xee ae ri", e'ÿ vy "Ovaẽ ma hora", he'i rive va'e. Tapeo eme hupive.

⁹ Penhemondyi eme "Joe opu'ã" 'ea rã pendu vy, neĩ "Huvixa kuery re opu'ã", 'ea tei. Ha'e nunga ranhe 'rãe oiko tei opa aguã e'ÿ teri — he'i.

¹⁰ Aipoe'i avi ha'e kuery pe:

— Peteĩ-tei tetã pygua kuery opu'ã 'rã amboae tetã pygua re, ha'e peteĩ-tei regua amboae regua re 'rã opu'ã.

¹¹ Yvy oryryi 'rã, oiko 'rã mba'eaxy vaikue ha'e karuai. Oiko 'rã nhomondyipaa, yva re hexa pyrã tuvixa va'e voi.

¹² Ha'e nunga oiko e'ÿ mbove pendejopya ha'e penemoingo axya 'rã. Xerery rupi pendekuai ramo pendereraa 'rã onhembo'eaty py, nhuã py ha'e huvixa kuerya py.

¹³ Ha'e nunga pendere oiko 'rã ayvu pemombe'u aguã.

¹⁴ Ha'e nunga rupi pendep'y a eta rei eme pembovai aguã re.

¹⁵ Mba'eta xee ae 'rã ame'ẽ pendeayvurã ha'e pene'arandu aguã, pendere ija'e e'ÿ va'e kuery nda'ipo'akai, neĩ nombovai kuaai aguã rami.

¹⁶ Penderu kuery voi penembo'a uka 'rã, penderegua, penetarã ha'e peneirã kuery voi, amongue pendejukaa 'rã guive.

¹⁷ Xerery káuxa pavã nda'ija'evei 'rã pendere.

¹⁸ Ha'e rami tei neĩ peteĩ pende'a nokanhyi 'rã peneakã guigua.

¹⁹ Pei atãa py perekro riae 'rã penenhe'ẽ.

Mateus 24.15-22; Marcos 13.14-20

²⁰ — Ha'e gui xondaro kuery Jerusalém tetã ojokopa rã pexa vy peikuaa 'rã omboavaipa ta maa.

²¹ Ha'e ramo Judéia pygua kuery tonhamba yvyty re. Tetã py ikuai va'e voi toopa, mba'ety rupi ikuai va'e voi toike eme tetã py.

²² Ha'e va'e ára ma nhombopagapaa ára, ipara oinya ha'e javi ojeupity aguã.

²³ — Ha'e va'e ára ma nda'evei 'rã imemby ryru'i ha'e imemby kambu va'e pe. Mba'eta yvy re oiko 'rã teko axy kova'e kuery mbopagaarã.

²⁴ Ojukaa 'rã kyxe py, ha'e escravo-rã ogueraapaa 'rã yvy jave rupi. Judeu e'ÿ va'e kuery po'akaa ára opa e'ÿa ja ha'e kuery opyrõmba 'rã Jerusalém tetã re.

Mateus 24.29-31; Marcos 13.24-27

²⁵ — Kuaray, jaxy ha'e jaxy-tata re ojekuaa 'rã hexa pyrã. Ye'ẽ revovo ha'e yai opu'ã-pu'ã va'e gui yvy regua ikuai va'e nda'evei ha'e ndoikuai rei 'rã okuapy.

²⁶ Yvy re mba'emo vai oiko ta va'e gui avakue onhemondyi vy ho'apa 'rã. Mba'eta yva re ipo'akakueve ikuai va'e voi oitypaa 'rã.

²⁷ Ha'e gui ma oexaa 'rã Ava ra'y ojeapo va'ekue arai rupi ou rã opo'aka ha'e guezakãmba reve.*

²⁸ Ha'e nunga oiko aguã ijypy ramo pevy'a, pemopu'ã peneakã, mba'eta ovaẽ ta ma pendereraa jepea.

Mateus 24.32-44; Marcos 13.28-37

²⁹ Peteĩ ayvu omombe'u avi mba'emo re ombojoja vy. Ha'e vy aipoe'i ha'e kuery pe:

* 21:27 Daniel 7.13-14

- Peikuaa pota figo'y ha'e vyvra ikuai va'e re.
- ³⁰ Mba'eta hokypa rā pexa vy peikuaa 'rā ára pyau ovaē rai'i maa.
- ³¹ Ha'e rami ae xeayvuague oiko rā pexa vy peikuaa 'rā Nhanderuete po'akaa ojekuaa aguā ovaē rai'i maa.
- ³² Anhetē aipoa'e pēvy: Aýgua kuery opa e'ŷ re ha'e nunga ha'e javi oiko 'rā.
- ³³ Yva ha'e vyv opa 'rā. Ha'e rā xeayvuague ma ndoaxa rivei 'rā.
- ³⁴ — Ha'e nunga rupi peiko kuaa pota pendepy'a pemonyē e'ŷ aguā opa marā rei pendekuaia, peka'ua, neĩ mba'emo ko vyv re ikuai va'e re pepenaa guive, pendere ha'e va'e ára ou xapy'a e'ŷ aguā nhuā rami.
- ³⁵ Mba'eta ko vyv re ikuai va'e ha'e javi re ou 'rāe.
- ³⁶ Peikuaa pota ha'e pejerure riae mba'emo oiko va'erā gui peo jepe aguā, ha'e Ava ra'y ojeapo va'ekue renonde pene'aí aguā.*

Jesus ijayvu rā heta va'e kuery ojapyxaka okuapyague

- ³⁷ Ko'ẽ nhavō Jesus nhombo'e oikovy templo py. Ha'e gui pyávy ma oo 'rā Oliveiras vyty re oke aguā.
- ³⁸ Ha'e rā heta va'e kuery ha'e javi ma aje'ive reve 'rā jogueraa templo py ijayvu rā ojapyxaka aguā.

22

Mateus 26.1-5; Marcos 14.1,2

- ¹ Ovaē rai ma ngaru mbojape imbovua reveguia e'ŷ "Páscoa" 'epy va'e ára.
- ² Sacerdote yvatekueve va'e ha'e lei re nhombo'e va'ety kuery oikuua pota okuapy marā rami vy pa Jesus ojuka aguā, mba'eta heta va'e kuery gui okyje.*

Mateus 26.14-16; Marcos 14.10,11

- ³ Ha'e gui ma Satanás ipo'aka peteĩ hemimbo'e kuery doze ikuai va'e regua Judas Iscariotes hery va'e py'a re.
- ⁴ Ha'e ramo oo jogueroayvu aguā sacerdote yvatekueve va'e ha'e jopya ruvixa kuery reve, ha'e kuery pe Jesus ojopy uka aguā re.
- ⁵ Ha'e ramo ha'e kuery oguerovy'a vy ixupe ijayvu peráta ome'ẽ aguā re.
- ⁶ Judas ojou porā vy oikuua pota ha'e kuery pe ojopy uka aguā pavē opu'ã e'ŷ re.

Mateus 26.17-19; Marcos 14.12-16

- ⁷ Ovaē ma ngaru mbojape imbovua reveguia e'ŷ Páscoa ára okaru aguā.
- ⁸ Ha'e ramo Jesus omondouka Pedro ha'e João. Ha'e vy aipoe'i:
- Tapeo, perekō katu Páscoa ára jakaru aguā.
 - ⁹ Ha'e rā oporandu ixupe:
 - Mamo tu reipota roguereko katu?
 - ¹⁰ Jesus ombovai:
 - Tetā py pevaē vy peovaexi'rā peteĩ ava yryru reeve. Tapeo hupive opy oikea peve.
- ¹¹ Hoo va'e pe ke aipopeje: "Orembo'ea oporandu uka kuri ndevy: Mamo pa oĩ opy ja'o Páscoa ára xeremimbo'e kuery reve rokaru aguā?" he'i uka.
- ¹² Ha'e ramo oexa uka 'rā pēvy peteĩ opy ja'o tuvixa va'e opa mba'e oĩa. Ha'e py ae 'rā perekō katu — he'i.
- ¹³ Ha'e rami rā jogueraa vy ojoupa Jesus aipoe'iague rami. Ha'e vy oguereko katu Páscoa ára okaru okuapy aguā.

Guemimbo'e kuery reve Páscoa ára opa vygua okaru okuapyague

- ¹⁴ Ha'e gui hora ovaē ramo mesa py Jesus oĩ apóstolo kuery reve.*
- ¹⁵ Ha'e vy aipoe'i ha'e kuery pe:
- Xee ma kova'e Páscoa ára akaruxe ete pendereve, aiko axy e'ŷ mbove'i.
- ¹⁶ Mba'eta aipoa'e pēvy: Nda'uvei ma 'rā kova'e nunga Nhanderuete po'akaa py ojeupity e'ŷa ja — he'i.

* 21:36 Lucas 12.35-48 * 22:2 João 11.47-57 * 22:14 Mateus 26.20,27-29

¹⁷ Ha'e gui ojopy karo. Oguerovy'a vy aipoe'i:
— Pejopy, pemboja'o jomeme.

¹⁸ Xee aipoa'e pêvy: Aÿ gui ma nday'uvei ma 'rã uva rykue, Nhanderuete po'akaa ovaẽ e'ÿa ja.

Mateus 26.26-29; Marcos 14.17-26

¹⁹ Peteĩ mbojape ju ojopy. Ha'e vy oguerovy'a ma vy oipe'ã-pe'ã'i vy ome'ẽ. Aipoe'i:
— Kova'e ma xerete peẽ kuery re vy ame'ẽ va'erã regua. Guĩ nunga pejapo 'rã xere penema'endu'aa rupi — he'i.

²⁰ Ha'ekue rami ju okarupa ma rire karo ojopy vy aipoe'i:
— Kova'e karo ma xereve guarã ipyau va'e ajapo va'e regua, peẽ kuery re vy xeruguy amoẽ uka ta va'e rupi.

²¹ Ha'e rami teĩ xejopy uka nhemiarã oĩ avi xereve mesa py.

²² Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiarã pe ma nda'evei ete 'rã — he'i.

²³ Ha'e ramo joupe-upo oporandu okuapy mava'e ete'i pa ha'e kuery regua ojopy uka 'rãa re.

Yvatekueve va'e yvyïve va'e rami ikuai aguã re ijayvuague

²⁴ Hemimbo'e kuery joo rami e'ÿ-e'ÿ ijayvu okuapy mava'e ete'i pa joegui yvateve va'ea oikuaaxe vy.

²⁵ Ha'e rami rã Jesus aipoe'i ha'e kuery pe:

— Yvy regua huvixa kuery ipo'aka 'rã ha'e kuery re, ha'e ipo'akakue pe "Ojapo porã va'e", 'ea 'rã.

²⁶ Ha'e rã pende kuery ma ha'e rami e'ÿ 'rã. Ha'e rami 'rãgue py peẽ kuery va'e regua joegui yvatekueve va'e ma yvyïgueve rami 'rã ikuai. Joguerekaoa ma nhoembiguai rami 'rã ikuai.*

²⁷ Mba'eta mava'e nda'u joegui yvateve: mesa py oĩ va'e tyrã pa joupe ojara va'e? Mesa py oĩ va'e'ÿ teve? Ha'e rami teĩ xee ma peẽ kuery mbyte aiko joupe ojara va'e rami.

²⁸ — Peẽ kuery ma xereve pendekuai riae va'ekue xerekaoa a'ãa ha'e javi rupi.

²⁹ Ha'e rami rire xee rombopo'aka Xeru xembopo'akaague rami avi,

³⁰ xepo'akaa py peẽ kuery avi pekaru ha'e pey'u aguã xe-mesa py, ha'e tenda pepenaaty py peguapy vy Israel kuery doze regua ikuai va'e re pepena aguã.

Mateus 26.31-35; Marcos 14.27-31; João 13.36-38

³¹ — Simão, Simão, ma'ẽ, Satanás ojerure penderereko aguã trigo ombogua va'e rami.

³² Ha'e rã xee ma ajerure ndere, rejeroviaa gui rejepe'a e'ÿ aguã. Ha'e rire rejeko rerova ju ma vy emombaraete nde-irmão kuery — he'i.

³³ Simão Pedro ombovai:

— Senhor, xevy pe ha'eve ndereve nhuã py aa, ha'e amano aguã voi.

³⁴ Ha'e rã Jesus aipoe'ive ju ixupe:

— Pedro, xee aipoa'e ndevy: Kuri uru ava ojapukai e'ÿ mbove mboapykue ren-hemombe'u 'rã xekuaa e'ÿ va'e rami.

Kyxre re ijayvuague

³⁵ Ha'e gui Jesus oporandu ha'e kuery pe:

— Xee romondouka jave peráta ryru reve'ÿ, voko, ha'e pendepy regua reve'ÿ jave pendevy oata teve raka'e mba'emo?

— Any, mba'eve rei — he'i okuapy.

³⁶ Ha'e ramo aipoe'i:

— Ha'e gui aÿ gui ma peráta ryru perekoo va'e peraa, voko guive. Ha'e kyxe ndaperekoi va'e ma pendecapa pevende 'rã pejogua aguã.

³⁷ Mba'eta xerekorã ipara oiny va'e ojeupity 'rãe: "Jojuka rive va'ety rami 'rã oguerekaoa", he'iague rami. Xerekorã ipara oiny va'e ojeupity ta ma — he'i.*

³⁸ Ha'e rami rã ha'e kuery aipoe'i:

* 22:26 Mateus 20.20-28; Marcos 10.35-45; 1 Pedro 5.3 * 22:37 Isaías 53.12

— Senhor, apy ma mokoī kyxe roguereko.

Ombovai:

— Ha'eve ma!

Mateus 26.36-41; Marcos 14.32-38

³⁹ Oliveiraas yvyty katy ju oo oikoaty rami vy. Hupive hemimbo'e kuery oje'oi avi.

⁴⁰ Ooxeague py Jesus ovaē ma vy aipoe'i ha'e kuery pe:

— Penhembo'e ke penderekō a'āa py pejeity uka e'ŷ aguā — he'i.

⁴¹ Ha'e rā ha'e ma mombyry'i ojepe'a ovy, ha'e guenapy'ā re oī vy onhembo'e.

⁴² Ha'e vy aipoe'i:

— Xeru, reipota ramo xegui oaxa 'rāgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

⁴³ [Ha'e jave ou peteī anjo yva pygua omombarae vy.]

⁴⁴ Ha'e rā ojexavai vy hatāve tema onhembo'e ramo hy'ai voi huguy rami otyky yvy py.]

⁴⁵ Ha'e gui onhembo'ea gui opu'ā ju vy guemimbo'e kuery ikuia py oo. Ha'e vy oexa rā okepa okuapy ra'e iporiau vy.

⁴⁶ Ha'e ramo aipoe'i ha'e kuery pe:

— Mba'e re tu pekepa ri? Pepu'ā katu, penhembo'e penderekō a'āa py pejeity uka e'ŷ aguā.

Mateus 26.47-56; Marcos 14.43-50; João 18.1-11

⁴⁷ Ha'e gui ijayvu teri ho'amy reve ovaē ma jogueruvy heta va'e. Ha'e kuery renonde ou oiny peteī hembiguai kuery doze ikuai va'e regua Judas hery va'e. Ha'e vy Jesus re onhemboja oova rayvu aguā.

⁴⁸ Ha'e rā Jesus aipoe'i ixupe:

— Judas, reayvu vy 'rāe ty'y rejopy uka Ava ra'y ojeapo va'ekue?

⁴⁹ Ha'e ramo hexeveguia kuery ma oiko ta va'e oexa vy aipoe'i:

— Senhor, ha'eve pa orekyxe roiporu aguā? — he'i.

⁵⁰ Ha'e vy ha'e kuery va'e regua peteī omboguai sacerdote yvateve va'e rembiguai nambi oiporu kuaa regua rupi, ha'e vy omboi.

⁵¹ Ha'e ramo Jesus aipoe'i:

— Tove, ha'eve ma! — he'i vyve inambi re opoko vy omonguera.

⁵² Ha'e gui Jesus ijayvu sacerdote yvatekueve va'e pe, templo rarōa ruvixa ha'e nhomongeta va'ety kuery ijopyarā ou va'e kuery pe guive. Ha'e vy aipoe'i:

— Peē kuery ma kyxe ha'e yvyra reve ri ty'y peju jojuka rive va'ety rami xejopy aguā?

⁵³ Mba'eta ko'ē nhavō templo py peē kuery pendekuaia rupi aiko teī ndaxejopyi va'ekue. Ha'e rami avi aŷ ma peē kuery hora ovaē, pytū ipo'aka aguā.

Mateus 26.69-75; Marcos 14.66-72; João 18.15-18,25-27

⁵⁴ Ha'e kuery ojopy vy sacerdote yvateve va'e ro py ogueraa. Hakykue Pedro oo avi mombyry'i rupi.

⁵⁵ Oka mbyte py ojape'e okuapy aguā ojatapy ramo Pedro voi oguapy ha'e kuery reve.

⁵⁶ Ha'e gui peteī tembiguai kunhataī ma Pedro tata yvýry oguapy oiny rā oexa vy oma'ē ngatu hexe. Ha'e vy aipoe'i:

— Peva'e voi hexeve oiko va'ety.

⁵⁷ Ha'e ramo Pedro onhemboapu vy aipoe'i:

— Kunha, xee tu aexa va'e'ŷ rima — he'i.

⁵⁸ Ha'e va'e rire amboae ju oexa vy aipoe'i:

— Ndee voi ta'vy ha'e kuery regua teve.

Ha'e ramo Pedro ombovai:

— Ava, xee tu ha'e kuery regua e'ŷ rima — he'i.

⁵⁹ Aje'i ma rire amboae ju aipoe'i:

— Peva'e tu anhetē rima ha'e kuery regua, mba'eta ha'e voi Galiléia pygua.

⁶⁰ Ha'e ramo Pedro aipoe'ive ju:

— Ava, xee tu ndaikuaai rima ndeayvua — he'i. Ha'e ijayvu teri reve uru ava ojapukai nhendu.

⁶¹ Ha'e ramove Senhor ojere vy oma'ẽ Pedro re. Ha'e ramo mae ma Pedro ima'endu'a ma Senhor aipoe'iague re: "Kuri uru ava ojapukai e'ŷ mbove mboapykue 'rã renhemombe'u xekuaa e'ŷ va'e rami", he'iague re.

⁶² Ha'e rami vy Pedro ojepe'a vy ojae'o vaipa.

Jesus rarõa kuery ojavyky rei okuapyague

⁶³ Jesus rerekoa kuery ojavyky rei, ounaga guive.*
⁶⁴ Hexa omo'ã vy aipoe'i okuapy:

— Emombe'u ke mava'e ete pa nembota ra'e — he'i.

⁶⁵ Ha'e vy opa marã hexe ijayvuve tema ayvu vai rupi.

Mateus 26.57-68; Marcos 14.53-65

⁶⁶ Ko'ẽ aje'ive'i reve nhomongeta va'ety kuery, sacerdote yvatekueve va'e ha'e lei re nhombo'e va'ety kuery onhemboatypa okuapy.* Ha'e vy ogueru ruka omboayvu aguã. Ha'e vy aipoe'i ixupe:

⁶⁷ — Ndee ma Cristo ri vy emombe'u orevy.

Jesus ombovai:

— Xee anhemombe'u ri ramo peẽ kuery ndaperoviai 'rã.

⁶⁸ Ha'e gui xee aporandu ramo peẽ kuery voi naxembovai 'rã.

⁶⁹ Aŷ gui ma voi Ava ra'y ojeapo va'ekue oguapy 'rã Nhanderuete Ipo'akapa va'e oiporu kuaa regua re — he'i.

⁷⁰ Ha'e ramo ha'e javive aipoe'i:

— Ndee ae ma nhi'ã Nhanderuete Ra'y?

Ombovai:

— Peẽ ae ri tu aipopeje ha'e aikoa rami — he'i.

⁷¹ Ha'e ramo ha'e kuery joupe-upe aipoe'i:

— Mba'erã tu jaipotave hekokue mombe'uarã? Mba'eta nhande kuery ae nhaendu ijuru gui.

23

Mateus 27.1,2,11-14; Marcos 15.1-5; João 18.28-38

¹ Ha'e gui ijaty okuapy va'ekue opu'ãmba vy ogueraa Jesus huvixa Pilatos-a py.

² Ha'e py ju hexe ijayvu vy aipoe'i okuapy:

— Kova'e ava ma rojou heta va'e kuery ombo'e vaikue rei rã, mba'eta aipoe'i huvixa César pegua imposto repy rome'ẽ ve'ŷ aguã. Aipoe'i avi Cristo huvixave oikoa rami — he'i okuapy.

³ Ha'e rami rã Pilatos oporandu ixupe:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're — he'i.

⁴ Pilatos aipoe'i sacerdote yvatekueve va'e ha'e heta va'e kuery ijaty va'e pe:

— Xee ma mba'eve py ndajoui kova'e ava otekoavyague.

⁵ Ha'e ramo ha'e kuery aipoe'ive tema:

— Ha'e rami avi ojapo heta va'e kuery opa marã rei ikuai aguã rami, Judéia ha'e javi rupi ombo'e vy, Galiléia py omboypyga gui apy peve — he'i okuapy.

⁶ Ha'e rami Pilatos oendu vy oporandu Galiléia pygua paa re.

⁷ Ha'e vy huvixa Herodes openaa pygua oikoa oikuaa vy ha'e va'e pe ju omboaxa, mba'eta ha'e jave py Jerusalém py oĩ avi ramo.*

Herodes renonde ju Jesus ojexa ukaague

⁸ Herodes ma Jesus oexa vy ov'y'a vaipa, mba'eta yma ma oexaxe, hekokue oendu rire. Oexaxe avi hexa pyrã ojapo rã.

* 22:63 Mateus 26.67,68; Marcos 14.65

* 22:66 João 18.19-24

* 23:7 Huvixa Herodes ma Galiléia yvy re opena va'e (Lucas 9.7-9). Ha'e nunga rupi ixupe ju Pilatos omboaxa Jesus.

⁹ Ha'e rami vy opa marā re oporandu teī Jesus mba'eve py nombovai.

¹⁰ Sacerdote yvatekueve va'e ha'e lei re nhombo'e va'ety kuery ha'e py ikuai avi va'e ma hekokue ramigua omombe'u okuapy ijayvu rei vy.

¹¹ Ha'e rami rā Herodes oguereko vaikue rei oxondaro kuery reve. Ha'e vy peteī ao iporāve va'e py omonhemonde vy Pilatos-a katy ju omondouka.

¹² Ha'e va'e ára guive Herodes ha'e Pilatos joayvu, joe nda'ija'ei ete va'ekue ri.

Mateus 27.15-26; Marcos 15.6-15; João 18.39-19.16

¹³ Ha'e gui ma Pilatos omboatypa sacerdote yvatekueve va'e ha'e huvixa kuery heta va'e kuery reve.

¹⁴ Ha'e vy aipoe'i:

— Kova'e ava ma peē kuery Peru kuri penetarā kuery opa marā rei ombo'e rami peikuua vy. Ha'e gui ma pendua py xee amboayvu teī mba'eve rei ndaikuai pen-deayvuague ramigua.

¹⁵ Neī huvixa Herodes voi ndoikuuai kuri. Ha'e rami vy ae xea py ju ombou. Ha'e nunga rupi xee aikuua rā mba'eve ndojapo vai omano aguā.

¹⁶ Ha'e rami vy ainupā uka ta, ha'e gui ma apoi uka ju 'rā — he'i.

¹⁷ [Mba'eta ngaru oikoa ára nhavō opoi jepi 'rā peteī nhuā py oī va'e.]

¹⁸ Ha'e rami rā heta va'e kuery ha'e javi ojapukai vy

— Eraa upe va'e, ha'e vy epoi Barrabás orevy — he'i okuapy.

¹⁹ Barrabás ma nhuā py oī, tetā rupi nhomopu'āmba rei ha'e jojukaague re.*

²⁰ Ha'e gui ma Pilatos ma teīgue ju aipoe'i Jesus opoixea rami.

²¹ Ha'e rami teī ha'e kuery ma hatāve tema ojapukai okuapy:

— Emoī kuruxu re, emoī kuruxu re! — he'i okuapy.

²² Ha'e ramo mboapykuea ma Pilatos oporandu ha'e kuery pe:

— Mba'e nunga py tu ojapo vai raka'e? Xee ma hexe mba'eve ndaikuai ajuka uka aguā. Ha'e nunga rupi ainupā ukapa rire apoi ju 'rā — he'i.

²³ Ha'e rami rā katuve ma hatāve tema ojapukai okuapy kuruxu re omoī aguā re. Ha'e kuery ojapukaia ipo'aka.

²⁴ Ha'e ramo Pilatos ojapo nho ha'e kuery ojerurea.

²⁵ Ha'e rami vy opoi nhomopu'āmba rei va'ety jojukaague py nhuā py oī va'e. Ha'e rā Jesus ma omboaxa ha'e kuery oipotaa rami oguereko aguā.

Mateus 27.32; Marcos 15.21

²⁶ Ha'e gui ma Jesus reraa kuery ovaexī peteī ava Cirene pygua Simāo hery va'e, mba'ety gui ou va'ekue. Ha'e vy ha'e va'e axi'y áry ju omoī kuruxu, Jesus rakykue ogueraa aguā.

Jesus ojuka aguā katy ogueraa ague

²⁷ Hakykue heta oje'oi, amongue kunhague voi ipy'a vai vy opexo re oipete-pete oje'oivy.

²⁸ Ha'e rami rā Jesus ojere vy aipoe'i ha'e kuery pe:

— Jerusalém memby kuery, pejae'oeme xere, ha'e rā pendejee ha'e penememby kuery re 'rā pejae'o.

²⁹ Mba'eta ovaē 'rā aipopeje aguā ára: “Ovy'a ete 'rā imemby e'ŷ va'e, noikuavāi, neī nomokambui va'e”, peje aguā.

³⁰ Ha'e va'e ára aipopeje 'rā yvyty pe: “Pe'a ke ore'áry”, ha'e yvy'ā'i pe “Oreao'i ke” peje 'rā.*

³¹ Mba'eta yvyra pyau re ha'e rami ojapoa rire, mba'e tu ojapoa 'rā ipirukue re? — he'i.†

³² Mokoī avi ogueraa joapo vai va'ety hexeve ojuka aguā katy.

Mateus 27.33-44; Marcos 15.22-32; João 19.17-27

* 23:19 Atos 3.13,14 * 23:30 Oséias 10.8, Lucas 21.20-24; Apocalipse 6.15-17 † 23:31 “Yvyra pyau oapya aguā rami e'ŷ opyta va'e” he'ia ma heko porā va'e re ijayvu vy, ha'e rā “Ipirukue” he'ia ma opaga aguā rami ikuai va'e re ijayvu vy (Ezequiel 20.47, 21.3).

³³ Ha'e gui ma peteī henda py ovaē Calvário 'epy va'e py. Ha'e py omoī kuruxu re, joapo vai va'ety kuery guive: peteī ijaxu e'ŷa re, ha'e rā amboae ma ijaxua re.

³⁴ Ha'e ramo Jesus aipoe'i:

— Xeru, eperdoa ke, mba'eta ha'e kuery ndoikuuai mba'e pa ojapoa — he'i.

Ha'e gui ma ijaomboja'o-ja'o xortea oexa vy.

³⁵ Heta va'e kuery ha'e py ikuai va'e oexa okuapy oiko va'e. Huvixa kuery voi ojojai rei vy aipoe'i:

— Amboae kuery ogueraa jepe rire ha'e ae ju tojereraa jepe, anhetē ri Cristo Nhanderuete rembiporavo oiko vy — he'i okuapy.

³⁶ Xondaro kuery voi ha'e rami ojojai rei reve onhemboja vy vinagre ogueru oy'u aguā. Ha'e vy aipoe'i:

³⁷ — Judeu kuery pegua huvixave ri reiko vy ejereraa jepe ha'vy ndee ae — he'i.

³⁸ Inhakā áry omoña avi ipara [grego, romano ha'e hebraico ayvu py]: “*Kova'e ma judeu kuery pegua huvixave*” he'ia.

Mokoī joapo vai va'ety ijayvuague

³⁹ Peteī joapo vai va'ety kuruxu re oī va'e ojojai rei vy aipoe'i ixupe:

— Ndee Cristo e'ŷ ri ty'y? Ejereraa jepe na ndee ae, ore avi.

⁴⁰ Ha'e rā amboae ma oirū ombovai vy ijayvu ete ixupe. Ha'e vy aipoe'i:

— Nhanderuete renonde teī ndee neremoī va'e ty'y rejererokyje aguā? Mba'eta peva'e rami nhanembopagaa.

⁴¹ Ha'e gui nhande ma ha'evea rami jajexavai, jajapoague py japaga aguā. Ha'e rā peva'e ma mba'eve ndojapo vai — he'i.

⁴² Ha'e vy aipoe'ive ju:

— Jesus, nema'endu'a ke xere ndepo'akaa rupi reju jevy ma vy.

⁴³ Jesus ombovai:

— Anhetē aipoa'e ndevy: Kova'e árave reī 'rā xereve 'amba marā e'ŷ py — he'i.

Mateus 27.45-56; Marcos 15.33-41; João 19.28-30

⁴⁴ Kuaray mbyte rai'i jave kuaray naexakāvei. Yvy jave re pytūmba kuaray ojero'a puku peve.

⁴⁵ Ha'e gui henda iky'a e'ŷ va'e ropy ajukue okē regua oī va'e oxoro mbyte rupi.

⁴⁶ Ha'e gui ma Jesus ojapukai atā:

— Xeru, ndepo py amboaxa xenhe'ē — he'i. Po rami ijayvu vyve omano.*

⁴⁷ Ha'e nunga xondaro ruvixa oexa vy omboete Nhanderuete. Ha'e vy aipoe'i:

— Anhetē ae ra'e kova'e ava heko porā va'ekue — he'i.

⁴⁸ Heta va'e kuery ha'e py mba'emo oiko va'e oexa aguā ijatypa va'ekue ojepē'apa ju, ipy'a vai vy opexo re oipete-pete reve.

⁴⁹ Ha'e rā Jesus rexaaty kuery ha'e kunhague Galiléia guive hupive oje'oi va'ekue ma mombyry'i optytapa okuapy oma'ē aguā.

Mateus 27.57-61; Marcos 15.42-47; João 19.38-42

⁵⁰ Peteī ava oiko avi José hery va'e, nhomongeta va'ety kuery regua heko porā va'e.

⁵¹ Ha'e va'e ma ndojou porāi oirū kuery ojapoague. Ha'e ma judeu kuery rekao Arimatéia pygua, Nhanderuete po'akaa oarō oikovy va'e.

⁵² Ha'e va'e ma Pilatos-a py oo vy ojerure Jesus retekue re.

⁵³ Ha'e rami vy yvyra gui omboguejy vy onhovā ajukue xiñ porā va'e py, ha'e peteī itaova re ojo'o pyre py onhono porā, avave rei nonhono porāai teria py.

⁵⁴ Ha'e va'e ára ma mba'emo oguereco katupaa ára, ha'e sábado ovaē rai'i ma.

⁵⁵ Galiléia gui kunhague Jesus rupive ou va'ekue oje'oi avi oexa aguā itakua hetekue onhono porāague.

⁵⁶ Ha'e vy ojevy ju heakuā porā va'e oguereco katu aguā imoeakuāarā.

Ha'e gui sábado ára ma optytu'u ranhe okuapy ojapo uka pyre rami vy.

* 23:46 Salmo 31.5

24

Mateus 28.1-8; Marcos 16.1-8; João 20.1-13

¹ Semana ijypya ára aje'ive reve kunhague ma hupa katy ju oje'oi, heakuā porā va'e oguereko katu va'ekue ogueraa vy.

² Ha'e kuery oexa rā ita ombojerea ma ra'e itakua rokē gui.

³ Ha'e kuery oike teī Senhor Jesus retekue ma ndojoui.

⁴ Ha'e gui ma ha'e kuery ndoikuuai rei okuapy jave mokoī avakue ojexa uka ija hexakāmba va'e.

⁵ Ha'e ramo kunhague okyje vy yvy re anho oma'ẽ joguerokuapy. Ha'e ramo ha'e kuery pe avakue aipoe'i:

— Mba'e re tu peka oikove va'e omanogue rupa rupi?

⁶ Ha'e va'e ma apy noīvei ma, onhemboete ju ma. Penema'endu'a ke Galiléia py teri oiko vy ijayvuague re:

⁷ “Ava ra'y ojeapo va'ekue ma omboaxaa 'rā heko vai va'e kuery po py. Kuruxu re omoī rire mboapy araa py onhemboete ju 'rā”, he'iague re.

⁸ Ha'e ramo mae kunhague ima'endu'a ijayvuague re.

⁹ Ha'e rami vy hupa gui ojevy vy omombe'upa hemimbo'e kuery onze-ve va'e ha'e hexeveguia kuery ha'e javi pe.

¹⁰ Apóstolo kuery pe omombe'u va'e ma Maria Madalena, Joana ha'e Maria Tiago xy va'e. Ha'e kuery reve oo va'ekue voi omombe'u.

¹¹ Ha'e rami teī apóstolo kuery pe rā ha'e va'e ayvu omombe'u rive merami. Ha'e vy ndogueroviai.

¹² Ha'e rā Pedro ma opu'ã vy onha ovy hupa katy. Ha'e gui ojeyvy reve oma'ẽ vy mba'eve ndoexai, ajukue inhovāague e'ỹ vy. Ha'e vy ngoo katy ju oo, mba'emo oiko va'ekue gui onhemondyi reve.

Marcos 16.12,13

¹³ Ha'e va'e árave ha'e kuery va'e regua mokoī jogueraa peteī tekao Emaús 'epy va'e katy, Jerusalém tetā gui dez quilômetro rivyvia katy.

¹⁴ Ha'e va'e kuery ma mba'emo oiko va'ekue ha'e javi re ijayvu jogueravy.

¹⁵ Ijayvu tema jogueravy jave Jesus oupity vy oo avi ha'e kuery reve.

¹⁶ Ha'e rami teī ha'e kuery ndoexa kuaai ranhe, hexa mo'āa va'e rami.

¹⁷ Ha'e ramo Jesus oporandu:

— Mba'e nunga re tu pendeayvu peovy peguataa rupi?

Ha'e ramo ha'e kuery opyta iporiau reve.

¹⁸ Ha'e kuery regua peteī ombovai, Cleopas hery va'e. Ha'e vy aipoe'i:

— Jerusalém tetā py reiko avi va'eri ndereikuuai teve kuee rupi mba'emo oiko va'ekue?

Ndee anho rima ndereikuuai teri ra'e — he'i.

¹⁹ Ha'e ramo oporandu:

— Mba'e nunga tu?

Ombovai:

— Jesus Nazaré pygua va'e re oiko va'ekue. Ha'e va'e ma Nhanderuete renonde profeta ipo'akapa va'e oiko va'ekue ayvu py ha'e mba'emo ojapoa py, heta va'e kuery ha'e javi oexaa rupi guive.

²⁰ Sacerdote yvatekueve va'e ha'e nhanderuvixa kuery omboaxa imbopagaarā po py, kuruxu re ojuka uka aguā.

²¹ Ore kuery ma roexa'ã teī Israel kuery reraa jepearā oikoa re. Ha'e rami avi kova'e ára reve vy mboapy ára ma ojapo ha'e nunga oikoague.

²² Anhetē avi amongue ore kuery revegua kunhague ange oremondyipave ju, mba'eta ko'ẽ e'ỹ re onhono porāague py oje'oi

²³ teī ndojouwei Jesus retekue. Ha'e vy ojevy vy aipoe'i anjo oexaague rami oikove jevy maa omombe'u va'e.

²⁴ Oreirū kuery regua mboae ma onhono porāague py oo avi oikuaaxe vy kunhague omombe'ua anhetē paa. Ha'e rami teī ndoexai ae — he'i.

- ²⁵ Ha'e rami rā Jesus aipoe'i ha'e kuery pe:
 — Napene'arandui ha'e peneakā ratā va'e perovia aguā profeta kuery omombe'u va'ekue.
- ²⁶ Cristo nda'u ndoiko vai 'rā ri guexakāa py oike aguā? — he'i.
- ²⁷ Ha'e rami vy Moisés ayvukue gui omboypy vy profeta kuery ha'e javi ayvukue re ijayvu, guekorā re ipara oī va'e omombe'u porāve vy.
- ²⁸ Ha'e gui ma ha'e kuery tekao ovaēxeague py ovaē ramo Jesus oove aguā re ijayvu.
- ²⁹ Ha'e rā ha'e kuery ma oguerovaëxe vy aipoe'i:
 — Evaē na orea py, mba'eta ka'aru ma, pytū ma — he'i. Ha'e ramo ha'e kuery reve ovaē opyta aguā.
- ³⁰ Ha'e gui mesa py ovaēmba ma ramo Jesus ma mbojape ojopy vy oguerovy'a. Ha'e vy oipe'ā vy ome'ē ha'e kuery pe.
- ³¹ Ha'e ramove ha'e kuery rexo ojepe'a rā oexa kuaa ju. Ha'e rā okanhy xapy'a ha'e kuery gui.
- ³² Ha'e rami rā joupe aipoe'i:
 — Anhetē ae rāke tape rupi jaguataa rupi nhandepy'a re nhaendu kuri javy'aa nhandevy kuaxia para omombe'u porāve rā — he'i.
- ³³ Ha'e vyve opu'ā vy Jerusalém katy ju ojevy jogueravy onze hemimbo'e kuery ijatypa okuapya py amboae kuery reve.
- ³⁴ Ha'e ramo ha'e va'e kuery ranhe aipoe'i:
 — Senhor onhemboete ju vy ojexa uka ma kuri Simão pe — he'i okuapy.
- ³⁵ Ha'e gui mokoïve ju omombe'u tape rupi oiko va'ekue, ha'e mbojape oipe'ā rā oexa kuaa ague.
- João 20.19,20*
- ³⁶ Ha'e nungakue re ha'e kuery ijayvu teri reve Jesus ae ojekuaa ho'amy ha'e kuery mbyte.* Ha'e vy aipoe'i:
 — Toī peē kuery re mby'a porā.
³⁷ Ha'e kuery onhemondyipa vy “Ague po ojexa uka” he'i.
- ³⁸ Ha'e ramo aipoe'ive ju:
 — Mba'e re tu penhemondyipa, ha'e pendepy'a re oī ri ndaperoviai aguā?
- ³⁹ Pema'ē ha'vy xepo ha'e xepy re, xee ae aikoa peikuua aguā. Pepoko na xere perovia aguā, mba'eta ãgue ma ndao'oi, neī na'ikāguei xee rami e'ŷ — he'i.
- ⁴⁰ Po rami ijayvu vy oexa uka opo ha'e opy.
⁴¹ Ha'e kuery ovy'a ha'e onhemondyi vy ndogueroviai teri rā Jesus aipoe'i:
 — Mba'eve ndaperekoi pa ha'u va'erā?
- ⁴² Ha'e ramo ixupe ome'ē peteī pira mbixy pēgue'i [ha'e ei hetāgue'i reve].
- ⁴³ Ha'e ramo ha'e kuery oexaa py ho'u.

Kuaxia para Jesus omombe'u porāveague

- ⁴⁴ Ha'e gui ma Jesus aipoe'i ha'e kuery pe:
 — Pendereve aiko teri vy aipoa'e va'ekue: “Ojeupity 'rāe xerekorā Moisés lei oeja va'ekue, profeta kuery ayvukue ha'e Salmo re oīa rami”, he'iague.
- ⁴⁵ Ha'e rami vy ha'e kuery pe omombe'u porāve ipara oiny va'e.
- ⁴⁶ Ha'e vy aipoe'i:
 — Po rami ipara oiny: Cristo omano, ha'e gui mboapy araa py onhemboete ju 'rā va'ekue ae.
- ⁴⁷ Ha'e gui hery rupi yvy jave re ikuai va'e pe omombe'ua 'rā ojeko rerova aguā, ojejavyague omboguepaa aguā. Jerusalém tetā gui ijypy 'rā.
- ⁴⁸ Ha'e gui peē kuery ae ha'e nunga mombe'uarā pendekuai.*

* 24:36 Mateus 28.16-17; Marcos 16.14

* 24:48 Mateus 28.18-20; Marcos 16.15-18

Lucas 24:49

1356

Lucas 24:53

⁴⁹ Ha'e ramo pendevy ambou 'rã Xeru ome'ẽ 'rã va'ekue. Ha'e nunga rupi pepyta ranhe tetã py, yvate gui penembopo'akaarã pendere onhemonde e'ŷa ja.*

Marcos 16.19,20

⁵⁰ Ha'e gui ma Betânia tekoá peve guemimbo'e kuery ogueraa vy opo oupi reve ogueroayvu porã.

⁵¹ Ogueroayvu teri reve ojepe'a ový ha'e kuerya gui, yva re oupia heravy ramo.*

⁵² Ha'e ramo ha'e kuery omboete vy Jerusalém katy ojevypa jogueravy ový'a reve.

⁵³ Ha'e vy templo py tema ikuai Nhanderuete omboetea py.

* 24:49 Atos 1.6-8 * 24:51 Atos 1.9-14

João ayvu porã ombopara va'ekue João ayvu porã ombopara va'ekue

Kova'e kuaxia Jesus rekokue oña ma hemimbo'e João ombopara va'ekue. Jypy'i João Jesus pe "Nhanderuete Ayvu" he'iombojoja vy, mba'eta nhandeayvu ma nhandepy'a re oĩ va'e kuaa ukaa. Ha'e rã Jesus ou raka'e oexa uka aguã Nhanderuete nhanderayvu etea. "Mba'eta Nhanderuete yvy re ikuai va'e oayvu vy ome'ẽ Gua'y pete'i'i va'e, hexe ojerovia va'e okanhý e'ŷ aguã, ha'e rã tekove marã e'ŷ oupity aguã. Mba'eta ko yvy re Nhanderuete Gua'y ombou yvy regua kuery ombopaga aguã e'ŷ, ha'e rã hexeve vy yvy re ikuai va'e oo jepe aguã" (3.16-17). "Avave rei ndoexai Nhanderuete, tei Nhanderuete Ra'y pete'i'i va'e Nguu revegua ae oikuaa uka" (1.18).

Mba'eta exa'rã tu "Nhanderuete Ra'y pete'i'i va'e" he'ia py jaikuua? Mba'eta Jesus ae "Xee ha'e Xeru reve ma pete'i'i ae roiko", he'i (10.30). Nguu reve pete'i'i inhe'ẽ va'e oiko Nguu oipotaa rami anho, ha'e Nguu ipy'aa oexa uka guive raka'e. Nguu rami ae avi ojejavý e'ŷ va'e oiko.

Kova'e kuaxia para py Jesus onhemombe'u porã: "Xee ma mbojape tekove me'ẽa. Xere ou va'e kuery noenduvei 'rã okaruxea, xere ojerovia va'e ma noenduvei 'rã yuvei" (6.35); "Xee ma hendy va'e yvy regua kuery moexakãarã. Xerupive ikuai va'e ma pytû rupi ve'ŷ 'rã oiko, mba'eta ha'e kuery re oĩ 'rã hendy va'e nhomoingovea" (8.12); "Xee ma okẽ aĩ. Xea rupi oike va'e kuery oo jepe 'rã" (10.9); "Xee ma vexa'i re opena porã va'ety rami aiko. Mba'eta opena porã va'ety ma guymba kuery re ome'ẽ 'rã guekove ae" (10.11-12); "Xee ae ma anhomboete ha'e anhomboingove va'e. Xere ojerovia va'e omano tei oikove jeyv 'rã. Ha'e rami avi ha'e javive xere oiko ha'e ojerovia va'e ma nomanoi 'rã raka'eve rã peve guarã" (11.25-26); "Xee ae ma tape, anhetã va'e ha'e tekove. Avave rei ndooi 'rã Xerua py xereve'ŷ vy" (14.6).

Kova'e kuaxia João ombopara vy oito henda py omombe'u hexa pyrã Jesus ojapoague Nguuete reko oikuaa uka vy. Aipoe'i: "Jesus hexa pyrã heta ojapo raka'e guemimbo'e kuery oexaa rupi. Ha'e nungakue ha'e javi e'ŷ ipara oiny kova'e kuaxia re. Ha'e rã kova'e re ipara oinya ma peẽ kuery perovia aguã Jesus ae Cristo Nhanderuete Ra'y oikoa, pejerovia vy tekove peupity aguã hery rupi" (20.30-31).

Jypy'i guive Ayvu oiko va'ekue ava ju ojeapoague re ijayvua

¹ Jypy'i guive Ayvu oiko. Ayvu ma Nhanderuete reve oiko raka'e, ha'e Ayvu ma Nhanderuete ae.*

² Ha'e ma jypy'i guive oiko raka'e Nhanderuete reve.

³ Ha'e va'e rupi ae opa mba'e ojapo raka'e. Nei pete'i've ma ndoikoi ha'e ojapo va'ekue'ŷ.*

⁴ Hexe oĩ tekove, ha'e hekove ma avakue moexakãarã oĩ.

⁵ Hendy va'e ma pytû rupi hexakã, pytû ma hexe nda'ipo'akai.

⁶ Oiko raka'e pete'i ava Nhanderuete ombou va'ekue João hery va'e.*
⁷ Ha'e va'e ma imombe'uarã ou, hendy va'e rekorã kuaa ukaarã, hendy va'e ou rã hexe pavã ojerovia aguã.

⁸ João ma hendy va'e ete e'ŷ, hendy va'e mombe'uarã rive ou.

⁹ Hendy va'e ete ma yvy re ou vy omoexakã 'rã avakue ha'e javi.

¹⁰ Ha'e gui Ayvu ma yvy ixupe ojapo ukaa va'ekue re ae ou tei yvy regua kuery ndoexa kuaai.

¹¹ Guetarã kuerya py ae ou tei hetarã kuery nomovaõi.

* 1:1 Ayvu py ma jaikuua uka 'rã nhandepy'a re oĩ va'e. Ha'e gui Jesus Cristo ma Nhanderuete py'a re oĩ va'e kuaa ukaarã ou (versículo 18; Colossenses 1.15). * 1:3 Colossenses 1.16,17; Hebreus 1.1-4; 1 João 1.1-4 * 1:6 João 1.15-37; Marcos 1.2-8; Atos 19.4

¹² Ha'e rã ojee omovaẽ va'e ha'e javi pe ma ome'ẽ Nhanderuete ra'y kuery ikuai aguã, hery rupi ojerovia va'e kuery pe ae.

¹³ Ha'e va'e kuery ma avakue gui rive'ŷ oiko, to'o oipotaa rami e'ŷ, neĩ nguu kuery gui rive'ŷ guive. Ha'e kuery ma Nhanderuete gui ae oiko va'e.

¹⁴ Ha'e gui Ayvu ma ava ojeapo vy oiko va'ekue ore kuery mbyte rupi. Hexe oĩ va'e ma nhomboaxya ha'e anhetẽ va'e anho. Hexakãmbaa avi roexa karamboae, Nhanderuete Ra'y peteĩ'i va'e ramo.

João Batista Jesus rekora omombe'u porâveague

¹⁵ Hekorã ma João omombe'u ma voi. Ha'e vy aipoe'i:

— Hekorã re ae xeayvu va'ekue. Aipoa'e: “Xee aju rire ojekuaa 'rã peteĩ xegui yvateve ete va'e, mba'eta xee aiko e'ŷ mbove ha'e oiko ae ma”, ha'e va'ekue — he'i.

¹⁶ Mba'eta ojee mba'emo porã oĩ va'e ome'ẽ nhande kuery ha'e javi pe, nhanemboaxya oexa uka jepi.

¹⁷ Mba'eta lei ma Moisés pe oikuua ucaa raka'e. Ha'e rã nhomboaxya ha'e anhetẽ va'e ma Jesus Cristo rupi ae ojekuaa.

¹⁸ Avave rei ndoexai Nhanderuete, teĩ Nhanderuete Ra'y peteĩ'i va'e Nguu revegua ae oikuua uka.

Mateus 3.1-12; Marcos 1.2-8; Lucas 3.1-18

¹⁹ Po rami ae João omombe'u hekorã. Mba'eta Jerusalém tetã gui judeu ruvixa kuery omondouka oirũ sacerdote ha'e levita kuery ixupe oporandu aguã. Ha'e ramo aipoe'i:

— Marã ramigua tu ndee reiko? — he'i okuapy.

²⁰ Ha'e ramo João onhemombe'u porã, nda'ijapui. Ha'e vy aipoe'i:

— Xee ma Cristo e'ŷ — he'i.

²¹ Ha'e ramo ha'e kuery oporanduve ju:

— Marã ramigua ha'vy ndee? Tyrã pa profeta Elias?

Ombovai:

— Xee ma ha'e'ŷ — he'i.

Ha'e kuery oporandu ju:

— Tyrã pa ndee profeta ou va'erã va'e reiko?

— Any — he'i ombovai vy.†

²² Ha'e ramo ha'e kuery aipoe'i:

— Emombe'u porã orevy marã ramigua pa reikoa, oremboquare kuery pe ju romombe'u aguã.

²³ Ombovai:

— Xee ma teko a e'ŷa rupi ajapukai aikovy vy “Pembo'yvi ke tape Senhor ou aguã”, ha'e va'e, profeta Isaías ijayvuague rami vy — he'i.*

²⁴ João-a py omondouka pyre kuery ma fariseu regua meme.

²⁵ Ha'e gui ha'e kuery aipoe'i:

— Mba'e re tu ha'vy renhomongarai reikovy, Cristo e'ŷ, Elias e'ŷ neĩ profeta e'ŷ va'eri?

²⁶ Ha'e ramo João ombovai:

— Xee ma yy py rive anhomongarai va'e. Ha'e rã peẽ kuery mbyte rupi peteĩ oiko ndapeikuuai va'e,

²⁷ xerakykue ou va'e. Ixugui ma xe'yvyi've ete vy nda'evei ipy regua amboi aguã voi — he'i.

²⁸ Ha'e rami João ijayvu Jordão yakã rovai re, Betânia katy'i nhomongarai oikovya py.

João Batista peteigque ju Jesus rekora omombe'u porâveague

²⁹ Ko'ẽ jevy João oexa Jesus ha'e katy ou oiny rã. Ha'e vy aipoe'i:

† ^{1:21} Judeu kuery oikuua rã Cristo ou e'ŷ mbove Nhanderuete ombou jevy 'rã profeta Elias imombe'uarã (Malaquias 4.5-6). Ha'e rã “Profeta ou va'erã va'e” he'ia ma Deuterônômio 18.15-18 py oĩa gui oikuua. * ^{1:23} Isaías 40.3

— Pee ma ou oiny Nhanderuetea guigua vexa'i, yvy re ikuai va'e reko vaitaty pe'aarã.[‡]
 30 Hekorã re ae xeayvu vy “Raka'eve rã ou 'rã peteĩ ava xegui yvateve ete va'e, mba'eta xee aiko e'ŷ mbove ha'e oiko ae ma”, ha'e va'ekue.

31 Xee eteve voi ndaikuuai va'ekue mava'e pa ha'e oikoa. Ha'e rami avi Israel kuery oikuaa aguã xemboua karamboae yy py anhomongarai aguã — he'i.

Mateus 3.13-17; Marcos 1.9-11; Lucas 3.21,22

32 João aipoe'i:

— Xee ma aexa karamboae Nhe'ẽ apykaxu'i rami yva gui oguejy ouvy vy hexe oĩ rã.
 33 Xee voi ndaikuuai teri va'ekue ha'e oikoa. Ha'e ramo yy py anhomongarai aguã xembou va'ekue aipoe'i: “Rexa 'rã Nhe'ẽ oguejy ouvy vy peteĩ ava re oĩ rã. Ha'e va'e ae ma Nhe'ẽ Ky'a E'ŷ reve nhomongarai va'erã”, he'i va'ekue xevy.

34 Ha'e gui ha'e va'ekue ma xee aexa ete karamboae. Ha'e rami vy ae pêvy aikuaa uka Nhanderuete Ra'y oikoa.

Jesus rupive João Batista remimbo'e kuery mokoï oje'oiague

35 Ko'ẽ jevy João oiko mokoï guemimbo'e reve.

36 Oexa Jesus oaxa rã. Ha'e vy aipoe'i:

— Peva'e ma Nhanderuetea guigua vexa'i — he'i.

37 Po rami ijayvu rã hemimbo'e mokoïve oendu vy oje'oi Jesus rupive.

38 Ha'e gui Jesus guakykue re oma'ẽ vy oexa ha'e kuery ou rã. Ha'e vy aipoe'i:

— Mba'e re tu peju?

Ha'e kuery aipoe'i:

— Rabi, mamo tu ndee rekeaty? — he'i. “Rabi” ma “Porombo'ea” 'ea.

39 Ha'e ramo aipoe'i ha'e kuery pe:

— Peju ha'vy pexa peikuua aguã — he'i. Ha'e ramo ha'e kuery oje'oi vy oexa okeaty, ha'e ka'aru ma ramo opyta hexeve.

40 Ha'e gui João ijayvu rã hemimbo'e kuery oendu vy Jesus rupive oje'oi va'ekue regua peteĩ ma Simão Pedro ryvy André.

41 Ha'e va'e ma guyke'y Simão-a py ranhe oo. Ha'e vy aipoe'i guyke'y pe:

— Ore rojou ma Messias — he'i. “Messias” ma “Cristo” 'ea.[§]

42 Ha'e rami vy guyke'y ogueraa Jesus-a py.

Ha'e gui ha'e va'e re Jesus oma'ẽ vy aipoe'i:

— Ndee ma Simão, João ra'y reiko. Aŷ gui ma nderery 'rã Cefas — he'i. “Cefas” ma “Pedro” 'ea.

Jesus guemimbo'erã Filipe ha'e Natanael oenoïague

43 Ko'ẽ jevy Jesus onhembopy'a Galiléia katy oo aguã. Ha'e ramia ja oexa Filipe. Ha'e vy aipoe'i ixupe:

— Jaa ke xerupive — he'i.

44 Filipe ma Betsaida tetã pygua, André ha'e Pedro reve ha'e py hekoa va'e.

45 Ha'e gui Filipe ma oo oeka Natanael. Ojou vy aipoe'i:

— Roexa ma Moisés lei re omboparaague, ha'e profeta kuery voi omombe'u va'ekue. Ha'e va'e ma José ra'y Jesus Nazaré pygua va'e — he'i.

46 Ha'e ramo Natanael oporandu:

— Nazaré gui nda'u oiko 'rã ri mba'emo porã?

Filipe ombovai:

— Jaa ha'vy exa — he'i.

47 Ha'e gui Natanael ovaẽ ouvy rã Jesus oexa vy aipoe'i:

— Pee ma ou peteĩ Israel regua anhetẽ rupi ete oiko va'e — he'i.

48 Ha'e ramo Natanael oporandu:

[‡] 1:29 Jesus pe “Nhanderuete guigua vexa'i” he'i, mba'eta omanoa py opaga raka'e nhanderek vaitaty re (Êxodo 12.3-13, Isaías 53.7-11, 1 Pedro 1.18,19, Apocalipse 5.6). [§] 1:41 Tery Messias ma hebraico ayvu pygua, ha'e rã tery Cristo ma grego pygua. Mokoïve joo rami he'ia va'e, “Nhandereraa jepearã Nhanderuete ombou va'e” he'ia.

- Mamo ha'vy ndee xerexa ra'e?
 Jesus ombovai:
 — Ndevy pe Filipe xemombe'u e'ŷ mbove ma voi xee roexa kuri figo'y yvypy py reĩ rā he'i.
⁴⁹ Ha'e rami rā Natanael aipoe'i:
 — Porombo'ea, ndee ma Nhanderuete Ra'y, Israel kuery pegua huvixave ae — he'i.
⁵⁰ Ha'e gui Jesus aipoe'i:
 — Ndee ma ha'e rami aikoa rerovia mba'eta “Figo'y yvypy py reĩ rā roexa”, ha'e ramo rive. Ha'e gui raka'eve rā mba'emo ndevy aikuua uka 'rā pova'e gui iporāve va'e.
⁵¹ Mba'eta anhetē aipoa'e pēvy: Raka'eve rā pexa 'rā yva ojepe'a rā, ha'e Nhanderuetea guigua anjo kuery ojeupi ha'e oguejy ramo Ava ra'y ojeapo va'ekue re.

2

- Omendaa py Jesus avi ooague*
- ¹ Ha'e gui mboapy araa py omendaa ta Caná tetā Galiléia regua py. Ha'e py ma Jesus xy oo.
² Jesus voi hemimbo'e kuery reve oenoña avi omendaa aguā py oo aguā.
³ Ha'e gui vinho opa ramo ixy omombe'u Jesus pe. Ha'e vy aipoe'i:
 — Ha'e kuery ndoguererekovei ma vinho.
⁴ Jesus ombovai:
 — Kunha, mba'e tu ndee rerekoxereve? Mba'eta xe'ára novaëi teri — he'i.
⁵ Ha'e ramo tembiguai ikuai va'e pe ju ixy ijayvu:
 — Pejapo tema ha'e ojapo uka va'e rei — he'i.
⁶ Ha'e py ma mboapy meme yryru tuvixakue ikuai, ita ku'i gui ojapo pyre, oitenta, cem litro ogueraa va'e meme. Ha'e va'e yryru py yy oī va'e ma judeu kuery gueko ramy oiporu 'rā mba'emo oiky'a'o aguā.*
⁷ Ha'e gui Jesus aipoe'i tembiguai kuery pe:
 — Pemonyëmba yryru ikuai va'e — he'i. Ha'e ramo ha'e kuery omonyëmba.
⁸ Ha'e gui ma Jesus aipoe'ive ju:
 — Aŷ ma penoëve ju, ha'e peraa ngaru re opena va'e toa'anga — he'i. Ha'e ramo ha'e kuery ojapo.
⁹ Ha'e gui ngaru re opena va'e oa'anga vy ojou porā, mba'eta yy gui vinho ojeapo rire. Ha'e rami avi ndoikuuai magui pa vinho oguerua ra'e. Tembiguai kuery yy haraare anho oikuua.
 Ha'e gui ngaru re opena va'e ndoikuuai rei teri reve oenoñ omenda va'e.
¹⁰ Ha'e vy aipoe'i ixupe:
 — Ngaru py ikuai va'e pe ma vinho iporāve va'e ranhe 'rā ome'ëa. Oy'uxea rami oy'u pa ma rire iporā e'ŷve va'e ju 'rā ome'ëa. Ha'e rā ndee ma ha'e rami e'ŷ rejapo, vinho iporāve va'e remoñ porā ra'e aŷ guarā — he'i ndoikuuai vy.
¹¹ Ha'e nunga Jesus ojapo va'e ma jypy'i hexa pyrā ojapo, Caná tetā Galiléia regua py. Opo'akaa oexa uka ramo hemimbo'e kuery ojerovia hexe.
¹² Ha'e va'e rire ma Cafarnaum katy oo oxy, guyvy kuery ha'e guemimbo'e kuery reve. Ha'e py ma nda'ikuai arei'i.

- Templo gui Jesus oipe'apaague*
- ¹³ Ovaë rai ma judeu kuery ngaru Páscoa ojapo aguā ára. Ha'e rami rā Jesus oo avi Jerusalém katy.
¹⁴ Templo py ovaë vy oexa vaka, vexa'i ha'e apykaxu vendea kuery ikuai rā, peráta mboekoviaa kuery guive.
¹⁵ Ha'e rami vy mba'emo ryvikue ojopy vy oipoka. Ha'e va'e py ma omondyipa templo ropy gui. Vexa'i ha'e vaka omondyipa, ha'e mesa ikuai va'e oity vy peráta onhoëmba.*

* 2:6 Marcos 7.3,4 * 2:15 Mateus 21.12,13; Marcos 11.15-19; Lucas 19.45,46

¹⁶ Apykaxu vendea kuery pe ma aipoe'i:

— Peipe'apa apy gui kova'e nunga. Pejapo eme Xeru pegua oo mba'emo vendeaty — he'i.

¹⁷ Ha'e rami ojapo rā hemimbo'e kuery oexa vy ima'endu'a ipara oī va'e re: “Ndevyguia oo ayvu etea xemombaa 'rā” he'iague re.*

¹⁸ Templo gui Jesus oipe'apa rā judeu ruvixa kuery oexa vy oporandu ixupe:

— Mba'e nunga 'rā tu rejapo ha'e nunga rejapo aguā re ndepo'akaa kuaa ukaarā?

¹⁹ Ha'e ramo Jesus ombovai:

— Pembovaipa ha'vy kova'e templo, ha'e gui mboapy araa py ajapopa ju 'rā — he'i.

²⁰ Ha'e ramo judeu ruvixa kuery aipoe'i:

— Kova'e templo ma quarenta e seis ma'etŷa re ojapopa. Mba'exa tu ha'vy ndee mboapy araa pyve ri rejapopa ju ta? — he'i okuapy.

²¹ Ha'e rami avi Jesus “Templo” he'ia ma guete re ae ijayvu vy.

²² Omanoague gui onhemboete ju ma rire mae ma hemimbo'e kuery ima'endu'a aipoe'iague re. Ha'e rami vy oguerovia ipara oī va'e ha'e Jesus ijayvuague.

Jesus re heta ojerovia merami teĩ okuapyague

²³ Páscoa ára Jerusalém py Jesus oiko jave heta oexa okuapy hexa pyrā ojapo oikovy rā. Ha'e rami vy ojerovia hexe.

²⁴ Ha'e rā Jesus ma ha'e kuery re ndoyeroviai, ha'e javive py'a oikuaapa vy.

²⁵ Avakue reko ixupe nomombe'uai teĩ ha'e ae oikuaa ha'e kuery py'a re oī va'e.

3

Nicodemos reve Jesus ijayvuague

¹ Oiko peteĩ ava fariseu regua Nicodemos hery va'e, judeu kuery ruvixa.

² Peteĩ pytū ha'e va'e oo Jesus oĩa py. Ha'e vy aipoe'i ixupe:

— Porombo'ea, ore kuery roikuaa ndee Nhanderuetea gui ae rejuvene nhombo'earā, mba'eta hexa pyrā ndee rejapo reikovy va'e nunga avave rei ndojapo kuaai 'rā, hexeve Nhanderuete oiko e'ŷ re — he'i.

³ Jesus ombovai:

— Anhetē ete aipoa'e ndevy: Avave rei ndoexai 'rā Nhanderuete po'akaa, oiko jevy e'ŷ vy — he'i.*

⁴ Ha'e ramo Nicodemos oporandu:

— Mba'exa 'rā tu jaiko jevy nhandeduja ma va'eri? Nhanderuete py ju jajevy 'rā ri nda'u jaiko jevy aguā?

⁵ Jesus ombovai:

— Anhetē aipoa'e: Yy ha'e Nhe'ẽ gui ndapeikoi vy ma ndapeikei 'rāe Nhanderuete po'akaa py.*

⁶ To'o gui oiko va'ekue ma to'o, ha'e rā Nhe'ẽ gui oiko va'ekue ma nhe'ẽ.

⁷ Penhemondyi eme peiko jevy aguā re xeayvu rā pendu vy.

⁸ Yvytu minha oipejua rupi rei 'rā oipeju. Pendu teĩ ndapeikuuai magui pa oua, neĩ marā katy pa ooa. Nhe'ẽ gui oiko va'ekue voi ha'e rami ae avi ikuai — he'i.

⁹ Ha'e ramo Nicodemos oporandu ju:

— Mba'exa 'rā tu ha'eve ha'e rami aguā?

Jesus ombovai:

¹⁰ — Ndee ma Israel kuery mbo'ea reiko va'eri mba'exa tu ndereikuuai xeayvua?

¹¹ Anhetē aipoa'e: Ore kuery ma mba'emo roikuaa ha'e roexa va'ekue anho romombe'u. Ha'e rami teĩ peẽ kuery ma ndaperoviai.

¹² Kova'e yvy re mba'emo oiko va'e re xeayvu rā ndaperoviai pekuapy. Mba'exa 'rā tu ha'vy yva re ikuai va'e re xeayvu rā perovia?

¹³ Mba'eta avave rei ndooi yva re, Ava ra'y ojeapo va'ekue [ha'e pygua ae] e'ŷ vy.

* 2:17 Salmo 69.9 * 3:3 João 1.12,13; 1 Pedro 1.23 * 3:5 Ezequiel 36.25-28

- ¹⁴ Tekoa e'ŷa py Moisés oupi imoiny raka'e mboi ra'angaa.* Ha'ekue rami avi Ava ra'y ojeapo va'ekue voi oupia 'rā imoiny,
¹⁵ hexe ojerovia va'e ha'e javi oupity aguã tekove marã e'ŷ.

Ojerovia va'e ha'e ojerovia e'ŷ va'e kuery re ijayvuague

- ¹⁶ Mba'eta Nhanderuete yvy re ikuai va'e oayvu vy ome'ẽ Gua'y peteĩ'i va'e, hexe ojerovia va'e okanh e'ŷ aguã, ha'e rā tekove marã e'ŷ oupity aguã.*
¹⁷ Mba'eta ko yvy re Nhanderuete Gua'y ombou yvy regua kuery ombopaga aguã e'ŷ, ha'e rā hexeve vy yvy re ikuai va'e oo jepe aguã.
¹⁸ Ha'e ramo hexe ojerovia va'e kuery ndopagai 'rā. Ha'e rā ndojeroviai va'e ma opaga aguã rami ae ikuai, Nhanderuete Ra'y peteĩ'i va'e rery rupi ndojeroviai vy.
¹⁹ Ha'e kuery opaga 'rā mba'eta yvy re hendy va'e ou teĩ ha'e kuery teko vai rupi ikuai va'e vy pty ū rive ojou porâve.
²⁰ Mba'eta teko vai rupi ikuai va'e ndojou porai hexakaa, hendy va'e re nonhembojaxei ae, heko vaiaty ojekuaa e'ŷ aguã.
²¹ Ha'e rā anhetê va'e rupi ikuai va'e ma onhemboja 'rā hendy va'e re heko ojekuaa porã aguã rami, mba'eta Nhanderuete re ae ikuai.*

Jesus reko re teigue ju João Batista ijayvuague

- ²² Ha'e va'e rire guemimbo'e kuery reve oje'oi Judéia katy. Ha'e py ikuai ranhe ha'e kuery reve nhomongarai vy.
²³ João avi nhomongarai oikovy Enom re Salim katy'i, ha'e va'e rupi yy ikuai rei ramo. Ha'e oña py heta oje'oi onhemongarai uka vy.
²⁴ Ha'e va'e jave ma João nombo'aai teri.
²⁵ Ha'e gui João remimbo'e kuery ijayvu okuapy peteĩ judeu reve, marã rami vy pa ojeky'a'o aguã re oikuaaxe vy.
²⁶ Ha'e ramo hemimbo'e kuery oje'oi João pe omombe'u. Ha'e vy aipoe'i okuapy:
— Orembo'ea, kueve Jordão rovai re ndea py ava ou va'ekue, hekorã remombe'ua va'ekue ma nhomongarai avi oikovy. Ha'e ramo pavê rei 'rā oje'oi oña py — he'i okuapy.
²⁷ Ha'e ramo João aipoe'i:
— Nhanderuete mba'emo ome'ẽ ramo 'rāe jareko.
²⁸ Peẽ kuery voi peikuua porã aipoa'eague: “Xee ma Cristo e'ŷ aiko, ha'e rā henonderã xemboua va'ekue”, ha'e va'ekue.
²⁹ Ha'e rā Jesus ma omenda va'e rami oiko, ha'e omenda va'e anho 'rā ogueraa kunha. Ha'e rā omenda va'e irū ma ovy'a 'rā omenda va'e ayvu oendu vy. Ha'e nunga rupi xee voi avy'a aikovy.
³⁰ Tove heta-etave too hexe, ha'e rā xere ma mbovyve'i tou — he'i.

Jesus pavê gui yvatevea re ijayvua

- ³¹ Yva gui ou va'ekue ma pavê gui yvateve. Ha'e rā yvy re ikuai va'e ma yvy regua meme ikuai, ha'e rami vy mba'emo yvy re oiko va'e re 'rā ijayvu. Ha'e rā yva gui ou va'ekue ma yvateve pavê gui.
³² Ha'e va'e ma mba'emo oendu ha'e oexa va'ekue re ijayvu teĩ avave rei ndogueroviaai ijayvua.
³³ Ha'e rā oguerovia va'e ma Nhanderuete pe voi “Anhetê va'e” he'i.
³⁴ Mba'eta Nhanderuete remimbou ma ijayvua anho 'rā omombe'u, hexe Onhe'ẽ omoĩ ramo amongue'i py e'ŷ.
³⁵ Tuu ma Gua'y oayvu ete vy opa mba'e omboaxa ipo py.
³⁶ Ha'e nunga rupi Ta'y re ojerovia va'e kuery re oĩ tekove marã e'ŷ. Ha'e rā Ta'y nonhe'ẽ rendui va'e re ma tekove noĩ. Ha'e kuery re oĩ va'e ma Nhanderuete poxya anho.*

* 3:14 Moisés mboi ra'angaa oupi raka'e peteĩ yvyra apy re, ha'e va'e re mboi oixu'u va'ekue oma'ẽ vy okuera aguã (Números 21.9, João 12.32). * 3:16 Romanos 5.8,9; 1 João 5.11,12 * 3:21 Efésios 5.8-14 * 3:36 1 João 5.11,12

4

Samaria pygua kunha reve Jesus ijayvuague

¹ Ha'e gui fariseu kuery oendu aipo'ea rã João gui Jesus omongarai retavea guemimbo'erã. Senhor Jesus voi oikuua ha'e kuery oendua.

² Ha'e rami avi nhomongarai va'e ma Jesus e'ŷ, hemimbo'e kuery rima nhomongarai.

³ Ha'e ramo Judéia yvy gui ha'e kuery oje'oi ju Galiléia katy.

⁴ Ha'e rami vy Samaria yvy rupi 'rãe oaxa.

⁵ Ha'e gui ha'e kuery ovaẽ peteĩ tetã Samaria kuery rekoa py. Ha'e va'e tetã ma Sicar hery va'e, Jacó gua'y José pe yvy ome'ẽ va'ekue katy'i.

⁶ Ha'e py ma oĩ Jacó yguakue. Kuaray mbyte jave Jesus oguapy ygua rexei'i ikane'õgua aguã.

⁷ Ha'e jave py peteĩ kunha Samaria pygua ou yy re. Ha'e ramo kunha va'e pe Jesus aipoe'i:

— Eru na tay'u — he'i.

⁸ Mba'eta hemimbo'e kuery oopa ra'e tetã py tembi'u jogua vy.

⁹ Ha'e ramo kunha Samaria pygua aipoe'i:

— Mba'e re tu ndee judeu va'eri xee Samaria pygua pe rejerure yy re? — he'i, mba'eta Samaria pygua kuery reve judeu kuery ndajoayvui.*

¹⁰ Jesus ombovai:

— Mba'emo Nhanderuete ndevy ome'ẽ va'e, ha'e mava'e pa ndevy yy re ojerure va'e reikuua va'e rire ndee ma xevy pe rejerure 'rãgue, ha'e ramo ndevy pe xee ame'ẽ 'rãgue yy imarã e'ŷ va'e — he'i.

¹¹ Ha'e gui kunha va'e aipoe'i:

— Ndee ndererekoi yy rejara aguã, ha'e kova'e ygua ikua puku. Magui 'rã tu yy imarã e'ŷ va'e rejou?

¹² Ndee nda'u nhaneramoĩ Jacó gui ndepo'akave ri? Mba'eta Jacó ma nhandevy oeja raka'e kova'e ygua ha'e ae oy'uat, ta'y kuery ha'e hymba kuery guive.

¹³ Jesus ombovai:

— Kova'e yy gui oy'u va'e ma ijy'uvei kuerei 'rã.

¹⁴ Ha'e rã xee yy ame'ẽ va'e oy'u va'e ma nda'ijy'uvei riaevei ma 'rã, mba'eta xee yy ame'ẽ va'e ma yvu rami 'rã oĩ ipy'a re imoingo riaeарã — he'i.*

¹⁵ Ha'e ramo kunha va'e aipoe'i:

— Xevy pe ha'vy eme'ẽ ha'e va'e regua yy xey'uvei riae e'ŷ, ha'e yy re aju riae e'ŷ aguã.

¹⁶ Jesus ombovai:

— Tereo ha'vy enoĩ neme, ha'e gui peju ju apy.

¹⁷ Kunha va'e ju

— Xee ma xeme va'e'ŷ — he'i.

Jesus ombovai:

— Anhetẽ ae “Xeme va'e'ŷ” 'rea,

¹⁸ mba'eta peteĩ nhiruĩ avakue ma rerek raka'e. Ha'e gui aŷ ndereve oiko va'e ma neme e'ŷ ae. Anhetẽ ae ri aipo'rea — he'i.

Nhanderuete nhamboete aguã anhetẽ va'e re Jesus ijayvuague

¹⁹ Ha'e gui kunha va'e aipoe'i:

— Senhor, xee aikuua rã ndee profeta reiko.

²⁰ Oreramoĩ kuery ma yma Nhanderuete omboete raka'e peva'e yvyty áry. Ha'e rã peẽ kuery ma aipopeje Nhanderuete nhamboete aguã Jerusalém py anho oĩa rami.

²¹ Jesus ombovai:

— Ha'e gui kunha, erovia xeayvu, mba'eta ovaẽ 'rã kova'e yvyty áry avave rei Nhanderuete nomboeteavei aguã ára, neĩ Jerusalém py voi.

* 4:9 Samaria pygua kuery ma judeu e'ŷ, amboae regua ikuai. * 4:14 João 7.37-39; Apocalipse 22.17

²² Ha'e gui peẽ kuery ma ndapeikuaai marã ramigua pa pemboetea.* Ha'e rã ore judeu kuery ma roikuaa, mba'eta jogueraa jepearã judeu regua ae oiko.

²³ Ovaẽ 'rã ára, ha'e ovaẽ ae ma guive Xeru omboete ete va'e kuery nhe'ẽ re ha'e anhetã rupi omboete aguã. Mba'eta ha'e ramigua imboetearã ae Xeru oeka.

²⁴ Nhanderuete ma nhe'ẽ. Ha'e nunga rupi imboetea kuery voi nhe'ẽ re 'rã omboete, ha'e anhetã rupi — he'i.*

²⁵ Ha'e ramo kunha va'e aipoe'i:

— Xee aikuua ramo raka'eve rã ou 'rã Messias Cristo 'epy va'e. Ha'e ou vy ma nhandevy omombe'u porãve 'rã ha'e ramigua.

²⁶ Jesus ombovai:

— Xee ndereve xeayvu va'e ae ha'e — he'i.

²⁷ Ha'e rami jave hemimbo'e kuery ovaẽmba ju. Ha'e kuery kunha reve Jesus jogueroayvu rã oexa vy onhemondyipa, teī petēve ma noporandui mba'e nunga re pa jogueroayvua, neī mba'e re pa kunha reve ijayvua re.

²⁸ Ha'e ramove kunha va'e oeja ov yryru tetã katy oo vy. Ha'e rami vy aipoe'i tetã pygua kuery pe:

²⁹ — Peju ke jaje'oi pexa aguã petēi ava xerekokue ha'e javi mombe'uare. Ha'e nda'u Cristo e'ŷ ri? — he'i.

³⁰ Ha'e ramo ha'e kuery tetã gui jogueru Jesus oĩa katy.

Mba'emo mono'õa kuery re ijayvuague

³¹ Ha'e rami jave hemimbo'e kuery aipoe'i:

— Orembo'ea, ekaru ma'vy.

³² Jesus ombovai:

— Xee ma tembi'u areko peẽ kuery peikuaa e'ŷ va'e — he'i.

³³ Ha'e ramo hemimbo'e kuery joupe-upe aipoe'i:

— Amongue ta'vy ogueru ma teve ra'e ho'u va'erã?

³⁴ Jesus ombovai:

— Xee tembi'u areko va'e ma Xembouare oipotaa rami ajapo aguã ae, ajapopa peve.

³⁵ Peẽ kuery aipopeje: “Irundy jaxy teri oata ovaẽ aguã onhotõ mbyre nhamono'õ aguã”, peje. Ha'e rã xee ma aipoa'e: Pema'ẽ pexa aguã onhotõ mbyre ijajupa ma oupya.

³⁶ Ha'e nunga mono'õa rupi ikuai va'e ma aŷ guive 'rã ojopy ombo'eapoague repy, tekove marã e'ŷ reguarã omono'õ va'e vy. Ha'e rami vy mba'emo nhotõare ha'e imono'õare kuery jovaive re 'rã ov y'a okuapy.

³⁷ Anhetã ete “Petēi onhotõ 'rã, ha'e amboae ju 'rã omono'õ”, 'ea.

³⁸ Mba'eta xee romondouka penhotõ e'ŷague gui pemono'õ aguã. Amboae kuery ranhe ma omboypy, ha'e gui peẽ kuery ju 'rã pemono'õ ha'e kuery ombo'eapoague rupi.*

Jesus re Samaria pygua kuery heta ete ojeroviaague

³⁹ Ha'e va'e tetã Samaria pygua kuery heta ete ojerovia Jesus re, kunha va'e “Opa mba'e ajapo va'ekue ha'e omombe'upa” he'i rire.

⁴⁰ Ha'e rami vy Samaria pygua kuery Jesus oĩa py ou vy “Epytave apy ore kuery reve”, he'i ramo Jesus mokoõ ára re optyta ha'e py.

⁴¹ Ha'e ramo amboae kuery voi heta ete ojerovia Jesus re, ijayvua ae oendu vy.

⁴² Ha'e rami vy ha'e kuery aipoe'i kunha va'e pe:

— Aŷ ma ore kuery rojerovia mba'eta ore ae roendu ijayvua, ndee remombe'u ramo e'ŷ. Aŷ ore kuery roikuaa ma Jesus anhetã yvy re ikuai va'e reraa jepea oikoa — he'i okuapy.

Galiléia yvy katy Jesus petēgue ju ooague

⁴³ Mokoõ ára rire Galiléia yvy katy ju ojevy.

⁴⁴ Mba'eta Jesus ae aipoe'i:

* 4:22 Romanos 10.1,2

* 4:24 Romanos 12.1

* 4:38 Mateus 9.36-38

— Profeta ikuai va'e ma nomboeteai 'rã hekoa py ae — he'i.*

⁴⁵ Ha'e gui Galiléia re ovaẽ ramo ha'e pygua kuery oguerovy'a okuapy, ngaru Jerusalém py oiko mba'emo porã ojapo rã oexa rire.

Huvixave reveguia ra'y Jesus omongueraague

⁴⁶ Ha'e gui ojevy ju Caná tetã Galiléia regua py yy gui vinho ojapoague py. Ha'e py oiko peteĩ huvixave rembiguai yvateve va'e. Ha'e va'e ra'y ma Cafarnaum tetã py imba'eaxy oupy.

⁴⁷ Ha'e va'e oendu “Judéia gui Jesus ou ju ma Galiléia re” 'ea rã. Ha'e rami vy Jesus oĩa py oo ojerure gua'y omonguera aguã, mba'eta ta'y omano rai'i oupy.

⁴⁸ Tuu va'e pe Jesus aipoe'i:

— Peẽ kuery ma hexa pyrã ajapo rã pexa vy 'rãe pejerovia — he'i.

⁴⁹ Ha'e ramo ava va'e ojerure:

— Senhor, jaa ete ma xera'y omano e'ŷ mbove.

⁵⁰ Jesus ombovai:

— Tereo katu, nderay oikove ju ma — he'i. Ha'e ramo ijayvua tuu oguerovia vy oo ju.

⁵¹ Tuu ooa rupi ovaexí guembiguai kuery. Ha'e ramo ha'e kuery aipoe'i:

— Nderay okuera ju ma — he'i okuapy.

⁵² Ha'e ramo tuu oporandu:

— Mba'e hora py xera'y okuera ra'e?

Hembiguai kuery ju

— Kuee kuaray mbyte rire'i ipire raku-a oaxa — he'i okuapy.

⁵³ Ha'e ramo ma tuu ima'endu'a ha'e va'e hora py ae Jesus “Nderay oikove ju ma” he'iague re. Ha'e rami vy ojerovia hexe, hoo py ikuai va'e ha'e javive guive.

⁵⁴ Ha'e va'e reve mokoïguea ma Jesus hexa pyrã ojapo, Judéia gui Galiléia re ou rire.

5

Peteĩ ava oguata ve'ŷ va'e Jesus omongueraague

¹ Ha'e va'e rire oiko ngaru judeu kuery pegua. Ha'e ramo Jesus oo Jerusalém katy.

² Ha'e py vexa'i rokẽ 'epy va'e rexei'i oĩ peteĩ yy omboty pyre, hebraico ayvu py Betesda hery va'e. Ha'e va'e yvýry oĩ peteĩ nhiruŷ ougy.

³ Ha'e va'e oguy py ma imba'eaxy va'e anho ikuai: ára reveguia e'ŷ, oguata e'ŷ va'e ha'e ipirupa va'e.

⁴ [Ha'e kuery ma oarõ okuapy yy omyí rã guarã, mba'eta ou jepi 'rã anjo yy omomyí aguã. Ha'e gui peteĩ imba'eaxy va'e ha'e ranhe yy py oguejy vy okuera 'rã imba'eaxygui.]

⁵ Ha'e py oĩ peteĩ ava trinta e oito ma'etý re ma imba'eaxy oupy va'e.

⁶ Ha'e va'e onheno oupy rã Jesus oexa vy oikuua yma ma imba'eaxy oupya. Ha'e vy oporandu:

— Ndee pa rekueraxe?

⁷ Imba'eaxy va'e ombovai:

— Senhor, nda'ipoai avave rei yy omyí rã xemboguejy va'erã. Yy omyí nhavõ amboae ranhe kuerei 'rã oguejy xegui — he'i.

⁸ Ha'e ramo Jesus aipoe'i ixupe:

— Epu'ã ha'vy, ejopy nderupa, ha'e tereo — he'i.

⁹ Ha'e ramove ava okuera vy ngupa ojopy ha'e oguata ov. Ha'e va'e ára ma sábado.

¹⁰ Ha'e nunga rupi judeu ruvixa kuery ijayvu okuapy okuera va'ekue pe:

— Kova'e ára sábado ramo nda'evei nderupa re revoyi aguã — he'i ixupe.*

¹¹ Ombovai:

— Ha'e rami avi ava xemonguerare ma “Ejopy nderupa ha'e tereo” he'i xevy.

¹² Ha'e ramo ha'e kuery oporanduve ju:

— Mava'e ava tu ndevy “Ejopy nderupa ha'e tereo?” 'eare?

* 4:44 Mateus 13.57 * 5:10 João 7.23

¹³ Ha'e ramo ma okuera va'ekue ndoikuaai mava'e ete pa imongueraare, mba'eta Jesus ha'e gui ojepe'a vyvoi rire, heta vaipa ikuai rā.

¹⁴ Ha'e gui ka'aruve ma Jesus oexa ju templo rupi oikoa py. Ha'e vy aipoe'i:

— Aŷ ma rekuera ma. Ejejavyve eme nda'eveive va'e oiko e'ŷ aguā ndevy — he'i.

¹⁵ Ha'e gui ava ojepe'a vy oo judeu ruvixa kuery pe omombe'u Jesus ae omonguer-aague.

¹⁶ Ha'e ramo ha'e kuery onhea'ā okuapy Jesus omoī vai aguā sábado ára py voi nhomongueraaty re.

¹⁷ Ha'e ramo Jesus aipoe'i ha'e kuery pe:

— Xeru ma aŷ voi ombo'eapo. Ha'e rami ae avi xee voi amba'eapo tema aikovy — he'i.

¹⁸ Ha'e nunga rupi judeu ruvixa kuery ojukaxe sábado ára py voi nhomongueraaty re, ha'e Nhanderuete Tuu oikoa rami omombe'u vy Nhanderuete rami avi onhemingo ramo guive.*

Jesus gueko omombe'u porãveague

¹⁹ Ha'e gui Jesus ombovai vy aipoe'i:

— Anhetē aipoa'e pêvy: Ta'y ma mba'eve ndojapoi 'rā ojegui ae, Tuu mba'emo ojapo rā oexa e'ŷ vy. Mba'eta Tuu ojapo va'e ramigua ae avi 'rā Ta'y ojapo oikovy.*

²⁰ Tuu ma Gua'y oayvu vy ixupe oikuaa ukapa mba'emo ojapo oikovy. Raka'eve rā ixupe ojapo uka 'rā mba'emo tuvixave ete va'e, peẽ kuery penhemondyipa aguā.

²¹ Mba'eta Tuu ma omano va'ekue omboete ha'e omoingove jeyva rami avi Ta'y voi 'rā omoingove omoingovexe va'e.

²² Tuu ma nanhombopagai 'rā. Gua'y rima omoī pavē oikoague repy me'earā,

²³ Ta'y omboete pavē aguā Tuu omboetea rami. Ha'e rā Ta'y nomboetei va'e ma Tuu imbouare voi nomboetei.

²⁴ — Anhetē aipoa'e: Amongue xeayvu oendu vy Xembouare re ojerovia va'e, ha'e va'e kuery re oĩ tekove marā e'ŷ. Ha'e kuery ndopagavei 'rā, mba'eta manoia gui oaxa ma tekove oupity aguā re.

²⁵ Anhetē aipoa'e pêvy: Ovaẽ 'rā hora, ha'e ovaẽ ae ma guive omano va'ekue oendu aguā Nhanderuete Ra'y ijayvua. Ha'e gui hendua kuery oikove ju 'rā.

²⁶ Mba'eta Tuu re tekove ome'ẽ aguā oĩa rami avi Gua'y voi ombopo'aka tekove ome'ẽ aguā,

²⁷ ha'e pavē oikoague repy ome'ẽ aguā voi ombopo'aka, Ava ra'y ojeapo va'ekue ramo.

²⁸ Penhemondyi eme ha'e rami xeayvu rā pendu vy, mba'eta ovaẽ ma ouvy hora yvyra rupa py ikuai va'e Ta'y ijayvua oendu vy opu'āmba aguā.

²⁹ Heko porā va'ekue opu'āmba 'rā oikove riae aguā. Ha'e rā teko vai rupi ikuai va'ekue ma opu'ā 'rā opaga aguā.

³⁰ Xee ma mba'eve ndajapoi xejegui ae. Mba'emo ajapo va'e ma aenduague rami meme ajapo. Ha'e pavē oikoague repy ame'ẽ vy voi ha'evea rami 'rā ajapo, mba'eta xee ae aipota va'e'ŷ ajapoxe, ha'e rā Xembouare oipota va'e anho.

³¹ — Ha'e gui xee anho rive xerekos amombe'u va'e rire ndovarei 'rāgue xeayvua.

³² Ha'e oiko avi amboae xerekos kuaa ukaarā. Ha'e va'e xekuaa ukaa ma anhetē va'e meme, xee aikuaa.

³³ João Batista pe peẽ kuery peporandu uka ramo anhetē va'e meme xemombe'u raka'e.

³⁴ Ha'e rami teĩ xee naikotevēi xekuaa ukaa ko yvy regua. Ha'e rami avi João rekokue re xeayvu pendu vy peo jepe aguā.

³⁵ Mba'eta ijayvuague ma tataendy opa rupi omoexakāa rami. Ha'e ramo peẽ kuery pendu vy pêvy'a ranhe raka'e penemoexakāa rupi.

³⁶ Oiko avi peteĩ xerekos kuaa ukaa João gui yvateve va'e, mba'eta xerembiaporā Xeru ome'ẽ va'ekue ae 'rā oikuaa ukaa Xeru xembouague.

³⁷ — Ha'e gui Xeru Xembouare voi ijayvu raka'e xerekorā re. Teĩ peẽ kuery ma neĩ peteĩgue napendui ijayvua, ndapexai guive,

* 5:18 João 10.30,33 * 5:19 João 14.10,11

- ³⁸ neĩ pendejee napemoĩ ijayvu, mba'eta ndapejeroviai pekuapy hemimbou re.
- ³⁹ Peikuaa pota 'rã kuaxia para re tekove marã e'ŷ peupity aguã. Ha'e va'e re ma xerekorã mombe'ua oĩ,
- ⁴⁰ ha'e rami teĩ xere ma ndapejuxei tekove peupity aguã.
- ⁴¹ — Xee ma avakue pe rive nanhemboyvate ukai.
- ⁴² Ha'e rã peẽ kuery reko ma xee aikuaa porã, mba'eta pendere noĩ Nhanderuete peayvua.
- ⁴³ Xeru rery rupi aju teĩ peẽ kuery naxemovaõi. Ha'e rã amongue guery rupi rive ou ramo ma pemovaõ 'rã.
- ⁴⁴ Mba'exa tu pejerovia ta xere? Mba'eta joupe rive penhemboeko porã uka, ha'e rã Nhanderuete peteõ'i va'e pe ma napenhemboeko porã uka potai.
- ⁴⁵ — Pexa'ã eme Nhanderuete renonde xee pendere xeayvu aguã re. Moisés pemboete va'e ae 'rã ijayvu pendere.
- ⁴⁶ Ha'e rami avi anhetõ ri Moisés ombopara va'ekue perovia va'e rire xere voi pejerovia 'rãgue, xerekorã re ae ombopara rire.
- ⁴⁷ Ha'e gui Moisés ombopara va'ekue ndaperoviai vy ma mba'exa tu perovia ta xeayvu?

6

Mateus 14.13-21; Marcos 6.30-44; Lucas 9.10-17

- ¹ Ha'e va'e rire Jesus oaxa ový Galiléia yupa Tiberíades 'epy va'e rupi.
- ² Heta avi oo hupive, mba'eta oexa rire hexa pyrã ojapo rã imba'eaxy va'e omongueraa py.
- ³ Ha'e gui peteõ yvyty re Jesus oẽ vy guemimbo'e kuery reve oguapypa.
- ⁴ Ha'e jave ovaõ rai'i ma judeu kuery pegua ngaru Páscoa oikoa ára.
- ⁵ Ha'e gui Jesus oma'õ vy heta ou rã oexa vy aipoe'i guemimbo'e Filipe pe:
— Magui nda'u jajogua 'rã mbojape apy ikuai va'e kuery peguarã? — he'i.
- ⁶ Jesus po rami ijayvu ombovai rã oenduxe vy, mba'eta oikuaa ae ma ojapo va'erã.
- ⁷ Ha'e ramo Filipe aipoe'i:
— Peteõ-teĩ mbojape ho'u aguã ma neĩ duzentos ára repy re mbojape jajogua ramo voi 'rã nda'evei — he'i.
- ⁸ Ha'e gui hemimbo'e mboae Simão Pedro ryvy André aipoe'i Jesus pe:
— Ha'e rami avi pe py ma oĩ peteõ kunumi peteõ nhiruõ mbojape cevada guigua ha'e mokoõ pira'i oguereco va'e. Ha'e rami teĩ nda'evei 'rã ko heta ete ikuai va'e peguarã — he'i.
- ¹⁰ Jesus ombovai:
— Aipopeje ha'e javive oguapypa aguã — he'i. Ha'e py ma nhuñdy porã ramo ha'e javi oguapypa. Ha'e py rã nda'u cinco mil avakue ikuai.
- ¹¹ Ha'e gui peteõ nhiruõve mbojape Jesus ojopy vy oguerovy'a Nhanderuete. Ha'e gui mae ma ombojoja uka pavõ pe. Pira'i voi ha'ekue rami ju ombojoja uka.
- ¹² Ha'e gui ha'e javive hevyatãmba ma ramo Jesus aipoe'i guemimbo'e kuery pe:
— Pemono'õmba ju hembyrekue ojeavyky rei e'ŷ aguã — he'i.
- ¹³ Ha'ekue rami ha'e kuery ojapo vy ha'e javi vy doze varai omonyõ peteõ nhiruõ mbojape gui hembyre va'ekue.
- ¹⁴ Ha'e gui ha'e py ikuai va'e ma hexa pyrã Jesus ojapo rã oexa vy aipoe'i joupe-upa:
— Anhetõ ae peva'e oiko ra'e profeta ko yvy re ou 'rã va'ekue — he'i okuapy.
- ¹⁵ Ha'e rami vy ogueraaxe okuapy nguvixaverã. Ha'e rami teĩ Jesus oikuaa vy ojepe'a vy oëve ový yvyty re.
- Mateus 14.22-33; Marcos 6.45-51*
- ¹⁶ Pytû'i jave hemimbo'e kuery oguejy oje'oivy yupa peve.
- ¹⁷ Ha'e py ma ojou peteõ kanoã hovaigua re oaxa aguã Cafarnaum tetã katy. Pytû are ma va'eri Jesus ndoui teri ha'e kuerya py.
- ¹⁸ Ha'e gui ha'e kuery oo jave yai opu'ã-pu'ã, yvytu oipeju atã ramo.
- ¹⁹ Yy rembe gui cinco, seis quilômetro rãnda'u ha'e kuery oo ma jave kanoã katy Jesus ou jekuaa yy áry rupi oguata vy. Ha'e nunga hemimbo'e kuery oexa vy onhemondyipa.
- ²⁰ Ha'e ramo Jesus aipoe'i:

— Penhemondyi eme, xee rima — he'i.

²¹ Ha'e ramo hemimbo'e kuery ovy'a vaipa reve oupi kanoã py. Ha'e rire'ive ovaẽmba ma ooxeague py.

Jesus ae mbojape nhomoingo riaearã oikoa re ijayvuague

²² Ha'e gui ko'ẽ jevy heta va'e kuery yupa rembe re optya va'ekue ima'endu'a peteĩ kanoã kyri'i va'e anho ha'e py ituiague re, ha'e va'e py guemimbo'e kuery reve Jesus ndooiague re, mba'eta hemimbo'e kuery ha'e kuery ae'i oje'oi rire.

²³ Ha'e rami jave ma amboae kanoã ju Tiberíades tetã gui ou vy Senhor mbojape oguerovy'a rire ho'u okuapyague katy'iomboja.

²⁴ Jesus guemimbo'e kuery reve ha'e py ndoikovei maa heta va'e kuery oikuua vy ojopy kanoã, ha'e oje'oi Cafarnaum katy oeka vy.

²⁵ Ha'e gui yupa rovaigua re oexa vy oporandu:

— Orembo'ea, araka'e ma tu revaẽ apy?

²⁶ Jesus ombovai:

— Anhetẽ aipoa'e pêvy: Peẽ kuery ma mbojape pe'u ha'e penevyatãmba rire rive xereka, hexa pyrã ajapo rã pexa kuaa porã vy e'ŷ.

²⁷ Penhea'ã eme tembi'u opa va'erã re rive, ha'e rã imarã e'ŷ va'e nhomoingo riaearã re. Ha'e va'e regua ma Ava ra'y ojeapo va'ekue anho 'rã ome'ẽ, mba'eta Tuu oikuua uka hemimbou oikoa — he'i.

²⁸ Ha'e kuery oporandu ixupe:

— Mba'e nunga nda'u rojapo 'rã Nhanderuete oipota va'e rojapo aguã?

²⁹ Jesus ombovai:

— Nhanderuete oipota va'e ma hemimbou re pejeroviaa — he'i.

³⁰ Ha'e ramo ha'e kuery aipoe'ive ju:

— Mba'e nunga hexa pyrã tu rejapo 'rã ha'vy roexa vy ndere rojerovia aguã? Mba'e nunga tu ndee rejapo kuaa?

³¹ Mba'eta nhaneramoĩ kuery ma tekao e'ŷa rupi ikuai vy ho'u raka'e maná, ipara oĩa “Yva gui mbojape ombou ha'e kuery ho'u aguã”, he'ia rami vy.*

³² Ha'e ramo Jesus ombovai:

— Anhetẽ aipoa'e pêvy: Mbojape yva guigua Moisés e'ŷ ombou, Xeru ae pêvy ombou mbojape anhetẽ va'e yva gui.

³³ Mba'eta mbojape Nhanderuetea guigua ma yva gui ou vy yvy re ikuai va'e pe ome'ẽ tekove — he'i.

³⁴ Ha'e ramo ha'e kuery aipoe'i:

— Senhor, eme'ẽ riae orevy ha'e va'e regua mbojape.

³⁵ Jesus ombovai:

— Xee ae ma mbojape tekove me'ëa. Xere ou va'e kuery noenduvei 'rã okaruxea, xere ojerovia va'e ma noenduvei 'rã yuvei.*

³⁶ Xee aipoa'eague rami ae peẽ kuery xerexa teĩ ndapejeroviai.

³⁷ Xevy guarã Xeru ome'ẽ va'ekue-'ekue ma oupa 'rã xere. Ha'e xere ou va'ekue ma ndaipe'avei 'rã xejegui.

³⁸ Mba'eta xee ma yva gui aju Xembouare oipota va'e ajapo aguã, xee aipota va'e'ŷ.

³⁹ Ha'e gui Xembouare oipota va'e ma pova'e, xevy guarã ome'ẽ va'ekue peteïve namokanhyi aguã, ha'e rã opaa ára amboetepa ju aguã.

⁴⁰ Mba'eta Xeru oipota ha'e javive Ta'y oexa kuaa vy hexe ojerovia va'e kuery oupity tekove marã e'ŷ. Ha'e ramo ma xee amboetepa ju 'rã opaa ára.

Yva guigua mbojape omombe'u porãveague

⁴¹ Ha'e gui Jesus “Yva guigua mbojape aiko” he'i rã judeu kuery oendu vy ijayvu rei okuapy hexe.

⁴² Ha'e rami vy aipoe'i joupe-up:

* 6:31 Êxodo 16.4, Neemias 9.15, Salmo 78.24-25 * 6:35 João 4.13,14

— Peva'e Jesus nda'u José ra'y e'ŷ ri? Tuu ha'e ixy ndajaikuai ri ty'y? Mba'exa tu ha'vy "Yva gui aju va'ekue" he'i kuri?

⁴³ Ha'e ramo ma Jesus ombovai:

— Ha'e rami ete jomeme pendeayvu aguā ma nda'evei.

⁴⁴ Mba'eta avave rei ndoui 'rā xere, Xeru Xembouare ndoguerui rā. Ha'e gui opaa ára amboetepa ju 'rā.

⁴⁵ Mba'eta profeta kuery regua ombopara vy "Nhanderuete oeko mbo'e 'rā ha'e kuery ha'e javi", he'iague rami vy Xeru ayvu oendu ha'e oikuua va'e kuery ma ou 'rā xere.*

⁴⁶ Ha'e rami avi avave rei ndoexai Xeru. Petei'i anho oiko hexaare, oña gui aju va'ekue ae.

⁴⁷ Anhetē aipoa'e pēvy: Xere ojerovia va'e re ma tekove marā e'ŷ oī.

— Xee ae mbojape nhomoingove riae aiko.

⁴⁹ Peneramoī kuery ma tekao e'ŷa rupi ikuai vy maná ho'u tei ha'e javive omanomba raka'e.

⁵⁰ Ha'e rā kova'e mbojape yva gui ou va'ekue ho'u va'e ma nomanoi 'rā.

⁵¹ Xee ae mbojape oikove va'e yva gui ou va'ekue. Ha'e va'e regua ho'u va'e ma oiko riae 'rā. Mbojape ko yvy re ikuai va'e moingovearā xee ame'ẽ va'erā ma xerete ae — he'i.

⁵² Ha'e ramo judeu kuery joo rami e'ŷ-e'ŷ ijayvu. Ha'e vy aipoe'i:

— Mba'exa 'rā tu peva'e ngo'o ome'ẽ ja'u aguā?

⁵³ Jesus ombovai:

— Anhetē aipoa'e: Ava ra'y ojeapo va'ekue ro'o gui ndape'ui, ha'e huguy gui ndapey'ui ri ramo pendere noī 'rā tekove.

⁵⁴ Mba'eta xero'o gui ho'u, ha'e xeruguy gui oy'u va'e re ma oī tekove marā e'ŷ, ha'e amboetepa ju 'rā opaa ára.

⁵⁵ Mba'eta xero'o ma tembi'u anhetē va'e, ha'e xeruguy ma oy'u pyrā anhetē va'e.

⁵⁶ Xero'o gui ho'u ha'e xeruguy gui oy'u va'e ma ikuai 'rā xere, ha'e xee aī 'rā ha'e kuery re.

⁵⁷ Xeru xembouare oikove, ha'e hexe xee aikovea rami avi xere okaru va'e oikove 'rā xere.

⁵⁸ Kova'e mbojape yva gui ou va'ekue ma penamoī kuery ho'u va'ekue ramigua e'ŷ, mba'eta ha'e kuery omanomba raka'e. Ha'e rā kova'e mbojape ho'u va'e ma oikove riae 'rā — he'i.

⁵⁹ Ha'e rami Jesus ijayvu Cafarnaum tetā py judeu kuery onhembo'eaty py nhombo'ea py.

Jesus oayvua omombe'u porāveague

⁶⁰ Po rami ijayvu rā hemimbo'e kuery oendu vy heta aipoe'i okuapy:

— Haxy ete rima ijayvua. Mava'e tu oikuua ta?*

⁶¹ Ha'e gui Jesus ma ha'e kuery ndojou porāia oikuua ae vy aipoe'i:

— Peē kuery napendu kuaai va'e ty'y nami xeayvu rā?

⁶² Ha'e rami avi mba'exa 'rā tu peikuua Ava ra'y ojeapo va'ekue ouague katy ju ojeupi ov y rā pexa vy?

⁶³ Mba'eta Nhe'ẽ ae rima nhomoingovearā oī, ha'e rā nhandro'o ma ha'e rami aguā ndovarei. Nami xeayvu vy Nhe'ẽ ha'e tekove re rima xeayvu kuri.

⁶⁴ Ha'e rami avi peē kuery regua amongue ndapejeroviai — he'i. Po rami Jesus ijayvu mba'eta oikuua ae mava'e kuery pa hexe ndojeroviai, ha'e mava'e pa ijopy uka nhemiarā oikoa.

⁶⁵ Ha'e rami vy aipoe'ive ju:

— Ha'e nunga rupi xee aipoa'e kuri pēvy: "Avave rei ndoui 'rā xere, ha'e rami aguā Xeru ome'ẽ e'ŷ ramo."

Jesus-a gui heta ojepe'aague

⁶⁶ Ha'e rami rā hemimbo'e kuery heta ojepe'a, hexeve nda'ikuaxevei vy.

⁶⁷ Ha'e ramo guemimbo'e kuery doze ikuai va'e pe ju Jesus oporandu:

— Ha'vy peē kuery voi teve pejope'axe avi xegui?

* 6:45 Isaías 54.13 * 6:60 Mateus 13.10-17

- ⁶⁸ Simão Pedro ombovai:
 — Senhor, mava'e rupive 'rā tu roo? Mba'eta ndee ndeayvua anho tekove marā e'ŷ me'ēa.*
- ⁶⁹ Ha'e gui ore kuery roguerovia, roikuua porā ete ndee Nhanderuete remimbou Iky'a e'ŷ va'e reikoa — he'i.
- ⁷⁰ Ha'e ramo Jesus ombovai:
 — Ha'e rami avi peẽ kuery doze aiporavo va'ekue regua peteĩ re ma anha oĩ — he'i.
- ⁷¹ Po rami ijayvu Simão Iscariotes ra'y Judas reko re, mba'eta ha'e va'e ma doze ikuai va'e regua va'eri ijopy uka nhemiarā oiko.

7

Jesus re tyvy kuery ndojeroviai okuapyague

- ¹ Ha'e va'e rire ma Jesus oiko Galiléia yvy rupi. Judéia yvy katy ranhe ndooovei, judeu ruvixa kuery ojukaxe rā.
- ² Ha'e gui ovaẽ rai'i ma judeu kuery pegua ngaru oguy'i py ikuai aguã regua ára.
- ³ Ha'e ramo oĩa py tyvy kuery ou vy aipoe'i ixupe:
 — Tereo ju kova'e tekoa gui judéia katy, neremimbo'e kuery ha'e pygua voi mba'emo rejapo va'e oexa aguã.
- ⁴ Mba'eta avave rei ojekuaa ukaxe vy nhemi rupi ndojapoi 'rā mba'eve. Tove yvy jave rupi toikuua mba'emo rejapo reikovy va'e — he'i okuapy.
- ⁵ Ha'e ramo tyvy kuery ijayvu mba'eta ha'e kuery ae ndojeroviai hexe.*
- ⁶ Ha'e ramo Jesus aipoe'i ha'e kuery pe:
 — Nda'evei, xe'ára novaẽi teri. Ha'e rā peẽ kuery pe ma ára nhavõ ha'evepa rei.
- ⁷ Peẽ kuery re yvy regua kuery nda'ija'e e'ŷi 'rā. Ha'e rā xere ma nda'ija'ei okuapy, teko vai rupi ikuiaia amombe'u ramo.
- ⁸ Tapeo peẽ ae ngarua py. Xee ma ndaa reguai ranhe, mba'eta novaẽi teri xe'ára — he'i.
- ⁹ Ha'e ramo Jesus ijayvu vy opytave ranhe Galiléia py.

Ngarua py Jesus ooague

- ¹⁰ Tyvy kuery ngarua py oje'oipa ma rire mae Jesus voi oo. Ha'e ramo teĩ avave rei pe ndojekuaa ukai guive.
- ¹¹ Ngarua py ma judeu ruvixa kuery oeka okuapy, oporandu guive mamo pa oĩa re.
- ¹² Heta va'e kuery joo rami e'ŷ-e'ŷ ijayvu okuapy heko re, mba'eta amongue ma aipoe'i:
 — Ha'e tu porayyu va'e rima.
 Ha'e rā amboae kuery ma
 — Xevy pe rā nhombotavypa rei oikovy — he'i.
- ¹³ Avave rei nomombe'u porāai guive marā ramo pa oikoa, mba'eta judeu ruvixa kuery gui okyje vy.

Jesus guetarā kuery ojerovia e'ŷ va'e reve jogueroayvu okuapyague

- ¹⁴ Ha'e gui ngaru oikoa mbyte py mae ma Jesus oo templo py nhombo'e vy.
- ¹⁵ Ha'e ramo judeu ruvixa kuery ma nhombo'e rā oendu vy onhemondyipa. Ha'e vy aipoe'i:
 — Mba'exa tu kuaxia para re oĩ va'e oikuaapa, nonhembo'ei va'ekue ri?
- ¹⁶ Jesus ombovai:
 — Xee ma xejegui ae e'ŷ anhombo'e, ha'e rā Xembouare gui aikuua.
- ¹⁷ Ha'e gui Nhanderuete oipotaa rami ikuaxie va'e ma oikuua 'rā Nhanderuete gui pa anhombo'e kuaa, tyrā pa xejegui ae.
- ¹⁸ Mba'eta ojegui ae nhombo'e va'e ma onhembovate ucaa rupi rive 'rā oiko. Ha'e rā imbuare yvatea oikuua ucaa rupi nhombo'e va'e ma anhetē va'e, ha'e hexe noĩ 'rā teko vai.
- ¹⁹ Moisés e'ŷ teve peẽ kuery pegua lei ombopara raka'e? Ha'e ramive ma peẽ kuery neĩ peteĩve ndapejapoi. Mba'e re tu xejukaxe ri?

* 6:68 Atos 4.12 * 7:5 Mateus 10.36; Mateus 10.36

- ²⁰ Ha'e ramo heta va'e kuery aipoe'i:
 — Anha teve rima ndere onhemonde. Mava'e tu ndejukaxe?*
- ²¹ Jesus ombovai:
 — Xee ma peteī mba'e ajapo ramo rive peē kuery penhemondyipa.
- ²² Moisés ma oeja raka'e jopire pemboi aguā. Ha'e rami aguā ma Moisés guigua ete e'ŷ guive, ha'e rā nhaneramōkuery gui ijypy raka'e. Ha'e rami rire sábado ára py teī pemboi 'rā avakue'i pire.
- ²³ Moisés lei ombopara va'ekue rami vy sábado ára py voi avakue'i pire pemboi va'eri mba'e re tu xejou vai ri pekuapy sábado ára py anhomonguerague re?
- ²⁴ Nda'evei joe peikuaa pota aguā mba'emo pexaa rupi rive, ha'e rā anhetē va'e ha'e teko porā rupi anho 'rā ha'eve.

Judeu ruvixa kuery joo rami e'ŷ-e'ŷ ijayvuague

- ²⁵ Amongue Jerusalém pygua kuery aipoe'i:
 — Peva'e e'ŷ nda'u huvixa kuery ojukaxe va'e?
- ²⁶ Mba'exa tu ha'vy pavē oendua py nhombo'e teī avave rei nomokyrirī? Tyrā pa huvixa kuery voi teve oikuua Cristo oikoa rami?
- ²⁷ Nhande kuery ma jaikuua magui pa ha'e oua. Ha'e gui Cristo ou ramo ma avave rei ndoikuuaai 'rā magui pa oua — he'i okuapy.
- ²⁸ Ha'e gui Jesus ma templo py nhombo'e vy aipoe'i:
 — Peē kuery nda'u xekuua, ha'e magui pa ajua peikuaa avi ri ty'y? Ha'e gui xee ma xee ae aipotaa rami rive'ŷ aju. Peē kuery ma ndapeikuuaai ae Xembouare ma anhetē va'eri.
- ²⁹ Ha'e rā xee ma aikuua, mba'eta ixugui aju, ha'e ae xembou ramo — he'i.
- ³⁰ Ha'e ramo ha'e kuery ojopyxe teī avave rei opo nomoī hexe, hi'ára novaēi teri ramo.
- ³¹ Ha'e pygua kuery regua heta ojerovia hexe. Ha'e vy aipoe'i:
 — Cristo ou vy nda'u ojapo 'rā ri hexa pyrā peva'e ava ojapo va'e gui iporāve va'e? — he'i okuapy.
- ³² Ha'e gui fariseu kuery ma heta va'e kuery Jesus ojou porā okuapya oikuua vy sacerdote yvatekueve va'e reve omondouka xondaro kuery ojopy aguā.
- ³³ Ha'e ramo Jesus aipoe'i ha'e kuery pe:
 — Aŷ'i tema aiko teri peē kuery reve. Ha'e gui aa ju ta ma Xembouarea py.
- ³⁴ Ha'e va'e rire peē kuery xereka teī ndaxejoui 'rā, mba'eta xee aa ague py peē kuery peo aguā nda'evei — he'i.
- ³⁵ Ha'e ramo judeu ruvixa kuery joupe-upe ju aipoe'i:
 — Marā katy nda'u ha'e oo 'rā ndajajoui aguā? Tyrā pa grego kuery retā nhande kuery ikuiaia rupi teve oo ta ombo'e vy?
- ³⁶ Mba'e he'i vy nda'u po rami ijayvu: “Xereka teī ndaxejoui 'rā”, ha'e “Xee aa ague py peo aguā nda'evei”, he'i kuri?

Yy imarā e'ŷ va'e re Jesus ijayvuague

- ³⁷ Ngaru opaa ára ma omboeteave ára. Ha'e va'e ára Jesus opu'ã vy aipoe'i:
 — Pendey'uvei va'e peju xea py pey'u.
- ³⁸ Mba'eta xere ojerovia va'e kuery re oiko 'rā kuaxia para re oĩ va'e: “Ipy'a gui oxyry 'rā yy imarā e'ŷ va'e” he'ia rami.*
- ³⁹ Ha'e rami ijayvu Nhe'ẽ re, mba'eta Jesus re ojerovia va'e kuery re Nhe'ẽ oĩ 'rā. Ha'e rā ha'e va'e javé ma Nhe'ẽ nombouai teri, mba'eta Jesus nomboyvateai teri.
- ⁴⁰ Ha'e gui po rami Jesus ijayvu rā heta va'e kuery oendu vy aipoe'i:
 — Ha'e tu anhetē ae profeta oiko — he'i okuapy.
- ⁴¹ Amongue aipoe'i:
 — Ha'e tu Cristo ete rima oiko.
 Ha'e rā amboae kuery ma oporandu:

* 7:20 Mateus 13.53-58; Marcos 3.22 * 7:38 João 4.13,14; Apocalipse 22.1,17

— Cristo nda'u Galiléia gui 'rã ri ou?

⁴² Mba'eta kuaxia re ipara oiny: "Cristo ma Davi ramymino 'rã oiko, ha'e Belém tetã Davi rekoague py ae 'rã itui'i", he'iague.

⁴³ Ha'e rami vy joo rami e'ŷ-e'ŷ oikuua Jesus reko re ijayvu vy.

⁴⁴ Amongue ma ojopyxe teĩ avave rei opo nomoĩ hexe.

Xondaro kuery ojevypa riveague

⁴⁵ Ha'e gui xondaro kuery ojevypa rive ju sacerdote yvatekueve va'e ha'e fariseu kuerya py. Ha'e ramo xondaro kuery ha'e kuery oporandu:

— Mba'e re tu ndaperui?

⁴⁶ Xondaro kuery ombovai:

— Mba'eta ha'e va'e ava ijayvua rami avave rei nda'ijayvui teri — he'i okuapy.*

⁴⁷ Ha'e ramo fariseu kuery aipoe'i:

— Peẽ kuery voi teve penembotavy ra'e?

⁴⁸ Ha'e gui nhanderuvixa kuery e'ŷ vy fariseu kuery regua voi teve ojerovia hexe?

⁴⁹ Ha'e rã heta va'e kuery ma nhandevyguia lei oikuua va'e'ŷ, ayvu vaipy meme ikuai — he'i okuapy.

⁵⁰ Peteĩ ha'e kuery va'e regua ma Nicodemos, Jesus reve jogueroayvu vy oo va'ekue. Ha'e va'e ma oirũ kuery pe oporandu:

⁵¹ — Nhande kuery pegua lei rami vy nda'u ha'eve 'rã ri amongue nhamboayvu porã e'ŷ re nhanhombopaga aguã, e'ŷ vy mba'emo ojapo oikovya re jaikuua pota porã e'ŷ re?

⁵² Irũ kuery ombovai:

— Ndee voi teve Galiléia pygua reiko? Eikuua porã pota reikuua aguã Galiléia gui neĩ peteĩ profeta ndoui 'rãa — he'i okuapy.

⁵³ [Ha'e gui ma peteĩ-teĩ oje'oi ngoo katy.

8

Kunha itavy rei va'e ogueru okuapyague

¹ Ha'e rã Jesus ma Oliveira yvyty katy oo.

² Ko'ẽ rai ramove ma templo katy ju ou. Oĩa py heta va'e kuery voi joguerupa. Ha'e ramo oguapy vy ombo'epa oiny.

³ Ha'e gui Jesus oĩa py lei re nhombo'e va'ety ha'e fariseu kuery ogueru peteĩ kunha itavy reia py ojou pyre. Ha'e rami vy omopu'ã imo'amy teta mbyte py.

⁴ Ha'e vy aipoe'i Jesus pe:

— Porombo'ea, kova'e kunha ma itavya py ojoua ra'e.

⁵ Ha'e gui Moisés nhandevyguia lei ombopara vy aipoe'i raka'e kunha itavy rei va'e ita py jajapipa aguã. Ha'vy ndee, mba'e 're? — he'i okuapy

⁶ oeko a'ã vy hexe ijayvu rei aguã.

Ha'e ramo Jesus yvy re oma'ẽ reve okuã py ombopara oiny yvy re.

⁷ Ha'e kuery oporandu riae ma okuapy ramo mae ma Jesus oma'ẽ. Ha'e vy aipoe'i:

— Pejejavy va'e'ŷ ete peiko va'e ranhe pejapi ita py — he'i.

⁸ Ha'e gui yvy re ju oma'ẽ reve omboparave ju oiny.

⁹ Ha'e rami ijayvu rã ha'e kuery oendu vy opy'apy py oikuua ha'e kuery ae ojejavvy va'ea. Ha'e rami vy peteĩ-teĩ ojepe'a oje'oivy. Tujakueve ranhe oo, ha'e rami py oje'oipa. Opyta va'e ma Jesus anho, ha'e kunha va'e guive, ha'e kuery mbyte py hi'aĩague py ae.

¹⁰ Ha'e gui Jesus oma'ẽ vy avave rei ndoexavei. Kunha va'e anho ho'ame rã oexa vy aipoe'i ixupe:

— Kunha, mamo tu oopa ra'e ndere ijayvu va'ekue? Mava'eve rei teve nanembopagai?

¹¹ Kunha va'e ombovai vy

— Mava'eve rei, Senhor — he'i.

Ha'e ramo Jesus aipoe'i:

* ^{7:46} Mateus 7.28,29

— Xee voi norombopagai 'rā. Tereo ju, ejejavyve eme.]

Jesus queko omombe'u porāveague

¹² Teīgue ju Jesus aipoe'i:

— Xee ma hendy va'e yvy regua kuery moexakāarā. Xerupive ikuai va'e ma pytū rupi ve'ŷ 'rā oiko, mba'eta ha'e kuery re oī 'rā hendy va'e nhomoingovea — he'i.*

¹³ Ha'e gui fariseu kuery aipoe'i:

— Ndee tu nderekō re ae rima ndeayvu ra'e. Ha'e nunga rupi ndeayvua ndovarei.

¹⁴ Jesus ombovai vy aipoe'i ha'e kuery pe:

— Xee ae xerekō re xeayvu teī xeayvua anhetē meme. Mba'eta xee aikuaa magui pa ajuague, ha'e marā katy pa aa 'rāa. Ha'e rā peē kuery ma ndapeikuuai magui pa aju, neī marā katy pa aa 'rāa voi.

¹⁵ Peē kuery ma peikuuai rami rive penhombopagaxe, ha'e rā xee ma avave rei nambopagai.

¹⁶ Ha'e anhombopaga vy voi anhetē rupi meme 'rā anhombopaga, mba'eta xee ma xee ae'ŷ aiko. Xee ha'e Xembouare roiko.

¹⁷ Pendevygua lei re ma ipara oiny: “Mokoī joo rami meme ijayvu ramo 'rāe jaikuua anhetēa”, he'iague.

¹⁸ Xee aikuaa uka porā aikovy xerekō, ha'e Xeru Xembouare voi xekuaa uka — he'i.

¹⁹ Ha'e ramo oporandu okuapy:

— Mamo ha'vy oī Nderu?

Jesus ombovai:

— Peē ndaxekuaia rami avi neī Xeru voi ndapeikuuai. Xee xekuaa va'e rire ma peikuuai avi 'rāgue Xeru — he'i.

²⁰ Ha'e rami ijayvu templo py, perāta ryru oī va'e yvýry oīa py. Ha'e rami teī avave rei ndojopyai, hi'āra novaēi teri ramo.

Heta va'e kuery pe Jesus onhemombe'u teī ndogueroviai okuapyague

²¹ Peteīgue ju aipoe'i:

— Xee ma ajepe'a 'rā apy gui. Ha'e ramo peē kuery xereka teī ndapeoi 'rā xee aa ague py. Ha'e rami 'rāgue py pekanhymba 'rā pejejavyague re — he'i.

²² Ha'e ramo judeu ruvixa kuery aipoe'i:

— Peva'e teve ojejukaxe? Ha'e vy ae ma “Ndapeoi 'rā aa ague py”, he'i ri kuri.

²³ Jesus aipoe'ive ju:

— Peē kuery ma ko yvy rupigua, ha'e rā xee ma pe yvategua. Peē ma kova'e yvy regua, ha'e rā xee ma yvy regua e'ŷ.

²⁴ Ha'e nunga rupi ae xee aipoa'e kuri pekanhymba 'rā pejejavyague re. Mba'eta xee ae aikoa ndaperoviai vy pejejavyague re pekanhymba 'rāe — he'i.

²⁵ Ha'e ramo oporandu okuapy:

— Marā ramigua tu ndee?

Jesus ombovai:

— Mba'e tu jypy'i guive pendevy amombe'u raka'e?

²⁶ Heta mba'e areko peē kuery reko re xeayvu aguā peikoague repy ame'ē vy guarā. Ha'e rami teī aŷ ma ko yvy re ikuai va'e pe amombe'u aikovy Xembouare anhetē va'e gui aendu va'e anho — he'i.

²⁷ Ha'e rami ijayvu teī ha'e kuery ndoikuuai Nguu re ae ijayvua.

²⁸ Ha'e gui Jesus aipoe'ive ju:

— Ava ra'y ojeapo va'ekue peupi ma pekuapi vy peikuuai 'rā marā ramigua pa aikoa, ha'e xejegui ae mba'eve ndajapoia, mba'eta Xeru xembo'ea rami anho xeayvu aikovy.

²⁹ Xembouare ma oiko riae xereve. Ndaxerejai 'rā xee ae'i, ha'e oipotaa rami anho ajapo ramo — he'i.

³⁰ Ha'e rami ijayvu ramo heta ojerovia hexe.

* 8:12 João 1.4; Salmo 36.9

- ³¹ Ha'e gui judeu kuery hexe ojerovia va'e pe Jesus aipoe'i:
 — Xeayvua rupi riae ri peiko vy anhetē ete 'rā xeremimbo'e peiko.
- ³² Ha'e rami vy peikuua 'rā anhetē va'e, ha'e anhetē va'e pendejora 'rā escravo pendekuaia gui — he'i.
- ³³ Ha'e ramo ha'e kuery aipoe'i:
 — Ore ma Abraão ramymino orekuai vy neī peteīgueve ma escravo orekuai va'e'ŷ.
 Mba'e re tu escravo ve'ŷ orekuai aguā re ri ndeayvu?
- ³⁴ Jesus ombovai:
 — Anhetē aipoa'e: Teko vai rupi ikuai va'e ma teko vai pegua escravo meme ikuai.
- ³⁵ Ha'e escravo ikuai va'e ma ndoiko riae 'rā hereko ro py, ha'e rā ta'y anho.
- ³⁶ Ha'e rami avi Ta'y pendejora ramo ojora pyre ete 'rā pendekuaia.
- ³⁷ Ha'e gui xee ma aikuua ae peē kuery Abraão ramymino pendekuaia. Ha'e rami teī pendere xeayvu noī ramo xejukaxe pekuapy.
- ³⁸ Xee ma xeayvu mba'emo Xerua py aexa va'ekue re anho. Ha'e rā peē kuery ma penderu mba'emo ojapo rā pexa va'ekue ae pejapo — he'i.
- ³⁹ Ha'e ramo ha'e kuery
 — Oreru ma Abraão ae — he'i okuapy.
- Jesus ombovai:
 — Anhetē ete ri Abraão ra'y kuery pendekuaia va'e rire pejapo 'rāgue Abraão ojapoague rami.
- ⁴⁰ Ha'e rami 'rāgue py peē kuery xejukaxe pekuapy, anhetē va'e Nhanderuete gui aendu va'e amombe'u ramo rive. Ha'e rā Abraão ma ha'e ramigua e'ŷ ojapo raka'e.
- ⁴¹ Peē kuery ma penderu ojapo va'e ramigua ae pejapo va'e — he'i.
 Ha'e kuery aipoe'i:
 — Ore kuery ma tuu heta rei va'e'ŷ orekuai. Peteī'i oreru oiko. Ha'e va'e ma Nhanderuete ae.
- ⁴² Jesus ombovai:
 — Anhetē ri Nhanderuete re penderu va'e rire ma xerayvu 'rāgue pekuapy, mba'eta xee ma Xeruetea gui aju vy apy ju aiko. Xee ae aipotaa rami e'ŷ aju va'ekue, ha'e rā Xeru xembou ramo ma aju.
- ⁴³ Mba'e re tu peē kuery ndapeikuuai ri xeayvua? Ndapeikuuai mba'eta xeayvu pendu kuaa va'erā e'ŷ ae.
- ⁴⁴ Peē kuery ma anha guigua pendekuaia, hexe ae penderu va'e vy. Ha'e rami vy ae anha oipotaa rami pendekuaia. Mba'eta anha ma jypy'i giuve jojukaa rupi tema oiko, anhetē va'e rupi ndoikoi, hexe anhetē va'e noī ae ramo. Ha'e vy ijapu 'rā oikovy gueko rami vy, mba'eta ijapu va'e ae, ha'e ijapu va'e ru oiko.*
- ⁴⁵ Ha'e nunga rupi ae anhetē va'e re xeayvu ramo peē kuery ndaperoviai.
- ⁴⁶ Mava'e nda'u peē kuery regua peikuua ajejavyague? Anhetē meme aipoa'e teī mba'e re tu ndaperoviai?
- ⁴⁷ Nhanderuete guigua kuery anho 'rā onhe'ẽ rendu. Ha'e nunga rupi ae peē kuery naxenhe'ẽ rendui, mba'eta Nhanderuete guigua e'ŷ pendekuaia — he'i.
- ⁴⁸ Judeu kuery aipoe'i:
 — Anhetē'ŷ ri nda'u aiporo'ea Samaria pygua ha'e anha reveguia reikoa?
- ⁴⁹ Jesus ombovai:
 — Xee ma anha reveguia e'ŷ aiko, ha'e rā Xeru amboete va'e. Ha'e rā peē kuery ma naxemboetei.
- ⁵⁰ Ha'e rami avi xee ma avave rei pe nanhemboyvate ukai. Peteī oiko xemboyvatearā, ha'evea rami joe oikuua pota va'e ae.
- ⁵¹ Anhetē aipoa'e: Xeayvua rupi ikuai va'e ma nomanoi 'rā raka'eve rā peve guarā — he'i.
- ⁵² Ha'e ramo judeu kuery aipoe'i:

* 8:44 1 João 3.7-10

— Aÿ ma anhetẽ ete roikuua ma anha revegua reikoa. Mba'eta Abraão ha'e profeta kuery ha'e javive omano raka'e. Ha'e rã ndee ma “Xeayvua rupi ikuai va'e nomanoi 'rã raka'e rã peve guarã” 're.

⁵³ Ndee nda'u nhaneramoï Abraão omano va'ekue gui ndeyvateve ri? Profeta kuery voi omanomba raka'e. Marã ramigua tu ndee renhemingo?

⁵⁴ Jesus ombovai:

— Xee ae anhemboyvate uka va'e rire ma xeyvatea mba'everã ndovarei 'rãgue. Ha'e rã xemboyvatearã ma Xeru ae oiko. Ixupe ma peẽ kuery “Nhanderuete” peje

⁵⁵ va'eri peikuua va'e'ÿ. Ha'e rã xee ma aikuua. Xee “Ndaikuaai” ha'e va'e rire peẽ kuery rami avi 'rãgue xeapu. Xee ma aikuua, ha'e ijayvua ajapo aikovy guive.

⁵⁶ Ha'e gui peneramoï Abraão ma ov'y'a raka'e xerekorã ixupe oikuua ukaa rã oikuua vy. Ha'e ma oikuua vy xererovy'a ma voi raka'e — he'i.

⁵⁷ Judeu kuery aipoe'i:

— Ndee tu neĩ cinquenta ma'etÿ teri ndererekoi va'eri rexma va'e ty'y Abraão?

⁵⁸ Jesus ombovai:

— Anhetẽ aipoa'e: Abraão oiko e'ÿ mbove voi xee aiko ae ma — he'i.

⁵⁹ Ha'e ramo ha'e kuery ojopy ita ojapi aguã, teĩ Jesus ojepe'a ov'y templo gui.

9

Peteĩ ava ára revegua e'ÿ va'e Jesus omoma'ë jevyague

¹ Ha'e gui Jesus oo vy oexa peteĩ ava ára revegua e'ÿ ma voi oiko va'ekue.

² Ha'e ramo hemimbo'e kuery oporandu:

— Orembo'ea, mava'e nda'u ojejavy raka'e peva'e ára revegua e'ÿ ma voi itui'i aguã: ha'e ae, tyrã pa tuu kuery ojejavy?

³ Jesus ombovai:

— Ha'e va'e ojejavyague gui e'ÿ oiko, neĩ tuu kuery gui e'ÿ guive. Hexe Nhanderuete rembiapo ojekuaa aguã rima oiko.

⁴ Ha'e gui nhande kuery ma ára oĩ teri reve 'rã jajapo Xembouare ojapo uka va'e, mba'eta pytû ou ma oiny, avave rei nomba'lepoavei aguã.

⁵ Kova'e yvy re aiko teria ja yvy regua moexakãa aiko — he'i.

⁶ Ha'e rami ijayvu ma vy onyvõ yvy re. Ha'e rami vy guendyry py yvy omoakÿ va'ekue oikyty ára revegua e'ÿ rexma re.

⁷ Ha'e vy aipoe'i:

— Tereo ejeovai yy omboty pyre Siloé hery va'e py — he'i. Ha'e va'e tery ma “Omondouka pyre” 'ea. Ha'e gui ava oo vy ojeovai, ha'e gui oma'ë porã ju ma ouvy.

⁸ Ha'e gui oo katy'i ikuai va'e ha'e mba'emo ojerure oiny rã oexa va'ety kuery oexa okuapy. Oexa vy oporandu joupe-up:

— Peva'e e'ÿ teve mba'emo re ojerureaty py oĩ va'ekue?

⁹ Amongue ma

— Ha'e rima — he'i.

Ha'e rã amboae kuery ma

— Any teve, ha'e ae merami rive ta'vy — he'i.

Ha'e ramo ha'e ae aipoe'i:

— Xee ae ri — he'i.

¹⁰ Ha'e ramo oporandu okuapy:

— Mba'eda tu aÿ rexma ri reikovy?

¹¹ Ava va'e ombovai:

— Peteĩ ava Jesus hery va'e ma yvy omoakÿ vy oikyty kuri xerexa re. Ha'e vy aipoe'i xevy: “Tereo ejeovai Siloé yy omboty pyre py”, he'i. Ha'e ramo aa ajeovai, ha'e gui aÿ reve aexa porã ju — he'i.

¹² Oporandu ju okuapy:

— Mamo tu ha'e oĩ?

Ombovai:

— Xee ndaikuaai — he'i.

Fariseu kuery omboayvuague ára revegua e'ŷ va'ekue

¹³ Ha'e gui fariseu kuerya py ju ha'e kuery ogueraa ára revegua e'ŷ ma voi itui'i va'ekue, mba'eta Jesus yvy omoakŷ vy omoma'ëa ára ma sábado.

¹⁵ Ha'e gui fariseu kuery ju oporandu marã rami vy pa oma'ëa re.

Ha'e ramo ava va'e ombovai:

— Xerexa re yapo oikyty ha'e ajeovaipa rire ma ama'ë kuri — he'i.

¹⁶ Ha'e ramo fariseu kuery va'e regua amongue aipoe'i:

— Ha'e nunga apoare ta'vy Nhanderuete guigua e'ŷ teve, mba'eta sábado ára pygurarã oeja pyre rami e'ŷ oiko.

Ha'e rã amboae kuery ma aipoe'i:

— Mba'exa 'rã tu heko vai va'e ojapo kuaa guĩ ramigua hexa pyrã? — he'i okuapy. Ha'e rami vy joo rami e'ŷ-e'ŷ ijayvu okuapy.

¹⁷ Tēgue ju ha'e kuery oporandu ára revegua e'ŷ va'ekue pe:

— Nemoma'ëare tu marã ramigua oikoa ndee reikuua?

— Profeta — he'i.

¹⁸ Judeu ruvixa kuery ndogueroviai okuapy ára revegua e'ŷ ae itui'i raka'eague. Ha'e rami vy oenoï uka tuu kuery.

¹⁹ Tuu kuery pe oporandu okuapy:

— Peva'e ma nhi'ë pendera'y “Ára revegua e'ŷ ma voi itui'i” pejeague? Marã rami vy tu aÿ oma'ë?

²⁰ Ha'e ramo tuu kuery ombovai:

— Ore ma roikuua orera'y oikoa, ha'e ára revegua e'ŷ ma voi itui'iague.

²¹ Ha'e rã marã rami vy pa oma'ë jevyä ma ore kuery ndoroikuuaai, neñ mava'e pa imoma'ëare voi ndoroikuua. Orera'y ma tuja ma ramo ixupe ae 'rã peporandu. Ha'e ae vy 'rãe ma onhemombe'u kuaa — he'i okuapy.

²² Tuu kuery ma judeu ruvixa kuery gui okyje vy ha'e rami ijayvu, mba'eta huvixa kuery ijayvu ma voi onhembo'eatýgui omoxë aguã amongue Jesus ae Cristo oikoa rami omombe'u va'e.

²³ Ha'e nunga rupi ae tuu kuery “Ha'e ma tuja ma, ixupe ae peporandu” he'i.

²⁴ Ha'e gui tēgue ju huvixa kuery oenoï ava ára revegua e'ŷ va'ekue. Ha'e vy aipoe'i:

— Nhanderuete rembojerovia va'e rupi emombe'u porã, mba'eta ore ma roikuua ha'e va'e ava heko vai va'ea — he'i.

²⁵ Ha'e ramo ombovai:

— Xee ma ndaikuaai heko vai va'ea. Peteñ mba'e tema aikuua, mba'eta ára revegua e'ŷ aiko va'ekue ri aÿ ma oma'ë — he'i.

²⁶ Ha'e kuery oporanduve ju:

— Mba'e tu ojapo ndevy? Marã rami vy tu nemoma'ë?

²⁷ Ombovai:

— Xee ma amombe'u ae ma kuri teñ peñ kuery ndaperoviai. Mba'e re tu peñ kuery penduxe vai ri ha'ekue'-ekue'i amombe'u rã? Tyrã pa peñ kuery voi hemimbo'e pendekuaixe? — he'i.

²⁸ Ha'e rami rã ijayvu rei okuapy hexe. Ha'e vy aipoe'i:

— Ndee rima hemimbo'e, ha'e rã ore kuery ma Moisés remimbo'e orekuai.

²⁹ Mba'eta Moisés reve Nhanderuete ijayvu raka'e, roikuua porã. Ha'e rã ha'e va'e ava ma neñ maguigua pa oikoa voi ndoroikuuaai — he'i okuapy.

³⁰ Ava va'e ombovai:

— Peñ kuery tu “Maguigua pa oikoa ndoroikuuaai” peje, xemoma'ë va'eri.

³¹ Mba'eta jaikuua ae ma Nhanderuete noendui 'rãa heko vai va'e ojerurea. Ha'e rã Nhanderuete renonde ojererokyjea rupi ha'e oipotaa rami oiko va'e ojerurea ma oendu 'rã.

³² Yvy itui ypy'i guive nanhaendui teri ára revegua e'ŷ ma voi itui'i va'ekue moma'ëa omombe'ua rã.

³³ Ha'e nunga rupi ha'e va'e ava ma Nhanderuete guigua e'ŷ va'e rire mba'eve rei ndojapo kuaai 'rāgue — he'i.

³⁴ Ha'e rā ha'e kuery ombovai:

— Ndee tu ndetui'i guive rejeyavypa ma voi va'ekue ri aŷ ma orembo'e ta? — he'i okuapy. Ha'e rami vy omoxē.

Ára revegua e'ŷ va'ekue pe Jesus ojekuaa ukaague

³⁵ Jesus oendu ára revegua e'ŷ va'ekue omoxē okuapyague. Ha'e rami vy ovaexī vy oporandu:

— Ndee tu rejerovia ri Ava ra'y ojeapo va'ekue re?

³⁶ Ava va'e ombovai:

— Senhor, mava'e tu oiko, hexe ajerovia aguā?

³⁷ Jesus aipoe'i:

— Ndee ma rexma re'amy, xee ndereve xeayvu va'e ae ha'e — he'i.

³⁸ Ombovai:

— Senhor, xee ajerovia — he'i vyve omboete.

³⁹ Ha'e gui Jesus aipoe'i:

— Xee ma kova'e yvy re aju peteĩ-teĩ oikoague repy ojopy aguā, ha'e rami vy ára revegua e'ŷ ikuai va'ekue oma'ẽmba ju, ha'e oma'ẽ porā va'ekue ndoexavei aguā — he'i.

⁴⁰ Ha'e ramo fariseu kuery regua ijyvýry ikuai va'e oporandu ixupe:

— Ha'e rami vy ore kuery voi teve ára revegua e'ŷ orekuai?

⁴¹ Jesus ombovai:

— Ára revegua e'ŷ ete pendekuai va'e rire penderekovaia noī 'rāgue. Ha'e rā “Ore roma'ẽ porā” peje vy ma penderekovaia noī tema.*

10

Vexai're opena porā va'e oikoa re Jesus ijayvuague

¹ — Anhetē aipoa'e pêvy: Amongue vexai' kora rokē rupi e'ŷ, amboae rupi oike va'e ma imonda ha'e jojuka rive-rive va'e anho.

² Ha'e rā okē rupi oike va'e ma vexai' kuery re opena va'e ete.

³ Ha'e va'e pe ma okē rarõa oipe'a'rā, ha'e vexai' kuery voi oendu kuaa 'rā okuapy ijayvua. Ha'e ramo guymba kuery hery rupi meme oenoī reve oguenoẽmba 'rā heravy oka py.

⁴ Guymba kuery oguenoẽmba ma vy henonde 'rā oo, ha'e rā hymba kuery ma ijayvua oendu kuaa vy oo 'rā hakykue.

⁵ Ha'e rā opena va'ety e'ŷ ou ramo ma vexai' kuery ndooi 'rā hakykue, onhamba 'rā ixugui, ijayvua noendu kuaai vy — he'i.

⁶ Ha'e rami Jesus ijayvu mba'emo re ombojoja vy. Ha'e rami teĩ hendua kuery noendu kuaai.

⁷ Ha'e ramo Jesus omombe'u porāve ju:

— Anhetē aipoa'e pêvy: Xee ae vexai' kora rokē aĩ.

⁸ Xee aiko e'ŷ mbove ma imonda ha'e jojuka rive va'e kuery anho ou raka'e. Ha'e va'e kuery ayvu ma vexai' kuery noendui.

⁹ Ha'e rā xee ma okē aĩ. Xea rupi oike va'e kuery oo jepe 'rā. Oike 'rā, ha'e gui oẽ ju vy ojou 'rā ho'u va'erā.

¹⁰ Imonda va'e ou 'rā mymba kuery oipe'a, ojuka ha'e omomba aguā rive. Ha'e rā xee ma aju ha'e kuery oupity aguā tekove, ha'e opa mba'e py ikuai porā aguā.

¹¹ — Xee ma vexai' re opena porā va'ety rami aiko. Mba'eta opena porā va'ety ma guymba kuery re ome'ẽ 'rā guekove ae.

¹² Ha'e rā peráta re rive omiba'epo va'e ma vexai' re opena ete va'ety e'ŷ, neĩ vexai' ja e'ŷ guive. Ha'e rami vy aguara'i guaxu ou rā ha'e oexa vy onha rive 'rā vexai' kuery oejapa vy. Ha'e ramo aguara'i guaxu mymba kuery oguero'a vy omondyipa 'rā imondovy opa rupi.

* ^{9:41} Lucas 18.9-14; Apocalipse 3.17

¹³ Peráta re rive omba'eapo va'e ma onha 'rã veva'i kuery re'ŷ ae openave vy.

¹⁴ Ha'e rã xee ma veva'i re opena porã va'ety aiko. Aikuua xerymba kuery, ha'e rã ha'e kuery voi xekuaa,

¹⁵ Xeru xekuaa, ha'e xee Xeru aikuua rami ae avi. Ha'e rami vy xerymba kuery re ame'ẽ 'rã xerekove.

¹⁶ — Ha'e gui xerymba kuery areko avi kora mboae py, kova'e py e'ŷ. Ha'e va'e kuery avi 'rã aru, xeayvu oendu avi ramo. Ha'e rami vy peteĩ kora py 'rã ha'e javive ikuai, ha'e peteĩ'i avi 'rã oiko opena va'ety.

¹⁷ — Ha'e nunga rupi ae Xeru xerayvu, mba'eta ame'ẽ 'rã xerekove, ha'e gui ajopy jevy aguã.

¹⁸ Xegui avave rei ndoipe'aai 'rã xerekove. Xee ame'ẽxe'a'i py ae 'rã ame'ẽ. Mba'eta xepo'aka xerekove ame'ẽ, ha'e gui ajopy ju aguã, ha'e rami Xeru ojapo uka rire.

Joo rami e'ŷ-e'ŷ judeu kuery ijayvu okuapyague

¹⁹ Ha'e rami Jesus ijayvu rã judeu kuery oendu vy joo rami e'ŷ-e'ŷ ijayvu okuapy.

²⁰ Ha'e kuery va'e regua heta aipoe'i:

— Evoko va'e re tu anha rima onhemonde ra'e na'inhakã porãvei aguã rami. Mba'e re tu pejapyxaka ri ijayvua re?

²¹ Ha'e rã amongue ma aipoe'i:

— Ha'e rami avi anha reveguia ma nda'ijayvui 'rã ha'e rami. Tyrã pa anha omoma'ẽ kuaa ri ty'y oma'ẽ e'ŷ va'ekue?

Jesus pe oporandu ju okuapyague

²² Yro'y py oiko ngaru Jerusalém py, templo ojapopaague re ima'endu'aa aguã regua.

²³ Ha'e gui Jesus oiko templo roka rupi oguy puku Salomão 'epy va'e py.

²⁴ Ha'e jave judeu kuery ijyvýry oupa vy oporandu ixupe:

— Raka'e peve tu ropëxa rei aguã rami oremonoingo ta? Cristo ete ri reiko vy enhemombe'u porã.

²⁵ Jesus ombovai:

— Xee ma anhemombe'u porã teĩ peẽ kuery ndaperoviai. Mba'emo porã Xeru rery rupi ajapo aikovy va'e voi oikuua uka marã ramigua pa aikoa.

²⁶ Peẽ kuery ndapejeroviai mba'eta xerymba veva'i regua e'ŷ pendekuai vy.

²⁷ Mba'eta xerymba veva'i kuery ma oendu 'rã xeayvu, ha'e rã xee ma peteĩ-teĩ aexa kuaa. Ha'e kuery oo 'rã xerakykue.

²⁸ Ha'e kuery pe ame'ẽ tekove marã e'ŷ. Ha'e ramo ha'e kuery nomanovei ma 'rã, ha'e avave rei ndoipe'aai 'rã xepo gui.

²⁹ Xevy pe Xeru omboaxa va'ekue ma pavë gui ipo'akave. Ha'e Xeru po gui ma avave rei ndoipe'aai 'rã.

³⁰ Xee ha'e Xeru reve ma peteĩ'i ae roiko — he'i.

³¹ Ha'e gui teĩgue ju judeu kuery ojopy ita ojapi aguã.

³² Ha'e ramo Jesus aipoe'i:

— Pexaa rupi mba'emo porã ajapo reta ma, Xeru ojapo uka va'e meme. Ha'e nungakue regua mava'e re tu xeapipaxe ita py?

³³ Judeu kuery ombovai:

— Mba'emo porã rejapo va'ekue re'ŷ ri rojapipaxe ita py, ha'e rã Nhanderuete re ndeayvu vaiague re, mba'eta ndee ava rive reiko va'eri Nhanderuete rami renhemoingo ramo — he'i okuupy.

³⁴ Ha'e ramo Jesus aipoe'i:

— Pêvygua lei re aipo nde'i ri ty'y: “Xee aipoa'e tuuete regua pendekuaia rami”?*

³⁵ Nhanderuete ombopara uka va'ekue ndoaxa rivei 'rã. Ha'e nunga rupi ha'e va'e kuery pe ijayvu vy “Tuuete” he'i rire

* 10:34 “Tuuete” he'ia ma joe oikuua pota va'e kuery re ijayvu vy (Salmo 82.6).

³⁶ mba'e re tu ha'vy "Ndeayvu vai" peje xevy Nhanderuete Ra'y aikoa rami anhemombe'u ramo? Mba'eta xee ma Xeru guemimbourā xemoī va'ekue, ko yvy re xembou aguā.

³⁷ Ha'e gui mba'emo Xeru ojapo uka va'e xee ndajapoī va'e rire ha'evea rami 'rāgue xere ndapejeroviaia.

³⁸ Ha'e rami avi ha'e nunga ajapo ramo ha'e nunga oikoa ri jepe perovia 'rāgue, xere ae ndapejeroviai teī. Ha'e rami vy peikuua aguā xere Xeru oĩa, ha'e Xeru re xee aĩa — he'i.

³⁹ Ha'e rami ijayvu ramo ha'e kuery ojopyxe teī oo jepe ju ha'e kuery po gui.

⁴⁰ Peteīgue ju Jordão yakā rovaigua re Jesus oo João nhomongarai ypy'i oikovyague py. Ha'e py ranhe oiko.

⁴¹ Ha'e ramo heta ju oje'oí oĩa py. Ha'e rami vy joupe-upē aipoe'i okuapy:

— João ma neī peteīgueve hexa pyrā ndojapoī va'ekue. Ha'e rā kova'e rekorā re ijayvuague ma anhetē meme raka'e — he'i okuapy.

⁴² Ha'e rami vy ha'e py heta ete ojerovia hexe.

11

Jesus omboete jevyague Lázaro

¹ Ha'e gui Maria ha'e tyke Marta rekoa Betânia py ma ikovy Lázaro imba'eaxy oupy.

² Maria ma Senhor py re heakuā porā va'e oikyty vy o'a py ae omombiru va'erā.

³ Ha'e gui Lázaro reindy kuery aipoe'i uka Jesus pe:

— Senhor, orekyvy reayvu ete va'e imba'eaxy oupy — he'i uka.

⁴ Ha'e nunga Jesus oendu vy aipoe'i:

— Ha'e va'e teko axy ma ijukaarā e'ŷ oiko, ha'e rā Nhanderuete yvatea ha'e Ta'y yvatea avi ojekuua aguā — he'i.

⁵ Jesus oayvu ete Marta, ikypy'y ha'e ikovy Lázaro.

⁶ Ha'e rami vy Lázaro imba'eaxy oupya oikuua teī mokoī ára ranhe opytave oĩa py.

⁷ Ha'e gui mae ma

— Jaje'oí ju Judéia yvy katy — he'i guemimbo'e kuery pe.

⁸ Ha'e ramo hemimbo'e kuery oporandu:

— Orembo'ea, kuee'i judeu kuery ita py ndeapipaxe va'ekue ri ha'ekue katy ju va'e ty'y rejeyv ta?

⁹ Jesus ombovai:

— Doze hora e'ŷ ri ty'y peteī ára oĩ? Ha'e ara py teri amongue oguata vy nonhepyxangai 'rā, hexakāa ko yvy regua oexa vy.

¹⁰ Ha'e rā pyávy ma oguata vy onhepyxanga 'rāe, mba'eta hexe noī hexakāa — he'i.

¹¹ Ha'e rami ijayvu ma vy aipoe'ive ju:

— Nhaneirū Lázaro ma oke oupy. Ha'e ramo xee aa ta amomyī — he'i.

¹² Ha'e ramo hemimbo'e kuery aipoe'i:

— Senhor, oke vy 'rā okuera — he'i okuapy.

¹³ Ha'e rami Jesus ijayvu va'eri Lázaro omano maa re ijayvu vy. Ha'e rā hemimbo'e kuery ma okea re rive ijayvua rami oikuua.

¹⁴ Ha'e ramo ma Jesus omombe'u porāve:

— Lázaro omano ma.

¹⁵ Ha'e pendere ama'ẽ vy avy'a ha'e py ndaikoiague re, mba'eta ha'e rami rā 'rāe pejerovia. Jaje'oí ma'vy ituia py — he'i.

¹⁶ Tomé Dídimo hery va'e aipoe'i oirū kuery pe:

— Jaje'oí ha'vy nhande kuery voi hexeve nhamano aguā — he'i.

¹⁷ Ha'e gui Jesus ovaẽ rā irundy ára ma ojapo Lázaro onhono porāa ague.

¹⁸ Betânia tekua ma Jerusalém gui três quilômetro rānda'u opyta.

¹⁹ Marta ha'e Maria okyvy re ipy'a vai ramo heta ou judeu kuery ombopy'a guaxu aguā.

²⁰ Marta ma Jesus ou oinya oikuua vy oo ovaexī aguā. Ha'e rā ikypy'y Maria ma ngoo py ranhe opyta.

²¹ Ha'e gui Marta aipoe'i Jesus pe:

- Senhor, apy reiko va'e rire xekyvy nomano jepei 'rāgue.
- ²² Ha'e rami avi xee aikuaa opa mba'e re Nhanderuete pe rejerure ramo ha'e ojapo 'rāa ndevy — he'i.
- ²³ Jesus aipoe'i:
- Ndekyvy ma onhemboete ju 'rā.
- ²⁴ Ha'e ramo Marta ma
- Tá, xee aikuaa ma opaa ára onhemboete ju 'rāa, omboetepaa jevy jave — he'i.
- ²⁵ Ha'e gui Jesus aipoe'i:
- Xee ae ma anhomboete ha'e anhomingoove va'e. Xere ojerovia va'e omano teī oikove jevy 'rā.
- ²⁶ Ha'e rami avi ha'e javive xere oiko ha'e ojerovia va'e ma nomanoi 'rā raka'eve rā peve guarā. Rerovia pa xeayvua?*
- ²⁷ Kunha va'e ombovai:
- Tá Senhor, xee arovia ndee Nhanderuete Ra'y Cristo ko yvy re rejuvenar 'rā va'ekue reikoa — he'i.
- ²⁸ Ha'e rami ijayvupa vy ojepe'a ranhe, ha'e oenoī okypy'y Maria. Ha'e vy ixupe anho'i aipoe'i:
- Nhanembo'ea ovaē ma, ha'e nerenoī — he'i.
- ²⁹ Ikyvy' y oendu vyve opu'ā ha'e oo oña katy.
- ³⁰ Mba'eta Jesus ma tekaoa py ete'i novaē teri, Marta oexaague py teri oī.
- ³¹ Ha'e gui judeu kuery Maria mbopy'a guaxuarā hoo py ou va'ekue oexa okuapy Maria ojapura reve opu'ā ovy rā. Ha'e rami vy ha'e kuery voi oje'oi hupive, "Ikyvy ituia katy po oo ojae'o aguā" he'i vy.
- ³² Ha'e gui Jesus oña py Maria ovaē vy oexa vyve guenapy'ā re oī henonde. Ha'e vy aipoe'i:
- Senhor, apy reiko va'e rire xekyvy nomano jepei 'rāgue — he'i.
- ³³ Ha'e ojae'o rā, ha'e judeu kuery hupive ou va'ekue ha'e javi ojae'o avi ramo Jesus oexa vy oendu opy'a re omboaxya, ndovy'ai guive.
- ³⁴ Ha'e rami vy oporandu:
- Mamo tu penhono porā raka'e?
- Ha'e kuery ombovai:
- Senhor, eju ha'vy exa — he'i.
- ³⁵ Jesus voi ojae'o.
- ³⁶ Ha'e ramo judeu kuery oexa vy
- Ha'e oayvu ete va'e ty'y — he'i okuapy.
- ³⁷ Ha'e rā amongue ma aipoe'i:
- Ha'e ma ára reveguia e'ŷ omoma'ē va'ekue nda'evei ri ty'y kova'e voi omano aguā gui ogueraa jepe aguā? — he'i.
- ³⁸ Jesus teīgue ju opy'a re oendu omboaxya. Ha'e vy oo onhono porāa ague peve. Peteī itakua py onhono porāa, ha'e imbotyarā omoīa ita tuvixa va'e.
- ³⁹ Ha'e ramo Jesus aipoe'i:
- Peipe'a ita — he'i.
- Ha'e ramo omano va'ekue reindy Marta aipoe'i:
- Senhor, heakuā ma rima, irundy ára ma rire.
- ⁴⁰ Jesus ombovai:
- Xee aipo nda'e i ri ty'rā, rejerovia vy Nhanderuete po'akaa rexā 'rāa? — he'i.
- ⁴¹ Ha'e rami rā oipe'aa ita. Jesus yva re oma'ē vy aipoe'i:
- Xeru, xee roquerov'y'a, mba'eta rendu xeayvua.
- ⁴² Xee ma aikuaa ae xeayvua rendu riae. Ha'e rami avi nami xeayvu heta va'e kuery oikuaa aguā ndee ae xembouague — he'i.
- ⁴³ Ha'e rami ijayvu ma rire ojapukai reve aipoe'i:
- Lázaro, eē ke oka py — he'i.

* 11:26 João 5.21-29, 6.40

⁴⁴ Ha'e ramove omano va'ekue oẽ ouvy ipy ha'e ipo ojokuaague reve, ha'e hova panhero py onhovāa va'ekue reve.

Ha'e ramo Jesus aipoe'i:

— Pejora, tove too — he'i.

⁴⁵ Ha'e gui judeu kuery Maria-a py ou va'ekue ma ha'e rami Jesus ojapo rã oexa vy heta ojerovia hexe.

⁴⁶ Ha'e rã amboae kuery ma oje'oi vy fariseu kuery pe omombe'upa Jesus ojapo va'ekue.

Huvixa kuery Jesus ojuka aguã re jogueroayvuague

⁴⁷ Ha'e nunga sacerdote yvatekueve va'e ha'e fariseu kuery oendu vy nhomboatypa nhomboayvu va'ety kuery reve. Ha'e vy aipoe'i:

— Mba'e tu nhande kuery jajapo jakuapy? Mba'eta ha'e va'e ava ma hexa pyrã anho ojapo oikovy.

⁴⁸ Xapy'a rei nanhapenai ramo ma ojerovia pavẽ 'rã hexe. Ha'e ramo Roma pygua kuery ha'e nunga oendu vy ou vy omomba 'rã nhambojeroviaaty ha'e nhande kuery voi — he'i okuapy.

⁴⁹ Ha'e kuery regua peteĩ ma Caifás hery va'e, ha'e va'e ma'etõ re sacerdote yvateve va'e oĩ. Ha'e va'e aipoe'i:

— Peẽ kuery ma mba'eve ndapeikuuaai,

⁵⁰ neĩ ndapeikuua potai guive, mba'eta nhande kuery nhamanombaa 'rãgue py ha'eveve peteĩ ava omano aguã heta va'e kuery rekovia — he'i.

⁵¹ Ojee ae gui e'ŷ ha'e rami ijayvu. Ha'e rã ha'e va'e ma'etõ re sacerdote yvateve va'e oĩ vy Nhanderuete gui ae ijayvu Jesus heta va'e kuery rekovia omano aguã re.

⁵² Ha'e guetarã kuery rekovia anho e'ŷ guive omano, ha'e rã Nhanderuete ra'y kuery yvy jave re ikuai va'e ha'e javi omoingo aguã peteĩ tete rami.

⁵³ Ha'e gui ha'e va'e ára guive ha'e kuery onhembopy'a okuapy ojuka aguã.*

⁵⁴ Ha'e nunga Jesus oikuua vy judeu kuery ikuai rupi ve'ŷ oiko, ha'e rã teko a e'ŷa katy'i peteĩ tetã Efraim hery va'e oĩ va'e py oo. Ha'e py ranhe opyta guemimbo'e kuery reve.

⁵⁵ Ha'e gui judeu kuery pegua ngaru Páscoa ára ovaẽ rai'i ma ramo Jerusalém katy heta oje'oi teko a ikuai va'e gui, Páscoa oiko rã guarã ojeky'a'o aguã.

⁵⁶ Ha'e py ma oeka okuapy Jesus. Ha'e rami vy templo py ikuai vy aipoe'i joupe-up:

— Mba'exa ndee reikuua? Jesus nda'u ndoui 'rã ngarua py? — he'i.

⁵⁷ Sacerdote yvatekueve va'e ha'e fariseu kuery aipoe'i amongue mamo pa Jesus oikoa oikuua vy omombe'u aguã, ha'e kuery ojopy aguã.

12

Mateus 26.6-12; Marcos 14.6-8

¹ Mboapy meme ára teri oata Páscoa ára ovaẽ jave ma Betânia katy ju Jesus oo, Lázaro omanoague gui omboete ju va'ekue reko a py.

² Ha'e rã Jesus pe ojapo okuapy peteĩ ngaru. Marta ojara oikovy tembi'u. Ha'e rã Lázaro voi ha'e kuery reve oĩ okarua py.

³ Ha'e gui Maria ogueru meio quilo heakuã porã va'e nardo gui anho ojapo pyre, hepyve ete va'e. Ha'e rami vy Jesus py re oikyty heakuã porã va'e, ha'e o'a py ju omombiru. Opy ha'e javi rupi omoeakuãmba.

⁴ Ha'e rami rã hemimbo'e kuery regua Judas Iscariotes ijopy uka nhemiarã va'e aipoe'i:

⁵ — Mba'e re tu heakuã porã va'e novendei ra'e trezentos ára repy re, iporiaukue'i pe hepykue ome'ẽ aguã? — he'i.

⁶ Ha'e rami ijayvu iporiaukue'i oipytyvõxe vy e'ŷ, mba'eta imonda va'e oiko, ha'e oirũ kuery peráta ryru re opena va'e vy ojeupe guarã oipe'a kuerei 'rã peráta omoĩ mbyre.

⁷ Ha'e ramo ixupe Jesus aipoe'i:

— Tove ri, mba'eta guĩ rami xerete omoeakuã ma voi xenhono porãa rã guarã.

* 11:53 Mateus 26.1-5; Marcos 14.1,2; Lucas 22.1,2

⁸ Iporiaukue'i ma ikuai riae 'rã peẽ kuery reve. Ha'e rã xee ma pendereve ndaiko riae 'rã.

Lázaro avi ojukaxe okuapyague

⁹ Heta judeu kuery ma Jesus ha'e py oĩa oikuaa vy jogueru ha'e katy. Jesus oexaxe vy anho e'ŷ oo, oexaxe avi Lázaro omanoague guiomboete ju va'ekue.

¹⁰ Ha'e rã sacerdote yvatekueve va'e ma Lázaro voi ojukaxe okuapy,

¹¹ mba'eta judeu kuery Lázaro oexaxe vy oje'oi va'ekue heta ma ojevy Jesus re ojerovia reve.*

Mateus 21.1-9; Marcos 11.1-10; Lucas 19.28-38

¹² Ko'ẽ jevy ngaru oĩa py ou va'ekue heta oendu okuapy Jerusalém katy Jesus ou oinya.

¹³ Ha'e rami vy pindo rogue ojaya reta jogueravy ovaexí aguã oje'oi vy. Ojapukai reve aipoe'i:

— Iporã ete! Ima'endu'a porãmbly Israel kuery ruvixaverã Senhor rery rupi ou va'e — he'i oje'oviv.*

¹⁴ Ha'e gui Jesus ma mburika'i ojou uka va'ekue áry ou, kuaxia para re oĩa rami vy:

¹⁵ “Sião pygua kuery, pekyje eme, mba'eta mburika ra'y áry ou ma oiny penderuvixaverã”, he'iague rami.*

¹⁶ Hemimbo'e kuery ha'e nunga oexaxe teĩ ndoikuuai ranhe. Jesus ombovatea ju rire mae ma oikuaa, mba'eta ima'endu'a okuapy kuaxia para re hekorã re ijayvuague re, omovaẽ porã okuapy rã oexaxe rire.

¹⁷ Mba'eta heta ikuai va'ekue Lázaro omanoague gui Jesus omopu'ã ju ha'e onhono porãague gui oenoīague py. Ha'e kuery ha'e nungakue omombe'u ramo ae

¹⁸ heta va'e kuery oje'oi ovaexí aguã, ha'e nunga hexa pyrã ojapoague oendu rire.

¹⁹ Ha'e ramo fariseu kuery ma aipoe'i okuapy joupe-up:

— Opa mba'e jajapo va'e mba'everã ndovarei, mba'eta hakykue oje'oi pavẽ.

Amongue grego kuery Jesus oexaxe okuapyague

²⁰ Amongue grego kuery ngarua py ombojerovia aguã jogueru avi va'ekue.

²¹ Ha'e gui ha'e va'e kuery oje'oi hemimbo'e Filipe oĩa py, Galiléia regua Betsaida pygua ramo. Ha'e vy aipoe'i okuapy ixupe:

— Oreruvixa, ore kuery voi roexaxe Jesus — he'i.

²² Ha'e ramo Filipe oo vy André pe ranhe omombe'u. Ha'e rami vy André reve Jesus pe ju omombe'u.

²³ Ha'e ramo Jesus ombovai:

— Aŷ ovaẽ ma Ava ra'y ojeapo va'ekue ombovatea ju aguã ára.

²⁴ Anhetê aipoa'e pêvy, trigo ra'yí yvy py ndo'ai ha'e nomanoi vy peteĩ ha'yí'i ae 'rã optyta. Ha'e rã omano vy ma hi'a retave 'rã.

²⁵ Guekove oayvu va'e kuery ma omokanhý 'rã. Ha'e rã ko yvy re ikuai reve guekove ndoayvui va'ekue ma ojou 'rã tekove marã e'ŷ.*

²⁶ Xerembiguai ikuaike va'e toje'oi xerakykue, mamo rã xee aikoa py xerembiguai avi ikuai aguã. Ha'e gui xerembiguai ramo ikuai va'e ma Xeru ombovate 'rã.

²⁷ — Aŷ ma xepy'a py aendu ndavy'aia. Ha'e rami vy mba'e ha'e nda'u xee? “Xeru, xereraa jepe ke kova'e hora gui” ha'e 'rã nda'u? Any, mba'eta kova'e hora pyguarã ae xee aju rire.

²⁸ Ha'e rami 'rãgue py “Xeru, eikuua uka ke nderery yvatea” ha'e — he'i.

Ha'e ramo onhendu peteĩ ayvu yva gui:

— Xee aikuua uka ae ma xerery yvatea, ha'e aikuua ukave ju 'rã guive — he'i va'e.

²⁹ Ha'e va'e ayvu ma heta va'e kuery ikuai va'e oendu vy aipoe'i:

— Yapu.

* 12:11 Lucas 16.27-31 * 12:13 Salmo 118.26 * 12:15 Zacarias 9.9-10 py oĩa rami vy pindo rogue heta va'e kuery ogueru vy oexaxe uka nguvixa po'akaa oguerovy'aa, ha'e rã kavaju áry 'rãgue py mburika'i áry huvixa ou vy oexaxe uka onhemo'yvy'i ha'e ha'e evepa rei'ia. * 12:25 Mateus 16.24-28; Apocalipse 2.10, 12.11

Ha'e rā amboae kuery ma
— Anjo rima ijayvu ra'e — he'i.
³⁰ Ha'e gui Jesus ma aipoe'i:
— Pova'e ayvu ma xee anho aendu aguā e'ŷ onhendu, ha'e rā peē kuery peguarā.
³¹ Aŷ ovaẽ ma ko yvy regua kuery opaga aguā oikuua ukaa ára, ha'e ko yvy regua kuery rerekoo avi 'rā oitya.
³² Mba'eta ko yvy gui xereupia ramo ha'e javi regua 'rā aru xejee — he'i.
³³ Ha'e rami ijayvu, marā rami pa omano 'rāa re ijayvu vy.
³⁴ Ha'e ramo heta va'e kuery oporandu:
— Ore kuery ma roikuua lei re oĩa rami vy Cristo ou vy oiko riae 'rāa. Mba'exa tu ha'vy ndee aipo're Ava ra'y ojeapo va'ekue yvy gui oupia 'rāa rami? Mava'e tu “Ava ra'y ojeapo va'ekue” 'rea? — he'i okuapy.
³⁵ Jesus aipoe'i:
— Aŷ'i ma hendy va'e oiko teri pendereve. Peiko kuaa ke pendereve hendy va'e oĩa ja, pytū penderupity e'ŷ aguā, mba'eta pytū rupi ikuai va'e ma ndoikuuai marā katy pa ooa.
³⁶ Hendy va'e pendereve oiko teri reve pejerovia hexe, hendy va'e ra'y kuery peiko aguā — he'i. Ha'e rami Jesus ijayvupa ma vy ojepe'a ovy, ha'e ndojexa ukavei ha'e kuery pe.

Jesus re judeu kuery ndojeroviai okuapya re ijayvua

³⁷ Ha'e kuery oexaa rupi hexa pyrā ojapo reta teĩ ndojeroviai okuapy hexe,*
³⁸ profeta Isaías aipoe'iague ojeupity aguā: “Senhor, mava'e tu oguerovia 'rā oreayvua? Mava'e kuery pe tu reikuua ukaa 'rā ndepo'akaa?” he'iague rami.*
³⁹ Mba'eta ha'e kuery ndojeroviai ae, Isaías aipoe'ia rami vy:
⁴⁰ “Ha'e kuery rexamboguepa, amoakā ratā guive, ha'e kuery guexa py mba'eve oexa e'ŷ aguā, ha'e opy'a py mba'eve oendu e'ŷ aguā, ojeko rerova rā araa jepe aguā.”*
⁴¹ Ha'e rami Isaías ijayvu Jesus ipo'aka aguā oikuua ma voi vy. Ha'e vy ae hekorā re ijayvu.
⁴² Ha'e rami avi huvixa kuery heta ojerovia hexe teĩ okyje vy onhenhomí guive, onhembo'eaty gui fariseu kuery omoxē gui.
⁴³ Ha'e kuery ma avakue pe rive ojejou porā uka, Nhanderuete pe 'rāgue py.

Gueko re peteigue ju Jesus ijayvuague

⁴⁴ Ha'e gui Jesus ijayvu atā reve aipoe'i:
— Xere ojerovia va'e ma xere anho e'ŷ ojerovia, ha'e rā Xembouare re avi.
⁴⁵ Xerexa va'e kuery ma Xembouare avi oexa.
⁴⁶ Mba'eta xee ma ko yvy regua moexakāarā aju, xere ojerovia va'e pytū rupi ve'ŷ ikuai aguā.
⁴⁷ Ha'e gui amongue xeayvu oendu teĩ ndojapoi va'e ma xee nambopagai 'rā. Mba'eta xee aju ko yvy re ikuai va'e araa jepe aguā, ambopaga aguā e'ŷ.
⁴⁸ Ha'e rami avi oiko ae ma xere ndojeroviai ha'e xeayvua ndojapoi va'e mbopagaarā. Xeayvu amombe'u va'ekue ae 'rā ojapo opaa ára opaga aguā rami.
⁴⁹ Mba'eta xee ma xejegui e'ŷ xeayvu. Xeru Xembouare ae oikuua uka xeayvu aguā, ha'e amombe'u va'erā.
⁵⁰ Ha'e ijayvua ma tekove marā e'ŷ me'ëa, xee aikuua. Ha'e rami ae xee xeayvua voi, mba'eta Xeru xembo'ea rami anho xeayvu.

13

Guemimbo'e kuery py Jesus ojoiaque

¹ Páscoa ára py ngaru oiko e'ŷ mbove Jesus oikuua ovaẽ ta maa ko yvy gui nguua katy ju oo aguā ára. Ojeupega kuery yvy re teri optytave va'era oayvu etea rupi oexa uka oayvua opa peve.
² Ha'e kuery okaru teri okuapy reve, Simão Iscariotes ra'y Judas py'a re anha omoi Jesus ojopy uka nhemi aguā.

* 12:37 João 1.10,11 * 12:38 Isaías 53.1 * 12:40 Isaías 6.10

³ Ha'e rā Jesus ma oikuaa Tuu opa mba'e ipo py omboaxapaa. Oikuaa avi Nhanderuetea gui ou rire ha'ea py ju oo 'rāa.

⁴ Ha'e rami vy okaru oinya gui opu'ā vy omboi okamixa puku, ha'e peteī ajukue ojopy vy ojokua oku'a rupi.

⁵ Ha'e rami vy hy'a py yy omoī vy ojoi oiny guemimbo'e kuery py, ha'e gui omombiru ju ajukue oku'a rupi ojokua va'ekue py.*

⁶ Ha'e gui Simão Pedro oña py ovaē ramo aipoe'i:

— Senhor, ndee rejoi ta va'e ty'y xepy?

⁷ Jesus ombovai:

— Mba'emo aÿ ajapo va'e ndereikuuaai rire teī raka'eve rā reikuua 'rā — he'i.

⁸ Ha'e ramo Pedro aipoe'i:

— Ndee nderejoi 'rā xepy.

Jesus ombovai:

— Xee ndepy ndajoi ri ramo mba'eve ndererekoi 'rā xereve — he'i.

⁹ Ha'e ramo Pedro aipoe'i:

— Senhor, xepy anho'i e'ŷ ejoi, ha'e rā xepo ha'e xeakā ha'e javi rupi guive.

¹⁰ Jesus aipoe'i ixupe:

— Ha'e rami avi amongue ojaupa ma va'ekue opy anho ojoi uka teī ha'eve, nda'iky'avei vy. Peē kuery voi napendepy'a ky'avei ma aÿ, va'eri ha'e javive e'ŷ ta'vy — he'i.

¹¹ Mba'eta ha'e oikuaa ae mava'e pa ijopy uka nhemiarā oikoa. Ha'e vy ae “Ha'e javi e'ŷ napendepy'a ky'ai” he'i.

Mba'e re pa guemimbo'e kuery py ojoiague Jesus omombe'u porāveague

¹² Ha'e kuery py ojoiipa ma rire omoī ju okamixa, ha'e mesa py ju oī. Ha'e vy oporandu:
— Peikuaa pa guĩ rami ajapoague?

¹³ Mba'eta peē kuery ma xevy “Orembo'ea” ha'e “Senhor” peje. Anhetē ae aipopeje, mba'eta ha'e ae aiko.

¹⁴ Ha'e gui xee penembo'ea ha'e Senhor aiko va'eri pendepy ajoí rire ma peē voi 'rā pejoi peteī-teī py.*

¹⁵ Mba'eta guĩ rami ajapo rombo'e aguã ha'ekue rami avi peē kuery voi peteī-teī pe pejapo aguã re.

¹⁶ Anhetē aipoa'e pêvy: Tembiguai kuery ma opatō gui yvateve va'e'ŷ, ha'e imbou pyre voi imbauare gui yvateve va'e'ŷ.

¹⁷ Ha'e nunga peikuaa vy ha'e rami ri pendekuai vy pêvy'a ete 'rā.

¹⁸ — Peē kuery ha'e javive reko re'ŷ guive xeayvu, mba'eta aikuua xerembiporavo peteī-teī reko. Ha'e rami avi ojeupity 'rāe kuaxia re oī va'e: “Xereve okaru oiny va'ekue regua peteī opu'ā xerovai”, he'iague.*

¹⁹ Ha'e nunga oiko e'ŷ mbove xee amombe'u ma voi pêvy, ojeupity ramo xee ae aikoa perovia aguã.

²⁰ Anhetē aipoa'e pêvy: Xeremimbou kuery amongue omovaē vy ma xee avi xemovaē. Ha'e xemovaēa ma Xembouare avi omovaē.

Peteīgue ju ijopy uka nhemiarā Jesus omombe'uague

²¹ Pova'e nunga re Jesus ijayvu vy oendu nda'evei etea. Ha'e vy omombe'u porāve:

— Anhetē aipoa'e pêvy: Peē kuery va'e regua peteī xejopy uka nhemi 'rā — he'i.*

²² Ha'e ramo hemimbo'e kuery joe-joe rive oma'ẽ, mava'e re pa ijayvua oikuaa e'ŷ vy.

²³ Jesus yvýry oī hemimbo'e kuery regua oayvuve va'e.

²⁴ Ha'e va'e pe ma Simão Pedro okuã py ojapo “Eporandu mava'e ete pa” he'ia rami.

²⁵ Ha'e ramo ha'e va'e hemimbo'e ma Jesus pexo re ojekove'i reve oporandu:

* ^{13:5} Ha'e kuery reko rami vy oo py ipoua kuery ovaē ramo hoo va'e omovaē vy ogueru ruka 'rā yyojepyei aguã, tape rupi yvy ku'i rupi ou rire. Amongue py peteī tembiguai ojoi 'rā ipy (Gênesis 18.4, 19.2, 24.32, 43.24, Juízes 19.21, Lucas 7.44). * ^{13:14} Lucas 22.24-27; Filipenses 2.5-8

* ^{13:18} Salmo 41.9 * ^{13:21} Mateus 26.20-25; Marcos 14.17-21; Lucas 22.21-23

— Senhor, mava'e tu?

²⁶ Jesus ombovai:

— Mbojape ra'ykue hy'a py amoakŷ va'ekue ame'ēa va'e ae 'rā — he'i. Ha'e rire'ive mbojape ra'ykue ojopy vy omoakŷ, ha'e ome'ē Simão Iscariotes ra'y Judas pe.

²⁷ Ha'e va'e ma mbojape ho'u ramove ipy'a re onhemonde Satanás.

Ha'e ramo ixupe Jesus aipoe'i:

— Mba'emo rejapoxe va'e ke emboare eme — he'i.

²⁸ Ha'e rami ijayvu rā okarua py amboae kuery ikuai va'e oendu va'eri ndoikuuai okuapy mba'erā pa ijayvua.

²⁹ Judas ma ha'e kuery peráta re opena va'e ramo amboae kuery “Ngaru pygumarā ojogua aguā re po ijayvu” he'i, ha'e e'ŷ vy “Iporiaukue'i pe mba'emo ome'ē aguā po omondouka” he'i tei.

³⁰ Ha'e ramo Judas mbojape ho'upa vyve opu'ā ovvy. Ha'e jave ma pytū ma.

Jajoayvu aguā re ijayvuague

³¹ Judas ojepe'a ramove Jesus aipoe'i:

— Aŷ ma ovaē ma Ava ra'y ojeapo va'ekue omboyvatea aguā, ha'e xere vy Nhanderuete yvatea ojekuaa avi aguā.

³² Ha'e gui xere vy Nhanderuete yvatea ojekuaa ramo ma xee voi xemboyvate 'rā ojea py ae, xemboyvate voi 'rā guive.

³³ — Xera'y kue'iry, aŷ'i ma aiko teri pendereve. Araka'eve'i rā peẽ kuery xereka 'rā pekuapy. Aŷ pêvy aipoa'e avi judeu ruvixa kuery pe aipoa'eague rami: “Peẽ kuery voi ndapeoi 'rā aa ague py” ha'e.

³⁴ Ha'e gui mba'emo pyau ajapo uka pêvy: Pejoayvu peteĩ-tei, xee roayvua rami ae avi peẽ kuery voi pejoayvu aguā.

³⁵ Pejoayvua pavē oexa vy 'rāe oikuaa xeremimbo'e kuery pendekuaia.*

Mateus 26.31-35; Marcos 14.27-31; Lucas 22.31-34

³⁶ Ha'e ramo Simão Pedro oporandu:

— Senhor, mamo tu reo ta?

Jesus ombovai:

— Xee aa ague py ma ndee ndereoi ranhe 'rā. Raka'eve ramo mae 'rā reo xerakykue — he'i.

³⁷ Ha'e ramo Pedro oporanduve ju:

— Mba'e re tu nda'evei aŷve aa aguā nderupive? Xevy pe ha'evepa rei nderekovia ajejuka uka aguā voi.

³⁸ Jesus ombovai:

— Anhetē ri nda'u rejekuka uka 'rā xerekovia? Anhetē aipoa'e ndevy, mboapykue uru ava ojapukai e'ŷ mbove renhemombe'u 'rā xekuaa e'ŷa rami — he'i.

14

Hebreus 10.19,20

¹ — Pendep'y a re toĩ eme nda'eveia. Pejerovia tema Nhanderuete re, xere avi tema pejerovia.

² Mba'eta xeru ro py ma heta oĩ tekوارā, ha'e aa ta areko katu pendekuai aguā. Ha'e rami e'ŷ va'e rire xee amombe'u ma voi 'rāgue pêvy.

³ Ha'e gui aa vy pendekoarā areko katupa rire aju ju 'rā rogueraa aguā xea py, xee aikoa py peẽ voi pendekuai aguā.*

⁴ Ha'e peẽ kuery peikuua ae ma aa aguā katy tape oo va'e — he'i.

⁵ Ha'e ramo Tomé aipoe'i:

— Senhor, ore ma ndoroikuuai mamo pa reo taa. Marā rami vy 'rā tu roikuua tape?

⁶ Jesus ombovai:

— Xee ae ma tape, anhetē va'e ha'e tekove. Avave rei ndooi 'rā Xerua py xereve'ŷ vy.

* 13:35 1 João 3.11-18 * 14:3 1 Tessalonicenses 4.16,17; Hebreus 11.16

⁷ Peẽ kuery anhetẽ ri xekuaa vy Xeru voi 'rã peikuaa. Ha'e rami avi aŷ gui voi peikuaa, ha'e pexa ma guive — he'i.

⁸ Ha'e ramo Filipe aipoe'i:

— Senhor, exa uka na Nderu. Ha'e rami rã ha'eve ma 'rã orevy.

⁹ Jesus ombovai:

— Filipe, yma ma ri tu ojapo peẽ kuery reve aikoague va'eri ndaxekuaai teri va'e ty'y? Xerexa va'e ma Xeru avi oexa.* Mba'e re tu aipo're ri ndee: "Exa uka na Nderu orevy" 're?

¹⁰ Ndereroviai va'e ty'y Xeru re xee aĩa, ha'e Xeru xere oĩa? Ha'e ayvu amombe'u va'e voi ma xejeguigua e'ŷ, ha'e rã Xeru xere oĩ va'e ae ojapo oikovy mba'emo.

¹¹ Perovia na Xeru re aĩa, ha'e Xeru xere oĩa. Ha'e rami e'ŷ vy mba'emo ajapo va'e ri jepe perovia.

¹² — Anhetẽ aipoa'e pêvy: Xere ojerovia va'e kuery ma mba'emo ajapo va'ekue ramigua ju 'rã ojapo. Iporâve va'e voi 'rã ojapo, Xerua py xee aa ma rire.

¹³ Ha'e xerery rupi mba'emo re pejerure ramo ajapopa 'rã, Ta'y re vy Tuu yvatea ojekuaa aguã.

¹⁴ Xerery rupi mba'emo re pejerure ramo xee ajapo 'rã.

¹⁵ Peẽ xerayvu vy pejapo 'rã ajapo uka va'ekue.

Nhanembopy'a guaxuarã ombou aguã re ijayvuague

¹⁶ — Ha'e xee ajerure 'rã Xeru pe ombou aguã Penembojoyvyarã mboae, peẽ kuery reve oiko riae va'erã.

¹⁷ Ha'e va'e ma Nhe'ẽ anhetẽ va'e kuaa ukaa.* Ha'e va'e ma ko yvy regua kuery ojee nomoĩ kuaai 'rã, mba'eta ndoexai neĩ ndokuuaai guive. Ha'e rã peẽ kuery ma peikuaa ma, mba'eta pendereve oiko, ha'e pendereve oiko aguã.

¹⁸ Xee ma ndoroeja rivei 'rã, aju ju 'rã pendereve aiko aguã.

¹⁹ Yvy regua kuery ma ndaxerexavei ranhe 'rã. Ha'e rã peẽ kuery ma xerexa 'rã. Xee aikove ramo peẽ kuery voi peikove 'rã.

²⁰ — Ha'e va'e ára peikuaa ete 'rã Xeru re aĩa, ha'e peẽ kuery xere peĩa, ha'e gui xee peẽ kuery re aĩa guive.

²¹ Ajapo uka va'ekue ojee omoĩ ha'e ojapo ete va'e kuery ma xerayvu. Ha'e xerayvua kuery ma Xeru rembiayvu ikuai, ha'e xee voi ayvu vy ajekuaa uka 'rã ha'e kuery pe — he'i.

²² Ha'e ramo Judas mboae Iscariotes e'ŷ va'e aipoe'i:

— Senhor, mba'exa tu orevy anho rejekuaa uka ta, yvy regua kuery pe any va'eri?

²³ Jesus ombovai:

— Xerayvua kuery ma ikuai 'rã xeayvua rupi. Ha'e ramo ma Xeru oayvu 'rã, ha'e roju 'rã ha'e kuery re roĩ aguã.

²⁴ Ha'e rã ndaxerayvui va'e ma xeayvua rupi e'ŷ 'rã ikuai. Ha'e rami avi xeayvu pendu va'e ma xee ae guigua e'ŷ guive, ha'e rã Xeru Xembouare ayvu.

²⁵ — Po ramigua re xeayvu pendereve teri aiko reve.

²⁶ Ha'e rã Nhe'ẽ Ky'a E'ŷ Penembojoyvyarã xerery rupi Xeru ombou va'erã ma opa mba'e re 'rã penembo'e, ha'e penemoma'endu'a 'rã xeayvuague ha'e javi re.

²⁷ Pendevy pe aeja ta mby'a porã, xeguigua mby'a porã ae 'rã amboaxa pendevy. Ha'e nunga mby'a porã ma yvy re ikuai va'e nome'ẽ kuaai. Ha'e nunga rupi pendepy'a re toĩ eme nda'eveia, pekyje eme guive.

²⁸ — Pendu ma pêvy "Aa ta, ha'e gui aju ju 'rã pendea py" ha'e ramo. Ha'e gui peẽ kuery anhetẽ xerayvu va'e rire pevy'a 'rãgue "Xerua py xee aa ta" ha'e rã pendu vy, mba'eta Xeru ma xegui yvateve.

²⁹ Ha'e nunga ma xee amombe'u ma voi oiko e'ŷ mbove, ojeupity rã pejerovia aguã.

³⁰ — Nda'evevei ranhe xeayvuve aguã pêvy, mba'eta ou ma ko yvy regua kuery rerekaoa. Ha'e ma mba'eve ndoguerekoi xereve,

* 14:9 João 10.30; Colossenses 2.9 * 14:17 João 7.37-39, 16.7-14; Atos 2.1-4; 1 João 2.27

³¹ teĩ ha'e rami aiko 'rã ko yvy re ikuai va'e oikuua aguã Xeru ayvua, ha'e ajapo aikovya ha'e ojapo uka va'e. Pepu'ã ma ha'vy, jaje'oi apy gui.

15

Uva'y ha'e hakã reombojojaague

- ¹ — Xee ma uva'y anhetẽ va'e, ha'e rã Xeru ma ity re opena va'e.
- ² Ha'e gui hakã xere oĩ va'eri ndai'ai va'e ma ha'e ojayapa 'rã. Ha'e rã hi'a va'e ma ojaya pa'ũ-pa'ũ 'rã hi'a retave aguã.
- ³ Peẽ kuery ma hakã omoatyrõ mbyre rami ma pendekuai, ayvu pêvy amombe'ua py ha'eve va'e romoingo rire.
- ⁴ Peĩ atã xere, ha'e rã xee ma aĩ 'rã pendere. Mba'eta hakãgue rive ndai'ai 'rã ojegui ae, hi'y re oĩ e'ŷ vy. Ha'e rami ae avi peẽ kuery voi xere e'ŷ vy hakã hi'a e'ŷ va'e rami 'rã pendekuai.
- ⁵ Mba'eta xee ma uva'y, ha'e rã peẽ kuery ma hakã. Amongue xere oĩ, ha'e ha'e kuery re xee aĩ ramo hi'a porã 'rã, ha'e rã xere'ŷ vy ma mba'eve ndapejapoi 'rã.*
- ⁶ Xere noĩ va'e kuery ma hakãgue rami 'rã omomboa ipirupa aguã. Ha'e rire amongue ojopy vy tata py ju 'rã omombo okaipa aguã.
- ⁷ Xapy'a rei xere peĩ atã, ha'e pendere xeayvuague oĩ ramo ma peipota va'e re pejerure ramo ojapoa 'rã.
- ⁸ Hakã hi'a reta va'e rami pendekuai ramo 'rãe ojekuaa Xeru yvatea, ha'e xeremimbo'e ete pendekuai.
- ⁹ — Xeru xerayvua rami avi xee voi roayvu peẽ kuery. Xee roayvua rupi tema pendekuai.
- ¹⁰ Xeayvua rupi pendekuai vy roayvua rupi avi 'rã pendekuai, Xeru ijayvua rupi xee aiko vy xerayvua rupi aikoa rami avi.
- ¹¹ Ha'e rami xeayvu xeguigua vy'a peẽ kuery re oĩ aguã, opa mba'e py pevy'a aguã.
- ¹² — Pova'e ae xee aeja pendevy: Peteĩ-teĩ pejoayvu 'rã xee roayvua rami.
- ¹³ Mba'eta guembiyvu kuery rekovicia ojejuka uka va'e gui ma avave rei ndajoayvuavei.
- ¹⁴ Peẽ kuery ae xerembiayvu pendekuai, ajapo uka va'e pejapo vy.
- ¹⁵ Xee ma “Escravo” nda'eí pêvy, mba'eta escravo kuery ndoikuuaai mba'e pa herekoia ojapo oikovya. Ha'e rami 'rãgue py “Xerembiayvu” ha'e pêvy, mba'eta pendevy pe aikuua uka Xeru gui aendu va'e ha'e javi.
- ¹⁶ — Mba'eta peẽ ranhe'ŷ xeporavo va'ekue. Xee ae peẽ kuery roiporavo, ha'e romoĩ guive peoa rupi heta pemoingo aguã hi'a opa e'ŷ va'erã. Ha'e ramo 'rãe pêvy Xeru ojapo xerery rupi pejerurea ha'e javi.
- ¹⁷ Pova'e ae ajapo uka pêvy, peteĩ-teĩ pejoayvu aguã.
- ¹⁸ — Ha'e gui yvy regua kuery napenderayvui ramo peikuua pota tema pova'e re: Peẽ kuery gui xee ranhe ndaxerayvui okuapy.
- ¹⁹ Ha'e rã yvy regua peẽ pendekuai va'e rire ma yvy regua kuery penderayvu 'rãgue, ha'e kuery regua ae pendekuai rã. Ha'e rami avi yvy regua e'ŷ peẽ kuery pendekuai, ha'e kuery mbyte gui xee roiporavo rire. Ha'e nunga rupi ae yvy regua napendayvui.
- ²⁰ Penema'endu'a ke “Tembiguai kuery opatõ gui yvateve va'e'ŷ” ha'eague re. Ha'e nunga rupi xere opu'ã rei okuapyague rami avi peẽ kuery re voi opu'ã rei 'rã. Ha'e rã xeayvua oendua ramo ma pendeayvua voi oendua 'rã.
- ²¹ Ha'e nunga ha'e javi 'rã pendere ha'e kuery ojapo xerery rupi pendekuai ramo, mba'eta Xembouare voi ndoikuuaai vy.
- ²² — Ha'e gui xee ndajui ha'e ha'e kuery pe ndaxeayvui va'e rire ma ha'e kuery reko viai noĩ 'rãgue. Va'eri aŷ gui ma nda'evei ha'e kuery “Aikuua vy e'ŷ ajejavy” he'i aguã.
- ²³ Ndaxerayvui va'e kuery ma ndoayvui avi Xeru.

* 15:5 1 João 2.28; Gálatas 2.20; Filipenses 4.13

²⁴ Ha'e kuerya rupi xee ndajapoi va'e rire mba'emo avave rei ojapo kuaa e'ŷ va'e regua, ha'e kuery reko vaia noĩ 'rāgue. Ha'e rami avi aŷ ma ha'e kuery xerexa teĩ ndaxerayvui, ha'e Xeru voi ndoayvui okuapy.

²⁵ Ha'e nunga oiko ojeupity aguã ha'e kuery pegua lei re “Mba'e py e'ŷ ndaxerayvui okuapy” he'iague.*

²⁶ — Ha'e gui Xerua gui ambou 'rā Penembojoyvyarā, anhetē va'e kuaa ukaarā. Ha'e va'e ou ma vy oikuaa uka 'rā xereko.

²⁷ Peẽ kuery avi 'rā pemombe'u, jypy'i guive xerupive pendekuai rire.

16

Nhanembojoyvyarā ou va'erā re ijayvuague

¹ — Ha'e nunga xee amombe'u ma voi, pejeroviaa gui pejep'e a e'ŷ aguã.

² Mba'eta ha'e kuery penemoxẽ 'rā onhembo'eaty ikuai va'e gui. Ovaẽ 'rā pendejukaa kuery “Nhanderuete pe vy ajojuka” he'ia ára.

³ Ha'e nunga ha'e kuery ojapo 'rā mba'eta neĩ Xeru, neĩ xee voi xekuaa e'ŷ vy.

⁴ Pova'e nunga xee amombe'u pendevy ha'e nunga ojeupity rā pexa vy xeayvuague re penema'endu'a aguã. Po rami ma jypy'i guive e'ŷ amombe'u pêvy, mba'eta peẽ kuery reve teri 'rā aiko.

⁵ — Ha'e gui aŷ ma aa ta ma Xembouarea py. Ha'e rami teĩ peteĩve voi “Mamo tu reo ta?” ndapejevei xevy.

⁶ Ha'e nunga amombe'u rire ndapevy'aia anho pendu pendepy'a re.

⁷ Anhetē aipoa'e pêvy: Xee aa 'rāe, mba'eta xee ndaai ramo ndoui 'rā Penembojoyvyarā. Ha'e rami avi xee aa vy ambou 'rā pêvy.*

⁸ — Ha'e va'e ou vy yvy re ikuai va'e pe oikuaa uka 'rā heko vaia, teko porã ha'e opagapa aguã.

⁹ Heko vaia oikuaa uka 'rā mba'eta xere ha'e kuery ndojeroviai rire.

¹⁰ Teko porã oikuaa uka 'rā, mba'eta Xerua py aa ramo ndaxerexavei 'rā.

¹¹ Ha'e kuery opaga aguã avi 'rā oikuaa uka, mba'eta ko yvy regua kuery rerekaoa voi opaga aguã rami oiko.

¹² — Heta teri areko pêvy amombe'u va'erā, teĩ aŷ ma napendu kuaapai 'rā.

¹³ Ha'e gui Nhe'ẽ anhetē va'e kuaa ukaarā ou ma vy penembo'e 'rā anhetē va'e ha'e javi re. Ojegui ae e'ŷ 'rā ijayvu, mba'eta oikuaa uka 'rā oendu va'ekue anho, mba'emo oiko va'erā-'erā voi.

¹⁴ Ha'e ma xemboyvate 'rā, xeguigua pendevy oikuaa uka vy.

¹⁵ Opa mba'e Xeru oguereko va'e xemba'e meme. Ha'e nunga rupi aipoa'e: “Ojopy 'rā mba'emo xegui, ha'e oikuaa uka 'rā pendevy” ha'e va'ekue.

¹⁶ Peẽ kuery ndaxerexavei rai'i ma. Ha'e gui areve'i rā xerexa ju 'rā — he'i.

¹⁷ Ha'e ramo hemimbo'e kuery regua joupe-upé aipoe'i:

— Mba'e he'i vy nda'u po rami ijayvu, “Ndaxerexavei rai'i ma, ha'e gui areve'i rā xerexa ju 'rā”, ha'e “Aa ta Xerua py” he'iague?

¹⁸ Mba'e he'iia nda'u “Areve'i rā” he'iia? Mba'e he'i vy paa ndajaikuai — he'i.

¹⁹ Ha'e kuery oporanduxea Jesus oikuaa vy aipoe'i:

— Mba'e re tu joupe-upé ri peporandu “Ndaxerexavei rai'i ma. Ha'e gui areve'i rā xerexa ju 'rā” ha'eague re?

²⁰ Anhetē aipoa'e pêvy: Peẽ kuery pejae'opa ha'e ndapevy'avei 'rā. Ha'e rā yvy regua kuery ma ov'y'a rei 'rā okuapy. Ha'e rire ma pevy'apa ju 'rā ndapevy'aiague gui.

²¹ Kunhague imemby raxy va'e iporiau 'rā, ojexavai aguã hora ovaẽ ma ramo. Ha'e gui imemby ma rire na'ima'endu'avei 'rā ojexavaiague re, kyrĩ va'e itui'i ma ramo ov'y'a vy.

²² Ha'e rami ae avi peẽ kuery aŷ pendu ndapevy'aveia. Ha'e gui jajoexa jevy ramo ma pendepy'a py pendu 'rā pevy'aa avave rei ndoipe'a kuaai va'e.

* 15:25 Salmo 35.19, 69.4 * 16:7 João 14.16-19; Romanos 5.5

²³ — Ha'e va'e ára ma mba'eve re napeporanduvei 'rā xevy. Anhetē aipoa'e pēvy: Peipota va'e re rei Xeru pe pejerure ramo ome'ẽ 'rā xerery rupi.

²⁴ Aŷ peve xerery rupi ndapejerurei teri mba'eve re. Pejerure, ha'e pejopy 'rā pēvy'a ete aguã.

Oo rai'i ma vy ijayvuague

²⁵ — Aŷ peve mba'emo re ambojojaa rupi xeayvu. Ha'e gui raka'eve rā mba'emo re ambojojaa rupi ve'ŷ 'rā xeayvu, ha'e amombe'u porã 'rā Xeru reko.

²⁶ Ha'e va'e ára ixupe pejerure 'rā xerery rupi. Aipo nda'eí Xeru pe xee ajerure aguã pendere,

²⁷ mba'eta Xeru ae penderayvu, peẽ kuery xerayvu ha'e Xerua gui ajuague perovia rire.

²⁸ Mba'eta Xerua gui aju karamboae yvy re. Aŷ ma yvy gui aa ju ta Xerua py — he'i.

²⁹ Ha'e ramo hemimbo'e kuery aipoe'i:

— Aŷ ma roikuua aguã rami ma ndeayvu, ayvu haxy va'e py ve'ŷ ma.

³⁰ Aŷ roikuua ndee opa mba'e reikuaapa va'e reikoa, ndevy roporandu e'ŷ teĩ reikuaa roporanduxea. Ha'e nunga rupi roguerovia Nhanderuete remimbou reikoa — he'i okuapy.

³¹ Jesus ombovai:

— Perovia ete pa aŷ?

³² Mba'eta ou oiny hora, ha'e ovaẽ ae ma, peẽ kuery joa katy e'ŷ-e'ŷ peo aguã peteĩ-teĩ ro katy. Peo vy xerejapa 'rā xee ae'i.* Ha'e rami teĩ xee ae'i ete e'ŷ 'rā guive, mba'eta Xeru oiko 'rāe xereve.

³³ Ha'e nunga ha'e javi re xeayvu, xere vy pendepy'a guaxu aguã. Ko yvy re ma peiko axy 'rā. Ha'e rami teĩ pendepy'a guaxu ke, mba'eta xee xepo'aka ma yvy re.

17

Ojeupegua kuery re Jesus ojerure oinyague

¹ Jesus ijayvupa ma vy yva re ju oma'ẽ. Ha'e vy aipoe'i:

— Xeru, aŷ ovaẽ ma hora. Emboyvate ke Nderá'y, Nderá'y ju ndeyvatea oikuua uka aguã,

² avakue ha'e javi re ndee xembopo'akaague rami, xee ju tekove marã e'ŷ ame'ẽ aguã xevy guarã reme'ẽ va'ekue ha'e javi pe.

³ Tekove marã e'ŷ ma po rami 'rā oupity: Ndee Tuuete peteĩ'i ha'e anhetē va'e ndekuaa vy, ha'e xee neremimbou Jesus Cristo xekuaa avi vy 'rā oupity.

⁴ — Xee ma yvy re aiko jave aikuua uka ma ndeyvatea, rejapo uka va'ekue ajapopa vy.

⁵ Ha'e gui Xeru, aŷ ma ndea py ju xemboyvate, yvy itui e'ŷ mbove voi ndereve aĩ jave seyvateague py ae.

⁶ — Mba'eta yvy regua kuery mbyte gui amongue reiporavo vy xevy guarã ju reme'ẽ va'ekue pe ma xee aikuua uka ma nderery po'akaa. Ndepo py ae ikuai va'ekue ri xevy guarã ju remboaxa. Ha'e ramo ha'e kuery ma ndeayvua rupi meme ikuai.

⁷ Ha'e rami vy aŷ ma ha'e kuery oikuua mba'emo xevy reme'ẽ va'ekue ndeguigua memea.

⁸ Ha'e kuery pe xee amombe'u ma ayvu remombe'u uka va'ekue. Ha'e ramo ha'e kuery oguerovia, oikuua guive anhetē ete ndea gui ajuague, ndee xembou rā.

⁹ — Ha'e kuery re ma xee ajerure, yvy regua kuery re'ŷ, ha'e rā xevy guarã reme'ẽ va'ekue re anho, mba'eta ndevyguia meme ikuai.

¹⁰ Xevyguia kuery ha'e javi ma ndevyguia avi, ha'e ndevyguia ikuai va'e ma xevyguia avi, ha'e ha'e kuery ikuia rupi xeyvatea ojekuaa 'rā.

¹¹ — Xee ma ndaikovei ma 'rā yvy re. Ha'e rā ha'e kuery ma yvy re ikuai teri. Xee ma ndea py ta aa. Xeru ndeky'a e'ŷ va'e, epena ke ha'e kuery re nderery po'akaa xere ju remoĩ va'ekue rupi, ha'e kuery voi peteĩ rami ikuai aguã nhande rami avi.

* 16:32 Marcos 14.27,50

¹² Ha'e gui xee ma ha'e kuery reve aiko teri jave xee ae ranhe apena aikovy nderery po'akaa xere remoī va'ekue rupi. Xee aepy ramo neī peteīve nokanhyi, okanhy 'rā va'ekue e'ŷ vy, kuaxia para re oĩ ojeupity aguā.

¹³ Aŷ ma xee aa ta ma ndea py. Ha'e rami xeayvu ko yvy re aiko teri reve, ha'e kuery re xeguigua vy'a oĩ aguā opa mba'e py.

¹⁴ — Ha'e kuery pe ndeayvu aikuua uka ramo yvy regua kuery ndoayvui, mba'eta yvy regua e'ŷ ikuai, xee rami avi.

¹⁵ Ha'e kuery ko yvy gui reipe'a aguā re'ŷ ajerure, ha'e rā teko vai gui repena aguā.

¹⁶ Mba'eta xee rami avi ha'e kuery voi yvy regua ve'ŷ ma ikuai.

¹⁷ Eiky'a'o ke ha'e kuery anhetē va'e rupi. Ndeayvu ae ma anhetē va'e.

¹⁸ — Ndee yvy re xembouague rami avi xee voi amondouka yvy jave rupi.

¹⁹ Ha'e kuery re ama'ẽ vy xee ae anhemboaxa ndevy, ha'e kuery voi ndevyguia iky'a e'ŷ va'e ikuai aguā, anhetē va'e rupi.

²⁰ — Ha'e kuery re anho e'ŷ ajerure, ha'e rā amboae kuery ha'e kuery ijayvua oendu vy xere ojerovia va'erā re guive,*

²¹ ha'e javive peteī rami meme ikuai aguā. Xeru, xee ndere aĩ, ha'e ndee xere reĩ rami avi ha'e kuery voi nhandere toĩ. Ha'e ramo 'rāe ko yvy re ikuai va'e oguerovia ndee xembouague.

²² Ndeyvatea xevy reme'ẽ va'ekue ma ha'e kuery pe ju ame'ẽ, peteī rami meme ikuai aguā nhande rami avi.

²³ Xee ha'e kuery re aĩ, ha'e ndee xere reĩ ramo ha'e kuery voi peteī rami ete ikuai aguā, ko yvy re ikuai va'e oikuua aguā ndee xembouague ha'e ha'e kuery reayvua, xerayvua rami avi.

²⁴ — Xeru, xee aipota mamo rā aĩa py xevy guarā reme'ẽ va'ekue avi xereve ikuai, ha'e kuery oexa aguā xeyvatearā reme'ẽ va'ekue, mba'eta ko yvy renhono e'ŷ mbove ma voi xerayvua.

²⁵ — Xeru nderekō porā va'e, ko yvy regua kuery ma nandekuaai. Ha'e rā xee ma roikuua, ha'e kova'e kuery kuery voi oikuua ndee xembouague.

²⁶ Ha'e kuery pe aikuua uka ma nderery po'akaa, ha'e aikuua ukave ju 'rā guive, ha'e kuery re oĩ aguā reayvua ndee xerayvua ramigua ae, ha'e gui ha'e kuery re xee voi aĩ aguā.

18

Mateus 26.47-54; Marcos 14.43-47; Lucas 22.47-51

¹ Ha'e rami Jesus ijayvupa ma vy guemimbo'e kuery reve oje'oi Cedrom yakā'i rovaigua re, ha'e peteī yvotyty oĩ va'e py oike ha'e kuery reve.

² Jesus jopy uka nhemiarā Judas hery va'e voi oikuua ha'e va'e yvotyty, mba'eta mbovykue rei e'ŷ ha'e py Jesus guemimbo'e kuery reve ikuai jepi rire.

³ Ha'e rami vy ha'e katy Judas ogueraa xondaro kuery, sacerdote yvatekueve va'e ha'e fariseu kuery pegua jopya kuery. Ha'e kuery yvyrá reve-reve, ha'e takua ryxa rendy reve ovaẽ ha'e py.

⁴ Ha'e gui Jesus mba'emo hexe oiko va'erā oikuua vy ovaexī. Ha'e vy oporandum ha'e kuery pe:

— Mava'e tu peka?

⁵ Ombovai vy

— Nazaré pygua Jesus — he'i okuapy.

Ha'e ramo Jesus aipoe'i:

— Xee ae ha'e — he'i. Ijopy uka nhemia Judas voi oiko ha'e kuery reve.

⁶ Ha'e gui Jesus “Xee ae ha'e” he'i ramove ha'e kuery oguevipa vy ho'apa yvy rupi.

⁷ Teīgue ju Jesus oporandum:

— Mava'e tu peka?

— Nazaré pygua Jesus — he'i okuapy.

⁸ Ha'e ramo Jesus ombovai:

* 17:20 Romanos 8.34; Hebreus 7.25

— “Xee ae” ha'e ma kuri. Xee ri xereka ramo tove kova'e kuery toje'oipa — he'i,
⁹ ipara re oĩ va'e ojeupity aguã: “Xevy guarã reme'ẽ va'ekue regua neĩ peteĩve ma xee namokanhyi.”

¹⁰ Ha'e ramo Simão Pedro kyxe ogueru va'ekue oekyi vy omboguai sacerdote yvateve va'e rembiguai nambi oiporu kuaa regua re. Ha'e va'e ma Malco hery va'e.

¹¹ Ha'e ramo Jesus aipoe'i Pedro pe:

— Emoĩ ju kyxe hyru py. Nda'evei ri ty'y karo Xeru ome'ẽ va'e gui ay'u aguã?

Anás ro py ogueraa ague

¹² Ha'e gui xondaro kuery, huvixa ha'e judeu regua jopya kuery ojopy okuapy Jesus, ha'e ojokuapa.

¹³ Ha'e rami vy Anás ro py ranhe ogueraa. Ha'e va'e ma ha'e va'e ma'etỹ re sacerdote yvateve va'e Caifás oĩ va'e ratyua.*

¹⁴ Caifás ae judeu ruvixa kuery pe “Ha'eveve peteĩ ava omano heta va'e kuery rekovia” he'i va'ekue.

Mateus 26.69-75; Marcos 14.66-72; Lucas 22.55-62

¹⁵ Simão Pedro ha'e amboae hemimbo'e reve jogueraa Jesus rakykue. Ha'e va'e hemimbo'e ma sacerdote yvateve va'e rexaaty ae vy hoka py oike avi Jesus ogueroikea jave.

¹⁶ Ha'e rã Pedro ma oka py ranhe optya okẽ oĩ va'e rexei'i. Ha'e gui hemimbo'e mboae sacerdote yvateve va'e rexaaty va'e ou vy ijayvu kunhataĩ okẽ rarõa reve. Ha'e vy mae ma ogueroike avi Pedro.

¹⁷ Ha'e gui kunhataĩ okẽ rarõa oporandu Pedro pe:

— Ndee voi peva'e ava remimbo'e e'ŷ teve?

— Any — he'i.

¹⁸ Tembiguai ha'e jopya kuery ma tata omoendyague py ikuai ojape'ea py, yro'y ramo. Pedro voi ojape'ea ho'amy ha'e kuery mbyte.

Sacerdote yvateve va'e Jesus omboayvuague

¹⁹ Ha'e ramia ja sacerdote yvateve va'e oporandu Jesus pe hemimbo'e kuery ikuiaia ha'e nhombo'ea re.

²⁰ Jesus omombe'u vy aipoe'i:

— Xee ma yvy re ikuai va'e pe amombe'u porã ma. Anhombo'e riae judeu kuery ono'õa rupi, templo py ha'e py onhembo'eaty ikuai va'e rupi. Mba'eve namombe'ui nhemi rupi.

²¹ Mba'e re tu xevy pe reporandu? Eporandu xeayvu renduare kuery pe. Ha'e kuery ma oikuua xeayvuague — he'i.

²² Ha'e rami Jesus ijayvu ramo peteĩ jopya ha'e py hi'aĩ va'e oipete. Ha'e vy aipoe'i:

— Po rami va'e ty'y ndeayvu sacerdote yvateve va'e pe?

²³ Jesus ombovai:

— Xeayvu vai ri ra'e ramo emombe'u xeayvu vaiague. Ha'e rami avi xeayvu porã va'eri mba'e re tu xepete? — he'i.

²⁴ Ha'e gui Anás ojokua uka reve omondouka sacerdote yvateve va'e Caifás-a py.*

Pedro peteĩgue ju onhenhomiague

²⁵ Simão Pedro ha'e py teri ojape'ea ho'amy. Ixupe oporandu okuapy:

— Ha'e rami vy ndee voi hemimbo'e kuery regua teve?

Pedro onhenhomi vy

— Xee any — he'i.

²⁶ Ha'e py oĩ avi sacerdote yvateve va'e rembiguai regua peteĩ, Pedro inambi omboiague va'e retarã. Ha'e va'e ju aipoe'i:

— Xee ndoroexai ri ty ra'e hexeve yvotyty py?

²⁷ Teĩgue ju Pedro onhenhomi. Ha'e ramove uru ojapukai.

Mateus 27.1,2; Marcos 15.1; Lucas 23.1

* 18:13 Marcos 14.53,54 * 18:24 Mateus 26.59-66; Marcos 14.55-64; Lucas 22.66-71

²⁸ Ha'e rire aje'ive'i reve ma Caifás ro gui Jesus ogueraa okuapy huvixa ro katy. Ha'e rā judeu kuery ma nhomboayvuaty py ndoikexei, ojeko mongy'a e'ŷ aguã Páscoa ára py okaru aguã.

²⁹ Ha'e ramo ha'e kuery ikuiaia py huvixa Pilatos oẽ ijayvu aguã. Ha'e vy aipoe'i:

— Mba'ekue py tu Peru kova'e ava?

³⁰ Ombovai vy

— Kova'e ava ma mba'eve rei py ndotekoavyi va'e rire ndoroguerui 'rāgue ndea py — he'i okuapy.

³¹ Ha'e gui Pilatos aipoe'i ha'e kuery pe:

— Peẽ ae peraa, pendevyguia lei rami ae perek.

Judeu ruvixa kuery ombovai:

— Ha'e rami avi orevy pe nda'evei rojojuka aguã — he'i okuapy.

³² Ha'e rami oiko ojeupity aguã Jesus marã rami pa omano aguã re ijayvuague.

Mateus 27.11-26; Marcos 15.1-15; Lucas 23.1-5,13-25

³³ Opy ju Pilatos oike vy oenoï Jesus. Ha'e vy aipoe'i ixupe:

— Ndee ma nhi'ã judeu kuery pegua huvixave?

³⁴ Jesus ombovai:

— Ndee ae pa po rami reporandu tyrã amongue ndevy omombe'u xerek.

³⁵ Ha'e ramo Pilatos aipoe'i:

— Xee ma nhi'ã judeu aiko? Neretarã kuery ha'e sacerdote yvatekueve va'e ae ndereru kuri xea py. Mba'e py tu rejapo vai?

³⁶ Jesus ombovai:

— Xee apenaa ma ko yvy regua e'ŷ. Ko yvy regua va'e rire xerembiguai kuery opu'ãmba 'rāgue judeu ruvixa kuery re, xejopy uka e'ŷ aguã. Aŷ ma apenaa ko yvy regua e'ŷ — he'i.

³⁷ Ha'e ramo Pilatos oporandu:

— Ndee ma huvixave ri ty'y?

Jesus ombovai:

— Ndee ae aipo're huvixave aikoa rami. Xee ma ha'e nungarã ae aiko, ha'e rami aguã aju ko yvy re, anhetẽ va'e amombe'u aguã. Ha'e ramo anhetẽ va'e rupi ikuai va'e ma oendu 'rā xeayvua — he'i.

³⁸ Ha'e ramo Pilatos aipoe'i:

— Mba'e nunga tu "Anhetẽ va'e" 'rea? — he'i.

Po rami ijayvu rire oẽ ju judeu kuery ono'õa py. Ha'e vy aipoe'i ha'e kuery pe:

— Xee ma ndaikuuai mba'eve rei ojapo vaiague.

³⁹ Pendereko rami vy ma Páscoa ára nhavõ pepoi uka 'rā amongue. Peẽ kuery nda'u peipota ri apoi judeu kuery pegua huvixave?

⁴⁰ Ha'e javive ojapukai reve ombovai:

— Peva'e'ŷ, epoi Barrabás — he'i okuapy. Barrabás ma jojuka rive va'ety.

19

¹ Ha'e rami rā Pilatos ogueraa uka ju Jesus, ha'e oinupã uka.

² Xondaro kuery ojapo peteĩ ngora juu gui, ha'e omoï inhakã re. Omonhemonde peteĩ ao puku púrpura guigua py.

³ Jesus re onhemboja vy

— Iporã ete judeu kuery pegua huvixave — he'i reve oipete-pete.

⁴ Teǐgue ju Pilatos oẽ vy aipoe'i judeu kuery pe:

— Peva'e ava ambou ju ta apy peẽ ae peikuaa pota aguã ojapo vaiague re, mba'eta xee ma ndaikuuai — he'i.

⁵ Ha'e gui Jesus oguenoëa heruvy ngora juu gui ojapo pyre ha'e ao púrpura guigua py onhemonde reve. Ha'e ramo Pilatos aipoe'i:

— Apy ma ava hi'aî.

⁶ Ha'e ramo sacerdote yvatekueve va'e ha'e jopya kuery oexa vy ojapukai:

— Emoĩ kuruxu re, emoĩ kuruxu re.
Ha'e ramo Pilatos aipoe'i:

— Peẽ kuery ae peraa kuruxu re pemoĩ, mba'eta xee ndaikuaai ojapo vaiague — he'i.
⁷ Judeu kuery ombovai:

— Ore kuery lei roguerekva'e rami vy ojukaa aguã rami oiko, Nhanderuete Ra'y rami onhemingo ramo — he'i okuapy.

⁸ Ha'e rami ijayvu rã Pilatos oendu vy okyjeve.

⁹ Ha'e rami vy ngopy ju ogueroike vy oporandu Jesus pe:

— Maguigua tu ndee? — he'i teĩ Jesus nombovai.

¹⁰ Ha'e ramo Pilatos aipoe'i:

— Naxembovai va'e ty'y? Ndereikuuaai ri ty'y xepo'akaa ropoi e'ŷ vy kuruxu re romoĩ aguã?

¹¹ Jesus ombovai:

— Ndee ma mba'eve rei py xere nandepo'akai 'rãgue yvate gui nanembopo'akaa ukai va'e rire. Ha'e nunga rupi ndea py xereruare kuery heko vaive — he'i.

¹² Ha'e rami rã Pilatos teĩgue ju onhea'ã teĩ opoi aguã. Ha'e rã judeu kuery ma aipoe'i:

— Peva'e ndee repoi ri vy huvixave César irũ e'ŷ reiko. Mba'eta huvixave onhemingo va'e ma César rovaigua meme — he'i okuapy.

¹³ Ha'e rami ijayvu rã Pilatos oendu vy oka py ju oguenoẽ uka Jesus, ha'e tenda nhomboayvuaty py oguapy oiny ita ombojopeague py. Ha'e va'e henda ma hebraico ayvu py Gabatá hery va'e.

¹⁴ Kuaray mbyte rai'i ma, ha'e sexta-feira Páscoa ára ovaẽ rai'i ma guive.

Ha'e gui Pilatos aipoe'i ha'e kuery pe:

— Apy ma peẽ kuery ruvixave hi'aĩ.

¹⁵ Ha'e rã ha'e kuery ma ojapukaive:

— Eraa, eraa, eupi kuruxu re — he'i okuapy.

Ha'e ramo Pilatos aipoe'i:

— Peipota va'e ty'y peẽ kuery ruvixave kuruxu re aupi uka?

Sacerdote yvatekueve va'e ombovai:

— Ore kuery ma oreruvixave ndoroguererekoi, César e'ŷ vy — he'i okuapy.

¹⁶ Ha'e rami rã Pilatos ogueraa uka kuruxu re omoĩa aguã.

Mateus 27.33-38; Marcos 15.22-28; Lucas 23.33-38

¹⁷ Ha'e ramo ha'e kuery ogueraa Jesus. Ha'e ae kuruxu ogueraa reve oo peteĩ henda Calvário 'epy va'e katy. Ha'e rã hebraico ayvu py ma ha'e va'e henda Gólgota hery va'e.

¹⁸ Ha'e py ma oupia imoiny kuruxu re, ha'e mokoĩ ju oupi avi ijyvy joavaive, ha'e Jesus mbyte py.

¹⁹ Pilatos ombopara uka avi peteĩ ayvu, ha'e kuruxu re omoĩ uka. Po rami ipara oiny: "Nazaré pygua Jesus judeu kuery pegua huvixave."

²⁰ Ha'e va'e ipara heta judeu kuery ogueroayvu, mba'eta Jesus kuruxu re oupi imoinya ma tetã katy'i. Hebraico, latim ha'e grego ayvu py ipara oiny.

²¹ Ha'e ramo sacerdote yvatekueve va'e aipoe'i Pilatos pe:

— Embopara uka eme "Judeu kuery pegua huvixave." Ha'e rã embopara uka "Ha'e onhemombe'u judeu kuery pegua huvixave oikoa rami."

²² Ha'e ramo Pilatos ombovai:

— Xee ambopara uka va'ekue ma ipara ae ma oiny — he'i.

Jesus ao omboja'o okuapyague

²³ Xondaro kuery Jesus kuruxu re oupi ma rire ojopy iiao, ha'e omboja'o irundy henda rupi, peteĩ-teĩ xondaro ojeupe guarã ojopy aguã. Ikamixa puku avi ojopy. Ha'e rã ikamixa puku ma ombovyvy pyre'ŷ, yvate katy gui ipy katy peve ojapo pyre.

²⁴ Ha'e ramo joupe-upa aipoe'i:

— Nhamondoro eme teve kamixa puku. Ha'eve jaexa nhandexortea, mava'e ete'i pe pa kova'e optytaa jaikuaa aguã — he'i okuapy. Ha'e rami oiko kuaxia para re oĩ va'e ojeupity

aguā: “Omboja'o-ja'o xeao, ha'e rā xekamixa re ma oexa okuapy oxortea” he'iague. Xondaro kuery ha'ekue rami ae ikuai.*

²⁵ Kuruxu yvy'iry hi'aī Jesus xy, ikypy'y, ha'e gui Cleopas ra'yxy Maria ha'e Maria Madalena.

²⁶ Oxy, ha'e ijyvýry guemimbo'e oayvuve va'e hi'aī rā Jesus oexa vy aipoe'i:

— Kunha, pee ma ndepil'arā hi'aī — he'i.

²⁷ Ha'e gui guemimbo'e pe ju aipoe'i:

— Pee ma ndexyrā hi'aī — he'i. Ha'e rire hemimbo'e ogueraa ngoo py.

Mateus 27.45-56; Marcos 15.33-37; Lucas 23.44-46

²⁸ Ha'e rire Jesus oikuaa mba'emo oiko 'rā va'ekue ojeupitypa maa. Ha'e rami vy kuaxia re ipara oiny va'e ojeupity aguā aipoe'i avi:

— Xey'uwei — he'i.

²⁹ Ha'e py oī peteī hy'a vinagre tynyē va'e. Ha'e va'e py peteī esponja omoakŷa vy peteī takua apy re omoī, ha'e omovaē Jesus juru re.

³⁰ Jesus vinagre oy'u ma rire aipoe'i:

— Aŷ ma ojeupitypa ma oiko 'rā va'ekue — he'i. Ha'e gui ma oity oakā, ha'e omondouka onhe'ē.

1 João 5.6-8

³¹ Ha'e va'e ára ma judeu kuery mba'emo oguereko katua ára, mba'eta ha'e va'e sábado ma ára omboetevepy. Ha'e rami vy sábado peve kuruxu re hetekue oī e'ŷ aguā Pilatos pe judeu ruvixa kuery ojerure hetyma omopē uka vy omboguejy uka aguā.

³² Ha'e ramo xondaro kuery oje'oi vy omopē jypy oī va'e retyma, ha'e amboae hexeve kuruxu re oī va'e retyma ju.

³³ Ha'e rā Jesus oīa re ma ovaē vy oma'ē rā omano ma ra'e. Ha'e ramo ma nomopēi hetyma.

³⁴ Ha'e rami avi inharukā py peteī xondaro oipyxo nho hu'y guaxu py. Ha'e rā onhe'ē huguy ha'e yy.

³⁵ Ha'e nunga rexaare omombe'upa, anhetē guare meme omombe'u. Ha'e oikuaa guive anhetē meme omombe'ua, peē kuery voi perovia aguā.

³⁶ Ha'e rami oiko va'e kuaxia re ipara oinya ojeupity aguā: “Neī peteīve ikāgue nomopēai 'rā” he'iague.*

³⁷ Oī avi kuaxia para re “Ha'e kuery oexa ju 'rā oipyxo va'ekue” he'iague.*

Mateus 27.57-60; Marcos 15.42-46; Lucas 23.50-54

³⁸ Ha'e va'e rire peteī ava Arimatéia pygua José hery va'e ma Pilatos-a py oo vy ojerure Jesus retekue omboguejy aguā. Ha'e ramo omboguejy uka rā José omboguejy Jesus retekue. Ha'e va'e ma judeu ruvixa kuery gui okyje vy nhemi rupi Jesus remimbo'e oiko va'e.

³⁹ Nicodemos pyávy Jesus reve ijayvu aguā oo va'ekue voi trinta quilo heakuā porā va'e ogueraa mirra ha'e aloé guigua.

⁴⁰ Ha'e kuery Jesus retekue ojopy vy ajukue py onhovā heakuā porā va'e reve. Judeu kuery reko rami vy ojapo ha'e rami, onhono porā aguā.

⁴¹ Jesus kuruxu re oupi imoinyague katy'i ma peteī yvotyty oī. Ha'e py ma oī peteī tuparā oguereko katu ramo'i va'ekue. Ha'e va'e py avave rei nonhono porāai teri.

⁴² Judeu kuery mba'emo oguereko katua ára ovaē ma, ha'e tuparā oguereko katu pyre ha'e katy rai'i oī ramo ma ha'e py ae onhono porā Jesus retekue.

20

Mateus 28.1-8; Marcos 16.1-8; Lucas 24.1-12

¹ Semana ijypya ára ko'ē rai, pytū-pytū'i teri reve Maria Madalena oo Jesus onhono porāague katy. Ha'e vy oexa rā ita imbotyarā omoī mbyre ombojerea ma ra'e.

* 19:24 Salmo 22.18, Mateus 27.35,36,55,56; Marcos 15.24 * 19:36 Êxodo 12.46, Salmo 34.20 * 19:37 Zacarias 12.10

² Ha'e gui onha ovy Simão Pedro ha'e hemimbo'e mboae Jesus oayvuve va'e oña katy. Ha'e vy aipoe'i ha'e kuery pe:

— Senhor retekue tu oguenoëa rima ra'e hupa gui, ha'e ndoroikuaai marã katy pa oguerovaague — he'i.

³ Ha'e gui Pedro ha'e hemimbo'e mboae jogueraa onhono poräague katy.

⁴ Mokoïve onha reve oje'oi. Amboae hemimbo'e ma Pedro gui onha ratäve vy ha'e ranhe ovaë hupa py.

⁵ Ha'e rami vy ojeyvy vy oexa ajukue xiñ va'e anho. Ha'e rami teñ ndoikei.

⁶ Ha'e gui Simão Pedro ma takykueve'i ovaë vy oike. Ha'e rami vy oexa avi ajukue

⁷ ha'e panhero Jesus akã re omoï mbyre. Ha'e va'e ma ajukue mboae reve'ý itui, amboae henda py ombojo'a porä'i ra'e.

⁸ Ha'e gui amboae hemimbo'e ha'e ranhe ovaë va'ekue avi oike, ha'e oexa vy oguerovia.

⁹ Ha'e kuery ndoikuuai teri kuaxia para re oña rami vy omanoague gui onhemboete jevy aguã.

¹⁰ Ha'e gui hemimbo'e kuery mokoïve ojeyvju jogueravy ngoo katy.

Marcos 16.9-11

¹¹ Ha'e ramia ja Maria ma hupa rokë yvýry ojae'o ho'amy. Ojae'oa ramine ojeyvy ikua katy oma'ë aguã.

¹² Ha'e rami vy oexa mokoï anjo onhemondea xiñ va'e Jesus retekue ituiague py oguapy rã. Peteí ma inhakã katy, ha'e rã amboae ma ipy katy oï.

¹³ Ha'e ramo ha'e kuery aipoe'i:

— Kunha, mba'e re tu rejae'o?

Kunha va'e ombovai:

— Mba'eta ogueraa ra'e xe-Senhor, ha'e ndaikuuai marã katy pa oguerovaague — he'i.

¹⁴ Ha'e rami ijayvu rireojere vy oexa Jesus hi'aï rã, teñ ndoikuuai teri Jesus ae hi'aïa.

¹⁵ Ha'e ramo Jesus oporandu:

— Kunha, mba'e re tu rejae'o? Mava'e tu reka?

Maria ma “Yvotyty re opena va'e po” he'i vy ombovai:

— Senhor, ndee ri apygui hetekue rerova rire ke emombe'u marã katy pa rerovaague, xee aa araa aguã — he'i.

¹⁶ Ha'e ramo Jesus aipoe'i:

— Maria.

Ha'e rã ha'e va'e ojere vy aipoe'i hebraico ayvu py:

— Raboni — he'i, “Xembo'ea” he'ia.

¹⁷ Ha'e ramo Jesus aipoe'i:

— Xejoko eme, mba'eta ndaai teri Xerua py. Ha'e rami 'rãgue py tereo xeryvy kuery pe emombe'u aa taa Xeru ha'e Penderua py, Xeruete ha'e Penderuetea py — he'i.

¹⁸ Ha'e rami rã Maria Madalena oo hemimbo'e kuery pe omombe'u:

— Aexa ma kuri Senhor — he'i. Omombe'u avi Jesus ijayvuague ha'e javi.

Lucas 24.36-40

¹⁹ Ha'e va'e semana ijypya ára ka'aru hemimbo'e kuery ono'õmba peteí oo py, ha'e okë ojokopa judeu ruvixa kuerygui okyje vy. Ha'e jave Jesus ojexa uka xapy'a ha'e kuery mbyte. Ha'e vy aipoe'i:

— Toï pendere mby'a porã — he'i.

²⁰ Ha'e vyve oexa uka opo ha'e oarukã. Ha'e ramo hemimbo'e kuery Senhor oexa vy ovy'a okuapy.

²¹ Ha'e gui Jesus aipoe'ive ju:

— Toï pendere mby'a porã. Xeru xembouague rami avi xee voi romondouka 'rã — he'i.

²² Ha'e rami ijayvupa vyve ipytuë. Ha'e vy aipoe'i:

— Pemovaë Nhe'ë Ky'a E'ý pendejee.

²³ Ha'e gui amongue ojejavyague peperdoa ramo ombogue pyre 'rã oiko. Ha'e rã ndapeperdoai ramo ma ombogue pyre'ý 'rã oiko — he'i.

²⁴ Peteī hemimbo'e doze va'e regua Tomé Dídimio hery va'e ma Jesus ojekuaa jave noī va'ekue oirū kuery reve.

²⁵ Ha'e gui ixupe hemimbo'e kuery mboae
— Roexa ma kuri Senhor — he'i okuapy.

Ha'e ramo ombovai:
— Xee ma ipo re karavo kuare ndaexai, ha'e xekuā py ae ndapokoi vy, ha'e gui inharukā re voi apoko e'ŷ re xee ndaroviai 'rā — he'i.*

Guemimbo'e kuery pe teīgue ju Jesus ojexa ukaague

²⁶ Oito ára rire hemimbo'e kuery ha'ekue py ju onhemboatypa, ha'e Tomé avi oī ha'e kuery reve. Ha'e vy ojokopa okē. Ha'e gui Jesus ou vy ha'e kuery mbyte hi'aī xapy'a. Ha'e vy aipoe'i:

— Toī pendere mby'a porā.

²⁷ Ha'e vyve aipoe'i Tomé pe:
— Emoī apy nekuā, ha'e exa xepo. Epoko avi xearukā re. Ejerovia e'ŷve eme, aŷ ma erovia ma — he'i.

²⁸ Tomé ombovai:

— Xe-Senhor ha'e Xeruete! — he'i.

²⁹ Ha'e ramo Jesus aipoe'i:
— Ndee xerexa vy rive teve rerovia? Ha'e rā ov'y'a ete 'rā xerexa e'ŷ teī ojerovia va'e kuery — he'i.*

Jajerovia aguā re ijayvuague

³⁰ Jesus hexa pyrā heta ojapo raka'e guemimbo'e kuery oexaa rupi. Ha'e nungakue ha'e javi e'ŷ ipara oinya kova'e kuaxia re.

³¹ Ha'e rā kova'e re ipara oinya ma peē kuery perovia aguā Jesus ae Cristo Nhanderuete Ra'y oikoa, pejerovia vy tekove peupity aguā hery rupi.

21

Sete guemimbo'e kuery pe ju Jesus ojexa ukaague

¹ Ha'e va'e rire, teīgue ju Jesus ojexa uka guemimbo'e kuery pe, Tiberíades yupa py. Ha'e rami py ojexa uka tema.

² Ha'e py ma oī Simão Pedro, Tomé Dídimio hery va'e, Galiléia regua Caná pygua Natanael, ha'e Zebedeu ra'y mokoīve. Oīve avi mokoī hemimbo'e mboae.

³ Ha'e gui Simão Pedro aipoe'i:

— Xee aa ta pira mbo'a vy.

Ha'e ramo amboae kuery ombovai:

— Ore voi roo ta nderupive — he'i okuapy. Ha'e rami vy oje'oipa, kanoā py ikuai pira mbo'aa rupi. Pytū mbukukue re teī neī peteī'i nombo'ai.

⁴ Ko'ē aje'ive'i reve yy rembe re Jesus ojekuaa ho'amy ita ku'i reia py. Ha'e rami teī hemimbo'e kuery ndoexa kuaai ha'e ri hi'aia.

⁵ Ha'e gui Jesus oporandu:

— Xera'y kuery, perekpa pa upe py ja'u va'erā?

— Any — he'i okuapy.

⁶ Ha'e kuery pe aipoe'ive ju:

— Pemombo ha'vy pira mbo'aa kanoā yke peiporu kuaa regua re. Ha'e rami vy 'rāe pembo'a — he'i. Ha'e rami ha'e kuery ojapo vy haxy py omoatā pira mbo'aa, heta ho'a ramo.

⁷ Ha'e rami rā hemimbo'e Jesus oayvuve va'e aipoe'i Pedro pe:

— Senhor rima ra'e — he'i.

Ha'e ramo Simão Pedro ma Senhor-a oendu vy onhemonde pojava onhemboipa rire. Ha'e rami vy oguejy yy py.

* 20:25 Mateus 28.17 * 20:29 2 Coríntios 5.7; 1 Pedro 1.8,9

⁸ Ha'e rã hemimbo'e kuery mboae ma kanoã py ae ou, pira mbo'aa omoatã heruvy, mba'eta yy rembe gui namombyryi ikuai, cem metros rivyvyia py.

⁹ Yvy'ã re ha'e kuery oẽ vy oexa tapyi, ha'e hi'áry piky oexy inony va'e, mbojape guive.

¹⁰ Ha'e gui Jesus ha'e kuery pe

— Peru avi pira peẽ pembo'a va'ekue — he'i.

¹¹ Ha'e ramo Simão Pedro kanoã py oike vy omoatã pira mbo'aa yvy'ã re. Cento e cinqüenta e três pira tuvixakueve anho tynyé. Ha'e rami teĩ pira mbo'aa neĩ peteĩ henda py ma ndoxoi.

¹² Ha'e gui Jesus

— Peju jakaru — he'i. Ha'e neĩ peteĩve hemimbo'e kuery noporandui mavae pa oikoa re, mba'eta Senhor ae oikoa oikuua vy.

¹³ Ha'e gui Jesus onhemboja vy ojopy mbojape, ha'e omboja'o. Pira voi ha'ekue rami omboja'o.

¹⁴ Kova'e re mboapykuea ma Jesus guemimbo'e kuery pe ojexa uka raka'e, omanoague gui onhemboete rire.

Pedro pe mboapykue oporanduague

¹⁵ Ha'e kuery okarupa ma rire Jesus oporandu Simão Pedro pe. Ha'e vy aipoe'i:

— Simão João ra'y, ndee nda'u xerayvuve ri amboae kuery gui?

Pedro ombovai:

— Tá Senhor, xee roayvu. Ndee ma reikuua roayvua — he'i.

Ha'e ramo aipoe'i:

— Emongaru ha'vy xerymba vixa'i kuery — he'i.*

¹⁶ Teĩgue ju Jesus oporandu:

— Simão João ra'y, ndee pa xerayvu?

Ombovai:

— Tá Senhor, xee roayvu. Ndee reikuua roayvua — he'i.

Ha'e ramo Jesus aipoe'i:

— Epena ha'vy xerymba vixa'i kuery re — he'i.

¹⁷ Ha'e gui mboapykuea ma Jesus oporandu:

— Simão João ra'y, ndee pa xerayvu?

Ha'e ramo Pedro iporiau, mboapykue ma “Ndee pa xerayvu?” he'i ramo. Ha'e vy ombovai:

— Tá Senhor, ndee ma opa mba'e reikuua, ha'e reikuua avi xee roayvua — he'i.

Ha'e ramo Jesus aipoe'i:

— Emongaru ha'vy xerymba vixa'i kuery.

¹⁸ Anhetê aipoa'e ndevy: Nekunumive jave py ma ndee ae renhemonde ha'e reo va'ekue reoxea katy rei. Ha'e rã ndetuja'i ma rire reupi 'rã ndejyva jovaive, ha'e amboae kuery nemoxã vy ndererera 'rã ndee reoxeague katy e'ý — he'i.

¹⁹ Ha'e rami ijayvu vy oikuua uka marã rami pa Pedro omano aguã Nhanderuete mboetea rupi.* Ha'e rami ijayvupa rire aipoe'ive ju:

— Eju ke xerakykue — he'i.

²⁰ Ha'e gui Pedro ojere vy oexa hakykue'i hemimbo'e Jesus oayvuve va'e ou oiny ramo. Ha'e va'e ma okaru okuapy jave Jesus yvy'iry oguapy oiny, ha'e ijopy uka nhemiarã mavae pa oikoa re oporandu va'ekue.

²¹ Ha'e gui Pedro ha'e va'e oexa vy oporandu Jesus pe:

— Ha'vy peva'e?

²² Jesus ombovai:

— Xapy'a rei xee aipota ramo peva'e oikove 'rã aju jevy peve. Mba'e re tu ndee ha'e nunga reikuaxe? Ndee tema eju xerakykue — he'i.

* 21:15 1 Pedro 5.1-4 * 21:19 2 Pedro 1.13,14

²³ Ha'e va'e rire irmão kuery oikuua “Ha'e va'e hemimbo'e nomanoi 'rā" he'iague rami. Ha'e rami teĩ Jesus ma “Nomanoi 'rā" nde'i. Ha'e rā “Xapy'a rei xee aipota ramo ha'e oikove 'rā aju jevy peve. Mba'e re tu reikuaxe ha'e nunga?” he'i raka'e.

João omombe'u va'ekue re ijayvuague

²⁴ Ha'e va'e hemimbo'e ae ha'e nunga omombe'u ha'e imboparaare. Ha'e ore kuery roikuua ha'e omombe'u va'ekue anhetē memea.

²⁵ Heta teri oĩ Jesus ojapo va'ekue. Ha'e nunga ha'e javi omboparapaa va'e rire xee aikuua rā neĩ yvy jave re voi noimbai 'rāgue kuaxia ombopara pyre.

Apóstolo kuery rembiapokue atos 'epy va'e oĩa Apóstolo kuery ojapo va'ekue atos 'epy va'e oĩa

Jesus Cristo omanoague gui onhemboete ju, ha'e yva re oo ta ma jave ijayvu Nhe'ẽ Ky'a E'ŷ hemimbo'e kuery re oguejy vy omombaraete aguã. Aipoe'i: "Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'u, Judéia ha'e Samaria rupi, ha'e gui yvy apy ha'e javi rupi peve", he'i (1.8b). Quarenta araa py ha'e kuery re Nhe'ẽ ou. "Ha'e ramo hemimbo'e kuery oje'oi vy opa rupi omombe'u ayvu. Senhor voi oipytyvõ hexa pyrã ojapo py, ha'e kuery ayvu omombe'ua rupi anhetẽ memea oikuaa uka aguã" (Marcos 16.20). Kova'e kuaxia py ha'e nunga oĩ. Lucas ombopara va'ekue.

Jesus po'akaa rupi ha'e Nhe'ẽ Ky'a E'ŷ rupi hemimbo'e kuery omombe'u Jesus Cristo re jajerovia aguã regua ha'e hexa pyrã ojapo. Jerusalém tetã gui omboypy, Judéia ha'e Samaria ha'e javi rupi ju oje'oi, ha'e gui judeu e'ŷ va'e ikuia rupi. Apóstolo Pedro onhea'ãve raka'e judeu kuery pe ayvu omombe'u aguã, ha'e rã apóstolo Paulo ma judeu e'ŷ va'e kuery pe omombe'u. Ha'e ramia py opa rupi oikuaa uka ayvu Jesus nhandereraa jepea regua. Aŷ peve ha'e va'e ayvu omombe'ua teri peteĩ-teĩ regua ikuia rupi, Jesus aipoe'iague rami vy. Ko yvy re Jesus ojevy e'ŷa ja ha'e rami 'rã omombe'ua, pavẽ oendu aguã.

Ijayvu ypyague

¹ Jypyguia kuaxia ndevy Teófilo ambopara va'ekue ma amombe'u aguã Jesus ojapo va'ekue ha'e nhombo'eague ha'e javi,*

² yvate heraa ára peve. Ha'e va'e e'ŷ mbove ma apóstolo kueryrã oiporavo va'ekue pe ojapo uka mba'emo Nhe'ẽ Ky'a E'ŷ rupi.

³ Mba'eta omano rire ha'e va'e kuery pe ojexa uka ju oikove va'e. Mbovykue rei e'ŷ oikuaa uka anhetẽ ete oikovea. Quarenta ára re ha'e kuery pe ojexa uka vy ombo'e oikovy mba'emo Nhanderuete po'akaa rupi oiko va'erã re.

⁴ Ha'e kuery reve okaru vy aipoe'i avi:

— Jerusalém gui pejepa e'ŷ re pearõ ranhe Xeru Onhe'ẽ ombou aguã re ijayvuague. Ha'e va'e xee amombe'u rã pendu ae ma va'ekue.*

⁵ Mba'eta João ma anhetẽ yy py nhomongarai va'ekue. Ha'e rã peẽ ma Nhe'ẽ Ky'a E'ŷ reve 'rã penemongaraia, are vaipa e'ŷ re — he'i.

Yva re Jesus ooague

⁶ Ha'e rami rã ijaty va'e kuery oporandu:

— Senhor, aŷ ma nhi'ã rejapo ta Israel kuery ipo'aka ju aguã rami?

⁷ Ha'e ramo ombovai ha'e kuery pe:

— Mba'emo oiko aguã ára araka'e paa ma Xeru opo'akaa rupi ae oa'anga va'ekue. Ha'e rã peẽ kuery ma nda'evei peikuua aguã.

⁸ Ha'e rami avi pendere Nhe'ẽ Ky'a E'ŷ oguejy rã penembopo'akaa ae 'rã. Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'u, Judéia ha'e Samaria rupi, ha'e gui yvy apy ha'e javi rupi peve — he'i.

⁹ Ha'e rami Jesus ijayvupa ma rire yvate heraa ha'e kuery oexaa gui. Ha'e gui peteĩ arai ou vy ojao'i ramo ndoexavei.*

¹⁰ Yva re Jesus oo ma ramo ha'e kuery oma'ẽ teri okuapy jave ha'e kuery yvýry mokoĩ ava hi'aĩ xapy'a ijao xiimba rei va'e.

¹¹ Ha'e va'e kuery oporandu:

* 1:1 Lucas "Jypyguia kuaxia" he'ia ma Jesus Cristo reko ombopara va'ekue re ijayvu vy (Lucas 1.1-4), mba'eta ha'e va'e ombopara rire apóstolo kuery ojapo va'ekue ju ombopara, kova'e ae. * 1:4 Lucas 24.36-49 * 1:9 Mateus 28.16-20; Marcos 16.15,19; Lucas 24.50,51

— Avakue Galiléia pygua, mba'e re tu pema'ẽ teri yvate? Mba'eta penembyte gui Jesus yva re oo va'ekue ma ha'ekue rami ae ju 'rã ou, oo rã pexaague rami ae.

Jerusalém tetā py temimbo'e kuery ikuaiague

¹² Ha'e ramo Olival yvyty 'epy va'e gui ma Jerusalém tetā katy ju ojevypa, sábado ára py oguata aguã ha'evea peve.[†]

¹³ Tetā re ovaẽ ma vy ojeupi jogueravy yvate opy oĩ va'e py. Ha'e py ma nhomboaty: Pedro, João, Tiago, André, Filipe, Tomé, Bartolomeu, Mateus, Alfeu ra'y Tiago, Simão Zelote ha'e Tiago ra'y Judas.

¹⁴ Ha'e va'e kuery ha'e javi ma peteĩ rami meme ikuai onhembo'ea py. Kunhague avi ikuai. Ha'e kuery reve oĩ avi Jesus xy Maria, tyvy kuery guive.

Apóstolo-rã Matias oiporavoa ague

¹⁵ Ha'e va'e jave py ma irmão kuery cento e vinte ikuai va'e mbyte py Pedro opu'ã ho'amy. Ha'e vy aipoe'i:

¹⁶ — Irmão kuery, ojeupity 'rãe raka'e Davi juru rupi Nhe'ẽ Ky'a E'ŷ omombe'u va'ekue Judas rekorã. Ha'e va'e ma ogueraa raka'e Jesus jopyarã kuery.

¹⁷ Mba'eta ha'e va'e ma ore kuery regua vy kova'e tembiapo ojapo aguã rami oiko avi va'ekue.

¹⁸ (Ha'e gui ha'e va'e ava ma ojeavyague repy re ojoguaa peteĩ yvy. Ha'e py oo ma vy ho'a vy oxoropa, hyekue onheẽmba raka'e.)

¹⁹ Ha'e nunga ha'e javi Jerusalém py ikuai va'e oikuaapa. Ha'e rami vy oayvu py ae omboery Aceldama, “Yvy tuguy” he'ia.)*

²⁰ Mba'eta kuaxia Salmo oĩa re ipara oiny: “Hogue topyta tekaoa oĩ e'ŷa. Toĩ eme avave rei ha'e va'e py”, ha'e “Tove amboae tojopy hembiaporã va'ekue” he'iague.*

²¹ Ha'ekue rami vy jajou 'rã peteĩ ava Senhor Jesus oikoa pukukue re nhandereve ikuai va'ekue regua,

²² João nhomongaraia ára guive, ore mbyte gui yvate Jesus heraa-a ára peve. Ha'e va'e regua peteĩ toiko nhandereve onhemboete jevyague mombe'uarã — he'i.*

²³ Ha'e ramo mokoĩ ranhe ojou okuapy: José Barsabás Justo 'epy va'e, ha'e Matias guive.

²⁴ Ha'e rami vy onhembo'e vy aipoe'i okuapy:

— Ndee Senhor ha'e javive py'a re oĩa reikuua va'e vy eikuua uka orevy mava'e pa kova'e mokoĩ gui reiporavo ra'e,

²⁵ apóstolo rembiapo ojapo oikovy aguã. Mba'eta Judas ma ha'e rami aguã gui ojepe'a raka'e, ha'e ae oĩ aguã katy oo vy — he'i okuapy.

²⁶ Ha'e gui ma xortea oexa vy oikuua okuapy Matias ri ty ra'ea. Ha'e rami vy omoĩ onze apóstolo ikuai va'e irürã.

2

Nhe'ẽ Ky'a E'ŷ oguejyague

¹ Pentecostes ára ojeupity jave ha'ekue py ae ono'õmba okuapy.

² Ha'e gui yva gui ou nhendu xapy'a yvytu atã ramigua. Opy jave re oguapy okuapy rupi onhendu.

³ Ha'e kuerya rupi tata rendy vuku ramigua ojekuaa avi, apekũ ramigua merami. Ha'e vy peteĩ-teĩ áry oĩ.

⁴ Ha'e javive re Nhe'ẽ Ky'a E'ŷ anho oĩ ramo ijayvu okuapy ayvu mboae py, Nhe'ẽ ombo'ea rami meme.

Amboae ayvu py omboayvuague

[†] 1:12 Judeu kuery gueko rami vy sábado ára oguata aguã ha'evea ma namombyryi'i, peteĩ quilômetro rai'i peve anho (Lucas 24.52,53.) * 1:19 Mateus 27.3-10 * 1:20 Salmo 69.25, 109.8 * 1:22 João 15.27

⁵ Jerusalém py ikuai avi judeu regua avakue Nhanderuete pegua, yva guýry ha'e javi gui ou va'ekue.

⁶ Ha'e kuery ma hemimbo'e kuery ha'e rami ijayvu rā oendu vy heta ijatypa. Ndoikuuai rei okuapy, mba'eta ijayvu rā oendu okuapy peteī-teī oayvu ae py.

⁷ Onhemondyipa ha'e ndoikuuai rei vy aipoe'i okuapy:

— Ne'endu, Galiléia pygua meme e'ŷ ri nda'u peva'e kuery ijayvu okuapy va'e?

⁸ Mba'exa vy tu ijayvu rā peteī-teī nhandeayvu ae py nhaendu?

⁹ Mba'eta Pártia guigua nhandekuai, Média guigua, Elão, Mesopotâmia, Judéia ha'e Capadócia guigua, Ponto ha'e Ásia guigua,

¹⁰ Frígia, Panfília, Egito, Líbia, Cirene katy'i ha'e Roma guigua guive apy nhandekuai,

¹¹ judeu ha'e judeu reko rami nhandekuai va'e, Creta ha'e Arábia guigua kuery. Ha'e rami teī mba'exa vy tu nhandeayvu ae py nhaendu ha'e kuery ijayvu rā Nhanderuete mba'emo porā ojapoa re? — he'i okuapy.

¹² Ha'e javive ndoikuuai rei ha'e onhemondyipa vy oporandu okuapy joupe-upe:

— Mba'erā nda'u po rami ijayvu? — he'i okuapy.

¹³ Ha'e rā amboae kuery ma ojojai rei vy

— Oka'upa rima ra'e — he'i okuapy.

Pedro ijayvuague

¹⁴ Ha'e ramo Pedro opu'ã ho'amy apóstolo kuery mboae onze va'e reve. Ijayvu atā vy aipoe'i:

— Avakue judeu regua ha'e Jerusalém py pendekuai va'e ha'e javive, pejapyxaka xeayvua re peikuaa porā aguā.

¹⁵ Kova'e avakue ma ndoka'ui pexa'aa rami e'ŷ, mba'eta kuaray yvatepa ramo'i.

¹⁶ Ha'e rami 'rāgue py oiko va'e ma profeta Joel pe aipoe'i ukaague rami:

¹⁷ "Senhor aipoe'i: 'Opaa ára py po rami 'rā oiko. Avakue ha'e javi re ambou 'rā Xenhe'ē. Ha'e ramo pendera'y ha'e penderajy kuery ijayvu 'rā xegui. Ipyaukueve oexa 'rā hexa pyrā, kakuaakueve voi oexa ra'u 'rā.

¹⁸ Ha'e va'e ára Xenhe'ē ambou 'rā xerembiguai avakue ha'e kunhague re. Ha'e ramo ha'e kuery mba'emo omombe'u 'rā Nhe'ē rupi.

¹⁹ Yva re aexa uka 'rā nhomondyipaarā, yvy re voi hexa pyrā aexa uka 'rā tuguy, tata ha'e hataxī.

²⁰ Ha'e ramo kuaray pytumba 'rā, jaxy voi tuguy rami 'rā opyta, Senhor ára yvate ete ha'e hexakāmba va'e ovaē e'ŷ mbove.

²¹ Ha'e po rami 'rā oiko: Ha'e javive Senhor rery rupi ojapukai va'e oo jepe 'rā', he'iague."*

²² — Avakue Israel regua, pejapyxaka xeayvua re. Penerenonde rupi Nhanderuete oikuua uka va'ekue Nazaré pygua Jesus po'akaa. Ha'e ramo opo'akaa rupi ojapo oikovy penemondyiārā ha'e hexa pyrā. Ipo rupi Nhanderuete ojapo raka'e penembyte rupi. Peē kuery voi peikuaa.

²³ Ha'e gui Jesus ma Nhanderuete ha'e ae oipotaa rami vy ojopy uka, onhembopy'a voiague rami vy ae. Ha'e ramo peē kuery pejuka. Ha'e vy kuruxu re pemoī uka heko vai va'e kuery pe.

²⁴ Ha'e gui Nhanderuete ma manoa po'akaa ombovaipa vy omboete ju, mba'eta hexe ma manoa nda'ipo'akai 'rāe.

²⁵ Mba'eta hekorā re ae Davi ijayvu raka'e: "Xerenonde aexa riae Senhor aiporu kuaa regua re oī rā, xereity uka e'ŷ aguā.

²⁶ Ha'e rami rā xepy'a py avy'a vaipa, xeayvu py roquerovy'a guive. Xero'o eteve voi ojeroviaa rupi 'rā opytu'u.

²⁷ Mba'eta nderejai 'rā xenhe'ē omano aguā py, xerete voi nerembovaipa ukai 'rā, neremimbo'e iky'a e'ŷ va'e aiko rā.

* 2:21 Joel 2.28-32

²⁸ Ha'e rami 'rāgue py xevy pe reikuua uka tape tekove katy oo va'e, nerенонde xembovy'a 'rā guive opa mba'e py", he'i va'ekue.*

²⁹ — Ke'y ha'e xeryvy kuery, tamombe'u porāve nhaneramoī Davi rekokue. Ha'e va'e ma omano raka'e, onhono porāa guive. Onhono porāague ma aŷ peve oī nhanembyte.

³⁰ Ha'e rami avi profeta oiko, oikuua guive Nhanderuete oura voiague, hekovia peteī hamymino huvixaverā oī aguā re.

³¹ Ha'e nunga oikuua vy ae ijayvu raka'e Cristo onhemboete jevy 'rāa re, omanoa py ndoejai, neī hetekue ombovaipa uka e'ŷ aguā re.

³² Ha'e rami vy Nhanderuete omboete ju Jesus. Ha'e nungakue mombe'ua ma ore kuery ha'e javive orekuai.

³³ Ha'e gui Nhanderuete oiporu kuaa regua re omboyvateve ma ramo Nguu gui ojopy Nhe'ē Ky'a E'ŷ ombou 'rā va'ekue. Ha'e va'e ae ombou kuri pexa ha'e pendu va'e.

³⁴ Mba'eta Davi ma yva re ndooi va'eri ha'e ae aipoe'i: "Senhor ma aipoe'i xe-Senhor pe: 'Eguapy aiporu kuaa regua re,

³⁵ nderovaigua kuery ndepy guýry guarā amoī e'ŷa ja', he'i va'ekue."*

³⁶ Ha'e nunga rupi peē Israel kuery ha'e javi, peikuua porā pota pova'e re: Jesus kuruxu re pemoī va'ekue ae ma Nhanderuete oikuua uka Senhor ha'e Cristo oikoa — he'i.

Três mil onhemongarai ukaague

³⁷ Ha'e nunga ha'e kuery oendu vy opy'a re oendu okuapy ojeayvua. Ha'e vy oporandu Pedro ha'e apóstolo kuery mboae pe:

— Ke'y kuery, mba'e tu rojapo ta?

³⁸ Pedro ombovai:

— Pejeko rerova, ha'e peteī-teī penhemongarai uka Jesus Cristo rery rupi, pejavyague omboguepa aguā. Ha'e rami vy pendevy voi ome'ēa 'rā Nhe'ē Ky'a E'ŷ.

³⁹ Mba'eta peē kuery pe voi ijayvu ombou aguā re, penda'y ha'e pendajy kuery pe, ha'e mombyry teri ikuai va'e Senhor Nhanderuete oenoī va'erā ha'e javive pe guive — he'i.

⁴⁰ Opa marāgua ayvu py omongetave ju. Ha'e vy aipoe'i:

— Pejereraa jepe uka kova'e kuery heko vai va'e mbyte gui — he'i.

⁴¹ Ha'e gui onhe'ē rendu va'e kuery onhemongarai uka. Ha'e rami vy ha'e va'e ára hetave três mil rai'i.

Ojeko me'ē va'ekue ikuiaia re ijayvuague

⁴² Ha'e kuery ikuai tema apóstolo kueryombo'ea rami peteī'i rami meme, mbojape oipe'ā-pe'ālia rupi, ha'e onhembo'ea py.

⁴³ Peteī-teī oendu ojererokyjea. Ha'e rā apóstolo kuery ma opo py heta ojapo nhomondyipaarā ha'e hexa pyrā.

⁴⁴ Ha'e javive oguerovia va'e joupive ikuai, ha'e opa mba'e oguereko va'e joupe guarā meme.*

⁴⁵ Ha'e rami vy oyvy ha'e mba'emo oguereko va'ekue ovende vy hepykueomboja'o-ja'o amongue oikotevēa rami.

⁴⁶ Ko'ē nhavō peteī rami ikuai templo py, ha'e ngoo rupi mbojape ho'u okuapy. Ovy'a reve okaru peteī rami ipy'a reve.

⁴⁷ Nhanderuete pe oporaeia rupi tema ikuai. Ha'e rami rā heta va'e kuery ha'e javi ojou porā, ha'e ko'ē nhavō Senhor omboetave heravy oo jepe va'e.

3

Peteī oguata e'ŷ va'ekue omopu'ā jevyague

¹ Kuaray ojero'a jave Pedro ha'e João templo katy oo onhembo'e vy.

² Ha'e jave py ma heraa avi peteī ava itui'i guive ndoguatai va'e. Ha'e va'e ma ko'ē nhavō omoīa 'rā templo rokē Iporā 'epy va'e py, oike va'e kuery pe mba'emo re ojerure aguā.

³ Pedro ha'e João templo py oike jogueravy rā ava va'e oexa vy ha'e kuery pe voi ojerure mba'emo ome'ẽ aguã.

⁴ Ha'e gui hexe Pedro ha'e João oma'ẽ porã ranhe. Ha'e vy
— Ema'ẽ orere — he'i.

⁵ Ha'e ramo ha'e kuery re oma'ẽ oiny mba'emo ojopy aguã oarõ vy.

⁶ Ha'e gui Pedro aipoe'i:

— Xee ma prata neĩ ouro ndarekoi. Ha'e rā areko va'e ma ame'ẽ 'rā. Ha'e rami vy Jesus Cristo Nazaré pygua va'e rery rupi aipoa'e: Eguata — he'i.*

⁷ Ha'e rami vy ipo oiporu kuaa regua re ojopy vy omopu'ã. Ha'e ramove ipy ha'e ipy nhu'ã imbaraetepa.

⁸ Opo reve opu'ã vy templo py oike ha'e kuery reve. Opo-opo oikovy Nhanderuete pe oporaei reve.

⁹ Ava va'e oguata ha'e Nhanderuete pe oporaei rā pavẽ rei oexa okuapy vy

¹⁰ oikuapa ha'e ae ri ty ra'e mba'emo re ojerurea rupi templo rokẽ Iporã 'epy va'e py oguapy va'ety. Ha'e rami vy onhemondyipa, okyje guive ha'e nunga ri ty ra'e oiko rā.

Templo ropy Pedro ijayvuague

¹¹ Pedro ha'e João reve tema ava va'e onhemoirũ rā heta va'e kuery ha'e javi oexa vy onhemondyipa reve onhamba jogueruvy ha'e kuerya katy, Salomão roguy puku 'epy va'e py.*

¹² Heta va'e kuery ou rā Pedro oexa vy aipoe'i ha'e kuery pe:

— Israel kuery, mba'e re tu penhemondyipa ri kova'e nunga gui? Mba'e re tu orere anho ri pema'ẽ? Pexa'ã teve ore ae po'akaa py, e'ŷ vy orerekó porãa py romboguata jevyague?

¹³ Mba'eta Abraão, Isaque ha'e Jacó Ruete, nhaneramoĩ kuery Ruete ae ojapo, guembiguai Jesus po'akaa oikuua uka aguã. Ha'e va'e ma pejopy uka nhemi, ha'e huvinha Pilatos opoi ta ramo henonde pendeayvu va'ekue ndapeipotaia rupi.

¹⁴ Iky'a e'ŷ va'e, Heko porã ete va'e peẽ kuery ndapeipotai vy hekivia pejerure jojuka rive va'ety opoi aguã.

¹⁵ Ha'e rami py pejuka uka Tekove me'ẽa. Ha'e rā Nhanderuete ma omboete ju omanoague gui. Ore kuery ma ha'e nungakue mombe'ua orekuai.

¹⁶ Jesus rery re ore rojerovia ramo guery rupi ae omombaraete kova'e ava, aŷ pexa vy peikuua va'e. Tá, Jesus re rojerovia ramo ae omonguera porã ju peẽ kuery ha'e javive renonde.

¹⁷ — Ha'e gui aŷ ke'y ha'e xeryvy kuery, xee aikuua peikuua e'ŷ vy pejuka ukaague, penduvixa kuery reve.

¹⁸ Ha'e rami avi Nhanderuete ae ojapo Cristo oiko axy aguã rami, profeta kuery pe omombe'u uka va'ekue ha'e javi ojeupity aguã.

¹⁹ Ha'e nunga rupi penhemboaxy ha'e pejeko rerova ke pejejavyague omboguepa aguã,*

²⁰ Senhor gui ou aguã javy'a aguã ára, ha'e pendereraa jepearã omoĩ va'ekue Cristo ombou jevy aguã. Ha'e va'e ma Jesus ae.

²¹ Mba'eta yva re optya ranhe 'rā mba'emo ombopyaupa aguã ára ovaẽ e'ŷa ja. Ha'e va'e ára ma yma ma voi Nhanderuete omombe'u uka profeta kuery iky'a e'ŷ va'e pe.

²² Mba'eta anhetẽ ae Moisés aipoe'i: “Senhor Nhanderuete ma pendyvy kuery regua va'e ae omoingo 'rā peteĩ profeta xee rami guarã. Ha'e va'e ayvu re anho pejapyxaka 'rā opa mba'e omombe'u rā.

²³ Ha'e rā ha'e va'e profeta ayvu re ndojapyxakai va'e ma oipe'apaa 'rā heta va'e kuery mbyte gui”, he'i va'ekue.*

²⁴ Ha'e gui Samuel oiko guive profeta ikuai va'e ha'e javi omombe'u ma voi kova'e ára guarã.

* 3:6 João 14.13,14 * 3:11 Salomão roguy puku 'epy va'e ma templo roka py oĩ. * 3:19 Lucas 24.46,47 * 3:23 Deuteronômio 18.15,18-19

²⁵ Peẽ ma profeta ramymino kuery pendekuai, ha'e nhaneramoĩ kuery pe Nhanderuete guexeve guarã ojapo va'ekue ma pendevy pegua voi, mba'eta Abraão pe “Neramymino kuery re vy yvy regua ha'e javi ikuai porã 'rã”, he'iague rami.*

²⁶ Ha'e nunga rupi Nhanderuete Guembiguai omboete ju vy pendevy pe ranhe ombou, peteĩ-teĩ pendeko vaia gui pendepe'a vy penemoingo porã aguã.

4

Pedro ha'e João nhuã py ombotya ague

¹ Heta va'e kuery pe apóstolo kuery ijayvu teri reve ou sacerdote kuery, templo rarõa ruvixa ha'e saduceu kuery.

² Ha'e va'e kuery ma ndojou porãi heta va'e kuery ombo'ea, mba'eta omombe'u Jesus re vy omano va'ekue onhemboete jevy 'rãa.

³ Ha'e rami vy ka'aru ma ramo ojopy vy nhuã py ombotya ko'ẽ jevy oikuaa pota aguã.

⁴ Ha'e rã ijayvua oendu va'e kuery ma heta oguerovia. Avakue oguerovia va'e ma cinco mil rai'i ikuai.

Pedro ha'e João omboayvu okuapyague

⁵ Ko'ẽ jevy Jerusalém tetã py huvinha kuery nhomboaty okuapy nhomongeta va'ety kuery reve, lei re nhombo'e va'ety kuery,

⁶ sacerdote yvateve va'e Anás, Caifás, João, Alexandre ha'e gui sacerdote yvateve va'e ro pygua kuery ha'e javi reve.

⁷ Ha'e gui ojea py apóstolo kuery ogueru ruka vy oporandu ha'e kuery pe:

— Mba'e nunga po'akaa rupi tu, ha'e mava'e rery rupi pejapo guĩ nunga?

⁸ Ha'e ramo Pedro re Nhe'ẽ Ky'a E'ŷ anho oĩ ramo aipoe'i:*

— Oreruvixa ha'e nhomongeta va'ety kuery,

⁹ aŷ ma oremboayvu peteĩ ava imba'eaxy va'e pe mba'emo porã oiko va'ekue re, ha'e marã rami vy pa okueraague re.

¹⁰ Peikuua pota ha'vy pova'e re, peẽ ha'e Israel kuery ha'e javi reve: Nazaré pygua Jesus Cristo kuruxu re pemoĩ uka va'ekue, ha'e omanoague gui Nhanderuete omboete ju va'ekue rery rupi ae kova'e ava okuera reve hi'aĩ penerenonde.

¹¹ Jesus ae ita peẽ oo apoia kuery ndapeipotai va'ekue ri ita omboeteve pyrã rami optya.*

¹² Mba'eta jipoi nhanderereraa jepearã mboae, mba'eta yva guýry nda'ipoi amboae tery nhandevy pe ome'ẽ mbyre, ha'e va'e rupi jaa jepe aguã — he'i.

¹³ Ha'e rami rã Pedro ha'e João ipy'a guaxua oexa vy onhemondyipa okuapy, mba'eta kuaxia para oexa kuaa va'e e'ŷ, imbo'e pyre'ŷ ikuiaia oikuaa vy. Ha'e rami vy oikuaa Jesus reve ikuai va'ekuea.

¹⁴ Ha'e kuery mbyte py ava omonguera pyre oĩ avi rã oexa vy nda'ijayvu kuaavei ha'e kuery rovai.

¹⁵ Ha'e gui ma omboayvuague gui omoẽmba vy jomeme ju ijayvu vy

¹⁶ aipoe'i:

— Mba'e tu jajapo 'rã peva'e avakue re? Mba'eta anhetẽ ae Jerusalém pygua kuery oikuaapa ha'e kuery mba'emo porã ete ojapoague. Ha'e nunga rupi “Any” ja'e aguã nda'evei.

¹⁷ Ha'e rami avi heta va'e kuery pe ha'e kuery omombe'u ve'ŷ aguã nhamongyje 'rã. “Ha'e va'e rery rupi pendeayyuve eme avave rei pe”, ja'e 'rã — he'i okuapy.

¹⁸ Ha'e rami vy oenoĩ jevy vy ijayvu ha'e kuery pe Jesus rery rupi nda'ijayvuvei neĩ nanhombo'evei aguã.

¹⁹ Ha'e ramo Pedro ha'e João ombovai:

— Peikuua pota ke Nhanderuete renonde: Ha'eve ri nda'u peẽ kuery, tyrã pa Nhanderuete ronhe'ẽ rendu aguã?

* 3:25 Gênesis 22.18, 26.4

* 4:8 Lucas 21.12-15

* 4:11 Salmo 118.22

²⁰ Mba'eta ore ma ndorojep'e ai 'rā mba'emo roexa ha'e roendu va'ekue re oreayvua gi — he'i.

²¹ Ha'e rami rā omongyjeve rire opoipa, mba'e nunga re pa ombopaga aguā oikuaa e'ŷ vy, heta va'e kuery gui okyje guive. Mba'eta pavē rei ma mba'emo porā oikoague re ima'endu'a vy oguerovy'a okuapy Nhanderuete,

²² mba'eta Nhanderuete opo'akaa py omonguera va'ekue ma quarenta ma'etŷ raxa oguerek.

Igreja kuery onhembo'e okuapyague

²³ Pedro ha'e João opoia ma ramo ojou irmão kuery. Ha'e vy ha'e kuery pe omombe'u sacerdote yvatekueve va'e ha'e nhomongeta va'ety kuery ijayvuague ha'e javi.

²⁴ Omombe'u rā ha'e kuery oendu vy ha'e javive ojapukai okuapy Nhanderuete pe. Ha'e vy aipoe'i:

— Ndee Senhor Ndepo'akapa va'e ma yva, yvy, ye'ẽ ha'e opa mba'e hexe ikuai va'e apoare reiko.*

²⁵ Nhe'ẽ Ky'a E'ŷ rupi aipo'ere uka va'ekue nerembiguai oreramoī Davi pe: “Mba'e re nda'u judeu e'ŷ va'e kuery ipoxypa, ha'e heta va'e kuery voi mba'emo ovare'ŷ va'e ojapo aguā onhembopy'a okuapy?

²⁶ Mba'eta yvy regua huvixave kuery opu'ā, huvixa kuery peteī rami nhomboaty okuapy Senhor ha'e huvixaverā omoī va'ekue rovai”, 're uka va'ekue.*

²⁷ Mba'eta anhetē ae kova'e tetā py nhomboaty okuapy Nerembiguai iky'a e'ŷ va'e Jesus nhandereraa jepearā remoī va'ekue rovai. Herodes ha'e Pôncio Pilatos, judeu e'ŷ va'e ha'e oreretarā Israel kuery reve nhomboaty raka'e

²⁸ ojapo aguā ndepo'akaa rupi ndee ae renhembopy'a ma voiague ha'e javi.

²⁹ Aŷ ma Senhor, eikuua pota oremongyje okuapya re, ha'e ore nerembiguai kuery orembopy'a guaxu ndeayvu romombe'u aguā.

³⁰ Ha'e ramia ja ndepo'akaa rupi enhomonguera. Nerembiguai iky'a e'ŷ va'e Jesus rery rupi ejapo hexa pyrā ha'e nhomondyipaara — he'i okuapy.

³¹ Ha'e kuery onhembo'epa ramove oo ono'õ okuapya oryryipa. Ha'e javive re Nhe'ẽ Ky'a E'ŷ anho oī. Ha'e ramo okyjea py e'ŷ omombe'u Nhanderuete ayvu.*

Igreja kuery reko re ijayvuague

³² Ojerovia va'e kuery ma peteī rami meme ipy'a ha'e inhe'ẽ. Avave rei “Xevy anho” nde'i neī peteīve oguerek va'e regua pe ma voi. Mba'emo oguerek va'e ma joupe-upo omboja'o va'erā meme oguerek.

³³ Apóstolo kuery ma ipo'akapa reve omombe'u Senhor Jesus onhemboete jevyague, ha'e pavē re oī omboaxya.

³⁴ Mba'eta ha'e kuery mbyte neī peteīve iporiau'i va'e ndoikoi, mba'eta yvy, e'ŷ vy oo oguerek va'e ovendepa vy ogueru 'rā hepykue,

³⁵ ha'e apóstolo kuery py yvýry omoī. Ha'e ramo peteī-teī pe omboja'o-ja'o 'rā mba'emo oikotevēa rami.*

Barnabé mba'emo ome'ēague

³⁶ Peteī levita Chipre guigua José hery va'e avi ojapo, apóstolo kuery omboery va'ekue Barnabé, “Nhombopy'a guaxua” 'ea.

³⁷ Ha'e va'e ma oyvy oguerek va'ekue ovende, ha'e hepykue ogueru vy omoī apóstolo kuery py yvýry.

Ananias ha'e Safira reko re ijayvuague

¹ Oiko avi peteī ava Ananias hery va'e. Gua'yxy Safira reve ovende avi oyvy,

² va'eri gua'yxy reve jogueroayvua rami vy ojeupe guarā ae omboja'o hepykue. Hembyrekue rive ogueraa vy omoī apóstolo kuery py yvýry.

³ Ha'e ramo Pedro aipoe'i:

— Ananias, mba'e re tu ndeapu aguā, ndeyvy repykue regua ndejeupe guarā ae remoī porā vy?

⁴ Ndeyvy revende e'ŷ mbove nemba'e'ŷ ri ty'y itui? Ha'e revende rire voi hepykue ndepo py e'ŷ ri ty'y oī? Mba'e re tu guĩ rami rejapo aguā ri oī ndeapu, ha'e rā Nhanderuete pe — he'i.*

⁵ Ha'e rami ijayvu rā Ananias oendu vyve ho'a, omano. Ha'e ramo pavē oendu vy onhemondiyipa.

⁶ Ha'e gui kunumigue ikuai va'e ovaẽ vy onhovāmba hetekue, ha'e onhono porā aguā py ogueraa.

⁷ Ha'e gui três hora ma oaxa rire Ananias ra'yxy ju ovaẽ mba'e pa oikoague ndoikuai vy.

⁸ Ha'e ramo ixupe ju Pedro oporandu:

— Emombe'u xevy: Kova'e'i re ae ma nhi'ā pevende ra'e pendeyvy?

Kunha va'e ombovai:

— Tá, evoko va'e'i re ae ri — he'i.

⁹ Pedro aipoe'i:

— Mba'e re tu penhembopy'a ri Senhor Nhe'ẽ peko a'ã aguā? Aipo, okē py onhendu neme nhono porāare kuery pyambu. Ha'e ndee voi ndereraa avi 'rā — he'i.

¹⁰ Ha'e ramove kunha va'e ho'a Pedro py rupi, ha'e vy omano. Kunumigue oike vy omano ma oupy rā ojou. Ha'e rami vy ogueraa vy ime yvýry onhono porā.

¹¹ Ha'e rami rā igreja ikuai va'e oendu okyjea, oiko va'ekue renduare kuery ha'e javive guive.

Apóstolo kuery opa mba'e porā ojapoague

¹² Apóstolo kuery po py hexa pyrā ha'e nhomondiyipaarā heta ojapo ukaa heta va'e kuery mbyte rupi.* Ijatypa jepi 'rā Salomão roguy puku 'epy va'e py.

¹³ Ha'e rā amboae kuery ma peteīve na'irūxei ha'e kuery re. Ha'e rami avi heta va'e kuery ojou porā.

¹⁴ Ha'e rami vy avakue ha'e kunhague ma heta-etave tema oje'oivy Senhor re ojerovia va'e.

¹⁵ Ha'e ramo tape rupi imba'eaxy va'e heraa vy onhonoa inony hupa reve ha'e ajukue áry, Pedro oaxa ramo hi'ã ri jepe ojao'i aguā.

¹⁶ Jerusalém katy'i tetā ikuai va'e gui heta ou avi. Imba'eaxy ha'e nhe'ẽ vai gui oiko axy va'e herua ramo omonguerapaa.

Apóstolo kuery nhuā py ombo'aa ague

¹⁷ Ha'e gui ma sacerdote yvateve va'e ha'e irū kuery saduceu regua ha'e javive nda'ija'ei vy opu'ā okuapy.

¹⁸ Ha'e rami vy apóstolo kuery ojopy vy omboty nhuā py.

¹⁹ Ha'e rami teī pyávy peteī anjo Senhor-a guigua oipe'a nhuā rokē. Ha'e vy oka katy ogueraa vy aipoe'i:

²⁰ — Tapeo, templo py ju pene'aī, ha'e heta va'e kuery pe pemombe'u tekove regua ayvu ha'e javi — he'i.

²¹ Ha'e nunga ha'e kuery oendu vy ko'ẽmba'i ramove templo py oike vy nhombo'e.

Ha'e gui sacerdote yvateve va'e ha'e irū kuery ma nhomboayvuaty py oupa vy omboatypa avi Israel ruvixa kuery ha'e javi. Ha'e vy omondouka nhuā gui apóstolo kuery ogueru aguā.

²² Ha'e rā xondaro kuery nhuā py oo vy ndojoui. Ha'e rami vy ojevy ju vy omombe'u.

²³ Ha'e vy aipoe'i:

* 5:4 Gálatas 6.7 * 5:12 Marcos 16.17-20

— Roexa rā nhuā onhemboty porā oiny, ha'e okē py ma nhuā rarōa kuery ikuai. Ha'e rami teī roipe'a vy peteīve ndorojoui opy — he'i okuapy.

²⁴ Ha'e rami ijayvu rā templo rarōa ruvixa ha'e sacerdote yvatekueve va'e oendu vy ndoikuuai rei okuapy mba'e pa apóstolo kuery re oikoague, neī mba'e pa oiko 'rāa voi ndoikuuai.

²⁵ Ha'e rami jave ete'i amongue ovaē vy omombe'u ha'e kuery pe:

— Nhuā py avakue pemboty va'ekue tu templo py rima ombo'e okuapy heta va'e kuery — he'i.

²⁶ Ha'e ramo templo rarōa kuery ruvixa ixondaro kuery reve oo vy ogueru porā'i, mba'eta okyje heta va'e kuery ita py ojapipa gui.

²⁷ Omboayvu aguā ogueru ma ramo sacerdote yvateve va'e oporandu ha'e kuery pe.

²⁸ Ha'e vy aipoe'i:

— Ha'e gui aiporo'e va'ekue napenhombo'evei aguā ha'e va'e rery rupi. Ha'e ramive ma pejapo Jerusalém ha'e javi rupi penhombo'ea oikuaapaa aguā rami. Orere pemoīxe avi ha'e va'e ava ruguy omoēague re ropaga aguā — he'i.

²⁹ Ha'e ramo Pedro ha'e apóstolo kuery mboae ombovai:

— Avakue ronhe'ē rendu 'rāgue py ha'evee Nhanderuete ronhe'ē rendu.

³⁰ Mba'eta nhaneramoī kuery Ruete omboete ju Jesus, peē kuery yvyra re pemoī uka vy pejuka va'ekue.

³¹ Ha'e rā Nhanderuete ma opo'akaa oexa uka vy omboyvate Huvixave ha'e Jugueraa jepearā, Israel kuery onhemboaxya oendu nho ramo ojeavyague omboguepa aguā.

³² Ha'e gui ore kuery ma ha'e nungakue kuaa ukaarā orekuai, Nhe'ē Ky'a E'ŷ voi, mba'eta Nhanderuete ombou onhe'ē rendu va'e kuery pe.

Gamaliel ijayvuague

³³ Ha'e rami apóstolo kuery ijayvu rā ha'e kuery oendu vy ipoxypave okuapy, ojukaxe guive.

³⁴ Ha'e rami teī nhomongeta va'ety kuery mbyte peteī fariseu opu'ā Gamaliel hery va'e, lei re nhombo'e va'ety, ha'e heta va'e kuery ha'e javi omboeteve va'e.* Ha'e va'e ma opu'ā vy apóstolo kuery omoē uka ranhe xapy'a'i.

³⁵ Ha'e vy oirū kuery pe aipoe'i:

— Israel kuery regua, peikuaa pota ranhe, peva'e avakue pembopaga rive e'ŷ aguā.

³⁶ Mba'eta ymave opu'ā raka'e Teudas. Ha'e va'e ma onhemboyvate rei ramo hexeve quattrocentos avakue rāndā'u onhemoirū. Ha'e gui ma ojukaa rire hexe ojapyxaka va'ekue-ekue oaīmba, mba'eve rei ojapo e'ŷ re.

³⁷ Ha'e va'e rire tery ombopara ukaa jave py Galiléia pygua Judas ju opu'ā vy heta ete ogueraa ngupive. Ha'e va'e voi omano, ha'e rā onhe'ē rendu va'ekue oaīmba rive.

³⁸ Aŷ ma aipoa'e kova'e avakue re pejapo vai ve'ŷ aguā, tove ta'ikuai. Mba'eta ha'e kuery ayvu ha'e hembiapo ma avakue guigua ri vy opa rive 'rā.

³⁹ Ha'e rā Nhanderuete guigua ri ramo napemboavaipa kuaai 'rā, Nhanderuete rovaigua pendekuai e'ŷ aguā — he'i. Ha'e rami ijayvua rā pavē rei ojou porā.

⁴⁰ Ha'e gui ma apóstolo kuery oenoī ju vy oinupāmba. Ha'e vy ha'e kuery pe ijayvu ijayvu ve'ŷ aguā Jesus rery rupi. Ha'e gui oopoipa ju.

⁴¹ Ha'e rā ha'e kuery omboayvuague gui ojepe'a vy ovy'a jogueravy, Jesus rery káuxa ikuai axy aguā oiporavo rire.

⁴² Ha'e gui ko'ē nhavō templo py, ha'e oo ha'e javi rupi ndojepe'ai Jesus ae Cristo oikoa re nhombo'ea gui.*

¹ Ha'e va'e jave temimbo'e kuery heta-etave oje'oivy ramo grego kuery regua ijayvu rei okuapy hebreu regua re, mba'eta ko'ẽ nhavõ tembi'u omboja'oa py grego kuery regua imeve'ỹ va'e kuery re hexarai ra'e.

² Ha'e ramo apóstolo kuery doze va'e omboatypa temimbo'e kuery ha'e javi. Ha'e vy aipoe'i:

— Nda'evei Nhanderuete ayvu romombe'ua gui ore kuery rojep'e a aguã tembi'u romboja'oa rupi roiko aguã.

³ Ha'e nunga rupi irmão kuery, peiporavo peẽ kuery regua sete avakue heko porã va'e, Nhe'ẽ Ky'a E'ỹ anho oĩa, ha'e hi'arandu va'e. Ha'e va'e kuery ma romoõ 'rã ha'e nunga rupi omba'eapo va'erã.*

⁴ Ha'e rã ore kuery ma ronhembo'ea ha'e ayvu romombe'ua rupi anho 'rã orekuai — he'i okuapy.

⁵ Ha'e rami ijayvu rã pavẽ oendu vy ojou porã. Ha'e rami vy jypy ojou Estêvão, peteĩ ava ojerovia ete ha'e Nhe'ẽ Ky'a E'ỹ anho oĩa va'e, ha'e gui ma Filipe, Prócoro, Nicanor, Timão, Pármenas ha'e Nicolau. Ha'e va'e ma Antioquia guigua judeu kuery reko rami oiko va'e.

⁶ Ha'e va'e kuery ma apóstolo kuery renonde ogueru ramo onhembo'e reve ha'e kuery áry omoõ okuapy opo.

⁷ Ha'e gui ma Nhanderuete ayvu oendupaave. Jerusalém tetã py temimbo'e kuery heta-etave ma oje'oivy. Sacerdote kuery voi heta ikuai ojeroviaa rupi.

Estêvão omboayvua ague

⁸ Ha'e gui Estêvão ma Nhanderuete omboaxya ha'e ipo'akaa rupi oiko vy heta va'e kuery mbyte rupi ojapo oikovy nhomondyipaarã ha'e hexa pyrã.

⁹ Ha'e ramo hexe opu'ã okuapy judeu kuery va'e regua escravo ve'ỹ onhembo'eaty pygua, Cirene, Alexandria, Cilícia ha'e Ásia guigua. Ha'e va'e kuery ma Estêvão reve ijayvu ete okuapy.

¹⁰ Va'eri hexe nda'ipo'akai, Nhe'ẽ guigua 'arandua rupi ijayvu ramo.*

¹¹ Ha'e rami vy opaga amongue avakue aipoe'i aguã: “Roendu peva'e ava ijayvu vaikue rã Moisés ha'e Nhanderuete rovai”, he'i aguã.

¹² Ha'e rami py omopu'ãmba rei heta va'e kuery, nhomongeta va'ety ha'e lei re nhombo'e va'ety kuery guive. Ha'e rami vy oje'oi vy ojopy, nhomongeta va'ety kuerya py ogueraa.

¹³ Ha'e py ma ogueru avi hekokue ramigua mombe'uarã. Ha'e va'e kuery aipoe'i:

— Peva'e ava ma ijayvu vai riae oikovy templo iky'a e'ỹ va'e ha'e lei re.

¹⁴ Mba'eta roendu aipoe'i rã Nazaré pygua Jesus templo omomba 'rãa rami, ha'e nhanderekorã Moisés oeja va'ekue oguerova 'rãa rami guive — he'i.

¹⁵ Ha'e javive omboayvua py oguapy va'e ma Estêvão re anho oma'ẽ okuapy. Oma'ẽ okuapy rã anjo rami hova.

Estêvão ijayvuague

¹ Ha'e ramo sacerdote yvateve va'e oporandu vy aipoe'i:

— Ha'e rami ae teve?

² Estêvão omboavai:

— Ke'y kuery ha'e xeru kuery, pendu ke. Nhaneramoõ Abraão ma Mesopotâmia yvy re teri oiko jave, Harã py oiko e'ỹ mbove ixupe Nhanderuete hexakãmba va'e ojexa uka raka'e.

³ Ha'e vy aipoe'i ixupe: “Ejepe'a ndeyvy neretarã kuerya gui, ha'e tereo yvy aexa uka aguã katy”, he'i va'ekue.*

* 6:3 1 Timóteo 3.8-10

* 6:10 Lucas 21.14,15

* 7:3 Gênesis 12.1

⁴ Ha'e ramo caldeu kuery yvy gui oo Harā py ju oiko aguā. Tuu omano ma rire apy ju Nhanderuete ombou yvy aÿ peẽ pendekuaia py.

⁵ Ha'e rami avi apy voi ixupe guarā nome'ei neñ peteñgue'i opy oguerova aguā voi, teñ ijayvu yvy ome'ë aguā, ha'e hamymino kuery pe voi. Ha'e jave ma ndata'yí teri.

⁶ Ha'e gui Nhanderuete ijayvu hamymino kuery oyvy re'ÿ, yvy mboae re ikuai 'rāa re. Ha'e py ma escravo kuery 'rā ikuai, quatrocentos ma'etÿ re 'rā ikuai axy.

⁷ Ha'e gui Nhanderuete aipoe'ive ju: "Xee ma ambopaga 'rā escravo penemoingoare kuery. Ha'e va'e rire ha'e gui pexê 'rā kova'e yvy re ju xerembiguai pendekuai aguā", he'i va'ekue.*

⁸ — Ha'e gui ma ipire omboi uka vy hexeve ojapo guexeve guarā. Ha'e rami vy Isaque itui rire oito araa py Abraão omboi ipire. Isaque gui oiko Jacó, ha'e gui ha'e gui nhaneramoï kuery doze ikuai va'ekue oiko.

⁹ Ha'e gui José re nhaneramoï kuery nda'ija'ei vy ovende raka'e Egito yvy katy heraarã pe. Ha'e rami teñ Nhanderuete ma hexeve oiko vy

¹⁰ ogueraa jepe opa mba'e vai oiko va'e gui. Omboaxya rupi omo'arandu Egito pygua huvixave Faraó renonde. Ha'e ramo Faraó omoï ha'e pygua kuery re opena aguā, ha'e hoo pygua ha'e javi re guive.

¹¹ Ha'e gui ma karuai oiko Egito yvy ha'e javi rupi. Canaã yvy re voi ikuai axy ramo nhaneramoï kuery ndojouvei tembi'u.

¹² Ha'e rā Egito yvy re ma trigo oguerekoa omombe'ua rā Jacó oendu vy jypy omondouka raka'e nhaneramoï kuery.

¹³ Ha'e kuery teñgue ju ovaë ramo José ojekuaa uka guyke'y kuery pe, ha'e Faraó voi oexa José regua kuery.

¹⁴ Ha'e vy José oenoï uka nguu Jacó ha'e guetarā kuery ha'e javive setenta e cinco ikuai va'e.

¹⁵ Ha'e rami py Egito yvy re Jacó oo raka'e. Ha'e py ma omano, nhaneramoï kuery ha'e javive voi.

¹⁶ Hetekue ma Siquém katy heraa vy onhono porã Hamor ra'y kuery gui Abraão tuparã peráta re ojogua va'ekue py.

¹⁷ — Ha'e gui ovaë rai'i ma Abraão pe Nhanderuete ouraague ojeupity aguā ára. Ha'e jave ma nhaneramoï kuery hetave oje'oivy Egito yvy re,

¹⁸ amboae huvixave José oikuaa va'e'ÿ oiko peve.*

¹⁹ Ha'e va'e huvixa ma nhaneramoï kuery ombotavypa vy ojavyky rei, ojapo guive gua'y kuery re ae nopenavei rā omanomba aguā rami.

²⁰ Ha'e va'e jave py oiko Moisés. Ha'e va'e ma Nhanderuete renonde voi ojou porã ramo mboapy jaxy re ranhe onhomí tuu ro py.

²¹ Ha'e gui oejaaa ramo Faraó rajy ju ogueraa vy omemby ae'i rami omongakuaa.

²² Moisés ma Egito pygua 'arandua ha'e javi re ombo'ea ramo ipo'aka ayvu py ha'e mba'emo ojapoa py.

²³ — Quarenta ma'etÿ ma oguerekoa py oendu guyke'y kuery Israel regua oexaxea.

²⁴ Ha'e rami vy peteñ ava ojavyky rei rā oexa vy oipe'a, ha'e oepy vy ojuka Egito pygua.

²⁵ Mba'eta Moisés oexa'ã hetarā kuery "Ixupe Nhanderuete nhandereraa jepe uka 'rā" he'i aguā, teñ ha'e kuery ha'e rami ndoikuuai.

²⁶ — Ha'e gui ko'ëgue onhemboja ju guetarā kuery joguero'a va'e re. Ha'e kuery ikuai porã aguā omboja'oxe vy aipoe'i: "Avakue, peẽ kuery tu joegua'i rima pendekuai. Mba'e re tu pejoguero'a rei?" he'i.

²⁷ Ha'e ramo oirū re ojeaive va'e omoanha vy aipoe'i: "Mava'e tu nemoï oreruvixarã, orere repena aguā?

²⁸ Xee voi teve xejukaxe avi kuee Egito pygua rejukaague rami?" he'i.*

²⁹ Ha'e rami ijayvu rā Moisés oendu vy okanhy ovv, ha'e Midia yvy re ju oiko guekoia py e'ÿ. Ha'e py ma oiko mokoï ta'y.

* 7:7 Gênesis 15.13-14 * 7:18 Éxodo 1.8 * 7:28 Éxodo 2.14

³⁰ — Quarenta ma'etŷ rire tekoa e'ŷa py Sinai yvyty re ixupe ojexa uka peteĩ anjo. Yvyra rogue hendy va'e mbyte gui ojexa uka.

³¹ Moisés ha'e nunga oexa vy onhemondyi va'eri onhembojave ovy oexa porâve aguã. Ha'e vy oendu Senhor aipoe'i rã:

³² “Xee ma neramoï kuery Abraão, Isaque ha'e Jacó Ruete aiko”, he'i. Ha'e rami rã Moisés okyje vy oryryipa, oma'eve aguã nda'ipy'a guaxui guive.

³³ — Ha'e ramo Senhor aipoe'ive ju: “Emboi ndepy regua, mba'eta repyrõa ma yvy ky'a e'ŷ.

³⁴ Xee aexa ma Egito yvy re xevyguia kuery ikuai axya, ha'e kuery ipoaẽ rã aendu guive. Ha'e rami vy aguejy araa jepe aguã. Ejuve ke aŷ, xee romondouka 'rã Egito katy”, he'i.*

³⁵ — Ha'e rami teĩ ha'e kuery nonhe'ẽ rendui Moisés. Ha'e vy aipoe'i: “Mava'e tu nemoï huvixa orere repena va'erã?” he'i okuapy, huvixarã ha'e heraa jepearã Nhanderuete ombou va'ekue ri, anjo yvyra rogue hendy va'e mbyte gui ojexa uka va'ekue ipytyvõarã oiko guive.

³⁶ Ha'e gui Egito yvy re nhomondyipaarã ha'e hexa pyrã Moisés ae ojapo vy oguenoẽ nhaneramoï kuery. Ye'ẽ Pytã re voi ojapo, ha'e quarenta ma'etŷa pukukue re tekoa e'ŷa rupi ikuai jave guive.

³⁷ Moisés ae Israel kuery pe aipoe'i: “Peẽ kuery regua Nhanderuete omoingo 'rã peteĩ profeta xee rami guarã”, he'i va'ekue.*

³⁸ Ha'e Moisés ae oĩ va'ekue tekoa e'ŷa py ono'õmba va'e kuery reve, Sinai yvyty re ixupe anjo ijayvu va'ekue ha'e nhaneramoï kuery reve. Ojopy avi ayvu imarã e'ŷ va'e nhandevy ju oikuua uka aguã.

³⁹ — Ha'e rami teĩ nhaneramoï kuery ma nonhe'ẽ rendui raka'e. Ha'e kuery ndoipotai vy opy'a re omoï okuapy Egito katy ju ojevyxea.

⁴⁰ Ha'e vy aipoe'i Arão pe: “Ejapo orevy nhanderueterã nhanerenonde re oo va'erã. Mba'eta Egito yvy gui nhanerenoëare Moisés re ma ndajaikuai mba'e pa oikoa”, he'i okuapy.*

⁴¹ Ha'e va'e jave ojapo vaka ra'y ra'angaa, ha'e ha'angaa pe mymba kuery ojuka guive. Oguerovy'a rei okuapy opo py ojapo va'ekue rive.

⁴² — Ha'e ramo ha'e kuery gui Nhanderuete ojepe'a vy omboaxa yva re ikuai va'e rive ombojerovia aguã, profeta kuaxia ombopara vy aipoe'iague rami: “Israel kuery, tekoa e'ŷa rupi quarenta ma'etŷ re pendekuai vy xevy pe teve mymba pejuka vy peme'ẽ raka'e?

⁴³ Tuuete ramigua Moloque pe e'ŷ ri ty'y pejapo pembojerovia atyrã? Ha'e tuuete ramigua Renfã jaxy-tata ra'angaa pejapo va'ekue pembojerovia aguã. Ha'e nungakue re ma xee rogueraa ukapa 'rã Babilônia rovai katy”, he'iague.*

⁴⁴ — Ha'e gui ombojeroviaaty Nhanderuete ayvu oĩa va'e ma nhaneramoï kuery oguerekro raka'e tekoa e'ŷa re, Moisés pe ojapo ukaague rami ae ojapo va'ekue.

⁴⁵ Ha'e nunga ma nhaneramoï kuery Josué oiko javegua ju ojopy vy amboae katy ogueraa, mba'eta ha'e kuery renonde gui Nhanderuete yvy regua kuery omoxẽ ramo ha'e py ju ikuai. Davi oikoa ára peve oguerekro va'ekue.

⁴⁶ Ha'e gui Davi ma Nhanderuete ojou porã ramo ojerure peteĩ oo Jacó Ruete peguarã ojapo aguã.

⁴⁷ Ha'e rã ixupe guarã oo apoare ete ma Salomão raka'e.

⁴⁸ Ha'e rami teĩ Yvate ete va'e ma avakue opo py oo ojapo va'ekue py noĩ, profeta aipoe'iague rami:

⁴⁹ “Yva ma xerenda, ha'e rã yvy ma xepy renderã itui. Mba'e nunga oo 'rã tu pejapo xevy? Mamo 'rã tu xee apytu'u atyrã oĩ aguã ha'eve?

⁵⁰ Mba'eta xepo py e'ŷ ri ty'y ha'e nunga ha'e javi ajapo va'ekue?” he'i Senhor.*

* 7:34 Êxodo 3.5-8,10 * 7:37 Deuteronômio 18.15 * 7:40 Êxodo 32.1,23 * 7:43 Amós 5.25-27 * 7:50 Isaías 66.1-2, Atos 17.24

⁵¹ — Avakue peneakā ratā va'e, pendepy'a ratā ha'e pendeapyxa e'ŷ va'e, Nhe'ẽ Ky'a E'ŷ ijayvu teĩ ndapejapyxakaxeи kuerei. Peneramoĩ kuery ikuaiague rami ae ju peẽ voi pendekuai.*

⁵² Mba'eta mava'e profeta re nda'u peneramoĩ kuery nopo'ã rei raka'e? Mba'eta ojuka okuapy raka'e Heko porā ete va'e ou 'rāa mombe'ua kuery. Ha'e va'e gui aŷ ma peẽ ju ijopy nhemiare ha'e ijuka riveare pendekuai.

⁵³ Pende kuery ma anjo po gui lei pejopy va'eri ndapejapoi — he'i.

Estêvão omanoaque

⁵⁴ Ha'e rami ijayvu rā ha'e kuery oendu vy ipoxy okuapy opy'a py, ha'e hexe opu'ã vy haï jekyty guive okuapy.

⁵⁵ Ha'e rā Estêvão re ma Nhe'ẽ Ky'a E'ŷ anho oĩ ramo yva re oma'ẽ vy oexa Nhanderuete rexakāa, ha'e oiporu kuaa regua re Jesus hi'aĩ rā.

⁵⁶ Ha'e rami vy aipoe'i:

— Aipo aŷ, xee aexa yva ojepe'a rā, ha'e Nhanderuete oiporu kuaa regua re Ava ra'y ojeapo va'ekue hi'aĩ rā — he'i.

⁵⁷ Ha'e ramo ha'e kuery ojapukai atā vy omboty oapyxa, joo rami meme oguero'a okuapy.

⁵⁸ Tetā gui mombyry'i ogueraa py ojapipa okuapy ita py. Hekokue ramigua mombe'uare kuery ma oao puku omboi vy oeja imoiny peteĩ kunumi Saulo hery va'e hi'aĩa py.*

⁵⁹ Ha'e rami vy ita py Estêvão ojapipaa ramo ojapukai vy aipoe'i:

— Senhor Jesus, eraa ke xenhe'ẽ — he'i.

⁶⁰ Ha'e gui guenapy'ã re oĩ vy ijayvu atā:

— Senhor, embopaga eme kova'e kuery ojejavyague re — he'i. Po rami ijayvu reve oke.*

8

¹ Ha'e kuery ojuka okuapya ma Saulo ojou porā.

Atos 26,9-11

Ha'e va'e árave Jerusalém pygua igreja kuery omoingo axya vaipa. Ha'e ramo ha'e kuery ha'e javive apóstolo e'ŷ vy oaĩmba Judéia ha'e Samaria yvy rupi.

² Estêvão retekue ma Nhanderuete pegua avakue onhono porā, hexe ojae'o vaipa guive.

³ Ha'e rā Saulo ma omombaxe ete heravy igreja kuery. Oo rupi oike vy ogueraa avakue ha'e kunhague nhuā py omboty aguā.

Samaria tetā py Filipe oo vy ayvu omombe'uague

⁴ Ha'e gui opa rupi oaĩmba jogueravya rupi ayvu omombe'u.

⁵ Filipe ma Samaria tetā py oo vy ha'e kuery pe omombe'u Cristo.*

⁶ Filipe ijayvu rā heta va'e kuery peteĩ rami meme ojapyxaka okuapy. Oendu, oexa guive hexa pyrā ojapo rā.

⁷ Mba'eta heta gui nhe'ẽ vai ojapukai reve-reve ojepe'a, ha'e heta oguata e'ŷ ha'e hetyma pirupa va'e voi okuerapa.

⁸ Ha'e ramo ov'y'a ete okuapy ha'e va'e tetā py.

Onhembo'e vaikue va'e Simão re ijayvuague

⁹ Ha'e py ma oiko peteĩ ava Simão hery va'e, onhembo'e vaikuea rupi oiko. Samaria pygua kuery ombotavypa oikovy, ipo'akapa va'e rami rive onhemoingo vy.

¹⁰ Hexe ojapyxaka pavē, yvyigueve ha'e yvatekueve guive. Ha'e vy aipoe'i:

— Kova'e ava re ma Nhanderuete po'akaa oĩ. Ha'e ramo Ipo'akapa va'e hery — he'i okuapy.

¹¹ Hexe anho ojapyxaka, mba'eta are ma omaba'evykyta py ombotavypa ramo.

* 7:51 Mateus 23.30-32 * 7:58 Saulo ma Jesus pe ojeko me'ẽ va'erā va'e (Atos 2.20). Guery oguerova rire ixupe “Apóstolo Paulo” 'ea (Atos 9.1-9, 13.9). * 7:60 Lucas 21.16-19, 23.46,34 * 8:5 Atos 1.8; João 12.24

¹² Ha'e gui ha'e pygua kuery pe Filipe omombe'u oikovy ayvu porã Nhanderuete po'akaa ha'e Jesus Cristo regua. Ha'e ramo avakue ha'e kunhague oguerovia ramo omongaraipa.

¹³ Simão eteve voi ojerovia avi, ha'e omongarai ma rire Filipe re onhemoirũ oikovy, mba'eta hexa pyrã ha'e mba'emo porã ojapo rã oexa vy onhemondyipa.

Samaria py Pedro ha'e João ikuai jave guare

¹⁴ Samaria pygua kuery Nhanderuete ayvu ogueroviaa omombe'ua rã Jerusalém py apóstolo kuery ikuai va'e oendu okuapy. Ha'e rami vy ha'e katy omondouka Pedro ha'e João.

¹⁵ Ha'e py ha'e kuery ovaẽ vy ha'e pygua kuery re onhembo'e Nhe'ẽ Ky'a E'ŷ oĩ aguã,

¹⁶ mba'eta neĩ peteĩve re Nhe'ẽ Ky'a E'ŷ ndoguejyi teri, Senhor Jesus rery rupi omon-garaia rive.

¹⁷ Ha'e gui ha'e kuery áry apóstolo kuery opo omoĩ ramo ha'e kuery re Nhe'ẽ Ky'a E'ŷ ou.

¹⁸ Apóstolo kuery joe opo omoĩ rã Nhe'ẽ [Ky'a E'ŷ] oua Simão oexa vy apóstolo kuery pe ijayvu peráta ome'ẽ aguã re.

¹⁹ Ha'e vy aipoe'i:

— Xee voi ke xembopo'aka joe xepo amoĩ rã Nhe'ẽ Ky'a E'ŷ ou aguã — he'i.

²⁰ Ha'e rã Pedro ombovai:

— Ndeperáta too ndereve rekanhy aguã py, mba'eta rexâ'ã peráta re ndejeupe rejogua aguã Nhanderuete ome'ẽ rive va'e.

²¹ Ndee ma mba'eve ndererekoi ore rami reiko aguã, neĩ rojapo va'e rejapo aguã voi, mba'eta ndepy'a py ha'eve e'ŷa rami reiko Nhanderuete renonde.

²² Ha'e nunga rupi ejeko rerova nderekoo vaia gui, ha'e ejapukai Senhor pe. Xapy'a rei ombogue 'rã ndepy'a re remoĩ va'ekue.

²³ Mba'eta xee aexa rã opa marã rei teri reiko, nhuã py rami teko vai nembo'a ramo — he'i.

²⁴ Ha'e ramo Simão ombovai vy aipoe'i:

— Pejerure ha'vy Senhor pe pendeayvuague oiko e'ŷ aguã — he'i.

²⁵ Ha'e kuery Senhor ayvu omombe'u ha'e nhombo'epa ma vy Jerusalém tetã katy ju ojevy. Samaria pygua kuery rekoia ikuai va'e rupi omombe'u oje'oivy ayvu porã.

Eunuco reve Filipe onhemoirũague

²⁶ Ha'e gui Filipe pe peteĩ anjo Senhor-a guigua ijayvu. Ha'e vy aipoe'i:

— Epu'ã ke, tereo kuaray puku-a yke katy. Jerusalém gui Gaza katy tape oo va'e rupi tereo, tekoia e'ŷa rupi — he'i. Ha'e ramo opu'ã vy oo.

²⁷ Oo vy peteĩ ava oexa Etiópia pygua eunuco, huvixa kunha Candace mba'e peráta ha'e javi re opena va'ety. Ha'e va'e ma Jerusalém py ombojerovia aguã ooague gui

²⁸ ojevyia rupi oguapy oiny karóxa py. Ogueroayvu heravy profeta Isaías ombopara va'ekue.

²⁹ Ha'e ramo Nhe'ẽ aipoe'i Filipe pe:

— Enhemoja peva'e karóxa re, tereo ijyvy'iry — he'i.

³⁰ Ha'e ramo Filipe onha ovy vy oendu ogueroayvu rã profeta Isaías ombopara va'ekue. Ha'e vy aipoe'i:

— Reikuua ma'ã reroayvu heravy va'e?

³¹ Ombovai:

— Mba'exa vy tu aikuua ta avave rei omombe'u porãve e'ŷ rã? — he'i. Ha'e rami vy oenoĩ Filipe karóxa py ojeupi vy hexeve oĩ aguã.

³² Ipara ogueroayvu oiny va'e po rami: “Vexa'i rami heraa ojukaa aguã py. Ijukaarã renonde vexa'i okyrirĩa rami avi ha'e voi ndoipe'ai ojuru.

³³ Omo'yvy'i vy ha'eve e'ŷa rami oguerekoo. Mava'e nda'u omombe'u 'rã hamymino kuery? Mba'eta yvy gui hekove oipe'aa rire”, he'iague.*

³⁴ Ha'e ramo eunuco oporandu Filipe pe:

* 8:33 Isaías 53,7,8

— Ajerure remombe'u aguã mava'e reko re pa profeta ijayvu, ojee ae tyrã pa amboae reko re? — he'i.

³⁵ Ha'e ramo Filipe omombe'u porãve. Po rami ipara oĩ va'e guive omboypy vy ixupe omombe'u oiny Jesus.

³⁶ Ha'e kuery oo tema tape rupi. Yy oĩa py ovaẽ vy eunuco aipoe'i:

— Apy ma yy oĩ. Nda'evei 'rã ri nda'u anhemongarai uka aguã?

³⁷ [Filipe ombovai:

— Ndepy'a ha'e javi py rejerovia ramo ha'eve 'rã — he'i.

Ha'e ramo ombovai vy aipoe'i:

— Xee arovia Jesus Cristo Nhanderuete Ra'y oikoa — he'i.]

³⁸ Ha'e rami vy omombyta uka karóxa. Mokoïve oguejy ov y py, ha'e Filipe omongarai.

³⁹ Yy gui oẽ jogueravy jave Senhor Nhe'ẽ oipe'a heravy Filipe. Ha'e ramo eunuco ndoexavei va'eri ov y'a reve oo oiny tape rupi.

⁴⁰ Ha'e va'e rire'ive Filipe ma Azoto tekua py ra'e oikoa oikuaa vy oove ha'e gui. Ayvu porã omombe'u heravy tetã ha'e javi rupi, Cesaréia py ovaẽ peve.

9

Atos 22.4-11; 26.9-18

¹ Ha'e ramia ja Saulo ma Senhor remimbo'e kuery ojukapa aguã re ijayvu. Ha'e rami vy sacerdote yvateve va'ea py oo vy

² ojerure kuaxia para re Damasco tetã py oo aguã judeu kuery onhembo'eaty ikuai va'e rupi, Senhor reko rami avakue ha'e kunhague ikuai va'e ojou vy oipokua ha'e Jerusalém katy oguerupa aguã.

³ Ha'e rami vy oo tape rupi. Damasco py ovaẽ rai'i ovya py yva gui hendy va'e hexakãmba xapy'a ijyvýry.

⁴ Ha'e rã yvy rupi ho'a vy peteĩ ayvu oendu:

— Saulo, Saulo, mba'e re tu xererekoy axyxer ri? — he'i va'e.

⁵ Ha'e ramo oporandu:

— Mava'e tu ndee, Senhor?

Ombovai:

— Xee ma Jesus rerekoy axy rei va'e.

⁶ Epu'ã ke, eike tetã py. Ha'e py ma omombe'ua 'rã rejapo va'erã — he'i.

⁷ Ha'e gui irũ kuery hupive oo va'e ma okyirirí reve opytapa. Ijayvu va'e oendu teĩ avave rei ndoexai okuapy.

⁸ Ha'e rã Saulo ma yvy gui opu'ã vy guexa oipe'a teĩ mba'eve rei ndoexavei. Ha'e gui ijyva re ogueraa Damasco katy.

⁹ Mboapy ára re oĩ oexa e'ý re. Ha'e ramia pukukue re ndokarui neĩ ndoy'ui.

Atos 22.12-16

¹⁰ Damasco tetã py oiko peteĩ temimbo'e Ananias hery va'e. Ha'e va'e pe Senhor ojexa uka vy aipoe'i:

— Ananias.

Ombovai:

— Senhor, apy ma aĩ — he'i.

¹¹ Senhor aipoe'i:

— Epu'ã ke, tereo tape hi'yvi va'e 'epy va'e rupi. Judas ro py revaẽ vy ke eka Tarso guigua Saulo. Mba'eta ha'e va'e ma onhembo'e oiny jave

¹² oexa kuri peteĩ ava Ananias hery va'e ovaẽ ouvy rã, hi'áry opo omoĩ oexa ju aguã — he'i.

¹³ Ananias ombovai:

— Ha'e rami avi Senhor, heta gui ma aendu ha'e va'e ava reko. Mbovykue rei ve'ý maojapo vai va'ekue Jerusalém py ikuai va'e re,

¹⁴ ha'e apy guarã ju kuaxia para ogueru sacerdote yvatekueve va'ea gui, nderery rupi ojapukai va'e kuery ojopypa heravy aguã — he'i.

¹⁵ Ha'e ramo Senhor aipoe'i:

— Tereo nho, mba'eta ha'e va'e ma xerembiguarā aiporavo va'ekue judeu e'ŷ va'e kuery pe xerery ogueraa aguā, huvixa kuery ha'e Israel kuery renonde guive.

¹⁶ Ixupe xee ae aikuua uka 'rā xerery rupi oiko ramo omoingo axya 'rāa — he'i.

¹⁷ Ha'e ramo Ananias oo vy ovaē oo oña py. Hi'ary opo omoī reve aipoe'i:

— Irmão Saulo, Senhor Jesus tape rupi rejua rupi ojekuaa uka va'ekue xembou kuri rexia ju aguā, ha'e ndere Nhe'ě Ky'a E'ŷ anho oī aguā — he'i.

¹⁸ Ha'e ramove hexa gui pira pekue ramigua ho'a ramo oexa ju. Ha'e gui opu'ā vy onhemongarai uka.

¹⁹ Okarupa ma vy oendu imbaraetea. Ha'e vy Damasco py are'i optyta Jesus remimbo'e kuery reve.

Damasco py ayvu Saulo omombe'u oikovyague

²⁰ Ha'e rire'ive judeu kuery onhembo'eaty ikuai va'e rupi Saulo omombe'u oikovy Jesus ae Nhanderuete Ra'y oikoa.

²¹ Ha'e javive oendu va'e onhemondyipa. Ha'e vy aipoe'i okuapy:

— Peva'e e'ŷ ri ty'y Jerusalém py Jesus rery rupi ojapukai va'e ojukapaxe va'ety? Ha'e gui apy ju ou oipokuapa heravy aguā sacerdote yvatekueve va'ea katy — he'i okuapy.

²² Ha'e rā Saulo ma imbaraeteve oikovy. Ha'e vy Jesus ae Cristo oikoa omombe'u vy omokyririmbā judeu kuery Damasco py ikuai va'e.

²³ Kueve ma rire judeu kuery jogueroayvu ojuka aguā.

²⁴ Ha'e rami teĩ ha'e kuery ojapoxe va'e Saulo oikuua. Ha'e kuery ojuka vy ara py ha'e pyávy tetā kora rokē py oarō okuapy.

²⁵ Ha'e rā temimbo'e kuery ma pyávy ogueraa vy peteĩ ajaka py omoī vy omboguejy tetā kora rovai.

Jerusalém ha'e Tarso py Saulo ovaēague

²⁶ Jerusalém py ovaē vy onhemoirūxe temimbo'e kuery mboae reve, teĩ ha'e kuery ha'e javive Jesus remimbo'e oikoa ndogueroviai vy okyje okuapy.

²⁷ Ha'e rā Barnabé ma apóstolo kuerya py ogueraa vy omombe'u porāmba tape rupi Senhor ojekuaa uka vy hexeve ijayvuague, ha'e ramo Damasco tetā py okyjea py e'ŷ Jesus rery rupi ijayvuague.

²⁸ Ha'e rami rire Jerusalém py oiko ha'e kuery reve. Okyje reve'ŷ ijayvu oikovy Senhor rery rupi.

²⁹ Grego ayvu py ijayvu va'e kuery pe ayvu omombe'u ha'e ijayvu ete oikovy ramo ha'e kuery ojukaxe ete.

³⁰ Ha'e nunga irmão kuery oikuua vy Cesaréia peve ogueraa, ha'e gui Tarso katy ju omondouka.*

Igreja pygua heta-etave ovagogue

³¹ Ha'e rami rire Judéia ha'e javi rupi igreja kuery ikuai porā, Galiléia ha'e Samaria rupi guive. Imbaraeteve oje'oivy Senhor renonde ojererokyjea rupi. Nhe'ě Ky'a E'ŷ ombopy'a guaxu ramo heta-etave ov.

Enéias omongueraa ague

³² Ha'e gui Pedro ma opa rupi oaxa ovvy vy Lida tetā py ovaē iky'a e'ŷ va'e kuerya py.

³³ Ha'e py ma peteĩ ava oexa Enéias hery va'e. Ha'e va'e ma oguata va'e'ŷ vy oito ma'etý re ma tupa py itui.

³⁴ Ixupe Pedro aipoe'i:

— Enéias, Jesus Cristo nemonguera. Epu'ā ke ha'vy, emoī porā ju nderupa — he'i ramove opu'ā.

³⁵ Ha'e ramo Lida ha'e Sarona pygua kuery ha'e javi oexa vy ojeko rerova Senhor re.

Dorcias omboetea jevyague

* 9:30 Gálatas 1.15-24

³⁶ Jope tetā py ma oiko peteī temimbo'e kunha Tabita hery va'e, Dorcas he'ia. Ha'e va'e ma pavē oikuua mba'emo porā anho ojapo ha'e mba'emo ome'ē va'ety oikoa.

³⁷ Ha'e va'e jave imba'eaxy vy omano. Ha'e gui hetekue ombojaupa ma rire ombouve ju inony opy ja'o'i yvate oī va'e py.

³⁸ Jope gui ma Lida py Pedro oīa namombyryi'i. Ha'e ramo ha'e py oīa temimbo'e kuery oendu vy mokoī avakue omondouka "Jaa vyvoi ke orereve" he'i aguā.

³⁹ Ha'e nunga Pedro oendu vy oo ha'e kuery reve. Oo py ovaē ramo opy ja'o'i yvate oī va'e py ogueraa. Imeve'ŷ va'e kuery ha'e javi ombojere rei, ojae'o reve oexa uka ao puku ha'e tupyja Dorcas oikove teri reve ojapo va'ekue.

⁴⁰ Ha'e gui ma Pedro omoēmba vy guenapy'ā re oī, ha'e vy onhembo'e. Ha'e gui ojere vy hetekue ituia katy ju oma'ē. Ha'e vy aipoe'i:

— Tabita, epu'ā ke — he'i. Ha'e ramo guexa oipe'a vy oexa Pedro, ha'e vy ov y oiny.

⁴¹ Ha'e ramo ipo re ojopy vy omopu'ā. Ha'e gui iky'a e'ŷ va'e ha'e imeve'ŷ va'e kuery oenoīmba vy oexa uka oikove va'e.

⁴² Ha'e nunga Jope pygua kuery ha'e javi oikuua vy heta ojerovia Senhor re.

⁴³ Jope py ma Pedro opyta are, ipirekue re ombo'eapo va'e Simão hery va'e ro py.

10

Xondaro ruvixa Cornélio reko re ijayvuague

¹ Cesaréia tetā py peteī ava oiko Cornélio hery va'e, xondaro kuery Itália pygua ruvixa.

² Ha'e va'e ma Nhanderuete pe oiko ojererokyjea rupi, ngoo pygua kuery ha'e javi reve. Mba'emo ome'ē jepi ha'e py judeu kuery ikuai va'e pe, Nhanderuete pe onhembo'e riae guive.

³ Ha'e gui ma kuaray ojero'a'i jave peteī anjo Nhanderuetea guigua ojexa uka ixupe. Hexe onhemboja vy aipoe'i:

⁴ — Cornélio.

Ha'e ramo onhemondyi reve anjo re oma'ē vy oporandu:

— Mba'e tu, Senhor?

Anjo ombovai:

— Nhanderuete renonde ima'endu'aa renhembo'ea ha'e mba'emo reme'ē reikovya re.

⁵ Aŷ ma emondouka Jope tetā katy Simão Pedro hery va'e renoīarā.

⁶ Ha'e va'e ma ye'ē yvýry oiko, ipirekue re ombo'eapo va'e Simão ro py — he'i.

⁷ Hexeve anjo ijayvu va'ekue ojepe'a ramove oenoī mokoī guembiguai ha'e peteī xondaro Nhanderuete pe oiko va'e ixupe ombo'eapo va'e regua.

⁸ Ha'e va'e kuery pe ha'e nungakue omombe'upa vy Jope tetā katy omondouka.

Pedro pe mba'emo ojexa ukaague

⁹ Ko'ē jevy tape rupi ha'e kuery oo vy tetā py ovaē rai'i ma oje'oivy jave, Pedro ma kuaray mbyte rire'i oo áry ojeupi onhembo'e aguā.

¹⁰ Inhembyayi vy okaruxea oendu. Ha'e gui tembi'u ojapoa rā oarō jave ixupe ojexa uka peteī.

¹¹ Ha'e vy oexa yva ojepe'a rā, ha'e oguejy ouvy peteī ajukue ramigua tuvixa va'e, yvy rami omboguejya ijapy irundyve re.

¹² Ha'e va'e áry ma opa marāgua mymba ikuai irundy ipy va'e, yvy rupi otyryry ha'e guyra oveve va'e.

¹³ Ha'e gui ixupe peteī ijayvu va'e aipoe'i:

— Pedro, epu'ā ke, ejuka ha'e he'u.

¹⁴ Pedro ombovai:

— Any teve Senhor, mba'eta ha'u va'e'ŷ teri ha'eve'ŷ va'e nhomongy'aarā — he'i.

¹⁵ Mokoīguea ma ijayvu va'e aipoe'i:

— Nhanderuete oiky'a'o va'ekue pe "Ha'eve'ŷ va'e" 're eme — he'i.

¹⁶ Ha'e nunga mboapykue oiko rire ajukue ogueraa ju yva re.

Cornélio remimbou kuery Jope py ovaēague

¹⁷ Pedro mba'emo ojexā uka va'ekue mba'erā paa ndoikuuaai rei oiny jave avakue ovaē ma Cornélio ombou va'ekue. Simão ro re oporandu jogueruvy rire okē py optya.

¹⁸ Onhenduka vy oporandu:

— Simão Pedro hery va'e pa oī? — he'i.

¹⁹ Ha'e rā Pedro ma mba'emo oexā va'ekue re teri oikuua pota oiny reve Nhe'ẽ aipoe'i ixupe:

— Pe'i py mokoī ava ndereka va'e ikuai.

²⁰ Epu'ã ha'vy, eguejy ha'e tereo ha'e kuery reve. Erovia e'ŷ eme, mba'eta xee ae ambou uka — he'i.

²¹ Ha'e gui avakue ikuiaia py Pedro oguejy ma vy aipoe'i:

— Xee apy aī va'e ae pa xereka? Mba'e re tu peju?

²² Ha'e kuery ombovai:

— Xondaro ruvixa Cornélio ma ava heko porā ha'e Nhanderuete renonde ojererokyjea rupi oiko va'e, judeu kuery ha'e javi ima'endu'a porāa va'e guive. Ha'e va'e ae nerenoī uka, ngoo py revaē rā ndeayvu oendu aguā, anjo iky'a e'ŷ va'e aipoe'iague rami vy — he'i okuapy.

Pedro ijayvuague

²³ Ha'e rami rā Pedro ma ha'e kuery omovaē ranhe, omoinge opy. Ko'ẽ jevy opu'ã vy oo ha'e kuery reve. Jope pygua irmão kuery regua oo avi hupive.

²⁴ Ko'ẽ jevy Cesaréia py ovaēmba. Cornélio oarō vy omboatypa ma ra'e guetarā ha'e oirū kuery oayvuve va'e.

²⁵ Pedro ovaē ouvy rā Cornélio oẽ ovaexī aguā. Guenapy'ã re oī vy ombojerovia.

²⁶ Ha'e ramo Pedro omopu'ã vy aipoe'i:

— Epu'ã katu, xee voi ma ava avi aiko — he'i.

²⁷ Hexeve ijayvu reve oike vy heta oexā ono'õ okuapy va'e.

²⁸ Ha'e vy ha'e kuery pe aipoe'i:

— Peẽ ma peikuua porā rā ore judeu kuery amboae regua re ronhemboirū aguā nda'evei, neĩ ronhemboja aguā voi. Ha'e rami teĩ xevy pe Nhanderuete oikuua uka avave pe “Nda'evei va'e” neĩ “Ha'eve'ŷ va'e” ro'e aguā nda'eveia.

²⁹ Ha'e nunga rupi xerenoī uka ramo aju “Nda'evei” ha'e e'ŷ re. Aŷ ma aporandu: Mba'erā pa xerenoī uka?

³⁰ Cornélio ombovai:

— Kova'e ára reve vy irundy ára ma ojapo guĩ rami jave xero py anhembo'e ainyague, kuaray ojero'a jave. Ha'e gui xerenonde ojexā uka peteĩ ava ijao rexakāmba va'e.

³¹ Ha'e va'e ma aipoe'i: “Cornélio, Nhanderuete renonde ma oendua renhembo'ea, ha'e mba'emo reme'ẽ reikovya re ima'endu'aa guive.

³² Emondouka ke Jope katy Simão Pedro hery va'e renoītarā. Ha'e va'e ma ye'ẽ yvýry oiko, ipirekue re ombo'epo va'e Simão ro py”, he'i va'ekue.

³³ Ha'e ramo roenoī uka voi. Ha'eve vaipa rejuvenue. Aŷ ma apy roimba Nhanderuete renonde, ndevy Senhor omombe'u uka va'e ha'e javi roendu aguā — he'i.

³⁴ Ha'e ramo Pedro ijayvu vy aipoe'i:

— Aŷ ma aikuua ma anhetẽ ae ra'e Nhanderuete peteĩ regua rive joegui oayvuve va'e e'ŷa.

³⁵ Ha'e rami 'rāgue py ha'e javive regua omonhemboja 'rā henonde ojererokyjea rupi ha'e ha'evea rami ikuai va'e.*

³⁶ Pova'e ayvu Nhanderuete ombou raka'e Israel kuery pe, Jesus Cristo re vy peteĩ rami nhaneingo porā aguā. Mba'eta ha'e javi regua Senhor oiko.

³⁷ Peẽ avi peikuua ayvu Judéia ha'e javi rupi oendua va'ekue, Galiléia gui ijypy va'ekue, nhomongaraia regua João omombe'u ma rire.

* 10:35 Romanos 2.11; 1 Timóteo 2.4-6

³⁸ Oendua Nhanderuete Jesus Nazaré pygua va'e ombopo'aka vy hexe Nhe'ẽ Ky'a E'ŷ omoīague. Ha'e ramo hexeve Nhanderuete oiko ramo opa rupi oiko vy mba'emo porã ojapo, nhomonguera guive anha kuery omoingo axya gui.

³⁹ Judeu yvy re ha'e Jerusalém tetã py mba'emo porã ojapo va'ekue ha'e javi ma ore roexapa. Ha'e gui ma yvyra re omoī vy ojukaa.

⁴⁰ Ha'e gui mboapy araa py Nhanderuete omboete ju, ha'e joupe oexa uka guive.

⁴¹ Heta va'e kuery ha'e javive pe'ŷ oexa uka, ha'e rã imombe'uarã Nhanderuete oiporavo va'ekue pe anho, ore kuery omanoague gui onhemboete ju ma rire hexeve rokaru ha'e roy'u va'ekue pe ae.

⁴² Orevy pe ma ayvu omombe'u uka heta va'e kuery pe, roikuua uka aguã Nhanderuete omoīague oikove va'e ha'e omano va'ekue re oikuua pota va'erã.

⁴³ Hekorã re ae profeta kuery ha'e javi ijayvu raka'e. Ha'e vy omombe'u hery rupi omboguepaa 'rãa hexe ojerovia va'e ha'e javi ojejavague.

Judeu e'ŷ va'e kuery re Nhe'ẽ Ky'a E'ŷ oguejyague

⁴⁴ Ha'e nunga re Pedro ijayvu teri oiny jave ayvu re ojapyxaka okuapy va'e ha'e javive re Nhe'ẽ Ky'a E'ŷ oguejy.

⁴⁵ Judeu e'ŷ va'e kuery pe voi Nhe'ẽ Ky'a E'ŷ ome'ẽa ramo judeu regua ojerovia va'e Pedro rupive ou va'ekue onhemondyipa,

⁴⁶ mba'eta oendu okuapy ayvu mboae py ijayvu rã Nhanderuete omboetea rupi.

Ha'e ramo Pedro oporandu:

⁴⁷ — Amongue nda'u ojoko 'rã yy py kova'e kuery romongarai aguã? Mba'eta nhande rami avi kova'e kuery voi ojopy ra'e Nhe'ẽ Ky'a E'ŷ — he'i.

⁴⁸ Ha'e rami vy Jesus Cristo rery rupi omongarai uka. Ha'e ramo ojerure ha'e kuery reve opytave ranhe aguã.

11

Pedro guekokue re ijayvuague

¹ Ha'e gui Judéia py apóstolo ha'e irmão kuery ikuai va'e oendu okuapy judeu e'ŷ va'e kuery voi Nhanderuete ayvu ogueroviaague.

² Ha'e gui Jerusalém py Pedro ovaẽ ramo jopire omboi ukaxe va'e regua ndojou porãi vy aipoe'i:

³ — Kore revaẽ va'e ty'y avakue opire omboi uka e'ŷ va'e ro py, ha'e kuery reve rekaru guive — he'i okuapy.

⁴ Ha'e ramo Pedro omombe'upa jypy'i guive jorire-rire oiko va'ekue. Ha'e vy aipoe'i:

⁵ — Xee ma Jope tetã py anhembo'e ainy jave, xeakanhy vy aexa peteĩ ajukue tuvixa va'e ramigua oguejy ouvy rã. Ijapy irundyve re omboguejya yva gui. Ha'e vy xea'i py peve ou.

⁶ Ipy katy ama'ẽ vy aexa ipy irundy va'e yvy re ikuai va'e, mymba inharõ va'e, yvy rupi otyryry ha'e guyra oveve va'e.

⁷ Aendu avi peteĩ ayvu “Pedro, epu'ã ke, ejuka ha'e he'u”, he'i va'e xevy.

⁸ Ha'e ramo xee aipoa'e: “Any teve Senhor, mba'eta xejuru py oike va'e'ŷ teri ha'eve'ŷ va'e nhomongy'aarã”, ha'e.

⁹ Teĩgue ju yva gui onhendu: “Nhanderuete oiky'a'o va'ekue pe ‘Ha'eve'ŷ va'e' 're eme”, he'i va'e.

¹⁰ Ha'e nunga ma mboapykue oiko, ha'e gui ha'e nunga ha'e javi ma yva re ju heraa.

¹¹ — Ha'e va'e jave ete'i oo roĩa py ovaẽ mboapy avakue. Ha'e va'e kuery ma Cesaréia gui onmondouka pyre xerenoījarã.

¹² Ha'e ramo xevy pe Nhe'ẽ ijayvu ha'e kuery reve aa aguã akyje e'ŷ re. Xerupive oo avi kova'e irmão kuery mboapy meme ikuai va'e. Ha'e gui ma ha'e va'e ava ro py rovaẽ.

¹³ Ha'e ramo orevy pe omombe'u ngoo py anjo hi'aĩ rã oexaague, ha'e ixupe aipoe'iague: “Emondouka amongue Jope katy, ha'e enoī uka Simão Pedro hery va'e.

¹⁴ Ha'e va'e ma ndevy omombe'u 'rā reo jepe aguã regua ayvu, ndee ha'e ndero pygua kuery ha'e javive reve", he'iague.

¹⁵ Ha'e gui ma xeayvu ypy'i ramove Nhe'ẽ Ky'a E'ŷ oguejy ha'e kuery re, jypy nhandere oguejyague rami ae.

¹⁶ Ha'e ramo xema'endu'a Senhor aipoe'iague re: "João ma anhetẽ yy py nhomongarai. Ha'e rā peẽ ma penemongaraia 'rā Nhe'ẽ Ky'a E'ŷ reve", he'iague re.

¹⁷ Ha'e rami py ha'e kuery pe avi Nhanderuete ombou Senhor Jesus re jajerovia ramo nhandevy ombouague rami. Ha'e rami rire mava'e tu xee aiko Nhanderuete pe "Nda'evei" ha'e aguã? — he'i.

¹⁸ Ha'e rami ijayvu rā ha'e kuery oendu vy nda'ivavei. Ha'e vy Nhanderuete oguerovy'a vy aipoe'i:

— Ha'e rami vy ta'vy judeu e'ŷ va'e kuery pe voi teve Nhanderuete ome'ẽ ojeko rerova vy tekove ojopy aguã — he'i okuap.

Antioquia py temimbo'e kuery pe "Cristo pegua" 'eaague

¹⁹ Estêvão ojukaa rire oaïmba va'ekue ma opa rupi oje'oi, Fenícia, Chipre ha'e Antioquia peve. Judeu kuery regua pe anho ranhe omombe'u ayvu.

²⁰ Ha'e gui ha'e kuery regua Chipre ha'e Cirene guigua ma Antioquia tetã py ovaẽ vy grego kuery pe voi omombe'u ayvu porã Senhor Jesus regua.

²¹ Ha'e kuery re Senhor po'akaa oĩ ramo heta ojerovia vy ojeko rerova Senhor re.

²² Ha'e nunga ma Jerusalém py igreja kuery ikuai va'e pe omombe'ua. Ha'e rami rā Antioquia katy omondouka Barnabé.

²³ Ha'e va'e ma ha'e py ovaẽ vy Nhanderuete omboaxya rupi ikuiaia oexa vy ov'y'a, ha'e kuery ha'e javi omongoeta guive ipy'a mbaraete reve Senhor re ikuai aguã.

²⁴ Mba'eta hexe Nhe'ẽ Ky'a E'ŷ ha'e ojerovia etea anho oĩ ramo ava porayvu va'e oiko.* Ha'e ramo heta onhemboja Senhor re.

²⁵ Ha'e gui Tarso katy ju Barnabé oo Saulo reka vy.

²⁶ Ojou vy Antioquia py ogueru. Peteĩ ma'etŷ pukukue re ha'e pygua igreja kuery reve ikuai vy heta ombo'e. Antioquia py temimbo'e kuery ikuai va'e jypy'i oenoña Cristo pegua.

Karuai oiko va'erãa re Ágabo ijayvuague

²⁷ Ha'e va'e jave py Antioquia py profeta kuery regua ou Jerusalém gui.

²⁸ Peteĩ ha'e kuery regua Ágabo hery va'e opu'ã vy Nhe'ẽ gui omombe'u yvy jave re karuai oiko 'rãa. Ha'e nunga oiko ae ma huixave Cláudio oĩ jave py.

²⁹ Ha'e ramo temimbo'e kuery jogueroayvu okuapy mba'emo omondouka aguã Judéia py irmão kuery ikuai va'e pe. Peteĩ-teĩ ojoua'i rami 'rā omondouka oipytyvõ vy.

³⁰ Ha'ekue rami ae ha'e kuery ojapo. Ha'e vy Barnabé ha'e Saulo po py ogueraa uka igreja re opena va'e kuery pe.

12

Huvixa Herodes apóstolo Tiago ha'e Pedro oguerekaxyague

¹ Ha'e va'e jave py huixave Herodes ojopy uka igreja kuery ikuai va'e regua oguerekaxy aguã.

² Ha'e rami vy kyxe py ojuka uka João ryke'y Tiago.

³ Ha'e nunga judeu kuery ojou porã rei okuapya oikuua vy oguerekaxy ju. Ha'e vy Pedro voi ojopy uka, ngaru mbojape imbovua reveguia e'ŷ va'e ára.

⁴ Ojopy uka vy ombo'a uka nhuã py. Xondaro kuery po py omboaxa opena aguã. Irundy aty ikuai xondaro kuery, peteĩ-teĩ aty irundy xondaro oguerekaxy harõarã, Páscoa ára rire heta va'e kuery oendua py omboayvua aguã.

⁵ Ha'e rami py Pedro nhuã py oĩ, teĩ hexe igreja kuery ikuai va'e onhembo'e tema Nhanderuete pe.*

* 11:24 Atos 4.36,37 * 12:5 Mateus 18.19,20

⁶ Pyávy huvixa Herodes omboayvu e'ŷ mbove'i, Pedro oke oupy mokoĩ xondaro mbyte, mokoĩ corrente py ojokuaague reve. Xondaro kuery mboae ma okẽ py ikuai nhuã oarõa py.

⁷ Ha'e gui peteĩ anjo Senhor-a guigua ou xapy'a ramo peteĩ hendy va'e omoexakãmba nhuã ropy rupi. Pedro re opoko vy omomyi. Ha'e vy aipoe'i:

— Epu'ã pojava — he'i ramove ojokuaague ho'apa ipo gui.

⁸ Anjo aipoe'i:

— Ejeku'a jokua ke, ha'e emoĩ ndepy regua. — Ha'ekue rami ojapo ramo aipoe'ive ju:

— Emoĩ ndeo puku, ha'e eju xerakykue — he'i.

Nhuã gui Pedro oguenoẽa ague

⁹ Ha'e gui Pedro oẽ vy hakykue oo. Ndoikuuai ov y anhetẽ paa anjo opo py ojapo va'e, "Aexa ra'u rive po" he'i vy.

¹⁰ Xondaro ikuai va'e jypy ha'e mokoĩa ma oaxa vy ovaẽ jogueravy okẽ ferro guigua tetã katy oĩ va'e py. Ha'e va'e ma ha'e ae ojepe'a. Ha'e gui oẽ vy peteĩ tape rupi jogueraa. Oove'ia py anjo ojepe'a ixugui.

¹¹ Ha'e ramo mae ma Pedro oikuua xapy'a vy aipoe'i:

— Aŷ ma aikuua anhetẽ Senhor ombou ra'e ojea pygua anjo, Herodes po gui xereraa jepe aguã, ha'e judeu kuery ojapoxe va'e ha'e javi gui guive — he'i.

¹² Hexe oiko va'e re oikuua pota vy onhembopy'a oo aguã João Marcos hery va'e xy Maria ro py. Ha'e py ma heta ikuai onhembo'e vy.

¹³ Kora rokẽ re ombota ramo ou peteĩ tembiguai kunha'i Rode hery va'e, mava'e paa oexa aguã.

¹⁴ Pedro ayvu oendu kuaa vy ovy'a vaipa vy hexarai omoinge aguã. Onha reve opy ojevy Pedro okẽ py hi'aĩa omombe'u aguã.

¹⁵ Ha'e ramo ha'e kuery aipoe'i ixupe:

— Naneakã porãvei teve — he'i okuapy. Ha'e rami teĩ omombe'uve ha'e etea.

Ha'e ramo aipoe'i ju:

— Inhe'ẽ rive ri nhi'ã — he'i okuapy.

¹⁶ Ha'e ramia ja Pedro ombotave tema ho'amy. Ha'e ramo mae ma ha'e kuery oipe'a vy ha'e ri ty ra'ea oexa vy ndoikuuai rei okuapy.

¹⁷ Ha'e ramo opo py "Pekyrirĩ" he'ia rami ojapo vy omombe'u marã rami pa nhuã gui Senhor oguenoẽ ukaague. Ha'e vy aipoe'i:

— Pemombe'u ke Tiago pe, irmão kuery pe guive — he'i. Ha'e gui oẽ ju vy amboae katy oo.

¹⁸ Ko'ẽmba rã xondaro kuery nda'evei rei ikuai, mba'e pa Pedro re oikoague ndoikuuai vy.

¹⁹ Herodes oeka uka teĩ ndojoui. Ha'e rami vy nhuã rarõa kuery omboayvu ma vy ojuka ukapa. Ha'e vy Judéia gui ma Cesaréia katy ju oo. Ha'e py oiko are.

Herodes omanoague

²⁰ Ha'e va'e jave Herodes joo rami e'ŷ ijayvu Tiro ha'e Sidom pygua kuery reve. Ha'e ramo oĩa py ha'e kuery oupa peteĩ rami ojexa uka aguã. Ha'e rami vy huvixa rembiguai Blasto pe onheptyvõ uka rire ojerure okuapy peteĩ rami ju ikuai aguã re, mba'eta huvixa yvy rupi ho'u va'erã ojou vy.

²¹ Ha'e gui oa'angaague ára py Herodes omoĩ ao iporãve va'e. Tenda openaaty áry oguapy vy ijayvu ha'e kuery pe.

²² Ha'e ramo ha'e kuery ojapukai:

— Nhanderuete ae teve ijayvu, ava e'ŷ — he'i okuapy.

²³ Ha'e ramove anjo Senhor-a guigua omomba'eaxy huvixa, Nhanderuete nomboetei ramo. Haxo ho'upa rã omano.

²⁴ Ha'e gui Nhanderuete ayvu oenduave tema opa rupi, ha'e ojerovia va'e kuery hetave ový.*

* 12:24 1 Pedro 1.24,25

²⁵ Barnabé ha'e Saulo ma ojapo 'rā va'ekue ojapopa ma vy ojevy ju Jerusalém gui. Ngupive ogueraa avi João Marcos hery va'e.

13

Jypy'i Barnabé ha'e Saulo ayvu mombe'ua rupi oguataague

¹ Antioquia pygua igreja kuery regua ikuai profeta ha'e nhombo'ea kuery: Barnabé, Simeão Níger hery va'e, Cirene pygua Lúcio, huvixave Herodes ryvy ranga Manaém ha'e Saulo.

² Ha'e kuery ma Senhor pe okaru e'ŷ re ikuai ramo Nhe'ẽ Ky'a E'ŷ aipoe'i:

— Peiporavo xevy Barnabé ha'e Saulo, xee aenoīague rami ha'e kuery omba'eapo aguā — he'i.*

³ Ha'e ramo okaru e'ŷ re onhembo'e okuapy ranhe. Ha'e gui ha'e kuery áry opo omoī reve omondouka.

Onhembo'e vaikue va'e Elimas reko re ijayvua

⁴ Nhe'ẽ Ky'a E'ŷ omondouka ramo Selêucia peve ranhe oo. Ha'e gui yy rupi oje'oi Chipre katy.

⁵ Salamina py ovaẽ vy Nhanderuete ayvu omombe'u judeu kuery onhembo'eaty ikuai va'e rupi. Ipytyvõarã ogueraa avi João.*

⁶ Ypa'ũ oaxapa vy Pafos tetã peve oo. Ha'e py oexa peteĩ judeu onhembo'e vaikue va'e profeta ramigua, Barjesus hery va'e.

⁷ Ha'e va'e ma huvixa Sérgio Paulo irũ oiko. Ha'e rā huvixa ma ava hi'arandu va'e. Ha'e rami vy Barnabé ha'e Saulo oenoī vy oendu porã pota Nhanderuete ayvu omombe'u rā.

⁸ Ha'e rami teĩ onhembo'e vaikue va'e Elimas hery va'e ojokoxe huvixa ojerovia e'ŷ aguā.

⁹ Ha'e gui Saulo Paulo avi hery va'e re ma Nhe'ẽ Ky'a E'ŷ anho oĩ ramo oma'ẽ porã ranhe Elimas re. Ha'e vy aipoe'i:

¹⁰ — Anha ra'y, ndere ma renhombotavya ha'e opa marā rei reiko aguā anho oĩ. Heko porã va'e re repu'ã rei. Nderepytu'ui ta ri ty'y Senhor reko amboae rami rei reikuua ukaa gui?

¹¹ Aŷ ma ndere Senhor omoī 'rā opo nderexavei aguā. Ha'e ramo mbovy ára rei ve'ŷ nderexavei 'rā kuaray — he'i. Ha'e ramove hexe ho'a yvyxí ramigua pytū va'e. Ha'e ramo ojere-jere oikovy, oipota ijyva re imboguataarã.

¹² Mba'emo oiko va'e huvixa oexa vy oguerovia ayvu, Senhor re ombo'e rā oguerov'y a guive.

Jerusalém katy ju João Marcos ojevyague

¹³ Pafos gui ma Paulo yy rupi oo. Oirũ kuery reve oje'oi Panfília regua Perge tetã re. Ha'e rā João ma ha'e kuery gui oja'o vy Jerusalém katy ju ojevy.

¹⁴ Ha'e rā ha'e kuery ma Perge gui oove Pisídia regua Antioquia tetã peve, ha'e sábado ára py judeu kuery onhembo'eaty py oo vy oguapy.

¹⁵ Lei ha'e profeta ombopara va'ekue ogueroayvupaa ma rire onhembo'eaty pygua ruvixa aipoe'i uka ha'e kuery pe:

— Xeryvy kuery, heta va'e kuery pemombaraete aguā regua ayvu perekri vy ke pemombe'u.

Antioquia py Paulo ayvu omombe'uague

¹⁶ Ha'e ramo Paulo opu'ã vy opo py ojapo "Pekyrirí" he'ia rami. Ha'e vy aipoe'i:

— Avakue Israel regua ha'e Nhanderuete renonde pejererokyjea rupi pendekuai avi va'e, pejapyxaka ke.

¹⁷ Nhande Israel kuery Ruete ma oiporavo raka'e nhaneramoī kuery, ha'e gui oyvy re'ŷ ikuia pukukue re omboetave, Egito yvy re. Ha'e gui opo'akaa rupi oguenoẽmba vy

¹⁸ quarenta ma'etŷ re tekao e'ŷa py ikuai jave ogueropo'aka ha'e kuery reko vai.

* 13:2 Atos 9.15,16; Romanos 1.1 * 13:5 Apy João hery va'e ma Apóstolo João e'ŷ, ha'e rā João Marcos, Jesus rekoke ombopara va'erā va'e (versículos 13-15).

¹⁹ Ha'e gui sete regua Canaã yvy re ikuai va'ekue omomba vy ijyvykue ome'ẽ ha'e kuery yvyrã,

²⁰ quattrocentos e cinqüenta ma'etõ rai'i rire. Ha'e va'e rire omoõ herekoarã kuery, profeta Samuel oikoa ára peve.

²¹ Ha'e gui nguvixaverã re ha'e kuery ojerure okuapy ramo Nhanderuete omoõ uka Benjamim regua Quis ra'y Saul. Ha'e va'e ma quarenta ma'etõ re oĩ.

²² Ha'e gui ma oipe'a vy hekovia Davi ju oiporavo huvixaverã. Ha'e va'e reko re ijayvu vy aipoe'i: “Jessé ra'y Davi ma ava xee ae rami ipy'a va'e ajou, xee aipota va'e ojapopa va'erã”, he'i va'ekue.

²³ Ha'e va'e ramymino kuery regua Nhanderuete ijayvuague rami vy omoingo Israel kuery reraa jepearã. Ha'e va'e ma Jesus.

²⁴ Ha'e va'e ojekuaa uka e'õ mbove João ranhe Israel kuery ha'e javive pe omombe'u oikovy jajeko rerova vy nhanhemongarai uka aguã regua.

²⁵ Ha'e gui João ojapo 'rã va'ekue ojapopa ma vy aipoe'i: “Xee ma pexa'aa ramigua e'õ. Ha'e rã xerakykue rima ou oiny peteõ. Ha'e va'e gui ma xe'yvyi'i ete vy neõ ipy regua amboi aguã voi nda'evei”, he'i va'ekue.

²⁶ — Ke'y kuery Abraão ramymino kuery ha'e Nhanderuete renonde pejererokyjea rupi pendekuai va'e, nhandevy pe ae oikuua uka ayvu jaa jepe aguã regua.

²⁷ Mba'eta Jerusalém pygua kuery nguvixa kuery reve ndoikuai okuapy Jesus, neõ profeta kuery nhombo'ea noendu kuaai guive, sábado ára nhavõ ogueroayvu tei, mba'eta ojuka uka raka'e Jesus, profeta kuery ijayvuague ojeupity aguã rami.

²⁸ Neõ peteõ henda py ojapo vaiague ha'e kuery ndoikuai va'eri huvixa Pilatos pe ojerure okuapy ojuka aguã re.

²⁹ Hekorã ipara oiny va'e ojeupity aguã rami oguereko rire omboguejya yvyra gui, ha'e vy tuparã ojapo pyre py onhono porãa.

³⁰ Ha'e rami tei omanoague gui Nhanderuete omboete ju.

³¹ Ha'e ramo mbovy ára re rei e'õ ojexa uka oikovy, Galiléia guive Jerusalém katy hexeve oje'oi va'ekue pe. Ha'e va'e kuery ma imombe'uarã ikuai heta va'e kuery pe.

³² Ha'e gui ore ju pêvy romombe'u ayvu porã Nhanderuete nhaneramoõ kuery omoingo porã aguã re ijayvuague regua.

³³ Ha'e kuery ramymino nhandekuai va'e pe Nhanderuete ojapo ha'e nungakue ha'e javi ojeupity aguã rami, Jesus omboete jevya py, mba'eta mokoõ Salmo re ipara oia rami vy: “Ndee ma Xera'y, ange xee romoingo”, he'iague.*

³⁴ Ha'e rami vy ae omanoague gui Nhanderuete omboete ju ivaipa e'õ aguã, aipoe'iague rami: “Pendevy pe ajapo 'rã Davi pe xeayvuague iky'a e'õ ha'e oguerovia pyrã ojeupity aguã rami.”*

³⁵ Ha'e rami vy amboae Salmo py aipoe'i avi: “Nderejai 'rã neremimbo'e retekue Iky'a e'õ va'e ivaipa aguã”, he'i va'ekue.*

³⁶ Mba'eta anhetõ Nhanderuete oipotaa rami vy heta va'e kuery re Davi opena ma rire oke vy oo nguu kuery ooague py, ha'e ramo hetekue ivaipa.

³⁷ Ha'e rã Nhanderuete omboete ju va'e retekue ma nda'ivaipai.

³⁸ — Ha'e nunga rupi ke'y kuery, peikuua pota, mba'eta pêvy pe romombe'u hexe vy jejavya omboguepaa aguã regua.

³⁹ Hexe vy ma ha'e javive ojerovia va'e omboeko porãa 'rã opa mba'e vai gui. Ha'e rã Moisés lei oeja va'ekue rupi ma nanhanemboeko porãai 'rã.

⁴⁰ Peikuua pota ha'vy profeta kuery aipoe'iague pendere oiko e'õ aguã:

⁴¹ “Ma'ẽ ke, peõ pejojoxai rei va'e. Penhemondyi ha'e pekanhy, mba'eta pende'ára py xee ajapo 'rã mba'emo ndaperoviai va'erã, pêvy omombe'ua tei”, he'iague.*

Sábado jevya py ayvu omombe'u aguã re ojerure okuapyague

* 13:33 Salmo 2.7 * 13:34 Isaías 55.3 * 13:35 Salmo 16.10 * 13:41 Habacuque 1.5

⁴² Paulo ha'e Barnabé oẽ rã ojerure okuapy sábado jevy py ha'ekue rami ae ju ijayvu aguã.

⁴³ Onhembo'eaty gui ono'õ va'ekue oopa rã judeu kuery ha'e judeu reko rami Nhan-deruete pe ikuai va'e heta oje'oi Paulo ha'e Barnabé rakykue. Ha'e ramo omongoeta Nhanderuete porayvua re riae ikuai aguã.

Judeu e'ŷ va'e kuery pe ju Paulo ha'e Barnabé ayvu omombe'uague

⁴⁴ Sábado jevy py tetã pygua ha'e javi rai ou Nhanderuete ayvu oendu aguã.

⁴⁵ Ha'e rã judeu kuery ma heta ijaty va'e oexa vy ndojou porãi. Ha'e rami vy ijayvu vaikue, Paulo ayvu re ijayvu rei guive.

⁴⁶ Ha'e ramo Paulo ha'e Barnabé okyjea py e'ŷ ijayvu vy aipoe'i:

— Peẽ kuery pe ranhe ma romombe'u Nhanderuete ayvu. Ha'e rã napenduxei vy pexa uka tekove marã e'ŷ pejopy aguã nda'eveia. Ha'e rami rã judeu e'ŷ va'e kuery ikuiaia py ju 'rã roo.

⁴⁷ Mba'eta ha'e rami aguã rami ae Senhor oremoõ. Ha'e vy aipoe'i: "Xee romoõ judeu e'ŷ va'e kuery moexakãarã, vvy jave re ikuai va'e oo jepe aguã", he'i va'ekue.*

⁴⁸ Ha'e rami ijayvu rã judeu e'ŷ va'e kuery oendu vy ov'y'a okuapy, Senhor ayvu oguerovy'a guive. Tekove marã e'ŷ jopyarã oiporavo pyre ha'e javive oguerovia.

⁴⁹ Ha'e rami rã ha'e va'e javi rupi oendupaa Senhor ayvu.

⁵⁰ Ha'e rami teĩ judeu kuery ombopoxy kunhague judeu reko rami ikuai va'e yvatekueve, tetã pygua ruvixa kuery guive. Ha'e rami vy omoingo axy Paulo ha'e Barnabé vy omoxẽ oyvy gui.

⁵¹ Ha'e ramo ha'e kuery opy regua gui vvy ku'i oity-ity oikuua uka aguã ha'e kuery oeja ma ovya. Ha'e gui Icônio katy ju oje'oi.*

⁵² Ha'e rã temimbo'e kuery ikuai va'e ma opa mba'e py ov'y'a tema okuapy Nhe'ẽ Ky'a E'ŷ reve vy.

14

Icônio py Paulo ha'e Barnabé ovaẽague

¹ Icônio tetã py ma Paulo ha'e Barnabé ma judeu kuery onhembo'eaty py ovaẽ vy nhombo'e. Ha'e ramo heta ikuai va'e oguerovia, judeu ha'e grego kuery guive.

² Ha'e rã judeu kuery oguerovia e'ŷ va'e ma omopu'ã rei judeu e'ŷ va'e kuery, ombopoxypa irmão kuery pe.

³ Ha'e ramive ma ikuai are ha'e py, okyjea py e'ŷ ijayvu Senhor gui. Ha'e rã Senhor ma ha'e kuery po py hexa pyrã ha'e nhomondyipaarã ojapo vy oikuua uka ayvu nhomboaxya regua anhetêa.

⁴ Ha'e rami rire tetã pygua kuery oja'opa. Peteĩ regua oo judeu kuery re, ha'e rã amboae kuery ma apóstolo kuery re oje'oi.

⁵ Ha'e rami vy judeu e'ŷ va'e ha'e judeu kuery nguvixa kuery reve opu'ãmba rei okuapy ojojai reixe ha'e ita py ojapipa aguã.

⁶ Ha'e nunga ha'e kuery oikuua vy ojava Licaônia regua Listra ha'e Derbe tetã katy, ha'e katy rai-rai'i ikuai va'e rupi voi.

⁷ Ha'e py ju omombe'u ayvu porã.

Listra py peteĩ oguata e'ŷ va'e omongueraague

⁸ Listra py oguapy oiny peteĩ ava ípy pirupa va'e, itui'i guive ndoguatai va'e, neĩ peteĩgue ma oguata va'e e'ŷ.

⁹ Ha'e va'e ava ma Paulo ayvu re ojapyxaka oiny ramo hexe oma'ẽ vy oexa okuera aguã ojerovia etea.

¹⁰ Ha'e rami vy ijayvu atã reve aipoe'i ixupe:

— Epu'ã ke ndepy re — he'i ramove opo reve opu'ã vy oguata.

¹¹ Heta va'e kuery Paulo ojapo va'e oexa vy ojapukai Licaônia ayvu py, aipoe'i:

* 13:47 Isaías 49.6 * 13:51 Lucas 10.10,11

— Nhanderuete kuery teve avakue rami ojeapo vy oguejy ra'e nhandea peve — he'i okuapy.

¹² Ha'e rami vy Barnabé pe “Júpiter”, ha'e rā Paulo pe ma “Mercúrio” he'i okuapy, mba'eta ijayvuve ramo.*

¹³ Ha'e Júpiter pegua sacerdote oī va'e ma ixupeguia templo tetā kylvō katy oī va'e gui ou vy tetā rokē katy ogueru vaka ha'e ngora yvoty guigua. Heta va'e kuery reve mymbaojukaxe ha'e kuery pe.

¹⁴ Ha'e nunga apóstolo kuery Barnabé ha'e Paulo oendu vy oao omondoro reve opo heta va'e kuery mbyte py. Ha'e vy ojapukai:

¹⁵ — Avakue, mba'e re tu guī ramigua pejapo ta? Ore voi ma ava peē ramigua. Pendua rami ae avi roendu. Ha'e rami vy pēvy romombe'u ayvu porā guī ramigua ovare'ŷ va'e pejapoia gui pejeko rerova aguā Nhanderuete oikove va'e re. Ha'e va'e ae yva, yvy, ye'ē ha'e opa mba'e ikuai va'e apoare oiko.*

¹⁶ Ymagua kuery pe oeja raka'e peteī-teī regua ha'e kuery ae reko rami ikuai aguā.

¹⁷ Ha'e rami teī ikuua ukaarā ndoeja e'ŷi guive, mba'eta pendevy pe ojapo porā vy yva gui ombou oky ha'e mba'emo hi'a aguā ára. Pekaru ha'e pendepy'a py penv'y'a aguā nomboatai — he'i.

¹⁸ Po rami ijayvu teī haxy ete py ojoko heta va'e kuery ha'e kuery pe mymba ojuka taa.

Paulo ita py ojapipaague

¹⁹ Ha'e rami jave Antioquia ha'e Icônio gui judeu kuery ou vy ombopoxypa heta va'e kuery. Ha'e rami vy Paulo ojapipa okuapy ita py. Ombotyryry heravy tetā gui mombyry'i, “Omano ma po” he'i vy.

²⁰ Ha'e gui temimbo'e kuery ombojere rei ramo opu'ā, ojevy ju tetā py.
Ko'ē jevy Barnabé reve Derbe katy oo.

²¹ Ha'e va'e tetā py ayvu porā omombe'u vy heta ojou temimbo'erā. Ha'e gui ma Listra, Icônio ha'e Antioquia katy ju ojevy.

²² Temimbo'e ikuai va'e ombopy'a guaxu ovvy vy omongoeta ojeroviaa rupi riae ikuai aguā.
— Jaiko axy vy 'rāe jaike Nhanderuete pegua po'akaa py — he'i.*

²³ Peteī-teī igreja rupi okaru e'ŷ re onhembo'e rire oiporavo igreja re opena va'erā. Ha'e Senhor re ojerovia va'e kuery ma omboaxa ovvy ipo py.

²⁴ Pisídia yvy oaxa vy Panfília katy ju jogueraa.

²⁵ Perge py ayvu porā omombe'u rire oguejy jogueravy Atália katy.

²⁶ Ha'e gui yy rupi oo Antioquia katy, mba'eta ha'e py Nhanderuete po py jypy'i omboaxaa va'ekue mba'emo ojapo 'rā va'ekue ojapo aguā.†

²⁷ Ha'e py ovaē vy omboatypa igreja kuery, ha'e omombe'u oguataa rupi Nhanderuete ojapo va'ekue ha'e javi, ha'e okē judeu e'ŷ va'e kuery ojerovia aguā regua oipe'aague guive.

²⁸ Mbovy ára rei e'ŷ ikuai ha'e py temimbo'e kuery reve.

15

Judeu e'ŷ va'e kuery joo rami e'ŷ-e'ŷ ijayvu okuapyague

¹ Ha'e gui ma Judéia gui amongue ou vy ombo'e po rami irmão kuery:

— Orerekorā Moisés oejaague rami vy pendepire napemboi ukai ri vy ndapeo jepei 'rā — he'i okuapy.

² Ha'e rami rā ha'e kuery reve Paulo ha'e Barnabé joo rami e'ŷ-e'ŷ ijayvu ramo jogueroayvu Jerusalém katy ha'e va'e mokoī oo aguā amboae kuery ha'e pygua reve, apóstolo ha'e igreja re opena va'e kuery pe oikuua pota uka aguā ha'e nunga re.*

* 14:12 Júpiter ma ha'e kuery ruete ramigua yvateve va'e, ha'e rā Mercúrio ma tuuete ramigua ijayvu kuaave va'e.

* 14:15 Éxodo 20.11, Salmo 146.6 * 14:22 2 Timóteo 3.10-12; 1 Pedro 4.12-14 † 14:26 Mokoī henda py oī raka'e tetā Antioquia hery va'e. Apy omombe'u va'e ma Síria regua, igreja kuery ikuaria. Ha'e rā capítulo 13, ha'e 14.21 py ijayvua ma Pisídia regua. * 15:2 Gálatas 2.1-5; 5.1-6

³ Ha'e rami vy igreja kuery omondouka vy mombyry'i peve omoirū heravy. Ha'e ramo Fenícia ha'e Samaria rupi oaxa vy judeu e'ŷ va'e ojeko rerovaague omombe'u oje'oivy. Ha'e rami rā irmão kuery ha'e javive oendu vy ov'y'a vaipa.

⁴ Jerusalém py ovaẽ ramo igreja kuery omovaẽ porã'i, apóstolo ha'e opena va'e kuery reve. Ha'e ramo omombe'upa oguataa rupi Nhanderuete ojapo va'ekue.

⁵ Ha'e rā amongue fariseu regua Jesus re ojerovia va'e ma opu'ã vy aipoe'i:

— Ojerovia va'e kuery ma opire omboi uka ramo 'rāe ha'eve, ha'e nhambō'e avi 'rā lei Moisés oeja va'ekue rami ikuai aguā — he'i okuapy.

Jerusalém py opena va'e kuery nhomboatyague

⁶ Ha'e ramo apóstolo ha'e igreja re opena va'e kuery nhomboaty okuapy ha'e nunga re oikuaa pota aguā.

⁷ Joo rami e'ŷ-e'ŷ ijayvu ramo Pedro opu'ã vy aipoe'i:

— Irmão kuery, peẽ peikuaa yma Nhanderuete xeporavoague penembyte gui, judeu e'ŷ va'e kuery pe ayvu porã amombe'u rā oendu vy ojerovia aguā.*

⁸ Ha'e gui Nhanderuete nhande kuery pavē py'a re oĩa oikuaapa va'e vy ha'e kuery pe voi oikuaa uka ojou porāa, mba'eta ha'e kuery pe Nhe'ẽ Ky'a E'ŷ ombou, nhandevy ombouague rami avi.

⁹ Nhande, neĩ ha'e kuery regua nanhanderayvuvei joegui, mba'eta ha'e kuery ojerovia rā oiky'a'opa avi ipy'a.

¹⁰ Ha'vy aŷ, mba'e re tu Nhanderuete pe “Nda'evei” peje ri? Mba'eta temimbo'e kuery pembovoyixe pekuapy nhaneramoĩ kuery ndogueropo'akai va'ekue py, neĩ nhande voi ndajaropo'aka kuaai.*

¹¹ Ha'e rami 'rāgue py jarovia nhande voi Senhor Jesus nhanemboaxy ramo ae jaa jepea, ha'e kuery rami avi — he'i.

Tiago ijayvuague

¹² Ha'e gui ma heta va'e kuery ha'e javive okyrirī okuapy ojapyxaka aguā Barnabé ha'e Paulo omombe'u rā hexa pyrā ha'e nhomondyipaarā ipo py Nhanderuete ojapo va'ekue, judeu e'ŷ va'e kuery tekoá rupi oguataa rupi.*

¹³ Ha'e kuery ijayvupa ma rire Tiago ju ijayvu. Ha'e vy aipoe'i:

— Irmão kuery, pejapyxaka xeayvu re.

¹⁴ Simão ranhe omombe'u kuri judeu e'ŷ va'e pe jypy'i Nhanderuete ojekuaa ukaague, ha'e kuery regua gui oiporavo aguā hery rupi ikuai va'erā.

¹⁵ Ha'e rami ae avi profeta kuery ayvu ipara oinya. Mba'eta aipoe'i:

¹⁶ “Ha'e nunga oiko ma rire ajevy vy ajapo ju 'rā Davi ro ho'apa va'ekue. Ho'aague gui ajapo jevy vy amoatyrōmba 'rā,†

¹⁷ amboae kuery voi oeka aguā Senhor, judeu e'ŷ va'e kuery xerery rupi aenoĩ va'e ha'e javi voi”,

¹⁸ he'i Senhor yma voi ha'e nunga kuaa ukaare.*

¹⁹ Ha'e nunga rupi xee aikuaa ramo nda'evei nhamoangeko rei aguā judeu e'ŷ va'e kuery Nhanderuete re ojeko rerova va'ekue.

²⁰ Ha'e kuery pe nhambopara 'rā onhemongy'a e'ŷ aguā mba'emo ra'angaa py, neĩ itavy reia py, ha'e ho'u e'ŷ aguā xo'o ojyryvipy vy ojuka pyre ro'okue neĩ huguykue.

²¹ Mba'eta yma guive Moisés ombopara va'ekue rupi ijayvu va'e ikuai ae tetā nhavō rupi. Judeu kuery onhembo'eaty py voi sábado ára nhavō ogueroayvua 'rā.*

Antioquia katy ayvu ogueraa ukaa ague

* 15:7 Atos 10.1-48 * 15:10 Ha'e kuery ombovoyixe temimbo'e kuery amboae regua, mba'eta oipota ha'e kuery voi ikuai judeu kuery rekora oeja pyre rami. * 15:12 Gálatas 1.18,19 † 15:16 “Ajapo ju 'rā Davi ro ho'apa va'ekue”, he'i ma Davi ramymino Jesus nhandereraa jepearā ombou aguā re ijayvu vy. * 15:18 Amós 9.11-12 * 15:21 1 Coríntios 9.19-22, 10.31-33

²² Ha'e ramo apóstolo ha'e opena va'e kuery igreja ha'e javi reve ojou porã ha'e kuery regua avakue oiporavo ha'e omondouka aguã Antioquia tetã katy, Paulo ha'e Barnabé reve. Ha'e rami vy oiporavo Judas Barsabás 'epy va'e ha'e Silas, irmão kuery omboeteve va'e meme.

²³ Ha'e va'e kuery po py ogueraa uka po rami ombopara va'ekue: "Irmão kuery apóstolo ha'e igreja re opena va'e orekuai va'e, kova'e kuaxia rombopara irmão kuery judeu e'ŷ va'e regua, Antioquia, Síria ha'e Cilícia py pendekuai va'e pe. Pendevy roxarura.

²⁴ Roikuua karamboae amongue romondouka ramo e'ŷ orembyte gui [oje'oi va'ekue] penemoingo eta reiague, ayvu py penemoangeke rei vy.

²⁵ Ha'e nunga rupi peteĩ rami roikuua porã ma vy rojou porã amongue avakue roiporavo vy peẽ kuerya py rombou aguã orerembiayvu Barnabé ha'e Paulo reve.

²⁶ Ha'e va'e avakue ma nhande-Senhor Jesus Cristo rery káuxa ndojeavyuvei va'e.

²⁷ Ha'e rami vy Judas ha'e Silas rombou, peẽ kuery pe ha'e kuery ae omombe'u aguã ha'e nunga.

²⁸ Mba'eta Nhe'ẽ Ky'a E'ŷ reve rojou porã amboae ramigua pêvy ndorojapo ukai aguã, pova'e nunga anho:

²⁹ Penhemongy'a eme mba'emo ra'angaa pe ome'ẽ mbyre pe'ua py, neĩ huguykue, ha'e mymba ojyryvipy vy ojuka pyre ro'okue, ha'e pendetavy rei eme guive. Ha'e nunga gui pejejoko vy peiko porã 'rã. Tove tapendekuai porã."

Kuaxia para ogueroayvu okuapyague

³⁰ Are'ŷ re omondouka pyre kuery ma Antioquia tetã py ovaẽ ma vy ha'e py ikuai va'e omboatypa vy ha'e kuery pe omboaxa kuaxia para.

³¹ Ha'e pygua kuery ogueroayvu vy ov'y'a vaipa ombopy'a guaxu rã.

³² Judas ha'e Silas profeta ikuai va'e voi irmão kuery ombopy'a guaxu vy heta ayvu py omombaraete.

³³ Ha'e py ikuai are rire irmão kuery ombojevy uka porã'i ju imondoukaare kuerya katy.

³⁴ [Ha'e rã Silas ma ojou porã ha'e py ae opytave aguã.]

³⁵ Paulo ha'e Barnabé ma Antioquia py ikuai are vy nhombo'e ha'e omombe'u Senhor ayvu, heta ikuai va'e reve.

Barnabé gui Paulo oja'o rire mokoiguea ma ayvu omombe'ua rupi oguataague

³⁶ Are'i ma rire Paulo aipoe'i Barnabé pe:

— Aŷ ma jajevy ke jaexa ju irmão kuery tetã ha'e javi rupi Senhor ayvu nhamombe'uague rupi, jaikuua aguã marã rami pa ikuiaia — he'i.

³⁷ Ha'e vy Barnabé ogueraaxe João Marcos hery va'e.

³⁸ Ha'e rã Paulo ma ndojou porãi ogueraa aguã, Panfília py oĩa gui ojepe'a vy omba'eapoa rupi noipytyvõvei rire.*

³⁹ Ha'e rami py joo rami e'ŷ ijayvu vy oja'o joegui. Barnabé ma Marcos ogueraa vy yy rupi oo Chipre katy.

⁴⁰ Ha'e rã Paulo ma oirûrã Silas oiporavo vy oo avi, Senhor po py irmão kuery omboaxa rire.

⁴¹ Ha'e vy Síria ha'e Cilícia rupi oaxa, omombaraete ov'y igreja ikuai va'e ha'e javi.

16

Paulo Timóteo ngupive ogueraa ague

¹ Ha'e gui Derbe py ovaẽ avi, ha'e gui Listra py ju. Ha'e py ma peteĩ temimbo'e oiko Timóteo hery va'e, judeu regua oguerovia va'e pi'a. Ha'e rã tuu ma grego.

² Ha'e va'e re ma Listra ha'e Icônio pygua irmão kuery ima'endu'a porã.

³ Paulo oipota oo hupive. Ha'e vy ipire omboi ha'e katy'i rupi judeu kuery ikuai va'e re vy, mba'eta pavẽ oikuaa tuu grego oikoa.

* 15:38 Atos 13.13

⁴ Ha'e gui tetā ikuai va'e rupi oaxa vy irmão kuery pe omombe'u hekorā apóstolo ha'e opena va'e kuery Jerusalém py ikuai va'e ijayvuague.

⁵ Ha'e rami vy igreja kuery ikuai va'e imbaraeteve oje'ivy ojeroviaa py. Hetave ovv ko'ẽ nhavō.

Trôade py peteĩ ava oexa ukaa ague

⁶ Ha'e gui ma Ásia py ma Nhe'ẽ Ky'a E'ŷ ayvu nomombe'u ukai ramo Frígia-Galácia yvy rupi oje'oi.

⁷ Mísia py ovaẽ rai'i vy onhea'ã Bitínia katy oo aguã. Ha'e rami teĩ Jesus Nhe'ẽ nomondoukai.

⁸ Ha'e ramo Mísia rupi oaxa vy Trôade tetā py oguejy.

⁹ Pyávy Paulo pe peteĩ oexa ukaa, Macedônia pygua ava opu'ã ho'amy va'e. Ha'e va'e ma ojerure vy

— Tereo ke Macedônia katy oreptyvõ aguã — he'i.

¹⁰ Ha'e rami oexa ukaa rire roje'oi voi pota ha'e katy, mba'eta roikuaa ha'e kuery pe ayvu porã romombe'u aguã orerenoĩare Nhanderuete ae oikoa.*

Filipos py Paulo oiko jave Lídia ojeko me'ẽague

¹¹ Trôade gui yy rupi roo yvi Samotrácia katy. Ko'ẽ jevy ma Neápolis katy,

¹² ha'e gui ma Filipos katy ju roo.* Ha'e va'e tetā ma Macedônia regua pavẽ gui omboetevepy, ha'e Roma tetā gui ae openaa va'e. Ha'e py ma roiko are.

¹³ Sábado ára py tetā gui mombyry'i roo vy yakã rembe peve roguejy, ha'e py onhembo'eaty oĩa roikuaa vy. Ha'e vy roguapypa vy oreayvu roiny kunhague ijaty va'e reve.

¹⁴ Peteĩ kunha Lídia hery va'e ma ojapyxaka porã oiny oreayvua re. Ha'e va'e ma Tiatira guigua, ajukue púrpura guigua vendea, ha'e Nhanderuete renonde ojererokyjea rupi oiko va'e. Ha'e va'e py'a re Senhor ae omoĩ Paulo ijayvua re ojapyxaka pota aguã.

¹⁵ Ha'e rami vy onhemongarai uka ngoo pygua kuery ha'e javi reve. Ha'e rami vy orevy pe ojerure vy aipoe'i:

— Senhor re ajeroviaa perovia vy ke pevaẽ ke xero py, ha'e py ae pepyta — he'i. Ha'e rami ijayvua ha'eve orevy.

Peteĩ kunha'i imba'ekuua va'e gui nhe'ẽ vai oipe'aague

¹⁶ Onhembo'eaty katy roo jave peteĩ kunha'i ou orerovaexi nhe'ẽ vai gui imba'ekuua va'e. Ha'e va'e ma ombo'ekuua rupi ongana vaipa oikovy opatõ kuery pe.

¹⁷ Ha'e va'e ma Paulo ha'e ore kuery rakykue oo vy ojapukai reve aipoe'i 'rã:

— Peva'e avakue ma Nhanderuete Yvate ete va'e rembiguai, ha'e pêvy omombe'u tape peo jepe aguã — he'i.

¹⁸ Ha'e ramigua mbovy ára rei e'ŷ oiko. Ha'e ramo Paulo noenduxevei vy ojere, ha'e aipoe'i nhe'ẽ vai pe:

— Jesus Cristo rery rupi aipoa'e: Ejepa' ixugui — he'i ramove ojepe'a.

Paulo ha'e Silas oinupãmbaa rire nhuã py ombo'aa ague

¹⁹ Kunha'i patõ kuery ma nonganaveia oexa vy ojopy Paulo ha'e Silas, ha'e vy tetā mbyte py ogueraa huvixa kuery renonde.

²⁰ Huvixa kuerya py ogueraa vy aipoe'i:

— Peva'e avakue ma judeu ikuai vy opa marã omoingo nhaneretã pygua kuery.

²¹ Mba'eta teko mboae re nhombo'e 'rã. Ha'e va'e rupi ma nhandekuai aguã nda'evei, mba'eta nhande ma Roma pygua regua — he'i.

²² Ha'e gui heta va'e kuery peteĩ rami opu'ãmba ha'e kuery re. Huvixa kuery voi ijaõ omendoropa vy oinupã uka yvyra po'i'i py.

²³ Ha'e gui oinupãmba rire omботy nhuã py, ha'e nhuã rarõa pe opena uka oẽ e'ŷ aguã.

* 16:10 “Oje'oi” he'i 'rãgue py “Roje'oi” he'i, mba'eta ha'e kuery rupive kova'e kuaxia mboparaa Lucas voi oo raka'e.

* 16:12 Filipenses 1.1

²⁴ Ha'e va'e ma ha'e rami ijayvu rā oendu vy nhuā ropy apy py ogueraa, ha'e ipy voi ombofy vvyra py.

²⁵ Pytū mbyte jave ma Paulo ha'e Silas onhembo'e ha'e oporaei oiny Nhanderuete pe omboete vy.* Ha'e rā amboae kuery nhuā py ikuai avi va'e ma ojapyxaka okuapy.

²⁶ Ha'e rami jave yvy oryryi xapy'a vy omongu'epa nhuā yta. Ha'e ramo okē ikuai va'e ojepe'apa, ha'e javive gui oipa ojokuaague.

Nhuā rarōa ojeko me'ēague

²⁷ Nhuā rarōa omyī vy nhuā rokē ojepe'a rā oexa vy oekyi kyxe ojejuka aguā, “Nhuā py ikuai va'ekue oēmba ra'e ma po” he'i vy.

²⁸ Ha'e ramo Paulo ojapukai vy aipoe'i:

— Mba'eve ejapo eme ndejee, apy roī pavē — he'i.

²⁹ Ha'e ramo nhuā rarōa tataendy re ojerure vy oike pojava ovy. Oryryipa reve Paulo ha'e Silas renonde oī guenapy'ā re.

³⁰ Ha'e gui oka py ogueru vy aipoe'i:

— Avakue, mba'e tu ajapo 'rā aa jepe aguā?

³¹ Ombovai:

— Ejerovia Senhor Jesus re. Ha'e vy 'rā reo jepe, ndee ha'e ndero pygua kuery — he'i.

³² Ixupe omombe'u Nhanderuete ayvu, hoo pygua kuery ha'e javive pe guive.

³³ Ha'e va'e hora-ve pyávy ha'e kuery re opena porā vy ojoi oinupāague. Ha'e rire'ive onhemongarai uka, ha'e hoo pygua kuery ha'e javive reve.

³⁴ Ha'e gui ma ngoo py ae ogueraa vy omongaru. Ngoo pygua kuery ha'e javi reve ovy'a ete okuapy Nhanderuete re ojerovia vy.

Nhuā gui Paulo ha'e Silas opoia ague

³⁵ Ko'ēmba jave huvixa kuery ombou guembiguai “Pepoi peva'e avakue” he'i aguā.

³⁶ Ha'e ramo nhuā rarōa omboaxa pova'e ayvu Paulo pe:

— Huvixa kuery pendepoi uka kuri. Ha'e rā peēmba aŷ, tapeo porā — he'i.

³⁷ Ha'e ramo Paulo aipoe'i ha'e kuery pe:

— Ha'e rami avi mba'eve rojapo vaiague re'ŷ orenupāmba pavē oexaa py, nhuā py orembo'a uka guive, Roma pygua regua roiko va'eri. Aŷ ma nhemi rupi ju orepoi uka ta? Ha'e rami nda'evei. Ha'e rami 'rāgue py tou ha'e kuery ae torepoi — he'i.

³⁸ Ha'e nunga tembiguai kuery oendu vy oo omombe'u huvixa kuery pe. Ha'e va'e kuery ma Roma pygua regua oikoa oikuua vy okyjepa.*

³⁹ Ha'e rami vy Paulo kuerya py jogueru vy ijayvu porā'i. Nhuā gui oguenoē vy ojerure tetā gui ojepe'a aguā.

⁴⁰ Ha'e ramo nhuā gui oē ma vy Lídia ro py ranhe ovaē. Irmão kuery oexa vy omombaraetepa. Ha'e gui ma oje'oi.

17

Tessalônica py Paulo ha'e Silas ovaēague

¹ Anfípolis ha'e Apolônia rupi oaxa vy ovaē Tessalônica tetā py.* Ha'e py ma oī judeu kuery onhembo'eatay.

² Paulo gueko rami vy oo ha'e kuery nhomboatya py. Mboapy sábado re ha'e kuery reve ijayvu oikovy ipara re oĩa re.

³ Nhombo'e vy omombe'u porā. Ha'e vy aipoe'i:

— Cristo omanoague gui onhemboete jevy aguā rami oiko va'ekue. Jesus pēvy amombe'u va'e ae ma Cristo — he'i.

⁴ Ha'e va'e kuery regua amongue oguerovia vy onhemoirū Paulo ha'e Silas re. Grego kuery heta avi Nhanderuete pe ikuai, kunhague omboetevepy voi.

* 16:25 1 Tessalonicenses 5.16-18; Tiago 1.2-4 * 16:38 Atos 22.25-29 * 17:1 1 Tessalonicenses 1.1; 2.13,14

⁵ Ha'e rā judeu kuery ma nda'ija'e vy ojou avakue heko vai va'e. Ha'e vy omono'ō reta vy opa marā rei nhomoingo tetā rupi. Jasom ropy oikepa, teta mbyte katy Paulo kuery ogueraaxe vy.

⁶ Ha'e rami teī ndojoui vy huvixa kuerya py ogueraa Jasom ae, amongue irmão kuery reve. Ha'e vy aipoe'i:

— Kova'e kuery ma yvy jave re ikuai va'e moingo eta reia, ha'e gui apy ju rima ovaẽ ra'e.

⁷ Ha'e gui Jasom ma ngoo py omovaẽ. Ha'e va'e kuery ha'e javive César ayvu rami e'ŷ ikuai, Jesus pe anho "Huvixave" he'i okuapy.

⁸ Ha'e nunga ayvu heta va'e ha'e huvixa kuery oendu vy ipoxypa.

⁹ Ha'e rami teī Jasom ha'e amboae kuery gui peráta ojopy rire opoi ju.

Beréia py Paulo ha'e Silas ovaẽague

¹⁰ Ha'e rire'i pyavyve irmão kuery ma Beréia tetā katy ju omondouka Paulo ha'e Silas. Ha'e py ovaẽ ma vy judeu kuery onhembo'eaty oĩ va'e katy jogueraa.

¹¹ Ha'e gui Beréia pygua kuery ma Tessalônica pygua gui hi'aranduve va'e vy ojapyxaka porã ayvu re oenduxe vy. Ko'ẽ nhavõ ipara oĩa re oikuua pota guive, oikuua aguã oendu va'ekue anhetẽ paa.

¹² Ha'e rami vy heta ojerovia, grego regua kunhague omboetevepy, ha'e avakue mbovy e'ŷ avi.

¹³ Ha'e rami rā judeu kuery Tessalônica pygua ma Beréia py avi ri ty ra'e Nhanderuete ayvu Paulo omombe'ua oikuua vy ha'e py ju oje'oi nhombopoxy ha'e nhomopu'āmba rei aguã.

¹⁴ Ha'e ramo irmão kuery ojou porã Paulo omondouka voi aguã ye'ẽ rembe peve. Ha'e rā Silas ha'e Timóteo ma opytave ranhe ha'e py.

¹⁵ Paulo re opena va'e kuery ma Atenas peve ogueraa. Ha'e kuery ojevy vy Paulo ijayvuague ogueraa Silas ha'e Timóteo pe, oĩa py ha'e kuery ou voi aguã.

Atenas tetā py Paulo ijayvuague

¹⁶ Atenas tetā py Paulo oirũ kuery oarõ jave tetā rupi mba'emo ra'angaa anho oĩ rā oexa vy ndojou porāi vaipa.

¹⁷ Ha'e nunga rupi ijayvu oikovy judeu kuery onhembo'eaty py, judeu ha'e judeu e'ŷ va'e Nhanderuete mboetea rupi ikuai va'e kuery reve. Ha'e rami avi ko'ẽ nhavõ tetā mbyte rupi ijayvu ha'e py ikuai va'e reve.

¹⁸ Ha'e gui amongue onhemo'arandu va'e epicureu ha'e estóico regua ijayvu hexeve. Joupe-upe oporandum:

— Mba'e he'i vy tu po rami ijayvu katu rei va'e? Tuuete mboae re teve ijayvu — he'i okuapy, mba'eta Jesus reko omombe'u, onhemboete jevyague guive.

¹⁹ Ha'e rami vy ngupive ogueraa peteī henda Areópago hery va'e py. Ha'e vy aipoe'i:

— Aŷ ma roikuaaxe mba'e nunga pyau re pa renhombo'ea.

²⁰ Mba'eta remombe'u va'e ma ore kuery ndoroikuuai teri. Roikuaaxe mba'e 'rea pa ha'e nunga — he'i okuapy.

²¹ Mba'eta Atenas pygua kuery ha'e amboae regua ha'e py ikuai va'e voi amboae ramigua re ndoikuua potai, mba'emo ipyauve va'e re rive ijayvu ha'e ojapyxaka okuapy.

²² Ha'e ramo Areópago mbyte py Paulo opu'ā vy aipoe'i:

— Atenas pygua avakue, xee aexa rā peẽ kuery pembojerovia etea rupi anho pendekuai.

²³ Mba'eta tetā rupi aaxa avy vy aexa mba'emo pembojerovia va'ety ikuai va'e. Peteī aexa avi pembojeroviaaty re ipara oiny "Kova'e ma Nhanderuete jaikuua e'ŷ va'e pegua" he'ia va'e. Ha'e gui peikuua vy e'ŷ pembojerovia va'e ae xee amombe'u porâve pêvy.

²⁴ — Mba'eta Nhanderuete yvy ha'e yvy re opa mba'e ikuai va'e moingoare ma yva ha'e yvy re ipo'aka va'e vy oo avakue opo py ojapo va'ekue py noĩ,

²⁵ neĩ nhande kuery po py nanhaipytyvõi 'rã mba'eve py. Nhandegui mba'eve oipota va'e'ŷ, mba'eta nhande kuery ha'e javive pe ha'e ae ome'ẽ nhanderekoverã, nhanepytuêrã ha'e opa mba'e jareko va'e.

²⁶ Petei'i gui nhanemoingo raka'e opa marãguia yvy re nhandekuai va'erã. Yma voi oa'anga raka'e pa, ha'e mamo ete pa peteĩ-teĩ regua ikuai aguã,

²⁷ Nhanderuete jaeka aguã, ha'e jaeka ete vy jajou aguã. Ha'e rami avi nhandegui mombyry e'ŷ oiko,

²⁸ mba'eta hexe vy jaiko, nhamyĩ ha'e nhandekuai, peẽ kuery regua ijayvu kuaa va'e "Mba'eta ixuguigua meme jaiko", he'ia rami.

²⁹ Ha'e gui Nhanderuete gui meme jaikoague jaikuaa vy jaikuaa avi mba'emo ouro guigua rami e'ŷ oikoa, neĩ prata ha'e ita gui avakue o'arandua rupi ha'e oikuaa rami ojapo va'ekue rami e'ŷ guive.

³⁰ — Ha'e gui ymave rupi jaikuaa vy e'ŷ mba'emo vai jajapoague re Nhanderuete nanhanembopagai. Ha'e rami teĩ aŷ ma oikuaa uka avakue opa rupi ikuai va'e ojeko rerova aguã.

³¹ Mba'eta oa'anga ma yvy re ikuai va'e ombopagapa aguã ára. Ha'evea rami 'rã ombopaga uka peteĩ ava omoĩ va'ekue pe. Ha'e va'e ma jaikuaa pavẽ aguã omanoague gui omboete ju – he'i.

Amongue ojojai rei, ha'e rã amboae kuery ma ogueroviaague

³² Omanoague gui Jesus onhemboeteague re Paulo ijayvu rã ha'e kuery oendu vy amongue ojojai rei. Ha'e rã amboae kuery ma

— Amboae ára ma emombe'uve ju pova'e nunga roenduve aguã — he'i okuapy.

³³ Ha'e ramo Paulo ojepe'a ha'e kuery mbyte gui.

³⁴ Ikuai avi amongue avakue oguerovia vy hexe onhemoirũ va'e. Ha'e kuery regua ma Areópago pygua Dionísio, ha'e peteĩ kunha Dâmaris hery va'e. Ha'e va'e kuery reve ikuaive amboae kuery.

18

Corinto tetã py Paulo ova ague

¹ Ha'e va'e rire Atenas tetã gui Paulo o  vy Corinto katy ju oo.

² Ha'e py ma peteĩ judeu Ponto guigua oexa Áqüila hery va'e. Roma tetã gui huvixa Cláudio judeu kuery omox mba ramo Itália gui o  vy Corinto py ova  ramo'i va'ekue gua'yxy Priscila reve. Ha'e va'e kuery re Paulo onhemboja.*

³ Oo'i ipirekue guigua apoa rupi ikuai va'e meme ramo ha'e kuery reve Paulo optya ombo'eapoa py.

⁴ Ha'e gui s bado nhav  ijayvu oikovy judeu kuery onhembo'eaty py. Judeu ha'e grego kuery pe omombe'u oikovy ayvu.

Jesus reko Paulo omombe'uague

⁵ Macedônia gui Silas ha'e Timóteo ova  ma ramo Paulo nomba'eapovei, ayvu mombe'ua rupi anho oiko. Ha'e rami vy judeu kuery pe omombe'u oikovy Jesus ae Cristo oikoa.*

⁶ Ha'e rami teĩ ha'e kuery ijayvu vaikue reve opu' mba ramo Paulo oao ombojaity vy aipoe'i:

— Peneak  re ae to  penderuguy pemo  ukaague re pepaga agu .* Xee ma ha'e nunga py ndaxepo ky'ai. Aŷ gui ma amboae regua kuery pe ju 'r  aa amombe'u — he'i.

⁷ Ha'e gui ojepe'a vy peteĩ ava T cio Justo hery va'e ro py ova , judeu kuery onhembo'eaty yvy'iry o  va'e py. Ha'e va'e ava ma Nhanderuete renonde ojererokyjea rupi oiko.

* 18:2 1 Coríntios 1.1-3; Romanos 16.3,4 * 18:5 2 Coríntios 11.9 * 18:6 "Peneak  re ae to  penderuguy pemo  ukaague re pepaga agu " he'ia ma ha'e kuery ae ndojereraa jepe ukaxeit rire opaga agu  re ijayvu vy.

⁸ Ha'e gui onhembo'eaty pygua ruvixa Crispo hery va'e ma Senhor re ojerovia okuapy ngoo pygua kuery ha'e javi reve. Corinto pygua kuery voi ayvu oendu vy heta oguerovia vy onhemongarai uka.

⁹ Ha'e gui pyávy Senhor ojexa uka Paulo pe. Ha'e vy aipoe'i:

— Ekyje eme. Ha'e rami 'rāgue py ndeavyuve tema rekyrirī e'ŷ re,

¹⁰ mba'eta xee aiko ndereve. Avave rei ndere nopus'āi 'rā mba'emo vai ojapo aguā, mba'eta kova'e tetā py heta areko xejeupe guarā — he'i.

¹¹ Ha'e ramo ha'e py ma peteī ma'etŷ ha'e mboapy meme jaxy re oiko. Nhombo'ea rupi oiko Nhanderuete ayvu re.

Huvixa Gálio renonde Paulo ojexá ukaague

¹² Acaia pygua huvixa Gálio oĩ jave py ma judeu kuery peteī rami opu'ā okuapy Paulo re. Nhomboayvuaty py ogueraa vy

¹³ aipoe'i:

— Kova'e ava ma nhombo'e oikovy lei re oĩa rami e'ŷ Nhanderuete omboetea aguā re — he'i okuapy.

¹⁴ Ha'e ramo Paulo ombovai ta jave huvixa Gálio aipoe'i judeu kuery pe:

— Judeu kuery, mba'emo vai ete, e'ŷ vy jojukaague, mba'emo nda'evei ete va'e re pendeayvu va'e rire ha'eve 'rāgue xee aikuaa pota aguā.

¹⁵ Ha'e rā ayvukue, tery ha'e pêvygua lei re ri pendeayvu ta vy peikuaa pota peē ae ha'e nunga re. Xee ma ha'e nunga re ndaikuua potai 'rā — he'i.

¹⁶ Ha'e rami vy nhomboayvuaty gui omoẽmba ju.

¹⁷ Ha'e ramo ha'e kuery ha'e javi ma judeu kuery onhembo'eaty pygua ruvixa Sóstenes ojopy vy oinupãmba nhomboayvua kuery renonde. Ha'e rami teī Gálio ma ha'e nunga re voi ndoikuua potai.

Mokoiguea ayvu mombe'u vy ooague gui Paulo ojevyague

¹⁸ Ha'e py ma Paulo optytave ranhe heta ára. Ha'e va'e rire irmão kuerya gui oo vy Síria katy ju oguata. Ngupive ogueraa Priscila ha'e Áqüila. Ha'e rami e'ŷ mbove Cencréia py onhopi uka oakā, mba'emo ojapo aguā re onhemboayvuague ojapopa ma rire.

¹⁹ Ha'e gui ma Éfeso tetā py ovaẽ oirū kuery oeja aguā py. Ha'e rā ha'e ma judeu kuery onhembo'eaty py oike vy ha'e kuery pe omombe'u ayvu.

²⁰ Ha'e kuery ojerure optytave aguā ha'e py, teī nda'evei.

²¹ Ha'e rā ha'e kuerya gui oo ta vy aipoe'i:

— Nhanderuete oipota ramo ajevy ju 'rā peē kuerya py — he'i. Ha'e gui kanoā py ojeupi vy oove Éfeso gui.

²² Cesaréia py ovaẽ vy oguejy vy Jerusalém tetā re oo. Ha'e pygua igreja pe oxarurapa ma vy Antioquia katy ju oguejy ovv.

²³ Ha'e py ma oiko are rire oo ju. Galácia ha'e Frígia yvy rupi oaxa vy omombaraeteve ovv temimbo'e kuery ha'e javive.

Mboapykuea ayvu mombe'ua rupi Paulo oguata, ha'e Éfeso py Apolo ovaẽague

²⁴ Ha'e va'e jave py Éfeso py ma peteī judeu ovaẽ, Alexandria tetā guigua Apolo hery va'e. Ha'e va'e ma ijayvu kuaa, ha'e ipara oikuaapa va'e,

²⁵ Senhor reko re ombo'e pyre. Ikyre'ŷ vy ijayvu Jesus reko re, ha'evea rami nhombo'e oikovy guive, João nhomongarai jave guare anho oikuaa va'eri.

²⁶ Ha'e rami ranhe okyjea py e'ŷ ijayvu judeu kuery onhembo'eaty py. Ha'e ijayvu rā Priscila ha'e Áqüila oendu vy ogueraa, ha'e vy ixupe omombe'u porâve Nhanderuete reko.*

²⁷ Acaia katy Apolo ooxe ramo irmão kuery omonhanima, temimbo'e kuery pe ombopara guive omovaẽ aguā. Ha'e py ovaẽ ma vy opa mba'e py oipytyvõ Nhanderuete omboaxy rā ojerovia va'e kuery,

* 18:26 Efésios 1.1,2; 1 Coríntios 3.6-9

²⁸ mba'eta ijayvu kuaa ete vy pavē oendua py ipo'aka judeu kuery re, mba'eta ipara oī va'e gui omombe'u vy oikuaa uka Jesus ae Cristo oikoa.

19

Éfeso py Paulo ovaēague

¹ Corinto tetā py Apolo oiko jave Paulo ma yvy rupi oguata vy Éfeso tetā py ovaē. Ha'e py ma amongue temimbo'e kuery ojou vy

² oporandu ha'e kuery pe:

— Peē kuery pa pejerovia ramo pendere ou Nhe'ẽ Ky'a E'ŷ?

Ha'e kuery ombovai:

— Any, ore kuery ma noroendui ae Nhe'ẽ Ky'a E'ŷ oiko va'ea — he'i okuapy.

³ Ha'e ramo Paulo oporandu ju:

— Marā rami ha'vy penhemongarai uka?

Ha'e kuery ombovai:

— João Batista nhomongaraia rami rima — he'i okuapy.

⁴ Paulo aipoe'i ha'e kuery pe:

— João ma ojeko rerova va'ekue omongarai vy heta va'e kuery pe ijayvu va'ekue araka'eve rā ou va'erā re ju ojerovia okuapy aguā. Ha'e va'e ma Jesus — he'i.*

⁵ Ha'e nunga ha'e kuery oendu vy onhemongarai ukapa Senhor Jesus rery rupi.

⁶ Ha'e kuery áry Paulo opo omoĩ ramo ha'e kuery re ou Nhe'ẽ Ky'a E'ŷ. Ha'e ramo ayvu mboae py ijayvu, Nhe'ẽ guigua omombe'u guive.

⁷ Ha'e javi vy doze avakue ikuai.

Tirano nhombo'eaty py Paulo nhombo'egue

⁸ Ha'e gui ma judeu kuery onhembo'eaty py Paulo oo vy nhombo'e. Mboapy jaxy re okyjea py e'ŷ nhombo'e vy omombe'u oikovy Nhanderuete po'akaa.

⁹ Ha'e rā amongue ma ndogueroviai ha'e noenduxei vy heta va'e kuery oendua py ijayvu vai okuapy Senhor reko re. Ha'e ramo ha'e kuerya gui Paulo oguerojepe'a temimbo'e kuery. Ha'e gui ma Tirano hery va'e nhombo'eaty py ju ombo'e oikovy ko'ẽ nhavō.

¹⁰ Mokoĩ ma'etŷ re nhombo'ea rami oiko ramo Ásia pygua kuery ha'e javi oendu Senhor ayvu, judeu ha'e grego kuery voi.

¹¹ Paulo po py Nhanderuete mba'emo porā ete ojapo oikovy opo'akaa rupi.

¹² Panhero ha'e avental Paulo oiporu va'ety ma imba'eaxy va'e ikuaria rupi heraa ramo okuerapa 'rā imba'eaxygui, nhe'ẽ vai ikuai va'ekue voi ojepe'apa 'rā.

¹³ Ha'e gui amongue judeu kuery nhe'ẽ vai pe'aa rupi ikuai va'e ma onhea'anga Senhor Jesus rery rupi nhe'ẽ vai oipe'a aguā. Ha'e vy aipoe'i:

— Xee aipoa'e pejepe'a aguā Jesus rery Paulo omombe'u va'e rupi — he'i.

¹⁴ Ha'e rami ojapo va'e ma peteĩ judeu sacerdote yvateve va'e Ceva hery va'e ra'y kuery, ha'e javi vy sete ikuai.

¹⁵ Ha'e rami rā ha'e kuery pe nhe'ẽ vai ombovai:

— Jesus ma xee aikuua, Paulo guive. Ha'vy peē, mava'e tu peē? — he'i.

¹⁶ Ha'e rami vy ha'e kuery re nhe'ẽ vai onhemondea va'e opo vy ipo'aka ha'e kuery ha'e javive re. Opa marā oguerekaxy ramo ipire rei ha'e ijaipa rei reve onhamba oo oĩa gui.

¹⁷ Ha'e nungakue Éfeso py ikuai va'e oendupa, judeu ha'e grego kuery. Ha'e rami vy ha'e javive ojererokyje vy omboete okuapy Senhor Jesus rery.

¹⁸ Oguerovia va'e kuery heta ou vy onhemombe'u. Mba'emo vai ojapoague omombe'upa.

¹⁹ Heta avi onhembo'e vaikue va'ekue okuaxia oguerupa vy oapypa pavē renonde. Kuaxia para repykue re oikuaa pota vy cinqüenta mil ára repy oikuaa.

²⁰ Ha'e rami vy Senhor ayvu oenduave ha'e ipo'akave ovy.

Macedônia katy Paulo oirū kuery omondoukaague

* 19:4 Lucas 3.15,16

²¹ Ha'e nunga ha'e javi oiko rire Paulo onhembopy'a Macedônia ha'e Acaia rupi oaxa ma vy Jerusalém katy oo aguã. Mba'eta aipoe'i:

— Ha'e py aiko rire aexaxe avi Roma tetã pygua kuery — he'i.*

²² Mokoï opytyvõaty Timóteo ha'e Erasto omondouka Macedônia katy. Ha'e rã ha'e ma Ásia py ranhe opytave.

Demétrio nhomopu'ãmba reiague

²³ Ha'e va'e jave py heta opu'ã okuapy Senhor reko rami ikuai va'e re.

²⁴ Mba'eta peteĩ ava oiko ouro re ombo'eapo va'ety Demétrio hery va'e, prata gui xyete ramigua Diana ra'angaa ojapo va'e. Ha'e nunga repykue gui hexeve ombo'eapo va'e kuery oguerekopa.

²⁵ Ha'e gui guexeve ombo'eapo va'e kuery omboatypa vy aipoe'i ha'e kuery pe:

— Avakue, peikuua kova'e nunga gui jajoupaa.

²⁶ Pendu ha'e pexaa rami Éfeso tetã py ha'e Ásia yvy ha'e javi rupi rai'i Paulo nhombo'e vy heta ojapo mba'emo ra'angaa nomboetevei aguã rami, mba'eta ijayvu avakue opo py ta'angaa ojapo va'ekue tuuete e'ŷ oikoa rami.

²⁷ Ha'e nunga rupi nhanerembiapo re ndojeroviaavei. Ha'e rami anho e'ŷ, nhandexyete Diana ipo'akapa va'e pegua templo eteve voi nomboetevei. Ha'e rami vy ombovaipa 'rã Ásia ha'e yvy jave re ikuai va'e omboete va'e yvatea — he'i.

²⁸ Ha'e nunga ha'e kuery oendu vy ipoxypa, ha'e vy ojapuka-pukai:

— Éfeso pygua xyete Diana ma yvate ete — he'i okuapy.

²⁹ Tetã ha'e javi rupi opa marã ojapura okuapy vy ono'ðaty oĩ va'e katy oje'oi pavẽ. Ngupive ogueraa Paulo irũ kuery Gaio ha'e Aristarco, Macedônia gui ou va'ekue.

³⁰ Paulo voi heta va'e kuery pe ojexa ukaxe teĩ temimbo'e kuery nomondoukai.

³¹ Ásia pygua huvixa kuery Paulo irũ ikuai vy ixupe ojerure uka avi ono'ðaty py oo e'ŷ aguã.

³² Ono'õ va'e regua amongue ojapukai peteĩ rami, ha'e rã amboae kuery ma amboae rami ojapukai. Joo rami e'ŷ-e'ŷ ijaty va'e ikuai. Heta va'e kuery neĩ mba'erã pa ono'ðomba okuapya ma ndoikuuai.

³³ Ha'e ramo teta mbyte gui judeu kuery ogueru Alexandre, ha'e vy pavẽ renonde katy omoanha. Ha'e va'e ma ojapo opo py heta va'e kuery pe ijayvuxea rami.

³⁴ Ha'e rami teĩ judeu oiko ra'ea ha'e kuery oikuua vy peteĩ rami ojapukai okuapy mokoï hora re rãnda'u:

— Éfeso pygua xyete Diana ma yvate ete — he'i okuapy.

³⁵ Ha'e va'e tetã py oiko kuaxia mboparaaty. Ha'e va'e ma opu'ã vy omokyrirĩ heta va'e kuery. Ha'e vy aipoe'i:

— Avakue Éfeso pygua, pavẽ oikuua ae ma Diana ipo'akapa va'e ra'angaa pegua templo re nhande Éfeso tetã pygua kuery nhapena va'ea, ha'e Júpiter-a gui ta'angaa ho'a va'ekue re guive.

³⁶ Ha'e nunga avave rei amboae rami ndoikuuai 'rã. Ha'e nunga rupi pekyrirĩ 'rãgue, mba'eve pejapo eme peikuua pota porã e'ŷ re.

³⁷ Mba'eta peva'e avakue apy Peru va'ekue ma templo mbovaipaa rupi e'ŷ ikuai, neĩ nhandexyete re voi nda'ijayvu vai guive.

³⁸ Xapy'a rei Demétrio ha'e hexeve ombo'eapo va'e kuery ri amongue re ijayvu aguã oguerekoo ramo oa'angaa ae ma huvixa nhomboayvua kuery oikuua pota aguã ára, joe pendeayvu aguã.

³⁹ Ha'e rã amboae ramigua re ri peikuua potaxe ramo ma nhanhomboaty aguã ára oa'anga pyre py 'rã jaikuua pota.

⁴⁰ Mba'eta nhandevy pe voi nda'evei ange oiko va'ekue re ijayvua gui, nhapu'ãmba reiague rami omombe'ua rã. Mba'eta ha'e rami rã peteĩ henda py ma voi nanhamombe'u

* 19:21 Romanos 1.13-15; 15.22-29

porā kuaai 'rā mba'erā pa nhanhomboatyague — he'i. Ha'e rami ijayvu ma vy ijaty va'ekue omondoukapa ju.

20

Teīgue ju Macedônia ha'e Grécia rupi Paulo oguataague

¹ Ha'e kuery opa marā ikuiaia gui optyu'upa ma ramo Paulo oenoĩ uka temimbo'e kuery. Omombaraetea rupi ijayvu ma vy oipopyypa, ha'e gui oo Macedônia katy.

² Tekoa ikuai va'e rupi oaxa vy nhomongeta ha'e nhomombaraete ovu. Ha'e gui Grécia katy ju oo.

³ Ha'e py ma mboapy jaxy re oiko. Síria katy oo ta oikovy vy oendu judeu kuery hexe opu'ambaxeia. Ha'e rami vy Macedônia rupi ju ojevy.

⁴ [Ásia peve] omoirū va'e kuery ma pova'e: Beréia pygua Pirro ra'y Sópatro, Aristarco, Tessalônica pygua Secundo, Derbe pygua Gaio, ha'e gui Timóteo, Tíquico ha'e Ásia pygua Trófimo.

⁵ Ha'e va'e kuery ma orerenonde oje'oi, Trôade tetā py orerarō aguā.

⁶ Ha'e gui ngaru mbojape imbovua reveguia e'ŷa ára oaxa ma rire Filipos gui roo yy rupi. Ha'e gui peteĩ nhiruĩ araa py ma Trôade py rovaẽ ha'e kuery ikuiaia py. Ha'e py ma peteĩ semana ropyta.

Trôade py Paulo nhombo'eague

⁷ Semana ijypyá ára py mbojape roipe'ã-pe'ã'i aguā ronhomboaty rā Paulo nhomongeta. Ko'ẽ jevy oove ta vy pytū mbyte peve ijayvu.

⁸ Opy ronhomboatya py heta oĩ tataendy.

⁹ Ha'e py peteĩ kunumi oĩ Éutico hery va'e janela py oguapy oinya py. Ha'e va'e ma Paulo nda'ijayvupai ete ramo oke. Oke ete vy janela yvateve va'e gui ho'a yvy py. Ha'e gui he'õgue ojopya.

¹⁰ Ha'e ramo Paulo oguejy vy ojero'a hi'áry. Oikuavā vy aipoe'i:

— Penhemondyi eme, hekove oime teri — he'i.

¹¹ Ojeipi ju vy oipe'ã mbojape, ha'e ho'u. Nhomongetave ju ko'ẽmba peve. Ha'e gui mae ma oo.

¹² Ha'e rā kunumi va'e okuera jevy rā pavē oexa vy oguerovy'a ete okuapy. Ha'e vy ogueraa ju okuapy oikove va'e.

Assôs gui Paulo oo vy Mileto py ovaẽague

¹³ Ore roove vy kanoã py roĩ, ha'e Assôs katy roo. Ha'e py roarō Paulo yvy rupi ooa ja, ha'e rami aguā orevy ijayvu rire.

¹⁴ Assôs py orea py ju ovaẽ ma ramo orereve oĩ avi kanoã py, ha'e vy Mitilene katy ju roo.

¹⁵ Ha'e gui roove vy ko'ẽ jevy roaxa Quios ypa'ũ katy'i rupi. Are'ŷ'i re rovaẽ Samos py, ha'e ko'ẽ jevy Mileto py ju rovaẽ.

¹⁶ Mba'eta Paulo ijayvu ma voi Ásia yvy re ndopyta arexei vy Éfeso tetā py ovaẽ e'ŷ aguā re, mba'eta ojapura Pentecostes ára Jerusalém py oiko aguā, ha'eve ramo.

Mileto py Éfeso pygua igreja re opena va'e kuery omongoetaague

¹⁷ Mileto tetā gui Paulo oenoĩ uka Éfeso pygua igreja re opena va'e kuery.

¹⁸ Oĩa py ovaẽmba ma ramo aipoe'i ha'e kuery pe:

— Peẽ peikuaa porā marā rami pa peẽ kuery reve aikoague Ásia py avaẽ ypya ára guive.

¹⁹ Mba'eta anhemboyvatevea rupi e'ŷ Senhor pe ete aiko xerexay ha'e aiko axya py, mba'eta judeu kuery xerekoo a'ã vy xemoingo axy ramo.

²⁰ Ha'e rami teĩ xee ndajep'e ai romombaraetea rupi xeayvua gui. Ha'e nunga re rombo'e aikovy pavē oendua rupi, ha'e peteĩ-teĩ ro rupi guive.

²¹ Judeu ha'e grego kuery pe amombe'u aikovy Nhanderuete re ojeko rerova vy nhande-Senhor Jesus [Cristo] re ojerovia aguā.

²² — Aŷ ma xepy'a re aendu Jerusalém katy aaxeia, ha'e py xere oiko va'erā ndaikuai teĩ.

²³ Mba'eta tetā nhavō rupi xee aa rupi Nhe'ẽ Ky'a E'ŷ oikuaa uka nhuā py xembotya ha'e xemoingo axya 'rāa.

²⁴ Ha'e rami teī mba'eve py xee naendui ajeayvua, ajapo 'rā va'ekue ajapopaxea anho. Ha'e va'e ma xerembiaporā Senhor Jesus gui ae ajopy va'ekue, Nhanderuete nhanemboaxya regua ayvu porā amombe'u aguā.

²⁵ — Peē kuery mbyte Nhanderuete po'akaa re rombo'e aikovy rire teī aŷ ma aikuua xerova ndapexavei ma 'rāa.

²⁶ Ha'e nunga rupi kova'e ára xee anhemombe'u porā pēvy: Xee ndaxepo ky'ai peē mava'eve ruguy py,

²⁷ mba'eta peteīgueve ndajepe'ai Nhanderuete oipota va'e ha'e javi amombe'ua gui.

²⁸ Pepena pendejee ae ha'e vexa'i kuery ha'e javi re, ha'e va'e kuery re opena va'erā Nhe'ẽ Ky'a E'ŷ penemoī rire. Ha'e va'e ma Nhanderuete pegua igreja kuery nguguy py ae ojogua va'ekue.*

²⁹ Xee aikuua rā aa ma rire penembyte oiko 'rā guary kuery nhomondoropaarā, vexa'i kuery omboaxya rupi e'ŷ.

³⁰ Peē kuery regua voi opu'ã 'rā avakue ha'eve e'ŷa rami nhombo'e va'e, ojee ae temimbo'e kuery oguerova aguā.

³¹ Ha'e nunga rupi peikuua pota. Penema'endu'a mboapy ma'etŷ re xeayvu aikovyague re. Ara py ha'e pyávy ndapytu'ui xerexay reve peteī-teī romongetaa gui.

³² — Ha'e gui aŷ ma Senhor po py romboaxa, ayvu nhanemboaxya regua rupi vy penembaraete aguā, mba'eta ijayvu ma ipo'aka penemombaraete vy pendevy guarā ome'ẽ aguā iky'a e'ŷ va'e kuery ha'e javi reve.

³³ Xee ma napenai va'ekue avave mba'e prata, ouro, neī ao re.

³⁴ Peē voi peikuua xepo py ae ajouague xee ha'e xereveguia kuery roipota va'e.

³⁵ Opa mba'e py pēvy aexa uka nhamba'epo vy iporiaukue'i nhaipytyvō aguā. Penema'endu'a Senhor Jesus ae aipoe'iague re: “Joupe mba'emo nhame'ẽ vy javy'ave 'rā jajopya gui”, he'iague re.

Ha'e kuery reve Paulo onhembo'eague

³⁶ Ha'e rami Paulo ijayvupa ma vy guenapy'ã re oĩ, ha'e onhembo'e oiny ha'e kuery ha'e javi reve.

³⁷ Ha'e ramo ojae'o pavē. Oikuavā vy oayvupa.

³⁸ Ndovy'avei okuapy, “Xerova ndapexavei 'rā”, he'i rire. Ha'e vy omoirū heravy kanoā ituia py peve.

21

Tiro tetā py Paulo ovaēague

¹ Ha'e kuerya gui rojepa'rira kanoā ajukue regua py roo. Roje'oi yvi vy Cós py rovaẽ. Ko'ẽ jevy Rodes py, ha'e gui ma Pátara py ju rovaẽ.

² Peteī kanoā Fenícia katy oo va'e rojou vy ha'e va'e py ju roĩ. Ha'e vy roove.

³ Chipre ypa'ũ oreaxua regua ojekuaa maa gui roeja vy Síria yvy katy ju roo. Ha'e gui ma Tiro tetā py rovaẽ, mba'eta ha'e py mba'emo omboguejya 'rā kanoā gui.

⁴ Ha'e py temimbo'e kuery rojou vy sete ára ropyta ha'e py. Ha'e va'e kuery ma Nhe'ẽ gui oikuua vy Paulo pe ijayvu Jerusalém katy oo e'ŷ aguā.

⁵ Ha'e rami teī are'ŷ'i re rojepa'vy roove ju. Ha'e kuery ha'e javive oremoirū imondovy gua'yxy ha'e gua'y kuery reve. Tetā rovai roo vy ita ku'i reia py orerenapy'ã re roĩ vy ronhembo'e rokuapy ha'e py.

⁶ Ha'e gui peteī-teī rojopopyy ma vy roĩ ju kanoā py. Ha'e rā ha'e kuery ma ngoo katy ju ojevypa.

Cesaréia py Paulo ovaēague

* ^{20:28} João 21.15-17; 1 Pedro 5.1-4

⁷ Ha'e gui Tiro tetā gui roove vy Ptolemaida py rovaẽ. Ha'e py ma roxarura irmão kuery ikuai va'e pe. Peteĩ ára orekuai ha'e kuery reve.

⁸ Ko'ẽ jevy rojepe'a vy Cesaréia katy roo. Ha'e py ma Filipe ro py rovaẽ vy ropyta hexeve. Ha'e va'e ma ayvu porã mombe'uarã sete omoĩ mbyre regua.

⁹ Ha'e ma irundy guajy omenda e'ŷ va'e oguereko, profeta meme ikuai.

¹⁰ Ha'e py orekuai are ma rire Judéia gui ou peteĩ profeta Ágabo hery va'e.

¹¹ Ha'e va'e ma orea py ovaẽ vy ojora Paulo ku'akuaa. Ha'e va'e py ma opy ha'e opo ojokua reve aipoe'i:

— Po rami Nhe'ẽ Ky'a E'ŷ oikuaa uka: Nami judeu kuery Jerusalém pygua ojapo 'rã kova'e ku'akuaa ja re, mba'eta omboaxa 'rã judeu e'ŷ va'e kuery po py — he'i.

¹² Ha'e va'e ayvu roendu vy ha'e py ikuai va'e ha'e javi reve Paulo pe rojerure rokuapy Jerusalém katy oo ve'ŷ aguã.

¹³ Ha'e ramo ombovai:

— Mba'e tu pejapo pejae'o ha'e xemokangy vy? Mba'eta xevy pe ma ha'evepa rei Senhor Jesus rery káuxa Jerusalém tetā py nhuã py aa ha'e amano aguã voi — he'i.

¹⁴ Ha'e rami rã ndorojokoi vy ropytu'u, ha'e vy

— Tove toiko Senhor Oipota va'e — ro'e.

¹⁵ Ha'e va'e rire roiko katupa ma vy Jerusalém katy roje'oi.

¹⁶ Temimbo'e kuery Cesaréia gui ou va'ekue regua oo avi orerupive. Ha'e va'e kuery ma peteĩ temimbo'e yma ogueraa avi Chipre py itui'i va'ekue Mnasom hery va'e, mba'eta ha'e va'e ma ngoo py oremovaẽ va'erã.

Jerusalém py Paulo ovaẽague

¹⁷ Jerusalém py rovaẽ ma ramo irmão kuery ov'y'a reve oremovaẽ.

¹⁸ Ko'ẽ jevy orereve Tiago-a py Paulo oo oexa aguã. Igreja re opena va'e kuery ha'e javi ijaty ra'e.

¹⁹ Ha'e ramo Paulo oxarurapa ma vy omombe'u judeu e'ŷ va'e ikuia rupi ombo'eapo rã mba'emo Nhanderuete ojapoague ha'e javi.

²⁰ Ha'e nunga ha'e kuery oendu vy oguerovy'a okuapy Nhanderuete. Ha'e gui ma Paulo pe aipoe'i:

— Ha'e rami avi irmão, apy rexâa nhi'ã heta ikuai judeu kuery regua ojerovia va'e. Ha'e va'e kuery ha'e javi ma lei re oña rami anho ikuai.

²¹ Ha'e kuery pe ma omombe'ua ma nderekó ramigua. Ha'e vy aipo'ea: “Amboae regua ikuia rupi Paulo ombo'e judeu kuery Moisés ojapo uka va'ekue gui ojepe'a aguã re, gua'y kuery pire omboi e'ŷ, neĩ lei re oña rami ve'ŷ ikuai aguã”, 'ea nderekó ramigua rive omombe'u vy.

²² Ha'e ramo rã mba'eda 'rã tu jajapo? Mba'eta ndee revaẽague oikuua pavẽ 'rã.

²³ Ha'e nunga rupi ejapo oreayvu taa. Apy ore kuery regua ikuai irundy avakue onhemboayvuague ojapo aguã rami ikuai va'e.

²⁴ Ha'e va'e kuery reve tereo, ha'e ndee voi ejeky'a'o uka ha'e kuery reve, ha'e eme'ẽ ha'e kuery oakã onhopi uka aguã regua. Ha'e ramo 'rãe oikuua pavẽ nderekó re ijayvuague anhetẽ e'ŷa, ha'e ndee voi lei re oña rami reiko avia.

²⁵ Ha'e rã judeu e'ŷ va'e regua ojerovia va'e pe ma oreayvu romondouka ae ma, ha'e kuery ho'u e'ŷ aguã mba'emo ra'angaa pe ojuka pyre, huguykue, neĩ mymba ojyryvipy pyre ro'okue, ha'e gui itavy rei e'ŷ aguã — he'i.

²⁶ Ha'e ramo Paulo ma ko'ẽ jevy avakue ogueraa vy ha'e kuery reve ejeky'a'o uka. Ha'e vy templo py oike vy omombe'u ejeky'a'oa ára raka'e pa opa 'rãa, ha'e peteĩ-teĩ rekovia mymba ome'ẽ aguã.*

Paulo ojopy okuapyague

* 21:26 Ha'e ramo Paulo judeu kuery reko rami vy, pavẽ oikuua aguã hekokue ramigua omombe'ua va'e anhetẽ e'ŷa (versículo 24), amongue ayvu porã oguerovia vy oo jepe aguã (1 Coríntios 9.19-22, 10.32,33).

²⁷ Sete araa opa ta ma jave judeu kuery Ásia gui ou va'ekue regua ma Paulo templo py oĩ rã oexa vy ombopoxy heta va'e kuery ha'e javi. Ha'e rami vy ojopy vy

²⁸ ojapukai:

— Avakue Israel regua, orepytyvõ ke! Kova'e ava ma opa rupi nhombo'e oikovy nhande kuery rovai guarã, lei ha'e kova'e oo rovai guive. Aÿ katuve ma grego kuery ogueroike kuri templo py. Ha'e rami py omongy'apa kova'e oo iky'a e'ý va'ekue — he'i okuapy.

²⁹ Ha'e rami ijayvu mba'eta oexa va'ekue Éfeso pygua Trófimo hexeve tetã py oĩ rã. Ha'e rami vy oexa'ã tei Paulo templo py ogueroikea re.

³⁰ Ha'e ramo tetã ha'e javi rupi heta va'e kuery opu'ãmba vy onhamba jogueruvy. Ha'e vy Paulo ojopy vy ombotyryry heravy templo ropy gui. Ha'e ramove ombotypa vyvoi okẽ.

³¹ Ha'e kuery ojukaxe ete ramo xondaro ruvixa pe omombe'ua Jerusalém pygua kuery opu'ãmba okuapy.

³² Ha'e ramo ha'e va'e ogueru vyvoi xondaro kuery, huvixa yvyïve va'e reve. Onhamba jogueruvy heta va'e kuery mbyte katy. Ha'e ramo huvixa ha'e xondaro kuery ovaẽ rã heta va'e kuery oexa vy optyu'upa Paulo oinupãa gui.

³³ Xondaro ruvixa ovaẽ vy ojopy Paulo, ha'e mokoõ corrente py ojokua uka. Ha'e vy oporandu mava'e paa, ha'e mba'e pa ojapoague re.

³⁴ Heta va'e kuery regua amongue ojapukai peteñ rami, ha'e rã amboae kuery ma amboae rami ojapukai. Joo rami e'ý-e'ý ojapukai rã anhetãa huvixa ndokuuaai vy xondaro kuery okeaty katy ju ogueraa uka Paulo.

³⁵ Tape pyrõ-pyrõa'i py ovaẽ vy xondaro kuery oupi heravy, heta va'e kuery jo'a rei ramo.

³⁶ Mba'eta heta va'e kuery hakykue katy gui ou vy ojapukai:

— Pejuka — he'i okuapy.

³⁷ Ha'e gui Paulo ogueroike ta ma jave aipoe'i huvixa pe:

— Ha'eve pa ndereve xeayvu aguã mba'emo re?

Ombovai:

— Ndee ri ty'y grego ayvu py ndeayvu kuaa va'e?

³⁸ Ndee e'ý teve Egito pygua yma renhomopu'ãmba va'ekue, ha'e tekoa e'ýa katy quattro mil porojukaa reraa va'ekue? — he'i.

³⁹ Ha'e ramo Paulo ombovai:

— Xee ma judeu regua, Tarso tetã omboetevepy va'e pygua aiko Cilícia yvy re. Ha'e gui ndevy pe ajerure heta va'e kuery pe xeayvu aguã — he'i.

⁴⁰ — Ha'eve — he'i ma ramo Paulo opu'ã ho'amy tape pyrõ-pyrõa'i py. Opo py ojapo heta va'e kuery pe okyrirí aguã. Ha'e kuery okyririmba rã hebraico ayvu py ijayvu vy aipoe'i:

22

Paulo guekokue omombe'uague

¹ — Ke'y kuery ha'e xeryvy kuery, pendu ke aÿ xerekokue amombe'u rã — he'i.

² Ha'e ramo hebraico ayvu py ijayvu rã ha'e kuery oendu vy okyrirí ete okuapy. Ha'e rã ijayvuje tema:

³ — Xee ma judeu, Cilícia regua Tarso tetã py xetui'i va'ekue. Ha'e gui kova'e tetã py ju xetuja. Apy Gamaliel remimbo'e aiko vy lei nhaneramoõ kuery reko oña rami ete anhembo'e va'ekue. Nhanderuete pe aiko aguã re anho anhea'ã aikovy, aÿ peñ kuery pendekuaia rami avi.

⁴ Amoingo axy va'ekue Senhor reko rupi ikuai va'e, ajuka guive. Ajopy vy nhuã py amboty va'ekue, avakue ha'e kunhague.*

⁵ Ha'e nungakue sacerdote yvateve va'e ha'e nhomongeta va'ety ha'e javi oikuua anhetãa, mba'eta ha'e kuery gui ae kuaxia para araa karamboae nhanderyke'y kuery

* 22:4 Atos 8.3

peguarã. Ha'e rami vy Damasco tetã katy ju aa, ha'e py ikuai va'e voi aipokuapa reve Jerusalém py aru aguã omoingo axya aguã.*

⁶ — Ha'e gui ma tape rupi aa ainy jave, Damasco py avaẽ rai'i avya py, kuaray mbyte rai'i jave, peteĩ hendy hatã va'e yva gui hexakã xapy'a xeyvýry rupi.

⁷ Ha'e ramo ha'a yvy rupi. Ha'e gui peteĩ ayvu aendu xevy aipoe'i va'e: “Saulo, Saulo, mba'e re tu xererekoxe axyxerere ri?”

⁸ — Xee aporandu: “Mava'e tu ndee, Senhor?”

“Xee ma Jesus Nazaré pygua, ndee rerekoxe axy rei va'e”, he'i xevy.

⁹ Xereveguia kuery ma hendy va'e oexa teĩ noendu kuaai xevy ijayvu va'e ayvu.

¹⁰ — Ha'e ramo xee aporandu: “Mba'e 'rã tu ajapo, Senhor?”

Ombovai: “Epu'ã ke, evaẽ Damasco py, mba'eta ha'e py ma omombe'ua 'rã ndevy ajapo uka va'e ha'e javi”, he'i.

¹¹ Ha'e va'e hendy va'e rexakã gui ndaexavei rã xerupive ikuai va'e xejyva re xereraa ramo avaẽ Damasco py.

¹² — Ha'e py oiko peteĩ ava Ananias hery va'e. Nhanderuete pe oiko lei re oĩa rami, ha'e ha'e pygua judeu kuery ha'e javi ima'endu'a porãa va'e.

¹³ Ha'e va'e ma ou xereka. Xeyvýry ovaẽ ma vy aipoe'i: “Irmão Saulo, exa ju ke”, he'i. Ha'e ramove aexa jevy vy ama'ẽ hexe.

¹⁴ — Ha'e ramo aipoe'ive ju: “Nhaneramoĩ kuery Ruete yma voi ndeporavo ha'e oipota va'e reikuaa aguã, Heko porã ete va'e rexa aguã, ha'e ayvu ijuru guigua ae rendu aguã.

¹⁵ Mba'eta ixupe reiko vy ha'e javi regua renonde remombe'u 'rã rexa ha'e rendu va'ekue.

¹⁶ Ha'e vy aã mba'e re tu remboare ta? Epu'ã ke, enhemongarai uka, ha'e ejeky'a'o uka rejavyague gui, hery rupi rejapukai vy”, he'i.

¹⁷ — Ha'e gui ma Jerusalém katy ajevy ma rire templo py anhembo'e ainy jave aexa xapy'a karamboae peteĩ ojexa uka va'e.

¹⁸ Ha'e rami vy aexa xereve aipoe'i va'e: “Ndepojava ke, tereo voi Jerusalém gui, mba'eta ha'e kuery noenduxei 'rã xereko re ndeayvua”, he'i.

¹⁹ — Xee aipoa'e: “Ha'e rami teĩ Senhor, judeu kuery oikuua porã xee nhuã py amboty va'ekuea ndere ojerovia va'e kuery, ha'e ha'e kuery onhembo'eaty ikuai va'e rupi voi ainupãmbaague.

²⁰ Ha'e gui xee voi aã karamboae ndeayvu mombe'ua Estêvão ruguy moẽa kuery reve. Ha'e nunga ajou porã vy ijukaa kuery ao aarõ va'ekue”, ha'e.

²¹ — Ha'e rami teĩ aipoe'i xevy: “Tereo, mba'eta xee romondouka 'rã mombyry, judeu e'ã va'e ikuia rupi”, he'i.

Roma pygua regua Paulo oiko ramo noinupãaiague

²² Pova'e ayvu omombe'u peve'i ha'e kuery ojapyxaka. Ha'e gui ma ojapukai vy aipoe'i okuapy:

— Peipe'a peva'e ava ko yvy gui, nda'evei oikove aguã — he'i okuapy.

²³ Ha'e kuery ojapukai reve ojegui capa omboipa, ha'e yvy ku'i omombo-mombo yvate katy.

²⁴ Ha'e ramo xondaro ruvixa aipoe'i Paulo ogueroikea aguã xondaro kuery okeaty py, ha'e oinupã reve omboayvu aguã, mba'e re pa hexe ijayvu okuapy oikuua aguã.

²⁵ Ha'e gui ma ipire ra'ykue py ojokuaa rã Paulo aipoe'i huvinha yvyive va'e pe:

— Ha'evea rami ri ty'y peinupã Roma pygua regua peikuua pota porã e'ã re? — he'i.

²⁶ Ha'e nunga huvinha oendu vy xondaro ruvixa yvateve va'ea py ju oo. Ha'e vy aipoe'i ixupe:

— Mba'e tu rejapo ta? Mba'eta peva'e ava ma je Roma pygua regua — he'i.

²⁷ Ha'e rami rã xondaro ruvixa ou vy oporandu Paulo pe:

— Emombe'u xevy, ndee ma nhi'ã Roma pygua regua?

Ombovai:

— Xee ha'e aiko — he'i.

* 22:5 Atos 9.1-19

²⁸ Huvixa aipoe'i ixupe:

— Xee ma heta peráta apaga karamboae Roma pygua regua anhemoingo uka aguã.

Paulo ombovai:

— Ha'e rã xee ma ha'e pygua regua ae aiko — he'i.

²⁹ Ha'e ramove inupãarã ikuai va'ekue ojepe'apa. Huvixa eteve voi okyje Roma pygua regua ojokua uka rire.*

³⁰ Ko'ẽ jevy mba'e re pa judeu kuery hexe ijayvu rei okuapyague huvixa oikuaa porãvexe vy ojora uka. Ha'e gui omboaty ukapa sacerdote yvatekueve va'e ha'e nhomongeta va'ety kuery. Paulo ogueru ruka vy oexa uka ha'e kuery renonde.

23

Nhomongeta va'ety kuery renonde Paulo ojexa ukaague

¹ Ha'e gui nhomongeta va'ety kuery re Paulo oma'ẽ vy aipoe'i:

— Ke'y kuery, xee ma Nhanderuete renonde xepy'a ky'a e'ŷa rupi aiko opa mba'e py, aŷ peve — he'i.

² Ha'e ramo sacerdote yvateve va'e Ananias ma ijyvýry ikuai va'e pe oipete uka ijuru rupi.

³ Ha'e ramo Paulo aipoe'i ixupe:

— Nhanderuete nenupã avi 'rã, oo mbotya omoxiĩ mbyre rami rive reiko va'e.* Ndee ma upe py reguapy reiny lei re oĩa rami xemboayvu aguã, teĩ lei re oĩa rami e'ŷ ri ty'y xepete uka?

⁴ Ha'e ramo ijyvýry ikuai va'e aipoe'i:

— Ndeayvu vai ri ty'y sacerdote yvateve va'e Nhanderuete omoĩ va'ekue re?

⁵ Paulo ombovai:

— Ke'y kuery, xee ndaikuuai kuri sacerdote yvateve va'e oikoa. Mba'eta ipara oiny: "Pendeayvu vai eme heta va'e kuery ruvixa re" — he'i.*

⁶ Ha'e gui ma Paulo oikuaa nhomongeta va'ety kuery regua amongue saduceu, ha'e rã amboae ma fariseu regua ikuia. Ha'e rami vy ojapukai:

— Ke'y kuery, xee ma fariseu regua, ha'e fariseu ra'y aiko. Omano va'ekue omboetepa jevy rã guarã aarõ aikovy ramo ae xemboayvua — he'i.

⁷ Ha'e rami ijayvu ramo fariseu ha'e saduceu kuery joo rami e'ŷ-e'ŷ ijayvu. Mba'eta ijaty va'e kuery ma joo rami e'ŷ-e'ŷ oikuaa.

⁸ Mba'eta saduceu kuery ma oikuaa nonhemboete jevyavei 'rãa rami. Neĩ anjo, neĩ nhe'ẽ oikoa ha'e kuery ndogueroviai.* Ha'e rã fariseu kuery ma ha'e nunga ha'e javi oikoa oguerovia.

⁹ Ha'e rami py joo rami e'ŷ-e'ŷ ijayvu. Ha'e gui lei re nhombo'e va'ety fariseu regua opu'ã vy ijayvu atã:

— Ore ma mba'eve ndoroikuuai kova'e ava ojapo vaiague. Xapy'a rei nhe'ẽ e'ŷ vy anjo ri ty'y ixupe oikuaa uka ha'e nunga — he'i okuapy.

¹⁰ Ha'e kuery joguero'apa ramo huvixa okyje Paulo omopẽmba gui. Ha'e vy aipoe'i uka xondaro kuery ou vy oipe'a ha'e gui, okeaty py ju ogueraa aguã.

Paulo pe Senhor ojexa ukaague

¹¹ Pytũ jevy Paulo yvýry Senhor ojekuaa ho'amy. Ha'e vy aipoe'i:

— Ndepy'a guaxu ke, mba'eta Jerusalém py xerekó remombe'uague rami avi Roma tetã py ju 'rã remombe'u.

Paulo ojuka aguã re judeu kuery jogueroayvuague

¹² Ko'ẽmba rã judeu kuery nhomboaty vy oura okuapy Paulo ojuka e'ŷa ja ndokarui neĩ ndoy'ui aguã re, ayvu vaipy ikuai e'ŷ aguã.

¹³ Ha'e rami aguã re jogueroayvu va'e ma quarenta raxa'i ikuai.

* 22:29 Atos 16.35-39

* 23:3 Mateus 23.27,28

* 23:5 Êxodo 22.28

* 23:8 Lucas 20.27

¹⁴ Jugueroayvu va'e kuery ma sacerdote yvatekueve va'e ha'e nhomoneta va'ety kuerya py oo vy aipoe'i:

— Roura kuri Paulo rojuka e'ŷa ja ndorokarui ha'e ndoroy'ui aguã re, ayvu vaipy orekuai e'ŷ aguã.

¹⁵ Aŷ ma nhomoneta va'ety kuery po py pendeayvu pemondouka xondaro ruvixa pe, penerenonde oexa uka ju aguã. Hekokue re peikuaa pota porãvexea rami pemombe'u. Ha'e rã ore ma roarõ 'rã ovaẽ e'ŷ re rojuka aguã — he'i okuapy.

¹⁶ Ha'e rami ijayvu okuapy rã Paulo ri'y oendu. Ha'e rami vy ha'e va'e ma oo vy xondaro kuery okeaty py oike, ha'e vy Paulo pe omombe'u.

¹⁷ Ha'e rami rã Paulo xondaro ruvixa oenoĩ vy aipoe'i:

— Eraa kova'e kunumi va'e nderuvixaa py, mba'eta oguereko ixupe omombe'u va'erã — he'i.

¹⁸ Ha'e ramo nguvixaa py ogueraa vy aipoe'i:

— Nhuã py omboty pyre Paulo xerenoĩ vy ojerure kuri ndea py aru aguã kova'e kunumi va'e, mba'eta oguereko ndevy omombe'u va'erã — he'i.

¹⁹ Ha'e ramo huvixa ipo re ojopy vy mombyry'i oguerojep'e heravy. Ha'e vy oporandu ixupe:

— Mba'e tu rerekoxevy remombe'u va'erã?

²⁰ Ombovai:

— Judeu kuery ijayvu kuri ndevy pe ojerure aguã ko'ẽ rã Paulo rexu uka aguã re nhomoneta va'ety kuerya py, hekokue re oikuaa pota porãvexea rami.

²¹ Ha'e rã ndee enhembotavy uka eme, mba'eta ha'e kuery regua quarenta raxa oura okuapy Paulo ojuka e'ŷa ja ndokarui neĩ ndoy'ui aguã re, ayvu vaipy ikuai e'ŷ aguã. Aŷ ma oiko katupa ma okuapy ndeayvua oarõ vy — he'i.

²² Ha'e rami rã huvixa ma kunumi va'e omondouka ju vy ijayvu avave rei pe omombe'u e'ŷ aguã ixupe oikuaa ukaague.

²³ Ha'e gui mokoĩ xondaro ruvixa ju oenoĩ vy aipoe'i:

— Pytû are jave guarã pemboaty duzentos xondaro kuery, setenta kavaju árygua, ha'e duzentos hu'y guaxu reveguia Cesaréia peve peo aguã.

²⁴ Pejou avi kavaju Paulo oĩ aguã, mba'eve oiko e'ŷ re ovaẽ aguã huvixave Félix-a py — he'i.

²⁵ Ha'e gui kuaxia huvixave peguarã ombopara uka po rami ijayvua:

Félix pe huvixa Cláudio kuaxia ombopara uka va'ekue oĩa

²⁶ “Xee Cláudio Lísias ma kova'e ambopara uka ndee huvixave omboetevepy Félix pe. Tereiko porã.

²⁷ Kova'e ava ma judeu kuery ojopy vy ojuka rai ramo xee xondaro kuery reve aju vy araa jepe, Roma pygua regua oikoa aikuua vy.*

²⁸ Ha'e gui hexe ijayvu okuapya aikuua porãvexe vy araa uka ha'e kuery regua mongetaaty ikuua py.

²⁹ Ha'e rami vy aikuua ha'e kuery rekorã lei oeja pyre re oĩa re rive ijayvu okuapya. Mba'eve rei ndojapo vai jajuka aguã, neĩ nhuã py nhamboty aguã voi.

³⁰ Ha'e rami vy ava va'e ojuka ta okuapya xevy omombe'ua rã aendu vy amondouka voi ndea katy. Hexe ijayvu rei va'e kuery pe voi xeayvu, ha'e kuery avi ou vy nerenonde omombe'u aguã hexeve oguereko va'e. [Tereiko porã.]”

Huvixave Félix-a py Paulo ovaẽague

³¹ Ha'e gui xondaro kuery ma huvixa ijayvuague rami ikuai. Ha'e rami vy pyavyve Paulo ogueraa vy Antipátride peve oguerovaẽ.

³² Ko'ẽ jevy ha'e kuery ojevypa ju okeaty katy, ha'e rã kavaju árygua kuery pe ma ogueraa ukave Paulo.

³³ Ha'e va'e kuery ma Cesaréia py ovaẽ vy huvixave pe omboaxa kuaxia para, ha'e Paulo voi oexa uka.

* 23:27 Atos 21.27-39; 22.24-30

³⁴ Ha'e ramo huvixave ma kuaxia para ogueroayvupa ma vy oporandu maguigua pa oikoa re. Cilícia pygua oikoa oikuua vy

³⁵ aipoe'i:

— Nderekokue mombe'ua kuery ovaëmba ma ramo xee romboayvu 'rã — he'i. Ha'e rami vy omboty uka ranhe Herodes oo guaxu ojapo va'ekue py.

24

Félix renonde Paulo rekokue ramigua omombe'ua ague

¹ Peteï nhiruï ára rire ovaë sacerdote yvateve va'e Ananias, nhomongeta va'ety kuery ha'e peteï ava ijayvu va'erã Tértulo hery va'e. Ha'e va'e kuery ma huvixa renonde ojexa uka okuapy Paulo rekokue re ijayvu aguã.

² Ha'e gui Tértulo ma oenoña rã omombe'u hekokue ramigua. Ha'e vy aipoe'i:

— Oreruvixa omboetevepy Félix, ndegui vy orekuai porã riae opa mba'e py. Ndee repena porã ramo mba'emo porã anho oiko ore judeu kuery pe.

³ Ha'e nunga roikuua vy opa mba'e py roguerovy'a riae.

⁴ Ha'e rami avi xeayvu are e'ý aguã ajerure rejapyxaka porã aguã xapy'a'i.

⁵ Mba'eta ore roikuua pota rã peva'e ava ma mba'eaxy vaikue rami. Judeu kuery yvy jave re ikuai va'e omopu'ãmba rei oikovy, ha'e amboae rami nhombo'e Nazaré pygua peguarã rive.

⁶ Ha'e gui templo omongy'a ta ramo ore rojopy karamboae [rombopaga aguã ore kuery lei re oïa rami vy.

⁷ Ha'e rami teï xondaro ruvixa Lísias ou vy ivai vaipa reve orepo gui oipe'a heravy,

⁸ ha'e aipoe'i hexe oreayvu va'e apy ju roju aguã nerondenon.] Ha'e gui ndee voi hekokue re reikuua pota vy reikuua avi 'rã oreayvua anhetẽ memea — he'i.

⁹ Ha'e rami ijayvu rã judeu kuery ikuai va'e ojou porãmba. Ha'e vy

— Anhetẽ va'e meme — he'i okuapy.

Paulo guekokue omombe'uague

¹⁰ Ha'e gui Paulo pe ju huvixave opo py “Emombe'u ke” he'ia rami ojapo. Ha'e ramo aipoe'i:

— Heta ma'etý re ma ore kuery ruvixa reïa aikuua vy xee voi ta xeayvu.

¹¹ Mba'eta ndee voi reikuua doze ára ete'i ojapoa Jerusalém katy amboete aguã aa ague.

¹² Ha'e gui templo py ha'e kuery xejou okuapy jave avave reve ndaxeayvu vai, neï nanhomopu'âi ha'e kuery onhembo'eaty rupi, neï tetã rupi voi.

¹³ Ha'e kuery nomombe'u porã kuaai guive xere ijayvu rei okuapyague.

¹⁴ Ha'e rã peteï amombe'u ta ndevy: Xee ma Senhor reko rupi aiko, ha'e kuery “Amboae rami onhembo'e va'e”, he'ia rupi. Ha'e rami vy xee voi aiko oreramoï kuery Ruete pe. Lei re ipara oinya ha'e profeta kuery ombopara va'ekue rami vy mba'emo oiko va'e ha'e javi arovia.

¹⁵ Ha'e rami vy Nhanderuete gui aarõ aikovy ha'e kuery voi oarõ okuapy va'e, heko porã ha'e heko porã e'ý va'ekue omboetepaa ju aguã.

¹⁶ Ha'e nunga rupi anhea'â aikovy Nhanderuete ha'e avakue renonde xepy'a ky'a e'ýa rupi aiko aguã.

¹⁷ — Ha'e gui mbovy ma'etý rei e'ý aikoa gui aa karamboae ore kuery pe ome'ê mbyre araa vy, ha'e Nhanderuete pe mba'emo ame'ê aguã guive.

¹⁸ Ha'e nunga ajapo aikovy ari aikovy rupi ae judeu kuery Ásia pygua xejou templo py. Ajeky'a'o ukapa ma rire xejou xeirû heta reve'ý, ha'e anhombopoxy reia py e'ý guive.

¹⁹ Ha'e va'e kuery ae ou 'râgue nerondenon xere ijayvu aguã, oguereko va'e rire.

²⁰ Ha'e rami e'ý vy apy ikuai va'e ae oikuua ri vy tomombe'u nhomongeta va'ety kuery renonde ha'â jave ajapo vaiague ojou va'ekue.

²¹ Mba'eta po rami anho ha'e kuery mbyte ha'â vy xeayvu atã: “Kova'e ára xemboayvu omano va'ekue omboetepaa ju 'râa arovia ramo”, ha'e va'ekue.

Félix ha'e Drusila renonde Paulo ojexá ukaague

- ²² Ha'e ramo Félix ma Senhor reko oikuaa ae vy nopena voixei. Aipoe'i:
 — Xondaro ruvixa Lísias ou jave mae ma aikuaa pota porā 'rā pendeavua re — he'i.
- ²³ Ha'e rami vy xondaro ruvixa yvyíve va'e pe aipoe'i Paulo oarō vy hexe opena porā'i aguã, ha'e irū kuery oipytyvõxe rā ojoko e'ŷ aguã guive.
- ²⁴ Kueve'i ma rire Félix ou ju gua'yxy judeu va'e Drusila reve. Ha'e vy Paulo oenoĩ uka vy ojapyxaka oiny Cristo Jesus re jajerovia aguã re ijayvu rā.
- ²⁵ Teko porā, jejokoa ha'e nhomboayvupaa aguã re ijayvu ramo Félix oendu vy okyje. Ha'e vy aipoe'i:
 — Ha'e rami vy aŷ tereo ju. Ha'eve jave roenoĩ uka ju 'rā — he'i.
- ²⁶ Ha'e rami avi oipota teĩ Paulo ome'ẽ peráta ixupe. Ha'e rami vy mbovykue rei e'ŷ oenoĩ uka vy ijayvu hexeve.
- ²⁷ Mokoĩ ma'etŷ rire huvixa Félix rekovia oĩ Pórcio Festo. Ha'e jave Félix ma judeu kuery pe ojejou porā ukaxe vy oveja ov Paulo nhuã py.

25

Festo renonde Paulo oĩ vy César renonde ju ijayvu aguã re ojerureague

- ¹ Festo ha'e pygua kuery ruvixarā oĩ vy mboapy ára rire Cesaréia tetā gui oo Jerusalém katy.
- ² Are'ŷ re ixupe sacerdote yvatekueve va'e ha'e judeu ruvixa kuery omombe'u Paulo rekokue ramigua. Ha'e rami vy peteĩ re ojerure
- ³ oipytyvõ aguã. Paulo re nda'ija'eí vy ojerure Jerusalém katy ju ogueru ruka aguã, ha'e kuery tape py oarō vy ojuka aguã.
- ⁴ Ha'e rā Festo ombovai:
 — Paulo ma Cesaréia py ae oĩ nhuã py, ha'e gui xee voi are'ŷ'i re aa 'rā ha'e katy.
- ⁵ Peẽ kuery regua hi'arandukueve tapeo avi xerupive, ava va'e ojapo vaiague peikuua vy pemombe'u aguã — he'i.
- ⁶ Ha'e kuery ikuiaia py ndoiko arei. Oito, dez araa py oguejy ju Cesaréia katy. Ha'e gui ko'ẽ jevy nhomboayvuaty py oguapy vy ogueru ruka Paulo.
- ⁷ Paulo ovaẽ ramo judeu kuery Jerusalém gui ou va'ekue ombojere rei okuapy. Opa marā rei hekokue ramigua omombe'u. Ha'e rami teĩ ha'e kuery nomombe'u porā kuaai guive.
- ⁸ Ha'e rā Paulo ma guekokue omombe'u vy aipoe'i:
 — Peteïve henda py ma xee ndajejavyi judeu kuery pegua lei rovai, templo, neĩ César rovai — he'i.
- ⁹ Ha'e rā Festo ma judeu kuery pe ojejou porā ukaxe vy aipoe'i Paulo pe:
 — Ndevy pe ha'eve pa Jerusalém katy reo aguã, ha'e py ju xee romboayvu aguã ha'e nungakue re?
- ¹⁰ Paulo ombovai:
 — Xee ma César nhomboayvu atyrā omoĩ va'ekue py aĩ ae ma. Apy ae ha'eve xemboayvu aguã. Neĩ mba'eve ndajapo vai judeu kuery pe. Ndee reikuua porā.
- ¹¹ Mba'emo ajapo vai, e'ŷ vy ajojuka va'e rire amano teĩ ha'evepa rei 'rāgue. Ha'e rami 'rāgue py xerekokue ramigua omombe'u okuapya anhetē e'ŷ ramo nda'evei ha'e kuery po py avave rei xemboaxa rive aguã. Xee ma ajerure César renonde ju xeayvu aguã — he'i.
- ¹² Ha'e gui Festo ma imongetaa kuery reve jogueroayvu ma rire aipoe'i ixupe:
 — César renonde ndeayvu aguã re rejurerre rire ma ha'e katy 'rā reo.

Agripa pe Festo omombe'uague Paulo reko

- ¹³ Kueve ma rire Cesaréia py huvixave Agripa gua'yxy Berenice reve ovaẽ huvixa Festo pe oxarura aguã.
- ¹⁴ Ha'e py ikuai are ramo huvixave pe Festo omombe'u Paulo reko. Ha'e vy aipoe'i:
 — Apy Félix oeja ov y peteĩ ava nhuã py.

¹⁵ Ha'e va'e reko re ma Jerusalém py aĩ jave sacerdote yvatekueve va'e ha'e judeu monetaaty kuery ijayvu. Ajuka uka aguã re ojerure okuapy.

¹⁶ Ha'e kuery pe aipoa'e Roma pygua kuery reko rami vy nda'evei peteĩ va'e rei ajuka uka aguã hexe ijayvu va'e kuery joa py ikuai e'ŷ re, ayvu oiko va'e ombovai aguã.

¹⁷ Ha'e gui ma apy ju ha'e kuery ovaẽmba ma ramo xee namboarei. Ko'ẽ jevy nhomboayvuaty py aguapy vy aru ruka ava.

¹⁸ Ha'e rã hexe ijayvu va'e kuery opu'a vy peteĩve nda'ijayvui ojapo vaiague re xee aexa'ãague rami.

¹⁹ Ha'e rami 'rãgue py hexe ijayvu okuapy guekorã oeja pyre re rive, ha'e peteĩ ava omano va'ekue Jesus hery va'e re guive. Ha'e va'e pe ma Paulo "Oikove" he'i.

²⁰ Ha'e nunga re xee ndaikuua pota kuaai vy aporandu Jerusalém katy oo aguã ha'e eve paa re, ha'e py ju amboayvu aguã ha'e nungakue re.

²¹ Ha'e rami tei Paulo ojerure nhuã py optya aguã re César renonde ju ijayvu aguã. Ha'e ramo xeayvu apy ae optytave aguã, César-a katy amondouka peve — he'i.

²² Ha'e ramo Agripa aipoe'i Festo pe:

— Ha'e va'e ava ayvu ma xee voi aenduxe.

Ombovai:

— Ko'ẽ ramo rendu 'rã — he'i.

Tẽgue ju Agripa reve Festo ijayvuague

²³ Ko'ẽ jevy Agripa ha'e Berenice opa marã omboetea reve ou vy nhomboayvu aguã py ovaẽ, huvixa kuery ha'e tetã pygua yvatekueve reve. Ha'e gui Festo ogueru ruka Paulo.

²⁴ Ha'e rami vy aipoe'i:

— Huvixave Agripa, ha'e apy pendekuai va'e ha'e javi, kova'e ava pexa va'e káuxa ae judeu kuery ha'e javi ijayvu karamboae xerenonde. Jerusalém tetã py, ha'e apy voi ojapukai okuapy ndoikove riaevei aguã rami.

²⁵ Ha'e rã xee ma ndaikuai ojapo vaiague omano aguã. Ha'e rami vy nhanderuvixa guaxuve renonde ijayvu aguã re ojerure ramo xeayvu ha'e katy ju amondouka aguã.

²⁶ Ha'e rami avi hekokue mba'eve ndaikuai anhetẽ va'e nhanderuvixa pe ambopara aguã. Ha'e nunga rupi penerononde ju aru ruka. Huvixave Agripa, neretonde ae aru ruka aikuaxe vy, ndee remboayvu ramo aikuua aguã ambopara va'erã.

²⁷ Mba'eta xevy pe nda'evei nhuã py ombovai pyre amondouka aguã hexe ayvu oiko va'e amombe'u porã e'ŷ re.

26

Huvixave Agripa renonde Paulo ijayvuague

¹ Ha'e rire huvixave Agripa aipoe'i Paulo pe:

— Ha'eve ndeayvu ndereko re.

Ha'e ramo Paulo opo oupi vy omombe'u gueko. Aipoe'i:

² — Huvixave Agripa, kova'e ára avy'a neretonde xerekro re xeayvu vy, judeu kuery xere ijayvuague ha'e javi ambovai aguã.

³ Mba'eta ndee ma judeu kuery reko ha'e ayvu oiko va'e ha'e javi reikuua porãve va'e. Ha'e nunga rupi ajerure rejapyxaka porã aguã re.

⁴ Ha'e gui judeu regua huvixa kuery oikuaapa xekyrí guive aikoague, ha'e jypy guive ore kuery ikuia rupi ha'e Jerusalém tetã py aikoague guive.

⁵ Anhetẽ ae ha'e kuery jypy'i guive xekuaa, ha'e rami omombe'uxe rã. Mba'eta orereko rupi onhea'ave va'e fariseu kuery regua xee voi aiko va'ekue.

⁶ Oreramoĩ kuery pe Nhanderuete ijayvuague ojeupity aguã re ajerovia ramo rive xemboayvua aŷ.

⁷ Ha'e nunga ae ore kuery doze regua orekuai va'e rouosity aguã ronhe'a rokuapy ara py ha'e pyávy, Nhanderuete pe orekuai vy. Xeruvixa, ha'e nunga re ajerovia ramo ae judeu kuery xemboayvu.

⁸ Mba'e re tu peẽ kuery ndaperoviai Nhanderuete omano va'ekue omboete ju 'rãa?

⁹ — Anhetē xevy rā voi ha'eve rei va'ekue opa marāgua ajapo aguā Nazaré pygua Jesus rery amboetea rupi e'ŷ.*

¹⁰ Ha'e rami ae aiko va'ekue Jerusalém py. Kuaxia para sacerdote yvatekueve va'e guiaaraa vy iky'a e'ŷ va'e kuery heta amboty va'ekue nhuā py. Ojukaa ta ramo xee voi ojuka aguā re xeayvu va'ekue.

¹¹ Mbovykue rei e'ŷ ainupā va'ekue judeu kuery onhembo'eaty ikuai va'e rupi, ijayvu vai aguā rami guive ajapo. Ha'e kuery pe xevai vy yvy mboae re tetā ikuai va'e rupi voi amoingo axy va'ekue.

¹² — Ha'e rami aguā ae aa karamboae Damasco tetā katy. Sacerdote yvatekueve va'ea guiauaxia para araa, ha'e kuery xemoīague kuaa ukaarā.

¹³ Xeruvixa, kuaray mbyte jave tape rupi aa vy peteī hendy va'e aexa yva re, kuaray guihendy ratāve va'e. Ha'e va'e ma xeyvýry rupi omoexakāmba, ha'e xerupive oo va'e kuery yvýry guive.

¹⁴ Ha'e ramo yvy rupi ro'a pavē. Ha'e guihendy ayvu aendu hebraico ayvu py aipoe'i va'e: “Saulo, Saulo, mba'e re tu xererekoxo axyxre ri? Ndee ae renhemongo axy, ferro rakua re opyvoi va'e rami reiko vy”, he'i.

¹⁵ — Ha'e ramo xee aporandu: “Mava'e tu ndee, Senhor?” Ombovai: “Xee ma Jesus rerekoxo axy va'e.

¹⁶ Ha'e guihendy epu'ā he'amy ndepoy re, mba'eta po rami aguā ajexa uka ndevy, xerembiguairā romoī reikuua uka aguā mba'emo rexva va'ekue, ha'e raka'e rā aexa uka va'erā guive.

¹⁷ Neretarā kuery ha'e judeu e'ŷ va'e kuery ikuiaia rupi xee romondouka vy rogueraa jepe'rā ha'e kuery po guihendy.

¹⁸ Hexa reipe'a 'rā ojeko rerova aguā pytūa rupi ikuiaia guihendy va'e peguarā, ha'e Satanás po'akaa rupi ikuiaia guihendy Nhanderuete peguarā. Ha'e rami vy 'rā ombogue ukapa ojejavague, oupity aguā xere ojerovia vy ojeky'a'o uka va'ekue pegua”, he'i.

¹⁹ — Ha'e rami rā huvixa Agripa, xee nanhe'e rendu e'ŷi yva guigua aexa va'ekue.

²⁰ Ha'e rami vy Damasco tetā py ranhe ayvu amombe'u, ha'e guihendy Jerusalém py ju, Judéia regua ha'e javi rupi, ha'e judeu e'ŷ va'e kuerya rupi amombe'u aikovy ikuaiaty guihendy ojepe'a vy Nhanderuete re ojeko rerova aguā, ha'e iporā va'e ojapoa py oexa uka aguā ojeko rerovaague.

²¹ Ha'e rami aikoa re rima amongue judeu kuery xejukaxe vy xejopy karamboae templo py aiko jave.

²² Ha'e rami teī Nhanderuete xepytyvō ramo kova'e ára peve aiko. Yvyīgueve ha'e yvatekueve pe amombe'u ayvu. Xee amombe'u aikovy va'e ma profeta kuery ha'e Moisés ijayvuague rami vy oiko va'erā anho.

²³ Ha'e nunga ma Cristo oiko axy aguā, ha'e guihendy ranhe omanoague guihendy onhemboete ju vy judeu ha'e judeu e'ŷ va'e kuery pe oikuua uka aguā hendy va'e.

Paulo ijayvupa e'ŷ re Festo ijayvuague

²⁴ Paulo gueko omombe'upa e'ŷ re Festo ojapukai reve aipoe'i:

— Paulo, naneakā porāvei ma teve. Ipara re renhembo'e vai ete vy nane'aranduvei — he'i.

²⁵ Paulo ombovai:

— Xeruvixa Festo, xee naxeakā porā e'ŷi ri. Ha'e rami 'rāgue py xe'arandua rupi xeayvu anhetē va'e re anho.

²⁶ Mba'eta ha'e nunga ha'e javi huvixave oikuua. Ixupe ae amombe'u akyjea py e'ŷ. Xee aikuua rā ha'e nungakue ha'e javi oikuapaa, mba'eta neī peteīve ndoikoi nhemi rupi.

²⁷ Ha'vy ndee huvixave Agripa, rerovia pa profeta kuery ayvu? Xee aikuua porā reroviaa — he'i.

²⁸ Ha'e ramo Agripa aipoe'i Paulo pe:

— Rexa'ā rā ndaxyi Cristo pegua xeapo aguā?

²⁹ Paulo ombovai:

* 26:9 Atos 8.3, 9.1-19

— Xeruvixa, tove ndaxyi e'ŷ vy haxy py teĩ Nhanderuete tojapo ndee anho e'ŷ, kova'e ára xeayvu re ojapyxaka va'e kuery ha'e javive tojapo xee rami, va'eri aŷ'i xejokuaa rami e'ŷ ta'vy.

“Ha'eve 'rāgue teĩ Paulo japoī aguā”, he'iague

³⁰ Ha'e rami rā huvinxave opu'ã ju, ha'e gui huvinxamboae kuery, Berenice, ha'e ha'e kuery reve oguapy okuapy va'ekue ha'e javi voi.

³¹ Ha'e kuery ojepe'apa vy peteĩ-teĩ joupe ijayvu vy aipoe'i:

— Peva'e ava mba'eve rei ndojapoī ra'e ojukaa aguā, neĩ nhuā py ombotya aguā — he'i.

³² Ha'e ramo Agripa aipoe'i Festo pe:

— Peva'e ava ma ha'eve 'rāgue japoī aguā, César renonde ijayvu aguā re ndojerurei va'e rire.

27

Itália katy Paulo omondoukaague

¹ Ha'e gui huvinxamboae kuery ijayvu Itália katy oremondouka aguā. Ha'e rami vy Paulo ha'e nhuā py ikuai va'e regua omboaxa peteĩ xondaro ruvinha heraarā po py. Ha'e va'e ma César oña pygua, Júlio hery va'e.

² Ha'e ramo roimba peteĩ kanoā guaxu Adramítio guigua py. Ha'e va'e ma Ásia yke rupi oo va'erā. Ha'e rami vy yy rupi roje'oi. Orerupive oo avi Macedônia regua Tessalônica pygua Aristarco.

³ Ko'ẽ jevy rovaẽ Sidom py. Paulo re Júlio opena porā ivai reia py e'ŷ. Ha'e rami vy omondouka oirū kuery oexa aguā, ha'e mba'emo oipota va'e ojou aguā.

⁴ Ha'e gui ma roje'oi ju yy rupi. Ha'eve e'ŷa katy gui yvvtu oipeju ramo Chipre ypa'ū katy'i rupi roo ijyke yvvtu e'ŷa rupi.*

⁵ Cílicia ha'e Panffilia yke rupi ye'ẽ roaxa ma vy Lícia regua Mirra tetā py rovaẽ.

⁶ Ha'e py ma xondaro ruvinha peteĩ kanoā Alexandria guigua ojou Itália katy oo ta va'e. Ha'e va'e py ju oremoi.

⁷ Ha'e gui ma roove mbeguei'i. Mbovy ára rei e'ŷ haxy py Cnido tetā katy'i rovaẽ. Yvvtu ha'eve e'ŷa katy gui oipeju rā nda'evei rooxea katy roove aguā. Ha'e ramo Creta ypa'ū yke rupi roo yvvtu e'ŷa rupi, Salmona gui mombyry'i rupi.

⁸ Ijyke rupi anho roo vy haxy py rovaẽ peteĩ henda Porto Porā 'epy va'e py. Ha'e katy rai oĩ Laséia tetā.

Ára vai rupi oguataague

⁹ Are ma rire ha'e kuery oove aguā ijavaete, mba'eta okaru e'ŷ re ikuia ára oaxa ma rire. Ha'e ramo Paulo ha'e kuery omongoeta vy

¹⁰ aipoe'i:

— Avakue, xee aikuua rā jaguataa rupi jaiko axy vaipa 'rā. Mba'emo jajavyky rei 'rā, ha'e nhamokanhymba 'rā kanoā ha'e ivoyi guive, nhanderekove voi — he'i.

¹¹ Ha'e rā xondaro ruvinha ma Paulo ayvu gui ogueroviave kanoā mboguataa ha'e ija ayvu.

¹² Ha'e py yro'y jave kanoā omboja aguā nda'evei ramo ha'e kuery oovexe ha'e gui, Fenice py ovaẽ jepe rivyvvi gui, ha'e py mae ma oaxa aguā yro'y. Mba'eta ha'e py kanoā mbojaaty Creta ypa'ū re oĩ va'e ma kuaray oua katy ijapy jovaive opytā.

¹³ Ha'e gui kuaray ijapu'a'ia katy gui mbeguei'i yvvtu oiny ramo ha'e kuery oexa'ã teĩ ooxeague py ovaẽ jepe aguā re. Ha'e rami vy kanoā mombytaa oupi ju rā Creta ypa'ū yke rupi roo.

¹⁴ Ha'e rami teĩ are'ŷ'i re ypa'ū katy gui ou yvvtu atā, Euroaquilão 'epy va'e.

¹⁵ Yvvtu kanoā ogueraa rami rei ogueraa. Roguerova nhea'ã teĩ yvvtu re ndorepo'akai vy roopoipa. Ha'e vy noropenavei ogueraa tema aguā.

* ^{27:4} Yvvtu po'akaa re ha'e kuery oo kanoā guaxu re ajukue oipyoa va'e py.

¹⁶ Peteĩ ypa'ũ'i Cauda 'epy va'e yke yvytu e'ŷa rupi roaxa jave haxy py roupi imoiny kanoã'i.

¹⁷ Ha'e va'e oupi ma vy opa mba'e oiporu kanoã ojokua aguã, ita ku'i reia re ojeapi gui okyje vy. Ajukue oupi pyre omboguejy ju vy nopenavei ogueraa aguã.

¹⁸ Yvytu atã gui rojexavai vy ko'ẽ jevy ombovevuia kanoã mba'emo oĩ va'e omomboa vy.

¹⁹ Ha'e gui mboapy araa py ore ae po py romombo mba'emo kanoã regua ye'ẽ py.

²⁰ Ha'e gui ára vai orere ou va'ekue gui mbovy ára rei e'ŷ kuaray neĩ jaxy-tata ndojekuaavei ramo noroexa'ãvei ma roo jepe aguã.

²¹ Are ma ore kuery ha'e javive ndorokaruvei ramo Paulo opu'ã ho'amy ore kuery mbyte. Ha'e vy aipoe'i:

— Avakue, anhetẽ pejapyxaka va'e rire xeayvu re, ha'e Creta gui ndajajui va'e rire, guĩ rami ete jajexavai ha'e nhamokanhymba e'ŷ aguã.

²² Ha'e rami teĩ aŷ ma po rami xee romoneta: Pendepy'a guaxu ke, mba'eta peẽ kuery regua peteïve nomokanhyi 'rã guekove, kanoã anho 'rã okanhy.

²³ Mba'eta angegua pyávy xea py peteĩ anjo ojekuaa Nhanderuete ixupe aiko ha'e amba'eapoa va'e guigua.

²⁴ Ha'e va'e ma xevy pe aipoe'i: “Paulo, ekyje eme. César renonde rejexa uka 'rãe. Ha'e gui Nhanderuete nhomboaxya rupi ndere oma'ẽ vy ogueraa jepe 'rã ndereve oguata va'e kuery ha'e javi”, he'i va'ekue xevy.[†]

²⁵ Ha'e nunga rupi avakue, pendepy'a guaxu ke, mba'eta xee ajerovia Nhanderuete re, xevy ijayvuague oiko aguã.

²⁶ Ha'e rami teĩ nhandereraa 'rãe peteĩ ypa'ũ re — he'i.

Kanoã ivipaague

²⁷ Mokoĩ semana re ha'ekue'ŷ-kue'ŷ katy yvytu orereraa ye'ẽ Adriático rupi. Ha'e gui ma pyávy pytũ mbyte jave kanoã mboguataa kuery oendu vy re ovaẽ rai'i maa.

²⁸ Ha'e rami vy ixã ipoyi va'e oity vy oikuuaa vinte braça typya. Oove'ia py ixã oity ju vy quinze braça ete'i oikuua.

²⁹ Ha'e vy ita re ojeapi gui okyje vy kanoã revi gui irundy henda py omboguejy kanoã mombytaarã. Ha'e rami vy onhembo'e okuapy ko'ẽ voi aguã.

³⁰ Kanoã mboguataa kuery oëxe vy kanoã xí gui kanoã'i omboguejy nhemi yy py, kanoã mombytaarã mboae omboguejy aguã merami.

³¹ Ha'e ramo Paulo aipoe'i xondaro ruvixa ha'e xondaro kuery pe:

— Peva'e kuery kanoã py ndopytai ramo peẽ voi ndapeo jepei 'rã — he'i.

³² Ha'e ramo xondaro kuery kanoã'i xã ojaya vy opoi ogueroxyry heravy aguã.

³³ Ko'ẽ rai'i jave pavẽ pe Paulo ijayvu okaru aguã. Ha'e vy aipoe'i:

— Kova'e ára reve vy mokoĩ semana ma ojapo pekaru e'ŷ re pendekuai, mba'eve ndape'u.

³⁴ Ha'e ramo xee xeayvu pekaru aguã. Ha'e rami vy 'rãe penembaraete peo jepe aguã. Mba'eta napemokanhysi 'rã neĩ peteĩ pende'a ma voi — he'i.

³⁵ Po rami ijayvu ma vy peteĩ mbojape oupi, ha'e pavẽ oexaa py oguerovy'a Nhanderuete. Ha'e gui oipe'ã vy omboypy ho'u aguã.

³⁶ Pavẽ oexa vy oendu ipy'a guaxua, ha'e vy ha'e kuery voi okaru avi.

³⁷ Kanoã py ikuai duzentos e setenta e seis ha'e javi vy.

³⁸ Okaru porãmba ma vy ombovevuive ju kanoã, trigo ryru ye'ẽ py omombopa vy.

³⁹ Ko'ẽmba rã vy oexa teĩ ndoexa kuaai. Ha'e gui ma peteĩ yy oikea oexa. Ha'e va'e rembe re ma ita ku'i reia oĩ. Ha'e ramo nhomoneta okuapy ha'e va'e re kanoã omboja aguã.

⁴⁰ Ha'e rami vy kanoã mombytaa xã ojaya vy opoi yy py. Ojora avi imbojeapaa ojokuaague. Kanoã xí katy oupi imoiny ajukue, yy rembe katy yvytu ogueraa aguã.

[†] 27:24 Atos 23.11

⁴¹ Ha'e gui ma mokoī henda katy gui oxyrya py kanoā ovaē vy ipija. Ixī ipija vy noēvei. Ha'e rā hevi ma yai ojeapi-api vaipa ramo opēmba.

⁴² Ha'e ramo xondaro kuery ijayvu nhuā py omботы pyre kuery ojukapa aguā, peteīve ho'ytā vy oo jepe e'ŷ aguā.

⁴³ Ha'e rā xondaro ruvixa ma Paulo ogueraa jepexe vy ndojuka ukai omботы pyre kuery. Ha'e vy aipoe'i ho'ytā kuaa va'e ranhe yy py opo aguā, yy rembe re ovaē aguā.

⁴⁴ Ha'e gui amboae kuery pe ma aipoe'i yvyrapse ha'e kanoā pēgue áry oo jepe aguā. Ha'e rami py ha'e javive oo jepe, yvy'ā re oēmba.

28

Malta ypa'ū py ikuaiague

¹ Yvy'ā re orekuai vy roikuua ha'e va'e ypa'ū Malta herya.

² Ha'e pygua kuery opena porā'i orere. Tata ojapo vy oremovaēmba oky ha'e yro'y gui.

³ Paulo ma yxakā ra'ykue omono'ō vy tata py onhono ramo haku gui peteī mboi oē vy oixu'u oiny ipo re.

⁴ Ipo re mboi ovava oiny rā ha'e pygua kuery oexa vy joupe-upē aipoe'i:

— Peva'e ava ta'vy jojuka rive va'ety teve, mba'eta ye'ē gui oo jepe va'ekue ri Nhandererekoa ndoejai oikove aguā — he'i.

⁵ Ha'e rā Paulo ma tata py mboi omombo ramo mba'eve rei ndoikoi.*

⁶ Ha'e ramo ha'e kuery oexa pota iruru rivyvyi, e'ŷ vy ho'a vy omano vyvoi gui. Ha'e rami teī aje'i ma oarō rire mba'eve rei ndoikoi rā oexa vy amboae rami ju oexa'ā okuapy. Ha'e vy

— Peva'e ta'vy tuuete kuery regua teve — he'i okuapy.

Huvixa Públia ngoo py Paulo omovaēague

⁷ Ha'e katy rai oī ypa'ū pygua ruvixa pegua yvy, Públia hery va'e. Ha'e va'e ma ngoo py oremovaē porā mboapy ára peve.

⁸ Públia ru ma imba'eaxy oupy tye raxy gui, ipire raku vaipa guive. Ha'e ramo Paulo oo oipou vy, ha'e onhembo'e reve hexe omoī opo. Ha'e rami vy omonguera.

⁹ Ha'e nunga ypa'ū pygua kuery oikuua vy imba'eaxy va'e kuery mboae ou vy okuerapa.

¹⁰ Ha'e pygua kuery opa mba'e ome'ē orevy. Roo ju ta ma ramo voi kanoā py ombooru opa marāguia roikotevē va'e.

Oguatave jevyague

¹¹ Mboapy jaxy oaxa rire roī peteī kanoā Alexandria guigua py, yro'y jave ypa'ū re onhemboja oupy va'ekue, Dióscuros ra'angaa oīa va'e py.

¹² Siracusa tetā py rovaē vy mboapy ára re ropyta ha'e py.

¹³ Ha'e gui roove vy Régio py rovaē. Ko'ē jevy kuaray puku-a katy gui yvytu oipeju ramo mokoī araa py rovaē Putéoli py.

¹⁴ Ha'e py rojou amongue irmão kuery. Ha'e va'e kuery ojerure ha'e kuery reve ropyta aguā sete ára peve. Ha'e rami py roje'oi Roma katy.

¹⁵ Roju roinya omombe'ua rā oendu vy Roma pygua irmão kuery ju ou orerovaexī aguā. Praça de Ápio ha'e Mboapy Vendeaty 'epy va'e peve ou. Ha'e va'e kuery ou rā Paulo oexa vy oguerovy'a Nhanderuete, ipy'a guaxuve guive.*

Roma py Paulo ovaēague

¹⁶ Roma tetā py rovaē ma ramo Paulo ha'e ae oīxeia py omoīa. Hexeve oiko avi peteī xondaro harōarā.

¹⁷ Mboapy araa py oenoī uka judeu ruvixa kuery. Ha'e ramo ha'e kuery jogueru vy ono'ombia ramo aipoe'i:

* 28:5 Marcos 16.17,18 * 28:15 Romanos 1.10-12

— Ke'y kuery, xee ma mba'eve rei ndajapoi nhande kuery rovai, neĩ nhanderekorã nhaneramoĩ kuery pe oeja pyre rovai guive. Ha'e rami teĩ Jerusalém tetã guive xejokuaa reve aju, Roma pygua regua po py xemboaxaa rire.

¹⁸ Ha'e va'e kuery ma xemboayvu vy ndoikuuai mba'eve rei ajapo vaiague xejuka aguã. Ha'e rami vy xepoixe teĩ

¹⁹ judeu kuery ma xere opu'ã rei rã ajerure César renonde ju xeayvu aguã re. Ha'e rami avi mba'eve ndarekoi nhande kuery va'e regua re xeayvu aguã.

²⁰ Ha'e nunga rupi peẽ kuery roenoĩ uka roexa ha'e peẽ kuery reve xeayvu aguã, mba'eta Israel kuery ojerovia okuapya re xee voi ajerovia ramo rima xejokuaa imoiny kova'e corrente py — he'i.

²¹ Ha'e ramo ha'e kuery aipoe'i ixupe:

— Ore ma Judéia guigua kuaxia para noroexai nderekko re ijayvu va'e, neĩ peteĩve nhanderyke'y kuery regua ndouai guive nderekko omombe'u, e'ŷ vy ndere ijayvu aguã.

²² Ha'e rami avi roenduxe reikuaa va'e, mba'eta anhetẽ amboae rami penhembo'ea re opa rupi ijayvu reia rã roendu.

Roma py Paulo ayvu omombe'uague

²³ Ha'e kuery oa'angaague ára py heta ete ou Paulo oĩa py, okeaty py ae. Ha'e rã ko'ẽmba guive ka'aru peve ha'e kuery pe ayvu omombe'u porãve Nhanderuete po'akaa regua. Moisés lei ombopara va'ekue ha'e profeta kuery ombopara va'ekue rupi ijayvu vy onhea'ã Jesus re ha'e kuery ojerovia aguã.

²⁴ Ha'e ramo amongue ete'i oguerovia ijayvua. Ha'e rã amboae kuery ma ndogueroviai ae tema.

²⁵ Ha'e kuery joo rami e'ŷ-e'ŷ oikuua vy oje'oipa ta ma ramo Paulo aipoe'i:

— Ha'evea rami Nhe'ẽ Ky'a E'ŷ ijayvu raka'e penamoĩ kuery pe, mba'eta profeta Isaías pe aipoe'i uka:

²⁶ “Tereo heta va'e kuerya py, ha'e aipo'ere ha'e kuery pe: ‘Pendeapyxa py pendu teĩ napendu kuaai 'rã. Pexa pota teĩ ndapexa kuaai 'rã', 're.

²⁷ Mba'eta ha'e kuery ma inhakã ratãmba. Oapyxa py oendu vai, guexa guive omboty, ndoexai aguã guexa py, neĩ noendui aguã oapyxa py, opy'a py oikuua e'ŷ aguã, mba'eta ndojeko rerovaxei ae, xevy pe nonhemoingo porã ukaxei guive”, he'i va'ekue.*

²⁸ — Ha'e nunga rupi peikuaa pota, mba'eta judeu e'ŷ va'e kuery pe voi Nhanderuete oikuua uka nhandereraa jepe aguã regua. Ha'e rã ha'e kuery ma oendu 'rã — he'i.*

²⁹ [Pova'e ayvu rupi ijayvu rã judeu kuery oendu vy nhomotare'ŷmba reve oje'oipa.]

Mokoĩ ma'etŷ re Paulo omboty imoinyague

³⁰ Mokoĩ ma'etŷ re Paulo oĩ oke atyrã oiporuka va'e py. Ha'e py ma omovaẽ oexaxe vy ou va'e ha'e javi.

³¹ Omombe'u oikovy Nhanderuete po'akaa, ha'e nhombo'e oiny Senhor Jesus Cristo re. Okyjea py e'ŷ ijayvu, avave rei omokyrirĩ e'ŷ re.

* 28:27 Isaías 6.9-10

* 28:28 Atos 13.44-47

Roma pygua kuery pe Paulo ombopara va'ekue

Roma pygua kuery pe Paulo ombopara va'ekue

Kova'e kuaxia ma Roma tetā py Jesus remimbo'e kuery ikuai va'e peguarā apóstolo Paulo ombopara va'ekue. Paulo ma opa rupi oo raka'e ayvu porā omombe'u vy. Ha'e rā Roma tetā py ma ndooi ranhe. Ha'e py ma amboae kuery omboypy raka'e igreja. Ha'e py Paulo ovaẽxe avi vy ha'e pygua kuery pe ombopara kova'e kuaxia. Aipoe'i: "Mba'eta roexaxe ete, peẽ kuery pe voi aikuaa uka aguā Nhe'ẽ guigua penembaraeteve aguā. Ha'e rami avi peẽ kuery reve joo meme nhanhombaraaete aguā jajeroviaa rupi, peẽ ha'e xee. ... Mba'eta xee naxī ayvu porā amombe'u aguā, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive. Mba'eta ayvu porā rupi Nhanderuete oikuua uka ojeguigua teko porā. Ha'e va'e ma jajerovia rā ome'ẽ 'rā", he'i (1.11-12,16-17a).

Mba'eta 'rā tu nhande kuery nhanderekai vai va'e meme teĩ Nhanderuete nhanemboeko porā? Mba'eta Paulo aipoe'ia rami: "Mba'eta nhande ha'e javive jajejavvy vy ndajaupity kuaai Nhanderuete rexakāa. Ha'e rami teĩ Nhanderuete nhanemboaxy rupi rive nhanemboeko porā 'rā Cristo Jesus nhandejogua rire. Mba'eta Jesus ma Nhanderuete ombou vy oikuua uka raka'e jejavya pe'aarā, jajerovia rā huguy py ombogue aguā jajejavvyague" (3.23-25a).

"Ha'e gui ma jajerovia re Nhanderuete nhanemboeko porā rire hexeve peteĩ rami ju jaiko, nhande-Senhor Jesus Cristo re vy" (5.1). Ha'e nunga rupi nhande ae nhanhea'āa rupi e'ỹ Nhanderuete nhanemboeko porā, ha'e rā Jesus re jajerovia ramo nhanemboaxy vy rive ombogue 'rā nhanderekai vaitay, ha'e nhandevy ome'ẽ 'rā ojeguigua teko porā.

Oxarura reve ijayvu vy omboypyague

¹ Xee Paulo ma Jesus Cristo rembiguai aiko. Apóstolo-rā xerenoĩ ha'e Nhanderuete guigua ayvu porā amombe'u va'erā xeporavo.

² Ha'e va'e ayvu ma yma ma voi Nhanderuete oikuua uka aguā re ijayvu ojeupagua profeta kuery omboparaa rupi,

³ Gua'y rekorā re ijayvu vy. Ha'e va'e ma ngo'o re oiko Davi ramymino,

⁴ ha'e rā Nhe'ẽ Ky'a E'ỹ re ma omanoague gui onhemboete jevy vy ojekuaa uka Nhanderuete Ra'y ipo'akapa va'ea. Ha'e va'e ma Jesus Cristo nhande-Senhor.

⁵ Hexe vy oremboaxy vy oremoĩ apóstolo-rā guery omboete ukaa rupi vy, judeu e'ỹ va'e ha'e javi regua hexe ojerovia vy onhe'ẽ rendu aguā.

⁶ Ha'e kuery regua ma peẽ voi pendekuai, Jesus Cristo peguarā penerenoĩ rire.

⁷ Peẽ kuery Roma tetā pygua Nhanderuete rembiayvu ha'e iky'a e'ỹ va'erā penerenoĩ va'ekue ha'e javive pe ambopara. Tove peẽ kuery tapendu penemboaxyha'e mby'a porā Nhanderuete ha'e Senhor Jesus Cristo guigua.

Cristo pegua kuery Roma py ikuai va'e Paulo oexaxea re ijayvuague

⁸ Jypy ma peẽ kuery ha'e javi re arov'y'a Xeruete Jesus Cristo rery rupi, mba'eta yvy jave re pejerovia etea oendupaa.

⁹ Mba'eta Nhanderuete oikuuaa peẽ kuery re xema'endu'a riae. Ixupe ae xenhe'ẽ py guive amba'eapo aikovy Ta'y regua ayvu porā amombe'ua rupi.

¹⁰ Ixupe anhembo'e nhavō ajerure ha'evea ára, Nhanderuete oipotaa rami peẽ kuery roipou aguā re.

¹¹ Mba'eta roexaxe ete, peẽ kuery pe voi aikuaa uka aguā Nhe'ẽ guigua penembaraeteve aguā.

¹² Ha'e rami avi peẽ kuery reve joo meme nhanhomombaraete aguã jajeroviaa rupi, peẽ ha'e xee.*

¹³ Mba'eta irmão kuery, aipota peikuaa peẽ kuerya py mbovykue rei e'ŷ aaxea teĩ, peẽ kuery mbyte rupi voi ajou aguã Jesus peguarã, judeu e'ŷ va'e mboae ikuia rupi ajapoa rami avi. Ha'e rami teĩ aŷ peve nda'evei.

¹⁴ Mba'eta grego kuery ha'e amboae regua pe voi xee areve teri ayvu porã amombe'u aguã, ombo'epa pyre ha'e kuaxia ndoexa kuaai teri va'e pe guive.

¹⁵ Ha'e nunga rupi Roma tetã py pendekuai va'e pe voi ayvu porã amombe'u aguã rami aiko.

Jesus Cristo re jajerovia ramo teko porã ome'ëa aguã re ijayvua

¹⁶ Mba'eta xee naxí ayvu porã amombe'u aguã, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive.*

¹⁷ Mba'eta ayvu porã rupi Nhanderuete oikuua uka ojeguigua teko porã. Ha'e va'e ma jajerovia rã ome'ë 'rã, mba'eta ojerovia va'e pegua ae, ipara re oña rami: "Heko porã va'e ma ojeroviaa rupi 'rã ikuai", he'iague rami.*

Avakue mba'emo rive ombojeroviaha'e opa marã rei ikuia re ijayvua

¹⁸ Mba'eta Nhanderuete ma opoxya avi oikuua uka yva gui, ojejavvy ha'e heko vai va'e ha'e javive rovai, mba'eta ha'e kuery gueko vaia rupi vy ndoikuaaxe anhetë va'e.

¹⁹ Mba'eta ha'e kuery oikuua ae Nhanderuete reko oikuua pyrã oï va'e, ha'e kuery pe ha'e ae oikuua uka ramo.

²⁰ Mba'eta Nhanderuete reko ma ndajaexai va'eri yvy itui ypy'i guive jaikuua porã 'rã guive hembiapokue re jaikuua pota vy. Ha'e nunga rupi jaikuua porã 'rã ipo'akaa opa va'erã e'ŷ ha'e imarã e'ŷa. Ha'e rami vy heko vai va'e kuery "Aikuua vy e'ŷ rima ajejavvy" he'i aguã nda'evei.

²¹ Mba'eta ha'e kuery Nhanderuete reko oikuua teĩ nomboetexei vy ixupe "Xeruete" nde'i, ndoguerovy'ai guive. Ha'e rami 'rãgue py opëxaa py ovare e'ŷ va'e optya, ha'e opy'a py mba'eve noenduvei ramo pytumba.

²² Ojeupe ae "Hi'arandu va'e" he'i va'eri inhakã porã ve'ŷ va'e optya.

²³ Ha'e rami vy Nhanderuete imarã e'ŷ ha'e hexakãmba va'e ombojerovia 'rãgue py avakue imarã va'e ra'angaa rive ombojerovia, ha'e gui guyra, mymba ha'e yvy rupi otyryry va'e ra'angaa guive.

²⁴ Ha'e nunga rupi Nhanderuete omboaxa ha'e kuery ae onhemboeko ky'a aguã, opy'a re opa marã rei ikuaxea oña rami rive ikuai aguã, guete voi joo meme omongy'a aguã.

²⁵ Mba'eta Nhanderuete guigua anhetë va'e 'rãgue py apu rive ha'e kuery oguerovia. Ha'e rami vy imingoare 'rãgue py ombojerovia hemimoingo kuery rive. Ha'e rã Nhanderuete anho ha'eve nhombojerovia aguã, raka'e rã peve. Amém.

²⁶ Ha'e nunga rupi ae Nhanderuete omboaxa itavy reixe rupi rive ikuai aguã. Kunhague voi guekorã va'ekue omboekovia vy ha'eve'ŷa rami ikuai.

²⁷ Avakue voi ha'e rami ae avi ojepe'a gua'yxy reve joguerekaoa gui. Ha'e vy jomeme itavy reixe vy avakue meme joavyky rei. Ha'e rami rire ojee ae oendu ojejavvyague re ha'evea rami opagaa.

Amboae regua kuery opa marã rei ikuai aguã Nhanderuete omboaxaa re ijayvua

²⁸ Nhanderuete reko ha'e kuery oikuua va'eri oikuua ete aguã ndojou porãi ramo omboaxa opëxaa py ojou vaipy ikuai, ha'e ha'eve'ŷ va'e anho ojapo aguã.

²⁹ Ha'e kuery re ma teko vai anho oï, tavy reia, hakâte'ŷa ha'e porayvu e'ŷa. Joe ija'e e'ŷa rupi anho ikuai, jojukaa ha'e joguero'aa rupi guive. Nhombotavypa rei ha'e porayvu e'ŷ rei va'e ikuai. Joe ijayvu rei,

* 1:12 Romanos 15.22-29; Atos 28.15 * 1:16 2 Timóteo 1.6-12; Romanos 3.21-24 * 1:17 Habacuque 2.4

³⁰ ijayvuxé, neñ Nhanderuete re voi nda'ija'ei, ojee anho ojerovia ha'e ima'endu'a va'e, mba'emo vai re anho onhembopy'a, nguu kuery nonhe'ẽ rendui,

³¹ iporã va'e noenduvei, oayvuague ndojapoi, porayvu e'ŷ ae va'e, ha'e nanhomboaxy kuaavei va'e guive.

³² Ha'e kuery oikuaa ae Nhanderuete ha'evea rami omokanhymba 'rãa ha'e rami ikuai va'e. Ha'e ramive ma ojapove tema okuapy, ha'e amboae kuery ha'e rami ikuai rã oexa vy ojou porã guive.

2

Judeu ha'e judeu e'ŷ regua ombopaga pyrã ikuiaia re ijayvua

¹ Ha'e nunga rupi ndee renhombopagaxe vai va'e, ndee voi nda'evei "Aikuaa vy e'ŷ rima ajejavý" 're aguã, mba'eta amboae kuery rembopagaxea py ndee ae renhembopaga uka, mba'eta rejou vai va'e ramigua ndee voi rejapo.*

² Ha'e rã Nhanderuete ma ha'evea rami 'rã ombopaga ha'e rami ikuai va'e, jaikuua pavẽ.

³ Ha'e rami teñ ndee renhombopaga ukaxe va'eri ha'e rami ae reiko va'e, rexâ'ã ri ty'y reo jepe aguã re Nhanderuete nembopaga aguã gui?

⁴ Ndereikuai ri ty'y rejeko rerova aguã ae Nhanderuete oexa ukaa nderayvua? Tyrã pa nerembovarei ri ty'y oexa uka rã opa mba'e py nderayvua, nanembopaga voi ha'e nerarõ area?

⁵ Ha'e rami py neakã ratã ha'e ndepy'a py nderejeko rerovaxei vy ndejee ae remoõ ukave Nhanderuete poxya. Ha'e va'e ma ha'evea rami nhombopagaa ára py oexa uka 'rã.

⁶ Mba'eta peteñ-teñ peombojoja 'rã oikoague repy.*

⁷ Ha'e rami vy tekove marã e'ŷ ome'ẽ 'rã iporã va'e rupi anho ikuai vy hexakãmbaa, omboetea aguã ha'e imarã e'ŷ aguã re onhea'ã va'e kuery pe.

⁸ Ha'e rã joapo vaia rupi ikuai va'e pe ma oexa uka 'rã ivaia ha'e opoxya, anhetê va'e rupi e'ŷ, teko vaia rupi anho ikuai va'e pe.

⁹ Mba'eta heko vai va'e kuery áry ou 'rã ojexavai ha'e ikuai axy aguã, judeu kuery pe ranhe, ha'e gui gregó kuery pe avi.

¹⁰ Ha'e rã iporã va'e rupi ikuai va'e pe ma ome'ẽ 'rã guexakã, imboetea ha'e imoingo porãarã, judeu kuery pe ranhe, ha'e gui gregó kuery pe avi,

¹¹ mba'eta Nhanderuete ma peteñ regua rive joegui oayvuve va'e'ŷ.

¹² Ha'e nunga rupi lei reveguia e'ŷ ojejavý va'e ha'e javi ma lei re'ŷ avi 'rã okanhy. Ha'e rã lei reveguia ojejavý va'e ma lei re oña rami ae 'rã ombopagaa.

¹³ Mba'eta Nhanderuete renonde ma lei oendu rive va'e'ŷ 'rã heko porã, lei re oña rami ikuai va'e anho 'rã omboeko porã.

¹⁴ Ha'e nunga rupi xapy'a rei amboae regua kuery, lei reveguia e'ŷ teñ lei re oña rami ikuai 'rã oikuua rami ae. Ha'e va'e kuery ma lei ndojopyi teñ ha'e kuery ae oikuua 'rã lei regua.

¹⁵ Ha'e rami vy ha'e kuery oexa uka 'rã opy'a re lei regua oña, o'arandua gui ae oikuua guekorã. Ha'e rami vy amongue py oikuua 'rã ojejavýa, ha'e rã amongue py ma oikuua 'rã ha'evea rami ikuiaia.

¹⁶ Ha'e nunga ha'e javi ojekuaa porã 'rã avakue nhemi rupi ikuaiague re Nhanderuete oikuua potaa ára. Ayvu porã amombe'u aikovya rami vy Cristo Jesus pe ae 'rã oikuua pota uka.

Judeu kuery "Aikuaa vy e'ŷ rima ajejavý" he'i aguã nda'eveia re ijayvua

¹⁷ Ha'e gui ndee ma "Judeu" 'epy va'e reiko. Rejerovia reikovy lei re oña rami reikoa re, ha'e "Nhanderuete rembiayvu aiko" 're vy revy'a.

¹⁸ Lei re oña rami nembo'ea rã reikuua ae Nhanderuete oipota va'e ha'e rejapo kuaa iporã va'e.

¹⁹ Ndee rexâ'ã rã ndee ae reiko ára reveguia e'ŷ mboguataa, pytúa rupi ikuai va'e moexakãa,

* 2:1 Mateus 7.1,2 * 2:6 Salmo 62.12, Proverbios 24.12

- ²⁰ hi'arandu e'ŷ va'e rerekoa ha'e kyrīgue mbo'ea, mba'eta lei rupi vy 'arandua ha'e anhetēguia reikuaapa merami.
- ²¹ Ha'e rami avi nhombo'ea reiko va'eri mba'e re tu nerenhembo'ei ndee ae? Imonda e'ŷ aguā renhomongoeta va'eri ndee ae ri ty'y nemonda va'ety?
- ²² Joupe “Pendetavy eme”, 're va'eri ndee ae ri ty'y ndetavy? Mba'emo ra'angaa rejou vai va'eri ta'angaa pegua templo gui nemonda va'e ty'y?
- ²³ Lei rejou porā va'eri lei rovai reikoa py Nhanderuete neremboete ukai.*
- ²⁴ Mba'eta ipara re oĩa rami: “Peẽ kuery káuxa amboae regua kuery ijayvu vai 'rā Nhanderuete rery re”, he'ia rami ae pendekuai.*

Judeu regua anhetē ete va'e re ijayvua

- ²⁵ Mba'eta ndepire remboi ukaague ma lei re oĩa rami ete ri reiko ramo ovare. Ha'e rā lei re oĩa rami e'ŷ ri reiko ramo opire omboi uka e'ŷ va'e rami repyta.
- ²⁶ Ha'e rami avi amongue opire omboi uka e'ŷ va'eri lei re oĩa rami ikuai ramo ha'e kuery pe “Opire omboi uka va'ekue rami ikuai”, he'i pavē 'rā.
- ²⁷ Ha'e rami vy opire omboi uka e'ŷ va'eri lei re oĩa rami ikuai va'e kuery ijayvu 'rā okuapy ndere, mba'eta ipara re oĩ va'e reikuaa vy ndepire remboi uka va'eri lei re oĩa rami e'ŷ reiko.
- ²⁸ Mba'eta judeu ete ma guete re rive'ŷ oexa uka judeu oikoa, mba'eta opire omboi uka aguā oeja pyre ma ngo'o re rive'ŷ 'rā ojapo aguā.
- ²⁹ Ha'e rami 'rāgue py judeu ete ma opy'a py 'rā ha'e rami ikuai, ha'e opire omboi uka aguā oeja pyre ma ipy'a reguarā, nhe'ẽ re ae, ipara regua rive'ŷ. Ha'e rami ikuai va'e ma avakue rive'ŷ 'rā oguerovy'a, Nhanderuete ae 'rā oguerovy'a.*

3

Paulo mbovaia ayvu oĩa

- ¹ Ha'e gui mba'e nunga py tu amboae regua reko gui judeu kuery reko ha'eveve? Mba'erā nda'u ovare ha'e kuery opire omboi ukaa?
- ² Mba'eta heta oguereko iporā va'e, opa mba'e py. Jypy'i ma judeu kuery pe Nhanderuete ombou raka'e oayvu.*
- ³ Ha'e gui? Judeu regua amongue ndogueroviai rire nda'u Nhanderuete ndoikovei 'rā ri ojeroviap?
- ⁴ Any teve. Avakue ijapu va'e meme tei Nhanderuete ma anhetē va'e ae, ipara oĩa rami vy: “Oikuua pavē 'rā ndeayvua anhetē memea. Ha'e ramo nderekoo re oikuua potaa rā ndepo'aka 'rā”, he'ia rami.*
- ⁵ Ha'e gui amongue aipoe'i 'rā: “Nhanderoko vaia ojapo 'rā Nhanderuete reko porāa ojekuaa porāve aguā rami”, he'i 'rā. Mba'exa 'rā tu nhambovai? Nda'evei ri nda'u Nhanderuete nhanderoko vaia re nhanembopaga aguā? (Nami avakue rami rive xeayvu.)
- ⁶ Any. Ha'e rami va'e rire mba'exa 'rā tu ha'eve Nhanderuete vy re ikuai va'e re oikuua pota aguā?
- ⁷ Ha'e gui aipo'ea avi: “Xeapua ojapo 'rā Nhanderuete anhetē va'e ojekuaa porāve aguā rami, ha'e omboeteave 'rā guive. Ha'e rami rā mba'e re tu xevy pe ‘Ojejavy va'e’ he'i vy xembopaga 'rā?” 'ea.
- ⁸ Any, ha'e rami va'e rire ha'eve avi tei 'rāgue “Teko vai rupi tema nhandekuai mba'emo porā oiko aguā” ja'e aguā. Amongue ijapu vy omombe'u 'rā ha'e rami ae oreayvua rami. Ha'e kuery ma ha'evea rami 'rā ombopagaa.

Jajejavvy va'e memea re ijayvua

* 2:23 Romanos 3:19,20 * 2:24 Isaías 52:5; Ezequiel 36:22 * 2:29 Tery “Judeu” ma “Oguerovy'apy” he'ia. * 3:2 Romanos 9:4,5 * 3:4 Salmo 51:4, Romanos 9:6-8; 11:1-5, 25-27

⁹ Ha'e gui mba'exa tu jaikuua? Ore judeu kuery teve amboae regua gui orereko porāve va'e? Any, neī peteī henda py. Mba'eta amombe'u ae ma judeu ha'e grego kuery jejavya guy py ikuai va'e memea,

¹⁰ ipara oī rami: "Jipoi heko porā va'e, neī peteīve.*

¹¹ Jipoi oikuua ete va'e, jipoi Nhanderuete oeka va'e.

¹² Mba'eta ojepe'a pavē, joo rami meme ovare'ŷ va'e ikuai. Jipoi iporā va'e ojapo va'e, neī peteīve."

¹³ "Ha'e kuery jyryvi ma omanogue rupa ojepe'a va'e rami. Oapekū py nhombotavypa." "Ha'e kuery juru re ma mboi guigua veneno ramigua oī."

¹⁴ "Ijuru tynyē oiny ayvu vai ha'e py'a vaikue reia anho."

¹⁵ "Ha'e kuery py ma tuguy omoē aguā katy oo vy inhakuā.

¹⁶ Ikuia rupi ma nhomokanhyarā ha'e nhomomboriauarā oī.

¹⁷ Ha'e rā tape ikuai porā aguā ma ndoikuuai."

¹⁸ "Ha'e kuery re noī ae Nhanderuete renonde ojererokyje aguā."*

Judeu kuery amboae regua rami avi ojejavva re ijayvua

¹⁹ Ha'e gui lei re oī va'e ha'e javi ma lei rupi ikuai va'e pegua ae, jaikuua. Ha'e ramo Nhanderuete renonde yvy jave re ikuai va'e okyririmbā ha'e opaga aguā rami ikuai aguā.

²⁰ Mba'eta lei re onhea'āa rupi ma avave rei nomboeko porāai 'rā henonde, mba'eta lei gui ma jaikuua 'rā jajejavva re ikuai va'e memea.*

Jesus Cristo re jajerovia ramo nhanemboeko porāa aguā re ijayvua

²¹ Ha'e gui aŷ ma lei rupi e'ŷ Nhanderuete oikuua uka ojeguigua tekō porā, lei ha'e profeta kuery omombe'u ma voi va'ekue.

²² Mba'eta Nhanderuete guigua tekō porā ma Jesus Cristo re jajerovia ramo ome'ē. Ojerovia va'e ha'e javive pegua oī, [ha'e javi regua peguarā ombou,] mba'eta joo ramigua meme nhandekuai,

²³ mba'eta nhande ha'e javive jajejavva re ikuai Nhanderuete rexakāa.*

²⁴ Ha'e rami teī Nhanderuete nhanemboaxya rupi rive nhanemboeko porā 'rā Cristo Jesus nhandereraa jepe rire.

²⁵ Mba'eta Jesus ma Nhanderuete ombou vy oikuua uka raka'e jejavya pe'aarā, jajerovia rā huguy py omboguepa aguā jajejavvyague. Ha'e rami py Nhanderuete oexa uka ha'evea rami joguerekō va'e, mba'eta oarō are kuaa va'e vy ymagua kuery ojejavvyague re nombopaga potai ranhe raka'e.*

²⁶ Ha'e gui aŷ ma oexa uka ha'evea rami joguerekō va'e, mba'eta heko porā va'e oiko, ha'e Jesus re ojerovia va'e kuery mboeko porāa guive.

²⁷ Ha'e rami rire nda'u ha'eve nhanhemboyvate aguā? Peteīve henda py nda'evei. Mba'e re tu nda'evei? Mba'eta nhande ae nhanhea'ā rupi e'ŷ jaa jepe, hexe jajerovia vy rive.

²⁸ Ha'e nunga rupi jaikuua jajerovia ramo 'rāe nhanemboeko porā, lei rupi nhanhea'āa rupi e'ŷ.

²⁹ Tyrā pa Nhanderuete nda'u ore judeu kuery Ruete anho ri oiko? Amboae kuery Ruete guive e'ŷ ri ty'y? Tá, amboae kuery Ruete guive oiko,

³⁰ mba'eta Nhanderuete ma peteī'i. Ha'e rami vy judeu kuery ojerovia rā omboeko porā 'rā, ha'e amboae kuery voi ojerovia rā omboeko porā avi 'rā.

³¹ Ha'e gui jajeroviaa rupi jaa jepea py nda'u jajapo ri lei mba'erā ovare ve'ŷa rami? Any, peteīve henda py. Ha'e rami 'rāgue py lei re oī va'e jaikuua uka anhetē memea.

4

Abraão ojerovia ramo omboeko porāague re ijayvua

* 3:10 Gálatas 3.11,22 * 3:18 Salmo 5.9, 10.7, 14.1-3, 36.1, 53.1-3, 140.3; Eclesiastes 7.20; Isaías 59.7-8 * 3:20 Romanos 7.7,8; Gálatas 2.16 * 3:23 Romanos 1.17; 2 Coríntios 5.21; Gálatas 2.15-21; Filipenses 3.9 * 3:25 Atos 17.30,31

- ¹ Ha'e gui mba'e tu Abraão oupity raka'e? Mba'eta ha'e va'e ma ngo'o re oiko ore judeu kuery ramoī ypy.*
- ² Ha'e gui Abraão ha'e ae onhea'āa rupi onhemboeko porā va'e rire oguereko 'rāgue onhemboyvate aguā. Ha'e rami avi Nhanderuete renonde ndoguerokoi,
- ³ mba'eta mba'e he'i tu ipara? "Abraão ojerovia Nhanderuete re. Ha'e ramo ojeroviaa re ome'ē teko porā", he'iague.*
- ⁴ Ha'e gui omba'eapo va'e pe omba'eapoague repy ma ome'ēa va'e rive e'ŷ, ixupe guară ae oī.
- ⁵ Ha'e rā amongue ha'e ae onhea'ā 'rāgue py heko vai va'e mboeko porāa re ojerovia ramo ma ixupe ome'ē rā teko porā, ojeroviaa re rive.
- ⁶ Ha'e rami ae Davi voi ijayvu raka'e, mba'eta omombe'u amongue onhea'ā e'ŷ re ixupe Nhanderuete teko porā ome'ē ramo ov'y'a ete 'rāa. Ha'e vy aipoe'i:
- ⁷ "Ovy'a ete 'rā heko vaiague omboguepaa va'e, ojejavyague ojao'ipaa ramo.
- ⁸ Ovy'a ete 'rā avakue ha'e kuery pe Senhor 'Heko vai va'e' nde'i ramo", he'i raka'e.*
- ⁹ Ha'e gui opire omboi uka va'ekue pegua anho 'rā nda'u ov'y'a ete aguā oī, tyrā pa opire omboi uka e'ŷ va'e pegua avi? Mba'eta "Abraão ojeroviaa re rive ixupe ome'ē teko porā", ha'eague rami.
- ¹⁰ Mba'e tu ojapo ramo teko porā ome'ē raka'e? Opire omboi uka rire ri nda'u ome'ē, tyrā pa opire omboi uka e'ŷ re? Opire omboi uka rire'ŷ, omboi uka e'ŷ mbove ma voi teko porā ome'ē raka'e Abraão pe.
- ¹¹ Mba'eta opire omboi uka aguā ma hekorā Nhanderuete oeja raka'e oikuaa uka aguā ojeroviaa re teko porā ixupe ome'ēague, opire omboi uka e'ŷ teri reve. Ha'e rami rire ojerovia va'e ha'e javi ru opyta, opire omboi uka e'ŷ va'e kuery pe guive, mba'eta ha'e kuery voi ojerovia ramo ome'ē rā teko porā.
- ¹² Ha'e gui ore orepire romboi uka va'e ru avi oiko. Mba'eta ore ma orepire romboi uka va'e rive e'ŷ orekuai, nhanderu Abraão opire omboi uka e'ŷ re ojeroviaague rami rojerovia va'e avi.
- ¹³ Ha'e rami ae avi lei rupi e'ŷ Abraão ha'e hamymino kuery pe Nhanderuete ijayvu raka'e ko yvy ome'ē aguā re, ha'e rā ojeroviaa re teko porā ojopy rire.
- ¹⁴ Ha'e rā lei re ikuai va'e pe yvy ome'ē aguā re ijayvu va'e rire Abraão ojeroviaa ndovarei 'rāgue, ha'e ixupe ijayvuague voi oaxa rive 'rāgue.
- ¹⁵ Mba'eta lei gui ou Nhanderuete ipoxy aguā, ha'e rā lei ndoikuaaia py ma jipoi avi lei rovai ojejavy va'e.
- ¹⁶ Ha'e nunga rupi ae jajeroviaa re Nhanderuete ome'ē teko porā, nhanemboaxy ramo rive jaupity aguā. Ha'e ramo Abraão ramymino kuery ha'e javive pe ijayvuague oī atā 'rā, lei rupi ikuai va'e pe anho e'ŷ, Abraão rami ojerovia va'e kuery ha'e javive pe, (mba'eta nhande kuery pavē ru oiko,
- ¹⁷ ipara re "Heta regua rurā romoī" he'iague rami vy), mba'eta Nhanderuete renonde hexe ojerovia. Mba'eta Nhanderuete ma omano va'ekue moingovea, ha'e ndoikoi teri va'e pe "Oiko ae" he'i va'e guive.*
- ¹⁸ Abraão oarō aguā noī merami teī oarō nho vy ojerovia rire heta regua ru opyta, ixupe "Heta 'rā neramymino kuery ikuai" he'iague rami vy.*
- ¹⁹ Ikangy e'ŷ re ojerovia nho vy oikuaa pota guete omanogue rami oīa re, mba'eta cem ma'etŷ ma oguereko, ha'e Sara voi guaimi'i ete ma.
- ²⁰ Ha'e rami teī ndoguerovia e'ŷi Nhanderuete ijayvuague, oexa'ā reia noī. Ha'e rami 'rāgue py ojeroviaa py imbaraeteve ov'y, oguerov'y'a guive Nhanderuete,
- ²¹ mba'eta oikuaa porā oayvuague ojapo aguā ipo'aka va'ea.
- ²² Ha'e nunga rupi ae "Ojeroviaa re ome'ē teko porā" he'i.*
- ²³ Ixupe anho e'ŷ guive ipara oiny ome'ēa rami,

* 4:1 Gálatas 3.6-18 * 4:3 Gênesis 15.6 * 4:8 Salmo 32.1-2 * 4:17 Gênesis 17.5 * 4:18 Gênesis 15.5

* 4:22 Gênesis 15.6

²⁴ nhande kuery pe guive, mba'eta nhandevy pe avi ome'ẽ 'rã teko porã, nhande-Senhor Jesus omanoague gui omboete ju va'ekue re jajerovia ramo.

²⁵ Ha'e va'e ma omboaxaa raka'e nhanderekvaia re omano aguã, ha'e gui onhemboete ju nhanemboeko porã aguã.

5

Jajerovia re Nhanderuete nhanemboeko porã rire hexeve jaiko porã aguã re ijayvua

¹ Ha'e gui ma jajerovia re Nhanderuete nhanemboeko porã rire hexeve peteĩ rami ju jaiko, nhande-Senhor Jesus Cristo re vy.

² Hexe jajerovia vy Nhanderuete nhanemboaxya rupi nhandekuai, ha'e Nhanderuete rexakãa ojekuaa aguã nharõ vy javy'a jaikovy guive.

³ Ha'e rami anho e'ŷ, jajexavaia py voi javy'a, mba'eta jaikuua jajexavaia ojapo jaropo'akave aguã rami.

⁴ Ha'e gui mba'emo jaropo'aka vy jaikuua Nhanderuete nhandererovy'aa. Ha'e nhandererovy'a ramo jareko iporã va'e nharõ aguã.*

⁵ Nharõa py ndajajekorei guive, mba'eta nhandepy'a re Nhanderuete oendu uka ae nhanderayvua. Nhe'ẽ Ky'a E'ŷ nhandere ombou va'ekue gui nhaendu.

⁶ Mba'eta nhanekangy teri reve Cristo omano raka'e nhanderekovaai va'e re, oa'angaague ára py ete.

⁷ Heko porã va'e re vy haxy amongue omano aguã, ha'e rã porayvu va'e re ma amongue nhl'ã omano 'rã.

⁸ Ha'e rã Nhanderuete ma po rami oexa uka nhanderayvua; jajejavya rupi teri jaiko reve Cristo omano raka'e nhandere.

⁹ Ha'e rami rire, aŷ katuve ma huguy rupi nhanemboeko porã rire nhandereraa jepe 'rã nhombopaga aguã gui.

¹⁰ Mba'eta Nhanderuete rovaigua teri jaiko reve Ta'y omano vy hexeve peteĩ rami ju nhanemoingo rire aŷ katuve ma hexeve peteĩ rami nhanemoingo vy nhandereraa jepe 'rã, oikove ju rire.

¹¹ Ha'e nunga anho e'ŷ, Nhanderuete re ae javy'a, nhande-Senhor Jesus Cristo re vy. Mba'eta hexe vy aŷ peteĩ rami nhandekuai Nhanderuete reve.

Adão re Cristo ombojojaague

¹² Mba'eta peteĩ'i ava gui jejavya oiko ypy raka'e yvy jave re, ha'e jejavya gui oiko avi nhamano aguã. Ha'e rami py nhande pavẽ nhamano aguã rami nhandekuai, pavẽ jajejavre rire.

¹³ Mba'eta lei oejaaa e'ŷ mbove ma voi jejavya oĩ ae ma raka'e yvy re, lei ndoikuuaa ukaai teri jave avave pe "Lei rovai ojejavvy" nda'eai tei.

¹⁴ Ha'e rami avi Adão guive Moisés oiko peve manoa ipo'aka raka'e, ayvu rovai Adão ojejavague rami ete ndojejavyi va'e kuery re voi. Adão ma nhaneramoĩ ypy raka'e, ou va'erã va'e kuua ukaarã.

¹⁵ Ha'e rami avi Adão ojejavvy jave guare rami e'ŷ oiko tekove me'ẽ rivea ou rã, mba'eta peteĩ'i ojejavvy rire heta omano. Ha'e gui ma heta pe avi Nhanderuete oexa uka omboaxya, amboae ava Jesus Cristo ombou vy.

¹⁶ Ha'e rami avi tekove ome'ẽmbi ma peteĩ anho ojejavvy jave guare rami e'ŷ guive, mba'eta peteĩ'i ojejavague gui oiko raka'e nhombopagapa aguã. Ha'e gui heta jajejavague gui Nhanderuete nhanemboaxya oexa uka vy nhanemboeko porã.

¹⁷ Peteĩ'i ojejavague gui ae manoa ipo'aka rire tei Nhanderuete nhanemboaxya ha'e tekove porã ome'ẽ rã jaupity va'e katuve ma nhandepo'aka 'rã peteĩ'i re vy. Ha'e va'e ma Jesus Cristo.*

¹⁸ Mba'eta peteigüe'i ojejavya ague gui nhande kuery pavẽ re oiko raka'e japaga aguã. Ha'e rã peteigüe'i joapo porãague gui nhande kuery pavẽ pe oiko avi nhanemboeko porã rã tekove jaupity aguã.

* 5:4 Tiago 1.2-4 * 5:17 1 Coríntios 15.20-22,45-49

¹⁹ Mba'eta pete'i i ava nonhe'ẽ renduiague gui heta ikuai raka'e ojejavy va'e. Ha'e gui ma pete'i onhe'ẽ renduague gui ju heta ikuai 'rã heko porã va'e.

²⁰ Ha'e gui ma lei oejaa avi raka'e jejavya ojekuaa porâve aguã, va'eri jejavya hetave ramo nhanemboaxya voi hetave avi oexa uka raka'e.

²¹ Ha'e rami avi jejavya ipo'aka raka'e pavê nhamano aguã rami. Ha'e gui nhanemboaxya ju nhanemboeko porã vy ipo'aka tekove marã e'ŷ jaupity aguã, nhande-Senhor Jesus Cristo re vy.

6

Nhanderuete nhanemboaxy ramo jejavya po'akaa guijaa jepea re ijayvua

¹ Ha'e rami rã mba'e ja'e 'rã tu? Jajejavva rupi riae 'rã teve jaiko Nhanderuete nhanemboaxyve aguã?

² Any. Mba'eta tu jajejavva riaeve ta, ha'e nunga pe nhamano rire?

³ Tyrã pa ndapeikuuaai teri teve Cristo Jesus peguarã nhanhemongarai vy ha'e omanoague py avi nhanhemongaraiague?

⁴ Mba'eta nhanhemongarai vy hexeve nhande voi jajeaty uka avi nhamanoa py, Nguu po'akaa rupi Cristo omanoague gui onhemboete jevyague rami avi nhande voi nhandereko pyau reve nhandekuai aguã.*

⁵ Mba'eta Cristo omanoague rami nhande voi hexeve nhamano rire ha'e onhemboete jevyague rami avi 'rã jaiko.

⁶ Mba'eta jaikuua nhanderekoy mague kuruxu re hexeve omano aviague, to'o nhanembojejavva ve'ŷ aguã, jejavya rembiguai rami ve'ŷ jaiko aguã.

⁷ Mba'eta omano va'ekue ha'e javi oiko porã ju 'rã ojejavyague gui.

⁸ Ha'e gui nhande voi Cristo reve nhamano rire jarovia hexeve avi jaiko aguã.

⁹ Mba'eta jaikuua Cristo omanoague gui onhemboete ju rire nomanovei ma 'rãa. Hexe ma manoia nda'ipo'akavei.

¹⁰ Peteigüe'i omano raka'e jejavya pe. Ha'e gui oikove vy Nhanderuete pe ju oiko.

¹¹ Ha'e rami ae avi po rami peẽ voi peikuua: peẽ voi jejavya pe pemano ma avi, ha'e gui Cristo Jesus re vy Nhanderuete pe ju peiko.

¹² Ha'e nunga rupi jejavya ta'ipo'akave eme penderete imarã va'e re, to'o oipota va'e rupi ve'ŷ pendekuai aguã.

¹³ Penderete regua voi pemboaxave eme jejavya pe, nhomboeko vaia rembiguairã. Ha'e rami 'rãgue py omanoague gui oikove ju va'ekue rami pejeko me'ẽ Nhanderuete pe. Ixupe anho pemboaxa penderete regua, teko porã rembiguairã.

¹⁴ Mba'eta jejavya nda'ipo'akavei 'rã pendere, mba'eta lei guy py ve'ŷ pendekuai, ha'e rã Nhanderuete penemboaxyra rupi anho.

Lei, tembiguai ha'e nhanemboaxy re ijayvua

¹⁵ Ha'e gui? Lei guy py ve'ŷ, Nhanderuete nhanemboaxy rupi anho nhandekuai vy nda'u jajejavva riaeve ta? Any.

¹⁶ Ndapeikuuaai ri ty'y nhoembiguairã pejeko me'ẽ rire pendererekao anho 'rã penhe'ẽ rendu? Jejavva rembiguai ma omano aguã rami ikuai, ha'e rã Nhanderuete nhanhe'ẽ rendu va'e ma teko porã rupi nhandekuai.*

¹⁷ Xee arovya Nhanderuete, mba'eta yma rupi jejavya rembiguai pendekuaiague gui pejepe'a vy pendepy'a ha'e javi py penhe'ẽ rendu penembo'league rami.

¹⁸ Ha'e gui jejavya gui peo jepe vy teko porã rembiguai ju pendekuai.

¹⁹ Avakue reko re ambojoja, mba'eta penderero'o reve teri peiko vy ndapeikuua porãi ramo. Yma rupi penderete regua pemboaxa va'ekue imongy'aarã pe hembiguairã, penderekoy'ave ha'e penderekoy vai reive peovy aguã rami. Ha'e gui aŷ ma teko porã rembiguairã ju pemboaxa penderete regua, iky'a e'ŷ va'e pendekuai aguã.

* 6:4 2 Coríntios 5:17; Gálatas 2:19,20; 5:24; 6:14; Efésios 4:22-24; Colossenses 3:1-11; 1 Pedro 4:1-3 * 6:16 João 8:34

- ²⁰ Mba'eta jejavya rembiguai teri pendekuai jave teko porā rupi e'ŷ pendekuai va'ekue.
²¹ Ha'e va'e jave mba'e tu pejou raka'e ha'e nunga repy? Mba'emo aŷ penemoximba va'e anho, ha'e opaa py ma ha'e nunga nhandejuka 'rā.
²² Ha'e gui aŷ ma jejavya rembiguai pendekuaiague gui Nhanderuete pendereraa jepe vy guembiguai ae ju penemoingo rire pejou iky'a e'ŷ va'e penemoingoarā, ha'e opaa py ma tekove marā e'ŷ.
²³ Mba'eta jejavyague repy ma manoa. Ha'e rā Nhanderuete ome'ẽ rive va'e ma tekove marā e'ŷ, nhande-Senor Cristo Jesus re oĩ va'e.

7

Omenda va'e reko re ombojojaague

- ¹ Irmão kuery, lei peikuaa va'e pe ju ta xeayvu aŷ. Ndapeikuai ri ty'y jaikovea pukukue re anho lei ovare 'rāa?
² Mba'eta lei re oĩa rami vy kunha omenda va'e minha ime oikovea ja anho oiko 'rā ixupe. Ha'e gui ime omano ma ramo lei re oĩa rami vy ndoikovei ma 'rā ixupe.
³ Xapy'a rei ime oikove teri reve amboae ava re onhemoirū ramo jaikuua 'rā itavy reia. Ha'e rā ime omano ma ramo ha'e va'e lei rami ve'ŷ ma 'rā oiko. Omenda jevy tei itavy rei va'e'ŷ 'rā oiko.
⁴ Ha'e rami ae avi xe-irmão kuery, peẽ voi lei pe pemano va'ekue Cristo rete reve vy, amboae pe ju peiko aguã, omanoague gui onhemboete ju va'ekue pe ae, ha'e rami vy Nhanderuete oipotaa rami pendekuai aguã.*
⁵ Mba'eta to'o oipotaa rami teri nhandekuai jave lei ojapo raka'e jajejavypa reixeia anho nhaendu aguã rami, ha'e ramo opa marā oguereko nhanderete regua nhandejuka ete aguã.
⁶ Ha'e gui aŷ ma lei gui nhandereraa jepe rire nhandere ipo'aka va'ekue pe nhamano ma, Nhe'ẽ guigua teko pyau rupi ju nhandekuai aguã rami, teko ymague ipara re oĩa rupi ve'ŷ.

Lei ha'e jejavya re ijayvua

- ⁷ Mba'e ja'e 'rā tu ha'vy? Lei teve nhanembojejavayarā oĩ? Any. Ha'e rami avi lei gui e'ŷ va'e rire xee ndaikuai 'rāgue jejavya. Mba'eta lei aipo nde'i va'e rire: "Emoaruã eme", xee naendui 'rāgue amoaruãa.*
⁸ Ha'e gui ojapo uka pyre rupi vy jejavya ojapo opa marāguia amoaruãa aendu aguã rami, mba'eta lei ndoikuai py ma omano va'ekue rami avi jejavya nda'ipo'akai.
⁹ Ymave rupi lei aikuua e'ŷ mbove, aiko porā merami. Ha'e gui ma ojapo uka pyre aikuua ramo jejavya oikove ju, ha'e rā xee ma omano va'ekue rami apyta.
¹⁰ Ha'e rami vy ojapo uka pyre nhomoingovearā oĩ va'ekue ri xemoingo karamboae omano va'ekue rami.*
¹¹ Mba'eta ojapo uka pyre rupi jejavya ipo'akave vy xembotavy ojapo uka pyre aikuua py ae, ha'e vy omano va'ekue rami xemoingo.
¹² Ha'e gui lei ha'e ojapo uka pyre ma iky'a e'ŷ va'e meme, teko porā kuaa ukaarā ha'e iporā va'e.
¹³ Ha'e gui iporā va'e ae teve xemoingo omano va'ekue rami? Any, jejavya ae ha'e rami xemoingo iporā va'e rupi. Mba'eta ojapo uka pyre rupi jejavya ojekuaa porāve, jejavya etea jaikuua aguã rami. Ha'e rami vy ae omano va'ekue rami xemoingo.
¹⁴ Mba'eta jaikuua lei re oĩ va'e ma Nhe'ẽ guigua memea. Ha'e rā xee ma to'o re aiko, jejavya rembiguairā ombooxa pyre rami.
¹⁵ Mba'eta xee ae voi ndaikuai aikoa, mba'eta xee aikoxea rupi ndaikoi, aikoxe e'ŷa rupi rive aiko.
¹⁶ Ha'e gui aikoxe e'ŷa rupi aiko vy lei pe "Iporā va'e" ha'e.
¹⁷ Ha'e rami xemoingoa ma xee ae e'ŷ, ha'e rā jejavya xere oĩ va'e.

* 7:4 Romanos 10.4

* 7:7 Éxodo 20.17, Deuteronômio 5.21

* 7:10 Romanos 3.20; Gálatas 3.23,24

- ¹⁸ Mba'eta aikuua xere, xerete re ma iporā va'e noīa. Ha'evea rami aikoxea ma xere oī anhetē. Ha'e rā ha'e rami aiko kuaa etea ma noī.
- ¹⁹ Mba'eta ha'evea rami aikoxea rupi ndaikoi. Ha'e rami 'rāgue py mba'emo vai ajapoxe e'ŷ va'e anho ajapo.
- ²⁰ Ha'e nunga rupi ajapoxe e'ŷ va'e ajapo ramo ha'e rami xemoingoa ma xee ae e'ŷ, ha'e rā jejavya xere oī va'e.
- ²¹ Mba'eta ha'evea rami aikoxe teī xere aendu avi mba'emo vai rupi xemoingoarā.
- ²² Mba'eta xepy'a re ma Nhanderuete guigua lei arov'y'a,
- ²³ ha'e rā xero'o re ma amboae rami xemoingoarā aendu. Ha'e va'e ma xepy'a re lei oī va'e re opu'ā 'rā xemoingo aguā xerete re jejavya oī va'e rembiguairā.
- ²⁴ Ava ov'y'a e'ŷ ete va'e xee aiko! Mava'e tu xereraa jepe 'rā kova'e tete xejukaxe va'e gui?
- ²⁵ Arov'y'a Nhanderuete, Jesus Cristo nhande-Senhor rupi. Mba'eta xejegui ae xepy'a re oīa rami vy aiko Nhanderuete guigua lei rembiguai, ha'e rā to'o oipotaa rami aiko vy ma lei jejavya rembiguai aiko.

8

- Nhe'ē* re nhandekuai va'e ndajapagavei aguā re ijayvua
- ¹ Ha'e gui aŷ Cristo Jesus re jaiko va'e ma japaga aguā rami ve'ŷ jaiko,
- ² mba'eta Nhe'ē guigua tekove me'ēa Cristo Jesus re oī va'e ma nhandereraa jepe ma jejavya nhandejukaa gui.*
- ³ Mba'eta lei rupi nhanhea'ā teri jave nda'evei va'ekue jajapopa aguā, nhandro'o re nhanekangy vy. Ha'e ramo Nhanderuete ae ojapo nhandevy, mba'eta Gua'y ombou raka'e nhandro'o re jajejavvy va'e regua rami teī, jajejavvy oipe'a aguā. Ha'e rami py Nhanderuete oipe'a raka'e to'o re jejavya oī va'e po'aka,
- ⁴ lei re ojapo uka pyre oī va'e jajapo nho aguā, to'o re ve'ŷ jaiko vy guive, ha'e rā Nhe'ē re anho.
- ⁵ Mba'eta to'o re ikuai va'e ma to'o guigua re anho 'rā ipy'a, ha'e rā Nhe'ē re ikuai va'e ma Nhe'ē guigua re 'rā ipy'a.
- ⁶ Mba'eta to'o re ikuai va'e omano aguā rami ikuai. Ha'e rā Nhe'ē re ikuai va'e ma tekove ha'e mby'a porā 'rā oupity.
- ⁷ Mba'eta to'o re ikuai va'e ma Nhanderuete rovaigua meme ikuai. Ha'e kuery nonhe'ē rendui 'rā Nhanderuete guigua lei rupi, mba'eta nda'evei ae ha'e va'e rupi ikuai aguā.
- ⁸ Ha'e nunga rupi to'o re ikuai va'e nombovy'ai 'rā Nhanderuete.
- ⁹ Ha'e rā peē ma to'o re'ŷ pendekuai, ha'e rā Nhe'ē re, anhetē ri pendere Nhanderuete Nhe'ē oī ramo. Ha'e rā amongue re Cristo Nhe'ē noī ramo ixupegu e'ŷ oiko.
- ¹⁰ Ha'e rā pendere Cristo oī ramo penderete anhetē omano aguā rami oī jejavya káuxa, teī pendere teko porā oī avi rā Nhe'ē ome'ē tekove.
- ¹¹ Mba'eta Cristo Jesus omanoague gui omboete va'ekue Nhe'ē pendere oī vy penderete imarā va'e voi omoingove avi 'rā, Onhe'ē pendere oī va'e py ae.

Ta'y kuery ha'e mba'emo jopyarā jaikoa re ijayvua

- ¹² Ha'e nunga rupi irmāo kuery, Nhanderuete pe jaiko aguā rami nhandekuai, to'o pe'ŷ, to'o oipotaa rami nhandekuai ve'ŷ aguā.
- ¹³ Mba'eta to'o oipotaa rami ri pendekuai vy pemano aguā rami peiko. Ha'e rā Nhe'ē re vy to'o oipota va'e pemomba ri vy anhetē peikove 'rā.
- ¹⁴ Mba'eta Nhanderuete Nhe'ē pe ojererekoo uka va'e ma Nhanderuete ra'y kuery meme ikuai.*
- ¹⁵ Mba'eta Nhe'ē pendere oī va'e ma escravo penemoingoarā e'ŷ oī, pekyjea rupi peiko ve'ŷ aguā. Pendere Nhe'ē oī va'e ma Nhanderuete ra'y kuery peikoa kuaa ukaarā oī. Ha'e va'e rupi vy "Xeru, Xeru" ja'e 'rā jajapukai vy,

* 8:2 Gálatas 5.16-26 * 8:14 Gálatas 4.1-7

- ¹⁶ mba'eta nhanenhe'ẽ reve Inhe'ẽ avi oikuua uka Nhanderuete ra'y kuery jaikoa.
¹⁷ Ha'e ta'y kuery jaiko vy raka'eve rā jajopy 'rā nhandevy guarā omoī porā mbyre. Cristo reve vy jajopy 'rā Nhanderuete gui, mba'eta hexeve jaiko axy rire hexeve avi 'rā nhanemoingo imarā ve'ŷ va'e.
- Aŷ jaiko axy rire raka'eve rā iporā ete va'e jaupity aguã re ijayvua*
- ¹⁸ Mba'eta po rami xee aikuua porā: raka'eve rā imarā ve'ŷ va'e nhanemoingoa ma ramo aŷ jaiko axyague pe "Mba'e'ŷ va'ekue" ja'e 'rā.*
- ¹⁹ Mba'eta mba'emo omoingo pyre ha'e javi oarō avi Nhanderuete ra'y kuery ojekuaa ára pyguarā.
- ²⁰ Mba'eta opa mba'e omoingo pyre omombytaa raka'e ha'eve'ŷa rami ranhe, ha'e ae oipotaa rami e'ŷ, imoingoare oipotaa rami.
- ²¹ Ha'e rami rire mba'emo omoingo pyre voi oarō imarā aguã gui oo jepe aguã, Nhanderuete ra'y kuery oo jepea rami avi ha'e nunga voi imarā ve'ŷ va'e optya aguã.
- ²² Mba'eta jaikuua mba'emo omoingo pyre ha'e javi aŷ peve ikuai axy vy ipoaē oinya.
- ²³ Ha'e nunga anho e'ŷ, nhande kuery jypy Nhanderuete Onhe'ẽ ome'ẽ rā jajopy va'ekue voi nhanepoaē avi nhandepy'a py, gua'y kuery eterā nhandererova aguã nharō vy, nhanderete voi ogueraa jepe avi jave.
- ²⁴ Mba'eta ha'e rami aguã nharō reve ae jaa jepe raka'e. Ha'e gui nharō va'e ojekuaa ma va'e rire nharōa noīvei 'rāgue, mba'eta mba'emo ojekuaa ma va'ekue nanharōvei 'rā.
- ²⁵ Ha'e rami avi ndojekuaai teri va'e nharō vy nhandekuerai e'ŷ re 'rā nharō.

Nhandere Nhe'ẽ ojerurea re ijayvua

- ²⁶ Ha'e rami ae avi nhanekangya py Nhe'ẽ nhanepytyvõ 'rā, mba'eta nhande ndajaikuai neī nhanhembo'e aguã. Ha'e rā Nhe'ẽ ma nhandere ojerure 'rā opoaēa nhanhaendu kuaai va'e rupi.
- ²⁷ Nhe'ẽ py'a re oī va'e ma pavē py'a re oikuua pota va'e oikuapa 'rā, mba'eta Nhanderuete oipotaa rami ae ojerure oikovy iky'a e'ŷ va'e kuery re.
- ²⁸ Jaikuua mba'emo oiko va'e ha'e javi ojapo porā 'rāa Nhanderuete jayvu va'e kuery pe, ha'e ae oipotaa rami vy nhanerenoī rire.
- ²⁹ Mba'eta yma ma voi nhandekuaa vy nhandeporavo avi Gua'y reko rami nhanemoingo aguã, guyvy kuery oguerekro reta aguã.
- ³⁰ Ha'e gui nhandeporavo rire nhanerenoī avi, ha'e gui nhanerenoī rire nhanemboeko porā avi. Ha'e gui nhanemboeko porā rire imarā ve'ŷ va'e avi nhanemoingo.*

Nhanderuete nhanderayvua jaikuua porā aguã re ijayvua

- ³¹ Ha'e rami rire mba'e ja'e 'rā tu? Nhanderewe Nhanderuete oiko ramo mava'e 'rā tu nhanderovaigua oiko?
- ³² Mba'eta nhande kuery ha'e javi re Gua'y nome'ẽ e'ŷi rire hexeve opa mba'e ome'ẽ avi 'rā nhandevy.
- ³³ Mava'e tu ijayvu kuaa Nhanderuete rembiporavo kuery rovai? Mba'eta nhanemboeko porāa ma Nhanderuete ae.*
- ³⁴ Mava'e tu nhanembopaga 'rā? Mba'eta Cristo Jesus omano ha'e onhemboete ju va'ekue ae nhandere ojerure oiny Nhanderuete oiporu kuaa regua re.
- ³⁵ Mava'e 'rā tu ha'vy nhandepe'a Cristo nhanderayvua gui? Jajexavaia teve 'rā nhandepe'a, tyrā pa haxy va'e, nhandere opu'ā rei va'e, karuai, nhandeao e'ŷa, ijavaete va'e, tyrā kyxe revegua teve?
- ³⁶ Mba'eta ipara oña rami: "Ndevygua orekuai ramo ko'ẽ nhavō oremboaxaa orejukaarā pe. Vexa'i ojukaa aguã katy heraa va'e rami orekuai", he'iague rami.*
- ³⁷ Ha'e nunga ha'e javi nhandere oiko teĩ opa mba'e py Nhanderayvua nhanembopo'aka.

³⁸ Mba'eta xee aikuaa porã Nhanderuete nhanderayvua gui nhandepe'aarã ndoikoia: neĩ mano, tekove, anjo kuery, huvixa kuery, mba'emo aÿ oiko va'e, araka'eve rã guarã, ipo'akakueve,

³⁹ yvategua, yvy guyrygua, neĩ amboae nunga voi nanhandepe'ai 'rã Nhanderuete nhanderayvua nhande-Senor Cristo Jesus re oĩ va'e gui.

9

Judeu kuery ogueraa jepexea re Paulo ijayvuague

¹ Cristo rery rupi anhetẽ va'e amombe'u po rami, ndaxeapui. Nhe'ẽ Ky'a E'ŷ re vy xepy'apy py aikuaa anhetẽa.

² Mba'eta xeporiau ete, xekuraxõ raxy ndoaxai ae,

³ mba'eta xeryvy kuery, xeretarã kuery ngo'o re ikuai va'e araa jepe aguã ha'eve va'e rire ayvu vaipy ha'e Cristo gui okanhygue 'rãgue xee aiko.

⁴ Ha'e kuery ma Israel regua ikuai. Ha'e kuery peguarã va'ekue ma Nhanderuete ra'y kuery ikuai aguã, hexakã, guexeve guarã ojapo va'ekue, lei, Nhanderuete ombojerovia aguã, ha'e mba'emo ome'ẽ aguã re ijayvuague.

⁵ Ha'e kuery regua ma oreramoĩ kuery ikuai raka'e, ha'e Cristo voi ngo'o re ha'e kuery regua avi oiko. Ha'e va'e ma pavẽ gui yvateve va'e oiko raka'e rã peve, Nhanderuete ima'endu'a porãmby. Amém.*

Israel kuery pavẽ e'ŷ Nhanderuete oiporavo ramo ijayvuague ndoaxa riveia re ijayvua

⁶ Ha'e rami avi jaikuaa Nhanderuete ijayvuague ndoaxa riveia, mba'eta Israel ramymino kuery pavẽ e'ŷ ikuai Israel regua ete.*

⁷ Ha'e Abraão ramymino kuery ha'e javi e'ŷ guive ikuai ta'y kuery rami. Mba'eta "Isaque ramymino kuery pe anho 'rã 'Neramymino kuery' 'ea 'rã", he'i va'ekue.*

⁸ Ha'e nunga rupi ho'o gui rive oiko va'ekue'ŷ 'rã Nhanderuete ra'y kuery ikuai. Ijayvuague rami oiko va'ekue anho 'rã ta'y kuery jaikuaa.

⁹ Mba'eta Abraão pe aipoe'i raka'e: "Kova'e ára ojeupity jevy jave aju ramo Sara oguereko'i ma 'rã ava'i", he'i va'ekue.*

¹⁰ Ha'e va'e anho e'ŷ, Rebeca pi'a kuery voi pete'i'i nguu oguereko raka'e, oreramoĩ Isaque ae,

¹¹ ha'e rami teĩ mokoïve itui e'ŷ re ma voi pete'i'i Nhanderuete oiporavo raka'e, mba'emo porã neĩ mba'emo vai ha'e kuery ojapo e'ŷ re. (Mba'eta Nhanderuete ha'e ae oipotaa rami vy nhandeporavo, nhande ae nhanhea'ãa rupi e'ŷ, ha'e rã Nhanerenoĩa oipotaa rami vy anho.)

¹² Ha'e nunga rupi ixo pe aipoe'i raka'e: "Tyke'y oiko 'rã guyvy rembiguai", he'i,*

¹³ ipara oĩa rami: "Xee ayvu va'ekue Jacó, ha'e rã Esaú ma ayvu va'ekue'ŷ ae."*

Israel kuery amongue Nhanderuete ndoiporavoi teĩ ha'evea rami nhandererekva'ea re ijayvua

¹⁴ Ha'e rami rã mba'e ja'e 'rã tu? Nhanderuete ha'eve e'ŷa rami teve nhandererekva'ea Any teve.*

¹⁵ Mba'eta Moisés pe aipoe'i: "Xee amboaxy 'rã amboaxyxe va'e, xemboaxyxa rami areko 'rã amboaxy va'e ete'i", he'i va'ekue.*

¹⁶ Ha'e nunga rupi nhande ae jaipotaa rami e'ŷ 'rã nhandeporavo, nhande nhanhea'ãa re'ŷ guive, ha'e rã Nhanderuete ha'e ae nhanemboaxyxa rupi.

¹⁷ Mba'eta ipara oĩa py aipoe'i Faraó pe: "Po rami aguã ae romoĩ, ndee reikoa rupi xepo'akaa aexa uka aguã, yvy jave re xerery oikuaapaa aguã", he'i raka'e.*

* 9:5 Romanos 3.1,2 * 9:6 Romanos 2.25-29 * 9:7 Gênesis 21.12 * 9:9 Gênesis 18.10,14 * 9:12 Gênesis 25.23 * 9:13 Malaquias 1.2-3 * 9:14 Romanos 3.5-8; Mateus 20.1-16 * 9:15Êxodo 33.19 * 9:17 Êxodo 9.16

¹⁸ Ha'e rami vy Nhanderuete omboaxy 'rā omboaxyxe va'e, ha'e rā amboae kuery ma omoakā ratā 'rā, ha'e ae oipotaa rami oiko vy.

Nhanderuete opa mba'e re ipo'aka va'ea re ijayvua

¹⁹ Ha'e gui xapy'a rei ndee aipo're 'rā xevy: "Mba'e re tu ha'vy Nhanderuete jojou vai? Mava'e tu oiko 'rā ha'e oipotaa rami e'ŷ?" 're 'rā.

²⁰ Ha'e rami teī ndee ava, marā ramigua tu reiko Nhanderuete rembovai ete aguā? Mba'emo ryrurā ojapo pyre nda'u ijapoare pe: "Mba'e re tu guī rami ri xeapo?" he'i 'rā ri?*

²¹ Mba'eta nhae'ū gui mba'emo apoa ipo'aka 'rā yapo re, peteī apu'a gui mokoī ryru ojapo aguā: iporā va'e ryrurā, ha'e gui mba'emo rive ryrurā avi.

²² Mba'e ja'e 'rā tu ha'vy? Mba'eta xapy'a rei Nhanderuete opoxya ha'e opo'akaa oexa ukaxe vy ogueropo'aka are 'rā mba'emo ryru ojou vai pyrā, okanhy aguā rive oguereko pyre,

²³ ha'e rā mba'emo ryru hemimboaxy ikuai va'e re ma oexa uka 'rā guexakāa, yma ma voi guexakāa pygurarā oguereko katu rire.

²⁴ Ha'e va'e kuery ma nhande ae, mba'eta judeu regua anho e'ŷ, amboae regua voi nhanerenoī raka'e.

²⁵ Mba'eta Oséias ombopara va'ekue re aipoe'ia rami: "Xevyguia e'ŷ va'ekue pe 'Xevyguia ae' ha'e 'rā, ha'e xerembiaiyvu e'ŷ va'ekue pe 'Xerembiaiyvu ae' ha'e 'rā.

²⁶ Ha'e gui pendevy pe 'Xevyguia e'ŷ 'ea 'rāgue py 'Nhanderuete oikove va'e ra'y kuery 'ea 'rā", he'i raka'e.*

²⁷ Ha'e rā Israel kuery re ma Isaías ijayvu vy aipoe'i: "Israel kuery ma ye'ē rembe re ita ku'i ikuai va'e rami heta teī mbovy'i ete 'rā oo jepe.

²⁸ Mba'eta Senhor ojapopa vyvoi 'rā oayvuague yvy re",

²⁹ Isaías aipoe'i ma voiague rami: "Senhor Ixonitaro reta va'e nhaneramymminorā nomoingovei va'e rire Sodoma ha'e Gomorra pygua kuery rami avi 'rāgue nhakan-hymba."*

Israel kuery ndojeroviaia re ijayvua

³⁰ Mba'e ja'e 'rā tu ha'vy? Amboae regua kuery nonhemboeko porā uka potai va'ekue ri ojeroviaa rupi oupity nho teko porā.

³¹ Ha'e rā Israel kuery ma lei rupi teko porā re onhea'ā va'ekue ri ndoupityi.

³² Mba'e re nda'u ha'e kuery ndoupityi? Mba'eta ojeroviaa rupi e'ŷ oupityxe, ha'e kuery ae onhea'āa rupi rive. Ha'e rami vy onhepyxanga okuapy ita nhomonhepyxangaarā oī va'e re,

³³ ipara oīa rami: "Pendu ke, Sião py amoī 'rā peteī ita nhomonhepyxangaarā, joityarā. Ha'e rā hexe ojerovia va'e ma nda'eve e'ŷi nho 'rā."*

10

Nhanderuete guigua teko porā judeu kuery ojee nomoīxeia re ijayvua

¹ Irmāo kuery, xepy'a py aipota va'e, ha'e Nhanderuete pe judeu kuery re ajerure aikovya ma ha'e kuery oo jepe aguā.

² Mba'eta xee aikuua rā ha'e kuery anhetē ete onhea'ā okuapy Nhanderuete pe ojererovy'a ukaxe vy, teī oikuua rupi e'ŷ onhea'ā.

³ Mba'eta ndoikuua okuapy Nhanderuete guigua teko porā, ha'e rami vy ha'e kuery ae reko porāa rive oexa ukaxe vy nonhemo'yvyīxei Nhanderuete guigua ojee omoī aguā.

⁴ Mba'eta Cristo ma lei opaa, mba'eta hexe ojerovia va'e ma teko porā oguereko va'e meme.*

⁵ Ha'e gui Moisés ombopara raka'e: "Lei re teko porā oī va'e rupi amongue oiko ri vy oikove 'rā ha'e va'e re", he'i.*

* 9:20 Isaías 29.16, 45.9 * 9:26 Oséias 1.10, 2.23 * 9:29 Isaías 1.9, 10.22-23 * 9:33 Isaías 8.14, 28.16 * 10:4

Gálatas 3.24-27 * 10:5 Levítico 18.5

- ⁶ Ha'e rã ojeroviaa re teko porã oupity va'e re ma aipoe'i: “Eporandu eme ndepy'a py: ‘Mava'e tu oo 'rã yva re?’ 're eme.” (Pova'e ma “Yva gui Cristo ogueru aguã”, he'ia.)
⁷ “Neĩ ‘Mava'e tu oguejy 'rã vykyua vaikue py?’ 're eme guive.” (Pova'e ma “Cristo omanoague gui ogueru ju aguã”, he'ia.)
⁸ Ha'e rami 'rãgue py mba'e he'i tu? “Ndeyvy'iry ae ayvu oĩ, ndejuru py ha'e ndepy'a re”, he'i.* Ha'e va'e ayvu ma jajerovia aguã regua romombe'u va'e, po rami:
⁹ Ndejuru py Jesus Senhor oikoa rami ri remombe'u, ha'e ndepy'a py omanoague gui Nhanderuete omboete jevyague rerovia vy reo jepe 'rã.
¹⁰ Mba'eta nhandepy'a py jajerovia 'rã teko porã jaupity aguã, ha'e nhandejuru py ma nhanhemombe'u 'rã jaa jepe aguã.
¹¹ Ha'e nunga rupi ae ipara oiny: “Ha'e javive hexe ojerovia va'e nda'eve e'ŷi nho 'rã.”*
¹² Mba'eta judeu ha'e grego kuery joo rami ikuai, mba'eta peteĩ'i oiko pavẽ regua Senhor, ha'e opa mba'e py omboaxy 'rã ixupe ojapukai va'e ma guive rã,
¹³ “Ha'e javive Senhor rery rupi ojapukai va'e oo jepe 'rã” he'iague rami.*
¹⁴ Ha'e rami avi mba'exa 'rã tu ixupe amongue ojapukai, hexe ojerovia e'ŷ re? Ha'e mba'exa 'rã tu hexe ojerovia, ayvu oendu e'ŷ re? Ha'e mba'exa 'rã tu oendu, imombe'uarã ndoikoi rã?
¹⁵ Ha'e mba'exa 'rã tu amongue omombe'u, omondoukaa e'ŷ ramo? Mba'eta ipara oĩa rami: “Iporã ete ayvu porã mombe'ua kuery ou rã.”*

Israel kuery “Noroendui rima”, he'i aguã nda'eveia re ijayvua

- ¹⁶ Ha'e rami teĩ Israel kuery pavẽ e'ŷ onhe'ẽ rendu ayvu porã. Mba'eta Isaías aipoe'i: “Senhor, mava'e tu oguerovia oreayvu?” he'i va'ekue.*
¹⁷ Ha'e nunga rupi ayvu omombe'ua ramo mae 'rã jajerovia, ha'e ayvu omombe'u pyrã ma Cristo regua ae.
¹⁸ Ha'e rami teĩ aporandu ta: Israel kuery nda'u noendui ri? Ha'e kuery oendu ae, mba'eta anhetẽ “Yvy jave rupi ojapo ayvu oendupaa aguã rami. Ijayvua ma yvy apy rupi peve oenduka”, he'iague rami.
¹⁹ Aporanduve ju ta: Israel kuery pe ri nda'u ndoikuua ukai teri ayvu? Jypy'i Moisés pe aipoe'i uka raka'e: “Penderegua e'ŷ va'e kuery amboaxy vy ajapo 'rã penerakâte'ŷ aguã rami. Hi'arandu e'ŷ va'ekue araa jepe vy peẽ kuery rojapo 'rã penerakâte'ŷa pendu aguã rami”, he'i.*
²⁰ Ha'e gui Isaías ju okyje e'ŷa py aipoe'i: “Ajejou uka xereka e'ŷ va'ekue pe, xere oporandu e'ŷ va'ekue pe ajekuua uka”, he'i.
²¹ Ha'e rã Israel kuery pe ma aipoe'i: “Ára pukukue re akuave'ẽ teĩ xenhe'ẽ rendu e'ŷ ha'e xerovai ikuai va'e kuery aenoĩ vy.”*

11

Israel kuery reko re ijayvua

- ¹ Ha'e gui aporandu jevy ta: Nhanderuete nda'u oejapa ri guembiporavo kuery? Any, mba'eta xee voi Israel regua aiko, Abraão ramymino ha'e Benjamim kuery regua.
² Nhanderuete ma ndoeja rivei guembiporavo kuery yma ma voi oikuua va'ekue. Tyrã ndapeikuuaai teve ipara Elias ayvu oĩa? Ha'e va'e ma Nhanderuete renonde Israel kuery re ijayvu vy aipoe'i:
³ “Senhor, ha'e kuery ojuka ndevygua profeta kuery, ombovaipa guive ndevygua altar ikuai va'ekue. Xee ae'i aikove, ha'e xerekove avi oipe'axe okuapy”, he'i raka'e.
⁴ Ha'e gui mba'e he'i tu ombovai vy? “Ha'e rami avi xejeupagua areko teri sete mil avakue Baal renonde guenapay'ã re oĩ e'ŷ va'e”, he'i.*

* 10:8 Deuterônômio 30.12-14 * 10:11 Isaías 28.16 * 10:13 Joel 2.32, Romanos 1.16,17; Marcos 16.15,16 * 10:15
 Isaías 52.7 * 10:16 Isaías 53.1 * 10:18 Salmo 19.4, Romanos 1.19,20 * 10:19 Deuterônômio 32.21 * 10:21
 Isaías 65.1-2 * 11:4 1 Reis 19.10,14,18

⁵ Ha'ekue rami avi aŷ voi ikuai amongue ete'i omboaxya rupi oiporavo va'ekue.

⁶ Ha'e gui omboaxya rupi oiporavo vy ma ha'e kuery onhea'aa rupi e'ŷ Nhanderuete oiporavo. Ha'e rami e'ŷ va'e rire omboaxya rupi e'ŷ oiporavo 'rāgue.

⁷ Ha'e gui mba'e ja'e 'rā tu ha'vy? Israel kuery onhea'aa rupi teko porā oupityxe teĩ ndoupityi, oiporavo va'ekue anho oupity. Ha'e rā amboae kuery ma inhakā ratāmba,*

⁸ ipara oĩa rami: "Ha'e kuery py'a re Nhanderuete omoõ ndoikuaa potavei, hexa ma ojapo oexa e'ŷ aguã rami, ha'e ijapyxa ojapo oendu e'ŷ aguã rami aŷ peve", he'i.*

⁹ Davi aipoe'i avi: "Tove mesa py ha'e kuery ikuiaia pyve toiko monde pi ha'e nhuã rami, ha'e kuery onhepyxanga ha'e opaga aguã.

¹⁰ Ha'e kuery rexâ tapytūmba oexa ve'ŷ aguã, ha'e ta'ikupe karē riae", he'i va'ekue.*

Atos 13.46, 28.23-28; Efésios 2.11-22; Hebreus 3.14

¹¹ Ha'e gui aporandu ta: Israel kuery ho'a aguã ri nda'u onhepyxanga? Any. Ha'e rami avi ha'e kuery heko vai ramo amboae regua kuery oo jepe, Israel kuery ju hakâte'ŷa oendu aguã.

¹² Mba'eta Israel kuery heko vai ramo yvy regua kuery oupity okuapy iporā va'e, Israel kuery re iporā va'e noõ ramo amboae regua opa mba'e porā oupity. Ha'e gui ma Israel kuery oo jepe ramo katuve ma ikuai porā 'rā.

¹³ Aŷ peẽ amboae regua kuery pe ju xeayvu ta. Xee amboae regua kuery pegua apóstolo aiko vy arov'y a xerembiaporā va'e,

¹⁴ mba'eta ajapoxe xeretarā kuery voi ikuai avi aguã pendekuaia rami, ha'e kuery regua avi araa jepe uka aguã.

¹⁵ Mba'eta ha'e kuery ma Nhanderuete rembiayvu e'ŷ ikuai ramo yvy regua kuery peteĩ rami ju ikuai hexeve. Ha'e rami rire mba'e tu oiko 'rā guembiyvurā ju ogueru ramo? O manoague gui oikove ju va'e 'rā ikuai.

¹⁶ Mba'eta jypy'i mbojape oexy pyre iky'a e'ŷ va'e oĩ rire ma mbojape ha'e javi 'rā iky'a e'ŷ va'e avi optya. Yvyra rapo iky'a e'ŷ va'e oĩ rire hakâgue voi ha'e rami 'rā optya.*

¹⁷ Ha'e gui hakâgue ojaya raka'e, ha'e pende kuery ju oliveira iro va'e rami teĩ ha'e kuery mbyte penemboja, hapo ha'e oliveira rykue re peiko aguã.

¹⁸ Ha'e rami teĩ nda'evei hakâgue ae gui pejejou porâve aguã. Pejejou porâve ri vy peikuaa pota povâ'e re: peẽ e'ŷ hapo moingo porâa peiko, ha'e rā hapo rima penemoingo porâa oĩ.

¹⁹ Xapy'a rei aipopeje 'rā: "Hakâ ae ojaya raka'e ha'ekue py ore roõ aguã", peje.

²⁰ Ha'e rami teĩ ha'e kuery ndojeroviaia re ojaya, ha'e peẽ ma pejerovia ramo penemboja. Pejejou porâ eme, ha'e rami 'râgue py pemoõ pejererokyje aguã,

²¹ mba'eta hakâgue ae Nhanderuete ombopaga rire peẽ voi napenembopaga e'ŷi 'rā.

²² Peikuaa pota ke Nhanderuete porayvu ha'e nhombopaga va'ea re. Ho'a va'e kuery ma Nhanderuete ombopaga 'rā. Ha'e rā pendevy pe ma oexa uka 'rā oporayvua, hexe peĩ riae ramo. Ha'e rami e'ŷ ramo peẽ voi pendepe'a 'rā.

²³ Ha'e gui Israel kuery voi ojerovia e'ŷa gui ojeko rerova ramo omboja nho 'rā, mba'eta Nhanderuete ipo'aka omoõ ju aguã.

²⁴ Mba'eta oliveira iro va'e gui pendeaya vy pendereko ae rovai oliveira iporā va'e re penemboja rire hakâgue ae katuve ju 'rā omboja hi'y re.

Opaa py Nhanderuete nhomboaxypa aguã re ijayvua

²⁵ Mba'eta irmão kuery, aipota peikuaa povâ'e oikuua pyre e'ŷ teri, peẽ ae rive penhemô'arandu e'ŷ aguã. Mba'eta Israel kuery re ma amongue henda py oiko imoakâ ratâarâ, peẽ amboae regua kuery pejerovia va'erâ va'e ha'e javi pejeroviapa peve.*

²⁶ Ha'e va'e rire ma Israel kuery ha'e javive 'rā oo jepe, ipara oĩa rami: "Sião gui ou 'rā Jacó regua reraa jepearâ, ha'e kuery reko vaia oipe'apa 'rā.

* 11:7 Mateus 13.10-17 * 11:8 Deuterônômio 29.4, Isaías 29.10 * 11:10 Salmo 69.22-23 * 11:16 "Jypy'i mbojape oexy pyre" ha'e "Yvyra rapo" he'ia ma judeu ypy kuery re ijayvu vy. * 11:25 Lucas 21.24; João 10.16; Mateus 23.37-39

²⁷ Po rami 'rā ha'e kuery pe ajapo xereve guarā, ojejavyague aipe'a vy", he'i.*

²⁸ Ayvu porā ha'e kuery ndogueroviai vy Nhanderuete rovaigua ranhe ikuai, peē kuery peo jepe aguā. Ha'e rami avi Nhanderuete oiporavoague rami vy hembiayvu guive ikuai, oreramoī kuery pe ijayvuague rami vy.

²⁹ Mba'eta Nhanderuete joupe mba'emo ome'ēa ha'e oenoīague ma oaxa rive va'erā e'ŷ.

³⁰ Mba'eta peē kuery minha ymave Nhanderuete napenhe'ē rendui va'ekue ri aŷ ma ha'e kuery nonhe'ē rendui ramo peupity Nhanderuete penemboaxya.

³¹ Ha'e gui aŷ ma ha'e kuery ju nonhe'ē rendui, ha'e kuery voi Nhanderuete penemboaxya oexa vy omboaxya oupity avi aguā.

³² Mba'eta Nhanderuete nhanembotypa ranhe nhanhe'ē rendu e'ŷa py, ha'e gui nhanemboaxypa ju aguā.

Nhanderuete 'arandua re ijayvua

³³ Opa mba'e py Nhanderuete 'arandua ha'e oikuaapaa ma opa va'erā e'ŷ. Mba'eta ipy'aa ma ndajaikuai ae, heko re voi ndajaikuua pota kuaai.*

³⁴ Mba'eta mava'e tu oikuaa Senhor ipy'aa? Mava'e tu imongetaarā oiko?*

³⁵ Mava'e ranhe tu mba'emo ome'ē ixupe, hekivia ojopy aguā?*

³⁶ Mba'eta ixugui ae opa mba'e oiko raka'e, ipo guigua ha'e ixupe guarā meme ikuai. Tove ha'e anho toguerovy'aa raka'e rā peve opa e'ŷ re. Amém.

12

Teko pyau re ijayvua

¹ Ha'e nunga rupi irmão kuery, Nhanderuete nhanemboaxy ramo aipoa'e: Mymba pejuka 'rāgue py penderete ae peme'ē ixupe, ome'ēmbry oikove ha'e iky'a e'ŷ va'e Nhanderuete ojou porā va'erā. Ha'e rami vy 'rā pendepy'a py pembojerovia.

² Ha'e rami vy penhemingo ukave eme yyv regua kuery reko rami. Ha'e rami 'rāgue py pejeko rerova pendepy'aa pembopyau uka vy, Nhanderuete oipota va'e pejapo kuaa aguā. Ha'e va'e ma iporā ha'e ha'evea ramigua meme. Ha'e rami pendekuai ramo pendejou porā 'rā.*

Nhe'ē guigua ome'ēmbry rupi jaikoa re ijayvua

³ Mba'eta Nhanderuete xemboaxyague rupi aipoa'e peē kuery peteī-teī pe: Pejejou porā rei eme, ha'evea rami meme peikuaa pota penderekō re, mba'eta jajeroviaa rupi joo rami e'ŷ-e'ŷ nhamba'eapo aguā Nhanderuete ome'ē peteī-teī pe.

⁴ Mba'eta peteī'i tete re minha mbovy rei e'ŷ hexegua ikuai, ha'e joo ramigua e'ŷ-e'ŷ oguerekō guembiaporā.

⁵ Ha'e rami ae avi nhande kuery voi, mbovy e'ŷ nhandekuai va'eri Cristo re vy peteī'i tete jaiko, ha'e peteī-teī joupegua nhandekuai.

⁶ Ha'e rami avi nhancerembiaporā joo ramigua e'ŷ-e'ŷ jareko nhanemboaxy rupi ome'ē va'ekue.* Xapy'a rei Nhe'ē guigua nhamombe'u aguā ri jajopy vy jajeroviaa rupi 'rā nhamombe'u.

⁷ Ha'e rami e'ŷ vy nhanhopytyvō aguā ri jajopy vy nhanhopytyvōa rupi nhanhea'ā ete 'rā. Nhombo'e va'e ma tonhea'ā ha'e rami aguā.

⁸ Nhombopy'a guaxu va'e ma tonhea'ā nhombopy'a guaxua rupi. Joupe mba'emo ome'ē va'e ma hakāte'ŷ rei ve'ŷ re tome'ē. Joe opena va'e ma oikuaa pota porā reve topena. Nhomboaxy rupi nhopytyvōa ma ov'y'a reve tojapo.

Ha'evea ramigua anho jajapo aguā re ijayvua

⁹ Pejoayvu merami rive eme. Pejepe'a ha'eve'ŷ va'e gui, ha'evea ramigua anho pejapo.*

* 11:27 Isaías 27.9 * 11:33 1 Coríntios 2.9,16 * 11:34 Isaías 40.13 * 11:35 Jó 41.11 * 12:2 1 Coríntios 6.20; Filipenses 4.8,9 * 12:6 1 Coríntios 12.1-11; Efésios 4.11-16; 1 Pedro 4.10,11 * 12:9 Efésios 4.25-5.2; 1 Pedro 3.8-12

- ¹⁰ Pejoayvu ete ke peteĩ-teĩ, joegua meme'i joayvua rami. Peteĩ-teĩ penhomboetea rupi pendekuai.
- ¹¹ Peneate'ŷ eme pemba'eapoa py. Senhor pe pendekuaia py penekyre'ŷ penenhe'ẽ ha'e javi py.
- ¹² Pevy'a ke pearõa py. Pendekuerai eme peiko axya py. Pejepe'a eme pejerurea gui.
- ¹³ Pemboja'o ke mba'emo iky'a e'ŷ va'e iporiaukue'i pe. Penhomovaẽ kuaa ke.
- ¹⁴ Peroayvu porã pendere opu'ã rei va'e kuery. Pendeayvu vai eme, peroayvu porã anho.
- ¹⁵ Pevy'a ke ov'y'a va'e kuery reve, ha'e rã ojae'o va'e reve ma pejae'o.
- ¹⁶ Peteĩ rami meme pendekuai. Penhemboyvate rei 'rãgue py penhemoirũ yvyigueve'i re. Pendejeupe ae "Xe'arandu" peje eme.
- ¹⁷ Pendevy ojapo vaia rã peẽ pejapo vai eme. Penhea'ã pavẽ oexaa py ha'evea ramigua anho pejapo aguã re.
- ¹⁸ Ha'evea ja pendekuai porã'i 'rã ha'e javive reve.
- ¹⁹ Xerembiayvu kuery, pejepy eme. Ha'e rami 'rãgue py pemboaxa nhombopagaarã pe. Mba'eta ipara oiny: "Xee anhombopaga 'rã, xee amboekovia 'rã", he'i Senhor.*
- ²⁰ Ha'e rami 'rãgue py pendere ija'e e'ŷ va'e okaruxe ramo peme'ẽ ho'u va'erã. Ijy'uvei ramo peme'ẽ oy'u aguã. Mba'eta ha'e rami vy 'rã rejapo inhakã áry tapyi hexakã va'e ramigua oendu aguã rami.
- ²¹ Pejeity uka eme teko vai pe. Ha'e rami 'rãgue py peẽ ma teko vai re pendepo'aka 'rã iporã va'e pejapo vy.*

13

Huvixa kuery nhanhe'ẽ rendu aguã re ijayvua

- ¹ Ha'e javive penhe'ẽ rendu huvixa kuery, mba'eta joe opena va'e kuery ma Nhanderuete ombopo'aka ramo opena. Huvixa ikuai va'e ma Nhanderuete omoi uka va'ekue meme.*
- ² Ha'e rami vy huvixa kuery re opu'ã rei va'e ma Nhanderuete omoi va'ekue re ae opu'ã. Ha'e nunga rupi joe opu'ã rei va'e ma ha'e kuery ae opaga aguã rami ojapo.
- ³ Mba'eta huvixa kuery ma heko porã va'e okyje aguã e'ŷ oĩ, ha'e rã heko vai va'e okyje aguã. Pendekuaixe pa huvixa kuery gui pekyje reia rupi e'ŷ? Penderekko porã ha'vy. Ha'e rami rã pendejou porã 'rã.
- ⁴ Mba'eta huvixa kuery ma Nhanderuete guembiguairã omoi va'ekue nhandere opena porã aguã. Xapy'a rei pejapo vai vy pekyje 'rãe, mba'eta huvixa kuery rive'ŷ oguereko kyxe. Nhanderuete rembiguai ikuai joepyarã, ha'e ojapo vai va'e mbopagaarã.
- ⁵ Ha'e rami vy penhe'ẽ rendu 'rãe, penembopaga aguã gui pekyje vy anho e'ŷ, ha'evea rami pendekuai aguã guive.
- ⁶ Ha'e nunga rupi ae imposto re pepaga, mba'eta huvixa kuery Nhanderuete rembiguai ikuai ha'e nunga re opena va'ety.
- ⁷ Pavẽ pe pemboekovia perevea: huvixa pe ri pepaga aguã oĩ ramo pepaga, imposto re ri pereve vy peme'ẽ, pemboete va'erã ma pemboete 'rã, ha'e pembojerovia va'erã ma pembojerovia 'rã.

Porayvu va'e lei ojapopaa re ijayvua

- ⁸ Avave rei pe pereve riae eme mba'emo re, pejoayvu aguã re anho. Mba'eta joayvu va'e ma lei re oĩa ha'e javi ojapopa.*
- ⁹ Mba'eta po rami oĩ: "Ndetavy rei eme, ejojuka eme, nemonda eme, emoaruã eme." Ha'e nunga ha'e javi, ojapo uka pyre mboae ikuai va'e avi ma pova'e ayvu re oĩ: "Reayvu 'rã neirũ ndee ae rejeayvua rami."*

* 12:19 Deuteronomio 32.35 * 12:21 Proverbios 25.21-22 * 13:1 Mateus 22.21; Tito 3.1; 1 Pedro 2.13-17 * 13:8 Mateus 22.39,40; Gálatas 5.13-15; 1 João 3.11-18 * 13:9 Éxodo 20.13-17, Levítico 19.18, Deuteronomio 5.17-21

¹⁰ Porayvu va'e ma ndojapo vai 'rā oirū pe. Ha'e nunga rupi porayvu va'e ojapopa 'rā lei re oī va'e ae.

“Ára ovaē rai'i ma”, he'iague

¹¹ Aŷ peẽ kuery mba'emo oiko va'e re peikuaa pota kuaa va'e pe xeayvu: Ovaē ma pekeague gui pemyī aguā, mba'eta aŷ ma jaa jepe aguā ára ovaē rai'ive ma jajerovia ypyague gui.

¹² Pytū oaxapa rai'i ma, ovaē ma ouvy ára.* Ha'e nunga rupi jajepe'a 'rā pytū rupi jaikoague gui, ha'e jaraa hendy va'e rembiporu.

¹³ Ha'evea rami pota 'rā nhandekuai ara py rami. Nda'evei opa marā rei ikuai ha'e oka'u va'e rami nhandekuai aguā, itavy rei ha'e ha'eve e'ŷa rami, neī joguero'a rei ha'e omoaruā reia rupi nda'evei.

¹⁴ Ha'e rami 'rāgue py penhemonde Senhor Jesus Cristo py, ha'e peteīve henda py pemoī eme to'o oipota va'e.

14

Ojeroviaa py ikangy va'e jaropo'aka aguā re ijayvua

¹ Pemovaē ojeroviaa py teri ikangy va'e, ha'e kuery oikuua va'e re pejoguero'a e'ŷ re.

² Mba'eta amongue oikuua rā opa mba'e nunga ja'u aguā ha'eve. Ha'e rā ikangy va'e ma mba'emo aju anho 'rā ho'u.

³ Ho'upa rei va'e ma tojou vai eme ho'upa rei e'ŷ va'e, ha'e ho'upa rei e'ŷ va'e avi tojou vai eme ho'upa rei va'e, mba'eta Nhanderuete omovaē ma mokoīve.*

⁴ Tyrā marā ramigua tu ndee reiko nhoembiguai re reikuua pota rei aguā? Mba'eta guerekoa pe ae oiko, ojou porā, e'ŷ vy ndojou porāia rupi. Ha'e rami avi Senhor ojou porā 'rā, mba'eta ipo'aka omombaraete aguā.

⁵ Amongueomboeteve 'rā amongue ára amboae gui, ha'e rā amboae ma joo ramigua memea oikuua ára nhavō. Peteī-teī toikuua porā ha'e kuery ae o'arandua rupi.

⁶ Amongue ára omboeteve va'e ma Senhor pe ae omboete, ha'e ho'upa rei va'e voi Senhor pe ae ho'u, mba'eta Nhanderuete oguerovy'a reve okaru. Ha'e ho'upa rei e'ŷ va'e voi Senhor pe avi ndo'upa rei, mba'eta ha'e voi oguerovy'a 'rā Nhanderuete.

⁷ Mba'eta peteīve nhandejeupe ae e'ŷ jaiko, ha'e nhandejeupe ae e'ŷ guive nhamano.

⁸ Mba'eta jaikove vy ma Senhor pe jaiko, ha'e nhamano vy Senhor pe ae ju 'rā nhamano. Jaikove e'ŷ vy nhamano teī Senhor pegua meme nhandekuai.

⁹ Ha'e rami aguā ae Cristo omano ha'e onhemboete ju raka'e, omano va'ekue ha'e okuave va'e ha'e javi Senhor oiko aguā.

¹⁰ Ha'e nunga rupi ndee, mba'e re tu reikuua pota rei ri nde-irmāo re? Ha'vy ndee, mba'e re tu rejou vai nde-irmāo? Mba'eta Nhanderuete nhomboayvu aguā py ha'e javive 'rā jajexa uka henonde,

¹¹ ipara oīa rami: “Senhor aipoe'i: ‘Xee ae rekove rupi aura vy aipoa'e: Xerenonde pavē 'rā oī guenapy'ā re, pavē 'rā ojuru py omboete Nhanderuete’, he'i.”*

¹² Ha'e rami vy peteī-teī nhanhemombe'u 'rā Nhanderuete pe.

Peteī-teī jaikuua rami jaiko teī jajoayvu aguā re ijayvua

¹³ Ha'e nunga rupi jajojou vai reive eme. Ha'e rami 'rāgue py penhea'ā pende-irmāo kuery pemonhepyxanga ha'e peity e'ŷ aguā.*

¹⁴ Xee ma Senhor Jesus gui aikuua porā: Mba'eve jipoi ha'e nunga ae nhanemboeko ky'a va'erā. Ha'e rami avi mba'emo pe amongue “Xemboeko ky'aarā” he'i ramo ha'e kuery pe ma imboeko ky'aarā ae oī.

¹⁵ Ha'e nunga rupi mba'emo re'u va'e káuxa nde-irmāo kuery remomboriau vy mborayvu rupi e'ŷ reiko. Ha'e kuery re Cristo omano rire nda'evei tembi'u káuxa rive rejoapo aguā okanhy aguā rami.

* 13:12 Efésios 5.14-18 * 14:3 Mateus 7.1-5; 1 Coríntios 10.23-33 * 14:11 Isaías 45.23 * 14:13 1 Coríntios 8.9-13

¹⁶ Ha'e rami avi ndejeupe ae rā ha'evea rami reiko teī nda'evei amboae kuery ndejou vai aguā rami reiko aguā.

¹⁷ Mba'eta Nhanderuete po'akaa py ma ja'u ha'e jay'u va'e re rive'ŷ nhanhea'ā, ha'e rā Nhe'ē Ky'a E'ŷ guigua tekō porā, mby'a porā ha'e javy'aa re.

¹⁸ Mba'eta ha'e va'e rupi Cristo pe ikuai va'e ma ombovy'a 'rā Nhanderuete, ha'e avakue voi ojou porā 'rā.

¹⁹ Ha'e nunga rupi peteī rami pota 'rā nhandekuai nhanhomombaraetea rupi.

²⁰ Tembi'u káuxa rive pembovaipa eme Nhanderuete rembiapo. Opa marāgua tembi'u anhetē nanhanemboeko ky'ai va'erā meme. Ha'e rami teī tembi'u pe "Xemboeko ky'aarā" he'i reve ho'u va'e pe ma nda'evei.

²¹ Ha'eve xo'o ja'u e'ŷ, vinho jay'u e'ŷ, ha'e mba'eve rei jajapo e'ŷ aguā nhande-irmāo kuery reityarā regua, [e'ŷ vy imomboriauarā, e'ŷ vy imokangyarā regua.]

²² Ha'e nunga ha'evea rami reroviaa ma ndepy'a py ae ereko Nhanderuete renonde. Ovy'a ete 'rā gueko ae ojou vai e'ŷ va'e.

²³ Ha'e rā amongue ojeroviaa rupi e'ŷ mba'emo ho'u va'e ma ojou vai pyrā ikuai, ojeroviaa rupi e'ŷ ikuai vy. Mba'eta jajeroviaa rupi e'ŷ ri nhandekuai vy jajejav.

15

Cristo rami mborayvu rupi jaiko aguā re ijayvua

¹ Ha'e gui nhande nhanembaraekeve va'e ma jaropo'aka 'rā ikangy teri va'e ikuiaia, nhande ae jaipota va'e rive jajapo 'rāgue py.

² Peteī-teī nhandekuai amboae kuery oipota va'e rupi, iporā va'e anho jajapo nhomombaraetearā.*

³ Mba'eta Cristo voi ha'e ae oipota va'e rupi e'ŷ oiko raka'e. Ha'e rami 'rāgue py hexe oiko ipara oĩa rami: "Ndere ijayvu rei okuapya ma xere ae ou", he'iague rami.*

⁴ Mba'eta yma ombopara pyre ma Nhanderuete nhanembo'e aguā meme ombopara uka, ipara oĩa re nhaĩ atā ha'e nhandepy'a guaxu vy jajeroviaa rupi nharō jaikovy aguā.

⁵ Ha'e gui Nhanderuete nhanemoĩ atāa ha'e nhanembopy'a guaxua va'e ma peẽ voi tapendeapo peteī rami meme peikuua aguā rami, Cristo Jesus rami ete,

⁶ ha'e rami vy peteī rami pendepy'a, ha'e peteī'i rami ae peporaei aguā Nhanderuete, nhande-Senhor Jesus Cristo Ru va'e pe.

⁷ Ha'e nunga rupi nhanhomovaẽ peteī-teī, Cristo nhanemovaẽmbaague rami ae, Nhanderuete oguerovy'aa aguā rami.

⁸ Mba'eta aipoa'e pendevy: Nhanderuete omoĩ Cristo judeu kuery pe oikuua uka aguā anhetē rupi meme oikoa, ojapo aguā oreramoĩ kuery pe ijayvague ojeupitypa aguā rami,

⁹ ha'e gui amboae regua kuery voi Nhanderuete oguerovy'a okuapy aguā omboaxyia re, ipara oĩa rami: "Ha'e nunga rupi amboae regua kuery mbyte xee roguerovy'a vy aporaei 'rā nderery amboetea rupi."*

¹⁰ Aipoe'i avi: "Peẽ amboae regua kuery, pevy'a avi ke ixupequa kuery reve."*

¹¹ Aipoe'ive ju: "Peẽ amboae regua kuery ha'e javi, pemboete ke Senhor. Ha'e javi regua tomboete okuapy."*

¹² Isaías aipoe'i avi: "Peteī henhoĩ'i 'rā Jessé rapokue gui, amboae regua kuery re opena va'erā. Ha'e va'e re vy ha'e kuery oguerekō 'rā oarō aguā."*

¹³ Nharō jaikovy aguā Nhanderuete ome'ẽ va'e vy tove pendere tomoĩ pevy'aa ha'e mby'a porā anho, Nhe'ē Ky'a E'ŷ po'akaa rupi pearō peikovy aguā opa mba'e py.

Paulo gueko omombe'u porāveague

¹⁴ Ha'e gui irmāo kuery, xee aikuua ae peẽ kuery re mborayvu ha'e 'arandua ha'e javi oĩa, joo meme penhomongeta kuaa aguā rami.

* 15:2 1 Coríntios 10.24; Filipenses 2.3-5 * 15:3 Salmo 69.9 * 15:9 2 Samuel 22.50, Salmo 18.49 * 15:10 Deuteronômio 32.43 * 15:11 Salmo 117.1 * 15:12 "Jessé rapo guigua" he'ia ma Jesus Cristo re ijayvu vy (Isaías 11.10).

¹⁵ Ha'e rami avi mba'emo amombe'u porãa rupi kova'e kuaxia ambopara pendevy, peteïgue ju ha'e nunga re romoma'endu'a aguã, Nhanderuete xemboaxy vy xemoïague rami vy.

¹⁶ Mba'eta xemoï karamboae amboae regua kuery ikuia rupi Cristo Jesus pe amba'eapo aguã, mba'eta sacerdote rami amba'eapo Nhanderuete guigua ayvu porã amombe'ua rupi. Ha'e rami rã Nhe'ẽ Ky'a E'ŷ ha'e kuery oiky'a'o rire Nhanderuete pe ome'ẽmby rami amboaxa aguã, oguerovy'a va'erã.*

¹⁷ Ha'e nunga rupi xee voi Nhanderuete pe amba'eapo aikovya rupi areko Cristo Jesus re vy arov'y'a aguã.

¹⁸ Ha'e rami avi mba'eve ndarovy'ai 'rã xepo rupi Cristo ae ojapo va'ekue e'ŷ vy. Mba'eta xeayvu ha'e mba'emo ajapoa py Cristo ojapo amboae regua kuery onhe'ẽ rendu aguã rami,

¹⁹ Nhe'ẽ Ky'a E'ŷ po'akaa rupi hexa pyrã ha'e nhomondyipaarã ajapoa py. Ha'e rami vy Jerusalém katy'i rupi guive Ilírico yvy peve amombe'u ma Cristo regua ayvu porã.

²⁰ Ha'e rami avi xee anhea'ã aikov Cristo regua ayvu ndoikuai teria rupi ju amombe'u aguã, amboae kuery omboypy ma voiague rupi e'ŷ amba'eapo aguã.

²¹ Mba'eta ipara oĩa rami: "Ha'e kuery pe omombe'u pyre e'ŷ 'rã oexa okuapy, ha'e oendu va'ekue'ŷ 'rã oikuaapa guive", he'ia rami aiko.*

Paulo oguata aguã re ijayvuague

²² Ha'e nunga rupi ae mbovykue rei e'ŷ xee roipoux tei nda'evei teri.

²³ Ha'e rã aŷ ma ha'ekue rupi amba'eapo aguã jipovei ramo, ha'e peẽ kuery roexaxe ete vy

²⁴ xepy'a Espanha katy aguata vy roipou aguã re. Ha'e rami vy aguata avya rupi avaẽ 'rã peẽ kuerya py, pendekuaia gui peẽ kuery ju xemondoukave aguã aaxeia katy, peẽ kuery reve xapy'a'i ri jepe aiko ranhe rire.

²⁵ Ha'e gui aŷ ma Jerusalém katy aa iky'a e'ŷ va'e kuery aipytyvõ aguã.

²⁶ Mba'eta Macedônia ha'e Acaia pygua kuery ma omboaxy rupi peráta omono'õ Jerusalém pygua kuery iky'a e'ŷ va'e iporiaukue'i oipytyvõ aguã.*

²⁷ Ha'e rami ha'e kuery ojapoxe ete okuapy, "Judeu kuery pe jareve" he'i vy. Mba'eta judeu kuery gui amboae regua kuery Nhe'ẽ guigua ojopy rire ha'evea rami oipytyvõ mba'emo py.

²⁸ Ha'e gui ha'e kuery pe ha'e nungakue araapa ma rire peẽ kuerya py ju 'rã avaẽ Espanha katy aguata avy vy.

²⁹ Xee aikuua porã peẽ kuerya py aru 'rãa Cristo guigua opa mba'e py penemoingo porãarã.

Ha'e kuery onhembo'e aguã re Paulo ojerureague

³⁰ Ha'e gui irmão kuery, po rami ajerure nhande-Senhor rery rupi, Nhe'ẽ guigua mborayvu rupi guive: Penhea'ã xereve Nhanderuete xepytyvõ aguã re pejerure vy,

³¹ aa jepe aguã Judéia pygua kuery onhe'ẽ rendu e'ŷ va'eia gui, ha'e Jerusalém pygua iky'a e'ŷ va'e kuery pegua araa rã ha'e kuery ojou porã aguã,

³² ha'e gui Nhanderuete oipotaa rami roipou vy avy'a reve avaẽ aguã peẽ kuerya py, jojavi japytu'u vy javy'a aguã.*

³³ Nhanderuete peteï rami nhanemoingo va'e toiko peẽ kuery ha'e javi reve. Amém.

16

Paulo Febe omovaẽ ukaague

¹ Tamombe'u nhanereindy Febe, mba'eta Cencréia pygua igreja kuery oipytyvõ va'ety oiko.

* 15:16 Efésios 3:1-9 * 15:21 Isaías 52.15 * 15:26 1 Coríntios 16.1-4 * 15:32 Atos 28.15

² Ha'e nunga rupi pemovaẽ porã Senhor rery rupi, iky'a e'ŷ va'e kuery nhamovaẽa rami ae. Peipytyvõ ke oipota va'e ha'e javi py, mba'eta heta re ma opena porã'i va'ekue, xere voi.

Oirũ kuery pe oxaruraague

³ Pemombe'u ke xema'endu'aa Priscila ha'e Áqüila pe, mba'eta Cristo Jesus pe amba'eapoa rupi xepytyvõ va'ety ikuai.

⁴ Ha'e va'e kuery ma ndojeayvuveikue py ikuai karamboae xere. Ha'e nungakue re arov'y'a, ha'e xee anho e'ŷ guive, amboae regua igreja kuery ha'e javi avi.*

⁵ Pemombe'u avi xema'endu'aa ha'e kuery ro py igreja kuery onhemboaty va'e pe. Pemombe'u avi xerembiayvu Epêneto pe. Ha'e va'e ma jypy'i Ásia pygua ojeko me'ẽ raka'e Cristo pe.

⁶ Pemombe'u avi Maria peẽ kuery re vy ombo'eapo vaipa va'ety pe.

⁷ Pemombe'u avi xeretarã kuery Andrônico ha'e Júnias nhuã py aĩ rã xemoirũ va'ekue pe. Ha'e va'e kuery ma apóstolo regua ima'endu'a porãmby ikuai. Xegui ha'e kuery ranhe Cristo pe ikuai raka'e.

⁸ Pemombe'u Ampliato pe voi, Senhor re vy ayvu va'e rã.

⁹ Pemombe'u xereve Cristo pe ombo'eapo oikovy va'e Urbano pe, ha'e xerembiayvu Estáquis pe guive.

¹⁰ Pemombe'u Cristo pegua ojou porãmby Apeles pe. Pemombe'u avi Aristóbulo ro pygua kuery pe.

¹¹ Pemombe'u xeretarã Herodião pe. Pemombe'u avi Narciso ro pygua kuery Senhor re ikuai va'e pe.

¹² Pemombe'u Trifena ha'e Trifosa pe. Ha'e va'e kuery ma Senhor pe ombo'eapo va'ety. Pemombe'u xerembiayvu Pérsida Senhor pe ombo'eapo vaipa avi va'ety pe.

¹³ Pemombe'u Senhor ojeupe guarã oiporavo va'ekue Rufo pe, ixy pe guive, mba'eta ha'i rami ae xere voi opena karamboae.

¹⁴ Pemombe'u Asíncrito, Flegonte, Hermes, Pátroras ha'e Hermas pe, ha'e gui irmão kuery ha'e kuerya py onhemboaty va'e pe.

¹⁵ Pemombe'u Filólogo ha'e Júlia pe, Nereu ha'e heindy pe, Olimpas, ha'e iky'a e'ŷ va'e kuery ha'e kuerya py onhemboaty va'e ha'e javi pe.

¹⁶ Pexarura joupe-upé iky'a e'ŷ va'e kuery joayvua rami. Cristo pegua igreja ikuai va'e ha'e javi pygua omombe'u uka okuapy pendevy oxaruraa.

Nhomonetaague

¹⁷ Ha'e gui irmão kuery, ajerure peikuaa pota porã aguã amongue penembo'egue rami e'ŷ, peteĩ rami e'ŷ penemoingoxe vy pendereityxe va'e kuery re. Pejepe'a ha'e kuerya gui,

¹⁸ mba'eta nhande-Senhor Cristo pe'ŷ ombo'eapo va'e, ojeupe guarã re anho onhea'ã. Ha'e rami vy ijayvu porã'i ha'e joguerory merami rive vy ombotavy 'rã onheangu e'ŷ va'e kuery kuraxõ.*

¹⁹ Ha'e rã peẽ kuery penhe'ẽ rendua ma pavẽ oikuaa. Xee voi roguerovy'a avi ha'e rami pendekuaia re. Ha'e rami avi aipota pene'arandu iporã va'e peikuaa aguã, ha'e rã mba'emo vai re ma peikuaa pota eme.

²⁰ Ha'e ramo Nhanderuete mby'a porã me'ëa va'e ma are'ŷ re 'rã omoï Satanás pendepy guýry. Pendere toï riae nhande-Senhor Jesus nhanemboaxya.

Irũ kuery oxarura ukaague

²¹ Xepytyvõa Timóteo oxarura uka pendevy, ha'e gui xeretarã kuery Lúcio, Jasom ha'e Sosípatro guive.

²² Xee Tercio kova'e kuaxia ambopara va'e voi pendevy axarura avi Senhor rery rupi.

* 16:4 Atos 18.1-3,18,26 * 16:18 Mateus 7.15-20; 1 João 3.10, 4.1-6; Efésios 5.6,7

²³ Xemovaẽ porã va'ety Gaio oxarura uka avi pendevy. Ha'e va'e ma igreja kuery ha'e javi omovaẽ va'ety. Tetã pygua peráta re opena va'ety Erasto ha'e irmão Quarto oxarura uka avi pendevy.

²⁴ [Peẽ kuery ha'e javive re toĩ riae nhande-Senhor Jesus Cristo nhanemboaxy. Amém.]

Opaa py ijayvuague

²⁵ Nhanderuete opo'akaa rupi penemombaraete 'rã Jesus Cristo regua ayvu porã amombe'u aikovy va'e rami vy. Ha'e va'e ayvu ma oikuua e'ŷ pyre, yma voi ndoikuua ukai va'ekue.

²⁶ Ha'e gui aŷ ma oikuua uka vy profeta kuery pe ombopara uka, Nhanderuete imarã e'ŷ va'e ojapo ukaague rami vy, ha'e javi regua ojerovia vy onhe'ẽ rendu aguã.

²⁷ Nhanderuete peteĩ'i oiko ha'e hi'arandupa va'e tomboetepaa Jesus Cristo rupi, raka'e rã peve ete. Amém.

Jypy'i Corinto pygua kuery pe Paulo ombopara va'ekue Jypy'i Corinto pygua kuery pe Paulo ombopara va'ekue

Corinto ma tetā guaxu, aŷ Grécia yvy re oĩ va'e. Ha'e py Jesus Cristo pegua igreja oĩ va'e ma apóstolo Paulo ae omboypy va'ekue. Ha'e va'e rire ndovy'ai ha'e kuery joo rami e'ŷ-e'ŷ ikuia omombe'ua rã oendu vy. Ha'e rami vy ombopara vy aipoe'i: “Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ŷ-e'ŷ pendekuai eme. Joo'i rami meme pendekuai, joo rami peikuaa ha'e joo rami meme pene'arandu” (1.10).

Ha'e kuery mbyte py oiko avi itavy rei va'e. Ha'e va'e reko apóstolo Paulo ndojou porāi vy nomovaẽ ukavei ranhe. Omoneta avi omenda va'e kuery reko re. Ombo'e Nhe'ẽ po'akaa rupi peteĩ-tei nhanhopytyvõa re, ha'e Jesus omanoague gui onhemboete ju rire nhande voi jaikove jevy aguã re. “Ha'e nunga rupi xerembiayvu irmão kuery, pei atā tema, pejeity uka eme, Senhor pe pemba'eapoa rupi penekyre'ŷ riae guive, mba'eta jaikuua Senhor re vy nhamba'eapoa ndoaxa rivei 'rãa” (15.58).

Oxarura reve ijayvu vy omboypyague

¹ Xee Paulo ma Jesus Cristo pegua apóstolo-rã Nhanderuete oipotaa rami vy xerenoĩ va'ekue. Irmão Sóstenes reve

² roxarura Nhanderuete pegua igreja kuery Corinto tetā py pendekuai va'e pe.* Peẽ kuery voi Cristo Jesus re vy pendeky'a'oa ha'e iky'a e'ŷ va'erã penerenoĩa, nhande-Senhor Jesus Cristo rery rupi opa rupi ojapukai va'e ha'e javi reve. Mba'eta ha'e kuery pegua Senhor avi oiko, nhande-Senhor oikoa rami.

³ Tove pendere toĩ penemboaxyha ha'e mby'a porā Nhanderuete ha'e Senhor Jesus Cristo guigua.

Oguerovy'aague

⁴ Peẽ kuery re arov'y'a riae [Xe]ruete, mba'eta Cristo Jesus re penemoĩ vy penemboaxy ramo.

⁵ Mba'eta ha'e va'e re vy mba'emo porā opa marāgua ome'ẽ pêvy, pendeayvurā ha'e pene'arandurā ha'e javi guive,

⁶ mba'eta pendekuaia re Cristo regua ayvu ojekuaa anhetẽ va'e.

⁷ Mba'eta nhande-Senhor Jesus Cristo ojekuaa aguã pearõ rã pendevy pe opa marāgua Nhe'ẽ guigua ome'ẽ rãndoatai peteĩve henda py.

⁸ Opa peve penemombaraete 'rã guive, nhande-Senhor Jesus Cristo ára py opa mba'e py heko porā va'e pejexa uka aguã.

⁹ Nhanderuete penerenoĩ gua'y Jesus Cristo nhande-Senhor reve peteĩ rami pendekuai aguã. Ha'e rire ojeroviapy 'rã oiko.

Peteĩ rami ikuai aguã re ijayvua

¹⁰ Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ŷ-e'ŷ pendekuai eme. Joo'i rami meme pendekuai, joo rami peikuaa ha'e joo rami meme pene'arandu.*

¹¹ Mba'eta irmão kuery, Cloe ro pygua kuery omombe'u rã aendu karamboae joo rami e'ŷ-e'ŷ peikuaa.

¹² Mba'eta peteĩ-tei aipopeje: “Xee ma Paulo pegua” e'ŷ vy “Xee ma Apolo pegua”, “Xee ma Cefas pegua” e'ŷ vy “Xee ma Cristo pegua”, peje.

¹³ Cristo nda'u onhemboja'opa ri? Xee Paulo nda'u penderekovia kuruxu re xemoĩa va'ekue? Tyrã pa xerery rupi penhemongarai? Any.

* 1:2 Atos 18.1-17 * 1:10 Romanos 15.5,6; Efésios 4.1-6; Filipenses 2.1-4

¹⁴ Arov'y'a [Nhanderuete] mba'eta peẽ kuery regua peteĩve xee namongarai, Crispo ha'e Gaio e'ŷ vy,

¹⁵ avave rei xerery rupi penhemongaraiague rami penhemombe'u e'ŷ aguã.

¹⁶ Amongarai avi Estéfanas ro pygua kuery. Ha'e va'e kuery e'ŷ vy amboae kuery amongaraiague re naxema'endu'ai.

¹⁷ Mba'eta anhomongarai aguã e'ŷ Cristo xembou, ha'e rã ayvu porã amombe'u aikovy aguã. Xee ae 'arandua rupi e'ŷ guive ayvu amombe'u, kuruxu re Cristo omanoague regua ayvu amboyke rive e'ŷ aguã.

Ayvu kuruxu regua re ijayvua

¹⁸ Anhetẽ kuruxu ayvu regua ma okanhy aguã rami ikuai va'e pe ovare'ŷ va'e merami. Ha'e rã nhande jaa jepe va'e pe ma Nhanderuete po'akaa oña.

¹⁹ Mba'eta ipara oiny: "Ambovaipa 'rã hi'arandu va'e kuery 'arandua, amomba 'rã oikuapa va'e kuery oikuua va'e", he'i.*

²⁰ Mamo tu opyta hi'arandu va'e ha'e lei re nhombo'e va'ety kuery? Mamo tu opyta ko yvy regua ijayvu kuaa va'e? Mba'eta kova'e yvy regua 'arandua ma Nhanderuete oikuua uka mba'veverã ndovareia.

²¹ Mba'eta Nhanderuete 'arandua rami vy yvy regua kuery ojee ae 'arandua rupi ikuai vy ndoikuuai okuapy. Ha'e ramo Nhanderuete oiporavo ayvu "Ovare'ŷ va'e" 'ea va'e omombe'u uka vy ogueraa jepe aguã hexe ojerovia va'e.*

²² Mba'eta judeu kuery ojerure 'rã hexa pyrã re, ha'e rã grego kuery ma o'arandurã oeka okuapy.

²³ Ha'e rã ore ma kuruxu re Cristo omoña ague regua romombe'u. Ha'e va'e ma judeu kuery pe rã ojou vaipy, ha'e amboae regua kuery pe ovare'ŷ va'e.

²⁴ Ha'e rã oenoī mbyre judeu ha'e grego ikuai va'e pe ma romombe'u Cristo Nhanderuete po'aka ha'e hi'arandu kuaa ukaa.

²⁵ Mba'eta Nhanderuete ayvu "Ovare'ŷ va'e" 'ea teĩ avakue gui hi'aranduve, ha'e ixuguigua "Ikangya" 'ea teĩ avakue gui imbaraeteve.

Iky'a e'ŷ va'erã oenoī mbyre re ijayvua

²⁶ Irmão kuery, peikuua pota ke penerenoī mbyre marã ramigua pa pendekuaia re. Mba'eta heta e'ŷ pendekuai avakue oikuua rã hi'arandupa va'e, ipo'akapa va'e, neĩ omboetevepy.

²⁷ Ha'e rami 'rãgue py ko yvy regua "Ovare'ŷ va'e" he'ia ma Nhanderuete oiporavo omoximba aguã hi'arandu va'e kuery, kova'e yvy regua "Ikangy" he'ia ma oiporavo omoximba aguã ipo'aka va'e kuery.*

²⁸ Ko yvy regua "Yvyigueve'i", "Ojou vaipy" ha'e "Mba'e'ŷ" he'ia ma Nhanderuete oiporavo omo'yvyi'i aguã onhemboyvate rei va'e,

²⁹ Nhanderuete renonde avave rei onhemboyvate e'ŷ aguã.

Cristo ovare etea re ijayvua

³⁰ Ha'e rã peẽ ma Nhanderuete ae penemoī Cristo Jesus re. Ha'e va'e ma nhandevy pe ojeapo Nhanderuete guigua 'aranduarã, teko porã, nhandeky'a'oarã ha'e nhande-joguaarã,

³¹ ipara oña rami: "Mba'emo oguerovy'a va'e ma Senhor ae toguerovy'a" he'ia rami jaiko aguã.*

2

Nhe'ẽ guigua po'akaa rupi Paulo ayvu omombe'uague re ijayvuague

¹ Irmão kuery, xee ma peẽ kuerya py Nhanderuete ayvu amombe'u vy aju jave ijayvu kuaa va'e rami e'ŷ xeayvu karamboae, hi'arandu va'e rami e'ŷ guive.

* 1:19 Isaías 29.14 * 1:21 Mateus 11.25,26 * 1:27 2 Coríntios 12.7-10 * 1:31 Jeremias 9.24, Gálatas 6.14; 2 Coríntios 5.21

² Mba'eta peẽ kuerya py aiko jave xejee amoĩ mba'eve rei aikuua e'ŷ aguã Jesus Cristo regua e'ŷ vy, ha'e kuruxu re omanoague guive.

³ Xekangy, ajererokyje ha'e aryryipa reve aiko va'ekue peẽ kuery mbyte.

⁴ Xeayvua ma xee ae 'arandua rupi e'ŷ, xeayvu kuaa rupi e'ŷ guive amombe'u. Ha'e rami 'rãgue py Nhe'ẽ guigua po'akaa aexa uka,

⁵ avakue 'arandu re rive'ŷ pejerovia aguã, ha'e rã Nhanderuete po'akaa re anho.

'Arandua anhetẽ va'e re Nhe'ẽ Ky'a E'ŷ nhanembo'ea re ijayvua

⁶ Ha'e rã hi'arandu va'e kuerya rupi ma 'arandua re guive oreayvu, va'eri yvy regua 'arandu re'ŷ, neĩ yvy regua ipo'akakueve va'e 'arandu re e'ŷ guive, mba'eta ha'e va'e kuery ma okanhy va'erã meme.

⁷ Nhanderuete 'arandu ndoikuua ukai va'ekue re ae oreayvu. Ymave rupi Nhanderuete ndoikuua ukai teĩ jypy'i guive oguereko katu nhanemoexakãmba aguã.

⁸ Ha'e va'e 'arandu ma yvy regua ipo'akakueve va'e peteïve ndoikuuai, mba'eta ha'e kuery oikuua va'e rire kuruxu re ndojukai 'rãgue Senhor hexakãmba va'e.

⁹ Ha'e rami teĩ ipara oĩa rami: "Avakue oexa py ndoexai, oapyxa py noendui, neĩ opy'a py voi noexa'ãi Nhanderuete guembiajvu kuery peguarã oguereko katu va'ekue re."*

¹⁰ Ha'e rã nhandevy pe ma Nhanderuete oikuua uka Nhe'ẽ rupi. Mba'eta Nhe'ẽ ma opa mba'e oikuua uka, Nhanderuete py'apy re oĩ va'e voi.

¹¹ Mba'eta mava'e nda'u jaikuua ta jopy'a re oĩ va'e? Inhe'ẽ hexe oĩ va'e anho oikuua 'rã. Ha'e rami ae avi Nhanderuete py'a re oĩ va'e voi avave rei ndoikuuai 'rã, Nhanderuete Nhe'ẽ anho oikuua.

¹² Ha'e gui nhandere ma ko yvy regua nhe'ẽ e'ŷ omoĩ va'ekue, ha'e rã Nhanderuete Nhe'ẽ, nhandevy Nhanderuete ome'ẽ va'e jaikuua aguã.*

¹³ Ha'e nunga re ae oreayvu, avakue o'arandua rupi orembo'ea rami e'ŷ, ha'e rã Nhe'ẽ orembo'ea rami, Nhe'ẽ guigua ayvu py Nhe'ẽ guigua romombe'u vy.

¹⁴ Ha'e rã avakue Nhe'ẽ revegua e'ŷ ma ojee nomoõxei Nhanderuete Nhe'ẽ guigua. Ha'e kuery pe rã ovare'ŷ va'e merami, noendu kuaai 'rãe, mba'eta Nhe'ẽ gui anho 'rã jaikuua.

¹⁵ Ha'e rã Nhe'ẽ revegua ma opa mba'e re oikuua pota teĩ ha'e kuery re avave rei ndoikuua pota kuaai 'rã.

¹⁶ Mba'eta ipara oĩa rami "Mava'e tu oikuua 'rã Senhor 'arandu ombo'e aguã?" Ha'e rã nhandere ma Cristo guigua 'arandu oĩ.*

3

Nhe'ẽ re'ŷ vy ha'e kuery joguero'a reia re ijayvuague

¹ Ha'e gui irmão kuery, xee ma nda'evei karamboae peẽ kuery rombo'e aguã Nhe'ẽ revegua ambo'ea rami. To'o re ikuai va'e ambo'ea rami rive rombo'e va'ekue, mba'eta Cristo pegua kyrigüe rami teri pendekuai ramo.

² Ha'e rami vy kamby py anho romongaru va'ekue, tembi'u ete name'ëi, mba'eta napendu kuaai teri va'ekue. Neĩ aŷ voi napendu kuaai teri, to'o re rive pendekuai vy.

³ Mba'eta penembyte ikuai hakâte'ŷ ha'e joo rami e'ŷ-e'ŷ oikuua va'e. Ha'e rami vy nda'u to'o re e'ŷ ri pendekuai, yvy regua ikuia rami?*

⁴ Mba'eta peẽ kuery regua amongue aipopeje 'rã: "Xee ma Paulo pegua", e'ŷ vy "Xee ma Apolo pegua", peje. Ha'e rami vy nda'u yvy regua rami e'ŷ ri pendekuai?

⁵ Mba'e ta marã ramigua tu Apolo oiko? Ha'e marã ramigua tu xee Paulo? Tembiguai rive orekuai, ha'e ayvu romombe'u rã pejerovia raka'e. Peteï-teĩ roiko Senhor orerembiaporã ome'ëague rupi.

⁶ Xee ma anhotŷ ha'yigue, ha'e gui Apolo ju omoakŷ. Ha'e rã imbo'yvatea ma Nhanderuete ae.

* 2:9 Isaías 64.4 * 2:12 João 14.26; 16.13-15 * 2:16 Isaías 40.13 * 3:3 Gálatas 5.16-21, Tiago 4.1-3

⁷ Ha'e rami vy inhotŷa ma mba'e'ŷ, imoakŷa voi mba'e'ŷ avi, ha'e rã Nhanderuete imbo'yvatea va'e anho.

⁸ Ha'e gui ha'yigue nhotŷa ha'e imoakŷa roiko va'e ma joo rami romba'eapo, ha'e peteĩ-teĩ rojopy 'rã romba'eapoague repy.

⁹ Mba'eta ore ma Nhanderuete pe omba'eapo va'e meme, ha'e rã peẽ kuery ma Nhanderuete mba'ety, ha'e ixupeguia oo guive.

Nhombo'ea kuery omba'eapoague re oikuua potaa 'rãa re ijayvua

¹⁰ Nhanderuete xemboaxy vy xerembiaporã ome'ëague rami vy oo apoa hi'arandu va'e rami avi hoo ytarã amoõ karamboae. Ha'e gui amboytaague áry ma amboae ju ojapove heravy. Peteĩ-teĩ toikuaa pota porã ha'e ae omba'eapoaa re.

¹¹ Mba'eta oo ytarã amboae ramigua ju nda'evei nhamoõ aguã, omoña ae ma va'ekue e'ŷ vy. Ha'e va'e ma Jesus Cristo.*

¹² Ha'e gui xapy'a rei ha'e va'e áry amongue ojapove 'rã ouro guigua, prata, ita iporägueve va'e py, ha'e rami e'ŷ vy yvyra, mba'emo rogue pirukue ha'e mba'emo 'ygue rive py.

¹³ Peteĩ-teĩ omba'eapoague ojekuaa porãmba 'rã. Hi'ára py 'rã ojekuaa tata rupi, mba'eta peteĩ-teĩ omba'eapoague tata py ae 'rã oa'angaa.

¹⁴ Ha'e gui oo yta áry amongue ojapoveague ndokai ramo ojopy 'rã hekobia.

¹⁵ Ha'e rã amongue omba'eapoague okai ramo ma omokanhymba 'rã. Ha'e ae oo jepe 'rã tata rupi oaxa va'e rami rive.

¹⁶ Ndapeikuuaai ri ty'y Nhanderuete mbojerovia atyrã pendekuaia, ha'e pendere Nhanderuete Nhe'ë oña?

¹⁷ Xapy'a rei Nhanderuete mbojeroviaaty amongue ombovaipa ramo Nhanderuete ju ombovaipa 'rã. Mba'eta Nhanderuete mbojeroviaaty ma iky'a e'ŷ va'e. Ha'e va'e ma pendekuaai.

Avakue 'arandu ovare e'ŷa re ijayvua

¹⁸ Avave rei tapejekore eme: Xapy'a rei peẽ kuery regua amongue ikuai yvy regua kuery "Hi'arandu va'e" he'ia va'e. Ha'e va'e ma "Hi'arandu e'ŷ va'e" he'ia va'e ju tojeapo, hi'arandu ete aguã.

¹⁹ Mba'eta kova'e yvy regua 'arandu ma Nhanderuete pe rã ovare'ŷ va'e.* Ha'e nunga rupi ipara oiny: "Nhanderuete oitypa 'rã hi'arandu va'e ha'e kuery ae 'arandua py."

²⁰ Oĩ avi: "Senhor oikuua hi'arandu va'e kuery py'a re oĩ va'e ovare'ŷ va'e memea."*

²¹ Ha'e nunga rupi perovy'a rei eme avakue pegua peikoa, mba'eta opa marâgua ikuai va'e pendevygua meme:

²² Paulo, Apolo, Cefas, kova'e yvy, tekove ha'e manoaa, mba'emo aŷ oiko va'e ha'e araka'e rã guarã, ha'e nunga ha'e javi ma pendevygua meme.

²³ Ha'e rã peẽ ma Cristo pegua, ha'e gui Cristo ma Nhanderuete pegua.

4

Ayvu mombe'ua kuery Nhanderuete rembiguai ikuia re ijayvua

¹ Toikuaa pavê Cristo rembiguai orekuuaia, Nhanderuete ayvu ndoikuua ukai va'ekue romombe'u porãve aguã.

² Ha'e rami avi tembiguai ikuai va'e re herekoaa oikuua pota 'rã ixupe anho pa ikuia re.

³ Ha'e rã peẽ e'ŷ vy amboae kuery xere oikuua pota ramo xee napenai. Neĩ xee ae voi xejee ndaikuua potai.

⁴ Peteĩve henda py noĩ xepy'a ky'aa teĩ ha'e nunga py ma xee ae nanhemboeko porãi. Xere oikuua pota va'e ma Senhor ae oiko.

⁵ Ha'e nunga rupi peikuaa pota rei eme avave re, Senhor oua ára ovaõ e'ŷ mbove. Ha'e gui ma Senhor omoexakãmba 'rã avakue hi'ã py ikuiaague, ha'e oikuua ukapa 'rã ipy'a re oĩ va'e ha'e javi. Ha'e ramo Nhanderuete gui ae 'rã peteĩ-teĩ oendu oguerovy'aa.

* 3:11 Efésios 2.19-22 * 3:19 1 Coríntios 1.10-25; Jó 5.13 * 3:20 Salmo 94.11

Ijayvu eteague

⁶ Irmão kuery, ha'e rami ma xee ae reko re, ha'e Apolo reko re guive xeayvu peẽ kuery re ama'ẽ vy, orereko re vy pene'arandu aguã. Ha'e rami vy peikuaave eme ipara oĩ va'e gui, amongue joegui pejou porãve vy penhemboyvate rei e'ŷ aguã.

⁷ Mba'eta mava'e tu joegui penemboyvateve? Mba'emo perekva'e nda'u joegui pejopy va'ekue'ŷ ri? Ha'e joegui pejopy rire mba'e re tu penhemboyvate ri, joegui mba'emo ndojopyi va'ekue rami?

⁸ Peẽ kuery aŷ voi perekopa merami, napendeporiauvei ma. Peẽ ranhe oregui peĩ huvixa rami. Ha'e rami avi huvixa peĩ ete ma 'rãgue, ore voi peẽ kuery reve huvixa roĩ avi aguã.*

⁹ Xee aikuua rã ore apóstolo kuery ma pavẽ rakykue py Nhanderuete oremoĩ, ojuka pyrã rami. Mba'eta ore ma ko yvy regua kuery rembiexarã rami orekuai, anjo kuery ha'e avakue oexaa rupi.

¹⁰ Cristo káuxa orevy pe “Inhakã porã e'ŷ va'e” 'ea, ha'e rã peẽ ma Cristo re vy pene'arandu. Ore ma orekangy merami, ha'e rã peẽ ma penembaraete. Peẽ ma omboetevepy, ha'e rã ore ma ojou vaipy orekuai.

¹¹ Mba'eta aŷ peve karuai ha'e yuvei gui rojexavai, neĩ oreaoarã ndoroguererekoi guive. Orenupãmbaa, neĩ orero roke atyrã ndoroguererekoi,

¹² ronhea'ã roikovy orepo py ae romba'eapoa py. Orere ijayvu vaia rã rogueroayvu porã'i, oremoingo axya rei rã rogueropo'aka,

¹³ orere ijayvu vaikuea ramo rombovai porã'i. Aŷ peve orevy pe “Yvy regua yty” ha'e “Opa mba'e ky'akue” 'ea.*

Tuu rami Paulo omongetaague

¹⁴ Romoximba aguã e'ŷ ha'e rami ambopara, ha'e rã xera'y kuery rami roayvu vy romoneta porã'i aguã.

¹⁵ Mba'eta Cristo re penderekombo'ea kuery ma mbovy e'ŷ ikuai teĩ heta e'ŷ guive penderu ikuai. Ha'e gui xee ma ayvu porã amombe'ua rupi penderu rami aiko karamboae Cristo Jesus re.

¹⁶ Ha'e nunga rupi aipota xee rami pendekuai.

¹⁷ Ha'e rami aguã ae pendea katy ambou xera'y ayvu va'e Timóteo, Senhor re vy ojeroviapiy oiko va'e. Ha'e va'e ma penemoma'endu'a 'rã Cristo Jesus pe aikoa re, opa rupi peteĩ-teĩ igreja ikuia rupi anhombo'ea rami vy.

¹⁸ Ha'e rã peẽ kuery regua amongue ma je onhemboyvate rei, pendea py navaẽvei aguã re oexa'ã vy.

¹⁹ Ha'e rami avi Senhor oipota rã xee aju voi 'rã peẽ kuery roexa vy. Ha'e rami vy aikuua 'rã onhemboyvate rei va'e kuery anhetẽ pa ipo'aka va'e, tyrã ijayvu anho rei rive va'e.

²⁰ Mba'eta Nhanderuete po'akaa py ma ayvu anho e'ŷ oĩ, ha'e rã ipo'akaa.

²¹ Mba'exa tu peipotave? Peẽ kuerya py yvyra rovi'i reve teve taju, tyrã pa mborayvu ha'e xevai reve'ŷ?

Itavy rei va'e re ijayvuague

¹ Opa rupi omombe'ua rã oendua peẽ kuerya rupi itavy rei va'e oikoa, nguu ra'yxy reve joguerekova'e. Amboae regua kuery ikuia rupi voi ha'e rami ete itavy rei va'e ndoikoi.

² Ha'e rami teĩ peẽ kuery ma pendeporiau 'rãgue py pejejou porã rei tema. Penembyte gui ha'e rami ete ojapo vai va'e pemoxẽ va'e rire!

³ Xee ma anhetẽ peẽa py naĩ teĩ nhe'ẽ re pendereve aiko vy peẽ kuerya py oĩ va'e rami xeayvu ha'e nunga apoare pembopaga aguã.

* 4:8 Araka'eve rã Jesus ou jevy vy guexeve nhanemoĩ avi 'rã huvixa rami mba'emo re nhapena va'erã (1 Coríntios 6.2-3; 2 Timóteo 2.12; Apocalipse 5.10). * 4:13 2 Coríntios 4.8-11

- ⁴ Ha'e rami aguã penhemboaty ke Senhor Jesus rery rupi, xenhe'ẽ ha'e nhande-Senhor Jesus po'akaa reve.
- ⁵ Ha'e rami vy Satanás po py pemboaxa ho'o ombovaipa aguã, ha'e rã inhe'ẽ oo jepe nho aguã Senhor [Jesus] ára py.*
- ⁶ Mba'eta pejejou porã reia ma na'iporãi. Ndapeikuaai ri ty'y trigo mbovua ruxã'i oĩ teĩ mesa ha'e javi rupi omoeakuãmba 'rãa?
- ⁷ Ha'e nunga rupi penembyte gui pemombo ke trigo mbovua ymague oĩ va'e, mbojape iky'a e'ŷ va'e ju pendekuai aguã, mba'eta trigo mbovua revegua e'ŷ anhetẽ peiko. Mba'eta nhandere vy ojukaa ma ngaru Páscoa pygurarã vexa'i. Ha'e va'e ma Cristo.
- ⁸ Ha'e nunga rupi ngaru jajapo 'rã trigo mbovua yma guare nhanemboeko vai ha'e nhandeapo vayarã reve'ŷ, ha'e rã mbojape irã e'ŷ va'e reve. Ha'e va'e ma anhetẽ ha'e teko porã rupi ete jaikoa.
- ⁹ Kuaxia mboae ambopara va'ekue py xeayvu karamboae heko vai va'e re penhemoirũ ve'ŷ aguã.
- ¹⁰ Ha'e rami avi ko yvy regua heko vai va'e ha'e javi gui pejepe'a aguã re'ŷ xeayvu, peráta re nda'eveive va'e gui, neĩ imonda va'e ha'e mba'emo ra'angaa ombojerovia va'e gui. Mba'eta kova'e yvy gui jaa vy mae ma 'rã ha'e kuery gui jajepe'a.
- ¹¹ Ha'e rami 'rãgue py aŷ ma amongue ojeupe "Irmão" he'i rive va'e re ambopara. Ha'e kuery reve penhemoirũ ve'ŷ aguã re xeayvu, neĩ heko vai va'e, peráta re nda'eveive va'e, mba'emo ra'angaa ombojerovia va'e, ijayvu vaikue rei va'e, oka'u va'ety, ha'e imonda va'e. Ha'e nunga reve nda'evei pekaru aguã voi.
- ¹² Mba'exa tu jaikuaa pota igreja pygua e'ŷ re? Peikuaa pota 'rãgue igreja pygua kuery re ae.
- ¹³ Mba'eta igreja pygua e'ŷ re ma Nhanderuete ae 'rã oikuua pota. Ha'e rã peẽ ma penembyte gui pemoxẽ 'rã mba'emo vai apoa oiko va'e.*

6

Irmão kuery jomeme oikuua pota uka e'ŷ aguã re Paulo ijayvuague

- ¹ Ha'e gui peẽ kuery jomeme pendeayvu aguã perekoy mba'exa tu heko vai va'e kuery renonde py pejogueraa peikuaa pota uka aguã, iky'a e'ŷ va'e kuery renonde 'rãgue py?
- ² Ndapeikuaai teve raka'eve rã iky'a e'ŷ va'e kuery ko yvy regua re oikuua pota 'rãa? Ha'e gui ko yvy regua re peikuaa pota aguã rami pendekuai vy aŷ mba'e'ŷ'i re peikuaa pota 'rãgue.
- ³ Ndapeikuaai ri ty'y anjo kuery re eteve voi jaikuaa pota 'rãa? Ha'e gui aŷguia kuery re katuve ma 'rã jaikuaa pota.
- ⁴ Ha'e rã peẽ ma mba'emo ko yvy regua re peikuaa pota uka aguã perekoy igreja kuery ndojou porãi va'e renonde py ri peikuaa pota uka!
- ⁵ Ha'e rami ma xeayvu peximba aguã. Penembyte ndoikoi ri ty'y peteĩ ri jepe hi'arandu va'e irmão kuery re oikuua pota kuaa va'erã?
- ⁶ Ha'e rami 'rãgue py ojerovia e'ŷ va'e kuery renonde ri irmão kuery meme jogueraa 'rã oikuua pota uka aguã!
- ⁷ Peẽ kuery regua jomeme peikuaa pota ukas py pejeity uka ma. Mba'e re tu ha'e rami 'rãgue py ndapejekore ukai ri? Mba'e re tu mba'emo perekoy va'e ndapeipe'a ukapai?*
- ⁸ Ha'e rã peẽ ae pejoapo vai vy nhomba'e rei-rei peipe'a uka. Pende-irmão kuery re ae pejapo ha'e rami.
- ⁹ Ndapeikuaai ri ty'y heko vai va'e kuery e'ŷ Nhanderuete po'akaa pygurarã ikuai? Pejekore eme, mba'eta heko ky'apa rei va'e ma nda'ikuai 'rã Nhanderuete po'akaa py, neĩ mba'emo ra'angaa ombojerovia va'e, itavy rei va'e, kunha rami rei oiko va'e, avakue meme joguereko va'e,

* 5:5 2 Coríntios 2.5-11 * 5:13 Deuteronômio 17.7 * 6:7 Mateus 5.38-40

¹⁰ imonda va'e, peráta re nda'evei rei va'e, oka'u va'ety, ijayvu vaikue va'e, neñ jokorepa va'e voi Nhanderuete po'akaa py nda'ikuai 'rã.

¹¹ Ha'e rami ae peẽ kuery regua pendekuai va'ekue ri pejejoi uka, pejeky'a'o uka ha'e penhemboeko porã uka ma Senhor Jesus Cristo rery rupi, ha'e Nhanderuete Nhe'ẽ re vy.

Nhandetavy rei e'ŷ aguã re ijayvua

¹² "Opa mba'e ha'eve jajapo aguã", 'ea teĩ opa mba'e e'ŷ 'rã nhanemoingo porã. "Opa mba'e ha'eve jajapo aguã", 'ea teĩ xere ma mba'eve ipo'aka aguã nda'evei.

¹³ "Temb'i'u ma nhanderyepy pygurarã oĩ, ha'e nhanderyepy ma tembi'u oĩ aguã", 'ea teĩ Nhanderuete omomba 'rã mokoõve. Ha'e rami avi nhanderete ma itavy rei aguã e'ŷ oĩ, Senhor peguarã anho.* Ha'e Senhor ma nhanderete peguarã ojou uka,

¹⁴ mba'eta Nhanderuete omboete ju rire nhande voi nhanemboete ju avi 'rã opo'akaa py.

¹⁵ Ndapeikuai ri ty'y penderete Cristo rete regua oikoa? Ha'e gui Cristo rete regua nda'u araa 'rã ri kunha itavy rei va'e re amboja aguã? Any teve.

¹⁶ Ndapeikuai ri ty'y kunha itavy rei va'e reve ava joguerekoy hexeve peteĩ'i tete optyaa? Mba'eta "Mokoï 'rãgue py peteĩ'i to'o ikuai 'rã", he'iague rami.*

¹⁷ Ha'e rã Senhor re onhemboja va'e ma hexeve peteĩ'i nhe'ẽ oguerekoy.

¹⁸ Penhemombyry ha'vy tavy reia gui. Jejavya mboae py ma nhande ae rete rovai e'ŷ jajejav. Ha'e rã itavy rei va'e ma guete rovai ae ojejav.

¹⁹ Ndapeikuai ri ty'y penderete Nhe'ẽ Ky'a E'ŷ mbojerovia atyrã oĩa? Mba'eta Nhe'ẽ pendere oĩ va'e ma Nhanderuete gui pejopy rire pendejeupegua ve'ŷ peiko.

²⁰ Mba'eta hepy re pendejogua. Ha'e rami rire aŷ pemboete 'rã Nhanderuete penderete py.

7

Omenda va'e reko re ijayvua

¹ Ha'e gui xevy pe pemboparaague re ju ta xeayvu. Ha'eve ava kunha reve joguerekoy e'ŷ ramo.

² Ha'e rami teĩ tavy rei gui peteĩ-teĩ toguerekoy gua'yxy ae, ha'e peteĩ-teĩ kunha toguerekoy ome ae.

³ Ava ma gua'yxy pe tojapo ojapo 'rã va'ekue, ha'e ta'yxy voi ha'e rami ae tojapo ome pe.

⁴ Mba'eta kunha ma guete re ae nda'ipo'akai va'e, ha'e rã ime. Ha'e rami ae ime ma guete re ae nda'ipo'akai avi, ha'e rã ta'yxy.

⁵ Peteĩ-teĩ joupe peikoxe e'ŷ eme, xapy'a'i pejoguerekoy rive ranhe aguã e'ŷ vy, pejerurea rupi anho pendekuai aguã. Ha'e va'e rire ma pejoguerekoy ju, pejejoko e'ŷa py Satanás penemoangeko e'ŷ aguã.

⁶ Ha'e rami xeayvu vy "Pejapo rã ha'eve" ha'e, "Pejapo 'rãe" nda'e.

⁷ Mba'eta aipota teĩ pavẽ xee aikoa rami ikuai. Ha'e rami teĩ peteĩ-teĩ guekorã ojopy Nhanderuete gui. Amongue ma anhetẽ peteĩ rami 'rã ikuai, ha'e rã amboae ma amboae rami ikuai aguã ojopy.*

⁸ Ha'e rã omenda e'ŷ ha'e imeve'ŷ va'e kuery pe ma aipoa'e: Xee aikoa rami ikuai rã ha'eve 'rãgue.

⁹ Ha'e rami teĩ amongue ndojejoko kuaai vy tomenda, mba'eta omendaxea oendu riae 'rãgue py ha'eve omenda aguã.

Omenda va'e joegui opoi rive e'ŷ aguã re ijayvua

¹⁰ Ha'e gui omenda va'e kuery pe ju xeayvu ta. Xee anho e'ŷ guive xeayvu, Senhor ae ijayvu raka'e ome gui kunhague opoi e'ŷ aguã re.

¹¹ (Ha'e gui opoi ri vy tomendave eme. Ha'e rami e'ŷ vy ome reve ae ju toiko.) Ha'e ime kuery voi topoi eme gua'yxy gui.*

* 6:13 Romanos 12.1,2; 1 Tessalonicense 4.1-8 * 6:16 Gênesis 2.24 * 7:7 Mateus 19.10-12 * 7:11 Mateus 19.3-9

¹² Ha'e rã amboae kuery pe ma xee ae aipoa'e, Senhor e'ŷ: Xapy'a rei amongue irmão gua'yxy ojerovia e'ŷ va'e oguereko rã hexeve oikoxe ramo ma topoi eme gua'yxy gui.

¹³ Ha'e rami ae avi amongue kunha ome ojerovia e'ŷ va'e oguereko rã hexeve oikoxe ramo topoi eme ome gui.

¹⁴ Mba'eta ime ojerovia e'ŷ va'e teĩ gua'yxy reve vy iky'a e'ŷ va'e rami 'rã oiko, ha'e ta'yxy ojerovia e'ŷ va'e voi iky'a e'ŷ va'e rami 'rã oiko ome ojerovia va'e reve vy. Ha'e rami e'ŷ va'e rire penda'y kuery heko ky'a va'e 'rāgue ikuai, va'eri aŷ ma iky'a e'ŷ va'e ikuai.

¹⁵ Ha'e rã ojerovia e'ŷ va'e ma opoixe ri vy topoi. Ha'e rami rã irmão ojegui opoi uka teĩ ha'eve, ha'e irmão ha'e rami ae avi. Mba'eta Nhanderuete penerenoĩ peteĩ rami pendekuai aguã.

¹⁶ Mba'eta ndee ta'yxy, mba'exa tu reikuua ndereve vy neme oo jepe 'rāa rami? Ha'e ndee ime, mba'exa tu reikuua ndereve vy nderayxy oo jepe 'rāa?

¹⁷ Peteĩ-teĩ tapeiko penderekorã Senhor oejaague rami, Nhanderuete penerenoĩague rami ae. Ha'e rami ae ajapo uka aikovy igreja ikuai va'e ha'e javi rupi.

¹⁸ Amongue Nhanderuete oenoĩ jave opire omboi uka va'ekue teve oiko? Tombovaipa eme ha'vy opire omboi ukaague. Amongue oenoĩ jave opire omboi uka e'ŷ va'e teve oiko? Tomboi uka eme ha'vy opire.

¹⁹ Mba'eta opire omboi ukaague ma mba'e'ŷ, ha'e opire omboi uka e'ŷa voi mba'e'ŷ avi. Ovare va'e ma Nhanderuete ojapo uka va'e rupi nhandekuaia anho.

²⁰ Ha'e nunga rupi peteĩ-teĩ toiko oenoĩ jave oikoague rupi ae.

²¹ Escravo teve reiko nerenoĩ jave? Ndepy'a eta rei eme ha'e nunga re. Ha'e rami avi escravo reikoa gui repoi aguã ha'eve ramo epoi ha'yy.

²² Mba'eta escravo Senhor oenoĩ va'ekue ma Senhor pegua escravo-ve'ŷ ikuai. Ha'e escravo e'ŷ oenoĩ va'ekue ma Cristo pegua escravo ikuai.

²³ Hepy re pendejogua rire pendekuaive eme avakue pegua escravo rami.

²⁴ Irmão kuery, peteĩ-teĩ Nhanderuete renonde peiko tema penerenoĩ jave peikoague rupi ae.

Ikuai axya ára pyguarã omenda ha'e omenda e'ŷ va'e re ijayvua

²⁵ Ha'e gui kunhataĩgue omenda e'ŷ teri va'e peguarã ma xee ndaikuaii Senhor ojapo uka va'ekue. Ha'e nunga rupi xee ae aikuua va'e amombe'u ta, mba'eta Senhor xemboaxy vy ojeroviapy xemoingo.

²⁶ Xee aikuua rã aŷ teko axy oiko ramo ha'eve 'rāgue peikoa rami ae tema peiko aguã.

²⁷ Remenda ri vy epoi eme, ha'e rã kunha reve'ŷ reiko vy emenda eme.

²⁸ Remenda ri vy nderejejavyi 'rã. Kunhataĩ voi omenda vy ndojejavyi avi 'rã. Ha'e rami teĩ guete reve oikoa ja ikuai axy 'rã, ha'e ramo xee ajapoxe ha'e nunga pendu e'ŷ aguã rami.

²⁹ Ha'e gui irmão kuery, tamombe'u porâve: Ára ovaẽ rai'i ma. Aŷ guive omenda va'e ta'ikuai omenda e'ŷ va'e rami,

³⁰ ojae'o va'e ta'ikuai ojae'o e'ŷ va'e rami, ov'y'a va'e ta'ikuai ov'y'a e'ŷ va'e rami, mba'emo ojogua va'e ta'ikuai mba'eve oguereko e'ŷ va'e rami,

³¹ ha'e mba'emo ko yvy regua oiporu va'e ta'ikuai oiporu e'ŷ va'e rami, mba'eta kova'e yvy jaexa va'e okanhy ma ov'y.

³² Xee opa mba'e py aipota va'e ma pendereketa reia gui peo jepea. Mba'eta omenda e'ŷ va'e kuery ma Senhor pe oiko aguã re anho 'rã opena, Senhor ombovy'a aguã.

³³ Ha'e rã omenda va'e ma mba'emo ko yvy regua re openaa rupi avi 'rã ikuai, gua'yxy ombovy'axe vy.

³⁴ Ha'e rami vy peteĩ'i re'ŷ 'rã opena. Kunhague ma ha'e rami ae avi. Imeve'ŷ va'e ha'e omenda e'ŷ teri va'e ma Senhor pe oiko aguã re anho 'rã opena, guete py ha'e onhe'ẽ re iky'a e'ŷa rupi oiko aguã. Ha'e rã omenda vy ma mba'emo ko yvy regua re voi 'rã opena, ome ombovy'a aguã.

³⁵ Ha'e rami xeayvu peẽ kuery pevy'a aguã, romoingo eta reixe vy e'ŷ. Ha'e rami 'rāgue py aipota ha'evea rami pendekuai, ajapoxe Senhor pe ete iky'a e'ŷ va'e pendekuai aguã.

³⁶ Ha'e gui xapy'a rei peteĩ tuu ojeupe ae "Xee ndareko kuaavei ma xerajy" he'i 'rã. Xapy'a rei tajy iporãa oaxa ta, ha'e omenda aguã ha'eve ramo kunha va'e oipotaa rami ae tuu toguereko. Omomenda ri vy ndojejavyi 'rã.

³⁷ Ha'e rã tuu mboae ma opy'a py omoĩ porã 'rã ngoo py ae guajy oguerekro tema aguã, xapy'a rei amboae rami imoingoarã jipo, ha'e ipo'aka ha'e ae oipotaa rami oguerekro aguã. Ha'e gui ipy'a re ha'e rami aguã oĩ atã ramo guajy omomenda e'ýa py ha'eve rami ojapo.

³⁸ Mba'eta guajy omomenda va'e ma ha'eve rami ojapo, ha'e rã omomenda e'ý va'e ma ha'eveva va'e ojapo.

³⁹ Ha'e gui ta'yxy kuery ma ime oikovea ja hexeve anho 'rã ikuai. Ha'e gui ime omano ma ramo ha'eve omendaxeja va'e re omenda ju aguã, va'eri Senhor pegua re anho.

⁴⁰ Ha'e rami avi imeve'ý va'e ma xee aikuua rã ha'ekue rami ae oiko vy ov'yave 'rã. Aikuua avi xere voi Nhanderuete Nhe'ë oña.

8

Mba'emo ra'angaa pe tembi'u ome'ë mbyre re ijayvua

¹ Aÿ ma xeayvu ta mba'emo ra'angaa pe tembi'u ome'ë mbyre re. Nhande kuery ha'e javive ha'e nunga jaikuua. Ha'e gui mba'emo oikuua va'e ma ha'e kuery ae onhemboyvate rei 'rã, ha'e rã mborayvu re ikuai va'e ma nhomombaraete 'rã.

² Mba'eta "Mba'emo aikuapa" he'i va'e ma ndoikuuai teri mba'emo oikuua ete aguã.

³ Ha'e rã Nhanderuete oayvua rupi ikuai va'e ma Nhanderuete rembikuua ikuai.

⁴ Ha'e nunga rupi mba'emo ra'angaa pe tembi'u ome'ë mbyre ma po rami jaikuua: Kova'e yvy re mba'emo ra'angaa ikuai va'e ha'e javi ma mba'e'ý, mba'eta Nhanderuete ndoikoi, peteĩ'i e'ý vy.

⁵ Ha'e ikuai avi "Nhanderuete" he'i va'e yva re e'ý vy yvy re mba'emo oĩ va'e pe. Heta ikuai "Nhanderuete" 'ea, ha'e heta avi "Senhor" 'ea va'e.

⁶ Ha'e rami teĩ nhandevy pe ma peteĩ'i oiko Nhanderuete. Ixugui ma opa mba'e oiko raka'e, ha'e ixupe meme jaiko. Ha'e rami ae avi peteĩ'i oiko Senhor. Ha'e va'e ma Jesus Cristo. Mba'eta ipo gui ma opa mba'e ikuai raka'e, nhande kuery voi ixugui jaiko.

⁷ Ha'e rami teĩ pavẽ e'ý ha'e rami oikuua. Mba'eta mba'emo ra'angaa mboetea rupi ikuai va'ekue amongue ma aÿ peve ta'angaa pe ome'ë mbyre ho'u vy "Xemboeko ky'aarã ha'u" he'i 'rã, o'arandua py ikangy teri vy.

⁸ Ha'e rami avi tembi'u e'ý 'rã nhanemboeko porã Nhanderuete renonde, mba'eta mba'emo ndaja'ui vy mba'eve ndoatai 'rã nhandevy, ha'e mba'emo ja'u teĩ mba'eve ndajarekovei 'rã.

⁹ Ha'e rami teĩ peikuaa pota pova'e re: Mba'emo pe'ua py peity e'ý aguã irmão kuery ikangykueve.*

¹⁰ Mba'eta xapy'a rei ndee "Aikuapa" 're reve reo 'rã mba'emo ra'angaa pegua templo py rekaru aguã. Ha'e gui ha'e py ikangy teri va'e nderexa vy ha'e kuery voi oendu 'rã tembi'u mba'emo ra'angaa pe ome'ë mbyre ho'uxe avia.

¹¹ Ha'e rami vy ndee reikuaa va'e káuxa nde-irmão ikangyve va'e okanhy 'rã, hexe Cristo omano rire teĩ.

¹² Ha'e ramia py rejeyavy irmão kuery pe, mba'eta ha'e kuery 'arandua ikangy teri va'e rembovaipa vy Cristo pe voi rejeyavy.

¹³ Ha'e nunga rupi xee ma tembi'u ha'ua py xe-irmão kuery aity 'rãgue py nda'uvei 'rã xo'o, aity rive'ý aguã.

9

Apóstolo Paulo gueko re ijayvuaque

* 8:9 1 Coríntios 10.14-22; Romanos 14.13-23

¹ Ha'e rami avi nda'evei ri ty'y xee aikuua rami aiko aguã? Xee apóstolo e'ŷ ri ty'y? Ndaexai ri ty'y Jesus nhande-Senhor? Peẽ kuery e'ŷ teve Senhor pe amba'epoague rupi pejerovia va'ekue?

² Xapy'a rei amboae kuery oikuua rã xee apóstolo e'ŷ, ha'e rã pendevy pe ma anhetẽ apóstolo aiko, mba'eta Senhor pegua apóstolo aikoa kuaa ukaa ma peẽ ae peiko.

³ Xere oikuua pota rei va'e kuery pe ma po rami ambovai:

⁴ Ore kuery ma nda'evei ri ty'y ronhemongaru uka aguã?

⁵ Nda'evei ri ty'y orerupive irmã orera'yxy rogueraa aguã, amboae apóstolo kuery, Senhor ryvy kuery ha'e Cefas rami avi?

⁶ Tyrã pa xee ha'e Barnabé anho vi nda'evei romba'epoague rupi e'ŷ roiko aguã?

⁷ Mava'e xondaro tu ha'e ae operáta re oo 'rã joe opu'ã aguã? Mava'e uva nhotŷare tu hi'a ho'u va'erã e'ŷ? Ha'e mava'e mymba re opena va'e tu guymba kamby gui oy'u va'erã e'ŷ?*

⁸ Ha'e rami xeayvu vy avakue oikuua rami rive teve xeayvu, tyrã pa lei re oĩ va'e voi aipo nde'i?

⁹ Mba'eta lei Moisés ombopara va'ekue re ma ipara oiny: "Pejokua eme vaka mba'emo ojyky va'e juru rupi", he'ia py vaka re anho teve Nhanderuete ijayvu?*

¹⁰ Nhande kuery re avi e'ŷ ri ty'y ijayvu? Nhanderekó re ae ipara oiny anhetẽ, mba'eta yvy karaãa rupi ombo'epo va'e ma mba'emo oarõ reve 'rã oyvy karaã. Ha'e mba'emo ojyky va'e voi ojeupegua oarõ reve 'rãe ombo'epo.

¹¹ Xapy'a rei peẽ kuerya py Nhe'ẽ guigua ronhotŷ rire ipoyi vaipa teve mba'emo perekó va'e gui rojopy'i aguã?

¹² Amboae kuery mba'emo perekó va'e ojopy aguã ha'eve ramo orevy pe katuve ma nda'evei ri ty'y rojopy aguã?

Ha'e rami teĩ ore kuery ma ha'e nunga ndorojopyxei. Ha'e rami 'rãgue py opa marãgua rogueropo'aka neĩ peteĩ henda py rojou vai uka e'ŷ aguã Cristo regua ayvu porã.*

¹³ Tyrã pa ndapeikuuaai teve templo re opena va'e kuery voi templo py ogueru pyre gui okaru 'rãa? Altar rupi ombo'epo va'e kuery voi altar áry ome'ẽ mbyre gui ae 'rã ho'u.

¹⁴ Ha'e rami ae avi Senhor ijayvu raka'e ayvu porã mombe'ua kuery onhemongaru uka aguã ayvu porã omombe'ua re.

¹⁵ Ha'e rã xee ma peteigüeve nanhemongaru ukai joupe, neĩ xemongarua aguã re e'ŷ guive pendevy pe ambopara aŷ. Mba'eta joupe anhemongaru uka aikovy 'rãgue py ha'eveve amano aguã. Avave rei ndoipe'ai 'rã xegui ha'e rami aiko vy avy'aa.

¹⁶ Mba'eta ayvu porã amombe'u teĩ ha'e rami aikoa rive e'ŷ arov'y'a, mba'eta amombe'u aguã rami aikoa aendu riae. Xevy pe ndavy'ai ete 'rãgue ayvu porã amombe'u e'ŷ va'e rire.

¹⁷ Xee ae amombe'uxea rupi rive amombe'u vy ajopy 'rã hekivia. Ha'e rã ayvu mombe'uarã xemoia rire amombe'ua aguã rami ae aiko.

¹⁸ Mba'eta exa tu ha'vy oĩ 'rã ambo'epoague repyrã? Po ramigua ae oĩ: Ayvu porã amombe'ua rupi nanhemongaru ukai, ha'e rami ajapo va'e rire ha'eve 'rãgue teĩ.

¹⁹ Mba'eta avave pegua escravo e'ŷ aiko teĩ pavẽ escravo rami ajeapo, heta araa jepe aguã, ha'evea peve.

²⁰ Ha'e rami vy judeu kuerya rupi judeu rami aiko, judeu kuery regua araa jepe aguã. Lei re oĩa rami ikuai va'ea rupi xee voi ha'e kuery rami aiko, lei guy py ikuai va'e araa jepe aguã, lei guy py ete'ŷ xee aiko teĩ.

²¹ Ha'e rã lei oikuua e'ŷ va'ea rupi xee voi ha'e kuery rami aiko, araa jepe aguã lei oikuua e'ŷ va'e regua. Ha'e rami avi Nhanderuete pe vy lei rupi ndaiko e'ŷi, Cristo guigua lei rupi aiko ae.

* 9:7 Paulo ma apóstolo oiko vy nhombo'ea rupi oikoa py ha'eve 'rãgue guemimbo'e kuery pe onhemongaru uka va'e rire, teĩ ha'e rami ndoiptai (versículo 18). * 9:9 Deuterônômio 25.4 * 9:12 Atos 20.33-35; 2 Coríntios 11.7-9

- ²² Ikangykuve ikuiaia rupi ikangy va'e rami aiko, ikangy va'e regua araa jepe aguã. Peteĩ-teĩ regua ikuiaia rupi opa marãguia rami aiko, marã rami vy pa araa jepe aguã amongue.
- ²³ Ha'e nunga ha'e javi ajapo ayvu porã oendua aguã, xee voi ixuguigua ajopy avi aguã.
- ²⁴ Ndapeikuai teve ougaa py onha va'e ha'e javive anhetẽ onha teĩ peteĩ'i anho ojopy 'rãa ome'ẽ mbyrã? Peẽ voi ke penhea'ã ome'ẽ mbyrã pejopy aguã re.
- ²⁵ Mba'eta ouga va'e kuery ha'e javi ojejoko 'rã opa mba'e py. Ha'e va'e kuery ma akã regua imarã va'e ojopy aguã ojejoko, ha'e rã nhande kuery ma imarã e'ŷ va'e jajopy aguã.
- ²⁶ Xee voi aiko ha'e rami, aa aguã katy ama'ẽ reve tema anha. Ha'e rami anhea'ã, ngovaigua oinupã ta vy ojavypa rive va'e rami e'ŷ.
- ²⁷ Areko axy xerete, xevygua escravo rami areko, amboae kuery pe ayvu amombe'u rire teĩ xee ae ougaa gui omoxẽ mbyre rami apyta e'ŷ aguã.

10

Israel regua ikuaiague re ijayvua

- ¹ Mba'eta irmão kuery, ndaiptai pendexarai nhaneramoĩ kuery ikuai jave guare re. Mba'eta ha'e kuery ma arai guy rupi oguata vy ye'ẽ mbyte rupi oaxa pavẽ raka'e.*
- ² Moisés peguarã onhemongaraia rami ha'e javive arai guy rupi oguata, ha'e ye'ẽ rupi oaxapa raka'e.
- ³ Ha'e javive peteĩ'i regua tembi'u ho'u raka'e, Nhe'ẽ guigua,
- ⁴ ha'e oy'u avi Nhe'ẽ guigua yvu gui, mba'eta peteĩ ita Nhe'ẽ guigua ha'e kuery oguataa rupi ojou kuerei va'e gui oy'u. Ha'e va'e ita ma Cristo.
- ⁵ Ha'e rami teĩ ha'e kuery regua hetave ma Nhanderuete ndoguerovy'ai vy tekao e'ŷa pyve oitypa.
- ⁶ Ma'ẽ, ha'e nunga oiko raka'e nhande voi nhanheangu aguã, ha'e kuery ikuaiague rami ovare'ŷ va'e nhamoaruã avi e'ŷ aguã.*
- ⁷ Ha'e nunga rupi pembojerovia eme mba'emo ra'angaa ha'e kuery regua ojapoague rami, ipara oĩa rami: "Ha'e kuery oguapy okuapy okaru ha'e oy'u aguã. Ha'e gui ma opu'ã ju ovy'a aguã", he'ique rami.*
- ⁸ Ha'e nhandedavy rei eme guive ha'e kuery regua ojapoague rami, ha'e ramo peteĩ ára pyve vinte e três mil oitya.
- ⁹ Nda'evei Senhor jaeko a'ã aguã ha'e kuery regua ojapoague rami, ha'e gui mboi oixu'u rã omanomba.
- ¹⁰ Pendeayvu rei eme Senhor re ha'e kuery regua ijayvuague rami, ha'e ramo poromokanhy omomba.
- ¹¹ Ha'e nunga ma ha'e kuery re oiko raka'e jaikuaa aguã, omboparaa guive nhanheangu aguã, mba'eta nhande ma ára opaa pygua nhandekuai.
- ¹² Ha'e nunga rupi "Xe'aĩ atã" he'i va'e ma tonheangu ho'a e'ŷ aguã.
- ¹³ Mba'eta penemoangecko pendu va'e ma nhande ha'e javi nhaendu va'e ramigua. Ha'e Nhanderuete ojeroziaply vy napenemoangeko ukai 'rã penembaraetea áryve. Ha'e rami 'rãgue py penemoangekoarã ou ramo oikuaa uka kuerei 'rã peo jepe aguã, ha'e va'e rupi vy peropo'aka aguã.

Mba'emo ra'angaa nhamborovia e'ŷ aguã re ijayvua

- ¹⁴ Ha'e nunga rupi xerembiayvu kuery, penhemombyry ke mba'emo ra'angaa pembojerovia aguã gui.
- ¹⁵ Pene'arandu va'e pe xeayvu, peẽ ae peikuaa porã pota xeayvua re.
- ¹⁶ Mba'eta karo nhanemoingo porãarã gui jarovy'a reve jay'u ramo Cristo ruguy rupi e'ŷ ri ty'y hexe nhanemonhembojapa? Ha'e mbojape nhaipe'ã reve ja'u ramo Cristo rete rupi e'ŷ ri ty'y hexe nhanemonhembojapa?

* 10:1 Apy ma Egito yvy gui Moisés Israel kuery ogueraapaague re ijayvu. * 10:6 Hebreus 3.7–4.11 * 10:7 Êxodo 32.6

¹⁷ Mba'eta heta nhandekuai teĩ peteĩ'i mbojape, peteĩ tete anho jaiko, mba'eta peteĩ'i mbojape gui ja'u pavẽ.

¹⁸ Peikuuaa pota ke Israel kuery ngo'o re ikuai va'e reko re, mba'eta altar áry tembi'u ome'ẽ mbyre gui ha'e javi ho'u.

¹⁹ Ha'e gui mba'e ha'e 'rã tu? Mba'emo ra'angaa pe tembi'u ome'ẽ mbyre, e'ŷ vy mba'emo ra'angaa ae ojapo 'rã teve mba'emo?

²⁰ Any, teĩ aipoa'e: Ta'angaa pe mba'emo ha'e kuery ome'ẽ va'e ma anha pe ae ome'ẽ, Nhanderuete pe'ŷ. Ha'e rami rã xee ndaiapotai anha kuery re penhemboja.*

²¹ Nda'evei Senhor karo gui ha'e anha karo gui avi pey'u aguã. Nda'evei Senhor pegua mesa py ha'e gui anha pegua mesa py avi pei aguã.

²² Tyrã pa pejapoxe ri Senhor nda'evei etea oendu aguã rami? Peẽ nda'u ixugui pendepo'akave ri?

Cristo re vy jajoitya rupi e'ŷ nhandekuai aguã re ijayvua

²³ "Opa mba'e ha'eve jajapo aguã" 'ea teĩ opa mba'e e'ŷ 'rã nhanemoingo porã. "Opa mba'e ha'eve jajapo aguã" 'ea teĩ opa mba'e e'ŷ 'rã nhanemombaraete.

²⁴ Avave rei ojeupe anho rive tojapo porã eme, ha'e rã amboae kuery pe.*

²⁵ Ha'eve pe'u aguã mba'emo vendea py ovende va'e rei, maguigua paa re peporandu e'ŷ re peikuaa potaxe vy.

²⁶ Mba'eta Senhor pegua ae itui yvy ha'e opa mba'e hexe ikuai va'e.*

²⁷ Ha'e rami vy ojerovia e'ŷ va'e regua ngoo py pekaru aguã penerenoĩ ramo peoxe vy tapeo, ha'e pe'u tema penerenonde omoĩ va'e rei, mba'eve re peporandu e'ŷ re peikuaa potaxe vy.

²⁸ Ha'e rami avi pendevy amongue aipoe'i: "Kova'e tembi'u ma mba'emo ra'angaa pe ome'ẽ mbyre", he'i ramo pe'u eme imombe'uare opy'a ky'aa oendu e'ŷ aguã.

²⁹ "Peẽ ae pendepy'a ky'aa gui pe'u eme" nda'e, "Amboae kuery opy'a ky'aa oendu e'ŷ aguã" ha'e.

Ha'e rami avi mba'exa tu amboae kuery opy'a ky'aa oendu e'ŷ aguã nda'evei xee aikuaa rami aiko aguã?

³⁰ Nhanderuete arovya'reve mba'emo ha'u ramo mba'exa tu xere ayvua 'rã mba'emo arovya'reva'e káuxa?

³¹ Ha'e nunga rupi pekaru ha'e pey'u, e'ŷ vy opa mba'e pejapo va'e rei Nhanderuete omboetea aguã rami pejapo.

³² Peity eme judeu kuery, neĩ amboae regua, ha'e neĩ Nhanderuete pegua igreja kuery,

³³ xee voi opa mba'e py pavẽ pe ajapo porãxe rami avi. Mba'eta xejeupe ae e'ŷ ajapo porãxe, ha'e rã pavẽ pe, ha'e kuery voi oo jepe aguã.

11

¹ Xee rami avi ke pendekuai, xee voi Cristo rami aikoa rami.

Igreja py kunhague akã ao'ia oiporu aguã re ijayvuague

² Anhetẽ xee roguerovy'a peẽ kuery, mba'eta opa mba'e py xerekore penema'endu'a, ha'e pendekorã amombe'u va'ekue guive pemoĩ porã.

³ Ha'e rami avi aipota peikuaa Cristo avakue ha'e javi akã oikoa, ha'e avakue ma kunhague akã, ha'e gui Cristo akã ma Nhanderuete ae oiko.

⁴ Ha'e nunga rupi avakue onheakã ao'i reve ri Nhanderuete pe onhembo'e, e'ŷ vy Nhe'ẽ guigua omombe'u vy oakã mboetea rupi e'ŷ oiko.

⁵ Ha'e rã kunhague ma onheakã ao'i e'ŷ re ri ojerure, e'ŷ vy Nhe'ẽ guigua omombe'u vy oakã nomboetei, inhakã onhopõ mbyre revegua rami ikuai.

⁶ Ha'e nunga rupi kunhague akã ao'ia ndoiporui ri vy tojayapa o'a. Ha'e rã o'a ndojayaxei, e'ŷ vy oakã onhopõ aguã oxõ ri vy toiporu akã ao'ia.

* 10:20 1 Coríntios 8.1-13

* 10:24 Romanos 14.1-15.7; Filipenses 2.1-4

* 10:26 Salmo 24.1

- ⁷ Mba'eta anhetē avakue onheakā ao'i aguā nda'evei, Nhanderuete ojee rami omoingo rire ipo'akaa oexa uka aguā. Ha'e rā kunhague ma ava po'akaa oexa uka aguā ikuai.
- ⁸ Mba'eta ava va'e ma kunha gui e'ŷ omoingo raka'e, ha'e rā kunha va'e ma ava gui omoingo.
- ⁹ Ha'e kunha pytyvōarā e'ŷ ava oiko raka'e, ha'e rā ava pytyvōarā kunha oiko.
- ¹⁰ Ha'e nunga rupi kunhague omoī'rā akā ao'ia, anjo kuery pe voi ipo'akaa oexa uka aguā.
- ¹¹ Ha'e rami teĩ Senhor re vy kunhague ndoikoi 'rā avakue e'ŷ re, ha'e avakue voi ndoikoi 'rā kunhague e'ŷ re.
- ¹² Mba'eta ava va'e gui kunha omoingoa raka'e teĩ kunhague gui avakue itui'i guive, ha'e opa mba'e oiko Nhanderuete gui.
- ¹³ Peẽ kuery ae peikuua pota: Ha'evea rami ri nda'u kunhague akā ao'ia omoī e'ŷ re onhembo'e aguā Nhanderuete pe?
- ¹⁴ Nhanderekorā oeja pyre gui ndapeikuuai ri ty'y avakue hi'a vuku aguā nda'eveia?
- ¹⁵ Ha'e rā kunhague ma hi'a vuku ramo jajou porā, mba'eta hi'a ma inhakā ao'iarā ome'ëa.
- ¹⁶ Ha'e amboae rami amongue oikuaa vy toikuaa pota pova'e re: Ore ma amboae rami ndorekuai, neĩ Nhanderuete pegua igreja kuery mboae voi.

Senhor pegua ngaru marā rami pa jajapo aguā re ijayvua

- ¹⁷ Ha'e gui po ramigua ma roguerovy'aa rupi e'ŷ ambopara, mba'eta pendekuai porāve aguā rami e'ŷ ri penhemboaty, ha'e rā napendekuai porāive aguā rami.
- ¹⁸ Mba'eta jypy'igua omombe'ua rā aendu joo rami e'ŷ-e'ŷ pendekuaia igreja penhemboatya py. Xee ma amongue henda py arovia guive.
- ¹⁹ Mba'eta peẽ kuery joo rami e'ŷ-e'ŷ 'rāe pendekuai, penembyte py ha'evea rami ikuai va'e ojekuaa porā aguā.
- ²⁰ Ha'e gui ngaru oiko aguā py penhemboaty vy Senhor pegua ngaru e'ŷ pe'u.
- ²¹ Mba'eta pekarua py peteĩ-teĩ ha'e ranhe 'rā ojopy ho'u va'erā. Oĩ 'rā inhembyayi va'e, oĩ avi 'rā oka'u va'e.
- ²² Pendero ndaperekoi ri ty'y pekaru ha'e pey'u aguā? Tyrā pa Nhanderuete pegua igreja napembovarei mba'eve oguereko e'ŷ va'e kuery pemoximbaa py? Mba'e ha'e 'rā tu pêvy? "Roguerovy'a" ha'e 'rā teve? Ha'e rami pendekuaia anhetē xee ndarovy'ai.
- ²³ Mba'eta xee Senhor gui aikuaa va'ekue pendevy pe ju amombe'u: Senhor Jesus ojopy uka nhemia pytū ma ojopy raka'e mbojape,
- ²⁴ ha'e oguerovy'a rire oipe'ã. Ha'e vy aipoe'i: "Kova'e ma xerete pendere ame'ë va'e. Guĩ nunga pejapo 'rā xere penema'endu'a vy", he'i.
- ²⁵ Ha'ekue rami ae ju okarupa rire ojopy karo. Ha'e vy aipoe'i: "Kova'e karo ma xereve guarā ipyau va'e xeruguy rupi ajapo va'e. Guĩ nunga pey'u nhavõ xere penema'endu'a aguā pejapo", he'i raka'e.
- ²⁶ Mba'eta ha'e va'e regua mbojape pe'u, ha'e karo gui pey'u nhavõ Senhor ou jevy peve peikuua uka 'rā omanoague.*
- ²⁷ Ha'e nunga rupi amongue ha'eve'ŷa rami oiko reve mbojape ho'u, ha'e Senhor karo gui oy'u va'e ma Senhor rete ha'e huguy py onhemboeko ky'a.
- ²⁸ Ha'e nunga rupi peteĩ-teĩ toikuaa pota gueko re ae. Ha'e rire mae ma to'u mbojape, ha'e toy'u karo gui.
- ²⁹ Mba'eta amongue Senhor rete mboetea rupi e'ŷ ho'u ha'e oy'u vy ha'e ae onhembopaga uka ho'u ha'e oy'uague re.
- ³⁰ Ha'e nunga rupi ae peẽ kuery va'e regua hetu ikuai ikangy ha'e imba'eaxy va'e, ha'e mbovy e'ŷ ma guive oke.*
- ³¹ Ha'e rā nhandere ae jaikuaa pota ramo nanhanembopagai 'rā.
- ³² Ha'e rami avi Senhor nhanembopaga vy nhanemo'arandu, yvy regua reve japaga ve'ŷ aguā.

* 11:26 Mateus 26.26-30; Marcos 14.22-26; Lucas 22.14-20 * 11:30 "Oke" he'ia ma Cristo pegua omano va'ekue re ijayvu vy (15.20).

³³ Ha'e nunga rupi xe-irmão kuery, pekaru aguã py penhemboaty vy penhoarõ ke jomeme.

³⁴ Xapy'a rei amongue okaruxea rive oendu vy ngoo py ae tokaru, penhemboatya py penhembopaga uka e'ŷ aguã. Ha'e gui amboae nunga re peẽ kuerya py avaẽ ma rire mae ma xeayvu 'rã.

12

Nhe'ẽ ojapo kuaa ucaa re ijayvua

¹ Irmão kuery, xee aipota peikuaa porã Nhe'ẽ guigua ome'ẽmby ikuai va'e.

² Mba'eta ymave rupi ndapejeroviai teri jave opa marã rei pejererekko uka va'ekue mba'emo ra'angaa ijayvu e'ŷ va'e pe rive pendekuai aguã, peikuaa rami.

³ Ha'e nunga rupi po rami xeayvu pendevy: Nhanderuete Nhe'ẽ gui amongue ijayvu vy "Jesus ayvu vaipy toiko" nde'i 'rã. Ha'e rami ae avi Nhe'ẽ Ky'a E'ŷ gui anho 'rã "Jesus ma Senhor" 'ea. *

⁴ Ha'e gui nhanerembiaporã Nhanderuete ome'ẽ va'e ma joo ramigua e'ŷ-e'ŷ, ha'e rã Inhe'ẽ ma peteĩ'i.*

⁵ Joo ramigua e'ŷ-e'ŷ 'rã nhanerembiaporã oĩ, ha'e rã Senhor ma peteĩ'i.

⁶ Joo rami e'ŷ-e'ŷ nhamba'eapo, va'eri ha'e nunga ha'e javi ma Nhanderuete ojapo kuaa uka pavẽ pe.

⁷ Mba'eta peteĩ-teĩ pe oikuua uka 'rã Nhe'ẽ guigua pavẽ pe ojapo porã aguã.

⁸ Mba'eta amongue pe Nhe'ẽ guigua ome'ẽ 'rã o'arandua rupi ijayvu aguã. Amboae pe ma Nhe'ẽ guigua ome'ẽ 'rã ayvu mba'emo kuaa ukaarã.

⁹ Amboae pe ma Nhe'ẽ guigua ome'ẽ 'rã ojerovia ete aguã. Ha'e rã amboae pe ma Nhe'ẽ guigua ome'ẽ 'rã nhomonguera aguã.

¹⁰ Amboae pe ma ome'ẽ 'rã hexa pyrã ojapo aguã. Amboae pe ju ome'ẽ 'rã Nhe'ẽ guigua ayvu omombe'u aguã. Amboae pe ma ome'ẽ 'rã nhe'ẽ ikuai va'e re oikuua pota aguã. Amongue pe ma ome'ẽ 'rã opa marãguia ayvu py ijayvu aguã. Ha'e rã amboae pe ma ome'ẽ 'rã ha'e rami ijayvua rã mba'e he'i paa omombe'u porãve aguã.

¹¹ Ha'e rami avi peteĩ'i ae Nhe'ẽ ojapo kuaa uka 'rã ha'e nunga ha'e javi. Peteĩ-teĩ pe ombojoja 'rã ha'e ae oipotaa rami.

Nhanderete re igreja ombojojaague

¹² Mba'eta nhanderete minha peteĩ'i oĩ va'eri heta oĩ hexegua, ha'e hexegua ikuai va'e ma heta teĩ ha'e javi vy peteĩ tete ojapo. Ha'e rami ae Cristo pegua nhandekuai.*

¹³ Mba'eta peteĩ'i Nhe'ẽ reve nhande kuery ha'e javive nhanemongarai raka'e peteĩ teterã, judeu, grego, escravo, escravo e'ŷ regua voi. Mba'eta nhande kuery ha'e javive pe ome'ẽ peteĩ'i Nhe'ẽ gui jay'u aguã.

¹⁴ Mba'eta nhanderete re minha peteĩ'i regua e'ŷ oĩ, heta.

¹⁵ Xapy'a rei nhandepy aipoe'i 'rã: "Xee ma ipo e'ŷ vy tete regua e'ŷ aiko", he'i teĩ ha'e nunga rupi voi ndoiko e'ŷi 'rã nhanderete regua.

¹⁶ Xapy'a rei nhandeapyxa aipoe'i rã: "Xee texa e'ŷ vy tete regua e'ŷ aiko", he'i teĩ ha'e nunga rupi voi ndoiko e'ŷi 'rã tete regua.

¹⁷ Mba'eta nhanderete re texa anho oĩ va'e rire mba'exa 'rãgue tu jajapyxaka? Apyxa anho oĩ va'e rire mba'exa 'rãgue tu nhaetũ?

¹⁸ Ha'e rami 'rãgue py nhanderete re ma Nhanderuete ae tete regua ha'e javi omoĩ, ha'e ae omoixea rami.

¹⁹ Mba'eta ha'e javive joo ramigua anho oĩ va'e rire mba'e nunga tete 'rãgue tu oiko?

²⁰ Ha'evea rami tete regua heta oĩ, peteĩ'i tete ojapo aguã.

²¹ Nda'evei nhandepo pe nhanderexa "Ndee noroikotevẽi" he'i aguã. Neĩ nhaneakã voi nda'evei nhandepo pe "Peẽ noroikotevẽi" he'i aguã.

²² Ha'e rami 'rãgue py nhanderete regua ikangykueve va'e teĩ nhaikotevẽ ete 'rã.

* 12:3 1 João 4.1-3

* 12:4 Romanos 12.6-8; 1 Coríntios 14.29; 1 Pedro 4.10,11

* 12:12 Romanos 12.3-5; Efésios

1.22,23; 4.11-16

²³ Nhanderete regua ovare e'ŷve va'e teĩ nhamboeteve 'rã. Na'iporãive va'e re nhapena porâve 'rã.

²⁴ Ha'e rã nhanderete regua jaexa ukave va'e ma nhamboete e'ŷ teĩ ha'eve 'rã. Mba'eta Nhanderuete tete regua omoĩ vy ombovare ukave ovare e'ŷve va'e,

²⁵ nhanderete regua joe opu'ã okuapy e'ŷ aguã, tete regua peteĩ rami meme oĩ aguã jomeme opena porãa rupi.

²⁶ Mba'eta peteĩ tete regua ojexavai ramo ha'e javive 'rã ojexavai hexeve. Peteĩ omboetea rã ha'e javive avi 'rã ovy'a hexeve.

²⁷ Ha'e rami ae peẽ kuery ma Cristo rete pendekuai, peteĩ-teĩ hete regua peĩ.

²⁸ Ha'e gui igreja mbyte py Nhanderuete omoĩ va'e jypy rã apóstolo-rã, mokoĩa ma profeta-rã, mboapya ma porombo'earã, ha'e va'e rire ma hexa pyrã apoarã, ome'ẽ avi nhomonguera aguã, nhopytyvõ aguã, joe opena aguã, ha'e opa marãgua ayvu py ijayvu aguã.

²⁹ Ha'e javive teve apóstolo ikuai? Tyrã pa ha'e javive 'rã profeta? Ha'e javive teve porombo'ea ikuai, tyrã pa hexa pyrã apoarã?

³⁰ Ha'e javive pe teve ome'ẽ nhomonguera aguã? Ha'e javive teve ijayvu kuaa 'rã amboae ayvu py? Ha'e javive teve omombe'u porâve kuaa 'rã amboae regua ayvu?

³¹ Any teĩ penhea'ã tema ome'ẽmbi iporãgueve pejopy aguã.

Mborayvu iporãve va'ea re ijayvua

Ha'e gui peteĩ tape pavẽ gui iporãve va'e ju amombe'u ta pendevy.

13

¹ Avakue ha'e anjo kuery ayvu py xeayvu kuaa va'e rire xeporayvu e'ŷ ri vy itapu onhendu va'e rami rive 'rãgue aiko, e'ŷ vy hy'a pu rami rive.

² Ha'e rami e'ŷ vy Nhe'ẽ guigua amombe'u kuaa va'e rire, mba'emo ndokuaa ukai pyre ha'e 'arandua ha'e javi aikuaapa, ha'e yvyty voi arova kuaa aguã rami ajeroviaa oĩ teĩ xeporayvu e'ŷ ri vy mba'everã ndavarei 'rãgue.

³ Iporiaukue'i pe xemba'e rei-rei ame'ẽmba va'e rire, ha'e xerete rapyarã pe amboaxa teĩ xeporayvu e'ŷ ri vy ha'e nungakue gui ndajoui 'rãgue mba'eve.

⁴ Ha'e rami 'rãgue py nhandeporayvua rupi nhandekuai vy ma nanhanhogueroangeko rei 'rã, jajapo porã 'rã joupe. Nhandeporayvua rupi vy joe nanhanerakâte'ŷi 'rã, nanhanhemboyvatei 'rã, neĩ ndajajejou porã rei 'rã guive.

⁵ Ha'eve'ŷa rami rei ndajaikoi 'rã, nhande ae jaipota va'e anho ndajajapoi 'rã, nanhande-vai rei 'rã, nhandevy otekoavya rã nanhanhenhandu vaikue rei 'rã,

⁶ ndajarovy'ai 'rã teko vai, ha'e anhetẽ va'e anho 'rã jarovy'a.

⁷ Opa mba'e py nanhandekuerai 'rã, opa mba'e jarovia 'rã, opa mba'e nharõ kuaa 'rã, opa mba'e jaropo'aka 'rã guive.

⁸ Mborayvu ma opa va'erã e'ŷ. Ha'e rã Nhe'ẽ guigua nhamombe'ua ma opa 'rã, amboae ayvu py nhandeayvua opa 'rã, mba'emo jaikuua aguã voi opa avi 'rã.

⁹ Mba'eta amongue henda py ete'i jaikuua mba'emo, ha'e amongue henda py ete'i guive nhamombe'u kuaa 'rã Nhe'ẽ guigua.

¹⁰ Ha'e gui ma opa mba'e py iporã va'e ou jave ma amongue henda py ete'i jajapo kuaa ague omombaa 'rã.

¹¹ Xee minha xekyrĩ jave py kyrĩ va'e rami xeayvu, mba'emo aendu, ha'e xepy'a va'ekue. Ha'e gui xetuja ma vy xekyrĩ jave aikoague rami ve'ŷ ma aiko.

¹² Mba'eta aŷ ma mba'emo jaexa epéko oje'opa va'e re ojexa vai-vai va'e rami. Ha'e rã ha'e va'e jave py ma hova re nhama'ẽ reve 'rã jaexa. Aŷ ma amongue henda py ete'i aikuua mba'emo. Ha'e rã ha'e va'e jave py ma aikuua porãmba 'rã Nhanderuete xekuaa-a rami avi.

¹³ Ha'e gui aŷ mboapy oiko: jajeroviaa, nharõa ha'e mborayvu. Ha'e va'e gui yvateve va'e ma mborayvu.*

* 13:13 João 13.31-35; Gálatas 5.13,14; Colossenses 3.12-14

14

Amboae ayvu py nhandeayvua gui Nhe'ẽ guigua nhamombe'ua yvatevea re ijayvua

¹ Peiko ke mborayvu re, ha'e penhea'ã Nhe'ẽ guigua ome'ẽmbry pejopy avi aguã. Penhea'ãve Nhe'ẽ guigua ayvu pemombe'u aguã.

² Mba'eta amboae ayvu py ijayvu va'e ma amboae kuery oendu aguã e'ŷ ijayvu, Nhanderuete anho, mba'eta avave rei noendu kuaai 'rã, mba'eta jaikuua e'ŷ va'e re ijayvu onhe'ẽ py ae.*

³ Ha'e rã Nhe'ẽ guigua ayvu mombe'ua ma nhaendu kuaa aguã ijayvu, nhanemombaraete, nhanemongeta ha'e nhanembopy'a porã aguã guive.

⁴ Amboae ayvu py ijayvu va'e ma ha'e ae onhemombaraete. Ha'e rã Nhe'ẽ guigua mombe'ua ma omombaraete 'rã igreja kuery ha'e javi.

⁵ Xee aipota teĩ peẽ kuery ha'e javive pendeayvu amboae ayvu py. Ha'e rami avi aipotave va'e ma Nhe'ẽ guigua ayvu pemombe'u, mba'eta Nhe'ẽ guigua mombe'ua ma amboae ayvu py ijayvu va'e gui yvateve, oayvua ae omombe'u porãve e'ŷ re igreja kuery omombaraeteve aguã.

⁶ Aŷ ma irmão kuery, amboae ayvu py xeayvu reve peẽ kuerya py avaẽ va'e rire mba'exa tu roipytyvõ 'rãgue? Peteĩve henda py noroipytyvõi 'rãgue. Ha'e rã Nhanderuete oikua uka va'ekue amombe'u ramo ha'eve, e'ŷ vy mba'emo aikuua va'e, Nhe'ẽ guigua, e'ŷ vy rombo'ea rupi xeayvu ramo ha'eve avi.

⁷ Mba'eta mba'epu omyi e'ŷ va'e voi, mimby, mbaraka mba'e nhaendu porã aguã rami e'ŷ ri ombopua ramo mba'exa tu nhaendu kuaa ta mba'epu ombopua rã?

⁸ Ha'e rami avi mimby guaxu nonhendu porãi ri ramo mava'e tu oiko katu ta joe opu'ã aguã?

⁹ Ha'e rami ae avi peẽ voi amboae ayvu py amboae kuery oikuua aguã rami e'ŷ ri pendeayvu ramo mba'exa tu oendu kuaa ta aipopejea? Mba'eta yvate rupi rive ijayvu va'e rami 'rãgue pendeayvu.

¹⁰ Anhetẽ opa marãguia ayvu ikuai ko yvy re, ha'e rã ayvu oendu kuaa aguã ramigua e'ŷ ma jipoi.

¹¹ Ha'e rami teĩ amongue ijayvu rã mba'e he'ia pa xee aikuua e'ŷ va'e rire ixupe amboae regua rami xee aiko 'rãgue, ha'e va'e voi amboae regua 'rãgue oiko xevy.

¹² Ha'e rami ae avi peẽ voi Nhe'ẽ guigua ome'ẽmbry pejopyxe vy penhea'ãve igreja kuery mombaraetearã pejopy aguã.

¹³ Ha'e nunga rupi amboae ayvu py ijayvu va'e tojerure oayvua omombe'u porãve kuaa avi aguã re.

¹⁴ Mba'eta amboae ayvu py ri Nhanderuete pe anhembo'e ramo xenhe'ẽ anhetẽ onhembo'e 'rã, ha'e rã xe'arandua ma oĩ rive 'rã.

¹⁵ Mba'exa tu aiko 'rã ha'vy? Xenhe'ẽ py anhembo'e 'rã, ha'e xe'arandua py guive. Xenhe'ẽ py aporaei 'rã, ha'e xe'arandua py guive.

¹⁶ Mba'eta penenhe'ẽ py anho ri Nhanderuete perovy'a ramo mba'exa tu oikuua e'ŷ va'e "Amém" he'i ta perovy'apa ma ramo? Mba'eta ndoikuuai 'rã mba'e pejea paa.

¹⁷ Peẽ anhetẽ Nhanderuete perovy'a porã'i, ha'e rã pendeayvua oendu va'e ma napemombaraetei 'rã.

¹⁸ Xee arov'y'a Nhanderuete mba'eta peẽ kuery ha'e javive gui xeayvuve amboae ayvu py.

¹⁹ Ha'e rami teĩ amboae ayvu py dez mil-kue xeayvu 'rãgue py igreja kuery ikuiai py ajou porãve xe'arandua reve peteĩ nhiruĩ ayvu py ete'i xeayvu aguã, anhombo'e porã aguã.

Igreja kuerya py ipoua kuery ikuai jave ome'ẽmbry jaiporu kuaa aguã re ijayvua

²⁰ Irmão kuery, kyrigue rami peiko eme pene'arandua py. Teko vai py ma kyrigue rami peiko teĩ ha'eve. Ha'e rã pene'arandua py ma kakuaakue oiko kuaa va'e rami peiko.

²¹ Lei re ipara oiny: "Kova'e kuery pe xeayvu 'rã amboae ayvu py, amboae regua ayvu rupi 'rã xeayvu teĩ naxenhe'ẽ rendui 'rã", he'i Senhor.*

* 14:2 1 Coríntios 12.7-11,27-31 * 14:21 Isaías 28.11-12

²² Ha'e nunga rupi ayvu mboae py ijayvua ma mba'emo kuaa ukaarã oiko, teĩ ojerovia va'e kuery pe'ŷ, ojerovia e'ŷ va'e kuery pe anho. Ha'e rã Nhe'ẽ guigua ayvu omombe'ua ma ojerovia e'ŷ va'e kuery pegua e'ŷ, ojerovia va'e kuery pegua.

²³ Ha'e gui igreja kuery ha'e javi joa py onhemboaty vy amboae ayvu py ha'e javive ijayvu ramo amongue oikuaa e'ŷ rei va'e, ojerovia e'ŷ va'e oike vy oendu vy "Na'inhakã porãveipa", nde'i 'rã ri ty'y?

²⁴ Ha'e rã Nhe'ẽ guigua ayvu ri ha'e javive omombe'u rã amongue ojerovia e'ŷ va'e, oikuaa e'ŷ va'e oike vy oendu vy onhemboaxy 'rã, mba'eta ha'e javi ijayvu rã oendu 'rã gueko regua meme, ojeupe guarã ae.

²⁵ Ha'e va'e opy'apy py mba'emo onhomni va'ekue teĩ oikuaapaa 'rã. Ha'e ramo guenapy'ã re oĩ vy ngova yvy re omovaẽ reve omboete 'rã Nhanderuete. Ha'e vy "Nhanderuete anhetẽ ete ri penembyte oĩ", he'i 'rã.

Nhanhemboatya py ha'evea rami meme nhandekuai aguã re ijayvua

²⁶ Ha'e gui irmão kuery, mba'exa tu ha'vy pendekuai 'rã? Mba'eta penhemboatya py amongue ogueru 'rã jogueroporaei aguã, ha'e rã amboae ma nhombo'e aguã 'rã ogueru, amongue ma ogueru 'rã mba'emo oikuaa uka aguã, ha'e rã amboae ma ayvu mboae py ijayvu aguã rami 'rã oiko, ha'e amboae ju omombe'u porãve 'rã ijayvague. Ha'e nunga ha'e javi ma nhomombaraete aguã rami meme tojeapo.

²⁷ Ha'e gui amboae ayvu py ri amongue ijayvu vy mokoĩ e'ŷ vy mboapy anho ta'ijayvu jorire. Toĩ avi ijayvague omombe'u porãve va'erã.

²⁸ Ha'e rami avi imombe'u porãvearã noĩ ramo pekyrirĩ 'rã peiny igreja kuerya py. Pendejeupe ae, ha'e Nhanderuete reve anho 'rã pendeayvu.

²⁹ Profeta kuery voi mokoĩ e'ŷ vy mboapy ta'ijayvu, ha'e rã amboae kuery ma toikuaa pota ijayvua re.

³⁰ Ha'e gui xapy'a rei peteĩ oguapy oiny va'e pe Nhe'ẽ mba'emo oikuaa uka ramo jypy'igua tokyrirĩ ranhe.

³¹ Ha'e rami vy Nhe'ẽ guigua ayvu jorire peteĩ-teĩ omombe'u teĩ ha'eve 'rã, pavẽ oikuaa vy ipy'a guaxuve aguã.

³² Mba'eta profeta kuery ikuai va'e ma ojoko kuaa 'rã onhe'ẽ ae.

³³ Mba'eta Nhanderuete ma nanhanemboeko eta rei, peteĩ rami 'rã nhanemoingo.

Ha'e javi igreja ikuai va'e rupi iky'a e'ŷ va'e kuery ikuiai py

³⁴ kunhague okyrirĩ 'rã okuapy pavẽ onhemboatya py, nda'evei ijayvu aguã. Ha'e rami 'rãgue py ome kuery po'akaa re ta'ikuai, lei re oĩa rami vy.

³⁵ Xapy'a rei kunhague mba'emo oikuaa porãvexe vy ome pe toporandu ngoo py ae. Mba'eta pavẽ onhemboatya py ri kunhague ijayvu vy oximba rei aguã rami ikuai.

³⁶ Tyrã pa peẽ kuerya gui ranhe ri ty'y Nhanderuete ayvu ou raka'e? Ha'e rami e'ŷ vy pendevy pe anho ri ty'y oikuaa uka raka'e?

³⁷ Amongue ojeupe ae "Profeta" e'ŷ vy "Nhe'ẽ reveguia" he'i va'e toikuaa pota povae're: Pendevy pe xee amboparaa ma Senhor ae ojapo uka va'e meme.

³⁸ Pova'e nunga re amongue ndojapyxakaxe rami ijayvua re ju tojapyxakaa eme.

³⁹ Ha'e gui xe-irmão kuery, penhea'ave tema Nhe'ẽ guigua ayvu pemombe'u kuaa aguã. Pejoko eme guive amboae ayvu py amongue ijayvu rã.

⁴⁰ Ha'e nunga ha'e javi ma ha'evea rami meme tojeapo jorire-rire.

15

Cristo onhemboete ju rire nhanhemboete ju avi aguã re ijayvua

¹ Irmão kuery, aŷ romoma'endu'a ta ayvu porã amombe'u aikovy va'e re. Ha'e va'e ma perovia rire hexe peĩ atã teri.

² Ha'e va'e rupi peo jepe guive, xapy'a rei pendevy ayvu amombe'u va'ekue pendejee pemoi riae vy. Ha'e rami e'ŷ ri vy peroviaague mba'everã ndovarei 'rã.

³ Mba'eta xevy pe ranhe ayvu oikuaa uka pyre pendevy ju amombe'u va'ekue: Jaje-javyague re Cristo omano raka'e ipara oĩa rami vy.

- ⁴ Ha'e gui onhono porāa, ha'e mboapy araa py onhemboete ju, ipara oĩa rami vy ae ju.*
⁵ Ha'e gui jypy'i ojexa uka Cefas pe, ha'e va'e rire ma doze-ve pe.
⁶ Ha'e va'e rire ma peteigue pyve ojexa uka quinhentos raxa irmão kuery pe. Ha'e va'e kuery regua heta okuave aŷ peve, ha'e rã amongue ma oke ma.
⁷ Ha'e va'e rire ma Tiago pe ju ojexa uka, ha'e gui apóstolo kuery ha'e javive pe.
⁸ Ha'e gui opaa py xevy pe avi ojexa uka, are rire itui'i va'ekue pe rami.
⁹ Mba'eta xee ma apóstolo kuery mboae gui xe'yvyïve va'e aiko, ha'e Nhanderuete pegua igreja kuery re apu'ã rei rire nda'evei va'ekue apóstolo-rã xerenoña aguã.
¹⁰ Ha'e rami teĩ Nhanderuete xemboaxy ramo apóstolo xee aiko. Xemboaxyia ndoaxa rivei guive, mba'eta apóstolo kuery ha'e javive gui amba'eapove va'e. Xee ae e'ŷ guive, Nhanderuete xemboaxyia xere oĩ va'e ojapo.
¹¹ Ha'e rami teĩ xee, e'ŷ vy ha'e kuery teĩ ha'e rami ae romombe'u va'e, ha'e gui ha'e rami ae ju perovia raka'e.
¹² Ha'e gui Cristo omanoague gui onhemboete jevyague romombe'u ramo mba'exa tu peẽ kuery regua amongue ijayvu ri omano va'ekue nonhemboete jevyi 'rãa rami?
¹³ Mba'eta anhetẽ ri omanoague gui nonhemboete jevyai va'e rire Cristo voi nonhemboete jevyi 'rãgue raka'e.
¹⁴ Ha'e Cristo nonhemboete jevyi va'e rire mba'everã ndovarei 'rãgue ayvu romombe'ua ha'e pejeroviaa.
¹⁵ Ha'e Nhanderuete ayvu romombe'u merami rive 'rãgue, Nhanderuete rovai oreapu va'e rami roiko 'rãgue, mba'eta Cristo omboete jevyague romombe'u. Mba'eta Cristo nomboete jevyi va'e rire omano va'ekue nonhemboete jevyi ae 'rãgue.
¹⁶ Mba'eta omano va'ekue nonhemboete jevyi ri ramo Cristo voi nonhemboete jevyi 'rãgue raka'e.
¹⁷ Ha'e Cristo nonhemboete jevyi va'e rire pejeroviaa mba'everã ndovarei 'rãgue, ha'e pejejavya rupi teri peiko 'rãgue.
¹⁸ Ha'e rami anho e'ŷ, Cristo pegua oke va'ekue voi okanhymba ae 'rãgue.
¹⁹ Xapy'a rei aŷ jaikovea peve'i Cristo guigua nharõa ovare va'e rire pavẽ gui ov'y'a e'ŷve va'e jaiko 'rãgue.

Oke va'e kuery gui Cristo ranhe oikove jevyague re ijayvua

- ²⁰ Ha'e rami avi anhetẽ ete omano va'ekue mbyte gui Cristo onhemboete ju raka'e, oke va'e kuery gui ha'e ranhe oikove ju aguã.
²¹ Mba'eta peteĩ'i ava gui nhamano aguã ouague rami peteĩ ava gui avi ou nhamanoague gui nhanhemboete ju aguã.
²² Mba'eta Adão re vy nhamano aguã rami japyta pavẽ. Ha'ekue rami avi Cristo re vy pavẽ jaikove ju 'rã.
²³ Ha'e rami avi peteĩ-teĩ hi'ára py porã 'rã oikove ju. Cristo ma jypygua ete raka'e. Ha'e va'e rire Cristo ou jave ma ixupeguia kuery ju 'rã okuave.
²⁴ Ha'e va'e rire mae ovaẽ 'rã opaa ára. Ha'e jave py yvatekueve ha'e ipo'akakueve ha'e javi Cristo omokanhymba ma rire Nguuete pe ju 'rã omboaxa opo'akaa.
²⁵ Mba'eta ipo'aka 'rã ngovaigua kuery ha'e javive opy guýry omo'yvyimba peve.
²⁶ Hovaigua opa vygua omomba va'erã ma mano,
²⁷ “Opa mba'e omo'i 'rã ipy guýry”, he'iague rami. Ha'e rami avi “Opa mba'e ipo'aka guy py omo'i”, he'ia py ma ipo'aka guy py opa mba'e moĩare re ae e'ŷ guive ijayvu.*
²⁸ Ha'e gui ipo'aka guy py Tuu opa mba'e omo'i ma rire mae ma Ta'y voi ha'e ae onhemoi 'rã opa mba'e moĩare po'aka guy py, Nhanderuete opa mba'e re ipo'aka aguã.

Nhanhemboete ju va'erã vy marã rami pa jaiko aguã re ijayvua

- ²⁹ Ha'e rami e'ŷ ramo mba'exa 'rã tu ikuai omano va'ekue re vy onhemongarai va'e? Anhetẽ ri omano va'ekue nonhemboete jevyi va'e rire mba'e re tu ha'e kuery onhemongarai 'rã omano va'ekue re?

³⁰ Ha'e mba'e re tu ore voi ndorojeayvuveikue py orekuai ára nhavõ?

³¹ Mba'eta ko'ẽ nhavõ xee ajejuka uka. Irmão kuery, ha'e rami xeayvu mba'eta Cristo Jesus nhande-Senhor re vy peẽ kuery roguerovy'a vy.

³² Xapy'a rei avakue oikuua rami rive ri Éfeso tetã py mymba inharõ va'e reve anhea'ã va'e rire mba'e 'rāgue tu ajopy ha'e nunga rekovia? Mba'eta omano va'ekue nonhemboete jevyvei ri ramo "Jakaru ha'e jay'u tema, mba'eta ko'ẽ rã nhamanomba 'rã", ja'e 'rāgue.*

³³ Pejekore eme, mba'eta heko vai va'e re penhemoirũ ramo ombovaipa 'rã pendereko porãa.

³⁴ Pendekuai porã pota nho ke, pejejavy ve'ŷ aguã. Mba'eta peẽ kuery regua amongue ikuai Nhanderuete ndoikuuaai teri va'e. Ha'e rami xeayvu peximba aguã.

Onhemboete jevy vy guete oguerekova'erã re ijayvua

³⁵ Ha'e gui amongue aipopeje 'rã: "Marã rami 'rã tu ha'vy omano va'ekue onhemboete ju? Marã ramigua tete 'rã tu ha'e kuery oguerekova'erã?" peje 'rã.

³⁶ Pene'arandu e'ŷ va'e, mba'emo ra'yigue omoaĩ mbyre rami 'rã ikuai, mba'eta ha'yigue ma omano e'ŷ re naenhoĩ 'rã.

³⁷ Mba'emo ra'yigue omoaĩ va'e minha heterã reve'ŷ 'rã nhamoaĩ, ha'yigue anho, trigo e'ŷ vy amboae ra'yigue rei.

³⁸ Nhanderuete ae heterã ome'ẽ 'rã ome'ẽxeia rami, peteĩ-teĩ ha'yigue pe heterã ae ome'ẽ.

³⁹ Ha'e javi ho'o va'e voi joo ramigua e'ŷ-e'ŷ: Peteĩ ma avakue ro'o, amboae ma mymba ro'o, amboae ma guyra, ha'e amboae ma pira ro'o.

⁴⁰ Ikuai avi yva regua ha'e yvy regua. Anhetã yva regua jaexa rã yvy regua reve joo rami e'ŷ-e'ŷ iporã va'e.

⁴¹ Kuaray rexakã ma ha'e rami 'rã iporã, jaxy rexakã ma amboae rami 'rã, ha'e jaxy-tata rendy ma amboae rami ju 'rã iporã. Jaxy-tata ikuai va'e voi joo rami e'ŷ-e'ŷ 'rã hendy.

⁴² Ha'e rami ae avi 'rã omano va'ekue onhemboete ju jave. Nhanderetekue ivaipa aguã rami onhono porãa va'ekue ri onhemboete ju 'rã ivaipa ve'ŷ aguã rami. Nda'evei va'ekue onhono porãa va'ekue ri onhemboete ju 'rã imarã ve'ŷ aguã.*

⁴³ Ikangy va'e onhono porãa va'ekue ri onhemboete ju 'rã ipo'aka reve.

⁴⁴ Nhande regua tete onhono porãa va'ekue ri onhemboete jevy vy Nhe'ẽ guigua ju 'rã oiko. Mba'eta oiko nhande regua tete, ha'e Nhe'ẽ guigua tete avi oiko.

⁴⁵ Mba'eta ipara oiny: "Ava jypygua Adão ma omoingo raka'e oikove va'erã, ha'e rã opa vyguia Adão ma nhe'ẽ nhomoingovearã oiko."*

⁴⁶ Ha'e rami avi nhande regua ranhe oiko raka'e, Nhe'ẽ guigua e'ŷ. Ha'e rire mae ma Nhe'ẽ guigua oiko.

⁴⁷ Jypygua ava yvy gui ojapo rire yvy regua ae oiko. Ha'e rã mokoña ava ma yva guigua.*

⁴⁸ Jypygua ava yvy regua oiko rire avakue mboae yvy regua meme ikuai. Ha'e gui yva guigua ava oikoague rami avi yva guigua 'rã ikuai.

⁴⁹ Yvy regua rami jaiko rire yva guigua rami ju 'rã jaiko.

Okuave va'e voi omnibopyaupaa aguã re ijayvua

⁵⁰ Irmão kuery, po rami amombe'u porã: Ho'o ha'e huguy va'e ma nda'evei Nhanderuete po'akaa pygurarã, mba'eta imarã va'e nda'evei imarã e'ŷa py ikuai aguã.

⁵¹ Ma'ẽ, pendevy amombe'u ta ndoikuua ukai pyre: Pavẽ e'ŷ 'rã jake, teĩ pavẽ 'rã nhanembopyaupa,

⁵² nhaxapymi xapy'a'ia rami 'rã, opa vyguia mimby guaxu onhendu jave. Mba'eta mimby guaxu onhendu rã omano va'ekue onhemboete jevypa 'rã imarã ve'ŷ aguã, ha'e nhande nhanembopyaupa 'rã.*

⁵³ Mba'eta nhanderete imarã va'e onhemonde 'rã imarã e'ŷ aguã py. Nhanderete omano va'erã va'e onhemonde 'rã omano ve'ŷ aguã py.

* 15:32 Isaías 22.13 * 15:42 Filipenses 3.20,21; 1 João 3.2 * 15:45 Gênesis 2.7 * 15:47 "Opa vyguia Adão"
ha'e "Mokoña ava" he'ia ma Cristo re ae ijayvu vy. * 15:52 1 Tessalonicenses 4.13-18

⁵⁴ Ha'e gui nhanderete imarā va'e imarā e'ŷ aguã py ju onhemonde jave, omano va'erā va'e omano ve'ŷ aguã py onhemonde ma jave py mae ma ojeupity 'rā ayvu ipara oinya: "Ipo'akapave va'e ombovaipa ma manoia."*

⁵⁵ Ha'e nunga rupi manoia, mamo tu opyta ndepo'akaague? Mamo tu opyta orepiarā reiporu va'ekue?*

⁵⁶ Mba'eta manoia popia ma jejavya, ha'e jejavya po'akaa ma lei re oĩ.

⁵⁷ Ha'e rami teĩ jarovy'a Nhanderuete, mba'eta nhande-Senhor Jesus Cristo re vy nhanembopo'aka.

⁵⁸ Ha'e nunga rupi xerembiayvu irmão kuery, peĩ atā tema, pejeity uka eme, Senhor pe pemba'eapoa rupi penekyre'ŷ riae guive, mba'eta jaikuua Senhor re vy nhamba'eapoa ndoaxa rivei 'rāa.

16

Judéia pygua kuery iporiaukue'i peguarā mba'emo omono'ō aguã re ijayvuague

¹ Ha'e gui iky'a e'ŷ va'e kuery pe peme'ẽ va'erā pemono'ō aguã re xeayvu po rami: Peẽ voi ke pejapo Galácia pygua igreja kuery pe ajapo ukaague rami avi.

² Ha'e rami vy semana ijypyá ára nhavõ peteĩ-teĩ pendero rupi pemoĩ porã 'rā pejoua rami. Pemono'ō-no'ōve tema, xee avaẽ rã pemono'ō ve'ŷ teĩ ha'eve aguã.

³ Ha'e gui avaẽ ma rire peẽ peiporavo va'e rei amondouka 'rā Jerusalém katy kuaxia para reve. Ha'e rami rã ha'e kuery ogueraa 'rā peme'ẽ va'ekue.

⁴ Xee voi aa avi aguã ha'eve ramo ha'e kuery oo 'rā xerupive.*

Paulo oguataxea re ijayvuague

⁵ Macedônia yvy rupi aaxa rire peẽ kuerya py ju 'rā avaẽ, mba'eta ha'e rupi aaxa aguã rami ranhe aiko.*

⁶ Xapy'a rei peẽ kuery reve aiko are vy aaxa 'rā yro'y jave, ha'e peẽ kuery xepytyvõ 'rā aaxeia katy aguatave aguã.

⁷ Mba'eta aaxa avy vy rive roexa aguã nda'evei, Senhor oipota rã peẽ kuery reve aiko arexe.

⁸ Ha'e rami avi Pentecostes ára peve apyta 'rā Éfeso tetã py,

⁹ mba'eta ha'e py peteĩ okẽ tuvixa va'e ojepe'a xevy amba'eapo aguã, xejokoxe va'e heta ikuai teĩ.

Timóteo ha'e Apolo rekora re ijayvuague

¹⁰ Peẽ kuerya py Timóteo ovaẽ ramo ke pepena porã okyje reia oendu e'ŷ aguã rami, mba'eta xee rami avi Senhor pe ombo'eapo va'e.

¹¹ Ha'e nunga rupi pemboete e'ŷ eme. Ha'e rami 'rāgue py pemondouka porã'i ju xea katy, mba'eta irmão kuery reve roarõ 'rā rokuapy.

¹² Ha'e gui irmão Apolo pe ma mbovykue rei e'ŷ ajerure pendea katy irmão kuery reve oo aguã, teĩ aŷ peve noendui ooxea. Ha'e rami avi ha'eve jave ma ou 'rā.

Opaa py omongetaague

¹³ Peiko kuaa pota ke, peĩ atā pejeroviaa re, pendep'y'a guaxu avakue rami, penembaraete tema guive.*

¹⁴ Mba'emo pejapo va'e mborayvu rupi meme pejapo.

Estéfanas, Fortunato ha'e Acaico reko re ijayvua

¹⁵ Ha'e gui aŷ irmão kuery, po ramo ajerure pendevy. (Mba'eta peikuaa ae ma Estéfanas ro pygua kuery jypygua Acaia py ojeroviaague, ha'e iky'a e'ŷ va'e kuery pytyvõarã ojeko me'ēague.)

¹⁶ Ha'e gui aipota peẽ voi ha'e kuery regua oipotaa rami pendekuai, ha'e hexeve ombo'eapo va'e ha'e javi oipotaa rami guive.

* 15:54 Isaías 25,8 * 15:55 Oséias 13,14 * 16:4 Atos 11,27-30; Romanos 15,25-27; 2 Coríntios 8,1-24 * 16:5 Atos 19,21,22 * 16:13 Efésios 6,10-12; 1 Pedro 5,8-9

¹⁷ Ha'e gui xea py Estéfanas, Fortunato ha'e Acaico ovaẽ ramo avy'a karamboae, mba'eta xevy pe ha'e kuery ojapopa peẽ ndapejapopa reguai va'ekue.

¹⁸ Ha'e rami vy xembopy'a guaxu, penembopy'a guaxua rami avi. Ha'e nunga rupi pemboete ha'e kuery ramigua.

Oxarura ha'e ogueroayvu porãague

¹⁹ Ásia pygua igreja kuery oxarura ukapa pendevy. Senhor re ikuai va'e pendevy oxarura uka ete okuapy, Áqüila, Priscila ha'e hoo py igreja onhemboaty va'e voi.

²⁰ Irmão kuery ha'e javive oxarura uka pendevy. Pexarura joupe-upe iky'a e'ŷ va'e joayvua rami.

²¹ Xee Paulo xepo py ae ambopara axarura avia.

²² Ha'e rã Senhor oayvua rupi e'ŷ ikuai va'e ma ayvu vaipy topyta. Ore-Senhor, eju voi ke.

²³ Tove peẽ kuery tapendu Senhor Jesus penemboaxya.

²⁴ Cristo Jesus re vy xee roayvua toiko avi peẽ kuery ha'e javi reve.

Mokoīguea Corinto pygua kuery pe Paulo ombopara
va'ekue

Mokoīguea Corinto pygua kuery pe Paulo ombopara
va'ekue

Kova'e kuaxia ma Corinto tetā pygua kuery pe apóstolo Paulo ombopara hexe opu'ā rei va'e ikuai omombe'ua rā oendu vy. Ha'e va'e kuery ma ojeupe "Apóstolo" he'i teī ha'eve'ŷa rami nhombo'e, apóstolo Paulo re ijayvu rei, ha'e opa marā rei ikuai aguā rami ojapo guive. Ha'e nunga apóstolo Paulo oendu vy gueko omombe'u porāve ha'e kuery oikuaa porāmba aguā rami. "Mba'eta ore ma Nhanderuete ayvu romombe'ua rupi ndorojokorei. Ha'e rami'rāgue py Cristo re vy Nhanderuete guigua anhetēa rupi oreayvu roikovy, Nhanderuete renonde rupi ae" (2.17). Amongue henda py Paulo ndovy'ai vy ijayvu poyi ha'e kuery pe.

Paulo gueko re ijayvu vy ima'endu'a haxy va'e oendu oikovy va'e re. "Ha'e nunga rupi mboapykue Senhor pe ajerure xegui oipe'a aguā re. Ha'e rami teī ha'e aipoe'i xevy: 'Xee romboaxya ha'eve ma ndevy, mba'eta ikangy va'e re xepo'akaa ojekuaa porāve 'rā', he'i va'ekue. Ha'e nunga rupi avy'a reve 'rā xeayvu xekangya re, xere Cristo po'akaa oī aguā', he'i (12.8-9). Ha'e nunga ma ha'eve nhande kuery pavē pe.

Opaa py Paulo ijayvu ha'e kuery mba'emo ome'ē aguā Jerusalém tetā py Jesus remimbo'e kuery ikuai va'e pe, karuai oiko va'e gui ojexavai okuapy rā.

Oxarura reve ijayvu vy omboypyague

¹ Xee Paulo ma Cristo Jesus pegua apóstolo-rā Nhanderuete oipotaa rami xemoī va'ekue. Irmão Timóteo reve roxarura Nhanderuete pegua igreja kuery Corinto py pendekuai va'e pe, ha'e iky'a e'ŷ va'e kuery Acaia yvy re pendekuai va'e ha'e javi pe guive.

² Tove peē kuery tapendu penemboaxya ha'e mby'a porā Nhanderuete ha'e Senhor Jesus Cristo guigua.

Nhanderuete ombopy'a guaxua re Paulo oguerovy'aague

³ Ta'ima'endu'a porā Nhanderuete nhande-Senhor Jesus Cristo Ru va'e re. Mba'eta Nhanderu ma nhanemboaxy ha'e opa mba'e py nhanembopy'a guaxu va'e.

⁴ Ha'e rami vy ore voi opa mba'e py rojexavai rā orembopy'a guaxu 'rā, ore ju rombopy'a guaxu aguā opa mba'e gui ojexavai va'e, Nhanderuete orembopy'a guaxua py ae.

⁵ Mba'eta Cristo káuxa opa mba'e py rojexavaia rami avi Cristo orembopy'a guaxua voi roendu avi opa mba'e py.

⁶ Ha'e nunga rupi rojexavaia oiko va'e ma peē kuery pendepy'a guaxu ha'e peo jepe aguā oiko. Orembopy'a guaxua voi pendepy'a guaxu aguā oī, mba'eta peē voi pendekuerai e'ŷ re peropo'aka pekuapy ore roiko axya ramigua.

⁷ Peē kuery re rojerovia, mba'eta roikuua ore rami pendekuai axya rami orereve avi 'rā penembopy'a guaxua.

⁸ Mba'eta irmão kuery, aipota peikuua Ásia yvy re roiko jave rojexavaiague. Mba'eta ha'e nunga ndorogueropo'aka kuaavei peve ipoyi ramo noroexa'āvei ma va'ekue roikove aguā re.*

⁹ Ha'e rami vy orepy'a re romano taa roendu karamboae orejee ae rojerovia e'ŷ aguā, ha'e rā Nhanderuete omano va'ekue omboete jevy va'e re anho.

¹⁰ Mba'eta ha'e ae orereraa jepe karamboae ha'e rami ete romano aguā va'ekue gui. Hexe vy roarō orereraa jepe riaeve aguā,

¹¹ peē kuery voi orepytvō ramo pejerurea py. Ha'e rami rā heta 'rā Nhanderuete oguerovy'a orere, heta ojerurea rupi orereraa jepe rire.

* 1:8 Atos 19.23-40

Paulo anhetēa rupi oikoa re ijayvuague

¹² Mba'eta pova'e nunga re ae roguerovy'a: Peteīve henda py orepy'a ky'aa noroendui, mba'eta Nhanderuete guigua iky'a e'ŷa ha'e anhetēa rupi orekuai kova'e yvy re, peē kuerya py guive. Avakue 'arandua rupi e'ŷ roiko, ha'e rā Nhanderuete oremboaxya rupi.

¹³ Mba'eta pendevy romboparaague re ma peroayvu vy pendu kuaa va'erā anho oĩ. Ha'e ajerovia pendu kuaa porāmba aguā,

¹⁴ amongue henda py orepy'a re oĩ va'e peikuaa maa rami, nhande-Senhor Jesus oua ára py peē kuery orererovy'a aguā, ore roguerovy'aa rami avi.

Paulo mba'e re pa Corinto py ndooi teria omombe'u porāveague

¹⁵ Ha'e rami peē kuery orekuua aguā re ajerovia vy anhembopy'a teī peē kuerya py ranhe avaē vy jajoexa aguā, peteīgue ju pejopy aguā penemoingo porārā,

¹⁶ ha'e gui peē kuery xepytyvō ramo aave aguā Macedônia yvy katy, ha'e Macedônia gui ajevy vy peē kuerya py ju avaē aguā, Judéia yvy katy ju aa rā xepytyvō aguā.

¹⁷ Ha'e rami aguā re xeayvu vy nda'u rombotavypa reia rupi ri aiko raka'e? To'o revegua rami ri ty'y xeayvu? Xee teve "Ha'eve" ha'e vyve "Nda'evei" ha'e avi va'e?

¹⁸ Ha'e rami 'rāgue py Nhanderuete ojeroviapy oikoa rami avi ore voi peē kuery pe "Ha'eve" ha'e "Nda'evei" ndoro'ei va'e,

¹⁹ Nhanderuete Ra'y Cristo Jesus peē kuery mbyte rupi ore kuery — xee, Silvano ha'e Timóteo — romombe'u va'ekue rami avi, mba'eta Jesus ma "Ha'eve" ha'e "Nda'evei" he'i avi va'e'ŷ. Hexe ma ha'eve va'e anho oĩ.

²⁰ Mba'eta Cristo re vy Nhanderuete ijayvuague ojeupity aguā ha'eve va'e meme. Ha'e rami ae hexe vy Nhanderuete nhamboete vy "Amém" ja'e avi 'rā.

²¹ Mba'eta Nhanderuete ae peē kuery reve nhanemoī atā Cristo re, ha'e ojeupe guarā nhanemoī.

²² Nhandere ha'e nunga kuaa ukaarā omoī vy Onhe'ẽ ae omoī nhanekuraxō re.

²³ Ha'e gui xerekove rupi ae aipoa'e, Nhanderuete voi oikuua xeayvu anhetēa: Peē kuery romomboriau e'ŷ aguā rima ndajuvei teri apy Corinto py.

²⁴ "Pejeroviaa re orepo'aka va'e" nda'e. Ha'e rami avi peē kuery pevy'ave aguā re ronhea'ā. Mba'eta pejeroviaa rupi ae 'rā penembaraeteve.

2

¹ Ha'e rami vy xejeupe ae xeayvu karamboae peē kuery romomboriaua rupi aju ve'ŷ aguā re.

² Mba'eta xee romomboriau va'e rire mava'e 'rāgue tu oiko xembovy'a ju aguā, peē romomboriau va'ekue e'ŷ vy?

³ Ha'e nunga rupi ae ambopara va'ekue, peē kuerya py avaē vy peē xembovy'aarā pendekuai va'e re xeporiau e'ŷ aguā. Mba'eta peē kuery ha'e javi re ajerovia mba'emo xembovy'a va'e peē voi penembovy'a avi aguā.

⁴ Mba'eta xepy'a py aiko axya ha'e ajaxavaia aendu reve ae ambopara va'ekue pēvy, xerexay ete reve guive. Pendeporiau rei aguā e'ŷ guive ambopara, ha'e rā roayvu etea peikuaa aguā.

Ojejavý va'ekue ojeko rerova rā igreja kuery omovaẽ ju aguā re ijayvua

⁵ Ha'e gui penembyte py nhomomboriaua oiko va'ekue ma xee anho e'ŷ xemomboriau, peē kuery ha'e javi penemomboriau amongue henda py. Ha'e rami xeayvu ajou vai etea rupi e'ŷ.*

⁶ Ha'eve ma aŷ peē kuery regua hetave va'e pembopagaague.

⁷ Ha'e gui aŷ ma ha'eve peperdoa ha'e pembopy'a guaxu ju aguā, mboriau gui okanhy ete e'ŷ aguā.

⁸ Ha'e rami vy pēvy ajerure ixupe pexa uka ju aguā peayvua.

* ^{2:5} Ha'e kuery va'e regua otekoavy va'ekue re ijayvu, xapy'a rei itavy rei va'e 1 Coríntios 5 py omombe'u va'ekue re. Apy ma Paulo ijayvu operdoa ju aguā re (Lucas 17.3,4; Gálatas 6.1,2).

⁹ Ha'e nunga rupi ae ambopara va'ekue pēvy, peē kuery anhetē opa mba'e py pa xenhe'ẽ rendu va'ea aexaxe vy.

¹⁰ Mba'eta mba'emokue re pejoperdoa ri ramo xee voi aperdoa. Anhetē peē kuery re ama'ẽ vy aperdoa ae ma Cristo renonde,

¹¹ nhandere Satanás ipo'aka e'ŷ aguā, mba'eta jaikuua porā ae nhanembotavyxea.

Tito ndojoui vy Paulo ndovy'aia re ijayvuague

¹² Ha'e gui Trôade tetā py Cristo regua ayvu porā amombe'u aguā avaẽ jave py peteĩ okẽ ojepe'a xevy Senhor pe amba'eapo aguā.

¹³ Ha'e rami tei xe-irmão Tito ndajoui vy xepy'a py ma avy'aa naendui. Ha'e nunga rupi ha'e kuerya gui ajepo'aka vy Macedônia katy ju aa.

Apóstolo kuery ombo'eapoa rupi Cristo po'akaa ojekuua 'rāa re ijayvua

¹⁴ Ha'e rami avi arov'y'a Nhanderuete, mba'eta Cristo re vy opo'akaa rupi riae orereraa, ha'e ore kuery orekuuaia re opa rupi oikuua uka Cristo regua heakuā porā va'e ramigua.

¹⁵ Mba'eta ore kuery ma Cristo guigua heakuā va'e rami orekuai Nhanderuete pegua, oo jepe va'e ha'e okanhy va'e kuerya rupi.

¹⁶ Okanhy oje'oivy va'e pe ma manoa reakuā rami orekuai, mba'eta ha'e kuery oikuua omano aguā regua romombe'ua. Ha'e rā oo jepe va'e kuery pe ma tekove reakuā rami orekuai, mba'eta oikuua tekove regua romombe'ua. Ha'e ramo mava'e tu ha'eve 'rā ha'e rami aguā?

¹⁷ Mba'eta ore ma Nhanderuete ayvu romombe'ua rupi ndorojokorei, amboae kuery rami e'ŷ. Ha'e rami 'rāgue py Cristo re vy Nhanderuete guigua anhetēa rupi oreayvu roikovy, Nhanderuete renonde rupi ae.

3

Guexeve guarā ojapo pyau pyre inhymague gui iporāvea re ijayvua

¹ Po rami vy ri nda'u oreayvu rojejou porā uka reivea rupi? Amboae kuery rami avi ore voi ri ty'y roipota kuaxia oremombe'uarā pendevy pe rogueraa aguā, ha'e'ŷ vy pende guigua kuaxia romba'eapoa kuaa ukaarā amboae rupi rogueraa aguā?

² Any, mba'eta kuaxia para rami oremombe'uarā ma peē kuery ae pendekuai. Ha'e nunga ma orepy'a re ipara oiny ramo ogueroayvu pavē, oikuapa 'rā.

³ Mba'eta peē ae pexa uka Cristo guigua kuaxia para pendekuia, ore kuery romba'eapoa kuaa ukaarā. Ha'e rami avi tinta py e'ŷ ipara, ha'e rā Nhanderuete oikove va'e Nhe'ẽ py. Itape re'ŷ guive ipara, avakue ro'o re, orekuraxõ re ae.*

⁴ Cristo re vy ha'e rami ae rojerovia Nhanderuete re.

⁵ Orejegui ae e'ŷ guive mba'emo rojapo kuaa, oregui e'ŷ mba'emo oiko. Mba'eta rojapo kuaa aguā ma Nhanderuete gui ae ou.

⁶ Ha'e ae oremo'arandu guexeve guarā ipyau va'e ojapo va'ekue roikuua uka aguā. Ha'e va'e ma ipara regua e'ŷ, ha'e rā Nhe'ẽ guigua. Mba'eta ipara regua nhandejuka 'rā. Ha'e rā Nhe'ẽ ma nhanemoingove 'rā.

⁷ Ipara nhandejukaarā ma itape re omboparaa vy omoexakā reve oeja raka'e. Ha'e nunga gui Moisés rova hexakā raxy ramo hova katy Israel kuery noma'ẽ kuaai raka'e, ogue ovy tei.

⁸ Ha'e va'ekue gui nda'u Nhe'ẽ guigua naexakā ratāive 'rā?

⁹ Mba'eta nhanembopagaarā omoexakā reve oeja rire tekoporā me'ea katuve ma hexakā ratāive 'rā.

¹⁰ Ha'e nunga rupi aŷ hexakā ratāive va'e ou ma rire ymagua omoexakā mbyre rexakā ndojeukuaavei ma.

¹¹ Mba'eta ogue ovu vy va'e omoexakā reve oeja pyre gui ogue va'erā e'ŷ katuve ma hexakā ratāive.

* 3:3 "Itape re ipara va'e" he'ia ma lei Moisés ombopara va'ekue re ijayvu vy, teko yma guare kuaa ukaarā.

- “Senhor Nhe’ẽ oĩa py jaiko porã ‘rã”, he’ia*
- ¹² Ha'e nunga roarõ roikovy vy orepy'a guaxua rupi ete oreayvu.
- ¹³ Ore ma Moisés ngova omo'āague rami e'ŷ orekuai. Mba'eta ha'e va'e ma ngova omo'ā raka'e Israel kuery oexa e'ŷ aguã ogue ovy va'e opa rã.*
- ¹⁴ Ha'e rami teī ha'e kuery 'arandua omopytūmbaa. Mba'eta aŷ peve yma guare guexeve guarã ojapo pyre ogueroayvu rã hova mo'āa oime teri. Imo'āa ma ndoipe'aai teri, mba'eta Cristo re vy mae ma oipe'aa 'rã.
- ¹⁵ Aŷ peve Moisés ombopara va'ekue ogueroayvu rã imo'āa oime teri ha'e kuery py'a re.*
- ¹⁶ Ha'e rã amongue Senhor pe ojeko me'ẽ ramo oipe'aa 'rã imo'āa.
- ¹⁷ Ha'e gui “Senhor” he'ia ma Nhe'ẽ, ha'e mamo rã Senhor Nhe'ẽ oĩa py jaiko porã 'rã opa mba'e gui.
- ¹⁸ Mba'eta nhande kuery ha'e javive nhanderova mo'āa oipe'aa rire Senhor rexakã re nhama'ẽ porã jaikovy epéko re rami. Ha'e ramo nhanembopyau 'rã nhanerexakãve javy aguã rami, Senhor rami ete nhandekuai aguã. Ha'e rami aguã ma Senhor, Nhe'ẽ gui ae ou.

4

- Paulo ojapo 'rã va'ekue ojapo porãa re ijayvuague*
- ¹ Ha'e nunga rupi Nhanderuete oremboaxy vy ha'e ramigua orerembiaporã ome'ẽ rire norekangyi,
- ² neī nhemi rupi ndorekuai mba'emo nharoxī va'erãa rupi. Ronhombotavya rupi e'ŷ orekuai, neī Nhanderuete ayvu ramigua rive noromombe'ui. Ha'e rami 'rãgue py Nhanderuete renonde orekuai anhetẽ va'e roikuua ukaa rupi, ha'evea rami orekuua oikuua pavẽ aguã.
- ³ Ha'e gui xapy'a rei ayvu porã romombe'u va'e ndojekuaai teri vy ma okanhy aguã rami ikuai va'e pe anho ndoikuua ukaai.
- ⁴ Mba'eta ha'e kuery ndojeroviai ramo kova'e yvy regua ruete omopytūmba hi'arandua, ha'e kuery pe Cristo rexakã regua ayvu porã ojekuaa e'ŷ aguã. Ha'e va'e ma Nhanderuete rami ete heko va'e.
- ⁵ Mba'eta ore ma ore ae e'ŷ rojekuaa uka, ha'e rã Cristo Jesus Senhor oikoa. Ha'e rã ore ma Jesus re vy peẽ kuery rembiguai rami roiko.
- ⁶ Mba'eta Nhanderuete “Pytãa gui taexakã hendy va'e”, he'i va'ekue ae oremoexakã avi orepy'a rupi, Cristo rova re hexakã ojekuaa va'e roexa uka aguã.*

- Nhanderuete gui imbaraetea re Paulo ijayvuague*
- ⁷ Ha'e nunga ma iporã ete va'eri hyru yapo gui ojapo pyre ramigua py rive roguereko, pavẽ oikuua aguã ipo'aka etea Nhanderuete gui ae oua, oregui e'ŷ.*
- ⁸ Mba'eta ore ma opa mba'e py oremoingo axya teī ndorejokoa etei. Ndoroikuai rei teī ndorekuerai.
- ⁹ Orere opu'āa rei teī oeja pyre'ŷ orekuai. Orenupãa teī noremombai.
- ¹⁰ Orerete re Cristo ojukaa ague ramigua roendu riae, orerete re hekove voi ojekuaa avi aguã.
- ¹¹ Mba'eta Jesus káuxa nhande jaikove va'e jajejuka uka riae, Jesus rekove ojekuaa avi aguã nhanderete imarã va'e re.
- ¹² Ha'e rami vy orere oĩ orejukaa aguã, peẽ kuery re ma tekove oĩ aguã.
- ¹³ Ha'e rami teī rojeroviaa oĩ avi, ipara oĩa rami: “Xee arovia, ha'e rami vy xeayvu.”* Ore voi roguerovia vy oreayvu,
- ¹⁴ mba'eta roikuua Senhor Jesus mboete jevyare ma Jesus re vy ore voi oremboete ju avi 'rã, ha'e peẽ kuery reve nhandererupa 'rã guive.
- ¹⁵ Mba'eta orere oiko va'e ha'e javi ma peẽ kuery penemoingo porãarã oiko. Ha'e rami vy Nhanderuete penemboaxyta heta-etave oikuua vy oguerovy'a ha'e omboete 'rã okuapy.

* 3:13 Êxodo 34.33,35 * 3:15 Romanos 11.7-10 * 4:6 Gênesis 1.3 * 4:7 1 Coríntios 2.4,5; 2 Coríntios 12.9
* 4:13 Salmo 116.10

Mba'erã pa jaiko axya re ijayvua

¹⁶ Ha'e nunga rupi nanhandekuerai 'rã. Ha'e rami 'rãgue py nhanderete ivaipave ovy teĩ nhandepy'a rupi nhanembopyaua 'rã ko'ẽ nhavõ.

¹⁷ Mba'eta xapy'a'i jajexavaia ipoyi e'ŷ va'e ojapo 'rã mba'emo porã opa e'ŷ va'e, opa mba'e gui ovareve va'e jajopy aguã rami.*

¹⁸ Ha'e nunga rupi mba'emo jaexa va'e re'ŷ jaikuua pota, ha'e rã mba'emo jaexa e'ŷ va'e re. Mba'eta jaexa va'e ma opa 'rã, ha'e rã jaexa e'ŷ va'e ma opa va'erã e'ŷ.

5

Nhanderete jaeja vy Senhor oĩa py jaiko 'rãa re ijayvua

¹ Mba'eta jaikuua nhandro yvy regua ivaipa ramo yva re jajopy 'rã nhanderorã Nhanderuete guigua, avakue opo py ojapo va'ekue e'ŷ, opa va'erã e'ŷ.*

² Ha'e gui kova'e oo py nhaĩ teria ja nhanepoaẽ jaikovy, nhanderorã yva regua nharõ vy ha'e va'e py ju nhaĩ aguã.

³ Mba'eta ha'e va'e py ma nhaĩ vy hete e'ŷ va'e rami ve'ŷ 'rã jaiko.

⁴ Mba'eta anhetẽ kova'e oo py nhaĩ teri vy nhanepoaẽ jaikovy jajexavai vy. Ha'e rami avi hete e'ŷ va'e ndajaikoxei guive, ha'e rã hete pyau va'e, imarã va'e 'rãgue py tekove jareko vy.

⁵ Ha'e rami aguã rami Nhanderuete ae nhanemoingo, ha'e nhandevy Onhe'ẽ guive ome'ẽ ikuaa ukaarã.

⁶ Ha'e nunga rupi nhandepy'a guaxu riae. Nhanderete re jaikoa ja jaikuua Senhor oĩa py ndajaikoi teria,

⁷ mba'eta jajeroviaa re jaiko, mba'emo jaexa va'e re'ŷ.

⁸ Ha'e gui nhandepy'a guaxu vy nhanderete jaejaxe, Senhor oĩa py ju jaiko aguã.

⁹ Ha'e nunga rupi Senhor oĩa py, e'ŷ vy apy jaiko teĩ nhanhea'ã jaikovy nhambovy'a aguã.

¹⁰ Mba'eta Cristo oikuua potaaty renonde jajexa uka pavẽ 'rã, peteĩ-teĩ jajopy aguã nhanderete re teri jaikoa ja ha'eve rami, e'ŷ vy ha'eve'ŷa rami jaikoague rekovia.

Gueko re apóstolo Paulo ijayvuague

¹¹ Senhor renonde rojererokyjea ore roendu vy amboae kuery pe voi oreayvu ojeko rerova aguã. Nhanderuete orekuua porã, ha'e ajerovia peẽ voi pene'arandua py orekuua porã avi aguã.

¹² Ha'e rami peteĩgue ju oreayvua rojejou porã ukaa rupi e'ŷ. Ha'e rami 'rãgue py pendevy roikuua uka orekuia, amongue orere ijayvu rã peẽ kuery orejou porãa rupi pembovai aguã. Ha'e kuery ma oexa va'e rive oguerovy'ave, opy'a re oĩ va'e'ŷ.

¹³ Ha'e rami na'inhakã porãvei va'e rami oreayvua ma Nhanderuete peguarã anho. Ha'e rã 'arandua rupi oreayvua ma pendevy guarã.

¹⁴ Mba'eta Cristo orerayvu rire ixupe anho roiko. Mba'eta pavẽ re peteĩ omano rire jaikuua ha'e javive omanoague.

¹⁵ Anhetẽ ete Cristo omano raka'e pavẽ re, jaikove va'e nhandejeupe ae jaiko ve'ŷ aguã, ha'e rã nhandere omano ha'e onhemboete ju va'ekue pe anho.

¹⁶ Ha'e ramo aŷ gui ma ndajaikuua potavei avave rei ngo'o re oikoa re. Yma rupi Cristo ngo'o re oikoa re jaikuua pota va'ekue ri aŷ ma ha'ekue rami ve'ŷ ma jaikuua.

¹⁷ Mba'eta Cristo re ikuai va'e ma hemimoingo pyau ma. Heko ymague oaxapa ma, ipyau va'e ju oĩ.*

Nhanderuete reve peteĩ rami ju nhandekuai aguã re ijayvua

¹⁸ Ma'ẽ, ha'e nunga ha'e javi Nhanderuete guigua meme. Mba'eta Cristo re vy ngupive nhanemoingo peteĩ rami, ha'e nhanemoi guive hexeve peteĩ rami ju nhandekuai aguã regua mombe'uarã,

* 4:17 Romanos 8:18-25; 1 Pedro 1:3-5 * 5:1 "Nhandro yvy regua" he'ia ma nhanderete re ijayvu vy (4:16; 2 Pedro 1:13,14). * 5:17 Romanos 6:4-6; Efésios 4:22-24; Colossenses 3:9,10

¹⁹ po rami: Cristo re vy Nhanderuete ma ko yvy regua kuery reko vaiague re oikuaa pota 'rāgue py ojapo raka'e hexeve peteī rami ikuai aguā. Ha'e nhandevy omombe'u uka guive hexeve peteī rami nhandekuai aguā regua ayvu.

²⁰ Ha'e rā ore kuery ma Cristo rery rupi oreayvu va'e, ore oreayvua rupi Nhanderuete voi ijayvu avi. Ha'e rami vy Cristo rery rupi rojerure: Nhanderuete reve peteī rami penhemingo uka.*

²¹ Mba'eta Cristo ojejavy e'ŷ va'eri nhandere vy hexe omoña raka'e jajejavya, hexe vy nhandere Nhanderuete omoñ aguā ojeguigua teko porā.

6

¹ Ha'e rami rire ore hexeve romba'eapo va'e ma peē kuery pe oreayvu avi Nhanderuete penemboaxya pejopy rive'ŷ aguā re.

² (Mba'eta aipoe'i: "Ha'evea ára aendu pendeayvua, ha'e rami vy rogueraa jepe aguā ára roepy", he'i va'ekue.* Ma'ẽ, aŷ ma ha'evea ára, aŷ ae peo jepe aguā ára.)

³ Ore ma mba'eve py rojitya rupi e'ŷ orekuai, romba'eapoa ndojou vaiai aguā.

Paulo onhemoingo axy ukaa re ijayvuague

⁴ Ha'e rami 'rāgue py opa mba'e py roexa uka Nhanderuete rembiguai roikoa: orekuerai e'ŷa py, orekuai axya py, rojexavaia py, rojererekko axy ukaa py,

⁵ ronhenupā ukaa py, nhuā py roñā py, orere opu'āmbaa reia py, romba'eapoa py, roke e'ŷa py, rokaru e'ŷ re roikoa py,

⁶ orerekko ky'a e'ŷa py, mba'emo roikuua-a py, orevai rive-rive'ŷa py, ha'eve vai'i orekuuaia py, Nhe'ẽ Ky'a E'ŷ po'akaa py, oreporayvu merami rive e'ŷa py,

⁷ anhetē ete rupi oreayvua py, Nhanderuete po'akaa rupi orekuuaia py, orepo jovaive py heko porā va'e rembiporu roiporua py;

⁸ oremboetea rupi, ha'e oremboete e'ŷa rupi orererekko rā; orere ijayvu rei, ha'e ijayvua porā rā; mba'eta nhombotavypa va'e rami orererekko, anhetē va'e roiko teī;

⁹ oexapy e'ŷ rami orererekko, oexa riaepy roiko teī; omano ta va'e rami orekuua teī oikove va'e roiko; ombopagapy rami orererekko teī ndorejukaai;

¹⁰ orepy'a vai va'eri rovy'a riae; oreporiakue'i va'eri heta rojapo iporiau e'ŷ aguā rami; mba'eve ndorogueroko merami teī opa mba'e roguerekko.

Paulo oayvua rami ha'e kuery voi oayvu aguā re ijayvuague

¹¹ Peē Corinto pygua kuery pe ronhemombe'u porā, noronhomni orepy'a re oī va'e.

¹² Peē kuery pe ore noronhemoakāte'ŷi, peē kuery ae rima penhemoakāte'ŷ orevy.

¹³ Ore rami avi ke pendekuai. (Xera'y kuery pe rami xeayvu pendevy.) Peē voi ke pendepy'a peipe'a avi orevy.

Ojerovia e'ŷ va'e kuery ikuiaia rami nhandekuai e'ŷ aguā re ijayvua

¹⁴ Canga py peē eme amboae kuery ojerovia e'ŷ va'e reve. Mba'eta mba'exa tu heko porā va'e nhomoirū ta heko vai va'e reve? Mba'exa tu hendy va'e nhomoirū ta pytū reve?

¹⁵ Mba'exa tu Cristo oguerekko ta Poromboeko vaia reve? Mba'e tu ojerovia va'e oguerekko ta ojerovia e'ŷ va'e reve?*

¹⁶ Mba'e 'rā tu Nhanderuete pegua templo oguerekko mba'emo ra'angaa reve? Mba'eta nhande ae Nhanderuete oikove va'e pegua templo jaiko, aipoe'iague rami: "Aī 'rā, aiko 'rā ha'e kuery mbyte. Aiko 'rā ha'e kuery Ruete, ha'e rā ha'e kuery ma xevygua 'rā ikuai."*

¹⁷ "Ha'e nunga rupi pejepe'a ha'e kuery mbyte gui, penhemoirūve eme", he'i Senhor. "Pepokove eme iky'a va'e re. Ha'e ramo xee romovaẽ 'rā,

¹⁸ aiko 'rā Penderu, ha'e rā peē ma xera'y ha'e xerajy kuery 'rā pendekuai", he'i Senhor Ipo'akapa va'e.*

* 5:20 Romanos 5,1,10; Colossenses 1,19,20 * 6:2 Isaías 49,8 * 6:15 1 Coríntios 10,20-22; 15,33; Tiago 4,4,5

* 6:16 Levítico 26,11-12, Ezequiel 37,27, Jeremias 32,38 * 6:18 Ezequiel 20,41, Isaías 52,11, 2 Samuel 7,14

¹ Ha'e nunga rupi xerembiayvu kuery, ha'e rami nhandereroayvu porā rire jajeky'a'o ukapa 'rā nhanemboeko ky'aarā, nhandro'o ha'e nhanenhe'ẽ mongy'aarā va'ekue ha'e javi gui. Iky'a e'ŷ ete va'e nhandekuai, Nhanderuete renonde jajererokyjea rupi.

Corinto pygua kuery oayvua rupi Paulo ijayvuague

² Oremovaẽ ke penekuraxõ py. Avave rei ndorogueroko ha'eve e'ŷa rami, noronhomboeko vai ha'e ndorojokorei guive.

³ Ha'e rami avi rojou vaia rupi e'ŷ xeayvu, mba'eta aipoa'e ae ma peẽ kuery orekuraxõ re roguerekoa, joupive nhamano e'ŷ vy jaikove aguã.

⁴ Opa mba'e py anhemombe'u porā pêvy, opa mba'e py roguerovy'a guive. Ha'e nunga rupi aendu xepy'a guaxuvea ha'e avy'a etea, opa mba'e py rojexavai tei.

Tito ovaẽague re ijayvuague

⁵ Mba'eta Macedônia yvy re rovaẽ vy peteīve henda py noroendui karamboae mby'a porā. Ha'e rami 'rāgue py opa mba'e py rojexavai. Amboae kuery opu'ã okuapy orere, ha'e orepy'a py roendu rokyjea.

⁶ Ha'e rami tei Tito ovaẽ ramo Nhanderuete ikuerai va'e mbopy'a guaxua va'e vy orembopy'a guaxu ju.

⁷ Ha'e va'e ovaẽ ramo anho e'ŷ, peẽ kuery pembopy'a guaxuague omombe'u rā roendu vy voi orepy'a guaxu. Mba'eta orevy pe omombe'u peẽ kuery xerexaxe, penhemboaxyha'e xenhe'ẽ rendu pekuapya. Ha'e rami vy xembovy'ave.

⁸ Mba'eta peẽ kuery pe kuaxia ambopara va'ekue pexa vy pendeporiau rei tei xee ma nda'evei nho ndaikoi, ymave nda'evei nho aiko va'ekue tei (mba'eta aikuaa ha'e va'e kuaxia para xapy'a'i penemomboriaua).

⁹ Ha'e gui aŷ ma avy'a ju, pendeporiaupa reiague re rive'ŷ, ha'e rā pejeko rerova aguã rami pendeporiauage re, mba'eta Nhanderuete gui ae pendu pendeporiaua, ha'e rā oregui ma peteīve henda py pendeporiau e'ŷ aguã.

¹⁰ Mba'eta Nhanderuete gui ma nhandeporiau vy jajeko rerova 'rā jaa jepe aguã. Ha'e rami aguã gui ju avave rei ndojeko rerovavei 'rā. Ha'e rā yvy guigua mboriau reia ma nhamano aguã rami 'rā ojapo.

¹¹ Mba'eta Nhanderuete guigua mboriau ma opa mba'e py penemoingo porā: penhemboeko porā uka, teko vai pejou vai ete, pejererokyje, xerexaxe ete ju, xenhe'ẽ rendu, ha'e penhombopagaxe guive. Opa mba'e py pexa uka pejejavya rupi ve'ŷ pendekuaia ha'e nungakue py.

¹² Ha'e nunga rupi pêvy ambopara va'ekue tei otekoavy va'ekue re vy e'ŷ ambopara, nei omomboriau va'ekue re vy e'ŷ guive, ha'e rā Nhanderuete renonde peẽ kuery pexa uka ju aguã orenhe'ẽ rendua.

¹³ Ha'e nunga rupi ae roendu ju karamboae orepy'a guaxua. Ha'e orepy'a guaxua guirovy'ave ete, mba'eta roendu avi Tito pembopy'a porā ramo ov'y'aa.

¹⁴ Mba'eta ixupe xeayvu va'ekue peẽ kuery roguerovy'aa rami, ha'e gui nda'evei nho ndaikoi. Mba'eta opa mba'e py pendereve oreayvua anhetẽ memea rami avi Tito oendua py roguerovy'aague voi anhetẽ ojeupitypa.

¹⁵ Tito voi penderayvua oenduve mba'eta penhe'ẽ renduague ha'e javi re ima'endu'a vy, ha'e gui pejeayvu ha'e peryryipa reve pemovaẽague re guive.

¹⁶ Xee avy'a mba'eta opa mba'e py peẽ kuery re ajeroviaa ojeupitypa.

Judéia py iporiaukue'i ikuai va'e pe Macedônia py igreja ikuai va'e peráta ome'ẽague re ijayvuague

¹ Ha'e rami avi irmão kuery, peẽ kuery pe romombe'u va'ekue Macedônia yvy re igreja kuery ikuai va'e Nhanderuete omboaxy vy marā rami pa omoingoague,

² mba'eta ha'e kuery ma opa marā omoingo axya teĩ oexa uka tema ov'y'a etea, mba'eta iporiaupa va'eri heta ojou irmão kuery pe ome'ẽ va'erā.*

³ Mba'eta xee aipoa'e: Ha'e kuery oexa uka mba'emo oguerekva'ekue áryve ome'ẽxe.

⁴ Ha'e rami vy orevy pe ju ojerure jepi iky'a e'ŷ va'e kuery oipytyvō aguā re, amboae kuery rami avi.

⁵ Ha'e gui ore roexa'āague rami anho e'ŷ ikuai, mba'eta Senhor pe ranhe ojeko me'ẽ okuapy, ha'e rire Nhanderuete oipotaa rami orevy pe ju ikuai.

⁶ Ha'e nunga rupi ae Tito pe rojerure penepytyvō aguā peráta peme'ẽ 'rā va'ekue pemono'õmba aguā, ha'e rami aguā omboypy rire.

⁷ Ha'e nunga rupi pejapopa ke, opa mba'e py pendekuai porā etea pexa ukaa rami avi: pejeroviaa py, ayvu py, mba'emo peikuua-a py, opa mba'e py penekyre'ŷa py, ha'e roayvua py guive.

⁸ Pêvy ajapo uka nhea'āa rupi e'ŷ guive xeayvu. Ha'e rami avi amboae kuery nhopytyvōx ea pêvy amombe'u vy aexaxe anhetē pa peẽ kuery voi pendoporayvua.

⁹ Mba'eta peikuua ma Senhor Jesus Cristo nhanemboaxya, mba'eta iporiau e'ŷ va'eri penderayvu vy iporiau va'e ojeapo raka'e, iporiau va'e oiko ramo peẽ kuery iporiau e'ŷ va'e peiko aguā.

¹⁰ Amombe'u porāve ta aikuua va'e: Peẽ kuery ma ma'etŷa oaxa va'e py peẽ ranhe pemboypy va'ekue mba'emo pemono'õ aguā, mba'eta peẽ ranhe pendepy'a re ha'e rami aguā pemoi va'ekue. Ha'e rami vy po rami 'rā ha'eve:

¹¹ Aŷ pejapopa ke pemboypy va'ekue. Peme'ẽxea peikuua ukaague rami pemono'õmba ke peme'ẽ va'erā, pejoua'i rami.

¹² Mba'eta nhame'ẽxe oĩ ramo jajoua rami nhame'ẽ rā ojou porā pavē 'rā, ruxā'i anho jajou vy nanhame'ẽive teĩ.

¹³ Mba'eta "Amboae kuery nome'ẽive, ha'e rā peẽ peme'ẽve aguā" nda'ei. Ha'e rami 'rāgue py aipota joo rami meme perekoi'i mba'emo.

¹⁴ Ha'e rami vy perekopa va'e gui pemboja'o ramo ha'e kuery pe ndoatavei 'rā, araka'eve rā ha'e kuery ju oguerekopa va'e gui omboja'o rā pendevy pe ju ndoatavei aguā. Ha'e rami vy joo rami meme 'rā perekoi,

¹⁵ ipara oĩ rami: "Omono'õ reta va'ekue pe naembyre. Ha'e rā mbovy'i omono'õ va'ekue pe ma ndoatai."*

Tito pe ojapo uka pyau jevyague re ijayvua

¹⁶ Ha'e gui arov'y'a Nhanderuete mba'eta Tito py'a re omoi xee rami penepytyvōx ea.

¹⁷ Ha'e ramo ojapyxaka karamboae rojerurea re. Ha'e rami vy ikyre'ŷve ete vy ha'e ae penepytyvōx ea rupi oguata peẽ kuerya katy.

¹⁸ Hupive romondouka avi irmão mboae. Ha'e va'e ma ayvu porā omombe'ua rupi oiko va'e, opa rupi igreja kuery oikuua.

¹⁹ Ha'e rami anho e'ŷ, igreja kuery oiporavo va'ekue oreirūrā, peráta mono'õa rupi orepytyvō aguā. Ha'e nunga rojapo Senhor omboetea aguā, ha'e ronhopytyvōx etea roexa uka aguā.

²⁰ Mba'eta ronhea'ã avave rei orere ijayvu rei e'ŷ aguā peráta ome'ẽa reta pyre rogueraa rā.

²¹ Mba'eta ronhea'ã ha'evea rami orekuai aguā Senhor renonde, ha'e avakue oexaa py guive.

²² Ha'e va'e irmão kuery reve romondouka avi nhande-irmão mboae. Ha'e va'e ma opa mba'e py nhopytyvōx ea roexa jepi va'e, mbovykue rei e'ŷ. Ha'e gui aŷ ma peẽ kuery re ojeroviaa rupi vy oexa ukave ju nhopytyvōvexea.

²³ Ha'e gui xeirū Tito ma peẽ kuerya rupi xepytyvō va'ety. Ha'e gui irmão kuery mboae ma igreja kuery remimondouka meme, ha'e Cristo mboetea guive.

* 8:2 Atos 11.27-30; Romanos 15.25-27; 1 Coríntios 16.1-4 * 8:15 Êxodo 16.18

²⁴ Ha'e ramo igreja kuery pavẽ renonde peẽ voi ke pexa uka pendoporayvua, ha'e va'e avakue oendua py ore roguerovy'a rire.

9

Ha'e kuery ome'ẽmba voi aguã re Paulo ijayvuague

¹ Ha'e gui iky'a e'ŷ va'e kuery pe mba'emo pemboja'o aguã re ambopara ve'ŷ teĩ ha'eve,
² mba'eta aikuaa porã peipytyvõxea. Ha'e nunga py roguerovy'a Macedônia pygua kuery ikuia rupi. Mba'eta ha'e kuery pe aipoa'e penderekoo re: "Acaia pygua kuery ma ma'etýa oaxa va'e guive mba'emo omboja'o aguã rami ikuai", ha'e va'ekue. Ha'e rami vy peẽ ranhe peme'ẽxe rire heta ju ma ikuai ome'ẽxe avi va'e.

³ Ha'e rami avi pẽa py ambou irmão kuery, peẽ kuery roguerovy'aa oaxa rive'ŷ aguã, ha'e rami 'rãgue py pemono'õmba aguã, xee aipoa'league rami.

⁴ Ha'e rami vy Macedônia pygua kuery xerupive ou va'e oexa e'ŷ aguã ndapejapo porãi ra'ea, roximba e'ŷ aguã. (Ha'e rami avi "Peẽ peximba 'rã" nda'ei,) mba'eta peẽ kuery re ajerovia ae ha'e nunga py.

⁵ Ha'e rami avi ajou porã xegui irmão kuery ranhe peẽ kuerya py ambou aguã, oguereko katu ma voi aguã mba'emo peme'ẽ aguã va'ekue. Ha'e rami vy pemono'õmba 'rã penhopytyvõxea rupi ete, penerakâte'ŷ reia rupi e'ŷ.

Mba'emo moaña ha'e imono'ða re ombojojaague

⁶ Aipoa'e: Mbovy'i ri amongue omoaĩ rire mbovy'i avi 'rã omono'ð. Ha'e rã omoaĩ reta va'ekue ma omono'ð reta avi 'rã.

⁷ Peteĩ-teĩ tapeme'ẽ pendepy'a re pemoiague rami, penerakâte'ŷa rupi e'ŷ, neĩ ame'ẽ uka nhea'ã ramo e'ŷ guive, mba'eta Nhanderuete oayvu ov'y'a reve ome'ẽ va'e.

⁸ Ha'e ramo Nhanderuete penemboaxy vy opa mba'e 'rã ojou uka pãvy. Ha'e rami vy opa mba'e pejou riae 'rã, opa mba'e py penhopytyvõ aguã,

⁹ ipara oia rami: "Mba'emo omboja'o vy iporiaukue'i pe ome'ẽ ramo heko porãa ojekuaa riae 'rã", he'iague rami.*

¹⁰ Mba'eta Nhanderuete ae ome'ẽ mba'emo ra'yigue inhotýarã pe, mbojape guive ome'ẽ ho'u va'erã pe. Ha'e pendevy pe voi ome'ẽ porãmba 'rã pemoaĩ va'erã, omboetave avi 'rã penderekoo porãa.

¹¹ Opa mba'e ome'ẽmba 'rã pendevy, opa mba'e py joupe pemboja'o aguã. Ha'e gui ha'e joupe rogueraa ramo heta 'rã oguerovy'a Nhanderuete.

¹² Mba'eta ha'e rami penhopytyvõ ramo iky'a e'ŷ va'e kuery oguerekopa 'rã. Ha'e rami anho e'ŷ, heta oguerovy'a 'rã Nhanderuete guive.

¹³ Mba'eta Nhanderuete omboete 'rã okuapy, peipytyvõa py Cristo regua ayvu porã peroviaa rupi penhe'ẽ rendua pexa uka ramo, mba'eta peme'ẽxea py ha'e kuery pe pemboja'o, pavẽ rei pe guive.

¹⁴ Ha'e ramo ha'e kuery ma pendererovy'aa rupi ojerure 'rã pendere, opa mba'e py Nhanderuete penemboaxy oikuua vy.

¹⁵ Nhandevy Nhanderuete ome'ẽ opa mba'e gui iporãve va'e. Ha'e ramo jarovy'a.

10

Apóstolo po'akaa rupi Paulo ijayvuague

¹ Cristo ivai rei e'ŷ ha'e porayvu va'e rery rupi xee Paulo ae pãvy ajerure. Xee ma anhetẽ peẽ kuerya py aiko jave xe'yvy'i va'eri pendekuaia rupi e'ŷ aiko jave "Ijayvu ete va'e" 'ea xevy.

² Tá, xee ajerure pãvy peẽ kuerya py avaẽ ju jave ijayvu ete va'e rami e'ŷ xeapo aguã, mba'eta anhetẽ xeayvu ete 'rã amongue to'o re roikoa rami ijayvu va'e ikuai rã.

³ Mba'eta orero'o re roiko teĩ to'o oikuua rami e'ŷ guive ropu'ã roikovy orerovaigua kuery re.

* 9:9 Salmo 112:9

⁴ Mba'eta ore ronhea'ña rupi tembiporu roiporu va'e ma to'o guigua e'ŷ, ha'e rā Nhanderuete guigua ipo'aka va'e, oo imbaraete ete va'e mbovaipaara. * Ha'e rami vy rombovaipa 'rā nhombotavypa reia rupi ayvua,

⁵ ha'e opa marāgua onhemboyvatevexea guive, Nhanderuete oikuaaxe va'e rovai opu'ā va'e. Ha'e rami vy roity avakue 'arandu ha'e javi, ha'e kuery voi Cristo onhe'ē rendu aguā rami.

⁶ Ha'e gui opa mba'e py penhe'ē rendu ma ri ramo rombopaga 'rā inhe'ē rendu e'ŷ va'e ha'e javi.

⁷ Peikuua pota ke mba'emo ojekuaa porā va'e re. Amongue ojejou porāa rupi ojeupe "Cristo pegua" he'i vy peteīgue ju toikuaa pota ojee. Mba'eta Cristo pegua ha'e kuery oikoa rami avi ore voi Cristo pegua roiko.

⁸ Orepo'akaa re peteīgue ju xeayvu teī naxī, mba'eta peē kuery romombaraeteve aguā Senhor orembopo'aka, penembaraaetea rombovaipa aguā e'ŷ.

⁹ Ha'e rami xeayvu, kuaxia ambopara vy romongyjexea rami pexa'ā e'ŷ aguā.

¹⁰ Mba'eta amongue ndaxejou porāi vy aipoe'i: "Paulo kuaxia ombopara va'ekue ma ipoyi, ha'e ipo'akaa kuaa ukaa guive, va'eri nhandea py oī vy ikangy, ha'e ijayvu ndovarei", he'i.

¹¹ Ha'e rami ijayvu va'e toikuaa pota pov'a e nunga re: Ha'e kuerya py e'ŷ roī jave kuaxia para romboparaa rami ae ju 'rā oreayvu ha'e kuerya py rovaē vy.

¹² Mba'eta ore ma noronhemboyvatexei va'ekue, ojejou porā rei va'e kuery rami e'ŷ. Ha'e kuery ma ojee ae rive ov'y'a, ha'e ojegui ae mba'emo ombojoja vy oexa uka o'arandu e'ŷa.

Mamo pa Paulo om̄ba'epo aguā oikuaa ukaague re ijayvua

¹³ Ha'e rā ore ma orejee ae ndoreayvui 'rā ha'evea ramigua áryve, Nhanderuete orerembiaporā ome'ē va'ekue re anho oreayvu. Mba'eta peē kuerya rupi voi romba'epo aguā ome'ē.

¹⁴ Mba'eta peē kuerya rupi noremomba'epoi va'e rire pendekuaia re oreayvu aguā nda'evei 'rāgue. Ha'e rami avi Cristo regua ayvu porā romombe'u vy peē kuerya rupi romba'epo ae ma.

¹⁵ Ha'e rami avi ha'evea ramigua áryve e'ŷ 'rā oreayvu, amboae kuery om̄ba'epoa re oreayvu e'ŷ aguā. Ha'e peē kuery re rojerovia, pejeroviaa oīve ramo peē kuerya rupi romba'epo aguā, orerembiaporā ome'ē mbyre rami vy,

¹⁶ ha'e pendekuaia rovai rupi voi ayvu porā romombe'u aguā, mba'eta ore ndoreayvui 'rā amboae kuery om̄ba'epoague rupi ore ju romba'epoa roguerovy'aa rupi.*

¹⁷ Ha'e rami 'rāgue py "Mba'emo oguerovy'a va'e ma Senhor ae toguerovy'a" he'ia rami orekuai.*

¹⁸ Mba'eta amongue ha'e ae rive ojererovy'a va'e'ŷ 'rā ojou porā mbyrā oiko, ha'e rā Senhor oguerovy'a va'e anho.

11

Paulo gueko re ijayvuve jevyague

¹ Inhakā porā e'ŷ va'e rami xeayvuve ju ta ramo aipota xereropo'akave. Ha'e rami vy xereropo'akave'i ju ke.

² Mba'eta peē kuery re xee nda'evei etea ma Nhanderuete guigua ae. Mba'eta omerā peteī'i va'e pe kunhatai ete'i ojexa uka va'e rami avi xee ma roguereko katu peteī pe roexa uka aguā. Ha'e va'e ma Cristo.

³ Ha'e rami teī xee akyje, mboi ijapua rupi Eva om̄botavyague rami avi pene'arandua voi om̄bovaipa avi gui, peteī rami anho pendepy'aa ha'e Cristo pe pendeko ky'a e'ŷa rupi pendekuaia gui pejep'e a gui.

* 10:4 Efésios 6.10-18; 1 Tessalonicenses 5.8

* 10:16 Romanos 15.18-21

* 10:17 Jeremias 9.24

⁴ Mba'eta anhetē pēa py amongue ovaẽ vy Jesus regua ore romombe'u va'ekue ramigua e'ŷ 'rā omombe'u, ha'e rami e'ŷ vy Nhe'ẽ e'ŷ vy ayvu porā pejopy va'ekue ramigua e'ŷ 'rā omombe'u. Ha'e ramo ha'e va'e regua pe teĩ penhembo'e uka 'rā, pevy'a reve.

⁵ Ha'e kuery ojeupe ae “Apóstolo” he'ia va'e gui xee ma neĩ peteĩ henda py naxe'yvyi've.

⁶ Ayvu py xe'yvyi'i teĩ mba'emo aikuaa-a py any. Ha'e nunga ha'e javi roikuua uka ae ma pēvy, opa mba'e py.

Joupe nonhemongaru ukaiague re Paulo ijayvuague

⁷ Tyrā pa peẽ kuery romboyvateve vy xee ae anhemo'yvyi've vy ajejavvy va'ekue ri ty'y? Mba'eta peẽ kuerya rupi aiko jave hepy e'ŷ re amombe'u va'ekue Nhanderuete guigua ayvu porā.

⁸ Mba'eta igreja kuery mboae gui mba'emo aipe'a heruvy peẽ kuery roipytyvō rive aguã, ha'e amba'epoague repy ajopy guive.

⁹ Peẽ kuerya py aiko jave mba'emo py xeporiau teĩ peẽ kuery peteĩve pe nanhemongaru ukai. Mba'eta Macedônia gui irmão kuery ovaẽ vy ome'emb̄a aikotevē va'ekue. Opa mba'e py anhea'ã va'ekue peẽ kuery pe anhemongaru uka e'ŷ aguã, ha'e anhea'ã riaeve 'rā guive ha'e rami.*

¹⁰ Cristo regua ayvu anhetē ete va'e xere oĩ va'e rupi aipoa'e: Xegui ndoipe'aai 'rā apy Acaia yvy re ha'e rami aiko vy avy'aa.

¹¹ Mba'e re nda'u nanhemongaru ukai va'ekue pendevy? Peẽ kuery roayvu e'ŷ vy teve ha'e rami aiko? Nhanderuete ma oikuua roayvua.

¹² Ha'e rami 'rāgue py “Paulo kuery rami orekuai” he'i rive va'e kuery amokyrirī aguã nanhemongaru ukai va'ekue pendevy, ha'e kuery ojejou porā ve'ŷ aguã. Ha'ekue rami aiko riaeve 'rā guive,

¹³ mba'eta ha'e kuery ma apóstolo ramigua rive, anhetē rupi e'ŷ om̄ba'epo, Cristo pegua apóstolo ramigua rive onhemoingo va'e.

¹⁴ Ha'e ramigua jaexa teĩ nanhanhemondyi, mba'eta Satanás ae voi anjo hexakāmba va'e rami onhemoingo.

¹⁵ Ha'e nunga rupi hembiguai kuery voi heko porā va'e merami rive onhemoingo rā jaexa vy nanhemondyi 'rā. Ha'e gui opaa py ha'e kuery ha'evea rami 'rā opaga ojapo vaiague re.

Ayvu porā káuxa ojexavaia re Paulo ijayvuague

¹⁶ Teǐgue ju xeayvu: Avave rei xevy pe “Inhakā porā e'ŷ va'e” ta'ea eme. Ha'e rami teĩ ha'e rami xekuaa va'e ikuai vy taxereropo'akave'i ju, inhakā porā e'ŷ va'e rami xejee xeayvuve rā.

¹⁷ Mba'eta xeayvu ta Senhor gui e'ŷ ijayvu va'e rami, 'arandu rupi e'ŷ, ojejou porā rei va'e rami rive.

¹⁸ Heta ikuai to'o re vy ojererovy'aa rupi rive ijayvu va'e. Ha'e gui xee voi xeayvu ta ranhe ajererovy'aa rupi.

¹⁹ Mba'eta peẽ kuery pendejeupe “Hi'arandu va'e” peje teĩ pevy'a reve penhembo'e uka hi'arandu e'ŷ va'e pe.

²⁰ Ha'e kuery pe pejejokuai uka escravo rami, penhemomba uka, pejekore ukapa, mba'eta pendegui onhembovateve vy penderova petepa.

²¹ Xee axĩ reve xema'endu'a ha'e kuery rami orekuai aguã ndorepy'a guaxuiague re. Ha'e rami avi amongue ipy'a guaxua rupi ijayvu ramo xee voi xepy'a guaxu 'rā. Inhakā porā e'ŷ va'e rami teri xeayvu.

²² Ha'e kuery hebreu regua teve? Xee voi hebreu aiko. Ha'e kuery Israel regua teve? Xee voi. Ha'e kuery Abraão ramymino teve ikuai? Xee voi.

²³ Cristo rembiguai teve ikuai? (Inhakā porā e'ŷ va'e rami teri xeayvu.) Xee katuve ma ha'e aiko. Mba'eta pavẽ gui amba'epo, nhuã py hetakueve aĩ, mbovykue rei e'ŷ anhenupā uka, mbovykue rei e'ŷ amano aguã rupi aiko va'ekue.

* 11:9 1 Coríntios 9.1-27

- ²⁴ Peteī nhiruīgue ma judeu kuery xenupā trinta e nove-kue,
²⁵ mboapykue xenupāa vyvra rovi py, peteīgue ita py xeapipaa, mboapykue kanoā aia
 va'e oike, peteī pytū ha'e peteī ára ye'ē mbyte py aī va'ekue.
²⁶ Aguataa rupi aiko vy mbovykue rei e'ŷ ajexavai. Yy oxyry atā va'e rupi aaxa, jojuka
 rive-rive va'e ikuia rupi, xeretarā kuery ha'e amboae regua xejukaxe ramo, tetā ha'e
 tekao e'ŷa rupi aikoa py, ye'ē rupi aa vy, ha'e irmão ramigua rive xejukaxe ramo.
²⁷ Amba'eapoa py aiko vy xekane'ō va'ekue, mbovykue rei e'ŷ ake e'ŷ re aiko. Xenhem-
 byayi ha'e xey'uvei va'ekue. Mbovykue rei e'ŷ akaru e'ŷ re aiko va'ekue, ha'e xeao e'ŷ vy
 yro'y aendu guive.
²⁸ Ha'e nunga xerete re oiko va'e ramigua anho e'ŷ aendu, ko'ē nhavō xere oī ipoyive
 va'e, igreja kuery ha'e javi re nda'evei aikoa.
²⁹ Ha'e kuery va'e regua ikangy rā xee voi xekangya aendu. Ho'a ramo xee voi xepy'a vai
 'rā.
³⁰ Ha'e rami avi mba'emo arov'y'aa rupi xeayvu vy xeayvu ta avi xekangya rupi aikoa
 re.
³¹ Nhanderuete, Senhor Jesus Ru va'e raka'e rā peve ima'endu'a porāmby oiko va'e ma
 oikuua ndaxeapuia.
³² Damasco tetā py aiko jave tetā re opena va'erā huvixave Aretas omoī va'ekue omboaty
 jopya kuery xejopy aguā.
³³ Ha'e rami teī tetā kora re janela oī va'e gui xemboguejya yvy katy peteī ajaka tuvixa
 va'e py. Ha'e rami vy aa jepe karamboae ha'e kuery po.gui.*

12

Senhor mba'emo oexa uka ha'e oikuua ukaague re ijayvuague

- ¹ Ajererovy'aa rupi xeayvuve aguā nda'evei teī amombe'u ta Senhor mba'emo oexa
 ha'e oikuua ukaague.
² Peteī ava aikuua Cristo pegua. Ha'e va'e ma catorze ma'etŷ ma ojapo yva mboapya peve
 oupiague. Hete reve pa tyrā hete reve'ŷ oupia xee ndaikuuai, Nhanderuete ma oikuua.*
³ Ha'e gui ha'e va'e ava hete reve pa tyrā hete reve'ŷa ndaikuuai, Nhanderuete ma oikuua
 teī xee aikuua
⁴ yvy marā e'ŷ re oupia. Ha'e ramo ayvu oendu avave rei omombe'ua aguā nda'evei va'e.
⁵ Ha'e ramigua oikoague re xee xeayvu 'rā, ha'e rā xerekoo re ae ndaxeayvui 'rā, xekangya
 re e'ŷ vy.
⁶ Ha'e rami ajererovy'aa rupi xeayvu va'e rire inhakā porā e'ŷ va'e ndaikoi 'rāgue,
 mba'eta anhetē va'e meme. Ha'e rami teī ha'e rami ndaxeayvuxei, avave rei xejou porā
 rei e'ŷ aguā. Ha'e rā xere mba'emo oī rā oexa, e'ŷ vy xegui ayvu oendu va'ekue anho
 ha'eve.

Ho'o re juu oī va'e re Paulo ijayvuague

- ⁷ Ha'e ramigua iporā ete va'e xevy oikuua ukaague re ajejou porā rei e'ŷ aguā, peteī juu
 omoīa xero'o re. Ha'e va'e ma Satanás ombou va'ekue xererekoo axy aguā, anhemboyvate
 rei e'ŷ aguā.
⁸ Ha'e nunga rupi mboapykue Senhor pe ajerure xegui oipe'a aguā re.
⁹ Ha'e rami teī aipoe'i xevy: "Xee romboaxya ha'eve ma ndevy, mba'eta ikangy va'e
 re xepo'akaa ojekuaa porāve 'rā", he'i va'ekue. Ha'e nunga rupi avy'a reve 'rā xeayvu
 xekangya re, xere Cristo po'akaa oī aguā.*
¹⁰ Ha'e rami vy arov'y'a 'rā xekangya, xere ayvua reia, ajexavaia, xere opu'āa reia, ha'e
 nda'evei aikoa Cristo káuxa aendu va'e. Mba'eta xekangya py xembaraeteve 'rā.

Apóstolo oikoa kuaa ukaa re Paulo ijayvuague

* 11:33 Atos 9.23-25 * 12:2 Apy "Peteī ava" he'ia ma ojee ae ijayvu vy (versículo 7). * 12:9 1 Coríntios 1.26-29

¹¹ Inhakā porā e'ŷ va'e rami xeayvu va'ekue, ha'e rami aguā rami peē ae xemoingo ramo. Peē ae pendeayvu 'rāgue xererovy'aa rupi, mba'eta xee ma mba'eve py ojeupe "Apóstolo" he'i rive va'e kuery gui naxe'yvyi'ive, mba'e'ŷ aiko va'eri.

¹² Mba'eta peē kuery mbyte rupi aexa uka ae ma apóstolo aikoa kuaa ukaarā, opa mba'e aropo'akaa py, ha'e gui hexa pyrā, nhomondyipaarā ha'e po'akaa kuaa ukaarā ajapoa py guive.

¹³ Mba'e nunga py tu igreja kuery mboae gui peē kuery pe ajapo vaive, xee anho pēvy nanhepytyvō ukaia py e'ŷ vy? Xeperdoa ke ha'e nunga py ri ajapo vai rā.

Oipouxea rupi Paulo ijayvuague

¹⁴ Mboapykuea ma peē kuerya py aa aguā rami aiko, ha'e teīgue ju nanhepytyvō ukai 'rā guive pēvy. Mba'eta xee ndaipotai mba'emo perekō va'e, peē kuery ae roipota. Mba'eta ta'y kuery minha mba'eve nomoī porāi 'rā nguu kuery peguarā, ha'e rā tuu kuery ma gua'y kuery peguarā omoī porā 'rā mba'emo.

¹⁵ Ha'e nunga rupi xee avy'a reve mba'emo ame'ē, ha'e penenhe'ē re vy xee ae anhemomba uka 'rā guive. Pavē gui xee roavyuve rā peē kuery ndaxerayvuive teve?

¹⁶ Mba'eve py pēvy nanhepytyvō ukai ramo xapy'a rei peē kuery va'e regua "Paulo ijapu vy nhandekorea rupi oiko" he'i 'rā.

¹⁷ Ha'e rami avi pēa py amongue ambou va'ekue pe teve rokore uka?

¹⁸ Mba'eta Tito ou aguā re ajerure, ha'e hexeve ambou avi karamboae irmāo mboae. Tito teve pendekore raka'e? Hexeve peteī nhe'ē rupi ae e'ŷ ri ty'y roiko? Peteī tape rupi e'ŷ ri ty'y roo?

Ha'e kuery oipou aguā okyjea rupi Paulo ijayvuague

¹⁹ Are ma guive rā peē kuery pexā'ā teī ore rojejou porā ukaxe vy rive oreayvua rami. Ha'e rami 'rāgue py xerembiayvu kuery, Cristo re vy Nhanderuete renonde romombaraeve aguā oreayvu ha'e nunga ha'e javi re.*

²⁰ Ha'e rami teī akyje, peē kuerya py avaē vy aipotaa rami e'ŷ pendekuai rā roexa gui, ha'e peē voi pexā'āgue rami e'ŷ xerexa gui. Akyje peē kuery mbyte aexa gui joguero'a rei va'e, joe ija'e'ŷ, ivai rei, ha'e ranhexe va'e, ijayvu vaikue, ijayvuxe, onhemboyvate ha'e nhombopoxypa rei va'e.

²¹ Akyje peteīgue ju avaē ramo peē kuery mbyte Xeruete xemo'yvyi rivyvyi gui, ha'e yma rupi pejejavyague gui ndapejeko rerovai rā xee ajae'o rivyvyi gui, heko ky'a rei va'e, itavy rei ha'e opa marā ikuai va'e aexa vy.

13

Oikuaa pota ha'e ijayvu ete aguā re Paulo ijayvuague

¹ Kova'e re mboapykuea ma 'rā avaē peē kuerya py. "Mokoī e'ŷ vy mboapy mba'emo omombe'u rā jaikuua porāve 'rā", 'ea ague rami.*

² Mba'eta mokoīgue pēa py aī jave aipoa'eague rami ae ju 'rā xeayvu. Aŷ peē kuerya py naī vy aipoa'e ymave rupi ojejavu va'ekue pe, ha'e amboae kuery ha'e javive pe guive: Peteīgue ju avaē vy xee noromboaxyvei ma 'rā.

³ Mba'eta peikuuae anhetē pa Cristo gui ae xeayvua. Ha'e va'e rima na'ikangyi 'rā peē kuery mbyte, ha'e rā pendevy pe oexa uka 'rā opo'akaa.

⁴ Mba'eta anhetē ikangy va'e rami kuruxu re onhemoī uka va'ekue ri oikove ju raka'e Nhanderuete po'akaa rupi. Ha'e rami ae hexe vy ore voi orekangy va'eri peē kuery mbyte Nhanderuete po'akaa rupi avi 'rā orekuai hexeve.

⁵ Peikuuae pota ke pendejee ae, pexa aguā anhetē pa pejeroviaa oĩa. Penhea'anga ke pendejee ae. Ndapeikuuai ri ty'y Jesus Cristo pendere oĩa? Ha'e rami e'ŷ ri ramo ojou vaipy peiko.*

⁶ Ha'e rami teī xee ajerovia peikuuae aguā ore kuery ojou vaipy e'ŷ roikoa.

* 12:19 2 Coríntios 3:1-3

* 13:1 Deuteronomio 19:5

* 13:5 1 Coríntios 11:31

⁷ Nhanderuete pe rojerure mba'eve py pejejavy e'ŷ aguã, pavẽ orejou porã aguã e'ŷ guive. Roipota va'e ma teko porã rupi peẽ pendekuai, ojou vaipy ore roikoa rami amongue oikuua teĩ.

⁸ Mba'eta peteĩve henda py ndorepo'akai 'rã anhetẽ va'e rojoko aguã, ha'e rã anhetẽ va'e ojekuaa porãve aguã anho.

⁹ Ha'e rami vy rovy'a 'rã peẽ penembaraete ramo, ore orekangy teĩ. Ha'e rami vy rojerure peẽ kuery opa mba'e py pendekuai porã aguã.

¹⁰ Ha'e nunga rupi pẽa py e'ŷ teri aiko vy ambopara ha'e rami, peẽ kuerya py aiko jave Senhor xembopo'akaague rami vy rombopaga e'ŷ aguã, mba'eta anhomomba aguã e'ŷ xembopo'aka, ha'e rã anhomombaraeleteve aguã.

Oxaruraa rupi ijayvuague

¹¹ Aŷ ma irmão kuery, pevy'a ke. Opa mba'e py pendekuai porã pota, joo meme penhombopy'a guaxu, peteĩ rami peikuaa, ha'e peteĩ rami pendekuai guive. Ha'e ramo Nhanderuete mborayvu me'ëa ha'e peteĩ rami nhanemoingoa va'e oiko 'rã pendereve.

¹² Pexarura joupe-upé iky'a e'ŷ va'e joayvua rami. Iky'a e'ŷ va'e kuery ha'e javi oxarura uka pêvy.

Ogueroayvu porãague

¹³ Tove peẽ kuery ha'e javive tapendu Senhor Jesus Cristo nhanemboaxyá, Nhan-deruete nhanderayvua ha'e Nhe'ë Ky'a E'ŷ peteĩ rami nhanemoingoa.

Galácia pygua kuery pe Paulo ombopara va'ekue

Galácia pygua kuery pe Paulo ombopara va'ekue

Kova'e kuaxia ma Galácia yvy re Jesus remimbo'e kuery ikuai va'e pe apóstolo Paulo ombopara va'ekue. Ha'e ae omboypy va'ekue igreja ha'e py. Ha'e gui Galácia yvy gui Paulo oo ma rire ha'e py ovaẽ amboae rami rei nhombo'e va'e, judeu regua. Ha'e va'e kuery ma nhombo'e vy aipoe'i: “Moisés lei oeja va'ekue rupi nhandekuai ramo 'rāe Nhanderuete nhanemboeko porã, nhandepire nhamboi uka aguã regua rupi guive”, he'i nhombo'e vy.

Ha'e rā Paulo ma ha'e rami e'ŷ nhombo'e, avakue oikuua rami rive'ŷ. Aipoe'i: “Ayvu porã pendevy xee amombe'u va'ekue ma avakue guigua e'ŷ. Mba'eta xee ma avakue gui naendui neĩ ndaikuuaai karamboae. Jesus Cristo ae oikuua uka xevy” (1.11b-12). “Nhanderuete renonde avave rei lei re onhea'āa rupi nomboeko porāai 'rā, mba'eta 'Heko porã va'e ma ojeroviaa rupi 'rā ikuai', he'i” (3.11). “Mba'eta peẽ kuery voi Cristo Jesus re pejerovia vy Nhanderuete ra'y kuery pendekuai”, he'i (3.26).

Ha'e gui ára nhavõ Nhanderuete renonde jaiko aguã ma ha'e rami ae avi, mba'eta nhande ae nhanhe'aãa rupi rive'ŷ 'rā jaupity teko porã, ha'e rā Jesus re jajeroviaa re, ha'e Nhe'ē po'akaa rupi anho. “Ha'e nunga rupi aipoa'e: Pendekuai Nhe'ē re. Ha'e vy 'rāe ndapejapoi to'o oipota va'e”, he'i (5.16).

Oxarura reve ijayvu vy omboypyague

¹ Xee Paulo ma apóstolo aiko. Avakue e'ŷ xemoĩ, neĩ avakue pe e'ŷ guive xemoĩ ucaa. Ha'e rā Jesus Cristo ae xemoĩ va'ekue, ha'e omanoague gui Nhanderuete imboete jevyare va'e voi.

² Irmão kuery xeirũ ikuai va'e ha'e javi reve roxarura Galácia py igreja kuery pendekuai va'e pe.*

³ Tove peẽ kuery tapendu Nhanderuete ha'e [nhande] Senhor Jesus Cristo penemboaxyha'e mby'a porã.

⁴ Mba'eta ha'e ae ojejuka uka raka'e jajejavague re, Nhanderuete oipotaa rami vy ko yvy vai regua reko gui nhandereraa jepe aguã.

⁵ Tove ha'e anho tomboetea aŷ, ha'e raka'eve rā peve. Amém.

Galácia pygua kuery ojeroviaa gui ojepe'aa re ijayvuague

⁶ Ha'e rami avi anhemondyi mba'eta omombe'ua rā aendu Cristo rupi Nhanderuete penemboaxy vy penerenoĩ va'ekue ri ixugui pejepetapa vyvoia, ayvu porã ramigua re rive pevapaxe vy.

⁷ Ha'e va'e ma amboae ayvu porã e'ŷ guive. Ha'e rami avi amongue rānda'u Cristo regua ayvu porã oguerovaxe vy penemboeko eta rei.*

⁸ Ha'e gui ayvu porã romombe'u va'ekue rami e'ŷ ri omombe'u va'e rei tove tokanhy, ore e'ŷ vy anjo yva pygua omombe'u teĩ.

⁹ Aipoa'e ae ma va'ekue ri teĩgue ju aipoa'e: Ayvu porã oregui pendu va'ekue rami e'ŷ ri omombe'u vy tokanhy.

Ayvu porã oendu ha'e omombe'ua re Paulo ijayvuague

¹⁰ Ha'e rami xeayvu vy nda'u aŷ avakue pe ri ajejou porã uka, tyrã pa Nhanderuete pe? Avakue rive ri nda'u ambovy'axe? Mba'eta avakue ambovy'aa rupi rive aiko va'e rire ndaikoi 'rāgue Cristo rembiguai.

¹¹ Irmão kuery, po ramigua aipota peikuua porã: Ayvu porã pendevy xee amombe'u va'ekue ma avakue guigua e'ŷ.

* 1:2 Atos 16.6, 18.23 * 1:7 Romanos 16.17; 2 Coríntios 11.3,4; Colossenses 2.8; 2 Pedro 2.1-3

¹² Mba'eta xee ma avakue gui naendui neĩ ndaikuaai karamboae. Jesus Cristo ae oikuaa uka xevy.

¹³ Mba'eta pendu ae majudeu kuery reko rami aikoague. Mba'eta Nhanderuete pegua igreja kuery amoingo axy rei va'ekue, amombaxe ete vy.

¹⁴ Ha'e rami aikoa rupi xeretarã judeu kuery xejavegua gui voi anhea'ave va'ekue, oreramoĩ kuery orembo'eague rami ete aikoxe vy.*

¹⁵ Ha'e gui ma xetui'i e'ŷ mbove ma voi Nhanderuete xemboaxya rupi xeporavo rire xerenoĩ, ha'e oipotaa rami vy

¹⁶ xevy pe oikuaa uka Gua'y regua, judeu e'ŷ va'e kuery ikuiaia rupi amombe'u aguã. Ha'e ramo amboae kuery pe xee naporandui karamboae aiko aguã re,

¹⁷ neĩ Jerusalém tetã katy ma voi ndaai ha'e kuery ranhe xegui apóstolo ikuai va'ea py. Ha'e rã Arábia yvy katy ranhe aa, ha'e gui Damasco tetã py ju ajevy.

Jerusalém py, Síria ha'e Cilícia katy Paulo ooague

¹⁸ Ha'e gui mboapy ma'etŷa py mae ma Jerusalém katy aa Cefas aexa aguã. Quinze ára re aiko hexeve.

¹⁹ Ha'e rã apóstolo kuery mboae ma ndaexai karamboae, Senhor ryvy Tiago e'ŷ vy.*

²⁰ Nhanderuete renonde aipoa'e: Po rami pêvy ambopara vy ndaxeapui.

²¹ Ha'e gui ma Síria ha'e Cilícia yvy katy ju aa.

²² Ha'e rã Judéia yvy re Cristo pegua igreja kuery ikuai va'e ma ndaxerexai teri.

²³ Xereko omombe'u ramo rive ha'e kuery oendu, "Nhanemoingo axy reiare aŷ ma omombe'u oikovy jajerovia aguã regua yma rupi ombovaipaxe va'ekue", 'ea rã.

²⁴ Ha'e rami xereko oendu vy oguerovy'a okuapy Nhanderuete.

2

Judeu ha'e judeu e'ŷ va'e ikuiaia rupi apóstolo kuery ombo'eapoa re ijayvuague

¹ Ha'e gui catorze ma'etŷ rire ma Jerusalém katy ju aa karamboae Barnabé reve. Tito avi araa.

² Aa aguã Nhanderuete oikuaa ukaague rami vy aa. Ha'e py ma opena va'e kuery pe amombe'u ayvu porã judeu e'ŷ va'e kuerya rupi amombe'u aikovy va'e. Pavẽ pe'ŷ guive amombe'u, irmão kuery yvatekueve va'e pe anho, ha'e kuery ombovaipa e'ŷ aguã anhombo'ea ha'e anhombo'eague.*

³ Ha'e rami teĩ neĩ Tito xerupive oo va'ekue pe voi ha'e kuery nda'ijayvui opire omboi uka aguã, grego va'eri.

⁴ Omboi uka aguã ijayvu va'e ma irmão ramigua kuery rive, irmão kuery reve onhemoirũ va'ekue. Ha'e kuery ma oikuaa pota reixe raka'e opa mba'e gui Cristo Jesus nhandereraa jepe ramo nhandekuaia re, escravo rami ju nhanemoingoxe vy.*

⁵ Ha'e rami teĩ ha'e kuery oipota va'e ma neĩ peteĩ henda py ma voi ndorojapoi, ayvu porã anhetã va'e peẽ kuery peguarã optya aguã.

⁶ Ha'e guiomboetevepy kuery re ma xee napenai, mba'eta Nhanderuete voi amongue rive joegui oayvuve va'e'ŷ. Ha'e kuery yvatekueve ikuai va'e voi neĩ peteĩ henda py naxembo'ei mba'emo pyau re.

⁷ Ha'e rami 'räge py xejou porã, mba'eta oikuaa amboae regua kuery pe ayvu porã amombe'u aguã Nhanderuete xemoīague, judeu kuery pe Pedro omombe'u aguã omoīague rami avi.

⁸ Mba'eta apóstolo Pedro judeu kuery pe ayvu omombe'u rupi Nhanderuete oipytyvõa rami avi xee voi xepytyvõ amboae regua ikuiaia rupi amba'eapoa rupi.

⁹ Ha'e gui ha'e rami amba'eapo aguã Nhanderuete xemboaxy vy xemoīague omboetevepy kuery Tiago, Cefas ha'e João oikuaa vy orererovy'a, orepopyy guive, xee ha'e

* 1:14 Atos 26.9-20 * 1:19 Atos 9.26-30 * 2:2 Atos 15.1-11 * 2:4 Irmão ramigua kuery ma nhomoingoxe judeu kuery pegua lei rupi anho, escravo rami ae.

Barnabé reve. Mba'eta ojou porã amboae regua kuery mbo'ea rupi ore orekuiaia, ha'e kuery judeu kuery mbo'ea rupi ikuiaia rami avi.

¹⁰ Petei'i re anho tema ha'e kuery ojerure, iporiaukue'i roipytyvõ aguã re orema'endu'a aguã. Ha'e gui xee ma ha'e nunga re anhea'ã ae ma aikovy.

Pedro pe Paulo ijayvuague, ha'e Cristo Jesus re jajerovia ramo nhanemboeko porãa re ijayvua

¹¹ Ha'e gui ma Antioquia tetã py Cefas ovaã ma vy ha'eve e'ýa rami oiko ramo xeayvu ete ixupe.

¹² Mba'eta Tiago remimbou avakue novaã teria ja Cefas okaru oikovy va'ekue judeu e'ý va'e kuery reve. Ha'e rami tei avakue ovaã ma ramo opytu'u, judeu kuery gui okyje vy ojepe'a.

¹³ Hexeve judeu kuery mboae heta avi onhenhomu. Barnabé eteve voi ha'e kuery onhenhomia rami onhemoingo uka.

¹⁴ Ha'e gui ma ha'e kuery ha'eve e'ýa rami, ayvu porã anhetã va'e rami e'ý ikuiaia xee aexa vy pavã oendua py aipoa'e Cefas pe: "Ndee ma judeu va'eri amboae regua reko rami reiko va'ekue, judeu reko rami e'ý. Ha'e gui aý ma mba'e re tu amboae regua kuery ri remoingoxe judeu reko rami?" ha'e va'ekue.

¹⁵ Mba'eta ore ma judeu ae ma voi orekuai, "Amboae regua ojejavypa rei va'e" 'ea va'e e'ý.

¹⁶ Jaikuua guive lei re nhanheaa rupi e'ý nhanemboeko porãa, ha'e rã Cristo Jesus re jajeroviaa re. Ha'e rami vy ore voi Cristo Jesus re rojerovia, ha'e rami vy rojeroviaa re oremboeko porãa aguã, lei re ronheaa rupi e'ý. Mba'eta lei re onhea'aa rupi ma avave rei nomboeko porãai 'rã.[†]

¹⁷ Ha'e rami avi xapy'a rei Cristo re vy nhanhemboeko porã uka tei amongue ojou 'rã jajejavya. Ha'e rami vy nda'u Cristo ae ri nhandeapo jajejav aguã rami? Any teve.

¹⁸ Mba'eta mba'emo nhambovaipa va'ekue jajapo ju va'e rire mae japyta 'rãgue ojejavypa riae va'e.

¹⁹ Ha'e rami 'rãgue py lei re oia aikuua porã rire xee amano ae ma lei pe, Nhanderuete pe ju aiko aguã. Xee voi kuruxu re xemoia avi Cristo reve.*

²⁰ Ha'e rami rire xee ve'ý ma aiko, Cristo oiko xere. Aý xero'o re aiko teri reve Nhanderuete Ra'y re ajeroviaa rupi aiko, xerayvu vy xere ojejuka uka rire.

²¹ Xee ma Nhanderuete xemboaxy nambovare e'ýi. Mba'eta lei re nhanheaa rupi nhanemboeko porãa va'e rire Cristo omanoague ndovarei 'rãgue.

3

Galácia pygua kuery pe Paulo oporanduague

¹ Peõ Galácia pygua kuery pene'arandu e'ý va'e, mava'e tu penembotavy ra'e? Mba'eta pendua py amombe'u porã va'ekue Jesus Cristo kuruxu re ojejuka ukaague.

² Po rami anho aikuaxe pëgui: Lei re penhea'aa rupi ri nda'u Nhe'ẽ pejopy, tyrã pa ayvu porã pendu vy pejeroviaa py?

³ Pene'arandu e'ý va'e, Nhe'ẽ reve pemboypy va'ekue ri aý to'o re rive ju ta ri ty'y opa mba'e py pendekuai porã?*

⁴ Pendekuai axy reiague ndovarei ri ty'y mba'everã? Ha'e nungakue ndovare e'ýi 'rãgue.

⁵ Ha'e gui Nhe'ẽ mbouare nda'u lei re penhea'aa ramo ri mba'emo porã ojapo penembyte, tyrã pa ayvu porã pendu va'e re pejerovia ramo?

Abraão rekokue re ijayvua

⁶ Ha'e ramigua ae Abraão ojou raka'e, mba'eta "Nhanderuete re ojerovia ramo ojeroviaa re ome'ẽ teko porã", he'iague rami.*

[†] ^{2:16} "Ore" he'ia ma judeu kuery re ijayvu vy. Galácia pygua kuery ma judeu e'ý ikuai. Ha'e gui ha'e javi regua ma Jesus Cristo re ojerovia vy 'rãe oo jepe (Romanos 3.21-30). * ^{2:19} Romanos 6.1-4

* ^{3:3} Gálatas 5.16-23; Efésios 2.8-10 * ^{3:6} Gênesis 15.6

⁷ Ha'e nunga rupi jaikuua ojerovia va'e ae Abraão ramymino kuery ikuai.*

⁸ Mba'eta Abraão pe ranhe omombe'u ayvu porã vy "Ndegui vy amoingo porã 'rã yvy regua ha'e javi", he'i va'ekue. Ha'e ramia py ipara re Nhanderuete oikuua uka ma voi amboae regua kuery ojerovia ramo omboeko porã 'rãa.*

⁹ Ha'ekue rami vy Abraão ojerovia ete va'e reve omoingo porã avi 'rã ojerovia va'e kuery ha'e javi.

¹⁰ Ha'e rã lei re onhea'ã va'e ma ayvu vaipy meme, mba'eta ipara oiny: "Lei re ikuai va'e ndojapopai ri vy ayvu vaipy opyta."*

¹¹ Ha'e nunga rupi Nhanderuete renonde avave rei lei re onhea'ãa rupi nomboeko porãai 'rã, mba'eta "Heko porã va'e ma ojeroviaa rupi 'rã ikuai", he'i.*

¹² Ha'e gui lei re nhanhea'ã vy ma jajeroviaa rupi e'ŷ nhandekuai. Ha'e rami 'rãgue py "Lei re oĩa amongue ojapopa ri vy oikove 'rã hexe vy", he'iague rami.*

¹³ Ha'e gui ma Cristo nhandejogua raka'e lei re ayvu vai oĩa gui, nhanderekovia ayvu vaipy ojeapo vy. Mba'eta ipara oiny: "Yvyra re oupia imoiny va'ekue ma ayvu vaipy meme" he'ia rami.*

¹⁴ Ha'e rami vy Jesus Cristo ojapo Abraão pe Nhanderuete "Ndegui vy anhomoingo porã 'rã" he'iague amboae regua kuery voi oupity aguã. Ha'e rami rã jajerovia vy jajopy 'rã Nhe'ẽ ombou va'erã va'ekue.

Nhanderuete ayvu mbovaipaarã e'ŷ lei oejaague re ijayvua

¹⁵ Irmão kuery, nhande ae reko re ambojoja ta aŷ. Mba'eta mba'emo jajapo aguã re jajogueroayvu rire nda'evei avave rei ombovaipa, neĩ omoiave aguã ha'e va'ekue áry.

¹⁶ Ha'e gui Abraão ha'e hamymino pe Nhanderuete ijayvu raka'e omoingo porã aguã re. Ha'e ramia py "Hamymino kuery pe" nde'i, mba'eta heta pe rami e'ŷ ijayvu, peteĩ'i pe anho, "Neramymino" he'ia py. Ha'e va'e ma Cristo.*

¹⁷ Ha'e gui aipoa'eve ju: Nhanderuete yma ma voi guexeve guarã ojapo ma rire quatrocentos e trinta ma'etŷa py lei oeja avi vy nomboaxa rivei, neĩ nombovaipai ijayvu ma voiague.*

¹⁸ Mba'eta lei re nhanhea'ãa rupi ri Nhanderuete gui mba'emo jajopy va'e rire ijayvuague rupi ve'ŷ jajopy 'rãgue. Ha'e rami tei ijayvuague rupi rive Nhanderuete mba'emo ome'ẽ raka'e Abraão pe.

¹⁹ Ha'e gui ma mba'erã nda'u oeja avi lei? Lei ma jejavya kuaa ukaarã oeja raka'e, ovare aguã hamymino ijayvu ma voiague va'e oiko peve'i.* Anjo kuery po rupi lei ome'ẽ uka raka'e, ha'e gui amboae po rupi ju.

²⁰ "Amboae po rupi ome'ẽ uka" he'ia py ma peteĩ'i re e'ŷ ijayvu vy, mokoĩ re. Ha'e rã Nhanderuete ma peteĩ'i.

²¹ Ha'e gui Nhanderuete nda'u ijayvu ma voiague rovai guarã ri lei oeja raka'e? Any teve. Mba'eta tekove me'earã ri lei oeja va'e rire anhetẽ lei re nhanhea'ãa rupi 'rãgue teko porã jaupity.

²² Ha'e gui ipara oinya oikuua uka jejavya guy py meme nhandekuaia, Jesus Cristo re jajerovia vy ome'ẽ 'rã va'ekue jajopy aguã.

Cristo-a py lei nhanererovaẽague rami ijayvua

²³ Ha'e gui hexe jajerovia aguã regua oikuua uka e'ŷ mbove ma lei rupi ranhe nhanemoingo vy omboty pyre rami nhanderereko raka'e, jajerovia aguã regua oikuua uka peve.

²⁴ Ha'e rami vy lei ma nhandere opena va'e rami ranhe nhanderereko raka'e, Cristo-a py nhanererovaẽ aguã, hexe jajerovia ramo nhanemboeko porã aguã.*

* 3:7 Romanos 4:1-25 * 3:8 Gênesis 12.3, 18.18 * 3:10 Deuteronômio 27.26 * 3:11 Habacuque 2.4 * 3:12 Levítico 18.5 * 3:13 Deuteronômio 21.23 * 3:16 Gênesis 13.15, 24.7 * 3:17 Hebreus 6.13-18 * 3:19 Romanos 5.20,21 * 3:24 Romanos 10.4

- ²⁵ Ha'e gui jajerovia aguã regua oikuaa uka ma rire nhandererekoare rupi ve'ŷ nhandekuai.
- ²⁶ Mba'eta peẽ kuery voi Cristo Jesus re pejerovia vy Nhanderuete ra'y kuery pendekuai.
- ²⁷ Mba'eta Cristo re penhemongarai uka va'ekue ha'e javi ma Cristo py avi penhemonde.
- ²⁸ Ha'e nunga rupi jipovei 'rã judeu ha'e grego, escravo ha'e escravo e'ŷ, avakue ha'e kunhague, mba'eta Jesus Cristo re vy ha'e javive peteĩ regua anho nhandekuai.
- ²⁹ Ha'e rami vy Cristo pegua peiko vy peẽ kuery voi Abraão ramymino kuery pendekuai, ha'e ijayvuague peuputy avi aguã rami guive pendekuai.

4

Cristo re vy Nhanderuete ra'y kuery jaikoa re ijayvua

- ¹ Aipoa'e: nguu gui ta'y kuery mba'emo ojopy aguã rami ikuai va'e ma kyrigue teri ikuiaja escravo rami ete 'rã ikuai, opa mba'e ha'e kuery pe guarã oĩ teĩ.
- ² Ha'e rami vy imbo'ea ha'e hexe opena va'e kuery oipotaa rami 'rã ikuai, tuu oa'angaague ára novaëi teria ja.
- ³ Nhande kuery voi ha'e rami avi nhandekuai va'ekue. Kyrigue rami teri nhandekuai jave escravo rami nhanemoingoa va'ekue ko vyv regua oikuaa rami rive.
- ⁴ Ha'e gui oa'angaague ára ovaë ramo Nhanderuete ombou Gua'y ae kunha gui oiko aguã, lei rupi guarã,
- ⁵ lei rupi nhandekuaiague gui nhandereraa jepe vy ta'y kuery ete nhanemoingo aguã.
- ⁶ Ha'e gui ta'y kuery jaiko ramo nhandepy'a re Nhanderuete ombou Gua'y Nhe'ẽ, ojapukai vy "Xeru, Xeru" he'i va'erã.
- ⁷ Ha'e nunga rupi escravo ve'ŷ, ta'y kuery ma peiko. Gua'y kuery Nhanderuete penemoingo rire ixugui mba'emo porã pejopy aguã rami pendekuai.*

Gueko ymague ae rupi ju ojevyxea re ijayvuague

- ⁸ Ymave rupi Nhanderuete peikuaa e'ŷ mbove escravo rami pendekuai teri va'ekue Nhanderuete ramigua kuery pe rive.
- ⁹ Aŷ ma peikuaa ma Nhanderuete, ha'e ranhe pendekuaa rire. Mba'e re tu ha'vy pejevyxe ju mba'emo ipo'aka e'ŷ ha'e ovare'ŷ va'e re, ha'e nunga pegua escravo ju pendekuaixe vy?
- ¹⁰ Mba'eta amongue ára pemboeteve 'rã joegui, amongue jaxy, mba'emo oiko aguã ára ha'e amongue ma'etŷ guive.
- ¹¹ Ha'e ramo xee akyje peẽ kuerya rupi amba'apoague ndovarevei gui.*

Paulo ndoikuuai reia re ijayvuague

- ¹² Xee rami avi pendekuai 'rãgue, mba'eta xee voi peẽ rami aiko.* Irmão kuery, po rami anho ajerure, mba'eta xevy pe mba'eve py ndapejapo vai.
- ¹³ Jypy'i pêvay ayvu porã amombe'u jave xemba'eaxy ete va'ekue, peẽ peikuaa porã.
- ¹⁴ Xee aiko axya peẽ kuery pe voi haxy ete va'ekue peropo'aka aguã. Ha'e ramive ma peẽ kuery ndaxerexaxe e'ŷi, ndaxerayvu e'ŷi guive. Ha'e rami 'rãgue py xemovaë porã va'ekue Nhanderuetea guigua anjo rami, Jesus Cristo rami ete.
- ¹⁵ Ha'e gui aŷ ma mba'exa tu noïvei ri pendekuai porãague? Xee aipoa'e porã: Ha'eve va'e rire penderexa ae penoë'rãgue raka'e xevy peme'ẽ aguã.
- ¹⁶ Ha'e gui aŷ ma anhetë va'e rupi xee romongeta vy nda'u penderovaigua ju ri aiko?
- ¹⁷ Ha'e rã amboae kuery ma pendererory merami rive xegui pendererovapaxe vy, ha'e kuery re ju peo aguã.
- ¹⁸ Ha'eve avi iporã va'e re peo aguã, pendereve xee aiko jave anho e'ŷ.
- ¹⁹ Xera'y kuery, peẽ kuery re nda'evei aiko imembry raxy va'e rami, pendere Cristo reko ojekuaa porã e'ŷa ja.

* 4:7 Romanos 8.14-17 * 4:11 Colossenses 2.16,17 * 4:12 Paulo ma judeu va'eri judeu e'ŷ va'e reko rami oiko ombo'ea rupi (1 Coríntios 9.21,22).

²⁰ Ha'eve va'e rire aŷ voi xee avaѣ 'râgue peě kuerya py amboae rami ju xeayvu aguã, mba'eta ndaikuuai rei peě kuery reko.

Sara ha'e Agar rekokue re ombojoaque

²¹ Lei rupi rive pendekuaixe va'e, pemombe'u xevy: Ndapeikuuai ri ty'y lei re oĩ va'e?

²² Mba'eta ipara oiny: "Abraão oguereko mokoõ gua'y. Peteĩ ma kunha escrava pi'a, ha'e rã amboae ma escrava e'ŷ pi'a raka'e."†

²³ Escrava pi'a ma to'o gui rive itui'i. Ha'e rã escrava e'ŷ pi'a ma Nhanderuete ijayvuague rami vy itui'i.

²⁴ Ha'e nunga oiko raka'e jaikuua pota aguã, mba'eta ha'e va'e kunhague ma mokoõ ayvu nhanderekorã oeja pyre rami. Peteĩ ayvu ma Sinai yvyty re oeja, escravo rami nhanemoingo va'e. Ha'e va'e ma Agar.‡

²⁵ Mba'eta Agar ma Arábia regua Sinai yvyty rami, ha'e Jerusalém tetã aŷgua rami guive oiko, mba'eta ha'e pygua kuery escravo rami meme teri ikuai.

²⁶ Ha'e rã Jerusalém yvategua pygua kuery ma escravo e'ŷ ikuai. Ha'e va'e ae ma nhandexy.

²⁷ Mba'eta ipara oiny: "Nememby e'ŷ va'e, kyrĩ va'e reikuavã e'ŷ teri va'e, evy'a ke. Kyrĩ va'e raxy rendu e'ŷ teri va'e, enhendu atã ke revy'a vy, mba'eta ome reve oiko va'e memby kuery gui hetave 'rã ikuai kunha oeja pyre memby kuery."*

²⁸ Ha'e gui irmão kuery, peě ma Isaque itui'iague rami avi Nhanderuete ijayvuague rami vy peiko.

²⁹ Yma guare rami to'o gui itui'i va'ekue ma opu'ã rei raka'e Nhe'ẽ gui itui'i va'ekue re. Ha'ekue ramigua ae aŷ voi oiko.

³⁰ Ha'e rami teĩ ipara re oĩ: "Eipe'a ke escrava ipi'a reve, mba'eta nda'evei escrava e'ŷ pi'a rami avi escrava pi'a ojopy aguã mba'emo."*

³¹ Ha'e rami vy irmão kuery, nhande ma escrava memby kuery e'ŷ, ha'e rã escrava e'ŷ memby kuery nhandekuai.

5

Lei rupi nhandekuai 'râgue py Cristo re anho jajerovia aguã re ijayvua

¹ Escravo ve'ŷ nhandekuai aguã ae Cristo nhandereraa jepe. Peĩ atã ke ha'vy escravo penhemingo uka jevy e'ŷ aguã.*

² Mba'eta xee Paulo aipoa'e pêvy: Pendepire pemboi uka ramo Cristo pendereraa jepeague ndovarei 'rã.

³ Teǐgue ju aipoa'e pavẽ pe: Opire omboi uka va'ekue ma lei re oĩ va'e ha'e javi ojapo aguã rami ikuai.

⁴ Peě kuery lei re penhea'ãa rupi penhemboeko porã ukaxe va'e, pejepe'a ma Cristo gui, ha'e penemboaxyague peja guive.

⁵ Mba'eta ore ma Nhe'ẽ rupi vy rojerovia reve roarõ roikovy teko porã ome'ẽ mbyrã.

⁶ Mba'eta Cristo Jesus re nhandekuai ramo mba'everã ndovarei nhandepire nhamboi ukaague, neĩ nhamboi uka e'ŷa voi. Ovare va'e ma jajeroviaa nhandeporayvua rupi jaexa uka va'e anho.

⁷ Peě kuery pendekuai porã va'ekue. Mava'e tu pendejoko ra'e anhetẽ va'e rupi pendekuai ve'ŷ aguã?

⁸ Mba'eta ha'e rami aguã ma penerenoĩare gui e'ŷ ou.

⁹ Trigo mbovua minha ruxã'i teĩ mesa ha'e javi 'rã omoeakuãmba.

¹⁰ Ha'e rami teĩ xee ma Senhor rupi vy ajerovia amboae rami rei peikuaa e'ŷ aguã. Ha'e rã penemoangeko reia mava'e rã rei opaga 'rã.

† 4:22 Abraão ma mokoõ kunha re omenda raka'e, gua'yxy ae'i Sara re, ha'e gui escrava Agar re guive, Nhanderuete oipotaa rami e'ŷ teĩ. Sara pi'a ma Isaque, ha'e rã Agar pi'a ma Ismael (Gênesis 16 ha'e 21).

‡ 4:24 Sinai yvyty re ma lei judeu kuery rekoraõ oeja raka'e. Ha'e va'e rupi onhea'ã va'e ma escravo rami meme ikuai (Êxodo 20; Hebreus 12.18-29). * 4:27 Isaías 54.1 * 4:30 Gênesis 21.10 * 5:1 João 8.32,36

¹¹ Ha'e gui irmão kuery, xee ma nhandepire nhambói uka aguã re teri anhombo'e va'e rire mba'ixa 'rāgue tu ha'vy xembojexavai reia? Ha'e rami anhombo'e va'e rire ha'e kuery ndojou vaiwei 'rāgue kuruxu re Cristo ojuka ukaague amombe'u rā.

¹² Ha'eveve 'rāgue penemoangeko reia kuery ha'e kuery ae onhekxímba va'e rire.

Escravo ve'ŷ ma jaiko vy nhandeporayvu aguã re ijayvua

¹³ Mba'eta peẽ irmão kuery, escravo ve'ŷ pendekuai aguã Nhanderuete penereno. Ha'e rami avi escravo ve'ŷ pendekuaia rupi nda'evei to'o oipotaa rami pendekuai aguã, ha'e rā pejoayvua rupi 'rā pendekuai peteĩ-teĩ rembiguai rami.*

¹⁴ Mba'eta lei re oĩ va'e ha'e javi 'rā jajapo pete'i ayvu rupi nhandekuai vy: "Peayvu peneirũ peẽ ae pejeayvua rami" he'iague.*

¹⁵ Ha'e rami teĩ jomeme pejoxu'u ha'e penhomboi-mboi ri vy penheangu ke peẽ ae penhomomba e'ŷ aguã.

To'o rembiapo ha'e Nhe'ẽ guigua re ijayvua

¹⁶ Ha'e nunga rupi aipoa'e: Pendekuai Nhe'ẽ re. Ha'e vy 'rāe ndapejapoi to'o oipota va'e.

¹⁷ Mba'eta to'o oipota va'e ma Nhe'ẽ ndoipotai, ha'e Nhe'ẽ oipota va'e ma to'o ndoipotai, joo ramigua e'ŷ vy. Ha'e nunga rupi ae ndapejapo kuaai peipota va'e.

¹⁸ Ha'e rā Nhe'ẽ ri penderereko ramo lei guy py ve'ŷ pendekuai.*

¹⁹ Ha'e gui to'o guigua ma jaikuaa pavẽ: tavy reia, teko ky'a, jajejoko e'ŷa,

²⁰ mba'emo ra'angaa re jajeroviaa, mba'evyky, joe nanhandea'eia, joe nhapu'ã reia, takâte'ŷ, joupe nhandevai reia, nhandeyvate reixea, joegui jaja'oa, joo rami e'ŷ-e'ŷ nhandekuaia,

²¹ jajojou vai reia, jaka'u reia, jakaru guaxua rupi nhandekuaia, ha'e ramigua anho. Ha'e nunga re pêvy xeayvu ae ma va'ekue, ha'e aŷ ma amombe'u porâve ju: Ha'e rami ikuai va'e ma Nhanderuete po'akaa pyguarã e'ŷ.

²² Ha'e rā Nhe'ẽ guigua ma pova'e: mborayvu, vy'a, mby'a porã, jajogueropo'akaa, joupe jajapo porã, nhanhopytyvõa, ojeroviapy jaikoa,

²³ nhandevai rive e'ŷa ha'e jajejokoa. Ha'e ramigua jokoarã lei jipoi.

²⁴ Ha'e Jesus Cristo pegua ikuai va'e ma kuruxu re ojuka avi ma to'o opa marã rei oipota va'e.

²⁵ Nhe'ẽ re vy jaikove rire Nhe'ẽ reve ae tema nhandekuai.

²⁶ Nda'evei jajejou porã rei aguã, nhanhombopoxy ha'e jajojou vaia rupi.

6

Nhanhopytyvõ ha'e nhandejee ae jaikuua pota aguã re ijayvua

¹ Irmão kuery, amongue ha'eve e'ŷa rami oiko rā oexaa ramo peẽ Nhe'ẽ reve pendekuai va'e pemongeta 'rā, pendevai e'ŷ re. Penheangu ke guive peẽ voi penhembotavy uka e'ŷ aguã.

² Peraa ke peteĩ-teĩ voyi. Ha'e rami vy 'rāe Cristo guigua lei rupi pendekuai.*

³ Ha'e rā amongue heko porâve e'ŷ teĩ ojeupe "Xerekó porã" he'i vy ha'e kuery ae ojekore.

⁴ Peteĩ-teĩ peikuuaa pota peẽ ae pendereko re. Ha'e rami vy 'rāe pejererovy'a aguã ha'eve, amboae kuery reko re peikuuaa pota rei nda'ei.

⁵ Mba'eta peteĩ-teĩ ogueraa 'rā ovoyi ae.

Mba'emo nhanhotŷague gui nhamono'õ ju 'rāa re ijayvua

⁶ Ayvu porã re penembo'ea rā opa mba'e porã pemboja'o 'rā penembo'ea kuery pe.

⁷ Pejekore eme pova'e nunga re, mba'eta Nhanderuete ndojejajai ukai 'rā, mba'eta nhanhotŷague gui ae ju 'rā nhamono'õ.

* 5:13 Romanos 6.18,19; 1 Pedro 2.16,17 * 5:14 Levítico 19.18 * 5:18 Romanos 8.1-9 * 6:2 Mateus 18.15; Lucas 17.3,4; Tiago 5.19,20

⁸ To'o guigua onhotŷ rire to'o gui ju 'rā omono'ō imombaarā. Ha'e rā Nhe'ē guigua ri onhotŷ rire ma Nhe'ē gui ae ju 'rā omono'ō tekove marā e'ŷ.

⁹ Japytu'u rive eme joupe jajapo porāa gui, mba'eta oa'angaague ára nhamono'ō 'rā hekobia, ndajajepe'ai rire.

¹⁰ Ha'e nunga rupi ha'eve jave jajapo porā 'rā pavē pe, nhanderevegua ojerovia va'e kuery pe katuve ma.*

Cristo kuruxu regua anho Paulo oguerovy'aa re ijayvuague

¹¹ Pexa ke ipara tuvixa rei va'e xepo py ae ambopara va'ekue.

¹² Ha'e gui to'o re onhemboyvatevexe va'e kuery onhea'ā 'rā pendepire pemboi uka aguā re. Ha'e ramigua oipota onhembojexavai uka e'ŷ aguā, mba'eta Cristo kuruxu regua omombe'u va'e rire ombojexavaia ae 'rāgue.

¹³ Ha'e rami avi opireomboi uka va'ekue voi ndojapopai 'rā lei re oĩa, ha'e rami teĩ ha'e kuery onhea'ā pendepire pemboi uka aguā re, ha'e nunga re ojererovy'a rei aguā.

¹⁴ Ha'e rā xee ma mba'eve rei ndarovy'ai kuruxu re nhande-Senhor Jesus Cristo omanoague e'ŷ vy.* Mba'eta kuruxu re ma yvy regua reko omano ae ma xevy, ha'e xee voi amano avi yvy regua reko pe.

¹⁵ Mba'eta nhandepire nhamboi ukaa, ha'e nhamboi uka e'ŷa voi mba'e'ŷ, hemimoingo pyau jaikoa anho ovare.

¹⁶ Tove ha'e rami ikuai va'e ha'e javi toendu mby'a porā ha'e omboaxya, Nhanderuete pegua kuery Israel regua voi.

¹⁷ Ha'e rami avi ndaipotavei ma avave rei xemoangeko, mba'eta xerete rupi iperepa ma Jesus káuxa.

Ogueroayvu porāague

¹⁸ Irmão kuery, tove penenhe'ē py tapendu nhande-Senhor Jesus Cristo penemboaxya. Amém.

* 6:10 2 Coríntios 9.6-15 * 6:14 1 Coríntios 1.22-24; 2.1,2

Éfeso pygua kuery pe Paulo ombopara va'ekue Éfeso pygua kuery pe Paulo ombopara va'ekue

Kova'e kuaxia ma Jesus remimbo'e kuery Éfeso tetā pygua pe apóstolo Paulo ombopara va'ekue. Ha'e kuery pe omombe'u porāve nhandevy peguarā Nhanderuete oguerekō va'e, araka'eve rā guarā guive, Ta'y Jesus re nhaī rā. Aipoe'i: "Tove Nhanderuete nhande-Senor Jesus Cristo Ru va'e re ta'ima'endu'a porāa, mba'eta Cristo re nhanemoī vy yva re opa mba'e porā Nhe'ē guigua ome'ē nhandevy. Mba'eta yvy onhono e'ŷ mbove ma voi Cristo re nhanemoī vy ojeupe guarā nhandeporavo raka'e, henonde rupi iky'a e'ŷ ha'e otekoavy e'ŷ va'e nhandekuai aguā" (1.3-4). Jesus re jajerovia va'e ma iky'a e'ŷ va'erā ojogua pyre nhandekuai, Nhanderuete pegua templo rami, ha'e Jesus rete rami guive.

Paulo ijayvu avi Nhanderuete nhanderayvu etea re. Aipoe'i: "Mba'eta jajerovia rā nhanemboaxy py ae nhandereraa jepe. Ha'e nunga ma nhandegui ae e'ŷ ou, Nhanderuete ome'ē rive. Nhande ae nhanhea'āa rupi e'ŷ guive ou, avave rei ojejou porā rei e'ŷ aguā" (2.8-9). Ha'e rami rire amboae kuery reve peteī rami nhandekuai aguā, Nhe'ē po'akaa rupi peteī-teī nhanhombaraeeta rupi ae.

Opaa py Paulo aipoe'i: "Penembaraete tema Senhor re, ipo'akaa rupi ae. Pendejee pemoī Nhanderuete guigua tembiporu ha'e javi, pendere anha opu'ā rā peī atā aguā" (6.10-11).

Oxarura reve ijayvu vy omboypyague

¹ Xee Paulo ma Nhanderuete oipotaa rami vy Cristo Jesus pegua apóstolo aiko. Kova'e kuaxia ambou Éfeso tetā py iky'a e'ŷ va'e ha'e Cristo Jesus pegua ojeroviapy pendekuai va'e pe:^{*}

² Tove peē kuery tapendu Nhanderuete ha'e Senhor Jesus Cristo guigua penemboaxy ha'e mby'a porā.

Cristo nhandereraa jepe rā Nhanderuete nhanemoingo porāague re ijayvua

³ Tove Nhanderuete nhande-Senor Jesus Cristo Ruete va'e re ta'ima'endu'a porāa, mba'eta Cristo re nhanemoī vy yva re opa mba'e porā Nhe'ē guigua ome'ē nhandevy.

⁴ Mba'eta yvy onhono e'ŷ mbove ma voi Cristo re nhanemoī vy ojeupe guarā nhandeporavo raka'e, henonde rupi iky'a e'ŷ ha'e otekoavy e'ŷ va'e nhandekuai aguā. Nhanderayvu vy

⁵ nhandeporavo ma voi va'ekue gua'y kuery ae nhanemoingo aguā. Ha'e ae oipotaa rami vy nhanemboaxy Jesus Cristo rupi,^{*}

⁶ nhanemboaxy ramo pavē oguerovy'a aguā. Ha'e rami nhandekuai aguā ome'ē rive, gua'y oayvu va'e re nhanemoī vy.

⁷ Hexe nhanemoī vy nhandejogua raka'e jajejavyague gui, mba'eta nhanemboaxy ete vy huguy py omboguepa.

⁸ Ha'e nunga Nhanderuete ombou nhandere opa marāguā 'arandu reve, jaiko kuaa aguā.

⁹ Nhandedevy oikuaa uka avi ha'e ae oipotaa rami mba'emo ojapo aguā ndoikuaa ukai va'ekue. Ha'e va'e ma nhanemboaxy rupi ojapo uka 'rā Cristo pe,

¹⁰ oa'angaague ára ovaē rā ojapo aguā opa mba'e re Cristo ipo'aka aguā rami, yva ha'e yvy re ikuai va'e ha'e javi re.

¹¹ Cristo re nhanemoī vy nhandeporavo raka'e ojeupe guarā. Ha'e ae oipotaa rami vy opa mba'e omoingoague rami avi ha'e rami nhandeapo onhembopy'a ma voiague rami,

¹² ha'e rami nhandekuaia pavē oikuaa vy oguerovy'a aguā hexakāmbaa, yma guive ore kuery Cristo roarōa rupi orekuaia re guive.^{*}

* 1:1 Atos 19.1-40, 20.17-35 * 1:5 Romanos 8.28-30; 1 Pedro 1.2 * 1:12 Apy ma "Ore" he'ia ma judeu kuery re ijayvu vy.

¹³ Ha'e gui peẽ kuery voi penemoĩ avi Cristo re. Mba'eta pendereraa jepea regua ayvu porã anhetẽ va'e pendu vy hexe pejerovia ramo pendere omoĩ ikuaa ukaarã, Nhe'ẽ Ky'a E'ŷ ombou 'rã va'ekue ae.*

¹⁴ Mba'eta nhandere Onhe'ẽ omoĩ rire jaikuaa nhandevy guarã oguerekva'e ha'e javi jajopy 'rãa. Ojeupega eterã nhandereraa jepea ára ome'ẽ 'rã nhandevy, hexakãmbaa oguerovy'aa pavẽ aguã.

Ojerovia va'e kuery re Paulo ojeruleague

¹⁵ Ha'e nunga rupi xee voi arov'y'a, omombe'ua rã aendu vy Senhor Jesus re pejeroviaa ha'e iky'a e'ŷ va'e kuery ha'e javi peayvua.

¹⁶ Ha'e rami vy anhembo'e nhavõ pendere xema'endu'a vy arov'y'a Nhanderuete.

¹⁷ Ha'e rami vy ixupe ajerure pendere omoïve aguã pene'arandurã peikuua ete aguã Nhanderuete nhande-Senhor Jesus Cristo Ru hexakãmba va'e.

¹⁸ Tove pendepy'a py tapenemoexakã peikuua aguã mba'e pearõ aguã pa penerenoïague, iky'a e'ŷ va'e kuery mboae reve opa mba'e porã pejopy avi va'erã,

¹⁹ ha'e opa mba'e re ipo'akaa, hexe jajerovia va'e pe oexa uka rã peikuua avi aguã.

²⁰ Mba'eta opo'akaa oexa uka raka'e Cristo omanoague gui omboete jevy vy. Ha'e gui yva re ju omboguapy imoiny oiporu kuua regua re,

²¹ huvixa ikuai va'e áryve oĩ aguã, joguerekoa kuery, mba'emo re ombopo'aka ha'e opena uka pyre kuery áryve, aÿga ha'e raka'eve rã ikuai va'e áryve guive.*

²² Mba'eta ipy guýry opa mba'e omoĩ, ha'e opa mba'e akãrã omoĩ vy igreja kuery pe ome'ẽ.*

²³ Mba'eta igreja kuery ma hete.* Igreja kuery reve anho 'rã Cristo regua oimba, hexeve anho opa mba'e oimbaa rami avi.

2

Nhanemboaxy vy nhandereraa jepeague re ijayvua

¹ Pendevy pe voi ome'ẽ tekove, pendeko vai ha'e pejejavya rupi vy omanogue rami pendekuai va'ekue ri.

² Mba'eta ha'e rami anho pendekuai va'ekue vy regua reko rami, arai guy rupi nhe'ẽ vai ipo'aka va'e, Nhanderuete onhe'ẽ rendu e'ŷ va'e kuery rerekova va'e oipotaa rami rive.

³ Ha'e rami nhande kuery pavẽ nhandekuai va'ekue to'o oipotaa rami. Mba'eta to'o oipota rami ha'e nhande ae nhandepy'aa rupi rive nhandekuai va'ekue. Amboae kuery rami avi japaga aguã rami nhandekuai va'ekue, ha'e rami ete nhanderekva'e vy.

⁴ Ha'e rã Nhanderuete opa ma mba'e py nhanemboaxy ha'e nhanderayvu ete vy

⁵ omanogue rami nhanderekova vaiague py teri nhandekuai va'ekue ri nhande avi nhanemoingove ju Cristo reve, mba'eta nhanemboaxy ramo ae jaa jepe.

⁶ Cristo Jesus reve nhanemoingove ju vy hexe vy nhanemboguapy avi yva re,

⁷ raka'eve rã oexa uka aguã Cristo Jesus re vy nhanemboaxy etea ha'e nhanderayvua.

⁸ Mba'eta jajerovia rã nhanemboaxy py ae nhandereraa jepe. Ha'e nunga ma nhandegui ae e'ŷ ou, Nhanderuete ome'ẽ rive.

⁹ Nhande ae nhanhea'aa rupi e'ŷ guive ou, avave rei ojejou porã rei e'ŷ aguã.*

¹⁰ Mba'eta nhande ma Nhanderuete rembiapo jaiko. Cristo Jesus re nhanemoingove ju iporã va'e jajapo jaikovy aguã, ha'e rupi nhandekuai aguã yma ma voi omoĩ rire.

Cristo kuruxu gui judeu kuery ha'e amboae regua joegua meme ikuiaia re ijayvua

¹¹ Ha'e nunga rupi peẽ judeu e'ŷ va'e ke penema'endu'a yma rupi pendero'o re pendekuaiague re. Pendevy pe judeu kuery "Opire omboi uka e'ŷ va'e" he'i, ha'e kuery ojeupe ma "Opire omboi uka va'e" he'i okuapy tei avakue po py rive omboi uka.

* 1:13 2 Coríntios 1.21,22 * 1:21 Filipenses 2.9-11; Colossenses 2.9,10 * 1:22 Salmo 8.6 * 1:23 Efésios 4.11-16; Romanos 12.4,5; 1 Coríntios 12.12-27 * 2:9 Romanos 3.19-24; 5.6-8; Tito 2.11-3.7

¹² Ha'e va'e jave ma Cristo reve'ŷ pendekuai va'ekue, Israel regua e'ŷ guive. Neñ ndapeikuuai va'ekue Nhanderuete mba'emo porã ome'ẽ aguã re ijayvu vy guexeve guarã ojapoague. Mba'eve ndaperekoi va'ekue pearõ aguã, mba'eta Nhanderuete revegua e'ŷ pendekuai va'ekue yvy re.*

¹³ Yma Nhanderuetea gui mombyry pendekuai va'ekue ri aŷ ma Cristo Jesus re vy penemonhemboja ma, Cristo ruguy rupi ae.

¹⁴ Mba'eta ha'e va'e ae ma peteĩ rami nhanemoingoa, mba'eta mokoĩ regua gui peteĩ i nhanemoingo.* Ha'e vy oity nhanembyte kora nhanemboja'oarã hi'aĩ va'ekue. Ha'e va'e ma joe nanhandea'eiague.

¹⁵ Ngo'o reve vy ombovaipa raka'e lei re ojapo uka pyre ha'e ndojapo ukai pyre oĩa. Mokoĩ regua gui peteĩ regua pyau omoingo, ojee ae nhanemoingo vy. Ha'e rami vy peteĩ rami nhanemoingo.

¹⁶ Mokoïve regua nhandereru ju Nhanderuete re, peteĩ i tete nhandekuai aguã. Kuruxu re omano vy oipe'apa raka'e ndajajoayvui reiague.

¹⁷ Ha'e gui ou vy oikuua uka peteĩ rami ju nhanemoingopa aguã, peẽ ixugui mombyry pendekuai va'ekue, ha'e'i rupi orekuai va'ekue guive.

¹⁸ Mba'eta hexe vy mokoïve regua ha'eve Nhanderuete re nhanhemboja aguã, peteĩ i Nhe'ẽ rupi.

¹⁹ Ha'e nunga rupi amboae regua ve'ŷ, amboae guigua ve'ŷ ma pendekuai. Ha'e rami 'râgue py iky'a e'ŷ va'e kuery reve joegua, Nhanderuete ro pygua kuery ae pendekuai.

²⁰ Ha'e va'e oo ytarã ma apóstolo ha'e profeta kuery ranhe omoĩ raka'e, ha'e gui peẽ kuery ju penemoĩ vy ojapove heravy. Cristo Jesus ae ita omboeteve pyrã oĩ.

²¹ Hexe vy oo ha'e javi joo'i rami oĩ vy yvateve ovy, templo Senhor peguarã.*

²² Cristo re vy peẽ kuery voi joo'i rami penemoĩ ramo Nhanderuete Onhe'ẽ rupi oĩ atyrã pepyta.

3

Amboae regua kuery oo jepea re ijayvua

¹ Ha'e nunga rupi aŷ xee Paulo ma Cristo Jesus káuxa aĩ nhuã py, peẽ judeu e'ŷ va'e kuery ayvu vy.

² Mba'eta peẽ kuery pendu ma nhi'ã Nhanderuete xemboaxy vy xemoïague pendevy pe ayvu amombe'u aguã.*

³ Mba'eta xevy pe oikuua uka karamboae ndoikuua ukai va'ekue. Ha'e va'e ma mboapy ayvu'i py pêv amboparaague.

⁴ Ha'e gui ambopara va'ekue peroayvu vy peikuua avi 'rã Cristo regua oikuua uka e'ŷ pyre xevy pe ranhe oikuua uka va'ekue.

⁵ Ymagua kuery pe ma ha'e nunga ndoikuua ukai va'ekue. Ha'e gui aŷ ma Onhe'ẽ rupi ae oikuua uka iky'a e'ŷ va'e apóstolo ha'e profeta kuery pe.

⁶ Ha'e va'e ma pova'e: peẽ kuery judeu regua e'ŷ voi ore judeu kuery reve nhandevy pavẽ pe Nhanderuete ome'ẽ 'rã mba'emo porã, ha'e gui peteĩ i tete nhanemoingo pavẽ, ha'e ijayvuague jajopy pavẽ aguã rami nhanemoingo guive, Cristo Jesus regua ayvu porã oĩ rami vy.

⁷ Ha'e va'e mombe'uarã ae Nhanderuete xemoĩ. Xemboaxya rupi xemoĩ opo'akaa oexa uka vy.

⁸ Xee ma iky'a e'ŷ va'e kuery pavẽ gui xe'yvyive va'eri Nhanderuete xemboaxy vy xemoĩ karamboae amboae regua kuery pe ayvu porã amombe'u aguã. Ha'e va'e oĩa rami vy opa mba'e porã jaikuua e'ŷ va'e regua Cristo re anho oĩ.

* 2:12 Colossenses 1.21,22 * 2:14 "Mokoï regua" he'ia py ma judeu kuery ha'e amboae regua re ijayvu vy, mba'eta Jesus pegua joegua e'ŷ-e'ŷ nhandekuai teĩ peteĩ i regua nhanemoingo (Gálatas 3.26-28). * 2:21

1 Coríntios 3.16,17; 1 Pedro 2.4,5 * 3:2 Romanos 15.15,16; Colossenses 1.25-27

- ⁹ Xemoī karamboae amombe'u aguā mba'emo oiko va'erā, Nhanderuete opa mba'e apoare va'e yma rupi onhembopy'aague ndoikuua ukai teri va'ekue ojeupity rā.
- ¹⁰ Mba'eta aŷ gui ma igreja kuery ikuia rupi Nhanderuete ha'ekue-'ekue'i rami e'ŷ oexa uka 'rā o'arandua. Yva pygua huvixa kuery ha'e ipo'akakueve ikuai va'e pe voi oikuua uka 'rā,
- ¹¹ mba'eta jypy guive oipotaa rami ae onhembopy'a ojapo aguā Cristo Jesus nhande-Senhor rupi.
- ¹² Ha'e rami rire hexe vy nhandepy'a guaxu Nhanderuete re nhanhemboja aguā, mba'eta aŷ jaikuua ete hexe jajerovia ramo nhanemboaxy.
- ¹³ Ha'e nunga rupi pendere vy aiko axya omombe'ua rā pendu teĩ ndaipotai pendekuerai, mba'eta pevy'ave aguā ae aiko axy.

Peteīgue ju Paulo onhembo'eague

- ¹⁴ Ha'e nunga rupi Nhanderuete renonde xerenap'yã re aĩ.
- ¹⁵ Hery rupi ae yva ha'e yvy re ha'e javi regua ikuai va'e omboerya.
- ¹⁶ Opa mba'e porã oguereco va'e vy ixupe ajerure pendepy'a re Inhe'ẽ oĩ va'e rupi penemombaraete aguā,
- ¹⁷ ha'e rami py pejerovia rā pendepy'a re Cristo oiko aguā. Ha'e gui mborayvu re penembarate ha'e peĩ atã vy
- ¹⁸ iky'a e'ŷ va'e kuery ha'e javi reve peikuaa aguā Cristo nhanderayvua tuvixa etea, mba'eta ipy ete, ipuku, yvate ha'e yvy katy oo.
- ¹⁹ Ha'e rami vy peikuaa aguā nhanderayvua, ndajaikuaapai va'e teĩ, Nhanderuete re oĩ va'e ha'e javi pendere voi oĩ aguā.
- ²⁰ Nhanderuete ma opa mba'e py ipo'akapa va'e vy ojapo jajerurea ha'e nhaexa'āa áryve voi, nhandere opo'akaa oĩ va'e rupi ae.
- ²¹ Tove igreja kuery ikuia rupi ixupe toporaeia, ha'e Cristo Jesus re vy guive, aŷ ha'e araka'e rā peve. Amém.

4

Peteī rami jajerovia aguā re ijayvua

- ¹ Senhor káuxa nhuā py aĩa py po rami xee romoneta: Nhanderuete ojeupe guarã penerenoĩ rire ha'ekue rami ae ke pendekuai.
- ² Pendekuai rive'i, ha'eve vai'i. Pendevai rei eme. Mborayvu re pejogueropo'aka peteī-teĩ.
- ³ Penhea'ã pembovaipa e'ŷ aguā peteī rami Nhe'ẽ penemoingoa, jomeme pendekuai porã vy.*
- ⁴ Mba'eta peteī'i tete nhandekuai, peteī Nhe'ẽ oiko ha'e peteī'i guive pearō pekuapy va'e, ha'e rami aguā penerenoĩ rire.*
- ⁵ Oiko peteī'i Senhor, peteī'i rami jajerovia aguā, peteī'i nhanhemongarai aguā,
- ⁶ peteī'i Nhanderuete nhande kuery ha'e javi Ru va'e. Ha'e ma ha'e javi re ipo'aka, ha'e javi rupi omba'eapo, ha'e javi re oĩ.

Iky'a e'ŷ va'e kuery mba'emo ojapo aguā re ijayvua

- ⁷ Ha'e rami avi nhanemboaxy rupi peteī-teĩ pe ome'ẽ nhanerembiaporã. Cristo ae ome'ẽxea rami ome'ẽ.*
- ⁸ Ha'e nunga rupi ipara re oĩa py "Yvate ojeupi vy heta ogueraa guembiguairã ojopy va'ekue, ha'e avakue pe ome'ẽ hembiaporã", he'i va'ekue.*
- ⁹ Ha'e gui "Ojeupi" he'ia py jaikuua yvy guýry peve oguejy ranheague,
- ¹⁰ mba'eta oguejy va'ekue ae ma ojeupi ju yva ha'e javi áry, opa mba'e re oĩ aguā.

* 4:3 Filipenses 2.1-4; Colossenses 3.12-15 * 4:4 Romanos 12.4,5; 1 Coríntios 12.12,13 * 4:7 Romanos 12.4-8; 1 Coríntios 12.4-11; 1 Pedro 4.10,11 * 4:8 Salmo 68.18

¹¹ Ha'e gui amongue pe ome'ẽ apóstolo ikuai aguã, amboae pe ma profeta ikuai aguã, amboae kuery pe ma ayvu porã mombe'ua rupi ikuai aguã, amboae kuery pe ma igreja re opena, e'ŷ vy nhombo'ea rupi ikuai aguã.

¹² Ha'e rami vy ombo'e uka porãmba iky'a e'ŷ va'e kuery peteĩ-teĩ guembiapo ojapo kuaa aguã rami. Ha'e rami vy Cristo rete omombaraeteve aguã,

¹³ peteĩ rami meme jajerovia ha'e Nhanderuete Ra'y jaikuaa ete peve. Ha'e rami vy 'rãe kakuaakue rami nhandekuai, Cristo rami ete nhandekuai peve opa mba'e py,

¹⁴ kyrigue rami ve'ŷ nhandekuai aguã, opa marã rei nhanembo'e va'e yvytu rami nhandereraa rã ha'ekue'ŷ-kuel'ŷ katy rive jaa e'ŷ aguã. Mba'eta ha'e kuery ma avakue 'arandua rami rive 'rã nhanembo'e, ijayvu kuaa vy nhanembotavypa 'rã guive.

¹⁵ Ha'e rami 'rãgue py anhetẽ va'e rupi ha'e mborayvu re nhandekuai vy opa mba'e py nhandeyvateve 'rã javy Cristo rami ete nhandekuaia jaupity peve, mba'eta ha'e anho nhaneakã oiko.

¹⁶ Hexe vy tete ha'e javi oïmba porã 'rã, joo rami ikuiai py. Peteĩ-teĩ regua joo rami meme ha'e mborayvu re nhomombaraete vy ha'e javi 'rã yvateve ov.

Jajeko rerova aguã re ijayvua

¹⁷ Ha'e nunga rupi aipoa'e Senhor rery rupi: Pendekuaive eme amboae regua kuery reko rami, mba'eta ha'e kuery ma ipy'aa ovare e'ŷ va'e rupi rive ikuai.

¹⁸ Ha'e kuery 'arandua ma pytumba. Mombyry ikuai Nhanderuete reko gui, inhakã ratãa rupi ae.

¹⁹ Ha'e kuery oxã noendu kuaavei vy opa marã rei ikuiai rupi ndojejokovei ma, ha'e rami anho ikuaixe vy.

²⁰ Ha'e rã peẽ kuery ma ha'e rami e'ŷ peikuaa raka'e Cristo reko.

²¹ Mba'eta anhetẽ ae Jesus regua anhetẽ va'e pendu, ha'e ha'e rupi ete penembo'ea.

²² Penembo'ea penderekoymague peja aguã re, mba'eta nhanderekoymague rupi vy nhanderekoyk'ave javy nhanhemoaruãa py jajekorepa vy.

²³ Ha'e gui penembo'ea penhembopyau uka aguã pendepy'a ha'e peikuaa-a py,

²⁴ ha'e pendeko pyau py ju penhemonde aguã. Ha'e va'e ma Nhanderuete omoingo ha'e rami ete pendekuai aguã, anhetẽ guigua teko porã ha'e pendeky'a e'ŷa rupi.*

Nhanderuete pe ete nhandekuai aguã re ijayvua

²⁵ Ha'e nunga rupi pendeapuague peja vy peteĩ-teĩ anhetẽ rupi anho pendeayvu jomeme, mba'eta peteĩ'i tete nhandekuai.*

²⁶ Pendevaia py teĩ pejejavu eme. Pendevaia gui pejepe'a kuerei 'rã kuaray oike e'ŷ re,*

²⁷ peteĩve henda py anha pe penhembotavy uka e'ŷ aguã.

²⁸ Imonda va'ekue ta'imondave eme. Ha'e rami 'rãgue py tomba'eapo, opo py tojapo iporã va'e, iporiaukue'i oipytyvõ aguã ojou aguã.

²⁹ Pendejuru gui toẽ eme ayvu vai, ha'e rã ayvu porã anho, peteĩ-teĩ oikotevãa rami penhomombaraete aguã. Ha'e rami vy 'rã hendua kuery pe pendeayvua ojapo porã.

³⁰ Pemomboriau eme Nhanderuete Nhe'ẽ, mba'eta opa mba'e gui pendereraa jepe aguã ára peve guarã pendere omoi, ojeupegua kuery peikoa kuaa ukaarã.*

³¹ Pejepe'a ke pendevai reiaty gui, ha'e gui penhenhandu vaikue reia, pendepoxy reia, penhomotare'ŷa, pendeayvu vaikue reia ha'e opa mba'e vai gui.

³² Ha'e rami 'rãgue py joo rami meme pendekuai pejoayvu ha'e penhomboaxya rupi. Pejoperdoa ke, Cristo re vy Nhanderuete pendeperdoaague rami avi.

5

¹ Ha'e nunga rupi Nhanderuete rami ete ke pendekuai, ta'y kuery hembiayvu va'e vy.

² Mborayvu re pendekuai Cristo penderayvua rami, mba'eta nhandere ojejuka uka raka'e, Nhanderuete pe guekove ae ome'ẽ heakuã porã va'e ome'ẽmbry rami.

* 4:24 Colossenses 3:5-10 * 4:25 Zacarias 8:16 * 4:26 Salmo 4:4 * 4:30 Gênesis 6:5,6; Salmo 78:40,41; Isaías 63,9,10

Hendy va'e ha'e pytū rupi ikuai va'e re ijayvua

³ Iky'a e'ŷ va'e pendekuai vy nda'evei neĩ pendeayvu aguã mba'emo vai re: tavy reia, nhemboeko ky'aa, nhomba'e re pena reia, ha'e nunga re.

⁴ Nda'evei pendeayvu vaikue aguã, pene'arandua rupi e'ŷ pendeayvu aguã, neĩ penderoryai rei aguã. Ha'e ramigua ma nda'evei va'e meme. Ha'e rami 'rāgue py perovy'a tema Nhanderuete.

⁵ Peikuua pota ke pova'e nunga re: Cristo ha'e Nhanderuete po'akaa ojekuaa jave peteĩve ndojejokoi rei va'e mba'eve ndojopyi 'rā, neĩ onhemboeko ky'a rei va'e, nhomba'e re opena rei va'e, mba'eta ha'e ramigua ma ta'angaa ombojerovia va'e rami meme.

⁶ Avave rei pe penhembotavy uka eme ayvu ovare'ŷ va'e py, mba'eta Nhanderuete ombopaga 'rā nonhe'ẽ rendui va'e kuery ha'e rami ikuaiague re.

⁷ Ha'e nunga rupi mba'eve perekoye ha'e kuery reve.*

⁸ Mba'eta yma rupi, pytū rupi pendekuai va'ekue ri aŷ ma Senhor re vy hexakā va'e peiko. Pendekuai ha'vy hendy va'e ra'y kuery rami ete,

⁹ mba'eta hendy va'e guigua ma mborayvu, teko porā ha'e anhetē va'e rupi nhan-dekuua.*

¹⁰ Peikuua pota ha'vy Senhor pembovy'aa rupi pendekuai aguã.

¹¹ Mba'eve perekoye ha'e pytū rupi mba'emo vai apoa kuery reve, mba'eta ovare'ŷ va'e meme. Ha'e rami 'rāgue py peikuua uka nda'evei va'ea.

¹² Mba'eta ha'e kuery nhemi rupi ojapo va'e re nhandeayvu vy voi nhaximba 'rā.

¹³ Mba'eta hendya py mba'emo jaikuua uka ramo ojekuaapa 'rā marā ramigua ete paa. Hendya py ojekuaa va'e ma hexakā va'e meme opyta,

¹⁴ aipoe'ia rami vy: "Reke va'e, emyí ke, epu'ã omano va'ekue mbyte gui, ha'e gui Cristo nemoexakā 'rā."

¹⁵ Ha'e nunga rupi peiko kuaa pota. Pendekuaive eme hi'arandu e'ŷ va'e rami, ha'e rā hi'arandu va'e rami anho.

¹⁶ Peiporu kuaa ke ára nhavõ, mba'eta ara vai meme.

¹⁷ Ha'e nunga rupi pepyta eme hi'arandu e'ŷ va'e, va'eri peikuua pota Senhor oipota va'e re.

¹⁸ Peka'u eme guive vinho py, mba'eta opa marā rei nhanemoingo. Ha'e rami 'rāgue py pendere Nhe'ẽ anho toĩ.*

¹⁹ Ha'e rami vy jomeme pendeayvu salmos peporaei vy. Pendepy'a py Senhor pemboetea rupi peporaei hinos ha'e Nhe'ẽ guigua mboraei.

²⁰ Opa mba'e re Nhanderuete perovy'a riae, Senhor Jesus Cristo rery rupi.*

²¹ Peteĩ-teĩ oipotaa rami peiko Cristo pemboetea rupi.

Omenda va'e kuery reko re ijayvua

²² Ha'e rami vy kunhague ma ome oipotaa rami ta'ikuai, Senhor pe rami ete.

²³ Mba'eta ime kuery ma gua'yxy akā ikuai, igreja kuery akā Cristo oikoa rami avi, heraa jepea guive oiko. Ha'e va'e ma hete.

²⁴ Ha'e gui igreja kuery Cristo oipotaa rami ikuiaia rami avi kunhague voi opa mba'e py ta'ikuai ome kuery oipotaa rami.

²⁵ Peẽ ime kuery voi peayvu ke penda'yxy, Cristo igreja kuery oayvua rami avi, mba'eta igreja kuery re vy guekove ae ome'ẽ raka'e,

²⁶ iky'a e'ŷ va'erā omoingo aguã yy py ojoi vy, ayvu omombe'ua reve,

²⁷ guenonde ae igreja kuery oexa uka aguã hexakāmba va'e, ipere ha'e ixorimba rei e'ŷ va'e, ha'e kuery re ivaikue reia, neĩ ha'e va'e regua oĩ e'ŷ aguã, ha'e rā iky'a e'ŷa anho.

²⁸ Ha'e rami avi ime kuery ma guete ae'i rami toayvu gua'yxy. Gua'yxy oayvua va'e ma ha'e ae ojeayvu.

²⁹ Mba'eta guete ae ndoayvui va'e jipoi. Ha'e rami 'rāgue py nhamongaru ha'e nhapena 'rā nhanderete re. Ha'e rami ae avi Cristo opena igreja re,

* 5:7 2 Coríntios 6.14–7.1

* 5:9 1 João 1.5–10

* 5:18 Gálatas 5.16–25

* 5:20 Colossenses 3.16,17

³⁰ hete regua nhandekuai ramo.

³¹ “Ha'e nunga rupi avakue oeja 'rā nguu ha'e oxy, gua'yxy reve joguerekō aguā, mokoī 'rāgue py pete'i to'o ikuai aguā”, he'iague rami.*

³² Pova'e ma ndoikuua ukai pyre iporā ete va'e, mba'eta Cristo ha'e igreja re xeayvu.

³³ Ha'e rami avi peē kuery voi pete'i-te'i peayvu 'rā penda'yxy peē ae pejeayvua rami, ha'e kunhague voi tomboete ome.*

6

Tuu ha'e ta'y kuery re ijayvua

¹ Peē ta'y ha'e tajy kuery voi Senhor re vy penhe'ẽ rendu 'rā penderu ha'e pendexy, mba'eta ha'e rami vy 'rā ha'evea rami pendekuai,

² “Pemboete 'rā penderu ha'e pendexy”, he'iague rami. Ha'e va'e ojapo uka pyre ma jypy'igua nhanemoingo porā aguā regua ayvu reve ou, po rami:

³ “Kova'e yvy re peiko porā ha'e peikove puku aguā”, he'i va'ekue.*

⁴ Ha'e gui peē tuu kuery ma pembopoxy rei eme penda'y ha'e penderajy kuery. Ha'e rami 'rāgue py Senhor guigua 'arandu rupi 'rā pemo'arandu ha'e pemongeta.*

Escravo ha'e joguerekoa kuery re ijayvua

⁵ Ha'e gui peē escravo kuery ma penhe'ẽ rendu ke pendererekoa ngo'o re ikuai va'e. Pemboetea rupi pejererokyje pendepy'a ha'e javi py, Cristo pemboetea rami avi.

⁶ Nda'evei pendererekoa oexaa py rive pemba'eapo porā aguā, avakue rive pendererovy'a e'ŷ aguā. Ha'e rami 'rāgue py Cristo rembiguai peiko vy pendepy'a py guive pejapo Nhanderuete oipota va'e.

⁷ Penekyre'ŷa py pemba'eapo, Senhor pe rami, avakue pe rive'ŷ.

⁸ Mba'eta jaikuua iporā va'e rupi nhandekuai rire pete'i-te'i rekoria jajopy 'rāa Senhor po gui, escravo ha'e escravo e'ŷ te'i.

⁹ Ha'e gui peē joguerekoa kuery voi, ha'e rami ae perekō porā penembiguai kuery. Pemongyje rei eme, mba'eta peikuua ha'e kuery Senhor ha'e pende-Senor yva re oikoa. Ha'e va'e ma pete'i regua rive joegui oayvuve va'e'ŷ.*

Nhanderuete guigua tembiporu re ijayvua

¹⁰ Ha'e gui ma penembaraete tema Senhor re, ipo'akaa rupi ae.

¹¹ Pendejee pemoī Nhanderuete guigua tembiporu ha'e javi, pendere anha opu'ã rā peĩ atā aguā.*

¹² Mba'eta nhande kuery re avakue e'ŷ opu'ã, ha'e rā yva regua huvixa kuery, ipo'akakueve, ko yvy pytū guy rupigua rerekoa kuery, ha'e nhe'ẽ vai arai guy rupigua.

¹³ Ha'e nunga rupi peraa ke Nhanderuete guigua tembiporu ha'e javi, ara vai ovaẽ rā peĩ atā aguā, ha'e gui opa pendepo'akapa ma rire pejeity uka e'ŷ re pene'aĩ aguā.

¹⁴ Ha'e gui peĩ atā aguā ma ku'akuua rami pemoī 'rā anhetē va'e, ha'e teko porā voi pemoī pexo regua rami.

¹⁵ Pendepy regua rami pemoī penekyre'ŷa, peiko katu aguā ayvu porā Nhanderuete reve pete'i rami nhanemoingoa regua pemombe'u aguā.

¹⁶ Hu'y jokoarā perekō riae ke pejeroviaa, poromboeko vaia hu'y hendy va'e omombo rā pemboguepa aguā.

¹⁷ Ngora ratārā ma peraa peo jepea, ha'e Nhe'ẽ guigua kyxe guive. Ha'e va'e ma Nhanderuete ayvu.

¹⁸ Nhanderuete pe penhembo'e pavē re, Nhe'ẽ re vy pejerure riae. Ha'e rami aguā peiko kuua pota tema, peĩ atā guive iky'a e'ŷ va'e kuery ha'e javi re pejerurea py.

* 5:31 Gênesis 2.24 * 5:33 Colossenses 3.18,19; 1 Pedro 3.1-7 * 6:3Êxodo 20.12, Deuteronômio 5.16 * 6:4

Colossenses 3.20,21 * 6:9 Colossenses 3.22-4.1; 1 Timóteo 6.1,2; Tito 2.9,10; 1 Pedro 2.18-21 * 6:11 2 Coríntios 10.3,4; 1 Tessalonicenses 5.8,9; 1 Pedro 5.8-10

¹⁹ Xere voi ke pejerure, xeayvu ta rã xeayvurã ome'ëa aguã, akyjea py e'ÿ amombe'u aguã ayvu porã ndoikuua ukai pyre.

²⁰ Mba'eta ha'e rami aguã ae aïnhuã py, Jesus rery rupi ayvu mombe'uarã. Tove Cristo re vy akyjea py e'ÿ tamombe'u, amombe'u aguã rami ae rire.

Tíquico omondouka aguã re ijayvuague

²¹ Ha'e gui aikoa ha'e mba'emo ajapo aikovya peikuua aguã ma xerembiajvu irmão Tíquico omombe'upa 'rã pendevy. Ha'e va'e ma Senhor pe omba'eapoa rupi ojeroviapy oiko.*

²² Ha'e rami aguã ae xee ambou aÿ, marã rami pa roikoa peikuua aguã, peẽ voi pendepy'a guaxu aguã.

Ogueroayvu porãague

²³ Irmão kuery, tapendu mby'a porã, mborayvu ha'e pejeroviavea guive, Nhanderuete ha'e Senhor Jesus Cristo guigua meme.

²⁴ Tove nhande-Senhor Jesus Cristo oayvu ete va'e kuery ha'e javi toendu nhanem-boaxyá.

* 6:21 Colossenses 4,7,8

Filipos pygua kuery pe Paulo ombopara va'ekue

Filipos pygua kuery pe Paulo ombopara va'ekue

Filipos tetā re ma Roma pygua huvixave opena raka'e, Macedônia yvy re oĩ, aŷ Grécia re. Ha'e pygua igreja ma Europa pygua jypy'i apóstolo Paulo omboypy va'ekue (Atos 16.12-40).

Filipos tetā gui Paulo oo ma rire ombotya nhuã py. Ha'e gui Filipos pygua kuery nhuã py Paulo oĩa omombe'ua rã oendu vy ixupe guarã ogueru ruka jepi oipytyvõ vy. Ha'e ramo apóstolo Paulo nhuã py oĩ reve ae kova'e kuaxia ombopara raka'e ha'e kuery pe oguerovy'a vy.

Mba'eta nhuã py Paulo oĩ va'eri nda'ikueraí, ový'a tema oikovy, ha'e ijayvu ha'e kuery voi ový'a avi aguã re. Aipoe'i: "Peẽ kuery re xema'endu'a nhavõ arový'a Xeruete. Anhembo'e nhavõ peẽ kuery ha'e javive re ajerure riae avy'a reve" (1.3-4). "Ha'e gui xapy'a rei xeruguy omoëa 'rã Nhanderuete pe mymba ome'ëmby rami, pejerovia peme'ë va'e irûrã. Ha'e rami tei ae ma xee avy'a 'rã, ha'e peẽ kuery ha'e javi reve 'rã arový'a. Ha'e rami rã peẽ voi ke pevy'a, ha'e xererovy'a guive" (2.17-18). "Pevy'a riae ke Senhor re. Peteigüe ju aipoa'e: Pevy'a riae ke", he'i (4.4).

Paulo ijayvu avi ha'e kuery peteĩ rami ikuai aguã. "Peẽ voi ke pendejee pemoï Cristo Jesus py'a re oĩ va'e ramigua, mba'eta ha'e va'e ma Nhanderuete rami ete oiko va'eri nonhea'äi raka'e Nhanderuete rami riae yvate aguã. Ha'e rami 'rãgue py ojegui ha'e ae yvatea oipe'a vy tembiguai rami ju oiko, ava ojeapo vy. Ha'e rami vy ava rami ojekuaa vy onhemo'yvy'iive ete. Ha'e vy onhe'ë rendu kuruxu re eteve voi ojejuka uka peve. Ha'e rami rire Nhanderuete omboyvate ju pavẽ aryve, ha'e heryrã ome'ë tery ikuai va'e gui yvateve va'e, Jesus rery pavẽ omboete vyi guenapy'ã re oĩ aguã, yva re, yvy re ha'e yvy guýry ikuai va'e guive, ha'e gui ha'e javive 'Jesus Cristo ae Senhor oiko' he'i okuapy aguã, Nhanderuete omboetea rupi," he'i (2.5-11).

Oxarura reve ijayvu vy omboypyague

¹ Paulo ha'e Timóteo, Cristo Jesus rembiguai roiko va'e roxarura Filipos tetā py Cristo Jesus re vy iky'a e'ŷ va'e pendekuai va'e ha'e javive pe, joe opena va'e ha'e nhopytyvõa kuery pe guive.*

² Tove peẽ kuery tapendu penemboaxyha'e mby'a porã Nhanderuete, Senhor Jesus Cristo Ru va'e guigua.

Filipos pygua kuery re oguerovy'a ha'e ojerureague

³ Peẽ kuery re xema'endu'a nhavõ arový'a Xeruete.

⁴ Anhembo'e nhavõ peẽ kuery ha'e javive re ajerure riae avy'a reve.

⁵ Xema'endu'a jypy'i guive aŷ peve ayvu porã mombe'ua rupi xereve penhea'ã pekuapya re.

⁶ Mba'eta xee aikuua porã Cristo Jesus oua ára peve peẽ kuery re mba'emo porã moï pypyare omoimba 'rãa.

⁷ Ha'eve peẽ kuery re xema'endu'a riae aguã, mba'eta xepy'a re aendu roayvua. Mba'eta Nhanderuete xemboaxy vy ixupe amba'eapo aguã xemoï rire peẽ kuery xepytyvõ pekuapya nhuã py aĩ rã, ha'e ayvu porã anhetê va'e amombe'ua rupi guive.

⁸ Nhanderuete oikuua peẽ kuery ha'e javive roexaxeá. Ha'e rami aguã ma Cristo Jesus gui ae aendu.

⁹ Po rami ajerure ixupe: Pendere tomoïve heravy mborayvu, mba'emo peikuua porãve ha'e opa mba'e py pene'arandua reve,

¹⁰ iporã va'e anho pendejee guarã peiporavo aguã, iky'a e'ŷ va'e ha'e ojou vaipy e'ŷ pendekuai aguã Cristo ára pyguarã,

* 1:1 Atos 16.12-40

¹¹ Jesus Cristo guigua teko porā anho pexa uka rā Nhanderuete oguerovy'aa ha'e omboetea aguā.

Apóstolo Paulo re mba'emo oiko ramo hetave ayvu porā oendua re ijayvuague

¹² Ha'e gui irmão kuery, aipota peikuaa mba'emo xere oiko rire ayvu porā oenduave ague.

¹³ Mba'eta huvixave pegua jopya kuery oikuapa Cristo káuxa nhuā py aīa, ha'e amboae kuery ha'e javi voi.*

¹⁴ Ha'e ramo irmão kuery voi Senhor káuxa nhuā py aīa heta oikuua vy ipy'a guaxu vy ndokyjevei okuapy Nhanderuete ayvu omombe'u aguā.

¹⁵ Ikuai avi amongue ete'i xere ija'e e'ŷa rupi Cristo regua ayvu omombe'u va'e, xegui onhemboyvatevexe vy rive. Ha'e rā amboae kuery ma anhetē rupi omombe'u.

¹⁶ Ha'e va'e kuery ma porayvua rupi ayvu omombe'u, mba'eta oikuua ayvu porā mombe'uarā xemoīague.

¹⁷ Ha'e rā amboae kuery ma onhemboyvate reixe vy rive omombe'u Cristo regua, anhetē rupi e'ŷ, mba'eta ha'e kuery ojapoxe nhuā py aīa py ajexavaive aguā rami.

¹⁸ Ha'e rami teī xee ma ndaikuua potai. Mba'eta anhetē rupi, ha'e'ŷ vy anhetē rupi e'ŷ teī Cristo omombe'ua ramo avy'a, ha'e avy'a tema 'rā guive.

¹⁹ Mba'eta po rami aikuua porā: Xere pejerure ramo Jesus Cristo Nhe'ē xepytyvō 'rā opa mba'e gui aa jepe aguā.

²⁰ Xee aipota ete va'e, ha'e ajeroviaa ma mba'eve py aximba e'ŷ aguā. Ha'e rami 'rāgue py xepy'a guaxu aguā, aiko jepiaty rami aŷ voi xee aikoa rupi Cristo omboetea aguā, aikove e'ŷ vy amano teī.

²¹ Mba'eta xevy pe ma aikovea Cristo pe aiko aguā, ha'e rā amano aguā ma ajoupave aguā.

²² Ha'e rami teī, xero'o re aikove teri reve amba'eapoa rupi iporā va'e oiko ramo xee ndaiporavo kuaai,

²³ mba'eta mokoī rami aendu. Mba'eta aaxe Cristo reve aiko aguā. Ha'e va'e ma opa mba'e gui ha'eveva va'e.

²⁴ Ha'e rami avi xero'o re ranhe aikove vy 'rāe peē kuery roipytyvōve.

²⁵ Ha'e nunga rupi aikuua porā peē kuery ha'e javi reve apytave ranhe 'rāa, pevy'a ha'e pejeroviave aguā,

²⁶ mba'eta peē kuerya py ju avaē rā xerexa vy perovy'ave 'rā Cristo Jesus.

Cristo reve vy peteī rami nhanhea'ā aguā re ijayvua

²⁷ Opa mba'e gui ha'eveva va'e ma Cristo regua ayvu porā omboetea aguā rami pendekuai aguā. Ha'e rami rā peē kuery roexa vy aa, ha'e'ŷ vy ndaai teī pendekuia omombe'ua rā aendu vy aikuua 'rā peteī Nhe'ē re peī atāa, ha'e peteī'i rami penhea'ā pekuapy ayvu porā rupi jajeroviaa re,

²⁸ mba'eve py nhanderovaigua kuery gui pekyje e'ŷ re. Ha'e kuery ma ha'e rami pendekuiaia oexa vy oikuua okanhy aguā rami ikuiaia, ha'e rā peē kuery ma peikuaa Nhanderuete re vy peo jepe 'rāa.

²⁹ Mba'eta pendevy pe ome'ē Cristo káuxa pendekuai axy aguā, hexe pejerovia aguā anho e'ŷ,

³⁰ mba'eta peē voi penhea'ā pekuapy ymave rupi pexa rā xee anhea'āague rami, ha'e aŷ pendu rā anhea'āa rami avi.*

2

Jajoayvu ha'e joegui nhanhemo'yvyi'ive aguā re ijayvua

¹ Ha'e nunga rupi Cristo re vy penembaraetea pendu vy, penderayvua py pendepy'a guaxu, Nhe'ē reve peteī rami pendekuai, ha'e pendeporayvua rupi penhomboaxya pendu vy,

* 1:13 Atos 28.16,30,31; Efésios 6.19,20

* 1:30 Atos 5.41; 1 Pedro 4.12,13

² ha'e rami vy xembovy'a ke opa mba'e py, peteī rami peikuaa vy, jomeme pejoayvu, peteī rami anho pendepy'a, ha'e pendepy'a py peteī'i ramigua anho pendu vy.*

³ Mba'eve pejapo eme penhemboyvatea rupi, neī pejejou porā reia rupi guive. Ha'e rami 'rāgue py penhemo'yvyī'i vy peteī-teī penhomboyvateve 'rā pendejegui.

⁴ Pemoī peteī-teī peē ae peipotaa rami rive'ŷ pendekuai aguā, ha'e rā amboae kuery oipotaa rami.

Cristo onhemo'yvyī'iague rami avi nhandekuai aguā re ijayvua

⁵ Peē voi pendejee pemoī Cristo Jesus py'a re oī va'e ramigua,
⁶ mba'eta ha'e va'e ma Nhanderuete rami ete oiko va'eri nonhea'āi raka'e Nhanderuete rami riae yvate aguā.

⁷ Ha'e rami 'rāgue py ojegui ha'e ae yvatea oipe'a vy tembiguai rami ju oiko, ava ojeapo vy.* Ha'e rami vy ava rami ojekuaa vy

⁸ onhemo'yvyī'ive ete. Ha'e vy onhe'ē rendu kuruxu re eteve voi ojejuka uka peve.

⁹ Ha'e rami rire Nhanderuete omboyvate ju pavē áryve, ha'e heryrā ome'ē tery ikuai va'e gui yvateve va'e,

¹⁰ Jesus rery pavē omboete vy guenapy'ā re oī aguā, yva re, yvy re ha'e yvy guýry ikuai va'e guive,

¹¹ ha'e gui ha'e javive "Jesus Cristo ae Senhor oiko" he'i okuapy aguā, Nhanderuete omboetaa rupi.*

Jaa jepea jaexa uka aguā re ijayvua

¹² Ha'e ramo xerembiyvu kuery, peē kuery xenhe'ē rendu riae pekuapy xerexaa rupi anho e'ŷ, aŷ peē kuerya py naī jave katuve ma. Ha'e rami vy peo jepea pexa uka-ukave tema pejererokyje ha'e peryryipaa rupi,

¹³ mba'eta Nhanderuete ae pendere ojapo 'rā ha'e oipotaa rami pendekuaise ha'e pendekuai ete aguā rami.

¹⁴ Opa mba'e pejapoa py pendeayvu rei eme, ha'e pejoguero'a rei eme guive,

¹⁵ ojou vaipy e'ŷ ha'e anhetē rupigua pendekuai aguā. Ha'e rami vy heko vai ha'e opa marā rei ikuai va'e mbyte pendekuia rupi pexa uka 'rā Nhanderuete ra'y kuery iky'a e'ŷ va'e peikoa. Mba'eta ha'e kuery mbyte rupi tataendy rami penerexakā peikovy kova'e yvy re,*

¹⁶ tekove regua ayvu re peē atā vy. Ha'e rami rire Cristo oua ára py xee roguerovy'a 'rā nanhea'ā rivei neī namba'eapo rivei rire.

¹⁷ Ha'e gui xapy'a rei xeruguy omoēa 'rā Nhanderuete pe mymba ome'ēmby rami, pejeroviaa peme'ē va'e irūrā. Ha'e rami teī ae ma xee avy'a 'rā, ha'e peē kuery ha'e javi reve 'rā arovya'a.

¹⁸ Ha'e rami rā peē voi ke pevy'a, ha'e xererovy'a guive.

Paulo oirū kuery Timóteo ha'e Epafrodito omombe'uague

¹⁹ Ha'e gui Senhor Jesus re ajerovia peē kuerya py ambou voi aguā Timóteo, pendekuiae aikuua vy xee voi avy'a aguā.

²⁰ Mba'eta xeirū mboae ndarekoi xee rami oendu va'erā anhetē rupi peē kuery re opena aguā.

²¹ Mba'eta amboae kuery ma ha'e kuery ae oipotaa rami ikuaise, Cristo oipotaa rami e'ŷ.

²² Ha'e rā Timóteo ma peē voi peikuaa ae heko porā va'e oikoa, mba'eta ayvu porā mombe'ua rupi xerupive omba'eapo nguu pe rami.

²³ Amondouka voi aguā rami aiko, xere mba'emo oiko va'e aikuua vyve.

²⁴ Senhor re ajerovia aikovy hare'ŷ re xee voi aju aguā.

* 2:2 Romanos 15.5,6; Efésios 4.1-3 * 2:7 João 13.12-17; 2 Coríntios 8.9 * 2:11 Efésios 1.20-23; Apocalipse 5.1-14

* 2:15 Mateus 5.14-16

²⁵ Ha'e rami teĩ ajou porã peẽ kuerya py ambou ranhe aguã Epafroditu. Ha'e va'e ma xe-irmão, xereve ombo'epo ha'e onhea'ã va'ety. Ha'e va'e ma peẽ kuery pemondouka avi raka'e, aiko axy rã xepytyvõ aguã.

²⁶ Ha'e ramo peẽ kuery ha'e javive penderexaxe ete oikovy, ha'e ipy'a eta rei guive, mba'eta imba'eaxy penduague ixupe omombe'ua rã oendu rire.

²⁷ Anhetẽ imba'eaxy vy omano rai'i va'ekue, teĩ Nhanderuete omboaxy. Ha'e anho e'ŷ, xee voi xemboaxy avi, xeporiauve ju e'ŷ aguã.

²⁸ Ha'e nunga rupi ajapurave tema ambou aguã, pexa ju vy perovy'a aguã, ha'e xee voi ndaxeporiau vaipavei aguã.

²⁹ Ha'e ramo Senhor re vy pemovaẽ ke perovy'a ete reve, ha'e pemboete tema ha'e ramigua avakue ha'e javi.

³⁰ Mba'eta Cristo pe ombo'epo rupi omano rai'i va'ekue ndojeayvuveikue py, peẽ kuery naxepytyvõ reguavei rã xepytyvõ aguã.

3

Cristo re javy'a aguã re ijayvua

¹ Ha'e gui xe-irmão kuery, pevy'a tema Senhor re. Ambopara ma voiague ramigua peteĩgue ju ambopara. Ha'e rami teĩ ndajou porã e'ŷi, mba'eta penemombaraeteve 'rã.*

Anhetẽ rupi e'ŷ nhombo'e va'e kuery gui nhanheangu aguã re ijayvua

² Penheangu ke jagua rami heko vai va'e kuery gui, mba'eta ha'eve'ŷa rami ombo'epo, ha'e anhetẽ rupi e'ŷ jopire omboi uka va'e.*

³ Ha'e rã nhande kuery ma opire omboi uka va'e ete nhandekuai, mba'eta Nhe'ẽ rupi nhamboete Nhanderuete, jarovy'a Cristo Jesus, ha'e rã to'o re ma ndajajeroviai va'e.

⁴ Ha'eve 'rãgue teĩ xee to'o re ajerovia aguã. Amongue va'e to'o re ojerovia aguã ha'eve va'e rire xee katuve 'rãgue,

⁵ mba'eta oito ára arekoa py xepire omboia va'ekue, Israel ramymino aiko, Benjamim kuery regua, hebreu kuery gui xetui'i va'ekue hebreu eterã. Fariseu regua aiko vy lei rupi anhea'ã va'ekue.

⁶ Anhea'âve ete vy igreja kuery re apu'ã rei va'ekue. Lei guigua tekó porã rupi aiko ramo xejou porã pavẽ karamboae.

⁷ Ha'e rami teĩ mba'emo xembovarearã areko va'ekue pe ma aŷ Cristo re vy "Ovare'ŷ va'e" ha'e.

⁸ Anhetẽ opa mba'e pe "Ovare'ŷ va'e" ha'e aŷ, mba'eta Cristo Jesus xe-Senhor aikuua aguã ma pavẽ gui iporâve va'e. Hexe vy amokanhy ha'e nungakue ha'e javi, ha'e "Omombo pyrã" ha'e guive, hekivia Cristo aupity aguã,

⁹ ha'e hexe aĩ aguã. Ha'e rami vy tekó porã aupity aguã, xee ae reko porã e'ŷ, neĩ lei guigua e'ŷ guive, ha'e rã Cristo re jajerovia vy jaupity va'erã. Ha'e nunga tekó porã ma jajerovia ramo Nhanderuete ome'ẽ 'rã nhandevy.*

¹⁰ Ha'e rami vy Cristo aikuua ete aguã, ha'e omanoague gui imboete jevyare po'akaa guive. Hexeve aiko axyxe avi, omanoague py guive aikoxe ha'e rami,

¹¹ marã rami vy pa aupity avi aguã amanoague gui anhemboete ju aguã.

Yvate katy nhanerenoĩa re ijayvua

¹² Xee ma "Aupitypa ma" nda'e, neĩ "Opa mba'e py xerekó porã" nda'e guive. Ha'e rami teĩ anhea'âve tema aupity aguã Cristo Jesus ojeupe guarã xejogua vy xerenonderã omoĩ va'ekue.

¹³ Irmão kuery, xee ma "Aupitypa ma" nda'e, teĩ peteĩ'i rupi ma anhea'ã aikovy: Mba'emo xerakykue opyta va'e gui xerexarai vy anhea'ã tema xerenonderã oĩ va'e re anho.*

* 3:1 Filipenses 2:18, 4:4 * 3:2 "Jagua rami heko vai va'e" he'ia kuery ma nhombo'ea rupi "Judeu reko rami pendekuai ramo anho 'rã Nhanderuete penderera jepe" he'i rive va'e. * 3:9 Romanos 3:21-26; Efésios 2:8,9

* 3:13 Hebreus 12:1-3

¹⁴ Anhea'ã tema xerenonderã oĩ va'e re, auptity aguã iporã va'e Nhanderuete ome'ẽ va'erã. Ha'e va'e ajopy aguã ae Cristo Jesus re vy yvate katy xerenoõ.

¹⁵ Jajeroviaa rupi nhanembaraete va'e ma ha'e rami ae 'rã jaikuua. Ha'e gui amboae rami ri peikuua ramo ha'e nunga avi Nhanderuete oikuaa uka 'rã pãvy.

¹⁶ Ha'e rami vy peteõ-teõ jaupity maague rupi tema nhandekuai.

Cristo kuruxu regua ayvu rovaigua kuery re ijayvua

¹⁷ Irmão kuery, peẽ avi ke xee aikoa rami tema pendekuai, ha'e ore rami ikuai va'e reko re guive peikuua porã pota.

¹⁸ Mba'eta nhanembyte rupi heta ikuai Cristo kuruxu rovaigua kuery. Ha'e va'e kuery reko gui mbovykue rei e'õ xee romonheangu, ha'e aõ xerexay reve ju xeayvu ha'e rami.

¹⁹ Ha'e kuery ma okanhy aguã rami ikuai, ombojerovia guyepy ae rive, ha'e oguerovy'a ogueroxi 'rã va'ekue, mba'emo kova'e yvy regua re anho nda'eveive vy.

²⁰ Ha'e rã nhande kuery retã ma yva re oĩ, ha'e nharõ jaikovy nhandereraa jepea Senhor Jesus Cristo ha'e gui ou rã guarã.

²¹ Mba'eta ou vy ombopyaupa 'rã nhanderete ikangy va'e, guete hexakãmba va'e rami avi nhanemboete jevy vy. Opo'akaa rupi 'rã ha'e rami nhanemoingo, opa mba'e re ipo'aka va'e vy.

4

¹ Ha'e nunga rupi irmão kuery xerembiajyu va'e, ha'e rami ae tema penembaraete Senhor re. Pendere xema'endu'a riae, mba'eta arov'y'a va'e ha'e xembovy'aarã peiko.

Evódia ha'e Síntique pe ojerure, ha'e gui javy'a ha'e nhanhembo'e aguã re ijayvua

² Evódia ha'e Síntique pe ajerure Senhor re vy peteõ rami ju oikuaa aguã.

³ Ha'e gui ndee xeirũ anhetẽ va'e pe ma ajerure avi ha'e va'e kunhague reipytyvõ aguã, mba'eta xereve mokoõve onhea'ã va'ekue ayvu porã mombe'ua rupi, Clemente ha'e xepytyvõa kuery mboae reve guive. Ha'e kuery rery oĩ ma kuaxia tekove oguerekva'e kuery rery oĩa re.

⁴ Pev'y'a riae ke Senhor re. Peteõgue ju aipoa'e: Pev'y'a riae ke.

⁵ Pavẽ pe pexa uka ha'eve vai'i peikoa. Senhor mombyry e'õ oĩ.

⁶ Pendep'y'a eta rei eme mba'eve re. Ha'e rami 'rãgue py, opa mba'e py Nhanderuete pe pejerure peikotevẽ va'e re. Penhembo'e ha'e pejerure tema perovy'a reve.

⁷ Ha'e ramo mby'a porã opa mba'e jaikuua va'e gui iporãve va'e rupi Nhanderuete opena 'rã penekuraxõ ha'e pendep'y'a re, Cristo Jesus re vy.

Nhandep'y'a re mba'emo nhamoõ aguã re ijayvua

⁸ Ha'e nunga rupi irmão kuery, pendep'y'a re pemoõ anhetẽ va'e ha'e javi, iporã va'e, ha'evea ramigua, iky'a e'õ va'e regua, nhombovy'a va'e ha'e ojou porãmby ha'e javi. Ha'e gui ojou porãmby, e'õ vy oguerovy'apy mboae oiko rã ha'e nunga re anho peikuua pota.*

⁹ Ha'e gui pejapo mba'emo xegui peikuua, pejopy, pendu ha'e pexa va'ekue ramigua. Ha'e ramo Nhanderuete mby'a porã me'ëa oiko 'rã pendereve.

Filipos pygua kuery re Paulo oguerovy'aague

¹⁰ Arov'y'a ete Senhor, mba'eta peteõgue ju pexa uka xepytyvõxe. Ha'e rami aguã pendu ae ma va'ekue, teõ pexa uka aguã novaõi teri va'ekue.

¹¹ Xevy pe mba'emo oata ramo e'õ ha'e rami xeayvu, mba'eta oiko va'e py rei aikuua avy'a aguã.

¹² Aikuua omo'yvyi'imby ha'e omboetevepy aiko aguã. Opa mba'e py, opa marãgwa oiko va'e py avy'a kuua, arekopaa py ha'e anhembyayia py, ajoupaa py ha'e xeporiaua py.

¹³ Opa mba'e aropo'aka 'rã xemombaraetea re vy.

¹⁴ Ha'e rami avi aiko axy rã peẽ kuery ha'evea rami xemoirũ uka.

* 4:8 Romanos 12,1,2

¹⁵ Filipos pygua kuery, jypy'i ayvu porã pendu jave pendeyvy Macedônia gui aa ramo jipoi raka'e igreja mboae mba'emo ome'ëa py xepytyvõ va'e, peẽ kuery anho'i e'ÿ vy. Ha'e rami peikuua porã.

¹⁶ Mba'eta Tessalônica tetã py aña peve peteigue'i e'ÿ, mokoigue peraa uka raka'e aipota va'e oata e'ÿ aguã.

¹⁷ Ha'e rami vy “Peme'ëve ke xevy” nda'ei, mba'eta xee aipota va'e ma peẽ ae pendejeupe guarã pejoupave aguã.

¹⁸ Mba'eta xee ajopypa ma, arekopa ramo mba'eve ndoatavei, mba'emo peẽ kuerya gui Epafrodito ogueru va'ekue xepo py omboaxapa rire. Ha'e nunga ma heakuã porã va'e rami oï Nhanderuete pe ome'ëmby ojou porã va'erã, imbovy'aarã.

¹⁹ Ha'e nunga rupi Cristo Jesus re vy Xeruete ojou ukapa 'rã peikotevã va'e, guexakãa py oguerekopa ete va'e vy.

²⁰ Nhanderuete tomboetea araka'eve rã peve. Amém.

Oxarura reve opaa py ijayvuague

²¹ Pemombe'u ke axaruraa iky'a e'ÿ va'e kuery Cristo Jesus re ikuai va'e ha'e javi pe. Irmão kuery xereveguia oxarura uka pêvy.

²² Iky'a e'ÿ va'e kuery ha'e javi avi oxarura uka pêvy, César ro pygua kuery voi.

²³ Tove penenhe'ë py tapendu Senhor Jesus Cristo penemboaxyia.

Colossos pygua kuery pe Paulo ombopara va'ekue

Colossos pygua kuery pe Paulo ombopara va'ekue

Colossos tetā ma Ásia yvy 'epy va'e re, aŷ Turquia py oĩ. Ha'e pygua igreja re opena va'ety ma Epafras hery va'e. Ha'e gui Paulo ma nhuã py oĩ reve omombe'ua rã oendu ha'e py ha'eve'ŷa rami nhombo'ea kuery ova ague. Ha'e rami vy kova'e kuaxia ombopara ha'e pygua kuery omombaraete ha'e ombo'e por ave agu .

Jypy ma ijayvu Jesus Cristo pav  gui yvatevea re. Aipoe'i: "Ha'e ma Nhanderuete jaexa e'ŷ va'e rami ete oiko, temimoingo ha'e javi renondegua guive. Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ŷ va'e guive, ha'e gui huixia kuery, yvatekueve, imbaraatkueve ha'e ipo'akakueve va'e te . Opa mba'e Jesus rupi ae omoingo raka'e, ha'e ixupe guar  meme ikuai. Opa mba'e oiko e'ŷ mbove oiko ae ma guive, ha'e hexe vy opa mba'e oimba por . Igreja nhandekuai va'e ma hete, ha'e rã ha'e ma nhaneak . Jypy'igua oiko, omanoague gui ha'e ranhe onhemboete ju va'ekue, pav  gui yvateve va'e oiko agu  opa mba'e py" (1.15-18). "Mba'eta hexe ae oĩ 'arandu ha'e oikuua pyr  ndoikuua ukai va'ekue ha'e javi. Ha'e rami xeayvu avave rei pe penhembotavy uka e'ŷ agu , ijayvu por  merami rive va'e kuery pe" (2.3-4).

Paulo ijayvu avi jajojou vai e'ŷ agu , ha'e rami 'r gue py aipoe'i: "Pendejee pemo  penhombaxy agu , pendoporayvu, penhemo'yvyi'i, ivai rei e'ŷ va'e ha'e ivai rive-rive'ŷ va'e pendekuai agu . Pejogueropo'aka pete -te , ha'e pendeapo vaia r  pejoperdoa guive. Senhor pendeperdoaque rami avi pe  voi pejoperdoa 'r " (3.12b-13).

Oxarura reve ijayvu vy omboypyague

¹ Xee Paulo ma Nhanderuete oipotaa rami vy Jesus Cristo pegua ap stolo aiko. Irm o Tim oteo reve

² roxarura pe  irm o kuery Colossos py pendekuai va'e pe. Iky'a e'ŷ va'e peiko, ha'e Cristo re pejerovia ete va'e. Tove pe  kuery tapendu Nhanderuete penemboaxyha'e mby'a por .

Oguerovy'aague

³ Pe  kuery re ronhembo'e vy roguerovy'a riae Nhanderuete nhande-Senhor Jesus Cristo Ru va'e,

⁴ mba'eta omombe'ua r  roendu Cristo Jesus re pejerovia, ha'e iky'a e'ŷ va'e kuery ha'e javi peayvu pekuanya.

⁵ Ha'e rami pendekuai pear  vy yva re pendevy guar  omo  por  mbyre. Ha'e nunga ma yma voi pendu va'ekue ayvu por  anhet  va'e

⁶ pe  kuerya rupi omombe'ua r . Yvy jave re heta-etave ayvu por  oguerovia vy ojeko rerovaa. Pe  kuery voi ayvu anhet  va'e Nhanderuete nhanemboaxyha regua pendu vy peikuua  ra guive ha'e rami ae avi pendekuai,

⁷ Epafras penembo'e ramo. Ha'e va'e ma orerembiajyu, ore reve Cristo rembiguai avi oiko, ha'e pe  kuery ptyv a rupi Cristo pe omba'eapo va'e ojeroviap.

⁸ Ha'e va'e ma orevy ju omombe'u Nhe'  reve vy mborayvu re pendekuaia.

Colossos pygua kuery re Paulo ojerureague

⁹ Ha'e rami pendekuaia roendu guive ndoropytu'ui pe  kuery re ronhembo'e gu. Rojerure Nhanderuete oipota va'e peikuua por  ete agu , opa mba'e py Nhe'  gu pene'arandu ha'e peikuapa agu  guive.

¹⁰ Ha'e rami vy Senhor pegua ete pendekuai agu , opa mba'e py pembovy'a, joupe pejapo por , ha'e Nhanderuete peikuua por ave peovy agu .

¹¹ Ajerure avi opa mba'e py penemombaraete agu  opo'akaa hexak mba va'e py, opa mba'e py pe  at  ha'e peropo'akapa agu  rami, ha'e gui pevy'a reve

¹² Penderu perovy'a aguā opa mba'e py, mba'eta ha'e ae penemoingo hexakāa py iky'a e'ŷ va'e kuery peguarā peupity avi aguā rami.

Cristo reko ha'e mba'emo ojapo va'e iporā etea re ijayvua

¹³ Mba'eta nhandereraa jepe raka'e pytū po'akaa gui, ha'e Gua'y oayvu va'e po'akaa py ju nhandereru.

¹⁴ Mba'eta hexe vy ae jaupity jaa jepe aguā, jajejavvyague omboguepa ramo.

¹⁵ Ha'e ma Nhanderuete jaexa e'ŷ va'e rami ete oiko, temimoingo ha'e javi renondegua guive.

¹⁶ Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ŷ va'e guive, ha'e gui huvixa kuery, yvatekueve, imbaraetekueve ha'e ipo'akakueve va'e tei. Opa mba'e Jesus rupi ae omoingo raka'e, ha'e ixupe guarā meme ikuai.

¹⁷ Opa mba'e oiko e'ŷ mbove oiko ae ma guive, ha'e hexe vy opa mba'e oimbā porā.*

¹⁸ Igreja nhandekuai va'e ma hete, ha'e rā ha'e ma nhaneakā. Jypy'igua oiko, omanoague gui ha'e ranhe onhemboete ju va'ekue, pavē gui yvateve va'e oiko aguā opa mba'e py.

¹⁹ Mba'eta Nhanderuete oipotaa rami vy ojapo guexegua ha'e javi Cristo re avi oimbā aguā.

²⁰ Ha'e gui kuruxu re huguy omoē uka vy peteī rami ju guexeve nhanemoingo, Cristo rupi opa mba'e ogueru ju aguā ojee, yvy ha'e yva re ikuai va'e ha'e javi.

²¹ Peē kuery voi ojee pendereru, ymave rupi teko vai rupi anho pendekuai vy pendepy'a py hexeveguia e'ŷ, hovaigua pendekuai va'ekue ri.*

²² Ha'e gui aŷ ma pendereru ju ojee, Cristo guete ha'e ngo'o reve omanoa py, guenonde penderexa uka aguā iky'a e'ŷ va'e, jejavya oĩa e'ŷ va'e, ha'e ojou vaipy e'ŷ.

²³ Pejeroviaa re peī atā ri ha'e rami 'rā pendekuai, pendepy'apy guive penembaraete reve, ha'e ayvu porā regua pearōa gui ndapejepe'ai vy. Ha'e va'e ayvu pendu va'ekue ma yva guýry ikuai va'e ha'e javi pe omombe'ua. Xee Paulo voi imombe'uarā xemoia.

Ayvu porā oikuua uka pyre re Paulo ijayvuague

²⁴ Aŷ peē kuery re vy aiko axya rupi ayv'a, mba'eta xero'o re aiko axyve Cristo oiko axyague rami. Hete re vy aiko axy. Ha'e va'e ma igreja.

²⁵ Mba'eta Nhanderuete xemoī karamboae igreja kuery rembiguairā, peē kuerya rupi voi Nhanderuete ayvu amombe'upa aguā.

²⁶ Ha'e va'e ayvu ma ndoikuua ukai va'ekue ymave rupi ikuai va'e pe. Ha'e rā aŷ ma iky'a e'ŷ va'e kuery pe oikuua uka.

²⁷ Mba'eta nhande kuery pe Nhanderuete oipotaa rami vy po rami oikuua uka: peē judeu e'ŷ va'e kuery peguarā voi oguereko iporā ete va'e ndoikuua ukai va'ekue, peē kuery re voi Cristo oĩ aguā.* Ha'e rami rā peē voi pearō pekuapy hexakā ojekuaa rā guarā.

²⁸ Cristo regua ae romombe'u. Romongeta pavē, ha'e 'arandua ha'e javi rupi rombo'e guive, henonde ha'e javive roexa uka aguā Cristo re vy opa mba'e py ojerovia porā va'e.

²⁹ Ha'e rami aguā ae xee amba'eapo, anhea'ā ete aikovy, ipo'akaa xere oĩ va'e xemombaraete rā.

2

Colosso pygua kuery oipytyvõxeia re Paulo ijayvuague

¹ Mba'eta aipota peikuuaa peē kuery re vy anhea'ā ete aikovya, Laodicéia re ikuai va'e ha'e xerexa e'ŷ teri va'e ha'e javi re vy guive.

² Ha'e rami rā pendepy'a py penembaraete ha'e mborayvu re peteī rami pendekuai aguā, peikuuaa porāmba aguā Nhanderuete guigua ndoikuua ukai va'ekue. Ha'e va'e ma Cristo.

³ Mba'eta hexe ae oĩ 'arandu ha'e oikuua pyrā ndoikuua ukai va'ekue ha'e javi.

⁴ Ha'e rami xeayvu avave rei pe penhembotavy uka e'ŷ aguā, ijayvu porā merami rive va'e kuery pe.

* 1:17 João 1.1-5, 10-14; Hebreus 1.1-14

*

1:21 Efésios 2.11-22

*

1:27 Efésios 3.1-6

⁵ Mba'eta aŷ peẽ kuerya py xerete re ndaikoi teĩ xenhe'ẽ re aiko ae peẽ kuery reve. Ha'e rami vy roguerovy'a pendekuai porãa ha'e Cristo re pejerovia etea omombe'ua rã aendu vy.

Ha'e kuery ojeroviaa re imbaraete aguã re Paulo ijayvuague

⁶ Ha'e gui Senhor Jesus Cristo pemova ague rami avi hexe tema pendekuai.

⁷ Hexe vy peĩ atã yvyla hapo porã va'e, ha'e oo omboytã mbyre rami avi. Pejeroviaa re penembaraete penembo'eague rami, ha'e perovy'a riaeve tema Nhanderuete.

Ha'eve' ya rami nhombo'ea, ha'e Cristo reko re ijayvua

⁸ Penheangu ke avave rei pe penhembotavy uka e' y agu  ijayvu kuaa ha'e ijayvu porã meramia py. Ha'e rami ijayvu va'e ma mba'emo ko yvy regua re rive penembo'e, avakue oikuua rami rive, Cristo gui e' y.

⁹ Mba'eta hexe anho o  Nhanderuete py'a re o  va'e ha'e javi, hete re ae.

¹⁰ Ha'e hexe vy pendere voi Nhanderuete omo  ha'e nunga ha'e javi, mba'eta Cristo ma yvatekueve ha'e ipo'akakueve ha'e javi  ryveguia oiko.

¹¹ Hexe vy opire omboi uka va'ekue ramigua avi peiko, te i avakue opo py ojapoa rami e' y. Pendegui omboi pyre ma to'o oipotaa. Ha'e nunga ae Cristo omboi nhandegui.

¹² Mba'eta penhemongaraia py penenhono porãa avi raka'e hexeve. Penhemongaraia rupi penemboete ju avi, mba'eta Cristo omanoague gui Nhanderuete omboete ju va'ekue po'akaa re pe  voi pejerovia.

¹³ Mba'eta pe  kuery voi omanogue pendekuai va'ekue pejejavya rupi, to'o guigua napemboi uka kuaai vy. Ha'e rami te i pendevy pe voi tekove ome'  avi Cristo reve.* Mba'eta jajapo vaiague omboguepa raka'e

¹⁴ ipara japaga agu  o ague ombovaipa vy. Ha'e nunga ma nhanembopagaar  o  va'ekue, ojapo uka pyre nhanderovai o  va'ekue. Ha'e nunga ma oipe'apa raka'e, kuruxu re ombokaravo avi vy.

¹⁵ Ha'e gui oipe'a avi yvatekueve ha'e ipo'aka va'e kuery po'akaa, ha'e pav  pe oikuua uka mba'ever  ndovareia. Kuruxu re o  vy ipo'aka raka'e ha'e kuery ha'e javi re.

Mba'emo nhambetea Cristo '  rami rive oikoa re ijayvua

¹⁶ Ha'e rami rire avave rei toikuua pota rei eme mba'emo pe'u ha'e pey'ua re, ne  ngaru oikoa  ra, jaxy pyau, e' y vy s bado  ra napemboeteia re,

¹⁷ mba'eta ha'e nunga ha'e javi ma ou oiny va'e '  ramigua rive. Ha'e r  ou va'e ete ma Cristo.*

¹⁸ Avave rei pe pejekore uka eme pendevy guar  omo  porã mbyre re, mba'eta on-hemo'yvy i merami rive va'e ikuai, ha'e anjo kuery ombojeroviaa rupi guive. Ha'e kuery ma mba'emo oexa ra'uague gui rive oikuua, ha'e ojee rive ojerovia reve to'o oipotaa rami anho ipy'a va'e.

¹⁹ Ha'e kuery ojepe'a ma igreja kuery Ak  gui. Mba'eta hexe vy tete nhandekuai va'e ha'e javi oiko porã ha'e o mba porã, mba'eta Nhanderuete ae ojapo iku'ea ha'e hexegua ikuai va'e yvateve ovu agu  rami.

Avakue reko rupi rive nhandekuai vy jajejavya gui ndajajejokoi 'r a re ijayvua

²⁰ Cristo reve ko yvy regua 'arandua pe pemano ma avi rire, mba'e re tu ha'y vy ko yvy regua rami teri pendekuai ha'e kuery oipotaa rami?

²¹ Mba'eta po rami ijayvu: "Pejopy eme ha'e nunga", "Pe'u eme ha'e nunga", ha'e "Pepoko eme ha'e nunga re" he'i.

²² Ha'e ramigua ma avakue ojapo uka va'e ha'e nhombo'ea rive. Ha'e ramigua rupi nhandekuia ma opa va'er  meme.*

²³ Ha'e ramigua ojapo uka pyre re ma 'arandua o  merami te i, mba'eta nhandejegui ae nhamboyerovia kuaa agu , nhanhemo'yvy i merami rive, ha'e nhanderete jareko axy agu  re ijayvu. Ha'e rami te i pete i henda py ndovarei to'o oipotaa jajoko agu .

* 2:13 Ef sios 2:1-7 * 2:17 G latas 4:8-11 * 2:22 G latas 3:1-5

Cristo reve hexakāa py jajekuaa avi 'rāa re ijayvua

¹ Ha'e nunga rupi Cristo reve penhemboete ju avi rire penhea'ā yvate, Nhanderuete oiporu kuaa regua re Cristo oguapy oinya py mba'emo oī va'e re.

² Pendepy'a re pemoī yvate guigua, apy yvy regua rive e'ŷ.

³ Mba'eta pemano ma, ha'e ramo penderekove pyau ma Nhanderuetea py oī, Cristo reve ndojekuaai teri va'e.*

⁴ Ha'e gui Cristo nhanderekove reruarā ojekuaa ramo peē voi peī avi 'rā hexeve, hexakāa py.

Cristo reve nhandekuai vy teko vai jaipe'apa aguā re ijayvua

⁵ Ha'e nunga rupi pemomba ke penderekko ko yvy regua oī teri va'e: tavy reia, nhemongy'apa reia, opa marā pendekuaixea, moaruā reia ha'e peipotapa reia. Ha'e nunga ma ta'angaa pembojeroviaa rami.

⁶ Ha'e rami ae [onhe'ē rendu e'ŷ va'e kuery ikuai ramo ha'e kuery áry] ou 'rā Nhanderuete poxya.

⁷ Peē kuery voi ha'e rami pendekuai va'ekue ymave rupi, ha'e kuery reko rupi ae.

⁸ Ha'e rā aŷ ma pendejegui pemboi ke ha'ekue ramigua ha'e javi: pendevaia, pendepoxy reia, pejoapo vai reia, joe pendeayvu reia ha'e ha'eve'ŷ rei va'e rupi pendeayvua.

⁹ Pendeapuve eme joupe, mba'eta penderekko yma guare pemboipa ma,

¹⁰ ha'e teko pyau ju pendejee pemoī rire. Mba'eta teko pyau moingoare ma penembopy- auve avi 'rā heravy opa mba'e oikuua ucaa py, ojee rami ete penemoingo aguā.

¹¹ Ha'e ramia py jipovei grego neī judeu regua, opire omboi uka va'ekue neī opire omboi uka e'ŷ va'e, amboae ramigua neī nhanderegua e'ŷ va'e, escravo neī escravo e'ŷ va'e. Ha'e rā Cristo anho jaikuaa, nhande ha'e javive re oī guive.*

Teko porā rupi nhandekuai aguā re ijayvua

¹² Ha'e nunga rupi iky'a e'ŷ va'e ha'e guembiyurā Nhanderuete pendeporavo rire ke pendejee pemoī penhomboaxy aguā, pendeporayvu, penhemo'yvy'i, ivai rei e'ŷ va'e ha'e ivai rive-rive'ŷ va'e pendekuai aguā.

¹³ Pejogueropo'aka peteī-teī, ha'e pendeapo vaia rā pejoperdoa guive. Senhor pendeperdoaague rami avi peē voi pejoperdoa 'rā.

¹⁴ Ha'e nunga ha'e javi áryve pemoī mborayvu, opa mba'e py nhanemoingo porāarā.

¹⁵ Tove Cristo peteī rami nhanemoingoa tapenderereko pendepy'a py, mba'eta ha'e rami aguā ae penerenoī, peteī'i tete pendekuai aguā. Ha'e Nhanderuete perovy'aa rupi guive pendekuai.

¹⁶ Tove Cristo ayvu peē kuery re toī opa mba'e py penemoingo porāarā. Penhombo'e ha'e penhomongeta 'arandua ha'e javi rupi. Nhanderuete pe peporaei salmos, hinos ha'e Nhe'ē guigua mboraei, pendepy'a py perovy'a reve.

¹⁷ Ha'e gui pendeayvua py, e'ŷ vy mba'emo pejapo py, Senhor Jesus rery rupi meme pejapo, hery rupi Nhanderuete perovy'a reve.*

Oo pygua kuery reko re ijayvua

¹⁸ Ta'yxy kuery, pendekuai peneme oipotaa rupi, mba'eta Senhor re vy ha'e rami aguā ha'eve.

¹⁹ Ime kuery, peayvu pendera'yxy, ha'e perekō eme pendevai rei reve.

²⁰ Ta'y kuery, penhe'ē rendu penderu ha'e pendexy opa mba'e py, mba'eta ha'e rami rā Senhor voi pendererovy'a 'rā.

²¹ Tuu kuery, pembopoxy rei eme pendera'y ha'e penderajy kuery, ha'e kuery ikuerai rei e'ŷ aguā.*

²² Tembiguai kuery, opa mba'e py penhe'ẽ rendu pendererekua ko yvy regua. Ha'e kuery oexaa py anho e'ŷ pemba'eapo porã, avakue pe ojejou porã ukaxe va'e rami rive. Ha'e rami 'rãgue py Senhor renonde pejererokyjea rupi peteĩ rupi anho pendekuai pendepy'a py.

²³ Opa mba'e pejapoa py pendepy'a ha'e javi py pejapo Senhor pe ae, avakue pe'ŷ,

²⁴ mba'eta peikuaa Senhor gui pejopy 'rãa hekivia omoĩ porã va'ekue. Senhor Jesus Cristo pe ae pemba'eapo.

²⁵ Ha'e rã heko vai va'e ma mba'emo vai anho 'rã ojopy, mba'eta Nhanderuete oikuaa potaa py peteĩ regua rive ndoayvuvei joegui.

4

¹ Joguerekua kuery, pepena porã ke penerembiguai kuery re. Ha'evea rami perekua, mba'eta peikuaa pendererekua Senhor avi oikoa yva re.

"Pejerure orere, ha'e 'arandu rupi pendekuai", he'iague

² Peĩ atã tema pejerurea py, peiko kuaa pota ha'e perovy'a reve.

³ Ha'e rami nhavõ orere guive pejerure, peteĩ okẽ Nhanderuete oipe'a aguã, Cristo regua ayvu ndoikuaa ukaai teria rupi romombe'u aguã. Ha'e rami aikoa re ae aĩ nhuã py.

⁴ Pejerure amombe'u porãve aguã re, xevy ojapo ukaague rami ae.

⁵ 'Arandu rupi pendekuai nhande revegua e'ŷ va'e kuerya rupi. Peiporu kuaa ke ára nhavõ.*

⁶ Pendeayvu porã kuaa riae ke, juky py anho he'ẽ porã va'e rami, peteĩ-teĩ pe pembovai kuaa aguã.

Tíquico ha'e Onésimo ombou aguã re ijayvuague

⁷ Ha'e gui xere mba'emo oiko va'ekue ma irmão Tíquico omombe'upa 'rã pêvy. Ha'e va'e ma xerembiayvu ha'e ojeroviapy, xereve Senhor pe omba'eapo va'ety.*

⁸ Pêa py ambou, orere oiko va'ekue omombe'u ramo pendepy'a guaxu aguã.

⁹ Hupive amondouka avi 'rã irmão Onésimo, ojeroviapy ha'e nhanerembiayvu, peẽ kuerya pygua ae. Ha'e va'e kuery ma omombe'upa 'rã oreia py oiko va'ekue.

Opaa py oxaruraague

¹⁰ Peẽ kuery pe oxarura uka va'e ma nhuã py xereve oĩ va'e Aristarco, ha'e Barnabé ryvy Marcos guive. (Ha'e va'e reko ma pêvy omombe'ua ae ma. Peẽ kuerya py ha'e ovaẽ rã ke pemovaẽ.)

¹¹ Jesus Justo 'epy va'e voi oxarura uka pêvy. Ha'e va'e kuery anho ikuai judeu regua xereve Nhanderuete po'akaa amombe'ua rupi omba'eapo va'e, xembopy'a guaxu va'e meme.

¹² Ha'e gui peẽ kuery regua, Cristo Jesus rembiguai Epafras voi oxarura uka avi pêvy. Ha'e va'e ma onhea'ã ete oikovy peẽ kuery re ojerurea py, opa mba'e py pendekuai porã ha'e Nhanderuete oipota va'e peikuaapa porã aguã.

¹³ Ha'e va'e ma peẽ kuery re nda'evei oiko, Laodicéia ha'e Hierápolis pygua kuery re guive.

¹⁴ Peẽ kuery pe oxarura uka avi xerembiayvu poropoanoa Lucas, ha'e gui Demas.

¹⁵ Pexarura ke irmão kuery Laodicéia py ikuai va'e pe, Nifia ha'e hoo py igreja kuery onhemboaty va'e pe guive.

¹⁶ Kova'e kuaxia para ma peẽ kuerya py peroayvu ma rire Laodicéia katy ju pemondouka, ha'e pygua igreja kuery voi ogueroayvu aguã. Ha'e gui kuaxia para Laodicéia pegua voi peẽ kuerya py ju Peru peroayvu aguã.*

¹⁷ Arquipo pe aipopeje: "Enhea'ã tema nerembiaporã Senhor ome'ẽ va'ekue rupi, rejapopa peve."

Oxarura reve ogueroayvu porãague

* 4:5 Efésios 5.15,16; 1 Pedro 3.13-17 * 4:7 Efésios 6.21,22 * 4:16 Colossenses 2.1

Colossenses 4:18

1532

Colossenses 4:18

¹⁸ Xee Paulo xepo py ae ambopara pēvy axaruraa. Penema'endu'a ke nhuā py aī rā xere pejerure aguā.

Tove peẽ kuery tapendu Nhanderuete penemboaxyā.

**Tessalônica pygua kuery pe jypy'i Paulo ombopara
va'ekue**

**Tessalônica pygua kuery pe jypy'i Paulo ombopara
va'ekue**

Tessalônica tetā ma aŷ Grécia yvy re oĩ. Ha'e va'e pygua igreja apóstolo Paulo omboypy va'ekue (Atos 17.1-10). Ha'e pygua kuery Jesus remimbo'e ikuai va'e re amboae kuery opu'ã rei teĩ ojeroviave tema Jesus re.

Ha'e nunga omombe'ua rã Paulo oendu vy kova'e kuaxia ombopara Tessalônica pygua kuery ombopy'a guaxu aguã. Oguerovy'a reve ijayvu ha'e kuery ojeroviaa py oĩ atã riae aguã re, mba'emo oiko teĩ. Aipoe'i: "Pevy'a riae ke. Pejerure riae tema pejepe'a e'ŷ re. Opa mba'e py perovy'a Nhanderuete. Ha'e rami ae oipota pendekuai Cristo Jesus re vy" (5.16-18). Omombe'u porâve guive Jesus remimbo'e kuery omano teĩ onhemboete jevy aguã, Jesus ou jevy javé.

Oxarura reve ijayvu vy omboypyague

¹ Xee Paulo ma Silvano ha'e Timóteo reve roxarura peẽ kuery Tessalônica tetā py Nhanderuete ha'e Senhor Jesus Cristo pegua igreja pendekuai va'e pe. Tove peẽ kuery tapendu penemboaxya ha'e mby'a porã.

Tessalônica pygua igreja kuery re oguerovy'aague

² Peẽ kuery ha'e javive re roguerovy'a riae Nhanderuete, ronhembo'e nhavõ orema'endu'a pendere. Nhanderuete renonde orema'endu'a riae avi

³ pejeroviaa rupi pemba'epoa re, pejoayvua rupi penhea'ãa, ha'e nhande-Senhor Jesus Cristo ou jevy rã guarã pearõ pekuapya py peĩ atãa re.

⁴ Ha'e rami vy irmão kuery Nhanderuete rembiayvu pendekuai va'e, roikuaa pendeporavoague.

⁵ Mba'eta pendea py ayvu porã romombe'u ramo ayvu anho e'ŷ ombou raka'e, ombou avi opo'akaa, Nhe'ẽ Ky'a E'ŷ ha'e anhetẽ va'e peikuua porã aguã. Mba'eta peikuua ma penembyte rupi orekuaiague, roayvua rupi.

⁶ Ha'e rami vy ore orekuai rami avi peẽ voi pendekuai raka'e, Senhor rami ete. Ha'e rami vy ayvu pendu vy pevy'a pekuapya Nhe'ẽ Ky'a E'ŷ gui, opa mba'e py pejexavai teĩ.

⁷ Ha'e rami py ojerovia va'e kuery Macedônia ha'e Acaia pygua ikuai va'e ha'e javi pe pexa uka pekuapya teko porã.

⁸ Ha'e rami rã peẽ kuerya gui Senhor ayvu onhendu opa rupi. Macedônia ha'e Acaia rupi anho e'ŷ, opa rupi oendua Nhanderuete re pejerovia pekuapya. Ha'e rami rire ore romombe'u porâve e'ŷ teĩ ha'eve.

⁹ Mba'eta ha'e kuery ae omombe'u peẽ kuerya py orekuai jave guare. Mba'eta Nhan-deruete re pejeko rerova vy mba'emo ra'angaa pembojeroviaa gui pejepe'apa raka'e, Nhanderuete oikove ha'e anhetẽ va'e pe anho pendekuai aguã,

¹⁰ ha'e pearõ pekuapya aguã ta'y Jesus omanogue mbyte gui omboete va'ekue yva gui ou jevy rã guarã. Ha'e va'e ma nhandereraa jefe 'rã poxya ou oiny va'e gui.

Tessalônica py Paulo kuery ayvu porã omombe'ua rupi ikuai jave guare re ijayvuague

¹ Mba'eta irmão kuery, peikuua porã peẽ kuerya py orekuaiague ndovare e'ŷia.

² Jypy Filipos tetā py ranhe oremoingo axy ha'e oreojai rei teĩ Nhanderuete re rojerovia vy peẽ kuery pe ju romombe'u ayvu porã, orere opu'ã reia teĩ. Ha'e nungakue peẽ kuery peikuuaapa.

³ Mba'eta ore ma ronhombotavya rupi e'ŷ ronhomoneta, orerekoo ky'aa rupi e'ŷ, neĩ rojokore reia rupi e'ŷ guive oreayvu.

- ⁴ Mba'eta Nhanderuete anhetē rupi orekuiaia oikuua vy oremoī ayvu porā mombe'uarā. Ha'e ramo ha'e rami ae oreayvu, avakue rive orejou porā aguā e'ŷ, ha'e rā Nhanderuete nhandepy'a re oī va'e re oikuua pota va'e anho.*
- ⁵ Mba'eta anhetē neī peteīgueve ndoreayvui rojejou porā ukaa rupi rive, neī mba'emo rojopyxeia rupi e'ŷ guive, peē voi peikuaa, Nhanderuete oikuua avi.
- ⁶ Ndorekuai guive avakue orererov'yaa rupi, peē kuery, neī amboae kuery.
- ⁷ Cristo remimbou roiko vy ha'eve 'rāgue teī pēvy ronhemongaru uka aguā. Ha'e rami 'rāgue py penembyte rupi mborayvu rupi orekuai, kunha omemby kuery oayvua rami.
- ⁸ Roayvu ete vy Nhanderuete guigua ayvu porā anho e'ŷ ha'eve pendevy romboaxa aguā, ore ae rekove voi, orerembiajvu ete peiko ramo.
- ⁹ Mba'eta irmão kuery, penema'endu'a romba'eapoa rupi rojexavaiague re. Nhanderuete guigua ayvu porā romombe'ua rupi orekuai jave ara py ha'e pyávy ronhea'ā va'ekue peē kuery pe ronhemongaru uka e'ŷ aguā.
- ¹⁰ Mba'eta peē pejerovia va'e kuerya rupi iky'a e'ŷ va'e orekuai, heko porā va'e ha'e ojou vaipy e'ŷ guive. Peē kuery peikuaa, ha'e Nhanderuete voi.
- ¹¹ Peikuaa avi tuu gua'y kuery omongoeta porā'ia rami avi peē kuery peteī-teī
- ¹² romongoetaague, rombopy'a guaxu ha'e romokyre'ŷague guive, Nhanderuete oipotaa rami pendekuai aguā, opo'akaa ha'e guexakāa pyguarā penerenoī rire.

Tessalônica pygua kuery ojexavai teī ojeroviave temaa re ijayvuague

- ¹³ Amboae nunga re avi roguerovy'a riae Nhanderuete, mba'eta ixuguigua ayvu romombe'u rā pendu vy pejopy raka'e avakue ayvu rami rive'ŷ, ha'e rā Nhanderuete ayvu anhetē va'e rami ae. Ha'e va'e rupi oexa uka opo'akaa pejerovia va'e pendekuiai rupi.*
- ¹⁴ Ha'e rami vy irmão kuery, Cristo Jesus re vy peē voi pendekuai Judéia pygua igreja kuery Nhanderuete pe ikuiaia rami. Mba'eta judeu kuery po py ha'e kuery ikuai axyague rami avi peē voi pendekuai axy raka'e peneretā pygua kuery po py.
- ¹⁵ Judeu kuery ma Senhor Jesus ha'e profeta kuery ojuka rire ore kuery ju orembojexavai rei. Nhanderuete oguerovy'aa rupi e'ŷ ikuai, ha'e avakue pavē re opu'ā rei okuapy guive.
- ¹⁶ Mba'eta amboae regua kuery pe ayvu romombe'u ta ramo ha'e kuery orejoko karamboae, amboae regua oo jepe e'ŷ aguā. Ha'e rami ojejavypave ovy rire ha'e kuery áry poxya ou ae ma.

Tessalônica pygua kuery Paulo oexaxeia re ijayvuague

- ¹⁷ Irmão kuery, ore ma xapy'a rai'i orepe'aa karamboae peē kuerya gui mombyry, ha'e rā orekuraxō py ma peēa gui mombyry e'ŷ orekuai. Ha'e rami vy ronhea'ā ete roexa ju vy roo aguā.*
- ¹⁸ Ha'e nunga rupi peē kuerya py rojuxe jepi teī. Xee Paulo ri jepe, peteīgue'i anho e'ŷ, mokoīgue ma aaxe. Ha'e rami teī Satanás orejoko.
- ¹⁹ Mba'eta mava'e tu roarō ha'e orembovy'a va'e ikuai? Nhande-Senhor Jesus ou rā mava'e kuery tu coroa roguerovy'a va'e 'rā ikuai henonde, peē e'ŷ vy?
- ²⁰ Tá, peē kuery ae rojou porā ha'e roguerovy'a va'e pendekuai.

3

Ha'e kuerya py oirū Timóteo omiou jave guare re Paulo ijayvuague

- ¹ Ha'e nunga rupi peē kuery re nda'eveia ndorogueropo'akavei vy ronhembopy'a karamboae Atenas py ore ae'i ropyta,
- ² ha'e vy penda katy romondouka aguā irmão Timóteo.* Ha'e va'e ma Nhanderuete rembiguai ha'e Cristo regua ayvu porā mombe'ua oiko. Penemombaraete ha'e penem-bopy'a guaxu aguā rombou karamboae pejeroviave aguā,

* 2:4 2 Coríntios 1.12; 4.1,2 * 2:13 Atos 17.1-9 * 2:17 Atos 17.10-13 * 3:2 Atos 17.14,15, 18.5

³ pendekuai axy teĩ mava'eve rei pejep'e a e'ŷ aguã. Mba'eta peẽ voi peikuua jajexavai aguã rami nhandekuaia.

⁴ Mba'eta peẽ kuerya py teri orekuai reve aiporo'e ae ma nhandekuaai axy 'rãa. Ha'e ramo ha'ekue rami ae oiko, peẽ peikuua rami.

⁵ Ha'e nunga rupi xee nda'evevei vy ambou Timóteo pejerovia teri paa aikuaa aguã, mba'eta akyje poromoangecko penemoangeko ramo peãa py romba'eapoague mba'everã ndovarei va'e opyta gui.

⁶ Ha'e gui aŷ ma peẽ kuerya gui Timóteo ou ju vy omombe'u pejerovia riae, pende-porayvu ha'e orere penema'endu'a riae guive. Omombe'u avi orerexaxe pekuapya, ore roexaxeia rami avi.

⁷ Anhetê irmão kuery, peẽ kuery pejerovia riae roikuua vy orepy'a porã ju, opa mba'e py orekuai axy ha'e rojexavai teĩ.

⁸ Aŷ ma Senhor re vy penembaraete riae roendu vy orepy'a porã ju.

⁹ Mba'ixa nda'u ha'eve Nhanderuete roguerovy'a aguã pendere? Mba'eta opa mba'e py peẽ kuery re rovy'a Nhanderuete renonde.

¹⁰ Ara py ha'e pyávy rojerure orepy'a ha'e javi py roexa ju aguã, pejeroviave aguã re norombo'epai teri va'ekue re rombo'eve ju aguã.

Tessalônica pygua kuery re Paulo ojerureaque

¹¹ Ha'e nunga rupi tove Nhanderuete ha'e nhande-Senhor Jesus torembou peẽ kuerya py.

¹² Senhor tojapo avi penembaraeteve ha'e pejoayvuve aguã rami jomeme ha'e pavã reve, peẽ kuery roayvua rami avi.

¹³ Ha'e rami vy pendepy'a py penembaraeteve aguã, Nhanderuete renonde iky'a e'ŷ va'e ha'e ojou vaipy e'ŷ pendekuai aguã, nhande-Senhor Jesus ojeupagua iky'a e'ŷ va'e kuery reve ou rã guarã.

4

Iky'a e'ŷ va'e nhandekuaai aguã re ijayvua

¹ Aŷ ma irmão kuery, Senhor Jesus re vy rojerure ha'e romongeta oreayvua pendu va'ekue rupi pendekuaive tema aguã, Nhanderuete pendererovy'a aguã rami. Pendekuaia rami ae tema pejapove peovy.

² Mba'eta peikuua porã ae ma Senhor Jesus ayvu re rombo'eague.

³ Po rami ae Nhanderuete oipota: iky'a e'ŷ va'e pendekuai, pendetavy rei eme,

⁴ ha'e peteĩ-teĩ perekoo kuaa penderete regua, iky'a e'ŷ va'e ha'e omboetepy pendekuai aguã,

⁵ amboae regua kuery Nhanderuete ndoikuuaii va'e itavy reixeia rupi ikuia rami e'ŷ.

⁶ Ha'e nunga py avave rei petekoavy eme, neĩ pekore eme pende-irmão, mba'eta Senhor nhombopaga 'rã ha'e nunga ha'e javi re. Ha'e nunga re oreayvu ha'e romombe'u porã ae ma.

⁷ Mba'eta Nhanderuete ma nhanhemongy'apa rei aguã e'ŷ nhanerenoĩ, ha'e rã iky'a e'ŷ va'e nhandekuaai aguã.*

⁸ Ha'e nunga rupi ha'e va'e ayvu noenduxei va'e ma avakue ayvu rive'ŷ noenduxei, ha'e rã Nhanderuete pendevy Nhe'ẽ Ky'a E'ŷ ome'ẽ va'ekue ayvu ae.

Irmão kuery jayvu aguã re ijayvua

⁹ Irmão kuery peayvu aguã re ambopara e'ŷ teĩ ha'eve, mba'eta Nhanderuete ae penembo'e peteĩ-teĩ pejoayvu aguã re.

¹⁰ Anhetê peayvu ae ma Macedônia py irmão kuery ikuai va'e ha'e javi. Ha'e rami teĩ irmão kuery, ajerure mborayvu re pendekuaive tema aguã.

¹¹ Penhea'ã ke pendekuai porãa rupi, peikuua pota penderekoo re ae, ha'e pumba'eapo pendepo py, aiporo'eague rami ae.

* 4:7 Romanos 13.11-14; Efésios 5.3-14

¹² Ha'e rami vy 'rā nhanderevegua e'ŷ kuery voi penemboete, ha'e mba'eve ndoatai pēvy.*

Senhor oua ára ixupeguia kuery omano va'ekue onhemboete ju aguã re ijayvua

¹³ Irmão kuery, roipota peikuua avi Cristo pegua oke va'ekue reko, ha'e kuery re pendeporiau riae e'ŷ aguã, amboae kuery mba'eve noarõi va'e rami e'ŷ.

¹⁴ Mba'eta jarovia Jesus omanoague gui onhemboete jevyague. Ha'ekue rami avi ixupeguia kuery oke ma va'ekue voi Nhanderuete ogueru rukapa ju 'rā Jesus pe.

¹⁵ Mba'eta Senhor ayvu rupi romombe'u porâve ju: Senhor ou peve nhande jaikove teri va'e ma nhande ranhe e'ŷ 'rā hexeve nhaï oke va'e kuery gui.

¹⁶ Mba'eta Senhor ijayvu atã reve oguejy 'rā yva gui, anjo yvateve va'e ayvu ha'e Nhanderuete mimby guaxu onhendu reve. Ha'e gui Cristo pegua omano va'ekue ranhe 'rā onhemboete.

¹⁷ Ha'e gui ma nhande jaikove teri va'e ju ha'e kuery reve nhandereraapaa avi 'rā arai rupi, Senhor nhaovaexí aguã yvate. Ha'e rami vy Senhor reve riae 'rā nhandekuai.

¹⁸ Ha'e va'e ayvu py penhombopy'a guaxu ke peteĩ-teĩ.*

5

Senhor ou xapy'a 'rāa re ijayvua

¹ Irmão kuery, ha'e va'e ára ha'e araka'e paa amombe'u porâ ve'ŷ teĩ ha'eve,

² mba'eta peikuua ae Senhor ára ou xapy'a 'rāa, imonda va'e pyávy oua rami.

³ Amboae kuery "Javy'a tema, mba'eve rei ndoikoi 'rā" he'i okuapy jave ou xapy'a 'rā imombaarã, imemby ta va'e haxy oendua rami. Ha'e rami vy ndoo jepei 'rā.*

Nhama'ena aguã re ijayvua

⁴ Ha'e rā irmão kuery, peẽ ma pytū rupi e'ŷ pendekuai, ha'e va'e ára penemondiyiarã e'ŷ ovaẽ aguã imonda va'e rami.

⁵ Nhande ma ára pygua hendy va'e ra'y meme. Pyavygua e'ŷ, pytū guy rupigua e'ŷ nhandekuai.

⁶ Ha'e rami vy nda'evei amboae kuery rami jake aguã. Ha'e rami 'rāgue py nhama'ena tema 'rā jaiko kuaa pota reve.*

⁷ Mba'eta oke va'e kuery ma pyávy 'rā oke, oka'u va'e voi oka'u 'rā okuapy pyávy.

⁸ Ha'e rā nhande ma ara pygua vy jaiko kuaa pota 'rā. Nhandedjee pexo reguarã nhamoï 'rā jajerovia aguã ha'e mborayvu. Ngora ratãrã ma nhamoï 'rā nhandereraa jepea nharõ jaikovya.

⁹ Mba'eta Nhanderuete ipoxy rā guarã e'ŷ nhanemoingo, ha'e rā jaupity aguã nhande-Senor Jesus Cristo nhandereraa jepe aguã.

¹⁰ Mba'eta nhandere omano raka'e, nharõ jaikovy e'ŷ vy jake ma teĩ hexeve nhandekuai aguã.

¹¹ Ha'e nunga rupi penhombopy'a guaxu ha'e penhomombaraete peteĩ-teĩ, pejapoa rami ae.

Mba'exa pa nhandekuai aguã re ijayvua

¹² Aŷ ma irmão kuery, rojerure pemboete aguã penembyte rupi ombo'eapo va'e kuery, Senhor re vy pendererekha'e penemongeta rã.

¹³ Senhor pe ombo'eapo ramo peayvu ha'e pemboyvate guive.* Pendekuai porâ ke jomeme.

¹⁴ Ha'e gui irmão kuery, oreayvu avi po rami: pemongeta ke nhonhe'ẽ rendu e'ŷ va'e, na'ikyre'yi va'e ma pembopy'a porâ, ha'e rā ikangy va'e ma pemombaraete. Pavê reve pendekuai peteĩ rami.

* 4:12 2 Tessalonicenses 3.6-13 * 4:18 Mateus 24.29-31; 1 Coríntios 15.51-58 * 5:3 Mateus 24.36-25.13; 2 Pedro 3.10-13 * 5:6 Lucas 12.35-48 * 5:13 1 Timóteo 5.17-19

¹⁵ Peja eme avave rei ojepy-jepy aguã. Ha'e rami 'rāgue py iporā va'e rupi meme pendekuai jomeme ha'e pavē reve.

¹⁶ Pevy'a riae ke.

¹⁷ Pejerure riae tema pejepe'a e'ŷ re.

¹⁸ Opa mba'e py perovy'a Nhanderuete. Ha'e rami ae oipota pendekuai Cristo Jesus re vy.

¹⁹ Pejoko eme Nhe'ẽ.

²⁰ Pembovare e'ŷ eme profeta kuery ijayvu rā.

²¹ Peikuaa pota opa mba'e re. Pendejee pemoĩ ha'eve va'e,

²² ha'e rā ha'eve'ŷa ramigua ha'e javi gui ma pejepe'a.

Apóstolo ojerureague

²³ Tove Nhanderuete nhanemoingo porāa va'e tapendeky'a'o opa mba'e py. Tove topena penenhe'ẽ, peikovea ha'e penderete re, peteĩ'i rupi iky'a e'ŷ va'e pendekuai aguã nhande-Senhor Jesus Cristo ou jevy rā guarā.

²⁴ Penerenoĩare ma ojeroviapy vy ojapo 'rāe ha'e rami.

Oxarura reve opaa py ogueroayvu porāague

²⁵ Irmão kuery, pejerure ke orere.

²⁶ Pexarura irmão kuery ha'e javi pe iky'a e'ŷ va'e kuery joayvua rami.

²⁷ Senhor rery rupi ajerure kova'e kuaxia irmão kuery ha'e javi pe ogueroayvua aguã.

²⁸ Tove peẽ kuery tapendu nhande-Senhor Jesus Cristo penemboaxya.

**Tessalônica pygua kuery pe mokoīguea Paulo ombopara
va'ekue**

**Tessalônica pygua kuery pe mokoīguea Paulo ombopara
va'ekue**

Kova'e kuaxia mokoīguea ma Tessalônica tetā pygua Jesus remimbo'e kuery pe apóstolo Paulo ombopara va'ekue. Kuaxia jypy ombopara va'ekue ha'e kuery oexa tei ndoikuuai rei teri okuapy Senhor Jesus ou jevy aguā ára. Ha'e kuery va'e regua amongue “Ha'e va'e ára ovaē ma”, he'i, ha'e rā amboae kuery ma “Any va'eri ha'e va'e ára ovaē rai'i ma ramo aŷ gui ma nanhamba'eapovei 'rā” he'i okuapy, ndoikuuai rei vy.

Ha'e nunga rupi kova'e kuaxia ju apóstolo Paulo ombopara omombe'u porāve aguā Senhor ou jevy rā guarā. Aipoe'i: “Avave rei pe penhembotavy uka eme, mba'eta heta ojepe'a ma ramo mae ma 'rā hi'ára ovaē, ha'e ava heko vai ete va'e nhomokanhy ra'y ojekuaa ma ramo” (2.3). Paulo omombaraetea rupi guive ijayvu Jesus re ojeroviave aguā.

Oxarura reve ijayvu vy omboypyague

¹ Xee Paulo ma Silvano ha'e Timóteo reve roxarura Tessalônica py Nhanderuete ha'e Senhor Jesus Cristo pegua igreja kuery pendekuai va'e pe.

² Tove peē kuery tapendu penemboaxyha'e mby'a porā Nhanderuete ha'e Senhor Jesus Cristo guigua.

Tessalônica pygua kuery re oguerovy'aague

³ Irmão kuery, peē kuery re roguerovy'a riae Nhanderuete. Ha'evea rami guive roguerovy'a, mba'eta opa mba'e py pejeroviave, ha'e peteī-tei pejoayvuve peovy.

⁴ Ha'e rami rā Nhanderuete pegua igreja kuery ikuiaia rupi orema'endu'a porā peē kuery re, mba'eta roikuua pejeroviaa py peī atāa, opa mba'e py pendekuai axy ha'e pejexavai tei.

⁵ Ha'e rami pendekuai ramo pavē oikuua Nhanderuete ha'evea rami joguerekao. Ha'e gui pendevy pe Nhanderuete “Xepo'akaa pygurarā roiporavo” he'i 'rā, ikáuxa ae pendekuai axy ramo.

⁶ Mba'eta anhetē ha'evea rami Nhanderuete omoingo axy 'rā penemoingo axyare kuery,

⁷ ha'e rā aŷ pendekuai axy va'e ma penemombytu'u avi 'rā orereve, yva gui Senhor Jesus opo'akaa oexa uka vy ojekuaa jave, ojeupegua anjo kuery reve.

⁸ Ha'e rami vy tata py ombopagapa 'rā Nhanderuete ndoikuaxeai ha'e Senhor Jesus regua ayvu porā rupi nda'ikuaixeai va'ekue.

⁹ Ha'e kuery ikuai axy riae 'rā Senhor renonde ha'e ipo'akaa rexakāa gui mombyry oipe'aague py.

¹⁰ Ha'e va'e ára Jesus ou rā iky'a e'ŷ va'e kueryomboete 'rā, hexe ojerovia va'e ha'e javi 'rā oguerovy'a okuapy, peē kuery voi, mba'eta ayvu porā romombe'u rā perovia avi rire.

¹¹ Ha'e nunga rupi ropytu'u e'ŷ re rojerure pendere, Nhanderuete ojeupe guarā ete penemoingo aguā, penerenoīague rami ae. Tove opo'akaa rupi tomoingo joupe pejapo porāxeia, ha'e pejeroviaa rupi mba'emo pejapoxea ha'e javi guive.

¹² Ha'e rami rā peē kuery pendekuaia re Senhor Jesus Cristo rery omboetea aguā, ha'e hexe penemboetea avi aguā, Nhanderuete ha'e Senhor Jesus Cristo penemboaxyha'e oexa uka rire.

Senhor ou ju aguā, ha'e ava heko vai ete va'e re ijayvua

¹ Ha'e gui irmão kuery, xeayvu ta nhande-Senhor Jesus Cristo ou jevy ramo oĩa py nhano'õmba aguā re. Ha'e rami rā guarā romongeta.

- ² Xapy'a rei amongue ijayvu vy "Senhor ára ovaẽ ma" he'i rã pendu teĩ penhemondyi eme, neĩ pepẽxa rei eme guive, "Nhe'ẽ guigua ayvu aendu" 'ea teĩ, ha'e'ŷ vy "Paulo kuery kuaxia para ombopara vy omombe'u" 'ea rã pendu teĩ ae ma.
- ³ Avave rei pe penhembotavy uka eme, mba'eta heta ojepe'a ma ramo mae 'rã hi'ára ovaẽ, ha'e ava heko vai ete va'e nhomokanhyra'y ojekuaa ma ramo.
- ⁴ Ha'e va'e ma ivai ete reve opu'ã 'rã "Nhanderuete" 'epy va'e ha'e javi rovai, mba'emo ombojeroviapu ikuai va'e re. Ha'e rami vy Nhanderuete ramigua rive onhemoingo vy ixupeguia henda iky'a e'ŷ va'e ropy ae 'rã oguapy.*
- ⁵ Napanema'endu'ai teve pendea py teri aiko vy amombe'u jepiague re?
- ⁶ Ha'e gui aŷ peikuaa avi mba'e pa ijokoarã oĩ, hi'ára py mae ma ojekuaa aguã.

Ava heko vai ete va'e rekorã re ijayvua

- ⁷ Ha'e rami avi aŷ guive voi heko vaia nhemi rupi ojapo oiny mba'emo. Ha'e rami teĩ ndojekuaa porãi teri, ijokoarã oĩ va'e oipe'aa e'ŷa ja.
- ⁸ Ha'e gui mae ma 'rã heko vai ete va'e ojekuaa. Ha'e va'e ma Senhor Jesus ou vy ojuka 'rã ojuru py oipeju vy rive. Opo'akaa oexa ukaa py omokanhy vyvoi 'rã.
- ⁹ Heko vai ete va'e ma Satanás po'akaa rupi ojekuaa vy ojapo 'rã opa marãguia hexa pyrã ha'e nhomondyipaarã, nhombotavyxe vy.
- ¹⁰ Opa marãguia tekó vai py ombotavy 'rã okanhoy vy va'e kuery, ha'e kuery ojee nomoõ rire anhetã va'e oendu pota aguã oo jepe aguã.*
- ¹¹ Ha'e ramo Nhanderuete ombou 'rã imbotavyarã, apu rive oguerovia aguã.
- ¹² Ha'e kuery ha'e javi 'rã ombopaga, anhetã va'e oguerovia 'rãgue py tekó vai anho oguerovy'a rire.

Jarovy'a reve nhanembaraete aguã re ijayvua

- ¹³ Ha'e nunga rupi irmão kuery Senhor rembiayvu pendekuai va'e, ha'evea rami peẽ kuery re roguerovy'a riae Nhanderuete, mba'eta jypy'i guive pendeporavo raka'e Nhe'ẽ pendeky'a'o, ha'e ayvu anhetã va'e re pejerovia ramo peo jepe aguã.
- ¹⁴ Ha'e rami aguã ae ayvu porã romombe'u rã penerenoõ raka'e, nhande-Senhor Jesus Cristo rexakaa peupity aguã.*
- ¹⁵ Ha'e nunga rupi irmão kuery, peĩ atã ha'e pemoõ porã oreayvu py ha'e kuaxia romboparaague py rombo'eague.
- ¹⁶ Ha'e nunga rupi peẽ kuery re rojerure nhande-Senhor Jesus Cristo ha'e Nhanderuete pe, mba'eta nhanderayvu vy nhanemboaxya rupi ome'ẽ mby'a guaxu marã e'ŷ ha'e iporã ete va'e nharõ aguã.
- ¹⁷ Tove tapenembopy'a guaxuve ha'e tapenemombaraeteve, iporã va'e pejapo ha'e iporã va'e re pendeayvua ha'e javi py.

3

Tessalônica pygua kuery Paulo re ojerure aguã re ijayvuague

- ¹ Ha'e gui irmão kuery, pejerure avi orere, Senhor ayvu romombe'u rã oenduave ha'e oguerovy'aave tema aguã, peẽ kuerya rupi oikoa rami avi.
- ² Pejerure roo jepe aguã avakue heko vai ha'e porayvu e'ŷ va'e gui, mba'eta pavẽ e'ŷ ojerovia.
- ³ Ha'e rami teĩ Senhor ma ojeroviapu. Ha'e vy penemombaraete ha'e pendere opena 'rã poromboeko vaia gui.
- ⁴ Ha'e rami avi Senhor re vy ore rojerovia peẽ kuery re, mba'eta roikuua rojapo uka va'ekue pejapopa pekuapya, ha'e pejapo riaeve 'rã guive.
- ⁵ Tove Senhor pendepy'a re topena ixuguigua mborayvu ha'e Cristo re peĩ atãa rupi pendekuai aguã rami.

Ha'eve ramigua jajapo aguã re ijayvua

* 2:4 1 João 2.18,19 * 2:10 Mateus 24.23-25; Apocalipse 13.1-10 * 2:14 Romanos 8.28-30

⁶ Irmão kuery, Senhor Jesus Cristo rery rupi aiporo'e: Penhemoirũve eme irmão ha'eve e'ŷa rami rei, rombo'eague rami e'ŷ ikuai va'e re.

⁷ Mba'eta peẽ ae voi peikuua orekuuaiague rami pendekuai aguã, mba'eta neĩ peteĩ henda py ndoroiko vaikue rei va'ekue peẽ kuerya rupi,

⁸ ndorokaru rivei guive. Ha'e rami 'râgue py romba'eapo rupi ronhea'ã ete va'ekue. Ara py ha'e pyávy romba'eapo va'ekue avave rei pe ronhemongaru uka rive e'ŷ aguã.

⁹ Ha'e rami avi ronhemongaru uka aguã nda'eve e'ŷi teĩ ha'e rami ndoroikoi va'ekue ore rami avi pendekuai aguã.

¹⁰ Mba'eta pendereve teri roiko vy aiporo'eague rami: "Nomba'eapoxei va'e tokaru eme."

¹¹ Mba'eta omombe'ua rã roendu peẽ kuerya rupi amongue ombo'eapo e'ŷ vy ha'eve e'ŷa rami rei ikuiaia. Joeko re rive tema oikuua pota.

¹² Ha'e rami ikuai va'e pe oreayvu, ha'e Senhor Jesus Cristo rery rupi romongeta ikuai porã'ia rupi ombo'eapo vy okaru aguã ha'e kuery ae po py ojou va'ekue re.*

¹³ Ha'e rã peẽ irmão kuery, pejep'e eme iporã va'e pejapoa gui.

¹⁴ Xapy'a rei kova'e kuaxia re oreayvu oĩ va'e amongue noendu potai 'rã. Ha'e ramo peikuua pota porã ke ha'e kuery re. Penhemoirũve eme oxímba aguã.

¹⁵ Ha'e rami teĩ ha'e kuery pe "Xerovaigua" peje eme, ha'e rã irmão pe rami 'rã pendeayvu.*

¹⁶ Tove Senhor nhanemoingo porãa va'e ae tapenemoingo porã opa mba'e py. Senhor toiko peẽ kuery ha'e javi reve.

Oxarura reve opaa py ogueroayvu porãague

¹⁷ Axaruraa ma xee Paulo po py ae ambopara. Guĩ rami ae xekuaa 'rã ambopara va'e nhavõ re. Guĩ rami ae xee ambopara xerery.

¹⁸ Tove peẽ kuery ha'e javi tapendu nhande-Senhor Jesus Cristo penemboaxya.

* 3:12 Efésios 4.28; 1 Tessalonicenses 4.9-12 * 3:15 Mateus 18.15-20

Timóteo pe jypy'i Paulo ombopara va'ekue

Timóteo pe jypy'i Paulo ombopara va'ekue

Timóteo ma apóstolo Paulo irū kunumi va'e raka'e. Paulo oirūrā ogueraa vy jypy ombo'e, ha'e gui Éfeso tetā katy omondouka, igreja ikuai va'e re opena aguā.

Kova'e kuaxia ma Timóteo pe Paulo ombopara mba'eta oendu vy omombe'ua rā Cristo remimbo'e kuery mbyte ha'eve'ŷa rami nhombo'e va'e ikuaria. Ha'e rami rā apóstolo Paulo ombopara ha'evea rami ju ombo'e vy. Aipoe'i: "Mba'eta peteĩ'i oiko Nhanderuete. Ha'e rami ae avi peteĩ'i oiko Nhanderuete reve peteĩ rami nhanemoingoa. Ha'e va'e ma Cristo Jesus ava ojeapo va'ekue. Pavē reraa jepearā ojejuka uka raka'e" (2.5-6a).

Paulo omongoeta igreja re opena va'e kuery. Timóteo pe guive aipoe'i: "Iporā va'e re anho enhea'ã rejeroviaa rupi. Eupity ete tekove marā e'ŷ" (6.12a).

Oxarura reve ijayvu vy omboypyague

¹ Xee Paulo ma Cristo Jesus pegua apóstolo aiko, Nhanderuete nhandereraa jepea ha'e Cristo Jesus nharō jaikovy va'e ojapo ukaague rami vy.

² Ndee Timóteo pe axarura. Rejeroviaa py xera'y ete rami reiko. Tove terendu Nhanderuete ha'e nhande-Senhor Jesus Cristo guigua mborayvu, nemboaxyha'e mby'a porā.*

Éfeso tetā py Timóteo nhombo'e ha'e nhomongoetaa rupi oiko aguā re ijayvuague

³ Macedônia yvy katy aa vy aipoa'e va'ekue ndee Éfeso tetā py ranhe repyta aguā, ha'e rami vy amongue remongoeta aguā, amboae rami rei nhombo'e ve'ŷ aguā,

⁴ ha'e ayvu rive ha'e ymagua kuery rery oĩa ndopa kuaai va'e re oikuua pota ve'ŷ aguā, mba'eta ha'e nunga ojapo 'rā joo rami e'ŷ-e'ŷ oikuua aguā rami, ojeroviaa rupi Nhanderuete pe ikuai 'rāgue py.

⁵ Ha'e rami xeayvu ha'e kuery porayvu re ikuai aguā ipy'a ky'a e'ŷa ha'e hi'arandua rupi anho, ojerovia merami rivea rupi e'ŷ.

⁶ Mba'eta ha'e rami ikuaria gui amongue ojepe'a vy okanhymba ma ovare e'ŷ va'e re rive ijayvua rupi.

⁷ Ha'e kuery ma lei re nhombo'e va'ety ramigua onhemoingo va'eri ha'e kuery ae oayvua oikuua vy e'ŷ, neĩ mba'e nunga re pa nhombo'ea voi, oikuapa merami teĩ.

Lei mba'erā pa oejaague re ijayvua

⁸ Ha'e rami avi lei ma ha'evea rami amongue oiporu ramo ha'evea, jaikuua pavē.

⁹ Mba'eta heko porā va'e peguarā e'ŷ lei oejaaa raka'e, ha'e rā heko vai ha'e nhonhe'ẽ rendu e'ŷ va'e kuery pe, Nhanderuete nomboetei ha'e ojejavypa rei va'e pe, ndojeroviai ha'e iky'a e'ŷ va'eua rupi e'ŷ ikuai va'e pe, nguu ha'e oxy ae ojuka, ha'e amboae kuery voi ojuka va'e pe,

¹⁰ heko ky'a ha'e avakue meme joe opena va'e pe, jogueraa rive va'e pe, ijapu ha'e ijayvuxa va'e pe, ha'e nhombo'e porāa rupi e'ŷ ikuai va'e mboae pe lei oejaaa raka'e.

¹¹ Mba'eta ayvu porā Nhanderuete hexakāmba ha'e ima'endu'a porāmby va'e xevy pe omombe'u uka va'ekue re anho oĩ nhanhombo'e porā aguā.*

Nhanderuete omboaxyague re apóstolo Paulo ijayvuaque

¹² Arovya ete nhande-Senhor Cristo Jesus xemombaraetea va'e, mba'eta ojeroviap aikoa oikuua vy xemoĩ ixupe amba'eapo aguā.

¹³ Xee ma yma hexe xeayvu vai ha'e ajoavyky rei va'ekue xevai vy. Ha'e rami ete teĩ xemboaxy, mba'eta aikuua e'ŷ vy, ajerovia e'ŷ vy ha'e ramigua ajapo.*

* 1:2 Atos 16.1-5; 1 Coríntios 4.17, 16.10,11

* 1:11 Gálatas 3.19-25

* 1:13 Atos 26.9-18

¹⁴ Ha'e gui nhande-Senhor xemboaxy etea oexa uka vy omoī ajerovia aguā, mborayvu Cristo Jesus re oī va'e reve.

¹⁵ Pova'e ayvu ma ogueroviaa ha'e peteī-teī ojee omoīmbaa aguā ha'eve va'e: Cristo Jesus ou vyv re ojejavvy va'e kuery ogueraa jepe aguā. Ha'e gui xee ma pavē gui ajejavvyve va'ekue,

¹⁶ va'eri xemboaxy karamboae po rami aguā, xee ajejavvyve va'ekue aikoa rupi Jesus Cristo oexa uka aguā nhomboaxy etea, amboae kuery xerekoo oendu vy xee rami avi hexe ojerovia vy tekove marā e'ŷ oupity aguā.

¹⁷ Ha'e nunga rupi Huvixave imarā e'ŷ, omano e'ŷ ha'e jaexa e'ŷ va'e, Nhanderuete peteī'i oiko va'e ae tomboetea ha'e toguerovy'aa aŷ ha'e araka'e rā peve. Amém.

Iporā va'e re Timóteo onhea'ã aguā re ijayvuague

¹⁸ Xera'y Timóteo, pova'e ae aeja rejapo aguā, Nhe'ẽ gui nderekorā omombe'ua ague rami vy. Ha'e nunga re nembaraete vy enhea'âve tema iporā va'e re.

¹⁹ Ejepe'a eme rejeroviaa gui, neī ndepy'a ky'a e'ŷa rupi reikoa gui, mba'eta amongue ma ipy'a ky'a e'ŷa rupi ikuiaa gui ojepe'a vy ha'e kuery ae ojeroviaa ombovaipa uka.

²⁰ Ha'e va'e kuery regua ma Himeneu ha'e Alexandre. Ha'e ramo Satanás po py ranhe xee amboaxa uka oguereko axy aguā, ha'e kuery ijayvu vai ve'ŷ aguā.*

2

Pavē re jajerure aguā, ha'e Nhanderuete reve peteī rami nhanemoingoa re ijayvua

¹ Opa mba'e gui aipotave va'e ma peē kuery pejerure aguā Nhanderuete pe. Penhembo'e, pejerure, perovy'a guive pavē re penema'endu'a vy,

² huvixave ha'e joe opena aguā ombopo'aka pyre ha'e javi re guive, ha'eve vai'i reve nhandekuai porā aguā, opa mba'e py Nhanderuete pe nhandekuai ha'e nhanhomboetea rupi.

³ Ha'e rami pejerurea ma Nhanderuete nhandereraa jepea renonde iporā, oguerovy'a 'rā guive.

⁴ Mba'eta oipota anhetē ete va'e pavē oikuua vy oo jepe.

⁵ Mba'eta peteī'i oiko Nhanderuete. Ha'e rami ae avi peteī'i oiko Nhanderuete reve peteī rami nhanemoingoa. Ha'e va'e ma Cristo Jesus ava ojeapo va'ekue.*

⁶ Pavē reraa jepearā ojejuka uka va'ekue. Ha'e va'e ayvu ma ha'evea ára oikuua uka.

⁷ Ha'e rami aguā ae xemoī karamboae ayvu mombe'uarā, apóstolo ha'e amboae regua mbo'earā, anhetē va'e re ha'e kuery ojerovia aguā. Ha'e rami xeayvua ma anhetē, xeapua e'ŷ.

Nhandeatya py marā rami pa nhandekuai aguā re ijayvua

⁸ Ha'e nunga rupi aipota avakue opa rupi ikuai va'e onhembo'e opo iky'a e'ŷ va'e oupi reve. Ivai e'ŷ re, ha'e nda'ija'ei rei e'ŷ re tonhembo'e.

⁹ Kunhague voi ha'e rami ae avi tonhemonde ha'eve va'e py anho. Oikoaty'i rami ae toiko onhemoatyrōa py. Nda'evei opa marā oje'a popē aguā, o'a re ouro ha'e ita hepyve va'e omoī aguā, neī ao hepyve va'e py onhemonde aguā.

¹⁰ Ha'e rami 'rāgue py ojee tomoī joupe ojapo porā aguā, kunhague Nhanderuete pegua reko rami vy.

¹¹ Kunhague ombo'ea rā tokyrirī, opa mba'e py nhomboetea oexa uka aguā.

¹² Kunhague pe xee nanhombo'e ukai, neī ime re nambopo'aka ukai guive. Ha'e rami 'rāgue py tokyrirī toiny.

¹³ Mba'eta Adão ranhe Nhanderuete omoingo rire mae ma Eva ju omoingo raka'e.

¹⁴ Ha'e gui Adão e'ŷ guive onhembotavy uka, ta'yxy ranhe onhembotavy uka vy ojejavvy raka'e.

¹⁵ Ha'e rami teī kunhague omemby oikuavāa py ogueraa jepea nho 'rā, o'arandua rupi ojeroviaa, porayvua ha'e iky'a e'ŷ va'e ikuiaa gui ndojepo'ai vy.

* 1:20 1 Coríntios 5,4,5 * 2:5 João 3,36; 14,6; Atos 4,12; 1 João 5,11,12

3

Igreja re openaa ha'e nhopytyvõa rupi ikuai va'e reko re ijayvua

¹ Pova'e ayvu ma ogueroviaa aguã ha'eve va'e: Igreja kuery re openaa rupi oikoxe va'e ma tembiapo iporã ete va'e ojapoxe.

² Ha'e nunga rupi igreja re opena va'e ma pavẽ ojou porã aguã rami ta'ikuai, peteñ'i kunha re omenda va'e, hi'arandu ha'e ojejoko kuaa va'e, omboetepy, nhomovaõ ha'e nhombo'e kuaa va'e,

³ vinho oy'ua rupi e'õ oiko va'e, ojerovia rei e'õ va'e, ha'e rã ha'eve vai'i, joguero'a rei e'õ va'e ha'e peráta re nda'evei rei e'õ va'e,

⁴ ha'e ngoo pygua kuery re opena porã va'e, gua'y ha'e guajy kuery onhe'õ rendu ha'e omboete porã aguã rami oguerekva'e.

⁵ Mba'eta ngoo pygua kuery re ae nopena kuaai vy mba'exa 'rã tu opena Nhanderuete pegua igreja kuery re?

⁶ Joe opena va'erã ma ojeko me'õ ramo va'e'õ 'rã, ojee rive ojerovia ramo anha opagaa py ombopagaa e'õ aguã.

⁷ Ha'e rami 'rãgue py nhande revegua e'õ kuery voi omboete aguã rami oiko va'e, ojou vaia e'õ ha'e anha pe onhembo'a uka e'õ aguã.*

⁸ Ha'e rami ae avi nhopytyvõa kuery ma omboetea aguã rami 'rã ikuai, peteñ'i rupi ijayvu va'e, vinho oy'ua rupi rei e'õ oiko va'e, peráta re nda'evei rei e'õ va'e,

⁹ ha'e ipy'a ky'a e'õa rupi jajerovia aguã regua oikuua uka pyre re opena va'e.

¹⁰ Nhopytyvõarã reko re jaikuaa pota ranhe 'rã. Ha'e kuery re nda'ijayvu vaiai ramo ma ha'eve 'rã nhopytyvõa ikuai aguã.

¹¹ Ha'e rami ae avi kunhague voi omboetea aguã rami ta'ikuai. Ijayvu vaikue rei e'õ, oiko kuaa va'e, ha'e opa mba'e py ojeroviapy ta'ikuai.

¹² Nhopytyvõa oiko va'erã ma peteñ'i kunha re omenda va'e, ha'e gui gua'y ha'e guajy kuery, ngoo pygua kuery ha'e javi re opena kuaa va'e.

¹³ Mba'eta nhopytyvõ porã va'e ma ha'evea rami nhamboete, ha'e okyjea py e'õ 'rã omombe'u Cristo Jesus re jajerovia aguã.

Nhanderuete pegua igreja reko omombe'u porãveague

¹⁴ Po rami ambopara ndevy, roexa aguã aa voi aguã rami aiko va'eri.

¹⁵ Ha'e rami avi ndaa voi ramo kova'e kuaxia gui reikuua 'rã Nhanderuete ro pygua kuery marã rami pa ikuai aguã. Ha'e va'e oo ma Nhanderuete oikove va'e pegua igreja, anhetê va'e yta ha'e hendarã oĩ va'e.*

¹⁶ Mba'eta anhetê Nhanderuete pe nhandekuai aguã kuaa ukaa ma yvate ete:

Ngo'o re ojekuaa va'ekue ma

Nhe'õ ju oikuua uka heko ky'a e'õa.

Anjo kuery oexa pota,

hexegua ma amboae regua ikuia rupi voi omombe'ua.

Ha'e ramo hexe ojeroviaa yvy re.

Ha'e gui hexakaa py ju heraa.

4

Opaa ára py heta ojepe'a 'rãa re ijayvua

¹ Nhe'õ oikuua uka porã avi opaa ára py nhe'õ nhombotavya ha'e anha nhombo'e rã amongue ojapyxaka vy ojepe'a 'rãa ojeroviaa gui.*

² Nhombo'e vaikue va'e kuery ma heko porã merami rive ha'e ijapu rei va'e, ipy'a ky'aa noenduvei aguã rami ha'e kuery ae ojeapo rire.

* 3:7 Tito 1.5-9 * 3:15 Efésios 2.19-22 * 4:1 Mateus 24.10-13; 2 Timóteo 3.1-5; 2 Pedro 2.1-3; Judas 3-21

³ Ha'e kuery nanhomomenda ukai 'rā, ha'e ndo'u ukai 'rā guive amongue regua tembi'u, jajerovia ha'e anhetē va'e jaikuaa va'e jarovy'a reve ja'u aguā Nhanderuete omoingo va'eri.

⁴ Mba'eta Nhanderuete omoingo va'ekue ma ha'eve va'e meme. Jarovy'a reve jajopy vy ndaja'u e'ŷi 'rā,

⁵ Nhanderuete ayvu ha'e jarovy'aa py nda'iky'avei ramo.

Heko porā ha'e nhombo'e porāa rupi Timóteo onhea'ā aguā re ijayvuague

⁶ Ha'e nunga re irmāo kuery rembo'e vy reiko 'rā Cristo Jesus rembiguai porā, jajerovia aguā regua ayvu re nembaraete ha'e nembo'e porāague rupi reiko vy.

⁷ Ha'e rā ayvu reko rei guaimigue'i hi'arandu e'ŷi va'e omombe'u va'e nunga ma endu rive. Enhea'ā tema Nhanderuete pe ete reiko aguā re.

⁸ Mba'eta jauga kuaa aguā re nhanhembo'ea ma xapy'a'i guarā rive ovare. Ha'e rā Nhanderuete pe jaikoa ma opa mba'e py ovare, mba'eta tekove ome'ē aŷi ha'e araka'e rā peve guarā.

⁹ Pova'e ayvu ma pavē ojerovia ha'e ojee omoī aguā ha'eve va'e.

¹⁰ Ha'e va'e rupi nhanheā'ā 'rā guive opa mba'e py, Nhanderuete oikove va'e pavē reraa jepea va'e re jajerovia rire. Jajerovia va'e katuve ma nhandereraa jepe.

¹¹ Ejapo uka ha'e enhombo'e ke ha'e nunga re.

¹² Nekunumi teri va'eri eiko eme avave rei nembojaru rei aguā rami. Ha'e rami 'rāgue py ndee rami ojerovia va'e kuery ikuai aguā rami eiko, ndeayvu py, nderekō porāa, ndeporayvua, rejeroviaa ha'e nderekō ky'a e'ŷa py guive.*

¹³ Xee aju e'ŷa ja eiko kuaxia reroayvua rupi pavē pe, renhomongetaa ha'e renhombo'ea rupi.

¹⁴ Ejapo e'ŷ eme nerembiaporā ome'ē mbyre. Ha'e rami aguā ae Nhe'ē oikuua uka raka'e, igreja re opena va'e kuery ndeapte re opo omoī jave.

¹⁵ Eikuua pota ke ha'e nunga re, ejapo porā pota guive, pavē oikuua aguā rejapo porāve reovya.

¹⁶ Eikuua pota ke ndee ae reko re, renhombo'ea re guive. Enhea'ā tema ha'e nunga re, mba'eta ha'e rami vy 'rā rejapo ndee ae reo jepe aguā rami, ha'e ndeayvu re ojapyxaka va'e kuery guive.

5

Peteĩ-teĩ regua omonogeta kuaa aguā re ijayvua

¹ Ndeayvu vaipa eme tujakueve pe. Ha'e rami 'rāgue py nderu rami emoneta. Kunumigue pe ma nderyvy pe rami 'rā ndeayvu,

² guaimigue pe ma ndexy pe rami, ha'e kunhataīgue pe nereindy pe rami 'rā ndeayvu, nderekō ky'a e'ŷa rupi.

Imeve'ŷ va'e kuery oipptyvō aguā re ijayvua

³ Eipptyvō uka imeve'ŷ va'e kuery, imeve'ŷ va'e ete ri ikuai ramo.*

⁴ Ha'e rā omembry, e'ŷ vy guemiarirō kuery oguerekō ramo topena pota ngoo pygua re, oxy e'ŷ vy ojaryi openaague rekovia. Mba'eta ha'e rami ikuai ramo Nhanderuete oguerovy'a 'rā.

⁵ Ha'e rā imeve'ŷ ete va'e, ipptyvōarā ndoguerekoi va'e kuery ma Nhanderuete gui anho 'rā oarō oikovy mba'emo. Ara py ha'e pyáv y ojerure ha'e onhembo'ea rupi 'rā ikuai.

⁶ Ha'e rā ndojejoko kuaai va'e ma oikove merami teĩ omanogue ikuai.

⁷ Ha'e rami ae emoneta ha'e kuery, ojou vaipy ikuai e'ŷ aguā.

⁸ Ha'e rā guetarā ha'e ngoo pygua kuery re nopenai va'e ma ojeroviaa rupi ve'ŷ ikuai, ojerovia e'ŷ va'e kuery gui nda'eveive.

⁹ Imeve'ŷ va'e kuery sessenta ma'etŷ ma oguerekō ramo mae ma 'rā remoī uka hery. Peteĩ'i re omenda va'ekue rery anho 'rā remoī uka,

* 4:12 2 Timóteo 1.6-8; Tito 2.1-8

* 5:3 Tiago 1.27

¹⁰ ojapo porāague oikuaa pavē va'e, omemby kuery omongakuaapa ma va'ekue, nhomovaē porā va'ety, ha'e iky'a e'ŷ va'e kuery py ojoi va'ety, iporiaukue'i oipytyvō va'ety, ha'e ojapo porāa rupi onhea'ã va'ekue.

¹¹ Ha'e rā imeve'ŷ va'e ipyaukueve rery ma emoī uka eme. Mba'eta ha'e kuery ma Cristo pe anho ndoikoxevei vy oendu 'rā omenda jevyxea.

¹² Ha'e rami jypy ouraague omboaxa rive vy opaga aguā rami 'rā ikuai.

¹³ Omboypy 'rā guive inhate'ŷ aguā, peteī-teī oo rupi ikuai vy. Inhate'ŷ vy anho e'ŷ, ijayvu katu vai ete 'rā, ha'e joeko re oikuaa pota rei 'rā ha'eve'ŷ va'e re ijayvu vy.

¹⁴ Ha'e nunga rupi aipota ipyaukueve omenda, omemby oguereko, ha'e ngoo re opena porā aguā. Ha'e ramo 'rāe nhanderovaigua ndojoui nhandere ijayvu rei aguā.

¹⁵ Mba'eta amongue ma Satanás re ova vy anhetē ojepe'a ma ojeroviaa gui.

¹⁶ Ha'e gui ojerovia va'e kuery guetarā imeve'ŷ va'e oguereko ri vy toipytyvō. Nda'evei igreja pygua kuery pe oipytyvō uka aguā, igreja kuery ma imeve'ŷ ete va'e anho oipytyvō aguā.

Igreja re opena va'e kuery mba'emo ojapo aguā re ijayvua

¹⁷ Igreja re opena porā va'e kuery ma mba'emo organave teī ha'eve, mba'eta ayvu mombe'ua rupi ha'e nhombo'ea rupi onhea'ã va'e vy.

¹⁸ Mba'eta ipara re oĩa rami: "Vaka mba'emo ra'yī ojykya rupi om̄ba'epo ramo nda'evei ijuru pejokua aguā." Oĩ avi: "Om̄ba'epo va'e ha'eve ojopy aguā om̄ba'epoague repy", he'iague rami.*

¹⁹ Ha'e gui igreja re opena va'e re ayvua ramo ejapyxaka eme, mokoī e'ŷ vy mboapy gui rendu e'ŷ vy.

²⁰ Xapy'a rei ojejavy ramo pavē oendua py 'rā remongeta, amboae kuery voi ojererokyje aguā.

²¹ Nhanderuete, Cristo Jesus ha'e anjo kuery oiporavo va'ekue renonde aipoa'e ndevy: Ha'e va'e ayvu rami eiko rejape'a e'ŷ re. Mba'eve ejapo eme joe gui peteī reayvuvea rupi.

²² Avave apyte re ndepo emoī eme heko re reikuaa pota porā e'ŷ re, amboae kuery ojejavya py renhemongy'a e'ŷ aguā. Eiko kuaa pota ke ndee ae nderekoye ky'a e'ŷ aguā.

²³ Nda'evei yy anho riae rey'u aguā, ey'u avi kyrī'i vinho ndepy'a raxyha ha'e nemba'eaxy rendu jepi vy.

²⁴ Amongue ojejavya oikuaapaa voi 'rā, ombopagaa aguā py ovaē e'ŷ mbove ma voi. Ha'e rā amboae kuery ojejavyague ma raka'eve ramo mae 'rā ojekuaa.

²⁵ Ha'e rami ae avi ha'evea rami nhandekuaia voi ojekuaa voi 'rā. Ha'e rami e'ŷ va'ekue voi ndojekuaa e'ŷ riae 'rā.

6

Escravo ha'e herekoaa kuery reko re ijayvua

¹ Ha'e gui escravo kuery jopo'aka guýry ikuai va'e ma opa mba'e py tomboete guerekoaa, Nhanderuete rery ha'e nhanembo'ea re ijayvu vaia e'ŷ aguā.*

² Ha'e gui herekoaa ma irmão ojerovia avi va'e ramo tomboete e'ŷ eme. Ha'e rami 'rāgue py tomba'epo porāve tema ixupe, mba'eta ojerovia va'e vy hembiayvu oiko, ha'e ixupe om̄ba'epo porā ramo mba'emo ojouve 'rā. Embo'e, ha'e ejapo uka ha'e nunga.

Amboae rami rei nhombo'e ha'e peráta re nda'evei va'e re ijayvua

³ Ha'e gui amongue amboae rami rei 'rā nhombo'e, nhande-Senhor Jesus Cristo regua ayvu porā rami e'ŷ, Nhanderuete pe jaiko aguā regua rami e'ŷ.

⁴ Ha'e va'e kuery ma ojee ae rive ojerovia vy ndoikuuai mba'eve. Ha'e rami vy joo rami e'ŷ-e'ŷ 'rā ijayvuxa rei, ha'e ayvu py rive joguero'a rei 'rā. Ha'e nunga gui oiko 'rā joe ija'e'ŷ va'e, nhomoangeko rei va'e, joe ijayvu rei va'e, oexa'ã vaikue rei va'e,

* 5:18 Deuteronomio 25.4, Atos 14.23; 1 Coríntios 9.7-14; 1 Pedro 5.1-4 * 6:1 Efésios 6.5-9; Colossenses 3.22-24; Tito 2.9,10; 1 Pedro 2.18-21

⁵ ha'e joo rami e'ŷ-e'ŷ ijayvua ndopa kuaai va'e guive. Hi'arandu ve'ŷ ramo ha'e kuery re noïvei anhetẽ va'e, oĩ va'e ma Nhanderuete pe merami rive oikoa rupi mba'emo ojoupave aguã.

⁶ Ha'e rami avi anhetẽ Nhanderuete pe jaiko vy opa mba'e porã 'rã jajou, javy'a 'rã guive.

⁷ Mba'eta mba'eve ndajarui ko yvy re, ha'e apy gui jaa vy mba'eve ndajaraai 'rã guive.

⁸ Ja'u va'erã ha'e nhanhemonde aguã jareko vy ma tajavy'a.

⁹ Ha'e rã opa mba'e ojouxé va'e ma anha omoangeko rã onhembo'a uka 'rã nhuã py. Hi'arandu ve'ŷ vy opa marã oipotaa rupi rive 'rã ikuai, ojexavai 'rã guive. Ha'e rami vy ikuai axy 'rã okanhy peve.

¹⁰ Mba'eta peráta re nda'eveivea gui ma opa marãgua teko vai oiko. Ha'e nunga re anho amongue nda'evei vy ojepe'a ma 'rã ojeroviaa gui, ha'e kuery ae onhemoingo axy uka 'rã guive opa mba'e py.

Timóteo omongetaague

¹¹ Ha'e rã ndee Nhanderuete remimbo'e, eiko eme ha'e rami, enhea'ã teko porã reupity aguã anho, ha'e gui Nhanderuete pe ete reikoa, rejeroviaa, ndeporayvua, opa mba'e reropo'akaa ha'e ndevai e'ŷa guive.

¹² Iporã va'e re anho enhea'ã rejeroviaa rupi. Eupity ete tekove marã e'ŷ, ha'e rami aguã nerenoña, ha'e heta oendua py renhemombe'u porã rire.

¹³ Xee romongeta Nhanderuete opa mba'e moingoare va'e renonde, ha'e Pôncio Pilatos renonde re Cristo Jesus onhemombe'u porã va'ekue renonde guive:

¹⁴ Senhor Jesus Cristo ojekuaa rã guarã enhea'ã ojapo uka pyre iky'a e'ŷ va'e ha'e ojou vaipy e'ŷ oikuua pavã aguã.*

¹⁵ Ha'e va'e ma Nhanderuete Ima'endu'a porãmby pete'i oiko ha'e Ipo'akapa va'e oexa uka 'rã oa'angaague ára py ae. Ha'e ma huvixave ikuai va'e Ruvixave, ha'e senhor ikuai va'e Senhor oiko.

¹⁶ Ha'e anho ma hekove marã e'ŷ va'e oiko. Hexakãa ma avave rei ndoupity kuaai. Oexaa e'ŷ va'e, ha'e oexa pyrã e'ŷ oiko. Tomboetea ha'e ta'ipo'aka riae. Amém.

Oguerekopa rei va'e kuery re ijayvua

¹⁷ Emongogeta oguerekopa rei va'e kuery ojee e'ŷ ojerovia aguã, neĩ mba'emo imarã va'erã re rive'ŷ guive, ha'e rã Nhanderuete re anho, mba'eta ome'ë oikovy nhanembovy'aarã ha'e javi.

¹⁸ Ha'e kuery ma joupe ojapo porãa rupi ta'ikuai, tanhopytyvõ opa mba'e py. Ome'ëxeia'i py tome'ë reta, hakâte'ŷa rupi e'ŷ tomboja'o.

¹⁹ Ha'e rami vy 'rãe mba'emo porã ojeupe guarã omoõ porã uka araka'e rã peve imarã e'ŷ va'erã, ha'e rami vy oupity aguã tekove anhetẽ ete va'e.*

Omongeta reve opaa py ogueroayvu porãague

²⁰ Ha'e gui ndee Timóteo, epena ke ndepo py opena uka pyre re. Ejapyxaka eme ayvu rive iporã e'ŷ va'e re, neĩ "Aikuapa" he'i rive vy joo rami e'ŷ-e'ŷ ijayvua re guive.

²¹ Mba'eta ha'e nunga re amongue ojapyxaka vy ojepe'a ma ojeroviaa gui.

Tove peẽ kuery tapendu penemboaxya.

Timóteo pe mokoīguea Paulo ombopara va'ekue

Timóteo pe mokoīguea Paulo ombopara va'ekue

Kova'e kuaxia mokoīguea ma Timóteo peguarā apóstolo Paulo ogueraa uka va'ekue. Ixupe Paulo aipoe'i Jesus regua omombe'ua rupi okyje e'ŷ aguā, ojepe'a e'ŷ aguā guive.

Paulo guekorā re ae oexa'ã ojukaa voi aguā Jesus re ojeroviaa py. Ha'e rami teĩ ipy'a guaxu reve ojerovia tema. Ha'e vy aipoe'i: "Ovaẽ ma ouvy aa aguā ára. Iporā va'e re xee anheā'ã va'ekue, ajapopa ma xerembiaporā va'ekue, ha'e amombe'u porā jajerovia aguā regua. Aŷ ma heko porā va'e pegua coroa oĩ xevy pe oguerekō katu pyre. Ha'e va'e ma Senhor ha'evea rami oikuua pota va'e opaa ára ome'ẽ 'rā xevy. Xevy pe anho e'ŷ guive, oua ára peve oarō ha'e oayvu okuapy va'e ha'e javi pe 'rā ome'ẽ", he'i (4.6b-8).

Timóteo pe ijayvu omokyre'ŷa rupi, oiko axy teĩ nhombo'ea rupi tema oiko aguā gueko porāa oexa uka reve.

Oxarura reve ijayvu vy omboypyague

¹ Xee Paulo ma Nhanderuete oipotaa rami vy apóstolo-rā Cristo Jesus xemoī va'ekue. Cristo Jesus re tekove oĩ va'e oikuua uka aguā re ijayvuague rami xemoī.

² Timóteo xera'y roayvu ete va'e, taxarura ndevy. Tove terendu Nhanderuete ha'e nhande-Senhor Jesus Cristo guigua mborayvu, nemboaxyha ha'e mby'a porā guive.

Timóteo ojeroviaa re Paulo oguerovy'aague

³ Xeramoī kuery rami avi xee voi ambojerovia Nhanderuete xepy'a ky'a e'ŷa rupi, arov'y'a guive, mba'eta ara py ha'e pyávy anhembo'e vy xema'endu'a riae ndere.

⁴ Nderexaya re xema'endu'a vy roexaxe ete ju, opa mba'e py avy'a aguā.

⁵ Xema'endu'a avi rejerovia etea re, mba'eta ndejaryi Lóide ranhe ha'e ramigua oĩ, ha'e gui ndexy Eunice ju. Ha'ekue rami avi xee aikuua ndere voi oĩa.*

Nhanhea'ã, nhanembaraete ha'e jajerovia ete aguā re ijayvua

⁶ Ha'e nunga rupi romongeta nerembiaporā ome'ẽ mbyre rupi renhea'ave ju aguā re. Ha'e va'e ma ndeapte re xepo amoī jave Nhanderuete ome'ẽ va'ekue.

⁷ Mba'eta nhanemongygearā e'ŷ nhandere Nhanderuete omoī Onhe'ẽ, ha'e rā nhanembaraete, nhandeporayvu ha'e jajejokoa rupi nhandekuai aguā.*

⁸ Ha'e nunga rupi exī eme Senhor regua remombe'u aguā, ikáuxa nhuā py xee aĩ teĩ. Ha'e rami 'rāgue py Nhanderuete po'akaa rupi enhemoingo axy uka avi xereve ayvu porā remombe'ua py.

⁹ Mba'eta nhandereraa jepe vy iky'a e'ŷ va'e ojeupe guarā nhanerenoī raka'e. Nhande ae nhanhea'ãa re e'ŷ guive. Ha'e rami 'rāgue py ha'e ae oipotaa rami vy nhanemboaxy raka'e ára ijypy e'ŷ mbove voi, ha'e onhembopy'aague rami vy nhanemoī Cristo Jesus re.

¹⁰ Ha'e gui aŷ mae ma oikuua uka nhanemboaxy, Cristo Jesus Nhandereraa jepearā ojekuaa py. Mba'eta ha'e va'e ma manoa ombovaipa vy tekove marā e'ŷ oikuua uka ayvu porā rupi.

¹¹ Ha'e va'e amombe'u aikovy aguā xemoī apóstolo ha'e nhombo'earā.

¹² Ha'e nunga rupi ae nami aiko axy. Ha'e rami teĩ xee naxī, mba'eta aikuua mava'e re pa ajeroviaa, aikuua porā guive ipo'akapa va'e vy ipo py xerekove amboaxa va'ekue re opena 'rāa, opaa ára peve guarā.

¹³ Enhombo'e tema ayvu amombe'u rā rendu va'ekue rupi, exa uka guive rejeroviaa ha'e mborayvu Cristo Jesus re oĩ va'e.

¹⁴ Nhe'ẽ Ky'a E'ŷ nhandere oĩ va'e po'akaa rupi epena tema iporā va'e ndepo py opena uka pyre re.

* 1:5 Atos 16.1,2 * 1:7 1 Timóteo 4.12-16

Apóstolo Paulo nhuã py oĩa, ha'e irũ kuery ikuiaia re ijayvuague

¹⁵ Xeirũ kuery Ásia pygua ojepe'apa xegui, ndee reikuaa ma. Ha'e va'e kuery regua ma Fígelo ha'e Hermógenes.*

¹⁶ Ha'e rã Onesiforo ha'e hoo pygua kuery ma Senhor tomboaxy, mba'eta mboapykue rei e'ŷ xembopy'a guaxu, ha'e nhuã py aĩa oendu teĩ peteĩgueve ma naxereroxí.

¹⁷ Ha'e rami 'rãgue py Roma tetã py ovaẽ vy xereka raka'e xejou peve.

¹⁸ Ha'e ramo tove opaa ára py Senhor tomboaxy. Xegui ndee reikuaa porãve ha'e kuery xepytyvõ jepiague Éfeso tetã py.

2

Cristo re jajeroviaa rupi vy nhanhemoingo axy uka aguã re ijayvua

¹ Ha'e gui ndee xera'y, nembaraeteve tema Nhanderuete nemboaxy Cristo Jesus re oĩ va'e re.

² Heta oendua py xee anhombo'e rã renduague rami avi ndee ju embo'e ojeroviapy kuery, amboae kuery mbo'earã.

³ Cristo Jesus pegua xondaro ojeroviapy va'e reiko vy enhemoingo axy uka avi ke xereve.

⁴ Ha'e gui peteĩve xondaro ndoikoi 'rã amboae nunga re openaa rupi, nguvixa hery moĩare ombovy'a aguã.

⁵ Ha'e rami ae avi ouga va'e kuery voi ha'evea rami ouga e'ŷ rã peteĩve ndoguerovy'aai 'rã.

⁶ Oma'etŷa rupi onhea'ã va'ekue voi ha'eve ha'e ranhe ijaju va'e ho'u aguã.

⁷ Eikuua pota ke xeayvua re, mba'eta Senhor oikuua uka porãmba 'rã ndevy.

⁸ Nema'endu'a tema Jesus Cristo rekukue re, mba'eta Davi ramymino oiko, ha'e omanoague gui onhemboete ju raka'e, ayvu porã amombe'u aikovya rami vy.

⁹ Ha'e va'e káuxa ae xemoingo axya nhuã py heko vai va'e rami. Ha'e rã Nhanderuete ayvu ma ndojoko kuaai.

¹⁰ Ha'e nunga rupi opa marãguia aropo'aka oiporavo pyre kuery re vy, ha'e kuery voi oupity aguã Cristo Jesus nhandererera jepea ha'e hexakãa imarã e'ŷ va'e.

¹¹ Pova'e ayvu ma jarovia ete va'erã:

Hexeve nhamano rire hexeve avi 'rã jaikove ju.

¹² Mba'emo jaropo'akapa rire

hexeve avi 'rã nhaĩ huvixarã.

Ha'e rã ixupegua rami e'ŷ ri nhanhemombe'u rire

ha'e ju 'rã nanhanemombe'ui.*

¹³ Ojeroviapy e'ŷ jaiko ramo

ha'e ma ojeroviapy ae 'rã oiko,

mba'eta ndaexarai 'rã ojegui ae.

Amboae rami rei nhombo'e ha'e ojerovia merami rive va'e omongeta aguã re ijayvuague

¹⁴ Enhomoma'endu'a ke ha'e nunga re. Nhanderuete renonde ke ndeayvu pavẽ pe, ha'e kuery joguero'a rei e'ŷ aguã ayvu mba'everã ovare'ŷ va'e py, mba'eta ha'e nunga ma opa marã 'rã omoingo hendua kuery.

¹⁵ Enhea'ã tema reximba rei e'ŷ re Nhanderuete pe rejexa uka aguã ombo'eapo va'e ojou porã va'erã, ayvu anhetê ete va'e ha'evea rami remombe'u rire.

¹⁶ Ha'e rã ayvuxe iporã e'ŷ va'e ma endu rive, mba'eta ha'e rami ijayvu va'e heko vaive 'rã oje'oivy.

¹⁷ Ha'e kuery ijayvua ma nhomokanhy tema 'rã heravy, mba'eaxy vaikue nhandero'o omou'ũ va'e rami avi. Ha'e va'e kuery regua ma Himeneu ha'e Fileto.

¹⁸ Ha'e va'e kuery ojepe'a ma anhetê va'e gui, mba'eta nhombo'e teĩ nanhanhemboete jeyvei 'rãa rami. Ha'e rami vy joapo ndojeroviavei aguã rami.

* 1:15 2 Timóteo 4.16-18 * 2:12 Mateus 10.32,33

¹⁹ Ha'e rami teĩ oo ytarã Nhanderuete omoĩ va'ekue ma oĩ atã. Ha'e va'e re ma po rami oĩ ikuua ukaarã: "Senhor oikuua ae ojeupequa kuery" he'ia va'e. Ha'e gui amboae ju "Senhor rery rupi ikuai va'e tojep'e a teko vai gui", he'i avi.

²⁰ Ha'e rami avi oo tuvixakueve ikuai va'e py oĩ 'rã mba'emo ryru ouro ha'e prata guigua anho e'ŷ, oĩ avi 'rã yvyra ha'e yapo guigua. Iporägueve ma mba'emo porã ryrurã oĩ, ha'e rã amboae ma oiporu rive pyrã oĩ.

²¹ Ha'e rami ae avi nhande voi opa marã rei nhandekuaiague gui jajeky'a'o vy mba'emo porã ryrurã rami 'rã jaiko, iky'a e'ŷ va'erã omboaxa pyre ija oiporu va'erã rami, iporã va'e ha'e javi jajapo aguã rami nhandeapo rire.

²² Ha'e nunga rupi eiko eme kunumigue opa marã ikuaxea rami. Teko porã rupi enhea'ã, rejeroviaa, ndeporayvu, ha'e peteĩ rami pendekuaia rupi, ipy'a ky'a e'ŷ re Senhor pe ojapukai va'e kuery reve.

²³ Endu rive amongue ijayvux rã ovare'ŷ va'e re hi'arandu e'ŷa rupi, mba'eta ha'e nunga gui joguero'apa rei 'rã, reikuua ma avi.

²⁴ Mba'eta Senhor rembiguai kuery ma nda'evei joguero'a rei aguã. Ha'e rami 'rãgue py ijayvu porã'i 'rã pavẽ reve, ha'e ivai rei e'ŷ re nhombo'e kuaa 'rã guive.

²⁵ Ha'e kuery re amongue opu'ã rei ramo omongoeta porã'i 'rã, mba'eta xapy'a rei ha'e kuery pe voi Nhanderuete ome'ẽ 'rã ojeko rerova vy anhetẽ va'e oikuua nho aguã,

²⁶ ha'e rami vy hi'arandu ju vy anha pe onhembo'a ukaague gui oo jepe aguã, ixupe ojererekko uka rire teĩ oipotaa rami ikuai aguã.*

3

Opaa ára opa marã rei ikuai 'rãa re ijayvua

¹ Eikuua pota ke pova'e re: Opaa ára py ou 'rã ikuai axya ete aguã.*

² Mba'eta avakue ikuai va'e ojejou porã rei 'rã, peráta re anho 'rã nda'eveive, ojee rive 'rã ojerovia, onhemboyvate rei 'rã, ijayvu vaikue-ikue 'rã, nguu kuery nonhe'ẽ renduvei 'rã, ndajoguerovy'axevei 'rã, Nhanderuete nomboetevei 'rã,

³ nda'iporayvujei 'rã, nanhomboaxy kuaavei 'rã, joe ijayvu rei 'rã, ndojejoko kuaavei 'rã, ojerovia rei 'rã, iporã va'e rovai 'rã ikuai,

⁴ nhombo'a uka rive 'rã, o'arandua rupi e'ŷ 'rã ikuai, onhembotuvixa rei 'rã, ha'e kuery ae oipotaa rami 'rã ikuaxe, Nhanderuete pe ikuai 'rãgue py,

⁵ Nhanderuete pe merami ikuai va'eri ixupe "Ipo'aka va'e'ŷ" he'i rive 'rã. Ejepe'a ke ha'e kuery gui voi.

⁶ Ha'e kuery va'e regua ma joo rupi ovaẽ vy ombotavy 'rã kunhague ikangykuve ojejavypa va'e, opa marã rei oikoxea rami rive ikuai va'e.

⁷ Ha'e kuery ma mba'emo re onhembo'e uka riae teĩ ndouesityi 'rã anhetẽ va'e oikuua ete aguã.

⁸ Moisés re Janes ha'e Jambres opu'ã reiague rami avi ha'e kuery voi anhetẽ va'e re opu'ã rei teĩ. Ha'e kuery opa marã rei nai'arandui, ha'e ndojeroviavei vy ojou vai pyrã ikuai.

⁹ Ha'e rami teĩ ha'e kuery nda'ikuai riae 'rã ha'e rami, mba'eta pavẽ oikuua 'rã hi'arandu e'ŷa, Moisés rovaigua kuery re oikoague rami avi.

Timóteo anhetẽ va'e re oĩ atã aguã re Paulo ijayvuaque

¹⁰ Ha'e rã ndee ma reikuua ae ma anhombo'e aikovya, xereko, anhembopy'aa, ajeroviaa, mba'emo arop'o'akapaa, xeporayvua, aĩ atãa,

¹¹ xemoingo axya ha'e ajexavaia guive, mba'eta ha'e ramigua ma Antioquia, Icônio ha'e Listra tetã py oiko xere. Opa marãguia teko axy arop'o'aka va'ekue. Ha'e rami teĩ ha'e nunga ha'e javi gui Senhor xereraa jepe.*

¹² Ha'e gui Cristo Jesus pe oikoxe va'e ha'e javi 'rã omoingo axya rei.

* 2:26 1 Pedro 3.14-16 * 3:1 Mateus 24.9-13; 1 Timóteo 4.1-5; 2 Pedro 2.1-3; Judas 3-21 * 3:11 Atos 13.14-14.22

¹³ Ha'e rā heko vai ha'e heko porā merami rive va'e ma heko vaive 'rā oje'oivy, nhombotavy ha'e onhembotavy ucaa rupi anho.

Nhanderuete ayvu anhetē ete ha'e ha'evea re ijayvua

¹⁴ Ha'e rā ndee ma eī atā tema mba'emo reikuua ha'e rerovia va'e re. Nema'endu'a ke ha'e nunga re mava'e pa nembo'eague re.

¹⁵ Mba'eta nekyrī reve reikuua ae ma ipara iky'a e'ŷ va'e. Ha'e va'e rupi vy reupity ne'arandurā Cristo Jesus re rejerovia vy reo jepe aguā.

¹⁶ Ha'e va'e ipara va'e ma Nhanderuete guigua meme, ha'e rami vy ha'eve nhanhombo'e aguā, nhanhomongeta, nhanhomo'arandu, ha'e teko porā rupi nhanhomoingo aguā,

¹⁷ Nhanderuete remimbo'e kuery opa mba'e py hi'arandu vy iporā va'e ha'e javi ojapo kuaa aguā.*

4

Ayvu porā nhamombe'ua rupi nhanhea'ā aguā re ijayvua

¹ Nhanderuete ha'e Cristo Jesus renonde xee romongeta. Ha'e va'e ma ojekuaa ju vy oikuuaa pota 'rā oikove va'e ha'e omano va'ekue ikuaiague re.

² Emombe'u tema ayvu porā. Ha'e va'e rupi enhea'ā katu ha'eve jave, e'ŷ vy haxy tē. Joupe ndeayvu, enhomo'arandu ha'e enhomongeta ndevai rei e'ŷ re renhombo'ea ha'e javi py.*

³ Mba'eta ovaē 'rā ha'evea rami nhanhombo'e tē ndojapyxakaavei aguā ára. Ha'e rami 'rāgue py ojou 'rā ha'e kuery ae oipotaa rami ombo'e va'era, oapyxa remo rive oikaraí va'e rami.

⁴ Ha'e rami vy noenduxevei 'rā anhetē va'e, ayvu rive re anho ojapyxakave vy.

⁵ Ha'e rā ndee ma eiko kuaa pota opa mba'e py. Nemoingo axya rā eropo'aka, ayvu porā remombe'ua rupi tema eiko, ejapopa ete nerembiaporā va'e.

Apóstolo Paulo omano taa re ijayvuague

⁶ Ha'e gui xee ma xeruguy omoēa ta ma mymba ome'ẽmby rami. Ovaē ma ouvy aa aguā ára.

⁷ Iporā va'e re xee anhea'ā va'ekue, ajapopa ma xerembiaporā va'ekue, ha'e amombe'u porā jajerovia aguā regua.*

⁸ Aŷ ma heko porā va'e pegua coroa oĩ xevy pe oguereko katu pyre. Ha'e va'e ma Senhor ha'evea rami oikuua pota va'e opaa ára ome'ẽ 'rā xevy. Xevy pe anho e'ŷ guive, oua ára peve oarō ha'e oayvu okuapy va'e ha'e javi pe 'rā ome'ẽ.*

Avakue apóstolo oejapaague, ha'e rā Nhanderuete ndoejaia re ijayvuague

⁹ Eju voi pota ke xea py.

¹⁰ Mba'eta Demas ma aŷ mba'emo oĩ va'e re nda'eveive vy xereja. Tessalônica tetā katy ojepe'a ovy. Crescente ma Galácia katy, ha'e rā Tito ma Dalmácia katy oo.

¹¹ Lucas anho oiko teri xereve. Ejou ke Marcos, ha'e vy eru, mba'eta ha'e ma xepytyvõ 'rā amba'eapoa rupi.

¹² Ha'e gui Tíquico ma Éfeso tetā katy amondouka va'ekue.

¹³ Reju vy ke eru avi Trôade py capa aeja va'ekue, Carpo ro py. Eru avi kuaxia para, aiapotave va'e ma ipire guigua.

¹⁴ Ferro re omba'eapo va'ety Alexandre ma ojapo vai ete xevy. Ha'e ramo Senhor ombopaga 'rā ojapoague re.

¹⁵ Ndee voi enheangu avi ixugui, mba'eta oreayvu rā orere opu'ā rei va'ekue.

¹⁶ Jypy'i xemboayvua jave avave rei naxepytyvõai. Ha'e rami 'rāgue py pavẽ rei xereja karamboae. Ha'e ramiague re tombopagaa eme.

* 3:17 Romanos 15:4; 2 Pedro 1.20,21 * 4:2 Colossenses 4.5,6 * 4:7 Atos 20.17-24 * 4:8 1 Coríntios 9.25;
Tiago 1.12; 1 Pedro 5.4; Apocalipse 2.10

¹⁷ Ha'e rã Senhor ma xereve oiko vy xemombaraete, ayvu amombe'uve ju rã amboae regua kuery oendupa aguã. Ha'e rami aguã xereraa jepe karamboae guary juru gui.

¹⁸ Ha'e rami ae avi Senhor xereraa jepe 'rã xevy ojapo vaixe va'e ha'e javi gui, ha'e opo'akaa py xereraa jepe 'rã yva re. Ixupe toporaeia aÿ ha'e araka'e rã peve. Amém.

Oxarura reve opaa py ogueroayvu porãague

¹⁹ Emombe'u ke xema'endu'aa Prisca ha'e Áqüila pe, Onesíforo ro pygua kuery pe guive.

²⁰ Erasto ma Corinto tetã py optya. Ha'e rã Trófimo ma Mileto py aeja karamboae imba'eaxy rã.

²¹ Eju voi ke yro'y ovaẽ e'ŷ mbove. Ndevy oxarura uka va'e ma Êubulo, Lino, Cláudia ha'e irmão kuery ha'e javive.

²² Tove Senhor toiko nenhe'ẽ reve. Tove peẽ kuery tapendu penemboaxya.

Tito pe Paulo ombopara va'ekue

Tito pe Paulo ombopara va'ekue

Tito ma Timóteo rami avi apóstolo Paulo irū oiko raka'e igreja kuery re openaa rupi. Ha'e va'e ma Creta yy pa'ū py Paulo oeja raka'e Jesus remimbo'e kuery ha'e py ikuai va'e ombo'e porāve aguā, ha'eve'ŷa rami nhombo'e va'e kuery ikuai avi rā.

Ha'e rami vy omombe'u porāve Jesus Cristo regua, ijayvu guive hemimbo'e kuery marā rami pa ikuai aguā re. “Mba'eta pavē pe Nhanderuete oikuua uka omboaxya ogueraa jepe aguā. Ha'e rami vy nhanemo'arandu nhanderekova vaiaty ha'e yvy regua reko gui jajepe'a aguā, ha'e aŷ gui voi jaiko kuaa pota ha'e teko porā rupi nhandekuaa aguā Nhanderuete pe ete” (2.11-12).

Oxarura reve ijayvu vy omboypyague

¹ Xee Paulo ma Nhanderuete rembiguai ha'e apóstolo-rā Jesus Cristo xemoī va'ekue, Nhanderuete rembiporavo kuery ambo'e rā ojerovia, ha'e ixupe ikuai vy oikuua porāmba aguā anhetē ete va'e,

² ha'e tekove marā e'ŷ oarō okuapy aguā guive. Ha'e va'e ma Nhanderuete ijapu e'ŷ va'e ome'ē aguā re ijayvu raka'e, ára ijypy e'ŷ mbove ma voi.

³ Ha'e gui aŷ oa'angaague ára py ma Nhanderuete Nhandereraa jepeva'e oayvu oikuua uka vy oipotaa rami vy xemoī karamboae imombe'uarā.

⁴ Ndee Tito rejeroviaa py xera'y ete reiko va'e pe axarura. Tove terendu Nhanderuete ha'e Nhandereraa jepeva'e Cristo Jesus guigua nemboaxya ha'e mby'a porā.*

Igreja re opena va'e kuery reko re ijayvua

⁵ Ha'e nunga rupi ae roeja karamboae Creta ypa'ū py py, mba'emo ndajapopai va'ekue rejapopa aguā, ha'e rami vy peteī-teī tetā py remoī aguā igreja re opena va'erā, ndevy ajapo ukaague rami vy.

⁶ Ha'eve remoī aguā ojou vaia rei aguā rami e'ŷ ikuai va'e, ha'e peteī'i ta'yxy va'e. Ta'y kuery ojerovia va'e, ha'e kuery opa marā rei e'ŷ, inhe'ē rendua rupi anho ikuia oikuua pavē va'e.

⁷ Mba'eta igreja re opena va'e ma nda'evei ojou vaia rei aguā rami ikuai aguā, ha'e kuery pe Nhanderuete ae opena uka rire. Ha'e kuery ojee ae rive'ŷ ojerovia va'e, ivai ja e'ŷ, ha'e vinho oy'ua rupi e'ŷ ikuai va'e, ojerovia rei e'ŷ va'e, neī peráta re nda'evei rei e'ŷ va'e ha'eve.

⁸ Ha'e rami 'rāgue py nhomovaẽ kuaa va'e, iporā va'e anho oguerovy'a va'e, oiko kuaa pota ha'e ha'evea rami joguerekova'e, iky'a e'ŷa rupi oiko ha'e ojejoko kuaa va'e,

⁹ ha'e ayvu anhetē ete va'e ojee omoī ete va'e ombo'eague rami ae. Ha'e rami vy 'rāe nhombo'e porā ha'e nhombopy'a guaxu kuaa, ha'e ombovai kuaa 'rā guive hexe opu'ā reia rā.

Nhombo'e porā merami rive va'e kuery re ijayvua

¹⁰ Mba'eta heta ikuai nhonhe'ē rendu e'ŷ va'e, ijayvuxha'e nhombotavypa rei va'e. Judeu regua ma hetave ikuai ha'e rami.

¹¹ Ha'e va'e kuery nhamokyrirī'rāe, mba'eta oo pygua ha'e javi-javi 'rā ombotavy ombo'e vaikuea rupi, peráta re rive nda'eveive vy.

¹² Ha'e kuery reguae profeta rami aipoe'i va'ekue: “Creta pygua kuery ma ijapu va'e ae, mymba inharō va'e rami okaru guaxu ha'e inhate'ŷ va'e”, he'lague rami.

¹³ Ha'e rami ijayvua ma anhetē. Ha'e nunga rupi ha'e kuery pe ndeayvu ete 'rā ojeroviaa rupi imbaraete aguā,

* 1:4 2 Coríntios 8.23; Gálatas 2.1-3

¹⁴ ha'e ojapyxaka ve'ŷ aguã judeu kuery ijayvu rivea re, neĩ anhetẽ va'e gui ojepe'a va'ekue ayvu re.

¹⁵ Mba'eta heko ky'a e'ŷ va'e kuery pe mba'eve rei nomongy'ai 'rã. Ha'e rã heko ky'a ha'e ojerovia e'ŷ va'e kuery ma opa mba'e py 'rã onhemongy'a, mba'eta o'arandua ha'e opy'aa rupi iky'apa rã.

¹⁶ Ha'e kuery ma "Xee aikuua Nhanderuete" he'i teĩ gueko vaia py oexa uka anhetẽ e'ŷa. Ojeguarupy ha'e nanhonhe'ẽ rendui va'e vy iporã va'e ojapo aguã nda'evei.

2

Ojerovia va'e kuery reko re ijayvua

¹ Ha'e rã ndee ma ndeayvu ke ha'evea rami renhombo'ea rupi.

² Tujakueve embo'e ojejoko aguã re, omboetea aguã. Toiko kuaa pota, ha'e ojeroviaa py ta'imbaraete, iporayvua ha'e oĩ atãa py guive.

³ Ha'e rami ae avi guaimigueve ma nhomboetea rupi ta'ikuai. Ta'ijayvux rei eme, ha'e vinho oy'ua rupi ta'ikuai eme. Tanhombo'e iporã va'e re,

⁴ ombo'e aguã kunhague ipyauve va'e ome ha'e omemby kuery oayvu ete aguã re,

⁵ oiko porã pota ha'e heko ky'a e'ŷ aguã, ngoo rupi opena porã aguã, ha'eve vai'i ha'e ome oipotaa rami oiko aguã, ha'e rami rã Nhanderuete ayvu re ijayvu vaia e'ŷ aguã.

⁶ Kunumigue ha'e rami ae avi emongeta opa mba'e py oiko kuaa pota aguã.

⁷ Ndee ae voi iporã va'e rupi eiko, amboae kuery ndee rami ikuai aguã. Renhombo'ea rupi exa uka anhetẽ rupi anho reikoa ha'e renhomboetea.

⁸ Iporã va'e re anho ndeayvu ndejou vaia aguã rami e'ŷ, nhanderovaigua kuery oximba aguã, mba'eve py nhandere nda'ijayvu vai kuaai vy.

⁹ Escravo kuery ma guerekoa kuery nhe'ẽ rendua rupi ta'ikuai opa mba'e py, ha'e ramo oguerovy'a aguã. Ta'inhe'ëngi rei eme,

¹⁰ ha'e ta'imonda eme guive. Ha'e rami 'rãgue py toexa uka opa mba'e py ojeroviap oikoa. Ha'e rami vy opa mba'e py ojapo 'rã Nhanderuete Nhandereraa jepea va'e regua ayvu ojou porãa aguã rami.

Cristo nhandereraa jepe vy nhanemoingo porãague re ijayvua

¹¹ Mba'eta pavõ pe Nhanderuete oikuua uka omboaxya ogueraa jepe aguã.

¹² Ha'e rami vy nhanemo'arandu nhandereko vaitaty ha'e yyv regua reko gui jajepe'a aguã, ha'e aý gui voi jaiko kuaa pota ha'e teko porã rupi nhandekuai aguã Nhanderuete pe ete,

¹³ ima'endu'a porãmby ou aguã nharõ jaikovya ja. Ha'e va'e ma Nhanderuete Ipo'akapa va'e ha'e Nhandereraa jepea Cristo Jesus rexakaa ojekuaa rã guarã.

¹⁴ Mba'eta nhandere ojejuka uka raka'e, opa mba'e vai gui nhandejogua vy ojeupe guarã ae nhandeky'a'o aguã, iporã va'e re anho nhanhea'aa rupi nhandekuai aguã.*

¹⁵ Ha'e nunga re tema ndeayvu. Enhomombaraete ha'e enhomongeta ipo'akaa ha'e javi rupi, avave rei nembojaru rei e'ŷ aguã.

3

Huvixa kuery nhanhe'ẽ rendu, ha'e iporã va'e rupi nhandekuai aguã re ijayvua

¹ Enhomoma'endu'a ke joe opena va'e ha'e huvixa kuery oipotaa rami ikuai aguã. Tonhe'ẽ rendu, ha'e ta'ikyre'ŷ opa mba'e porã ojapo aguã.

² Avave rei re ta'ijayvu rei eme, neĩ ta'ijayvu rive eme joupe. Ha'e rami 'rãgue py ha'eve vai'i ta'ikuai, pavõ reve ta'ijayvu porã'i opa mba'e py.*

³ Mba'eta nhande voi yma rupi hi'arandu e'ŷ va'e nhandekuai va'ekue, nhanhe'ẽ rendu e'ŷ va'e ha'e okanhhygue rami, to'o pegua escravo rami nhandekuai va'ekue nhamoaruã rei ha'e opa marã nhandekuaixa rupi. Jaiko vaikue rei, nanhandea'eい rei joe, nanhandeporayvui, ha'e ndajajoayvui rei va'ekue.

* 2:14 Efésios 2.8-10; Filipenses 3.20,21 * 3:2 Romanos 13.1-6

- ⁴ Ha'e gui Nhanderuete Nhandereraa jepea va'e oexa uka nhanderayvua, nhanem-boaxypaa guive.
- ⁵ Ha'e rami vy nhanemboaxy vy rive nhandereraa jepe, teko porā re nhanhea'ā rupi e'ŷ. Nhe'ē Ky'a E'ŷ nhandeky'a'o vy nhanemoingove ju, ha'e nhanembopyau.
- ⁶ Ha'e va'e ma Nhandereraa jepea Jesus Cristo rupi nhandere Nhanderuete ombou vy opa mba'e py nhanemoingo porā.
- ⁷ Ha'e ramo nhanemboaxy vy nhanemboeko porā ma rire tekove marā e'ŷ nharōa rupi mba'emo porā jopyarā ju jaiko.
- ⁸ Ha'e va'e ayvu ma jarovia va'erā, aipota remombe'u porāve guive, Nhanderuete re ojerovia va'e kuery iporā va'e ojapoa rupi onhea'ā aguā. Ha'e nunga ma iporā, ha'e omoingo porā pavē 'rā.*
- ⁹ Ha'e rā ayvu ovare'ŷ va'e ma endu rive, ymagua kuery rery oīa re ijayvua rā, ha'e lei re joo rami e'ŷ-e'ŷ ijayvu vy joguero'a rei ramo, mba'eta ha'e nunga ma nhomoingo porārā e'ŷ, mba'everā ndovarei.
- ¹⁰ Joo rami e'ŷ-e'ŷ nhomoingoa kuery pe mokoīgue ma ndeayvu rire ejep'e a ke ha'e kuery gui.
- ¹¹ Mba'eta reikuaa ma heko vai ha'e ojejavypa va'e ae ikuia. Ha'e kuery ae onhembopaga uka.

Oxarura reve opaa py ogueroayvu porāague

- ¹² Ndea py ambou 'rā Ártemas, e'ŷ vy Tíquico. Ha'e va'e ovaē ma ramo eju pojava Nicópolis tetā py xerovaexī aguā. Anhembopy'a ha'e py ae yro'y aaxa aguā.
- ¹³ Eipytyvō porā pota lei re nhombo'e va'ety Zenas oguatave ta ramo, Apolo guive, ha'e kuery pe mba'eve oata e'ŷ aguā.
- ¹⁴ Ha'e gui nhandereveguia kuery tonhea'ā iporiaukue'i pytyvōa rupi, yvyra hi'a e'ŷ va'e rami ikuai e'ŷ aguā.
- ¹⁵ Ha'e gui xereve ikuai va'e ha'e javi oxarura uka ndevy. Emombe'u ke orema'endu'aa ojeroviaa py orerayvu va'e kuery ha'e javive pe.

Tove peē kuery ha'e javi tapendu penemboaxya.

* 3:8 Efésios 2.1-10

Filemom pe Paulo ombopara va'ekue

Filemom pe Paulo ombopara va'ekue

Nhuā py apóstolo Paulo oī javé peteī ava oexa escravo oikoague gui ojava va'ekue, hery va'e Onésimo. Paulo oexa vy Jesus regua omombe'u ramo ojerovia, ojeko me'ē guive Jesus pe. Ha'e rami vy Paulo pytyvōa rupi oiko.

Onésimo rerekoa Filemom hery va'e ma amboae tetā Colossos pygua oiko Paulo oexa va'ety, igreja re opena va'e, ha'e Jesus regua Paulo omombe'u rā ojeko me'ē avi va'ekue. Ha'e nunga rupi Paulo onhembopy'a ija Filemom pe ju Onésimo omondouka aguā.

Kova'e kuaxia ogueraa uka Onésimo po py, Filemom pe omombe'u porāve ha'e ojerure aguā operdoa vy omovaē porā ju aguā guembiguai onha va'ekue. Mborayvu rupi ojerure porā'i vy aipoe'i: “Ha'e rami vy ajerure xera'y Onésimo removaē porā ju aguā, ... ndevygua escravo-rā ju e'ŷ guive removaē aguā, ha'e rā nde-irmão reayvu ete va'e rami, nde-escravo rami rive'ŷ. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'ŷ, ha'e rā Senhor re vy irmão oiko” (versículos 10a, 16).

Oxarura reve ijayvu vy omboypyague

¹ Xee Paulo ma Cristo Jesus pegua aikoa re nhuā py aī. Xe-irmão Timóteo reve roxarura ndevy, xerembiayvu Filemom. Ore rami avi remba'epo va'e reiko.

² Irmā Áfia pe voi axarura, ore rami onhea'ā va'ety Arquipo, ha'e igreja kuery ndero py onhemboaty va'e pe guive.

³ Tove peē kuery tapendu penemboaxya ha'e mby'a porā Nhanderuete ha'e Senhor Jesus Cristo guigua.

Filemom nhopytyvōa re oguerovy'aague

⁴ Ndere xema'endu'a riae vy Xeruete pe anhembo'e nhavō arov'y'a,

⁵ mba'eta aendu omombe'ua rā iky'a e'ŷ va'e kuery ha'e javi reayvua, ha'e Senhor Jesus re rejeroviaa rupi reikoa guive.

⁶ Ajerure ore rami rejerovia reve Cristo re vy mba'emo porā jareko va'e reikuaapa avi aguā.

⁷ Mba'eta irmão, ndeporayvua omombe'ua rā aendu vy avy'a ete ha'e xepy'a guaxuve, iky'a e'ŷ va'e kuery rembovy'a ramo ipy'a py.

Onésimo re apóstolo Paulo ojerureague

⁸ Ha'e gui Cristo re vy aendu ndevy pe mba'emo ajapo uka va'e rire ha'eve 'rāguea,

⁹ ha'e rami teī roayvua rupi ajerure porā'i ha'e nunga re. Xee Paulo xetuja'i ma, ha'e aŷ Jesus káuxa nhuā py aī.

¹⁰ Ha'e rami vy ajerure xera'y Onésimo removaē porā ju aguā, mba'eta xejokuaa imoinya py xera'y rami amoingo va'ekue.*

¹¹ Ha'e va'e ma anhetē yma ndovarei va'ekue ndevy, teī aŷ ma ovare ete ndevy, xevy pe voi.

¹² Ha'e rami vy ndea py ambou ju xekuraxō ae reve.

¹³ Xee ma nderekovia amombytavexe teī xea py, ayvu porā káuxa xejokuaa imoinya py xepytyvō aguā.

¹⁴ Ha'e rami avi mba'eve rei ndajapoxei ndevy pe ranhe aporandu e'ŷ re. Ha'e ramo 'rāe xepytyvōxe'a'i py xepytyvō uka, xee ajapo uka ramo rive'ŷ.

¹⁵ Mba'eta xee aikuua rā xapy'a'i rive ojepe'a raka'e ndea gui, raka'e rā peve guarā removaē ju aguā,

¹⁶ ndevygua escravo-rā ju e'ŷ guive removaē aguā, ha'e rā nde-irmão reayvu ete va'e rami, nde-escravo rami rive'ŷ. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'ŷ, ha'e rā Senhor re vy irmão oiko.

* ^{1:10} Romanos 15.7; Efésios 4.32

¹⁷ Ha'e nunga rupi xevy pe "Xereveguá" 're vy xee xemovaëa rami ae ha'e voi emovaë.
¹⁸ Ha'e gui xapy'a rei nemba'e rei-rei omokanhy rire ndevy pe orevea oï ramo ejá ranhe xee ae amboekoviapa aguã.

¹⁹ Xee Paulo xepo py ae ambopara amboekovia aguā re. Ha'e "Nderekove re ae xevy pe rereve" ha'e e'ŷ teĩ reikuua.

²⁰ Ha'e nunga rupi irmão, Senhor re vy ejapo ha'e nunga xevy. Xembovy'a ke Cristo re.

Oxarura reve opaa py ogueroayvu porāague

²¹ Ha'e rami ambopara ri teī aikuaa xenhe'ē rendu 'rāa, ha'e ajerurea gui rejapove 'rā guive.

²² Ajerure avi rerekou katu aguā ake aguā, mba'eta xee aikuaa rā xere pejerurea rupi pēa py xemboua ju 'rā.

²³ Epafros ma Cristo re vy xereve oĩ avi nhuã py. Ha'e va'e ma oxarura avi ndevy,

²⁴ ha'e gui Marcos, Aristarco, Demas ha'e Lucas xepytyvõ va'ety kuery voi.

²⁵ Tove penenhe'ẽ py tapendu Senhor Jesus Cristo penemboaxyá.

Hebreu kuery pe ombopara pyre Hebreu kuery pe ombopara pyre

Kova'e kuaxia para ma hebreu kuery Jesus re ojerovia va'e pe omboparaa. Imboparaare rery ma noī.

Jesus re ha'e kuery ojerovia ramo hetarā kuery opu'ā rei ha'e kuery re, nhandere oikoa rami ae avi. Ha'e rami rā ha'e kuery va'e regua amongue ojeroviaa gui ojepe'axe gueko ymague rami ju ikuai aguā. Ha'e nunga rupi kova'e kuaxia omboparaa ha'e kuery pe ipy'a guaxu reve onhea'āve aguā, mba'eta Jesus regua ha'e kuery ojeroviaa ma pavē gui ha'eveva'e, yma guare teko gui voi. Mymba kuery Nhanderuete pe ome'ēa 'rāgue py Jesus ojejuka ukaague anho ovare nhandereraa jepe aguā. Jesus ma nhandereraa jepea peteī'i va'e Nhanderuete ombou va'ekue.

Aipoe'i: “Ha'e rami rire mba'exa 'rā tu nhande jaa jepe, nhandereraa jepe aguā regua iporāve va'e nhaendu rive vy? Mba'eta jypy'i Senhor ae omombe'u, ha'e gui henuare kuery ju omboaxa, anhetē etea jaikuua porāve aguā rami” (2.3). Ha'e nunga rupi “nhanekangy e'ŷ re nhaī atā tema nharō va'e nhamombe'u jaikovy va'e re” (10.23), “nhama'ē porā tema Jesus re anho, mba'eta ixugui ae ou jypy guive opa peve jajerovia aguā” (12.2). Mba'eta “Jesus voi tetā rokē gui mombyry'i oiko axy raka'e, nguguy py ae ojeupegua kuery oiky'a'o aguā. Ha'e nunga rupi oĩa py jaje'oi nhande voi, amboae kuery ikuiai gui mombyrya py teī, Jesus káuxa nhanembojaru reia rā jaropo'aka vy. Mba'eta anhetē apy ndajarekoi tetā oĩ riae va'erā, raka'eve rā ojekuua va'erā va'e re nhanheā'a” (13.12-14).

Nhanderuete ojekuua ukaague re ijayvua

¹ Ymave rupi Nhanderuete mbovskyue rei e'ŷ, ha'e ha'ekue-'ekue'i rami e'ŷ ijayvu raka'e nhaneramoī kuery pe profeta kuery rupi.

² Ha'e gui aŷ opa vyguá ára ma Gua'y rupi ae ijayvu nhandevy. Ha'e va'e ma opa mba'e ikuai va'e jopyarā omoī, ipo rupi opa mba'e ojapo rire.*

³ Nhanderuete rexakāa rexaa ukaa oiko, Nguu rami ete heko va'e vy. Mba'emo ikuai va'e oguereko porāmba oayvu ipo'akapa va'e py rive. Ha'e gui jajejavvyague gui nhandeky'a'opa ma vy oguapy oiny yvate. Ipo'akapa va'e oiporu kuaa regua re oĩ

⁴ anjo kuery gui ombovivateve rire, mba'eta hery oenoīa va'e ma anjo kuery oenoīa gui iporāve.

Cristo Ta'y oikoa, ha'e rā anjo kuery ma tembiguai ikuiai re ijayvua

⁵ Mba'eta anjo kuery pe ma aipo nde'i: “Ndee ma Xera'y, ange ma romoingo”, nde'i. Ha'e gui teīgue ju aipoe'i: “Xee aiko 'rā Tuu, ha'e rā ha'e ma Xera'y 'rā oiko.”*

⁶ Ha'e gui kova'e vy re Gua'y Jypygua ombou vy teīgue ju aipoe'i: “Nhanderuete pegua anjo kuery tomboete pavē”, he'i.*

⁷ Ha'e rā anjo kuery pe ma aipo'ea: “Ojeupegua anjo kuery ojapo vytytu rami, guembiguai kuery ojapo tata rami”, 'ea.*

⁸ Ha'e rā Ta'y pe ma aipo'ea: “Oreruete, ndepo'akaa ma raka'e rā peve guarā. Ha'e ndepo'akaa py rejoguereko 'rā ha'evea rami.”*

⁹ Rerovy'a teko porā, ha'e rā teko vai ma nderejou porāi. Ha'e nunga rupi Nderu Nhanderuete ndererovy'aa rupi nemoī neirū kuery áry guarā, ndere azeite omoī uka vy”, 'ea.

¹⁰ Ixupe aipo'ea avi: “Senhor, jypy'i renhono va'ekue vy. Yva regua voi ndepo py rejapo va'ekue meme.

* 1:2 João 1.1-5; Colossenses 1.15-18 * 1:5 Salmo 2.7; 2 Samuel 7.14, 1 Crônicas 17.13 * 1:6 Deuteronômio 32.43 * 1:7 Salmo 104.4 * 1:8 Salmo 45.6-7

¹¹ Ha'e nunga ma opa va'erā. Ha'e rā ndee ma reiko riae 'rā. Ha'e nunga ha'e javi 'rā inhyma ovy ao rami,

¹² ha'e ramo ao pukukue rami 'rā rembojo'a imoiny, ao rami ae avi 'rā remboekovia. Ha'e rā ndee ma ha'ekue ae reiko. Nderekove opa va'erā e'ŷ", 'ea.*

¹³ Ha'e gui peteīve anjo pe aipo nde'i: "Eguapy ke aiporu kuaa regua re, nderovaigua kuery ndepy guýry amoī peve", nde'i.*

¹⁴ Mba'eta anjo kuery ma nhe'ẽ hembiguai ikuai, oo jepe aguā rami ikuai va'e pytyvõarā ombou va'e.

2

Ayvu porā nhaendu rive'ŷ aguā re ijayvua

¹ Ha'e nunga rupi anhetē ete va'e nhaendu vy nhamoī porā pota 'rā nhandejee, ha'e va'e rupi nhandekuaia gui jajepe'a e'ŷ aguā.*

² Mba'eta ymave rupi Nhanderuete ayvu anjo kuery omombe'u va'ekue ndoaxa rivei raka'e, mba'eta ha'e va'e rupi heko vai ha'e nonhe'ẽ rendui va'e kuery ombopagapa.

³ Ha'e rami rire mba'exa 'rā tu nhande jaa jepe, nhandereraa jepe aguā regua iporāve va'e nhaendu rive vy? Mba'eta jypy'i Senhor ae omombe'u, ha'e gui henduare kuery ju omboaxa, anhetē etea jaikuua porāve aguā rami.

⁴ Ha'e kuery ijayvua rupi Nhanderuete oikuua uka anhetē etea, hexa pyrā, nhomondypaarā ha'e opa marāgua opo'akaa rupi ojapo vy. Ha'e gui peteī-teī rupi oexa uka avi Nhe'ẽ Ky'a E'ŷ guigua, ha'e ae oipotaa rami vy.

Sacerdote yvateve va'e ojeroviapy ha'e nhomboaxy kuaa va'e Jesus oikoa re ijayvua

⁵ Mba'eta anjo kuery pe'ŷ Nhanderuete opena uka raka'e yvy pyau oreayvua va'e re.

⁶ Ha'e rami 'rāgue py amongue henda py omombe'u porā vy aipoe'i: "Marā ramigua tu avakue, ha'e kuery re nema'endu'a aguā? Marā ramigua tu avakue ra'y kuery, ha'e kuery re reikuua pota aguā?

⁷ Ha'e rami teī hare'i anjo kuery gui remo'yvyi've rire remboyvate, remboete uka [ha'e rembopo'aka ndepo py rejapo va'ekue ha'e javi re].

⁸ Opa mba'e re rembopo'aka, ipy guýry remoī vy", he'i va'ekue. Opa mba'e re nhanembopo'aka rire ma mba'eve jipoi nhandepo'aka e'ŷa. Ha'e rami teī aŷ peve ndajaexai teri opa mba'e re nhandepo'akaa.*

⁹ Ha'e rā Jesus ma jaexa omano rire Nhanderuete ombopo'aka ha'e omboete ukaague. Mba'eta Nhanderuete nhanemboaxy vy anjo kuery gui xapy'a'i omo'yvyi've raka'e Jesus, nhande kuery ha'e javi re omano aguā.*

¹⁰ Mba'eta Nhanderuete peguarā opa mba'e oiko, ha'e ae omoingopa rire. Ha'e rami vy guexakāa katy gua'y kueryrā nhandereru aguā ma opa mba'e py oguereko katu raka'e Nhandereraa jepearā, oiko axya py guive.

¹¹ Mba'eta Nhandeky'a'oarā ou va'ekue ha'e nhande kuery oiky'a'o va'ekue voi peteī'i gui ae jaiko. Ha'e nunga rupi noxī nhandevy "Xeryvy kuery" he'i aguā,

¹² mba'eta aipoe'i: "Xeryvy kuery pe aikuua uka 'rā nderery, ha'e onhemboaty okuapya py aporaei 'rā ndevy."*

¹³ Aipoe'ive ju: "Xee ajerovia 'rā hexe." Teīgue ju aipoe'i: "Apy ma xee aī, ha'e xera'y kuery Nhanderuete ome'ẽ va'ekue reve", he'i.*

¹⁴ Ha'e gui ta'y kuery he'ia ho'o ha'e huguy va'e ikuia rami avi ha'e voi oiko ha'e rami, omanoa py ombovaipa aguā porojukaa po'akaa. Ha'e va'e ma anha.

¹⁵ Ha'e gui nhandereraa jepe aguā, mba'eta jaikoa pukukue re nhamano aguā gui jakyje vy manoia pegua escravo rami nhandekuaia va'ekue.

* 1:12 Salmo 102.25-27 * 1:13 Salmo 110.1 * 2:1 Marcos 4.14-25 * 2:8 Salmo 8.4-6 * 2:9 Filipenses 2.6-11 * 2:12 Salmo 22.2 * 2:13 Isaías 8.17-18

¹⁶ Mba'eta anhetē anjo kuery reraa jepearā e'ŷ ou, ha'e rā Abraão ramymino kuery reraa jepearā anho.

¹⁷ Ha'e nunga rupi opa mba'e py guyvy kuery rami 'rāe ojeapo, nhanemboaxy kuaa ha'e ojeroviapy oikoa oexa uka aguā, ha'e Nhanderuete pegua sacerdote yvateve va'e oiko aguā guive, ojeupeguia kuery ojejavyague re opaga aguā.

¹⁸ Mba'eta anha omoangecko py oiko axy rire aŷ ipo'aka nhanderepy aguā nhande voi nhanemoangeko rā.

3

Moisés gui Cristo yvateve ramo jajeroviaa gui jajepē'a e'ŷ aguā re ijayvua

¹ Ha'e nunga rupi irmāo kuery iky'a e'ŷ va'erā Yva pygua penerenoī avi va'ekue, peikuua pota porā Jesus re, mba'eta Nhanderuete ombou raka'e Sacerdote Yvateve va'erā, nhamombe'ua rami ae.*

² Ha'e va'e pe ma Nhanderuete ngoo pygua kuery re opena uka ramo henonde rupi ojeroviapy oiko, Moisés oikoague rami avi.

³ Ha'e rami avi Moisés gui ma Jesus omboetevepy, oo gui ijapoare omboeteavea rami avi.*

⁴ Mba'eta oo ikuai va'e ma ojapo pyre meme, ha'e rā opa mba'e apoare ma Nhanderuete anho.

⁵ Ha'e gui Moisés ma Nhanderuete rembiguai rami oiko raka'e hoo pygua ha'e javi re openaa rupi. Ha'e ramia py ojeroviapy oiko, omombe'u ma voi guive raka'eve rā Nhanderuete omombe'u porāve va'erā regua.

⁶ Ha'e rā Cristo ma hoo pygua kuery re opena vy Ta'y ae oiko. Ha'e gui "Hoo pygua kuery" he'ia ma nhande ae jaiko, opa peve ete ri nhaĩ atā vy nhandepy'a guaxu ha'e jarovy'a reve nharō jaikovya re.

⁷ Mba'eta Nhe'ẽ Ky'a E'ŷ aipoe'iague rami: "Kova'e ára ijayvua pendu vy peneakā ratā eme, tekoia e'ŷa rupi ymagua kuery ikuai jave oeko a'ã rei ha'e nonhe'ẽ renduiague rami e'ŷ.

⁹ Mba'eta ha'e py ma peneramoī kuery xerekō a'ã vy xemoangecko rei va'ekue, quarenta ma'etŷ re mba'emo porā ajapo rā oexa okuapy tei.*

¹⁰ Ha'e nunga rupi ha'e javeguia kuery pe xevai vy aipoa'e: 'Ha'e kuery ojejavy riae opy'a py, ndoikuaxei guive xerekō', ha'e va'ekue.

¹¹ Ha'e rami vy xepoxy reve aura va'ekue ha'e kuery oupity e'ŷ aguā opytu'u aguā areko katu va'ekue", he'i.*

¹² Ha'e nunga rupi irmāo kuery, penheangu ke peē kuery regua neī peteīve py'a re oī e'ŷ aguā pejerovia e'ŷa, Nhanderuete oikove va'e penhe'ẽ rendua gui pendepe'aarā.

¹³ Ha'e rami 'rāgue py ko'ẽ nhavō penhomombaraete peteī-tei, "Kova'e ára" he'iague oī teria ja, jejavya peteīve penembotavy e'ŷ aguā peneakā ratā aguā rami.

¹⁴ Mba'eta Cristo rewegua ete jaiko, anhetē ri jypy guive jajeroviaa re opa peve nhaĩ atā vy.

¹⁵ Mba'eta "Kova'e ára ijayvua pendu vy peneakā ratā eme, oeko a'ã rei va'e kuery rami e'ŷ", he'iague rami.

¹⁶ Ha'e gui mava'e kuery tu ijayvua oendu tei nonhe'ẽ rendui raka'e? Moisés reve Egito gui oẽmba va'ekue ha'e javi.

¹⁷ Ha'e mava'e kuery pe tu quarenta ma'etŷ re ipoxy raka'e? Ojejavy va'ekue pe ae, mba'eta ha'e va'e kuery ma tekoia e'ŷa pyve ho'apa rā hetekue opytu'u aguā rami.

¹⁸ Ha'e gui mava'e rovai tu oura raka'e opytu'u aguā oguerekō katu va'ekue oupity e'ŷ aguā? Nonhe'ẽ rendui va'ekue rovai ae.

¹⁹ Ha'e rami vy po rami jaikuua: Ha'e kuery ndojeroviaiague re ae nda'evei raka'e oupity aguā.

* 3:1 Números 12.17 * 3:3 João 1.17,18 * 3:9 "Peneramoī kuery" he'ia ma Moisés reve Egito yvy gui oẽ va'ekue re ijayvu vy. * 3:11 Salmo 95.7-11

4

Japytu'u aguã py Nhanderuete re jajeroviaa rupi jaike aguã re ijayvua

¹ Ha'e nunga rupi nhanheangu, japytu'u aguã Nhanderuete oguereko katu va'ekue jaupity aguã re ijayvu rire teĩ peẽ kuery regua amongue ndapeupityi gui.

² Mba'eta nhandevy pe voi ayvu porã omombe'ua, ymagua kuery pe rami avi. Mba'eta ha'e kuery ayvu oendu teĩ ndojeroviai ramo ha'e kuery pe mba'everã ndovarei.

³ Ha'e rã nhande jajerovia va'e ma jaupity 'rã japytu'u aguã, Nhanderuete aipoe'iague rami vy: "Xepoxy reve aura va'ekue ha'e kuery oupity e'ŷ aguã optytu'u aguã areko katu va'ekue" he'i, ko yvy onhono ypy jave mba'emo ojapopa rire teĩ.

⁴ Mba'eta amongue henda py sete araa re ijayvu vy aipoe'i: "Sete araa py Nhanderuete optytu'u raka'e mba'emo ojapoa gui", he'i.*

⁵ Ha'e pyve ju aipoe'i: "Ha'e kuery ma ndoupityi 'rã optytu'u aguã areko katu va'ekue", he'i.

⁶ Ha'e nunga rupi oĩ teri optytu'u aguã amongue oupity aguã, ha'e rã ymagua kuery pe ma ayvu porã omombe'ua rã nonhe'ẽ rendui vy ndoupityi raka'e.

⁷ Ha'e gui yma ete rire peteĩgue ju Nhanderuete oa'angaa ára, mba'eta "Kova'e ára" he'i uka Davi pe, "Kova'e ára ijayvua pendu vy peneakã ratã eme", he'iague romombe'u ma voiague rami.

⁸ Mba'eta ha'e kuery optytu'u aguã ete py Josué ogueraa va'e rire ma yma rire noa'anga jevyi 'rãgue ára mboae.

⁹ Ha'e nunga rupi oĩ teri Nhanderuete pegua kuery optytu'u aguã.

¹⁰ Mba'eta japytu'u aguã Nhanderuete oguereko katu va'ekue jaupity vy japytu'u 'rã mba'emo re nhanhea'ã jaikovya gui, Nhanderuete oikoague rami avi.

¹¹ Ha'e nunga rupi nhanhea'ã ke japytu'u aguã oguereko katu va'ekue jaupity aguã, avave rei ho'a e'ŷ aguã inhe'ẽ rendu e'ŷ rei va'e kuery ho'apaague rami.

¹² Mba'eta Nhanderuete ayvu ma oikove ha'e ipo'akapa va'e. Kyxe haĩmbe jovai va'e gui haĩmbeve va'e, mba'eta oike 'rã jaikovea ha'e nhanenhe'ẽ omboja'o aguã peve, jaku'ea ha'e nhanderajy ojaya rami avi. Ha'e rami vy oikuua uka 'rã nhapẽxaa ha'e nhandepy'aa ha'e javi.

¹³ Ha'e ramo hemimoingo jipoi henonde onhenhomí kuaa va'erã. Ha'e rami 'rãgue py oikuua pota va'e renonde jajexa uka rã opa mba'e ojekuaa porãmba 'rã.*

Sacerdote yvateve va'e Jesus nhanemboaxya oikoa re ijayvua

¹⁴ Ha'e nunga rupi Nhanderuete Ra'y Jesus, Sacerdote yvateve va'e rami nhanderepy vy yva re oo rire nhaĩ atã tema jajeroviaa re.

¹⁵ Mba'eta nhande-Sacerdote ma nhanekangy rã nanhanemboaxy e'ŷi 'rã. Ha'e rami 'rãgue py nhande rami avi onhemoangeko uka raka'e opa mba'e py, teĩ ojejavý e'ŷ re.

¹⁶ Ha'e nunga rupi jakyjea py e'ŷ 'rã nhanhemboja Nhanemboaxya guenda openaaty py oguapy oinya re, nhanekangya ára jaupity aguã nhanemboaxy vy nhanepytyvõa.*

5

Sacerdote ymagua kuery gui Cristo yvatevea re ijayvua

¹ Mba'eta sacerdote yvatekueve ikuai va'e ma avakue mbyte gui oiporavoa ha'e omoia rire Nhanderuete pe ombo'eapo 'rã avakue rekovia, mymba ojuka ha'e mba'emo ome'ẽ aguã ojejavague re.

² Ha'e omboaxy kuaa 'rã oikuua e'ŷ vy ojejavý va'e kuery, mba'eta ha'e kuery rami avi ikangy va'e vy.

³ Ha'e nunga rupi ae mba'emo ome'ẽ 'rã ha'e ae ojejavague re, heta va'e kuery ojejavague re anho e'ŷ.

* 4:4 Gênesis 2.2 * 4:13 Efésios 6.17; Apocalipse 1.16 * 4:16 Hebreus 10.19-25; 1 João 2.1,2

- ⁴ Ha'e gui avave rei ha'e ae nonhemboyvatei 'rā ha'e rami oiko aguā. Nhanderuete oenoī ramo mae ha'eve, Arão oenoīague rami.
- ⁵ Ha'e rami ae avi Cristo voi ha'e ae e'ŷ onhemboyvate sacerdote yvateve va'e oī aguā. Ha'e rā ixupe "Ndee ma Xera'y, kova'e ára romoingo" he'i va'e ae*
- ⁶ amboae henda py "Ndee ma sacerdote reī riae 'rā, Melquisedeque reko rami nderekō va'e vy" he'i.*
- ⁷ Ha'e gui Jesus ma ngo'o re oiko jave ojapukai atā ha'e hexay reve onhembo'e vy ojerure raka'e omanoa gui ogueraa jepe aguā ipo'aka va'e pe. Ha'e ramo oendu ete, mba'eta Nguu pe ete oiko ramo.
- ⁸ Ta'y ae oiko va'eri oiko axya py voi oikuua raka'e onhe'ē rendua.
- ⁹ Ha'e gui ha'e nunga ha'e javi oaxapa ma rire ogueraa jepe inhe'ē rendua kuery ha'e javi, raka'e rā peve guarā,
- ¹⁰ Melquisedeque rami sacerdote yvateve va'erā Nhanderuete omoī rire.*

Ha'e kuery ndoikuua porāi teria re ijayvua

- ¹¹ Ha'e va'e rekoke re ma heta roguereko oreayvu aguā, teī aŷ ma napendu kuaa porāi ramo haxy 'rā romombe'u porāve aguā.*
- ¹² Mba'eta yma ma pejerovia teī penhombo'e kuaa 'rāgue py peikotevē teri Nhanderuete ayvu jypy guare, haxy e'ŷve va'e re penembo'e va'erā. Ha'e rami vy kyrīgue'i okambu va'e rami teri pendekuai, tembi'u tykue'ŷ va'e ho'u va'e rami e'ŷ.
- ¹³ Mba'eta okambu va'e rami ikuai va'e ma noendu kuaai 'rā teko porā regua, kyrī'i va'e rami teri ikuai vy.
- ¹⁴ Ha'e rā tembi'u tykue'ŷ va'e ma kakuaakueve peguarā, mba'eta o'arandua re onhea'āa rupi vy oikuua 'rā ha'eve va'e ha'e ha'eve'ŷ va'e.*

6

Jajeroviaa regua jaikuua porāve pota aguā re ijayvua

- ¹ Ha'e nunga rupi jaikuua porāve pota ke jypy'i Cristo regua re nhanembo'eague, ha'e opa mba'e py nhanemoingo porāarā re ju jaikuua pota. Nda'evei jypy'i nhaendu va'ekue re rive rombo'eve ju aguā. Ha'e va'e ma nhamano aguā rami nhandekuaiague gui jajeko rerova aguā, Nhanderuete re jajerovia aguā,
- ² nhanhemongarai aguā, nhandeapte re opo omoīa aguā, nhamanoague gui nhanhem-boete ju aguā, ha'e raka'e rā peve guarā nhanemboayvua aguā.
- ³ Ha'e rami 'rāgue py amboae nunga re ju 'rā jaikuua pota, Nhanderuete oipota rā.

Ojeroviaa gui ojepe'a va'ekue re ijayvua

- ⁴ Ha'e rā anhetē va'e oikuua va'ekue gui amongue ojepe'a ramo ma nda'evei nham-boeko rerova ju aguā. Ha'e va'e kuery ojopy ae ma yva guigua, Nhe'ē Ky'a E'ŷ
- ⁵ ha'e Nhanderuete guigua ayvu porā, ha'e oendu ma guive Nhanderuete po'akaa raka'eve rā peve guarā,
- ⁶ ha'e rami teī ha'e kuery ho'a ramo nda'evei nhamo'arandu ju aguā ojeko rerova aguā rami, mba'eta ha'e kuery ae ojapo Nhanderuete Ra'y pavē ojojai rei aguā rami, teīgue ju kuruxu re omoīa rami.
- ⁷ Mba'eta yvy minha oky jepi rā inhakŷ vy hi'a porā 'rā oma'etŷ va'e kuery peguarā. Ha'e va'e yvy ma Nhanderuete ogueroayvu porā 'rā.
- ⁸ Ha'e rā juu ha'e juu rakua endy rive moingoa yvy ma ndojou porāi 'rā, ayvu vai pyrā rive oiko. Ha'e va'e ma opaa py oapypaa 'rā.*

Jaa jepea kuaa ukaarā re ijayvua

* 5:5 Salmo 2.7 * 5:6 Salmo 110.4 * 5:10 Mateus 26.36-46 * 5:11 Melquisedeque rekoke ma capítulo 7 py omombe'u porāve. * 5:14 1 Coríntios 3.1,2, 14.20; Efésios 4.11-16 * 6:8 Hebreus 10.26-31

⁹ Ha'e rā peẽ orerembiayvu kuery, ha'e rami oreayvu teĩ roikuaa rā pendere oĩ iporāve va'e nunga, peo jepea kuaa ukaarā.*

¹⁰ Mba'eta Nhanderuete ndaexarai 'rā pemba'eapoague ha'e hery rupi pejoayvua pexa ukaague re, mba'eta iky'a e'ŷ va'e kuery peipytyvõ va'ekue, ha'e peipytyvõve teri guive.

¹¹ Ha'e rami avi roipota opa peve peteĩ-teĩ pexa uka ha'ekue rami penhea'āa, peupity aguã pearō peikovy va'e.

¹² Pendekuai eme inhate'ŷ va'e rami, ha'e rā ojeroviaa ha'e oĩ atāa rupi Nhanderuete ijayvuague oupity va'erā kuery rami anho.

Nhanderuete ijayvuaguendoaxa rivei 'rāa re ijayvua

¹³ Mba'eta Abraão pe Nhanderuete mba'emo ome'ẽ aguã re ijayvu vy guery rupi ae oura raka'e, mba'eta ixugui yvateve va'e jipoi hery rupi oura aguã.

¹⁴ Ha'e vy aipoe'i: "Anhetē romoingo porā 'rā, neramymino kuery amoingo reta 'rā guive", he'i.*

¹⁵ Ha'e ramo Abraão oĩ atāa rupi oarō rire oupity raka'e ijayvuague.

¹⁶ Ha'e gui avakue minha ha'e kuery gui yvateve va'e rery rupi 'rā oura. Ha'e rami rire jomeme joguero'a teĩ ouraague ojapo 'rā peteĩ rami ju oikuua aguã rami.

¹⁷ Ha'e nunga rupi Nhanderuete voi oura reve ijayvu raka'e, ijayvuague oupity va'erā kuery pe oikuua uka aguã ndoaxa rivei 'rāa.

¹⁸ Ha'e rami vy mokoĩ mba'e oaxa rive e'ŷ va'erā py Nhanderuete oikuua uka raka'e nda'ijapuia.*

Ha'e rami rire jajereraa jepe uka rire nhandepy'a guaxu ete 'rā, ha'e rami vy nharō jaikovya nhanerenonderā omoĩ mbyre jaupity aguã.

¹⁹ Nharō va'e ma kanoã mombytaa rami oĩ nhanenhe'ẽ moĩ atāarā. Mba'eta mba'eve py nanhanemokanhy ukai 'rā, nhanemoĩ atā 'rā, templo mbotya ajukue guigua rovai oike rire.†

²⁰ Mba'eta ha'e py ma Jesus nhandegui ha'e ranhe oike raka'e. Nhandere vy oike, Melquisedeque rami sacerdote yvateve va'e omoĩa rire raka'eve rā peve guarā.

7

Cristo rami Melquisedeque oikoague re ijayvua

¹ Mba'eta Melquisedeque ma Salém tetā pygua huvixave oiko raka'e, ha'e sacerdote Nhanderuete Yvate ete va'e pegua guive. Ha'e va'e ma Abraão ovaexī vy oo raka'e. Abraão ma huvixa kuery juka vy ooague gui ojevy jave Melquisedeque ovaexī vy ogueroayvu porā.

² Ha'e ramo ixupe Abraão ome'ẽ raka'e mba'emo ojou va'ekue ha'e javi guigua dízimo. (Jypy Melquisedeque rery ma "Huvixave heko porā va'e" he'ia, ha'e rire ma Salém pygua huvixa avi oiko vy "Huvixave nhomoingo porāa" he'ia.

³ Tuu e'ŷ va'e, ixy e'ŷ va'e, tamoĩ e'ŷ va'e, hekove ijypy va'ekue'ŷ, neĩ opa e'ŷ va'e guive oiko raka'e, Nhanderuete Ra'y rami omoingo pyre.) Ha'e ma sacerdote raka'e rā peve guarā oiko.*

Levi ramymino kuery sacerdote ikuai va'e gui Melquisedeque yvatevea re ijayvua

⁴ Peikuuaa pota ke ha'vy Melquisedeque yvatea re, mba'eta ixupe nhandeypy Abraão ome'ẽ raka'e dízimo huvixa kuery mba'e rei-reikue iporāve va'e guigua.

* 6:9 1 Tessalonicenses 1.2-4; 2 Pedro 1.5-10 * 6:14 Gênesis 22.17 * 6:18 "Mokoĩ mba'e oaxa rive e'ŷ va'erā" he'i, mba'eta Nhanderuete guery rupi ae ijayvu, ha'e oura guive. † 6:19 "Templo mbotya ajukue guigua" he'ia ma ombojeroviaaty ropy oĩ va'e re ijayvu vy, Henda iky'a e'ŷ ete va'e jaikea. Ha'e nunga omombe'u porāve capítulo 9 py. Ha'e rami avi apy ma ombojeroviaaty yva re oĩ va'e re ijayvu, 8.12 ha'e 9.11-12 py oĩa rami. * 7:3 Apy Melquisedeque pe "Cristo rami oiko va'ekue" he'i, mba'eta Antigo Testamento py nomombe'uai tuu, ixy, tamoĩ kuery, ituiague neĩ omanoague (Gênesis 14.17-20).

- ⁵ Ha'e gui Levi ramymino kuery regua sacerdote ikuai va'e ma lei re oĩ rami vy heta va'e kuery gui ojopy 'rã dízimo, guyvy kuery gui ae, Abraão ramymino ikuai avi va'eri.
- ⁶ Ha'e rã Melquisedeque ma ha'e kuery regua e'ŷ vy Abraão gui eteve voi ojopy raka'e dízimo, ha'e ogueroayvu porã guive Nhanderuete ijayvuague renduare.
- ⁷ Ha'e rami avi joegui yvateve va'e ogueroayvu porã 'rã yvyïve va'e, jaikuaa pavẽ.
- ⁸ Ko yvy re Levi ramymino kuery regua dízimo jopya ikuai va'e ma avakue omano va'erã meme. Ha'e rã Melquisedeque pe ma "Oikove va'e" 'ea.
- ⁹ Ha'e gui jaikuaa rã Levi voi dízimo ome'ẽ avi raka'e Abraão ome'ẽa py, aŷ hamymino kuery dízimo jopya ikuai va'eri,
- ¹⁰ mba'eta tamoi Abraão ma Melquisedeque rovaexi vy oo jave hete re Levi voi oĩ ae ma raka'e.

Levi ramymino kuery sacerdote ikuai aguã opa va'erã, ha'e rã Cristo ma opa va'erã e'ŷa re ijayvua

- ¹¹ Levi ramymino kuery sacerdote ikuai aguã ma heta va'e kuery lei ojopy va'ekue re oĩ. Ha'e rami avi Levi ramymino kuery opa mba'e gui nhandeky'a'opa va'e rire amboae regua sacerdote oĩ e'ŷ teī ha'eve 'rãgue. Ha'e va'e ma Arão ramymino e'ŷ, ha'e rã Melquisedeque reko rami heko va'e.
- ¹² Lei omboekoviaa ramo mae ma ha'eve amboae regua sacerdote oĩ aguã.
- ¹³ Mba'eta sacerdote ro'ea va'e ma amboae regua. Ha'e va'e regua ma avave rei altar rupi ombo'epo va'e'ŷ.
- ¹⁴ Mba'eta jaikuaa nhande-Senhor ma Judá ramymino oikoague. Ha'e va'e regua pe ma Moisés "Sacerdote oĩ va'erã" nde'i.
- ¹⁵ Ha'e rami teī jaikuaa porãve 'rã, mba'eta amboae regua Melquisedeque reko rami heko va'e sacerdote oĩ aguã ma ha'eve.
- ¹⁶ Ha'e va'e ma avakue pegua lei re oĩ rami e'ŷ omoña raka'e, ha'e rã hekove imarã e'ŷ va'e vy ipo'akapa va'e ramo.
- ¹⁷ Mba'eta Jesus pe "Ndee ma Melquisedeque reko rami sacerdote reī raka'e rã peve guarã", he'i.*
- ¹⁸ Ha'e ramia py omboyke yma ojapo uka pyre, mba'eta ha'e va'e ma ipo'aka e'ŷ ha'e mba'everã ovare'ŷ ramo.
- ¹⁹ (Mba'eta lei ma peteïve henda py nhandeky'a'o va'e'ŷ.) Ha'e gui oikuaa uka iporãve va'e nharõ aguã, ha'e va'e rupi Nhanderuete re nhanhemboja ete aguã.

Cristo anho'i sacerdote heko porã ete va'e oikoa re ijayvua

- ²⁰ Ha'e gui Nhanderuete ma sacerdote-rã Jesus omoi vy ndoura e'ŷi guive. (Amboae regua sacerdote kuery ma oura re'ŷ 'rã omoña.
- ²¹ Ha'e rã Jesus ma oura reve omoi, mba'eta ixupe "Senhor ouraague ndoaxa rivei 'rã, 'Ndee ma sacerdote raka'e rã peve guarã', he'ia py.")
- ²² Ha'e nunga rupi Jesus ma Nhanderuete reve guarã iporãve va'e oikuaa uka.
- ²³ Ymave rupigua sacerdote kuery ma heta ikuai raka'e, mba'eta peteï-teī omano vy noïvei 'rã.
- ²⁴ Ha'e rã Jesus ma raka'e rã peve guarã vy sacerdote opa e'ŷ re oĩ.
- ²⁵ Ha'e nunga rupi hexeve vy Nhanderuete re nhanhemboja va'e nhandereraa jepe 'rã opa mba'e gui, mba'eta oikove riae nhandere ojerure aguã.
- ²⁶ Anhetê ha'e va'e regua sacerdote yvateve va'e anho ha'eve nhandevy, iky'a e'ŷ va'e, heko vaia oĩ e'ŷ va'e, heko ky'a e'ŷ va'e, ojejavy va'e kuerya gui oipe'a pyre, ha'e yva áryve omboyvatea va'e.
- ²⁷ Sacerdote yvateve va'e mboae ikuai va'e rami e'ŷ Jesus noikotevõi ára nhavõ ha'e ae ojejavyague re ranhe mymba ome'ẽ aguã, ha'e gui mae ma amboae kuery ojejavyague re ju. Mba'eta peteïgue'i ha'e ae ojejuka uka vy ombogue raka'e jejavya.

* 7:17 Salmo 110.4

²⁸ Mba'eta lei re oĩa rami vy sacerdote kuery yvatekueve va'e ma ikangy va'e meme. Ha'e gui Nhanderuete lei oeja ma rire Gua'y ae omoĩ, oura reve ijayvuague rami vy. Ha'e rã Ta'y ma opa mba'e py heko porã va'e, raka'e rã peve guarã.

8

Jypygua guexeve guarã ojapo pyre qui Cristo rupi ou va'ekue iporâvea re ijayvua

¹ Ha'e gui aiporo'egue ma po rami: Nhandevyguia sacerdote yvateve va'e ma yva re oguapy raka'e Ipo'akapa va'e renda oiporu kuaa regua re.

² Ha'e py ma ojeupeguia kuery re ojerure oiny ombojeroviaaty iky'a e'ŷ ha'e anhetẽ ete va'e py, Senhor ae ojapo va'ekue py, avakue ojapo va'ekue py e'ŷ.

³ Mba'eta sacerdote yvateve va'e kuery ma mba'emo ome'ẽ aguã omoĩa, mymba ojuka aguã guive. Ha'e nunga rupi nhandevyguia sacerdote yvateve va'e voi oguereko avi ome'ẽ va'erã.*

⁴ Ha'e rami avi ko yvy re oiko teri va'e rire neĩ sacerdote voi ndoikoi 'rãgue, mba'eta ikuai 'rãe lei re oĩa rami vy mba'emo me'earã.

⁵ Ha'e va'e kuery omba'epo aguã ma yva re mba'emo oĩ va'e 'ã rami rive, Moisés ombojerovia atyrã ojapo aguã re Nhanderuete ijayvu vy aipoe'iague rami vy: "Ma'ẽ, ejapopa ke yvyty áry ndevy ha'angaa aexa uka va'ekue rami", he'iague rami.*

⁶ Ha'e nungakue gui aŷ Jesus mba'emo ojapo va'e ma ha'eveve, Nhanderuete reve guarã ogueru va'ekue voi ha'eveve, ayvu iporâve va'e rupi ogueru guive.*

⁷ Mba'eta hexeveguia jypy guare opa mba'e py ha'eve ete va'e rire ma amboae ju ogueru e'ŷ tei ha'eve 'rãgue.

⁸ Ha'e rami avi Senhor ndoguerovy'ai raka'e ymagua kuery. Ha'e vy aipoe'i: "Ma'ẽ, ou ma oiny ára xereve guarã ipyau va'e ju ajapo aguã Israel ha'e Judá kuery pe.

⁹ Peneramoĩ kuery pe ajapo va'ekue ramigua e'ŷ 'rã ajapo, ha'e kuery po re ajopy vy Egito yvy gui anoẽmba jave guare rami e'ŷ, mba'eta ha'e kuery ojepe'apa ma xereve guarã ajapo va'ekue gui. Ha'e rire ha'e kuery re xee napenavei ma 'rã", he'i Senhor.

¹⁰ "Ha'e gui raka'eve rã po rami 'rã ajapo xereve guarã pyau Israel kuery pe. Xee aipota va'e amoi 'rã ha'e kuery 'arandua re, ipy'a re ae 'rã ambopara. Xee aiko 'rã Tuuete, ha'e rã ha'e kuery ma xevyguia kuery 'rã ikuai", he'i Senhor.

¹¹ "Ha'e rami rire mava'eve nombo'evei 'rã oirũ neĩ guyvy kuery Senhor oikuua aguã re, mba'eta pavẽ 'rã xekuua, yvyigueve'i ha'e yvatekueve voi.

¹² Mba'eta amboaxy vy amboguepa 'rã heko vaiague, naxema'endu'avei ma 'rã ojejavague re", he'i.*

¹³ "Ipyau va'e" he'ia py oikuua uka jypy guare inhyma maa. Ha'e gui yma guare inhymamba va'e vy oaxa ta ma ový.

9

Ymave rupi mba'emo ome'ẽmby mba'everã ndovareiague re ijayvua

¹ Ha'e gui Nhanderuete jypy guexeve guarã ojapo va'ekue re oĩ heta va'e kuery ombojerovia aguã, ha'e ko yvy regua oo iky'a e'ŷ va'erã ojapo aguã guive.*

² Ha'e rami rã ojapopa raka'e ombojerovia atyrã. Ha'e gui opy jaikea py ma oĩ va'ekue tataendy 'y, mesa ha'e Senhor renonde mbojape omoĩ mbyre. Ha'e va'e henda pe ma "Henda iky'a e'ŷ va'e" 'eaague.

³ Ha'e gui ma peteĩ okẽ re ajukue mokoĩa oĩ va'e rovai ma ombojeroviaaty ropy ete oĩ, "Henda iky'a e'ŷ ete va'e" 'eaague.

⁴ Ha'e va'e pegua oĩ va'ekue ma peteĩ altar ouro guigua heakuã porã va'e rapyaty. Oĩ avi guexeve guarã Senhor ojapo va'ekue ryru, ouro py onhovãmba pyre. Ha'e va'e ryepy

* 8:3 Jesus ome'ẽ va'ekue ma nguguy ae (Hebreus 9.12). * 8:5 Êxodo 25.40 * 8:6 Lucas 22.20; 2 Coríntios 3.6-11 * 8:12 Jeremias 31.31-34 * 9:1 Êxodo 25.8-40

py oĩ va'ekue maná ryru ouro guigua, Arão popoka ipoty va'ekue, ha'e itape ayvu oeja va'ekue oĩa guive.

⁵ Hi'ary ma omopu'ã anjo ipepo va'e ra'angaa hexakãmba va'e. Ha'e kuery omo'ã hyru mbotya teko vai mbogue atyrã oĩ va'e. Ha'e nungakue ma aŷ nda'evei romombe'u porãve aguã.

⁶ Ha'e nunga ha'e javi oguerekó katupa ma rire sacerdote kuery ma opy ja'o oike ypya'i pyve oĩ va'e py oike jepi 'rã Nhanderuete pe mba'emo ome'ẽ aguã.*

⁷ Ha'e rã opyve ma sacerdote yvateve va'e ha'e ae'i 'rã oike, peteigue-igue'i ma'etýa nhavõ. Mba'emo ruguy reve 'rã oike ha'e ae ojejavvyague re ome'ẽ va'erã, ha'e gui heta va'e kuery oikuua vy e'ŷ ojejavvyague re ju.

⁸ Ha'e nunga py Nhe'ẽ Ky'a E'ŷ po rami oikuua uka: Ombojeroviaaty jypy guare ho'ame teria ja Henda iky'a e'ŷ va'e py jaike aguã nda'evei, mba'eta nhanhemboja aguã ndoikuua ukaai teri.

⁹ Ha'e nunga oejaa raka'e nhande aŷguia kuery jaikuua aguã, mba'eta ymagua kuery ombojerovia vy mymba ojuka ha'e mba'emo ome'ẽ teĩ ha'e nunga ma ipy'apy rupi ndoik'y'aoi raka'e opa mba'e vai gui.

¹⁰ Ha'e ramigua ojapo uka pyre ma ha'e kuery ro'o reguarã rive. Okaru, oy'u ha'e ojepoei aguã rive oeja, opa mba'e ombopyau aguã ára peve guarã.

Tuguy omoëa re ijayvua

¹¹ Ha'e gui ma Cristo ou vy sacerdote yvateve va'e rami ogueru mba'emo porã aŷ ojekuaa va'e. Ha'e rami vy ombojeroviaaty tuvixave ha'e iporãve va'e py oike, avakue opo py ojapo va'ekue py e'ŷ, mba'eta ko yvy regua e'ŷ ae.

¹² Kavara ha'e vaka ra'y ruguy e'ŷ guive ogueroike raka'e Henda iky'a e'ŷ ete va'e py, ha'e rã nguguy ae. Peteigue'i oike raka'e, araka'e rã peve guarã nhandereraa jepe ma rire.*

¹³ Mba'eta ymave rupi kavara ha'e vaka ruguy, ha'e gui vaka ra'y oapy pyre rugue ma onhemongy'a va'ekue áry omboayvi vy oiky'a oa 'rã hi'árykue rupi rive.

¹⁴ Ha'e gui Cristo ruguy katuve ma nhandeky'a'o 'rã, mba'eta Nhe'ẽ imarã e'ŷ va'e po'akaa rupi iky'a e'ŷ va'e vy ha'e ae ojejuka uka raka'e Nhanderuete pe ome'ẽ mbyrã. Ha'e rami vy nhandepy'apy rupi peve 'rã nhandeky'a'o, jajapo ve'ŷ aguã manoakaty nhandereraa arã nunga, Nhanderuete oikove va'e pe anho nhandekuai aguã.

¹⁵ Ha'e rami py Nhanderuete reve guarã ipyau va'e ogueru. Omano vy omboguepa raka'e jypy guare ayvu rupigua kuery ojejavvyague, Nhanderuete remienoí kuery ha'e javi oupity aguã mba'emo imarã e'ŷ va'e ijayvuague.

¹⁶ Mba'eta amongue omano ta vy joupe mba'emo oeja aguã re ijayvuague ma ijayvu va'ekue omano ramo anho 'rã ovare,

¹⁷ omano ma ramo mae ma ijayvuague oiko 'rã. Ijayvu va'ekue oikove teria ja peteive henda py ndoikoi 'rã.

¹⁸ Ha'e nunga rupi Nhanderuete jypy guare guexeve guarã ojapo vy omoë uka raka'e mba'emo ruguy.

¹⁹ Ha'e ramo Moisés ma heta va'e kuery pe lei regua ojapo uka pyre omombe'upa ma vy ogueru raka'e vaka ra'y ha'e kavara ruguy yy reve. Ha'e rami vy hissopo rogue ha'e vexa'i rugue omopytã mbyre omoaký vy omboayvi raka'e kuaxia para oĩ va'e ha'e heta va'e kuery ha'e javi re.

²⁰ Ha'e vy aipoe'i: "Kova'e tuguy py Nhanderuete ojapo guexeve guarã, ha'e va'e rupi pendekuai aguã", he'i raka'e.

²¹ Ha'ekue rami ae huguy py omboayvi avi ombojeroviaaty ha'e tembiporu opy rupi oiporu va'erã ha'e javi re.

²² Mba'eta lei re oĩa rami vy opa mba'e rai oiky'a oa 'rã tuguy py, mba'eta tuguy omoëa e'ŷ re nda'evei jejavya omboguea aguã.

Cristo omanoague araka'e rã peve guarã ovarea re ijayvua

* 9:6 Êxodo 30:10; Levítico 16:34 * 9:12 1 Timóteo 2,5,6

²³ Ha'e va'e nunga ma yva re mba'emo oĩ va'e kuaa ukaarã rive ome'ẽa, ha'e rami vy mymba ojukaa py 'rã oiky'a'oa. Ha'e rã yva re ete mba'emo oĩ va'e ma yvateve va'e ojukaa py 'rã oiky'a'oa.

²⁴ Mba'eta Cristo ma henda iky'a e'ŷ va'erã avakue opo py ojapo va'ekue py e'ŷ oike raka'e, mba'eta ha'e nunga ma anhetẽ va'e kuaa ukaarã rive ome'ẽa. Ha'e rami 'rãgue py yva re ete oike raka'e, aŷ peve Nhanderuete renonde ojexa uka vy nhandere ojerure aguã.

²⁵ Ojejuka uka jepi e'ŷ teĩ ha'eve guive, sacerdote yvatekueve va'e ma'etõa nhavõ henda iky'a e'ŷ ete va'e py mba'emo ruguy reve oike va'e rami e'ŷ.

²⁶ Mba'eta ha'e rami va'e rire yvy itui ypy'i guive mbovykue rei e'ŷ Cristo omano 'rãgue. Ha'e rami 'rãgue py aŷ ára ojeupity ramo peteigue'i ojekuaa, ha'e ae ojejuka uka vy jejavya ha'e javi oipe'apa vyvoi aguã.

²⁷ Mba'eta avakue renonderã omoia peteigue'i omano aguã, ha'e va'e rire imboayvuarã pe ojexa uka aguã.

²⁸ Ha'e rami ae avi Cristo voi peteigue'i ojejuka uka raka'e heta ojeavyague oipe'a aguã, ha'e va'e rire jejavya reve'ŷ ju 'rã ojekuaa, oo jepe aguã oarõ va'e kuery pe.

10

Mymba ojukaa ague rami e'ŷ Cristo omanoague re ijayvua

¹ Lei regua ma henonde re mba'emo porã ou oiny va'e 'ã rami rive, ou va'e ete e'ŷ.* Ha'e nunga rupi nda'evei 'rã opa mba'e gui oiky'a'o aguã mba'emo me'ẽa kuery, ma'etõa nhavõ mymba ome'ẽ jepi teĩ.

² Ha'e rami e'ŷ va'e rireombojerovia va'e kuery nome'ẽvei 'rãgue, mba'eta peteigue'i oiky'a'opaa va'e rire ipy'a ky'aa noenduvei ma 'rãgue.

³ Ha'e rami avi ma'etõa nhavõ mymba ome'ẽ aguã ma ojeavya re ima'endu'a jepi aguã rive,

⁴ mba'eta vaka ha'e kavara ruguy omoë mbyre ma ndoipe'ai 'rãe jajeavya.

⁵ Ha'e nunga rupi kova'e yvy re Cristo ou vy aipoe'i: "Mymba ojukaa pyre ha'e mba'emo ome'ẽmbi ma ndereipotai. Ha'e rami 'rãgue py xereterã rerekokatu.

⁶ Jejavya regua oapy reve ome'ẽa rã ndererovy'ai.

⁷ Ha'e nunga rupi aipoa'e: 'Ma'ẽ Xeruete, apy ma aĩ ndee reipota va'e ajapo aguã, (mba'eta kuaxia onhemama va'e re oĩ xerekorã)', ha'e", he'i.

⁸ Jypy aipoe'i: "Mymba ojuka pyre ha'e mba'emo ome'ẽmbi ndereipotai, mba'eta jejavya regua oapy reve ome'ẽa rã ndererovy'ai", he'i raka'e, lei re oĩ rami vy ome'ẽa va'e memeteĩ. Ha'e va'e rire

⁹ aipoe'ive ju: "Ma'ẽ Xeruete, apy ma aĩ ndee reipota va'e ajapo aguã", he'i. Ha'e rami vy jypy guare omomba raka'e, hekovia amboae ju omoi aguã.

¹⁰ Ha'e rami vy "Nhanderuete oipota va'e" he'ia rami vy nhandeky'a'o, Jesus Cristo guete reve peteigue'i ojejuka uka rire.

¹¹ Ha'e gui sacerdote kuery ikuai va'e ma ko'ẽ nhavõ ojexa uka 'rã Nhanderuete pe omba'eapo aguã, ha'ekue'i rami ae mymba ojukaa py, ha'e nunga neĩ peteigueve jejavya ndoipe'ai teĩ.

¹² Ha'e rã Jesus ma raka'e rã peve guarã peteigue'i ojejuka uka jejavya re, ha'e rire Nhanderuete oiporu kuaa regua re oguapy oiny.

¹³ Ha'e va'e rire oarõ oiny hovaigua kuery ipy guýry omoimba peve guarã.

¹⁴ Mba'eta peteigue'i ojejuka uka vy opa mba'e gui oiky'a'o raka'e ojeky'a'o uka va'e ha'e javi, raka'e rã peve guarã.

¹⁵ Ha'e ramigua Nhe'ẽ Ky'a E'ŷ voi oikuua uka, mba'eta jypy'i Senhor aipoe'i:

¹⁶ "Ha'e va'e ára rire ha'e kuery pe ajapo 'rã xereve guarã, po rami: Ha'e kuery py'a re amoï 'rã aipota va'e, hi'arandua re ae 'rã ambopara", he'i rire

* 10:1 Colossenses 2.16,17

¹⁷ aipoe'ive ju: "Ha'e kuery ojejavyague ha'e heko vaiague re peteīve henda py naxema'endu'avei ma 'rā raka'e rā peve", he'i.

¹⁸ Ha'e nungakue omboguepa ma rire mba'eve nanhame'ēvei ma 'rā jajejavyague re.

Nhanderuete re nhanhemboja, nhaī atā ha'e nhanhopytyvō aguā re ijayvua

¹⁹ Ha'e nunga rupi irmāo kuery, Jesus ruguy gui vy nhandepy'a guaxu Henda iky'a e'ŷ ete va'e py jaike aguā,

²⁰ mba'eta nhandevy pe ojapo tape pyau imarā e'ŷ va'e, ajukue okē regua rovai katy oo va'e. Ha'e va'e ma hete ae.

²¹ Nhandevy pegua sacerdote yvateve ete va'e oiko Nhanderuete pegua oo re opena va'e.

²² Ha'e ramo nhanhemboja tema peteī rupi nhandepy'a ha'e jajerovia ete reve, nhandepy'a oiky'a'opaa rire iky'aa oī va'ekue gui, ha'e nhanderete voi yy iky'a e'ŷ va'e py ojoi porāmbaa rire.*

²³ Nhanekangy e'ŷ re nhaī atā tema nharō va'e nhamombe'u jaikovy va'e re, mba'eta nhanemboaxy aguā re ijayvu va'ekue ma ojeroviapy.

²⁴ Peteī-teī nhanhopytyvō pota guive nhandeporayvu ha'e jajapo porāa rupi nhandekuai aguā.

²⁵ Japtyu'u eme nhanhemboatya gui, amboae kuery ikuiaia rami e'ŷ. Ha'e rami 'rāgue py nhanhombopy'a guaxu, hi'ára ovaē rai'ive ma ouvy rā jaexa vy katuve ma jajapove tema.

Ojejavy potae rei va'ekue ombopagaa 'rāa re ijayvua

²⁶ Mba'eta anhetē va'e jaikuua porā rire teī jajejavy potae reia rupi ri nhandekuai ramo jipovei ma 'rā jajajevyague re ome'ē mbyrā.

²⁷ Ha'e rami 'rāgue py jakyje reve 'rā nharō nhanemboayvuarā ha'e tata nhombopagaarā, hovaigua kuery mokanhayarā.*

²⁸ Mba'eta Moisés lei ombopara va'ekue amongue noenduxei ramo omboaxy e'ŷ re ojukaa 'rā raka'e, mokoī e'ŷ vy mboapy hekokue omombe'u rire.*

²⁹ Ha'e gui mba'exa tu peikuaa? Ha'e nungakue gui nombopaga vaipaave 'rā teve amongue Nhanderuete Ra'y re opyrōmba rei va'ekue? Mba'eta nombovarei Cristo ruguy, ha'e va'e py Nhanderuete guexeve guarā ojapoague rami vy oiky'a'o rire teī, ha'e ombojaru rei guive Nhe'ē nhanemboaxy kaua ukaa.

³⁰ Mba'eta jaikuua ae "Xee ae ajoepy ha'e anhombopaga 'rā" he'i va'ekue. Teīgue ju aipo'ea: "Senhor omboayvu 'rā ojeupegua kuery."*

³¹ Nhanderuete oikove va'e po py amongue ho'a rā nda'evei ete 'rā.

Yma guare re nhanema'endu'a, ha'e jaikoague repy jaupity aguā re ijayvua

³² Ha'e rami avi penema'endu'a ke yma guare re, mba'eta ayvu porā peikuaa rire pendere opu'āa rei rā pejexavai teī peī atā pekuapy raka'e.

³³ Amongue py pavē rembiexarā penemoña penembojaru rei ha'e pendererekaxy rei vy. Ha'e amongue py amboae kuery oguerekaxy rā ojexavai va'e kuery re penhemoirū va'ekue,

³⁴ nhuā py ikuai rā pemboaxy vy. Ha'e nunga anho e'ŷ, peē ae penemba'e rei-rei peipe'a ukapa va'ekue pevy'a reve, mba'eta mba'emo iporāve ha'e opa e'ŷ va'e perekoa peikuua.

³⁵ Ha'e nunga rupi pejepa eme pejeroviaa rupi pendekuaia gui, mba'eta ha'e nungakue repy iporā va'e oī.*

³⁶ Peī atā tema, Nhanderuete oipota va'e pejapopa ma rire peupity aguā ijayvuague.

³⁷ "Mba'eta are'ŷ'i re ou va'erā va'e ovaē 'rā, ndarei 'rā ou aguā.

³⁸ Ha'e rami avi xevygua heko porā va'e ma ojeroviaa rupi 'rā ikuai. Ha'e rā ha'ekue py ojevy ramo xee ndarovy'avei 'rā", he'i va'ekue.*

* 10:22 Romanos 5,1,2; Efésios 3,12; Hebreus 4,14-16

* 10:30 Deuteronômio 32,35-36, Salmo 135,14

* 10:27 Hebreus 6,4-8

* 10:35 Tiago 1,2-4, 12

* 10:28 Deuteronômio 17,6

* 10:38 Habacuque 2,3-4

³⁹ Ha'e rā nhande kuery ma okanhy aguā katy ojevy va'e regua e'ŷ. Ojeroviaa rupi ikuai va'e regua nhandekuai, onhe'ẽ omokanhy va'e'ŷ.

11

Jajeroviaa re ijayvua

¹ Ha'e gui jajeroviaa rupi vy jaikuua porā 'rā mba'emo nharō va'e anhetē ete oikoa, mba'emo jaexa e'ŷ va'e oikoa jaikuua.

² Mba'eta ymagua kuery voi ojeroviaa rupi vy oexa uka raka'e heko porā va'ea.

³ Jajeroviaa rupi vy jaikuua Nhanderuete oayvu py rive opa mba'e omoingo raka'eague. Ha'e rami vy mba'emo jaexa va'e ma jaexa e'ŷ va'e gui oiko va'ekue meme.*

*Jypy ombopara pyre re jaikuua pota aguā re ijayvua**Abel, Enoque ha'e Noé rekukue oña*

⁴ Abel ma ojeroviaa rupi oiko vy ome'ẽ raka'e guyke'y Caim ome'ẽ va'e gui iporāve va'e. Mba'emo ome'ẽ va'e Nhanderuete ojou porā ramo jaikuua heko porā va'ea. Ha'e nunga rupi omano ma rire teī aŷ voi ijayvu teri.*

⁵ Enoque ma ojeroviaa rupi oiko ramo heraa raka'e omano e'ŷ aguā rami. Nhanderuete ogueraa rire ndojouavei, mba'eta ogueraa e'ŷ mbove voi oexa uka Nhanderuete ombovy'a va'ea.

⁶ Ha'e rā jajerovia e'ŷ re ma nda'evei Nhanderuete nhambovy'a aguā, mba'eta Nhanderuete oikoa jarovia vy 'rāe nhanhemboja hexe, ha'e oeka va'e kuery pe mba'emo porā ome'ẽ 'rāa jarovia vy guive.*

⁷ Noé voi ojeroviaa rupi vy Nhanderuete gui oikuua raka'e mba'emo ojekuaa e'ŷ teri va'e oiko 'rāa. Nhanderuete renonde ojererokyjea rupi vy ojapo raka'e peteī kanoā guaxu ngoo pygua kuery ogueraa jepe aguā. Ha'e rami vy oikuua uka ko yvy regua kuery ombopagaa 'rāa, ha'e ojeroviaa rupi teko porā oupity aguā rami oiko.*

Abraão, Sara, Isaque, Jacó ha'e José rekukue oña

⁸ Ha'e gui Abraão ma ojeroviaa rupi oiko vy Nhanderuete oenoī rā onhe'ẽ rendu, ha'e rami vy oo peteī henda oyvyrā ojopy aguā katy. Marā katy pa ooa oikuua vy e'ŷ oo.

⁹ Ojeroviaa rupi oiko yvy ome'ẽ va'erā va'e rupi, oyvy re'ŷ rami. Oo'i py oiko raka'e Isaque ha'e reve. Ha'e va'e kuery voi hexeve ojopy avi 'rā oyvyrā ijayvuague.

¹⁰ Mba'eta oarō oikovy tetā ijyta porā va'e ojekuaa aguā. Ha'e va'e re onhembopy'a va'ekue ha'e ijapoare ma Nhanderuete ae.*

¹¹ Ta'xy Sara voi ojeroviaa rupi oiko vy imemby nho raka'e, guaimi'i ete ma va'eri. Mba'eta oikuua imemby aguā re ijayvu va'ekue ojeroviapy oikoa.*

¹² Ha'e nunga rupi peteī ava omanogue rami oiko va'e gui heta ikuai raka'e, yva re jaxy-tata ikuai va'e ha'e ye'ẽ yyýry ita ku'i ikuai va'e rami avi mbovy rei e'ŷ ikuai.

¹³ Ha'e va'e kuery ha'e javive ojeroviaa rupi ikuai reve omano raka'e, ome'ẽ va'erā va'ekue ojopy e'ŷ re. Ha'e nunga ma mombyry gui mba'emo oexaa rami rive oguerovy'a. Ha'e rami vy yvy mboae regua ikuia rami onhemombe'u, ha'e rā ko yvy rupi ma oguata rei va'e ikuia.

¹⁴ Ha'e rami ijayvu va'e kuery ma guekoarā oeka teria oikuua uka.

¹⁵ Tekoa oxēague re ima'endu'a riae va'e rire anhetē ojevy 'rāgue ha'e katy.

¹⁶ Ha'e rami 'rāgue py oeka oikovy guekoia iporāve va'erā, yva regua. Ha'e nunga rupi Nhanderuete noxī "Ha'e kuery Ruete" he'i aguā ojeupe, ha'e rami vy oguerekō katu ha'e kuery retārā.

¹⁷ Abraão ma Nhanderuete oeko a'ã ramo ojeroviaa rupi oiko vy ome'ẽ gua'y Isaque. Nhanderuete omoingo aguā re ijayvu rā oendu vy oguerovy'a va'ekue ri gua'y peteī'i va'e ojuka aguā rami oiko.

* 11:3 Gênesis 1.1; 2 Pedro 3.5 * 11:4 Gênesis 4.1-8 * 11:6 Gênesis 5.21-24 * 11:7 Gênesis 6.8-22 * 11:10

Gênesis 12.1-4 * 11:11 Gênesis 17.15-22

¹⁸ Mba'eta ixupe Nhanderuete “Isaque ra'y kuery pe ‘Neramymino kuery’ 'ea 'rā”, he'i va'ekue.*

¹⁹ Ha'e rami Abraão oiko mba'eta oikuua ta'y omanoague gui Nhanderuete omboete ju aguā voi ipo'aka va'ea. Ha'e rire omanoague gui oikove ju va'e rami ete avi ogueraa gua'y.*

²⁰ Ha'ekue rami ju Isaque voi ojeroviaa rupi oiko vy ogueroayvu porā gua'y kuery Jacó ha'e Esaú, ha'e rami vy omombe'u mba'emo oiko va'erā.*

²¹ Jacó ma ojeroviaa rupi vy omano ta ma vy ogueroayvu porā José ra'y kuery peteī-teī. Ha'e rami vy opopoka apy re onhemomburu reve opu'ā vy omboete Nhanderuete.*

²² José ma ojeroviaa rupi vy omano rai'i ma vy omombe'u Israel kuery oopa ju 'rāa, ha'e okāgue guive ogueraa uka.*

²³ Ha'e gui Moisés itui'i ramove tuu kuery ojeroviaa rupi ikuai vy mboapy jaxy re onhomí raka'e, mba'eta oexa rā kyrī va'e iporā. Ha'e rami vy ndokyjei huvixave ayvu rovai rupi ikuai aguā.*

Moisés rekukue oīa

²⁴ Moisés tuja ma rire ojeroviaa rupi vy ndoikoxevei Faraó rajy pi'a rami.

²⁵ Mba'eta ojejavy reia py xapy'a'i ov'y'a'rāgue py ojou porāve Nhanderuete pegua kuery reve ojerereko axy uka aguā.

²⁶ Mba'eta Cristo káuxa onhemoingo axy uka vy Egito pygua kuery oguerekopaa gui oguerekopave 'rāa oikuua, mba'eta oarō oikovy hekoviarā.

²⁷ Ojeroviaa rupi vy oeja ov'y Egito yvy, neī huvixa ipoxy ramo voi ndokyjei guive. Ha'e rami 'rāgue py oī atā, jaexa e'ŷ va'e oexa va'e rami.

²⁸ Ojeroviaa rupi vy ojapo raka'e ngaru Páscoa ára pygua, ha'e rami vy vexal'i ruguy omoē uka porojukaa oupity e'ŷ aguā Israel regua ra'y kuery tujakueve.*

²⁹ Ha'e kuery ojeroviaa rupi ikuai vy oaxa raka'e Ye'ẽ Pytā rupi, yvy pirua rupi ooa rami. Ha'e rā Egito pygua kuery ma oaxa aguā onhea'anga vy oy'upa.

Canaã yvy re Israel kuery ikuai jave guare re ijayvua

³⁰ Ha'e kuery ojeroviaa rupi ikuai ramo Jericó tetā kora ho'apa raka'e, sete ára re ombojere rire.

³¹ Ha'e gui Raabe voi kunha itavy rei va'ekue ri ojeroviaa rupi oiko vy omovaẽ porā raka'e avakue oikuua pota vy oje'oi va'ekue. Ha'e rami vy nokanhyi nhonhe'ẽ rendu e'ŷ va'e kuery reve.*

³² Ha'e gui nda'evei amombe'upave aguā. Mba'eta oata 'rāgue amombe'u aguā Gideão rekukue, Baraque, Sansão, Jefté, Davi, Samuel ha'e profeta kuery rekukue ha'e javi.

³³ Ha'e va'e kuery ma ojeroviaa rupi ikuai vy ipo'aka raka'e tetā ikuai va'e re, teko porā rupi joguereko, oupity mba'emo ome'ẽ 'rā va'ekue, omботy uka guary juru,

³⁴ ombogue uka tata guaxu, kyxe gui oo jepe, ikangya gui imbaraete ju, joe opu'āa py ipo'aka, ha'e amboae guigua xondaro kuery omonhamba.

³⁵ Kunhague ma hoo pygua omano va'ekue omboetea jeyv ramo ogueraa ju oikove va'e. Ha'e rā amboae kuery ma nonhemoẽ ukaxeí vy onhemoingo axy uka raka'e, onhemboete ju aguā iporāve va'e oupity aguā.

³⁶ Ha'e gui amboae kuery ju ombojarua rei rā ikuai axy rei, oinupāa, oipokuaa, ha'e nhuā py ombotya ramo.

³⁷ Ita py ojapipaa, omboayvua, yvyra kyxia py mbyte rupi ojaya, kyxe py ojukaa guive. Hoo e'ŷ va'e ikuai, vexal'i ha'e kavara pire py onhemonde, iporiau rei, ojexavai rei ha'e ojavykyaa rei.

* 11:18 Gênesis 21.12 * 11:19 Gênesis 22.1-18 * 11:20 Gênesis 27.1-40 * 11:21 Gênesis 48.10-16 * 11:22 Gênesis 50.22-26 * 11:23 Éxodo 2.1-15 * 11:28 Éxodo 12.1-28; 14.15-31 * 11:31 Josué 6.1-25

³⁸ (Ha'e va'e kuery rekoarā kova'e yvy nda'evei.) Tekoa e'ŷa rupi ikuai, yvyty, itakua ha'e yvykua oĩ va'e rupi.

³⁹ Ha'e va'e kuery ha'e javive ma ojeroviaa rupi ikuai vy oexa uka raka'e heko porā va'ea. Ha'e rami teĩ ndoupityi guive ome'ẽ 'rā va'ekue,

⁴⁰ mba'eta nhande kuery peguarā Nhanderuete oguerekō katu mba'emo iporāve va'e, nhande kuery reve vy anho ha'e kuery oupitypa aguā ijayvuague.

12

Cristo rami avi nhande voi nhaĩ atā aguā re ijayvua

¹ Ymagua kuery heta ojeroviaa oexa uka va'ekue ma arai tuvixa va'e rami nhanembo-jere okuapy. Ha'e ramo nhande voi ke nhandejegui nhamboipa ipoyikue oĩ va'e ha'e javi, nhandere jejavya oja ratā va'e guive. Ha'e rami vy nhaĩ atā reve nhanha tema nhanerenonderā omoĩ mbyre katy.*

² Nhamā'ẽ porā tema Jesus re anho, mba'eta ixugui ae ou jypy guive opa peve jajerovia aguā. Mba'eta ha'e ma henonderā imbovy'aarā omoĩ mbyre ojopy voi 'rāgue py oxī e'ŷ re ogueropo'aka raka'e kuruxu re oiko axya. Ha'e rire oguapy oiny Nhanderuete renda openaaty oiporu kuaa regua re.

³ Peikuaa pota porā ke ha'e rami ete heko vai va'ety kuery hexe opu'ã rei rā ogueropo'akaague re, penekangy e'ŷ aguā, neĩ pendep'y a py pendekuerai e'ŷ aguā.

Nhanemo'arandua py Nhanderuete nhanderayvua oexa ukāa re ijayvua

⁴ Mba'eta peẽ ma teko vai rovai penhea'ãa rupi penderuguy nomoẽai teri.

⁵ Ha'e penderexarai guive gua'y pe rami penemogetaa re: "Xera'y kuery, pembovare'ŷ eme Senhor penemo'arandu rā, pendekuerai eme guive pêvy ijayvu ramo.

⁶ Mba'eta Senhor omongoeta 'rā guembiaiyvu kuery, ha'e oinupā 'rā gua'yrā ogueru va'e ha'e javive", he'iague re.*

⁷ Ha'e nunga rupi penemoingo axya ma Nhanderuete penemo'arandu aguā oiko, gua'y kuery rami ae pendererekoy. Mba'eta jipoit a'y kuery tuu omo'arandu e'ŷ va'e.

⁸ Napenemo'arandui ri ramo penderu peikuaa e'ŷ va'e peiko, ta'y e'ŷ, mba'eta Nhanderuete omo'arandu 'rā gua'y kuery ha'e javi.

⁹ Nhanderu kuery ngo'o re ikuai va'e ma nhanemo'arandu rā nhanhe'ẽ rendu 'rā. Nhanenhe'ẽ Ruete katuve ma nhanhe'ẽ rendu 'rāgue, jaikove aguā.

¹⁰ Mba'eta nhanderu kuery nhanemo'arandu 'rā xapy'a'i guarā, ha'e kuery oikuaa rami. Ha'e rā Nhanderuete ma nhanemoingo porā aguā nhanemo'arandu, iky'a e'ŷa rami nhande voi nhandekuai aguā.

¹¹ Nhanemo'arandua nhavõ ha'e ramove'i nanhanembovy'ai 'rā merami, nhanemombo-riau ranhe. Ha'e rami teĩ nhanemo'arandupaa ma rire ojapo 'rā nhandekuai porā ha'e nhanderekoy porā aguā rami.*

¹² Ha'e nunga rupi pemombaraete ju ipo ho'a va'ekue ha'e henapy'ã kangy va'e kuery.

¹³ Pembo'yvi porā tape oguata aguā, okarau va'ekue okanhy 'rāgue py okuera aguā.*

Peteĩ rami nhandekuai, ha'e nhanderekoy ky'a e'ŷ aguā re ijayvua

¹⁴ Peteĩ rami pendekuai pavẽ reve, ha'e penhea'ã pendeko ky'a e'ŷa rupi, mba'eta ha'e rami e'ŷ vy avave rei ndoexai 'rā Senhor.

¹⁵ Peikuaa pota porā ke Nhanderuete omboaxya avave rei oupity e'ŷ re ojepe'a e'ŷ aguā. Toĩ eme guive iro va'e rapo rami ikuai va'e, mba'eta ha'e va'e henhoĩ vy penemoingo eta rei ha'e heta 'rā penemboeko ky'a.*

¹⁶ Penembyte rupi ta'ikuai eme heko ky'a va'e, neĩ ha'eve'ŷa rami ikuai va'e Esaú ramigua. Mba'eta ha'e va'e ma peteigüe'i okaru aguā re rive ovende raka'e ta'y jypyguia oikoa peguarā va'ekue.

* 12:1 Apy ma corrida re ombojoja Senhor pe nhandekuaia (Filipenses 3.12-14). * 12:6 Jó 5.17; Proverbios 3.11-12

* 12:11 João 15.1,2; Tiago 1.2-4; 1 Pedro 4.1,2 * 12:13 Proverbios 4.26 * 12:15 Deuteronomio 29.18

¹⁷ Ha'e va'e rire ma nguu pe ojereroayvu porā ukaxe teĩ nda'evei ae. Hexay reve onhea'ã teĩ ndojoupei ha'ekue py ojevy aguã.

Yvyty Sinai ha'e Sião re ijayvua

¹⁸ Ha'e gui peẽ ma yvyty tata haku raxy hendya py e'ŷ pevaẽ.[†] Pyávy rami pytūa py e'ŷ pevaẽ, neĩ ara vai oikoa py,

¹⁹ mimby guaxu onhendu ratã va'e oĩa py, neĩ ayvu atãa py e'ŷ pevaẽ. Ha'e va'e gui hendua kuery ojerure raka'e onhendu ve'ŷ aguã re,

²⁰ mba'eta ha'e kuery ndogueropo'akavei ma ijayvuague: "Mymba teĩ ae ma yvyty re onhemboja ramo tojapipaa ita py", he'iague.*

²¹ Anhetẽ ha'e nunga nhomondyipa ete ramo Moisés eteve voi "Akyje ha'e aryryipa reia aendu!" he'i raka'e.*

²² Ha'e rami 'râgue py peẽ ma Sião yvyty re pevaẽ, Nhanderuete oikove va'e pegua tetã, yva re Jerusalém oĩ va'e py. Pevaẽ anjo kuery mbovy e'ŷ ikuia py, ha'e nhemboaty iky'a e'ŷ va'ea py,

²³ igreja kuery jypyguia ta'y ha'e tajy kuery yva re hery ipara va'e ijatya py. Pevaẽ Nhanderuete pavẽ re oikuua pota va'erã oĩa py, ha'e penhemoirũ ma guive heko porã va'e kuery imoingo porãarã oupitypa ma va'ekue nhe'ẽ reve.

²⁴ Pevaẽ avi Nhanderuete reve guarã ipyau va'e Reruare Jesus oĩa py, ha'e huguy nhandeky'a'oarã omboayvi pyre oĩa py guive. Ha'e va'e ma Abel ruguy gui mba'emo iporãve va'e oikuua uka va'e.

²⁵ Ha'e nunga rupi pejapyxaka porã pota, ijayvua pendu rive'ŷ aguã. Mba'eta yvy re Nhanderuete ijayvu rã noenduxei va'ekue ndoo jepei rire nhande kuery katuve ma ndajaa jepei 'rã, yva gui nhandevy ijayvua gui jajepe'a ri vy.

²⁶ Ha'ekue py Nhanderuete ijayvu vy omomyi raka'e ko yvy. Ha'e gui aŷ ma ijayvu jevy vy aipoe'i: "Peteigue ju, teigue'i pyve amomyi 'rã yvy anho e'ŷ, yva guive", he'i.*

²⁷ Ha'e gui "Peteigue ju, teigue'i pyve" he'ia py jaikuua Nhanderuete oipe'apa 'rãa guembiaipo omomyi mbyrã oĩ va'e, omomyi mbyrã e'ŷ anho opyta aguã.

²⁸ Ha'e nunga rupi nhande ma nhaneretã omomyi mbyrã e'ŷ jareko vy nhaĩ atã tema nhanemboaxya re, mba'eta nhanemboaxya rupi Nhanderuete pe nhandekuai ramo nhandererovy'a 'rã. Henonde nhamboete ha'e jajererokyjea iky'a e'ŷ va'e rupi tema nhandekuai,

²⁹ mba'eta Nhanderuete ma tata nhomombaarã oiko.*

13

Jomeme nhandekuai porã aguã re ijayvua

¹ Pendekuai riae tema mborayvu re, joegua meme'i joavyua rami ae.

² Penhomovaẽ e'ŷ eme, mba'eta amongue ma oikuua vy e'ŷ anjo kuery ete omovaẽ raka'e.

³ Penema'endu'a tema nhuã py omboty pyre re, ha'e kuery reve peẽ voi peĩ avia rami. Penema'endu'a avi oguereko axya va'e re, peẽ voi ojavyky reipy peikoa rami.

⁴ Tomboete pavẽ omenda va'e kuery, ha'e iky'a e'ŷa rupi tajoguereko. Mba'eta Nhanderuete ombopaga 'rã heko ky'a ha'e itavy rei va'e ha'e javi.

⁵ Pendekuai eme peráta re nda'eveivea rupi. Mba'emo perekoi'i vy pevy'a, mba'eta Nhanderuete aipoe'i: "Peteive henda py xee ndoroejai 'rã, neĩ peteigueve ndoroayvu e'ŷi 'rã", he'i.*

⁶ Ha'e rami rire jakyjea py e'ŷ 'rã aipoja'e: "Senhor xepytyvõarã oiko ramo xee ndakyjei 'rã. Mba'e tu avakue ojapo 'rã xere?"*

* ^{12:18} Apy ma ijayvu judeu kuery yma guare Sinai yvyty katy'i ikuia py lei ojopy jave okyje rei okuapayague re. Ha'e va'e jave py Nhanderuete ma nhomondyipa rei va'e rami ojekuaa (Êxodo 19.9-25; 20.18-21; Deuteronômio 4.9-12).

* ^{12:20} Êxodo 19.12-13 * ^{12:21} Deuteronômio 9.19 * ^{12:26} Ageu 2.6 * ^{12:29} Deuteronômio 4.24 * ^{13:5} Deuteronômio 31.6 * ^{13:6} Salmo 118.6-7

Nhanderuete pe jaiko aguã re ijayvua

⁷ Penema'endu'a tema pendererekore kuery Nhanderuete ayvu mombe'uare rekoke re. Peikuua pota porã ha'e kuery omano peve ikuaiague re. Ha'e kuery ojeroviaague rami ke peẽ voi pendekuai.*

⁸ Jesus Cristo ma jypy guive aÿ peve ha'ekue ae oiko, ha'e raka'e rã peve guarã.

⁹ Opa marã ha'e amboae rami rei penembo'ea rã pendu rive. Mba'eta pavẽ gui ovareve va'e ma Nhanderuete nhanemboaxya re nhanhemombaraete aguã nhandepy'a py, tembi'u re rive'ÿ, mba'eta ha'e nunga re nda'eveive va'e kuery peteïve henda py ndoupityi 'rã imoingo porãarã.

¹⁰ Ha'e rã nhande kuery ma amboae regua altar jareko. Ha'e va'e gui ma ombojeroviaaty pygua kuery ho'u aguã nda'evei.

¹¹ Ha'e gui Henda iky'a e'ÿ ete va'e py sacerdote kuery yvatekueve va'e ogueroike 'rã mymba ruguy jejavya re, ha'e rã ho'okue ma tekaoa gui mombyry'i 'rã oapy.

¹² Ha'e rami ae Jesus voi tetã rokët gui mombyry'i oiko axy raka'e, nguguy py ae ojeupeguia kuery oiky'a'o aguã.

¹³ Ha'e nunga rupi oĩa py jaje'oi nhande voi, amboae kuery ikuiaia gui mombyrya py tei, Jesus káuxa nhanembojaru reia rã jaropo'aka vy.

¹⁴ Mba'eta anhetã apy ndajarekoi tetã oĩ riae va'erã, raka'eve rã ojekuaa va'erã va'e re nhanheaa'ã.

¹⁵ Ha'e rami vy Jesus rery rupi Nhanderuete pe nhame'ẽ riae 'rã jarovy'aa, nhandejuru py jaroporai hery.

¹⁶ Ha'e rami ae avi pejep'e a eme joupe pejapo porãha'e peteï-tei penhopytyvõa gui, mba'eta ha'e nunga ome'ẽmbi ma Nhanderuete oguerovy'a.

¹⁷ Penhe'ẽ rendu pendererekoa kuery, pendekuai ha'e kuery oipotaa rami, mba'eta penenhe'ẽ re opena, ha'e raka'eve rã oikuaa potaa 'rã openaague re. Ha'e rami rã ha'e kuery ov'y'aa rupi 'rã opena pendere, iporiaua rupi e'ÿ, mba'eta iporiaua ma mba'everã ndovarei 'rãgue pêvy.

Opaa py mba'emo re ojerureague

¹⁸ Pejerure tema orere, mba'eta ore roikuaa rã orepy'a ky'a e'ÿa rupi orekuaia, opa mba'e py ha'evea rami roikoxe vy.

¹⁹ Aipota pejerure ete pêa py xee aju voive aguã re.

²⁰ Ha'e gui Nhanderuete peteï rami nhanemoingo aguã nhande-Senhor Jesus omanoague gui omboete ju raka'e, ha'e huguy rupi ojapo guexeve guarã opa va'erã e'ÿ, ha'e omoi guive vexa'i kuery re opena va'erã yvateve va'e.

²¹ Tove tapenemoingo porã opa mba'e py, ha'e oipota va'e pejapo aguã rami. Tove peẽ kuery re tomoi imbovy'aarã pejapo aguã, Jesus Cristo rupi ae. Jesus toguerovy'aa raka'e rã peve. Amém.

²² Irmão kuery, ajerure pendu porã aguã kova'e ayvu ipuku e'ÿ'i va'e romongetaa rupi ambopara va'ekue.

²³ Pêvy amombe'u irmão Timóteo nhuã gui opoia jevy maa. Xapy'a rei ha'e va'e xea py ovaẽ voi ramo hexeve roo 'rã roexa vy.

²⁴ Pemombe'u ke pendererekoa kuery ha'e javive pe roxaruraa, iky'a e'ÿ va'e kuery ha'e javi pe guive. Itália pygua kuery oxarura uka avi pendevy.

²⁵ Tove peẽ kuery ha'e javive tapendu penemboaxya.

* 13:7 1 Tessalonicenses 5.12,13

Tiago ombopara va'ekue Tiago ombopara va'ekue

Kova'e kuaxia rupi Jesus ryvy Tiago omongeta hemimbo'e kuery. Ha'e rami vy ijayvu Jesus re jajeroviaaa jaexa uka aguā mba'emo jajapoa py.

Mba'eta "Irmão kuery, nhande-Senhor Jesus Cristo hexakāmba va'e re pejerovia vy peteī regua rive joegui peayvuve eme" (2.1), "nda'evei pejejou porā rei aguā, neī anhetē va'e rovai pendeapu aguā guive" (3.14). Ha'e rami 'rāgue py Nhanderuetea gui arandu ou va'e re 'rā nhandekuai. Mba'eta "yvate guigua 'arandua ma jypy'i nhandeapo 'rā nhanderekō ky'a e'ŷ aguā rami, ha'e gui nanhandevai rive-rivei 'rā, mborayvu re nhandekuai, ha'eve vai'i va'e 'rā jaiko, ha'e opa mba'e py nhomboaxy ha'e nhopytyvō va'e, peteī regua joegui ndajayvuvei 'rā, nanhanderekō porā merami rivei 'rā guive" (3.17). Ha'e rami vy 'rāe jaexa uka Jesus re jajeroviaaa.

Oxarura reve ijayvu aguā omboypyague

¹ Xee Tiago ma Nhanderuete ha'e Senhor Jesus Cristo rembiguai aiko.* Axarura doze regua opa rupi pendekuai va'e pe.

Nhanderekō a'āa rire iporā va'e oiko va'erā re ijayvua

² Irmão kuery, opa marā penderekō a'āa rā pevy'a ete ke,

³ mba'eta peikuaa pejeroviaaa a'āarā oiko va'e peaxapa ma rire peī atāve 'rāa.

⁴ Ha'e gui peī atāa tojapopa ojapo 'rā va'ekue, peē kuery opa mba'e py penderekō porā aguā, peteīve henda py iporā va'e oata e'ŷ re.*

Nhane'arandurā re jajerure aguā re ijayvua

⁵ Ha'e gui amongue 'arandurā oata ramo tojerure Nhanderuete pe. Ha'e ramo ome'ẽ 'rā, mba'eta ivai e'ŷ re 'rā mba'emo ome'ẽ pavē pe.

⁶ Ha'e rami avi ojeroviaaa rupi tojerure, peteīve henda py toī eme oexa'ā reia.* Mba'eta ndojerovia porāi va'e ma yai yvytu ogueraa rupi rei omomy-momyī va'e rami ikuai.

⁷ Ha'e ramigua avakue toexa'ā eme Senhor gui mba'emo ojopy aguā re,

⁸ mba'eta mokoī rami rei oikuaa va'e vy mamo rā oikoa rupi nai'arandui rei 'rā.

Mba'emo ko yvy regua okanhymba 'rāa re ijayvua

⁹ Irmão kuery yvyī'igueve va'e ma toguerovy'a Nhanderuete ombovatea re.

¹⁰ Ha'e rā oguerekopa va'e ma omo'yvyī'ia re toguerovy'a, mba'eta jai poty rami rive 'rā okanhý.*

¹¹ Mba'eta kuaray ojope ratā reve ou ramo jai ipiru rā ipoty okuipa 'rā. Jaexa rā iporāague ndojekuaavei 'rā. Ha'e rami ae oguerekopa va'e voi okanhý 'rā mba'emo re opena rupive.

Jejavya re ijayvua

¹² Ovy'a ete 'rā avakue oeko a'āa rā oī atā reve ogueropo'aka va'e, mba'eta oaxapa rire coroa-rā oupity 'rā tekove. Ha'e va'e ma guembiyvu kuery pe Senhor ome'ẽ aguā re ijayvu.

¹³ Ha'e rami teī avave rei omoangekoa rā "Nhanderuete xemoangeko" te'i eme. Mba'eta Nhanderuete ma mba'emo vai pe onhemoangeko uka va'e'ŷ, neī nanhanemoangekoi 'rā mava'eve rei.

¹⁴ Ha'e rami 'rāgue py peteī-teī nhande ae jaipotapa reia py nhanhemoangeko uka. Ha'e nunga py ae nhanhembotavy uka ha'e jajeity uka.

¹⁵ Mba'eta jaipotapa reia ma nhandejee nhamoī rire nhanemoingo 'rā jajejavvy aguā rami. Ha'e gui jajejavvy ma opaa py ojapo 'rā nhamano aguā rami.

* 1:1 Atos 15.13; Gálatas 1.19, 2.9,12 * 1:4 Romanos 5.3,4; 1 Pedro 4.12-14 * 1:6 Mateus 21.22 * 1:10 1 Pedro 1.24,25

Iporã va'e me'ëa re ijayvua

¹⁶ Irmão kuery xerembiayvu, pejekore eme.

¹⁷ Mba'eta yvate gui meme ou mba'emo porã iky'a e'ÿ va'e, Nhanderuete hendy va'e moingoare va'e ae ombou.* Ixupe ma jipo amboae rami rei imoingoarã, neñ kuaray'ã rami rive herovaarã.

¹⁸ Mba'eta ha'e ae oipotaa rami vy gua'y kueryrã nhanemoingo raka'e ayvu anhetẽ va'e rupi, hemimoingo kuery ha'e javi gui nhande ranhe ixupeguai nhandekuai aguã.

Nhanderuete ayvu rupi nhandekuai ete aguã re ijayvua

¹⁹ Irmão kuery xerembiayvu, ha'e nunga peikuaapa ae ma. Ha'e rami avi peteñ-teñ penhea'ã penembo'ea rã pejapyxaka porã aguã. Ha'e rã pendeayvu voi eme, neñ pendevai voi eme guive.

²⁰ Mba'eta avakue ivaia py ndoexa ukai 'rã Nhanderuete guigua teko porã.*

²¹ Ha'e nunga rupi pendejegui pemboi nda'evei va'e ha'e teko vai pendere oĩ va'e ha'e javi. Ha'e penhemmo'yvy'i reve pendu ete ayvu porã pendere omoñ mbyre, mba'eta pendereraa jepe aguã ipo'aka va'e.

²² Ha'e rami vy ayvu ojapo ete va'e peiko, oendu rive va'e'ÿ, peñ ae pejekore e'ÿ aguã.*

²³ Mba'eta ayvu oendu rive vy ha'e rupi ndoikoi va'e ma epéko re peteñ ava ojexa rive va'e rami,

²⁴ mba'eta ojexa ma vy ojep'e vyve marã rami pa ojekuaa ague re hexaraipa vyvoi 'rã.

²⁵ Ha'e rã lei opa mba'e gui nhanemoingo porã va'e re amongue oikuua pota ete ha'e ojapoa rupi oĩ atã va'e ma omoingo porãa ete 'rã mba'emo ojapoa rupi rei, mba'eta oendu rive va'e'ÿ, ojapo ete va'e oiko rã.

²⁶ Ha'e rã amongue ojeupe "Nhanderuete pegua" he'i teñ oayvu py ndojejokoi va'e ma oþy'a py ae ojekore, ha'e Nhanderuete pe merami rive oiko.

²⁷ Ha'e gui Nhanderuete renonde nhanderekoy ky'a e'ÿa ha'e anhetẽ rupi nhandekuai vy jaipou 'rã tyre'ÿ ha'e imeve'ÿ va'e kuery ojexavai rã, ha'e jajejoko 'rã yvy regua reko rupi nhanderekoy ky'a gui.

2

Peteñ regua rive joegui jayvu ve'ÿ aguã re ijayvua

¹ Irmão kuery, nhande-Senhor Jesus Cristo hexakãmba va'e re pejerovia vy peteñ regua rive joegui peayvuve eme.*

² Xapy'a rei penhembo'eaty py peteñ ava oike 'rã kuã regua ouro guigua ha'e onhemonde porã reve. Ha'e gui amboae ju oike avi 'rã iporiaukue'i, ao ymague py rive onhemonde va'e.

³ Xapy'a rei onhemonde porã va'e peroryxe vy "Apy ke eguapy tenda iporãve va'e py" peje 'rã. Ha'e rã iporiaukue'i pe ma "Ndee, epu'ã he'amy upe py, ha'e'ÿ vy eguapy apy xepy renda yvýry" peje 'rã.

⁴ Ha'e ramia py peteñ regua rive'ÿ ri ty'y joegui peayvuve? Ha'eve'ÿa rami e'ÿ ri ty'y joeko re peikuaa pota?

⁵ Irmão kuery xerembiayvu, pendu ke. Ko yvy regua kuery "Iporiaukue'i" he'ia va'e regua e'ÿ teve Nhanderuete oiporavo ojerovia ete aguã? Ha'e kuery va'e regua pe e'ÿ teve ouputy uka opo'akaa? Mba'eta guembayvu kuery ha'e javi peguarã oguerekoy.

⁶ Ha'e rã peñ kuery ma napemboetei pekuapy iporiaukue'i. Ha'e rami avi oguerekopa rei va'e kuery e'ÿ ri ty'y penemoingo axy rei? Ha'e kuery e'ÿ ri ty'y penemboayvua aguã katy pendereraa va'e?

⁷ Ha'e kuery e'ÿ ri ty'y tery porã pendere omoñ mbyre re ijayvua rei va'e?

⁸ Lei re ipara oĩ va'e "Reayvu 'rã neirã ndee ae rejeayvua rami" he'ia pejapopa ri vy ha'evea rami pendekuai.*

* 1:17 2 Pedro 1.3,4 * 1:20 Romanos 12.17-21; Efésios 4.26-32 * 1:22 Mateus 7.24-27; 1 João 2.3-6 * 2:1 1
Timóteo 5.21 * 2:8 Levítico 19.18

⁹ Ha'e rā peteī regua rive joegui peayvuve ri vy pejejavy. Lei rupi e'ŷ pendekuai vy heko vai va'e pepyta.

¹⁰ Mba'eta lei re oĩ va'e ha'e javi amongue ojapopa teī peteī henda'i py mba'e ho'a vy ha'e javi py onhemboeko ky'a.

¹¹ Mba'eta "Ndetavy eme" he'i va'ekue ae "Ejojuka eme" he'i avi. Ha'e ramo nandetavy rei va'eri rejojuka vy lei rovai rupi reiko.*

¹² Ha'e nunga rupi pendeayvu ha'e pendekuai ke jaa jepe aguã regua lei rupi, mba'eta ha'e va'e rupi ae 'rā nhandere oikuua potaa.

¹³ Mba'eta nanhanhomboaxyi rire nhanemboaxy re'ŷ ju 'rā nhanembopaga. Ha'e rā nhomboaxy va'ekue ma nhombopagaa aguã ára py ipo'aka 'rā.

Jajerovia jaexa uka aguã re ijayvua

¹⁴ Irmão kuery, mba'erā tu ovare amongue "Xee ajerovia" he'i teī ojeroviaa mba'eve py ndoexa ukai ramo? Ha'e rami ojeroviaa rupi nda'u oo jepe 'rā?

¹⁵ Xapy'a rei peteī irmão e'ŷ vy irmā nda'ijaoi ha'e tembi'u ndoguerokoi rā

¹⁶ peē kuery regua pexa vy onheovā aguã napeme'ēi e'ŷ re "Peiko porā ke, penhemonde ha'e pekaru", peje 'rā. Mba'erā tu ovare 'rā ha'e rami pendeayvua?

¹⁷ Ha'e rami ae avi jajeroviaa voi mba'eve py ndajaexa ukai ri ramo omanogue rami rive opytā, hexa ukaarā noī avi rā.*

¹⁸ Xapy'a rei amongue aipoe'i 'rā: "Peteī ojerovia 'rā, ha'e rā amboae ma onhea'ā 'rā mba'emo ojapoa rupi", he'i 'rā. Exa uka ha'vy rejeroviaa mba'emo rejapo e'ŷ re. Ha'e rā xee ma aexa uka 'rā ajeroviaa mba'emo ajapoa py.

¹⁹ Ndee rerovia teve Nhanderuete peteī'i oikoa? Ha'evea rami reikuua teī anha kuery voi ha'e rami oguerovia oryryipa reve.

²⁰ Ha'e gui ava hi'arandu e'ŷ va'e, reikuua porāxe teve jajeroviaa ndajaexa ukai ramo mba'everā ndovareia?

²¹ Nhaneramoī Abraão nda'u ojerovia etea oexa uka e'ŷ re ri omboeko porāa raka'e? Mba'eta altar áry gua'y Isaque ome'ē aguã rami oiko.

²² Ma'ē, ojerovia ete ha'e oexa uka guive, mba'eta mba'emo ojapoa py oexa uka ojerovia etea.

²³ Ha'e rami vy ae ojeupity ipara re oĩ va'e: "Abraão ojerovia Nhanderuete re. Ha'e ramo ojeroviaa re omoī tekō porā" he'iague. Ipara avi oiny: "Ixupe 'Nhanderuete irū' 'ea."*

²⁴ Ha'e rami rire jajerovia jaexa uka ramo mae 'rā nhanemboeko porāa, jajeroviaa re rive'ŷ.

²⁵ Raabe itavy rei va'ekue voi ojeroviaa oexa uka ramo omboeko porāa raka'e. Mba'eta ha'e va'e ma oikuua pota aguã ombou pyre kuery omovaē raka'e, ha'e gui amboae tape rupi ju omondouka guive.

²⁶ Mba'eta nhanenhe'ē reve'ŷ vy nhanderete omanogue itui. Ha'e rami ae avi jajeroviaa voi xapy'a rei mba'eve py jaexa uka e'ŷ ramo omanogue ae avi opytā.

3

Nhaneapekū nhanemboeko vaia re ijayvua

¹ Irmão kuery, nda'evei peē kuery heta peiko aguã porombo'ea, mba'eta jaikuaa porombo'ea kuery rekoke re oikuua potaa poive 'rāa.

² Mba'eta nhande kuery ha'e javive 'rā jajeity uka opa mba'e py. Oayvu py ndojejavyi va'e ma opa mba'e py 'rā heko porā, ha'e guete regua ha'e javi guive ojoko kuaa.

³ Kavaju re minha ijuru xā nhamoī 'rā jaipotaa rami jareko aguã. Ha'e rami vy hete ha'e javi 'rā jaaxeia rupi jaraa.

⁴ Peikuua pota avi kanoã guaxu ikuai va'e re. Ha'e nunga ma tuvixa ete, ha'e hexe yvytu oipeju atā teī imbojeapaa kyrī'i va'e py imboguataa kuery ogueraaxeia katy rei 'rā ogueraa.

* 2:11 Éxodo 20.13-14, Deuteronômio 5.17-18

* 2:17 Lucas 3.8-14; Atos 26.20

* 2:23 Gênesis 15.6

- ⁵ Ha'e rami ae avi nhaneapekũ, mba'eta nhanderete regua kyrĩ'i va'eri onhemboyvate reia rupi 'rã ijayvu, peteĩ tata ravijukue'i ka'aguy tuvixa va'e omoendypaa rami avi.
- ⁶ Mba'eta nhaneapekũ voi tata ramigua, ha'e nhanderete regua ikuai va'e mbyte py oĩ opa marãguia teko vai rexâ ukaarã. Nhanemboeko ky'apa 'rã. Tata ogue'ŷ va'e omoendy rire oapy avi 'rã jaikoa ha'e javi.
- ⁷ Mba'eta mymba ikuai va'e minha nhamomãxo kuaa 'rã: guyra, yvy rupi otyryry va'e ha'e yy rupigua ha'e javive regua ma nhamomãxo va'e meme.
- ⁸ Ha'e rã nhaneapekũ ma avave rei ndojoko kuaai 'rã. Teko vai moingoa ojoko pyrã e'ŷ oĩ, ha'e veneno rami jojuka 'rã guive.
- ⁹ Nhaneapekũ py jaroayvu porã 'rã Senhor Nhanderuete. Ha'e va'e py ae ju 'rã nhandeayvu vai avakue Nhanderuete ojee rami omoingo va'ekue re.
- ¹⁰ Nhandejuru peteĩ'i va'eri ayvu porã ha'e ayvu vai rupi ijayvu. Irmão kuery, ha'e nunga ma nda'evei.*
- ¹¹ Yvu peteĩ'i oĩ va'e gui nda'u oẽ 'rã yy porã ha'e iro va'e avi?
- ¹² Irmão kuery, figo rembypy gui nda'u oiko 'rã azeitona? Ha'e rami e'ŷ vy uva'y gui nda'u oiko 'rã figo? Ha'e rami ae avi peteĩ yvu gui noẽi 'rã yy he'ẽ ro ha'e iporã va'e.

'Arandua yvate guigua re ijayvua

- ¹³ Peẽ kuery va'e regua mava'e nda'u hi'arandu ha'e oikuaapa va'e pendekuai? Pene'arandua pexa uka ha'vy pendevai reia rupi e'ŷ, ha'evea rami anho pendekuaia py.
- ¹⁴ Ha'e rã xapy'a rei pendepy'a re joe napenda'e'i reia ha'e peẽ ranhexea oĩ ramo nda'evei pejejou porã rei aguã, neĩ anhetẽ va'e rovai pendeapu aguã guive.
- ¹⁵ Ha'e ramigua pexa uka va'e ma yvate guigua 'arandua e'ŷ. Ha'e ramigua ma yvy regua, mymba kuery oendu va'e ramigua rive, anha guigua ae.
- ¹⁶ Mba'eta joe nda'ija'e'i ha'e ha'e ranhexe va'e ikuaiia py oĩ avi 'rã joo rami e'ŷ-e'ŷ ikuai va'e ha'e opa marãguia teko vai.
- ¹⁷ Ha'e rã yvate guigua 'arandua ma jypy'i nhandeapo 'rã nhanderekoo ky'a e'ŷ aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderekoo porã merami rivei 'rã guive.*
- ¹⁸ Mba'eta peteĩ rami nhomoingoa kuery ma oma'etõ va'e rami avi peteĩ rami nhomoin-gague rupi ojou 'rã heko porã va'e.

4

Joguero'a reia re ijayvua

- ¹ Magui tu ou joe pepu'ã ha'e pejoguero'a reixeia? Pendepy'apy py mba'emo re nda'eveivea pendu va'e gui e'ŷ teve ou?*
- ² Mba'eta mba'emo peipota teĩ ndapejoui vy pejojukaxe. Mba'emo re nda'eveive peiko teĩ ndapejoui vy pejoguero'a rei ha'e joe pepu'ãa rupi pendekuai. Mba'eve ndapejoui mba'eta ndapejerurei.
- ³ Pejerure vy voi ndapejopyi, mba'eta ha'eve'ŷa ramigua re pejerure, peẽ ae peipotaa rami pendekuaixe vy.
- ⁴ Nhanderuete pe merami rive pendekuai va'e, ndapeikuaai ri ty'y ko yvy regua re peo vy Nhanderuete rovaigua pepytaa? Mba'eta ko yvy regua re ooxe va'e rei Nhanderuete rovaigua oiko.
- ⁵ Tyrã pa pexa'ã ipara re oĩa oaxa rive 'rãa re? Mba'eta "Nhandere Nhanderuete Onhe'ẽ omoĩ va'ekue oipota hexe anho jaa", he'i va'ekue.
- ⁶ Ha'e rami teĩ nhanemboaxyve ju 'rã, mba'eta aipoe'i avi: "Nhanderuete opu'ã 'rã onhemboyvate rei va'e re, ha'e rã onhemo'yvy'i va'e ma omboaxy 'rã."*

* 3:10 Efésios 4.29 * 3:17 Gálatas 5.19-26 * 4:1 Tiago 3.14-16 * 4:6 Provérbios 3.34

⁷ Ha'e nunga rupi penhemo'yvy'i ke Nhanderuete oipotaa rami. Ha'e rā anha pe ma pejeity uka eme. Ha'e ramo ojava 'rā pendegui.

⁸ Penhemboja ke Nhanderuete re. Ha'e ramo ha'e ju onhemboja 'rā peē kuery re. Pejejavypa va'e, peiky'a'o uka ke pendepo. Mokoī rupi rei pendepy'a va'e, peiky'a'o uka pendepy'a.

⁹ Pendu ke penhemboaxya, ha'e rami vy peneraxē ha'e pejae'o. Penderory rei 'rāgue py pendepy'a vai, pevy'a rei 'rāgue py pendeporiau.

¹⁰ Penhemo'yvy'i ke Senhor renonde. Ha'e ramo penemboyvate ju 'rā.

Joe nhandeayvu rei e'ŷ aguã re ijayvua

¹¹ Irmão kuery, pendeayvu rei eme joe. Mba'eta irmão kuery re ijayvu rei, e'ŷ vy oikuua pota rei va'e ma lei re voi ijayvu ha'e oikuua pota rei. Ha'e gui lei re peikuua pota rei vy lei rupi ve'ŷ pendekuai, ha'e rā lei re peikuua pota reia rupi rive.

¹² Mba'eta pete'i oiko lei mbouare ha'e joe oikuua pota va'erā. Ha'e va'e ma jogueraa jepe ha'e nhomokanhy aguã ipo'aka va'e. Ha'e rā ndee, marā ramigua tu reiko, neirū kuery re reikuua pota rei aguã?*

Tenonde oiko va'erā ndajaikuuaia re ijayvua

¹³ Peē kuery va'e regua "Kova'e ára, e'ŷ vy ko'ẽ rā roo 'rā tetā re. Petei ma'etŷ re 'rā roiko ha'e py. Mba'emo romboekoviaa rupi rojoupa 'rā", peje. Ha'e ramo pejapyxaka porā pota ke aŷ.

¹⁴ Mba'eta peē ndapeikuuaai nei ko'ẽ rā mba'e pa oiko 'rāa voi.* Marā ramigua tu peikovea? Mba'eta yvyxī xapy'a'i ojekuua, ha'e gui are'ŷ'i re okanhy va'e rami peiko.

¹⁵ Ha'e rami 'rāgue py "Senhor oipota ramo roikove, ha'e rojapo 'rā ha'e nunga", peje aguã ha'eveve.

¹⁶ Ha'e rami tei aŷ ma mba'emo tuvixa va'e pejapo aguã re pendeayvua rupi penhemboyvate rei. Ha'e rami nhanhemboyvatea ha'e javi ma teko vai.

¹⁷ Ha'e nunga rupi iporā va'e ojapo aguã oikuua tei ndojapoi va'e ma ojejavy.

5

Ojeupe guarā rive ojou pyre Nhanderuete omomba aguã re ijayvua

¹ Perekopa rei va'e kuery, pejapyxaka ke aŷ. Pejae'o ha'e pendepy'a vai ke, mba'eta penembojexavaiarā ou.*

² Mba'emo perekova'e ma hu'umba 'rā, vixo ho'upa 'rā pendeao,

³ ha'e ouro, prata perekova'e voi opa 'rā iky'apa vy. Iky'akue pavē oexa vy oikuua 'rā napene'aranduia. Ha'e nunga ma tata rami 'rā ombovaipa pendero'o. Opaa ára py tei penemba'e rei-reirā rive pemono'ō.

⁴ Ma'ẽ, ombo'eapo va'e kuery pe napeme'ẽi penhotŷ va'ekue omono'ðague repy, pekorepa rei rire ojapukai okuapy. Ha'e kuery ojapukaia ma Senhor Ixonitaro reta va'e oendua peve onhendu.

⁵ Perekopa va'ekue ko yvy re, pevy'aa rupi rive pendekuai. Penemombaa ára py tei penekuraxō py voi penhemongyra rive.

⁶ Heko porā va'e kuery ma pendere ha'e kuery nopus'āi tei pembopaga uka, ha'e pejuka uka guive.

Jajapura rei e'ŷ aguã re ijayvua

⁷ Ha'e nunga rupi irmão kuery, Senhor ndoui teria ja pejapura rei eme. Ombo'eapo va'e voi ojapura e'ŷ re oarō 'rā okuapy oky jypy'igua ha'e opa vygua ho'a ramo onhotŷ va'ekue hi'a porā aguã.

⁸ Peē voi pejapura rei eme. Penembaraete ke penekuraxō py, mba'eta namombyryvei ma Senhor ou aguã.

* 4:12 Mateus 7.1-5; Lucas 6.37; Romanos 2.1-3; 1 Coríntios 4.5 * 4:14 Lucas 12.15-21 * 5:1 1 Timóteo 6.9,10

⁹ Irmão kuery, pendeayvu eme joe, penembopagaa e'ŷ aguã. Ma'ẽ, nhandere oikuaa pota va'erã ovaẽ ma okẽ py.

¹⁰ Irmão kuery, peiko axy teĩ pejapura eme, profeta kuery Senhor rery rupi ijayvu va'ekue ikuaiague rami avi.

¹¹ Amongue ojapura e'ŷ re mba'emo ogueropo'aka ramo jaikuaa ovy'a 'rãa. Mba'eta pendu ma Jó teko axy ogueropo'akaague, peikuaa avi opaa py Senhor omoingo porãague, opa mba'e py nhanemboaxy ha'e nhanderayvu va'e vy.*

Jaura e'ŷ aguã, ha'e jajerure aguã re ijayvua

¹² Ha'e gui irmão kuery, opa mba'e gui yvateve va'e ma po rami: Peura eme yva re, yvy re, neĩ amboae nunga re rei. Ha'e rami 'rãgue py "Tá" peje aguã py "Tá" peje, ha'e "Any" peje aguã py "Any" peje, penembopagaa e'ŷ aguã.*

¹³ Peẽ kuery mbyte ikuai teve ojexavai va'e? Tojerure ha'vy Nhanderuete pe. Ikuai teve ovy'a va'e? Toporaei ha'vy.*

¹⁴ Penembyte ikuai teve imba'eaxy va'e? Tenoĩ ha'vy igreja re opena va'e kuery, ha'e va'e kuery Senhor rery rupi azeite oikyty reve ojerure aguã.

¹⁵ Ha'e gui ojeroviaa rupi ojerure ramo imba'eaxy va'e okuera 'rã, Senhor ae omopu'ã ju 'rã. Ojejavyague oĩ ramo ombogue 'rã guive.

¹⁶ Ha'e nunga rupi peteĩ-teĩ pe pemombe'u pejeadyague, ha'e jomeme pejerure pekuera aguã. Heko porã va'e ojerurea ma ipo'aka vaipa 'rã.

¹⁷ Elias ma nhande ramigua ae oiko raka'e, nhande rami guive onhenhandu va'e. Ha'e va'e ma onhea'ãa rupi ojerure raka'e yvy áry oky e'ŷ aguã. Ha'e ramo mboapy ma'etý raxa peve nda'okyi.

¹⁸ Ha'e gui ojerure ju ramo oky ou yva gui, ha'e ramo yvy gui oiko mba'emo aju.

¹⁹ Irmão kuery, xapy'a rei peẽ kuery regua anhetẽ va'e gui ojepe'a rã amongue ogueru jevy ramo

²⁰ peikuaa pota pova'e re: Ojejavy va'e teko vai rupi oikoague gui amongue ogueru ju vy inhe'ẽ ogueraa jepe omano aguã gui, ojejavyague heta teĩ ombogue uka vy.*

* 5:11 Jó 2.10; 42.10-17 * 5:12 Mateus 5.33-37 * 5:13 Romanos 12.15 * 5:20 Mateus 18.15; Gálatas 6.1,2; 1 Pedro 4.8; Judas 22,23

Jypy'i kuaxia Pedro ombopara va'ekue Jypy'i kuaxia Pedro ombopara va'ekue

Kova'e kuaxia para apóstolo Pedro ogueraa uka Jesus Cristo remimbo'e kuery peguarā. Ha'e va'e kuery ma Jesus re ojerovia rā ha'e kuery re opu'āa rei. Ha'e nunga rupi Pedro ijayvu omokyre'ŷ ha'e omombaraetea rupi, nhandereraa jepea re ima'endu'a riae aguā: "Yva re pendevy guarā omoī porā mbyre ma ivaipa e'ŷ va'e, iky'a e'ŷ ha'e imarā e'ŷ va'e. Peē kuery re Nhanderuete opena opo'akaa rupi, pejerovia vy opaa ára py peo jepe aguā. Ha'e va'e ojekuaa aguā ma namombyryvei ma guive. Ha'e rami aguā pearō vy pevy'a, aŷ pendekuai axy aguā rami pendekuai vy are'ŷ'i re pendeporiau pekuapy ranhe tei, mba'eta ha'e nunga peaxapa ma ramo pejeroviaa ojekuaa aguā ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erā. Ha'e rā peē ma Jesus Cristo ojekuaa jave pendererovy'aa 'rā, penemboyvate ha'e penemboetea 'rā guive", he'i (1.4-7).

Oxarura reve ijayvu vy omboypyague

¹ Xee Pedro ma Jesus Cristo pegua apóstolo aiko.* Axarura Nhanderuete rembiporavo opa rupi pendeyvy re'ŷ pendekuai va'e pe. Ponto re, Galácia, Capadócia, Ásia ha'e Bitínia re pendekuai.

² Nhanderuete onhembopy'a ma voiague rami vy pendeporavo. Ha'e rami vy ixupe guarā Inhe'ẽ penemoingo rire penhe'ẽ rendu Jesus Cristo, huguy py pejeky'a'o uka vy.* Tove peē kuery tapendu penemboaxyha'e mby'a porā opa mba'e py.

Nhandereraa jepea re jarovy'a aguā re ijayvua

³ Ta'ima'endu'a porāa Nhanderuete nhande-Senhor Jesus Cristo Ru va'e re, mba'eta nhanemboaxy ete vy nhanemoingove ju raka'e. Ha'e ramo nharō jakuapy oikove va'e ou aguā, Jesus Cristo omanoague gui omboete ju rire.

⁴ Ha'e gui yva re pendevy guarā omoī porā mbyre ma ivaipa e'ŷ va'e, iky'a e'ŷ ha'e imarā e'ŷ va'e.

⁵ Peē kuery re Nhanderuete opena opo'akaa rupi, pejerovia vy opaa ára py peo jepe aguā. Ha'e va'e ojekuaa aguā ma namombyryvei ma guive.

⁶ Ha'e rami aguā pearō vy pevy'a, aŷ pendekuai axy aguā rami pendekuai vy are'ŷ'i re pendeporiau pekuapy ranhe tei,

⁷ mba'eta ha'e nunga peaxapa ma ramo pejeroviaa ojekuaa aguā ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erā. Ha'e rā peē ma Jesus Cristo ojekuaa jave pendererovy'aa 'rā, penemboyvatea ha'e penemboetea 'rā guive.

⁸ Cristo ma peē ndapexai teri va'eri peavyu. Aŷ pexa e'ŷ re hexe pejerovia vy perovy'a ete. Pendere vy'aa oĩ va'e ma iporā ete va'e nhamombe'u kuaa va'e'ŷ,

⁹ mba'eta pejopy ma pejeroviaa rekopia. Ha'e va'e ma penenhe'ẽ oo jepea.

¹⁰ Ha'e rami jaa jepe aguā re ma profeta kuery yma guare oporandu ha'e oikuua pota raka'e, nhanemboaxyha'e ombou pyrā omombe'u ma voi va'ekue ri.

¹¹ Mba'eta ha'e kuery re Cristo Nhe'ẽ oĩ vy yma ma voi oikuua uka Cristo omano 'rāa, ha'e va'e rire mba'emo iporā ete va'e oiko 'rāa guive. Ha'e kuery oikuaxe tei araka'e ete ha'e marā rami pa ha'e nunga ojeupity 'rāa.

¹² Ha'e ramo ha'e kuery pe oikuua uka ojeupe guarā e'ŷ ayvu omombe'ua, ha'e rā peē kuery peguarā, mba'eta omombe'u ma voi raka'e mba'emo aŷ peē kuery pe oikuua ukaa va'e. Mba'eta pendevy pe ae ayvu porā mombe'ua kuery omombe'u, yva gui Nhe'ẽ Ky'a E'ŷ ombou pyre rupi. Ha'e ramigua ma anjo kuery eteve voi oikuua porāvexe tei okuapy.

Iky'a e'ŷ va'e jaiko aguā re ijayvua

* 1:1 João 1.40-42 * 1:2 Romanos 8.29,30; Efésios 1.4,5

- ¹³ Ha'e nunga rupi pendejee pemoī pene'arandurā, peiko kuaa pota ha'e pearō aguā, mba'eta Jesus Cristo ojekuaa ára oexa uka 'rā penemboaxy etea.
- ¹⁴ Ta'y kuery inhe'ẽ rendu va'e peiko vy pendekuaive eme yma ndapeikuuai teri jave peipotaague rupi rive.
- ¹⁵ Ha'e rami 'rāgue py penerenoīare iky'a e'ŷ va'e oikoa rami avi peē voi ke iky'a e'ŷ va'e pendekuai, peikoa ha'e javi rupi,
- ¹⁶ mba'eta ipara oī va'e "Iky'a e'ŷ va'e ke pendekuai, mba'eta xee ma iky'a e'ŷ va'e" he'ia rami.*
- ¹⁷ Nhanderuete ma peteī regua joegui oayvuve e'ŷ re oikuaa pota 'rā peteī-teī jaikoague re. Ha'e nunga rupi kova'e yvy re peikoa pukukue re pejererokyjea rupi tema pendekuai.
- ¹⁸ Mba'eta po rami peikuuai ae: Pendejoguaa raka'e penderekō yma guare ovare'ŷ va'e rupi pendekuaigue gui, mba'eta peneramoī kuery gui ha'e ramigua rive peikuuai va'ekue. Prata, ouro, mba'emo opa va'erā re rive'ŷ guive pendejoguaa,
- ¹⁹ ha'e rā Cristo ruguy ovarepave va'e re. Ha'e va'e ma vexa'i ivaikue rei e'ŷ, iky'a e'ŷ va'e rami ojukaa raka'e.
- ²⁰ Hekorā ma kova'e yvy itui e'ŷ mbove ma voi Nhanderuete omoī raka'e. Ha'e gui aŷ opaa ára py mae ma oikuaa uka penderayvu vy.
- ²¹ Cristo gui vy ae pejerovia Nhanderuete omanoague gui omboete ha'e omboyvate ju va'ekue re. Ha'e rami py Nhanderuete re pejerovia ha'e pearō pekuapy.

Mborayvu re nhandekuai aguā re ijayvua

- ²² Anhetē va'e rupi penhe'ẽ rendu vy peiky'a'o uka ma pendep'y'a. Aŷ ma joegua meme'i joayvua rami pejoayvu, merami rive'ŷ. Ha'e rami vy pendep'y'a ha'e javi py pejoayvu peteī-teī.*
- ²³ Mba'eta mba'emo ra'yī ivaipa va'erā gui e'ŷ penemoingove ju, ha'e rā imarā e'ŷ va'e gui, Nhanderuete ayvu oikove ha'e ndopai va'erā gui ae.
- ²⁴ Mba'eta "Avakue ma jai rami meme'rā opa. Iporāa ha'e javi ma jai poty ramigua rive oī. Mba'eta jai ipiru rā ipoty okuipa 'rā.
- ²⁵ Ha'e rā Senhor ayvu ma oī riae 'rā", he'i.* Ha'e va'e ayvu porā ma pēvy omombe'u pyre ae.

2

Cristo re jajerovia va'e Nhe'ẽ rorā nhanemoingoague re ijayvua

- ¹ Ha'e nunga rupi pendejegui pemboi opa mba'e vai, pendeapua, pendeko porā merami rivea, mba'emo peipota reia ha'e joe pendeayvu reia ha'e javi.
- ² Ha'e rami 'rāgue py kyri'i va'e itui ramo'i va'e rami avi penhea'ã ke kamby Nhe'ẽ guigua iky'a e'ŷ va'e re, ha'e va'e re pende'yvate vy oo jepe ete va'e peiko aguā,
- ³ Senhor penderayvua pendu ma rire.
- ⁴ Cristo ma ita oikove va'e avakue omombo va'ekue rami oiko, teī Nhanderuete pe ovare ete va'e rā oiporavo. Ha'e nunga rupi hexe penhemboja ramo
- ⁵ peē voi ita oikove va'e rami Nhanderuete penemoī Nhe'ẽ rorā.* Ha'e pygua sacerdote iky'a e'ŷ va'erā avi penemoī, ixupe peme'ẽ aguā Nhe'ẽ guigua. Jesus Cristo rupi peme'ẽ ramo oguerovy'a 'rā.
- ⁶ Mba'eta ipara re oī: "Sião py amoī 'rā peteī ita oo ytarā aiporavo va'ekue, ovare ete va'e. Ha'e va'e re ojerovia va'e kuery ma peteīve henda py nda'eve e'ŷi nho 'rā", he'i.*
- ⁷ Peē kuery hexe pejerovia va'e pe ma anhetē ovare ete va'e oiko. Ha'e rā ojerovia e'ŷ va'e kuery pe ma "Oo apoa kuery ita omombo va'ekue ma omboeteve pyrā optya, tenondeve pyguarā",*
- ⁸ ha'e "Nhomonhepyxangaarā, joityarā optya", he'ia rami. Mba'eta ha'e kuery ojeity uka 'rā ayvu porā oendu teī nonhe'ẽ renduia py, ha'e rami ae hekorā omoña rire.*

* 1:16 Levítico 11.44-45 * 1:22 1 João 5.1 * 1:25 Isaías 40.6-9 * 2:5 1 Coríntios 3.16; Efésios 2.19-22 * 2:6 Isaías 28.16 * 2:7 Salmo 118.22-23 * 2:8 Isaías 8.14

⁹ Ha'e rā peẽ kuery ma peteĩ regua oiporavo pyre, huvixave pegua sacerdote, iky'a e'ŷ va'e, Nhanderuete ojeupe guarā ae ojogua va'ekue, peikuaa uka aguã pytūa gui guexakāa pygumarā penerenoĩ va'ekue po'akaa.*

¹⁰ Mba'eta yma rupi peteĩ regua e'ŷ pendekuai va'ekue. Ha'e rā aŷ ma Nhanderuete pegua pendekuai. Yma ndapeupityi penemboaxya, ha'e rā aŷ ma peupity ma.*

Ojerovia e'ŷ va'e ha'e huvixa kuery pe Cristo pegua kuery iporā va'e anho oexa uka aguã re ijayvua

¹¹ Xerembiayvu kuery, oyvy re'ŷ ikuai va'e pendekuai ramo ajerure pejejoko aguã to'o oipota va'e gui, mba'eta penenhe'ẽ re opu'ã rei va'e.

¹² Amboae regua mbyte pendekuaia rupi pexa uka tema penderekō porāa. Ha'e ramo heko vai va'e re rami pendere amongue ijayvu rei teĩ, pendekuai porāa oexa vy ha'e kuery voi ombojerovia aguã Nhanderuete, ojekuaa ára.

¹³ Senhor re vy penhe'ẽ rendu ke joe opena va'e kuery ha'e javi: huvixave yvateve ikuai va'e

¹⁴ ha'e hembiguai kuery huvixa yvyiguveva'e, mba'eta ha'e kuery omoña heko vai va'e ombopaga aguã, ha'e rā heko porā va'e ma oguerory aguã.

¹⁵ Mba'eta Nhanderuete oipota pendekuai porāa py pejapo hi'arandu e'ŷ va'e kuery oikuua vy e'ŷ ijayvua gui okyrirí aguã rami.

¹⁶ Opa mba'e gui peo jepe teĩ nda'evei "Jaa jepe" peje vy ha'eve'ŷ va'e pejapo aguã. Ha'e rami 'rāgue py Nhanderuete rembiguai rami pendekuai.

¹⁷ Pemboete pavē ke. Peayvu irmão kuery. Nhanderuete renonde pendekuai pejererokyea rupi. Pemboete avi huvixave.*

Tembiguai kuery ombo'epo porā aguã re ijayvua

¹⁸ Tembiguai kuery, penhe'ẽ rendu tema pendererekoa, opa mba'e py pemboete reve. Pendererekoa porayvu ha'e hi'arandu va'e anho e'ŷ 'rā penhe'ẽ rendu, ha'e rā heko vai va'e voi.*

¹⁹ Mba'eta xapy'a rei Nhanderuete renonde pendepy'a ky'a e'ŷa rupi pendekuaia teĩ mba'e re'ŷ penemoingo axya 'rā. Ha'e ramigua pendeporiau reia peropo'aka porā vy ojou porāmby 'rā peiko.

²⁰ Ha'e gui xapy'a rei pejejavyague re ri penembopagaa ramo mba'exa 'rā tu pendererovy'a? Ha'e rami avi xapy'a rei ha'evea rami pendekuai teĩ penemoingo axya rā pendevai e'ŷ re peropo'aka ramo Nhanderuete pendejou porā 'rā.

²¹ Mba'eta ha'e rami aguã ae penerenoĩ, mba'eta Cristo voi pendere oiko axy raka'e, oikoague rami avi peẽ voi pendekuai aguã.

²² Ha'e ma ndojejavyi, peteĩve henda py nda'ijayvui nhombotavy reia rupi.

²³ Ixupe ijayvu vaikuea rā nombovai ayvu vai py. Oguereko axya rei ramo nanhomongy-jei. Ha'e rami 'rāgue py onhemboaxa ha'evea rami joe oikuua pota va'e po py.*

²⁴ Yvyra re ojukaa py guete re ae ogueraa raka'e jajejavyague, nhande voi jejavya pe nhamano avi, ha'e teko porā re ju jaiko aguã. Ijai gui vy jakuera.*

²⁵ Mba'eta vexa'i okanhigue rami pendekuai va'ekue ri aŷ ma penenhe'ẽ re Opena ha'e Onhangareko va'e oĩa py ju pendereru.*

3

Omenda va'e kuery joguereko kuaa aguã re ijayvua

¹ Kunhague, peẽ voi peneme oipotaa rami avi peiko. Ha'e rami avi ayvu porā rupi ha'e kuery nda'ikuai teri teĩ peẽ ta'yxy kuery pendekuai porāa oexa vy rive ha'e kuery voi ojerovia 'rā pendeayvu re'ŷ.

² Mba'eta opa mba'e py pejererokyea rupi peiko ramo oexa 'rā pendekuai porāa.

* 2:9 Isaías 43.21 * 2:10 Oséias 1.6,9, 2.23 * 2:17 Mateus 22.21; Romanos 13.1-7 * 2:18 Efésios 6.5-8;

Colossenses 3.22-25 * 2:23 Isaías 53.9, Mateus 27.11-14, 39-44; Lucas 23.39-41 * 2:24 Isaías 53.4 * 2:25 Isaías

53.6

³ Peẽ ta'yxy kuery, penhemoatyrõ eme hi'árykue rive, peje'a vykypa reia py, ouro guigua py pejeguaa py, neĩ ao hepyve va'e py penhemonde vy.

⁴ Ha'e rami 'rãgue py pendepy'a re oĩ va'e ae toexa uka penoporãa, ha'eve vai'ia ha'e pejapura e'ÿa. Ha'e ramigua ma Nhanderuete pe ovareve ete va'e.

⁵ Mba'eta ymave rupi kunhague iky'a e'ÿa rupi Nhanderuete re ojerovia va'e ma ha'e ramigua py ae onhemonde raka'e, ome oipotaa rami ikuia py.

⁶ Abraão ra'yxy Sara voi ha'e rami oiko raka'e, mba'eta ome onhe'ẽ rendua rupi ixupe "Senhor" he'i. Peẽ voi iporã va'e pejapo ha'e mba'eve rei gui ndapekyjei vy imemby kuery 'rã peiko.

⁷ Ha'e peẽ ime kuery voi ha'e rami. Pene'arandua rupi pejoguereko pendera'yxy reve. Ha'e kuery ikangyve ramo pemboetea rupi perek, mba'eta peẽ reve ha'e kuery peguarã voi tekove oĩ. Ha'e rami vy 'rãe mba'eve napendejokoi pejerurea gui.*

Irmão kuery joayvu aguã re ijayvua

⁸ Opaa py aipota jojo'i rami peikuaa. Penhomboaxy, joegua meme rami pejoayvu, joegui penhemo'yvyi've guive.

⁹ Pendevy otekoavya rã pejepy-jepy eme ha'ekue rami, ha'e pendere ijayvu vaia rã pembovai eme ayvu vai rupi. Ha'e rami 'rãgue py pejogueroayvu porã, mba'eta ha'e rami aguã ae Nhanderuete penerenoĩ, pendereroayvu porãa peupity aguã.*

¹⁰ Mba'eta "Oiko pukuvexe ha'e ový'aa aguã va'e ára oupityxe va'e ma tojoko oapekũ mba'emo vai rupi ijayvu e'ÿ aguã, tojoko ojuru ijapu rei e'ÿ aguã.

¹¹ Tojepe'a mba'emo vai gui, iporã va'e anho tojapo. Tonhea'ã pavẽ reve ikuai porã aguã. Tonhea'ã ete, oupity peve.

¹² Mba'eta heko porã va'e re Senhor oma'ẽ oikovy, ojapyxaka oiny guive ha'e kuery ojerurea re. Ha'e rã mba'emo vai apoa kuery pe ma Senhor oexa uka 'rã opoxya", he'i.*

Iporã va'e jajapoa rupi nhaĩ atã aguã re ijayvua

¹³ Ha'e gui iporã va'e pejapoa rupi penhea'ã ramo mava'e tu penemoingo axy ta?

¹⁴ Ha'e rami avi penderekõ porãa rupi pejexavai teĩ ový'a ete va'e 'rã peiko. Penemongyea rupi ijayvua teĩ pekyje eme, pejapura eme guive.

¹⁵ Ha'e rami 'rãgue py pendepy'a py Cristo pemboetea rupi "Xe-Senhor iky'a e'ÿ va'e" peje vy peiko katu riae oporandu va'e-va'e pe pemombe'u porãe aguã pearõ peikovya.

¹⁶ Ha'e rami avi pendevai reia rupi pendeayvu eme, ha'e rã pejererokyjea ha'e pendepy'a ky'a e'ÿa rupi anho. Ha'e ramo penderovai ijayvu va'e oximba 'rã Cristo re vy penderekõ porãa re ijayvu vaiague re.*

¹⁷ Mba'eta pendekuai axy Nhanderuete oipota ri ramo ha'eveve pendeko porãa re pendekuai axy, pendeko vaia re 'rãgue py.

¹⁸ Mba'eta Cristo voi omano raka'e jajejavvyague re, peteigüe'i. Heko porã ete va'e ojejuka uka nhanderekõ vai va'e re, nhandereru aguã Nhanderuete pe. Ngo'o re omano teĩ Nhe'ẽ omoingove ju raka'e.

¹⁹ Ha'e gui onhe'ẽ rupi oo vy ayvu omombe'u nhe'ẽ nhuã py omboty pyre kuery pe.

²⁰ Ha'e va'e kuery ma yma rupi Noé oiko jave Nhanderuete nonhe'ẽ rendui okuapy teĩ Nhanderuete oarõ are ranhe kanoã guaxu ojapoa ja. Ha'e rami teĩ mbovy'i oo jepe raka'e yy rupi, oito ete'i.

²¹ Ha'ekue rami ae ju aÿ ma peẽ voi penhemongaraia rupi peo jepe. Pendero'o peiky'a'o vy rive peo jepe nda'ei, ha'e rã Nhanderuete pe pejapukaia rupi, pendepy'a peiky'a'o uka vy. Jesus Cristo onhemboete ju rire pendeky'a'o.

²² Ha'e gui yva re oo ma vy Nhanderuete oiporu kuaa regua re oĩ. Ha'e ramo ha'e oipotaa rami ikuai anjo kuery, yvatekueve ha'e mba'emo re ombopo'aka pyre ha'e javi.

* 3:7 Efésios 5.22-25; 1 Timóteo 2.9-11 * 3:9 Lucas 6.27,28; Romanos 12.9-21 * 3:12 Salmo 34.12-16 * 3:16 Isaías 8.12-13; Mateus 10.16-20; 2 Timóteo 2.24-26

4

Jejavya pe nhamano ha'e iky'a e'ŷ va'e jaiko aguã re ijayvua

- ¹ Ha'e gui Cristo ngo'o re oiko axy rire peẽ voi pendepy'a re pemoĩ ha'ekue rami penhemingo axy uka avi aguã, mba'eta ngo'o re oiko axy va'ekue ma mba'eve ndoguererekovei ma jejavya reve.*
- ² Ha'e rami rire pendero'o re peikove teria ja avakue oipotaa rami ve'ŷ pendekuai aguã, ha'e rã Nhanderuete oipotaa rami anho.
- ³ Mba'eta ha'eve ma amboae regua oipotaa rami pendekuaiague. Opa marã rei pendekuai va'ekue to'o oipota va'e rupi, peka'ua rupi, opa marã vy'aa rupi, iro va'e pey'ua rupi, ha'e mba'emo ra'angaa ojeguarupy pembojeroviaa rupi guive.
- ⁴ Ha'e gui amboae kuery opa marã ikuaia rupi peẽ kuery napenhemoirûvei ramo onhemondyipa rei okuapy, ha'e peẽ kuery re ijayvu vai guive.
- ⁵ Ha'e rami teĩ ha'e kuery onhemombe'upa 'rã oikove va'e ha'e omano va'ekue re oikuaa pota va'e renonde.
- ⁶ Mba'eta ha'e rami aguã ae omano va'ekue pe voi ayvu porã omombe'ua raka'e, avakue rami ha'e kuery ngo'o re opaga teĩ nhe'ẽ re oikove ju aguã Nhanderuete rami.

Peteĩ-teĩ nhanhopytyvõ aguã re ijayvua

- ⁷ Namombyryvei ma opa mba'e opa aguã ára. Ha'e nunga rupi pejejoko ha'e peiko kuaa pota ke penhembo'e kuaa aguã.*
- ⁸ Opa mba'e gui yvateve va'e ma peteĩ-teĩ pejoayvu ete aguã, mba'eta porayvu va'e ombogue uka reta 'rã amboae kuery ojejavvyague.*
- ⁹ Penhomovaẽ peteĩ-teĩ pendeayvu rei e'ŷ re.
- ¹⁰ Peteĩ-teĩ penerembiaporã pejopyague rami vy penhopytyvõ, mba'eta peteĩ-teĩ pe Nhanderuete ome'ẽ joo rami e'ŷ-e'ŷ nhopytyvõ aguã. Ha'e rami rã pejapo ete.
- ¹¹ Ayvu omombe'u aguã ojopy va'ekue ma tomombe'u porã, Nhanderuete ayvu ramo. Nhopytyvõ aguã ojopy va'ekue ma Nhanderuete omombaraetea rupi tojapo, opa mba'e py Nhanderuete omboetea aguã Jesus Cristo rery rupi. Ha'e va'e ma hexakãmba ha'e ipo'akapa araka'e rã peve guarã. Amém.

Cristo káuxa nhanemoingo axya teĩ javy'a aguã re ijayvua

- ¹² Xerembiayvu kuery, penembyte tata hendy va'e rami pendeko a'ãarã ou teĩ penhemondyi eme, mba'eta penemondyipaarã e'ŷ ou.
- ¹³ Ha'e rami vy Cristo oiko axyague rami peẽ voi pendekuai axy vy pevy'a, hexakãa ojekuaa jave pevy'ave ete aguã.*
- ¹⁴ Cristo rery káuxa pendere ijayvua rei ramo ov'y'a ete va'e peiko, mba'eta pendere oĩ 'rã Nhanderuete Nhe'ẽ hexakãmba va'e.
- ¹⁵ Ha'e gui peẽ kuery va'e regua nda'evei mava'eve rei pejojukaague py peiko axy aguã, e'ŷ vy penemondaague re, pejapo vai reiague re, neĩ joe pepena reiague re guive.
- ¹⁶ Ha'e rã Cristo pegua peikoa re ri penemoingo axya rã pexi eme. Ha'e rami 'rãgue py perovy'a Nhanderuete, pendere Cristo rery oĩa re.
- ¹⁷ Mba'eta ovaẽ ma ára Nhanderuete joe oikuaa pota aguã. Ojeupeguia kuery re ranhe 'rã oikuaa pota. Ha'e ramo nhande kuery re ranhe oikuaa pota rire mba'exa 'rã tu ikuai Nhanderuete guigua ayvu porã rupi nonhe'ẽ rendui va'ekue?
- ¹⁸ Mba'eta "Heko porã va'e ojexavaia py anho 'rã oo jepe, rire mba'exa 'rã tu ikuai Nhanderuete re ima'endu'a e'ŷ ha'e heko vai va'e kuery?" he'iague rami.*
- ¹⁹ Ha'e nunga rupi Nhanderuete oipotaa rami vy ikuai axy va'e guekove re topena uka imoingoare ojeroviapy va'e pe, ha'e iporã va'e rupi tema ta'ikuai guive.

* 4:1 Romanos 6.1-4; Colossenses 3.1-10

* 4:7 Mateus 24.42-44; Apocalipse 16.15

* 4:8 Proverbios 10.12

* 4:13 João 16.1-4; Tiago 1.2-4

* 4:18 Proverbios 11.31

Igreja re opena va'e kuery omongoetaague

¹ Ha'e gui peẽ kuery regua igreja re pepena va'e kuery ju xee romongoeta, mba'eta xee voi peẽ kuery rami avi aiko igreja kuery re apena va'e, ha'e Cristo oiko axyague amombe'u va'e, ha'e gui peẽ kuery reve aĩ avi 'rã hexakãa ojekuaa jave.

² Pepena porã ke Nhanderuete rymba kuery pãvy opena uka va'ekue re.* Ojapo uka ramo rive'ý pejapo, ha'e rã pejapoxea'i py, Nhanderuete oipotaa rami ae. Peráta re rive'ý guive pejapo, ha'e rã penekyre'ýa rupi.

³ Pejokuai poyi eme pãvy opena uka va'ekue. Ha'e rami 'rãgue py peiko ha'e kuery voi peẽ rami ikuai aguã.

⁴ Ha'e ramo Opena va'ety Yvateve ete va'e ojekuaa ramo pejopy 'rã coroa hexakãmba va'e opa va'erã e'ý.

Omongoeta ha'e oxarura reve opaa py ogueroayvu porãague

⁵ Ha'e rami ae avi peẽ kunumigueve, pendekuai 'rã tujakueve oipotaa rami. Ha'e peẽ kuery ha'e javi, pendekuaia rupi pendejee pemoõ joegui penhemo'yvy'i've aguã. Mba'eta Nhanderuete opu'ã 'rã onhemboyvate rei va'e re, ha'e rã onhemo'yvy'i'i va'e pe ma oexa uka 'rã omboaxya.*

⁶ Ha'e nunga rupi penhemo'yvy'i'i Nhanderuete po'akaa guy py, ha'evea ára py penemboyvate ju aguã.

⁷ Ipo py meme ke pemboaxa pendevoyi perekva'e, mba'eta penemboaxya rupi 'rã opena pendere.

⁸ Peiko kuaa pota ke, penheangu guive. Mba'eta penderovaigua anha ma pendeyvýry rupi oiko guary guembiarã oeka vy okororõ oikovy va'e rami avi.

⁹ Pejeity uka eme ixupe, pejeroviaa re peẽ atã vy. Mba'eta peikuuaa pende-irmão kuery vyv jave re ikuai va'e voi oendu avi okuapya peẽ pendekuai axya ramigua.

¹⁰ Ha'e gui xapy'a'i pendekuai axy ma rire Nhanderuete penemoingo porã ju 'rã, penemoõ atã, penemombaraete ha'e penemombyta porã ju 'rã, mba'eta opa mba'e py nhanemboaxy va'e, ha'e Cristo re vy guexakãa imarã e'ý va'e pygurarã nhanerenoí va'ekue.

¹¹ Ha'e ae ta'ipo'akapa araka'e rã peve guarã. Amém.

¹² Irmão Silvano pe ma kova'e kuaxia ambopara uka pãvy. Ha'e va'e ma xee aikuua rami ojeroviapy oiko, peẽ kuery pe avi. Ayvu mbovy'i py ambopara uka. Romongoetaa rupi teigue ju aipoa'e: Ha'e rami ae Nhanderuete nhanemboaxy anhetã va'e. Ha'e va'e re anho tema peẽ atã.

¹³ Babilônia py oiporavo pyre ikuai va'e avi oxarura uka peẽ kuery pe, xera'y Marcos voi.*

¹⁴ Pexarura peteñ-teñ pe pejoayvua rupi.

Tove Cristo re pendekuai va'e ha'e javive tapendu mby'a porã.

* 5:2 João 10.11-13, 21.15; Atos 20.28

* 5:5 Provérbios 3.34, Lucas 18.9-14

* 5:13 Amongue py Roma tetã pe "Babilônia" 'ea 'rã.

Mokoīguea kuaxia Pedro ombopara va'ekue Mokoīguea kuaxia Pedro ombopara va'ekue

Kova'e kuaxia py apóstolo Pedro ojapo Jesus Cristo remimbo'e kuery onheangu aguā. Mba'eta Jesus Cristo pegua igreja mbyte py ikuai nhombotavya rupi nhombo'e va'e. Mba'eta yma heta va'e kuery mbyte rupi profeta ramigua rive ikuaiague rami avi “peē kuery mbyte voi ikuai 'rā porombo'ea anhetē rupigua e'ŷ. Ha'e va'e kuery ma nhemi rupi 'rā omombe'u apu nhomombaarā. Senhor Ijoguaare Ipo'akapa va'e rovai eteve voi 'rā ijayvu. Ha'e ramia py o'áry ae ombou uka imomba vyvoiarā” (2.1b).

Ijayvu avi Jesus Cristo re jajeroviaa rupi nhaī atāve aguā, ha'e Jesus ou ju jave guarā nharō jaikovy aguā. Mba'eta “Senhor ára ma imonda va'e rami 'rā ou xapy'a. Ha'e va'e jave py yapu ratā reve yva okanhymba 'rā, ha'e mba'emo jaexa va'e okai vy ivaipa 'rā. Ko yvy ha'e mba'emo ojapo pyre ha'e javi 'rā okaipa. Ha'e nunga ha'e javi ha'e rami ete okanhymba aguā rami opyta ramo peē kuery pendeky'a e'ŷa rupi pota ke pendekuai Nhanderuete pe ete” (3.10-11).

Oxarura reve ijayvu vy omboypyague

¹ Xee Simão Pedro ma Jesus Cristo rembiguai ha'e apóstolo-rā xemoī va'ekue. Axarura pēvy, mba'eta peē kuery voi peupity pejerovia aguā, Nhanderuete ha'e Nhandereraa jepea Jesus Cristo guigua teko porā rupi ome'ē va'ekue. Ha'e va'e ma ovare ete va'e.

² Tove opa mba'e py tapendu penemboaxyha'e mby'a porā, Nhanderuete ha'e nhande-Senhor Jesus Cristo peikuaa porāvea rupi.

Cristo guigua jaexa uka aguā re ijayvua

³ Mba'eta Nhanderuete ma guexakāa ha'e gueko porāa jaupity aguā nhanerenoī ma vy opo'akaa rupi ome'ē avi nhanemoingo porāarā ha'e ixupe nhanemoingoarā regua ha'e javi. Nhanerenoīare jaikuua porāvea rupi jajopypa 'rā.

⁴ Ha'e rami vy mba'emo ovare ha'e iporā ete va'e nhandevy ome'ē aguā re ijayvu, kova'e yvy re to'o oipota va'e nhanemongy'aarā oī va'e gui jaa jepe aguā, nhandere voi Nhanderuete py'a re oī va'e oī avi aguā.

⁵ Ha'e nunga rupi ae penhea'ā pejeroviaa re pemoirū aguā penderekō porā aguā, ha'e penderekō porāa re pemoirū pene'arandua rupi pendekuai aguā,

⁶ ha'e pene'arandua re pemoirū pejejoko aguā, ha'e pejejokoa re pemoirū peī atā aguā, ha'e peī atāa re pemoirū Nhanderuete pe ete peiko aguā,

⁷ ha'e ixupe peikoa re pemoirū irmāo kuery pexaxe aguā, ha'e irmāo kuery pexaxe re pemoirū mborayvu re pendekuai aguā.

⁸ Mba'eta pendere ha'e nunga oī, ha'e oīve ovy ri ramo nhande-Senhor Jesus Cristo peikuaa porāvea rupi pexa uka 'rā penekyre'ŷ ha'e iporā va'e anho.*

⁹ Ha'e rā amongue re ha'e nunga noī ri ramo ára revegua e'ŷ, ha'e'i py oī va'e anho'i oexa va'e rami teri oiko, mba'eta hexarai ma ojejavyague gui oiky'a'oague re.

¹⁰ Ha'e nunga rupi irmāo kuery, penhea'āve tema penerenoīague ha'e pendeporavoague pexa ukaa rupi. Ha'e rami vy 'rā neī peteīve henda py voi ndapejeity ukai.

¹¹ Ha'e rami rā nhande-Senhor Nhandereraa jepea Jesus Cristo po'akaa imarā e'ŷ va'e peupity rā penemovaē porā 'rā.

Apóstolo Pedro nhanemoma'endu'aa rupi ijayvuague

¹² Ha'e nunga rupi pendere anhetē va'e oī va'e peikuaa porā, ha'e nunga re peī atā guive teī ha'e nunga re romoma'endu'aa aguā rami riae aiko.

¹³ Mba'eta kova'e oo'i re aikove teria ja ha'e nunga re romoma'endu'aa rupi xeayvu vy romokyre'ŷvexe.†

* 1:8 Filipenses 2.12,13 † 1:13 “Oo'i” he'ia ma guete'i re ae ijayvu vy (2 Coríntios 5.1-4).

¹⁴ Mba'eta xee aikuua rā kova'e oo'i areko va'e are'ŷ'i re aeja 'rā, nhande-Senhor Jesus Cristo oikuua ukaague rami vy.

¹⁵ Ha'e nunga rupi xee anhea'āve 'rā aa ma rire ha'e nunga ha'e javi re penema'endu'a aguā rami.

Nhanderuete ayvu anhetē etea re ijayvua

¹⁶ Mba'eta ore ma avakue akā gui rive'ŷ pěvy romombe'u va'ekue nhande-Senhor Jesus Cristo po'akaa, ha'e ou jevy aguā regua guive. Ha'e rami 'rāgue py ipo'akaa ma ore ae rexa py roexa va'ekue.

¹⁷ Mba'eta Nguuete gui ae ou raka'e omboetepaa aguā ha'e hexakāa. Mba'eta ixupe Hexakāmba va'e oayvu ombou vy "Kova'e ma Xera'y ayvu va'e, arov'y'a va'e", he'i va'ekue.

¹⁸ Ha'e va'e ayvu yva gui onhendu rā ore voi roendu karamboae yvyty iky'a e'ŷ va'e áry hexeve orekuuaia py.*

¹⁹ Ha'e rami rire jaikuua porāve profeta kuery ayvu anhetē va'e memea, ha'e nhandejee nhamoī atāve 'rā guive, mba'eta pytūa py tataendy rami nhanemoexakā 'rā ko'ẽmba peve, nhandepy'a re jaxy-tata ko'ẽ mbija ojekuaia peve.

²⁰ Po ramigua jypy'i jaikuua: Ipara iky'a e'ŷ va'e re ayvu ikuai va'e ma avakue akā gui rive'ŷ ou,

²¹ mba'eta peteīve ayvu ndojekuaai raka'e profeta kuery ae oipotaa gui. Ha'e rami 'rāgue py Nhanderuete gui ae avakue [iky'a e'ŷ va'e] ijayvu raka'e, Nhe'ẽ Ky'a E'ŷ omo'arandu heravy rā.*

2

Porombo'ea kuery anhetē rupigua e'ŷ opaga 'rāa re ijayvua

¹ Heta va'e kuery mbyte rupi ikuai avi raka'e profeta ramigua rive. Peẽ kuery mbyte voi ikuai 'rā porombo'ea anhetē rupigua e'ŷ. Ha'e va'e kuery ma nhemi rupi 'rā omombe'u apu nhomombaara. Senhor Ijoguaare Ipo'akapa va'e rovai eteve voi 'rā ijayvu. Ha'e ramia py o'áry ae ombou uka imomba vyvoiarā.*

² Heta 'rā ikuai avi ha'e kuery opa marā rei ikuia rupi. Ha'e ramo ha'e kuery káuxa ijayvu vaia 'rā tape anhetē va'e re.

³ Ha'e kuery ma peráta re nda'eveive vy pendekore 'rā ijapua py. Ha'e rami teĩ ha'e kuery mbopagaara yma guive omoī mbyre ndarei 'rā. Imombaara ma ndokei ae.

⁴ Mba'eta anjo kuery eteve voi ojejavvy ramo Nhanderuete nomboaxyi raka'e. Ha'e rami 'rāgue py yvy guy py nhuā oĩ va'e py omombo, yvykua pytū reia py omboty ombopaga aguā ára pygurarā.

⁵ Ymagua kuery voi nomboaxyi vy Noé teko porā mombe'ua va'e anho ogueraa jepe raka'e, ha'e hexeve sete ju. Ha'e rā ko yvy regua heko vai va'e kuery áry ma yy ombou.

⁶ Ha'e gui Sodoma ha'e Gomorra tetā ma tanhimbu rive omombyta. Ombovaipa ete raka'e, raka'eve rā heko vai va'e ikuai va'erā oikuua vy onheangu aguā.

⁷ Ló anho ogueraa jepe. Ha'e va'e heko porā va'e ma nhonhe'ẽ rendu e'ŷ va'e kuery opa marā rei ikuia oexa vy nda'evei etea oendu raka'e.

⁸ (Mba'eta ha'e kuery opa marā rei ikuia mbyte heko porā va'e oiko vy ko'ẽ nhavō oexa ha'e oendu vy opy'a heko porā va'e py ojexavai.)

⁹ Ha'e nunga rupi Senhor ogueraa jepe kuuah heko porā va'e ikuai axya gui, ha'e rā heko vai va'e kuery ma ikuai axy aguā py omboty 'rā oikuua pota aguā ára pygurarā.

¹⁰ Ombopagave 'rā to'o oipotaa rami opa marā rei ikuai va'ekue, huvixa kuery onhe'ẽ rendua rupi e'ŷ guive. Ha'e kuery ma nhombojaru ha'e onhemboyyate rei va'e vy neī ipo'akakueve re ijayvu aguā voi ndokyiei.

¹¹ Ha'e rā anjo kuery ma imbaraeteve ha'e ipo'akave va'eri huvixa kuery re nda'ijayvu vai 'rā Senhor renonde.

* 1:18 Marcos 9.1-8 * 1:21 2 Timóteo 3.16,17 * 2:1 1 Timóteo 4.1,2; Judas 3-23

¹² Ha'e rã nhombojaru rei va'e kuery ma mymba inharõ va'e ombo'a ha'e ojuka pyrã rami rive ikuai, mba'eta ijayvu vai 'rã oikuaa e'ŷ va'e re voi. Ha'e ramo mymba opaa rami avi ha'e kuery voi omombaa 'rã.

¹³ Ha'e kuery ojexavai 'rã nhombojexavaiague py ae. Ha'e kuery ma ara py teĩ opa marã rei 'rã ov'y'a okuapy to'o oipotaa rupi. Mba'emo iky'apa ha'e ivaikue rei va'e rami ikuai. Ha'e kuery ae 'rã onhemongy'a ojekorea py, peẽ kuery reve okaru okuapya pyve.

¹⁴ Joe oma'ẽ 'rã itavy reixea rupi anho, ndopytu'ui 'rã guive ojejavya gui. Ombotavy 'rã ikangy va'e, peráta re nda'eveive ha'e ayvu vaipy ra'y ikuai vy.

¹⁵ Tape hi'yvi porã va'e gui ojepe'a vy Beor ra'y Balaão oikoague rupi oo vy okanhymba, mba'eta ha'e va'e ma teko vai rupi mba'emo ojoupa va'erã re anho nda'eveive raka'e.

¹⁶ (Ha'e rami avi opaga raka'e ojejavague re. Profeta oiko va'eri hymba ovoyi va'ety avakue ayvu py ijayvu ixupe, o'arandua rupi e'ŷ oiko ta ramo ojokoxe vy.)

¹⁷ Ha'e kuery ma ygua ipirupa va'e rami ikuai, yvyxí yvytu ogueraapa rive va'e rami guive. Pytúa rupi guarã rive ikuai.

¹⁸ Mba'eta onhemboyvate reia rupi ijayvu, ha'e to'o oipotaa rami ikuai vy ombotavy 'rã gueko vaitaty gui oo jepexe va'e.

¹⁹ "Escravo ve'ŷ ma peiko", he'i teĩ ha'e kuery ae imongy'apaa pegua escravo ikuai. Mba'eta jajeity uka vy nhandereityare pegua escravo japyta.

²⁰ Mba'eta amongue ma Senhor Nhandereraa jepea Jesus Cristo oikuaa, ha'e ko yvy regua nhomongy'apa reia gui oo jepe teĩ ha'e nunga pyve ju 'rã ojekore ha'e ojeity uka. Ha'e rami rire jypy guare gui nda'eveive 'rã opaa py.

²¹ Ha'e kuery pe ha'eveve 'rãgue teko porã katyua tape ndoikuuai ma voi va'e rire. Mba'eta oikuaa teĩ ojapo uka pyre iky'a e'ŷ va'e gui ojepe'a vy ha'ekue py ju ojevy.

²² Ha'e kuery re oiko ayvu "Jagua ojevy 'rã ha'e ae ombojevyague py, ha'e poryko ojoia porã teĩ ojevy ju 'rã yapo py onhemou'ũ aguã rive", he'i va'e.*

3

Senhor ou jevy aguã ára re ijayvua

¹ Xerembiayvu kuery, kova'e kuaxia ma mokoïguea ma pëvy ambopara. Mokoïve ma mba'emo re romoma'endu'a aguã rupi ambopara, pene'arandu ae teĩ.

² Ha'e rami rã penema'endu'a aguã profeta iky'a e'ŷ va'e kuery yma ijayvuague re, ha'e Senhor Nhandereraa jepea ojapo uka va'ekue re guive, peẽ kuerya rupi apóstolo kuery penembo'egue rami ae.

³ Jypy'i peikuuaa pota pova'e nunga re: Opaa ára py ikuai 'rã porojajai rei va'e. Nhandejajai reia rupi 'rã ikuai, ha'e kuery ae oipotaa rami rive.

⁴ Ha'e rami vy aipoe'i 'rã: "Mba'exa tu oiko Cristo ou jevy aguã re ijayvuague? Mba'eta nhaneramoï kuery omano guive ha'ekue rami ae tema opa mba'e ikuai, ko yvy onhonoa guive", he'i 'rã.

⁵ Ha'e rami teĩ ha'e kuery hexarai potae pova'e nunga gui, mba'eta yma Nhanderuete oayvu gui rive omoingo raka'e yva ha'e yvy. Yvy ma ojapo raka'e yy gui ojekuaa aguã rami, yy mbyte rupi gui ae.

⁶ Ha'e va'e rupi ae ju ha'e va'e javegua yvy omomba, yy ombou vy.

⁷ Ha'e gui aŷ yva ha'e yvy itui va'e ma Nhanderuete oayvu rupi ae ju omombyta tata py okaipa aguã. Joe oikuaa pota ha'e heko vai va'e kuery ombopaga aguã ára pyguarã omombyta.

⁸ Ha'e rami avi xerembiayvu kuery, peteĩ mba'e oĩ penderexarai e'ŷ aguã: Senhor pe rã peteĩ ára mil ma'etŷa rami, ha'e rã mil ma'etŷa ma peteĩ ára rami rive oaxa.

⁹ Ha'e nunga rupi Senhor ndarei ijayvuague ojapo aguã, amongue "Are ete ma" he'i teĩ. Ha'e rami 'rãgue py nhanerarõ are oikovy. Ndoipotai peteїve nhakanhy, ha'e rã nhande ha'e javive jajeko rerova.*

* 2:22 Provérbios 26.11 * 3:9 Lucas 13.6-8

¹⁰ Ha'e gui Senhor ára ma imonda va'e rami 'rā ou xapy'a. Ha'e va'e jave py yapu ratā reve yva okanhymba 'rā, ha'e mba'emo jaexa va'e okai vy ivaipa 'rā. Ko yvy ha'e mba'emo ojapo pyre ha'e javi 'rā okaipa.*

¹¹ Ha'e nunga ha'e javi ha'e rami ete okanhymba aguā rami optya ramo peē kuery pendeky'a e'ŷa rupi pota ke pendekuai Nhanderuete pe ete.

¹² Nhanderuete ára pearōa rupi pejapo ovaẽ voive aguā rami. Ha'e va'e jave py yva voi hendy vy ivaipa 'rā, ha'e mba'emo jaexa va'e okai vy hykupa 'rā.

¹³ Ha'e rā nhande kuery ma ijayvuague rami vy yva pyau ha'e yvy pyau nharō jakuapy, teko porā rendaraã.*

Senhor nharō vy ipara re nhanhembo'e aguā re ijayvua

¹⁴ Ha'e nunga rupi xerembiayvu kuery, ha'e nunga pearō vy penhea'ã tema pejexa uka aguā peteī rami ikuai va'e, iky'a e'ŷ va'e ha'e ojou vai pyrā e'ŷ.*

¹⁵ Penema'endu'a nhande-Senhor jogueraa jepexe vy nhoarō area re. Ha'e nunga re nhanerembiayvu irmão Paulo voi omo'aranduague rami vy ombopara pēvy.

¹⁶ Ha'e va'e ijayvu ha'e kuaxia ombopara va'e ha'e javi re ma ha'e ramigua oĩ. Ha'e rami avi amongue henda py oĩ jaikuua aguā haxyve va'e. Ha'e ramo oikuaa e'ŷ rei ha'e ikangy va'e kuery ma ha'e nunga oexa vy ha'evel'ŷa rami 'rā oikuaa, ipara iky'a e'ŷ va'e mboae re oĩ va'e voi ha'e kuery ndoikuaai reia rami avi. Ha'e ramia py ha'e kuery okanhy aguā katy oo.

¹⁷ Ha'e rā peē xerembiayvu kuery, ha'e nunga peikuua ma voi vy penheangu. Penhembotavy uka eme Senhor nhe'ẽ rendu e'ŷa kuery pe, penembaraetea rupi pendekuiai gui pejeity uka e'ŷ aguā.

¹⁸ Ha'e rami 'rāgue py penembaraeteve tema peovy nhande-Senhor Nhandereraa jepea Jesus Cristo penemboaxya rupi, ha'e peikuua porāvea py. Ha'e ae toguerovy'aa aŷ ha'e araka'e rā peve.

* 3:10 Mateus 24.29-31; Apocalipse 21.1-8

* 3:13 Isaías 65.17

* 3:14 1 João 3.2,3

Jypy'i kuaxia João ombopara va'ekue Jypy'i kuaxia João ombopara va'ekue

Apóstolo João aipoe'i: “Pova'e ayvu peẽ kuery pe ambopara peikuaa aguã pendere tekove marã e'ŷ oĩa, Nhanderuete Ra'y rery rupi pejerovia va'e re ae” (5.14).

Marã rami vy 'rã nda'u jaikuua nhandere tekove marã e'ŷ oĩa? Jaikuua 'rã jajejavya nhamombe'u ha'e jaejapa vy (1.8-9), Jesus ojapo uka va'ekue rupi nhandekuai vy (2.3), Jesus oikoague rami nhande voi nhandekuai vy (2.6), irmão kuery jayvu vy (2.9-11), Jesus reveguia jaikoa rami nhanhemombe'u porã vy (2.23), ha'e teko porã rupi jaiko vy (2.29). Jesus Cristo re jajerovia vy 'rãe jaupity tekove marã e'ŷ: “Nhandevy Nhanderuete ome'ẽ tekove marã e'ŷ, ha'e tekove ma Ta'y re oĩ. Ha'e nunga rupi amongue Nhanderuete Ra'y reve ikuai ramo ha'e kuery re oĩ tekove. Ha'e rã Ta'y reve e'ŷ ikuai ramo ma ha'e kuery re tekove noĩ” (5.11-12).

Ayvu Tekove me'ëa ha'e Nhanderuete reve peteĩ rami nhandekuaia re ijayvua

¹ Jypy'i guive roendu va'ekue, orerexa py ae roexa ha'e hexe ropoko guive va'ekue ma Ayvu Tekove me'ëa.*

² Mba'eta Tekove me'ëa ojekuaa rã ore roexa rire imombe'uarã roiko. Ha'e rami vy pendevy pe ju romombe'u. Ha'e va'e ma Tekove marã e'ŷ me'ëa, Nguu reve oiko va'ekue ri orevy ju ojekuaa karamboae.

³ Roexa ha'e roendu va'ekue ma pendevy pe ju romombe'u, peẽ kuery voi orereve peteĩ rami nhandekuai aguã. Mba'eta ore ma Tuu ha'e Ta'y Jesus Cristo reve ae orekuai.

⁴ Ha'e va'e rombopara pêv opa mba'e py javy'a aguã.

Nhanderuete rexakää rupi nhandekuai aguã jajejavya nhamombe'upa aguã re ijayvua

⁵ Ha'e gui ayvu ixugui roendu va'ekue, ha'e pêv ju romombe'u va'e ma pov'a'e: Nhanderuete ma hexakã va'e, hexe ma neĩ peteĩ henda py noĩ pytûa.

⁶ Xapy'a rei “Xee ma Nhanderuete reve aiko” ja'e teĩ pytûa rupi jaiko vy ma nhandeapu, anhetẽ va'e rupi e'ŷ jaiko.

⁷ Ha'e rami teĩ guexakää rupi ha'e oikoa rami avi nhande voi hexakää rupi jaiko ri vy peteĩ rami 'rã nhandekuai jomeme, ha'e Ta'y Jesus ruguy nhandeky'a'o 'rã jajejavya ha'e javi gui.

⁸ Ha'e rã “Xere ma neĩ peteĩ henda py jejavya noĩ” ja'e ri vy nhande ae jajekore, ha'e nhandere anhetẽ va'e noĩ.

⁹ Ha'e gui jajejavya nhamombe'upa ramo ma Nhanderuete heko porã ha'e ojeroviap y va'e vy ombogue 'rã jajejavvyague, ha'e nhandeky'a'o 'rã teko vai ha'e javi gui.

¹⁰ Xapy'a rei “Xee ma ajejavvyague va'e'ŷ” ja'e vy ixupe “Ijapu va'e” ja'e, ha'e nhandere ijayvu noĩ.

2

¹ Xera'y kue'iry, ha'e rami ambopara pejejavy e'ŷ aguã. Ha'e rami avi xapy'a rei amongue ojejavvyague ramo ma Nhanderuetea py peteĩ oiko nhanepytyvõarã. Ha'e va'e ma Jesus Cristo, heko porã va'e.

² Ha'e ma jajejavvyague re opaga va'ekue. Nhande jajejavvyague re anho e'ŷ opaga raka'e, ha'e rã yvy jave regua ojejavvyague re.

³ Ha'e ojapo uka va'e rupi jaiko vy jaikuua 'rã jaikuua va'e jaikoa.

⁴ Ha'e nunga rupi amongue “Xee aikuua” he'i teĩ ha'e ojapo uka va'e rupi ndoikoi va'e ma ijapu, ha'e hexe noĩ anhetẽ va'e.

⁵ Ha'e rã ijayvua rupi jaiko vy 'rãe anhetẽ Nhanderuete jayvu aguã va'e rami ete jayvu. Ha'e rami vy ae 'rã jaikuua hexe nhaña.

* 1:1 João 1.1-3, 14

6 “Xee ma hexe aĩ” he'i va'e ma ha'e oikoague rami ae toiko.

Ayvu yma guare ha'e ipyau va'e re ijayvua

7 Xerembiayvu kuery, ayvu ipyau va'e'ŷ ambopara pêvy, ha'e rã yma ojapo uka pyre jypy'i guive pendu va'ekue, mba'eta yma guive ojapo uka pyre ma ayvu pendu va'ekue ae.*

8 Ha'e rami avi ojapo uka pyre ambopara va'e ma ipyau guive, mba'eta Jesus Cristo ranhe anhetẽ va'e rupi oiko rire peẽ kuery ju ha'e va'e rupi peiko. Mba'eta pytū oaxa ma ovv, ha'e hendy va'e anhetẽ va'e ju hexakã ouvy.

9 Amongue “Xee hexakãa rupi aiko” he'i teĩ o-irmão ndoayvui va'e ma pytū rupi teri oiko.

10 Ha'e rã o-irmão kuery oayvu va'e ma hexakãa rupi oiko, ha'e hexe noĩ joityarã.

11 Ha'e rã o-irmão ndoayvui va'e ma pytū reia rupi oiko, marã katy pa ooa voi ndoikuuai, pytū oexa mbogue rã.

Kyrīgue'i, tujakue ha'e ipyaukue pe ijayvua

12 Xera'y kue'iry, pêvy ambopara mba'eta pejeavyague omboguepaa ma hery rupi.

13 Ha'vy peẽ tujakue, pêvy ambopara mba'eta peikuaa ma jypy'i guive oiko va'e. Ha'e ipyaukue, pêvy ambopara mba'eta pendepo'aka ma poromboeko vaia re.

14 Xera'y kue'iry, pêvy ambopara mba'eta peikuaa ma Nhanderuete. Ha'e tujakue, pêvy ambopara mba'eta peikuaa jypy'i guive oiko va'e. Ipyaukue, pêvy ambopara mba'eta penembaraete ha'e pendere Nhanderuete ayvu oĩ ramo pendepo'aka ma poromboeko vaia re.

Kova'e yvy regua reko re ijayvua

15 Peayvu eme ko yvy regua reko, neĩ mba'emo yvy re ikuai va'e. Mba'eta yvy regua reko rayvua kuery re ma Nhanderuete rayvua noĩ.

16 Mba'eta mba'emo yvy re ikuai va'e ma yvy regua meme: to'o oipota va'e, mba'emo jaexa vy jaipotapa reia, ha'e nhandejee ae rive jajeroviaa. Ha'e nunga ma yvy guigua meme, Nhanderuete guigua e'ŷ.

17 Ko yvy ma opa 'rã, to'o oipota va'e ha'e javi reve. Ha'e rã Nhanderuete oipota va'e ojapo va'e ma oikove riae 'rã.

Cristo ramigua rive ikuai va'e re ijayvua

18 Xera'y kue'iry, ovaẽ ma opa aguã ára, Cristo ramigua rive ojekuaa aguã. Pendu ma omombe'ua rã ha'e va'e ou 'rãa. Aŷ voi heta ma ikuai Cristo ramigua rive. Ha'e nunga rupi ae jaikuaa opa aguã ára ovaẽ maa.

19 Ha'e kuery ma nhande kuery mbyte gui ojepe'a va'ekue, nhande regua e'ŷ vy. Mba'eta nhande regua ikuai va'e rire optya 'rãgue nhande kuery reve. Ha'e gui ha'e kuery ojepe'a ramo jaikuaa nhande regua e'ŷ ikuiaia.

20 Ha'e rã pendere ma oĩ penemo'aranduarã Iky'a e'ŷ va'e omoĩ va'ekue. Ha'e rami rire peẽ kuery peikuaapa.

21 Kova'e kuaxia pêvy ambopara “Anhetẽ va'e ndapeikuuai” ha'e vy e'ŷ. Mba'eta peikuaa ae, ha'e peikuaa avi apu ikuai va'e anhetẽ va'e guigua e'ŷa.

22 Ha'e gui ijapu va'e ma “Jesus ae Cristo oiko” nde'i va'e. Ha'e nunga ma Cristo ramigua rive, mba'eta Tuu neĩ Ta'y re ndojeroviai va'e.

23 Ha'e nunga rupi Nhanderuete Ra'y pe “Xee ma hexeveguia e'ŷ” he'i va'e re ma Tuu noĩ. Ha'e rã “Nhanderuete Ra'y reveguia ae xee” he'i va'e re ma Tuu avi oĩ.

24 Pendere toĩ riae jypy'i guive pendu va'ekue. Mba'eta jypy'i guive pendu va'ekue pendere oĩ ramo ma peẽ voi 'rã peĩ Nhanderuete ha'e Ta'y re.

25 Mba'eta ijayvu tekove marã e'ŷ ome'ẽ aguã re nhandevy.

26 Ha'e nunga ambopara penembotavyxea kuery gui penheangu aguã.

Nhe'ẽ Ky'a E'ŷ nhanembo'ea re ijayvua

* 2:7 João 13.34

²⁷ Ha'e gui pendere ojeguigua omoī va'ekue oī riae ramo penembo'earā mboae oī e'ŷ teī ha'eve, mba'eta pendere omoī mbyre ae 'rā penembo'e opa mba'e re. Ha'e va'e ma anhetē rupigua ae, anhetē rupigua merami rive'ŷ. Peī riae ke hexe, penembo'league rami vy ae.

²⁸ Ha'e gui aŷ xera'y kue'iry, peī atā tema hexe. Ha'e rami vy ha'e ojekuaa jevy ramo nhandep'y a guaxu, ha'e ixugui nhaximba reve nhanhemi e'ŷ aguā ou jevya py.

²⁹ Cristo heko porā va'ea jaikuaa vy jaikuaa avi teko porā rupi ikuai va'e ixugui oiko va'ekue memea.

3

Cristo iky'a e'ŷa rami nhande voi nhandekuai aguā re ijayvua

¹ Peikuuaa pota Nhanderuete nhanderayvu etea re, nhandevy "Xera'y kuery" he'ia py. Anhetē ae Nhanderuete ra'y kuery nhandekuai.* Ha'e nunga rupi ae yvy regua kuery nanhandekuaai, mba'eta Cristo voi ndoikuaai okuapy rire.

² Xerembiayvu kuery, aŷ voi Nhanderuete ra'y kuery nhandekuai. Ha'e rami teī ndajaikuaai teri raka'eve rā marā ramigua ete pa jaiko 'rāa. Ha'e rā peteī mba'e ma jaikuaa porā: Cristo ojekuaa ramo nhande voi 'rā heko rami jaiko, mba'eta jaexa 'rā marā rami ete pa ha'e oikoa.

³ Ha'e rami aguā oarō okuapy va'e ha'e javi ojeky'a'o uka 'rā ha'e iky'a e'ŷa rami avi ikuai aguā.

⁴ Ha'e rā jejavya rupi ikuai va'e ma lei rovai rupi avi ikuai, mba'eta jejavya ma lei rovai ae.

⁵ Peikuuaa avi Cristo ou raka'e jajejavva oipe'apa aguā. Hexe ma jejavva noī.*

⁶ Hexe ikuai va'e ma ndojejavva riaevei ma 'rā. Ha'e rā jejavya rupi ikuai va'e ma ndoexai, neī ndoikuaai okuapy.

Nhanderuete guigua ha'e anha guigua re ijayvua

⁷ Xera'y kue'iry, penhembotavy uka eme avave rei pe. Teko porā rupi ikuai va'e ma heko porā va'e ae, Cristo heko porā va'ea rami avi.

⁸ Ha'e rā jejavya rupi ikuai va'e ma anha guigua, mba'eta anha jypy'i guive ojejavva raka'e. Ha'e rami aguā ae Nhanderuete Ra'y ou, anha rembiapo ombovaipa aguā.

⁹ Ha'e javi Nhanderuete gui oiko va'ekue ma ndojejavva riaevei ma 'rā, mba'eta ha'e kuery re oī Nhanderuete guigua. Ha'e kuery ndojejavva riaevei 'rāe, Nhanderuete gui oiko rire.

¹⁰ Po rami 'rā jaikuaa mava'e pa Nhanderuete ra'y kuery ha'e anha ra'y kuery ikuiaia. Teko porā rupi nda'ikuai va'e ma Nhanderuete guigua e'ŷ, ha'e o-irmão kuery ndoayvui va'e guive.

Irmão kuery jayvu ete aguā re ijayvua

¹¹ Ha'e gui ayvu jypy'i guive pendu va'ekue ma pova'e: Peteī-teī jajoayvu aguā.

¹² Caim oikoague rami e'ŷ 'rā nhandekuai, mba'eta ha'e va'e ma poromboeko vaia guigua oiko rire ojuka raka'e guyvy. Mba'e re nda'u ojuka? Mba'eta heko vai va'e oiko, ha'e rā tyvy ma heko porā va'e.*

¹³ Irmão kuery, penhemondyi eme yvy regua kuery pendere nda'ija'ei rā.

¹⁴ Irmão kuery jayvu vy ae 'rā jaikuaa manoia gui tekove jaupity aguā re jaaxa maa.* Ha'e rā ndoayvui va'e ma manoia py teri ikuai.

¹⁵ Irmão kuery re nda'ija'ei va'e ma jojuka va'ety meme ikuai. Ha'e peikuuaa jojuka va'ety re tekove marā e'ŷ noīa.

¹⁶ Po rami ae jaikuaa mborayvu, Cristo nhanderayvu vy nhandere guekove ome'ẽ rire. Ha'e ramo nhande kuery avi 'rā nhanderekove nhame'ẽ irmão kuery re.

¹⁷ Ha'e gui xapy'a rei amongue mba'emo kova'e yvy rupigua oguerekopa rei va'e o-irmão ojexavai rei rā oexa teī ipy'a mbarae 'rā oipytyvō e'ŷ aguā. Ha'e nunga re mba'exa tu oī Nhanderuete guigua porayvua?

* 3:1 João 1.12 * 3:5 João 1.29 * 3:12 Gênesis 4.8 * 3:14 João 5.24

¹⁸ Xera'y kue'iry, nda'evei jajoayvu merami aguã, nhandeayvu py rive. Jaexa uka ete ke jajoayvua, nhanhopytyvõa py ae.

¹⁹ Po rami 'rã jaikuua anhetẽ va'e guigua jaiko va'ea, henonde nhandepy'a guaxu aguã ndajaikuai reia gui.

²⁰ Ha'e rami avi nhandepy'a py nhanembopagaarã nhaendu teĩ nhandepy'a gui Nhan-deruete hi'aranduve va'e vy opa mba'e oikuua.

²¹ Xerembiayvu kuery, nhandepy'a py nhanembopagaarã nanhaendui ri vy nhandepy'a guaxu 'rã Nhanderuete renonde.

²² Ha'e rami vy mba'emo re jajerurea voi jajopy 'rã ixugui, mba'eta henonde ojapo uka va'e rupi jaiko vy nhambovy'a.

²³ Po rami ae ha'e ojapo uka va'ekue: Ta'y Jesus Cristo rery rupi jajerovia aguã, ha'e peteĩ-teĩ jajojayvu aguã ijayvuague rami vy.

²⁴ Nhanderuete ojapo uka va'e rupi ikuai va'e ma hexe anho tema ikuai, ha'e gui ha'e kuery re ma Nhanderuete voi oĩ. Po rami 'rã jaikuua nhandere oĩa, Inhe'ẽ nhandere omoĩ va'ekue gui ae.

4

1 João 2.18-26; 2 João 7-11

¹ Xerembiayvu kuery, nda'evei perovia aguã nhe'ẽ guigua ayvu va'e ma guive rã. Peikuua pota ranhe nhe'ẽ kuery anhetẽ Nhanderuete guigua tyrã pa anya re, mba'eta heta ma ikuai profeta ramigua rive yvy re.

² Po rami jaikuua 'rã Nhanderuete Nhe'ẽ, mba'eta "Jesus Cristo ngo'o reve ou va'ekue re ajerovia" he'i va'e ma Nhanderuete guigua meme.

³ Ha'e rã "Jesus revegua aiko" nde'i va'e ma Nhanderuete guigua e'ŷ, ha'e rã Cristo ramigua nhe'ẽ rive. Pendu ma ha'e nunga oiko 'rãa, ha'e gui aŷ voi oiko ae ma yvy re.

⁴ Xera'y kue'iry, peẽ kuery ma Nhanderuete guigua pendekuai vy pendepo'aka ma profeta ramigua kuery re, mba'eta pendere oĩ va'e ma yvy regua kuery re oĩ va'e gui ipo'akave.

⁵ Ha'e kuery ma yvy regua ikuai va'e vy yvy gui rive 'rã ijayvu, ha'e ramo yvy regua kuery ojapyxaka 'rã ijayvua re.

⁶ Ha'e rã nhande kuery ma Nhanderuete guigua nhandekuai ramo Nhanderuete oikuua va'e kuery ojapyxaka 'rã nhandeayvua re. Ha'e rã Nhanderuete guigua e'ŷ ma ndojapyx-akai 'rã okuapy. Ha'e rami rã jaikuua 'rã nhe'ẽ anhetẽ rupi, tyrã pa nhombotavya rupi ijayvu va'ea.

Jajoayvu aguã re ijayvua

⁷ Xerembiayvu kuery, jajoayvu peteĩ-teĩ, mba'eta mborayvu ma Nhanderuete guigua ae. Porayvu va'e ma Nhanderuete guigua meme ikuai, ha'e oikuua guive Nhanderuete.

⁸ Ha'e rã joayvu e'ŷ va'e ma ndoikuuaai Nhanderuete, mba'eta Nhanderuete ma mborayvu rupigua ae.

⁹ Po rami Nhanderuete oexa uka raka'e nhanderayvua, Gua'y peteĩ'i va'e ombou vy, hexe vy jaikove riae aguã.

¹⁰ Pova'e py ma mborayvu ojekuaai: Nhanderuete jayvua py e'ŷ, ha'e rã ha'e ranhe nhanderayvua py, mba'eta Gua'y ombou jajejavyague re opaga aguã.

¹¹ Xerembiayvu kuery, ha'e rami Nhanderuete nhanderayvu rire nhande kuery avi 'rã jajoayvu peteĩ-teĩ.

¹² Avave rei ndoexaai teri Nhanderuete. Ha'e rami avi jomeme jajoayvu ramo ma Nhanderuete oĩ 'rã nhandere, ha'e iporayvua ojekuaai 'rã va'ekue ojekuaapa 'rã.*

¹³ Po rami jaikuua 'rã hexe nhaĩa, ha'e ha'e voi nhandere oĩa, mba'eta nhandereve guarã ombou Onhe'ẽ.

¹⁴ Ha'e ore kuery roexa ha'e romombe'u guive Nhanderuete Gua'y ombouague yvy re ikuai va'e reraa jepearã.

* 4:12 João 1.18

¹⁵ “Jesus ma Nhanderuete Ra'y” he'i va'e re ma Nhanderuete oĩ. Ha'e kuery voi ikuai Nhanderuete re.

¹⁶ Nhande kuery jaikuua ha'e jarovia guive Nhanderuete nhanderayvua. Nhanderuete porayvua rupi oiko va'e ramo porayvu rupigua ikuai va'e ma hexe meme ikuai, ha'e ha'e kuery re Nhanderuete avi oĩ.

¹⁷ Ha'e ramo nhanderayvua jaikuua porã vy nhandepy'a guaxu 'rã pavẽ re oikuua potaa ára py voi, mba'eta kova'e vy re jaiko reve ma voi nhandekuai ha'e oikoa rami.

¹⁸ Hembiajyvu jaiko vy ndajakyje rei 'rã, mba'eta opa mba'e py nhanderayvua oipe'a 'rã jakyjea. Mba'eta jakyjea ma japaga aguã rami jaikoa py anho 'rã nhaendu. Ha'e nunga rupi okyje va'e ma ndoikuua porãi teri nhanderayvua.

¹⁹ Nhande kuery jajoayvu mba'eta ha'e ranhe nhanderayvu rire.

²⁰ Amongue “Xee ayvu Nhanderuete”, he'i va'eri irmão kueryndoayvui va'e ijapu. Mba'eta o-irmão oexa va'e ndoayvui vy Nhanderuete oexa e'ŷ va'e katuve ma ndoayvui 'rã.

²¹ Pova'e ayvu nhaendu ixugui: Nhanderuete oayvu va'e ma toayvu avi o-irmão kuery.

5

Yvy rupigua re nhandepo'aka aguã re ijayvua

¹ Jesus ae Cristo oikoa oguerovia va'e ma Nhanderuete gui oiko va'ekue meme. Ha'e Nhanderuete oayvu va'e kuery oayvu avi 'rã ixugui oiko va'ekue mboae.

² Po rami jaikuua Nhanderuete ra'y kuery jayvua, mba'eta Nhanderuete jayvu vy ojapo uka va'e rupi nhandekuai.

³ Mba'eta Nhanderuete ojapo uka va'e rupi nhandekuaia py ae 'rã jaexa uka jayvua.* Ha'e ojapo uka va'e ma nda'ipoyi guive,

⁴ mba'eta ha'e javi Nhanderuete gui jaiko va'ekue ma nhandepo'aka 'rã vy rupigua re. Po rami 'rã nhandepo'aka vy rupigua re, jajerovia rupi ae.

⁵ Mava'e kuery nda'u ipo'aka 'rã vy rupigua re? Jesus Nhanderuete Ra'y oikoa oguerovia va'e kuery anho.

Jesus reko regua kuaa ukaa re ijayvua

⁶ Jesus Cristo ou vy yy ha'e nguguy py ojekuaa uka raka'e. Yy py anho e'ŷ ojekuaa uka, ha'e rã yy ha'e nguguy py. Ha'e gui Nhe'ẽ avi oiko ikuua ukaarã, mba'eta Nhe'ẽ ma anhetẽ va'e kuaa ukaa ae.

⁷ Mba'eta ikuua ukaa mboapy ikuai [yva re: Nhanderuete, Jesus ha'e Nhe'ẽ Ky'a E'ŷ. Ha'e mboapyve ma pete'i].

⁸ Ha'e gui ikuua ukaa mboapy avi ikuai vy re:] Nhe'ẽ, yy ha'e huguy. Mboapyve ma pete'i rami meme oikuua uka.

⁹ Ha'e gui avakue ayvu jarovia vy Nhanderuete ayvu katuve ma jarovia. Po rami Nhanderuete oikuua uka Gua'y reko regua.

¹⁰ Nhanderuete Ra'y re ojerovia va'e kuery re ae 'rã ikuua ukaa oĩ. Ha'e rã Nhanderuete ayvu ndogueroviai va'e ma ixupe “Ijapu va'e” he'i, mba'eta Gua'y reko regua Nhanderuete oikuua uka rã ndogueroviai.

¹¹ Mba'eta oikuua uka va'ekue ma pova'e ae: Nhandedy Nhanderuete ome'ẽ tekove marã e'ŷ, ha'e tekove ma Ta'y re oĩ.

¹² Ha'e nunga rupi amongue Nhanderuete Ra'y reve ikuai ramo ha'e kuery re oĩ tekove. Ha'e rã Ta'y reve e'ŷ ikuai ramo ma ha'e kuery re tekove noĩ.*

Mba'emo re jajerure aguã re ijayvua

¹³ Pova'e ayvu peẽ kuery pe ambopara peikuaa aguã pendere tekove marã e'ŷ oĩa, Nhanderuete Ra'y rery rupi pejerovia va'e re ae.

¹⁴ Nhanderuete re jajerovia vy jaikuua avi ixupe mba'emo re jajerure ramo oendu 'rãa, ha'e oipotaa rami ri jajerure ramo.

* 5:3 João 14.15 * 5:12 João 3.36

¹⁵ Jajerurea oendua jaikuaa vy jaikuaa avi jajerureague ome'ẽ ma 'rãa.

¹⁶ Ha'e gui xapy'a rei amongue oexa 'rã o-irmão omano aguã rami e'ŷ ojejavy rã. Ha'e rami vy ha'e va'e re ojerure 'rã, ha'e ramo Nhanderuete omoingove ju 'rã, omano aguã rami e'ŷ ojejavy ramo. Mba'eta oiko avi teko vai nhamano aguã rami nhanemoingo va'erã. "Ha'e nunga re pejerure" nda'ei.

¹⁷ Teko vai ma guive rã jejavya meme. Teĩ oiko avi teko vai nhamano aguã rami nhanemoingo va'erã e'ŷ.

¹⁸ Jaikuaa ha'e javi Nhanderuete gui oiko va'ekue ndojejavy riaevei ma 'rãa. Mba'eta ha'e kuery re Nhanderuete gui jypy'i oiko va'ekue opena 'rã poromboeko vaia oity e'ŷ aguã.

¹⁹ Jaikuaa nhande kuery Nhanderuete guigua nhandekuaia, ha'e rã yvy regua kuery ma poromboeko vaia re ikuaria.

Omongangeta reve opaa py ijayvuague

²⁰ Jaikuaa avi Nhanderuete Ra'y ou vy nhanemo'arandu anhetẽ va'e jaikuaa aguã rami. Ha'e rami rire ma anhetẽ va'e re nhaĩ, Ta'y Jesus Cristo re ae. Ha'e va'e ma Nhanderuete anhetẽ va'e ha'e tekove marã e'ŷ me'ea.

²¹ Xera'y kue'iry, penheangu ke Nhanderuete ramigua rive pembojerovia e'ŷ aguã.

Mokoīguea kuaxia João ombopara va'ekue Mokoīguea kuaxia João ombopara va'ekue

Kova'e kuaxia apóstolo João ombopara va'ekue peteī kunha pe, imemby kuery pe guive. Ijayvu anhetē va'e rupi ikuai aguā, mborayvu re guive. Anhetē va'e ma Jesus Cristo regua ae, mba'eta “Cristo regua rami e'ŷ nhombo'ea, ha'e ayvu porā gui ojepe'a va'ekue re ma Nhanderuete noī. Ha'e rā ha'e va'e ayvu nhanembo'eague rupi riae ikuai va'e re ma Nhanderuete ha'e Ta'y oī” (versículo 9).

Oxarura reve ijayvu vy omboypyague

¹ Xee igreja re apena va'e ma axarura ndevy, xereindy Nhanderuete ojeupe guarā ndeporavo va'ekue pe, ha'e nememby kuery xerembiayvu ikuai avi va'e pe. Xee anho e'ŷ roayvu, anhetē va'e oikuua va'e kuery ha'e javi guive,

² mba'eta nhande kuery pavē re anhetē va'e oī, ha'e nhandereve riae 'rā oiko.

³ Nhandereve oī 'rā nhanemboaxya ha'e mby'a porā Nhanderuete ha'e Ta'y Jesus Cristo guigua, anhetē va'e ha'e mborayvu guive.

Jajoayvu aguā re ijayvua

⁴ Xee avy'a ete nememby kuery regua anhetē va'e rupi ikuai rā aikuua vy, Nhanderu ojapo ukaague rami vy ae.

⁵ Aŷ ma xereindy, xee ajerure peteī-teī jajoayvu aguā. Ha'e ramia py ma ayvu ipyau va'e'ŷ ambopara, ha'e rā jypy'i guive oeja va'ekue.*

⁶ Po rami 'rā jajoayvu: ha'e ojapo uka va'e rupi nhandekuaia py. Kova'e ma jypy'i guive ojapo uka va'e regua pendu va'ekue, mborayvu re nhandekua aguā.

Nhombotavya rupi nhombo'ea kuery reko re ijayvua

⁷ Mba'eta heta avi ikuai nhombotavy va'e yvy jave rupi. Ha'e va'e kuery ma “Jesus Cristo ngo'o reve ou va'ekue re ajerovia” nde'i. Ha'e rami ikuai nhombotavypa rei va'e kuery, Cristo rovaigua ae.*

⁸ Ha'e nunga rupi peiko kuaa pota, pemokanhy e'ŷ aguā penhea'āague repyrā oī va'e, ha'e rā pejopypa aguā.

⁹ Ha'e gui Cristo regua rami e'ŷ nhombo'ea, ha'e ayvu porā gui ojepe'a va'ekue re ma Nhanderuete noī. Ha'e rā ha'e va'e ayvu nhanembo'eague rupi riae ikuai va'e re ma Nhanderuete ha'e Ta'y oī.

¹⁰ Amongue pendea py ou vy ha'e va'e ayvu rupi e'ŷ penembo'e ramo pemovaē eme pendero py, pexarura eme guive.

¹¹ Mba'eta ha'e kuery pe amongue oxarura vy ma teko vai apoa kuery reve onhemoirū va'e.

Oxarura reve opaa py ijayvuague

¹² Heta teri areko ambopara va'erā pēvy. Ha'e rami teī aŷ namombe'uxei tinta py kuaxia re, mba'eta peē kuerya py aju voixe. Ha'e ramo ma nhandeayvu porā 'rā, javy'a ete aguā.

¹³ Ndekypy'y oiporavo pyre memby kuery ha'e javive oxarura uka ndevy.

* 1:5 João 13.34,35; 1 João 2.7,8

* 1:7 Romanos 16.17,18; 1 João 2.18-26

Mboapykuea kuaxia João ombopara va'ekue Mboapykuea kuaxia João ombopara va'ekue

Kova'e kuaxia ma apóstolo João ombopara va'ekue peteī igreja re opena va'e Gaio hery va'e pe. Oguerovy'aa rupi ijayvu, “mba'eta xera'y kuery anhetē va'e rupi ikuai aendu rā xembovy'ave pavē gui”, he'i vy (versículo 4).

Guyvy Gaio pe oxarura reve ijayvu vy omboypyague

- ¹ Xee igreja re apena va'e axarura ndee Gaio roayvu ete va'e pe.
- ² Xerembiayvu, opa mba'e py ajerure reiko porā ha'e nerexaī aguā re, nenhe'ẽ oiko porāa rami avi.
- ³ Xee avy'a ete irmão kuery ovaē vy omombe'u rā anhetē rupigua reikoa, mba'eta anhetē va'e rupi ae reiko va'e.
- ⁴ Mba'eta xera'y kuery anhetē va'e rupi ikuai aendu rā xembovy'ave pavē gui.

Ayvu porā mombe'ua kuery nhaipytyvō aguā re ijayvua

- ⁵ Xerembiayvu, irmão kuery reipytyvō reikovya py ma ha'evea rami rejapo. Yvy mboae guigua kuery ou ramo voi reipytyvō jepi.
- ⁶ Mba'eta igreja kuery pe ha'e kuery omombe'u porā ndeporayvua. Ha'evea rami reipytyvō oguatave aguā, ha'e ramia py Nhanderuete rami ete rejapo.
- ⁷ Mba'eta ha'e kuery ma Hery rupi oje'oi vy peteīve henda py nonhepytyvō ukai nhande kuery regua e'ŷ pe.
- ⁸ Ha'e nunga rupi ha'evea rami nhaipytyvō ha'e va'e irmão kuery, anhetē va'e oenduave aguā rami jajapo.

Heko vai ha'e heko porā va'e reko re ijayvua

- ⁹ Xee ma igreja kuery pe mba'emo re ambopara teī Diótrefes onhemboyvatevexe rei vy ndojapyxaka potai oreayvu re.*
- ¹⁰ Ha'e nunga rupi araka'e'i rā apy pendekoa py aju vy ixupe xeayvu 'rā ha'eve'ŷa rami ojapoague re, mba'eta opa marā rei ijayvu orere. Ha'e ramia gui ojapo vaivexe vy irmão kuery ha'e py ovaē ramo nomovaēi, ha'e amongue omovaē ta ramo nomovaē ukai, ha'e rā igreja gui omoxē ete raka'e.
- ¹¹ Xerembiayvu, ndee ma eiko eme teko vai rupi, ha'e rā teko porā rupi anho, mba'eta teko porā rupi ikuai va'e ma Nhanderuete guigua meme. Ha'e rā teko vai rupi ikuai va'e ma neī peteīgue voi ndoexai Nhanderuete.
- ¹² Ha'e rā Demétrio re ma ima'endu'a porā pavē, anhetē va'e eteve voi. Ore kuery voi roikuua heko porāa, ha'e ndee reikuua avi oreayvu anhetē ete memea.

Oxarura reve opaa py ijayvuague

- ¹³ Heta mba'e teri areko ndevy ambopara aguā. Ha'e ramia teī namombe'uxei tinta ha'e caneta py rive.
- ¹⁴ Mba'eta xee aa voixe roexa vy. Ha'e ramo ma nhandeayvu porā 'rā.
- ¹⁵ Tove terendu mby'a porā. Nhaneirū kuery ha'e javi oxarura uka ndevy. Ha'e nhaneirū kuery ndea py ikuai va'e peteī-teī pe emombe'u orema'endu'aa.

* 1:9 Mateus 20.25-28; 23.1-12

Judas ombopara va'ekue Judas ombopara va'ekue

Kova'e kuaxia mboparaare ma Judas Iscariotes e'ŷ, Judas mboae, Tiago ha'e Jesus ryvy (versículo 1). Jypy onhembopy'a jaa jepea omombe'u porāve aguā, ha'e gui amboae rami onhembopy'a, jajerovia regua jaepya rupi nhanhea'ã aguā re ijayvu aguā. “Mba'eta amongue avakue Nhanderuete pegua e'ŷ nhanembotavyxe vy nhemi rupi oike ra'e nhanembyte py. Ha'e va'e kuery ma opa marā rei ikuai vy ha'eve'ŷa rami nhombo'e” (versículo 4a).

“Ha'e rā peē xerembiayvu kuery, tapenembaraeeteve peovy pejerovia iky'a e'ŷ va'e rupi, ha'e Nhe'ẽ Ky'a E'ŷ gui peikuua vy pejerurea py guive. Nhanderuete penderayvua rupi anho tapendekuai. Pearō tema nhande-Senhor Jesus Cristo penemboaxya rupi tekove marā e'ŷ ogueru rā guarā” (versículos 20-21).

Oxarura reve ijayvu vy omboypyague

¹ Xee Judas ma Jesus Cristo rembiguai ha'e Tiago ryvy aiko.* Axarura peē kuery Nhanderuete remienoĩ, hembiayvu, ha'e Jesus Cristo rery rupi openamby pendekuai va'e pe.

² Tove peē kuery tapenduve tema penemboaxya, mby'a porā ha'e mborayvu.

Cristo re jajerovia regua re nhanhea'ã aguā re ijayvua

³ Xerembiayvu kuery, jypy anhembopy'a teĩ nhande kuery jaa jepea re pêvy ambopara aguā. Ha'e gui ma aendu ete amboae re xeayvu aguā pêvy ambopara vy, jajerovia regua anhetē va'e rupi penhea'ã aguā, iky'a e'ŷ va'e kuery pe peteigüe'i omboaxaa rire.

⁴ Mba'eta amongue avakue Nhanderuete pegua e'ŷ nhanembotavyxe vy nhemi rupi oike ra'e nhanembyte py. Ha'e va'e kuery ma opa marā rei ikuai vy ha'eve'ŷa rami nhombo'e Nhanderuete nhanemboaxya re, ha'e Senhor Jesus Cristo Huvixave petei'i va'e re ndojeroviaia rami ijayvu guive. Ha'e kuery opaga aguā yma ma voi omoña.*

Ymagua kuery heko vai va'e ombopagaa ague re ijayvua

⁵ Ha'e nunga ha'e javi peikuua ae ma teĩ romoma'endu'axe ju Egito yvy gui Senhor heta va'e kuery oguenoẽ vy ogueraa jepepa rire teĩ ojerovia e'ŷ va'e kuery omokanhyague re.*

⁶ Anjo kuery voi guekorā va'ekue gui ojepe'a vy guekoa ae oejapa rire Senhor ombotypa pytúa py, corrente opa e'ŷ va'e py ojokua, ombopaga aguā ára tuvixa va'e pyguarā.

⁷ Ha'e gui Sodoma, Gomorra ha'e ha'e katy'i rupi tetã ikuai va'e re ha'ekue rami ae ju oiko raka'e. Ha'e pygua kuery ma anjo ojejavy va'ekue rami ae itavy reia rupi ikuai, ha'e amboae rami rei to'o oipotaa rupi guive. Ha'e kuery ombopagaague ma tata ogue'ŷ va'e gui nhande voi jakyje aguā opyta.*

⁸ Ha'e gui aŷ voi nhombotavy reia kuery ma ha'ekue rami ae ju ikuai. Oexa ra'ua rupi rive vy ngo'o ae omongy'a, nonhe'ẽ rendui huvixa kuery, ha'e ijayvu rei 'rā ipo'akakueve re.

⁹ Ha'e rā anjo yvateve va'e Miguel ma anha reve Moisés retekue re joaka ete ijayvua py voi nonhemboyvatei raka'e anha pe ijayvu vai aguā. Ha'e rami 'râgue py “Senhor ae ta'ijayvu ndevy”, he'i.*

¹⁰ Ha'e rā nhombo'e vaia kuery ma ijayvu vai 'rā oikuaa e'ŷ va'e ha'e javi re. Mymba kuery hi'arandu e'ŷ va'e rami avi onhemongy'apa rei 'rā mba'emo oakā gui ae oikuaa va'e rupi rive.

* 1:1 Mateus 13.55 * 1:4 2 Timóteo 3.1-9 * 1:5 2 Pedro 2.1-22 * 1:7 Egito yvy gui oo jepe va'ekue ri ojerovia e'ŷ va'e omokanhyague omombe'u Números 14.26-30 py, ha'e gui tetã Sodoma ha'e Gomorra ombovaipaague ma Gênesis 19 py omombe'u. * 1:9 Zacarias 3.2

¹¹ Ha'e kuery pe nda'evei ete 'rā! Mba'eta Caim oikoague rupi ae ju ha'e kuery ikuai, ha'e mba'emo ojoupaxea rupi rive oje'oi pojava Balaão ojekoreague ramigua rupi, ha'e rire Coré kuery rami avi okanhymba 'rā nhonhe'ē raxaveague re.[†]

¹² Ha'e kuery ma yy guy py ita itui va'e rami onhenhomni va'e, mba'eta ha'e javi joa-joapy, pekarua py ha'e kuery voi 'rā ikuai, peteīve henda py oxīa oendu e'ŷ re.[‡] Mymba kuery re opena va'ety ha'e ae rive onhemongaru va'e rami avi ikuai. Oky aguā e'ŷ arai yvytu ogueraapa rive va'e rami, ha'e yvyra hi'a ára py teī hi'a e'ŷ va'e rami avi ikuai. Ha'e va'e nunga ma mokoīgue omano va'e, mba'eta ipirupa va'ekue ha'e oapo'opa pyre rami.

¹³ Ha'e kuery ma yai opu'ā-pu'ā vy hyjui ombovu va'e rami avi ikuai, ha'e jaxy-tata ova va'e rami, pytū reia py araka'e rā peve guarā omoingo pyre.

¹⁴ Ha'e va'e kuery rekora ma Enoque omombe'u raka'e. Ha'e va'e ma Adão ramymino kuery jevy regua sete-a va'ekue. Aipoe'i: "Senhor ou 'rā ojeupeguia kuery iky'a e'ŷ va'e mbovy rei e'ŷ reve.

¹⁵ Joe oikuua pota vy ou, mba'eta heko vai va'ekue ha'e javi 'rā ombopaga, ixupe ndoikoxei vy teko vai ojapo, ha'e hexe ijayvu vaiague re", he'i va'ekue.

¹⁶ Ha'e kuery ma joe ijayvu rei riae va'e, ndovy'aia rupi rei ijayvu va'ety, ha'e kuery ae oipotaa rami ikuai va'e. Onhemboyvate reia rupi anho ijayvu. Joguerorya rupi 'rā ijayvu mba'emo ojoupaxe vy rive.

Apóstolo kuery ijayvu ma voiague rupi nhane mongetaague

¹⁷ Ha'e rā peē xerembiayvu kuery, penema'endu'a riae ke yma guive nhande-Senhor Jesus Cristo pegua apóstolo kuery ijayvuague re.

¹⁸ Mba'eta aipoe'i pêvy: "Opaa ára ikuai 'rā porojajai reia kuery, teko vai ojapoxea rupi rive ikuai va'e", he'i va'ekue.*

¹⁹ Ha'e va'e kuery ojapo 'rā joo rami e'ŷ-e'ŷ ikuai aguā rami. Yvy regua reko rami rive ikuai, Nhe'ē rewegua e'ŷ.

²⁰ Ha'e rā peē xerembiayvu kuery, tapenembaraeteve peovy pejeroviaa iky'a e'ŷ va'e rupi, ha'e Nhe'ē Ky'a E'ŷ gui peikuaa vy pejerurea py guive.

²¹ Nhanderuete penderayvua rupi anho tapendekuai. Pearõ tema nhande-Senhor Jesus Cristo penemboaxya rupi tekove marā e'ŷ ogueru rā guarā.

²² Pemboaxy ke ndojerovia porāi teri va'e.

²³ Ha'e rami vy peraa jepe, tata gui perojepe'a vy. Ha'e rā amboae kuery ma pemboaxy avi teī pejererokyjea rupi guive, mba'eta to'o oipotaa rupi vy oao voi omongy'apa rei vy ojeguarupy optya.*

Opaa py ogueroayvu porāague

²⁴ Ha'e gui Nhanderuete ma ipo'aka opena aguā ja'a e'ŷ aguā, ha'e guexakāa py nhandererovy'a reve iky'a e'ŷ va'e nhanderexa uka aguā.

²⁵ Tove Nhanderereraa jepea Nhanderuete peteī'i va'e toguerovy'aa nhande-Senhor Jesus Cristo rery rupi. Ha'e anho ha'eve yvate ete aguā, pavē re opena ha'e ipo'aka aguā, yma guive, aŷ ha'e araka'eve rā peve. Amém.

[†] 1:11 Caim rekoke ma Gênesis 4.1-8 py omombe'u, Balaão rekoke ma Números 22 py, ha'e rā Coré kuery rekoke ma Números 16.1-9 py omombe'u. [‡] 1:12 Yy guy py ita itui va'e ma ijavaete 'rā, mba'eta ha'e nunga kanoā mboguataa kuery ndoexai vy onhembota rive 'rā. * 1:18 2 Pedro 3.3 * 1:23 Gálatas 6.1,2; Tiago 5.19,20

João pe oexa uka pyre Apocalipse 'epy va'e oĩa João pe oexa uka pyre apocalipse 'epy va'e oĩa

"Kova'e ma Jesus Cristo araka'eve guarã oikuua uka va'ekue. Ixupe Nhanderuete omboaxa va'ekue, guembiguai kuery pe ju oikuua uka aguã mba'emo are'ŷ'i re oiko va'erã, tenonderã omoĩ ma voiague rami vy. Ha'e rami vy ojeupegua anjo ombou, guembiguai João pe oikuua uka aguã" (1.1).

Apóstolo João pe Jesus ojexá uka vy aipoe'i: "Ekyje eme. Xee ma jypy'igua ha'e opa vygua, oikove va'e guive aiko. Mba'eta amano va'ekue, teĩ aŷ ma aikove ju araka'e rã peve guarã. Areko avi omanogue retã rokẽ pe'aa. Ha'e nunga rupi embopara ke mba'emo rexá va'ekue, mba'emo aŷ oiko, ha'e araka'eve rã oiko va'erã guive", he'i (1.17b-19). Ha'e gui ma omombe'u igreja kuery sete henda rupi ikuai va'e pegua João ombopara va'erã (capítulos 2-3). Ha'e gui ma ixupe oikuua uka raka'eve rã oiko va'erã. Mba'eta oiko 'rã Jesus remimbo'e kuery re opu'ã rei va'e ha'e ko yvy re mba'emo tuvixa va'e Nhanderuete omoingo rã. Ha'e gui opaa py Jesus Cristo ou jevy 'rã yva gui, yva pyau ha'e yvy pyau reve. Hexe huvixa kuery opu'ã rei teĩ ojekuaa xapy'a 'rã pavẽ pe, mba'eta ha'e ma "Huvixave ikuai va'e Ruvixave, ha'e senhor ikuai va'e Senhor" (19.16).

Ha'e nunga rupi nhandep'y a guaxu ha'e nhaĩ atã 'rã Jesus re jajeroviaa py. Mba'emo oiko rã jaropo'aka 'rã, mba'eta Jesus ipo'aka ae ma mba'emo vai re, ha'e opaa ára py opo'akaa oexa uka 'rã pavẽ pe.

Jesus Cristo raka'eve guarã oikuua uka va'ekue re ijayvua

¹ Kova'e ma Jesus Cristo araka'eve guarã oikuua uka va'ekue. Ixupe Nhanderuete omboaxa va'ekue, guembiguai kuery pe ju oikuua uka aguã mba'emo are'ŷ'i re oiko va'erã, tenonderã omoĩ ma voiague rami vy. Ha'e rami vy ojeupegua anjo ombou, guembiguai João pe oikuua uka aguã.

² Ha'e va'e ju omombe'u Nhanderuete ayvu Jesus Cristo oikuua uka va'ekue. Oexa va'ekue ha'e javi omombe'u.

³ Ovy'a ete 'rã okuapy kova'e ayvu ogueroayvu, e'ŷ vy oendu rire ipara oĩa rupi ikuai va'e, mba'eta ára namombyryvei ma.*

Ásia yvy re sete igreja ikuai va'e pe João oxaruraague

⁴ Xee João axarura Ásia yvy re sete igreja ikuai va'e pygua kuery pe: Tove peẽ kuery tapendu penemboaxyha'e mby'a porã, aŷ oiko va'e, yma guive oiko va'ekue, ha'e araka'eve rã ou va'erã va'e guigua, henda openaaty renonde sete Nhe'ẽ ikuai va'e guigua, ⁵ ha'e Cristo guigua guive. Ha'e va'e ma anhetẽ va'e mombe'ua ojeroviapy va'e oiko, omanogue mbyte gui ha'e ranhe ju onhemboete va'ekue, ha'e yvy re huvixave kuery ikuai va'e áryve Ipo'akapa va'e. Nhanderayvu vy nguguy py ae nhandejogua raka'e jajejavague gui,

⁶ ha'e gui nhanemoingo opo'akaa pyguarã ha'e Nguuete pegua sacerdote-rã. Ha'e ma taexakãmba ha'e ta'ipo'akapa araka'e rã peve. Amém.

⁷ Ma'ẽ, arai rupi 'rã ou. Ha'e ramo oexa pavẽ 'rã, ipyxoare kuery voi. Yvy re ikuai va'e ha'e javi regua oexa vy ojae'opa 'rã okuapy. Anhetẽ ete va'e. Amém.*

⁸ Senhor Nhanderuete aipoe'i: "Xee ma jypy'igua ha'e opa vygua. Aŷ aiko, yma guive aiko va'ekue, ha'e raka'eve rã aju va'erã va'e, Ipo'akapa va'e aiko", he'i.

Jesus guexakã reve ojexa ukaague

⁹ Xee João ma pende-irmão aiko, ha'e gui jaiko axya py, Nhanderuete po'akaa py ha'e Jesus re nhaĩ atãa py peẽ kuery irũ aiko. Peteĩ ypa'ũ Patmos 'epy va'e re aĩ va'ekue, Nhanderuete ayvu Jesus regua amombe'uangue re.

* 1:3 Apocalipse 22.6,7 * 1:7 Zacarias 12.10

¹⁰ Ha'e gui ma Senhor ára py Nhe'ẽ re aiko vy xerakykue katy gui peteĩ aendu ijayvu atã va'e, mimby guaxu rami onhendu va'e.

¹¹ Ha'e va'e ma aipoe'i xevy:

— Rexa va'e ke embopara kuaxia re, ha'e emondouka sete igreja ikuai va'e pe: Éfeso, Esmirna, Pérgamo, Tiatira, Sardes, Filadélfia ha'e Laodicéia pygua pe — he'i.

¹² Ha'e ramo ajere aexa aguã xereve ijayvu va'e. Ajere vy sete tataendy renda aexa ouro guigua meme.

¹³ Tataendy renda ikuai va'e mbyte peteĩ aexa avi ava ra'y rami ojekuaa va'e. Ha'e va'e ma ao puku py onhemonde, ha'e ipexo rupi oĩ ajukue ra'ykue ouro guigua.

¹⁴ Inhakã re hi'a oĩ va'e ma vexa'i rague rami xiĩ, yro'y apĩ rami avi. Hexa ma tata rami hendy.

¹⁵ Ipy ma overa va'e rami hendy, tata py omoexakã mbyre rami ojekuaa. Ijayvua ma yy tuvixa va'e revovo rami onhendu.*

¹⁶ Opo oiporu kuaa regua py ma sete jaxy-tata oguereco. Ijuru gui ma peteĩ kyxe guaxu oẽ haïmbe jovai va'e. Hova ma kuaray ojope ratãa rami hexakã.

¹⁷ Ha'e gui aexa vy ipy yvýry ha'a ajupy omanogue rami. Ha'e ramo opo oiporu kuaa regua xere omoĩ vy aipoe'i:

— Ekyje eme. Xee ma jypy'igua ha'e opa vygua,

¹⁸ oikove va'e guive aiko. Mba'eta amano va'ekue, teĩ aÿ ma aikove ju araka'e rã peve guarã. Areko avi omanogue retã rokẽ pe'aa.

¹⁹ Ha'e nunga rupi embopara ke mba'emo rexâva'ekue, mba'emo aÿ oiko, ha'e araka'eve rã oiko va'erã guive.

²⁰ Ha'e gui sete jaxy-tata xepo aiporu kuaa regua py areko va'e, ha'e sete tataendy renda ouro guigua rexâva'e ma ndoikuua ukaai teri. Sete jaxy-tata ma anjo kuery sete igreja ikuai va'e pegua, ha'e rã sete tataendy renda ma sete igreja ae — he'i.

2

Éfeso pygua igreja kuery pe ombopara ukaague

¹ — Embopara Éfeso tetã py igreja kuery ikuai va'e pegua anjo pe: “Po rami ijayvu opo oiporu kuaa regua re sete jaxy-tata oguereco va'e, ha'e sete tataendy renda ouro guigua mbyte rupi avi oiko va'e:

² “Xee aikuua peẽ kuery reko. Xevy pe pembâeapoa ha'e peĩ atãa voi aikuapa, ha'e heko vai va'e kuery ayvu re ndapejapyxakaia guive. Pea'anga apóstolo onhemoingo rive va'e, ha'e vy ijapu va'e memea peikuaa.*

³ Peĩ atã, ha'e xerery rupi pendekuai ramo penderekko a'ãa rã pendekuerai e'ŷ re peropo'akapa guive.

⁴ Ha'e rami avi penderekko regua peteĩ ma naxembovy'ai, mba'eta pejepe'a ma jypy'i mborayvu rupi pendekuaiague gui.*

⁵ Penema'endu'a ke magui pa pe'aague re. Pejeko rerova ke, pendekuai ju jypy peikoague rami. Ha'e rami e'ŷ rã pẽa py aju vy aipe'a 'rã pendevygua tataendy renda oĩaty gui, pejeko rerova e'ŷ ramo.

⁶ Ha'e rami avi penderekko regua peteĩ oĩ xembovy'a va'e: Nicolaíta kuery reko ndapejou porãia. Ha'e va'e kuery reko ma xee voi ndajou porãi.

⁷ Ijapyxa oĩ va'e ke toendu igreja kuery pe Nhe'ẽ ijayvu rã. Mba'eta ogueropo'akapa va'ekue pe ame'ẽ 'rã Nhanderuete 'amba re yvyla tekove me'ëa hi'aí va'e'a ho'u aguã.”

Esmirna pygua igreja kuery pe ombopara ukaague

⁸ — Ha'e gui Esmirna tetã py igreja kuery ikuai va'e pegua anjo pe ju embopara: “Po rami ijayvu jypy'igua ha'e opa vygua, omano va'ekue ri oikove ju va'e:

* 1:15 Daniel 7.13, 10.5-6, Ezequiel 43.2 * 2:2 2 Coríntios 11.13-15 * 2:4 Mateus 24.12,13

⁹“Xee aikuua pendekuai axy ha'e pendeporiaukue'i va'ea. Ha'e rami avi perekopa va'e guive. Aikuua avi judeu rami rive onhemingo va'e kuery pendere ijayvu rei okuapya. Ha'e va'e kuery ma Satanás peguarã rive onhemboaty va'e.

¹⁰ Pekyje eme pendekuai axy aguã gui. Ma'ë, amongue peẽ kuery regua ma anha omboty uka 'rã nhuã py penderekko a'ã aguã. Dez ára peve 'rã pendekuai axy. Pejerovia tema pemano peve. Ha'e ramo coroa-rã pãvy ame'ë 'rã tekove.*

¹¹ Ijapyxa oĩ va'e ke toendu igreja kuery pe Nhe'ë ijayvu rã. Mba'eta ogueropo'akapa va'ekue ma mokoïguea manoa py nda'ikuai axyi 'rã, peteïve henda py.”

Pérgamo pygua igreja kuery pe ombopara ukaague

¹² — Embopara ke Pérgamo tetã py igreja kuery ikuai va'e pegua anjo pe: “Po rami ijayvu kyxe guaxu haïmbe jovai va'e oguerekova va'e:

¹³ “Xee aikuua tetã pendekuaia py Satanás renda ae.* Ha'e rami teĩ xerery rupi pendekuaia re peĩ atã, ndapejepé ai guive xere pejeroviaa gui, Antipas ojukaa ára voi. Ha'e va'e ma xevygua omombe'u porã ramo ojukaa va'ekue penderekko Satanás renda oĩa py.

¹⁴ Ha'e rami teĩ oiko avi penderekko regua naxembovy'ai va'e, mba'eta peẽ kuery mbyte perekko Balaão nhombo'league rupi ikuai va'e. Ha'e va'e ma Balaque ombo'e raka'e Israel kuery renonde nhuã omoi aguã, mba'emo ra'angaa pe ome'ë mbyre gui ha'e kuery ho'u ha'e itavy rei okuapy aguã rami.

¹⁵ Penembyte perekko avi Nicolaíta kuery nhombo'ea rupi ikuai va'e.

¹⁶ Ha'e nunga rupi pejeko rerova. Ha'e rami e'ŷ ramo aju voi 'rã pãa py, ha'e xejuru gui kyxe guaxu oẽ va'e py apu'ã 'rã ha'e kuery rovai.

¹⁷ Ijapyxa oĩ va'e ke toendu igreja kuery pe Nhe'ë ijayvu rã. Mba'eta ogueropo'akapa va'ekue pe ame'ë 'rã maná onhomí mbyre ha'e ita'i xií va'e guive. Ha'e va'e ita re ma tery payu oĩ 'rã avave rei ndoikuaai va'e, ojopy va'e e'ŷ vy.”

Tiatira pygua igreja kuery pe ombopara ukaague

¹⁸ — Embopara ke Tiatira tetã py igreja kuery ikuai va'e pegua anjo pe: “Po rami ijayvu Nhanderuete Ra'y tata rami hexa ha'e overa va'e rami ipy va'e:

¹⁹ “Xee aikuua penderekko, pendeporayvua, pejeroviaa, xevy pe pemb'a'eapoa ha'e peĩ atãa. Aikuua avi jypy'i pemb'a'eapoague gui aŷ pemb'a'eapovea.

²⁰ Ha'e rami teĩ peteĩ oĩ penderekko regua naxembovy'ai va'e, mba'eta kunha Jezabel ayvu re pejapyxaka. Ha'e va'e ma profeta ramigua rive onhemingo vy xerembiguai kuery ombo'ea rupi ombotavy, itavy rei ha'e mba'emo ra'angaa pe ome'ë mbyre gui ha'e kuery ho'u okuapy aguã.

²¹ Ha'e va'e ma xee arõ are ma ojeko rerova aguã, teĩ itavy reia gui ndojeko rerovaxei.

²² Ma'ë, ajapo 'rã tupa py ojexavai ete oupy aguã rami, ha'e hexeve itavy rei va'ekue guive, kunha va'e ombo'ea rupi ikuiaigui ndojeko rerovai ramo.

²³ Ajuka ete 'rã imemby ha'e ipi'a kuery. Ha'e ramo igreja kuery ha'e javi 'rã oikuua xee jopy'a ha'e nhokuraxõ re aikuua pota va'e. Ha'e rami vy peteĩ-teĩ pe ame'ë 'rã peikoague rekovia.

²⁴ “Ha'e rã peẽ Tiatira pygua kuery mboae, ha'e kuery rami e'ŷ penhembo'e va'e, ‘Satanás py'apy regua’ he'ia re pepena e'ŷ va'e, peẽ kuery pe ma aipoa'e: Pendevy pe ndajapo ukai 'rã ipoyi va'e,

²⁵ pov'a'e anho: Xee aju peve peĩ atã tema mba'emo peupity ma va'e re.

²⁶ Mba'eta ogueropo'akapa, ha'e opa peve ajapo uka va'e rupi ikuai va'ekue pe ma ame'ë 'rã vyv regua kuery re ipo'aka aguã.

²⁷ Ha'e ramo omo'arandu 'rã po pygua ferro guigua py, omboa'ypa 'rã mba'emo ryru nhae'ũ guigua rami rive.*

²⁸ Ha'e kuery pe voi ame'ë 'rã jaxy-tata ko'ë mbija, xevy pe xeru ome'ëague rami avi.

* 2:10 Mateus 10.28; 1 Pedro 1.6,7 * 2:13 Filipenses 2.15 * 2:27 Salmo 2.9

²⁹ Ijapyxa oĩ va'e ke toendu igreja kuery pe Nhe'ẽ ijayvu rã.”

3

Sardes pygua igreja kuery pe ombopara ukaague

¹ — Sardes tetã py igreja kuery ikuai va'e pegua anjo pe embopara: “Po rami ijayvu sete nhe'ẽ Nhanderuete guigua ha'e sete jaxy-tata oguerekva'e:

“Xee aikuua pendereko. Pendevy pe ‘Oikove va'e’ 'ea teĩ omanogue peiko.

² Peiko kuaa pota ke, ha'e pemombaraete okuave'i teri teĩ omano aguã rami ikuai va'e, mba'eta xee aikuua Xeruete renonde opa mba'e py e'ŷ pendereko porãa.

³ Ha'e nunga rupi penema'endu'a ke ayvu pendu vy pendejee pemoĩ va'ekue re. Pemoĩ porã ju, ha'e pejeko rerova. Mba'eta ndapeiko kuaa potai ri ramo aju xapy'a 'rã imonda va'e rami, ndapeikuuai 'rã guive penderovai aju aguã hora.*

⁴ Ha'e rami avi Sardes tetã py peẽ kuery regua mbovy'i avi ikuai oao nomongy'ai va'e. Ha'e va'e kuery heko porã va'e vy xerupive 'rã ikuai xiĩ va'e py onhemonde reve.

⁵ Ogueropo'akapa va'ekue ma ha'e kuery rami avi 'rã onhemonde xiĩ va'e py. Peteĩve henda py hery namboguei 'rã kuaxia tekove oguerekva'e kuery rery oĩa gui. Ha'e rami 'rãgue py hery amombe'u porã 'rã Xeru ha'e ixupeguia anjo kuery renonde.

⁶ Ijapyxa oĩ va'e ke toendu igreja kuery pe Nhe'ẽ ijayvu rã.”

Filadélfia pygua igreja kuery pe ombopara ukaague

⁷ — Embopara ke Filadélfia tetã py igreja kuery ikuai va'e pegua anjo pe: “Po rami ijayvu iky'a e'ŷ ha'e anhetẽ va'e. Ha'e va'e ma oguerekva'e pe'aa Huvixave Davi rami ipo'aka aguã. Ha'e ramo oipe'aague avave rei nombotyai 'rã, ha'e ombotyague avave rei ndoipe'aai 'rã guive. Ha'e vy aipoe'i:

⁸ “Xee aikuua pendereko. Ma'ẽ, penerenonde amoĩ 'rã peteĩ okẽ ojepe'a va'e, avave rei nomboty kuaai va'erã, mba'eta amongue py ete'i penembaraete va'eri xeayvu pemoĩ porã, napemombe'u e'ŷi guive xerery rupi peikoa.

⁹ Ha'e gui Satanás peguarã onhemboaty va'e kuery, judeu rami rive onhemoingo teĩ ha'e'ŷ ikuai va'e ma ajapo 'rã oupa vy pendepy yvýry guenapy'ã re ikuai aguã rami. Ha'e ramo ha'e kuery oikuua 'rã xerembiayvu peikoa.

¹⁰ Xeayvuague rami vy peĩ atã rire xee voi pendere apena porã 'rã jexavaia ára yvy jave re joeko a'ãarã ou va'e gui.

¹¹ Aju 'rã are'ŷ'i re. Pendejee pemoĩ atã ke mba'emo peupity ma va'e, pendevyguia coroa avave rei oipe'aa e'ŷ aguã.

¹² Mba'eta ogueropo'akapa va'ekue ajapo 'rã Xeruete ro iky'a e'ŷ va'e yta rami oĩ aguã. Ha'e va'e rire ndoipe'aavei 'rã ha'e gui. Ha'e kuery re amoĩ 'rã Xeruete rery, ha'e Xeruete pegua tetã rery guive. Ha'e va'e ma Jerusalém pyau, yva Xeruetea gui oguejy va'erã. Ha'e kuery re amoĩ avi 'rã xerery pyau.

¹³ Ijapyxa oĩ va'e ke toendu igreja kuery pe Nhe'ẽ ijayvu rã.”

Laodicéia pygua igreja kuery pe ombopara ukaague

¹⁴ — Embopara ke Laodicéia tetã py igreja kuery ikuai va'e pegua anjo pe: “Po rami ijayvu Anhetẽ ete va'e hery va'e, mba'eta ha'e va'e ma anhetẽ va'e mombe'ua ojeroviapy va'e, ha'e Nhanderuete omoingo va'ekue ha'e javi ypy. Ha'e vy aipoe'i:

¹⁵ “Xee aikuua pendereko. Ha'e gui peẽ ma yro'yxã va'e'ŷ, neĩ haku va'e'ŷ. Penero'yxã e'ŷ vy penderaku va'e rire ha'eveve 'rãgue.

¹⁶ Ha'e rami 'rãgue py haku vevui va'e rive peiko, neĩ napenderakui, neĩ napenero'yxãi. Ha'e rami rã xejuru gui rombojevy aguã rami aiko.*

* 3:3 Lucas 12.35-40 * 3:16 “Haku va'e” he'ia ma Nhanderuete pe ete ikuai va'e, ha'e rã “Yro'yxã va'e” he'ia ma ixupe oikoxea neĩ oendu va'e'ŷ. Ha'e rã “Haku vevui va'e” he'ia ma ixupeguia merami rive va'e.

¹⁷ Mba'eta peẽ kuery 'Arekopa, aiko porã, xevy pe mba'eve ndoatai' peje.* Ha'e rami teĩ ndapeikuuaai ovy'a e'ŷ ete va'e peikoa. Omboetepy e'ŷ, iporiaukue, ára revegua e'ŷ ha'e ipire rei va'e peiko.

¹⁸ Ha'e ramo xee romongeta xegui pejogua aguã ouro tata py oiky'a'o pyre oguerekopa va'e ete peiko aguã, ha'e ao xiĩ va'e py penhemonde aguã, pendepire reia pexa ucaa py peximba e'ŷ aguã. Xegui pejogua avi texa raxy poã penderexa py pemoĩ vy pexa porã ju aguã.

¹⁹ Xerembiayvu kuery ha'e javive pe xeayvu amo'arandua rupi. Ha'e nunga rupi penekyre'ŷ ha'e pejeko rerova.

²⁰ Ma'ẽ, okẽ py xe'aĩ anhenduka vy. Amongue xeayvu oendu vy okẽ oipe'a ramo aike 'rã hoo py. Hexeve akaru 'rã, ha'e voi okaru 'rã xereve.

²¹ Mba'eta ogueropo'akapa va'ekue pe amboguapy 'rã xereve xerenda apenaaty yvýry, xee voi aropo'akapa rire Xeru reve henda yvýry aguapya rami avi.

²² Ijapyxa oĩ va'e ke toendu igreja kuery pe Nhe'ẽ ijayvu rã."

4

Nhanderuete renda oexaague

¹ Ha'e va'e rire ama'ẽ vy peteĩ okẽ aexa yva re ojepe'a va'e, ha'e teĩgue ju aendu jypy'i ayvu aendu va'ekue. Mimby guaxu pu rami onhendu vy aipoe'i:

— Enhemboja ke ejuvy. Ha'e ramo aikuua uka 'rã kova'e nunga rire mae ma mba'emo oiko va'erã, tenonderã omoĩ ma voiague rami vy — he'i.

² Ha'e ramove nhe'ẽ re aiko vy peteĩ tenda aexa yva re huvixa openaaty oĩ va'e, ha'e tenda py peteĩ oguapy oiny va'e guive.

³ Oguapy oiny va'e rova ma ita jaspe ha'e sardônio rami hexakã. Henda yvýry rupi ojekuaa peteĩ karugua esmeralda rami hexakã va'e.

⁴ Tenda yvýry rupi ikuai avi vinte e quatro tenda mboae. Ha'e va'e áry ma vinte e quattro tujakueve joe opena va'ety oguapy okuapy onhemondea xiĩ va'e. Ha'e va'e kuery akã re oĩ coroa ouro guigua.

⁵ Mbyteguia tenda oĩ va'e gui oẽ overa va'e, ayvu ha'e yapu. Tenda renonde ma sete tataendy oĩ. Ha'e va'e ma sete nhe'ẽ Nhanderuete guigua.

⁶ Tenda renonde oĩ avi peteĩ henda yupá vidro guigua rami ojekuaa va'e, itaendy rami hexakã va'e. Ha'e gui mbyte py, tenda ijyvýry rupi ikuai irundy temimoingo kuery. Ha'e va'e kuery jovaive re ma hexa oĩmba va'e, henonde katy ha'e hakykue katy guive.

⁷ Temimoingo jypyguia ma guary rami ojekuaa, mokoĩa ma vaka ra'y rami, mboapya ma ava rami hova va'e, ha'e rã irundaya ma taguato tuvixa va'e oveve oikovy va'e rami.

⁸ Irundy temimoingo ikuai va'e peteĩ-teĩ ma mboapy meme ipopo va'e. Opa rupi hexa oĩ va'e, hi'áry ha'e hyepy rupi. Ara py ha'e pyávy optytu'u e'ŷ re aipoe'i:

— Iky'a e'ŷ, iky'a e'ŷ, iky'a e'ŷ va'e ma Senhor Nhanderuete Ipo'akapa va'e. Yma guive oiko va'ekue ae, aŷ oiko, ha'e raka'eve rã ou va'erã va'e — he'i okuapy.*

⁹ Ha'e gui tenda py oguapy oiny va'e araka'e rã peve guarã oiko va'e pe temimoingo kuery oporaei okuapy. Omboete ha'e oguerovy'a ramo

¹⁰ vinte e quattro tujakueve joe opena va'ety voi guenapy'ã re ikuai, tenda py oguapy oiny va'e araka'e rã peve guarã oiko va'e renonde. Omboete vy tenda renonde omombo ojeupagua coroa. Ha'e vy aipoe'i:

¹¹ — Senhor Oreruete, ndee ma ha'eve rombojerovia, romboete ha'e ndepo'akaa roquerovy'a aguã, mba'eta opa mba'e moingoare reiko. Ndee ae reipotaa rami vy ha'e nunga ha'e javi remoingo ramo oiko raka'e — he'i okuapy.

5

Vexa'i ra'y kuaxia para oipe'a rã oexaague

* 3:17 Lucas 12.15-21 * 4:8 Ezequiel 1.4-10, Isaías 6.3

¹ Ha'e gui aexa rā tenda py oguapy oiny va'e opo oiporu kuaa regua py oguereko peteī kuaxia para onhemama va'e. Ha'e va'e py rupi ha'e hi'áry rupi ipara va'e oī. Sete henda py ombojaague ikuai.

² Ha'e gui peteī aexa avi anjo imbaraete va'e. Ha'e va'e ijayvu atā vy aipoe'i:

— Mava'e tu ha'eve kuaxia para mbojaague ikuai va'e omboi vy oipe'a aguā? — he'i.

³ Ha'e rami teī yva re, yvy re ha'e yvy guýry avave rei jipoí kuaxia para oipe'a aguā ha'eve va'e, neī kuaxia re oma'ē aguā voi nda'evei.

⁴ Ha'e ramo xee ajae'o vaipa, mba'eta avave rei ndojouai kuaxia para oipe'a aguā ha'eve va'e, neī oma'ē aguā.

⁵ Ha'e rami teī tujakueve joe opena va'ety regua peteī aipoe'i xevy:

— Ejae'o eme. Ma'ē, Judá regua guary ipo'aka ma, Davi rapokue renhoī 'epy va'e. Ha'e rami rire ha'e ae ha'eve kuaxia mbojaa sete ikuai va'e omboi vy oipe'a aguā — he'i.

⁶ Ha'e ramo peteī aexa tenda ha'e irundy temimoingo kuery ha'e tujakueve ikuai va'e mbyte hi'aī va'e, Vexā'i ra'y ojuka pyre rami ojekuaa. Ha'e va'e re ma sete hakua oī, ha'e sete hexa avi. Hexa ma sete nhe'ē Nhanderuete guigua yvy jave rupi omondouka va'e.*

⁷ Ha'e gui Vexā'i ra'y ou vy ojopy kuaxia para tenda py oguapy oiny va'e oiporu kuaa regua gui.

⁸ Kuaxia para Vexā'i ra'y ojopy ramo henonde irundy temimoingo kuery guenapy'ā re ikuai, ha'e vinte e quatro tujakueve voi. Peteī-teī opo py oguereko mba'epu ixā reta va'e ha'e hy'a'i ouro guigua, heakuā porā va'e oapy va'erā tynyē va'e. Ha'e va'e ma iky'a e'ŷ va'e kuery onhembo'ea.

⁹ Ha'e kuery ma mboraei pyau omonhendu vy aipoe'i:

— Ndee ma ha'eve kuaxia para rejopy vy imbojaa reipe'a aguā. Mba'eta ndejukaa va'ekue, ha'e nderuguy py Nhanderuete peguarā rejogua joegua e'ŷ-e'ŷ, amboae rami ijayvu va'e, amboae yvy regua, ha'e amboae regua kuery ha'e javi gui.

¹⁰ Nhanderuete po'akaa pyguarā remoingo, ixupeguia sacerdote-rā guive. Ha'e ramo ha'e kuery huvixa rami 'rā joguereko yvy re — he'i okuapy.

¹¹ Ha'e gui teīgue ju ama'ē vy peteī ayvu aendu tenda yvýry anjo kuery mbovy e'ŷ ikuai va'e oporaei rā. Ha'e va'e kuery ma temimoingo kuery ha'e tujakueve yvýry mbovy rei e'ŷ ikuai, jaipapapa kuaa aguā rami rei e'ŷ.

¹² Oporaei atā vy aipoe'i okuapy:

— Vexā'i ra'y ojuka pyre pe ma ha'eve “Ipo'akapa va'e, oguerekopa, hi'arandu ha'e imbaraete va'e” 'ea aguā. Ha'eve omboetea aguā, oguerovy'a ha'e ombojerovia pavē aguā guive — he'i okuapy.

¹³ Ha'e gui aendu rā yva re, yvy, yvy guýry ha'e ye'ē áry temimoingo ikuai va'e ha'e javi aipoe'i:

— Tove tenda py oguapy va'e ha'e Vexā'i ra'y tombojeroviaa, tomboetea, toguerovy'aa, ha'e ta'ipo'akapa araka'e rā peve — he'i okuapy.

¹⁴ Ha'e ramo irundy temimoingo kuery ombovai vy

— Anhetē ete — he'i. Tujakueve voi guenapy'ā re ikuai vy omboete okuapy.

6

Jypygua kuaxia para mbojaague Vexā'i ra'y omboi rā oexaague

¹ Ha'e gui aexa rā Vexā'i ra'y omboi kuaxia para mbojaague sete oī va'e regua jypygua. Ha'e gui aendu irundy temimoingo kuery va'e regua yapu ratā va'e rami ijayvu rā. Ha'e vy

— Enhemboja ke ejuvy — he'i.

² Ha'e ramo aexa rā ou peteī kavaju xiī va'e. Ha'e va'e árygua ma guyrapa oguereko, ha'e ixupe ome'ēa coroa. Ha'e ramo joe ipo'aka ovy, ipo'akave aguā.*

* 5:6 Vexā'i ra'y ojuka pyre rami ojekuaa va'e ma Jesus Cristo ae (Isaías 53.6-12; João 1.29; Filipenses 2.5-11). Ha'e rā hexa ma Zacarias 4.10 py omombe'u porāve. * 6:2 Mateus 24.4-14

Kuaxia para mbojaague mokoña va'e omboi rā oexaaque

³ Ha'e gui kuaxia para mbojaague mokoña va'e omboi jave mokoña temimoingo aendu — Enhemoja ke ejuvy — he'i rā.

⁴ Ha'e gui aexa rā oẽ kavaju mboae, pytā va'e. Ha'e va'e árygua pe ma ome'ēa yvy regua kuery ojapo aguã peteī rami ve'ŷ ikuai aguã rami, peteī-teī jojuka aguã. Ixupe ome'ēa avi peteī kyxe guaxu.

Kuaxia para mbojaague mboapya va'e omboi rā oexaaque

⁵ Kuaxia para mbojaague mboapya va'e omboi jave aendu mboapya temimoingo — Enhemoja ke ejuvy — he'i rā.

Ha'e gui aexa rā ou peteī kavaju huū va'e. Ha'e va'e árygua ma opo py oguereko mba'emo opejaa.

⁶ Peteī ayvu aendu avi irundy temimoingo kuery mbyte gui rami onhendu va'e. Ha'e vy aipoe'i:

— Peteī ryru'i trigo ma peteī ára repy re 'rā ovendea. Mboapy ryru cevada voi 'rā peteī ára repy re ovendea. Ha'e rami teī embovaipa eme azeite ha'e vinho — he'i.

Kuaxia mbojaague irundaya va'e omboi rā oexaaque

⁷ Ha'e gui Vexa'i ra'y kuaxia para mbojaague irundaya va'e omboi jave aendu irundaya temimoingo — Enhemoja ke ejuvy — he'i rā.

⁸ Ha'e ramo ama'ē vy aexa peteī kavaju iju va'e. Ha'e va'e árygua rery ma Manoa Ja. Hakykue ou avi omanogue retā. Ha'e kuery pe ma ome'ēa yvy regua kuery ojuka aguã, irundy-rundy ikuai va'e gui peteī-teī ojuka aguã kyxe guaxu py, karuai, nhomoingo axya ha'e yvy rupigua vixo inharō va'e py.*

Kuaxia para mbojaague teī nhiruña va'e omboi rā oexaaque

⁹ Kuaxia para mbojaague teī nhiruña va'e omboi jave ma aexa rā altar oĩ va'e yvýry ikuai Nhanderuete ayvu omombe'uague ha'e onhemombe'u porāague re ojuka pyre kuery nhe'ē.

¹⁰ Ha'e va'e kuery ojapukai atā vy

— Senhor ndepo'akapa va'e, iky'a e'ŷ ha'e anhetē va'e, raka'e peve 'rā tu ndereikuaa potai, neĩ nerembopagai yvy regua kuery oreruguy omoēague re? — he'i okuapy.

¹¹ Ha'e ramo ha'e kuery peteī-teī pe ome'ēa ao xii va'e, ha'e aipo'ea opytu'uve ranhe aguã xapy'a'i, ha'e kuery ojukaa ague rami avi irmão kuery Nhanderuete rembiguai ojuka pyrā ikuai va'e ojukapaa peve.

Kuaxia para mbojaague mboapy memea va'e omboi rā oexaaque

¹² Ha'e gui aexa rā Vexa'i ra'y kuaxia para mbojaague mboapya memea va'e omboi jave yvy oryryi atā. Kuaray pytūmba ajukue huū rei va'e rami, jaxy voi tuguy rami pytāmba.

¹³ Yva re jaxy-tata ikuai va'e ho'apa yvy py, yvytu oipeju atā rā figo'a ky'i okuipaa rami avi.

¹⁴ Ha'e gui ma yva okanhy xapy'a mba'emo pire onhemama ovy va'e rami. Yvyty ha'e ypa'ū ikuai va'e ha'e javi ovapa oīague gui.

¹⁵ Ha'e ramo yvy regua huvixave kuery, yvatekueve, xondaro ruvixa, oguerekopa va'e kuery, ipo'akakueve, escravo ha'e escravo e'ŷ va'e ha'e javi ma yvykua rupi onhemimba okuapy, ha'e yvy'ā re ita pa'ū ikuai va'e rupi guive.

¹⁶ Ha'e va'e kuery ma yvyty ha'e ita ikuai va'e pe aipoe'i:

— Pe'a ke ore'áry, orenhomni tenda py oguapy oiny va'e orerexa e'ŷ aguã, ha'e Vexa'i ra'y orembopaga e'ŷ aguã.

¹⁷ Mba'eta ovaẽ ma ipoxya ára. Mava'e tu ogueropo'aka ta?

¹ Ha'e va'e rire irundy anjo aexa yvy apy irundy oī va'e py hi'aī rā. Ha'e va'e kuery ma yvytu jokoarā ikuai, yvytu oipeju e'ŷ aguā yvy re, ye'ē re, neī peteīve yvyra hi'aī va'e re guive.

² Ha'e gui peteī anjo mboae ju aexa kuaray oua katy gui oē ouvy va'e, Nhanderuete oikove va'e guigua kuaa ukaarā ogueru. Ha'e va'e ma ojapukai atā irundy anjo yvy ha'e ye'ē mbovaipaarā omoī mbyre pe.

³ Ha'e vy aipoe'i:

— Pembovaipa eme ranhe yvy, ye'ē, neī yvyra ikuai va'e, Nhanderuete rembiguui kuery rova re ikuua ukaarā romoī e'ŷa ja — he'i.*

⁴ Ha'e gui ikuua ukaarā omoīmbaa va'ekue oipapaa rā aendu mbovy paa. Ha'e va'e kuery ha'e javi vy ma cento e quarenta e quatro mil ikuai, Israel kuery ha'e javi regua gui.*

⁵ Judá regua kuery gui doze mil, Rúben regua gui doze mil ju, Gade regua gui doze mil,

⁶ Aser regua gui doze mil, Naftali regua gui doze mil, Manassés regua gui doze mil,

⁷ Simeão regua gui doze mil, Levi regua gui doze mil, Issacar regua gui doze mil,

⁸ Zebulom regua gui doze mil, José regua gui doze mil, ha'e Benjamim regua gui doze mil re avi ikuua ukaarā omoīa.

Ombopyau pyre opu'ā okuapy va'e oexaague

⁹ Ha'e va'e rire aexa rā heta ete ikuai avave rei oipapa kuaa aguā rami e'ŷ, ha'e javi regua kuery, joegua e'ŷ-e'ŷ, amboae yvy regua ha'e amboae rami ijayvu va'e gui. Ha'e va'e kuery opu'āmba okuapy tenda ha'e Vexa'i ra'y renonde. Xiī va'e py peteī-teī onhemonde va'e, opo py pindo rogue oguereko guive.

¹⁰ Ha'e rami vy ijayvu atā vy aipoe'i:

— Tenda py Nhanderuete oguapy oiny va'e ha'e Vexa'i ra'y gui ae ou jaa jepe aguā — he'i okuapy.

¹¹ Anjo kuery ma tujakueve ha'e irundy temimoingo kuery yvýry rupi ikuai, tenda jovaise re opu'ā okuapy. Ha'e javive guenapy'ā re ikuai tenda renonde, yvy re ngova omovaē okuapy Nhanderuete omboete vy.

¹² Ha'e vy aipoe'i:

— Anhetē ete. Tove Nhanderuete pe toporaeia, tombojeroviaa, tai'arandu, toguerovy'aa, tomboetea, ta'ipo'aka ha'e ta'imbaraete araka'e rā peve. Amém — he'i okuapy.

¹³ Ha'e gui tujakueve regua peteī ijayvu vy oporandu xevy:

— Peva'e kuery xiī va'e py onhemonde va'e, marā ramigua tu? Magui ou va'ekue tu?

¹⁴ Xee ambovai vy

— Xeruvixa, ndee ma reikuua 'rā — ha'e.

Ha'e ramo aipoe'i xevy:

— Ha'e kuery ma ikuai axy eteague gui ou va'ekue. Vexa'i ra'y ruguy py oao ojoi uka vy oiky'a'o uka va'ekue.

¹⁵ Ha'e nunga rupi Nhanderuete renda renonde rupi riae ikuai. Ara py ha'e pyávy ombojerovia okuapy ixupegua oo iky'a e'ŷ va'e py. Ha'e ramo ha'e kuery áry rupi tenda py oguapy oiny va'e ojao'i 'rā ho'ā py.

¹⁶ Ha'e ramo ha'e kuery noenduvei ma 'rā karuai neī yuvei. Ha'e kuery áry kuaray ndojope raxyvei 'rā, neī haku noenduvei 'rā guive,

¹⁷ mba'eta ha'e kuery re Vexa'i ra'y tenda py oī va'e opena 'rā, ha'e ogueraa 'rā guive ygua tekove me'ea oīa katy. Ha'e kuery rexay Nhanderuete omombirupa 'rā.*

¹ Ha'e gui kuaxia para mbojaague sete-a va'e Vexa'i ra'y omboi jave yva re okyririmba katu'i meia-hora rãnda'u.

² Ha'e gui aexa sete anjo Nhanderuete renonde opu'ã okuapy rã. Ha'e va'e kuery pe ma sete mimby guaxu ome'ëa.

³ Ha'e gui ou avi anjo mboae. Ha'e va'e ma altar yvy'iry hi'aï. Opo py oguereko hy'a'i heakuã porã va'e oappyaty ouro guigua. Ixupe ma ome'ëa vaipa heakuã porã va'e, iky'a e'ë va'e kuery ojerurea irûrã oapy aguã altar ouro guigua tenda renonde oï va'e áry.

⁴ Ha'e gui anjo po py hy'a'i heakuã porã va'e rapyaty oï va'e gui hataxí ojeupi ov y Nhanderuete oña peve, iky'a e'ë va'e kuery ojerurea irûrã.

⁵ Ha'e gui hy'a'i heakuã porã va'e oappyaty ma peteïgue ju anjo omonyë tata altar áry gui ojopy va'ekue. Ha'e vy omombo yvy re. Ha'e rã oiko yapu, ayvu, overa ha'e yvy ryryi.

⁶ Ha'e gui mae ma anjo kuery sete mimby guaxu reveguo oguereko katu omonhe'ë aguã.

Jypygua mimby guaxu omonhe'ë jave oexaague

⁷ Ha'e gui jypygua anjo omonhe'ë mimby guaxu. Ha'e ramo ho'a amandau ha'e tata tuguy re irû va'e. Ha'e nunga ma ko yvy re omomboa. Ha'e ramo oapy yvy, yvyra ikuai va'e ha'e jai rogue pyau ha'e javi. Mboapy-apy henda ikuai va'e gui peteï-teï okai.

Mokoïa mimby guaxu omonhe'ë jave oexaague

⁸ Ha'e gui anjo mokoïa ju omonhe'ë mimby guaxu. Ha'e ramo peteï omomboa ye'ë py, yvyty tuvixa va'e ramigua, hendi va'e. Ha'e ramo ye'ë mboapy-apy oï va'e gui peteï-teï henda py opyta tuguy.

⁹ Temimoingo kuery ye'ë rupi mboapy-apy ikuai va'e peteï-teï omano. Kanoä voi mboapy-apy ikuai va'e gui peteï-teï ombovaipa.

Mboapya mimby guaxu omonhe'ë jave oexaague

¹⁰ Ha'e gui anjo mboapya ju omonhe'ë mimby guaxu. Ha'e ramo yva gui ho'a peteï jaxy-tata tuvixa va'e, takua ryxa rami hendi va'e. Yakã mboapy-apy oï va'e gui peteï-teï áry ho'a, ha'e yvu ikuai va'e áry guive.

¹¹ Jaxy-tata rery ma Iro ete va'e. Ha'e rami vy yy mboapy-apy oï va'e gui peteï-teï iro. Ha'e ramo avakue heta omano yy gui, iro vaipa ramo.

Irundaya mimby guaxu omonhe'ë jave oexaague

¹² Ha'e gui anjo irundaya ju omonhe'ë mimby guaxu. Ha'e ramo kuaray, jaxy ha'e jaxy-tata mboapy-apy ikuai va'e gui peteï-teï pytû. Ara py ha'e pyávy teï naexakâvei.

¹³ Ha'e ramo ama'ë vy aendu peteï taguato tuvixa va'e yva mbyte rupi oveve vy ijayvu rã. Ijayvu atã reve aipoe'i:

— Nda'evei ete, nda'evei ete, nda'evei ete 'rã yvy regua kuery pe, mboapy anjo mimby guaxu omonhe'ë va'erã oime teri ramo.

Teñ nhiruña mimby guaxu omonhe'ë jave oexaague

¹ Ha'e gui teñ nhiruña anjo omonhe'ë mimby guaxu. Ha'e rã aexa peteï jaxy-tata yva gui ho'a rã yvy re. Ha'e va'e pe ma ome'ëa yvykua pytûa rokë pe'aa.

² Ha'e gui yvykua pytûa rokë oipe'a ramo yvykua gui ojeupi hataxí, tatakua tuvixa va'e gui hataxí opu'ää rami. Yvykua gui hataxí oë va'e omo'ämbo kuaray ha'e yvate rupi.

³ Hataxí mbyte gui oë tuku, ha'e yvy re oje'oi. Ha'e va'e kuery pe ome'ëa japeuxa yvy rupigua rami jopi aguã.

⁴ Ha'e kuery pe aipo'ea ojavyky e'ë aguã yvy re nhuñ ha'e hogue va'e, neñ yvyra ikuai va'e, ha'e rã avakue rova re Nhanderuete guigua kuaa ukaarã nomoñaia va'ekue anho.

⁵ Tuku kuery jojuka aguã 'rãgue py ha'e kuery pe ome'ëa teñ nhiruña jaxy re nhomoingo axy aguã rive. Ha'e ramo japeuxa jopi vy nhomoingo axya rami 'rã nhomoingo axy.

- ⁶ Ha'e va'e jave py avakue onhea'ã 'rã omano aguã teĩ nda'evei 'rã. Omanoxea oendu teĩ nda'evei 'rã omano aguã.
- ⁷ Tuku ma kavaju joe opu'ã aguã katy guarã oguereko katu pyre rami ojekuaa. Inhakã re oĩ coroa ouro guigua rami ojekuaa va'e. Hova ma ava rami ojekuaa.
- ⁸ Hi'a ma kunhague'a rami, haĩ ma guary raĩ rami.
- ⁹ Opexo re ma oguereko pexo regua ferro gui ojapo pyre ramigua. Ipepo revovo ma joe opu'ã aguã katy karóxa heta kavaju omoatã heravy va'e revovo rami.
- ¹⁰ Huguai ma japeuxa rami ipopia. Huguai re ae oĩ teĩ nhiruĩ jaxy re nhomoingo axy va'erã.
- ¹¹ Ha'e kuery rerekaoa huvixave rami oguereko va'e ma anjo yvykua pytãa pygua. Ha'e va'e rery ma hebraico py Abodom, ha'e rã grego py ma Apoliom.
- ¹² Ha'e rami py ojeupity ma jypygua "Nda'evei ete" he'iague. Ha'e va'e rire mokoĩ ju 'rã oiko.

Mboapy memea mimby guaxu omonhe'ẽ jave oexaque

- ¹³ Ha'e gui anjo mboapy memea ju omonhe'ẽ mimby guaxu. Ha'e gui aendu peteĩ ayvu. Ha'e va'e ma ouro guigua altar Nhanderuete renonde oĩ va'e apy irundy oĩ va'e gui onhendu.
- ¹⁴ Ha'e vy aipoe'i anjo mboapy memea va'e mimby guaxu oguereko va'e pe:
— Ejora ke irundy anjo Eufrates yakã guaxu yvýry ojokua pyre — he'i.
- ¹⁵ Ha'e ramo ojora irundy anjo. Ha'e va'e kuery ma ha'e va'e ma'etã, ha'e va'e jaxy, ha'e va'e ára, ha'e va'e hora jave ae avakue mboapy-apy ikuai va'e gui peteĩ-teĩ jukaarã oguereko katu pyre.
- ¹⁶ Kavaju árygua xondaro kuery mbovy paa aendu rã duzentos milhões ikuai.
- ¹⁷ Ha'e rami vy aexa rã kavaju ha'e hi'árygua kuery opexo regua oguereko tata rami pytã va'e, jacinto rami hovy va'e ha'e enxofre rami iju va'e. Kavaju akã ma guary akã rami. Ijuru gui ma oẽ oiny tata, hataxã ha'e enxofre.
- ¹⁸ Ha'e va'e mboapy nhomoingo axyarã ijuru gui oẽ va'e py ae jojuka 'rã, tata, hataxã ha'e enxofre py. Avakue mboapy-apy ikuai va'e gui peteĩ-teĩ ojuka 'rã.
- ¹⁹ Mba'eta kavaju kuery mbaraetea ma ijuru ha'e huguai re oĩ. Huguai ma mboi rami inhakã va'e. Ha'e va'e py ae 'rã nhomoingo axy.
- ²⁰ Ha'e rã amboae kuery, imoingo axyarã oiko va'e gui nomanoj va'ekue ma ndojeko rerovai opo py mba'emo vai ojapoaty gui. Ndojepelai ae anha ha'e mba'emo ra'angaa ouro guigua omboetea gui, neĩ prata guigua, overa va'e, ita ha'e yvyra guigua gui, ha'e nunga oexa va'erã e'ŷ, oendu va'erã e'ŷ, neĩ oguata va'erã e'ŷ teĩ.
- ²¹ Ha'e kuery ndojeko rerovai ae jojukaaty gui, imba'evykyia, itavy reia, neĩ imondaa gui.*

10

João pe kuaxia para'i ho'u ukaa ague

- ¹ Ha'e gui amboae anjo imbaraete va'e aexa yva gui oguejy ouvy rã. Ha'e va'e ma arai py onhemonde ouvy. Inhakã áry rupi ma karugua ojekuaa. Hova ma kuaray rami hexakã, ha'e hetyma ma tata rami.
- ² Opo py ma peteĩ kuaxia para'i ojepe'a va'e oguereko. Opy oiporu kuaa regua re opyrõ ye'ẽ áry, ha'e rã opy oiporu kuaa e'ŷa re ma yvy re opyrõ.
- ³ Ha'e gui ojapukai atã guary okororõa rami. Ojapukai ramo sete yapu oĩ va'e ombovai.
- ⁴ Sete yapu ijayvu rã aendu vy ambopara ta ramove peteĩ ayvu aendu yva gui,
— Emombe'u eme sete yapu ijayvuague, embopara eme — he'i va'e.*
- ⁵ Ha'e gui ye'ẽ ha'e yvy re anjo opyrõ rã aexa va'e ma opo oiporu kuaa regua oupi yvate katy.
- ⁶ Ha'e rami vy oura araka'e rã peve oiko va'erã rery rupi, yva, yvy, ye'ẽ ha'e opa mba'e ikuai va'e apoare re. Ha'e vy aipoe'i:

* 9:21 Jeremias 5.3 * 10:4 Daniel 12.4

— Ndarevei ma 'rã.

⁷ Mba'eta sete-a anjo ijayvua ára py mimby guaxu omonhe'ẽ ta jave ojeupitypa ma 'rã Nhanderuete oikuaa uka e'ŷ teri va'ekue, guembiguai profeta kuery pe omombe'uague rami vy — he'i.

⁸ Yva gui ijayvu va'ekue ma teigue ju ijayvu vy aipoe'i xevy:

— Tereo, ejopy kuaxia para ojepe'a va'e ye'ẽ ha'e yvy re anjo opyrõ va'e po py oĩ va'e — he'i.

⁹ Ha'e ramo anjo hi'aia py aa vy ajerure kuaxia para'i xevy ome'ẽ aguã re. Ha'e ramo aipoe'i:

— Ejopy ha'vy, ha'e he'upa. Anhetẽ iro 'rã nderyepy py, ha'e rã ndejuru py oĩ teria ja ei rami he'ẽ 'rã — he'i.

¹⁰ Anjo po gui kuaxia para'i ajopy vy ha'u ramo xejuru py he'ẽ ei rami. Ha'e rami teĩ amokõ rire xerye py ma iro.*

¹¹ Ha'e gui aipoe'ive xevy:

— Teigue ju 'rã remombe'u heta regua kuery rekorã, amboae regua, amboae rami ijayvu va'e ha'e huvixave ikuai va'e rekorã.

11

Nhanderuete pegua oo iky'a e'ŷ va'e oa'ã aguã re ijayvuague

¹ Ha'e gui xevy pe ome'ea peteĩ takua popoka rami ipuku va'e. Ha'e aipo'ea xevy:

— Epu'ã ke, tereo, ha'e ea'ã Nhanderuete pegua oo iky'a e'ŷ va'e. Ea'ã avi altar oĩ va'e, ha'e pygua ombojerovia va'e kuery voi.*

² Ha'e rã oo iky'a e'ŷ va'e roka ma tove, ea'ã eme, mba'eta amboae regua kuery pe ranhe omboaxaa va'ekue. Ha'e va'e kuery ma quarenta e dois jaxy re 'rã opyrõ tetã iky'a e'ŷ va'e re.

Mokoï profeta ojukaa rã oexaague

³ — Ha'e gui mokoï profeta xeayvu mombe'uarã ambou vy mil duzentos e sessenta ára re 'rã amoingo, ajukue vaikue py onhemonde reve — he'i.

⁴ Ha'e va'e kuery ma mokoï oliveira, ha'e mokoï tataendy renda Senhor yvy re ipo'aka va'e renonde hi'aí va'e.*

⁵ Ha'e kuery pe amongue ojapo vai ta ramo ijuru gui oẽ 'rã tata hovaigua kuery mombaarã. Ha'e rami 'rãe imoingo axyxea kuery omano.

⁶ Ha'e kuery ipo'aka 'rã yva ojoko aguã, ayvu omombe'u oikovya ja oky e'ŷ aguã. Yy re voi ipo'aka 'rã tuguy rami ojeapo aguã. Ipo'aka avi 'rã opa marãgua nhomoingo axya py yvy ombovaipa aguã, mbovykue rei e'ŷ ojapoxea rami.

⁷ Ha'e va'e rire ha'e kuery omombe'u 'rã va'ekue omombe'upa ma ramo ha'e kuery re peteĩ opu'ã 'rã, vixo vaikue yvykua gui oẽ va'e. Ha'e va'e ma ha'e kuery re ipo'aka vy ojuka ete ranhe 'rã.

⁸ Ha'e kuery retekue omomboa inony 'rã tetã guaxu mbyte rupi tape oaxa va'e py. Ha'e va'e tetã pe ma “Sodoma” ha'e “Egito” 'ea Nhe'ẽ gui, mba'eta ha'e py ae ha'e kuery Senhor ojukaa aviague, kuruxu re.

⁹ Ha'e ramo mokoï profeta retekue re heta 'rã oma'ẽ: amboae yvy regua kuery, joegua e'ŷ-e'ŷ, amboae rami ijayvu va'e ha'e amboae regua kuery. Irundy araa kuaray mbyte peve 'rã hetekue re oma'ẽ okuapy, ojaty uka vy e'ŷ.

¹⁰ Mba'eta yvy regua kuery oguerovy'a rei 'rã mokoïve omanoague. Ha'e rami vy ojapo 'rã ngaru, ha'e joupe-upe ome'ẽ 'rã mba'emo, “Ha'e va'e mokoï profeta ma yvy regua kuery omoingo axy rei va'ekue” he'i vy.

¹¹ Ha'e gui irundy araa kuaray mbyte rire ma Nhanderuetea gui nhe'ẽ imoingove jevyarã ou vy ha'e kuery re 'rã oĩ. Ha'e ramo opu'ã 'rã nhogueno'amy, ha'e hexaa kuery ndaekorävei 'rã okuapy.

* 10:10 Ezequiel 3.1-3 * 11:1 Ezequiel 40.3 * 11:4 Zacarias 4.1-2

¹² Ha'e gui mokoī profeta yva gui oendu 'rā peteī ayvu atā "Penhemboja ke pejuvy" he'i nhendu va'e. Ha'e ramo yva re ojeupi 'rā arai rupi, hovaigua kuery oexaa py.

¹³ Ha'e ramove oiko 'rā yvy oryryi atā va'e, tetā mbovaipaara. Dez henda oī va'e-va'e gui peteī-teī henda py 'rā ombovaipa. Yvy ryryi gui omano 'rā sete mil. Ha'e rā amboae kuery ma ndaekorāvei reve ombojerovia 'rā okuapy Nhanderuete yva pygua.

¹⁴ Ha'e rami py ojeupity mokoīguea "Nda'evei ete" he'ague. Ma'ē, are'ŷ'i re mboapya ju 'rā ou.

Sete-a mimby guaxu ju omonhe'ẽ javé oexaque

¹⁵ Ha'e gui sete-a anjo ju omonhe'ẽ mimby guaxu. Ha'e ramo yva re onhendu peteī ayvu atā:

— Yvy regua po'akaa ma nhande-Senhor ha'e hemimbou Cristo pegua omboaxaa. Ha'e ramo ha'e va'e ju 'rā joguerek araka'e rā peve — he'i va'e.*

¹⁶ Ha'e gui vinte e quatro tujakueve joe opena va'ety kuery Nhanderuete renonde, guenda py oguapy okuapy va'e ma guenapy'ã re ikuai, ha'e yvy re ngova omovaẽ Nhanderuete omboetea rupi.

¹⁷ Ha'e vy aipoe'i okuapy:

— Senhor Oreruete Ndepo'akapa va'e, aŷ reiko ha'e yma guive reiko va'ekue va'e, ore kuery roquerovy'a, mba'eta ndepo'aka etea rexu uka vy huvixave ma rei.

¹⁸ Anhetē, yvy regua kuery ipoxypa va'ekue ri ovaẽ ma ndee ae ndepoxy aguã, omano va'ekue remboayvu aguã ára rea'angaague. Ha'e rami vy nerembiguai kuery pe reme'ẽ 'rā hekovia, profeta kuery, iky'a e'ŷ va'e ha'e nderery oendu vy ojererokyjea rupi ikuai va'e ha'e javi, yvyigueve ha'e yvatekueve. Ovaẽ avi yvy mombaare kuery remomba aguã — he'i.

¹⁹ Ha'e gui yva re ojepe'a jekuaa Nhanderuete pegua oo iky'a e'ŷ va'e rokē, ha'e ramo iky'a e'ŷ va'e ropy aexa guexeve guarã ojapo va'ekue ryru oī va'e. Ha'e gui oiko overa, ayvu, yapu ha'e yvy ryryi. Amandau avi ho'a vaipa.

12

Kunha ha'e teju-jagua oexaque

¹ Yva re peteī ojekuaa avi hexa pyrā tuvixa va'e. Oiko peteī kunha kuaray py onhemonde va'e, jaxy áry ipy oī va'e. Ha'e va'e akā re ma oī peteī coroa doze jaxy-tata oĩa.

² Hye guaxu'i va'e vy haxy rā haxē, ojexavai oiny kyrī'i va'e oikuavã aguã haxy ramo.

³ Amboae ojekuaa avi hexa pyrā yva re, peteī teju-jagua pytā hi'aĩ tuvixa va'e. Ha'e va'e ma sete inhakā ha'e dez hakua va'e. Sete inhakā re ma sete coroa oĩ.

⁴ Nguguai py oity yva gui jaxy-tata ikuai va'ekue. Mboapy-apy oī va'e gui peteī-teī oity vy omombo yvy katy. Kunha kyrī va'e oikuavã ta va'e renonde teju-jagua hi'aĩ, itui'i ramove ho'u aguã.

⁵ Ha'e gui itui'i ma peteī ava'i. Ha'e va'e ma ha'e javi regua mo'aranduarã oiko po pygua ferro guigua py. Ha'e gui kunha va'e pi'a ma Nhanderuetea py heraa, henda peve.

⁶ Ha'e gui kunha va'e ma tekao e'ŷa katy ojava ovy. Ha'e py hekoarã oī Nhanderuete oguerekou katu va'ekue. Ha'e py omongaru uka 'rā mil duzentos e sessenta araa peve.

Yva gui teju-jagua oitya rā oexaque

⁷ Ha'e gui yva re oiko joe opu'ã va'e. Ha'e rami vy anjo Miguel ma guexeveguia kuery reve opu'ã okuapy teju-jagua re. Ha'e ramo teju-jagua ojeupegua anjo kuery reve opu'ã avi,

⁸ teī ha'e va'e kuery nda'ipo'akai. Ha'e ramo ha'e kuery pe noīvei yva re ikuai aguã.

⁹ Ha'e ramo yva gui oitya teju-jagua tuvixa va'e, mboi yma guive oiko va'ekue, anha Satanás hery va'e, yvy regua kuery ha'e javi mbotavya. Yvy katy omomboa, ixupeguia anjo kuery reve.

¹⁰ Ha'e gui yva gui aendu peteī ijayvu atā va'e:

* 11:15 Daniel 7.27

— Aŷ ma ojekuaa ma jaa jepe aguã, Nhanderuete ombaraetea ha'e opo'akaa oexa uka aguã guive. Ojekuaa avi hemimbou Cristo po'akaa, mba'eta oity ma nhande-irmão kuery rekukue ramigua mombe'ua. Ha'e va'e ma ara py ha'e pyávy Nhanderuete renonde hi'aĩ ha'e kuery rekukue omombe'ua py.

¹¹ Ha'e rami teĩ hexe ma Vexa'i ra'y ruguy rupi ha'e kuery ipo'aka, ha'e hexegua ayvu omombe'ua py guive. Ha'e kuery omano aguã rami ikuai teĩ noendui okuapy ojeayvua.

¹² Ha'e nunga rupi yva re pendekuai va'e ha'e javi, pevy'a ke. Ha'e rã yvy ha'e ye'ẽ pe ma nda'evei ete 'rã, mba'eta penda py oguejy ma anha. Ipoxy vaipa reve oguejy, mba'eta oikuua hi'ára opa rai'i maa.

Teju-jagua kunha va'e oakykue monha rã oexaague

¹³ Ha'e gui yvy py teju-jagua omomboa ma ramo oakykue monha kunha opi'a'i oikuavã va'ekue.

¹⁴ Ha'e ramo kunha va'e pe ome'ëa taguato tuvixa va'e pepo joavaive revegua, tekao e'ŷa katy oveve aguã, hekoarã oguereko katu pyre py. Ha'e py ma omongarua 'rã mboapy ma'etŷ rire irundaya mbyte peve, mboi oexa e'ŷa py.*

¹⁵ Ha'e ramo kunha va'e rakykue mboi ou vy ojuru gui yy omoë yakã rami, kunha va'e ogueroxyry heravy aguã.

¹⁶ Ha'e rami teĩ yvy ae oipytyvõ kunha va'e. Ha'e rami vy ojepe'a vy omokõmba teju-jagua ojuru gui yy omoë va'ekue.

¹⁷ Ha'e ramo kunha va'e pe teju-jagua ipoxyve ete vy oo imemby mboae kuery ikuai va'e re opu'ã aguã. Ha'e va'e kuery ma Nhanderuete ojapo uka va'e omoï porã, ha'e Jesus regua omombe'ua rupi ikuai va'e.

¹⁸ Ha'e gui teju-jagua ma ye'ẽ rembe re ju hi'aĩ ita ku'i reia py.

13

Ye'ẽ gui vixo vaikue oẽ rã oexaague

¹ Ha'e gui peteĩ vixo vaikue aexa ye'ẽ gui oẽ ouvy rã. Ha'e va'e ma dez hakua ha'e sete inhakã va'e. Hakua re ma dez coroa oĩ. Inhakã re ma hery oĩ ayvu vai regua.

² Vixo aexa va'e ma reõ rami hete. Ipy ma urso rami, ha'e rã ijuru ma guary rami. Ixupe teju-jagua omboaxa opo'akaa, henda openaaty py oĩ aguã, ha'e mba'emo tuvixa va'e ojapo aguã guive.*

³ Ha'e gui aexa rã inhakã sete ikuai va'e regua peteĩ re ijukaarã omboguaiague oĩ, teĩ ijai ijukaarã oĩ va'ekue gui okuera. Ha'e ramo yvy regua kuery ha'e javi onhemondyipa vy vixo re anho oje'oi.

⁴ Teju-jagua voi ombojerovia okuapy, vixo ombopo'aka rire. Vixo vaikue avi ombojerovia. Ha'e vy aipoe'i okuapy:

— Mava'e nda'u vixo rami ipo'aka va'e? Mava'e nda'u opu'ã kuaa 'rã hexe? — he'i.

⁵ Ixupe ome'ëa avi ojuru py ijayvupa rei ha'e ijayvu vai aguã. Quarenta e dois jaxy peve ombopo'akaa.

⁶ Ha'e ramo ojuru oipe'a Nhanderuete re ijayvu vai aguã. Ha'e rami vy hery ha'e ombojeroviaaty re ijayvu rei, ha'e yva pygua kuery re guive.*

⁷ Ixupe ome'ëa avi iky'a e'ŷ va'e kuery re opu'ã ha'e ipo'aka ete aguã. Ombopo'akaa avi yvy re ikuai va'e re: peteĩ-teĩ regua re, joegua e'ŷ-e'ŷ, amboae rami ijayvu va'e ha'e amboae regua kuery re.*

⁸ Ha'e ramo yvy regua kuery ha'e javi 'rã ombojerovia. Ha'e va'e kuery rery ma kuaxia tekove oguereko va'e kuery rery oĩa re noĩ. Ha'e va'e kuaxia ma Vexa'i ra'y pegua, mba'eta yvy itui ypy'i guive ojejuka uka va'ekue.

⁹ Ijapyxa oĩ va'e ke toendu.

* 12:14 Daniel 7.25, 12.7

* 13:2 Daniel 7.3-7

* 13:6 Daniel 11.36

* 13:7 Daniel 7.21

¹⁰ Nhuā py heraa pyrā ma nhuā py ae 'rā oo. Kyxe guaxu py ojuka pyrā ma kyxe py ae 'rā ojukaa. Ha'e rami oiko rā iky'a e'ŷ va'e kuery toexa uka ogueropo'aka ha'e ojerovia etea.

Yvy guy gui vixo mboae oẽ ouvy rā oexaaque

¹¹ Ha'e gui vixo vaikue mboae ju aexa yvy guy gui oẽ ouvy rā. Ha'e va'e ma Vexa'i ra'y rami hakua mokoī va'eri teju-jagua rami ijayvu va'e.

¹² Jypygua vixo po'akaa rupi oiko henonde. Ha'e rami vy ojapo 'rā yvy regua kuery vixo jypygua omboete aguā rami, ijai ijukaarā oĩ va'ekue gui okuera rire.

¹³ Ojapo avi 'rā hexa pyrā tuvixa va'e. Ha'e rami vy yva gui omboguejy 'rā tata yvy katy, avakue oexaa py.

¹⁴ Vixo renonde hexa pyrā ojapo aguā ombopo'akaague rupi ombotavy 'rā yvy regua kuery. Ha'e rami vy ha'e kuery pe ojapo uka 'rā vixo ra'angaarā, kyxe guaxu py omboguaiague gui oikove ju va'ekue pegua ae.

¹⁵ Ombopo'aka avi vixo ra'angaa omopytuē aguā. Ha'e ramo ha'angaa ijayvu, ha'e ojuka uka guive ha'angaa ombojerovia e'ŷ va'e kuery.

¹⁶ Pavē re omoī uka ikuaa ukaarā, ipo oiporu kuaa regua re, e'ŷ vy hova re. Yvyīgueve ha'e yvatekueve, oguerekopa va'e ha'e iporiaukue'i, escravo ha'e escravo e'ŷ ha'e javi re omoī,

¹⁷ mba'eve rei ovende e'ŷ neī ojogua e'ŷ aguā, ikuaa ukaa oguereko va'e e'ŷ vy. Ha'e va'e kuery re oĩ jypygua vixo rery, e'ŷ vy hery regua número.

¹⁸ Ha'e nunga ma 'arandua oexa ukaa aguā oiko. Hi'arandu va'e kuery toikuaa pota vixo número mbovy paa re, mba'eta ava regua número ae, seiscentos e sessenta e seis.

14

Vexa'i ra'y ha'e ixupegu kuery Sião yvyty áry ikuai rā oexaaque

¹ Ha'e gui ama'ẽ vy aexa Vexa'i ra'y Sião yvyty áry hi'aĩ rā. Hexeve ikuai avi cento e quarenta e quatro mil. Ha'e va'e kuery rova re ma hery ha'e Tuu rery omboparaa va'ekue.*

² Ha'e gui peteī ayvu aendu yva gui onhendu va'e, yy heta ha'e yapu atā va'e revovo rami, ha'e mba'epu ixā reta va'e ombopua rā onhendua rami guive.

³ Tenda oĩ va'e renonde rupi oporaeia okuapy mboraei pyau, irundy temimoingo kuery ha'e tujakueve joe opena va'ety renonde. Ha'e va'e mboraei ma avave rei ndoporaei kuaai, cento e quarenta e quatro mil yvy regua kuery gui ogueraa jepe pyre'ŷ vy.

⁴ Ha'e va'e kuery ma kunhague reve onhemongy'a e'ŷ va'e, joguereko e'ŷ va'e vy. Vexa'i ra'y ooa rupi rei hupive oje'oi va'e. Avakue mbyte gui ojoguaa Nhanderuete ha'e Vexa'i ra'y peguarā jypy'igua ikuai aguā.

⁵ Ha'e kuery juru py apu oĩ e'ŷ va'e, mba'eta iky'a e'ŷ va'e meme.

Jypygua ayvu oenduague

⁶ Ha'e gui anjo mboae ju aexa yva mbyte rupi oveve-veve rā. Ha'e va'e ma ayvu porā araka'e rā peve guarā oguereko yvy regua kuery pe omombe'u va'erā, peteī-teī regua pe, joegua e'ŷ-e'ŷ, amboae rami ijayvu va'e, ha'e amboae yvy regua kuery ha'e javi pe.

⁷ Ha'e vy ijayvu atā reve aipoe'i:

— Pejererokyje ke Nhanderuete renonde, pemboete guive, mba'eta ovaẽ ma nhom-bopaga aguā hora. Pembojerovia yva, yvy, ye'ẽ ha'e yvu ikuai va'e apoare — he'i.

Mokoīa ayvu oenduague

⁸ Ha'e va'e rire ou anjo mboae, mokoīa va'e. Ha'e va'e ju aipoe'i:
— Ho'a, ho'apa ma Babilônia tetā guaxu. Mba'eta ha'e va'e tetā ma vinho ome'ẽ va'ekue yvy regua kuery ha'e javi oy'u aguā. Ha'e va'e ma poxya, Babilônia pygua kuery itavy reiague re ou va'e.

Mboapya ayvu oenduague

* 14:1 Apocalipse 7.1-4

⁹ Ha'e va'e rire ou anjo mboae ju, mboapya va'e. Ha'e va'e ma ijayvu atā reve aipoe'i:

— Vixo vaikue ha'e ha'angaa mbojeroviaa kuery rova re, e'ŷ vy ipo re ikuaa ukaarã omoimbaa va'ekue ma

¹⁰ oy'u'rã vinho Nhanderuete poxya regua. Ha'e nunga ma omoirū e'ŷ re oguereko katu va'ekue. Karo ipoxya oĩa gui ae 'rã ha'e kuery oy'u. Ha'e rami vy tata enxofre revegua py ikuai axy 'rã anjo iky'a e'ŷ va'e kuery ha'e Vexa'i ra'y renonde.

¹¹ Ha'e kuery ikuai axya gui hataxí ojeupi 'rã araka'e rã peve guarã. Vixo vaikue ha'e ha'angaa mbojeroviaa kuery re hery omoña va'ekue ma ara py ha'e pyávy optyu'u e'ŷ re ikuai axy riae 'rã — he'i.

¹² Ha'e rami oiko rã iky'a e'ŷ va'e kuery toexa uka oĩ atāa. Ha'e kuery ma Nhanderuete ayvu ha'e Jesus re ojeroviaa rupi ikuai va'e.

Irundaya ayvu oenduague

¹³ Ha'e ramo yva gui aendu peteĩ ayvu:

— Embopara ke: Ovy'a ete 'rã okuapy aŷ guive Senhor re omano va'e kuery — he'i va'e. Ha'e ramo Nhe'ẽ ombovai:

— Anhetẽ, mba'eta ha'e kuery optyu'u 'rã omba'epoague gui. Heko porãague repy ojekuaa avi 'rã ha'e kuery reve — he'i.

Mba'emo aju omono'õa rã oexaague

¹⁴ Ha'e gui ama'ẽ vy aexa peteĩ arai xiĩ va'e. Ha'e va'e áry ma peteĩ oguapy oiny, ava ra'y ojeapo va'ekue rami ojekuaa va'e. Ha'e va'e akã re ma coroa ouro guigua oĩ, ha'e opo py ma foice'i haimbe va'e oguereko.*

¹⁵ Ha'e gui ma Nhanderuete ro iky'a e'ŷ va'e gui oẽ ouvy anjo mboae. Ha'e va'e ma ojapukai reve aipoe'i arai áry oguapy oiny va'e pe:

— Mba'ety yvy regua ijajupa ma. Eraa ke nde-foice'i ha'e emono'õ, mba'eta remono'õ aguã hora ovaẽ ma. — he'i.

¹⁶ Ha'e ramo arai áry oguapy oiny va'e yvy áry rupi foice'i py ijaju va'e ojaya vy omono'õmba yvy gui.*

Uva omono'õa rã oexaague

¹⁷ Ha'e gui yva re Nhanderuete ro iky'a e'ŷ va'e oĩ va'e gui oẽ ouvy anjo mboae. Ha'e va'e voi foice'i haimbe va'e oguereko opo py.

¹⁸ Ha'e gui altar yvýry gui peteĩ oẽ anjo mboae ju, tata re opena va'ety. Ha'e va'e ma foice'i haimbe va'e revegua pe ijayvu atā vy aipoe'i:

— Eraa ke nde-foice'i haimbe va'e, ha'e emono'õ uva yvy regua hembypy gui, mba'eta uva ijajupa ma — he'i.

¹⁹ Ha'e ramo yvy áry rupi anjo foice'i omboaxa vy yvy re uva rembypy ikuai va'e gui ojaya hi'a. Ha'e rami vy uva'a ma peteĩ onhami atyrã tuvixa va'e oĩ va'e py omombopa, Nhanderuete opoxya rupi nhombopaga aguã.*

²⁰ Ha'e ramo uva onhamia tetã gui mombyry'i. Ha'e ramo onhamiaty gui onheẽ tuguy. Kavaju juruxã peve tyguaxu, ha'e trezentos quilometro-a rupi peve oxyry.

15

Sete nhomoingo axyarã omboua ta ramo oexaague

¹ Ha'e gui aexa rã yva re ojekuaa hexa pyrã tuvixa va'e mboae, nhomondyipaarã. Mba'eta sete anjo ikuai, sete nhomoingo axyarã rerua. Ha'e va'e nhomoingo axya ma opa vygua, mba'eta ha'e nunga py opa 'rã Nhanderuete opoxya rupi joguerekao.

Moisés ha'e Vexa'i ra'y poraei oporaeia okuapy rã oenduague

² Ha'e gui peteĩ yupa aexa vidro guigua rami ojekuaa va'e, tata re irũ va'e. Ha'e va'e áry ma mba'emo vai re ipo'aka va'ekue ikuai: vixo vaikue re, ha'angaa, ha'e hery regua

* 14:14 Daniel 7.13 * 14:16 Mateus 13.37-43 * 14:19 Apocalipse 19.15

número omoña 'rã va'ekue re. Ha'e va'e kuery ma Nhanderuete pegua mba'epu ixã reta va'e oupi reve

³ oporaei okuapy Nhanderuete rembiguai Moisés ha'e Vexa'i ra'y poraei. Ha'e rami vy aipoe'i:

— Senhor Oreruete Ndepo'akapa va'e, mba'emo rejapo va'e ma tuvixa ha'e iporã va'e meme. Reikoa ha'e javi rupi ndereko porãa anhetẽ rupigua meme rexu uka. Yvy regua kuery Ruvixave reiko!

⁴ Senhor, mava'e tu nderery oendu vy nanemboetei 'rã ojererokyjea rupi? Mba'eta ndee anho iky'a e'ŷ va'e reiko. Ha'e nunga rupi yvy regua kuery ha'e javi 'rã nerentonde ou nemboete aguã, ndereko porãa ojekuaa ma rire — he'i okuapy.

Nhanderuete nhomoingo axyarã ombou rã oexaague

⁵ Ha'e va'e rire ama'ẽ jevy rã yva re ombojeroviaaty iky'a e'ŷ va'e ojep'e'a, ha'e Nhanderuete ayvu ryru opy oĩa gui ojekuaa.

⁶ Ha'e gui iky'a e'ŷ va'e ropy gui sete anjo kuery oẽ ouvy sete nhomoingo axyarã rerua. Ha'e va'e kuery ma ajukue porâve xii rei hexakã va'e py onhemonde, ajukue ra'ykue ouro guigua opexo rupi ojokua reve.

⁷ Ha'e ramo sete anjo ikuai va'e po py irundy temimoingo kuery va'e regua peteĩ omboaxa sete hy'a'i ouro guigua. Ha'e va'e ma tynyẽ Nhanderuete raka'e rã peve oiko va'erã poxya.

⁸ Ha'e gui iky'a e'ŷ va'e ropy rupi tynyẽ Nhanderuete rexakã ha'e ipo'akaa guigua hataxã. Ha'e ramo avave rei nda'evei ranhe oike aguã, sete nhomoingo axyarã sete anjo oguerekoo va'e oiko e'ŷa ja.

16

Jypygua nhomoingo axyarã ombou rã oexaague

¹ Ha'e gui peteĩ ayvu aendu oo iky'a e'ŷ va'e gui onhendu atã va'e. Ha'e rami vy sete anjo ikuai va'e pe aipoe'i:

— Tapeo, sete hy'a'i perekoo va'e gui penhoẽ yvy re Nhanderuete poxya rexu ukaarã — he'i.

² Ha'e ramo anjo jypygua oẽ ovvy vy hy'a'i py oĩ va'e onhoẽ yvy re. Ha'e va'e gui ma oiko ai vaikue. Ha'e ramo vixo vaikue guigua kuaa ukaarã avakue omoña ha'e ha'angaa ombojerovia va'ekue re oiko imoingo axyarã.

Mokoña nhomoingo axyarã ombou rã oexaague

³ Ha'e gui anjo mokoña va'e ma ye'ẽ áry ju onhoẽ hy'a'i gui. Ha'e va'e gui ma omano va'ekue ruguy rami yy oiko. Ha'e ramo ye'ẽ rupi temimoingo ikuai va'e omanomba.

Mboapya nhomoingo axyarã ombou rã oexaague

⁴ Ha'e gui anjo mboapya va'e ma yakã ha'e yvu ikuai va'e áry ju onhoẽ hy'a'i gui. Ha'e va'e gui ma tuguy ojeapo.

⁵ Ha'e ramo aendu yy re anjo opena va'e aipoe'i rã:

— Ndee ma heko porã va'e, aŷ reiko ha'e yma guive reiko va'ekue, Ndeky'a e'ŷ ete va'e, mba'eta ha'e nunga py ma ha'evea rami renhombopaga.

⁶ Ha'e kuery ma iky'a e'ŷ va'e ha'e profeta kuery ruguy omoẽ uka rire ha'e kuery pe ju reme'ẽ tuguy oy'u aguã. Ha'e nunga py ha'evea rami rembopaga — he'i.

⁷ Ha'e gui aendu avi altar gui ombovai va'e:

— Anhetẽ, Senhor Oreruete Ndepo'akapa va'e. Anhetẽ va'e ha'e ha'evea rami meme renhombopaga — he'i.

Irundaya nhomoingo axyarã ombou rã oexaague

⁸ Ha'e gui irundaya anjo ma kuaray re ju onhoẽ hy'a'i gui. Ha'e va'e gui ma kuaray oapy avakue tata py.

⁹ Ha'e ramo kuaray aku gui okaipa vy ijayvu vaikue okuapy Nhanderuete rery re, imoingo axyarā ombou aguā re ipo'aka va'e ramo. Ha'e rami teī ndojeko rerovai guive omboete aguā.

Peteī nhiruīa nhomoingo axyarā ombou rā oexaague

¹⁰ Ha'e gui anjo peteī nhiruīa va'e ma vixo vaikue renda openaaty re ju onhoē hy'a'i gui. Ha'e va'e gui ma vixo openaa ha'e javi rupi pytūmba. Ha'e rā avakue haxy va'e oendu vy oixu'upa oapekū,

¹¹ ai vaikue gui ojexavai vy ijayvu vai okuapy Nhanderuete yva pygua re. Ha'e rami teī opa marā rei ikuiaia gui ma ndojeko rerovai guive.

Mboapy memea nhomoingo axyarā ombou rā oexaague

¹² Ha'e gui anjo mboapy memea va'e ma Eufrates yakā guaxu áry ju onhoē hy'a'i gui. Ha'e va'e gui ma yy ipirupa peteī tape oī aguā, kuaray oua katy gui huvixave kuery ou aguā.

¹³ Ha'e ramo ama'ē rā teju-jagua, vixo vaikue ha'e profeta ramigua juru gui ma mboapy nhe'ē vai oē ju'i rami ojekuaa va'e.

¹⁴ Ha'e va'e nhe'ē ma anha kuery meme, hexa pyrā apoarā ikuai. Ha'e kuery oje'oi 'rā yvy jave re huvixa kuery ikuai va'ea rupi omono'ōmba heruvy aguā, Nhanderuete Ipo'akapa va'e re opu'ā rei okuapy aguā, mba'eta hi'āra tuvixave va'e ovaē rā.

¹⁵ (— Ma'ē, xee ma imonda va'e rami 'rā aju xapy'a. Ovy'a ete 'rā xerarō vy oao py onhemonde riae va'e, ipire reia rupi oiko e'ŷ aguā, oexa pavē rā oxīmba e'ŷ aguā — he'i.)

¹⁶ Ha'e gui anha kuery nhe'ē ma peteī henda py omono'ōmba huvixa kuery, hebraico ayvu py Armagedom 'epy va'ea py.

Sete-a nhomoingo axyarā ju ombou rā oexaague

¹⁷ Ha'e gui anjo sete-a va'e ma yvate rupi onhoē hy'a'i gui. Ha'e va'e jave py ayvu atā onhendu oo iky'a e'ŷ va'e py, tenda openaaty oī va'e yvy'iry gui. Ha'e vy — Ojeupitypa ma — he'i.

¹⁸ Ha'e gui oiko overa, ayvu ha'e yapu. Oiko avi yvy ryryi atā tuvixa va'e. Ha'e va'e ramigua yvy ryryi ma yvy re ikuiaia ypy'i guive ndoikoi teri va'ekue.

¹⁹ Ha'e va'e gui ma tetā guaxu mboapy henda rupi oja'o. Ho'apa avi kova'e yvy re tetā ikuai va'e. Mba'eta Babilônia tetā guaxu re Nhanderuete oikuua pota vy omboy'u vinho ipoxya oĩa karo gui.

²⁰ Ha'e ramo ypa'ū ha'e javi okanhymba, yvyty ikuai va'e voi ndojouavei.

²¹ Ha'e gui avakue áry ho'a yva gui amandau tuvixa va'e, trinta quilo raxa va'e meme. Ha'e ramo amandau gui ojexavai vy ijayvu vai okuapy Nhanderuete re, imoingo axyarā ombou va'ekue tuvixa ramo.

Kunha itavy rei ete va'e oexaague

¹ Ha'e gui anjo kuery sete hy'a'i oguereko va'e regua peteī ou. Ha'e va'e ma ijayvu vy aipoe'i xevy:

— Enhemboja ke ejuvy, aexa uka ta kunha itavy rei ete va'e ombopagaa rā. Ha'e va'e ma yy heta va'e áry oguapy oiny va'e.

² Hexeve huvixave yvy re ikuai va'e itavy rei va'ekue. Kunha va'e itavy reia vinho ma yvy regua kuery oy'u vy oka'upa va'ekue — he'i.

³ Ha'e gui nhe'ē re aiko reve anjo xereraa peteī henda tekoa e'ŷa py. Ha'e py ma kunha va'e aexa peteī vixo pytā va'e kupe áry oguapy oiny rā. Ha'e va'e vixo re ma tery nda'evei ete va'e oīmba. Sete inhakā ha'e dez hakua va'e hi'ai.

⁴ Kunha va'e ma púrpura ha'e pytā va'e py onhemonde va'e. Ouro guigua py ojegua, ita hepyve va'e ha'e pérola guigua py. Opo py oguereko peteī karo ouro guigua. Ha'e va'e ma ojeguarupy anho tynyē, itavy reia rupi onhemongy'apaague.

⁵ Kunha va'e rova re ma peteī tery oī oikuaa pyrā e'ŷ: “*Babilônia tetā guaxu, itavy rei va'e kuery xy, ha'e yvy re ojeguarupy omoingo va'ety*” he'ia.

⁶ Aexa rā kunha va'e ma Jesus regua mombe'ua kuery iky'a e'ŷ va'e ruguy oy'u vy oka'u va'ekue. Ha'e nunga aexa vy anhemondyi vaipa.

⁷ Ha'e ramo anjo aipoe'i xevy:

— Mba'e re tu renhemondyi ri? Amombe'u porāve ta kunha va'e reko reikuua e'ŷ va'ekue, ha'e vixo sete inhakā ha'e dez hakua va'e kunha reraa reko guive.

⁸ Vixo rexâa va'e ma yma oiko va'ekue ri aŷ noīvei, ha'e gui yvykua gui oē aguā rami ju oiko, ha'e okanhy aguā rami guive. Ha'e rā yvy regua kuery yvy itui ypy'i guive kuaxia tekove oguereko va'e kuery rery oĩa re hery nomboparaaia va'e, ha'e kuery oexa 'rā vixo oiko va'ekue ri noīvei va'e ojekuaa ju rā. Ha'e gui vixo oiko va'ekue ri noīvei va'e ojekuaa ju rā rā yvy regua kuery oexa 'rā okuapy, yvy itui ypy'i guive kuaxia tekove oguereko va'e kuery rery oĩa re hery nomboparaaia va'e kuery ae. Ha'e kuery oexa vy onhemondyi pa 'rā okuapy.

⁹ — Ha'e nunga ma hi'arandu va'e kuery oikuaa aguā: Vixo akā sete ikuai va'e ma sete yvyty. Ha'e va'e yvyty áry ae kunha va'e oguapy oiny. Sete huvixave guive ikuai.

¹⁰ Ha'e kuery va'e regua peteī nhiruī ma noīvei ma. Peteī ju aŷ oikove, ha'e rā amboae ma ndoikoi teri. Ha'e va'e ma ojekuaa vy are'ŷ'i re 'rā oiko, henonderā omoī ma voiague rami vy.

¹¹ Ha'e gui vixo yma oiko va'ekue ri aŷ noīvei va'e ae 'rā oiko huvixave oito-a va'erā. Sete ikuai va'e gui 'rā oiko. Ha'e rami avi okanhy aguā rami oiko.

¹² Ha'e gui dez hakua rexâa va'e ma dez huvixave ikuai. Ha'e va'e kuery ma nombopo'akaai teri. Vixo reve vy mae ma 'rā ipo'aka huvixa ikuai aguā. Peteī hora ete'i 'rā oī.*

¹³ Ha'e va'e kuery ma peteī rami meme 'rā onhembopy'a. Ha'e rami vy vixo pe omboaxa 'rā opo'akaa joguereko aguā.

¹⁴ Ha'e kuery opu'ā 'rā okuapy Vexâ'i ra'y re. Ha'e rami teī ha'e kuery re Vexâ'i ra'y ipo'aka 'rā, mba'eta senhor ikuai va'e Senhor, ha'e huvixave ikuai va'e Ruvixave. Hexeveguia kuery ipo'aka avi 'rā, hexe anho ojerovia va'e, oiporavo ha'e oenoī va'ekue ikuai vy — he'i.

¹⁵ Ha'e gui aipoe'ive ju xevy:

— Kunha itavy rei va'e oguapy oinya yy ma joegua e'ŷ-e'ŷ va'e, heta va'e kuery, amboae yvy regua, ha'e amboae rami ijayvu va'e kuery.

¹⁶ Ha'e gui vixo ha'e dez hakua rexâa va'ekue ma nda'ija'ei 'rā okuapy kunha itavy rei va'e re. Ha'e rami vy oipe'apa 'rā heravy mba'emo oguereko va'ekue. Ho'upa 'rā ho'okue, ha'e gui oapypa 'rā guive tata py.

¹⁷ Mba'eta ha'e kuery py'a re Nhanderuete ae 'rā omoī ha'e oipota va'e ojapo aguā. Ha'e ramo peteī rami meme 'rā vixo pe omboaxa ipo'aka aguā, Nhanderuete ijayvuague ojeupitypa peve.

¹⁸ Kunha rexâa va'ekue ma tetā guaxu yvy regua huvixave kuery re ipo'aka va'e.

18

“*Babilônia tetā oitya ma*” 'ea rā oenduague

¹ Ha'e va'e rire ma ama'ě rā yva gui oguejy amboae anjo ipo'aka ete va'e. Ha'e va'e rexakāa ma yvy jave re oexape.

² Ha'e gui ojapukai vy aipoe'i:

— Oitya, oitypaa ma Babilônia tetā guaxu. Anha kuery ikuai atyrā rive opyta, opa marāgua nhe'ě vai kuarā, ha'e guyra ojeguarupy ha'eve'ŷ va'e onhemi atyrā.

³ Mba'eta Babilônia pygua kuery itavy reia re imbopagaarā vinho ma yvy regua kuery ha'e javi oy'u. Hexeve yvy regua huvixave kuery itavy rei avi va'ekue. Yvy regua mba'emo vendea kuery voi ojoupa va'ekue Babilônia pygua kuery itavy reia gui.

⁴ Ha'e gui amboae ayvu ju aendu yva gui aipoe'i va'e:

* 17:12 Daniel 7.24

— Xevyguá kuery, pejepe'a ke ha'e kuery mbyte gui, ha'e kuery ojejavya rupi pendekuai e'ŷ aguã, ha'e kuery moingo axyarã pendere voi oiko e'ŷ aguã — he'i.

⁵ Mba'eta ha'e kuery ojejavya ma yva re peve ojekuaa. Ha'e ramo Nhanderuete oikuua pota ae ma teko vai rupi ikuia re.

⁶ Tomoingo axya ete ha'e kuery nhomoingo axyague rekovia, tombopaga raxaave guiveojapoague re. Karo py ha'e kuery nhomonga'u aguã omoirüague py ae ju tomoirüave ete ha'e kuery oy'u aguã.

⁷ Ha'e kuery ojejou porã ha'e itavy reiague re tomboekoviaa ojexavai ha'e ojae'o aguãrami, mba'eta ojeupe ae “Xee ma huvixa kunha rami aguapy ainy. Imeve'ŷ va'e xee ndaikoi. Neĩ peteĩ henda py naendui 'rã xembojae'oarã” he'i rire.

⁸ Ha'e nunga rupi peteĩ ára pyve 'rã ou imoingo axyarã. Oiko 'rã ijukaarã, imbojae'oarã ha'e karuai. Ha'e gui okaipa 'rã tata py, mba'eta Senhor Nhanderuete imbopagaarã oiko va'e ma ipo'aka.

Babilônia tetã oguerovy'a va'ekue ipy'a vai rã oexaque

⁹ Ha'e gui yvy regua huvixave kuery oexa 'rã okuapy Babilônia tetã okai rã hataxí ojeupi va'e. Ha'e rami vy ojae'o ha'e ipy'a vai 'rã, ha'e kuery reve itavy rei ha'e opa marã ový'a rire.

¹⁰ Ha'e va'e kuery ma imbojexavaia gui okyje vy tetã gui mombyry ikuiai gui 'rã oma'ẽ okuapy. Ha'e vy aipoe'i 'rã:

— Nda'evei, nda'evei ete teĩ. Ndee tetã guaxu Babilônia, tetã ipo'akapa reiko va'ekue ri peteĩ hora pyve oiko nembopagaarã — he'i 'rã okuapy.

¹¹ Yvy regua mba'emo vendea kuery voi ha'e nunga oexa vy ojae'o ha'e ipy'a vai 'rã okuapy, mba'eta avave rei ndojoguaavei ma 'rã ovende va'erã oguerekó va'ekue.

¹² Ovende va'erã oguerekó va'ekue ma pova'e: ouro guigua, prata, ita hepyve va'e, pérola, ha'e ajukue iporâve va'e guigua, púrpura, seda ha'e pytã va'e guigua, opa mba'e marfim gui ojapo pyre, opa marâgua tenda, mesa, ha'e nunga ha'e javi yvyra hepyve va'e gui ojapo pyre, overa va'e, ferro ha'e mármore guigua,

¹³ canela heakuã porã va'e, mba'emo irûrã, heakuã porã va'e oapy pyrã, moã jaikyty va'e nunga, bálsamo, vinho, azeite, trigo, trigo ra'yigue, vaka, vexa'i, kavaju, karóxa ha'e escravo kuery, avakue oikove va'e ae.

¹⁴ Yvyra'a ijaju nhavõ ho'uxe vai va'ekue ma jipovei ma 'rã ndea py. Ndevy pe jipovei ma 'rã mba'emo hepyve va'e, ojou porãmby ikuai va'e, ha'e nunga ndojouavei ma 'rã ndea py.

¹⁵ Ha'e nunga vendea kuery omboekoviaa rupi ojoupa va'ekue ma mombyry gui 'rã oma'ẽ okuapy, nembojexavaia gui okyje vy. Ojae'o reve ipy'a vai vy

¹⁶ aipoe'i 'rã okuapy:

— Nda'evei, nda'evei ete teĩ tetã guaxu pe. Mba'eta ajukue iporâve va'e py anho ha'e kuery onhemonde va'ekue, púrpura ha'e pytã va'e py. Ijegua va'ekue ouro, ita hepyve va'e ha'e pérola guigua py.

¹⁷ Ha'e rami teĩ peteĩ hora pyve oguerekopa va'ekue okanhymba — he'i 'rã okuapy.

Ha'e gui kanoã ja kuery yy rupi oguata va'e, kanoã mboguataa kuery, ha'e ye'ẽ rupi ombo'epo va'e kuery ha'e javi ma mombyry gui avi 'rã oma'ẽ okuapy.

¹⁸ Ha'e rami vy tetã okai rã hataxí ojeupi va'e oexa vy ojapukai 'rã:

— Mba'e nunga tetã tu peva'e tetã guaxu iporãague rami iporã va'e? — he'i 'rã okuapy.

¹⁹ Ha'e kuery oakã re yvy ku'i omombo-mombo reve ojae'o ha'e ipy'a vai 'rã. Ha'e vy ojapukai 'rã:

— Nda'evei, nda'evei ete teĩ tetã guaxu pe. Ha'e py ma ye'ẽ rupigua kanoã ja kuery ha'e javi ojoupa va'ekue oguerekopaa gui. Ha'e rami teĩ peteĩ hora pyve ivaipa — he'i 'rã okuapy.*

* 18:19 Ezequiel 27.27-32

²⁰ Ha'e nunga rupi yva pygua kuery, pevy'a ke. Ha'e peẽ kuery iky'a e'ŷ va'e, apóstolo ha'e profeta kuery voi ke pevy'a, mba'eta Nhanderuete ombopaga ma penemoingo axyare.

"Babilônia ivaipa ae ma" 'ea rã oenduague

²¹ Ha'e gui peteĩ anjo imbaraeteve va'e oupi peteĩ ita mba'emo mongu'ia rami tuvixa va'e. Ha'e rami vy ye'ẽ mbyte py omombo. Ha'e vy aipoe'i:

— Guĩ rami 'rã oitya Babilônia tetã guaxu. Avave rei ndojouavei 'rã.

²² Ndea py noenduavei 'rã mba'epu ixã reta va'e mbopua, imba'epu va'e, neĩ mimby ha'e mimby guaxu monhe'ëa. Ndojekuaavei 'rã mba'emo py omba'eapo va'e rembiapo. Ndea py noenduavei 'rã mba'emo ra'yigue mongu'ia revovo.

²³ Ndea py naexakävei ma 'rã tataendy, omenda ta va'e kuery ayvu voi noenduavei 'rã. Ndevy mba'emo ovende va'e ma yvateve ikuai va'ekue yvy re, mba'eta yvy regua kuery ha'e javi rembotavypa va'ekue nemba'evyka py.

²⁴ Ha'e va'e tetã py ae omoëa profeta kuery ruguy, iky'a e'ŷ va'e kuery ha'e yvy re ojukaa va'ekue ha'e javi ruguy.

19

Yva re ovy'a okuapy va'e oexaague

¹ Ha'e nunga oiko rire ma yva re peteĩ ayvu atã aendu heta va'e kuery ijayvua rami. Ha'e vy aipoe'i:

— Aleluia! Jaa jepe aguã, hexakää ha'e po'akaa ma Nhanderuete guigua meme.

² Anhetê rupi, ha'evea rami meme nhombopaga, mba'eta ombopaga ma kunha itavy rei ete va'ekue. Ha'e va'e ma itavy reia py omongy'apa va'ekue yvy regua kuery, ha'e opo py ae Nhanderuete rembiguai kuery ruguy omoë va'ekue teĩ ombopaga ma ha'e nungakue re — he'i.

³ Aipoe'ive ju:

— Aleluia! Kunha okaia gui hataxí opu'ã 'rã araka'e rã peve — he'i.

⁴ Ha'e ramo vinte e quatro tujakueve joe opena va'ety ha'e irundy temimoingo kuery ma guenapy'ã re ikuai vy omboete avi okuapy Nhanderuete tenda py oguapy oiny va'e. Ha'e vy

— Anhetê ete. Aleluia! — he'i okuapy.

⁵ Ha'e gui peteĩ ayvu onhendu tenda oña gui:

— Nhanderuete rembiguai pendekuai va'e, pembojerovia ke, henonde pejererokyjea rupi pendekuai va'e ha'e javi, yvyigueve ha'e yvatekueve — he'i.

⁶ Peteĩ ayvu aendu avi heta va'e kuery ijayvua rami, yy tuvixa va'e ha'e yapu atã va'e revovo rami. Ha'e vy aipoe'i:

— Aleluia! Mba'eta Senhor Nhanderuete Ipo'akapa va'e ae oĩ Joguerekoarã.

⁷ Javy'a ke, japoraei ha'e ixupe "Hexakãmba va'e" ja'e, mba'eta ovaẽ ma Vexa'i ra'y omenda aguã ára. Ta'lyxyrã onhemotyrrõmba ma guive,

⁸ mba'eta ha'e va'e onhemonde aguã ma ajukue iporâve, hexakã ha'e iky'a e'ŷ va'e ome'ëa — he'i okuapy. Mba'eta ajukue iporâve va'e ma iky'a e'ŷ va'e kuery teko porã rupi ikuaria.

⁹ Ha'e ramo anjo aipoe'i xevy:

— Embopara ke po rami: "Ovy'a ete 'rã okuapy Vexa'i ra'y omenda aguã ngaru py oenoĩ mbyre kuery."*

Aipoe'ive ju:

— Pova'e nunga ma Nhanderuete ayvu anhetê va'e — he'i.

¹⁰ Ha'e ramo ipy yvy'iry xerenapy'ã re aĩ amboete aguã. Ha'e rami teĩ aipoe'i xevy:

— Ma'ë, ejapo eme evoko rami. Xee voi ndee rami tembiguai aiko, nde-irmão kuery Jesus regua omombe'ua rupi ikuai va'e rami. Nhanderuete anho tema emboete. Mba'eta profeta kuery pe Nhe'ë oikuaa uka va'e ma Jesus regua ae.

* 19:9 Mateus 22.1-14

Vixo vaikue ha'e profeta ramigua re Cristo ipo'aka rã oexaaque

¹¹ Ha'e gui ama'ẽ rã yva ojepe'a, ha'e oẽ ouvy peteĩ kavaju xiĩ. Hi'árygua pe ma "Ojeroviapy ha'e Anhetẽ va'e" 'ea. Ha'e va'e ma ha'evea rami joguerek, ha'e teko porã rupi opu'ã 'rã joe.

¹² Hexa ma tata rami hendy. Inhakã re ma coroa heta oĩ. Hexe ipara oiny peteĩ tery avave rei ndoikuuai va'e, ha'e anho e'ŷ vy.

¹³ Ijao ma tuguy py omopytã mbyre. Hery oenoĩa ma Nhanderuete ayvu.

¹⁴ Hakukue jogueru yva pygua xondaro kuery. Ha'e va'e kuery voi kavaju xiĩ va'e áry ikuai, ha'e ajukue xiĩ rei iky'a e'ŷ va'e py onhemonde va'e.

¹⁵ Herekoia juru gui ma peteĩ kyxe guaxu haimbe va'e oẽ, ha'e va'e py yvy regua kuery omoingo axy aguã. Ha'e rami vy omo'arandu 'rã po pygua ferro guigua py, ha'e onhami 'rã uva Nhanderuete Ipo'akapa va'e poxya rupi.*

¹⁶ Ijao puku re, ha'e hetyma re ma peteĩ tery ipara oiny: "Huvixave ikuai va'e Ruvixave, ha'e senhor ikuai va'e Senhor" he'ia va'e.*

¹⁷ Ha'e gui peteĩ anjo aexa kuaray áry opu'ã ho'amy va'e. Ha'e va'e ma ojapukai atã reve ijayvu yva mbyte rupi guyra oveve va'e ha'e javi pe. Ha'e vy aipoe'i:

— Peju ke, pendeaty Nhanderuete ngaru tuvixa va'e ojapoa py,

¹⁸ pe'u aguã huvixave ro'okue, xondaro ruvixa, ipo'akakueve, kavaju ha'e hi'árygua kuery ro'okue, opa marãgua ro'okue, escravo ha'e escravo e'ŷ, yvyigueve ha'e yvatekueve ro'okue guive — he'i.

¹⁹ Ha'e gui ma aexa rã vixo vaikue ha'e yvy regua huvixave kuery ono'õ okuapy, ha'e kuery pegua xondaro kuery reve. Ha'e va'e kuery ma kavaju áry oĩ va'e rovai opu'ã aguã ono'õ okuapy, ixupeguia kuery rovai guive.

²⁰ Ha'e rami teĩ vixo ombotya nhuã py, profeta ramigua guive. Ha'e va'e ma vixo renonde hexa pyrã ojapo vy ombotavy va'ekue vixo ra'angaa mbojeroviaa kuery ixuguigua kuaa ukaarã omoĩa va'ekue. Ha'e kuery mokoïve ma oikove reve omomboa yupa tata guigua, enxofre okaia py.

²¹ Ha'e rã amboae kuery ma kavaju árygua ojukapa ijuru gui kyxe guaxu oẽ va'e py. Ha'e ramo ho'okue re ma guyra kuery oveve va'e hevyatãmba.*

20

Mil ma'etŷ re anha ombotya, ha'e onhemboete ju va'e kuery oexaaque

¹ Ha'e gui peteĩ anjo aexa yva qui oguejy ouvy va'e. Opo py ogueru yvykua rokẽ pe'aa, ha'e peteĩ corrente tuvixa va'e guive.

² Ha'e gui ojopy teju-jagua, mboi yma guive oiko va'ekue. Ha'e va'e ma anha Satanás. Ha'e rami vy mil ma'etŷ peve ojokua.

³ Yvykua py omombo vy omboty imoiny. Okẽ re omoĩ imbojaarã, mil ma'etŷ ojeupity e'ŷa ja ombotavy ve'ŷ aguã yvy regua kuery. Ha'e va'e rire ma henonderã omoĩ ma voiague rami vy opoia 'rã xapy'a'i.

⁴ Aexa avi huvixa kuery pegua tenda ikuai va'e. Ha'e va'e py ma ombopo'aka pyre kuery oguapy okuapy joguerek aguã. Aexa avi Nhanderuete ayvu Jesus regua omombe'uague re ojyryvi kyxi mbyre kuery nhe'ẽ. Ha'e va'e kuery ma vixo vaikue ha'e ha'angaa nombojeroviai va'ekue, neĩ ixuguigua kuaa ukaarã omoĩ ukai va'ekue ngova re, neĩ opo re. Ha'e kuery oikove ju, ha'e Cristo reve ipo'aka okuapy mil ma'etŷ re.

⁵ Ha'e va'e ma nhemboete jevya jypyguia. Ha'e rã omano va'ekue mboae ma ndoikove jevyi 'rã mil ma'etŷ ojeupity e'ŷa ja.

⁶ Ovy'a ete, ha'e iky'a e'ŷ va'e 'rã ikuai jypyguia nhemboete jevya py onhemboete ju va'e kuery. Ha'e va'e kuery re ma omano jevyi aguã nda'ipo'akai 'rã. Ha'e rami 'rãgue py

* 19:15 Salmo 2.9 * 19:16 Mateus 24.30; 2 Tessalonicenses 1.6-10 * 19:21 Ezequiel 39.17-20

Nhanderuete ha'e Cristo pegua sacerdote 'rā ikuai. Hexeve huvixa rami 'rā opena okuapy mil ma'etŷ re.*

Anha opoia ma rire ombopagaa rā oexaque

- ⁷ Ha'e gui mil ma'etŷ ojeupity ma ramo Satanás opoia 'rā nhuã py ombotyague gui.
- ⁸ Ha'e ramo oẽ vy ombotavypa 'rā yvy regua kuery yvy apy irundyve ikuia rupi, Gogue ha'e Magogue 'epy va'e. Ha'e kuery ha'e javi 'rā omboatypa joe opu'ã aguã. Ye'ẽ rembe re ita ku'i ikuai va'e rami 'rā heta.
- ⁹ Ha'e ramo ha'e kuery ma yvy jave rupi gui oguata jogueruvy vy ojokopa 'rā iky'a e'ŷ va'e kuery reko, tetã Nhanderuete oayvu ete va'e. Ha'e rami teĩ yva gui tata oguejy vy omokanhymba 'rā.*
- ¹⁰ Ha'e gui anha imbotavyare omomboa 'rā yupa tata guigua enxofre okaia py. Ha'e py ma oĩ avi vixo vaikue ha'e profeta ramigua rive. Ha'e kuery ma ara py ha'e pyávy ojexavai 'rā araka'e rā peve.

Senhor oikuua pota rā oexaque

- ¹¹ Ha'e gui ma aexa peteĩ tenda guaxu openaaty xiĩ rei va'e, ha'e hi'áry oguapy oiny va'e guive. Ha'e va'e renonde gui ma yvy ha'e yva regua okanhymba, ndojouavei oĩ aguã.
- ¹² Aexa avi omano va'ekue, yvatekueve ha'e yvyigueve guive. Ha'e kuery ma tenda renonde ojexa uka vy opu'ãmba okuapy. Ha'e ramo oipe'aa kuaxia para ikuai va'e, ha'e amboae kuaxia avi oipe'aa, tekove oguereko va'e kuery rery oĩa. Ha'e rami vy omano va'ekue re oikuua potaa 'rā mba'emo ojapoague re, kuaxia ikuai va'e re ipara oĩa rami vy.*
- ¹³ Ye'ẽ gui ou 'rā omano va'ekue ha'e py ikuai va'ekue. Omanogue retã gui avi 'rā ou. Ha'e ramo peteĩ-teĩ re oikuua potaa 'rā mba'emo ojapoague re.
- ¹⁴ Ha'e ramo omanogue retã py ikuai va'ekue omombopaa 'rā yupa tata guigua py. Ha'e va'e yupa tata guigua ma omano jevy aguã ae oĩ.
- ¹⁵ Kuaxia para tekove oguereko va'e kuery rery oĩa re amongue rery ndojouai ramo omomboa 'rā yupa tata guigua py.

21

Yva pyau ha'e yvy pyau oexaque

- ¹ Ha'e gui aexa yva pyau ha'e yvy pyau, mba'eta yva ha'e yvy jypy guare ma okanhyma, ye'ẽ voi jipovei ma.*
- ² Aexa avi tetã iky'a e'ŷ va'e, Jerusalém pyau yva gui oguejy rā, Nhanderuetea guigua. Ha'e va'e ma iporã ete, kunhataõ omenda ta vy omerã pe onhemoatyrô va'e rami avi.
- ³ Ha'e gui peteĩ ayvu atã aendu tenda oĩa gui onhendu va'e:
 - Ma'ẽ, aŷ gui ma Nhanderuete optya 'rā avakue mbyte. Ha'e kuery reve ae 'rā oĩ. Ha'e kuery ikuai 'rā ixupegua, ha'e rā Nhanderuete ma oiko 'rā ha'e kuery reve.*
- ⁴ Ha'e rami vy omombirupa 'rā ha'e kuery rexay. Omano va'e jipovei ma 'rā, neĩ ipy'a vai va'e voi, haxẽ va'e, neĩ haxy va'e voi jipovei 'rā, mba'eta jypy guare oaxapa ma — he'i.*
- ⁵ Ha'e gui tenda py oguapy oiny va'e aipoe'i:
 - Ma'ẽ, opa mba'e ambopyaupa ma — he'i.
- Aipoe'ive ju:
 - Embopara ke pova'e ayvu, mba'eta anhetẽ meme vy ogueroviaa aguã ha'eve va'e.
- ⁶ Aipoe'ive ju xevy:
 - Opa mba'e ojeupitypa ma. Xee ma jypy'igua ha'e opa vygua, mba'emo mboypyare ha'e ijapopaarã. Ijy'uvei va'e pe ma xee ame'ẽ rive 'rā yvu tekove me'ea gui oy'u aguã.
- ⁷ Ha'e nunga ma mba'emo ogueropo'aka va'e kuery peguarã. Xee aiko 'rā ha'e kuery Ruete. Ha'e rā ha'e kuery ma xera'y ha'e xerajy kuery 'rā ikuai.*

* 20:6 1 Coríntios 15.20-25; 2 Timóteo 2.12; Apocalipse 5.9,10 * 20:9 Ezequiel 18.1-39; 16 * 20:12 Daniel 7.10, João 5.25-29 * 21:1 2 Pedro 3.13 * 21:3 Ezequiel 37.27 * 21:4 Isaías 25.8 * 21:7 1 Crônicas 17.13

⁸ Ha'e rã okyje rei va'e kuery, ojerovia e'ŷ va'e, ojou vai pyrã, jojuka va'ety, on-hemongy'apa rei va'e, imba'evyky va'e, mba'emo ra'angaa ombojerovia va'e, ha'e ijapu va'e kuery ha'e javi, ha'e kuery rekoarã ma yupa tata guigua enxofre okaia va'e. Ha'e kuery omano jevy aguã oĩ.

Jerusalém pyau regua omombe'u porâveague

⁹ Ha'e gui sete anjo kuery hy'a'i sete nhomoingo axyarã tynyẽ va'e oguereko va'ekue regua peteĩ ou. Ha'e va'e ma aipoe'i xevy:

— Enhemboja ke ejuvy, taexa uka kunhataĩ omenda va'erã, Vexâ'i ra'y ra'yxyrã — he'i.

¹⁰ Ha'e rami vy nhe'ẽ re aiko reve xereraa peteĩ yvyty tuvixa ha'e yvateve va'e áry. Ha'e vy xevy pe oexa uka Jerusalém tetã iky'a e'ŷ va'e, yva Nhanderuetea gui oguejy ouvy rã.*

¹¹ Ha'e va'e re ma oĩ Nhanderuete rexakã. Ita hepyve va'e rami hexakã, ita jaspe hendy va'e rami.

¹² Ikora ma tuvixa ha'e yvate ete va'e. Doze okẽ oĩ. Okẽ rarõarã ma doze anjo ikuai. Okẽ re ma ipara oiny Israel kuery doze regua ikuai va'e rery.

¹³ Kuaray oua katy mboapy okẽ oĩ, kuaray ijapu'a'ia katy ma mboapy ju, kuaray puku-a katy ma mboapy ju, ha'e gui kuaray oikea katy ma mboapy ju oĩ.*

¹⁴ Tetã kora re ma doze ita oĩ ijytarã. Ha'e va'e re ma ipara oiny Vexâ'i ra'y pegua apóstolo kuery doze ikuai va'e rery.

¹⁵ Xereve ijayvu va'e ma peteĩ yvyra po'i'i ouro guigua oguereko mba'emo oa'ãarã, tetã, kora ha'e okẽ oĩ va'e oa'ã aguã.

¹⁶ Tetã ma ipuku-a oĩ va'e'ŷ, ipuku-a ha'e ipya joo rami. Yvyra po'i'i py anjo tetã oa'ã rã dois mil e duzentos quilômetros ipuku-a. Ipuku-a, ipya ha'e yvatea ma joo rami meme.

¹⁷ Ha'e gui ikora ju oa'ã rã sessenta e cinco metros. Avakue oa'ã jepiaty rami ae avi anjo oa'ã.

¹⁸ Kora ma ita jaspe gui ojapo pyre. Ha'e rã tetã ma ouro iky'a e'ŷ va'e guigua, vidro iky'a e'ŷ va'e rami hexakã.

¹⁹ Tetã kora ytarã ita ikuai va'e ma ita hepyve va'e opa marâguia py ijegua. Ijyta jypyguia ma jaspe guigua. Mokoña ma safira guigua. Mboapya ma calcedônia guigua. Irundaya ma esmeralda guigua.

²⁰ Teĩ nhiruña ma sardônio guigua. Mboapy memea ma sárdio guigua. Sete-a ma crisólito guigua. Oito-a ma berilo guigua. Nove-a ma topázio guigua. Dez-a ma crisópraso guigua. Onze-a ma jacinto guigua. Ha'e gui doze-a ma ametista guigua.

²¹ Doze okẽ oĩ va'e ma doze pérola. Peteti-teĩ okêrã ma peteĩ pérola oĩ. Tetã mbyte rupi tape guaxu oaxa va'e ma ouro iky'a e'ŷ va'e guigua, vidro rami hexakã.

²² Tetã py xee ndaexai templo, mba'eta templo 'râgue py Senhor Nhanderuete Ipo'akapa va'e ha'e Vexâ'i ra'y oĩ.

²³ Tetã rupi kuaray neĩ jaxy nomoexakã teĩ ha'eve, mba'eta Nhanderuete rexakã ae oexape, ha'e Vexâ'i ra'y ma tataendy rami omoexakã.

²⁴ Tetã rexakãa rupi ma amboae regua kuery 'rã ikuai. Ha'e py 'rã yvy regua huvixave kuery ogueru mba'emo porâgueve oguereko va'e.

²⁵ Okẽ ikuai va'e ma nonhembotyi 'rã ara py, ha'e rã pytû ma ndoikoi ha'e py.

²⁶ Ha'e py amboae regua kuery mba'emo porâgueve anho 'rã ogueru imboetearã.

²⁷ Ha'eve'ŷ va'e ma ndoikei 'rã ha'e py, neĩ ojeguarupy, e'ŷ vy apua rupi ikuai va'e. Ha'e pygua kuery ma tekove oguereko va'e vy Vexâ'i ra'y pegua kuaxia re hery oĩa va'e kuery anho.

22

¹ Xevy pe anjo oexa uka avi yakã tekove me'ëa. Ha'e va'e ma itaendy rami hexakã, Nhanderuete ha'e Vexâ'i ra'y renda openaaty oĩa gui oxyry ov yva'e.

* 21:10 Ezequiel 40.1-2, Hebreus 12.22-24

* 21:13 Ezequiel 48.30-35

² Tape guaxu oĩ va'e mbyte rupi hi'aĩ yvyra tekove me'ëa, yakã rembe rovaive re guive. Ha'e va'e ma doze hi'a va'e, jaxy nhavõ hi'a mboae va'e. Yvyra rogue ma heta va'e kuery joegua e'ŷ-e'ŷ mongueraarã oĩ.*

³ Jipovei ma 'rã ayvu vaipy. Tetã re 'rã oĩ Nhanderuete ha'e Vexâ'i ra'y renda openaaty. Ixupeguia kuery omboete 'rã okuapy,

⁴ ha'e hova oexa 'rã guive. Ha'e rã ha'e kuery rova re ma oĩ 'rã hery.

⁵ Ha'e py pytû jipovei ma ramo ha'e pygua kuery ikuia rupi tataendy nomoexakãi, neĩ kuaray ndojopei teĩ ha'eve, mba'eta Senhor Nhanderuete ae 'rã omoexakã. Ha'e ramo ha'e kuery huvixa rami 'rã opena araka'e rã peve.

Kova'e kuaxia re ayvu oĩ va'e anhetẽ ete memea re ijayvua

⁶ Ha'e gui aipoe'ive ju xevy:

— Pova'e ayvu ma oguerovia pyrã ha'e anhetẽ va'e meme. Senhor profeta kuery nhe'ẽ Ruete va'e ma guembiguai kuery ikuia py ombou ojeupagua anjo are'ŷ'i re mba'emo oiko va'erã oikuua uka aguã, tenonderã omoõ ma voiague rami vy.

⁷ Ma'ë, are'ŷ re 'rã aju. Ovy'a ete 'rã okuapy kova'e kuaxia para re ayvu oĩ va'e rupi ikuai va'e.

Nhanemoneta ha'e nhandereroayvu porãague

⁸ Ha'e nunga xee João ae aendu ha'e aexa. Ha'e nunga aendu ha'e aexa vy ikuua ukaa anjo py yvy'iry aĩ xerenapy'ã re amboete aguã.

⁹ Ha'e ramo aipoe'i xevy:

— Ma'ë, ejapo eme evoko rami. Xee ma ndee rami avi tembiguai aiko, nde-irmão kuery profeta ha'e kova'e kuaxia re ayvu oĩ va'e rupi ikuai va'e ha'e javi ramigua. Nhanderuete ae 'rã remboete — he'i.

¹⁰ Aipoe'ive ju:

— Eikuua uka e'ŷ eme kuaxia re ayvu oĩ va'e, mba'eta hi'ára namombyryvei ma.

¹¹ Tove heko vai va'e kuery taeko vaive tema. Tove heko ky'a va'e kuery taeko ky'ave tema. Ha'e rã heko porã va'e ma teko porã rupi anho ta'ikuai, ha'e heko ky'a e'ŷ va'e ta'ikuave tema teko ky'a e'ŷa rupi.

¹² Ma'ë, xee aju 'rã are'ŷ re, aru 'rã guive peteĩ-teĩ oikoague repy ame'ë va'erã.

¹³ Xee ma jypy'igua ha'e opa vygua, mba'emo mboypyare ha'e ijapopaarã.

¹⁴ Ovy'a ete 'rã okuapy [Vexâ'i ra'y ruguy py] oao ojoi va'e, ha'e rami vy yvyra 'a tekove me'ëa va'e ho'u, ha'e tetã rokẽ rupi oike aguã.

¹⁵ Ha'e rã tetã rovai rupi ma jagua rami ikuai va'e 'rã opyta, imba'evyky va'e, on-hemongy'apa va'e, jojuka va'ety, mba'emo ra'angaa ombojerovia va'e, ha'e ijapuxe vai va'e apu rupi rive ikuai va'e ha'e javi.

¹⁶ Xee Jesus ma xejeupagua anjo ambou peẽ igreja pygua kuery pe ha'e nunga aikuua uka aguã. Xee ma “Davi rapokue renhoĩ” 'epy va'e, hamymino aiko, ha'e jaxy-tata ko'ë mbija hexakãmba va'e guive — he'i.

¹⁷ Nhe'ë ha'e ta'yxyrã ma

— Eju — he'i ixupe.

Tove oendu va'e voi

— Eju — te'i.

Tove ijy'uvei va'e voi tonhemboja touvy, yy tekove me'ëa oy'uxe va'e rei tojopy rive.*

Kuaxia para opaa py ijayvuague

¹⁸ — Po ramo kova'e kuaxia para re ayvu oĩ va'e rendua kuery ha'e javive pe xeayvu. Ayvu oĩ va'e áryve amongue omoïve ri ramo hexe ju 'rã Nhanderuete omoõ nhomoingo axyarã kova'e kuaxia re ipara oiny va'e.

¹⁹ Ha'e kova'e kuaxia re ayvu oĩ va'e gui amongue mba'emo'i teĩ oipe'a ramo ixugui Nhanderuete oipe'a 'rã yvyra'a ho'u aguã, tetã iky'a e'ŷ va'e py oike aguã, ha'e kova'e kuaxia re mba'emo porã oĩ va'e ojopy aguã.

* 22:2 Ezequiel 47.1,12 * 22:17 Isaías 55.1,2; João 4.13,14; 7.37-39

Apocalipse 22:20

1623

Apocalipse 22:21

²⁰ Ha'e nunga kuaa ukaa aipoe'i:
— Anhetē are'ŷ re 'rā aju — he'i.
Amém. Eju, Senhor Jesus.

Ogueroayvu porāague

²¹ Tove peẽ kuery ha'e javive tapendu Senhor Jesus penemboaxya.